

BIBLE

BAYIBURU IZII

Izii Language

Izii - All Bible

| Old Testament | | | |
|----------------------|-------|----------------|-------|
| | | Nahumu | 1.604 |
| Mbulembu | 3 | Habakuku | 1.608 |
| Awufu | 98 | Zefanaya | 1.613 |
| Ndu Uke | 180 | Hagayi | 1.618 |
| Ógú | 240 | Zekaraya | 1.622 |
| Ditoronomi | 327 | Malakayi | 1.639 |
| Jioshuwa | 398 | New Testament | |
| Ikpe | 446 | Matiyu | 1.645 |
| Rutu | 492 | Maku | 1.720 |
| 1 Sámeḷu | 499 | Luku | 1.765 |
| 2 Sámeḷu | 559 | Jiḡnu | 1.839 |
| 1 Ndu eze | 610 | Ndu-ishi-ozí | 1.897 |
| 2 Ndu eze | 671 | Romu | 1.966 |
| 1 Iphe, ndu eze meru | 728 | 1 Kḡrentu | 1.999 |
| 2 Iphe, ndu eze meru | 788 | 2 Kḡrentu | 2.031 |
| Ẹzura | 855 | Galeshiya | 2.052 |
| Nehemaya | 875 | Efesḡsu | 2.063 |
| Ẹsuta | 904 | Filipayi | 2.075 |
| Jiobu | 918 | Kḡlosi | 2.084 |
| Ebvu-ḡma | 981 | 1 Tesalonayika | 2.092 |
| Ẹtu | 1.127 | 2 Tesalonayika | 2.099 |
| Oziphe | 1.179 | 1 Timoti | 2.103 |
| Ebvu Sólomḡnu | 1.195 | 2 Timoti | 2.113 |
| Azáya | 1.204 | Tayitḡsu | 2.120 |
| Jieremaya | 1.307 | Fayilimḡnu | 2.124 |
| Ebvu Aphu | 1.415 | Hibiru | 2.126 |
| Ezekḡlu | 1.426 | Jiemusu | 2.150 |
| Daneḷu | 1.525 | 1 Pyḡta | 2.158 |
| Hosiya | 1.555 | 2 Pyḡta | 2.168 |
| Jioweḷu | 1.571 | 1 Jiḡnu | 2.174 |
| Émḡsu | 1.577 | 2 Jiḡnu | 2.183 |
| Obedaya | 1.589 | 3 Jiḡnu | 2.185 |
| Jiona | 1.591 | Jiudu | 2.187 |
| Mayika | 1.595 | Ophulenyá | 2.190 |

Izii - All Bible

Mbulembu

Mbulembu 1

Mbulembu

- ¹Lẹ mbulembu bẹ Chileke meru igwe bya emee eliphe.
- ²Ọphu eliphe enwedu ụgbugba; ọphu ọ dudu iphe, nọ iya nụ. Ọ buerupho mini echiphe l'ekameka; teme eli mini ono nọdu agbakọta ọchii. Unme Chileke nọdu erwuphe l'eli mini ono kwaphọ.
- ³Ọo ya bụ; Chileke sụ: “Gìphóró dụ.” Ìphóró bya adụ.
- ⁴Chileke bya elee ẹnya hụma l'ìphóró ono dụ ree. Ọ bya edokaha ìphóró ono yẹe ọchii.
- ⁵Chileke bya agụa ìphóró ono “eswe” ; bya agụa ọchii ono “enyashi” . Nchi jihu bya abọhu. Ono bụru mbọku kẹ mbụ.
- ⁶Ọo ya bụ; Chileke sụ: “G'ìphè nọdu l'echilabọ mini; nọ-buha mini ono ẹbo.”
- ⁷Tọbudu iya bụ; Chileke bya emee ìphè dobe; ọ nọ-buha mini ọphu nọ l'imeli yẹe ọphu nọ l'alì ẹbo. Ọ dụ g'o pfuru.
- ⁸Chileke woru ìphè ono gụa “akpaminigwe” . Nchi jihu bya abọhu. Ono bụru mbọku k'ẹbo.
- ⁹Chileke sụ: “Gẹ mini ọphu nọ lẹ mkpula akpaminigwe nọkobe l'ekalanu; g'ẹka kpọhuru nkụ gbafuta ìphè.” Ọ dụ g'o pfuru.
- ¹⁰Chileke gụa ẹka ono, kpọhuru nkụ ono “alì” ; bya agụa mini phọ “eze-ẹnymu” . Chileke bya elee ya ẹnya bya ahụma l'ọ dụ ree.
- ¹¹Chileke sụ: “G'alì fushia iphe, dzụ ndzụ: iphe, amì mebyi; yẹe oshi-ọmi g'ọphu nọnu fushigbaa g'ọ dụ l'ụgbugba nkiya.” Ọ dụ g'o pfuru.
- ¹²Alì bya efushia iphe, dzụ ndzụ; ẹphe bya amìshia mebyi; ọphu nọnu nọdu amìshigbaa g'ọ dụ l'ụgbugba nkiya. Chileke bya elee ya ẹnya bya ahụma l'ọ dụ ree.
- ¹³Nchi jihu bya abọhu. Ono bụru mbọku k'ẹto.
- ¹⁴Chileke sụ: “G'iphe, echí echíchí dụ l'akpaminigwe g'o dokahajẹ eswe yẹe ẹnyasi. Teme ẹphe egoshije teke bụ ògè iphe; waa mbọku; waa teke bụ apha agbaru.
- ¹⁵Teme g'iphe ono, echí echíchí ono, dụ l'akpaminigwe ono chije lẹ mgboko.” Ọ dụ g'o pfuru.

- 16**Chileke bya emee iphe, echí echíchí labọ, parụ ẹka apaa. Ophu ka shii bẹ o meru g'o chije l'eswe; ophu ka alwa alị bẹ o meru g'o chije l'enyashi. O bya emefukwapho kpokpode.
- 17**Chileke bya eworu phẹ dobe l'akpaminigwe g'ephe mee g'iphóró dọ lẹ mgboko.
- 18**G'ephe chije l'eswe yẹe ẹnnyashi; tẹme waa g'ephe dokaha iphóró yẹe ọchii. Chileke bya elee ya ẹnnyanya bya ahuma l'ọ dọ ree.
- 19**Nchi jihu bya abọhu. Ono buru mbọku k'eno.
- 20**Chileke bya asụ: “Gẹ mini kpofuta anụ, dọ igwerigwe g'o buru lẹ mini; ẹnụ awata ephe l'eliphe lẹ mkpula akpaminigwe.”
- 21**Oo ya bụ; Chileke mee eze anụ, bugbaa l'eze-ẹnnyimu; mękpoo iphe, dzụ ndzụ, awụ awụwu; o buru lẹ mini l'udu iya l'udu iya; waa ẹnụ, ephe l'eli g'ephe ha; ophu nonu l'ugbugba nkiya. Chileke bya ahuma l'iphemiphe ono dọ ree.
- 22**Noo ya; Chileke bya agọru ọnu-ọma nọ phẹ; sụ: “Unu zùà azùzù zù-jia mini, nọgbaa l'eze-ẹnnyimu; ẹnụ azụa ji mgboko ejiji.”
- 23**Nchi jihu bya abọhu. Ono buru mbọku k'ise.
- 24**Chileke bya asụ: “G'eliphe kpofuta iphe, dzugbaa ndzụ l'udu iya l'udu iya. G'anụ, bụ iphe-edobe kpofuta; waa anụ ophu awụ l'ephe; waa anụ, bu l'egbudu. G'ophu nonu kpofutagbaa l'ugbugba nkiya.” O dọ g'o pfuru.
- 25**Chileke mee anụ, bu l'egbudu l'udu iya l'udu iya; mę anụ, bụ iphe-edobe l'udu nkiya; mekwaphọ anụ ophu awụ l'ephe l'udu nkiya kwaphọ. Chileke bya elee ya ẹnnyanya bya ahuma l'ọ dọ ree.
- 26**Tọbudu iya bụ; Chileke sụ: “G'anyi bya emee nemadzụ g'o yee anyi; mbụ g'ọ dọ g'anyi dọ. G'ọ buru onye-ishi; g'ema, nọ l'eze-ẹnnyimu; yẹe ẹnụ, ephe l'eli; yẹe anụ, bụ iphe-edobe; yẹe eliphe l'ophu; waa iphe, bukpo anụ, akpụ wuruwuru l'alị nọdu iya l'ẹka.”
- 27**Oo ya bụ; Chileke woru nemadzụ mee; o yee ya; o buru gẹ Chileke dọ bụ g'o meru iya; o dọ. O buru nwoke lẹ nwanyị bẹ o meru.
- 28**Chileke bya agọru ọnu-ọma nọ phẹ; sụ phẹ: “Unu zùà azùzù kabaa shii; unu zù-jia mgboko kapyabẹ iya ẹnnyanya. Unu aburu ishi: ẹma, bu lẹ mini; yẹe ẹnụ, ephe l'eli; yẹe iphemiphe, bụ iphe, dzụ ndzụ, akpụ wuruwuru l'alị anọdu unu l'ẹka.”
- 29**Noo ya; Chileke sụ: “Iphe, bụ iphe, aakò akòkò lẹ mgboko; waa iphe, bụ oshi, amị amịmi l'ophu bẹ mu nọkotaru unu g'unu riye; g'ọ buru unu nri.
- 30**Anụ, nọkota lẹ mgboko-a; waa ẹnụ, ephekọta l'eli; mękpoo iphemiphe, awukota l'ephe; mbụ iphemiphe, dzụ ndzụ g'ephe ha bẹ mu nọkotaru irwu ẹswa g'ọ buru nri phẹ.” Iphemiphe dukota g'o pfuru.
- 31**Chileke bya elee ẹnnyanya huma iphemiphe, o meru. Ephe dọebekota rengurengu shii. Nchi jihu bya abọhu. Ono buru mbọku k'ishii.

Mbulembu 2

¹Noo g'e gude mee igwe; yee eliphe; me iphemiphe, no iya nu.

²Tobudu iya bu; o betashia le mboku k'esaa; Chileke jeebekotawaa ozi ono, o shi eje ono. O buru le mboku k'esaa ono be o tutaru unme ozi, o jekotaru.

³Chileke goru onu-oma nu mboku k'esaa ono; bya emee ya; o du nsu; kele o mboku ono be o tutaru unme eme iphemiphe, o meshiru ono.

Ádamu yee Ivu

⁴Waa g'e gude mee igwe; yee eliphe; teke e meru iya baa. Teke Chipfu, bu Chileke meru eliphe; yee igwe be

⁵o to nwedu iphe, aako akoko shiwaa du l'ali; ophu o dudu irwu, erwuje l'egu ophu kpo-futawaru nu; noo kele Chipfu, bu Chileke te eshidu mewaa g'igwe dzeje mini l'eliphe. Temu ophu o toko nweduru onye a-koje ali.

⁶O buru iji be o shi anoduje akwa gude agba ali l'ophu mini.

⁷Oo ya bu; Chipfu, bu Chileke bya egude aja, shi l'ali kpu nemadzu; bya ekuru unme ndzu ye iya l'imi; onye ono bya aburu onye dzu ndzu.

⁸Chipfu, bu Chileke bya eworu mgbabu gbaa l'uzo enyanwu-awawa le Eden; bya eworu nemadzu-a, o meru-a dobe l'eka ono.

⁹Chipfu, bu Chileke mee g'oshi, dulaje iche iche fushia l'ali ono. Oshi, du ree ele enya; bya atso utso eriri. O buru l'echi mgbabu ono be oshi, emeje g'a nodu ndzu no; waa oshi, emeje g'a maru iphe, du ree; yee ejo-iphe.

¹⁰O buru l'ali Eden be nggele, agba mini le mgbabu ono shi asoshi. Nggele ono bya agbaa eno le mgbabu ono.

¹¹Epha nggele ke mbu bu Pishonu; o shijaru echilabo ali Havila l'ophu; aka mkpola-ododo no.

¹²Mkpola-ododo, no l'ali ono du ree. Etse, eshi mkpo, bu iya bu bedelomu nodu iya; teme mkpuma, aswa du, bu onikusu nodukwa iya po.

¹³Epha nggele k'ebo bu Gihonu. O shijaru echilabo ali Kushi l'ophu.

¹⁴Epha nggele k'eto bu Tigrisu; yebdua soru shia uzo enyanwu-awawa l'ibiya ke Asiriya. Epha nggele k'eno buru Yufuretisu.

¹⁵Chipfu, bu Chileke bya eduta onye ono je edobe le mgbabu Eden g'o jeje iya ozi letaje iya enya.

¹⁶No iya; Chipfu, bu Chileke bya atuaru nemadzu ekemu su ya: "Rijekwa akpuru oshi, nokota le mgbabu-a m'o du ngu ree;

¹⁷ole nanu ophu i tii rijedu bu oshi ono, emeje g'a maru iphe, du ree yee ejo-iphe; kele mboku, i riru iya be ji-nwuhukwa."

¹⁸Noo ya; Chipfu, bu Chileke su: “O to dukwa ree ge nwoke ono nodu nwekinyi iya. Mu e-metaru iya onye n-yemeka, gbaru iya nu.”

¹⁹Oo ya bu; Chipfu, bu Chileke gudechaa eja, shi l'ali mee anu; waa enu, ephe l'eli bya achitaru iya Adamu ge ya maru iphe oo-gushi phe. O buru iphe, Adamu kuru iphemiphe ono, dzu ndzu ono be ephe wataru azaza.

²⁰Oo ya bu; Adamu bya eworu epha gushia iphe-edobe l'ophu; me enu, ephe l'eli; me anu-egbudu g'o ha. Obenu le Adamu te enwedu onye n-yemeka, gbaru iya nu, a cho-vuru iya.

²¹Oo ya bu Chipfu, bu Chileke bya emee oke mgbenya tu Adamu. O nodu eku mgbenya ono; o bya ahata iya okpu-egara; bya egude anu-ehu rwachita iya.

²²Tobudu iya bu; Chipfu, bu Chileke bya egude epara ono, o hataru l'ehu nwoke ono mee nwanyi; bya edutaru iya nwoke ono.

²³Nwoke ono su: “Onye owa-a bu okpu ophu shi l'okpu mu; bya aburu ogwehu, shi l'ogwehu mu. Iphe, ee-ku iya bu 'nwanyi'; noo kele e shi l'ehu nwoke wofuta iya.”

²⁴Noo iphe, meru g'o gude nwoke je l'ahaje nna iya; haa ne iya; ephe le nyee ya atugba; buru ogwehu lanu.

²⁵Nwoke ono yee nyee ya ono tuko gbaru oto; ophu iphere adudu phe.

Mbulumbu 3

Adada nemadzu

¹Agwo bu anu, shi kakota eregede l'anu-egbudu, Chipfu, bu Chileke meshiru l'ophu. Noo ya; o su nwanyi ono: “Chileke ? o sukpooru g'o to dushi akpuru oshi, no le mgbabu-a, unu e-rije to?”

²Nwanyi ono su agwo ono: “Anyi e-riekwa-a akpuru, shi l'oshi, nogbaa le mgbabu-a.

³O kwa akpuru oshi ophu no l'echi mgbabu be Chileke suru g'anyi te erishi; mbu g'anyi te emekwa iya eka ememe ophu; l'anyi -denyi iya eka be anyi a-nwuhukwa.”

⁴Agwo obu su nwanyi ono: “O to dukwa anwuhu, unu anwuhu.

⁵O chia le Chileke maru le unu -ria ya; enya asahu unu; unu adu ge Chileke; maru iphe, du ree waa ejo-iphe.”

⁶Nwanyi ono bya elee enya l'akpuru oshi ono; bya ahuma l'o du ree k'eriri; bya amakwapho mma ele enya; teme o nodu agukwa iya pho egu g'o ria akpuru oshi ono maru iphe. O wota iya ria bya anukwapho ji iya, ephe l'iya tuko nodu l'eka ono; o rikwapho.

⁷Enya tuko sahuchaa ephenebo; ephe maru l'ephe gba oto. Ephe dzukobe ekwo oshi figu nmaru.

⁸Èphe nùma ùkporo Chipfu, bụ Chileke lẹ g'oojephe lẹ mgbabu ono lẹ gẹ phẹrephere ụzenyashi ezi; ephe je eworu onwophe woharu Chipfu, bụ Chileke l'azu oshi, nọgbaa lẹ mgbabu ono.

⁹Chipfu, bụ Chileke bya ekua Ádamu; sụ iya: “? Bụ awe bẹ ị nọ?”

¹⁰Ádamu sụ iya: “Mu nùmakwaru ùkporo ngu lẹ mgbabu ono; mu je eworu onwomu domia l'eka ndzụ agu mu; kele mu gba ọto.”

¹¹Ọ sụ iya: “? Bụ onye sụru ngu l'ị gba ọto? ? Ti riakwaru nù akpuru oshi-a, mu sụru g'i ti rishi-a?”

¹²Ádamu sụ iya: “Ọ kwa nwanyị-a, i doberu mu l'iya l'eka-a bẹ woru akpuru, shi l'oshi ono nù mu; mu ria.”

¹³Chipfu, bụ Chileke bya ajia nwanyị ono sụ iya: “? Denu g'ọ nwuru i meru iphe, dū nno?” Nwanyị ono sụ: “Ọ kwa agwo gbaberu mu ẹregede; mu je erinaa ya.”

¹⁴Chipfu, bụ Chileke sụ agwo: “Eshinu i meru iphe-a bẹ “Iphe, bukota iphe-edobe; me anụ-egbudu l'ophu buepho gubedua bẹ a turu onu. Ii-wata awu l'epho. Ọ buru eja, shi l'alị bẹ ii-rije gbiriri jasụ g'ii-nọ-beru.

¹⁵Mu e-me g'unu lẹ nwanyị-a buru ohogu; awa nkengu yee ke nwanyị-a a-bukwarupho ohogu. Ọo-zopya ngu ishi; gubedua emeka iya iphe l'ichirupfu okpa.”

¹⁶Nwanyị ono bẹ ọ sụru: “Mu e-me g'iphe-ehuka, duru ngu l'apa epho-ime ka shii. Ii-jeje iphe-ehuka teme l'ị nwua nwa. Ji ngu a-noduje agu ngu egu; ọ buru iya bẹ ii-nodu l'eka.”

¹⁷Ọ sụ nwoke ono: “Eshi ophu i kwetaru ngaberu nyee ngu nchi je eria akpuru oshi ono, mu sụru g'i ti rikwa ono bẹ I meakwaru; alị buwaru iphe, mu turu onu. Ii-jeje ozi mkponwu ehụ teme l'ị seta nri, ii-ri. Ọ buru g'ii-je iya bụ ono gbiriri jasụ g'ii-nọ-beru.

¹⁸Alị a-wata efushiru ngu ejo eswa; waa obvu; teme ọ buru akpuru-iphe, mitaru l'egu a-bujeru ngu nri.

¹⁹Ii-kuta ephuru phee teme l'ị ria nri; gbiriri jasụ ị laphu azụ l'alị; eshi ophu ọ bụ eja shi l'alị bẹ i shi. Ọo eja shi l'alị bẹ ị bụ; ọ bukwarupho l'eja shi l'alị ono bẹ ii-laphu azụ.”

²⁰Tobudu iya bụ; nwoke ono gụa nyee ya ono Ivu; noo kele ọo-buru ne oha l'ophu.

²¹Chipfu bụ Chileke bya eworu akpo-anụ mee ekwa nmabẹ Ádamu yee nyee ya.

²²Noo ya; Chipfu, bụ Chileke bya epfua sụ: “Nta-a bẹ nemadzụ dūwaa g'anyịbedua; mbu ọ mawaru iphe, dū ree; bya amaru iphe, bụ ejo-iphe. G'ọ to wotafuanu akpuru oshi, emeje g'a nodu ndzụ ria nodu ndzụ ojejeje.”

²³Ọo ya bụ; Chipfu bụ Chileke chifu iya lẹ mgbabu Édenu; g'o je ejeahaa ozi l'alị, bụ eka e shi wota eja kpua ya.

²⁴Ọ chifuchaepho nemadzu ịe mgbabu ono; ọ bya eje l'uzo ẹnyanwu-awawa ke mgbabu Édenụ ono; bya eworu ojozi-imigwe, bu Chierobu dobe iya; bya edobe iya ogu-echi, charu gbarara; teme ọ nọdu egbu swiiswiiswii iphu l'azu g'o chee ụzo, e shi eje l'oshi ndzu pho nche.

Mbulembu 4

Kénu yéle Ebeļu

¹Ádamu bya ejepfu nyee ya, bu Ivu; ọ tsuta ime; bya anwua Kénu. Ivu su: “Chipfu yewaru mu eka; mu nwua nwa nwoke.”

²E mechaa; ọ bya anwua nwune iya, bu Ebeļu. Ebeļu buru onye nweru aturu; waa egbu; Kénu buru onye akọ opfu.

³A nonyaa; Kénu hata mebyi iphe, shi l'alị gude je g'ọ nụ Chipfu.

⁴Obenu ịe Ebeļu hataru aturu ivuzo, aturu iya nwushiru gbua; bya ebuta iya eka ọ tsuru eba; je anu Chipfu. Ebeļu yee iphe, ọ nuru du Chipfu ree; ọ nata iya.

⁵Ọ jika Kénu yee iphe, ọ nuru iya. Ehu ghuaaha Kénu egbu; ọ woru iphu gbanwube.

⁶Chipfu su Kénu: “? Bu gunu kparu iphe, ehu egbu ngu egbu? ? Bu gunu meru g'o gude i gbanwube iphu?”

⁷Ọ -buru l'i meru iphe, du ree; ? taa natadu ngu to? Obenu; l'ọ -buru l'i ti meduru iphe, du ree; makwaru l'iphe-eji pfuwaru l'onu mgbo ngu; ọ nọdu agu iya egu g'ọ nweru ngu. Ole ọ bu; kapyabekwa iya enya!”

⁸Tobudu iya bu; Kénu su nwune iya Ebeļu: “G'anyi je l'egu.” Epe jeshia; epe rwuepho l'egu; Kénu zupyaabe nwune iya Ebeļu gbua.

⁹Noo ya; Chipfu su Kénu: “? Denụ nwune ngu Ebeļu?” Ọ su: “Mu ta amakwa. ? Mu echekwanu nwune mu nche?”

¹⁰Chipfu su iya: “? Bu gunu be ọ gude i mee egube ejo-iphe owa-a? Gebekwa! Mee nwune ngu ono gbekwa l'alị echiku mu ịe mkpu.

¹¹E -shi ntanu-a be i buwaa onye a turu onu. Alị ono, saru onu ngua mee nwune ngu ono jikawa ngu.

¹²I -koo alị be ọ to dudu iphe, iimeta iya. Ii-noduepho agba oso-ndzu aghaphe phururugbada ịe mgboko.”

¹³Kénu su Chipfu: “Iphe-ehuka ono, i suru ge mu jee ono karikwaru mu eka.

¹⁴Nta-a, g'iichifuwa mu l'alị-a; k'ophu bu l'edomiwa mu edomi l'iphu ngu-a; teme mu buru onye agba oso-ndzu aghaphe phururugbada ịe mgboko-a; be onye humaru mu nu e-wokwaru mu gbua.”

¹⁵Chipfu su iya: “Ọ to dudu nno; ọ -duru onye gburu gube Kénu; eewota iphe, e meru ngu mee onye obu mgbo esaa.” Chipfu bya eworu iphe-ohubama mee Kénu; k'ophu ọ to dudu onye humaru iya nu eje iya egbugbu.

¹⁶Oo ya bụ; Kénu tughua lufu l'iphu Chipfu; je eburu l'alị Nodu, nọ l'uzo ɛnyanwu-awawa Édenu.

Eri Kénu

¹⁷Kénu bya ejepfu nyee ya; ọ tsuta ime nwua Inoku. Kénu nweru mkpukpu, ọokpu teke ono; o woru mkpukpu ono kua ɛpha nwa iya ono, bụ Inoku.

¹⁸Inoku nwuta Iradu; Iradu buru nna Mehujielu; Mehujielu buru nna Metushelu; Metushelu buru nna Lameku.

¹⁹Lameku lua unwanyi labo; onye lanu aza Ada; onye ophuu nodu aza Zila.

²⁰Ada bya anwuta Jiabalu; ọ buru iya bụ nna ndu ebujeru l'ulo-ekwa; bya aburu ndu ese akanya iphe-edobe.

²¹ɛpha nwune iya bụ Jiubalu; yebedua bụ nna ndu akpoje ogumogu; bya aphụ upyi.

²²Zila bya anwutakwapho nwa nwoke; ɛpha iya bụ Tubalu-Kénu. Yebedua bụ onye gude ope yee igwè kpushia ngwa, dụ igwerigwe. Tubalu-Kénu bẹ nwune iya nwanyi bụ Nama.

²³Noo ya; Lameku sụ unyomu iya: “Ada; waa Zila; unu gebekpodapho! Unube unyomu Lameku; unu numa opfu mu! Mu gburu nemadzu; kele o mekaru mu iphe. Oo nwokoroby, gburu mu onyá bẹ mu gburu.

²⁴O -buru le Kénu bẹ a gwataru ugwo-ochi iya ugbo ɛsaa; ge ke yebe Lameku bururo ukporo ugbo ɛto l'ugbo ɛsaa!”

²⁵Noo ya bụ; Ádamu byakwa bya ejepfu nyee ya ozo; ọ bya anwua nwa nwoke; bya eworu iya gwa Setu sụ: “Chileke nwaru mu nwa nwoke ozo, a-no-chi ɛnya Ebelu; eshi ophu Kénu gburu onye k'ono.”

²⁶Setu bya anwutakwapho nwa nwoke; bya eworu iya gwa Enoshi. E shi teke ono ndiphe wata eku ɛpha Chipfu.

Mbulembu 5

Eri Ádamu

¹Owa-a bụ g'e gude deshia ɛpha ndu bụ oshilokpa Ádamu; waa iphe, ɛphe meshiru. Teke Chileke meru nemadzu bẹ o meru iya ọ dụ ge Chileke dụ.

²O meru nwoke yee nwanyi. G'o mecharu phe bẹ ọ byaru agoru onu-oma nu phe bya ekua phe “nemadzu” .

³Ádamu nochaepho ukporo apha ishii l'apha iri; ọ nwuta nwa nwoke, yeru iya nu; bya adu g'ọ dụ. O woru iya gwa Setu.

⁴A nwuchaa Setu; Ádamu bya anofua unu apha labo. O nwushikwapho unwoke yee unwanyi tsobe Setu.

- ⁵Mkpako apha, Adamu noru buru unu apha labo l'ukporo apha ishii l'apha iri; bya anwuhu.
- ⁶Setu bya anoo ukporo apha ise l'apha ise; bya aburu nna Enoshi.
- ⁷O nwuchaa Enoshi; bya anofua unu apha labo l'apha esaa. O nwushikwapho unwoke yee unwanyi tsoke Enoshi.
- ⁸Mkpako apha, Setu noru buru unu apha labo l'ukporo apha ise l'apha iri l'ebo; bya anwuhu.
- ⁹Enoshi bya anoo ukporo apha eno l'apha iri; bya aburu nna Kenu.
- ¹⁰O nwuchaa Kenu; bya anofua unu apha labo l'apha iri l'ise. O nwushikwapho unwoke yee unwanyi tsoke Kenu.
- ¹¹Mkpako apha, Enoshi noru buru unu apha labo l'ukporo apha ise l'apha ise; bya anwuhu.
- ¹²Kenu bya anoo ukporo apha eto l'apha iri; bya aburu nna Mahalalelu.
- ¹³O nwuchaa Mahalalelu; bya anofua unu apha labo l'ukporo apha labo. O nwushikwapho unwoke yee unwanyi tsoke Mahalalelu.
- ¹⁴Mkpako apha, Kenu noru buru unu apha labo l'ukporo apha ise l'apha iri; bya anwuhu.
- ¹⁵Mahalalelu bya anoo ukporo apha eto l'apha ise; bya aburu nna Jiaredi.
- ¹⁶O nwuchaa Jiaredi; mbu Mahalalelu; bya anofua unu apha labo l'apha iri. O nwushikwapho unwoke yee unwanyi tsoke Jiaredi.
- ¹⁷Mkpako apha, Mahalalelu noru buru unu apha labo l'ukporo apha eno l'apha iri l'ise; bya anwuhu.
- ¹⁸Jiaredi bya anoo ukporo apha esato l'apha labo; bya aburu nna Inoku.
- ¹⁹O nwuchaa Inoku; bya anofua unu apha labo. O nwushikwapho unwoke yee unwanyi tsoke Inoku.
- ²⁰Mkpako apha, Jiaredi noru buru unu apha labo l'ukporo apha esato l'apha labo; bya anwuhu.
- ²¹Inoku bya anoo ukporo apha eto l'apha ise; bya aburu nna Metusela.
- ²²O nwuchaa Metusela; yee Chileke bya aswia oswi ukporo apha iri l'ise. O nwushikwapho unwoke yee unwanyi tsoke Metusela.
- ²³Mkpako apha, Inoku noru buru ukporo apha iri l'esato l'apha ise.
- ²⁴Inoku be yee Chileke swiru oswi. A nonyaa; a huma-buhu iya; o buru Chileke kutaru iya.
- ²⁵Metusela bya anoo ukporo apha tete l'apha esaa; bya aburu nna Lameku.

²⁶Ọ nwụchaa Lamẹku; bya anọfua ụnu apha l'ụkporo apha iri lẹ tete l'apha labo. Ọ nwụshikwapho unwoke yẹe ụnwanyi tsoke Lamẹku.

²⁷Mkpakọ apha, Metusela nọru buru ụnu apha labo l'ụkporo apha iri l'eshato l'apha tete; bya anwuhu.

²⁸Lamẹku bya anọo ụkporo apha iri lẹ tete l'apha labo; bya anwuta nwa nwoke.

²⁹Ọ gwa ya Nuwa sụ: “Ọo-du anyi obu l'akanya egu-a, anyi ese l'alị-a, Chipfu turu onu-a.”

³⁰Ọ nwụchaa Nuwa; bya anọfua ụnu apha l'ụkporo apha tete l'apha iri l'ise. Ọ nwụshikwapho unwoke yẹe ụnwanyi tsoke Nuwa.

³¹Mkpakọ apha, Lamẹku nọru buru ụnu apha l'ụkporo apha iri l'eshato l'apha iri l'esaa; bya anwuhu.

³²Nuwa bya anọo ụnu apha l'ụkporo apha ise; bya aburu nna Shemu; waa Hamu; waa Jiafeti.

Mbulembu 6

Ugbo Nuwa

¹Nemadzu nọdu aka shii eje lẹ mgboko; a nọdu anwushiru pẹ ụnwada.

²Unwu Chileke huma ụnwada nemadzu l'ephe ama mma; bya atugbaa je alugbaa pẹ.

³Chipfu sụ: “Unme mu ta anoduhedu l'ime nemadzu jasuru; noo kele o buepho anu-ehu mmanu. E -shi nta-a be iphe, nemadzu a-noje bu ukporo apha ishii.”

⁴Ndu gbaru oke mkparawa no lẹ mgboko lẹ teke ono; bya anokwaru iya ro kwaseru; mbu lẹ teke unwu Chileke jepfuru unwada nemadzu; ephe bya anwushiaru pẹ unwegirima. Ephe bu ndu e shi maru epha pẹ teke ndiche l'okpehu, shi du pẹ nu.

⁵Chipfu bya elee enya huma g'ejo-ememe nemadzu habewa shi lẹ mgboko; l'iphe, obu pẹ anodujeepho arị bu g'ephe e-shi mee ejo-iphe tekenteke.

⁶Ọ buru aphu tsoru Chipfu lẹ ya meru nemadzu lẹ mgboko; teme o nọdu egwu iya egwu l'ime okpoma.

⁷Chipfu sụ: “Mu e-meepho ge nemadzu, mu meru doke l'eliphe chihu. Nemadzu a-chihu; me anu; me iphe, awu l'epho; waa enu, ephe l'eli; kele o buwaa aphu tsoru mu lẹ mu meru pẹ doke.”

⁸Obenu lẹ Nuwa be du Chipfu l'obu.

⁹Waa oshilokpa Nuwa. Nuwa bu onye bue ya pho bu onye pfuleru-eka-oto; ophu uta adudu iya l'ehu lẹ ndu teke ono; teme ephe lẹ Chileke swia oswi.

¹⁰Nuwa ono nwutaru unwegirima unwoke eto, epha pẹ bu Shemu; yee Hamu; waa Jiafeti.

¹¹Teke ono be mgboko mebyishihuwaru l'atatiphu Chileke; bya aburu iwashi jiru iya.

¹²Chileke hūma gę mgboko mebyihubewaru; noo kẹle ndu bu lẹ mgboko mebyishibẹbewaru onwophe.

¹³Oo ya bụ; Chileke sụ Nuwa: “Mu abyawaa eme gę nemadzụ l'ophu chihu; noo kẹle iphe, jiru mgboko bụ iwashi; ọ bụru phe kparụ iya. Sụ-a; mu abyawaa phe emebyishi; mebyishikwapho mgboko.

¹⁴Oo ya bụ; je egude oshi gofa kua ugbo; tubushia ya omulo omulo l'ime iya; gude unwu dachishia ya ime; yee azu.

¹⁵Waa g'ii-gude kua ya baa: ugbo ono a-du ukporo nkwo-eka iri l'ise l'ogologo; osa iya aburu ukporo nkwo-eka labo le nkwo-eka iri; l'o bya adu ukporo nkwo-eka le nkwo-eka iri l'eli.

¹⁶L'i bya aku-chia eli ugbo ono aku-chi g'o du nkwo-eka lanu a -gbe l'igburonu iya. L'i bya eworu mgbo ye le mgbureku ugbo ono; teme l'i kua ya g'o du mkpopfu eto.

¹⁷Mu e-gude utso bya le mgboko bya erigbushikota iphe, dzu ndzu, no igwe le mkpula; mbu iphemiphe, e meru ememe, atu unme. Iphemiphe, no l'eliphe a-buru mkpurupyata.

¹⁸Obenu le gubedua be mu le ngu a-gba ndzu; l'ibahu l'ugbo ono; unu l'unwu ngu; waa nyee ngu; waa unyomu unwu ngu.

¹⁹L'i bya ahoo iphemiphe, dzu ndzu ebo ebo; okee le nyee; dobe ndzu l'eka i no.

²⁰Enu, ephe l'eli a-du ebo ebo du l'udu iya l'udu iya byapfuta ngu; unwu anu; yee anu, awu l'ephe adukwapho ebo ebo byapfutakota ngu g'i dobe phe ndzu.

²¹Iibya ahoo nri l'asa iya l'asa iya dobe g'o buru nri, unu l'ephe e-rije.”

²²Nuwa bya atukoepho iphemiphe ono mekota gę Chileke suru g'o mee ya.

Mbulembu 7

¹E mechaa; Chipfu sụ Nuwa: “Bahụ l'ugbo ono; unu lẹ ndibe ngu l'ophu; noo kẹle ọo gubedua kpologo be mu humaru bu onye pfuberu-eka-oto l'ogbo-a.

²Hota anu, a ta sodu nsọ esaa esaa; okee lẹ nyee. L'i hota anu, aasọ nsọ ebo ebo; okee lẹ nyee.

³L'i bya ahota enu esaa esaa; okee lẹ nyee; dobe phe ndzu lẹ mgboko.

⁴A -noepho ujiku esaa nta-a be mu e-dze mini lẹ mgboko ukporo abali labo eswe l'enyashi; gude mebyishikota iphemiphe, dzu ndzu, mu meru dobe lẹ mgboko.”

⁵Nuwa bya atuko iphemiphe, Chipfu suru g'o mee mekota.

⁶Nuwa ono nowaru unu apha l'ukporo apha iri teke utso ono byaru lẹ mgboko.

⁷Nuwa; yee unwu iya; waa nyee ya; waa unyomu unwu iya bya abahu l'ugbo ono; g'ephe gbalaru utso ono.

⁸Anu ẹbo ẹbo l'ophu a ta sodu nsọ; me ophu aasọ nsọ; me ẹnu; mekpoo iphe, awu l'epho;

⁹okee le nyee byapfuta Nuwa bya abahu l'ugbo ono, bu iya bu ge Chileke pfuru iya.

¹⁰A nochapho ujiku esaa ono; utso bya le mgboko.

¹¹O be l'apha, kwe Nuwa unu apha l'ukporo apha iri; le mboku, onwa k'ẹbo dūepho l'abalī iri l'esaa; oḡba mini ime alī gbafushihu; teme a guhashia ẹnya mini k'akpaminigwe.

¹²Igwe dzee mini le mgboko ukporo abalī labo eswe l'enyashi.

¹³O buru mboku ono gedegede be Nuwa; yee unwu iya, bu Shemu; waa Hamu; yee Jiafeti; yee nyee ya; waa unyomu unwu iya ephe n'eto tukoru bahu l'ugbo ono.

¹⁴Anu-egbudu, dulaje l'udu iya l'udu iya; me anu, bu iphe-edobe, dulaje l'udu iya l'udu iya; me iphemiphe, bu iphe, awu l'epho, dulaje l'udu iya l'udu iya; me ẹnu, dulaje l'udu iya l'udu iya; mbu iphemiphe, furu nkù be ephe l'ephe tukoru bahu l'ugbo ono.

¹⁵Iphemiphe, e meru ememe, dzu ndzu du ẹbo ẹbo byapfuta Nuwa; bya abahu l'ugbo ono.

¹⁶Anu, wubakotaru l'ugbo ono bukotaerupho okee le nyee iphemiphe, dzu ndzu; egube ono, Chileke suru Nuwa l'oo-du ono. E mechaa; Chipfu gu-chia ugbo ono guburu phe ye l'ime iya.

¹⁷Ukporo abalī labo be utso ono byakotaru le mgboko; mini ono nodu aka shii eje; o nodu apalī ugbo ono ephekerephe le mgboko.

¹⁸Mini ono nodu abyaepho ke kulakula le mgboko; ugbo ono nodu ese eli l'eli mini.

¹⁹Utso ono byaa shii le mgboko; bya atuko ubvu, no igwe le mkpula gbamikota.

²⁰Mini ono byaa shii; k'ophu o gude nkwo-eka iri l'ise kakota ubvu l'eli.

²¹Iphemiphe, eme ukporo le mgboko lakota l'iyi. Mbu ẹnu; waa anu, bu iphe-edobe; waa anu-egbudu; iphe, kukotaru le mgboko; yee nemadzu.

²²Iphemiphe, no l'eli mgboko, dzu ndzu, atu unme l'imi nwushikota.

²³Iphemiphe, nokota le mgboko be e mebyishikotaru. Nemadzu; me anu; me iphe, awu l'epho; me ẹnu be e mebyishikotaru le mgboko. O buerupho Nuwa yee iphemiphe ono, ephe l'iya tukoru nodu l'ugbo ono wafuru.

²⁴Utso ono doru le mgboko no ukporo abalī esaa l'abalī iri.

Mbulembu 8

Alala utso ono

¹Obenu le Chileke nyataru-a Nuwa; waa anu-egbudu; me anu, bu iphe-edobe, ephe l'iya tukoru nodu l'ugbo ono. O bya emee ge pherephere wata ezizi le mgboko; mini ono wata alala.

- ²A zachishia ọgba mini ime alị phọ; bya aguchishia ẹnya mini akpaminigwe phọ. E buchia mini, shi l'igwe mee; igwe dzebuhu mini.
- ³Mini ono nọdu alakpọepho lẹ mgboko. A nọepho ụkporo abalị ẹsaa l'abalị iri; mini ono lawaa shii.
- ⁴Onwa k'ẹsaa dọepho abalị iri l'ẹsaa; ụgbo ono je je ebvuru l'úbvú Araratu.
- ⁵Mini ono nọdu alakpọepho jasụ l'onwa k'iri. O buru lẹ mbọku mbụ l'onwa k'iri ono bẹ e beberu hụmaahaa mkpakponu úbvú.
- ⁶A nọkwapho ụkporo abalị labọ; Nuwa bya aguhaa windo, o yeru l'ugbo ono;
- ⁷bya atụfu okpoko-óhà. O je etsoru rwupheahaa l'eli; gbiriri jasụ mini tashihu lẹ mgboko.
- ⁸O bya atụfu ndo g'ọ maru ? mini ono tahụgbuwaru l'eli alị?
- ⁹Ophu ndo ono ahụmaduru ẹka ọo-zọbe ọkpa; noo kẹle mini nọkwadu l'eli mgboko. Oo ya bụ; ọ lapfu Nuwa l'ugbo ono ọzo. Nuwa machia ẹka nwuta ndo ono ye l'ime ugbo ono ọzo.
- ¹⁰O bya anọkwaa ujiku ẹsaa; bya agbẹkwa l'ugbo ono tufu ndo ono ọzo.
- ¹¹Ndo ono lwatashia l'uzenyashi; ọ takpuru ẹkwo oshi olivu ọphúú gude lwa. Nuwa maru lẹ mini tahụwaru l'eliphe.
- ¹²O nọkwaa ujiku ẹsaa ọzo; bya atufukwa ndo ono ọzo. O -rwua l'ogiya ono; ophu ọ lwaeduru azụ lwapfuta iya.
- ¹³O be gẹ Nuwa nọrwuerupho unu apha l'ụkporo apha iri l'apha lanụ; lẹ mbọku, onwa mbụ dụ l'abalị mbụ; mini ono tashihuwa l'alị. Nuwa bya ewofu iphe, e gude kuchia ugbo ono; bya ahuma l'eli alị kpohuwaru nkụ.
- ¹⁴O rwua lẹ g'onwa k'ẹbo dụ l'ụkporo abalị l'abalị ẹsaa; alị kpohukotawaa nkụ.
- ¹⁵Oo ya bụ; Chileke sụ Nuwa:
- ¹⁶“Unu lufuta l'ugbo ono; gu lẹ nyee ngu; waa unwu ngu; waa unyomu unwu ngu.
- ¹⁷L'iichifuta iphemiphe, dzụ ndzụ, unu l'iya nọ l'ẹka ono: ẹnu; mẹ anụ; mewardo iphemiphe, awụ ẹpho l'alị; g'ẹphe bya azua azụzụ zụ-jia mgboko; ẹphe anwushi unwu aka igwerigwe l'ime iya.”
- ¹⁸Oo ya bụ; Nuwa bya afuta; yee unwu iya; yee nyee ya; waa unyomu unwu iya.
- ¹⁹Anụ l'ophu; mewardo iphemiphe, awụ ẹpho l'alị; mẹ ẹnu l'ophu; mbụ iphemiphe, eme ụkporo lẹ mgboko shikota l'ugbo ono futaagbaa l'udu iya l'udu iya.
- ²⁰Nuwa bya akpụaru Chipfu ọru-ngweja; bya ahata anụ; yee ẹnu ndu k'ophu a ta sọdu nsọ; bya egude gwee ngweja-akpo-ọku nụ Chipfu l'ẹka ono.
- ²¹Chipfu numaepho ishishi iya, atso ntumatu; o pfa l'ime obu iya sụ: “Mu ta abyaedu egude opfu ẹhu nemadzu tubaa alị onu; kẹle iphe, nemadzu anodujekpọepho arị l'obu

iya e -shi lẹ nwata buẹpho ẹjo-iphe. Ophu mu abyaẹdu emebyishibaa iphemiphe, mu meru ememe, dzu ndzu; ẹgube-a, mu meru-a.

²²“Jasụ gẹ mgboko a-nọ-beru bẹ teke akọbe iphe l'alị a-du; teke akpata iya akpata adu. Teke oyi atsụ a-du; teke okpomoku du; adukwapho. Onanwu a-du; udzumini adukwapho. Eswe a-du; ẹnyasi adukwapho; ophu o du-bhubaedu.”

Mbulembu 9

Ogbandzu Chileke yele Nuwa

¹Chileke bya agoru onu-oma nu Nuwa yee unwu iya; su phe: “Unu zua azuzu; kabaa igwerigwe; unu azua zu-jia mgboko.

²Unwu anu, nokota l'eliphe; waa enu, ephe l'eli; waa iphemiphe, awu l'ephe; waa ema, bu lẹ mini l'ophu bẹ ndzu unu a-nodu agukota; ephe atsụ unu ebvu. G'ephe ha a-nodukota unu l'eka.

³Iphemiphe, dzu ndzu eme ukporo a-bukotaru unu nri. Oo gẹ mu nukotaru unu oshiomini l'ophu bu gẹ mu nukotakarupho unu iphemiphe l'ophu.

⁴“Ole g'unu ta atajekwa anu me mee ndzu nodukwadu iya l'ime ehu.

⁵Mee ndzu unu bẹ mu a-ji aji iya. Teke o shi anu l'eka mu ajikwaa ya pho aji iya. Nemadzu -gburu nwibe iya bẹ mu a-jikwapho aji iya.

⁶“Onye gburu nemadzu bukwapho nemadzu bẹ e-gbu yebedua. Noo kele Chileke meru nemadzu; o du g'o du.

⁷A -bya l'ehu ke gubedua; unu jaa ajaja ka l'otu; unu azua azuzu zujia mgboko.”

⁸Tobudu iya bu; Chileke su Nuwa; yee unwu iya, ephe l'iya tukoru nodu l'eka ono:

⁹“Nta-a bẹ mu l'unu waa oshilokpa unu ndu ophu no l'iphu gbawaru ndzu.

¹⁰Teme anyi l'iphe, dzu ndzu, unu l'iya shi tukoru nodu gbakwapho ndzu; mbu enu; waa anu, bu iphe-edobe; waa anu-egbudu; iphemiphe ono, unu l'iya tukoru shi l'ugbo futa ono; mbu iphemiphe ono, bu l'eliphe ono.

¹¹Mu l'unu gbaakwaru ndzu. E tee gudebaekwa utso erigbushi nemadzu l'ophu ozobaa. Ophu utso, e-mebyishibaa mgboko-a l'ophu abyaedu agbabaa.”

¹²Chileke su: “Waa iphe, egoshi ogbandzu ono, mu l'unu; waa iphe, dzu ndzu, unu l'ephe tukoru nodu l'eka ono; waa ogbo ophu no l'iphu agba bu owa-a.

¹³Mu wowaru eko-mini mu dobe l'akpaminigwe; teme oo-bujeerupho iphe, egoshi ogbandzu mu lẹ mgboko l'ophu.

¹⁴Teke igwe rwuru erwurwu; o gbaa eko-mini ono;

¹⁵mu a-nyata ogbandzu mu l'unu; waa iphe, dzu ndzu l'ophu, dulaje l'udu iya l'udu iya. Mbu lẹ mini ta abyabaedu abya utso bya erigbushia iphe, no ndzu ozo.

¹⁶Iphe, bukpoote teke ẹko-mini gbaru l'urwukpu; mu a-huma iya nyata ogbandzu ojejoje ono, Chileke yee iphe, no ndzu, dulaje l'udu iya l'udu iya, no le mgboko gbaru ono.”

¹⁷O buru iya bu Chileke su Nuwa: “Oo iphe-a bu iphe, egoshi ogbandzu ono, mu l'iphemiphe, dzu ndzu, no l'eliphe gbaru ono.”

Unwu Nuwa

¹⁸Unwu Nuwa, shi l'ugbo ono lufuta bu Shemu; waa Hamu; waa Jiafeti. O buru Hamu bu nna Kenu.

¹⁹O buru shita l'unwu Nuwa unwoke eto-a be nemadzu shiru dzuru mgboko l'ophu.

²⁰Noo ya; Nuwa bu onye emebe iphe l'ali; bya eworu opfu-vayinu koo.

²¹O rwua ujiku lanu; o ngua mee, shi l'akpuu vayinu iya ono. O wata iya atsutsu k'ophu o gba oto je aze l'ulo-ekwa iya.

²²Hamu, bu nna Kenu je ahuma nna iya aka o gba oto; bya eje epfuaru iya unwune iya ephenebo ophu no l'etezi.

²³Shemu; waa Jiafeti bya achita ekwa kobegbaa onwophe l'ukuvu je l'azu l'azu je aphukpute nna phe ono, gba oto ono. Ephe woru iphu ghaa l'ibe iya ozo g'ephe ta ahuma nna phe l'eka o gba oto.

²⁴O be teke mee tsubuhuru Nuwa; o tehu bya anuma iphe ono, nwa iya ke nwata meru iya ono;

²⁵O su: “Kenu be bukwa onye a turu onu. Oo-buru ohu ndu bu ohu l'eka unwune iya.”

²⁶O sukwapo: “G'e tua Chipfu, bu Chileke ke Shemu epha! Ge Kenu bukwaru ohu Shemu!

²⁷Ge Chileke mee ge Jiafeti jaa ajaja! Ge Jiafeti buru l'ulo-ekwa Shemu! Ge Kenu bukwarupho ohu iya!”

²⁸G'utso ono byacharu be Nuwa nofuaru ukporo apha iri l'esa l'apha iri.

²⁹Mkpako iphe, Nuwa noru buru unu apha labo l'ukporo apha esa l'apha iri; bya anwuhu.

Mbulumbu 10

Ajaja ohamoha

¹Waa oshilokpa unwu Nuwa, bu Shemu; waa Hamu; waa Jiafeti baa. Mbu l'awnushiru phe unwegirima le g'utso ono lacharu.

Eri Jiafeti

²Unwu Jiafeti bu Goma; waa Magogu; waa Madayi; waa Jiavanu; waa Tubalu; waa Mesheku; waa Tirasu.

³Unwu ke Goma buru Ashikenazu; waa Rifatu; waa Togarama.

⁴Unwu ke Jiavanu bu Elisha; waa Tashishi; waa ndu Kitimu; waa ndu Rodu.

⁵Ndu ono bu phe bu eri Jafeti. O buru phe be iphe, bukpo oha, bukube eze-enyimu gbẹ l'eka jakashia. Oha ono g'ephe hakota nwegbaarụ oke alị yee opfu-alị nkephe; waa ipfu ipfu nkephe.

Eri Hamu

⁶Unwu Hamu bu Kushi; waa Ijiputu; waa Putu; waa Kėnanu.

⁷Unwu ke Kushi buru Seba; waa Havila; waa Sabuta; waa Rama; waa Sabuteka. Unwu Rama bu Sheba; waa Dedanu.

⁸Kushi bu nna Nimurodu, bu onye mechaarụ bya aburu eze ojogu l'eliphe.

⁹O bu onye ike du l'achi nta l'iphu Chipfu; noo iphe, meru g'o gude a nodu anmajẹ etu su: "Onye-a du ge Nimurodu onye ike du l'achi nta l'iphu Chipfu."

¹⁰Eka o gbuberu ishi aburu eze iya bu le Babelu; waa Ereku; waa Akadu; waa Kalune, no l'ime alị Shina.

¹¹O shi l'eka ono wata ajaja jarwua alị Asiriya, bu eka o no meta mkpukpu Ninive. O metakwapho mkpukpu Rehobotu-Iye; waa mkpukpu Kala;

¹²waa mkpukpu Resenu. Resenu ono no le mgbaka Ninive waa Kala. O buru iya bu oke mkpukpu ono.

¹³Ijiputu bu nna ndu Ludu; waa ndu Anamu; waa ndu Lehabu; waa ndu Nafutu;

¹⁴waa ndu Paturosu; waa ndu Kasuluhu. Ndu Kasuluhu ono bu iya bu eka ndu Filisitayinu shi. Ijiputu bukwarupho nna ndu Kafuto.

¹⁵Kėnanu bu nna Sayidonu. O buru Sayidonu ono bu okpara iya. Kėnanu bukwarupho nna ndu Hetu;

¹⁶waa ndu Jiebusu; waa ndu Amoru; waa ndu Gigashi;

¹⁷waa ndu Hevu; waa ndu Aku; waa ndu Sini;

¹⁸waa ndu Avadi; waa ndu Zemaru; waa ndu Hamatu. E mechaa; okpa-ipfu ndu Kėnanu bya ajakashia.

¹⁹Oke alị Kėnanu gbẹ le mkpukpu Sayidonu; me a -nodu eje mkpukpu Jira; noo jasụ le mkpukpu Gaza. O gbekwapho le Gaza l'eka ono; me a -nodu eje mkpukpu Sodomu yee Gomora; yee Adama; yee Zebowimu; noo jasụ le mkpukpu Lesha.

²⁰O buru oha ono bukota unwu Hamu; g'ephe hakota nwegbaarụ ipfu ipfu nkephe; yee opfu-alị yee oke alị nkephe.

Eri Shemu

²¹Shemu nwushikwarupho unwegirima unwoke. Nwune Jiafeti k'ogerenya bu Shemu. O buru Shemu bu ochochoroche unwu Eba l'ophu.

- ²²Unwu Shemu bu Elamu; waa Ashuru; waa Afakusadu; waa Ludu; waa Arámu.
- ²³Unwu ke Arámu buru Uzu; waa Hulu; waa Geta; wafua Mashu.
- ²⁴Afakusadu bu nna Shela. Shela bya aburu nna Eba.
- ²⁵Eba nwuta unwoke labo. Epha onye lanu bu Pelegu; noo kele a nwuru iya teke mgboko kekashihuru. Epha nwune iya buru Jiokutanu.
- ²⁶Jiokutanu bu nna Alumodadu; waa Shilefu; waa Hazamaveti; waa Jera;
- ²⁷waa Hadoramu; waa Uzal; waa Dikila;
- ²⁸waa Obalu; waa Abimelu; waa Sheba;
- ²⁹waa Ofi; waa Havila; wafua Jiobabu. G'ephe ha bukota unwu Jiokutanu.
- ³⁰Eka ephe bu shi le Mesha phobe rwua Sefa l'uzo oha ubvu l'uzo enyanwu-awawa.
- ³¹O buru oha ono bukota unwu Shemu; g'ephe hakota nwegbaaru ipfu ipfu nkephe; yee opfu-ali yee oke ali nkephe.
- ³²Oha ono g'ephe ha bukota oshilokpa unwu Nuwa; g'ephe ha nwegbaaru ipfu ipfu nkephe. O buru phe be ohamoha shi l'eka dzuru eliphe l'ophu g'utso gbacharu.

Mbulumbu 11

Ulo-eli Babelu

- ¹Unwu-eliphe l'ophu shi epfukota opfu-ali lanu, a nu-dzuru.
- ²Noo ya; o be teke ndiphe kwaseru uzo enyanwu-awawa; ephe je ahuma nsuda le Shina; ephe je ebukobe l'eka ono.
- ³Ephe su nwibe phe: "Unu bya g'anyi kpua eja hua ya l'oku hu-ghee ya ahu-ghe." O buru eja akpukpu be no-chiru phe enya mkpuma; ephe wua ya korota g'o buru otu-paa.
- ⁴Ephe su: "Unu bya g'anyi metaru onwanyi mkpukpu; g'anyi kpua ulo-eli, e-je asupfuru l'igwe. Oo ya bu; g'anyi aburu ndu aa-maru epha phe; g'anyi te je agbakashihu dzuru mgboko."
- ⁵Tobudu iya bu; Chipfu bya enyizeta g'o huma mkpukpu ono; yee ulo-eli ono, unwu-eliphe akpu ono;
- ⁶bya asu: "Ndu-a bukwa nanu; bya epfukota opfu-ali lanu; ephe wata eme iphe, du egube-a. O to nwekwa iphe, ephe chiru idzu ememe g'ephe te emegha iya.
- ⁷Unu g'anyi nyizeta je aghaa phe olu-opfu; g'iphe, nwibe phe epfu te edojeh phe enya."
- ⁸Oo ya bu; Chipfu bya achikashia phe; ephe dzuru mgboko; ephe paru akpu mkpukpu ono haa.

⁹Noo iphe, meru g'o gude e kua ya Babelu; noo kele ọo ẹka ono be Chipfu ghashiru opfu unwu-eliphe l'ophu. O shi l'ẹka ono chikashia phe; ẹphe dzuru mgboko.

E shi le Shemu jasụ le Ebiramu

¹⁰Waa oshilokpa Shemu. A noepo mgbarapha labo g'utso byachaaru ono; Shemu nwuta Afakusadu. Teke ono be Shemu nowaru ukporo apha ise teme o nwuta Afakusadu ono.

¹¹O nwuchaa Afakusadu; bya anofua unu apha l'ukporo apha ise. O nwushikwapho unwoke yee unwanyi tsoke Afakusadu.

¹²Afakusadu bya anoo ukporo apha l'apha iri l'ise; bya aburu nna Shela.

¹³O nwuchaa Shela; bya anofua unu apha l'apha eto. O nwushikwapho unwoke yee unwanyi tsoke Shela.

¹⁴Shela bya anoo ukporo apha l'apha iri; bya aburu nna Eba.

¹⁵O nwuchaa Eba; bya anofua unu apha l'apha eto. O nwushikwapho unwoke yee unwanyi tsoke Eba.

¹⁶Eba bya anoo ukporo apha l'apha iri l'eno; bya aburu nna Pelegu.

¹⁷O nwuchaa Pelegu; bya anofua unu apha l'ukporo apha l'apha iri. O nwushikwapho unwoke yee unwanyi tsoke Pelegu.

¹⁸Pelegu bya anoo ukporo apha l'apha iri; bya aburu nna Rewu.

¹⁹O nwuchaa Rewu; bya anofua ukporo apha iri l'apha tete. O nwushikwapho unwoke yee unwanyi tsoke Rewu.

²⁰Rewu bya anoo ukporo apha l'apha iri l'ebo; bya aburu nna Serugu.

²¹O nwuchaa Serugu; bya anofua ukporo apha iri l'apha esaa. O nwushikwapho unwoke yee unwanyi tsoke Serugu.

²²Serugu bya anoo ukporo apha l'apha iri; bya aburu nna Nahọ.

²³O nwuchaa Nahọ; bya anofua ukporo apha iri. O nwushikwapho unwoke yee unwanyi tsoke Nahọ.

²⁴Nahọ bya anoo ukporo apha l'apha tete; bya aburu nna Tera.

²⁵O nwuchaa Tera; bya anofua ukporo apha ise l'apha iri le tete. O nwushikwapho unwoke yee unwanyi tsoke Tera.

²⁶Tera bya anoo ukporo apha eto l'apha iri; bya aburu nna Ebiramu; waa Nahọ; waa Haranu.

²⁷Waa oshilokpa Tera. Tera bu nna Ebiramu; waa Nahọ; waa Haranu. Haranu buru nna Lotu.

²⁸Nna iya, bu Tera nodukwadu ndzu; Haranu nwuhu le mkpukpu Uru l'ali Kaludiya, bu eka a nwuru iya.

²⁹Ebiramu yee Nahọ bya atuko lua nwanyi. Epha nyee Ebiramu bu Serayi; epha nyee ke Nahọ buru Milika. Onye nwuru Milika bu Haranu; o bukwarupho Haranu ono nwuru Isuka.

³⁰Ophu Serayi anwutaduru nwa; noo kele o too tsudu ime.

³¹Noo ya bu; Tera duta nwa iya, bu Ebiramu; waa nwanwa iya, bu Lotu, bu nwatibe Haranu; bya edutakwapho nyee nwa iya, bu Serayi; bu iya, bu nyee Ebiramu. Ephe tuko swiru shi le Uru, no l'ali Babilonu jeshia Kėnanu. Obenu l'ephe rwuerupho Haranu; ephe buru l'eka ono.

³²Tera noepho ukporo apha iri l'apha ise; o nwuhu le Haranu.

Mbulembu 12

Chileke eku Ebiramu

¹Chipfu suru Ebiramu: “Haa ali ngu; yee ndibe unu; me okpoku ibe nna ngu; lashia ali, mu e-goshi ngu.

²“Mu e-me ngu l'ii-buru oha, paru eka apaa; teme mu ekebekwa ngu pho l'oma. Mu emee g'epha ngu paa eka; teme l'iburu onye mu e-shi l'ehu iya ekebe ndu ozo l'oma.

³Mu a-goru onu-oma nu ndu goru onu-oma nu ngu; ndu turu ngu onu be mu a-tu onu. Teme ndu mgboko l'ophu be ee-gude iswi ehuru ngu kebe l'oma.”

⁴Oo ya bu; Ebiramu tugbuna, bu iphe, Chipfu pfuru iya. Lotu tsoru iya. Ebiramu nowaru ukporo apha eto l'apha iri l'ise teke o shi Haranu tugbua.

⁵Tobudu iya bu; Ebiramu bya atuko eku, ephe kpataru akpata rwuta; bya eduta nyee ya, bu Serayi; waa Lotu, bu nwa nwune iya; mekpoo ndu ephe shi le Haranu gude; ephe wufu; o buru phe ala ali Kėnanu. Ephe je jasuru ephe jerwua eka ono.

⁶Ebiramu phe kwasuru ali ono gbiriri jasuru ephe rwua eka eze oshi More no le mgboru mkpukpu Shekemu. O buru ndu Kėnanu bu l'ali ono teke ono.

⁷Ole Chipfu byapfutaru Ebiramu bya asuru iya: “O kwa oshilokpa ngu be mu a-nukota ali-a.” Ebiramu bya akparuru Chipfu ono, byapfutaru iya nu ono oru-ngweja.

⁸Ebiramu phe gbere l'eka ono kwasuru uzo enyanwu-awawa ubvu Betelu; je akpobe ulo-ekwa phe l'eka Betelu no l'uzo enyanwu-ariba. Eyayi nodu l'uzo enyanwu-awawa. Ebiramu rwukwaa eka ono bya akparuru Chipfu oru-ngweja; bya anodu l'eka ono kporo epha iya.

⁹Noo ya; Ebiramu phokata ulo-ekwa iya tugbua kwasuru uzo echiegu ndohali.

Ebiramu bu l'ali Ijiputu

¹⁰Tobudu iya bu; eze egu wata ememe l'ali onoya; Ebiramu phe lashia ali Ijiputu g'ephe je ebutota l'eka ono; noo kele egu ono eme shii.

- ¹¹Ephe bya l'abahụ l'alị Ijiputu; Ebiramu sụ nyee ya, bụ Serayi: “Mu maru l'ị bụ nwanyi, manụkaru mma.
- ¹²Lẹ ndu Ijiputu -huma ngu; bẹ ephe a-sukwa l'ị bụ nyee mu. Ephe eworu mu gbua; haa ngu g'ị nọdu ndzụ.
- ¹³Sujekwa lẹ mu lẹ ngu bụ nwune; ọo ya bụ g'eemekwanaru mu ree l'iswi ẹhu ngu; teme l'iishikwapho nno mee g'ishi mu kpọ-pfuru.”
- ¹⁴Ebiramu pẹ bya abahụ alị Ijiputu. Ndu Ijiputu huma lẹ Serayi bụ nwanyi, ama ntumatu.
- ¹⁵Ndu nọ l'oke okwa Fero hūmae ya pho; bya eje atua onu iya l'iphu Fero. A bya eduta iya lashia ibe Fero.
- ¹⁶Fero meeru Ebiramu ree l'opfu ẹhu Serayi; bya akpẹe ya aturu; kpẹe ya eswi; kpẹkwaa ya pho oke lẹ nyee nkafu-igara; bya eduru unwoke yee unwanyi, a-nodu ejeru iya ozi nụ iya. O bya akpẹkwaa ya pho inya-kamelu.
- ¹⁷Tobudu iya bụ; Chipfu bya aloru ejọ iphe-ememe tū Fero yee ndibe iya; opfu l'odutaru nyee Ebiramu, bụ Serayi.
- ¹⁸Noo ya; Fero kua Ebiramu sụ iya: “? Denu g'o gude i mee mu egube iphe owa-a? ? Bụ gunu bẹ ị ti kajeduru mu l'oo nyee ngu?
- ¹⁹? Bụ gunu meru iphe, ị suru l'oo nwune ngu nwanyi; ị haa; mu bya aluta iya lūaha? Ole g'ọ dūhabe; waa nyee ngu baa; duta iya tugbua!”
- ²⁰Fero bya asu gẹ ndu-ozii iya chifu Ebiramu. Ephe chifu yele nyee ya; waa iphemiphe, o nweru.

Mbulembu 13

Ebiramu yele Lotu ekekaha

- ¹Noo ya; Ebiramu; waa nyee ya; waa iphemiphe, o nweru; yee Lotu, ephe l'iya swi shi l'alị Ijiputu tugbua lashia echięgu ndohali.
- ²Ebiramu nwewaru iphe-edobe; waa mkpola-ochaa; waa mkpola-ododo shii.
- ³Ephe shi l'echięgu ndohali jekpoeppo; ephe -shi l'eka-a; ephe ejerwua l'eka-a; ephe -shi l'eka; ephe ejerwua l'eka-a; gbiriri jasụ ephe jerwua l'uzo isheli mkpukpu Betelu; mbu eka ono, nọ lẹ mgbaka Betelu yele mkpukpu Eyayi ono, bụ iya bụ eka ephe kpobejehawaru ulo-ekwa pẹ-a;
- ⁴teme o buru eka Ebiramu vuru uzo kpua oru-ngweja. O nodu l'eka ono kpọ-kuahaa Chipfu.
- ⁵Noo ya; Lotu-a, yele Ebiramu swi-a nwekwarupho aturu, du igwerigwe; waa eswi, du igwerigwe; waa ulo-ekwa, dukwapho igwerigwe.
- ⁶Ophu alị ono asuedu ephe nebo ebubu; kele iphe-edobe pẹ kwatakpo paa eka apaa; k'ophu bụ l'ephe ta aduedu ike anokota l'eka lanu.

⁷Oo ya bụ; uswo daru ndu echeru Ebiramu iphe-edobe; yee ndu echeru Lọtụ nkiya. Ndu Kénanu yee ndu Pérezu shikwapho buru l'alí ono teke ono.

⁸A nonyaa; Ebiramu sụ Lọtụ: “G'uswo ta adashinuru mu le ngu; ophu o dashinuru ndu echeru ngu iphe-edobe; yele ndu echeru mbedua nkemu; eshinu mu le ngu bụ abubu.

⁹I tukerupho alí obu l'ophu huma-gbua. G'anyi ta akwopfuheru l'eka lanu. Hatakpoephe ekiya ophu ii-la je eburu. I -nodu ala l'eka-icha; mbedua ala l'eka-utara; teke iila l'eka-utara; mbedua ala l'eka-icha.”

¹⁰Lọtụ palia enya imeli bya ahuma le nsuda enyimu Jiódanu, noru kpaa le mkpukpu Zowa be nggele du shii; o dupepho ge mgbabu Chipfu ono; ozoo ge alí Ijiputu. Teke ono be Chipfu teke emebyidu Sodomu yee Gomóra.

¹¹Tobudu iya bụ; Lọtụ gude eka iya hata nsuda enyimu Jiódanu l'ophu; bya egweta lashia uzo enyanwu-awawa. O buru iya bụ l'umadzu labo ono ekekaha;

¹²Ebiramu buru l'alí Kénanu; Lọtụ je ebukube mkpukpu, nogbaa le nsuda ono. O woru ulo-ekwa iya je akpobe le mgboru Sodomu gedegede.

¹³Noo ya; ndu Sodomu nodu eme ejo-iphe; bya aburu ndu menukaru Chipfu iphe-eji.

¹⁴Tobudu iya bụ; Lọtụ lufuchaephe; Chipfu sụ Ebiramu: “Gbè l'eka i no palia enya lee l'uzo isheli; waa l'uzo ohali. L'iile l'uzo enyanwu-awawa; lekwapho l'uzo enyanwu-ariba.

¹⁵Alí ono, i humakotaru ono mgburugburu be mu a-nukota gu l'awa ngu g'unu nweru jasụ l'ojejeje.

¹⁶Mu e-me awa ngu g'ephe ha g'eja, no l'alí. K'ophu bụ l'oo onye duru ike guta aja, no l'alí be a-du ike guta awa ngu.

¹⁷Jephekota alí ono maru eka o jeberu l'ogologo; l'imaru g'o habe osa. Noo kele mu a-nukota ngu iya.”

¹⁸Oo ya bụ; Ebiramu phuta ulo-ekwa iya bya eje ebukube eze oshi ndu Mamure, dokoberu le Hẹburonu. O nodu l'eka ono kpuru Chipfu oru-ngweja.

Mbulembu 14

Ebiramu adzota Lọtụ

¹O buru teke ono be Amurafelu, bu eze ndu Shina; me Ariyoku, bu eze ndu Elasa; me Kedolawoma, bu eze ndu Elamu; waa Tidalu, bu eze ndu Goyimu chitaru ndibe phe tugbua jeshia ogu.

²O buru Bira, bu eze ndu Sodomu; me Birisha, bu eze ndu Gomóra; me Shayinabu, bu eze ndu Adama; me Shimiba, bu eze ndu Zebowimu; waa eze Bela, bu iya bu Zowa be ephe jeru etso ogu obu.

³Ndu k'ikpazu-a bya edzukobe chita ndibe phe jepfushia phe ogu le nsuda Sidimu, mechaaru buru Eze-enyimu Unu.

- ⁴Ọ bụru iphe, kpara ọgu ono bụ l'ephe nọkotaru apha iri l'ẹbo l'eka Kedolawoma; o rwua lẹ k'iri l'eto; ephe kwefu ike.
- ⁵O rwua l'apha k'iri l'eno; Kedolawoma yee ndu eze ono, wupfutaru iya nu ono tuko je anodu lẹ Asheterotu Kaneemu lwu-kpee ndu Rafa; bya anodu lẹ Hamu lwu-kpee ndu Zuzu; bya anodukwapho lẹ Shave-Kiriyatayimu lwu-kpee ndu Emu.
- ⁶Ephe bya eje anodu l'ohu ubvu ndu Siye lwu-kpee ndu Horu; lwa phe jasụ lẹ Elu-Paranu, no lẹ mgboru echiegu.
- ⁷Ephe bya alwaphuta azu bya eje anodu lẹ Enu-Mishipati, bu iya bu Kadeshi; lwutakota ali Amaleku l'ophu; bya alwu-kpee ndu Amoru, bu lẹ Hazezonu-Tama.
- ⁸Tobudu iya bu; eze ndu Sodomu; me eze ndu Gomora; me eze ndu Adama; me eze ndu Zebowimu; wafua eze Bela, bu iya bu Zowa; wufuta bya eje akwaka k'ogu lẹ nsuda Sidimu;
- ⁹kwaberu Kedolawoma, bu eze ndu Elamu; me Tidalu, bu eze ndu Goyimu; me Amurafelu, bu eze ndu Shina; waa Ariyoku, bu eze ndu Elasa. Oo ya bu; lẹ ndu eze eno l'etso ndu eze ise ọgu.
- ¹⁰Nsuda Sidimu ono be iduma iduma, e bvutagbaru korota du igwerigwe. Obe teke ndu eze Sodomu waa Gomora ono; me ndibe phe tuku gbalaha agbala; o nweru ndibe phe ndu ophu haru dalahu iya nu. Ndu ophu phoduru nu gbaru laa l'ubvu ubvu.
- ¹¹Ndu eze eno ono bya atuko eku Sodomu, yele Gomora; me nri phe gweta tugbua.
- ¹²Ephe kputakwapho Lotu, bu nwa nwune Ebiramu yele eku iya; eshinu o bu lẹ Sodomu.
- ¹³Onye lanu l'ime ndu gblaru nu bya epfuaru iya Ebiramu onye Hiburu. Ebiramu bu lẹ mgboru eze oshi ndu Mamure. Mamure bukwanu onye Amoru bya aburu nwune Eshukolu waa Ana. Ndu ono be ephe lẹ Ebiramu tugbaru buru nanu.
- ¹⁴Ebiramu numaepho l'abubu iya be a lwutaru l'ogu; o kua unwoke iya ukporo umadzu iri l'ise l'umadzu iri l'esato, a nwuru l'ibe iya, e ziru g'aalwuje ọgu. Ephe chipyabe phe gbapfu phe lẹ Danu.
- ¹⁵O -rwua l'enyasi; Ebiramu bya ekekashia unwoke iya gude tsoo phe ọgu; lwu-kpee phe; chia phe gbiriri jasụ ephe gbarwua Hoba, bu isheli Damasukosu.
- ¹⁶Ọ natakota phe ivu ono, ephe shi gweta ono; byaedulata abubu iya, bu Lotu yee eku nkiya; waa unwany; mewaro ndu ozo, ephe shi rwuta.
- ¹⁷Ebiramu lwu-kpechaa Kedolawoma yee ndu eze, ephe l'iya swi bya alwatashia; eze ndu Sodomu gba iya ndzuta lẹ nsuda Shave, bu iya bu nsuda, aza Nsuda Eze.
- ¹⁸Noo ya bu; Melikizedeku, bu eze ndu Salemu gude buredi; waa mee byapfuta phe. Melikizedeku ono bu onye uke Chileke, bu Okalibe-kakota-shii.
- ¹⁹Ọ bya agoru onu-oma nu Ebiramu su: "Ge Chileke, bu Okalibe-kakota-shii kebe gube Ebiramu l'oma! Mbụ Chileke ophu bu iya meru igwe bya emee eliphe.

²⁰G'e tua Chileke, bu Ọkalibe-kakọta-shii ẹpha! Mbụ onye ono, woru ndu ọhogu ngu ye ngu l'ẹka!" Ebiramu nū iya oke-lanū-l'uzo-iri l'iphemiphe ono, o gwephtaruru azu ono; ọ nata iya.

²¹Eze Sodomu sukwanu Ebiramu g'ọ haaru yẹbedua ndu ọphu bu nemadzu; gwetawarọ ọphu bu ivu nworu.

²²Ebiramu sū eze ndu Sodomu: "Mu paliakwaru ẹka riaru Chipfu angu; mbụ Chileke ọphu bu Ọkalibe-kakọta-shii; onye meru igwe bya emee eliphe;

²³l'ọ tọ dudu iphe, bu iphe ngu, mu a-nata; mbụ m'obeta ọ buru oghu; ọzo eri akpokpa; g'ọ tọ du teke ịi-sū l'ọo ngu meru Ebiramu; ọ baa eze.

²⁴Q tọ dudu iphe, mu a-nata gbahaa ọphu ndu mu l'iya swi riwaru eriri; waa oke-iphe ọphu rwuberu ndu tso mu jee; mbụ-a; gẹ Ana; waa Ẹshukolu; waa Mamure ria oke, rwuberu pẹ nū."

Mbulembu 15

Ọgbandzu Chileke yele Ebiramu

¹E mechaa; Ebiramu nūma Opfu Chipfu l'ophulenya. Ọ sū iya: "Gẹ ndzū ba agushi ngu Ebiramu. Ọo mbedua bu onye egbobutaje ngu nū; bya aburu obunggo ngu, paru ẹka."

²Ebiramu sū: "Gube Nnajiuphu, bu Chipfu; ? bu gunu ọzo be ịi-nū mu gẹ mu ta nwutaduru nwa-a; teme onye e-mecha nwekotaru ẹku mu buru Eliyẹza-a, bu onye Damasukosu-a?"

³Ebiramu bya asukwapho: "Nta-a, g'ị ti nuduru mu nwa-a bunu ohu, a nwuru l'ibe mu e-mecha ria iphe mu."

⁴Tobudu iya bu; Chipfu sū iya: "Onye ono ta abukwa iya e-ri iphe ngu. Ọ kwa nwa nwoke ọphu shi ngu l'ẹhu e-ri iphe ngu obu."

⁵Ọ bya eduta iya lufu etezi bya asū iya: "Palia ẹnya lee l'akpaminigwe gūa kpokpode, nọ iya nū ọgu; m'ọ buru l'ii-du ike gukota iya." Sū iya: "Noo g'awa ngu a-ha bu ono."

⁶Ebiramu kweta iphe, Chipfu pfuru. Ọ guaru iya ya l'apfube-ẹka-oto.

⁷Ọ sukwa iya pho: "Ọo mbedua, bu Chipfu duru ngu dufuta le mkpukpu Uru, nọ l'alị Kaludiya gẹ mu bya anū ngu alị-a g'ọ buru oke alị ngu."

⁸Ebiramu sū: "Jiko Nnajiuphu, bu Chipfu; ? denu gẹ mu e-shi maru le mu e-nweru iya?"

⁹Chipfu sū iya: "Wotaru mu ada eswi; waa ada egbu; waa ebili, gbacharu apha ẹto ẹto; teme waa kparaka; waa ndupfu."

¹⁰Ebiramu tuko iphe ono wotaru iya; bya asuchaa ya ibe; bya ewocharu ibiribe iya ono dobegbaa g'ọ ghaaru nwibe iya iphu. Ọphu ọ suduru ndu ọphu bu ẹnu ibe.

¹¹Ẹnu, erije anū phezetagbaa g'ephe vuka anū ono; Ebiramu chifu pẹ.

- ¹²Enyanwu nyihujeepho; oke mgbenya tu Ebiramu. Ochi sọ-kputa iya. Ochi ono agba ntumatu; teme o nodu anyi ishi edzu.
- ¹³Chipfu bya asu iya: “G'o doo ngu enya ree l'oshilokpa ngu be e-mecha buru nlwamulwa l'ali, abudu nkephe; l'eemee phe ohu kpaa phe ehu l'eka ono unu apha.
- ¹⁴E -mechaa ephe evuru eku, ha shii lwa. Ole oha ono, ephe shi ejeru ozi ono be mu anukwanu aphu.
- ¹⁵Obenu le gubedua be a-ka nka kaghekpoo ya akaghe. L'ilapfu nna ngu phe l'ehuguu; l'eelia ngu elili.
- ¹⁶O -rwua l'ogbo k'eno be oshilokpa ngu a-lwaphuta azu l'eka-a; kele nta-a be ejoi phe, ndu Amoru eme teke ebuhudu.”
- ¹⁷Enyanwu nyihuchaepho le g'ochii byawaru; ite, a kpoberu oku, akpu tuutuutuu; yee oroku, enwu phoophoophoo bya aghaja ibe anu ono.
- ¹⁸O buru le mboku ono be Chipfu yee Ebiramu gbaru ndzu. O su: “Oshilokpa ngu be ya nuru ali-a; e -shi le nggele Ijiputu jasu le Yufuretis.
- ¹⁹Ali obu bu ali ndu Kenu; me ke ndu Kenazu; me ke ndu Kadumonu;
- ²⁰me ke ndu Hetu; me ke ndu Perezu; me ke ndu Rafa;
- ²¹me ke ndu Amoru; me ke ndu Kenu; me ke ndu Gigashi; me ke ndu Jiebusu.”

Mbulumbu 16

Hega yele Ishimelu

- ¹Tobudu iya bu; ophu Serayi, nyee Ebiramu anwutaduru iya nwa. Ole Serayi nweru nwamgboko, shi Ijiputu, o gbaru ohu, aza Hega.
- ²Oo ya bu; Serayi su Ebiramu: “Ge Chipfu mewaru ophu mu anwutaduru nwa-a be iijepfukwa ohu mu g'a maru ? mu e-shi iya l'eka nweru unwegirima?” Ebiramu kweta bya emee iphe, Serayi pfuru.
- ³O buru ge Ebiramu buwaru l'ali Kenu apha iri be Serayi, bu nyee ya kutaru nwamgboko Ijiputu ono, bu ohu iya ono kee ya; o luru.
- ⁴Ebiramu yele Hega kwaa; o buru iya atsuta ime. O maerupho le ya duwaa ime bya akpoo nwanyi, nwe iya nu ebo l'afu.
- ⁵Serayi su Ebiramu: “O kwa gubedua be iphe-ehuka-a, mu eje-a shi l'eka. Ge mu kuru ohu mu kee ngu; o maerupho l'o du ime bya akpooaha mu ebo l'afu. O kwa Chipfu ekpe ikpe mu le ngu.”
- ⁶Ebiramu su Serayi: “Ohu ngu nokwa l'obochi-eka ngu; mee ya iphe, du ngu ree.” Serayi kponwuhana Hega mkponwu; o gbalana gbafuru iya.
- ⁷Tobudu iya bu; Ojozi Chipfu huma Hega le mgboru ogba, no l'echiegu. Ogba ono bu ogba, no l'aguga uzo, shiru jeshia Shuru.

⁸O sụ: “Hega; ohu Serayi; ? i shi awe eje awe?” Hega sụ: “Mu agbalaru onye nwe mu nu, bu Serayi.”

⁹Oo ya bu; ojozi ono sụ iya: “La azu lapfu onye nwe ngu nu je ewoze onwongu ali meje iphe, o suru g'i mee.”

¹⁰Ojozi ono sukwapfo: “Mu e-me g'awa ngu du igwerigwe; k'ofhu ephe a-buru aguta aguta.”

¹¹Ojozi Chipfu ono sukwa iya pho: “Ime ono, i du ono be ii-nwu nwa nwoke. Iphe, ii-gu iya bu ‘Ishimelu’. Noo kele Chipfu numawaru ekwa iira k'iphe-ehuka, iije.

¹²Oo-buru onye agirigo. Oo-nodu etso onyemonye opfu; onyemonye etsokwa iya pho opfu. Ephe l'unwune iya eburu l'ukukanyi.”

¹³O kua epa Chipfu, bu onye shi epfu eyeru iya nu sụ: “I bu Elu-rowi, bu iya bu Chileke enya iya du l'eka mu no.” Noo kele Hega suru: “Nta-a be mu humawaru onye enya iya du l'eka mu no.”

¹⁴Noo iphe, e gude gu welu ono “Bee-lahayi-rowi,” bu iya bu, “o-dzu-ndzu-ele-mu-enya.” Welu ono no le mgbaka Kadashi yee Beredu byasu nta-a.

¹⁵E mecha; Hega nwuru Ebiramu nwa nwoke. Ebiramu gu nwata obu “Ishimelu” .

¹⁶Ebiramu nwaru ukporo apha eno l'apha ishii teke Hega nwuru iya Ishimelu.

Mbulumbu 17

Ogbandzu, e gude ebu-ubvu gbaa

¹Ebiramu nepho ukporo apha eno l'apha iri le tete; Chipfu byapfuta iya bya asu: “O kwa mbedua bu Chileke, bu Okwoolemka. Nodunu mu ntse g'uta ta adu le ndzu ngu.

²Mu e-me g'ogbandzu mu le ngu vuru ire. Mu emee g'unu du igwerigwe shii.”

³Ebiramu daa kpuke iphu l'ali. Chileke sụ iya:

⁴“A bya le mbedua; waa iphe, mu e-me l'ogbandzu mu le ngu. Ii-buru nnajioha, du igwerigwe.

⁵E te ekubaedu ngu Ebiramu. Epa ngu a-buru Ebirhamu; noo le mu mewaru ngu nnajioha, du igwerigwe.

⁶Mu e-me ngu g'i zu azuzu shii; mu eshi l'awa ngu mee oha, du iche iche; teme ndu eze eshi l'awa ngu futa.

⁷Mu e-me ogbandzu mu ono g'o buru ogbandzu, a-no ojejoje; mbu g'o buru ogbandzu mu le ngu; waa ndu a-buru oshilokpa ngu l'ogbo ofhu no l'iphu; k'ofhu mu a-buru Chileke ngu; waa Chileke oshilokpa ngu.

⁸Ali Kenu l'ofhu; mbu aka unu bu nlwamulwa nta-a be mu a-nu gu l'oshilokpa ngu; g'o buru okiphe unu jasuru asuru; teme mu aburu Chileke phe.”

- ⁹Chileke sù Ébirihamu: “A bya lẹ gùbedua; dobekwa ọgbandzu mu ono. Gùbedua l'onwongu; unu lẹ ndu a-bùru oshilọkpa ngu l'ọgbo ọphu nọ l'iphu.
- ¹⁰Waa iphe, gùbedua e-me gude dobe ọgbandzu mu lẹ ngu; waa oshilọkpa ngu bù ọwa-a: Gẹ ndibe ngu ọphu bù unwoke g'ẹphe ha bukọtaje úbvù.
- ¹¹Gùbedua e-bu úbvù g'ọ bùru iphe-ọhubama, nọ l'ọgbandzu mu lẹ ngu.
- ¹²A -gbẹkpoo nta-a bẹ iphe, bukọpoo nwa nwoke, a nwuru l'ibe ngu; ọ nọwa ujiku ẹsato bẹ ee-buje úbvù; mẹ lẹ ndu bù awa ngu; mẹ lẹ ndu shi ọhozo, bù ndu e gude okpoga zùta; mbù ndu abùdu awa ngu;
- ¹³mẹ a nwuru phẹ l'ibe ngu-o; ọzoo l'i gude okpoga ngu zùta phẹ-o; g'e bufutajẹ phẹ úbvù. Ọgbandzu mu ono, iphe-ọhubama iya nọ ngu l'ogwẹhu ono a-bùru ọgbandzu ọphu a-nọ jasù l'ojeje.
- ¹⁴Nwoke, bù akpapyi; mbù onye ebuduru úbvù; gẹ ndibe phẹ bufu iya; kele o mebyiru ọgbandzu mu.”
- ¹⁵Chileke sùkwapho Ébirihamu: “Nyee ngu, bù Serayi ta azaedu Serayi. Ẹpha iya a-bùru Sera.
- ¹⁶Mu e-kebe iya l'oma mee ya g'ọ nwutaru ngu nwa nwoke. Mu ekebe iya l'oma g'ọ bùru ne, nwuru ọha, dù iche iche; tẹme ndu eze ndiphe e-shi iya l'ẹka fùta.”
- ¹⁷Ébirihamu kpube iphu l'alì chĩa ọchi bya asù onwiya: “? Nwoke, nọwaru ọkporo apha ise bẹ aa-nwutaru nwa nwoke nta-a? Tọo ? Sera, nọwaru ọkporo apha ẹno l'apha iri a-gbẹkwadu nta-a nwuta nwa nwoke?”
- ¹⁸Ébirihamu sù Chileke: “Jiko g'ẹnya ngu dù nù lẹ ndzù Ishimẹlu!”
- ¹⁹Chileke sù: “Mu maru-a. Ọle nyee ngu, bù Sera bẹ a-nwutaru ngu nwa nwoke. Iphe ịi-gù iya bù Áyizaku. Mu l'iya; waa oshilọkpa iya, etso iya l'azù bẹ mu l'ẹphe a-gba ndzù, a-nọ ojejeje.
- ²⁰Ọ -bùru kẹ Ishimẹlu bẹ mu nọmawaru iphe, i pfuru. Mu kebefutajẹ iya l'oma mee ya g'ọ zùshia ka l'ọtu. Ọo-bùru nna ndu-ishi iri l'ẹbo; tẹme mu emee ya g'ọ bùru ọha, parù ẹka.
- ²¹Ọle ọgbandzu mu bukwanu mu lẹ Áyizaku bẹ a-gba iya nù; mbù onye ọphu Sera a-nwutaru ngu ẹgube nta-a apha ọzo.”
- ²²Chileke pfuẹbechaaru Ébirihamu iphe, o pfuru iya; ọ parù iya haa tųgbua.
- ²³Lẹ mbọku ono gẹdegede bẹ Ébirihamu dutaru nwa iya nwoke, bù Ishimẹlu; mẹ ndu ọzo, a nwuru l'ibe iya; mẹ ndu ọphu o gude okpoga iya zùta bushia úbvù. Iphe, bukọta unwoke, bu l'ibe iya bẹ o bukọtaru úbvù; gẹ Chileke sùru g'ọ mee ya.
- ²⁴Ébirihamu nọwaru ọkporo apha ẹno l'apha iri lẹ tete teke o buru úbvù;
- ²⁵nwa iya, bù Ishimẹlu nọwa apha iri l'ẹto.
- ²⁶A tųko Ébirihamu; waa nwa iya, bù Ishimẹlu bukọta úbvù l'ujiku lanù ono.

²⁷Unwoke, bukọta l'ibe Ébirihamu l'ophu; mę lę ndu ophu a nwuru anwunwu l'ibe iya; mę lę ndu ophu a zutaru azuta l'ęka ndu ohozo; bę ye l'iya tukokwarupho bua ubvu obu.

Mbulembu 18

Umadzu ęto, kpafutaru Ébirihamu

¹Noo ya; Chipfu bya abyapfuta Ébirihamu lę mgboru eze oshi ndu Mamure; lę g'ọ nọ anọo l'onu ọlo-ękwa iya l'echi eswe.

²Ébirihamu palia ęnya bya ahuma unwoke ęto, pfuru l'ataphu iya. O humae phe pho bya ezilihu l'onu ọzo iya gbapfushia phe. O gbapfu phe bya ephozetaru phe.

³O su: “Jiko Nnajiuphu mu; teke mu du ngu l'obu; ta aghatashinu ibe mube onye-ozu ngu.

⁴G'e kutanu nwa mini g'unu kwọ ọkpa tuta unme lę mkpula oshi-a.

⁵Gę mu chọoru unu nri g'unu ria; g'ike adu unu; unu ejeshiwaro iphe, unu eje; eshi ophu unu batawaru ibe mube onye-ozu unu.” Epe su iya: “O du ree; mee g'i pfuru.”

⁶Ébirihamu bya emee ęwegwa bahu l'ọlo-ękwa gbapfu Sera; je asu iya: “Ngwa; mee ęwegwa tuta ogbongu ukpokutu iphe, eegudeje eme buredi; tuta iya ogbongu ęto gwọ-phube gude mee buredi.”

⁷O bya agbaru je l'ęka eswi iya doru; bya ahota nwada eswi, anu iya du belebele je akpee onye-ozu iya; onye-ozu ono kpuru iya je egbua boshia.

⁸O bya apata ęra-eswi; yę manu, e gude ęra-eswi mee; waa nweswi ono, a boshiru ono dobe phe l'ataphu. Epe nodu eri nri ono; o nọ-kube phe lę mkpula oshi ono.

⁹Epe su iya: “? Denu nyee ngu, bu Sera?” O su: “O nokwa l'ọlo-ękwa anyi l'ęka pho.”

¹⁰Chipfu su iya: “Egube nta-a apha ozo be mu lwafutajekwa azu; ozo bu lę nyee ngu, bu Sera be a-nwu nwa nwoke.” Sera nọ l'onu ọlo-ękwa, Chipfu gharu okotazu ngabe nchi.

¹¹Ébirihamu yę Sera be buwaa ọgerenya bya akahukpowaa shii; teme Sera noghawa teke ogogo atsu ime.

¹²Sera chia ọchi l'ime obu su: “? Gę mu gbirihucharu egbirihu; teme nnajiuphu mu kahwa g'ọ kahuru pho be mu a -gbę nta laaru iya l'ọlo?”

¹³Chipfu su Ébirihamu: “? Bu gunu be Sera gude chia ọchi su: ‘Ya a-nwutakwadu-a nwa nta-a; gę ya kahwaru ęgube-a?’

¹⁴? O nweru iphe, kporu Chipfu ęka ememe? Mu a-byakwa teke ono, mu turu onu l'apha ozo ono; ozo bu lę Sera e-nweru nwa nwoke.”

¹⁵Ndzu guahaa Sera; o tua ęgo su: “Mu ta chikwaru ọchi.” O su iya: “Waawaa; i chicharu-a ọchi.”

Ébirihamu arwochiteru ndu Sodomu

- 16**Unwoke ono gbeshiepho alala; bya eshia ụzo Sodomu. Ébirihamu tsoru phẹ g'o duriberu phẹ.
- 17**Chipfu sụ: “? Mu a-nọdu awachiru Ébirihamu iphe, mu eje ememe ọtọ?”
- 18**Eshi ọphu Ébirihamu e-mecha buru eze ọha, ọkpehu dụ; teme ọhamoha, nọ le mgboko bẹ ee-gude iswi ẹhu iya kebe l'oma.
- 19**Noo kele mu hotawaru iya g'ọ buru onye a-kpo-ziru unwu iya ụzo; ephe le ndibe iya ndu ọphu a-nọdu etso iya l'azu; g'ephe meje iphe, mu sụru g'ephe meje, bu iya bu g'ephe meje iphe, pfuru ọto; waa iphe, gbaru phẹ nụ. Ọo ya bu gẹ mu emekwanaaru Ébirihamu iphe, mu kweru iya ukwe iya.”
- 20**Ọo ya bu; Chipfu sụ: “E chikuwaru iya le mkpu shii l'iphe-eji ndu Sodomu yee Gomóra bẹ panukaru ẹka.
- 21**Mu nọdu eje gẹ mu maru ? iphe-eji phẹ kabẹ dụ-be eji g'e pfuru l'ọ dụ-be? Teke ọ to dudu; mu amakwarupho.”
- 22**Unwoke ono ghachi kwaseru ụzo Sodomu; obenu le Ébirihamu pfukwaduru l'iphu Chipfu l'eka ono.
- 23**Ébirihamu bya akpitaru iya ntse bya asụ iya: “? Ii-mebyishi ndu ejo-iphe yee ndu pfuberu-eka-oto ọtọ?”
- 24**? Ọ -buru le ndu pfuberu-eka-oto rwuru ukporo umadzu labo l'umadzu iri le mkpukpu ono? ? Ii-mebyishikwa iya pho? ? Tii gudedu iswi ẹhu ukporo umadzu labo l'umadzu iri, pfuberu-eka-oto, nọ iya nụ pho haa ya?
- 25**A maru-a l'i tii tudu ama eme iphe, dụ nno; mbụ g'i gbua ndu pfuberu-eka-oto yee ndu ejo-iphe; ọzoo mee ndu pfuberu-eka-oto g'i meru ndu ejo-iphe. A makwaru-a l'i tii tudu ama eme iphe, dụ nno; mbụ gẹ gubedua, bu Onye-ikpe ke mgboko-a l'ophu te eme iphe, pfuru nhamunha.”
- 26**Chipfu sụ: “Ọ -buru le mu humaru ukporo umadzu labo l'umadzu iri, bu ndu pfuberu-eka-oto le mkpukpu Sodomu bẹ mu e-gudekwa iswi ẹhu phẹ hakota mkpukpu ono l'ophu.”
- 27**Ébirihamu pfukwa ọzo sụ: “Eshinu mu gbenu kerebewanu k'epfu anu Nnajiuphu l'ebe adu iphe, mu bu gbahaa urwuku yele ntụ;
- 28**? ọ -bukwanuru le ndu ono te erwuduru ukporo labo l'iri; mbụ ọ -buru l'ephe phoduru umadzu ise; teme ephe erwua egube ono-ee?” Chipfu sụ: “Mu -huma ukporo umadzu labo l'umadzu ise l'eka ono bẹ mu te emebiyikwa iya.”
- 29**Ébirihamu bya epfua ọzo sụ: “? Ọ -bukwanuru ukporo labo damu bẹ i humaru-ee?” Ọ sụ: “Mu egude nụ iswi ẹhu ukporo umadzu labo ono haa ya ememe.”

³⁰Ébirihamu sù: “Jiko g'èhu te eghukwa gùbe Nnajiuphu egu; gè mu pfubarò: ? ọ -bùkwánuru ọkpòrò ọmadzù l'ọmadzù iri bẹ a hùmaru l'ẹka ono-ee?” Ọ sù: “Mu te emebyikwa iya mẹ mu hùma ọkpòrò ọmadzù l'ọmadzù iri l'ẹka ono.”

³¹Ébirihamu sù: “Eshinu mu gbenu kerebewanu k'epfu eyeru Nnajiuphu; ? ọ -bùkwánuru ọkpòrò ọmadzù kpoloko bẹ a hùmaru l'ẹka ono-ee?” Ọ sù: “Mu egude iswi ẹhu ọkpòrò ọmadzù ono haa ya emebyi.”

³²Ébirihamu sù: “Jiko Nnajiuphu; g'èhu te eghukwa ngu egu; gè mu jifua nwa aji lanu: ? ọ -bùkwánuru ọmadzù iri kpoloko bẹ a hùmaru l'ẹka ono-ee?” Ọ sù: “Mu egude iswi ẹhu ọmadzù iri ono haa ya emebyi.”

³³Chipfu yẹle Ébirihamu pfughechaepho ọ tųgbua; Ébirihamu lashia unuphu.

Mbulembu 19

Eemebyishi Sodomu yẹle Gómóra

¹Ojosi labo ono jerwua Sodomu l'uzenyashi. Epe jeshia; Lotu nodu anoo l'onu-abata mkpukpu ono. O hūmae phe pho bya agba phe ndzuta; bya ephozetaru phe woru iphu kpube l'ali.

²Ọ sù phe: “Nnajiuphu mu; mu arwo unu g'unu bataro l'ulo mube onye-ozu unu; bya akwo okpa unu; unu akwaa ibe mu; o -rwua l'utsu; unu atugbuwaro jeshia iphe, unu eje.” Epe su waawaa; l'ephe a-kwa l'uzo l'enyashi ono.

³Ọ rwo phe rwohia phe ike gbiriri jasù epe tsoru iya bahu ibe iya. O bya akwaaru phe eze ebyaa; mbu gheeru phe buredi, e yeduru iphe, ekoje buredi; epe taa.

⁴Epe bya ala l'ulo; unwoke, shigba l'ekameka le mkpukpu Sodomu; egirima me ogerenya; bya aso-pee ulo ono mgburugburu.

⁵Epe bya ekua Lotu su iya: “? Denu unwoke, bataru ibe ngu l'uzenyashi-a? Chifuta phe chitaru anyi g'anyi l'ephe kwaa!”

⁶Lotu bya alufu etezi bya eworu uzo gu-chia jepfushia phe bya asu:

⁷“Jiko ndu mu; unu ta akabeshinu mee ejo-iphe owa-a!”

⁸Unu hūma le mu nweru unwumboko labo, epe l'unwoke teke akwaswee; gè mu chifutachiaru phe unu; g'unu mee phe iphe, du unu ree; g'unu haa unwoke-a; l'ephe bu ebyaa mu.”

⁹Epe su iya g'o gbalëshikwaru phe l'uzo; su: “Oo gube nlwamulwa a-bya atuharu anyi ekemu; anyi e-mekwa ngu ophu ka nkephe njo.” Epe nwuriberu Lotu; bya akpitaru g'ephe gbajaa mgbo ono.

¹⁰Unwoke labo ono machiepho aka lobata Lotu l'ulo; bya eworu uzo ono gu-chia.

¹¹Epe mee; ndu ono, pfuru l'onu mgbo ono tsuahaa ishi; egirima me ogerenya; k'ophu epe ta ahumaeduru onu mgbo ono.

- 12**Unwoke labo ono su Lotu: “? O nweru onye ozo, i nweru l'eka-a? ? O nweru ndu i keru nwanyi; ozoo unwu ngu k'unwoke; ozoo unwanyi; ozokwanu l'o duru ndu ozo, bu le mkpukpu-a, bu ndu gu l'ephe bu? Tụkokwa phe dufuta l'eka-a!
- 13**Noo kele anyi abyakwa emebyi eka-a. E chikuwaru Chipfu le mkpu shii l'ejo-iphe ndu eka-a pawaru eka; o zia anyi g'anyi bya emebyishia ya.”
- 14**Oo ya bu; Lotu tugbunaa bya eje epfuchaaru iya ndu ephe l'iya gba l'ogo, bu ndu abya alu unwada iya; su phe: “Unu medupho egwegwa futa le mkpukpu-a; noo le Chipfu abyakwa iya emebyishi.” Ole ndu ogo iya riru l'oo mgbonu be oogbaru phe.
- 15**O be le geregere nchi-abohu; ojozi ono lwuaharu Lotu ulwu su iya: “Mee egwegwa duta nyee ngu; waa unwumboko labo ibe ngu, bu ndu ophu no l'eka-a! Odumeka be unu a-lakwa l'iyi teke aa-nu mkpukpu-a chipfu.”
- 16**O jeshia abyibyibe; unwoke ono kputa iya l'eka; bya akputa nyee ya; yele unwumboko ibe iya ephenebo; kpufu le mkpukpu ono; noo kele Chipfu aphuru phe obu-imemini.
- 17**Ephe kpufutachae phe pho; onye lanu su phe: “Unu gbaa oso ndzu unu! Unu ta aghakwa enya l'azu; ophu unu ejekwa apfuru apfuru le nsuda! Unu gbakwaru laa l'ubvu! Odumeka be unu a-lakwa l'iyi!”
- 18**Lotu su phe: “Waawakwa; jikonu nnajiuphu mu phe!
- 19**Eshi ophu mube onye-ozu unu du unu l'obu; unu goshiwa l'unu yeru mu obu okpobe eyeye; k'ophu unu dzoru ndzu mu; ge mu te jeshinu agba ala l'ubvu! Odumeka be ejo iphe-ehuka ono a-byapfutakwa mu; mu anwuhu.
- 20**Unu lekpodapho! O nweru mkpukpu, no-a le mgboru eka-a, du ntse k'ophu mu a-gbaru laa ya; teme o ha nwanshi. ? Unu te eledu enya le mkpukpu obu ta abadu ishi? Ge mu gbanuru laa eka ono; k'ophu mu a-nodu ndzu.”
- 21**O su iya: “O dupho ree; mu e-kwetaepho iphe, i rworu; mu te emebyishidu mkpukpu k'ono, iifu opfu iya ono.
- 22**Ole o bu; gbaru laa eka ono egwegwa! Noo kele o to nwedu iphe, mu e-me gbiriri jasu l'i jerwua eka ono.” Noo iphe ono meru g'o gude e kua mkpukpu ono Zowa.
- 23**Lotu gbarwushia Zowa; enyanwu nodu aawatakpoepho awata.
- 24**Chipfu dzee oku nshi-egbe ge mini le Sodomu yele Gomora; mbu o shi l'eka Chipfu ophu no l'imigwe.
- 25**O bya atuko mkpukpu ono; me nsuda ono l'ophu mebyishikota; bya emebyishikwapho iphe, bu ndu bukota le mkpukpu ono; me iphe, futaru efuta, dzu ndzu l'ali ono.
- 26**Nyee Lotu ghaa enya l'azu; o ghoo obvudu unu.
- 27**L'onmewa utsu mboku ono Ebirhamu tehu; bya ejeshia l'eka o shi pfuru l'ataphu Chipfu pho.

²⁸Ọ gbẹ l'ẹka ono lee ẹnya lẹ Sodomu yẹle Gómóra; bya elekota ẹnya lẹ nsuda ono l'ophu. Ọ buerupho iphe, ọ humaru bu ẹnwuru-ọku, akpu kẹ tọtututu g'ẹka ọku enwu phoophoohoo.

²⁹Ọo ya bu; lẹ gẹ Chileke mebyishiru mkpukpu ono, nọ lẹ nsuda ono bẹ ọ nyataru Ébirihamu bya edufuta Lotu lẹ mkpukpu, o shi buru teke o meru gẹ mkpukpu ono buru ọla l'iyi.

Lotu yẹle unwu-ada iya

³⁰Lotu yẹ l'unwada iya nonyaa bya ahaa Zowa je eburu l'úbvú; noo kele ndzu ebu lẹ Zowa nonyaru guahaa ya. Epe l'unwada iya ono ephenebo tugbua je eburu l'ime ogba.

³¹Ọ -rwua ujiku lanu; onye k'ogerenya su onye kẹ nwata: “Nta-a bẹ nna anyi kahwaru; ophu ọ budu l'ọ duru nwoke, bu l'uswe iya-a, anyi l'iya a-kwa, bu g'eemeje iya lẹ mgboko l'ophu.

³²G'anyi chee nna anyi mee; g'anyi eje g'anyi l'iya kwaa; g'anyi shi l'ehu nna anyi mee g'awa anyi phodu.”

³³L'enyashi ono bẹ epe cheru nna phe mee; onye k'ogerenya je azee epe l'iya kwaa; ophu ọ madu teke ọ byaru aze-kube iya; teme ophu ọ makwapho teke ọ gbeshiru.

³⁴Ọ -rwua lẹ nchitabohu iya; onye k'ogerenya su onye kẹ nwata: “L'enyashi unyaphu bẹ mu lẹ nna mu kwawaru. G'anyi chebakwaa ya mee ọzo l'enyashi-a; g'i je g'unu l'iya kwaa. Ọo ya bu g'anyi eshi l'ehu nna anyi mee g'awa anyi phodu.”

³⁵Epe bya echekwapho nna phe mee ọzo l'enyashi ono. Onye kẹ nwata je; epe l'iya kwa; ophu ọ makwapho teke ọ byaru bya aze-kube iya; ọzo teke ọ gbeshiru.

³⁶Tobudu iya bu; Lotu yee unwu iya nwanyi ono ephenebo ime.

³⁷Onye k'ogerenya bya anwua nwoke; o woru iya gu Mówabu. Ọ buru iya bu nna ndu Mówabu ntanu-a.

³⁸Onye kẹ nwata nwutakwapho nwoke; o woru iya gu Benu-Ami; ọo ya bu nna ndu Amonu ntanu-a.

Mbulembu 20

Ébirihamu yẹle Abimeleku

¹Ébirihamu shi l'ẹka o bu tugbua shia uzo echiegu, nọ l'ohali; bya eje eburu lẹ mgbaka Kadeshi yẹ Shuru; o je ebutota lẹ Gera.

²Ọ buru l'ẹka ono bẹ Ébirihamu nọ su lẹ nyee ya, bu Sera bu nwune iya kẹ nwanyi. Abimeleku, bu eze ndu Gera zia; e je edutaru iya Sera.

³Obenu lẹ Chileke byapfutaru Abimeleku lẹ nrwo l'enyashi ujiku lanu; bya asu iya: “I buakwaa maa. Ọ buru iphe, kparu iya nu bu nwanyi ono, i dutaru ono. Nwanyi obu bukwa nyee nemadzu.”

- ⁴Ole Abimeleku be ephe l'iya teke akwadu. Oo ya bu o su: “Nnajiuphu; ? ii-mebyishikwapho oha, adudu iphe, ephe meru?”
- ⁵? To pfunuru mu-a l'onwiya su l'oo nwune iya nwanyi? Too nwanyi l'onwiya; ? ta asunuru mu-a l'o kwa nwune iya ke nwoke? Obu gukwaru mu iphoro l'iphe, mu meru; teme iswi dukwa mu pho mma.”
- ⁶Chileke su iya le nrwọ ono: “O bu eviya; mu makwaru-a l'imeru iya l'obu, guru iphoro. O buru iphe ono, meru g'o gude ophu mu ekwedu g'i meswee mu. Mbụ l'oo iphe ono meru iphe, mu ekwedu g'i denyi iya eka.
- ⁷Ngwa; dulaaru nwoke ono nyee ya; kele o bukwa onye mpfuchiru. Oo-pfuru-a nu mube Chileke l'iswi ehu ngu g'i ndu ndzu. Teke i ti duladuru iya; makwaru le gubedua; unu le ndibe ngu buakwaa maa.”
- ⁸O -rwua l'onmewa utsu Abimeleku bya ekuko ndu-ozu iya g'ephe ha; bya akokotaru phe iphemiphe, nwuru nu. Ephe numae ya pho; ndzu rwuta phe.
- ⁹Abimeleku kua Ebirhamu; o bya; o su iya: “? Bu gunu be i meru anyi egube-a? ? Bu awe be mu mesweru ngu meru g'o gude i mee g'a taa mu uta, ha egube-a; mbu mbedua mu le ndu no l'ali-eze mu? I mekwaru mu iphe, i tigi kabedu mee mu!”
- ¹⁰Abimeleku bya ajia Ebirhamu su: “? Bu gunu kpakporu iphe, i meru iphe ono?”
- ¹¹Ebirhamu su: “Mu riru l'eshinu o to nwedu ndu atsu Chileke ebvu, bu l'eka-a be ephe e-gbu mu l'opfu ehu nyee mu.
- ¹²Ozo bukponu le-a; l'o kwa nwune mu gedegede; kele o bukwa-a nna mu nwuru iya; ole mu l'iya te shikwanu le ne lanu; ole mu alukwanu iya alulu.
- ¹³Chileke meepho ge mu shi l'okpoku nna mu bya awata aghaphe aghaphe-a; mu su nyee mu ono: ‘Waa g'ii-gude goshi l'i yeru mu obu baa: Iphe, bukpo ekekameka anyi jeru; sujekwa le mu bu nwune ngu.’ “
- ¹⁴Abimeleku bya achita aturu; rwuta eswi; chita ohu; unwoke me unwany; tuko chiru nu Ebirhamu; bya edulatakwaru iya pho Sera, bu nyee ya.
- ¹⁵O bya asukwa iya pho: “Wakwa ali mu baa; je eburu l'eka du ngu ree.”
- ¹⁶Sera be o suru: “Mu nukwaru nwune ngu eka mkpola-ochaa iri; noo iphe, mu gude mezia emeswe, e mesweru ngu l'atatiphu ndu unu l'ephe swi. Iswi dukotakpo ngu mma.”
- ¹⁷Ebirhamu pfuru nu Chileke; Chileke bya emee Abimeleku; me unyomu iya; me unwumboko ndu ophu bu ohu iya g'ephe nwushiaha unwu ozobaa;
- ¹⁸kele Chipfu shi mechia unwany ibe Abimeleku eka-nwa; o buru l'iswi ehu nyee Ebirhamu, bu Sera.

Mbulumbu 21

Anwunwu Ayizaku

¹Chipfu bya emeeru Sera eze-iphe-oma, bu g'o pfuru. Mbụ l'o meru Sera iphe, o kweru iya ukwe iya.

²Sera tsuta ime bya anwuru Ébirihamu nwa nwoke le nka. O buerupho teke Chileke kweru iya ukwe iya gedegede be a nwuru iya.

³Ébirihamu woru nwa nwoke ono, Sera nwutaru iya ono gua Áyizaku.

⁴Nwa iya ono, bu Áyizaku noepho ujiku esato; Ébirihamu woru ubvu bua ya, bu iya bu ge Chileke suru g'o meje iya.

⁵Ébirihamu bu iphe, o noru bu ukporo apha ise teke a nwuru iya Áyizaku.

⁶Sera su: “Chileke meakwaru ge mu chia ochi; teme iphe, bukpo onye numaru iya nu be mu l'iya a-tuko chia ochi.”

⁷O bya asufukwapho: “? Bu onye gege asu Ébirihamu le mu e-mecha chee nwa era? Ole mu mechaleru-a nwutaru iya nwa nwoke le g'o kahwaru akahu-a.”

Aachifu Hega yele Ishimelu

⁸Nwata ono bya evuta; a mifu iya onu l'era. O buru mboku ono, a mifuru iya onu l'era ono be Ébirihamu shiru nri, ha shii.

⁹Sera huma le nwa nwoke, Hega, bu nwanyi Ijiputu nwuru Ébirihamu be epfuru iya nu.

¹⁰O su Ébirihamu: “Jekwa achifu nwanyi-a, bu ohu-a yele nwa iya; noo kele nwa nwanyi ono, bu ohu ono; yele nwa mu, bu Áyizaku ta agbakwaru mgba l'eku ngu.”

¹¹Iphe ono buru aphu tsoru Ébirihamu; kele o bu opfu ehuru nwa iya be eepfu.

¹²Obenu le Chileke suru iya: “Ge ke nwata-okoro ono ye l'ohu ngu nwanyi ono ta abushiru aphu tsoru ngu. Jekwa emee iphe, Sera pfuru ngu; noo kele o Áyizaku be awa ngu e-shi l'eka jaa.

¹³Mu e-mekwapho nwatibe ohu ngu ono g'o buru oha eka iya; eshinu o bu iphe, shi ngu l'ehu.”

¹⁴O -rwua l'onmewa utsu nchita-abohu iya; Ébirihamu bya ewota nri; bya ekuru mini ye l'akpo, eeyeje mini woru nu Hega. O woru iya tukobe iya l'ukuvu bya achifu iya; ephe le nwata-okoro ono. Ephe tugbua je etsoru echigu Biye-Sheba ghapheaha.

¹⁵Mini, no l'eda-akpo ono -bvupho; o woru nwata ono nyebe le mkpula irwu lanu l'eka ono.

¹⁶O tugbua je anodu iche le mgboru eka ono; l'eka bu; a -gbaa apfu l'oojerwua ya. Noo kele o riru su le ya taa nodudu ele nwata ono enya g'o nwuhu. O nodu le mgboru eka ono bya awata ara ekwa.

¹⁷Chileke numa olu nwata ono l'eka ora ekwa. Ojosi Chileke shi l'imigwe kua Hega; bya asu iya: “? Bu gnu Hega? Ge ndzu ba agushi ngu; noo le Chileke numaru olu nwata ono le g'o ze l'eka ono ara ekwa.

¹⁸Gbeshi kulia nwata ono ekuli; gudeshia ya ẹka; kele mu e-me iya g'ọ buru ọha, paru ẹka.”

¹⁹Chileke bya emee; ẹnya sahu iya; ọ huma welu, mini du. Ọ bya eje eworu mini kujia l'eda-akpo ono; bya echebe nwata ono.

²⁰Chileke no-kube nwata ono le g'oovukpopho. O buru l'echiegu; jasụ ọ buru ọ-gba-apfu.

²¹Ọ buru g'o bu l'echiegu Paranu be ne iya jeru alutaru iya nwanyi l'alị Ijiputu.

Ébirihamu waa Abimeleku agba ndzu

²²Le teke ono be Abimeleku; waa Fayikolu, bu onye-ishi ndu ojogu iya suru Ébirihamu: “Chileke no-kubekwa ngu l'iphemphe, iime.

²³Rinaaru mu nte l'atatiphu Chileke l'eka-a l'i ti byadu agbaru mu eregede; ophu iigbaduru iya unwegirima ibe mu; ozoo oshilokpa mu. Ọ buchia g'i goshi l'i yeru mu obu; bya eye mkpukpu-a obu; mbu mkpukpu-a, i lwaru alwalwa-a; egube ono, mu goshiru le mu yeru ngu ono.”

²⁴Ébirihamu su: “Mu e-ri-a nte obu.”

²⁵Ébirihamu bya epfuaru Abimeleku ke welu mini, ndu-ozu Abimeleku nataru iya.

²⁶Abimeleku su: “Mu ta amakwa onye meru iya nu; ophu i tiki pfusweru mu iya; mu teke anuma-swekwaa ya abudu ntanu-a.”

²⁷Ébirihamu bya achita aturu; rwuta eswi bya achie Abimeleku; ephebo bya eworu ndzu gbaa.

²⁸Ébirihamu bya ahota ada-aturu esaa l'igwe aturu iya dobe iche.

²⁹Abimeleku su Ébirihamu: “? Bu gunu meru g'o gude i hota ada-aturu esaa ono dobe iche?”

³⁰Ọ su: “Ngge ada-aturu esaa-a, shi l'eka mu-a g'ọ buru iphe, agba ekebe l'oo mu turu welu-a.”

³¹E woru ẹka ono gube Biye-Sheba; kele ẹka ono be umadzu labo ono riru nte.

³²Ephe gbachaepho ndzu ono le Biye-Sheba; Abimeleku; waa Fayikolu, bu onye-ishi ndu ojogu iya laphushia azu l'alị ndu Filisitayinu.

³³Ébirihamu bya eworu oshi tamarisuku dzaa le Biye-Sheba; bya anodu l'eka ono kpo-ku Chiojeje, bu Chipfu.

³⁴Ébirihamu bukporu l'alị ndu Filisitayinu noo odu.

Mbulumbu 22

Chileke ahụ Ébirihamu ama

¹E mechaa Chileke bya ahua Ébirihamu ama. O kua ya su: “Ébirihamu!” Ọ za iya enu.

- ²Chileke sụ: “Duta nwa ngu; mbụ mkpakọ nwa ngu, bụ Áyizaku, bụ onye i yeru obu gude je l'ali Moriya. Gude iya gwee ngweja-akpo-oku l'úbvú lanu, mu e-goshi ngu.”
- ³Onmewa utsu nchita-abohu iya Ébirihamu gbeshi bya edozichaa nkafu-igara iya ree. O duta ndu-ozi iya umadzu labo; waa nwa iya, bụ Áyizaku. O wataepho nkụ, sụru iya egude gwee ngweja-akpo-oku ono vuru tugbua; o buru phe eje eka ono, Chileke pfuru iya opfu iya ono.
- ⁴O -rwua mboku, kwe phe eto; Ébirihamu jenya bya apalia enya huma eka ono uzenya.
- ⁵O sụ ndu-ozi iya ono: “Unu ndukwa l'eka-a; unu le nkafu-igara ono; ge mu le nwa mu jeribaaaru eka pho je abaarụ Chipfu eja lwaphuta azu byapfuta unu.”
- ⁶Ébirihamu bya apata nkụ, ee-gude gwee ngweja-akpo-oku ono woru boo nwa iya, bụ Áyizaku; yebdua gude oku; yele mma. Ephenebo swiru tugbua.
- ⁷Ephe jenya; Áyizaku sụ nna iya, bụ Ébirihamu: “Nnana!” Ébirihamu sụ: “Owee nwa mu!” Áyizaku sụ: “Nkụ yee oku duwaa; obenu ? denuhunu aturu, ee-gude gwee ngweja-akpo-oku ono?”
- ⁸Ébirihamu sụ iya: “Nwa mu; Chileke a-nu-a aturu, ee-gude gwee ngweja-akpo-oku ono.” Ephenebo kwaseru; o buru phe atugbu.
- ⁹Ephe rwuepho eka ono, Chileke pfuru iya opfu iya ono; Ébirihamu kpua oru-ngweja l'eka ono; bya eworu nkụ doo ya. O bya ekee nwa iya, bụ Áyizaku egbu bya eworu iya tu-kobe l'eli nkụ ono.
- ¹⁰O machia eka bya ewota mma g'o gude gbua nwa iya ono, bụ Áyizaku.
- ¹¹Ojozi Chipfu gbẹ l'imigwe kua ya oku sụ: “Ébirihamu! Ébirihamu!” O za iya enu.
- ¹²O sụ: “Te ebyikwa nwata ono eka! Ta adukwa iphe, ii-me iya. Nta-a be mu maru l'iitsu Chileke ebvu; noo kele i ti sephuduru nwa ngu azu; mbụ nwa ngu lanu kpoloko.”
- ¹³Ébirihamu bya apalia enya; bya ahuma ebili, mpu iya kwagaru l'iphe. O je akputa ebili ono gbua gude gwee ngweja-akpo-oku ono; paru nwa iya ono haa.
- ¹⁴Oo ya bụ; Ébirihamu woru eka ono gube: “Chipfu, bụ Okwoolemka.” Gbiriri byasu me ntanu-a be aasuje: “L'eli úbvú Chipfu be aa-kwo ngu le mkpa.”
- ¹⁵Ojozi Chipfu bya eshi l'imigwe kua Ébirihamu k'ugbo ebo bya asu iya:
- ¹⁶“Mu gudeakwa onwomu ria nte. Eshi ophu i meru iphe-a; mbụ eshi ophu i ti sephuduru nwa ngu azu; mbụ nwa ngu lanu kpoloko;
- ¹⁷be mu kebefutaje ngu l'oma; bya emee g'awa ngu du igwerigwe ge kpokpode, du l'akpaminigwe; waa g'eja, du l'aguga-enyimu. Oshilokpa ngu be l'a-nata mkpukpu ndu ohogu phe;

¹⁸teme ọ bụru eri ngu be ee-shi kebe ọhamoha, nọkota le mgboko-a l'oma; noo kele i ngaberu mu nchi.”

¹⁹Ébirihamu bya abyapfuta ndu-ozu iya; ephe tuko lashia azu le Biye-Sheba. Ébirihamu buwaruro le Biye-Sheba.

Ụnwu Nahọ

²⁰E mecha; a bya epfuaru Ébirihamu su iya: “Milika nwushikwaru nwune ngu, bu Nahọ unwegirima unwoke.

²¹Ọo Uzu, bu okpara; Buzu buri nwune iya nwoke; waa Kemelu. Kemelu ono mecha buri nna Aramu.

²²A nwua Kesedu tsoke Kemelu; waa Hazo; waa Piludashu; waa Jidulafu; waa Betuwelu.”

²³Betuwelu ono mecha bya aburu nna Ribeka. O buri unwegirima esato ono be Milika nwushiru nwune Ébirihamu, bu Nahọ.

²⁴Onye ophu o too ludu okpobe alulu, epha iya bu Ruma be nwutakwaru iya pho unwegirima. Epha phe bu Teba; waa Gahamu; waa Tahashu; waa Maka.

Mbulembu 23

Anwuhu Sera

¹Sera noru ukporo apha ishii l'apha esaa.

²O nwuhu le Kiriyaatu-Araba, bu iya bu Heburonu, no l'ali Kenanu. Ébirihamu kwaa Sera; raa ekwa iya.

³Ébirihamu bya agbeshi l'aguga nyee ya ono, nwuhuru nu ono; bya ejepfu ndu Hetu; je asu phe:

⁴“Mu bukwa nlwamulwa; mbu onye shi ohozo lwapfuta unu. Jiko unu renaa mu ali; ge mu lia odzu nyee mu-a.”

⁵Ndu Hetu su Ébirihamu:

⁶“Nnajiuphu; anyi suru-a: i bukwa onyibe, paru eka l'echilabo anyi. Hatakpoepho ilu ndu anyi ophu kachaa ngu ree je elia nyee ngu. O to nwedu onye ndu anyi, a-jika su g'i ti lishi iya l'ilu nkiya.”

⁷Ébirihamu bya agbalihu bya ephozeru ndu ali ono, bu iya bu ndu Hetu.

⁸O su phe: “O -buru l'o du unu ge mu lia odzu nyee mu be mu suru-a: g'unu je arworu mu Efuronu, bu nwatibe Zoha;

⁹g'o ree mu ogba Makupela iya pho, no l'ishi ali iya ono. Unu su iya g'o ree mu iya okpobe aswa iya; g'o buri eka ee-lije odzu l'ibe unu.”

¹⁰Efuronu ono, bu onye Hetu ono be ephe le ndu ndu phe tukokwaru-a nodukota l'eka ono l'onu-abata mkpukpu ono. O raa ya arara k'ophu ndu Hetu, byakotaru eka ono numakotaru iya; su Ebirihamu:

¹¹“Nnajiuphu; waawakwa! Mu suru-a: mu pfuru l'ataphu ndu ali mu epfu su gi nwokotaru ali ono l'ophu; nworu ogba, no iya nu. Je elia ya ro odzu nyee ngu!”

¹²Ebirihamu bya ephozetakwa ozo l'ataphu ndu ali ono;

¹³bya asu Efuronu; mbu pfua ya ndu ali ono numa-dzuru; su iya: “Mu suru-a; o -buru l'ii-nu mu ali obu be mu a-pfu ngu-a okpoga l'aswa ali obu. Natanu mu aswa iya; k'ophu mu e-je elia odzu nyee mu l'eka ono.”

¹⁴Efuronu su Ebirihamu:

¹⁵“Mu suru-a nnajiuphu; ali ono sukwaru unu mkpola-ochaa. Ole o bu; ? bu gunu bu iphe ono bu le mgbaka mu le ngu? Je elia ya ro odzu nyee ngu.”

¹⁶Ebirihamu kweta iphe, Efuronu huru iya; bya eworu aswa ali ono, o huru l'iphu ndu Hetu ono pfua ya. Iphe, o pfuru iya bu unu mkpola-ochaa, a turu l'ekpa, e gude azu aswa teke ono.

¹⁷Oo ya bu; e woru ali Efuronu, no le Makupela ree Ebirihamu. Makupela obu nokube Mamure. E reru iya ali obu; yee ogba, no iya nu; mecha oshi, no je akpaa l'oke iya.

¹⁸Iphe, bu ndu Hetu l'ophu, bu ndu doru l'onu-abata mkpukpu ono nokota huma teke e reru Ebirihamu ali ono g'o buru ali iya.

¹⁹E mecha; Ebirihamu lia nyee ya, bu Sera l'ogba ono, no l'ali Makupela ono; nokubekwapho Mamure, bu iya bu Hiburunu ono, no l'ali Kenanu ono.

²⁰O buru iya bu le ndu Hetu woru ali obu; ye l'ogba, no iya nu; bvuaru Ebirihamu; o buru ali iya bya aburu eka ee-lije odzu.

Mbulumbu 24

Áyizaku waa Ribeka

¹Ebirihamu kahwaru buru ogerenya shii; teme Chipfu kebewa iya l'oma l'uzomuzo.

²O bya ekua onye ophu bu onye-ishi le ndu-ozu iya; mbu onye ophu eletakota iphemiphe, o nweru enya; bya asu iya: “Dee mu eka l'ehe.

³Gude epha Chipfu, bu Chileke ophu bu l'imigwe; bya eburu l'eliphe; ria nte l'i tii lutaduru nwa mu Áyizaku nwanyi, shi l'ibe ndu Kenanu, anyi l'ephe bu l'eka-a.

⁴L'ii-je l'ali mu; mbu l'ibe abubu mu gedegede je alutaru nwa mu, bu Áyizaku nwanyi.”

⁵Onye-ozu iya ono su iya: “? O -bukwanuru le nwanyi obu te ekwedu l'ootsoru mu alwa eka-e; ? mu duta nwa ngu gude lashia ali ono, i shi ono too?”

⁶Ébirihamu sù iya: “Be dutakwapho nwa mu laa alì ẹka ono ọzo!”

⁷Chipfu, bụ Chileke k'imigwe, bụ onye dufutaru mu l'okpoku ibe nna mu; waa l'ali, a nwuru mu anwunwu; mbụ onye pfuru yeru mu nù; bya ekwee mu ukwe-iphe ribua ya l'angu sù l'awa mu bẹ ya a-nù alì-a; Chileke ono e-zia ojozi iya g'unu l'iya swiru; k'ophu ì-lùta nwanyì l'ẹka ono dulataru nwa mu.

⁸Ọ -bùru lẹ nwanyì ọbu te ekwedu ngu etsoru; ẹvu ngu ogodogo. Ọo ẹpho g'i ti dukwaru nwa mu laa alì ẹka ono ọzo!”

⁹Ọo ya bụ; onye-ozì iya ono bya eye nnajìuphu iya ẹka l'ehe; bya eria angù l'opfu ono.

¹⁰Onye-ozì iya ono bya achìta anù-ije, bụ ìnya-kamèlu nnajìuphu iya iri gude tũgbua. Nnajìuphu iya ono hakwarupho nù iya iphe, dũgbaa ree; o gude; ọ bũru iya eje alì Mesopotémiya. O jerwua bya abahù mkpũkpu ẹka Nahò bu.

¹¹O mee g'ìnya-kamèlu ono g'ẹphe ha gbushichaa ikpere lẹ mgboru wèlu, nọ l'azù mkpũkpu ono k'ophu ọ-nyizeta. Teke ono bũwaa ụzenyashi; bya abũru teke ụnwanyì awũfujẹ lẹ mkpũkpu je eseta mini.

¹²Tọbudu iya bụ; onye-ozì Ébirihamu ono pfuru nù Chileke sù: “Jiko Chipfu, bụ Chileke kẹ nnajìuphu mu, bụ Ébirihamu. Menaa g'ije mu ntanù-a nweru ishi! Goshinu l'i yeru nnajìuphu mu, bụ Ébirihamu obu!”

¹³Mbù-a; ọ kwa wèlu bẹ mu nọ-kube-a; tẹme ụnwumboko shi lẹ mkpũkpu-a wũfuta abya eseta mini.

¹⁴Menaa g'ọ bũru; teke o nweru ụnwumboko ono onye ọphu mu sũru: ‘Jiko phozetanu ite ngu gẹ mu ngũta mini’; o -kweta chebe mu iya; bya asù lẹ ya e-jekwa echebefua ìnya-kamèlu mu; g'onye ono bũkwaru onye ì họtaru onye-ozì ngu, bụ Áyizaku. Noo iphe, l'e-me gẹ mu maru l'i yeru nnajìuphu mu, bụ Ébirihamu obu.”

¹⁵Ọ nọdu epfukwadu anù Chileke ono; Ribeka nọdu abyawaa yẹ l'ite, ọ nmako l'ukuvu. Ọ bũru nwatibe Bituwèlu. Bituwèlu bũkwanuru nwatibe Milika, bụ nyee Nahò. Nahò ono bũkwanuru nwune Ébirihamu.

¹⁶Nwamgboko ono nọdu ama ntũmatu; tẹme o dobe onwiya ọrù; kẹle o to nwedu nwoke, yẹ ya kwajẹwaru. Ọ bya eje lẹ wèlu ono je esejia ite iya mini nmakoru lũfuta.

¹⁷Onye-ozì ono bya emee ẹgwegwa bya agbapfu iya sù iya: “Jiko chebenu mu mini l'ite ngu ono nwanshìi gẹ mu ngua.”

¹⁸Ọ sù: “Nguaro nnajìuphu mu!” Ọ bya ezia ite ono ẹgwegwa bya apata iya l'ẹka gude chebe iya mini ono.

¹⁹O chebechaa ya mini ọbu ọ sù: “Mu e-setafũkwaru ìnya-kamèlu ngu g'ẹphe ngua jasù ẹphe angù-dzuru iya.”

²⁰O mee ẹgwegwa bya awũfu mini l'ite iya ono woru ye l'iphe, eeyejeru anù mini; bya agbaphu azù lẹ wèlu je esetaba mini ọzo. O seẹ ya pho gbiriri jasù ọ sù-dzuru ìnya-kamèlu ono angũngu.

- 21** Ophu onye-ozì onò epfukpòdaru m̀e akp̀uru opfu laǹu. O nòdu egekp̀oè ya phò g'ò maru ? Chipfu kabè mewaa ije iya; o nweru ishi t̀o?
- 22** Inya-kamèlu onò ng̀ughechaepho mini òbu; nwoke onò bya achìfuta eregede-imi, e gude mkpirikpu mkpòla-ododo mee; waa mgbalèka labò, e gude mkpòla-ododo, èrwa iya dù shèkelu iri mee woru chiè ya.
- 23** O jìà nwamgbòko onò sù iya: “? Ì bú nwatibe onye? Jiko mu sùru-a: ? o nweru èka anyi a-zè l'ibe nna ngu g'anyi je akwaa l'enyashi-a?”
- 24** O sù iya: “Mu búkwa nwatibe Bituwèlu; nwa, Milika yeru Nahò.”
- 25** O bya epfufua ya sù: “Anyi nweru èswa oyii; yèlè k'òkponku shii; waa ùlo, ìi-kwa l'enyashi-a.”
- 26** Nwoke onò bya ephureta bya abaarù Chipfu èja sù:
- 27** “G'ajaja búru kè Chipfu, bú Chileke kè nnajìuphu mu, bú Èbirìhamu. Mbù Chipfu ahadùru Èbirìhamu; o yèè ya phò obu g'ò yeru iya ya; bya apfushikwapho ike l'iphe, oomeru iya. A bya lè mbèdua bè Chipfu duwaru ije durwuta ibe abùbu nnajìuphu mu phè.”
- 28** Nwamgbòko onò bya agbaru laa unuphu je at̀uko iphemiphe onò kòkotaru ndu bu l'ùlo ne iya.
- 29** Ribeka nweru nwune nwoke, aza Lebanù. Lebanù gbagbùà jeshia nwoke òbu ndzuta lè wèlu l'èka onò;
- 30** kèlè ò hùmaru eregede-imi phò; waa mgbalèka, nwune iya nwanyì gba l'èka; bya anùmakwapho iphe onò, Ribeka pfuru sù l'òo iphe, nwoke onò pfuru iya onò. O t̀ugbua jepfushia nwoke òbu; o jeshia ò pfùwaru pfù-kube ìnya-kamèlu iya lè mgboru wèlu onò.
- 31** Tòbudu iya bú; Lebanù sù iya: “Bata abata-o! Gùbe onye Chipfu gòru ònu-òma nù! ? O nwùru ìnwu-agma bè ì jeru apfuru l'èka onò? Mu doziakwaru ngu ùlo; bya edoziwaa èka ìnya-kamèlu ngu a-dòru.”
- 32** Oo ya bú; nwoke onò bahù l'ùlo onò. Lebanù bya atòshia ìnya-kamèlu iya iphe, o shi vuru. O bya achìtaru ìnya-kamèlu onò g'èphe ha èswa oyii; waa k'òkponku; bya apataru yèbedua yèè unwoke, èphe l'ìya swì mini g'èphe kwòo òkpa.
- 33** A bya akwata nri doberu iya l'atatiphu. O sù lè ya te erikwa nri jasù teke ya pfuadaru iphe, ya byaru. Lebanù sù iya: “Ngwanù; pfunaa ya!”
- 34** Oo ya bú; ò sù: “Mu búkwa onye-ozì Èbirìhamu.
- 35** Chipfu mewaru nnajìuphu mu iphe-òma, parù èka. O búwaru onye nweru iphe ntùmatu. O nùru iya atùru; waa eswi; waa mkpòla-òchaa; yèlè mkpòla-ododo; waa ohu, dù igwerigwe; unwoke m̀e unwanyi; waa ìnya-kamèlu; waa nkapfù-ìgara.
- 36** Nyee nnajìuphu mu, bú Sera nwùtaru iya nwa lè nka. Èbirìhamu wowaru iphemiphe, o nweru nùkota nwata òbu.

- ³⁷Nnajiuphu mu ono mee; mu riaru iya nte kweta ɛ mu ta alutaduru nwa iya ono nwanyi, shi l'ali ono, o bu ono, bu iya bu ali Kėnanu.
- ³⁸“Lɛ mu e-je l'ɛnya unuphu ibe nnajiuphu mu ono; mbu l'okpa-ipfu iya gedegede; je alutaru nwa iya ono nwanyi.
- ³⁹“Mu jia nnajiuphu mu ono su iya: ‘? O -bukwanuru ɛ nwanyi obu te ekwedu l'ootsoru mu alwa ɛka ono-e?’
- ⁴⁰“O su ɛ Chipfu ono, bu onye ono, ye l'iya l'anɔ ono be e-duru-a ojozi iya ye ge mu l'iya swiru; k'ophu oo-me g'ije mu nweru ishi. Oo ya bu; k'ophu mu a-luta nwanyi, shi l'okpa-ipfu phe; waa l'ɛnya unuphu phe gedegede dulataru nwa iya nwoke.
- ⁴¹Lɛ mu -jekpɔwaa l'okpa-ipfu phe; o buru l'ephe jikaru be ɛnwa iya te egudehedu mu; l'oburu ɛvu mu ogodogo.
- ⁴²“O buru iya bu; mu byarwuta ɛ wɛlu-a ntanu-a; mu su: ‘Jiko gube Chipfu, bu Chileke ke nnajiuphu mu, bu ɛbirihamu; o -buru l'o du ngu ree; jiko menaa g'ije-a, mu byaru-a nweru ishi.
- ⁴³Nta-a be mu pfuru ɛ mgboru wɛlu-a; o -buru l'o nweru nwamgboko, byaru eseta mini; mu su iya: ‘Jiko ge mu ngutanu nwa mini, ha nwanshi l'ite ngu ono!’
- ⁴⁴O -buru l'o kwetaru chebe mu iya; bya asu ɛ ya e-jekwa echebefua inya-kamɛlu mu; g'onye ono bukwaru onye gube Chipfu hotaru nwatibe nnajiuphu mu.’
- ⁴⁵“Mu nodu epfukwadu anu Chileke ono l'ime obu; Ribeka nodu abyawaa ye l'ite, o nmako l'ukuvu. O bya eje ɛ wɛlu ono je eseta mini. Mu su iya: ‘Jiko chebenu mu mini!’
- ⁴⁶“O mee ɛgwegwa pazeta ite ono, o pa l'ukuvu ono; bya asu mu: ‘Ngge; ngua; ge mu je esetafuaru inya-kamɛlu ngu g'ephe ngua.’
- ⁴⁷“Mu jia ya su iya: ‘? I bu nwatibe onye?’ “O su ɛ ya bu nwatibe Betuwɛlu, bu iya bu nwatibe Nahɔ; onye ophu Milika nwutaru iya. “Mu bya eworu eregede-imi ye iya l'imi; bya agbabe iya echi-ɛka.
- ⁴⁸Mu bya ephureta bya abaru Chipfu eja; bya ajaa Chipfu, bu Chileke ke nnajiuphu mu, bu ɛbirihamu ajaja; mbu Chipfu, onye duru mu; mu shia okpobe uzo byarwuta ɛka mu humaru nwamgboko, bu nwanwa nwune nnajiuphu mu, mu a-luta dularu nwatibe nnajiuphu mu.
- ⁴⁹O -buru l'unu e-goshi l'unu yeru nnajiuphu mu obu; l'o gbaru g'o gude ire unu ɛka; unu pfunaa ya ge mu numa. Teke o dudu; unu pfukwapho; ge mu maru ophu mu e-shi eshishi.”
- ⁵⁰Lebanu yee Betuwɛlu yeru iya onu su: “O kwa Chipfu du ngu bya; ophu anyi enweekwa onu opfu k'asu l'owa-a meru; ophu owa-a emeduru.
- ⁵¹Wakwa Ribeka baa; duta iya gude laa g'o je aluru nwatibe nnajiuphu ngu; eshinu o bu ge Chipfu suru l'oo-du bu ono.”

- ⁵²Onye-ozí Ébiríhamu nùmaephò ònu, èphe yeru; o phozetaru Chipfu.
- ⁵³Ò bya egwefuta ngwa, e gude mkpòla-ododo; yèe mkpòla-òchaa mee bya achìe Ribeka; bya achìekwaa ya phò èkwa. Ò nùkwaphò nwune iya; èphe lè ne iya iphe, vu oke aswa.
- ⁵⁴Èphe lè ndu èphe l'íya swì gbè teke ono bya atùko ria nri; bya angùa iphe, angùngu; bya akwaa èka ono l'ènyashi ono. Èphe tehuèphò lè nchita-abòhu iya onye-ozí ono sù: “Unu dukwa mu gè mu lashìà lapfushia nnajìuphu mu.”
- ⁵⁵Nwune nwamgbòko ono; yèlè nene iya sù: “Kabènu haa g'anyi lè nwada anyi òbu nòfua nwujìku iri; tème unu alashìwaro.”
- ⁵⁶Ò sùkwanu phè: “? Unu esedekwadù mu kè gùnu; l'èka Chipfu gbè mewaa ije mu; o nweru ishi? Unu hanaa gè mu lashìà lapfu nnajìuphu mu!”
- ⁵⁷Èphe sù g'èphe kua nwamgbòko ono jìà ya g'o yee ònu.
- ⁵⁸Èphe kua Ribeka bya ajìà ya sù: “? Ii-tsoru nwoke-a?” Ò sù ee; lè ya e-tsoru iya-a.
- ⁵⁹Òo ya bù; èphe duru nwune phè nwanyi, bù Ribeka nù iya; èphe lè nwanyi, eleta iya ènya. Onye-ozí Ébiríhamu ono; yèlè ndu èphe l'íya swì duta iya; èphe lashìà.
- ⁶⁰Èphe bya ala; ndu nwe Ribeka gòru ònu-òma nù iya; sù iya: “Nwune anyi nwanyi; jaa àjàjà ka l'òtu! Mbù g'awa ngu bùru agùta agùta! G'awa ngu natajèkwa òguzo ndu ohogu phè!”
- ⁶¹Òo ya bù; Ribeka yèlè ndu-ozí iya kwakòbe bya enyita ìnya-kamèlu phè tsoru onye-ozí Ébiríhamu ono; o duru phè; ò bùru iya alala.
- ⁶²Teke ono bè Áyizaku shiwaa lè Ògba Ò-dzù-ndzù-ele-mu-ènya abya; kèlè èka o bu ebubu bù l'èchiègu ndòhali.
- ⁶³Ò -rwua ùzenyashi ujìku lanù o tsoru òma ègu aghaphe. Ò jeshia ele ènya bya ahùma ìnya-kamèlu, awù abya nù.
- ⁶⁴Ribeka bya apalikwaphò ènya hùma Áyizaku; bya eshi l'eli ìnya-kamèlu iya pfù-zeta.
- ⁶⁵Ò jìà onye-ozí ono sù iya: “? Nwoke ono, shi lè mgbègu eje abya nù ono bù onye?” Onye-ozí ono sù iya: “Ò kwa nnajìuphu mu bè ò bù.” Ò chìta èkwa-ishi iya gude kpuchia onwiya.
- ⁶⁶Onye-ozí ono bya akòkotaru Áyizaku gè ya gude mee ya.
- ⁶⁷Áyizaku bya eduta iya duba l'ùlo-èkwa ne iya, bù Sera. Ò bùru iya bù l'e kewaru iya Ribeka; ò lùru. Ò yee ya obu shii. Ò bùru iya bù l'òbu abyahùkwa bya ejizeta Áyizaku lè kè ne iya, nwùhuru nù-a.

Mbùlembu 25

Anwùhu Ébiríhamu

- ¹Ébirihamu bya alúta nwanyị ọzo, ẹpha iya bụ Ketura.
- ²Ọ nwútaru iya Zimuranu; waa Jiọkushanu; waa Midanu; waa Midiyanu; waa Ishibaku; waa Shuwa.
- ³Jiọkushanu bụ nna Sheba; waa Dedanu. Ndu bụ oshilọkpa Dedanu bụ ndu Ashuru; waa ndu Letushi; waa ndu Leyumu.
- ⁴Unwu Midiyanu bụ Ifa; waa Ife; waa Inọku; waa Abida; waa Ẹludaa. G'ẹphe hakọta tukuru bụru unwu Ketura.
- ⁵Ébirihamu hakọtaru Áyizaku iphemiphe, o nweru.
- ⁶Ọle g'ọ nọkwadu ndzụ bẹ ọ hatarụ iphe hee unwu, ẹphe nwútaru iya; mbụ unwanyi, ndu ọphu abụ-zidu unyomu iya; bya edufu pẹ; ẹphe lashia ụzo alị ẹnyanwu-awawa; k'ọphu yẹ Áyizaku te ebuduru l'ẹka lanụ.
- ⁷Iphe, Ébirihamu kpakọtaru nọo bụ ụkporo apha ẹsato l'apha iri l'ise.
- ⁸Ébirihamu tụa unme ikpazụ iya bya anwuhu lẹ g'ọ kahuchawaru lịbaliba; k'ọphu ọ bukpo nwoke ọgerenya, apha, ọ nọru ndzụ jiru ẹpho; tẹme ọ lapfushia ndiche pẹ.
- ⁹Unwu iya; mbụ Áyizaku yẹ Ishimelu lia ya l'ogba Makupela, nọ l'alị Ẹfuronu, bụ nwatibe Zoha, onye Hetu. Ọgba ono nọ-kube Mamure.
- ¹⁰Alị ono bụ alị, Ébirihamu zuru ndu Hetu; ọ bụru ẹka ono bẹ e liru Ébirihamu; lia nyee ya, bụ Sera.
- ¹¹Ébirihamu nwuhuchaepo Chileke bya ekebekpọo Áyizaku l'oma ẹka o bukube welu Ọ-dzụ-ndzụ-ele-mu-ẹnya.

Unwu Ishimelu

- ¹²Waa oshilọkpa Ishimelu nwa Ébirihamu; onye nwanyị, shi Ijiputu, bụ ohu Sera, ẹpha iya bụ Hega nwútaru Ébirihamu baa:
- ¹³Qwaa bụ unwu Ishimelu lẹ g'e deru ẹpha pẹ g'a nwuru pẹ. Nebayotu bụ ọkpara Ishimelu. Ndu ọzo bụru Keda; waa Adubelu; waa Mibusamu;
- ¹⁴waa Mishima; waa Duma; waa Masa;
- ¹⁵waa Hadadu; waa Tema; waa Jieturu; waa Nafishi; waa Kedema.
- ¹⁶G'ẹphe ha tukuru bụru unwu Ishimelu; ọ bụru pẹ bugbaa ndu-ishi ọkpa-ipfu pẹ ono ẹphe n'iri l'ẹbo. Tẹme ọ bụru ẹpha pẹ bẹ a gubegbaaru mkpukpu lẹ mkpukpu pẹ.
- ¹⁷Mkpakọ iphe, Ishimelu nọru bụ ụkporo apha ishii l'apha iri l'ẹsaa; bya atua unme ikpazụ iya nwuhu; lapfu ndiche pẹ.
- ¹⁸Oshilọkpa iya shi lẹ Havila bua jasụ Shuru, nọ-kube oke alị Ijiputu; mẹ i nọdu eje ụzo Asiriya. Ẹphe l'unwunna pẹ g'ẹphe ha tuko duru l'opfu.

Jiékpọ yẹle Iso

- ¹⁹Waa oshilokpa Áyizaku, nwa Ébirihamu. Ébirihamu bu nna Áyizaku;
- ²⁰Áyizaku noepho ukporo apha labo bya alua Ribeka, nwada Betuwelu, onye Arámu; eka o shi bu Padanu-Arámu; teme Ribeka ono buru nwune Lebanu, onye Arámu kwapho.
- ²¹A nonyaa; Áyizaku bya epfuru nu Chipfu l'iswi ehu nyee ya; noo kele o too tsudu ime. Chipfu numa epfufu, o pfuru nu iya; bya emee nyee ya, bu Ribeka tsuta ime.
- ²²Unwegirima ono nodu akpa onwophe mkpa l'ime epho iya. A nonyaa; o su: “? Bu gunu be iphe-a l'anwuru mu egube-a?” O jeshia l'aji l'iphu Chipfu.
- ²³Chipfu su iya: “O kwa mkpukpu labo no ngu l'epho; mbu l'oha labo e-shi ngu l'ehu kekahaa onwophe. Onye lanu a-ka onye ophuu ike; teme o buru onye k'ogerenya be a-nodu ejeru onye ke nwata ozi.”
- ²⁴O gbabe ya pho l'ezeda; o nwua ejima; o buchaaru nwoke.
- ²⁵Onye ophu vuru uzo futa du uswe-uswe; ehu iya l'ophu duepho g'uwe-adzu. Oo ya bu; ephe woru iya gua Iso.
- ²⁶Anwunwu, aanwu iya; nwune iya nodu etso iya; woru iya eka l'ichirupfu okpa. Oo ya bu; ephe gua ya Jiékopu. Áyizaku nowaru ukporo apha eto teke Ribeka nwutaru iya unwegirima ono.
- ²⁷Unwegirima ono bya evuta. Iso buru onye maru enya nta-a; onye anoduje aghaphe l'oma egu. Jiékopu bukwannuru onye eme gelee; teme o nodu anoduje anoo l'unuphu.
- ²⁸Eshinu Áyizaku bu onye anu, shi l'egbudu atsoje ntumatu; o yee Iso obu; Ribeka yekwanaa Jiékopu obu.
- ²⁹O -rwua ujiku lanu; Jiékopu nodu agwo ine. Iso shi nta-a bata; mbà nodu atu iya atutu.
- ³⁰O su Jiékopu g'o koo ya o-cha-pfu iphe ono, o shiberu ono egwegwa; le mbà atukwa iya atutu! (Noo iphe, meru g'o gude a wata iya eku Edomu bu ono.)
- ³¹Jiékopu su iya: “Oo m'o buru le mu a-buru ngu ogerenya!”
- ³²Iso su g'o lenu le ya anwuhukwa anwuhu. ? Ya gude aburu ogerenya eme gunu?
- ³³Jiékopu su iya g'o riadanaru iya angu. O bya eria angu le ya hawaru ge Jiékopu buru iya ogerenya.
- ³⁴Jiékopu bya awata buredi nu iya; bya ekuta ine azamu ono, o gworu ono nukwa iya pho; o ria. O richaa ya bya angua iphe, aangu angungu; o buru iya atugbu. Oo ya bu le Iso ta agubeduru aburu ogerenya iya iphe.

Mbulumbu 26

Áyizaku ye Abimeleku

- ¹A nonyaa; ẹgu bya l'ali ono; a -gufukwa ophu byajeru teke Ẹbirihamu nọ. Áyizaku lapfu Abimeleku, eze ndu Filisitayinu lẹ Gera.
- ²Chipfu byapfuta Áyizaku bya asu iya: “Te ejekwa ala ali Ijiputu. Bukwaru l'ali ono, mu a-su ngu g'i buru ono!
- ³Butotanu l'ali-a; huma lẹ mu a-nodu swiru ngu eswiru; teme mu ekebekwa ngu pho l'oma. Kele oo gubedua; gu l'awa ngu be mu a-nukota ali-a l'ophu. Ozo bu l'iphemiphe, mu riru Ẹbirihamu nte lẹ mu e-meru iya be mu e-mekotakwa.
- ⁴Mu e-me awa ngu g'ephe ha l'otu ge kpokpode, nọ l'akpaminigwe. Mu abya anu phe ali-a l'ophu. Teme o buru oshilokpa ngu be ee-shi l'eka kebe ohamoha, nokota lẹ mgboko l'oma.
- ⁵O buru iphe, kparu iya nu bu lẹ Ẹbirihamu meru olu mu; mbu l'o meru opfu mu. O buru iphe, mu suru g'o mee be o meru; mbu iphe, mu toru okpa iya; bya edobekota ekemu mu.”
- ⁶O buru iya bu lẹ Áyizaku eburu lẹ Gera.
- ⁷Unwoke ndu eka ono bya akpaahaa ya ishi nyee ya. O su phe l'ephe l'iya bukwa nwune. Iphe, o gude pfua nno bu lẹ ndzu agu iya asu l'oo nyee ya. O riru lẹ ndu eka ono e-gbu iya nata iya Ribeka; kele Ribeka manukaru mma.
- ⁸Áyizaku buepho eka ono nono odu; Abimeleku, eze ndu Filisitayinu bya epyofu enya lẹ windo huma Áyizaku eka yele nyee ya, bu Ribeka ebvu oke ebvu.
- ⁹Abimeleku bya ekua Áyizaku su iya: “? O kwa lẹ nwanyi ono be ilu okpobe alulu? ? Bu gunu meru g'o gude i su l'o bu nwune ngu?” Áyizaku su iya: “? Ti madu lẹ mu ari lẹ ndzu mu e-tuphahu l'opfu ehu iya?”
- ¹⁰Oo ya bu; Abimeleku su iya: “? Egube iphe owa-a, i meru anyi-a bu gunu? Ome unwoke ndu anyi onye lanu jekwanuru je ejepfu nyee ngu onoya; me iishi egube ono mee g'a taa anyi uta.”
- ¹¹Oo ya bu; Abimeleku bya aturu ndu eka ono g'ephe ha ekemu su: “Onye choru nwoke-a; ozoo nyee ya opfu be ee-gbukwa ebugbu!”
- ¹²Áyizaku bya akobe iphe l'ali ono; bya akpata iphe, ha g'iphe, o koberu l'ali apha ono mgbo ukporo ise; noo kele Chipfu keberu iya l'oma.
- ¹³O bya enweru iphe; eku wata iya abyaru; jasu o buru obaba.
- ¹⁴O nweru aturu, du igwerigwe; bya enweru eswi; bya agbashia ohu dobe. A nonyaa; ndu Filisitayinu jaharu iya ijenya.
- ¹⁵Oo ya bu; iphe, bukpo welu iya, shiro teke nna iya, bu Ẹbirihamu nọ; bu welu, ohu nna iya phe tushiru doberu iya; ndu Filisitayinu bya atsuchishichaa ya; mbu gude eja nwuchishichaa ya.
- ¹⁶Oo ya bu; Abimeleku su Áyizaku: “Kwata lufuru anyi; noo kele i kariwaru anyi eka shii!”

- ¹⁷Ọ bụru iya bụ ị Ọyizaku akwafu je akpobe ụlo-ekwa iya ị nsuda Gera; je eburu l'eka ono.
- ¹⁸Ọyizaku bya etsoru tukwachaa welu ono, a turu teke nna iya, bụ Ebirhamu no ndzu ono; mbu welu ono, ndu Filisitayinu nwuchishiru ị ge nna iya nwuhucharu ono. Ọ bya agukwachaa ya epha ono, nna iya shi gushia ya ono.
- ¹⁹Ndu ozi Ọyizaku bya ebvua welu ị nsuda ono; bya ebvuvu mini, doru risaa.
- ²⁰Obenu ị ndu eche iphe-edobe ndu Gera; epe ị ndu eche ke Ọyizaku wataru adzo welu obu. Epe su ị mini ono bụ mini epebe ndu Gera. Ọyizaku woru welu ono gua Iseku; kele a sworu iya uswo.
- ²¹Epe bya atua welu ozo; ndu Gera dzopfukwaru iya pho. Ọyizaku gua ono Sitina.
- ²²Ọ gbeshi l'eka ono je atua welu ozo; ophu o nweedu onye dzobaru ono. Ọ gua ya Rehobotu su: “Nta-a be Chipfu mewaru g'anyi susaa onwanyi l'alị-a; nodu iya mia amimi g'oshi-omi.”
- ²³Ọ gbẹ l'eka ono; o lashia Biye-Sheba.
- ²⁴Ọ -rwua l'enyashi ono; Chipfu byapfuta iya bya asu iya: “Ọ kwa mbedua bụ Chileke ke nna ngu, bụ Ebirhamu. Ge ndzu ta agushi ngu; kele mu no-kube ngu. Mu e-gude iswi ehu onye-ozi mu, bụ Ebirhamu kebe ngu l'oma; mee g'awa ngu ka l'otu.”
- ²⁵Ọyizaku bya akpuo oru-ngweja l'eka ono; bya akpo-ku epha Chipfu. Ọ woru ụlo-ekwa iya kpobe. Ndu ozi iya bya eworu welu tua.
- ²⁶Ọ buru teke ono be Abimeleku shi ị Gera kpapfuta iya; epe ị Ahuzatu, onye agbaziru iya olu; waa Fayikolu, onye-ishi ndu ojogu iya.
- ²⁷Ọyizaku jia phe su: “? Bụ gunu meru iphe, unu abya ibe mu; l'eka mu du unu ashi; unu chia mu l'alị unu-a?”
- ²⁸Epe su iya: “Anyi humaru ị Chipfu no-kube ngu. Noo ya; anyi su l'o gbaru g'anyi ị ngu ria nte. G'anyi ị ngu gbaa ndzu;
- ²⁹g'o to du iphe, ii-me anyibe ndu Gera; egube ono, adudu iphe, anyi meru ngu ono; o chia l'anyi meru ngu odoo; bya edufu ngu; i lashia ị nchi-odoo. Ọ buru iya bụ ị Chipfu abya nta-a bya ekebe ngu l'oma.”
- ³⁰Ọyizaku bya eshiaru phe nri, ha shii; epe bya eria bya angua iphe, aangụ angungu.
- ³¹Ọ -rwua ị nchita-abohu iya l'onmewa utsu; unwoke ono bya eworu nte ria. Ọyizaku dufu phe; epe tugbua; o buru phe alala ị nchi-odoo.
- ³²Ọ buru mboku ono be ndu-ozi Ọyizaku byaru bya epfuaru iya ke welu pho, epe turu pho su iya l'epe humakwaru mini.
- ³³Ọ gua ya Sheba. Epha mkpukpu ono buru Biye-Sheba byasu ntanu-a.
- ³⁴Iso nepho ukporo apha labo; o je alua Jiuditu, nwada Beri, onye Hetu; bya alukwapho Basumatu, nwada Elonu, onye Hetu kwapho.

³⁵Ephe buru aphụ tsọru Áyizaku yẹle Ribeka.

Mbulembu 27

Jiékpọpu anata ọnu-ọma l'ẹka Áyizaku

¹Áyizaku buerupho ọgerenya; k'ọphu ọophuwa ragaraga; o kua Iso, bu ọkpara iya su iya: “Nwa mu!” Ọ za iya ọnu.

²Ọ su iya: “Nta-a be mu buakwaa nwoke ọgerenya; ọphu mu amakwa mbọku, mu anwuhu.

³Ngwa; wota iphe, iigudeje achi nta-a; mbu ẹda-apfu waa apfu ngu; gude je l'egbudu je egbuaru mu anu!

⁴L'ibiya egude iya shiaru mu nri, atso utso, bu ọphu aduje mu ree; pataru mu; ge mu ria goru ọnu-ọma nu ngu; temanu mu anwuhu!”

⁵Ribeka ngabekpoepho nchi ge Áyizaku epfu eyeru nwa iya, bu Iso. Iso tugbuepho jeshia l'egbudu ge ya gbua anu palata;

⁶Ribeka su nwa iya, bu Jiékpọpu: “Mu suru-a; mu numakwaru teke nna ngu shi epfu eyeru nwune ngu, bu Iso

⁷su iya g'o je egbu anu-egbudu gude shiaru iya nri, atso utso ge ya ria; k'ọphu ya anodu l'ataphu Chipfu goru ọnu-ọma nu iya; teme ya anwuhu.

⁸Nta-a bu le-a; nwa mu; ngabekpoepho nchi ree; mee iphe, mu a-su g'i mee!

⁹Ngwa; je l'eka aturu ye l'eghu doru; je ahota ada egbu labo, du ree; ge mu gude shiaru nna ngu nri, atso utso. Mu e-shie ya pho g'oo-du iya ree.

¹⁰L'iwata iya je anu nna ngu g'o ria; k'ọphu oo-goru ngu ọnu-ọma iya; temanu l'onwuhu.”

¹¹Jiékpọpu su Ribeka, bu ne iya: “Obenu le nwune mu, bu Iso gbaru eji; mbedua buru onye ehu akwo akwo.”

¹²? Ọ bukwanuru le nna mu rwaru mu eka-e? L'ohuma l'oo eregede be mu agbaru iya; looworu onu tua mu; me o lashia ọphu oo-goru ọnu-ọma nu mu.”

¹³Ne iya su iya: “Nwa mu; ge mu vutaro onu ono m'o tua ngu iya! Oo epho g'i mee iphe, mu suru g'i mee-a; tugbua je akputaru mu iya!”

¹⁴Oo ya bu; o tugbua je akputaru ne iya egbu obu. Ne iya bya egude iya shia nri, atso utso; shie ya pho g'oduje nna Jiékpọpu ono ree.

¹⁵Ribeka bya ewota uwe Iso, bu nwune Jiékpọpu k'ogerenya; mbu uwe iya ọphu kakota ama mma l'uwe, Iso koberu l'ulo iya; bya eworu yee nwa iya ke nwata, bu Jiékpọpu.

¹⁶Ọ bya eworu akpo egbu phua ya l'eka; bya aphua ya ya l'olu, bu eka akwo iya akwo.

¹⁷Ọ bya eworu nri ono, atso utso ono pee Jiékpọpu; bya apee ya buredi, o gheru ye iya.

- 18 Jiékpóu bya aparu iya jepfu nna iya bya asụ iya: “Nnana!” Ọ za iya: “Owee nwa mu! ? I bú onye?”
- 19 Jiékpóu sụ nna iya: “Ọ kwa mbèdua, bú Iso; bya aburu ọkpara ngu. Mu meakwaru g'i ziru mu. Gbeshikwa nọdu anọ taa anụ ọbu, mu gburu ọbu; g'ìigoru ọnu-ọma nụ mu.”
- 20 Áyizaku bya ajia ya sụ: “? Denu g'i shiru gbukebewa iya egwegwa egube ono nwa mu?” Jiékpóu sụ iya: “Oo Chipfu, bú Chileke ngu meru mu; o nweru ishi.”
- 21 Áyizaku sụ Jiékpóu: “Kpírítaekwaru gẹ mu rwaa ngu ẹka; gẹ mu maru ? i bú-a nwa mu Iso tọ tị búdu iya?”
- 22 Jiékpóu bya ejekube nna iya, bú Áyizaku ntse. Ọ bya arwachaa ya ẹka bya asụ: “Olu-opfu ngu bú olu Jiékpóu; obenu l'ẹka ngu bú ẹka Iso.”
- 23 Ọphu ọ tọ hụbeduru iya ama; noo kẹle ẹka iya dụ eji eji gẹ kẹ nwune iya, bú Iso. Ọ goru ọnu-ọma nụ iya.
- 24 Ọ jįadaa ya sụ iya: “? I bú-a nwa mu, bú Iso tọ?” Ọ sụ iya: “Ee. Mu búkwa iya-a.”
- 25 Ọo ya bú; ọ sụ iya: “Ngwanụ nwa mu; patanuru mu anụ, i gburu shia nri ọbu gẹ mu ria; k'ọphu mu a-goru ọnu-ọma nụ ngu!” Jiékpóu bya apajeru iya ya; o ria; ọ bya apataru iya mее; ọ ngua.
- 26 Nna iya, bú Áyizaku sụ iya: “Bya ẹka-a nwa mu; bya etsutsua mu ọnu!”
- 27 Ọo ya bú; o jekube iya ntse je etsutsua ya ọnu; Áyizaku numaepho mkpọ, uwe iya eshi; ọ goru ọnu-ọma nụ iya sụ iya: “Mkpọ, nwa mu eshi dụ gẹ mkpọ egu, Chipfu keberu l'ọma.
- 28 Gẹ Chipfu shi l'imigwe kwaaruru ngu iji; l'ọonu ngu ẹka mgboko kakọta ree; l'oomее g'i nweru nri yele mее nweru k'etsutsu iya.
- 29 G'ọha, dụ igwerigwe jeru ngu ozi! Gẹ ndiphe phozejeru ngu! L'їiburu onye a-buru onye-ishi unwune ngu! G'unwu, ne ngu nwutaru phozejeru ngu! Gẹ ndu turu ngu ọnu búkwaru ndu a turu ọnu! Ndu goru ọnu-ọma nụ ngu abúkwanuru ndu a goru ọnu-ọma nụ!”
- 30 Áyizaku gọ-ghechaerupho Jiékpóu ọnu-ọma ono; o shiẹpho l'atatiphu nna iya tųgbua jeriberu nwanshїi; nwune iya, bú Iso shi nta-a bata.
- 31 Ọ bya eshikwaphọ nri, atso uto pataru nna iya bya asụ iya: “Nnana; gbeshi bya ataa anụ-a, mu gburu shiaru ngu-a g'їigoru ọnu-ọma ngu nụ mu.”
- 32 Nna iya, bú Áyizaku bya ajia ya sụ: “? I bú onye?” Ọ sụ iya: “Mu búkwa nwa ngu nwoke; mbụ ọkpara ngu, bú Iso.”
- 33 Áyizaku phuhu mebyikpọo kẹ kpaakpaakpaa bya asụ: “? Buhunu onye gburu anụ wotaru mu; mu righeru lẹ mgboru g'їibya-a? Mu gọakwaru ọnu-ọma nụ onye ono; mbụ l'onye ono búakwaa onye e keberu l'ọma.”

34 Iso nūmaepho opfu nna iya; ọ tūkpoo ẹkwa; chiahaa mkpu sū nna iya: “Gofunaaru mu ọnu-oma; jikonu nna!”

35 Áyizaku sū iya: “Nwune ngu gudeakwa ẹregede bya anata ọnu-oma ngu obu.”

36 Iso sū: “Ọo ẹpho Jiékọpu, a guru iya bẹ gbaru iya nū. Ọwa-a kwewa mgbo labo, ọ gho-gbutaru mu. Ọ nataru mu okpara, mu bu. Ọ bya nta-a bya anatafua mu ọnu-oma mu.” Ọ jia nna iya sū iya: “? To nwekpodaa ọnu-oma ono ọphu i doberu mu me nanu?”

37 Áyizaku sū Iso: “Mu meakwaru Jiékọpu g'ọ buru nnajiuphu ngu; mu bya emekotaakwaa ndu ẹphe l'iya bu g'ẹphe buru ndu-ozii iya; bya agoakwarupho ọnu-oma nū iya lẹ nri; waa lẹ mee. Nta-a bẹ o to nwekwa iphe, mu a-du ike meeru ngu nwa mu.”

38 Iso nodu epfukpọekwarupho nna iya sū iya: “Nna; ti nwekpodaa g'ọ ka mma l'ọo akpuru ọnu-oma lanu, ii-goru mu? Gofunaaru mu ọnu-oma; jikonu nna!” Ọ wata ara ẹkwa.

39 Nna iya, bu Áyizaku bya eyeeru iya ọnu sū iya: “I tii budu l'eka mgboko kakota ree; ọphu i budu l'eka Chipfu shi l'imigwe akwa iji.

40 Ọo egbu mma bẹ ii-gude buru; teme nwune ngu bẹ ii-nodu ejeru ozi. Ọle a - nonyakwanaa ọ du ngu ẹnyiru; L'iikwefuru iya ike; unu l'iya edokaha.”

Jiékọpu agba ala ibe Lebanu

41 Iso bya akpoo Jiékọpu ashii; kele ọo ọnu-oma, nna iya gege agoru nū iya bẹ ọ goru nū Jiékọpu. Ọ ria l'ime onwiya sū: “? Ọ kwa l'oorwuwa teke aa-kwa nnana? E - mechaa bẹ mu e-woru Jiékọpu, bu nwune mu-a gbua.”

42 E pfuerupho Ribeka iphe, nwa iya k'ogeranya, bu Iso pfuru; o zia g'e je ekua nwa iya ke nwata, bu Jiékọpu. Ọ bya; ọ sū iya: “Lekwa lẹ nwune ngu, bu Iso bukwa iphe, o gude adu onwiya obu bu lẹ ya e-mecha gbua ngu.

43 Ọo ya bu lẹ-a; nwa mu; mekwaa iphe, mu abya epfufu; gbalakwa ẹgwegwa lapfu nwune ne ngu, bu Lebanu lẹ Haranu!

44 Je anotota l'eka ono g'ẹhu ghubuhuada nwune ngu egbu!

45 Ọ -buru l'iphe, i meru nwune ngu ghubuhueru iya pho egbu; ọ zohaa ya; mu ezia ozi sū g'i shi l'eka ono lwatashia. Kele mu ta ahadu ge ndzu unu n'ẹbo tuphashihu l'eswe ujiku lanu.”

46 Noo ya bu; Ribeka bya ejepfu Áyizaku je asu iya: “Anodu ndzu dukwaa mu ẹnyiru; ọ buru unwanyi ndu Hetu-a kparu iya. Ọ -buru lẹ Jiékọpu lutafuaru unwanyi ndu ali-a; mbu unwanyi ndu Hetu, du ge ndu ọwa-a; bẹ ? mu a-nodukwadu ndzu eme gunu?”

Mbulembu 28

1 Ọ buru iya bu lẹ Áyizaku bya ekua Jiékọpu; bya agoru ọnu-oma nū iya; bya aturu iya ekemu sū iya: “Ta alunupho nwanyi Kėnanu!”

²Tugbuekwapho jeshia Padanu-Arámu jepfu ndibe nna ngu oche, nwuru ne ngu, bu Betuwelu; je alutaru onwongu nwanyi l'eka ono; luta nwada Lebanu, bu nwune ne ngu!

³Gẹ Chileke, bu Okwoolemka kebe ngu l'oma; mee ngu g'i nwushia unwu; bya emee g'i jaa ajajà gbiriri jasụ ịburu nna oha, du igwerigwe.

⁴Gẹ Chileke mee g'onu-oma ono, o goru nu Ebirhamu ono; ree l'ehu ngu me l'awa ngu. Oo ya bu; k'ophu ii-nweru ali ono, i bu nlwamulwa ono; mbu ali ono, Chileke nuru Ebirhamu ono.”

⁵Oo ya bu; Ayizaku bya edufu Jiekopu; o tugbua jeshia Padanu-Arámu. O buru ibe Lebanu be ooje, bu iya bu nwatibe Betuwelu, onye Arámu. Lebanu ono bu nwune Ribeka, bu ne Jiekopu yele Iso.

⁶E mechaa; Iso bya amaru le Ayizaku gowaru onu-oma nu Jiekopu; bya edufuwa iya g'o laa Padanu-Arámu; je aluta nwanyi l'eka ono; teme le teke ono, o goru onu-oma nu iya ono be o turu iya ekemu su g'o to lukwa nwanyi Kenanu;

⁷teme waa le Jiekopu mewaru iphe, ne iya yele nna iya pfuru iya bya ejeshiwa Padanu-Arámu.

⁸O gbete teke ono bya edoo Iso enya l'o du nna iya, bu Ayizaku eji; mbu unwanyi, shi l'ali Kenanu.

⁹O tugbua je l'ibe Ishimelu; bya alua Mahalatu, bu nwune Nebayotu; bya aburu nwada Ishimelu, bu nwatibe Ebirhamu; je eyekoberu unwanyi ophu o shi aluhawa.

Nrwo, Jiekopu rworu le Betelu

¹⁰Tobudu iya bu; Jiekopu shi le Biye-Sheba tugbua; o buru iya eje mkpukpu Haranu.

¹¹O jenyaa; nchi jipfu iya l'eka lanu. O pfushi l'eka ono ge ya kwaa akwakwa. O je apata mkpuma lanu l'eka ono bya eswibe l'ishi zezeta; mgbenya tu iya.

¹²O bya arwo nrwo bya ahuma obebe, a suseru okpa iya l'ali; o je eberu l'imigwe. Unwu ojozi Chileke nodu enyi iya godogodo; ndu enyihu enyihu; ndu enyizeta enyizeta.

¹³Chipfu pfuru l'ononu iya pfua su: “O kwa mu bu Chipfu; bya aburu Chileke ke nna ngu, bu Ebirhamu; yele Ayizaku. Ali ono, i ze l'eli iya ono be mu a-nu unu l'awa ngu.

¹⁴Oshilokpa ngu a-du igwerigwe g'aja, no l'ali. Unu e-bucha burwua uzo enyanwuariba; bya eburwua uzo enyanwu-awawa; unu ebua jasụ l'uzo isheli; bua jasụ uzo ohal. Mu e-shi unu l'awa ngu l'eka kebe ndiphe l'ophu l'oma.

¹⁵Teme; humakpodapho; mu swikwaru ngu eswiru; mu a-nodukpoepho eleta ngu enya l'iphe, bukpo ekameka ije; ozo bu le mu e-duphuta ngu azu l'ali-a. Mu ta abyadu aha ngu jasụ mu emekota iphe, mu kweru ukwe iya.”

¹⁶Jiekopu shiepho le mgbenya tehu; bya asu: “Aha! ? Bu iya bu le Chipfu no l'eka-a; ophu mu eshidu maru?”

¹⁷Ndzụ nọdu agụ iya. Ọ sụ: “Eka-a bẹ akpabiri iya dukwa! Eka-a te nwekwa iphe ọzo, ọ bụ; abụdu ụlo Chileke. Ọ kwa eka-a bụ eka eeshije bahụ l'imigwe!”

¹⁸Ọ -rwua l'ọnmeawa ụtsu lẹ nchita-abọhu iya; Jiékpọ bya ewota mkpuma ono, o shi swibe l'ishi ono; bya akpọbe g'itso; o woru manụ wushi iya l'eli.

¹⁹Ọ gua eka ono Bẹtelu; obenu iphe, e shi ekuje iya bụ Luzu.

²⁰Jiékpọ bya eribua nte sụ: “Chileke -swikpọwaru mu eswiru; eleta mu ẹnya l'ije-a, mu eje-a; bya anukota mu nri; ye l'iphe, eeye l'ẹhu; mę k'anma l'upfu;

²¹k'ọphu bụ lẹ mu lwarụ l'ibe nna mu l'ẹhu-guu; bẹ mu e-mekwa Chipfu g'ọ bụru Chileke mu!

²²Mkpuma-a, mu pfuberu g'itso-a bẹ a-buru ụlo Chileke; tẹme iphemiphe, gube Chipfu nukotaru mu bẹ mu a-nuje ngu oke-lanụ-l'uzo-iri.”

Mbulembu 29

Jiékpọ ejerwu alị Padanu-Arámu

¹Jiékpọ tųgbukwa jeshia iphe, ooje; o jee gbiriri jasụ o jerwua alị ndu ụzo ẹnyanwu-awawa.

²Ọ -rwua l'eka ono; ọ hụma wẹlu, nọ l'oma ẹgu; waa ikpo aturu ẹto, dọru lẹ mgboru iya; noo kele aturu ono anguje mini lẹ wẹlu ono. Mkpuma, e gude swichia onu wẹlu ono ha shii.

³Ọ nọdu abujeru; aturu ono -dzukọpho l'eka ono; ndu eche iya nụ abya atuko swifu mkpuma ono l'onu wẹlu ono seta mini doberu aturu ono. Ẹphe -mechaa; ẹphe abya eswita mkpuma ono dobe l'eka o shi dụ l'onu wẹlu ono.

⁴Jiékpọ bya ajia ndu eche aturu ono sụ: “Unwune mu; ? bụ awe bẹ unu shi?” Ẹphe sụ iya l'ẹphe shikwa Haranu.

⁵Ọ sụ phẹ: “? Unu maru Lebanu, nwanwa Nahọ?” Ẹphe sụ ee; l'ẹphe makwaru iya.

⁶Jiékpọ sụ phẹ: “? Ẹhu dụ iya-a ree?” Ẹphe sụ iya: “Ee; ẹhu dukwa iya-a ree; tẹme l'ọ kwa nwada iya, bụ Rechielu chi aturu abya phọ.”

⁷Ọ sụ phẹ: “? Unu te eledu l'ẹnyanwu dukwadu shii? L'ọ toko rwudu teke aachikobeje aturu. Unu setanu mini doberu aturu ọbu g'ẹphe ngua; g'unu achiru phẹ jebaa lẹ nri!”

⁸Ẹphe sụ iya: “Anyi ta adukwa ike. Ọ kwa a -chikobecheaa aturu ono g'ọ ha; l'aabya eswifu mkpuma l'onu wẹlu ono; tẹmanu l'aawata eche aturu mini teke ono.”

⁹Ọ nọdukwadu epfu eyeru phẹ; Rechielu chiru aturu ibe nna iya gude bya; noo kele ọ bụ nwamgboko, eche aturu.

¹⁰Jiékpọ hụmaepho Rechielu, bụ nwada Lebanu, onye bụ nwune ne iya; waa aturu Lebanu; ọ tųgbua je eswifu mkpuma ono l'onu wẹlu ono; bya eseta mini doberu aturu nwune ne iya ono; ọ ngua.

- 11 Jiékpóu bya etsutsua Rechiélu ónu; bya awata arashì ékwa ike.
- 12 Ó bya epfuaru Rechiélu l'èphe lẹ nna iya búkwa; mbụ lẹ ya búkwa nwatibe Ribeka. Rechiélu gbagbúa je akọoru iya nna iya.
- 13 Lebanụ nùmaepho kẹ Jiékpóu, bụ nwa nwune iya; ọ gbapfushia ya. Ó bya etsutsua ya ónu; bya eduta iya lashia ibe iya. E rwua ibe iya; Jiékpóu woru iphemiphe kọkotaru iya.
- 14 Lebanụ sụ iya “Mu lẹ ngu búkwa mee lanụ.”

Jiékpóu alúta Lii yẹle Rechiélu

- Tọbudu iya bụ; èphe lẹ Jiékpóu nọepho ónwa ophu;
- 15 Lebanụ sụ iya: “Ó tọ bụdu lẹ mu lẹ ngu bụ abubu bụ iphe, a-kpata g'i jejeru mu ozi kẹ mmanụ. Kọoru mu iphe, mu a-pfuje ngu aswa ozi ngu!”
- 16 Noo ya; Lebanụ nwutaru unwumboko labọ. Èpha onye k'ọgerenya bụ Lii; èpha onye kẹ nwata bụ Rechiélu.
- 17 Lii bẹ ẹnya dụ rogoro rogoro; Rechiélu nọdu ama mma bya adụ ùbvù l'ẹnya.
- 18 Jiékpóu yeru Rechiélu obu. Óo ya bụ; ọ sụ Lebanụ: “Gẹ mu jenaaru ngu ozi apha ẹsaa; g'i kee mu nwada ngu, bụ Rechiélu.”
- 19 Lebanụ sụ iya: “Ó kabakwanụ ree lẹ mu keru ngu iya eme lẹ mu woru iya kee akataka onye ọzo. Ngwa; g'anyi lẹ ngu bunuru.”
- 20 Óo ya bụ; Jiékpóu bya ejee ozi apha ẹsaa g'e kee ya Rechiélu. Apha ẹsaa ono dụe ya phọ gẹ nwujiku olemole; noo kẹle o yeru Rechiélu obu shii.
- 21 Óo ya bụ; Jiékpóu bya asụ Lebanụ: “Ngwa; dewaa mu rọ nyee mu. Mu nọ-dzuwaru apha ẹsaa ọbu. Ó nọdu aguwa mu ẹgu gẹ mu l'iya kwaa.”
- 22 Óo ya bụ; Lebanụ bya ekukọbe ndu ẹka ono bya eshiaru phẹ nri.
- 23 Ó be l'uzenyashi; ọ bya eduta nwada iya, bụ Lii; bya eduru nụ Jiékpóu; èphe lẹ Jiékpóu kwaa.
- 24 Lebanụ bya eye ẹka l'ohu iya duta nwamgbọko lanụ, èpha iya bụ Zilipa duru nụ nwada iya ono g'o jejeru iya ozi ọlo.
- 25 Nchi bọhuepho; Jiékpóu hụma l'ọo Lii bẹ e deru iya. Jiékpóu sụ Lebanụ: “? Bụ gunu bẹ i meru mu iphe, dụ ẹgube-a? ? Tọbudu Rechiélu bẹ mu jeru ngu ozi iya? ? Bụ gunu meru g'o gude i gbaaru mu ẹgube ẹregede-a?”
- 26 Lebanụ sụ iya: “? Tị madụ lẹ g'omelalì dụ bụ l'anyi te ekejedu onye kẹ nwata l'ẹba abụ l'ekewaru onye k'ọgerenya?”
- 27 Sụ iya: “Taa nshi meghekpọadaa ekele onye ọwa-a idzu-a. E -mechaa; mu ekefua ngu onye kẹ nwata; ọle ii-jekwanuru mu ozi iya apha ẹsaa ọzo.”

²⁸Jiékpóu mee ya nno. O mee ekele Lii idzu ophu. Lebanu bya ekefua ya nwada iya, bu Rechielu; o lufuaru.

²⁹Lebanu bya eye eka l'ohu iya duta nwamgboko lanu, epha iya bu Biliha duru nu nwada iya ono, bu Rechielu g'o jejeru iya ozi ulo.

³⁰Jiékpóu ephe le Rechielu bya akwakwapho. O ka eye Rechielu obu eme le Lii. O bya ejeeru Lebanu ozi apha esaa ozo.

Unwu, Jiékpóu nwutaru

³¹Chipfu humaepho le Lii be e te eyeduru obu; o ghebe eka-nwa iya onu; ophu Rechielu atsudu ime.

³²Lii bya atsuta ime bya anwua nwa nwoke. O woru iya gua Rubenu; kele o suru: "Chipfu humawaru iphe-ehuka, mu eje. Nta-a be mu maru le nnajiuphu mu e-ye mu obu."

³³O bya atsuta ime ozo bya anwukwapho nwa nwoke. O su: "O kwa le Chipfu numaru l'e te eyeduru mu obu meru g'o gude o nukwa mu pho onye owa-a." O woru iya gua Simiyonu.

³⁴O byakwa atsuta ime ozo; o zedakwapho nwua nwa nwoke ozo. O su: "Nta-a be mu maru le nnajiuphu mu a-gharu mu iphu; noo kele mu nwutawaru iya unwoke eto." Oo ya bu; o woru iya gua Liviayi.

³⁵O bya atsuta ime ozo; nwua nwa nwoke. O su: "Ogiya-a be mu e-tu Chipfu epha." O woru iya gua Jiuda. O nwuchaa onye k'ono; o pfuru apfuru.

Mbulumbu 30

¹Rechielu humaepho le ya ta anwutaduru Jiékpóu me nwa lanu; o koaharu nwune iya okophoo. Oo ya bu; o su Jiékpóu: "Yekwaa mu ime; odumeka mu anwuhukwa!"

²Opfu iya ono ghua Jiékpóu eghe. O su iya: "? Bu mbédua bu Chileke, kposhiru ngu anwuta nwa?"

³O su iya: "Duta ohu mu-a, bu Biliha ge gu l'iya kwaje g'o nwutaru mu unwegirima; k'ophu mu e-shi iya l'eka nweru awa."

⁴Oo ya bu; o bya ekuta ohu ono, bu Biliha nu iya; o luru. Biliha ye le Jiékpóu bya akwaa;

⁵o bya atsuta ime nwuaru iya nwa nwoke.

⁶Noo ya; Rechielu su: "Nta-a be Chileke hawaru mu enge. O ngabewaru nchi numa iphe, mu rworu iya; bya anu mu nwa nwoke." Eshinu o du egube ono; o gua ya Danu.

⁷A nonyakwa; ohu Rechielu ono, bu Biliha bya atsuta ime ozo; bya anwuaru Jiékpóu nwa nwoke k'ebó.

⁸Rechielu su: "Mu le nwune mu kpaakwaru enya shii; ole nta-a be mu kaakwanaa ya enya." Oo ya bu; o woru nwata obu gua Nafutali.

- ⁹Lii hūmaepho lẹ ya p̄furu ap̄furu; o duta ohu nkiya, bụ Zilipa nū Jiékoṗu g'ọ luru.
- ¹⁰Ohu Lii ono, bụ Zilipa bya anwṗtaru Jiékoṗu nwa nwoke.
- ¹¹Lii sū: “Ọwa-a bṗkwa iphe-ekweru.” Ọo ya bụ; ọ gṗa ya Gadu.
- ¹²Ohu Lii ono, bụ Zilipa bya anwṗta nwa nwoke k'ẹbo.
- ¹³Ọo ya bụ; Lii sū: “Ehu atsṗshikwa mu ṗtso ike; nta-a bẹ ṗnwanyi a-nṗdu eku mu onye a gṗru ehu-ṗtso nṗ.” O woru nwata ọbu gṗa Asha.
- ¹⁴O be teke ebuje witi; Rúbenu tṗgbua je l'ẹgu; ọ hūma akpuru mandureku; ọ wṗta iya je anṗ ne iya, bụ Lii. Rechiṗlu sṗ Lii: “Jiko hṗnaa mu akpuru mandureku, nwa ngu wṗtaru ngu.”
- ¹⁵Obenu l'ọ sṗru iya: “? Ji mu ọphu i natarṗ mu teke asṗduru ngu; i nṗdu emefṗa g'i nata mu akpuru mandureku, nwa mu nṗru mu?” Rechiṗlu sṗ iya: “O dṗ ree; g'ọ larṗ ngu l'ṗlo l'ṗnyashi-a l'ṗgwo akpuru mandureku nwa ngu ọbu.”
- ¹⁶Ọo ya bụ; Jiékoṗu shiṗpho l'ẹgu lwa l'ṗzenyashi mbṗku ono; Lii gba iya ndzuta je asṗ iya: “Lwakwaru mu l'ṗlo l'ṗnyashi-a! Mu gudeakwa akpuru mandureku nwa mu zṗa ngu!” Ọo ya bụ; ọ lwarṗ iya l'ṗlo l'ṗnyashi ono.
- ¹⁷Chileke ngaberṗ Lii nchṗ; ọ tsṗta ime bya anwṗtaru Jiékoṗu nwa nwoke k'ise.
- ¹⁸Ọo ya bụ; Lii sū: “Chileke buakwaru mu nggo; keṗe mu kutaru ohu mu kee Jiékoṗu; ọ luru.” O woru nwata ọbu gṗa Isaka.
- ¹⁹Lii tsṗta ime ọzo; bya anwṗtaru Jiékoṗu nwa nwoke k'ishii.
- ²⁰Lii bya asṗ: “Chileke meakwaru mu iphe-oma, parṗ ẹka. Nta-a bẹ mu mawaru lẹ ji mu a-kwabeje mu-a ṗbvù; eshinu mu nwṗtaru iya ṗnwu-okoro ishii.” Ọo ya bụ; o woru iya gṗa Zebulṗnu.
- ²¹E mechaa; ọ bya anwṗa nwamgbṗko bya eworu iya gṗa Dayina.
- ²²Chileke bya anyata Rechiṗlu; bya angaberṗ iya nchṗ bya eworu iya ẹkpa-nwa ghebe ọnu.
- ²³Ọ tsṗta ime; bya anwṗa nwa nwoke bya asṗ: “Chileke nafṗwaru mu iphe-iphere ono.”
- ²⁴Ọ gṗa ya Jióṗefu; keṗe ọ sṗru: “Gṗ Chipfu yekwakwaru mu nwa nwoke ọzo l'ọwa-a.”

Aturu Jiékoṗu azṗshi aka igwerigwe

- ²⁵Rechiṗlu nwṗchaepho Jióṗefu; Jiékoṗu sṗ Lebanṗ: “Dua mu gṗ mu laa ibe nna mu.
- ²⁶L'i haarṗ mu unyomu mu pṗṗ; waa ṗnwegirima mu, bṗ ndu mu jeru ngu ozi l'ishi pṗṗ-a; gṗ mu gude lashṗa. L'i mawaru gṗ mu jeberu ngu ozi.”

- 27**Lebanu sụ iya: “Ọ -buru lẹ mu dụ ngu l'obu eviya; jiko nọbanaa! Lẹ mu lewaru ẹnya g'iphe, aanwu; mu maru l'ọo iswi ẹhu ngu meru g'o gude Chipfu kebe mu l'oma ẹgube-a.”
- 28**Ọ sụkwa iya phọ: “Pfuia iphe, mu a-pfujẹ ngu gẹ mu apfujẹ ngu iya.”
- 29**Jiékpọ sụ iya: “I makpọwaru-a gẹ mu jeberu ngu ozi; waa g'iphe-edobe ngu gude zụ-beru gẹ mu eletaru ngu iya ẹnya.
- 30**Nwiphe nshii ono, i shi nweru teme mu bya ono bẹ hawa shii ẹgube-a. Kẹle ọobujeru; ibiya ọphu mu shiru Chipfu ekebe ngu l'oma. Nta-a buru; ? denuhunu teke mu a-gba mkpu ẹhu mu lẹ ndibe mu?”
- 31**Lebanu sụ iya: “? Bụ gunu bẹ mu a-pfujekwanu ngu?” Jiékpọ sụ iya: “Ta pfushi mu ugwo; ọ chĩa ọ -buru l'i kwetaru iphe, mu abya epfufu-a; mu echebaaru ngu aturu ngu.
- 32**Gẹ mu jephekota l'ẹka aturu ngu kuru ntanu-a; je ahoshikota aturu, tukashiru iphe oji; ọzoo ọphu dekaşiru iphe; waa iphe, bu nwaturu, jigburu uji; ye l'eghu, tukashiru ucha; ọzoo ọphu dekaşiru iphe. Ndu k'ono a-buru aswa ozi mu.
- 33**Mbu l'ii-mechaa maru lẹ mu bu onye ire-lanu. Lẹ-a; teke ọ bu l'e mecharu i bya ele ẹnya lẹ ndu k'ono, i gude pfua mu ugwo ono; i -huma iya egbu, atukashiduru ucha; ọphu o dekaşiduru iphe; ọzoo l'ọo nwaturu, ata budu k'ojii; l'ikua mu onye-oshi.”
- 34**Lebanu kweta bya asu iya: “G'ọ dẹkwapho g'i pfuru.”
- 35**Lẹ mboku ono gedegede bẹ ọ tugburu je ahoshikota mkpi, dekaşiru iphe; waa ndu ọphu tukashiru ucha; waa ne egbu mmanu ndu ọphu tukashiru ucha; yele ndu ọphu dekaşiru iphe; waa aturu, jikotaru uji g'ẹphe ha. Ndu k'ono bẹ ọ chiru nu unwegirima ibe iya g'ẹphe cheje.
- 36**Ọ chita phe je ije ujiku ẹto je edobe phe l'ẹka ono dokaha yebedua, bu Lebanu l'onwiya yele Jiékpọ. Jiékpọ nodu eche ndu ọphu ọ chi-phodoru.
- 37**Jiékpọ bya egbuta ekali-oshi oyi; ekali-oshi popula; waa oshi alumonu; waa oshi pulenu. Ọ bya aswabotachaa ekali-oshi ono egbo; mee ya; ọ dụ g'o dekaşiru iphe ọchaa.
- 38**Ọ bya ewota ekali-oshi ono, ọ swashiru egbo ono dobechaa l'iphe, eeyejeru iphe-edobe ono mini; ọo ya bu k'ọphu ẹphe a-nodujeepho iphe-edobe ono l'atatiphu nhamunha; m'ẹphe byatashia anguta mini. Ọ nodu abujeru; iphe-edobe ono -nodu ana okee; ẹphe -bya anguta mini;
- 39**ẹphe awata eshi okee l'atatiphu ekali-oshi ono. ẹphe bya anwushi nwa; ẹphe anwushia unwu, dekaşiru iphe; waa ọphu tukashiru iphe.
- 40**Jiékpọ bya ahoshia unwu iphe-edobe ono bya edobe iche; bya eworu ndu ọphu chiru yeru ndu ọphu dekaşiru iphe yele k'ojii pho, bu ke Lebanu pho. O shi ẹgube ono nweaharu iphe-edobe k'ẹka iya; ọphu ọochikobejeedu iya lẹ ke Lebanu.

⁴¹Ndu ọphu bụ nyee ya, gbashiru ike -najeepho okee; Jiékoṣu eje eworu ẹkali-oshi ono ye l'iphe, eeyejeru iphe-edobe mini ono dobe l'atatiphu phe; k'ọphu ẹphe e-shi okee le mgboru ẹkali-oshi ono.

⁴²O -rwua l'anụ ọphu dụ nyegenyege; o too dobeduru iya ẹkali-oshi ono. Oo ya bụ; e shi ẹgube ono iphe-edobe ono, ndu ọphu dụ nyegenyege laaru Lebanu; ndu ọphu shihuru ike laaru Jiékoṣu.

⁴³Jiékoṣu shi ẹgube ono kwatakpoọ nweru iphe mebyi enweru; bya enweru igwe iphe-edobe; gbashia ohu; unwanyi me unwoke; bya enweru inya-kamelu; yele nkapfu-igara.

Mbulembu 31

Jiékoṣu agbafu l'ibe Lebanu

¹Noo ya; a nonyaa; Jiékoṣu naha l'unwu Lebanu be epfu l'ọ tukowaru iphe, nna phe nweru chitachaa. L'iphemiphe ono, o nweru ono g'ọ ha be bukota ẹku nna phe be ọ bụ.

²Teme Jiékoṣu humakwapho l'ọ to buedu ge Lebanu shi emeru iya umere bu g'oomekwadu.

³Oo ya bụ; Chipfu su Jiékoṣu: “Tugbua lashia ibe nna ngu phe. Su-a; lapfu ndibe unu le mu no-a swiru ngu.”

⁴Ọ buru iya bụ; Jiékoṣu bya ezia g'e je ekuaru iya Rechielu waa Lii; ẹphe byapfuta iya l'egu l'eka anu, bu iphe-edobe iya doru.

⁵Ọ su phe: “Mu elekwa enya l'ọ to buedu ge nna unu shi emeru mu umere bu g'oomekwadu; ole Chileke ke nna mu phe noekwapho swiru mu.

⁶Unu makotaru le mu gude ike mu g'ọ ha jekotaru nna unu ozi.

⁷Obenu le nna unu riru mu urwu; gbanwee aswa ozi mu ugbo iri. Ole Chileke te ekwekwanu g'o meka mu iphe.

⁸Ọ -buru l'ọ suru l'oo ndu ọphu tukashiru iphe, bu aswa ozi mu; iphe-edobe ono awataepho anwushi unwu, tukashiru iphe. Teke ọ bu l'ọ suru l'oo ndu ọphu dekaashiru iphe, a-buru aswa ozi mu; iphe-edobe ono awataepho anwushi unwu, dekaashiru iphe.

⁹Oo ya bụ l'oo Chileke l'onwiya chitaru iphe-edobe nna unu chiru nu mu.

¹⁰“Le teke anu anaje okee be mu rwojeru nrwo ge mu humaru l'iphe-edobe ono ndu ọphu eshi okee be ndu ọphu dekaashiru iphe du iya; ndu ọphu tukashiru iphe dukwa iya pho.

¹¹Ojosi Chileke bya ekua mu oku le nrwo ono su: ‘Jiékoṣu!’ Mu za iya: ‘Owee!’

¹²Ọ su: ‘Palikpodapho enya apali huma l'iphe-edobe ono ndu ọphu eshi okee be ndu ọphu dekaashiru iphe du iya; ndu ọphu tukashiru iphe dukwa iya pho. Noo kele mu humakotawaru iphe, Lebanu emekotaje ngu.

13 O kwa mbèdua bụ Chileke kẹ Bètelu. Bètelu bụ ẹka ono, ị wụru manụ l'eli mkpuma ono; mbụ ẹka ono, ị nọ kwee ukwe-iphe ono. Sụ-a; gbèshikwa lufu l'alì-a nta-a nta-a; lashia ẹka a nwuru ngu.' “

14 Tòbudu iya bụ; Rechièlu yèe Lii bya eyeeru iya onu sụ iya: “? O dūru teke anyi e-ketakwadu oke l'iphe, shi l'ibe nna anyi?”

15 ? Nna anyi te ekuada anyi ndu ọhozo; mbụ l'ọ tọ buda l'o reru anyi erere; obenu l'o mephushichawaru okpoga, a pfuru iya l'ishi anyi g'ọ ha.

16 O doru ẹnya l'ẹku ono l'ophu, Chileke nataru nna anyi ono bụkotawa k'anyi; bya aburu k'unwu anyi. Ngwanu; menaa iphe, Chileke suru g'i mee!”

17 Oo ya bụ; Jiékoṗu bya eworu unwu iya; yèe unyomu iya kuru ye l'eli inya-kamèlu.

18 O bya achiru iphe-edobe iya g'ọ ha dobe l'ivuzo; yèe iphemiphe, o setakotaru lẹ Padanu-Arámu. O gude phẹ lashia ibe nna iya, bụ Áyizaku l'alì Kénanu.

19 Lebanu jeruro ebushi aturu iya ẹji. Rechièlu tugbushia bya akpaswata obu-nshi ibe nna iya ono, bụ Lebanu.

20 Tẹmanu; ọ bụkwarupho ezita bẹ Jiékoṗu zitaru onwiya ala l'èbe epfuru Lebanu ono, bụ onye Arámu ono lẹ ya alawa.

21 O chita iphemiphe, o nweru gude gbalaa; je adaghaa ẹnimu Yufurétisu; kwaseru uzo, shijaru oha úbvú Giladu lashia.

Lebanu achipyabe Jiékoṗu

22 O -rwua mboku k'eto; e pfuaru Lebanu lẹ Jiékoṗu phẹ gbalaakwaru.

23 O chita ndibe iya; ephe chia phẹ ujiku ẹsaa; bya agbapfu phẹ l'oha úbvú Giladu.

24 Chileke byapfuta Lebanu, onye Arámu lẹ nrwo l'enyashi bya asu iya: “Letanupho ẹnya! Ba adukwa iphe, ii-pfuru nu Jiékoṗu! Be pfukwaru iya opfu oma; ophu i pfukwaru iya ejo opfu!”

25 Oo ya bụ; Lebanu bya agbapfu Jiékoṗu. O buru l'oha úbvú Giladu bẹ Jiékoṗu kpoberu ulo-ekwa iya teke ono. Lebanu yèe ndu ephe l'iya swi bya akpobekwapho nkephe l'eka ono.

26 Lebanu sụ Jiékoṗu: “? Bụ gunu bẹ i meru egube-a? ? Denu g'o gude i zita onwongu ezita tugbua gẹ mu ba ma; chita unwada mu gẹ ndu a kpuru lẹ ndzu l'egu ọgu?”

27 ? Bụ gunu bẹ o gude ị nọdu agbala lẹ mpya; i zita onwongu tugbua gẹ mu ba ma; ophu i pfuduru mu iya; k'ophu mu e-gude ehu-utso; gude ebvu, aaku nkwa yèe une eye; gude bya edua unu?”

28 Ophu i kwekpodanu gẹ mu tsutsua unwu nwanwa mu; waa unwada mu onu; gude sụ phẹ tokwa ehu. I meru umere onye-eswe.

29 Mu gege emerwukwa ngu ehu; ome o to bu le Chileke ke nna ngu byapfutaru mu le nrwọ l'enyashi bya asu mu: 'Letanupho enya! Ba adukwa iphe, ii-pfuru nu Jiékoṗu! Be pfukwaru iya opfu oma; ophu iipfukwaru iya ejo opfu!'

30 Nta-a be i tugburu ala opfu l'oghoroko ibe nna ngu du ngu. Obenu ? bu gunu kparu iphe, i zitaru iteshi mu?"

31 Jiékoṗu su Lebanu: "O kwa ndzu shi agu mu; kele mu riru l'ii-nata mu unwu ngu k'ehuka.

32 Obenu l'o -buru l'i humaru onye gude iteshi ngu be onye ono ta anodukwa ndzu. Ngwa; nodu l'iphe ndu anyi l'ephe bu-a; gude eka ngu choo gi maru ? o nweru iphe ngu, mu gude? O -nweru ophu i humaru; wota iya!" Ge Jiékoṗu epfu nno be o to bukpoṑdanu l'o maru l'oo Rechielu be zitaru obu iteshi obu.

33 Oo ya bu; Lebanu bya abahu l'ulo-ekwa Jiékoṗu; waa ke Lii; waa le k'unwanyi ohu labo ono je achokota iya; ophu o dudu iphe, o humaru. O lufutaepho l'ulo-ekwa Lii; bya abahu l'ulo-ekwa Rechielu.

34 Ama le Rechielu woru obu-nshi ono nwua l'iphe, aanoduje anoo l'eli inya-kamelu; nopyabe iya anoo. Lebanu bya atuko iphe, no l'ulo-ekwa ono chighashia; ophu o dudu iphe, o humaru.

35 Rechielu su nna iya: "G'ehu te eghukwa ngu eghe; nana; le mu ta agbalihuduru agbalihu le gi byaru-a; l'o kwa nsọ nwanyi eme mu." O kwe iya hm; bya achoo obu-nshi ono nta-a; choo imo; ophu o humaduru iya.

36 Ehu ghushiaha Jiékoṗu eghe ike; o tsopyabe Lebanu uswo su iya: " ? Bukpoṑo gunu bu ejo-iphe obu, mu meru obu? ? Bu iphe-eji gunu be mu meru kparu iphe, iichi mu kpabekpabe nno?"

37 Nta-a, i tukoru ivu mu voghashicha-a; ? bu gunu be i humaru, bu nkengu? Wofuta iya l'atatiphu ndibe anyi le ngu-a; g'ephe pfua onye ophu acho opfu!

38 "Mu le ngu buwaru ukporo apha nta-a. Ophu aturu yee eghe ngu adudu ophu kwojeru nwa; ophu mu atsojeduru onu l'ebili, shi l'aturu ibe ngu;

39 Ophu mu apalatajeduru ngu odzu iphe-edobe ngu, anu-egbudu gburu; o chia mbedua be oobutajechia; i nodu asuje ge mu pfua ngu ugwo iphe ophu iphuru zitaru l'eswe; ozoo l'enyashi.

40 Lenaa g'o shi adujeru mu. L'eswe be anwu shi egheje mu eghege. O -rwua l'enyashi; mu anokota l'ogoyi abali; ophu mgbenya abyadu eshita mu enya.

41 Noo ge mu jekotaru iya l'ukporo apha ono, mu bukotaru l'ibe ngu ono. Mu jeru ngu ozi apha iri l'eno l'ishi unwada ngu; bya echeru ngu iphe-edobe apha ishii. I ghazia ugwo mu mgbo iri.

42 Ome Chileke ke nna mu; mbu Chileke ke Ebirhamu; waa onye Ayizaku atsu ebvu; ome o to no-kube mu; me imechaa gbabeghaa mu eka oto chia mu. Obenu le Chileke

humaru iphe-ehuka mu; waa ge mu eseberu akanya; bya abaarū ngu mba l'enyashi-a, larū nū-a.”

⁴³Lebanū sū Jiékoṗu: “Unwanyi-a bukwa unwada mu; unwegirima-a buru unwegirima mu; iphe-edobe-a buru mu nwe iya. Iphemiphe-a g'ò ha bukota nkemu. Olee ? bukwanu gunu be mu e-me l'ehu unwada mu obu; ozoo l'ehu unwegirima-a, ephe nwushiru-a?”

⁴⁴Ngwa; bya ge mu le ngu gbaa ndzu g'ò buru iphe, a-buru ekebe mu le ngu!”

⁴⁵Oo ya bu; Jiékoṗu bya apata mkpuma kpobe; o du g'itso.

⁴⁶O sū ndu ono, ephe l'iya bu ono g'ephe pakoo mkpuma. Ephe bya apakoo mkpuma ono kukobe l'eka lanu. Ephe nodu le mgboru ikpo mkpuma ono rigba nri.

⁴⁷Lebanū kua eka ono Jiga Sahaduta; Jiékoṗu kua ya Giladu.

⁴⁸Lebanū sū: “Ikpo mkpuma-a bu ekebe mu le ngu ntanu-a.” Noo iphe, kparu iphe, a guru iya Giladu.

⁴⁹E kukwaru iya pho Mizupa; noo kele o suru: “Ge Chipfu tukokwa mu le ngu chee nche; me anyi gbakashihuchaa; tugbua.

⁵⁰Teke o bu l'i meru unwada mu-a eji; ozoo l'i jeru alua unwanyi ozo; agufu ephebedua; a makwaru-a l'o to dudu onye anyi l'iya tuko nodu l'eka-a; ole gi nyatakwa le Chileke bu onye-ekebe mu le ngu.”

⁵¹Lebanū sukwapo Jiékoṗu: “Waa ikpo mkpuma-a; teme waa itso mkpuma-a, mu kpoberu l'echilabo mu le ngu.

⁵²Ikpo mkpuma-a bu ekebe; teme itso mkpuma-a bukwarupho ekebe le mu ta abyadu aghata iya; bya l'ibiya nkengu bya ngu emeka iphe. Ophu gubedua abyadu aghata iya abya ibiya nkemu abya mu emeka iphe.

⁵³Ge Chileke ke Ebirihamu, bu Chileke ke Naho; bya aburu Chileke ke nna phe kpee ikpe mu le ngu!” Oo ya bu; Jiékoṗu bya egude epha Chileke, bu Onye nna iya, bu Ayizaku atsu ebvu riaru iya nte.

⁵⁴O bya egwee ngweja l'eli ubvu l'eka ono; bya ezia abubu iya g'ephe bya le nri. Ephe richaa nri bya akwaa l'eka ono l'enyashi ono.

⁵⁵O -rwuepho l'onmewa utsu; Lebanū bya etsutsua unwu nwanwa iya; yee unwada iya onu; bya agoru onu-oma nu phe; bya adakobe; o buru iya ala unuphu.

Mbulumbu 32

Jiékoṗu akwakobe g'ephe le iso dzuda

¹Jiékoṗu tugbukwapo nkiya; o buru iya alala. O jenyaa; unwu ojozi Chileke wupfuta iya.

²Jiékoṗu humae phe pho; o su: “Ha! Ndu owa-a bukwa ndu ojogu ke Chileke!” O gua eka ono “Mahanayimu” bu iya bu odu labo.

- ³Jiékoṗu zia ndu-ozí g'èphe vuru iya ọ́zo jepfu nwune iya, bú Iso l'alí Siye, búkwapho alí ndu Edómu.
- ⁴Ọ́ bya ezia phẹ́ sù: “Waa iphe, unu e-pfuru nnajíuphu iya, bú Iso. Unu sù iya l'onye-ozí iya, bú Jiékoṗu sùkwaru l'ọ́o l'ibe Lebanù bẹ́ ya shi teke ono butaru; ọ́ búru ẹ́ka ono bẹ́ ya bu byasù nta-a.
- ⁵Ya nweru eswi; bya enweru nkapfù-igara; nweru aturu; yẹ́ eghu; nweru ohu; unwoke mẹ́ unwanyí. Ya ezi ndu-ozí iya-a g'èphe byapfuta nnajíuphu iya g'a maru ? ya a-dù iya l'obu?”
- ⁶Ndu ozí ono jechaa bya alwaphuta azù lwapfuta Jiékoṗu sù iya: “Èphe jepfukwaru nwune ngu ọ́bu, bú Iso. Nta-a bẹ́ o gudekwa unu umadzu gude abya ngu ndzuta.”
- ⁷Ndzù gùahaa Jiékoṗu; meji tọ́fu iya. Ọ́ bya ekee ndu èphe l'íya swí ọ́zo labọ́; bya ekekwapọ́ aturu waa eghu iya; kee eswi iya; mẹ́ ìnya-kamẹ́lu iya ọ́zo ẹ́bo ẹ́bo kwaphọ́.
- ⁸Ọ́ ríà sù: “Ọ́ -bùru lẹ́ Iso tsoru ndu kẹ́ mbù ọ́gu; oke lanù ọ́phuu, ghuduru nù phọ́ agbalakponu.”
- ⁹Jiékoṗu bya epfuru nù Chileke sù: “Gùbe Chileke kẹ́ nna mu oche, bú Ébiríhamu; Chileke kẹ́ nna mu, bú Áyízaku; gùbe Chipfu; onye sùru mu gẹ́ mu lapu azù l'alí, a nwùru mu; lapfu abùbu mu phẹ́; l'ii-me-a gẹ́ mu barahù.
- ¹⁰Obu ono, i goshíru l'í yeru mu ono; waa ememe, i meru mu iphe, i pfuru ono be ta agbakwarù mu. Teke mu daru ẹ́nyimu Jíódanu-a bú oshí-mpalẹ́ka bẹ́ mu pa kpoloko; obenu lẹ́ nta-a bẹ́ mu nwewaru iphe; k'ọ́phu mu tsukaharu iya ẹ́bo.
- ¹¹Mu epfu anù ngu g'í dzọ́o mu l'ẹ́ka nwune mu, bú Iso. Kẹ́le ndzù agù mu l'oo-tso mu ọ́gu; tsoo unwanyí ibe mu yẹ́ unwegirima phẹ́ ọ́gu kwaphọ́.
- ¹²Obenu l'í pfuru sù l'í mee mu gẹ́ mu barahù; l'iimee g'awa mu ha g'ẹ́ja, nọ́ l'eze-ẹ́nyimu; mbù g'èphe búru agùta agùta.”
- ¹³Ọ́ kwaa l'ẹ́ka ono l'ẹ́nyashi ono; bya eshi l'iphe, o nweru họtá iphe, oo-gude meeru Iso iphe-ọ́ma.
- ¹⁴Iphe, ọ́ họtáru bú ọ́kporo ne eghu iri; yẹ́ ọ́kporo mkpí; waa ọ́kporo ne aturu iri; yẹ́ ọ́kporo ebili;
- ¹⁵bya ahọtakwapọ́ ne ìnya-kamẹ́lu yẹ́ unwu iya ọ́kporo l'iri; waa ọ́kporo ne-eswi labọ́; yẹ́ oke-eswi iri; waa ọ́kporo ne nkapfù-igara; yẹ́ okee ya iri.
- ¹⁶Ọ́ dokọ́ta anù ono íche íche; bya eyekọ́ta ndu-ozí iya g'èphe leta iya ẹ́nya íche íche. Ọ́ sù ndu-ozí iya ono: “Unu vuru mu ọ́zo! Unu edoo onwunu íche íche gẹ́ ndu eche anù ọ́phuu ta tükobekwa onwophe lẹ́ ndu eche ọ́phuu!”
- ¹⁷Ọ́ sù ndu ọ́phu vu ọ́zo: “Ọ́ -bùru l'unu lẹ́ nwune mu, bú Iso dzuru; ọ́ jía; sù: ‘? Unu bú ndibe onye?’ tẹ́me ‘? Bù awe bẹ́ unu eje?’ tẹ́me ‘? Bù onye nwekọ́ta anù ono, awù l'atatíphu unu ono?’

¹⁸Iphe, unu e-pfu bu: ‘O kwa onye-ozu ngu, bu Jiékpóu nwe iya. O le o iphe, o nuru g'e wotaru nnajuphu iya, bu Iso; le yebedua, bu Jiékpóu etsokwa phe-a l'azu.’ “

¹⁹O pfuaru ndu k'ebó; waa ndu k'eto; me iphe, bukpuo g'ephe hakota, etso iphe-edobe ono; su phe: “O kwapho iphe ono, mu pfuru ono be unu e-pfujeru Iso; me unu l'iya dzuda.

²⁰Ole g'unu nyatajekwa su l'onye-ozu iya, bu Jiékpóu be etsokwa unu.” Iphe, Jiékpóu gude pfua nno bu l'o riru su l'ee-gude iphe ono, ya nuru e gude vuru uzo ono mee g'obu jidata iya. Su: “? A maru; ? oo-nata mu-a; me mu humae ya pho?”

²¹Oo ya bu; e rwutanu eku ono, Jiékpóu chieru g'a chie Iso ono vuru uzo; yebedua, bu Jiékpóu kwaa l'eka ono l'enyashi ono.

Jiékpóu yele Chileke agba mgba

²²L'enyashi ono be Jiékpóu dutaru unyomu iya ephenebo; waa unwanyi labo ono, bu ohu iya ono; waa unwu iya ephe n'iri le nanu je adaghaa nggele Jiaboku l'uzo eka eerwuje iya erwurwu.

²³O dughachae phe pho le nggele ono; o bya alaphu azu bya achifukota iphemiphe, o nweru l'azu iya ophuu kwapho.

²⁴O buwaru Jiékpóu nwekinyi iya no l'eka ono. Ephe le nwoke lanu gbaepho mgba gbiriri jasú l'uzo utsu.

²⁵A nonyaa; nwoke ono maerupho l'o to gudedu iya; o rwua Jiékpóu eka l'ishi nka; nka kpokafu iya g'ephe le nwoke ono agba mgba ono.

²⁶Nwoke ono su iya: “Haa mu ge mu laa; le nchi abohuwaa!” Jiékpóu sukwanu: “Mu taa hakwa ngu g'i laa; abudu l'i goru onu-oma nu mu.”

²⁷Nwoke ono su iya: “? Bu gunu bu epha ngu?” O su iya: “Oo Jiékpóu.”

²⁸Oo ya bu; nwoke ono su iya: “Epha ngu taa bueduru Jiékpóu; oo Izurelu be oo-buru; noo kele unu le Chileke; waa nemadzu gharu iya; i lwu-kpee.”

²⁹Jiékpóu su iya: “Jiko; konaaru mu epha ngu.” O su iya: “? Bu gunu meru iphe, ikpa ishi epha mu?” O goru onu-oma nu Jiékpóu l'eka ono.

³⁰Oo ya bu; Jiékpóu gua eka ono Peniyelu su: “Noo le mu humaru Chileke iphu l'iphu; bya anodukwadu ndzu.”

³¹Jiékpóu bya l'aghata Peniyelu; enyanwu wawaa. O nodu ete okpa; o buru nka ono, kpokafuru iya nu ono kparu iya.

³²Noo iphe, kparu iphe e -shi teke ono rwua ntanu-a be ndu Izurelu ta atajedu anu, nmopfuru le nka. Noo kele oo l'eka ono be a rwuru Jiékpóu eka obu.

Mbulumbu 33

Jiékpóu yele Iso edzuda

- ¹Jiékpọpọ jeshia ele ẹnya; ọ hụma Iso ẹka ẹphe l'unu ụmadzu, ọ chi, eje abya. Ọ bya eworu ụnwegirima iya keeru Lii; yee Rechielu; yee ụnwanyi labo ophuu, bu ohu iya ono.
- ²O duru ụnwanyi labo ono, bu ohu ono; yee ụnwu phe dobe l'ivuzo. O dotsota phe Lii yee ụnwu iya; bya eworu Rechielu yee Jiófefu dobe l'ikpazu.
- ³Yẹbedua vuta ụzo jeru jepfushia nwune iya ono; bya ephozeru iya ishi mgbo esaa le g'ooje ejepfu iya ono.
- ⁴Noo ya; Iso gbapfu Jiékọpọ je anmata iya akpa. Ọ bya eworu ẹka gbaqua ya l'olu bya etsutsua ya onu. Epe tuko wa ekwa.
- ⁵Iso jeshia apali ẹnya imeli; bya ahuma ụnwanyi ono; yee ụnwegirima ono; bya aja ya su: “? Bu ndu ole be unu l'ephe swi ono?” Jiékọpọ su iya: “O kwa ụnwegirima, Chileke nuru mube onye-ozu ngu shita l'eze-ipe-oma nkiya.”
- ⁶Ụnwanyi ono, bu ohu ono; yee ụnwegirima phe bya abyarwuta; bya ephozeru iya ishi.
- ⁷Lii yee ụnwegirima ibe iya bya abyarwuta bya ephozeru iya ishi. O -rwua l'ikpazu iya; Jiófefu yee Rechielu bya ephozekwaru iya pho ishi.
- ⁸Iso jia su: “? Bu gunu be ndu k'ophuu, epe l'iya dzuru l'uzo pho bu?” O su iya: “O bu nupho iphe, mu nuru ngu gude eme ge mu tuba gube nnajiuphu mu l'obu.”
- ⁹Obenu le Iso suru iya: “Waawaa. Nworuro iphe ngu; ophu mu nweru du-a shii.”
- ¹⁰Jiékpọpọ su: “E phokwaro! O -buru le mu du ngu l'obu; jiko natanu iphe ono, mu nuru ngu ono! Ahuma iphu ngu du g'onye eje ahuma iphu Chileke; eshinu i gude obu-oma nata mu.
- ¹¹Jiko nataro iphe ono, e wotaru ngu ono; noo kele Chileke meru mu eze-ipe-oma; mu nwekotaru iphe, mkpa iya duru mu.” Jiékọpọ rwoonyakpoepo; Iso nata iya.
- ¹²Iso su: “Unu g'anyi je! G'anyi l'unu tuko swiru!”
- ¹³Jiékpọpọ su iya: “Nnajiuphu; i maru l'ụnwegirima-a be okpu teke eshihudu ike. Teme mu emekwapho ge mu chikobe aturu waa eswi mu, nwushiru nwa k'ophuu. O -buru l'a chiru phe l'ehuka bu-a ujiku ophu be epe a-nwushihukota.
- ¹⁴Oo ya bu; nnajiuphu; vururo onye-ozu ngu uzo! Mu a-tokpoepo nwehu etso ndu ono, no l'ivuzo achu iphe-edobe ono; waa ụnwegirima gbiriri jasụ mu abyapfuta ngu le Siye.”
- ¹⁵Iso su: “Ge mu haphoduru ngu unwoke mu g'unu l'ephe swiru.” Jiékọpọ jia su: “? Bukwanu gunu be iijero eme nno? O bu-a ge mu maru eviya le mu du nnajiuphu mu l'obu.”
- ¹⁶Oo ya bu; Iso gbeshi mboku ono; o buru iya ala Siye.

¹⁷Jiékpọpu swiá ọzo Sukọtu; o jerwua Sukọtu bya akpua unuphu l'ẹka ono; bya atọaru iphe-edobe iya m̀kpù. Noo iphe, kparu iphe, a guberu ẹka ono Sukọtu.

¹⁸Jiékpọpu shiepho Padanu-Arámu; lwarwuta lẹ nchi-odoo lẹ mkpukpu Shẹkemu l'ali Kénanu; bya eburu l'ataphu mkpukpu ono.

¹⁹O gude ukporo mkpola-ochaa ise zuta unwu Hamo; mbu nna Shẹkemu ali ẹka o kpoberu ulo-ekwa iya.

²⁰O bya eworu oru-ngweja kpua l'ẹka ono; kua ya “Chileke, bu Chileke ke ndu Ízurelu.”

Mbulembu 34

Dayina yele ndu Shẹkemu

¹Noo ya; Dayina, bu nwada, Lii nwutaru Jiékpọpu; kparufushia unwanyi ndu ali ẹka ono.

²Shẹkemu, bu nwatibe Hamo onye Hevu, bu eze ndu onu egu ono humae ya pho; o duta iya; ephe l'iya kwaa; o pharwushia ya.

³Dayina; mbu nwada Jiékpọpu la iya l'ehu; o yee ya obu; bya emeaharu iya emereme.

⁴Shẹkemu su nna iya, bu Hamo g'o lutaru iya nwamgboko ono g'o buru nyee ya.

⁵Jiékpọpu numa lẹ nwada iya, bu Dayina be a pharwushiwaru; ophu o dudu iphe, o meru jasu ndibe iya lwa; kele teke o numaru iya be ephe no l'egu eche iphe-edobe iya.

⁶Oo ya bu; Hamo, bu nna Shẹkemu je g'ephe lẹ Jiékpọpu pfugbabe.

⁷Unwu Jiékpọpu numaepho iphe, nwuru nu bya alwatashia. Aphu yee ehueghu ji phe obu; noo kele Shẹkemu meru iphe-iphere kpua ndu Ízurelu; kele o jepfuru nwada Jiékpọpu, bu iphe, agbaduru g'o nwua.

⁸Hamo su phe: “Nwa mu, bu Shẹkemu be obu iya du lẹ nwada unu-a. Jiko unu kenaa ya ya g'o luru.

⁹G'anyi l'unu lugbaru nwanyi. Unu keje anyi nwada unu; unu alutaje k'anyi.

¹⁰Unu eburu l'echilabo anyi. Ali dabyikpoerupho iphoro noduru unu. Unu eburu iya; anyi l'unu azugba aswa; unu anodu iya kpata eku.”

¹¹Oo ya bu; Shẹkemu su nna Dayina; yee unwune iya: “Unu kwenu lẹ mu du unu l'obu; iphe, unu sukpoerupho ge mu nu unu be mu a-nu unu.

¹²Unu hua aswa nwada unu; yee iphe-oma, mu e-meru unu jasu g'oo-du-be unu ree. Iphe, bu iphe, unu suru ge mu kwaa be mu a-kwaru unu. Oo ephe g'unu kee mu nwamgboko-a ge mu luru.”

¹³Eshinu a pharwushiwaru Dayina apharwushi be unwu Jiékpọpu yeru Shẹkemu; yee nna iya onu eregede.

- 14 Ẹphe sù phẹ: “Tùswekwa! Anyi ta abyakwa eme iphe, dù nno. Anyi te ewokwaru nwada anyi eke nwoke, ebuduru úbvù. Ọo-búkwaru anyi iphe-iphere.
- 15 Iphe, e-meẹpho; anyi ekweta bú g'unu dù g'anyi dù; mbú g'iphe, bú nwoke lẹ ndu unu bushikọta úbvù.
- 16 Ọo ya bú; anyi ekee unu nwada anyi; anyi bedua alútaaha nwada unubẹdua. Anyi l'unu ebua ẹghirigha; bya aburu iphe lanu.
- 17 Obenu l'ọ -búru l'unu te ekwedu l'unu e-bushi úbvù; anyi eduta nwada anyi; tẹme anyi alakwaphọ.”
- 18 Iphe ono, ẹphe pfuru ono dù Hamọ yẹle nwa iya, bú Shẹkemu ree.
- 19 Ophu nwokorọbya ono, bú iya bú onye a kakọta akwabẹ úbvù l'ibe nna iya l'ophu ono akpọduru upfu eme iphe ono, ẹphe pfuru ono. Kẹle nwada Jiékoju dù iya l'obu.
- 20 Ọo ya bú; ẹphe tųgbua; mbú Hamọ yẹe nwa iya, bú Shẹkemu jeshia l'oguzo mkpukpu phẹ; g'ẹphe je epfuaru iya unwoke, bu lẹ mkpukpu ono.
- 21 Ẹphe jerwua bya asù phẹ: “Ndu-a bẹ umere phẹ dukwa ree. Aa-hakwa phẹ g'ẹphe buru l'alì anyi; nọdu iya agba nghọ; eshinu alì, ha ọsa nọduru phẹ. Anyi a-nọdu alù unwada phẹ; ẹphe alù k'anyi.
- 22 Ọle tẹme ndu ono ekwe buru l'echilabọ anyi bẹ ndu Shẹkemu bú m'ọ búru l'unubẹ unwoke kwetarù bushia úbvù; dù g'ẹphe bedua dù.
- 23? Unu ta amadù l'iphe-edobe waa ẹku phẹ; waa iphe, bú anù, ẹphe nweru enweru a-buru k'anyi? Ọo ya bú; unu g'anyi kweta iphe, ẹphe pfuru g'ẹphe eburu l'echilabọ anyi.”
- 24 Unwoke, lufutakotaru l'oguzo mkpukpu ono kwetakọta iphe, Hamọ yẹe nwa iya pfuru. Unwoke, bu lẹ mkpukpu ono bya ebushikọta úbvù g'ẹphe ha.
- 25 A nọepho ujiku ẹto, ẹphe buru úbvù ono; g'ẹphe anyakwadu ọnyá úbvù ono; unwu Jiékoju ẹbo, ndu ophu yẹle Dayina shi lẹ ne lanu, bú iya bú Simiyonu; waa Lívayi gbẹshi bya amita ogu-echi phẹ bahù lẹ mkpukpu ono je atuko unwoke mkpukpu ono g'ẹphe ha gbuẹbe l'ọtulupfu.
- 26 Ẹphe gbua Hamọ; yẹe nwa iya, bú Shẹkemu; bya eduta Dayina l'ulo ibe Shẹkemu tųgbua; ọ búru phẹ alala.
- 27 Unwu Jiékoju bya adajaa l'echi odzu ono; bya akwata iphe, ndu mkpukpu ono, pharwushiru nwune phẹ ono l'okwata.
- 28 Ẹphe kputa aturu waa egbu phẹ; waa eswi phẹ; waa nkafu-igara phẹ; bya atuko iphemiphe, bukota kẹ ndu mkpukpu ono gwetakọta; mbú gwetachaa ndu ophu nọ l'oma mkpukpu; mẹ ndu ophu nọ l'ẹgu.
- 29 Ẹphe gwetakọta ẹku phẹ; waa unwanyi phẹ; yẹe unwegirima phẹ; bya atuko iphemiphe, nọkota l'ulo phẹ gweta.

³⁰Tobudu iya bu; Jiékpó sù Simiyónu; yèe Lívayi: “Ègube iphe-èhuka òphu unu wobatakwanuru mu nta-a! Nta-a bè unu meru gè mu búru onye eshi ndu Kénanu; yèe ndu Pérezu ishi; mbù ndu bu l'alì-a. ? Ó kwa l'unu maru-a l'anyi parù nwanshiji? Ó - búru l'èphe chigbaberu onwophè byapfuta mu ògu bè mu lè ndibe mu a-bùkwaru mkpurupyata!”

³¹Èphe sù: “? Ó gbakwanuru g'èphe mee nwune anyi nwanyi gè nwanyi-ovuòba?”

Mbùlembu 35

Jiékpó alwaphuta azù lè Bètelu

¹Óo ya bu; Chileke sù Jiékpó: “Kwalita lashia mkpùkpù Bètelu je eburu. I -rwua l'ì kpùaru mube Chileke òru-ngwèja; mbù mube Chileke ono, byapfutaru ngu l'èka ono; teke iigbalaru nwune ngu, bu Iso-a.”

²Ó búru iya bu; Jiékpó sù ndibe iya; waa ndu èphe l'ìya bu: “Unu lwua iphe, bùkpoo agwa, unu gude; unu emee onwunu g'unu dù nsò; unu agbanwee uwe unu.

³Óo ya bu; unu agbèshi g'anyi je Bètelu gè mu je akpùaru Chileke òru-ngwèja l'èka ono, bu iya bu onye ono, nùmaru olu mu teke mu nò l'aphù; bya aburu onye ono, nò-kuberu mu l'èkameka ono, ya jekòtaru ono.”

⁴Noo ya; èphe tuko agwa ono, èphe gude ono; yèe iphe-nchi, èphe yeru lè nchi yeshia chiru nù Jiékpó; o likòta lè mkpula akpùrata, nò lè mgboru mkpùkpù Shèkemu.

⁵Èphe gweta tugbua; ndzù-agugu, shi l'èka Chileke rwupyabè mkpùkpù òphu nò-phègbaaru phè mgburugburu; k'òphu bu l'ò tò dùdu g'èphe ha, jeru achì ndibe Jiékpó ono òso.

⁶Jiékpó yèe ndu èphe l'ìya swì bya ejerwua mkpùkpù Luzu, bu iya bu Bètelu, nò l'alì Kénanu.

⁷Ó búru l'èka ono bè ó kpùru òru-ngwèja; bya agwa èka ono Elu Bètelu. Noo l'òo èka ono bè Chileke goshiru iya onwiya lè g'òogbalaru nwune iya.

⁸No iya; Debora, bu onye shi eleta Ribeka ènya nwùhu; e lia ya lè mkpula upfu akpùrata lè nsùda Bètelu. Óo ya bu; a gwa èka ono Alónu Bakutu.

⁹Jiékpó shichaèpho Padanu-Arámu Iwa; Chileke byapfuta iya òzo bya agòru ònu-òma nù iya.

¹⁰Chileke sù iya: “Èpha ngu bu Jiékpó; òle èpha ngu ta abùheduru Jiékpó; èpha ngu a-bùru Ízurelu.” Óo ya bu; ó gwa ya Ízurelu.

¹¹Chileke sù iya: “Óo mbèdua bu Chileke, bu Ókwoolemka. Unu zùà azùzù ka l'òtu. L'iimeta ndu a-bùru òha èka phè; bya emetakwaphò òhamoha òzo yekòberu phè. Ndu eze eshi ngu l'èhu fùta.

¹²Alì ono, mu nùru Ébirihamu; waa Áyizaku bè mu nùkwaru ngu phò; tème mu nùkwa iya phò unwu nwanwanwanwanwa ngu.”

¹³Chileke shi l'eka ọ nọ pfuru yeru iya ono tugbua ephekerephe.

¹⁴Jiékoṗu bya apalia mkpuma pfube l'eka ono, Chipfu nọ pfuru yeru iya ono; bya ekpua ya mee l'eli; kpua ya manụ gude gwaa Chileke.

¹⁵Jiékoṗu gua eka ono, Chileke nọ pfuru yeru iya ono Bẹtelu.

Anwuhu Rechielu yele Áyizaku

¹⁶Ephe shi le Bẹtelu tugbua. Ephe rwujeepho mgboru Ifurata; ime meahaa Rechielu. Ezeda iya kwatakpo tsuahaa ya l'ehu.

¹⁷Le teke ono, iphe shihuru ike g'ooome zeda ono be nwanyị, eswi iya ime suru iya: “Ge ndzu ba agushi ngu. O kwa nwa nwoke ozo be i nwuru.”

¹⁸O bya l'atubuhu unme k'anwuhu; o gua nwa iya nwoke ono Benoni. E mechaa; nna iya gua ya Benjiaminu.

¹⁹Noo ya; Rechielu nwuhu; e lia ya l'uzo Ifurata, bu iya bu Bẹtulehemu.

²⁰Jiékoṗu swita mkpuma pfube l'eli ilu iya. Mbụ byasụ ntanụ-a be mkpuma ono noekwapho l'eka ono egoshi l'oo ilu Rechielu.

²¹Ízurelu tugbukwa ozo; bya eje akpobe ulo-ekwa iya l'azu ulo-ephekerephe, bu Eda.

²²O buru le teke Ízurelu bu l'alị eka ono be Rúbenu jepfuru nyee nna iya, nna iya ta aludu okpobe alulu, bu Biliha. Nna iya, bu Ízurelu numa iya. Jiékoṗu nwutaru unwoke iri l'ebo.

²³Unwu ke Lii bu: Rúbenu, bu iya bu okpara Jiékoṗu; waa Simiyonu; waa Lívayi; waa Jiuda; waa Isaka; teme waa Zebulon.

²⁴Unwu ke Rechielu buru Jiósefu waa Benjiaminu.

²⁵Unwu ke Biliha, bu ohu Rechielu buru Danu waa Nafutali.

²⁶Unwu ke Zilipa, bu ohu Lii buru Gadu waa Asha. O buru ndu ono g'ephe ha bu unwu, a nwushikotaru Jiékoṗu l'alị Padanu-Arámu.

²⁷Jiékoṗu lwapfuta nna iya, bu Áyizaku le Mamure, nọ le mgboru Kiriyatu-Araba, bu iya bu Heburonu; l'eka Ébirihamu yee Áyizaku shi tuko buru.

²⁸Áyizaku noru ukporo apha tete.

²⁹Oo ya bu; o tua unme ikpazu iya; o buru iya anwuhu. O lapfu ndiche phe le g'o kahucharu; bya anoo apha, du igwerigwe. Unwu iya, bu Jiékoṗu yee Iso woru iya lia.

Mbulembu 36

Oshilokpa ke Iso

¹Waa oshilokpa Iso, bu iya bu Edomu baa:

²Iso luru unwanyi ndu Kėnanu. Epha phe bu Ada, bu nwada Elonu, onye Hetu; waa Oholibama, bu nwada Ana; bya aburu nwanwa Zibiyonu, onye Hevu;

- ³wakwapho Basumatu, bu nwada Ishimelu; bya aburu nwune Nebayotu.
- ⁴Ada nwutaru Iso Elifazu; Basumatu nwutaru iya Ruwelu;
- ⁵Oholibama nwutaru iya Jiwushi; waa Jielamu; waa Kora. Ndu ono bukota unwu Iso; o buru l'ali Kénanu be a no nwushiru iya ya.
- ⁶Iso bya eduta unyomu iya; waa unwu iya unwoke; yee ke nwanyi; mekpoo iphe, bukota ndibe iya g'ephe hakota; teme waa iphe-edobe iya; waa anu iya ndu ozo; mekpoo eku, o kpatakotaru le Kénanu g'o ha; gude lashia ali eka du enya; me a -gbe l'eka nwune iya Jiekopu bu.
- ⁷Èku phe pawaru eka; k'ophu o daghawaru g'ephe atuko buru l'eka lanu. Kèle iphe-edobe phe ono meru; ophu ali eka ono asuedu phe ebubu.
- ⁸Oo ya bu; Iso, bu iya bu Edomu je eburu l'oha ubvu Siye.
- ⁹Wa oshilokpa Iso, bu nna ndu Edomu l'oha ubvu Siye baa:
- ¹⁰Waa epha unwu Iso baa: Elifazu, bu iya bu nwa nwoke, Ada, bu nyee Iso nwutaru iya; waa Ruwelu, bu iya bu nwa nwoke, Basumatu, bukwapho nyee Iso nwutaru iya.
- ¹¹Unwu nwa nwoke ke Elifazu bu Temanu; waa Omaru; waa Zefo; waa Getamu; teme waa Kenazu.
- ¹²Nwa Iso; mbu Elifazu nweru nyee ya ophu o too ludu okpobe alulu, epha iya bu Timuna. Nwanyi ono nwutaru iya nwa nwoke, aza Amaleku. Ndu ono bukota unwu nwanwa Ada, bu nyee Iso.
- ¹³Unwu nwa nwoke ke Ruwelu bu: Nehatu; waa Zera; waa Shama; teme waa Miza. Ndu ono bukota unwu nwanwa Basumatu, bu nyee Iso.
- ¹⁴Unwu Oholibama, bu nyee Iso; mbu nwada Ana bya aburu nwanwa Zibiyonu nwutaru Iso bu: Jiwushi; waa Jielamu; teme waa Kora.
- ¹⁵Waa ndu-ishi l'oshilokpa Iso baa. Okpara Iso, bu Elifazu nwuru ndu-ishi, bu: Temanu; waa Omaru; waa Zefo; waa Kenazu;
- ¹⁶waa Kora; waa Getamu; teme waa Amaleku. Ndu ono bu ndu-ishi ali Edomu, shi l'eri Elifazu. Epe bu unwu nwanwa Ada.
- ¹⁷Ruwelu, bu nwa Iso, nwuru ndu-ishi, bu Nehatu; waa Zera; waa Shama; teme waa Miza. Ndu ono bu ndu-ishi ali Edomu ndu ophu shi l'eri Ruwelu. Epe bu unwu nwanwa nyee Iso, bu Basumatu.
- ¹⁸Oholibama, bu nyee Iso nwuru ndu-ishi, bu Jiwushi; Jielamu; teme waa Kora. Ndu ono bu ndu-ishi ndu ophu shi l'eri nyee Iso, bu Oholibama, bu nwatibe Ana.
- ¹⁹G'ephe hakota ono bu unwu Iso, bu iya bu Edomu; bya aburu phe bu ndu-ishi phe.
- ²⁰Waa unwu Siye, onye Horu, bu onye nwe ali ono baa: Lotanu; waa Shobalu; waa Zibiyonu; teme waa Ana;

- ²¹waa Dishonu; waa Eza; teme waa Dishanu. Unwu Siye ono, bu l'alị Edomu ono bu ndu-ishi ndu Hōru.
- ²²Unwu Lotanu bu Hori; waa Homamu. Timuna bu nwune Lotanu ke nwanyi.
- ²³Unwu Shobalu bu Aluvanu; waa Manahatu; waa Ebalu; waa Shefo; teme waa Onamu.
- ²⁴Unwu Zibiyonu bu Aya; waa Ana. Ana k'owa-a bu onye ophu humaru nggele, ekpo oku l'echiegu teke o shi eche nkapfu-igara nna iya, bu Zibiyonu.
- ²⁵Unwu Ana bu Dishonu; waa Oholibama, bu nwada iya.
- ²⁶Unwu Dishonu buru Hemudanu; waa Eshubanu; waa Ituranu; teme waa Keranu.
- ²⁷Unwu Eza bu Bilihanu; waa Zevanu; teme waa Ekanu.
- ²⁸Unwu Dishanu bu Uzu; waa Eranu.
- ²⁹Ndu bu ndu-ishi ndu Hōru bu: Lotanu; waa Shobalu; waa Zibiyonu; waa Ana;
- ³⁰waa Dishonu; waa Eza; teme waa Dishanu. Oo ephebedua bu ndu-ishi ndu Hōru; e-shi le g'ephe gude kekashia onwophe l'alị Siye obu.

Ndu bu eze l'alị ndu Edomu

- ³¹Owa-a bu ndu vuadaru uzo buru eze ndu Edomu; teme o nwejeru onye shi le Izurelu bya aburu eze:
- ³²Bela, bu nwatibe Beyo be bu eze ndu Edomu. Mkpukpu iya aza Dinuhaba.
- ³³Bela nwuhuepho; Jiobabu, bu nwatibe Zera, bu onye shi Bozura bya aburu eze l'onodu iya.
- ³⁴Jiobabu nwuhuepho; Hushamu, bu onye shi l'alị Temanu bya anochia enya iya buru eze.
- ³⁵Hushamu nwuhuepho; Hadadu, bu nwatibe Bedadu, bu onye lwu-kperu ndu Midiyanu l'alị Mowabu; bya aburu eze l'onodu iya. Mkpukpu nkiya aza Avitu.
- ³⁶Hadadu nwuhuepho; Samula, bu onye shi Measureka bya anochia enya iya buru eze.
- ³⁷Samula nwuhuepho; Shawulu, bu onye shi Rehobotu, no l'uzo onu enyimu Yufuretis; bya aburu eze nochia enya iya.
- ³⁸Shawulu nwuhuepho; Belu-hanani, bu nwatibe Akubo bya aburu eze l'onodu iya.
- ³⁹Belu-hanani, bu nwatibe Akubo nwuhuepho; Hadadu bya aburu eze l'onodu iya. Epha mkpukpu iya buru Pawu; epha nyee ya buru Mehetabelu, bu nwada Maturedi. Maturedi bukwanuru nwada Mezahabu.
- ⁴⁰Waa epha ndu-ishi l'oshilokpa Iso baa; wakwapho okpa-ipfu; yee ohamoha, ephe shigbaa, l'azagbaa epha phe baa. Timuna; waa Aluva; waa Jietetu;
- ⁴¹waa Oholibama; waa Ela; waa Pinonu;

⁴²waa Kenazu; waa Temanu; waa Mibiza;

⁴³waa Magudelu; teme waa Iramu. Ndu-a g'ephe ha bu ndu-ishi ndu Edomu; le g'ephe gude bua l'ali ono, ephe lwaru ono. Ephe bu ndibe Iso, bu nna ndu Edomu.

Mbulembu 37

Nrwọ, Jiósefu rwọru

¹Oo ya bu; Jiékoṣu buru l'ali ono, nna iya shi buru, bu iya bu ali Kénanu.

²Waa oshilokpa Jiékoṣu. Ge Jiósefu noerupho apha iri l'esaa be o shi etsojeru unwunna iya eche aturu; mbu unwu nyee nna iya, bu Biliha; waa Zilipa. O dooru nna phe ejo-iphe, unwunna iya ndu ophuu anoduje eme.

³No iya; Ízurelu ka eye Jiósefu obu eme le g'o yeru unwu iya ndu ophuu. Iphe, kparu iya nu buru l'oo nwa, a nwuru iya le nka. O bya akwaaru Jiósefu eguru uwe, ama ntumatu, chikashiru mkpo.

⁴Unwunna iya maerupho le nna phe ka iya eye obu eme le g'o yeru ephebedua; ephe kpo ya ashi; ophu ephe epfujeheduru opfu oma eyeru iya.

⁵Tobudu iya bu; Jiósefu rwoo nrwọ bya ezeeru unwunna iya ono nrwọ ono. O mee; o kabakpo phe ro adu ashi.

⁶O suru phe: “Unu gebe ge mu zeeru unu nrwọ, mu rwọru.

⁷Anyi esweshi upfu ereshi esweshi l'egu. A nonyaa; upfu ereshi nkemu gbalihu pfuru nhamunha; upfu iya k'unu bya anophee nkemu mgburugburu phozegbaaru iya.”

⁸Unwunna iya su iya: “? Iiri l'ii-mechaa buru eze anyi to? Mbu-a; ? buwaa ngu e-mecha buru onye-ishi anyi?” Nrwo ono, o rworu ono; yee opfu ono, o pfuru ono mee; o kabakpo phe ro adu ashi.

⁹No iya; o byakwa arwo nrwọ ozo; bya ezeeru unwunna iya ono ozo. Ono be o suru phe: “Unu gebe ge mu zeeru unu nrwọ ozo, mu rworu. Ogiya-a be mu rworu g'enyawu; waa onwa; waa kpokpode iri le nanu bya ephozeru mu ishi.”

¹⁰O zeeru iya pho nna iya g'o zeru iya unwunna iya; nna iya baaru iya mba su iya: “? Iphe owa-a, iirwo owa-a bu gunu? ? Bu le ne ngu; waa mbedua, bu nna ngu; waa unwunna ngu be e-mecha bya ephozeru ngu to?”

¹¹Unwunna iya jiaharu iya ijiyenya; obenu le nna iya kwakoberu iphe ono l'okpoma.

Unwunna Jiósefu ere iya

¹²Noo ya; unwunna iya chita aturu nna phe jeshia echeche le mgboru mkpukpu Shekemu.

¹³Oo ya bu; Ízurelu su Jiósefu: “Eshi ophu i maru l'unwunna ngu eche aturu le mgboru Shekemu bukwa gi bya ge mu zia ngu gi je agbaphe phe.” Jiósefu su nna iya l'o du ree.

- 14**Oo ya bu; o su iya: “Jiko jenu je agbaphee unwunna ngu phe; yee aturu phe; maru ? ehu duchaa phe-a ree? L'ilwa bya akaru mu g'o du.” O buru le nsuda Heburonu be o no zia ya ozi obu. O tugbua jeshia; bya ejerwua Shekemu.
- 15**O nweru nwoke humaru iya l'eka ogha-phe l'egu eka ono; bya ajia ya su: “? Bu gunu be ijicho?”
- 16**O su iya: “Mu elekwa enya unwunna mu. O -buru l'i maru eka epe no eche aturu phe; jiko tunuru mu onu iya.”
- 17**Nwoke ono su iya: “Epe shiakwa l'eka-a tugbuwa. Mu numakwaru teke epe shi epfu su g'ephe je Dotanu.” Oo ya bu; Jiosifu chooru unwunna iya jeshia; je ahuma phe le mgboru Dotanu.
- 18**Epe levukpo ya ro teke o nokwadu uzanya; bya awata achi idzu g'ephe e-shi gbua ya.
- 19**Epe su nwibe phe: “O-rwo-nrwo-a abyaje-o!”
- 20**Unu bya nta-a g'anyi gbua ya chie le nsu lanu l'eka-a. E -mechaa; anyi asu l'oo anu-egbudu gburu iya. G'anyi mawaruro ge nrwo iya ono e-me vaa.”
- 21**Rubenu numae ya pho bya emehaa g'o gbafuta iya. O su phe: “Unu g'anyi te egbushi iya egbugbu.
- 22**G'anyi be gbushi ochi. G'anyi chiechia ya le nsu lanu l'echiegu l'eka-a; g'anyi te edenyikwa iya eka.” Iphe, Rubenu gude pfua ya bu g'o dzoo ya duta iya duphuru nna iya azu ozo.
- 23**Jiosifu byarwutaepho eka unwunna iya ono no; epe gude iya yefu iya eguru uwe ono, o yeru ono, chikashiru mkpo ono;
- 24**bya akputa iya je echie le nsu. Nsu obu ta adudu iphe, du iya nu; ophu mini adudu iya.
- 25**Epe no-zetaepho anoo wata eri nri; epe jeshia ele enya bya ahuma ndu ije, shi l'eri Ishimelu; eka epe shi l'ali Giladu; epe l'inya-kamelu phe; vuru manu, eshi mkpo; waa unwu, eshikwapho mkpo; waa arwu, bu meru eje ala ali Ijiputu.
- 26**Jiuda su unwunna iya: “? Bu urwu gunu be anyi e-rita iya m'o buru l'anyi gburu nwanna anyi bya eworu mee ya domia?”
- 27**Unu g'anyi ree ya oshilokpa Ishimelu. G'o to dukwa iphe, anyi e-je iya ememe; eshi ophu o bu nwanna anyi; teme anyi buru mee lanu.” Unwunna iya kweta.
- 28**Ndu Midiyanu ono, agba ngho ono ghatashiepho; unwunna Jiosifu bya ekufuta iya le nsu ono; woru iya ree oshilokpa Ishimelu ono ukporo ekpa-ego mkpola-ochaa. Epe kputa iya lashia Ijiputu.
- 29**Rubenu byaepho le nsu ono bya ahuma le Jiosifu ta noedu iya; o gude ehu-eghu woru uwe iya gbajaa.

³⁰O jepfu unwunna iya phe je asu phe: “Nwata ono ta noekwa l'eka e chieru iya. ? Bukpoo awe be mu e-dobe iphu?”

³¹Noo ya; ephe bya achita uwe Jiosefu bya egbua egbu; woru uwe Jiosefu ono tsee le mee ya.

³²Ephe chita uwe ono, chikashiru mkpo ono chiphuru nna phe azu; su iya: “Anyi humakwaru iphe-a l'uzo; lekwa ya enya gi maru ? bu ke nwa ngu to to budu iya?”

³³Jiekopu bya elee enya; o buru iya. O su: “O kwa uwe nwa mu-o! O dukwa g'o bu anu-egbudu gburu iya. Oowaa! Nta-a be Jiosefu be anu-egbudu lajashiakwaru nanu nanu!”

³⁴Jiekopu woru uwe iya gbajaa; bya achita uwe aphu yee onwiya; bya araa ekwa nwa iya ono ujiku olemole.

³⁵Unwu iya k'unwoke; me unwada iya bya g'ephe dua ya obu. Ophu o kwedu g'a duta iya. O pfua su: “Mu a-gukwa aphu nwa mu-a jasu mu alapfu iya le maa.” O buru egube ono bu ge nna iya gude gua aphu iya.

³⁶No iya; ndu Midiyanu ono woru Jiosefu ree Potifa l'ali Ijiputu. Potifa ono bu onye lanu l'ime ndu Fero nuru oke-okwa; kele o bu ishi ndu ojogu, eche Fero nche.

Mbulumbu 38

Jiuda yele Tema

¹Le teke ono be Jiuda haru unwunna iya je; ephe le nwoke Adulamu, aza Hira buru.

²O buru l'eka ono be Jiuda no huma nwada nwoke Kenanu, epha iya bu Shuwa. O luta iya; ephe l'iya kwaa.

³O tsuta ime; bya anwua nwa nwoke a guru Eru.

⁴O tsuta ime ozo; bya anwua nwa nwoke; bya agua ya Onanu.

⁵O bya anwufua nwa nwoke lanu; bya agua ya Shela. O buru le Kezibu be o no nwua ya.

⁶Jiuda bya alutaru okpara iya bu Eru, nwanyi. Epha nwanyi ono bu Tema.

⁷Obenu le Eru, bu okpara Jiuda bu onye eme ejo-iphe l'enya Chipfu. Oo ya bu; Chipfu woru iya gbua.

⁸Oo ya bu; Jiuda su Onanu: “Duta nyee nwune ngu g'unu l'iya kwaa. Luru iya g'iishi nno togboru nwune ngu ako le mgboko.”

⁹Obenu le Onanu maru le nwa, nwanyi ono a-nwuta ta abuduru nkiya. O nodu abujeru; yee nyee nwune iya -nodu akwa; l'ogboshia unwuda l'ali g'eeshi ge nwune iya ta togbo ako.

¹⁰Iphe ono, oomeje ono buru ejo-iphe l'iphu Chipfu; o wokwaru iya pho gbua.

11E mechaa; Jiuda sụ nyee nwa iya, bụ Tema g'ọ laa ibe nna iya je eburu eburu kwabe jasụ teke Shela, bụ nwa iya evuta. Kele ọ riru sụ: “? A maru ? onye k'ono ta anwuhudunu g'unwune iya ndu ophuu nwuhuru.” Tema kwe hm laa ibe nna iya je eburu.

12A nonyakpoepho; nyee Jiuda, bụ nwada Shuwa nwuhu. Jiuda rokotachaepho ike l'anwuhu nyee ya ono; bya ejeshia Timina; l'eka eebushiru iya aturu iya eji. Onyà iya, bụ Hira, onye Adulamu tsoru iya.

13A bya edooru iya Tema le nna ji iya ejekwa Timina je ebushi aturu iya eji.

14O kweepho doo yefu uwe nwanyi, no l'ulo-maa, o yeru; bya eworu gerebe gerebe ekwa phua onwiya l'iphu g'a ta hube iya ama; bya eje anodu l'onu-abata, e shi abahu Enemu, bukwapho uzo, e shi eje Timina. Kele ọ maru le Shela vutawaru; obenu l'e te kuduru iya g'ọ bya g'ọ lupyabe iya ge ya buru nyee ya.

15Jiuda huma Tema; bya aria l'oo nwanyi-ovuoba; noo kele ọ phu-chiru onwiya iphu;

16ophu ọ madu l'oo nyee nwa iya. O duta iya je l'aguga gbororo bya asu iya g'ọ bya g'ephe l'iya je akwaa. O jia ya sụ: “? Bu gunu be ii-nu mu g'anyi le ngu kwaa obu?”

17Q sụ iya: “Mu e-shi l'iphe-edobe mu kpee ngu ada-eghu.” O kwe iya hm; bya asu iya: “? Ii-yekwanuru mu iphe l'itumo; ge mu gude jasụ l'jikputaru mu iya?”

18Q sụ iya: “? Bu gunu be mu e-yeru ngu l'itumo obu?” O sụ iya: “Oo iphe, agba l'eka ngu, eegudeje hube ngu ama; waa eri, tso iya nu; waa oshi-mpaleka ngu ono, i gude l'eka ono.” Q chiru iya nu iya; ephe l'iya je akwaa; o woru ime yee ya.

19Q tugbuepho bya eje aphufu ekwa ono, o shi phua l'iphu ono; bya eje eworu uwe nwanyi, no l'ulo-maa, o shi yee woru yephu azu.

20E mechaa; Jiuda bya akputa ada-eghu ono kpee onyà iya, onye Adulamu g'o je akpee nwanyi ono; chitaru iya iphe, o yeru iya l'itumo ono. O jee ophu ọ humaeduru nwanyi obu.

21Q jia ndu bu l'eka ono sụ: “? Denu nwanyi-ovuoba, shi nodu l'aguga uzo Enemu-a?” Epe sụ iya: “Nwanyi-ovuoba ta nojekwaru l'eka-a.”

22Oo ya bu; ọ laa je asu Jiuda le ya ta ahumakwaru iya. Teme ozo bu le ndu bu l'eka ono sukwaru le nwanyi-ovuoba ta nojeduru l'eka ono.

23Jiuda sụ: “G'a hakwaa ya g'o nwowaruro iphe, o gude; a -nonyaa; e gude iya gbaaharu anyi mgbonu. Eshi ophu mu kperu ngu ada-eghu, i gude je achokota iya; ophu i humaduru iya.”

24A nepho iphe, rwuru onwa eto; a bya asu Jiuda: “Tema, bu nyee nwa ngu be buakwaa nwanyi-ovuoba; mbu le-a; ọ dukwaa ime. O buru l'ovuoba ono be o vutaru iya.” Jiuda sụ: “Unu kpufuta iya g'e kegbua ya l'oku!”

²⁵A kpufutashia ya; o zia ozi g'e je ezia nna ji iya ono su iya l'ọ kwa onye nwe iphe-a be yeru iya ime ono. Su iya: “Maeshikwaru ? ii-du ike maru onye nwe iphe, agba l'eka eegudeje ahube nemadzu ama-a; waa eri, tso iya nu; waa oshi-mpaleka-a?”

²⁶Jiuda huma iphe ono bya amaru l'oo nkiya bya asu: “Ha! Nwanyị-a kakwa mu apfubekoto; eshi ophu mu sucharu le mu e-kuru iya nu nwa mu, bu Shela g'o luru. E mecha; ophu ephe l'iya alueduru.”

²⁷O rwue ya pho l'ezeda; a maru l'unwu ono du iya ebo l'epho.

²⁸Le g'oozeda be onye lanu wofutaru eka. Nwanyị, eswije ime bya ewota eba oghu, du uswe-uswe libe iya le nkwo-eka; bya asu l'oo onye owa-a bu ivuzo.

²⁹O wobaepho eka ono; nwune iya kwofuta. Nwanyị, eswi ime ono su: “? Bu g'i shiru kpakata uzo baa?” A gua ya Pérezu.

³⁰Oo ya bu; nwune iya onye ophu, a gbaeru eba oghu, du uswe-uswe le nkwo-eka ono lufuta; a gua ya Zera.

Mbulembu 39

Jiosefu yele nyee Potifa

¹Tobudu iya bu; e gude Jiosefu jerwua ali Ijiputu. O buru Potifa onye Ijiputu zuru iya ndu oshilokpa Ishimelu ono, gude iya jerwua ali Ijiputu ono. Potifa ono tso le ndu no l'oke-okwa. Yebedua bu onye-ishi ndu ojogu, anoduje eche Fero nche.

²Chipfu no-kube Jiosefu; o buru onye iphe ejehuru. O buru l'ulo nnajiuphu iya, bu nwoke Ijiputu ono.

³Nnajiuphu iya ono humaepho le Chipfu no-kube iya; teme le Chipfu emeje g'iphemiphe, Jiosefu ono eme vuru ire;

⁴Jiosefu du iya l'obu. O woru Jiosefu mee onye-ozu iya; mbu mee ya onye elekota unuphu ibe iya l'ophu enya; teme o wokwarupho iphemiphe, o nweru yekota iya l'eka g'o leta enya.

⁵Eshi teke ono, o woru unuphu ibe iya l'ophu; yee iphemiphe, o nweru enweru yekota Jiosefu l'eka g'o leta enya ono be Chipfu bya ekebeahaa nwoke Ijiputu ono l'oma shita l'ehu Jiosefu. Chipfu kebeahaa ya l'oma l'iphemiphe, o nweru enweru; je akpaa le ndu ophu no l'unuphu; me le ndu ophu no l'egu.

⁶Oo ya bu; o hakotaru Jiosefu eku iya l'ophu g'o leta enya. Ophu o duedu iphe, o nweru, ookpajekwadu ishi iya. Iphe, o maerupho kpoloko bu g'o ria nri. Jiosefu gbaru mkparawa bya amashi mma ike.

⁷A noepho nwanshii; Jiosefu guahaa nyee nnajiuphu iya ono; o su iya g'o bya g'ephe l'iya je akwa.

⁸Obenu le Jiosefu jikaru bya asukwapho nyee nnajiuphu iya ono: “A -gbe teke nnajiuphu mu meru mu onye-ishi iphemiphe, o nwekotaru be o to duedu iphe, eeme

l'unuphu-a, ọkpajekwadu ishi iya. Iphemiphe, o nweru g'ọ ha bẹ o yekotawaru mu l'ẹka gẹ mu leta ẹnya.

⁹Ophu ọ tọ dudu onye kabaa mu shii l'ulo-a. Ophu ọ dukwapho iphe, oowoharu mu ewoha gbahaa gubedua; kele i bu nyee ya. ? Denu gẹ mu e-shi mee ejo-iphe, du egube ono; mbu mee Chileke iphe-eji onoya?"

¹⁰O nodu anodujekpoeppo epfuru iya Jiosẹfu mbokumboku; obenu le Jiosẹfu te ekwedu g'ephe l'iya kwaa; mbukponu g'ephe l'iya no-kube ntse.

¹¹O be ujiku lanu; Jiosẹfu bahu l'ulo gẹ ya je ozi, duru iya nu. Teke ono bẹ ọ tọ dudu ndu-ozi ulo ono l'ophu m'onye lanu, no l'ime ulo ono;

¹²O gude iya l'uwe su iya g'ọ bya g'ephe l'iya kwaa. Jiosẹfu yefu uwe iya ono haa ya l'ẹka gbado ulo ono gbafu etezi.

¹³O maerupho le Jiosẹfu yefuru uwe iya haa ya l'ẹka gbafu etezi;

¹⁴O kua ndu-ozi ulo iya ndu ophu; su phe: "Unu lenu! Nwophu shi l'ali ndu Hiburu-a bẹ e dutaru dobe; g'ọ bya anyi eme iphe-iphere. O bataru l'ẹka-a bya g'anyi l'iya kwaa; mu chishia mkpu.

¹⁵O numaepho le mu chiaharu mkpu; ọ gbadoo mu uwe iya l'ẹka gbala gbafu etezi."

¹⁶O gude uwe ono gbiriri jasụ nnajiuphu Jiosẹfu bata.

¹⁷O bya eworu iya pfuaru iya su: "Nwohu ono, i zutaru, bu onye Hiburu ono bẹ shi eme g'ọ mee mu iphe-iphere ntanu-a.

¹⁸Mu wataepho echi mkpu; ọ gbadoo mu uwe iya l'ẹka gbala gbafu etezi."

¹⁹Nnajiuphu Jiosẹfu numaepho iphe ono, nyee ya pfuru iya ono su l'onoo g'ohu iya meru iya ya bu ono; ọ vuru oku wua ehu.

²⁰O kputa Jiosẹfu jeye l'oka-mkporo, eze atu-chije ndu mkporo iya. O le Jiosẹfu no le mkporo ono;

²¹Chipfu no-kube iya bya egoshi iya le ya yeru iya obu. O mee; Jiosẹfu du onye eche oka-mkporo ono nche l'obu.

²²Onye eche oka-mkporo ono woru Jiosẹfu mee ishi ndu nokota l'oka-mkporo ono. Iphemiphe, eemekota l'ẹka ono buru yebe Jiosẹfu bẹ e yeru iya l'ẹka.

²³Iphe, nowa Jiosẹfu l'ẹka bẹ onye eche oka-mkporo ono ta akpajedu ishi g'ee-me iya; noo kele Chipfu no-kube Jiosẹfu bya emee; iphemiphe, oome nodu evujeru ire.

Mbulumbu 40

Onye etsujeru Fero onu le mee; yele onye eghejeru iya buredi

¹O nweru teke a nonyaru; onye etsujeru eze ndu Ijiputu onu le mee; yee onye eghejeru iya buredi meswee nnajiuphu phe, bu eze ndu Ijiputu.

- ²Umadzu labo ono, ejeru iya ozi ono, bu onye-ishi ndu etsujeru iya onu le mee; waa onye-ishi ndu eghejeru iya buredi pho mee; ehu ghuahanaa Fero obu eghe.
- ³O ye phe l'oka-mkporo l'ibe onye-ishi ndu ojogu, anoduje eche Fero nche, bu eka a tu-chikwarupho Jiosefu.
- ⁴Onye-ishi ndu ojogu, anoduje eche Fero nche woru phe ye l'eka Jiosefu; o nodu eleta phe enya. Ephe nonyaepho l'eka ono;
- ⁵unwoke labo ono; mbu onye etsujeru eze ndu Ijiputu onu le mee; yee onye eghejeru iya buredi, bu ndu toko nodu le mkporo ono bya atuko rwo nrwo l'enyashi ujiku lanu. Nrwo ono nwecharu iphe, o futaru iche iche.
- ⁶Jiosefu bya l'utsu iya bya ahuma l'ephe adzu iphu.
- ⁷Oo ya bu; o jia ndu ono, bu ndu no l'oke-okwa Fero, a tukoru ephe le yebe Jiosefu tuchia l'ibe nnajuphu iya ono; su phe: “? Bu gunu kparu iphe, unu adzu iphu ke ntanu?”
- ⁸Ephe su l'ephenebo ono toko rwo nrwo; ophu o dudu onye a-koru phe iphe, nrwo ono futaru. Jiosefu su phe: “? Tobudu Chileke bu onye akoje iphe, a rworu le nrwo? Jiko unu zeeshikwaru mu nrwo ono, unu rworu ono.”
- ⁹Oo ya bu; onye-ishi ndu etsujeru Fero onu le mee bya ezeeru Jiosefu nrwo nkiya; su iya: “Mu rworu nrwo ge mu humaru vayinu l'atatiptu mu.
- ¹⁰Vayinu ono nweru ekali eto. O tuchaa ige; bya ajaa ajaja; bya amishia ke wogalaa; bya achashia.
- ¹¹Mu gude okoro Fero l'eka; bya ewota akpuru vayinu ono pyiru ye l'okoro Fero; bya eworu iya nu iya.”
- ¹²Jiosefu su iya: “Waa iphe, nrwo ono bu baa. Ekali-oshi eto ono bu ujiku eto.
- ¹³A -noepho ujiku eto; Fero abya edufuta ngu l'eka-a; bya edobe ngu l'onodu, i shi nodu; l'ibya agbaaharu Fero mee egube ono, i shi emeje teke ono, i shi buru onye etsujeru iya onu le mee pho.
- ¹⁴Teke iphemiphe adueru ngu pho le ree; jiko nyatakwa mu. Iphe-oma, ii-meru mu bu g'i pfuaru Fero opfu ehu mu dufuta mu l'oka-mkporo-a;
- ¹⁵kele o kwa ezita be e zitaru mu l'oshi l'alj ndu Hiburu. O rwukwaa l'eka-a; a bya atua mu mkporo l'ebe adu iphe, mu meru.”
- ¹⁶Onye-ishi ndu ophu eghejeru Fero buredi pho humaepho le Jiosefu kowaru nrwo ono ree; o su Jiosefu: “Mbedua rwokwarupho nrwo ge mu vu nkata buredi eto.
- ¹⁷Le nkata k'eli iya be e yeru iphe, du iche iche, e gheshiru Fero. Enu pheru bya eberu le nkata k'eli iya ono; bya awata avuka iphe, no le nkata ono, mu vu l'ishi ono.”
- ¹⁸Jiosefu su iya: “Waa iphe, o bu baa; nkata eto ono bu ujiku eto.
- ¹⁹A -noepho ujiku eto; Fero abya akpufuta ngu; je eworu ngu swigbua l'eli oshi. Enu abya avuka anu ngu.”

²⁰O beepho mbọku k'eto ono, gbaru l'eswe a nwuru Fero. O bya eshiaru ndu-ozu iya g'ephe ha nri obo-iphe. O bya edufuta onye-ishi ndu etsujeru iya onu le mee; yee onye-ishi ndu eghejeru iya buredi dobe l'ataphu ndu-ozu iya.

²¹O bya eworu onye-ishi ndu etsuje onu le mee dophu azu l'okwa iya ozo. O bya agbaaharu Fero mee g'o shi agbaru iya.

²²O bya eworu onye-ishi ndu eghejeru iya buredi pho swi-gbu l'eli oshi. O nwukotaephe ge Jiosefu suru phe l'oo-nwu.

²³Obenu l'onye-ishi ndu etsuru Fero onu le mee ono ta nyataeduru Jiosefu; o zohaa ya.

Mbulembu 41

Nrwo Fero

¹A noepho apha labo sugbaa ishi; Fero rwo nrwo. O gbepfuru l'aguga enyimu Nayilu.

²A bya ele enya; eswi esaa, du ubvu l'enya bya adu okporokpo shi l'enyimu Nayilu ono rwufutagba; bya anodugba l'aguga aka ono taaha nri.

³E mecha; eswi esaa ozo, du eji bya ajo ehu shikwapho l'enyimu ono rwufuta bya anokube ophu l'aguga enyimu ono l'aka ono.

⁴Eswi esaa ophu du eji bya ajo ehu pho bya atuko eswi esaa ophu du ubvu l'enya bya adu okporokpo pho lwekota. O mecha nno; Fero tehu.

⁵A nonyakwaa; mgbanya tu iya ozo; o rwo nrwo k'ebo. K'ogiya ono be o rwo nrwo g'ishi akpe esaa, du okporokpo bya adu ree photaru l'oshi akpe lanu.

⁶E mecha; ishi akpe esaa ozo, du mgbanya mgbanya, pherephere uzo enyanwu-awawa mebyishiru bya aphoshia l'oshi akpe ozo.

⁷Ishi akpe esaa ophu du mgbanya mgbanya pho bya atuko ishi akpe esaa ophu du okporokpo bya apho aphopho pho lwekota. Oo ya bu; Fero tehu; bya amaru l'iphemiphe ono bu le nrwo be o shi anwukota.

⁸A futa l'utsu; iphe ono nodu atsui iya l'ehu shii. O zia g'e je ekuaru iya ndu jibya; waa ndu mmamiphe ndu Ijiputu. Fero bya ezeeru phe nrwo ono. Ophu o dudu onye duru ike kooru iya iphe, nrwo ono bu.

⁹Onye-ishi ndu etsujeru Fero onu le mee su Fero: "Ntanu-a be mu nyatakwaru iphe, mu meru, adudu ree.

¹⁰O nweru teke ehu ghujeru gube Fero eghe l'aka anyibe ndu-ozu ngu no; i tua mu l'onye-ishi ndu eghejeru ngu buredi pho mkporo l'ulo ibe onye-ishi ndu ojogu, echeje gube Fero nche.

¹¹O -rwua enyashi ujiku lanu; anyi n'ebo tuko rwo nrwo; nrwo ono ephenebo nwecharu iphe, o bugbaa.

12O nweru nwokorɔbya Hiburu, bụ onye ohu onye-ishi ndu ojogu, echeje gube Fero nche, anyi l'iya tuko nodu l'eka ono. Anyi zeeru iya nrwo ono; o kooru anyi iphe, o bugbaa. Onyenonu be o kochaaruu iphe, nrwo nkiya bu.

13E mechaa; iphemiphe ono nwukotaerupho anyi g'o pfuru. Mbɛdua be e kuphuru azu l'okwa mu; e woru onye ophuu je aswi-gbua.”

14Oo ya bu; Fero zia g'e je ekua Jiɔsefu; a bya atufuta iya l'ulo-mkporo ono. O kpuchaa ishi bya agbanwee uwe iya bya ejeshia l'atatiphu Fero.

15Fero su Jiɔsefu: “Mu rworu nrwo; ophu o dudu onye duru ike kooru mu iphe, nrwo obu bu. Obenu le mu numaruu l'obujeru; teke e zeru ngu nrwo; li kooru onye ono iphe, o bu.”

16Jiɔsefu su Fero: “O to bukwa mbɛdua akoje iphe, nrwo bu. O kwa Chileke be a-koru gube Fero iphe, nrwo ono bu le g'oo-ji ngu epho.”

17Fero su Jiɔsefu: “Mu rworu nrwo ge mu pfuru le mgboru enyimu Nayilu;

18mu huma eswi esaa, du okporokpo bya adu ubvu l'enya g'o shi le mini ono rwufuta bya anodu l'aguga mini l'eka ono taaha nri.

19Ephe futachaa; eswi esaa ozo, du eji bya ajo ehu du garanyongu bya erwufutakwapho. Mbụ le mu teke ahuma-swee eswi, du-be eji egube ono l'ali Ijiputu!

20Eswi esaa k'ono, du garanyongu ono bya ajo ehu ono bya atuko eswi esaa ke mbu pho, du okporokpo pho takota lwee.

21Ephe taebachaa phe; ephe dukwapho njo adudu g'ephe du; k'ophu bu l'o to dudu onye e-kweta l'oo phe taru eswi ono. Mu tehu le mgbenya ono.

22“Mu byakwa ekuru mgbenya ozo; mu watakwa arwo nrwo. O be k'ogiya ono; mu huma ishi akpe esaa, phoru aphopho bya adu ree g'o photakotaru l'oshi akpe lanu.

23E mechaa; mu humakwapho ishi akpe esaa ozo, duchaa mgbapya mgbapya; bya aduchaa ke zitazita; teme pherephere uzo enyanwu-awawa zipyashia ya; o nwulwashihu anwulwashihu; g'o photakwarupho.

24Ishi akpe k'ono, du mgbapya mgbapya ono bya atuko ndu ophu du ree pho lwekota. Mu bya ezeeru iya ndu jibya; ophu o dudu onye duru ike kooru mu iphe, nrwo obu bu.”

25Noo ya; Jiɔsefu su Fero: “Nrwo labo ono bukwa iphe lanu be o bu. Chileke meru g'o kooru gube Fero iphe, ya abya ememe.

26Eswi esaa pho, du ree pho bu apha esaa; teme ishi akpe esaa pho, du ree pho bukwarupho apha esaa. Oo ya bu le nrwo ono tukoru buru nrwo lanu.

27Eswi esaa ophu du eji bya ajo ehu, futaru nu ge ndu ophuu futachaerupho pho bu apha esaa. Teme ishi akpe esaa pho, du mgbapya mgbapya; pherephere, shi uzo enyanwu-awawa zipyashiru; o nwulwashihu anwulwashihu pho buru apha esaa, egu e-me.

28“O kwa-a iphe, mu pfuhawaru gube Fero-a be o bu. O kwa Chileke goshiru ngu iphe, yebe Chileke abya ememe.

29Su-a; l'ime apha esaa be nri a-kwatakpo du shii l'ali Ijiputu mgburugburu.

30Ole e -mechaa; apha esaa ophu egu e-meshi ike etsota iya. L'atuko apha esaa pho, nri shi du shii l'ali Ijiputu pho zohakota. Egu ono abya atuko ali ono nmaa swokoswoko.

31Apha, nri shi paa aka l'ali ono-a te enweedu onye anyata iya nu; noo kele egu ono a-buru ejo iphe-ehuka.

32Iphe, meru g'o gude gube Fero rwoo nrwo ono mgbo labo bu iphe obu be bu le Chileke chipyawaru iya rengurengu le ya e-me iya; teme ophu o duedu g'aa-no-beru; Chileke emee ya.

33“Nta-a bukwa ge gube Fero lee enya hota onye iphe edoje enya bya aburu onye maru iphe mee ya g'o buru ishi l'ali Ijiputu.

34Teme li hotakwapho ndu-ozu, a-no-tsota onye-ishi ali Ijiputu pho; g'ephe keje iphe, ndu Ijiputu kpataru l'opfu uzo ise wota oke lanu.

35G'ephe nakobe nri ono g'o ha l'apha k'ono, nri du ono. Teke ephe nakobecharu iya; ephe egude epha gube Fero je edobegbaa ya l'ulo aka eedobeje nri, nogbaa le mkpukpu le mkpukpu.

36L'e woru nri ono doberu ndu ali-a kwaberu apha esaa k'egu pho, a-bya le Ijiputu-a. Oo ya bu g'egu ete egbuchidu ali-a.”

37Iphe ono du Fero yee ndu-ozu iya l'ophu ree.

38Oo ya bu; Fero jja phe su: “? Anyi a-du ike ahumaba onye ozo, a-du ge nwoke-a; mbu onye unme Chileke bu l'ehu egube-a?”

39Noo ya; Fero su Jiosesu: “Eshi ophu Chileke meru gi makotaru iphemiphe-a be o to nwekwa onye ka ngu aburu onye iphe edoje enya; ophu o nwekwa onye ka ngu amaru iphe.

40Oo gubedua be a-buru ishi l'ibe mu; teme o buru iphe, i pfuru be onyemonye e-meje l'ali-eze mu. Iphe, mu e-gude ka ngu shii kpoloko buepho l'oo mbedua be bu eze.”

Jiosesu eleta ali Ijiputu l'ophu enya

41Noo ya; Fero su Jiosesu: “Nta-a buakwaa ngu be mu yekotaru ali Ijiputu l'ophu l'aka.”

42Oo ya bu; Fero gbata echi-eze iya woru gbabe Jiosesu le mkpushi-aka; bya eyee ya akpawuru-uwe; nyabe iya iphe-olu, e gude mkpola-ododo mee.

43O bya anu iya ugbo-inya iya k'ebo; o nodu agba. Ndu ozo vuta uzo agbo ogboo ekpu iya asuje: “Unu phozeru iya!” O buru iya bu le Fero eworu ali Ijiputu l'ophu woru yekota Jiosesu l'aka.

- ⁴⁴Fero sụ Jiósẹfu: “Ọ kwa mbẹdua bụ Fero; mbụ ị-a; ọ -bụru l'i ti pfuduru l'owa-a iphe, ee-me baa; te enwekwa onye nweru iphe, ọ byaru eme l'alị Ijiputu l'ophu.”
- ⁴⁵Fero gụa Jiósẹfu Zafunatu-Paneya bya eduta Asenatu, nwada Potifera onye uke ndu Onu kee ya g'ọ bụru nyee ya. Jiósẹfu bya ejedzuru alị Ijiputu l'ophu.
- ⁴⁶Jiósẹfu nọwaru ụkporo apha l'apha iri tẹme ọ wata ejeru Fero, bụ eze ndu Ijiputu ozi. Jiósẹfu shi l'iphu Fero tughua; bya ejedzuru alị Ijiputu.
- ⁴⁷L'apha ẹsaa ono, nri dụ ono bẹ alị meshikpọoru kẹ nri ree ike.
- ⁴⁸Jiósẹfu bya atụko nri, a kọtaru l'alị Ijiputu l'apha ẹsaa ono, nri dụ ono kwakọkota; dobegbaa ị mkpụkpu ị mkpụkpu l'alị Ijiputu. Ọobujeru; ọ -bya ị mkpụkpu k'owa-a l'ọ kwakọo nri, a kọtaru l'ẹgu, nọ-pheru iya mgburugburu doo ya.
- ⁴⁹Jiósẹfu kwakọephọ ereshi, e metaru l'opfu jasụ ọ kuta l'ikpo, ha g'evevee, nọ l'aguga eze-enyimu. Nri ọbu kwatakpọo paa ẹka k'ophu a nọnyaru; ọphu e dejeedu iya l'ekwo. Noo kele ọ bụwaa aguta aguta.
- ⁵⁰O rwutashia apha ọkpa-nri ono; Asenatu, nwada Potifera, onye uke ndu Onu nwutawaru iya unwegirima unwoke labọ.
- ⁵¹Jiósẹfu gụa onye ọphu bụ ọkpara iya Manáse; noo kele ọ sụru: “Chileke mewaru; mu zọhaa aphi, tsoru mu nụ; bya azọhaa ọkpoku ibe nna mu.”
- ⁵²Onye k'ẹbo bẹ ọ guru Ifuremu sụ: “Ọo Chileke bụ onye meru gẹ ya jaa àjàjà l'alị, ya shi nọdu eje iphe-ẹhuka.”
- ⁵³Apha ẹsaa, nri dụ shii l'alị Ijiputu phọ bya abvụ.
- ⁵⁴Apha ẹsaa k'ẹgu phọ bya awata; mbụ ọ nwụephọ gẹ Jiósẹfu pfuru ono; ọkpa-nri bya ị mgboko mgburugburu; ọ bụeruphọ alị Ijiputu bụ ẹka nri dụ.
- ⁵⁵Ẹgu meahaephọ ndu Ijiputu; ẹphe je araaru Fero kẹ nri. Fero sụ ndu Ijiputu l'ophu: “Unu jepfujẹ Jiósẹfu. Iphe, ọ sụkpọoru g'unu mee; unu emee ya!”
- ⁵⁶Ọkpa-nri ono jedzueruphọ alị ono; Jiósẹfu tughashia ụlo ẹka eedobeje nri reaha ndu Ijiputu nri; noo kele ẹgu ono emeshikpọ ike l'ekameka l'alị Ijiputu.
- ⁵⁷Ọhamoha l'ophu nọdu abyajẹ l'alị Ijiputu bya azuta Jiósẹfu nri; noo kele ẹgu ono emeshikpọ ike ị mgboko mgburugburu.

Mbulembu 42

Unwunna Jiósẹfu eje alị Ijiputu je azuta nri

- ¹Jiékpọ numaephọ ị nri dụ l'alị Ijiputu; ọ sụ unwu iya: “? Bụ gunu kparụ iphe, unu a-nọdu elegbaa nwibe unu ẹnya?”
- ²Ọ sụkwaphọ: “Mu nūmakwaru ị nri dụ l'alị Ijiputu. Unu jekwa ẹka ono je azutaru anyi nri ilile. Ọo ya bụ; g'anyi anọdu ndzụ; g'ẹgu te egbushi anyi.”
- ³Unwunna Jiósẹfu ụmadzụ iri bya atughbunaa jeshia azuta nri l'alị Ijiputu.

- ⁴Ọphu Jiékpọ ekwedu gẹ nwune Jiósefu, bú Benjiaminu tsoru phẹ. Noo kele ndzụ agu iya l'iphe-kpanganga e-me iya.
- ⁵Ọ buru iya bú l'unwu Ízurelu yi lẹ ndu jeru azuta nri ọbu; kele ọkpa-nri ono dukwapho l'alị Kénanu.
- ⁶Noo ya; ọ buru Jiósefu bú ọchi-ọha ndu Ijiputu ono; teme ọ buru iya anọduje ere ndu alị ono l'ọphu nri. Ọo ya bu; unwune Jiósefu byarwutaepho bya eworu iphu kpube l'alị baaru iya ẹja.
- ⁷Ahuma, Jiósefu ahuma unwunna iya; ọ hube phẹ ama; bya awataro eme umere g'ọ to madu ndu ephe bú; bya epfuharu phẹ opfu ehuka ehuka. Sụ phẹ: “? Bụ awe bẹ unu shi?” Ephe sụ l'ephe shikwa alị Kénanu bya azuta nri.
- ⁸Jiόsefu hubeepho unwunna iya ono ama; obenu l'ephebedua ta ahubeduru yebedua ama.
- ⁹Ọ bya anyata nrwo, o rwojeru k'ehu phẹ pho; bya asu phẹ: “Unu bú ndu ngge; unu byaru g'unu huma ẹka alị anyi dụ nyegenyege!”
- ¹⁰Ephe sụ iya: “Waawakwa nnajuphu; anyibe ndu-ozu ngu bukwa nri bẹ anyi byaru azuta.
- ¹¹G'anyi haa shikwa lẹ nna lanu. Anyibe ndu-ozu ngu epfukwa ire-lanu; anyi ta abukwa ndu ngge.”
- ¹²Ọ sụ phẹ: “Ọo ọka; unu byacharu-a g'unu huma ẹka alị anyi dụ nyegenyege!”
- ¹³Ephe sụ iya: “Anyibe ndu-ozu ngu dukwa iri l'ẹbo tuko shi lẹ nna lanu buru l'alị Kénanu. Onye ke nwata bẹ ephe lẹ nna anyi nokwa l'unuphu; onye lanu ta anọedu ndzụ.”
- ¹⁴Jiόsefu sụ phẹ: “Ọo gẹ mu pfuru unu-a bú g'ọ dụ; unu bú ndu ngge!”
- ¹⁵Waa g'ee-shi huta unu ama baa: Ọ -buru-a lẹ Fero no ndzụ g'ọ no iya-a bú g'iphe, mu epfu-a bú eviya l'unu ta abyadu ahata okpa l'eka-a tugbua; abudu lẹ nwune unu ke nwata bẹ e dutaru bya l'eka-a!
- ¹⁶Unu zia onye lanu l'ime unu g'o je eduta nwune unu ono; unube ndu ọphuu g'unu ha bẹ a-nodukota lẹ mkporo. Ọo ya bú l'ee-shi nno hua unu ama; maru me ọ bú-a ire-lanu bẹ unu epfu. Teke odumeka l'aamaru l'oo g'o doru enya lẹ Fero no ndzụ bú g'ọ bú eviya; l'oo ndu ngge bẹ unu bú.”
- ¹⁷Ọ tuko g'ephe ha je atu-chishikota lẹ mkporo; ephe noo ujiku ẹto.
- ¹⁸Ọ -rwua lẹ mboku k'eto; Jiόsefu sụ phẹ: “Unu -mewaa iphe-a, mu abya epfufu-a; mu ahaa unu g'unu nodu ndzụ; kele mu bú onye atsụ Chileke ebvu.
- ¹⁹Unu -sụ l'unu bú ndu ire-lanu; unu haa onye lanu lẹ g'unu ha g'ọ nodu lẹ mkporo; unube ndu ọphuu egude nri wojeru ndibe unu, no l'unuphu, ẹgu eme.

- 20**Ole unu dutafutajekwaru mu nwanna unu ke nwata obu; g'e shi egube ono maru l'unu epfu ire-lanu; g'e te egbukwanu unu." Epe kweta l'ephe e-me iya nno.
- 21**Epe nodu epfugbaru nwibe phe su: "O kwa iphe, anyi meru nwune anyi be aanu anyi aphu iya. Anyi humaru egube aphu, o guru kpua anyi teke oorwo anyi g'anyi dobe iya ndzu; obenu l'anyi te eyeduru iya onu. O kwa iphe ono meru g'o gude ejo aphu, du egube-a byapfuta anyi ntanu-a."
- 22**Ruben su: "? Mu ta asuduru unu g'o to dushi iphe, unu e-me nwata ono; ophu unu eyeduru onu? Nta-a be ishi ochi iya tu-konuru anyi l'ishi."
- 23**Epe dobesu l'eshi ophu a gbanweru Jiosesu opfu agbanwe be o to numaduru iphe, epe epfu.
- 24**O wofu iphu l'eka epe no kwashia enya-mini bya aghachikwaru phe iphu ozo; bya awata abo uja eyeru phe ozo. O zia; a kpufuta Simiyonu l'echilabo phe; kee ya egbu l'ataphu phe l'eka ono.
- 25**Jiosesu bya asu g'e yejishicharu phe nri l'eda phe; teme l'eeyephucharu phe okpoga phe azu l'eda phe; teme l'aanu phe nri, epe e-ri l'uzo. A bya emeebecharu phe iphemiphe ono;
- 26**epe bya apata eda nri ono nmakobechaa l'eli nkapfu-igara phe bya atugbua; o buru phe alala.
- 27**O -rwua l'eka epe no-zetaru k'akwakwa; onye lanu bya atohashia eda iya ge ya hata nri nu nkapfu-igara iya; okpoga iya noduwaa l'onu eda ono.
- 28**O su unwune iya: "Iyii; okpoga mu be a gbekwa yephuru mu azu! Wakwa iya no l'eda mu-a!" Meji tsukah phe; teme ehunodu aphukwa phe pho aphuphu. Epe su nwibe phe: "? Bu gunu be Chileke meru anyi egube-a?"
- 29**Epe lwapfuta nna phe Jiekopu l'alij Kenu; epe toko iphemiphe, nwuru phe nu kokotaru iya; su iya:
- 30**"Onye bu nnajiuphu l'alij ono be pfukwaru anyi opfu ehuka ehuka; bya emee anyi ge ndu byaru ngge l'alij phe.
- 31**Obenu l'anyi suru iya l'anyi bukwa ndu e gude ire phe aka; l'anyi ta abukwa ndu ngge.
- 32**Anyi dukwa unwoke iri l'ebo, shi le nna lanu. Onye lanu ta noedu; onye ke nwata be epe le nnana anyi no l'unuphu le Kenu.
- 33**"Noo ya; nnajiuphu ndu alij ono su anyi: 'Waa-a ge mu e-shi maru me unu bu ndu ire-lanu baa. G'anyi haa nwanna anyi onye lanu g'o nodu l'eka ono; anyibe ndu ophu e-wota nri wojeru ndibe anyi, no l'unuphu, egu eme.
- 34**Ole g'anyi dutaru iya nwanna anyi ke nwata pho. Oo ya bu; ya amaru l'anyi ta abudu ndu byaru ngge; l'anyi bu ndu e gude ire phe aka eviya. Oo ya bu; ya eduru nwanna anyi ono nu-phu anyi azu; anyi ejeahawaro g'o du anyi l'alij-a.' "

³⁵Ephe nọdu awufu nri ono l'eda phe; ephe huma ekpa okpoga phe g'ọ nọgbaa l'eda phe. Ephe le nna phe bya atukocha huma ekpa okpoga ono; ndzu rwuta phe.

³⁶Nna phe Jiékpọ sụ phe: “? Unu eme g'unwu mu bvuebe? Jiósẹfu ta nọhedu; ọphu Simiyonu anọedu; teme unu nọdu emefukwaapho g'unu natafua mu Benjiaminu. Mbẹdua bukpowa oshi ukpara-ẹhu.”

³⁷Rúbẹnu sụ nna iya: “Gbua unwegirima ibe mu-a ephenebo; m'ọ buru le mu te eduphutaduru ngu Benjiaminu azu. Woru iya ye mu l'eka; mu e-duphutaru ngu iya azu.”

³⁸Jiékpọ sụ phe: “Nwa mu te etsodu unu eje-o; kele nwune iya nwuhuwaru; ọ buwaru iya nwẹkinyi iya. O -nweru ejo-iphe, meru iya l'iphe ọzo ọbu, unu eje ọbu; unu emee ge mu gua aphu laa maa l'ishi ewo mu-a.”

Mbulembu 43

Unwunna Jiósẹfu alaphu azu l'alị Ijiputu

¹Egu ono nọdukwapo eme l'alị Kėnanu g'oome.

²Ndibe Jiékpọ rigbuẹpho nri pho, ephe shi l'alị Ijiputu gude pho; nna phe sụ phe: “Unu jebanaa je azutabaaru anyi nri!”

³Jiuda sụ iya: “Nwoke ono pfukwaru iya pfushia ya ike sụ l'anyi ta abyakwa ahumaba iphu iya; abudu l'anyi le nwanna anyi ọbu swi.

⁴Ọ -buru l'i kweru haaru anyi nwanna anyi ono g'o tsoru anyi be anyi e-jekwa-a je azutaru ngu nri.

⁵Ọ -bukwanuru l'i ti kwedu g'o je; be anyi te ejekwa; noo kele nwoke ono suru l'anyi ta ahumabaedu iphu iya; m'ọ budu l'anyi le nwanna anyi ono swi.”

⁶Ízurelu sụ: “? Denu g'ọ nwuru unu tugburu je epfuaharu nwoke ọbu l'unu nweru nwanna ọzo; shi nno mee; oke iphe-ẹhuka-a byapfuta mu?”

⁷Ephe sụ: “? Tọbodu nwoke ono jikpaaharu anyi onu le k'ẹhu anyi; waa k'unuphu ibe anyi? Ọ jiru sụ: “? Nna unu nọkwadu ndzu? ? Unu nwebaaru nwune ọzo?” Anyi kwenu ‘Ee’ bya eyeeru iya onu l'iphe, ọ jiru. ? Anyi makwanuru l'ọo-sụ g'anyi duta nwanna anyi ọbu bya?”

⁸Noo ya; Jiuda sụ Ízurelu, bu nna iya: “Denaa mu nwata-a g'anyi l'iya swiru; g'anyi agbeshi jeshia; k'ọphu anyibedua; waa gubedua; waa unwu anyi a-tuko nọdu ndzu; g'anyi ta nwuhushi.

⁹Ọo mbẹdua l'a-noduru ngu iya le mkpaleka. Ọ buru mu be ii-kpa ishi iya. Teke mu te eduphutaduru ngu iya azu; bya apfube ngu l'atatiphu; g'ọ buru mu be aa-nodu ata uta iya jaswaruro.

¹⁰Ọme anyi te eshi teke-a noduta; me anyi ejeakwa mgbo labo lwachawa.”

- 11Nna phe, bu Ízurelu su phe: “Ọ -bukpowaru l'ọo egube ono bu g'e mefutaje iya bukwa iphe, unu e-me bu g'unu wota mebyi iphe, kachaa ree, shi l'alị-a yee l'eda unu, unu a-nu nwoke ono. Unu meta nwa manu bamu; waa nwa manu-enu; waa etse; waa manu meru; waa akpuru oshi pisutasho; waa akpuru oshi alumundu.
- 12Unu wota okpoga mkpola-ochaa, ha g'ophu unu gude ogiya ophuu ugbo labo; kele unu e-je anu-phu phe ophuu, e yeru l'onu eda unu pho azu. ? A maru ? to budu nu emeswe be phe mesweru iya?
- 13Ngwa; unu duta nwune unu obu gude jepfu nwoke obu!
- 14Ge Chileke, bu Okwoolemka mee ge nwoke ono phuru unu obu-imemini; k'ophu oo-kwe ge nwune unu ophuu; waa Benjaminu toko swiru lwa. O -buru ke mbedua; o -buru l'ọo aphu a-tsoru mu; g'o tsowaru mu ro.”
- 15Oo ya bu; unwoke ono bya egweta iphe-anunu ono; bya ewota okpoga mkpola-ochaa ugbo labo; bya eduta Benjaminu; phe jeshia alị Ijiputu. Phe rwua bya apfuru l'iphu Jiósefu.
- 16Jióséfu humaepho l'phe le Benjaminu swi; o su onye-ozu ulo iya: “Duta ndu ono gude la ibe mu. Unu aphua anu terii gude shia ite; kele mu l'unwoke-a e-rigbakwa nri-eswe.”
- 17Nwoke ono bya emee ge Jióséfu pfuru; bya eduta phe lashia l'ulo Jióséfu.
- 18Ndu wata agu unwoke ono; kele e dutaru phe je edobe l'ulo Jióséfu. Phe su: “Iphe, e gude chiru anyi bya edobe l'eka-a a-bukwaru-a k'okpoga mkpola-ochaa pho, e yephuru anyi azu l'eda le mboku ke mbu pho, anyi byaru pho. O kwa iphe, ocho bu iphe, oo-su l'anyi meru kobe anyi opfu; mee anyi ohu iya; anyi le nkapfu-igara anyi.”
- 19Noo ya; phe jepfu onye-ozu Jióséfu l'onu mgbo ulo ono bya asu iya:
- 20“Jiko nnajiuphu; g'anyi byaru ogiya ophuu bya azuta nri;
- 21be anyi lashiaru bya ejerwua l'ulo ndu ije; anyi jeshia atoha eda anyi; bya ejeshia ele enya; okpoga onyemonye nodugbawa l'onu eda iya. Mbu; okpoga anyi obu hachaepho g'o ha. Nta-a be anyi gudekwa iya wophuta azu.
- 22Anyi gudefukwapho okpoga ozo, anyi e-gude zutaba nri. Anyi ta amakwa onye woru okpoga anyi ono yephuru anyi azu l'eda.”
- 23O su phe: “G'ehu dukwa unu guu! Ge ndu ta agushi unu! Oo Chileke unu; waa ke nna unu be yeru okpoga l'eda unu. Mu natakwaru-a okpoga unu ogiya ono.” O je atufuta Simiyonu duta byafuta phe.
- 24Onye-ozu Jióséfu duta ndu ono je edobe l'ulo Jióséfu ono; bya ekee phe mini; phe kwoo okpa; bya anu nkapfu-igara phe nri.
- 25Phe bya akwakobe iphe, phe gude, phe a-nu Jióséfu-a; mbu iphe, phe a-nu iya me o lwaepho l'eswe; kele phe numaru l'ọo l'eka ono be phe e-ri nri.

- ²⁶Jiósèfu lwaèpho unuphu; èphe wota iphe, èphe shi l'unuphu gude, èphe a-nu iya woru nu iya; èphe buaru iya iphu l'alì gude phozèru iya.
- ²⁷O bya ajìebekpo phè g'èphe dù sù phè: “? Dènu gè nna unu nwoke ògerenya-a, unu pfuru mu opfu iya-a dù? ? O dzùkwadu-a ndzu?”
- ²⁸Èphe sù iya: “Onye-ozì ngu, bù nna phè bè nòkwa-a ndzu; tème èhu dùkwa iya phò ree.” Èphe bya ephoze ishi baaru iya èja.
- ²⁹O bya apalia ènya bya ahùma nwune iya, bù Benjiaminu, onye òphu nene iya nwùkpooru gèdegede. O sù: “? Bù nwune unu kè nwata, unu pfuru mu opfu iya òbu baa?” O sù iya: “Nwa mu; gè Chileke meeru ngu eze-ìphe-òma!”
- ³⁰Imemini nwune iya onò dù iya. Jiósèfu tughua ègwègwa; je achò èka ò-òdu raa èkwa. O bahù lè mkpulabò iya je anòdu raa èkwa òbu.
- ³¹O swachaèpho iphu; ò lùfuta òzo; bya egude èka l'òbu sù g'e wotaru phè nri-a.
- ³²E doberu Jiósèfu nkiya ìche; bya edoberu unwunna iya phè nkèphè ìche; bya edoberu ndu Ijiputu, èphe l'ìya erigba nri nkèphè ìche; noo kèlè ndu Ijiputu bè èphe lè ndu Hiburu te erigbàbèjèdu nri; kèlè ò bù èbyi l'alì Ijiputu.
- ³³Ndu onò bè e doru; èphe gharu Jiósèfu iphu; doo phè g'ògerenya phè becharu. A - gbè l'òkpara jasù l'onye òphu bùcha nwata. Èphe ghachaa ènya lee nwibe phè gude goshi g'ò dù-be phè biribiri.
- ³⁴E shièpho lè tebùru kè Jiósèfu hèe phè iphe. Oke-ìphe kè Benjiaminu gude ụzo oke ise kachaa kè ndu òphuu shii. Èphe tũko tsoru Jiósèfu ria nri; bya angua g'ò dù phè.

Mbùlèmbu 44

Okoro mkpòla-òchaa Jiósèfu

- ¹Noo ya; Jiósèfu sù onye-ozì ụlò iya: “Je akwajishichaaru ndu onò nri l'èda phè; ò èpho g'èphe a-dù ìke vuru bè ìi-yerù phè; tème l'ìyephuchaaru onyemonye okpoga iya azù l'ònu èda iya.
- ²L'ìiwota okoro mkpòla-òchaa mu onò woru ye l'ònu èda onye kè nwata; tème wakwaphò okpoga, o gude bya azùta nri.” O bya emee gè Jiósèfu pfuru iya.
- ³Nchi bòhuepho; ndu onò tughua lashia; yèe nkàpfù-ìgara phè.
- ⁴Èphe shi lè mkpùkpù onò tughua; òlè èphe teke atughbu-mihudu lè teke Jiósèfu sùru onye-ozì iya: “Chipyabe ndu onò nta-a; teke ì gbapfueru phè phò; sù phè: “? Dènu g'ò nwuru unu gude èjo-ìphe pfua ụgwò iphe-òma, e meru unu?”
- ⁵? Tòbudu okoro, nnajìuphu mu anguje mini; tème ò nòdu egudeje iya aphù òphulènya bè unu gude nno? Iphe onò, unu meru onò bükwa èjo-ìphe bè unu meru!” “
- ⁶O gbapfu phè bya eworu iphe onò pfushikòtaru phè.
- ⁷Èphe sù iya: “? Dènu g'ò nwuru gùbe nnajìuphu anyi pfuru iphe, dù nno? Tuswekwa! Anyìbe ndu-ozì ngu ta adùkwa onye tũru ama eme iphe, dù nno!”

- ⁸Teme anyi shi l'alì Kénanu wolatakwarūro unu okpoga, anyi hūmaru l'ōnu ẹda anyi. ? Denu g'anyi e-shi zita mkpola-ododo; ọzoo k'ocha l'ulo ibe nnajiuphu ngu?
- ⁹Ọ -būru l'ọ dūru onye lanu l'ime anyibe ndu-ozì ngu, a hūmaru iya l'iphe iya; g'e gbua onye ọbu egbugbu; anyibe ndu ọphuu abukpooruro ohu gube nnajiuphu anyi."
- ¹⁰Ọ sū phẹ: "Ọ dū ree; g'ọ dū g'unu pfuru. Onye a hūmaru, gude iya nū bẹ a-būru ohu mu; unubẹ ndu ọphuu ta adukwa onye bya ata unu uta."
- ¹¹Onyenonu bya ezia ẹda iya l'alì ẹgwegwa; bya atōhaa ya.
- ¹²Onye-ozì ono bya awata iya achochō; shi l'onye ọphu bucha ọgerenya jasū l'onye ọphu bucha nwata. A hūma okoro ono l'ẹda Benjaminu.
- ¹³Ẹphe woru uwe phẹ gbajashia bya ebogbaa nkapfu-igara phẹ ivu phẹ; bya adakōbe laphushia azū lẹ mkpukpu ono.
- ¹⁴Jiósẹfu nọdukwadu l'ulo teke Jiuda yẹc unwunna iya bataru; bya azẹpho kẹ bẹc l'atatiphu iya.
- ¹⁵Jiósẹfu sū phẹ: "Ọ Denu g'ọ nwuru unu meru iphe, dū nno? ? Unu ta amadu l'onye gbaru gẹ mu aphuje ọphulenyā?"
- ¹⁶Jiuda sū: "Ọ Bū gūnu bẹ anyi a-dū ike pfuaru gube nnajiuphu mu? ? Denu g'anyi e-shi sū l'anyi pfuberu-ẹka-oto? Chileke mewaru g'ẹjo-iphe ndu-ozì ngu gbafuta iphe. Anyi būwaa ohu gube nnajiuphu anyi; anyibedua; waa onye a hūmaru okoro ono l'ẹka."
- ¹⁷Obenu lẹ Jiósẹfu sūru: "Tuswekwa! Mu ta abyakwa eme iphe, dū nno; ọo onye a hūmaru okoro ono l'iphe iya bẹ a-būru ohu mu. Unubẹ ndu ọphuu lashikporo lẹ chiriri werere lapfu nna unu."
- ¹⁸Noo ya; Jiuda bya ejepfu iya bya asū iya: "Gube nnajiuphu mu; kwenu gẹ mube onye-ozì ngu pfuru nwakpuru opfu lanu ye gube nnajiuphu mu lẹ nchì. Ọo eviya l'unu lẹ Fero būwaa iphe lanu; ọle jiko nū; g'umere mube onye-ozì ngu te emeshi nū g'ẹhu ghua ngu egħu.
- ¹⁹Gube nnajiuphu mu jiru anyibe ndu-ozì ngu sū: 'Ọ Unu nweru nna; waa nwune ọzo tọo?'
- ²⁰Anyi sū gube nnajiuphu mu lẹ nna anyi bukwa nwoke ọgerenya; teme l'ọ nweru nwata okoro, a nwuru iya lẹ nka. Nwune iya nwuhuwaru; ọ būwaa yẹbedua nwẹkinyi iya ghuduru l'ẹpho ne iya; teme nna iya ye iya obu shingushingu.
- ²¹"Tọbodu iya bụ; ị sū anyibe ndu-ozì ngu g'anyi dutaru ngu iya g'ì hūma.
- ²²Anyi sū gube nnajiuphu anyi lẹ nwata ono ta atugbukwa atugbu l'ẹka nna iya nọ. Ọ -būru l'ọ tūgburu bẹ nna iya a-nwuhukwa.
- ²³Obenu l'ì sūru anyibe ndu-ozì ngu: 'Ọ -būru lẹ nwune anyi kẹ nwata te etsoduru anyi bya ẹka-a bẹ anyi ta ahūmabaedu iphu ngu.'

²⁴Anyi laphuepho azu lapfu onye-ozu ngu, bu nnana anyi. Anyi bya epfuaru iya iphe, gube nnajuphu anyi pfuru.

²⁵“Noo ya; nna anyi su: ‘Unu tugbua je azutaba nri!’

²⁶Anyi su iya: ‘Anyi te ejekwa; abudu le nwanna anyi ke nwata be anyi eya swi; oo ya bu anyi eje; kele anyi ta ahumabaedu iphu nwoke ono; abudu l'anyi le nwanna anyi ke nwata swi.’

²⁷“Onye-ozu ngu, bu nna anyi su anyi: ‘? O kwa l'unu maru-a le nyee ya bu unwegirima unwoke labo b'owutaru.

²⁸Ophu onye lanu anodu; mu su l'anu-egbudu lajashiwaru iya; e -shi teke ono ophu mu ahumabaeduru iya.

²⁹O -buru l'unu dutafuaru onye owa tugbua; iphe-kpanganga -mee ya be unu e-mekwa g'ishi ewo mu gude aphu kpuba l'ali.’

³⁰“Oo ya bu; o -buru le nwata ono te etsodu anyi laphu azu jepfu onye-ozu ngu, bu nna anyi; teme o -buru le nna anyi, bu onye wotawaru ndzu nkiya tuswia le ke nwata-a

³¹humaru l'anyi le nwata ono ta aswudu be oo-nwuhukwa. Anyibe ndu-ozu ngu e-shi nno mee ge nna anyi guru aphu gude ishi ewo iya kpuba l'ali;

³²kele mube onye-ozu ngu no-dokwaru nwata ono l'itumo l'eka nna mu. Mbule le mu suru nna mu le teke mu te eduphutaduru iya ya azu; g'ow buru mu be aa-nodu ata uta iya jaswaruro.

³³“Oo ya bu; jiko ge mube onye-ozu ngu no-chinuru nwata ono l'eka-a buru ohu ngu. Haa nwata ono g'ephe l'unwune iya ndu ophuu swiru lashia;

³⁴kele-a; ? denu ge mu e-shi lapfu nna mu; m'ow buru le nwata ono be anyi l'iya ta aswudu? Jiko te ekwekwa ge mu je ahuma egube aphu, a-tsoru nna mu!”

Mbulembu 45

Jiosefu eme g'unwunna iya maru iya

¹Noo ya; ophu Jiosefu aduedu ike sede onwiya ozo l'ataphu iphe, bu ndu-ozu iya, pfu-kuberu iya nu. O chia mkpu; su: “Unu mee g'onymonye tugbua lufu l'ataphu mu!” A tuko wufu; ophu o duedu onye ephe l'iya nokwadu l'eka ono. Tobudu iya bu; Jiosefu gbete teke ono bya emee g'unwunna iya maru onye ya bu.

²O bya arashikpo ekwa ike k'ophu ndu Ijiputu numaru iya; teme ndibe Fero numakwa iya pho.

³Jiosefu su unwunna iya ono: “O kwa mbedua bu Jiosefu obu! Mbule-a; ? nna mu nokwadu ndzu too?” Ophu unwunna iya adudu ike ye onu yeru iya; noo kele ndzu rwupyaberu phe l'ataphu iya.

- ⁴Noo ya; Jiósefu sù ùnwunna iya: “Unu jiko kpìritaru mu ntse!” Èphe kwe hm bya akpìritaru iya ntse. Ọ sù phẹ: “Ọ kwa mbedua bụ nwanna unu, bụ Jiósefu; onye ọphu unu reru; e gude iya lashia alì Ijiputu-a.
- ⁵Ọle g'aphu te jishi unu obu; ọphu ẹhu anodushi eghu unu eghu l'unu reru mu; noo kele ọo gẹ mu dzọo unu ndzụ meru g'o gude Chileke zia mu gẹ mu vuru unu ụzo.
- ⁶Ọkpa-nri mewaru apha labọ l'alì-a; tẹme l'ime apha ise, abya nù bẹ ọ tọ dudu onye a-kobe iphe l'alì; ọphu ọ bụro k'akpata iphe, shi iya nù.
- ⁷Obenu lẹ Chileke ziru mu gẹ mu vuru unu ụzo; k'ọphu mu e-me g'awa unu phodu lẹ mgboko; waa gẹ mu a-dzọta ndzụ unu l'ụzo, dụ biribiri.
- ⁸“Ọo ya bụ lẹ-a; ọ tọ bukwa unubedua ziru mu gẹ mu bya l'ẹka-a; ọ kwa Chileke. Tẹme ọ bụru iya meru mu onye akpo-zijeru Fero ụzo; bya emee mu onye elekota ibe iya l'ọphu; waa onye-ishi ndu Ijiputu l'ọphu.
- ⁹Nta-a bukwa g'unu tugbua ẹwegwa lapfu nna mu je asu iya lẹ mube nwa iya, bụ Jiósefu sukwaru lẹ Chileke mewaru mu nnajuphu ndu Ijiputu l'ọphu. G'ọ lwatashikwa lwapfuta mu; g'o to jekwa akpo upfu;
- ¹⁰L'ẹka oo-buru bụ l'alì Goshenu; l'ẹka ọo-nọ-kube mu ntse; yebedua yee unwegirima ibe iya; waa unwu nwanwa iya; waa aturu iya; waa eswi iya; mewaro iphemiphe, o nwekporu enweru g'ọ ha.
- ¹¹L'oo-buru l'ẹka ono; mu a-zu iya; noo kele apha ise, ẹgu e-mefua nokwadu l'iphu. Odumeka bẹ ọkpa-nri a-dapfukwa yebedua yee ndibe iya l'ọphu; waa iphemiphe, o nwekporu enweru g'ọ ha.
- ¹²“Unubedua humawaru l'onwunu; tẹme nwune mu Benjaminu humakwapho l'ọo mbedua epfu opfu eyeru unu eviya.
- ¹³Unu kọkotaru nna mu k'egube ùbvù, a kwabẹru mu l'alì Ijiputu; tẹme waa k'iphemiphe, unu humakotaru l'onwunu. Unu je ẹwegwa je edutaru mu nna mu!”
- ¹⁴Noo ya; ọ gbakua nwune iya, bụ Benjaminu ẹka l'olu bya awaa ẹkwa; Benjaminu bya azukobe iya wata ara ẹkwa nkiya.
- ¹⁵Ọ bya etsutsua unwune iya ono onu g'ẹphe ha; bya araru ẹkwa kpua phẹ. E mechaa; ẹphe l'unwune iya ono wata abọ ụja.
- ¹⁶Noo ya; nzi ono rwuepho l'ibe Fero l'ùnwunna Jiósefu byaru; ẹhu tsoo Fero yee ndu-ozì iya g'ẹphe ha uto.
- ¹⁷Fero sù Jiósefu: “Pfuaru unwunna ngu sù phẹ g'ẹphe wota ivu phẹ tukobe l'eli anu phẹ gude lashia alì Kėnanu
- ¹⁸je eduta nna phẹ; waa ndibe phẹ l'ọphu gude lwapfuta iya. Mu a-nu phẹ alì Ijiputu ẹka kachaa ree. Mbù l'ọo ẹguru iphe, shi l'alì ono bẹ ẹphe a-nodu eri.
- ¹⁹Tẹme l'isukwa phẹ phọ g'ẹphe pata ugbo-inya ndu Ijiputu gude pata unwegirima phẹ; yee unyomu phẹ; waa nna phẹ gude bya.

²⁰Sụ phẹ g'ephe ta ayoshi oshi k'eku phẹ; noo kele iphe, kachaa ree l'alị Ijiputu bu nkephe.”

²¹Unwu Ízurelu bya emee nno. Jiósẹfu bya anụ phẹ ugbo-inya, dụ gẹ Fero pfuru; bya anukwa phẹ phọ nri, ephe e-ri l'ije ono.

²²Ọ bya anuchaa phẹ uwe òphúú. O be lẹ Benjaminu; ọ nụ iya ẹkpa mkpọla-ọchaa ẹto; waa ụzo uwe ise.

²³Iphe, ọ nuru g'a nụ nna iya bu: Nkapfu-igara iri, e dojiru iphe, kachaa ree lẹ Ijiputu edoji; teme waa ne nkapfu-igara iri, e dojiru ereshi; waa buredi; mewaro iphe ọzo, bu iphe, nna iya e-rije l'uzo teke ọo-nodu abya.

²⁴Ọo ya bu; o zia unwunna iya ono g'ephe tugbua lashia. Ọ sụ phẹ g'ephe ta swokwa uswo l'uzo.

²⁵Ọo ya bu; ephe shi l'alị Ijiputu tugbua lapfushia nna phẹ, bu Jiékpọu l'alị Kénanu.

²⁶Ephe sụ iya: “Jiósẹfu nokwa ndzu! Mbụ l'ọo yẹbedua bu onye-ishi ndu Ijiputu l'ophu.” Ọ tufu Jiékpọu ẹhu; ophu o kwetaduru l'ọo eviya.

²⁷Obenu l'ephe bya atukoepho iphemiphe, Jiósẹfu pfuru phẹ pfushikota; ọ humaepho ugbo-inya, Jiósẹfu nuru g'e gude bya apata iya; unme lwa nna phẹ azụ l'oru iya.

²⁸Ọ sụ: “Nta-a bẹ mu kwetawaru lẹ nwa mu Jiósẹfu nokwadu ndzu. Mu e-je ahuma iya ẹnya teme mu anwuhu.”

Mbulembu 46

Jiékpọu ala Ijiputu

¹Noo ya; Ízurelu bya egweta iphe, bu nkiya tugbua. Ọ rwuepho mkpukpu Biye-Sheba bya egweeru Chileke nna iya, bu Áyizaku ngweja.

²Noo ya; Chileke bya epfuru opfu yeru Ízurelu l'enyashi shita l'ophulenyanya sụ iya: “Jiékpọu! Jiékpọu!” Ọ za iya ẹnu.

³Ọ sụ iya: “Ọo mbedua bu Chileke; mbụ Chileke ke nna ngu phẹ.” Sụ: “Gẹ ndzu ala Ijiputu ta agushi ngu; noo kele mu e-me ngu g'i buru oha, parụ ẹka l'ẹka ono.

⁴Mu e-toru ngu je alị Ijiputu; teme mu eduphutakwa ngu phọ azụ ọzo. Teme ọo Jiósẹfu ono gẹdegede a-nodukpo swiru ngu teke ịi-nwuhu.”

⁵Noo ya; Jiékpọu parụ Biye-Sheba haa tugbua. Unwu Ízurelu bya apata nna phẹ, bu Jiékpọu; waa unwu phẹ; waa unyomu phẹ l'ugbo-inya ono, Fero nuru g'e gude pata iya ono.

⁶Ephe rwutakwaphọ iphe-edobe phẹ; waa ẹku, ephe setarụ l'alị Kénanu. Jiékpọu yee oshilokpa iya l'ophu lashia Ijiputu.

⁷Ọ bya edutakwaphọ unwu iya nwoke; waa unwu nwanwa iya nwoke; waa unwu iya nwanyi; waa unwu nwanwa iya nwanyi. Ọ tuko iphe, bukota awa iya l'ophu rwuta gude lashia Ijiputu.

- ⁸Waa epha unwu Ízurelu, laru alí Ijiputu baa; mbu Jiékoṗu; yee oshilokpa iya: Rúbenu, bu okpara Jiékoṗu.
- ⁹Unwu ke Rúbenu bu Hanoku; waa Palu; waa Hezuronu; waa Kami.
- ¹⁰Unwu ke Simiyonu bu Jimelu; waa Jiaminu; waa Ohadu; waa Jiakinu; waa Zoha; teme waa Shawulu; onye o nwuru; mbu nwanyi, shi l'alí Kénanu.
- ¹¹Unwu ke Lívayi bu Geshonu; waa Kohatu; teme waa Merari.
- ¹²Unwu ke Jiuda bu Eru; waa Onanu; waa Shela; waa Pérezu; waa Zera. Eru waa Onanu tuko nwushihuwa l'alí Kénanu. Unwu Pérezu bu Hezuronu; waa Hamulu.
- ¹³Unwu ke Isaka bu Tola; waa Puwa waa Jiobu; teme waa Shimuronu.
- ¹⁴Unwu ke Zebulun bu Seredu; waa Elonu; teme waa Jahulelu.
- ¹⁵Ndu ono g'ephe ha bu unwu, Lii nwutaru Jiékoṗu le Padanu-Arámu; a -gufukwa Dayina, bu nwa iya nwanyi. Unwu nwa nwoke iya ono yee ke nwanyi du umadzu ukporo l'iri l'eto mkpakota iya.
- ¹⁶Unwu ke Gadu bu Zefonu; waa Hagi; waa Shuni; waa Ezubonu; waa Eri; waa Arodi; teme waa Areli.
- ¹⁷Unwu ke Asha bu Imuna; waa Ishiva; waa Ishivi; teme waa Beraya. Nwune phe ke nwanyi bu Sera. Unwu Beraya bu Heba; waa Malukelu.
- ¹⁸Ndu ono bu unwu, Zilipa, nwutaru Jiékoṗu; mbu onye Lebanu kuru nu nwa iya nwanyi, bu Lii g'o buru ohu iya. Iphe, ephebedua tukoru du bu umadzu iri l'ishii.
- ¹⁹Unwu, Rechielu, nyee Jiékoṗu bu Jiósefu yee Benjiaminu.
- ²⁰L'alí Ijiputu be Jiósefu no nwuta Manase waa Ifuremu. O buru nwanyi, nwuru Jiósefu unwegirima ono bu Asenatu, bu nwada Potifera onye ishi-uke ndu Onu.
- ²¹Unwu ke Benjiaminu bu Bela; waa Beka; waa Ashibelu; waa Gera; waa Nemanu; waa Ehi; waa Roshi; waa Mupimu; waa Hupimu; teme waa Arudu.
- ²²Ndu ono bu unwu, Rechielu nwutaru Jiékoṗu. Ephe du umadzu iri l'eno le mkpakota iya.
- ²³Nwa ke Danu bu Hushimu.
- ²⁴Unwu ke Nafutali bu Jiahuzelu; waa Guni; waa Jieza; teme waa Shilemu.
- ²⁵Ndu ono bu unwu, Biliha, nwutaru Jiékoṗu; mbu onye Lebanu kuru nu nwa iya nwanyi, bu Rechielu g'o buru ohu iya. Ephe du umadzu esaa le mkpakota iya.
- ²⁶Ndu tso Jiékoṗu laa Ijiputu; a -gufukwa unyomu unwu iya; mbu ndu ophu bu oshilokpa iya gedegede du umadzu ukporo eto l'umadzu ishii.
- ²⁷A -bya eyekobe iya unwu labo ke Jiósefu, a nwutaru Jiósefu le Ijiputu; oshilokpa Jiékoṗu, laru Ijiputu du umadzu ukporo eto l'iri le mkpakota iya.

²⁸Noo ya; Jiékoṗu bya ezifū Jiuda g'o vuru ụzo jepfu Jiósefu; je eduta iya g'ephe dzuda l'alì Goshenu. Ephe jee jasụ l'alì Goshenu oḅu;

²⁹Jiósefu byanụ edozichaa ụgbo-inya iya; bya ejeshia alì Goshenu gẹ yẹle nna iya, bụ Ízureḷu dzuda. O bya egoshi iya onwiya bya agbakua ya ẹka l'olu; kukua ya l'olu l'ẹka ono wata ẹkwa; raa ya nọo odu.

³⁰Ízureḷu sụ Jiósefu: “Gẹ mu nwuhwaro nta-a; eshi oḅu mu gudewaa ẹnya mu ephebebo huma l'ì nọkwadu-a ndzụ!”

³¹Noo ya; Jiósefu sụ ụnwunna iya; waa ndibe nna iya l'ophu: “Mu e-jepfu Fero je asụ iya l'ụnwunna mu; waa ndibe nna mu l'ophu, shi buru l'alì Kénanu bẹ lwapfutawaru mu nụ.

³²Ndu ono bụ ndu eche aturu; mbụ l'ephe bụ ndu azụ iphe-edobe; teme waa l'ephe tükowa iphe pẹ; mecha aturu pẹ; me eswi pẹ; mekpoo iphe pẹ g'o ha rwuta.

³³Teke Fero kuru unu bya asụ: ‘? Bụ gunu bụ akanya, unu maru esese?’

³⁴Unu sụkwa iya l'unube ndu-ozì iya shikwa teke unu bụ nwata buru ndu azụ iphe-edobe; egube gẹ nna unu oche pẹ shihawaa butaru iya. Oo ya bụ l'eeke g'unu buru l'alì Goshenu; noo kele ndu eche aturu dụ ndu Ijiputu ashì.”

Mbulembu 47

¹Jiósefu bya ejepfu Fero je asụ iya: “Nna mu yee ụnwunna mu; waa aturu pẹ; waa eswi pẹ; yee iphe, ephe nweru enweru g'o ha bẹ shiakwa l'alì Kénanu byarwuta Goshenu.”

²O bya ahota ụnwunna iya ono ụmadzu ise; bya eduru pẹ jepfu Fero.

³Fero bya ajia ụnwunna Jiósefu sụ pẹ: “? bụ gunu bụ akanya, unu maru esese?” Ephe sụ Fero: “Anyibe ndu-ozì ngu bukwa ndu eche aturu. O kwapho egube ono bụ gẹ nna anyi oche pẹ shi bukwaru iya pho.”

⁴Ephe sụkwa iya pho: “Anyi byaru ebutota l'ẹka-a; noo kele okpa-nri paru ẹka l'alì Kénanu; oḅu aturu anyibe ndu-ozì ngu enwedu ẹka o-taje nri. Jiko hanaa g'anyibe ndu-ozì ngu buru l'alì Goshenu.”

⁵Fero sụ Jiósefu: “Nna ngu; waa ụnwunna ngu byapfutaakwaru ngu.

⁶Teme alì Ijiputu buwaru ngu bẹ o nọ l'ẹka. Hata ẹka kachaa ree l'alì-a woru nụ nna ngu; yee ụnwunna ngu g'ephe buru. Mbụ-a; woru alì Goshenu nụ pẹ g'ephe buru. O - buru l'ì maru ndu oḅu ejeshi ozi ike l'echilabo pẹ l'iimee pẹ ndu a-noduje echeru mu iphe-edobe nkemu.”

⁷Noo ya; Jiósefu bya eduta nna iya, bụ Jiékoṗu; bya eduru jepfu Fero. Jiékoṗu bya agoru onu-oma nụ Fero;

⁸Noo ya; Fero bya asụ Jiékoṗu: “I nọwaru apha ole?”

⁹Jiékọpu sụ Fero: “Apha, mu nọwaru lẹ mgboko bẹ rwuakwaru ụkporo apha ishii l'apha iri. Apha, mu nọwaru hakwa nwanshii; ọle ọo ẹpho iphe-ẹhuka bẹ mu gude ejeje; ọ nọdu eme gẹ mu ta nọ-rwu gẹ ndiche mu phẹ nọ-rwuru lẹ mgboko.”

¹⁰Jiékọpu bya agọru Fero ọnu-ọma; bya aburu iya atugbu.

¹¹Ọo ya bụ; Jiósefu bya emee gẹ nna iya; waa ụnwunna iya buru lẹ Ijiputu. Ọ nụ phẹ alị Ijiputu ẹka kachaa ree g'ẹphe buru, bụ iya bụ alị Ramesesu, bụ ẹgube Fero sụru g'o mee ya.

¹²Jiósẹfu nọdu azụkwapho nna iya; waa ụnwunna iya; waa iphe, bụkota ndibe nna iya l'ophu lẹ nri. Ọo ẹpho g'ụnwegirima phẹ habe bụ g'ọonu-bejeru phẹ nri.

Jiósẹfu yẹle ọkpa-nri ono

¹³Nri bvukotawa l'alị ono mgburugburu; noo kele ẹgu ono paru ẹka. Alị Ijiputu mẹ alị Kénanu tuko gbajoshihu; ọ buru shita l'ọkpa-nri ono.

¹⁴Ndu Ijiputu; yee Kénanu tuko okpoga, nọ l'alị phẹ gude pfu-gbua Jiósẹfu aswa nri, ẹphe zutaru. Jiósẹfu vutakota okpoga ono je akube l'ulo Fero.

¹⁵Okpoga ndu Ijiputu yee Kénanu -bvuepho; ndu Ijiputu lwapfuta Jiósẹfu bya asu iya: “Nụ anyi nri! ? Denu g'ọ nwuru anyi a-nọdu l'atatiphu ngu nwushihu? Okpoga anyi bẹ anyi kpagbuakwaru lẹ nri.”

¹⁶Jiósẹfu sụ phẹ: “Eshi ọphu okpoga unu bvụwaru; unu kpọtajenuru mu iphe-edobe unu; gẹ mu gude ree unu nri.”

¹⁷Ọo ya bụ; ẹphe nọdu akpọtajeru Jiósẹfu iphe-edobe phẹ; mbụ inya phẹ; mẹ aturu phẹ; mẹ egbu phẹ; mẹ eswi phẹ; mẹ nkapfu-igara phẹ. Ọ nọdu egudeje nri gbanweta phẹ iphe-edobe phẹ; shi nno zukota phẹ apha ono l'ophu.

¹⁸Apha k'ono -bvuepho; ẹphe byapfuta iya l'apha ọphu tsotaru iya nụ bya asu iya: “Anyi te ewohakwaru gube nnajiphu anyi iphe l'eshi ọphu okpoga anyi bvụwaru; teme iphe-edobe anyi bukotawaru nkengu; nta-a te nwehekwa iphe, anyi e-gude pfua gube nnajiphu anyi; abudu ishi onwanyi; waa alị anyi kpoloko.

¹⁹? Denu g'ọ nwuru anyi a-nọdu l'atatiphu ngu nwushihu; anyibedua l'ishi onwanyi; waa alị anyi? Zụa alị anyi; waa ishi onwanyi; g'ị nuje anyi nri. G'alị anyi bwaruro ke Fero. Teme anyibedua l'ishi onwanyi abukwarupho ohu iya. Nụ anyi akpuru iphe-akuku; g'anyi ta nwuhushi; k'ọphu alị-a ta abuduru echięu.”

²⁰Noo ya; Jiósẹfu bya azutakotaru Fero alị Ijiputu l'ophu. Ndu Ijiputu g'ẹphe ha rekota alị phẹ; noo kele ẹgu ono shi menuka phẹ. Alị ono bukotaru ke Fero.

²¹Jiósẹfu mee ndu Ijiputu; shita l'ishi iya ọphuu jasụ l'ishi iya ọphuu ohu.

²²Alị lanụ, ọ zuduru l'alị ono l'ophu bụ alị ndu-uke; noo kele ọo Fero anụ phẹ nri. Teme nri k'ono, Fero eketaję nụ phẹ ono nọdu asujeru phẹ. Noo iphe, meru g'o gude ọphu ẹphe ereduru nkephẹ.

- ²³Jiósèfu sù phẹ: “Eshinu mu zuru unu; waa alì unu ntanu-a nù Fero; wakwa akpuru-
iphe, unu a-kòbe l'alì baa.
- ²⁴Ole unu -kpatachaẹ ya phọ; unu keje iya ụzo ise nù Fero oke lanù. Ụzo ẹno k'ophuu
bẹ unu e-dobe g'ọ buru ophu unu a-kọ-phu azù l'alì. Tẹme ọ bukwaru iya phọ bẹ unu;
waa ndu unu l'ẹphe bu; waa ụnwegirima ibe unu e-rije.”
- ²⁵Ẹphe sù iya: “Ì dzọru anyi ndzù! Jiko g'anyi dù gùbe nnajiuphu anyi l'obu! Anyi a-
bukpooruro ohu Fero.”
- ²⁶Jiósèfu bya eworu ekemu tụa l'alì Ijiputu. Tẹme ekemu ono bẹ eemekwa byasu
ntanu-a. Ọ sùru l'oke lanù l'ụzo ise l'iphe, a kpatarù l'opfu bẹ aa-nùje Fero. Ọ buepho
alì ndu-uke bẹ ta abudu kẹ Fero kpoloko.
- ²⁷Ndu Ízurelu bya eburu l'alì Ijiputu l'alì Goshenu. Ẹphe buru l'ẹka ono daa ẹku; bya
azua ka l'otu.
- ²⁸Jiékpọ bua l'alì ndu Ijiputu mgbarapha iri l'ẹsaa; jasù teke ọ nọ-rwuru mgbarapha
ukporo ẹsaa l'apha ẹsaa.
- ²⁹O rwujeepho Ízurelu l'anwuhu; o kua nwa iya, bu Jiósèfu bya asù iya: “Ọ -buru l'i
yeru mu obu; jiko chìnuru ẹka ye mu l'ehe riaru mu angù; l'ii-goshi mu l'i yeru mu obu
bya aburu onye apfushije ike l'iphe, i pfuru; l'i tii lidu mu l'alì Ijiputu.
- ³⁰Mu -nwuhuepho lapfu nna mu oche phẹ; patakwa mu pafù l'alì Ijiputu je elia mu
l'ẹka e liru ẹphebedua!” Jiósèfu sù iya: “Mu e-mekọta g'i pfuru.”
- ³¹Ọ sù iya g'o riaru iya nte l'oo-me iya. Jiósèfu bya eriaru iya nte obu. Jiékpọ ze
l'iphe-azẹe ya phoze ishi gude baarù Chileke ẹja.

Mbulembu 48

Ọnu-ọma, Jiékpọ agọ anù Manáse; waa Ifuremu

- ¹Noo ya; o be ujiku lanù; g'iphemiphe ono mechaarù; a bya ezia Jiósèfu lẹ nna iya bẹ
iphe emekwa. O duta ụnwu iya ẹphenebo; Manáse; waa Ifuremu gude jeshia.
- ²A sùepho Jiékpọ: “Ọ kwa Jiósèfu nwa ngu byapfutaru ngu nta-a.” Ọ rọkota ike; bya
agbeshi nọdu anọo l'iphe, ọo zeje azẹe.
- ³Jiékpọ sù Jiósèfu: “Chileke, bu Ọkwoolemka byapfutakwaru mu lẹ Luzu, nọ l'alì
Kénanu; bya agọru ọnu-ọma nù mu l'ẹka ono;
- ⁴sù mu: ‘Lekwa; mu e-me ngu g'ì zùà azùzù; bya emee g'unu dù l'otu. Mu e-me ngu
g'ì buru ọha ẹka ngu; tẹme mu anù ngu alì-a g'ọ buru oke-iphe oshilọkpa ngu jasù lẹ
tuutuutuu lẹ mịmimii.’ “
- ⁵Jiékpọ sù iya: “Ụnwegirima labọ, ì nwutaru l'alì Ijiputu tẹme mu bya phọ; mbu
Ifuremu waa Manáse bẹ mu wotaru g'ụnwu, mu nwuru l'onwomu; ẹgube Rúbenu; waa
Simiyonu bu ụnwu mu ono.

⁶Unwu ọzo, aa-gbẹ nta-a nwutaru ngu a-buru unwu nkengu. Oke alì ọphu ẹphebedua a-hata bẹ e-shi l'ẹka unwune phẹ, bụ Ifuremu; waa Manáse.

⁷Gẹ mu shi alì Padanu alwa bẹ aphụ jiru mu obu teke Rechielu nwuhuru l'alì Kėnanu g'anyi nọkwadu lẹ gbororo lẹ mgboru alì Ifurata. Mu woru iya lia l'aguga ọzo; l'alì Ifuratu, bụ iya bụ Bětulehemu.”

⁸Ízurelu huma unwu Jiósefu bya asụ iya: “? Bụ ndu ole baa?”

⁹Jiósefu sụ nna iya: “Ọ kwa unwu, Chileke nuru mu.” Ízurelu sụ iya: “Dutaru mu phẹ gẹ mu ọoru ọnu-ọma nụ phẹ.”

¹⁰Teke ono bẹ Ízurelu aphuwaa ragaraga; kele ọ kahwaru. Ọ tọo phụ-rweedu aphurwe. Jiósefu duritaru iya unwu iya ono ntse; nna iya bya etsutsua phẹ ọnu; bya anmata phẹ akpa.

¹¹Ízurelu sụ Jiósefu: “Mu te eshikwa arikwadu lẹ mu e-mecha humaba ngu akpuru-ẹnnya ọzobaa; Chileke mechaa bya ahaa mu; mu humafua unwu ngu yekobe iya.”

¹²Jiósefu bya eduritaru phẹ lẹ mgboru ikpere nna iya; bya ephureta kpube iphu l'alì.

¹³Noo ya; Jiósefu bya esekputa ẹphenebo l'ẹka. Ifuremu bẹ o sekpu l'ekutara; ọ nọdukwanu Ízurelu l'ekicha; o sekpuru Manáse l'ekicha; ọ nọdu Ízurelu l'ekutara. O gude phẹ ẹgube ono byakube Ízurelu ntse.

¹⁴Obenu lẹ Ízurelu byaru l'agoru ọnu-ọma nụ phẹ; ọ gbanga ẹka iya ẹphenebo; woru ẹkutara iya byabẹ Ifuremu, bụ onye kẹ nwata l'ishi; bya atụ-kobe Manáse, bụ ọkpara ẹkicha.

¹⁵Ọ bya agoru Jiósefu ọnu-ọma sụ: “Gẹ Chileke ono, nna mu oche phẹ, bụ Ébirihamu; waa Áyizaku tsoru ọzo iya ono kebe unwegirima-a l'ọma. Mbụ Chileke ono, bụ Onyeneche mu e -shi teke a nwuru mu byasụ nta-a.

¹⁶Ọo ya bụ Ojozi-imigwe ono, dzotakotaru mu nụ l'ẹka iphe, bụ ẹjo-iphe, byapfutaru mu nụ ono. G'e kujekwa ẹpha unwegirima-a laa l'ẹpha mu; waa lẹ kẹ nna mu oche phẹ, bụ Ébirihamu; waa Áyizaku. Teme ẹphe adukwapho l'otu lẹ mgboko-a.”

¹⁷Jiósefu humaepho lẹ nna iya woru ẹkutara tų-kobe Ifuremu l'ishi; ẹhu gbangahụ iya. O je azụ nna iya l'ẹka; g'ọ lofu iya ẹka l'ishi Ifuremu lota tų-kobe l'ishi kẹ Manáse.

¹⁸Jiósefu sụ nna iya: “Waawakwa nna; ọ kwa onye k'ọgerenya baa! Wokwaru ẹkutara byabẹ yẹbedua l'ishi!”

¹⁹Nna iya jika sụ iya: “Mu maru-a nno nwa mu; mu maru-a lẹ yẹbedua bẹ a-jaakwapho buru ọha ọphu; teme ọha ono apakwaapho ẹka. Obenu lẹ nwune iya kẹ nwata bẹ a-ka iya shii; teme oshilokpa nkiya bẹ a-buru ikpoto ọha.”

²⁰Ọ ọoru ọnu-ọma nụ phẹ mbọku ono sụ: “Ndu Ízurelu e-gudeje ẹpha ngu ọọ ọnu-ọma sụ: ‘Gẹ Chileke mekwaa ngu g'ị dų gẹ Ifuremu yẹ Manáse.’ “ O shi ẹgube ono mee; Ifuremu ka Manáse shii.

²¹Ízurelu sù Jíósefu: “Mu abyaakwa anwuhu; ọle Chileke bẹ a-ọ-kubekwa unu duphu unu azu l'alì nna unu.

²²Ozo bụ lẹ-a; mu nwawaru ngu oke alì lanu g'i gude kangoo unwanwa ngu ndu ophuu. Alì ono bẹ mu gude ogu-echi waa apfu lwuta l'eka ndu Amoru.”

Mbulembu 49

Jiékpọu agọ ọnu-oma anu unwu iya

¹Noo ya; Jiékpọu bya ekua unwu iya; sù phẹ: “Unu dzukọbe gẹ mu kọoru unu iphe, a-nwuru unu l'atatiphu!

²Unu dzukọbe bya angabẹ nchì; unubẹ unwu Jiékpọu! Unu ngaberu nna unu, bụ Ízurelu nchì!

³Rúbenu; ọo gubedua bụ okpara mu; bya aburu ike mu; mbu l'ì bụ nwa ivuzo, mu nwuru teke ike du mu. Oo ngu bẹ a kachaa akwabẹ ùbvù; bya aburu ngu bẹ kakota okpehu.

⁴Eshinu inoduje atụ kpereree g'akpara-mini l'eme iphe, erwubeduru ngu nu; bẹ ì tii kaedu ndu ophuu shii; noo kele ì zeru l'iphe-azee nna ngu; mbu je eworu iphe, mu azeje aze merwua.

⁵Simiyonu; waa Lívayi bụ unwune. Epe egudeje ogu-echi phẹ emekpa ndu ozo ehu.

⁶Mu ta abyakwa ayiru l'idzù, epe achi; ophu mu abyakwa anodu l'echilabo phẹ; noo kele epe gude ehu-eghu gbushia nemadzu; bya egbubushia oke-eswi akwara azu okpa k'iwashi.

⁷G'ehu-eghu phẹ vuru onu; noo kele ooghughajeru phẹ eka. G'obu-oku phẹ vuru onu; noo kele opanukaje phẹ eka l'ehu. Mu a-chikashi-dzuru phẹ l'alì Jiékpọu; mbu dokashidzuru phẹ l'alì Ízurelu l'ophu.

⁸Jiuda; unwanwa ngu a-nduje ekele ngu ekele. Eka ngu a-zuchaa ndu ohogu ngu l'ekpiri ke pfurii. Unwanwa ngu g'ephe ha ephozeru ngu.

⁹Gube Jiuda bụ nwa oduma ebara. Gube nwa mu; i shiwaa l'eka i gbushiru iphe, i riru lwa. Nta-a bẹ o gbushiwaru ikpere ze aze g'oduma; mbu g'akahu oduma; ? bụ onye suru iya ekute?

¹⁰Jiuda ta abu-buhuduru eze abu-buhu; ophu mgboro-eze ono abyadu alufu iya alufu le mgbaka okpa; gbiriri jasụ teke onye o kuru ishi l'eka a-bya. O -byaephe bẹ oha l'ophu a-ngaberu iya nchì.

¹¹Nkapfu-igara iya bẹ oo-libeje le vayinu. Nwa nkapfu-igara iya bẹ oo-libeje l'ekali vayinu ono ophu mishiru mebyi ke wogalaa. Oo-saje uwe iya le mini akpuru vayinu. Akpuru vayinu ono, enwuje ke pfu gẹ mee ono bẹ oo-gudeje asa akpawuru-uwe iya.

¹²Mee e-me; enya achaa ya vaa. Era-eswi emee; eze acha iya phuuphuu.

- 13**Zebulunụ bẹ e-buru lẹ mgboru eze-onyimu. Agụga onyimu iya a-buru ọdu ụgbo-mini. Oke alị iya e-jerwu Sayịdonu.
- 14**Isaka bụ nkapfụ-igara, ọkphehu dū; mbụ gude ẹda labo, a nmakoberu iya l'okpurukpu ze azee.
- 15**Ọ hụmaepho g'eka oodzu ike dū-be ree; waa g'alị iya ono dū-be guu; o phozeta nmakota ivu-erwa iya jikoru l'ukuvu; bya ejeahaa ozi, e kebutaru iya g'o je.
- 16**Danu bẹ a-nọduje ekpe ndu nkiya ikpe, pfuru ọto; mbụ egube ono, ọkpa-ipfu Ízurelu ndu ọphuu ekpeje iya pho.
- 17**Danu a-dū g'agwo, nọ l'aguga ụzo; mbụ g'ogiji, nọ l'aguga gbororo, abujeru: Ọ -taa inya l'ichirupfu ọkpa l'ọ tufu onye agba iya nū l'azu.
- 18**Gube Chipfu; mu ele ọnya teke ii-dzota mu.
- 19**Gadu bẹ ndu ọ-lwua-olaa a-dapfu; ọle ọoghakobe chipyabe phe.
- 20**Asha bẹ a-nọdu akọ ọkpobe nri. Nri, ọo-nọdu akọ bụ nri, atso uto, gbaru ndu eze l'eriri.
- 21**Nafutali bụ ele, agbaphe g'ọ dū iya. Ọonwuje nwa, ama ntumatu.
- 22**Jiósẹfu bụ vayinu, amije ntumatu; ọ bụ vayinu, nọ-kube mgboru ẹka mini dū, amije mebyi shii. Ẹkali iya baa ụba tuko igbulọ sweta.
- 23**Ndu ọgba-apfụ gude ẹhu-eghu byapfuta iya ọgu. Ẹphe gbaru iya apfụ; shi nno mekpaa ya ẹhu.
- 24**Ọle apfụ iya keerupho jingujingu g'o keru; teme e mee ọkpu ẹka iya; o shihu ike. Ọ buru shita l'ike k'onye bụ Ọkalibe kẹ Jiékpọ; mbụ onye ono, bụ onye-nche; waa onye mgbobuta kẹ Ízurelu.
- 25**Onye ike ono shi l'eka bụ Chileke kẹ nna gube Jiósẹfu, bụ onye eyejeru ngu ẹka; mbụ onye ono, bụ Ọkwoolemka, bụ onye emejeru ngu iphe-oma. Oomejeru ngu iphe-oma ọphu shi l'imigwe; bya emejekwaru ngu pho iphe-oma ọphu shi lẹ mini ime-alị. Teme ọ buru iya bụ onye egudeje nwa; waa eche nwa era meeru ngu iphe-oma.
- 26**Onu-oma ọphu nna ngu goru ngu kakwa k'oke-úbvú ndiche shii; mbụ l'ọ kakwa iphe-oma ọphu úbvú, shi teke ndiche nọduta anuje shii. G'iphe-oma ono g'ọ hakota bukwaru kẹ Jiósẹfu; mbụ g'ọ bukotakwaru kẹ yẹbe onye ono, a hofutaru l'echilabo unwune iya dobe iche ono.
- 27**Benjaminu bụ ẹjo-nkuta-oswa, ẹgu alabushi akurepho. O -rwua l'utsu l'ọ gbua iphe taa. O -rwua l'uzenyashi l'ọ kee iphe, ọ lwutaru l'ogu.”
- 28**Ndu ono bukota ọkpa-ipfu Ízurelu ẹphe n'iri l'ẹbo. Teme iphe ono bukotaru iphe, nna phe pfuru yeru phe teke o goru phe onu-oma. Ọ gorerupho onyenonu onu-oma, rwuberu iya nū.

Anwụhu Jiékpọ

²⁹Noo ya; ọ bya ekeru ekpe nụ phẹ sụ: “Mu abyawaa alapfu ndiche mu phẹ. Unu likwa mu l'ẹka e liru nna mu phẹ l'ogba, nọ l'alị Ẹfuronu, bụ onye Hetu.

³⁰Ogba ono yele alị ono nọ l'alị Makupela ono, nọ lẹ mgboru Mamure l'alị Kénanu; bẹ Ẹbirihamu zọturu l'ẹka Ẹfuronu onye Hetu dobe; g'ọ bụru ẹka ee-lije odzu.

³¹Ọ bụru ẹka ono bẹ e liru Ẹbirihamu; yee nyee ya, bụ Sera; tẹme e likwapho Áyizaku; yee nyee ya, bụ Ribeka l'ẹka ono; tẹme mu bya elia Lii l'ẹka ono.

³²Alị ono yee ogba, nọ iya nụ bẹ a zuru ndu Hetu.”

³³Jiékọpu keghechaepho ekpe nụ unwu iya; bya aze-zeta aze; tua unme ikpazu; ọ bụru iya alapfu ndiche iya phẹ.

Mbulembu 50

¹Jiósẹfu bya apata onwiya tua l'eli nna iya; kwaru ẹkwa kpua ya; bya etsutsukwaa ya pho onu.

²Noo ya; Jiósẹfu bya ezia ndu dokinta, ejeru iya ozi g'ephe dozia odzu nna iya, bụ Ízurelu g'o to rehu. Ndu dokinta ono bya edozia odzu ono egube ono.

³Ọ bụru ukporo abalị labo bẹ ephe gude dozia odzu ono; tee ya mmanu, g'o to rehu. E mechaa; ndu Ijiputu bya akwaa ẹkwa iya ukporo abalị eto l'abalị iri.

⁴Eswe akwakwa iya -bvuepho; Jiósẹfu sụ ndu-ozí Fero: “Ọ -bụru lẹ mu du unu l'obu; unu pfiaru Fero sụ iya

⁵lẹ nna mu mekwaru; mu riaru iya nte sụ lẹ ya abyawaa anwuhu; ọle gẹ mbẹdua jekwa elia ya l'ilu, ọ turu doberu onwiya l'alị Kénanu. Ọo ya bụ gẹ mu jenu je elia nna mu; gẹ mu alwaphuta azu.”

⁶Fero sụ iya: “Tugbua je elia nna ngu l'ẹka o pfuru g'i riaru iya nte l'ii-je elia ya.”

⁷Ọo ya bụ; Jiósẹfu tugbuna jeshia eli nna iya. Ndu ozi Fero g'ephe ha tuko wufu tsoru iya. Ndu bụ ogerenya l'ibe Fero; waa ndu bụ ogerenya Ijiputu l'ophu;

⁸tẹme waa ndibe Jiósẹfu l'ophu; waa unwunna iya; mę ndu bukpuo kẹ nna iya g'ephe hakota. Unwegirima ibe phẹ mę iphe-edobe phẹ bẹ ephe hakotaru l'alị Goshenu.

⁹Ugbo-inya; mę ndu agba l'inya bẹ ephe l'ephe swikwapho. Ephe dukpuo igwerigwe tuko swiru.

¹⁰Ephe rwua ẹka eechije balị lẹ Atadu, nọ lẹ mgboru ẹnymu Jiódanu; ephe raa ẹkwa iya rashia ya ike. Jiósẹfu bya anodu l'ẹka ono kwaa nna iya ono ujiku esaa.

¹¹Ndu Kénanu, bu l'ẹka ono numaepho ẹkwa aphu, aara lẹ mgboru ẹka eechije balị lẹ Atadu; ephe sụ: “Ndu Ijiputu ataswibejekwa okpoma raa ẹkwa aphu.” Noo iphe ono meru g'o gude e kua ẹka ono, nọ-kube ẹnymu Jiódanu ono “Abelu-mizuremu” .

¹²Noo ya; unwu Jiékọpu mee g'ọ suru g'ephe mee.

13 Ɛphe pata iya je l'ali Kénanu je elia ya l'ogba, no l'ali Makupela le mgboru Mamure, bu eka Ebirhamu zutaru Efuronu onye Hetu g'ọ buru eka ee-lije odzu; yee ali, tso iya nu.

14 E lichaepho nna iya; Jiófefu lwaphuta azu l'ali Ijiputu; yee unwune iya; mewaro ndu ozo, tso iya je eli nna iya ono.

Jiófefu epfu opfu oma eyeru unwunna iya

15 Unwunna Jiófefu humaeapho le nna phe nwuhuwaru; ephe su: “O -buru le Jiófefu be iphe, anyi meru iya-a eghukwadu eghe be oo-pfukwa anyi ugwo iya.”

16 Noo ya; ephe zia ozi g'e je ezia Jiófefu su iya: “Nna ngu byakwa l'anwuhu bya atua ekemu-a su:

17 “Unu e-pfuru Jiófefu le mu arwokwa iya arworwo g'ọ gukwaaru unwunna iya nu l'eka ephe mesweru iya; ye l'iphe-eji, ephe meru; kele o kwa ejo-iphe be ephe meru iya.’ O bukwanuru iphe, anyi arwo ngu nta-a bu g'i gunaa nvu l'emeswe, anyibe ndu-ozu Chileke nna ngu mesweru ngu.” Ephe zichaepho Jiófefu ozi ono; o wata ekwa.

18 Unwunna iya tugbukwapho wu-pfu iya je adaa kpurumu l'atatifhu iya bya asu: “Iilena l'anyi tukoakwaru buru ohu ngu.”

19 No iya; Jiófefu su phe: “Ge ndzu ta agushi unu; kele o to budu mu bu Chileke.

20 O bu eviya l'unu chiru idzu g'unu mee mu ejo-iphe; obenu le Chileke meru iya; o bya aburu iphe-oma; k'opfu e shi egube ono dzota ndzu ndu du igwe, bu iya bu iphe, nwuru nu-a.

21 Oo ya bu ge ndzu ta agushi unu. Mu a-nodua anu unu nri; unu l'unwegirima unu.” O bya emee ya; o doo phe enya l'ehu te egudu iya eghe; bya epfuru opfu-oma yeru phe.

Anwuhu Jiófefu

22 Jiófefu buru l'ali Ijiputu; yee ndibe nna iya l'opfu. O noru ukporo apha ise l'apha iri;

23 bya ahuma nwanwa unwu Ifuremu. Teme Jiófefu hetakwapho unwu Makiya, bu nwatibe Manase l'utapfu iya teke a nwuru phe.

24 Noo ya; Jiófefu su unwunna iya: “Mu abyaakwaa anwuhu. Ole mu maru le Chileke e-mecha bya eyeru unu eka dufuta unu l'ali-a; duta unu laphu azu l'ali, Chileke kweru Ebirhamu; waa Ayizaku; waa Jiekopu ukwe iya ono; bya eria nte yeru phe iya ono.”

25 Jiófefu mee g'unwu Izurelu riaru iya nte. O su phe: “Mu maru le Chileke e-mecha bya eyeru unu eka. O -rwua teke ono; unu chitakwa okpu mu gude lufu l'eka-a.”

26 Oo ya bu; Jiófefu nwuhu g'ọ nochaeapho ukporo apha ise l'apha iri. E dozia odzu iya g'ọ to rehu; bya eye iya l'okpoko-odzu dobe l'ali Ijiputu.

Awufu

Awufu 1

Mkpamẹhu ndu Ízurelu

- ¹Waa ẹpha unwu Ízurelu, tso Jiékọpu laa alì ndu Ijiputu baa. Onyemonye dutaru ndibe iya lashia ẹka ono.
- ²Rúbenu; waa Simiyonu; waa Lívayi; waa Jiuda;
- ³waa Isaka; waa Zebulon; waa Benjiaminu;
- ⁴waa Danu; waa Nafutali; waa Gadu; waa Asha.
- ⁵Oshilokpa Jiékọpu tukoru du ukporo umadzu ẹto l'umadzu iri. Jiósefu nohawaa anono l'alì ndu Ijiputu.
- ⁶Tobudu iya bu; Jiósefu yee unwunna iya g'ẹphe ha; waa ogbo k'ono tukowa nwushihukota.
- ⁷Ole ndu Ízurelu azushiele-a; bya abarahu. Ẹphe zushiru kwatakpo paa ẹka apaa; k'ophu ẹphe tukoerupho alì ono sweta.
- ⁸Noo ya; onye eze ophúú, bu onye ta amadu ke Jiósefu amama ophu bya aburu eze le Ijiputu.
- ⁹Noo ya; o su ndu alì iya: “Unu lenu le ndu Ízurelu akaakwa anyi shii k'ophu ẹphe e-mechaa ka anyi okpehu.
- ¹⁰Unu byakwa g'anyi kwaberu phe ẹnya. Odumeka be ẹphe a-kabakwa evuvu. O -buru l'a nonyaru; ogu daa be ẹphe e-tsokwaru ndu ohogu anyi bya etsoo anyi ogu; gbado ẹka-a lashia.”
- ¹¹Oo ya bu; ndu Ijiputu bya ahota nemadzu; mee phe udumali; su g'ẹphe kebutaje ndu Ízurelu g'ẹphe je ozi mkponwu-ẹhu. Ẹphe bya akpu mkpukpu Pitomu; waa mkpukpu Ramesesu g'o buru mkpukpu ẹka Fero e-dobeje iphe.
- ¹²A -ka phe akpa ẹhu; ẹphe agbe ka azushi ka l'otu dzuru ekameka. Ndu Ijiputu kabakpooro atsù ndu Ízurelu ebvu;
- ¹³bya akabakpooro eme g'ẹphe jeje ozi mkponwu-ẹhu.
- ¹⁴Ẹphe kpabe phe ozi; gude mee ndzu phe buru phe aphu; mee g'ẹphe yoshi eja buloku. Teme ẹphe aghakwa pho eja mini; mewaro ozi, no-gbua l'egu phe. Iphe, bukota ozi, ndu Ijiputu kebutaru phe g'ẹphe je bukotaru ozi mkponwu-ẹhu.
- ¹⁵Eze ndu Ijiputu su unwanyi, eswije ndu Hiburu ime, ẹpha phe bu Shifura; waa Puwa:
- ¹⁶“Unu -nodu eswi unwanyi ndu Hiburu ime m'ẹphe nodu anwu nwa; ẹphe -nwue ya pho; unu nyoje phe. O -buru nwoke; unu gbuje iya; teke o bu nwata nwanyi; unu hajekwa iya g'o nodu ndzu!”

¹⁷Obenu lẹ ndu eswije ime ono atsu Chileke ebvu; ophu ephe emejedu iphe ono, eze Ijiputu ziru phe ono. Ephe nodu ahaje nwa-nwoke; ephe anodu ndzu.

¹⁸Noo ya; Eze ndu Ijiputu bya ekuko ndu eswije ime ono; bya asu phe: “? Bu gunu be unu meru iphe, du egube-a? ? Bu gunu kparu iphe unu ahaje unwegirima unwoke; ephe anodu ndzu?”

¹⁹Unwanyi eswije ime ono su Fero: “Ti madu l'unwanyi Hiburu ta adudu ge ke ndu Ijiputu. Okpehu du phe. O nodu abujeru; ndu eswije ime -bya abyarwuta aka ono; ephe ezedawaa.”

²⁰Oo ya bu; Chileke meeru ndu eswije ime ono iphe-oma. Ndu Izurelu nodu evu; bya akakporo aka l'otu.

²¹Chileke mekwapho g'unwu ndu eswije ime ono ka l'otu; kele ephe atsu iya ebvu.

²²Noo ya; Fero bya atuaru ndu nkiya g'ephe ha ekemu su: “O -buru le ndu Hiburu nwuru nwa; o -buru nwoke; g'e jeje echie ya l'enyimu Nayilu! Teke o bu nwanyi l'a haa ya g'o nodu ndzu!”

Awufu 2

Anwunwu Mosisu

¹Noo ya; nwoke, shi l'onulo Livayi bya aluta nwanyi, shikwapho l'onulo Livayi.

²Nwanyi ono bya atsuta ime; bya nwua nwa nwoke. O humaepho le nwata ono manukaru mma; o hee ya l'edomi onwa eto.

³O nonyaa; ophu o duedu ike domikota iya edomi. O bya egbuta eji gude kpaaru iya nkata; bya echia ya urwa mbekee. O bya ekuru nwata ono ye l'ime nkata ono; pata je edobe l'aguga enyimu Nayilu aka eji zeru.

⁴Nwune iya nwanyi bya eje apfuru uzanya g'o maru iphe, l'e-eme nwata ono.

⁵Noo ya; nwa Fero ke nwanyi jeshia awu ehu l'enyimu Nayilu ono. Yele unwumboko, ejeru iya ozi swiru tuko eje l'aguga enyimu ono. O huma nkata ono g'o no l'ime eji ono; bya ezia ohu iya nwamgboko g'o je ewotaeduru iya ya.

⁶O kpuhaa ya; bya ahuma nwata ono. Nwata ono nodu ara ekwa; imemini iya du iya. O su: “O kwa nwa onye Hiburu be o bu!”

⁷Nwune nwata ono ke nwanyi su nwatibe Fero ono: “? Bu ge mu je ekuaru ngu nwanyi Hiburu, e-heru ngu nwata ono?”

⁸O su iya ngwa; g'o jenu. Nwamgboko ono tugbua je ekua nene nwata ono.

⁹Nwada Fero su ne nwata ono g'o kuta nwata ono je ehofutaru iya; ge ya pfua ya ugwo. Noo ya; nwanyi ono bya ekuta nwata ono je eehaa.

¹⁰Nwata ono vutaepho; o duta iya dulaaru nwatibe Fero ono; o buru nwa iya. O woru iya gua Mosisu; kele o suru l'oo nwata, ya gutaru le mini.

Mósisu agba ala Midiyanu

- ¹¹Noo ya; o rwua ujiku lanu ge Mósisu vutachaaru; o jeshia ahuma ndu nkiya l'eka ono, ephe eje ozi mkponwu-ehu ono. O huma onye Ijiputu eka oochi onye Hiburu iphe, bu onye lanu l'unwunna iya.
- ¹²O bya achika enya ibe k'ebo ebo; ophu o dudu onye o humaru. O chigbua onye Ijiputu ono bya egude eja kpamia ya.
- ¹³O -rwua le nchitabohu iya; o tugbukwa ozo je ahuma ndu Hiburu umadzu labo eka ephe alwu ugu. O su onye ophu achọ opfu: “? Denu g'o nwuru iichi onye Hiburu ibe ngu iphe?”
- ¹⁴Onye k'ono su iya: “? Bu onye meru ngu onye-ishi; waa onye-ikpe anyi? Tọo ? iimewaa g'i gbua mu g'i gburu onye Ijiputu pho?” Noo ya; ndzu guahaa Mósisu; o ría su: “Iphe-a, mu meru-a be a -gbę madzuchawaru nu.”
- ¹⁵Fero numaepho iphe ono bya emeahaa g'o gbua Mósisu. Mósisu gbafu l'ibe Fero gbaru lashia ali ndu Midiyanu je eburu. O jerwua bya anodu anoo l'aguga welu.
- ¹⁶Noo ya; onye uke ndu Midiyanu nweru unwumboko esaa. Ephe bya le welu ono bya ekuta mini ye l'iphe, eeyejeru anu mini g'aturu ibe nna phe ngua.
- ¹⁷O nweru ndu ozo, eche aturu, byaru bya achifu phe. Noo ya; Mósisu gbalihu bya eyetaru phe eka; kuta mini doberu aturu phe.
- ¹⁸Unwumboko ono lapfuepho nna phe, bu Ruwelu; o su phe: “? Denu g'o nwuru unu lwaru egwegwa egube-a ntanu-a?”
- ¹⁹Ephe su iya l'o nwekwaru nwoke Ijiputu, nafutaru phe l'eka ndu eche aturu ndu ophu. Teme o bya esetafukwapho mini doberu aturu phe; o ngua.
- ²⁰O su unwada iya: “? Denuhununu nwoke obu? ? Bu gunu kparu iphe, unu paru iya haa? Unu je ekua ya g'o bya eria nri.”
- ²¹Mósisu kweta; yee nwoke ono buru. Nwoke ono bya ekuru nwa iya nwanyi, bu Zipora kee Mósisu; o luru.
- ²²Zipora bya eyeru iya nwa nwoke. Mósisu gua ya Geshomu; noo kele Mósisu suru: “Mu bu onye lwaru alwalwa l'ali ndu ohozo.”
- ²³A nonyakpoepho; eze ndu Ijiputu nwuhu. Ndu Izurelu nodu atsu pfupfufu; echi mkpu; ara g'e yeru phe eka l'iphe-ehuka ono, ephe eje l'abubu ono, ephe bu ohu ono. Ekwaa ono, ephe ara ono rwua Chileke nchi.
- ²⁴Chileke numa ude ono, ephe atsu ono; bya anyata oghandzu ephe le Ebirhamu; waa Ayizaku; waa Jiékopu.
- ²⁵Chileke bya aghaa enya; lee ndu Izurelu; bya ariahaa oriri ehu phe.

Awufu 3

Oku, l'enwu l'irwu oshi

- ¹No iya; Mósísu nõdu eche aturu Jieturo, bu nna nyee ya; bya aburu onye uke ndu Midiyanu. O -rwua ujiku lanu; o chita aturu ono gude jeshia eka du enya l'echiegu. O jee jasu o jerwua l'ubvu Horebu, bu iya bu ubvu Chileke.
- ²O buru l'eka ono be Ojozi Chipfu gude oku, enwu l'irwu oshi hee ya l'atatiphu. Mósísu huma l'oku ono enwu l'irwu oshi ono; obenu l'o to tsupyashidu iya.
- ³Oo ya bu; Mósísu su: "Ge mu bya ejekubeekwa iphe owa-a ntse; mbu iphe owa-a, tufuru ehu, anwu nu-a; ge mu maekwaru iphe, kparu iphe, oku ono te etsupyashidu irwu ono."
- ⁴Chipfu humaepho l'o kpiritawaru ntse g'o lerweta enya; Chileke shi l'irwu ono kua ya oku su: "Mósísu! Mósísu!" Mósísu za enu; su: "Wakwa mu no l'eka-a."
- ⁵Chileke su iya: "Ta kpiritabaekwaru ntse ozobaa! Yefu akpokpa ngu; noo kele eka ono, i pfuru ono bu ali, du nsu."
- ⁶Su iya: "O kwa mbedua bu Chileke ke nna ngu; buru Chileke ke Ebirihamu; buru Chileke ke Ayizaku; bya aburu Chileke ke Jiekpu." Mósísu numae ya pho; o wohaa iphu; kele ndzu ele Chileke enya wataru iya agugu.
- ⁷To budu iya bu; Chipfu su: "Mu humawaru iphe-ehuka, ndibe mu eje l'ali ndu Ijiputu. Mu numawa mkpu, ephe echi su g'a dzota phe l'eka ndu udumali; teme iphe-ehuka, ephe eje rwuwa mu l'ehu.
- ⁸Oo ya bu le mu byawaru ge mu nafuta phe l'eka ndu Ijiputu; duru phe laa l'ali, du ree; bya adu shii; mbu ali mini era-eswi; waa manu-enwu jiru ke pyimu pyimu; mbu l'ali ndu Kenu; waa ndu Hetu; waa ke ndu Amoru; waa ke ndu Perezu; waa ke ndu Hevu; teme waa ke ndu Jiebusu.
- ⁹Nta-a be mkpu, ndu Izuru echi rwuwaru mu le nchi; teme mu humawaa ge ndu Ijiputu gude akpa phe ehu.
- ¹⁰Oo ya bu; le nta-a be mu ezi ngu g'i jepfu Fero je edufuta ndibe mu, bu ndu Izuru l'ali Ijiputu!"
- ¹¹Mósísu su Chileke: "? Bu onye be mu bu k'ije apfuru Fero l'iphu; je edufuta ndu Izuru l'ali Ijiputu?"
- ¹²Chileke su iya: "Mu e-swiru ngu eswiru. Teme waa iphe-ohubama, ii-gude maru l'oo mbedua ziru ngu ono baa: I -dufutaepho ndu ono le Ijiputu be unu a-baru mube Chileke eja l'ubvu-a."
- ¹³Mósísu su Chileke: "O -bukwanuru le mu jepfuru ndu Izuru je asu phe: 'Chileke ke nna unu phe zikwaru mu ge mu byapfuta unu.' Ephe -jikwanua mu su: '? Epha ngu aza gunu?' ? Bu gunu be mu e-yeru phe onu?"
- ¹⁴Chileke su Mósísu: "Mu bu onye mu bu. Iphe, ii-pfuru ndu Izuru bu l'oo mbedua, bu Chipfu ziru ngu g'i byapfuta phe."

¹⁵Chileke sụkwapho gę Mósísu sụ ndu Ízurelu: “Oo Chipfu, bụ Chileke kę nna unu phez; mbụ onye bụ Chileke kę Ébiríhamu; bụru Chileke kę Áyízaku; bya aburu Chileke kę Jiékọpu bę ziru ngu g’i byapfuta phez. Noo epha mu bụ ono jasụ lę tuutuutuu lę mјimiimii. Epha ono bę ogbo mę ogbo e-gude maru mu.”

¹⁶“Tugbua je ekukoo ndu bụ ogerenya lę Ízurelu; sụ phez lę Chipfu, bụ Chileke kę nna unu phez; byapfutaru ngu; mbụ onye ono, bụ Chileke kę Ébiríhamu; bụru Chileke kę Áyízaku; bya aburu Chileke kę Jiékọpu. Waa iphe o pfuru baa: ‘Mu lewaru unu enya; huma egube iphe, eeme unu lę Ijiputu.’

¹⁷Mu kwewaa ukwe lę mu e-dufuta unu l’iphe-ehuka, unu eje lę Ijiputu; duru unu laa alı ndu Kėnanu; waa kę ndu Hetu; waa kę ndu Amoru; waa kę ndu Pėrezu; waa kę ndu Hevu; teme waa kę ndu Jiebusu; alı, mini era-eswi; waa manụ-enwu aso gborogboro.’

¹⁸“Ndu bụ ogerenya Ízurelu bę a-ngaberu ngu-a nchi. Oo ya bụ; gubedua unu lę ndu bụ ogerenya atuko swiru jepfu eze ndu Ijiputu je asu iya: ‘Chipfu, bụ Chileke ndu Hiburu bę byapfutakwaru anyi. Hanaa anyi g’anyi jee ije ujiku eto; lufu l’echiegu je agwaa Chipfu, bụ Chileke anyi.’

¹⁹Ole mu makwaru-a l’eze ndu Ijiputu te ekwedu g’unu je; gbahaa l’e meru iya l’okpehu.

²⁰Oo ya bụ lę mu a-machi eka mu; gude iphe, du biribiri, mu e-me lę Ijiputu nua phez chiiipfu. Iphe ono -mechaepho bę oo-kwechaa haa unu g’unu lashia.

²¹“Mu e-me gę ndu Ízurelu-a du ndu Ijiputu l’obu; k’ophu bụ; unu -lashiepho; unu ta agbaduru eka.

²²Nwanyi, nonu a-su onye obutobu iya; ozoo nwanyi, bu l’ulo iya g’o nu iya iphe, e meru lę mkpola-ochaa; waa ophu e meru lę mkpola-ododo; waa uwe, unu e-ye unwegirima unu. Oo ya bụ unu eshi nno kwaa iphe ndu Ijiputu l’okwata gude lashia.”

Awufu 4

Iphe-ohumalenya, Mósísu e-me

¹Mósísu su: “? O -bukwanuru l’ephe te kwetaduru iphe, mu pfuru; ozoo l’ephe te ekwedu ngaberu mu nchi; su l’oo uka lę Chipfu ta abyapfutaduru mu-e?”

²Oo ya bụ; Chipfu jia ya; su: “? Bụ gunu bę i gude l’eka ono?” O su iya l’o kwa mgboro.

³Chipfu su iya: “Togboedu iya l’ali!” O togbo iya. O ghoo agwo. O ye okpa l’oso.

⁴Chipfu su iya: “Machia eka gude iya lę mgbodzu!” Mósísu bya amachia eka; zu agwo ono. O nodu iya l’eka; ghō-zia buri mgboro g’o shi buri.

⁵Chipfu su iya: “Mee iphe-a gude mee g’ephe kweta lę Chipfu, bụ Chileke kę nna phez; mbụ onye ono, bụ Chileke kę Ébiríhamu; buri Chileke kę Áyízaku; bya aburu Chileke kę Jiékọpu bę byapfutaru ngu nu.”

⁶Chipfu byakwa asu Mosisu ozo: “Nwua eka le mkputepho ngu!” Mosisu bya eworu eka ye le mkputepho. O wofutashia eka; ekpenta nmawa iya eka swokoswoko; eka chahuwa iya roboo.

⁷Chileke su iya: “Ngwa; yephu iya azu le mkputepho ngu!” Tobudu iya bu; Mosisu bya eyephu eka iya azu le mkputepho iya ono. O wofutashia ya; ekpenta ono mishihuwa; mbu eka dukotawa iya g'ehu iya ibe iya ophuu du.

⁸Noo ya; Chipfu su: “O -buru l'ephe te ekwetadu nkengu; ozo l'ephe ta angabeduru ngu nchi l'iphe-ohumalenyanya ke mbu pho be ephe e-kweta-a k'ebo-a.

⁹Obenu o -buru l'ephe te ekwetaduru; ozo l'ephe ta angabeduru ngu nchi l'iphe-ohumalenyanya labo-a; je ekuta mini l'enyimu Nayilu; bya awushi l'ali okponku. Mini ono, i kutaru l'enyimu ono a-gho mee l'ali eka ono.”

¹⁰Mosisu su Chipfu; “Oowaa Nnajiuphu; mu ta amakwa g'aasaje opfu. Eshikpo le mbu bya aduru nta-a, iipfu eyeru mube onye-ozu ngu-a be mu buepho onye epfu deneshii bya aburu onye epfu l'onu oku.”

¹¹Chipfu su iya: “? Bu onye meru onu nemadzu? ? Bu onye emeje nemadzu l'ooda nkuchi; ozo onu kpurukudukuu? ? Bu onye emeje nemadzu l'ophu uzo; ozo g'o tsua ishi? ? Tobudu mbedua, bu Chipfu?

¹²Ngwa je! Mu e-yetaru ngu-a eka g'i pfua opfu; bya ezikwa ngu pho iphe, ii-pfu.”

¹³Obenu le Mosisu suru: “Jiko Nnajiuphu mu; zia ya ro onye ozo g'o jee.”

¹⁴Noo ya; Mosisu mee; ehuhuahaa Chipfu egu. O su Mosisu: “? Nwune ngu, bukwanu Eronu, bu oshilokpa Livayi-e? Mu maru le yebedua maru g'eeppu opfu. O noakwa l'uzo eka oobya ngu ndzuta. Ozo bu l'obu a-tso iya utso shii me o -huma ngu.

¹⁵Ii-pfuje yeru iya; karu iya iphe, oo-pfu. Mu a-nodu eyeru unu n'ebo eka l'epfu opfu; teme o buru mbedua a-nodu ezije unu iphe, unu e-meje.

¹⁶Oo Eronu be e-pfuchitajeru ngu opfu l'atitiphu ndu Izurelu. Mbu l'oo-duepho g'o bu yebedua bu onu ngu. Teme l'i due ya pho g'i bu Chileke.

¹⁷Ole o g'i gude mgboro-a, i gude l'eka-a; k'opu ii-gude iya meje iphe-ohumalenyanya.”

Mosisu ala azu le Ijiputu

¹⁸Oo ya bu; Mosisu bya ejepfu Jieturo, bu ogo iya bya asu iya g'o haa ya ge ya jepfu ndibe phe l'ali ndu Ijiputu je amaru ? ephe no-dzukwaduru-a ndzu? Jieturo kweta bya asu iya g'o tokwa ehuh.

¹⁹Teke ono be Chipfu nohawa l'ali ndu Midiyanu; su Mosisu: “Tugbua laphu azu l'ali ndu Ijiputu; noo kele iphe, bu ndu ono, shi acho ndzu ngu ono nwushihuchawaru.”

²⁰Oo ya bu; Mosisu bya eduta nyee ya; waa unwu iya; ephe no-koru l'eli nkapfu-igara. O bya ewota mgboro Chileke ono gude l'eka; o buru phe ala ali Ijiputu.

- ²¹Chipfu sụ Mósísu: “Í -laẹpho Ijiputu; t̀kọkwa iphe, ụ́ biribiri ono, mu yeru ngu l'ẹka g'i mee ono mekọta l'iphu Fero. Ọle mu a-kpochi iya ọkpoma akpochi; k'ophu o too kwedu aha ndu ono g'ephe la.
- ²²Iphe, ii-pfuru Fero ụ́ lẹ mụbe Chipfu sụru l'ọo Ízuru ụ́ ọkpara mu.
- ²³Mu pfuwaru ngu sụ g'i haa ọkpara mu ono g'ọ t̀gbua; k'ophu oo-je abarụ mu ẹja. Í -jika l'í t̀ji hadụ iya g'ọ t̀gbua ẹ mu e-gbukwa ọkpara nkengu.”
- ²⁴Noo ya; o rwua l'uzo ẹka ẹphe kwarụ; Chipfu byapfuta Mósísu bya emeahaa g'ogbua ya.
- ²⁵Zipora wota mkpuma, atsụ nkọ; bya ebuta akpapyi nwa iya bya edenyi Mósísu l'okpa sụ iya: “Nta-a ẹ anyi lụwaru l'ẹhu mee.”
- ²⁶Ọo ya ụ́; Chipfu haa ya. Teke ono, Zipora sụru l'ephe lụwaru l'ẹhu mee ẹ iphe, ọorwu ẹka ụ́ k'ebu úbvù.
- ²⁷Chipfu sụ Erọnu g'ọ je l'echiegu je agba Mósísu ndzuta! Ọo ya ụ́; Erọnu gbapfu Mósísu l'úbvù Chileke; je anma iya akpa.
- ²⁸Mósísu bya akọkotaru Erọnu iphemiphe, Chipfu ziru iya g'ọ je epfua; wakwapho k'iphe-ohumalenya ono, Chileke sụru g'ọ meshia ono.
- ²⁹Mósísu yẹ Erọnu bya ekukọta ndu ụ́ ọgerenya Ízuru g'ephe ha.
- ³⁰Erọnu bya atuko iphemiphe, Chipfu pfushiru Mósísu pfukotaru pẹ. Ọ bya emee iphe-ohumalenya ono l'iphu ndu Ízuru;
- ³¹ephe kweta. Ọo ya ụ́; ephe numaepho lẹ Chipfu akpa ishi pẹ; teme waa l'ohumawaru iphe-ehuka, ephe eje; ephe phozeta baarụ Chileke ẹja.

Awufu 5

- ¹E mechaa; Mósísu yẹ Erọnu jepfu Fero bya asụ iya: “Waa iphe, Chipfu, ụ́ Chileke ke Ízuru epfu baa: ‘Haa ndibe mu g'ephe je abooru mu iphe l'echiegu!’ “
- ²Fero sụ: “? Ụ́ onye ụ́ Chipfu k'ophu mu a-ngaberu iya nchi; haa ndu Ízuru g'ephe t̀gbua? Sụ: Mu ta amakwa Chipfu; ophu mu ahakwa ndu Ízuru g'ephe t̀gbua.”
- ³Ephe sụ iya: “Chileke ndu Hiburu byapfutakwaru anyi. Jiko hanaa g'anyi wuru je l'echiegu jee ije ujiku ẹto je egweeru Chipfu, ụ́ Chileke anyi ngweja. Odumeka ẹ oo-gudekwa iphe-ememe; ọzoo ogu-echi gbushia anyi.”
- ⁴Obenu l'eze ndu Ijiputu kuru Mósísu yẹ Erọnu; sụ pẹ: “? Ụ́ gunu kparụ iphe unu jeru je achifuta ndu ono l'ozí, ephe eje? Ngwa; unu t̀gbua laphu azụ l'ozí unu!”
- ⁵Ọ sụkwapho: “Unu lewaro ya! Nta-a ẹ ndu Ízuru hawaa igwerigwe; teme unu gbẹ bya akposhiaha pẹ ozi, ephe eje!”
- ⁶Ọ ụ́ mboku ono kwapho ẹ Fero kuru ndu udumali; waa ndu-ishi l'ozí ndu Ízuru; sụ pẹ:

7“Unu ta anujehe ndu Ízurelu ɛswa, ɛphe e-gude yoo ɛja! G'ɛphe jeje achɔ ɛswa chɔta l'onwophe!

8Ole g'unu mekwaa phe g'ɛphe yotaje iya g'o dzua ole, ɛphe shiwaa ayotaje iya. Unu te egbubotakwa iphe l'ɛja ole, ɛphe shi ayotaje. ɛphe bu ndu ɛnyiru; o buru iphe ono meru g'o gude; ɛphe nodu echi mkpu su g'a haa phe g'ɛphe je egweeru Chileke phe ngweja.

9Unu kabaa phe akpabe ozi; k'ophu uzo k'eje angabe nchi l'asulasu ta adueduru phe.”

10Tobudu iya bu; ndu udumali; waa ndu-ishi l'ozi ono bya asu ndu Ízurelu: “Waa iphe, Fero pfuru baa. O suru g'a ta nujehe unu ɛswa.

11G'unu jeje achita iya l'onwunu l'eka unu humaru iya. Ole ozi unu be e tee gbubotakwa iphe me nanu.”

12Oo ya bu; ndu Ízurelu gbakashihu tsoru ali ndu Ijiputu l'ophu cholahaa ɛswa, ɛphe e-vuta gude bya ayɔ ɛja obu.

13Ndu udumali chiahaa phe kpabekpabe; su phe: “Ngwa! Unu yota-dzua ɛja ole, unu shi ayotaje ujiku lanu teke pho, e shi evutajeru unu ɛswa pho!”

14Ndu udumali Fero bya echiahaa ndu-ishi l'ozi ndu Ízurelu ono iphe; mbu ndu ono, ɛphe hotaru dobe g'ɛphe letaje ndu Ízurelu ɛnya ono; su phe: “? Bu gunu kparu iphe, unu ta ayɔ-dzuduru ɛja unu unyaphu waa ntanu-a; g'unu shi ayɔ-dzujehawa iya?”

15Ndu-ishi l'ozi ndu Ízurelu ono bya awuru jepfu Fero; su iya: “? Bu gunu be iime anyibe ndu-ozu ngu egube-a?”

16Ndu ozi ngu be e te vutajeeduru ɛswa; teme a sukwapo g'anyi yoo ɛja. A nodu echi ndu-ozu ngu iphe; l'eka o gbɛ buru ndu nkengu be o shi l'eka.”

17Fero su: “Oo ke mmanu ono, unu no ono meru iphe; unu pfuaharu g'a haa unu g'unu je egweeru Chipfu ngweja.

18Ngwa! Unu tugbua nta-a je eje ozi, unu eje. E tee vutabaeduru unu ɛswa. Ole mkpakɔ bukwa g'unu yota-dzujee ɛja ole, unu shi ayotaje!”

19Ndu-ishi l'ozi ndu Ízurelu gbɛ teke ono maru l'ɛphe nmaru l'agaga g'ɛphe numachaaaru l'e tee gbubotaduru iphe l'ɛja ole, ɛphe shi ayotaje ujiku ophu.

20ɛphe lufutaepo l'ibe Fero; ɛphe huma Mosisu; waa Erɔnu l'eka ɛphe pfuru echeru phe.

21ɛphe su: “Ge Chipfu lekwa ɛnya l'iphe-a, unu meru-a; kpee unu ikpe iya! Kele unu kpataru; anyi duchawanu Fero yee ndu-ozu iya ashi. Nta-a be unu wowaru mma ye phe l'eka g'ɛphe gbushia anyi.”

Chileke ekwe ukwe adzo ndu Ízurelu

22Mosisu jepfu Chipfu bya asu iya: “Oowaa Nnajiuphu! ? Bu gunu kparu iphe, iime ge ndu-a jee egube iphe-ehuka-a? ? Bu iphe, i zidoru mu baa?”

²³Eshi teke mu jepfucharu Fero je egude epha ngu pfuru yeru iya be o wotaru iphe-ehuka, du egube-a nmakobe phe l'ishi. Ophu o to dudu iphe, i meru me nanu gude dzota ndu nkengu.”

Awufu 6

¹Noo ya; Chipfu su Mosisu: “Nta-a be ii-humanu-a iphe, mu e-me Fero. Kele oo okpehu mu be mu e-gude mee l'oo haa phe; mbu l'oo okpehu mu be mu e-gude mee l'oo chifu phe l'alij iya.”

²Chileke sukwapfo Mosisu: “Oo mbedua bu Chipfu.

³Mu heru l'iphu Ebirhamu; bya ehee l'iphu Ayizaku; hekwaapho l'iphu Jiekopu; karu phe l'epha mu bu Chileke, bu Okalibe-kangokotaru-nu. Obenu l'epha mu ono, bu Chipfu be mu te emeduru g'ephe maru.

⁴Anyi l'ephe bya agbaa ndzu le mu a-nu phe alij ndu Kenanu eka ephe shi buru ge ndu lwaru alwalwa.

⁵Ozo bu le mu numawaru ude, ndu Izurelu atsui; mbu ndu ono, ndu Ijiputu meru ohu ono. Mu nyata ogbandzu mu ono.

⁶“Oo ya bu; unu su ndu Izurelu le-a: Oo mbedua bu Chipfu; oo mu a-nafuta unu l'ozi mkponwu-ehu ono, ndu Ijiputu meru; unu nodu eje ono. Mu e-me g'unu nweru onwunu; g'unu ta abuheru ohu phe. Mu a-machi eka mu dzota unu; bya emeshia iphe, du biribiri gude nua phe aphu.

⁷Mu e-me; unu aburu ndibe mu; mu aburu Chileke unu. Oo ya bu g'unu amaru l'oo mbedua, bu Chipfu bu Chileke unu; bya aburu onye nafutaru unu l'ozi mkponwu-ehu ono, ndu Ijiputu meru; unu nodu eje ono.

⁸Mu e-duta unu je l'alij ono, mu paliru eka mu imeli ria nte le mu a-nu Ebirhamu; waa Ayizaku; waa Jiekopu ono. Mu a-nu iya unu g'oo buru okiphe unu. Oo mbedua bu Chipfu.”

⁹Mosisu bya eje ezia ya ndu Izurelu; obenu l'ephe te eyeduru iya onu; noo kele meji tofuwaru phe; teme ozi mkponwu-ehu, ephe eje l'eka ono mewaru; o refu phe l'ehu.

¹⁰Chipfu su Mosisu:

¹¹“Je epfuaru Fero, eze ndu Ijiputu g'oo haa ndu Izurelu g'ephe tugbua lufu l'alij iya.”

¹²Mosisu su Chipfu: “O -buru le ndu Izurelu ta angabeduru mu nchi; ? bu ishi gunu be Fero e-gude ngaberu mu nchi ge mu bu onye epfu l'onu oku-a?”

¹³Noo ya; Chipfu bya epfuaru Mosisu yee Eronu opfu ehu ndu Izurelu; waa opfu ehu Fero, bu eze ndu Ijiputu; su phe g'ephe dufuta ndu Izurelu l'alij ndu Ijiputu.

Oshilokpa Mosisu waa Eronu

¹⁴Waa ndu-ishi l'enya-unuphu ibe nna phe. Unwu ke Rubenu, bu okpara Izurelu bu Hanoku; waa Palu; waa Hezuronu; waa Kami. Ndu k'ono bukota okpa-ipfu Rubenu.

¹⁵Unwu ke Simiyonu bu Jiemelu; waa Jiaminu; waa Ohadu; waa Jiakinu; waa Zoha; teme waa Shawulu, nwa, nwanji shi Kénanu nwutaru. G'ephe ha bukota okpa-ipfu Simiyonu.

¹⁶Epha unwu Lívayi le g'e deru phe l'ekwo bu: Geshonu; waa Kohatu; teme waa Merari. Lívayi noru ukporo apha ishii l'apha iri l'esaa.

¹⁷Unwu Geshonu l'enya-unuphu l'enya-unuphu phe bu Libuni; waa Shimeyi.

¹⁸Unwu Kohatu bu Amuramu; waa Izuha; waa Hiburunu; waa Uzelu. Kohatu noru ukporo apha ishii l'apha iri l'eto.

¹⁹Unwu Merari bu Mahuli; waa Mushi. Ono bu okpa-ipfu Lívayi le g'e deru iya l'ekwo.

²⁰Amuramu bya alua nwune nna iya, bu Jiokebedu. O nwutaru iya Eronu; waa Mosisu. Amuramu noru ukporo apha ishii l'apha iri l'esaa.

²¹Unwu Izuha bu Kora; waa Nefegu; teme waa Zikiri.

²²Unwu Uzelu bu Mishelu; waa Eluzafanu; teme waa Sitiri.

²³Eronu bya alua Elisheba, bu nwatibe Amínadabu ke nwanji; bukwarupho nwune Nashonu ke nwanji. Elisheba ono nwutaru iya Nadabu; waa Abihu; waa Eleyaza; teme waa Itama.

²⁴Unwu Kora bu Asiru; waa Elukana; teme waa Abiyasafu. Ndu k'ono bu oshilokpa Kora l'ipfu l'ipfu.

²⁵Eleyaza nwa Eronu bya alua onye lanu l'ime unwegirima unwanji ibe Putelu; o bya nwutaru iya Finehasu. Ndu ono bukota ndu-ishi unuphu ibe Lívayi l'ipfu l'ipfu.

²⁶Oo buru Eronu; yee Mosisu ono be Chipfu suru g'ephe dufuta ndu Izurelu g'ephe hakota l'alí Ijiputu!

²⁷O bukwaru phe pho be bu ndu pfuru Fero, bu eze ndu Ijiputu k'edufuta ndu Izurelu l'alí ndu Ijiputu. Oo kwapho Mosisu yee Eronu lanu ono be o bu.

Eronu bu onu, epfuchiru Mosisu

²⁸Noo ya; teke ono, Chipfu pfuru yeru Mosisu l'alí ndu Ijiputu ono

²⁹be o suru iya: “Oo mbedua bu Chipfu. Zikota Fero, bu eze ndu Ijiputu iphemiphe, mu ziru ngu.”

³⁰Obenu le Mosisu suru Chipfu: “Eshi ophu mu epfu l'onu oku; ? denu ge Fero e-mekwanu ngaberu mu nchi?”

Awufu 7

¹Oo ya bu; Chipfu su Mosisu: “Huma le mu mewaru ngu; i du Fero ge Chileke. Nwune ngu Eronu bu onye a-noduje epfuchiru ngu opfu.

²Pfukotakwa iphemiphe, mu pfuru ngu. Nwune ngu Erõnu bu iphe, oo-pfuru Fero bu g'ò haa ndu Ízurelu g'ephe lufu l'alì iya.

³Obenu lẹ mu a-kpọ-chi Fero ọkpoma. Mu e-mee iphe-ohumalenya; waa iphe-ohubama, du igwerigwe l'alì Ijiputu;

⁴ole ọ tọ byadu angaru unu nchi. Ọ buru teke ono be mu e-byi ndu Ijiputu eka l'ehu; meshia iphe, du biribiri gude nua phe aphu; dufuta ndibe mu, bu ndu Ízurelu g'ephe hakota le Ijiputu.

⁵Ndu Ijiputu be a-maru l'oo mbedua bu Chipfu me mu machiepho eka mu byia Ijiputu; bya edufuta ndu Ízurelu l'echilabo phe.”

⁶Mosisu yee Erõnu bya emee ge Chipfu ziru phe.

⁷Mosisu nowaru ukporo apha eno; Erõnu nowa ukporo apha eno l'apha eto teke ephe jeru je epfuru opfu nu Fero.

Mgboro Erõnu ghõru agwo

⁸Chipfu su Mosisu yee Erõnu:

⁹“Ọ -buru le Fero suru unu g'unu mee iphe-ohumalenya gude goshi iphe, unu epfu; l'i su Erõnu g'o woru mgboro iya togbo l'atatiphu Fero! Ọ -togboe ya pho; l'ò ghoo agwo.”

¹⁰Oo ya bu; Mosisu yee Erõnu bya ejepfu Fero je emekota ge Chipfu ziru phe. Erõnu togbo mgboro iya ono l'iphu Fero; yee ndu-ozì iya; ọ ghoo agwo.

¹¹Fero bya ekukoo ndu mmamiphe; waa ndu emeje omamanshi. Ndu jibya ndu Ijiputu ono shi l'omamanshi ephe emeje mekwaapho nno.

¹²G'ephe ha byaru atogbochaa mgboro nkephe l'alì; ọ ghoshia agwo; ole ke Erõnu bya atuko mgboro nkephe lwekota.

¹³Ole obu Fero kpọ-chileru-a; ophu o kwedu ngaberu phe nchi; ge Chipfu pfuru pho.

Mini ghõru mee

¹⁴Noo ya; Chipfu su Mosisu: “Fero be ọkpoma kpoakwaru mkpolanu. Ọ jikaakwaru le ya ta ahadu ndu Ízurelu g'ephe tugbua.

¹⁵Jepfu Fero l'utsu m'o jeje l'enyimu. Nodu l'aguga Nayilu kwaberu iya; l'i wota mgboro ono, shi ghoo agwo pho gude l'eka.

¹⁶L'i su iya le Chipfu, bu Chileke ke ndu Hiburu zikwaru ngu g'i bya asu iya g'ò haa ndibe iya g'ephe tugbua; je a-baru iya eja l'echiegu. Ophu i kwedu byasu nta-a.

¹⁷L'i su iya: ‘Wakwa iphe, Chipfu pfuru baa: “Shita l'iphe-a, be ii-shi maru l'oo yebdua bu Chipfu. Mube Mosisu e-woru mgboro ono, mu gude l'eka ono chia le mini Nayilu. Mini ono agbanwee buru mee.

¹⁸Ema, nokota le Nayilu a-nwushihukota. Enyimu ono eshihu ke swiswisi. Ndu Ijiputu ta adudu ike angu mini, shi iya nu.” ’ “

¹⁹Chipfu sù Mósísu: “Pfuaru Erõnu g'o wota mgbõro ono, o gude l'eka machia le mini, nõkota l'ali ndu Ijiputu. G'o maa ya l'enyimu enyimu; waa le nggele nggele; waa l'okpuru okpuru; waa l'iphe, bu o-che-mini g'ephe tukochaa gbanwee buru mee. Mee a-tukoru ekameka sweta l'ali Ijiputu; mbu lufuchaa l'iphe, bu iphe, aado mini; ndu ophu a pyiru apyipyi; me ndu ophu a kpuru akpukpu.”

²⁰Mósísu yee Erõnu bya emeepho ge Chipfu ziru phe. O bya eworu mgbõro iya malia l'atatiphu Fero; yee ndu-ozí iya; bya echia ya l'enyimu Nayílu. Mini, du l'enyimu ono tukoeppo gbanwee buru mee.

²¹Ema, nõkota le Nayílu nwushihukota. Mini ono shihuepho ke swiswiswi; k'ophu bu le ndu Ijiputu ta adudu ike ngua mini, shi iya nu. Mee ono toko ekameka sweta l'ali ndu Ijiputu.

²²Ndu jibya ndu Ijiputu ono shi l'omamanshi ephe emeje mekwaapho nno. Oo ya bu; Fero kpo-chile-a obu iya g'o kpo-chiru iya. Ophu o to ngabeduru Mósísu yee Erõnu nchi; mbu egube ono, Chipfu pfuhawaru ono.

²³O ghakobe bya alaphushia azu l'ibe iya. Ophu iphe ono erwukpodaru iya nu l'ehu.

²⁴Ndu Ijiputu bya agwoshia obvu l'aguga Nayílu; eka ephe acho mini, ephe a-ngu. Noo kele mini enyimu ono ta adudu k'angungu.

Mbara byaru ogu

²⁵A noepho ujiku esaa e -shi teke Chipfu byiru eka l'enyimu Nayílu;

Awufu 8

¹Chipfu sù Mósísu: “Jepfu Fero je asu iya: Wakwa iphe, Chipfu epfu baa: Haa ndibe mu g'ephe laa; k'ophu ephe a-baru mu eja.

²O -buru l'i jikaru g'ephe ta lashi; mu egude mbara bya ogu l'ali ngu l'ophu.

³Mbara a-tuko enyimu Nayílu sweta; kposhihu bya akuru l'ibe ngu; kuru l'ime eka iikwaje; kuru l'oma iphe-azee ngu; kuru l'ulo ndu-ozí ngu; kuru l'ibe ndu ali ngu l'ophu; kuru l'onu epfu, eeshijeru ngu ite; waa l'ochi, eegudeje agwo iphe, e gude emeru ngu buredi.

⁴Mbara ono a-noduje apfu-kogbaa ngu l'ehu; waa l'ehu ndu ali ngu; me l'ehu ndu-ozí ngu l'ophu.”

⁵Chipfu sù Mósísu: “Pfuaru Erõnu g'o wolia mgbõro iya ono; maa l'enyimu enyimu; waa le nggele nggele; waa l'okpuru okpuru; mee ge mbara dzuru ali Ijiputu.”

⁶No iya; Erõnu bya amachia eka le mini, nõkota l'ali ndu Ijiputu. Mbara wufuta bya edzuru ali ndu Ijiputu.

⁷Ndu jibya ono shi l'omamanshi ephe emeje mekwaapho nno. Ephe mekwarupho; mbara wubata l'ali Ijiputu.

⁸Fero kua Mosisu waa Erõnu bya asu: “Unu pfuru yeru Chipfu g'o wofuru mu le ndu ali mu l'ophu mbara-a; ge mu ahaa ndibe unu g'ephe je agwaa Chipfu.”

⁹Mosisu su Fero: “Übvù, mu akwabẹ ngu bu g'i pfua teke mu e-pfuru nuru ngu Chileke; waa ndu-ozu ngu; waa ndu ali ngu; k'ophu mbara ta aduedu ngu l'ehu; me l'ibe ngu; a -gufu ndu ophu no l'enyimu Nayilu.”

¹⁰Fero su: “Oo echele.” Mosisu su: “G'o du g'i pfuru; oo ya bu; g'i shi nno maru l'o to dudu onye du ge Chipfu, bu Chileke anyi.

¹¹Mbara ono a-ha ngu; haa ibe ngu; haa ndu-ozu ngu; haa ndu ali ngu. Eka ephe a-phoduepho kpoloko bu l'enyimu Nayilu.”

¹²Oo ya bu; Mosisu yee Erõnu lufuepho l'iphu Fero; Mosisu bya araku Chipfu le ke mbara ono, o meru; o bya ogu l'ali-eze Fero ono.

¹³Chipfu bya emeeru Mosisu iphe, o rworu iya. Mbara ono nwushihukota l'ulo; waa l'oma-unuphu; waa l'egu.

¹⁴A bya akua phe l'ikpo l'ikpo. Ali ono l'ophu shihu ke swiswiswi.

¹⁵Obenu le Fero humaerupho le mbara ono ta aduedu; o woru okpoma iya kpo-chia. Ophu o to kweedu angaberu Mosisu yee Erõnu nchi ge Chipfu pfuru ono.

Mkpuruumkpu byaru ogu

¹⁶Oo ya bu; Chipfu su Mosisu g'o pfuaru Erõnu g'o machia mgboro iya chia l'urwuku, no l'ali; k'ophu urwuku ono a-gho mkpuruumkpu; dzuru ali Ijiputu l'ophu.

¹⁷Ephe mee nno. Erõnu bya amachia mgboro ono chia l'urwuku, no l'ali. Mkpuruumkpu bya erikpute nemadzu eh; yee anu. Urwuku, nokota l'ali Ijiputu ono mgburugburu bukotaru mkpuruumkpu.

¹⁸Ndu jibya bya emeahaa g'ephe shi l'omamanshi phe mekwaapho nno. Ophu ephe aduedu ike. Mkpuruumkpu ono toko eh nemadzu yee anu ripyabe aata.

¹⁹Ndu jibya ono su Fero: “Iphe-a be eka Chileke dukwa.” Obenu le Fero kpo-chilerua obu iya. Ophu o to kwedu ngabe nchi ge Chipfu pfuru ono.

Ijiji byaru ogu

²⁰Oo ya bu; Chipfu su Mosisu g'o tehu l'onmewa utsu; jepfu Fero me o -jejeepho l'enyimu; su iya l'owa-a iphe, mube Chipfu pfuru baa: “Haa ndibe mu g'ephe laa; je abaarü mu eja.

²¹O -buru l'i tji hadu ndibe mu g'ephe tugbua be mu e-zikwa ijiji g'o tsuru duuduuduu; wu-pfuta ngu; wu-pfuta ndu-ozu ngu; wu-pfuta ndu ali ngu; mekwapho l'ulo ngu l'ophu. Ulo ndu Ijiputu be ijiji e-jikota; etsu duuduuduu; mbu mechaa l'ali eka ephe azoje okpa.

²²“Obenu le mboku ono be mu e-me g'ali Goshenu du iche. Mbu l'eka ndibe mu bu be o to dudu ijiji, e-tsu duuduuduu l'eka ono; k'ophu ii-maru le mbedua, bu Chipfu no l'ali-a.

- ²³Mu a-kpa oke l'eka ndibe mu yee ndibe ngu no. Iphe-ohumalenya-a e-me echele.”
- ²⁴Chipfu bya emee iphe ono. Ijiji tsuru duuduudu wubata l'ibe Fero; me l'ulo ndu-ozu iya; me l'ali Ijiputu l'ophu. Ijiji ono tukoeppo ali Ijiputu l'ophu mebyishikota.
- ²⁵Fero bya ekua Mosisu yee Eronu bya asu phe: “Unu je agwaa Chileke unu obu l'ali eka-a!”
- ²⁶Obenu le Mosisu suru: “O to dudu ree nno; noo kele iphe, anyi egudeje agwa Chipfu, bu Chileke anyi bu ndu Ijiputu ebyi. O -buru l'anyi gude iphe, bu ebyi l'enya nkephe gwee ngweja; be epehe a-tu-gbukwa anyi le mkpuma!
- ²⁷Anyi e-jekwa ije ujiku eto jerwua l'echiegu je egweeru Chipfu, bu Chileke anyi ngweja l'eka ono; egube o turu ekemu su g'anyi mee.”
- ²⁸Fero su: “Mu a-ha unu g'unu je egweeru Chipfu, bu Chileke unu ngweja l'echiegu. Ole g'unu te ejenukakwa eka du enya. Ngwa; unu pfuru nuru mu Chileke!”
- ²⁹Mosisu su iya: “Mu -lufueppo l'atatiphu ngu; mu epfuru nu Chipfu; k'ophu ijiji ono, etsu gbiigbiigbi ono a-ha gube Fero; waa ndu-ozu ngu; teme waa ndu ali ngu. Ole ge gube Fero te egudenupho eregede ozo mee ge ndu Izurelu te je abaru Chipfu eja!”
- ³⁰Mosisu shi l'atatiphu Fero tugbua; je epfuru nu Chipfu.
- ³¹Chipfu bya emee iphe, Mosisu rworu iya. Ijiji ono paru Fero; waa ndu-ozu iya; waa ndu ali iya haa. Ophu o to dudu me ijiji lanu, ghuduru nu.
- ³²Fero bya akpo-chikwapho obu iya ozobaa. Ophu o to kwedu ge ndu Izurelu tugbua.

Awufu 9

Onwu iphe-edobe

- ¹Noo ya; Chipfu su Mosisu: “Jepfu Fero je asu iya: Waa iphe, Chipfu, bu Chileke ndu Hiburu pfuru baa: ‘Haa ndibe mu g'ephe tugbua; je abaru mu eja!’
- ²O -buru l'i jikaru g'ephe ta tugbushi; bya esede phe
- ³be Chipfu e-gudekwa eka iya zia ejo iphe-ememe; l'o bya atuko iphe-edobe unu gbushia. Mbụ l'oo-gbushi inya unu; waa nkapfu-igara unu; waa inya-kamelu unu; teme waa eswi unu; waa aturu yee egbu unu.
- ⁴Ole Chipfu a-kpa oke l'eka iphe-edobe ndu Izurelu; waa l'eka ke ndu Ijiputu no; k'ophu bu l'o to nwedu anu ke ndu Izurelu me nanu a-nwuhu nu.”
- ⁵Chipfu bya epfua teke oo-me iphe ono; su: “Echele be mube Chipfu e-me iphe ono l'ali-a.”
- ⁶O -rwua le nchitabohu iya; Chipfu mee ya. Iphe-edobe ndu Ijiputu tuko nwushihukota. Obenu l'o to nwedu ke ndu Izurelu me nanu, nwuhuru nu.
- ⁷Fero zia ndu jeru je ahuma l'o to dudu iphe-edobe ndu Izurelu me nanu, nwuhuru nu. Obenu le Fero kpo-chileru-a okpoma; ophu o to kwedu ge ndu Izurelu tugbua.

Ejo-onwo byaru oḡu

⁸Oo ya bụ; Chipfu sụ Mósísu waa Eronu: “Unu kpota ntụ, jiru mkpoji ẹka l'ovokoku; ge Mósísu phakashia ntụ ono l'imeli l'ataphu Fero.

⁹Oo-phekashihu dzuru alí Ijiputu l'ophu g'urwuku; l'o mee; ejo-onwo aphokashiaha nemadzu l'ehu yee anụ, bu l'alí ono l'ophu. Ejo-onwo ono efushihu; baaha phe ọnyá.”

¹⁰Ephe bya ekpota ntụ l'ovokoku; bya apfuru l'ataphu Fero. Mósísu woru ntụ ono phekashia l'imeli. Ejo-onwo bya atuko nemadzu; yee anụ wata aphokashi; baahaa phe ọnyá.

¹¹Ophu ndu jibya adudu ike pfuru l'ataphu Mósísu; kele ejo-onwo ono phokwaru phe pho g'ọ phoru ndu Ijiputu ndu ophu g'ephe ha.

¹²Obenu le Chipfu kpo-chiru Fero obu; ophu o to ngabeduru Mósísu yee Eronu nchi; ge Chipfu pfuru Mósísu ono.

Akamini byaru oḡu

¹³Oo ya bụ; Chipfu sụ Mósísu: “Nmaa ewa l'utsu je apfuru l'ataphu Fero; sụ iya: Waa iphe, Chipfu, bụ Chileke ke ndu Hiburu pfuru baa: ‘Haa ndibe mu g'ephe tugbua; je a-baru mu eja.

¹⁴Odumeka be ogiya be mu e-me g'ejo iphe-ehuka, l'a-lo ngu ẹka le meji byapfuta ngu; gu le ndu-ozí ngu; yee ndu alí ngu. Oo ya bụ g'i maru l'o to dudu onye du ge mbedua le mgboko l'ophu.

¹⁵Noo kele mu gege amachihawa ẹka mu gude ejo iphe-ememe gbushia gu le ndu alí ngu; unu achihu le mgboko-a.

¹⁶Obenu l'iphe, kparu iphe, mu gude haa ngu bu k'ophu mu e-goshi ngu g'okpehu mu habe shii. Oo ya bụ g'eepfukashi-dzuru epha mu le mgboko l'ophu.

¹⁷Obenu l'iigude opfu ehu ndibe mu eku onwongu; jika l'i tii hadu phe g'ephe la.

¹⁸Egube nta-a echele be mu a-tu ejo akamini egube teke atu-swee l'alí Ijiputu e -shi teke o beberu du byasu ntanu-a.

¹⁹Zikwaa ozi nta-a g'e je achibata iphe-edobe ngu l'eka iphe e-gbobuta iya; noo kele akamini ono a-tu-gbushikota nemadzu; yee iphe-edobe, no l'egu, a chibataduru unuphu; ephe anwushihukota.’ “

²⁰Ndu-ozí Fero ndu ophu atsụ Opfu Chipfu ebvu bya emee egwegwa chibata ohu phe; waa iphe-edobe phe l'ime ulo.

²¹Obenu le ndu agubeduru Opfu Chipfu iphe be haru ohu phe; waa iphe-edobe phe l'egu.

²²Oo ya bụ; Chipfu sụ Mósísu g'ọ machia ẹka l'akpaminigwe g'akamini awata adashi l'alí ndu Ijiputu tu-gbushia nemadzu me iphe-edobe; waa irwu, dukotakpo l'alí Ijiputu.

- ²³Mósisu machiepho mgboro iya l'akpaminigwe; Chipfu zia egbigwe; yee akamini; o wata adada. Ebemu nodu alo l'akpaminigwe. Chipfu dzee akamini l'ali Ijiputu.
- ²⁴Akamini yee oku-egbigwe toko ghaa eghirigha nodu atu gbaagbaa. Ejo oke pherephere, ha shii; nodu ezi. Mbú l'oo pherephere ono kakota shii le pherephere, zijekporu l'ali ndu Ijiputu e -shi teke e beberu ali ndu Ijiputu du.
- ²⁵L'ali ndu Ijiputu mgburugburu be akamini ono tu-gbushikotaru iphemiphe, nokota l'egu; nemadzu me iphe-edobe. O tupyashia iphemiphe, futaru l'egu; bya ezijashicha iphe, bu oshi, du l'egu ezijashi.
- ²⁶Eka o tuduru akamini ono kpoloko bu l'ali Goshenu, bu eka ndu Izurelu bu.
- ²⁷Noo ya; Fero zia g'e je ekua Mósisu yee Eronu; bya asu phe: "Mu mewaru iphe-eji. Oo Chipfu be iswi du maa; mbedua, bu Fero; waa ndibe mu acho ofu.
- ²⁸Pfuru nu Chipfu; noo kele egbigwe ono; yee akamini ono tata-shiwaru. Mu je a-ha unu g'unu laa; o to gbaeduru g'unu nodukwadu."
- ²⁹Mósisu su: "Mu -lufuepho le mkpukpu-a; mu achi-lia eka imeli; pfuru nu Chipfu. Egbigwe adabuhu; igwe atu-buhu akamini. Oo ya bu gi maru le mgboko-a bu ke Chipfu.
- ³⁰Obenu le mu maru-a le gubedua waa ndu-ozu ngu ta atsuadaa Chipfu, bu Chileke ebvu."
- ³¹Owu fulakusu; waa balu be akamini ono mebyishicharu; noo kele balu eyeshiwa mebyi; owu fulakusu bukwaduru ige be otu.
- ³²Obenu le witi; waa supelutu be o to mebyishiduru; noo l'oo to budu teke ono be oomije.
- ³³Mósisu paru Fero haa; shi le mkpukpu ono tugbua. O bya apaliaru Chipfu eka imeli. Egbigwe; waa akamini tukoru buru ke nyoo; igwe dzebuhu mini l'ali ono.
- ³⁴Fero humae-pho le mini; waa akamini; waa egbigwe ono buwaa ke nyonyoronyo; o mekwaa iphe-eji ozo. Yebedua yee ndu-ozu iya kpo-chikwa obu phe ozo.
- ³⁵Okpoma Fero bya akpo-chikwa; ophu o kwedu aha ndu Izurelu g'ephe tugbua, bu iya bu ge Chipfu shihawaa l'onu Mósisu pfua ya.

Awufu 10

Igube byaru ogu

- ¹Noo ya; Chipfu su Mósisu: "Jepfu Fero; noo kele mu kpo-chiru iya obu; kpo-chia ke ndu-ozu iya; k'ophu mu e-meshigbaa oke iphe-ohumalenya, dugbaa biribiri l'echilabo phe;
- ²k'ophu unu a-koru unwu unu; me unwu nwanwa unu ge mu gude kpaa ndu Ijiputu eh; teme waa ge mu gude mee oke iphe-ohubama nu phe. Oo ya bu g'unu amaru l'oo mbedua bu Chipfu."

- ³Oo ya bu; Mosisu yee Eronu bya ejepfu Fero su iya: “Waa iphe, Chipfu, bu Chileke ndu Hiburu pfuru baa: ‘? Bu teke ole be ijika-beru ewoze onwongu ali l'ataphu mu? Haa ndibe mu g'ephe la; k'ophu ephe e-je abaru mu eja!
- ⁴O -buru l'i jikaru g'ephe ta tugbushi be mu e-gude igube bata l'ali ngu echele.
- ⁵Oo-bya atuko ali unu nyinwua; k'ophu bu l'o to dudu aka aahuma uzo l'ali ono. L'o tuko iphe, akamini mebyishiphodoru tapyashikota; mechaa iphe, bu oshi, pfuru l'egu unu.
- ⁶Ephe abya atuko ulo ngu; me ulo ndu-ozu ngu; mekpoo ali Ijiputu l'ophu sweta. Iphe ono bu iphe, nna ngu; me nna ngu oche phe teke ahuma-swee l'ali-a; e -shi teke ephe lwaru aka-a byasu nta-a.’ “ Mosisu dakobe; paru Fero haa; o buru iya atugbu.
- ⁷Ndu ozi Fero su Fero: “? Bu teke ole be nwoke-a a-chi-beru anyi okpu akpohu? Haa ndu-a g'ephe tugbua je abaru Chipfu, bu Chileke phe eja. ? Ti madu l'ali ndu Ijiputu buwaa mkpurupyata?”
- ⁸Noo ya; a bya eduphuta Mosisu yee Eronu azu l'iphu Fero. O su: “Unu je abaru Chileke unu eja! Ole o bu; ? bulaje ndu ole e-je?”
- ⁹Mosisu su: “Anyi l'unwegirima anyi; waa ndu bu ogerenya anyi; waa unwu anyi ke nwoke; waa ke nwanyi a-tukokwa swiru; anyi atuko aturu anyi; waa eswi anyi rwuta. Noo kele anyi a-boru Chipfu anyi obo-iphe.”
- ¹⁰Fero su phe: “Ge Chipfu swikwaru unu eswiru ome o o ke ge mu haa unu g'unu l'unwegirima unu swiru tugbua! Nta-a be mu makporu l'oo ejo-iphe be unu ari k'ememe.
- ¹¹Waawakwa-o; g'o buru ndu k'unwoke kpoloko be unu e-rwuta gude je abaru Chipfu eja; eshi ophu o bu iphe ono be unu shi teke-a rwota!” Noo ya; a chifu Mosisu yee Eronu l'iphu Fero.
- ¹²Chipfu su Mosisu: “Machia aka maa l'ali Ijiputu; g'igube wubata l'ali ono bya atuko iphe, futaru l'egu l'ali ono tapyashikota; mbu iphe, akamini mebyishiphodoru.”
- ¹³Oo ya bu; Mosisu bya eworu mgboro iya maa l'ali ndu Ijiputu. Chipfu bya emee; pherephere shi l'uzo enyanwu-awawa wata ezizi. Pherephere ono zikota l'ali ono eswe l'enyashi. A futashia l'utsu; pherephere ono vubatawa igube l'ali ono.
- ¹⁴Igube tuko Ijiputu sweta; bya anoepho l'ekameka l'ali ono ke nyimunyimu. Igube teke ekpofutaswe egube ono; teme ophu o byadu awubataba l'otu egube ono ozo.
- ¹⁵Ephe nyinwuepho ali ono l'ophu; k'ophu bu l'ekameka jihukotaru ke kpakpalu. Ephe bya atuko iphe, phoduru nu g'akamini byacharu tapyashikota; mbu iphe, rwutakporu irwu l'egu; mechaa akporu oshi. Ekwo oshi; me k'iphe, a koru l'egu te nwedu me nanu, phoduru nu l'ali Ijiputu l'ophu.
- ¹⁶Fero bya ekua Mosisu yee Eronu egwegwa; su phe: “Mu meswewaru Chipfu, bu Chileke; bya emeswee unu.

¹⁷Jiko gūfuaru mu nvu ugbo lanu owa-a; je epfuru nu Chipfu, bu Chileke unu g'o wofuru mu ejo iphe-ehuka-a!”

¹⁸Mosisu paru Fero haa; lufu je epfuru nu Chipfu.

¹⁹Oo ya bu; Chipfu bya agbanwee pherephere ono; mee ya; o buru eze pherephere, ha shii, shi l'uzo enyanwu-ariba bya ezikotachaa igube ono g'o ha je achiru ye le Eze-enyimu Uswe-uswe. Ophu o to dudu me igube lanu, ghuduru l'ali ndu Ijiputu.

²⁰Ole Chipfu kpo-chilerua obu Fero; ophu o kwedu haa ndu Izuru lu g'ephe tugbua.

Ochii byaru ogu

²¹Noo ya; Chipfu su Mosisu g'o machia aka maa l'akpaminigwe; g'ochii bya aso-kpute ekameka l'ali ndu Ijiputu. Ochii, e-me g'ekameka gbahu ke tsukiribaa.

²²Oo ya bu; Mosisu bya amachia aka maa l'akpaminigwe. Ali ndu Ijiputu l'ophu gbahukota tsurikitiki; no abali eto.

²³Ophu o dudu onye humaru nwibe iya; teme ophu o dudu onye humaru uzo ke g'o shi l'eka o bu kpuriberu; jasuh abali eto ono. Obenu le ndu Izuru lu be iphoro du l'eka ephe bu.

²⁴Noo ya; Fero kua Mosisu bya asu: “Unu je abaru Chipfu aja! Unu dutachaa unwanyi me unwegirima unu g'unu swiru! Iphe, unu a-ha kpoloko bu aturu; waa eswi unu.”

²⁵Obenu le Mosisu suru iya: “I-hafukwapho anyi g'anyi gude iphe, anyi e-gude nu Chipfu, bu Chileke anyi ngweja-akpo-oku; waa ngweja mmanu ozo.

²⁶Oo ya bu l'anyi e-rwuta iphe-edobe anyi. A taa hakwa g'o ka mma l'oo ichiripfu okpa eswi; k'ophu anyi a-haru iphe-edobe ono hata gude baaru Chipfu, bu Chileke anyi aja. Anyi ejerwuduru aka ono be anyi ta amadu ndu ophu anyi e-gude baaru Chileke aja.”

²⁷Ole Chipfu kpo-chilerua obu Fero; ophu o kwedu haa ndu Izuru lu g'ephe tugbua.

²⁸Fero su Mosisu: “Makwaru onwongu! Gbeshi mu l'iphu! Ge mu ta ahumabaekwa ngu ozo l'ataphu mu. Mbochi, i byabaaru apfuru mu l'iphu be ii-nwuhukwa!”

²⁹Mosisu su iya: “G'o du nu g'i pfuru. Mu ta abyabaedu ngu apfuru l'iphu ozobaa.”

Awufu 11

Mgbu-onwu a-bya ogu

¹Noo ya; Chipfu su Mosisu: “Mu e-gudofua oke iphe-ehuka lanu byapfuta Fero; ye le ndu Ijiputu. E -mechapho be oo-kwechaa g'unu wufu l'eka-a. Teme o -kwepho ono be oo-chifukota unu g'unu ha.

²Pfuaru ndu Izuru lu; g'unwoke phe; waa unwanyi phe; jepfu ndu obutobu phe je asu phe g'ephe nu phe iphe, e meru le mkpola-ochaa; waa ophu e meru le mkpola-ododo!”

³Chipfu bya emee; ndu Ízurelu t̄ba ndu Ijiputu l'obu; mekwaapho ḡe ndu-ozí Fero; waa ndu Ijiputu l'ophu kwab̄e Mósísu l'onwiya eze ùbvù, ha shii.

⁴Oo ya b̄u; Mósísu s̄u: “Wakwa iphe, Chipfu epfu baa. O s̄uru l̄e ya e-gude ụzo echi abal̄i jedzuru al̄i Ijiputu l'ophu.

⁵Iphe, b̄ukota ndu b̄u ọkpara l̄e nwoke l'al̄i Ijiputu b̄e a-nw̄ushihukota n̄u; a -gbe l'ọkpara Fero, b̄u onye n̄o l'aba-eze; je akpaa l'ọkpara nwanyi, b̄u ohu, b̄u onye egwejeru iya iphe; mekwapho iphe-edobe, e vuru ụzo nw̄ua l'ep̄ho ne iya.

⁶Oke ụzu-ekwa, par̄u ẹka a-t̄u l'al̄i Ijiputu l'ophu. Mb̄u ụzu-ekwa, ẹtu iya ad̄ujeduru; ophu ọ byadu l'a-d̄ubaa.

⁷Obenu l'eka ndu Ízurelu bu b̄e ọ t̄o d̄udu g'ọ ka mma l'oo nk̄uta bya agb̄o ire kpua nemad̄u; ọzoo an̄u. Oo ya b̄u g'unu amaru l̄e Chipfu kpar̄u oke; dokaha Ijiputu ȳe Ízurelu.

⁸No teke ndu-ozí ngu-a a-w̄u-pfuta mu bya ephozeru mu bya as̄u mu: ‘Unu t̄ugbuwaro-o! T̄ukokpoo ndu ndu-unu l'ophu rwuta t̄ugbua-o!’ O -nw̄uchaep̄ho nno; mu at̄ugbua.’ No iya; Mósísu gude ẹhu-eghu lufu-shia l'ip̄hu Fero.

⁹T̄obudu iya b̄u; Chipfu bya as̄u Mósísu: “Fero te ekwekwa angab̄eru ngu nchi; ḡe mu eshi nno meshia igwerigwe iphe-ohumalenya l'al̄i Ijiputu.”

¹⁰Noo ya; Mósísu ȳe Er̄onu bya emeshik̄ota iphe-ohumalenya ono l'ip̄hu Fero. Obenu l̄e Chipfu kp̄o-chileru-a Fero obu; ophu o to kwedu haa ndu Ízurelu g'ep̄he shi l'al̄i iya w̄ufu lashia.

Aw̄ufu 12

Ọbo Ojehata

¹Chipfu s̄u Mósísu ȳe Er̄onu l'al̄i ndu Ijiputu:

²“Onwa-a, a n̄o-a; a-b̄ujeru unu ọnwa mb̄u l'apha.

³Pfuaru ndu Ízurelu g'ep̄he ha l'o -rwua mb̄oku, ọnwa-a a-d̄u l'abal̄i iri ḡe nwoke, nonu kp̄uta nwat̄uru lan̄u dobe k̄e ȳe ndibe iya.

⁴O -b̄uru l̄e ndibe onye ọbu han̄ukaru nwansh̄ii; k'ophu b̄u l̄e nwat̄uru ophu par̄u p̄he ẹka; ep̄he ejepfu ndu kachaa p̄he ebukube ntse; g'ep̄he gbar̄u mgba l̄e nwat̄uru lan̄u; m'ep̄he ḡuchaa onwoph̄e maru ole, ep̄he d̄u. Unu lee ẹnya l̄e g'on'yemonye a-taberu.

⁵An̄u, unu a-h̄ota l'a-b̄uru an̄u, gbaru apha; b̄uru okee ya; bya ab̄uru ophu ad̄udu ẹka iphe mebyiru iya. Unu -eshidu l'at̄uru h̄ota iya; unu ah̄ota iya l'eghu mman̄u.

⁶Unu leta iya ẹnya gbiriri jas̄u mb̄oku, ọnwa-a l'a-d̄u l'abal̄i iri l'eno. Noo mb̄oku, ndu Ízurelu l'ophu e-gbushik̄ota iya g'ọ ha l'uzenyashi iya.

⁷Ep̄he ah̄aru mee ya nata techaa l'aḡuga mgbo; waa l'eli oshi-mgbo, n̄okota l'ulo, ep̄he n̄o ata an̄u nwat̄uru ono.

- ⁸Enyashi ono bẹ ẹphe a-ta anụ nwaturu, a huru ahuhu l'ọku; yee ẹkwo oshi, atso ilu; waa buredi, e yeduru iphe, ekoje buredi.
- ⁹Unu te eshikwa anụ ono eshishi; ẹbe unu atakwa iya l'oyii. Oo ẹpho g'unu hushia ya l'ọku; mbụ ishi iya; me ọkpa iya; mechaa iphe-ẹpho iya.
- ¹⁰G'o to nwekwa ọphu unu a-ha g'ọ bọo nchi. O -buru l'o nweru ọphu a haru; o nọo futa utsu; unu akpoo ya ọku.
- ¹¹Waa g'unu e-gude taa ya baa: Unu gude akpoo tubuta uwe unu; unu eye akpokpa unu l'okpa; bya ewota mgboro unu paru l'eka. Unu ataa ya wobuwobuwobu; kele oo obo Ojaghata ke Chipfu.
- ¹²“Enyashi ono kwapho bẹ mu e-jedzuru ali Ijiputu; gbushigbua iphe, bu okpara nemazu me iphe-edobe. Iphe, bukpo agwa ndu Ijiputu l'ophu bẹ mu a-nukota chiipfu. O kwa mbedua bu Chipfu.
- ¹³Mee ono a-buru iphe-ohubama, e-goshije ulo ọphu unu no. Oo ya bu; mu -humaepho mee ono; mu aghata unu. O to nwedu ejo iphe-ememe, e-byi unu eka teke mu a-nodu egbushi ndu Ijiputu ono.
- ¹⁴“Mboku ono l'a-buru unu mboku obo-iphe, unu e-gudeje nyata iphe-a. E shi l'ogbo sweru ogbo bẹ unu a-boje iya g'ọ buru obo-iphe ke Chipfu. Ekemu ono a-du jasụ le tuutuutu le mijimiimii.
- ¹⁵Ujiku esaa bẹ unu a-ta buredi, e yeduru iphe, ekoje buredi. Mboku mbụ bẹ unu e-wofukota iphe, ekoje buredi l'ulo unu. Noo kele iphe, bukpo onye taru iphe, e yeru iphe, ekoje buredi; a -gbe le mboku mbụ ono jasụ le mboku k'esaa ono bẹ ee-bufu le Izurelu.
- ¹⁶Mboku ke mbụ bẹ unu e-nweru ndzuko, du nsọ; bya enwekwarupho ozo mboku k'esaa. G'ọ to dukwa iphe, unu e-je l'ujiku labo ono; gbahaepho nri, unu e-ri bẹ unu e-shije. Noo iphe, unu e-meje bu ono kpoloko.
- ¹⁷“Unu bọo obo-iphe buredi, ekoduru ekoko; noo kele oo mboku ono gedegede bẹ mu dufutaru unu g'unu hakota l'ali Ijiputu. Unu boje mboku ono obo-iphe; g'ọ buru ekemu, a-no jasụ l'ojejoje; e -shi l'ogbo sweru ogbo.
- ¹⁸L'onwa mbụ pho bẹ unu a-taje buredi, e yeduru iphe, ekoje buredi; a -gbe l'uzenyashi mboku, onwa ono du l'abali iri l'eno jasụ l'uzenyashi mboku, o du l'ukporo abali l'abali lanu.
- ¹⁹Ujiku esaa bẹ a ta abyadu ahuma iphe, ekoje buredi l'ulo unu. Onye rikporu iphe, e yeru iphe ekoje buredi bẹ ee-bufu le ndu Izurelu; m'onye ono bu nlwamulwa; ozo onye a nwuru anwunwu l'ali ono.
- ²⁰G'o to dukwa iphe, e yeru iphe, ekoje buredi, unu e-de onu. Eka unu e-buhabe; unu taa buredi, ekoduru ekoko!”

²¹Tobudu iya bu; Mosisu bya ekukoo ndu bu ogerenya Izurelu g'ephe ha; bya asu phe: "Unu tugbua nta-a nta-a; je ahota anu ophu unu le ndibe unu e-gbu gude bo obo Ojehata k'unu.

²²Unu ewota ekwo isopu, du jipfujipfu tsee le mee anu pho, a nakoberu le gbamugbamu pho tee l'eli oshi-mgbo ono; waa l'aguga iya ibe k'ebo ebo. G'o to nwekwa g'unu ha onye a-lufu etezi jasu l'utsu.

²³Oo ya bu; Chipfu -jeshiepho egbushi ndu Ijiputu; l'o huma mee, e teru l'eli oshi-mgbo waa l'aguga iya ono; l'o ghata onu mgbo k'ono. O too kwedu ge mgbugbumadzu ono bata l'ulo unu bya egbushia unu.

²⁴"Unu mejekwa iphe-a g'o buru nsu, a-duru unu l'oshilokpa unu jasu l'ojeje.

²⁵Unu -bahuepho l'ali ono, Chipfu a-nu unu ono, bu iya bu iphe, o kweru ukwe iya ono; unu mejekwa omelali ono.

²⁶O -buru l'unwu unu jiru unu su: "? Bu gunu be unu emedojeru omelali ono?"

²⁷unu asu phe: "Oo ngweja egbu anu obo Ojehata, eegweru Chipfu, bu onye ghataru ulo ndu Izurelu l'ali ndu Ijiputu je egbushia ndu Ijiputu; mbu onye haru unuphu ibe anyi; ophu o gbuduru ndibe anyi." "Ndu Izurelu -numaepho iphe ono; ephe phozeta; baaru Chipfu eja.

²⁸Ndu Izurelu bya emee iphe ono; ge Chipfu toru Mosisu yele Eronu okpa iya; o buru egube ono bu g'ephe meru iya.

²⁹O -rwua l'echi-abali; Chipfu bya egbushia okpara ndu Ijiputu l'ophu; a -gbe l'okpara Fero, bu onye no l'aba-eze; jasu l'okpara onye mkporo, a tu-chiru l'oka-mkporo; wakwapho nwa ivuzo iphe-edobe.

³⁰Fero; yee ndu-ozu iya g'ephe ha; waa ndu Ijiputu l'ophu tehu l'enyashi. Uzu-ekwa nodu atuwaa l'ali Ijiputu; noo kele o to nwezu ulo, no l'ali ono l'ophu, nemadzu ata nwuhuduru.

Awufu unwu Izurelu le Ijiputu

³¹Fero bya ekua Mosisu yee Eronu l'enyashi ono; su phe: "Unu gbeshi; unu le ndu Izurelu; jwaro. Unu paru ndu ali mu haa; tugbuwara je abaru Chipfu eja, bu iya bu iphe, unu epfukpo.

³²Unu rwuta aturu unu; waa eswi unu gude tugbua, bu iphe, unu epfu. Ole unu gokwaaru mu onu-oma."

³³Ndu Ijiputu nodu alwuru ndu Izurelu ulwu g'ephe mee egwegwa lufu l'ali eka ono; kele ephe suru l'odumeka be ephebe ndu Ijiputu a-nwushihukotakwa.

³⁴Ephe kpota iphe, eegudeje eghe buredi kpojia ochi buredi; gude uwe phe kechia ya; nmakobe iya l'ukuvu; ophu ephe eyeduru iya iphe, ekoje buredi.

³⁵Ndu Izurelu mee ge Mosisu ziru phe; bya arwoko ndu Ijiputu iphe, e meru le mkpola-ochaa; waa mkpola-ododo; waa uwe.

- ³⁶Chipfu mee; ndu Ízurelu t̄ba ndu Ijiputu l'obu; k'ophu ephe n̄ru ph̄ iphemiphe, ephe rw̄oru ph̄. Ephe shi nno kwaa iphe ndu Ijiputu l'okwata gude t̄gbua.
- ³⁷Ndu Ízurelu shi l̄ mkp̄kp̄u Rames̄esu jeshia mkp̄kp̄u Suk̄otu. Unwoke ndu ophu gude okpa eje rwuru ukporo unu mgbo ukporo eto; l'ukporo unu ugbo iri l'ise; a -gufukwa unwanyi waa unwegirima.
- ³⁸Ndu ozo, dukwapho igwerigwe tsokwaru ph̄ ph̄; wakwapho ikpoto iphe-edobe; mbu aturu m̄ eswi.
- ³⁹Iphe, eegheje buredi, ephe shi l'al̄i Ijiputu gude b̄ ephe gude ghee akara, e yeduru iphe, ekoje buredi. Iphe meru g'o gude ophu iphe, ekoje buredi adudu iya bu l'a chifuru ph̄ achifu l'al̄i Ijiputu; ophu uzo k'akwakobe k̄ nri, ephe e-ri aduduru ph̄.
- ⁴⁰Iphe, ndu Ízurelu n̄ru l'al̄i Ijiputu bu unu apha l'apha ukporo l'iri.
- ⁴¹O -rwuepho l̄ mboku, unu apha l'apha ukporo l'iri ono bvuru gedegede; ndibe Chipfu g'ephe ha, bu iya bu ndu Ízurelu; wufukota l'al̄i ndu Ijiputu.
- ⁴²Eshi ophu Chipfu nwuru enya l'enyashi ono g'oo-me dufuta ph̄ l̄ Ijiputu b̄ ephebe ndu Ízurelu g'ephe ha a-nwujekwarupho Chipfu enya l'enyashi ono gude kwab̄e iya ubv̄u; e shi l'ogbo sweru ogbo.

K'eme k'obo Ojaghata

- ⁴³Chipfu su Mosisu waa Er̄onu: “Waa g'unu e-meje k'obo Ojaghata baa: “G'o to nwekwa nlwamulwa, l'a-taj̄e anu obo-iphe ono.
- ⁴⁴Ohu, unu gbataru agbata b̄ unu e-bujeada ubv̄u; teme l'o taa ya.
- ⁴⁵Ole g'onye, byaru abyabya; ozoo onye e beru ozi ba ataj̄kwa iya.
- ⁴⁶“Aa-n̄duje l'ime ulo lanu taa ya. G'o to nwekwa anu obu; ophu ee-gude lufuta etezi. Ophu o dukwa okpu iya m̄ nanu, unu a-nyakwo anyakwo.
- ⁴⁷Ndu Ízurelu g'ephe ha b̄ a-tukoje bo obo-iphe ono.
- ⁴⁸“O -buru l'onye lwaru alwalwa, bu l̄ ndunu b̄ o du ḡe ya yiru l'obo Ojaghata k̄ Chipfu ono; g'o bushikota ndibe iya ndu k'unwoke ubv̄u g'ephe ha. Oo ya bu l'o yiwaruro boaha ya g'onye a nwuru l'al̄i ono. G'o to nwekwa nwoke, ebuduru ubv̄u, a-ta iya nu.
- ⁴⁹Oo ekemu lanu-a duru onye a nwuru anwunwu l'al̄i-a; bya aduru onye lwaru alwalwa; unu eya tuko buru.”
- ⁵⁰Ndu Ízurelu g'ephe ha bya emekota iphe, Chipfu pfuru Mosisu ȳe Er̄onu.
- ⁵¹O buru l̄ mboku ono gedegede b̄ Chipfu dufutaru ndu Ízurelu g'ephe hakota l'al̄i Ijiputu.

Awufu 13

Eye ndu bu okpara l'eka Chileke

¹Chipfu sụ Mosisu:

²“Doberu mu ọkpara unu iche. Iphe-mbụ, vu-kpọoru ụzo waa ẹkpa-nwa l'ẹpho ne iya lẹ Ízurelụ: mę nemadzụ mę iphe-edobe; bụ nkemu.”

³Noo ya; Mosisu sụ ndu Ízurelụ: “Unu nyata ntanụ-a; mbụ mbọku, unu wufutaru lẹ Ijiputu, bụ ẹka unu shi buru ohu. Ntanụ-a bụ mbọku, Chipfu gude ọkpehu iya dufuta unu. G'ọ tọ dukwa onye a-ta iphe, e yeru iphe, ekoje buredi.

⁴Ọo ntanụ-a l'ime ọnwa Abibu-a bę unu atugbu.

⁵Teke Chipfu durwuęrupho unu l'alị ndu Kėnanu; waa kę ndu Hetu; waa kę ndu Amọru; waa kę ndu Hevu; tẹme waa kę ndu Jiebusu; alị ono, o riburu nna unu oche phę angụ lẹ ya a-nụ unu; alị, mini ẹra-eswi waa manụ-ẹnwu jiru kę pyimu pyimu; unu dobejekwa omelalị-a l'ọnwa-a.

⁶Ujiku ẹsaa bę unu a-takọta buredi, e yeduru iphe, ekoje buredi. O -rwua lẹ mbọku k'ẹsaa; unu abọoru Chipfu ọbo-iphe.

⁷Unu takọtaje buredi, e yeduru iphe, ekoje buredi l'ime ujiku ẹsaa ono. G'o to nwekwa iphe, e yeru iphe, ekoje buredi, aa-huma l'echilabọ unu. Tẹme g'ọ tọ dukwa iphe, ekoje buredi, aa-huma l'alị unu.

⁸Mbọku ono bę unu a-sụ unwu unu l'iphe, kparụ iphe, unu gude eme iya bụ iphe, Chipfu meru unu mbọku, unu lufutaru l'alị Ijiputu.

⁹G'omelalị ono bukwaru iphe-ọhubama, e byiru unu gę mbo l'ẹka; dee ya unu g'uri l'iphu; g'e gude nyatajeru unu l'ekemu Chipfu bụ iphe, unu a-kpujeru l'ọnu; kele ọọ Chipfu ono gude ọkpehu iya dzọta unu l'alị Ijiputu.

¹⁰Unu meje ekemu-a mę o -rwuępho teke emeje iya; apha g'apha.

¹¹“Chipfu -durwuchaępho unu alị Kėnanu ono; bya anụ ẹya phọ unu g'o riburu iya unu lẹ nna unu oche phę lẹ nte;

¹²bukwa g'unu nuje Chipfu iphe-mbụ, vukpọoru ụzo waa ẹkpa-nwa l'ẹpho ne iya. Anụ mbụ, bụ okee ya, vuru ụzo waa ẹkpa-nwa l'ẹpho ne iya l'iphe-edobe unu a-buru kę Chipfu.

¹³Iphe, bụ nkapfụ-igara, vuru ụzo waa ẹkpa nwa l'ẹpho ne iya bę unu e-gudeje nwaturu gbata. Ọ -buru l'unu ta agbatadu iya agbata; unu aswịkwoo ya olu aswịkwo. Iphe, bụ ọkpara unu lẹ nwoke bę unu a-gbatajękwapho agbata.

¹⁴“O -be l'atatiphu; unwu unu -jia unu sụ: ‘? Bụ gunu bę eemedojeru iphe-a?’ Unu sụ phę: ‘Chipfu gude ọkpehu iya dufuta anyi l'alị ndu Ijiputu; mbụ dufuta anyi l'ẹka ono, anyi shi buru ohu ono.

¹⁵Lẹ teke Fero kpọ-chiru obu jika lẹ ya ta ahadụ anyi g'anyi tugbua bę Chipfu gbushiru ọkpara l'alị ndu Ijiputu; nemadzụ mę iphe-edobe. Noo iphe, meru g'o gude anyi nọdu akputaje anụ, bụ okee ya, vuru ụzo waa ẹkpa-nwa l'ẹpho ne iya; gbuaru Chipfu; bya egude iphe gbata ndu bụ ọkpara l'ẹpho ne phę lẹ nemadzụ.’¹⁶G'omelalị

ono bukwaru iphe-ohubama, e byiru unu ge mbo l'eka; dee ya unu g'uri l'iphu; gude goshi le Chipfu gude okpehu iya dufuta unu l'ali Ijiputu.”

Ndu Izurelu l'awugha Eze-enyimu Uswe-uswe

¹⁷Fero haepho ndu Izurelu; ephe tugbua; ophu Chipfu eduduru phe shia uzo ali ndu Filisitayinu; a makwaru-a l'ono be ka ntse. Noo kele Chipfu suru: “? A maru ? ephe -vubaa ugu be ephe ta agbanwedu nu egomunggo; lasha azu l'ali Ijiputu?”

¹⁸Oo ya bu; Chipfu duru ndu Izurelu gbaa mgburugburu; shia uzo echiegu l'ibe iya k'uzo Eze-enyimu Uswe-uswe. Ndu Izurelu ono shi l'ali Ijiputu wuru tugbua; kwakobe onwophe k'ogu.

¹⁹Mosisu bya achita okpu Jiosesu gude; noo kele Jiosesu meru unwu Izurelu; ephe riaru iya nte l'ephe e-me nno. O suru: “Mu maru le Chileke be e-mechaa bya eyeru unu aka. Ole g'unu chitakwa okpu mu l'eka-a me unu tugbushia.”

²⁰Ephe wufuta le Sukotu; je akpobe ulo-ekwa phe le Etamu l'aguga echiegu.

²¹O -rwua l'eswe; Chipfu egude urwukpu, kpuru oronmono edu phe uzo. O -rwua l'enyashi l'o nwuberu phe oku, kpuru oronmono g'ephe gude huma iphoro; k'opu ephe a-noduje eje ije: eswe l'enyashi.

²²Urwukpu ono, kpuru oronmono ono, oogudeje edu phe l'eswe; waa oku ono, kpuru oronmono ono, oogudeje edu phe l'enyashi ta alufujedu alufu l'atatiphu ndu Izurelu.

Awufu 14

¹Oo ya bu; Chipfu su Mosisu:

²“Pfuaru ndu Izurelu g'ephe laphu azu je akpobe ulo-ekwa phe le mgboru mkpukpu Pi-Hahirotu, no le mgbaka mkpukpu Migudolu yee eze-enyimu. Ephe akpobe ulo-ekwa phe ono l'aguga eze-enyimu; g'o gha iphu le mkpukpu Belu-Zefonu nhamunha.

³Oo ya bu le Fero a-su l'unube ndu Izurelu nmawaru l'agaga; l'unu kwawaru l'echiegu.

⁴Mu a-kpo-chia Fero obu; l'o chipfuru phe. Obenu l'ee-shi l'iphe, a-nwu l'ehu Fero; yee ndu ojogu iya; kwabe mu ubvu. Oo ya bu; ndu Ijiputu amaru l'oo mbedua bu Chipfu.” Noo ya; ndu Izurelu mee nno.

⁵A bya epfuaru eze ndu Ijiputu le ndu Izurelu gbalaakwaru; Fero yee ndu-ozu iya gbanwee obu phe l'eka ephe no; su: “? Bu gunu be anyi meru egube-a? ? Anyi gbhaa ndu Izurelu g'ephe tugbua paru ozi, ephe eje haa?”

⁶Oo ya bu; a bya edoziaru Fero ugbo-inya iya ree; o duta ndu ojogu yeru onwiya.

⁷O chita ugbo-inya, kachaa ree unu l'ukporo iri; mewaro ugbo-inya Ijiputu g'o hakota. O byakwapho eworu ndu-ishi ojogu yegbachaa l'ugbo-inya ono.

⁸Chipfu kpo-chia obu Fero, bu eze ndu Ijiputu; o chipyabe ndu Izurelu g'ephe azo garamu garamu; awufu.

⁹Ịnya Fero l'ophu; waa ụgbo-inya iya; waa ndu agba l'inya; waa ikpoto ndu ojogu iya; mbu ndu Ijiputu l'ophu chipyabe ndu Ízurelu bya agbapfu phe l'eka ephe kpoberu ulo-ekwa phe l'agugu eze-enyimu; le mgboru Pi-Hahirotu, gharu iphu le Belu-Zefonu nhamunha.

¹⁰Fero nodu akpiritaru ntse; ndu Ízurelu palia enya imeli; o buwaru ndu Ijiputu be etso phe nu. Ndu rwuta phe; ephe bya araku Chipfu.

¹¹Ephe su Mosisu: “? Bu l'ilu ta adudu l'alì Ijiputu meru g'o gude i dufuta anyi g'anyi bya anwushihu l'echiegu? ? Bunua gunu meru; g'o gude i dufuta anyi l'alì Ijiputu?”

¹²? Anyi ta asuduru ngu l'alì Ijiputu g'i paru anyi haa; g'anyi jeruro ndu Ijiputu ozi? ? Togo kaduru anyi mma l'anyi ejeru ndu Ijiputu ozi; eme l'anyi nwushihuru l'echiegu?”

¹³Mosisu su phe: “Ge ndu ba agushi unu! Unu pfuru pfushia ike; g'unu ahuma iphe, Chipfu e-me gude dzota unu ntanu-a. Ndu Ijiputu ono, unu ele enya ntanu-a be unu ta ahumabaekwa ozo.

¹⁴Unu nodu nggujunguji; Le Chipfu a-lwu-chiru-a unu ogo!”

¹⁵Oo ya bu; Chipfu su Mosisu: “? Bu gunu be iraku mu? Karu ndu Ízurelu g'ephe tugbua jeshia iphe, ephe eje.

¹⁶Wolia mgboro ngu; maa l'eze-enyimu ono g'o kekaha mini ono ebo; k'ophu ndu Ízurelu e-gude okpa phe jee ije l'alì okponku l'oma enyimu ono; wughaa.

¹⁷Mu akpo-chia obu ndu Ijiputu; k'ophu ephe e-tsopyabe phe. Oo ya bu; l'e shi l'iphe, a-nwuru Fero; yee ndu ojogu iya; waa ụgbo-inya iya; me ndu agba l'inya; kwabe mube Chipfu ubvu.

¹⁸Oo ya bu ge ndu Ijiputu eshi nno maru le mu bu Chipfu; mbu teke ee-shi l'iphe, a-nwuru Fero; yee ndu ojogu iya; waa ụgbo-inya iya; me ndu agba l'inya; kwabe mu ubvu.”

¹⁹Noo ya; Ojosi Chileke, shi vuru uzo edu ndu Ízurelu pho bya atsulaa azu bya etsoaha phe etsotso. Urwukpu pho, kpuru oronmono pho bya eshikwapho l'ataphu laa l'azu; je anodu phe l'okotazu;

²⁰je anokaha ndu ojogu ndu Ijiputu; waa ndu Ízurelu. L'enyashi ono mgburugburu be urwukpu ono gbakotaru ochii l'eka lanu bya acha oku l'eka lanu. Iphe ono mee; ophu o dudu ndu ophu jekuberu nwibe phe ntse l'enyashi ono l'ophu.

²¹Tobudu iya bu; Mosisu bya amachia aka iya l'eli eze-enyimu ono. Enyashi ono l'ophu be Chipfu gude oke pherephere, shi l'uzo enyanwu-awawa ziphu eze-enyimu ono azu; o bya agho alì okponku. Mini ono kekaha ebo.

²²Ndu Ízurelu bya azo okpa l'alì okponku gude wughaa eze-enyimu ono. Mini eze-enyimu ono kpa g'igbulo; nodu phe l'ekutara; waa l'ekicha teke ephe awugha.

²³Ndu Ijiputu chipyabe phe. Inya Fero; waa ụgbo-inya iya; waa ndu agba l'inya tuko tsoru phe wuba l'ime eze-enyimu ono.

- ²⁴O -rwua l'uzo nchi-abohu; Chipfu shi l'oku; waa l'urwukpu ono, kpuru oronmono ono lee ndu ojogu ndu Ijiputu enya; bya atu phe eberebete.
- ²⁵O mee; okpa ugbo-inya phe wata agbaphe mgburugburu; k'ophu agbagba iya tsuahaaru phe l'ehu. Ndu Ijiputu su: "G'anyi halekwaa ndu-a; laphu azu; kele o kwa Chipfu l'etso anyi ugu l'iswi ehuh phe."
- ²⁶Oo ya bu; Chipfu su Mosisu g'o machia aka maa l'eze-enyimu ono ge mini ono bya aso-kpote ndu Ijiputu; waa ugbo-inya phe; waa ndu agba l'inya phe.
- ²⁷Mosisu bya amachia aka; maa l'eze-enyimu ono. O -rwua l'utsu; mini ono soahaa g'o shi aso. Ndu Ijiputu nodu agba g'ephe nahu mini ono; Chipfu zaru phe ye l'eze-enyimu ono.
- ²⁸Mini ono bya asogbabe; rikota ugbo-inya ono; yee ndu agba l'inya. Mbuh le ndu ojogu Fero, chipyaberu ndu Izurelu chia phe jasuh l'eze-enyimu ono ta adudu g'o ka mma l'oo onye lanu, lwaruh nu.
- ²⁹Obenu le ndu Izurelu jeru ije l'ali okponku ghaa eze-enyimu ono. Mini eze-enyimu ono kpua g'igbulo; nodu phe l'ekutara; me l'ekicha.
- ³⁰Mboku ono be Chipfu dzotaru ndu Izurelu l'eka ndu Ijiputu. Ndu Izurelu humu ndu Ijiputu g'ephe nwushihuru dabyichaaru l'aguga mini.
- ³¹Ndu Izurelu humu ike-okpu, Chipfu gude lwu-kpee ndu Ijiputu; ephe tsuaha Chipfu ebvu; bya ekweta nkiya; waa k'onye-ozu iya, bu Mosisu.

Awufu 15

Ebvu Mosisu

- ¹Noo ya; Mosisu; waa ndu Izurelu gua ebvu-a nu Chipfu su: Mu a-gu ebvu nu Chipfu; kele o goshiwaru l'o paru aka. Inya me ndu agba iya nu be o nwuru ye l'eze-enyimu.
- ²Chipfu bu okpehu mu bya aburu onye mu agu-ku l'ebvu. O buru yebdua bu onye dzotaru mu nu. Oo ya bu Chileke mu; mu a-nodu aja iya ajaja. O buru iya bu Chileke nna mu; mu a-nodu ekutse epha iya.
- ³Chipfu bu ojogu. Oo Chipfu bu epha iya.
- ⁴Ugbo-inya Fero yee ndu ojogu iya be o nwuru ye l'eze-enyimu. Ndu kachaa ree le ndu-ishi ugbo-inya Fero be mini riru le Eze-enyimu Uswe-uswe
- ⁵Ogbumini riru phe; ephe buru tubukungu l'ohu-mini ge mkpuma.
- ⁶Ekutara gube Chipfu be okpehu, du iya nu du biribiri. Ekutara gube Chipfu be gweru ndu ohogu ngu uji.
- ⁷I gude odu-biribiri ngu, paru aka kwatsushia ndu wu-lihuru etso ngu opfu. I haa oke ehueghu ngu, enwu g'oku; o bya etsua phe g'oku, etsu eswa okponku.
- ⁸Oo unme be i ziru l'imi; eze-enyimu koo obvudu. Utso ono pfuru roo g'igbulo. Ogbumini hukoo l'ohu eze-enyimu.

⁹Ndu ọhogu sūru: “Anyi a-chi phe ọso gude. Anyi a-kwa iphe phe l'okwata; kee; gude phe mee iphe, agu anyi egu ememe. Anyi a-mita ogu-echi anyi; tuko phe gbushia.”

¹⁰Obenu l'i tūru unme; eze-enyimu tuko phe rigbushikota. Epe buru tubukungu l'eze-nyimu g'ota-njele.

¹¹? Denu agwa, aturu gube Chipfu? ? Bu onye du ge ngu? G'i du-be nsọ be du biribiri. G'i du-be akpabiri dukwapho ebvu. Iimeje iphe, dugbaa biribiri.

¹²Ekutara ngu be i machiru; mgboko bya atuko ndu ohogu anyi lwee.

¹³Ndu i gbafutaru be ii-gude n-yemobu ngu; dua. O buru eka ono, i bu, du nsọ ono be ii-gude okpehu ngu durwua phe.

¹⁴Ohamoha, nūmaru iya nū be ndzū e-rwuta. Ndzū e-rwuta ndu Filisitayinu.

¹⁵Ndu-ishi ndu Edomu be meji a-tofu. Ehu anmaa ndu-ishi Mowabu anmanma. Ndu Kėnanu erwushihu.

¹⁶Ndzū-agugu; waa ehu-anmanma e-gude phe. O buru okpehu, du ngu l'ekutara be ii-gude mee g'ephe dabyichaaru ge mkpuma; gbiriri jasū ndibe gube Chipfu wughata; mbū ndu ono, i gbafutaru l'ohu, epe shi buru ono.

¹⁷Ii-dubata phe; bya eye phe l'eli ubvú nkengu; mbū eka gube Chipfu hotaru g'o buru ibe ngu; mbū ulo, du nsọ ophu i gude eka ngu kpua.

¹⁸Oo gube Chipfu a-buru eze jasū le tuutuutuu le mijimiimii.

¹⁹Teke inya Fero; waa ugbo-inya iya; waa ndu agba l'inya bahuru l'eze-nyimu ono be Chipfu vutaru mini ono so-kpute phe. Obenu le ndu Izurelu jeru ije l'ali okponku ghaa eze-nyimu ono.

²⁰Noo ya; Miriyamu, nwanyi, epfuchiru Chileke, bu nwune Eronu bya ewota nkwa; unwanyi l'ophu wu-tsoru iya; aku nkwa bya ete iya etete.

²¹Miriyamu nodu aguru phe ebvu ono; asuje: Unu gua ebvu nu Chipfu; noo kele o goshiwaru l'o paru eka. Inya yee ndu agba iya nu be o nwuru ye l'echi eze-nyimu.

Mini Mara; waa Elimu.

²²Tobudu iya bu; Mosisu dua ndu Izurelu gbē le Eze-nyimu Uswe-uswe duru phe bahu l'echiegu Shuru. Epe jee ije ujiku eto l'echiegu; ophu epe ahumaduru mini.

²³Epe rwua Mara; ophu epe adudu ike ngua mini iya; noo kele mini ono atso ilu. Noo iphe ono, kparu iphe, a guru eka ono Mara.

²⁴Epe guaharu Mosisu aphu; su: “? Bu gunu be anyi a-ngu?”

²⁵Noo ya; Mosisu raku Chipfu. Chipfu bya egoshi iya mkpirikpu oshi. O wota iya chie le mini ono. Mini ono tsoahaa utso mini. O kwa l'eka ono be Chipfu turu ekemu nu phe; bya atooru phe okpa iya. O bukwarupho l'eka ono be o no hua phe ama.

²⁶Chipfu sụ phẹ: “Ọ -bụru l'unu ngaberu nchị l'opfu mube Chipfu, bu Chileke unu; bya eme iphe, pfuru ọto l'anya mu; ọ -bụru l'unu anga nchị l'iphe, mu sụru g'unu meje; bya etsoepho iphe, mu toru ọkpa sụ g'unu tsoje; be ọ to dudu ẹjo iphe-ememe ono, mu gude byapfuta ndu Ijiputu ono, mu bya egude byapfuta unu. Noo kele ọo mbedua bu Chipfu onye emeje unu g'unu ka mma l'iphe-ememe.”

²⁷E mecha; ẹphe bya ejerwua Elimu; ẹka ọgba-mini iri l'ẹbo nọ; waa upfu mpfu ukporo ẹto l'iri. Ẹphe bya akpobe ọlo-ẹkwa phẹ lẹ mgboru mini ono.

Awufu 16

Mana waa ọkwà

¹Ndu Ízurelu g'ẹphe ha wufu lẹ Elimu; bya erwua echięgu Sinu, nọ lẹ mgbaka Elimu yee úbvú Sayinayi lẹ mbọku, ọnwa k'ẹbo dọ l'abalị iri l'ise g'ẹphe shichaepho l'alị ndu Ijiputu futa.

²G'ẹphe ha guru aphụ kpua Mosisu yee Eronu l'echięgu ono;

³sụ phẹ: “Ọme Chipfu gude ẹka iya gbushia anyi l'alị Ijiputu; m'ẹhu akakwa anyi guu! Ẹka ono, anyi shi anọ-pheje ite-anụ mgburugburu; eriji ẹpho. Obenu l'unu chifutaru anyi bya edobe l'echięgu l'ẹka-a g'unu kpọ-gbushia anyibe igwe ọha-a l'ẹgu.”

⁴Chipfu sụ Mosisu: “Mu e-shi l'imigwe dzeeru unu nri gẹ mini. Gẹ ndu Ízurelu lufutaje mbokumboku bya ekpota ọphu a-suru phẹ eriri kẹ mbọku ono. Gẹ mu eshi ẹgube ono hua phẹ ama; maru; ? ẹphe e-kweta-a meje iphe, mu turu phẹ ekemu iya.

⁵O -rwua lẹ mbọku k'ishii; ẹphe eshia nri ọphu ẹphe kpotaru. Mbọku ono be ẹphe e-kpota iya g'ọ ha g'ọphu ẹphe ekpotajehawa mbọku ọzo ugbo labọ.”

⁶Ọo ya bụ; Mosisu yee Eronu sụ ndu Ízurelu g'ẹphe ha: “Ụzenyashi-a be unu a-huma l'ọo Chipfu bụ onye dufutaru unu l'alị Ijiputu.

⁷O -rwua l'utsu be unu a-huma ọdu-biribiri Chipfu; noo kele ọ nụmawaru aphụ, unu agu ekpu iya. ? Bụ onye be anyibedua bụ; ọphu unu a-nodu aguru anyi aphụ?”

⁸Mosisu sụkwapho: “Unu a-maru l'ọ bụ Chipfu eviya. Ọo-nụ unu anụ, unu a-ta l'uzenyashi-a; waa nri, a-suru unu eriri l'utsu; noo kele ọ nụmawaru aphụ, unu guru kpua ya. ? Bụ onye be anyi bụ? Unu ta agukwaru anyi aphụ; ọ kwa Chipfu be unu aguru iya!”

⁹Mosisu sụ Eronu: “Sụ ndu Ízurelu g'ẹphe ha; g'ẹphe tuko bya l'atatiphu Chipfu. Kele ọ nụmawaru aphụ, ẹphe agu.”

¹⁰Eronu nọdukwađu epfu eyeru ndu Ízurelu g'ẹphe ha; ẹphe ghaa ẹnya l'echięgu; bya ahuma ọdu-biribiri Chipfu g'ọ nwuru kẹ phoo l'urwukpu ono, kpuru oronmono ono.

¹¹Chipfu sụ Mosisu:

¹²“Mu nụmawaru aphụ, ndu Ízurelu agu. Pfuaru phẹ l'ẹphe a-ta anụ lẹ nchi-ẹjihu. O -rwua l'utsu l'e gude nri zu-jia phẹ ẹpho. Ọo ya bụ g'ẹphe amaru l'ọo mbedua bụ Chipfu, bu Chileke phẹ.”

- ¹³O -rwua l'uzenyashi ono; òkwà bya atùko ẹka ẹphe kpọberu ọlo-ẹkwa pẹ dzuru. A fútashia l'ùtsu; iji kwashiwaa ike; kwaphee ẹka ono, ẹphe kpọberu ọlo-ẹkwa pẹ ono mgburugburu.
- ¹⁴Iji ono phosahuẹpho; o nweru nwa iphe, wùshiru l'alì l'echiẹgu ono, dughaa yegeyege; bya adù g'iji, oyi meru; ọ hùko ahùko.
- ¹⁵Ndu Ízurelu humae ya phọ; ẹphe sù nwibe pẹ: “? Bù gunu baa?” Noo kele ẹphe te eshidu maru iphe ọbu. Mósìsù sù pẹ: “Ọo nri, Chipfu nùru unu g'unu ria.
- ¹⁶Waa ekemu, Chipfu turu baa: ‘G'onyenonu kpotajẹ ọphu a-suru iya eriri. Ndu bu l'ulo-ẹkwa unu bẹ unu e-kpotajẹru ogbongu lanu ogbongu lanu.’ “
- ¹⁷Ndu Ízurelu mee g'e pfuru pẹ. O nweru ndu ọphu kpotaru shii; o nweru ndu ọphu kpotaru nwanshii.
- ¹⁸E mechaa; ẹphe gude ogbongu gbaa ya; ọphu ndu kpotaru shii; ekpotanukaduru; ọphu ndu kpotaru nwanshii; ekpopeteduru. Onyenonu kpotarupho ọphu suru iya nu.
- ¹⁹Mósìsù sù pẹ: “G'o to nwekwa onye e-dobe nkiya g'ọ futa l'ùtsu.”
- ²⁰Ole o nwelẹru-a ndu ọphu angabeduru Mósìsù nchì, haphodoru nkepẹ dobe; ọ nọdu futa l'ùtsu. A fútashia l'ùtsu; ẹka jiwa iya ejiji; teme ọ nọdu eshiakwapho ishi. Ehu-eghu iphe ono, ẹphe meru ono ghuaaha Mósìsù.
- ²¹Utsu mbokumboku; onyenonu ekpota ọphu a-suru yẹ ndibe iya eriri. Teke anwu chishijeeru pho ike; ọphu phoduru l'alì azashihu.
- ²²O -rwua mboku k'ishii; ẹphe kpota ọphu ha g'ọphu ẹphe ekpotajẹ mgbo labo. Ogbongu labo bẹ ẹphe kpotaru onye lanu. Ndu-ishi ndu Ízurelu bya epfuaru iya Mósìsù.
- ²³O sù pẹ: “Waa ekemu, Chipfu turu baa: ‘Echele bù eswe Sabatu; mbu eswe-atuta-unme, dù nsọ kẹ Chipfu. Ọo ya bù; unu ghee iphe, dù unu k'egheghe; shia, iphe dù unu k'eshishi ntanu-a. Unu edobe ọphu ghuduru nu jasù l'ùtsu.’ “
- ²⁴Ẹphe haa ya; ọ boọ nchi, bù iphe, Mósìsù pfuru; ọphu o shiduru ishi; ọphu ẹkà aladuru iya.
- ²⁵Mósìsù sù pẹ: “Unu ria ono ntanu-a! Noo kele ntanu-a bù eswe-atuta-unme kẹ Chipfu; ọphu ọ tọ dudu nri, unu a-huma l'etezi ntanu-a.
- ²⁶Unu e-kpotajẹ nri ono ujiku ishii; ọle o -rwua mboku k'ẹsaa, bù eswe-atuta-unme bẹ ọ tọ dudu.”
- ²⁷Ole o nwelẹru-a ndu tugburu lẹ mbochi k'ẹsaa jeshia ekpota nri; obenu l'o to nweduru ọphu ẹphe humaru.
- ²⁸Chipfu sù Mósìsù: “? Bù teke ole bẹ unu a-jikaberu eme ekemu mu; waa opfu mu?
- ²⁹Nyatakwa l'ọo Chipfu bẹ nuru unu eswe-atuta-unme. Noo iphe, meru g'o gude ọ nọdu abujeru: o -rwua mboku k'ishii; l'ọ nu unu nri, a-suru unu ujiku ẹbo. O -rwua

mbòku k'èsa; g'onnyemonye nõdujeepho l'èka ọ nõ. G'o to nweshiru onye a-lufuje alufu.”

³⁰Oo ya bu; ndu ono dzua ike le mbòku k'èsa.

³¹Ndu Ízurelu kua nri ono mana. Oocha ucha g'akpuru koryanda; teme ọ nõdu atsoje g'ècha mbekee, e gude manụ-ẹnwu mee.

³²Mósisu sụ: “Wakwa iphe, Chipfu epfu baa: ‘Unu kpota ogbongu mana lanụ doberu ogbo ophu nõ l'iphu. Oo ya bu g'èphe ahuma nri, mu nuru unu; unu ria l'echiegu; teke mu dufutaru unu l'alì Ijiputu.’ “

³³Oo ya bu; Mósisu sụ Erõnu: “Wota ite; kporu ogbongu mana lanụ ye iya. Dobe iya l'ataphu Chipfu; g'e doberu iya ogbo ophu nõ l'iphu.”

³⁴Erõnu woru iya dobe l'ataphu okpoko ono, e yeru ekwo ekemu Chipfu ono; k'ophu ee-dobe iya; ge Chipfu pfuru Mósisu.

³⁵Ndu Ízurelu ria mana ukporo apha labo; gbiriri jasụ ephe jerwua alì èka e bu ebubu. Mbụ l'ephe riru mana gbiriri jasụ ephe rwua l'oke alì Kènanu.

³⁶Ogbongu lanụ bu oke-lanụ-l'uzo-iri l'iphe, jiru nkweka.

Awufu 17

Mini, shi le mkpuma

¹Ndu Ízurelu g'ephe ha bya wulihu l'echiegu Sinu tugbu; ephe -gbè l'ibe iya ophuu; ephe abahụ l'ibe iya ophuu; ọ buerupho ge Chipfu ziru phe bu ge ephe eje iya. Ephe je akpobe ulo-ekwa phe le Refidimu. Obenu le mini, ephe a-ngu ta adudu l'èka ono.

²Oo ya bu; ephe baaharu Mósisu mba sụ: “Nụ anyi mini g'anyi ngua!” Mósisu sụ: “? Bụ gunu be unu abaru mu mba? ? Bụ gunu kparu iphe unu ahụ Chipfu ama?”

³Obenu le ndu Ízurelu be egu mini agushi ike; ephe nõdu aguru Mósisu aphụ; sụ: “? Bunu gunu kparu iphe i dufutaru anyi; waa unwu anyi; waa iphe-edobe anyi l'alì Ijiputu bya edobe g'egu mini gbushia?”

⁴Oo ya bu; Mósisu raku Chipfu sụ: “? Denu ge mu e-me ndu-a? Ephe a-byaakwa mu atụ-gbu le mkpuma.”

⁵Chipfu sụ Mósisu: “Vuta uzo ge ndu Ízurelu tso ngu l'azu. L'i haru ndu bu ogerenya Ízurelu duta; l'i wota mgboro ono, i chiru l'enyimu Nayilu ono gude jeshia.

⁶Mu a-pfuru ngu l'ataphu le mkpuma Horebu. I -rwua èka ono; chia mgboro ngu le mkpuma ono. Mini, ndu Ízurelu a-ngu e-shi iya lwashihu.” Mósisu bya emee nno l'ataphu ndu bu ogerenya ndu Ízurelu ono.

⁷O bya agua èka ono “Masa” ; gwakwaa ya pho “Meriba” ; noo kele ndu Ízurelu baru mba; bya ahua Chipfu ama; sụ: “? Chipfu noa l'echilabo anyi to to nõdu iya?”

Aalwụ-kpee ndu Amaleku

⁸Ndu Amaleku bya etso ndu Ízurelu oḡu lẹ Refidimu.

⁹Mósisu sụ Jioshuwa: “Haru unwoke anyi hōta g'unu je awōta ndu Amaleku oḡu. Echele bẹ mu e-gude mgboro Chipfu l'ẹka je apfuru l'eli úbvú.”

¹⁰Oo ya bụ; Jioshuwa bya awōta ndu Amaleku oḡu, dụ gẹ Mósisu ziru iya. Mósisu; waa Erōnu; waa Huru bya enyihu eli úbvú; je anōdu lẹ mkpakponu iya.

¹¹Ọ nōdu abujeru; Mósisu -chiliēpho ẹka imeli; ndu Ízurelu alwu-kpeahaa. Teke ọ chizetaru ẹka; ndu Amaleku alwu-kpeahaa.

¹²A nōnyaa; ẹka tsuhu Mósisu mē; ẹphe pata mkpuma; bya edoberu iya; ọ nōdu anōo. Erōnu; waa Huru bya apalia ya ẹka imeli; onye lanu l'ekutara; onye ophuu l'ekicha. Oo ya bụ; ẹka nōdue ya pho l'imeli ẹgube ono gbiriri jasụ nchi jihu.

¹³Oo ya bụ; Jioshuwa phẹ lwu-kpee ndu Amaleku.

¹⁴Noo ya; Chipfu sụ Mósisu: “Dee iphe-a l'ekwo g'o buru iphe, ee-gudeje nyata iya. Teme l'i mekwaapho gẹ Jioshuwa numa lẹ mu e-me gẹ ndu Amaleku chihu lẹ mgboko; g'a ta nyatabahe phe.”

¹⁵Mósisu bya akpua ọru-ngweja; bya agua ya “Ọ kwa Chipfu bụ onye emeje g'ẹka mu kangoo l'ogu” .

¹⁶Ọ sụ: “Iphe, meru iphe, mu guru iya nno bụ l'a chi-liru ẹka pfuru nụ Chipfu l'abaze iya. Chipfu a-nōduepho etso ndu Amaleku oḡu; e -shi l'ogbo sweru oḡbo.”

Awufu 18

Jieturo akpafuta Mósisu

¹Noo ya; Jieturo, onye uke ndu Midiyanu, bukwapho nna nyee Mósisu; bya anumakota iphemiphe, Chileke mekotaru Mósisu waa ndu nkiya, bụ Ízurelu; teme waa gẹ Chipfu gude dufuta ndu Ízurelu l'alị ndu Ijiputu.

²Teke Mósisu dutaru nyee ya, bụ Zipora dulaa ibe Jieturo, bụ nna nyee ya ono; bẹ Jieturo ono nabataru nyee Mósisu obu;

³waa unwu iya unwoke labo. Onye lanu bẹ ẹpha iya bụ Geshomu; noo kele Mósisu suru: “Mu bụ onye lwaru alwalwa l'alị ndu ohozo.”

⁴Ẹpha onye ophuu buru Eliyéza; noo kele ọ suru: “Ọo Chileke nna mu bụ onye yeru mu ẹka. Ọ dzotaru mu gẹ Fero te egbu mu.”

⁵Jieturo, bụ nna nyee Mósisu duru unwu Mósisu; waa nyee Mósisu obu byapfuta iya l'echiēgu l'ẹka ọ kpoberu ulo-ekwa lẹ mgboru úbvú Chileke.

⁶Jieturo zihawaru g'e je asụ iya: “Mube Jieturo, bụ nna nyee ngu bẹ dukwa nyee ngu; waa unwegirima ibe ngu abya.”

⁷Oo ya bụ; Mósisu gba iya ndzuta bya ephozeru iya ishi; bya anma iya akpa. Ẹphe kelecha; bya bahu l'ulo-ekwa Mósisu.

⁸Mósisu kòkòtaru nna nyee ya ono iphemiphe, Chipfu meru Fero waa ndu Ijiputu l'iswi ehu ndu Ízurelu; teme waa iphe-ehuka, ephe jekòtaru l'uzo; waa ge Chipfu gude dzòta phe.

⁹Ehu tsoo Jieturo utso g'o nùmaru k'iphe, du ree, Chipfu mekòtaru Ízurelu; dzòta phe l'eka ndu Ijiputu.

¹⁰O sù: “G'ajaja buru ke Chipfu, bu onye nafutaru ngu l'eka ndu Ijiputu; yele eka Fero; mbu onye nafutaru ndu Ízurelu l'eka ndu Ijiputu.

¹¹Nta-a be mu maru le Chipfu be kakota agwa l'ophu shii. Noo kele o ndu nmaru ndu Ízurelu phulaphula be o meru iphe-a.”

¹²Noo ya; Jieturo, bu nna nyee Mósisu bya egweeru Chipfu ngweja-akpo-oku; gwekwaarù iya pho ngweja ozowaro. Eronu duta ndu bu ogerenya Ízurelu bya g'ephe le Jieturo ria nri l'atatiphu Chileke.

Aahota ndu l'e-doshijeru ndu Ízurelu opfu

¹³O -rwua nchitabohu iya; Mósisu bya eje anodu l'eka onoduje; kpeaharu ndu Ízurelu ikpe. Ephe shi l'utsu no-pee ya mgburugburu jasù l'uzenyashi.

¹⁴Nna nyee Mósisu bya ahuma iphe, Mósisu emeru ndu Ízurelu; o sù: “? Bu gunu be iimeru ndu Ízurelu egube ono? ? Bu gunu kparu iphe, o bu gubedua nwekinyi ngu anoduje ekperu ndu ono ikpe; ke g'ephe shije l'utsu no-pee ngu mgburugburu jasù l'uzenyashi?”

¹⁵Mósisu sù iya: “O kwa phe abyaje mu akpata ishi iphe, bu uche Chipfu.

¹⁶Teke o bu l'oo opfu adaru phe; ephe ewotaru mu iya; mu edoshiaru phe iya; bya akaru phe iphe, Chipfu toru okpa sù g'e tsoje; waa ekemu iya.”

¹⁷Nna nyee Mósisu sù iya: “Iphe, iime ta adudu ree.

¹⁸Oo egbugbu be gubedua; waa ndu ono, awu-pfutaje ngu nu ono egbu onwunu. Ozi ono kariru ngu eka; i tii jekotadu iya nwekinyi ngu.

¹⁹Ngabe nchi ge mu kpo-ziaru ngu uzo g'ii-meje iya. Ge Chipfu swikwaru ngu. Oo gubedua a-nochi enya ndu-a l'atatiphu Chileke. Ii-wotaje iphe, adaru phe nu dooru iya.

²⁰Zia phe iphe, Chipfu toru okpa sù g'e tsoje; waa ekemu iya; bya egoshi phe uzo, ephe e-tsoru; waa iphe, gbaru phe l'ememe.

²¹L'i bya eshi l'ime ndu Ízurelu g'ephe ha hota ndu ike du; mbu ndu atsù Chileke ebvu, bu ndu e gude ire phe eka; bya aburu ndu te eridu uphalazu. Hota phe g'ephe buru ndu-ishi unu umadzu labo l'ukporo iri iri; waa ndu-ishi umadzu ukporo ise ise; waa ndu-ishi umadzu ukporo ebo l'iri iri; teme waa ndu-ishi umadzu iri iri.

²²Hota phe g'ephe doshikotajeru ndu Ízurelu opfu tekenteke. Ole g'ephe wotajeru ngu opfu ophu shihuru ike. Ephe edoshije opfu ophu du nphe nweka phe. Ono e-me g'ivu ngu ka nphe; noo kele unu l'ephe tukoru evu iya.

²³I -mee ya nno; ọ -buru uche Chileke; be ịi-dụkwa ike vua ivu-erwa ono; teme ndu ono -nọdu ala unuphu; ephe egude ẹhu-utso ala.”

²⁴Mosisu ngaberu nna nyee ya ono nchi; bya emekota iphemiphe, o pfuru.

²⁵Ọ bya ahota ndu okpehu du l'echilabo Ízurelu l'ophu; bya emee phe ndu-ishi ndu du unu labo l'ukporo iri iri; waa ndu-ishi ndu du ukporo ise ise; waa ndu-ishi ndu du ukporo ẹbo l'iri iri; teme waa ndu-ishi ndu du iri iri.

²⁶Ephe nọdu anọduje edoshikotaru ndu Ízurelu opfu. Opfu ophu shihuru ike be ephe ewotajeru Mosisu. Opfu ophu du nphe be ephe edoshije nweka phe.

²⁷Noo ya; Mosisu haa nna nyee ya ono; ọ lashia alị iya.

Awufu 19

Úbvú Sayinayi

¹O be mboku, kwe ndu Ízurelu onwa ẹto gedegede, ephe wufuru l'alị Ijiputu; ephe byarwuta echiegu Sayinayi.

²Ephe shi le Refidimu bya erwua echiegu Sayinayi, bya akpobe ulo-ekwa phe l'eka ono l'okpa úbvú ono.

³Mosisu nyihu eli úbvú ono nyipfu Chileke. Chipfu bya agbe l'úbvú ono kua ya su: “Waa iphe, ii-zi ndu onu-ulo Jiékọpu baa; mbu iphe, ii-pfuru ndu Ízurelu:

⁴Unubedua l'onwunu humaru iphe, mu meru ndu Ijiputu; waa ge mu gude hee unu g'ugo, he nwa iya; hepfuta onwomu.

⁵Ọ -buru l'unu ngaberu mu nchi; bya edobe oqbandzu mu be unu a-buru okiphe, duru mu iche l'echilabo ohamoha. A makwaru-a le mgboko l'ophu bu nkemu;

⁶Ọle unu a-buru mu alị-eze ndu-uke; waa oha, du nsọ.’ Noo iphe, ii-pfuru ndu Ízurelu bu ono.”

⁷Ọo ya bu: Mosisu bya alaphu azu; bya ekuko ndu bu ogerenya ndu Ízurelu; bya atuko iphemiphe ono, Chipfu ziru iya g'o pfua ono; pfukotaru phe.

⁸Ndu Ízurelu tuko zu mgbede su: “Iphemiphe, Chipfu pfuru be anyi e-mekota.” Ọo ya bu; Mosisu bya egude onu, ephe yeru jepfu Chipfu ozo.

⁹Chipfu su Mosisu: “Mu a-nodu l'urwukpu, jihuru kpakpalu byapfuta ngu; k'ophu ndu Ízurelu a-nodu anu ẹka mu epfu eyeru ngu; g'ephe a-chiru upfu kwewaro l'eka i no.” Ọo ya bu; Mosisu bya epfuaru Chipfu onu, ephe yeru.

Edobe ndu Ízurelu nsọ

¹⁰Chipfu su Mosisu: “Jepfu ndu Ízurelu je edoo phe nsọ ntau-a; waa echele. G'i pfuaru phe g'ephe saa uwe phe asasa.

¹¹Ọ -rwutashia mboku k'eto; g'ephe kwakobe-ghewa; noo kele mboku ono be Chipfu e-nyizeta bya anodu l'úbvú Sayinayi; ndu Ízurelu ahumakota iya g'ephe ha.

¹²Kpaaru phẹ oke l'úbvú ono mgburugburu. Pfuaru phẹ g'ẹphe letakwa ẹnya g'okpa phẹ te jekubekwa mgboru úbvú ono ejekube; ophu ọ boro k'enyihu iya enyihu. Onye ẹhu iya rwutaru l'úbvú ono bẹ ee-gbu egbugbu.

¹³G'a tũgbua ya lẹ mkpuma; ọzo gbagbua ya l'apfũ; g'e te denyikwa iya ẹka. Ọ -bu nemadzu; ọzoo anũ; g'e te kwekwa g'ọ nọdu ndzu. Ọ buepho teke a nonyaru; e gbua opu bẹ ẹphe e-bebe jekube úbvú obu.”

¹⁴Mósisu shichaepho l'eli úbvú ono nyizeta byapfuta ndu Ízurelu. Ọ bya edoo phẹ nsọ g'ẹphe dũru Chileke iche; ẹphe bya asashia uwe phẹ.

¹⁵Ọ sũ phẹ: “Ọ -rwutashia mbọku k'ẹto; unu kwakọbechaakwa onwunu! Unu hakwaa ejepfu nwanyi!”

Mósisu enyipfu Chileke l'úbvú Sayinayi

¹⁶Ọ belephọ l'utsu mbọku k'ẹto ono; ebemu-igwe wata akũ kẹ phoophoophoo; egbigwe nọdu ada; tẹme urwukpu, jihuru kpakpalu so-kputa eli úbvú ono. Opu, adashi oda ike shi l'úbvú ono ada. Onyemonye, nọ l'ulo-ẹkwa iya phuhu kẹ kpaakpaakpaa.

¹⁷Mósisu bya edufuta phẹ l'ẹka ẹphe kọberu ọlo-ẹkwa phẹ g'o duru phẹ byapfuta Chileke. Ẹphe bya tũko pfuru l'okpa úbvú ono.

¹⁸Ẹnwuru-ọku tũko úbvú Sayinayi sweta; noo kẹle Chipfu gude ọku nyizeta l'úbvú Sayinayi ono. Ẹnwuru-ọku ono nọdu akpu kẹ tũtũtũtũ zelihi g'ẹnwuru shi l'ọku, enwu phoophoophoo. Úbvú ono l'ophu nọdu anmakọta jijijiji ẹhuka ẹhuka.

¹⁹Oda opu ono nọdu aka shii eje. Mósisu nọdu epfu opfu; a nọdu anukwapho olu Chileke ẹka oopfu eyeru Mósisu.

²⁰Ọ buru iya bũ lẹ Chipfu enyizeta l'eli úbvú Sayinayi; bya ekua Mósisu g'o nyipfuta iya lẹ mkpakponu úbvú ono. Mósisu nyihu eli úbvú ono.

²¹Chipfu sũ iya: “Nyizeta l'alĩ je anmaaru ndu Ízurelu ọkwa g'ẹphe ta akpahẹ ọzo g'ẹphe hũma Chipfu; ọdumeka bẹ ẹphe a-dũkwa igwerigwe laa l'iyi.

²²Mbũkponu ndu-uke, eme g'ẹphe byakube mũbe Chipfu ntse bẹ e-do onwophe nsọ g'ẹphe dũru mu iche; ọdumeka mu anũa phẹ aphũ.”

²³Mósisu sũ Chipfu: “Ndu Ízurelu te enyitakwa úbvú Sayinayi; noo kẹle ị tũru anyi ekemu sũ g'anyi dobe úbvú ono nsọ; tẹme anyi akpaa ya oke gbaphee mgburugburu.”

²⁴Chipfu sũ: “Nyizeta l'alĩ je eduta Eronu g'unu l'iya swĩru. Ọle gẹ ndu-uke; waa ndu Ízurelu ophu ta akpaghatakwa oke ono byapfuta mũbe Chipfu; ọdumeka bẹ mu a-nũkwa phẹ aphũ.”

²⁵Mósisu nyizeta bya epfuaru ndu Ízurelu iphe, Chipfu pfuru.

Awũfu 20

Ekemu iri, shi l'ẹka Chileke

¹Chipfu bya epfukọta iphemiphe-a; sũ:

- ²“Oo mbèdua bụ Chipfu, bụ Chileke unu, bụ onye dufutaru unu l'alị Ijiputu; mbụ alị ẹka ono, unu shi bụru ohu ono.
- ³“Unu ta adụkwa iphe, unu a-bajeru ẹja; gbahaa mụbe Chileke kpurumu.
- ⁴“Unu te emetakwaru onwunu ntẹkpe, e meru; o yee iphe, nọ l'imigwe; ọzoo iphe, nọ lẹ mgboko-a; mę iphe, bu lẹ mini-ime-alị.
- ⁵Unu ta abajekwaru phez ẹja; ọphu unu ejejekwaru phez ozi. Noo kele mụbe Chipfu, bụ Chileke unu eko okophoo. Mu nọdu anuje ndu mu du ashị aphụ k'iphe, du ẹji, ẹphe meru mu; gude iya nua unwu phez aphụ; mę unwu nwanwa phez; mę unwu nwanwanwanwanwa phez.
- ⁶Obenu l'iphe, bụkpoo ndu yeru mu obu bya emeje iphe, mu pfuru be mu emejekwanu ge n-yemobu mu buru o-je-le-nwanwa l'ehu phez.
- ⁷“Unu te ekujekwa ẹpha mụbe Chipfu, bụ Chileke unu l'uzo, apfuduru-oto. Noo kele mụbe Chipfu ta ahakwa ndu eme nno; ge mu ta nu phez aphụ.
- ⁸“Unu nyataje mee mboku Sabatu, bụ eswe-atuta-unme g'ọ du nsọ.
- ⁹Oo ujiku ishii be unu e-seje akanya; jekota ozi unu;
- ¹⁰Obenu lẹ mboku k'ẹsaa bụ eswe atuta-unme ke Chipfu, bụ Chileke unu. G'ọ to dukwa ozi, unu e-jeje mboku onoya. Ọphu unu ekwekwa ge nwa unu; m'onye unu gbaru ohu; mę iphe-edobe unu; m'onye lwaru alwalwa, bu l'ibe unu; jee ozi mboku ono.
- ¹¹Noo kele ọo ujiku ishii be mụbe Chipfu meru igwe; bya emee eliphe; yee eze-enyimu; mę iphemiphe, dukota iya nu. O be lẹ mboku k'ẹsaa; mu tuta unme. O buru iphe ono kparu iphe, mụbe Chipfu goru onu-oma nu eswe-atuta-unme; bya emee ya; o du nsọ.
- ¹²“Unu kwabekwa ne unu mę nna unu ubvu. Oo ya bụ g'unu enweru ndzu ogologo; buru l'alị ono, Chipfu, bụ Chileke unu abya unu anunu ono.
- ¹³“Unu te egbukwa ọchi.
- ¹⁴“Unu te erijekwa ogori.
- ¹⁵“Unu te ezijekwa iphuru.
- ¹⁶“Unu ta adzujekwa ụka kpua nemadzu ibe unu.
- ¹⁷“G'ulo nwibe unu; mę nyee ya; mę ohu, o gbataru agbata; mę iphe-edobe iya; mekpoo iphe, o nweru enweru g'ọ ha ta adujekwa unu g'a su l'oo unu nwe iya.”
- ¹⁸Ndu Izurelu humaepho egbigwe; waa ebemu; bya anuma opu; bya ahuma g'ubvu ono akpushi enwuru-oku; ẹphe nmahu ke rwuurwu lẹ ndzu-agugu. Ẹphe pfuru uzanya;
- ¹⁹su Mosisu: “Pfujueru yeru anyi gubedua; anyi a-ngabe-a nchi. Ge Chileke te epfuhakwa opfu yeru anyi l'onwiya; odumeka be anyi a-nwushihukwa.”

²⁰Mósisu sụ ndu Ízurelu: “Gẹ ndzu ba agushi unu. Chileke byaru g'ọ húa unu ama; k'ọphu unu a-nọdu atsuje iya ebvu; haa eme iphe-ẹji.”

²¹Ndu Ízurelu pfuru ụzenya; Mósisu bya ejekube ọchii ono ntse, bu ẹka Chileke nọ.

Aakpụ ọru-ngweja Chipfu

²²Chipfu sụ Mósisu: “Sụ ndu Ízurelu ị-a: Unu humawaru l'onwunu ị mu shi l'imigwe pfuru yeru unu.

²³G'ọ tọ dukwa agwa, unu e-meta swikube mu. Unu te egudekwa mkpọla-ọchaa; ọzoo mkpọla-ododo meta agwa doberu onwunu.

²⁴“Ọ buru ẹja, shi l'alị bẹ ee-gudeje kpuaru mu ọru-ngweja, bu ẹka ee-gbuje aturu; waa egbu; waa eswi; gude gweeru mu ngweja-akpọ-ọku; waa ngweja-ẹhu-guu. Ẹkameka mu meru g'a nọduje; nyata ẹpha mu bẹ mu a-byapfutajẹ unu bya ekebe unu l'oma.

²⁵Ọ -buru l'unu gude mkpuma akpuru mu ọru-ngweja; unu te egudekwa mkpuma, a rwaru arwarwa. Noo kele unu -kua ya ọngu bẹ unu tūrwwaru iya.

²⁶Ọphu unu akpukwa ọru-ngweja ono g'ọ du l'eli; tua ya ocho k'ọphu ee-nyihuje iya enyihu; a nọnyaa; unu jia onwunu uwele l'ọru-ngweja ono.”

Awụfu 21

Ndu Hiburu, a gbaru ohu

¹“Waa ekemu, ii-zi pẹ baa:

²“Ọ -buru l'ị gbaru onye Hiburu ohu bẹ iphe, oo-jeru ngu ozi bu apha ishii. O -be l'apha k'ẹsaa l'o nweru onwiya; a taa pfudu ụgwo l'ishi iya.

³Teke ọ bu l'ọ swi nwẹkinyi iya teke ọ byaru; l'ọ laa nwẹkinyi iya. Ọ -bukwanuru ị yee nyee ya swi teke ọobyaa; nyee ya ono etsoru iya mẹ ọ lashia.

⁴Teke ọ bu ị nnajiuphu iya lutaru iya nwanyi; ọ nwutaru iya unwegirima; nyee ya ono mẹ unwegirima iya ono a-tuko buru ke nnajiuphu iya. Ọ buerupho nwoke a-la nwẹkinyi iya.

⁵“Obenu ọ -buru l'ohu ono suru ị ya yeru nnajiuphu iya obu; bya eye nwanyi ono, ọolu ono; waa unwegirima iya; ọphu ya alufudu eje enweru onwiya;

⁶g'onye nwe iya nọ duru iya je l'iphu ndu-ikpe. L'o duru iya je l'onu-mgbo; ọzo l'okpa mgbo; je egude oji kpọ-fua ya nchi. L'ọ buru ohu iya jasụ g'ọo-nọ-beru.”

⁷“Ọ -buru ị nwoke reru nwa iya nwanyi g'ọ buru ohu; a ta abyadu aha iya g'ọ laa g'aahajẹ unwoke phọ.

⁸Teke e reru iya onye ari ke g'ọ luru iya; a nọnyaa; ọphu ọ duedu iya ree; g'ọ hakwaa g'a gbata iya. Ọ tọ gbakwaru gẹ nnajiuphu iya ono ree ya ndu ọhozo; noo kele o to meeduru ohu iya obu iphe, o kweru ukwe iya.

⁹Q -būru l'oo nwa iya nwoke bẹ ọ zū-doru iya g'ọ luru; g'ọ mejekwa nwamgboko obu gẹ nwa, ọ nwuru anwunwu.

¹⁰Q -būru lẹ nwoke lūtaru nwanyị ọzo; g'ọ nujekwa nyee ya kẹ mbụ nri; nmajeru iya ekwa; emeru iya iphemiphe, eemejeru nwanyị, aalū alūlu.

¹¹O -būru l'oo too meduru iya ọzo iphe ẹto ono; gẹ nwanyị ono lufu; ọle g'ọ tọ dukwa mẹ afū, aa-pfū nwoke ono.”

Emeka onye ọzo iphe

¹²“Onye chiru nemadzū iphe chigbua ya; g'ọ lakwaa l'ochi iya.

¹³Ọle ọ -būru l'oo to lekebeduru ẹnya chigbua ya; ọ -būru l'oo Chileke harū iya g'ọ nwua nno; bẹ o nweru ẹka mu e-goshi unu g'onye dū nno gbajeru laa.

¹⁴Obenu; ọ -būru lẹ nemadzū lekeberu ẹnya; gude ẹregede gbua nemadzū ibiya; unu kpūta onye obu kpuru lufu l'oru-ngweja mu; je egbua l'ẹka ọzo.”

¹⁵“Onye tsoru ne iya; ọzo nna iya ọgu bẹ ee-gbu egbugbu.”

¹⁶“Onye parū nwibe iya je eree; ọzo l'ọ nọkwadu iya l'ẹka teke e guderu iya; g'e gbua onye obu egbugbu.”

¹⁷“Onye phuru ne iya iphu; ọzo nna iya; g'e gbukwaa onye ono egbugbu.”

¹⁸“Q -būru l'unwoke labo bẹ opfu adaru; onye lanū tūa onye ọphuu mkpuma; ọzo l'ọ pfupfuberu ẹka tsua ya; ọphu onye ono anwuhuduru anwuhu; ọ būru iphe bẹ o mekaru iya; ọ zẹru iya azẹ; g'ọ tọ dukwa iphe, ee-me onye ono, mekaru iya iphe ono;

¹⁹m'ọ būru l'onye ono mechaaru-a; ọ nọdu aduje ike gude mgboro ejephe l'etezi. Ọle onye ọphu mekaru iya iphe, a-pfukwanu iya ugwo azẹ ono, o shi zẹ kẹ mmanu ono; bya aghakwaa ya pho jasū l'ọ kaẹbe mma ree.”

²⁰“Q -būru l'oo nweru onye chiru ohu iya iphe; m'ọ bū ohu iya kẹ nwoke; ọzo kẹ nwanyị; ohu ono shi l'iphe ono, e chiru iya ono nwuhu; g'a nūkwaa onye ono, chigburu iya nū ono aphū.

²¹Obenu l'ọ -būru l'ohu ono nọru ujiku ẹbo; ọzo ẹto bya ewekorohu; g'ọ tọ dukwa iphe, ee-me onye chiru iya iphe; eshinu ohu ono bū ẹku iya bẹ ọ bū.”

²²“Q -būru l'oo nweru unwoke, alwū ọgu; ẹphe meka nwanyị, dū ime iphe; mee k'ọphu ẹpho lufuru iya; ọphu ọ dudu ẹka a kwataru meka iya iphe ọzo; g'e retakwaa onye ọphu mekaru iya iphe obu nre lẹ g'ọodu ji nwanyị ono ree; waa gẹ ndu-ikpe kpeburu.

²³Obenu; ọ -būru l'e mekaru iya iphe shii; gẹ ndzū laaru ndzū;

²⁴g'ẹnya laaru ẹnya; eze alaaru eze; ẹka alaaru ẹka; ọkpa alaaru ọkpa.

²⁵Q -būru ọku bẹ ọ hūru iya; l'a hūlata iya. Teke o mefuru iya ọnyá l'ẹhu; l'e melata iya. Teke o tsuru mkpukpu-mee ye iya l'ẹhu; l'e tsukwarupho mkpukpu-mee ye yẹbedua l'ẹhu.”

26“O -būru l'o nweru onye chiru ohu iya iphe l'ēnya; k'ophu o chipyaru iya ēnya lanū; g'onye ono hakwaa ohu ono g'ọ laa; je enweru onwiya; g'ọ būru ụgwọ ēnya ono, o chipyaru iya ono.

27O -būru l'o chikwofuru iya eze lanū; g'ọ hakwaa ohu ono g'ọ laa je enweru onwiya; g'ọ būru ụgwọ eze iya ono.”

28“O -būru l'oke-eswi gude mpu dū-gbua nemadzū; g'a tugbua eswi ono lẹ mkpuma; tẹme g'a ta takwa anū iya atata; ọle g'ọ tọ dūkwa iphe, ee-me onye nwe iya nū.

29Obenu; ọ -būru l'oke-eswi ọbu eme ẹna; e pfuhawaru iya onye nwe iya nū; ọphu ọ tọ kpọ-chiduru iya l'ọka; ọo ya bụ; ọ -būru l'ọ dū-gburu nemadzū; l'a tugbua eswi ono lẹ mkpuma; onye nwe iya nū alaa l'ọchi onye ọ dū-gburu.

30Ole ọ -būru l'ọ dū ndu ono g'ẹphe gbuaru onye nwe eswi ono nre; g'ọ pfukotakwa iphemiphe, e gbuburu iya; shi nno gbata onwiya.

31Ekemu ono bụkwapho iphe lanū m'ọ -būru l'oke eswi dū-gburu nwokoro; ọzoo nwamgboko.

32O -būru l'oke-eswi ono bẹ dū-gburu ohu; g'onye nwe eswi ono pfa onye nwe ohu ono okpoga mkpola-ọchaa, ẹrwa iya rwuru ụkporo shẹkelu lẹ shẹkelu iri; tẹme l'a tūgbukwaapho eswi ono lẹ mkpuma.”

33“O -būru lẹ nemadzū kpufuru iphe lẹ nsū; ọzoo l'onye ono tūru nsū; ghebe ọnu; oke-eswi; ọzoo nkapfū-igara je adalahū iya; nwūhu;

34g'onye nwe nsū ono pfukwaa ụgwọ anū ono. Mbū-a; g'onye ono pfukwaa onye nwe anū pho dalahuru lẹ nsū pho ụgwọ iya; patawaro ono, nwūhuru nū ono.

35“O -būru lẹ nemadzū bẹ oke-eswi iya dū-gburu oke-eswi onye ọzo; g'umadzu labo ono gbarū mgba ree oke-eswi ọphu dzū ndzū; kee aswa iya ēnya-nhamūnha. Ẹphe ekekwaapho anū iya ọphu nwūhuru anwūhu ēnya-nhamūnha.

36Ole ọ -būru l'onye nwe oke-eswi ono maru l'oke-eswi iya eme ẹna; ọphu ọ tọ kpọ-chiduru iya l'ọka; g'onye nwe oke-eswi ono kpẹe onye ọphuu oke-eswi ọzo; pata ọphu nwūhuru nū pho.”

Awụfu 22

Akwabẹru ẹku ẹnya

1“Teke o nweru onye kpuru eswi; ọzoo aturu onye ọzo l'oshi; gbua; ọzoo l'o reru iya erere; g'o gude eswi ise pfa ụgwọ eswi ono. O -būru aturu; l'ọ būru aturu ẹno.

2“O -būru l'a hūmaru iphuru l'ẹka ootsukpo ulo onye ọzo gẹ ya bahu; e meka iya iphe; o shi nno nwūhu; bẹ onye ono, gburu iya nū ono te egbuduru ọchi.

3Obenu; ọ -būru l'iphe ono nwuru g'ẹnyanwu wacharu bẹ onye chigburu iya nū gbukwaru ọchi. “Onye oshi pfufutaje ụgwọ iphe, o zitaru. Teke ọ bụ l'o to nweduru iphe, o nweru; l'e ree yẹbedua l'onwiya; gude aswa iya pfa ụgwọ iphe, o zitaru.

- 4“Q -būru l'iphe ono, o zitaru ono bē a hūmaru iya l'ēka; iphe obu nōdukwadua ndzū; o bū oke-eswi-o; ozo nkapfū-igara; mē atūru; g'onye ono pfūa ūgwo iya mpfūkwasē.
- 5“Q -būru lē nemadzū chīru iphe-edobe iya ye; o je ataa iphe e meberu l'opfu onye ozo; ozo opfu-vayīnu onye ozo; ozo l'o harū iya ēka; o je ataa iphe e meberu l'opfu onye ozo; g'onye nwe iphe-edobe ono gude iphe, kachaa ree, shi l'opfu iya; ozo opfu-vayīnu iya; gude pfūa onye ophuu ūgwo iphe iya.
- 6“Q -būru l'oku nahuru laa l'egbudu; k'ophu o tsuru ereshi, e gburu egbugbu; ozo ophu pfūru apfūru; ozo l'o tsugburu opfu ono l'ophu; g'onye tūru oku ono pfūa ūgwo iya.
- 7“Q -būru l'o nweru onye nuru onye ozo okpoga; ozo iphe ozo g'o doberu iya; a bya ezita iya l'ulo ibe onye ono; o -būru l'e guderu onye-oshi ono; l'o pfūa ūgwo iya mpfūkwasē.
- 8Teke o bukwanu l'e te egudeduru iphuru obu; g'onye nwe ulo ono futa l'ataphu ndu-ikpe; bya egude epha Chipfu gua enwa g'a maru l'o to budu iya kpamiru iya.
- 9Q -būru l'o duru iphe, tuphahuru etuphahu; a hūma iya onye ozo l'ēka; mbu iphe, du g'eswi; ozo nkapfū-igara; ozo atūru; ozo iphe eye l'ehu; mbu iphe, bukpo iphe, eenwejeru enweru; l'e duta umadzu labo, adzo iphe ono bya l'ataphu ndu-ikpe. Onye ophu ikpe nmaru l'o pfūa onye ophuu mpfūkwasē.
- 10“Q -būru l'o nweru onye kperu onye ozo nkapfū-igara; ozo oke-eswi; ozo atūru; mēwaro anu ozo g'o doberu iya; o nwuhu; ozo l'e mekaru iya iphe; ozo l'o tuphahuru; ophu o dudu onye maru iphe, meru iya nu;
- 11g'ee-shi doshia opfu ono bu g'onye ono bya l'ataphu Chipfu je agua enwa l'o to makwa iphe, meru eku onye ophuu. G'onye nwe iya nu kwetakwa nno; g'a ta pfukwa iya ugwo iya.
- 12Ole o -bukwanuru l'a kpuru iya k'iphuru l'ibe onye ono, e doberu iya ono; g'onye ono pfukwaa onye nwe iya nu ugwo iya.
- 13Q -būru l'oo anu-egbudu gburu iya; l'o wota anu iya ophu o taphodoru je egoshi; g'a maru l'oo anu-egbudu gburu iya. G'a ta asukwa g'o pfūa ūgwo iya.
- 14“Q -būru l'o nweru onye rwotaru iphe-edobe onye ozo; iphe-ehuka meka iya; ozo l'o nwuhuru teke onye nwe iya nu ta nodu l'ēka ono; g'onye rwotaru iya nu pfukwaa ugwo iya.
- 15Obenu; o -būru l'onye nwe iya nu no l'ēka ono teke ono; g'onye jeru arwota iya nu ta pfushi ugwo iya. Teke o bu l'o pfuru ugwo; nguta eswi ono; g'okpoga ono, a pfuru ono no-chiwaro uburu obu.”

Iphe, gbaru l'ememe

- 16“Q -būru l'o nweru onye kparu nwamgboko, nwoke teke ejepfuswee; ophu o dudu onye ejewa iya alulu; epe l'iya kwaa; g'o kwaru aswa nu ndibe phe; duta iya je aluru.

- 17 Ọ -buru lẹ nna nwamgboko ono jikaru sụ lẹ ya te ekedu iya ya; g'ọ kwaakwapho aswa, aakwajẹ l'ishi nwamgboko, nwoke teke ejepfuswee; nụ nna iya.
- 18 “Unu ta ahajekwa nwanyi, eme omamanshi g'ọ ndu ndzu.
- 19 “Onye jepfuru anu; ephe l'iya kwaa be ee-gbuje egbugbu.
- 20 “Onye gweru ngweja nu iphe ozo, abudu mbedua, bu Chipfu nwekinyi mu be ee-gbu egbugbu.
- 21 “Unu ta akpajekwa ndu lwaru alwalwa ehụ; ophu unu emejekwa phe ewere; noo kele unu shi buru ndu lwaru alwalwa l'alị Ijiputu.
- 22 “Unu te emejekwa unwanyi, ji phe anodedu; waa unwu-ogbee ewere.
- 23 Teke unu meru phe ewere; ephe -wolia olu; raku mube Chipfu be mu a-numakwa olu phe.
- 24 Ehu a-watakwa mu eghushi egu ike; mu egude ogu bya atuko unu gbuẹbe. Unyomu unu aburu unwanyi, ji phe anodedu; unwegirima unu aburu ndu enweedu nna.
- 25 “Ọ -buru l'unu jieru ndu ke mube Chipfu, mkpa byaru ugwo l'echilabo unu; unu te emekwa ge ndu ejije ugwo-ntukwase. Unu ta asukwa g'ephe tukwase iya iphe.
- 26 Ọ -buru lẹ nwibe unu yeru unu uwe l'itumo; unu wolaaru iya ya temanu enyanwu ariba.
- 27 Noo kele oo uwe ono bu iphe, oogudeje gbobuta ehụ iya. ? Buhunu gunu be oogude kuru mgbenya? Ọ -raku mube Chipfu be mu a-numakwa olu iya. Noo kele mu aphuje obu-imemini.
- 28 “Unu ta anmakwa Chileke phulaphula; ophu unu ephukwa ndu bu ndu-ishi alị unu iphu.
- 29 “Unu ta ahakwa egweru mube Chipfu ngweja, shi l'akpuru iphe, unu kpataru l'opfu; waa ophu shi lẹ mee, unu pyitaru apyita. “Unu kujeru okpara unu nwoke nu mu.
- 30 Unu mekwaapho eswi unu; waa aturu unu nno. Unu haje phe g'ephe noo l'ehu ne phe ujiku esaa. O -rwua mboku k'esato; unu akputa iya wotaru mu.
- 31 “Unu a-buru ndu duru mu nsọ. Unu ta atajekwa iphe, anu-egbudu gburu. Unu togbojeru iya nkuta.”

Awufu 23

Ekemu, a turu swibe ikpe, pfuru oto; waa k'obu-imemini

- 1 “Ta asujekwa asulasu. Ta agbajekwa ejo ekebe gude eyeru ejo nemadzu aka.
- 2 “Te etsojekwaru igwe-oha ye aka l'eme iphe, adudu ree. Teke i pfuru l'iphu ndu-ikpe; te egudekwa l'iime g'i pfua iphe l'a-du oha ree; woru ikpe nma onye iswi du mma.
- 3 Te egudekwa lẹ nemadzu bu onye ukpa; gbaaru iya odzori l'iphu ndu-ikpe.

4“O -buru l'i humaru oke-eswi; ozoo nkapfu-igara onye ohogu ngu aka ootuphahwa etuphahu; kpata iya kpu-jeru iya.

5O -buru l'i humaru nkapfu-igara onye i du ashi aka ivu, o vu nyi-tsutaru iya; ta ahakwa iya. Tugbukwaa je eyeru iya aka.

6“Ta jikakwa ekperu onye ukpa ikpe, pfuru oto l'ulo-ikpe.

7G'a ta anmajekwa onye e boru ibo ikpe; teme ophu eemegbukwa onye pfuberekoto, adudu iphe, o meru. Noo kele onye meru ejo-iphe, du nno be mu ta ahadu ge mu ta anma iya ikpe.

8“Ta anatajekwa iphe-uphalazu; kele iphe-uphalazu emejekwa g'a tua enya mkpu l'iphe, e gege ahuma; teme o nodu emeje g'a nmaa onye pfuberekoto ikpe.

9“Unu ta akpajekwa ndu lwaru alwalwa ehuru; kele unu maru g'o duje onye lwaru alwalwa; noo kele unu shiwaa buru ndu lwaru alwalwa l'ali Ijiputu.”

Ekemu eswe-atuta-unme

10“Apha ishii be unu a-koje ali unu; kpata iya iphe, e meberu iya.

11O -be l'apha k'esaa; unu ahaa ali ono g'o to dukwa iphe, unu a-ko iya; k'ophu ndu Izurelu ndu ophu akpa nri e-je akpa l'eka ono; teme anu-egbudu erifufuwaro ughudu iya. Unu mekwapho opfu-vayinu; waa egu olivu unu nno.

12“Ujiku ishii be unu e-jeje ozi; o -be le mboku k'esaa; unu te ejekwa ozi. Oo ya bu g'oke-eswi unu; waa nkapfu-igara unu edzutaje ike; teme waa g'ohu, a nwuru l'ibe unu; m'onye lwaru ibe unu alwalwa a-tutakwapho unme.

13“Unu kwabekwa enya mekota iphemiphe-a, mu pfushiru unu-a. Unu ta adukwa iphe, bu iphe, aagwa agwagwa, unu a-kpo-kuje. Unu te ephotajekwa epha iya ephota ophu.”

Uzo obo-iphe eto

14“Ugbo eto l'apha be unu a-bojeru mu obo-iphe.

15“Unu bo obo-iphe buredi, ekoduru ekoko. Ujiku esaa be unu a-taje buredi, e yeduru iphe, ekoje buredi, bu iphe, mu turu unu l'ekemu. Unu meje iya teke ono, aaboje obo-iphe ono l'onwa Abibu; noo kele o l'onwa ono be unu lufutaru l'ali Ijiputu. “G'o to nwekwa onye a-gbajeru aka bya l'ataphu mu.

16“Unu gudeje mebyi-iphe-mbu, iphe unu meberu l'ali mitaru; gude bo Obo Mebyi-iphe-mbu. “Unu bo Obo-Mkpù l'ishi apha; me unu metajepho iphe, unu meberu l'ali.

17“Ugbo eto l'apha be unwoke unu g'ephe ha a-tukoje bya l'ataphu Nnajiuphu, bu Chipfu.

18“Unu ta adukwa iphe, e yekoberu iphe, ekoje buredi, unu e-yekobe le mee anu, unu gude egweru mu ngweja. Ophu o dukwa eba-anu ono, e gude abo obo-iphe ono, aa-ha g'o bo nchi.

19“Iphe-mbụ, vuru ụzo kaa l'opfu unu bẹ unu e-gudeje bya l'ulo Chipfu, bụ Chileke unu. “Unu te egudejekwa mini-ẹra ne eghu shia nwa iya.”

Ojozi Chileke bẹ a-bọru ndu Ịzurẹlu ụzo

20“Unu hụma lẹ mu e-zi ojozi-imigwe g'o vutaru unu ụzo; eche unu nche; waa g'o dua unu durwua ẹka ono, mu kwakọbewaru akwakọbe ono.

21Unu ngabẹjeru ojozi-imigwe ono nchị; mee iphemiphe, ọ sụru g'unu mee. Unu te kwefukwaru iya ike; kele ọ tọo gụkwaru unu nvụ; eshinu ọ bụ ẹpha mu bẹ o gude eje.

22Ọ -buru l'unu jikpọerupho obu oyi; ngabẹ nchị l'iphemiphe, o pfuru; bya emekọta iphe, mu sụru g'unu meje; mu aburu ọhogu ndu ọhogu unu; ẹphe adu mu ashị; mbu ndu unu du ashị.

23Ojozi mu e-vuta ụzo duru unu bahu l'alị ndu Amoru; waa ke ndu Hetu; waa ke ndu Pẹrezu; waa ke ndu Kėnanu; waa ke ndu Hevu; waa ke ndu Jiebusu; teme mu atukọepho ndu ono mee g'ẹphe chihu l'alị ono.

24Unu te ephozejekwaru iphe, bụ iphe, aagwa agwagwa; ọphu unu abajekwaru iya ẹja; ọphu unu etsojekwaru pẹ mee omelalị pẹ. Unu mebyishia agwa pẹ; unu etsukpọshia mkpuma, ẹphe doberu l'oru-ngweja pẹ.

25Unu bajeru mube Chipfu, bụ Chileke unu ẹja. Mu e-meru unu iphe-oma lẹ nri waa lẹ mini; bya ewofu iphe-ememe l'echilabọ unu.

26L'alị unu te enwedu nwanyi, ẹpho bya alufu; ọzoo onye ata atsudu ime. Mu e-me g'unu kajẹ nka ọkpobe akaka.

27“Mu e-me g'a tsuje unu ebvu. Iphe, bụ ọhamoha, unu l'ẹphe alwu ọgu bẹ mu e-meje g'ẹphe mehu botorii. Mu emee ndu ọhogu unu g'ẹphe ghakọbeje; gbaaru unu ọso.

28Mu e-ye evu g'o vuru ụzo je je agbaa ndu Hevu; yee ndu Kėnanu; yee ndu Hetu gbakashia pẹ g'ẹphe gbeshiru unu.

29Ole mu ta achifu-gbudu pẹ l'apha lanu; noo kele alị ono a-bya buru okorobo-egu; teme anu-egbudu apanukaru iya unu ẹka.

30Mu a-tokpoeppo nwehu achishi pẹ; gbiriri jasụ unu aka igwerigwe; du ike nwekotaru alị ono.

31“Mu emee g'oke alị unu gbẹ lẹ Eze-enyimu Uswe-uswe je akpaa l'eze-enyimu ndu Filisitayinu; l'ọ bya agbẹ l'echiegu noo jasụ l'enyimu Yufurėtisu. Mu eworu ndu bu l'alị ono ye unu l'ẹka; g'unu chifu pẹ l'ataphu unu.

32G'unu l'ẹphe; ọzoo agwa pẹ ta agbakwa ndu.

33Unu te ekwekwa g'ẹphe buru l'alị unu; ọdumeka bẹ ẹphe a-kpatakwa; unu emee iphe-ẹji meswee mube Chipfu. Noo kele unu -baaru agwa pẹ ẹja bẹ unu nmalahukwaru l'onyà.”

Awufu 24

Eme g'ogbandzu nguru anguru

- ¹Oo ya bu; Chipfu su Mosisu: “Ge gubedua; waa Eronu; waa Nadabu; waa Abihu; waa ndu bu ogerenya Izurelu ukporo umadzu eto l'umadzu iri nyipfuta mube Chipfu; bya anodu uzanya; baaru mu eja.
- ²Oo Mosisu nwekinyi iya bu onye a-byapfuta mube Chipfu; ge ndu ophuu be ejekwa mu akpiritaru ntse; ophu ndu Izurelu etsokwa Mosisu nyikota imeli.”
- ³Mosisu bya eje epfukotaru ndu Izurelu iphe, Chipfu pfushiru; waa ekemu iya. Ephe tuko gude olu lanu zu; su: “Iphemiphe, Chipfu pfuru be anyi e-mekota.”
- ⁴Mosisu bya atuko iphemiphe, Chipfu pfuru dekota l'ekwo. O gbeshi l'onmewa utsu; bya akpua oru-ngweja l'okpa ubvu; bya apfube mkpuma iri l'ebo, no-chiru enya okpa-ifu iri l'ebo ndu Izurelu.
- ⁵Oo ya bu; o bya ezia unwokoroby ndu Izurelu; ephe je egwee ngweja-akpo-oku nu Chipfu; bya egbushikwaapho unwu oke-eswi gude gwee ngweja-ehu-guu nu Chipfu.
- ⁶Mosisu bya ekee mee anu ono ebo woru nanu wuru ye le gbamugbamu; bya ewota ophuu phee l'oru-ngweja.
- ⁷O bya ewota Ekwo Ogbandzu ono guaru ndu Izurelu. Ephe zu mgbede su: “Iphemiphe, Chipfu pfuru be anyi e-mekota; mbu l'anyi e-mekotajekpoephe iphemiphe, o pfuru.”
- ⁸Mosisu bya ewota mee ono phee ndu Izurelu l'ehu bya asu: “Waa mee, egoshi ogbandzu, Chipfu meru; unu l'iya gbaa le k'opfu, o pfuru-a.”
- ⁹Mosisu; yee Eronu; waa Nadabu; yee Abihu; waa ndu bu ogerenya Izurelu ukporo umadzu eto l'umadzu iri bya enyihu eli ubvu ono;
- ¹⁰bya ahuma Chileke ndu Izurelu. Iphe, o pfuru l'eli iya buru iphe, e meru le mkpuma, aswa du, bu safaya; o doephe risaa g'akpaminigwe.
- ¹¹Ophu o dudu iphe, Chileke meru ndu bu ogerenya Izurelu; ephe huma Chileke; bya eria nri; ngua iphe, aangungu.
- ¹²Chipfu su Mosisu: “Nyipfuta mu l'ubvu-a bya anodu l'eka-a ge mu nu ngu mkpuma, du bachibachi, mu deru ekemu; waa iphe, mu suru g'ephe meje, a-noduje akpo-ziru phe uzo.”
- ¹³Noo ya; Mosisu; yee Jioshuwa, bu onye eyejeru iya eka gbalihu swiru; je enyihu ubvu Chileke.
- ¹⁴Mosisu su ndu bu ogerenya ono: “Unu nodu l'eka-a ngaberu anyi gbiriri jas teke anyi a-byapfuta unu ozo. Eronu yee Huru be unu l'ephe no l'eka-a; onye opfu dafutaru; g'o jepfuje phe.”
- ¹⁵Mosisu nyihuepho ubvu ono; urwukpu so-kpute iya.

¹⁶Ogbunwii Chipfu bya atuko úbvú Sayinayi ono sweta. Urwukpu ono nokota l'úbvú ono ujiku ishii. O be le mboku k'esaa; Chipfu gbẹ l'urwukpu ono kua Mosisu oku.

¹⁷Ogbunwii Chipfu ono duepho ndu Ízurelu g'oku, enwu enwunwu l'eli úbvú ono.

¹⁸Mosisu nodu enyiribębaaru l'úbvú ono; o nodu abahuba l'ime urwukpu ono. O noo l'eli úbvú ono ukporo abali labo eswe l'enyashi.

Awufu 25

Iphe, ee-gude mee ulo-ekwa

(Awu 35:4-9)

¹Chipfu su Mosisu:

²“Pfuaru ndu Ízurelu g'ephe shi l'iphe, ephe nweru enweru hata iphe bya anu mu. Iphe, ii-nataje bu iphe, onye gude obu iya wota bya anu.

³Iphe, ephe a-nu bu mkpola-ododo; waa mkpola-ochaa; waa onyirubvu;

⁴waa owu urwukpu-urwukpu; waa ophu eke mee-mee; waa ophu du uswe-uswe; waa okpobe owu ochaa; waa eji egu;

⁵waa akpo ebili, a tseru l'uswe; waa akpo umoro-enyimu; waa oshi akesha;

⁶waa manu olivu, ee-gudeje anwu oku; waa iphe, eeyeje le manu k'awu l'ishi g'o shia mkpo; me ophu eeyeje l'unwu-isensu g'o shia kwekweekwee;

⁷waa mkpuma onikusu; mewaro mkpuma ozo, aswa dugbaa. Mkpuma ono be ee-mechaa gbapyabe l'uwe-ukuvu onye-ishi ndu-uke; yele uwe-okpoma iya.

⁸“Pfuaru phe g'ephe kpuaru mube Chipfu ulo, du nsọ; ge mu eburu l'echilabo phe.

⁹Unu mekwa ulo-ekwa ono; ye iphemiphe, a-nodukota l'ime iya g'o duepho ge mu e-goshi unu g'e mee ya.”

Okpoko Ogbandzu

(Awu 37:1-9)

¹⁰“G'ephe gudekwa oshi akesha kua okpoko. G'ogologo iya du nkwo-eka labo le mkpirikpu iya. Osa iya adu nkwo-eka lanu le mkpirikpu iya. Eli iya adukwapho nkwo-eka lanu le mkpirikpu iya.

¹¹L'i wua okpobe mkpola-ododo l'ime iya; waa l'azu iya. L'i gudekwapho mkpola-ododo wu-pee mgburuku iya mgburugburu.

¹²L'i kputa echi mkpola-ododo eno depfubegbaa l'okpa iya ephen'eno; mbu gi wota ebo depfube l'ibe lanu; wota ebo k'ophuu depfube l'ibe iya ophuu.

¹³L'i gude oshi akesha pyita mgboro labo; wua ya mkpola-ododo.

¹⁴L'i woru mgboro ono ephenebo pyochaa l'echi ono, e depfubegbaaru le mgburuku okpoko ono g'o buru iphe, ee-gudeje apa iya.

- ¹⁵Mgboro ono a-nọduwaro l'echi okpoko ono. G'e te wofubaekwa iya ewofu.
- ¹⁶L'i woru iphe, e deru ekemu mube Chipfu, bu iphe, mu e-mechaa nu unu dobe l'ime okpoko ono.
- ¹⁷“L'i gude okpobe mkpola-ododo meta opfu okpoko; eka aapfuje ugwo iphe-eji, nemadzu meru. G'ogologo iya du nkwo-eka labo le mkpirikpu iya. Osa iya adu nkwo-eka lanu le mkpirikpu iya.
- ¹⁸L'i gude mkpola-ododo mee chierobu labo, a-noduchaa l'ishi opfu okpoko ono. G'o buru mkpola-ododo, e tsusaru etsusa be ii-gude mee ya.
- ¹⁹L'i woru chierobu lanu dobe l'ishi ibe lanu; woru ophuu dobe l'ishi iya ophuu. L'i mee ge chierobu labo ono, nogbaa l'ishishi okpoko ono ephenebo ye le okpoko ono buru iphe lanu.
- ²⁰Chierobu ono be ee-me g'o jashia nku l'uzo imeli; k'ophu nku iya ono e-kpuchite opfu okpoko ono. G'ephe ghagbabe iphu tuko lee enya l'eli okpoko ono kwapho.
- ²¹L'i wota opfu okpoko ono kpuchia ya; woru iphe ono, e deru ekemu mu ono, bu iphe, mu e-mechaa nu unu ono; yekwapho l'ime okpoko ono.
- ²²O buru l'eli opfu okpoko ono; mbu le mgbaka chierobu labo ono, no l'eli okpoko ono, bu iya bu eka ono, e doberu iphe, e deru ekemu mu ono be mu a-byapfuta ngu bya akaru ngu iphemiphe, ndu Izurelu e-meje.”

Teburu ono
(Awu 37:10-16)

- ²³“Gude oshi akesha meta teburu. G'ogologo iya du nkwo-eka labo. Osa iya adu nkwo-eka lanu. Eli iya adu nkwo-eka lanu le mkpirikpu iya.
- ²⁴L'i wua ya okpobe mkpola-ododo; bya egudekwapho mkpola-ododo wu-pee le mgbureku iya mgburugburu.
- ²⁵L'i wota werere oshi, osa iya ha g'obochi-eka wu-pee mgbureku iya mgburugburu; bya egudekwapho mkpola-ododo kp-pee oshi ono.
- ²⁶Kputa echi mkpola-ododo eno depfubegbaa le mgbureku okpa teburu ono.
- ²⁷Echi ono a-no-kubechakwaa werere oshi pho; k'ophu o-dukwanu ike gudeshia mgboro, ee-gudeje apa teburu ono.
- ²⁸L'i gude oshi akesha pyishia mgboro ono; wua ya mkpola-ododo g'o buru mgboro, ee-gudeje apa teburu ono.
- ²⁹L'i gude okpobe mkpola-ododo meshia gbamugbamu; waa ite; waa okoro; me nkweka ee-gudeje gweeru mu ngweja-mee. Iphemiphe ono bu iphe, aa-tu-kobeje l'eli teburu ono.
- ³⁰G'e dobeje buredi l'iphu mu. O buru l'eli teburu ono be aa-tu-kobeje iya; k'ophu oduje l'iphu mu tekenteke.”

Iphe, aapfubeje oroku

(Awụ 37:17-24)

- 31**“Gude okpobe mkpola-ododo, e tsusaru etsusa mee iphe, aapfubeje oroku. Mee ya g'o nweru oshi; waa ekali. L'o nweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Tukokwa iphemiphe ono mee ge ye iphe ono, aapfubeje oroku ono dze pfua buru nanu.
- 32**Oshi iya ono e-nweru ekali ishii. G'ekali eto nodu le mgbureku iya lanu; eto k'ophuu anodu le mgbureku iya ophuu.
- 33**G'ekali iya lanu nwejeru okoro eto. Okoro ono be ee-mechaa g'o dugbaa g'okoko oshi alumundu. L'e mekwaapho nwopu okoko ye iya; yee okoko ophu jawaru ajaja. Noo g'oo-dukota l'ekali iya ono ephe n'ishii, dze pfugbaaru l'oshi iya ono.
- 34**G'oshi iya ono nwekwaru okoro eno, e meru; o du g'okoko oshi alumundu. L'o nwekwarupho iphe, e meru; o du ge nwopu okoko; yee iphe, du g'okoko ophu jawaru ajaja.
- 35**Nwopu okoko lanu be ee-me g'o nodu le mkpula ekali iya labo ono, no l'uzo ali iya. K'ebo anodu le mkpula ekali iya labo k'echi. K'eto anodu le mkpula ekali iya labo k'uzo eli. Mbụ l'oo-noduchaa le mkpula ekali iya ono ephe n'ishii.
- 36**Nwopu okoko iya ono; yee ekali iya ekali iya ono be ee-me ge ye oshi iya toko dze pfuru. O buru okpobe mkpola-ododo, e tsusaru etsusa be ee-gude mee ya.
- 37**“L'i bya emeta oroku esaa pfubegbaa l'eli iphe ono, aapfubeje oroku ono. G'e dobekwa iya k'ophu iphoro iya a-ngakotaje iphu eka o no.
- 38**Akpaa ya; waa iphe, aagujeru oku iya ye bukwa okpobe mkpola-ododo be ee-gude mekwaa ya pho.
- 39**Iphe, aapfubeje oroku ono; yee ngwa iya g'o hakota bu okpobe mkpola-ododo, erwa iya du talentu lanu be ee-gude mee ya.
- 40**Letakwa enya g'e mee iphemiphe ono g'o du g'e goshiru ngu iya l'eli ubvu ono.”

Awufu 26

Mkpù-ekwà

(Awụ 36:8-38)

- 1**“Ozoo bu le-a; ii-meta ulo-ekwa. Gude owu ochaa, a swiru udo; waa ophu du urwukpu-urwukpu; waa ophu du uswe-uswe; yee ophu eke mee-mee; kwee ekwa kweta iya upfu ekwa iri. G'onye maru eme ona gude owu ono kwee chierobu ye l'upfu ekwa ono.
- 2**G'upfu ekwa ono tukokwa haru enya nhamunha. G'ogologo iya du nkwo-eka ukporo l'esato. Osa iya adu nkwo-eka eno.
- 3**L'i wota upfu ekwa ono ise gbagbabe g'o buru nlochiru lanu; l'i wotakwapho uzo ise ophuu gbagbabe nanu.

- ⁴Nlọchiru iya ono kẹ mbụ bẹ ii-gude owu, dụ urwukpu-urwukpu yeshia ya nkoloba l'igburonu upfu ẹkwa iya ono k'ikpazu. L'ì bya emekwaaphọ nno l'upfu ẹkwa k'ikpazu lẹ nlọchiru iya k'ẹbo.
- ⁵Nkoloba ụkporo labọ l'iri bẹ ii-ye l'ishishi nlọchiru lanu; l'i yekwaphọ nkoloba ụkporo labọ l'iri l'ishishi nlọchiru lanu ophuu. Nkoloba ono a-tuko ghagbabe iphu.
- ⁶Gude mkpọla-ododo meta iphe, kweru nko ishi labọ ụzo ụkporo labọ l'iri. L'i gude iya dzegbabe nlọchiru ẹkwa ono ẹphenebo g'ọ tuko buru nanu.
- ⁷“L'ì bya egude ẹji egbu kwee ẹkwa; kweta iya upfu ẹkwa iri lẹ nanu, ee-gude phụ-chite eli ụlo-ẹkwa ono.
- ⁸G'upfu ẹkwa ono ẹphe n'iri lẹ nanu tukokwa haru ẹnya nhamunha. G'ogologo iya dụ nkwo-ẹka ụkporo l'iri. Osa iya adu nkwo-ẹka ẹno.
- ⁹L'ì bya achita upfu ẹkwa ono ise gbagbabe g'ọ buru nlọchiru lanu; chita ụzo upfu ẹkwa ishii ophuu gbagbabekwapho nanu. Upfu ẹkwa lanu ophu meru nlọchiru lanu; o dụ upfu ishii phọ bẹ ii-pyaji ẹbo dobe g'ọ gboru l'atatiphu ụlo-ẹkwa ono.
- ¹⁰Nkoloba ụkporo labọ l'iri bẹ ii-ye l'ishishi nlọchiru lanu; l'i yekwaphọ nkoloba ụkporo labọ l'iri l'ishishi nlọchiru lanu ophuu.
- ¹¹L'i gude onyirubvu meta iphe, kweru nko ishi labọ ụzo ụkporo labọ l'iri. L'i gude iya kotagbaa nkoloba nlọchiru ẹkwa ono ẹphenebo; gude iya dzegbabe ụlo-ẹkwa ono g'ọ buru nanu.
- ¹²A bya l'upfu ẹkwa, tsufuru l'ulo-ẹkwa ono; mbụ nkeru-ẹbo upfu ẹkwa ono bẹ ee-me g'ọ wu-zeta l'azu ụlo-ẹkwa ono.
- ¹³Nlọchiru upfu ẹkwa ono, e gude phụ-chite nlọchiru k'ime iya phọ bẹ e-gudekọta nkwo-ẹka lanu ka k'ime iya phọ osa lẹ mgbureku iya ibekẹboebo. Ndu k'ono bẹ aa-ha g'ọ wu-zeta l'uzo alì iya g'e gude iya kwechia mgbureku iya.
- ¹⁴L'i wota akpọ ebili, a tseru l'uswe mee iphe, ee-gude phụ-chia eli ụlo-ẹkwa ono ozo. L'ì bya egudekwaphọ akpọ umoro-enyimu mee iphe, ee-gude kwechite eli akpọ k'ebili ono.
- ¹⁵“Gude oshi akesha metachaa oshi, ee-gudeje kpọbe ụlo-ẹkwa ono.
- ¹⁶Oshi ono bẹ aa-ruchaa g'ọ dugbaa nkwo-ẹka iri l'eli. Osa iya adu nkwo-ẹka lẹ mkpirikpu iya.
- ¹⁷Oshi ono bẹ aa-pyitachaa okpa labọ ye l'ibekẹboebo. O buru egube ono bẹ ii-mekọta oshi ụlo-ẹkwa ono g'ọ ha.
- ¹⁸A bya l'ulo-ẹkwa ono ibiya ophu gharu iphu l'uzo ohali; bu ụkporo oshi bẹ ii-ruta yegbaa ya.
- ¹⁹L'i gude mkpọla-ochaa meshia ẹnya ẹka aa-kpogbaaru okpa oshi ono ye. L'i meta iya ụzo ụkporo labọ. Iphe, bu oshi ono g'ọ ha e-nweru ẹnya ẹka labọ, aa-kpọjeru okpa iya ye.

- 20A bya l'ibiya ophuu; mbu ibiya ophu gharu iphu l'uzo isheli; bukwapo ukporo oshi be ii-ruta; yeshia ya.
- 21Gude mkpola-ochaa meshia enya eka aa-kpogbaaru okpa oshi ono ye. L'i meta iya uzo ukporo labo. Iphe, bu oshi ono g'o ha e-nweru enya eka labo, aa-kpojeru okpa iya ye.
- 22A bya l'okotazu ulo-ekwa ono; mbu ibiya ophu gharu iphu l'uzo enyanwu-ariba bu oshi ishii be ii-ruta; yeshia ya.
- 23L'i metachaa oshi ebo ebo; yechaa le mgbureku mgbureku ulo-ekwa ono l'uzo okotazu iya ono.
- 24Oshi labo ono, ee-yechaa le mgbureku iya ono be a-dugbaa nkwegba ebo ebo. Ooshi l'uzo ali du nkwegba ebo jasụ l'imeli. Teme o buru echi lanu be aa-kube iya. Ephenebo a-tuko dukota nno.
- 25Oo ya bu l'oo-du oshi esato l'uzo okotazu ulo-ekwa ono. L'e gude mkpola-ochaa meshia enya eka aa-kpogbaaru okpa oshi ono ye uzo iri l'ishii. Iphe, bu oshi ono g'o ha e-nwegbaaru enya eka labo, aa-kpojeru okpa iya ye.
- 26“Gude oshi akesha rwashia oshi, dugbaa gberere, ee-gude swebushia l'oshi ono. Uzo ise be ii-swebe l'oshi mgbureku ulo-ekwa ono ibe lanu;
- 27I'i swebekwapo uzo ise ozo le mgbureku ibe iya ophuu. Uzo ise ozo aburu k'okotazu ulo-ekwa ono; ibiya ophu gharu iphu l'uzo enyanwu-ariba.
- 28Oshi ophu ee-swebe l'echi iya be aa-rwa g'o gbẹ l'ishi lanu lufu l'ishi iya ophuu.
- 29L'i wukota mkpola-ododo l'oshi ono, eegudeje kpobe ulo-ekwa ono. L'i gudekwapho mkpola-ododo meshia echi, e-gudeshigbaa oshi ono, dugbaa gberere ono. Teme l'i wukwapo mkpola-ododo le gberere oshi ono.
- 30“Rukwaa ulo-ekwa ono g'a turu ngu onu iya l'eli ubvu Sayinayi.
- 31“L'i gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. G'onye maru eme ona gudekwa owu ono kweshia chierobu ye l'ekwa ono.
- 32L'i gude oshi akesha rwa itso eno; wua ya mkpola-ododo. L'i woru itso ono kpobechaa l'enya eka e meshiru le mkpola-ochaa. L'i gude iphe, kweru nko, e gude mkpola-ododo mee kobe ekwa ono l'itso ono
- 33le mkpula iphe pho, kweru nko ishi labo pho, e gude dzegbabe nlochiru ekwa pho, e gude phu-chite eli ulo-ekwa ono. L'i woru okpoko-ekemu ono sibe l'eka ono, e kobutaru ekwa ono. Ekwa ono be ee-gude kekahaa eka-du-nsọ; ye le eka-kakota-adu-nsọ.
- 34L'e woru opfu okpoko ono, bu eka aapfufe ugwo iphe-eji, nemadzu meru ono; kpube l'eli okpoko-ekemu ono, a suberu l'eka-kakota-adu-nsọ ono.

³⁵L'i pata teburu pho sibe l'iphu ekwa ono, e gude kobuta aka-kakota-adu-nso ono. Eka aa-sibe iya bu l'ime ulo-ekwa ono l'ibiya ophu gharu iphu l'uzo isheli. L'i woru iphe pho, aapfubeje oroku pho sibe l'ibiya ophu gharu iphu l'uzo ndohali; g'ephe le teburu pho ghagbabe iphu.

³⁶“G'onye gude ngga ekwe ekwa gude owu, du urwukpu-urwukpu; waa ophu eke mee-mee; waa ophu du uswe-uswe; yee owu ocha, a swiru udo; kwee ekwa, ee-gudeje kochite onu-abata ulo-ekwa ono.

³⁷L'i gude mkpola-ododo meshia iphe, kweru nko, ee-gude kobe ekwa ono l'itso. L'i gude oshi akesha rwata itso ise; wukwaa ya pho mkpola-ododo; gude onyirubvu kpushia enya aka aa-kpobegba itso ono ephe n'ise.

Awufu 27

Oru-ngweja-akpo-oku

(Awu 38:1-8)

¹“Gude oshi akesha ruta oru-ngweja. G'eli iya du nkwo-eka eto. G'ogologo iya waa osa iya tukokwa haru enya nhamunha. Iphe, oo-duchaa bu nkwo-eka ise ise.

²L'i rutachaa mpu mobechea l'ishi ishi mgbureku iya ephen'eno. Ge mpu ono; yee oru-ngweja ono rwagbakwaa buru nanu. I -mecha ya nno; l'i woru onyirubvu wua ya.

³L'i gude onyirubvu meshia iphemiphe, ee-gudeje eje ozi l'oru-ngweja ono, bu iya bu ite ekpo ntu; waa iphe, eegudeje ekpo ntu eye l'ite ono; waa gbamugbamu; waa oji; me iphe, aaguje oku.

⁴L'i gude onyirubvu meta iphe, du nggafu-nggafu g'ugbu; bya enweru mgbureku eno. L'i gudekwapho onyirubvu meta echi eno hebechea le mgbureku iphe ono.

⁵L'i wota iphe ono kwechia uzo ali mgbureku oru-ngweja ono. G'a gbete l'uzo ali iya kwechia ya jasule l'echilabo iya.

⁶L'i gude oshi akesha pyita mgboro labo, ee-gudeje apa iya. L'i wukwapho mgboro ono onyirubvu.

⁷L'e wocharu mgboro ono nwua l'enya echi pho ibekboebo. Mgboro ono ephenebo a-nodujecha le mgbureku iya ephenebo me a -nodu apa iya.

⁸Gudekwa ibiribe oshi mee oru-ngweja ono g'uzo du iya l'echi. Mee ya g'o du ge mu goshiru ngu iya l'eli ubvu ono.”

Oma-unuphu ono

(Awu 38:9-20)

⁹“Meeru ulo-ekwa ono oma-unuphu. Gude owu ocha, a swiru udo; kwee ekwa, du ukporo nkwo-eka ise l'ogologo; g'e gude gebuta ibiya ophu oma-unuphu ono gharu iphu l'uzo ndohali.

¹⁰L'i gude onyirubvu meta ukporo itso, aa-kpobe iya; yee enya eka aa-kpobechaa itso ono. L'i gude mkpola-ochaa meshia iphe, kweru nko, ee-gude kobe ekwa ono l'itso ono; yee iphe, ee-swebe l'itso ono.

¹¹Uzo isheli iya bukwapho ekwa, du ukporo nkwo-eka ise l'ogologo be ee-kwe; gude gebuta iya. Itso, aa-kpobe l'uzo isheli ono; yee enya eka aa-kpobe itso ono a-duchaa ukporo ukporo. O bukwapho onyirubvu be ee-gude metachaa ya. O bukwapho mkpola-ochaa be ee-gude meshia iphe, kweru nko, ee-gude kobe ekwa ono l'itso ono; yee iphe, ee-swebe l'itso ono.

¹²“A -bya l'osa oma-unuphu ono l'uzo enyanwu-ariba iya; bukwapho ekwa, du ukporo nkwo-eka labo le nkwo-eka iri l'ogologo be ee-kwe; gude gebuta iya. G'e meta itso iri, aa-kpobe l'uzo enyanwu-ariba ono; metakwapho enya eka aa-kpobechaa itso ono uzo iri.

¹³Osa oma-unuphu ono l'uzo enyanwu-awawa iya a-dukwapho ukporo nkwo-eka labo le nkwo-eka iri l'ogologo.

¹⁴L'e kwee ekwa, du nkwo-eka iri l'ise l'ogologo; gude gebuta aguga onu-abata oma-unuphu ono ibe lanu. Itso, aa-kpobe iya; yee enya eka aa-kpobechaa itso ono a-duchaa eto eto.

¹⁵A -bya l'eka aguga onu-abata oma-unuphu ono ibe iya ophuu; bukwapho ekwa, du nkwo-eka iri l'ise l'ogologo be ee-kwe; gude gebuta iya. Itso, aa-kpobe iya; yee enya eka aa-kpobechaa itso ono a-duchakwapho eto eto.

¹⁶“L'e gude owu, du urwukpu-urwukpu; waa ophu eke mee-mee; waa k'uswe-uswe; yee owu ochaa, a swiru udo; gude kwee ekwa, du nkwo-eka ukporo l'ogologo; gude gebuta onu-abata oma-unuphu ono. G'o bukwapho onye maru egude ngga kwee ekwa be e-me iya nu. Onu-abata iya ono be ee-metaru itso eno; waa enya eka aa-kpobechaa itso eno ono.

¹⁷Iphe, ee-swebegbaa l'itso, ee-gude kpobuta oma-unuphu ono mgburugburu; yee iphe, kweru nko, ee-gudechaa kobe ekwa ono l'itso ono bukota mkpola-ochaa be ee-gude meta iya. Teme enya eka aa-kpobechaa itso ono be ee-gude onyirubvu mekota.

¹⁸Oma-unuphu ono a-du ukporo nkwo-eka ise l'ogologo; du ukporo nkwo-eka labo l'iri l'osa. Ee-gude ekwa, e kweru l'owu ochaa, a swiru udo; gebuta iya. Eli ekwa ono a-du nkwo-eka ise. Teme l'a wukota onyirubvu l'enya eka aa-kpobechaa itso iya.

¹⁹Iphemiphe ozo, ee-gudejekpo eje ozi l'ulo-ekwa ono; m'obeta o buru gunu be e gude iya eme; je akpaa le nggu, ee-libegbaa eri ulo-ekwa ono; mekwapho k'oma-unuphu ono; be ee-gude onyirubvu mekota.”

Manu oroku ono

(Uke 24:1-4)

²⁰“Pfiaru ndu Izurelu g'ephe wotaru ngu okpobe manu olivu, a tsuru l'ikwe, ee-yeje l'oroku; g'oku oroku ono nwuje mkpurumkpuru.

²¹Gẹ Erõnu; yẹle ụnwu iya yeje ọku l'orọku ono l'ataphu Chipfu l'ime ụlo-ẹkwandzuko ono; mbụ l'okotazụ ẹkwa phọ, e gude kobuta okpoko-ekemu phọ. G'ẹphe mejekwa orọku ono g'o shije l'uzenyashi nwuje jasụ l'ụtsu. Gẹ ndu Ízurelu dobekwa ekemu-a; a -gbẹ l'ogbo sweru ogbo.”

Awụfu 28

Uwe ndu-uke

(Awụ 39:1-7)

¹“G'e shi l'echilabọ ndu Ízurelu dufutaru ngu nwune ngu, bụ Erõnu; yẹle ụnwu iya, bụ Nadabu; yẹ Abihu; waa Eleyaza; yẹ Itama; g'ẹphe buru ndu-uke; jejeru mu ozi.

²L'a kwaarụ nwune ngu, bụ Erõnu uwe, dụ nsọ; g'e shi nno mee ya g'ọ dụ akpabiri l'ẹnya; k'ọphu aa-kwabeje iya ùbvù.

³Pfuaru ndu maru eme ọna; mbụ ndu mu meru g'ẹphe nweru mmamiphe g'ẹphe maru eme iphe, dụ nno; g'ẹphe kwaarụ Erõnu uwe, ee-gude doo ya nsọ; k'ọphu ọo-buru onye uke; jejeru mu ozi.

⁴Wakwa ẹgube uwe, ẹphe a-kwagbaaru iya bụ ọwa-a: uwe-ọkpoma; yẹ uwe-ukuvu; waa uwe-mgbalanu; yẹ uwe ime-ẹhu; waa okpu-ẹkwa; yẹ ẹkwa-atụ-buta-l'upfu. G'ẹphe kwaarụ nwune ngu, bụ Erõnu; waa ụnwu iya; uwe ono, dụ nsọ; k'ọphu ẹphe a-buru ndu-uke; jejeru mu ozi.

⁵Iphe, ẹphe e-gude kwee ẹkwa uwe ono bụ owu, e meru lẹ mkpọla-ododo; yẹ owu, dụ urwukpu-urwukpu; waa ọphu eke mee-mee; waa k'uswe-uswe; yẹ owu ọchaa, a swịru ụdo.

Uwe Ukuvu

(Awụ 39:2-7)

⁶“G'onye maru eme ọna gude ẹkwa, e kweru l'owu mkpọla-ododo; waa owu, eke urwukpu-urwukpu; waa ọphu eke mee-mee; waa k'uswe-uswe; waa k'ọchaa, a swịru ụdo; kpaa uwe-ukuvu.

⁷G'a kwaa uwe ukuvu ono; woru wẹrere ẹkwa labọ yechaa ya l'ishi ukuvu iya ibe ẹka ẹbo. L'e gudeje wẹrere ẹkwa ono ẹphenebo lita k'ataphu yẹ k'azụ.

⁸L'e kwekwaphọ wẹrere ẹkwa, ee-gudeje tū-buta iya l'upfu ye iya. Wẹrere ẹkwa ono bẹ yẹ uwe-ukuvu ono a-tuko buru iphe lanu. Iphe, ee-gude kwaa ya bụ owu, e meru lẹ mkpọla-ododo; yẹ owu, dụ urwukpu-urwukpu; waa ọphu eke mee-mee; yẹ k'uswe-uswe; yẹ owu ọchaa, a swịru ụdo.

⁹“Wota mkpuma ónikùsù labọ; deshia ẹpha ụnwu Ízurelu l'eli iya.

¹⁰Deshia ẹpha ono lẹ g'e gude nwushia phẹ. Ẹpha ishii bẹ ii-de lẹ mkpuma lanu. L'i dee ẹpha ishii ọphuu lẹ mkpuma k'ọphuu.

¹¹Ọo g'onye apyije mkpuma, vu oke aswa akashije iya ẹpha; gude mee ya iphe-ọhubama-a bụ g'ii-kakọta ẹpha ụnwu Ízurelu l'ophu l'eli mkpuma labọ ono. L'i waa mkpọla-ododo l'igburonu mkpuma ono mgburugburu.

¹²L'i dzupyaabe mkpuma labo ono l'eli uwe-ukuvu pho ephenebo; k'ophu mube Chipfu e-gudeje iya nyata unwu Izurelu. Epha unwu Izurelu ono a-du l'ukuvu Eronu ephenebo g'o buru iphe, mu e-gudeje nyata phe.

¹³L'i wua mkpola-ododo l'igburonu mkpuma ono.

¹⁴L'i gude owu okpobe mkpola-ododo swita udo gwogirigwo labo. L'i woru gwogirigwo ono ephenebo lipfubechaa le mkpola-ododo ono, a wuru l'igburonu mkpuma ono."

Uwe-Okpoma

¹⁵"G'onye maru eme ona kwee uwe-okpoma, ee-gudeje achu iphe, bu uche mube Chipfu. G'e gude iphe ono, e gude kwee uwe-ukuvu ono kwee ya, bu iya bu owu, e meru le mkpola-ododo; yee owu, du urwukpu-urwukpu; yee ophu eke mee-mee; waa k'uswe-uswe; waa owu ocha, a swiru udo.

¹⁶G'e kwekwaa ya g'o nweru mgbureku eno; du nkwegba labo. Ge mgbureku iya ono ephen'eno tukokwa haru enya nhamunha. G'ogologo iya du nkwo-eka lanu; osa iya adukwapho nkwo-eka lanu.

¹⁷"Dzupyaabe mkpuma, vu oke aswa g'o kpoo giriri uzo eno l'ekwa ono. Mkpuma, anodu l'ogiri ke mbu bu rubi; yee topazu; waa berilu.

¹⁸O -be l'ogiri k'ebo; bu tokwasu; yee safaya; waa emeraludu be ee-do iya.

¹⁹O -bekwa l'ogiri k'eto; l'e doo ya jiasintu; yee agetu; waa amitisutu.

²⁰Teke o beru l'ogiri k'eno; l'e doo ya kirisolayitu; yee onikusu; waa jiasupa; l'a wua mkpola-ododo l'igburonu mkpuma ono.

²¹Iphe, o-du bu mkpuma iri l'ebo. G'ephe ha nanu nanu no-chichaa enya unwu Izurelu. G'e dechaa epha unwu Izurelu ono le mkpuma ono g'o du g'iphe-ohubama nochia enya okpa-ipfu iri l'ebo ndu Izurelu.

²²"L'i gude okpobe mkpola-ododo swishia udo gwogirigwo, ee-lipfubegbaa l'uwe-okpoma obu.

²³L'i gude mkpola-ododo meta echi labo; yechaa l'ishi uwe-okpoma ono.

²⁴L'i woru gwogirigwo pho libechaa l'echi ono, e yegbaaru l'ishi uwe-okpoma ono.

²⁵L'e wota ishi gwogirigwo ono ishi iya ophuu lipfubekwapho le mkpola-ododo pho, a wuru l'igburonu mkpuma labo pho, e lipfuberu l'eli uwe-ukuvu pho.

²⁶L'i gude mkpola-ododo meta echi labo ozo; lipfube l'ishi uwe-okpoma pho l'uzo ali iya. Lipfubekwa iya l'ime uwe-okpoma obu; ibiya ophu tukoru l'eli uwe-ukuvu ono.

²⁷L'i gude mkpola-ododo metafua echi labo ozo; libechaa l'ishishi werere ekwa labo pho l'uzo ali iya; mbu werere ekwa ono, e liberu l'eli uwe-ukuvu ono. Libekwa iya l'eli eka ono, a nmaru werere ekwa, a tu-butaru l'upfu uwe-ukuvu ono.

²⁸Echi k'uwe-òkpoma phò bẹ ee-gude eri, e gude owu, dù urwukpu-urwukpu swia; libechaa l'echi uwe-ukuvu òbu; k'òphu òò-nòdu lẹ mgboru wẹrere ẹkwa, atụ-butá l'upfu phò; g'uwe-òkpoma phò ta nòdujeshi akụ pẹpẹe l'eli uwe-ukuvu ono.

²⁹“Oo ya bụ; g'ò bụru teke Erọnu abahụ l'ẹka-dụ-nsò; ẹpha unwu Ízurẹlu anòdu iya l'obu; mbụ l'ẹpha ono a-nòdu l'uwe-òkpoma, eegudeje achò iphe, bụ uche Chileke; shi nno mee gẹ Chipfu gudeje iya nyata phẹ tekenteke.

³⁰L'i yekòbefukwapho ido, Urimu waa Tumimu l'uwe-òkpoma òbu; g'ò tų-kojeru Erọnu l'obu l'iphe, bụkpoo teke ọobyá l'atátiphu Chipfu. Noo gẹ Erọnu e-gudeje parụ iphe, eegudeje achò iphe, bụ uche Chileke l'ẹhu ndu Ízurẹlu bya l'atátiphu Chipfu tekenteke bụ ono.”

Uwe ọzo, ndu-uke e-yeje

³¹“Gude ẹkwa, dù urwukpu-urwukpu kwee uwe mgbalanụ, ee-yeje uwe-ukuvu ono l'eli iya.

³²Kwekwaa ya g'ẹka, eepyoje iya ishi nòdu iya l'echilabò. L'i swia igburọnu iya ọnu g'eeswije olu uwe-a; g'ò tọ lakahụ.

³³Gude owu, dù urwukpu-urwukpu; waa ọphu eke mee-mee; yẹe ọphu dù uswe-uswe; kpacháaru akpuru itorokuma; dophee ọnu uwe ono mgburugburu. L'i gudekwapho mkpọla-ododo meshia ọkumnengu dokahajẹ iya l'echilabò.

³⁴G'ọkumnengu mkpọla-ododo ono; waa itorokuma ono; nọ-phekwaa igburọnu uwe ono mgburugburu. L'e dongakọta phẹ edonga l'ọnu uwe ono.

³⁵Gẹ Erọnu yeje iya m'ò nòdu eje ozi l'atátiphu Chipfu; g'ò tọ nwuhu. Oda ọkumnengu ono bẹ aa-nòduje anụ m'ò nòdu abahụ l'ẹka-dụ-nsò ono; waa m'ò lufutashia.

³⁶“Gude ọkpobe mkpọla-ododo meta iphe, dù g'okwekpu; dee ya iphe g'eedeje gude mee iphe-ọhubama-a. Iphe, ee-de iya bụ: Onye-a duru Chipfu nsò.

³⁷L'i wota eri, e gude owu, dù urwukpu-urwukpu swia; libe l'iphe ono, dù g'okwekpu ono; woru iya lipyabẹ l'atátiphu okpu-ẹkwa phò.

³⁸Erọnu -kpuru okpu-ẹkwa ono; g'ò nòdu iya l'egedegee ọnu-iphu; g'ò bụru yẹbedua bẹ ọò-tų-koru l'ishi; mbụ aturwu, a aturwuru iphe, ndu Ízurẹlu doberu Chipfu nsò; m'obeta ọ bụru iphe, dù ọdu-agma bẹ ẹphe doberu mu nsò ọbu. Iphe ono, dù g'okwekpu ono a-nòdujeepho Erọnu l'egedegee ọnu-iphu; g'iphe ono, e doberu nsò ono adukwanu mube Chipfu ree k'anata.

³⁹“L'i gude owu ọchaa kwee uwe ime-ẹhu phò; yẹe okpu-ẹkwa phò. G'ò bụkwaru onye maru egude ngga kwee ẹkwa bẹ e-me ẹkwa-atụ-butá-l'upfu phò.

⁴⁰A -bya l'ẹhu unwu Erọnu; kweeru phẹ uwe-ime-ẹhu; yẹe ẹkwa-atụ-butá-l'upfu; waa okpu ndu-uke; g'e shi nno mee phẹ g'ẹphe dù akpabiri l'ẹnya; k'òphu aa-kwabeje phẹ ùbvù.

⁴¹I -yechaephō nwune ngu Erōnu; waa ụnwu iya uwe ono; l'ì wụa phẹ manụ l'ishi; gude mee g'ephē bụru ndu-uke. L'ì dobe phẹ iche g'ephē bụru ndu-uke; jejeru mu ozi.

⁴²“L'ì gude ẹkwa ọchaa metaru phẹ nwịba, ephe e-yeje. G'ephē yeje iya g'ọ gbẹ ephe l'upfu rwua phẹ l'utapfu.

⁴³Gẹ Erōnu; yee ụnwu iya yejekwa nwịba ono m'ephē nọdu abahụ l'ulo-ẹkwa-ndzuko ono; ọzoo l'ephē eje ejeru mube Chipfu ozi l'oru-ngweja, nọ l'eka-du-nsọ; k'ophu ephe tee metadu iphe-uta kpua onwophe; shi nno nwushihu. “G'ekemu ono dukwaru Erōnu; yee awa iya jasụ lẹ tuutuutu lẹ mịimiimii.”

Awụfu 29

Edobe ndu-uke nsọ

¹“Waa iphe, ii-me gude dobe phẹ nsọ; k'ophu ephe a-buru ndu-uke; jejeru mu ozi bu ọwa-a: Kpụta nwa oke-eswi lanụ; waa ebili labọ, enwedu ẹka ntucha dụ iya l'ẹhu;

²l'ì gude ukpokutu iphe, e yeduru iphe, ekoje buredi; gude ghee buredi. Hatakwa iya phọ gwọo lẹ manụ; gude ghee akara. L'ì gudekwa iya phọ ghee ẹcha-mbekee, a gbashiru manụ.

³L'ì tuko iya gweru ye lẹ nkata pataru mu; ephe l'oke-eswi phọ; yee ebili labọ phọ.

⁴E -mechaa nno; l'ì duta Erōnu; yee ụnwu iya bya l'onu-abata ulo-ẹkwa-ndzuko; gude mini wua phẹ ẹhu.

⁵L'ì chita uwe ndu-uke phọ yee Erōnu. Vuru ụzo yee ya uwe ime-ẹhu phọ; teme l'ì yee ya uwe mgbalanụ phọ, ee-ye uwe-ukuvu l'eli iya phọ. L'ì gbẹ teke ono yee ya uwe-ukuvu ono l'onwiya; mefua uwe-okpoma phọ. L'ì gude werere ẹkwa phọ, e kweru g'e gudeje tų-butu uwe-ukuvu ono; gude tų-butu iya.

⁶L'ì wota okpulishi-ẹkwa phọ kpube iya; wota iphe, dụ g'okwekpu phọ, e doberu nsọ phọ libe l'okpulishi ono.

⁷L'ì wota manụ, aawuje l'ishi wua ya l'ishi gude mee ya onye uke.

⁸L'ì duta ụnwu iya yeshia phẹ uwe mgbalanụ;

⁹bya ewochaaru okpu ndu-uke kpubegbaa phẹ l'ishi. L'ì wotakwaphọ ẹkwa-atų-butu-l'upfu phọ; webegbaa Erōnu; yee ụnwu iya l'upfu. Ekemu, mube Chipfu turu phẹ bukwa g'ephē bụru ndu-uke jasụ lẹ tuutuutu lẹ mịimiimii. Nokwa g'ii-gude mee Erōnu; yee ụnwu iya g'ephē bụru ndu-uke bu ono.

¹⁰“E -mebechaa nno; l'ì kpụta oke-eswi phọ gude bya l'onu-abata ulo-ẹkwa-ndzuko ono. Gẹ Erōnu; yee ụnwu iya byabẹ iya ẹka l'ishi;

¹¹l'ì nọdu l'iphu Chipfu gbua ya l'onu-abata ulo-ẹkwa-ndzuko ono.

¹²L'ì meta mee oke-eswi ono gude mkpushi-ẹka ngu tee ya lẹ mpu, nọgbaa l'oru-ngweja ono. L'ì woru ophu ghuduru nụ wushia l'okpali oru-ngweja ono.

- 13Tuko ɛba, nɔkɔta l'iphe-ɛpho iya g'ɔ ha heta. L'i bɔtakwapho anya iya; waa ɔkpɔrɔ iya ɛphenebo; yɛɛ ɛba, nɔkɔta iya nɔ; kpɔɔ ɔku l'ɔru-ngweja ono.
- 14Anɔ oke-eswi ono; waa akpɔ iya; yɛɛ nshɪ iya bɛ ii-gude je akpɔɔ ɔku l'azɔ ɛka ndu Ɔzɔrɛlu kpɔberu ulo-ɛkwa phɛ.
- 15“L'i kpɔta ebili phɔ nanɔ gude bya gɛ Eɔnu yɛɛ ɔnwu iya byabɛ iya ɛka l'ishi;
- 16l'i gbua ya; nakɔbe mee ya; pata mee ya ono phedzuru lɛ mgburɛku ɔru-ngweja ono mgburugburu.
- 17L'i bushia anɔ ebili ono iphiriba iphiriba; chɪta iphe-ɛpho iya; yɛɛ ɔkpa iya; saa asasa. L'i woru iphe-ɛpho iya ono; yɛɛ ɔkpa iya ono; chɪkobe l'ishi iya; yɛɛ iphiriba iphiriba iya phɔ.
- 18L'i tuko anɔ ebili ono g'ɔ ha kpɔɔ ɔku l'ɔru-ngweja ono. G'ɔ buru ngweja, a kpɔru ɔku nɔ Chipfu; mkpɔ iya dɔ iya ree.
- 19“L'i kpɔta ebili ɔphuu gude bya gɛ Eɔnu yɛɛ ɔnwu iya byabɛkwa iya phɔ ɛka l'ishi;
- 20l'i gbua ya; harɔ mee ya meta; tee Eɔnu; yɛɛ ɔnwu iya l'atakpa-nchɪ ɛkutara; waa lɛ mkpɔshi-ɛka ezeke-ɛka ɛkutara; waa lɛ mkpɔshi-ɔkpa ezeke-ɔkpa ɛkutara. L'i woru mee ono phedzuru lɛ mgburɛku ɔru-ngweja ono mgburugburu.
- 21L'i meta mee ono, sɔru l'ɔru-ngweja ono; metakwaphɔ manɔ awɔ l'ishi phɔ phedzuru Eɔnu l'ɛhu; phɛkɔta iya l'uwe iya; phedzukwaru iya phɔ ɔnwu Eɔnu; mɛ l'uwe phɛ. Noo g'ee-shi mee gɛ Eɔnu; yɛɛ ɔnwu iya; waa uwe phɛ; dɔ nsɔ bu ono.
- 22“Ebili ono bɛ ii-heshikɔta ɛba; hetachaa ɛba, dɔ l'upfumɔdzu iya; waa ɛba, nɔkɔta l'iphe-ɛpho iya g'ɔ ha; bɔtakwapho anya iya; waa ɔkpɔrɔ iya ɛphenebo; yɛɛ ɛba, nɔkɔta iya nɔ. L'i wota ɔtapfu ɔkpa ɛkutara iya tɔkwase iya. Ebili ono bukwa ɔphu e gude eme Eɔnu yɛɛ ɔnwu iya g'ɛphe buru ndu-uke.
- 23L'i je lɛ nkata ono, e yeru buredi, e gudedu iphe, ekoje buredi ghee ono, nɔwaa l'iphu Chipfu ono; hata iya ishi buredi lanɔ; hatakwaphɔ ishi akara lanɔ l'akara ono, a gwɔru lɛ manɔ ghee ono; waa ɛcha-mbekee lanɔ.
- 24L'i tuko iphemiphe ono g'ɔ ha dɛ Eɔnu; yɛɛ ɔnwu iya l'ɛka g'ɛphe woru iya maa l'atatiphu Chipfu g'ɔ buru ngweja-amama.
- 25E -mechaa nno; l'i nata phɛ iphemiphe ono; l'i tuko yeɛ ngweja-akpɔ-ɔku phɔ kpɔɔ ɔku l'ɔru-ngweja ono; g'ɔ buru ngweja, a kpɔru ɔku; nɔ Chipfu; mkpɔ iya dɔ iya ree.
- 26E -mechaa; l'i wota ndɔ ebili ono, e gude mee Eɔnu g'ɔ buru onye uke ono; woru maa l'iphu Chipfu g'ɔ buru ngweja-amama. Ono a-buru oke iya nkengu.
- 27“Anɔ ebili ono, e gude mee Eɔnu g'ɔ buru onye uke ono bɛ ii-do nsɔ; mbɔ ɛka ono, rwuberu Eɔnu; yɛɛ ɔnwu iya ono, bu iya bu ndɔ iya phɔ, a mɔru amamɔ phɔ; waa ɔtapfu iya phɔ, e doberu mɔbe Chipfu phɔ.

²⁸Ndu Ízurelu -gude iphe ngweja bya; gę ndú iya; waa utoapfu iya bujekwaru oke, aa-heje Erõnu yęe unwu iya. Ono bu okiphe ophu ndu Ízurelu e-dobejeru mube Chipfu iche m'ephe bya egwe ngweja-ehuu.

²⁹“Uwe, du nsõ kę Erõnu ono bę a-bukwarupho k'awa iya. O buru uwe ono bę ephe e-yeje teke aawu phe manu gude eme phe g'ephe buru ndu-uke.

³⁰Gę nwa Erõnu onye ophu eeme g'o nochia enya iya l'okwa uke; jeje l'ulo-ekwandzukõ; je ejee ozi l'eka-du-nsõ; yejekwa uwe ono ujiku esaa.

³¹“Wota anu ebili ono, e gude mee Erõnu; o buru onye uke ono; je eshia l'eka du nsõ.

³²Gę Erõnu yęe unwu iya nõdu l'onu-abata ulo-ekwandzukõ taa anu ebili ono; waa buredi phõ, e yeru lę nkata phõ.

³³O kwa ephebedua a-ta anu ngweja ono, e gude pfua ugwo iphe-eji phe; teke aawu phe manu l'ishi; e shi nno dobe phe nsõ g'ephe buru ndu-uke. G'o to dukwa onye ozo, a-ta iya nu; noo kele o du nsõ.

³⁴O -buru l'o duru anu ebili ono, e gude mee Erõnu; o buru onye uke ono; ozoo buredi phõ; ophu a taphodoru; o kwaa akwakwa futa l'utsu; g'e jekwa akpõo ya oku. G'o to dukwa onye a-ta iya nu; kele o du nsõ.

³⁵“Su-a; mekwaaru Erõnu yęe unwu iya iphe, mu turu ngu ekemu su g'i meeru phe-a. Gude ujiku esaa mee phe g'ephe buru ndu-uke.

³⁶Gbukwa oke-eswi mbokumboku l'ime ujiku esaa ono g'o buru ngweja-iphe-eji, e gude apfu ugwo iphe-eji. Nokwaphõ g'ii-gwe ngweja-iphe-eji gude pfua ugwo iphe-eji; shi nno safu emeswe, du l'oru-ngweja ono. Teme l'i wukwaa ya phõ manu gude mee ya g'o du nsõ.

³⁷Gude ujiku esaa gwee ngweja, e gude apfu ugwo iphe-eji; shi nno safu nturwu, du l'oru-ngweja ono; k'ophu õo-du nsõ. Oo ya bu g'o du nsõ shii; k'ophu iphemiphe, rwuru iya nu a-du nsõ.

³⁸“Mbokumboku bu iphe, ii-gudeje gwee ngweja ono l'oru-ngweja ono bu nwaturu labõ, nõgbaaru mgbarapha.

³⁹Gbuu nanu l'utsu; l'i gbuu nanu ophuu l'uzenyashi.

⁴⁰Aturu kę mbu phõ bę ii-yekõbeje ukpokutu iphe je egwee; mbu uzo lanu l'ime nkweka ukpokutu iphe, e keru uzo iri; gwõo lę manu, a tsuru l'ikwe; manu, e-ji eze ekpemu eno. L'i wotakwaphõ nkeru-enõ õtu-lupfu otumu mee; ye iya g'o buru ngweja-mee.

⁴¹O -be l'uzenyashi; l'i kpõta aturu ophuu gbuu. L'i yekõbekwa iya phõ ngweja-nri; waa ngweja-mee g'e yeru lę k'utsu phõ; g'o buru ngweja, a kpõru oku nu Chipfu; mkpõ iya du iya ree.

42“G'e gwejekwa ngweja-akpo-oku-a tekenteke l'onu-abata ulo-ekwa-ndzuko, bu iya bu l'ataphu mube Chipfu; e -shi l'ogbo sweru ogbo. Oo l'eka ono be mu a-byapfuta ngu bya epfuru yeru ngu.

43O bukwarupho eka ono be mu a-byapfuta ndu Izurelu; ogbunwiiinwii mu emee eka ono l'o du nsọ.

44“Noo ge mu e-shi mee g'ulo-ekwa-ndzuko ono; yee oru-ngweja ono; du nsọ; mekwapho ge Eronu; yee unwu iya; du nsọ; buru ndu-uke; jejeru mu ozi.

45Teke ono; mu eburu l'echilabo ndu Izurelu buru Chileke phe.

46Oo ya bu g'ephe amaru l'oo mbedua bu Chipfu, bu Chileke phe; onye dufutaru phe l'ali Ijiputu ge mu eburu l'echilabo phe. Oo mbedua bu Chipfu, bu Chileke phe.”

Awufu 30

Oru-ngweja unwu-isensu

(Awu 37:25-28)

1“Gude oshi akesha kua oru-ngweja, bu eka aa-kpoje unwu-isensu oku.

2G'ogologo iya waa osa iya tukokwa haru enya nhamunha. Iphe, oo-duchaa bu nkwo-eka lanu. Eli iya adu nkwo-eka labo. Ge mpu iya; yee oru-ngweja ono rwagbakwaa buru nanu.

3Wukotakwa eli iya; yee mgbureku iya; waa mpu iya okpobe mkpola-ododo. Li gudekwapho mkpola-ododo kpu-pee mgbureku iya mgburugburu.

4Li meta echi mkpola-ododo ebo ebo yegbaa le mgbureku iya ibekeboebo. Yekwa iya g'o noduchaa le mkpula iphe ono, a kpu-pheru iya mgburugburu ono. O buru l'echi ono be ee-yeje mgboro, ee-gudeje apa iya.

5Gude oshi akesha pyita mgboro ono; wua ya mkpola-ododo.

6Li dobe oru-ngweja ono l'iphu ekwa pho, e gude kochite okpoko-ekemu; mbu opfu okpoko pho, aa-noduje apfu ugwo iphe-eji pho, e gude kpuchia okpoko-ekemu. Oo eka ono bu eka mu a-byapfutaje ngu.

7“Ge Eronu kpojekwa unwu-isensu, eshi mkpo oku l'oru-ngweja ono l'utsu me o -jeshia emezi oroku pho.

8G'o kpojekwapho unwu-isensu oku l'oru-ngweja ono l'uzenyashi me o -jeshia eye oku l'oroku ono; k'ophu oku unwu-isensu a-noduje enwu l'ataphu Chipfu; e -shi l'ogbo sweru ogbo.

9G'o to dukwa unwu-isensu ozo, gbaru iche, ee-gudeje bya akpoo oku l'oru-ngweja ono. Ophu e gudejekwa ngweja-akpo-oku; ozo ngweja-nri; ozo ngweja-mee bya l'oru-ngweja ono.

10Ugbo lanu l'apha be Eronu e-teje mee le mpu oru-ngweja ono gude pfua ugwo iphe-eji. O buru mee anu ngweja-iphe-eji, e gude apfu ugwo iphe-eji; be ee-teje le mpu ono

aphagapha. G'e mejekwa iya nno; e -shi l'ogbo sweru ogbo. Eka ono bukwa eka kachaa aduru mube Chipfu nsọ.”

Ụtu ụlo-ekwa-ndzukọ

¹¹Noo ya; Chipfu sụ Mosisu:

¹²“Teke ii-gu ndu Ízurelu ogu g'i maru g'ephe ha; g'onyenonu pfujekwa mube Chipfu aswa ishi onwiya gude gbata onwiya; me a gue ya pho. Oo ya bu g'o to du ejo iphe-ehuka, a-byapfuta phe nu teke aa-gu phe ogu obu.

¹³G'onye a guru pfujekwa okpoga mkpola-ochaa, erwa iya rwuru nkeru-ebo shekelu; teme l'o jepfu ndu ophu a guwaru. G'erwa shekelu ono, onye ono a-nu ono bukwaru iphe, eegudeje atụ erwa iphe l'eze-ulo mube Chileke be ee-gude tua ya. Erwa shekelu lanu bu ukporo gera. O buru nkeru-ebo erwa shekelu ono be a-buru iphe, ee-doberu mube Chipfu iche.

¹⁴Iphe, bu onye a guru ogu; a -gbẹ l'onye noru ukporo apha kwaseru be a-nu mube Chipfu iphe.

¹⁵Ge ndu nweru iphe ta nughatakwa nkeru-ebo erwa shekelu ono; ophu ndu ukpa anu-petekwanu iya; me unu -nodu anu mube Chipfu iphe unu gude pfua ugwo iphe-eji, unu meru.

¹⁶Nata okpoga ndu Ízurelu ono, e gude apfu ugwo iphe-eji phe ono; gude jee ozi l'ulo-ekwa-ndzukọ ono. Ono bu iphe, mube Chipfu e-gude anyata ndu Ízurelu; bya aburu iphe, ee-gude pfua ugwo iphe-eji, ephe meru.”

Eze gbamugbamu ono

(Awu 38:8)

¹⁷Noo ya; Chipfu sụ Mosisu:

¹⁸“Gude onyirubvu mee eze gbamugbamu, ee-gudeje wua ehu. Gudekwa iya pho mee okpa iya. Li sibe iya le mgbaka ulo-ekwa-ndzukọ ono; yee oru-ngweja ono; kuru mini ye iya.

¹⁹Ge Eronu; yee unwu iya kwoje eka yee okpa le mini ono.

²⁰Ephe -nodu abahu l'ulo-ekwa-ndzukọ ono; ozoo l'ephe ejekube oru-ngweja ono eje anu mube Chipfu ngweja, aakpo oku; g'ephe kwoshijekwa onwophe mini; k'ophu ephe ta anwushihudu.

²¹Mbu-a; g'ephe kwojekwaa eka yee okpa; k'ophu ephe ta anwushihudu. Ono bu ekemu, a-duru Eronu; yee awa iya; e -shi l'ogbo sweru ogbo.”

Manu awu l'ishi

(Awu 37:29)

²²Noo ya; Chipfu sụ Mosisu:

²³“Wota okpobe iphe, eshi mkpo gude bya. Iphe, ii-wota bu: Meru mini ophu erwa iya du unu shekelu l'ukporo shekelu ise; waa sinamonu, eshi mkpo ophu erwa iya du

ụkporo shẹkelu iri l'ẹbo ẹ shẹkelu iri, bu iya bu nkeru-ẹbo meru pho; waa oshi omanko, eshi mkpo ophu ẹrwa iya du ụkporo shẹkelu iri l'ẹbo ẹ shẹkelu iri;

²⁴waa kashiya ophu ẹrwa iya du unu shẹkelu l'ụkporo shẹkelu iri. G'ọ ha bukwaru iphe, eegudeje atụ ẹrwa iphe l'eze-ulo mube Chileke be ee-gude tua ya. Li wotakwapho manụ olivu, jiru eze ekpemu ẹno.

²⁵G'onye maru eme manụ-mbeleke tuko iphemiphe ono gwakobe g'ọ buru manụ, du nsọ bya eshi mkpo, aawuje l'ishi. Oo-buru manụ, du nsọ, aa-wuje l'ishi.

²⁶L'i gude manụ ono wu-dzuru ulo-ekwa-ndzuko; waa okpoko-ekemu;

²⁷waa teburu; yee iphemiphe, nokota iya nu; waa iphe, aapfubeje oroku; yee ngwa iya g'ọ ha; waa oru-ngweja unwu-isensu;

²⁸waa oru-ngweja, bu ẹka ee-gweje ngweja-akpo-oku; yee ngwa iya g'ọ ha; waa eze gbamugbamu; yee okpa iya.

²⁹Tuko iphemiphe ono doo nsọ; g'ọ buru iphe, kakota nsọ; g'ọ buru iphe, rwutakporu iya nu; l'ọ dukwapho nsọ.

³⁰“Wua Eronu; yee unwu iya manụ l'ishi; doo phe nsọ; k'ophu ẹphe a-aburu ndu-uke jeahaaru mube Chipfu ozi.

³¹Pfuaru ndu Izurelu l'owa-a bu manụ mu, du nsọ, aa-wuje l'ishi; e -shi l'ogbo sweru ogbo.

³²G'a ta wujekwa iya nemadzu mmanu; teme ophu agwajekwa manụ ozo g'ọ du g'owa-a. O kwa manụ, du nsọ. Oo ya bu g'e dobeje iya nsọ.

³³O -duru onye gwaru manụ ozo; o du ge manụ owa-a; ozoo l'ọ wuru iya nemadzu mmanu l'ishi, abudu onye uke; g'e bufukwa iya ẹ ndu nkiya.”

Unwu-isensu

³⁴Noo ya; Chipfu su Mosisu: “Wota iphe, eshi mkpo gude bya. Iphe ii-wota bu: etse; yee onika; waa galubanumu; yee okpobe furankisensu. Tua ya l'iphe, eegudeje atụ ẹrwa iphe g'ọ tuko haru ẹnya nhamunha.

³⁵G'onye maru eme manụ-mbeleke tuko iphemiphe ono gwakobe g'ọ buru unwu-isensu, eshi mkpo. G'a pyashi iya unu. G'ọ bukwaru iphe ono, a gushiru ono kpoloko be ee-gude mee unwu-isensu obu. Oo-buru unwu-isensu, du nsọ.

³⁶Haru iya gwee egwegwe dobe l'atatiphu okpoko-ekemu, no l'ulo-ekwa-ndzuko, bu iya bu ẹka ono, mu a-byapfuta unu ono. G'ọ bukwaru unu unwu-isensu, kakota adu nsọ.

³⁷Unu te emekwa unwu-isensu k'unu g'ọ du g'owa-a. Unu doberu iya mube Chipfu nsọ.

³⁸O -duru onye meru unwu-isensu ozo, du g'owa-a; doberu onwiya ge manụ-mbeleke; g'e bufukwa iya ẹ ndu nkiya.”

Awufu 31

Bezalelu; waa Oholiyabu

- ¹Noo ya; Chipfu sù Mósísu:
- ²“Lenu; mu hòtawaru Bezalelu nwa Uri, bù nwanwa Huru; onye òkpa-ipfu Jiuda;
- ³bya emewaa; unme mube Chileke ji iya ehu; g'o nweru mmamiphe; yee nkwaemanya; g'iphe edoje iya enya ree; k'ophu o-makotaru g'eemema iphemiphe emema;
- ⁴g'o maru g'eemeje iphe-erengete le mkpola-ododo; yee mkpola-ochaa; waa onyirubvu;
- ⁵makwarupho g'aawa mkpuma, aswa du; waa g'aawuje mkpola-ododo l'igburonu iya; bya amakwarupho g'aapyije iphe apyipyi; mewaro g'eeshije eme ona ozo, dugbaa iche iche.
- ⁶Temu mu hotafuakwaru Oholiyabu nwa Ahisamaku; onye okpa-ipfu Danu; g'o yeru iya eka; bya anukotakwapho ndu maru eme ona g'ephe ha ike g'ephe mekota iphemiphe, mu suru g'unu mee.
- ⁷Iphe, ephe e-me bu: ulo-ekwa-ndzuko; waa okpoko-ekemu; yee opfu okpoko ono, aanoduje apfu ugwo iphe-eji ono; mewaro iphemiphe ozo, eegudeje eje ozi l'ime ulo-ekwa ono;
- ⁸dunaa ge teburu; yee iphemiphe, nokota iya nu; waa iphe, aapfubeje oroku, e meru l'okpobe mkpola-ododo; yee ngwa iya g'o ha; waa oru-ngweja unwu-isensu;
- ⁹waa oru-ngweja-akpo-oku; yee ngwa iya g'o ha; waa eze gbamugbamu; yee okpa iya;
- ¹⁰wafua uwe, e kweru ekwekwe; mbu uwe, du nsu, Eronu, bu onye uke e-yeje; waa uwe, unwu iya e-yeje gude eje ozi ndu-uke;
- ¹¹waa manu awu l'ishi; waa unwu-isensu, eshi mkpo k'eka-du-nsu. O buepho g'ephe mee ya g'o du ge mu suru ngu g'e mee ya.”

Eswe-atuta-unme

- ¹²Noo ya; Chipfu sù Mósísu:
- ¹³“Waa iphe ii-pfuru ndu Izurelu baa: Unu ba adukwa iphe unu e-jeje l'eswe-atuta-unme ke mube Chipfu. Owaa a-buru iphe-ohubama, a-nodu l'echilabo mu l'unu; e-shi l'ogbo sweru ogbo. Oo ya bu g'unu amaru l'oo mbedua bu Chipfu, bu onye eme unu g'unu du nsu.
- ¹⁴“Unu nyataje eswe-atuta-unme; noo kele mboku ono duru unu nsu. O -duru onye dakaru iya nu; g'e gbukwaa onye obu egbugbu. Iphe, bu onye jeru ozi mboku ono be ee-bufu ebufu le ndu nkiya.
- ¹⁵Oo ujiku ishii be unu e-gudeje jee ozi unu. Mboku k'esaa bu eswe Sabatu, bu iya bu eswe-atuta-unme; bya aburu mboku, duru mube Chipfu nsu. O -duru onye jeru ozi l'eswe-atuta-unme; g'e gbukwaa onye obu egbugbu.

¹⁶Gẹ ndu Ízurèlu dobeje eswe-atùta-unme; mee ekemu iya; e -shi l'ogbo sweru ogbo; g'ò buru iphe, a-nòdu egoshi ogbandzu mu l'unu jasù l'ojejoje.

¹⁷Oo-buru iphe-òhubama, a-nòdu lẹ mgbaka mu lẹ ndu Ízurèlu jasù lẹ tuutuutuu lẹ m̀m̀m̀m̀m̀m̀; noo kẹle ọọ ujiku ishi bẹ m̀bẹ Chipfu gude mee igwe; yẹe alì. O -rwua lẹ mbòku k'ẹsaa; mu haa ozi; tuta unme.”

¹⁸Noo ya; Chipfu pfughechaephò opfu nù Mòsisu l'eli úbvú Sayinayi; bya anù iya bachìbachi mkpuma labò, e deru Ekemu. Mkpuma ono bụ Chileke gude mkpùshi-ẹka iya dee ya iphe nwẹkiya.

Awùfu 32

Nweswi, a kpuru lẹ mkpòla-ododo

¹Ndu Ízurèlu nọnyaa bya asù lẹ Mòsisu anonukawa ọdu l'eli úbvú ono; ẹphe bya edzukòbẹ gbaphee Eronu mgburugburu bya asù iya: “Ngwa; metaru anyi Chileke, a-nòdu edu anyi! Ọ -buru Mòsisu-a, dufutaru anyi l'alì ndu Ijiputu-a bẹ anyi ta amakwa iphe, meru iya nù.”

²Eronu sù phẹ: “Unu yeshia iphe-nchì mkpòla-ododo, unyomu unu; waa unwu unu unwoke; mẹ k'unwanyi unu yeru lẹ nchì; chítaru mu!”

³Noo ya; ndu ono g'ẹphe ha bya eyeshia iphe-nchì phẹ bya achijeru Eronu.

⁴Ọ bya achita iphe ono, ẹphe nuru iya ono gude meta agwa; bya akpua ya; ọ dọ gẹ nweswi; bya egude ngwa ọru mee ya ọna. Noo ya; ẹphe sù: “Unubẹ ndu Ízurèlu; waa Chileke unu baa; mbù onye dufutaru unu l'alì Ijiputu!”

⁵Noo ya; Eronu hùmaephò iphe ono bya akpua ọru-ngweja l'atatiphu nweswi ono bya araa sù: “Echele bẹ a-bò Chipfu!”

⁶Oo ya bụ; o rwua nchitabòhu iya; ndu Ízurèlu tehu l'onma-ẹwa-ùtsu; bya egwee ngweja-akpò-ọku; bya egweeru iya ngweja-ẹhu-guu. E -mechaa; ẹphe bya anoshia ria nri; bya angua mẹ; bya awù-lihu meahaa ẹmereme.

⁷Noo ya; Chipfu sù Mòsisu: “Nyize l'alì; noo kẹle ndu nkengu ono; mbù ndu i dufutaru l'alì ndu Ijiputu ono bẹ merwushiwaru onwophe.

⁸Ẹphe meru ẹgwegwa gbado ekemu ono, mu turu phẹ ono; bya emetawaru onwophe agwa, ẹphe kpuru; ọ dọ gẹ nweswi. Ẹphe phozewaru ishi baaru iya ẹja; bya agwawaa ya agwagwa sù: ‘Unubẹ ndu Ízurèlu; waa Chileke unu, bụ onye dufutaru unu l'alì Ijiputu baa!’ “

⁹Chipfu sù Mòsisu: “Mu hùmawaru lẹ ndu-a b̀ǹǹkaru ndu ẹjo-ọkpoma.

¹⁰Nta-a bukwa g'ì haa mu gẹ mu gude oke ẹhu-eghu mu dapfu phẹ bya emebyishia phẹ. Mu eworu gùbẹ Mòsisu mee ọha, parù ẹka.”

¹¹Mòsisu rwọahaa Chipfu, bụ Chileke iya sù: “Jiko Chipfu; g'ẹhu te eghunukashi nù ngu eghu nno l'opfu ẹhu ndu nkengu ono, i gude ọkpẹhu ngu dufuta l'alì Ijiputu ono nọ!

12Ge ndu Ijiputu ta asu l'iphe, kparu iphe, i gude dufuta ndu nkengu bu g'i bya egbushia phe l'ubvu ubvu-a g'ephe chihu le mgboko. Jiko gbanaa mini l'obu; paru haa; te emebyishishi nu ndu nkengu.

13Nyatanu ndu-ozu ngu, bu Ebirhamu; waa Ayizaku; waa Izurelu, bu ndu i gude epha ngu riaru nte su l'ii-me awa phe g'ephe ha ge kpokpode, no l'igwe; teme li nu awa phe ali-a, i kwekotaru phe ukwe iya-a; lo buwa okiphe phe jasu le tuutuutu le mijimiimii.”

14Noo ya; egomunggo lwa Chipfu azu; o woru ejo iphe-ehuka ono, o shi epfu l'oo-gude byapfuta phe ono paru haa.

15Mosisu bya aghachi nyizetashia l'eli ubvu ono; yee mkpuma labo ono, du bachibachi, e deru ekemu ono, o gude l'eka ono. Mkpuma ono be e deru iphe l'iphu; dee ya l'azu.

16Mkpuma ono bu Chileke gude eka iya mee ya. Iphe ono, e deru iya ono, buru Chileke gude eka iya dee ya l'eli mkpuma ono.

17Noo ya; Jioshuwa numaepho uzu, ndu Izurelu atu; o su Mosisu: “Aatukwa uzu ogo l'eka anyi koberu ulo-ekwa anyi.”

18Mosisu su iya: “O too dakwa g'uzu ndu lwu-kperu l'ogu; ophu o too dakwanu g'uzu ndu a lwu-kperu. Iphe, mu anu bukwa uzu ebvu.”

19Mosisu bya erwua le mgboru eka a koberu ulo-ekwa ono; bya ahuma nweswi ono; waa ndu ete ebvu ono. Ehu kwatakpo ghushia ya eghu ike; o woru mkpuma ono, o gude l'eka ono tukposhia l'okpa ubvu ono.

20O bya ewota nweswi ono, ephe kpuru ono tsua oku bya egwee ya; o du ge ntu; bya awuru iya ye le mini; mee ndu Izurelu; ephe ngua ya.

21O su Eronu: “? Bu gunu be ndu-a kabekpo mee ngu; meru g'o gude i duru phe ye l'eme iphe-eji, habe egube-a?”

22Eronu su iya: “Jiko g'ehu te eghukwa ngu eghu; nnajiuphu mu. I mahawaru ge ndu-a bu-be ndu gharu iphu l'eme ejo-iphe.

23Ephe suru ge mu metaru phe Chileke, a-nodu edu phe nu! Kele Mosisu, bu onye dufutaru phe l'ali Ijiputu be ephe ta amakwa iphe, meru iya nu.

24Oo ya bu; mu su phe: ‘G'onye nwekpoo iphe, e meru le mkpola-ododo; yefuta iya.’ Noo ya; ephe chitaru mu mkpola-ododo ono; mu chiru iya ye l'oku; iphe, shi iya nu futa buru nweswi-a.”

25Mosisu bya ahuma le ndu Izurelu zuwaru onwophe l'eka nafu; le Eronu mewaru phe; ophu ephe ekweedu g'a chikobe phe; ephe nodu emewaa phukuphuku l'iphu ndu ohogu phe;

26O bya apfuru l'onu-abata eka a koberu ulo-ekwa ono bya asu: “Onye bu ke Chipfu byapfuta mu!” Ndu Livayi g'ephe ha wu-pfuta iya.

²⁷Noo ya; ọ sù phẹ: “Waa iphe, Chipfu, bụ Chileke kẹ ndu Ízurelu pfuru baa: ‘G’onyenonu kebe onwiya ogu-echi iya l’upfu; jee l’okotazu; waa l’ataphu; mękpoo l’ekameka l’eka a kpoberu ọlo-ekwa ono. G’onyenonu gbushia nwanna iya; waa ọnyà iya; mę obutobu iya.’ “

²⁸Oshilokpa Lívayi bya emee gẹ Mosisu ziru phẹ. Ndu nwushihuru nù mboku ono bę rwuru iphe, dọ g’unu ọmadzu esaa l’ukporo iri.

²⁹Noo ya; Mosisu sù: “A hotawaru unu doberu Chipfu iche ntan-a; noo kele unu tsoru unwu unu; mę unwune unu ọgu. Teme ọ gowaru onu-oma nù unu ntan-a.”

³⁰O -rwua nchitabohu iya; Mosisu sù ndu Ízurelu: “Unu mekwaru eze iphe-ẹji, paru ẹka. Nta-a bę mu ejepfuwa Chipfu. ? A maru; mu a-dụ ike rwo-buta iya g’o gvaru unu nvu l’iphe-ẹji ono, unu meru ono?”

³¹Ọo ya bụ; Mosisu bya ejepfu Chipfu bya asu: “Oowaa! Iphe-ẹji, ndu-a meru kwatakwa paa ẹka! Ẹphe gudewaa mkpola-ododo metaru onwophe agwa.

³²Ole jiko gvaru phẹ rọ nvu l’iphe-ẹji ono; teke ọ dudu hufukwa ẹpha mu l’ekwo, i deru ẹpha ndu nkengu.”

³³Chipfu sù Mosisu: “Ọo onye mesweru mu nù bę mu e-hufu ẹpha iya l’ekwo mu.

³⁴Ngwa; tugbua nta-a je edurwua ndu Ízurelu ẹka mu pfuru opfu iya ono; le Ojozi mu a-nodu edu unu. Ole o -rwuepho teke mu a-nu phẹ aphu; mu anua phẹ iya k’iphe-ẹji phẹ.”

³⁵Chipfu bya egude ejo iphe-ememe byapfuta ndu Ízurelu; k’iphe ono, ẹphe gude nweswi ono, Eronu kpuru ono mee.

Awufu 33

¹Ọo ya bụ; Chipfu sù Mosisu: “Unu tugbua l’eka-a; unu le ndu ono, i dufutaru l’ali ndu Ijiputu ono! Tugbua jeshia l’ali ono, mu kweru ukwe bya eriru nte yeru Ébirihamu; waa Áyizaku; waa Jiékopu sù: ‘Mu a-nu iya awa unu.’

²Mu e-zi ojozi g’o duru unu je; je achishiaru unu ndu Kėnanu; waa ndu Amoru; waa ndu Hetu; waa ndu Pėrezu; waa ndu Hevu; waa ndu Jiebusu.

³Unu tugbua jeshia l’ali ono, bụ ali, mini ẹra-eswi; waa manu-enwu aso gborogboro. Ole mu te etsoduru unu; noo kele unu bunukaru ndu ejo-okpoma; kele ọ -buru gẹ mu tsoru unu bę o nwekwaru g’oo-du; mu emebyishia unu l’uzo.”

⁴Ndu Ízurelu numaepho njọ-nzi ono; ẹphe waa ẹkwa; ophu ọ dudu onye kwaru onwiya akwa.

⁵Noo kele Chipfu sù Mosisu: “Pfuaru ndu Ízurelu l’ẹphe bunukaru ndu ejo-okpoma. Mbụ l’o -buru gẹ mu tsoru unu hata mę ntụ-okpa lanu bę o nwekwaru g’oo-du; mu emebyishia unu. Ngwa; unu kwashia onwunu akwa, unu kwaru gẹ mu chia idzù iphe, mu e-me unu.”

⁶Noo ya; ndu Ízurelu woru akwa phẹ kwashia l'úbvú Horebu.

Mkpù-ékwa Ndzuko

⁷Mósisu shi aphutaje ụlo-ekwa je akpobe ụzenya l'azu eka ndu Ízurelu kpobechaaru ụlo-ekwa nkephe; kua ya “ụlo-ekwa-ndzuko.” Iphe, bu onye eje akpata ishi l'iphu Chipfu nodu ejeje l'ulo-ekwa-ndzuko ono, no l'azu eka ndu Ízurelu no ono.

⁸O nodu abujeru; Mósisu -gbalihu jeshia l'ulo-ekwa-ndzuko ono; ndu Ízurelu g'ephe ha awulihu je apfugbaaru l'onu-abata ụlo-ekwa nkephe elekpoeopho Mósisu enya; gbiriri jasụ l'obahu l'ulo-ekwa-ndzuko ono.

⁹O nodu abujeru; Mósisu -bahuchaepho l'ulo-ekwa ono; urwukpu ono, kpuru oronmono ono alwazeta bya anọ-chia onu-abata teke Chipfu epfu anụ Mósisu.

¹⁰Ndu Ízurelu humaepho urwukpu ono, kpuru oronmono ono g'ọ no l'onu-abata ụlo-ekwa ono; ephe atuko gbeshi baaru Chipfu eja. Onyenonu nodu anoduje l'onu-abata ụlo-ekwa nkiya baaru Chipfu eja ono.

¹¹Chipfu nodu epfuje eyeru Mósisu l'iphu l'iphu ge nemadzu yee onya iya anoduje abo uja-a. Teke e mechaaru; Mósisu alwaphuta azu l'eka ndu Ízurelu no; ophu nwokorobyia ono, bu onye n-yemeka iya ono, bu Jioshuwa nwa Nunu alufujedu alufu l'ulo-ekwa ono.

Mósisu yee ogbunwijnwii Chipfu

¹²Mósisu sụ Chipfu: “I shiepho teke-a pfutaru mu ge mu dua ndu-a; ole i tiki mekpoda ge mu maru onye ii-yeru mu ge mu l'iya swiru. I suru l'i maru epha mu; teme mu du ngu l'obu.

¹³O -buru pho le mu du ngu l'obu k'eviya; goshinu mu uzo ngu; k'ophu mu a-maru ngu; teme mu adu ngu l'obu kwaseru. Nyatakwa l'oha-a bu ndu nkengu.”

¹⁴Chipfu sụ iya: “Mu e-tsoru-a unu l'onwomu; teme mu emee ge meji nmapfuru ngu.”

¹⁵No iya; Mósisu sụ iya: “O -buru l'i tii tsoduru anyi l'onwongu; te emekwa g'anyi hata okpa ahata tugbua l'eka-a!

¹⁶? Denu g'ee-shi maru le mbedua; waa ndu nkengu du ngu l'obu; abudu l'i tso anyi? ? Bu gunu ozo e-goshi le mbedua waa ndu nkengu du iche l'eka ndu mgboko l'ophu no?”

¹⁷Oo ya bu; Chipfu sụ Mósisu: “Mu e-meepho iphe ono, i suru ge mu meeru ngu ono. Noo kele i du mu l'obu; teme mu maru epha ngu.”

¹⁸Mósisu sụ iya: “Jiko goshinu mu ogbunwijnwii ngu.”

¹⁹Tobudu iya bu; Chipfu sụ iya: “Mu e-me g'i huma ge mu du-be ree; teme mu anodu l'ataphu ngu kua onwomu iphe, mu aza. Onye o du mu ge mu meeru eze-iphe-oma; mu emeeru iya ya; onye o du mu ge mu phuaru obu-imemini; mu aphuaru iya ya.

²⁰Ole i tii humadu iphu mu; noo kele o to nwedu onye gude enya iya huma mu, a-nodu ndzu.”

²¹Chipfu sụ: “O nweru ẹka nọ-kube mu nụ, ịi-pfuru lẹ mkpuma.

²²Teke ogbunwịinwii mu ghatajẹerupho; mu eworu ngu dobe lẹ mgbaka agbara-mkpuma; bya egude ẹka mu gbobuta ngu; gbiriri jasụ mu aghata-gbua.

²³Mu agbẹ teke ono wofu ẹka; l'ị hụma mu okpurukpu. O -buru iphu mu bẹ a taa hụmajekwa ahụma.”

Awụfu 34

Bachibachi mkpuma k'ẹbo

¹Chipfu sụ Mosisu: “Je awata bachibachi mkpuma labo ozo, a-du gẹ kẹ mbu pho. Ge mu dekwaa ya iphe, shi nodu lẹ kẹ mbu pho, ị tukporu pho.

²Kwakobe l'utsu echele; nyikota ubvu Sayinayi; bya egoshi mu onwongu l'eli ubvu ono.

³G'o to nwekwa onye e-tsoru ngu nụ; ozo onye aa-huma l'ubvu ono l'ophu l'ophu; g'o to nwekwa aturu; ozoo eswi, a-nodu ata nri l'ataphu ubvu ono.”

⁴Noo ya; Mosisu mee gẹ Chipfu ziru iya; bya awata bachibachi mkpuma labo ozo, dukwa pho gẹ kẹ mbu pho; bya egude nyihu ubvu Sayinayi l'onmewa utsu. O paru bachibachi mkpuma labo ono l'eka.

⁵Noo ya; Chipfu bya anodu l'urwukpu nyizeta; bya araa ya arara l'epha iya bu Chipfu.

⁶O bya aghata l'ataphu Mosisu etushi onwiya epha sụ: “Oo mu bu Chipfu; oo mu bu Chipfu; bya aburu Chileke k'obu-imemini; bya abukwarupho Chileke k'eze-iphe-oma. Onye ehu ete eghujedu eghu egwegwa; onye n-yemobu iya; waa apfushi ike iya paru eka.

⁷Unubuku unwu-eliphe bẹ mu anoduje egoshi lẹ mu yeru obu. Mu agujeru phe nvu l'ejo-iphe, ephe meru; me l'atupya, ephe tupyaru mu; waa l'iphe-aji, ephe meru mu. Ole mu ta ahajekwanu onye-ikpe nmaru gẹ mu ta ahụ iya ahuhù. Ndu ejo-iphe bẹ mu ahuje ahuhù k'ejo-iphe, ephe meru mu; hu-rwua ya l'eka unwu nwanwa phe no; waa l'eka nwanwanwaranwa phe no; hu-rwua phe l'ogbo k'eno.”

⁸Mosisu bya ephoze iphu l'alị teke ono teke ono bya abaru Chipfu eja.

⁹O sụ: “Gube Chipfu; o -buru lẹ mu du ngu l'obu eviya; jiko gẹ gube Chipfu tsonuru anyi. A makwaru-a lẹ ndu-a bunukaru ndu ejo-okpoma; ole jiko gunaru anyi nvu l'ejo-iphe; waa iphe-aji anyi; wotarọ anyi g'anyi buru okiphe ngu.”

¹⁰Tobudu iya bu; Chipfu sụ: “Anyi lẹ ngu a-gba ndzu. L'ataphu ndu nkengu l'ophu bẹ mu e-me oke iphe, du biribiri, mu teke emeswe l'ohamoha, no lẹ mgboko l'ophu. Ndu ono, unu bu l'echilabo phe ono a-humakota g'iphe, mube Chipfu e-mekota du-be ebvu.

¹¹Unu ngabẹ nchi mee ekemu-a, mu aturu unu ntanu-a. Mu a-chifuru unu ndu Amoru; waa ndu Kėnanu; waa ndu Hetu; waa ndu Pėrezu; waa ndu Hevu; teme waa ndu Jiebusu.

- 12Ole g'unu kwabẹ ẹnya g'unu lẹ ndu bu l'alị ono, unu ala ono ta agba ndzu; ọdumeka bẹ ẹphe e-mechakwaa bụru ọnyà nmata unu.
- 13Unu gbukpọshia ọru-ngweja pẹ; tẹme unu etsukpọshia mkpuma, ẹphe doberu nsọ. Tẹme unu aphokashikwapho itso, e doberu agwa pẹ, bụ Ashera.
- 14Unu ta adukwa iphe ọzo, unu a-bajeru eja gbahaa mube Chipfu kpurumu. Noo kele mube Chipfu, ẹpha iya bụ Okophoo bẹ bukwa Chileke, ekoje okophoo.
- 15“Unu kwabekwa ẹnya g'ọ tọ dushi ndu bu l'alị ono, unu l'ẹphe a-gba ndzu. Noo kele ẹphe -nọdu agwa agwa pẹ ono; bẹ ẹphe e-zi unu lẹ nri; unu eje eria iphe, ẹphe gude gwaa iphe ono.
- 16O -buru l'unu haru unwada pẹ lutaru unwu unu g'ẹphe buru unyomu pẹ; ndu ono nọdu agwa agwa pẹ ono bẹ ẹphe e-dukwarupho unwu unu; ẹphe eje emee nno.
- 17“Unu ta akpukwa ntẹkpe!
- 18“Unu boje ọbo-iphe buredi, ekoduru ekoko. Ujiku ẹsaa bẹ unu a-tajẹ buredi, e yeduru iphe, ekoje buredi ẹgube ono, mu suru g'unu meje iya. Unu boje ọbo-iphe ono teke ono, e doberu iya ono l'ọnwa Abibu; noo kele ọo l'ọnwa ono bẹ unu shi l'alị ndu Ijiputu wufuta.
- 19“Iphe-mbu, vuru ọzo waa ẹkpa ne iya bụ ke mube Chipfu. Iphe, bụ nwa mbu iphe-dobe unu nwuru, bụ oke ya yichakwaa ya; m'ọ bụ eswi; ọzoo aturu; ọzoo egu.
- 20Unu gudeje nwaturu gbata nkafu-igara, bụ ke mbu l'ẹpho ne iya. Obenu l'ọ -buru l'unu ta agbataduru iya agbata; unu aswikwoo ya olu. “G'ọ to nwekwaru onye a-gbajeru ẹka bya l'atatiphu mu.
- 21“Ujiku ishii bẹ unu e-jeje ozi unu; o -rwua mboku k'ẹsaa; unu edzua ike. Unu te ejejekwa ozi lẹ mboku k'ẹsaa; m'obeta ọ buru aako okoro; ọzoo teke aakpata iphe, e meberu l'egu.
- 22“Witi-mbu, unu vuru ọzo kpata bẹ unu e-gudeje bo Ọbo-Idzu. Unu abo ọbo-iphe, a kpataru l'opfu lẹ mbvucha apha.
- 23“Ugbo ẹto l'apha bẹ unwoke unu g'ẹphe ha a-kpakoje bya l'atatiphu Nnajiuphu, bụ Chipfu.
- 24Mu a-chishiru unu ohamoha; bya emee g'alị unu kabaa shii. Ophu ọ dudu onye bya eme g'ọ nata unu alị unu ono; mẹ unu jeje l'iphu Chipfu, bụ Chileke unu; mbu ophu unu ejeje ugbo ẹto l'apha.
- 25“Unu ta adukwa iphe e yekoberu iphe ekoje buredi, unu e-yekobe lẹ mee anu, unu gude egweru mu ngweja. “Tẹme ophu ọ dukwa anu ngweja ono, e gude abo ọbo Ojehata, aa-ha g'ọ bo nchi.
- 26“Iphe-mbu, vuru ọzo kaa l'opfu unu bẹ unu e-gudeje bya l'ulo Chipfu, bụ Chileke unu. “Unu te egudejekwa mini-ẹra ne egu shia nwa iya.”

²⁷Noo ya; Chipfu sù Mósìsù: “Dekòta opfu ono g'ò ha l'èkwo. Noo kẹle ọọ opfu ono bẹ mu lẹ gùbedua; mẹ ndu Ízurelu gude gbaa ndzù.”

²⁸Mósìsù bẹ yẹ Chipfu nọru l'ẹka ono ụkporo abalị labọ; eswe l'enyashi; ọphu o riduru nri; ẹbe ọ ngutaduru mẹ mini. Ọ bya edee opfu ọgbandzu ono, bụ iya bụ ekemu iri ono, shi l'ẹka Chileke ono l'eli bachibachi mkpuma ono.

Iphu Mósìsù egbu nwịnwii

²⁹Mósìsù shiẹpho l'úbvú Sayinayi nyizeta; yẹ bachibachi mkpuma labọ ono, e deru ekemu Chipfu ono, o gude l'ẹka; ọphu ọ madụ l'iphu egbu iya nwịnwii; noo kẹle ẹphe lẹ Chipfu bogbaberu ụja.

³⁰Erọnu; yẹ ndu Ízurelu g'ẹphe ha hụma Mósìsù g'iphu egbu iya nwịnwii; ndzụ ejekube iya ntse gụahaa pẹ.

³¹Mósìsù bya ekua pẹ; ọọ ya bụ; Erọnu; yẹ ndu-ishi ọha ono g'ẹphe ha gbẹ teke ono bya ejekube iya ntse; ọ bya epfuru yeru pẹ.

³²E mechaa; ndu Ízurelu g'ẹphe ha byakube iya ntse; ọ bya atushikotaru pẹ ekemu, Chipfu nuru iya l'úbvú Sayinayi.

³³Mósìsù pfughechaaru pẹ opfu bya aphụ-chia ẹkwa l'atatiphu.

³⁴Ọ nọdu abujeru; teke Mósìsù bahuru l'ulo-ẹkwa l'atatiphu Chipfu gẹ yẹle iya bogba; l'ọ phufu ẹkwa ono l'atatiphu iya gbiriri jasụ l'ọ futa. Ọ -futaepho l'ọoby a epfukotaru ndu Ízurelu iphe, e ziru iya;

³⁵ẹphe ahuma l'iphu egbu iya kẹ nwịnwii. Ọọ ya bụ; Mósìsù abya ewota ẹkwa phụ-chia iphu ọzo gbiriri jasụ o jeshia gẹ yẹle Chipfu bogbabe.

Awụfu 35

Eswe-atụta-unme

¹Mósìsù bya ekukọbe ndu Ízurelu g'ẹphe ha; sù pẹ: “Wakwa iphe, Chipfu sùru g'unu mee bụ ọwa-a:

²Ọ sùru l'ọọ ujiku ishii bẹ unu e-jeje ozi unu; o -be lẹ mbọku k'ẹsaa; unu edobe iya nsọ; g'ọ bụru eswe-atụta-unme kẹ Chipfu. Ọ duru onye jeru ozi mbọku ono; g'e gbukwaa onye ọbu egbugbu.

³G'ọ tọ dukwa onye a-phụ-nwu ọku l'ibe iya l'eswe-atụta-unme.”

Iphe, ee-gude mee ụlo-ẹkwa

(Awụ 25:1-7; 35:10-19)

⁴Mósìsù sù ndu Ízurelu g'ẹphe ha: “Wakwa iphe, Chipfu sùru g'e mee bụ ọwa-a:

⁵Unu shi l'iphe, unu nweru hata iphe bya anụ yẹbe Chipfu. Onye oohe ihee g'ọ nụ yẹbe Chipfu iphe bẹ iphe, oo-gude bya anụ iya bụ mkpọla-ododo; waa mkpọla-ochaa; waa onyirubvu;

⁶waa owu urwukpu-urwukpu; waa ophu eke mee-mee; waa ophu du uswe-uswe; waa owu ocha; waa eji egu;

⁷waa akpo ebili, a tseru l'uswe; waa akpo umoro-enyimu; waa oshi aksha;

⁸waa manu olivu, ee-gudeje anwu oku; waa iphe, eeyeje le manu k'awu l'ishi g'o shia mkpo; me ophu eeyeje l'unwu-isensu g'o shia kwekweekwee;

⁹waa mkpuma onikusu; mewaro mkpuma ozo, aswa dugbaa. Mkpuma ono be ee-mechaa gbapyabe l'uwe-ukuvu onye-ishi ndu-uke; ye uwe-okpoma iya.

¹⁰“G'iphe, bukpo ndu maru eme ona l'echilabo unu futu bya emekota iphemiphe, Chipfu tutu onu g'e mee-a;

¹¹mbu ulo-ekwa ono; waa ekwa, aa-phushi l'eli ulo-ekwa ono; waa iphe iya ono, nweru nkoloba ishi labo ono; waa mgbo ono, ee-gude ku-chite ulo-ekwa ono; waa oshi ono, ee-gudegbaa swebushia le mgbo ono; waa itso iya ono; waa enya aka aa-kpogbaaru iya ye; mbu itso ono; ye okpa mgbo ono;

¹²waa okpoko ono; ye mgboro ono, ee-gudeje apa iya ono; waa opfu okpoko ono, aanojuje apfu ugwo iphe-eji ono; waa ekwa ono, ee-gude kochite iya;

¹³waa teburu ono; ye mgboro ono, ee-gudeje apa iya ono; ye ngwa iya; ye buredi ono, ee-dobeje l'iphu Chipfu ono;

¹⁴waa iphe ono, aapfubeje oroku ono, e-meje g'iphoro du; ye ngwa iya; waa oroku iya ono; me manu ono, ee-gudeje anwu oku ono;

¹⁵waa oru-ngweja-unwu-isensu ono; ye mgboro ono, ee-gudeje apa iya ono; waa manu ono, aa-wu l'ishi ono; ye unwu-isensu ono, eshi mkpo ono; waa ekwa ono, ee-kochite onu-abata ulo-ekwa ono;

¹⁶waa oru-ngweja ono, bu aka ee-gweje ngweja-akpo-oku ono; ye iphe iya ono, du g'ugbu, ee-gude onyirubvu mee ono; waa mgboro ono, ee-gudeje apa oru-ngweja ono; ye ngwa iya g'o ha; yekwapho eze gbamugbamu ono, ee-gude onyirubvu mee ono; ye okpa iya;

¹⁷waa ekwa ono, ee-gude gebuta oma-unuphu ulo-ekwa ono; waa itso oma-unuphu ono; ye enya aka aa-kpobegba itso ono; waa ekwa ono, ee-gude gechite onu-abata oma-unuphu ono;

¹⁸waa nggu ulo-ekwa ono; ye k'oma-unuphu iya; me eri iya;

¹⁹waa uwe ono, e kweru ekweke, ee-yeje gude eje ozi l'ulo-nso ono; mbu uwe, e doberu nso ke Eronu, bu onye uke; ye k'unwu iya, ephe e-yeje gude eje ozi ge ndu-uke.”

²⁰Ndu Izurelu wukahu l'atatiphu Mosisu.

²¹Iphe, bukpo onye oohe ihee; waa onye o rwuru l'ehu g'o nu Chipfu iphe; gudegbaa iphe bya anu iya; mbu iphe, ee-gude mee ulo-ekwa-ndzuko; mewaro iphe, ee-gude eje ozi l'ime iya; mekwapho ophu ee-gude kwee uwe, du nso.

- ²²Iphe, bukpo onye oohe ihee; unwoke me unwanyi; gudegbaa iphe, e gude mkpola-ododo mee bya anu; mbu iphe, dugbaa ge ngga agbabe; me eregede-nchi; me iphe-eka; mewaro iphe ozo, dugbaa egube ono. Epe gudegbaa mkpola-ododo phe ono bya anu Chipfu g'o buru ngweja-amama.
- ²³Ndu nweru owu wotagbaakwaru iya pho; mbu owu, du urwukpu-urwukpu; ozoo ophu eke mee-mee; ozoo ophu du uswe-uswe; ozoo owu ocha; ozoo eji egbu; ozoo akpo ebili, a tseru l'uswe; ozoo k'umoro-enyimu.
- ²⁴Ndu du ike nu mkpola-ochaa; ozoo onyirubvu; nukwaru iya pho Chipfu. Ndu nweru oshi akesha, nweru eka ee-gude iya jee ozi ono nukwa iya pho.
- ²⁵Iphe, bukpo nwanyi, maru eme ona gbaa owu bya anu. O duru ndu bu owu urwukpu-urwukpu be epe gbaru; ndu bu owu, eke mee-mee; duru ndu bu owu uswe-uswe; ndu aburu owu ocha be epe gbaru gude bya.
- ²⁶Unwanyi, oohe ihee; teme epe je adu ike mekota iya; bu eji egbu be epe gude gbaa owu nkephe.
- ²⁷Ndu-ishi wotagbaaru mkpuma onikusu; mewaro mkpuma ozo, aswa dugbaa; g'a gbapyabe l'uwe-ukuvu onye-ishi-uke; yele uwe-okpoma iya.
- ²⁸Epe nufukwapho iphe, eshi mkpo; waa manu olivu, ee-gudeje anwu oku; waa k'ophu ee-yeje le manu awu l'ishi; waa k'unwu-isensu, eshi mkpo.
- ²⁹Ndu Izuru lu l'ophu; unwoke me unwanyi; mbu ndu oohe ihee wotaru Chipfu iphe, epe turu obu phe onyo nu g'e gude meeru Chipfu iphe ono, o shi l'onu Mosisu pfua su g'e meeru iya ono.
- ³⁰Noo ya; Mosisu su ndu Izuru lu: "Unu maru le Chipfu hotawaru Bezalelu nwa Uri, bu nwanwa Huru, onye okpa-ipfu Jiuda;
- ³¹bya emewaa; unme yebe Chileke ji iya eh; g'o nweru mmamiphe; yee nkwananya; g'iphe doje iya enya ree; k'ophu oo-makotaru g'eemema iphemiphe emema;
- ³²g'o maru g'eemeje iphe-erengete le mkpola-ododo; yee mkpola-ochaa; waa onyirubvu;
- ³³makwarupho g'aawa mkpuma, aswa du; waa g'aawuje mkpola-ododo l'igburonu iya; bya amakwarupho g'aapyije iphe apyipyi; mewaro g'eeshije eme ona ozo, dugbaa iche iche.
- ³⁴Teme o nukwapho yee Oholiyabu nwa Ahisamaku, onye okpa-ipfu Danu mmamiphe g'ephe zia ndu ozo g'eeme ona obu.
- ³⁵O mekwaru ge mmamiphe k'eme iphe-erengete ji phe eh; mbu g'ephe maru eme ona; waa g'ephe maru g'eegudeje owu urwukpu-urwukpu; yee ophu eke mee-mee; waa k'uswe-uswe; waa owu ocha dengashia iphe edengashi. Ephenebo bu ndu tukoru makotaru g'eemeje iphe ona g'o maa mma.

Awufu 36

- ¹“Oo ya bu; Bezalelu; yee Oholiyabu; waa iphe, bukpuo ndu maru iphe, Chipfu nuru mmamiphe; yee iphe edo enya g'ephe maru g'eeme iphemiphe, laru le k'akpu ulo-nsu ono bukwapho g'ephe mee ya ge Chipfu pfuru su g'e meeru iya ya.”
- ²Tobudu iya bu; Mosisu kua Bezalelu; yee Oholiyabu; waa iphe, bukpuo onye maru iphe, Chipfu nuru mmamiphe; o nodu ehakwa iya pho ihee g'o jee ozi ono.
- ³Mosisu chiru iphe, ndu Izurelu tutaru g'e gude kpua ulo-nsu ono nu phe. Ndu Izurelu nodu atukokpoephe iphe ono l'utsu mboku anwuta anwuta g'ephe atu iya.
- ⁴Ndu maru eme ona, akpu ulo-nsu ono tuko g'ephe ha paru iphe, ephe eme haa;
- ⁵tugbua je asu Mosisu: “Ndu-a tutaakwaru iphe, suru egude mee iphe, Chipfu suru g'e mee; atawa k'etsutsu iya eye iya.”
- ⁶Mosisu tua ekemu su: “G'o to dukwa nwoke; ozoo nwanyi, a-kpataba iphe akpakpa bya anu su l'oo iphe, o gude eyeta aka k'ulo-nsu ono.” E woru iphe ono, Mosisu pfuru ono pfudzuru l'ulo-ekwa ndu Izurelu l'ophu. E shi nno kposhia ndu Izurelu g'o to duhe iphe, ephe e-wotaba;
- ⁷noo kele iphe, a tutawaru g'e gude jee ozi ulo ono suwaru g'ee-gude iya jee ozi ono; l'o tsufu etsufu.

Mkpù-ékwa ono

(Awu 26:1-14)

- ⁸Iphe, bu ndu ophu maru iphe le ndu-ozu ono gude owu ocha, a swiru udo; waa ophu du urwukpu-urwukpu; waa ophu du uswe-uswe; yee ophu eke mee-mee; kwee ekwa kweta iya upfu ekwa iri. Onye maru eme ona gude owu ono kwee chierobu ye l'upfu ekwa ono.
- ⁹Upfu ekwa ono tukokwa haru enya nhamunha. Ogologo iya du nkwo-eka ukporo l'esato; osa iya du nkwo-eka eno.
- ¹⁰Ephe wotaru upfu ekwa ono ise gbagbabe; o buru nlochiru lanu; bya ewotakwapho uzo ise ophu gbagbabe nanu.
- ¹¹Ishimishi-ophoko-ekwa ono ke mbu be ephe gude owu, du urwukpu-urwukpu yeshia ya nkoloba l'igburonu iya. Ephe bya emekwapho nno l'ishimishi-ophoko-ekwo ono k'ebo.
- ¹²Nkoloba ukporo labo l'iri be ephe yeru l'ishishi nlochiru lanu; ephe yekwapho nkoloba ukporo labo l'iri l'ishishi nlochiru lanu ophu. Nkoloba ono tuko ghagbabe iphu.
- ¹³Ephe gude mkpola-ododo meta iphe, kweru nko ishi labo uzo ukporo labo l'iri; gude iya dzegbabe nlochiru ekwa ono ephebo; o tuko buru nanu.
- ¹⁴Ephe bya egude eji egbu kwee ekwa; kweta iya upfu ekwa iri le nanu, ee-gude phuchite eli ulo-ekwa ono.

- 15**Upfu ẹkwa ono ẹphe n'iri le nanu ọko haru ẹnya nhamunha. Ogologo iya du nkwo-ẹka ọkporo l'iri. Osa iya du nkwo-ẹka ẹno.
- 16**Ẹphe bya achita upfu ẹkwa ono ise gbagbabe; o buru nlochiru lanu; chita uzo upfu ẹkwa ishii ophuu gbagbabe kwapho nanu.
- 17**Nkoloba ọkporo labo l'iri be ẹphe yeru l'ishishi nlochiru lanu; yekwapho nkoloba ọkporo labo l'iri l'ishishi nlochiru lanu ophuu.
- 18**Ẹphe gude onyirubvu meta iphe, kweru nko ishi labo uzo ọkporo labo l'iri; gude iya kotagbaa nkoloba nlochiru ẹkwa ono ẹphenebo; gude iya dzegbabe ulo-ẹkwa ono; o buru nanu.
- 19**E mecha; ẹphe gude akpo ebili, a tseru l'uswe; mee iphe, ee-gude phu-chia eli ulo-ẹkwa ono ozo; bya egudekwapho akpo umoro-enyimu mee iphe, ee-gude kwechite eli akpo k'ebili ono.
- 20**Ẹphe gude oshi akesha meta oshi, ee-gudeje kpo be ulo-ẹkwa ono.
- 21**Oshi ono be e mekotaru; o dugbaa nkwo-ẹka iri iri l'eli. Osa iya dugbaa nkwo-ẹka le mkpirikpu iya.
- 22**Oshi ono be ẹphe pyitachaa ru okpa labo ye l'ibekeboebo. O buru egube ono be ẹphe mekotaru oshi ulo-ẹkwa ono g'o ha.
- 23**A bya l'ulo-ẹkwa ono ibiya ophu gharu iphu l'uzo ndohali; bu ọkporo oshi be ẹphe rutaru yegbaa ya.
- 24**Ẹphe gude mkpola-ochaa meshia ẹnya ẹka aa-kpogbaaru okpa oshi ono ye; meta iya uzo ọkporo labo. Iphe, bu oshi ono g'o ha nweru ẹnya ẹka labo, aa-kpojeru okpa iya ye.
- 25**A bya l'ibe iya ophuu; mbu ibiya ophu gharu iphu l'uzo isheli; bukwapho ọkporo oshi be ẹphe rutaru; yeshia ya.
- 26**Ẹphe gude mkpola-ochaa meshia ẹnya ẹka aa-kpogbaaru okpa oshi ono ye; meta iya uzo ọkporo labo. Iphe, bu oshi ono g'o ha nweru ẹnya ẹka labo, aa-kpojeru okpa iya ye.
- 27**A bya l'okotazu ulo-ẹkwa ono; mbu ibiya ophu gharu iphu l'uzo ẹnyanwu-ariba bu oshi ishii be ẹphe rutaru; yeshia ya;
- 28**bya emetacha oshi ẹbo ẹbo; yechaa le mgbureku mgbureku ulo-ẹkwa ono l'uzo okotazu iya ono.
- 29**Oshi labo ono, ee-yechaa le mgbureku iya ono be dugbaa nkwegba ẹbo ẹbo. O shi l'uzo ali du nkwegba ẹbo jasun l'imeli. Teme o buru echi lanu be a kuberu iya. Ẹphenebo ọko dukota nno.
- 30**Oo ya bu l'o du oshi esato l'azu ulo-ẹkwa ono. E gude mkpola-ochaa meshia ẹnya ẹka aa-kpogbaaru okpa oshi ono ye uzo iri l'ishii. Iphe, bu oshi ono g'o ha nwegbaaru ẹnya ẹka labo, aa-kpojeru okpa iya ye.

- ³¹Ephe gude oshi akesha rwashia oshi, dugbaa gberere, ee-gude swebushia l'oshi ono. Uzo ise be ephe sweberu l'oshi mgbureku ulo-ekwa ono ibe lanu;
- ³²swebekwapho uzo ise ozo le mgbureku ibe iya ophuu. Uzo ise ozo buru k'okotazu ulo-ekwa ono; ibiya ophu gharu iphu l'uzo enyanwu-ariba.
- ³³Oshi ophu ee-swebe l'echi iya be ephe rwaru g'o gbẹ l'ishi lanu lufu l'ishi iya ophuu.
- ³⁴Ephe wukota mkpola-ododo l'oshi ono, eegudeje kpobe ulo-ekwa ono; bya egudekwapho mkpola-ododo meshia echi, e-gudeshigbaa oshi ono, dugbaa gberere ono. Ephe bya awukwapho mkpola-ododo le gberere oshi ono.
- ³⁵Ephe gude owu, du urwukpu-urwukpu; waa ophu du uswe-uswe; waa ophu eke mee-mee; yee owu ochaa, a swiru udo; kwee ekwa. Onye maru eme ona bya egude owu ono kweshia chierobu ye l'ekwa ono.
- ³⁶Ephe gude oshi akesha rwa itso eno; bya awua ya mkpola-ododo; bya egudekwapho mkpola-ododo meshia iphe, kweru nko, ee-gude kobe ekwa ono l'itso ono. Ephe bya egude mkpola-ochaa kpushia enya aka aa-kpobe itso ono uzo eno.
- ³⁷Ephe gude owu, du urwukpu-urwukpu; waa ophu eke mee-mee; waa ophu du uswe-uswe; yee owu ochaa, a swiru udo; kwee ekwa, ee-gudeje kochite onu-abata ulo-ekwa ono. O buru ndu gude ngga ekwe ekwa meru iya.
- ³⁸Ephe gude oshi akesha rwata itso ise; bya emekwapho iphe, kweru nko, ee-gude kobe ekwa ono l'itso ono. Ephe bya awua ishi itso ono; waa iphe, ee-swebe l'itso ono mkpola-ododo; bya egude onyirubvu kpushia enya aka aa-kpobegba itso ono ephe n'ise.

Awufu 37

Okpoko ono

(Awu 25:10-22)

- ¹Bezalelu gude oshi akesha kua okpoko. Ogologo iya du nkwo-eka labo le mkpirikpu iya. Osa iya du nkwo-eka lanu le mkpirikpu iya. Eli iya dukwapho nkwo-eka lanu le mkpirikpu iya.
- ²O wua okpobe mkpola-ododo l'ime iya; waa l'azu iya. O gudekwapho mkpola-ododo wu-pee mgbureku iya mgburugburu.
- ³O kputa echi mkpola-ododo eno depfubegbaa l'okpa iya ephen'eno; mbu wota ebo depfube l'ibe lanu; wota ebo k'ophuu depfube l'ibe iya ophuu.
- ⁴O gude oshi akesha pyita mgboro labo; wua ya mkpola-ododo.
- ⁵O woru mgboro ono ephenebo pyochaa l'echi ono, e depfubegbaaru le mgbureku okpoko ono g'o buru iphe, ee-gudeje apa iya.
- ⁶O gude okpobe mkpola-ododo meta opfu okpoko; aka aapfuje ugwo iphe-eji, nemadzu meru. Ogologo iya du nkwo-eka labo le mkpirikpu iya. Osa iya du nkwo-eka lanu le mkpirikpu iya.

⁷O gude mkpọla-ododo mee chierobu labọ, a-nọduchaa l'ishi opfu okpoko ono. O buru mkpọla-ododo, e tsusaru etsusa bẹ o gude mee ya.

⁸O woru chierobu lanu dobe l'ishi ibe lanu; woru ophuu dobe l'ishi iya ophuu; bya emee; chierobu labọ ono, nọgbaa l'ishishi okpoko ono ephenebo yele okpoko ono buru iphe lanu.

⁹Cherubimu ono bẹ o meru; o jashia nkù l'uzo imeli; nkù iya ono kpuchite opfu okpoko ono. Epe ghagbabe iphu; tuko ele enya l'eli okpoko ono kwapho.

Teburu ono
(Awu 25:23-30)

¹⁰Epe gude oshi akesha meta teburu. Ogologo iya du nkwo-eka labo. Osa iya du nkwo-eka lanu. Eli iya du nkwo-eka lanu le mkpirikpu iya.

¹¹Epe wua ya okpobe mkpọla-ododo; bya egudekwapho mkpọla-ododo wu-pee eli iya mgburugburu.

¹²Epe wota werere oshi, osa iya ha g'obochi-eka wu-pee mgbureku iya mgburugburu; bya egudekwapho mkpọla-ododo kpu-pee werere oshi ono.

¹³Epe kputa echi mkpọla-ododo eno depfubegbaa le mgbureku okpa teburu ono.

¹⁴Echi ono no-kubechaa werere oshi pho; k'opu o-dukwanu ike gudeshia mgboro, ee-gudeje apa teburu ono.

¹⁵Mgboro, ee-gudeje apa teburu ono bu oshi akesha bẹ epe gude pyishia ya; bya awua ya mkpọla-ododo.

¹⁶Epe gude okpobe mkpọla-ododo meshia ngwa, aa-tu-kobeje l'eli teburu ono; mbu gbamugbamu; waa ite; waa okoro; me nkweka ee-gudeje gweeru Chipfu ngweja-mee.

Iphe, aapfubeje oroku
(Awu 25:31-40)

¹⁷Epe gude okpobe mkpọla-ododo, e tsusaru etsusa mee iphe, aapfubeje oroku. Epe meru iya; o nweru oshi; waa ekali. O bya enweru ochi; nweru nkwo iya; nweru iphe, du ge nwopu okoko; waa iphe, du g'okoko, jawaru ajaja. Epe tuko iphemiphe ono mee ge yele iphe ono, aapfubeje oroku ono dzepfua buru nanu.

¹⁸Oshi iya ono nweru ekali ishii. Ekali eto nodu le mgbureku iya lanu; eto k'opu nodu le mgbureku iya ophuu.

¹⁹Ekali iya lanu nweru okoro eto. Okoro ono bẹ e mechaaru; o dugbaa g'okoko oshi alumundu. E mekwaapho nwopu okoko ye iya; yee okoko ophu jawaru ajaja. Noo g'okoko dukota l'ekali iya ono epe n'ishii, dzepfugbaaru l'oshi iya ono.

²⁰Oshi iya ono nweru okoro eno, e meru; o du g'okoko oshi alumundu. O nwekwarupho iphe, e meru; o du ge nwopu okoko; yee iphe, du g'okoko ophu jawaru ajaja.

²¹Nwopu okoko lanu be e meru; o nodu le mkpula ekali iya labo ono, no l'uzo ali iya. K'ebo nodu le mkpula ekali iya labo k'echi. K'eto nodu le mkpula ekali iya labo k'uzo eli. Mbụ l'o nochaa le mkpula ekali iya ono ephe n'ishii.

²²Nwopu okoko iya ono; yee ekali iya ekali iya ono be e meru; yele oshi iya tuko dze pfuru. O buru okpobe mkpola-ododo, e tsusaru etsusa be e gude mee ya.

²³Ephe gudekwapho okpobe mkpola-ododo meta oroku esaa, aa-pfubegbaa l'eli iphe ono, aapfubeje oroku ono; bya emetakwapho akpa iya; waa iphe, aaguje oku iya.

²⁴Iphe, aapfubeje oroku ono; yee ngwa iya g'o hakota bu okpobe mkpola-ododo, erwa iya du talentu lanu be e gude mee ya.

Oru-ngweja unwu-isensu

(Awu 30:1-5)

²⁵Ephe gude oshi akesha kua oru-ngweja, bu aka aa-kpoje unwu-isensu oku. Ogologo iya waa osa iya tuko haru enya nhamunha. Iphe, o duchaa bu nkwo-eka lanu. Eli iya du nkwo-eka labo. Mpu iya; yee oru-ngweja ono tuko rwagbabe buru nanu.

²⁶Ephe wukota eli iya; yee mgbureku iya; waa mpu iya okpobe mkpola-ododo. Ephe gudekwapho mkpola-ododo kpu-pee mgbureku iya mgburugburu.

²⁷Ephe meta echi mkpola-ododo ebo ebo depfubegbaa le mgbureku iya ibekeboebo. Ephe depfuberu iya; o noduchaa le mkpula iphe ono, a kpu-pheru iya mgburugburu ono. O buru l'echi ono be ee-yeje mgboro, ee-gudeje apa iya.

²⁸Ephe gude oshi akesha pyita mgboro ono; wua ya mkpola-ododo.

²⁹Ephe mekwaapho manu ono, du nsọ bya eshi mkpo, aawuje l'ishi ono; waa okpobe unwu-isensu ono, eshi mkpo ono. O buru ndu maru eme manu-mbeleke meru iya.

Awufu 38

Oru-ngweja aka ee-gweje ngweja-akpo-oku

(Awu 27:1-8)

¹Ephe gude oshi akesha kuta oru-ngweja. Eli iya du nkwo-eka eto. Ogologo iya waa osa iya tuko haru enya nhamunha. Iphe, o duchaa bu nkwo-eka ise ise.

²Ephe rutachaa mpu mobechea l'ishi ishi mgbureku iya ephen'eno. Mpu ono; yee oru-ngweja ono rwagbaa buru nanu. Ephe mechea ya nno; bya eworu onyirubvu wua ya.

³Ephe gude onyirubvu meshia iphemiphe, ee-gudeje eje ozi l'oru-ngweja ono, bu iya bu ite; waa iphe, eegudeje ekpo ntu; waa gbamugbamu; waa oji; me iphe, aaguje oku.

⁴Ephe gude onyirubvu meta iphe, du nggafu-nggafu g'ugbu; bya enweru mgbureku eno. Ephe woru iya kwechia uzo ali mgbureku oru-ngweja ono. A -gbẹ l'uzo ali iya kwechia ya jasụ l'echilabo iya.

⁵Ephe gudekwapho onyirubvu meta echi eno hebechea le mgbureku iphe ono, du nggafu-nggafu g'ugbu ono, e meru l'onyirubvu ono; g'o buru enya aka ee-pyocha mgboro, ee-gudeje apa oru-ngweja ono.

⁶Ḑphe gude oshi akesha pyita mgboro labo; wua ya onyirubvu;

⁷wochaaru mgboro ono nwua l'anya echi pho ibekeboebo. Mgboro ono ephenebo a-nodujechaa le mgbureku iya ephenebo me a -nodu apa iya. Ḑphe gude iberibe oshi mee oru-ngweja ono; uzo du iya l'echi.

Eze gbamugbamu ono

(Awu 30:17-21)

⁸Ḑphe gude onyirubvu mee eze gbamugbamu; yee okpa iya. Onyirubvu ono, ephe gude mee ya ono shi l'onyo unwanyi, anoduje eje ozi l'onu-abata ulo-ekwa-ndzuko.

Oma-unuphu

(Awu 27:9-19)

⁹Ḑphe bya emee oma-unuphu. Ḑphe gude owu ochaa, a swiru udo; kwee ekwa, du ukporo nkwo-eka ise l'ogologo; g'e gude gebuta ibiya ophu oma-unuphu ono gharu iphu l'uzo ndohali.

¹⁰Ḑphe gude onyirubvu meta ukporo itso, aa-kpobe iya; yee enya eka aa-kpobechaa itso ono; bya egude mkpola-ochaa meshia iphe, kweru nko, ee-gude kobe ekwa ono l'itso ono; yee iphe, ee-swebe l'itso ono.

¹¹Uzo isheli iya bukwapho ekwa, du ukporo nkwo-eka ise l'ogologo be e kweru gude gebuta iya. Itso, aa-kpobe l'uzo isheli ono; yee enya eka aa-kpobe itso ono duchaa ukporo ukporo. O bukwapho onyirubvu be e gude metachaa ya. O bukwannuru mkpola-ochaa be e gude meshia iphe, kweru nko, ee-gude kobe ekwa ono l'itso ono; yee iphe, ee-swebe l'itso ono.

¹²A bya l'osa oma-unuphu ono l'uzo enyanwu-ariba iya; bukwapho ekwa, du ukporo nkwo-eka labo le nkwo-eka iri l'ogologo be e kweru; gude gebuta iya. Ḑphe bya emeta itso iri, aa-kpobe l'uzo enyanwu-ariba ono; metakwapho enya eka aa-kpobechaa itso ono uzo iri. Ḑphe bya egude mkpola-ochaa meshia iphe, kweru nko, ee-gude kobe ekwa ono l'itso ono; yee iphe, ee-swebe l'itso ono.

¹³Osa oma-unuphu ono l'uzo enyanwu-awawa iya dukwapho ukporo nkwo-eka labo le nkwo-eka iri l'ogologo.

¹⁴Ḑphe bya ekwee ekwa, du nkwo-eka iri l'ise l'ogologo g'e gude gebuta aguga onu-abata oma-unuphu ono ibe lanu. Itso, aa-kpobe iya; yee enya eka aa-kpobechaa itso ono duchaa eto eto.

¹⁵A bya l'eka aguga onu-abata oma-unuphu ono ibe iya ophu; bukwapho ekwa, du nkwo-eka iri l'ise l'ogologo be e kweru g'e gude gebuta iya. Itso, aa-kpobe iya; yee enya eka aa-kpobechaa itso ono duchakwapho eto eto.

¹⁶Iphe, bu ekwa, ee-gude gebuta oma-unuphu ono mgburugburu bukota owu ochaa, a swiru udo be e kweru g'e gude kwee ya.

¹⁷Enya eka aa-kpobechaa itso, ee-gude kpobuta oma-unuphu ono mgburugburu bu onyirubvu be e kweru g'e gude meshia ya. Iphe, kweru nko, ee-gude kobe ekwa ono l'itso ono; yee iphe, ee-swebegbaa l'itso ono bukwannuru mkpola-ochaa be e kweru g'e gude

meshia ya. Ishi itso ono bẹ ẹphe wuru mkpọla-ọchaa. Iphe, ee-swebechaa l'itso ono, ee-gude kpọ-buta ọma-unuphu ono mgburugburu ono bụ mkpọla-ọchaa bẹ ẹphe gude meshia ya.

18 Ẹphe gude owu, dọ urwukpu-urwukpu; waa ọphu eke mee-mee; waa k'uswe-uswe; yee owu ọchaa, a swiru ọdo; gude kwee ẹkwa, dọ nkwo-ẹka ụkporo l'ogologo; g'e gude gechite ọnu-abata ọma-unuphu ono. Ọ bụru ndu gude ngga ekwe ẹkwa meru iya.

19 Ẹphe gude onyirubvu metaru ọnu-abata iya ono itso ẹno; waa ẹnya ẹka aa-kpọbechaa itso ẹno ono. Iphe, kweru nko, ee-gude kobe ẹkwa ono l'itso ono; waa iphe, ee-swebechaa l'itso ono bẹ ẹphe mekọtaru lẹ mkpọla-ọchaa. Ẹphe wukotakwapho mkpọla-ọchaa l'eli itso ono.

20 Iphe, bụ nggu, ee-libegbaa eri ọlo-ẹkwa ono; mekwapho k'ọma-unuphu ono bẹ ẹphe gude onyirubvu mekọta.

Iphe, e gude jee ozi ọbu.

21 Ọwaa bụ mkpakọ iphe, e gude mee ọlo-ẹkwa ọbu; mbụ ọlo-ẹkwa Ekemu ono. Ọo Mosisu sọru gẹ ndu oshilọkpa Lívayi dekọta iphemiphe ono l'ẹkwo. Onye-ishi pẹ bụ Itama nwa Erọnu, bụ onye uke.

22 Bezalelu nwa Uri, bụ nwanwa Huru, bụ oshilọkpa Jiuda mekọta iphemiphe gẹ Chipfu tọru Mosisu ọnu g'e mee ya.

23 Onye ẹphe l'iya tuko mee ya bụ Oholiyabu nwa Ahisamaku; oshilọkpa Danu; bụ onye maru eme ọna; yee ẹrengete; bya aburu onye maru g'eegudeje owu, dọ urwukpu-urwukpu; waa ọphu eke mee-mee; waa ọphu dọ uswe-uswe; waa owu ọchaa dengashia iphe edengashi.

24 Ẹrwa mkpọla-ododo, a tataru lẹ ngweja-amama, a nuru g'e gude mee ọlo ono, dọ nsọ ono dọ ụkporo talentu lẹ talentu tete; waa unu shekelu; l'ụkporo shekelu iri l'ishii; lẹ shekelu tete. G'ọ ha bukwa iphe, eegudeje atụ ẹrwa iphe l'eze-ọlo Chileke bẹ e gude tọ ya.

25 Ẹrwa mkpọla-ọchaa, ndu Ízurelu tataru teke ono, a guru pẹ ọgu ono dọ ụkporo talentu ise; waa unu shekelu ẹno; l'ụkporo shekelu ẹsato; lẹ shekelu iri l'ise. G'ọ ha bukwa iphe, eegudeje atụ ẹrwa iphe l'eze-ọlo Chileke bẹ e gude tọ ya.

26 Iphe, mkpọla-ọchaa ọbu gbaru pẹ l'ẹhu l'ẹhu bụ mkpọla-ọchaa, ẹrwa iya bụ nkeru-ẹbo shekelu. G'ọ ha bukwa iphe, eegudeje atụ ẹrwa iphe l'eze-ọlo Chileke bẹ e gude tọ ya. Ndu a guru teke ono, a guru ndu Ízurelu ọgu ono bụ; a -gbẹ lẹ ndu nọru ụkporo apha kwaseru. Iphe, ẹphe dọ bụ ụkporo unu nemadzu ugbo ụkporo ẹto l'iri l'ise; l'unu nemadzu ẹsato; l'ụkporo umadzu iri l'ẹsaa; l'umadzu iri.

27 Mkpọla-ọchaa ono, ẹrwa iya dọ ụkporo talentu ise ono bẹ e gude kpushigbaa ẹnya ẹka aa-kpọbegba ọkpa mgbo ono, ee-gude kọ-chite ọlo-ẹkwa ono ọzo ụkporo ise. Mkpọla-ọchaa, ẹrwa iya dọ talentu lanu bẹ eegudeje kpua ẹnya iya lanu.

²⁸Ephe gude ụnu shẹkelu mkpọla-ọchaa ẹno; l'ụkporo shẹkelu ẹsato; ị shẹkelu iri l'ise kpushia iphe, nweru nkoloba, ee-gude kobe ẹkwa ono l'itso ono; bya egudekwa iya pho wukota l'ishi itso ono; bya egude iya mekwapho iphe, ee-swebegbaa l'itso ono.

²⁹Ephe tutakwarupho onyirubvu, ẹrwa iya du ụkporo talentu ẹto ị talentu iri; waa ụnu shẹkelu ishii ị ngweja-amama ono.

³⁰Ephe gude iya kpua ẹnya ẹka aa-kpobegba itso k'onu-abata ụlo-ẹkwa-ndzuko ono; bya egudekwa iya pho kpua ọru-ngweja ono, bu ẹka ee-gweje ngweja-akpo-oku ono; yee iphe ono, du g'ugbu ono; waa ngwa ọru-ngweja ono g'ọ ha.

³¹Ephe gudekwa iya pho kpua ẹnya ẹka aa-kpobegba itso, ee-gude kpọ-butaa ọma-unuphu ono; wakwapho k'onu-abata iya; waa nggu, ee-libegbaa eri ụlo-ẹkwa ono; mekwapho k'oma-unuphu iya.

Awufu 39

Uwe ndu-uke

(Awu 28:1-14)

¹Ephe gude owu, du urwukpu-urwukpu; waa ọphu eke mee-mee; yee ọphu du uswe-uswe; kweeru ndu-uke uwe, ephe e-yeje gude eje ozi l'ulo-ẹkwa ono. Ephe kwekwarupho Eronu uwe, du nsọ, bu iya bu ge Chipfu suru Mosisu g'e mee ya.

Uwe ifodu

²Ephe gude owu mkpọla-ododo; yee owu, du urwukpu-urwukpu; waa ọphu eke mee-mee; waa ọphu du uswe-uswe; waa owu ọchaa, a swiru udo; kwee uwe-ukuvu.

³Ephe woru mkpọla-ododo tsusaa etsusa; mee ya; ọ du pheripheri; woru iya washia agwara; gude agwara ono tsokota ị mgbaka owu urwukpu-urwukpu pho; yee ọphu eke mee-mee; yee ọphu du uswe-uswe; waa owu ọchaa, a swiru udo pho. O buru onye maru eme ọna meru iya.

⁴Ephe woru werere ẹkwa labo libechaa l'uwe-ukuvu ono ibekęboebo; g'a nyaje iya l'ukuvu; g'e gudeje werere ẹkwa ono ephebebo lita k'atatiphu yee k'azu.

⁵Ephe bya ekwekwapho werere ẹkwa, ee-gudeje tu-butaa iya l'upfu ye iya. Werere ẹkwa ono be yee ifodu ono tuko buru iphe lanu. Iphe, e gude kwee ya bu owu mkpọla-ododo; yee owu, du urwukpu-urwukpu; waa ọphu eke mee-mee; yee k'uswe-uswe; yee owu ọchaa, a swiru udo, bu iya bu ge Chipfu turu Mosisu onu g'e mee ya.

⁶Mkpuma onikusu pho be ephe wuru mkpọla-ododo l'igburonu iya. O buru egube ono, onye apyije mkpuma, vu oke aswa akashije ephe ị mkpuma; gude mee ya iphe-ohubama ono bu g'ephe kakotaru ephe unwu Izurelu ị mkpuma ono.

⁷Ephe bya adzupyaabe mkpuma labo ono l'eli uwe-ukuvu pho ephebebo; k'ophu Chipfu e-gudeje iya nyata unwu Izurelu, bu iya bu ge Chipfu turu Mosisu onu g'e mee ya.

Uwe-Okpoma

- ⁸Ephe bya ekwee uwe-òkpoma phọ, ee-gudeje achọ iphe, bu uche Chipfu phọ. Ephe kweru iya; ọ dụ g'uwe-ukuvu phọ, e kweru l'owu mkpọla-ododo; yee owu, dụ urwukpu-urwukpu; yee ophu eke mee-mee; waa k'uswe-uswe; waa owu ocha, a swiru ọdo. O buru onye maru eme ọna meru iya.
- ⁹O nweru mgbureku ẹno; dụ nkwegba labọ. Mgbureku iya ono ẹphen'eno tukokwa haru ẹnya nhamunha. Ogologo iya dụ nkwo-ẹka lanu; ọsa iya dukwapho nkwo-ẹka lanu.
- ¹⁰Ephe bya adzupyabe mkpuma, vu oke aswa l'ogiri l'ogiri ọzo ẹno l'ekwa ono. Mkpuma, nọ l'ogiri iya ke mbu bu rubi; yee topazu; waa berilu.
- ¹¹Ogiri iya k'ẹbo; bu tokwasu; yee safaya; waa emeraludu be ephe doru iya.
- ¹²O be l'ogiri iya k'eto; ọ buru jiasintu; yee agetu; waa amitisutu be ephe doru iya.
- ¹³Teke o beru l'ogiri k'eno; bu kirisolayitu; yee onikusu; waa jiasupa be ephe doru iya. Ephe bya awua mkpọla-ododo l'igburonu mkpuma ono.
- ¹⁴Iphe, ọ dụ bu mkpuma iri l'ẹbo. G'ephe ha nanu nanu no-chichaa ẹnya ẹpha unwu Izurelu. Ephe bya edechaa ẹpha unwu Izurelu ono le mkpuma ono; ọ dụ g'iphe-ohubama nochia ẹnya okpa-ipfu iri l'ẹbo ndu Izurelu.
- ¹⁵Ephe gude owu okpobe mkpọla-ododo swishia gwogirigwo, ee-lipfubegbaa l'uwe-òkpoma obu; mbu swishia ya; ọ dụ g'onye swiru ọdo.
- ¹⁶Ephe gude mkpọla-ododo meta echi labọ; yechaa l'ishi uwe-òkpoma ono;
- ¹⁷bya eworu gwogirigwo phọ libechaa l'echi ono, e yegbaaru l'ishi uwe-òkpoma obu.
- ¹⁸Ephe bya ewota ishi gwogirigwo ono ishi iya ophuu lipfubekwaphọ le mkpọla-ododo phọ, a wuru l'igburonu mkpuma labọ phọ, e lipfuberu l'eli uwe-ukuvu phọ.
- ¹⁹Ephe bya egude mkpọla-ododo meta echi labọ ọzo; lipfube l'ishi uwe-òkpoma obu l'uzo ali. Ephe lipfuberu iya l'ime uwe-òkpoma obu; ibiya ophu tukoru l'eli uwe-ukuvu phọ.
- ²⁰Ephe bya egude mkpọla-ododo metafua echi labọ ọzo; libechaa l'ishishi werere ekwa labọ phọ l'uzo ali iya; mbu werere ekwa ono, e liberu l'eli uwe-ukuvu ono. Ephe liberu iya temanu l'e rwua ẹka ono, a nmaru werere ekwa, a tu-butaru l'upfu uwe-ukuvu ono.
- ²¹Echi k'uwe-òkpoma phọ be ephe gude eri, e gude owu, dụ urwukpu-urwukpu swia; litachaa l'echi uwe-ukuvu obu; k'ophu oo-nodu le mgboru werere ekwa, atu-butu l'upfu phọ; g'uwe-òkpoma phọ ta nodujeshi aku peepee l'eli uwe-ukuvu obu, bu iya bu ge Chipfu turu Mosisu onu g'e mee ya.

Uwe uke ọzo

- ²²Ephe gude ekwa, dụ urwukpu-urwukpu mee uwe mgbalanu, ee-yeje uwe-ukuvu ono l'eli iya. O buru onye maru ekwe ekwa ree kweru iya.

- ²³Ephe kweru iya; ẹka eepyoje iya ishi nọdu iya l'echilabọ; bya eswia igburonu iya onu g'eeswije olu uwe-a; g'ọ tọ lakahu.
- ²⁴Ephe gude owu, ọdu urwukpu-urwukpu; waa ọphu eke mee-mee; yee ọphu ọdu uswe-uswe; waa owu ọchaa, a swiru ọdo; metachaa iphe, dugbaa g'akpuru itorokuma; dophee onu uwe ono mgburugburu.
- ²⁵Ephe bya egude ọkpobe mkpola-ododo meshia ọkunmengu dophee igburonu uwe ono mgburugburu le mgbaka iphe ono, dugbaa g'akpuru itorokuma ono.
- ²⁶Ọkunmengu ono; waa iphe ono, e meru; ọ ọdu g'akpuru itorokuma ono; nọ-pee igburonu uwe ono mgburugburu. E dongakotaru phe edonga l'onu uwe ono, ee-yeje ejeru Chipfu ozi ono, bu iya bu ge Chipfu turu Mosisu onu g'e mee ya.
- ²⁷Ephe gude owu ọchaa kweeru Eronu; yee unwu iya uwe mgbalanu. O buru onye maru ekwe ẹkwa ree kweru iya.
- ²⁸Ephe gudekwapho owu ọchaa kwee okpulishi-ẹkwa ono; waa okpu ndu-uke ono; gude owu ọchaa, a swiru ọdo kwee nwiba ono.
- ²⁹Ephe gude owu ọchaa, a swiru ọdo; waa owu, ọdu urwukpu-urwukpu; waa ọphu eke mee-mee; yee ọphu ọdu uswe-uswe kwee ẹkwa-atu-butu-l'upfu ono. O buru onye maru ekwe ẹkwa kweru iya; bya aburu ge Chipfu turu Mosisu onu g'e mee ya.
- ³⁰Ephe gude ọkpobe mkpola-ododo meta iphe, ọdu g'okwekpu; dee ya iphe g'eedeje l'iphe-ohubama-a. Iphe, ephe deru iya bu: IPHE, DURU CHIPFU NSO.
- ³¹Ephe bya ewota eri, e gude owu, ọdu urwukpu-urwukpu swia; libe l'iphe ono, ọdu g'okwekpu ono; woru iya lipyabe l'ataphu okpulishi-ẹkwa, bu iya bu ge Chipfu turu Mosisu onu g'e mee ya.

Mosisu eje agbaphe ọlo-ẹkwa ono.

- ³²Nta-a be ọlo-ẹkwa ono; mbu ọlo-ẹkwa-ndzukọ ono be e meghewaru. Ndu Izurelu tukoeru iya pho mekota ge Chipfu suru Mosisu g'e mee ya.
- ³³Noo ya; ephe chita iphe ọlo-ẹkwa ono g'ọ ha chitaru Mosisu; mbu ọlo-ẹkwa ono; me ngwa iya, ọdu g'iphe iya ono, nweru nkoloba ono; waa mgbo ono, ee-gude ku-chite ọlo-ẹkwa ono; waa oshi ono, ee-gudegbaa swebushia le mgbo ono; waa itso iya ono; yee enya ẹka aa-kpobechaa itso ono; waa okpa mgbo ono.
- ³⁴Ephe chitakarupho akpo ebili ono, a tseru l'uswe, ee-gude kpua ọlo-ẹkwa ono; waa akpo umoro-enyimu ono; waa ẹkwa ono, ee-gude kobuta ẹka-kakota-adu-nsọ ono;
- ³⁵waa okpoko-ekemu ono; yee mgboro ono, ee-gudeje apa iya ono; waa opfu okpoko ono, aa-noduje apfu ugwo iphe-eji ono;
- ³⁶waa teburu ono; yee ngwa iya; waa buredi ono, ee-dobeje l'iphu Chipfu ono;
- ³⁷waa iphe ono, aapfubeje oroku ono, e meru l'okpobe mkpola-ododo ono; waa oroku iya ono; yee ngwa iya; waa manu ono, ee-gudeje anwu oku ono;

³⁸waa ɔru-ngweja ono, e meru lɛ mkpɔla-ododo ono; waa manɔ ono, aa-wu l'ishi ono; waa ɔnwù-isensu ono, eshi mkpɔ ono; waa ɛkwa ono, ee-kochite ɔnu-abata ɔlo-ɛkwa ono;

³⁹waa ɔru-ngweja ono, bu ɛka ee-gweje ngweja-akpɔ-ɔku ono, e gude onyirubvu mee ono; waa iphe iya ono, du g'ugbu ono; waa mgboro iya; yɛ ngwa iya g'ɔ ha; waa eze gbamugbamu ono; yɛ iphe ono, aa-subeje iya ono;

⁴⁰waa ɛkwa ono, ee-gude gebuta ɔma-unuphu ono; yɛ itso iya; waa ɛnya ɛka aa-kpɔbechaa itso ono g'ɔ ha; waa ɛkwa, ee-gude gechite ɔnu-abata ɔma-unuphu ono; waa eri iya; yɛ nggu iya; yɛ iphemiphe, ee-gude eje ozi l'ɔlo-ɛkwa ono; mbu ɔlo-ɛkwa-ndzuko ono;

⁴¹waa uwe ono, e kweru ekwekwe, ee-yeje gude eje ozi l'ɔlo-nsɔ ono; mbu uwe, du nsɔ kɛ Erɔnu, bu onye uke; yɛ k'unwu iya, ɛphe e-yeje m'ɛphe nɔdu eje ozi uke pɛ.

⁴²Ndu Ízurelu tukoephe iphemiphe ono mekɔta gɛ Chipfu tɔru Mosisu ɔnu iya.

⁴³Mosisu bya elee ɛnya l'ozi ono; hɔma l'ɛphe jekɔtaeru iya phɔ gɛ Chipfu sɔru g'e mee ya. ɔo ya bu; ɔ bya agɔru ɔnu-ɔma nu pɛ; gude kele pɛ ekele ozi ono, ɛphe jeru ono.

Awufu 40

Akpɔbe ɔlo-ɛkwa ono

¹Noo ya; Chipfu sɔ Mosisu:

²“Kpɔbe ɔlo-ɛkwa ono; mbu ɔlo-ɛkwa-ndzuko; lɛ mbɔku, ɔnwa mbu fɔerupho.

³Paru okpoko-ekemu ono sube iya l'ime; l'i wota ɛkwa ono gude kobuta iya.

⁴L'i pabata teburu ono; yɛ ngwa iya. L'i pabatakwapho iphe ono, aapfubeje orɔku ono; dozichaa orɔku, du iya nu.

⁵L'i patakwapho ɔru-ngweja-ɔnwù-isensu ono, e meru lɛ mkpɔla-ododo ono; sube l'ataphu okpoko-ekemu ono; gude ɛkwa ono kobuta ɔnu-abata ɔlo-ɛkwa ono.

⁶“L'i sube ɔru-ngweja ono, bu ɛka ee-gweje ngweja-akpɔ-ɔku ono l'ataphu ɔnu-abata ɔlo-ɛkwa ono; mbu ɔlo-ɛkwa-ndzuko ono.

⁷L'i pata eze gbamugbamu ono sube lɛ mgbaka ɔlo-ɛkwa-ndzuko ono; yɛ ɔru-ngweja ono, bu ɛka ee-gweje ngweja-akpɔ-ɔku ono; kuru mini ye iya.

⁸L'i chita ɛkwa ɔma-unuphu ono gude kobuta ɔma-unuphu mgburugburu; wotakwapho ɛkwa ɔnu-abata ɔma-unuphu ono kochite ɔnu-abata iya.

⁹L'i wota manɔ ono, aa-wu l'ishi ono; wua l'ɔlo-ɛkwa ono; yɛ iphemiphe, nɔkota iya nu; shi nno doo yɛ iphemiphe, nɔ iya nu nsɔ; g'ɔ du nsɔ.

¹⁰L'i wukwapho ɔru-ngweja ono, bu ɛka ee-gweje ngweja-akpɔ-ɔku ono manɔ; yɛ ngwa iya g'ɔ ha; shikwapho nno doo ya nsɔ; g'ɔ buru iphe, du nsɔ shii.

- 11L'i wukwapho eze gbamugbamu ono; yee okpa iya manu; shi nno doo ya nsọ.
- 12“L'i duta Eronu; yee unwu iya bya l'onu-abata ulo-ekwa-ndzuko ono; wua phe ehu.
- 13L'i chita uwe ono, du nsọ ono yee Eronu; wua ya manu l'ishi gude doo ya nsọ; k'ophu oo-buru onye uke; jeeru mu ozi.
- 14L'i dutakwapho unwu iya yeshia phe uwe mgbalanu phe.
- 15L'i wua phe manu l'ishi g'i wuru nna phe; g'ephe buru ndu-uke jeeru mu ozi. Manu ono, ii-wu phe l'ishi ono e-me phe; g'ephe buru ndu-uke; e -shi l'ogbo sweru ogbo.”
- 16Mosisu tuko iphemiphe mekota ge Chipfu turu iya onu g'o mee ya.
- 17O be l'apha k'ebo le mboku, onwa mbu furu; e woru ulo-ekwa ono kpobe.
- 18Mosisu woru enya aka aa-kpobechaa mgbo ulo-ekwa ono; waa itso iya; pfubegbaa; bya akpobe iya mgbo ono; bya eye iya iphe ono, ee-gude swebushia le mgbo ono; bya kpobekwa iya pho itso ono; shi nno kpobe ulo-ekwa ono teke ono.
- 19O wota ekwa ono phushi l'eli ulo-ekwa obu; bya achita iphe phu-chite ulo-ekwa ono, bu iya bu ge Chipfu suru g'e mee ya.
- 20O pata ekemu ono ye l'ime okpoko ono; woru mgboro iya ono pyochaa l'okpoko ono; bya apata opfu okpoko ono, aa-nodu apfu ugwo iphe-eji ono; sibe iya l'eli.
- 21O gbete teke ono pata okpoko ono pabata l'ulo-ekwa ono; bya eworu ekwa ono kobuta okpoko-ekemu ono, bu iya bu ge Chipfu turu iya onu g'o mee ya.
- 22Mosisu bya apata teburu ono sibe l'ulo-ekwa-ndzuko ono l'uzo isheli; l'okotazu ekwa, e gude kobuta aka-kakota-adu-nsọ ono.
- 23O woru buredi ono dobe l'ataphu Chipfu, bu iya bu ge Chipfu turu iya onu g'o mee ya.
- 24O pata iphe ono, aapfubeje oroku ono sibe l'ulo-ekwa-ndzuko ono l'uzo ndohali; yeleteburu ono ghagbabe iphu;
- 25bya anodu l'iphu Chipfu l'eka ono mezichaa oroku, du iya nu, bu iya bu ge Chipfu turu iya onu g'o mee ya.
- 26O patakwapho oru-ngweja ono, e meru le mkpola-ododo ono sibe l'ataphu ekwa ono, e gude kobuta aka-kakota-adu-nsọ ono;
- 27bya akpo unwu-isensu oku l'oru-ngweja ono, bu iya bu ge Chipfu ziru iya g'o mee ya.
- 28O wota ekwa ono gude kochite onu-abata ulo-ekwa ono;
- 29bya eworu oru-ngweja ono, bu aka ee-gweje ngweja-akpo-oku ono sibe le mgboru onu-abata ulo-ekwa-ndzuko ono; bya egweeru Chipfu ngweja-akpo-oku; yee ngwejanri l'oru-ngweja ono, bu iya bu ge Chipfu turu iya ekemu g'o mee ya.

³⁰Ọ bya apata eze gbamugbamu ono s̄be l̄ mgbaka ụlo-ẹkwa-ndzukọ ono; ȳe ọru-ngweja ono, b̄ ẹka ee-gweje ngweja-akpo-ọku ono.

³¹Ọ b̄ru eze gbamugbamu ono b̄ Eronu ȳe unwu iya; waa Mosisu gude kw̄o ẹka; ȳe ọkpa.

³²Ọ n̄du abujeru; ẹphe -mee g'ẹphe bahu l'ulo-ẹkwa-ndzukọ ono; ọzoo g'ẹphe kp̄iritaru ntse l'ọru-ngweja ono, b̄ ẹka eegweje ngweja-akpo-ọku ono; ẹphe akw̄adaa ẹka ȳe ọkpa, b̄ iya b̄ ḡ Chipfu t̄ru ph̄ ekemu g'ẹphe meje iya.

³³Mosisu bya ach̄itakwapho ẹkwa ọma-unuphu ono gude kobuta ọma-unuphu ụlo-ẹkwa ono ȳle ọru-ngweja ono mgburugburu; wotakwapho ẹkwa ọnu-abata ọma-unuphu ono kochite ọnu-abata iya. Ọ b̄ru iya b̄ l̄ Mosisu ejeghee ozi ọbu.

Akpabiri Chipfu

³⁴Noo ya; urwukpu ono bya aso-kpute ụlo-ẹkwa-ndzukọ ono; akpabiri Chipfu bya eji ụlo-ẹkwa ono ejiji.

³⁵Ọphu Mosisu adukpodanu ike ye ishi l'ulo-ẹkwa-ndzukọ ono; noo k̄le urwukpu so-kputeru iya; t̄me akpabiri Chipfu ji ụlo-ẹkwa-ndzukọ ono ejiji.

³⁶Ndu Ízurelu n̄du abujeru; teke urwukpu ono wukahuru l'eli ụlo-ẹkwa ono; ẹphe akwalia.

³⁷Teke urwukpu ono atugbuduru; ẹphe an̄du l'ẹka ẹphe n̄ gbiriri jas̄ mb̄oku, urwukpu ono a-tugbu.

³⁸Ọo ya b̄; urwukpu Chipfu, n̄ aso-kputaj̄e ụlo-ẹkwa ono l'eswe; teke o beru l'enyashi l'o nwuahaa g'ọku l'ataphu ndu Ízurelu. Ọ b̄ru g'o mekotaru b̄ ono jas̄ ndu Ízurelu jeghee ije ph̄e ono.

Ndu Uke

Ndu Uke 1

Ngweja-akpo-oku

- ¹Chipfu gbẹ l'ulo-ekwa-ndzuko kua Mosisu oku bya epfuru yeru iya; su iya:
- ²“Waa opfu, ii-pfuru nu unwu Izurelu baa: O -duru g'unu ha onye gude ngweja abya anu Chipfu; g'onye ono jejekwa l'eka eswi; ozoo aturu me eghu iya doru je akputa nanu gude bya anu iya.
- ³“O -buru onye bu eswi be o gude abya egweru mu ngweja-akpo-oku; g'onye ono kputakwa oke-eswi, adudu eka iphe mebyiru iya; bya anu l'onu-abata ulo-ekwa-ndzuko; k'ophu Chipfu a-natakwanu iya.
- ⁴G'onye ono byabe anu ono, o nuru g'o buru ngweja-akpo-oku ono eka l'ishi. Aa-nata iya g'o nochia enya onye ono; buru iphe, ee-gude pfua ugwo iphe-eji, onye ono meshiru.
- ⁵G'onye ono nodu l'iphu Chipfu gbua oke-eswi ono. Unwu Eronu, bu ndu-uke egude mee oke-eswi ono phephee oru-ngweja mgburugburu; mbu l'onu-abata ulo-ekwa-ndzuko ono.
- ⁶G'o swakwaa anu ono akpo; bushia anu iya iphiriba iphiriba.
- ⁷Unwu Eronu ono, bu onye uke ono abya akpobe oku l'oru-ngweja ono; bya eworu nkụ doo byemubyemu l'oku ono.
- ⁸Ndu uke ono, bu iya bu unwu Eronu ono abya eworu iphiriba iphiriba anu ono; mekpoo ishi iya; yee ebà iya doo le nkụ ono, e doru l'oku ono, a kpoberu l'oru-ngweja ono.
- ⁹Iphe-epho iya; waa eka iya; me okpa iya be onye ono e-gude mini saa asasa. E -mechaa; onye uke atuko iphemiphe ono kpo oku l'oru-ngweja ono; g'o buru ngweja-akpo-oku; mbu ngweja, aakpo oku anu Chipfu, mkpo iya du Chipfu ree.
- ¹⁰“O -buru l'onye obu bu eghu; ozoo aturu be o gude bya egwe ngweja-akpo-oku; g'o bukwaru iphe, oo-wota bu okee ya, adudu eka iphe mebyiru iya.
- ¹¹G'onye ono gha iphu l'uzo isheli woru iphe-ngweja ono gbua le mgbureku oru-ngweja ono l'ataphu Chipfu. Unwu Eronu, bu ogbo-uke eworu mee anu ono phephee mgburugburu oru-ngweja ono.
- ¹²Onye ono eworu anu ngweja ono bushia iphiriba iphiriba. Onye uke abya achiru yele ishi iya; yee ebà iya doo byemubyemu l'eli nkụ ono, no l'oku ono, a kpoberu l'oru-ngweja ono.
- ¹³Iphe-epho iya; waa eka iya; yee okpa iya be onye ono e-gude mini saa asasa. Onye uke atuko iphemiphe ono kpo oku l'oru-ngweja ono; g'o buru ngweja-akpo-oku; mbu ngweja, aakpo oku anu Chipfu, mkpo iya du Chipfu ree.

¹⁴“O -buru l'oo iphe furu ñkù bẹ onye obu gude bya egweru Chipfu ngweja-akpo-oku obu; g'o bukwaru ndo; ozoo kparaka bẹ oo-gude bya.

¹⁵Onye uke anwuta iya bya l'oru-ngweja ono; bya aswi-bufu iya ishi woru iya kpoo oku l'oru-ngweja onoya. L'o haa mee ya g'o lashia l'aguga oru-ngweja ono.

¹⁶L'o bya achifuta iya okpa-nri; bya anmashia ya eba bya eworu iya wushi l'ibiya k'uzo enyanwu-awawa oru-ngweja ono; mbu l'uzo eka ono, aawushije ntu ono.

¹⁷L'o gbẹ lẹ ñkù enu ono lajaa ya ebo g'o gheru onu; ole g'o to lajashia iya ebo g'o nodu iche iche. Onye uke abya eworu iya kpoo oku l'oru-ngweja; mbu l'eli nku ono, e doru l'eli iya ono; g'o buru ngweja-akpo-oku; mbu ngweja, aakpo oku anu Chipfu, mkpo iya du Chipfu ree.”

Ndu Uke 2

Ngweja-nri

¹“O -buru onye gude ngweja-nri abya agwa Chipfu; g'onye ono gude ukpokutu iphe gude bya. L'o gbashi iya manu; yekwa iya pho unwu-isensu.

²O -mechaa ya nno l'o woru iya nu unwu Eronu, bu ndu-uke. G'onye uke woru ukpokutu iphe ophu jiru mkpoji-eka a gbashiru manu; bya eworu iphe, bu unwu-isensu, e yeru iya kpoo oku l'oru-ngweja ono; g'o nochia enya ngweja-nri ono; g'o buru iphe, aakpo oku anu Chipfu, mkpo iya du Chipfu ree.

³Ngweja-nri ono ophu ghuduru nu a-buwaro ke Eronu yee unwu iya. O du nsu shii kele o shi le ngweja, aakpo oku anu Chipfu.

⁴Teke o bu ngweja-nri, e gheru le ntu-oku be i wotaru; g'o bukwaru akara, e yeduru iphe, ekoje buredi, e meru l'ukpokutu witi, a gworu le manu; odumeka l'o buru echambekee, e yeduru iphe, ekoje buredi, a gworu le manu.

⁵Teke o bu le ngweja ngu bu ngweja-nri ophu e gheru le mbeji; g'o bukwaru ukpokutu ereshi, a gworu le manu; mbu ereshi, e yeduru iphe, ekoje buredi.

⁶Gwepyashia ya egwepyashi; l'i bya agbashi iya manu l'eli; kele o bukwa ngweja-nri.

⁷Teke o bu le ngweja ngu bu ngweja-nri, e shiru l'ite; g'o bukwaru ukpokutu ereshi, e yeru manu be ii-gude mee ya.

⁸O buru ngweja-nri, dugbaa egube ono be unu e-gudeje byapfuta Chipfu. Teke e gwetaru iya bya anu onye uke; l'o gude iya bya l'oru-ngweja ono.

⁹Onye uke ono e-wota ophu a-no-chi enya ngweja ono je akpoo oku l'oru-ngweja; g'o buru ngweja, aakpo oku anu Chipfu, mkpo iya du Chipfu ree.

¹⁰Ngweja-nri ono ophu phoduru nu buwaa ke Eronu yee unwu iya. O du nsu shii kele o shi le ngweja, aakpo oku anu Chipfu.

11“G'ò tọ dukwa ngweja-nri, unu gude abya agwa Chipfu, unu e-yeje iphe, ekoje buredi. Mbụ-a; g'ò tọ dukwa iphe, e yeru iphe, ekoje buredi; ọzoo manụ-ẹnwu, unu e-ye lẹ ngweja, unu akpọ ọku anụ Chipfu.

12Unu e-yekọbeje iya lẹ ngweja akpuru mbụ, iphe, unu kọru l'opfu unu mịtaru abya anụ Chipfu. Obenu lẹ-a; g'a ta kpọkwa iya ọku l'ọru-ngweja g'ò bụru ngweja, mkpọ iya dụ Chipfu ree.

13G'onye gude ngweja-nri abya agwa Chipfu yejekwa iya únú. Ọphu i kwejekwa g'únú ọgbandzu Chileke ngu ono ta adu lẹ ngweja-nri ngu. Mbụ-a; yejekwa únú l'iphe, bụkpoo ngweja, iigwekpoo egwegwe.

14“Ọ -bụru l'unu gude akpuru mbụ, iphe, unu kọru l'opfu unu mịtaru gude abya egweru Chipfu ngweja-nri; unu gbutakwa ishi ereshi, dukwadu oyii; hụa ahùhù gude gwee ngweja-nri ọbu; unu tsukwaa ya etsutsu.

15Unu gbashikwa iya manụ; yekwa iya phọ ùnwù-isensu; kele ọ bụkwa ngweja-nri.

16G'onye uke hata nwọphu a-nọ-chi ẹnya ngweja ono kpoo ọku; mbụ iphe, shi l'ereshi ono, e tsuru etsutsu gbashi iya manụ ono; mekpoo iphe, bụ ùnwù-isensu, e yeru iya. Ọ buakwaa ngweja, aakpọ ọku anụ Chipfu.”

Ndu Uke 3

Ngweja-ẹhu-guu

1“Ọ -bụru onye gude ngweja-ẹhu-guu abya agwa Chipfu; ọ -bụru oke-eswi; ọzoo ne iya bẹ o gude abya agwa Chipfu ọbu; g'onye ono gudekwa ọphu adudu ẹka iphe mebyiru iya.

2G'onye ono woru ẹka byabẹ iphe ngweja ono l'ishi. O -mechaa nno l'o woru iya gbua l'ọnu-abata ọlo-ẹkwa-ndzukọ. E -gbuchaa ya; unwu Erọnu, bụ ndu-uke egude mee-iphe ono je ephephee ọru-ngweja mgburugburu.

3L'ọ gbẹ l'iphe ngweja-ẹhu-guu ono bota anụ, aa-kpọ ọku nụ Chipfu. Iphe, aa-bota bụ ẹba, kwechiru iphe-ẹpho iya; waa ọphu nọkota l'iphe-ẹpho iya l'ọphu.

4L'ọ bọtakwapho àkpùrù iya ẹphenebo yekobe iya; waa ẹba, dụ iya nụ, bụ ọphu nọ l'uzo ose iya. G'ò tuko anya iya ẹphe l'àkpùrù iya ono bọfuchaa.

5G'unwu Erọnu woru iya kpoo ọku l'ọru-ngweja l'eli ngweja-akpọ-ọku ono, nọ l'eli nkụ, e doru l'ọku ono; g'ò bụru ngweja, aakpọ ọku anụ Chipfu, mkpọ iya dụ Chipfu ree.

6“Ọ -bụru onye bụ aturu; ọzoo eghe bẹ o gude abya anụ Chipfu ngweja-ẹhu-guu; ọ -bụ okee ya-o; ọzoo nyee ya-o; g'ò nukwa ọphu adudu ẹka iphe mebyiru iya.

7Ọ -bụru nwaturu bẹ onye ono kpụ bya anụ ke ngweja ọbu; g'ò kpukwaru iya bya l'iphu Chipfu.

⁸G'onye ono woru ẹka byabẹ iphe ngweja ono l'ishi; woru iya gbua l'onu-abata ọlo-ẹkwa-ndzukọ. E -mechaa; unwu Eronu egude mee anu ono je ephephee oru-ngweja mgburugburu.

⁹Onye ono abya agbẹ l'anụ ngweja-ẹhu-guu ono buta anụ, ee-gude gweeru Chipfu ngweja, aa-kpọ ọku nụ iya. Ẹba iya g'ọ ha bẹ ee-hetagbu; teme l'a gbẹ lẹ mgboru ọkpụ okpurukpu iya gbujita upfumọdzu iya l'ophu, bu ẹka ẹba aduje ono. Ẹba, kwechiru iphe-ẹpho iya; waa ophu nọkota l'iphe-ẹpho iya bẹ ee-hetafua.

¹⁰L'ọ bọtakwapho àkpùrù iya ẹphenebo yekọbe iya; waa ẹba, dọ iya nụ, bu ophu nọ l'uzo ose iya. G'ọ tuko anya iya; ẹphe lẹ àkpùrù iya ono bọfuchaa.

¹¹Onye uke ewota iya je akpọoru Chipfu ọku l'oru-ngweja; kele o bu nri; mbu ngweja, aakpọ ọku anụ Chipfu.

¹²“O -buru onye bu eghu bẹ o kpụ bya egwe ngweja ọbu; g'onye ono kpụtakwa iya phọ bya l'iphu Chipfu.

¹³G'onye ono wokwarupho ẹka byabẹ eghu ono l'ishi; woru iya gbua l'ataphu ọlo-ẹkwa-ndzukọ. Unwu Eronu eworu mee ya je ephephee l'oru-ngweja mgburugburu.

¹⁴Iphe, oo-wofuta l'anụ ono gude gweeru Chipfu ngweja, aakpọ ọku bu ẹba, kwechiru iphe-ẹpho iya; me ophu nọkota l'iphe-ẹpho iya.

¹⁵L'ọ bọtakwapho àkpùrù iya ẹphenebo yekọbe iya; waa ẹba, dọ iya nụ, bu ophu nọ l'uzo ose iya. G'ọ tuko anya iya ẹphe l'akpùrù iya ono bọfuchaa.

¹⁶Onye uke ewota iya je akpọ ọku l'oru-ngweja; g'ọ buru nri, e gweru ngweja, aakpọ ọku, mkpọ iya dọ Chipfu ree. Ẹba anụ l'ophu bukota ke Chipfu.

¹⁷Ekemu-a bu ekemu, a-nọ; e -shi l'ogbo sweru ogbo l'eka bukpo ẹka unu bu: Unu ta atajekwa ẹba-iphe; ozo me ya.”

Ndu Uke 4

Ngweja-iphe-ẹji

¹Tobudu iya bu; Chipfu su Mosisu:

²“Waa iphe, ii-pfuru ndu Izurelu baa: Teke o duru onye meru iphe-ẹji l'amagama; mee iphe, Chipfu turu ekemu su g'e te emeshi.

³“O -buru onye uke, a wuru manụ l'ishi meru iphe-ẹji ọbu; shi nno meta ikpe-anmanma kpua oha l'ophu; g'onye ono kpụtakwa oke-eswi, adudu ẹka iphe mebyiru iya; gude bya ewotaru Chipfu g'ọ buru ngweja-iphe-ẹji k'iphe-ẹji ono, o meru ono.

⁴G'onye ono kputa oke-eswi ono gude bya l'iphu Chipfu l'onu-abata ọlo-ẹkwa-ndzukọ. L'o woru ẹka byabẹ oke-eswi ono l'ishi; gbua ya l'iphu Chipfu l'eka ono.

⁵G'onye uke ono, a wuru manụ l'ishi ono haru meta mee oke-eswi ono gude bahu l'ime ọlo-ẹkwa-ndzukọ.

- ⁶L'ò tsee mkpushi-eka le mee ono phee mgbo esaa l'ataphu Chipfu; mbu l'ataphu ekwa ono, du nsò ono.
- ⁷Onye uke ono abya emetawaphò mee anu ono wuru ye le mpu phò, e mobegbaaru l'oru-ngweja unwu-isensu; mbu oru-ngweja ono, no l'ataphu Chipfu l'ulo-ekwandzuko. L'ò pata mee ophu phoduru nu je awuru ye l'okpali oru-ngweja eka eegweje ngweja-akpo-oku, no l'onu-abata ulo-ekwandzuko.
- ⁸"L'ò bya eheshikota iphe, bu eba, du l'oke-eswi ono, e gude egwe ngweja-iphe-eji ono; mbu eba, kwechiru iphe-epho iya; mekpoo eba, kweru iphe-epho iya ono l'ophu.
- ⁹L'ò bya abofu iya akpuru iya ephenebo; bya eheshikota iya eba, du iya nu, bu ophu no l'uzo ose iya. G'ò tuko anya iya; ephe l'akpuru iya ono bofuchaa.
- ¹⁰Oo egube ono, eeheshije eba l'oke-eswi, e gude egwe ngweja-ehu-guu ono bu g'eeheshikwaphò owa. E -mechaa ya nno; onye uke ono ewota iya je akpoo oku l'oru-ngweja eka eegweje ngweja-akpo-oku.
- ¹¹Akpo oke-eswi ono; me anu iya l'ophu; je akpaa l'ishi iya; me eka iya; me okpa iya; waa iphe-epho iya; me nshi iya;
- ¹²mbu anu eswi ono g'ò hakota be oo-gude lufu l'eka ndu Izurelu kpobegbaaru ulo-ekwa phe. G'ò gude iya je l'eka e te merwushiduru emerwushi; mbu l'eka aawushije ntu ono; je akpoo ya oku l'eli ntu ono.
- ¹³"Teke o bu l'oo ndu Izurelu l'ophu meru iphe-eji l'amagama; shi nno mee iphe, Chipfu turu ekemu su g'e te emeshi; obeta o buru l'ephe ta amadu iphe, meru nu; be ikpe nmakwaru phe.
- ¹⁴Teke o bukwanu l'iphe, ephe meru be ephe byaru amaru; ge ndu Izurelu kputakwa nwa oke-eswi gude bya l'iphu ulo-ekwandzuko bya egweeru Chileke ngweja-iphe-eji ono.
- ¹⁵Ge ndu bu ogerenya ndu Izurelu byabe oke-eswi ono eka l'ishi l'ataphu Chipfu; l'e woru nwa oke-eswi ono gbua l'eka ono.
- ¹⁶G'onye uke, a wuru manu l'ishi meta mee oke-eswi ono gude bahu l'ulo-ekwandzuko;
- ¹⁷tsee mkpushi-eka le mee anu ono; phee mgbo esaa l'ataphu Chipfu; mbu l'iphu ekwa ono.
- ¹⁸"L'ò metawaphò mee ono wuru ye le mpu, e moberu l'oru-ngweja; mbu oru-ngweja ono, no l'ataphu Chipfu l'ulo-ekwandzuko ono. L'ò pata mee ono ophu phoduru nu je awuru ye l'okpali oru-ngweja eka eegweje ngweja-akpo-oku, bu ophu no l'onu-abata ulo-ekwandzuko.
- ¹⁹Eba anu ono l'ophu be oo-heshikota kpoo oku l'oru-ngweja ono.

- 20** Oo ẹpho g'o meru oke-eswi ono, e gude gwee ngweja-iphe-ẹji ono bu g'oo-mekota oke-eswi owa-a. Oo ẹgube ono bu g'onye uke ono e-shi pfiaru phe ugwo iphe-ẹji obu, ẹphe meru obu; k'ophu aa-gukwanuru phe nvu.
- 21** L'o pata anu oke-eswi ono gude lufu l'azu ẹka ndu Izurelu kpobegbaaru ulo-ekwa phe je akpo oku g'a kporu oke-eswi k'ivuzo pho. Ono aburu ngweja-iphe-ẹji oha l'ophu.
- 22** “O -buru onye-ishi meru iphe-ẹji l'amagama; mbu mee iphe, Chipfu, bu Chileke iya turu ekemu su g'e te emeshi; be ikpe nmaakwaru onye obu.
- 23** O -buru l'iphe-ẹji ono, o meru be e meru; o maru; iphe, oo-wota bu mkpi, adudu ẹka iphe mebyiru iya g'o buru ngweja iya.
- 24** L'o byabe mkpi ono ẹka l'ishi woru iya gbua l'eka eegbuje anu, e gude egwe ngweja-akpo-oku l'ataphu Chipfu. O kwa ngweja-iphe-ẹji be o bu.
- 25** G'onye uke tsee mkpushi-eka le mee anu ono tee le mpu, e mobegbaaru l'oru-ngweja ẹka eegweje ngweja-akpo-oku. L'o bya eworu mee ono, phoduru nu ono wuru ye l'okpali oru-ngweja obu.
- 26** Eba anu ono l'ophu be oo-heshikota kpo oku l'oru-ngweja; g'a kporu ke ngweja-ehu-guu pho. Onye uke eshi nno pfua ugwo iphe-ẹji obu, onye ono meru obu; g'eeshi nno gukwanaaru onye ono nvu l'iphe-ẹji iya obu.
- 27** “O -buru l'o duru onye Izurelu mmanu ozo, meru iphe-ẹji l'amagama; mbu mee iphe, Chipfu turu ekemu su g'e te emeshi; be ikpe nmaakwaru onye obu.
- 28** O -buru l'iphe-ẹji ono, o meru ono be e meru; o maru; iphe, oo-wota bu nyee egu, adudu ẹka iphe mebyiru iya; g'o buru ngweja k'iphe-ẹji ono, o meru ono.
- 29** G'o byabe ẹka l'ishi anu ono; woru iya gbua l'eka eegbuje anu, e gude egwe ngweja-akpo-oku.
- 30** G'onye uke tsee mkpushi-eka le mee anu ono tee le mpu, e mobegbaaru l'oru-ngweja ẹka eegweje ngweja-akpo-oku. L'o bya eworu mee ono, phoduru nu ono wuru ye l'okpali oru-ngweja obu.
- 31** L'o bya eheshikota eba, no l'anu ono; mbu egube ono, eemeje ke ngweja-ehu-guu ono. Onye uke akpo ya oku l'oru-ngweja; g'o buru ngweja, mkpo iya du Chipfu ree; g'o shi nno pfua ugwo iphe-ẹji, onye obu meru; k'ophu aa-gukwanuru iya nvu.
- 32** “Teke o bu aturu be onye ono gude bya anunu ke ngweja-iphe-ẹji obu; g'onye ono gudekwa ada aturu, adudu ẹka iphe mebyiru iya.
- 33** G'o wokwarupho ẹka byabe l'ishi anu ono; woru iya gbua; g'o buru ngweja-iphe-ẹji. Eka oonodu gbua ya bu ẹka eegbuje anu, e gude egwe ngweja-akpo-oku.
- 34** G'onye uke tsee mkpushi-eka le mee anu ono tee le mpu ono, e mobegbaaru l'oru-ngweja ẹka eegweje ngweja-akpo-oku. L'o bya eworu mee ono, phoduru nu ono wuru ye l'okpali oru-ngweja obu.

³⁵L'ò bya eheshikòta ẹba, nò l'anù ono; mbù ẹgube ono, eemeje kẹ ngweja-ẹhu-guu ono. Onye uke akpọo ya ọku l'ọru-ngweja; g'ò buru ngweja, mkpọ iya dọ Chipfu ree; g'ò shi nno pfula ụgwo iphe-ẹji, onye ọbu meru; k'ọphu aa-gukwanuru iya nvu.”

Ndu Uke 5

Iphe, bụ nemadzu -mee ya; l'ò gwee ngweja-iphe-ẹji

¹“Ọ -buru lẹ nemadzu meru iphe-ẹji; kẹle ọ humaru iphe, nwuru nu; ọzoo l'e meru ọ maru iphe, nwuru nu; a raaru iya ọha arara g'onye humaru nu bya agbaa ekebe; ọphu o jeduru agba ekebe ọbu; bẹ ẹjo-iphe ono, o meru ono tukowaru onye ono l'ishi.

²“Ọzoo l'ò duru onye denyiru ẹka l'iphe, aaso nsọ; mbù l'iphe, dọ g'odzu anụ-ẹgbudu, aaso nsọ; ọzoo l'ọo odzu iphe-edobe, aaso nsọ; ọzoo l'odzu iphe, akpu wuruwuru l'ali, aaso nsọ; bẹ onye ọbu buakwaa onye aaso nsọ; m'obeta ọphu ọ tọ madu l'ò denyiru iya ẹka; bẹ ọ buakwaa onye ikpe nmaru.

³“Ọzoo l'ò denyiru ẹka l'iphe, aaso nsọ, shi nemadzu l'ẹhu; g'iphe, aaso nsọ ọbu aduhabe, bụ iphe, emeje gẹ nemadzu buru onye aaso nsọ; m'obeta ọphu ọ madu l'ò denyiru iya ẹka; bẹ ọo-bukwaru onye ikpe nmaru mẹ ọ maerupho.

⁴“Onye ariduru iphe ọriri; ọ pfula-bilihuẹpho rịa angu sù lẹ ya e-me iphe; m'ò bụ iphe, dọ ree; m'ò bụ ẹjo iya; ọ tọ dukpodaa m'obeta ọ buru ẹgube gunu bẹ onye ọbu riru angu ememe; l'ẹbe o vuadaru ụzo rịa ya ọriri; bẹ ikpe nmaakwaru iya; m'ò maerupho.

⁵“Ọ -buru l'ò duru onye meru iphe-a, a gushiru-a; shi nno mee; ikpe nma iya; g'onye ono pfukwaa iphe, o meru.

⁶G'onye ono, mesweru nu ono shi l'ẹka eghu iya mẹ aturu iya dọru; kpata ada aturu; ọzoo ada eghu bya anụ Chipfu g'ò buru ngweja-iphe-ẹji. Onye uke eshi nno pfula ụgwo iphe-ẹji ọbu, onye ono meru ọbu.

⁷“Ọ -buru l'ẹka onye ọbu te erwuduru lẹ nwaturu; l'ò wotaru Chipfu ndo labọ; ọzoo kparaka labọ k'iphe-ẹji ono, o meru ono. Gẹ nanu buru kẹ ngweja-iphe-ẹji; ọphuu aburu kẹ ngweja-akpọ-ọku.

⁸G'onye ono chiru unwu-enu ono je achie onye uke. Onye uke ono evuru ụzo gwee ọphu bụ ngweja-iphe-ẹji. Ọo-swikwo iya olu; ọle g'ò to bufukwa iya ishi.

⁹L'ò meta mee ngweja-iphe-ẹji ono phee lẹ mgbureku ọru-ngweja ono; haa mee ya ọphu phoduru nu g'ò lwashia l'okpali ọru-ngweja ono. Ọ kwa ngweja-iphe-ẹji bẹ ọ bu.

¹⁰L'ò bya eworu enu k'ẹbo gwee ngweja-akpọ-ọku; mee ya g'eemeje iya; shi nno gude iya pfula ụgwo iphe-ẹji, onye ọbu meru; l'a guaru iya nvu.

¹¹“Ọle ọ -bukwanuru l'onye ono bẹ ta adudu ike gbata ndo labọ; ọzoo kparaka labọ; g'onye ono wota nkeru-iri nkweka ukpokutu ereshi; g'ò buru ngweja-iphe-ẹji k'iphe-ẹji ono, o meru. G'ò to yekwa iya manu; ọphu o yekwa iya unwu-isensu; kẹle ọo ngweja-iphe-ẹji bẹ ọ bu.

¹²G'onye ono gude iya wojeru onye uke. G'onye uke hata iya ophu jiru mkpoji-eka g'o nochia enya ngweja ono; l'o kpoo ya oku l'eli oru-ngweja; l'eli ngweja, aakpo oku anu Chipfu; kele oo ngweja-iphe-eji.

¹³O buru; e -mee ya nno; l'o buru iya bu l'onye uke apfua ugwo iphe-eji, onye obu meshiru; l'a guaru iya nvu. Iphe-ngweja ono ophu phoduru nu aburu k'onye uke ono; egube eemeje ke ngweja-nri ono.”

Ngweja-apfu-ugwo

¹⁴Chipfu bya epfuru yeru Mosisu su iya:

¹⁵“O -duru onye mesweru iphe; mbu l'o meru iphe-eji l'amagama; ophu o nuduru Chipfu iphe, gbaru iya nu; g'onye ono shi l'eka egbu iya me aturu iya doru; kputa ebili, adudu eka iphe mebyiru iya; bya anu Chipfu g'o buru ngweja-apfu-ugwo. G'e gudekwa erwa shekelu k'eze-ulo Chileke maru aswa ebili ono. Oo ngweja-apfu-ugwo be o bu.

¹⁶G'onye ono mezia iphe ono, o mesweru ono; kele o to nuduru Chipfu iphe, gbaru iya nu; l'o yekwakwa iya pho oke lanu l'uzo ise l'iphe ono; tuko iya chiru nu onye uke. Onye uke ono egude ebili pho gwee ngweja-apfu-ugwo; shi nno pfua ugwo iphe-eji, onye ono meru; l'a guaru iya nvu.

¹⁷“O -duru onye meru iphe-eji; mbu l'o meru iphe, Chipfu turu ekemu su g'e te mejeshi; m'obeta ophu o madu; be ikpe nmaakwaru iya; teme ejo-iphe ono tukoru onye ono l'ishi.

¹⁸G'onye ono shi l'eka egbu iya me aturu iya doru; kputakwa ebili, adudu eka iphe mebyiru ya; g'o buru ngweja-apfu-ugwo. G'e gudekwa mkpola-ochaa k'eze-ulo Chileke maru aswa ebili ono. G'o nu iya onye uke g'o gude iya pfua ugwo amagama ono, bu iphe ono, o meru; ophu o madu ono; l'a guaru iya nvu.

¹⁹O kwa ngweja-ikpe-anmanma be o bu; kele ikpe nmaru onye ono l'iphu Chipfu.”

Ndu Uke 6

¹Tobudu iya bu; Chipfu bya epfuru yeru Mosisu su iya:

²“O -duru onye meru iphe-eji; shi nno meswee Chipfu; mbu l'o dzuru nemadzu ibiya uka l'iphe, a nuru iya su g'o dobe; ozoo g'o leta enya; ozoo l'o naru nwibe iya nfu; ozoo l'o riru nwibe iya urwu;

³ozoo l'o turutaru iphe, tuphahuru etuphahu; ophu o kwedu le ya humaru iya; ozoo l'onye ono kpapyaberu iphe, o meru gua enwa; ozoo l'onye ono meru iphe, dugbaa egube ono; shi nno mee iphe-eji;

⁴onye ono, meru iphe-eji ono; shi nno meta iphe, ikpe nmaru iya; bu iphe, oo-me bu g'o wolata iphe, o nataru le nfu; m'o bu ophu o ritaru l'urwu; m'o bu ophu a nuru iya g'o leta enya; o ria ya; m'o bu iphe onye ozo, tuphahuru nu; o turuta iya;

⁵m'ò bụ iphe, dūgbaa ẹgube ono, o meru; ọ kpapyabẹ iya gua ẹnwa. G'onye ono pfukwaa ugwo iphe ono g'ò ha; ẹme l'o wotafua ophu ha g'e kee iphe ono ụzo ise; tukobe iya woru nū onye nwe iphe ono. Mbọku, ọo-tuko iphemiphe ono nū bụ mbọku ono, oo-gude ngweja-apfu-ugwo gude bya anū ono.

⁶Ngweja-apfu-ugwo, oo-gweru Chipfu bẹ oo-wotaru onye uke. G'o shi l'ẹka egbu iya mẹ aturu iya doru kpata ebili, adudu ẹka iphe mebyiru iya. G'e gudekwa mkpola-ochaa k'eze-ulo Chileke maru aswa ebili ono.

⁷Onye uke ono eshi ẹgube ono nọdu l'atatiphu Chipfu pfa ugwo iphe-ẹji, onye ono meru; l'a gukotaru iya nvu l'iphemiphe ono, o meru; ikpe iya nmaru iya ono.”

Ngweja-akpo-oku

⁸Noo ya; Chipfu bya epfuru yeru Mosisu su iya:

⁹“Waa ekemu ii-turu Eronu yee unwu iya bu owa: Ekemu owa-a bu ke ngweja-akpo-oku be a tu-doru iya su: Ge ngweja-akpo-oku nokotajekwa l'oku, du l'oru-ngweja enyashi ophu; jasu ge nchi boh. Oku, no l'oru-ngweja ono enwue ya pho l'eli.

¹⁰Teke o rwuru l'utsu; g'onye uke ono chita uwe iya ono yee; mbu uwe ono, e meru l'oghu ochaa ono. L'o chitakwapho nwiba pho yeada l'ime ehu. L'o bya ekpota ntụ, shi le ngweja-akpo-oku ono, bu ophu oku kepyashiru l'oru-ngweja ono; je asube le mgbureku oru-ngweja ono.

¹¹L'o bya eyefu uwe iya ono; bya achita uwe ozo yee; pata ntụ ono lufu l'azu eka ndu Izurelu kpobegbaaru ulo-ekwa phe; je asube l'eka e merwuduru emerwu.

¹²G'oku ono, no l'oru-ngweja ono nwuekwapho g'oonwu l'eli iya; g'e te menyikwa iya emenyi. G'onye uke yejekwa iya nku l'utsu mbokumboku. L'o bya eworu anu ngweja-akpo-oku doo giriri l'eli iya; l'o kpokwapho eba, shi l'anu ngweja-ehu-guu oku l'eli iya.

¹³G'oku ono nwujeepho l'eli oru-ngweja ono mkpurumkpuru; g'o to nyihujekwa anyihu.”

Ngweja-nri

¹⁴“Waa ekemu le g'ee-gudeje egwe ngweja-nri baa: Oo unwu Eronu a-noduje l'iphu Chipfu gwee ngweja ono; l'iphu oru-ngweja ono.

¹⁵G'onye uke hata ukpokutu ereshi ono, a gworu le manu ono ophu jiru mkpoji-eka; wotakwapho iphe, bu unwu-isensu, e yeru le ngweja-nri ono; je akpo oku l'oru-ngweja ono g'o nochia enya ngweja ono; buru ngweja, mkpo iya du Chipfu ree.

¹⁶E -mechaa; ge Eronu yee unwu iya ria ophu ghuduru nu; ole g'ephe te eyekwa iya iphe, ekoje buredi; ẹme g'eka ephe a-nodu ria ya bukwaru eka du nsọ. G'ephe nodukwa l'oma-unuphu ulo-ekwa-ndzuko ria ya.

¹⁷G'e te eyekobejekwa iya iphe, ekoje buredi; me a -nodu eghe iya. Ono be mu nuru phe g'o buru oke iya nkephe le ngweja, aakpo oku ono. O kakota nsọ ge ke ngweja-iphe-ẹji; waa ke ngweja-apfu-ugwo.

18Onyemonye, bu nwoke l'oshilokpa Erõnu be e-rije iya nu. O buru g'ee-meje iya bu ono jasụ l'ojejoje l'ogbo unu; mbu g'ee-meje iphe, bukpo ngweja, aakpo oku anu Chipfu. Onyemonye, denyiru aka le ngweja ono a-dukwa nsọ.”

19Tobudu iya bu; Chipfu bya epfuru yeru Mosisu su iya:

20“Owa-a bu ngweja, oshilokpa Erõnu e-gudeje gweeru Chipfu mboku, a wuru iya manụ l'ishi: Iphe, ephe e-gudeje bu nkeru-iri nkweka ukpokutu ereshi; g'o buru ngweja-nri ono, eegweje mkpurumkpuru ono. Nkerubo iya be ee-gwe l'utsu; nkerubo iya ophuu buru l'uzenyashi.

21G'e ye iya le mbeji; gwoo ya le manụ ree; woru iya ghee egheghe pabata. L'i bya eworu iya gwepyashia egwepyashi; gude bya egweeru Chipfu; g'o buru ngweja-nri, mkpo iya du Chipfu ree.

22O buru onye ono, bu oshilokpa Erõnu ono, a wuru manụ g'o nochia enya iya buru onye uke ono be e-gwe ngweja ono l'onwiya. Iphe ono bu iphe, a toru okpa iya g'e meje iya jasụ l'ojejoje. G'a kpokotajekwa iya oku g'o ha.

23Mbu l'iphe, bukpo ngweja-nri, onye uke gweru be aa-kpo oku l'ophu; g'e te rikwa iya eriri.”

Ngweja-iphe-eji

24Tobudu iya bu; Chipfu bya epfuru yeru Mosisu su iya:

25“Waa iphe, ii-pfuru yeru Erõnu yee unwu iya baa: Owaa bu ekemu ke ngweja-iphe-eji. Oo l'eka ono, eegbuje anu e gude egwe ngweja-akpo-oku ono bukwapho aka eegbuje anu, e gude egwe ngweja-iphe-eji; mbu l'aa-noduje l'atatiphu Chipfu gbua anu obu. O kwa ngweja, du nsọ shii be o bu.

26G'onye uke, bu iya gweru ngweja-iphe-eji ono rikwaa ya. Oo l'eka du nsọ be onodu ria ya. Eka onodu ria ya bu l'oma-unuphu ulo-ekwa-ndzuko.

27Onyemonye, denyiru aka l'anu ono a-dukwa nsọ. O -buru le mee anu ono daru l'uwe; g'a nodukwa l'eka du nsọ saa uwe obu.

28O -buru ite, a kpuru l'urwa be e gude shia anu ono; g'a tukpokwaa ite ono; teke o bu ite-igwe; g'e huchakwaa ya ehucha; teme l'a saa ya asasa.

29Ndu bu nwoke le ndibe onye uke g'ephe ha l'e-rikota iya. O kwa ngweja, du nsọ shii be o bu.

30Ole-a; g'e te rikwa anu ngweja-iphe-eji, bu ophu e gude mee ya woba l'ulo-ekwa-ndzuko g'e gude pfua ugwo iphe-eji l'eka-du-nsọ. G'a kpokotakwa iya oku.”

Ndu Uke 7

Ngweja-apfu-ugwo

1“Owaa bu ekemu ke ngweja-apfu-ugwo. O kwa iya bu ngweja, du nsọ shii.

- ²Oo l'eka eegbuje anu, e gude egwe ngweja-akpo-oku be ee-gbuje anu, e gude egwe ngweja-apfu-ugwo. L'e phephee mee ya l'oru-ngweja mgburugburu.
- ³Eba anu ono l'ophu be ee-gude gwekotaru Chileke; mbu eba, shi l'upfumodzu iya; me ophu kwechiru iphe-epho iya;
- ⁴waa akpuru iya ephenebo; yee eba, no l'uzo ose iya; waa anya iya be aa-tuko yee akpuru iya pho wota.
- ⁵G'onye uke tukokwa iya kpoo oku l'oru-ngweja; g'o buru ngweja, aakpo oku anu Chipfu. O kwa ngweja-apfu-ugwo be o bu.
- ⁶Iphe, bukpo onye bu nwoke le ndu bu uke l'e-rije iya. O buru l'eka du nsu be aaduje ria ya; noo kele o bu ngweja, du nsu shii.
- ⁷"G'o bukwarupho egube ono, a turu onu g'e meje iphe ngweja-iphe-eji ono bu g'ee-meje ke ngweja-onye-ikpe-nmaru. O buru onye uke, gude iya apfu ugwo iphe-eji ono be e-nweru iya nu.
- ⁸O buru onye uke, gweru nemadzu ngweja-akpo-oku be e-nworu akpo iya.
- ⁹Iphe, bu ngweja-nri, e gheru le ntukoku; ozoo ophu e shiru l'ite; ozoo ophu e gheru le mbeji bukwa onye uke, gweru iya nu nwe iya.
- ¹⁰Teme iphe, bukpo ngweja-nri ophu a gworu le manu; me k'okponku; tukwarupho bukotaru k'unwu Eronu g'ephe ha. G'ephe kejekwa iya enya nhamunha."

Ngweja-ehu-guu

- ¹¹"Owaa bu ekemu ke ngweja-ehu-guu, nemadzu gude bya anu Chipfu.
- ¹²O -buru l'onye obu anu iya g'o gude iya kele Chipfu ekele; be iphe, onye ono e-gude tsoru iphe ngweja ono bu akara, a gworu le manu; ophu e yeduru iya iphe, ekoje buredi; waa echa-mbekee, e meru manu; ophu e yeduru iya iphe, ekoje buredi; waa akara, e meru l'ukpokutu ereshi, a gworu le manu rengurengu.
- ¹³Iphe oo-gweru yekobe le ngweja-ehu-guu ono, o gude ekele Chipfu ono bu akara, e yekoberu iphe ekoje buredi.
- ¹⁴L'ooshije le ngweja ono wota ngguru akara lanu l'iphe ngweja ono iche iche woru gwee g'o buru ngweja, e gweru nu Chipfu. O buru onye e-ri iya nu bu onye uke ono, pheru mee ngweja-ehu-guu pho.
- ¹⁵Anu ngweja-ehu-guu ono, o gude bya ekele Chipfu ekele ono be aa-takota le mboku, a nuru iya Chipfu. G'o to dukwa ophu aa-ha g'o kwaa akwakwa futu utsu.
- ¹⁶"Ole o -bukwanuru le ngweja onye obu bu ngweja, o gude eme iphe, o riburu angu ememe; ozoo ngweja, o turu obu iya onyo abya egwegwe; l'a taa anu ono mboku, a nuru iya. O -buru l'a ta tagbuduru iya; g'a tafufua ya le nchitabohu iya.
- ¹⁷Teke o bu l'o phodukwarupho le mboku k'eto; g'a kpoo ya oku.

18O -buru l'ò dūru anū ngweja-ẹhu-guu ono ọphu a taru le mboku k'eto be aa-jikakwa ngweja obu; ọphu aaguduru iya eyeru onye gweru iya nu. Oo-buru ebyi be o meru; teme onye rikwanuru iya nu be ejo-iphe, o meru a-tu-koru l'ishi.

19“Anu ono ọphu rwuru l'iphe, aaso nsọ; g'a ta takwa iya atata; g'e wokwaru iya kpoo oku. Ole o -bukwanuru l'oo anu ozo; g'onye a ta sodu nsọ taa ya.

20O -duru onye aaso nsọ, taru anu ngweja-ẹhu-guu ke Chipfu; g'e bufukwa iya le ndu nkiya.

21O -bukwarupho l'ò dūru onye denyiru eka l'iphe, aaso nsọ; du g'iphe, aaso nsọ, shi nemadzu l'ehu; ozoo anu, aaso nsọ; ozoo iphe ozo, bugbaa iphe, aaso nsọ; o -mechaa bya ataa anu ono, e gude gweeru Chipfu ngweja-ẹhu-guu ono; g'e bufukwa onye obu le ndu nkiya.”

22Tobudu iya bu; Chipfu bya epfuru yeru Mosisu su iya:

23“Pfuuru ndu Izurelu su phe-a: Unu ta adukwa eba iphe, unu a-taje, du g'eba eswi; ozoo eba aturu; ozoo eba egu.

24Teke o bu eba-anu, nwuhuru l'onwiya; ozoo ọphu anu-egbudu gburu be o -du unu ree; unu gudejekwa iya mee iphe; ole g'unu ba tsokwa iya onu.

25Iphe, bu onye taru eba-anu, e gude gwee ngweja, aakpo oku anu Chipfu; g'e bufukwa iya le ndu nkiya.

26Obetakpoo unu laa awe je eburu; unu te erijekwa mee-iphe; mbu mee enu; ozoo mee anu.

27Onye riru mee-iphe; unu bufukwa onye ono le ndu nkiya.”

28Tobudu iya bu; Chipfu bya epfuru yeru Mosisu su iya:

29“Pfuuru ndu Izurelu su phe-a: Onye gude ngweja-ẹhu-guu abya egweru nu Chipfu; g'o wotakwa eka iya ọphu rwuberu Chipfu gweeru iya;

30mbu g'o gude eka iya wota ngweja, aa-kpo oku nu Chipfu. L'o wota eba iya; waa ndu iya bya anu Chipfu; woru ndu iya ono maa amama l'iphu Chipfu g'o buru ngweja-amama.

31Onye uke ewota eba iya ono kpoo oku l'oru-ngweja. Ole ndu iya bu ke Eronu yee unwu iya.

32G'unu kwata utapfu okpa ekutara anu ngweja-ẹhu-guu unu ono woru nu onye uke ono g'o buru utu, a turu iya.

33Unwu Eronu onye ọphu gude mee anu ono; yee eba iya je egwee ngweja-ẹhu-guu obu be aa-nu utapfu okpa ekutara iya ono g'o buru oke iya nkiya;

34kele mu shiwaa le ngweja-ẹhu-guu ono, ndu Izurelu egwejeru nu mu ono wota ndu iya ono, aamaje amama ono; yee utapfu iya ono, a turu l'utu ono; woru nu Eronu yee unwu iya; g'o buru okiphe, ephe e-ketaje l'eka ndu Izurelu jasu l'ojejoje.

³⁵Owaa bu okiphe, shi le ngweja, aakpoje oku anu Chipfu, bu ophu e doberu g'a nuje Eronu yee unwu iya; eshi mboku, a hofutaru phe iche; g'ephe buru ndu-uke jejeru Chipfu ozi.

³⁶Mboku ono, a wuru phe manu l'ishi ono be Chipfu turu ekemu su ge ndu Izurelu nuje phe aka ono g'o buru okiphe phe; teme o bukwarupho g'aa-nuje iya unwu phe bu ono; e -shi l'ogbo sweru ogbo jasu l'ojejoje.”

³⁷Oo ekemu-a be ee-tsoje me a -nodu egwe ngweja-akpo-oku; waa ngweja-nri; waa ngweja-iphe-eji; waa ngweja-apfu-ugwo; waa ngweja, e gude eme nemadzu g'o buru onye uke; waa ngweja-ehu-guu;

³⁸bu iya bu ekemu ono, Chipfu turu nu Mosisu l'ubvu Sayinayi le mboku ono, o suru ge ndu Izurelu wotaru yebe Chipfu ngweja l'echiegu Sayinayi ono.

Ndu Uke 8

Edobe ndu-uke nsọ

(Awu 29:1-37)

¹Tobudu iya bu; Chipfu bya epfuru yeru Mosisu; su iya:

²“Duta Eronu yee unwu iya; l'i chita uwe ndu-uke ono; bya ewota manu awu l'ishi ono; l'i kputa oke-eswi ono, ee-gude gwee ngweja-iphe-eji ono; waa ebili labo ono; bya apata nkata buredi ono, e yeduru iphe, ekoje buredi ono.

³L'i bya ekuko ndu Izurelu g'ephe ha g'ephe dzukobe l'onu-abata ulo-ekwa-ndzuko.”

⁴Tobudu iya bu; Mosisu bya emekota ge Chipfu ziru iya g'o mee; ndu Izurelu bya edzukobe l'onu-abata ulo-ekwa-ndzuko.

⁵Mosisu bya asu ndu Izurelu ono: “Wakwa iphe, Chipfu suru g'e mee baa.”

⁶Mosisu bya eduta Eronu; yee unwu iya lufuta; bya egude mini wua phe eh.

⁷O wota uwe ime-ehu ono yee Eronu; bya egude ekwa-atu-buta-l'upfu ono kebuta iya. O bya ewota uwe mgbalanu ono yepyabe iya; bya ewota uwe-ukuvu ono yechite l'uwe mgbalanu ono; gude werere ekwa ono, ee-gude tu-buta uwe-ukuvu ono l'upfu ono; gude tu-buta iya.

⁸O wota uwe-okpoma ono yekwaa ya pho; bya ewota ido Urimu; waa Tumimu ye l'uwe-okpoma ono.

⁹O bya eworu okpulishi-ekwa ono kpuke iya; bya eworu iphe ono, du g'okwekpu, e meru le mkpola-ododo ono; mbu okpu ono, du nsọ ono; libe l'okpulishi-ekwa ono l'uzo ataphu, bu iya bu ge Chipfu turu Mosisu ekemu su g'o mee ya.

¹⁰Noo ya; Mosisu bya ewota manu awu l'ishi obu; bya awukota l'ulo-ekwa ono; me iphemiphe, nokota iya nu; shi nno mee ya; o dukota nsọ.

¹¹O meta manu ono phee mgbo esaa l'oru-ngweja ono; mekpoo ngwa iya g'o ha; mekpoo eze gbamugbamu ono; yee okpa iya; shi nno mee ya; o dukota nsọ.

- 12O bya ewota manụ awụ l'ishi ono wụa Erõnu l'ishi gude mee ya; ọ dū nsọ.
- 13No iya; Mòsisu byakwaphọ bya eduta unwu Erõnu futa; bya eworu uwe mgbalanu yee phẹ; bya egude ẹkwa-atụ-butal-upfu webegbaa phẹ; bya ewota okpu ndu-uke kpwebgbaa phẹ l'ishi, bụ iya bụ gẹ Chipfu turu Mòsisu onu g'o mee ya.
- 14O bya akputa oke-eswi ono, ee-gude gwee ngweja-iphe-ẹji ono bya; Erõnu yee unwu iya woru ẹka byabẹ oke-eswi ono l'ishi.
- 15Mòsisu woru oke-eswi ono gbua; bya emeta mee ya gude mkpushi-ẹka iya tee ya lẹ mpu, nọgbaa l'oru-ngweja ono; shi nno swafu nturwu, dū iya nū. O woru ophu ghuduru nū wụa l'okpali oru-ngweja ono; gude mee ya; ọ dū nsọ; pfula ugwo iphe-ẹji; shi nno swafu nturwu, dū iya nū.
- 16Mòsisu bya eheshikọta ẹba, nọ l'iphe-ẹpho iya g'ọ ha; botakwapho anya iya; waa àkpùrù iya ẹphenebo; yee ẹba, nọkota iya nū; woru kpọo oku l'oru-ngweja ono.
- 17O buru anụ oke-eswi ono; waa akpọ iya; yee nshị iya bẹ o gude je akpọo oku l'azu ẹka ndu Ízurelụ kpọberu ụlo-ẹkwa phẹ, bụ iya bụ gẹ Chipfu suru Mòsisu g'o mee ya.
- 18O bya akputa ebili ono, ee-gude gwee ngweja-akpọ-oku ono; Erõnu yee unwu iya bya eworu ẹka byabẹ ebili ono l'ishi.
- 19Mòsisu gbua ebili ono; nakọbe mee ya; pata mee ya ono phedzuru lẹ mgburẹku oru-ngweja ono mgburugburu.
- 20O gbubushia anụ ebili ono mkpirikpu mkpirikpu; mbụ Mòsisu; bya eworu ishi iya yee mkpirikpu mkpirikpu iya ono; mẹ ẹba iya kpọkota oku.
- 21O gude mini saa iphe-ẹpho iya; waa ẹka iya; yee okpa iya asasa; bya atuko anụ ebili ono kpọo oku l'oru-ngweja ono; ọ buru ngweja-akpọ-oku, a nuru Chipfu; mbụ ngweja, aakpọ oku anụ Chipfu, mkpọ iya dū iya ree, bụ iya bụ gẹ Chipfu turu Mòsisu ekemu g'o mee ya.
- 22O bya akputa ebili ophuu. Ebili k'ono bụ ophu ee-gude mee Erõnu; yee unwu iya g'ẹphe buru ndu-uke. Erõnu yee unwu iya je eworu ẹka byabẹ iya l'ishi.
- 23Mòsisu gbua ebili k'ono; haru mee ya meta; tee Erõnu l'atakpa-nchị ẹkutara; mẹ lẹ mkpushi-ẹka ezeke-ẹka ẹkutara; waa lẹ mkpushi-okpa ezeke-okpa ẹkutara.
- 24Mòsisu dufutakwaphọ unwu Erõnu; bya etekwa phẹ phọ mee ono l'atakpa-nchị ẹkutara; waa lẹ mkpushi-ẹka ezeke-ẹka ẹkutara; waa lẹ mkpushi-okpa ezeke-okpa ẹkutara. Mòsisu bya eworu mee ono phedzuru lẹ mgburẹku oru-ngweja ono mgburugburu.
- 25O bya eheta ẹba iya; hetachaa ẹba, dū l'upfumọdzu iya; waa ophu nọkota l'iphe-ẹpho iya g'ọ ha; botakwapho anya iya; waa àkpùrù iya ẹphenebo; yee ẹba, nọkota iya nū; wota utapfu okpa ẹkutara iya tükwase iya.
- 26O je lẹ nkata ono, e yeru buredi ono, e gudedu iphe, ekoje buredi ghee ono, nọ l'atatiphu Chipfu ono; bya ahata ishi buredi lanụ; hatakwaphọ ishi akara lanụ l'akara

ono, a gworu lẹ manụ ghee ono; waa ẹcha-mbekee lanu. O wota iya yekobe l'eba iya pho; yee utapfu okpa ẹkutara iya pho.

²⁷O tuko iphemiphe ono g'o ha dee Eronu yee unwu iya l'eka; ephe bya eworu iya maa amama l'iphu Chipfu g'o buru ngweja-amama.

²⁸Mosisu bya anata phe iphemiphe ono; tuko yele ngweja-akpo-oku pho kpoo oku l'oru-ngweja ono; o buru ngweja, e gude mee nemadzu g'o buru onye uke; mbu ngweja, aakpo oku anu Chipfu, mkpo iya du iya ree.

²⁹O wotakwapho ndu iya, bu iya bu oke, a heru Mosisu l'ebili ono, e gude mee Eronu phe g'ephe buru ndu-uke ono; makwapho amama l'iphu Chipfu; g'o buru ngweja-amama, bu iya bu ge Chipfu turu Mosisu l'ekemu g'o mee ya.

³⁰Noo ya; Mosisu bya emeta manụ awu l'ishi ono; bya emetakwapho mee ono, no l'oru-ngweja ono; bya eworu phee Eronu yee unwu iya l'ehu; waa l'uwe phe. Oo ya bu; o mee Eronu yele uwe iya; waa unwu iya yele uwe nkephe; ephe tuko dukota nso.

³¹Mosisu su Eronu yee unwu iya: “Unu je eshia anu ono l'onu-abata ulo-ekwandzuko. Unu anodu l'eka ono taa ya; yele buredi ono, no le nkata ono, e yeru ngweja, e gude mee unu g'unu buru ndu-uke ono, bu iya bu iphe, mu turu ekemu su ge Eronu yee unwu iya riye.

³²Anu ono yee buredi ono ophu phoduru nu be unu e-woru je akpoo oku.

³³Unu ta tugbukwa l'onu-abata ulo-ekwandzuko ono jasụ unu ano-rwua ya ujiku esaa; mbu jasụ l'e meghee k'eme unu g'unu buru ndu-uke ono; noo kele oo ujiku esaa ono be ee-gude mekota k'eme unu g'unu buru ndu-uke ono.

³⁴Iphe, e meru ntanu-a bu iphe, Chipfu turu ekemu su g'e mee; gude pfua ugwo iphe-iji, unu meru.

³⁵Noo g'o gude unu je l'anodu l'onu-abata ulo-ekwandzuko eswe l'enyashi noo ya ujiku esaa; shi nno mee iphe, Chipfu suru g'e meje; g'onwu te egbu unu; kele o kwa g'a turu mu ekemu iya bu ono.”

³⁶Noo ya; Eronu yee unwu iya mekota iphe, Chipfu shi l'onu Mosisu su g'ephe mee.

Ndu Uke 9

Ndu uke awata eje ozi phe

¹O be le mboku k'esato; Mosisu kua Eronu; yee unwu iya; waa ndu bu ogerenya Izurelu.

²O su Eronu-a: “Kputa nwa oke-eswi, ii-gude gwee ngweja-iphe-iji; yee ebili, ii-gude gwee ngweja-akpo-oku; mbu ophu adudu eka iphe mebyiru iya; kpuru iya bya l'iphu Chipfu.

³Pfuaru unwu Izurelu su phe: Unu kputa mkpi g'e gude gwee ngweja-iphe-iji; unu akputa nweswi yee nwaturu; ephebebo a-bucharu ophu nowaru mgbarapha; ophu o dudu eka iphe mebyiru iya; gude je g'e gwee ngweja-akpo-oku.

⁴Unu akputakwapho oke-eswi; waa ebili, ee-gude gwee ngweja-ehuguu; g'e gude gwee ngweja l'iphu Chipfu; mekwapho ngweja-nri, a gworu le manu; kele ntanu-a be Chipfu e-goshikwa unu onwiya.”

⁵Ephe gweta iphe ono, Mosisu gushiru ono; bya l'iphu ulo-ekwa-ndzuko. Iphe, bukpo ndu Izurelu l'ophu wuritaru bya akuru l'iphu Chipfu.

⁶Noo ya; Mosisu su: “Wakwa iphe, Chipfu suru g'unu mee baa; ge ya egoshikwanu unu odu-biribiri iya.”

⁷Tobudu iya bu; Mosisu su Eronu: “Tugbua je l'oru-ngweja je egwee ngweja-iphe-eji ngu obu; yee ngweja-akpo-oku ngu obu; gude pfuaru onwongu ugwo iphe-eji; yee ugwo iphe-eji ndu Izurelu. Gwee ngweja ono gude pfua ugwo iphe-eji phe, bu iya bu ge Chipfu pfuru su g'e mee ya.”

⁸Noo ya bu; Eronu bya eje l'oru-ngweja ono; je egbua nwa oke-eswi ono, oo-gude gwee ngweja-iphe-eji nkiya ono.

⁹Unwu iya bya apataru iya mee nwa oke-eswi ono. O gude mkpushi-eka meta mee ono tee le mpu, e mobegbaaru l'oru-ngweja ono; bya eworu mee ono ophu phoduru nu; wuru ye l'okpali oru-ngweja ono.

¹⁰O bya eworu eba-anu ono, o gude gwee ngweja-iphe-eji ono; waa akpuru iya ephenebo; waa anya iya; kpo oku l'oru-ngweja ono, bu iya bu ge Chipfu turu Mosisu onu g'e mee ya ono.

¹¹Anu iya; waa akpo iya be o kporu oku l'azu eka ndu Izurelu kpoberu ulo-ekwa phe ono.

¹²Eronu bya akputa anu ono, oo-gude gwee ngweja-akpo-oku ono gbua. Unwu iya bya apataru iya mee anu ono; o bya ephephee ya l'oru-ngweja ono mgburugburu.

¹³Ephe haa anu ngweja-akpo-oku ono nanu nanu nu iya; ephe nuchaa ya; nu iya me ishi iya; o tuko iya g'o ha kpo oku l'oru-ngweja ono.

¹⁴O gude mini saa iphe-epho iya; waa eka iya; waa okpa iya asasa; bya akpokwaa ya pho oku l'eli ngweja-akpo-oku ono, nohawa l'oru-ngweja ono.

¹⁵Eronu gwefuta iphe ngweja ndu Izurelu; kputa eghe ono, oo-gude gwee ngweja-iphe-eji nkephe ono gbua; gude iya gwee ngweja-iphe-eji; egube ono, o gweru ke mbulembu pho.

¹⁶O bya akputa anu ono, oo-gude gwee ngweja-akpo-oku ono; bya egude iya gwee ngweja obu g'a turu onu su g'e meje iya.

¹⁷O wotakwapho ngweja-nri ono; bya ahata iya ophu jiru mkpoji-eka; kpo ya oku l'oru-ngweja; a -gufukwaro ngweja-akpo-oku, eegweje l'utsu.

¹⁸O bya egbua oke-eswi pho; yee ebili pho; gude gweeru ndu Izurelu ngweja-ehuguu. Unwu iya pataru iya mee anu ono; o nata iya phephee oru-ngweja ono mgburugburu.

¹⁹Ephe wotakwaru iya pho ɛba oke-eswi ono; yee k'ebili ono; mbu ɛba, shi l'upfumodzu iya; waa ɛba, kwechiru iphe-epho iya; waa akpuru iya ephe-nebo; waa anya iya.

²⁰Ephe woru ɛba-anu ono tukobe le ndu iya. Eronu bya eworu ɛba ono kpoo oku l'oru-ngweja ono;

²¹ole ndu iya ono; waa utapfu okpa ekutara iya; be o woru maa amama l'iphu Chipfu g'o buru ngweja-amama, bu iya bu ge Mosisu suru g'e mee ya.

²²Tobudu iya bu; Eronu chilia aka imeli l'uzo aka ndu Izurelu no; bya agoru onu-oma nu phe; bya eshi l'eka o shi egwe ngweja-iphe-eji pho; yee ngweja-akpo-oku pho; me ngweja-ehu-guu pho; nyizeta.

²³Mosisu yee Eronu toko bahu l'ime ulo-ekwa-ndzuko ono. Ephe futae-pho; ephe goru onu-oma nu ndu Izurelu; Chipfu goshi ndu ono l'ophu ogbunwijnwii ya.

²⁴Oku shi l'iphu Chipfu daa bya ekee ngweja-akpo-oku ono; yee ɛba ono, no l'eli oru-ngweja ono. Ndu Izurelu humaepho iphe ono, nwuru nu ono; ephe tushia uzu ehutso; bya adakota kpurumu woru iphu bubechaa l'ali.

Ndu Uke 10

Anwuhu Nadabu yee Abihu

¹Unwu Eronu, bu Nadabu; yee Abihu wotachaa iphe, aaguje oku phe l'ehu l'ehu; bya anwuru oku ye iya; bya eye iya unwu-isensu. O buru oku adudu nsɔ be ephe gude bya l'iphu Chipfu; bu iphe o suru g'ephe te emejeshi.

²Tobudu iya bu; oku shi l'iphu Chipfu bya eworu phe tsua; ephe nodu l'iphu Chipfu l'eka ono nwushihu.

³Mosisu su Eronu: “O kwa iphe-a be Chipfu pfuru teke ono su: ‘Ndu abya mu ntse be mu e-goshije onwomu g'ephe maru le mu du nsɔ; mu emee ge ndu Izurelu l'ophu huma odu-biribiri mu.’ “ Eronu noduepho nggujungguji.

⁴Mosisu kua Mishelu; waa Eluzafanu, bu unwu Uzelu. Uzelu ono bu nwune nna Eronu. O su phe: “Unu kpitaru ntse bya apata unwunna unu pafu l'ulo-ekwa Chileke; paru je l'azu aka ndu Izurelu koberu ulo-ekwa phe.”

⁵No iya; ephe jekube iya; je apata phe; ephe l'uwe mgbalanu phe ono pafu l'azu aka ndu Izurelu koberu ulo-ekwa phe ono, bu iya bu ge Mosisu suru g'ephe mee ya.

⁶Noo ya; Mosisu su Eronu; yee unwu iya, bu Eleyaza; waa Itama: “Unu te emekwa ishi unu njo ememe; ophu o dukwa onye a-laka uwe iya; kele o -buru l'unu meru nno be unu a-nwuhukwa; mbu Chipfu atukoshi ndu Izurelu l'ophu oke ehueghu iya. Oo unwunna unu, bu ndu Izurelu l'ophu a-ra ekwa ndu Chipfu gude oku kegbushia.

⁷Unu ta lufukwa alufu l'onu-abata ulo-ekwa-ndzuko; anonyakwa unu nwushihu; noo kele Chipfu wuru unu manu l'ishi.” Ephe mekotaepho iphemiphe, Mosisu suru g'ephe mee.

Ekemu kẹ ndu-uke

8Tọbodu iya bụ; Chipfu bya epfuru yeru Erọnu sụ iya:

9“Ta ngujekwa mee; ophu i ngujekwa iphemiphe, atsu atsutsu; gubedua l'onwongu; mekpoo unwu ngu; teke unu abahu l'ulo-ekwa-ndzuko; odumeka be unu anwushihukwa. O buru g'oo-du bu ono ojejoje l'ogbo unu; eshi l'ogbo swewaruro ogbo.

10Oo ya bu; g'unu edokahaje iphe, du nsọ; yee iphe, adudu nsọ; dokaha iphe, aaso nsọ; yee iphe, a ta sodu nsọ.

11Unu ezije unwu Izurelu iphe, bu ekemu ono g'o ha, bu ophu Chipfu shi l'eka Mosisu tųaru phe.”

12Tọbodu iya bụ; Mosisu bya epfuru yeru Erọnu; yee unwu iya ndu ophu phoduru nų, bu iya bu Eleyaza yee Itama; sų phe: “Unu wota ngweja-nri ophu phoduru nų le ngweja ono, a kporu oku nų Chipfu. Unu woru iya ria le mgboru oru-ngweja ono. Ole g'unu te eyekwa iya iphe, ekoje buredi. Noo kele o bu ngweja, du nsọ shii.

13Unu nodukwa l'eka du nsọ ria ya; noo kele oo iphe, rwuberu ngu nų; bya aburu iphe, rwuberu unwu ngu; mbu ngweja ono, aakpo oku anų Chipfu ono; kele oo g'a tųru mu ekemu iya bu ono.

14Obenu le-a; gubedua gu l'unwu ngu unwoke; yee unwu ngu unwanyi be a-taje ndu anų ono, e gude gwee ngweja-amama ono; yee utapfu iya ono, a nuru ono. Unu nodujekwa l'eka du nsọ taa ya; kele oo iphe, rwuberu ngu nų; bya aburu iphe, rwuberu unwu ngu, shi l'iphe, unwu Izurelu gude bya egwe ngweja-ehu-guu.

15Utapfu iya ono, a nuru ono; waa ndu iya ono, a maru amama ono be ephe e-yekebeje eba-anų ngweja ono, aakpo oku ono wota; g'a maa amama l'iphu Chipfu g'o buru ngweja-amama. Ono aburu nkengu; yee k'unwu ngu; l'o buru iphe, rwuberu unu jasų l'ojejoje, bu iya bu ge Chipfu tųru ekemu sų g'e meje iya ono.”

16Mosisu kpaa ishi g'e meru egbu pho, e gude gwee ngweja-iphe-eji pho; bya amaru l'a kporu iya oku. Ebu ghuaaha ya egbu l'iphe, unwu Erọnu ndu ophu nokwadu ndzu ono meru, bu iya bu Eleyaza; yee Itama. O bya asų phe:

17“? Bu gunu kparu iphe, unu ta nodu l'ime ulo-ekwa Chileke taa anų ono, e gude gwee ngweja-iphe-eji ono; eshinu o bu iphe, du nsọ shii; bya aburu iphe, a nuru unu g'unu gude safu ejo-iphe, oha l'ophu meru; unu apfu a ugwo iphe-eji phe l'iphu Chipfu?

18Eshinu e te egudedu mee anų ono bahu l'eka-du-nsọ be unu gege anodu l'ulo-ekwa Chileke taa anų ono, bu iya bu ge mu sųru g'e meje iya.”

19Erọnu sų Mosisu: “O kwa ntanu-a be ephe no l'iphu Chipfu gwee ngweja-iphe-eji phe; yee ngweja-akpo-oku phe; teme iphe, du egube-a bya anwujehawaru mu! Ome mu jeru je ataa anų ngweja-iphe-eji ono ntanu-a; Chipfu ? o gogo nata iya-a?”

20Mosisu numaepho iphe ono, o pfuru ono; o jiye ya pho epho.

Ndu Uke 11

Nri, aasọ nsọ; yee nri, a ta sọdu nsọ

(Dit 14:3-21)

- ¹Tọbudu iya bu; Chipfu bya epfuru yeru Mosisu yee Eronu; su phe:
- ²“Unu pfuru yeru ndu Izurelu; su phe-a: Wakwa uduru anu, unu a-taje l'iphe, bu anu, nokota le mgboko-a baa:
- ³Unu taje iphe, bu anu, nweru ujarabvu-okpa; teme o nodu anwafutaje nri taphu azu l'iphe, bukpo unu anu.
- ⁴O dukwaru ndu ophu anwafutaje nri taphu azu; ophu ephe enwedu ujarabvu-okpa; bya enwekwarupho ndu ophu nweru ujarabvu-okpa; ophu ephe anwafutajedu nri taphu azu. Unu ta tajakwa ndu k'ono. Inya-kamelu be anwafutaje nri taphu azu; obenu l'o to nwedu ujarabvu-okpa. Oo ya bu l'ehu unu be o bu anu, aasọ nsọ.
- ⁵Unu ta tajakwa nchi-ogba; kele onwafutaje nri taphu azu; obenu l'o to nwedu ujarabvu-okpa. O bukwaru unu anu, aasọ nsọ.
- ⁶Nngamachi bukwarupho unu anu, aasọ nsọ; kele onwafutaje nri taphu azu; obenu l'o to nwedu ujarabvu-okpa.
- ⁷Teme g'ezi bukwarupho unu anu, aasọ nsọ; noo kele o nweru ujarabvu-okpa; obenu l'o to nwafutaje nri taphu azu.
- ⁸Unu ta tajakwa egube anu ono; ophu unu edenyijekwa odzu phe eka; noo kele ephe bukota unu anu, aasọ nsọ.
- ⁹“Wakwanu ophu unu a-taje baa l'anu, bu ndu ophu bu le mini; anu nweru mkpo; yee ophu nweru ekiri; buru l'eze-enyimu; me le nggele; unu taje ndu k'ono.
- ¹⁰O -be le ndu ophu g'ephe ha; mbu ndu ophu bu l'eze-enyimu; me le nggele; ophu o to nwedu mkpo; ophu o to nwedu ekiri; mekpoo iphemiphe, bu iphe, bu le mini; mekpoo iphe, bu iphe, dzu ndzu; buru le mini g'o ha bukotakwa unu ebyi.
- ¹¹Eshinu o bu unu ebyi; unu ta tajakwa anu iya; g'odzu iya bukwarupho unu ebyi.
- ¹²Mbu l'iphemiphe, bu le mini, enwedu mkpo; ophu o nwedu ekiri a-bukotajekwaru unu ebyi.
- ¹³“Waa enu ndu ophu a-buru unu ebyi baa; ndu k'ono be unu ta atajedu anu iya; kele o bu ebyi. Ndu k'ono bu ugo; waa udele; waa udele-ojii;
- ¹⁴waa egebe; waa ivu l'udu iya l'udu iya;
- ¹⁵mekpoo okpoko-oha l'udu iya l'udu iya;
- ¹⁶⁻¹⁸waa mgbashi-ujiku l'udu iya l'udu iya; waa enu golu; waa okpo-ngwere l'udu iya l'udu iya; waa ogu-ikporo; waa ugo-mini;
- ¹⁹wakwapho eze-okwu-eswi-uda; waa apyari-nhoko l'udu iya l'udu iya; waa ovu; waa utsu-nwankuta.

- 20“Iphe, bukpoogo, furu eba, bu iphe, gude okpa eno eje ije a-bukotajeru unu ebyi.
- 21Ole o dukwaru-a ogu, furu eba, egudeje okpa eno eje ije, unu a-taje. Ophu unu a-taje bu ophu nweru ogba-kpii, oogudeje apfu mpfu.
- 22Ophu unu a-taje bu igube l'udu iya l'udu iya; waa okaka l'udu iya l'udu iya; waa atsu-egu l'udu iya l'udu iya; waa mgbagbaramatsu l'udu iya l'udu iya.
- 23O be l'iphe, bukpoogo ozo, furu eba bya egude okpa eno eje ije l'a-tuko buru unu ebyi.
- 24“Unwu iphe ono g'ephe ha l'e-me; unu aburu ndu aaso nsọ. Onye denyikwanuru odzu iya eka be aa-nodu aso nsọ jasụ nchi ejihu.
- 25Iphe, bu onye pataru odzu iya l'a-sa uwe iya asasa; teme l'o buru onye aaso nsọ jasụ nchi ejihu.
- 26Iphe, bukpoogo anu, nweru upyi-okpa; ophu o nwedu ujarabvu-okpa; waa ophu ta anwafutajedu nri taphu azu; bukwaru unu anu, aaso nsọ. Iphe, bukpoogo onye denyiru odzu iya eka l'a-bukwarupho onye aaso nsọ.
- 27G'iphe, bukpoogo anu, nweru okpa eno, bu ndu ophu akobeje nvo eje ije bukwaru unu anu, aaso nsọ. Onye denyiru odzu iya eka a-bukwaru onye aaso nsọ jasụ nchi ejihu.
- 28Onye pataru odzu iya a-sa uwe iya asasa; teme l'o buru onye aaso nsọ jasụ nchi ejihu. Unwu anu ono bukotarun unu anu, aaso nsọ.
- 29“A -bya l'anu, awu l'epho; ndu owa-a bu ndu ophu unu a-nodu aso nsọ: uphega; waa okerepfu; waa ngwere l'udu iya l'udu iya;
- 30waa agulo; waa awala; waa okporoko; waa orinvuru; waa oguba.
- 31Ono bukota anu, unu a-soje nsọ l'anu, awu l'epho. Onye duru ophu o denyiru eka l'eka o nwuhuru anwuhu l'a-buru onye aaso nsọ jasụ nchi ejihu.
- 32Iphe, bu iphe, odzu iya ophu nwuhuru anwuhu dapyaberu buakwaa iphe, aaso nsọ; m'o bu iphe, e gude oshi pyia; ozoo uwe; ozoo akpo-anu; me uwe-aphu; mbukpoogo iphe, bu ngwa, e gude emekpoogo iphemiphe; g'e dekwaa ya le mini; l'o noo buru iphe, aaso nsọ jasụ nchi ejihu; l'a turwua ya.
- 33Teke o duru g'ephe ha ophu daru l'ite urwa; iphe, bukpoogo iphe, du l'ite ono bukotaakwa iphe, aaso nsọ; unu tukpokwaa ite obu atukpo.
- 34Nri, e gude ite, du nno kuta mini shibe buakwaa nri, aaso nsọ; teme iphe, aangu angungu shi l'ite, du nno buakwaa iphe-angungu, aasokwapho nsọ.
- 35Iphe, odzu anu ono, a gushiru ono daru buakwaa iphe, aaso nsọ. O -buru l'o daru l'ite-oku; ozoo l'epfu, eeshi ite g'a photakwa iya je atukposhia. Ephe buwaa iphe, aaso nsọ; oo ya bu; unu mekwaa ya pho iphe, aaso nsọ.
- 36O -buru l'o daru l'enya eka mini eshije anwushi; ozoo l'obvu, mini du shii be duebekwa ree; ole onye denyiru odzu iya ono eka be buakwaa onye aaso nsọ.

³⁷Ọ -buru l'ọ duru odzu anụ ono ọphu daru lẹ mebyi iphe, eemebe l'alị bẹ mebyi iphe ono ta abụkwa iphe, aasọ nsọ.

³⁸Obenu; ọ -buru l'e yewaru mini lẹ mebyi iphe ọbu; odzu anụ ono dalahụ iya bẹ ọ buakwaa unu iphe, aasọ nsọ.

³⁹“Ọ -buru l'ọo anụ ọphu a haru g'unu taje anụ iya nwuhuru bẹ onye denyiru iya ẹka a-bụkwaru onye aasọ nsọ jasụ nchi ejihu.

⁴⁰Onye takwanuru odzu iya l'a-sa uwe iya asasa; buru onye aasọ nsọ jasụ nchi ejihu. Onye patakporunu odzu iya apata l'a-sakwapho uwe iya; buru onye aasọ nsọ jasụ nchi ejihu.

⁴¹“Iphe, bụkpoo iphe, awụ awụwu, bụ ọphu akpụ wuruwuru l'alị l'a-bụkotakwaru ẹbyi; ọphu e rijekwa iya eriri.

⁴²Unu ta tajeakwa iphemiphe, awụ awụwu lẹ mgboko-a; m'ọ bụ ọphu gude ẹpho awụ; ọzoo ọphu gude ọkpa ẹno eje; ọzoo ọphu gude igwe ọkpa eje; kele ẹphe tukururu buru ẹbyi.

⁴³G'ọ tọ dukwa iphe, awụ l'ẹpho, unu e-gude mee onwunu ẹbyi. Ọphu unu egudekwa pẹ mee onwunu ndu aasọ nsọ; g'unu te shi l'ẹphe buru ndu e merwuru emerwụ;

⁴⁴kele ọ kwa mbedua bụ Chipfu; bya aburu Chileke unu. Ọo ya bụ; unu sachaa onwunu; unu adu nsọ; kele mbedua du nsọ; ọphu unu aturwukwa onwunu l'iphe, awụ awụwu, bụ ọphu akpụ wuruwuru l'alị g'ọ dūhabe;

⁴⁵kele ọ kwa mbedua bụ Chipfu, onye shi l'alị Ijiputu dufuta unu gẹ mu buru Chileke unu. Ọo ya bụ lẹ-a; unu dukwa nsọ; kele mbedua dukwa nsọ.”

⁴⁶“Ono bụ ekemu, a turu swibe anụ; waa ẹnu; waa iphe, bụ iphe, dzu ndzu, bu l'ime mini; mekpoo iphe ọzo, bụ iphe, awụ awụwu, bụ ọphu akpụ wuruwuru l'eliphe;

⁴⁷g'e gude dokaha iphe, aasọ nsọ; yee iphe, a ta sọdu nsọ; dokaha anụ, bụ ọphu ee-rije eriri; yee ọphu e te ridu eriri.”

Ndu Uke 12

Aswafu nturuw nwanji me o -zedacha

¹Chipfu bya epfuru yeru Mosisu su iya:

²“Pfururu yeru unu wu Izurelu; su pẹ-a: Nwanji -tsuta ime bya anwua nwa nwoke; g'ọ bụkwaru onye aasọ nsọ noo abali esaa; mbu l'ọo ẹpho g'aasọ-bejeru iya nsọ me ọ - noo anọ nsọ nwanji-a bụ g'aa-sọ-beru iya nsọ.

³Ọ -be lẹ mboku k'esato l'e bua nwata obu ubvu.

⁴E -mechaa; nwanji ono anoo ukporo abali l'abali iri l'eto g'e gude swafu iya nturuw mee, laru iya nu. G'ọ tọ dukwa iphe, e doberu nsọ, oo-denyi ẹka; teme ọphu ọ bahukwa lẹ Ulo-du-nsọ jasụ mboku, nsọ aswafu nturuw iya a-bvu.

⁵“O -buru l'oo nwa nwanyi be o nwuru be nwanyi obu a-buru onye aaso nsọ ujiku iri l'eno; egube ono, aanoduje aso iya nsọ me o -nodu anọ nsọ nwanyi ono. Iphe, oo-no g'e gude swafu iya nturu mee alala bu ujiku ukporo eto l'ishii.

⁶“Teke eswe mboku aswafu nturu iya ono buverupho; l'onye nwuru nwoke ozoo nwanyi; ge nwanyi ono kputa nwaturu mgbapha g'e gude gwee ngweja-akpo-oku. L'o nwekwapho nwa ndo; ozoo kparaka; g'e gude gwee ngweja-iphe-eji. G'o gude iya bya l'onu-abata ulo-ekwa-ndzuko bya anu onye uke.

⁷Onye uke ono egude iphe ono je egwee ngweja nu Chipfu gude pfua ugwo iphe-eji iya; l'o bya adubebe ree le mee, laru iya nu. Noo ekemu, duru nwanyi, nwuru nwa nwoke; ozoo nwa nwanyi.

⁸“Teke o bu l'onye obu ta adudu ike agbata nwaturu; g'o nwutaru iya kparaka labo; ozoo nwa ndo labo. L'a nwuta nanu gude gwee ngweja-akpo-oku; gude ophuu gwee ngweja-iphe-eji. Onye uke egude iya pfua ugwo iphe-eji iya; l'o bya adubebe ree.”

Ndu Uke 13

Onye ekpenta eme

¹Tobudu iya bu; Chipfu bya epfuru yeru Mosisu yee Eronu; su phe:

²“O -buru l'o nweru onya, no nemadzu l'ehu; ozoo l'oo iphe, du g'ekpa; ozoo l'iphe, tukashiru iya poopoo l'ehu, bugbaa iphe, nweru g'oo-du; l'o ghoo ekpenta; nodu onye ono l'akpo-ehu; g'e dutakwa onye obu duru jepfu Eronu, bu onye uke; ozoo l'e duru iya jepfu onye bu nwa iya, bukwapho uke.

³G'onye uke ono lee enya l'onya ono, no onye obu l'akpo-ehu ono. Teke o bu l'oji, futaru l'eka ono ghohuru aghohu acha ucha; teme eka ono dalahu adalahu; be eka-iphe-no obu buakwaa ekpenta; nodu onye ono l'akpo-ehu. G'onye uke lee ya enya gua ya l'onye aaso nsọ.

⁴Teke o bu l'eka obu acha iya ucha l'akpo-ehu; e lee ya enya ophu o dalahuduru adalahu; ophu eji, no iya nu aghohuduru aghohu acha ucha; g'onye uke gu-chia onye ono l'ulo noo ujiku esaa.

⁵O -be le mboku k'esaa; g'onye uke je elebaa onye obu enya l'ehu; teke ekpenta ono du g'o du; ophu o kadu asa asa; g'onye uke ono gu-chifua ya l'ulo ujiku esaa ozo.

⁶O -bekwa le mboku k'esaa; g'onye uke jekwapho elebaa onye obu enya l'ehu. O -buru l'eka-iphe-no iya obu duwaa inchi inchi; ophu o kadu asa asa; g'onye uke gua ya onye a ta sodu nsọ. Iphe, o bu be bu ekpa mmanu. G'o saa uwe iya asasa; buru onye a ta sodu nsọ.

⁷Obenu le-a; teke iphe ono bakahuru ka iya asa l'ehu; g'onye uke humacharu iya su l'a taa sodu iya nsọ pho; g'o jekwa egoshibaa onwiya onye uke ono ozo.

⁸Teke onye uke ono leri iya enya bya ahuma l'osa iya asa l'ehu; mbu iphe ono; g'onye uke ono gukwaa ya l'onye aaso nsọ; o kwa ekpenta eme onye ono.

- 9“O -buru lẹ nemadzu bẹ iphe eme l'akpo-ẹhu, bu iphe, eswe nswe; g'e dukwaru onye obu jepfu onye uke.
- 10G'onye uke ono lee ya ẹnya; teke o nweru ọnyá, nọ onye ono l'ẹhu, acha nmalanmala; o mewaa; ẹji, nọ iya nọ ghohuwaa aghohu; teme o nweru iphe, du g'ájí, du iya nọ;
- 11bẹ ọ kwa alagala ekpenta nọ onye ono l'akpo-ẹhu. G'onye uke gụkwaa ya l'onye aasọ nsọ. G'o to jekwa iya agụ-chi l'ulo; kele ọ buakwaa onye aasọ nsọ.
- 12Teke ọ bu l'ekpenta ono voshiru nemadzu l'akpo-ẹhu; ọ tuko onye obu ẹhu sweta; mbu shi iya l'ishi vua ya kpatakpata jasụ l'okpa; mbu iphe, bukpoọ ẹka onye uke ono lekporu iya ẹnya bukotaru iya;
- 13g'onye uke ono lebakwaa ya ẹnya. O -buru l'ekpenta ono mewaru iya; kpohu; ẹka ono nọdu achawa ụcha; g'ọ gụkwaa onye ono l'onye a ta sọdu nsọ; kele ọ buwaa ichii- iphe; ọ tọ buedu ekpenta.
- 14Ole ọ -nonyakwanaa; ájì futa l'ẹka-iphe-nọ iya ono; l'ọ buru onye aasọ nsọ.
- 15Onye uke ono -humaepfo ájì ono; g'ọ gua onye ono l'onye aasọ nsọ; kele ájì bu iphe, aasọ nsọ. O kwa ekpenta eme onye ono.
- 16O -buru l'ájì ono nonyaaru gbanwee; bya aghohu chaahaa ụcha; g'onye obu jepfukwa onye uke ozobaa.
- 17G'onye uke ono lee ya ẹnya; ọ -buru l'ẹka ono iphe shi eme iya ono kpohuwaru; achawa ụcha; g'onye uke ono pfukwaa l'onye ono, iphe shi eme ono bẹ a taa sọdu nsọ. Teke ono; onye ono abya aburu onye a ta sọdu nsọ.
- 18“A bya l'ẹhu onye bu ejo-onwo shi phọo ya; ọ kawaa mma;
- 19a bya l'ẹka ono, ejo-onwo shi phọo ya ono; ọ -buru l'ọ byaru ahuta ahuta acha ụcha; ozoo l'o nweru ẹka acha ụcha bya adu nwa uswe-uswe; g'e jekwa egoshi iya onye uke.
- 20G'onye uke ono lekwa ya ẹnya; ọ -buru l'ẹka ono dalahuru adalahu; teme ẹji, futaru l'ẹka ono ghohuwaa aghohu acha ụcha; g'onye uke ono gua ya l'onye aasọ nsọ; kele ọ kwa ekpenta laru onye ono l'ẹka ono, ejo-onwo shi phọo ya ono.
- 21Ole ọ -buru l'onye uke ono leri ẹka obu ẹnya; ophu ẹji, furu l'ẹka ono aghohuduru aghohu; ophu ọ dalahuduru adalahu; ọ rwakputewa arwakpute; g'onye uke ono gụ- chia onye ono l'ulo g'ọ nọ ujiku ẹsaa.
- 22Teke ọ bu l'ẹka-iphe-nọ iya obu kabaa asa ọsa eviya; g'onye uke ono pfukwaa l'ọ bu onye aasọ nsọ; kele ọ bu ekpenta eme iya.
- 23Teke ọ bu l'ẹka-iphe-nọ iya ono dūepfo g'ọ du; ophu ọ sadu ọsa; l'a maru l'ọo ichii ejo-onwo pho bẹ ọ bu; g'onye uke ono gua ya l'onye a ta sọdu nsọ.
- 24“Teke ọ bu l'oku huru nemadzu l'ẹhu; ẹka ono, oku huru iya ono chaahaa ụcha; bya adukwapho nwa uswe-uswe; ozoo l'oocha ụcha;

25g'onye uke ono lekwa ya ɛnya; ɔ -buru l'ɛji, futaru l'ɛka ono ghohuwaru aghohu acha ucha; tɛme ɛka ono dalahu adalahu; bɛ ɔ bukwa ekpenta laru onye obu l'ɛka ono, oku huru iya ono. Oo ya bu g'onye uke gukwa ya l'onye aaso nsɔ; kele ɔ kwa ekpenta eme onye ono.

26Obenu lɛ-a; ɔ -buru l'onye uke ono luru iya ɛnya; ophu ɛji, nɔ iya l'ɛka ono aghohuduru aghohu acha ucha; tɛme ophu ɛka ono adalahunuru adalahu; tɛme ɛka ono rwakputewa arwakpute; g'onye uke ono gu-chia ya l'ulo g'ɔ nɔo ujiku ɛsaa.

27O -be lɛ mboku k'ɛsaa g'onye uke ono lebaa ya ɛnya l'ɛhu. Teke ɔ kabaa ya asa ɔsa l'ɛhu eviya; g'onye uke ono pfukwa l'ɔ bu onye aaso nsɔ; kele ɔ kwa ekpenta eme iya.

28Ole ɔ -bukwanuru l'ɛka-iphe-nɔ iya ono duɛpho g'ɔ du; ophu ɔ kadu iya asa ɔsa l'ɛhu; ɔ gbɛchianu arwakpute arwakpute bɛ ɔ bukwa oku ono, huru iya nu ono switaru iya eswita; g'onye uke ono gukwa ya l'onye a ta sɔdu nsɔ; kele ɔo ichii oku pho bɛ ɔ bu.

29“O -buru lɛ nwoke; ɔzoo nwanyi bɛ ɔnyá du l'ishi; ɔzoo l'agba;

30g'onye uke lekwa ɛnya l'ɔnyá obu. O -buru l'ɔ dalahunuru adalahu; mbu ɔnyá obu; tɛme ɛjí, furu iya nu du manɔ-manɔ; bya adu kɛ zitazita; g'onye uke ono gukwa ya l'onye aaso nsɔ; kele ɔo ɛjo akuruba; mbu l'oo ekpenta turu onye ono l'ishi; ɔzoo l'agba.

31Ole ɔ -buru l'onye uke ono lechaaru ɛnya l'ɛjo akuruba obu; ophu ɔ dudu l'ɛnya g'ɔ dalahunuru adalahu; tɛme ophu ɛjí, du iya nu ejidu uji; g'onye uke ono gu-chia onye ono l'ulo g'ɔ nɔo ujiku ɛsaa.

32O -be lɛ mboku k'ɛsaa g'onye uke ono lebaa ɛnya l'iphe-ememe ono; ɔ -buru l'ɛjo akuruba ono ta abakahuduru abakahu; ophu ɛjí, du iya nu adudu manɔ-manɔ; ophu akuruba ono adudu l'ɛnya g'ɔ dalahunuru adalahu;

33g'a kpushia onye ono ishi; kpu-buru ɛka akuruba ono du haa; g'onye uke ono gu-chifua ya l'ulo g'ɔ nɔo ujiku ɛsaa ɔzo.

34Teke o rwuru mboku k'ɛsaa; g'onye uke ono lee ɛnya l'akuruba ono; ɔ -buru l'ɔ to bakahuduru abakahu; e lee ya ɛnya; ophu ɔ dalahunuru adalahu; g'onye uke ono gua ya l'onye a ta sɔdu nsɔ. G'onye ono saa uwe iya; buru onye a ta sɔdu nsɔ.

35Obenu lɛ-a; ɔ -buru l'akuruba ono bakahuru iya l'akpo-ɛhu eviya g'a guwaru iya l'onye a ta sɔdu nsɔ-a;

36g'onye uke ono lebaa ya ɛnya. O -buru l'akuruba ono bakahuru iya l'ɛhu; g'onye uke te jeekwa ele ɛnya g'a maru ɛjí iya; ? ɔ du manɔ-manɔ. Onye ono buakwa onye aaso nsɔ.

37O -buru l'akuruba obu bɛ duɛpho g'ɔ du l'ɛnya; tɛme ɛjí ojii rwutawaa l'ɛka ono bɛ akuruba obu kpoakwaru; ɔ buakwaru onye a ta sɔdu nsɔ; g'onye uke gua ya l'onye a ta sɔdu nsɔ.

38“O -buru lẹ nwoke; ọzoo nwanyi bẹ iphe-ọchaa tũkashiru poopoo l'ẹhu; achagbaa ọcha;

39g'onye uke lekwa onye ọbu ẹnya l'ẹhu. O -buru l'ẹka ọbu ta achadu ọkpobe ọcha; l'a maru l'ọo ọgwò bẹ tũkashiru onye ọbu l'ẹhu; l'onye ọbu bẹ a ta sọdu nsọ.

40“Egbushi -rishihu onye nwoke l'ishi; bũkwa ishi-ọnmọ bẹ ọ bũ; obenu l'a taa sọdu iya nsọ.

41Teke ọ bũ l'ọo l'ọnu-iphu bẹ ẹgbushi rishihuru iya; bẹ onye ọbu bũkwa ishi ọnmọ ọnu-iphu; obenu l'a taa sọdu iya nsọ.

42Ole ọ -buru l'ọ duru ọnyá, acha ọcha; bya adũkwapho nwa uswe-uswe, nọ iya l'ishi-ọnmọ ọbu; ọzoo l'ishi-ọnmọ ọnu-iphu ọbu; bẹ ọ bũakwaa ekpenta bẹ tũru iya l'ishi-ọnmọ ọbu; ọzoo l'ishi-ọnmọ ọnu-iphu ọbu.

43Oo ya bũ; g'onye uke lee ya ẹnya. Teke ọ bũ l'ọnyá, dũ onye ono l'ishi; ọzoo l'ọnu-iphu acha ọcha; bya adũkwapho nwa uswe-uswe; mbũ dũ g'ekpenta ono, eswe nswe, emeje nemadzũ l'akpọ-ẹhu ono;

44oo ya bũ l'onye ọbu bũ onye ekpenta; ọ bũru onye aasọ nsọ eviya. G'onye uke ono gũa ya l'onye aasọ nsọ; kele ekpenta nkiya tũru iya l'ishi.

45“G'onye ekpenta ono lakakwaa uwe iya; haa ẹgbushi iya g'ọ yagashihu ayagashihu; woru ẹkwa gbobuta ọgbo-ọnu; chia mkpu sũ lẹ ya bũkwa onye aasọ nsọ; ya bũkwa onye aasọ nsọ.

46Oo-buru onye aasọ nsọ jasũ teke ọ-ka mma. G'ọ bũru onye aasọ nsọ je eburu nkinyi iya l'azũ ẹka ndu Ízurelu kpọberu ọlo-ẹkwa phe.

Ekemu k'iphe, tsũru evu

47“O -buru l'ọ nweru uwe, tsũru evu; ọzoo uwe ẹji anũ; ọzoo uwe ọchaa;

48ọzoo ẹkwa, e kweru l'oghu ọchaa; ọzoo ọphu e gude ẹji anũ kwee; ọzoo l'akpọ; ọzoo l'iphe, e meru l'akpọ;

49teke ọ bũ l'ẹka ono, tsũru evu ono dũ oyingo-oyingo; ọzoo l'ọ dũ uswe-uswe; bẹ ọ bũkwa ekpenta. G'e jekwa egoshi iya onye uke.

50G'onye uke ono lekwa ẹnya l'ẹka ono, tsũru evu ono; woru iphe ọbu, tsũru evu ọbu gu-chia l'ọlo g'ọ nọ ujiku ẹsaa.

51O -be lẹ mbọku k'ẹsaa; g'onye uke ono je elebaa ya ẹnya ọzo. O -buru l'evu ọbu kabaa asakahũ l'uwe ọbu; g'a makwarũ l'ọ bũ ekpenta. Iphe ono, tsũru evu ono bũakwaa iphe, aasọ nsọ.

52G'onye ono kpọkwaa uwe ono ọku; m'ọ bũ uwe ẹji anũ; ọzoo uwe ọchaa; m'ọ bũ ẹkwa, e kweru l'oghu ọchaa; ọzoo ọphu e gude ẹji anũ kwee; ọzoo l'iphe, e meru l'akpọ, bũ ọphu evu ono dũ; g'a kpọkwaa ya ọku; kele ọ bũ ekpenta.

53“Ole ọ -bụru l'onye uke ono leri iya ẹnya; ọphu evu ọbu asakahuduru asakahu l'iphe ono;

54g'onye uke ono zia g'a saa iphe ono, tsuru evu ono asasa; l'ọ bya agụ-chia ya l'ulo g'ọ nọ ujiku ẹsaa ọzo.

55G'onye uke ono lee ẹnya l'iphe ono; mę a sachaa ya ono; ọ -bụru l'iphe ọbu ta agbanweduru ụdudu iya; obetakporu ọphu ọ sakahuduru asakahu; be ọ bukwa iphe, aasọ nsọ; g'a kpokwaa ya ọku; mę evu ọbu; ? ọ nọ iya l'iphu; m'ọ nọ iya l'azu.

56Ọ -bụru l'onye uke ono jeshiaru iya ele ẹnya; ẹka ono, tsuru evu ono rwakputewa arwakpute g'a sachaa iya ono; g'ọ lakafukwa ẹka ono, tsuru evu ono; mbu l'uwe ono; ọzoo l'akpo ono; ọzoo l'ekwa ono, e kweru ekwekwe ono; ọzoo l'ọphu a kparu akpakpa.

57Ọle ọ -bụru l'ọ watawaru atsu evu ono ọzo l'uwe ono; ọzoo l'iphe ono, e kweru ekwekwe; ọzoo l'ọphu a kparu akpakpa; m'ọ bu l'iphe ono, e meru l'akpo-anu ono; l'a maru l'ọ bu iphe, asakahu asakahu. G'a kpokwaa iphe, bu iphe, tsuru evu ono ọku.

58Iphe, bu iphe, tsuru evu, a sawaru asasa; ọphu evu ono aduedu iya; g'a saa ya k'ugbo ebo g'ọ buru iphe, a taa sọhedu nsọ.”

59Ono bu ekemu, duru iphe, bu evu, tsuru l'uwe ẹji anu; ọzoo l'uwe ọchaa; ọzoo l'ekwa, e kweru ekwekwe; ọzoo l'ọphu a kparu akpakpa; ọzoo l'ọphu e gude akpo-anu mee; g'a gwa ya iphe, a ta sọdu nsọ; ọzoo l'a guru iya l'iphe, aasọ nsọ.

Ndu Uke 14

Egoshi l'onye iphe eme l'akpo-ẹhu dụwaa iche

1Tọbudu iya bu; Chipfu bya epfuru yeru Mosisu su iya:

2“Owaa bu ekemu, ee-tsoje mboku, ee-me onye ekpenta shi eme g'a ta sọhe iya nsọ; G'e duru iya dutaru onye uke.

3G'onye uke ono shikwa l'eka ndu Izurelu kporu ulo-ekwa phe lufu je elerwee ya ẹnya ree. Ọ -bụru l'onye ono wekorohuwaru l'ekpenta ono, shi eme iya l'akpo-ẹhu ono;

4g'onye uke ono zia ozi g'e wotaru onye ọbu, eeme g'a ta sọhe nsọ ọbu ẹnu labo, no ndzu, a ta sọdu nsọ; waa oshi sida; waa ekwa uswe-uswe; waa ẹsua isopu.

5Onye uke ono asu g'e gbua ẹnu ono nanu l'eli ite, a kpuru l'urwa, e yeru mini, doru risaa.

6Enu ọphu no ndzu pho be ọo-nwuta; wota oshi sida pho; waa ekwa uswe-uswe pho; waa ẹsua isopu pho; tuko tsee le mee ẹnu ono, e gburu l'eli mini ono, du ree ono.

7L'ọ bya ephee ya onye ono ugbo ẹsaa; mbu onye ono, eeme g'a ta sọhe nsọ l'ekpenta ono, shi eme iya nu ono. L'ọ bya agwa ya l'onye a ta sọdu nsọ; woru ẹnu k'ono, dzu ndzu ono haa g'ọ pheba l'egu.

⁸Onye ono, byaru g'e mee ya g'a ta sọhe iya nsọ ono eje eworu uwe iya saa; kpushikọta eji, dọ iya l'ẹhu g'ọ ha; mę ẹgbushi iya; woru ẹhu wua lę mini; shi nno buru onye a ta sọdu nsọ. E -mechaa nno; l'ọ batawarọ l'ime ẹka ndu Ízurelu kpọberu ulo-ẹkwa phe; ọle g'ọ nokwaa l'azu ulo-ẹkwa iya ujiku ẹsaa.

⁹Ọ -nochaa ujiku ẹsaa g'ọ kpushikwaa eji, dọ iya l'ẹhu g'ọ ha ọzo. G'ọ kpushia ishi; yę ẹjí-agba; waa njibu-ẹnya; męwaro eji ọzo, dọgbaa ya l'ẹhu. L'ọ saa uwe iya; woru ẹhu wua lę mini; ọo ya bu; l'ọ buru onye a ta sọdu nsọ.

¹⁰“Teke o rwuru lę mbọku k'ẹsato; g'onye ọbu kputa unwu ebili labọ, adudu ẹka iphe mebyiru iya; waa ada aturu, gbaru apha, adudu ẹka iphe mebyiru iya. Teme l'o gude ọzo ẹto l'ime nkweka ukpokutu ereshi, e keru ọzo ẹto; gwọo lę manu; g'e gude iya gwee ngweja-nri. L'o wotakwaphọ manu, jiru konggo ejiji tukobe iya.

¹¹Onye uke ono, eme iya g'a ta sọhe iya nsọ ono; abya eduta onye ọbu, eeme g'a ta sọhe nsọ ọbu; yę iphemiphe ono, o gude bya ono; bya eworu dobe l'iphu Chipfu l'onu-abata ulo-ẹkwa-ndzukọ.

¹²L'ọ bya akputa nwa ebili ono nanu; yę konggo, manu jiru ejiji phọ; gude gwee ngweja-apfu-ugwo. G'ọ maa ngweja ono l'iphu Chipfu g'ọ buru ngweja-amama.

¹³“L'ọ bya eworu nwa ebili ono gbua l'ulo-du-nsọ; mbu l'eka ono, eegbuje anu, e gude egwe ngweja-iphe-eji; yę ngweja-akpo-oku. Ọo egube ono, ngweja-iphe-eji bu k'onye uke bukwapo gę ngweja-apfu-ugwo bukwapo nkiya; teme o buru ngweja, dọ nsọ shii.

¹⁴Onye uke ono emeta mee anu ono, e gude gwee ngweja-apfu-ugwo ono; ye onye ono, eeme g'a ta sọhe nsọ ono l'atakpa-nchi ẹkutara; waa lę mkpushi-eka ezeke-eka ẹkutara; yę mkpushi-okpa ezeke-okpa ẹkutara iya.

¹⁵Onye uke ono abya emeta konggo manu ono; bya emeru iya ye onwiya l'ọbochi-eka ẹkicha;

¹⁶L'ọ bya eworu mkpushi-eka ẹkutara tsee lę manu ono; meta iya phee ugbo ẹsaa l'iphu Chipfu.

¹⁷Manu ọphu ghuduru iya l'ọbochi-eka be ọo-tada onye ono, eeme g'a ta sọhe nsọ ono l'atakpa-nchi ẹkutara; waa lę mkpushi-eka ezeke-eka ẹkutara; waa mkpushi-okpa ezeke-okpa ẹkutara; waa l'eli mee anu ono, e gude gwee ngweja-apfu-ugwo ono.

¹⁸Manu ọphu ghuduru nu be ọo-hu onye ono, byaru g'e mee ya g'a ta sọhe iya nsọ ono l'ishi; gude pfua ugwo iphe-eji onye ono l'iphu Chipfu.

¹⁹“Onye uke ono abya egwee ngweja-iphe-eji ono; gude pfua ugwo iphe-eji, onye ono meru; mbu onye ono byaru g'e mee ya g'a ta sọhe iya nsọ ono. E -mechaa; l'o woru anu ono, ee-gude gwee ngweja-akpo-oku ono gbua;

²⁰woru ngweja-akpo-oku ono; yę ngweja-nri, tso iya nu l'oru-ngweja; gude pfua ugwo iphe-eji onye ono l'ọ bya aburu onye a ta sọdu nsọ.

- 21“Ole ọ -buru l'onye ọbu akpa nri; ọphu ọ dudu ike anụ iphemiphe ono, a gushiru ono; g'onye ọbu kpụta nwa ebili lanụ nụ g'ọ buru kẹ ngweja-apfụ-ugwo; l'e woru iya maa g'ọ buru ngweja-amama, e gude apfụ ugwo iphe-eji. Teme l'o wota nkeru-iri nkweka ukpokutu ereshi, a gworu lẹ manụ; g'ọ buru ngweja-nri; waa manụ, jiru konggo;
- 22mẹ ndo labo; ọzoo kparaka labo; ọphu rwukpoeru iya pho eka. Nanu be ee-gude gwee ngweja-iphe-eji; l'e gude ọphuu gwee ngweja-akpo-oku.
- 23O -be lẹ mboku k'esato l'ọ chiru iphemiphe ono byapfuta onye uke g'e gude mee ya g'a ta sohe iya nsọ; gude iya bya l'onu-abata ulo-ekwa-ndzuko l'iphu Chipfu.
- 24G'onye uke ono kputa nwaturu ono; yee konggo, manụ jiru ejiji ono je amaa l'iphu Chipfu g'ọ buru ngweja-amama.
- 25L'o woru nwaturu ono gbu; meta mee ya tada onye ọbu, eeme g'a ta sohe nsọ ọbu l'atakpa-nchi ekutara; waa lẹ mkpushi-eka ezeke-eka ekutara; wakwapho lẹ mkpushi-okpa ezeke-okpa ekutara.
- 26Onye uke ono abya emeta manụ ono bya emeru ye onwiya l'obochi-eka ekicha;
- 27l'o woru mkpushi-eka ekutara iya phee manụ ono ugbo esaa l'iphu Chipfu.
- 28Onye uke ono abya emeta manụ ono, du iya l'obochi-eka ono tada l'eka ono, ọ tadaru mee anụ ono, e gude gwee ngweja-apfụ-ugwo ono, bu iya bu l'atakpa-nchi ekutara onye ono, eeme g'a ta sohe iya nsọ ono; waa lẹ mkpushi-eka ezeke-eka ekutara; waa lẹ mkpushi-okpa ezeke-okpa ekutara iya.
- 29Manu ọphu ghuduru iya l'obochi-eka be oo-hu onye ono, byaru g'e mee ya g'a ta sohe iya nsọ ono l'ishi; gude pfua ugwo iphe-eji iya l'iphu Chipfu.
- 30L'ọ nwuta ndo ono; ọzoo kparaka ono, bu ọphu onye ono duru ike gbata; gude gwee ngweja.
- 31Nanu be oo-gude gwee ngweja-iphe-eji; l'o gude ọphuu gwee ngweja-akpo-oku; yee ngweja-nri. Oo egube ono bu g'onye uke a-nodu l'iphu Chipfu pfua ugwo iphe-eji onye ono, eeme g'a ta sohe nsọ ono.
- 32Ono bu ekemu, duru onye oome; mbu ekpenta ono; ọphu ọ dudu ike gbata iphe, ee-gude mee g'a ta sohe iya nsọ.”

Eka igbulọ tsuru evu

- 33Tobudu iya bu; Chipfu bya epfuru yeru Mosisu yee Eronu; su phe:
- 34“Unu -laepho ali Kėnanu ono, bu eka mu abya anu unu g'ọ buru okiphe unu ono; ọ -buru l'ọ duru ulo, no l'ali ono, mu meru; o nweru eka tsuru evu;
- 35g'onye nwe ulo ono jekwa akporu onye uke l'ulo iya gbekwa du iya g'ọ tsuru evu.

- 36 Onye uke ono a-sụ g'e gweshigbua iphe l'ulo ono; teme l'ọ bahu jeshia ahuma aka tsuru evu obu; ọo ya bu g'ọ tọ tuko ulo ono; yee iphe, nọ iya nọ gua l'iphe, aaso nsọ. E-gweshikotachaa iphe l'ulo ono; g'onye uke ono bahu l'ulo obu je elee ya enya.
- 37 G'ọ lee enya l'igbulọ aka tsuru evu obu; teke ọ bu l'ọ du oyingo-oyingo; ọzoo l'ọ du uswe-uswe; teme aka obu dalahu adalahu;
- 38 g'onye uke ono lufuta l'ulo ono; woru onu iya gu-chia g'ọ nọ ujiku esaa.
- 39 O -be le mboku k'esaa; g'onye uke laphu azu je elee enya l'ulo obu ọzo. O -buru l'evu obu sakahuru l'oma igbulọ ono;
- 40 l'ọ sụ g'e bvufu mkpuma ono, tsuru evu ono je etuphaa l'eka aaso nsọ l'azu mkpukpu.
- 41 L'e kwoshia igbulọ ime ulo ono ekwoshi mgburugburu; kpota iphe, e kwoshiru iya je awushia l'azu mkpukpu l'eka aaso nsọ.
- 42 L'e wota mkpuma ọzo gude tu-chishia enya iya ophu e bvukpofugbaaru pho; teme l'a kutakwapho epuchi ọzo gude rwaa ulo obu ọzo.
- 43 "Teke ọ bu l'evu obu chafutaru l'ulo obu ọzo g'e bvukpofuchaaru mkpuma mkpuma pho; e kwoshichaa ya; bya arwaphu iya azu obu;
- 44 g'onye uke laphu azu jee elee ya enya ọzo; teke ọ bu l'evu obu bakahuru l'ulo obu be ọ bukwa evu, asakahu asakahu du l'ulo ono; ọo ya bu; l'a maru l'ulo obu buwaa ulo, aaso nsọ.
- 45 G'e woru ulo obu gbukaa; vuta mkpuma ulo obu; me oshi iya; waa aja, e gude rwaa ya je awushia l'azu mkpukpu l'eka aaso nsọ.
- 46 Onye bahuru l'ulo ono teke ono, a gu-chikwaduru iya agu-chi ono; be a-buru onye aaso nsọ jasụ nchi ejihu.
- 47 Onye zeru l'ulo ono kua mgbenya; ọzoo ria nri; g'onye ono sakwaa uwe iya asasa.
- 48 "Ole ọ -buru l'onye uke byaru g'ọ lee ulo ono enya; ọ huma l'evu ono ta aduedu aka ọ nọba l'ulo ono g'a rwaphuchaaru iya azu; g'ọ gua ulo ono l'ulo, a ta sọdu nsọ; nọo kele evu obu ta aduedu.
- 49 Iphe, oo-gude mee ulo ono g'ọ tọ buhe ulo, aaso nsọ; bukwa g'ọ nwuta enu labo; wotakwapho oshi sida; waa ekwa uswe-uswe; waa eswa isopu.
- 50 L'ọ woru enu lanu gbua l'eli ite, a kpuru l'urwa, e yeru mini, doru risaa.
- 51 L'ọ wota oshi sida pho; waa eswa isopu pho; waa ekwa uswe-uswe pho; yee enu pho, dzu ndzu pho; tuko tsee le mee enu ophu e gburu egbugbu pho; yele mini pho, du ree pho; woru iya phee l'ulo ono akpo esaa.
- 52 Oo-gude mee enu pho; waa mini pho, du ree pho; waa enu ophu nọ ndzu pho; waa oshi sida pho; waa eswa isopu pho; waa ekwa uswe-uswe pho mee ulo ono g'a ta sọhe iya nsọ.

⁵³L'o gude ɛnu k'ɔphu nɔ ndzu phɔ lufu azu mkpukpu je ahaa ya g'o pheba l'oma ɛgu. O kwa ɛgube ono be oo-shi pɔua ugwo iphe-ɛji; shi nno safu nturuwu, du l'ulo ono. Oo ya bu l'ulo obu aburu ulo, a ta sɔdu nsɔ.”

⁵⁴Ono bu ekemu, g'ee-meje k'ekpenta, dukpoo l'udu iya l'udu iya; yee ejo akuruba;

⁵⁵waa k'evu, turu l'uwe; yee ophu turu l'ulo;

⁵⁶waa k'onye ɔnyá du l'ehu; ɔzoo iphe du g'ekpá; ɔzoo onye iphe tukashiru poopoo l'ehu;

⁵⁷g'e shi ɛgube ono goshi teke iphe, bu iphe, aasɔ nsɔ; waa teke o bu iphe, a ta sɔdu nsɔ. Ono bu ekemu, g'ee-meje k'ekpenta; waa k'iphe, tsuru evu.

Ndu Uke 15

Onye iphe asoshi l'ehu

¹Tɔbudu iya bu; Chipfu bya eɔfuru yeru Mosisu yee Erɔnu:

²“Unu ɔfuru yeru ndu Ízurelu; su phe-a: O -duru onye nweru iphe, asoshi iya asoshi l'ehu; be iphe ono, asoshi iya l'ehu ono bukwa iphe, aasɔ nsɔ.

³Iphe ono meakwaru onye obu; o buru onye aasɔ nsɔ; me iphe obu nɔdu asoshi g'ɔososhi; ɔzoo l'o duru iphe, e gude gbobuta iya be o bukwapho iphe, meru; a nɔdu asɔ iya nsɔ.

⁴Iphe, bukpoo iphe-azee, onye ono, iphe asoshi l'ehu ono zeru azee be buakwaa iphe, aasɔ nsɔ; teme iphemiphe, bu iphe, o noru anoo l'a-bukwarupho iphe, aasɔ nsɔ.

⁵G'onye denyiru eka l'iphe-azee onye obu; sakwaa uwe iya asasa; wua ehu. A -nɔwaa jasɔ nchi jihu be a taa sɔhedu iya nsɔ.

⁶Onye noru anoo l'iphe, onye iphe shi l'ehu asoshi shi nɔdu anoo; g'onye ono sakwaa uwe iya; wua ehu. A -nɔwaa jasɔ nchi jihu be a taa sɔhedu iya nsɔ.

⁷G'onye denyiru onye iphe shi l'ehu asoshi eka sakwaa uwe iya; wua ehu. A -nɔwaa jasɔ nchi jihu be a taa sɔhedu iya nsɔ.

⁸Onye ono, iphe asoshi l'ehu ono -gbua onye a ta sɔdu nsɔ onu-mini; g'onye obu sakwaa uwe iya; wua ehu. A -nɔwaa jasɔ nchi jihu be a taa sɔhedu iya nsɔ.

⁹Teme iphe, aagbajekpo agbagba, onye ono, iphe asoshi ono noru gbaa be buakwaa iphe, aasɔ nsɔ;

¹⁰teme onye denyiru eka l'iphe, onye obu shi nɔdu anoo; g'a sokwaa onye obu nsɔ jasɔ nchi ejihu. Onye wotaru iphe obu be a-sakwa uwe iya wua ehu. A -nɔwaa jasɔ nchi jihu be a taa sɔhedu iya nsɔ.

¹¹Onye iphe shi l'ehu asoshi -denyi onye ozo eka; ophu o kwoduru eka; g'onye ono sakwaa uwe iya asasa; wua ehu. A -nɔwaa jasɔ nchi jihu be a taa sɔhedu iya nsɔ.

12O -buru ite, a kpuru l'urwa be onye obu denyiru eka; g'a tukpokwaa ya; teke o bu iphe, e gude oshi mee; g'e gudekwa mini saa iphe obu asasa.

13“Onye ono, iphe asoshi l'ehu ono -kaepho mma; g'o gutaru onwiya ujiku esaa noo g'e gude mee ya g'a ta sohe iya nsọ; l'o saa uwe iya; gude mini, doru risaa wua ehu; l'o bya aburu onye a ta sodu nsọ.

14O -be le mboku k'esato l'o nwuta kparaka labo; ozoo unwu ndo labo gude bya l'ataphu Chipfu l'onu-abata ulo-ekwa-ndzuko; bya anu iya onye uke.

15Onye uke anwuta iya gude gwee ngweja. Nanu be oo-gude gwee ngweja-iphe-eji; l'o gude ophuu gwee ngweja-akpo-oku. Noo g'ee-shi bu ono l'o pfua ugwo iphe-eji onye ono, iphe asoshi l'ehu ono l'iphu Chipfu.

16“Teke nwoke gboshiru unwuda; g'o wukotakwa ehu iya l'ophu. A -nowaa jasụ nchi jihu be a taa sohedu iya nsọ.

17Ekwa; ozoo akpo, a gboru unwuda kpua be ee-gude mini saa asasa. A -nowaa jasụ nchi jihu be a taa sohedu iya nsọ.

18Nwoke yee nyee ya -kwaa akwakwa; o -buru le nwoke ono gboru iphe; g'ephenebo jekwa awua ehu. A -nowaa jasụ nchi jihu be a taa sohedu phe nsọ.”

Nwanyị, anọ nsọ

19“O -buru le nwanyị be nsọ-nwanyị eme be oo-buru onye mmerwu du l'ehu abali esaa; teme onye denyiru iya eka a-buru onye aasọ nsọ jasụ nchi ejihu.

20Iphe, bu iphe, o zekpooru azee teke ono, onono nsọ ono; ozoo iphe, o noru anọ be tukoakwaru buru iphe, aasọ nsọ.

21Onye denyiru iphe-azee ya eka; a-sa uwe iya asasa; wua ehu. A -nowaa jasụ nchi jihu be a taa sohedu iya nsọ.

22Onye denyiru iphe, o noru anọ eka; a-sa uwe iya asasa; wua ehu. A -nowaa jasụ nchi jihu be a taa sohedu iya nsọ.

23Onye denyiru iphe-azee ya eka; ozoo oshi, ononoje anọ eka be buakwaa onye aa-so nsọ jasụ nchi ejihu.

24O -buru le nwoke jepfuru nwanyị, anọ nsọ; mee ono, ala nwanyị ono -rwua ya l'ehu; g'a sokwaa ya nsọ noo abali esaa. Teme iphe, nwoke ono zeru azee g'o ha abukotaru iphe, aasọ nsọ.

25“O -buru le nwanyị be mee laru ujiku olemole le teke o too nodu nsọ; ozoo le mee obu laghataru onye obu ujiku ole, ononoje nsọ; g'a sokwaa onye obu nsọ g'aasoje iya me o -nodu anọ nsọ pho.

26Iphe, bukpo iphe-azee, o zeru azee l'iphe, bukpo mboku le mboku ono, mee ono ala iya ono; be aa-sokwapho nsọ g'a soru iphe-azee, oozeje me o -nodu anọ nsọ pho. Iphe, bu iphe, o noru anọ; g'a sokwaa ya pho egube ono, aasoje iya me o -nodu anọ nsọ ono.

- ²⁷Iphe, bu onye denyiru eka l'iphe ono buakwaa onye aaso nsọ. G'onye ono sakwaa uwe iya; wua ehu. A -nowaa jasụ nchi jihu be a taa sohedu iya nsọ.
- ²⁸Obenu le-a; mee obu -labuhue ya pho; g'o gutaru onwiya ujiku esaa noo. E -mechaa l'o bya aburu onye a ta sodu nsọ
- ²⁹O -be le mboku k'esato g'onye obu nwuta kparaka labo; ozoo unwu ndo labo; nwutaru onye uke l'onu-abata ulo-ekwa-ndzuko.
- ³⁰G'onye uke ono nwuta enu lanu gude gwee ngweja-iphe-eji; l'o gude ophuu gwee ngweja-akpo-oku. Onye uke ono e-shi nno pfa ugwo iphe-eji nwanyi ono l'iphu Chipfu le ke mee ono, laru iya nu ono, shi mee ya; o buru onye aaso nsọ ono.
- ³¹“Noo g'unu e-shije dobe unwu Izurelu iche l'iphe, e-me g'ephe buru ndu aaso nsọ; g'ephe ta aburu ndu aaso nsọ; nwuhu; m'ephe turwua ulo-ekwa mu ono, no l'echilabo phe ono.”
- ³²Ono bu ekemu, a turu doberu nwoke, iphe asoshi asoshi l'ehu; yee nwoke, gboru unwuda; shi nno buru onye aaso nsọ;
- ³³bya abukwarupho ke nwanyi, nsọ-nwanyi eme. O bu k'onye iphe asoshi l'ehu; m'o bu nwoke-o; m'o bu nwanyi-o; yee k'onye jepfuru nwanyi, aaso nsọ.

Ndu Uke 16

Eswe apfu ugwo iphe-eji

(Uke 23:26-32; Ogú 29:7-11)

- ¹O be le g'unwu Eronu duchaa ebo nwuhu; g'ephe jekubeerupho l'ataphu Chipfu pho; Chipfu bya epfuru yeru Mosisu;
- ²su iya: “Pfururu yeru nwune ngu, bu Eronu su iya g'o to bujekwarupho teke du iya ree be oo-byaje l'eka-kakota-adu-nsọ ono; mbu l'eka ono, e gude ekwa kobuta ono, bu iya bu l'iphu eka aapfuje ugwo iphe-eji, bu ophu no l'eli okpoko Chileke ono; odumeka be oo-nwuhukwa. Noo kele mu anoduje l'urwukpu bya l'eli eka aapfuje ugwo iphe-eji ono.
- ³Waa ge Eronu e-gudeje bahu l'eka-kakota-adu-nsọ ono baa: Oo-gude nwa oke-eswi, oo-gude gwee ngweja-iphe-eji; bya egude ebili, oo-gude gwee ngweja-akpo-oku.
- ⁴“L'o chita uwe-ime-ehu ochaa, e doberu nsọ pho yee; bya eyekwaapho nwiba ochaa, eeyeje l'ime ehu; l'o wota ekwa-ochaa atu-buta-l'upfu gude tubuta onwiya; bya ewota okpu-ekwa ochaa kpuru. Uwe ono g'o ha dukota nsọ; noo g'o gude o je l'a-wuada ehu teme l'o gude uwe ono kwaa onwiya akwa ono.
- ⁵“Ge ndu Izurelu kpee Eronu mkpi labo g'o gude gwee ngweja-iphe-eji; waa ebili lanu, oo-gude gwee ngweja-akpo-oku.
- ⁶Ge Eronu kputa oke-eswi pho gude gwee ngweja-iphe-eji ke nkiya; shi nno pfa ugwo iphe-eji, o meru; yee ke ndibe iya l'ataphu Chipfu.
- ⁷L'o bya akputa mkpi labo pho bya l'ataphu Chipfu l'onu-abata ulo-ekwa-ndzuko.

⁸Erõnu abya eworu ido t̄aru mkpi labõ ono. Ido lanu a-buru ke Chipfu; õphuu aburu ke Azazelu.

⁹Erõnu abya akputa mkpi õphu ido Chipfu daru gude gwee ngweja-iphe-eji;

¹⁰obenu le mkpi õphu ido ke Azazelu daru be aa-kputa le ndzu bya l'ataphu Chipfu g'e gude iya pfua ugwo iphe-eji; teme l'a kputawa iya ro je ahaa l'echiegu g'o lapfu Azazelu.

¹¹“Erõnu abya akputa oke-eswi pho, oo-gude gwee ngweja-iphe-eji; gude pfua ugwo iphe-eji onwiya yee ke ndibe iya pho. L'o woru oke-eswi ono gbua g'o buru ngweja-iphe-eji k'onwiya ono.

¹²L'o wota iphe, aaguje oku; vota oku l'oru-ngweja, no l'ataphu Chipfu; vo-jia ya avo-ji; bya ahata unwu-isensu õphu e-ji mkpoji eka labo, e gweru rwukuru rwukuru; gude bahu l'eka ono, e kobutaru ekwa ono.

¹³L'o bya eworu unwu-isensu ono tukobe l'eli oku ono, no l'ataphu Chipfu ono; k'õphu enwuru-oku unwu-isensu ono a-kpu tuuu kpu-chia eka ono, aanõduje apfu ugwo iphe-eji ono, no l'eli okpoko ono, e doberu ekemu ono. Oo ya bu k'õphu o to nwhudu.

¹⁴L'o meta mee oke-eswi ono; gude mkpushi-eka phee ya l'eli eka ono, aapfuje ugwo iphe-eji ono; l'o gudekwapho mkpushi-eka phee mee-iphe ono mgbo esaa l'iphu eka ono, aapfuje ugwo iphe-eji ono.

¹⁵“L'o woru mkpi pho, e gude gwee ngweja-iphe-eji ndu Izurelu pho; woru gbua egbugbu; gude mee ya bahu l'ime eka ono, e kobutaru ekwa ono; woru mee ya ono mee g'o meru mee oke-eswi pho; mbu phee ya l'eli eka ono, aapfuje ugwo iphe-eji ono; ye le iphu eka ono, aapfuje ugwo iphe-eji ono.

¹⁶O buru egube ono be oo-shi pfua ugwo iphe-eji k'eka-kakota-adu-nsõ ono; kele ndu Izurelu be buwaa ndu aasõ nsõ; waa kele ephe meswewaru iphe l'iphe-eji, ephe mekotaru g'o ha. O bukwarupho nno bu g'oo-me iya le k'ulo-ekwa-ndzuko, bu õphu no l'echilabo phe teke ono, ephe bu ndu aasõ nsõ ono.

¹⁷G'o to dukwa onye a-noðu l'ime ulo-ekwa-ndzuko ono; me Erõnu bahuepho l'ekakakota-adu-nsõ ono je anõdu apfu ugwo iphe-eji; jasõ l'o pfu-ghee ugwo iphe-eji k'onwiya; yee ke ndibe iya; yee ke ndu Izurelu l'õphu; lufuta.

¹⁸E -mechaa l'o jeshia l'oru-ngweja ono, no l'ataphu Chipfu ono; je apfua ugwo iphe-eji k'eka ono. L'o meta mee oke-eswi pho; yee mee mkpi pho; wuru ye le mpu, e mobegbaaru l'oru-ngweja ono.

¹⁹L'o meta mee ono gude mkpushi-eka iya phee ya l'oru-ngweja ono mgbo esaa; shi nno swafu iya asõ nsõ ke ndu Izurelu; dobe iya nsõ ozo.”

Mkpi, vu iphe-eji, ndu Izurelu meru

²⁰“Erõnu -pfuchaa ugwo iphe-eji, e meru l'eka-kakota-adu-nsõ ono; yee k'ulo-ekwa-ndzuko ono; yee k'oru-ngweja ono; l'o bya akpufuta mkpi pho, no ndzu pho.

²¹L'ò bya eworu ẹka labọ byabẹ mkpi k'ono, nọ ndzụ ono l'ishi; mbụ Erọnu; bya atuko ẹjo-iphe, ndu Ízurelu mekotaru; mekpoo emeswe, ẹphe meswekotaru; yee iphe-ẹji, ẹphe mekotaru g'ò ha; pfushikọta kpua ya; l'ò tuko iya byabẹ mkpi ono l'ishi; kpuru iya kpẹe onye a turu ẹka g'o je ahaa ya l'echiegu.

²²Ọ buru mkpi ono e-vutakọta ẹjo-iphe pẹ g'ò ha laa l'oma-egu; ẹka e budu ebubu; je anodu. Ọ buru ẹka oo-je ahaa mkpi ono bu l'echiegu.

²³“Erọnu abahụ l'ulo-ekwa-ndzuko je eyefu uwe ochaa ono, o yeru teme o bahushia l'eka-kakota-adu-nsọ ono. O -yefuchaa ya l'ò haa ya l'eka ono.

²⁴L'ò nodu l'eka du nsọ wua ẹhu; woru uwe iya ye; lufuta bya egwee ngweja-akpo-oku ke nkiya; yee ke ndu Ízurelu; shi nno pfua ugwo iphe-ẹji k'onwiya yee ke ndu Ízurelu.

²⁵L'ò woru ẹba-anu, e gude gwee ngweja-iphe-ẹji pho kpoo oku l'oru-ngweja.

²⁶Onye pho, jeru je ahaa mkpi pho; g'ò lapfu Azazelu pho; l'a-sakwapho uwe iya; wua ẹhu; teme l'ò batawaro l'ime ẹka ndu Ízurelu kpoberu ulo-ekwa pẹ.

²⁷Oke-eswi pho; yee mkpi pho, e gude gwee ngweja-iphe-ẹji pho, bu ophu e wobataru mee ya l'eka-kakota-adu-nsọ g'e gude pfua ugwo iphe-ẹji pho; be aa-paru lufu l'azu ẹka ndu Ízurelu kpoberu ulo-ekwa pẹ; l'e woru akpo iya; waa anu iya; mekpoo nshi iya kpoo oku.

²⁸G'onye ono, jeru akpoo ya oku ono sakwaa uwe iya asasa; wua ẹhu; teme l'ò bata l'ime ẹka ndu Ízurelu kpoberu ulo-ekwa pẹ.”

Ekemu eswe apfu ugwo iphe-ẹji

²⁹“No iya; g'iphe-a bukwaru iphe, Chileke toru okpa iya su g'e tsoje, unu e-meje jasụ l'ojejoje. Mbụ-a; o -rwuje l'onwa esaa; le mboku, onwa ono du l'abalị iri; unu aswiye egu. Unu te ejekwa ozi ejeje ophu; mbụ unube ndu a nwuru le Ízurelu; me ndu lwaru alwalwa, bu l'echilabo unu;

³⁰kele oo mboku ono be aa-pfu ugwo iphe-ẹji, unu meru; g'e gude sachafu unu iphe-ẹji, unu meru g'ò ha; unu aburu ndu a ta sodu nsọ l'iphu Chipfu.

³¹Mboku ono a-buru unu eswe Sabatu, bu eswe-atuta-unme; unu aswija egu. Iphe ono bu iphe, Chileke toru okpa iya su g'e tsoje, unu e-meje jasụ l'ojejoje.

³²Ọ buru onye uke, a wuru manụ l'ishi dobe nsọ g'ò buru onye uke l'ozori nna iya bu onye a-pfu ugwo iphe-ẹji obu. Oo-yeje uwe ochaa ono, du nsọ ono.

³³L'ò pfua ugwo iphe-ẹji, e meru l'eka-kakota-adu-nsọ; me k'ulo-ekwa-ndzuko; me k'oru-ngweja; l'ò bya apfua ugwo iphe-ẹji, ndu-uke meru; me ke ndu Ízurelu l'ophu.

³⁴Ono a-bwaruro iphe, Chileke toru okpa iya su g'e tsoje, unu a-nodu emewaro jasụ l'ojejoje; mbụ l'aa-pfuje ugwo iphe-ẹji, unwu Ízurelu l'ophu mekotaru. Ọ buru mgbo lanu l'apha be ee-meje iya.” E mekotaepho iphemiphe ge Chipfu suru Mosisu g'e mee ya.

Ndu Uke 17

Ekemu g'a ta tajeshi mee-iphe

- ¹Tɔbodu iya bu; Chipfu bya epfuru yeru Mosisu su iya:
- ²“Waa iphe, ii-pfuru yeru Erɔnu yee unwu iya; yee unwu Ízurelu l'ophu baa; su phe-a: Wakwa iphe, Chipfu turu ekemu iya baa:
- ³Ɔ -duru onye Ízurelu gburu eswi; ɔzoo nwaturu; ɔzoo egbu l'ime eka ephe kpɔbegbaaru ɔlo-ekwa phe; ɔzoo l'azu eka ono;
- ⁴ophu onye ono egudedu iya bya l'onu-abata ɔlo-ekwa-ndzuko g'e gude gwee ngweja nu Chipfu l'iphu ɔlo-ekwa Chipfu ono; onye ono be ikpe ochi nmaakwaru; ɔ buakwaa ochi be o gburu. G'e bufukwa iya le ndu nkiya.
- ⁵Iphe, meru iphe, a turu ekemu-a bu g'o mee ge ndu Ízurelu wotaje ngweja ono, ephe anɔduje egwe l'oma egu ono; bya egweru nu Chipfu; mbu g'ephe woru iya nu onye uke l'onu-abata ɔlo-ekwa-ndzuko; g'o gbua ya g'o buru ngweja-ehu-guu, e gweru Chipfu.
- ⁶Onye uke ono ephee mee anu ono l'oru-ngweja l'onu-abata ɔlo-ekwa-ndzuko; bya akpoo eba iya oku g'o buru ngweja, mkpo iya du Chipfu ree.
- ⁷Ephe te egweeduru ngweja phe anu agwa, a kpuru; o du g'eghu; mbu agwa ono, meru ephe du gheleghelehele ono. Ono bu iphe, Chipfu toru okpa iya su g'e tsoje, ephe anodu eme jasuu l'ojejoje; ephe eme iya; e -shi l'ogbo sweru ogbo.
- ⁸“Su phe le-a: Onye bu onye Ízurelu; ɔzoo onye lwaru alwalwa, ephe l'ephe bu, bu onye gweru ngweja-akpo-oku; ɔzoo l'o duru ngweja ɔzo, o nuru;
- ⁹ophu o gudedu iya bya l'onu-abata ɔlo-ekwa-ndzuko bya egweru nu Chipfu; g'e bufukwa onye obu le ndu nkiya.
- ¹⁰“Iphe, bukpo onye Ízurelu; ɔzoo onye lwaru alwalwa l'ali Ízurelu, taru mee-iphe be mu a-nɔduepho achi le njo; mbu l'onye ono, taru mee-iphe ono; be mu e-bufu le ndu nkemu.
- ¹¹Noo kele ndzu iphemiphe, e meru ememe dobe bu le mee be o du. O kwa mee ono be mu nuru unu g'unu gudeje iya bya apfua ugwo iphe-aji unu l'oru-ngweja. O buru mee be eegudeje apfu ugwo ndzu nemadzu.
- ¹²Oo ya kparu iphe, mu suru unube ndu Ízurelu: G'o to dukwa g'unu ha onye a-taje mee-iphe; ophu o dukwa onye lwaru alwalwa, unu l'ephe bu ebubu, a-taje mee-iphe.
- ¹³“O -duru onye Ízurelu; ɔzoo onye lwaru alwalwa, unu l'ephe bu, akpa l'egbudu; o -gbua anu; ɔzoo enu, a ta sodu nsu; g'onye ono phushikwaa mee ya l'ali kpochia ya eja.
- ¹⁴Noo kele iphemiphe, no ndzu, e meru ememe bu le mee be ndzu iya no. O buru iya kparu, iphe, mu suru ndu Ízurelu: ‘Unu ta adukwa mee iphe, unu a-taje; kele ndzu iphemiphe, e meru ememe bukota le mee be o no; l'onyemonye taru iya nu be e-bufukwa ebufu.’

¹⁵“Onyemonye kpọ; m'ọ bụ onye a nwuru ị Ịzurelu; m'ọ bụ onye lwaru alwalwa, bụ onye taru iphemiphe, bụ iphe, nwuhuru anwuhu; ọzoo iphe, anu dzugburu; be a-sa uwe iya asasa; wua ẹhu; l'ọ buru onye aaso nso jasụ nchi ejihu; teme l'ọ buru onye a ta sodu nso.

¹⁶Ọle ọ -buru l'onye ọbu ta saduru uwe iya; ọphu ọ wuduru ẹhu; be ejo-iphe ọbu, o meru tukokwaru iya l'ishi.”

Ndu Uke 18

Akwakwa nwoke yee nwanyi ọphu adudu ree

¹Tobudu iya bu; Chipfu bya epfuru yeru Mosisu su iya:

²“Waa iphe, ii-pfuru yeru unwu Ịzurelu baa; su phe-a: O kwa mbedua bu Chipfu; bya aburu Chileke unu.

³Unu te emekwa g'eemeje ị Ijiputu, bu iya bu ẹka ono, unu shi buru ono; teme ọphu unu emekwa g'eemeje l'alị Kėnanu, bu alị ẹka ono, mu edu unu ala ono. Unu te etsokwa ẹka phe.

⁴Unu mejekwa iphe, mu ọru l'ekemu; waa iphe, mu ọru ọkpa iya su g'e tsoje; kele ọ kwa mbedua bu Chipfu; bya aburu Chileke unu.

⁵Unu tsojekwa iphe, mu ọru ọkpa iya su g'e tsoje; unu emekwapho iphe, mu ọru l'ekemu, bu iphe, onye meru iya nu e-gude nodu ndzu. O kwa mbedua bu Chipfu.

⁶“G'ọ to dukwa onye e-jepfu onye ephe l'iya bu ọkpobe abubu g'ephe l'iya kwaa; kele ọ kwa mbedua bu Chipfu.

⁷Te ejekwa g'unu ị ne ngu kwaa; shi nno mee nna ngu iphe-iphere; noo kele onye ọbu bu ne ngu. G'unu ị ne ngu ta akwakwaa akwakwa nwoke yee nwanyi.

⁸Te jepfukwa nyee nna ngu; kele ọ kwa eme nna ngu iphe-iphere.

⁹Te jepfukwa onye unu l'iya bu nwune ọzoo nwanna; m'ọ bu l'unuphu lanu be e yeru unu; ọzoo l'e yeru iya l'ibe onye ọzo.

¹⁰Te jepfukwa nwanwa ngu; m'ọ bu nwa ngu nwoke nwuru iya; ọzoo nwa ngu nwanyi nwuru iya; kele ono bukwa eme onwongu iphe-iphere.

¹¹Te jepfukwa nwada nyee nna ngu; mbu onye e yeru nna ngu; noo kele ọ bu nwanna ngu nwanyi.

¹²Te jepfukwa nwune nna ngu; noo kele ephe ị nna ngu bu mee lanu.

¹³Te jepfukwa nwune ne ngu; noo kele ephe ị ne ngu bu mee lanu.

¹⁴Te jepfukwa nyee nwune nna ngu; shi nno mee nwune nna ngu ọbu iphe-iphere, noo kele ọo nyee nwune nna ngu.

¹⁵Te jepfukwa nyee nwa ngu; kele ọo nyee nwa ngu be ọ bu. Be jepfukwa iya.

¹⁶Te jepfukwa nyee nwune ngu; kele ọ kwa eme nwune ngu iphe-iphere.

¹⁷Te jepfukwa nwanyi; yee nwa iya; ophu i jepfukwa nwanwa nwanyi ono; ozoo onye ophu nwa iya nwoke nwuru; ozoo onye nwa iya nwanyi nwuru; noo kele ephe l'iya be bu mee lanu. Onye eme nno eme ejo-ememe.

¹⁸Te ejekwa aluta nwune nyee ngu g'ephe le nwune iya bya anodu kpaaha enya l'ibe ngu. Teme unu l'iya akwaa akwakwa nwoke yee nwanyi l'eka nyee ngu nokwadu ndzu.

¹⁹“Te jepfukwa nwanyi teke onono nsu; mbu teke aasokwadu iya nsu ke nsu-nwanyi ono, eme iya nu ono.

²⁰Te jepfukwa nyee nwoke obutobu ngu; shi nno merwua onwongu.

²¹Ta adukwa unu ngu ophu ii-kwe g'e gude kpoo oku gude gwaa agwa ono, bu Moleku; mbu-a; te shikwa egube ono merwua epha Chileke ngu. O kwa mbedua bu Chipfu.

²²Te jepfukwa nwoke ibe ngu g'unu l'iya kwaa akwakwa nwoke yee nwanyi; kele ono bukuwa ebyi.

²³Te jepfukwa anu; shi nno merwua onwongu. G'o to dukwa nwanyi, a-togbo onwiya g'anu jepfu iya; kele ono bukuwa ejo ahuma be o bu.

²⁴“G'o to dukwa iphe ono me nanu, unu e-gude merwua onwunu; noo kele o iphemiphe-a be ohamoha gude merwushia onwophe; mbu ndu-a, mu abya achifu l'iphu unu-a.

²⁵Umere phe ono woru ali eka ono merwushia; mu nua ndu eka ono aphu; ali ono gboshia ndu bu iya nu g'onye gboru egbo.

²⁶Ole-a; unu tsojekwa iphe, mu toru okpa iya su g'e tsoje; waa iphe, mu turu l'ekemu. Ophu o dukwa onye e-je eme iphe ono, bu ahuma ono me nanu. G'onye a nwuru le Izurelu te emekwa iya; ophu onye lwaru alwalwa emekwa iya;

²⁷kele o ahuma ahuma ono g'o ha be ndu ali-a meru; mbu ndu ono, vuru unu uzo bua l'eka-a; ephe merwushia ali-a.

²⁸O kwa k'ophu ali ono ata agboshidu unu g'onye gboru egbo; me unu merwushie ya pho; egube ono, o gboshiru oha ono, vu unu uzo ono.

²⁹Kele o -duru onye meru ahuma ahuma ono; be ee-bufukwa onye ono le ndu nkiya.

³⁰“Noo g'o gude unu je l'emeje iphe, mu suru g'e meje; g'o to du ejo omelali ono ophu unu e-meje, bu ophu e shi emeje teme unu lwa ono; ophu unu egude iya merwushia onwunu; kele o kwa mbedua bu Chipfu; bya aburu Chileke unu.”

Ndu Uke 19

Ekemu, ekemu ozo dugbaa nu

¹Tobudu iya bu; Chipfu bya epfuru yeru Mosisu su iya:

- 2“Waa iphe, ii-pfuru yeru unwu Ízurelu l'ophu baa; sù phẹ lẹ-a: Unu dukwa nsọ; kele mbèdua, bụ Chipfu bya aburu Chileke unu dukwa nsọ.
- 3G'onyenonu l'ime unu kwabejekwa ne iya ephe lẹ nna iya ùbvù. Unu edobeje ekemu eswe-atuta-unme mu; kele ọ kwa mu bụ Chipfu; bya aburu Chileke unu.
- 4“Unu te jejekwa l'agwa; ophu unu akpukwa agwa akpukpu doberu onwunu; kele ọ kwa mbèdua bụ Chipfu; bya aburu Chileke unu.
- 5“Unu -nọdu egweru Chipfu ngweja-ẹhu-guu; unu gwejekwa iya l'uzo, ọo-nata iya unu.
- 6G'a tajekwa iphe ngweja obu lẹ mbọku, unu gweru iya; ọzoo lẹ nchitabọhu iya. Ọ -buru l'o duru ophu phoduru jasụ lẹ mbọku k'eto; g'a kpoo ya ọku.
- 7Ọ -bukwanuru l'a taru iya ilile lẹ mbọku k'eto ono bẹ ọ buakwaa ahuma bẹ e meru; ophu a taa nataekwa iya.
- 8Oo ya bụ l'onyemonye, bụ onye taru iya nù bẹ ejo-iphe, o meru a-tukoru l'ishi; kele o merwuru iphe, duru Chipfu iche. Onye ono bẹ ee-bufukwa lẹ ndu nkiya.
- 9“Unu -nọdu akpata iphe, unu meberu l'egu; unu ta akparwujekwa okoke; ophu unu aturutajekwa ophu nashihuru ndu akparu iya unu daa l'ali.
- 10Unu te jejekwa mkpakwa akpuru vayinu l'opfu-vayinu unu; ophu unu aturutajekwa ophu dashihuru l'ali. Unu pajeru ndu k'ono haaru ndu ukpa; waa ndu lwaru alwalwa; noo kele ọ kwa mbèdua bụ Chipfu; bya aburu Chileke unu.
- 11“Unu te ezijekwa iphuru; ophu unu adzujekwa uka; ophu unu aghojekwaru nwibe unu ugho.
- 12Unu ta akpapyabejekwa iphe, unu meru gude epa mu gua enwa; shi nno merwua epa Chileke unu. Ọ kwa mbèdua bụ Chipfu.
- 13“Te erijekwa nemadzu ibe ngu urwu; ophu i najekwa iya nfu. G'aswa ozi onye i butaru k'ozi ta akwajekwa ngu akwakwa l'eka futa utsu.
- 14Te ephujekwa onye ada nkuchi iphu; ophu i dochijekwa onye ata aphudu uzo iphe l'uzo. Tsuje Chileke ngu ebvu; noo kele ọ kwa mbèdua bụ Chipfu.
- 15“Unu te ekpejekwa ikpe, apfuduru-oto. Unu te elejekwa onye ukpa enya l'iphu haaru iya enge; kele ọ bụ onye ukpa; ophu unu akwabejekwa onye ha shii ùbvù haaru iya enge; kele ọ bụ onye ha shii. G'ikpe, unu e-kpeje nemadzu ibe unu buru ikpe, pfuru oto.
- 16Te etsokwaru aghaphe asuphe asulasu; ophu i nọdujekwa lẹ mpfube g'e gbua nwibe ngu. Ọ kwa mbèdua bụ Chipfu.
- 17“Gẹ nwune ngu ta adujekwa ngu ashị l'ime okpoma. Gudeje obu ngu baaru iya mba g'i ti tsoru keta oke l'ejo-iphe, onye obu meru.

18Te emelatajẹkwa iphe, unwu ndibe unu meru ngu; ophu o dukwa onye ophu ii-vujeru aphu l'obu. O chia gi yee nemadzu ibe ngu obu gi yeru onwongu. O kwa mbedua bu Chipfu.

19“Unu mejekwa iphe, mu toru okpa iya su g'e tsoje. G'a ta hajekwa anu-ulo g'o shia ophu yee ya abudu udu anu lanu. Ophu i kujekwa uzi iphe labo l'opfu ngu; ophu i yejekwa uwe, abudu udu ekwa lanu be e gude kwaa ya.

20“O -duru onye jepfuru nwamgboko, a gbaru ohu, e kwetawaru l'ee-ke nwoke ozo; teme ophu o budu l'a gbafutawaru iya g'o nweru onwiya; g'e kpekwa ya ekpekpe nukwa ndu obu aphu, rwuberu phe nu. Ole g'e te egbukwa phe egbugbu; noo kele nwamgboko ono bukwa du ohu.

21G'onye ke nwoke kputakwa ebili gude bya anu l'onu-abata ulo-ekwa-ndzuko; g'e gude gweeru iya ngweja-apfu-ugwo l'iphu Chipfu.

22Onye uke egude ebili ono, e gude gwee ngweja-apfu-ugwo ono pfua ugwo iphe-eji onye ono l'iphu Chipfu; l'a gvaru iya nvu l'iphe-eji ono, o meru ono.

23“Unu -bahuepho l'alì ono; unu bya eyeshia ya oshi-omi, dugbaa iche iche, eeri mebyi iya eriri; unu sojekwa mebyi iya nsò. G'a sokwaa ya nsò ono apha eto; g'e te erikwa iya eriri.

24Teke o beerupho l'apha k'eno g'e doo akpuru, oshi ono mitaru nsò; woru gweeru Chipfu ngweja-ekele.

25O -be l'apha k'ise; unu awatawaro eri akpuru oshi obu. O buru nno bu g'ee-shi; iphe, unu meberu l'alì emehuaha; eevu aka shii eje. O kwa mbedua bu Chipfu; bya aburu Chileke unu.

26“Unu ta atajekwa anu, mee dukwadu. Unu te emejekwa omamanshi; ophu unu emejekwa mgbashi.

27Unu ta akpufubebejekwa egbushi, no unu l'ishi; ophu unu akpu-byishijekwa eji-agba unu akpubyishi.

28Unu te eyebatajekwa onwunu onya l'ehu opfu le nemadzu nwuhuru; ophu unu ebyikashijekwa onwunu mbo. O kwa mbedua bu Chipfu obu.

29“Te emekwa nwada ngu g'o buru nwanyi-ovuoba; shi nno merwua nwa ngu obu; a -nonyakwa; o buru ndu agba ukpara e-sweta ndu unu; ejo-ememe eji alì ono bushihu.

30Unu dobeje ekemu eswe-atuta-unme mu; unu akwabeje ulo mu ono, du nsò ono ubvu; kele o kwa mbedua bu Chipfu.

31“Unu te ejejekwa aji maa l'ibe ndu aphu ophulenyà; ozoo ndu jibya; noo kele epe e-merwu unu. O kwa mbedua bu Chipfu; bya aburu Chileke unu.

32“Gbeshijekwaru ndu-ishi-ewo l'oshi. Kwabeje ndu bu ogerenya ubvu; l'i tsuje Chileke ebvu. O kwa mbedua bu Chipfu.

33“O -duru onye lwaru alwalwa l'alì unu; unu te emekpakwa iya ehu.

³⁴G'e mejekwa onye lwaru alwalwa, bu l'alị unu g'eemeje onye a nwuru lẹ Ízurelu. Unu yekwaa onye ono obu g'unu yeru onwunu; noo kele unubedua shikwapho buru ndu lwaru alwalwa l'alị Ijiputu. O kwa mbedua bu Chipfu bya aburu Chileke unu.

³⁵“Unu -nodu atu ogologo iphe; ozoo erwa iphe; ozoo g'iphe habe l'igwerigwe; unu te emejekwa iya l'uzo, apfuduru-oto.

³⁶Unu gudejekwa iphe, darwuru nu gude mee ya; mbu iphe, e gude atu erwa iphe ophu bu okpobe iya; yee okpobe nkweka; yee okpobe ekpemu be bugbaa iphe, unu e-gudeje tua iphe. O kwa mbedua bu Chipfu; bya aburu Chileke unu; onye dufutaru unu l'alị Ijiputu.

³⁷Oo ya bu le-a; unu tsokotaje iphe, bukpo iphe, mu toru okpa iya su g'e tsoje; waa iphe, mu turu l'ekemu g'ọ ha. Unu meje iya nno; noo kele o kwa mbedua bu Chipfu.”

Ndu Uke 20

Ahu onye meru iphe-aji

¹Tobudu iya bu; Chipfu bya epfuru yeru Mosisu su iya:

²“Waa iphe, ii-pfuru yeru unwu Ízurelu baa: Iphe, bukpo onye Ízurelu; ozoo onye lwaru alwalwa bya eburu lẹ Ízurelu, kputaru nwa iya je anu Moleku; g'e gbukwa onye ono egbugbu. Ge mkpukpu ono l'ophu wufutakwa je atugba ya le mkpuma.

³Mbedua l'onwomu a-gbanwuberu onye ono iphu mu; bufu iya le ndu nkiya; kele o gude nwa iya gwaa Moleku; shi nno merwua ulo mu ono, du nsọ ono; bya arwutoshia epha mu ono, du nsọ ono.

⁴O -buru le ndu mkpukpu ono humaru onye kputaru nwa iya je anu Moleku; ephe nyia nchi manu; ophu ephe egbuduru onye obu;

⁵be mu a-gbanwubekwaru onye obu iphu mu; yee ndibe iya; bufu phe le ndu nkephe; mekpoo iphe, bu ndu ono, yee ya eshiswe uzo; jeru; ephe le Moleku nodu eri ogori ono.

⁶“Onye ejeje aji maa l'ibe ndu jibya; shi nno du gheleghelehele; be mu a-gbanwubekwa iphu; bufu iya le ndu nkephe.

⁷Unu dobekwa onwunu iche; unu adu nsọ; noo kele o mbedua bu Chipfu; bya aburu Chileke unu.

⁸Unu dobe iphe, mu toru okpa iya su g'e tsoje; meje iya ememe; kele o mbedua bu Chipfu, emeje unu g'unu du nsọ.

⁹“Onye phuru nna iya; ozoo ne iya iphu; g'e gbukwaa onye obu egbugbu; kele o nna iya; ozoo ne iya be o phuru iphu; ge mee ya tu-kokwaru iya l'ishi.

¹⁰“O -buru le nwoke jepfuru nyee nwoke ibe iya; ephe shi nno ria ogori; g'e gbukwaa nwoke obu yee nwanyi obu egbugbu.

- 11 Ozo bu l'onye jepfuru nyee nna iya bukwa nna iya be o meru iphe-iphere. G'e gbukwaa ephenebo egbugbu; ishi ochi phe atu-koru phe l'ishi; mbu ndu ono, e gburu ono.
- 12 Onye -jepfuru nyee nwa iya; g'a tuko ephenebo gbua; noo kele iphe, epe meru bu akpamara. Ishi ochi phe bukwa onwophe be o tu-koru l'ishi.
- 13 O -buru le nwoke jepfuru nwoke ibe iya; epe l'iya kwaa akwakwa nwoke yee nwanyi; be ephenebo mekwaru ebyi. G'e gbukwaa ephenebo egbugbu. Ishi ochi onwophe bukwa epebedua be o tu-koru l'ishi.
- 14 Onye jeru aluta nwanyi; bya emechaa je alutafua ne nyee ya ono mekwaru ejo-ememe. G'a kpatakwa nwoke ono; yee unwanyi labo pho je akpo odu. Oo ya bu; g'ejo-ememe, du egube ono ta adu l'echilabo unu.
- 15 Teke o bu le nwoke jepfuru anu; g'e gbukwaa ya egbugbu; gbukwapho anu obu.
- 16 O -buru le nwanyi togboru onwiya g'anu jepfu iya; g'e gbukwaa nwanyi obu yee anu obu. Ishi ochi onwophe atu-koru phe l'ishi.
- 17 "Teke o bu le nwoke lutaru nwune iya; ozoo nwanna iya; o -jepfu iya; be o bukwa iphe-iphere. G'a nodukwa l'edzudu-oha ndu nkephe bufu phe ebufu. O kwa nwune iya be o meru iphe-iphere. Iphe, o meru tu-koru iya l'ishi.
- 18 Onye jepfuru nwanyi teke onno nso be bvuarwaru enu-mee nwanyi ono; mbu le yebe nwanyi kpuhwaru enu-mee ya ghebe onu. Oo ya bu; g'a tukokwa ephenebo bufu ebufu le ndu nkephe.
- 19 "Te jepfukwa nwune ne ngu; ozoo nwune nna ngu; kele onye meru nno bu onye yele iya bu mee lanu be o meru iphe-iphere. Iphe, unu meru a-tu-kokwaru unu l'ishi.
- 20 Onye jepfuru nyee nwune nna iya; ozoo nyee nwune ne iya; be bukwa nwune nna iya ono; ozoo nwune ne iya ono be o meru iphe-iphere. G'iphe, epe meru tu-kokwaru phe l'ishi. Ephenebo ta abyadu atogbo ako le mgboko.
- 21 Onye tugburu je aluta nyee nwune iya be mekwaru iphe, aaso nso; bya emee nwune iya obu iphe-iphere. Epe ta abyadu atogbo ako le mgboko.
- 22 "Oo ya bu le-a; unu tsoje iphe, mu toru okpa iya su g'e tsoje g'o ha; waa iphe, mu turu l'ekemu. Unu meje iya ememe; k'ophu ali ono, mu edu unu ala ono ata agbodu unu g'onye gboru egbo.
- 23 Unu te emekwa iphe, epe emeje; mbu oha ono, mu abya achifu l'iphu unu ono; noo kele o kwa iphemiphe ono, epe meru ono meru g'o gude mu soo phe oyi.
- 24 Mbu le mu suru unu-a: O kwa unu e-nworu ali phe; mbu le mu a-nu iya unu g'o buru okiphe unu; mbu ali ono, mini era-eswi waa manu-enwu aso gborogboro ono. O kwa mbedua bu Chipfu; bya aburu Chileke unu, bu onye hofutaru unu l'echilabo ndiphe.

²⁵Oo ya bu; unu mejekwa iya g'o doo ɛnya; mbu ɔdu-iche, du l'anu, aaso nsɔ; yɛ anu, a ta sɔdu nsɔ; yɛ ɔdu-iche, du l'enu, a ta sɔdu nsɔ; yɛ ɛnu, aaso nsɔ. Unu te egudekwa anu; ɔzoo ɛnu; mɛwaro iphe, awu l'ɛpho merwua onwunu; mbu anu ono; waa ɛnu; mɛwaro iphe ɔzo ono, mu gushiru unu su g'unu soje nsɔ ono.

²⁶Unu dukwaru mu nsɔ; noo kele mbedua, bu Chipfu du nsɔ; teme mu hɔfutawa unu l'echilabo ndiphe g'unu buru nkemu.

²⁷“Nwoke; ɔzoo nwanyi, aji maa; ɔzoo onye jibya g'e gbukwaa onye obu. G'e gude mkpuma tugbua onye o bu. Ishi ochi onwiya atu-koru iya l'ishi.”

Ndu Uke 21

Ekemu, a tɔru ndu-uke

¹Tɔbodu iya bu; Chipfu bya asu Mosisu: “Waa iphe, ii-pfuru ndu-uke baa; mbu unwu Erɔnu. Su phe g'o tɔ dukwa onye ophu e-gudeje k'onye nwuhuru anwuhu l'ibe phe mee onwiya onye aaso nsɔ;

²gbahaephe l'onye obu nwuhuru nu obu be ephe l'onye uke obu bu mee lanu; mbu l'oo ne iya; ɔzoo nna iya; ɔzoo nwa iya nwoke; ɔzoo nwa iya nwanyi; ɔzoo nwune iya nwoke;

³ɔzoo nwune iya nwanyi, eteke aludu ji; o buru iya be o no l'eka opfu l'o tɔ ludu ji; odzu egube onye ono gbakwaru g'o gude iya mee onwiya onye aaso nsɔ.

⁴G'o to mekwa onwiya onye aaso nsɔ l'eka o bu onye-ishi l'echilabo ndibe phe; mbu shi nno merwua onwiya.

⁵“G'ephe ta akpushijekwa ishi; ophu ephe akpu-byishijekwa aguga aguga ejj-agba phe; ophu ephe ebyijekwa mbo l'ehu ebyibi ophu.

⁶G'ephe dukwaru Chileke phe nsɔ; g'ephe ta turwu epha Chileke phe ono; kele ngweja ono, aakpoje oku nu Chipfu ono; mbu nri ono, aanuje Chileke phe ono be bu phe agwaje iya. Oo ya bu le-a; g'ephe bukwaru ndu du nsɔ.

⁷G'ephe ta lujekwa nwanyi, gude agba ukpara merwushiwa onwiya; ophu ephe alujekwa nwanyi, ji iya chifuru; noo kele onye uke duru Chileke iya nsɔ.

⁸Unu meje onye uke g'o buru onye du nsɔ; kele oo yebedua l'agwaru unu Chileke. G'o bukwaru onye duru unu nsɔ; kele mbedua, bu Chipfu, bu onye meru g'unu du nsɔ bukwa onye du nsɔ.

⁹O -buru le nwada onye uke wataru agba ukpara shi nno merwua onwiya bukwa nna iya be o merwuru. G'a kpokwaa nwamgboko ono oku.

¹⁰“G'onye bu onye-ishi uke l'echilabo unwune iya; mbu onye ono, a wuru manu l'ishi; bya aburu onye e meru g'o yeje uwe ndu-uke; g'onye ono ta ahajekwa egbushi iya g'o du yagalayagalayagala; ophu o lakajekwa uwe iya alaka.

¹¹G'onye ono ta abahujekwa l'eka odzu ze. G'o tɔ dukwa m'obetaru o buru nna iya ɔzoo ne iya nwuhuru; l'o bahu eka ono je eme onwiya onye aaso nsɔ.

¹²G'ò tò lufujekwa alufu l'ulo, dù nsò kẹ Chileke; ophu o merwukwa ulo obu; noo kẹle oo manụ Chileke iya bẹ a wuru iya l'ishi. O kwa mbèdua bụ Chipfu.

¹³Gẹ nwanyi, oo-lu buru nwanyi, adudu nwoke jepfujeru iya nu.

¹⁴G'ò tò lukwa nwanyi, ji iya ta anọedu; ophu o lukwa nwanyi, a chifuru achifu; ozoo nwanyi, agba ukpara; shi nno merwua onwiya. Gẹ nwanyi, oo-lu bukwaru onye adudu nwoke, jepfujeru iya nu; teme o bukwarupho onye Ízurelu.

¹⁵Oo ya bụ; g'ò to shi nno mee oshilokpa iya g'ephe buru ndu ndibe phe aso nsò. O kwa mbèdua, bụ Chipfu bụ onye meru iya; o dù nsò.”

¹⁶Tobudu iya bụ; Chipfu bya epfuru yeru Mosisu sụ iya:

¹⁷“Waa iphe, ii-pfuru Eronu baa; sụ iya: Iphe, bukpoo onye bụ oshilokpa ngu; e -shi l'ogbo sweru ogbo, bụ onye nweru ẹka iphe mebyiru iya; g'ò tò byajekwa g'ò nu Chileke iya nri.

¹⁸G'iphe, bụ onye nweru ẹka iphe mebyiru iya ta abyakubejekwa Chileke ntse; mbụ onye atsụ ishi; ozoo onye bụ eniyeni; ozoo onye iphe mebyiru ẹka ozo;

¹⁹ozoo onye iphe lonwuru okpa lanu; ozoo ẹka lanu;

²⁰ozoo onye okwebe kweberu; ozoo onye chikpirihuru achikpirihu; ozoo onye iphe eme l'anya; ozoo onye iphe eme l'akpo-ehu; ozoo onye a haru aháhá.

²¹G'ò tò dukwa oshilokpa Eronu, bụ onye uke, duru ẹka iphe mebyiru iya, a-byaje ntse k'abya egweru Chipfu ngweja, aakpo oku. Eshinu o duru ẹka iphe mebyiru iya g'ò tò kpiritakwaru ntse k'anụ Chileke iya nri.

²²G'ò rijekwaro nri, a nuru Chileke iya; mbụ ophu dù nsò; me ophu dù nsò shii.

²³Ole eshinu o duru ẹka iphe mebyiru iya g'ò to jekubejekwa mgboru ẹkwa, e gude kobuta ẹka-kakota-adu-nsò; ophu oojekubejekwa oru-ngweja; g'ò to shi nno merwua ulo mu ono, dù nsò ono; kẹle o kwa mbèdua bụ Chipfu, bụ onye meru phe; ephe dù nsò.”

²⁴Tobudu iya bụ; Mosisu bya eworu iphemiphe ono kọkotaru Eronu; waa unwu iya; yee ndu Ízurelu g'ephe hakota.

Ndu Uke 22

Ndu uke yee iphe, dù nsò kẹ Chileke

¹Tobudu iya bụ; Chipfu bya epfuru yeru Mosisu sụ iya:

²“Pfuaru Eronu yee unwu iya g'ephe kwabejekwaru iya enya; mbụ iphe ono, ndu Ízurelu doberu mu nsò; g'ephe te egude iphe ono merwua epha mu ono, dù nsò; kẹle o kwa mbèdua bụ Chipfu.”

³L'i sụ phe-a: “Iphe, bụ onye bụ oshilokpa unu; e -shi l'ogbo sweru ogbo, bụ onye aaso nsò, byakuberu iphe, ndu Ízurelu doberu mube Chipfu nsò; g'e bufukwa onye ono l'atatiphu mu. O kwa mbèdua bụ Chipfu.

- 4“O -buru l'o nweru oshilokpa Eronu, iphe, eswe nswe eme l'akpo-ehu; ozoo l'iphe alwashi iya l'ehu; g'onye ono te erikwa iphe, du nsọ; jasụ teke ọ-du iche l'iphe ọbu, eme iya nụ ọbu; buru onye a taa sohedu nsọ. Teke ọ bukwanu l'o nweru onye denyiru iphe, aasọ nsọ ẹka; du ge l'o meru odzu ẹka; ozoo nwoke, gboru unwuda;
- 5ozoo l'onye ono denyiru iphe, awu l'epho ẹka bu iphe, ee-me iya g'ọ buru onye aasọ nsọ; ozoo l'o denyiru onye aasọ nsọ ẹka; ozoo l'ọ duru iphe ọzo, meru iya; ọ buru onye aasọ nsọ; be ọ buakwaa onye aasọ nsọ.
- 6Onye denyiru iphe, du nno ẹka a-buru onye aasọ nsọ jasụ nchi ejihu. G'ọ to dukwa iphe, e doberu nsọ, oo-ri; gbahaa l'o gude mini wua onwiya ehu.
- 7Enyanwu -nyihuepho; be a taa sohedu onye ọbu nsọ. A -gbẹ teke ono be onye ono a-watawaro eri iphe, e doberu nsọ; noo kele ọo nri iya bu ono.
- 8G'o to rijekwa iphe, nwuhuru anwuhu; ozoo iphe, anu-egbudu dzugburu; g'o to shi nno merwua onwiya. O kwa mbedua bu Chipfu.
- 9“Ge ndu-uke mejekwa iphe, mu suru g'ephe meje. O -buru l'ephe te emedu iya; ephe emeta iphe-aji kpua onwophe; teme l'o gbukwaa phe pho. O kwa mbedua bu Chipfu, bu onye meru phe; ephe du nsọ.
- 10“G'o to dukwa onye abudu eri ndu-uke, e-rije iphe, e doberu nsọ. G'onye byaru onye uke ebyaa; ozoo onye o butaru ebuta ozi te erijekwa iphe, du nsọ.
- 11Ole ọ -buru l'onye uke gude okpoga iya gbata ohu; ozoo l'a nwuru iya ohu l'unuphu; ge ndu k'ono rijekwa nri ono.
- 12Nwada onye uke -je aluru onye abudu onye uke; g'onye ọbu te erijeekwa iphe ono, du nsọ ono, aanuje ndu-uke ono.
- 13Obenu teke ọ bu le nwada onye uke be teke anwutadu nwa; ji iya nwuhu; ozoo l'a chifuru iya achifu; ọ laa ibe nna iya; g'o rijekwa nri ono, bu nri nna iya ono; g'o shi erije iya teke ọ bu nwata. Ole ọ bu; g'onye abudu onye oshilokpa ndu-uke te erikwa iya.
- 14“Onye riru iphe, e doberu nsọ l'amagama; g'onye ono pfukwaa onye uke ugwo iya. O -pfuchaa ugwo iya l'o wota iphe ono ọzo, ha nno; kee ọzo ise woru oke lanu tukobe l'ono, o gude apfu ugwo iya ono.
- 15Ge ndu-uke te emerwukwa iphe ono, du nsọ ono, shi l'eka ndu Izurelu ono, bu ophu ephe nuru Chipfu;
- 16shi egube ono mee g'ephe buru ndu ejo-iphe tukoru l'ishi; teme ephe aburu ndu-ikpe nmaru; kele ephe riru iphe ono, ephe doberu nsọ ono; kele ọ kwa mbedua bu Chipfu, bu onye meru phe; ephe du nsọ.”
- 17Tobudu iya bu; Chipfu bya epfuru yeru Mosisu su iya:
- 18“Waa iphe, ii-pfuru Eronu; yee unwu iya; yee ndu Izurelu l'ophu baa; su phe-a: O -duru onye bu onye Izurelu gedegede; ozoo onye lwaru alwalwa, bu le Izurelu, gude

iphe abya g'e gude iya gweeru Chipfu ngweja-akpo-oku k'iphe, o kweru ukwe le ya e-me; ozoo iphe, o turu obu iya onyo anu;

¹⁹g'onye ono kputakwa anu, bu okee ya, adudu eka iphe mebyiru iya bya. Iphe, oo-gude bya bu oke-eswi; ozoo ebili; ozoo mkpi; k'ophu aa-nafukwanu iya unu l'eka.

²⁰Unu te wotakwa iphe, nweru eka iphe mebyiru iya gude bya egwee ngweja obu; kele a taa natakwa iya unu l'eka.

²¹Onye kputaru eswi; ozoo aturu; ozoo eghe gude abya egweru Chipfu ngweja-eghu-guu; shi nno emekota iphe, o kweru ukwe iya; ozoo g'o buru iphe, o turu obu iya onyo anu; g'onye ono wotakwa anu, adudu eka iphe mebyiru iya; k'ophu aa-natakwanu iya ya l'eka.

²²“Unu ba anujekwa Chipfu anu, atsui ishi; ozoo ophu e mekaru iphe; ozoo ophu iphe mebyiru ibe lanu; ozoo ophu iphe alwashu l'ehu; ozoo ophu iphe eme l'akpo-eghu. Unu te egudekwa anu, du egube ono je akporu Chipfu oku l'eli oru-ngweja.

²³O -buru ngweja, a turu obu onyo anu; g'onye egwe iya nu nujekwaro eswi; ozoo aturu, nweru eka iphe mebyiru iya; aa-nafu iya ya-a l'eka. Ole o -buru ophu onye ono gude emekota iphe, o kweru ukwe iya be a taa nafukwa iya ya l'eka.

²⁴Unu ta nujekwa Chipfu anu, e mekaru iphe l'akporu-anwu; ozoo ophu e tsupyaruru nkiya etsupya; ozoo ophu iphe lajaru nkiya; m'o bu ophu e bufuru nkiya ebufu. Unu te emejekwa iphe, du egube ono l'ali unu-a.

²⁵Unu ta nujekwa anu, shi l'eka onye ohozo; g'o buru nri, unu anu Chileke unu. Eshinu egube anu ono du g'anu, nweru eka iphe mebyiru iya be a taa nafukwa iya unu l'eka.”

²⁶Tobudu iya bu; Chipfu bya epfuru yeru Mosisu su iya:

²⁷“Nwa eswi, a nwuru k'ophuu; ozoo aturu; ozoo eghe be aa-hajekwa ge yele ne iya noadaa ujiku esaa. A -gbe le mboku, kwe anu ono ujiku esato tugbua; be a -kputa iya bya anu g'e gude gweeru Chipfu ngweja, aakpo oku be aa-natakwa iya-a.

²⁸Unu ta tukojekwa ne-eswi yee nwa iya; m'o bu aturu yee nwa iya gbua ujiku lanu.

²⁹Unu -nodu egweru Chipfu ngweja-ekete; unu mejekwa iya l'uzo, du ree; k'ophu aanaata iya unu l'eka.

³⁰G'a tukokwa anu, e gude gwee ngweja obu takota mboku ono; g'o to dukwa ophu aa-ha g'o noo futu utsu. O kwa mbedua bu Chipfu.

³¹“Oo ya bu le-a; unu dobekwa ekemu mu; unu emeje iya ememe. O kwa mbedua bu Chipfu.

³²Ophu unu emerwukwa epha mu ono, du nsu ono; o chikwa ge ndu Izurelu dobe epha mu iche l'echilabo phe; kele o kwa mbedua bu Chipfu, bu onye meru; unu du nsu;

³³bya aburu onye dufutaru unu l'alì Ijiputu gę mu buru Chileke unu. Ọ kwa mbędua bu Chipfu.”

Ndu Uke 23

Ọbo-iphe kę Chipfu

¹Tọbudu iya bu; Chipfu su Mosisu:

²“Wakwa iphe, ii-pfuru ndu Ízurelu baa; su phe-a: Wakwa ọbo-iphe, mube Chipfu doberu baa; mbu ọbo-iphe, unu a-ra arara l'ọo ya be a-buru ndzuko ophu du nsọ.

³Ọo ujiku ishii be unu e-jeje ozi; mboku k'ęsaa a-buru eswe Sabatu, bu eswe-atuta-unme. Mboku ono a-buru eswe ndzuko ophu du nsọ. Unu te jejekwa ozi mboku ono; kele ọ bu eswe-atuta-unme ke Chipfu l'ekameka unu bukpo.

⁴Ọwaa bu ọbo-iphe, Chipfu doberu; mbu ndzuko, du nsọ, unu e-dzukojeje m'o -rwua teke e doberu iya.”

Ọbo Ojaghata

(Ọgú 28:16-25)

⁵“Ọbo Ojaghata Chipfu bu mboku, aa-boje iya bu mboku, onwa mbu du l'abalì iri l'eno l'uzenyashi.

⁶Ọ -be le mboku k'iri l'ise l'onwa ono kwapho; be unu a-bojeru Chipfu Ọbo-Buredi, ekoduru ekoko. Ujiku ęsaa be unu a-ta buredi, e yeduru iphe, ekoje buredi.

⁷Mboku mbu k'ọbo-iphe ono be unu e-nweru ndzuko, du nsọ; g'ọ to dukwa ozi, unu e-je mboku ono.

⁸Ujiku ęsaa be unu a-noduepho egweru Chipfu ngweja, aakpo oku. Teke o rwuerupho le mboku k'ęsaa; unu enweru ndzuko, du nsọ; g'ọ to dukwa ozi, unu e-je mboku ono.”

⁹Tọbudu iya bu; Chipfu bya pfuru yeru Mosisu su iya:

¹⁰“Wakwa iphe, ii-pfuru ndu Ízurelu baa; su phe-a: Unu -bahuepho l'alì ono, mu abya anu unu ono; teke unu kpataru iphe, e meberu l'alì ono; unu ewota upfu lanu l'iphe mbu, unu e-vuru ọzo kpata je anu onye uke.

¹¹G'onye uke ono wota upfu iphe ono maa l'iphu Chipfu. Ọo ya bu gę Chileke anata iya unu l'eka. Ọ buru le nchitabohu iya; me eswe-atuta-unme -bvuepho be ọo-ma iya obu.

¹²Mboku ono, unu a-ma upfu iphe ono l'iphu Chipfu ono be unu e-gudekwapho nwa ebili, nowaru apha lanu, adudu eka iphe mebyiru iya; bya egwee ngweja-akpo-oku nu Chipfu.

¹³Ngweja-nri, a-yikwaru iya pho a-buru ukpokutu ereshi, a gworu le manu, jiru nkweka e keru ọzo iri wota uzi labo, ee-gude gweeru Chipfu ngweja, aakpo oku, mkpo iya du ree; teme l'e yekobekwa iya pho mee, jiru nkeru-eno otu-lupfu otumu g'ọ buru ngweja-mee.

¹⁴Ophu unu adukwa buredi, unu a-ta; ophu unu atakwa ereshi, a huru ahuhu; ophu unu atakwa ophu du oyii; gbiriri jasụ mbọku ono, unu e-wotaru Chileke unu ngweja ono. Ono a-buru iphe, mu toru okpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo l'ekameka unu bu.”

Obo-Idzu
(Ọgú 28:26-31)

¹⁵“O -be le nchitabohu mbọku ono, unu byaru egude upfu iphe gwee ngweja-amama ono; me eswe-atuta-unme bvuchaepo; unu agbe mbọku ono no-dzua idzu esaa.

¹⁶Teke a no-dzuerupho ukporo abali labo l'abali iri; o -rwua le nchitabohu eswe-atuta-unme k'esaa; unu abyakwa egweeru Chipfu ngweja-nri, unu e-gude ereshi ophuu gwee.

¹⁷Unu gbe l'eka unu bu wota ishi buredi ebo, e gheru l'ukpokutu ereshi, jiru nkweka e keru uzo iri wota uzi labo, e yeru iphe, ekoje buredi; bya anu g'e gude gwee ngweja-amama g'o buru akpuru-iphe-mbu, a nuru Chipfu.

¹⁸Iphe, unu e-wotafua yekoberu ishi buredi ono bu unwu ebili esaa, nokotaru mgbarapha; teme o buru ophu adudu eka iphe mebyiru iya; waa nwa oke-eswi lanu; waa ebili labo. G'e gude anu ono g'o ha; waa ngweja-nri, etso iya nu; yee ngweja-mee, etso iya nu; gwee ngweja-akpo-oku nu Chipfu; mbu ngweja, aakpo oku, mkpo iya du Chipfu ree.

¹⁹Oo ya bu; unu abya akputa mkpi lanu gude gwee ngweja-iphe-eji; bya akputa unwu ebili labo, nogbaaru mgbarapha gude gwee ngweja-ehu-guu.

²⁰G'onye uke ono woru unwu ebili labo ono; waa buredi ono, e meru l'akpuru-iphe-mbu, a kpataru l'opfu ono maa l'iphu Chipfu g'o buru ngweja-amama. Iphe ngweja ono bukota ngweja, du nsọ ke Chipfu; o buru onye uke bu onye e-ri iya nu.

²¹Mbọku ono kwapho be unu e-nweru ndzuko, du nsọ. Unu ta adukwa ozi, unu e-je mbọku ono l'ophu. Ono a-buru iphe, a toru okpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo; unu emeje iya l'ekameka unu bukpo.

²²“Unu -nodu akpata iphe, unu meberu l'egu; unu ta akparwujekwa okoke; ophu unu aturutajekwa ophu nashihuru ndu akparu iya unu daa l'ali. Unu hajeru ndu ukpa; yee ndu lwaru alwalwa ophu daru l'ali. O kwa mbedua bu Chipfu; bya aburu Chileke unu.”

Obo Apha-ophuu
(Ọgú 29:1-9)

²³Tobudu iya bu; Chipfu bya epfuru yeru Mosisu sụ iya:

²⁴Wakwa iphe, ii-pfuru yeru unwu Izurelu baa; sụ phe-a: “Iphe, bukpo mbọku mbu l'onwa k'esaa bukwa unu eswe-atuta-unme; mbu mbọku, unu a-noje ndzuko, du nsọ. O -be mbọku ono g'e gbua opu gude karu onyemonye.

²⁵Unu ta adukwa ozi, unu e-je mbọku ono l'ophu; iphe, unu e-mejechia bu l'unu a-nuje Chipfu ngweja, aakpo oku.”

Eswe apfu ugwo iphe-ẹji

(Uke 16:1-34; Ọgú 29:7-11)

26Tọbudu iya bu; Chipfu bya epfuru yeru Mosisu sù iya:

27“Mbọku, ọnwá ẹsaa ono dù l'abalì iri l'a-bujeru unu eswe apfu ugwo iphe-ẹji. Mbọku ono bẹ unu a-noje ndzukọ, dù nsọ; unu a-swì ẹgu; gwee ngweja, aakpọ ọku anu Chipfu.

28Unu ta adukwa ozi, unu e-je mbọku ono; noo kẹle mbọku ono bu eswe apfu ugwo iphe-ẹji; mbu mbọku, aa-nodu l'iphu Chipfu, bu Chileke unu pfua ugwo iphe-ẹji, unu meru.

29Kẹle onyemonye, ta aswìdu ẹgu mbọku ono bẹ ee-bufukwa ebufu lẹ ndu nkepẹ.

30Teke ọ duru onye jeru ozi mbọku ono; mu e-me onye ono g'ọ chíhu l'echilabo ndu nkepẹ.

31G'ọ tọ dukwa ozi g'ọ dọhabe, unu e-je. Ono a-buru iphe, a toru ọkpa iya sù g'e tsoje jasù l'ojejoje; mbu l'oo-shije l'ogbo sweru ogbo. Unu emeje iya l'ẹkameka unu bu.

32Mbọku ono a-buru unu eswe-atuta-unme. Unu aswì ẹgu mbọku ono. Unu e-shije l'uzenyashi mbọku, ọnwá dù l'abalì tete tuta unme jasù l'uzenyashi kẹ mbọku, ọnwá a-dù l'abalì iri.”

Ọbo-Mkpù

(Ọgú 29:12-40; Dìt 16:13-17)

33Tọbudu iya bu; Chipfu bya epfuru yeru Mosisu sù iya:

34“Wakwa iphe, ii-pfuru yeru unwu Ízurelu baa; sù phẹ-a: Teke ọnwá ẹsaa ono dọepho l'abalì iri l'ise g'a bọ Ọbo-Mkpù kẹ Chipfu. Iphe, aa-boru iya Chipfu bu ujiku ẹsaa.

35Mbọku mbu bẹ unu e-nweru ndzukọ, dù nsọ; g'ọ tọ dukwa ozi, unu e-je mbọku ono l'ophu.

36Ujiku ẹsaa ono bẹ unu a-nuje Chipfu ngweja, aakpọ ọku. O -be lẹ mbọku k'ẹsato; unu anoje ndzukọ, dù nsọ; bya anukwapho Chipfu ngweja, aakpọ ọku. Ndzukọ ono bukwa ndzukọ, dù nsọ; ọo ya bu g'ọ tọ dukwa ozi, unu e-je mbọku ono l'ophu.”

37“Ono bu ọbo-iphe, Chipfu doberu; mbu ophu unu a-ra arara g'ọ buru ndzukọ, dù nsọ. G'a nu Chipfu ngweja, aakpọ ọku, bu iya bu ngweja-akpọ-ọku; yee ngweja-nri; waa ngweja-mee; mewaro ngweja ọzo. Iphe, bu ngweja ono bẹ aa-nodujeepho egwe lẹ mbọku, gbaru iya nu.

38A gufukpokwaru ngweja k'eswe-atuta-unme; bya agufu iphe, unu anuje Chipfu anunu; gufu l'onye-a apfu iphe, o kweru ukwe iya; gufu iphe-anunu ophu unu turu obu unu onyo anu, bu ophu unu anu Chipfu.

39“O -rwua mbọku, ọnwá ẹsaa dọepho l'abalì iri l'ise; m'unu kpatachapho iphe, unu meberu l'alì; unu abọoru Chipfu ọbo-iphe ujiku ẹsaa. Mbọku abahu iya bẹ unu a-tuta unme ozi; unu atutakwapho unme lẹ mbọku k'ẹsato.

⁴⁰Mbọku mbụ l'ọbo-iphe ono bẹ unu a-hata akpuru oshi, kachaa ree l'akpuru oshi, unu wotaru; unu egbuta igu; mę ẹkali-oshi, ẹkwo dụ shii; waa ẹkali-oshi wilo. Unu gweta iphe ono gude je anodu l'iphu Chipfu, bụ Chileke unu tee ẹswa ujiku ẹsaa.

⁴¹Unu bojekwaru Chipfu ọbo-iphe ono ujiku ẹsaa ono aphagapha. Ono bụ iphe, a toru ọkpa iya sụ g'e tsoje jasụ l'ojejoje; mbụ l'oo-shije l'ogbo sweru ogbo. Onwa, aa-boje iya bụ l'onwa ẹsaa.

⁴²O bụru lẹ mkpù bẹ unu e-buru abali ẹsaa ono; mbụ l'iphe, bukpo ndu a nwuru lẹ Ízurelu e-bukotaru lẹ mkpù teke ono.

⁴³Oo ya bụ; g'ogbo l'ogbo a-maru lẹ mu meru g'unwu Ízurelu bua lẹ mkpù teke ono, mu shi lẹ Ijiputu dufuta phe ono. O kwa mbedua bụ Chipfu; bya aburu Chileke unu."

⁴⁴Oo ya bụ; Mosisu bya atuko ọbo-iphe, Chipfu doberu kakotaru ndu Ízurelu.

Ndu Uke 24

Eleta oroku ẹnya

(Awụ 27:20-21)

¹Tobudu iya bụ; Chipfu bya epfuru yeru Mosisu sụ iya:

²"Pfuaru ndu Ízurelu g'ephe wotaru ngu ọkpobe manụ olivu, a tsuru l'ikwe, ee-yeje l'oroku g'oku oroku ono nwuje mkpurumkpuru.

³Gẹ Eronu; yele unwu iya yeje ọku l'oroku ono l'ataphu Chipfu l'ime ụlo-ekwandzukọ ono; mbụ l'okotazu ẹkwa pho, e gude kobuta okpoko-ekemu pho. G'ephe mejekwa oroku ono g'o nwuje shita l'uzenyashi jasụ l'utsu. Gẹ ndu Ízurelu dobekwa ekemu-a; a -gbẹ l'ogbo sweru ogbo.

⁴Gẹ Eronu dozije ọku l'oroku ono l'eli iphe, aapfubeje oroku ono, e meru lẹ mkpola-ododo ono; g'o nwuje enwunwu l'ataphu Chipfu mkpurumkpuru."

Buredi, e doberu Chileke nsọ

⁵"Gude ukpokutu ereshi gmeta ishi buredi iri l'ẹbo. L'ishi buredi lanu bẹ ii-yeje ukpokutu ereshi, jiru nkweka e keru ụzo iri wota uzi labo.

⁶L'i woru buredi obu doo l'ogiri labo l'eli teburu ono, e gude ọkpobe mkpola-ododo mee dobe l'ataphu Chipfu ono. Ishi buredi ishii l'eka lanu; ishi buredi ishii ophuu l'eka iya ophuu.

⁷L'i bya eworu ọkpobe unwu-isensu dokubegbaa ogiri iya ogiri iya ono; g'o buri iphe, no-chiru ẹnya buredi ono; teme g'e gude iya gweeru Chipfu ngweja, aakpo oku.

⁸Iphe, bukpo eswe-atuta-unme, a-nwuta anwuta bẹ Eronu e-dozije iya l'iphu Chipfu. O buri ndu Ízurelu bẹ ọo-nodu emejeru iya; g'o buri ogbandzu, a-no jasụ l'ojejoje.

⁹Buredi ono bụ Eronu yee oshilokpa iya nwe iya. G'ephe ndujekwa l'eka dụ nsọ taa ya; kele o dụ nsọ shii; kele o bụ oke iya nkephe lẹ ngweja, aakpo oku anu Chipfu jasụ l'ojejoje."

Onye pfubyiru ẹpha Chileke

10O nweru nwoke, ne iya bụ onye Ízurelu; nna iya buru onye Ijiputu; ẹphe lẹ ndu Ízurelu swiru. A nonyaa; ọgu daru ẹphe l'onye Ízurelu l'ẹka ẹphe kpọberu ọlo-ẹkwa pẹ.

11Onye ono, ne iya bụ onye Ízurelu ono wata epfubyishi ẹpha Chipfu. A kpụta iya kpụjeru Mosisu. Ẹpha ne nwata ono bụ Shelomotu; nwada Dibiri onye bụ oshilọkpa Danu.

12A kpụta iya je atụ-chia kwabere Chipfu g'ọ karu pẹ iphe, bụ uche iya.

13Tọbudu iya bụ; Chipfu bya epfuru yeru Mosisu sụ iya:

14“Kpụta onye ono, pfubyiru ẹpha mu ono kpụfu l'azụ ẹka unu kpọberu ọlo-ẹkwa unu. G'iphe, bụkpoo ndu nūmaru teke oopfubyi ẹpha mu ono byabẹ iya ẹka l'ishi; g'ọha wulihu woru iya tugbua lẹ mkpuma.

15Sụ ndu Ízurelu: Onye pfubyiru ẹpha Chileke iya bụkwa onye ọbu bẹ iphe-ẹji iya ọbu tų-koru l'ishi.

16Onye pfubyiru ẹpha Chipfu bẹ ee-gbu egbugbu. G'ọha zefutakwa je atugbua onye ọbu lẹ mkpuma. Onye ọbu -buru onye lwaru alwalwa; ọzoo l'ọ bụ onye a nwuru lẹ Ízurelu; o pfubyia ẹpha Chipfu ono; g'e gbua onye ọbu egbugbu.

17“Onye gburu nemadzu ibiya; g'e gbukwaa yẹbedua.

18G'onye gburu iphe-edobe onye ọzo pfukwaa ugwo iya. Ophu dzu ndzu bẹ oo-gude dochia ophu nwuhuru nụ.

19“Onye mebyiru nwibe iya ibe ẹhu lanu; bụkwapho g'ee-mebyi yẹbedua ibe ẹhu lanu.

20Onye gbajiru nwibe iya okpu g'a gbajilatakwa iya pho. Teke o bụ ẹnya bẹ o meru; o pyahu onye ọbu; g'e mekwapho gẹ nkiya pyahulata. Teke o bụ eze bẹ o chikwofuru onye ono; g'e chikwofulatakwa iya pho eze. Oo g'ọ mekaberu onye ọzo iphe, bụ g'ee-mekaberu iya.

21Onye gburu anu nemadzu ibiya; g'ọ pfukwaa ugwo iya; teke o bụ l'oo nemadzu bẹ o gburu g'e gbukwaa yẹbedua.

22Ekemu-a du swiru ndu a nwuru anwunwu lẹ Ízurelu; yee ndu lwaru iya alwalwa. O kwa mbedua bụ Chipfu; bya aburu Chileke unu.”

23Mosisu pfuchaaru iya ndu Ízurelu; ẹphe kpụta onye ono, pfubyiru ẹpha Chipfu ono; kpụfu l'azụ ẹka ẹphe kpọberu ọlo-ẹkwa pẹ je eworu iya tugbua lẹ mkpuma. Ndu Ízurelu shi nno mee iphe, Chipfu turu Mosisu ekemu g'ẹphe mee.

Ndu Uke 25

Apha-atuta-unme

(Dit 15:1-11)

1Tọbudu iya bụ; Chipfu bya epfuru yeru Mosisu l'eli úbvú Sayinayi sụ iya:

²“Wakwa iphe, ii-pfuru yeru unwu Ízurelu baa; sù phe-a: Teke unu bahuerupho l'ali ono, mu abya anu unu ono; unu hajekwa ali ono g'ò nooru Chipfu apha-atuta-unme.

³Unu mebeje iphe l'ali unu apha ishii; unu akochaje opfu-vayinu unu akocha apha ishii; woo akpuru iya.

⁴O -be l'apha k'esaa l'a haa ali ono g'ò tuta unme. Ono bu apha-atuta-unme ke Chipfu. Unu be mebekwa iphe l'ali unu apha ono; ophu unu akochakwa opfu-vayinu unu.

⁵Unu te ejekwa akpata iphe, daru eda. Teke vayinu, e mechaduru emecha miru amimi; unu ta awotakwa iya; noo kele apha ono be ali ono atuta unme.

⁶Iphe, ali mitaru l'apha k'ono, ali atuta unme ono; a-buru nri unu; waa k'ohu unu; waa ndu-ozu, unu butaru ebuta; me ndu lwaru alwalwa, bu l'echilabo unu.

⁷O kwapho iphe, daru eda l'ali ono a-buru nri iphe-edobe unu; waa anu-egbudu, bu l'ali unu.”

Apha-ehu-utso

⁸“Unu gua apha-atuta-unme guta apha esaa; mbu apha esaa esaa mgbo esaa. Apha-atuta-unme esaa ono bu iphe, oo-du bu apha ukporo labo l'apha tete.

⁹Onwa k'esaa -duepho l'abali iri, bu iya bu eswe-apfu-ugwo-iphe-eji; li zia g'e gbua opu gude jedzuru l'ali unu ono.

¹⁰Unu edoo apha k'ukporo ebo l'iri nsò; unu epfua g'onnyemonye l'ali ono mgburugburu nweru onwiya. Apha ono a-buru unu apha-ehu-utso; noo teke onyenonu a-la ali iya; mbu l'onnyenonu a-lapfu ndibe iya.

¹¹G'apha k'ukporo ebo l'iri ono bukwaru unu apha-ehu-utso. Unu ta akobekwa iphe l'ali; ophu unu ejejekwa akpata ophu daru eda l'apha ono; ozoo ophu mitaru le vayinu, a kochaduru akocha.

¹²Eshinu apha ono buru unu apha-ehu-utso be unu e-dobe iya nsò. Oo iphe, daru eda l'ali ono be unu e-ri l'apha ono.

¹³“O -rwua l'apha-ehu-utso ono; g'onnyenonu lakwaa ali iya.

¹⁴O -buru l'ò duru iphe, i reru nwibe ngu; ozoo l'ò duru iphe, i zutaru l'eka nwibe ngu; unu mekwaa ya g'ò to du onye e-ri nwibe iya urwu.

¹⁵G'ii-gudeje zuu nwibe ngu iphe, bu: a -gbe le g'a bocharu obo-iphe apha-ehu-utso. Mbu l'oo g'oo-no-beru l'aakpata iphe, e meberu l'ali bu g'oo-gude ree ngu iphe, izu iya.

¹⁶Teke o bu l'apha a-du igwerigwe nwua teme l'o rwua apha-ehu-utso; aswa ali obu aha shii. Teke o bu l'apha habe nwahabe li gbuzeta aswa iya; noo kele iphe, izu ele enya iya gubedua l'azu azuzu bu iphe i-meta l'ali obu.

¹⁷G'ò to dukwa onye ophu e-ri nwibe iya urwu; o chia iphe, unu e-meje bu g'unu tsuje Chileke unu ebvu. O kwa mbedua bu Chipfu; bya aburu Chileke unu.”

Iphe, atsù l'èhu lẹ k'apha k'èśaa ono

18“Oo ya bụ lẹ-a; unu tsojekwa iphe, mu tọru ọkpa iya sù g'e tsoje; unu emeje iphe, mu turu l'ekemu; k'ọphu unu e-buru l'alì ono; ọ tọ dudu iphe, eme unu.

19Oo ya bụ; g'alì emehuaha iphe, a kọberu iya; unu erijiaha ẹpho; buru iya; ọ tọ dudu iphe, eme unu.

20“Unu a-jìkwanu sù: ‘? Bù gunu bẹ anyi e-ri l'apha k'èśaa ọbu; m'anyi adudu iphe, anyi kọru; ọphu ọ dukwapho iphe, anyi kpataru?’

21Ole mu e-kebe unu l'oma l'apha k'ishii; k'ọphu apha ono e-mehu iphe; unu enweru akpuru-iphe, a-suru unu apha ẹto.

22O -be l'apha k'èśato; unu awata akọbe iphe l'alì. O buru akahù iphe, unu metaru bẹ unu a-nọdu eri jasù l'apha kẹ tete; teke unu a-kpata iphe, unu meberu l'alì.”

Agbafuta iphe, e reru erere

23“G'ọ tọ dukwa onye e-rebuje alì iya erebu; noo kẹle alì bukwa mbẹdua nwe iya. Unubẹdua bụ abyabya bẹ unu byaru; ọ buru anunu bẹ mu nuru iya unu g'unu buru.

24“Unu sùbeje iphe, ee-gude agbata alì ono, bụ oke alì unu ono l'ọphu.

25O -buru lẹ nwune ngu bẹ ọkpa byaru; k'ọphu ọ harù alì iya ree; g'onye a-bya agbata alì ono, o reru ono; bukwaru onye yele iya bụ ọkpobe abubu.

26Ole ọ -bukwanuru l'onye ọbu te nwedu onye e-je agbafuta iya nù; obenu lẹ yẹbedua nwewaru iphe k'ọphu ọo-dù ike gbata iya;

27g'ọ gbakọo apha, nwụwaru nù e -shi teke o reru iya; l'ọ pfula onye o reru alì ono ugwo apha ọphu o tokọ kọdu alì ọbu; laphu azù l'alì iya.

28Ole ọ -bukwanuru l'onye ọbu ta amadù ọzo, oo-shi gbafuta iya; g'alì ono, o reru ono nọdukwa l'ẹka onye zuru iya nù jasù l'apha-ẹhu-utso. O -be l'apha-ẹhu-utso g'onye zuru iphe ọbu haa ya; g'onye ono, nwe iya nù ono laphu azù l'alì ono.

29“O -duru onye reru ọlo-ebubu lẹ mkpukpu, e gude igbulọ kpụ-pheru mgburugburu; g'ọ gbatakwa iya l'ime mgbatapha, o reru iya ono. Oo l'ime teke ono bẹ ọo-gbata iya.

30Ole ọ -buru l'ọ tọ gbataduru iya jasù apha gbaru; ọo ya bụ l'ọlo ono, dù lẹ mkpukpu, a kpụ-pheru mgburugburu ono bẹ ee-me g'ọ bụwaruro k'onye zuru iya nù; e -shi l'ogbo sweru ogbo. O tọo kufukpokwaa ya nù l'ẹka l'apha-ẹhu-utso.

31Obenu l'ọlo, nọgbaa l'oma mkpukpu, a kpụ-pheduru igbulọ mgburugburu bụ g'eemeje oma ẹgu bẹ ee-meje iya. Ẹphebedua dù k'agbata; tẹme o jee l'akufu onye zuru iya nù l'ẹka mẹ o -rwua l'apha-ẹhu-utso.

32O bekwanù lẹ-a; a bya lẹ mkpukpu lẹ mkpukpu kẹ ndu Lívayi; ọlo, nọgbaa l'oma mkpukpu, bụ nkephẹ bẹ ndu Lívayi ono a-gbatajẹ teke dù phẹ ree.

33Teke ọ duru onye zuru onye Lívayi ọlo; ọphu onye Lívayi ono adudu ike gbafuta iya; g'ọlo ono, e reru ono, nọ lẹ mkpukpu ono, bụ phẹ nwe iya ono; laphukwa iya azù

l'eka; noo kele ulo ndu Lívayi le mkpukpu ono, a nuru phe ono bu iphe phe l'echilabo ndu Ízurelu.

³⁴G'o to dukwa iphe, e-me g'ephe ree ali eka ephe echeje aturu phe; mbu ophu no le mkpukpu phe; noo kele ono bu okiphe phe jasu l'ojejeje."

Ejie ndu ukpa ugwo

³⁵"O -buru l'onye Ízurelu ibe ngu be ukpa byaru; ophu o duedu ike azu onwiya l'obutobu ngu; yejeru iya eka egube ono, eeyejeru onye lwaru alwalwa; ozoo onye byaru abyabya ono; k'ophu oo-bukube ngu g'o bukube ngu.

³⁶Ta natakwa iya ntukwase; o chikwa g'i tsu Chileke ngu ebvu; k'ophu nwune ngu ono e-bukube ngu g'o bukube ngu.

³⁷Te jiekwa iya okpoga su iya g'o tukwaseru ngu iya iphe; ophu i lekwa enya urwu le nri, i nuru iya.

³⁸O kwa mbèdua bu Chipfu; bya aburu Chileke unu, bu onye dufutaru unu l'ali Ijiputu ge mu nu unu ali Kènanu; teme mu aburu Chileke unu."

Aha ohu g'o nweru onwiya

³⁹"O -buru l'onye Ízurelu ibe ngu, gu l'iya bu obutobu be ukpa byaru; k'ophu o woru onwiya ree ngu; be mekwa iya g'o jejeru ngu ozi g'ohu.

⁴⁰Oo g'iimeje onye i beru ozi; ozoo onye byaru abyabya bu g'ii-me iya; l'o jeeru ngu ozi nno jasu l'apha-ehu-utso.

⁴¹O -rwua teke ono l'i haa ya; mekpoo unwu iya; l'o laa lapfu ndibe phe; lapfu okiphe nna iya.

⁴²Kele eshinu ndu Ízurelu bu ohu nkemu, mu shi l'ali Ijiputu dufuta be e tee redu phe g'ephe buru ohu.

⁴³Ta dukwaru onye Ízurelu ibe ngu ehuka; l'i tsujekwa Chileke ngu ebvu.

⁴⁴Ge ndu unu a-gbaje ohu; unwoke me unwanyi; bukwaru ndu shi l'ohozo, no-pheru unu mgburugburu. Nokwa ndu unu a-gbaje ohu bu ono.

⁴⁵Ndu ozo, unu a-gbajefua ohu bu ndu byaru abyabya, unu l'ephe tuko buru; ozoo ndibe ndu ono, unu l'ephe tukokwapho buru ono, bu ndu ephe no l'ali unu nwushia. Unu -gbaa phe ohu; unu enwowa ru phe ro.

⁴⁶Ndu k'ono be unu e-me g'ephe buru okiphe, unu ketaru unwu unu, l'etso unu l'azu; g'ephe keta phe g'ephe buru ohu phe jaswaruro. O -be l'unwune unu, bu unwu Ízurelu; unu ta adukwaru phe ehuka.

⁴⁷"O -buru l'onye lwaru alwalwa; ozoo onye byaru abyabya, unu l'iya tuko buru nonyaru bya enweru iphe; onye Ízurelu ibe ngu, yee ya bukube -daa ukpa bya eworu onwiya ree onye lwaru alwalwa ono, bukube ngu nu ono; ozoo l'o woru onwiya ree abubu onye ono, lwaru alwalwa ono;

48e -rechakpoo ya nu be aa-gbafutale iya-a; onye lanu l'ime unwune iya a-gbafutakpoo ya.

49Ge nwune nna onye obu; ozoo nwa nwune nna iya; ozoo onye ozo, ephe l'iya bu abubu jekwaa agbafuta iya. O -buru l'onye obu nonyaru bya enweru iphe k'ophu oo-du ike gbafuta onwiya; g'onye obu gbafutakwa onwiya.

50G'onye reru onwiya; yee onye zuru iya nu; nodukwa gbakoo maru apha ole, du nu; a -gbegbe l'apha onye obu reru onwiya jasu l'apha-ehu-utso. G'a gbegbe l'iphe, onye o-gburumita ejetaje ujiku lanu; gbakoo okpoga apha, ghuduru nu; karu iya iphe, oo-pfu gude gbata onwiya.

51O -buru l'apha, ghuduru nu hakwadu shii; g'onye ono keta okpoga ono, o shi gude ree onwiya ono ophu kwata ka shii pfua gude gbata onwiya.

52Teke o -bukwanu l'apha, ghuduru nu habewa nwahabe g'o rwua l'apha-ehu-utso; g'ephe l'iya gbakoo ya; g'o pfua g'apha ole, ghuduru nu ha gbata onwiya.

53G'e mejekwa onye ono g'eemeje onye-ozu, e butaru ebuta aphagapha. G'e leta enya g'onye ono, o no l'eka ono ta adukwaru iya ehuka.

54O -buru l'a taa gbafutadu iya l'uzo, du egube ono; g'a hakwaa yee unwegirima ibe iya me o -rwuepho l'apha-ehu-utso.

55Noo kele ndu Izurelu bu ohu mu. Ephe bu ohu mu, mu dufutaru l'ali Ijiputu. O kwa mbedua bu Chipfu; bya aburu Chileke unu."

Ndu Uke 26

Obunggo, ee-bu onye emeje iphe, a suru g'o mee

(Dit 7:12-24; 28:1-14)

1"G'o to dukwa agwa; ozoo ntekpe, a pyiru apyipyi; ozoo mkpuma, a kpoberu g'itso, unu e-dobe l'ali unu. Ophu o dukwa mkpuma, a pyiru apyipyi, unu ee-dobe l'ali unu wata abaru aja. O kwa mbedua bu Chipfu; bya aburu Chileke unu.

2Unu dobeje eswe nkemu, bu eswe-atuta-unme iche; unu akwabeje ulo mu, du nso ubvu. O kwa mbedua bu Chipfu.

3"Unu -nodu atukojewa iphe, mu toru okpa iya su g'e tsoje etso; bya emekota iphe, mu suru g'unu mee;

4be mu a-noduepho edzeru unu mini l'orwuberu iya; iphe, e meberu l'ali emehu emehu; teme oshi, no l'egu amishigbaa mebyi iya.

5Iphe a-nodu emehuru unu shii; k'ophu bu l'unu a-nodu echi ereshi jasu ogge awo akpuru vayinu erwua. Unu egude awo akpuru vayinu jasu ogge emebe iphe l'ali erwua ozo. Unu a-nodu eri nri eriji epho; unu eburu l'ali ono; o to dudu iphe, eme unu.

6"Mu e-me g'unu buru l'ehuguu l'ali ono; k'ophu bu l'unu a-ze pyakoo; o to dudu onye eye unu ebvu. Mu emee g'ejo anu-egbudu chihu l'ali ono; ophu a byadu alwu ogu l'ali unu ono.

⁷Unu a-chi ndu ọhogu unu gbushia phe.

⁸Unu -du ise; unu achia umadzu ukporo ise; teke unu du ukporo ise; unu achia unu ukporo l'ise. Unu e-gude ogu-echi unu gbushia ndu ọhogu unu.

⁹Mu a-nodu eleta unu enya; mee unu g'unu zua azuzu kabaa l'otu. Ogbandzu mu l'unu be mu e-me g'o nguru anguru.

¹⁰Ozo bu l'unu e-rije akahu iphe, unu kpataru jasun unu akpata k'ophuu; mbu a -nonyaa unu achishiaha akahu iya k'ophu ee-wobata k'ophuu.

¹¹Temu mu eworu ulo-ekwa mu kpohe l'echilabo unu; ophu unu adubaedu mu ideyideyi.

¹²Mu a-nodu ejephe l'echilabo unu; mu aburu Chileke unu; unu aburu ndibe mu.

¹³O kwa mbedua bu Chipfu; bya aburu Chileke unu, bu onye dufutaru unu l'ali Ijiputu; g'unu ta abureru ohu ndu Ijiputu. Mu mebyiwaa ike ono, ephe shi gude mee g'unu buru ohu phe ono; shi nno mee unu g'unu phafuta ishi.”

Aphu, aa-nu onye te emejedu iphe, a suru g'o mee

(Dit 28:15-68)

¹⁴“Ole o -buru l'unu ta ngabeduru mu nchi; ophu unu emedu iphe, mu suru g'unu meje g'o ha;

¹⁵mbu o -buru l'unu ta agubeduru iya iphe; mbu iphe, mu toru okpa iya su g'e tsoje; ozoo l'obu unu woru iphe, mu turu l'ekemu mee; o du ideyideyi; k'ophu bu l'unu te emejedu iphe, mu suru g'unu meje g'o ha; unu eshi nno woru ogbandzu, mu l'unu gbaru mebyia;

¹⁶bukwa iphe, mu e-me unu bu owa: Mu e-me ge ndzu-agugu rwuta unu; teme ukwaranta esehaa unu; yee ejo ehukwu, e-woru unu enya mebyia; ndzu unu ala ke mmanu. Unu -kpohe iphe l'ali l'o buru iphe-mmanu; noo kele oo ndu ọhogu unu e-mechaa ria ya.

¹⁷Mu a-gharu unu iphu le ke njo; ndu ọhogu unu alwu-kpee unu l'ogu. Ndu unu du ashi a-buru ndu-ishi unu; unu agbaaha oso teke adudu onye achi unu.

¹⁸“O -buru le mu mechaaru unu nno; ophu unu angabeduru nchi; mu anubaa unu aphu iphe-eji unu ono ophu ha g'owa mgbo esaa.

¹⁹Mu e-me g'unu kubuhu onwunu; mbu mee akpaminigwe, unu vu l'ishi g'o du gborojii ge mkpurukpu-igwe; bya emee ali, unu zoberu okpa g'o ha ngerengere g'onirubvu.

²⁰Okpehu, unu gude koo ali a-buru unu ke mmanu; noo kele ali ta adudu iphe, ometa; teme oshi-omi, pfuru l'ali ono ami-buhu mebyi.

²¹“Teke o bu l'unu emekwapho iphe, mu suru g'unu te emejeshi; k'ophu bu l'unu ta angakwaru mu pho nchi be mu e-gude iphe-ehuka, ka iphe-eji, unu meru mgbo esaa; nua unu aphu.

22Mu a-chiru anụ-egbudu ye g'ephe bya adakaa unu; bya atuko unwegirima unu nakota unu l'okpehu; tuko iphe-edobe unu mebyishichaa; mee; unu ta abaedu ishi; eze gbororo unu adabyiru iphoro.

23“Teke mu mechakporu unu iphemiphe ono; ophu unu agbanwekwarupho; unu nodu emekwapho iphe, mu suru g'unu te emejeshi

24be mu e-mekwapho unu iphe, mu tege emedu unu; mbu le mu a-nu unu aphu iphe-aji ono, unu eme ono mgbo esaa.

25Mu a-ha g'ogu dapfu unu; gude iya gwata unu ugwo ogbandzu ono, unu mebyiru ono. Unu -dzukobeepho l'oma mkpukpu unu; mu emee g'ejo iphe-ememe dapfu unu; shi nno woru unu yee ndu ohogu unu l'eka.

26Teke mu gbuchiru unu uzo, eeshije akota nri ono; be unwanyi iri a-duje ike ghekota buredi g'unu ha l'ovokoku lanu. Ephe -ghechaa ya; ephe egude iphe, eegudeje atu erwa iphe keeru iya unu. Unu -richaa ya; egu aguroo unu l'eka ogu unu.

27“Ole o -buru le mu mechaaru unu iphemiphe ono; unu nodu emekwapho iphe, mu suru g'unu te emeshi

28be mu e-gude ehueghu mee unu iphe, mu tege emedu unu; mbu l'oo mbedua l'onwomu e-chi unu iphe mgbo esaa k'iphe-aji, unu eme.

29Noo teke unu a-wata eri anu unwu unu unwoke; mbu richaa ria anu unwu unu unwanyi.

30Mu e-mebyishi aka unu agwaje iphe; bya enwutsushia oru-ngweja aka unu akpoje unwu-isensu oku. Mu eworu odzu unu tukaa l'eli nshi unu ono, buhukwapho odzu l'onwiya ono. Unu adu mu pho ideyideyi l'obu.

31Mu emee mkpukpu le mkpukpu unu g'o buru iphe, dabyigbaaru iphoro. Mu emee ulo unu, du nsu g'o buru okorobo ulo. Teke ono be mkpo ngweja, unu gweru ta abyaedu adu mu ree.

32Ali ono be mu e-me g'o buru ochobu; k'ophu bu le ndu ohogu unu, bu ndu e-mechaa buchua ya nu be oo-du biribiri.

33Ozo bu le mu a-tuka unu nanunanu l'ali ndu ohozo. O buru ogu-echi be mu a-mita gude tsoru unu. Ali unu adabyiru iphoro. Mkpukpu le mkpukpu unu abukotaru ochobu.

34Noo teke ehueghu a-wata atso ali ono le ya atuta unme; mbu teke ono, o dabyikporu iphoro; unubedua nodu l'ali ndu ohogu unu ono. Teke ono be ali ono a-nodukpoepho ete eswa le ya atuta unme.

35Teke ono, ali ono dabyiru iphoro ono bu unme be otuta; kele o to shidu atutajekwadu unme l'apha-atuta-unme unu teke unu shi buru iya.

36“A bya le ndu ophu ghuduru nu l'echilabo unu; ndu k'ono be mu e-me g'ephe du ogozi l'ime obu phe l'ali ndu ohogu phe; k'ophu bu l'ekwo, a nmaru yigayiga l'e-me

g'ephe ye okpa l'oso; gbalaa ge ndu e gude ogu-echi achi. Ephe adaa l'ebe adu onye achi phe oso.

³⁷Ephe e-vukotaje nwibe phe daa dapyabe phe ge ndu e gude ogu-echi achi l'ebe abu l'o duru onye achi phe nu. Ophu unu adubaedu ike apfuru l'iphu ohogu unu.

³⁸Unu a-nwushihu l'alì ndu ohozo. O buru alì ndu ohogu unu e-ri ishi unu.

³⁹Teme nwa ndu ophu phoduru nu l'echilabo unu be a-nodu eyifu eyifu l'alì ndu ohogu unu. O buru ejo-iphe, ephe meshiru; waa ophu nna phe oche phe meshiru be ephe e-gude yifu ono.

⁴⁰“Ole o -buru l'ephe pfushiru ejo-iphe, ephe eme; yee ejo-iphe, nna phe oche meshiru; mekpoo emeswe, ephe mesweru mu; yee ememe, ephe emeje iphe, mu suru g'ephe te emeshi,

⁴¹bụ iphe, meru; mu mee phe iphe, mu tege emedu phe; chiru phe jeye l'alì ndu ohogu phe. O -buru l'okpoma phe ono, ejo-iphe jiru ejiji ono be ephe e-woze alì; bya apfua ugwo ejo-iphe, ephe mekotaru;

⁴²be mu a-nyatakwa-a ogbandzu mu le Jiékoṗu; yee ogbandzu mu le Áyizaku; mu anyatakwapḥo ogbandzu mu le Ébirihamu; nyatakwapḥo alì ono.

⁴³Obenu l'alì ono be ephe a-ha g'o dabyiru iphoro; gude ehu-utso nyaa oku. Noo teke ephe a-pfu ugwo ejo-iphe, ephe meru; noo kele ephe ta adudu iphe, ephe guberu iphe, mu turu l'ekemu; wafua l'ephe woru iphe, mu toru okpa iya su g'e tsoje mee; o du ideyideyi.

⁴⁴Ole g'o duhabe be teke ono, ephe a-nodu l'alì ndu ohogu phe ono be mu ta ajikakwa phe; ophu mu edobekwa phe ge ndu du ideyideyi; ke ge mu mebyishikota phe kpamu; mebyia ogbandzu mu l'ephe; kele o kwa mbedua bu Chipfu; bya aburu Chileke phe.

⁴⁵Ole mu e-gude iswi ehu phe nyata ogbandzu mu le ndu ndiche phe, bu ndu mu shi l'alì Ijiputu dufuta l'atatiphu ohamoha; k'ophu mu a-buru Chileke phe. O kwa mbedua bu Chipfu.”

⁴⁶Ono bu iphe, Chipfu toru okpa iya su g'e tsoje; waa iphe, o turu l'ekemu; waa ekemu, Chipfu turu dobe l'echilabo ephe le ndu Izurelu l'eli ubvu Sayinayi. O buru Mosisu be o nuru iya g'o nu phe.

Ndu Uke 27

Ekwe ukwe emeru Chipfu iphe

¹Tobudu iya bu; Chipfu bya epfuru yeru Mosisu su iya:

²“Pfuaru unwu Izurelu; su phe-a: O -buru le nemadzu rifuru angu le ya e-woru nemadzu nu Chipfu; g'o pfukwaa ugwo l'ishi onye obu:

³“O -buru nwoke, nowaru a -gbé l'ukporo apha rwua ukporo apha eto; be iphe, aa-pfu l'ishi iya bu mkpola-ochaa, erwa iya du ukporo shekelu labo le shekelu iri. G'o bukwaru iphe, eegudeje atù erwa iphe l'eze-ulo Chileke be ee-gude tua ya.

- 4“O -būru nwanyị; bẹ iphe, aa-pfū l'ishi iya bụ mkpọla-ọchaa, ẹrwa iya dū ụkporo shẹkelu lẹ shẹkelu iri.
- 5“O -būru nwokoro, nọru a -gbẹ l'apha ise jasū l'ụkporo apha; bẹ iphe, aa-pfū l'ishi iya bụ mkpọla-ọchaa, ẹrwa iya dū ụkporo shẹkelu; ọ -būru nwanyị; iphe, aa-pfū l'ishi iya aburu mkpọla-ọchaa, ẹrwa iya dū shẹkelu iri.
- 6“O -būru nwata kẹ nwoke, nọru a -gbẹ l'ọnwa lanū jasū l'apha ise; bẹ iphe, aa-pfū l'ishi iya bụ mkpọla-ọchaa, ẹrwa iya dū shẹkelu ise. O -būru nwata kẹ nwanyị; iphe, aa-pfū l'ishi iya aburu mkpọla-ọchaa, ẹrwa iya dū shẹkelu ẹto.
- 7“Nwoke, nọ-ghataru ụkporo apha ẹto bụ mkpọla-ọchaa, ẹrwa iya dū shẹkelu iri l'ise bẹ aa-pfū l'ishi iya; teke ọ bụ nwanyị l'a pfua mkpọla-ọchaa, ẹrwa iya dū shẹkelu iri.
- 8“O -būru l'onye ono, riburu angū ono bẹ akpa nri; k'ọphu bụ l'ọ tọ dudu ike apfū iphe, a suru g'ọ pfua; g'ọ duru onye ọbu, o riru angū iya ọbu; dujeru onye uke. Onye uke ono elee ya ẹnya kọoru iya iphe, ọo-pfū. O buri g'ike onye ono, riburu angū ono habe bụ g'ee-gbuberu iya iphe, ọo-pfū.
- 9“Teke ọ bukwanu l'ọo anū bẹ nemadzu gude bya anū Chipfu iphe ngweja; mbu anū ọphu gbaru g'anū iya Chipfu; iphe, bukpo anū, a nuru Chipfu egube ono dukotakwa nsọ.
- 10G'ọ to wotakwa anū ọzo dochia ẹnya iya; g'ọ to wotakwa anū ọzo ka eji; ọzoo ọphu ka ree gude gbanweta anū k'ono, o riburu angū l'ọo-nū ono. O -būru l'ọ gude anū ọzo je agbanweta iya bẹ anū ọphu o gude je iya agbanweta; yee anū, o jeru agbanweta tukoakwa buru anū, duru Chileke nsọ.
- 11Obenu; ọ -būru l'iphe, o riburu angū l'ọo-nū bụ anū, aasọ nsọ; mbu anū ọphu e tee gudejedu egweru Chipfu ngweja; g'a kpatakwa anū ọbu kpujeru onye uke.
- 12G'onye uke ono lee ya ẹnya maru m'ọ dū ree tọo ọ dū eji; ọ buri iphe, onye uke ono sukpoerupho g'ọ pfua bụ iphe, ọo-pfū.
- 13O -būru l'onye nwe iya nū bẹ ọ dū g'ọ gbata iya; g'onye ono kee aswa iya ọzo ise wota oke lanū tukwase l'aswa iya pfua gude gbata iya.
- 14“O -būru l'ọ duru onye woru ọlo iya nū g'ọ duru Chipfu nsọ; bukwa onye uke bẹ ọ duru epfu l'ọlo ono dū ree; ọzoo l'ọ dū eji. O buri iphe, onye uke sukpoerupho l'ọo aswa iya bụ aswa iya.
- 15O -būru l'onye woru ọlo ono doberu Chipfu nsọ bẹ ọ dū g'ọ gbata iya; g'onye ọbu kee aswa iya ọzo ise wota yekobe l'aswa iya pfua; teme ọlo ọbu abubaruru nkiya.
- 16“O -būru lẹ nemadzu butaru alị-ihe iya nū g'ọ buri kẹ Chipfu; g'ee-gude maru iphe, bụ aswa iya bụ gẹ mebyi iphe, aa-kobe l'alị ono habe shii. Alị, aa-ku-gbu balị, jiru nkweka iri bẹ aswa iya bụ mkpọla-ọchaa, ẹrwa iya dū ụkporo shẹkelu labo lẹ shẹkelu iri.
- 17O -būru l'ọo apha-ẹhu-utso bẹ ọ nuru alị iya g'ọ buri kẹ Chipfu ọbu; buepho iphe, a suru g'a pfua bẹ aa-pfū.

- 18**Ole ọ -buru l'apha-ẹhu-utso ghatawaru; ẹme o ribua angu l'oo-woru ali ono doberu Chileke nsọ; g'onye uke gwa apha ole, phoduru nu; ẹme l'o rwua l'apha-ẹhu-utso ọzo; shi nno karu onye ono iphe, aswa iya bu. Oo ya bu l'ee-gbubota iphe l'iphe, a suru g'a pfua.
- 19**O -buru l'onye woru ali ono doberu Chileke nsọ be ọ du g'o gbata iya; g'o kekwaaswa iya ọzo ise woru oke lanu yekobe l'aswa iya pfua gude gbata iya. O -mechaa nno; ali ono abuwaruro nkiya g'o shi buru iya.
- 20**Ole ọ -buru l'onye ono ta agbataduru ali ono; o woru iya ree onye ọzo; be ali obu kwawaru; ophu ọ duedu ike gbata iya.
- 21**O -rwuepho l'apha-ẹhu-utso; be ali ono a-duru Chipfu nsọ; ọ buru ndu-uke be ọo-du l'eka; eshinu ọ bu ali, e dobehawaru Chipfu nsọ.
- 22**“O -duru onye riburu angu anu Chipfu ali, ọ zuru azuzu, abudu ali iya, shi l'enya unuphu ibe phe;
- 23**g'onye uke gwa apha ole, phoduru nu; ẹme l'o rwua l'apha-ẹhu-utso; shi nno karu onye ono iphe, aswa iya bu. O buru mboku ono be onye ono a-pfu aswa iya obu g'o buru iphe, duru Chipfu nsọ.
- 24**O -rwua l'apha-ẹhu-utso; g'ali ono laphu azu l'eka onye a zuru iya l'eka iya; mbu onye ali ono bu nkiya gedegede.
- 25**“G'iphe, bukpo aswa iphe, aapfukpo apfupfu bukwaru iphe, eegudeje atu erwa iphe l'eze-ulo Chileke be ee-gudeje tua ya; g'a maru shekelu ole, ọ du. Erwa shekelu lanu bu ukporo gera.
- 26**“G'o to dukwa onye a-kputaje anu mbu, vuru ọzo waa ekpa ne iya; bya anu g'e doberu Chileke nsọ; kele anu, vuru ọzo waa ekpa ne iya bukwa ke Chipfu; m'o bu eswi; ọzo aturu; g'o ha tukoru buru ke Chipfu.
- 27**O -buru anu, aaso nsọ; g'onye ono pfua iphe, a suru g'o pfua gude gbata iya; g'o kekwapo aswa iya ọzo ise; wota oke lanu yekobe l'aswa iya ono pfua. Teke ọ bu l'o to dudu ike gbata iya g'e ree ya onye ọzo iphe, a suru l'o bu aswa iya.
- 28**“Ole g'o duhabe; g'o to dukwa iphe, nemadzu goru nu Chipfu, ee-re erere; ọzo gbata iya agbata. Mbu iphe, shi l'iphe, nemadzu nweru enweru; m'o bu nemadzu; ọzo anu; ọzo ali, bu iya nwe iya; iphemiphe, a goru nu Chipfu dukwaru Chipfu nsọ shii.
- 29**G'o to dukwa onye e doberu k'egbugbu, aa-gbataje agbata; g'e gbukwaa onye obu egbugbu.
- 30**“Oke-lanu-l'uzo-iri l'iphe, e metaru l'ali; m'obeta ọ buru mebyi iphe, a kpataru l'iphe, a koru l'ali; ọzo akpuru, oshi mitaru; bukotakwa ke Chipfu; ọ duru Chipfu nsọ.
- 31**O -duru onye eme g'o gbata oke-lanu-l'uzo-iri nkiya; g'onye ono kekwaaswa iphe, bu aswa iya ọzo ise; wota oke lanu yekobe l'aswa iya ono gude gbata iya.

³²A bya l'oke-lanụ-l'uzo-iri, shi l'eswi; ọzoo ọphu shi l'eghu mę aturu; mękpoo ọphu shi l'iphe, bụ anụ, eye ishi l'ọka; g'oke-lanụ-l'uzo-iri, shi iya nụ dukotajeru Chipfu nsọ.

³³G'o to jejekwa iya enyocha kę ? a maru ọ dụ ree tọo ọ dụ eji; ọphu ọ gbakwa iya inwe. A -gbakwanaa ya inwe agbagba ọphu; g'ono yęe ọphu e gude agbanweta iya tükokwa buru iphe, dụ nsọ; ọphu a byadu agbata iya agbata.”

³⁴Ono bụ ekemu, Chipfu tushiru nụ Mosisu l'úbvú Sayınayi g'o je anụ ndu Ízurelu.

Ọ́gú

Ọ́gú 1

Agú ndu Ízurèlu ọ́gu

- ¹Chipfu pfuru opfu yeru Mósísu l'ulo-ẹkwa-ndzukọ ndu Ízurèlu lẹ g'ẹphe nọ l'echiegu Sayinayi l'abalí mbụ l'ọ́nwa k'ẹbo l'apha, kwe ndu Ízurèlu apha labọ, ẹphe shi l'ali Ijiputu wufuta. Ọ sọru iya:
- ²“Unu gụa ndu Ízurèlu g'ẹphe hakọta ọ́gu. Gụa phẹ l'ọ́nulo l'ọ́nulo; mẹ l'ẹnya-unuphu l'ẹnya-unuphu. Unwoke bẹ ii-deshikọta ẹpha phẹ nanu nanu.
- ³Gẹ gụ lẹ Eronu tukọ iphe, bụ unwoke lẹ Ízurèlu gụkọta ọ́gu; mbụ ndu nọwaru ụkporo apha kwasẹru; bya aburu ndu sọwaru eje ọ́gu.
- ⁴Unu họtachaa nwoke lanu l'ọ́kpa-ipfu l'ọ́kpa-ipfu g'o yetaru unu ẹka. Ndu unu a-họta bụ ndu-ishi l'ẹnya-unuphu ibe phẹ.
- ⁵Waa ẹpha ndu ono, unu a-họta g'ẹphe yeru unu ẹka ọbu baa: “Onye unu a-họta l'ọ́kpa-ipfu Rúbenu bụ Elizuru nwa Shediyo.
- ⁶“Onye unu a-họta l'ọ́kpa-ipfu Simiyonu bụru Shelumelu nwa Zurishadayi.
- ⁷“Onye unu a-họta l'ọ́kpa-ipfu Jiuda bụru Náshonu nwa Amínadabu.
- ⁸“Onye unu a-họta l'ọ́kpa-ipfu Isaka bụru Netanelu nwa Zuwa.
- ⁹“Onye unu a-họta l'ọ́kpa-ipfu Zebulonu bụru Eliyabu nwa Helonu.
- ¹⁰“A -bya l'ọ́kpa-ipfu k'unwu Jiósefu; onye unu a-họta l'ọ́kpa-ipfu Ifuremu bụ Elishama nwa Amihudu. Unu ahọta Gamalelu nwa Pedazo l'ọ́kpa-ipfu kẹ Manáse.
- ¹¹“Onye unu a-họta l'ọ́kpa-ipfu Benjiaminu bụru Abidanu nwa Gidiyoni.
- ¹²“Onye unu a-họta l'ọ́kpa-ipfu Danu bụru Ahiyeza nwa Amishadayi.
- ¹³“Onye unu a-họta l'ọ́kpa-ipfu Asha bụru Pagelu nwa Okuranu.
- ¹⁴“Onye unu a-họta l'ọ́kpa-ipfu Gadu bụru Eliyasafu nwa Diyuwelu.
- ¹⁵“Onye unu a-họta l'ọ́kpa-ipfu Nafutali bụru Ahira nwa Enanu.”
- ¹⁶Ndu ono bẹ bụ unwoke, a họtaru lẹ Ízurèlu l'opfu. Ẹphe bukọta ndu-ishi l'ọ́kpa-ipfu, shi lẹ ndiche phẹ; bya abuchaaru ishi l'ẹnya-unuphu, du lẹ Ízurèlu.
- ¹⁷Mósísu yele Eronu bya achita ndu ono, a gushiru ẹpha phẹ ono;
- ¹⁸ẹphe kukọbe ndu Ízurèlu g'ẹphe ha; deshia ẹpha phẹ l'ẹkwo l'abalí mbụ l'ọ́nwa k'ẹbo ono. Ẹphe deshiru ẹpha onyemonye l'ọ́nulo l'ọ́nulo; mẹ l'ẹnya-unuphu l'ẹnya-unuphu. Iphe, bukọpoo unwoke, nọwaru ụkporo apha kwasẹru bẹ e dekotaru ẹpha phẹ nanu nanu;

¹⁹egube ono, Chipfu s̄uru M̄osisu g'o mee ya ono. Oo ya bu; M̄osisu ḡua ndu Ízurelu ogu l'echiegu Sayinayi.

Umadzu ole, a ḡutaru l'ipfu l'ipfu

²⁰A -bya l'oshilokpa Rúbenu, bu okpara Ízurelu; iphe, bukota unwoke, nowaru ukporo apha kwaseru; mbu ndu s̄waru eje ogu be a ḡukotaru; deshikota epha phe nanu nanu l'ekwo. E deshiru epha phe l'onulo l'onulo; me l'enya-unuphu l'enya-unuphu.

²¹Iphe, a ḡutaru l'ipfu Rúbenu be bu ukporo unu nemadzu mgbo ise l'unu iri l'ishii l'ukporo umadzu ise.

²²Oshilokpa Simiyonu be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe nanu nanu l'ekwo. E deshiru epha phe l'onulo l'onulo; me l'enya-unuphu l'enya-unuphu.

²³Iphe, a ḡutaru l'ipfu Simiyonu be du ukporo unu nemadzu mgbo esaa l'unu esato l'umadzu ukporo ise.

²⁴Oshilokpa Gadu be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe nanu nanu l'ekwo. E deshiru epha phe l'onulo l'onulo; me l'enya-unuphu l'enya-unuphu.

²⁵Iphe, a ḡutaru l'ipfu Gadu be du ukporo unu nemadzu mgbo ise l'unu iri l'eno l'umadzu ukporo labo l'iri.

²⁶Oshilokpa Jiuda be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe nanu nanu l'ekwo. E deshiru epha phe l'onulo l'onulo; me l'enya-unuphu l'enya-unuphu.

²⁷Iphe, a ḡutaru l'ipfu Jiuda be du ukporo unu nemadzu mgbo tete l'unu ishii l'umadzu ukporo iri.

²⁸Oshilokpa Isaka be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu.

²⁹Iphe, a ḡutaru l'ipfu Isaka be du ukporo unu nemadzu mgbo ishii l'unu iri l'ishii.

³⁰Oshilokpa Zebulonu be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe l'ekwo. E deshiru epha phe l'onulo l'onulo; me l'enya-unuphu l'enya-unuphu.

³¹Iphe, a ḡutaru l'ipfu Zebulonu be du ukporo unu nemadzu mgbo esaa l'unu eto l'umadzu ukporo iri.

³²A -bya l'oshilokpa Jiosefu; mbu awa Ifuremu be a ḡukotaru iphe, bu unwoke, nowaru ukporo apha kwaseru, bu ndu s̄waru eje ogu; bya edeshia epha phe. E deshiru epha phe l'onulo l'onulo; me l'enya-unuphu l'enya-unuphu.

³³Iphe, a ḡutaru l'ipfu Ifuremu be du unu nemadzu ukporo ise l'unu lanu l'umadzu ukporo ise.

³⁴Awa Manáse bẹ a gụkotaru iphe, bụ unwoke, nọwaru ụkporo apha kwaseru, bụ ndu sụwaru eje ogu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; me l'ẹnya-unuphu l'ẹnya-unuphu.

³⁵Iphe, a gụtaru l'ipfu Manáse bẹ dụ ụkporo unu nemadzu mgbo ẹno l'umadzu ụkporo iri.

³⁶A -bya l'oshilokpa Benjaminu bẹ a gụkotaru iphe, bụ unwoke, nọwaru ụkporo apha kwaseru, bụ ndu sụwaru eje ogu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; me l'ẹnya-unuphu l'ẹnya-unuphu.

³⁷Iphe, a gutaru l'ipfu Benjaminu bẹ dụ ụkporo unu nemadzu mgbo ẹno l'unu ẹsato l'umadzu ụkporo iri.

³⁸Oshilokpa Danu bẹ a gụkotaru iphe, bụ unwoke, nọwaru ụkporo apha kwaseru, bụ ndu sụwaru eje ogu; bya edeshia ẹpha phẹ l'ẹkwo. E deshiru phẹ l'ọnulo l'ọnulo; me l'ẹnya-unuphu l'ẹnya-unuphu.

³⁹Iphe, a gutaru l'ipfu Danu bẹ dụ ụkporo unu nemadzu mgbo ẹsaa l'unu iri l'ishii l'umadzu ụkporo iri l'ise.

⁴⁰Oshilokpa Asha bẹ a gụkotaru iphe, bụ unwoke, nọwaru ụkporo apha kwaseru, bụ ndu sụwaru eje ogu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; me l'ẹnya-unuphu l'ẹnya-unuphu.

⁴¹Iphe, a gutaru l'ipfu Asha bẹ dụ ụkporo unu nemadzu mgbo ise l'unu ẹto l'umadzu ụkporo iri l'ise.

⁴²Oshilokpa Nafutali bẹ a gụkotaru iphe, bụ unwoke, nọwaru ụkporo apha kwaseru, bụ ndu sụwaru eje ogu; bya edeshia ẹpha phẹ l'ẹkwo. E deshiru ẹpha phẹ l'ọnulo l'ọnulo; me l'ẹnya-unuphu l'ẹnya-unuphu.

⁴³Iphe, a gutaru l'ipfu Nafutali bẹ dụ ụkporo unu nemadzu mgbo ishii l'unu iri l'ẹto l'umadzu ụkporo iri.

⁴⁴Ndu ono bẹ bụ ndu Mosisu yele Eronu guru ogu. Ndu yetaru phẹ ẹka gụa ogu ono bụ ndu-ishi ndu Ízurelu umadzu iri l'ẹbo ono, nọ-chigbaaru ẹnya-unuphu unuphu phẹ ono.

⁴⁵Iphe, bụ unwoke Ízurelu l'ophu, nọwaru ụkporo apha kwaseru, bụ ndu sụwaru ejeru ndu Ízurelu ogu bẹ a gụkotaru l'ẹnya-unuphu phẹ l'ẹnya-unuphu phẹ.

⁴⁶Mkpakọ iphe, ẹphe dụ g'ẹphe ha bẹ bụ ụkporo unu nemadzu mgbo ụkporo ẹto l'umadzu ụkporo iri l'ise; l'unu umadzu ẹsato; l'umadzu ụkporo iri l'ẹsaa; l'umadzu iri.

A gụfuru ipfu Lívayi

⁴⁷Ole ipfu Lívayi bẹ a ta gụduru teke a guru ndu Ízurelu ophuna.

⁴⁸O noo kele Chipfu bẹ sụru Mosisu lẹ-a:

49“Ndu ị tji gudu kpoloko bu ipfu Lívayi. Ta gukobekwa phe me ị guje ndu Ízurelu ophuna.

50Iphe, l'ii-mechia bu g'i hota ndu Lívayi ono g'ephe letaje enya l'ulo-ekwa, eedobeje ekwo-ekemu Chileke; ephe eletaje enya l'ivu, du iya nu; me iphemiphe, bu iphe, aduje l'ulo-ekwa ono. Oo ephebedua be a-noduje apa ulo-ekwa ono; me iphe, bu ivu, dukota iya nu. O buru phe a-nwuberu iya enya; ephe egudeje ulo-ekwa nkephe kpọ-pee ulo-ekwa ono mgburugburu.

51Iphe, bu teke ulo-ekwa ono abya atugbu; g'o buru ndu Lívayi be a-pho-tsutaje iya. Iphe, bu teke aakpobe ulo-ekwa ono; g'o bukwarupho ndu Lívayi be a-kpobeje iya nu. Onye ozo mmanu, jekuberu iya ntse be ee-gbu egbugbu.

52Ndu Ízurelu a-kpobeje ulo-ekwa phe l'onu-ogo l'onu-ogo. Iphe, bu nwoke nonu a-kpobeje ulo-ekwa iya l'onu-ogo nkephe l'eka ephe kpoberu ekwa-ohubama ipfu phe.

53Obenu le ndu Lívayi be e-gude ulo-ekwa nkephe kpọ-pheta ulo-ekwa ono, eedobeje ekwo-ekemu Chileke mgburugburu; k'opu Chileke eta atu-koshidu edzudzu-oha Ízurelu oke ehu-eghu iya. Oo ndu Lívayi be a-nodu eleta ulo-ekwa eka eedobeje ekwo-ekemu Chileke ono enya.”

54Tobudu iya bu; ndu Ízurelu mekotaepho iphemiphe ono egube ono, Chipfu suru Mosisu g'o mee ya.

Ọgú 2

Ekeshi eka ndu ipfu nonu a-kpobe ulo-ekwa nkephe

1Chipfu bya epfuaru Mosisu waa Eronu; su phe:

2“Ge ndu Ízurelu kpobeje ulo-ekwa phe g'o gha iphu l'ulo-ekwa-ndzuko. Ephe ebuphee ulo-ekwa-ndzuko ono mgburugburu. G'onyenonu kpobejekwa ulo-ekwa nkiya l'onu-ogo nkephe l'eka ndu enya-unuphu phe kpoberu ekwa-ohubama phe.”

Ipfu opu a-kpobe ulo-ekwa ebubu phe laaru uzo enyanwu-awawa

3“Ndu Jiuda bu ephebedua a-kpobe ulo-ekwa nkephe l'uzo enyanwu-awawa; l'onu-ogo l'onu-ogo; l'eka ipfu ono kpoberu ekwa-ohubama phe. Onye a-buru ishi ndu Jiuda bu Nashonu nwa Aminadabu.

4Iphe, a gutaru l'ipfu Jiuda ono be du ukporo unu nemadzu mgbo tete l'unu ishii l'umadzu ukporo iri.

5“Ndu a-kpobe ulo-ekwa nkephe tsota phe be bu ndu ipfu ke Isaka. Onye a-buru ishi l'oshilokpa Isaka bu Netanelu nwa Zuwa.

6Iphe, a gutaru l'ipfu Isaka be du ukporo unu nemadzu mgbo ishii l'unu iri l'ishii.

7“Ndu ozo, a-kpobe nkephe tsota phe be bu ndu ipfu ke Zebulun. Onye a-buru ishi l'oshilokpa Zebulun bu Eliyabu nwa Helonu.

⁸Iphe, a gɔtaru l'ipfu Zebulonu bɛ dɔ ɔkporo ɔnu nemadzu mgbo ɛsaa l'unu ɛto l'umadzu ɔkporo iri.

⁹“Ipfu ono, a hɔtaru g'ɛphe l'ipfu Jiuda kpɔ-kube ɔlo-ɛkwa phɛ l'onu-ogo l'onu-ogo ono bɛ tɔkoru dɔ ɔkporo ɔnu nemadzu mgbo ɔkporo l'unu ishii. O buru ɛphebedua e-vutajɛ ɔzo; ndu ɔzo etso phɛ.”

Ipfu ɔphu a-kpɔbe ɔlo-ɛkwa ebubu nkepɛ laaru ɔzo ndɔhali

¹⁰“Ndu ɔphu a-kpɔbe ɔlo-ɛkwa ebubu nkepɛ l'ɔzo ndɔhali bɛ bu ipfu Rúbɛnu bɛ a-kpɔbe iya l'onu-ogo l'onu-ogo. Onye a-buru ishi l'oshilɔkpa Rúbɛnu bu Elizuru nwa Shediyo.

¹¹Iphe, a gɔtaru l'ipfu Rúbɛnu bɛ dɔ ɔkporo ɔnu nemadzu mgbo ise l'unu iri l'ishii l'umadzu ɔkporo ise.

¹²“Ndu a-kpɔbe ɔlo-ɛkwa nkepɛ tsota ipfu Rúbɛnu bɛ bu ipfu kɛ Simiyonu. Onye a-buru ishi l'oshilɔkpa Simiyonu bu Shelumɛlu nwa Zurishadayi.

¹³Iphe, a gɔtaru l'ipfu Simiyonu bɛ dɔ ɔkporo ɔnu nemadzu mgbo ɛsaa l'unu ɛsato l'umadzu ɔkporo ise.

¹⁴“Ndu ɔphu a-kpɔbe nkepɛ tsota phɛ bɛ bu ipfu Gadu. Onye a-buru ishi l'oshilɔkpa Gadu bu Eliyasafu nwa Diyuwɛlu.

¹⁵Iphe, a gɔtaru l'ipfu Gadu bɛ dɔ ɔkporo ɔnu nemadzu mgbo ise l'unu iri l'ɛno l'umadzu ɔkporo labo l'iri.

¹⁶“Ipfu ono, a hɔtaru g'ɛphe l'ipfu Rúbɛnu kpɔ-kube ɔlo-ɛkwa phɛ l'onu-ogo l'onu-ogo ono bɛ tɔkoru dɔ ɔkporo ɔnu nemadzu mgbo iri l'ɛsato l'unu iri l'ɛsato; l'ɔkporo ɔmadzu iri l'ɛbo l'umadzu iri. O buru ɛphebedua bu ndu k'ɛbo, a-palihuje mɛ a -gbɛshi ije.

¹⁷“Oo ya bu; ndu Lívayi evuta ɔlo-ɛkwa-ndzukɔ nɔdu l'echilabo ndu ipfu ono tɔgbushia. Oo ɛpho g'ɛphe gude kpɔo ɔlo-ɛkwa phɛ l'onu-ogo l'onu-ogo ono bu g'ɛphe e-gudeje gbɛshi ije phɛ. Ndu nɔnu ɛphe apagbaaru ɛkwa-ɔhubama phɛ.”

Ipfu ɔphu a-kpɔbe ɔlo-ɛkwa ebubu nkepɛ l'ɔzo ɛnyanwu-ariba

¹⁸“Ndu ɔphu a-kpɔbe ɔlo-ɛkwa ebubu nkepɛ l'ɔzo ɛnyanwu-ariba bɛ bu ipfu kɛ Ifuremu; l'onu-ogo l'onu-ogo. Onye a-buru ishi l'oshilɔkpa Ifuremu bu Elishama nwa Amihudu.

¹⁹Iphe, a gɔtaru l'ipfu Ifuremu bɛ dɔ ɔkporo ɔnu nemadzu mgbo ise; l'unu nemadzu; l'umadzu ɔkporo ise.

²⁰“Ndu a-kpɔbe ɔlo-ɛkwa nkepɛ tsota ipfu Ifuremu bɛ bu ipfu Manáɛ. Onye a-buru ishi l'oshilɔkpa Manáɛ bu Gamalɛlu nwa Pedazo.

²¹Iphe, a gɔtaru l'ipfu Manáɛ bɛ dɔ ɔkporo ɔnu nemadzu mgbo ɛno; l'umadzu ɔkporo iri.

22“Ndu ophu a-kpobe ụlo-ekwa nkephe tsota phe be bu ndu ipfu ke Benjaminu. Onye a-buru ishi l'oshilokpa Benjaminu bu Abidanu nwa Gidiyoni.

23Iphe, a gutaru l'ipfu Benjaminu be du ukporo unu nemadzu mgbo eno; l'unu umadzu esato; l'umadzu ukporo iri.

24“Ipfu ono, a hotaru g'ephe l'ipfu Ifuremu kpokube ụlo-ekwa phe l'onu-ogo l'onu-ogo ono be tukoru du ukporo unu nemadzu mgbo iri l'eto; l'unu umadzu iri; l'umadzu ukporo ise. O buru ephebedua bu ndu k'eto, a-palihuje me a -gbeshi ije.”

Ipfu ophu a-kpobe ụlo-ekwa ebubu nkephe l'uzo isheli

25“Ndu ophu a-kpobe ụlo-ekwa ebubu nkephe l'uzo isheli be bu ipfu Danu; l'onu-ogo l'onu-ogo. Onye a-buru ishi l'oshilokpa Danu bu Ahiyeza nwa Amishadayi.

26Iphe, a gutaru l'ipfu Danu be du ukporo unu nemadzu mgbo esaa; l'unu umadzu iri l'ishii; l'umadzu ukporo iri l'ise.

27“Ndu l'a-kpobe ụlo-ekwa nkephe tsota ipfu Danu be bu ipfu Asha. Onye a-buru ishi l'oshilokpa Asha bu Pagelu nwa Okuranu.

28Iphe, a gutaru l'ipfu Asha be du ukporo unu nemadzu mgbo ise; l'unu umadzu eto; l'umadzu ukporo iri l'ise.

29“Ndu ophu a-kpobe ụlo-ekwa nkephe tsota phe be bu ndu ipfu Nafutali. Onye a-buru ishi l'oshilokpa Nafutali bu Ahira nwa Enanu.

30Iphe, a gutaru l'ipfu Nafutali be du ukporo unu nemadzu mgbo ishii; l'unu umadzu iri l'eto; l'umadzu ukporo iri.

31“Ipfu ono, a hotaru g'ephe l'ipfu Danu kpokube ụlo-ekwa phe l'onu-ogo l'onu-ogo ono be tukoru du ukporo unu nemadzu mgbo iri le tete; l'unu umadzu iri l'eno. O buru ephebedua be e-kpejeru azu l'ije phe ono; pagbaaru ekwa-ohubama phe.”

32Ndu ono be bu ndu Izurelu; g'e gude gua phe ugu l'enya-unuphu phe l'enya-unuphu phe. Mkpako ndu nokota l'eka a kpoberu ụlo-ekwa, bu ndu a guru ugu l'onu-ogo l'onu-ogo be du ukporo unu nemadzu mgbo eto; l'ukporo umadzu iri l'ise; l'unu umadzu esato; l'umadzu ukporo iri l'esaa; l'umadzu iri.

33Ole ndu Liviayi be a ta gukobeduru le ndu Izurelu ophu; o buru egube ono be Chipfu suru Mosisu g'o mee ya.

34Oo ya bu; ndu Izurelu mekotaepho iphemiphe, Chipfu turu Mosisu ekemu iya. O buru egube ono be ephe kpobecharu ụlo-ekwa phe l'onu-ogo l'onu-ogo; pfubechaa ya ekwa-ohubama phe. Nokwapho g'ephe eshije gbeshi tugba; ndu ophu nonu ephe le ndu onu-ulo nkephe; me ndu enya-unuphu nkephe.

Ọgú 3

Ndu Liviayi

¹Owaa bu oshilokpa Erõnu yele Mõsisu le teke ono, Chipfu pfuru yeru Mõsisu l'úbvú Sayinayi pho:

²Epha unwu Erõnu be bu Nadabu, bu iya bu okpara iya; waa Abihu; me Eleyaza; waa Itama.

³Noo epha unwu Erõnu, bu ndu a wuru manu l'ishi; mbu ndu ono, a hotaru dobe g'ephe buru ndu-uke Chileke.

⁴Ole Nadabu yele Abihu be daru l'atatiphu Chipfu nwushihu; kele epe gude oku, ta adudu nsõ kpõoru Chipfu ngweja oku l'echiegu Sayinayi. Ophu epe emetaduru unwegirima; o buru Eleyaza yele Itama be jeahaaru ozi ndu-uke Chileke le teke ono, nna phe, bu Erõnu nokwaduro ndzu.

⁵Oo ya bu Chipfu bya asu Mõsisu:

⁶“Chita ipfu Lívayi jeye l'eka Erõnu, bu onye uke Chileke; k'ophu epe a-nõdu egebude iya ozi.

⁷Epe a-nõdu ejeru Erõnu ozi; bya ejeru ndu Ízurelu l'ophu ozi l'ulo-ekwa-ndzuko; mbu l'ephe a-nõdu eje ozi, rwuberu phe nu l'ulo Chileke.

⁸Epe a-nõduje eleta ivu, du l'ulo-ekwa-ndzuko ono enya; shi nno ejeru ndu Ízurelu ozi, rwuberu phe nu l'ulo Chileke.

⁹Tuko ndu Lívayi l'ophu ye Erõnu yele unwu iya l'eka; mbu l'a hotutawaru phe g'ephe hakõta l'echilabo ndu Ízurelu l'ophu woru ye iya l'eka.

¹⁰L'i tua Erõnu me unwu iya eka g'ephe buru ndu-uke Chileke. Ipe, bu onye õzo mmanu, jekuberu mgboru ulo-nsõ ono be ee-gbu egbugbu.”

¹¹Chipfu byakwa epfuaru Mõsisu õzo su iya:

¹²“Lenu; mu shiwaa l'echilabo ndu Ízurelu hota ndu Lívayi g'ephe nochia enya iphe, bu okpara; mbu iphe, bu nwoke, vu uzo waa ne iya ekpa-nwa le Ízurelu. Oo ya bu le ndu Lívayi be bu nkemu;

¹³noo kele ndu bukota okpara bu nkemu. Mboku ono, mu gbushiru ndu bu okpara l'ali Ijiputu ono be mu wotaru iphe, bu okpara ndu Ízurelu; doberu onwomu; mbu e shikpõo le nemadzu je akpaa l'anu. Epe a-buru nkemu. Oo mbedua be bu Chipfu.”

Agu ndu Lívayi õgu.

¹⁴No iya; Chipfu bya epfuru yeru Mõsisu l'echiegu Sayinayi su iya:

¹⁵“Gua ndu Lívayi õgu; gua phe l'enya-unuphu l'enya-unuphu; me l'onulo l'onulo. Ndu ji-gu be bu unwoke, nowaru a -gbõ l'onwa lanu kwasõru.”

¹⁶Tõbudu iya bu; Mõsisu gua phe egube ono, Chipfu pfuru iya ya ono.

¹⁷Waa epha unwu Lívayi baa: Geshõnu; me Kohatu; waa Merari.

- 18Owaa bu ɛpha unwu Geshonu l'ɛnya-unuphu phe l'ɛnya-unuphu phe: Libuni waa Shimeyi.
- 19Unwu ke Kohatu l'ɛnya-unuphu phe l'ɛnya-unuphu phe be bu Amuramu; me Izuha; me Heburonu; waa Uzelu.
- 20Unwu ke Merari l'ɛnya-unuphu phe l'ɛnya-unuphu phe be bu Mahuli waa Mushi. Ndu ono tukoru buru ipfu Lívayi; egube ephe du l'ɛnya-unuphu l'ɛnya-unuphu phe.
- 21Unwu Geshonu bu ndu onu-ulo Libuni waa ndu onu-ulo Shimeyi. O buru phe bu ndu onu-ulo Geshonu.
- 22Unwoke, nowaru onwa lanu kwaseru l'onulo Geshonu be du unu nemadzu iri l'esato; l'umadzu ukporo iri l'ise.
- 23Ndu onu-ulo Geshonu be akpobeje ulo-ekwa ebubu phe l'uzo enyanwu-ariba; l'azu ulo-ekwa Chileke.
- 24Onye bu ishi l'onulo Geshonu bu Eliyasafu nwa Layelu.
- 25Ozi, e yeru unwu Geshonu ono l'eka g'ephe jeje l'ulo-ekwa-ndzuko ono bu eleta ulo-ekwa Chileke enya; waa ekwa, e gude kpua ya; me eleta ekwa, e gude gbobuta onu-abata ulo-ekwa-ndzuko ono enya;
- 26me eleta ekwa, e gude gbobuta oma-unuphu; waa ekwa, e gude gbobuta onu-abata oma-unuphu ono, no-pheru ulo-ekwa Chileke ono; waa oru-ngweja mgburugburu; me eleta udo enya; waa iphe, bukpo ozi, gbaru phe nu.
- 27Unwu Kohatu bu ndu onu-ulo Amuramu; me ndu onu-ulo Izuha; me ndu onu-ulo Heburonu; me ndu onu-ulo Uzelu. O buru phe bu ndu onu-ulo Kohatu.
- 28Unwoke, nowaru onwa lanu kwaseru le ndu onu-ulo Kohatu be du ukporo unu nemadzu; l'unu umadzu lanu; l'umadzu ukporo iri. O buru phe be o duru; mbu ozi, eeje l'ulo du nsu.
- 29Ndu onu-ulo Kohatu be akpobeje ulo-ekwa ebubu phe l'uzo ndohali ulo-ekwa Chileke.
- 30Onye bu ishi l'onulo Kohatu bu Elizafanu nwa Uzelu.
- 31Ozi, duru phe nu bu eleta okpoko Chileke enya; me teburu; me iphe, aapfubeje oroku; me oru-ngweja; me ivu, du l'ulo-nsu, ndu-uke egudeje eje ozi; me ekwa, e gude gbobuta aka-kakota-adu-nsu; waa iphe, bukpo ozi ozo, gbaru phe nu.
- 32Onye-ishi ndu-ishi ndu Lívayi l'ophu bu Eleyaza nwa Eronu, bu onye uke Chileke. Oo yebedua be a hotaru g'o buru onye-ishi ndu eleta enya l'ulo-nsu ono.
- 33Unwu ke Merari be bu phe bu ndu onu-ulo Mahuli waa ndu onu-ulo Mushi. O buru ndu ono bu onu-ulo Merari.
- 34Unwoke, nowaru onwa lanu kwaseru le ndu onu-ulo Merari du unu nemadzu iri l'ise l'umadzu ukporo iri.

³⁵Onye bụ ishi l'ọnulo Merari ono bụ Zuriyelu nwa Abihelu. Ndu ọnu-ulo Merari akpọbeje ọlo-ekwa ebubu phẹ l'uzo isheli ọlo-ekwa Chileke.

³⁶Ozi, e yeru unwu Merari l'eka k'ejeje bụ: eleta mgbo ọlo-ekwa Chileke ono ọnya; mę oshi, e swebushiru lę mgbo ono; mę itso iya; mę ọnya ęka aakpọbeje ọkpa mgbo ono; waa itso ono; mę iphe, bụ ngwa, dukota iya nụ; waa ozi ọzo, gbaru phẹ nụ.

³⁷Ozi ọzo, e yeru phẹ l'eka g'ephe jeje bụ: eleta ọnya l'itso, e gude kpọ-pheta ọmanuphu ono mgburugburu; mę ọkpa iya; mę nggu, a kpọru l'ọlo-ekwa Chileke ono; mę eri, e kegbaaru iya.

³⁸Ndu bụ phẹ a-kpọbeje ọlo-ekwa ebubu nkephẹ l'uzo ọnyanwu-awawa ọlo-ekwa Chileke; mbụ l'atatiphu ọlo-ekwa-ndzukọ ono; bę bụ Mosisu; yele Erọnu; mę unwu Erọnu. Oo phẹ e-jekọtaje iphe, bụ ozi, eeje ejeje l'ulo Chipfu. Onye ọzo mmanu, jekuberu mgboru ọlo Chipfu bę ee-gbu egbugbu.

³⁹Iphe, bụ ndu a guru ọgu l'ipfu Lívayi; mbụ ndu Mosisu yele Erọnu guru ọgu l'ọnulo l'ọnulo, bụ gę Chipfu sụru g'ephe mee ya; mbụ unwoke, nọwaru ọnwa lanu kwaseru bę dụ ukporo unu nemadzu mgbo labọ l'unu iri l'ise.

⁴⁰Chipfu bya asụ Mosisu: “Gukota unwoke, bụ ọkpara l'alị Ízurelu l'ophu ọgu; mbụ unwoke, nọwaru a -gbę l'ọnwa lanu kwaseru; woru ępha phẹ deshia.

⁴¹L'i woru ndu Lívayi doberu mube Chipfu iche; g'ephe nọdu l'ugwo ndu bụ ọkpara l'ulo l'ulo lę Ízurelu. L'i woru anu, bụ iphe-edobe ndu Lívayi ono doberu mu; g'ephe nọdu l'ugwo anu, vuru ọzo waa ękpa-nwa l'iphe-edobe ndu Ízurelu l'ophu.”

⁴²Oo ya bụ; Mosisu gụa iphe, bụ ọkpara l'alị Ízurelu l'ophu ọgu; ęgube ono, Chipfu sụru g'o mee ya.

⁴³Mkpakọ ndu bụ ọkpara l'iphe, bụ unwoke l'alị Ízurelu l'ophu; mbụ unwoke, nọwaru a -gbę l'ọnwa lanu kwaseru bę dụ ukporo unu nemadzu mgbo labọ; l'unu iri l'ise; l'umadzu ukporo iri l'eto; l'umadzu iri l'eto. A guru phẹ ọgu; deshia ępha phẹ l'ekwo.

⁴⁴Tọbudu iya bụ; Chipfu bya asụ Mosisu:

⁴⁵“Woru ndu Lívayi doberu mu iche; g'ephe nọdu l'ugwo ndu bụ ọkpara l'ulo l'ulo lę Ízurelu. L'i woru anu, bụ iphe-edobe ndu Lívayi ono doberu mu; g'ephe nọdu l'ugwo anu, vuru ọzo waa ękpa-nwa l'iphe-edobe ndu Ízurelu l'ophu. O kwa mbędua bę bụ Chipfu.

⁴⁶A -bya abya l'ukporo umadzu iri l'eto l'umadzu l'iri l'eto ono, bụ iphe, ọkpara ndu Ízurelu gude ka oshilokpa Lívayi shii ono; iphe, aa-pfu gude gbata phẹ bę bụ

⁴⁷mkpọla-ọchaa, ęrwa iya dụ shẹkelu ise, bụ iphe, eegudeje atụ ęrwa iphe l'eze-ulo Chileke bę e gude tya ya. Ęrwa shẹkelu lanu bụ ukporo gera. Ugwono bę aa-pfu l'ishi onye l'onye.

⁴⁸L'i woru okpoga ono, ee-gude gbata umadzu ole ono, ęphe gude ka ndu Lívayi shi ono nụ Erọnu yele unwu iya.”

⁴⁹Oo ya bu; Mosisu nakoo okpoga ono, ee-gude gbata ndu ono; l'eka ndu ono, a guru ogo; ephe ka ndu Lívayi shii ono.

⁵⁰Iphe, Mosisu natakotaru l'eka ndu bu okpara l'alí Ízurelu be bu mkpola-ochaa, erwa iya du unu shekelu eto; l'ukporo shekelu esato le shekelu ise, bu iphe, eegudeje atu erwa iphe l'eze-ulo Chileke be e gude tua ya.

⁵¹Mosisu wota okpoga-agbafuta ono nu Eronu yele unwu iya; egube ono, Chipfu turu iya ya l'ekemu.

Ógú 4

Awa Kohatu

¹Chipfu bya epfuru yeru Mosisu yele Eronu; su phe:

²“Unu gua unwu Kohatu, bu ndu shi l'eri Lívayi ogo. Unu gua phe l'onulo l'onulo; me l'anya-unuphu l'anya-unuphu.

³Ndu unu a-gu be bu iphe, bu unwoke, nowaru ukporo apha l'apha iri je akpaa l'ukporo apha labo l'apha iri; mbu ndu suwaru eje ozi l'ulo-ekwa-ndzuko.

⁴“Ozi, unwu Kohatu a-nodu eje l'ulo-ekwa-ndzuko ono bu: eleta iphe, kakota adu nsọ enya.

⁵Ndu Ízurelu -nodu abya aphota ulo-ekwa phe tugba; ge Eronu yele unwu iya bahu l'ime ulo-ekwa-ndzuko je atofuta ekwa, eegudeje gbobuta eka-kakota-adu-nsọ; gude iya phu-chia okpoko-ekemu.

⁶Oo ya bu; ephe ewota akpo umoro-enyimu phu-kputa iya; gude ekwa, dukota urwukpu-urwukpu phua ya l'eli; bya eworu mgboro, eegudeje eka apa iya ye iya.

⁷“L'eli teburu pho, eedobeje buredi ono, aduje l'iphu Chipfu ono be ee-kwebeje ekwa, du urwukpu-urwukpu; l'e wota gbamugbamu tu-kobe iya l'eli; me ite; me nkweka; waa okoro, ngweja-mee aduje. Aatu-kobekwa iya pho buredi ono, aduje l'ataphu Chileke mkpurumkpuru ono.

⁸Ephe abya eworu ekwa uswe-uswe tusaa l'eli iphemiphe ono; kwechita iya akpo umoro-enyimu; wota mgboro, eegudeje eka apa iya ye iya.

⁹“Ephe abya egude ekwa, du urwukpu-urwukpu kwechia iphe, aatukobeje oroku, e gude anwu oku; gude iya kwechia oroku l'onwiya; me iphe, apaje oghu iya; me iphe, aaguje oku; me iphemiphe, eeyeje manu, e gude anwu oku.

¹⁰Oo ya bu; ephe egude akpo umoro enyimu phu-kputa iphemiphe ono; me ivu, dukota iya nu; woru dobe l'eli iphe, aa-dobeje iya gude apa iya.

¹¹“Ephe a-phushi ekwa, du urwukpu-urwukpu l'eli oru-ngweja ono, e meru le mkpola-ododo ono; gude akpo umoro enyimu kwechia ya; woru mgboro, eegudeje apa iya ye iya.

12“Ēphe ewotak̄ota iphe, b̄u ivu, eegudeje eje ozi l'ulo Chipfu; gude ẹkwa, d̄u urwukpu-urwukpu kek̄obe iya; bya egude akp̄o umoro ẹnyimu kwechita iya; woru iya tukobe l'eli iphe, eegudeje apa iya.

13“Ēphe e-kpofu nt̄u, n̄o l'oru-ngweja ono; woru ẹkwa oruswe oruswe t̄usaa l'eli iya.

14Noo ya; ēphe ewota iphe, b̄u ivu, eegudeje eje ozi l'oru-ngweja ono; tukobe l'eli ẹkwa oruswe oruswe ono. Mb̄u l'ēphe a-tukobe iya iphe, aaguje ọku; m̄e oji; m̄e iphe, eegudeje ekpo nt̄u; m̄e gbam̄ugbam̄u. Iphemiphe ono b̄e ee-kwechita akp̄o umoro ẹnyimu; woru mgb̄oro, eegudeje apa iya ye iya.

15“Ēronu yēle un̄wu iya -kwechishigbuchāep̄ho ulo Chipfu; m̄e ivu, d̄u iya n̄u; ndu Ízurēlu -byāep̄ho aph̄ota ulo-ẹkwa p̄he t̄ugbua; g'ọ b̄uru un̄wu Kohatu e-vuta iphe ono. Ọle ọo g'ēphe te edenyikwa ẹka l'iphe, d̄u ns̄o; ọdumeka b̄e ēphe a-nw̄uhukwa. Ọo un̄wu Kohatu b̄e e-vutaj̄e iphe ono, d̄u l'ulo-ẹkwa-ndzuk̄o ono.

16“Eleyaza nwa Ēronu, b̄u onye uke Chileke b̄e k̄e man̄u, eegudeje an̄w̄u ọku d̄u l'ẹka; m̄e un̄w̄u-is̄ensu, an̄ōduje eshi mkp̄o; m̄e ngweja-nri, eegweje mb̄okumboku; m̄e man̄u, aawuj̄e l'ishi. Ọo yēbedua b̄e a-n̄ōdu eleta ulo-ẹkwa Chileke l'ophu ẹnya; m̄e iphemiphe, d̄u iya n̄u; mb̄u ulo Chipfu; m̄e ivu, dukota iya n̄u.”

17Chipfu s̄u M̄osisu yēle Ēronu:

18“Unu te ekwekwa g'onulo Kohatu ch̄ihu l'ipfu ndu Lívayi.

19Waa iphe, unu e-meru p̄he; k'ophu ēphe a-n̄ōdu ndzu; ēphe taa nw̄uhudu m'ēphe jekube iphe, kak̄ota-ad̄u-ns̄o ntse baa: G'ọ b̄uru Ēronu yēle un̄wu iya a-bahuj̄e l'ime ulo Chipfu je akaru onyen̄onu ozi ọphu oo-je; m̄e ivu, oo-vuta.

20Ọle g'oshilokpa Kohatu ta abahukwa je ele ẹnya l'iphe, d̄u ns̄o ono; m'obeta ọ b̄uru g'ọ chaa ya ẹnya achacha mgbo lan̄u; ọdumeka b̄e ēphe a-nw̄ushihukwa.”

Un̄wu Gesh̄onu

21Chipfu bya as̄u M̄osisu:

22“Ḡukwaapho un̄wu Gesh̄onu ọgu. Ḡua p̄he l'onulo l'onulo; m̄e l'ẹnya-unuphu l'ẹnya-unuphu.

23Ndu ̄i-ḡu b̄u iphe, b̄u unwoke, n̄owaru ukporo apha l'apha iri jeye l'ukporo apha lab̄o l'apha iri; mb̄u ndu s̄uwaru eje ozi l'ulo-ẹkwa-ndzuk̄o.

24“Iphe, a-b̄uru ozi ndu ọnu-ulo Gesh̄onu l'ozi, eeje ejeje l'ulo-ẹkwa-ndzuk̄o; m̄e iphe, eevu evuvu b̄e b̄u:

25Ēphe e-vutaj̄e ẹkwa, e gude mee ulo-ẹkwa Chileke; mb̄u vuta ulo-ẹkwa-ndzuk̄o ono, m̄e ẹkwa, e gude kpua ya; m̄e akp̄o umoro-ẹnyimu, e gude kwechia ya; m̄e ẹkwa, eegudeje gbobuta ọnu-ulo-ẹkwa-ndzuk̄o;

26m̄e ẹkwa, eekobutaj̄e mgburugburu l'oma-unuphu ono, n̄o-pheru ulo-ẹkwa Chileke ono; m̄e ọru-ngweja ono; waa ẹkwa, eekobutaj̄e l'onuzo; m̄e eri, e gude gebe iya; m̄e

iphe, bukota ngwa, eegudeje eje ozi, du iya nu. Oo ndu Geshonu ono be e-gude iphe ono g'ọ ha mee iphe, ọ gbaru g'e gude iya mee.

²⁷Iphe, bukpo ozi, unwu Geshonu ejekpo ejeje; obeta ọ buru evu ivu; ozoo eje ozi ozo; be bu Eronu yele unwu iya be e-goshije g'ephe e-je iya. Oo unubedua be e-goshije phe ivu, gbaru phe l'evuvu.

²⁸Noo ozi, ndu onu-ulo Geshonu a-noduje eje l'ulo-ekwa-ndzuko bu ono. Iphe, bu ozi phe be bu Itama nwa Eronu, bu onye uke Chileke be a-nodu egoshije phe g'ephe e-je iya.”

Unwu Merari

²⁹“A -bya abya l'unwu Merari; gua phe ọgu l'onulo l'onulo; me l'anya-unuphu l'anya-unuphu.

³⁰Ndu ii-gu bu iphe, bu unwoke, nowaru ukporo apha l'apha iri jeye l'ukporo apha labo l'apha iri; mbu ndu suwaru eje ozi l'ulo-ekwa-ndzuko.

³¹Waa iphe, gbaru unwu Merari l'ememe teke ephe eje ozi l'ulo-ekwa-ndzuko baa: Ephe e-vutaje mgbo ulo-ekwa Chileke; me oshi, e swebushiru le mgbo ono; me itso iya; me okpa mgbo.

³²Ephe e-vutajekwapho itso, no-pheru oma-unuphu mgburugburu; me okpa itso ono; me nggu, a kporu l'ulo-ekwa ono; me udo iya; mewaro ivu, etsoje iya nu g'ọ ha; waa iphemiphe, e gude eje egube ozi ono. Unu ketaru onyenonu iphe, gbaru iya l'evuvu.

³³“Noo ozi, ndu onu-ulo Merari a-noduje eje l'ulo-ekwa-ndzuko bu ono. O buru Itama nwa Eronu, bu onye uke Chileke be a-noduje egoshi phe g'ephe e-je ozi ono.”

Iphe, ndu Lívayi kpakoru du

³⁴No iya; Mosisu yele Eronu; me ndu-ishi ndu Izurelu bya atuko ndu Kohatu gukota ọgu; gua phe l'onulo l'onulo; me l'anya-unuphu l'anya-unuphu.

³⁵Ndu bu unwoke, nowaru shita l'ukporo apha l'apha iri jeye l'ukporo apha labo l'apha iri; mbu ndu suwaru eje ozi l'ulo-ekwa-ndzuko;

³⁶mbu ndu a guru l'onulo Kohatu be du unu nemadzu ishii; l'umadzu ukporo iri l'esaa l'umadzu iri.

³⁷Noo mkpako unwoke, a guru ọgu l'ipfu Kohatu bu ono; mbu ndu jeru ozi l'ulo-ekwa-ndzuko. Mosisu yele Eronu guru ọgu ono egube Chipfu turu Mosisu ekemu g'ọ gua ya.

³⁸Unwu Geshonu be a gukwarupho ọgu l'onulo l'onulo; me l'anya-unuphu l'anya-unuphu.

³⁹Iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu suwaru eje ozi l'ulo-ekwa-ndzuko

⁴⁰be a guru ọgu l'onulo l'onulo; me l'anya-unuphu l'anya-unuphu phe. Iphe, a gutaru be du unu nemadzu ishii l'ukporo iri le nanu l'umadzu iri.

- ⁴¹Noo mkpakọ unwoke, a guru ọgu l'ọnulo Geshonu; mbụ ndu sụru eje ozi l'ulo-ekwan-dzuko teke Mosisu yele Eronu guru phe ọgu ge Chipfu turu phe iya l'ekemu.
- ⁴²Unwu Merari be a gukwarupho ọgu l'ọnulo l'ọnulo; me l'anya-unuphu l'anya-unuphu.
- ⁴³Iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu sūwaru eje ozi l'ulo-ekwan-dzuko
- ⁴⁴be a guru ọgu l'ọnulo l'ọnulo; guta unu umadzu esato damu.
- ⁴⁵Noo mkpakọ unwoke, a gutaru l'ọnulo Merari bu ono. O buerupho ge Chipfu pfuru iya Mosisu bu ge Mosisu yele Eronu guru phe ọgu ono.
- ⁴⁶Oo ya bu; Mosisu yele Eronu; me ndu-ishi ndu Izurelu gukota ndu Liviayi l'ophu ọgu; l'ọnulo l'ọnulo; me l'anya-unuphu l'anya-unuphu.
- ⁴⁷Ndu ephe guru be bu iphe, bu unwoke, nowaru shita l'ukporo apha l'apha iri jeye l'ukporo apha labo l'apha iri, bu ndu sūwaru eje ozi l'ulo-ekwan-dzuko; me evu ivu.
- ⁴⁸Iphe, ephe tukoru du buru ukporo unu nemadzu; l'unu umadzu lanu; l'umadzu ukporo tete.
- ⁴⁹E goshichaa ndu nonu l'ehu l'ehu ozi, ephe a-nduje eje; me ivu, ephe a-nduje evu. O buerupho ge Chipfu sūru Mosisu g'o mee ya bu g'o meru iya.

Ọgú 5

Edobe eka ndu Izurelu kpoberu ulo-ekwa phe nsọ

- ¹Chipfu bya asu Mosisu:
- ²“Pfuaru ndu Izurelu g'ephe chishia iphe, bu ndu ekpenta eme l'eka ono, ephe kpoberu ulo-ekwa ebubu phe ono; ephe achishia ndu iphe alwashị alwashị l'ehu. Ephe achishikwaapho ndu denyiru eka l'odzu; shi nno merwua onwophe.
- ³Unu chifukota phe; unwoke; me unwanyi. Unu chishia phe l'eka ono, unu kpoberu ulo-ekwa unu g'ephe be merwu iya; mbu l'eka ono, mu bu l'echilabo unu ono.”
- ⁴Ndu Izurelu mee ya egube ono; bya achishikota ndu ono l'eka ono, ephe kpoberu ulo-ekwa phe ono. O buru ge Chipfu pfuru iya Mosisu bu g'ephe meru iya.

K'apfu ugwo iphe, e mebyiru

- ⁵Chipfu su Mosisu:
- ⁶“Pfuaru ndu Izurelu le-a: Teke nemadzu; mbu nwoke; ozoo nwanyi mesweru nwibe iya egube ono, ndiphe emeje; mbu shi nno meswee Chipfu; be ikpe nmaakwaru onye obu.
- ⁷Onye obu be e-pfu iphe-eji ono, o meru ono. L'o pfu-dzuko ugwo ejo-iphe obu, o meru obu g'o ha; wota uzo lanu l'uzo ise l'iphe iya yekobe iya nu onye ono, o mesweru ono.

⁸Ọ -bùru l'onye ono, e mesweru ono te nwedù abùbu, bù onye aa-pfù ùgwò iphe ono; ọọ ya bù; ùgwò ono abùru kẹ Chipfu. Onye aa-nù iya bẹ bù onye uke Chileke. Aakpuru ebili, e gude apfù ùgwò iphe-ẹjì yekọbe iya.

⁹Iphe, bù iphe, ndu Ízurelu doberu nsọ g'ẹphe nù Chipfu, bù iphe, ẹphe wotaru bya anù onye uke Chileke bụkota k'onye uke ono.

¹⁰Iphe, onye doberu nsọ gẹ ya nù Chileke bẹ bù onye uke Chileke bẹ nwe iya nù. Iphe, bụkpoo iphe, a nùru onye uke Chileke bụru onye uke Chileke ono nwe iya.”

Kẹ nwanyị, jì iya ele ẹnya l'oori ogori

¹¹Tọbudu iya bù; Chipfu bya asù Mósìsù:

¹²“Pfiaru ndu Ízurelu; sù phẹ: Ọ -bùru lẹ nwoke bẹ nyee ya akpa njọ ụrì; shì nno emeswe jì iya;

¹³mbù; ọ -bùru lẹ yẹle nwoke ọzo kwarù; o shì nno merwua onwiya; ọphu jì iya ta amadù; tẹme ọphu egechiduru iya teke oome iya; ọphu ọ dudu onye gbaru ekebe l'ọọ iphe, o meru bù ono;

¹⁴mbù; ọ -bùru lẹ nwoke ono bẹ nnyaaaru; o koaharù nyee ya ono okophoo; leahaa ya ẹnya l'o merwuwaru onwiya; lẹ teke nwanyị ono merwuru onwiya; ọzoo l'a nnyaaaru; o koaharù nyee ya ono okophoo; leahaa ya ẹnya l'o merwuru onwiya l'ẹbe abù l'o merwuru onwiya;

¹⁵gẹ nwoke ono duta nyee ya ono jepfu onye uke Chileke. L'o gude ụzo lanù l'ime nkweka ukpokutu balì, e keru ụzo iri, ee-gude gwee ẹja ẹhu nyee ya ono. G'o to yekwa manù l'ukpokutu balì ono; ọphu o yekwa iya ụnwù-isensu; noo kẹle ọọ ngweja-nri, e gwerù lẹ k'okophoo; mbù ngweja, e gude anyata ẹjo-iphe.

¹⁶“G'onye uke Chileke duritaru nwanyị ono ntse g'ọ pfuru l'ataphu Chipfu.

¹⁷Ọọ ya bù; onye uke Chileke ono ekuta mini, e doberu nsọ l'ite, a kpuru l'urwa; kpota udzu ẹja, shì l'oma-ulo ulo-ekwa Chileke wuru ye l'ime mini ono.

¹⁸Onye uke Chileke -pfubechaepho nwanyị ono l'ataphu Chipfu; l'ootofu iya iphe, o keberu l'ishi; pata ngweja-nri ono, e gude anyata ẹjo-iphe ono nù iya g'ọ parù l'ẹka; mbù ngweja-nri ono, e gwerù lẹ k'okophoo ono. Onye uke Chileke ono l'onwiya aparù mini, atso ilu ono, emeje gẹ nemadzù bụru onye a turu onu ono.

¹⁹Ọ bụru teke ono bẹ onye uke Chileke a-nù nwanyị ono nte g'o ria sù: ‘Ọ -bùru l'ọ tọ dudu nwoke ọzo, gù l'iya kwajeru; ọphu ì tì kpaduru njọ ụrì; shiwaa nno merwua onwongu l'ẹhu-nwoke ọzo, gbahakwa jì ngu-a; gẹ mini, atso ilu-a, emeje gẹ nemadzù bụru onye a turu onu-a ta adukwa iphe, oo-me ngu.

²⁰Ọloburu l'ì nọ l'ẹka jì ngu-a; bya akpaa njọ ụrì; gù lẹ nwoke ọzo kwaa gbahakwa jì ngu-a; ì shì nno merwua onwongu;

²¹gẹ Chipfu mekwaa g'ẹkpa-nwa chihu ngu; mbụ g'ị tị tų nwa l'ụtapfu; g'ị bụru onye aa-nọduje ephu l'iphu; bya anma l'ejo ẹtu l'ibe unu.' Noo nte, onye uke Chileke ono a-sụ nwanyị ono g'o ria; tų onwiya ọnu bụ ono.

²²'Mbụ; gẹ mini, atso ilu-a, emeje gẹ nemadzu bụru onye a tųru ọnu-a kpobakwa ngu l'ẹpho; k'ọphu ẹkpa-nwa e-chihu ngu; g'ị tị tų nwa l'ụtapfu.' "Ọo ya bụ; nwanyị ono asụ: 'G'ọ dų nų g'ị pfuru. G'ọ dų nų g'ị pfuru.'

²³"Onye uke Chileke ono abya atuko ẹjo ẹnwa ono, ọ guru ono deshikota l'ẹkwo; l'ọ bya asaru iphe ono, o deru ono ye lẹ mini, atso ilu ono.

²⁴L'ọ bya eworu mini, atso ilu ono, emeje nemadzu g'ọ bụru onye a tųru ọnu ono nų nwanyị ono g'ọ ngua. Ọ -ngue ya pho; mini ono anodu iya l'ẹpho; mee g'ejo iphe-ẹhuka, tsohuru ilu dapfuta iya.

²⁵Lẹ teke ono bẹ onye uke Chileke ono a-nata nwanyị ono ngweja-nri ono, e gweru lẹ k'okophoo ono, nwanyị ono pa l'ẹka ono; l'ọobyaa amaa ya amama l'ataphu Chipfu; woru iya je edobe l'ọru-ngweja.

²⁶Onye uke Chileke ono abya ahajia ngweja-nri ono mkpoji-ẹka; woru kpoo oku l'ọru-ngweja ono. Ngweja ono a-buru ngweja, e gude anyata ẹjo-iphe ono. O -mechaepho nno; l'ọ bya anų nwanyị ono mini ono g'ọ ngua.

²⁷Ọ -buru l'ọ merwurwu onwiya; mbụ l'ọ mesweru ji iya; bẹ bụ teke a nueru iya pho mini ono; ọ ngua; ọ bahu iya l'ẹpho bẹ oo-me g'ejo iphe-ẹhuka, atso ilu dapfuta iya. Oo-me g'ẹkpa-nwa chihu iya; g'ọ to tų nwa l'ụtapfu; temanu ọ bụru onye vu ọnu l'ibe phe.

²⁸Teke ọ bụ lẹ nwanyị ono bẹ te emerwuduru onwiya; mbụ-a; ọ -buru lẹ nwanyị ono dų ree; bẹ ọ to dudu iphe, bya l'e-me iya nų; ọo-nodu anwushi unwegirima.

²⁹"Noo ekemu, a tųru swiberu nwanyị, ji iya ekoru okophoo; mbụ nwanyị, no l'ẹka ji iya; ọ nodu akpaje njo uri; emerwushi onwiya;

³⁰ozoo l'a nonyaaru nwoke koaharu nyee ya okophoo; leahaa ya njo ẹnya. G'onye uke Chileke pfube nwanyị obu l'iphu Chipfu mekota iya iphemiphe ono, a tųru l'ekemu ono.

³¹Nwoke ono l'onwiya bẹ ta adukwa ẹjo-iphe, a-tukoru iya l'ishi. Ọo nwanyị ono e-vuru ẹjo-iphe, o metaru kpua onwiya."

Ọgú 6

Onye woru onwiya doberu Chipfu iche

¹Chipfu sụ Mosisu:

²"Pfururu yeru ndu Ízurelu sụ phe-a: O -nweru nwoke; ozoo nwanyị, kweru ukwe, gbaru iche sụ lẹ ya a-duru Chipfu iche; mbụ lẹ ya e-dobe onwiya gẹ ya bụru onye gbaru iche l'ẹnya Chipfu;

³g'onye obu ta ngujekwa mee; ozoo iphe, aangụ angungu, atsu atsutsu. Ophu o ngujekwa mee-veniga; ozoo ophu e meru l'iphe, aangụ angungu ozo, atsu atsutsu. G'o to ngujekwa mini akpuru vayinu; ophu o rijekwa akpuru vayinu oyii; ozoo ophu e gheru egheghe.

⁴G'o to rijekwa iphe, shi l'oshi vayinu; m'o bu akpuru vayinu obu l'onwiya; ozoo egbo vayinu jeye teke oo-bu-beru onye duru Chipfu iche.

⁵“Akwo ta abyadu e-rwu iya l'ishi jeye g'oo-bu-beru onye doberu onwiya iche ono. Oo-duepho iche g'o du iya jasu; teke ono, o doberu onwiya Chipfu iche ono edzua. Egbushi, no iya l'ishi be oo-ha g'o rwuchia erwuchi.

⁶L'ogè teke ono, o duru Chipfu iche ono be o to byadu e-je le mgboru aka odzu no.

⁷Mbu; obeta o buru l'oo nna iya nwuhuru; ozoo l'oo ne iya nwuhuru; ozoo l'oo nwune iya ke nwoke; ozoo nwune iya ke nwanyi be o to budu iya e-me g'o turwua onwiya; kele abubu, o bu onye duru Chileke iche; tukoru iya l'ishi.

⁸Le teke ono oo-nokotakpo buru onye doberu onwiya iche ono be o bu onye duru Chipfu nsò.

⁹“Teke o nweru onye ghabuhuru nwuhu le mgboru aka o no; o shi nno turwua onwiya l'abubu ono, o bu onye duru Chileke iche ono, bu ophu tukoru iya l'ishi ono; g'o no abali esaa; o -rwuepho le mboku k'esaa; l'o kpushia ishi; shi nno roo onwiya ehuru ozo.

¹⁰O -be le mboku k'esato; l'o wota ndo labo; ozoo unwu kparaka labo wojeru onye uke Chileke l'onu ulo-ekwa-ndzuko.

¹¹Oo ya bu; onye uke Chileke ono abya ewota nanu gwee ngweja-iphe-eji; l'o wota nanu ophu gwee ngweja-akpo-oku gude pfua ugwo iphe-eji ono, o meru ono; mbu l'o noru le mgboru aka nemadzu nwuhuru. O buru mboku onokwapho be oo-me g'ishi iya du-phu nsò azu.

¹²L'o byakwa aburu onye duru Chipfu iche g'o shi buru iya. O -no-dzua ya; l'o kputa ebili, gbaru apha je anu g'e gude gweeru iya ngweja-apfu-ugwo. Ophu, o nohawaru pho be a taa gukwa eye iya; kele o no iya turwua onwiya.

¹³“Owaa bu ekemu, duru onye woru onwiya doberu Chipfu iche; noo ya no-dzua. Ee-duru onye obu bya l'onu ulo-ekwa-ndzuko.

¹⁴O buru l'eka ono be oo-nodu woru iphe, onu Chipfu nu iya. Oo-nu iya ebili, gbaru apha, te nwedu aka iphe mebyiru iya g'e gude gwee ngweja-akpo-oku; l'o bya anu nwada aturu, gbawaru apha, te nwedu aka iphe mebyiru iya g'e gude gwee ngweja-iphe-eji; l'o nu ebili, te nwedu aka iphe mebyiru iya g'e gude gwee ngweja-ehuru-guu.

¹⁵Iphe ozo, oo-yekobe iya bu nkata buredi, e te yeduru iphe ekoje buredi; waa akara, e meru l'ukpokutu witi, gwoo le manu; me echa-mbekee, a wuru manu l'eli; waa ngweja-nri; yele ngweja-mee, ayijeru iya nu.

¹⁶“Iphe ono g'o ha be onye uke Chileke e-gweru nu Chipfu. L'o gwee ngweja-iphe-eji ono; waa ngweja-akpo-oku ono.

17 Onye uke Chileke ono bę e-woru nkata buredi ono, ekoduru ekoko ono nų Chipfu; bya egbua ebili pho gude gwee ngweja-ęhu-guu nų Chipfu; bya eyekobekwa iya pho ngweja-nri; yęe ngweja-męe, etsoje iya nų tųko gwee.

18 O buru l'onu ųlo-ękwa-ndzuko bę onye ono, woru onwiya doberu Chipfu iche ono a-nodu kpushia ishi ono, o shi doberu Chileke iche ono. L'o kpotu egbushi iya ono ye l'oku, no le mkpula ęka iphe, e gude gwee ngweja-ęhu-guu no.

19 “Onye ono, duru Chipfu iche ono -kpushichaepho ishi ono, o doberu iche ono; g'onye uke Chileke wota ęka ebili ono ophu e shiru eshishi deę ya l'ęka; l'o bya ewotafua akara lanu, te koduru ekoko le nkata ono; waa ęcha-mbekee lanu, te koduru ekoko nų iya.

20 Oo ya bu; onye uke Chileke ono abya amaa ya amama l'iphu Chipfu g'o buru ngweja amama. Iphe ono bę du nsu; o buru onye uke Chileke bę nwe iya nų; yele ndu ebili ono, a maru amama; me utapfu iya ono, a nuru Chipfu ono. E -mechaa nno; onye ono, duru Chipfu iche ono angwaro meę.

21 “Ono bu ekemu duru onye woru onwiya doberu Chipfu iche; mbu onye kwetaru ukwe le ya e-woru onwiya doberu Chipfu iche; wakwapho iphe, oo-nuje Chipfu me o no-dzue ya pho; a -gufukwa iphe ozo, oo-du ike gbatafua. Ole o medzufutaje iphe, o kweru ukwe iya; le g'ekemu onye duru Chipfu iche gude du.”

Onu-oma ndu-uke Chileke l'ęhu ndu İzurelu

22 Chipfu bya asu Mosisu:

23 “Pfuaru Eronu yele unwu iya su phe g'ęphe gojeru ndu İzurelu onu-oma. Waa g'ęphe epfuje iya baa:

24 “Ge Chipfu goru onu-oma nu unu; chee unu.

25 Ge Chipfu mee g'atathu iya gbuaru unu nwijnwii; l'o meeru unu eze-iphe-oma.

26 Ge Chipfu ghaaru unu iphu; mee g'ęhu du unu guu.’

27 “Oo ya bu; ęphe -gude ępha mu goru onu-oma nu ndu İzurelu; mu agoru onu-oma nu phe.”

Ōgú 7

Ngweja, e gude edobe ųlo-ękwa Chipfu iche

1 Todbudu iya bu; Mosisu bvubechaepho ųlo-ękwa Chipfu ono; o wua ya manu; bya edobe iya iche; bya edobekwapho iphe, bu ivu no iya nu g'o ha iche. Nokwapho g'o wuru manu l'oru-ngweja; dobe iya iche; bya edobekwapho iphe, bu ivu oru-ngweja ono g'o ha iche.

2 Oo ya bu; ndu-ishi ndu İzurelu, bu ndu-ishi l'ęnya-unuphu l'ęnya-unuphu; mbu ndu-ishi l'ipfu l'ipfu, bu iya bu ndu ono, bu ishi ndu ophu a guru ogo ono bya eworu iphe nu.

³Iphe, ephe nuru Chipfu be bu ogba-kperekpere ishii, e kpuchiru iphe; me oke-eswi iri l'ebo. Ndu-ishi ono be nuchaaru oke-eswi lanu oke-eswi lanu l'ehu l'ehu. Ephe du ebo ebo nucha ogba-kperekpere lanu. Noo iphe, ephe wotaru bya anu l'iphu ulo-ekwa Chipfu bu ono.

⁴Chipfu su Mosisu:

⁵“Natakota phe iphe ono, ephe nuru; k'ophu ee-gude iya eje ozi l'ulo-ekwa-ndzukọ. Li woru iya nu ndu Liviayi. Onyenonu be ii-nucha ya le g'ozi iya gbaru.”

⁶Oo ya bu; Mosisu bya ewota ogba-kperekpere ono; me oke-eswi ono nu ndu Liviayi.

⁷Unwu Geshonu be o nuru ogba-kperekpere labo; waa oke-eswi eno g'ephe gude jeje ozi, gbaru phe nu.

⁸O nu unwu Merari ogba-kperekpere eno; waa oke-eswi esato g'ephe gude jeje ozi, gbaru phe nu. G'ephe ha be nokota l'eka Itama nwa Eronu, bu onye uke Chileke eje ozi phe.

⁹Obenu l'o to dudu ophu o nuru unwu Kohatu; kele oo ephebedua be evu iphe, du nso ono l'ukuvu duru.

¹⁰Mboku, a wuru manu l'oru-ngweja Chileke g'e gude woru iya ye Chileke l'eka be ndu-ishi ono wotagbaaru iphe bya anu Chileke l'iphu oru-ngweja ono.

¹¹Chipfu bya asu Mosisu: “Ge ndu-ishi ono byaje nanu nanu le mboku le mboku bya anu iphe ngweja phe g'e gwee l'oru-ngweja ono; shi nno woru iya ye Chileke l'eka.”

¹²Onye wotaru iphe nkiya bya anu le mboku ke mbu be bu Nashonu nwa Aminadabu, bu onye-ishi ndu Jiuda.

¹³Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri.

¹⁴Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu;

¹⁵bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

¹⁶waa mkpi lanu, ee-gude gwee ngweja-iphe-eji;

¹⁷me oke-eswi labo; waa ebili ise; me mkpi ise; me unwu ebili ise, gbachaaaru apha, ee-gude gwee ngweja-ehu-guu. Noo iphe, Nashonu nwa Aminadabu wotaru bya anu bu ono.

¹⁸O be le mboku k'ebo; Netanelu nwa Zuwa, bu onye-ishi l'ipfu Isaka wota iphe nkiya bya anu.

19Iphe, ọ nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'ọ ha bu iphe, eegudeje atụ erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manụ; g'e gude gwee ngweja-nri.

20Iphe ozo, ọ nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu;

21bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

22waa mkpi lanu, ee-gude gwee ngweja-iphe-eji;

23me oke-eswi labo; waa ebili ise; waa mkpi ise; me unwu ebili ise, gbachaaru apha, ee-gude gwee ngweja-ehu-guu. Noo iphe, Netanelu nwa Zuwa wotaru bya anu bu ono.

24O be le mboku k'eto; Eliyabu nwa Helonu, bu onye-ishi ndu ke Zebulun wota iphe nkiya bya anu.

25Iphe, ọ nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'ọ ha bu iphe, eegudeje atụ erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manụ; g'e gude gwee ngweja-nri.

26Iphe ozo, ọ nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu;

27O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

28waa mkpi lanu, ee-gude gwee ngweja-iphe-eji;

29waa oke-eswi labo; me ebili ise; waa mkpi ise; me unwu ebili ise, gbachaaru apha, ee-gude gwee ngweja-ehu-guu. Noo iphe, Eliyabu nwa Helonu wotaru bya anu bu ono.

30O be le mboku k'eno; Elizuru nwa Shediyo, bu onye-ishi, unwu Rubenu wota iphe nkiya bya anu.

31Iphe, ọ nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'ọ ha bu iphe, eegudeje atụ erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manụ; g'e gude gwee ngweja-nri.

32Iphe ozo, ọ nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu;

33O bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-oku;

34waa mkpi lanụ, ee-gude gwee ngweja-iphe-eji;

35waa oke-eswi labo; me ebili ise; waa mkpi ise; waa unwu ebili ise, gbachaaaru apha, ee-gude gwee ngweja-ehu-guu. Noo iphe, Elizuru nwa Shediyo wotaru bya anụ bu ono.

36O be le mboku k'ise; Shelumelu nwa Zurishadayi, bu onye-ishi unwu Simiyonu wota iphe nkiya bya anụ.

37Iphe, o nuru bu gbamugbamu mkpola-ochaa lanụ, erwa iya du ukporo shekelu ishii le shekelu iri; bya anukwapho ochi lanụ, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manụ; g'e gude gwee ngweja-nri.

38Iphe ozo, o nuru be bu ago lanụ, e meru le mkpola-ododo, erwa iya du shekelu iri; iphe, jiru iya nu bu unwu-isensu;

39O bya anụ nwa oke-eswi lanụ; waa ebili lanụ; me nwa ebili lanụ, gbaru apha, ee-gude gwee ngweja-akpo-oku;

40waa mkpi lanụ, ee-gude gwee ngweja-iphe-eji;

41waa oke-eswi labo; me ebili ise; waa mkpi ise; waa unwu ebili ise, gbachaaaru apha, ee-gude gwee ngweja-ehu-guu. Noo iphe, Shelumelu nwa Zurishadayi wotaru bya anụ bu ono.

42O be le mboku k'ishii; Eliyasafu nwa Diyuwelu, bu onye-ishi unwu Gadu wota iphe nkiya bya anụ.

43Iphe, o nuru bu gbamugbamu mkpola-ochaa lanụ, erwa iya du ukporo shekelu ishii le shekelu iri; bya anukwapho ochi lanụ, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manụ; g'e gude gwee ngweja-nri.

44Iphe ozo, o nuru be bu ago lanụ, e meru le mkpola-ododo, erwa iya du shekelu iri; iphe, jiru iya nu bu unwu-isensu;

45O bya anụ nwa oke-eswi lanụ; waa ebili lanụ; me nwa ebili lanụ, gbaru apha, ee-gude gwee ngweja-akpo-oku;

46waa mkpi lanụ, ee-gude gwee ngweja-iphe-eji;

47waa oke-eswi labo; me ebili ise; waa mkpi ise; waa unwu ebili ise, gbachaaaru apha, ee-gude gwee ngweja-ehu-guu. Noo iphe, Eliyasafu nwa Diyuwelu wotaru bya anụ bu ono.

48O be ịe mbọku k'ẹsaa; Elishama nwa Amihudu, ịu onye-ishi ndu Ifuremu wota iphe nkiya bya anụ.

49Iphe, ọ nuru ịu gbamugbamu mkpọla-ọchaa lanụ, ẹrwa iya ịu ụkporo shẹkelu ishii ịe shẹkelu iri; bya anụkwapho ochi lanụ, e meru ịe mkpọla-ọchaa, ẹrwa iya ịu ụkporo shẹkelu ẹto ịe shẹkelu iri. G'ọ ha ịu iphe, eegudeje atụ ẹrwa iphe l'eze-ulo Chileke ịe e gude tụa ya. Ophu nonu ịe e yejishikotaru ukpokutu ereshi, a gwọru ịe manụ; g'e gude gwee ngweja-nri.

50Iphe ọzo, ọ nuru ịe ịu ago lanụ, e meru ịe mkpọla-ododo, ẹrwa iya ịu shẹkelu iri; iphe, jiru iya nụ ịu ụnwù-isensu;

51O bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku;

52waa mkpi lanụ, ee-gude gwee ngweja-iphe-ẹji;

53waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ẹhu-guu. Noo iphe, Elishama nwa Amihudu wotaru bya anụ ịu ono.

54O be ịe mbọku k'ẹsato; Gamalelu nwa Pedazo, ịu onye-ishi ndu ipfu Manase wota iphe nkiya bya anụ.

55Iphe, ọ nuru ịu gbamugbamu mkpọla-ọchaa lanụ, ẹrwa iya ịu ụkporo shẹkelu ishii ịe shẹkelu iri; bya anụkwapho ochi lanụ, e meru ịe mkpọla-ọchaa, ẹrwa iya ịu ụkporo shẹkelu ẹto ịe shẹkelu iri. G'ọ ha ịu iphe, eegudeje atụ ẹrwa iphe l'eze-ulo Chileke ịe e gude tụa ya. Ophu nonu ịe e yejishikotaru ukpokutu ereshi, a gwọru ịe manụ; g'e gude gwee ngweja-nri.

56Iphe ọzo, ọ nuru ịe ịu ago lanụ, e meru ịe mkpọla-ododo, ẹrwa iya ịu shẹkelu iri; iphe, jiru iya nụ ịu ụnwù-isensu;

57O bya anụ nwa oke-eswi lanụ; waa ebili lanụ; waa nwa ebili lanụ, gbaru apha, ee-gude gwee ngweja-akpo-ọku;

58waa mkpi lanụ, ee-gude gwee ngweja-iphe-ẹji;

59waa oke-eswi labo; me ebili ise, waa mkpi ise; waa unwu ebili ise, gbachaaru apha, ee-gude gwee ngweja-ẹhu-guu. Noo iphe, Gamalelu nwa Pedazo wotaru bya anụ ịu ono.

60O be ịe mbọku ke tete; Abidanu nwa Gidiyoni, ịu onye-ishi ndu Benjaminu wota iphe nkiya bya anụ.

61Iphe, ọ nuru ịu gbamugbamu mkpọla-ọchaa lanụ, ẹrwa iya ịu ụkporo shẹkelu ishii ịe shẹkelu iri; bya anụkwapho ochi lanụ, e meru ịe mkpọla-ọchaa, ẹrwa iya ịu ụkporo shẹkelu ẹto ịe shẹkelu iri. G'ọ ha ịu iphe, eegudeje atụ ẹrwa iphe l'eze-ulo Chileke ịe e gude tụa ya. Ophu nonu ịe e yejishikotaru ukpokutu ereshi, a gwọru ịe manụ; g'e gude gwee ngweja-nri.

62Iphe ọzo, ọ nuru bẹ bụ ago lanu, e meru ọ mkpọla-ododo, ọrwa iya du shekelu iri; iphe, jiru iya nu bu unwu-isensu;

63Ọ bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

64waa mkpi lanu, ee-gude gwee ngweja-iphe-eji;

65waa oke-eswi labo; me ebili ise; waa mkpi ise; waa unwu ebili ise, gbacharu apha, ee-gude gwee ngweja-ehu-guu. Noo iphe, Abidanu nwa Gidiyoni wotaru bya anu bu ono.

66O be ọ mboke k'iri; Ahiyeza nwa Amishadayi, bu onye-ishi ndu ipfu Danu wota iphe nkiya bya anu.

67Iphe, ọ nuru bu gbamugbamu mkpọla-ochaa lanu, ọrwa iya du ukporo shekelu ishii ọ shekelu iri; bya anukwapho ochi lanu, e meru ọ mkpọla-ochaa, ọrwa iya du ukporo shekelu eto ọ shekelu iri. G'ọ ha bu iphe, eegudeje atụ ọrwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu ọ manu; g'e gude gwee ngweja-nri.

68Iphe ọzo, ọ nuru bẹ bụ ago lanu, e meru ọ mkpọla-ododo, ọrwa iya du shekelu iri; iphe, jiru iya nu bu unwu-isensu;

69Ọ bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

70waa mkpi lanu, ee-gude gwee ngweja-iphe-eji;

71waa oke-eswi labo; me ebili ise; waa mkpi ise; waa unwu ebili ise, gbacharu apha, ee-gude gwee ngweja-ehu-guu. Noo iphe, Ahiyeza nwa Amishadayi wotaru bya anu bu ono.

72O be ọ mboke k'iri ọ nanu; Pagelu nwa Okurunu, bu onye-ishi ndu ipfu Asha wota iphe nkiya bya anu.

73Iphe, ọ nuru bu gbamugbamu mkpọla-ochaa lanu, ọrwa iya du ukporo shekelu ishii ọ shekelu iri; bya anukwapho ochi lanu, e meru ọ mkpọla-ochaa, ọrwa iya du ukporo shekelu eto ọ shekelu iri. G'ọ ha bu iphe, eegudeje atụ ọrwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu ọ manu; g'e gude gwee ngweja-nri.

74Iphe ọzo, ọ nuru bẹ bụ ago lanu, e meru ọ mkpọla-ododo, ọrwa iya du shekelu iri; iphe, jiru iya nu bu unwu-isensu;

75Ọ bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

76waa mkpi lanu, ee-gude gwee ngweja-iphe-eji;

⁷⁷waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Pagelu nwa Okuranu wotaru bya anu bu ono.

⁷⁸O be le mboku k'iri l'ebo; Ahira nwa Enanu, bu onye-ishi unwu Nafutali wota iphe nkiya bya anu.

⁷⁹Iphe, o nuru bu gbamugbamu mkpola-ochaa lanu, erwa iya du ukporo shekelu ishii le shekelu iri; bya anukwapho ochi lanu, e meru le mkpola-ochaa, erwa iya du ukporo shekelu eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya. Ophu nonu be e yejishikotaru ukpokutu ereshi, a gworu le manu; g'e gude gwee ngweja-nri.

⁸⁰Iphe ozo, o nuru be bu ago lanu, e meru le mkpola-ododo, erwa iya du shekelu iri; iphe, jiru iya nu bu unwu-isensu;

⁸¹O bya anu nwa oke-eswi lanu; waa ebili lanu; waa nwa ebili lanu, gbaru apha, ee-gude gwee ngweja-akpo-oku;

⁸²waa mkpi lanu, ee-gude gwee ngweja-iphe-eji;

⁸³waa oke-eswi labo; me ebili ise; waa mkpi ise; waa unwu ebili ise, gbachaaru apha, ee-gude gwee ngweja-ehu-guu. Noo iphe, Ahira nwa Enanu wotaru bya anu bu ono.

⁸⁴Iphe ono be bu iphe, ndu-ishi ndu Izurelu wotaru bya anu g'e gude woru oru-ngweja ono ye Chileke l'eka; mbu teke ono, a wuru iya manu ono. Iphe, ephe nuru be bu: gbamugbamu mkpola-ochaa iri l'ebo; waa ochi mkpola-ochaa iri l'ebo; waa ago mkpola-ododo iri l'ebo.

⁸⁵Gbamugbamu lanu be erwa iya aduje ukporo shekelu mkpola-ochaa ishii le shekelu iri. Erwa ochi lanu nodu aduje ukporo shekelu mkpola-ochaa eto le shekelu iri. G'o ha bu iphe, eegudeje atu erwa iphe l'eze-ulo Chileke be e gude tua ya.

⁸⁶Ago mkpola-ododo ono du iri l'ebo; teme e yejishichaa ya unwu-isensu. Erwa iya nodu abujeru shekelu mkpola-ododo iri iri. G'o ha bu iphe, eegudeje atu erwa iphe l'eze-ulo Chileke be e gude tua ya. Mkpola-ododo, e gude mee ago ono be erwa iya tuko du ukporo shekelu mkpola-ododo ishii.

⁸⁷Iphe mkpakpo anu, ee-gude gwee ngweja-akpo-oku ono dukota be bu; unwu oke-eswi iri l'ebo; waa ebili iri l'ebo; waa unwu ebili iri l'ebo, gbachaaru apha; yele ngweja-nri tso iya nu; waa mkpi iri l'ebo, ee-gude gwee ngweja iphe-eji.

⁸⁸Anu, ee-gude gwee ngweja-ehu-guu be tukoru du oke-eswi ukporo l'eno; waa ebili ukporo eto; me mkpi ukporo eto; waa unwu ebili ukporo eto, gbachaaru apha. Noo iphe, a nuru g'e gude woru oru-ngweja ono ye Chileke l'eka; mbu teke ono, a wuru iya manu ono.

⁸⁹O be teke Mosisu bahuru ge yele Chipfu bogba l'ime ulo-ekwa-ndzuko ono; o numa olu-opfu, a no l'eli opfu okpoko ono; aka aapfuje ugwo iphe-eji ono epfu, bu iya bu

ẹka ono, e doberu ekemu Chipfu ono. Opfu ono bẹ a nọ lẹ mgbaka chierobu labọ phọ epfu eyeru Mosisu.

Ọgú 8

Edobe orọku

¹Chipfu bya asu Mosisu:

²“Pfuaru Eronu su iya l'ọ -bya adobe orọku; g'ọ dobe orọku ẹsaa ono k'ọphu ìphóró iya a-nga atatiphu iphe ono, a tukoberu iya ono.”

³Eronu mee ya ẹgube ono, a suru g'o mee ya ono; mbu dobe orọku ono; k'ọphu ìphóró iya ngakotaru atatiphu iphe ono, a tu-koberu iya ono, bu iya bu ge Chipfu karu Mosisu g'e mee ya.

⁴Waa g'e gude mee iphe ono, aatukobeje orọku ono baa: Ọo mkpọla-ododo, e tsusaru etsusa bẹ e gude mekọta iya shita l'ike iya jeye lẹ nchị iya. Iphe ono, aatukobeje orọku ono bẹ e meerupho ẹgube Chipfu goshiru iya Mosisu.

Edobe ndu Lívayi iche

⁵Chipfu byakwa asu Mosisu:

⁶“Họta ndu Lívayi l'echilabọ ndu Ízurelu; mee phe g'ẹphe dube ree.

⁷Waa g'ii-shi mee phe g'ẹphe dube ree baa: Wota mini nturwu phee phe l'ẹhu; ẹphe akpushikota iphe, bu eji, du phe l'ẹhu; bya asashikota uwe phe shi nno sachaa onwophe ree.

⁸Ẹphe ewota nwa oke-eswi; yele ngweja-nri, ayiru iya nu, bu iya bu ukpokutu ereshi, a gworu lẹ manu. L'i wota nwa oke-eswi ozo, ee-gude gwee ngweja-iphe-eji.

⁹L'i duru ndu Lívayi obu je l'iphu ulo-ekwa-ndzuko; kukobe iphe, bu ndu Ízurelu l'ophu g'ẹphe dzukota l'eka ono.

¹⁰L'i duru ndu Lívayi ono bya l'atatiphu Chipfu. Ndu Ízurelu ebyibe phe ẹka l'ishi.

¹¹Ọ buru Eronu e-woru ndu Lívayi ono ye Chipfu l'eka; ẹphe aburu ngweja-amama, shi l'eka ndu Ízurelu; k'ọphu ẹphe a-nodu ejeru Chipfu ozi.

¹²Ọo ya bu; ndu Lívayi ono abya ebyibegbaa oke-eswi ono ẹka l'ishi. L'i gude nanu gwee ngweja-iphe-eji; gude nanu gwee ngweja-akpo-oku nu Chipfu; shi nno pfua ugwo iphe-eji ndu Lívayi.

¹³“L'i mee; ndu Lívayi ono abya atuko pfuru l'iphu Eronu yele unwu iya. L'i woru phe ye l'eka Chipfu g'ẹphe aburu iya ngweja-amama.

¹⁴Noo g'ii-shi dobe ndu Lívayi iche l'eka ndu Ízurelu ophuna nọ bu ono; mee ndu Lívayi ono g'ẹphe buru nkemu.

¹⁵I -sachaepho ndu Lívayi ono; bya eworu phe dobe g'ẹphe du ge ngweja-amama; ẹphe ejeahaa ozi l'ulo-ekwa-ndzuko.

¹⁶Oo ẹphebedua g'ẹphe hakọta bẹ e shi lẹ ndu Ízurelu họtá ye mu l'ẹka. Mu nata pẹ; mee pẹ; ẹphe buru nkemu; nọchia ẹnya ndu bu ọkpara l'alì Ízurelu; mbu iphe, bukota unwoke mbu, vu ọzo waa ẹkpa-nwa l'alì Ízurelu.

¹⁷Iphe, bu ọkpara l'ophu l'alì Ízurelu; nemadzu-o; mẹ anu bẹ bukota nkemu. Lẹ teke ono, mu gbushikọtaru iphe, bu ọkpara l'alì Ijiputu bẹ mu doberu pẹ iche g'ẹphe buru nkemu.

¹⁸Nta-a bẹ mu wowaru ndu Lívayi mee; ẹphe nọchia ẹnya ndu bu ọkpara l'alì Ízurelu l'ophu.

¹⁹Mbu lẹ mu shiwaa l'echilabo ndu Ízurelu l'ophu họtá ndu Lívayi woru ye Eronu yẹle unwu iya l'ẹka; g'ẹphe jejeru ndu Ízurelu ozi l'ulo-ẹkwa-ndzuko; ẹphe apfuje ugwo iphe-ẹji unwu Ízurelu; k'ophu mgbu-onwu ete egbudu pẹ m'ẹphe jekube ọlo Chipfu ono ntse.”

²⁰Mósisu; waa Eronu; mẹ iphe, bu ndu Ízurelu l'ophu bya emeeru ndu Lívayi ẹgube ono, Chipfu turu iya Mósisu l'ekemu sù g'e mee ndu Lívayi. O buru gẹ ndu Ízurelu meru pẹ iya bu ono.

²¹Ndu Lívayi bẹ safuru onwophe nturuwu; bya asaa uwe pẹ asasa. Oo ya bu; Eronu woru pẹ nu Chipfu g'ẹphe du gẹ ngweja amama; bya apfua ugwo iphe-ẹji pẹ shi nno safu pẹ nturuwu.

²²E mechaa; ndu Lívayi nọdu Eronu yẹle unwu iya l'ẹka wata eje ozi l'ulo-ẹkwa-ndzuko. O buru gẹ Chipfu gude tọaru iya Mósisu l'ekemu bu g'ẹphe meru ndu Lívayi ono.

²³Chipfu bya asu Mósisu:

²⁴“Iphe-a bẹ bu ndu Lívayi bẹ o duru: Unwoke nọwaru a -gbẹ l'ukporo apha l'apha ise kwaseru bẹ a-watajẹ eje ozi l'ulo-ẹkwa-ndzuko.

²⁵Ẹphe -nọwa ukporo apha labo l'apha iri; ẹphe ahaa eje ozi l'ulo-ẹkwa-ndzuko ono; ẹphe te ejebaedu iya.

²⁶Ole o -buru l'o du pẹ g'ẹphe yejeru unwunna pẹ ẹka l'ozi ọlo-ẹkwa-ndzuko ono; g'ẹphe yekpooro ẹka. Obenu l'ẹphebedua l'onwophe bẹ l'e-jebuhu ozi. Noo g'ii-shi nu ndu Lívayi ozi, ẹphe a-nọduje eje bu ono.”

Ọgú 9

Ọbo Ojaghata

¹L'onwa mbu l'apha, kwe ndu Ízurelu apha labo, ẹphe shi l'alì Ijiputu lufuta bẹ Chipfu pfuru yeru Mósisu l'echiegu Sayinayi sù iya:

²“Gẹ ndu Ízurelu bokwaa obo Ojaghata teke a boje iya.

³Onwa-a -duẹpho l'abalì iri l'eno; unu bo obo Ojaghata ono teke a boje iya. Teke unu a-wata iya abobo bẹ bu mẹ ẹnyanwu ribajeepho. Unu bo iphe ono g'ekemu iya gude du waa gẹ nsọ iya gude du.”

- ⁴Oo ya bu; Mosisu bya epfuaru ndu Ízurelu g'ephe bọo ọbo Ojaghata ono.
- ⁵Ephe woru ọbo Ojaghata ono bọo l'echiegu Sayinayi g'onwa mbu ono du l'abalı iri l'eno; g'enyawu abyawaa ariba. Ephe tuko iphemiphe mekota ge Chipfu suru Mosisu g'emeje iya.
- ⁶Ole o nwekwanuru ndu ophu ayidu le ndu boru ọbo Ojaghata ono mboku ono. Ishi iya bu l'ephe turwuru onwophe kele ephe denyiru onye nwuhuru anwuhu aka. Ndu ono byapfuta Mosisu yele Eronu le mboku ono;
- ⁷bya asu Mosisu: "Nta-a be turwu du anyi l'ehu kele anyi denyiru onye nwuhuru anwuhu aka. Ole-a; ? denu g'o gude ophu e te ekwedu g'anyi tsoru ndu Ízurelu ophuna nu Chipfu ngweja teke a nuje iya?"
- ⁸Mosisu su phe: "Unu ngabe; ge mu maru iphe, Chipfu l'e-pfu l'opfu ehunu."
- ⁹Tobudu iya bu; Chipfu su Mosisu:
- ¹⁰"Pfuaru ndu Ízurelu su phe: O -nweru onye shi l'ime unu; ozoo l'onye obu bu oshilokpa unu, denyiru aka l'odzu; shi nno turwua onwiya; ozoo l'onye obu jeru aka du enya enya; g'onye ono boleka-a ọbo Ojaghata ke Chipfu ono.
- ¹¹Teke ephe a-bọ iya be bu l'abalı iri l'eno l'onwa k'ebọ iya; me enyanwu ribajeepho. Iphe, ephe e-gude bọo ya bu: buredi, ekoduru ekoko; waa mkpeekwo, atsogbaa ilu.
- ¹²G'o to dukwa iphe ono ophu ephe a-ha g'o bọo nchi; ophu o dukwa okpu iya, ephe a-nyakwo anyakwo. Oo g'ekemu ọbo Ojaghata ono dukota bu g'ephe e-gude bọo ya.
- ¹³Ole onye turwu adudu l'ehu; ophu o jeduru iphe; ophu onye obu aboduru ọbo Ojaghata ono be ee-bufu l'echilabo ndibe phe; noo kele o to nuduru Chipfu ngweja iya teke a turu onu iya. Onye ono be iphe-eji, o meru a-tukoru l'ishi.
- ¹⁴"Onye lwaru alwalwa; unu l'iya buru; o -du iya g'o tsoru unu bọo ọbo Ojaghata ke Chipfu ono; g'onye obu mekwaa ya g'ekemu iya; waa nsọ iya gude du. Oo nsọ lanu be duru onye a nwuru anwuwu l'ali-a waa onye lwaru alwalwa."

Urwukpu aso-kputa ulo-ekwa Chileke

(Awu 40:34-38)

- ¹⁵Mboku ono, a kpoberu ulo-ekwa Chipfu, bu iya bu ulo-ekwa, aka eedobeje ekwo ekemu Chipfu ono; be urwukpu so-kputeru iya. L'uzenyashi be urwukpu ono duepho g'oku l'eli ulo-ekwa ono; duepho nno jasụ l'utsu.
- ¹⁶O buerupho g'o du kwaseru bu ono. L'eswe be urwukpu ono aso-kputaje ulo-ekwa Chipfu ono; o -be l'enyashi; l'o nwua ke phoo g'oku.
- ¹⁷O nodu abujeru teke urwukpu ono shi l'eli ulo-ekwa ono palihu imeli imeli; ndu Ízurelu awu-lihu tugbua ije phe. Eka ephe jeberu; urwukpu ono keshiru; ephe akpobe ulo-ekwa phe l'eka ono; noshia.
- ¹⁸O nodu abujeru Chipfu -su ndu Ízurelu g'ephe wu-lihu tugbua; ephe awufu tugbua. Teke o bu l'o suru phe g'ephe nodu; ephe akpobe ulo-ekwa phe noshia. O buru

g'urwukpu ono nọ-beru l'eli ọlo-ẹkwa Chipfu ono bụ g'ephe anọ-bejeru l'eka ephe kpọberu ọlo-ẹkwa pẹ ono.

¹⁹Teke urwukpu ono nọru ọdu l'eli ọlo-ẹkwa Chileke ono; ndu Ízurelu emeepho gẹ Chipfu pfuru pẹ; nọpyabe; ephe ta atugbudu.

²⁰Teke ọ bụ l'urwukpu ono nọru l'eli ọlo-ẹkwa Chipfu ono; nọo ya nwujiku olemole; bẹ bụ Chipfu -sụ g'ephe nọdu; ephe akpọbe ọlo-ẹkwa pẹ nọshia. Teke ọ sụru pẹ g'ephe wụ-lihu tugbua; ephe awufu tugbua.

²¹Teke ọ bụ l'urwukpu ono nọru shita l'uzenyashi jasụ l'utsu; o -rwua l'utsu ọ palihu imeli imeli; ephe awufu tugbua. Obetakpọo ọ bụru l'eswe bẹ urwukpu ono palihuru imeli; ọzoo l'enyashi; bẹ buepho teke ọ palihuru bẹ ndu Ízurelu awufuje tugbua.

²²Obetakpọo urwukpu ono nọdu l'eli ọlo-ẹkwa Chipfu ono nọo ya abali labọ; ọzoo nọo ya ọnwa ophu; ọzoo l'ọo apha ophu; bẹ ndu Ízurelu a-nọdujeepho l'eka ephe kpọberu ọlo-ẹkwa pẹ g'ephe nọ iya; ọphu ephe ta abyadu atugbu atugbu. Obenu lẹ teke a nọnyaaru urwukpu ono palihu imeli; ephe awufu tugbua.

²³Ọ nọdu abujeru; Chipfu -sụ pẹ g'ephe nọdu; ephe akpọbe ọlo-ẹkwa pẹ nọshia. Teke ọ sụru pẹ g'ephe tugbua; ephe awufu tugbua. Iphemiphe, Chipfu pfuru pẹ bẹ ephe mekọtaru ẹgube ọ turu iya Mosisu l'ekemu.

Ọgú 10

Opu labọ, e meru lẹ mkpọla-ọchaa

¹Chipfu sụ Mosisu:

²“Gude mkpọla-ọchaa, e tsusaru etsusa meta opu labọ; k'ọphu ii-gudeje iya eku ndu Ízurelu g'ephe dzukọbe; gudejekwa iya phọ karu pẹ teke ephe a-phutaje ọlo-ẹkwa pẹ tugbua.

³Teke a tukoru opu labọ ono gbua bẹ bụ iphe, oopfu bụ g'iphe, bụ ndu Ízurelu l'ophu dzukọbe l'iphu ngu l'ọnu ọlo-ẹkwa-ndzukọ.

⁴Ọ -buru l'ọo opu lanu kpoloko bẹ e gburu; iphe, oopfu bụ g'iphe, bụ ndu-ishi dzukọbekota l'atatiphu ngu; mbu ndu bugbaa ishi ipfu ipfu ndu Ízurelu.

⁵Teke opu ono daru ugbo lanu; iphe, oopfu bụ g'iphe, bụ ipfu, kpọberu ọlo-ẹkwa pẹ l'uzo ẹnyanwu-awawa wulihu tugbua.

⁶Teke i gburu opu ono k'ugbo ẹbo; gẹ ndu ọphu kpọberu ọlo-ẹkwa nkepẹ l'uzo ndohali wulihu tugbua. Ee-gbuje opu ono g'ọ gbajẹ ama teke ephe a-wufu tugbua.

⁷Unu -byaepho eku edzudzu-ọha g'ephe dzukọbe; unu egbua opu ono; ọle ọo g'ọ to dashi g'ọphu e gude agba ama.

⁸Ọo unwu Eronu, bụ iya bụ ndu-uke Chileke bẹ e-gbuje opu ono. Ọo-buru omelali, a-duru unu jasuru asuru; e -shi l'ogbo sweru ogbo.

⁹Teke ọ bụ l'unu eje etso ndu ọhogu unu ọgu l'alị unu; mbụ ndu akpa unu ẹhu; unu gbua opu ono g'ọ dashia ọda ike; k'ọphu Chipfu, bụ Chileke unu a-nyata unu; bya adzọta unu l'ẹka ndu ọhogu unu ono.

¹⁰Nokwaphọ g'unu e-gbuje opu mę ẹhu nọdu atso unu; mę teke unu abọ ọbo-iphe, unu abojegbaa; mę teke unu abọ iphe k'onwa ọphúú unu; unu -gwechaepho ngweja-akpọ-ọku; mę ngweja-ẹhu-guu ono, unu egweje ono; unu egburu opu ye iya; k'ọphu Chileke e-gude iya nyata unu. Ọo mbędua bụ Chipfu, bụ Chileke unu.”

Ndu Ízurelu awufu l'echięgu Sayınayi

¹¹O be lę g'onwa k'ẹbo dų l'ukporo abalı; l'apha k'ẹbo iya; urwukpu ono shi l'eli ọlo-ẹkwa Chipfu ono, bụ ẹka ẹkwo ekemu aduje ono palia imeli imeli.

¹²Tọbudu iya bụ; ndu Ízurelu bya eshi l'echięgu Sayınayi ono; ọ bụru phę atugbu. Ẹphe jee jasų l'echięgu Paranu, bụ ẹka urwukpu ono jeberu keshiru.

¹³Onoya bụ kę mbụ, ẹphe tugburu ije phę ono; ẹgube ono, Chipfu tųru iya Mosisu l'ekemu.

¹⁴Ọ bụru ipfu Jiuda bę vutaru ọzo ije ono. Ẹphe dzebe l'okpa l'okpa; parų ẹkwa-ọhubama ipfu phę wųru tugbua. Ọ bụru Náshonu nwa Amínadabu bę bụ onye-ishi ipfu Jiuda ono.

¹⁵Netanelu nwa Zuwa bụru onye-ishi ipfu Isaka;

¹⁶Eliyabu nwa Helonu bụru onye-ishi ipfu Zebulonu.

¹⁷Ọo ya bụ; a phọ-tsuta ọlo-ẹkwa Chipfu ono; oshilokpa Geshonu; mę oshilokpa Merari pata iya; ọ bụru phę atugbu.

¹⁸Ipfu ọzo, l'etsota l'atugbu ono bę bụ ndu ipfu kę Rúbenu. Ẹphe dzebkwaphọ l'okpa l'okpa; gude ẹkwa-ọhubama ipfu phę wųru tugbua. Ọ bụru Elizuru nwa Shediyo bụ onye-ishi ipfu Rúbenu ono.

¹⁹Shelumelu nwa Zurishadayi bụru onye-ishi ndu ipfu Simiyonu;

²⁰Eliyasafu nwa Diyuwelu bụru onye-ishi ipfu Gadu.

²¹Tọbudu iya bụ; ndu Kohatu vuta iphe, dų nsọ ono gude tugbushia. Ẹphe jerwushia; a kpobewa nų ọlo-ẹkwa Chipfu.

²²Ipfu ọzo, l'etsota phę nų bụru ndu Ifuremu. Ipfu ọzo, l'etsota l'atugbu ono bę bụ ndu ipfu kę Rúbenu. Ẹphe dzebkwaphọ l'okpa l'okpa; gude ẹkwa-ọhubama ipfu phę wųru tugbua. Ọ bụru Elishama nwa Amihudu bụ onye-ishi ndu ipfu Ifuremu ono.

²³Gamalelu nwa Pedazo bụru onye-ishi ndu ipfu Manáse;

²⁴Abidanu nwa Gidiyoni bụru onye-ishi ndu ipfu Benjaminu.

²⁵Ipfu ọzo, l'etsota nų; bya aburu ipfu ọphu ekpejeru azų l'ije ono bụru ndu Danu. Ipfu ọzo, l'etsota l'atugbu ono bę bụ ndu ipfu kę Rúbenu. Ẹphebedua dzebkwaphọ l'okpa

l'okpa; gude ekwa-ohubama ipfu phe wuru tugbua. O buru Ahiyeza nwa Amishadayi bu onye-ishi ipfu Danu ono.

²⁶ Pagelu nwa Okuranu buru onye-ishi ipfu Asha.

²⁷ Ahira nwa Enanu buru onye-ishi ipfu Nafutali.

²⁸ Noo ge ndu Izurelu edzebeje l'okpa l'okpa wufu m'ephe gbeshi ije phe bu ono.

²⁹ Mosisu bya epfuaru Hobabu nwa Ruwelu, bu onye Midiyanu; bya aburu ogo iya su iya: "Nta-a be anyi atugbuwa ala ali eka ono, Chipfu pfuru anyi l'oo-nu anyi ono. Tsonuru anyi g'anyi je. Anyi e-mekwaru ngu ree; kele Chipfu kweshikwaru ndu Izurelu ukwe-iphe, dugbaa ree."

³⁰ Hobabu su iya waawaa; le ya te etsoduru phe; le ya alaphuwa azu l'ali iya; lapfu ndu ephe l'iya bu.

³¹ Obenu le Mosisu suru iya: "Jiko ta ahashinu anyi. Eshinu obu ngu maru eka anyi a-kpobeje ulo-ekwa anyi l'echiegu-a; nodunu gi buru enya, anyi gude aphu uzo.

³² I -tsoru anyi be anyi le ngu a-gbaru mgba l'iphe, bukpo iphe-oma, Chipfu e-mekotaru anyi."

Okpoko Chileke waa urwukpu

³³ Noo ya; ephe shi l'ubvu Chipfu ono tugbua; jee ije abali eto. Okpoko ogbandzu Chipfu vuta uzo l'ime abali eto ono; g'o chotaru phe eka ephe a-nodu tuta unme.

³⁴ O nodu abujeru; o -beepho l'eswe; urwukpu, shi l'eka Chipfu no abya atukoru phe l'ishi; mbu teke ono, ephe shi l'eka ephe kpoberu ulo-ekwa phe tugbua ono.

³⁵ Teke e vutaerupho okpoko ono tugbua; Mosisu asu: "Zilihunu gube Chipfu. Ge ndu ohogu ngu gbakashihukwa nanu nanu. Ge ndu ono, i du ashi shikwa ngu l'iphu gbalachaa."

³⁶ Teke a pazetaru okpoko ono; Mosisu asu: "Lwaphuta azu gube Chipfu; lwaphuta unu-kuru-unu ndu Izurelu-a."

Oku 11

Oku, shi l'eka Chipfu

¹ Tobudu iya bu; ndu Izurelu wata aku photophoto epfu l'ephe eje iphe-ehuka. Photophoto ono, ephe aku ono bya erwua Chipfu le nchi; ehuhuahaa ya egghu. Oku shinu l'eka Chipfu bya ekegbushikota ndu Izurelu ndu ophu kpoberu ulo-ekwa phe l'uzo ishi ishi.

² Ndu Izurelu bya araku Mosisu; o pfuru nu Chipfu; oku ono nyishihu.

³ Oo ya bu; e kuahaa epha eka ono Tabera, bu iya bu "oku-ekeke"; kele oku, shi l'eka Chipfu bya ekegbushia phe.

Nri, bu Mana

⁴Ikpoto ndu ono, ephe le ndu Ízurelu gwaru ogwaramogwa, bu ndu tsoru phe nu g'ephe gbeshiru ije ono; wata eze nzeri nri. Ndu Ízurelu watanu ara ekwa ozo su: “? Bu onye a-nukpo anyi anu g'anyi taa?”

⁵Anyi nyataru teke anyi shi anoduje ata anu ema l'alì Ijiputu; anyi ta apfudu ugwo; teke ono be anyi shi anoduje eri ata kukumba; bya eri ashì; eri liku; me alibasa; waa galiku.

⁶Ole nta-a be o to duedu iphe, agukwadu anyi egu; ophu o dudu iphe, anyi ahumaje ria; gbahaa mana-a!”

⁷Nri ono, bu mana be ugbugba iya du g'akpuru koriyanda. I -lee ya enya; l'o nyaku anyaku; eshi mkpo g'etse bedelomu.

⁸Ndu Ízurelu nodu ejeje ekpokoo ya; gwee ya egwegwe; ozo tsua ya etsutsu l'ikwe. Ephe ahajeru shia ya eshishi; haru ghee ya egheghe. Onoduje atsò g'iphe, e gude manù olivu ghee.

⁹Teke mana ono adajeru phe bu teke iji daahaerupho l'eka ephe kpoberu ulo-ekwa phe l'enyashi.

Mosisu edoru Chipfu edo

¹⁰Mosisu bya anuma ge ndu Ízurelu wushigbaaru l'onu ulo-ekwa phe aragbaa ekwa; onyenonu tukò nodugbaa l'onulo l'onulo akwa ntumatu; ehù nodu egbu Chipfu egbu eghushikpoò ya ya ike. O tsuaha Mosisu l'ehu.

¹¹Noo ya; Mosisu jiahaa Chipfu su iya: “? Denu g'o gude o buru mube onye-ozì ngu be i meru g'egube iphe-ehuka owa-a dapfuta? ? Bu le mu ta adudu ngu l'obu meru g'o gude i paru ivu ehù ndu-a l'ophu bo mu?”

¹²? Bu mbèdua be yeru ime ndu-a g'ephe ha; too mu nwushiru phe; meru g'o gude i su ge mu heru phe l'utapfu ge nna he nwa iya, angukwadu era. Ge mu heru phe nno jasù l'alì ono, i riburu nna phe oche nte l'ii-nu phe ono.

¹³? Bu awe be mu a-huma anu, mu a-nugbabe ndu-a; g'ephe echiru mu mkpu owa-a, ephe echi-a; su g'a nu phe anu g'ephe taa!

¹⁴Mu taa dukwa ike ehokota ndu-a nwèkinyi mu; ivu ehù phe anyi-gbukwa mu anyi-gbu.

¹⁵O -buru l'oo egube-a be ii-mee mu iya; gbuchikwa mu egbugbu nta; m'o -buru le mu du ngu-a l'obu; ge mu ta anodukwanu ndzu gude enya huma ejo onodu mu.”

¹⁶Chipfu bya eyeeru Mosisu onu su iya: “Chita ndu bu ogerenya Ízurelu umadzu ukporo eto l'iri g'ephe byapfuta mu; mbu ndu i huberu ama l'ephe bupho ndu bu ogerenya; buru ndu-ishi phe. Chita phe ge gu l'ephe tukò bya apfuru l'ulo-ekwandzuko.

¹⁷Mu e-nyizeta byapfuta ngu l'eka ono; mu le ngu epfugba opfu; mu aharu unme, du ngu l'ehu habota woru ye ndu ono l'ehu nkephe; k'opfu ephe e-yeta eka vubude ngu ivu ono; g'i ti vuhe iya nwekinyi ngu.

¹⁸Pfuaru ndu Izurelu g'ephe dobe onwophe iche kwaberu echele; l'o -rwua echele be ephe a-ta anu; kele mube Chipfu numawaru ekwa ono, ephe ara su: '? Bu onye a-nu anyi anu g'anyi taa? Teke anyi shi nodu le Ijiputu be shikwa karu anyi le ree.' Nta-a be Chipfu a-nu unu anu g'unu taa.

¹⁹Anu ono be unu ta atagbudu l'ujiku lanu; ophu unu atagbudu iya l'ujiku labo; ozoo l'ime ujiku ise; ozoo l'ime ujiku iri; ozoo l'ime ujiku ukporo.

²⁰Unu a-ta anu ono onwa ophu; taa ya jasu l'o bushihu unu l'imi; mbu jasu oo-tushihu unu ayi; noo kele unu jikaru Chipfu, bu onye swiru unu; mbu raru ekwa kpua ya su: '? Bu gunu meru g'o gude anyi shi l'ali Ijiputu futu?' "

²¹Tobudu iya bu; Mosisu su Chipfu: "I humanaru-a l'oo ukporo unu nemadzu mgbo ukporo eto; l'ukporo unu nemadzu iri l'ise be mu l'ephe gude okpa eje egube-a. O buru phe be i suru l'ii-nu anu, ephe a-ta onwa ophu.

²²E -gbushigbua aturu me eswi; ? bu g'o dzuru phe? Mbu-a; ? bu g'o dzuru phe obetakpo e gbushikotaru phe ema, nokota l'eze-enyimu?"

²³Chipfu su Mosisu: "? Bu l'eka mu ta asudu iya ememe to? Nta-a be ii-huma; iphe, mu suru l'oo-meru ngu; ? oo-me to too medu?"

Ndu bu ogerenya Izurelu epfuchiru Chileke

²⁴Noo ya; Mosisu bya alufu je akaru ndu Izurelu iphe, Chipfu pfuru. O chita ndu bu ogerenya ukporo eto l'iri ono; ephe bya apfu-pee ulo-ekwa Chileke mgburugburu.

²⁵Oo ya bu; Chipfu gude urwukpu nyizeta bya epfuru yeru Mosisu; haru unme, du Mosisu l'ehu habota woru ye ndu bu ogerenya ukporo eto l'iri ono l'ehu. Unme ono byae phe pho l'ehu; ephe wata epfuchiru Chileke teke ono; obenu l'ephe te epfuchibaeduru iya ozobaa.

²⁶Ole o nweru umadzu labo ozo, nopyaberu l'ulo-ekwa phe. Epha onye lanu bu Eludadu; epha onye ophuu buru Medadu. Ephe yi le ndu bu ogerenya ono, e deru epha phe ono; ole ephe te ejeduru l'ulo-ekwa Chileke ono. Obenu le Unme Chileke byaleru-a bya eji ephebedua eh; ephe nodu l'ulo-ekwa phe ono; pfuchiahaaru Chileke.

²⁷Nwata nwokoro lanu gbagbua je asu Mosisu: "Eludadu yele Medadu nokwa l'eka a kpoberu ulo-ekwa epfuchiru Chileke."

²⁸Jioshuwa nwa Nunu, bu onye shi teke o bu nwata jetaru Mosisu ozi tufuekwapho onu su: "Nnajiuphu mu, bu Mosisu; pfunuru phe g'ephe dobe onu doo."

²⁹Mosisu su iya: "? Bu odzori be igbaru mu egube ono to? O gege adu mu ree; o -bu l'oo ge ndu ke Chipfu g'ephe ha gbę bukotaru ndu mpfuchiru; mbu ge Chipfu gbę yekota phe Unme nkiya l'ehu."

³⁰E mechaa; Mosisu me ndu bu ogerenya Ízurelu ono laphu azu l'eka ephe kpoberu ulo-ekwa phe.

Chipfu woru okwà mee anu atata

³¹Noo ya; pherephere bya eshi l'eka Chipfu no ziahaa; o shi l'eze-enyimu chikashia okwà; ephe bya adabyigbaaru le mgboru eka ephe kpoberu ulo-ekwa phe ono. Ephe tuko eka ono g'o ha dzuru rwua iphe, ha g'eka nemadzu a-du ike jee l'okpa ujiku ophu. G'ephe epheberu l'eli be bu iphe, rwuru ntu-okpa eto me a -gbe l'omali.

³²Mboku ono l'ophu; me enyashi ono l'ophu; mekwapho nchitabohu iya be ephe tsoru je anwuko okwà ono. Onye nwutanukaru nwanshii be nwu-jiru gbamugbamu-nkweka ukporo ise. Ephe woru iya kpassaaru onwophe; o tuko eka ono, ephe kpoberu ulo-ekwa phe ono dzuru mgburugburu.

³³Ephe kpukwaduru-a anu okwà ono l'onu ata; mbu l'ephe teke atagbudu iya; Chipfu watawaa phe atu-koshi oke ehu-eghu iya. O loru ejo mgbu-onwu tu phe.

³⁴Oo ya bu; e kuahaa eka ono Kiburotu-Hatava, bu iya bu "ochieja ndu ekpiri" ; kele oo l'eka ono be e liru iphe, bu ndu ono, meru ekpiri ono.

³⁵Ephe shi le Kiburotu-Hatava l'eka ono wufu; je adoru le Hazerotu.

Oku 12

Miriyamu yele Eronu etso Mosisu opfu

¹Tobudu iya bu; Miriyamu yele Eronu wata epfubyishi Mosisu le ke nwanyi Kushi, o luru. Noo kele Mosisu lutakwanuru onye Kushi.

²Ephe su: "? Bu Mosisu kpoloko be Chipfu eshije l'onu iya pfua opfu? ? To shijedu l'onu k'anyibedua pfukwapho opfu?" Chipfu numanu iphe ono, ephe pfuru ono.

³Su-a; nwoke ono, bu Mosisu be bunukaru onye eme odoo. Oo ya kachakpoo eme odoo l'iphe, bu ndu mgboko l'ophu.

⁴G'e jia epfu; Chipfu pfuaru Mosisu; waa Eronu; me Miriyamu su phe: "Unu n'eto tuko futa byakota l'ulo-ekwa-ndzuko." Ephe n'eto ono bya afuta tugbua jeshia.

⁵Oo ya bu; Chipfu nodu l'urwukpu, kpuru oronmono nyizeta bya apfuru l'onu ulo-ekwa-ndzuko ono; bya ekua Eronu yele Miriyamu oku; ephe kpiritaru.

⁶Chipfu su phe: "Unu ngabe nchi numa iphe, mu epfuru unu: Oobujeru; onye mpfuchiru Chipfu -nodu l'echilabo unu; mube Chipfu egoshi iya onwomu l'ophulenyaa; bya epfuru yeru iya le nrwo.

⁷Obenu l'o to dudu nno l'ehu onye-ozu mu, bu Mosisu. Yebedua be mu yekotaru ndibe mu l'ophu l'eka.

⁸Teme mu l'ia nodu abogbaje uja l'iphu l'iphu; mbu l'anyi l'epfuje opfu doru enya yeru onwanyi; o to budu etu-opfu. Oohumaje ge mube Chipfu gbaru ugbugba. Oo ya

bụ; ? bụ ụnu meru g'o gude ọphu unu atụdu ebvu; unu ọdu epfutooshi onye-ozu mu ono, bụ Mosisu?"

⁹Chipfu tukoshi pẹ ẹhu-eghu iya; bya aburu iya atugbu.

¹⁰Urwukpu ono shiepho l'eli ọlo-ekwa ono palia imeli imeli; a bya l'amaru; ekpenta nmawaa Miriyamu swokoswoko. Ehu chahue ya pho ke roboo. Eronu bya elee Miriyamu enya bya ahuma g'ekpenta tukoru iya ẹhu sweta.

¹¹Eronu su Mosisu: "Oowaa nnajuphu mu; ba nushinu anyi aphu l'oo l'anyi gude eme eswe mee iphe-aji.

¹²Te ekweshinu ge nwanyi-a chahu roboo ge nwata, byaru l'afuta l'epho ne iya; o nwuhuwaa anwuhu; ibe ẹhu iya rekashihuwa erekashi."

¹³Tobudu iya bu; Mosisu bya araku Chipfu su: "Jiko gube Chileke; menaa ya g'o wekorohu!"

¹⁴Chipfu su Mosisu: "O -bu le nna nwanyi-a vuru onu-mini kpua ya l'iphu; ? iphere iya tege adudu abali esaa to? Nwuru iya ye l'azu eka ono, a kporu ọlo-ekwa gu-buru iya ye g'o ọo ujiku esaa; o -no-chaepho ujiku esaa ono; l'e duphuta iya azu."

¹⁵Tobudu iya bu; a bya enwufu Miriyamu gu-buru iya ye l'azu eka ono, ephe kporu ọlo-ekwa pẹ ono; o ọo ujiku esaa. Ophu ndu Izurelu agbeshiduru ije jeye teke e duphutaru iya azu.

¹⁶E mechaa; ephe shi le Hazerotu l'eka ono lufu je akpobe ọlo-ekwa pẹ l'echiegu Paranu.

Ọgú 13

Anwu ngge l'ali Kėnanu

(Dit 1:19-33)

¹Chipfu su Mosisu:

²"Yefu ndu e-je ali Kėnanu je anwua ya ngge; mbu ali ono, mu eme ge mu nu ndu Izurelu ono. Shi l'ipfu l'ipfu, bu ipfu ndiche pẹ hotachaa onye lanu, e-je nu. Ndu ji-hota be bu unwoke, bugbaa ishi l'ipfu, nonu."

³Mosisu bya aho pẹ egube ono, Chipfu pfuru ono; bya ezia pẹ su g'ephe shi l'echiegu Paranu tugbua jeshia. Ndu ono, o ziru ozi ono bukotaerupho ndu-ishi ndu Izurelu.

⁴Qwaa be bu epha pẹ: Onye shi l'ipfu Rubenu bu Shamuwa nwa Zaku;

⁵onye shi l'ipfu Simiyonu buru Shafatu nwa Horu;

⁶onye shi l'ipfu Jiuda buru Kalebu nwa Jiefune;

⁷onye shi l'ipfu Isaka buru Igalu nwa Jiosefu;

⁸onye shi l'ipfu Ifuremu buru Hosiya nwa Nunu;

- ⁹onye shi l'ipfu Benjaminu b̄uru Paliti nwa Rafu;
- ¹⁰onye shi l'ipfu Zebulon̄u b̄uru Gadiȳelu nwa Sodi;
- ¹¹onye shi l'ipfu Manáse, b̄u iya b̄u ipfu Jiósefu b̄e b̄u Gadi nwa Susi;
- ¹²onye shi l'ipfu Danu b̄uru Amiȳelu nwa Gemali;
- ¹³onye shi l'ipfu Asha b̄uru Seturu nwa Maȳikelu;
- ¹⁴onye shi l'ipfu Naf̄utali b̄uru Nahubi nwa Vofusi;
- ¹⁵onye shi l'ipfu Gadu b̄uru Geyuw̄elu nwa Maki.
- ¹⁶Noo ̄ep̄ha unwoke ono, Mós̄isu yeru g'̄ep̄he je anw̄ua ngge l'al̄i Kénanu b̄u ono. Mós̄isu woru Hosiya nwa Nunu ḡube Jioshuwa.
- ¹⁷Mós̄isu bya ezia ph̄e g'̄ep̄he jeshia ngge l'al̄i Kénanu s̄u ph̄e: “Unu tsoru echīegu nd̄ohali bah̄u l'al̄i úbvú úbvú ̄eka ono.
- ¹⁸Unu je ah̄uma g'al̄i ono gbaru; m̄e ḡe ndu bu iya n̄u d̄u. Unu maru ? ̄okpehu d̄u ph̄e; t̄oo ? ̄ep̄he rw̄uhuru arw̄uhu? ? ̄Ep̄he ha l'̄otu; t̄oo ? ̄ep̄he habe ahabe?
- ¹⁹Unu maru ? b̄u al̄i, d̄u ree; t̄oo al̄i, d̄u ̄eji? Unu maru mkp̄ukpu, ̄ep̄he bugbaa: ? b̄u mkp̄ukpu, a ta kp̄u-pheduru igbul̄o mgburugburu; t̄oo mkp̄ukpu, a kp̄ushiru ike?
- ²⁰Unu amaru g'al̄i ph̄e d̄u. Unu maru ? b̄u al̄i emehuje iphe, e meberu iya; t̄oo ̄ejo al̄i? Unu amaru ? oshi d̄u iya; t̄oo ? oshi ta ad̄udu iya? G'obu shihukwa unu ike. Unu egude akp̄uru oshi, shi l'al̄i ono lwa.” Teke ono b̄e b̄u teke akp̄uru vaȳinu mb̄u an̄oduje achash̄igbaa.
- ²¹Noo ya; ̄ep̄he t̄uḡbua jeshia je anw̄ukota al̄i ono ngge; shita l'echīegu Zinu je akp̄aa l̄e Rehobu; m̄e a -n̄odu eje Hamatu.
- ²²̄Ep̄he tsoru echīegu nd̄ohali ono jeye ̄ep̄he rwua mkp̄ukpu H̄eburonu, b̄u ̄eka Ahimanu; m̄e Sheshayi; m̄e Tal̄umayi, b̄u ndu shi l'eri Anaku bu ebubu. (A kp̄uru mkp̄ukpu H̄eburonu; ̄o n̄oo apha ̄esaa; t̄emanu a kp̄ua mkp̄ukpu Zowanu ̄ophu d̄u l'al̄i Ijiputu.)
- ²³̄Ep̄he jerwuepho l̄e ns̄uda ̄Eshukolu; ̄ep̄he gbukwota ̄ekali vaȳinu lan̄u, akp̄uru w̄opfuru aw̄opfuru. ̄Umadzu lab̄o l'ime ph̄e pyokafu iya l'oshi, d̄u ogologo par̄u; onye lan̄u par̄u iya l'ishi lan̄u; onye ̄ophuu par̄u iya l'ishi lan̄u. ̄Ep̄he w̄okokwaapho akp̄uru itorokuma; m̄e akp̄uru oshi figu wolata.
- ²⁴A ḡube ̄eka ono ns̄uda ̄Eshukolu, b̄u iya b̄u “w̄opfulaa” ; k̄ele ̄o l'̄eka ono b̄e ndu Ízurelu gbukwotar̄u ̄ekali vaȳinu, akp̄uru w̄opfuru aw̄opfuru vulata.
- ²⁵̄Ep̄he n̄oru ̄ukporo abal̄i ugbo lab̄o g'̄ep̄he jeru anw̄u ngge l'al̄i ono; t̄emanu ̄ep̄he lwa.
- ²⁶̄Ep̄he bya alwapfuta Mós̄isu m̄e Er̄onu; waa ndu Ízurelu l'ophu l'echīegu Paranu, d̄u l̄e mkp̄ukpu Kad̄eshi. ̄Ep̄he bya edooru Mós̄isu; m̄e Er̄onu; waa ndu Ízurelu l'ophu g'̄ep̄he jeru; bya egoshi ph̄e akp̄uru oshi, shi l'al̄i ono.

²⁷Waa iphe, ephe pfuru Mosisu baa: “Anyi jewaru je ahuma ali ono, i suru g'anyi je ahuma. Ali ono bu ali, mini era-eswi yee manu-enuw aso gborogboro. Waa akpuru oshi, shi l'ali ono baa.

²⁸Ole ndu bu l'ali ono be okpehu du; mkpukpu, du iya nu hagbaa shii; bya aburu mkpukpu, e gude igbulo kpu-phee mgburugburu. Anyi humacharuro ndu shi l'eri Anaku l'eka ono.

²⁹Ndu Amaleku be bu l'echiegu ndohali. Ndu Hetu; me ndu Jiebusu; me ndu Amoru buru l'ali ubvu ubvu eka ono; ndu ke Kenanu bua kube ehu l'eze-enyimu; bukwarupho l'aguga enyimu Jiodanu.”

³⁰Tobudu iya bu; Kalebu bya emee ndu Izurelu daa jii l'iphu Mosisu; bya asu phe: “Unu g'anyi je alwuta ali ono g'o buru nkanyi; noo kele anyi a-du ike lwuta iya.”

³¹Obenu le ndu ono, ephe le Kalebu swi je ije ono be suru: “Anyi ta adukwa ike eje adatso ndu ono ogu; noo kele ephe kakwa anyibedua okpehu.”

³²O buru ejo nzi be ephe byaru ezia ndu Izurelu le k'ali ono, ephe jeru anwua ngge ono su: “Ali ono, anyi jeru anwua ngge ono be egbukwa ndu bu iya nu mgbu-onwu. Temen ndu anyi humakotaru l'eka ono bukotaru ndu hagbaa ke phengara phengara.

³³Anyi humaru ndu gbaru oke mkparawa l'eka ono. (Oshilokpa Anaku ono bu l'ehu ndu ono, gbaru oke mkparawa ono be ephe shi futa.) Anyi dehucharu onwanyi edehu l'enya dugbaa g'unwu ogu; o buru g'anyi du ephebedua bu ono.”

Ọgú 14

Jioshuwa yele Kalebu be epfu l'ali Kenanu du ree

¹Tobudu iya bu; ndu Izurelu l'opfu rakota ekwa l'enyashi ono rashia ya ike.

²Ephe tuko g'ephe ha guru aphu kpua Mosisu yele Eronu. Ephe nodu epfugbaa su: “Ogege akakwaru anyi ree l'anyi nwushihuru l'ali Ijiputu; ozoo l'echiegu-a!

³? Bu gunu meru g'o gude Chipfu nodu eme g'o duru anyi je edobe l'ali ono g'ephe gbushia anyi? Unyomu anyi phe; me unwegirima anyi phe be a-bya aburu ndu a kpucharu le ndzu. ? To gege akaduru anyi ree g'anyi laphu azu l'ali Ijiputu?”

⁴Ephe pfuaharu nwibe phe asuje: “G'anyi hota onye lanu; mee ya ishi g'o duru anyi laphu azu l'ali Ijiputu.”

⁵Mosisu yele Eronu daa kpurumu l'atatiphu igwe-oha ndu Izurelu ono l'opfu.

⁶Jioshuwa nwa Nunu; yee Kalebu nwa Jiefune, bu ndu yi le ndu jeru ngge l'ali Kenanu ono gude ehu-eghu lajashia uwe, ephe yeru l'ehu;

⁷aku opfu ekpu edzudzu-oha Izurelu ono su phe: “Ali ono, anyi jeru aghaphee bya anwua ya ngge ono be bukwa ali, dushikpoo ree ike.

⁸O -buru l'anyi du Chipfu ree be oo-duru anyi bahu l'ali ono; nu iya anyi; kele ali ono bu ali, mini era-eswi waa manu-enuw aso gborogboro.

⁹Iphe, dū iya nū kpoloko buepho g'unu te kwefuru Chipfu ike. Iphe ọzo buri g'unu ba tsushi ndu ali ono ebvu. Noo kele anyi e-ri phe ge nri. Ephe te nwedu onye egbobuta phe nu; obenu l'anyibedua be Chipfu swiru eswiru. G'anyi ba tsushinu phe ebvu.”

¹⁰Obenu l'iphe, bu ndu Izurelu ono g'ephe ha be suru g'a tu-gbushia phe le mkpuma. Tobudu iya bu; odu-biribiri ke Chipfu bya enwuaru ndu Izurelu g'ephe ha ke phoo l'ulo-ekwa-ndzuko ono.

Mosisu arwo Chipfu l'iswi ehu ndu Izurelu

¹¹Chipfu bya asu Mosisu: “? Bu teke ole be ndu-a a-kpo-beru mu ebo l'afu-a? ? Bukpoo teke ole be ephe a-jika-beru ekweta nkemu; yekwaru iphe-ohumalenya ono, mu meshigbaberu l'eka ephe no ono?”

¹²Mu e-gude ejo iphe-ememe gbushia phe; mee phe; ephe aburu mkpurupyata. Mu eworu gubedua mee li buru oha l'ophu; oha, paru eka apaa; bya aka okpehu eme l'ephebedua.”

¹³Mosisu su Chipfu: “Oowaa! Ndu Ijiputu be a-numakwa iya me i -mee ya nno. Nyatakwa li gude okpehu ngu dufuta ndu-a l'eka ndu Ijiputu ono.

¹⁴Ephe e-pfukwaru iya ndu bu l'ali-a; kele ephe numakotawaru le gube Chipfu swiru phe eswiru; numawa l'ephe egudeje enya phe huma gube Chipfu; teme l'urwukpu nkengu be anoduje phe l'eli; teme l'oobujeru; o -rwua l'eswe; li gude urwukpu, kpuru oronmono edu phe; o -rwua l'enyasi li gude oku, kpuru oronmono edukwa phe pho.

¹⁵O -buru li gbushiru ndu-a l'ugbo lanu nta-a be oha ono, numajewaru udū ngu ono be a-sukwa:

¹⁶‘Le gube Chipfu ta aduedu ike durwua phe l'ali ono, i kweru phe ukwe iya; ribua le nte l'ii-nu phe ono; i woru phe gbushia l'echiegu.’

¹⁷Oo ya bu; gube Nnajiuphu; mu arwo ngu g'i goshinu li bu onye ike paru eka apaa; mbu egube ono, i pfujehawaru su:

¹⁸‘Chipfu bu onye ehu te eghujedu eghu egwegwa; bya aburu onye n-yemobu iya nyiberu anyibe; bya aburu onye aguje nvu l'iphe-eji; me l'emeswe, e mesweru iya. Obenu l'o bukwapo onye ta ahajedu onye-ikpe nmaru ke mmanu. Qogwaje unwegirima ochi iphe-eji, ndu nwuru phe nu meru jasū l'ogbo k'eto rwua le k'eno.’

¹⁹Iphe, mu arwo ngu bu g'i gudenū obu-imemini ngu ono, nyiberu anyibe ono gvaru ndu-a nvu l'ejo-iphe, ephe meru ngu; mbu egube ono, i shiro l'ali Ijiputu gutaru phe nvu byasu nta-a ono.”

²⁰Chipfu bya asu Mosisu: “Mu gvaru phe nvu egube ono, i rworu.

²¹Ole; eshinu mu no ndzu ge mu no iya-a; odu-biribiri nkemu sweta mgboko g'o swetaru iya-a;

²²bẹ ndu-a, gudewaa ɛnya phẹ huma ọdu-biribiri mu-a; mẹ iphe-ọhumalenya ono, mu meshiru l'alị Ijiputu ono; mẹ ọphu mu meshiru l'echiegu; mbụ ndu ono, mecharu dale mu adale mgbo iri ono; ọphu ẹphe angaduru mu nchị ono;

²³bẹ ọ tọ dudu onye ọphu byaru egude ɛnya huma alị ono, mu riburu lẹ nte kwe nna phẹ ukwe iya ono. Ọphu ọ tọ dudu iphe, bụ ndu ono, kporu mu ẹbo ẹbo l'afu ono, byaru ahuma iya nụ.

²⁴Ole a -bya l'ẹhu k'onye-ozu mu ono, bụ Kalẹbu; eshi ọphu ọ bụ onye obu iya gbaru iche; tẹme ọ buru onye gude obu iya g'ọ ha etso ọzo nkemu bẹ mu e-duru iya bahu l'alị ono, ọ bahu je anwua ngge ono; ọ buru oshilokpa iya bẹ e-nweru alị ono.

²⁵Oo ya bụ; eshinu ndu Amaleku; mẹ ndu Kėnanu bu lẹ nsuda nsuda; o -rwuepho echele; unu dakobe shia ọzo echiegu ono, du l'uzo, e shi eje Eze-ɛnyimu Uswe-uswe.”

Chipfu anu ndu Izuru aphu

(Dit 1:34-40)

²⁶Chipfu bya asu Mosisu yele Eronu:

²⁷“? Bu teke ole bẹ ndu ẹjo-ememe-a a-gunyaaru mu aphu gu-buhu? Mu numakotawaru aphu, ndu Izuru no gushia kpua mu.

²⁸Unu karu phẹ lẹ mube Chipfu suru-a: ‘Eshinu mu no-a ndu ge mu no iya-a; bẹ mu a-tukokpoo iphemiphe ono, mu numaru, unu pfushiru ono; mee unu.

²⁹Oo l'echiegu-a bẹ odzu unu a-wushiru; mbụ iphe, bụ ndu ono, nowaru a -gbẹ l'ukporo apha kwaseru ono; mbụ ndu a guru ọgu teke aagu ọgu, bụ ndu ono, yi lẹ ndu ono, guru ẹjo aphu kpua mu ono.

³⁰Ọ tọ dudu m'onye lanu l'ime unu bya a-bahu l'alị ono, mu woliru ẹka mu imeli kweta lẹ mu a-nu unu g'unu buru ono; gbahaepho Kalẹbu nwa Jiefune; waa Jioshuwa nwa Nunu.

³¹Ọ buru unwegirima unu ono, unu suru l'aa-kpu lẹ ndu ono bẹ mu e-duru bahu l'alị ono; g'ẹphe je amaru alị ono, unu jikaru ono.

³²A -bya l'unubedu; ọo l'oma echiegu-a bẹ odzu unu a-wushiru.

³³Unwegirima unu bẹ a-nodu awu-phe l'oma echiegu-a ge ndu eche aturu; ghapee nno no ukporo apha labo sugba ishi; jee iphe-ehuka k'ekwegekwe unu ono; gbiriri jasụ odzu unu akwashia l'oma echiegu ono.

³⁴Iphe, unu noru teke unu jeru anwu ngge l'alị ono bu ukporo abali labo. Ọ buru ukporo apha labo bẹ unu e-je iphe-ehuka ẹjo-ememe, unu meru ye iya. Ujiku lanu anwataru unu apha ọphu. Oo ya bụ g'unu a-makwanuru iphe, bụ lẹ mu bụ onye opfu unu.

³⁵Mube Chipfu bẹ pfuakwaru nkemu; mu mefutajekwa iphemiphe ono l'ẹhu ndu ẹjo-ememe ono; mbụ ndu ono, dokoberu etso mu opfu ono. Ẹphe a-tuko buru mkpurupyata l'echiegu-a; mbụ l'oo l'eka-a bẹ ẹphe a-tuko nwushihukota.’ “

³⁶Noo ya; iphe, bu ndu ono, Mosisu yeru; ephe je anwua ngge l'alì ono, lwaru nu bya atua onu alì ono le njo ono; mbu shi nno mee ndu Izurelu guru aphu kpua Mosisu ono;

³⁷ndu ono, bu phe turu onu alì eji eji ono be ejo iphe-ememe gbushikotaru l'iphu Chipfu.

³⁸O buru Jioshuwa nwa Nunu yele Kalebu nwa Jiefune be bu ndu phoduru nu l'iphe, bu ndu ono, jeru anwua ngge l'alì ono.

Aalwụ-gbu ndu Ízurelu le Homa

(Dit 1:41-46)

³⁹Mosisu bya eworu iphe ono pfiaru ndu Izurelu l'ophu; o rwua phe l'ehu; ephe kwatakpo raa ekwa onwophe.

⁴⁰O -rwua l'onmewa utsu ophu etsota mboku ono; ephe tugbua jeshia l'alì úbvú úbvú Kénanu je anodu asuje: “Anyi mewaru iphe-eji. Unu g'anyi wufukwa jeshia eka ono, Chipfu kweru anyi ukwe iya ono.”

⁴¹Mosisu su: “? Bu gunu meru iphe unu e-me g'unu mebyia iphe, ekemu Chipfu pfuru? O to dukwaru unu le ree!

⁴²Unu te ejekwa; kele Chipfu ta nokwa swiru unu. Unu -jee be ndu ohogu unu e-chigbushikwa unu;

⁴³noo kele ndu Amaleku me ndu Kénanu be no unu l'uzo ataphu l'eka ono. Ephe e-gudekwa ogu-echi gbushikota unu. Chipfu te eswikwaru unu; kele unu gbakutawaru iya azu.”

⁴⁴Obenu l'ephe ta akpaduru ishi; ephe tugbua jeshia l'alì úbvú úbvú ono; ole Mosisu waa okpoko oibandzu Chipfu te tsodu phe lufu l'eka ono, ephe kpoberu ulo-ekwa phe.

⁴⁵Tobudu iya bu; ndu Amaleku me ndu Kénanu, bu l'alì úbvú úbvú ono datso phe ogu; lwu-kpee; chia phe jeye le mkpukpu Homa.

Ọgú 15

Ekemu, du le ngweja, du iche iche

¹Chipfu bya asu Mosisu:

²“Waa iphe, ii-pfuru ndu Izurelu baa: Unu -laepho alì ono, unu eje eburu ono, bu alì ono, mu a-nu unu ono;

³unu -gwejeepho ngweja nu Chipfu; unu shi l'ikpoto eku unu hota anu gbua kpo oku gude gwee ngweja obu g'o buru ngweja, mkpo iya du Chipfu ree. Unu e-meje iya nno le ngweja-akpo-oku; me ngweja, e gude apfu ukwe-iphe e kweru; me teke unu anu iphe, shi unu l'obu; ozoo teke unu egwe ngweja obo-iphe.

⁴Onye wotaru ngweja ono e-yekobeje iya ngweja-nri bya anu Chipfu; mbu wota uzi lanu l'ime nkweka ukpokutu ereshi, e keru uzo iri; gwoo le manu, jiru eze ekpemu.

- ⁵“Iphe, bu nwaturu, e gude egwe ngweja-akpo-oku; ozoo ngweja mmanu be unu e-yekobeje ngweja-mee; mbu mee, jiru nkeru-eno otu-lupfu otumu.
- ⁶“A bya l'iphe, bu ebili, e gude egwe ngweja; unu yekobeje iya ngweja-nri; mbu uzo labo l'ime nkweka ukpokutu ereshi, e keru uzo iri; gwoo le manu, jiru eze ekpemu lanu l'ubvu iya.
- ⁷Ngweja-mee ono be unu e-gude mee, jiru nkereto otu-lupfu otumu gwee. Unu meje iya g'o buru ngweja, mkpo iya du Chipfu ree.
- ⁸“Teke o bu l'oo nwa oke-eswi be unu gude abya egweru Chipfu ngweja-akpo-oku; ozoo ngweja, e gude apfu ukwe-iphe; ozoo ophu e gude egwe ngweja-ehu-guu;
- ⁹g'onye egwe ngweja ono yekobekwa iya ngweja-nri; mbu uzo eto l'ime nkweka ukpokutu ereshi, e keru uzo iri; gwoo le manu, jiru eze ekpemu labo.
- ¹⁰Nokwapho g'unu e-wota mee, jiru nkeru-ebo otu-lupfu otumu gude gwee ngweja-mee. Ngweja ono be a-buru ngweja, a kporu oku, mkpo iya du Chipfu ree.
- ¹¹“O buru egube ono bu g'unu e-medzujeru iya l'iphe, bu oke-eswi; ozoo ebili; ozoo nwaturu; m'o bu nweghu, unu gude egwe ngweja.
- ¹²Noo g'unu e-medzujeru iya bu ono l'iphe, bu ngweja, unu egwekpo egwegwe; g'o hahabe igwerigwe.
- ¹³Iphe, bu onye a nwuru anwunwu le Izurelu be bu egube ono be oo-meje ngweja, oogwe anu Chipfu; mbu ngweja, a kporu oku shi nno mee ge mkpo iya du Chipfu ree.
- ¹⁴Shita l'ogbo k'unu-a je akpaa l'ogbo ophu abya l'ataphu; onye bu onye lwaru alwalwa, bu ebubu l'echilabo unu -wota ngweja bya ge ya gweru nu Chipfu; mbu ngweja, a kporu oku; shi nno mee ge mkpo iya du Chipfu ree; g'o bukwaru egube unu emeje be oo-me.
- ¹⁵Oo omelali lanu ono duru unube ndu Izurelu l'ophu; me iphe, bu ndu lwaru alwalwa, bu l'echilabo unu. Omelali ono a-noepo shita l'ogbo unu sweru ogbo ophu abya nu jasuru asuru. Oo g'unu du l'ataphu Chipfu bu ge ndu lwaru alwalwa dukwapho.
- ¹⁶O buru ekemu lanu; waa omelali lanu be duru unu le ndu lwaru alwalwa; unu l'ephe buru.”

Anu Chipfu iphe-mbu

- ¹⁷Chipfu bya asu Mosisu:
- ¹⁸“Waa iphe, ii-pfuru ndu Izurelu baa: Unu -rwuepho ali ono, mu edu unu eje ono;
- ¹⁹unu -rijeepo nri, shi l'ali ono; unu ketakwa oke iya bya anu Chipfu.
- ²⁰Unu gude ukpokutu-iphe, shi l'akporu-iphe-mbu, unu metaru l'ali ono gmeta buredi nu Chipfu g'o buru ngweja, shi l'eka eechije bali.
- ²¹Ngweja ukpokutu iphe-mbu, unu metaru l'ali ono be unu a-nuje Chipfu jasuru asuru; mbu e -shi l'ogbo sweru ogbo.”

Ngweja k'iphe-ẹji, e lekebeduru ẹnya mee

²²“Sù-a; ọ -bùru l'o nweru onye elekebuduru ẹnya darwua ekemu-a, Chipfu tushiru ye Mòsisu l'ẹka-a;

²³mbù ekemu ono, Chipfu shi l'ẹka Mòsisu nùkòta unu ono; g'ọ ha; mbù e -shi lẹ mbòku, Chipfu tùru iya nù unu jasùwaruroya; e -shi l'ogbo sweru ogbo;

²⁴bẹ ọ -bùru lẹ ndu Ízùrẹlu te elekebeduru ẹnya darwua ekemu ono; mbù l'ọha Ízùrẹlu l'ophu ta amadu teke ẹphe meru iphe-ẹji ono; gẹ ndu Ízùrẹlu l'ophu kpùta nwa oke-eswi gude gwee ngweja-akpọ-ọku; mbù ngweja, e meru; mkpọ iya dù Chipfu ree. L'e yekòbekwa iya phọ ngweja-nri; mẹ ngweja-mẹe, ayìkwaru iya phọ; waa mkpi, ee-gude gwee ngweja-iphe-ẹji.

²⁵G'onye uke Chileke gwee ngweja ono gude pfua ụgwọ iphe-ẹji ndu Ízùrẹlu ono l'ophu; g'aa-guaru phẹ nvù l'iphe-ẹji ono, ẹphe meru ono; kẹle ẹphe te elekebeduru ẹnya mee ya; tẹme ẹphe bya egwewaru ngweja nù Chipfu lẹ k'emeswe ono, ẹphe mesweru ono; mbù ngweja, a kpọru ọku; mẹ ngweja-iphe-ẹji.

²⁶Ndu Ízùrẹlu l'ophu; mẹ ndu lwaru alwalwa, bu l'echilabọ phẹ bẹ aa-gùkotaru nvù; noo kẹle ẹphe tukuru mee iphe-ẹji ono; ọle ẹphe te elekebeduru ẹnya mee ya.

²⁷“Ọle-a; ọ -bùru l'ọo onye lanù bẹ meru iphe-ẹji ono; ọphu o lekebeduru ẹnya mee ya; g'onye ọbu wota nwada egwu, gbaru apha g'e gude gwee ngweja-iphe-ẹji ono, o meru ono.

²⁸Onye uke Chileke bẹ a-nọdu l'iphu Chipfu pfua ụgwọ iphe-ẹji ono, onye ono elekebeduru ẹnya mee ono. A -pfuwa ụgwọ iphe-ẹji ono, onye ono meru ono; bẹ a guwaru iya nvù.

²⁹Ọo ekemu lanù ono bẹ duru iphe, bu onye meru iphe-ẹji, o lekebeduru ẹnya mee; m'ọ bu onye a nwuru anwunwu lẹ Ízùrẹlu; m'ọ bu onye lwaru alwalwa.”

Ngweja k'iphe-ẹji, e lekeberu ẹnya mee

³⁰“O bekwanu l'onye lekeberu ẹnya mee iphe-ẹji; mẹ a nwuru onye ọbu anwunwu lẹ Ízùrẹlu; ọzo l'ọ bu onye lwaru alwalwa; bẹ onye ọbu pfubiyakwaru ẹpha Chipfu. Onye dù nno bẹ ee-bufu ebufu l'echilabọ ndibe phẹ.

³¹Eshi ọphu onye ono ta adudu iphe, ọ guberu Opfu Chipfu; bya emebiywaa ekemu Chipfu; bẹ ee-bufuje onye ọbu ebufu; iphe-ẹji, o meru atụ-koru iya l'ishi.”

Nwoke, darwuru nsọ eswe-atuta-unme

³²Lẹ teke ndu Ízùrẹlu nọkwadu l'echiegu bẹ o nweru nwoke lanù, e guderu g'ookpa nkù l'eswe-atuta-unme.

³³Ndu humaru iya l'ẹka ookpa nkù ono kpùta iya kpù-pfushiaru Mòsisu yẹle Erọnu; mẹ ndu Ízùrẹlu l'ophu.

³⁴Ẹphe kpùta iya tų-chia atų-chi; kẹle e teke pfukahadu iphe, ee-me iya.

³⁵Oo ya bụ; Chipfu sụ Mósísi: “Nwoke ono bẹ ee-gbukwa egbugbu. Gẹ ndu Ízurelu l'ophu kpufukwa iya azụ ẹka ẹphe kpọberu ọlo-ẹkwa phẹ je atugbua ya lẹ mkpuma.”

³⁶Tọbudu iya bụ; ndu Ízurelu bya akpụta iya kpufu azụ ẹka ono, ẹphe kpọberu ọlo-ẹkwa phẹ ono; je eworu iya tugbua lẹ mkpuma, bụ gẹ Chipfu sụ Mósísi g'e mee ya.

Iphe, a kparụ akpakpa gude mengashia ọnu uwe

³⁷Chipfu bya asụ Mósísi:

³⁸“Waa iphe, ii-pfuru ndu Ízurelu baa: Unu kpajeru iyanguyangu ye lẹ mgbureku uwe mgbalanu unu ishi ẹno. Iphe, unu e-gudeje kpa iyanguyangu ono aburu oghu, du urwukpu-urwukpu. Noo g'unu e-meje iya bụ ono; e -shi l'ogbo sweru ogbo.

³⁹Iyanguyangu ono bẹ unu e-leje ẹnya gude nyatakota ekemu mube Chipfu; k'ophu unu a-nọduje eme iya ememe; haa ẹgu ẹjo-iphe ono, anọduje agugbaa obu unu; me ophu ẹnya unu ahumagbabe ono; mbu ẹjo-iphe ono, unu shi anọduje emegbaa ono.

⁴⁰Oo ya bụ; k'ophu unu a-nyataje ekemu; bya eme iya ememe; shi nno duru Chileke unu nsọ.

⁴¹Oo mbedua bụ Chipfu; buru Chileke unu; mbu onye ono, dufutaru unu l'ali Ijiputu; gẹ mu buru Chileke unu ono. Oo mu bụ Chipfu, bụ Chileke unu.”

Ọgú 16

Kora; Detanu; waa Abiramu

¹O be teke ono; Kora nwa Izuha, bụ nwanwa Kohatu; onye eri Lívayi; waa Detanu; me Abiramu, bụ unwu Eliyabu; me Onu nwa Peleti, bụ ndu ipfu Rúbenu bya achita nemadzu yeru onwophe;

²ẹphe wulihu tsoahaa Mósísi opfu. Ndu ono, tso phẹ nụ ono bugbaa ndu a hotaru g'ẹphe buru ndu-ishi ndu Ízurelu; bya aburu ndu a maru ẹpha phẹ lẹ Ízurelu l'ophu. Iphe, ẹphe du bụ ukporo umadzu iri l'ẹbo l'umadzu iri.

³ẹphe kpako onwophe byapfutashia Mósísi yele Eronu bya asụ phẹ: “Unu metawaru iphe obu; o tso be paa! Ndu Ízurelu l'ophu bẹ unu maru l'ẹphe du nsọ l'ẹhu l'ẹhu; teme Chipfu swiru phẹ eswiru. ? Bụ gunu meru g'o gude unu palia onwunu eli eli dobe doghata ndu ke Chipfu l'ophu?”

⁴Mósísi numaepho iphe ono, ẹphe pfuru ono; o daa kpupyabe iphu l'ali.

⁵O sụ Kora yele ndu ẹphe l'iya swi: “O -rwua l'utsu echele bẹ Chipfu e-goshiwaro onye ophu bụ nkiya; waa onye du nsọ; onye o hotaru bẹ oo-me g'o byakube iya ntse.

⁶Waa iphe, unu l'e-me baa: Gẹ gubedua, bụ Kora; gu lẹ ndu etso ngu nụ; wota iphe, aaguje oku;

⁷o -be echele; unu aguru oku ye iya; bya eye iya unwu-isensu l'ataphu Chipfu. Onye bụ onye Chipfu hotaru bẹ a-buru onye du nsọ. Unube eri Lívayi metawaru iphe obu; o tso be paa!”

- ⁸Mósisu bya asúkwapfo Kora: “Unu ngabẹ nchi; unubẹ eri Lívayi!
- ⁹Chileke kẹ Ízurelu hotaru unu dobe iche lẹ Ízurelu l'ophu; mee g'unu nõdu iya ntse; eje ozi, dọ l'ulo-ẹkwa kẹ Chipfu; mẹ g'unu pfujeru l'ataphu ndu Ízurelu l'ophu jeru phẹ ozi; ophu ono asudu unu.
- ¹⁰O meru gẹ gubedua; mẹ ndu Lívayi ibe ngu phẹ nõdu iya ntse; nta-a bẹ unu achofua ọzo, unu e-shi buru ndu-uke Chileke.
- ¹¹O kwa Chipfu bẹ gọ lẹ ndu etso ngu nọ g'ẹphe ha tukuru etso opfu. ? Bọ onye bẹ Erọnu bọ kẹ g'unu tanyiru iya ntanyi?”
- ¹²Oo ya bọ; Mósisu bya ezia g'e je ekua Detanu; mẹ Abiramu, bọ unwu Eliyabu. Ẹphe sọ l'ẹphe ta abyadu.
- ¹³Sọ: “? I rwutaru anyi rwufuta l'alì ono, ẹra-eswi waa manụ-ẹnwu asọ gborogboro ono; ophu ono asudu ngu. I nõdu emefua g'i woru anyi gbushia l'echiegu l'ẹka-a; bya emefukwapfo g'i mee onwongu onye-ishi anyi.
- ¹⁴Ophu ka njo bọ l'i ti dubaduru anyi l'alì, ẹra-eswi waa manụ-ẹnwu asọ gborogboro; mbọ alì ẹka anyi a-kọbeje iphe; waa ẹka anyi e-me opfu-vayinu. ? Iime g'i mee ndu-a mkpurukpuru-ẹnya tọ? Waawaa! Anyi ta abyadu!”
- ¹⁵Oo ya bọ; ẹhu ghushiahaa Mósisu egbu ike; o sọ Chipfu: “G'ọ tọ dukwa ngweja, ndu-a gweru nọ ngu, ii-nata. Mu ta natajekwaru phẹ g'ọ ka mma l'ọo nkafu-igara phẹ mẹ nanu; ophu mu emekajeduru phẹ iphe mẹ onye lanu.”
- ¹⁶Mósisu sọ Kora: “Gẹ gubedua yẹ ndu etso ngu nọ g'ẹphe ha tuko bya l'iphu Chipfu echele. Gẹ gubedua; waa ẹphebedua; waa Erọnu tuko byakota.
- ¹⁷G'onyenonu gudekwa iphe, aaguje oku; ye iya unwu-isensu gude bya l'ataphu Chipfu. Iphe, ọo-du; mbọ iphe ono, aaguje oku ono bọ ukporo iri l'ẹbo l'iri. Gubedua, bọ Kora l'onwongu e-gudekwapho nkengu; Erọnu egude nkiya bya.”
- ¹⁸Tobudu iya bọ; onyenonu wota iphe ono, aaguje oku ono; bya aguru oku ye iya; ye iya unwu-isensu je apfugbaaru l'onu ulo-ẹkwa-ndzukọ ono. Ẹphe lẹ Mósisu mẹ Erọnu tuko pfuru l'ẹka ono.
- ¹⁹Kora bya achikobe oha Ízurelu ono l'ophu; l'onu ulo-ẹkwa-ndzukọ ono g'ẹphe tso Mósisu yẹle Erọnu opfu. No iya; ọdu-biribiri kẹ Chipfu sopyabe oha Ízurelu ono l'ophu.
- ²⁰Chipfu sọ Mósisu yẹle Erọnu:
- ²¹“Unu shi l'echilabo igwe oha ono futa gẹ mu bya atuko phẹ mebyishikota lẹ ntabu ẹnya lanu.”
- ²²Mósisu yẹle Erọnu daa; kpube iphu l'alì chishia sọ: “Oowaa! Gube Chileke; mbọ Chileke bọ ishi ndzu iphe, bọ nemadzu l'ophu; ? ii-gude k'iphe-ẹji, onye lanu metaru tu-koshi oha l'ophu oke ẹhu-eghu ngu tọ?”
- ²³Chipfu bya asọ Mósisu:

24“Pfuaru oha Ízurelu ono l'ophu g'ephe kpuriberu l'ibiya ophu ulo-ekwa Kora; me Detanu; waa Abiramu no.”

25Mosisu gbalihu; yele ndu bu ogerenya Ízurelu swiru jepfushia Detanu waa Abiramu.

26O su igwe oha ono: “Unu lufutakwa l'ulo-ekwa ndu ejo-ememe ono! Unu te edenyikwa eka l'iphe, bu nkephe; odumeka be Chipfu e-gudekwa k'iphe-eji, ephe meru woru unu megbushia.”

27Oo ya bu; onyemonye buru ubara yeru ulo-ekwa Kora; me ke Detanu; waa ke Abiramu. Detanu yele Abiramu bya afuta pfuru l'onu ulo-ekwa phe; ephe l'unyomu phe; me unwu phe unwoke; waa unwegirima phe.

28Mosisu su: “Oo iphe-a be unu e-gude maru l'oo Chipfu ziru mu ge mu mee iphemiphe ono; l'o to budu iphe, gbataru mu l'uche be mu emeje.”

29O -buru le ndu-a be nwuhuru ge nemadzu mmanu anwuhuje; mbu-a; o -buru l'oo g'onwujeru nemadzu l'ophu be o nwuru phe; oo ya bu l'o to budu Chipfu ziru mu iphe ono, mu eme ono.

30Ole o -buru le Chipfu meru g'iphe te emejeduru nu mee; mbu; ali -saa onu lwegbushia phe; me iphemiphe, ephe nweru enweru; mbu; ephe buru ndu wubaru l'ali-maa le ndzu; oo ya bu; unu amaru l'o to dudu iphe, ephe guberu Chipfu.”

31Epfughe, Mosisu epfughe opfu ono; ali ono, Detanu phe pfuru ono kejaha ebo;

32ali ono saa onu lwekota phe; me ndibe phe; me ndu ke Kora; me ivu phe.

33Ephe wubakota l'ali-maa le ndzu; me iphemiphe, ephe nweru enweru; ali kpupyabe phe; ephe toko g'ephe ha lakota l'iyi l'echilabo ndu Ízurelu.

34O buru mkpu, ephe chishiru be meru; ndu Ízurelu, no-pheru eka ono mgburugburu ye okpa l'oso; araje su: “Ali abyakwa anyi elwelwe-o!”

35Noo ya; oku, shi l'eka Chipfu bya ekegbushikota umadzu ukporo iri l'ebo l'umadzu iri pho, shi akpo unwu-isensu oku pho.

Gbamugbamu, du nsọ, aagujeru oku ye

36Chipfu su Mosisu:

37“Pfururu Eleyaza, bu nwa Eronu; bya aburu onye uke Chileke g'o loshia iphe ono, aaguje oku l'ime oku ono; voshia icheku-oku, du iya nu tukaa nanu nanu; noo kele iphe ono du nsọ;

38mbu iphe ono, aaguje oku ono, bu ke ndu ono, meru iphe-eji shi nno tuphaa ndzu phe ono. O -loshichaa ya; g'a kusaa ya akusa g'o chisaa echisa g'e kpubeje iya l'eli oru-ngweja Chipfu. Noo kele a nwaru iya Chipfu; o buru iya bu l'o duwaa nsọ. Iphe ono be a-buru iphe-ohubama l'eka ndu Ízurelu no.”

39Oo ya bu; Eleyaza, bu onye uke Chileke bya achikoo iphe ono, aaguje oku ono, bu onyirubvu be e gude mee ya ono; mbu iphe ono, ndu ono, oku kegbushiru gude bya

akpọ ùnwù-isensu oku ono. A kúsa ya ọsa k'ophu ee-kpubeje iya l'eli ọru-ngweja Chipfu;

⁴⁰g'ọ bụru iphe, ndu Ízurelu e-gudeje nyata l'ọ tọ dudu onye ọzo, bụ onye ta abudu oshilokpa Erọnu, a-kpuritajeru bya g'ọ kpọ ùnwù-isensu oku l'atatiphu Chipfu; odumeka bẹ ọo-dụkwaru onye ono egube ono, ọ duru Kora yele ndu tsoru iya nụ; mbụ egube ono, Chipfu shi l'ẹka Mosisu pfua ya ono.

Ọnwu egbushi ndu Ízurelu

⁴¹O -rwuepho nchitabọhu iya; ndu Ízurelu l'ophu wata aguru Mosisu yele Erọnu aphụ asuje: “Ọ kwa ụnwu Chipfu bẹ unu gbushiru egube ono.”

⁴²Tọbudu iya bụ; ọha Ízurelu ono l'ophu bya akpakọbe onwophe g'ephe wata etso Mosisu yee Erọnu opfu. Ephe jeshia ele ọnya l'ulo-ekwa-ndzukọ; urwukpu so-kputewa iya; ọdu-biribiri ke Chipfu bya enwua ke phoo.

⁴³Mosisu yele Erọnu bya ejeshia l'atatiphu ulo-ekwa-ndzukọ ono;

⁴⁴Chipfu sụ Mosisu:

⁴⁵“Unu shi l'echilabọ igwe ọha ono lufuta ge mu bya atuko phe mebyishikota le ntabu enya lanu.” Ephe daepho kpurumu l'iphu Chipfu.

⁴⁶Tọbudu iya bụ; Mosisu sụ Erọnu: “Wota iphe, iguje oku; shi l'ọru-ngweja Chipfu guta oku ye iya. L'i woru ùnwù-isensu ye iya mee egwegwa gude jepfu igwe ọha ono g'i pfua ugwo iphe-eji phe. Noo kele oke ehu-eghu, shi l'ẹka Chipfu bẹ talihuru nụ; ejo iphe-ememe dapfutawa phe.”

⁴⁷Oo ya bụ; Erọnu wota iphe ono egube Mosisu pfuru iya ono; bya agbagbua bahu l'echilabọ igwe ọha ono. O jerwushia; ejo iphe-ememe ono nodu egbushiwaa ndu ono. O bya akporu Chipfu ùnwù-isensu ono oku; bya apfua ugwo iphe-eji ndu ono.

⁴⁸O pfuru l'echilabọ ndu ophu nwuhwaru anwuhu; waa ndu ophu no ndzu; ejo iphe-ememe ono buri bugemu.

⁴⁹Ndu ejo iphe-ememe ono gbushiru bẹ du ukporo unu umadzu; l'unu umadzu iri l'ishii; l'ukporo umadzu iri l'ise; a -gufukwa ndu ophu nwuhuru l'opfu ehu Kora.

⁵⁰Erọnu mechaa bya ejepfushia Mosisu l'onu ulo-ekwa-ndzukọ; noo kele ejo iphe-ememe ono mebuwaru.

Ọgú 17

Mgboro Erọnu bẹ rwutaru irwu

¹Chipfu sụ Mosisu:

²“Pfuaru ndu Ízurelu g'ephe chie ngu mgboro iri l'ẹbo. Ge ndu-ishi l'ipfu, nonu nuchaa ngu mgboro nanu nanu. L'i deshia epha onyemonye le mgboro nkiya.

³Onye ii-de epha iya le mgboro k'ipfu Livayi bu Erọnu. Kele onyenonu le ndu-ishi l'ipfu l'ipfu e-nweru mgboro lanu.

⁴L'i chita mgboro ono je awushi l'ulo-ekwa-ndzuko l'iphu okpoko-ekemu, bu eka ono, mu abyapfutaje unu ono.

⁵Mgboro k'onye ophu mu hotaru be a-kpofuta ome. Oo ya bu ge mu e-shi nno mee ge ndu Izurelu wofu mube Chipfu onu l'ehu l'aphu ono, ephe anoduje agushi ekpu unu tekenteke ono."

⁶Tobudu iya bu; Mosisu bya epfuaru iya ndu Izurelu. Ndu-ishi l'ipfu nonu bya anugbaa ya mgboro nanu nanu; o tuko du mgboro iri l'ebo. Mgboro ke Eronu yikwaru iya pho.

⁷Mosisu chita iya je edobe l'ataphu Chipfu l'ulo-ekwa l'eka ono, okpoko-ekemu Chileke no ono.

⁸O -rwua nchitabohu iya; Mosisu bahu l'ulo-ekwa eka ono, okpoko-ekemu Chileke no ono; bya ahuma ge mgboro ke Eronu, bukwanu onye no-chiru enya ipfu ke Liviayi kpofushiru ome; rwushia irwu; tushikwapho ige; bya amishia akpuru alumundu.

⁹Oo ya bu; Mosisu bya achifuta mgboro ono g'o ha l'ataphu Chipfu chijeru ndu Izurelu. Ephe lee ya enya; onyenonu wotachaa mgboro ophu bu nkiya.

¹⁰Chipfu su Mosisu: "Woru mgboro ke Eronu dobephu azu l'iphu okpoko-ekemu ono; g'o du l'eka ono buru iphe-ohubama noduru ndu ono, ekwefuje ike ono; g'o buru iphe, a-noduje alo phe eka le nchi g'ephe haa agu-phe aphu ekpu mube Chipfu; a -nonyaa ephe nwushihu."

¹¹O buerupho ge Chipfu suru ge Mosisu mee ya bu g'o meru iya.

¹²Ndu Izurelu su Mosisu: "Anyi a-nwushihuchaakwa! Anyi laakwaru maa! Anyi lakotaakwaru maa g'anyi ha!

¹³Onyemonye, jekubekporu ulo-ekwa Chipfu ntse be a-nwuhukwa nu. ? Anwuhu a-tuko anyi gbuembe too?"

Ōgú 18

Ozi, duru ndu-uke Chileke waa ndu Liviayi

¹Chipfu su Eronu: "Gubedua l'onwongu; waa unwu ngu; me iphe, bu onu-ulo nna ngu l'ophu be o tu-koru l'ishi; mbu ejo-iphe, e meru l'ulo mu; o buru gubedua l'onwongu kwapho; me unwu ngu be o tu-kokwarupho l'ishi; mbu ejo-iphe, e meru meswee k'abu uke.

²Duta unwunna ngu phe, bu iya bu eri Liviayi, bu ipfu nna ngu g'ephe yejeru ngu eka; gubedua waa unwu ngu phe be a-nodu l'ataphu ulo-ekwa eka okpoko-ekemu Chileke no eje ozi.

³Ephe a-nodu eje ozi, i ziru phe; me ozi, dukota l'ulo-ekwa. Ole oo ephe g'ephe te jekubekwa mgboru ulo Chipfu; waa mgboru oru-ngweja Chileke; o -dudu be gu l'ephe a-tukokwa nwushihu.

⁴Gụ l'ẹphe a-tugba nanu; ẹphe eje ozi, dụ l'ulo-ẹkwa-ndzuko; mbụ iphe, bukota ozi, dụ l'ulo-ẹkwa ono. G'onye abudu onye Lívayi ta abyakubejekwa unu ntse.

⁵Oo unubedua a-nodu eje ozi, dụ l'ulo Chipfu; me ozi k'oru-ngweja Chileke; k'ophu Chileke ata atụ-koshiedu ndu Ízurelu oke ẹhu-eghu iya ozo.

⁶Sụ-a; mu hotawaru ndu Lívayi, bụ unwunna unu l'echilabo ndu Ízurelu. Ẹphe bụ ndu e woru nụ unu; buru ndu e doberu mube Chipfu iche g'ẹphe jeje ozi, dụ l'ulo-ẹkwa-ndzuko.

⁷Gubedua waa unwu ngu be a-nodu eje ozi k'egweru Chileke ẹja; mbụ l'unu a-nodu ejekota ozi k'oru-ngweja Chileke; waa ozi, dụ l'ime ẹka ẹkwa-mgbochi nọ. Noo ozi, unu a-nodu eje bụ ono. Mu yeru unu k'egwe ngweja ono l'eka g'ọ buru iphe-oma, mu meru unu. Onye ozo, abudu oshilokpa Lívayi -byaru le mgboru ulo Chipfu be a-nwuhukwanu.”

Oke, rwuberu ndu-uke Chileke

⁸No iya; Chipfu sụ Eronu: “Nta-a be mu woakwaru iphemiphe, bụ iphe, aanuje mu anunu ye ngu l'eka. Iphemiphe, bụ iphe, ndu Ízurelu doberu mu nsọ; buwaa ngu be mu nukotaru iya g'ọ buru okiphe ngu; buru okiphe unwu ngu jasuru asuru.

⁹Owaa be a-bufuaru okiphe unu l'iphe, kakota adu nsọ ono, bụ ophu a ta kpoduru oku: Iphe, ẹphe gudekota bya egwe ngweja nụ mu; mbụ iphe, shi le ngweja-nri; me iphe, shi le ngweja-iphe-eji; me ophu shi le ngweja-apfu-ugwo; mbụ iphemiphe ono, ẹphe nuru mu g'ọ buru ngweja, kakota adu nsọ ono. Ndu k'ono be bukota okiphe, rwuberu gube Eronu; waa unwu ngu phe.

¹⁰Unu noduje l'eka kakota adu nsọ ria ya. O buru unwoke kpoloko be e-rije iya nụ. G'ọ bukwaru unu iphe, dụ nsọ.

¹¹“Iphe, bụ iphe, ndu Ízurelu doberu mu iche; mbụ iphe, shikota le ngweja-amama be bụ nkengu. Mu wowaru iya nụ gụ l'unwu ngu unwoke; me unwada ngu jasuru asuru. Iphe, bụ ndibe ngu, nturuw adudu l'ehu be e-tsojeru ria ya.

¹²Iphe, ndu Ízurelu nuru Chipfu l'oo iphe-mbụ, shi l'iphe, ẹphe metaru l'alị be bụ ngu nwe iya; mbụ iphe, bụ manụ olivu, kakota ree; me iphe, bụ mee ophúú, kakota ree; waa iphe, bụ ereshi, kakota ree.

¹³Iphe, bukota iphe, ẹphe wotaru Chipfu l'oo akpuru-iphe-mbụ, ẹphe metaru l'alị phe bụ nkengu. Iphe, bụ ndibe ngu, nturuw adudu l'ehu be l'e-tsojeru ria ya.

¹⁴“Iphe, bụ iphe, e yeru Chipfu l'eka l'alị Ízurelu be bukota nkengu.

¹⁵“Iphe, bụ iphe, vuchakpoo uzo waa ẹkpa-nwa ne iya; anu me nemadzu; mbụ ophu e woru nụ mube Chipfu a-bukotajeru nkengu. Obenu l'aa-pfuje ugwo gude gbata iphe, bụ okpara, shi l'ehu nemadzu; nokwapho g'aa-pfuje ugwo gude gbata iphe, bụ anu mbu, shi l'ehu anu, aasọ nsọ futa.

¹⁶Ephe -nɔwaa ɔnwa ophu bɛ aa-pfujɛ mkpɔla-ɔchaa, ɛrwa iya dɔ shɛkelu ise gude gbata phɛ; mbɔ mkpɔla-ɔchaa, bɔ iphe, eegudejɛ atɔ ɛrwa iphe l'eze-ɔlo Chileke bɛ gude tɔa ya.

¹⁷Obenu lɛ nweswi, ne iya vuru ɔzo nwɔa; mɛ nwatɔru, ne iya vuru ɔzo nwɔa; mɛ nweghu, ne iya vuru ɔzo nwɔa bɛ aa-hajɛ agbata. Ndu k'ono bɛ dɔ nsɔ. Unu gbuje iya; phɛ mee ya l'eli ɔru-ngweja ono; unu akpɔjɛ ɛba iya ɔku gude gwee ngweja-akpɔ-ɔku; mbɔ ngweja, mkpɔ iya dɔ Chipfu ree.

¹⁸Anɔ iya a-buru nkengu; ɛgube ono, ndɔ-iphe, e gude gwee ngweja-amama; mɛ utapfu ɔkpa ɛkutara anɔ bɔ nkengu ono.

¹⁹“Iphemiphe, Ízurelu doberu nsɔ g'ɛphe nɔ Chipfu bɛ mu nɔwaru gɔ l'unwu ngu unwoke; mɛ unwada ngu phɛ g'ɔ buru nkunu jeye lɛ gbururu. Ono bɔ nrakunraku ɔgbandzu mu lɛ ngu; mɛ awa ngu l'ophu. ɔgbandzu ono a-nɔ jasuru asuru. O to nwedu echihu.”

²⁰Chipfu bya asɔ Erɔnu: “Gɛ ndu Ízurelu te emejekwa alɔ gbaa unu; ophu ɛphe ahejekwa unu okiphe. ɔ kwa mbɛdua bɔ okiphe, unu hatarɔ. ɔ mu bɔ okiphe, unu ketarɔ l'ɛka ndu Ízurelu.”

Oke-lanɔ-l'ɔzo-iri bɔ oke, dɔru ndu Lívayi

²¹“A bya abya l'ɛhu ndu Lívayi; eshinu ɛphe eje ozi, dɔ l'ɔlo-ɛkwa-ndzukɔ bɛ mu nukotawaru phɛ iphe, shi l'oke-lanɔ-l'ɔzo-iri, ndu Ízurelu anɔje mu. Ono bɔwaa okiphe phɛ.

²²Shita nta-a kwasɛru bɛ ɔ tɔ dɔdu onye Ízurelu ɔzo, e-jekube mgboru ɔlo-ɛkwa-ndzukɔ; ɔdumeka bɛ iphe-ɛji onye ɔbu a-tukokwaru iya l'ishi; onye ono a-nwuhukwa.

²³ɔo ndu Lívayi bɛ eje ozi, dɔ l'ɔlo-ɛkwa-ndzukɔ dɔ l'ɛka; ɔ buru phɛ bɛ ɛjo-iphe, e meru l'ɛka ono tukoru l'ishi. Iphe ono, a-buru nsɔ, a-dɔ jasuru asuru; mbɔ jasɔ l'ogbo sweru ɔgbo. ɔ tɔ dɔdu iphe, ɛphe eketa l'ɛka ndu Ízurelu.

²⁴Oke-lanɔ-l'ɔzo-iri, ndu Ízurelu anɔje mu; bɛ mu nɔwaru ndu Lívayi g'ɔ buru okiphe phɛ. ɔo ya meru g'ɔ gude mu pfua opfu ɛhu phɛ sɔ: ‘Ephe ta ahatadu okiphe l'ɛka ndu Ízurelu.’ “

Oke-lanɔ-l'ɔzo-iri kɛ ndu Lívayi

²⁵Chipfu sɔ Mosisu:

²⁶“Pfiaru ndu Lívayi sɔ phɛ lɛ-a: ɔ -buru l'unu natarɔ ndu Ízurelu oke-lanɔ-l'ɔzo-iri ono, mu nɔru unu g'ɔ buru okiphe unu ono; unu shije l'ime iya woru oke-lanɔ-l'ɔzo-iri nukwapho Chipfu.

²⁷Iphe, unu nɔru bɛ aa-nɔduje aguru unu g'ɔ bɔ ereshi, shi l'ɛka l'eechije ereshi; a gukwaa ya phɔ gɛ mɛɛ, shi l'ɛka aakuje mɛɛ.

²⁸ɔo ya bɔ l'unu e-shije l'oke-lanɔ-l'ɔzo-iri ono, unu anatajɛ l'ɛka ndu Ízurelu ono woru oke-lanɔ-l'ɔzo-iri iya nukwapho Chipfu. ɔ buru l'oke-lanɔ-l'ɔzo-iri ono bɛ unu e-shi woru kɛ Chipfu nɔ Erɔnu, bɔ onye uke Chileke.

²⁹Unu wojeru iphe, gbaru Chipfu nū iya l'iphemiphe, a nūru unu; unu shije l'ophu bu iya kakōta ree nū iya ya; mē l'ophu kakōta adū nsō.

³⁰Oo ya bū; pfiaru ndu Lívayi sū phē lē teke ephe woru iphe, kakōta ree nū Chipfu ono bē aa-guru phē iya g'iphe, shi l'ēka eechije balī; a gukwaa ya phō gē mē, shi l'ēka aakuje mē.

³¹Unu lē ndibe unu a-nōduje l'ēka dū unu ree ria ndu ophuu; kēle o obunggo ozi, unu eje l'ulo-ēkwa-ndzukō.

³²O tō dudu iphe-ēji, bya a-tukoru unu l'ishi m'ō buru l'unu wotaru iphe ono ophu kachaa ree nū mu. Tēme ophu unu e-merwudu iphe, ndu Ízurelu doberu nsō g'ephe nū mu; k'ophu unu ta anwushihudu.”

Ógú 19

Mini, e gude asafu nturu

¹Chipfu bya asu Mosisu yele Erōnu:

²“Waa ekemu, Chipfu tūru sū: Pfiaru ndu Ízurelu g'ephe kpūtaru ngu nwada eswi, eke uswe-uswe; ophu o dudu ēka iphe mebyiru iya; ophu o dudu ntūji, dū iya nū; tēme ophu e gudejeada ya jee ozi.

³Unu kpūta nwada eswi ono kpē Eleyaza, bū onye uke Chileke; g'a kpūfu iya l'azu ēka a kpōberu ulo-ēkwa je egbua l'ēka Eleyaza nō.

⁴Gē Eleyaza, bū onye uke Chileke tsee mkpūshi-ēka lē mee ya phee l'uzo atatiphu ulo-ēkwa-ndzukō ugbo esaa.

⁵Nwada eswi ono bē aa-kpō oku l'iphu Eleyaza; kpōo akpō iya oku; mē anū iya; waa mee ya; mē nshī iya.

⁶Onye uke Chileke ono bē e-wota oshi sida; mē eswa isopu; mē oghu uswe-uswe chiru ye l'echilabō oku ono, e gude akpō nwada eswi ono oku ono.

⁷Teke ono bē onye uke Chileke ono e-gude mini saa uwe iya; gude mini wūa ēhu. O - megheē ya phō nno; l'ō batawarō l'ime ēka ono, a kpōberu ulo-ēkwa ono. Ole o-buru onye aasō nsō nōo jasū l'uzenyashi mbōku ono.

⁸Onye bū iya kpōru nwada eswi ono oku bē e-gudekwaphō mini saa uwe iya; gude mini wūa ēhu; l'ō bukwarupho onye aasō nsō nōo jasū l'uzenyashi mbōku ono.

⁹Onye a ta sōdu nsō bē e-kpota ntū, shi l'oku ono, e gude kpōo nwada eswi ono oku. Oo-kpota iya je awūshi l'ēka nturu ta adudu; l'azu ēka a kpōberu ulo-ēkwa. O buru l'ēka ono bē aa-wūshiru iya ndu Ízurelu g'ephe gude meje kē mini, eegudeje asafu nemadzu nturu; gude iya eme k'asafu iphe-ēji.

¹⁰Onye bū iya kpōtaru ntū ono bē a-sa uwe iya asasa. L'ō buru onye aasō nsō nōo jasū l'uzenyashi mbōku ono. Omelalī ono bē a-dū gbururu jeye lē gbururu. Oo-duru ndu Ízurelu; duru ndu lwaru alwalwa; ephe l'ephe buru.”

Edenyi odzu ẹka

- 11“Onye denyiru odzu onye nwuhuru anwuhu ẹka be a-buru onye aaso nsọ nọ ujiku ẹsaa.
- 12Onye obu be e-gude mini ono, eegudeje asafu nturuwuu saa onwiya le mboku k'eto iya; waa le mboku k'ẹsaa ya; teme l'oo-du ree. O le o -buru l'o to sachaduru onwiya le mboku k'eto iya ono; me le mboku k'ẹsaa ya ono be o to do du ree.
- 13Iphe, bu onye meru odzu onye nwuhuru anwuhu ẹka; ophu onye obu ta sachaduru onwiya be bukwa ulo-ekwa Chipfu be ooturuwuu. Onye obu be ee-bufu l'eka ndu Izurelu no. Oo-buru onye aaso nsọ; noo kele e te pheduru iya mini, eegudeje asafu nturuwuu; emeswe ono be dukwadu iya l'ehu g'o du iya.
- 14“Owaa bu ekemu, du le k'onye no l'ime ulo nwuhu. Iphe, bu onye bahuru l'ime ulo ono teke ono; me iphe, bu onye no iya l'ime teke ono be a-buru onye aaso nsọ abali ẹsaa.
- 15Iphe, bu ivu, du l'ulo ono, e gheberu onu; ophu e kpureduru iya iphe be aasoakwapho nsọ.
- 16Iphe, bu onye no l'oma egu denyi ẹka l'odzu onye e gburu le mma; ozoo odzu onye nwuhuru anwuhu mmanu; ozoo l'o denyiru ẹka l'okpu onye nwuhuru anwuhu; m'o bu l'ilu; be a-buru onye aaso nsọ nọ abali ẹsaa.
- 17“A -bya le ke ndu aaso nsọ; g'ephe kpota ntu ono, shi l'oku, e gude kpoo ngweja- iphe-eji oku ono ye l'iphe; ephe eje l'eka mini, doru risaa du; kuta mini ye iya.
- 18Oo ya bu; onye a ta sodu nsọ ewota ẹsua isopu tsee l'ime mini ono; phee ya l'eli ulo-ekwa ono; me l'eli ivu, du l'ulo-ekwa ono; me l'ehu ndu no l'ime ulo-ekwa ono. Nokwapho g'oo-phe iya iphe, bukpo onye denyiru ẹka l'okpu onye nwuhuru anwuhu; me onye denyiru ẹka l'odzu onye e gburu le mma; ozoo onye denyiru onye nwuhuru anwuhu mmanu ẹka; me onye denyiru ẹka l'ilu.
- 19Onye obu, a ta sodu nsọ obu be e-phe onye ono, aaso nsọ ono mini ono le mboku k'eto; waa le mboku k'ẹsaa. O -rwua le mboku k'ẹsaa ono; l'o safu iya nturuwuu ono. Onye ono, a saru ono asaa uwe iya asasa; gude mini wua ehuru; l'o bya adu ree l'uzenyashi mboku ono.
- 20“Obenu l'onye aaso nsọ; ophu o sachaduru onwiya asacha be ee-bufu l'echilabo ndu Izurelu; kele o merwuwaru ulo Chipfu. Eshinu e te pheduru iya mini, eegudeje asafu nemadzu nturuwuu be o bu onye aaso nsọ.
- 21Ono bu ekemu, a-duru phe nu jasuru asuru. Onye ono, bu iya epheje mini ono, eegudeje asafu nemadzu nturuwuu ono be a-sakwapho uwe iya asasa. Onye meru ẹka le mini ono, eegudeje asafu nturuwuu ono be a-buru onye aaso nsọ jeye l'uzenyashi mboku ono.
- 22Iphe, onye aaso nsọ denyiru ẹka be a turuwuaru aturuwuu; onye denyiru ẹka l'iphe obu be a-nodu aso nsọ jasuru l'uzenyashi mboku ono.”

Ọ́gú 20

Anwùhu Miriyamu

¹Tọ́budu iya bú; o rwua l'ọ́nwa mbù l'apha; ndu Ízùrẹ̀lù l'ọ́phu jerwua echiẹ̀gu Zinu. Ẹ̀phe nọ́shia lẹ̀ Kadẹ̀shi. Miriyamu nọ́du l'ẹ̀ka ono nwùhu; e lia ya l'ẹ̀ka onokwaphọ́.

Mini, shi lẹ̀ mkpuma

²Teke ono bẹ̀ mini ta adùdu k'ọ́phu ndu Ízùrẹ̀lù a-ngù; ẹ̀phe kpakọ́ onwophẹ̀ tsoahaa Mọ́sisu yẹ̀le Eronu opfu.

³Ẹ̀phe wata abarù Mọ́sisu mba sù: “O gege akaru anyi ree; ọ́ bú l'anyi nwùshihuru teke phọ́ ndibe anyi phẹ̀ nwùshihuru l'iphu Chipfu phọ́.

⁴? Bù gùnu meru g'o gude ì chítà anyìbẹ̀ ndu kẹ̀ Chipfu bya awùshi l'echiẹ̀gu l'ẹ̀ka-a g'anyi l'iphe-edobe anyi nwùshihu?

⁵? Bù gùnu meru g'o gude i dufuta anyi l'alì Ijiputu bya eduru dobe lẹ̀ mkpọ́koro ẹ̀ka-a, ta adùdu ereshi, dù iya nù; ọ́phu oshi figu adùdu iya; ọ́phu vayìnu adùdu iya; ọ́phu oshi itorokuma adùdu iya; ọ́phu ọ́ dùdu mini, anyi a-ngù, dù iya nù?”

⁶Tọ́budu iya bú; Mọ́sisu yẹ̀le Eronu lùfu l'ẹ̀ka ono, ndu Ízùrẹ̀lù dọ́ru ono tųgbua jeshia l'ọ́nu ọ́lọ-ẹ̀kwa-ndzuko je adaa; kpupyabẹ̀chaa iphu l'alì. O-gbu-nwìinwii kẹ̀ Chipfu nwuaru phẹ̀ kẹ̀ phoo.

⁷Chipfu sù Mọ́sisu:

⁸“Wota mgbọ́ro phọ́ gẹ̀ gù lẹ̀ nwune ngu Eronu chikobe ndu Ízùrẹ̀lù. Pfulu yeru mkpuma ono l'ẹ̀ka ẹ̀phe ele ngu ẹn̄ya gẹ̀ mini shi iya sọ́futa. Noo ọ́zo, ii-shi mee gẹ̀ mkpuma ono sọ́futaru phẹ̀ mini bú ono; k'ọ́phu ndu Ízùrẹ̀lù mẹ̀ iphe-edobe phẹ̀ a-ngù mini.”

⁹Tọ́budu iya bú; Mọ́sisu bya ewota mgbọ́ro ono l'atatiphu Chipfu l'ẹ̀ka ono gude tųgbua; gẹ̀ Chipfu sùru iya g'o mee ya.

¹⁰Mọ́sisu yẹ̀le Eronu bya achikobe ndu Ízùrẹ̀lù l'iphu mkpuma ono. Mọ́sisu sù phẹ̀: “Unu ngabẹ̀ nchì nta-a unubẹ̀ ndu okwefurike ono. ? Bù g'anyi kuta mini lẹ̀ mkpuma-a nù unu tọ́o?”

¹¹Ọ́o ya bú; Mọ́sisu halia ẹ̀ka iya imeli byia mgbọ́ro ono ugbo labọ́ l'eli mkpuma ono. Mini shi lẹ̀ mkpuma ono nwùshihu; ndu Ízùrẹ̀lù; mẹ̀ iphe-edobe phẹ̀ ngua ya.

¹²Tọ́budu iya bú; Chipfu sù Mọ́sisu yẹ̀le Eronu: “Eshi ọ́phu unu te kwetaduru nkemu; ọ́phu unu emeduru mu gẹ̀ mu dù nsọ́ l'ẹn̄ya ndu Ízùrẹ̀lù bẹ̀ unu te edurwuẹ̀kwa ndu-a alì ono, mu nùru phẹ̀ ono.”

¹³Ọ́wana bú mini Meriba, bú iya bú “uswo” ; kele ọ́o l'ẹ̀ka ono bẹ̀ ndu Ízùrẹ̀lù nọ́ tsoo Chipfu uswo; Chipfu goshi phẹ̀ lẹ̀ ya dù nsọ́.

Ndu Edọ́mu ajika gẹ̀ ndu Ízùrẹ̀lù ta aghatashì l'alì phẹ̀

- 14**Mósisu bya eshi lẹ Kadēshi zia ozi g'e je zia eze ndu Edomu sụ: “Owaa bụ iphe, Ízurelu, bụ nwune ngu pfuru: Unu mawaru egube iphe-ehuka, byapfutaru anyi g'ọ ha.
- 15**Unu mawaru gẹ nna anyi oche pẹ gude chiru anyi laa alí Ijiputu; je ebua ẹka ono nọo ọdu. Ndu Ijiputu kpaa nna anyi pẹ ono ẹhu shii; bya akpakwaapho anyịbedua.
- 16**Obenu lẹ teke anyi rakuru Chipfu bẹ ọ nūmaru olu anyi; bya ezia ojozi; ọ bya edufuta anyi lẹ Ijiputu. Nta-a bẹ anyi nọwa lẹ Kadēshi, bụ mkpukpu, unu l'ephe maru oke alí.
- 17**Jiko unu hanaa g'anyi shia alí unu ghata. Anyi te eshidu ẹgu unu aghata; ọzoo ẹka unu gbaru opfu-vayinu; ọphu ọ dudu wẹlu unu, anyi bya l'e-kuta mini ngua. Anyi e-tsoerupho oma oji unu ogologo ghata. Anyi ta abyadu a-swiba aswiba l'uzo ẹkutara; ọzoo l'uzo ẹkicha jasụ anyi aghatakota l'alí unu.”
- 18**Ọle eze ndu Edomu yeru iya onu sụ: “Unu ta aghatakwa l'alí anyi; ọ dudu bẹ mu e-gudekwa ogu-echi byapfuta unu ọgu.”
- 19**Ndu Ízurelu sụ iya: “Anyi e-tsoerupho oma oji ghata. Ọ -buru l'anyi nguru mini unu; ọzoo l'ọo iphe-edobe anyi nguru mini unu; anyi apfua unu ugwo iya. Unu haarọ g'anyi gude ọkpa ghata; ọ tọ dukwa iphe ọzo.”
- 20**Ọle eze ndu Edomu bẹ sụru g'ephe ta aghatashị. Ọo ya bụ; ndu Edomu chita ikpoto unwoke pẹ, bụ ndu ọkpehu dọ jepfushia ndu Ízurelu ọgu.
- 21**Ọ buru iya bụ lẹ ndu Edomu ajika gẹ ndu Ízurelu ta aghatashị. Ephe dakọbe shia ibiya ọzo.

Anwuhu Eronu

- 22**Ndu Ízurelu l'ophu wu-lihu lẹ Kadēshi dzebe; jasụ ephe jerwua l'úbvú Họru.
- 23**Ọ buru l'úbvú Họru ono, nọ-kube oke alí Edomu ono bẹ Chipfu nọ sụ Mósisu yẹle Eronu:
- 24**“Eronu bẹ abya anwuhu lapfu ndiche ya pẹ. O too jerwudu alí ono, mu nuru ndu Ízurelu ono; kele unu kwefuru ike l'ekemu, mu turu lẹ ke mini Meriba.
- 25**Duta Eronu yẹle Eleyaza, bụ nwa iya g'unu nyihu eli úbvú Họru;
- 26**I'i yeshia Eronu uwe iya woru yee Eleyaza, bụ nwa iya; noo kele Eronu a-nodu l'eka ono nwuhu lapfu ndiche ya pẹ.”
- 27**Mósisu mee iphe, Chipfu sụru g'o mee. Ndu Ízurelu nọdu ele pẹ ẹnya; ephe nyihu eli úbvú Họru ono.
- 28**Mósisu yeshia Eronu uwe iya woru yee Eleyaza, bụ nwa iya. Eronu nwuhu l'eli úbvú l'eka ono. Mósisu yẹle Eleyaza shi l'eli úbvú ono nyizeta.
- 29**Ndu Ízurelu l'ophu humaephe lẹ Eronu bẹ nwuhwaru nụ; iphe, bụ ndu Ízurelu l'ophu rakota ẹkwa iya ukporo abalí l'abalí iri.

Ọgú 21

Ndu Ízurèlu alwu-kpe ndu Aradu

¹O be teke onye Kénanu, bu eze ndu Aradu; mbu onye ono, bu l'echiegu ndohali ono numaru le ndu Ízurèlu be shi l'uzo Atarimu abya; o je etsoo ndu Ízurèlu ogo; kputa ndu ophu o kputaru le ndzu.

²Ndu Ízurèlu ribuaru Chipfu nte su: “O -buru l'ii-woru ndu-a yee anyi l'eka be anyi e-woru mkpukpu phe g'o ha mebyishikota.”

³Chipfu ngaberu ndu Ízurèlu nchi l'olu; bya eworu ndu Kénanu ye phe l'eka. Ephe mee ndu ono; me mkpukpu phe omeliwe; mbu ephe bukotaru mkpurupyata. Oo ya bu; e kuahaa eka ono Homa, bu iya bu “mkpurupyata” .

Agwo, e meru l'ope

⁴Ndu Ízurèlu bya eshi l'ubvu Horu tugbua; ephe tsoru uzo, laru Eze-enyimu Uswe-uswe; k'ophu ephe e-shi nno jee ali Edomu mgburugburu. Ephe jenyaa l'uzo ono; ophu ephe aduhedu ike takota nshi.

⁵Ephe wata epfutoshi Chileke yele Mosisu su: “? Bu gunu kparu iphe, unu dufutaru anyi le Ijiputu bya awushi l'echiegu-a g'anyi nwushihu? Eka nri ta adudu! Ophu mini adudu iya! Njo nri-a, anyi tsoru eriphe-a be tuhuakwaru anyi ayi!”

⁶Tobudu iya bu; Chipfu bya achiru ejo agwo yeru ndu Ízurèlu ono. Agwo ono wata phe atagbushi. O tagbua ndu dukpoo igwerigwe.

⁷Ndu Ízurèlu byapfuta Mosisu bya asu iya: “Anyi mewaru iphe-eji; kele anyi pfutoshiwaru Chipfu; waa gubedua. Pfunuru nu Chipfu; k'ophu oo-wofuru anyi agwo ono.” Oo ya bu; Mosisu bya eworu opfu ehuru ndu Ízurèlu ono pfuru nu Chipfu.

⁸Chipfu su Mosisu: “Meta ejo agwo dobe l'eli itso lanu; k'ophu bu onye agwo pho - taru eru; l'o lee ya enya; dzuru ndzu.”

⁹Oo ya bu; Mosisu gude onyirubvu meta agwo bya atukobe iya l'eli itso lanu. O nodu abujeru; onye agwo taru; o -lewa enya l'agwo ono, e meru l'ope ono; l'oo-dzuru ndzu.

Ndu Ízurèlu eje ala Mowabu

¹⁰Ndu Ízurèlu bya atugbua; rwua Obotu; ephe kpobe ulo-ekwa phe.

¹¹Ephe gbete le Obotu tugbua; je akpobe ulo-ekwa phe le Iye-Abarimu l'echiegu ono, no chebe iphu le Mowabu l'uzo enyanwu-awawa ono.

¹²Ephe shi l'eka ono tugbua bya erwua nsuda Zeredu; bya akpobe ulo-ekwa phe l'eka ono.

¹³Ephe shikwapho l'eka ono tugbua je akpobe ulo-ekwa phe l'azu enyimu Anonuazu iya ophu; eka ono, no l'echiegu, no kpaa l'oke ali ndu Amoru; noo kele oo enyimu Anonu bu oke ali ndu Mowabu; mbu nokaharu ndu Mowabu ephe le ndu Amoru.

¹⁴Oo ya meru g'o gude e pfua l'ekwo, e deru k'ogù, Chipfu lwuru su: “Mkpukpu Wahebu ono, du le Sufa; yele nsuda nsuda enyimu Anonu;

¹⁵mẹ lẹ mkpọ-ze mkpọ-ze ono, du lẹ nsuda nsuda, nọ je akpaa lẹ mkpukpu Aru; bya anọdu nno jasụ l'oke alị ndu Mówabu.”

¹⁶Ẹphe gbalihu l'ẹka ono kwaseru jerwua Biye, bu iya bu wẹlu ono, Chipfu sụru Mósisi: “Chikobe ndu Ízurelu l'ẹka lanu ge mu nu phe mini g'ẹphe nḡa.”

¹⁷Tọbudu iya bu; ndu Ízurelu gụa ebvu-a sụ: “Nwufuta mini; gube wẹlu! G'a guru ebvu nu iya.

¹⁸Oo ndu-ishi bvuru wẹlu ono; mbụ l'ọo ndu a maru ẹpha phe lẹ Ízurelu be turu iya nu. O buru mgboro ndu eze; me mgboro ndu a maru ẹpha phe be ẹphe gude bvua ya.” Tọbudu iya bu; ẹphe shi l'echiegu jeshia Matana;

¹⁹shi lẹ Matana lufu lẹ Nahalelu; shi lẹ Nahalelu lufu lẹ Bamotu;

²⁰shi lẹ Bamotu lufu lẹ nsuda, nọ l'alị Mówabu lẹ mgboru úbvú Pisiga, bu ẹka aagbeje ele alị, dabyiru mgbegere.

Ízurelu alwụ-kpe Sihonu, bu eze ndu Amoru

(Dit 2:26-37)

²¹Tọbudu iya bu; ndu Ízurelu zia ozi g'e je zia Sihonu, bu eze ndu Amoru sụ:

²²“G'anyi ghatanu l'alị unu. Anyi ta aswibakwa l'egu unu; ophu anyi ta aswibadu l'opfu-vayinu unu. Ophu o dudu wẹlu unu, anyi bya l'e-kuta mini nḡa; ọo ẹpho oma oji be anyi e-tsoru jasụ anyi aghatagbua l'alị unu.”

²³Obenu lẹ Sihonu te ekwedu ge ndu Ízurelu ghata l'alị iya. O chikobe ndu nkiya g'ẹphe ha; ẹphe jepfushia ndu Ízurelu ọgu l'echiegu. Ẹphe rwuepho mkpukpu Jiahazu; ẹphe datso ndu Ízurelu ọgu l'ẹka ono.

²⁴Ndu Ízurelu gude ọgu-echi sụa phe pyaapya; nata phe alị phe ono; shita l'enyimu Anonu je akpaa l'enyimu Jiaboku; jeyewaruro l'alị ndu Amonu; oke alị ndu Amonu be a kpuru igbulọ mgburugburu; o shihu ike.

²⁵Ndu Ízurelu lwutakota mkpukpu ndu Amoru g'o ha; buchikota iya; lwutachaa mkpukpu Heshibonu; me mkpukpu, nọ-pheru iya mgburugburu.

²⁶Heshibonu be bu mkpukpu Sihonu, eze ndu Amoru. Yele onye shi buru eze ndu Mówabu lwujeru ọgu; Sihonu lwutakota alị iya je akpaa l'enyimu Anonu.

²⁷Oo ya meru g'o gude ndu àkàkà ebvu nọdu aguje sụ: “Bya mkpukpu Heshibonu; g'a kpụ-phu iya azụ; mbụ g'a kpụ-phu mkpukpu Sihonu azụ; kpua ya g'o shihu ike.

²⁸Noo kele ọku shi lẹ Heshibonu kpufu; mbụ l'ire-ọku shi lẹ mkpukpu Sihonu kpufu. O tsuwaru mkpukpu Aru ke ndu Mówabu; mbụ ndu nwe úbvú, dugbaa lẹ mgboru enyimu Anonu.

²⁹Nshio unube ndu Mówabu! E mebyishiwaru unu; unube ndu anọduje agwa agwa Kemoshi! Unwegirima unu unwoke be o mewaru; ẹphe gbalakota lashia alị ọzo. Unwegirima unu unwanyi be o mewaru; ẹphe buwaru ndu a kpuru lẹ ndzụ nu Sihonu, bu eze ndu Amoru.

³⁰Anyi kwatsuwaru phe. Mkpukpu Heshibonu buwaa mkpurupyata je akpaa le mkpukpu Dibonu. Anyi gwewaru phe arakabya jasu le mkpukpu Nofa; mbu je akpaa le mkpukpu Medeba.”

Ízurelu alwu-kpe Ogu, bu eze Beshanu

(Dit 3:1-11)

³¹Tobudu iya bu; ndu Ízurelu buru l'ali ndu Amoru.

³²Mosisu bya ezia ndu e-je anwua ngge le mkpukpu Jiaza; ephe jechaephe; ndu Ízurelu je alwua mkpukpu, du iya nu; chikashia ndu Amoru, shi buru l'eka ono.

³³Oo ya bu; ndu Ízurelu ghakobe shia uzo ophu shiru jeshia ali Beshanu. Ogu, bu eze ndu Beshanu chita ndu nkiya g'ephe ha jepfushia phe ugu le mkpukpu Edereyi.

³⁴Chipfu su Mosisu: “Ta tsukwa iya ebvu; noo kele mu wowaru iya ye ngu l'eka; me ndu nkiya; waa ali iya. Mekwaa ya iphe, i meru Sihonu, bu eze, bu le Heshibonu buru onye-ishi ndu Amoru.”

³⁵No iya; ndu Ízurelu gbua Ogu; gbushia unwegirima iya; me ndu nkiya g'ephe ha; k'ophu bu l'o to dudu onye phoduru nu l'ime phe. Ndu Ízurelu nata ali iya nworu.

Ógú 22

Belaku ezi g'e je ekua Belamu

¹Ndu Ízurelu bya atugbua jerwua phorokoto ali ndu Mowabu; ephe kpobe ulo-ekwa phe l'aguga enyimu Jiordanu, no chebe iphu le mkpukpu Jieriko.

²Belaku nwa Zipo huma iphemiphe, ndu Ízurelu meru ndu Amoru.

³Ndzu-agugu rwuta ndu Mowabu kele ndu Ízurelu du igwerigwe. Ndzu ndu Ízurelu gushiahaa ndu Mowabu ike.

⁴Ndu Mowabu jepfu ndu bu ogerenya ndu Midiyanu je asu phe: “Nta be ikpoto ndu Ízurelu-a a-tuko iphe, bu ndu gbaru anyi mgburugburu lwukota g'eswi, atukoje eswa, no l'egu lwukota-a.” Teke ono be bu Belaku nwa Zipo be bu eze ndu Mowabu.

⁵O bya ezia g'e je ekua Belamu nwa Beyo, bu onye no le mkpukpu Peto l'ali Amawu, du le mgboru enyimu Yufuretisu. Iphe, Belaku ziru iya bu: “O nweru ndu shi l'ali Ijiputu futa; bya atuko mgboko l'ophu dzuru. Nta-a be ephe noakwa mu le mgboru.

⁶Iphe, mu arwo ngu nta-a bukwa gi bya atuaru mu ndu ono onu; noo kele ephe ka mu okpehu. ? A maru; mu alwu-kpe phe; chia phe l'ali-a? Noo kele mu maru l'onye i goru onu-oma nu be buwaa onye a goru onu-oma nu; onye i turu onu buwaru onye a turu onu.”

⁷Oo ya bu; ndu bu ogerenya ndu Mowabu; me ndu bu ogerenya ndu Midiyanu gude ugwo, aapfuje g'a gbaa eja tugbua jepfushia Belamu; je ezia ya ozi, Belaku ziru iya ono.

⁸Belamu su phe: “Unu kwaa l'eka-a l'enyashi-a k'ophu mu a-karu unu iphe, Chipfu e-pfuru yeru mu.” Oo ya bu; Belamu yele ndu-ishi Mowabu ono tuko nodu.

- ⁹Chileke bya abyapfuta Belamu bya ajia ya su: “? Bu ndu ole be gu l'ephe no ono?”
- ¹⁰Belamu su Chileke: “o kwa Belaku nwa Zipo, bu eze ndu Mowabu be ziru phe ozi g'ephe bya asu mu
- ¹¹I'o nweru ndu shi l'ali Ijiputu futa bya atuko mgboko l'ophu dzuru. L'oo ge mu bya aturu iya ndu ono onu; g'a maru ? Ya a-lwu-kpee phe? chishia phe l'ali phe.”
- ¹²Chileke su Belamu: “Te etsokwa phe je; ta tukwa ndu ono onu; kele ephe bukwa ndu a goru onu-oma nu.”
- ¹³O -rwua l'utsu iya; Belamu futa bya epfuaru ndu-ishi ono, ejeru Belaku ozi; su phe: “Unu lashia ali unu le Chipfu te ekwedu ge mu tsoru unu je.”
- ¹⁴Oo ya bu; ndu-ishi Mowabu ono tugbua lashia je asu Belaku le Belamu jikakwaru le ya te etsoduru phe.
- ¹⁵Belaku bya ezikwaa ndu-ishi ozo, kaba igwerigwe; mbu ndu a ka akwabeg ubvu eme le ndu ke mbu pho.
- ¹⁶Ephe byapfuta Belamu bya asu iya: “Waa iphe, Belaku nwa Zipo pfuru baa: ‘Jiko g'o to dukwa iphe, ii-kwe g'o kposhia ngu abya ibe mu.
- ¹⁷Noo kele mu a-kwabeg ngu ubvu, paru aka; bya emeeru ngu iphe, i suru ge mu meeru ngu. Jiko byanu aturu mu ndu-a onu.’ “
- ¹⁸Belamu su ndu-ozu Belaku ono: “O -betakpo Belaku je a-nu mu ulo iya ono, mkpola-ododo waa mkpola-ochaa jiru ejiji ono; be mu te emeghatadu iphe, Chipfu, bu Chileke mu pfuru. Mu te ewofudu iya iphe; ophu mu te eyekwadu iya iphe.
- ¹⁹Jiko unu kwakwaapho akwakwa l'eka-a l'enyashi-a ge mu maru me o -nweru iphe, Chipfu e-pfubaa yeru mu.”
- ²⁰Chileke bya abyapfuta Belamu l'enyashi bya asu iya: “O -buru l'oo oku be ndu-a byaru ngu ekuku; gbalihu tsoru phe; ole oo iphe, mu suru g'i mee be ii-me kpoloko.”

Nkapfu-igara Belamu epfu opfu

- ²¹Belamu bya agbalihu l'utsu dozia nkapfu-igara iya tsoru ndu-ishi Mowabu ono; ephe tugbua.
- ²²Ole ehu ghuru Chileke egu shii g'o tugburu jeshia ono. Ojozi Chipfu je apfuru kwachia ya uzo. Teke ono be Belamu no l'eli nkapfu-igara iya agba eje; yele ndu-ozu iya umadzu labo swiru.
- ²³Nkapfu-igara ono humaepho ojozi Chipfu ono g'o pfuru l'uzo; mifuta ogu-echi iya gude l'eka; o haa uzo swiba l'egbudu. Belamu chiahaa nkapfu-igara ono iphe g'o gozia ya g'o laphu azu l'uzo.
- ²⁴Ojozi Chipfu ono je apfuru l'owere uzo, no le mgbaka opfu-vayinu labo, igbulu nochaa ibekboebo.

²⁵Tobudu iya bu; nkapfu-igara ono humaeopho ojozi Chipfu ono; o je akwaa onwiya l'igbulo ono; woru Belamu okpa hua l'igbulo ono. Belamu chikwaa ya iphe ozo.

²⁶Ojozi Chipfu ono bya atugbukwa je apfuru l'eka du kparagu. Eka ono te nwedu uzo, ee-shi swia ekutara; ozoo swia ekicha.

²⁷Nkapfu-igara ono humaeopho ojozi Chipfu ono; o nmakpuru le mkpula Belamu; ehuhuahaa Belamu egu; o chiahaa ya mgboro iya.

²⁸Chipfu kuhaa nkapfu-igara ono onu; o pfuru opfu yeru Belamu su: “? Bu gunu be mu meru ngu; meru g'o gude i nodu echi mu egube ono? Owaa kweakwa ugbo eto, i chiru mu iphe-a?”

²⁹Belamu su nkapfu-igara ono: “Iphe, mu gude echi ngu egube ono bu l'iime mu sukusuku. O -bu le mu gude ogu-echi l'eka be mu eworu ngu gbua nta-a.”

³⁰Nkapfu-igara ono su Belamu: “? Mu ta abudu nkapfu-igara, i nwe enwenwe too? I shihawaa gbata mu byasu ntanu-a. ? Mu mejewaru ngu egube-a?” Belamu su iya: “Waawaa.”

³¹Noo ya; Chipfu bya emee g'enya sahu Belamu; o huma ojozi Chipfu ono g'o pfuru l'uzo; mifuta ogu-echi iya paru l'eka. Belamu phozeta ishi ephozeta; bya adaa kpube iphu l'ali.

³²Ojozi Chipfu ono jia ya su: “? Bu gunu meru iphe, i chiru nkapfu-igara ngu iphe ugbo eto-a? Mu byaru ge mu kwachia ngu uzo; noo kele uzo, i phoberu be du gbajogbajogbajo l'enya nkemu.

³³Ugbo eto be nkapfu-igara-a humaru mu; bya agbangochaa mu. O -bu l'o to gbango mu; me mu asuwaa ngu pyaapya; haa yebedua g'o nodu ndzu.”

³⁴Belamu su ojozi Chipfu ono: “Mu mewaru iphe-eji; kele mu ta amadu l'i pfuru kwachia mu uzo. Oo ya bu; o -buru l'o to dudu ngu ree ge mu je; mu a-laphu azu.”

³⁵Ojozi Chipfu ono su Belamu: “Tsoruro ndu ono jeshia; ole oo g'o bukwaru iphe, mu suru g'i pfua be ii-pfu kpurumu.” Oo ya bu; Belamu yele ndu-ishi ono, ejeru Belaku ozi ono tgbua; o buru phe ejeje.

Belamu no l'ibe Belaku

³⁶Belaku numaeopho le Belamu abyawaa; o lufu jeshia ya ndzuta le mkpukpu, no l'ali Mowabu l'oke enyimu Anonu; mbu l'ime ime eka oke ali ono beru.

³⁷Belaku su Belamu: “Mu ziru ozi, du oku-oku g'a bya ekua ngu g'i bya. ? Buhunu gunu meru iphe, i ti byakebeduru? ? Bu le mu ta adudu ike akwabegun ubvu too?”

³⁸Belamu su Belaku: “O du ree; mu byawaru. Ole o bu; ? o dahunuru iphe, mu adu ike epfu; abuedupho opfu, Chileke yeru mu l'onu ge mu pfua.”

³⁹Oo ya bu; Belamu tsoru Belaku; ephe jeshia Kiriya-Huzotu.

⁴⁰Belaku gbushia eswi me aturu gude gwee ngweja; bya aharu nu Belamu ye ndu-ishi ono, ye ya tuko swiru ono.

Opfu mbu, Belamu nataru l'eka Chipfu

⁴¹O be l'utsu echele iya; Belaku duta Belamu; ephe tugbua jeshia Bamotu-Belu; Belamu gbẹ l'eka ono haru huma ndu Izurelu.

Ōgú 23

¹Belamu su Belaku: “Kpuru mu oru-ngweja uzo esaa. Li kpuru mu oke-eswi esaa; waa ebili esaa.”

²Belaku bya emee ge Belamu pfuru. Belaku ye Belamu gbua oke-eswi; me ebili ono nanu nanu l'oru-ngweja ono.

³Belamu su Belaku: “Puru le mgboru ngweja-akpo-oku ono ge mu kpribeeshikwaru. G'a maru; ? Chipfu abyapfuta mu? Iphe, bukpo iphe, o goshiru mu be mu a-koru ngu-a.” O tugbua jeshia l'eli nwubvu, adudu iphe, du iya nu.

⁴Chileke byapfuta Belamu. Belamu su Chileke: “Mu doziwaru oru-ngweja uzo esaa; mu gbuwa oke-eswi ye ebili nanu nanu l'oru-ngweja ono ephe n'esaa.”

⁵Tobudu iya bu; Chipfu ye Belamu opfu l'onu su iya: “Laphu azu jepfu Belaku je ezia ya ozi-a.”

⁶O jefpushia Belaku; bya ahuma iya go pfuru le mgboru ngweja-akpo-oku ono; ye ndu-ishi Mowabu gephe ha.

⁷Belamu pfuaha su: “Belaku be byaru eduta mu l'ali Aramu. Eze ndu Mowabu bya eduta mu l'ubvu ubvu uzo enyanwu-awawa. O suru ge mu bya aturu iya unwu Jekopu onu; ge mu bya epfubya unwu Izurelu.

⁸? Denu ge mu e-shi bya eworu onu tu ndu Chileke atuduru onu? ? Denu ge mu e-shi pfubya ndu Chipfu te epfubiduru?

⁹Oo l'eli eze mkpuma be mu anoduje huma phe. O buru l'eli ubvu be mu anoduje ele phe enya; mbu ndu ono, bu iche ono, adudu ndu ephe l'ephe buru eghirigha ono. Ephe ta agujeduru onwophe yeru ohozo.

¹⁰? Bu onye be a-du ike guta unwu Jekopu l'ogu; mbu ndu ha g'urwuku, no l'ali. Mbu-a; ? bu onye a-du ike guta nkeru-eno unwu Izurelu l'ogu? Ge mu nwuhukwa anwuhu onye pfuberekoto! Ge mu lakwaa ge ndu pfuberekoto laru!”

¹¹Belaku su Belamu: “? Bu gunu be i meru mu egube ono? Mu suru ngu gi bya aturu ndu ohogu mu onu; o gbẹ buru onu-oma be i goru nu phe!”

¹²Belamu su: “? Bu ge mu te epfushi iphe, Chipfu yeru mu l'onu ge mu pfua?”

Opfu k'ebu, Belamu nataru l'eka Chipfu

¹³Belaku su Belamu: “Tsoru mu g'anyi je l'eka ozo, ii-nodu huma phe. Oo aharu be ii-haru phe huma; i ti huma-gbudu phe gephe ha. Gbe l'eka ono taru mu phe onu.”

14Belaku duta Belamu; ephe jeshia l'egu mkpukpu Zofimu, no l'eli ubvu Pisiga; o kpua oru-ngweja uzo esaa. Ephe gbushia oke-eswi yele ebili nanu nanu l'oru-ngweja ono.

15Belamu su Belaku: “Pfuokwaru le mgboru ngweja-akpo-oku ono ge mu jepfu Chipfu l'eka pho.”

16Chipfu byapfuta Belamu; bya eye iya opfu l'onu su iya: “Jepfu Belaku ozo je ezia ya ozi-a.”

17Belamu bya ejepfu Belaku; huma iya g'o pfuru le mgboru ngweja-akpo-oku ono; yele ndu-ishi Mowabu, yee ya tuko nodu. Belaku su Belamu: “? Bu gunu be Chipfu pfuru?”

18Belamu pfushiahaa su: “Gube Belaku; gbalihu agbalihu ngabe nchi! Numa iphe, mu epfu; gube nwa Zipo.

19Chileke ta abukwa nemadzu; k'opfu oo-bya adzuaha uka. Ophu o budu nwa ndiphe; ke g'o gbanwee uche iya. ? O pfujewaru opfu; ophu o meduru g'o pfuru? ? O kwejeru ukwe-iphe; g'o to medzu ukwe-iphe obu?

20Su-a; ekemu, mu nataru bukwa ge mu goru ndu ono onu-oma. Chileke goru onu-oma nu phe. Ophu mu ta adukwa ike agbanwe iya.

21O to dudu ejo-iphe, e levuru l'ehu unwu Jiekopu. Ophu o dudu iphe, ta adudu ree, o humaru l'ehu unwu Izurelu. Chipfu, bu Chileke phe swiru phe okpobe eswiru. Ephe anoduje atu uzu l'o bu eze phe.

22Chileke be dufutaru phe l'ali Ijiputu; bya emee phe; ephe nweru okpehu g'atsu.

23A ta abyadu egude oswe keta unwu Jiekopu. Ophu a byadu e-shi l'omamanshi mekata unwu Izurelu. Nta-a be ee-pfu opfu ehunwu Jiekopu; pfua opfu ehunwu Izurelu su: ‘Lewaro iphe, Chileke megbaberu!’

24Su-a; ndu Izurelu angu-lihuje ge ne oduma. Ephe anoduje ebu nggada g'oduma; mbu oduma, ta azejedu azee jasunwu l'o labushia anu eriri iya; mbu jasunwu l'o ngua mee-iphe, o guderu.”

25Oo ya bu; Belaku su Belamu: “Ta atuekwa phe onu ilile; ophu i goekwaru phe onu-oma ililekpo!”

26Belamu su Belaku: “? Mu te epfuduru ngu l'oo iphe, Chipfu pfuru be mu e-me?”

Opfu k'eto, Belamu nataru l'eka Chipfu

27Tobudu iya bu; Belaku su Belamu: “Bya ge mu duru ngu je eka ozo. ? G'a maru odu Chileke ree g'i gb'e l'eka ono taru mu phe onu?”

28Belaku duta Belamu; ephe nyihu ononu ubvu Peyo; mbu ubvu ono, no chebe iphu l'ali, dabyiru mgbegere.

²⁹Belamu sù Belaku: “Kpàaru mu òru-ngweja ụzo ẹsaa l'ẹka-a; l'ì kpàtaru mu oke-eswi ẹsaa waa ebili ẹsaa.”

³⁰Belaku mee ya gẹ Belamu sùru g'o mee ya. Ẹphe gbua oke-eswi ono yẹle ebili ono nanụ nanụ l'òru-ngweja ono.

Ọgú 24

¹Belamu bya ahumaepho l'iphe, dù Chipfu ree bụ g'a gòru ònu-òma nù ndu Ízurelu; òphu o to jeèduru l'ajì ẹgube oojejhawa. Iphe, o meru bụ l'o woru iphu ghaa l'ụzo echiegu.

²Belamu bya apalia ẹnya imeli hụma ndu Ízurelu g'ẹphe kpòbegbaaru ụlo-ẹkwa phe l'ipfu l'ipfu. Unme Chileke bya iya l'ẹhu;

³o pfushiahaa sù: “Waa iphe, Belamu nwa Beyo epfu. O kwa opfu, onye ono, e meru; ẹnya sahu ono epfu.

⁴Opfu, onye anumaje opfu, shi l'ònu Chileke epfu; mbụ onye ono, ahumaje iphe, Okalibe-kangokotaru-nụ egoshi; daa kpurumu kpupyabẹ iphu; onye ono, e meru; ẹnya dù sarimu ono.

⁵Ẹgube g'ụlo-ẹkwa ngu amabe mma; gube Jiékpò; mbụ ẹka gube Ízurelu bukpo ebubu!

⁶Oo gẹ nsuda nsuda aduje-a bụ g'ò sùsaru asusa. O dù gẹ mgbabu, a gbaru l'aguga ẹnyimu. O dù g'oshi alowe, Chipfu yeru l'onwiya; bya adụ g'oshi sida, bvuru l'aguga ẹnyimu.

⁷Mini e-shije l'ite-mini Ízurelu asoshihu asoshihu. Oshilokpa phe bẹ e-nweru mini nweru k'etsutsu iya. Eze phe bẹ a-ka eze Agagu shii. Alì-eze phe bẹ aa-pali eli.

⁸Chileke dufutaru phe l'alì Ijiputu; bya emee phe; ẹphe nweru okpehu g'atsụ. Ẹphe alwucha ohamoha, ẹphe dù ashi; mbụ kupyashia okpu phe yogiri yogiri. Ẹphe e-gude arwa phe nmafushia phe ẹpho.

⁹Ízurelu bẹ nmakpuru anmakpuru; bya azẹe l'alì g'oduma. Ẹphe dù gẹ ne oduma; ? bụ onye a-dù ike kpatsu phe? G'iphe, bụ ndu gòru unwu Ízurelu ònu-òma bukwaru ndu a gòru ònu-òma nù. G'iphe, bụ ndu tũru unu ònu bukwaru ndu a tũru ònu.”

¹⁰Tòbudu iya bụ; Belamu mee; ẹhu ghushiaha Belaku egbu ike. O kua ẹka kpa; bya asù Belamu: “Nta-a bẹ mu kuru ngu g'ì bya atàaru mu ndu ohogu ònu; o bụ-chiaru ònu-òma bẹ ì gòcharu nù phe ugbo ẹto-a.

¹¹Ngwa; keta oso tũgbua lashia ibe ngu ẹgwegwa! Mu shi rìà kẹ gẹ mu kwabẹ ngu ùbvù, parụ ẹka; obenu lẹ Chipfu bẹ nafuwaru ngu ùbvù obu.”

¹²Belamu sù Belaku: “? Mu te epfuduru iya ndu i ziru g'ẹphe bya ekua mu sù:

¹³Obetakpoo Belaku nù mu ụlo iya ono, mkpòla-ododo mẹ mkpòla-ochaa jiru pyimu ono bẹ mu te emeghatakwa iphe, Chipfu sùru gẹ mu mee; òphu mu egudekwa uche

k'onwomu eme iphe, dụ ree; ọzoo iphe, dụ eji. Ọo ẹpho iphe, Chipfu pfuru bẹ mu e-pfu.'

¹⁴Nta-a bẹ mu alawa; alapfu ndibe mu. Ọle-a; byakwa gẹ mu nmaaru ngu ọkwa; gẹ mu pfuaru ngu iphe, ndu-a e-mechaa mee ndibe unu lẹ teke dụ l'iphu."

Opfu k'ẹno, Belamu nataru l'ẹka Chipfu

¹⁵Ọo ya bụ; Belamu pfuahaa sụ: "Waa iphe, Belamu nwa Beyo epfu. Ọ kwa opfu, onye ono, e meru; ẹnya sahu ono epfu.

¹⁶Opfu, onye anumaje opfu, shi l'onu Chileke epfu; mbu onye ono, maru iphe, shi Okalibe-kakota-shii l'ẹka; onye ono, anumaje iphe, Okalibe-kangokotaru-nu egoshi; daa kpurumu kpupyabe iphu; onye ono, e meru; ẹnya dụ sarimu ono.

¹⁷Mu humaru onye ono; ọle ọ to budu nta-a. Mu ele onye obu ẹnya; ọle ọ to nodu ntse. Kpokpode bẹ e-shi l'onulo Jiékọpu futa. Mgboro-eze bẹ a-futa lẹ Ízurelu. Mówabu bẹ ọo-tuko egedegede onu-iphu gwee arakabya. L'ọo-tuko unwu Sheti l'ophu mebyishikota.

¹⁸Ndu Edomu bẹ aa-lwuta l'ogu. Nokwapho g'aa-lwuta ndu Siye, bụ ndu ohogu Ízurelu. Obenu lẹ ndu Ízurelu bẹ a-nodu aka ike eje.

¹⁹Onye-ishi bẹ e-shi l'onulo Jiékọpu futa; bya emebyishia ndu ophu phoduru nu lẹ mkpukpu ono."

²⁰Belamu bya elee ndu Amaleku ẹnya bya asu: "Ndu Amaleku bẹ bụ ivuzo l'echilabo ohamoha; obenu l'ẹphe a-buru mkpurupyata l'ikpazu."

²¹Ọ bya elee ndu Kenu ẹnya bya asu: "Eka unube ndu Kenu bu ebubu bẹ e meru; o shihu kẹ dungudungu. Nwamkpu, unu turu bẹ unu turu l'eli mkpuma.

²²Ọle unube ndu Kenu bẹ aa-lwukwa alwulwu. Ndu Asiriya bẹ a-kpuko unu lẹ ndzu."

²³Tobudu iya bụ; o pfua sụ: "Oowaa! ? Bụ onye a-nodu ndzu lẹ teke Chileke a-nodu eme iphe ono?

²⁴Ugbo-mini e-shi aguga ẹnyimu l'alị Kitimu bya; bya emekpaa ndu Asiriya yele ndu Eba ẹhu; obenu l'ẹphebedua bẹ a-bukwarupho mkpurupyata."

²⁵Tobudu iya bụ; Belamu pfuchaa nno bya agbalihu; ọ buru iya ala ibe iya; Belaku tugbukwapho lashia.

Ọgú 25

Ndu Mówabu eduswe ndu Ízurelu ọzo

¹A nonyaepho lẹ teke ono, ndu Ízurelu bu lẹ nsuda Shitimu ono; ẹphe l'unwada ndu Mówabu wata apharwushi onwophe.

²Unwanyi Mówabu ono wata eku ndu Ízurelu ono g'ẹphe tsoru phe je agwa agwa phe. Ndu Ízurelu nodu erije iphe, e shiru l'agwa ono; bya abaarụ agwa ndu Mówabu ono ẹja.

³No iya; ndu Ízurelu woru onwophe tũgbabe l'agwa Balu-Peyo. Eshi nno; ndu Ízurelu kpatsu Chipfu ehu-eghu.

⁴Chipfu bya asu Mosisu: “Chitakota ndu-ishi ndu Ízurelu l'ophu megbushia l'ataphu mu; gbaa phe l'anwu; k'ophu mu e-wofu ehu-eghu mu, ata pfupfufu l'ehu ndu Ízurelu.”

⁵Oo ya bu; Mosisu su ndu ogbo-ikpe ndu Ízurelu: “G'onyenonu le g'unu ha l'ehu l'ehu gbushia ndu nkiya, bu ndu woru onwophe tũgbabe l'agwa Balu-Peyo.”

⁶Ndu Ízurelu dokwaduru-a l'onu ulo-ekwa-ndzukọ aragbaa ekwa. A bya ele enya; onye lanu l'unwu Ízurelu duwaru nwanyi Midiyanu bahu ibe iya l'eka Mosisu phe tukoru ele iya enya; me ndu Ízurelu l'ophu.

⁷Finehasu nwa Eleyaza; mbu nwanwa Eronu, bu onye uke Chileke hũmaepho iphe ono; o kwoliu l'eka ono, igwe-oha ono kuru ono; je aduchata arwa iya.

⁸O tsopyabe nwoke Ízurelu ono bahu l'ime ulo iya; je eworu arwa ono nmaa ya l'eli nwanyi ono; o shi l'eka a nmaru iya nwoke foo ke nwanyi ono l'epho; nkephe bu. Oo ya bu; ejo iphe-ememe ono haa ndu Ízurelu.

⁹Ole ndu ejo iphe-ememe ono gburu egbugbu be du ukporo unu nemadzu ugbo eto.

¹⁰Chipfu su Mosisu:

¹¹“Finehasu nwa Eleyaza; mbu nwanwa Eronu, bu onye uke Chileke be mewaru ophu ehu-eghu ndu Ízurelu adueduru mu. Noo kele o wotaru okophoo, mu gege ekoru ndu Ízurelu kooru phe; shi nno mee ophu mu egudeedu okophoo mu ono mee ge ndu Ízurelu laa l'iyi.

¹²Oo ya bu le-a; su iya le mu l'iya nowaa l'ogbandzu ehu-guu.

¹³Ogbandzu ono a-buru nkiya waa k'awa iya phe, bu ndu ophu etso iya etsotso. Ogbandzu ono be bu l'ephe a-buru uke jaswaruroya; kele o gude iswi ehu Chileke iya koo okophoo; mbu shi nno pfua ugwo iphe-eji, ndu Ízurelu meru.”

¹⁴Epha nwoke Ízurelu ono, e gburu yele nwanyi Midiyanu ono be bu Zimiri nwa Salu. Nna iya, bu Salu be bu onye-ishi l'enya-unuphu, no l'ipfu Simiyonu.

¹⁵Epha ke nwanyi Midiyanu ono, e gbukwarupho ono bu Kozubi nwada Zuru. Nna iya, bu Zuru be bu onye-ishi l'enya-unuphu ndu Midiyanu.

¹⁶Chipfu bya asu Mosisu:

¹⁷“Buru ohogu ndu Midiyanu; woru phe gbushia.

¹⁸Noo kele ephe gude eregede buru ohogu unu; deru unu ye l'agwa agwa Balu-Peyo ono; waa le ke Kozubi, bu nwada onye-ishi ndu Midiyanu; mbu nwune ndu Midiyanu ke nwanyi, bu onye ono, e gburu teke ono, ke Peyo meru; ejo iphe-ememe bya ono.”

Ọgú 26

Agú ndu Ízurelu ogu k'ugbo labo

- ¹O be g'ẹjo iphe-ememe ono lachaaru; Chipfu bya epfuru Mósísu yẹle Eleyaza nwa Erọnu, bụ onye uke Chileke sụ:
- ²“Unu gụa ndu Ízurèlu l'ophu ọgu l'ẹnya-unuphu l'ẹnya-unuphu; e -shi ịe ndu nọwaru ụkporo apha kwasẹru; mbụ ndu sụwaru eje ọgu ịe Ízurèlu.”
- ³O bụru ịe baswaa alị Mówabu, nọ l'agụga ẹnyimu Jiódanu ịe mgboru mkpụkpu Jieriko bẹ Mósísu yẹle Eleyaza, bụ onye uke Chileke nọ pfiaru ndu Ízurèlu sụ:
- ⁴“Unu gụa ndu Ízurèlu l'ophu ọgu; e -shi ịe ndu nọwaru ụkporo apha kwasẹru; mbụ ẹgube ono, Chipfu tūru iya Mósísu l'ekemu.” Waa ndu Ízurèlu, shi l'alị Ijiputu futa baa:
- ⁵Ndu bụ oshilọkpa Rúbẹnu, bụ ọkpara Ízurèlu bụ: Hanọku, onye metaru ipfu Hanọku; mẹ Palu, onye metaru ipfu Palu;
- ⁶mẹ Hẹzuronu, onye metaru ipfu Hẹzuronu; mẹ Kami, onye metaru ipfu Kami.
- ⁷Ipfu ono g'ẹphe ha tukuru bụru oshilọkpa Rúbẹnu. Ndu ọphu a gụru ọgu bẹ dụ ụkporo unu nemadzu ugbo ise l'unu tete l'ụkporo ụmadzu ishii l'ụmadzu iri.
- ⁸Nwa Palu kẹ nwoke bụ Eliyabu.
- ⁹Unwu kẹ Eliyabu unwoke bụru: Nemẹlu; mẹ Detanu; waa Abiramu. Ọo Detanu waa Abiramu-a bẹ a họtajeru g'ẹphe bụru ishi ịe Ízurèlu; ẹphe tsoru ndu kẹ Kora kwefuru Mósísu yẹle Erọnu ike; mbụ teke ono, ẹphe kwefujeru Chipfu ike phọ.
- ¹⁰Alị saa ọnu tuko ẹphe ịe Kora lwekọta; ndu shi etso iya nụ bẹ nwushihuru nụ; mbụ ịe teke ono ọku kegbushijeru ụkporo ụmadzu iri l'ẹbo l'ụmadzu iri phọ. Iphe ono bụru iphe alọ ẹka ịe nchị.
- ¹¹Ọle unwu Kora ta anwushihuduru.
- ¹²Ndu bụ oshilọkpa Simiyọnu l'ipfu l'ipfu phẹ bụ: Nemẹlu, onye metaru ipfu Nemẹlu; mẹ Jiaminu, onye metaru ipfu Jiaminu; mẹ Jiakinu, onye metaru ipfu Jiakinu;
- ¹³mẹ Zera, onye metaru ipfu Zera; mẹ Shawulu, onye metaru ipfu Shawulu.
- ¹⁴Ipfu ono bẹ tukuru bụru oshilọkpa Simiyọnu. Ndu ọphu a gụru ọgu bẹ dụ ụkporo unu nemadzu ugbo labọ l'unu iri l'ise l'ụkporo ụmadzu iri.
- ¹⁵Ndu ọphu bụ oshilọkpa Gadu l'ipfu l'ipfu phẹ bụ: Zefọnu, onye metaru ipfu Zefọnu; mẹ Hagi, onye metaru ipfu Hagi; mẹ Shuni, onye metaru ipfu Shuni;
- ¹⁶mẹ Ozuni, onye metaru ipfu Ozuni; mẹ Eri, onye metaru ipfu Eri;
- ¹⁷mẹ Arodi, onye metaru ipfu Arodi; waa Areli, onye metaru ipfu Areli.
- ¹⁸Ipfu ono bẹ tukuru bụru oshilọkpa Gadu. Ndu ọphu a gụru ọgu bẹ dụ ụkporo unu nemadzu ugbo ise l'unu nemadzu; l'ụmadzu ụkporo ise.
- ¹⁹Jiuda bẹ nwutaru unwoke labọ, ẹpha phẹ bụ Ẹru; waa Ọnanu. Ọle ẹphenebo nwushihuru l'alị Kénanu.

- ²⁰Ndu bụ oshilokpa Jiuda l'ipfu l'ipfu phe bụ: Shela, onye metaru ipfu Shela; me Pérezu, onye metaru ipfu Pérezu; me Zera, onye metaru ipfu Zera.
- ²¹Unwu ke Pérezu bụ: Hezuronu, onye metaru ipfu Hezuronu; waa Hamulu, onye metaru ipfu Hamulu.
- ²²Ipfu ono be tukoru buru oshilokpa Jiuda. Ndu ophu a guru ogu be du ukporo unu nemadzu ugbo tete l'unu iri le nanu l'ukporo umadzu ise.
- ²³Ndu bụ oshilokpa Isaka l'ipfu l'ipfu phe bụ: Tola, onye metaru ipfu Tola; me Puwa, onye metaru ipfu Puwa;
- ²⁴me Jiashubu, onye metaru ipfu Jiashubu; waa Shimuronu, onye metaru ipfu Shimuronu.
- ²⁵Ipfu ono be tukoru buru oshilokpa Isaka. Ndu ophu a guru ogu be du ukporo unu nemadzu ugbo esato l'ukporo umadzu iri l'ise.
- ²⁶Ndu bụ oshilokpa Zebulun l'ipfu l'ipfu phe bụ: Seredu, onye metaru ipfu Seredu; me Elonu, onye metaru ipfu Elonu; waa Jiahulelu, onye metaru ipfu Jiahulelu.
- ²⁷Ipfu ono be tukoru buru oshilokpa Zebulun. Ndu ophu a guru ogu be du ukporo unu nemadzu ugbo esaa l'unu iri le nanu l'ukporo umadzu ise.
- ²⁸Ndu bụ oshilokpa Jiosifu l'ipfu l'ipfu phe bụ: Manase; waa Ifuremu.
- ²⁹Unwu ke Manase bụ: Makiya, onye metaru ipfu Makiya. Makiya bụ nna Giladu. Giladu meta ipfu Giladu.
- ³⁰Unwu Giladu bụ: Iyeza, onye metaru ipfu Iyeza; me Heleku, onye metaru ipfu Heleku;
- ³¹me Asurelu, onye metaru ipfu Asurelu; me Shekemu, onye metaru ipfu Shekemu;
- ³²me Shemida, onye metaru ipfu Shemida; waa Hefa, onye metaru ipfu Hefa.
- ³³Zelofehadu, bu nwa Hefa be ta nwutaduru unwoke. Oo unwanyi be o nwushiru. Epha unwanyi ono, o nwushiru ono bu Mahula; me Nuwa; me Hogula; me Milika; waa Tiza.
- ³⁴Ipfu ono tukoru buru oshilokpa Manase. Ndu ophu a guru ogu du ukporo unu nemadzu ugbo ishii l'unu iri le nanu l'ukporo umadzu iri l'ise.
- ³⁵Unwu ke Ifuremu l'ipfu l'ipfu phe bụ: Shutela, onye metaru ipfu Shutela; me Beka, onye metaru ipfu Beka; waa Tahanu, onye metaru ipfu Tahanu.
- ³⁶Unwu Shutela bu Eranu, onye metaru ipfu Eranu.
- ³⁷Ipfu ono be tukoru buru oshilokpa Ifuremu. Ndu ophu a guru ogu be du ukporo unu nemadzu ugbo eno l'unu nemadzu l'ukporo umadzu ise. Ndu ono be tukoru buru oshilokpa Jiosifu l'ipfu l'ipfu phe.

³⁸Ndu bụ oshilọkpa Benjiaminu bụ: Bela, onye metaru ipfu Bela; mę Ashibelu, onye metaru ipfu Ashibelu; mę Ahiramu, onye metaru ipfu Ahiramu;

³⁹mę Shefufamu, onye metaru ipfu Shefufamu; waa Hufama, onye metaru ipfu Hufamu.

⁴⁰Unwu Bela bụ: Arudu; mę Nemanu. Arudu, bụ iya metaru ipfu Arudu; Nemanu bụ iya metaru ipfu Nemanu.

⁴¹Ndu ono bę tukuru bụru oshilọkpa Benjiaminu l'ipfu l'ipfu phę. Ndu ophu a guru ogu bę dụ ukporo unu nemadzu ugbo ise l'unu umadzu iri l'eno.

⁴²Ndu bụ oshilọkpa Danu l'ipfu l'ipfu phę bụ: Shuhamu, onye metaru ipfu Shuhamu. Ndu ono bę tukuru bụru oshilọkpa Danu l'ipfu l'ipfu phę.

⁴³Ephę tukuru bụru ipfu Shuhamu. Ndu ophu a guru ogu bę dụ ukporo unu nemadzu esato l'unu nemadzu lanu.

⁴⁴Ndu bụ oshilọkpa Asha bụ: Imuna, onye metaru ipfu Imuna; mę Ishivi, onye metaru ipfu Ishivi; waa Beraya, onye metaru ipfu Beraya.

⁴⁵Unwu Beraya bụ: Heba, onye metaru ipfu Heba; waa Malukelu, onye metaru ipfu Malukelu.

⁴⁶O bụru nwa nwanyị lanu bę Asha nwutaru; epha iya bụ Sera.

⁴⁷Ndu ono bę tukuru bụru oshilọkpa Asha. Ndu ophu a guru ogu bę dụ unu ukporo ugbo ishii l'unu iri l'eto l'ukporo umadzu iri.

⁴⁸Ndu bụ oshilọkpa Nafutali l'ipfu l'ipfu phę bụ: Jiahuzeļu, onye metaru ipfu Jiahuzeļu; mę Guni, onye metaru ipfu Guni;

⁴⁹mę Jieza, onye metaru ipfu Jieza; waa Shilemu, onye metaru ipfu Shilemu.

⁵⁰Ndu ono bę tukuru bụru oshilọkpa Nafutali l'ipfu l'ipfu phę. Ndu ophu a guru ogu bę dụ ukporo unu nemadzu ugbo ise l'unu iri l'eto l'ukporo umadzu iri.

⁵¹Noo ya; iphe, ndu Izureļu tukuru dụ bụru ukporo unu nemadzu ugbo ukporo eto l'ukporo unu ugbo iri l'ise l'unu nemadzu eno l'ukporo umadzu ishii l'umadzu iri.

Ndu Izureļu awa alị ono, ephę eje eburu ono

⁵²Chipfu sụ Mosisu:

⁵³“Oo ndu-a bę aa-washiru alị ono g'ọ bụru okiphe, ephę ketaru. Ndu nonu e-keta oke le g'ephe ha teke a guru phę ogu.

⁵⁴Ndu ha shii bę ii-wę alị, ha shii; ndu ophu ha nwanshii; węc phę alị, ha nwanshii. Ndu ophu nonu e-keta oke le g'ephe ha teke a guru phę ogu.

⁵⁵Alị ono bę bụ ido bę aa-tụ gude washia ya. Aa-wa iya l'ipfu l'ipfu; ipfu nonu l'o keta oke iya nkephę.

⁵⁶Ọ bụru ido bẹ aa-tụ gude washịaru ndu ọphu ha shii; mę ndu ọphu ha nwanshii alị ono.”

Agụ eri Lívayi ọgu

⁵⁷Waa oshilọkpa Lívayi baa; waa g'e gude gụa phẹ ọgu l'ipfu l'ipfu: Geshonu, onye metaru ipfu Geshonu; mę Kohatu, onye metaru ipfu Kohatu; waa Merari, onye metaru ipfu Merari.

⁵⁸Ipfu-a bẹ bukwapfo oshilọkpa Lívayi: Ipfu Libuni; mę ipfu Hẹburonu; mę ipfu Mahuli; mę ipfu Mushi; mę ipfu Kora. Kohatu bụ nna Amuramu.

⁵⁹Epha nyee Amaramu bẹ bụ Jiekobedu, bụ nwada Lívayi. Jiokebedu bụ nwa nwanyi, a nwuru Lívayi l'alị Ijiputu. Ndu ọ nwutaru Amuramu bụ Eronu; waa Mosisu; mę Miriyamu. Miriyamu bụru nwune phẹ kę nwanyi.

⁶⁰Eronu bụ nna Nadabu; mę Abihu; mę Eleyaza; waa Itama.

⁶¹Nadabu yẹle Abihu bẹ nwuhuru lẹ teke ephe gude ọku, adudu nsọ kpọru Chipfu ngweja ọku.

⁶²Ndu a guru ọgu l'eri Lívayi; mbụ unwoke phẹ, nọwaru shita l'onwa lanu kwaseru bẹ tukoru dū ukporo unu nemadzu ugbo labo; l'unu umadzu iri l'esaa; l'ukporo umadzu iri. Ọphu a guduru phẹ teke a guru ndu Izurelu ọphuna; kẹle ephe te ketaduru oke l'echilabo ndu Izurelu.

⁶³Ndu ono bẹ bụ ndu Mosisu yẹle Eleyaza, bụ onye uke Chileke guru ọgu; mbụ ndu ono, guru ndu Izurelu ọgu lẹ baswaa alị Mowabu l'aguga enyimu Jiordanu lẹ mgboru Jieriko.

⁶⁴Ndu ono ta adudu g'ephe ha, yi lẹ ndu ọphu Mosisu yẹle Eronu, bụ onye uke Chileke gujeru ọgu teke pho, ephe guru ndu Izurelu ọgu l'echiegu Sayinayi pho.

⁶⁵Noo kẹle Chipfu suru ndu Izurelu ono l'ephe nwuhufutaje l'echiegu ono. Ọ tọ dudu g'ọ ka mma l'oo onye lanu, aphodu nū l'ime ndu ono; a -gufuepho Kalebu nwa Jiefune; yẹle Jioshuwa nwa Nunu.

Ọgú 27

Oke alị unwada Zelofehadu

(Ọgú 36:1-12)

¹Tobudu iya bụ; unwada Zelofehadu bya atuko je apfuru l'onu ulo-ekwa-ndzukọ. Zelofehadu l'onwiya bụ nwa Hefa; Hefa bụru nwa kę Giladu; Giladu bụru nwa kę Makiya; Makiya bụru nwa kę Manase. G'ephe ha bukota oshilọkpa Manase. Manase bụru nwa kę Jiosefu. Epha unwada Zelofehadu ono bụ: Mahula; mę Nuwa; mę Hogula; mę Milika; waa Tiza.

²Unwada Zelofehadu ono bya apfuru l'ataphu Mosisu; waa l'ataphu Eleyaza, bụ onye uke Chileke; mę l'ataphu ndu-ishi; mę l'ataphu ndu Izurelu l'ophu l'onu ulo-ekwa-ndzukọ pfuaha sụ:

³“Nna anyi bẹ nwuhuru l'echiegu. O le o to yikwa le ndu ono, chikoberu onwophe tsoo Chipfu opfu ono; mbu ndu ono, tsoru Kora ono. Nna anyi bẹ bukpoepho iphe-aji, o metaru l'onwiya gburu iya; ophu o nwutaduru nwa nwoke.

⁴? Ee-gude kele nna anyi ta nwutaduru nwa-nwoke; epha iya echihu l'ipfu iya? G'a hekwa anyi oke l'echilabo ndibe nna anyi.”

⁵Oo ya bu; Mosisu wota opfu unwada Zelofehadu ono papfu Chipfu.

⁶Chipfu su Mosisu:

⁷“Unwada Zelofehadu pfuru iphe, gbaru nu. Unu shi l'oke ali ndu nna phe wee phe ali; k'ophu epe e-keta okiphe nna phe.

⁸Pfuaru ndu Izurelu; su phe-a: O -buru le nwoke bẹ nwuhuru nu; ophu o nwutaduru nwa-nwoke; g'e wotaje okiphe, rwuberu iya nu woru nu nwada iya.

⁹O -buru l'onye obu ta nwutafudaru nwa-nwanyi; g'e wotaje okiphe, rwuberu iya nu obu woru nu unwune iya ke nwoke g'o buru iphe phe.

¹⁰Teke obu l'o to nwefuda unwune nwoke; g'e woru okiphe ono, rwuberu iya nu woru nu unwune nna iya phe ke nwoke g'o buru iphe phe.

¹¹O -buru le nna, nwuru onye obu te nwe du unwune nwoke; g'e woru okiphe, rwuberu iya nu obu nu ndu epe l'iya bu okpobe abubu g'o buru iphe phe. Iphe ono bu omelali, a toru okpa iya doberu ndu Izurelu; egube Chipfu turu iya Mosisu l'ekemu.”

Jioshuwa anochi enya Mosisu

(Dit 31:1-8)

¹²Tobudu iya bu; Chipfu su Mosisu: “Nyihu eli ubvu Abarimu-a je anodu humakota ali ono, mu nuru ndu Izurelu ono.

¹³I -humachae ya pho be ii-nwuhu lapfushia ndibe unu; egube ono nwune ngu nwoke, bu Eronu nwuhuru.

¹⁴Iphe, kparu iya nu bu l'unu kwefuru ike l'opfu mu le teke ono, ndu Izurelu gujeru aphu le mgboru mini ono, du l'echiegu Zinu ono. Ophu unu adudu ike dobe mu nso l'iphu phe.” (Mini ono bu mini Meriba, du le Kadashi le mbegu Zinu.)

¹⁵Mosisu su Chipfu:

¹⁶“Ge Chipfu; mbu Chileke ophu gude ndzu onyemonye hota nu onye a-nodu edu ndu Izurelu.

¹⁷Onye e-vutajeru phe uzo l'ejeje me l'alwalwa; mbu onye a-nodu edu phe eje ejeje alwa alwalwa; ge ndibe gube Chipfu ta adushi g'aturu, te enwe du onye eche iya nu.”

¹⁸Oo ya bu; Chipfu su Mosisu: “Duta Jioshuwa nwa Nunu, bu onye Unme ke mube Chipfu bu l'ehu; byabe iya aka l'ishi.

¹⁹Duru iya g'o je apfuru l'atatiphu Eleyaza, bu onye uke Chileke; me l'atatiphu ndu Izurelu l'ophu; g'i nodu l'atatiphu ndu ono woru ozi ono ye iya l'eka.

²⁰Haru ike nkengu ye iya l'eka; k'ophu iphe, bu Izurelu l'ophu a-noduje eme iphe, o suru g'ephe mee.

²¹Ge Jioshuwa pfuru l'ataphu Eleyaza, bu onye uke Chileke. Eleyaza egude ido, urimu jee l'iphu Chipfu je ajia Chipfu g'o maru g'o pfuru opfu ehu iya. O buru iphe, Jioshuwa suru ge ndu Izurelu mee be ephe a-tukoje mee. O -su ge ndu Izurelu tugbua; ephe atugbua; o -su g'ephe bata; yele ephe a-tuko bata.”

²²Mosisu mee ge Chipfu pfuru iya. O duta Jioshuwa pfube l'ataphu Eleyaza, bu onye uke Chileke; me l'ataphu edzudzu-oha Izurelu.

²³Oo ya bu; o byibe Jioshuwa eka l'ishi woru ozi ono ye iya l'eka bu iphe, Chipfu shi l'onu Mosisu pfua.

Ọgú 28

Ngweja, eegweje mbokumboku

(Awu 29:38-46)

¹Chipfu su Mosisu:

²“Turu ekemu nu ndu Izurelu; su phe: Unu leta enya nuje mu ngweja, rwuberu mu nu; mbu nri, e gude egweru mu ngweja; mbu ngweja ono, a kporu oku, mkpo iya du mu ree. Unu nuje mu iya le teke bu orwuberu iya.

³Su phe le-a: ‘Waa ngweja, a kporu oku, unu e-gweje nu Chipfu baa: unwu ebili labo, gbachaaaru apha; ophu adudu eka iphe mebyiru iya. Unu gweje iya mbokumboku; g'o buru ngweja-akpo-oku, unu e-gweje tekenteke.

⁴Unu gbuje ebili lanu l'utsu; unu egbua ebili lanu l'uzenyashi.

⁵Unu yeje iya ngweja-nri gwee; mbu uzo lanu l'ime nkweka ukpokutu ereshi, e keru uzo iri; gwoo le manu, a tsuru l'ikwe; manu e-ji eze ekpemu.

⁶Oo ya bu ngweja-akpo-oku, eegweje mbokumboku, bu iya bu g'e meru iya dobe l'ubvu Sayinayi; mbu ngweja ono, a kporu oku, mkpo iya du Chipfu ree.

⁷Unu -gbua ebili lanu; unu yekobe iya ngweja-mee gwee; mbu mee, jiru nkeru-eno otu-lupfu otumu. O buru l'eka-du-nsa be unu a-gbashijeru Chipfu ngweja-mee ono; mbu mee, shihuru ike.

⁸Unu egbufua ebili lanu l'uzenyashi; yekobekwa iya pho ngweja-nri; waa ngweja-mee egube ono, o du le k'utsu pho. Unu gwee ngweja ono; g'o buru ngweja, a kporu oku, mkpo iya du Chipfu ree.’ “

Ngweja, eegweje l'eswe-atuta-unme

⁹“A -bya l'eswe-atuta-unme; unu gbuje ebili labo, gbachaaaru apha, adudu eka iphe mebyiru iya; gude gwee ngweja. Unu egude uzo labo l'ime nkweka ukpokutu ereshi, e keru uzo iri; gwoo le manu; gude gwee ngweja-nri. Unu yekobe iya ngweja-mee, ayijeru iya nu.

¹⁰Ono bu ngweja-akpo-oku, unu e-gweje l'eswe-atuta-unme; yekwaru ngweja-akpo-oku, eegweje mbokumboku pho; yele ngweja-mee, ayijeru iya nu.”

Ngweja, eegweje l'onwa ophuu

¹¹“Mboku mbu, onwa furu gedegede be unu e-gwejeru Chipfu ngweja-akpo-oku. Unu gudeje unwu oke-eswi labo; waa ebili lanu; me unwu ebili esaa, gbacharu apha, adudu aka iphe mebyiru iya; gude gwee ngweja ono.

¹²Unu -gbua oke-eswi ono nanu be unu e-yekobeje iya ngweja-nri gwee; mbu uzo eto l'ime nkweka ukpokutu ereshi, e keru uzo iri; gwoo le manu. Unu -gbua ebili ono; unu yekobe iya ngweja-nri gwee; mbu uzo labo l'ime nkweka ukpokutu ereshi, e keru uzo iri; gwoo le manu.

¹³Unu -gbua nwa ebili lanu; unu eyekobe iya ngweja-nri gwee; mbu uzo lanu l'ime nkweka ukpokutu ereshi, e keru uzo iri; gwoo le manu. Ono bu ngweja-akpo-oku, mkpo iya du Chipfu ree; mbu ngweja, a kporu oku gweeru Chipfu.

¹⁴Ngweja-mee, a-yijeru iya nu bu: unu -gbua oke-eswi; unu eyekobe iya mee, jiru nkeru-ebo otu-lupfu otumu. O -buru l'oo ebili; unu eyekobe iya mee, jiru nkereto otu-lupfu otumu gwee. Unu -gbua nwa ebili; unu eyekobe iya mee, jiru nkeru-eno otu-lupfu otumu gwee. Noo ke ngweja-akpo-oku, unu e-gweje l'onwa l'onwa; mbu l'onwa, dukota l'ime apha.

¹⁵Unu gbuje mkpi lanu gude gwee ngweja-iphe-eji nu Chipfu; a -gufukwa ngweja-akpo-oku, eegweje mbokumboku; yele ngweja-mee, ayijeru iya nu.”

Obo Ojehata

(Uke 23:5-14)

¹⁶Mboku k'iri l'eno l'onwa mbu be bu obo Ojehata ke Chipfu.

¹⁷Mboku k'iri l'ise l'onwa mbu ono be bu obo-iphe. Ujiku esaa l'ophu be unu a-takotaje buredi, te koduru ekoko.

¹⁸Mboku mbu, unu wataru obo-iphe ono be unu a-noje ndzuko, du nsu. G'o to dukwa ozi, unu e-jeje mboku ono l'ophu.

¹⁹Su-a; unu gweje ngweja-akpo-oku nu Chipfu. Unu gbua unwu oke-eswi labo; waa ebili lanu; me unwu ebili esaa, gbacharu apha, adudu aka iphe mebyiru iya; gude gwee ya.

²⁰Ngweja-nri be unu e-gudeje ukpokutu ereshi, a gworu le manu gwee. Oke-eswi lanu bu nkweka ukpokutu ereshi, e keru uzi iri be unu e-yeje iya uzi lanu gude gwee ya. Teke o bu ebili ono; unu eworu uzo labo l'ime nkweka ukpokutu ereshi, e keru uzo iri; gwoo le manu.

²¹O buru uzo lanu l'ime uzo iri be unu e-gweje l'ishi nwa ebili ono nanu nanu ephe n'esaa.

²²Unu e-gbukwapho mkpi lanu gude gwee ngweja-iphe-eji; shi nno pfua ugwo iphe-eji, unu meru.

²³Unu a-tũkoje ngweja ono gwekõta; yekõbe lẹ ngweja-akpo-õku ono, eegweje l'utsu, bu iya bu ngweja ono, eegweje mbokumboku.

²⁴O buru egube ono be unu a-nõduje egwe ngweja ono mbokumboku abali esaa ono; g'õ buru ngweja-nri, a kporu õku; mkpo iya du Chipfu ree. Unu gweje ngweja ono; yekõbefua lẹ ngweja-akpo-õku ono, unu egweje mbokumboku; me ngweja-meẽ, ayijeru iya nu.

²⁵O -rwua mboku k'esaa; unu anõo ndzuko, du nsõ. G'õ to dukwa ozi, unu e-jeje lẹ mboku ono l'ophu.

Qbo-Idzu

²⁶Ozo bu; o -be mboku, unu abõ õbo-iphe k'akporu-iphe-mbu unu; unu nojee ndzuko, du nsõ. G'õ to dukwa ozi, unu e-jeje mboku ono l'ophu. Mboku ono be unu a-gbaje l'upfu-õha k'õbo Idzu. O buru mboku ono be unu a-nuje Chipfu akporu-iphe õphúú, unu metaru.

²⁷Unu gwee ngweja-akpo-õku; mbu ngweja, mkpo iya du Chipfu ree. Unu gbuje unwu oke-eswi labõ; waa ebili lanu; me unwu-ebili esaa, gbacharu apha; gude gwee ngweja ono.

²⁸Ngweja-nri, ee-yekõbeje l'oke-eswi lanu be bu uto eto l'ime nkweka ukpokutu ereshi, e keru uto iri; gwõo lẹ manu. Teke õ bu ebili; unu yekõbe iya uto labõ l'ime nkweka ukpokutu ereshi, e keru uto iri; gwõo lẹ manu.

²⁹O buru uto lanu l'ime nkweka ukpokutu ereshi, e keru uto iri; gwõo lẹ manu be unu e-yekõbeje lẹ nwa ebili nanu nanu gwee ephe n'esaa.

³⁰Unu egbuje mkpi lanu gude pfua ugwo iphe-eji, unu meru.

³¹Unu tũkoje ngweja ono g'õ ha gwekõtaje; yekõberu ngweja-akpo-õku, unu egweje; me ngweja-nri, ayijeru iya nu; me ngweja-meẽ, ayijekwaru iya phõ nu. Olee õo g'unu nwube enya g'õ to dukwa anu ono, a-duru ophu nweru eka iphe mebyiru iya.

Qgú 29

Qbo Apha-õphúú

(Uke 23:23-25)

¹"Lẹ mboku mbu l'onwa esaa be unu a-noje ndzuko, du nsõ. G'õ to dukwa ozi, unu e-jeje lẹ mboku ono. Mboku ono bu mboku, unu e-gbuje opu.

²Unu egwee ngweja-akpo-õku; mbu ngweja, mkpo iya du Chipfu ree. Unu egbua nwa oke-eswi lanu; waa ebili lanu; me unwu-ebili esaa, gbacharu apha, adudu eka iphe mebyiru iya; gude gwee ngweja ono.

³Ngweja-nri, ayijeru iya nu be bu ukpokutu ereshi, a gwõru lẹ manu. Oke-eswi ono be unu e-yekõbeje uto eto l'ime nkweka ukpokutu ereshi, e keru uto iri gwõo lẹ manu. Ebili ono be unu e-yekõbeje uto labõ l'ime nkweka ukpokutu ereshi, e keru uto iri gwõo lẹ manu.

⁴A -bya l'unwu-ebili ɛsaa pho; nanu be unu e-yekobeje uzi lanu l'ime nkweka ukpokutu ereshi, e keru uzo iri gwoo le manu.

⁵Unu egbua mkpi lanu gude gwee ngweja-iphe-eji; shi nno pfua ugwo iphe-eji, unu meshiru.

⁶Unu a-tukoje ngweja ono g'o ha gwekota; yekoberu ngweja-akpo-oku pho, eegweje l'onwa l'onwa; me mbokumboku; ye ngweja-nri, ayijeru iya nu; me ngweja-mee, ayijekwaru iya pho ya; mbu g'a suru g'e meje iya; mbu ngweja ono, mkpo iya du ree, bu iya bu ngweja, a kporu oku nu Chipfu.”

Eswe apfu ugwo iphe-eji

(Uke 16:1-34; 23:26-32)

⁷“Su-a; le mboku k'iri l'onwa ɛsaa ono be unu a-noje ndzuko, du nso. Mboku ono be unu a-swɛ egu; g'o to dukwa ozi, unu e-je mboku ono.

⁸Unu egwee ngweja-akpo-oku nu Chipfu; mbu ngweja, mkpo iya du ree. Unu gbua nwa oke-eswi lanu; waa ebili lanu; me unwu-ebili ɛsaa, gbachaaru apha, adudu aka iphe mebyiru iya; gude gwee ngweja ono.

⁹Ngweja-nri, a-yiru iya nu bu ukpokutu ereshi, a gworu le manu be unu e-gudeje gwee ya. Oke-eswi ono be unu e-yekobeje uzo eto l'ime nkweka ukpokutu ereshi, e keru uzi iri. Ebili ono be unu e-yekobeje uzo labo l'ime nkweka utu-ereshi, e keru uzo iri.

¹⁰A -bya l'unwu-ebili ɛsaa pho; nanu be unu e-keje nkweka okpokutu ereshi uzo iri; wota uzo lanu gude gwee ya.

¹¹Unu egbua mkpi lanu gude gwee ngweja-iphe-eji; a -gufukwa ngweja-iphe-eji, eegweje gude pfua ugwo iphe-eji; me ngweja-akpo-oku ono, eegweje mbokumboku ono; ye ngweja-nri, ayijeru iya nu; me ngweja-mee, ayijekwaru iya pho nu.”

Obo-Mkpù

(Uke 23:33-43; Dit 16:13-17)

¹²“Le mboku k'iri l'ise l'onwa ɛsaa be unu a-noje ndzuko, du nso. G'o to dukwa ozi, unu e-jeje mboku ono. Unu booru Chipfu obo-iphe abali ɛsaa.

¹³Unu e-gwe ngweja-akpo-oku; mbu ngweja, a kporu oku, mkpo iya du Chipfu ree. Unu egbua unwu oke-eswi iri l'eto; me ebili labo; waa unwu ebili iri l'eno, gbachaaru apha, adudu aka iphe mebyiru iya; gude gwee ngweja ono.

¹⁴Ngweja-nri, a-yijeru iya nu bu ukpokutu ereshi, a gworu le manu be unu e-gudeje gwee ya. Unwu oke-eswi ono nanu nanu ephe n'iri l'eto be unu e-yekobeje uzo eto l'ime nkweka ukpokutu ereshi, e keru uzo iri; gwoo le manu. Ebili labo pho; nanu iya be unu e-yekobeje uzo labo l'ime nkweka ukpokutu ereshi, e keru uzo iri; gwoo le manu.

¹⁵Unwu ebili iri l'eno pho; nanu nanu be unu e-yekobeje uzo lanu l'ime nkweka ukpokutu ereshi, e keru uzo iri; gwoo le manu.

16Unu egbua mkpi lanu gude gwee ngweja-iphe-aji; a -gufukwa ngweja-akpo-oku ono, unu egweje mbokumboku; yeke ngweja-nri, ayijeru iya nu; me ngweja-mee, ayijekwaru iya pho nu.

17“Su-a; le mboku k'ebbo be unu e-gbu unwu oke-eswi iri l'ebbo; me ebili labo; waa unwu ebili iri l'eno, gbacharu apha, adudu aka iphe mebyiru iya; gude gwee ngweja ono.

18A bya l'unwu oke-eswi ono; yeke ebili ono; me unwu ebili ono g'o ha; unu yekobeje iya ngweja-nri, ayijeru iya nu; me ngweja-mee, ayijekwaru iya pho nu; bu g'a suru g'e meje iya.

19Unu egbua mkpi lanu gude gwee ngweja-iphe-aji; a -gufukwa ngweja-akpo-oku ono, unu egweje mbokumboku; yeke ngweja-nri, ayijeru iya nu; me ngweja-mee, ayijekwaru iya pho nu.

20“Su-a; le mboku k'eto be unu e-gbu unwu oke-eswi iri le nanu; me ebili labo; me unwu ebili iri l'eno, gbacharu apha, adudu aka iphe mebyiru iya; gude gwee ngweja ono.

21A bya l'unwu oke-eswi ono; yeke ebili ono; me unwu ebili ono g'o ha; unu e-yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho nu; bu g'a suru g'e meje iya.

22Unu egbua mkpi lanu gude gwee ngweja-iphe-aji; a -gufukwa ngweja-akpo-oku ono, unu egweje mbokumboku; yeke ngweja-nri, ayijeru iya nu; me ngweja-mee, ayijekwaru iya pho nu.

23“Su-a; le mboku k'eno be unu e-gbu unwu oke-eswi iri; me ebili labo; me unwu ebili iri l'eno, gbacharu apha, adudu aka iphe mebyiru iya; gude gwee ngweja ono.

24A bya l'unwu oke-eswi ono; yeke ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya; bu g'a suru g'e meje iya.

25Unu egbua mkpi lanu gude gwee ngweja-iphe-aji; a -gufukwa ngweja-akpo-oku ono, unu egweje mbokumboku; yeke ngweja-nri, ayijeru iya nu; me ngweja-mee, ayijekwaru iya pho nu.

26“Su-a; le mboku k'ise be unu e-gbu unwu oke-eswi tete; me ebili labo; me unwu ebili iri l'eno, gbacharu apha, adudu aka iphe mebyiru iya; gude gwee ngweja ono.

27A bya l'unwu oke-eswi ono; yeke ebili ono; me unwu ebili ono g'o ha; unu yekobeje iya ngweja-nri, ayijegbaaru iya nu; me ngweja-mee, ayijegbakwaaru iya pho ya, bu g'a suru g'e meje iya.

28Unu egbua mkpi lanu gude gwee ngweja-iphe-aji; a -gufukwa ngweja-akpo-oku ono, unu egweje mbokumboku; yeke ngweja-nri, ayijeru iya nu; me ngweja-mee, ayijekwaru iya pho ya.

29“Sụ-a; lẹ mbọku k'ishii bẹ unu e-gbu ụnwu oke-eswi ẹsato; mẹ ebili labọ; mẹ ụnwu ebili iri l'eno, gbachaaru apha, adudu ẹka iphe mebyiru iya; gude gwee ngweja ono.

30A bya l'ụnwu oke-eswi ono; yẹle ebili ono; mẹ ụnwu ebili ono g'ọ ha; unu yekọbeje iya ngweja-nri, ayijegbaaru iya nụ; mẹ ngweja-mẹe, ayijegbakwaaru iya phọ ya; bu g'a sụru g'e meje iya.

31Unu egbua mkpi lanụ gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yẹle ngweja-nri, ayijeru iya nụ; mẹ ngweja-mẹe, ayijekwaru iya phọ nụ.

32“Sụ-a; lẹ mbọku k'ẹsaa bẹ unu e-gbu ụnwu oke-eswi ẹsaa; mẹ ebili labọ; mẹ ụnwu ebili iri l'eno, gbachaaru apha, adudu ẹka iphe mebyiru iya; gude gwee ngweja ono.

33A bya l'ụnwu oke-eswi ono; yẹle ebili ono; mẹ ụnwu ebili ono g'ọ ha; unu yekọbeje iya ngweja-nri, ayijegbaaru iya nụ; mẹ ngweja-mẹe, ayijegbakwaaru iya phọ ya, bu g'a sụru g'e meje iya.

34Unu egbua mkpi lanụ gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yẹle ngweja-nri, ayijeru iya nụ; mẹ ngweja-mẹe, ayijekwaru iya phọ ya.

35“Lẹ mbọku k'ẹsato bẹ unu a-noje ndzuko, du nsọ. G'ọ tọ dukwa ozi, unu e-jeje lẹ mbọku ono.

36Unu egwee ngweja-akpo-ọku; mbu ngweja, a kporu ọku, mkpo iya du Chipfu ree. Unu egbua oke-eswi lanụ; mẹ ebili lanụ; mẹ ụnwu ebili ẹsaa, gbachaaru apha, adudu ẹka iphe mebyiru iya; gude gwee ngweja ono.

37A bya l'ụnwu oke-eswi ono; yẹle ebili ono; mẹ ụnwu ebili ono g'ọ ha; unu eyekọbeje iya ngweja-nri, ayijegbaaru iya nụ; mẹ ngweja-mẹe, ayijegbakwaaru iya phọ nụ; bu g'a sụru g'e meje iya.

38Unu egbua mkpi lanụ gude gwee ngweja-iphe-ẹji; a -gufukwa ngweja-akpo-ọku ono, unu egweje mbokumboku; yẹle ngweja-nri, ayijeru iya nụ; mẹ ngweja-mẹe, ayijekwaru iya phọ nụ.

39“Ngweja ono g'ọ ha bẹ unu e-gweje nụ Chipfu lẹ teke unu abọ ọbo-iphe unu, gechaaru egeru; a -gufukwa iphe, unu kweru Chipfu ukwe iya; mẹ iphe, unu turu obu unu onyo l'unu l'a-nụ Chipfu; mẹ ngweja-akpo-ọku; mẹ ngweja-nri; mẹ ngweja-mẹe; mẹfua ngweja-ẹhu-guu.”

40Mosisu bya atuko ekemu ono, Chipfu tushiru ye iya l'ẹka ono pfukotaru ndu Izurelu.

Ọgú 30

Ekwe Chipfu ukwe-iphe

1Mosisu bya epfuaru ndu-ishi l'ipfu l'ipfu ndu Izurelu; sụ phẹ: “Waa iphe, Chipfu turu l'ekemu baa:

²Nwoke -kweta Chipfu ukwe-iphe; ọzoo l'o nweru iphe, o riburu nte iya ị ya te emedu; ọ nwoke ọbu te emebyikwa ọpfi, o pfuru. G'o mekọtakwa iphemiphe, shi iya l'ọnu futa.

³“Teke nwamgboko, bukwadu l'ibe nna iya kweru Chipfu ukwe-iphe; ọzoo l'o nweru iphe, o riburu nte iya ị ya te emedu;

⁴nna iya -nụma k'ukwe-iphe ono, o kweru ono; mę k'iphe ono, o riburu nte iya ị ya te emedu ono; ọpfi ọ dudu iphe, nna iya ono pfuru yeru iya; ọo ya bu l'ukwe-iphe ono, o kweru ono e-keru; iphe ono, o riburu nte iya ị ya te emedu ono ekekwarupho.

⁵Teke ọ bu ị nna iya nūmachaaru l'o kweru ukwe-iphe; bya anodu ị mboku ono, ọ nūmaru iya ono jika ị ya te ekwetaduru; ọo ya bu l'ọ to dudu ukwe-iphe ono, o kweru ono; mę iphe ono, o riburu nte ị ya te emedu ono, duru ọpfi e-keru nū. Sụ-a; Chipfu be a-guru nwamgboko ono nvu; noo kele ọo nna iya be te kwetaduru g'o mee ya.

⁶“Teke ọ bu ị nwamgboko ono be kweadaru ukwe-iphe ono; teme ọ lua ji; mbu l'o nweru iphe, o gudewaa ọnu iya ribua nte ị ya te emedu;

⁷ji iya ono -nụma iya; ọpfi ọ dudu iphe, o pfuru yeru iya ị mboku ono, ọ nūmaru iya ono; ọo ya bu l'ukwe-iphe ono, o kweru ono e-keru; iphe ono, o riburu nte ị ya te emedu ekekwarupho.

⁸Ole ọ -buru ị ji iya ono be nūmachaaru l'o kweru ukwe-iphe; bya anodu ị mboku ono, ọ nūmaru iya ono jika ị ya te kwetaduru; ọo ya bu l'ukwe-iphe ono, o kweru ono; mę iphe ono, o gudewa ọnu iya ribua nte ị ya te emedu ono te eveeduru ire; Chipfu aguru nwamgboko ono nvu.

⁹“Nwanyi, ji iya anodedu ndzu; ọzoo nwanyi, ji iya chifuru achifu -kwee Chipfu ukwe-iphe; be o mefutajekwa iphe ono, o kweru ukwe iya ono.

¹⁰“O -buru l'oo nwanyi, no l'ibe ji iya be kweru Chipfu ukwe-iphe; ọzoo l'o nweru iphe, o riburu nte ị ya te emedu;

¹¹ji iya bya anuma iya; ọpfi ọ dudu iphe, o pfuru yeru iya; mbu ọpfi ọ jikaduru; ọo ya bu l'ukwe-iphe ono, nwanyi ono kweru ono e-keru; iphemiphe, o riru nte ị ya te emedu ekekwarupho.

¹²Ole ọ -bukwanuru ị ji iya ono be nūmaru iya nū; bya anodu ị mboku ono, ọ nūmaru iya ono jika; sụ g'o to vushiru ire; be iphemiphe, shi nwanyi ono l'ọnu futa l'ukwe-iphe ono, o kweru ono; mękpoo iphe ono, o riru nte ị ya te emedu ono te ekeeduru. Chipfu aguru nwanyi ono nvu; kele ọo ji iya be suru g'o to vushiru ire.

¹³Iphe, bukpoo ukwe-iphe, nwanyi ono kweru; mę iphemiphe, o riburu nte ị ya te emedu bu ji iya be ọ du l'eka. Ji iya -sụ g'o keru; l'o keru; ọ -sụ g'o to vushiru ire; o too vuduru ire.

¹⁴O -buru ị ji iya be nūmachaaru iya; ọpfi ọ dudu iphe, oopfujeru yeru iya mbokumboku; be ukwe, o kweru g'ọ ha e-keru; iphemiphe, o riru nte ị ya te emedu e-

kekwarupho. Ji nwanyi ono be suru g'o keru; noo kele o to dudu iphe, o pfuru mboku, o numaru iya.

¹⁵Ole o -numachaa ya; bya emecha mee g'o to vushiru ire; be oo-vuru ejo-iphe, nwanyi ono gege evuru.”

¹⁶Noo iphe, Chipfu toru Mosisu okpa iya su g'e tsoje g'o duru nwoke yee nyee ya; duru nna yee nwa iya nwanyi; mbu nwamgboko, bukwadu l'ibe nna iya.

Ọgú 31

Aagwata ndu Midiyanu ugwo iphe, ephe mejeru ndu Ízurelu

¹Chipfu bya epfuaru Mosisu su:

²“Gwata ndu Midiyanu ugwo iphe ono, ephe mejeru ndu Ízurelu-a. I -gwatachae phe iya pho be ii-nwuhu lapfu ndibe unu phe.”

³Oo ya bu; Mosisu su ndu Ízurelu: “Unu haru kwaa onwunu ngwogu jepfu ndu Midiyanu ogu je agwataru Chipfu ugwo iphe ono, ephe mejeru ndu Ízurelu ono.

⁴Ipfu, nonu le Ízurelu be unu a-hotu unu umadzu labo l'umadzu ukporo iri g'ephe je ogu ono.”

⁵Noo ya; e shi l'ipfu, nonu le Ízurelu hotachaa unu nemadzu ugbo labo l'umadzu ukporo iri. O buru ukporo unu nemadzu l'unu nemadzu iri be bu ndu a hotakotaru; kwaa phe ngwogu.

⁶Mosisu zia phe g'ephe jeshia ogu ono. Ipfu, nonu be hotaru unu nemadzu ugbo labo l'umadzu ukporo iri k'ogu ono. Ephe le Finehasu nwa Eleyaza, bu onye uke Chileke swiru. Finehasu gude ivu, shi l'ulo Chipfu; me opu-ogu, eegudeje echi mkpu ogu.

⁷Ephe jepfushia ndu Midiyanu ogu egube Chipfu turu iya Mosisu l'ekemu; toko iphe, bu unwoke ndu Midiyanu gbushikota.

⁸Ephe gbukwaapho ndu eze ise, bu ndu-ishi ndu Midiyanu; mbu Evi; me Rekemu; me Zuru; me Huru; me Reba; yekwaru ndu ozo, e gbukwarupho egbugbu. Ephe gudekwapho ogu-echi gbua Belamu nwa Beyo.

⁹Ndu Ízurelu kpukota unwanyi ndu Midiyanu le ndzu; me unwegirima phe. Ephe rwuta eswi phe; me eku phe; bya atuko iphe, ephe nweru enwuru kwaa l'okwata;

¹⁰bya atushia oku le mkpukpu eka ndu Midiyanu bukota; me eka ephe kporo ulo-ekwa phe g'o ha.

¹¹Ephe rwutakota iphe, ephe kwataru l'okwata; me iphe, ephe lwutaru l'ogu; mbu nemadzu; mekpoo iphe-edobe.

¹²Ephe chita ndu ono, ephe lwutaru l'ogu ono; me ivu ono, ephe vutaru; me iphe, ephe kwataru l'okwata wolataru Mosisu yele Eleyaza, bu onye uke Chileke; mewaro ndu Ízurelu l'ophu l'eka ephe kporo ulo-ekwa phe le baswaa ali Mowabu l'aguga enyimu Jiordanu le mgboru mkpukpu Jieriko.

Ekemu, Mósísu tǔru teke ndu Ízurelu shi ọgu Midiyanu Iwa

13Tọbodu iya bụ; Mósísu; mę Eleyaza, bụ onye uke Chileke; mę ndu-ishi ndu Ízurelu l'opfu wuru jeshia phę ndzuta l'azu ęka ono, ęphe kọberu ọlo-ękwa phę ono.

14Ndu-ishi ndu oјogu ono, shi l'ọgu Iwa ono; mbu ndu-ishi unu ndu oјogu labo l'ukporo iri; yeę ndu-ishi ndu oјogu ukporo ise ise; mee; ęhu ghuahaa Mósísu egbu.

15Mósísu sụ phę: “? O kwa l'unu hakotaru unwanyi-a g'ęphe nodu ndzu?”

16? Tọbodu unwanyi-a bę Belamu ziru; ęphe mee gę ndu Ízurelu meswee Chipfu l'opfu ęhu agwa, du lę Peyo; eshi nno; eјo iphe-ememe bya adaa l'echilabo ndu kę Chipfu ono.

17Ngwa; unu tuko unwegirima phę unwoke gbushikota g'ęphe ha; unu egbushikota iphe, bụ nwanyi, yele nwoke kwajęwaru l'ime phę.

18Ndu ophu unu a-haru onwunu buępho unwumboko, ęphe lę nwoke ta akwajęduru.

19A -bya lę g'unu ha buru ndu gburu nemadzu ono; mę ndu denyiru onye e gburu egbugbu ęka; gę ndu ono jekwa l'azu ęka ono, a kọberu ọlo-ękwa je ano abali ęsaa. O -rwuepho lę mboku k'ęto iya waa mboku k'ęsaa ya; g'ęphe safu onwophe nturu; safukwapho ndu ono, unu kputaru lę ndzu ono nturu.

20Unu mechaa uwe unu emecha; unu emechaa iphe, e meru l'akpo; mę iphe, e meru l'ęji egbu; mę iphe, a pyiru l'oshi.”

21Eleyaza, bụ onye uke Chileke sụ ndu oјogu ono, jeru ọgu ono: “Waa omelali, du l'ekemu ono, Chipfu turu nu Mósísu baa:

22Oo mkpola-ododo kpoloko; mę mkpola-ochaa; mę onyirubvu; mę igwę; mę gbumgbamu; mę ọta-njele;

23mbu l'iphe, oku te ekepyashiduru bę unu a-hu l'oku g'ọ du ree. Oe e gudefutaje mini ono, eegudeje asafu nturu mechaa ya emecha. Obenu l'iphe, oku e-ke mę a -hua ya l'oku bę unu e-ye lę mini ono gude mee ya g'ọ du ree.

24Lę mboku k'ęsaa bę unu safutaje uwe unu asasa; unu abya adu ree. Unu -mechaa nno; unu abatawaro l'ęka ono, a kọberu ọlo-ękwa ono teke ono.”

Eekeshi iphe, a lwutaru l'ọgu Midiyanu

25Chipfu sụ Mósísu:

26“Gę gubedua; mę Eleyaza, bụ onye uke Chileke; mę ndu-ishi lę ndu-unuphu ndu-unuphu ndu Ízurelu tuko iphemiphe ono, ęphe lwutaru l'ọgu ono gukota ọgu; mbu nemadzu; mekpoo iphe-edobe ono.

27Unu ekekaha iphe ono, a lwutaru l'ọgu ono uzi labo. Unu kekaharu iya ndu ono, jeru ọgu ono waa igwe-oha Ízurelu.

- 28Unu shi l'ime ndu k'ono, unu keru nū ndu ono, jeru ọgu ono tūaru Chipfu ụtu. Onye lanụ bẹ unu e-wofuta l'ime unu nemadzū l'ụkporo ise; unu ewofuta iphe-edobe lanụ l'ime unu iphe-edobe l'ụkporo ise; mbụ eswi; mę nkapfụ-igara; mę aturu; mę eghu.
- 29Unu shi l'oke iya nkephę ono wota iya nū Eleyaza, bụ onye uke Chileke g'ọ bụru iphe, aa-nū Chipfu.
- 30Unu eshikwaphọ l'iphe ono, unu keru nū ndu Ízurelu wofutachaa nanū nanū l'ime ụkporo labọ l'iri; mbụ lę nemadzū; mę l'eswi; mę lę nkapfụ-igara; mę l'aturu; mę l'eghu; mę l'anū ọzo. Unu eworu iya nū eri Lívayi, bụ ndu eleta ụlo-ẹkwa Chipfu enya.”
- 31Oo ya bụ; Mósisu yele Eleyaza, bụ onye uke Chileke mee gę Chipfu tūru iya Mósisu l'ekemu.
- 32Waa iphe, phoduru nū l'iphe ono, ndu ono, jeru ọgu lwutaru l'ọgu baa: Aturu, phoduru nū bụ ụkporo unu aturu ugbo ụkporo ẹno l'ụkporo unu ẹno l'unu ẹsaa l'ụkporo iri.
- 33Eswi, phoduru nū bụru ụkporo unu eswi ugbo tete.
- 34Nkapfụ-igara, phoduru nū bụru ụkporo unu nkapfụ-igara ugbo ẹsaa l'unu iri l'ẹbo l'ụkporo iri.
- 35A -bya lę nemadzū; unwanyi, ẹphe lę nwoke ta akwajęduru bę dū ụkporo unu unwanyi ugbo ẹno.
- 36Waa g'iphe, e keru nū ndu ono, jeru ọgu ono ha baa: Aturu dū ụkporo unu aturu ugbo ụkporo labọ l'ụkporo unu ugbo labọ l'unu ẹto l'ụkporo iri l'ise.
- 37L'ime aturu ono; ophu bụ iya ụtu, aatū anū Chipfu bụ unu aturu l'ụkporo iri l'ẹto l'aturu iri l'ise.
- 38Eswi dū ụkporo unu eswi ugbo ẹno l'unu iri. L'ime eswi ono; ophu bụ iya ụtu, aatū anū Chipfu bụ ụkporo eswi ẹto l'eswi iri l'ẹbo.
- 39Nkapfụ-igara dū ụkporo unu nkapfụ-igara ugbo ẹto l'unu iri l'ishii l'ụkporo ise. L'ime nkapfụ-igara ono; ophu bụ iya ụtu, aatū anū Chipfu dū ụkporo nkapfụ-igara ẹto lę nkapfụ-igara lanụ.
- 40A bya lę nemadzū; iphe, ẹphe dū bụ ụkporo unu nemadzū ugbo labọ. Iphe, bụ ndu e gude atū ụtu anū Chipfu l'ime phę bụ ụkporo ụmadzū l'ụmadzū iri l'ẹbo.
- 41Tọbudu iya bụ; Mósisu bya eworu ụtu ono, a tūru nū Chipfu ono nū Eleyaza, bụ onye uke Chileke g'ọ bụru iphe, aanū Chipfu. Ono bụru gę Chipfu tūru iya Mósisu l'ekemu.
- 42Waa g'iphe ono, e keru nū ndu Ízurelu ono ha baa; mbụ iphe ono, Mósisu wofuru l'ophu e keru nū ndu ono, jeru ọgu Midiyanu ono.
- 43Iphe, e keru nū igwe-ọha Ízurelu ono bę aturu dū ụkporo unu aturu ụkporo ugbo labọ l'ụkporo unu ugbo labọ l'unu ẹto l'ụkporo iri l'ise.

- ⁴⁴Eswi dụ iya ụkporo ụnu eswi ugbo ẹno l'ụnu iri.
- ⁴⁵Nkapfu-igara dụ iya ụkporo ụnu nkapfu-igara ugbo ẹto l'ụnu iri l'ishii l'ụkporo ise.
- ⁴⁶Ndu nemadzu, e ketaru nụ phẹ dụ ụkporo ụnu nemadzu ugbo labo.
- ⁴⁷Mósisu bya eshi l'iphe ono, e keru nụ ndu Ízurelu ono wotachaa iphe nanu nanu l'ime ụkporo labo l'iri iri; mbụ lẹ nemadzu; mę l'iphe-edobe; o woru iya nụ eri Lívayi, bụ ndu eleta ụlo-ẹkwa Chipfu ẹnya; bụ gę Chipfu turu iya Mósisu l'ekemu.
- ⁴⁸Noo ya; ndu-ishi, achi ndu ojogu ono; mbụ ndu-ishi, ụnu ndu ojogu ugbo labo l'ụkporo iri; mę ndu-ishi ndu ojogu ụkporo ise ise wuru byapfutashia Mósisu.
- ⁴⁹Ephe sụ Mósisu: “Anyibe ndu-ozu ngu bę guakwaru ndu ojogu ono, anyi chi jee ogu ono ogu; ophu o dudu m'onye lanu, aachọ aachọcho l'ime phẹ.
- ⁵⁰Owaa bụ iphe, anyi ewota g'a nụ Chipfu. Onyenonu gude iphe, o lwutaru l'ogu ono; mbụ iphe, e meru lẹ mkpọla-ododo, bụ iya bụ iyagba-upfu; mę echi mgbaleka; mę echi mkpushi-eka; mę iphe-nchi; mę iyagba-olu. Anyi wotaru iya g'e gude pfa ụgwo iphe-eji l'iphu Chipfu.”
- ⁵¹Mósisu yele Eleyaza, bụ onye uke Chileke nata phẹ iphe ono, e meshiru lẹ mkpọla-ododo ono; mbụ iphemiphe, e mekotaru ona.
- ⁵²Iphe ono, e meru lẹ mkpọla-ododo ono, ndu-ishi ụnu ndu ojogu ugbo labo l'ụkporo iri; mę ndu-ishi ndu ojogu ụkporo ise ise nuru Chipfu ono bę bụ mkpọla-ododo, ẹrwa iya dụ ụkporo ụnu shẹkelu labo l'ụnu lanu l'ụkporo shẹkelu iri l'ẹsaa lẹ shẹkelu iri.
- ⁵³Ndu ojogu ono l'ẹhu l'ẹhu gudechaa iphe, ephe kwataru l'okwata lwa.
- ⁵⁴Mósisu yele Eleyaza, bụ onye uke Chileke nata iphe ono, e meru lẹ mkpọla-ododo ono l'eka ndu-ishi ụnu ndu ojogu labo l'ụkporo iri; mę l'eka ndu-ishi ndu ojogu ụkporo ise ise. Ephe nata phẹ iya je edobe l'ulo-ẹkwa-ndzukọ l'eka ọo-nodu l'ataphu Chipfu; gę ndu Ízurelu e-gudeje iya nyata ogu ono.

Ọgú 32

Alị, a nuru ọkpa-ipfu Rúbenu; waa ọkpa-ipfu Gadu

(Dit 3:12-22)

- ¹Unwu Rúbenu waa unwu Gadu bę nweru iphe-edobe shingushingu. Ephe bya ahuma l'alị Jiaza; mę alị Giladu bę dụ ree g'e dobe iya iphe-edobe.
- ²Oo ya bụ; unwu Gadu; mę unwu Rúbenu ono bya ejepfu Mósisu; waa Eleyaza, bụ onye uke Chileke; mę ndu-ishi ndu Ízurelu je asu:
- ³“Mkpukpu Atarotu; mę mkpukpu Dibonu; mę mkpukpu Jiaza; mę mkpukpu Nimura; mę mkpukpu Heshibonu; mę mkpukpu Eleyale; mę mkpukpu Sebamu; mę mkpukpu Nebo; mę mkpukpu Beyonu;
- ⁴mbụ alị ono, Chipfu meru gę ndu Ízurelu lwuta bę bukwa alị, dụ ree k'edobe iphe-edobe; temanu anyibe ndu-ozu ngu buru ndu nweru iphe-edobe.

- ⁵Su-a; o -buru l'anyi du ngu l'obu; nunu anyibe ndu-ozu nkengu ali ono g'o buwaruro oke ali nkanyi. Unu te edutashinu anyi dafu azu enyimu Jiordanu azu iya ophuu.”
- ⁶Mosisu su unwu Gadu; me unwu Rubenu: “? Unwunna unu a-nodu eje ogo; unubedua ano-kirishia l'eka-a too?”
- ⁷? Bu gunu meru iphe, unu eme g'obu te shihushi ndu Izurelu ike g'ephe la l'ali ono, Chipfu nuru phe ono?
- ⁸Oo egube ono bu ge nna unu phe meru teke mu ziru phe g'ephe gbete le Kadeshi-Baneya je ahuma ali ono;
- ⁹kele ephe jerwuru nsuda Eshukolu; je ahumabebe ali ono; bya eteyia ndu Izurelu obu; mee g'ephe ta abahu l'ali ono, Chipfu nuru phe ono.
- ¹⁰Ephe shi nno kpatsu Chipfu ehu-eghu le mboku ono. O ribua angu su:
- ¹¹‘O to dudu onye nwoke Izurelu, shi le Ijiputu futa; shita l'onye nowaru ukporo apha kwaseru, bya l'e-gude enya iya huma ali ono; mbu ali ono, mu riburu le nte le mu l'anu Ebirhamu; me Ayizaku; me Jiekopu; noo kele ephe te egudedu obu phe g'o ha etso mu;
- ¹²Gbahaepho Kalebu nwa Jiefune k'eri Kenazu; me Jioshuwa nwa Nunu; kele ephe gude obu phe g'o ha tsoru Chipfu.’
- ¹³Chipfu swibenuru ndu Izurelu ehu-eghu iya; o mee phe; ephe tsoru echiogu ghaphee ukporo apha labo; jeye teke ogo ono, meru ejo-iphe l'enya Chipfu ono bukotaru.
- ¹⁴O rwukwaa nta; unube unwu-a, ndu eme iphe-eji nwushiru-a byakwa apfuru l'ozori nna unu phe; g'unu mee g'ehu-eghu Chipfu kaba atangirihu l'ehu ndu Izurelu.
- ¹⁵Kele-a; unu -gbakuta iya azu su l'unu te etsohedu iya nta; be oo-pakwaru phe haa l'echiogu; oo-buru l'oo unu be kpataru ge ndu Izurelu laa l'iyi.”
- ¹⁶Tobudu iya bu; unwu Gadu ono; me unwu Rubenu ono byapfuta Mosisu bya asu iya: “Oo-du anyi ree g'anyi meta eka iphe-edobe anyi a-nodu; me g'anyi kpushia mkpukpu eka unwegirima anyi phe a-nodu.
- ¹⁷Ole anyi jikobewaru k'achita ngwogu vutaru ndu Izurelu uzo jeshia; jeye teke anyi e-durwu phe eka ono, ephe e-buru ono. Unwu anyi phe be e-buru le mkpukpu-a, a kpuchaa; o shihu ike-a; ge ndu ali-a te sweta iya.
- ¹⁸Anyi ta abyadu alwa ibe anyi jeye teke ndu Izurelu e-ketadzuru oke, rwuberu phe nu g'ephe ha.
- ¹⁹Ole anyibedua te etsoduru phe eketa oke l'azu enyimu Jiordanu azu iya ophuu; iphe, kparu iya nu bu l'oke k'anyi be no l'azu iya owa l'uzo enyanwu-awawa enyimu Jiordanu.”
- ²⁰Oo ya bu; Mosisu su phe: “O -buru l'unu e-me iya egube ono; o -buru l'unu a-kwa onwunu ngwogu unu l'ataphu Chipfu vuta uzo k'ogu ono;

- 21 Ọ -bụru lẹ g'unu ha bẹ a-chiru ngwoḡu unu daa ẹnymu Jiódanu l'ataphu Chipfu; lwua oḡu ono jasụ teke Chipfu chifuru ndu oḡu iya ono l'ataphu iya.
- 22 A -lwua alị ono lwutaru Chipfu; unu alwatashiwaro teke ono; ikpe ta anmaedu unu l'iphu Chipfu; me l'iphu ndu Ízurelu l'ophu. Alị owa abụwaruro k'unu l'ataphu Chipfu.
- 23 Ọle ọ -bụru l'unu te emeduru iphe, unu pfuru; ọo ya bụ l'unu meru Chipfu iphe-eji; g'o dokwaa unu ẹnya l'iphe-eji, unu meru bẹ unu e-je iphe-ehuka iya.
- 24 Unu kpushia mkpukpu, unwegirima unu phe a-nodu; unu emeta aka iphe-edobe unu a-nodu; unu emeabekpoe ya pho g'unu pfuru iya.”
- 25 Unwu Gadu ono; me unwu ke Rubenu su Mosisu: “Anyibe ndu-ozu ngu phe l'e-me ge gube nnajiuphu pfuru anyi.
- 26 Unwegirima anyi phe; me unyomu anyi phe; me iphe-edobe anyi bẹ a-nodu lẹ mkpukpu lẹ mkpukpu, du l'alị Giladu.
- 27 Ọle anyibedua, bu ndu-ozu ngu phe bẹ a-da ẹnymu; anyi a-chigbaaru ngwoḡu l'ehu l'ehu k'ogụ ono l'ataphu Chipfu egube ono, gube nnajiuphu anyi pfuru anyi.”
- 28 Noo ya; Mosisu bya atua ekemu nu Eleyaza, bu onye uke Chileke; me Jioshuwa nwa Nunu; me ndu-ishi, achigba ẹnya-unuphu nonu l'ipfu Ízurelu lẹ k'opfu ehụ unwu Gadu ono; me k'opfu ehụ unwu Rubenu.
- 29 Ọ su phe: “Ọ -bụru l'unwu Gadu; me unwu Rubenu bẹ chitaru ngwoḡu phe; tsoru unu daa ẹnymu Jiódanu; bya etsoru unu nodu l'iphu Chipfu lwua oḡu ono lwuta; unu l'ephe -lwutachaepfo alị ono; unu nukwaa phe alị Giladu g'o buri oke alị phe.
- 30 Ọle ọ -bụru l'ephe ta achitaduru ngwoḡu tsoru unu daa ẹnymu; ephe etsoru unu keta oke l'alị Kėnanu.”
- 31 Unwu Gadu; me unwu Rubenu ono su: “Ọo ge Chipfu pfuru anyibe ndu-ozu ngu phe bu g'anyi e-me iya.
- 32 Anyi a-chiru ngwoḡu daa ẹnymu Jiódanu bahu l'alị Kėnanu l'ataphu Chipfu; ole oke alị anyi bẹ a-dukota l'azu ẹnymu Jiódanu azu iya owa.”
- 33 Tobudu iya bu; Mosisu bya eworu alị-eze Sihonu, bu eze ndu Amoru; me alị-eze Ogu, bu eze ndu Beshanu woru nu unwu Gadu; me unwu ke Rubenu; me nkeru-ebọ ipfu Manase, bu nwa Jiosefu. Ọ nuru phe alị ono l'ophu; me mkpukpu, dukota iya nu g'o ha; mbukpoo mkpukpu lẹ mkpukpu, no-pheru alị ono mgburugburu.
- 34 Unwu Gadu kpua mkpukpu Dibonu; me Atarotu; me Arowa;
- 35 me Atarotu-Shofanu; me Jiaza; me Jiogbeha;
- 36 me Betu-Nimura; me Betu-Haranu. Ephe kpukotaru mkpukpu ono; o shihuchaa ike; bya emetagbaa aka iphe-edobe phe a-noduje.
- 37 Unwu ke Rubenu kpua mkpukpu Heshibonu; me Eleyale; me Kiriyatayimu;

³⁸mękwapho Nebo; me Belu-Meyonu. Epe kpukwapho mkpukpu Sibuma. Epe gbanweshikota epha mkpukpu ono g'ọ ha; bya eworu epha ozo gushia mkpukpu le mkpukpu ono, epe kpushiru ono.

³⁹Unwu Makiya, bu nwa Manase jee ọgu l'ali Giladu; je alwuta iya; chishia ndu Amoru, bu l'eka ono.

⁴⁰Oo ya bu; Mosisu woru ali Giladu nu Makiya, bu nwa Manase; o buru l'eka ono.

⁴¹Jiayi, bukwapho oshilokpa Manase lwuta unwu mkpukpu le mkpukpu, du iya nu; o gua epha mkpukpu ono Havotu-Jiayi.

⁴²Noba lwuta mkpukpu Kenatu; me nwa mkpukpu, no-pheru iya mgburugburu. O gube mkpukpu ono Noba, bu epha, yebedua aza.

Ọgú 33

Ije ndu Ízurelu e shi le Ijiputu jasụ le Mówabu

¹Qwaa bu ge ndu Ízurelu gude jee ije phe teke epe futaru l'ali Ijiputu. Epe dzeberu le mkpa le mkpa; o buru Mosisu yele Eronu be edu phe nu.

²O buru Mosisu be deru g'ephe gude jee ije ono l'ekwo ge Chipfu pfuru iya ya. Waa g'ephe gude jee ije phe ono baa e shi le Ijiputu:

³Ndu Ízurelu gbalihuru ije l'onwa mbu; l'abali iri l'ise l'onwa mbu ono. Le mboku, tsotaru mboku obo Ojaghata ke Chipfu be epe wataru ije phe. Epe shi le mkpukpu Ramesesu wuru goromii wufuta k'ehuka tugbua. Ndu Ijiputu doru chikafuchaepho enya ele phe; epe nodu awu atugbu.

⁴Le teke ono be ndu Ijiputu eligbaa odzu ndu bu okpara phe ono, Chipfu chigbushiru l'echilabo phe ono. Chipfu bya ekpekwa pho agwa phe ikpe.

⁵Noo ya; ndu Ízurelu shi le Ramesesu wuru tugbua. Epe rwua Sukotu; bya akpobe ulo-ekwa phe.

⁶Epe gbeshi le Sukotu je akpobe ulo-ekwa phe le Etamu, no l'aguga echiegu.

⁷Epe gbeshi le Etamu; bya adakobe laphu azu le Pi-Hahirotu, no l'uzo enyanwu-awawa Belu-Zefonu; epe kpobe ulo-ekwa phe le mgboru Migudolu.

⁸Epe gbeshi le Pi-Hahirotu; bya adaa eze-enyimu bahu l'echiegu. Epe jee ije abali eto le mgbegu Etamu; bya erwua Mara; epe kpobe ulo-ekwa phe.

⁹Epe gbeshi le Mara; bya ejerwua Elimu. Elimu be nweru enya-obvu mini iri l'ebo, no iya nu; mpfu ukporo eto l'iri nodu iya; epe kpobe ulo-ekwa phe l'eka ono.

¹⁰Epe gbeshi le Elimu bya erwua aguga Eze-enyimu Uswe-uswe; epe kpobe ulo-ekwa phe.

¹¹Epe gbeshi le Eze-enyimu Uswe-uswe bya eje akpobe ulo-ekwa phe l'echiegu Sinu.

- 12 Ẹphe gbẹshi l'echiegu Sinu je akpọbe ọlo-ẹkwa phẹ ẹ Dọfuka.
- 13 Ẹphe gbẹshi ẹ Dọfuka je akpọbe ọlo-ẹkwa phẹ ẹ Alushi.
- 14 Ẹphe gbẹshi ẹ Alushi je akpọbe ọlo-ẹkwa phẹ ẹ Refidimu. Ẹka ono bẹ mini ta adudu gẹ ndu Ízurelu ngua.
- 15 Ẹphe gbẹshi ẹ Refidimu je akpọbe ọlo-ẹkwa phẹ l'echiegu Sayinayi.
- 16 Ẹphe gbẹshi l'echiegu Sayinayi je akpọbe ọlo-ẹkwa phẹ ẹ Kiburotu-Hatava.
- 17 Ẹphe gbẹshi ẹ Kiburotu-Hatava je akpọbe ọlo-ẹkwa phẹ ẹ Hazerotu.
- 18 Ẹphe gbẹshi ẹ Hazerotu je akpọbe ọlo-ẹkwa phẹ ẹ Ritima.
- 19 Ẹphe gbẹshi ẹ Ritima je akpọbe ọlo-ẹkwa phẹ ẹ Rimonu-Pérezu.
- 20 Ẹphe gbẹshi ẹ Rimonu-Pérezu je akpọbe ọlo-ẹkwa phẹ ẹ Libuna.
- 21 Ẹphe gbẹshi ẹ Libuna je akpọbe ọlo-ẹkwa phẹ ẹ Risa.
- 22 Ẹphe gbẹshi ẹ Risa je akpọbe ọlo-ẹkwa phẹ ẹ Kehelata.
- 23 Ẹphe gbẹshi ẹ Kehelata je akpọbe ọlo-ẹkwa phẹ l'úbvú Shefa.
- 24 Ẹphe gbẹshi l'úbvú Shefa je akpọbe ọlo-ẹkwa phẹ ẹ Harada.
- 25 Ẹphe gbẹshi ẹ Harada je akpọbe ọlo-ẹkwa phẹ ẹ Makelotu.
- 26 Ẹphe gbẹshi ẹ Makelotu je akpọbe ọlo-ẹkwa phẹ ẹ Tahatu.
- 27 Ẹphe gbẹshi ẹ Tahatu je akpọbe ọlo-ẹkwa phẹ ẹ Tera.
- 28 Ẹphe gbẹshi ẹ Tera je akpọbe ọlo-ẹkwa phẹ ẹ Mitika.
- 29 Ẹphe gbẹshi ẹ Mitika je akpọbe ọlo-ẹkwa phẹ ẹ Hashimona.
- 30 Ẹphe gbẹshi ẹ Hashimona je akpọbe ọlo-ẹkwa phẹ ẹ Moserotu.
- 31 Ẹphe gbẹshi ẹ Moserotu je akpọbe ọlo-ẹkwa phẹ ẹ Bene-Jiakanu.
- 32 Ẹphe gbẹshi ẹ Bene-Jiakanu je akpọbe ọlo-ẹkwa phẹ ẹ Họru-Hagidigadu.
- 33 Ẹphe gbẹshi ẹ Họru-Hagidigadu je akpọbe ọlo-ẹkwa phẹ ẹ Jiọtubata.
- 34 Ẹphe gbẹshi ẹ Jiọtubata je akpọbe ọlo-ẹkwa phẹ ẹ Aburona.
- 35 Ẹphe gbẹshi ẹ Aburona je akpọbe ọlo-ẹkwa phẹ ẹ Eziyonu-Geba.
- 36 Ẹphe gbẹshi ẹ Eziyonu-Geba je akpọbe ọlo-ẹkwa phẹ ẹ Kadẹshi, nọ l'echiegu Zinu.
- 37 Ẹphe gbẹshi ẹ Kadẹshi je akpọbe ọlo-ẹkwa phẹ l'úbvú Họru, nọ l'oke alí ndu Edomu.

³⁸Ọ buru l'ẹka ono bẹ ẹphe nọ; Chipfu sù Erọnu, bu onye uke Chileke g'o nyihu eli úbvú Họru ono. Erọnu nyihu úbvú ono nọdu iya nwùhu; ẹ mbọku mbù l'ọnwa ise l'apha, kwe ndu Ízurelu ọkporo apha labọ, ẹphe shi l'alì Ijiputu lufuta.

³⁹Erọnu bẹ nọwaru ọkporo apha ishii l'apha ẹto ẹ teke ọ nwùhuru l'úbvú Họru.

⁴⁰Onye Kénanu, bu eze ndu Aradu; bu l'echięgu ndọhali l'alì Kénanu ono; numa ẹ ndu Ízurelu l'awu abya.

⁴¹Ndu Ízurelu gbeshi l'úbvú Họru je akpọbe ọlo-ẹkwa phẹ ẹ Zalumona.

⁴²Ẹphe gbeshi ẹ Zalumona je akpọbe ọlo-ẹkwa phẹ ẹ Punonu.

⁴³Ẹphe gbeshi ẹ Punonu je akpọbe ọlo-ẹkwa phẹ ẹ Obotu.

⁴⁴Ẹphe gbeshi ẹ Obotu je akpọbe ọlo-ẹkwa phẹ ẹ Iye-Abarimu, nọ l'oke alì Mówabu.

⁴⁵Ẹphe gbeshi ẹ Iye-Abarimu je akpọbe ọlo-ẹkwa phẹ ẹ Dibonu-Gadu.

⁴⁶Ẹphe gbeshi ẹ Dibonu-Gadu je akpọbe ọlo-ẹkwa phẹ ẹ Alumonu-Dibulatayimu.

⁴⁷Ẹphe gbeshi ẹ Alumonu-Dibulatayimu je akpọbe ọlo-ẹkwa phẹ l'úbvú úbvú Abarimu; l'atatiphu úbvú Nebo.

⁴⁸Ẹphe gbeshi l'úbvú úbvú Abarimu je akpọbe ọlo-ẹkwa phẹ ẹ baswaa alì ndu Mówabu; l'aguga ẹnyimu Jiódanu ẹ mgboru mkpukpu Jieriko.

⁴⁹Ẹphe kpọbe ọlo-ẹkwa phẹ l'aguga ẹnyimu Jiódanu; e -shi ẹ Bẹtu-Jieshimotu je akpaa ẹ Abẹlu-Shitimu ẹ baswaa alì ndu Mówabu ono.

⁵⁰Ọ buru ẹ baswaa alì ndu Mówabu ono, nọ l'aguga ẹnyimu Jiódanu ẹ mgboru Jieriko ono bẹ Chipfu pfuru yeru Mosisu sù:

⁵¹“Pfiaru ndu Ízurelu sù phẹ-a: Unu -daẹpho ẹnyimu Jiódanu bahu l'alì Kénanu;

⁵²unu tuko ndu bu l'alì ono g'ẹphe ha chifukota. Unu emebyishikota mkpuma, ẹphe pyiru apyipyi; mebyishia iphe, bu ntẹkpe, ẹphe kpushiru doberu onwophe. Unu atuko iphe, bukpoọ ẹka ẹphe agwajẹ iphe nwukpọshia.

⁵³Unu anata phẹ alì ono buru; kele mu nọwaru iya unu g'ọ buru k'unu.

⁵⁴Unu a-tu ido washia alì ono l'ipfu l'ipfu. Ipfu ọphu ha shii; unu awẹe phẹ alì, ha shii; ipfu ọphu ha nwanshii; unu awẹe phẹ alì, ha nwanshii. Ẹka a turu ido; ọ dabaru ndu ọphu ọ dabaru; ẹphe enworu ẹka ọbu. Onyenonu a-wata oke alì nkiya l'ipfu nna iya.

⁵⁵Ole ọ -buru l'unu ta achifuduru ndu bu l'alì ono l'atatiphu unu bẹ ndu ono, unu haru ono e-mechakwaa buru mkpọ kpọahaa unu l'ẹnya; buru obvu dzuahaa unu ẹ mgbureku. Ẹphe a-nọduepho akpa unu ẹhu l'alì ono, unu e-buru ono.

⁵⁶Teke ono; mu emee unu iphe, mu kwakọberu gẹ mu mee phẹ.”

Ọgú 34

Oke alì Kénanu

¹Chipfu sù Mòsisu:

²“Pfiaru ndu Ízurelu sù phẹ-a: Teke unu bahuru l'alì Kénanu, bụ alì ono, unu eje eketa g'ò buru oke alì unu ono; bụ g'oke alì ono a-dụ bụ ọwana:

³Uzo ndohali unu bẹ e-shi l'echiegu Zinu; nọ-tSORU oke ndu Edomu ogologo. L'uzo enyanwu-awawa bẹ oke alì ọzo ndohali unu a-wata l'ishi ẹka Eze-enyimu Únú jeberu.

⁴Oke alì unu ono e-shi l'uzo ndohali gojia futa l'elikoro Akurabimu; shi l'ẹka ono jee je afuta lẹ mgbegu Zinu. L'ọ bya ejee nno futa l'uzo ndohali Kadeshi-Baneya; shikwapho nno lufuta lẹ Hazarada; ghabua ẹka ono rwua Azumonu.

⁵Oke alì ọzo ndohali unu ono e-shi lẹ Azumonu gojia futa lẹ nggele Ijiputu. Ẹka oo-jeberu; mbụ oke alì ono bụ l'eze-enyimu.

⁶“A bya l'oke alì ọzo enyanwu-ariba; oke iya a-buru l'oke-enyimu. Noo ẹka a-buru oke alì ọzo enyanwu-ariba unu bụ ono.

⁷“A bya l'oke alì ọzo isheli unu; unu shi l'oke-enyimu kpaa oke alì ono jeye l'úbvú Hòru.

⁸Unu eshi l'úbvú Hòru kpaa oke alì ono jeye l'ẹka eeshije abahụ Hamatu. Ẹka oke alì ono e-beru bụ lẹ Zedadu.

⁹L'ọ shi l'ẹka ono nọ jeye lẹ Zifuronu. Ẹka oke alì ọzo isheli unu ono e-beru aburu lẹ Haza-Enanu. Noo ẹka a-buru oke alì ọzo isheli unu bụ ono.

¹⁰“A bya l'oke alì ọzo enyanwu-awawa unu; unu shi lẹ Haza-Enanu kpaa oke alì ono jeye lẹ Shefamu.

¹¹Oke alì ono e-shikwapho lẹ ndohali Shefamu lufuta lẹ Ribula; l'uzo enyanwu-awawa Ayinu. O -rwua ẹka ono l'ọ tsoerupho ọzo ndohali ono futa l'úbvú úbvú, dụ l'uzo enyanwu-awawa eze-enyimu Kineretu.

¹²L'ọ kwaseru; mbụ oke alì ọbu jasụ l'enyimu Jiordanu. Ẹka oo-beru aburu lẹ Eze-enyimu Únú. “Noo ẹka a-buru alì unu bụ ono; mẹ oke iya mgburugburu.”

¹³Mòsisu bya epfiaru ndu Ízurelu sù phẹ: “Noo alì, unu a-tụ ido gude washia g'ò buru oke alì unu ọbu bụ ono. Ọo ya bụ alì ono, Chipfu sùru g'a nù ipfu tete lẹ nkeru-ẹbo ipfu.

¹⁴Noo kele ipfu unwu Rúbenu; mẹ ipfu k'unwu Gadu bẹ natawaru oke alì nkephe l'enya-unuphu phẹ l'enya-unuphu phẹ; wakwapho nkeru-ẹbo ipfu Manáse.

¹⁵Ipfu labo ono; mẹ nkeru-ẹbo ipfu Manáse ono bẹ nataru oke alì nkephe l'uzo enyanwu-awawa l'azu enyimu Jiordanu azu iya ophuu lẹ mgboru mkpukpu Jieriko l'uzo ẹka enyanwu eshije awata.”

Unwoke, a hotaru g'ephe washia alì ono

¹⁶Chipfu sù Mòsisu:

- 17“Waa ẹpha unwoke, a-washì alì ono nù unu g'ò buru oke alì unu baa: Eleyaza, bù onye uke Chileke; waa Jioshuwa nwa Nunu.
- 18Unu hotachaa onye-ishi lanù l'ipfu l'ipfu g'ẹphe yeta ẹka g'a washia alì ono.
- 19Epha unwoke ono bù: Kalebu nwa Jiefune, bù onye shi l'ipfu Jiuda;
- 20mẹ Sámẹlu nwa Amihudu, bù onye shi l'ipfu Simiyonu;
- 21mẹ Elidadu nwa Kisulonu, bù onye shi l'ipfu Benjaminu;
- 22mẹ Buki nwa Jioguli; onye-ishi ndu ipfu Danu;
- 23mẹ Hanẹlu nwa Efodu; onye-ishi l'ipfu Manáse, bù nwa Jiósefu;
- 24mẹ Kemẹlu nwa Shifutanu; onye-ishi l'ipfu Ifuremu, bukwapo nwa Jiósefu;
- 25mẹ Elizafanu nwa Panaku; onye-ishi l'ipfu Zebulun;
- 26mẹ Palutelu nwa Azanu; onye-ishi l'ipfu Isaka;
- 27mẹ Ahihudu nwa Shelomi; onye-ishi l'ipfu Asha;
- 28mẹ Pedahẹlu nwa Amihudu; onye-ishi l'ipfu Nafutali.”
- 29Noo ẹpha unwoke obu Chipfu sùru g'ẹphe washia alì ono g'ò buru oke alì ndu Ízurelu l'alì Kénanu.

Ọgú 35

Mkpukpu, ipfu Lívayi e-buru

- 1Tọbodu iya bù; Chipfu pfuru yeru Mosisu lẹ baswaa alì Mówabu l'aguga Jiódanu l'ẹka ono, nọ lẹ mgboru Jieriko sù iya:
- 2“Pfuaru ndu Ízurelu g'ẹphe shi l'oke alì, ẹphe ketarù nùgbaa eri Lívayi mkpukpu lẹ mkpukpu, ẹphe e-buru. Unu anukwapo ndu Lívayi ono alì ẹka iphe-edobe pẹ a-kpajẹ nri lẹ mgburugburu mkpukpu lẹ mkpukpu ono, aa-nù pẹ ono.
- 3Mkpukpu ono g'ò ha bẹ a-buru ẹka ipfu Lívayi e-buru eburu; alì ono aburu ẹka eswi pẹ; mẹ ẹku pẹ; mẹkpoo iphe-edobe pẹ l'ophu a-nọduje ata nri.
- 4Alì ẹka ono, unu a-nù ipfu Lívayi g'iphe-edobe pẹ kpajẹ nri ono bẹ a-dù unu ntụ-ọkpa ẹto lẹ ntụ-ọkpa ụkporo iri l'ise. Oo-shi l'azụ igbulọ mkpukpu ono nọdu gbaa mgburugburu.
- 5“Uzo ẹnyanwu-awawa azụ mkpukpu ono bẹ unu a-tuta unu ntụ-ọkpa ẹsaa lẹ ntụ-ọkpa ụkporo iri; unu atuta unu ntụ-ọkpa ise l'uzo ndohali azụ mkpukpu ono. Unu atuta unu ntụ-ọkpa ise l'uzo ẹnyanwu-ariba azụ mkpukpu ono; tuta unu ntụ-ọkpa ise l'uzo isheli mkpukpu ono. Mkpukpu pẹ ono anọdu l'echilabọ. Azụ mkpukpu ono aburu ẹka iphe-edobe pẹ a-tajẹ nri.
- 6Mkpukpu ishii l'ime mkpukpu ono, unu a-nù ipfu Lívayi ono bẹ a-buru mkpukpu ẹka aa-nọduje ezeru ndzụ. Onye gburu ọchi; l'ọ gbaru laa lẹ mkpukpu ono je anọdu zeeru

ndzụ. Unu anụfua p̄hẹ ụkp̄oro mkp̄ukpu lab̄o lẹ mkp̄ukpu lab̄o ọzo yek̄oberu p̄hẹ lẹ mkp̄ukpu ono.

⁷Mkp̄ukpu, unu a-nụ ipfu Lívayi bẹ a-kpak̄ota d̄u ụkp̄oro mkp̄ukpu lab̄o lẹ mkp̄ukpu ẹsato; yẹle alì ẹka iphe-edobe p̄hẹ a-n̄duje akpa nri.

⁸A bya lẹ mkp̄ukpu, unu e-shi l'alì unwu Ízurēlu n̄u ipfu Lívayi ono; unu shikwa l'ipfu ọphu alì p̄hẹ ha shii n̄u p̄hẹ mkp̄ukpu, d̄u igwerigwe. Unu eshi l'ipfu ọphu alì p̄hẹ p̄huru n̄u-pete p̄hẹ mkp̄ukpu. Ọo ẹpho g'oke alì ndu nonu habe b̄u g'aa-n̄u-beru ipfu Lívayi ono mkp̄ukpu ọbu.”

Mkp̄ukpu, onye gburu nemadzụ a-n̄duje ezeru ndzụ

(Dit 4:41-43; 19:1-13; Jios 20:1-9)

⁹Chipfu s̄u M̄osisu:

¹⁰“Pfuaru ndu Ízurēlu s̄u p̄hẹ: Unu -dāep̄ho ẹnyimu Jiódanu bah̄u l'alì Kénanu;

¹¹unu h̄ota mkp̄ukpu, unu a-n̄duje ezeru ndzụ; mb̄u ẹka b̄u: onye -gbua nemadzụ; ẹbe o lekebeduru ẹnya; l'ọ gbaru laa ẹka ono.

¹²Mkp̄ukpu ono a-b̄uru unu ẹka unu a-n̄duje zeeru ndzụ; gbalaaru onye agwata ụgwọ ọchi; g'onye ono, gburu nemadzụ ono ta nw̄uhu jeye teke ọo-f̄uta bya ap̄furu l'ip̄hu edzudzu-ọha g'e kpee ya ikpe.

¹³Ọ b̄uru mkp̄ukpu ishii ono, unu a-n̄u ipfu Lívayi ono a-b̄uru mkp̄ukpu ezeru ndzụ ọbu.

¹⁴Unu a-n̄u mkp̄ukpu, ee-zejeru ndzụ ono ẹto l'az̄u ẹnyimu Jiódanu az̄u iya ọwa-a; unu an̄u ẹto ọzo l'alì Kénanu.

¹⁵Mkp̄ukpu ishii ono bẹ a-b̄uru mkp̄ukpu ẹka ndu Ízurēlu; m̄e ndu ab̄udu ndu Ízurēlu; m̄e ndu lwar̄u alwalwa, bu l'echilab̄o p̄hẹ a-gbabaj̄e je an̄odu zeeru ndzụ. Ọ b̄uru onye gburu nemadzụ; ẹbe o lekebeduru ẹnya; bẹ a-gbaj̄eru laa l'ẹka ono.

¹⁶“Obenu lẹ-a; ọ -b̄uru lẹ nemadzụ b̄u iphe-ígwè bẹ o gude chigbua nemadzụ ibiya; bẹ onye ọbu buakwaa onye gburu ọchi. Onye ono, gburu ọchi ono laf̄utajekwa l'ọchi, o gburu.

¹⁷Ọzoo ọ -b̄uru l'ọ nweru onye t̄uru nemadzụ mkpuma tugbua ya; bẹ onye ọbu buakwaa onye gburu ọchi. Onye ono, gburu ọchi ono laf̄utajekwa l'ọchi, o gburu.

¹⁸Ọzoo l'ọ nweru onye wotaru oshi chia nemadzụ; woru iya chigbua; bẹ onye ọbu buakwaa ọchi bẹ o gburu. Onye ono, gburu ọchi ono laf̄utajekwa l'ọchi, o gburu.

¹⁹Onye b̄u iya agwata ụgwọ ọchi ono bẹ ee-gbu onye ono, gburu ọchi ono. Mb̄u-a; g'onye ono, b̄u iya agwata ụgwọ ọchi ono gbua ya l'ẹka o jepfukp̄ooru iya.

²⁰“Onye gude kele nemadzụ bẹ d̄u iya ash̄i; o nwutsua ya; ọ nw̄uhu; ọzoo l'ọ kwab̄eru ẹnya t̄ua ya iphe shi nno tugbua ya;

- 21** ọzoo gude kele yele onye obu du l'opfu; o je echia ya eka chigbua ya; be onye ono, chigburu nemadzu ono be e gbufutajekwa; noo kele o gburu ochi. Onye agwata ugwo ochi ono e-gbu onye ono, gburu ochi ono teke o jepfuru iya.
- 22** “Ole o -buru l'o nweru onye nwutsuru nemadzu l'otulupfu; o nwuhu; ophu o budu le yele onye obu du l'opfu; ozoo l'o to lekebeduru enya tua ya iphe;
- 23** ọzoo l'oo mkpuma, a-du ike tugbua nemadzu be o to humaduru onye ono; o tua ya woru onye ono tugbua; be eshi ophu onye ono, o tu-gburu ono be yele iya ta adudu l'opfu; ophu o gbaduru enya ge ya meka ya iphe;
- 24** g'edzudzu-oha kpeshiaru iya onye ono, gburu nemadzu ono yele onye ono, agwata ugwo ochi onye ono, o gburu ono. Waa g'ee-gude doshiaru phe iya baa:
- 25** G'edzudzu-oha nafuta onye ono, gburu nemadzu ono l'eka onye ono, bu iya agwata ugwo ochi onye ono, o gburu ono; ephe eduru iya je edobephu azu le mkpukpu ono, aa-noduje ezeru ndzu ono, bu eka o gbaru laa. O nodu le mkpukpu, aa-noduje ezeru ndzu ono jeye teke onye-ishi ndu-uke Chileke, bu onye ono, a wuru manu, du nsọ l'ishi a-nwuhu.
- 26** Ole o -buru l'onye ono, gburu ochi ono be nweru teke o nonyaru; o kpoghata oke mkpukpu, o no ezeru ndzu ono; mbu mkpukpu ono, o gbaru je anodu ono;
- 27** onye ono, bu iya agwata ugwo ochi ono -huma iya l'oke azu mkpukpu, o no ezeru ndzu ono; o -buru l'onye ono, bu iya agwata ugwo ochi ono be gburu iya nu; be ikpe ochi ta anmakwaru iya.
- 28** Noo kele onye ono, gburu ochi ono nodufutaje le mkpukpu, o no ezeru ndzu ono jeye teke onye-ishi ndu-uke Chileke a-nwuhu. Oo ephe; onye-ishi uke Chileke -nwuhuada teme l'o lawarọ alı iya.
- 29** Iphe ono a-bukotaru omelalı, a toru okpa iya, a-duru ogbomogbo l'eka unu bukotakpoo.
- 30** “Oo ya bu l'iphe, bu onye gburu nemadzu; be onye ono gburu nemadzu ono be e gbufutaje egbugbu; m'o -buru l'o duru ndu agba iya ekebe ochi, o gburu. Ole g'o to bukwa ekebe, onye lanu agba be ee-gude gbua nemadzu.
- 31** G'o to dukwa iphe, unu a-nataje g'e gude gbata ndzu onye gburu ochi, bu onye o gbaru g'o nwuhu anwuhu. E gbufutaje iya egbugbu.
- 32** Onye gbaru laa le mkpukpu, eezejeru ndzu; bya eworu iphe nu l'ugwo g'a haa ya g'o laa alı phe teme onye-ishi ndu-uke Chileke anwuhu; unu ta natakwa iya iphe obu.
- 33** Unu te emerwushikwa alı ono, unu eje eburu ono emerwushi; noo kele mee ochi aturwujekwa alı. O to dudu g'ee-shi pfua ugwo ejo-iphe alı eka e gburu ochi; gbahaephe l'e gburu onye ono gburu ochi ono.
- 34** Unu ta turwukwa alı ono, unu eje eburu ono; noo kele mbedua, bu Chipfu be bu l'echilabo unube ndu Izurelu.”

Ógú 36

Òkè alì ụnwada Zelofehadu

(Dit 27:1-11)

¹Ndu-ishi l'ęnya-unuphu l'unuphu, nọgbaa l'ipfu Giladu bya abyapfuta Mósisu; me ndu-ishi l'ęnya-unuphu l'unuphu ndu Ízurelu. Giladu bu nwa Makiya; Makiya buru nwa Manáse. Manáse l'onwiya be shi l'onulo Jiósefu.

²Ephe byapfuta phe bya asu: “Chipfu be suru ge gube nnajiuphu anyi, bu Mósisu tua ido gude washia alì ono keeru ndu Ízurelu g'ọ buru oke alì phe. Chipfu sukwapfo ge gube nnajiuphu anyi woru oke alì ophu rwuberu Zelofehadu, bu nwune anyi woru nu unwada iya.

³Ole-a; ọ -buru l'o nweru onye shi l'ipfu ozo, nọ le Ízurelu; bya aluta phe; oniya bu l'aa-gufu okiphe phe l'ime okiphe, shi le ndiche anyi phe; je eworu yekobe le k'ipfu ono, ephe laru ji ono. Oo ya bu; eeshi nno wofu iphe l'okiphe, anyi ketaru.

⁴O -rwuepho l'apha-ehu-utso ke ndu Ízurelu; ee-wota okiphe phe yekoberu ipfu ono, ephe laru ji ono. Okiphe phe be aa-gufu l'okiphe ipfu nna anyi phe.”

⁵Tobudu iya bu; Mósisu bya epfuaru ndu Ízurelu iphe, Chipfu pfuru iya su: “Iphe, ipfu unwu Jiósefu epfu be pfukwaru nhamunha.

⁶Wakwa iphe, Chipfu pfuru l'opfu ehụ unwada Zelofehadu ba. O suru: G'ephe luru onye dukpoo phe ree. Ole eka ephe a-lu ji bu l'ęnya-unuphu ipfu nna phe.

⁷G'okiphe ndu Ízurelu te shikwa l'ipfu dasweru ipfu. Iphe, bu ndu Ízurelu be e-gudeshichaa okiphe, ephe ketaru l'ipfu nna phe.

⁸Iphe, bu nwa nwanyi, ketaru oke l'ipfu Ízurelu be lufutaje ji l'ipfu nna iya; k'ophu eeshi nno g'iphe, bu ndu Ízurelu nwekotaru okiphe nna phe.

⁹Oo ya bu l'òkè-iphe te eshidu l'ipfu adasweru ipfu ozo; noo kele ipfu nonu le Ízurelu be e-gudeshi òkè-iphe nkephe.”

¹⁰O buru iphe ono, Chipfu pfuru Mósisu ono be unwada Zelofehadu meru.

¹¹Noo kele unwada Zelofehadu ono, epha phe bu Mahula; me Tiza; me Hogula; me Milika; waa Nuwa be bu unwu nwune nna phe luru phe.

¹²A luru phe lubata l'ipfu unwu Manáse, bu nwa Jiósefu; okiphe phe nodu g'ọ nọ l'ipfu nna phe.

¹³Noo ekemu, Chipfu turu; me omelali, ọ gbę Mósisu l'eka nu unwu Ízurelu le baswaa alì Mówabu; l'aguga ęnyimu Jiódanu le mgboru Jieriko bu ono.

Ditoronomi

Ditoronomi 1

Ekemu k'alufu l'úbvú Horẹbu

¹Qwaa bu iphe, Mosisu pfuru nu ndu Ízurelu g'ephe ha l'echiegu uto enyanwu-awawa Jiordanu, bu iya bu nsuda Araba, no gha iphu l'uzo Sufu. O no le mgbaka Paranu l'azu lanu; waa Tofelu; waa Lebanu; waa Hazerotu; yee Dizhabu l'azu iya ophuu.

²E -shi l'úbvú Horẹbu eje Kadeshi-Baneya be ee-jegbuje ije ujiku iri le nanu teme l'ewua ya me e tsoru uto ubvu Siye.

³O be l'apha, kwe phe mgbarapha ukporo labo; le mboku, onwa k'iri le nanu furu gedegede; Mosisu raaru iya ndu Ízurelu g'ephe ha arara; mbu iphe, Chipfu turu iya l'ekemu le k'opfu ehu phe.

⁴Ono bu g'o lwu-kpechaerupho Sihonu, bu eze ndu Amoru; bu onye shi buru le Heshibonu. Teme o jekwapho Edereyi je alwu-kpee Ogu, bu eze ndu Beshanu; bu onye shi buru le Ashitoretu.

⁵O buru l'uzo enyanwu-awawa Jiordanu l'eka ono l'ali ndu Mowabu be Mosisu no wata phe atokashiru ekemu ono; su:

⁶“Chipfu, bu Chileke anyi no l'úbvú Horẹbu pfuru nu anyi su: ‘Unu nonukakwaru odu l'úbvú-a.

⁷Unu phokashia ulo-ekwa unu tugbua jeshia ali ubvu ubvu ndu Amoru; waa ali ndu no-kube phe nu le nsuda Araba; me l'ali ubvu ubvu; me l'ali okpa-ubvu, no l'uzo enyanwu-ariba; waa ndu bu l'uzo echiegu ndohali; waa ndu bu l'uzo aguga eze-enyimu; mbu kwaseru uto ali ndu Kenanu; yee ubvu ubvu Lebanonu; mbu kwaseru rwuchaa enyimu ono, bu enyimu Yufurétisu.

⁸Lekwaa; mu woakwaru ali ono dobe l'iphu unu. Unu wubakwa je alwuta ali obu nworu; mbu ali ono, Chipfu riru angu le ya a-nu nna unu oche phe ono, bu Ebirihamu; waa Ayizaku; waa Jieko; yee oshilokpa phe g'ephe ha.’ “

Mosisu ahota ndu-ikpe

(Awu 18:13-27)

⁹“O buru teke ono be mu suru unu: ‘Mu ta adukwa ike evukota ivu-erwa unu nwekinyi mu.

¹⁰Su-a; nta-a be Chipfu, bu Chileke unu mewaru; unu ka l'otu k'opfu bu le nta-a be unu hawa ge kpokpode, no l'igwe.

¹¹Mu nodu epfukwapho ge Chipfu, bu Chileke ke nna unu phe mekwaro g'unu kabaa l'otu eme le g'unu ha nta-a ugbo ukporo l'unu; teme l'ookebekwapho unu l'oma, bu iphe, o kweru unu ukwe iya.

¹²? Denu ge mbedua nweka mu a-du ike vukota ivu-erwa unu; me iphe, atsụ unu l'ehu; edoshikotaru unu opfu?

13Sụ-a; unu shigbaa l'okpa-ipfu unu l'okpa-ipfu unu hotakota ndu maru iphe; mbụ ndu bụ ndu iphe edoje ɛnya; bya aburu ndu a maru ɛpha pɛ; gɛ mu mee pɛ g'ɛphe buru ndu-ishi unu.'

14“Unu yeeru mu onu sụ l'iphe, mu pfuru bụ iphe, o gbaru g'unu mee.

15Oo ya bụ; mu bya ahotagbaa ndu bụ ndu nweru ɛnya l'okpa-ipfu unu iche iche buru ndu maru iphe; bukwarupho ndu a maru ɛpha pɛ; mee pɛ g'ɛphe buru ndu-ishi unu. O duru ndu ophu mu meru; ɛphe buru ishi unu umadzu labo l'ukporo umadzu iri iri; o duru ndu ophu bụ ishi umadzu ukporo ise. O dukporuro ndu ophu bụ ishi umadzu ukporo ɛbo l'iri; duru ndu ophu bụ ishi umadzu iri; tuko g'ɛphe ha mee ndu-ishi l'ipfu l'ipfu.

16“Mu tɔaru ndu-ikpe unu ekemu teke ono; sụ pɛ: ‘Unu ngabejekwaru unwune unu, opfu adaru nchi; g'ɛphe dooru unu iphe, adaru pɛ nɔ. ɛphe -dochaa ya; unu edoshiaru pɛ opfu obu l'uzo pfuru oto; m'o bụ ndu Izurelu lɛ ndu Izurelu bɛ odaru; m'o bụ onye Izurelu yele onye lwaru alwalwa.

17Unu te elejekwa nemadzu ɛnya l'iphu ekpe ikpe. Unu ngabejekwaru umadzu labo, opfu adaru nchi; g'ɛphe doo iphe, adaru pɛ nɔ; m'ɛphe bụ ndu ha nwanshii; m'ɛphe bụ ndu ha shii. Unu ta atsujekwa nemadzu ebvu; kele onye-ikpe du l'eka bukwa Chileke. Teke o bụ opfu, kariru unu ɛka; unu egude iya byapfuta mbedua gɛ mu nɔma.’

18Mbụ lɛ teke ono bɛ mu tukoerupho iphe, gbaru unu l'ememe kakotaru unu g'unu mee.”

Anwụ ngge l'alị Kénanu

(Ọgú 13:1-33)

19“Noo ya; gɛ Chipfu, bụ Chileke anyi suru g'anyi wufu l'ubvú Horebu; bɛ anyi wufuru kwaseru ɔzo, e shi eje alị ubvú ubvú ndu Amoru; jekota ije l'echiegu ono, paru ɛka bya adu ebvu ono, unu humakotaru ono; jasụ anyi rwua Kadeshi-Baneya.

20Tobudu iya bụ; mu sụ unu: ‘Nta bɛ unu rwuakwaru alị ubvú ubvú ndu Amoru, bụ iya bụ alị, Chipfu, bụ Chileke anyi abya anyi anunu.

21Unu lenu; lɛ Chipfu, bụ Chileke unu nɔakwaru unu alị obu. Unu tugbukwa je anata alị obu, bụ iya bụ iphe, Chipfu, bụ Chileke kɛ nna anyi oche pɛ pfuru. Gɛ ndzu ba agukwa unu; ophu ɛhu anmakwa unu anmanma!’

22“Obenu l'unu byapfutaru mu bya asụ l'o kakwa ree g'anyi hota ndu nemadzu zia g'ɛphe je anwuaru anyi ngge l'alị ono; g'ɛphe bya akaru anyi ɔzo, anyi ee-shi bahụ iya; teme waa mkpukpu, anyi e-shi bahụ.

23“Iphe ono, unu pfuru ono du mu ree shii; oo ya bụ; mu bya ahotu umadzu iri l'ɛbo; okpa-ipfu, nonu onye lanu.

24Ndu ono tugbua kwaseru ɔzo alị ubvú ubvú ono; lufuta lɛ nsuda Eshukolu; nwukota alị obu ngge.

²⁵Ephe hachaaaru akpuru oshi, nọ l'alì ono wọta gude lwapfuta anyi; bya asu anyi: 'Alì obu, Chipfu, bu Chileke anyi abya anyi anunu obu dukwa ree.' "

Ndu Ízurelu ekwefuru Chipfu ike

²⁶"Obenu l'unu numachaaaru iya; bya ekwefu ike ejeje; jìka eme iphe, Chipfu, bu Chileke anyi sùru g'unu mee.

²⁷Unu nọdu l'ulo-ekwa unu agushi aphụ sù: 'Chipfu be anyi dukwa ashì; o kwa iphe ono meru iphe, o dufutaru anyi l'alì ndu Ijiputu; woru anyi ye ndu Amọru l'eka g'ephe megbushia anyi.'

²⁸Unu sù: '? Bu ole be anyi e-shi abahụ nta; g'unwunna anyi-a mewaru; meji tsukahụ anyi-a? kele ephe sùru le ndu bu l'alì ono ka anyi l'otu; bya akagbaa anyi ogologo; teme mkpukpu phe pagbaa eka; yee phengara phengara igbulọ mkpukpu ono, aakpujegbaa l'oorwua akpaminigwe. Ozo, ka njọ bu l'anyi humacharu unwu ndu Anaku l'alì eka ono.'

²⁹"Mu sù unu: 'Ge meji te tsukahushi unu! Mbụ-a; ge ndzụ phe ba agushi unu!

³⁰Le Chipfu, bu Chileke unu, bu onye vutaru unu ọzo be a-lwu-chiteru-a unu ọgu; egube ono, o lwu-chiteru iya unu l'alì ndu Ijiputu ono; bu ophu unu gude enya unu huma-a.

³¹Teme wakwaphọ g'ọ lwu-chiteru iya unu l'echiegu; eka unu humaru ge Chipfu, bu Chileke unu hetaru unu ge nna ehetaje nwatibe iya-a; hekpoeppo unu gbiriri jasụ unu rwua eka-a.'³²Unu lephukota opfu mu ono; mbụ bya ajika achiru upfu kwe l'eka Chipfu, bu Chileke unu nọ,

³³bu onye vutaru unu ọzo l'ije unu obu. Teme o buru yebedua be anọduje eleru unu enya eka unu a-kpobe ulo-ekwa ono. Onye abujeru; o -be l'enyashi l'o nwuberu unu oku; teke o beru l'eswe l'o doberu unu urwukpu; shi nno egoshi unu ọzo unu a-nọdu eshi; teme o buru yebedua anọduje eleru unu enya eka unu a-kpobe ulo-ekwa unu."

Chipfu anụ ndu Ízurelu aphụ

(Ọgú 14:20-45)

³⁴"Chipfu numa iphe, unu pfuru; ehu ghuahaa ya egu; o buta angu ria sù:

³⁵'O to dukwa me onye lanu l'ogbo ndu ejo-okpoma-a, byaru ahuma eguru alì ono enya; mbụ alì ono, mu riru angu sù le mu a-nu nna unu oche phe ono;

³⁶gbahaa Kalebu nwa Jiefune. Yebedua a-huma iya; mbụ le yebedua be mu a-nu eka o zokporu okpa l'alì ono; teme mu anukwa iya pho unwu iya. Iphe, kparu iya nu buru l'o gude obu iya g'ọ ha tsoo Chipfu.'

³⁷O bukwarupho opfu ehu unu meru g'o gude; ehu ghuahaa Chipfu egu l'eka mu nọ. O pfua sù: 'Gubedua ta abahukwa iya pho.

³⁸L'ọo onye eyejeru mu eka bu Jioshuwa nwa Nunu be a-bahụ iya nù.' Sù: 'Gbakwaa ya unme g'obu shihu iya ike; noo kele ọo yebedua e-du ndu Ízurelu g'ephe je alwuta alì ono nworu.

³⁹A -bya l'unwegirima ke nshii, bu ndu ophu unu suru l'aa-kpu le ndzu ono; mbu unwegirima unu ndu ophu teke amaduru iphe, du ree; me iphe, du eji le teke ono; ndu k'ono bu ndu a-bahu l'alii ono. O buru ephedua be mu a-nu alii obu; epe enworu iya g'o buru okiphe phe.

⁴⁰A -bya l'unubedua; unu laphukwa azu; unu wukwaru shia uzo echiegu lashia l'uzo Eze-enyimu Uswe-uswe.'

Aalwu-gbu ndu Izurelu

(Ogu 14:39-45)

⁴¹"Tobudu iya bu; unu yeeru mu onu su: 'Anyi mesweakwaru Chipfu. Anyi e-jewaro alwua ogu obu; mekota iphemiphe, Chipfu, bu Chileke anyi suru g'anyi mee.' Oo ya bu; unu toko g'unu ha kwakobe k'eje ogu. Unu dobesu l'abahu l'alii ubvu ubvu ono du nphe.

⁴²"Tobudu iya bu; Chipfu su mu: 'Kakwaru phe g'ephe te ejekwa abahu; ophu epe ejekwa alwu ogu; noo kele mu ta no-kubekwa unu. Unu -jee be ndu ohogu unu alwukwa unu.'

⁴³Mu pfuaru iya unu; ophu unu angaduru nchi; unu jika eme iphe, Chipfu suru g'unu mee; gude eku onwunu wufu jeshia l'alii ubvu ubvu.

⁴⁴Ndu Amoru, bu l'alii ubvu ubvu ono wufuta tsopfuru unu ogu. Epe vupyabe unu g'enwu; gbushia unu. Epe chipfuru unu egbushi unu eshi le Siye jasu le Homa.

⁴⁵Unu lwaphuta azu bya egude olu ekwa raku Chipfu; ophu o yeduru onu yeru unu; o gbagbua ya le nkuchi.

⁴⁶O buru iya bu l'unu aduru le Kadeshi noo ujiku, du igwerigwe."

Ditoronomi 2

Aghaphe botorii l'echiegu

¹"Anyi dakobe wu-phu azu l'echiegu; wuru shia uzo Eze-enyimu Uswe-uswe, bu iya bu ge Chipfu suru mu g'e mee ya. Anyi wu-phekpoo noo odu l'alii ubvu ubvu Siye l'eka ono.

²"A nonyaa Chipfu su mu:

³"Unu wu-pheshitaakwaru l'alii ubvu ubvu-a. Iphe, unu e-me nta-a be bu g'unu shia uzo isheli.

⁴Waa iphe, ii-pfuru ndu Izurelu baa: Nta-a be unu abyakwa awughata eka unwunna unu, bu oshilokpa Iso bu; mbu ndu bu l'alii Siye. Epe a-nodukwa atsu unu ebvu; ole-a; unu kwabekwaru onwunu enya!

⁵Unu ta akpakokwaru phe k'ogu; noo kele o to dudu alii phe me eka lanu, mu a-nu unu; m'o beta o buru ntokpa lanu. Mu nuakwaru Iso alii ubvu ubvu Siye g'o buru nkiya.

⁶Unu gudekwa okpoga z̄ta phe nri, unu e-ri; unu egudekwapho okpoga z̄ta phe mini, unu a-ngu.’

⁷“Chipfu, bu Chileke unu kebekwaru unu l'oma l'iphe, bu ozi, unu gude eka unu jee. O buru yebedua letakotaru unu enya l'ije, unu jekotaru l'echiegu-a, paru eka apa-a. L'ime ukporo apha labo-a be Chipfu, bu Chileke no-kubekotakwaru unu; ophu o dudu iphe, uko iya dujeru unu me nanu.

⁸“Tobudu iya bu; anyi bya aghata eka unwunna anyi ono, bu oshilokpa Iso bu l'ali Siye. Anyi bya aji-chi uzo nsuda Araba, bu uzo, shi mkpukpu Elatu; bya eshikwapho mkpukpu Eziyonu-Geba. Anyi kwaseru uzo echiegu Mowabu tugbua.

⁹Noo ya; Chipfu su mu: ‘Unu ta chokwa ndu Mowabu opfu; ophu unu akpakokwaru phe k'ogu; kele o to dukwa ali phe me eka lanu, mu a-nu unu; eshinu mu wowaru ali Aru nu oshilokpa Lotu g'o buru nkephe.’ “

¹⁰Ndu shi buru l'eka ono bu ndu Emu. Epe bu ndu okpehu du; teme epe du igwerigwe. Epe hachaepho kpaphere kpaphere ge ndu Anaku.

¹¹O kwapho egube ono, aasuje le ndu Anaku bu oshilokpa Rafa; bukwapho g'aasuje l'ephebedua bu. Ndu Mowabu ekuje phe ndu Emu.

¹²O buru ndu Horu shi buru l'ali Siye; ole oshilokpa Iso chifuru phe gbushia phe l'eka ono bya ebuchia eka epe shi buru; egube ono, ndu Izurelu meru l'ali ono, Chipfu nuru phe g'o buru nkephe ono.

¹³“Tobudu iya bu; Chipfu su: ‘Unu wu-lihu je adaghaa nggele Zeredu ono.’ Anyi wu-lihu je adaghaa nggele Zeredu obu.

¹⁴A -gbē le teke anyi gbeshiru le Kadēshi-Baneyā gbiriri jasū teke anyi jeru je adaghaa nggele Zeredu obu be bu ukporo apha l'apha iri l'esato. O rwutashia teke ono; ogbo, shi suru eje ugu le Izurelu laebewa mfulome, bu iya bu iphe, Chipfu riburu angu le ya e-me.

¹⁵Kele Chipfu daberu phe eka; gbushikota jasū epe chihu l'odu unwu Izurelu.

¹⁶“Tobudu iya bu; o be teke ndu suru eje ugu l'echilabo ndu Izurelu nwuhubebechaerupho;

¹⁷Chipfu su mu:

¹⁸‘Ntanu-a be unu a-ghabu ali ndu Mowabu, bu iya bu Aru.

¹⁹Ole teke unu rwuru l'ali ndu Amonu; unu ta chokwa phe opfu; ophu unu akpakokwaru phe k'ogu; noo kele o to dudu ali, bu ke ndu Amonu, mu byaru anu unu. Ali obu be mu nuwaru oshilokpa Lotu g'o buru nkephe.

²⁰‘Ndu shi buru l'ali ono bukwapho ndu aasuje l'ephe bu oshilokpa Rafa. Mbū l'oo ndu Rafa shi buru iya teke ndiche. Ndu Amonu bu ndu Zamuzumimu be epe ekuje phe.

21 Ɛphe bu ndu okpehu shi du shii; teme epe shi du l'otu; bukwarupho ndu shi hagbaa kpaphere-kpaphere ge ndu Anaku. Obenu le Chipfu mebyishiru phe l'iphu ndu Amonu. Ndu Amonu chifu phe buru l'eka epe shi buru.

22 O bukwapo nno bu ge Chipfu meru iya oshilokpa Iso, shi buru l'ali Siye. O mebyishiru phe ndu Horu, shi buru l'eka ono. Oshilokpa Iso chifu phe buru l'eka epe shi buru gbiriri jasu ntanu-a.

23 Ndu Ava, shi bugbaaru l'unwu mkpukpu, noru jasu le mkpukpu Gaza be ndu Kafuto, shikwapo l'ali Kafuto wufuta byaru bya emebyishia; chifu phe; buchia eka epe shi buru.

izurelu alwu-kpe Sihonu, bu eze ndu Amoru

(Ogu 21:21-30)

24 "Unu gbeshi je aghabua nsuda Anonu. Unu lenu; mu woakwaru Sihonu onye Amoru, bu eze Heshibonu; yee ali iya ye unu l'eka. Unu je awata phe achifu. Unu je akpakoru iya k'ogu.

25 Mu agbe ntanu-a wata eme ge ndzu unu wata agu onyemonye, no le mkpula akpaminigwe-a l'opu; mbu g'ephe tuko g'ephe ha wata aphu kpaakpaakpaa l'opfu ehu unu. Epe a-numa iphe, unu eme; meji etsukahu phe; epe awata ete kparikpari l'eka ndzu unu agu phe." "

26 "Mu gbe l'echiegu Kedemotu zia ndu-ozu g'ephe je ezia Sihonu, bu eze Heshibonu ozi nchi-odoo; su iya:

27 "Jiko g'anyi ghatanu l'ali unu. Oo epho l'oma eze gbororo be anyi e-toru. Anyi ta ahakwa gbororo ono; swia uzo ozo.

28 Nri, anyi a-nodu eri; waa mini, anyi a-nodu ngu be anyi a-zuje unu l'okpoga. Iphe, anyi arwo unu kpoloko bu g'anyi zo okpa anyi l'ali unu ghata.

29 Mbu egube ono, oshilokpa Iso, bu l'ali Siye shi ereje iya anyi-a; ndu Mowabu, bu l'ali Aru shi erejekwa iya pho anyi nno. Unu reje iya anyi nno gbiriri jasu anyi aghaa enyimu Jiodanu bahu l'ali, Chipfu, bu Chileke anyi anu anyi.'

30 "Obenu le Sihonu, bu eze Heshibonu jikaru g'anyi ta aghatashi. Noo kele Chipfu, bu Chileke unu meru g'o buru onye ejo-okpoma waa g'o kpochia obu; g'ee-shi g'o woru iya ye unu l'eka; bunu iya bu iphe, o mewaru-a.

31 "Chipfu sukwaru mu: 'Lenu; mu wataakwaru eworu Sihonu; yee ali iya ye unu l'eka. Unu watakwu iya alwuta; k'opu ali iya e-mechaa buru okiphe unu.'

32 Tobudu iya bu; Sihonu yee ndu nkiya g'ephe ha wufuta byapfuta anyi ugu le Jiahazu.

33 Chipfu, bu Chileke anyi woru iya ye anyi l'eka; anyi lwu-kpee ya; waa unwu iya; yee ndu nkiya iya g'ephe ha.

³⁴Anyi nata mkpukpu le mkpukpu iya g'ọ ha teke ono; bya emebyishikọta iya l'ophu; unwoke; me unwanyi; me unwegirima. Ophu o dudu me onye lanu, anyi haru g'ọ phodu.

³⁵Iphe-edobe; me iphe ozo, anyi kwataru l'okwata le mkpukpu ono, anyi lwu-kperu ono be anyi gwetaru; o buru k'anyi.

³⁶A -gbẹ le mkpukpu Arowa, no l'oke nsuda Anonu; me le mkpukpu ono, no l'ime nsuda Anonu ono je akpaa l'alị Giladu ta adudu me mkpukpu lanu, okpehu nkephe nyiberu k'anyi; kele Chipfu, bu Chileke anyi tukoru iya g'ọ ha nukota anyi.

³⁷Obenu l'alị ndu Amonu; me alị, no l'aguga nggele Jiaboku; me le mkpukpu, nogbaa l'ubvu ubvu be unu gbangoru, bu iphe, Chipfu, bu Chileke anyi suru g'anyi mee.”

Ditoronomi 3

Ịzurelu alwu-kpe Ogu, bu eze ndu Beshanu

(Ọgụ 21:31-35)

¹“Tobudu iya bu; anyi gbẹ teke ono gha iphu l'uzo Beshanu. Ogu, bu eze ndu Beshanu; yee ndu alị iya wufuta; byapfuta anyi ugu le mkpukpu Edereyi.

²Chipfu su mu: ‘Unu ta atsukwa iya ebvu; kele mu woakwaru iya; yee ndu alị iya; waa alị iya l'ophu ye unu l'eka. Unu mekwaa phe iphe, unu meru Sihonu, bu eze ndu Amoru, bu le Heshibonu.’

³“Noo ya; Chipfu, bu Chileke anyi woru Ogu, bu eze ndu Beshanu; yee ndu alị iya l'ophu ye anyi l'eka. Anyi gbushiaha phe; lwua phe gbiriri jasụ ophu o duedu onye phodukwaduru nu.

⁴Anyi nata mkpukpu iya g'ọ ha teke ono; ophu o dudu me mkpukpu lanu, l'ime ukporo mkpukpu eto, o nweru, anyi nataphodoru; mbu alị Agobu l'ophu, bu iya bu alị-eze Ogu, no l'alị Beshanu.

⁵Mkpukpu ono g'ọ ha b'e gude igbulọ kpu-phekota mgburugburu; teme a kpukotakwapho igbulọ obu; o hakota ephekerephe ephekerephe; bya eyekota mgbo-igwe l'onu-abata iya; tuchikota iya atuchi. Teme o dukwarupho mkpukpu le mkpukpu ozo, du igwerigwe, a kpuduru igbulọ, anyi lwutachaa ru ye iya.

⁶Anyi tuko mkpukpu ono g'ephe ha mebyishikota; egube anyi meru ke Sihonu, bu eze ndu Heshibonu; mbu tuko unwoke; me unwanyi; me unwegirima mkpukpu ono mebyishikota.

⁷Iphe-edobe phe; me iphe, ephe nweru enweru be anyi kwataru l'okwata; g'ọ buru k'anyi.

⁸“O buru teke ono be anyi nataru ndu eze ndu Amoru ono ephenebo alị, no l'uzo enyanwu-awawa enyimu Jiordanu; a -gbẹ le nsuda Anonu jasụ l'ubvu Hamonu.

⁹Ubuvu Hamonu be ndu Sayidonu ekuje Siriyonu; ndu Amoru nodu ekuje iya Seniru.

10 Anyi natakoṭaru mkpukpu le mkpukpu, nokota le baswaa uswe iya ono l'ophu; waa ali Giladu l'ophu; mekwapho ali Beshanu g'o ha; jasụ le mkpukpu Saleka; yee Edereyi, tukokwapho yiru l'ali Beshanu; eka Ogu bu ishi.

11 “Oo Ogu, bu eze ndu Beshanu be shi phodu nu l'oshilokpa Rafa. Mbu l'iphe, oozeje azee bu l'igwe be e meru iya. Ogologo iphe-azee obu du nkwo-eka tete. Uswekete iya du nkwo-eka eno; mbu nkwo-eka mmanu. Iphe-azee ya obu dukwa le mkpukpu Raba, du l'ali ndu Amonu byasu ntanu-a.”

Aaweshi ali ono

(Ogu 32:1-42)

12 “Anyi lwutachaephe ali ono; mu woru uzo isheli mkpukpu Arowa, bu ophu du l'aguga nsuda Anonu; waa nkeru-ebo ali ubvu ubvu Giladu me mkpukpu, dukota iya nu; nu oshilokpa Rubenu; waa oshilokpa Gadu.

13 Mu bya ekee okpa-ipfu Manase ebo bya eworu ali Giladu ibiya ophu ghuduru nu pho; waa ali Beshanu l'ophu; eka shikota buru ali-eze Ogu; woru nu oke lanu l'uzo labo ndu Manase ono.” Ali Agobu l'ophu, no l'ali Beshanu be aza ali oshilokpa Rafa.

14 O buru Jiayi, bu oshilokpa Manase wotakotaru ali Agobu ono l'ophu; jasuchaa l'oke ephe le ndu Geshu; waa ndu Maka. E woru epha iya gua ali ono; k'ophu bu l'a -gbe teke ono byasu ntanu-a be a wataru eku uswe eka ono Havotu-Jiayi.

15 “Mu woru ali Giladu nu Makiya.

16 A bya abya l'unwu Rubenu; yee unwu Gadu; o buru eka mu nuru phe bu a -gbe l'ali Giladu tugbua jee jasụ le nsuda nggele Anonu. O buru echilabo nsuda ono be oke iya kparu. Teme mu nukwa phe pho ali ophu shi l'eka ono noo jasụ le nggele Jiaboku, bu iya bu eka ali ndu Amonu kparu.

17 Mu nukwa phe pho nsuda Jiodanu, gbe l'eze-enyimu Galili noo jasụ l'eze-enyimu nsuda Araba, bu iya bu Eze-enyimu Unu, no l'uzo enyanwu-awawa ubvu ubvu Pisiga. O buru l'enyimu Jiodanu be oke iya kparu.

18 “Mu t̄aru iya unu l'ekemu teke ono su: ‘Chipfu, bu Chileke unu nuakwaru unu ali-a g'o buru k'unu. G'unwoke unu ndu ike du l'ogu kwakwaa onwophe k'ogu; vuru unwune unu ndu Izurelu uzo daa enyimu Jiodanu.

19 Ole g'unyomu unu; yee unwegirima unu; mekpoo iphe-edobe unu nodukwa le mkpukpu ono, mu nuru unu ono. Le mu makwaru-a l'unu nwenukaru iphe-edobe.

20 Unu tsokwaru phe je ugu gbiriri jasụ teke Chipfu e-mefua g'unwune unu ono nopyabe g'o meru g'unubedua nopyabe-a; mbu m'ephe nata ali nkephe, bu ali ono, Chipfu abya phe anunu l'azu enyimu Jiodanu azu iya ophuu. O -nwuchaephe nno; ndu nonu alaphushiwaro azu l'oke ali ophu mu nuru phe ono.’

21 “Mu bya akaru Jioshuwa teke ono su iya: ‘Nta be i gudewaa enya ngu ebo ebo huma iphe, Chipfu, bu Chileke unu meru ndu eze labo-a. O kwapho egube ono bu ge Chipfu e-me ali-eze ophu nokota l'azu-enyimu azu iya ophu unu eje pho.

22Unu ta tsukwa phe ebvu; kele o kwa Chipfu, bu Chileke unu l'onwiya a-lwu-chiru unu ogu obu.' "

Aadabuta Mosisu g'o to ghatashi enyimu Jiordanu

23"O buru teke ono be mu rworu Chipfu su:

24'Gube Nnajiuphu, bu Chipfu; nta-a be i watawaru egoshi mube onye-ozu ngu gi habe shii; yee okpukpu-ike ngu. ? Bu agwa, du idu-agma, no l'eliphe-a; ozoo l'imigwe suru eme iphe, paru aka imegbabe-a?

25Hanaa mu jiko ge mu daghaa enyimu-a je ahuma eguru ali ono, no l'azu enyimu Jiordanu azu iya ophuu ono; mbu eguru ali ubvu ubvu ono; waa ubvu ubvu Lebanonu ono!'

26"Obenu l'oo opfu ehuru unu be Chipfu gude tukoshi mu oke ehuru-eghu iya; ophu o kwedu ngaberu mu nchi. Chipfu gbenuru su mu: 'Be pufekwa iya ozo! Ta rwokwa mu iphe ono, iirwo mu ono!'

27Nyihukwa ubvu Pisiga; lee enya l'uzo enyanwu-ariba; lee l'uzo isheli; lee l'uzo ndohali; waa l'uzo enyanwu-awawa. Nodu l'eka ono lee enya l'ali ono; kele i tii dakwa enyimu Jiordanu-a alufu azu iya ophuu.

28Oo gi zia Jioshuwa iphe, oo-me; l'i mee g'obu shihu iya ike; g'o to te etete; kele o yebdua bu onye e-du ndu-a g'ephe lufu azu iya ophuu je enworu ali ono, ii-huma ono.'

29"O buru iya bu; anyi doshia le nsuda ono, no-kube mkpukpu Betu-Peyo."

Ditoronomi 4

Mosisu epfu ge ndu Izurelu meje iphe, a turu l'ekemu

1"Unube unwu Izurelu; unu ngabekwa nchi ge mu zia unu iphe, Chipfu toru okpa iya su g'e tsoje; yee iphe, o suru g'e meje. Unu mekwaa ekemu-a g'unu anodu ndzu; je alwuta ali ono nworu; mbu ali ono, Chipfu, bu Chileke nna unu phe abya unu anunu ono.

2Unu te eyekwakwa iphe, l'opfu-a, mu epfuru unu-a; ophu unu ahabotakwa iya iphe; k'ophu unu a-nodu eme ekemu Chipfu, bu Chileke unu, bu ekemu ono, mu aturu unu ono.

3Unu gudewaa enya unu huma iphe, Chipfu meru l'opfu ehuru agwa Balu-Peyo. Chipfu, bu Chileke unu meru iphe, bu ndu shi l'ime unu tsoru agwa, bu Balu-Peyo; ephe bukotaru mkpurupyata.

4Obenu le g'unu ha, bu ndu noshiru ike l'ime Chipfu, bu Chileke unu be no ndzu rwua ntanu-a.

5"Unu lekwa; mu zikwaru unu iphe, Chipfu toru okpa iya su g'e tsoje; bya ezia unu iphe, o suru g'e meje, bu iphe, Chipfu, bu Chileke mu suru ge mu zia unu; k'ophu unu a-wata iya ememe me unu laepho l'ali ono, unu eje alwuta ono.

⁶Unu dobekwa ekemu ono; meje iya ememe; kele ọo ya bu mmamiphe unu; bya aburu iya bu l'iphe edoje unu ẹnya l'iphu ndiphe, bu ndu e-mechaa numa iphemiphe ono, Chipfu toru okpa iya ono; pfuaaha su: 'Okpobe-opfu bu l'oha-a, paru eka-a bukwa oha, maru iphe; bya aburu oha, iphe edoje ẹnya!'

⁷"Mbụ-a; ? denu ohozo, ha shii, agwa phe no-kube ntse okpobe ano-kube ge Chipfu, bu Chileke anyi ano-kubeje anyi me anyi raku iya-a?"

⁸Too; ? denu ohozo, habaa shii, nweru ekemu, pfuru oto ge ndu owa-a, mu atushiru unu ntanu-a?

⁹Oo epho g'unu kwaberu onwunu ẹnya; unu anwuberu ndzu unu okpobe ẹnya; a - nonya unu zoha iphe, unu gude ẹnya unu huma; mbu g'o to lufu unu alufu l'okpoma jeye g'unu a-no-beru ndzu. O chia g'unu zia ya unwu unu; unu ezia ya unwu nwanwa unu phe.

¹⁰Unu nyatakwa mboku ono, unu pfuru l'ataphu Chipfu, bu Chileke unu l'ubvu Horebu ono; mbu mboku ono, o suru mu: 'Kukobe ndu Izurelu g'ephe dzukobe l'ataphu mu; g'ephe numa olu mu; k'ophu epe a-nwuta g'ephe e-shije akwabe mu ubvu; jasu g'ephe a-no-beru l'ali ono; teme epe ezikwaa ya pho unwu phe.'

¹¹"O buru iya bu; unu kpitaru ntse bya apfuru le mgboru okpa ubvu ono; oku, enwu phoophoohoo l'eli ubvu ono nodu ebulihuje erwu echilabo imigwe. Ekameka gbakota ochii; urwukpu nodu akpu ke tutuutuu; ekameka gbahukota ke tsukiribaa.

¹²Chipfu gbẹ l'oku ono epfu anu unu. Unu nodu anu olu-opfu; obenu l'unu ta ahumaduru onye epfu iya nu. O buepho olu-opfu kpoloko be unu numaru.

¹³O mee g'unu maru ogbandzu iya, o suru g'unu dobe, bu iya bu ekemu iri ono. O wokwaru iya pho deeru unu le mkpuma labo, du bachibachi.

¹⁴Chipfu bya akaru mu teke ono su mu ge mu zia unu iphe, o toru okpa iya su g'e tsoje; yee iphe, o suru g'e meje; k'ophu unu a-nodu eme iya l'ali ono, unu adagha eje enweru ono."

Eebuchi abaru agwa eja

¹⁵"Oo ya bu le-a; eshinu o dudu ugbuga iphe, unu humaru mboku ono, Chipfu gbẹ l'oku pfuru yeru unu l'ubvu Horebu ono; unu kwabekwaru onwunu ẹnya okpobe akwabe;

¹⁶a nonya; unu pyia ntekpe; gude merwua onwunu; pyia ya; o yee iphe, oo-ye; ophu l'o yeru nwoke; ozoo nwanyi.

¹⁷Ozoo l'o yeru udu anu ophu oo-ye l'eliphe-a; ozoo l'o yeru enu, epe le pherephere;

¹⁸ozoo l'o yeru iphe, akpu wuruwuru l'ali; ozoo ema, bu le mini.

¹⁹Mbụ-a; unu kwabekwa ẹnya; a -nonya; unu jeshia apali ẹnya imeli bya ahuma ẹnyanwu; ozoo onwa; ozoo kpokpode; mbukpoo iphemiphe, nokota l'akpaminigwe; o

guahaa unu ẹgu k'abarụ ẹja; unu wata phẹ ejeru ozi; mbụ iphemiphe ono, Chipfu, bụ Chileke unu meru; keshigbaaru ndiphe, nọkọta ị mkpula akpaminigwe-a l'opfu.

²⁰Obenu l'unubedua bẹ Chipfu lofutaru l'ọ-ta-pfupfupfu oku, ekeje mkpụrukpu-ígwè; mbụ l'ọ dufutaru unu l'alị Ijiputu g'unu buru iya ndu o ketarụ l'oke; g'unu bụnu iya-a ntanụ-a.

²¹Tẹmanukwapho; mbedua bẹ Chipfu tukoshiakwaru ẹhu-eghu iya l'opfu ẹhu unu; bya eribua ya l'angụ ị mu ta adaghatadu ẹnyimu Jiódanu; ọphu mu abahudu l'ẹguru alị ono, Chipfu, bụ Chileke unu nuru unu g'ọ buru okiphe unu ono;

²²Ị mu nwuhufutaje l'alị ẹka-a; l'ọ tọ dudu iphe, e-me gẹ mu daghata ẹnyimu Jiódanu. L'ọo unubedua a-daghata iya je enworu ẹguru alị ono.

²³Unu kwabekwa ẹnya g'unu ta azoha ọgbandzu Chipfu, bụ Chileke unu meru; unu l'iya gbaa. G'ọ tọ dukwa iphe ono, Chipfu, bụ Chileke unu sụru g'unu ta abashiru ẹja ono, unu a-kpụ; ọzoo pyia ntekpe, yeru iya nụ.

²⁴Noo kele Chipfu, bụ Chileke unu bukwa oku, ekepyashije iphe, ọ humaru; bya aburu Chileke, te ekwedu g'e koo ya okpa l'ishi.

²⁵“O -buru l'unu buchaaru l'alị ono; nọo ọdu; k'ọphu unu nwushichawaru unwegirima; bya enwechawaru unwu nwanwa; bya agbẹ teke ono mebyishiaha onwunu; mbụ je emeta ntekpe g'unu emehabe iya; ọ dū; shi nno mee ejo-iphe l'iphu Chipfu, bụ Chileke unu bya akpatsu iya ẹhu-eghu;

²⁶mbụ ị mu ekukwa igwe l'alị oku; g'ephe bya agbaa unu ekebe ntanụ-a l'unu ta adukwa g'unu a-nọ-beru; unu alakota l'iyi l'alị ono, unu abya ada ẹnyimu Jiódanu eje enworu ono. Unu te ebukwaru iya nọo ọdu; l'e mewaa unu; unu echihu.

²⁷Ọzo bụ ị Chipfu a-chikashi unu g'unu dzuru ohamoha; l'ọ buru nwa ndu habe nwahabe l'a-wafu l'ohamoha ono, Chipfu a-chiru unu laa ono.

²⁸Ẹka ono bẹ unu a-baru agwa, nemadzu gude ẹka mee ẹja; mbụ iphe, bụ mkpuma; yee mkpụrukpu oshi bẹ ọ bụ. Iphe, ta aphudu ọzo; ọphu ọonudu iphe ị nchi; ọphu oorijedu nri; teme ọphu ọonudu ishishi iphe.

²⁹Ọle unu -nọdu l'ẹka ono chọo Chipfu, bụ Chileke unu bẹ unu a-chotakwa iya-a; m'ọ buru l'unu gude obu unu g'ọ ha; mę ndzu unu g'ọ ha gude chọo ya.

³⁰Teke unu jeahaaru iphe-ehuka ono; mbụ teke iphemiphe-a nwukotaru kpua unu bẹ o -be l'ikpazu iya bẹ unu a-dakobe woru iphu ghaaru Chipfu, bụ Chileke unu; bya emeahaa opfu iya.

³¹Eshinu Chipfu, bụ Chileke unu bụ Chileke, aphuje obu-imemini; bẹ ọ tọo jikakwa unu; ọphu oomebyishikwa unu; ọphu ọozohakwa ọgbandzu ono, yele nna unu oche phẹ gbaru ono, bụ ọphu o riru angụ yeru phẹ.”

Abubu, Chipfu bụ Chileke

³²“Mbụ-a; unu gbeshikwa nta-a kpaa ishi iphe, meru ị teke k'azu; teme a nwua unu; mbụ e -shi teke Chileke meru nemadzu ị mgboko. Unu kpaeshikwa ishi jeye l'ẹka

imigwe beru; alì beru; g'unu maeshikwaru mē iphe, paberu ẹka ẹgube-a mejewaru; ọzoo l'a nūmajewaru ẹtu iya.

33? O dūru ndu ọzo, nūmajewaru ẹka Chileke gbẹ l'ọku epfu opfu; g'unu nūmaru-a; mechaa nọdu ndzū?

34Tọo ? o dūru agwa, tujeru ama anafutaru onwiya ọha, nọ l'ẹka ndu ọhozo? Mbū-a gude ọhutama; waa iphe-ọhumalenya; waa iphe, dū biribiri; waa ọgu; gude ike mē agburehu iya; yee oke n-yemebvu; ẹgube ono, Chipfu, bụ Chileke unu meru unu l'alì ndu Ijiputu; unu gude ẹnya unu hūma ono?

35E goshiru unu iphe ono; k'ophu unu a-maru l'ọo Chipfu bụ Chileke; l'ọ tọ duedu Chileke ọzo, dū nū.

36O gbẹ l'imigwe mee g'unu nūma olu iya; shi nno lọo unu ẹka lẹ nchì. O goshi unu ọ-ta-pfupfufu ọku iya l'eliphe; unu nūma olu-opfu, o gbẹ l'ime ọku ono epfu.

37Oo kele o yeru nna unu oche phe obu; họta oshilokpa phe; meru g'o gude yẹbedua l'onwiya gude ọkpukpu-ike iya dufuta unu l'alì Ijiputu;

38bya achifuru unu ọhozo, kagbaa unu shii; ka unu ọkpehu; bya edubata unu l'alì phe ono; woru iya nū unu g'ọ buru okiphe unu, bunu iya bụ g'ọ dū ntanū-a.

39Oo ya bụ l'iphe, unu a-maru ntanū-a; l'ọ dukwapho unu l'ọkpoma bụ l'ọo Chipfu bụ Chileke l'imigwe ọphu nọ ephekerephe; bya aburu iya l'eli alì ọphu nọ iya lẹ mkpula; l'ọ tọ duedu Chileke ọzo.

40Oo ya bụ lẹ-a; unu tsojekwa iphe, o toru ọkpa iya sū g'e tsoje; unu emejkwapho ekemu ya ono, bụ ekemu, mu aturu unu ntanū-a. Oo ya bụ g'iphe aduru unu lẹ ree; dūru unwu unu m'unu nọchaa laa; waa k'ophu ndzū unu a-dū ogologo l'alì ono, Chipfu, bụ Chileke unu abya unu anūnu g'ọ buru k'unu jasū l'ojejoje ono.”

Mkpukpu, onye gburu nemadzu a-noduje ezeru ndzu

(Ọgú 35:9-34; Dit 19:1-13; Jios 20:1-9)

41Oo ya bụ; Mosisu kpafu mkpukpu ẹto dobe iche l'uzo ẹnyanwu-awawa ẹnyimu Jiódanu;

42ẹka onye gburu nemadzu ibiya; ẹbe o lekebeduru ẹnya; a-gbajeru laa; m'ọ budu l'onye ono dūjehawaru onye ọbu ashì. G'onye dū nno gbaru laa lẹ mkpukpu lanu l'ime mkpukpu ẹto ono je anodu; zeeru ndzū iya.

43Epha mkpukpu ono bụ: Beza, nọ l'echiegu, dabyiru baswaa. Ono bụ ẹka oshilokpa Rúbenu a-gbajeru laa. Mkpukpu ọzo buru Ramatu, nọ l'alì Giladu; bụ ẹka oshilokpa Gadu a-gbajeru laa. Ọzo buru Golanu; nọ l'alì Beshanu, bụ iya bụ ẹka oshilokpa Manásẹ a-gbajeru laa.

Mosisu eme g'ekemu doo ẹnya

44Owaa bụ ekemu, Mosisu turu doberu ndu Ízurelu.

⁴⁵Qwaa buru iphe, Chipfu tūru l'ekemu; bya aburu iphe, ọ tōru ọkpa iya sū g'e tsoje; waa iphe, ọ sūru g'e meje; mbū iphe Mósísu pfushikotaru nū ụnwu Ízurelu g'ephe shichaa l'alí Ijiputu wufuta;

⁴⁶mbū teke ephe nọ lẹ nsuda, nọ lẹ mgboru mkpukpu Betu-Peyo, l'uzo ẹnyanwu-awawa ẹnyimu Jiódanu; l'alí Sihonu, eze ndu Amoru, bụ onye shi buru lẹ mkpukpu Heshibonu, bụ onye ono, Mósísu yele ndu Ízurelu lwu-gburu g'ephe shi l'alí Ijiputu wufuta ono.

⁴⁷Ephe nworu alí Sihonu ono; yee alí Ogu, bụ eze ndu Beshanu. Ndu eze labo ono bụ ndu eze ndu Amoru, shi buru l'uzo ẹnyanwu-awawa ẹnyimu Jiódanu.

⁴⁸Alí ono gbẹ lẹ mkpukpu Arowa, nọ l'aguga nsuda nggele Anonu; rwua úbvú Siriyonu, bụ iya bụ úbvú Hamonu.

⁴⁹Nsuda Araba l'ophu l'uzo ẹnyanwu-awawa Jiódanu; gbiriri jasū l'eze-ẹnyimu nsuda Araba; mbū gbazeta l'úbvú Pisiga tuko yikotaru iya.

Ditoronomi 5

Ekemu iri

(Awụ 20:1-17)

¹Tobudu iya bụ; Mósísu bya ekukobe ndu Ízurelu g'ephe ha bya asū p̄e-a: “Unube ndu Ízurelu; unu n̄makwa iphe, Chipfu tōru ọkpa iya sū g'e tsoje; yee iphe, ọ sūru g'e meje, mu epfu eye unu lẹ nchí ntanu-a. Unu nwua ya onwu-ekwo; unu edobe iya edobe; eme iya ememe.

²Chipfu, bụ Chileke anyi bẹ mekwaru; anyi l'iya gbaa ndzū l'úbvú Horebu.

³Ọ tọ bukwa nna anyi oche p̄e bẹ ephe lẹ Chipfu gbaru ndzū obu; ọ kwa anyibedua; mbū g'anyi hakota, bụ ndu nọ ndzū l'eka-a ntanu-a.

⁴Chipfu gbekwa l'ime oku pfuru opfu nū unu l'iphu l'iphu l'eli úbvú.

⁵Teke ono bẹ mu pfuru lẹ mgbaka unu lẹ Chipfu; epfuru unu iphe, Chipfu pfuru; noo kele ndzū oku ono agū unu; ophu unu enyihuduru úbvú ono. Iphe, o pfuru bụ:

⁶“Ọ kwa mbedua bụ Chipfu, bụ Chileke unu, bụ onye dufutaru unu l'alí Ijiputu; mbū l'alí eka ono, unu shi buru ohu ono.

⁷“Ta adukwa iphe ozo, ii-bajeru eja; gbahaa mbedua.

⁸“G'ọ tọ dukwa ntekpe, ii-metaje dobe; mbū iphe, dukpoo g'iphe, dū l'imigwe l'ephekerephe; ozoo iphe, nọ l'eli alí lẹ mkpula igwe; ozoo iphe, bu lẹ mini-ime alí.

⁹Ta abajekwaru p̄e eja; ophu i jekwaru p̄e ozi; kele mbedua, bụ Chipfu; bya aburu Chileke ngu bukwa Chileke, l'ekoje okophoo. Mu ahujekwa ndu kporu mu ashí ahùhù k'ejo-iphe, ephe meru mu; huchaa mē unwu p̄e; hürwuchaa ya ogbo k'eto mē k'eno.

¹⁰Mu nọdu aphujekwanu obu-imemini l'ehu unu-kuru-unu ndu yeru mu obu bya edobe ekemu mu.

11"Te ekujekwa ẹpha Chipfu, bụ Chileke ngu kẹ mmanụ; kẹle onye eku ẹpha Chipfu kẹ mmanụ bẹ ọ tọo hakwa g'ọ tọ nma iya ikpe.

12" Dobekwa eswe-atụta-unme nsọ, bụ iya bụ iphe, Chipfu, bụ Chileke ngu sụru g'i meje.

13" Oo ujiku ishii bẹ ii-seje akanya; jekota ozi ngu g'ọ ha.

14" Obenu l'abalị k'ẹsaa bụ eswe-atụta-unme kẹ Chipfu, bụ Chileke ngu. G'ọ tọ dukwa ozi, ii-je mbọku ono. Te ejekwa ozi; ọphu nwa ngu nwoke ejekwa; ọphu nwa ngu nwanyị ejekwa; ọphu onye nwoke, ị gbaru ohu ejekwa; ọphu onye nwanyị, ị gbaru ohu ejekwa; ọphu oke-eswi ngu ejekwa; ọphu nkapfu-igara ngu ejekwa; ọphu ọ dukwa iphe-edobe ngu ọphu e-je nụ; ọphu onye byaru abyabya, nọ l'ibe ngu ejekwa; g'onye nwoke, ị gbaru ohu; yee onye nwanyị, ị gbaru ohu tụtakwa unme g'ịituta.

15" Teme; nyatakwa l'i shi buru ohu l'alị Ijiputu; l'ọo Chipfu, bụ Chileke ngu gude ike; mę agburęhu iya dufuta ngu l'eka ono. Noo g'ọ gude Chipfu, bụ Chileke ngu nọdu aturu ngu iya l'ekemu sụ g'i tụtajekwa unme l'eswe-atụta-unme.

16" Kwabejekwa nna ngu yee ne ngu ùbvù, bụ iya bụ iphe ono, Chipfu, bụ Chileke ngu sụru g'i meje ono-a; k'ọphu ịi-noriberu ndzụ; mę k'ọphu iphe a-duru ngu lę ree l'alị ono, Chipfu, bụ Chileke ngu abya ngu anunu ono.

17" Te egbukwa ọchi.

18" Ọphu i rijekwa ogori.

19" Ọphu i zijekwa iphuru.

20" Ọphu ị gbajekwa nwibe ngu ekebe ntuphu-ire.

21" Ọphu nyee nwibe ngu agujekwa ngu. Ọphu ọlo nwibe ngu; ọzoo alị iya; ọzoo ndu ọ gbaru ohu; ọzoo oke-eswi iya; ọzoo nkapfu-igara iya; ọzoo iphe, bukpo iphe, nwibe ngu nweru enweru adujekwa ngu g'a sụ l'ọo ngu nwe iya.'

22" Ono bụ opfu, Chipfu gbẹ l'ime ọku raa arara ye unu lę nchị l'eli úbvú l'eka unu dzuru edzudzu. Mbụ l'úbvú ono, urwukpu yee ọchii sopyaberu ono. Ọ tọ dudu iphe ọzo, o yekoberu iya. O woru iya dee l'eli mkpuma labo, dụ bachibachi nụ mu ono."

Ndzụ agụ ndu Ízurẹlu l'úbvú Sayınayi

(Awụ 20:18-21)

23" Tọbodu iya bụ; o be g'unu numaru olu ono, gbẹ l'ime ọchii epfu anụ unu ono; kẹle ọku ono bụ l'eli úbvú ono bẹ ootsu; iphe, bukpo ndu-ishi l'okpa-ipfu l'okpa-ipfu unu; yee ndu bụ ọgerenya unu wụ-pfuta mu.

24" Unu bya asụ mu: 'Nta bẹ Chipfu, bụ Chileke anyi goshiwaru anyi akpabiri iya; waa g'ọ habe shii. Teme anyi nưmakwapho olu-opfu iya, ọ gbẹ l'ime ọku ono epfu. Ntanu-a bẹ anyi humawaru lę Chileke pfuru opfu yeru nemadzụ; ọ nọduele-a ndzụ.

25" Ole nta-a; ? bụ g'anyi nwushihu tọo? Kẹle ejo ọku-a l'e-kegbushikwa anyi; mbụ l'anyi -nưmabaa olu Chipfu, bụ Chileke anyi ọzobaa bẹ anyi a-nwuhukwa.

²⁶Noo kele ọ tọ dudu nemadzu mmanu numajewaru aka Chileke, dzu ndzu; gbẹ l'oku epfu opfu; g'anyi numaru iya-a; mechaa dzuru ndzu-a.'

²⁷Unu su mu ge mu jekubechia Chipfu, bu Chileke anyi ntse; je anumakota iphemiphe, oopfu. E -mechaa; mu abyawaro bya akoru unu iphe, Chipfu, bu Chileke anyi pfuru. L'unu angabe-a nchi; mee iphe, o pfuru.

²⁸“Tobudu iya bu; Chipfu bya anuma iphe, unu epfu teke ono, unu epfu eyeru mu ono; bya asu mu: ‘Mu numakotaru iphe, ndu ono pfuru ngu. Iphemiphe, ephe pfuru dukwa ree.

²⁹Ome l'oo ke g'obu phe duwara g'o du-a je asuru; mbu g'ephe tsuje mu ebvu; dobe iphemiphe, mu turu l'ekemu; me iphe adukwaru phe le ree; yee unwu phe jasu l'ojejoje!

³⁰Tugbua; je asu phe g'ephe laphuchawaro azu l'ulo-ekwa phe.

³¹Ole ge gubedua no-kubekwa mu l'eka-a; k'ophu mu a-koru ngu iphemiphe, mu turu l'ekemu; yee iphe, mu toru okpa iya su g'e tsoje; yee iphe, mu suru g'e meje; bu iphe, ii-zi phe g'ephe meje l'alì ono, mu abya phe anu g'ephe nworu ono.’

³²“Oo ya bu; unu kwabekwa enya; meje iphe, Chipfu, bu Chileke unu suru g'unu meje. Unu ta ahakwa iya; meahaa iphe ozo.

³³Unu tukojekwa uzo ono shije; mbu uzo ono, Chipfu, bu Chileke unu suru g'unu shije ono; k'ophu unu a-nodu ndzu; waa k'ophu iphe aduru unu le ree; wafua k'ophu unu a-karo nka l'alì ono, unu e-nworu ono.”

Ditoronomi 6

Iphe, a tu-doru ekemu obu

¹“Owaa bugbaa iphe, Chipfu turu l'ekemu; waa iphe, o toru okpa iya su g'e tsoje; waa iphe, o suru g'e meje, bu ophu Chipfu, bu Chileke unu suru ge mu zia unu g'unu meje l'alì ono, unu adagha enyimu Jiordanu eje enworu ono;

²mbu k'ophu unubedua; me unwu unu; me unwu nwanwa unu a-no atsụ Chipfu, bu Chileke unu ebvu; emeje iphe, o toru okpa iya su g'e tsoje; waa iphe, o turu l'ekemu, bu iphe, mu epfuru unu g'unu meje jasụ g'unu a-no-beru; k'ophu unu a-ka nka.

³Unube ndu Izurelu; unu ngabe nchi. Unu letakwa enya mee iphemiphe ono; k'ophu iphe a-duru unu le ree; teme unu ajaa ajaja ka l'otu l'alì ono, bu ali, mini era-eswi yee manu-enwu aso ge mini ono, bu iya bu iphe, Chipfu, bu Chileke nna unu phe kweru unu ukwe iya.

⁴“Unube ndu Izurelu; unu numakwa iya: Chipfu, bu Chileke anyi bukwa Chileke lanu be o bu.

⁵Oo ya bu g'unu gude obu unu g'o ha; yee ndzu unu g'o ha; waa ike unu g'o ha ye Chipfu, bu Chileke unu obu.

⁶G'ekemu-a, mu aturu unu ntanu-a bukwaru unu eburu l'okpoma.

⁷Unu zijekwa iya unwegirima unu okpobe ezizi. Unu egude iya abo l'uja me unu nodu anoo l'oma ulo unu; me teke unu eje ije le gbororo; me teke unu ze azee; mekpoo teke unu pfuru pfuru.

⁸Unu gbajeru iya l'eka g'o buru iphe-ohubama; unu epfubeje iya l'onu-iphu; k'ophu unu a-nyataje iya.

⁹Unu dee ya edede l'okpa mgbo ulo unu; wafua l'oguzo ibe unu.

¹⁰“K'ophu bu le-a; teke Chipfu, bu Chileke unu dubataerupho unu l'ali ono, o riru angu le ya a-nu nna unu oche phe, bu Ebirhamu; waa Ayizaku; waa Jiekopu ono; mbu eze mkpukpu le mkpukpu ono, dugbaa ree, abudu unu kpuru iya l'onwunu ono;

¹¹nukwapho unu ulo, dugbaa iphe, du ree jiru iya; iphe, abudu unu kwaru iya ye l'ulo obu; nu unu omi-mini ono, abudu unu turu iya ono; nu unu opfu-vayinu; yee oshi olivu, abudu unu yegbaaru iya ono; teke ono, unu a-nodu eri nri eriji epho ono;

¹²unu kwabekwa enya; g'unu ta azoha Chipfu, bu iya dufutaru unu l'ali Ijiputu ono, bu eka ono, unu shi buru ohu ono.

¹³Unu tsuje Chipfu, bu Chileke unu ebvu. Unu jejeru iya ozi. Unu egudeje epha iya eri angu.

¹⁴Unu te etsokwaru agwa ozogba; mbu agwa ndu ono, bupheru unu mgburugburu ono.

¹⁵Odumeka be ehu-eghu Chipfu, bu Chileke unu a-dapfutakwa unu; mebyia unu; mee unu; unu achihu l'eliphe-a; kele Chipfu, bu Chileke unu bukwa Chileke, l'eko okophoo.

¹⁶“Unu ta ahukwa Chipfu, bu Chileke unu ama; egube ono, unu huru iya ya le Masa.

¹⁷Unu tubekwa nvo; huma l'unu emeje iphemiphe, Chipfu, bu Chileke unu suru g'unu meje; me iphe, o turu l'ekemu; yee iphe, o toru okpa iya su g'e tsoje.

¹⁸G'iphe, unu e-meje bukwaru iphe, pfuru nhamunha bya aburu iphe, du ree l'enya Chipfu; k'ophu iphe a-duru unu le ree; waa k'ophu unu a-du ike bahu je enworu eguru ali ono, bu ophu Chipfu rifuru nna unu oche phe angu iya;

¹⁹su le ya a-chifukotaru unu ndu ohogu unu phe g'ephe lufu unu l'iphu, bu iya bu ge Chipfu pfuru iya.

²⁰“Teke o beru l'iphu; unwu unu -jja unu su: ‘? Bu gunu be o bu; mbu iphe, Chipfu, bu Chileke anyi turu l'ekemu-a; yee iphe, o toru okpa iya su g'e tsoje-a; waa iphe, o suru g'e meje-a?’

²¹Iphe, unu e-pfuru unwu unu ono bu l'unu shi buru ohu Fero l'ali Ijiputu; Chipfu gude okpehu, du iya l'eka dufuta unu.

²²Teme unu gude enya unu huma iphe-ohumalenya; waa oke iphe, daru kpaakpaa, Chipfu meru kpua ali Ijiputu; yee Fero; waa ndu ali iya l'ophu.

²³L'o dufutaru unu l'eka ono; bya anu unu ali ono, o kweru nna unu oche phe ukwe iya; bya eriru angu yeru phe iya ono;

²⁴bya asu unu g'unu tsokotaje iphe-a, o toru okpa iya su g'e tsoje-a; teme unu atsujekwapho Chipfu, bu Chileke unu ebvu; g'iphe aduru unu le ree; wafua g'unu akaa nka; bunu iya bu g'o du ntanu-a.

²⁵L'o -buru l'unu kwaberu enya; dobekota iphe, bukpo ekemu-a l'ataphu Chipfu, bu Chileke unu, bu iya bu iphe, o suru g'unu meje-a; be unu buakwaa ndu pfuberekoto l'iphu iya.”

Ditoronomi 7

Ndibe Chipfu

(Awu 34:11-16)

¹“Teke Chipfu, bu Chileke unu durwutaerupho unu ali ono, unu eje enworu ono; bya achishierupho unu ikpoto oha ono; mbu ndu Hetu; waa ndu Gigashi; waa ndu Amoru; waa ndu Kenanu; waa ndu Perezu; waa ndu Hevu; wakwapho ndu Jiebusu; ohamoha esaa, kachaa unu shii; bya akachaa unu okpehu ono;

²mbu-a; teke Chipfu, bu Chileke unu -woeru phe pho ye unu l'eka; unu gbushikotakwa phe; unu tukokwaphe mebyishibebe. G'unu l'ephe ta agbakwa ndzu; ophu unu aphukwaru phe obu-imemini.

³G'unu l'ephe te kegbakwaru nwanyi. Unu te ekukwaru unwada unu kee unwu phe; ophu unu alutajekwa unwada phe.

⁴Noo kele ephe e-mekwa unwu unu ono; ephe ahaa ya etsotso; je awata ejeru agwa ozogba ozi. Noo teke unu e-me; ehu eguaha Chileke egu; l'oomee unu; unu achihu nchihu lanu.

⁵Waa iphe, unu e-me phe bu owa-a: Unu toko oru-ngweja phe mebyishikotachaa; unu etsukposhichaa mkpuma, ephe doberu nsu; unu atuko itso Ashera phe gbutsushia; woru ntekpe phe l'ophu kpokota oku.

⁶Noo kele unu bu oha, duru Chipfu, bu Chileke unu nsu. Mbu le Chipfu, bu Chileke unu hotawaru unu g'unu buru oha, o doberu iche g'o buru nkiya. O doberu unu; unu no-ngoo iphe, bu ndu nokota l'eliphe l'ophu.

⁷“Iphe, kparu iphe, unu du Chipfu l'obu; o hota unu ta abukwa l'unu ka ndu ozo igwerigwe; g'o gbę buru unu be kachaa nwanshi le ndiphe l'ophu-a.

⁸Ochia l'oo le Chipfu yeru unu obu; waa kele iphe ono, o rifuru angu iya l'iphu nna oche unu phe le ya e-meru unu ono be o mefutaje; meru g'o gude Chipfu gude okpehu, du iya l'eka dufuta unu; bya agbafuta unu l'eka ono, unu shi buru ohu ono; mbu l'eka Fero, bu eze ndu Ijiputu.

⁹Oo ya bu le-a; makwaru le Chipfu, bu Chileke ngu bukwa Chileke; mbu Chileke, apfushije ike l'iphe, o kweru ukwe iya; buru Chileke, edobeje ogbandzu, yee ndu yeru

iya obu gbaru; teme o nodu egoshije phe l'o yeru phe obu; mbu ndu ono, yeru iya obu bya emeje iphe, o suru phe g'e meje. Iphe ono be oomeje unu-kuru-unu ogbo.

10O nodu apfuje ndu kporu iya ashị ugwo l'iphu phe; mbu l'oomeje; ephe aburu mkpurupyata. Mbu-a; ndu kporu iya ashị be o too kpokwa upfu emelata.

11Oo ya bu le-a; unu kwabekwa enya mejekwa iphe, Chipfu turu l'ekemu; unu etsoje iphe, o toru okpa iya su g'e tsoje; waa iphe, o suru g'e meje; ge mu aturu iya unu ntanu-a.”

Obunggo, ee-bu onye emeje iphe, a suru g'o mee

(Uke 26:1-13; Dit 28:1-14)

12“Su-a; o -buru l'unu ngaberu nchi l'ekemu-a; unu dobe iya; eme iya ememe; be Chipfu, bu Chileke unu e-dobekwa ogbandzu iya ono; yee n-yemobu iya ono, bu ophu o riburu nna oche unu phe angu l'oo-me.

13Oo-ye unu obu; kebe unu l'oma; l'o mee unu; unu adu igwerigwe. L'o gokwarupho onu-oma nu unwu unu; waa iphe, unu meberu l'ali; mbu ereshi unu; me mee unu; me manu unu; mee g'eswi unu; yee aturu unu; waa egbu unu nodu azu azuzu l'ali ono, o riburu nna unu oche phe angu le ya a-nu unu ono.

14G'oo-shi kebe unu l'oma a-kachaa ke ndu ozo shii. O to dudu nwoke, te eyedu ime; ozo nwanyi, ta atudu ime, byaru adu l'echilabo unu; ophu o dudu l'iphe-edobe unu.

15Ozo bu le Chipfu a-tuko iphe-ememe wofu l'ehu unu; ophu o dudu ejo o-me-l'ehu ndu Ijiputu ono, unu maru ono me nanu, o byaru ekwe g'o mee unu. Oo ndu unu du ashị be oo-gude iya dapfu.

16Unu tukokwa ndu ono, Chipfu, bu Chileke unu abya unu eye l'eka ono gbushia. Unu ta aphujekwaru phe obu-imemini; ophu unu ejejekwaru agwa phe ozi; kele ono abukwaru onya be a gbaberu unu.

17“Unu a-gbekwaro su: ‘Ohamoha-a kagbakwa anyi okpehu. ? Denu g'anyi e-shi lwa phe?’

18Obenu le-a; unu ta atsukwa phe ebvu. Unu nyatakwa iphe, Chipfu, bu Chileke unu meru Fero; yee ndu Ijiputu l'ophu.

19Unu gude enya unu ebo ebo huma oke ohotama; waa iphe-ohumalenya; waa iphe, dugbaa biribiri, Chipfu, bu Chileke unu gude ike; me agburehu iya dufuta unu. Noo ge Chipfu, bu Chileke unu e-me iphe, bukpuo ndu ono, unu atsu ebvu ono bu ono.

20Ozo bu le Chipfu, bu Chileke unu l'e-ye evu g'o je adatsu phe; gbagbushiaha phe gbiriri jasu teke oo-gbagbushibebe mecha ndu ophu nahuru unu je edomia onwophe.

21G'ephe be yekwa unu ebvu; kele Chipfu, bu Chileke unu nokwa l'echilabo unu; mbu Chileke ono, paru eka bya aburu onye aatsu ebvu ono.

22Chipfu, bu Chileke unu a-to nwehu chishiaru unu ohamoha ono, no-chiru unu uzo ono. Unu ta adukwa ike erwushikota phe mgbo lanu; odumeka be ejo anu-egbudu apakwa eka l'echilabo unu.

²³Obenu lẹ Chipfu, bụ Chileke unu e-wokwanuru phẹ ye unu l'ẹka. Oo-meje g'ùtsú daa l'echilabọ phẹ jasụ unu atụko phẹ gbushichaa.

²⁴Oo-tụko ndu eze phẹ g'ẹphe ha yekọta unu l'ẹka; unu emee g'ẹpha phẹ chihu lẹ mkpula akpaminigwe-a. Ọ tọ dudu onye adu ike apfuru g'unu l'iya mee jasụ teke unu e-mebyishibebe phẹ g'ẹphe ha.

²⁵Ntekpe agwa phẹ bẹ unu a-kpọ ọku. Gẹ mkpọla-ọchaa; ọzoo mkpọla-ododo, a wuru lẹ ntekpe ono ta agujekwa unu agugu ophu. Ophu unu ewotajekwa iya nworu enworu; ọdumeka bẹ ọo-bukwaru ọnyà nmata unu; kele ọ bukwa eme ahuma l'ẹhu Chipfu, bụ Chileke unu.

²⁶Ophu unu ewobatajekwa ẹjo ahuma ono l'ulo unu; a nonyakwa unu buru ndu a turu onu g'ẹphe bu-a. Ọchia iphe, unu e-me bụ g'unu kpokotaje iya ashi; unu asokota iya oyi; noo kele ọ bụ iphe, a turu onu.”

Ditoronomi 8

Ta azọhakwa Chipfu

¹“Unu kwabekwa ẹnya tsoru ekemu-a, mu aturu unu ntanu-a; k'ophu unu a-nodu ndzu jaa ajaja ka l'otu; jekwapho enworu ali ono, Chipfu kweru nna unu oche phẹ ukwe iya; bya eriru angu yeru phẹ iya ono.

²Unu nyatakwa gẹ Chipfu, bụ Chileke unu gude dua unu ukporo apha labo l'echiegu; gude nno go-zeta unu; hukwaapho unu ama; gẹ ya maru iphe, du unu l'obu; mbu gẹ ya maru; ? me unu e-meje-a ekemu iya; too unu te emedu?

³Ọ go-zetaru unu mee g'egu gua unu; bya anu-a unu mana, bụ nri unu amahadaa; ophu nna unu oche phẹ amadu iya; k'ophu unu a-maru l'ọ tọ budu nri kpurumu bẹ amadu e-gudeje nodu ndzu. Iphe, amadu e-gude nodu ndzu bụ iphe, bukpo opfu, shi Chipfu l'onu.

⁴L'ime ukporo apha labo ono bẹ uwe unu akahuduru; ophu okpa abyaduru unu ẹrwa.

⁵Ọo ya bụ g'o dokwaa unu ẹnya ree; l'oo g'amadu ahuje nwa iya ahuhu-a bụ gẹ Chipfu, bụ Chileke unu ahuje unu.

⁶Noo g'o gude unu jee edobe ekemu Chipfu, bụ Chileke unu; tsoje ọzo iya; tsuje iya ebvu;

⁷Kele Chipfu, bụ Chileke unu edu unu ala l'ali, du ree; ali, mini, shi l'ime ali anwu shokoshoko; teme nggele nodu aso iya gborogboro.

⁸Mbu ali, witi; me bali; me vayinu; me oshi figu; me oshi itorokuma jiru ejiji; mbu ali, oshi olivu; me manu-enuwu jiru ejiji.

⁹Ọ bụ ali, uko nri ta abyadu aduru unu; ophu ọ dudu me iphe lanu, uko iya, bya aduru unu l'ali ono. Mkpuma, no iya nu bukota mkpurukpu-igwe; teme ubvu ubvu, nogbaa ya nu bẹ unu a-nodu ebvutaje onyirubvu.

10Teke unu richaaru nri; ẹpho ji unu; unu tujekwa Chipfu, bu Chileke unu ẹpha k'ẹguru alì ono, ọ nuru unu ono.

11“Unu kwabẹkwa ẹnya g'unu ta azọha Chipfu, bu Chileke unu; mbu g'unu ta aha emeje ekemu iya; yee iphe, ọ suru g'e meje; yee iphe, ọ toru ọkpa iya su g'e tsoje, bu iya bu ekemu ono, mu aturu unu ntanu ono.

12Unu kwabẹkwa ẹnya g'ọ to bu; unu -rijeepho nri rijiaha ẹpho; bya awata akpushi ulo, dugbaa ree buru l'ime iya;

13eswi unu yee aturu unu; me egbu unu -wataepho azushi; mkpola-ochaa unu; me mkpola-ododo; mewaro iphemiphe, unu nweru enweru bya aduepho shii;

14unu eworu ọkpoma kpọ-vube; zọhaa Chipfu, bu Chileke unu, bu iya dufutaru unu l'alì Ijiputu ono; mbu l'eka ono, unu shi buru ohu ono.

15Mbu onye ono, duru unu ghakota echiegu ono, paru eka bya eye ebvu ono; eka ejo-agwo dugbaa; akpi du iya; teme o kpohu nku; ophu mini adudu iya; o buru le mkpuma, kporu jegengu be o shi ekufutajeru unu mini.

16Mbu onye bu iya nuru unu mana l'echiegu, bu nri, nna unu oche phe amadu. O buru iphe, kparu iya nu bu l'oome g'ọ go-zeta unu; hua unu ama; meeru unu ree l'ikpazu iya.

17Unu ta asunupho l'ime obu unu: ‘O kwa ike unu; waa ike eka unu be unu gude kpatakota eku-a.’

18Obenu le-a; unu nyatajekwa Chipfu, bu Chileke unu; kele ọo yebdua nuru unu ike, unu gude akpa eku obu; k'ophu oo-me g'ogbandzu ono keru, bu ophu o riru nna unu oche phe angu iya ono; egube o du ntanu-a.

19O -bukwanuru l'unu zoharu Chipfu, bu Chileke unu ililekpoo; bya awata etso agwa; jeahaaru phe ozi; baaharu phe eja be mu agbakwaru unu ama ntanu-a su: L'ọ to dukwa iphe, e-me g'unu ta laebe l'iyi.

20O kwa g'ohamoha ono, Chipfu no l'iphu unu mebyishia ono lakotaru l'iyi bu g'unu alakota l'iyi; m'ọ -buru l'unu te emeduru olu Chipfu, bu Chileke unu.”

Ditoronomi 9

Ekwefu ike ndu Izurelu

1“Unube ndu Izurelu; unu gebekwapho. O kwa ntanu-a be unu abya adaghata ẹnyimu Jiordanu; g'unu je enworu ohamoha, kakota unu shii; bya akakota unu okpehu; mkpukpu le mkpukpu, kagbaa unu shii; teme e gudegbaa igbulo, su-pfuru l'imigwe kpuphee ya mgburugburu.

2Mbu ndu paru eka bya ahagbaa ke phengara phengara; mbu ndu Anaku, bu ndu unu maru amaru; teme unu nodu anumajewaa etu, aanmajẹ su: ‘? Bu onye suru akpafu unwu Anaku l'iphu?’

³Ole ọ bụ; g'o dokwaa unu ọnya ntau-a l'oo Chipfu, bụ Chileke unu bụ onye e-vutaru unu ọzo g'oku, enwu enwunwu. Oo-mebyishi phe; bya akapyabe phe l'iphu unu; k'ophu unu a-chifu phe egwegwa; mee; ẹphe aburu mkpurupyata; bụ iphe, Chipfu kweru unu ukwe iya.

⁴“Teke Chipfu, bụ Chileke unu chifuchaeru phe pho l'iphu unu; unu ta awatakwa ari l'ime okpoma unu su: ‘O kwa l'oo l'unu pfulerekoto meru g'o gude Chipfu dubata unu g'unu bya enworu ali-a.’ Waawakwa; iphe, Chipfu gude achifu phe l'iphu unu bukwa l'ohamoha ono menukaru ejo-iphe.

⁵O to bukwa ke l'unu pfulerekoto; ọzo l'obu unu guru iphoro meru g'o gude unu nodu eje enworu ali phe. O buchia l'oha ono wenukaru iwashi meru g'o gude Chipfu, bụ Chileke unu nodu achifu phe l'iphu unu; wafua k'ophu oo-me iphe ono, o riru nna unu oche phe angu iya ono; mbu Ebirhamu; waa Ayizaku; me Jieko.

⁶Oo ya bụ; g'o dokwaa unu ọnya l'o to budo l'oo l'unu pfulerekoto meru g'o gude Chipfu, bụ Chileke unu nu unu eguru ali-a g'unu nworu; kele unubdua bukwa ndu ejo-okpoma.”

Nweswi, a kpuru akpukpu

⁷“Unu nyatakwa iphe-a; mbu-a; unu ba azohakwa g'unu gude kpatsua Chipfu, bụ Chileke unu oke ẹhu-eghu l'echiegu. A -gbe le mboku ono, unu gbeshiru l'ali Ijiputu ono; jasụ unu byarwuta aka-a be unu shiepho kwefutaru Chipfu ike.

⁸L'ubvu Horebu be unu kpatsukwarupho Chipfu oke ẹhu-eghu iya. Ehu ghutabe Chipfu eghu; k'ophu o gogo mebyishi unu.

⁹Teke mu nyihuru ubvu je anata mkpuma, du bachibachi ono; mbu mkpuma ogbandzu, unu le Chipfu gbaru ono; be mu noru l'eli ubvu ono ukporo abali labo; eswe l'enyashi; ophu mu eriduru nri; ophu mu anguduru mini.

¹⁰Chipfu nu mu mkpuma labo, du bachibachi; mbu mkpuma, bụ Chileke l'onwiya gude aka iya dee ya iphe. O buru le mkpuma labo ono be e dekotaru ekemu ono; mbu ekemu ono, Chipfu no l'oku, enwu enwunwu l'eli ubvu taru unu g'unu dzukoberu ono.

¹¹Ukporo abali labo; eswe l'enyashi ono bvuchaepho; Chipfu nu mu mkpuma labo ono; mbu mkpuma ogbandzu ono.

¹²“Tobudu iya bu; Chipfu su mu: ‘Gbeshikpodapho; shikwa l'eka-a nyizeta egwegwa; noo kele ndibe ngu-a, i dufutaru l'ali Ijiputu-a merwuakwaru onwophe. O to dukwa g'ephe no-bekwaduru; ẹphe gbakutawa azu l'uzo ono, mu taru phe ekemu g'ephe shije ono; bya akputawaru onwophe iphe a kpuru akpukpu.’

¹³“Chipfu bya asukwa mu pho: ‘Mu humawaru le ndu-a bunukaru ndu ejo-okpoma eviya!

¹⁴Hakwaa mu ge mu mebyishia phe; hufu epha phe l'eliphe. Mu -mechaa; mu emee ngu g'i buru oha, ka phe okpehu; teme l'i ka phe l'otu.’

- 15“Tɔbudu iya bɔ; mu dachi shi l'eli úbvú ono, ọku enwu phoophoophoo ono nyizetashia; parɔ mkpuma ọgbandzu labo pho, du bachibachi pho l'eka.
- 16Mu bya elee enya; bya huma eviya l'unu meswewaru Chipfu, bu Chileke unu; mbu l'unu kputawaru iphe, a kpuru akpukpu, du ge nweswi doberu onwunu. L'unu gbakutawaru uzo, Chipfu turu unu ekemu g'unu shia ono azu; ebe eteke adu g'a noberu.
- 17Mu woru mkpuma labo pho, mu pa l'eka pho tukposhia l'ataphu unu.
- 18Mu byakwa adaa kpurumu l'iphu Chipfu ozo; noo ukporo abali labo; eswe l'enyashi; ophu mu eriduru nri; ophu mu angutaduru mini. O buru iphe, kparu iya nu bu iphe-aji, unu meru l'iphu Chipfu; shi nno kpatsua ya ehu-eghu.
- 19Ndzu oke ehu-eghu Chipfu shiwaa rwuta mu; noo kele ehu ghutabewaru iya egu k'ophu o shiwaa abya unu emebyishi. Obenu le Chipfu mechaaru ngaberu mu nchi teke ono kwapho.
- 20Erɔnu shikwapho kpatsu Chipfu ehu-eghu; k'ophu o shikwapho abya iya emebyishi. Mu pfukwarupho nu Chipfu l'iswi ehu iya.
- 21Mu bya eworu iphe ono, unu gude mee iphe-aji, bu iya bu nweswi ono, unu kpuru ono woru kpo ọku; bya eworu iya tsukposhia; bya egwee ya; o du rwukuru rwukuru g'urwuku. Mu woru urwuku iya ono wuru ye le nggele ono, shi l'ubvu asoshi ono.
- 22“Unu kpatsukwarupho Chipfu ehu-eghu le Tabera; me le Masa; mekwapho le Kiburotu-Hatava.
- 23O be teke Chipfu gbɛ le Kadeshi-Baneya zia unu; su g'unu tugbua je alwuta ali ono, ya nuru unu ono; unu kwefu ike jika eme iphe, Chipfu, bu Chileke unu suru g'unu mee. Unu jika akporu obu ye l'eka o no; jika eme opfu iya.
- 24Eshikpo teke mu beberu maru unu be unu gudepho ekwefuru Chipfu ike byasu nta-a.
- 25“Iphe, mu gude daa kpurumu nodu l'iphu Chipfu ukporo abali labo; eswe l'enyashi pho; bukwa l'oo le Chipfu suru le ya e-mebyishi unu.
- 26Mu pfuru nu Chipfu su: ‘Gube Nnajiuphu, bu Chipfu; jiko te emebyishishinu ndu bu nkengu; bya aburu okiphe ngu, i gbafutaru l'ike-okpu ngu; bya egude okpehu ngu dufuta l'ali Ijiputu.
- 27Jiko nyatanu ndu-ozu ngu; mbu Ebirhamu; waa Ayizaku; waa Jieko! Te eleshinu g'ejo-okpoma ndu-a; waa ejo-iphe phe; me g'iphe-aji phe habe shii!
- 28Odumeka be ndu ono, i dufutaru anyi l'ali phe ono a-sukwa l'o kwa le Chipfu ta adudu ike edurwu phe ali ono, o kweru phe ukwe iya ono; teme ndu ono du iya ash; meru iphe, o dutaru phe bya egbushia l'echiegu.
- 29Obenu l'ephe ta adudu ngu ash; ephe gbɛchia buru ndu nkengu; buru okiphe ngu, i gude eze ike ngu; me agburehu ngu dufuta.’ “

Ditoronomi 10

Bachibachi mkpuma k'ẹbo

(Awu 34:1-10)

- ¹“O buru teke ono be Chipfu suru mu: ‘Je awata mkpuma labo, du bachibachi ge ke mbu pho gude nyipfuta mu l'eli ubvu. Teme l'i gudekwapho oshi kuta okpoko.
- ²Mu e-wota iphe, e shi dee le mkpuma ke mbu pho, i tukporu pho dee ya. L'i chita iya ephenebo yee l'ime okpoko ono.’
- ³“Noo ya; mu gude oshi akeshia ruta okpoko ono; bya awata mkpuma labo, du ge ke mbu pho. Mu gude mkpuma labo ono l'eka nyihu eli ubvu ono.
- ⁴Chipfu bya eworu iphe, o shi dee le mbu pho; woru dephe azu le mkpuma ono, bu iya bu ekemu iri ono, o gbẹ l'ime oku l'eli ubvu mee g'unu madzuru le mboku ono, unu dzukoberu ono; bya eworu iya nu mu.
- ⁵Mu bya eshi l'eli ubvu ono nyizeta; woru mkpuma ono ye l'ime okpoko ono, mu rutaru ono, bu iya bu ge Chipfu turu mu ekemu ge mu mee ya. Mkpuma ono nokwa l'ime okpoko ono nta-a.”
- ⁶Ndu Izurelu shi le welu ndu Jiakanu jerwua Moserotu. O buru l'eka ono be Eronu nwuhuru; e lia ya. Eleyaza, bu nwa iya nwoke buru onye uke nochia enya iya.
- ⁷Ephe gbẹ l'eka ono jeshia Gudugoda. Ephe shi Gudugoda; o buru phe eje Jiqtubata. Ali k'ono bu eka nggele dugbaa.
- ⁸O buru teke ono be Chipfu hotaru okpa-ipfu Liviayi dobe iche; g'ephe paje okpoko ogbandzu yebe Chipfu; waa g'ephe pfujeru l'iphe yebe Chipfu ejeru iya ozi; waa g'ephe gudeje epha iya go o nu-oma. Ephe emekwa iya byasu ntanu-a.
- ⁹O buru iphe ono kparu iphe, oshilokpa Liviayi te nwedu okiphe l'eka unwunna phe ndu ophuu no. O buru Chipfu bu okiphe phe, bu iya bu iphe, Chipfu, bu Chileke ngu kweru iya ukwe iya.
- ¹⁰“Noo ya; mu byakwa anoo l'eli ubvu ono ukporo abali labo; eswe l'enyashi; ge mu noru ke mbu pho. Chipfu ngabekwaru mu pho nchi g'o ngaberu mu ogiya ophuu. Ophu o mebyishiduru unu.
- ¹¹Chipfu su mu: ‘Tugbua je edua ndu Izurelu g'ephe je enworu ali ono, mu riburu angu le mu a-nu nna phe oche ono.’ “

Tsuje Chipfu ebvu

- ¹²“Oo ya bu le-a; unube ndu Izurelu; ? bubaa gunu be Chipfu, bu Chileke unu ele enya g'unu mee, abudu g'unu tsuje Chipfu, bu Chileke unu ebvu; unu etsokota uzo iya g'o ha; unu eyee ya obu; gude obu unu g'o ha; yee ndzu unu l'ophu ejeru Chipfu ono, bu Chileke unu ozi.
- ¹³Ozo bu g'unu meje iphemiphe, Chipfu suru g'e meje; waa iphe, o toru okpa iya su g'e tsoje; mbu ekemu-a, mu aturu unu ntanu-a; g'o duru unu le ree.

- 14**Unu lewaro ɛnya; eligwe; yee imigwe, noɣhataru eligwe bukwa Chipfu, bu Chileke unu nwe iya. Eliphe bukwarupho nkiya; mekpoo iphemiphe, no iya nu.
- 15**O buɛpho le Chipfu be nna unu oche phe duɛpho l'obu; k'ophu o yeru phe obu; bya ahota oshilokpa phe; ophu o hotaduru ohozo, noɣbaa nu; g'o dunaa ntanu-a.
- 16**Oo ya bu le-a; unu bunaa onwunu ubvu; bufu akpapyi ophu no unu l'ime obu; ba apfubehe olu kanganaa;
- 17**kele Chipfu, bu Chileke unu bukwa Chileke, ka agwa, nokota nu; bya aburu Nnajiuphu, kakota iphe, bukpuo ndu bu nnajiuphu. O bu Chileke, paru eka bya adu akpabiri; du ebvu l'ɛnya; ophu o dudu onye ooleje ɛnya l'iphu; teme ophu o ridu uphalazu.
- 18**Oo yebedua ahajeru ndu enwedu nna; yee unwanyi, ji phe anodedu enge. Ndu lwaru alwalwa be ooyeje obu; azu phe le nri; yee iphe, anma l'upfu.
- 19**Oo ya bu le-a; unu yejekwa ndu lwaru alwalwa obu; noo kele unubedua shikwapho buru ndu lwaru alwalwa l'ali ndu Ijiputu.
- 20**Unu tsuje Chipfu, bu Chileke unu ebvu; o buru iya be unu a-nodu ejeru ozi kpoloko; buru iya be unu a-kukuru; buru epha iya be unu e-gudeje eri angu.
- 21**Oo yebedua be unu a-noduje aja ajaja; o buru iya bu Chileke unu, bu onye meru unu eze iphe-a, du ebvu l'ɛnya-a, bu ophu unu gude ɛnya unu huma-a.
- 22**Nna unu oche phe be teke epe laru ali ndu Ijiputu bu umadzu ukporo eto l'iri be epe du; obenu le nta-a be Chipfu, bu Chileke unu mewaru; unu du ge kpokpode, no l'igwe; o buru g'unu habe igwe.”

Ditoronomi 11

Eye Chipfu obu; anuru iya opfu

- 1**“Oo ya bu le-a; yee Chipfu, bu Chileke ngu obu; meje iphe, o karu ngu g'i meje; l'i meje iphe, o toru okpa iya su g'e tsoje; me iphe, o suru g'i meje; meje ekemu iya tekenteke.
- 2**Ophu unu a-maru ntanu-a bu owa-a. Ndu mu epfuru iphe-a ta abukwa unwu unu; ndu ata amadu; ophu epe ahumajeduru ahuhu ono, Chipfu, bu Chileke unu huru unu ono; ozo akpabiri iya; ozo ike me okpehu iya;
- 3**waa iphe-ohubama iya ono; waa iphe ono, o meru l'ali ndu Ijiputu l'ophu ono; mbu iphe, o meru Fero, bu eze ndu Ijiputu; yee ali iya l'ophu;
- 4**waa iphe ono, o meru ndu ojogu ndu Ijiputu; me inya phe; me ugbo-inya phe; waa g'o gude mee ge Eze-ɛnyimu Uswe-uswe bya utso byapyabe phe teke ono, epe achi unu oso ono; teme waa ge Chipfu mecharu gude mee; epe bukotaru mkpurupyata byasu ntanu-a;
- 5**mekpoo iphemiphe ono, o meru unu l'echiegu gbiriri jasun unu byarwuta eka-a ono;

- ⁶waa iphe ono, o meru Detanu; yee Abiramu; unwu Eliyabu, bu nwa Rúbenu; teke ono, alí saru onu l'echilabo ndu Ízurelu lwekóta; ephe le ndibe phe g'ephe ha; me ulo-ekwa phe; mekpoo iphe, dzu ndzu ophu bu nkephe.
- ⁷Oo unubedua gude enya unu humakota eze iphe ono, Chipfu mekotaru ono.
- ⁸“Oo ya bu; unu toko ekemu, mu aturu unu ntanu-a dobekota. Oo ya bu g'ike adukwanu unu; g'unu je alwuta alí ono, unu abya ada enyimu Jiódanu eje enworu ono.
- ⁹Teme g'unu enwekwarupho ndzu ogologo l'alí ono, Chipfu riburu nna unu phe angu le ya a-nu phe; yele awa phe ono; mbu alí ono, mini era-eswi; yee manu-enwu aso gborogboro ono;
- ¹⁰kele alí ono, unu eje anata ono ta adukwa g'alí Ijiputu, bu eka unu shi lufuta, bu eka unu shi akoje iphe l'alí l'onwunu; unu ejee l'okpa unu je agbaa ya mini g'aagbaje l'eka a koru ekwo-ophe-a.
- ¹¹Obenu l'alí ono, unu eje enworu ono bu alí, du úbvú úbvú; bya enweru nsuda nsuda; o buru igwe edzeje mini agba iya l'onwu shokoshoko.
- ¹²Oo alí, Chipfu, bu Chileke unu nwuberu enya. Mbu l'enya Chipfu, bu Chileke unu adujeepho l'alí ono mkpurumkpuru; mbu e -shi le mgbube ishi apha jasú l'abvubvu iya.
- ¹³“K'ophu bu le; o -buru l'unu kwetaru mee ekemu, mu aturu unu ntanu-a, bu iya bu g'unu yee Chipfu, bu Chileke unu obu; unu egude obu unu g'o ha; me ndzu unu l'ophu jeeru iya ozi
- ¹⁴be Chipfu e-me g'igwe dzejeru mini l'orwuberu iya wushiru unu l'alí unu; o -dzeeru unu mini ishi-apha; l'o dzekwapho mini ula-apha; k'ophu onyenonu a-kpata iphe, o meberu l'alí; mbu g'i gbuta ereshi ngu; kua mee ngu; mee manu ngu.
- ¹⁵Oo-me g'eswa du l'egu ngu; g'eswi ngu taje; k'ophu ii-nodu eri nri eriji ephe.
- ¹⁶Unu kwabekwaru onwunu enya; g'e te dephe unu g'unu dakobe wata ejeru agwa ozi baaharu phe eja.
- ¹⁷Unu -mee ya nno be Chipfu a-tukoshikwa unu oke ehu-eghu iya; l'o woru imigwe guchia g'igwe te edzehe mini. Ophu o nweedu iphe, a koberu l'alí, emehuba emehu. O to duedu g'a no-beru; unu aburu mkpurupyata l'eguru alí ono, Chipfu abya unu anunu ono.
- ¹⁸“Oo ya bu le-a; unu woru opfu-a, mu epfuru unu ntanu-a kwachia l'ime obu unu; yefua le ndzu unu. Unu gbaru iya l'eka g'o buru iphe-ohubama; l'o kejekwarupho unu l'egedegee iphu g'o buru unu iphe-ohubama.
- ¹⁹Unu zije iya unwegirima unu. I -nodu l'ibe ngu l'i bo iya l'uja; teke iije l'uzo l'iibo iya. I -zee aze l'iipfu iya; teke i gbalihuru l'i pfukwa iya pho.
- ²⁰L'i dekwaa ya pho l'oshi mgbo ulo ngu; waa l'oshi mgbo oguzo ngu.

- ²¹Oo ya bu k'ophu gu l'unwegirima ngu a-ka nka l'alì ono, Chipfu riburu angu le ya a-nu nna ngu oche phe ono; g'ephe buru jasù teke mgboko a-nò-beru.
- ²²“Kele-a; o -buru l'unu tukoru ekemu-a, mu aturu unu g'unu dobe-a tsokota; mbu g'unu ye Chipfu, bu Chileke unu obu-a; tsoo uzo iya; chiru upfu kwee ya;
- ²³be Chipfu a-chifukwaru unu ohamoha, no unu l'iphu ono. Unu a-chifu oha, kagbaa unu shii; bya aka unu okpehu; buru l'alì phe.
- ²⁴Eka unu wotawaru okpa unu zobe a-buru k'unu; mbu a -gbè l'echiegu rwua úbvú úbvú Lébanonu; yee a -gbè l'enyimu Yufurétisu rwua eze-enyimu uzo enyanwu-ariba.
- ²⁵O to dudu onye byaru adu ike akpafu unu l'iphu; kele Chipfu, bu Chileke unu e-me g'a tsuje unu ebvu l'alì ono l'ophu. Mbu l'iphe, bukpoò eka unu zoru okpa be ndzu-agugu e-rwutaje phe, bu iya bu iphe, o kweru unu ukwe iya.
- ²⁶“Unu lenu! Ntanu-a be mu edoberu unu onu-oma; yee mburonu.
- ²⁷Oo-buru onu-oma duru unu; me o -buru l'unu ngaberu nchi mee ekemu Chipfu, bu Chileke unu, bu iya bu ekemu, mu aturu unu ntanu-a.
- ²⁸Oo-buru mburonu duru unu; me o -buru l'unu jikaru eme ekemu Chipfu, bu Chileke unu-a; unu bya agbakuta azu l'uzo-a, mu aturu unu ekemu iya ntanu-a; su g'unu shije-a; je etsoaha agwa ozo, bu ophu unu amahaada.
- ²⁹Su-a; teke Chipfu, bu Chileke ngu dubaeru ngu pho l'alì ono, unu eje enworu ono; teke ono be unu e-pfufuta k'onu-oma pho l'úbvú Gerizimu; waa k'atu onu pho l'úbvú Ebalu.
- ³⁰Úbvú ono ephenebo noephe me a dafuta enyimu Jiòdanu. O no l'eka uzo gbororo ono ibe iya ophu enyanwu aribaje; le mgboru ibe iya ophu oshi More pfugbaaru; mbu l'alì ndu Kénanu, bu le nsuda Araba; le mgboru mkpukpu Gilugalu.
- ³¹Nta-a be unu abyawaa ada enyimu Jiòdanu je g'unu nworu alì ono, Chipfu, bu Chileke unu abya unu anunu ono. Unu -natae ya pho nworu;
- ³²unu kwabekwa enya mekotaje iphe, Chipfu toru okpa iya su g'e tsoje; waa iphe, o suru g'e meje, bu ophu mu egoshi unu ntanu-a.”

Ditoronomi 12

Oru-ngweja ke Chipfu

- ¹“Owaa bu iphe, Chipfu toru okpa iya su g'e tsoje; waa iphe, o suru g'e emeje, bu iphe, unu e-leta enya; meje okpobe ememe l'alì ono, Chipfu, bu Chileke nna unu phe anu unu g'o buru k'unu jasù g'unu a-nò-beru l'eliphe-a.
- ²Unu tukokpoò eka ohamoha ono agwaje agwagwa mebyishicha; mbu oha ono, unu eje enworu alì phe ono. Unu mebyishicha agwa, epe agwaje l'eli úbvú, ha shii; me l'eli úbvú, ha nwanshii; me le mkpula oshi, jaru àjàjà.

³Unu tũko ọru-ngweja phe nwukpọshia; unu atũko mkpuma, ẹphe doberu nsọ tsukpọshia; tsua itso Ashera phe ọku. Unu tũkokwapho ntẹkpe agwa phe gbujishia; g'ẹpha iya chihuchaa; g'ọ tọ duhekpo adudu ophu l'ẹka ono.

⁴“Ọ tọ bukwa g'ẹphe emeje k'agwa phe bụ g'unu e-meje kẹ Chipfu, bụ Chileke unu.

⁵Iphe, unu e-mechia bụ g'unu chọo ẹka Chipfu, bụ Chileke unu a-họta l'ọkpa-ipfu unu g'ọ buru ẹka ee-dobe ẹpha iya; l'ọ buru iya eburu. Ọ buru ẹka ono bẹ unu e-jeje.

⁶Ngweja-akpo-ọku; mẹ ngweja mmanụ ọzo; mẹ oke-lanụ-l'uzo-iri; mẹ iphe ọzo, unu nuru iya; mẹ iphe, unu riburu angu anunu; waa ngweja onye tũru obu iya onyo; mẹ nwa eswi yee aturu, bụ ọkpara l'ẹpho ne iya; bukota l'ẹka ono bẹ unu a-tũkoje iya wota bya anụ.

⁷Ọ buru l'atatiphu Chipfu, bụ Chileke unu l'ẹka ono bẹ unu lẹ ndibe unu a-tũkoje nọdu ria nri. Ehu atsojekwapho unu l'iphemiphe, unu kũberu ẹka k'ememe; noo kele Chipfu, bụ Chileke unu kebwaru unu l'oma.

⁸“G'ọ tọ bukwaru g'anyi eme l'ẹka-a ntanụ-a bụ g'unu e-meje l'ẹka ono. L'ẹka-a bẹ onyenonu anọduje eme iphe, du iya ree l'ẹnya nkiya.

⁹Noo kele nta-a bẹ unu teke erwudu ẹka unu a-tũta unme, bụ ẹka Chipfu, bụ Chileke abya unu anunu g'ọ buru okiphe unu.

¹⁰Ole unu -daẹpho ẹnyimu Jiọdanu je eburu l'alị ono, Chipfu, bụ Chileke unu abya unu anunu ono; mbụ o -meẹpho; unu nweru onwunu l'ẹka iphe, bụ ndu ọhogu unu, bupheru unu mgburugburu; k'ọphu unu bu lẹ nchi-odoo;

¹¹Ọ buru teke ono bẹ unu e-wotajẹ iphemiphe-a, mu tũshiru unu l'ekemu-a gude bya l'ẹka ono, Chipfu, bụ Chileke unu a-họta g'e dobe ẹpha iya; l'ọ buru iya eburu. Iphemiphe ono bụ iya bụ ngweja-akpo-ọku; waa ngweja mmanụ ọzo; mẹ oke-lanụ-l'uzo-iri; mẹ iphe ọzo, unu anụ iya anunu; mẹkpoo iphe, kachaa ree l'iphe, unu nweru enweru, bụ iphe, unu riburu angu l'unu a-nụ Chipfu.

¹²Ọ buru l'atatiphu Chipfu, bụ Chileke unu ono bẹ unu a-nọduje; tee ẹswa. Unubẹdua l'onwunu; waa unwu unu unwoke; mẹ unwu unu unwanyi; waa ohu unu unwoke; mẹ ohu unu unwanyi; waa ndu Lívayi, bu lẹ ndu-unu, bụ ndu ophu adudu alị ẹka a nuru phe; ophu ọ dudu iphe, ẹphe ketarụ g'ọ buru okiphe phe.

¹³Unu kwabekwa ẹnya g'ọ tọ buẹpho ẹka du unu ree bẹ unu e-jeje anọdu gwee ngweja-akpo-ọku.

¹⁴G'ẹka unu e-gweje ngweja-akpo-ọku ono bukwarupho l'ẹka Chipfu a-họta l'ọkpa-ipfu unu nanụ. Ọ buru ẹka ono bẹ unu a-tũkoje iphemiphe-a, mu tũru unu ekemu iya-a emekọta.

¹⁵“Ole ọ bụ; unu gbujekwaa anụ, du unu ree; taa lẹ mkpũkpu lẹ mkpũkpu unu g'ọ ha; mbụ iphe, bukpo anụ, guru unu ẹgu atata. Ọo gẹ Chipfu, bụ Chileke kebeberu nemadụ l'oma bụ g'ọo-tabejeru. G'onye dũebe ree; ọzoo onye aasọ nsọ tajekwa iya rọ. G'a tajẹ iya g'ọ bụ mgbada; ọzoo umoro bẹ aata.

- 16Q buẹpho g'unu ta tajekwa mee ya; unu wushijekwa iya l'alì g'onye wushiru mini.
- 17Qphu unu anọdujekwa l'oma mkpukpu unu ria iphe, a turu oke-lanu-l'uzo-iri l'ereshi unu; ozoo mee unu; ozoo manu unu; ozoo nwa mbu, o nwuru mbu eswi unu; ozoo iphe-edobe unu ozo; ozoo iphe, onye kweru ukwe iya; ozoo iphe ngweja, nemadzu turu obu iya onyo anu; ozoo iphemiphe ozo, du iche, a nuru anunu.
- 18Qchia g'unu noduje l'iphu Chipfu, bu Chileke unu riye iya; mbu l'eka ono, Chipfu, bu Chileke unu a-hota ono. Unubedua l'onwunu e-riye iya; waa unwu unu unwoke; waa unwu unu unwanyi; waa ohu unu ke nwoke; waa ohu unu ke nwanyi; waa ndu Lívayi, bu le mkpukpu unu. Unu noduje l'iphu Chipfu, bu Chileke unu tee eswa iphemiphe, unu kuberu eka k'ememe.
- 19Unu kwabekwa enya g'unu ta akwasweru ndu Lívayi enya jasukpoo g'unu a-no-beru l'alì unu ono.
- 20“Chipfu, bu Chileke unu -meepho g'oke alì unu ka shii, bu iya bu iphe, o kweru unu ukwe iya; onye egu anu agu; o -nonyaa bya asu: ‘Anu agukwa mu!’ G'onye ono takwaa ya g'oggu iya.
- 21Q -buru l'eka Chipfu, bu Chileke unu a-hota g'o buru eka oo-dobe epha iya be paru enya; oo ya bu g'onye obu gbua eswi iya obu; ozoo iphe-edobe iya obu, bu ophu Chipfu nuru iya, bu iya bu ge mu turu iya unu l'ekemu ono; onye obu anodu l'oma mkpukpu unu taa ya g'o guru iya.
- 22Q buẹpho g'aataje mgbada; ozoo umoro bu g'unu a-taje iya. Ge ndu aaso nsọ; waa ndu a ta sodu nsọ tukojekwa taa ya.
- 23Q buẹpho g'unu kwabe enya g'unu te erije mee ya; kele oo mee bu ndzu. Oo ya bu; unu te erijekwa ndzu iphe; taa anu iya.
- 24Unu be rijekwa mee-iphe. Unu wushijekwa iya g'onye wushiru mini.
- 25Unu be erijekwa iya; k'ophu oo-duru unu le ree; duru unwu unu le ree, bu ndu anodu etso unu l'azu; kele unu eme iphe, pfuru oto l'iphu Chipfu.
- 26Obenu l'iphe ono, unu doberu Chipfu nsọ ono; yee iphe ono, unu kweru ukwe iya ono be unu e-gudeje je l'eka Chipfu a-hota.
- 27Eka unu e-gweje ngweja-akpo-oku; mbu anu obu mekpoo mee ya; l'a-buru l'eli oru-ngweja ke Chipfu, bu Chileke unu. L'a gbashì mee-iphe ono l'eli oru-ngweja Chipfu, bu Chileke unu ono; unu eworu anu iya taa.
- 28Unu kwabekwa enya; mekotaje iphe, bu opfu-a, mu epfu anu unu; aturu iya unu l'ekemu-a; k'ophu oo-duru unu le ree; duru unwu unu, etso unu l'azu ree jasụ l'ojejoje; kele unu eme iphe, pfuru oto l'iphu Chipfu, bu Chileke unu.
- 29“Teke ono, Chipfu, bu Chileke unu e-me g'ephe chihu l'atatiphu unu; mbu ohamoha ono, unu eje enworu alì phe ono; unu bya anochia enya phe; bya ebuchia alì phe;

³⁰unu kwabekwaru onwunu enya me a lwepho ndu ono l'iphu unu: g'a ta kwaru unu ye g'unu wata anwu eka phe; mbu g'unu wata akpa ishi agwa phe; jiahaa su: '? Denu g'ohamoha-a egudeje abaru agwa phe eja; g'anyibedua awata eme g'ephe emeje.'

³¹Unu ba abajekwaru Chipfu, bu Chileke unu eja g'ephe abajeru agwa phe; kele o bukwapho ahuma ahuma, Chipfu kporu ashi be ephe emejeru agwa phe; mbu l'unwu phe unwoke; yee unwu phe unwanyi be ephe akpojechaa oku; nu agwa phe.

³²"Su-a; iphemiphe-a, mu aturu unu ekemu iya-a; unu letakwa enya mee ya. Unu te eyekwa iya iphe; ophu unu ahabotakwa iya iphe!"

Ditoronomi 13

Abaru agwa ohozo eja

¹"O -buru l'o nonyaaru; onye shi l'echilabo unu bya aburu onye mpfuchiru; ozoo o-rwo-nrwo; o bya emeaharu unu iphe-ohubama; ozoo iphe-ohumalenya;

²e mechaa; iphe-ohubama ono; waa iphe-ohumalenya ono vua g'o pfuru iya; o bya epfuahaaru unu su: 'Unu g'anyi tsopyabe agwa ozo, unu amahaada je awata phe ejeru ozi';

³unu ta angakwa nchi l'opfu egube onye mpfuchiru ono; ozoo opfu o-rwo-nrwo, du nno; kele o kwa Chipfu, bu Chileke unu ahụ unu ama ge ya maru: ? unu gude-a obu unu g'o ha; me ndzu unu g'o ha yee Chipfu, bu Chileke unu obu?

⁴O kwa Chipfu, bu Chileke unu bu onye unu e-tsojeru; o buru iya kpoloko kpekpu bu onye unu a-tsuje ebvu. Unu dobeje ekemu iya; ngabejeru iya nchi; jeeru iya ozi; chijeru upfu kwee ya.

⁵G'e gbukwaa onye mpfuchiru ono; ozoo o-rwo-nrwo ono egbugbu; noo kele o ziru unu g'unu kwefu ike; haa etso Chipfu, bu Chileke unu, bu onye dufutaru unu l'ali Ijiputu; bya agbafuta unu l'ali eka unu shi buru ohu ono. Onye ono bu iphe, oome bu g'o kposhia unu g'unu te tsoshi uzo ono, Chipfu turu unu ekemu g'unu tsoo ono. O kwa egube ono be unu e-shije wofu ejo-iphe l'echilabo unu.

⁶"O -buru nwune ngu; mbu onye gu l'iya shi le ne lanu; ozoo nwa ngu nwoke; ozoo nwa ngu nwanyi; ozoo nyee ngu, du ngu l'obu; ozo eguru onya ngu, gu l'iya no le ndzu; byapfutaru ngu le mpya bya emeahaa g'o rata ngu g'unu je awata ejeru agwa ozogba ozi; mbu agwa, gubedua l'onwongu amahaadaa; ophu nna ngu phe amahadaa ya;

⁷mbu agwa ndu bupheru unu mgburugburu; ndu ophu no unu ntse; me ndu ophu no unu enya; jasukpoo l'eka igwe beru; ali beru.

⁸Unu te kwetakwa iphe onye ono pfuru; ophu unu angabekwaru iya nchi. Unu ta aphukwaru onye ono obu-imemini. Unu te edobekwa iya ndzu; ophu unu ewohakwa onye obu ewoha.

⁹Unu gbukwaa onye obu egbugbu. Ge gubedua vuru uzo dabu iya eka onwu l'ehu; temanu ndu ophu l'ophu awupyabewa iya ro.

¹⁰Unu gude mkpuma tugbu ya; kele o meru g'o dufu unu l'eka Chipfu, bu Chileke unu, bu onye dufutaru unu l'ali Ijiputu, bu eka unu shi buru ohu.

¹¹Oo ya bu ge ndu Izurelu l'ophu anuma iya tsuhu ebvu; o to duedu onye byaru emebaa ejo-iphe, du g'ono l'echilabo unu.

¹²“O -buru l'unu shi le mkpukpu lanu l'ime mkpukpu le mkpukpu ono, Chipfu, bu Chileke unu a-nu unu g'unu buru ono numa;

¹³I'o duru ndu bu ogalemkpa, no iya nu; o buru l'echilabo unu be ephe shi; bya erwutawaa ndu bu le mkpukpu ono; su phe: 'Unu g'anyi je awata ejeru agwa ozo ozi'; mbu agwa, unu amahaada;

¹⁴unu kpakwaa ishi; bua eka iya okpobe ebubu; jja aji mkponwu mkponwu. Teke e mechaaru o buru eviya; iphe obu mee ememe eviya; mbu l'ejo ahuma, du nno meru l'echilabo unu;

¹⁵unu egude ogu-echi gbushikota ndu bu le mkpukpu ono; mebyishikota iya g'o ha; mekpoo iphemiphe, no l'ime iya; mekpoo iphe-edobe no iya nu; unu gude ogu-echi gbushichaa ya.

¹⁶Unu abya atuko iphemiphe, no le mkpukpu l'wua; bya akube l'oma edupfu mkpukpu ono. Unu eworu mkpukpu ono; yee iphemiphe, no iya nu kpoo oku; g'o buru ngweja-akpo-oku l'ophu, a nuru Chipfu, bu Chileke unu. Ge mkpukpu ono bukwaru ikpozu jasu l'ojejoje; ophu a kpu-phukwa iya azu ozo.

¹⁷G'o to dukwa iphe ono, e doberu k'emebyishi ono me nanu, aa-huma nemadzu l'eka; k'ophu Chipfu e-woru onwu-phuruphuru oke ehu-eghu iya ono sephu azu; imemini unu adu iya; l'o phuru unu obu-imemini; l'o mee unu aka igwerigwe, bu iphe, o rifuru nna unu oche phe angu iya;

¹⁸m'o -buru l'unu ngaberu Chipfu, bu Chileke unu nchi; dobekota ekemu iya-a, mu aturu unu ntanu-a g'o ha; bya emekwapho iphe, pfuru oto l'enya Chipfu, bu Chileke unu.”

Ditoronomi 14

Nri, aaso nsọ; yee nri, a ta sọdu nsọ (Uke 11:1-47)

¹“O kwa unu bu unwu Chipfu, bu Chileke unu. Unu te eyebatajekwa onwunu onya l'ehu; ophu unu akpushijekwa onwunu egbushi onu-iphu me unu -nodu akwa nemadzu.

²Noo kele unu bu oha, duru Chipfu, bu Chileke unu nsọ; teme le Chipfu shiwaa l'echilabo oha, no l'eliphe mgburugburu hota unu dobe g'unu buru oha, bu yebdua kpoloko nwe unu.

³“Unu te erijekwa iphe, bu ebyi.

⁴Waa anu, unu a-taje bu owa-a: eswi; waa aturu; waa eghe;

- ⁵waa ele; waa anigo; waa egħu-ḡswa; waa atsū; waa atūru-ḡswa.
- ⁶Unu tajē iphe, bụ anū, nweru ujarabvu-ḡkpa; bya anwafutaje nri taphu azū.
- ⁷Ole ọ bụ; anū ọphu anwafutaje nri taphu azū; ọzoo ọphu nweru ujarabvu-ḡkpa, unu ata tajēdu bụ: inya-kamēlu; waa nggamachi; waa nchi-ḡgbà. Ndu k'ono bụ anū, unu a-nḡdu asḡ nsḡ; noo keḡe ọnwafutaje nri taphu azū; obenu l'o to nwedu ujarabvu-ḡkpa.
- ⁸Ezi bukwapħo anū, unu a-nḡdu asḡ nsḡ; a makwarū-a l'o nweru ujarabvu-ḡkpa; obenu l'ḡ tḡ nwafutajedu nri taphu azū. Unu ta tajēkwa anū iya; ọphu unu edenyijekwa odzu iya ēka.
- ⁹“Iphe, bu lē mini bē ọphu unu a-tajē bụ ọphu nweru m̀kpḡ yēē ēkiri.
- ¹⁰Ndu ọphu enwedu m̀kpḡ yēē ēkiri bukwa anū, unu a-nḡdu asḡ nsḡ; unu ta atajēkwa iya.
- ¹¹“Iphe, bukḡpoo ēnu, a ta sḡdu nsḡ; unu tajē iya.
- ¹²Ole ndu ọphu unu ta atajēdu bụ: ugo; waa udele; waa udele-oji;
- ¹³waa égbé l'udu iya l'udu iya; waa ivu;
- ¹⁴mēkpoo okḡoko-ḡhà l'udu iya l'udu iya;
- ¹⁵⁻¹⁷waa mgbashi-ujiku l'udu iya l'udu iya; waa ēnu ḡḡlu; waa ḡkpo-ngwere l'udu iya l'udu iya; waa ugo-mini; waa ḡḡ-ikporo;
- ¹⁸waa eze ḡku-eswi-uda; waa apyari-nħḡko l'udu iya l'udu iya; waa ovu; waa utsu-nwankḡta.
- ¹⁹“Iphe, bukḡpoo ogu, furu ēba bukḡtakwa anū, unu a-nḡdu asḡ nsḡ; unu ta atajēkwa iya.
- ²⁰Obenu l'iphe, bukḡpoo iphe, furu ēba ḡ'ḡ ha, a ta sḡdu nsḡ bē unu a-takḡtaje.
- ²¹“Unu ta atajēkwa iphe, nwḡhuru anwḡhu. Unu nḡje iya ndu lwarū alwalwa, bu lē ndu unu ḡ'ēphe taa. Ọzoo unu eje eree ya ndu ḡhozo. Keḡe unubēdua bụ ndu dḡru Chipfu, bụ Chileke unu nsḡ. “Unu te egudejekwa mini-ēra ne egħu shia nwa iya.”

Oke-lanū-l'uzo-iri

- ²²“Unu nḡjekwa oke-lanū-l'uzo-iri l'iphemiphe, unu kpatarū l'opfu unu aphagapha.
- ²³Ọ kwa l'ataphu Chipfu, bụ Chileke unu l'ēka ono, ọo-hḡta; dobe ēpha iya; buru iya eburu ono bē unu a-nḡduje ria oke-lanū-l'uzo-iri ono, bụ iya bụ iphe, shi l'ereshi unu; waa lē mēē unu; waa lē manū unu; waa l'iphe mbū, shi l'eswi unu; yēē egħu unu mē atūru unu; k'ọphu unu e-shi nno nwḡta atsū Chipfu, bụ Chileke unu ebvu tekenteke.
- ²⁴Ọ -buru l'ēka ono bē parū unu ēnya; k'ọphu bụ lē teke Chipfu, bụ Chileke unu keberu unu l'ḡma shii; bē unu ta adḡdu ike evukḡta iya eje ēka ono, Chipfu a-hḡta ḡ'ḡ buru ēnya ēka ēpha iya a-dḡ ono; keḡe ọ parū unu ēnya;

²⁵unu eree ya erere; reta iya okpoga; gudepyabẹ l'ẹka gude je ẹka ono, Chipfu, bu Chileke unu a-hota ono.

²⁶“Unu -rwua; unu egude okpoga ono mee iphe, du unu ree; unu egude iya zuta eswi; ozoo gude iya zua aturu; ozoo gude iya gaa mee; ozoo gude iya gaa iphe-angungu ozo, atsu atsutsu; ozoo zukupoe ya pho iphe, du unu ree. Unu anodu l'iphu Chipfu, bu Chileke unu l'ẹka ono ria ya; tee eswa; unu le ndibe unu l'ophu.

²⁷A bya le ndu Lívayi, bu le ndu-unu; unu ta akwaswekwaru phe enya; noo kele o to dudu ali ẹka a nuru phe; ophu o dudu iphe, ephe ketaru g'o buru okiphe phe.

²⁸Iphe, bukpuo apha eto a-nwuta anwuta; me apha k'eto ono bvuje abvubvu be unu a-chitakotaje oke-lanu-l'uzo-iri l'iphe, bu iphe, unu meberu l'ali l'apha ono; bya akubegbaa l'ẹka aa-kwakobechaa ya le ndu-unu;

²⁹k'ophu ephe a-byaje bya eria rijia ephe; mbu ndu Lívayi, bu ndu ophu adudu ali ẹka a nuru phe; ophu o dudu iphe, ephe ketaru g'o buru okiphe phe; waa ndu lwaru alwalwa; me ndu enweedu nna; waa unwanyi, ji phe anodu, bugbaa le ndu-unu. Oo ya bu ge Chipfu, bu Chileke unu ekebe unu l'oma l'iphemiphe, bu akanya, unu gude ẹka unu ese.”

Ditoronomi 15

Apha, onyemonye e-nweru onwiya

(Uke 25:1-7)

¹“Iphe, bukpuo apha esaa; me apha k'esaa ono bvuje abvubvu be unu a-haje ugwo, e ji ejiji g'o laa nno.

²Waa g'ee-gudeje mee k'aha ugwo ono baa: G'onye jieru nwibe iya ugwo hajekwaaru iya ya. G'o to jeekwa anata onye Izurelu ibe iya ono; ozoo nwune iya ugwo ono; kele iphe, e kuru apha ono bu apha, Chipfu suru ge k'ugwo laa.

³O -buru ophu onye ohozo ji ngu; jero je anata ono; obenu ophu dagbaru gu le nwune ngu; hakwaa ẹka l'ono.

⁴“O to dukwa onye ukpa, byaru l'adu l'echilabo unu; kele Chipfu, bu Chileke unu akwatakwa kebe unu l'oma l'ali ono, oome ge ya nu unu g'o buru okiphe unu ono;

⁵m'o -buru l'unu ngaberu Chipfu, bu Chileke unu nchi; leta enya; mekota ekemu-a, mu aturu unu ntanu-a.

⁶Noo kele Chipfu, bu Chileke unu e-kebekwa unu l'oma, bu iya bu iphe, o kweru ukwe iya. Unu e-jieje ohamoha, du igwerigwe ugwo; ole unu ta abyadu ejita; teme unu aburu ishi ikpoto oha; ole o to dudu ndu byaru a-buru ishi unubedu.

⁷“O -buru l'o nweru nwune unu, bu onye ukpa, unu l'iya tuko buru le mkpukpu; l'ali-a, Chipfu, bu Chileke unu abya unu anunu-a; unu te edobekwaru iya okpoma mgbashi; ophu unu ekekwaru nwune unu ono, bu onye ukpa ono ẹka mbvu.

⁸O chia ẹka bẹ unu a-nọdu asajeru iya ọkpobe asaru. Unu ejiejee iya ụgwọ, a-suru iya eme iphe, bụ mkpa iya; gẹ mkpa obu ahahabẹ.

⁹Unu letakwa ẹnya g'ejo ọriri ta abatajekwa unu l'obu kẹ g'unu sụ l'apha k'ẹsaa, bụ iya bụ apha aa-ha g'ụgwọ-a laa dukwaa ntse; woru iphu gbanwuberu nwune unu ono, mkpa byaru ono; ọ tọ dudu iphe, unu anụ iya. Onye ono a-kpokwaru Chipfu yeru unu; l'ọ bụru unu iphe-eji.

¹⁰Unu gudejekwa obu unu; nụ iya iphe, ọ suru g'unu nụ iya; ọphu unu anọdukwa agu aphụ anụ iya ya; kele Chipfu, bụ Chileke unu e-gudekwa k'iphe ono, unu nuru iya ono kebe unu l'oma l'iphemiphe, unu turu ama ememe; mekpoo l'iphemiphe, unu yeru ẹka wata ememe.

¹¹Kele ndu ụkpa ta abyadu abvu abvubvu l'ali-a. Noo g'o gude mu nọdu aturu iya unu l'ekemu epfu sụ: Unu sajekwaaru unwune unu ẹka ọkpobe asasa; yee ndu ụkpa; me ndibe unu, nọ lẹ mkpa l'ali unu ono.”

Aha ndu bụ ohu g'ẹphe nweru onwophe

(Awụ 21:1-11)

¹²“O -buru l'ọ nweru onye Hiburu ibe ngu, ị gbataru l'ohu; m'ọ -bụ nwoke; ọzo nwanyi; o jewaru ngu ozi apha ishii; o -be l'apha k'ẹsaa; hakwaa ya g'ọ laa; je enweru onwiya l'ẹka ngu.

¹³Teke ono, ị haru iya g'o shi ngu l'ẹka lashia ono; ta agbabekwa iya ẹka ọto.

¹⁴Sakwaa ẹka asasa; nụ iya iphe, shi l'eku ngu; me ọphu shi l'ulo balị ngu; me ọphu shi l'ẹka ikuje mee. Oo iphemiphe ono, Chipfu, bụ Chileke ngu gude kebe ngu l'oma ono; bụ iphe, ii-nụ iya.

¹⁵Unu nyatakwa l'unu shi buru ohu l'ali Ijiputu; Chipfu, bụ Chileke unu bya agbafuta unu. O buru iphe ono meru iphe, mu aturu unu ekemu-a ntanu-a.

¹⁶“Ole ọ bu; teke ọ bukwanu l'ohu ngu ono suru ngu lẹ ya ta alufudu ngu l'ẹka; kele o yeru ngu obu; bya eyee ndibe ngu obu; teme gu l'iya du lẹ ree;

¹⁷I'i wota oji; dobe iya nchi lẹ mgbo; kpo-fua; onye ono abuwaruro ohu ngu jaswaruroya. O bukwarupho egube ono bẹ ii-mekwapho ohu ngu kẹ nwanyi.

¹⁸G'aha ohu ngu g'o nweru onwiya te ejekwa ngu atsu l'ehu; kele ozi, yebedua nwekiya jeru ngu apha ishii ono kakwa shii ugbo labo; eme l'ozi, onye e butaru ebuta gege jeru ngu. I -mee ya nno; Chipfu, bụ Chileke ngu ekebe ngu l'oma l'iphemiphe, iime.”

Anu, vuru ụzo waa ẹkpa-nwa ne iya

¹⁹“Iphe, bụ eswi unu; waa aturu yee egbu unu; bẹ nwa mbu, o vuru ụzo nwua, bụ okee ya bẹ unu e-dobekotajeru Chipfu, bụ Chileke unu iche. Unu te egudejekwa oke-eswi, bụ iya vuru ụzo waa ẹkpa-nwa ne iya eje ozi egu; ọphu unu ebushijekwa aturu, bụ iya vuru ụzo waa ẹkpa-nwa ne iya eji.

²⁰Apha g'apha bẹ unu lẹ ndibe unu a-nọduje l'atatiphu, Chipfu, bụ Chileke unu taa ya; l'ẹka Chipfu a-họta.

²¹Ole ọ -bụkwanuru l'anụ ono nweru ẹka iphe mebyiru iya; mbụ l'ọ bụ ẹniyeni; ọzoo l'ootsu ishi; ọzoo l'ọ duru ẹka ọzo, iphe mebyiru iya shii; unu te egudekwa iya gweeru Chipfu, bụ Chileke unu ngweja.

²²Unu nọdujekwa lẹ ndu-unu taa ya. Unu taa ya g'aatajẹ mgbada; ọzoo umoro-a. Onye aasọ nsọ a-ta iya; onye dūebe ree ataa ya.

²³Ọ bụepho g'unu ta tajẹ mee ya. Unu wūshije iya l'alị g'onye wūshiru mini.”

Ditoronomi 16

Ọbo Ojaghata

(Awụ 12:1-20)

¹“Unu boje ọbo Ojaghata kẹ Chipfu, bụ Chileke unu l'ọnwa Abibu; noo kẹle ọọ l'ọnwa Abibu ono bẹ Chipfu, bụ Chileke unu duru unu l'enyashi dufuta l'alị Ijiputu.

²Unu gwejeru Chipfu, bụ Chileke unu ngweja Ojaghata ono. Ọ buru aturu; ọzoo egbu; ọzoo eswi bẹ unu e-gudeje egwe ngweja ono l'ẹka Chipfu a-họta; dobe ẹpha iya; buru iya eburu.

³Unu te egudejekwa buredi, e yeru iphe, ekoje buredi taa ya. Ujiku ẹsaa bẹ unu a-tajẹ buredi, e yeduru iphe, ekoje buredi, bụ iya bụ buredi iphe-ẹhuka. Noo kẹle ọọ ẹphuru-ọku bẹ unu gude wufuta l'alị Ijiputu. Unu meje iya jasukpoo g'unu a-nọ-beru gudeje nyata teke unu shi lẹ Ijiputu wufuta.

⁴G'ọ tọ dukwa onye aa-huma iphe, ekoje buredi l'ibe iya l'alị ono mgburugburu gbiriri jasụ ujiku ẹsaa ono abvụ. Ọphu e kwejekwa g'anụ ono, e gburu l'uzenyashi mbụ pho nọ futa l'utsu.

⁵“Unu ta nọdujekwa lẹ mkpukpu lẹ mkpukpu ono, Chipfu, bụ Chileke unu abya unu anunu ono bọo ọbo Ojaghata.

⁶Ẹka ee-gweje iya bụ l'ẹka ono, Chipfu, bụ Chileke unu a-họta; dobe ẹpha iya; buru iya eburu ono. Noo ẹka aa-nọduje gwee ngweja Ojaghata ọbu l'uzenyashi; mę ẹnyanwu rịbaahaepho; l'ẹgube teke ono, unu shi l'alị Ijiputu wufuta ono.

⁷Ọ buru ahuhu bẹ aa-hùje anụ iya taa l'ẹka ono, Chipfu, bụ Chileke unu a-họta ono. O -be l'utsu; onyenonu adakọbe lashia ibe iya.

⁸Ujiku ishii bẹ aa-tajẹ buredi, e yeduru iphe, ekoje buredi; o -be lẹ mbọku k'ẹsaa; unu edzukọo l'iphu Chipfu, bụ Chileke unu. G'ọ tọ dukwa onye e-je ozi mbọku ono.”

Ọbo-Idzu

(Awụ 34:22; Uke 23:15-21)

⁹“Idzu ẹsaa bẹ unu a-gutajẹ dobe. Teke aa-watajẹ agu idzu ono bụ mę a wataepho egbuta ereshi.

10Noo teke unu a-bojeru Chipfu, bu Chileke unu Obo-Idzu. A -nòdu abò iya; g'onyenonu wotajèkpoephe iphe, o turu obu iya onyo je anu Chipfu; g'onyenonu nujeekwapho gè Chipfu, bu Chileke unu kebeberu iya l'oma.

11Unu adòru l'iphu Chipfu, bu Chileke unu; mee emereme; onyemonye yee unwegirima iya unwoke me unwanyi; me ohu iya unwoke me unwanyi; mekpoo ndu Lívayi, nò lè mkpukpu unu; me ndu lwaru alwalwa; me ndu enwedu nna; me unwanyi, ji phe nwuhwaru, bu ndu unu l'ephe tukoru nòdu. Eka aa-nòdu mee ya bu l'eka ono, Chipfu, bu Chileke unu a-hòta; dobe epha; buru iya eburu ono.

12Unu nyatajèkwa l'unu shi buru ohu l'alì Ijiputu; k'òphu oo-me g'unu kwabè enya mekòtaje iphe-a, mu toru okpa iya; sù g'e meje-a.”

Obo-Mkpù

(Uke 23:33-43; Ojú 29:12-38)

13“Unu bọo Obo-Mkpù ujiku esaa; me unu gbutachaephe balì unu; kutachaa mee unu.

14Unu -nòdu abò iphe obu; unu eme emereme; unubèdua l'onwunu; mekpoo unwu unu unwoke me unwanyi; me ohu unu unwoke me unwanyi; me ndu Lívayi; me ndu lwaru alwalwa; me ndu enwedu nna; me unwanyi, ji phe nwuhwaru, bu ndu unu l'ephe tukoru nòdu.

15O buru l'eka Chipfu, bu Chileke unu a-hòta bè unu a-nòdu bọoru iya obo-iphe ono ujiku esaa. Noo kele Chipfu, bu Chileke unu bè e-kebe unu l'oma l'iphe, unu kpataru l'egu; waa l'iphemiphe, unu byibekporu eka k'ememe; k'òphu ehu a-tso unu utso tsofu l'ishi.

16“Ugbo èto l'apha g'apha bè unwoke unu g'ephe ha a-byakòtaje l'atatiphu Chipfu, bu Chileke unu l'eka o-hòta. Ephe a-bya lè Obo-Buredi, e yeduru iphe ekoje buredi; waa lè Obo-Idzu; waa lè Obo-Mkpù. Ephe -nòdu abya ono; g'ephe ta agbajèkwaru eka bya l'iphu Chipfu.

17G'onyenonu nujeephe iphe, o-dù ike nu. G'ò bujeerupho gè Chipfu, bu Chileke unu kebepoerupho onyemonye l'oma beru bu g'oo-nu-beru.”

Ahòta ndu-ikpe

18“Unu hòtakwa ndu-ikpe; me ndu-ishi l'okpa-ipfu, nonu lè mkpukpu, nòkòta nu, Chipfu, bu Chileke unu abya unu anunu ono. O buru ndu ono, aa-hòta ono a-nòduje ekpe ndu Izurelu ikpe, pfuru oto.

19Unu ta nmajèkwa ikpe inmaphu; ophu unu elejekwa enya l'iphu kpee ikpe. Unu te erijekwa uphalazu; noo kele uphalazu apyi-chijekwa onye maru iphe eka l'enya; teme o nòdu emeje g'opfu onye pfuberekoto dù gheleghelehele.

20O buekwapho ikpe, pfuru oto kpoloko kpeekpu bè unu a-nòduje ekpe; k'òphu unu a-nòdu ndzu; alì ono, Chipfu, bu Chileke unu abya unu anunu ono aburu k'unu.”

Abaru agwa eja

²¹“Unu ta akpọbejekwa itso Ashera lẹ mgboru ọru-ngweja, unu doberu Chipfu, bu Chileke unu.

²²Ọphu ọ dukwa mkpuma, unu e-dobeje ọnu wata agwagwa; mbụ iphe ono, Chipfu, bu Chileke unu kporu ashị ono.”

Ditoronomi 17

¹“Unu te egudekwa oke-eswi; ọzoo aturu, ntucha du l'ẹhu; ọzoo ọphu nweru ẹka iphe mebyiru iya; bya egweeru Chipfu, bu Chileke unu ngweja; kele ono bukwa akpamara l'iphu Chipfu, bu Chileke unu.

²“Ọ -duru nwoke; ọzoo nwanyi, unu l'iya bu lẹ mkpukpu lanu l'ime mkpukpu ono, Chipfu, bu Chileke unu abya unu anunu ono, a humaru l'eka oome iphe, du eji l'enya Chileke; shi nno emebyi ọgbandzu Chileke;

³mbụ; ọ -buru l'onye ono wataru agwa agwa ọzogbaa; mbụ wata abaru phe eja; phozeaharu enyanwu; ọzoo ọnwa; ọzoo kpokpode, bu iphe, mu suru g'e be emejeshi-a;

⁴e pfiaru iya unu; unu numa; unu kparwetakwa ishi iya rengurengu; ọ -buru eviya; l'iphe obu meru ememe; mbụ l'egube ahuma ono be e meru l'ali Izurelu;

⁵g'a kputa onye obu, meru ejo iphe obu; m'ọ bu nwoke; ọzoo nwanyi kpufu l'onu-abata mkpukpu unu ono; gude mkpuma tugbua ya.

⁶Onye ee-kpe mpfugbu be aa-duada ẹbo; ọzoo ẹto; gbaa ekebe teme l'e gbuje onye obu. G'ọ to dukwa onye e-gbu me ọ -buru onye lanu agba iya ekebe.

⁷G'ọ bukwaru ndu ekebe ono, e-vuru ọzo dabẹ iya ẹka ọnwu l'ẹhu; teme ndu ọphuu g'ephe ha awupyabewa iya ro. Ọ kwa egube ono be unu e-shije wofu ejo-iphe l'echilabo unu.”

Ulo-ikpe

⁸“Ọ -buru l'ọ duru opfu, daru nu, dunukaru unu ehuka ekpekpe; opfu ke l'e gburu ochi te egbu; ọzoo l'e tsuru nemadzu iphe te tsu; ọ buru opfu dahaa lẹ mkpukpu unu; unu gude opfu ono je l'eka ono, Chipfu, bu Chileke unu a-hota ono;

⁹gude iya jepfu ndu-uke, bu oshilokpa Lívayi; waa onye-ikpe, no l'okwa lẹ teke ono; pafuru phe ikpe obu g'ephe kpee; pfua g'ọ gbaru g'e mee ya.

¹⁰G'onye e kperu ikpe iya mekwaa iphe ono, ephe kperu ono; mbụ ikpe ono, ephe no l'enya ẹka ono, Chipfu a-hota ono kpee ono. Unu kwabekwa enya g'ọ buerupho iphe, ephe suru g'e mee be ee-me.

¹¹Unu tukokwa ekemu, ephe turu unu g'ọ ha; waa ikpe, ephe kperu unu g'ọ ha mekotaje. Unu ta ahakwa iphe, ephe pfuru unu; meahaa iphe ọzo.

¹²Onye jikaru eme iphe onye-ikpe kperu; ọzoo iphe, o kperu mbụ onye uke, no l'eka ono ejeru Chipfu, bu Chileke unu ozi be ee-gbu egbugbu. Ọ buru egube ono be unu l'e-shi wofu ejo-iphe l'ali ndu Izurelu.

¹³Onyemonye a-nụma iya; ndzụ agụhu iya. Ọ tọ duedu onye byaru emebaa iphe, dū ẹgube ono ọzobaa.

Ahọta Eze

¹⁴“Teke unu bahuerupho l'alị ono, Chipfu, bụ Chileke unu abya unu anunu ono; ọ - laepho unu l'eka; unu buru iya eburu; unu wata epfu sụ: ‘Unu g'anyi họt a eze, a-buru onye-ishi anyi g'ohozo, nọ-phegbaaru anyi mgburugburu họt a eze nkephẹ-a.’

¹⁵G'o dokwaa unu ọnya l'onye unu a-tụ ẹka bụ onye Chipfu, bụ Chileke unu họt a eze. Mbụ-a; g'ọ bụkwaru onye Ízurelu ibe unu bẹ unu a-họt a eze. Unu ta ahọt a eze onye ọhozo g'ọ buru onye-ishi unu; mbụ onye abụdu onye Ízurelu.

¹⁶G'onye ọbu ta abụkwaru onye a-nọdu achiko ịnya akuberu onwiya; ọphu o mekwa gẹ ndu Ízurelu laphu azụ lẹ Ijiputu; ọ buru g'ee-shi gẹ ya nmakobaa ịnya doberu onwiya. Noo kele Chipfu pfuwaru iya unu sụ: ‘Unu ta alaphubaekwa azụ l'eka ono ọzobaa.’¹⁷Ọphu onye ọbu abụkwa onye a-nọdu aluko nwanị akuberu onwiya; ọdumeka bẹ ọzo a-kpọ-swehukwa iya. G'ọ tọ chitakwa mkpọla-ododo; waa mkpọla-ochaa kuberu onwiya.

¹⁸Onye ono -bahuepho l'okwa eze ono g'ọ wota ekwo, a phuru aphuphu detakotaru onwiya iphe, nọkota l'ekwo ekemu-a, bụ ekwo, nọ l'eka ndu-uke, bụ oshilokpa Lívayi.

¹⁹G'ọ gudeje ekwo ono tekenteke; l'oguje iya mbokumboku jasụ gẹ ndzụ iya a-nọberu. Ọo ya bụ g'ọ shi nno nwuta g'oo-shije atsụ Chipfu, bụ Chileke iya ebvu; shi nno kwabẹ ọnya mekotaje iphe, bụkpoo ekemu Chipfu; yee iphe, ọ toru okpa iya sụ g'e tsoje.

²⁰G'onye ono ta arikwa lẹ ya ka unwunna iya ndu ọphuu shii; shi nno parụ ekemu ono haa; meahaa iphe ọzo. Mbụ l'ọ kwa g'onye ọbu anoriberu ndzụ l'aba-eze iya ọbu; yebedua yee unwegirima iya l'echilabọ ndu Ízurelu.”

Ditoronomi 18

Oke, rwuberu ndu-uke

¹“Ndu uke, bụ iya bụ oshilokpa Lívayi; mbụ ndu okpa-ipfu Lívayi g'ephe ha bẹ a taa hedu oke ali; ọphu ọ dudu okiphe ọzo, e-rwube phe nụ l'alị Ízurelu. Iphe, ephe e-gude buru bụ iphe ngweja, a kpọ-phoduru oku l'iphu Chipfu; kele ono bụ okiphe phe.

²Ephe te enwedu okiphe g'unwunna phe; ọo Chipfu bụ okiphe nkephẹ, bụ iya bụ iphe, o kweru phe ukwe iya.

³“Waa iphe, rwuberu ndu-uke baa mē ndu Ízurelu gude oke-eswi; ọzoo aturu bya egweru Chipfu ngweja: iphe, aa-nụ onye uke bụ ẹka iya; waa agba iya; waa opfuru iya.

⁴Iphe ọzo, unu a-nujekwa phe pho bụ ereshi, unu vuru ọzo gbuta; waa mē ọphúú; yee manụ; waa ẹjí mbụ, unu bushiru l'aturu unu;

⁵noo kele Chipfu, bu Chileke unu shiwaa l'okpa-ipfu unu l'ophu hota phe; ephe l'oshilokpa phe; g'ephe gude epha Chipfu pfujeru l'iphu iya; ejeru iya ozi tekenteke.

⁶“O -buru l'onye shi l'okpa-ipfu Lívayi shi le mkpukpu eka o bu l'alí Ízurelu; gude obu iya l'ophu byatashia eka Chipfu, bu Chileke a-hota;

⁷g'a hakwaa ya g'o gude epha Chipfu, bu Chileke iya jejeru iya ozi ge ndu oshilokpa Lívayi ibe iya; bu ndu no l'ataphu Chipfu eka ono ejeru iya ozi.

⁸G'ephe kejekwaa iphe, gbaru phe nu enya nhamunha; g'a -gufukwaro ophu onye k'ono ketaru l'iphe, e retaru l'iphe ndu unuphu ibe phe.”

Etso eka ndu amadu Chileke

⁹“Teke unu baherupho l'alí ono, Chipfu, bu Chileke unu abya unu anunu ono; unu te ejekwa anwu eme ahuma ahuma ono, ndu ohamoha ono anoduje eme ono.

¹⁰G'o to dukwa g'unu ha onye a-kpo nwa iya nwoke; ozoo ke nwanyi oku. Ophu o dukwa onye a-nodu agba eja; ozoo eme omamanshi; ophu o dukwa onye e-jeje l'eja.

¹¹Ophu o dukwa onye e-keje oswe; ophu o dukwapho onye e-jeje l'aji maa;

¹²kele iphe, bukpo onye eme iphemiphe ono bukwa ahuma be oome l'iphu Chipfu; o buru ahuma ahuma ono, ohamoha ono eme ono meru g'o gude Chipfu, bu Chileke unu je achifu phe l'iphu unu.

¹³Unu bukwaru ndu uta adudu l'ehu l'iphu Chipfu, bu Chileke unu.”

Onye mpfuchiru ono

¹⁴“Ohamoha ono, unu a-chifu ono anoduje angaru ndu eme omamanshi me ndu agba eja nchi. Ole unubedua be Chipfu, bu Chileke unu te ekwekwa g'unu mee nno.

¹⁵Chipfu, bu Chileke unu e-shi l'echilabo unu hofutaru unu onye mpfuchiru; onye ono a-buru onye shi l'unwunna unu gedegede; buru onye du ge mu du. Noo onye unu a-ngabejeru nchi bu ono.

¹⁶“Kele mboku ono, unu dzukoberu l'ubvu Horebu ono bukwa iphe ono be unu rworu Chipfu, bu Chileke unu su: ‘Jiko g'anyi ta anuhenu olu Chipfu, bu Chileke anyi; ophu anyi ahumahe oku-a, paru eka-a; odumeka be anyi a-nwuhukwa.’

¹⁷Chipfu su mu: ‘Iphemiphe ono, ephe pfuru ono be ephe pfukwaru ree.

¹⁸Mu e-shikwa l'echilabo unwunna phe wofutaru phe onye mpfuchiru, du ge gubedua. Mu eworu opfu mu ye onye obu l'onu; l'ootuko iphe, mu pfuru iya kokotajeru phe.

¹⁹Onye ta ngabeduru nchi l'opfu, onye ono a-nodu epfu epfuchiteru mu ono; bu mbedua be a-ji aji iya.

²⁰Ole onye mpfuchiru, nonyaaru wata eku onwiya bya epfuahaa iphe, mu epfuduru; ozoo onye ophu e-gude epha agwa ozo epfu; g'e gbukwaa onye mpfuchiru ono egbugbu.’

²¹“Unu a-jikwaro onwunu; sù: ‘? Denu g'anyi e-shi maru ozi ophu abudu Chipfu ziru iya?’

²²Ọ -bùru l'onye mpfuchiru gude epha Chipfu ezi ozi; teke ọ bù l'ozi, o ziru te egeduru egeru; ọzoo l'o to meduru g'o pfuru iya; nokwa iphe, Chipfu epfuduru bù ono. Ọ kwa onye mpfuchiru ono gude eku-onwonye pfua opfu ọbu. G'a ba tsujekwa egube onye ono ebvu.”

Ditoronomi 19

Mkpukpu, onye gburu nemadzù a-nòduje ezeru ndzù

(Ọgú 35:9-28; Dít 4:41-43; Jios 20:1-9)

¹“Teke Chipfu, bù Chileke unu meerupho g'ohamoha ono chíhu; mbù ndu ono, Chipfu, bù Chileke unu abya eworu alì phẹ nù unu; g'unu nòchia ẹnya phẹ; buchia mkpukpu lẹ mkpukpu phẹ; yẹ unuphu l'unuphu phẹ ono;

²unu hòfutakwa mkpukpu ẹto dobe iche l'echilabọ alì ono, bù alì ophu Chipfu, bù Chileke a-nù unu g'ọ bùru k'unu ono.

³Unu e-gude ẹka unu kpaa oke; gude kee alì ono, Chipfu, bù Chileke unu abya unu anunu g'ọ bùru nkunu ono ọzo ẹto. Oke alì ono ephẹ n'ẹto e-nwekọtaru mkpukpu, agbabe ezeru ndzù nanu nanu l'ime iya. L'a bya tọ oji g'ọ rwua ẹka ono; k'ophu onye gburu nemadzù a-gbajẹru laa ẹka ono.

⁴“Waa g'ọo-dujẹru onye gburu ọchi gbalaa laa ẹka ono baa; k'ophu ọo-nòdu ndzù; mbù onye elekebeduru ẹnya gbua nwibe iya; ophu ọ bùdu l'opfu dọhawaru yẹ onye ọbu;

⁵dù gẹ lẹ nemadzù bẹ yẹ nwibe iya swì je l'oswa je awata nkù; ọ halia ẹka gbua kẹ swì gẹ ya gbutsua oshi ono; ishi ogbunkù ono mífù je atọ nwibe iya ono woru iya tugbua; g'onye ono gbalaa laa mkpukpu lanu l'ime mkpukpu ẹto ono je adzuru ndzù.

⁶Odumeka bẹ onye eme g'ọ gwata ọgwọ ọchi onye ono, e gburu ono e-gudekwa ehu-eghu chipfuru onye ono, gburu nwibe iya ono; gbapfu iya; kele ọzo dù ẹnya; je eworu iya gbua; l'ẹbe abù l'onye ọbu gbaru g'ọ nwùhu; eshinu abudu lẹ yẹ nwibe iya ono shi dọhawaa l'opfu.

⁷Noo g'ọ gude mu nòdu aturu iya unu l'ekemu sù g'unu hòta mkpukpu ẹto doberu onwunu.

⁸“Teke ọ bù lẹ Chipfu, bù Chileke unu kparu oke alì unu; ọ kabaa ọsa, bù iphe, o riburu ndiche unu phẹ angu lẹ ya e-me; e mechaa; ọ nukota unu iphe, bukpo alì ono, o kweru ukwe lẹ ya a-nù ndiche unu phẹ ono;

⁹ọ -bùru l'unu doberu-a ekemu-a g'ọ ha eme iya ememe, bù ophu mu aturu unu ntanu-a; mbù g'unu yee Chipfu, bù Chileke unu obu; g'ọ bùru ọzo iya bẹ unu a-nòdujekpoepho etso; unu eyekwabaa mkpukpu ẹto ọzo lẹ mkpukpu ẹto ophu;

¹⁰k'ophu e tee gbujedu onye iswi dù mma l'alì unu ono, bù ophu Chipfu, bù Chileke unu nuru unu g'ọ bùru okiphe unu ono; shi nno mee g'ikpe ọchi tukoru unu l'ishi.

11“Obenu; teke ọ bụ ị nemadụ bẹ opfu duru yee nwibe iya; o je akwaberu iya l'uzo; tsoo ya ọgu; megbua ya; bya agbaru laa ị mkpukpu-a nanu;

12ge ndu bu ọgerenya mkpukpu ono zia g'e je akputa iya l'eka ono; kpee onye agwataje ugwo ochi onye e gburu; g'o gbua.

13G'a ta aphukwaru iya obu-imemini. Onye gburu onye adudu iphe, o meru; bẹ ee-wofujekwa ndu iya l'ali Izurelu; g'oo-duru unu ị ree.”

Iphe, e gude kpa ake ali

14“G'ọ to dukwa onye e-wofuje mkpuma, e gude kpaaru yele nwibe iya oke ali; mbu iphe, ndiche meru l'ali ono, bu okiphe, unu e-keta l'ali ono, Chipfu, bu Chileke unu abya unu anunu g'unu nworu ono.”

Agba ekebe

15“G'e te egudejekwa ekebe onye lanu gbaru; nma nemadụ ikpe ejo-iphe; ọzo iphe-aji, a suru l'o meru. Nemadụ -mee iphe-aji; g'a du ebo; ọzo eto gbaa ya ekebe; teme l'e kpeba ikpe onye obu.

16Teke ọ bụ l'onye-ekebe eregede wataru agba nemadụ ekebe; gbaahaa ya ekebe, abudu eviya;

17g'uzi umadzu labo obu, opfu adaru obu bya apfuru l'iphu Chipfu: l'iphu ndu-uke me ndu-ikpe, bu ndu no l'okwa teke ono.

18Ge ndu-ikpe ono jia phe aji njinwuru-njinwuru. Teke ọ bụ l'onye-ekebe ono bẹ epfu iphe, abudu eviya; k'ophu bu l'ọ wataru epfu iphe, nwibe iya emeduru;

19unu eworu iphe ono, o shi ari l'ee-me nwibe iya ono woru mee ya. Ọ kwa egube ono bẹ unu e-shije wofu ejo-iphe l'echilabo unu.

20Oo ya bu; k'ophu ndu ọzo a-numa iya; tsuhu ebvu; ọ to duhedu onye emebaa egube ejo-iphe ono ọzo l'echilabo unu.

21Unu ta aphujekwa obu-imemini. Ọ kwa ge ndu laaru ndu; enya alaaruu enya; eze alaaruu eze; eka alaaruu eka; okpa alaaruu okpa.”

Ditoronomi 20

Ekemu, duru ọgu ndu Izurelu

1“Unu -huma inya ndu ohogu unu; waa ugbo-inya phe; waa ndu ojogu phe; l'eka unu ejepfu phe ọgu; ephe ka k'unu shii; ge ndu phe ta agujekwa unu. Noo kele Chipfu, bu Chileke unu, bu onye dufutaru unu l'ali Ijiputu bẹ nokwa swiru unu eswiru.

2Unu -bya awata ọgu ono; g'onye uke futakwa bya epfuru opfu yeru ndu ojogu unu.

3G'ọ su phe: ‘Unube ndu Izurelu; unu ngabekwa nchi; ntanu-a bẹ unu ejepfu ndu ohogu unu ọgu. Ge meji ta atofukwa unu; ophu ndu agukwa unu. G'ehu te etekwa unu etete; ophu ephe eyekwa unu ebvu;

- ⁴kele ọo Chipfu, bu Chileke unu be unu l'iya swi; g'ọ lwu-chiteru unu ọgu l'iphu ndu ọhogu unu; shi nno mee g'unu lwu-kpee phe.'
- ⁵"Ge ndu-ishi unu byakwapho bya epfuru nu ndu ono; su phe: '? O duru g'unu ha, onye kpuru ọlo ọphuu; ọphu o toko yedu iya Chileke l'eka? G'onye ono lakwa unuphu; a nonyakwa o nwuhu l'ogu; onye ozo je eworu ọlo ọbu ye Chileke l'eka.
- ⁶? O duru onye gbaru opfu-vayinu ọphu o toko ridu iphe, shi iya nu? G'onye ono lakwa unuphu; a nonyaa; o nwuhu l'ogu; onye ozo ria ya.
- ⁷? O duru onye kweru nwanyi ukwe l'oo-lu iya; ọphu o toko ludu iya? G'onye ono lakwa unuphu; a nonyakwa onye ono nwuhu l'ogu; onye ozo je alua onye ọbu.'
- ⁸"Ge ndu-ishi ono pfukwarupho yebaaru ndu ojogu ono; su phe: '? O -duru onye ndzu agu; ọzoo onye meji atofu atofu? G'onye ono lakwa unuphu; a nonyakwa o mee; meji tofuahaa ndu ọphuu g'ootofu iya.'
- ⁹Teke ndu-ishi ono pfughechaerupho iphemiphe ono nu ndu ojogu ono; ephe abya ahotagbaa ndu-ishi ojogu dobe, bu ndu a-nodu edu phe eje.
- ¹⁰"Teke unu wufuru ejepfu mkpukpu ọgu; unu vukwaru ọzo kua phe; g'unu l'ephe doshia; ge nchi du doo.
- ¹¹Oo ya bu; teke o bu l'ephe zaru unu oku nchi-adu-doo ono; bya aguhaaruru unu ọzo phe; ọo ya bu; iphe, bukpo ndu bu le mkpukpu ono abukotaru ndu unu a-noduje ezi ozi mkponwu-ehu.
- ¹²Teke ephe te ekweduru g'unu l'ephe nodu le nchi-odoo; ephe gbenu wata unu etso ọgu; unu ekee ọgu kephee mkpukpu ono mgburugburu.
- ¹³Teke Chipfu, bu Chileke unu woerupho mkpukpu ono ye unu l'eka; unu gude oguechi tuko unwoke, nokota iya nu gbushigbua.
- ¹⁴Obenu l'unwanyi phe; me unwegirima; me iphe-edobe phe; mewaro iphemiphe ozo, no l'ime mkpukpu ono; mekpoo iphe akwa l'okwata g'ọ hakota; be unu e-gwetakota g'ọ buru k'unu. Mbu-a; unu e-ripya iphe, unu gwetaruru l'eka ndu ohogu unu, bu ọphu Chipfu, bu Chileke unu nuru unu.
- ¹⁵Noo g'unu e-mekotaje iphe, bu mkpukpu le mkpukpu ono l'ophu, bu ndu ọphu nochaa unu ọzenya, bu ndu ọphu ayidu l'ohamoha ọwa-a, bugbaa l'eka-a.
- ¹⁶"Ole o -buru mkpukpu ndu ọwa-a, no l'ali, Chipfu, bu Chileke unu abya unu anunu g'ọ buru okiphe unu-a; g'ọ to dukwa iphe, atu unme me nanu, unu a-ha g'ọ nodu ndzu.
- ¹⁷Unu tukokwa phe g'ephe ha gbushikota; mbu ndu Hetu; me ndu Amoru; me ndu Kenu; me ndu Perezu; me ndu Hevu; me ndu Jiebusu, bu iya bu ge Chipfu, bu Chileke unu turu ekemu; su g'unu mee;
- ¹⁸g'ephe te ezi unu ahuma ahuma, ephe anoduje eme, bu ọphu ephe anoduje eme eyeru agwa phe; unu eshi nno meswee Chipfu, bu Chileke unu.

¹⁹“Teke unu keru ọgu kephee mkpukpu mgburugburu nọo ọdu; l'ẹka unu etso iya ọgu g'unu lwua ya lwuta; unu te emebyishikwa oshi, pfugbaaru le mkpukpu ono; ke g'unu gude ogbunku wata iya egbutsushi. Unu hakwaa ya; wotaje mebyi iya ria eriri; unu te egbutsushikwa iya egbutsushi. ? Unu eke ọgu ekephefua oshi, bvuru l'egu mgburugburu? Oshi; ? ọ bu nemadzu?”

²⁰Ọ buẹpho oshi ndu ọphu unu maru l'ọ to budu oshi, eeri mebyi iya eriri; noo ndu ọphu unu e-mebyishi. Unu gbutsushia ndu k'ono. Unu akpua ose-ọgu kpuphee mkpukpu ono, etso unu ọgu ono mgburugburu jasụ teke unu emekpe phe.”

Ditoronomi 21

Onye e gburu; ọphu a madu onye gburu iya nu

¹Ọ -buru l'a humaru odzu onye e gburu egbugbu; ọphu a madu onye gburu iya nu l'ẹka ọ dabyiru l'egu; l'alị ono, Chipfu, bu Chileke unu abya anu unu g'ọ buru okiphe unu ono;

²ge ndu bu ọgerenya unu phe; me ndu-ikpe unu phe wufutakwa; bya agbe l'ẹka onye ono, e gburu ono ze; tua iphe atutu jasuchaa le mkpukpu le mkpukpu, no-pheru iya mgburugburu.

³Ge ndu bu ọgerenya, shi le mkpukpu ọphu ka anọ-kube onye ono, e gburu ono ntse kputa ada eswi, e teke gudeswee jee ozi; ọphu a tugbabejeduru iya le nwibe iya;

⁴gude bahu le nsuda, mini aso asoso; mbu nsuda, e teke ako-swe akoko; ọphu e teke aku-swee ya iphe, aaku akuku. Ge ephe nodu le nsuda ono; swi-kwoo ada eswi ono olu.

⁵Ge ndu-uke, bu unwu Liviayi lufuta l'ataphu bya apfu. Noo kele Chipfu, bu Chileke unu hotaru phe g'ephe jejeru iya ozi; wafua g'ephe gudeje epha Chipfu goru nemadzu onu-oma. Teke opfu adaru nemadzu yee nwibe iya; ozo le nemadzu mekaru nwibe iya iphe; l'ọ buru ephe e-kpe iya.

⁶Ndu bu ọgerenya, shi le mkpukpu ọphu ka anọ-kube ntse l'ẹka onye e gburu pho zee g'ephe hakota akwo eka l'eli ada eswi ono, a swi-kworu olu le nsuda ono.

⁷Ephe epfua su: “Eka anyi ta adukwa l'ochi onye-a; ọphu anyi ahumakwaru teke eegbu iya.

⁸Jiko Chipfu; natanu ugwo-a, aapfu k'iphe-eji, ndu nkengu, bu ndu Izurelu meru-a; mbu ndu ono, i gbafutaru. G'ochi onye adudu iphe o meru ta atukokwaru ndu nkengu, bu ndu Izurelu l'ishi. Oo ya bu; e shi egube ono pfua ugwo ochi onye ono, e gburu ono.

⁹Ọ buru egube ono bu g'unu e-shi nwefu onwunu ochi onye adudu iphe, o meru ono l'echilabo unu; kele unu mewaru, iphe, pfuru oto l'iphu Chipfu.

K'alụ nwanyị, a lwutaru l'ogu

10“O -buru l'unu jepfuru ndu ohogu unu ogu; Chipfu, bu Chileke unu woru phe ye unu l'eka; unu kpua phe le ndzu;

11O -buru le ndu ono, unu kpuru le ndzu ono be o duru nwanyi, ama mma, nweru g'unu ha onye o du ree; teme o nodu agu onye ono egu g'onye ono duta iya g'o buru nyee ya;

12g'onye ono duta iya laa ibe iya je akpushia ya ishi; bee ya nvo ebebe.

13L'o yefu uwe, o shi ye teke a kputaru iya pho. L'o buru l'ibe onye obu; kwaa ekwa ne iya yee nna iya onwa ophu. E -mechaa; yee onye obu awatawaro akwakwa; onye obu aburu ji iya; l'o buru nyee ya.

14O -buru l'e mechaaru; ophu nwanyi obu aduedu onye obu ree; g'o pakwaru iya haa g'o je eka du iya ree. O buepho g'i ti re iya erere k'ereta okpoga; ophu i mekwa iya g'eemeje ohu; noo kele i mewaru iya iphe-iphere.”

Iphe, rwuberu okpara

15“O -buru le nwoke alu unwanyi labo; o yee onye lanu obu; onye ophu du iya ashi; ephe toko nwutawaru iya unwegirima; me onye ophu e yeru obu yee onye ophu a kporu ashi; teke o bu l'oo onye ophu a kporu ashi yeru okpara le nwoke;

16mboku, oo-ke ekpe gude keeru unwu iya eku iya; g'o to wotakwa nwa onye ophu o yeru obu pho dobe l'onodu okpara; hachia nwa nke onye ono, o kporu ashi pho, gbetchia buru iya bu okpara.

17G'onye ono mekwaaru okpara iya ono, bu nwa nwanyi ono, o kporu ashi ono iphe, rwuberu iya nu. Mbua-a; g'o hee ya oke labo; l'iphemiphe, o nweru enweru; kele oo nwata ono bu nwa mbu, goshiru l'o duje ike yee ime. Iphe, rwuberu okpara bukwa iya nwe iya.”

Nwa, kariru ndu nwuru iya nu eka

18“O -buru le nemadzu nwutaru nwa, kariru iya eka; k'ophu bu l'o too ngadu nchi l'opfu ndu nwuru iya nu; mbu l'o too mejedu iphe, nna iya pfuru; ophu o medu iphe, ne iya pfuru; temanu; teke ephe chiru iya iphe; o too yeduru phe onu;

19ge nna iya; yee ne iya kputakwa iya kpuleru ndu bu ogerenya l'onu-abata mkpukpu phe.

20Ephe asu ndu bu ogerenya mkpukpu ono: 'Nwatibe anyi-a kariru anyi eka; k'ophu bu l'o too ngajedu nchi l'opfu anyi; ophu oomejedu iphe, anyi suru g'o mee. O bu oke-ekpiri; teme o ngunuka mee.'

21G'unwoke mkpukpu ono g'ephe ha wufuta; woru iya tugbua le mkpuma. O kwa egube ono be unu e-shije wofu ejo-iphel'echilabo unu; k'ophu ndu Izurelu l'ophu anuma iya; tsuhu ebvu.”

Ekemu, du iche iche

22“O -buru le nemadzu meru iphe, o gbaru g'ọ nwuhu; e woru iya gbua; unu kobe odzu onye ono l'eli oshi;

23g'odzu iya te kokwaru l'eli oshi l'eka ono jasụ nchị aboһu. Unu likwaa ya mboku ono gedegede; kele onye koru l'eli oshi be bu onye Chileke turu onu. Unu te emerwushikwa ali ono, Chipfu, bu Chileke unu abya unu anunu; g'ọ buru okiphe unu ono.”

Ditoronomi 22

1“O -buru li humaru eswi; ozoo aturu nemadzu ibe ngu l'eka ookpaphuhu akpaphuhu; te emekwa enya gi ti humaduru iya; kukebekwa ehu kputa iya kpuphuru nwibe ngu ono azu.

2Teke o bu l'onye ono te ebukubedu ngu ntse; ozoo li ti madu onye obu; kputa iya laa ibe ngu je edobe jasụ teke onye ono a-choru iya bya; li kpuru iya nu iya.

3Nokwapho g'ii-meje nkafu-igara iya; o bukwarupho nno bu g'ii-meje uwe iya; mekpoo iphemiphe, bu ke nwibe ngu, tuphahuru etuphahu; mbu ophu tuphahuru nu; i huma iya. Te emekwa enya gi ti humaduru iya.

4“O -buru li humaru nkafu-igara nemadzu ibe ngu; ozoo eswi iya l'eka o daru l'aguga gbororo; te emekwa enya gi ti humaduru iya. Kukebekwa ehu je eyeru onye obu eka g'ọ palia ya.

5“Ge nwanyi ta akwajekwa ngwa nwoke; ophu nwoke akwajekwa ngwa nwanyi; kele onye eme iphe, du nno bukwa ebyi be oome l'iphu Chipfu, bu Chileke unu.

6“I -nodu aghata le gbororo; i huma efunne enu, kparu l'eli oshi; ozoo l'ali; o buru unwu enu no iya; ozoo l'ọ bukwa du eka iya; ne iya kpuru l'eli unwu iya ono; ozoo l'eli eka iya ono; ba anwupyaabekwa ne enu ono; yee unwu iya.

7Kukebekwa ehu kpatsu ne iya g'ọ phefu; li nwutawaro unwu iya; k'ophu ọo-duru ngu le ree; waa k'ophu ii-kariberu nka.

8“I -nodu akpu ulo ophuu; kpusakwaa uko iya osa; swia ya onu mgburugburu; g'ọ to du onye e-shi l'eka ono wefu bya adaa; g'ochi ta akwa l'ulo ngu ono.

9“I -gbaa opfu-vayinu; ta akukwa iya iphe eghirigha. I -mee ya nno be aa-natakwa ngu mebyi iphe ono, i koru ono; natakwa ngu pho akpuru, vayinu ngu mitaru je edobe l'ulo, du nsọ.

10“Te eligbabejekwa eswi yee nkafu-igara gude atupya ali mgbo lanu.

11“Te eyejekwa uwe, a kwaru eghirigha; du ge l'e wotaru eka baragidi je akwagbabe le gerebe-gerebe eka mmanu.

12“Kpajekwaru iyanguyangu ye le mgbureku uwe mgbalanu ngu ishi eno.”

Emebyi k'alulu

13“O -buru le nwoke lutaru nwanyi; epe le nwanyi obu kwachaepho; o kpoa ya ashi;

- 14boaha ya ibo gude epfubyishi iya sù: ‘Mu lùtaru nwanyị-a; mu jepfu iya; ophu o dudu iphe, egoshi l’o shi buru nwamgboko, yele nwoke teke akwaswee.’
- 15Ge nna nwamgboko ono yee ne iya gude iphe, egoshi le nwamgboko ono shi buru onye yele nwoke teke akwaswee je egoshi ndu bu ogerenya l’onu-abata mkpukpu.
- 16Nna nwamgboko ono asu ndu bu ogerenya ono: ‘Nwa mu nwanyị-a be mu keru nwoke-a; ole nta-a be nwamgboko ono duwaa iya ashi.
- 17Ole-a; unu lewaro le nta-a be o wataru iya ebo ibo asuje le nwatibe mu obu ta adukwa iphe, egoshi le yele nwoke teke akwaswee! Ole o bu; wakwa iphe, egoshi le nwatibe mu obu be yee nwoke teke akwaswee baa.’ Epeh abya eworu ekwa ono phushi l’iphu ndu bu ogerenya mkpukpu ono.
- 18Ndu bu ogerenya mkpukpu ono akputa nwoke ono chia ya echachi;
- 19reta iya nre ukporo mkpola-ochaa ise; woru nu nna nwamgboko ono; noo kele nwoke ono boru nwamgboko Izurelu ibo. Nwamgboko ono aburu nyee ya aka o bu iya; ophu o byadu achifubaa nwanyị ono jasù g’oo-no-beru.
- 20“Ole o -bukwanuru l’ibo ono, e boru iya ono bu eviya; k’ophu bu l’o to dudu iphe, e gude goshi le nwamgboko ono be yele nwoke teke akwaswee;
- 21oo ya bu; g’ephe kpufutakwa nwamgboko ono l’onu eswulo l’ibe nna iya; unwoke mkpukpu iya atua ya mkpuma; woru iya tugbua; kele o meru ejo ememe l’ali Izurelu. O shi nodu l’ibe nna iya agba ukpara. O kwa egube ono be unu e-shije wofu ejo-iphe l’echilabo unu.
- 22“O -buru l’e ge-chiru nwoke l’eka epe le nyee onye ozo akwa; g’e gbukwaa nwoke ono, jepfuru nwanyị obu; yee nwanyị, o jepfuru egbugbu. O kwa egube ono be unu e-shije wofu ejo-iphe l’ali Izurelu.
- 23“O -buru le nwamgboko, yele nwoke teke akwaswee; mbu nwamgboko, e jebuwaru k’alulu; be yele nwoke ozo kwaru l’ime mkpukpu;
- 24unu tukokwa ephenebo kputa kpu fu l’onu-abata mkpukpu ono; toko ephenebo tugbukota le mkpuma. Nwamgboko ono be aa-tu-gbu; noo kele o no l’oma mkpukpu ophu o chiduru mkpu. Nwoke be aa-tu-gbukwapho; kele o merwuru nyee onye ozo. O kwa egube ono be unu e-shije wofu ejo-iphe l’echilabo unu.
- 25“Obenu; o -buru l’oo l’azu egu be nwoke guderu nwamgboko, onye ozo jebuwaru k’alulu; epe l’iya kwaa; bukwa nwoke kpoloko be ee-gbu.
- 26G’o to dukwa iphe, unu e-me nwamgboko ono; o to dukwa iphe-eji, o metaru, ee-gude gbua ya. Noo kele owa-a dukwapho g’onye je afuaru nemadzu ibiya l’uzo; gbua.
- 27Mbu le nwoke ono guderu nwamgboko ono, onye ozo jebuwaru k’alulu ono l’azu egu; o chia mkpu; ophu o dudu onye nafutaru iya nu.
- 28“Ole o -bukwanuru le nwoke zuguderu nwamgboko, adudu onye eje iya nu; epe l’iya kwaa; a huma phe;

²⁹gę nwoke ono pfukwaa nna nwamgboko ono ukporo shekelu mkpola-ochaa labo le shekelu mkpola-ochaa iri. G'onye obu lukwaru nwamgboko ono; noo kele o mebyishwaru iya. Ophu o byadu achifu nwamgboko ono gbiriri jasụ g'oo-no-beru.

³⁰“Gę nwoke ba lukwa nyee nna iya; shi nno mee nna iya iphe-iphere.”

Ditoronomi 23

Ebufu nemadzụ lę ndzukọ

¹“G'onye e tsupyarụ akpuru-anwu; ozoo onye e bufuru utsu ta abatajekwa l'eka ndu ke Chipfu dzukoberu.

²“G'o to dukwa onye a gbataru l'ukpara; abataje l'eka ndu ke Chipfu dzukoberu. Ophu oshilokpa iya; mbu je eyee l'ogbo k'iri abatajekwa l'eka ndu ke Chipfu dzukoberu.

³“G'o to dukwa onye Amonu; ozoo onye Mowabu, abataje l'eka ndu ke Chipfu dzukoberu; ophu oshilokpa phe jeye l'ogbo k'iri abatajekwa; mbu g'ephe ta abatajekpo l'eka ndu ke Chipfu dzukoberu jeye l'ojejeje.

⁴Noo kele ephe te egudedu nri; yee mini gbaa unu ndzuta teke unu shi l'ali Ijiputu. Iphe, ephe meru bu l'ephe gbetchia je ebuta Belamu nwa Beyo, shi mkpukpu Peto l'ali Mesopotemiya g'o bya atua unu onu.

⁵Obenu le Chipfu, bu Chileke unu ta ngabeduru Belamu nchi; o gbetchia ghazia onu ono; o buru onu-oma; kele Chipfu, bu Chileke unu yeru unu obu.

⁶Unu ta achokwa uzo, ee-shi g'ehu du phe guu; ozoo g'o duru phe le ree jasụ g'unu a-no-beru.

⁷“Gę ndu Edomu ta adukwa unu ashi; noo kele ephe bu unwune unu. Ophu ndu Ijiputu adukwa unu ashi; noo kele unu shi buru ndu lwaru alwalwa l'ali phe.

⁸G'a hajekwa oshilokpa phe ogbo k'eto g'ephe bata l'eka ndu ke Chipfu dzukoberu.”

Eme odu-ogu g'o to du ideyideyi

⁹“O -buru l'unu jepfuru ndu ohogu unu ogu; unu dokwaduru l'odu-ogu unu; unu kwabekwa enya g'unu te eye aka l'eme ejo-iphe.

¹⁰O -buru l'o nweru onye lanu l'echilabo unu, byaru bya aburu onye aaso nsu; kele o gboru unwuda kpua onwiya l'enyashi; g'onye ono lufukwa je anodu l'azu odu-ogu; g'o to nodukwa l'ime iya.

¹¹O -be l'uzenyashi l'o gude mini wua ehụ. Enyanwu -nyihuchaepho; l'o batawaro l'odu-ogu ono.

¹²“Unu eje l'azu odu-ogu ono je emeta aka unu e-jeje ejelukpo.

¹³Unu yekobeje ikworo le ngwogu unu; oo ya bu g'o buru; onye eje anyi nshi; l'o gude ikworo ono tua nsu; nyiru iya yee; ghakobe woru iya kpochia.

14Noo kele Chipfu, bu Chileke unu etsojeru oma odu-ogu ejephe; adzo unu ndzu; waa g'o woru ndu ohogu unu ye unu l'eka. Noo g'o gude; odu-ogu unu je l'adu nsọ; g'o to huma iphe, aaso nsọ l'eka unu no; dakobe paru unu haa.”

Unwu ekemu ozo

15“Ohu -shi l'eka nnajiuphu iya gbapfuta ngu; ta akputakwa iya kpuphuru nnajiuphu iya ono azu.

16Hakwaa ya g'unu l'iya buru; l'o buru l'eka du iya ree le mkpukpu, dukpoe ya pho ree. Ophu a kpakwa iya ehu.

17“G'o to dukwa unwada Izurelu onye a-nodu agbaru agwa ukpara; ophu o dukwa onye nwoke Izurelu a-nodu agbaru agwa ukpara.

18Mbu-a; g'e be wotajekwa ugwo, a pfuru nwanyi-ovuoba; ozoo ugwo, a pfuru nkuta-urwuali ono; gude bya l'ulo Chipfu, bu Chileke unu bya apfu ugwo iphe, unu riburu l'angu k'ememe; kele ephenebo bu ebyi l'anya Chipfu, bu Chileke unu.

19“Be jiekwa onye Izurelu ibe ngu ugwo ntukwase; ntukwase l'okpoga; ozoo ntukwase le nri; ozoo l'iphemiphe, bukpo iphe, eejieje ugwo ntukwase.

20Onye ii-jie ugwo ntukwase bu onye ohozo; obenu l'onye bu nwune ngu be i tii jiedu ntukwase; oo ya bu ge Chipfu, bu Chileke ngu ekebe ngu l'oma l'iphemiphe, i byibekporu eka ememe l'ali ono, iije alwuta ono.

21“O buru l'i riburu angu emeru Chipfu, bu Chileke ngu iphe; ta akpokwa upfu ememe iya; kele Chipfu, bu Chileke ngu a-wata ele ngu enya g'i mee ya; teme l'i buru onye-ikpe nmaru l'i meru iphe-eji.

22Ole o -bukwanuru l'i selaru onwongu azu l'eribu angu eme iphe; be ikpe ta nmakwaru ngu.

23Iphe, shikpowa ngu l'ogbogboromonu futa; letakwa enya g'i mebekota iya. Noo kele oo gubedua turu obu ngu onyo gudekpoo onu ngu gedegede ribuaru Chipfu, bu Chileke ngu angu.

24“O buru l'i bahuru l'opfu-vayinu nemadzu ibe ngu; ritakpopho akpuru vayinu g'o dukpoe ngu pho ree; ole g'o to dukwa ophu ii-ye le nkata ngu.

25Teke i -bahuru l'egu nemadzu ibe ngu; o -du ngu g'i wota iphe, o kuru akuku ria; wotakwa iya; ole g'o to dukwa upfu iphe ono ophu ii-gude mma gbutsua.

Ditoronomi 24

1“O -buru le nwoke luchaaru nwanyi; ophu nwanyi ono aduedu iya ree; kele o humaru iphe, adudu ree l'ehu nwanyi obu; o bya ederu ekwo achifu nwanyi nu iya; bya achifu iya;

2o -buru l'o lufuru g'o jero je aluru nwoke ozo;

³teke ọ bụkwanu l'onye k'ono byakwarupho bya akpoo ya ashi; bya edekwapho ekwo achifu ozokwa bya eyekwa iya pho l'eka; bya achifukwa iya pho l'ibe iya; ozoo l'onye k'ono bu anwuhu be ọ nwuhuru; mbu onye k'ono, shi duta iya alu alulu ono;

⁴ge ji iya ke mbu pho, chifuru iya nu pho ta laphukwa azu jeshia ya alulu g'e merwushichawaru iya ono; kele ọ bụkwa ebyi l'iphu Chipfu. Unu te emetakwa ebyi kpube ali ono, Chipfu, bu Chileke unu abya unu anunu g'ọ buru okiphe unu ono.”

Ekemu, du iche iche

⁵“O -buru le nemadzu luru nwanyi k'ophuu; g'e te zikwa iya g'o je ọgu; ophu ọ dukwa ozi ozo, ee-zi iya. G'onye ono no-gbukwaa mgarapha l'unuphu; mee nyee ya ono, ọ lutaru ono g'ehu tsoo ya utso.

⁶“Ge nemadzu ta patakwa mkpuma, egweje nri; ozoo nggu-mkpuma; g'ọ buru iphe, e yeru iya l'itumo; kele ono duakwaa g'onye woru ishi nemadzu ophu sibe l'itumo.

⁷“O -buru le nemadzu be e guderu l'eka ọ pataru onye Izurelu ibe iya l'oshi eme iya g'ohu; ozoo loore onye obu erere; g'e gbukwa onye opaleda ono egbugbu. O kwa egube ono be unu e-shije wofu ejo-iphe l'echilabo unu.

⁸“O -buru onye ehu-ochaa byaru; unu letakwa enya mee iphemiphe, ndu-uke, bu oshilokpa Liviayi suru g'unu mee. Unu tukokpoepho iphemiphe, mu turu phe ekemu su g'ephe meje mekota.

⁹Unu nyatakwa iphe, Chipfu, bu Chileke unu meru Miriyamu teke unu no l'uzo; g'unu wufutacharu l'ali Ijiputu.

¹⁰“Teke i jieru nemadzu ibe ngu ugwo; m'obeta ọ buru ugwo, du idu-agma; ta abahukwa l'ulo iya je ewota iphe, ọ siberu ngu l'itumo.

¹¹Nodukwa l'etezi g'onye obu, i jieru ugwo obu wofutaru ngu iphe, ọ siberu ngu l'itumo obu.

¹²O -buru l'onye obu akpa nri; te egudekwa iphe ono, o yeru ngu l'itumo ono lashia unuphu je akwaa ge nchi bahu.

¹³Nchi -jihushia; wophutakwaru iya ukpo ono, o yeru ngu l'itumo ono azu; k'ophu oze iya; kua mgbenya; goru onu-oma nu ngu. Oo ya bu g'a guaru ngu iya l'apfubekoto l'iphu Chipfu, bu Chileke ngu.

¹⁴“Onye adudu g'ọ du iya; ọ nodu akpa nri -byaru ngu ozi; te emekwa iya omeliwe; m'obeta onye obu buru onye Izurelu ibe ngu; ozoo onye lwaru alwalwa, bu l'ali unu l'ime mkpukpu unu.

¹⁵Pfujekwa iya aswa ogburumita iya; teme enyanwu anyihu mbokumboku; kele onye obu akpa nri; ọ gbawaru aswa ozi iya ono ye le mkpa. Teke odumeka be oo-chikukwa ngu l'ejo mkpu l'iphu Chipfu; iphe obu aburu ngu iphe-eji, iimeta iya.

¹⁶“Ge ndu bu nna ta lajekwa l'iphe, nwa phe metaru; ophu unwu alajekwa l'iphe, nna phe metaru. G'onye metaru iphe onwu lajekwa l'iphe, o meru.

17“Unu ta anafujekwa nemadzu iswi-odumma iya opfu l'ọ bu onye lwaru alwalwa; ozoo onye enwedu nna; ophu unu anatajekwa ekwa nwanyi, ji iya anodedu l'itumo.

18Unu nyatajekwa l'unubedua shi buru ohu l'alị Ijiputu; Chipfu, bu Chileke unu gbata unu l'eka ono; noo iphe, meru g'o gude mu nodu aturu unu ekemu epfu g'unu meje iphemiphe ono.

19“Unu -nodu akpata iphe, unu meberu l'opfu unu; unu zohaa tiyotiyoo iya ophu l'egu; unu ba laphuhakwa azu je iya achita. Unu hajekwa iya g'o duru ndu lwaru alwalwa; yee ndu nna phe anodedu; yee unwanyi, ji phe anodedu; k'opfu Chipfu, bu Chileke unu e-kebe unu l'oma l'iphemiphe, unu byiberu eka unu k'ememe.

20Unu -nodu aji-koshi akpuru, miru l'oshi olivu unu; unu ta ajijekwa iya nji labo. Unu hakwa ophu phoduru nu g'o duru ndu lwaru alwalwa; yee ndu nna phe anodedu; yee unwanyi, ji phe anodedu.

21Teke o bu l'unu awo akpuru vayinu l'opfu-vayinu unu; unu te ejekwa mkpakwa iya m'e mechaa. Unu hajekwa ophu phoduru nu g'o duru ndu lwaru alwalwa; yee ndu nna phe anodedu; me unwanyi, ji phe anodedu.

22Unu nyatajekwa l'unubedua shi buru ohu l'alị Ijiputu; noo iphe, meru g'o gude mu nodu aturu unu ekemu epfu g'unu meje iphemiphe ono.”

Ditoronomi 25

Ekemu k'echi nemadzu echachi

1“O -buru l'unmadzu labo be opfu adaru; g'ephe gude iya je l'ulo-ikpe ge ndu-ikpe kpeeru phe iya; haaru onye ophu iswi du mma enge; nma onye ophu achọ opfu ikpe.

2Teke o bu l'onye ophu ikpe nmaru be o gbaru g'e chia iphe; g'onye-ikpe mekwaa ya g'o zee azee; g'e chia ya iphe obu l'iphu iya; chia ya onu echachi ole yeje iphe o meru ha.

3Iphe, ee-chi iya bu onu echachi ukporo labo. G'e te chighatakwa iya egube ono. E -chighata iya egube ono be o buakwaa eme nwune ngu ono g'o to dudu iphe, o bu l'iphu ngu.

4“Te ekechijekwa eswi onu me o -nodu azoshiru ngu ereshi.”

Onye nwune iya nwuhuru; gbado nyee ya

5“O -buru l'unwune labo bu; onye lanu nonyaa bya anwuhu; ebe o nwuta nwa; ge nyee ya ta lukwa ndu unuphu ozo. Ge nwune ji iya dutakwa iya luru; lajeru iya l'ulo. Nwune ji iya ono eshi nno medzukota iphe, gbaru iya nu l'ehu nwanyi ono.

6Nwa nwoke mbu, o nwutaru; mbu nwanyi ono be a-zaru epha la l'epha nwune iya ono, nwuhuru nu ono g'epha iya te echihu l'alị Izurelu.

7Ole o -buru l'o to dudu onye ono g'o luru nyee nwune iya ono; ge nwanyi ono jepfu ndu bu ogerenya mkpukpu ono l'onu-abata mkpukpu ono je asu phe: ‘Nwune ji mu

jìkawaru eme g'èpha nwune iya te echihu lẹ Ízurelu. O jìkawaru lẹ ya te emeduru mu iphe, nemadzù emejeru nyee nwune iya.'

⁸Oo ya bụ; ndu bụ ọgerenya mkpukpu ono ekua nwoke ono; pfiaru iya opfu. O -buru l'iphe, oopfu bẹ oopfu epfushi iya ike; sù lẹ ya ta abyakpoda aluru nwanyi ono m'obeta gunu mee;

⁹gẹ nyee nwune iya ono gbeshi l'atatiphu ndu bụ ọgerenya ono je eyeta akpokpa nwoke ono nanu; gbuta onu-mini tua ya l'iphu su: 'Noo iphe, eemeje onye ta choduru eme g'unuphu ibe nwune iya keru bu ono.'

¹⁰Iphe, ee-ku ibe nwoke ono lẹ Ízurelu bu 'ibe onye e yetaru akpokpa.'

¹¹"O -buru l'unwoke labo alwu ogo; nyee onye lanu byatashia odzori ji iya; bya azu nwoke ophu l'ehu-nwoke;

¹²g'e gbubufukwa nwanyi ono aka; g'a ta aphukwaru iya obu-imemini.

¹³"Unu te eyejekwa iphe, eegudeje atu erwa iphe uzo labo l'eda unu; ophu bu okpobe iya; me ophu abudu okpobe iya.

¹⁴Ophu unu enwekwaru iphe, eegudeje akpo iphe uzo labo l'ibe unu; ophu bu okpobe iya; me ophu abudu okpobe iya.

¹⁵Unu gudeje okpobe iphe, ugho adudu tua erwa iphe. Unu egudejekwapho okpobe iphe, ugho adudu; kpoo iphe; k'ophu unu a-noriberu ndzu l'alì ono, Chipfu bu Chileke unu abya unu anunu ono;

¹⁶kele iphe, bukpo onyemonye, eme egube iphe ono; mbukpo onyemonye, eme iphe l'ugho emekotakwa ebyi l'iphu Chipfu, bu Chileke unu."

A turu ekemu g'e gbushia ndu Amaleku

¹⁷"Unu nyatakwa iphe, ndu Amaleku meru unu teke unu no l'uzo; g'unu lufutacharu lẹ Ijiputu.

¹⁸O bu teke ike ije bvwawaru unu; ophu ike aduziedu unu be ephe shiru unu azu byapfuta unu ogo l'uzo; gbushia ndu ophu kpe azu; ophu ephe atsuduru Chileke ebvu.

¹⁹Oo ya bu; Chipfu, bu Chileke unu -meepho; unu nweru onwunu l'eka iphe, bu ndu ohogu unu, bupheru unu mgburugburu l'alì ono, oobyu unu anunu ono; g'o buru okiphe unu ono; unu mekwaa g'a ta nyatabahe ndu Amaleku lẹ mkpula akpaminigwe. Unu ta azohakwa iya ememe!"

Ditoronomi 26

Akpuru-iphe-mbu; waa oke-lanu-l'uzo-iri

¹"I -bahupho l'alì ono, Chipfu, bu Chileke abya unu anunu g'o buru okiphe unu ono; mbu unu -natae ya pho buru;

²hatajekwa akpuru-iphe-mbu l'iphe, i kotakpooru l'alì ono, Chipfu abya ngu anunu ono; chiru ye lè nkata; vuru je l'èka Chipfu, bu Chileke ngu a-hòta; dobe epha iya; buru iya eburu.

³L'i vuru iya jepfu onye bu onye uke teke ono je asu iya: 'Ntanu-a be mu pfuwaru epfuru Chipfu, bu Chileke ngu lè mu lwarwutaru l'alì ono, Chipfu riru nna anyi oche phe angu lè ya a-nu anyi ono.'

⁴"Onye uke ono anata ngu nkata ono; sùbe l'ataphu oru-ngweja Chipfu, bu Chileke ngu.

⁵L'i nòdukwapho l'ataphu Chipfu, bu Chileke ngu pfua sù: 'Nnana mu shi buru onye Arámu, aghaphe aghaphe. O gude ndu ha nwanshii laa Ijiputu je aburu onye lwaru alwalwa l'èka ono. O buru l'èka ono be o je eburu; buru oke mba, okpehu du; teme epe du igwerigwe.

⁶Obenu lè ndu Ijiputu nuru anyi aphu; bya emee g'anyi jee iphe-ehuka; mee g'anyi jee ozi mkponwu-ehu.

⁷Tobudu iya bu; anyi chia mkpu raku Chipfu, bu Chileke ke nna anyi oche phe. Chipfu numa olu anyi; bya ahuma iphe-ehuka, anyi eje; waa ozi mkponwu-ehu, anyi eje; me g'e gude emebe anyi ewere.

⁸No iya; Chipfu bya egude ike me agburehu iya; yee ebvu, ooye; yee iphe-ohubama; mekpoo iphe, du biribiri; gude dufuta anyi lè Ijiputu.

⁹O bya edubatawa anyi l'èka-a; bya eworu ali-a nu anyi; mbu ali, bu mini era-eswi yee manu-enuw aso iya gborogboro-a.

¹⁰Nta-a be mu wotawaru ngu akpuru-iphe-mbu, shi l'iphe, mu meberu l'alì-a, gube Chipfu nuru mu-a.' L'i bya eworu iya dobe l'iphe Chipfu, bu Chileke ngu; bya abaarü Chipfu, bu Chileke ngu ono eja.

¹¹L'i bya etee eswa iphemiphe ono, du ree ono, Chipfu, bu Chileke ngu nuru gu lè ndibe ngu ono. Ndu Lívayi; me ndu lwaru alwalwa, unu l'ephe bu etekwapho eswa."

Uzo-lanu-l'uzo-iri k'apha k'eto

¹²"I -pfuchaa oke-lanu-l'uzo-iri l'iphemiphe, i setaru l'apha k'eto, bu apha, aapfuje oke-lanu-l'uzo-iri; mbu; i -wochaaru iya nu ndu Lívayi; yee ndu lwaru alwalwa; yee ndu nna phe anodedu; me unwanyi, ji phe anodedu; k'ophu epe a-nodu lè ndunu eriji epho;

¹³L'i nodu l'iphe Chipfu, bu Chileke ngu pfua sù: 'Mu wofuakwaru iphe ono, du nsò ono l'ulo mu; teme mu wowaru iya nu ndu Lívayi; waa ndu lwaru alwalwa; me ndu nna phe anodedu; me unwanyi, ji phe anodedu, bu ekemu, i turu nu mu. O to dukwa ekemu ono, i turu nu mu ono, duru ophu mu etsotaduru; ophu o dukwa ophu mu zoharu.

¹⁴O to dukwa oke-lanu-l'uzo-iri ono ophu mu riru teke mu no l'aphu; ophu o dukwa ophu mu wofuru teke mu bu onye aaso nsò; ophu o dudu ophu mu nujeru ndu maa.

Mu meerupho olu Chipfu, bu Chileke mu; mbu l'oo iphemiphe, i suru ge mu mee be mu meru.

¹⁵Shinu l'ibe ngu ono, du nsọ ono lezeta ɛnya; mbu-a; shinu l'imigwe lezeta ɛnya; goru onu-oma nu ndibe ngu ono, bu ndu Ízurelu; l'i goru onu-oma nu ali ono, i nuru anyi ono, bu ali, mini era-eswi yee manu-ɛnwu aso gborogboro ono; eshinu ono bu iphe, i riru nna anyi oche phe angu iya.'

¹⁶“Ntanu-a be Chipfu, bu Chileke ngu tuwaru ngu ekemu su g'i meje iphe-a, ya toru okpa iya su g'e tsoje-a; waa iphe-a, ya suru g'e meje-a. Zikwaa obu l'ali; gude ndzu ngu g'o ha yele obu ngu g'o ha meje iphemiphe ono.

¹⁷Ntanu-a be i pfuwaru ke Chipfu hoo haa; su l'oo ya bu Chileke ngu; l'oo uzo, o toru be ii-nodu etso; eme iphe, o toru okpa iya su g'e meje; emekwapho iphe, o toru l'ekemu; mekpoo iphe, o suru g'e meje; teme l'i mekwapho olu iya.

¹⁸Teme Chipfu bya epfuakwaa ya hoo haa ntanu-a; su l'unu buwaa ndibe iya, ya nwe k'iche, bu iphe, o kwahawaru unu ukwe iya; bya asu g'unu mekotaje iphe, o suru g'unu meje l'ophu.

¹⁹Ozo bu le ya e-me g'unu ha shii; kakota ohamoha ozo, ya meru ememe shii. Unu aka phe enweru epha; oha m'oha ono aka unu etu epha; ka unu akwabẹ ubvu. Unu aburu oha, duru Chipfu, bu Chileke unu nsọ, bu iphe, o pfuhawaru.”

Ditoronomi 27

Oru-ngweja, no l'ubvu Ebalu

¹Noo ya; Mosisu yee ndu bu ogerenya ndu Ízurelu bya aturu ndu Ízurelu ono ekemu-a; su phe: “Unu tukokwa ekemu-a, mu aturu unu ntanu-a dobekota.

²Teke unu gharu ɛnyimu Jiordanu bahu l'ali ono, Chipfu, bu Chileke unu abya unu anunu ono; unu patachaa mkpuma, ha shii kpokobe; unu emeta urwa gude rwaa ya arwarwa.

³Unu woru ekemu-a g'o ha dekota iya me unu ghachaepho ɛnyimu ono bahu l'ali ono, Chipfu, bu Chileke unu abya unu anunu ono; mbu ali ono, era-eswi yee manu aso gborogboro ono. Ono bu iphe, Chipfu, bu Chileke nna unu oche phe kweru unu ukwe iya.

⁴Oo ya bu; teke unu dachaerupho ɛnyimu Jiordanu; unu akpokobe mkpuma ono, mu aturu unu ekemu iya ntanu ono. O buru l'eli ubvu Ebalu be unu a-kpokobe iya. Unu egude urwa rwaa ya arwarwa.

⁵O buru l'eka ono be unu a-kpuru Chipfu, bu Chileke unu oru-ngweja. O buru mkpuma be ee-gude kpu ya; mbu mkpuma, adudu iphe, e meru l'igwe, a kujeru iya.

⁶O buru mkpuma, furu ophu be unu e-gude kpuaru Chipfu, bu Chileke unu oru-ngweja obu. Teme o buru l'eli iya be unu egweje ngweja-akpo-oku; nu Chipfu, bu Chileke unu.

⁷Unu gwejekwapho ngweja-ehu-guu l'eka ono. Unu atuko nodu l'eka ono ria ya; tee eswa l'iphu Chipfu, bu Chileke unu.

⁸Unu tukokwa ekemu-a g'o ha dekota g'o shia ekiri le mkpuma ono, unu kpobegbaaru ono.”

Mburonu, a no l'ubvu Ebalu togbo

⁹Mosisu waa ndu-uke, bu oshilokpa Lívayi bya epfuru yeru ndu Ízurelu l'ophu; su phe: “Unu gebekwa-o; unube ndu Ízurelu; unu ngabekwa nchi. Ntanu-a be unu buakwaa ndibe Chipfu, bu Chileke unu.

¹⁰Oo ya bu le-a; unu mejekwa olu Chipfu, bu Chileke unu. Unu dobekwa ekemu iya; meje iphe, o toru okpa iya su g'e tsoje, bu iphe, mu aturu unu ekemu iya ntanu-a.”

¹¹O bukwarupho mboku ono be Mosisu turu ndu Ízurelu ekemu su:

¹²“Teke unu dachaerupho enyimu Jiòdanu; waa okpa-ipfu, a-pfuru l'eli ubvu Gerizimu goru onu-oma nu ndu Ízurelu baa: Okpa-ipfu Simiyonu; waa ipfu Lívayi; waa ipfu Jiuda; waa ipfu Isaka; waa ipfu Jiósefu; waa ke Benjaminu.

¹³Okpa-ipfu owa-a a-buru ndu ophu a-pfuru l'eli ubvu Ebalu togbo mburonu: Okpa-ipfu Rúbenu; waa ipfu Gadu; waa ipfu Asha; waa ipfu Zebulun; waa ipfu Danu; waa ke Nafutali.

¹⁴Ndu Lívayi ewolia olu; raaru iya unwoke ndu Ízurelu l'ophu arara su:

¹⁵“Mburonu duru onye edobe ntekpe, a pyiru apyipyi; ozoo ophu a kpuru akpukpu. Iphe ono bukwa eme ebyi l'iphu Chipfu; mbu iphe ono, bu ndu eme ona be meru iya nu; bya eworu iya dobe; agwa le mpya!” “Ndu Ízurelu atuko g'ephe ha su: ‘G'o du egube ono-o!’

¹⁶“Mburonu duru onye nmaru nna iya; ozoo ne iya phulaphula!” “Ndu Ízurelu atuko g'ephe ha su: ‘G'o du egube ono-o!’

¹⁷“Mburonu duru onye wofuru mkpuma oke ali nemadzu ibiya!” “Ndu Ízurelu atuko g'ephe ha su: ‘G'o du egube ono-o!’

¹⁸“Mburonu duru onye dusweru onye atsuh ishi uzo!” “Ndu Ízurelu atuko g'ephe ha su: ‘G'o du egube ono-o!’

¹⁹“Mburonu duru onye anafuje nemadzu iswi-oduma; opfu l'o bu onye lwaru alwalwa; ozoo onye nna iya anodedu; ozoo nwanyi, ji iya anodedu!” “Ndu Ízurelu atuko g'ephe ha su: ‘G'o du egube ono-o!’

²⁰“Mburonu duru onye jepfuru nyee nna iya; noo kele o nna iya be o meru iphe-iphere.” “Ndu Ízurelu atuko g'ephe ha su: ‘G'o du egube ono-o!’

²¹“Mburonu duru onye jepfuru anu; udu anu, o buhabe!” “Ndu Ízurelu atuko g'ephe ha su: ‘G'o du egube ono-o!’

22“Mburonu duru onye jepfuru nwune iya nwanyi; m'obeta o buru ada nna iya; ozoo ada ne iya!” “Ndu Ízurelu atuko g'ephe ha su: ‘G'o du egube ono-o!’”

23“Mburonu duru onye jepfuru ne nyee ya!” “Ndu Ízurelu atuko g'ephe ha su: ‘G'o du egube ono-o!’”

24“Mburonu duru onye gburu nemadzu ibiya le mpya!” “Ndu Ízurelu atuko g'ephe ha su: ‘G'o du egube ono-o!’”

25“Mburonu duru onye nataru uphalazu je egbua onye adudu iphe, o meru!” “Ndu Ízurelu atuko g'ephe ha su: ‘G'o du egube ono-o!’”

26“Mburonu duru onye atukoduru iphemiphe, a turu l'ekemu-a emekota!” “Ndu Ízurelu atuko g'ephe ha su: ‘G'o du egube ono-o!’”

Ditoronomi 28

Obunggo, ee-bu onye emeje iphe, a suru g'o mee

(Uke 26:1-13; Dit 7:12-24)

1“Teke o bukwanu l'unu ngaberu nchi okpobe angabe l'olu Chipfu, bu Chileke unu; kwaberu ekemu iya g'o ha enya; eme iya ememe; mbu ekemu ono, mu aturu unu ntanu-a ono; be Chipfu, bu Chileke unu e-me g'unu kakota ohamoha, nogbaa le mgboko-a shii.

2Onu-oma-a g'o ha a-soru so-pfuta unu etso unu purupuru; m'o buru l'unu a-nodu anuru Chipfu, bu Chileke unu olu.

3“Onu-oma a-nodu etso unu l'oma mkpukpu; etso unu l'oma egu.

4“Onu-oma a-nodu etso unwu, unu nwutaru anwuta; etsokwapho unwu iphe, unu meberu l'alij; etsokwapho unwu iphe-edobe unu nwushiru. Mbu l'eswi unu; waa egu yee aturu unu a-nodu azu azuzu; azushi iya ike.

5“Onu-oma a-nodu etso nkata, unu evuje eje l'egu; waa ikwe, unu atsuje nri.

6“Onu-oma a-nodu etso unu me unu -nodu abata abata; l'o tsokwapho unu me unu -nodu alufu alufu.

7“Chipfu e-me g'unu lwu-kpee ndu ohogu unu, wu-lihuru etso unu ugu. Ephe e-dzebe edzebe byapfuta unu ugu; ole ephe e-mechaa gbaa nanu nanu; gbackashihu.

8“Chipfu e-me g'onu-oma iya tsoru oha unu; mekpoo l'iphemiphe, unu byiberu aka k'ememe; mbu l'oo-goru onu-oma nu unu l'alij ono, Chipfu, bu Chileke unu abya unu anunu ono.

9“Chipfu e-me g'unu nguru anguru; mee unu g'unu buru ndu duru iya nsu, bu iphe, o rifuhawaru unu angu iya; ole o kwa me o -buru l'unu e-dobe ekemu Chipfu, bu Chileke unu; bya etsokwapho uzo, o toru.

10Unwu-eliphe l'ophu ahuma l'unu zaru epha laaru Chipfu; ephe atsuhaha unu ebvu.

11 Teme Chipfu emee g'unu nweru iphe okpobe enweru; nwushia unwu okpobe anwushi; unwu iphe-edobe unu anwushi nwa okpobe anwushi; unwu iphe, unu meberu l'alì emehu okpobe emehu l'alì ono, Chipfu riburu nna unu phe angu le ya anu unu ono.

12 Chipfu a-guharu unu ulo eka oodobeje eku iya l'imigwe; g'igwe dzeje mini gbaa l'alì unu; l'orwuberu iya; l'o goru onu-oma nu iphe, bukpo ozi, unu gude eka unu jee. Unu ejieje ikpoto oha ugwo; unu ta adudu ndu unu eje ejita.

13 Chipfu e-meje unu g'unu buru ishi; unu ta anodu ndu ozo l'eka. L'o mee; unu akaepho shingushingu eje; unu ta abyadu alwa alì alì; ole o kwa me unu -nodu angabe nchi l'ekemu Chipfu, bu Chileke unu, bu ophu mu aturu unu ntanu-a su g'unu leta enya; meje iya ememe.

14 Unu ta agbakutakwaru ekemu-a, mu aturu unu ntanu-a azu me nanu. Unu ta ahakwa iya; meahaa iphe ozo; tsolahaa agwa ozo, unu a-nodu abaru aja.

Aphu, aa-nu onye te emejedu iphe, a suru g'o mee

(Uke 26:14-46)

15 “Ole o -bukwanuraa l'unu ta angadu nchi l'olu Chipfu, bu Chileke unu; ophu unu eletaduru enya eme ekemu iya g'oha; ophu unu etsoduru iphe, o toru okpa iya su g'e tsoje, bugba iphe, mu aturu unu l'ekemu ntanu-a; be mburonu-a g'o ha a-byapfutakwa unu; etso unu purupuru.

16 “Mburonu a-nodu etso unu l'oma mkpukpu; etso unu l'egu.

17 “Mburonu a-nodu etso nkata, unu evuje eje l'egu; waa ikwe, unu atsuje nri.

18 “Mburonu a-nodu etso unwu, unu nwutaru anwuta; etso unwu iphe, unu meberu l'alì; etso unwu, eswi unu nwushiru; mekpoo ikpoto egu me aturu unu.

19 “Mburonu a-nodu etso unu me unu -nodu abata abata; l'o tsokwapho unu me unu -nodu alufu alufu.

20 “Chipfu a-tu unu onu; tu unu eberebete; meru ghajoghajoghajo nu unu l'iphemiphe, unu byiberu eka ememe. Oo-me iya unu egube ono gbiriri jasu unu aburu mkpurupyata; mbu ola-l'iswi atu unu l'uzorehu; l'ejo-ememe, unu wataru ememe; gwobe Chileke.

21 Chipfu e-gudeepho ejo iphe-ememe swiru unu gbiriri jasu unu abvube l'alì ono, unu abahu eje alwuta g'o buru k'unu ono.

22 Chipfu a-tu unu eh, ami mini; yee ehoku; yee eh-ekoko; yee oke okpomoku; l'o mee; anwu akpobe; iphe unu meberu l'alì achashia man; l'e gude ogu-echi gbushia unu. Iphemiphe ono emekpaa unu eh jasu unu aburu mkpurupyata.

23 Akpaminigwe-a, unu vu l'ishi-a a-buru onyirubvu; alì, unu zoberu okpa aburu mgboro-igwe.

24 Chipfu e-me ge mini, gege edze l'alì unu buru urwuku; yee udzu. O buru igwe a-nodu edze urwuku yee udzu ono ekpu unu gbiriri jasu unu abvube.

- 25“Chipfu a-ha gę ndu ọhogu unu lwu-kpee unu. Unu e-dzebe edzebe byapfuta ndu ọhogu unu ọgu; ọle unu a-gba nanu nanu; gbakashihu. Unu aburu ndu ali-eze ndu mgboko l'ophu a-nodu aso oyi.
- 26Odzu unu a-buru nri enu, ephe l'eli; yee anu, bu l'eliphe; ophu o dudu onye bya eye phe ebvu; chifu phe.
- 27Chipfu a-tu unu ejo-onwo ndu Ijiputu; waa oke-ejo-onwo; waa onwo, aba yoyoyo; waa ekpa-ebyi; ophu unu abyadu aka mma l'iphe-ememe obu.
- 28Chipfu e-me g'obvu bya unu; unu atsuhaha ishi; egomunggo eswehu unu.
- 29Echilabo eswe be unu a-wata ebyiphe aka ebyiphe g'aka onye atsu ishi ebyiphe aka l'ochii. Ophu o dukpoda iphe, unu byiberu aka k'ememe, byaru ekeru ekeru. Aa-noduepho akpa unu ehuru; ana unu nfu mbokumboku; ophu unu abyadu enweru onye agbaru unu mkpu.
- 30“Ii-je le nwanji jebua; oo-buru onye ozo e-mehaa jepfuaha ya. Li kpua ulo kpu-ghe; ole i ti buduru iya. Li koo opfu-vayinu; i tii ghotadu mebyi iya.
- 31Oke-eswi ngu be aa-nodu l'atatiphu ngu gbua; ole i tii tadu anu iya. Nkapfu-igara ngu be aa-nata ngu l'okpehu; ophu a byadu akpu-phutaru ngu iya azu. Aturu ngu be ee-rwuta chiru nu ndu ohogu ngu; ophu o dudu onye agbaru ngu mkpu.
- 32Unwu unu unwoke; yee ke nwanji be aa-chiru nu ndu ohozo. Enya aduepho unu l'uzo mbokumboku gbiriri jasu enya agbahu unu tsukiribaa. Eka unu be e-rishihu erine; ole o to dudu iphe unu adu ike ememe.
- 33Ndu unu amadu be e-ri iphe, unu koru l'opfu; mbu iphe, unu setaru l'akanya. Iphe, a-noduepho etso unu kpoloko bu mkpamehu; yee mkpawere mbokumboku;
- 34k'ophu bu l'iphe, unu e-gude enya unu huma a-gbaghaa unu iphu.
- 35Chipfu a-tu unu ejo-onwo, eme ejo ehuka l'ikpere; me l'okpa l'ophu; mbu ejo-onwo, ata byadu akpohu akpohu. Ejo-onwo ono e-shiepho unu l'obochi-okpa phokota jasu l'ishi.
- 36“Chipfu a-chita unu; yee onye unu hotaru g'o buru eze unu; laa oha, unu ta amadu; ophu nna unu oche phe amajeduru oha obu. O buru l'eka ono be unu a-nodu baaru agwa aja; mbu agwa, e gude oshi; yee mkpuma mee.
- 37Unu a-buru ndu aka ono, Chipfu a-chiru unu laa ono iphe, anyi ishi edzu; iphe, e gude anma l'ejo etu; waa iphe, e gude agba mgbonu.
- 38“Unu e-mebekwa iphe, ha shii l'ali; ole iphe, unu a-kpata iya ta abadu ishi; noo kele igube e-mebyishi iya.
- 39Unu a-gba opfu-vayinu koo ya opfu; ole unu ta angudu mee, shi iya nu; ophu unu awotadu akpuru, shi iya nu; noo kele unwehu a-tafu iya.
- 40Oshi olivu a-tuko ali unu sweta; ole unu ta abyadu ete onwunu manu, shi iya nu; noo kele akpuru iya e-rishihu; dashia.

- 41Unu a-nwushi unwoke; yee unwanyi; ole ephe ta abaduru unu urwu; kele aa-kpu phe le ndzu laa ohozo.
- 42Iphe, bu oshi, pfuru l'alị unu; waa iphe, unu meberu emebe be igube a-tapyashibebe.
- 43“Ndu lwaru alwalwa, bu l'echilabo unu be eka phe l'a-kangoje k'unu okpobe akango; unubedua akaepho alwa alị alị eje.
- 44Ephe e-jieje unu ugwo; ole unu tee nweddu ophu unu e-jie phe. O buru ephebedua a-bujeru ishi; unubedua anodu phe l'eka.
- 45“Mburonu ono g'o hakota l'a-dapfuta unu; chia unu kpabe kpabe; jasụ l'o gude unu; mee; unu aburu mkpurupyata. Noo kele unu ta ngabeduru Chipfu, bu Chileke unu nchi mee ekemu iya; me iphe, o toru okpa iya su g'e tsoje.
- 46Mburonu ono a-du unu l'ehu; buru unu iphe-ohubama; yee iphe, du biribiri; dukwapho oshilokpa unu l'ehu jasụ l'ojeje.
- 47Eshinu unu te egudedu ehu-utso; tee eswa; jeeru Chipfu, bu Chileke unu ozi teke iphe shi ejehuru unu le ree;
- 48be unu a-swị egu nri; waa egu mini; gbaru oto; teme uko iphemiphe aduru unu; unu ejeeru ndu ohogu unu ozi; mbu ndu ono, Chipfu e-ye g'ephe bya etsoo unu ogu ono. L'o woru odogoro-igwe nyabe unu l'olu; jasụ unu aburu mkpurupyata.
- 49Chipfu e-duta oha, shi uzanya; mbu l'eka igwe beru alị beru; g'ephe zia phaa g'ugo bya ezikota unu. Oha ono a-buru ndu unu ta anodu olu phe.
- 50Oha ono be iphu a-gba igirigiri; k'ophu bu l'ephe ta agubedu ndu bu ogeranya iphe; ophu ephe aphuduru unwegirima obu-imemini.
- 51Ephe e-ripya unwu iphe-edobe unu; waa unwu iphe, unu meberu l'alị; jasụ e mebyishibebe unu. O to dudu ereshi unu; me mee ophuu unu; me manu unu; ozoo eswi unu; me unwu aturu unu, ephe byaru aharu unu gbiriri jasụ unu alakota l'iyi.
- 52Ephe a-no-phekota mkpukpu, nogbaa l'alị unu mgburugburu gbiriri jasụ igbulo, ha l'eli ono, a kpushiru ike ono, unu chiru upfu kwee ono aphofu daa. Ephe a-no-phekota mkpukpu unu l'ophu, nogbaa l'alị unu l'ophu mgburugburu; mbu alị ono, Chipfu, bu Chileke unu nuru unu ono.
- 53“Shita l'iphe-ehuka, ndu ohogu unu e-me g'unu je teke ephe a-no-phe mkpukpu unu ono mgburugburu be e-me; unu awata ata iphe, shi unu l'ehu; mbu wata ata unwu unu unwoke; me unwanyi, bu unwu, Chipfu, bu Chileke unu nuru unu.
- 54Oo-du-tabẹ eji; k'ophu bu le nwoke, kachakpo enweru obu-imemini; bya aburu onye iphe kachaa erwu l'ehu be imemini nwune iya nwoke; ozoo nyee ya, o yeru obu; ozoo unwu iya, ghuduru nu ta aduedu.
- 55Ophu o byadu ebuta anu nwa iya ono, oota ono; bee onye lanu le ndu ono. Iphe, a-kpata iya nu aburu l'o to duedu iphe ozo, phodubaaru iya l'eka; kele ndu ohogu unu no-pheru unu mgburugburu; unu nodu eje iphe-ehuka.

⁵⁶Nwanyị, kachakpoo enweru obu-imemini; bya aburu onye iphe kachaa erwu l'ehu l'echilabo unu; mbu onye anoduje arwo ali ge ya zobe okpa le g'o nweberu obu-imemini; yee g'iphe erwube iya l'ehu; be imemini ji iya, o yeru obu; me nwa iya nwoke yee ke nwanyi ta adukwa.

⁵⁷Unwu, oo-nodu anwushi; mekpoo eze, letsoje nwa be oo-meje le mpya ge ya atuko iya taa nkinyi iya. O buru iphe, a-kpa iya nu bu okpa-nri, a-du nu; yee iphe-ehuka, ndu ohogu unu e-me g'unu jee teke ono, ephe a-no-phe mkpukpu unu mgburugburu ono.

⁵⁸“O -buru l'unu te eletaduru enya meje iphemiphe, e pfuru l'ekemu-a, e deru l'ekwo-a; k'ophu unu a-nodu akwabepha-a ubvu; mbu epha ono, du akpabiri bya adu ebvu ono, bu iya bu Chipfu, bu Chileke unu;

⁵⁹be Chipfu e-mekwa g'ejo iphe-ehuka, etu iya adujeduru dapfu unu l'awa unu; mbu ejo iphe-ehuka, a-pa aka; teme l'oonoo odu alala; wafua ejo iphe-ememe, a-du iberezi; teme l'oomee eriri nggeringge.

⁶⁰L'o wofutakwarupho unu iphe, bu ejo iphe-ememe ono, l'emeje ndu Ijiputu ono, bu ophu unu shi atsuje ebvu ono g'o bya arakwaruro unu arakuru l'ehu.

⁶¹O bukwarupho iphe, bu iphe-ememe; me iphe, bu iphe-ehuka, e deduru l'ekwo ekemu-a be Chipfu e-vuru byabe unu l'ishi gbiriri jasu unu aburu mkpurupyata.

⁶²Unu abya aburu ndu a-phodu nwanshii nwanshii; l'unube ndu shi dutabe igwerigwe ge kpokpode, no l'igwe. O buru iphe, a-kpa iya nu bu l'unu te emeduru Opfu Chipfu, bu Chileke unu.

⁶³O buru egube ono, Chipfu gude ehutu mee g'iphe duru unu le ree; bya emee g'unu ka l'otu ono; nokwapho ge Chipfu e-gude ehutu mee; unu aburu mkpurupyata; mekwaapho; o to duhedu iphe, unu a-bu; l'e phefu unu l'ali ono, unu eje alwuta ono.

⁶⁴“Chipfu a-chika unu; mee unu edzuru mgboko l'ophu; e -shi l'ishi mgboko ishi iya-a jasu l'ishi iya ophuu. Eka ono be unu a-nodu baaru agwa aja; mbu agwa, e meru l'oshi; yee mkpuma. Iphe ono buru iphe, unu ta mahaada; teme ophu nna unu oche phe amajeduru iya.

⁶⁵Ole iphe ta abyadu adu unu le nphe l'echilabo oha m'oha ono; ophu okpa abyadu adu unu doo. O chia iphe, Chipfu e-me bu l'oo-me g'obu te unu etete l'eka ono; enya agbahukota unu ochii; aphu eji unu obu.

⁶⁶Ndzu unu a-nodu awa awawa; mbu l'eswe l'enyashi be unu a-noduje le ndzu-agugu. O to nwedu onye a-maru; ? ya a-dzuru-a ndzu; too ya ta adzudu.

⁶⁷Teke o beru l'utsu be unu a-su: ‘Ome o bukponu l'uzenyashi!’ Teke o bu l'uzenyashi; unu asu: ‘Ome o bukponu l'utsu!’ Iphe, a-kpata iya nu aburu oke ndzu-agugu, a-nodu l'ime okpoma unu; yee ejo-iphe, unu e-gude enya unu ahumagbabe.

⁶⁸Chipfu e-ye unu l'ugbo-mini; mee unu alaphu azu l'alì Ijiputu, bu ẹka ono, ya sùru l'unu te ejebaedu ozo ono. Ẹka ono be unu a-kpobe onwunu k'erere; ge ndu ohogu unu zua unu g'unu buru ohu phe unwoke; me k'unwanyi; ole o to dudu onye e-kwe azu unu."

Ditoronomi 29

Ọgbandzu, Chileke yele ndu Ízurelu gbaru le Mówabu

¹Qwaa bu iphe, e pfuru l'ogbandzu ono, Chipfu turu Mosisu ekemu su g'o mee ge yele ndu Ízurelu gbaa l'alì ndu Mówabu ono; a -gufukwa ogbandzu ophu yele ephe gbaru l'ubvú Horebu.

²Mosisu bya ekukobe ndu Ízurelu g'ephe ha; su phe: "Unu gudewaa enya unu huma iphemiphe, Chipfu meru Fero; waa ndu-ozì iya l'ophu; waa alì iya l'ophu l'alì ndu Ijiputu.

³Enya unu ebo ebo be unu gude huma iphe-ohutama, paru ẹka ono; yee iphe-ohumalenya ono; me iphe, dugbaa oke biribiri, nwuru nu ono.

⁴Ole Chipfu ta nuduru unu uche, emeje g'iphe doo enya; waa enya, unu e-gude huma uzo; waa nchi, unu e-gude anu iphe jasun tanu-a.

⁵Mu duru unu ukporo apha labo l'echiegu; ophu uwe unu akahuduru unu l'ehu; ophu akpo-okpa unu akahuduru unu l'okpa.

⁶Unu ta taduru buredi; ophu unu anguduru mee; ozo iphe ozo, atsù atsùtsù; k'ophu unu a-maru l'oo mu bu Chipfu bya aburu Chileke unu.

⁷O be teke anyi rwuru alì ẹka ono; Sihonu, bu eze ndu Heshibonu; waa Ogu, bu eze ndu Beshanu lufuta bya adatso anyi ugu; anyi lwu-kpee phe.

⁸Anyi lwu ta alì phe bya eworu iya nu okpa-ipfu Rube nu; waa Gadu; waa okpa-ipfu Manase, e keru ebo; woru iya nu phe g'o buru okiphe phe.

⁹Oo ya bu le-a; unu dobekwa opfu, e pfuru l'ogbandzu-a; unu emeje iya ememe; g'iphe, unu kuburu ẹka ememe abujeru unu upete.

¹⁰"G'unu ha tanu-a pfukotaru l'iphu Chipfu, bu Chileke unu; mbu ndu-ishi unu; okpa-ipfu unu; waa ndu bu ogerenya unu; waa ndu nweru enya, nogbaa l'echilabo unu; mekwapho ndu bu nwoke le ndu Ízurelu l'ophu;

¹¹yee unwegirima unu; me unwanyi, unu alu alulu; waa ndu lwaru alwalwa, bu l'eka unu kperu ulo-ekwa unu, bu ndu awaru unu nku; ekuru unu mini;

¹²k'ophu unu le Chipfu, bu Chileke unu a-gba ndu; unu ayiru l'angu ono, Chipfu, bu Chileke unu eriru unu tanu onoya.

¹³G'ee-shi g'o mee unu tanu-a g'unu buru ndibe iya; g'o buru Chileke unu, bu iya bu iphe, o pfuru; bya aburu iphe, o riburu nna unu oche phe, bu Ebirhamu; waa Ayizaku; waa Jieku l'angu.

- 14**Ogbandzu-a, mu nọ l'ẹka-a eme g'unu gbaa ntanu-a; me angu-a, mu eri eye iya-a ta abukwa unubedua be yi ya nu kpoloko.
- 15**O yi ya; mbu onye anyi l'iya tuko pfuru l'ataphu Chipfu, bu Chileke anyi l'ẹka-a; o yiru iya; mbu onye anyi l'iya ta nodu l'ẹka-a ntanu-a.
- 16**“Unubedua l'onwunu be o doru enya ree g'anyi shi buru l'alị ndu Ijiputu; waa g'anyi shi ghakota alị ndu ohozo; jee gbiriri; jasụ anyi rwua ẹka-a.
- 17**Teme unu humawaa ahuma ahuma, ephe emeshi; me agwa phe, bu iphe, ephe pyiru l'oshi; me ophu ephe wataru le mkpuma; waa ophu a kpuru le mkpola-ochaa; waa mkpola-ododo.
- 18**Unu letakwa enya g'o to du nwoke; ozoo nwanyi; ozoo ipfu; ozoo okpa-ipfu obu iya a-lufu l'ẹka Chipfu, bu Chileke anyi no; tugba je abaaharu agwa ndu ohozo ono eja. Unu te ekwekwa g'ejo-iphe, egbu egbugbu bya atsọ ilu egube ono kprofuta l'echilabo unu.
- 19**G'o to dukwa onye a-numacha ejo onu, aatu-a l'owata agoru onu-oma anu onwiya su l'ehu a-du iya-a guu; m'obeta ya tsoru okpoma-mgbashi, shi iya l'obu. Kele egube iphe ono -du be alị, mini du yee k'okponku a-tuko buru mkpurupyata.
- 20**Chipfu ta abyakwa aguru onye obu nvu. Ehu-eghu Chileke; yee okophoo ya a-noduwaro swiru onye obu. Teme mburonu ono, e deshuru l'ekwo-a a-dapfuta iya; teme Chipfu e-hufu ephe onye ono le mkpula akpaminigwe-a.
- 21**Chipfu a-hota onye ono l'okpa-ipfu Izurelu l'ophu dobe g'ejo-iphe nwuaru iya; mbu ejo onu ono, e pfuru opfu iya l'ekwo ekemu-a, e deru ogbandzu-a.
- 22**“Unwu unu, bu ogbo ophu e-tsota k'unu; me ndu bu nlwamulwa, shi l'eka du enya ahuma ejo-iphe, a-nwu l'alị ono; waa iphe-ememe, Chipfu e-gude kpakaa alị ono.
- 23**Alị ono g'o ha be iphe, e-jiru iya nu bu oku nshi-egbe; waa unu; yee onwuphuruphuru; k'ophu bu l'a taa kodu iphe l'alị ono; ophu o dudu iphe, emehu iya nu; ophu eswa efukpoda ya nu. Mbu l'ee-me iya iphe, e meru Sodomu; yee Gomora; mee ya iphe, e meru Adama; yee Zebowimu; bu ndu Chipfu gude oke ehueghu iya mebyishia ono.
- 24**Ohamoha l'ophu atuko jahaa su: ‘? Bu gunu kparu iphe, Chipfu meru alị-a egube-a; mbu iphe, kparu iphe, o tu-koshuru alị-a ejo oke ehueghu iya egube-a?’
- 25**“Noo teke ndiphe e-yeru phe onu su: ‘Iphe, kparu iya nu bukwa le ndu ono gbakutaru azu l'ogbandzu Chipfu, bu Chileke nna phe oche, bu ophu ephe l'iya gbaru teke ono, o dufuturu phe l'alị Ijiputu ono.
- 26**Ephe gbafuru je abaaharu agwa eja; bya ephozeaharu iya; mbu agwa ephe amadu; teme ophu o budu yebedua nuru phe iya.
- 27**Oo iphe ono kparu iphe, oke ehueghu Chipfu gbanwuhuru oku l'eka alị-a no; k'ophu o tukoru ejo onu, a turu dee l'ekwo ekemu-a kpukposhi phe l'ehu.

²⁸Tɔbudu iya bụ; Chipfu p̄hefu p̄he l'alì ono g'onye p̄hefuru ọgbarabvu-oshi; ọ b̄uru oke ẹhu-eghu iya; ȳe ẹnya, ata iya kp̄itikpiti b̄e o gude nwuru p̄he ye l'alì ndu ọzo g'ọ d̄unaa nta.'

²⁹"Ip̄he, e domiru edomi b̄u k̄e Chipfu, b̄u Chileke anyi; obenu l'ip̄he, e meru g'a maru b̄u k'anyibedua; waa ụnwu anyi jas̄u l'ojejoje; k'ophu anyi e-meje ip̄hemip̄he, e pfuru dee l'ẹkwo ekemu-a."

Ditoronomi 30

Ip̄he e-jehuru onye iziman̄u lwar̄u az̄u

¹"Oo ya b̄u; teke ip̄hemip̄he-a mejeerup̄ho unu; mb̄u aḡo ọnu-oma ȳe at̄u ọnu ono, mu t̄ogboru unu ono; unu n̄odu l'echilab̄o ọhamoha ono, Chipfu, b̄u Chileke unu ch̄ikashiru unu; unu laa je an̄odu ono; nyata iya; k'ophu o rwuru unu l'uche;

²k'ophu unu lwaphutaru az̄u lwapfuta Chipfu, b̄u Chileke unu; bya emeahaa olu iya, b̄u ip̄hemip̄he ono, mu at̄uru unu ekemu iya n̄an̄u ono; mb̄u unub̄edua unu l'ụnwegirima ibe unu; unu gude obu unu g'ọ ha; ȳe ndz̄u unu l'ophu lwa

³b̄e Chipfu, b̄u Chileke unu e-dophu unu az̄u l'onodu unu; mb̄u l'oo-ph̄uru unu obu-imemini; bya edufutak̄ota unu l'ọhamoha ono, b̄u ẹka Chipfu, b̄u Chileke unu ch̄iru unu ye onoya.

⁴O -nwekp̄ooru ndibe unu ono ọphu a ch̄iru jeye l'ẹka igwe beru alì beru; Chipfu, b̄u Chileke unu ejele-a ẹka ono je eduphuta p̄he az̄u; mb̄u l'oo-jekp̄oep̄ho l'ẹka ono je ekua unu.

⁵Mb̄u l̄e Chipfu, b̄u Chileke unu e-duphuta unu az̄u l'alì ono, b̄u k̄e nna unu oche p̄he ono; l'ọ b̄uru k'unu. L'o meeru g'ip̄he d̄uru unu l̄e ree; mee g'unu barah̄u jaa àjàjà ka nna unu oche p̄he shii.

⁶Chipfu, b̄u Chileke unu e-bu unu ụbv̄u l'ime obu; bukwaph̄o awa unu ụbv̄u l'ime obu; k'ophu b̄u l'unu e-ye Chipfu, b̄u Chileke unu obu unu g'ọ ha; gude ndz̄u unu l'ophu yee ya obu; k'ophu unu a-n̄odu ndz̄u.

⁷Oo ya b̄u; Chipfu, b̄u Chileke unu at̄uko ọtu-ọnu-a byab̄e l'ishi ndu ọhogu unu; waa l'ishi ndu kp̄oru unu ash̄i eme unu ewere.

⁸Noo teke unu a-lwaphuta az̄u bya emeahaa op̄fu, o pfuru; mb̄u Chipfu, b̄u Chileke unu; bya awata emek̄ota ip̄he, buk̄poo ekemu iya, b̄u ọphu mu at̄uru unu n̄an̄u-a.

⁹Chipfu, b̄u Chileke unu e-me g'ip̄he, unu k̄uberu ẹka ememe jehuru unu; mekwaph̄o g'unu nw̄ushia ụnwu; waa g'ip̄he-edobe z̄ushiaru unu; t̄eme ip̄he, unu meberu l'alì emehukwaph̄o; k̄ele Chipfu e-mechaa gude ẹhu-ut̄so ọzobaa mee g'ip̄he jehuru unu; ẹgube ono, o gude ẹhu-ut̄so meeru iya nna unu oche p̄he ono;

¹⁰m̄e ọ -b̄uru l'unu ngaberu nch̄i l'op̄fu Chipfu, b̄u Chileke unu; meje ekemu iya; waa ip̄he, ọ t̄oru ọkpa iya s̄u g'e tsoje, buchaa ip̄he, e deru l'ẹkwo ekemu-a; ȳefua m'ọ b̄uru-a l'unu e-gude obu unu g'ọ ha; waa ndz̄u unu l'ophu dak̄obe lwaphuta az̄u lwapfuta Chipfu, b̄u Chileke unu."

Opfu mkpochi-ishi

- ¹¹“Noo kele ekemu-a, mu aturu unu ntanu-a ta atsunukakwa unu l'ehu ememe; ophu o karikwaru unu eka.
- ¹²Opfu ono ta nodu l'imigwe k'ophu unu a-ji su: ‘? Bu onye e-nyihu imigwe je ewota iya bya araaru anyi arara; k'ophu anyi a-ngabe iya nchi mee ya?’
- ¹³Teme ophu o nodu l'azu eze-enyimu azu iya ophuu; k'ophu unu a-ji su: ‘? Bu onye a-da eze-enyimu je ewota iya raaru anyi arara k'ophu anyi a-numa iya meahaa ya?’
- ¹⁴Obenu l'opfu obu nokpoo unu ntse okpobe anono; mbu l'unu kpu iya akpukpu l'onu; teme o nodu unu l'obu; k'ophu unu e-mekwanu iya ememe.
- ¹⁵“Unu lenu; ntanu-a be mu dobekwaru unu ndzu; waa eka-atutu; bya edoberu unu anwuhu; yee ola-l'iswi.
- ¹⁶O -buru l'unu yeru Chipfu, bu Chileke unu obu; bya etsokota uzo iya; mbu edobe iphe, o turu l'ekemu; waa iphe, o toru okpa iya su g'e tsoje; waa iphe, o suru g'e meje, bu iya bu iphe, mu ezi unu ntanu-a; be unu a-nodukwa ndzu; jaa ka l'otu; teme Chipfu, bu Chileke unu ekebe unu l'oma l'ali ono, unu abahu eje alwuta nworu ono.
- ¹⁷Ole o -buru l'unu wofuru okpoma unu l'eka Chipfu no; ophu unu ekweddu angabe nchi; unu haa; e deta unu; unu je ephozeaharu agwa; baaharu iya eja;
- ¹⁸be mu arajakwaru iya unu araja ntanu-a su l'unu a-lakwa l'iyi. Ophu unu ebukwa noo odu l'ali ono, unu abya ada enyimu Jiordanu eje alwuta nworu ono.
- ¹⁹Ntanu-a be mu ekukwa igwe yee ali g'o bya agbaa unu ekebe le mu dobeakwaru unu ndzu; bya edoberu unu anwuhu; doberu unu onu-oma; yee mburunu. Oo ya bu le-a; unu hatalakwa ndzu; k'ophu unu le ndu a-buru oshilokpa unu a-tuko nodu ndzu;
- ²⁰k'ophu unu e-ye Chipfu, bu Chileke unu obu; waa k'ophu unu e-meje opfu iya; waa k'ophu unu l'iya arakuru; noo kele oo yebdua bu ndzu unu. O buru iya bu l'unu no ndzu ogologo; k'ophu unu e-buru l'ali ono, Chipfu rifuru nna unu oche phe l'angu le ya anu phe ono; mbu ndiche unu phe, bu Ebirhamu; waa Ayizaku; yee Jiekopu.”

Ditoronomi 31

Jioshuwa anochi enya Mosisu

- ¹Tobudu iya bu; Mosisu nodu epfukpockwapho opfu-a anu ndu Izurelu g'ephe ha;
- ²su phe: “Nta-a be mu kawaru nka nowa ukporo apha ishii; ophu mu aduedu ike edu unu eje ejeje alwa alwalwa. Teme Chipfu suakwa mu pho ge mu ta adafukwa azu enyimu Jiordanu azu iya ophuu.
- ³O buru Chipfu, bu Chileke unu e-vuta uzo; unu etso iya je adaa enyimu ono. O buru iya a-tuko ohamoha-a mebyishiaru unu; mee; unu alwuta ali phe nworu. O buru Jioshuwa e-vutaru unu uzo; unu etso iya je adaa enyimu ono, bu iya bu ge Chipfu pfuru iya.

⁴Chipfu emee phẹ ẹgube ono, o meru ndu eze ndu Amoru, bu Sihonu yee Ogu; bu ndu o mebyishiru; yee ali phẹ.

⁵Mbu le Chipfu e-woru phẹ ye unu l'eka; ole g'unu mekotakwa phẹ ge mu suru g'unu mee phẹ.

⁶G'okpehu dukwa unu; unu eshihu obu ike. Ge ndzu ba agukwa unu; ophu unu atsukwa phẹ ebvu. Noo kele oo Chipfu, bu Chileke unu l'onwiya bu onye du unu eje. O to byadu aha unu; ophu o leswedu unu enya."

⁷Mosisu bya ekua Jioshuwa; bya anodu l'ataphu ndu Izurelu g'ephe ha su iya: "G'okpehu dukwa ngu; li shihu obu ike; kele o kwa ngu e-tsoru ndu-a bahu l'ali ono, Chipfu riburu angu l'oo-nu nna phẹ oche ono. O buru gubedua l'e-me g'ephe lwuta iya nworu.

⁸O buru Chipfu l'onwiya e-vutakwanuru ngu uzo; teme l'o nodukwapho swiru ngu eswiru. O to byadu aha ngu; ophu o leswedu ngu enya. Ge ndzu ba agukwa ngu; ophu obu etekwa ngu etete!"

Agụ ekemu ono

⁹Noo ya; Mosisu bya edee ekemu ono edede woru nu ndu-uke, bu phẹ bu oshilokpa Lívayi, bya aburu phẹ apaje okpoko ogbandzu Chipfu; nukwa iya pho ndu bu ogerenya le Izurelu g'ephe ha.

¹⁰Mosisu bya atukwaru phẹ pho ekemu su phẹ: "A -nojechaephe apha esaa; o bvujeephe, bu iya bu l'apha akagbu ugwo; mbu teke ono, aaboje Obo-Mkpù ono;

¹¹teke ndu Izurelu wufutakotaerupho l'iphu Chipfu, bu Chileke phẹ l'eka oo-hota dobe g'unu dzukoje; teke ephe dzukoerupho; unu agua ekemu-a ge Izurelu l'ophu numakota g'ephe ha.

¹²Unu dzukobe phẹ l'eka lanu; unwoke me unwanyi; yee unwegirima; me ndu lwaru alwalwa, bu le mkpukpu le mkpukpu unu; k'ophu ephe a-tuko ngabe nchi; nwuta atsu Chipfu, bu Chileke unu ebvu; teme ephe eleta enya emekota iphe, e pfuru l'ekemu ono g'o ha.

¹³Unwu phẹ ndu ophu teke amadu ekemu-a be aa-numakwa iya pho nwuta atsu Chipfu, bu Chileke unu ebvu jasụ g'unu e-buberu l'ali ono, unu ada enyimu Jiordanu eje enworu ono."

Aanma okwa le ndu Izurelu e-mechaa kwefuru Chileke ike

¹⁴Tobudu iya bu; Chipfu bya epfuru yeru Mosisu su iya: "Mboku, ii-nwuhu erwuakwa ntse. Kua Jioshuwa; g'unu l'iya tuko swiru bya apfuru l'ulo-ekwa-ndzukọ ge mu karu iya iphe, oo-me." Mosisu yee Jioshuwa bya ejerwua je apfuru l'ulo-ekwa-ndzukọ obu.

¹⁵Chipfu gude urwukpu, kpuru oronmono bya l'ulo-ekwa-ndzukọ ono. Urwukpu ono kpua oronmono l'onu-abata ulo-ekwa-ndzukọ ono.

¹⁶Chipfu su Mosisu: "Nta be ibyakwa alapfu nna ngu oche phẹ. Ole ndu-a ta adukwa g'ephe a-no-beru; ephe awata apharwushi onwophe g'unwanyi ukpara l'abarụ agwa

ndu alì ono, ephe abahù ono eja. Ephe a-gwòbe mu; mebyia oḡbandzu ono, anyi l'ephe gbaru ono.

¹⁷Ọ bụru teke ono bẹ ẹhu-eghu mu e-nwuahaa phuruphuru. Mu agwòbe phẹ; woru iphu wohaarù phẹ. L'e woru phẹ mebyishia. Ikpoto ejo-iphe; mẹ iphe-ẹhuka a-dapfu phẹ; k'ophu ephe a-wata epfu l'eswe mbòku ono sù: 'Iphe, meru g'o gude ejo-iphe-a byapfuta anyi bụkwa l'ọo lẹ Chileke anyi ta anọedu l'echilabọ anyi.'¹⁸Mbòku ono bẹ mu wohafutajeru phẹ atatiphu mu. Ọ bụru iphe, a-kpa iya nù bụ iphe, bụkota ejo-iphe, ephe e-mekọta; merwua k'ophu bụ l'ephe a-gharu agwa ọzo iphu.

¹⁹“Nta-a bụ g'i woru ebvu-a dee l'ẹkwo dobe; gujeru onwongu; l'i zikwaa ya phọ ndu Ízurelù g'ephe maru iya agugu; g'ọ bụru iphe, mu e-gude agba phẹ ekebe.

²⁰Mu -durwutaẹ phẹ phọ l'alì ono, manù-ẹnwu yẹ mini ẹra-eswi asọ gborogboro ono; mbù l'alì, mu kweru nna phẹ oche phẹ ukwe iya; bya eriru angù yeru phẹ iya ono; ephe -rijiaha ephe bya adù okporokpo; bẹ ephe a-gharu agwa ọzo iphu; jeahaarù phẹ ozi; nmaahaa mu phulaphula; bya emebyia oḡbandzu mu.

²¹Ikpoto ejo-iphe; mẹ iphe-ẹhuka -dapfuẹ phẹ phọ; ebvu ono agbaa phẹ ejo ekebe; kele oshilokpa phẹ ta abyadù agù-buhu iya agù-buhu. Noo kele mu mahawarù idzu iphe, ephe achì k'ememe; tẹmanu mu durwutajẹ phẹ alì, mu riburu angù anunu-a.”

²²Ọo ya bụ; Mòsisu dee ebvu ono mbòku ono; bya eworu iya zia ndu Ízurelù.

²³Chipfu pfiaru Jioshuwa nwa Nunu iphe, oo-me; sù iya: “G'okpehu dukwa ngu; l'i shihu obu ike; kele ọo gubedua e-du ndu Ízurelù laa l'alì ono, mu riburu angù lẹ mu a-nù phẹ ono. Mbèdua e-swiẹru ngu phọ eswiru.”

²⁴Mòsisu dekọtachaephe ekemu-a l'ẹkwo; e -shi l'ishi jeye l'ẹka ọ bvuru;

²⁵o pfiaru oshilokpa Lívayi, bụ ndu apajẹ okpoko oḡbandzu Chipfu; sù phẹ:

²⁶“Unu nata ẹkwo ekemu-a dobe lẹ mgburẹku okpoko oḡbandzu Chipfu, bụ Chileke unu ono; g'ọ nọdu l'ẹka ono agba unu ejo ekebe.

²⁷Kele mu maru g'unu bụ-be ndu ekwefuje ike; waa g'unu bụ-be ndu ejo-okpoma. Ọ -bùru l'unu shiwaa nta-a, mu nọkwadu swiru unu-a bụru ndu kwefuru Chipfu ike; lewarọ g'ọo-dù mẹ mu nwuhuepho!

²⁸Unu kukoberu mu ndu bụ ọgerenya l'okpa-ipfu l'okpa-ipfu nonu g'ephe ha; yẹ ndu-ishi unu; gẹ mu pfua opfu-a ye phẹ lẹ nchì; mu ekua igwe yẹ alì g'ọ bya agbaa phẹ ekebe.

²⁹Kele o dokpọoru mu ẹnya rengurengu lẹ mu -nwuhuchaa bẹ unu a-wata eme ejo umere, rehuru erehu; mbù unu ahaa ọzo-a, mu tũru unu l'ekemu sù g'unu tsoje-a. L'iphu bẹ ejo-iphe a-dapfukwa unu; noo kele unu a-nọdu eme iphe, dù eji l'iphu Chipfu; shi nno gude iphe, unu gude ẹka unu meta kpatsu iya ẹhu-eghu.”

Ebvù, Mòsisu gùru

³⁰Tòbudu iya bụ; Mòsisu shièpho l'ishi gùshiaru phè iphe, e deru l'ebvu ono gbiriri jasù ò bvù. Ndu Ízurelu, dzukòberu nù g'èphe ha nùmakota iya.

Ditoronomi 32

¹Gùbe igwe; ngàberu mu nchì gè mu pfua opfu! Gùbe ali; nùmakwa opfu, shi mu l'ònu!

²G'iphe, mu ezi dzekwaa gè mini. G'opfu, shi mu l'ònu kwakwaa g'iji. G'o dzekwaa gè mini, alwa yegeyege l'irwu èswa; mbù g'o dzekwaa g'oke mini, alwa wòwoowoo l'eli irwu oshi.

³Mu a-rakwa èpha Chipfu arara. Unu janaa èpha Chileke anyi ono ajaja; kèlè ò parù èka!

⁴Ò bụ iya bụ oke mkpuma ono! Iphemiphe, oome nòdu adùebeje ree; tème ụzò iya pfùkotaru nhamunha. Ò bụ Chileke, apfùshije ike l'iphe, o pfuru; òphu ò dudu iphe, apfùduru-òto, oomeje. Ò pfùberekoto; tème obu gù ya ìphóró.

⁵Èphe watawarù eme èjò umere, rehuru erehu l'èka ò nò. Mbù lè ntùcha, dù phè l'èhu meakwaru; òphu èphe abùedu unwu iya. Èphe bürù ògbo, menùkaru èjò-iphe; mbù ògbo, ụzò phè gberu nggò.

⁶? Bù ègube iphe-a bè unu gude apfù Chipfu ụgwo; unubè ndu-a, bụ ndu eswe; bya abürù ndu amadù iphe-a? ? Tòbudu iya bụ nna unu; bya abürù onye meru unu? Mbù-a; ? tò bùdu iya meru unu g'unu a-du; bya emee; unu ngürù angürù?

⁷Unu nyatakwa teke k'ichee! Unu arìja òriri nyata ògbo, ghatawaru nù! Unu jìja nna unu g'èphe kòoru iya unu! Unu ajìkwaa ya phò ndu bụ ògerenya unu; g'èphe kòkwaaru iya phò unu!

⁸Teke Òkalibe-kakòta-shii hèru òhamoha okiphe phè; mbù teke o kekashìru unwu-eliphe; bè ò tù-bugbaaru unwu-eliphe oke èka èphe e-jeberu l'èhu l'èhu; g'unwu Ízurelu habe l'òtu;

⁹kèlè okiphe Chipfu bụ ndibe iya; mbù l'òo ndu Jìékpò bụ okiphe òphu ò hòtaru.

¹⁰Òo l'echiègu bè ò chòru phè chòta; mbù l'òo l'ali, dabyiru mgbegere èka aanugbaa njò òrà; bè ò nò-pheru phè mgburugburu; eleta phè ènya. Ò nwùberu phè ènya g'aanwùbejeru akpuru ènya ojii-a.

¹¹Òo ègube ono, ugo anòduje ephephe èpfune iya; erwuphe l'eli unwu iya-a; mbù ègube ono, òosashije òkù iya pakòo unwu iya; mbù parù phè l'igburònu òkù iya;

¹²bù gè Chipfu nwèkinyi iya duru phè; òphu ò dudu agwa ndu òhòzo, yeru iya èka.

¹³Ò doberu phè l'èka ha l'eli lè mgboko; g'èphe bürù ishi. Ò bürù akpuru-iphe, mìru l'ègu bè èphe riru. Ò mekwaaphò; èphe ria manù-ènwu, shi lè mkpuma; yèe manù, shi l'ali, dù epfu epfu.

- 14Manu ẹra-eswi; yee mini-ẹra aturu; waa nwaturu, tsuru ẹba; yee ebili; waa iphe-dobe, shi l'ali Beshanu; yee egbu; waa okpobe witi be o gudekwapho zu-jia phe-epho. Temẹ epe ngukwaapho mee uswe-uswe, shi l'akpuru vayinu.
- 15Ole Jieshurunu datachaerupho okporokpo; o kwefu ike. O daru okporokpo; bya aduwa bogili-bogili. O tsuwaru onwiya ẹba; temẹ o gbẹ teke ono bya ajika Chileke, meru iya nu. O buru oke mkpuma ono, dzotaruru iya nu ono be o gude weaha gbegele-gbegele.
- 16Epe shi nno kpata; o koaharu phe okophoo k'agwa ndu ohozo epe jetaru dobegba. O buru ahuma ahuma ono, epe eme ono be epe gude mee; ehu ghuahaa ya egbu.
- 17Epe wataru egwe ngweja nu obvu, abudu Chileke; mbu agwa, epe amajeduru; agwa ophuu, bua mgboru nta-a be o futaru; agwa, nna unu oche phe atsujeduru ebvu.
- 18O kwa oke mkpuma ono, zufutaru unu ono be unu gbakutaru azu; mbu l'oo Chileke ono, bu onye nwuru unu ono be unu zoharu.
- 19Tobudu iya bu; Chipfu bya ahuma iphe ono, epe eme ono; bya asoha phe oyi; noo kele unwu iya nwoke; me ke nwanyi be kpatsuru iya ehu-egbu.
- 20O su: "Mu e-wofu phe enya; ge mu humaeshikwa iphe, epe e-mechaa buru. Noo kele epe bu ogbo, uzo phe gberu nggo; mbu unwegirima, ta apfushijedu ike l'iphe, epe pfuru.
- 21Epe gude iphe, abudu Chileke eme ge mu wata eko okophoo; gude unwu agwa, buchaa iphe-mmanu akpatsu mu ehu-egbu. Mu e-gudekwanu oha, abudu okpobe oha meru okophoo ye phe l'ehu; gude oha, eme eswe kpatsu phe ehu-egbu;
- 22kele oke ehu-egbu mu be gbanwuhwaru oku; oku obu jee eke gbiriri jasu l'o kerwua ime ime ali-maa. Oo-kekota mgboko; yee iphe, a kpataru dobe iya; l'o woru oku tua l'eka ubvu futaru.
- 23Mu a-tupyabe phe iphe-ehuka. O buru phe be mu a-ndu awu apfu mu l'ehu.
- 24Mu e-me g'ejo okpa-nri byapfuta phe; l'o mee g'ephe korofu enya. Mu emee; okpomoku erebushi phe anu; ejo iphe-ememe, atuko phe gbushia. Mu e-me g'ejo anu-egbudu gude epyii-eze bya atajashia phe; ejo agwo, awu l'ali, atagbushia phe l'eru.
- 25Ogu-echi be ee-gude egbu phe pyaapya l'etezi. Ndzu-agugu anma phe ehu godagoda l'ime ulo. Unworooby; me unwumboko; me unwegirima nshii; me ndu ewo befuru l'ishi atuko buru mkpurupyata.
- 26Mu shi su le mu achikashi phe; epe edzuru ekameka; bya emee g'a ta nyatabahe phe l'eliphe.
- 27Obenu l'oo ejo opfu ndu ohogu phe be mu ezeru; mbu; a -nonyakwa; ndu ohogu phe pfua iphe, abudu ire-lanu. G'ephe ta anonya wata epfu su: 'L'o kwa epebedua gude eka phe lwu-kpe phe; l'o to bubekwa Chipfu meberu iphemiphe ono!' "

- 28Sụ-a; ndu Ízurelu bukwa ọha, egomunggo swehuru. Ọ tọ dukpoda iphe, edoje phe ẹnya mẹ nanu.
- 29Ome l'ọ duru mmamiphe, du phe l'ẹhu; mẹ iphe-a edokwa phe ẹnya. Mbụ m'ẹphe amakwaru-a g'ọ mechaa nwụaru phe teke ikpazu.
- 30? Denu g'onye lanu e-shi chia unu umadzu labo l'umadzu ukporo iri oso? Mbụ-a; ? denu g'umadzu labo e-shi chia unu umadzu ise oso g'ẹphe gbala; gbahaa l'onye ono, bu Agbara-mkpuma phe ono be gbahawaru phe ẹka; mbụ le Chipfu miwaru phe ẹnya?
- 31Kele mkpuma nkephe ta adudu ge Agbara-mkpuma k'anyi. Ndu ohogu anyi makwaru-a l'oo g'ọ du bu ono.
- 32Vayinu nkephe shi le vayinu ke ndu Sodomu. Ọ buru l'egu ndu Gomóra be akpuru vayinu phe shi. Akpuru vayinu phe nodu egbu egbugbu. Itoto iya nodu atsokota ilu.
- 33Mee phe bukwa obire ejo agwo; teme o buru ejo onu-mini, shi oghu l'onu.
- 34“Mu woru iphemiphe ono kwakobe ree; mbụ le mu kwachiwaru iya l'eka mu doberu ẹku, mu nweru enweru.
- 35Ọ kwa mbedua nwe emelata. Ọo mbedua a-pfu phe ugwo phe. Ọ -beepho teke ono be okpa e-chifu phe. Mbụ le mboke, ẹphe a-buru mkpurupyata noakwa ntse. Ọa-l'iswi gudeakwa oso achi phe kpabe kpabe.”
- 36Ọ kwa Chipfu a-haru ndibe iya enge. Ọ buru iya a-phuru ndu-ozu iya obu-imemini; mẹ o -humaepho l'ike ta aduedu phe mẹ nanu; mbụ l'ọ tọ duedu onye ghuduru nu: ohu mẹ amadu.
- 37Oo-sụ phe: “? Denu agwa phe obu; mbụ mkpuma phe ono, ẹphe agbabaje je anodu eze ndzu?
- 38Mbụ agwa, ataje ebà anu ngweja phe; bya angwa mee ngweja phe ono. G'ọ gbeshinu bya eyeru unu ẹka! G'ọ gbobutanu unu!
- 39Unu humakwa; o kwa mbedua kpoloko bu Chileke! Ọ tọ dukwa Chileke ozo, du nu; gbahaa mbedua. Ọ kwa mbedua emeje g'a nwuhu; teme mu nodu emeje g'a nodu ndzu. Ọo mbedua emekaje iphe; o buru mu emeje g'e wekorohu; ophu o dudu onye adu ike anafu mu onye mu guderu.
- 40Mu paliru ẹka mu mabe l'imigwe ria angu su: Ọo ge mu bu onye a-no ndzu jasụ l'ojejeje-a bu ge mu ephu su:
- 41Mu -baepho ogu-echi mu ono, egbu nwijnwii ono ababa; bya aparu iya l'eka; gude kpeahaa ikpe; be mu e-melata ndu ohogu mu; mbụ pfua ndu kpuru mu ashi ugwo.
- 42Mu e-me ge mee nemadzu nguguchaa apfu mu angugu; mbụ mee ndu e gburu egbugbu; waa ndu a kpuru le ndzu. Teme ogu-echi mu asua nemadzu pyaapya; gbushia ishi ndu bu ndu-ishi ndu ohogu mu ono.”

⁴³Unu tee ęswa; unube ọhamoha! G'unu le ndibe Chileke tee ęswa! Noo kele ọgwata ụgwọ ishi ọchi ụnwu iya. Ndu ọhogu iya be ọo-melata ụgwọ iphe, ẹphe eme iya. L'ọ pfua ụgwọ iphe-ẹji, ndu nkiya meru l'alị iya.

⁴⁴Mosisu ẹphe le Jioshuwa nwa Nunu swiru bata; bya agukota ebvu ono; ndu Ịzurelu l'ophu nưmakota.

⁴⁵Tobudu iya bu; Mosisu pfuchaerupho ndu Ịzurelu iphemiphe ono;

⁴⁶bya asukwa phe pho: “Unu vukwaru opfu-a, mu rarụ unu arara ntanụ-a l'obu. Ọo ya bu; g'unu ezia ụnwu unu g'ẹphe kwabe ẹnya mekotaje iphemiphe, e deru l'ekemu-a.

⁴⁷G'opfu-a ta abukwaru unu opfu, enwedu ishi; kele ọ kwa ẹka ono be ndzu unu no. Ọ buru iphemiphe ono e-me g'unu kariberu nka l'alị ono, unu adagha ẹnnyimu Jiordanu eje alwuta nworu ono.”

Eepfu le Mosisu a-nwuhu l'eli ubvu Nebo

⁴⁸Noo ya bu; Chipfu bya epfuru yeru Mosisu l'eswe mboku ono gedegede su:

⁴⁹“Nyihu ubvu-a, bu ubvu ubvu Abarimu-a; mbu ubvu Nebo, no l'alị Mowabu; bya anodukwapho l'okotazu mkpukpu Jieriko; je ahuma alị Kėnanu, bu alị, mu abya anu ndu Ịzurelu g'ẹphe nworu.

⁵⁰Ọo l'eli ubvu ono, ii-nyihu ono be ii-nodu nwuhu lapfu ndiche ngu phe; egube ono, nwune ngu, bu Eronu nwuhuru l'ubvu Huru; lapfu ndiche iya phe ono.

⁵¹Iphe, a-kpa iya nu buru l'unu no l'echilabo ndu Ịzurelu le mini Meriba ke Kadeshi, no l'echiegu Zinu kwefuru mu ike; mbu l'oo l'unu te emeduru g'a maru ge mu du-be nsọ l'echilabo ndu Ịzurelu.

⁵²Ọo ya meru iphe, bu ụzenya be ii-gbe huma alị ono; ọle i tị bahudu l'alị obu, mu a-nu ndibe mu, bu ndu Ịzurelu ono.”

Ditoronomi 33

Mosisu ago onu-oma anu okpa-ipfu Ịzurelu

¹Qwaa bu onu-oma, onye ke Chileke, bu Mosisu goru nu unwu Ịzurelu teme o nwuhu.

²Ọ suru: “Chipfu shi l'ubvu ubvu Sayinayi bya. Mbu-a; o gbẹ l'uzo alị Siye nwaru phe ke phoo ge nchi-abo. Ọ gbẹ l'ubvu Paranu echiru phe ke swachaswacha; chiru unubuku ndu du nsọ abya; bya aparu oku, enwu enwunwu l'ekutara.

³Su-a; ndiphe be o yeru obu; mbu l'iphe, bu ndu du nsọ nokota iya l'eka. ẹphe nodu adaje kpurumu le mgboru okpa iya; phozeta baaru iya aja. Ọ buru iphe, o pfuru be ẹphe emeje.

⁴Mosisu turu ekemu doberu anyi; o buru okiphe k'oshilokpa Jiokopu l'ophu.

⁵Chipfu buru eze ndu Jieshurunu teke ono, ndu-ishi le Ịzurelu; ẹphe l'okpa-ipfu ndu Ịzurelu l'ehu l'ehu dzukoru ono.

- ⁶Ge ndzụ bukwaru k'okpa-ipfu Rúbenu! G'ò tọ chíhukwa; ophu awa iya epehukwa!”
- ⁷Owaa bụ iphe, o pfuru l'ehu okpa-ipfu Jiuda: “Jiko Chipfu; nūmajekwa olu ndu Jiuda! Dutakwa phẹ dupfuta ndu nkephe; l'i mee g'eka shihuje phẹ ike l'ogu! Jiko yejenuru phẹ aka g'ephe lwu-kpee ndu ohogu phẹ!”
- ⁸Okpa-ipfu Lívayi bẹ o pfuru nkephe; sụ: “Gube Chipfu; menaa g'okpa-ipfu Lívayi tujeru ngu ido, bụ iya bụ tumimu yee urimu ngu; gudeje maru iphe, bụ obu ngu; mbụ ndu i huru ama lẹ Masa; teme gu l'ephe see opfu l'aguga mini Meriba.
- ⁹Oo phẹ pfuru kẹ nna phẹ; yee kẹ ne phẹ; sụ l'ephe ta akpadu phẹ ishi. Ephe mia unwu, ephe nwuru anwunwu enya; mikwaapho unwune phẹ enya. Obenu l'ephe letaru enya mee opfu ngu; bya eletakwapho ogbandzu ngu enya.
- ¹⁰O bụ phẹ e-zije ndibe Jiékopu iphe, i sụru g'e meje. Ephe ezia ndu Ízurelu iphe, i turu l'ekemu. O buru phẹ e-dobejeru ngu unwù-isensu; buru phẹ e-dobeje ngweja-akpo-oku l'oru-ngweja ngu.
- ¹¹Jiko Chipfu; goru onu-oma ye l'akanya, oose! Jiko g'ozi, o gude aka iya jee dujekwa ngu ree! Ndu ono, wu-lihuru etso iya opfu ono; me ndu ono, kpuru iya ashị ono; nyakashinaa phẹ okpu-nka; k'ophu ephe ta adubaedu ike egbeli ishi ozo!”
- ¹²Okpa-ipfu Benjiaminu bẹ o pfuru nkiya; sụ: “Onye Chipfu yeru obu l'a-nodu nokube iya; tūsarū ehū. O buru Chipfu anoduje egbobuta iya eswe l'enyashi. O buru l'echi okpoma Chipfu bẹ oo-nmakojeru.”
- ¹³Okpa-ipfu Jiósefu bẹ o pfuru nkiya; sụ: “G'alì iya bukwaru alì, Chipfu goru onu-oma nū. G'ò kwajeru phẹ eguru iji, shi l'imigwe; l'ò nwuru phẹ mini ime alì shokoshoko.
- ¹⁴G'enyanywu mekwaa g'eguru akpuru-iphe, o koberu l'alì mehuru iya! G'iphe, e meberu l'alì byaru iya gbukugbuku l'onwa l'onwa!
- ¹⁵G'a nukwa iya iphe, kachakpo ree, shi l'úbvú úbvú ndiche ono; yee eguru iphe, shigbaa lẹ nwa-obvù ojejoje onoya!
- ¹⁶G'e gudekwa iphe, kachaa ree, jiru eliphe kebe iya l'oma! Ge Jiósefu tubakwa onye ono l'enya; mbụ onye ono, nọ l'irwu nwoshi ono, enwu oku ono! G'iphemiphe-a bukotakwaru kẹ Jiósefu; onye bụ onye-ishi l'echilabo unwune iya.
- ¹⁷O dū akpabiri g'oke-eswi, vu ụzo l'epho ne iya. Mpu iya dū ge k'atsū. O buru mpu iya ono bẹ oo-gude adu-tsushi ohamoha l'ophu; mbụ je akpaa lẹ ndu bu l'eka igwe beru alì beru. Nokwapho g'unubuku oshilokpa Ifuremu dū; bya abukwarupho nno bụ g'aguta aguta oshilokpa Manáse dū.”
- ¹⁸Okpa-ipfu Zebulun bẹ o pfuru nkiya; sụ: “G'ehu tsoje ngu utso; Zebulun; teke ilufu alufu. G'ehu tsokwa ngu pho; Isaka; me i nodu l'ibe ngu.
- ¹⁹Ephe e-ku ndiphe g'ephe dzukoo l'ubvú. Ephe anodu l'ubvú ono gwee ngweja l'uzo, pfuru oto. O buru iphe-oma, kuru l'eze-enyimu; waa eku, domigbaaru onwiya l'alì-evevee bẹ ephe e-gude buru.”

²⁰Okpa-ipfu Gadu bẹ o pfuru nkiya; sụ: “G'ajaja buru k'onye meru g'alì Gadu jaa àjàjà. Ipfu Gadu tókpoepo nwehu zẹ; kupyabe ishi g'oduma. Iphemiphe, ọ humaru bẹ oozijashije ẹka; zijashia ya ishi.

²¹Ọ họtaru alì, kakọta ree doberu onwiya; kele ọ bụ ẹka oke alì ke ndu-ishi ndu ojogu nọ bẹ ndu-ishi ndu Ízurelu edzukobeje; mee iphe, pfuru ọto l'anya Chipfu; bya edobe iphe, ọ sụru g'e meje.”

²²Okpa-ipfu Danu bẹ o pfuru nkiya; sụ: “Danu bukwa nwa oduma, shi lẹ Beshanu apfu shooshoo eje abya.”

²³Okpa-ipfu Nafutali bẹ o pfuru nkiya; sụ: “Nafutali bẹ tubaakwaru Chipfu l'anya. Teme onu-oma Chipfu bukwarupho nkiya. Oke alì iya bẹ shi l'uzo eze-enyimu Gálili; je akpaa l'uzo ndohali.”

²⁴Okpa-ipfu Asha bẹ o pfuru nkiya; sụ: “G'onu-oma unwu ke Asha kakọta k'unwegirima ozo shii. G'ọ tubakwa unwune iya l'anya. G'okpa iya dekwaru ederu lẹ manu.

²⁵G'iphe, ii-gudeje gu-chia oguzo ngu bukwaru igwè; yee onyirubvu. Ike ngu; yee ujiku ole, ii-nọ a-haerupho enya nhamunha.

²⁶Ọ tọ dukwa onye dụ ge Chileke ke Jieshurunu; onye aghajaje akpaminigwe ẹbo bya eyeru unu ẹka; teme ọ nọdu aduje akpabiri l'eka ogha l'urwukpu.

²⁷Ọ kwa Chiojejoje bụ onye ii-nọduje l'ime iya eze ndzu. Ọ buru oshi-eka ojejoje iya ono bẹ ọodeje ngu lẹ mkpula; kuta; heru eheru. Ọ nọdu achifuje ndu ohogu ngu l'ataphu ngu; sụ ngu: ‘Ngwa; tuko phe gbushia!’

²⁸Ọo ya bụ lẹ ndu Ízurelu e-buru; tūsarū ẹhu; ọ tọ dudu iphe, byaru eme phe nū. Mbū l'eri Jiékpó e-buru mbvulehu phe l'alì, ereshi yee mee dụ. Teme igwe akwaaru phe iya iji.

²⁹Ehutso bẹ a goru nū unubẹ ndu Ízurelu. ? Bụ onye dụ g'unu; unubẹ ndu Chipfu dzotaru? Ọo yẹbedua bụ onye egbobutaje unu; bya aburu onye eyejeru unu ẹka. Ọ bukwarupho yẹbedua bụ ogu-echi, unu gude eku onwunu. Ndu ohogu unu e-gude ndzu-agugu byapfuta unu; unu azopyashia ẹka ephe agwaje iphe azopyashi.”

Ditoronomi 34

Anwuhu Mosisu

¹Noo ya; Mosisu gbẹ lẹ nsuda Mówabu nyihu úbvú Nebo, bụ iya bụ úbvú, kachaa l'eli l'ime úbvú úbvú Pisiga, nọ ghaaru mkpukpu Jieriko iphu. Chipfu bya egoshikota iya alì ono g'ọ ha; a -gbẹ l'alì Giladu jasụ l'alì ndu Danu;

²goshigbua ya alì ndu Nafutali l'ophu; yee alì ndu Ifuremu; waa alì ndu Manáse; mekpoo alì ndu Jiuda l'ophu je akpaa l'eze-enyimu uzo enyanwu-ariba;

³goshigbua ya echiegu ndohali; mekpoo uswe iya ono l'ophu; eshikpoo lẹ nsuda ke mkpukpu Jieriko, bụ iya bụ ndu Oha-mpfu; je akpaa lẹ mkpukpu Zowa.

- ⁴Tɔbudu iya bɔ; Chipfu sɔ iya: “Owaa bɔ alɔ ono, mu riburu Ébirihamu; waa Áyizaku; waa Jiékɔpu angɔ lɛ mu a-nɔ oshilɔkpa phɛ ono. Mu hawaru ngu g'i gude ɛnya ngu hɔma iya; ɔle ɔ tɔ bahɔdu iya abahɔ.”
- ⁵Oo ya bɔ; onye-ozɔ Chipfu ono, bɔ Mósɔsu nwɔhu l'ɛka ono l'alɔ ndu Mówabu; ɛgube Chipfu pfuru iya.
- ⁶O woru iya lia lɛ nsɔda l'alɔ ndu Mówabu l'ɛka nɔ ghaaru mkpɔkpu Bɛtu-Peyɔ iphu; ɔle ɔ tɔ dɔdu onye maru nhamɔnha ɛka e liru iya jasɔ ntanɔ-a.
- ⁷Mósɔsu nɔru ɔkporo apha ishii; tɛme ɔ nwɔhu; ɔle ɔ tɔ phɔjeduru ragaraga; ɔphu ɔkpehu iya alwajɛduru alɔ.
- ⁸Ndu Ízurelu nɔdu lɛ nsɔda Mówabu ono kwaa ɛkwa Mósɔsu ɔkporo abalɔ l'abalɔ iri. ɛphe nɔchaa nno; eswe mbɔku, eegude akwa Mósɔsu bvɔ.
- ⁹Unme mmamiphe bya eji Jioshuwa nwa Nunu ɛhu; noo kɛle Mósɔsu byiberu iya ɛka l'ishi. Ndu Ízurelu nɔdu emeje iphe, o pfuru; ɛphe shi nno mekɔtaephe iphe ono, Chipfu tɔru Mósɔsu ekemu iya ono.
- ¹⁰Eshi teke ono ta adɔkwa onye mpfuchiru, fɔtajeru l'alɔ Ízurelu, dɔ gɛ Mósɔsu; mbɔ onye Chipfu maru iphu l'iphu.
- ¹¹O tɔ dɔdu onye dɔ g'oo ya l'eme iphe-ɔhumalenya; yɛɛ iphe, dɔ biribiri, bɔ ɔphu Chipfu ziru iya; o je emeshia l'alɔ Ijiputu; mbɔ meeru Fero; yɛɛ ndu-ozɔ iya; mɛ ndu alɔ iya l'ophu.
- ¹²Ophu ɔ dɔdu onye dɔ gɛ Mósɔsu l'enweru oke agburɛhu; yɛɛ eme iphe, parɔ ɛka bya adɔ ebvu l'ɛnya, bɔ ɔphu ɔ nɔ l'iphu ndu Ízurelu l'ophu meshia.

Jioshuwa

Jioshuwa 1

Chipfu ezi Jioshuwa ozi

¹Tɔ̀budu iya bụ; onye-ozì Chipfu, bụ Mòsìsù nwùhuchaep̄hò; Chipfu sù Jioshuwa nwa Nunu, bụ onye shì anòduje eyeru Mòsìsù ẹ̀ka:

²“Onye-ozì mu, bụ Mòsìsù bẹ̀ nwùhuwaru nù. Nta-a bụ̀kwa g'ì gbẹ̀shi; g'unu lẹ̀ ndu Ízurùlù l'ophu je adaa ẹ̀nyimu Jìdànu-a bahu l'alì onò, mu abya p̄hẹ̀ anunu onò.

³Iphẹ̀, bụ̀kpoo ẹ̀ka unu zòru ọ̀kpa bẹ̀ mu a-nùkota unu, bụ̀ iya bụ̀ gẹ̀ mu pfuru iya Mòsìsù.

⁴Alì unu a-gbẹ̀ l'echiẹ̀gu nòdu jasù l'úbvù úbvù Lébanonu l'ẹ̀ka onò. L'ọ̀ gbẹ̀kwapho l'oke-ẹ̀nyimu Yufurétìsù nòdu je akpaa l'oke eze-ẹ̀nyimu, nò l'uzo ẹ̀nyanwu-arìba. Alì ndu Hetu l'ophu ayìkwaru iya phò.

⁵Ọ̀ tọ̀ dụ̀kpodaa onye byaru adù ike pfuchia ngu ụ̀zo gbiriri jasù teke ìi-nò-beru. Ọ̀ ẹ̀gube onò, mu shì swiru Mòsìsù onò bụ̀ gẹ̀ mu e-swikwaru ngu phò; ophu mu abyadu aha ngu nwẹ̀kinyi ngu; tẹ̀me ophu mu agwọ̀bekwa ngu.

⁶“G'obu shihu ngu ike; gẹ̀ ndzù ba agụ̀kwa ngu; noo kẹ̀le ọ̀o gụ̀bedua bẹ̀ e-duru ndu-a je g'ẹ̀phe je anata alì onò, mu riru nna p̄hẹ̀ oche angù lẹ̀ mu a-nù p̄hẹ̀ onò.

⁷Ọ̀o ẹ̀pho g'obu shihukwa ngu ike; gẹ̀ ndzù ba agụ̀kwa ngu agùgu ophu. Ọ̀o g'ì kwabẹ̀ ẹ̀nya dobekọ̀ta ekemu onò, onye-ozì mu, bụ̀ Mòsìsù nùru ngu onò. Ta agbakutakwaru iya azù; ophu i yekwarù iya ẹ̀ka lanù. Ọ̀o ya bụ̀ g'upete agbajeru ngu l'ẹ̀kameka i jekpọ̀ru.

⁸Ta ahakwa ẹ̀kwo ekemu onò g'ọ̀ gbatehu ngu l'onu. Rije iya l'oriri eswe l'enyashi; ọ̀o ya bụ̀ l'i-leta ẹ̀nya mekọ̀taje iphemiphe, e deru l'ime iya. Ọ̀o ya bụ̀; g'ẹ̀so etsoje ngu l'iphemiphe, iimekpọ̀o ememe; upete agbakwaaru ngu phò.

⁹? Tọ̀ bụ̀naa mbẹ̀dua sùru g'obu shihu ngu ike? Gẹ̀ ndzù ba agùshi ngu; ophu meji atọ̀fukwa ngu. G'ọ̀ tọ̀ dụ̀kwa teke ìi-la azù azù. Noo kẹ̀le Chipfu, bụ̀ Chileke ngu bẹ̀ e-swiru ngu nù l'ẹ̀kameka iijekpọ̀.”

¹⁰Jioshuwa bya ezia ndu-ishi ndu Ízurùlù sù:

¹¹“Unu jedzuru ẹ̀ka ndu Ízurùlù kpọ̀beru ụ̀lo-ẹ̀kwa p̄hẹ̀ je epfuaru p̄hẹ̀ g'ẹ̀phe kwakọ̀be nri eriri p̄hẹ̀ ree; kẹ̀le o ghuduru ujiku ẹ̀to; unu adaa ẹ̀nyimu Jìdànu je anata alì onò, Chipfu bụ̀ Chileke unu a-nù unu; g'ọ̀ bụ̀ru k'unu onò.”

¹²O be l'ọ̀kpa-ipfu Rúbenu; waa ọ̀kpa-ipfu Gadu; waa unwunna ọ̀kpa-ipfu Manáse, e keru ẹ̀bo; Jioshuwa sù p̄hẹ̀:

¹³“Unu nyatakwa ekemu, onye-ozì Chipfu, bụ̀ Mòsìsù tũru nù unu g'unu meje! Chipfu, bụ̀ Chileke unu abya eme g'unu tũta unme; woru alì-a nù unu g'ọ̀ bụ̀ru k'unu.

¹⁴Oo ya bu l'unyomu unu; waa unwegirima unu; me iphe-edobe unu be a-nodu l'ali pho, Mosisu nuru unu l'uzo enyanwu-awawa enyimu Jiordanu pho. Obenu le ndu alwuru unu ogo be e-vuru unwunna unu-a uzo dafuazu iya ophuu; je eyeru unwunna unu aka;

¹⁵gbiriri jasu teke Chipfu e-me g'ephe tuta unme; g'o meru unubedua; bya emee; ephe anata ali ono, Chipfu, bu Chileke unu a-nu phe g'o buru nkephe ono. Teke e mecharu; unu alaphuwaro azu je eburu l'ali k'ono, onye-ozu Chipfu, bu Mosisu nuru g'o buru k'unu l'azu enyimu Jiordanu azu iya ophuu; l'uzo enyanwu-awawa."

¹⁶Ephe su Jioshuwa: "Iphemiphe, i suru g'anyi mee be anyi e-mekotaje. Eka i suru g'anyi je be anyi e-je.

¹⁷Oo egube ono, anyi ngabekotaru Mosisu nchi l'iphemiphe ono bu g'anyi a-ngabejeru ngu iya. Ole o ephe go Chipfu, bu Chileke ngu no-kube ngu; g'o shi no-kube Mosisu.

¹⁸Onye jikakporu l'o too medu opfu ngu; m'obeta o buru gunu be i ziru iya be eegbuje egbu. Ole o bukwapho g'obu shihu ngu ike; ophu ndzu agukwa ngu!"

Jioshuwa 2

Réhabu; yee ndu ngge

¹Noo ya; Jioshuwa nwa Nunu bya agbe le Shitimu zia ndu ngge labo le mpya. Su phe: "Unu je agbaphee ali ono; kekelekphe ke mkpukpu Jieriko." Tobudu iya bu; ephe tugbua bya eje abahu l'ulo ibe nwanyi ovuoba, aza Réhabu je anodu.

²Ama bya agbaaru eze ndu Jieriko su l'o nwekwaru ndu Izurelu bataru le mkpukpu-a l'uzenyashi-a; bya anwu ngge l'ali-a.

³Eze ndu Jieriko bya ezia ozi su g'e je asu Réhabu g'o je achifuta unwoke ono, bataru ibe iya ono; noo kele ephe byaru anwu ngge l'ali-a l'ophu.

⁴Obenu l'e jeshiaru; nwanyi ono dutawa unwoke labo ono je ewoha. O su phe: "Unwoke ono byakwaru-a; ole mu ta amakwa aka ephe shi bya.

⁵O be l'uzenyashi; g'o rwwaru mgboru teke aabya agu-chi oguzo mkpukpu; ephe tugbua. Ophu mu amaekwa ibe iya ophu ephe shiru. O -buru l'unu tugburu nta-a gbakwaseru uzo be unu a-gbapfukwa phe-a l'uzo."

⁶(Ama l'o dutaru phe je ewohaa le mkpula oghu oghaa, a susagbaaru l'eli ulo ono.)

⁷Unwoke ono gbakwaseru uzo, eeshije je adaa enyimu Jiordanu; jeshia achu ndu ngge ono. Ephe lufuepho azu mkpukpu; e woru oguzo mkpukpu ono gu-chia.

⁸Ndu ngge ono bya l'ala l'ulo; nwanyi ono byapfuta phe l'eli ulo ono;

⁹bya asu phe: "Mu mawaru le Chipfu nwaru unu ali-a. Akpabiri unu gudewaru anyi g'anyi hakota. Ndu bukota l'ali-a be anmakota rwwuru l'eka ephe atsuzo unu ebvu.

- 10**Anyi n̄mawaru ḡe Chipfu gude meeru unu gbororo l'echi Eze-̄nyimu Uswe-uswe l̄e teke unu shi l'al̄i ndu Ijiputu wufuta; waf̄ua g'unu woru eze ndu Am̄oru umadzu lab̄o ono, b̄u Sih̄onu; waa Ogu mee umerekete l'uzo ̄nyanwu-awawa ̄nyimu Jīodanu.
- 11**Anyi n̄machaa nno; meji tofu anyi; ike bv̄ukwapho anyi l'opfu ̄hu unu; noo k̄ele anyi maru l̄e Chipfu, b̄u Chileke unu b̄u Chileke k'imigwe; waa k'eliphe.
- 12**Nta-a bukwa g'unu gude ̄pha Chipfu riaru mu nte l'unu e-meru mu l̄e ndibe mu iphe-oma; eshinu mb̄edua mekwarupho unu iphe-oma. Unu an̄u mu iphe-ohubama iya;
- 13**l'unu a-dz̄o nna mu ndz̄u; waa ne mu; waa unwune mu nwoke; waa unwune mu k̄e nwan̄ȳi; mekpoo ndibe anyi l'ophu; mb̄u l'unu a-dz̄ota anyi g'anyi ta anw̄uhu.”
- 14**̄p̄he s̄u iya: “Anyi e-gude k̄ele i dz̄oru anyi ndz̄u; dz̄oo ndz̄u nkengu. O -b̄uru l'o to nwedu onye i pfuru iphe, anyi byaru ememe-a; b̄e Chipfu -n̄ep̄ho anyi al̄i ono b̄e anyi e-doberu ngu ire-lan̄u meeru ḡu l̄e ndibe ngu iphe-oma.”
- 15**O bya epyofu eri l̄e windo; ̄p̄he gude iya ̄ka lufu az̄u iya ophuu; noo k̄ele o bu l'ulo, a kpuru l'eli igbul̄o, e gude kp̄u-pee mkp̄ukpu ono mgburugburu.
- 16**O s̄u p̄he: “Unu t̄ugbukwaa je ewohaa onwunu l'ubv̄u ḡe ndu ono, ach̄o unu ono ta ah̄uma unu. Unu wohaa onwunu l'̄eka ono ujiku ̄to ḡe ndu ono lwaphutaada az̄u; t̄eme unu at̄ugbuwaro jeshia iphe, unu eje.”
- 17**Unwoke ono s̄u iya; “Nte-a, i meru anyi ria tee gudekwa anyi;
- 18**gbahaa l'anyi byatash̄iaru; i lipfube eri-a, d̄u uswe-uswe-a, i gude yeru anyi ̄ka; anyi nyifu-a l̄e windo, anyi pyoru ono. T̄eme i duta nna ngu; ȳe ne ngu; waa unwune ngu; mekpoo ndibe ngu l'ophu dobe l'ulo ngu.
- 19**Onye t̄ugburu lufu gbororo; iphe me iya; b̄e bukwa iya paa ishi ̄chi onwiya; o to bukwa anȳibedua. Oo ndu ophu n̄o l'ime ulo ngu ḡedegede b̄e anȳibedua paa ishi ̄chi p̄he m'o d̄uru onye denyiru p̄he ̄ka.
- 20**Ole o -bukwanuru l'i t̄ugburu je epfukash̄ia iphe, anyi byaru ememe-a; b̄e nte ono, i suru g'anyi riaru ngu ono tee gudekwa anyi.”
- 21**O s̄u: “Ee! Mu kwetar̄u!” G'o d̄u g'unu pfuru; o dufu p̄he; ̄p̄he t̄ugbua. O wota eri uswe-uswe ono lipfube l̄e windo ono.
- 22**̄p̄he t̄ugbua je ewohaa onwop̄he l'ubv̄u ujiku ̄to; gbiriri jas̄u ndu ach̄i p̄he n̄u ch̄okota p̄he l'uzo ono; ophu ̄p̄he ah̄umaduru p̄he; ̄p̄he laphu az̄u.
- 23**Noo ya; unwoke lab̄o ono bya af̄uta; o b̄uru p̄he alala. ̄p̄he bya akp̄o-zeta l'okpa ubv̄u ono; bya adaa ̄nyimu lapfushia Jioshuwa nwa Nunu. ̄p̄he je ak̄okotaru iya iphe, nw̄ukotaru p̄he n̄u.
- 24**̄p̄he s̄u Jioshuwa: “Al̄i ono g'o ha b̄e Chipfu woakwaru ye anyi l'̄eka. G'̄p̄he ha t̄ukoep̄ho aph̄u k̄e kpaakpaakpaa l'̄eka ndz̄u anyi aḡu p̄he.”

Jioshuwa 3

Ndu Ízurelu awuḡha ɛnyimu Jiɔdanu

¹O be l'ɔnmewa-utsu; Jioshuwa; yele ndu Ízurelu g'ɛphe ha wufu le Shitimu; jeshia ɛnyimu Jiɔdanu. Ɛphe woru ɔlo-ɛkwa phe kpɔbegba l'ɛka ono g'ɛphe nɔduadaa; teme ɛphe aghaa ɛnyimu ono.

²A nɔepho ujiku ɛto; ndu-ishi ndu ojogu bya ejedzukoṭaru ɛka ɛphe doru ono;

³bya asu ndu Ízurelu: “Unu -humaepho okpoko oḡbandzu ke Chipfu, bu Chileke unu; waa ndu-uke, bu phe bu oshilokpa Lívayi l'ɛka ɛphe pa iya; unu wu-lihukwa l'ɛka unu nɔ tsoru iya.

⁴Oo ya bu g'unu amaru ɔzo, unu e-shi; eshi ophu unu teke eshiswee ɔzo owa-a. O le g'unu te etsokubekwa iya ntse ntse. Unu a-kparu unu nkwo-ɛka ise yeru okpoko ono.”

⁵Noo ya; Jioshuwa su ndu ono: “Unu doo onwunu nsɔ; noo kele echele be Chipfu e-me iphe, du biribiri l'echilabo unu!”

⁶Jioshuwa su ndu-uke: “Ngwa; unu pata okpoko oḡbandzu ono ghata ndu Ízurelu vuru ɔzo!” Ɛphe bya apata iya ghata vuru ɔzo.

⁷Chipfu su Jioshuwa: “Ntanu-a be mu e-kutse ngu l'atatiphu ndu Ízurelu g'ɛphe ha; k'ophu ɛphe a-maru le mu nɔ-kube ngu egube ono, mu shi nɔ-kube Mosisu ono.

⁸Pfuaru ndu-uke, pa okpoko oḡbandzu su phe: ‘Teke unu rwuru ɛnyimu Jiɔdanu; unu rwuba l'ime ɛnyimu ono je apfuru!’ “

⁹Jioshuwa su ndu Ízurelu: “Unu dzua l'ɛka-a bya angabe nchi l'opfu Chipfu, bu Chileke unu.

¹⁰Waa g'unu e-shi maru le Chileke ophu dzu ndzu bu l'echilabo unu baa; teme l'ochifuru unu ndu Kėnanu; waa ndu Hetu; waa ndu Hevu; waa ndu Pėrezu; waa ndu Gigashi; waa ndu Amoru; waa ndu Jiebusu.

¹¹Unu huma l'okpoko oḡbandzu ke Chipfu ophu nwe mgboko l'ophu be e-vuru unu ɔzo rwuba l'ɛnyimu Jiɔdanu.

¹²Nta-a bukwa g'unu ho unwoke nanu nanu l'okpa-ipfu l'okpa-ipfu; hota umadzu iri l'ɛbo dobe.

¹³Ndu uke, pa okpoko oḡbandzu Chipfu; Chipfu ophu nwe mgboko l'ophu; -yeepho okpa le Jiɔdanu; be mini ono, aso ala l'uzo ndohali ono e-bukahu ɛbo kpua oronmono.”

¹⁴Oo ya bu; ɛphe bya aphokashia ɔlo-ɛkwa phe g'ɛphe daa ɛnyimu Jiɔdanu; ndu-uke bya apata okpoko oḡbandzu ghata vuru ɔzo.

¹⁵Teke ono be ɛnyimu Jiɔdanu byakporu utso shingushingu; kele o bu teke eemeta iphe, e meberu l'alı. O le ndu-uke Chileke, pa okpoko ono rwubaerupho l'ɛnyimu Jiɔdanu; mbu l'oo ɛpho erwurwu, okpa phe erwu le mini ono;

¹⁶mini, shi l'ishi nggele so-buhu asoso. Mini ono bya akocha obvudu urenya urenya le mkpukpu Adamu, no le mgboru Zaretanu; mini ono, aso ala le Eze-enyimu nsuda Araba, bu iya bu Eze-enyimu Unu tabuha ebo. Oo ya bu; ndu Izurelu bya awughaa dafuazu iya ophuu gha iphu le mkpukpu Jieriko.

¹⁷Ndu uke, pa okpoko oghandzu Chipfu ono; paru iya pfuru pfushia ike l'echilabo enyimu Jiordanu, buwaa ali okponku ono; ndu Izurelu nodu awugha. Epe pfuru gbiriri jasu oha ono l'ophu jekota ije ghata l'echilabo enyimu Jiordanu ono, buwaa ali okponku ono.

Jioshuwa 4

Mkpuma, e gude anyata iphe, Chipfu meru

¹Ndu Izurelu ghatagbuchaepho enyimu Jiordanu; Chipfu bya efulu yeru Jioshuwa su iya:

²“Hoo unwoke nanu nanu l'okpa-ipfu l'okpa-ipfu; hota umadzu iri l'ebo l'echilabo ndu Izurelu;

³zia phe g'ephe pata mkpuma iri l'ebo l'echilabo enyimu Jiordanu l'eka ndu-uke Chileke pfuru. G'ephe pata mkpuma ono pafuta l'enyimu ono; paru jeshia eka unu akwa. Epe -rwua; epe atuko zia mkpuma ono l'eka ono.”

⁴Oo ya bu: Jioshuwa bya ekukobe unwoke iri l'ebo ono, o horu nanu nanu l'okpa-ipfu l'okpa-ipfu ndu Izurelu ono;

⁵bya asu phe: “Unu tugbua je l'eka ono, a pa okpoko oghandzu Chipfu, bu Chileke unu pfuru l'echilabo Jiordanu ono. Unu je apatachaa mkpuma lanu mkpuma lanu nmakobechaa l'ukuvu; gbiriri jasu unu apatazua ya okpa-ipfu iri l'ebo, ndu Izurelu du.

⁶Ono aburu iphe-ohubama, unu doberu l'echilabo unu; k'ophu bu teke unwu unu, eje l'iphu jiru nna phe su: ‘? Bu gunu be unu dobedoru mkpuma owa-a?’

⁷Unu asu phe le teke e gude okpoko oghandzu Chipfu rwubata l'enyimu Jiordanu be enyimu ono tabuharu ebo. Mbua l'okpoko ono daerupho enyimu Jiordanu; mini ono tabuha ebo. Mkpuma ono bu iphe, ndu Izurelu e-gudeje nyata iphe ono, nwuru nu ono jasule tuutuutuule mijimiimii.”

⁸Oo ya bu; ndu Izurelu bya emee ge Jioshuwa ziru phe; je apata mkpuma iri l'ebo l'echilabo enyimu Jiordanu, bu iya bu g'okpa-ipfu Izurelu ha; bya aburu ge Chipfu pfuru iya Jioshuwa. Epe paru mkpuma ono ghaa enyimu Jiordanu; je edobe l'eka epe kwaru.

⁹Jioshuwa bya apakobe mkpuma iri l'ebo l'echilabo enyimu Jiordanu l'enyoru pho, ndu-uke Chileke, shi paru okpoko oghandzu Chileke pfuru pho. O noekwapho l'eka ono byasu ntau-a.

¹⁰Ndu uke, pa okpoko ono pfukpoerupho l'echilabọ ẹnnyimu Jiódanu ono gbiriri jasụ ndu Ízurelu mekọta iphe, Chipfu sụru Jioshuwa g'e mee. E meebekota iya gẹ Mósisi tūru Jioshuwa ọnu sụ g'e mee ya. Nokwaphọ gẹ ndu Ízurelu wụru ẹgwegwa wughaa.

¹¹Ephe wughataepho je akuru l'azụ iya ọphuu; ele ẹnnya; ndu-uke parụ okpoko ogbandzu Chipfu lufuta nkephe.

¹²Ndu okpa-ipfu Rúbenu; waa kẹ Gadu; waa ndu okpa-ipfu Manáse, e keru ẹbo; bya akwaa onwophe ngwogu gẹ Mósisi sụru g'ephe mee; wufuta bya awughaa l'ataphu unwu Ízurelu.

¹³Ndu kwarụ onwophe ngwogu wughata l'ataphu Chipfu, bụ ndu kwakoberu k'ogu; wuru jeshia lẹ baswaa alị, nọ lẹ mgboru mkpukpu Jieriko; dụ ukporo unu unwoke ise.

¹⁴Mbọku ono bẹ Chipfu tuliru Jioshuwa ẹka l'eli l'ataphu ndu Ízurelu. Ephe wata akwabẹ Jioshuwa ùbvù. Ọ buerupho g'e shi akwabẹ Mósisi ùbvù bụ g'a kwaberu iya ya jasụ ọ nwuhu.

¹⁵Noo ya; Chipfu bya epfuru nụ Jioshuwa sụ iya:

¹⁶“Ngwa; kawaruro ndu-uke, pa okpoko-ekemu ono g'ephe lufutawaro l'enyimu Jiódanu l'eka ono, ephe pfuru ono.”

¹⁷Tobudu iya bụ; Jioshuwa bya akaru ndu-uke ono sụ phe: “Ngwa; unu shiwaro l'enyimu Jiódanu ono futa!”

¹⁸Tobudu iya bụ; ndu-uke Chileke parụ okpoko ono lufuta. Ọ buerupho azobe okpa phe l'eli mgboko; mini ẹnnyimu Jiódanu ono sogbabe; bya abyaa utso; bya adu g'o shihawaa dụ.

¹⁹O -rwua lẹ mbọku, ọnwaa mbụ dụ l'abalị iri; ephe gbẹ l'enyimu Jiódanu jeshia mkpukpu Gilugalu lẹ mgboru oke alị mkpukpu Jieriko l'uzo ẹnyanwu-awawa.

²⁰Jioshuwa woru mkpuma iri l'ẹbo, a pataru l'enyimu Jiódanu ono; woru kpokobe lẹ Gilugalu.

²¹Ọ sụ ndu Ízurelu: “O -rwuepho l'ataphu; teke unwu unu a-ji unu sụ: ‘? Bụ gunu bẹ e dobedoru mkpuma ọwa-a?’

²²Unu asụ phe l'unwu Ízurelu gharu ẹnnyimu Jiódanu l'alị okponku.

²³Kele Chipfu, bụ Chileke unu meru oma ẹnnyimu ọ kpọhu nkụ l'iphu unu gbiriri jasụ unu wughakota. Ọo ephe iphe ono, Chipfu, bụ Chileke unu meru lẹ Eze-ẹnnyimu Uswe-uswe ono bẹ o meru l'enyimu Jiódanu ono. Mbụ teke ono, o meru Eze-ẹnnyimu Uswe-uswe ọ tabuha; oma alị iya kpọhu jegiri-jegiri nọo jasụ anyi tuko wughakota ono.

²⁴Iphe, kparụ iphe, o meru iya bụ g'unwu-eliphe amaru lẹ Chipfu nweru okpehu; ọo ya bụ g'unu atsujẹ Chipfu, bụ Chileke unu ebvu.”

Jioshuwa 5

¹Tɔbudu iya bụ; eze ndu Amọru, bu l'uzo ẹnyanwu-arịba ẹnnyimu Jiódanu; waa eze ke ndu Kénanu, bu le mgboru eze-ẹnnyimu; nũaaepfo le Chipfu meru oma ẹnnyimu Jiódanu kpọhu nkụ; unwu Ízurelu bya awughá g'ephe hakọta; ndzụ rwuta pẹ. Akpabiri unwu Ízurelu ono mee; ophu uvohu adukpoedu pẹ ililekpoo.

Ndu Ízurelu ebushi úbvù le Gilugalu

²O buru teke ono be Chipfu suru Jioshuwa: “Gude mma, atsu nkọ bushia unwu Ízurelu úbvù! Ono bu k'ugbo ẹbo, e buru udu úbvù ono le Ízurelu.”

³Oo ya bụ; Jioshuwa bya egude mkpuma mee mma gude bushia unwu Ízurelu úbvù le Úbvú Akpapyị ono.

⁴Waa iphe, meru g'o gude Jioshuwa bushia pẹ úbvù baa: Unwoke, shi l'alì Ijiputu futa; mbụ ndu suru eje ogu be nwushihukotarunu l'echiegu, g'ephe shichaepfo l'alì Ijiputu lufuta.

⁵Iphe, bukota ndu ono g'ephe ha be bushikotaru úbvù. Obenu l'unwegirima, a nwuru l'echiegu teke ephe shiwaa l'alì Ijiputu lufuta be e te buduru úbvù.

⁶Kele unwu Ízurelu noru ukporo apha labo l'echiegu. Unwu Ízurelu, bu ndu suru eje ogu; mbụ ndu ono, shi le Ijiputu futa ono nodu l'eka ono nwushihu-gbua; kele ephe te ekwedu mee iphe, Chipfu suru g'ephe mee. Oo ya bụ; Chipfu ria nte su l'ephe ta abyadu ahuma alì ono, ya kweru nna pẹ oche ukwe le ya a-nu pẹ; mbụ alì, manụ-ẹnwu yele ẹra-eswi aso gborogboro.

⁷Noo ya; o mee unwu pẹ bya evutachaa nochia ẹnya nna pẹ. O buru ndu ono be Jioshuwa bushiru úbvù-a; kele ephe shi buru akpapyị; l'e te buduru pẹ úbvù teke ephe eje l'echiegu.

⁸E bushichaa ephebe oha ophu ono úbvù g'ephe ha; ephe nodu l'ulo-ekwa pẹ nyaa ya gbiriri jasụ ephe ka mma.

⁹No iya; Chipfu su Jioshuwa: “Ntanu-a be mu swafuwaru unu iphere ono, shi unu le teke unu gbeshiru l'alì Ijiputu ono!” Oo ya bụ; e woru eka ono gwa Gilugalu, bu iya bu “eswifu.”

¹⁰O buru teke ndu Ízurelu no le Gilugalu be ephe boru obo Ojeghata; l'uzenyashi mboku, onwa ono duepho abalì iri l'eno; le baswaa alì, no le mgboru mkpukpu Jieriko.

¹¹O be le nchitabohu mboku obo Ojeghata; ephe ria iphe, shi l'alì ono. Ephe taru buredi, ekoduru ekoko; bya ataa akpe, a huru ahuhu.

¹²A -gbẹ le mboku, ephe beberu wata eri iphe, shi l'alì ono be mana dabuhuru. Ophu mana adabaeduru ndu Ízurelu; ephe gbẹ l'apha ono rikwaseru nri, a kotaru l'alì ndu Kénanu.

Jioshuwa yee onye pa ogu-echi

¹³Jioshuwa noduepho le mgboru mkpukpu Jieriko l'eka ono; o palia ẹnya huma nwoke, mitawaru ogu-echi iya paru l'eka pfuru iya l'atatiphu. Jioshuwa bya ejepfu iya su: “? I bu anyi? Too ? I bu ke ndu ohogo anyi?”

¹⁴Q sù iya: “Waawakwa; mu bükwa onye-ishi ndu ojogu ke Chipfu. O buru iphe ono be mu byaru.” Jioshuwa bya adaa kpurumu; woru iphu kpube l'alì baaru iya eja bya asu iya: “? Bu gunu be Nnajiuphu ziru mube onye-ozì iya?”

¹⁵Onye-ishi ndu ojogu Chipfu ono sù Jioshuwa: “Yefu akpokpa ngu; kele eka ono, i pfuru ono bükwa eka du nsò!” Jioshuwa kwe doo bya emee g'o pfuru.

Jioshuwa 6

Adada Jieriko

¹Tobudu iya bu; ndu mkpukpu Jieriko woerupho onuzo eka eeshije abahu l'ime mkpukpu phe tu-chia. Ophu o duedu onye abata abata; ophu o duedu onye alufu alufu; l'eka ephe atsù ndu Ízurelu ebvu.

²No iya; Chipfu sù Jioshuwa: “Humakwa; mu woakwaru mkpukpu Jieriko yee onye eze phe; yee ndu ojogu phe; ye ngu l'eka.

³Chita ndu ojogu ngu g'unu je azo-pee mkpukpu ono mgburugburu ugbo lanu le mboku. Unu emee ya nno abali ishii.

⁴Ndu uke Chileke umadzu esaa apagbaaru opu mpu ebili l'ehu l'ehu; vuru uzo; aaparu okpoko ogbandzu etso phe. O -be le mboku k'esaa; unu ejephee mkpukpu ono mgburugburu ugbo esaa. Ndu uke atuko wata egbu opu ono.

⁵Teke ephe gbuerupho opu ono mkpeelanu; ndu Ízurelu numa opu ono; ge ndu Ízurelu l'ophu wata agbo ogboo ehuka ehuka. Noo teke igbulu mkpukpu ono e-zekposhihu; onyemonye echebepho iphu nhamunha.”

⁶Noo ya; Jioshuwa nwa Nunu bya ekua ndu-uke Chileke bya asu phe: “Unu je apata okpoko ogbandzu Chipfu paru. Ge ndu-uke Chileke umadzu esaa gudegbaa opu mpu ebili l'ehu l'ehu; vuru uzo; unu aparu okpoko-ogbandzu Chipfu ono etso phe.”

⁷O bya edzukobe ndu Ízurelu sù phe: “Unu wu-lihu jephee mkpukpu ono mgburugburu. Ge ndu gude ngwogu vuru uzo; ge ndu pa okpoko ogbandzu Chipfu nodu etso phe!”

⁸Jioshuwa ziebechaa phe iya egube ono; ndu-uke esaa, pa opu mpu ebili l'ehu l'ehu; bya evuta uzo; egbu opu ono l'atatiphu Chipfu. Okpoko ogbandzu Chipfu nodu etso phe.

⁹Ndu kwaru ngwogu bya awughata ndu-uke, egbu opu ono awughata je evuta uzo. Ndu ojogu ozo nodu etso okpoko ogbandzu. Ndu uke Chileke ono nodu egbuepho opu ono eje l'iphu l'iphu.

¹⁰Jioshuwa pfuhawaru phe sù phe g'o to dukwa onye a-gbo ogboo; ophu e chikwa mkpu; gbiriri jasù mboku, ya a-sù g'ephe gbowaro ogboo; teme ephe agbowaro ogboo.

- 11** Oo ya bu; ephe byanu apata okpoko ogbandzu Chipfu ono bya egude iya wu-pee mpukpku ono. Ephe wu-pee mpukpku ono mgbo lanu; bya awu-phu azu l'eka ephe doru je azeshia.
- 12** O -rwua l'onmewa-utsu echele iya; Jioshuwa gbeshi; ndu-uke gbeshi; pata okpoko ogbandzu Chipfu.
- 13** Ndu uke esaa, gudegbaa opu mpu ebili l'ehu l'ehu nodu egbu opu ono eje l'ataphu okpoko ogbandzu Chipfu ono. Ndu chi ngwogu vuru uzo; ndu ojogu ozo nodu awu etso phe l'azu.
- 14** Le mboku k'ebo ono; be ephe wufutaru; bya awu-pee mpukpku ono mgburugburu mgbo lanu; bya awu-phu azu l'eka ephe doru. Ephe wu-pee nno abali ishii.
- 15** O be le mboku k'esaa; ephe gbeshi l'onmewa-utsu; je awu-pee mpukpku ono mgburugburu g'ephe awu-phejehawa iya. Ole mboku ono be ephe wu-pheru iya ugbo esaa.
- 16** Ephe noduepho le k'ugbo esaa ono; ndu-uke woru opu phe gbua; Jioshuwa su unwu Izurelu: "Unu tua okoo; kele Chipfu wowaru mpukpku-a yee unu l'eka!"
- 17** Le mpukpku ono; me iphemiphe, no iya nu; be a nmaru mpurophu dobe g'e mebyiaru Chileke g'o buru iya iphe ngweja. Oo ephe nwanyi ovuoba ono, bu Rehabu be aa-ha; yee onyemonye, nokpoo l'ulo iya; noo kele o woharu ndu ngge, anyi zijeru pho.
- 18** Ole unu kwabekwa enya g'o to dukwa iphemiphe ono, e doberu k'emebyishi ono, unu e-wota k'enworu; odumeka be unu e-mekwa onwunu g'unu buru ndu e doberu k'emebyishi; kele unu wotaru iphe, e doberu k'emebyishi; unu emee; ndu Izurelu l'ophu aburu iphe, e doberu k'emebyishi; shi nno kpataru phe opfu.
- 19** Obenu l'iphe, bu mpuola-ochaa; waa mpuola-ododo; waa iphe, e meru l'onwirubvu; ozoo l'igwe; duchaaru Chipfu nsu. Ndu k'ono be ee-gweta dobe l'ulo-eku ke Chipfu."
- 20** Ndu Izurelu bya agbo ogbo. Mbui l'opu ono wataerupho adada; ephe tuko g'ephe ha wata agbo ogboo; igbulu, e gude kpu-pee mpukpku ono mgburugburu zekposhihu buru l'ali gwoo. Unwu Izurelu wuba l'ime mpukpku ono; onyemonye chebeepho iphu nhamunha; ephe lwua mpukpku ono lwuta.
- 21** Tobudu iya bu; ephe tuko iphemiphe, du le mpukpku ono mebyishikota; unwanyi me unwoke; nwata me ogerenya; me eswi; waa aturu; waa nkafu-igara. Iphemiphe ono be ephe gude ogu-echi su pyaapya.
- 22** No iya; Jioshuwa bya asu unwoke labo pho, nwuru ngge pho: "Unu bahu je l'ulo nwanyi ovuoba ono je edufuta iya; yee ndibe iya g'ephe ha. Unu je emeeru iya iphe ono, unu riru angu l'unu e-meru iya ono."
- 23** Oo ya bu; unwoke labo ono, jeru anwua ngge ono bya abahu l'ulo Rehabu je edufuta iya; dufuta nna iya yee ne iya; me unwune iya; mekpoo iphe, bu ndu ephe l'iya no; mekpoo abubu iya l'ophu; chita phe je edobe l'azu eka ndu Izurelu doru.

²⁴Ephe tufu oku le mkpukpu ono; o tuko iphe, nokota iya nu tsufu. O be le mkpola-ochaa; waa mkpola-ododo; waa iphe, e meru l'onirubvu; ozoo l'igwe; ephe vuta ndu k'ono je edobe l'ulo-eku ke Chipfu.

²⁵Ole nwanyi ovuoba ono, bu Réhabu; yee ndibe iya; waa abubu iya l'ophu be Jioshuwa doberu ndzu; noo kele o woharu ndu Jioshuwa yeru g'ephe je anwua ngge le Jieriko. A haa; o buru l'echilabo ndu Izurelu gbiriri jasụ ntanu-a.

²⁶Tobudu iya bu; Jioshuwa bya epfua ya pfushia ya ike su l'iphe, bukpo onye nonyaru bya ejeshia akpukwa mkpukpu Jieriko-a buakwaa onye a turu onu l'iphu Chipfu. Su: “G'onye ono bukwaru okpara iya be oo-gude ta okpa igbulu ono. Teme iphe, onye ono e-gude chia ya mgbo aburu mbuhu ime iya.”

²⁷Oo ya bu; Chipfu swikpoperuho Jioshuwa; teme udu Jioshuwa ono tuko ali eka ono voo pfurufuru.

Jioshuwa 7

Iphe-aji Ekanu

¹Obenu l'iphe ono, Chipfu suru g'e mebyishiaru iya ono; be unwu Izurelu emeemeduru ge Chipfu suru g'e mee ya. Ekanu nwa Kami, bu nwanwa Zabudi; bya aburu nwanwanwanwanwa Zera; buru onye shi l'okpa-ipfu Jiuda; be haru iphe ono, a suru g'e mebyishia ono gweta k'enworu. Chipfu vuharu ndu Izurelu ovuma.

²Noo ya; Jioshuwa gbegbe le mkpukpu Jieriko zia unwoke g'ephe je mkpukpu Eyayi, nokube mkpukpu Betu-Avenu; l'uzo enyanwu-awawa mkpukpu Betelu; su phe g'ephe je anwua ngge l'onu-egu ibe iya ono. Oo ya bu; unwoke ono je anwua mkpukpu Eyayi ngge.

³Ephe lwa bya asu Jioshuwa-a: “Ge ndu Izurelu l'ophu ta awukwaru je k'ogiya-a. O kwa unu unwoke ise; ozoo unu esaa l'umadzu ukporo iri be ee-ye g'ephe je alwuta ndu Eyayi obu. G'a ta chitakwa ndu Izurelu l'ophu g'ephe je ese nsegbu akanya; kele ndu ono bu-a nwochileka mkpukpu.”

⁴Oo ya bu; a byanu ezia unu umadzu esaa l'umadzu ukporo iri; ephe jeshia alwu Eyayi. Ephe jerwua; ndu Eyayi chia phe ikpabaka.

⁵Ephe gbua ndu Izurelu iphe, rwuru umadzu ukporo l'iri l'ishii. Ephe shiepho l'eka eeshije abahu le mkpukpu Eyayi chia ndu Izurelu oso jasụ l'eka aakwoje mkpuma; bya egbushia ndu du igwerigwe g'ephe agbazeta le nsuda ono; k'ophu bu le meji tofuru ndu Izurelu; ephe rwushihu.

⁶Tobudu iya bu; Jioshuwa yeephe eka l'uwe iya laa tarara; bya adaa kpurumu; woru iphu bube l'ali l'ataphu okpoko Chipfu gbiriri jasụ nchi jihu. O buru ephe le ndu bu ogerenya ndu Izurelu tukoru wushiru l'eka ono; votachaa urwuku kpube onwophe l'ishi.

⁷Jioshuwa bya asu: “Gube Nnajiuphu, bu Chipfu; ? Bu iphe, i dughataru anyi enyimu Jiordanu bu g'i bya eworu anyi ye ndu Amoru l'eka g'ephe gbushia? Anyi gege anodukwaro l'azu enyimu Jiordanu azu iya ophuu!

⁸Gube Nnajiuphu; ? bu gunu be mu e-pfujekpoo nta-a; ge ndu ohogu ndu Izurelu achi anyi kpabekpabe egube-a?

⁹Noo kele o -buru le ndu Kenu; waa ndu ozo, bukota l'ali-a numaru iya be ephe a-byakwa atuko anyi lwebe; mbu mee; anyi achihu le mgboko-a. O -bukwanuru l'o du nno; ? bu gunu be ii-me g'epha ngu ono, paru eka ono pfuru?”

¹⁰Oo ya bu; Chipfu su Jioshuwa: “Gbeshi agbeshi! ? Bu gunu kparu iphe, i ze woru iphu kpuke l'ali?”

¹¹O kwa ndu Izurelu meru iphe-eji. Ephe wowaru ogbandzu ono, mu suru g'ephe dobe ono gbukaa. Kele ephe hataru iphe ono, mu suru g'e mebyishia ono woru je achikobe l'iphe, ephe nweru. Ephe zikwaru iphuru; bya adzua uka.

¹²Noo iphe, kparu iphe, ndu Izurelu adudu ike pfushia ike l'iphu ndu ohogu phe. Ephe dakobe ye okpa l'oso; kele ephe bu ndu e doberu k'emebyishi. Unu -atukoduru iphemiphe ono, mu suru g'e mebyishia ono chifuta mebyishikota be mu ta anokubebaekwa unu ozobaa.

¹³“Gbalihu je emee ndu Izurelu g'ephe du nsu. Iphe, ii-pfuru phe bu: Unu dobe onwunu nsu kwaberu echele. Le-a; wakwa iphe, Chipfu, bu Chileke ke ndu Izurelu epfu baa: O nwekwaru iphe, e doberu k'emebyishi, du l'echilabo unube ndu Izurelu. Ophu unu adukwa ike apfushibaa ike l'iphu ndu ohogu unu; abudu l'unu wofuru iphe ono, e doberu k'emebyishi ono l'echilabo unu.

¹⁴“O -rwua l'utsu be aa-chiru unu bya l'eka-a l'ipfu l'ipfu. Ipfu ophu Chipfu turu eka afuta bya l'anya-unuphu l'anya-unuphu. Enya-unuphu ophu Chipfu turu eka abyaa l'onulo l'onulo. Onu-ulo ophu Chipfu turu eka abyaa l'onye l'onye.

¹⁵Iphe, bukpuo onye a humaru iphe ono, e doberu k'emebyishi ono l'eka; unu kpoo ya oku; yee ndibe iya; mekpoo iphemiphe, o nweru enweru g'o ha. Onye obu gbukaru ogbandzu Chipfu; bya emewaa akpamara l'ali ndu Izurelu.”

¹⁶O -rwua l'onmewa-utsu; Jioshuwa bya ekua ndu Izurelu g'ephe wufuta bya anoo l'ipfu l'ipfu. A hota ipfu Jiuda.

¹⁷Okpa-ipfu Jiuda bya anoo l'onulo l'onulo; o nmaa onu-ulo Zera. A bya edoo ndu onu-ulo Zera l'anya-unuphu l'anya-unuphu; o nmaa enya-unuphu Zabudi.

¹⁸O bya achifuta enya-unuphu Zabudi bya edoo phe l'onye l'onye; o nmaa Ekanu nwa Kami; mbu nwanwa Zabudi; bya aburu nwanwanwanwa Zera; buru onye shi l'okpa-ipfu Jiuda.

¹⁹Noo ya; Jioshuwa bya asu Ekanu: “Nwa mu; jiko kwabekwa Chipfu, bu Chileke ndu Izurelu ubvu. Pfuaru mu iphe, i meru; mbu-a; pfukpoeru mu pho iphe, i meru. Pfuaru mu iya nta-a; b'emekwaru mu iya le mpaya!”

²⁰Ekanu bya eyeeru Jioshuwa ɔnu sɔ iya: “O kwa eviya; mu mesweakwaru Chipfu, bu Chileke ke ndu Ízurelu. Wakwa iphe, mu meru baa.

²¹Mu humaru uwe mgbalanu, ama mma; uwe ndu Babilonu, yi l'iphe ono, aakwa l'okwata ono; bya ahuma mkpola-ochaa, erwa iya du ukporo shekelu iri; waa mkpirikpu mkpola-ododo, erwa iya du ukporo shekelu labo le shekelu iri. O guahaa mu egu enworu; mu jenu achita iya nworu. Mu bya eje ebvua nsu l'ime ulo-ekwa mu woru iya libe; mu woru mkpola-ochaa pho dobe l'ohu nsu ono.”

²²Oo ya bu; Jioshuwa bya eye nemadzu; a gbaru jeshia ibe Ekanu. E jeshia; o domiwaa ya l'ulo ibe iya eviya; mkpola-ochaa pho nduepho l'ohu nsu l'eka o domiru iya.

²³Ephe bya avota iphe ono l'ulo ibe iya l'eka ono gbaru bya achie Jioshuwa yee unwu Ízurelu g'ephe ha. E woru iya tosaa l'alí l'atatiphu Chipfu l'eka ono.

²⁴Noo ya; Jioshuwa yee ndu Ízurelu g'ephe ha bya akputa Ekanu, bu onye onu-ulo Zera; waa unwu iya nwoke; me ke nwanyi; bya achita mkpola-ochaa ono; yee uwe mgbalanu ono; waa mkpirikpu mkpola-ododo ono; waa ulo-ekwa iya; bya akputa eswi iya; waa nkafu-igara iya; waa aturu iya; mekpoo iphe, o nweru enweru g'o ha gude je adoru le nsuda Akoru.

²⁵No iya; Jioshuwa sɔ iya: “? Denu g'o gude i kpataru anyi opfu? Ntanu be Chipfu e-mekwanu g'opfu rikpute ngu ishi.” Noo ya; ndu Ízurelu wupyabe yee ndibe iya woru phe tugbushia le mkpuma; bya eworu phe kpoo oku.

²⁶Ephe tutua mkpuma, du igwerigwe kube Ekanu l'eli. Mkpuma ono no l'eka ono gbiriri jasɔ ntanu-a. O buru iya bu le Chipfu avu-buhuru ndu Ízurelu ovuma. Oo ya bu; a wata eku eka ono nsuda Akoru, bu iya bu “iphe-ehuka”. E kumaru eka ono epha ono byasɔ ntanu-a.

Jioshuwa 8

Aalwu-kpe ndu Eyayi

¹Tobudu iya bu; Chipfu sɔ Jioshuwa: “Ge ndzu ba agushi ngu; ophu meji atofukwa ngu. Rwuta ndu ojogu g'ephe ha gude jepfu ndu Eyayi ogu. Kele-a; mu woakwaru onye eze ndu Eyayi; yee ndibe iya; mekpoo mkpukpu iya; waa ali iya woru ye ngu l'eka.

²Oo epho iphe, unu meru ndu Jieriko; waa onye eze phe; be unu e-me ndu Eyayi; yee onye eze phe. Ole iphe phe, a lwutaru l'ogu; waa iphe-edobe phe be unu te emebyishidu emebyishi. Unu a-tuko iya gweta g'o buru nkunu. Unu je edomia onwunu l'azu mkpukpu ono.”

³Oo ya bu; Jioshuwa yee ndu ojogu ndu Ízurelu l'ophu tsulihu jeshia ogu le Eyayi. Jioshuwa bya ahota ndu ojogu, ike du l'ogu; unu ukporo eto l'iri l'ise; dufu phe l'enyashi.

⁴Iphe, o pfuru phe bu: “Unu lekwa; unu je edomia onwunu l'azu mkpukpu ono kwaberu phe. Unu ta anodukwa mkpukpu ono enya; oo epho g'unu kwakobe akwakobe.

⁵Mbedua le ndu mu l'ephe swi e-je emeeru ndu mkpukpu ono bugagangu. Teke ephe wufutaru byatashia anyi etso ogu; g'ephe tsoru iya anyi ogiya ophuu; anyi eye okpa l'oso gbalaha.

⁶Ephe achia anyi gbiriri jasu anyi edefutagbua phe; k'ophu ephe nowa mkpukpu ono uzanya; noo kele ephe a-su l'anyi a-gbakwaru phe oso g'anyi gbaru le mbu pho. Oo ya bu; teke anyi yeerupho okpa l'oso gbalashiaru phe;

⁷unu eshi l'eka unu woharu onwunu wubata le mkpukpu ono; kele Chipfu, bu Chileke unu wowaru iya yee unu l'eka.

⁸Unu -wubaephe le mkpukpu ono; unu tufu iya oku. Unu mekwaa ya ge Chipfu suru g'e mee ya. Unu tukokwa iphemiphe-a, mu suru g'unu mee-a; mekota!”

⁹Tobudu iya bu; Jioshuwa su g'ephe je; ephe tugbua je ewohaa onwophe le mgbaka Betelu yee Eyayi; l'uzo enyanwu-awawa Eyayi. Jioshuwa yee ndu Izurelu nodu l'unuphu l'enyashi ono.

¹⁰O -rwua l'onmewa-utsu; Jioshuwa dzua ndu nkiya. Ephe le ndu bu ogerenya ndu Izurelu vuta uzo duru phe jeshia mkpukpu Eyayi.

¹¹Ndu ojogu, ephe l'iya swi g'ephe ha wu-tsoru iya; jasu ephe jerwua atatiphu mkpukpu ono. Ephe kpobe ulo-ekwa phe l'uzo isheli mkpukpu Eyayi. Nsuda nokaha ephe le mkpukpu Eyayi l'echilabo.

¹²Jioshuwa bya eduta unwoke, rwuru unu iri l'ebo l'ukporo iri je edomia le mgbaka mkpukpu Betelu yee mkpukpu Eyayi; l'uzo enyanwu-ariba mkpukpu ono.

¹³O bya edoo ndu ojogu ono g'ephe a-nodu k'ogu. O woru ndu bukpo ndu alwu ogu gedegede dobe l'uzo isheli mkpukpu ono; bya achiru ndu ophu phoduru nu dobe l'uzo enyanwu-ariba. Jioshuwa l'onwiya nodu le nsuda ono.

¹⁴Eze ndu Eyayi humaephe iphe ono; yeke ndu mkpukpu iya ono gude oso wufuta le mkpukpu ono l'onmewa-utsu; chebe iphu l'uzo nsuda Araba jepfushia ndu Izurelu ogu. Ophu o to madu l'o nweru ndu woharu onwophe l'azu mkpukpu ono kwaberu phe.

¹⁵Jioshuwa yee ndu Izurelu g'ephe ha meahaa g'o bu l'eemekpe phe emekpe. Ephe chipyabe phe; chia phe gbaa uzo echiegu.

¹⁶E kukota unwoke, bu le mkpukpu Eyayi l'ophu; ephe zefuta tuko chipyabe phe. Ephe gude achu Jioshuwa phe oso gbiriri jasu ndu Eyayi ono wufu-gbua l'oma mkpukpu phe.

¹⁷Ophu o to dudu g'o ka mma l'oo nwoke lanu, bu le mkpukpu Eyayi; ozo mkpukpu Betelu, alufuduru chiru ndu Izurelu kwaseru. Ephe gbakokota mkpukpu phe; ghebe iya onu; chiru ndu Izurelu tugbua.

¹⁸Noo ya; Chipfu sù Jioshuwa: “Ngwa; wolia arwa ngu maa amama l'uzo mkpukpu Eyayi; gè mu bya bya eworu mkpukpu ono ye ngu l'èka!” Tòbodu iya bù; Jioshuwa bya ewolia arwa iya bya eworu maa l'uzo mkpukpu Eyayi.

¹⁹Ewoli, Joshuwa ewoli arwa ono; ndu phò, woharu onwophe k'ògu phò shi l'èka ephe nò wufutagbaa wùba lè mkpukpu ono je alwua ya lwuta teke ono teke ono woru òku tufu iya.

²⁰Unwoke Eyayi jeshia agha enya l'azu; enwuru-òku shiwaa lè mkpukpu phè kpuwaa oronmono tsoru akpaminigwe l'okotazu phè; ophu ephe amaèdu ụzo, ephe e-shi gbalaa; kele ndu Ízurelu ono, shi tsoru ụzo echiègu agbaru phè ọso ono kpòrawaru etsowa phè ọgu.

²¹O be gè Jioshuwa; yèe ndu Ízurelu l'ophu hùmaerupho lè ndu ono, geparu egeparu ono wùbawaru lè mkpukpu ono; l'enwuru-òku, shi lè mkpukpu ono kpufuwaru; ephe ghakòbe wata egbushi ndu Eyayi.

²²Ndu ophuu shi l'ime mkpukpu ono alwu phè eje abya; mbù lè ndu ophuu nò phè l'iphu; ndu ophuu nòdu phè l'azu; ephe kwaa iphè l'echi nòdu lè mgbaka ndu Ízurelu. Ndu Ízurelu gbua phè pyaapya gbiriri jasù ophu ọ dudu g'ò ka mma l'òo onye lanù nahuru gbalaa.

²³Ephe kpua onye eze ndu Eyayi lè ndzù; kpùta iya kpùjeru Jioshuwa.

²⁴O be gè ndu Ízurelu gbuèberu ndu Eyayi ono; mbù l'ephe gude ogu-echi sù phè pyaapya; jasù ephe bvùebe lè mgbègu ono; mbù l'echi-ègu l'èka ono, ephe chi-beru phè ono; ndu Ízurelu g'ephe ha gbè teke ono bya awùba lè mkpukpu Eyayi je egude ogu-echi gbushikòta ndu nò iya nù.

²⁵Ndu Eyayi, e gburu mbòku ono rwuru unu nemadzu ukporo l'unu iri; unwoke mè unwanyi. Mbù lè ndu Eyayi bè e gbuèberupho mbòku ono.

²⁶Kele Jioshuwa te wophuduru èka arwa iya azù. O mabèru iya phò g'ò mabèru iya gbiriri jasù e gbuèbe ndu bu lè mkpukpu Eyayi l'ophu.

²⁷Ndu Ízurelu je akpukoo iphe-edobe ndu èka ono; bya atùko iphe ndu mkpukpu ono kwaa l'òkwata je enworu, bù iya bù gè Chipfu sùru Jioshuwa g'e mee ya.

²⁸Òo ya bù; Jioshuwa woru òku tufu lè mkpukpu Eyayi; mee èka ono; ọ buru ikpòzu ojejeje. Èka ono buru ochobu byasù ntanù-a.

²⁹Ò kpùta eze ndu Eyayi je akpopyabe l'eli oshi. Ọ kpòru l'èka ono gbiriri jasù l'uzenyashi. Enyanwu gbuzèpho; Jioshuwa tua ekemu; e je je apazeta odzu iya l'eli oshi ono; je atògbo l'onu-abata mkpukpu ono. Ephe kwakòo mkpuma kua ya l'eli jasù ọ kùta l'ikpo l'ikpo. Ephe haa ya; ọ nòdu nno gbiriri byasù ntanù-a.

Ọgbandzu, a gbaziru l'úbvú Ebalu

³⁰Noo ya; Jioshuwa bya akpàru Chipfu, bù Chileke ndu Ízurelu ọru-ngwèja l'eli úbvú Ebalu;

³¹meɛbekota iya g'onye-ozì Chipfu, bụ Mósìsù tũrũ ekemu sũ gɛ ndu Ízurɛlu meje iya l'ɛkwo ekemu Mósìsù. Mbũ-a; e gude mkpuma, fũru ophu kpua ya; mbũ mkpuma, adũdu onye kujeru iya iphe-ígwè gbengu. Ọ buru l'elì iya bɛ ɛphe gwerũ Chipfu ngweja-akpo-oku; waa ngweja-ɛhu-guu.

³²Jioshuwa nõdu l'iphu ndu Ízurɛlu l'ɛka ono deru ekemu Mósìsù ono ye lɛ mkpuma; mbũ ekemu ono, o shihawaa dee ono.

³³Ndu Ízurɛlu l'ophu; ndu bũ nlwamũlwa mɛ ndu bũ okpobe Ízurɛlu; waa ndu bũ ogerenya phɛ; mɛ ndu-ishi phɛ; mɛ ndu-ikpe phɛ; pfugbaru okpoko oghandzu Chipfu ono lɛ mgburũku labo; ghagbaru ndu-uke, bũ oshilokpa Lívayi, pa iya nũ iphu. Ndu ono ọzo lanũ pfũru gha iphu l'úbvũ Gerizimu; ndu ophuu pfũru gha iphu l'úbvũ Ebalu. Mbũ pfũerupho ɛgube onye-ozì Chipfu, bũ Mósìsù sũru g'ɛphe pfũru teke ono, o tũru ekemu g'a goru onu-oma nũ phɛ ono.

³⁴E mechaa; Jioshuwa bya atũko ekemu ono g'ọ ha gushikotaru phɛ; onu-oma mɛ atũ onu; mbũ gũeru phɛ iya pho g'e deru iya l'ɛkwo ekemu.

³⁵Ọ tọ dũdu mɛ akpũru opfu lanũ, Mósìsù pfũru, Jioshuwa agufutaduru; ndu Ízurɛlu l'ophu nũmakota; je akpaa l'unwanyì; waa unwegirima; mɛ ndu lwarũ alwalwa, ɛphe l'ɛphe buru ɛghirigha.

Jioshuwa 9

Èregede, ndu Gibiyonu gbaru ndu Ízurɛlu

¹Tobudu iya bũ; ndu eze, bukota l'uzo ɛnyanwu-arĩba ɛnyimu Jìodanu; ndu bu l'alì úbvũ úbvũ; mɛkpoo ndu ophu bu l'alì okpa úbvũ, nõ l'uzo ɛnyanwu-arĩba; mɛ ndu ophu buru dɛe ike l'oke-ɛnyimu ono; je akpaa l'úbvũ úbvũ Lébanonu; mbũ ndu Hetu; waa ndu Amoru; waa ndu Kénanu; waa ndu Pérezu; waa ndu Hevu; waa ndu Jiebusu nũmaepho iphe, nwũru nũ ono;

²ɛphe dzukobe tugba nanũ jeshia etso Jioshuwa yɛe ndu Ízurɛlu ogu.

³Obenu lɛ ndu mkpũkpu Gibiyonu nũmaru iphe, Jioshuwa meru ndu Jieriko waa ndu Eyayi;

⁴ɛphe je eworu ɛregede gbaa wata eme umere gɛ ndu dũru ndu ɛphe nõ-chiru ɛnya phɛ; je eworu nkĩrika ɛda-ukpo; waa akahũ ɛda, eeyeje mɛe, lakashihucharu alakashihu; tɛme a dzukwachakwaa ya pho adzukwa; woru dojicha nkapfũ-igara phɛ edoji.

⁵ɛphe wota nkĩrika akpokpa, a dzukwanyaru ike bvũ; woru yee. ɛphe bya eworu nkĩrika uwe yekwapho; bya ewota buredi, kpohuru nkũ; bya atsua evu gude.

⁶Noo ya; ɛphe bya ejepfu Jioshuwa phɛ l'ɛka ɛphe kpoberu ọlo-ɛkwa phɛ lɛ Gilugalu; je epfuru nũ Jioshuwa yɛe ndu Ízurɛlu sũ phɛ: “Anyi bukwa ndu shi ɛka dũ ɛnya bya g'anyi l'unu gbaa ndzũ.”

⁷Ndu Ízurɛlu sũ ndu Hevu ono: “? A maru tọ bukwanu lɛ mgboru anyi l'ɛka-a bɛ unu bu? ? Denu g'anyi l'unu e-shi agba ndzũ?”

⁸Ephe sụ Jioshuwa: “Anyi bukwa ndu-ozu ngu.” Jioshuwa sụ phẹ: “? Bụ onye bẹ unu bụ? Teme ? bụ awe bẹ unu shi?”

⁹Ephe sụ iya: “Anyibe ndu-ozu ngu shikwa oha, du ęnya. Iphe, kparu anyi abyabya bukwa l'anyi numaru iphe, du biribiri, Chipfu, bu Chileke unu meru. Anyi numakotaru k'iphe, o meru; mbu k'iphe, o mekotaru l'ali ndu Ijiputu;

¹⁰waa iphe, o meru ndu eze ndu Amoru ono ephenebo, bu l'uzo ęnyanwu-awawa ęnyimu Jiđdanu; mbu Sihonu, bu eze Heshibonu; waa Ogu, bu eze ndu Beshanu, bu le mkpukpu Ashitoretu.

¹¹Oo ya bu; ndu bu ogerenya anyi; waa onyemonye, bu l'ali anyi sụ anyi g'anyi kwakobe iphe, anyi e-ri l'uzo; gbeshi byatashia unu ndzuta; bya asu unu l'anyi buakwaa ndu ejeru unu ozi. G'unu kwenu g'onye l'unu gbaa ndzu.

¹²Su-a; buredi anyi-a shikwa evugbaa oku teke anyi chitaru iya gude gbeshi ije mboku, anyi gbeshiru abyapfuta unu; ole lewaro ęnya huma le nta-a bẹ o kposhihuwaru nku; tsuchaa evu.

¹³Eda-a, eeyeje mee-a bẹ shikwa buru k'ophuu teke anyi yeru iya mee. Ole lewa iya ro ęnya g'o lakashihuchaaru. Uwe anyi; me akpokpa anyi bu g'anyi no l'uzo bẹ o tukocharu kashihu; noo kele aka anyi shi du ęnya.”

¹⁴Ndu Izurelu nata iphe, ephe gude bya eworu ria; ophu ephe ejeduru akpata Chipfu ishi g'a maru g'ephe e-me iya.

¹⁵No iya; Jioshuwa bya ekweta l'ephe l'ephe te enwedu opfu; ephe l'ephe bya agbaa ndzu ye iya; kweta l'ephe a-ha phe g'ephe nodu ndzu. Ndu-ishi Izurelu bya eworu ego riaru phe.

¹⁶A noepho ujiku eto, ephe le ndu Gibiyonu riru nte ndzu ono; ndu Izurelu numa l'ephe bu ndu ephe l'ephe bu obutobu mkpukpu.

¹⁷Oo ya bu; ndu Izurelu bya awufu nu; jeepho ije ujiku eto; ephe rwua ndu aka ono. Mkpukpu, nogbaa l'aka ono bu Gibiyonu; waa Kefira; waa Berotu; waa Kiriyatu-Jiarimu.

¹⁸Obenu le ndu Izurelu te etsoduru phe ugu; noo kele ndu-ishi phe gudewaa epha Chipfu, bu Chileke ndu Izurelu riaru phe angu l'ephe ta abyadu etso phe ugu. Ndu Izurelu wata ata ndu-ishi phe uta l'ephe meru iphe, du nno.

¹⁹Tobudu iya bu; ndu-ishi ono g'ephe hakota bya asu ikpoto oha ono l'ophu: “Anyi gudeakwa epha Chipfu, bu Chileke ke ndu Izurelu riaru ndu-a nte. Nta-a ta aduekwa iphe, anyi emekwadu phe.

²⁰Iphe, anyi e-me bu l'anyi a-ha phe g'ephe nodu ndzu; k'ophu ejo-iphe ata abyapfutadu anyi le nte ono, anyi riru phe ono.”

²¹Ndu-ishi ono nodu epfukwaru phe pho su phe: “Unu g'anyi haa phe g'ephe nodu ndzu; wajeru anyi nku; kujeru anyi mini.” E shi egube ono; ndu-ishi mee iphe ono, ephe kweru ukwe l'ephe e-me ono; mbu ephe paru ndu ono haa; ephe nodu dzu.

²²Tɔ̀budu iya bụ; Jioshuwa bya ekukọbe ndu mkpụkpu Gibiyonu; bya asụ phẹ: “? Denu g'o gude unu gbaberu anyi ẹregede sụ anyi l'unu shi ọha, dū ẹnya; l'unubẹ ndu anyi l'unu tukururu buru l'ẹka-a?”

²³Nta-a bẹ unu buakwaa ndu a tūru onu. O buakwaa ohu anyi bẹ unu bya l'aburu je aduwaruroya. Oo unu a-nodu awa nku; eku mini edo l'eze-ulo Chileke mu.”

²⁴Ephe sụ Jioshuwa: “Anyibe ohu ngu bẹ a kochakwaru gẹ Chipfu, bụ Chileke unu gude tūa ekemu nū onye-ozu iya, bụ Mosisu sụ g'ọ nū unu alị-a l'ophu; wafua g'ọ tuko ndu bu l'alị-a gbushikotaru unu. Tɔ̀budu iya bụ; ndzū unu rwutanū anyi. O buru iphe ono, meru g'o gude anyi mee iphe ono, anyi meru ono.

²⁵Nta-a bẹ anyi noakwa ngu l'obochi-eka. O kpoe pho g'i mee anyi iphe, dukpoe ngu pho ree.”

²⁶Oo ya bụ; Jioshuwa nafuta phẹ l'eka ndu Izurelu; ophu ephe e gbuduru phẹ.

²⁷Jioshuwa woru ndu Gibiyonu mee ndu awa nku; me ndu ekuru ndu Izurelu l'ophu mini. Ephe nodu awakwapho nku bya eku mini, eegudeje eme iphe l'eka Chipfu hotaru g'ọ buru eka aa-kpuru iya oru-ngweja. O buru iphe ono bẹ ephe bụ gbiriri jasuntanu-a.

Jioshuwa 10

Enyanwu ekeshiru l'eka lanu

¹Tɔ̀budu iya bụ; eze ndu Jierusalemu, bụ Adoni-Zedeku bya anuma le Jioshuwa lwupewaru ndu Eyayi; mee mkpụkpu phẹ; o buru mkpurupyata. Mbụ l'o meru ndu Eyayi; yee onye eze phẹ g'o meru ndu Jieriko; yee onye eze phẹ. Teme o bya anuma le ndu mkpụkpu Gibiyonu tugburu jepfu ndu Izurelu; ephe l'ephe ria nte nchi-adu-doo; ephe l'ephe tukowa buru.

²Iphe ono kwatakpooru rwua ephe le ndu alị iya l'ehu; noo kele mkpụkpu Gibiyonu kwatakpooru nweru okpehu okpobe enweru; bya aburu mkpụkpu, duta-be mkpa g'oha ndu eze. Teme o buru mkpụkpu, ka ke ndu Eyayi shii; teme unwoke mkpụkpu Gibiyonu buru ndu ike dū l'ogu.

³Oo ya bụ; Adoni-Zedeku, bụ eze ndu Jierusalemu; zia ozi g'e je ezia Hohamu, bụ eze ndu Həburonu; yee Piramu, bụ eze ndu Jiarumutu; yee Jiafiya, bụ eze ndu Lakishi; yee Debi, bụ eze ndu Egulonu; sụ phẹ:

⁴“Unu byanu bya eyetaru mu eka g'anyi je etsoo ndu mkpụkpu Gibiyonu ogu; kele ephe tugburu jepfu Jioshuwa yee ndu Izurelu; ephe ria nte nchi-adu-doo.”

⁵Noo ya; ndu eze ise ono, bụ eze ndu Amoru ono bya edzukobe, bụ iya bụ eze ndu Jierusalemu; waa ke ndu Həburonu; waa ke ndu Jiarumutu; waa ke ndu Lakishi; wafua eze ndu Egulonu. Ephe chitanu ndu ojogu phẹ je akpobe ulo-ekwa phẹ l'iphu mkpụkpu Gibiyonu; bya awata etso ndu Gibiyonu ogu.

⁶Ndu Gibiyonu zia ozi g'e je zia Jioshuwa l'eka ndu Izurelu kpoberu ulo-ekwa phẹ le Gilugal. Sụ iya: “Jiko ta agbadoshinu anyibe ohu ngu phẹ! Kukebero ehu bya

egwegwa bya adzoo anyi; le ndu eze ndu Amoru, bu l'ubvu ubvu dzukobeakwaru; abya anyi alwulwu.”

⁷Tobudu iya bu; Jioshuwa rwutanu ndu ojogu iya l'ophu; mekpoo iphe, bu ndu ike du l'ogu; ephe shi le Gilugalu wufuta; o buru phe eje mkpukpu Gibiyonu.

⁸Chipfu su Jioshuwa: “Ba atsukwa phe ebvu; kele mu woakwaru phe ye ngu l'eka. O to dukwa g'ephe ha bya l'ekeru okpa l'ataphu unu.”

⁹Noo ya; Jioshuwa phe gude enyashi ono shi le Gilugalu tugbua jekota ije l'enyashi ono je atu phe l'uzorehu.

¹⁰Chipfu mee phe; ephe mehu butsu-butsu-butsu l'iphu ndu Izurelu. Ndu Izurelu gbua phe pyaapya le mkpukpu Gibiyonu gbushikpoo phe ike; chia phe kpara-kpara-kpara chipyabe phe kwaseru uzo, shiru jeshia mkpukpu Betu-Horonu; saa phe osa-mpfu l'uzo, shiru jeshia mkpukpu Azeka; waa mkpukpu Makeda (bu iya bu a -ghachaa mkpukpu Betu-Horonu).

¹¹Ephe nodu agba agbalaru ndu Izurelu ono; kwaseru uzo Betu-Horonu; eje ala mkpukpu Azeka ono; Chipfu gbẹ l'imigwe wata phe atu akamini-mkpuma, paru eka; gude tu-gbushiahaa phe. Ndu akamini-mkpuma ono tu-gburu ka igwerigwe eme le ndu ophu ndu Izurelu gude ogu-echi sua pyaapya.

¹²Le mboku ono, Chipfu woru ndu Amoru yee ndu Izurelu l'eka ono be Jioshuwa pfuru l'iphu ndu Izurelu su Chipfu: “Gube enyanwu; keshiru le mkpukpu Gibiyonu! Gube onwa; kwakwaa le nsuda Ajialonu!”

¹³Oo ya bu; enyanwu keshiru l'eka-lanu; onwa keshiru l'eka o jeberu nokirishia gbiriri jasu ndu Izurelu mee ndu ohogu phe g'o ghuru phe. Iphe-a be e dekwaru l'ekwo Jiasha; l'enyanywu keshiru l'echi akpaminigwe; noo ujiku ophu; ophu o ribaduru ariba.

¹⁴Eshinu ta adudu mboku dujehewaru ge mboku ono; e -mecha ophu o dubaekwapho mboku ozo nwubaaru ge mboku ono; mbu mboku, Chipfu ngabejebaaru amadu nchi ge mboku ono. Ge mu gbukwaa ya tororo; o kwa Chipfu lwu-chiru ndu Izurelu ogu mboku ono.

¹⁵E mecha; Jioshuwa yee ndu Izurelu wufu lashia l'eka ephe koberu ulo-ekwa phe le Gilugalu.

Eegbushi ndu eze ndu Amoru; ephe n'ise

¹⁶Tobudu iya bu; ndu eze ise ono gbagbua je ewohaa onwophe l'ogba, no le Makeda.

¹⁷A bya epfuaru Jioshuwa le ndu eze ise ono be a humakwaru l'eka ephe woharu onwophe l'ogba, no le mgboru mkpukpu Makeda.

¹⁸Jioshuwa su: “Unu je eswita eze mkpuma gude swichia onu ogba ono. Unu aharu nemadzu hota ye g'e che iya nche.

¹⁹Unu alwuro ogu, unu alwu. Unu chiru ndu ohogu unu ono oso tugbua; unu eje atuko ndu ophu no l'uzo okotazu phe gbushia. Unu te ekwekwa g'ephe gbarwua mkpukpu phe; noo kele Chipfu wowaru phe ye unu l'eka.”

²⁰Jioshuwa yee ndu Ízurelu tuko phe mebyishikota. O phoduru nwanshii me a su l'o to nwedu me onye lanu waru nu. Ole nwa umadzu olemole, waru nu be lanu le mkpukpu phe ono, bu mkpukpu, a kpushiru ike.

²¹E mechaa; ndu Ízurelu g'ephe ha wufu le chiriri le werere lapfushia Jioshuwa l'eka ephe kpoberu ulo-ekwa phe le mgboru mkpukpu Makeda; ophu o dudu onye halibaru onu k'epfuru ndu Ízurelu.

²²Jioshuwa su: "Unu swifu mkpuma ono l'ogba ono; kpufutaru mu ndu eze ise-a!"

²³Oo ya bu; ephe bya akpufuta ndu eze ise ono. Mbụ eze ndu mkpukpu Jierusalem; waa ke ndu Heburonu; waa ke ndu Jiarumutu; waa ke ndu Lakishi; waa ke ndu Egulonu.

²⁴Ephe kputacharu Jioshuwa ndu eze ono; o bya ekuko unwoke Ízurelu; bya ekua ndu-ishi ndu ojogu, bu ndu ephe l'iya swi; su phe: "Ngwa; unu bya l'eka-a bya azobecha phe okpa l'olu!" Oo ya bu; ephe wufuta bya eworu okpa zobechaa phe l'olu.

²⁵Jioshuwa su phe: "Unu ta atsukwa ebvu; ophu meji atofukwa unu. G'obu shihukwa unu ike; ophu ndzu agukwa unu; kele oo egube-a be Chipfu e-mekota iphe, bukpo ndu ohogu unu, unu eje etso ogu."

²⁶E mechaa; Jioshuwa woru ndu eze ono gbushia; woru odzu phe kobegbaa l'eli oshi iche iche uzi ise. A paru phe haa l'eli oshi l'eka ono, e kobegbaru phe ono jasụ l'uzenyashi.

²⁷O be l'uzenyashi; Jioshuwa zia; e je ekofuta phe l'eli oshi eka ono; je eworu nwua l'ogba eka ephe shi wohaa onwophe pho. Ephe pata oke mkpuma, hagbaa shii swichia onu ogba ono. Mkpuma ono du l'eka ono gbiriri byasu ntanu-a.

²⁸O buru mboku ono be Jioshuwa lwutaru mkpukpu Makeda. O tuko ndu bu le mkpukpu ono; waa onye eze phe gbushikota. Ophu o to dudu g'o ka mma l'oo onye lanu, no le mkpukpu ono, waru nu. Oo ephe g'o meru eze ndu Jieriko bu g'o meru ke ndu Makeda.

Aalwụ-kpe ndu ndohali

²⁹Noo ya; Jioshuwa yee ndu Ízurelu g'ephe ha gbẹ le mkpukpu Makeda jeshia ogu le mkpukpu Libuna.

³⁰Chipfu wokwarupho ndu mkpukpu ono; yee eze phe ye ndu Ízurelu l'eka. Jioshuwa yee ndu Ízurelu tuko ndu bu le mkpukpu ono gbuẹbe. Ophu o dudu g'o ka mma l'oo onye lanu, waru nu. O bukwarupho g'o meru eze ndu Jieriko bu g'o meru eze ndu Libuna.

³¹Tobudu iya bu; Jioshuwa yee ndu Ízurelu l'ophu gbẹ le mkpukpu Libuna jeshia mkpukpu Lakishi; je eworu ulo-ekwa phe kpobe l'eka ono; bya awata phe etso ogu.

³²Chipfu bya eworu mkpukpu Lakishi ye ndu Ízurelu l'eka. O be le mboku k'ebo; Jioshuwa lwuta iya. O tukoeppo ndu bu iya nu gbushigbua; g'o gbushiru ndu mkpukpu Libuna.

- 33**Horam, bu eze ndu Geza bya g'o yeru eze ndu Lakishi ẹka; Jioshuwa phe lwu-kpekwa ya pho yele ndu ojoḡu iya; ophu o dudu g'o ka mma l'oo onye lanu, waru nu.
- 34**Noo ya; Jioshuwa yee ndu Izuru lu l'ophu gbẹ le mkpukpu Lakishi jeshia mkpukpu Egulun; je eworu ulo-ekwa phe kpobe l'eka ono; bya awata phe etso ogu.
- 35**Ephe lwu-kpee ya le mboku ono kwapho; bya egude ogu-echi gbuẹbekota onyemonye, bu iya nu; mbu l'iphe, bukpo nemadzu, bu le mkpukpu ono be e gbukotaru pyaapya mboku ono; bu nwune iphe, o meru ndu Lakishi.
- 36**Jioshuwa yee ndu Izuru lu l'ophu bya agbe le mkpukpu Egulun jeshia mkpukpu Hebunon; je etsoo ndu ẹka ono ogu.
- 37**Ephe lwuta mkpukpu ono; bya egude ogu-echi gbushia ndu bu iya nu; epe le ndu eze phe; waa ndu bu le mkpukpu, nogbaa ya mgburugburu g'ephe hakota. Ophu o dudu m'onye lanu, waru nu. E mee phe iphe, e meru ndu Egulun. Mbu l'o tukorupho mkpukpu le mkpukpu ono g'ephe hakota; mekpoo iphe, bu nemadzu, bukota iya nu; su pyaapya.
- 38**Jioshuwa yee ndu Izuru lu l'ophu bya alwatashia; bya abahu le mkpukpu Debi je etsoo phe ogu.
- 39**Ephe lwuta mkpukpu ono; waa onye eze phe; waa mkpukpu le mkpukpu, nogbaa ya mgburugburu; bya egude ogu-echi toko phe gbushia; mbu l'ephe tukoru nemadzu, bukota l'eka ono sibe pyaapya; ophu o dudu m'onye lanu, wafuru nu; bu nwune iphe, o meru ndu Hebunon. Noo iphe, o meru ndu Debi; yee onye eze phe bu ono; teme o bukwarupho nwune iphe, o meru ndu Libuna; yee onye eze phe be o meru phe ono.
- 40**Oo ya bu; Jioshuwa phe toko ndu ali ẹka ono lwu-kpee; mbu ndu bu l'ali ubvu ubvu; yee ndu ophu bu l'echiegu ndohali; waa ndu bu l'ali okpa ubvu, no l'uzo enyanwuariba; waa ndu ophu bu le mgbaka ubvu; epe le ndu eze phe l'ophu. Ophu o dudu me onye lanu, waru nu. Epe toko iphe, bukpo iphe, atu unme l'eka ono gbushikota. O mee ya pho ge Chipfu, bu Chileke ndu Izuru lu turu ekemu su g'o mee ya.
- 41**Jioshuwa phe shiepho le mkpukpu Kadeshi-Baneya lwa phe gbiriri jasu le mkpukpu Gaza; bya atoko mkpukpu, nokota le Goshenu lwukota; je akpaa le mkpukpu Gibiyonu.
- 42**Ndu eze ono; me ali phe be Jioshuwa lwutakotaru l'akpo ephopho lanu; noo kele Chipfu, bu Chileke ndu Izuru lu bu iya alwu-chiru phe ogu.
- 43**Tobudu iya bu; Jioshuwa yee ndu Izuru lu mechaa bya awufu lashia l'eka epe kpoberu ulo-ekwa phe le Gilugalu.

Jioshuwa 11

Aalwu-kpe ndu eze ndu isheli

- ¹Tɔ̀budu iya bụ; Jiabinu, bụ eze ndu Hazo numaepho iphemiphe ono, eme nū ono; o zia sū g'e je ekua Jiobabu, bụ eze ndu Madonu; kukwapho eze ndu Shimuronu; waa eze ndu Akushafu;
- ²waa ndu eze, bu l'alì úbvú úbvú l'uzo isheli; waa ndu ophu bu lẹ nsuda Araba, nọ l'uzo ndohali eze-enyimu Kineretu; waa ndu ophu bu l'alì okpa úbvú, nọ l'uzo enyanwu-ariba; teme wakwapho ndu bu lẹ mgboru mkpukpu Nafatu-Doru, nọ l'uzo enyanwu-ariba.
- ³O byakwapho ezia g'e je ekua ndu Kėnanu ndu ophu bu l'uzo enyanwu-awawa; ephe lẹ ndu ophu bu l'uzo enyanwu-ariba; wakwapho ndu Amoru; waa ndu Hetu; waa ndu Pėrezu; waa ndu Jiebusu, bugbaa l'alì úbvú úbvú; waa ndu Hevu, bu l'okpa úbvú Hamonu l'alì Mizupa.
- ⁴Ephe tuko rwuta ndu ojogu phe gude bya. Ndu ojogu phe haepho l'otu g'ėja, nọ l'aguga eze-enyimu. Ephe chikwarupho inya; waa ugbo-inya, dū igwerigwe.
- ⁵Ndu eze ono g'ephe ha bya achigbabe ndu ojogu phe ono; bya eworu ulo-ekwa phe kpobe l'aguga nggele Meromu g'ephe tsoo ndu Izurelu ogu.
- ⁶Chipfu sū Jioshuwa: “Ba atsukwa phe ebvu; kele o -rwutashia egube nta-a echele be mu woakwaru phe ye unube ndu Izurelu l'eka g'unu gbushibebe. Unu ebushikota inya phe akwara azu okpa; unu eworu ugbo-inya phe kpokota oku.”
- ⁷Jioshuwa yee ndu ojogu ndu Izurelu wufuta; bya atu phe l'uzorehu lẹ nggele Meromu; daru ivoyi kpua phe.
- ⁸Chipfu woru phe ye ndu Izurelu l'eka; ephe lwu-kpee phe; chipyabe phe kwaseru uzo eze mkpukpu Sayidonu; me uzo mkpukpu Misurefotu-Mayimu. Ephe chikwaa phe pho shia uzo enyanwu-awawa; mbu chia phe gbiriri jasū lẹ nsuda Mizupa. Ephe gbua phe gbiriri jasū teke aduedu me onye lanu, ghuduru nu.
- ⁹Jioshuwa mee phe ge Chipfu suru g'ephe mee phe. Ephe tuko inya phe bushikota akwara azu okpa; bya achikobe ugbo-inya phe tua oku.
- ¹⁰Teke ono kwapho be Jioshuwa phe wu-phuru azu je alwua mkpukpu Hazo; bya eworu onye eze phe gbua. Hazo shi buru ishi mkpukpu ono g'o hakota.
- ¹¹Ephe gude ogu-echi tuko nemadzu, bu lẹ mkpukpu ono sua pyaapya; tuko phe gbuebekota; ophu o dudu g'o ka mma l'oo onye atu unme me nanu, phoduru nu. E woru oku lokpua lẹ mkpukpu Hazo; o tsufu iya.
- ¹²Jioshuwa tuko mkpukpu ndu eze ono g'o hakota; ephe lẹ ndu eze phe, lwutakota; bya egude ogu-echi sukota phe pyaapya; tuko phe gbushibebe; g'onye-ozu Chipfu, bu Mosisu turu iya ekemu su g'o mee ya.
- ¹³Obenu l'iphe, bukpuo mkpukpu ono, a kpuru l'eli úbvú ono be Jioshuwa phe ta akpoduru oku me nanu; gbahaa Hazo kpoloko be Jioshuwa phe kporu oku.

14Ndu Ízurelu tuko ẹku ndu mkpukpu ono gweta; bya akpukoo iphe-edobe phe le ndzu je edoberu onwophe. Obenu le nemadzu be ephe gude ogu-echi sua pyaapya; jasụ teke ephe tukoru g'ephe ha gbushibekota.

15O buerupho ge Chipfu turu iya onye-ozu iya, bu Mosisu l'ekemu bu ge Mosisu turu iya Jioshuwa; teme o bukwarupho ge Jioshuwa mekotaru iya. Ophu o dukpoda me iphe lanu, o meduru l'iphemiphe ono, Chipfu turu Mosisu l'ekemu ono.

16Oo ya bu; Jioshuwa phe lwutakota ali aka ono l'ophu: ndu bu l'ali ubvu ubvu; yee ndu ophu bu l'echiegu ndohali; waa ndu bu l'ali Goshenu l'ophu; waa ndu ophu bu l'ali okpa ubvu, no l'uzo enyanwu-ariba; waa ndu bu le nsuda Araba; mbu ndu bu l'ubvu ubvu Ízurelu; yee ndu bu l'okpa ubvu iya.

17Ephe gbe l'ubvu Halaku, no l'uzo Siye; lwuta ali ono jasụ le mkpukpu Belu-Gadu, no le nsuda Lebanonu l'uzo ndohali ubvu Hamonu. O kpuchaa ndu eze phe le ndzu gbushia.

18Jioshuwa tsokpo ndu eze ono ogu no odu.

19A -gufu ndu Hevu, bu le mkpukpu Gibiyonu be o to dudu ndu ephe le ndu Ízurelu gbabaaru ndu. Ndu Ízurelu lwutacharu ndu k'ophuu g'ephe ha.

20Kele oo Chipfu l'onwiya kpo-chiru phe okpoma g'ephe tsoje ndu Ízurelu ogu; k'ophu oo-shi nno gbuibe phe rengurengu; mee g'ephe chihu; g'a ta phuru phe obu-imemini, bu iya bu iphe, Chipfu turu Mosisu ekemu su g'o mee.

21O bukwarupho teke ono be Jioshuwa phe byaru bya emee ge ndu Anaku chihu l'ali ubvu ubvu; me ndu ophu bu le mkpukpu Hiburunu; me ndu ophu bu le mkpukpu Debi; waa mkpukpu Anabu; waa ndu ophu bu l'ali ubvu ubvu ndu Jiuda l'ophu; wakwapho ndu bu l'ali ubvu ubvu Ízurelu l'ophu. Jioshuwa tuko phe mebyishikota; ephe le mkpukpu phe.

22Ophu o to dudu ndu Anaku, phoduru l'ali unwu Ízurelu ono me onye lanu. Eka nemadzu phoduru bu le mkpukpu Gaza; waa le mkpukpu Gatu; waa le mkpukpu Ashidodu.

23Oo ya bu le Jioshuwa atuko ali ono l'ophu lwutakota; mbu egube ono, Chipfu suru Mosisu g'o mee ya. O lwutachaa ya; bya eworu iya keeru unwu Ízurelu l'okpa-ipfu l'okpa-ipfu; o buru okiphe phe. E mecha; ali ono kabe daa jii; haa alwu ogu.

Jioshuwa 12

Ndu eze, Mosisu lwutaru

1Owaa bu epha ndu eze ndu ali ono, unwu Ízurelu suru pyaapya natachaa ali phe nworu l'azu enyimu Jiodanu azu iya ophuu l'uzo enyanwu-awawa; a -gbe le ndu bu le nsuda nggele Anonu; jasụ le ndu bu l'ubvu Hamonu; mekpoo ndu bu l'uzo enyanwu-awawa nsuda Araba.

2Eze ke mbu bu Sihonu, bu eze ndu Amoru. Yebdua shi buru le mkpukpu Heshibonu. Ali-eze iya kee ali Giladu ebo; o buru eze l'uzo lanu. Ali-eze iya ono gbe

lẹ mkpukpu Arowa, nọ l'aguga aguga nsuda nggele Anonu; bya agbe lẹ mkpukpu ono, nọ l'echilabo nsuda nggele Anonu ono je akpaa lẹ nggele Jiaboku, bu oke ali ndu Anonu.

³O shikwapho buru eze ndu ophu bu lẹ nsuda Araba; a -gbe l'uzo enyanwu-awawa eze-enyimu Galili je akpaa lẹ mkpukpu Betu-Jieshimotu, du l'uzo enyanwu-awawa Eze-enyimu Unu; bya ago-jia shia uzo ndohali lufuta lẹ mgbaze mgbaze ubvu Pisiga.

⁴Onye eze ozo bu Ogu, bu eze ndu Beshanu. Ali eka o shi buru eze phe be a lwutakwarupho. Yebedua shi buru lẹ mkpukpu Ashitoretu; yee mkpukpu Edereyi. Ogu ono bu onye ikpazu l'eri Rafa.

⁵Ali-eze iya rwuchaaru ubvu Hamonu; waa mkpukpu Saleka; waa ali Beshanu l'ophu; je akpaa l'oke ali ndu Geshu; me ke ndu Maka; me nkeru-ebo ali Giladu; noo jasu ephe l'onye eze, bu Sihonu je amaa oke lẹ mkpukpu Heshibonu.

⁶Ndu eze labo ono bu onye-ozu Chipfu, bu Mosisu; yee ndu Izurelu lwu-kperu phe. Mosisu bya eworu ali ono nu okpa-ipfu Rubenu; waa ke Gadu; waa ke nkeru-ebo okpa-ipfu Manase g'o buru okiphe phe.

Ndu eze ophu Jioshuwa lwu-kperu l'onwiya

⁷Owa-a bu ndu eze ophu bu l'uzo enyanwu-ariba enyimu Jiodanu, bu ndu Jioshuwa yee ndu Izurelu lwu-kpekotaru. Ali ndu eze ono gbe lẹ mkpukpu Belu-Gadu, no lẹ nsuda Lebanonu; je akpaa l'ubvu Halaku, no l'uzo, e shi eje Siye. Jioshuwa bya eworu ali ono keeru ndu Izurelu l'okpa-ipfu l'okpa-ipfu g'o buru okiphe phe.

⁸Ali, shi tuku yikotaru iya nu bu: ali ubvu ubvu; waa ali okpa ubvu, no l'uzo enyanwu-ariba; waa nsuda Araba; waa ali, no lẹ mgbaka mgbaka ubvu; waa oma echiegu; waa echiegu ndohali. Ali ono shi tukuru bukotaru ali ndu Hetu; waa ke ndu Amoru; waa ke ndu Kenanu; waa ke ndu Perezu; waa ke ndu Hevu; me ke ndu Jiebusu.

⁹Ndu Izurelu lwu-kperu onye eze ndu Jieriko; waa onye eze ndu Eyayi, no-kube mkpukpu Betelu;

¹⁰waa onye eze ndu Jirusalemu; me onye eze ndu Heburonu;

¹¹waa onye eze ndu Jiarumutu; me onye eze ndu Lakishi;

¹²waa onye eze ndu Egulonu; me onye eze ndu Geza;

¹³waa onye eze ndu Debi; me onye eze ndu Geda;

¹⁴waa onye eze ndu Homa; me onye eze ndu Aradu;

¹⁵waa onye eze ndu Libuna; me onye eze ndu Adulamu;

¹⁶waa onye eze ndu Makeda; me onye eze ndu Betelu;

¹⁷waa onye eze ndu Tapuwa; me onye eze ndu Hefa;

¹⁸waa onye eze ndu Afeku; me onye eze ndu Lasharonu;

¹⁹waa onye eze ndu Madonu; me onye eze ndu Hazo;

²⁰waa onye eze ndu Shimurõnu-Merõnu; mę onye eze ndu Akushafu;

²¹waa onye eze ndu Tanaku; mę onye eze ndu Megido;

²²waa onye eze ndu Kadęshi; mę onye eze ndu Jiokuneyamu, nõ l'úbvú Kamęlu;

²³waa onye eze ndu Dõru, nõ lę Nafatu-Dõru; mę onye eze ndu Goyimu, nõ l'ali Gálili;

²⁴wafua onye eze ndu Tiza. Iphe, ndu eze ono tukoru du bu ndu eze ukporo l'iri lę nanu.

Jioshuwa 13

Ali õphu ee-mechakwaphõ je alwuta

¹Tõbudu iya bu; Jioshuwa buerupho õgerenya; bya akapfuhuchawa akapfuhu; Chipfu su iya: “Nta bę i buwaa õgerenya bya akapfuhuchawa akapfuhu; teme ali, aa-lwuta kpokwadro kę barara-a.

²Ali ndu õphu ghuduru nu, ee-je alwutafua bu õnu-ęgu ndu Filisitayinu; waa kę ndu Geshu;

³mbu ali, gbę lę nggele Shihõ, nõ l'uzo ęnyanwu-awawa ali ndu Ijiputu; je akpaa lę mkpukpu Ekuronu l'uzo isheli. Ali ono, ndu-ishi ndu Filisitayinu ise shi buru eze phe ono bę aguchaaru yeru ali ndu Kėnanu, bu iya bu: mkpukpu Gaza; waa mkpukpu Ashidodu; waa mkpukpu Ashikelõnu; waa mkpukpu Gatu; wafua mkpukpu Ekuronu. Ozoo bu ali ndu Ava,

⁴nõ l'uzo ndõhali; waa ali ndu Kėnanu l'õphu; mę ndu mkpukpu Meyara, bu ali ndu Sayidonu; je akpaa lę mkpukpu Afęku, bu oke ali ndu Amõru;

⁵wafua ali ndu Gebalu; waa ali úbvú úbvú Lébanõnu l'õphu l'uzo ęnyanwu-awawa; a - gbę lę mkpukpu Belu-Gadu, bu ndõhali úbvú Hamõnu; je akpaa lę mkpukpu Lebo-Hamatu;

⁶wafua ali ndu Sayidonu ndu õphu bu l'ali úbvú úbvú, nõ lę mgbaka úbvú úbvú Lébanõnu; yele mkpukpu Misurefotu-Mayimu. Iphe, bu ndu ono, mu gushiru ono bę mu a-chifukotaru ndu Izuręlu. Ole g'i tua ido gude keshiaru ndu Izuręlu ali ono g'o buru okiphe phe; mbu gę mu suru g'i keeru phe iya ono.

⁷Oo ya bu; gbęshi nta-a woru ali ono keeru okpa-ipfu tete phõ; waa nkeru-ębo okpa-ipfu Manáse ndu õphu ghuduru nu phõ; g'o buru okiphe phe.”

Eeke ali, nõ l'uzo ęnyanwu-awawa ęnyimu Jiõdanu

⁸Okpa-ipfu Rúbenu; waa kę Gadu; waa nkeru-ębo okpa-ipfu Manáse bę natawaru ali, onye-ozu Chipfu, bu Mõsisu nuru phe; l'uzo ęnyanwu-awawa ęnyimu Jiõdanu;

⁹natakwaphõ ali, nõru jasụ lę mkpukpu Arowa. Ndu Arowa bu lę nsuda ono, nõ l'aguga nggele Anõnu; teme õ buru iya bu mkpukpu ono, pharu l'echi nggele ono; mękpoo baswaa ali ono, nõ l'uzo mkpukpu Medeba; je akpaa lę mkpukpu Dibõnu.

¹⁰Ephe natakwarupho alì, nòru je akpaa l'oke alì ndu Amònu l'uzo ẹnyanwu-awawa, bu iya bu mkpukpu Sihonu, bu eze ndu Amoru, shi buru le mkpukpu Heshibonu;

¹¹natakwapfo alì Giladu; waa alì ndu Geshu; waa ke ndu Maka; waa ubvu Hamonu l'ophu; wafua alì Beshanu l'ophu je akpaa le mkpukpu Saleka;

¹²mbu alì Beshanu ono, shi buru alì-eze Ogu, bu onye phoduru nu l'oshilokpa Rafa, bu onye shi bua le mkpukpu Ashitoretu; yee mkpukpu Edereyi. Ole Mosisu lwuchawaru ndu ono; chifu phe l'alì ono.

¹³Obenu le ndu Izurelu ta achifuduru ndu Geshu; waa ndu Maka. Ephe paru phe haa; ephe le ndu Izurelu toko buru byasu ntanu.

¹⁴A bya l'okpa-ipfu Lìvayi; ophu a heduru phe alì; kele Chipfu kwewaru phe ukwe su l'okiphe, ephe e-keta bu iphe-ngweja, a kporu oku nu Chipfu, bu Chileke ke ndu Izurelu.

Alì okpa-ipfu Rúbenu

¹⁵Okpa-ipfu Rúbenu be Mosisu mekwarupho alì ono hee l'ipfu l'ipfu.

¹⁶Alì nkephe shiepho le mkpukpu Arowa noduta. Ndu Arowa bu le nsuda ono, no l'aguga nggele Anonu; teme o buru iya bu mkpukpu ono, pharu l'echi nggele ono; mekpoo baswaa alì ono, no l'uzo mkpukpu Medeba;

¹⁷waa mkpukpu Heshibonu; waa mkpukpu le mkpukpu, nokota le baswaa alì, bu iya bu: Dibonu; waa Bamotu-Belu; waa Betu-Belu-Meyonu;

¹⁸waa Jiahazu; waa Kedemotu; waa Mefahatu;

¹⁹waa Kiriyaatayimu; waa Sibuma; waa Zeretu-Shaha, bu iya bu mkpukpu ophu no l'eli ubvu, no l'ime nsuda;

²⁰wafua mkpukpu Betu-Peyo; waa mkpoze ubvu Pisiga; wafua mkpukpu Betu-Jieshimotu;

²¹waa iphe, bukpoo mkpukpu le mkpukpu, nokota le baswaa alì; mekpoo iphe, bu ohamoha ono, onye eze ndu Amoru ono, bu Sihonu shi buru le mkpukpu Heshibonu buru onye-ishi phe ono. E mechaa; Mosisu lwu-kpee ya; lwu-kpekwapfo ndu-ishi ndu Midiyanu, bu iya bu Evi; waa Rekemu; waa Zuru; waa Huru; waa Reba. G'ephe hakota shi nochia enya Sihonu bugbaaru ishi ndu alì ono.

²²Belamu nwa Beyo, bu onye jibya yi le ndu ophu ndu Izurelu gburu l'ogu.

²³Eka oke alì ndu okpa-ipfu Rúbenu kparu l'uzo ẹnyanwu-ariba bu l'enyimu Jiòdanu. Noo oke alì, ndu okpa-ipfu Rúbenu ketaru bu ono. E woru mkpukpu le mkpukpu, nogbaa ya nu; mekpoo unwu mkpukpu, no-pheru iya mgburugburu keeru phe l'ipfu l'ipfu.

Alì okpa-ipfu Gadu

²⁴Okpa-ipfu Gadu be Mosisu nukwarupho oke alì ono; ephe haa l'ipfu l'ipfu.

²⁵Alì nkepẹ l'ophu bẹ mkpukpu Jiaza yìkotakpo; mẹ iphe, bukota mkpukpu, nọ l'alì Giladu l'ophu; waa alì ndu Amọnu jasụ lẹ mkpukpu Arowa, bụ iya bụ ụzo ẹnyanwu-awawa mkpukpu Raba.

²⁶Alì ono bya agbẹ lẹ mkpukpu Heshibonu; je akpaa lẹ mkpukpu Ramatu-Mizupa; waa mkpukpu Betonimu. Ọ gbẹkwapho lẹ Mahanayimu nọo jasụ l'oke alì Lodeba.

²⁷Mkpukpu, nọgbaa lẹ nsuda, bụ iya bụ Bẹtu-Haramu; waa Bẹtu-Nimura; waa Sukotu; waa Zafonu yìchaaru iya; mękpoo iphe, bụ ohamoha ono, onye eze ono, bụ Sihonu shi buru lẹ Heshibonu buru eze pẹ ono. Mkpukpu ono bukota oke alì okpa-ipfu Gadu l'uzo ẹnyanwu-arịba ẹnyimu Jiđdanu je akpaa l'eze-ẹnyimu Gálili l'uzo isheli iya.

²⁸Ono bukpoepho alì, e woru keeru okpa-ipfu Gadu. E keru pẹ iya l'ẹnya-unuphu l'ẹnya-unuphu; mbụ mkpukpu lẹ mkpukpu, nọgbaa ya nụ; mękpoo nwa mkpukpu, nọpferu iya mgburugburu.

Alì nkeru-ẹbo okpa-ipfu Manáse

²⁹Nkerẹbo okpa-ipfu Manáse bẹ Mosisu nukwarupho oke alì ono; ẹphe haa l'ipfu l'ipfu.

³⁰Alì nkepẹ bụ ẹka o swetaru bụ a -gbẹ lẹ mkpukpu Mahanayimu; je atuko alì Beshanu l'ophu sweta; mękpoo ohamoha, onye eze ono, bụ Ogu, shi buru eze ndu Beshanu waa ukporo mkpukpu ẹto, bụ mkpukpu ndu Jiayi; Jiayi ono nọkwapho lẹ Beshanu.

³¹Nkerẹbo alì Giladu yìkwa iya phọ; waa mkpukpu Ashitoretu; waa mkpukpu Edereyi. Mkpukpu lẹ mkpukpu ono shi buchaaru ohamoha, onye eze, bụ Ogu shi buru onye-ishi pẹ a -gbẹ lẹ Beshanu ẹka o shi buru. Ono, a gushiru ono bụ ophu a nuru oke lanu l'oshilokpa Makiya nwa Manáse. Ẹphe keshia ya l'ipfu l'ipfu.

Iphe, e doberu oshilokpa Lívayi

³²Alì ono bụ lẹ baswaa alì ndu Mówabu, nọ l'azụ ẹnyimu Jiđdanu azụ iya ophuu; l'uzo ẹnyanwu-awawa mkpukpu Jieriko; bẹ Mosisu nọ keshia ya.

³³Obenu l'okpa-ipfu Lívayi bẹ Mosisu ta aheduru oke alì; kele ọ sụru pẹ l'oo Chipfu, bụ Chileke kẹ ndu Ízurelu bụ okiphe nkepẹ.

Jioshuwa 14

Eeke alì ụzo ẹnyanwu-arịba ẹnyimu Jiđdanu

¹Qwaa bukota alì ndu Kėnanu; ibe iya ophu ndu Ízurelu natagbaaru; ọ buru okiphe pẹ, bụ iya bụ gẹ Eleyaza, bụ onye uke Chileke; waa Jioshuwa nwa Nunu; waa ndu-ishi okpa-ipfu ndu Ízurelu gude keeru pẹ iya.

²Oke alì pẹ ono bụ ido bẹ a turu gude keeru iya okpa-ipfu tete lẹ nkeru-ẹbo iya phọ, bụ iya bụ gẹ Chipfu sụru Mosisu g'e mee ya.

³Mósisu nɔwaru ɔkpa-ipfu labo le nkeru-ɛbo iya ophuu oke ali nkephe l'uzo ɛnyanwu-awawa ɛnyimu Jiɔdanu. Obenu l'ɔkpa-ipfu ke ndu Lívayi ta adudu ophu a nuru phe g'a nuru ndu ophuu;

⁴mbu l'ɔkpa-ipfu Jiósefu duwaa ɔkpa-ipfu labo, bu iya bu ɔkpa-ipfu Manáse; waa ke Ifuremu. Ndu Lívayi be a ta nuduru ali. Nwɛka a nuru phe buepho mkpukpu ɛka ephe e-buru; yee ɛka ephe e-cheje iphe-edobe phe.

⁵Ndu Ízurelu woru ali ono kee ge Chipfu suru Mósisu g'e kee ya.

Aanu Kalebu mkpukpu Heburonu

⁶Noo ya; ndu shi l'ɔkpa-ipfu Jiuda wu-pfuta Jioshuwa le Gilugalu. Tobudu iya bu; Kalebu nwa Jiefune, shi l'ipfu ndu Kenazu su iya: “? O kwa l'i makwaduru-a iphe, Chipfu pfuru onye-ozu iya, bu Mósisu l'opfu ehu mu le ngu le Kadeshi-Baneya?”

⁷Iphe, mu nowaru eshinu a nwuru mu bu ukporo apha labo teke onye-ozu Chipfu, bu Mósisu no le mkpukpu Kadeshi-Baneya zia mu su ge mu je anwua ngge l'ali-a. Mu jechaa bya ewota iphe, mu humaru kokotaru iya; koreru iya pho g'o du mu l'obu.

⁸Obenu le ndu ophu anyi l'ephe swi jeru je emee; ndzu rwuta ndu Ízurelu. Ole mbedua gudepho obu mu g'o ha tsoru Chipfu, bu Chileke mu.

⁹Oo ya bu; o buru le mboku ono gedegede be Mósisu rifuru angu su l'ali ono, mu zoru ɔkpa ono a-buru okiphe mu l'unwu mu jasu le tuutuutu le mimiimii; kele mu gude obu mu l'opfu etso Chipfu, bu Chileke ke yebe Mósisu.

¹⁰“Chipfu mechaa mee iphe ono, o kweru mu ukwe iya ono; dobe mu ndzu; k'opfu bu le nta-a be mu nowaru ukporo apha labo l'apha ise; e -shi teke ono, o pfuru Mósisu iphe ono, bu iya bu teke ono, ndu Ízurelu shi aghaphe l'echiegu ono. Waa mu baa ntanu-a; mube onye nowaru ukporo apha eno l'apha ise eshinu a nwuru mu!”

¹¹Teme mu bukwaduru opha ge mu bu iya eshi teke Mósisu ziru mu ozu ono. Oo g'ike du mu teke ono bu g'o du mu nta-a k'eje ugu jee lwa.

¹²O buru iphe, mu epfu bu g'i phenaaru mu ɛka l'oboto-egu ndu-a, bu l'ali ubvu ubvu-a, bu ali ɛka Chipfu kweru mu ukwe iya mboku ono. O dunaa g'i numanuru-a teke ono le ndu bu l'eka ono bu oshilokpa Anaku; le mkpukpu phe paru ɛka; wafua l'ephe gude igbulu kpu-pee mkpukpu phe ono mgburugburu; obenu le Chipfu e-yetaru mu-a ɛka; mu achifu phe nata ali phe; bu iphe, o pfuru mu.”

¹³Noo ya; Jioshuwa bya agoru onu-oma nu Kalebu nwa Jiefune; bya eworu Heburonu nu iya g'o buru okiphe iya.

¹⁴Oo ya bu; mkpukpu Heburonu buru ke Kalebu nwa Jiefune, shi l'ipfu ndu Kenazu e -shi teke ono; noo kele o gude obu iya g'o ha tsoru uzo Chipfu, bu Chileke ndu Ízurelu.

¹⁵Heburonu be e shi ekuje Kiriyatu-Araba. Aba ono bu nwoke, bu iya shi kachaa shii l'oshilokpa Anaku. Oo ya bu; e mechaa; ephe tuta unme k'alwu ugu.

Jioshuwa 15

Alì ọkpa-ipfu Jiuda

- ¹Alì, a t̄uru ido; ọ dabaru ọkpa-ipfu Jiuda; ẹphe haa ya l'ipfu l'ipfu n̄oru gbiriri jas̄u l'oke ẹphe l̄e ndu Edomu; l'uzo echięgu Zinu; l'ẹka alì ono jeberu l'uzo ndohali iya.
- ²Oke alì phe l'uzo ndohali gb̄e l'aguga Eze-ẹnyimu Únú l'ibiya k'uzo ndohali;
- ³kwaseru uzo ndohali úbvú “akpì” ; bya agbewaro l'ẹka ono pfukwaseru n̄o jas̄u l'echięgu Zinu. T̄eme ọ gb̄ekwapho l'ẹka ono lufu l̄e ndohali mkpukpu Kad̄eshi-Baneya. O shijaa mkpukpu H̄ezuronu bah̄u l̄e mkpukpu Adaru; gbajia uswe bah̄u l̄e mkpukpu Karaka.
- ⁴O shikwapho l'ẹka ono kwaseru jas̄u l̄e mkpukpu Az̄umonu; bya anowaro lufuta l'onu nggele ndu Ijiputu. Alì phe ono l'ophu buru l̄e nggele ono b̄e ọ kparu. Ọ buru ẹka alì phe jeberu l'uzo ndohali b̄u ono.
- ⁵Oke iya l'uzo ẹnyanwu-awawa shi l̄e Eze-ẹnyimu Únú kwaseru jas̄u l'ẹka ẹnyimu Jiđdanu as̄oba l̄e Eze-ẹnyimu Únú ono. Oke iya l'uzo isheli gb̄e l'ẹka ono
- ⁶n̄o jas̄u l̄e mkpukpu B̄etu-Hogula; n̄owaro gbiriri jas̄u l'uzo isheli mkpukpu B̄etu-Araba; jas̄u l̄e Mkpuma Bohanu. Bohanu ono b̄u nwa Rúb̄enu.
- ⁷Oke-alì ono bya agb̄e l̄e ns̄uda Ak̄oru kwaseru uzo mkpukpu Debi; bya agb̄e l'ẹka ono kwaseru uzo nd̄egu jas̄u l̄e mkpukpu Gilugalu, n̄o gha iphu l'úbvú Adumimu, n̄o l'uzo ndohali ns̄uda nggele, n̄o l'ẹka ono. Ọ gb̄e l'ẹka ono pfukwaseru Enu-Sh̄emeshi; kwaseru lufuta l̄e Enu-Rogelu.
- ⁸Noo ya; oke alì phe ono gb̄e l̄e ns̄uda H̄inomu, n̄o l'uzo ndohali mkpukpu Jiebusu, b̄u iya b̄u Jierúsalem̄u; nyikota úbvú, n̄o l'uzo ẹnyanwu-ar̄iba ns̄uda H̄inomu; mb̄u l'uzo isheli ns̄uda Refayimu.
- ⁹Oke-alì ono bya agb̄e l'eli úbvú ono n̄o jas̄u l'ẹnya-mini Nefutowa; bya agb̄e l'ẹka ono lufuta l̄e mgboru mkpukpu, n̄ogbaa l̄e mgboru úbvú Ẹfuronu; bya aswi-jia futa l̄e mkpukpu Bala, b̄u iya b̄u Kiriyatu-Jiarimu.
- ¹⁰Ọ gb̄e l̄e mkpukpu Bala gbajia uzo ẹnyanwu-ar̄iba jas̄u l'úbvú Siye; shiwaro l'ẹka ono kwaseru uzo isheli úbvú Jiarimu, b̄u iya b̄u úbvú Kesalonu; bya eshi l'ẹka ono gbazeta mkpukpu B̄etu-Sh̄emeshi; bya aghabua mkpukpu Timuna.
- ¹¹Ọ gb̄e l'ẹka ono pfukwaseru úbvú, n̄o l'uzo nd̄egu mkpukpu Ẹkuronu; bya agbajia shita mkpukpu Shikeronu; je aghabua úbvú Bala; bya erwua Jiabun̄elu. Oke iya jeeph̄o je as̄ube l'eze-ẹnyimu.
- ¹²Oke iya l'uzo ẹnyanwu-ar̄iba b̄u Eze Ẹnyimu. Noo g'e gude meeru ọkpa-ipfu Jiuda alì b̄u ono; ẹphe haa ya l'ipfu l'ipfu.

Ọtuniyelu alwuta mkpukpu Debi

(Ikpe 1:10-15)

13No iya; ọ bụru l'ẹka oke alì ọkpa-ipfu Jiuda dū bẹ Jioshuwa meru alì nū Kalẹbu nwa Jiefune. O bụru ẹgube ono bẹ Chipfu tūru iya ya l'ekemu sū g'o mee ya. Alì ẹka ọ nūru iya bụ mkpukpu Kiriyatu-Araba, bụ iya bụ Hẹburonu. Aba ono bụ nna Anaku.

14Kalẹbu bya agbẹ lẹ Hẹburonu chifu ipfu ndu Anaku ẹphe n'eto, bụ iya bụ ndu Sheshayi; waa ndu Ahimanu; waa ndu Talumayi. G'ẹphe ha tukuru bụru oshilokpa Anaku.

15O gbẹ l'ẹka ono jeshia ndu mkpukpu Debi ọgu. Iphe, e shi ekuje Debi bụ Kiriyatu-Sefa.

16No iya; Kalẹbu sū: “Onye -gbeshikpowaru je alwua ndu Kiriyatu-Sefa lwuta; mu ekee onye obu nwatibe mu, bụ Akusa g'ọ luru.”

17O bụru Otuniyelu nwa Kenazu, bụ nwune Kalẹbu bẹ jeru alwuta mkpukpu ono. Oo ya bụ; Kalẹbu kee ya nwada iya ono, bụ Akusa; ọ luru.

18O lwaepho ibe Otuniyelu; ọ sū iya g'o je epfuaru nna iya, bụ Kalẹbu g'ọ wẹe ya alì. Akusa bya enyizeta l'eli nkafu-igara iya; Kalẹbu jia ya sū: “? Bụ gunu bẹ mu e-meru ngu?”

19O sū iya: “Menaarū mu iphe-oma. Eshinu i sūru gẹ mu laa echiegu ndohali; nufunaa mu alì l'ẹka mini, anwu shokoshoko.” Oo ya bụ; Kalẹbu bya eworu ẹka mini anwu shokoshoko l'ẹka dū dagere-dagere mẹ l'ẹka bụ ọhu iya woru nū iya.

20Waa oke alì, e meru nū ọkpa-ipfu Jiuda l'ipfu l'ipfu g'ọ bụru okiphe pẹ baa:

21Mkpukpu, a nūgbaru ọkpa-ipfu Jiuda l'alì ndu ndohali lẹ mgboru oke alì ndu Edomu bụ: Kabuzelu; waa Eda; waa Jiagu;

22waa Kina; waa Dimona; waa Adada;

23waa Kadeshi; waa Hazo; waa Itunanu;

24waa Zifu; waa Telemu; waa Beyalotu;

25waa Hazo Hadata; waa Keriyotu-Hezuronu, bụ iya bụ Hazo;

26waa Amamu; waa Shema; waa Molada;

27waa Haza-Gada; waa Heshimonu; waa Betu-Peletu;

28waa Haza-Shuwalu; waa Biye-Sheba; waa Biziyotiya;

29waa Bala; waa Imu; waa Ezemu;

30waa Elutoladu; waa Kesilu; waa Homa;

31waa Zikulagu; waa Madumana; waa Sansana;

32waa Lebawotu; waa Shilihimu; waa Ayinu; wafua Rimonu. Iphe, ọ tukuru dū bụ ukporo mkpukpu lẹ mkpukpu tete; yee unwu mkpukpu, nogbaa pẹ mgburugburu.

- ³³Èka a nuru òkpa-ipfu Jiuda l'alì òkpa úbvú, nò l'uzo ẹnyanwu-arìba bụ Èshutolu; waa Zora; waa Ashùna;
- ³⁴waa Zanowa; waa Enu-Ganimu; waa Tapuwa; waa Enamu;
- ³⁵waa Jiarumutu; waa Adulamu; waa Soko; waa Azeka;
- ³⁶waa Sharayimu; waa Aditemu; waa Gedera; wafùà Gederotayimu. Iphe, ò dụ bụ mkpụkpu iri l'èno; yèe unwu mkpụkpu, nọgbaa phẹ mgburugburu.
- ³⁷Wafùà Zenanu; waa Hadasha; waa Mìgudalu-Gadu;
- ³⁸waa Dilanu; waa Mizupa; waa Jìòkutelu;
- ³⁹waa Lakishi; waa Bòzukatu; waa Ègulonu;
- ⁴⁰waa Kabonu; waa Lahumamu; waa Kitulishi;
- ⁴¹waa Gederotu; waa Bètu-Dagonu; waa Nama; wafùà Makeda. Iphe, ò dụ bụ mkpụkpu iri l'ishii; yèe unwu mkpụkpu, nọgbaa phẹ mgburugburu.
- ⁴²Wafùà Libuna; waa Eta; waa Ashanu;
- ⁴³waa Ifuta; waa Ashùna; waa Nezibu;
- ⁴⁴waa Keyila; waa Akuzibu; wafùà Maresha. Iphe, ò dụ bụ mkpụkpu tete; yèe unwu mkpụkpu, nọgbaa phẹ mgburugburu.
- ⁴⁵Ọzo bụ mkpụkpu Èkuronu; yèe mkpụkpu ọzo, nọgbaa lẹ mgboru ẹka ono; yèe unwu mkpụkpu, nọgbaa phẹ mgburugburu.
- ⁴⁶Ọzo bụ iphe, bụ mkpụkpu, nò lẹ mgboru Ashìdodu; lẹ mgbaka ọzo ẹnyanwu-arìba mkpụkpu Èkuronu; yèe eze-ẹnnyimu.
- ⁴⁷Ọzo bụ mkpụkpu Ashìdodu l'onwiya; waa mkpụkpu Gaza; waa mkpụkpu ọzo, nọgbaa lẹ mgboru ẹka ono; waa nwa mkpụkpu, nọgbaa iphe, bụ mkpụkpu ono mgburugburu; gbiriri je akpaa lẹ nggele, bụ oke alì ndu Ijiputu; waa l'oke-ẹnnyimu.
- ⁴⁸Ọwaa bụ mkpụkpu, nò l'alì úbvú úbvú, a nuru òkpa-ipfu Jiuda baa: Shamiru; waa Jiatiru; waa Soko;
- ⁴⁹waa Dana; waa Kiriyatu-Sana, bụ iya bụ Debi;
- ⁵⁰waa Anabu; waa Eshutemowa; waa Animu;
- ⁵¹waa Goshenu; waa Holonu; wafùà Gilo. Iphe, ò dụ bụ mkpụkpu iri lẹ nanu; yèe unwu mkpụkpu, nọgbaa phẹ mgburugburu.
- ⁵²Wafùà Arabu; waa Duma; waa Eshanu;
- ⁵³waa Jianimu waa Bètu-Tapuwa; waa Afeka;
- ⁵⁴waa Humuta; waa Kiriyatu-Araba, bụ iya bụ Hẹburonu; waa Ziyọ. Iphe, ò dụ bụ mkpụkpu tete; yèe unwu mkpụkpu, nọgbaa phẹ mgburugburu.

- ⁵⁵Wafua Mawonu; waa Kamelu; waa Zifu; waa Jiuta;
- ⁵⁶waa Jiezerelu; waa Jiokudeyamu; waa Zanowa;
- ⁵⁷waa Kenu; waa Gibiya; wafua Timina. Iphe, o du bu mkpukpu iri; yee unwu mkpukpu, nogbaa phe mgburugburu.
- ⁵⁸Wafua Haluhulu; yee Betu-Zuru; waa Gedo;
- ⁵⁹waa Maratu; waa Betu-Anotu; wafua Elitekonu. Iphe, o du bu mkpukpu ishii; yee unwu mkpukpu, nogbaa phe mgburugburu.
- ⁶⁰Wafua Kiriyatu-Belu, bu iya bu Kiriyatu-Jiarimu; waa Raba. Iphe, o du bu mkpukpu labo; yee nwa mkpukpu, nogbaa ya mgburugburu.
- ⁶¹Owaa bugbaa mkpukpu, no l'echiegu, a nuru okpa-ipfu Jiuda: Betu-Araba; waa Midinu; waa Sekaka;
- ⁶²waa Nibushanu; waa Unu; waa Enu-Gedi. Iphe, o du bu mkpukpu ishii; yee unwu mkpukpu, nogbaa phe mgburugburu.
- ⁶³Ophu ndu Jiuda adudu ike chifu ndu Jiebusu, bu le Jierusalemu. Ndu Jiuda ephe le ndu Jiebusu ono bua eghirigha e -shi teke ono byasu ntau-a.

Jioshuwa 16

Ali okpa-ipfu Ifuremu waa Manase

- ¹Oke ali ophu a turu ido gude hee oshilokpa Jiosefu; gbẹ l'uzo enyanwu-awawa obvu mini ke mkpukpu Jieriko, no le mgboru enyimu Jiordanu; ghata mkpukpu Jieriko; kwaseru echiegu lufu l'ali ubvu ubvu je akpaa le mkpukpu Betelu.
- ²O shi le mkpukpu Betelu kwaseru mkpukpu Luzu; bya eshi l'eka ono rwua mkpukpu Atarotu, no l'ali ndu Aku.
- ³O gbẹ l'eka ono kwaseru uzo enyanwu-ariba lufu l'oke ephe le ndu Jiafuleti; noduwaro egube ono kwaseru ali ndu Betu-Horonu; shiwaro l'eka ono noo jasụ le mkpukpu Geza; o kwaseru je asube l'eze-enyimu.
- ⁴Noo oke ali, okpa-ipfu Manase; yee ke Ifuremu, oshilokpa Jiosefu nataru g'o buru okiphe phe.
- ⁵Waa g'oke ali oshilokpa Ifuremu l'ipfu l'ipfu jeru baa: O gbẹ le mkpukpu Atarotu-Ada, no l'uzo enyanwu-awawa kwaseru mkpukpu Betu-Horonu ophu no l'uzo eli iya;
- ⁶shikwapho l'eka ono noo jasụ l'eze-enyimu; l'uzo ndohali mkpukpu Mikumetatu. O gbẹ l'eka ono gbajia uzo enyanwu-awawa noo jasụ le mkpukpu Tanatu-Shilo; bya agbe l'eka ono pfukwaseru uzo enyanwu-awawa noo jasụ le mkpukpu Jianowa.
- ⁷O gbewaro l'eka ono gbazeta jasụ le mkpukpu Atarotu; waa mkpukpu Nara; bya ehuru ehuru le mkpukpu Jieriko; gbẹ l'eka ono lufuta l'enyimu Jiordanu.

⁸L'ibiya ophuu be oke ali ndu Ifuremu gbẹ lẹ mkpukpu Tapuwa kwaseru lufu lẹ nggele Kana; nowaro nno kpoda l'eze-enyimu. Ono bukota oke ali ndu Ifuremu l'ipfu l'ipfu;

⁹yee mkpukpu olemole ozo, e bufuru ndu Ifuremu l'ali ophu a nuru ndu Manase.

¹⁰Ole ephe ta achifuduru ndu Kenanu, bu lẹ mkpukpu Geza. Ephe lẹ ndu Ifuremu buru eghirigha byasu ntanu-a; ephe nodu ekebutaje ndu Kenanu ono g'ephe jeru phe ozi.

Jioshuwa 17

¹Owaa bu okè ali ophu a turu ido gude keeru oshilokpa Manase; kele oo ya bu okpara Jiosefu. Okpara Manase, bu Makiya, bu nna Giladu be a nuwaru ali Giladu; waa ali Beshanu, no l'uzo enyanwu-awawa enyimu Jiordanu. Noo kele o goshiru l'o bu onye ike du l'ogu.

²A tukwapho ido gude mee ali nu okpa-ipfu Manase ophu ghuduru nu; ephe haa l'ipfu l'ipfu, bu iya bu unwu Abiyeza; waa unwu Heleku; waa unwu Asurelu; waa unwu Shekemu; waa unwu Hefa; waa unwu Shemida. G'ephe ha tukoru bukotaru unwu Manase; Manase bukwanuru nwatibe Jiosefu. O buru g'ephe haru ali ono l'ipfu l'ipfu bu ono.

³A bya lẹ Zelofehadu; yebedua ta nwutaduru nwa nwoke. Oo unwu nwa nwanyi be o nwushiru. Zelofehadu ono bu nwa Hefa; Hefa buru nwa Giladu; Giladu buru nwa Makiya; Makiya bukwanuru nwa Manase. Epha unwanyi ono, Zelofehadu nwushiru ono bu Mahula; yee Nuwa; yee Hogula; yee Milika; yee Tiza.

⁴Unwu iya unwanyi ono wuru bya ejepfu onye uke Chileke, bu Eleyaza; waa Jioshuwa nwa Nunu; yee ndu bu ndu-ishi je asu phe: "Chipfu tukwaru ekemu nu Mosisu su iya g'o hee anyi oke ali g'a heru unwunna anyi phe." Oo ya bu; Jioshuwa bya emeepho ge Chipfu pfuru; mee ali nu phe g'a nuru unwunna phe.

⁵Okpa-ipfu Manase be a nuru uzo ali iri; a -gufukwa ali Giladu; waa ali Beshanu, bu ophu no l'uzo enyanwu-awawa enyimu Jiordanu azu iya ophuu;

⁶kele unwuada Manase be a nuru ali g'a nuru unwu iya unwoke. Unwu Manase ndu ophuu buru ali Giladu bu oke ali phe.

⁷Ali ndu Manase shi l'oke ephe l'okpa-ipfu Asha noo je akpaa lẹ mkpukpu Mikumetatu, bu uzo enyanwu-awawa mkpukpu Shekemu. Oke ali ono gbẹ l'eka ono kwaseru uzo ndohali; kpabuta ndu bu lẹ Enu Tapuwa yekobe iya.

⁸Ali ndu Tapuwa l'ophu bukota ke ndu Manase; obenu lẹ mkpukpu Tapuwa obu gedegede laaru ndu Ifuremu; kele o no lẹ mgbaka ndu Manase ephe lẹ ndu Ifuremu.

⁹Oke ali ono gbẹ l'eka ono kwaseru uzo ndohali lufu lẹ nsuda nggele Kana. O nweru mkpukpu olemole, no l'uzo ndohali nggele ono, bu ke ndu Ifuremu. Ole ali ono bu ndu Manase nwe iya. Oke ali ndu Manase gbẹ l'eka ono laphu azu l'uzo ndegu nggele ono bya akwaseru nno jasụ l'eze-enyimu.

10Alì ono l'uzo ndòhali nggele ono bẹ bụ kẹ ndu Ifuremu; ụzo isheli bụru kẹ ndu Manáse. Nkephẹ nọru je akpaa l'eze-enyimu; ephe lẹ ndu Asha je amaa oke l'uzo isheli; ephe lẹ ndu Isaka je amaa oke l'uzo enyanwu-awawa.

11L'ime alì ndu Isaka; waa kẹ ndu Asha bẹ o nweru mkpukpu olemole, bụ kẹ ndu Manáse, bụ iya bụ Bẹtu-Shanu; waa Ibulamu; mękwapho mkpukpu kẹ ndu Dọru; waa Enu-Dọru; mę Tanaku; mękwapho Megido; tẹme wakwapho ndu bupheru iya mgburugburu. Mkpukpu ophu kwe k'eto lẹ mkpukpu ono, a gushiru ono bụ Nafatu.

12Ole oshilokpa Manáse ta adudu ike chifu ndu Kėnanu, bu lẹ mkpukpu ono; ndu Kėnanu buerupho l'alì ono g'ephe bu iya.

13O be gẹ ndu Ízurelu nonyaru bya evuta kapyabẹ ndu Kėnanu; ephe kebuta ndu Kėnanu; ephe jeahaaru phẹ ozi; ophu ephe achifuduru phẹ achifu.

14O -rwua ujiku lanu; oshilokpa Jiófẹfu jepfu Jioshuwa je asu iya: “? Denu g'ọ nwuru o bụ uzi alì lanu kpoloko bẹ a turu ido nu anyi su g'ọ bụru oke alì anyi; l'anyibe ndu Chileke keberu l'oma mee; anyi bụru ndu du igwerigwe egube-a?”

15Jioshuwa su phẹ: “O -buru l'unu ha l'igwe k'ophu bụ l'alì úbvú úbvú ndu Ifuremu parụ unu nwanshii; unu je asuta oswa l'alì ndu Pėrezu; waa k'oshilokpa Rafa yebaa ya!”

16Oshilokpa Jiófẹfu ono su iya: “Alì úbvú úbvú ono ta asukwa anyi; tẹme ndu Kėnanu, bu lẹ nsuda nsuda, nọ lẹ mgboru ẹka ono bụru ndu nwechaaru ugbo-inya, e meru l'ígwè; mbu ndu bu lẹ Bẹtu-Shanu; mę ndu bupheru iya mgburugburu; waa ndu bu lẹ nsuda Jiezerelu.”

17Jioshuwa su oshilokpa Jiófẹfu, bụ iya bụ ndu Ifuremu; waa ndu Manáse: “Unu du igwe shii; tẹme okpehu du unu; o to budu uzi alì lanu kpoloko bẹ ido iya a-dabaru unu.

18Alì úbvú úbvú l'ophu a-buru k'unu. O bụ eviya l'oswa du iya. Unu sua ya; g'oke iya g'ọ hakota bukotaru k'unu. A makwaru-a lẹ ndu Kėnanu bẹ nweru ugbo-inya, e meru l'ígwè; tẹme okpehu du phẹ; ole unu a-du-a ike chishichaa phẹ l'eka ono!”

Jioshuwa 18

Eeme alì ophu ghuduru nu

1Ndu Ízurelu g'ephe ha bya edzukobe lẹ mkpukpu Shilo; woru ulo-ekwa-ndzuko kpobe. Ephe sepyabewaa alì ono; o nodukota phẹ l'eka.

2Ole okpa-ipfu Ízurelu esaa teke anatadu oke alì nkephẹ.

3Oo ya bụ; Jioshuwa su ndu Ízurelu: “? Bukpoo teke ole bẹ unu a-nọ-beru; tẹme unu atugbua je anata alì ono, Chipfu, bụ Chileke kẹ nna unu oche phẹ nuru unu ono?”

4Ngwa; g'okpa-ipfu nonu hota unwoke eto eto g'ephe bya gẹ mu zia phẹ g'ephe je agbaphe alì ono; bya edee ya l'ekwo kọo g'ee-gude kee ya. Ephe -meebe nno; ephe ewotaru mu iya.

⁵Alì ono bẹ ẹphe e-ke uzi ẹsaa. Ndu Jiuda a-nọdu l'alì ọphu a nuru phẹ l'uzo ndọhali; ndu Jiósefu anọdu l'ọphu a nuru phẹ l'uzo isheli.

⁶Unu pfua g'ee-me alì ono ọzo ẹsaa; dee ya l'ẹkwo; unu abya epfuaru mu g'unu meru iya; mu atua ido l'iphu Chipfu, bu Chileke anyi g'unu gude haa ya.

⁷Unu te emekwa alì gbaa ndu Lívayi; kele okiphe nkephẹ bu abubu ono, ẹphe bu ndu-uke Chileke ono. Teme ọphu ndu Gadu; waa ndu Rúbenu; waa ndu Manáse ẹka lanu ahatakwaphọ alì ono; kele ẹphebedua bẹ a nwaru oke alì nkephẹ l'uzo ẹnyanwu-awawa ẹnyimu Jiódanu. Ọ buru onye-ozì Chipfu, bu Mósìsu bẹ nuru phẹ alì nkephẹ.”

⁸Tọbodu iya bu; unwoke ono wu-lihuepho g'ẹphe je emee alì ono dee ya l'ẹkwo; Jioshuwa nmaaru phẹ ọkwa su phẹ: “Unu tugbua je ejedzuru alì ono mgburugburu; unu edee g'ọ gbaru l'ẹkwo wotaru mu; gẹ mu nọdu l'ẹka-a tua ido l'iphu Chipfu lẹ Shilo l'ẹka-a g'unu gude haa ya.”

⁹Ọo ya bu; unwoke ono tugbua je ejedzuru alì ono. Ẹphe bahu lẹ mkpukpu lẹ mkpukpu ọzo je emee alì ono ọzo ẹsaa; dekọta g'alì ono gbaru l'ẹkwo; wolataru Jioshuwa l'ẹka ndu Ízurelu kpọberu ọlo-ẹkwa phẹ lẹ Shilo.

¹⁰Jioshuwa bya atuaru phẹ ido l'iphu Chipfu lẹ Shilo; shi nno doziaru ndu Ízurelu alì ono; ẹphe haa lẹ g'e keru iya.

Alì ndu Benjaminu

¹¹Ido ono daaru ọkpa-ipfu Benjaminu l'ipfu l'ipfu. Alì ọphu a nuru phẹ nọdu lẹ mgbaka alì ndu Jiuda yee ke ndu Jiósefu.

¹²L'uzo isheli bẹ oke alì phẹ gbẹ l'enyimu Jiódanu nọo jasụ l'uzo ibiya k'isheli mkpukpu Jieriko; bya adasweru alì úbvú úbvú l'uzo ẹnyanwu-ariba; gbẹ l'ẹka ono lufuta l'echiegu, nọ lẹ mkpukpu Bẹtu-Avenu.

¹³Oke alì phẹ ono gbẹ l'ẹka ono dasweru ọzo mkpukpu Luzu; mbu l'o jeerupho je adakoru Luzu, bu iya bu Bẹtelu; l'uzo ndọhali; bya agbẹ l'ẹka ono gbazeta lẹ mkpukpu Atarotu-Ada l'eli úbvú, nọ l'uzo ndọhali mkpukpu Bẹtu-Horonu.

¹⁴Oke alì ndu Benjaminu gbẹ l'úbvú, gharu iphu lẹ mkpukpu Bẹtu-Horonu l'uzo ndọhali; gbajia ọzo ndọhali; kwaseru ọzo ẹnyanwu-ariba úbvú ono; bya alufuta lẹ Kiriyatu-Belu, bu iya bu Kiriyatu-Jiarimu, bu mkpukpu, nọ l'alì ndu Jiuda. Noo oke alì ndu Benjaminu k'uzo ẹnyanwu-ariba bu ono.

¹⁵L'uzo ndọhali bẹ ọ gbẹ l'oke Kiriyatu-Jiarimu; pfukwaseru lufu lẹ mgboru ẹnyamini Nefutowa.

¹⁶Oke alì ono bya agbẹ l'ẹka ono dasweru ọkpa úbvú, nọ gha iphu lẹ nsuda Hìnomu; mbu l'uzo isheli nsuda Refayimu. Ọ gbẹ l'ẹka ono gbazeta lẹ nsuda Hìnomu, nọ l'uzo ndọhali mkpukpu Jiebusu; jee jasụ ọ lufu lẹ Enu-Rogelu.

¹⁷Ọ gbẹ l'ẹka ono gbajia ọzo isheli lufu l'uzo mkpukpu Enu-Shemeshi; nọwaro jasụ lẹ mkpukpu Gelilotu, nọ gha iphu l'úbvú Adumimu; gbẹ l'ẹka ono gbafu lẹ Mkpuma Bohanu. Bohanu ono bu nwa Rúbenu.

¹⁸Ọ gbẹkwapho l'ẹka ono ọọ jasụ l'ụzo isheli mkpụkpu Bẹtu-Araba; gbẹ l'ẹka ono lufu lẹ nsụda Araba.

¹⁹Ọ kwaseru ụzo isheli mkpụkpu Bẹtu-Hogula; bya ebufuta l'ụzo isheli Eze-enyimu Únú l'ẹka enyimu Jiódanu asọba l'eze-enyimu ono l'ụzo ndohali. Noo oke alị ndu Benjaminu k'ụzo ndohali bụ ono.

²⁰L'ụzo enyanwu-awawa bẹ oke iya bụ l'enyimu Jiódanu. Ono bụ oke alị ndu Benjaminu. Ọ bụ alị nkephe bụ ono gbaa mgburugburu; ọ buru g'ephe haru alị phe bụ ono l'ipfu l'ipfu.

²¹Waa mkpụkpu, bụ k'okpa-ipfu Benjaminu l'ipfu l'ipfu baa: Jieriko; waa Bẹtu-Hogula; waa Emeku-Kezizu;

²²waa Bẹtu-Araba; waa Zemarayimu; waa Bẹtelu;

²³waa Ava; waa Para; waa Ofura;

²⁴waa Kefa-Amoni; waa Ofuni; wafua Geba. Iphe, ọ dū bụ mkpụkpu iri l'ẹbo; yee unwu mkpụkpu, ọgbaa phe mgburugburu.

²⁵Mkpụkpu ọzo bụ ke ndu Benjaminu bụ Gibiyonu; waa Rama; waa Berotu;

²⁶waa Mizupa; waa Kefira; waa Moza;

²⁷waa Rẹkemu; waa Ipelu; waa Tarala;

²⁸waa Zela; waa Hẹlefu; waa mkpụkpu ndu Jiebusu, bụ iya bụ Jierúsalemu; waa Gibiya; waa Kiriyatu-Jiarimu. Iphe, ọ dū bụ mkpụkpu iri l'eno; yee unwu mkpụkpu, ọgbaa phe mgburugburu. Ono bụ g'ọ hakota; mbụ okiphe unwu Benjaminu; g'e keru iya l'ipfu l'ipfu.

Jioshuwa 19

Alị ndu Simiyonu

¹A bya atua ido k'ẹbo; ọ daaru okpa-ipfu Simiyonu l'ipfu l'ipfu. Oke alị, a nuru phe no l'ime alị ndu Jiuda.

²Mkpụkpu, yi l'ophu a nuru phe bụ: Biye-Sheba, bụ iya bụ Sheba; waa Molada;

³waa Haza-Shuwalu; waa Bala; waa Ezemu;

⁴waa Elutoladu; waa Betulu; waa Homa;

⁵waa Zikulagu; waa Bẹtu-Makabotu; waa Haza-Susa;

⁶waa Bẹtu-Lebawotu; wafukwaapho Sharuhenu. Iphe, ọ dū bụ mkpụkpu iri l'eto; yee unwu mkpụkpu, ọgbaa phe mgburugburu.

⁷Mkpụkpu ọzo, yikwapho l'alị ndu Simiyonu bụ Ayinu; waa Rimonu; waa Eta; wafua Ashanu. Iphe, ọ dū bụ mkpụkpu eno; yee unwu mkpụkpu, ọgbaa phe mgburugburu;

⁸mẹwaro iphe, bu unwu mkpukpu ozo, no-phegbaaru mkpukpu ono, a gushiru ono mgburugburu; je akpaa le Balatu-Biye, bu iya bu Rama, du l'echiegu ndohali. Noo oke ali, a nuru okpa-ipfu Simiyonu l'ipfu l'ipfu bu ono.

⁹Ali ke ndu Simiyonu bu ali, a wataru l'ali ophu a nuru ndu Jiuda; noo kele ophu a nuru oshilokpa Jiuda paru eka k'ophu bu l'ephe ta adudu ike buchia ya. Noo iphe, meru g'o gude a wata ali ndu Jiuda nu phe.

Ali ndu Zebulun

¹⁰A bya atua ido k'eto; o daaru Zebulun l'ipfu l'ipfu. Oke ali nkephe kparu le Saridi.

¹¹O gbe l'eka ono kwaseru uzo enyanwu-ariba mkpukpu Marala; bya eshita mkpukpu Dabeshetu; bya anodu nno gbiriri jasu le nggele, no gha iphu le mkpukpu Jiokuneyamu.

¹²L'ibiya ke mkpukpu Saridi be o kwaseru uzo enyanwu-awawa jasu l'oke ali ndu mkpukpu Kisulotu-Tabo; shiwaro l'eka ono noo jasu le mkpukpu Daberatu; bya ejerwucha mkpukpu Jiafiya.

¹³Oo ya bu; o kwasekpoerupho uzo enyanwu-awawa lufu le mkpukpu Gatu-Hefa; waa mkpukpu Etu-Kazinu; o bufuta le mkpukpu Rimonu; bya ekwojia okotazu Mkpukpu Neya.

¹⁴O -rwua eka ono; o kwaseru uzo ndegu lufu le mkpukpu Hanatonu; je akpaa le nsuda Ifutahelu.

¹⁵Mkpukpu, no l'oke ibe iya ono bu Katatu; waa Nahalolu; waa Shimuronu; waa Idala; wafua Betulehemu. Iphe, o tukoru du bu mkpukpu iri l'ebo; yee unwu mkpukpu, nogbaa phe mgburugburu.

¹⁶Mkpukpu ono; yee unwu mkpukpu ono, no-pheru phe mgburugburu ono tukoru buru okiphe ndu Zebulun l'ipfu l'ipfu.

Ali ndu Isaka

¹⁷O -rwua l'ido k'eno; o daaru ndu Isaka l'ipfu l'ipfu.

¹⁸Mkpukpu, no l'ali ophu a nuru phe bu: Jiezerelu; waa Kesulotu; waa Shunemu;

¹⁹waa Hafarayimu; waa Shiyonu; waa Anaharatu;

²⁰waa Rabiti; waa Kishonu; waa Ebezu;

²¹waa Remetu; waa Enu-Ganimu; waa Enu-Hadahu; wafua Betu-Pazezu.

²²Oke ali phe rwuchaaru ubvu Tabo; waa Shahazuma; waa Betu-Shemeshi; shi l'eka ono lufu l'enyimu Jiodanu. Iphe, o tukoru du bu mkpukpu iri l'ishii; yele unwu mkpukpu, nogbaa phe mgburugburu.

²³Mkpukpu ono; yee unwu mkpukpu ono, nogbaa ya mgburugburu ono g'o ha tukoru buru k'okpa-ipfu Isaka. Ephe kee ya l'enya-unuphu l'enya-unuphu me le mkpukpu le mkpukpu waa l'onu-egu l'onu-egu.

Alì ndu Asha

²⁴A bya atua ido k'ise; o daaru okpa-ipfu Asha l'ipfu l'ipfu.

²⁵Mkpukpu, no l'ali ophu a nuru phe bu: Helukatu; waa Hali; waa Betenu; waa Akushafu;

²⁶waa Alameleku; waa Amadu; wafua Mishalu. Eka a kparu oke ali obu l'uzo enyanwu-ariba bu ubvu Kamelu; waa mkpukpu Shihō-Libinatu.

²⁷O bya agbajia uzo enyanwu-awawa shita Betu-Dagonu; bya erwua ali ndu Zebulon; waa nsuda Ifutahelu; bya agbe l'eka ono kwaseru uzo ndegu jasu le mkpukpu Betu-Emeku; waa mkpukpu Niyelu; bya aghabua mkpukpu Kabulu l'uzo ekicha.

²⁸O kwaseru egube ono shita mkpukpu Eburonu; waa Rehobu; waa Hamonu; wafua Kana; jasu o rwua eze mkpukpu ono, bu Sayidonu.

²⁹Oke ali ono bya agbe l'eka ono laphu azu kwaseru uzo mkpukpu Rama; bya erwua mkpukpu Taya, bu mkpukpu, a kpu-pheru igbulo mgburugburu. O bya agbe l'eka ono gbajia uswe lufu le mkpukpu Hosa; bya ebufuta l'eze-enyimu. Mkpukpu, nogbaa l'ime ali ono bu Mahalabu; waa Akuzibu;

³⁰waa Uma; waa Afeku; wafua Rehobu. Iphe, o tukoru du bu ukporo mkpukpu le mkpukpu labo; yee unwu mkpukpu, nogbaa ya mgburugburu.

³¹Mkpukpu le mkpukpu ono; yele unwu mkpukpu, no-pheru iya mgburugburu ono g'o ha tukoru buru okiphe okpa-ipfu Asha. Ephe haa ya l'enya-unuphu l'enya-unuphu; me l'onu-egu l'onu-egu.

Alì ndu Nafutali

³²A byakwa atua ido k'ishii; o daaru Nafutali. Ephe haa ya l'enya-unuphu l'enya-unuphu.

³³Oke ali ono gbē le mkpukpu Helefu; waa le mgboru eze oshi Zanimu; ghata mkpukpu Adaminekebu; waa mkpukpu Jiabunelu; gbē l'eka ono lufu le mkpukpu Lakumu; kwaseru nno jasū l'enyimu Jiōdanu.

³⁴Oke ali ono bya agbajia uzo enyanwu-ariba ghabua mkpukpu Azunotu-Tabo; bya eshia futa le mkpukpu Hukoku. O bya erwua ali ndu Zebulon l'uzo ndohali; waa ke ndu Asha l'uzo enyanwu-ariba; waa ke ndu Jiuda l'uzo enyanwu-awawa le mgboru enyimu Jiōdanu.

³⁵Mkpukpu, no l'ali eka ono, a kpu-pheru igbulo mgburugburu bu Zidimu; waa Zeru; waa Hamatu; waa Rakatu; waa Kineretu;

³⁶waa Adama; waa Rama; waa Hazo;

³⁷waa Kadeshi; waa Edereyi; waa Enu-Hazo;

³⁸waa Yirõnu; waa Migudalu-Elu; waa Horemu; waa Betu-Anatu; waa Betu-Shemeshi. Iphe, o kpakotaru du bu mkpukpu iri le tete; yee unwu mkpukpu, nogbaa phe mgburugburu.

³⁹Mkpukpu ono; yee unwu mkpukpu ono, no-pheru iya mgburugburu ono g'o ha tukoru bukotaru okiphe okpa-ipfu Nafutali l'enya-unuphu l'enya-unuphu; le mkpukpu le mkpukpu me l'onu-egu l'onu-egu.

Alì ndu Danu

⁴⁰Tobudu iya bu; a bya atua ido k'esaa; o daaru okpa-ipfu Danu.

⁴¹Mkpukpu, no l'alì ophu a nuru phe bu: Zora; waa Eshutolu; waa Iru-Shemeshi;

⁴²waa Shalubimu; waa Ajialonu; waa Itula;

⁴³waa Elonu; waa Timuna; waa Ekuronu;

⁴⁴waa Eluteke; waa Gibetõnu; waa Balatu;

⁴⁵waa Jiehudu; waa Bene-Baraku; waa Gatu-Rimonu;

⁴⁶waa Mejakõnu; wafua Rakõnu; wakwapho alì ophu no gha iphu le Jiopa.

⁴⁷Obenu le ndu Danu be alwuta alì nkephe tsuru l'ehu. Oo ya bu; ephe gbeshi je adatso ndu mkpukpu Leshemu ogu; lwu-kpee phe bya atuko phe gbushia; nata alì phe buru. Ephe je eburu le mkpukpu Leshemu; bya eworu mkpukpu ono gua epha nna phe oche, bu Danu.

⁴⁸Mkpukpu ono; yee unwu mkpukpu, no-pheru phe mgburugburu tukoru bukotaru okiphe okpa-ipfu Danu l'ipfu l'ipfu.

Alì Jioshuwa

⁴⁹⁻⁵⁰A tuebe ido gude washiaru ndu Izurelu alì ono g'ephe nworu ndu Izurelu bya eworu alì nu Jioshuwa nwa Nunu no l'echilabo phe. O buerupho iphe, Chipfu suru g'ephe mee be ephe meru; mbu l'ephe nueru iya pho eka o turu eka su g'a nu iya. Alì, ephe nuru iya bu Timunatu-Sera, bu mkpukpu, no l'alì ubvu ubvu Ifuremu. O kpukwaa mkpukpu ono buru.

⁵¹Alì ono g'o ha be Eleyaza, onye uke Chileke; waa Jioshuwa nwa Nunu; waa ndu-ishi ndu Izurelu l'okpa-ipfu l'okpa-ipfu no l'ataphu Chileke le mkpukpu Shilo; l'onu-abata ulo-ekwa-ndzukõ tua ido gude washiaru iya ndu Izurelu. O buru egube ono bu g'ephe gude kee alì ono g'o ha keghee.

Jioshuwa 20

Mkpukpu, onye gburu nemadzõ a-noðuje ezeru ndzõ

(Ogú 35:9-34; Dit 4:41-43; 19:1-13)

¹Tobudu iya bu; Chipfu su Jioshuwa:

²“Pfuaru ndu Izurelu g'ephe hota mkpukpu ono, aa-noðuje ezeru ndzõ ono, mu shi l'onu Mõsisu pfuaru unu ono;

³k'ophu bu: ọ -duru onye gburu nemadzu; ẹbe o lekebeduru ẹnya; l'ọ gbaru laa ẹka ono je ezeeru ndzu; ge ndu nwe onye ono, e gburu ono te egude ẹnya-mee gbua ya gwata ugwo ọchi onye k'ono, e gburu ono.

⁴“Onye ono -nodu agba ala le mkpukpu lanu le mkpukpu ono bu a -gbabe aadzuru ono; teke onye ono gbarwuerupho l'onu-abata mkpukpu ono; g'onye ono pfukwaru l'eka ono dooru ndu bu ọgerenya mkpukpu ono iphe, daru nu. E -mecha; ephe edubata onye obu le mkpukpu ono, nu iya ali; ẹka oo-buru.

⁵Ọ -buru l'o nweru onye achi onye obu g'o melata iya; ge ndu bu ọgerenya mkpukpu ono ta ahakwa iya g'onye abya emelata obu melata iya; noo kele o to lekebeduru ẹnya gbua onye obu; teme ophu ọ budu l'opfu, shiwaa duru ephe l'onye obu.

⁶Onye ono ebua l'eka ono, ọ gbaru laa ono gbiriri jasụ teke ọo-bya apfuru l'iphu ndiphe; ephe ekpee ya ikpe. E -kpechaa ya ikpe; l'o bukwarupho l'eka ono; jasụ onye-ishi-uke Chileke, ejeru Chileke ozi teke ono anwuhu. Ono -mechaepho; onye ono alashiwaro l'eka o shi buru le mkpukpu ono, ọ gbẹ gbala gbaru lashia mkpukpu a -gbabe aadzuru ono.”

⁷Ọo ya bu; ephe hota mkpukpu Kadeshi, no l'ali ubvu ubvu ke ndu Nafutali l'ali Galili; waa mkpukpu Shekemu, no l'ali ubvu ubvu ke ndu Ifuremu; waa mkpukpu Kiriyatu-Araba, bu iya bu Heburonu, no l'ali ubvu ubvu ke ndu Jiuda.

⁸O -rwua l'uzo ẹnyanwu-awawa ẹnyimu Jiordanu; mbu baswaa ali, tu-koru l'eli ubvu, no l'echiegu l'uzo ẹnyanwu-awawa mkpukpu Jieriko; ephe hota mkpukpu Beza, no l'ali okpa-ipfu Rubenu; waa mkpukpu Ramatu, no l'ali Giladu l'ali k'okpa-ipfu Gadu; waa mkpukpu Golanu, no l'ali Beshanu l'ali okpa-ipfu ke Manase.

⁹Mkpukpu ono g'ọ hakota be a hotaru doberu ndu Izurelu; waa ndu bu nlwamulwa; g'onye gburu nemadzu; ophu o lekebeduru ẹnya gbajeru laa; g'ọ to du iphe, onye eme g'ọ gwata ugwo ọchi onye ọzo e-me iya; gbiriri jasụ teke onye ono a-pfuru l'iphu ndiphe g'e kpee ya ikpe.

Jioshuwa 21

Mkpukpu ophu a nuru ndu Lívayi

¹Noo ya; ndu-ishi ndu unuphu ndu Lívayi bya edzukobe; wuru jepfu Eleyaza onye uke Chileke; waa Jioshuwa nwa Nunu; waa ndu-ishi ndu unuphu ndu Izurelu ophu

²le mkpukpu Shilo l'ali Kėnanu bya asu phe: “Chipfu shikwa l'onu Mosisu tua ekemu su g'a nu anyi mkpukpu olemole g'anyi buru; wafua ali, iphe-edobe anyi a-noduje ata nri.”

³Ọo ya bu; ndu Izurelu bya emee ge Chileke turu ekemu su g'ephe mee; bya eshi l'oke iya nkephe buta mkpukpu; waa ẹka iphe-edobe phe a-taje nri woru nu oshilokpa Lívayi.

- ⁴Ido ke mbu, e vuru uzo tua daaru oshilokpa Kohatu l'ipfu l'ipfu. A nu ndu Lívayi ndu ophu bu oshilokpa Erõnu, bu onye uke Chileke mkpukpu iri l'eto, shi l'alì okpa-ipfu Jiuda; waa ke Simiyõnu; waa ke Benjiaminu.
- ⁵Oshilokpa Kohatu ndu ophu ghuduru nu be a nuru mkpukpu iri, shi l'alì okpa-ipfu Ifuremu; waa ke Danu; wafua ke nkeru-ebo okpa-ipfu Manáse.
- ⁶Oshilokpa Geshõnu be a nuru mkpukpu iri l'eto, shi l'alì okpa-ipfu Isaka; waa ke Asha; waa ke Nafutali; waa nkeru-ebo okpa-ipfu Manáse, bu l'alì Beshanu.
- ⁷Oshilokpa Merari l'ipfu l'ipfu be a nuru mkpukpu iri l'ebo, shi l'alì okpa-ipfu Rúbenu; waa ke Gadu; wafua ke Zebulun.
- ⁸Tõbudu iya bu; ndu Ízurelu bya atua ido gude nu ndu Lívayi mkpukpu le mkpukpu nkephe; waa aka iphe-edobe phe a-taje nri, bu iya bu ge Chipfu turu Mõsisu ekemu su g'e mee ya.
- ⁹⁻¹⁰A -gbe l'alì k'okpa-ipfu Jiuda; waa ke Simiyõnu woru mkpukpu-a, aabya agushia nu g'o buru alì nkephe. Ndu a nuru iya bu oshilokpa Erõnu, shi l'ipfu unwu Kohatu bu okpa-ipfu Lívayi; kele oophe be ido mbu vuru uzo daaru.
- ¹¹Ephe nuru phe alì ke mkpukpu Kiriyatu-Araba, bu iya bu Hëburonu; yeke aka iphe-edobe a-taje nri, no mkpukpu ono mgburugburu. Hëburonu ono no l'alì úbvú úbvú ndu Jiuda. Aba bu nna oche Anaku.
- ¹²O be l'alì egu; waa nwa mkpukpu, no-pheru mkpukpu ono mgburugburu; ephe woru iya nu Kalebu nwa Jiefune g'o buru okiphe iya.
- ¹³Oshilokpa Erõnu, bu onye uke Chileke be a nuru mkpukpu Hëburonu g'o buru mkpukpu aka onye gburu ochi a-gbajeru laa je anodu; bya anu iya mkpukpu Libuna;
- ¹⁴waa Jiatiru; waa Eshutemowa;
- ¹⁵waa Holõnu; waa Debi;
- ¹⁶waa Ayinu; waa Jiuta; wafua Betu-Shemeshi; yee aka iphe-edobe ataje nri, no-pheru iya mgburugburu. Mkpukpu tete be a wataru l'alì k'okpa-ipfu labo k'ono.
- ¹⁷A bya l'alì k'okpa-ipfu Benjiaminu; a wee phe mkpukpu Gibiyõnu; waa Geba;
- ¹⁸waa Anatõtu; waa Alumonu; teme wakwapho aka iphe-edobe ataje nri, no-pheru iya mgburugburu. Iphe, o du bu mkpukpu eno.
- ¹⁹Mkpukpu, a nuru ndu-uke, bu oshilokpa Erõnu du iri l'eto; yee aka iphe-edobe phe a-taje nri.
- ²⁰Oshilokpa Kohatu, bu okpa-ipfu Lívayi ndu ophu ghuduru nu be e butaru mkpukpu olemole l'alì ke Ifuremu nu.
- ²¹Alì úbvú úbvú Ifuremu be e butaru mkpukpu Shekemu; nu phe g'o buru aka onye gburu ochi a-gbajeru laa je anodu; waa Geza;

- 22**waa Kibuzayimu; waa Bētu-Horonu; teme yee eka iphe-edobe phe a-taje nri, no-pheru iya mgburugburu. Iphe, o du bu mkpukpu eno.
- 23**Okpa-ipfu Danu nu phe Eluteke; waa Gibetonu;
- 24**waa Ajialonu; wafua Gatu-Rimonu; yee eka iphe-edobe phe a-taje nri, no-pheru iya mgburugburu. Iphe, o dukwapho bu mkpukpu eno.
- 25**E shi le nkeru-ebo okpa-ipfu Manase, woru Tanaku nu phe; bya anu phe Gatu-Rimonu; yeke eka iphe-edobe phe a-taje nri, no-pheru iya mgburugburu. Iphe, o du bu mkpukpu labo.
- 26**Mkpukpu iri ono; yee eka iphe-edobe ataje nri ono be a nukotaru oshilokpa Kohatu ndu ophu ghuduru nu.
- 27**Waa mkpukpu, a nuru oshilokpa Livayi, bu ipfu unwu Geshonu baa: Okpa-ipfu Manase, be e keru ebo nu phe Golanu, no l'ali Beshanu g'ọ buru eka onye gburu ochi a-gbajeru laa je anodu; waa Beshitera; yee eka iphe-edobe phe a-taje nri, no-pheru iya mgburugburu. Iphe, o du bu mkpukpu labo.
- 28**Okpa-ipfu Isaka nu phe Kishonu; waa Daberatu;
- 29**waa Jiarumutu; wafua Enu-Ganimu; yee eka iphe-edobe phe a-taje nri, no-pheru iya mgburugburu. Iphe, o du bu mkpukpu eno.
- 30**Okpa-ipfu Asha nu phe Mishalu; waa Abudonu;
- 31**waa Helukatu; waa Rehobu; teme wakwapho eka iphe-edobe phe a-taje nri, no-pheru iya mgburugburu. Iphe, o du bu mkpukpu eno.
- 32**Okpa-ipfu Nafutali nu phe Kadeshi, no l'ali Galili g'ọ buru eka onye gburu ochi a-gbajeru laa je anodu; waa Hamotu-Doru; wafua Katanu; yee eka iphe-edobe phe a-taje nri, no-pheru iya mgburugburu. Iphe, o du bu mkpukpu eto.
- 33**Mkpukpu ophu a nuru ipfu unwu Geshonu epe kee l'anya-unuphu l'anya-unuphu du iri l'eto; yeke eka iphe-edobe phe a-taje nri, no-pheru iya mgburugburu.
- 34**Waa mkpukpu, a nuru oshilokpa Livayi ndu ophu ghuduru nu, bu ipfu unwu Merari baa. Okpa-ipfu Zebulun nu phe Jiokuneyamu; waa Kata;
- 35**waa Dimuna; wafua Nahalolu; yee eka iphe-edobe phe a-taje nri, no-pheru iya mgburugburu. Iphe, o du bu mkpukpu eno.
- 36**Okpa-ipfu Rubenu nu phe Beza; waa Jiahazu;
- 37**waa Kedemotu; wafua Mefahatu; yee eka iphe-edobe phe a-taje nri, no-pheru iya mgburugburu. Iphe, o du bu mkpukpu eno.
- 38**Okpa-ipfu Gadu nu phe Ramatu, no l'ali Giladu g'ọ buru eka onye gburu ochi a-gbajeru laa je anodu; bya anukwa phe pho Mahanayimu;
- 39**waa Heshibonu; teme waa Jiaza; yeke eka iphe-edobe phe a-taje nri, no-pheru iya mgburugburu. Iphe, o tukoru du bu mkpukpu eno.

⁴⁰Mkpukpu ophu a nuru ipfu unwu Merari, bu phe bu oshilokpa Lívayi ndu ophu phoduru nu; du iri l'ebo.

⁴¹Mkpakota mkpukpu, a nuru oshilokpa Lívayi l'ime ali ndu Ízurelu du ukporo mkpukpu labo le mkpukpu esato; yele ali eka iphe-edobe phe a-taje nri.

⁴²Mkpukpu ono g'ọ hakota iche iche be nwekotachaaaru eka iphe-edobe a-taje nri no-phechaaru iya mgburugburu.

⁴³Oo ya bu; Chipfu nukota ndu Ízurelu ali ono, o riburu ndiche phe angu l'oo-nu phe ono; epe je alwuta ali ono buru.

⁴⁴Chipfu mee; ophu o duedu ndu emekpakwadu phe ehu, bu iphe, o kweru ndiche phe ukwe su le ya e-meru phe. Ophu o duedu ndu ohogu phe, duru ndu ophu adujekwadu ike gbelia ishi l'eka epe no. Chipfu wokotaru ndu ohogu phe ono g'ephe ha yekota phe l'eka.

⁴⁵Ophu o dudu iphemiphe, du ree ono, Chipfu kweru ndu Ízurelu ukwe iya ono, duru ophu o meduru phe. O tukoru iya g'ọ ha mekotaru phe.

Jioshuwa 22

¹Noo ya; Jioshuwa bya ekukobe ndu Rúbenu; waa ndu Gadu; waa ndu Manáse ibe lanu;

²bya asu phe: “Nta be unu mekotawaru iphe, Mosisu, bu onye-ozu Chipfu turu unu ekemu su g'unu mee; teme unu ngabekotaru yebe Jioshuwa nchi mekota iphe, ya ziru unu g'ọ ha.

³E -shi teke ama byasu ntanu-a be unu ta ahaduru unwunna unu; unu letakpopho enya je ozi, Chipfu yeru unu l'eka.

⁴Nta-a, Chipfu mewaru iphe, o kweru ukwe iya-a; bya emee; ophu o duedu ndu akpakwadu unwunna unu ehu-a; bukwa g'unu lashwaro ibe unu l'ali ono, Mosisu onye-ozu Chipfu nuru unu l'azu enyimu Jiordanu azu iya ophu.

⁵Ole g'unu letakwa enya meje iphemiphe ono, Chipfu suru g'emeje; yele ekemu iya ono, Mosisu turu nu unu ono, bu iya bu g'unu yee Chipfu, bu Chileke unu obu; shije iphe, bukpo uzo, o suru g'unu shije; tukota ekemu iya g'ọ ha mekota. Teme unu achiru upfu kwee l'eka o no gude obu unu g'ọ ha ejeru iya ozi.”

⁶Jioshuwa bya agochaaru onu-oma nu phe; bya edufu phe; epe wufu; o buru phe ala ibe phe.

⁷Okpa-ipfu Manáse ibe lanu be Mosisu nuru ali le Beshanu; Jioshuwa bya anu ibe lanu k'ophuu ali l'eka o nuru unwunna phe ali l'azu enyimu Jiordanu azu iya ophu l'uzo enyanwu-ariba. Jioshuwa bya akarụ phe g'ephe lasha bya agoru onu-oma nu phe

⁸su: “Unu tukochaa gude eku unu, paru eka lashichaa ibe unu; mbu me igwe iphe-edobe unu; me mkpola-ochaa unu; me mkpola-ododo unu; me onyirubvu unu; me

ígwè unu; m̀kpoo ̀kwa unu, parụ ̀ka. G'unu l'unwunna unu kekwa iphe ono, unu kwatarụ l'òkwata l'alì ndu ọhogu unu ono.”

⁹Oo ya bụ; ndu Rúbenu; waa ndu Gadu; waa ndu Manáse ibe lanụ haa ndu Ízurelu le Shilo, nọ l'alì Kénanu lashia alì Giladu, bụ alì nkephe, bụ iya bụ alì ono, Chipfu turu ekemu sụ gẹ Mosisu nụ phe ono.

¹⁰Noo ya; ephe jerwuepho mkpukpu Gelilotu le mgboru enyimu Jiódanu l'alì Kénanu; ndu Rúbenu; waa ndu Gadu; waa ndu Manáse ibe lanụ bya eworu ọru-ngweja, ha shii kpua le mgboru enyimu Jiódanu l'eka ono.

¹¹Tọbudu iya bụ; ndu Ízurelu numaephe l'ephe kpuru ọru-ngweja le mkpukpu Gelilotu, bụ oke alì Kénanu le mgboru enyimu Jiódanu l'azu iya ke ndu Ízurelu azu iya-a;

¹²ndu Ízurelu l'ophu bya edzukobe le mkpukpu Shilo g'ephe je etso phe ọgu.

¹³Oo ya bụ; ndu Ízurelu bya ezia Finehasu, bụ nwa Eleyaza, bụ onye uke g'o je l'alì Giladu; jepfu ndu Rúbenu; waa ndu Gadu; waa ndu Manáse ibe lanụ.

¹⁴Ephe bya eyeru iya ndu-ishi umadzu iri; umadzu iri ono shicha l'okpa-ipfu ndu Ízurelu nanunanu. G'ephe ha buchaaaru ishi l'enya-unuphu, ndu Ízurelu l'ehu l'ehu.

¹⁵Ephe jerwuepho Giladu jepfu ndu Rúbenu; waa ndu Gadu; waa ndu Manáse ibe lanụ bya asụ phe:

¹⁶“Ndibe Chipfu l'ophu sukwaru: ‘? Denu g'o nwuru unu mebyiru ekemu, Chileke turu? Mbụ; ? denu g'o nwuru unu gbakutaru Chipfu azu je akpuaru onwunu ọru-ngweja; shi nno kwefuru iya ike?’

¹⁷? Iphe-eji, anyibe ndu Ízurelu meru le mkpukpu Peyo teke ahudu anyi ahuhù? O kwa l'unu maru l'eshi teke ono byasu nta-a be anyi teke aduebedu ree le k'iphe-eji ono; mbukponu je akpaa le g'ejo ahuma-a dapfutachakporu anyi ono.

¹⁸? Unu towaa nwehu akpo geegeegee akpofu l'eka Chipfu to? “Unu makwaru l'o -buru l'unu kwefuru Chipfu ike ntanu-a be o -rwutashia echele be Chipfu tukoshiakwaru anyibe ndu Izurelu l'ophu oke ehueghu iya.

¹⁹O -buru l'o du unu g'alì nkunu be e merwushiwaru; unu lwakwa l'alì ke Chipfu l'azu iya-a; l'eka ulo-ekwa ke Chipfu nọ g'anyi l'unu tuko buru. Unu ta akpushiru onwunu ọru-ngweja, abudu ọru-ngweja Chipfu, bụ Chileke anyi; shi nno kwefuru Chipfu; waa anyibedua ike.

²⁰Teke ono, Ekanu nwa Zera mebyiru ekemu, Chipfu turu le k'iphe, duru iya nsọ ono; ? Chipfu ta atụ-koshiduru ndu Ízurelu l'ophu oke ehueghu iya to? O to buekwapho yebedua nwekinyi iya be nwuhuru nu.’ “

²¹Noo ya; ndu Rúbenu; waa ndu Gadu; waa ndu Manáse ibe lanụ sụ ndu-ishi ndu Ízurelu:

22“Chipfu, bu Chileke; bya aburu Okalibe-Kakota-Ike makwaru! Mbü le Chipfu, bu Chileke; bya aburu Okalibe-Kakota-Ike tukokwaru iphemiphe maëberu. G'unube ndu Izurelu makwaru iya pho! L'o to budu iphe, anyi gude kpua ya bu l'anyi eme g'anyi kwefuru iya ike. Oo ya bu le teke unube ndu Izurelu mecharu bya amaru l'iphe, anyi gude kpua ya bu g'anyi kwefuru Chileke ike; unu tukoeppo anyi gbushigbua ntanu-a.

23Ozoo; o -buru l'iphe, anyi gude kpua oru-ngweja k'eka anyi; bu g'anyi gwaje iya agwagwa; g'anyi shi nno gbakutaru Chipfu azu; wata iya anu ngweja-akpo-oku; ozoo ngweja-nri; ozoo ngweja-ehu-guu; ge Chipfu gwatakwa anyi ugwo iya l'onwiya!”

24Su: “Waawakwa! L'iphe, anyi gude mee ya bukwa ndzu-agugu. ? A maru ? to budunu; a -nonyaa; awa unu asu l'ephe e-bufu anyi su l'o to dudu iphe, anyi le Chipfu, bu Chileke ke ndu Izurelu jigba?

25Mbu; ephe asu le Chipfu mewaru; oke anyi l'unu buru enyimu Jiordanu; l'anyi be ndu Rubenu; waa ndu Gadu be ta agbadu le Chipfu. Oo ya bu; eshi nno; awa unu emee awa nkanyi ababuhuru Chipfu eja.”

26Su: “O kwa iphe, meru g'o gude anyi kpua oru-ngweja bu ono. O to bukwa iphe, anyi kpu-doru iya bu g'anyi egweahaa ngweja-akpo-oku; ozoo ngweja ozo l'eli iya.

27Iphe, anyi kpu-doru iya bukwa g'o buru iphe, a-nodu agba anyi l'unu ekebe; waa ogbo ophu no l'iphu; l'anyi e-gudeje ngweja-akpo-oku; waa ngweja-ehu-guu; wafua ngweja ozo bya abaru Chipfu eja l'ulo iya, du nsu. G'o to dukwanu teke bu: a -nonyaa; awa unu asu k'anyibedua l'anyi l'unu ta agbadu le Chipfu.

28“A -ta asu; o -buru l'a nonyaru awa unu pfiaru anyi; ozoo unwu anyi nno; oo ya bu g'anyibedua asukwanu phe: ‘Unu humakwa oru-ngweja ophu ephe le ke Chipfu gba nanu; mbu ophu nna anyi oche phe kpuru l'onwophe. Ole anyi ta akpukwaru iya g'anyi egwejeru Chipfu ngweja-akpo-oku; ozoo ngweja ozo l'eli iya; obenu l'anyi kpuru iya g'o buru iphe, a-nodu agba anyi l'unu ekebe.’

29“Tuswekwa! Anyi ta abyadu ekwefuru Chipfu ike; ophu anyi abyakwa aha etso uzo iya; je akpua oru-ngweja ozo, ee-gweje ngweja-akpo-oku; ozoo ngweja-nri; ozoo ngweja ozo; abudu oru-ngweja Chipfu, bu Chileke anyi ono, no l'ataphu ulo-ekwa iya ono.”

30Tobudu iya bu; Finehasu, bu onye uke; waa ndu-ishi ndu Izurelu, bu phe bu ndu-ishi, shigbachaa le ndu unuphu ndu Izurelu numaepho iphe, ndu Rubenu; waa ndu Gadu; waa ndu Manase pfuru; eh tsoahaa phe utso.

31Noo ya; Finehasu, bu nwa Eleyaza, bu onye uke bya eyeru ndu Rubenu; waa ndu Gadu; waa ndu Manase onu su phe: “Nta-a be anyi mawaru le Chipfu no swiru anyi; noo kele unu te emebyiduru ekemu Chipfu. Nta-a be unu nafutawaru anyibe ndu Izurelu l'eka Chipfu.”

32Oo ya bu; Finehasu, bu nwa Eleyaza, bu onye uke; waa ndu-ishi gbé l'alí Giladu eka ephe le ndu Rubenu; waa ke Gadu shi nodu ndzuko ono lashia ali Kénanu je akooru ndu Izurelu g'ephe jeru.

³³Ephe n̄machaa g'ephe jeru iya; ẹhu t̄soo p̄hẹ nt̄matu; t̄me ephe bya ekele Chileke ekele. Ephe gb̄e teke ono gb̄utoshia ẹka k'eye etso ndu Rúb̄enu; waa k̄e Gadu ọgu; mb̄u ọgu, ephe shi akwak̄obe g'ephe je etso p̄hẹ; mebyishia al̄i p̄hẹ.

³⁴Ndu Rúb̄enu waa ndu Gadu bya eworu ep̄ha ḡua ọru-ngweja ono. Iphe, ephe ḡuru iya b̄u: “Iphe, agba anyi ekebe l̄e Chipfu b̄u Chileke.”

Jioshuwa 23

Ekpe, Jioshuwa eke an̄u ndu Ízurelu

¹A n̄onyakpowaro ḡe Chipfu mechaar̄u; ẹhu d̄u ndu Ízurelu guu; ọphu ọ d̄uedu ndu ọhogu p̄hẹ akpakwadu p̄hẹ ẹhu; ḡe Jioshuwa kah̄ukpowaru k̄e l̄ibaliba.

²O -rwua ujiku lan̄u; o kuk̄obe ndu Ízurelu g'ephe ha. O kuru ndu b̄u ọgerenya p̄hẹ; waa ndu-ishi; waa ndu-ikpe; waa ndu ọzo, d̄ugbaa mkpa bya as̄u p̄hẹ: “Nta b̄e mu b̄uwaa ọgerenya; t̄me mu kapf̄uhuchawa akapf̄uhu.

³Unub̄edua gudewaa ẹn̄ya unu h̄uma iphemiphe, Chipfu, b̄u Chileke unu meru ọhamoha-a l'opfu ẹhu unu. Ọo Chipfu ono, b̄u Chileke unu ono b̄u onye lw̄u-chiteru unu ọgu.

⁴Unu nyatakwa ḡe mu gude wash̄iaru unu al̄i ndu k'ono, e teke alw̄utadu; waa al̄i ndu k'ono, mu lw̄utawaru ono; mb̄u al̄i ono, n̄o l̄e mgbaka ẹn̄yimu Jiódanu ȳe Eze Ẽnyimu, n̄o l'uzo ẹn̄yanwu-ar̄iba ono.

⁵Ọo Chipfu, b̄u Chileke unu l'onwiya b̄e a-ch̄ifuru p̄hẹ unu; ch̄ia p̄hẹ g'ephe b'an̄oduhe l'atatip̄hu unu. Unu anata iya; l'ọ b̄uru al̄i unu, b̄u iphe, Chipfu, b̄u Chileke unu kweru unu ukwe iya.

⁶“Unu dekwa ẹn̄ya l̄e mini t̄uko iphemiphe, e deru l'ekwo ekemu Mós̄isu mek̄ota; ẹbe unu agbak̄utakwaru iya az̄u shia ọzo ẹka-ịcha; ọzoo ẹkutara.

⁷G'ọ t̄o d̄ukwa iphe, unu l'ọha, ghuduru n̄u, bukube unu e-megbaj̄e m̄e ililekp̄oo. Unu te epf̄ujekwa mab̄eru agwa p̄hẹ; ọphu unu egudejekwa p̄hẹ ria anḡu. Unu te ep̄hozejekwaru agwa p̄hẹ ono; ọphu unu abaj̄ekwaru p̄hẹ ẹja.

⁸Ọ b̄uchia g'unu ch̄iru ọp̄fu kw̄e l̄e Chipfu, b̄u Chileke unu; ẹgube ono, unu shi teke ama meta byas̄u nta-a ono.

⁹“Chipfu ch̄ishiru unu ọha, hagbaa shii, ọkp̄ehu pagbaar̄u ẹka. Eshi teke ono byas̄u n̄tan̄u-a ta ad̄uk̄poda ọha ọphu d̄ujeru ike pf̄uru w̄ota unu ọgu.

¹⁰Onye lan̄u l'ime unu b̄e a-d̄u ike ch̄ishia aḡuta aḡuta nemad̄z̄u; noo k̄e Chipfu, b̄u Chileke unu an̄oduje alw̄u-chiru unu ọgu, b̄u iphe, o kweru unu ukwe iya.

¹¹Ọo ya b̄u; g'unu pf̄ushikpoep̄ho ike l'eye Chipfu, b̄u Chileke unu obu g'unu yeru iya.

¹²“Obenu l'ọ -b̄uru l'unu n̄nyaaru gbak̄uta iya az̄u; bya eje; unu l'ọha ọwa, a lw̄u-phodoru-a t̄ugba b̄uru nan̄u; ọzoo l'unu l'ephe watar̄u al̄ugba nwanȳi; wata emegbaa l'iphemiphe;

¹³unu makwaru le Chipfu, bu Chileke unu be taa achifuekwaru unu oha ono. O chia iphe, e-me nu bu l'ephe a-buru onya nmata unu. Ephe aburu echachi, ee-mechaa gude ahù unu ahùhù; bukwarupho obvu, a-nodu adzukashi unu l'ehu; gbiriri jasù teke unu a-tuko buru mkpurupyata l'eguru ali ono, Chipfu, bu Chileke unu nuru unu ono.

¹⁴“O gbabewaru mu l'alala, bu iphe, duru ndiphe l'ophu. Unu gudewaa obu; waa uche unu maru l'o to dudu iphe, Chipfu, bu Chileke unu kweru ukwe iya, duru ophu o mephodoru unu me nanu. O tukoru ukwe-iphe ono g'o ha mekota. Ophu o dudu g'o ka mma l'oo nanu, o haru; o laa ke mmanu.

¹⁵Ole o kwa egube ono, iphe, du ree, Chipfu, bu Chileke unu kwekotaru ukwe iya vukotaru ono; bukwapo g'ejo-iphe, Chipfu pfuru unu opfu iya ono a-vukota; bya atuko unu mebyishikota l'eguru ali-a, o nuru unu-a;

¹⁶m'o buru l'unu mebyiru ekemu, du l'ogbandzu ono, unu le Chipfu gbaru ono. O - buru l'unu jeru ephozeaharu agwa ishi bya abaaharu phe eja be Chipfu a-tu-koshikwa unu oke ehueghu iya; ophu o dukwa g'unu a-no-beru; unu aburu mkpurupyata l'eguru ali ono, Chipfu nuru unu g'unu buru ono.”

Jioshuwa 24

Ozi ikpazu, Jioshuwa ziru ndu Izurelu

¹Noo ya; Jioshuwa bya ekukobe okpa-ipfu ndu Izurelu l'ophu; ephe dzugbua le mkpukpu Shekemu. O bya ekugbua ndu bu ogerenya; waa ndu-ishi; waa ndu-ikpe; waa ndu ozo, dugbaa mkpa, shi le ndu Izurelu; ephe dzugbua l'iphu Chileke.

²Jioshuwa su ndu ono g'ephe ha: “Wakwa iphe, Chipfu, bu Chileke ke ndu Izurelu epfu baa: ‘Teke ndiche be nna unu oche phe; shi abaru agwa eja; je akpachaa le Tera, bu nna Ebirhamu; waa Nahu; shi buru l'azu enyimu Yufuretis azu iya ophu.

³Obenu le mu dufutaru nna unu, bu Ebirhamu l'ali ono, no l'azu enyimu azu iya ophu ono; bya edua ya; o jedzukotaru ali Kenanu l'ophu; teme mu mee ya; o nweru awa, du igwerigwe. Mu nuru iya Ayizaku;

⁴bya emee; Ayizaku nwuta Jekopu; yee Iso. Mu woru ali ubvu ubvu Siye nu Iso; obenu le Jekopu yee unwu iya laru ali Ijiputu.

⁵“Mu zia Mosisu yee Eronu ozi; bya egude phe mee ndu Ijiputu; ephe jee iphe-ehuka; shi nno dufuta unu l'eka ono.

⁶Teke mu dufutaru nna unu phe l'ali Ijiputu be ephe rwuru eze-enyimu. Ephe bya ele enya; ndu Ijiputu gudewaa ugbo-inya; waa ndu agba l'inya achi phe; ephe chia phe jasù le Eze-enyimu Uswe-uswe.

⁷Obenu l'ephe rakuru Chipfu su g'o dzoo phe. O woru ochii dobe le mgbaka nna unu phe le ndu Ijiputu. O chiru phe ye l'oma eze-enyimu; o woru phe ria. Unu gude enya unu huma iphe, mu meru ndu Ijiputu. E mechaa; unu buru l'echiegu no odu.

- 8“Mu dua unu; jasụ l'alị ndu Amọru, bụ ndu shi buru l'uzo ẹnyanwu-awawa ẹnyimu Jiódanu. Ẹphe bya etsoo unu ọgu; obenu ẹ mu wotaeru phe pho ye unu l'ẹka; mbụ woerupho nkephe meghee l'ataphu unu; unu nata alị phe; ọ buru nkunu.
- 9Teke ono, Belaku nwa Zipo, bụ eze ndu Mówabu kwakọberu g'ọ bya etsoo ndu Ízurelu ọgu; bẹ o ziru g'e je ekuaru iya Belamu nwa Beyo g'ọ bya atua unu onu.
- 10Obenu ẹ mu ta ngabeduru Belamu nchi; ọ buru iphe ono kparụ iphe, ọ wataru agoru unu onu-oma; ọ -gochaa l'ọ gọbaa; mu shi nno nafuta unu l'ẹka iya.
- 11“Noo ya; unu dachaa ẹnyimu Jiódanu; bya abyarwuta mkpukpu Jieriko. Ndu bu ẹ Jieriko tsoo unu ọgu. Ndu Amọru; waa ndu Pérezu; waa ndu Kénanu; waa ndu Hetu; waa ndu Gigashi; waa ndu Hevu; wafua ndu Jiebusu bya etsokwapho unu ọgu. Obenu ẹ mu tukoru phe g'ẹphe ha yekota unu l'ọbochi-ẹka; unu lwu-kpee phe.
- 12Mu ziru kirikiti-mgbọ g'o vutaru unu ọzo ọgu; ọ buru iya chifuru phe unu; teme unu byarwuta; mbụ je akpachaa ndu-eze labo, shi buru ndu-eze ndu Amọru pho. Noo kele ọ to bụdu ogu-echi; ọzoo apfu unu bẹ unu gude mee ya.
- 13Mu nuru unu alị, unu te seduru akanya iya; mbụ mkpukpu, abudu unu gude ẹka unu kpua ya. Unu bya eburu l'ime iya eri iphe, shi l'akpuru vayinu, unu ta akuduru; bya eri iphe, shi l'oshi olivu, unu eyeduru l'onwunu.’
- 14“Nta bukwa g'unu tsuje Chipfu ebvu bageru iya eja. Unu tuphashikota nshi, nna unu oche phe shi abaru eja l'azu ẹnyimu Yufurétisu azu iya ophu; wafua l'alị ndu Ijiputu; wata ejeru Chipfu ozi.
- 15Obenu ọ -buru l'ejeru Chipfu ozi du unu ẹji; ọo ya bụ; unu ahatawaro onye ophu unu a-nodu ejeru ozi ntanu-a: l'agwa ophu nna unu oche phe shi abaru eja l'azu ẹnyimu; l'agwa ke ndu Amọru, bụ ndu ophu shi buru l'ẹka unu bu-a. Obenu ẹ mbedua; waa ndibe mu l'ophu; bukwa Chipfu bẹ anyi a-nodu ejeru ozi!”
- 16Ndu Ízurelu tuko pfua su: Tuswekwa! “Anyi ta abyakwa aha Chipfu je ejeaaru agwa ozi.
- 17Oo Chipfu, bụ Chileke l'onwiya bẹ dufutaru anyi; waa nna anyi oche phe l'alị ndu Ijiputu; ẹka anyi shi buru ohu. Ọ bya emeshigbaa iphe, du biribiri anyi huma. Ọ buru yebedua bụ onye gbochiteru anyi l'ẹka ohamoha, anyi ghakotaru teke anyi no l'ije ono.
- 18Teme Chipfu bya achifuru anyi ohamoha; waa oha ke ndu Amọru-a, shi buru l'alị-a. Anyibedua a-tukokwapho jeeru Chipfu ozi; noo kele ọo ya bụ Chileke anyi.”
- 19Jioshuwa su phe: “Unu taa adukwa ike ejekotaru Chipfu ozi; noo kele ọo Chileke, du nsọ; teme ophu ọ dukwa onye ookweje g'o koo ya okpa l'ishi. Ọ too hakwa unu ke mmanu me unu kwefuru iya ike mee iphe-ẹji.
- 20O -buru l'a nonyaaru; unu gbakuta Chipfu azu; bya awata ejeru agwa ndu ohozo ozi; bẹ Chipfu a-ghakobekwa meka unu iphe; mekwaapho unu achihu ẹ g'oomebechaerupho unu ree ono.”
- 21Obenu ẹ ndu Ízurelu suru Jioshuwa: Waawaa-o! Anyi a-nodu-a abaru Chipfu eja-o!

22Noo ya; Jioshuwa sụ phẹ: “Unu bụakwaa ekebe onwunu l'unu họtaru l'unu a-nọdu abarụ Chipfu eja.” Ẹphe tuko sụ: “Ee; anyi bụwaa ekebe onwanyi.”

23Jioshuwa sụ phẹ: “Nta bụkwa g'unu tuko agwa unu g'ọha lwua; unu eworu obu unu nụ Chipfu, bụ Chileke kẹ ndu Ízurelu.”

24Ndu Ízurelu tuko sụ Jioshuwa: “Anyi a-bajeru-a Chipfu eja bya angabejeru iya nchi mee iphe, ọ sụru g'anyi mee.”

25Ọ bụru mbọku ono bẹ Jioshuwa yee ndu Ízurelu nọ lẹ Shẹkemu gbaa ndzụ; tẹme ọ tūaru phẹ ekemu; karụ phẹ iphe, ẹphe e-meje.

26Ọ bya atuko iphemiphe ono dekota l'ẹkwo ekemu Chileke; tẹme ọ pata mkpuma, ha shii pfube l'upfu achi, nọ-kube ọlo, du nsọ kẹ Chipfu.

27Ọ sụbechaa ya; bya asụ ndu Ízurelu g'ẹphe ha: “Mkpuma-a a-nọdu agba anyi ekebe. Ọ tükowaru iphemiphe, Chipfu pfuru anyi nụmakota. Teke e mecharu; ọphu unu emeęduru iphe, unu kweru Chipfu ukwe iya; mkpuma ono agbaa unu ejo ekebe!”

Anwụhu Jioshuwa

28Noo ya; Jioshuwa parụ phẹ haa; ẹphe lashia. Onyenonu lashia ibe iya ọphu a wẹru phẹ.

29E meębechaepho iphemiphe ono; Jioshuwa nwa Nunu; onye ejeru Chipfu ozi; nwụhu g'ọ nọchaaru ụkporo apha ise l'apha iri.

30E lia ya l'ẹka a nuru iya alị; mbụ lẹ mkpụkpu Timunatu-Sera l'alị úbvú úbvú ndu Ifuremu l'uzo ndẹgu úbvú Gashị.

31Ndu Ízurelu bakọtakpoerupho Chipfu eja lẹ teke Jioshuwa; waa ndu bụ ọgerenya, gude ẹnya phẹ hụma iphemiphe, Chipfu mekọtaru ndu Ízurelu; nọkwadu ndzụ.

32Ọkpu Jíósefu, ndu Ízurelu shi lẹ Ijiputu chiru bẹ ẹphe liru lẹ mkpụkpu Shẹkemu l'alị, Jíékọpu zuru unwu Hamọ, bụ nna Shẹkemu l'ụkporo mkpọla-ọchaa ise. Ẹka ono mechawarọ bụru alị k'oshilọkpa Jíósefu.

33Tẹme Eleyaza, bụ nwa Erọnu nwụhu; e lia ya lẹ mkpụkpu Gibiya, bụ ẹka a wẹru nwa iya, bụ Finehasu l'alị úbvú úbvú ndu Ifuremu.

Ikpe

Ikpe 1

Ndu Ízurelu etso ndu Kénanu ophu phoduru nù ogu

- ¹Jioshuwa nwuhuchaepfo; ndu Ízurelu bya akpata Chipfu ishi sù iya: “? Bù onye e-vuru ụzo je etsooru anyi ndu Kénanu ogu?”
- ²Chipfu sù phẹ: “Oo ndu Jiuda bẹ e-je nù; mu wowaru alì ono ye phẹ l'ẹka.”
- ³Tòbudu iya bụ; ndu Jiuda bya asù ndu kẹ Simiyonu, bụ unwune phẹ: “Unu bya g'anyi tuko je l'alì ono, a nuru anyi ono je etsoo ndu Kénanu ogu. E -mechaa anyi ee-tsoru unu jee ogu k'unu.” Oo ya bụ; ndu Simiyonu tsoru phẹ jeshia.
- ⁴No iya; ndu Jiuda jenu etsoo phẹ ogu ono. Chipfu woru ndu Kénanu waa ndu Pérezu ye phẹ l'ẹka; ephe gbua ukporo unu nemadzu l'unu ise lẹ mkpukpu Bẹzeku.
- ⁵O buri lẹ mkpukpu Bẹzeku ono bẹ ephe humaru Adoni-Bẹzeku; bya etsokwaa ya pho ogu. O buri iya bụ l'ephe alwu-kpee ndu Kénanu waa ndu Pérezu.
- ⁶Adoni-Bẹzeku ye okpa l'oso. Ephe chia ya gude; bushia ya mkpushi-eka ezekeka waa mkpushi-okpa ezekokpa.
- ⁷No iya; Adoni-Bẹzeku sù: “Ukporo ndu eze eto lẹ ndu eze iri, e bushiru ezekeka me ezekokpa shi atutuje ekputara lẹ mkpula teburu mu. Nta-a bẹ Chileke pfuwaru mu ugwo iphe, mu meru phẹ.” Ephe kpuru iya jeshia Jierusalemu; o buri l'eka ono bẹ o mechaaru nodu nwuhu.
- ⁸Ndu Jiuda tsokwaapho mkpukpu Jierusalemu ogu; lwuta iya. Ephe gude ogu-echi gbufu mkpukpu ono; tufu iya oku.
- ⁹E mechaa; ndu Jiuda jepfushia ndu Kénanu ogu; mbu ndu Kénanu ophu bu l'alì ubvu ubvu; me l'echiegu ndohali; me l'alì okpa ubvu, no l'uzo enyanwu-ariba.

Otuniyelu alwuta mkpukpu Debi

(Jios 15:13-19)

- ¹⁰Ndu kẹ Jiuda ono bya ejekwapho je etsoo ndu Kénanu ophu bu lẹ mkpukpu Hẹburonu ogu; lwuta ndu Sheshayi; me ndu Ahimanu; waa ndu Talumayi. Iphe, e shi ekuje Hẹburonu lẹ mbu bụ Kiriyatu-Araba.
- ¹¹Ephe gbẹ l'eka ono wuru jeshia ndu mkpukpu Debi ogu. Iphe, e shi ekuje Debi bụ Kiriyatu-Sefa.
- ¹²No iya; Kalebu sù: “Onye gbeshikpowaru je etsoo ndu Kiriyatu-Sefa ogu; lwua phẹ lwuta; mu e-ke onye obu nwatibe mu, bụ Akusa g'ọ luru.”
- ¹³Otuniyelu nwa Kenazu, nwune Kalebu kẹ nwata tugbua je alwuta mkpukpu ono. Oo ya bụ; Kalebu kee ya nwada iya ono, bụ Akusa; o luru.

¹⁴Ọ lwaepho ibe Ọtuniyelu; ọ sụ iya g'o je epfuaru nna iya, bụ Kalẹbu g'ọ wẹe ya alị. Akusa bya enyizeta l'eli nkapfu-igara iya; Kalẹbu jia ya sụ: “? Bụ gunu bẹ mu e-meru ngu?”

¹⁵Ọ sụ iya: “Menaarụ mu iphe-oma. Eshinu ị sụru gẹ mu laa echięgu ndohali; nufunaa mu alị l'eka mini, anwu shokoshoko.” Ọo ya bụ; Kalẹbu bya eworu eka mini anwu shokoshoko l'eka dụ dagere-dagere mę l'eka bụ ohu alị woru nụ iya.

¹⁶Oshilokpa ogo Mosisu, bụ iya bụ ndu Kenu bę yee ndu Jiuda shi le mkpukpu Jieriko, bụ iya bụ ndu Oha-mpfu tuko wufu jeshia echięgu ndu Jiuda, bụ iya bụ eka ono, nọ l'echięgu ndohali le mgboru mkpukpu Aradu. Ọo ya bụ; ephe tuko buru l'eka ono.

¹⁷Tobudu iya bụ; ndu Jiuda mę ndu Simiyonu, bụ unwunna phe tugbabe nanu je etsoo ndu Kenu ophu bu le mkpukpu Zefatu ogu; mekota mkpukpu ono l'ophu; ọ chihu. Ọo ya bụ e kuahaa mkpukpu ono Homa, bụ iya bụ “mkpurupyata” .

¹⁸Ndu Jiuda lwutakwarupho alị Gaza; mę alị Ashikelonu; mę alị Ekuronu; lwutakota mkpukpu, nokota iya nụ.

¹⁹Chipfu nọ swiru ndu Jiuda; ephe lwuta ndu bu l'eka dụ ubvu ubvu. Ndu ophu bu le nsuda bę kpobaru phe achishi kele ndu k'ono bę nweru ugbo-inya ogu, e gude igwe mee.

²⁰Mkpukpu Heburonu bę a nuru Kalẹbu; kele Mosisu kwehawaru iya ukwe iya. Kalẹbu bya achishia unwu Anaku eto, bu l'eka ono.

²¹Ndu Benjaminu bę ta achifuduru ndu Jiebusu, bu le Jierusalemu. Ndu Benjaminu yee ndu Jiebusu tuko buru eghirigha le Jierusalemu byasu ntanu-a.

²²Ndu onu-ulo ke Jiosefu bę jekwarupho etsoo mkpukpu Betelu ogu; Chipfu swikporu phe eswiru.

²³Ephe bya ezia ndu e-je anwua ngge le Betelu ono, bụ iphe, o shi aza bụ Luzu.

²⁴Ndu ono huma nwoke, shi le mkpukpu ono alufuta. Ephe sụ iya: “Jiko goshinu anyi onu-abata mkpukpu-a. Anyi e-mekwaru ngu-a iphe-oma.”

²⁵Ọo ya bụ; o goshi phe onu-abata mkpukpu ono. Ephe tsoo ndu mkpukpu ono ogu; gude ogu-echi gbushikota phe. Ole ephe haru nwoke ono; waa ndibe iya l'ophu.

²⁶Tobudu iya bụ; nwoke ono kwafu lashia alị ndu Hetu, bụ eka o buwaro jaa buru mkpukpu eka iya. Ọ gube mkpukpu ono Luzu, bụ iya bụ iphe, oza byasu ntanu-a.

Ọha, ndu Izurelu ta achifuduru

²⁷Ndu Manase bę ta achifuduru ndu alị Betu-Shanu waa mkpukpu iya; mę ndu alị Tanaku; mę ndu alị Doru; mę ndu alị Ibulamu; mę ndu alị Megido; mę mkpukpu le mkpukpu, nogbaa phe nụ; kele ndu Kenu ono bę kpofuru ishi phe ye l'alị ono.

²⁸A nonyaa; ndu Izurelu bya enweru agburehu; ephe kebuta ndu Kenu; ephe jeahaaru phe ozi; kele ephe ta achifu-gbuduru ndu Kenu ono.

²⁹Ndu Ifuremu bẹ ta achifukwarupho ndu Kénanu ndu ọphu bu lẹ mkpukpu Geza; ẹphe l'ẹphe tuko bua ẹghirigha l'ẹka ono.

³⁰Ndu kẹ Zebulun bẹ ta achifuduru ndu ọphu bu lẹ mkpukpu Kituronu; mẹ ndu ọphu bu lẹ mkpukpu Nahalolu. Ndu Kénanu ono, bu l'echilabo phe ono; jeahaaru phe ozi.

³¹Ndu kẹ Asha bẹ ta achifuduru ndu bu lẹ mkpukpu Akọ; mẹ ndu ọphu bu lẹ mkpukpu Sayidonu; mẹ ndu mkpukpu Ahulabu; mẹ ndu mkpukpu Akuzibu; mẹ ndu mkpukpu Heluba; mẹ ndu mkpukpu Afeku; mẹ ndu mkpukpu Rehobu.

³²Oo ya bu; ndu Asha buru l'echilabo ndu Kénanu, bu ndu vuhawaa ọzo buru l'alị ono; kele ndu Asha bẹ ta achifuduru phe.

³³Ndu Nafutali bẹ ta achifuduru ndu bu lẹ mkpukpu Betu-Shemeshi; waa ndu bu lẹ mkpukpu Betu-Anatu. Ẹphe buru l'echilabo ndu Kénanu, bu ndu vuhawa ọzo buru l'alị ono. Ẹphe mee ndu Betu-Shemeshi; waa ndu Betu-Anatu; ẹphe jeahaaru phe ozi.

³⁴Ndu Amoru bẹ nwularu ndu Danu azu; chiru phe ye l'alị úbvú úbvú. Ọphu ẹphe te ekwedu g'ẹphe wu-pfuta phe lẹ nsuda.

³⁵Oo ya bu; ndu Amoru kebe l'ẹphe bufutaje l'úbvú Heresu; mẹ lẹ mkpukpu Ajialonu; mẹ lẹ mkpukpu Shalubimu. A nonya ndu onu-ulo Jiófesu bya aja ajàjà ka l'otu; bya aka enweru okpehu; ẹphe kebata ndu Amoru ẹphe jeahaaru phe ozi mkponwu-ẹhu.

³⁶Oke-alị ndu Amoru bẹ shi l'uzo isheli úbvú “Akpi” noo jasụ lẹ mkpukpu Sela; bya akwasewaruro ya.

Ikpe 2

Aabarụ ndu Ízurelu mba

¹Ojozi-imigwe, shi l'ẹka Chipfu bya agbẹ lẹ mkpukpu Gilugalu jeshia lẹ mkpukpu Bokimu je asụ: “Mu dufutaru unubẹ ndu Ízurelu l'alị Ijiputu; duru unu ye l'alị ono, mu riburu nte lẹ mu a-nụ nna unu ono. Mu sụ lẹ mu ta abyadu emebi ọgbandzu, mu lẹ unu gbaru.

²L'unubedua bẹ bu iphe, duru unu bu g'unu lẹ ndu bu l'alị-a ta gbashị ndzụ; unu echikposhikota ọru-ngweja phe. Obenu l'unu jikaru eme iphe ono, mu pfuru unu g'unu mee ono. ? Bu gunu kparu iphe, unu meru egube ono?

³Eshinu ọ dọ nno bẹ iphe, mu epfuru unu nta-a bu lẹ mu taa chifuekwaru unu ndu ono. Ẹphe a-buru unu aghamehu; teme agwa phe, a-buru ọnyà, unu a-nmalahuje.”

⁴Ojozi-imigwe, shi l'ẹka Chipfu ono pfuchaerupho ndu Ízurelu iphe ono; ẹphe tushia uzu-ekwa.

⁵Oo ya bu; ẹphe gube ẹka ono “Bokimu, uzu-ekwa.” Ẹphe nodu l'ẹka ono gwaa Chipfu.

Anwụhu Jioshuwa

⁶Tọbudu iya bụ Jioshuwa sụchaa gę ndu Ízurelu lashĩa; onyenonu laa je enwechaaru oke alì nkiya.

⁷Èphe bakotaru Chipfu ẹja lẹ teke Jioshuwa nọ ndzụ; mękwapho lẹ teke ndu bụ ọgerenya ọphu ka Jioshuwa aka nka nọ ndzụ, bụ iya bụ ndu ono, humakotaru iphe, du biribiri, Chipfu meshiru ndu Ízurelu ono.

⁸Onye-ozì Chipfu, bụ Jioshuwa; nwa Nunu bẹ nọru ụkporo apha ise l'apha iri; ọ nwuhu.

⁹Èphe lia ya l'ẹka o nweru alì lẹ mkpụkpu Timunatu-Heresu, nọ l'alì úbvú úbvú Ifuremu l'uzo isheli úbvú Gashì.

¹⁰Ọgbo k'ono nwushihu-gbuchaephò lapfuchaa nna phẹ; ọgbo ọzo bya alufuta, bụ ndu ta amadu Chipfu; ọphu epfuro k'iphe, du biribiri ono, o meshiru ndu Ízurelu ono.

Ndu Ízurelu abaru Balu ẹja

¹¹Tọbudu iya bụ; ndu Ízurelu meahaa ẹjo-ememe l'ẹnya Chipfu; bya awata abaru Balu ẹja;

¹²mbụ; parụ Chipfu, bụ Chileke kẹ nna phẹ haa, bụ onye ono, dufutaru phẹ l'alì Ijiputu ono. Èphe tsoru iphe, bụ agwa ndu bupheru phẹ mgburugburu baaharu ẹja. Èphe kpatsunu Chipfu ẹhu-eghu;

¹³kẹle ẹphe parụ Chipfu haa; baaharu agwa Balu; waa Ashitoretu ẹja.

¹⁴Tọbudu iya bụ; oke ẹhu-eghu Chipfu dapfuta ndu Ízurelu; o woru phẹ ye l'ẹka ndu ọ-lwua-ọlaa; ẹphe lwua phẹ alwulwu. O nwuru phẹ nù ndu ọhogu phẹ, bupheru phẹ mgburugburu, bụ ndu ẹphe ta aduedu ike wotaba ọgu ọzoba.

¹⁵Èkameka, ẹphe jekporu bẹ Chipfu ahajee phẹ phọ; g'e emekpee phẹ; mbụ ẹgube ono, o pfuhawaru phẹ l'ọo-nodu anwuru phẹ ono. O bunuru iya bụ l'ẹphe anodunu l'oke iphe-ẹhuka.

¹⁶A nonya Chipfu bya emee ẹphe nweru ndu-ikpe, bụ ndu adzoje phẹ l'ẹka ndu lwutaru phẹ nù.

¹⁷Obenu l'ẹphe ta angabekwarupho ndu-ikpe phẹ ono nchì; kẹle ẹphe tsoleru-a apharwushi onwophe l'abaru agwa ẹja. Èphe dakoberu gbakuta azu l'etso ọzo ono, nna phẹ tsoru ono, bụ iya bụ; eme ekemu Chipfu. Èphe te emeduru gę nna phẹ.

¹⁸Ọ nodu abujeru teke Chipfu meru g'ẹphe nweru Onye-ikpe; o swiru onye-ikpe ono eswiru; gude onye-ikpe ono dzotakota phẹ l'ẹka ndu ọhogu phẹ jasụ g'onye-ikpe ono a-nọ-beru ndzụ. Iphe, kparụ iya nù buru l'ude, ẹphe atsujẹ lẹ k'ishi, ndu ono akpaya phẹ; mę k'ẹhu, ẹphe anoduje emekpa phẹ; bẹ l'emeje imemini phẹ adu Chipfu.

¹⁹Teke onye-ikpe ono nwuhuerupho; ẹphe adakobe; kabaa apharwushi onwophe eme lẹ gę nna phẹ meru; mbụ ephozeru agwa abaru iya ẹja. Èphe te ekweddu haa ẹjo-ememe phẹ; ọphu ẹphe ta ahaduru ekwefuru Chipfu ike.

²⁰No iya; oke ẹhu-eghu Chipfu dapfuta ndu Ízurelu; ọ sù: “Eshinu ọha-a mebyiwaru ọgbandzu ono, mu meru doberu nna phẹ ono; ọphu ẹphe ta angajẹedu nchi l'iphe, mu pfuru;

²¹bẹ mu ta abyadu achifukwaduru phẹ ọha ono, Jioshuwa ta chishiduru; tẹme ọ nwuhu ono.

²²Mu e-gude phẹ huta ndu Ízurelu ama; maeduru ? ẹphe a-wata etso mube Chipfu egube nna phẹ oche tsoru mu?”

²³Ọo ya bu; Chipfu paru ọha ono haa; ọphu o woduru phẹ ye Jioshuwa l'eka; mbu shi nno chishi-kebe phẹ egwegwa.

Ikpe 3

Ọha, Chipfu ta achishiduru ndu Ízurelu

¹Waa ọha ono, Chipfu paru haa g'o gude hua ndu Ízurelu ama; mbu ndu Ízurelu, ndu ọphu ta amadu k'ogu ono, alwuru l'alí Kėnanu ono.

²Iphe, kparu iphe o meru iphe-a bu g'o gude iya zia unwu Ízurelu ndu ọphu te eshidu maru g'aalwuje ọgu egube aalwuje iya.

³Ọha ono bu umadzu ise, bu ndu-ishi ndu Filisitayinu; me ndu Kėnanu l'ọphu; me ndu Sayidonu; me ndu Hevu, bukota l'ubvu ubvu Lėbanonu; e-shikpo l'ubvu Belu-Hamonu je akpaa le mkpukpu Lebo-Hamatu.

⁴Chipfu ta achishiduru phẹ g'o gude phẹ hutaje ndu Ízurelu ama g'ọ maru; ? ẹphe e-meje-a ekemu Chipfu; mbu ekemu ono, o shi l'eka Mosisu turu nu nna phẹ ono.

⁵Ndu Ízurelu buru l'echilabo ndu Kėnanu; me ndu Hetu; me ndu Amoru; me ndu Pėrezu; me ndu Hevu; waa ndu Jiebusu.

⁶Ndu Ízurelu wata alu unwada ndu ono; bya ewojekwarupho unwada nkephe kee unwoke ndu ọhozo ono; bya abaahakwarupho agwa phẹ eja.

Ọtuniyelu adzo ndu Ízurelu

⁷Ndu Ízurelu bya emee ejo-ememe l'anya Chipfu. ẹphe zoharu Chipfu, bu Chileke phẹ; baaharu Balu me Ashera eja.

⁸Tobudu iya bu; Chipfu swibenuru ndu Ízurelu ẹhu-eghu; k'ọphu o nwuru phẹ ye l'eka Kushanu-Rishatayimu, bu iya bu eze ndu Mesopotemiya. Ndu Ízurelu nodu Kushanu-Rishatayimu l'eka apha esato.

⁹A nonyaa; ndu Ízurelu raku Chipfu; ọ nu phẹ onye ndzota, bu Ọtuniyelu nwa Kenazu; mbu Kenazu, bu nwune Kalebu ke nwata; ọ dzota phẹ.

¹⁰Unme Chipfu bya eji iya ẹhu; ọ bya aburu onye-ikpe ndu Ízurelu. Ọ tugbua jeshia ọgu; Chipfu woru Kushanu-Rishatayimu, bu eze ndu Mesopotemiya ye iya l'eka; ọ lwu-kpee Kushanu-Rishatayimu.

11Tɔbudu iya bụ; alì ono buru lẹ nchì-odoo ụkporo apha labo. Oo ya bụ Ọtuniyelu, bụ nwa Kenazu bya anwụhu.

Ehudu adzọ ndu Ízurelu l'ẹka ndu Mówabu

12No iya; ndu Ízurelu bya emekwaa ẹjo-ememe ọzobaa l'anya Chipfu. Oo ya bụ; Chipfu gude nù k'ẹjo-ememe ono ẹphe meru ono mee Ẹgulonu, bụ eze ndu Mówabu o kapyabẹ phe.

13Oo ya bụ; Ẹgulonu je akpakọ ndu Amonu; waa ndu Amaleku; ẹphe je alwu-kpee ndu Ízurelu. Ẹphe nata phe mkpukpu Oha-mpfu ono.

14Ndu Ízurelu noo l'ẹka Ẹgulonu, bụ eze ndu Mówabu ono apha iri l'esato.

15Ole ndu Ízurelu rakuẹrupo Chipfu; o nù phe onye ndzota, bụ Ehudu; nwa Gera; bya aburu onye shi l'okpa-ipfu Benjaminu. O bụ onye eme ẹkicha. O be teke ndu Ízurelu byaru aturu utu nù iya g'o je anụ Ẹgulonu, bụ iya bụ eze ndu Mówabu;

16Ehudu bya emeta ogu-echi, atsu nkọ akpata iphu labo, ogologo iya habe ge nkwo-ẹka lanu; woru nwua l'ime uwe iya l'utapfu okpa ẹkutara.

17O je eworu utu ono nù Ẹgulonu, bụ eze ndu Mówabu. Ẹgulonu be bụ onye du okporokpo.

18O nuebichaa ya iphe ono; o bya edufu ndu ono, shi vuru iphe ono, ẹphe tutaru ono.

19E rwuẹpho l'agwa, no-kube mkpukpu Gilugalu; o ghakobe lashia azu je asu: “Jiko eze; o duru ozi, mu e-zi ngu lẹ mpya.” Eze ono su ndu-ozì iya: “Unu gebeeshikwa-o!” Oo ya bụ; ẹphe tuko gbado iya tugbua.

20Noo ya; Ehudu bya ejekube iya ntse l'ẹka o no nkinyi iya l'ime mkpuru ulo-eli ono, bụ ẹka ka ejidata ejidata; je asu iya: “O duru ozi, shi Chileke l'ẹka mu eme ge mu zia ngu.” Eze gbalihuẹpho l'oshi, o no anoo;

21Ehudu gudeẹpho ẹkicha mifuta ogu-echi ono l'utapfu okpa ẹkutara iya ono; woru iya nmaa eze ono l'epho.

22Ogu-echi ono bahugbua ya l'epho jeye l'ishi iya; ẹba rimia ogu-echi ono; k'ophu bụ lẹ Ehudu be haru iya amifuta. Akurepho kposhihu iya.

23Tɔbudu iya bụ; Ehudu bya abahu l'oma ulo ono; woru mgbo k'ulo-eli ono gu-chishikota; guburu iya ye; woru iya tu-chishia.

24O tugbuchaepho; ndu ejeru eze ono ozi bya eje ahuma lẹ mgbo ulo-eli ono be a tu-chishikotaru atu-chishi; ẹphe su: “Oo-bukwaru unme be otuta l'ime mkpuru ulo-eli ono.”

25Ẹphe nodu kwabẹ gbiriri jasụ odu tsuru phe; ẹphe ghadashiaha; ophu o to guhaduru phe uzo. Ẹphe bya ewota ire-igodo thashia uzo ono. Ẹphe bya ahuma nnajiuphu phe ono g'o dabyiru l'oma-ulo ono; nwuhuwaa anwuhu.

²⁶Ehudu bụ teke ono, ẹphe nọ kwabẹ phọ bẹ o pyofuru gbalaa; shia ụzo ẹka ono, agwa nọ ono; gbaru lashia mkpukpu Seyira.

²⁷Ọ gbarwuepho l'ẹka ono; ọ nọdu l'alị úbvú úbvú Ifuremu woru opu gbu; ndu Ízurelu wuru tsoru iya; a -gbẹ l'úbvú ono; yẹbedua vuta ụzo.

²⁸Ọ sụ phẹ: “Unu tso mu! Chipfu yeakwaru unu ndu ọhogu unu, bụ ndu Mówabu l'ẹka.” Ọo ya bụ; ẹphe wuru tsoru iya; je anọ-chishikọta ẹnyimu Jiódanu l'ẹka dukota chara chara, bụ ẹka eeshije gude ọkpa dafu mkpukpu Mówabu; ọphu ẹphe ekwedu g'o nweru m'onye lanu a-dafu azu iya ọphuu.

²⁹Ẹphe gbu ndu Mówabu ono iphe, rwuru ukporo unu nemadzu l'unu ise le teke ono; mbu ndu bukota mkparawa okpehu dukota; ọphu ọ dudu m'onye lanu, nahuru nu.

³⁰Ndu Ízurelu lwuta ndu Mówabu le mboku ono; ẹphe nọdu phẹ le mkpula. Tọbudu iya bụ; alị ono nọdu le nchi-odoo ukporo apha ẹno.

Shamuga l'adzota ndu Ízurelu

³¹Ehudu bughechaepho ishi; Shamuga, bụ nwa Anatu bya aburu ishi. Ọ bụru yẹbedua gude mgboro chigbushia ndu Filisitayinu unu nemadzu l'ukporo umadzu iri. Yẹbedua bukwapho onye dzoru ndu Ízurelu.

Ikpe 4

Debora me Baraku adzota ndu Ízurelu l'ẹka ndu Kėnanu

¹Tọbudu iya bụ; Ehudu nwuhuchaa; ndu Ízurelu meahaa ẹjo-ememe l'ẹnya Chipfu ọzo.

²Chipfu woru phẹ ye Jiabinu, bụ eze ndu Kėnanu l'ẹka. Ẹka ọ nọ bụru eze bẹ bụ le mkpukpu Hazo. Onye-ishi ndu ọhogu iya bụru Sizera, onye bu le mkpukpu Haroshetu-Hagoyimu.

³Ọ gude kele o nweru ugbo-inya, e meru l'igwè; unu labo l'ukporo ise kpa ndu Ízurelu owechorochoro apha ukporo. Tọbudu iya bụ; ndu Ízurelu raku nu Chipfu g'ọ gbaaru phẹ mkpu.

⁴Debora, bụ nwanyi epfuchiru Chileke; mbu nyee Lapidotu bụ onye-ikpe ndu Ízurelu teke ono.

⁵Ẹka o shi anọduje bụ le mkpula mpfu Debora, nọ le mgbaka mkpukpu Rama yele mkpukpu Bėtelu l'alị úbvú úbvú Ifuremu; ndu Ízurelu awu ejepfu iya g'o kpeeru phẹ ikpe.

⁶Ọo ya bụ; ọ bya ezia e je ekua Baraku nwa Abinowamu, shi le mkpukpu Kadeshi, nọ l'alị ndu Nafutali. Ọ sụ iya: “Chipfu, bụ Chileke ndu Ízurelu bẹ ziru ngu sụ g'i tugbu je achita unwoke ndu Nafutali; me unwoke ndu Zebulun ukporo unu nemadzu l'unu ise yeru onwongu; duru phẹ g'unu shia ụzo úbvú Tabo.

⁷Mu e-me Sizera, bụ onye-ishi ndu ojogu Jiabinu; g'ọ chiru ugbo-inya iya; yele ndu ojogu iya; bya l'ẹnyimu Kishonu; mu eworu Sizera ye ngu l'ẹka.”

⁸Baraku sụ iya: “Ọ -bụru l'ii-tsoru mu je; bẹ mu e-jekwa-a; teke i tii tsodu mu je bẹ mu tee jekwa.”

⁹Debora sụ iya: “Ọ dūephō ree; mu lẹ ngu a-swīru-a je; ọle ùbvù, nọ l'iphe-a, ìbya ejeje-a bẹ taa bụekwanuru nkengu. Ishi iya bụ l'ọo nwanyị bẹ Chipfu e-me; l'ọ gude Sizera.” No iya; Debora gbalihu tsoru Baraku; ẹphe jeshia Kadēshi.

¹⁰Ọ bụru lẹ Kadēshi bẹ Baraku rwukọberu ndu Zebulon waa ndu Nafutali ẹphe dọru. Ndu o gude jee bụ ụkporo ụnu nemadzụ l'ụnu ise. Debora tsokwaru pẹ phọ.

¹¹No iya; Heba, bụ onye Kénu, bụ iya bụ oshilọkpa Hobabu, bụ nwune nyee Mosisu; bufu onwiya l'ẹka ndu Kénu nọ. Ọ tughua je eworu ụlo-ẹkwa iya kpọbe l'upfu achi, nọ lẹ mkpukpu Zanimu, nọ lẹ mgboru alị Kadēshi.

¹²Tọbodu iya bụ; epfuaru Sizera lẹ Baraku nwa Abinowamu bẹ jeshiakwaru l'ùbvú Tabọ;

¹³Sizera chitakota ụkporo ụnu ụgbo-inya ígwè iya labọ l'ụkporo ụgbo-inya ígwè ise; mẹ unwoke, ẹphe l'iya nọ l'ophu; shi lẹ mkpukpu Haroshetu-Hagoyimu jeshia l'enyimu Kishonu.

¹⁴Noo ya; Debora sụ Baraku: “Ngwa! Ọo ntanu-a bẹ Chipfu woru Sizera ye ngu l'ẹka.” Sụ iya: “Chipfu vutahaakwaru ụzo.” Ọo ya bụ; Baraku chiru ụkporo ụnu ojogu labọ l'ụkporo iri nyizetakota l'ùbvú Tabọ.

¹⁵Chipfu gude ogu-echi Baraku meru ẹberebete tọ Sizera; mẹ ụgbo-inya iya l'ophu; waa ndu ojogu iya g'ẹphe ha. Sizera pfufuta l'ụgbo-inya iya chie okpa l'oso.

¹⁶Baraku chipyabe ndu ojogu Sizera; mẹ ụgbo-inya pẹ jasụ ẹphe rwua Haroshetu-Hagoyimu. Ọ bụru ogu-echi bẹ e gude gbushikota ndu ojogu Sizera. Ophu o dudu m'onye lanu, phoduru nu.

Jiayelu egbu Sizera

¹⁷No iya; Sizera gude okpa gbaru lashia l'ulo-ekwa Jiayelu, bụ nyee Heba; onye Kénu. Ọ bụru iphe, kparu iya nu bụ lẹ Jiabinu, bụ eze ndu Hazo bẹ yele ndibe Heba, bụ iya bụ onye Kénu ono dọ lẹ ree.

¹⁸Jiayelu gbagbua je agba Sizera ndzuta; bya asu iya: “Nnajiuphu mu tokwa ẹhu! Gbabata! Ta atsushi ebvu!” Ọ gbapfu nu iya l'ulo-ekwa ono; o bya eworu ekwa kpube iya.

¹⁹Ọ sụ iya: “Jiko kenaa mu mini ge mu ngua; kele ẹgu mini agukwa mu.” O kpuaa iphe, ooyeje mini-era-eswi; gbata iya nu iya; o ngua. Ọ bya ewokwaru ekwa ono kpuchia ya.

²⁰Ọ sụ nwanyị ono: “Pfikwaru l'onu-abata ulo-ekwa ono; k'ophu bu; o -duru onye byaru bya aja ngu su: ‘? O nweru onye no l'eka-a?’ l'ii-sukwanu iya: ‘Waawaa!’ “

²¹Obenu lẹ Jiayelu, bụ nyee Heba gbẹ wota nggu, eegudeje kpọbe ulo-ekwa; bya ewota ongu; pyaa mpya jepfu iya; je egude ongu ono kpọbe iya nggu ono l'ishi nchi.

O foo ya bahu l'ali; kele mgbenya tu-rwewaru iya atu-rwe; teme ike bvushikwa iya pho. O buru iya anwuhu.

²²A bya l'amaru; Baraku nodu agbaghawaa l'eka ochikwanu Sizera; Jiayelu lufuta gbapfuta iya; bya asu iya: "Bya; ge mu goshi ngu nwoke ono, iicho ono." Tobudu iya bu; o bya etsoru nwanyi ono bahu; bya ahuma Sizera g'o dabyiru nwuhuwaa anwuhu; nggu kporu iya l'ishi-nchi.

²³O buru le mboku ono be Chileke meru Jiabinu, eze ndu Kenanu; o laa ndu Izurelu l'eka.

²⁴Ike ndu Izurelu bya akapyabe ke Jiabinu, bu eze ndu Kenanu okpobe akapyabe gbiriri jasu ephe lwu-kpee ya.

Ikpe 5

Ebv, Debora yee Baraku guru

¹Le mboku ono be Debora yee Baraku nwa Abinowamu guru ebvu-a su:

²"Ndu-ishi ndu Izurelu vutaru uzo ugu; ndu Izurelu l'ophu gude obu phe tsoru phe; unu jaa Chipfu ajaja!

³Unu numa iphe-a; unube ndu eze! Unu ngabe nchi; unube ndu-ishi! Mu a-gu ebvu nu Chipfu; mu a-gu ebvu gu-ku iya; mbu le mu e-gude ebvu jaa Chipfu, bu Chileke ndu Izurelu ajaja.

⁴Gube Chipfu; teke i lufuru l'ali Siye; mbu teke i zoru garamugaramu lufu l'ali ndu Edomu be mgboko nmahuru jijijijii; igwe rwua erwurwu; wa mini.

⁵Ubvú be nmakotaru jijijijii l'iphu gube Chipfu; mbu jeyekpo l'ubvu Sayinayi be nmacharu jijijijii l'iphu gube Chipfu, bu Chileke ke ndu Izurelu.

⁶Le teke ke Shamuğa nwa Anatu; waa Jiayelu be a gwoberu eshi eze gbororo; ndu ije pyoaha ntubo.

⁷Iphe, bu mkpukpu, no le Izurelu dabyikotaru iphoro; gbiriri jasuru Debora futa; bya aburu ne ndu Izurelu.

⁸G'ephe hataru agwa ophuú; be ugu wataru ada l'ali Izurelu gbaa mgburugburu; ophu o dudu me iphe, eegudeje egbobuta onwonye; ozoo arwa, a humaru l'echilabo ukporo unu nemadzu ise, no l'ali Izurelu.

⁹Ndu-ishi ndu Izurelu du mu l'obu; mbu ndu turu obu phe onyo wofuta onwophe onoya. Unu jaa Chipfu ajaja!

¹⁰Unube ndu ono agba l'eli nkafu-igara ocha; mbu unube ndu ono, no l'eli ukpo, a wukoberu l'eli nkafu-igara; me unube ndu eje l'okpa;

¹¹unu geedukwa olu-ebvu ndu ono, agu ebvu l'eka eekutaje mini ono. Oo l'eka ono be ephe a-nodu gua ebvu k'iphe, pfuru oto, Chipfu mekotaru; mbu iphe, pfuru oto, o

mekotaru ndibe iya le Ízurelu. Tòbudu iya bu; ndibe Chipfu wufu jeshia l'onu-abata mkpukpu.

12 ‘Gbalihukpodapho! Debora gbalihu! Gbalihu! Gbalihu! Chiswee ebvu! Baraku; gbalihu! Gube nwa Abinowamu; duta ndu i kpuru le ndzu.’

13 Tòbudu iya bu; unwoke ophu phoduru nu wu-pfushia ndu-ishi. Ndibe Chipfu wuru byapfuta mu g'anyi tsoo ndu okpehu du ogu.

14 Ndu Ifuremu, bu ndu ophu gbaru ogbarabvu l'ubvu ubvu Amaleku wufuta tsoru gube Benjiaminu; gu le ndibe ngu. Ndu-ishi-ojogu, shi l'ali ndu Makiya wufutakwapho; ndu shi l'ali Zebulun bu ndu gude mgboro onye-ishi-ojogu.

15 Ndu-ishi ndu Isaka; ephe le Debora toko swiru. Nokwapho ge ndu Isaka l'onwophe wukwarupho tsoru Baraku; gbazeta le nsuda ono. Ophu obu anodu ndu Rubenu l'eka lanu.

16 ? Bu gunu be unu doru l'odu aturu eme? ? Bu g'unu numa okwe onye eche aturu akpo gude ekukobe aturu iya to? Ndu Rubenu be agba egomunggo shii.

17 Ndu Giladu be kwaru l'azu enyimu Jiodanu. ? Bu gunu be ndu Danu gugaru kwaa l'ugbo-mini? Ndu Asha kwaa l'aguga enyimu; mbu l'odu ugbo-mini.

18 Ndu Zebulun mia enya le ndzu kweta onwu. Nokwapho ge ndu Nafutali mikwarupho enya le ndzu bu ono; mbu l'egu ogu ono.

19 Ndu eze byaru; ephe lwua ogu ono. Ndu eze ndu Kenu bu lwuru ogu le mkpukpu Tanaku; le mgboru mini mkpukpu Megido; ophu ephe alwutaduru me mkpola-ochaa.

20 Kpokpode be gbachaa l'akpaminigwe alwu ogu; mbu l'ephe shichaa l'eka ephe eshije; etso Sizera ogu.

21 Enyimu Kishonu toko phe kpota; mbu enyimu shi l'ichee ono, bu iya bu enyimu Kishonu. Gube obu mu; gude ike zoru je l'iphu!

22 No iya; igiji okpa inya nodu ada g'egbigwe. Mbu inya, okpehu du nodu agbagbaa ke kwaakwa.

23 Ojozi-imigwe, shi l'eka Chipfu suru: ‘Unu tua mkpukpu Merozu onu; mbu; unu tua phe ojo onu; kele ephe ta abyaduru eyetaru Chipfu eka l'ogu; mbu yetaru Chipfu eka lwua ndu ike du l'ogu.’

24 Ge Jiayelu; mbu nyee Heba, bu onye Kenu bukwaru onye aa-kachaa agoru onu-oma nu l'iphe, bu unwanyi; g'o buru iya be aa-kachaa agoru onu-oma nu l'iphe, bu unwanyi, bu l'ulo-ekwa.

25 O raru ora mini; o nu iya mini-era-eswi. Mbu l'oo l'iphe, gbaru ndu eze be o yeru iya mini era-eswi.

26 O dzu-liru nggu ulo-ekwa; bya egude ekutara palia ongu ndu-ozu; kpo be iya Sizera l'ishi-nchi; tsupyabe iya ishi l'ali; kpo-fua uzo.

²⁷Ọ bụru lẹ mgboru ọkpa iya bẹ o phozeru; dabyiru. Mbụ l'ọo lẹ mgboru ọkpa iya bẹ o phozeru dabyiru nwuhu. Ọ bụru l'ẹka o phozeru ono bẹ ọ daru; nwuhu.

²⁸Lẹ windo bẹ ne Sizera gbẹ pyofu ẹnya. Ọ nọdu l'ọnu-uzo ọlo-eli ara ẹkwa sụ: ‘? Bụ gunu kparu iphe, ụgbo-inya anọ ọdu alwalwa? ? Bụ gunu meru iphe, a ta nọada ụkporo ọkpa ụgbo-inya iya?’

²⁹Unwumboko ibe eze ndu ọphu kachaa amaru iphe nọdu azu eyeru iya l'iphe, oopfụ; teme yẹbedua nọdu azukwa iya pho ekwe l'onwiya.

³⁰Ephe nọdu asuje iya: ‘? Tọbodu iphe, ephe a-kwata l'okwata bẹ ephe achọ; bya ekekwa iya pho ekeke? Nwoke nonu e-keta nwamgboko lanu; ọzoo ẹbo. Sizera eketachaa uwe, ama ntumatu; mbụ l'oo-ketachaa uwe, ama ntumatu, akwaru k'erengete; waa ẹkwa, du ẹguru, mu a-tu-phuje l'olu; mbụ ? ọ bukotaru iphe, a kwataru l'okwata?’

³¹Gẹ ndu ọhogu gube Chipfu lakota l'iyi ẹgube ono. Ọle gẹ ndu yeru ngu obu gbukwa ke nwijnwii g'ẹnyanwu, agbakota agbakota.” Tọbodu iya bụ; alị ono nweru nchi-odoo nọ ụkporo apha labo.

Ikpe 6

Ndu Midiyanu akpa ndu Ízurelu ẹhu

¹Ndu Ízurelu mekwa ẹjo-ememe l'iphu Chipfu ọzo. Chipfu woru phe yee ndu Midiyanu l'ẹka; ephe nọo phe l'ẹka apha ẹsaa.

²Ndu Midiyanu kpaa phe ẹhu k'ọphu ephe laru l'úbvú je emeshia ọlo waa mkpù lẹ mgbaka mgbaka mkpuma; me l'ogba; me l'ẹka a kpushigbaaru ike je ebugbaaru.

³No iya; ọ nọdu abujeru teke ndu Ízurelu kọru opfu; ndu Midiyanu; me ndu Amaleku; mewaro ndu buchaa l'uzo ẹnyanwu-awawa awuru bya etsoo phe ọgu naa phe iya.

⁴Ephe nọdu ejeje anmaa anmanma ọgu l'alị ono; tuko iphe, ephe meberu l'alị mebyishikota; mbụ mebyishikota iya nno je akpaa lẹ mkpukpu Gaza. Ọphu ọ dudu me iphe, dzu ndzu, ephe ahaje lẹ Ízurelu; je akpachaa l'aturu; waa eswi; me nkapfu-igara.

⁵Ephe achijeru ẹku phe; waa ọlo-ẹkwa phe zeru gbiigbiigbi g'igube; mbụ k'ọphu a ta majeduru g'e-shi aguta phe l'ogbu ephe l'inya-kamelu phe; ephe abya aphunwua alị ono gbaa ya ophorokpo.

⁶Ndu Midiyanu ono mee ndu Ízurelu; ephe kwata daa ukpa ọkpobe adada. No iya; ephe bya araku Chipfu g'ọ gbaaru phe mkpu.

⁷Ọo ya bụ; ndu Ízurelu rakuẹpho Chipfu lẹ k'iphe ndu Midiyanu eme phe ono;

⁸o zitaru phe onye mpfuchiru Chileke, bụ onye pfuru ndu Ízurelu sụ: “Waa iphe, Chipfu, bụ Chileke ndu Ízurelu epfu baa: Ọo mu bụ onye ono, dufutaru unu l'alị Ijiputu; mbụ l'alị ono, unu shi bụru ohu ono.

⁹Mu nafutaru unu l'ẹka ndu Ijiputu me l'ẹka ndu shi akpa unu ẹhu; mu chishikotaru unu ndu ono l'alị phe; woru iya nọ unu.

- 10**Mu pfiaru unu sù l'òo mbedua, bù Chipfu, bù Chileke unu. G'unu ta abakwaru agwa ndu Amòru ẹja l'alì ono, unu bu ono. Ọle unu te eyeduru mu ọnu.”
- 11**Noo ya; ojozi-imigwe, shi l'ẹka Chipfu bya bya anọdu l'upfu achi, nọ lẹ mkpukpu Ọfura. Onye nwe achi ono bù Jiowashi, bù onye shi l'ipfu ndu Abiyeza. Nwatibe iya, bù Gidiyonu nọdu l'ẹka aazoshije mee l'akpuru vayinu; echishi witi g'o wohaa ya ge ndu Midiyanu ta ahuma iya.
- 12**Ojozi-imigwe, shi l'ẹka Chipfu ono bya achaa Gidiyonu l'iphu bya asu iya: “Chipfu nokwa swiru ngu; gube ojobu, ike du.”
- 13**Gidiyonu su iya: “Oowaa; nnajuphu mu; o -buru lẹ Chipfu nọ swiru anyi; ? bu gunu meru g'o gude iphe-a nọdu anwukotaru anyi? ? Denuhunu iphe-ohumalenya iya ono, nna anyi phe koru anyi ono; mbu l'ephe suru: ‘L'òo Chipfu dufutaru anyi l'alì Ijiputu.’ Ọle nta-a be Chipfu obu gbẹ gwobewaa anyi; woru anyi ye l'ẹka ndu Midiyanu.”
- 14**No iya; Chipfu bya adakobe su iya: “Gude ike, i nweru je anafuta ndu Ízurelu l'ẹka ndu Midiyanu. Ọ kpokwaa mbedua gedegede be ezi ngu su ngu g'i je.”
- 15**Gidiyonu su iya: “Oowaa; nnajuphu mu; ? mu e-me ime-agma dzoo ndu Ízurelu? Humanu l'ò kwa unuphu k'anyi be ẹnya kachakpo alwalwa l'ipfu Manase; teme o buru mu be kachaa alwa alì l'onulo ibe nna mu.”
- 16**Chipfu su iya: “Mu e-swiru ngu-a; mbu l'ii-tuko ndu Midiyanu lwu-kpekota g'ephe bu onye lanu.”
- 17**Gidiyonu yeeru iya onu su: “Ọ -buru lẹ mu duwaa ngu l'obu; goshinu mu iphe, e-me ge mu maru l'ò bu-a gubedua be epfu eyeru mu nu.
- 18**Jiko ta atugbukwa l'ẹka-a jasù ge mu byapfuta ngu; ge mu je ewota iphe, mu a-nu ngu bya edoberu ngu l'ataphu.” Tòbudu iya bu; Chipfu su iya: “Mu a-nodu-a jeye ilwa azu.”
- 19**Tòbudu iya bu; Gidiyonu bya abahu l'ulo je eworu mkpi gbua shia; bya ewota utu iphe, egudeje eme buredi, jiru nkweka gbeta buredi, e te yeduru iphe, ekoje buredi. Ọ bya agushia anu ono ye lẹ nkata; wuru urwukurwuku iya ye l'itoshi. Ọ gweta iya wojeru iya l'upfu achi ono.
- 20**Ojozi-imigwe, shi l'ẹka Chileke ono bya asu iya: “Gweta anu ono; me buredi ono dobe l'eli mkpuma-a; iwufutakwapho urwukurwuku iya ono.” Gidiyonu bya emekota iya nno.
- 21**Tòbudu iya bu; ojozi-imigwe, shi l'ẹka Chipfu ono bya eworu ononu mgboro, o gude l'ẹka denyi l'anu yele buredi ono. Ọku shi lẹ mkpuma ono gbanwuhu; kepyashikota anu; me buredi ono. Ojozi-imigwe, shi l'ẹka Chipfu ono phuhu.
- 22**Gidiyonu maerupho l'òo Ojozi-imigwe, shi l'ẹka Chipfu; o rashia: “Nnajuphu, bu Chileke mu-e! Alashikwa mu-o! Kele o kwa Ojozi-imigwe, shi l'ẹka Chipfu be mu gude ẹnya mu huma ono-o!”
- 23**Chipfu su iya: “G'ehu dukwa ngu guu! Ta atsushi ebvu. I ti nwuhuduro.”

- 24**Tɔbɔdu iya bɔ; Gidiyɔnu kpɔaru Chipfu ɔru-ngweja l'ɛka ono; gbɛbe iya: “Chipfu bɔ ɛhu-guu.” ɔru-ngweja ono bɛ nɔɛpho lɛ mkpɔkpɔ ɔfura, nɔ l'ali ndu Abiyeza byasu ntanu-a.
- 25**L'enyashi mbɔku onokwaphɔ bɛ Chipfu sɔru iya: “Kpɔta oke-eswi k'ɛbo l'eswi nna ngu; mbɔ ɔphu gbawaru apha ɛsaa. Je enwukpɔshia ɛnya ɛka nna ngu agwajɛ Balɔ; gbutsushia itso Ashera, nɔ iya l'agɔga.
- 26**I -mechaa g'i kpɔaru Chipfu, bɔ Chileke ngu ɔru-ngweja, dukpoo rengurengu l'ɛka-a, ha l'eli-a. Ii gbɛ teke ono kpɔta oke-eswi k'ɛbo ono; chɔta itso Ashera ono, i gbutsushiru ono gude nkɔ iya gwee ngweja-akpɔ-ɔku.”
- 27**Tɔbɔdu iya bɔ; Gidiyɔnu bya achɔta ndu-ozi iya unwoke iri; bya emee gɛ Chipfu pfuru iya ono. ɔ buru l'enyashi bɛ o mekɔtaru iphemiphe ono. ɔphu o meduru iya l'eswe; keɛ ɔotsu ndibe phɛ waa unwoke mkpɔkpɔ ono ebvu.
- 28**Ndu mkpɔkpɔ ono lɔfutashia l'ɔnmewa ɔtsu; bya ahɔma l'a gbɛ mebyishikɔtawa nɔ ɛka ɛphe agwajɛ Balɔ; gbutsushiwa itso Ashera, nɔ l'agɔga iya; bya eworu oke-eswi k'ɛbo ono kpɔo ɔku l'eli ɔru-ngweja ono, a gbɛ kpɔwaanu l'ɛka ono.
- 29**Ndu mkpɔkpɔ ono bya ajjahaa: “? Bɔ onye meru iphe ɔwa?” ɛphe kpanyaa ishi; jikashinyaa; a sɔ phɛ l'ɔ kwa Gidiyɔnu nwa Jiowashi bɛ meru iya nɔ.
- 30**No iya; ndu mkpɔkpɔ ono bya epfuaru Jiowashi sɔ iya: “Je edufuta nwa ngu. ɔonwuhu; keɛ o tsukpɔshiru ɛnya ɛka aagwajɛ Balɔ; bya egbutsushia itso Ashera, nɔ l'agɔga iya.”
- 31**Iphe, Jiowashi pfuru ndu ono, nɔ-pheru iya mgburugburu ɛhuka ɛhuka ono bɛ bɔ: “? Unu agbaru Balɔ ɔdzori? Tɔo g'unu dzoo ya bɛ unu eme? Onye agbataru Balɔ bɛ eegbukwa l'utsu. ɔ -buru-a lɛ Balɔ bɛ bɔ ɔkpobe agwa bɛ teke nemadzɔ mebyishiru ɔru-ngweja iya be ɔo-du nɔ ike gbaaru onwiya ɔdzori.”
- 32**ɔ buru lɛ mbɔku ono bɛ a gɔberu Gidiyɔnu “Jieru-Balɔ; “ bɔ iya bɔ: “Gɛ Balɔ gbaa mkpu onwiya” ; keɛ Gidiyɔnu bɛ tsukpɔshiru ɛnya ɛka aagwajɛ Balɔ.
- 33**Tɔbɔdu iya bɔ; ndu Midiyanu l'ɔphu; mɛ ndu Amalɛku; waa ndu bugbaa l'uzo ɛnyanwu-awawa bya atuko ndu ojogu phɛ dzukɔbe; bya awufu azu ɛnyimu Jiɔdanu azu iya ɔphuu; je anmaa lɛ nsuda Jiezerɛlu.
- 34**ɔo ya bɔ; Unme Chipfu bya eji Gidiyɔnu ɛhu; o woru opu gbua gude kukɔta unwu Abiyeza g'ɛphe tsoru iya.
- 35**ɔ byakwaphɔ eye ndu-ozi ɛphe zikɔta ozi l'ali ndu Manasɛ l'ɔphu g'ɛphe kwaa ngwogu; bya ekukɔkwapho ndu Asha; mɛ ndu Zebulun; waa ndu Nafutali; ɛphe wuru byapfuta phɛ.
- 36**Gidiyɔnu bya asu Chileke: “ɔ -buru l'ii-shi l'ɛka mu dzoo ndu Izurelu ɛgube ono, i kweru mu ukwe iya;

³⁷lenu; mu a-kube eji aturu l'eka eechishije witi-a. O -buru l'oo l'oji aturu-a be iji dashiru kpoloko; ophu o to dashiduru l'oma ali l'ophu; mu amaru l'ii-shi-a l'eka mu dzoo ndu Izurelu egube ono, i pfuru iya ono.”

³⁸No iya; o meepho egube ono, Gidiyonu pfuru ono. O bya agbalihu le nchitabohu iya je apyia eji aturu ono mini; pyita iya mini, jiru gbamugbamu, eku mini.

³⁹Tobudu iya bu; Gidiyonu su Chileke: “Jiko g'ehu-eghu ngu te ejekwa aburu oku dapfuta mu; ge mu rwofuna ngu iphe lanu. Ge mu gudeeshi eji aturu ono hutafua ama ugbo lanu. K'ogiya-a; mee g'oji aturu ono kpohekota nku; l'i mee g'iji dashikota l'oma ali l'eka ono.”

⁴⁰L'enyashi mboku ono be Chileke meeru iya pho egube ono. Eji aturu ono kpoloko be iji ta adashiduru; o dashikota l'oma ali l'ophu.

Ikpe 7

Gidiyonu alwu ndu Midiyanu

¹O -rwua l'onmewa utsu; Jieru-Balu, bu iya bu Gidiyonu yee ndu ojogu iya l'ophu wu-lihu je anmaa anmanma ogu le mgboru obvu-mini Harodu. Ndu Midiyanu doru le nsuda, no l'uzo isheli ibiya ophu ephebedua no; le mgboru ubvu More.

²Chipfu bya asu Gidiyonu: “Ndu ojogu ngu be hanukakwaru mu igwerigwe ge mu eworu ndu Midiyanu ye phe l'eka. Iphe, ii-me nta-a ge ndu Izurelu ta anodushi epfuru mu l'oo ike phe be ephe gude dzoo onwophe

³bu g'i je araaru iya ephe arara nta-a su phe: ‘Teke o dukwaru onye eh u anmaa anmanma le ndzu-agugu; g'onye obu shikwa l'ubvu Giladu-a lashia.’ “ No iya; ukporo unu nemadzu ugbo labo l'unu iri l'ise zehu lashia; o buwaru ukporo unu nemadzu l'unu ise be phoduru nu.

⁴Obenu le Chipfu pfuleru-a Gidiyonu su: “Ndu ono be panukakwarupho igwerigwe. Chita phe je le mini ge mu huchaaru ngu ephe ama l'eka ono. Onye mu suru l'oo-tsoru ngu je; be e-je nu. Onye ophu mu sukwanuru l'o too tsoduru ngu eje be te ejekwa.”

⁵Oo ya bu; Gidiyonu duta ndu ono jeshia le mini. Chipfu su iya: “Dobe ndu ophu gude ire angu mini ge nkuta anguje-a iche; l'i dobekwapho ndu ophu gbushiru ikpere angu iya iche.”

⁶O buru umadzu ukporo iri l'ise be gude eka kwota mini ono ye l'onu. Ndu ophuu l'ophu be tukoru gbushikota ikpere g'ephe nguta iya.

⁷No iya; Chipfu su Gidiyonu: “Oo umadzu ukporo iri l'ise ono, gude eka kwota mini ye l'onu ono be mu e-gude dzoo unu; mbu woru ndu Midiyanu ye unu l'eka. Ge ndu ophuu tuko lashichaa ibe phe.”

⁸Oo ya bu; ndu k'ophuu vulia nri; bya achita opu-ogu ndu k'ophuu. Gidiyonu su phe g'ephe lashichaa unuphu. O buru umadzu ukporo iri l'ise pho be o haru. Eka ndu Midiyanu doru buru l'uzo ali le nsuda eka ono, Gidiyonu phe doru ono.

- ⁹O -rwua l'enyashi mboku ono; Chipfu su Gidiyonu: “Gbalihu; je adatso ndu Midiyanu ogu; kele mu wowaru phe ye ngu l'eka.
- ¹⁰O -buru l'iitsu ebvu eje phe etso ogu; ge gu le Pura, bu onye-ozu ngu swiru je l'odu-ogu phe ono.
- ¹¹Ii-numawaro iphe, ephe epfu. I -numachaa ya be oo-me-a g'obu shihu ngu ike g'i je ogu l'odu ono.” Tobudu iya bu; yele Pura, bu iya bu onye-ozu iya ono swiru jerwua azu eka ndu ojogu ono doru.
- ¹²Ndu Midiyanu ono; me ndu Amaleku; me ndu shikota l'uzo enyanwu-awawa tuko nmaa erupfu g'igube le nsuda ono. Inya-kamelu phe buru aguta aguta; mbu byerupho g'eja, no l'aguga eze-enyimu.
- ¹³Gidiyonu jerwua; bya ahuma ge nwoke lanu ezeru onya iya nrwọ, o rworu asuje iya: “Mu rworu nrwọ g'ishi buredi, du mgburugburu, e meru le balu ewe kperekpere ewebata l'eka ndu Midiyanu nmaru anmanma ogu. Ishi buredi balu ono weru bya asua l'ulo-ekwa; suta iya tua; o daa gwoo; kpoo mkpomishaku.”
- ¹⁴Oo ya bu; onya iya ono su iya: “Iphe-a ta adukwa iphe ozo, o bu; abudu ogu-echi Gidiyonu nwa Jiowashi, bu onye Izurelu; kele Chileke woakwaru ndu Midiyanu waa ndu ojogu phe l'ophu ye iya l'eka.”
- ¹⁵Tobudu iya bu; Gidiyonu numa nrwọ ono, e zeru ono; waa iphe, o bu; o bya abaaru Chileke eja. O buru iya ala azu l'odu-ogu ndu Izurelu; je asu phe: “Unu wu-lihu-o! Chipfu woakwaru ndu ojogu Midiyanu ye unu l'eka.”
- ¹⁶O bya eworu umadzu ukporo iri l'ise ono kee uzi eto; bya eworu opu-ogu nuchaa phe; wakwapho ite nshii, duchaa iphoru, owá nochaa l'ime.
- ¹⁷O su phe: “Unu lee mu enya! Unu meje ge mu meru. Teke mu rwuerupho l'onu eka ono, ephe doru ono; unu tsokwaru mu mejekpoephe ge mu meru.
- ¹⁸Teke mu le ndu ophu mu l'ephe swi gburu opu-ogu; g'unubedua nodukwapho l'eka unu no gbaa odu phe ono mgburugburu gbua nkunu; chia mkpu su: ‘A kwa ogu-echi ke Chipfu waa Gidiyonu-o!’ “
- ¹⁹Tobudu iya bu; Gidiyonu yele umadzu ukporo ise ono, ephe l'iya tuko swiru ono jerwua l'onu eka ono, ndu Midiyanu ono doru ono le teke a watararu eche nche k'echi abalu. O buerupho teke ono be ndu ophu no le nche lufuru; ndu ozo bahuwaa le nche. Gidiyonu phe woru opu-ogu phe ono gbua; bya eworu ite nshii ono, ephe gudechaa l'eka pho tukposhia.
- ²⁰G'ephe hakota uzi eto ono woru opu-ogu nkephe gbua; bya atukposhichaa ite ono. Ephe pagbaaru owá pho l'ekicha; gudegbaa opu-ogu, ephe e-gbu l'ekutara; bya echishia su: “A kwa ogu-echi ke Chipfu waa Gidiyonu-o!”
- ²¹Onyenonu pfugbaaru l'ekiya nkiya; ephe gbaphee eka ndu Midiyanu doru ono mgburugburu. Ndu Midiyanu ono l'ophu ye okpa l'oso; echi mkpu agba agbala.

²²Oo ya bu; ephe gbuēpho opu-ogu ukporo iri l'ise ono; Chipfu mee onyemonye, no l'odu ndu Midiyanu ono wata egbu nwibe iya ogu-echi. Ndu ojogu ono gbaru lashia mkpukpu Betu-Shita; l'uzo mkpukpu Zerera; mbu gbaa gbarwua oke mkpukpu Abelu-Mehola, no-kube mkpukpu Tabatu.

²³Ndu Izurelu, shi l'okpa-ipfu Nafutali; me ipfu Asha; waa ipfu Manase be e kukotaru; ephe chipyabe ndu Midiyanu.

²⁴Gidiyonu ye ndu-ozu; ephe je ezidzuru iphe, bu ndu bukota l'alj ubvu ubvu ndu Ifuremu g'ephe wufuta je agbabua ndu Midiyanu iphu l'enyimu Jiordanu; je akpakpo le mkpukpu Betu-Bara. Tobudu iya bu: e kukoo ndu Ifuremu l'ophu; ephe wufuta je anochia enyimu Jiordanu; je akpaa le Betu-Bara.

²⁵Oo ya bu; ephe gude ndu-ishi ndu Midiyanu umadzu ebo. Epha ndu-ishi labo ono bu Orebu waa Zeyebu. Orebu b'ephe gburu le mkpuma Orebu; gbua Zeyebu l'eka aakuje mee le mkpuma Zeyebu. Ephe nodu achikpoepho ndu Midiyanu ono; bya apata ishi Orebu waa Zeyebu palataru Gidiyonu l'eka o no l'azu enyimu Jiordanu.

Ikpe 8

Gidiyonu alwu ndu Midiyanu ophu phoduru nu

¹Tobudu iya bu; ndu Ifuremu su Gidiyonu: “? Denu g'o gude i mee ya anyi egube-a? Mbu; ? denukpoo g'o gude ophu i ti kuduru anyi teke i jeru etso ndu Midiyanu ogo?” Ephe gbachae ya pho opfu agbagba ehuka ehuka.

²Gidiyonu su phe: “? Denu iphe, mu gbē mee, ka ophu unu meru shii? ? O du g'akpa mkpakwa akpuru vayinu ke ndu Ifuremu ta akadū ree; eme l'akpuru vayinu ke Abiyeza l'ophu?”

³Chileke be woru Orebu waa Zeyebu, bu ndu-ishi ndu Midiyanu ye unu l'eka. ? Denu iphe, mu gbē mekpō, ka ophu unu meru shii?” O pfuchaepho iphe ono; obu jizeta phe.

⁴Gidiyonu yee umadzu ukporo iri l'ise pho bya erwua enyimu Jiordanu; bya aghabua ya aghabu. Teke ono be ike bvushichakpowaru phe ree; ole ephe achiepho ndu ohogu phe ono kpabe kpabe.

⁵Ephe rwua mkpukpu Sukotu; o su ndu mkpukpu ono: “Jiko unu nunu ndu ojogu mu nri le mbà atukwa phe atutu. O kwa Zeba waa Zalumuna, bu ndu eze ndu Midiyanu be anyi achī oso.”

⁶No iya; ndu-ishi Sukotu ono su iya: “? Unu gudeakwanaru Zeba yee Zalumuna obu meru g'o gude anyi je anu ndu ojogu ngu nri?”

⁷Tobudu iya bu: Gidiyonu su phe: “O dua ree; teke Chipfu woerupho Zeba yee Zalumuna ye mu l'eka be bu ogara-mbo, shi l'echiegu; waa obyambvu be mu e-gude lakashia anu unu alakashi.”

⁸O bya agbe l'eka ono jeshia mkpukpu Peniyelu; bya eje arwokwa phe pho nno; ephe pfukwapho ge ndu Sukotu pfuru pho.

- ⁹Oo ya bu; o su ndu Peniyelu: “Mu -lwu-kpee l’ogu ono lwajeepho alwalwa; be mu e-tsukposhi ulo-eli unu-a.”
- ¹⁰Zeba waa Zalumuna be no le mkpukpu Kako ephe le ndu ojogu phe, du ukporo unu nemadzu l’unu iri l’esaa l’ukporo nemadzu iri, bukota ndu ojogu, e gbuphodoru le ndu ojogu, shi l’uzo enyanwu-awawa. Ndu ojogu ono be e gbuwaru ukporo unu nemadzu ugbo iri l’ise, bukota ndu pagbaa ogu-echi.
- ¹¹Gidiyonu bya eje eshia uzo ndu ije eshije; l’uzo enyanwu-awawa mkpukpu Noba waa mkpukpu Jiogbeha; je etsoo ndu ojogu ono ogu le teke ephe tuzohuru ehu.
- ¹²Eze ndu Midiyanu ono ephenebo, bu iya bu Zeba yee Zalumuna ye okpa l’oso; a chia phe je egude; bya edukaa ndu ojogu phe.
- ¹³Gidiyonu, bu nwa Jiowashi lwajeepho ogu ono o shia uzo ubvu Heresu.
- ¹⁴Oo ya bu; o gude nwokoro lanu, shi le mkpukpu Sukotu bya ajiahaa ya aji. Nwokoro ono deshiaru iya epha ndu-ishi waa ndu bu ogerenya mkpukpu Sukotu; deta umadzu ukporo eto l’iri l’esaa.
- ¹⁵Tobudu iya bu; Gidiyonu bya ejepfu ndu mkpukpu Sukotu ono je asu phe: “Wakwa Zeba yee Zalumuna ba; mbu ndu ono, unu shi epfuru mu kwaphukwaphu su: “? Mu gudeakwanaru Zeba waa Zalumuna; meru g’o gude unu je anu ndu ojogu mu, ike bvushiru nri g’ephe ria-a?” “
- ¹⁶No iya; o bya akpukoo ndu bu ogerenya mkpukpu Sukotu; gude ogara-mbo, shi l’echiegu; waa obyambvu gude nua phe aphu.
- ¹⁷O bya etsukposhia ulo-eli ndu mkpukpu Peniyelu; bya egbushikwaapho ndu mkpukpu ono.
- ¹⁸Tobudu iya bu; Gidiyonu bya ajia Zeba waa Zalumuna su phe: “? Bu egube ndu gunu be unu gbushiru l’ubvu Tabo?” Ephe su iya: “? O kwa unwoke, dukotaepho g’unubedua; mbu l’onye ophu nonu duchaepho ge nwa onye eze.”
- ¹⁹Gidiyonu su phe: “Ndu ono be bukotakwa unwune mu; mbu l’ephe bukota unwoke, ne mu nwushiru. Eshinu Chipfu no ndzu g’o no iya-a; be mu tege egbukwa unu ome unu doberu phe ndzu.”
- ²⁰Oo ya bu; o su okpara iya, bu Jieta g’o gbushia phe. Ophu o dudu ike milia ogu-echi iya gbua; kele o bunukaru nwatanshii; ndzu nodu agu iya.
- ²¹Tobudu iya bu; Zeba waa Zalumuna su iya: “Gbalihu; bya egbua anyi l’onwongu. Oo ge nwoke ha bu g’ike iya ahaje.” Oo ya bu; Gidiyonu zilihu; woru phe gbushia; bya anyafuchaa inya-kamelu phe iphe, e gude mee phe ona, bu iphe, e shi nyabechaa phe l’olu.
- ²²E mechaa; ndu Izurelu su Gidiyonu: “Buru Onye-ishi anyi; gu le nwa ngu; me nwanwa ngu; eshinu o bu ngu dzotaru anyi l’eka ndu Midiyanu.”

²³Gidiyọnu sụ phẹ: “Mu taa bukwaru onye-ishi unu; ọphu nwa mu abukwaru onye-ishi unu. Ọ kwa Chipfu a-buru Onye-ishi unu.”

²⁴Ọ sụ phẹ: “Iphe lanu, mu arwo unu bu g'onyenonu nuchaa mu iphe-nchi, yi l'iphe, o kwataru l'okwata.” Ndu Midiyanu eyeje iphe-nchi; noo kele ephe bu ndu ke Ishimelu.

²⁵Ephe yee onu su: “Anyi e-gudekpoo ehu-utso nu ngu iya.” Ephe bya eworu ekwa phushi l'ali; onyenonu wotachaa iphe-nchi, yi l'iphe, o kwataru l'okwata chie l'ekwa ono.

²⁶Iphe-nchi mkpola-ododo ono, o suru g'ephe nu iya ono be erwa iya ha g'unu ekpa mkpola-ododo eno l'ukporo ekpa mkpola-ododo ise; a -gufukwa iphe, e gude eme ome mma; me iyagba-olu; me uwe uswe, ndu eze ndu Midiyanu eyeje; waa gwogirigwo, ndu eze ono nyabechaaruru inya-kamelu phe l'olu.

²⁷Gidiyọnu gude iphe-nchi mkpola-ododo ono kputa uwe-ukuvu; dobe iya onu le mkpukpu iya ono, bu Ofura. Ndu Izurelu bya agwaahaa ya; gude pharwushiahaa onwophe. O bya aburu onya; nmata Gidiyọnu yee ndibe iya.

²⁸Oo ya bu; ndu Izurelu bya akapyabe ndu Midiyanu; ọphu ndu Midiyanu egbelibaeduru ishi ozobaa. Le teke Gidiyọnu no ndzu be ali ono bukotaru le nchi-odoo ukporo apha labo.

Anwuhu Gidiyọnu

²⁹Jieru-Balu, nwa Jiowashi bya alaa ibe iya je eburu.

³⁰Ọ nwutaru unwoke ukporo eto l'iri; kele o luru unwanyi igwerigwe.

³¹O nwekwarupho nwanyi, o to ludu okpobe alulu, bu le mkpukpu Shekemu. Yebedua nwutaru iya nwa nwoke lanu. Iphe, o guru nwata ono bu Abimeleku.

³²Gidiyọnu, nwa Jiowashi nwuhu teke o kahwaru okpobe akahu. E lia ya l'ilu nna iya, bu Jiowashi le Ofura, bu iya bu mkpukpu ndu Abiyeza.

³³Anwuhu, Gidiyọnu anwuhu; ndu Izurelu dakobe wata apharwushi onwophe; mbu wata abaru Balu, nogbaa l'ali ono eja. Ephe woru Belu-Beritu dobe; o buru agwa phe.

³⁴Ọphu ephe anyataeduru Chipfu, bu Chileke phe ono, bu iya dzotakotaru phe l'eka ndu ohogu phe mgburugburu egede ono.

³⁵Ọphu ephe emejeduru ndibe Jieru-Balu, bu iya bu Gidiyọnu ree le ke ree ono, o mekotaru ephebe ndu Izurelu ono.

Ikpe 9

Ejo-idzu, Abimeleku chiru

¹Tobudu iya bu; Abimeleku nwa Jieru-Balu gbeshi bya ejeshia le mkpukpu Shekemu l'ibe nwune ne iya phe; jekota l'iphe, bu ipfu ke ndu ne iya je asu phe:

²“Unu jikotakpoo iphe, bu ndu Shekemu su phe: ‘? Bu ole karu unu ree? ? Bu g'unwu Jieru-Balu umadzu ukporo eto l'iri ono buru onye-ishi unu; too ? g'onye lanu buru

onye-ishi unu?’ Ozo bu g'unu nyatakwapfo le mu bu okpu, shi unu l'ehu waa mee unu.”

³Ndu ne iya ono je eworu iphe ono pfukotaru iphe, bu unwoke ndu Shekemu; o buru iphe, okpoma phe nataru bu g'ephe tsoru Abimeleku; kele ephe pfuru su: “Oo nwune anyi be obu.”

⁴Ephe bya anu iya ukporo mkpola-ochaa eto le mkpola-ochaa iri, shikota l'ulo agwa phe ono, bu Belu-Beritu. Abimeleku bya egude mkpola-ochaa ono bukoo ndu ogalemkpa waa ndu eme gaphu-gaphu-gaphu; ephe wuru tsoahaa ya.

⁵O bya ejeshia l'ibe nna iya le mkpukpu Ofura; je egbushikota unwunna iya ono, bu iya bu unwu Jieru-Balu ono, du umadzu ukporo eto l'iri ono l'eli mkpuma lanu. Oo ephe Jiótamu, bu iya kachakpo aburu nwata l'unwu Jieru-Balu ono be bu onye phoduru nu; kele o jeru edomia onwiya.

⁶No iya; ndu Shekemu mekpoo ndu mkpukpu Betu-milo je atuko dzukobe l'upfu achi, no le mgboru itso, du nsò, bvuru le Shekemu; woru eze mee Abimeleku.

⁷G'e pferupho Jiótamu iphe ono, ephe meru ono; o je enyihu mkpakponu ubvu Gerizimu; raaru phe iya arara su: “Unube ndu Shekemu; unu ngabekpodaru mu pho nchi-o; k'ophu Chileke a-ngabekwarupho unu nchi!”

⁸Su-a; o nweru teke oshi gbeshikotaru jeshia ahota oshi, a-buru eze phe. Ephe pfiaru oshi olivu g'o buru eze phe.

⁹Oshi olivu su phe: “? Mu a-paru manu mu haa, bu iphe, eegudeje akwabe Chileke me nemadzu ubvu bya eletaha oshi l'ophu enya?”

¹⁰Ephe bya epfukwaarupho oshi figu g'o buru eze phe.

¹¹Oshi figu su phe: “? Mu a-paru eguru akpuru ono, mu amije ono, atsoje ntumatu ono haa bya eletaaha oshi l'ophu enya?”

¹²Tobudu iya bu; ephebe oshi ono bya asu vayinu g'o buru eze phe.

¹³Vayinu su phe: “? Bu ge mu paru mee mu, emeje g'obu tso Chileke waa nemadzu utso ono haa bya eletaaha oshi l'ophu enya?”

¹⁴E mechaa; oshi ono g'ephe ha su ge ogara-mbo bya aburu eze phe.

¹⁵Ogara-mbo su phe: “Teke o du unu ge mu buru eze unu; unu wubata nu le mkpula mu bya eze ndzu; o -dudu; g'oku shikwa le mube ogara-mbo bya ekepyashikota iphe, bu oshi sida, nokota l'ubvu Lebanonu!” “

¹⁶Noo ya; Jiótamu su phe: “O -buru l'oo iphe, gbaru unu be unu meru ono; mbu o -buru l'oo ree be unu meru ono; woru Abimeleku mee eze; mbu-a; o -bukpooru l'oo iphe, duta aduta be unu meru Jieru-Balu yee ndibe iya ono; mbu o -bukpooru l'oo egube, o gbaru g'unu mee ya ya be unu meru iya ya ono;

¹⁷mbu nna mu ono, lwuru unu ogo; tua ishi ndzu iya; dzota unu l'eka ndu Midiyanu ono;

18 Ọ ọ gbẹchia rwua ntanụ ọwa; unu gbẹ tsopyabẹ ndu unuphu ibe nna mu ono; woru unwu iya ukporo umadzu ẹto l'iri gbushia l'eli mkpuma lanu. Unu bya eworu Abimeleku, bu nwatibe ohu, nna mu gbataru agbata mee eze ndu Shekemu; kele ọ bu nwune unu.

19 Ọ -buru l'oo iphe, gbaru unu be unu meru ono; mbu ọ -buru l'oo ree be unu meru Jieru-Balu yee ndibe iya le ntanu-a; ge Abimeleku bukwaru unu ehu-utso; unubedua abukwarupho yebedua!

20 Teke ọ to dudu; g'oku shikwa l'ehu Abimeleku bya ekepyashia unube ndu Shekemu waa ndu Betu-milo; g'oku shikwapho l'ehu unube ndu Shekemu; waa ndu Betu-milo bya ekepyashia Abimeleku!"

21 Noo ya; Jiótamu pfuchaa nno; bya agbalaa lasha mkpukpu Biye je ebuwaruro l'eka ono; kele ootsu nwanna iya ono, bu Abimeleku ebvu.

22 Abimeleku buru onye-ishi ndu Izurelu noo apha ẹto;

23 Chileke zia ejo maa; o je anodu l'echilabo Abimeleku yele ndu Shekemu; ephe meahaaru Abimeleku gheleghelehele.

24 Ọ buru Chileke meru ge ndu Shekemu meje nno; g'ee-shi g'a pfua Abimeleku ugwo ejo-iphe ono, o meru unwunna iya ono; mbu g'a gwata iya ugwo ochi unwu Jieru-Balu, du umadzu ukporo ẹto l'iri; mbu unwunna iya ono, o gbushiru ono. Aagwatakwapho ndu Shekemu, bu ndu yetaru Abimeleku njo eka g'o gbushia unwunna iya ono ugwo ochi phe.

25 Tobudu iya bu; ndu Shekemu bya eye ndu jeru akwakaaru iya l'eli ubvu, nogbaa l'eka ono g'ephe mekata iya. O nodu abujeru onye ghatakporu l'uzo ibe iya ono; ephe anaa ya nfu. E je agbaaru Abimeleku ama.

26 Noo ya; Galu, bu nwa Ebedu gbeshi duta unwunna iya; ephe wuru jeshia Shekemu. O jerwua; ndu Shekemu woru onwophe ye iya l'eka okpobe eyeye.

27 Ephe bya awufu jeshia l'egu je awokoo akpuru vayinu l'opfu-vayinu phe. Ephe wokobechaa ya; bya azoshia mee l'akpuru vayinu ono wata abo obo-iphe l'ulo agwa phe. Ephe nodu eri; bya angu; teme ephe nodu epfubyishikwapho Abimeleku.

28 Tobudu iya bu; Galu nwa Ebedu su: “? Bu onye be Abimeleku bunu-a? ? Bukpoo gunu aa-kpata g'anyi be ndu Shekemu nodu iya l'eka? ? O kwa l'oo nwatibe Jieru-Balu be ọ bu? Mbu ? to budu Zebulu be etsota iya nu l'aburu ishi? Unu jechiaru ndu Hamo, bu iya bu nna ndu Shekemu ozi! ? Bu gunu aa-kpata g'anyi bya ejeahaaru Abimeleku ozi?”

29 Ọ du g'a sukwanu le ndu-a be no mu l'eka! Mu gege emegheana ke Abimeleku. Mu gege asu Abimeleku g'okwakobe ndu ojogu iya gude lufuta!”

30 No iya; Zebulu, bu onye-ishi mkpukpu ono numaepho iphe ono, Galu nwa Ebedu pfuru ono; ọ voru oku wua ehu.

- 31 O bya ezia ndu-ozu iya lẹ mpya; ephe je ezia Abimeleku ozi su iya: “Lenu; Galu nwa Ebedu be yele ndu unuphu ibe phe byaakwaru Shekemu. Ephe tukoakwa iphe, bu ndu mkpukpu-a kpalia g'ephe tso ngu opfu.
- 32 Oo ya bu; iphe, ii-me nta-a bu g'i gbeshi l'enyashi; waa ndu ophu gu l'ephe no; je akwakachaa l'ime egbudu.
- 33 O -beepho l'utsu; mbu me enyanwu -waepho; unu gbeshi je etsoo mkpukpu ono ogu. Galu yee ndu ono -byatashia g'ephe tso ngu ogu; mee phe g'eka ha ngu.”
- 34 Oo ya bu; o be l'enyashi; Abimeleku yele ndu ojogu iya l'ophu kee onwophe uzi eno; je akwakachaa l'aguga mkpukpu Shekemu.
- 35 No iya; Galu nwa Ebedu gbeshi je apfuru l'onu eka eeshije abahu le mkpukpu ono. Abimeleku yele ndu ojogu iya shichaa l'eka ono, ephe domishiru onwophe ono wufuta.
- 36 Galu humae phe pho; o rashiaru Zebulu su: “Lenu-o! Ndu nemadzu shikwa l'eli ubvu awu abya!” Zebulu su iya: “Oo onyonyo ubvu ono be i humaru; o gbẹ duchaa ngu nu g'o bu nemadzu.”
- 37 Galu bya epfukwaa ya pho ozo su: “Ophu lekpodapho; ndu nemadzu shikwa l'echilabo mkpukpu eje abya; teme o dukwarupho ndu ophu shi l'uzo upfu achị ndu jibya eje abya.”
- 38 Zebulu su iya: “? Denuhununu onu ono, i shi apashi-a; mbu onu, i gude su: ‘? Bu onye be Abimeleku bu ke g'anyi bya ejeahaaru iya ozi-a?’ ? Tobunaa ndu-a be i shi epfutoshi-a? Jenu je adatso phe ogu!”
- 39 No iya; Galu bya eduta ndu Shekemu; ephe je etsoo Abimeleku ogu.
- 40 Abimeleku chia phe oso; ephe ye okpa l'oso. Igwerigwe ndu ojogu ke Galu dachaa iko; mekachaa iphe-ehuka. Ephe daepho popoo jasụ l'onu eka eeshije abahu le mkpukpu ono.
- 41 E mechaa; Abimeleku lashia mkpukpu Aruma je anodu. O buru Zebulu be chifuru Galu yele unwunna iya ono le Shekemu.
- 42 Tobudu iya bu; o bya ebekwa le nchitabohu iya; ndu Shekemu bya ejeshikwaa l'egu; e je epfuaru iya Abimeleku.
- 43 Oo ya bu; o chita ndu ojogu iya; woru phe kee uzi eto; ephe je akwakachaa l'egbudu l'egbudu. O leepho enya; huma ge ndu Shekemu shi le mkpukpu ono awu abya; o gbeshi datso phe ogu; woru phe gbushia.
- 44 Tobudu iya bu; Abimeleku waa ndu ophu yee ya swi bya awufu-kebe jeshia l'ibiya k'onu eka eeshije abahu le mkpukpu ono. Uzi labo k'ophuu wufu je adatso ndu Shekemu ndu ophu no l'egu pho ogu; woru phe gbushia.
- 45 Le mboku ono l'ophu be Abimeleku lwukotaru ogu le mkpukpu ono. O lwuta iya; gbushia ndu bu iya nu; mebyishikota mkpukpu ono; bya eworu unu ghakota iya.

⁴⁶Ndu bu l'ulo-eli ono, no le Shekemu ono numapho iphe ono; ephe wubakota l'ime eka a kpushiru ike l'eze ulo agwa, bu Elu-Beritu.

⁴⁷No iya; ama bya agbaaru Abimeleku le ndu bu l'ulo-eli Shekemu be kukobekwaru l'eka lanu.

⁴⁸Oo ya bu; Abimeleku waa ndu ophu yee ya swi bya ejeshia ubvu Zalumu. Ephe rwua l'eka ono; Abimeleku bya egude ogbunku gbukwoshia nku; chita tua l'ukuvu. O bya asu ndu ono, yee ya swi ono: "Ngwa! Iphe, unu humaru, mu meru; unu mee egube ono!"

⁴⁹Noo ya; onyenonu bya ebukoo nku; vuta tsoru Abimeleku. Ephe je eworu iya doo l'ime eka ono, a kpushiru ike ono; mbu l'eli ndu no l'ime iya ono; woru oku tua ya. Oku tsua ulo-eli ono; kegbushikota ndu no iya nu, rwuru unu umadzu labo l'ukporo umadzu iri; unwoke me unwanyi. Ephe nwushihukota.

Anwuhu Abimeleku

⁵⁰E mechaa Abimeleku bya ejeshia mkpukpu Tebezu; je ekephee mkpukpu ono; lwuta iya.

⁵¹Ole o nwekwanuru ulo-eli, a kpushiru ike no le mkpukpu ono. O buru l'eka ono be unwoke me unwanyi; mbu ndu bukota le mkpukpu ono gbaru la je anodu. Ephe guchishikota onwophe l'ime iya; bya awuru lashia l'ime mkpotsu ulo-eli ono.

⁵²Abimeleku bya ejeshia l'ulo-eli ono g'o tsoo ndu no ya nu ogu. O rwutashia onu-abata ulo-eli ono ntse g'o tufu iya oku;

⁵³nwanyi lanu l'ime ndu ono, no l'ulo-eli ono pataepho nggu-mkpuma uswe woru tua Abimeleku l'ishi; woru iya okpu ishi tupyashia atupyashi.

⁵⁴O bya ekukebe nwokorobya, achijeru iya ngwogu iya su iya: "Mita-kebe ogu-echi ngu gbugbua mu; k'opu ephe taa anodudu epfu su: 'O kwa nwanyi be gburu iya nu.' " Oo ya bu; onye-ozu iya ono wota ogu-echi su ya; o nwuhu.

⁵⁵Ndu Izurelu humaepho le Abimeleku be nwuhwaru nu; onyenonu tugbuchaa lashia unuphu.

⁵⁶O buru egube ono be Chileke shiru gwata Abimeleku ugwo ejo-iphe ono, o meru nna iya ono; mbu k'unwunna iya, du ukporo eto l'iri, o gbushiru ono.

⁵⁷Chileke be mekwarupho g'ejo-iphe, ndu Shekemu meru ono tukoru phe l'ishi. Onu ono, Jiotamu nwa Jieru-Balu turu be mechaa nwua l'ehu phe.

Ikpe 10

Tola; onye-ikpe ndu Izurelu

¹No iya; ge Abimeleku buchaaru onye-ikpe ndu Izurelu; be onye ozo shi l'okpa-ipfu Isaka byaru afuta g'o dzota ndu Izurelu. Epha nwoke ono bu Tola; nwa Puwa; mbu nwanwa Dodo. Eka o bu bu le mkpukpu Shamiru, no l'ali ubvu ubvu ndu Ifuremu.

²Q buru onye-ikpe ndu Ízurelu ukporo apha l'apha eto; bya anwuhu; e lia ya le mkpukpu Shamiru.

Jiayi; onye-ikpe ndu Ízurelu

³Jiayi, bu onye Giladu bya etsota iya; bya ekpeeru ndu Ízurelu ikpe ukporo apha l'apha labo.

⁴Q nwuta unwoke ukporo l'iri. Unwu iya ono nodu agbakota nkafu-igara l'ehu l'ehu. Onye ophu nonu; nwechaaru mkpukpu nkiya l'alí Giladu. Mkpukpu ono g'o hakota be aza Havotu-Jiayi byasu le ntanu.

⁵E mecha; Jiayi nwuhu; e lia ya le mkpukpu Kamonu.

Jiefuta; onye-ikpe ndu Ízurelu

⁶Ndu Ízurelu bya emee ejo-ememe l'enya Chipfu ozobaa; mbu baaharu agwa Balu eja; me Ashitoretu; me agwa ndu Aramu; me agwa ndu Sayidonu; me agwa ndu Mowabu; me agwa ndu Amonu; waa agwa ndu Filisitayinu. Epe paru Chipfu haa; ophu epe ta abajeeduru iya eja.

⁷Oke ehu-eghu Chipfu dafuta nu ndu Ízurelu. Chipfu nwuru phe ye ndu Filisitayinu waa ndu Amonu l'eka.

⁸Epe mekpaa phe ehu; gwee phe arakabya l'apha ono. Apha iri l'esato be epe mekpakotaru ndu Ízurelu, bukota l'uzo enyanwu-awawa enyimu Jiodanu ehu; mbu l'alí Giladu, no l'alí ndu Amoru.

⁹Ndu Amonu bya adafu azu enyimu Jiodanu azu iya ophuu g'ephe je adatso ndu Jiuda; me ndu Benjaminu; waa unwu Ifuremu ogo. Oo ya bu; ndu Ízurelu nodunu l'oke iphe-ehuka.

¹⁰Tobudu iya bu; ndu Ízurelu bya araku Chipfu; su iya: "Anyi mesweakwaru ngu; kele anyi paru gube Chileke anyi haa; je abapheahaaru agwa, bu Balu eja."

¹¹No iya; Chipfu su phe: "? To bunu mu-a be dzotaru unu l'eka ndu Ijiputu; me ndu Amoru; me ndu Amonu; mekpoo ndu Filisitayinu?"

¹²Mekpoo teke ndu Sayidonu; me ndu Amaleku; waa ndu Mawonu shi akpaya unu ishi ono be unu rakuru mu ge mu gbaaru unu mkpu; mu dzota unu l'eka phe.

¹³Unu gbeparu mu haa je abapheahaaru agwa eja. Eshinu o du nno be mu ta abyakwa adzotabaa unu ozo.

¹⁴Unu tugbua jenu araku agwa, bu ophu unu hataru g'ephe bya adzota unu teke unu no l'iphe-ehuka!"

¹⁵Tobudu iya bu; ndu Ízurelu su Chipfu: "Anyi meakwaru iphe-eji. Mee anyi iphe, dukpoe ngu pho ree. Ole-a; jiko dzonaa anyi ntanu-a."

¹⁶Tobudu iya bu; epe wofukota agwa ndu ohozo ono, epe dobechaaru ono; bya abaaharu Chipfu eja. Aphu, ndu Ízurelu no ono rwutabe iya l'ehu k'ophu o to duedu ike taa nshi.

¹⁷No iya; a bya ekukoo ndu Amonu k'ogu; ephe je anmaa anmanma ogu l'alì Giladu. Ndu Ízurelu bya edzukobekwapho; je anmaa anmanma ogu le mkpukpu Mizupa.

¹⁸No iya; ndu-ishi Giladu su nwibe phe: "Onye vukporu uzo je etsoo ndu Amonu ogu be bu onye ono a-buru onye-ishi ndu Giladu l'ophu."

Ikpe 11

¹Jiefuta, bu onye Giladu be bu onye ojogu ike du; ole o bu nwatibe nwanyi ukpara. Nna Jiefuta be bu Giladu.

²Unyomu Giladu be nwushiru iya unwu. O be teke unwegirima unyomu iya ono byaru evushichaa; ephe chifu Jiefuta su iya: "I tii ketakwa oke l'unuphu ibe anyi; kele o nwananyi ozo be nwuru ngu nu."

³Tobudu iya bu; Jiefuta gbafuru unwune iya ono gbaru lashia ali Tobu je eburu. O buru l'eka ono; ndu ogalemkpa wu-pfuta iya bya etsoahaa ya.

⁴A nonyaa; ndu Amonu bya etsoo ndu Ízurelu ogu.

⁵O buru teke ono, ndu Amonu tsoaharu ndu Ízurelu ogu ono be ndu bu ogerenya ndu Giladu tugburu je ekua Jiefuta l'alì Tobu;

⁶su iya: "Bya bya aburu onye-ishi anyi; k'ophu anyi a-du ike datsoo ndu Amonu ogu."

⁷Jiefuta su phe: "? Unu ta akponuru mu-a ashi; chifu mu l'unuphu ibe nna mu? ? Bu gunu kparu iphe, o bu nta-a, unu no l'iphe-ehuka-a be unu choaharu mu bya?"

⁸Ndu bu ogerenya Giladu su: "Oo ya meru g'o gude anyi byapfutashia ngu-a; k'ophu ii-tsoru anyi je etsoo ndu Amonu ogu; l'i buru onye-ishi ndu bukota l'alì Giladu."

⁹Oo ya bu; Jiefuta su phe: "Unu -duta mu lashia azu ge mu je etsoo ndu Amonu ogu; ? mu a-buru-a onye-ishi unu k'eviya me Chipfu mee mu lwu-kpee phe?"

¹⁰Ndu bu ogerenya Giladu ono su iya: "O buepho Chipfu be bu onye-ekebe anyi le ngu. Anyi ee-mejeepho iphe, i pfuru."

¹¹Tobudu iya bu; Jiefuta bya etsoru ndu bu ogerenya ndu Giladu ono. Ndu ono mee ya onye-ishi waa onye-ishi ojogu phe. Jiefuta nodu le Mizupa pfushikota iphe ono, o pfuhawaru ono l'iphu Chipfu.

¹²No iya; Jiefuta bya ezia ndu-ozì g'ephe je ajia eze ndu Amonu su iya: "? Bu gunu be anyi meru ngu, meru g'o gude i byatashia anyi etso ogu l'alì anyi?"

¹³Eze ndu Amonu bya ezia ndu ono, Jiefuta ziru ozi ono; su phe: "Iphe, kparu iya nu bu le teke ndu Ízurelu shi l'alì Ijiputu wufuta be ephe natakotaru mu ali mu shita l'enyimu Anonu jeye l'enyimu Jiaboku; mbu jasu l'enyimu Jiodanu. Unu nu-phuchaa mu ali obu azu nta-a le nchi-odoo."

¹⁴Jiefuta bya ezikwaa ndu-ozì iya ozo g'ephe je eziphu eze ndu Amonu ono azu;

- 15sụ iya: “Waa iphe, Jiẹfuta pfuru baa: Ndu Ízurelu ta natakwaru alì ndu Mówabu; ophu ephe anatađuru ndu Amonu alì phe.
- 16Teke ndu Ízurelu shi l'alì Ijiputu lufuta be ephe shiru uto echiegu lufu le Eze-nyimu Uswe-uswe; gbẹ l'eka ono bahu le mkpukpu Kadeshi;
- 17O buru le Kadeshi ono be ndu Ízurelu no zia ndu-ozì g'ephe je epfuaru eze ndu Edomu su: ‘Jiko g'anyi shijana-a alì ngu ghata.’ Ophu eze ndu Edomu ta angaduru phe nchi. Ephe byakwapho eje ezia eze ndu Mówabu egube ono; yebedua jikakwapho. Oo ya bu; ndu Ízurelu kwaa le Kadeshi.
- 18Tobudu iya bu; ephe wulihu kwaseru echiegu; tsoru alì ndu Edomu waa ke ndu Mówabu gbaa mgburugburu; bya alufuta l'uzo enyanwu-awawa alì ndu Mówabu ono. Ephe je adoru l'azu enyimu Anonu azu iya ophuu; ole ephe ta abahuduru l'alì ndu Mówabu; kele oo enyimu Anonu bu oke alì ndu Mówabu ono.
- 19Ndu Ízurelu byakwa ezia ndu-ozì g'ephe je ezia Sihonu, bu eze ndu Amoru, mbu onye bu le mkpukpu Heshibonu su iya: ‘G'anyi shijana-a alì ngu ghata lashia alì nkanyi.’
- 20“Ophu Sihonu ekwekwapho ge ndu Ízurelu ghata l'alì iya. O bya ekukobekota ndu nkiya l'ophu; ephe wufu je adoru le mkpukpu Jiahazu; ephe le ndu Ízurelu lwugbabe ugu.
- 21Tobudu iya bu; Chipfu, bu Chileke ke ndu Ízurelu woru Sihonu; me ndu nkiya l'ophu ye ndu Ízurelu l'eka. Ephe lwu-kpee phe. Ndu Ízurelu nakota alì ndu Amoru, bu ndu bu l'eka ono.
- 22Ephe lwutakota alì ndu Amoru; e shi le Anonu jasụ le Jiaboku; mekwapho; a -gbẹ l'echiegu jasụ l'enyimu Jiordanu.
- 23Oo ya bu; eshi ophu Chipfu, bu Chileke ke ndu Ízurelu chishichawaru ndu Amoru; bya eworu alì phe nu ndu nkiya, bu ndu Ízurelu; ? o gbaru g'a nu-phu ngu iya azu ozo to?
- 24? Tobudu iphe, agwa ngu, bu Kemoshi nuru ngu bu ophu ii-kwe eka? Nokwapho g'anyibedua e-nweru iphe, Chipfu, bu Chileke anyi nuru anyi g'anyi nweru bu ono.
- 25? I ka eze ndu Mówabu, bu Belaku nwa Zipo ree? ? O tsoru ndu Ízurelu opfu? To; ? ephe l'iya lwuru ugu?
- 26Ndu Ízurelu bukotaru le Heshibonu; me Arowa; me nwa mkpukpu, no-pheru phe mgburugburu; mekwapho le mkpukpu, nochaa l'aguga enyimu Anonu ukporo apha iri l'ise ophu. ? Bu gunu meru iphe, i ti natachadaru alì obu le teke ono?
- 27Mbedua te emeswekwaru ngu. Oo gubedua, byaru etsoaha mu ugu be gbẹ achọ mu opfu. Ole-a; ge Chipfu, bu onye-ikpe, bukafukwa opfu ono, duru ndu Ízurelu yee ndu Amonu le ntanu.”
- 28Ole eze ndu Amonu be ta ngakpodaru nu nchi l'ozì ono, Jiẹfuta ziru g'e zia ya ono.

Jiẹfuta alwụ ndu Amọnu

²⁹Tọbudu iya bụ; Unme Chipfu bya eji Jiẹfuta ẹhu. Ọ bya eshijaa alị Giladu; waa alị ndu Manáse; bya eshijaa mkpụkpu Mizupa, nọ l'alị Giladu. Ọ bụru lẹ mkpụkpu Mizupa ono bẹ ọ gbẹ jeshia etso ndu Amọnu ọgu.

³⁰Jiẹfuta bya ekwee Chipfu ukwe; sụ: “Ọ -bụru l'i woru Amọnu ye mu l'ẹka;

³¹bẹ iphe, vukpọ ụzo gbafuta l'ulo mu bya agba mu ndzuta mę mu -lwụ-kpee ndu Amọnu lwaje; bẹ a-buru kẹ Chipfu. Mu e-gudeele iya phọ gwee ngweja-akpọ-ọku.”

³²Tọbudu iya bụ; Jiẹfuta bya atugbua jeshia etso ndu Amọnu ọgu. Chipfu woru phẹ ye iya l'ẹka.

³³E -shi lẹ mkpụkpu Arowa jasụ l'uzo, eeshije abahụ lẹ mkpụkpu Minitu bẹ o mekọtaru mkpụkpu ụkporo umerekete; mbụ gbua phẹ pyaapyaas jasụ lẹ mkpụkpu Abẹlu-Keramimu. Tọbudu iya bụ; ndu Ízurelu bya akapyabẹ ndu Amọnu.

Jiẹfuta eworu nwatibe iya kẹ mgbọko anụ Chipfu

³⁴No iya; Jiẹfuta lwarutaepho unuphu ibe iya lẹ mkpụkpu Mizupa; a bya ele ẹnya; nwatibe iya kẹ mgbọko nọdu akụwa nkwa; ete ebvu; agba iya ndzuta. Nwamgbọko ibe iya ono bụ nwa lanụ, ọ nwutaru kpeekpu. Mbụ l'a -gụfu iya bẹ o to nweedu nwa nwoke; ọzo nwa nwanyị ọzo ọ nwutabaaru.

³⁵Jiẹfuta humae ya phọ; o woru uwe iya lajashia; bya arashia: “Oowa-e! Nwada mu-e! I mewaru aphụ tsoru mu; mbụ mu bya aburu onye gba ẹka nwa; kele ukwe-iphe, mu kweru Chipfu bẹ mu ta adukwa ike gę mu te emeru iya ya.”

³⁶Nwa iya nwanyị ono sụ iya: “Nnana mu! Iphe, i pfuru Chipfu bẹ i pfuwaru iya. Mee mu ẹgube ono, i kwetawaru ukwe iya; eshinu Chipfu mewaru g'i gwata ndu ọhogu ngu bụ ndu Amọnu ụgwọ iphe, ẹphe meru.”

³⁷Sụ iya: “Ole-a; iphe, ii-mekpọeru mu phọ kpoloko bụ g'i haaru mu ọnwa labọ gę mu lẹ ndu ọnyà mu swiru je l'úbvú; je araa ẹkwa; kele mu ta abyadu aluru ji.”

³⁸Tọbudu iya bụ; ọ sụ iya: “Jenu.” O dufu iya; o je l'úbvú je anọo ọnwa labọ yele unwumgboko, bụ ọnyà iya. Ẹphe raa ẹkwa kele ọ tọ byadu aluru ji.

³⁹Ọnwa labọ ono -bvụepho; ọ lapfushia nna iya. O woru iya mee ẹgube ono, o kweru ukwe iya ono; ọphu yee nwoke akwajeduru jasuru ọ nwuhu. Ọo ya bụ; ọ bya aburu omelali, dụ l'alị ndu Ízurelu;

⁴⁰k'ọphu bụ l'aphagapha bẹ akatikpo unwumgboko ndu Ízurelu awufuje je anọo ujiku eno gude nyata nwada Jiẹfuta ono; mbụ Jiẹfuta, onye Giladu ono.

Ikpe 12

Jiẹfuta yele ndu Ifuremu

¹Tọbudu iya bụ; ndu Ifuremu bya edzukọbe k'ogu; bya adafu azu ẹnymu Jiọdanu azu iya ọphuu jeshia lẹ mkpụkpu Zafonu je ajia Jiẹfuta; sụ iya: “? Bụ gunu meru iphe, i

jeru alwua ndu Amonu; ophu i kuduru anyi? Anyi ejeakwa atu ulo ngu oku g'o tsupyabe gubedua.”

²Jiefuta su phe: “? O kwa le mu le ndibe mu be yele ndu Amonu shi nodu l'ukukanyi; mu kua unu; ophu unu ekwedu bya adzoo mu l'eka phe.

³Mu humapho l'unu ta agbaduru mu mkpu; mu woru ishi ndzu mu tua; dafu azu enyimu Jiodanu je adatso ndu Amonu ogu. Chipfu meekwapho; mu lwu-kpee phe. ? Buhunu ole be unu gbę nta-a byatashia mu etso ogu?”

⁴Tobudu iya bu; Jiefuta bya ekukobe ndu Giladu; ephe je etsoo ndu Ifuremu ono ogu. Ndu Giladu lwu-kpee ndu Ifuremu; kele ndu Ifuremu suru phe: “Unube ndu Giladu; unu bu nlwamulwa, bya eburu l'echilabo ndu Ifuremu waa ndu Manase.”

⁵Ndu Giladu je akwachishichaa eka eerwuje erwurwu l'enyimu Jiodanu lufu le mkpukpu Ifuremu. O nodu abujeru teke onye Ifuremu, nahuru nu gbarwutaru l'eka ono; oosu phe: “Ge mu ghataeshikwa.” Ndu Giladu ono ajia ya su iya ? I bu onye Ifuremu? Teke onye obu suru: “Waawaa.”

⁶Ephe asu iya: “O du ree; pfeedukwa: ‘Shiboletu.’ “ O nodu abujeru; onye jeru iya ekuku; o -kuswee ya kua ya “Siboletu” ; ephe egude iya woru gbua l'eka ono, eerwuje enyimu Jiodanu erwurwu ono. Le teke ono be e gburu ndu Ifuremu, du ukporo unu nemadzu ise l'unu ise.

⁷Noo ya; Jiefuta ono, bu onye Giladu ono; buru onye-ikpe ndu Izurelu apha ishii. O nwuhu; e lia ya le mkpukpu lanu, no l'ali Giladu obu.

Ibuzanu; onye-ikpe ndu Izurelu

⁸Onye ozo, byaru aburu Onye-ishi, ndu Izurelu ge Jiefuta nwuhuchaa ono be bu Ibuzanu, onye mkpukpu Betulehemu.

⁹O nwutaru ukporo unwoke l'unwoke iri; waa ukporo unwanyi l'unwanyi iri. Unwumboko ibe iya ono be o keshichaa ji l'ipfu ozo. Unwu iya unwoke ono be o jekwarupho alutachaa unwumboko l'ipfu ozo. Ibuzanu buru ishi ndu Izurelu apha esaa;

¹⁰nwuhu; e lia ya le mkpukpu Betulehemu.

Elonu; onye-ikpe ndu Izurelu

¹¹Ibuzanu buchaa ishi; Elonu, bu onye Zebulun bya aburu ishi ndu Izurelu apha iri.

¹²Tobudu iya bu; Elonu, bu onye Zebulun bya anwuhu; e lia ya le mkpukpu Ajialonu l'ali ndu Zebulun.

Abudonu; onye-ikpe ndu Izurelu

¹³Noo ya; Elonu nwuhuchaa; Abudonu; nwa Hilelu onye shi le mkpukpu Piratonu bya aburu onye-ikpe ndu Izurelu.

¹⁴Ọ nwutaru ukporo unwoke labo; bya enweru unwu nwanwa, du ukporo unwoke l'unwoke iri. Ephe nweru ukporo nkapfu-igara eto le nkapfu-igara iri. Abudonu buru onye-ikpe ndu Izurelu apha esato.

¹⁵Abudonu; nwa Hilelu, bu onye Piratonu nwuhu; e lia ya le Piratonu, no l'ali ndu Ifuremu l'ali ubvu ubvu ndu Amaleku.

Ikpe 13

Anwunwu Samusinu

¹Ndu Izurelu bya emee iphe-eji l'enya Chipfu ozobaa. Oo ya bu; o nwuru phe ye; ephe noo ndu Filisitayinu l'eka ukporo apha labo.

²O nweru nwoke lanu, bu onye mkpukpu Zora, epha iya bu Manowa. O bu onye shi l'ipfu ke Danu. O luru nwanyi; ophu nyee ya ono ta atsudu ime; o nodu ophu o to nwutaduru nwa.

³Tobudu iya bu; ojozi-imigwe, ke Chipfu bya ehee nwanyi ono l'iphu; su iya: "Lenu; nta-a be i tii tsudu ime; ophu o dudu nwa, i nwutaru; ole ii-tsuta ime; nwua nwa nwoke.

⁴Nta-a bu g'i kwabeekwapho enya g'i ti ngu mee; ophu i ngukwa iphe, atsudu atsutsu; ophu i rikwa iphe, aaso nsu;

⁵Kele ii-tsuta ime nwua nwa nwoke. G'a ta kpukwa iya ishi; noo kele oo-buru onye duru Chileke iche e -shi l'epho. Oo-wata adzo ndu Izurelu l'eka ndu Filisitayinu."

⁶Tobudu iya bu; nwanyi ono tugbua je epfuaru ji iya su iya: "Onye ke Chileke byapfutakwaru mu. O dwepho akpabiri g'ojosi-imigwe ke Chileke. Ole mu ta jikwanuru iya eka o shi; ophu o kokwanuru mu epha iya.

⁷Ole o suru mu le mu a-tsuta ime; nwua nwa nwoke. Le nta-a be bukwa ge mu ba angushi mee; ophu mu angukwa iphe, atsudu atsutsu; ophu mu erikwa iphe, aaso nsu; kele nwata ono a-buru onye duru Chileke iche e -shi teke o no l'epho jeye mboku, oonwuhu."

⁸Tobudu iya bu; Manowa bya epfuru nu Chipfu su: "Nnajiuphu; jiko menaa g'onye ke Chileke ono, i ziru; o byapfuta anyi ono lwaphuta azu ozo bya egoshi anyi g'anyi e-shi hee nwata ono, aa-nwu onoya."

⁹Chileke numa iphe ono, Manowa pfuru ono. Ojozi-imigwe ke Chileke ono byapfuta nwanyi ono ozo le teke o no l'egu; ole Manowa, bu ji iya be yele iya ta atukoduru nodu l'eka ono.

¹⁰Nwanyi ono gbaepho egwegwa je epfuaru iya ji iya su: "Lenu-o! Nwoke ono, byapfutajeru mu mboku pho-a be ruwakwaru ozo!"

¹¹Manowa gbalihu tsoru nyee ya ono jeshia. O bya abyapfuta nwoke ono; o jia ya su: "? Bu ngu be pfujeru opfu nu nyee mu-a?" O su iya: "Oo mu."

¹²Oo ya bu; Manowa su iya: “Teke iphe ono, i pfuru ono vukotaerupho; ? denu egube anyi ee-gude hee nwata ono? Temе; ? bu gunu a-buru ozi iya?”

¹³Ojozi-imigwe ke Chipfu ono su iya: “Ge nyee ngu mekotaepho iphe, mu pfuru iya ono.

¹⁴G'o to rikwa iphe, shikpo l'akporu vayinu; ophu o ngukwa mee; ophu o ngukwa mee, atsu atsutsu; ophu o rikwa iphe, aaso nso. Iphemiphe ono, mu tushiru iya ekemu iya ono be oo-mekota.”

¹⁵Manowa su ojozi-imigwe ke Chipfu ono: “Jiko g'anyi sede nu ngu gi nodu g'anyi gude nwa mkpi meeru ngu nri.”

¹⁶Ojozi-imigwe ke Chipfu ono su: “Unu e-sedekpokwa mu; ole mu tee erikwa nri unu. Ole o -buru l'oo ngweja-akpo-oku be unu eme g'unu gwee; unu gweru iya nu Chipfu.” Ophu Manowa amakwanu l'oo ojozi-imigwe ke Chipfu be o bu.

¹⁷Tobudu iya bu; o bya ajja ojozi-imigwe ke Chipfu ono; su iya: “? Iza gunu; k'oplu anyi a-kwabekwanu ngu ubvu me iphe ono, i pfuru ono vukotaepho?”

¹⁸Ojozi-imigwe ke Chipfu ono su iya: “? Bu gunu kparu iphe, iiji mu iphe, mu aza? Epha mu dakikwaru uche amadu.”

¹⁹Tobudu iya bu; Manowa bya akputa nweghu yekobe iya ngweja-nri; bya egweshiru iya Chipfu l'eli mkpuma. Manowa yee nyee ya nodukpoepho ele enya; Chipfu mee iphe, du biribiri;

²⁰noo kele oku gbanwuhuerupho l'eli aka ono, eegweje eja ono; kpumia ala l'igwe; ojozi-imigwe ke Chipfu ono bahu l'iroku ono. Manowa yee nyee ya humaeopho iphe ono; ephe dachaa woru iphu kpube l'ali.

²¹Ojozi-imigwe ke Chipfu ono mechaa; ophu o chafutabaeduru l'iphu Manowa yee nyee ya. Manowa gbete teke ono maru l'oo ojozi-imigwe ke Chipfu be o bu.

²²O su nyee ya ono: “Anyi a-nwuhukwa; noo kele oo Chileke be anyi humaru ono!”

²³Nyee ya ono su iya: “Ome o du Chipfu g'o gbua anyi egbugbu me o togo natadunu ngweja-akpo-oku waa ngweja-nri ono, anyi nuru iya ono; ophu o togo goshidunu anyi iphemiphe-a; ophu o togo pfukwarupho anyi iphemiphe-a, o goshiru anyi-a.”

²⁴Nwanyi ono mechaa bya atsuta ime; nwua nwa nwoke; bya agua ya Samusinu. Nwata ono bya evuta; Chipfu kebe iya l'oma.

²⁵No iya; Unme Chipfu bya emeahaa ya ire l'ehu le teke o no le mkpukpu Mahane-Danu, no le mgbaka mkpukpu Zora waa mkpukpu Eshutolu.

Ikpe 14

Samusinu alu nwamgboko Filisitayinu

¹O be ujiku lanu; Samusinu jeshia mkpukpu Timuna. O buru l'eka ono be o humaru nwamgboko Filisitayinu lanu.

²Ọ bya alarwua unuphu; je asụ ne iya yẹe nna iya lẹ ya jekwaru mkpụkpu Timuna; ya hụma nwamgboko ndu Filisitayinu lanu. Sụ g'e jekwa alutaru iya ya g'ọ buru nyee ya.

³Nna iya waa ne iya ono sụ iya: “? Tọ dukpodaa nwanyi, du ngu ree l'ime unwada abubu ngu phe; ozoo lẹ ndibe anyi? Gubedua; ? bu l'ibe ndu Filisitayinu, bu ndu te ebuduru ubvu ono be ii-jeshia alu nwanyi?” O le Samusinu suleru-a nna iya g'o je alutaru iya ya; l'oo ya bu nwamgboko ama iya mma shii.

⁴Ophu nna iya yee ne iya ta amadu l'oo Chipfu be iphe ono shi l'eka; mbu le Chipfu achọ g'oo-shi mekata ndu Filisitayinu; kele teke ono be ndu Izurelu no l'eka ndu Filisitayinu.

⁵Tobudu iya bu; Samusinu yee nna iya waa ne iya tuko swiru jeshia Timuna. Epe rwuepho l'opfu-vayinu, nogbaa le Timuna ono; a bya l'amaru; nwa oduma lufutawa; aba hanyihanyi azo-kube Samusinu.

⁶Unme Chipfu bya abya iya l'ehu k'ike. O zuepho oduma ono gburumu; gude eka labushia ya g'onye labushiru nweghu nshii. Ophu o pfuduru nna iya; waa ne iya iphe ono, o meru ono.

⁷Oo ya bu; o bya atugbua jepfushia nwanyi ono, oopfu k'alulu ono; yee ya bogbabechaa; nwanyi ono nodu ama iya mma shii.

⁸E mechaa g'a nonyaaru; o laphushia azu je iya aluta; o swiba ge ya huma odzu oduma pho. O huma l'enwu gbawaru iya ite; manu-enwu duwa iya.

⁹O gude eka kukuta iya ritsoru uzo. O jepfuepho nna iya waa ne iya; o nu phe; epe ria. Ophu o pfukwanuru phe l'oo l'odzu oduma pho be o kukutaru manū-enwu obu.

Ílú, Samusinu turu

¹⁰Tobudu iya bu; nna iya bya ejeshia g'ọ huma nwanyi ono. Samusinu bya eshia nri ekele-nwanyi l'eka ono; kele oo g'unwoke, alu nwanyi l'eka ono emejekpo bu ono.

¹¹No iya; epe humaepho Samusinu; epe duru umadzu ukporo l'iri yeru iya g'ephe l'iya tuko nodu.

¹²Samusinu bya asu phe: “Ge mu tukpodarupho unu ilu lanu. O -buru l'unu koru mu iphe, o bu l'ime abali esaa, a no le nri-a be mu a-nu unu uwe mgbalanu ukporo l'iri waa uwe, du iche iche ukporo l'iri.

¹³Teke o bu l'unu ta akotaduru iya; unu anu mbedua uwe mgbalanu ukporo l'iri waa uwe, du iche iche ukporo l'iri.” Epe su iya: “Tueshiduru anyi ilu ngu obu; g'anyi numa.”

¹⁴O bya aturu phe iya su: “Iphe, erije iphe be iphe, eeri eriri shi lufuta. Iphe, nweru okpehu be iphe, atso utso shii lufuta.” A noo abali eto; ophu epe adudu ike ko iphe, ilu ono bu.

¹⁵O be lẹ mbọku k'eno; ndu ono sụ nyee Samụsinu ono: “Dee ji ngu edede g'ọ karu anyi iphe, ílú ono bụ; ọdumeka bẹ anyi e-tsukwa ngu ọku; gụ lẹ ndibe nna ngu. ? Bụ iphe, i yeru anyi g'anyi bya bụ g'i nata anyi iphe, anyi nweru ọo?”

¹⁶Tọbudu iya bụ; nyee Samụsinu ono bya anọdu iya l'iphu raahaa ẹkwa; sụ iya: “Mu dụ ngu ashị! I ti yeduru mu obu ilile! I turu ndibe anyi ílú; ọphu i tị kaduru mu iphe, ílú ọbu bụ!” Ọ sụ iya: “Mu ta akọduru iya nna mu; ọzoo ne mu; ? denụ gẹ mu e-shi bya akọ-chiaru iya gubedua?”

¹⁷Nwanyị ono rakọta ẹkwa ujiku ẹsaa, ẹphe nọ lẹ nri ono. Ọo ya bụ; o be lẹ mbọku k'ẹsaa ono; o woru iya kọoru iya; kele oopfukpoeru iya phọ g'ọ kọoru iya ya. Yẹbedua je eworu iphe, ílú ono bụ kọoru ndibe pẹ ono.

¹⁸Enyanwu bya ariba lẹ mbọku k'ẹsaa ono; ndu mkpukpu ono sụ Samụsinu: “? Bụ gunu bẹ ka manụ-ẹnwu uto? ? Bụ gunu bẹ ka oduma ọkphe?” Samụsinu sụ pẹ: “Ọ tọ bụ l'unu kularu l'ẹka ada-eswi mu nọ; bẹ unu tege adukwa ike kọo iphe, ilu mu ono bụ.”

¹⁹Tọbudu iya bụ; Unme Chipfu bya iya l'ẹhu k'ike; ọ buru iya eje mkpukpu Ashikelonu je echigbushia ukporo umadzu l'umadzu iri; natakọta pẹ iphe, ẹphe nweru. Ọ chiru uwe pẹ, dụ iche iche chiru nụ ndu ono, kọtaru ílú ono, ọ turu ono. Ọ gude ẹhu-eghu, enwu iya phuruphuru l'ẹhu lashia ibe nna iya.

²⁰Ẹphe woru nyee Samụsinu ono kee ọnyà Samụsinu, yeru iya ẹka lẹ teke ọolu nwanyị ono.

Ikpe 15

Samụsinu atụ ọku l'iphe, ndu Filisitayinu meberu l'ali

¹Ọ rwuerupho teke eebu je witi; Samụsinu kpụta nwada egbu; kpapfushia nyee ya ono. Ọ rwua ọ sụ ọgo iya ono: “Mu e-jepfuakwa nyee mu lẹ mkpuru nkiya.” Ọphu nna nyee ya ono te ekwedu g'ọ bahu l'ime ọlo;

²sụ iya: “Mu maru lẹ nyee ngu ono bẹ dụ ngu ashị ọkpobe adudu. Ọo ya meru g'ọ gude mu kee ya ọnyà ngu.” Sụ iya: “? Nwune iya kẹ nwata ta akadụ iya ama mma ọo? Dutachinaa yẹbedua.”

³Samụsinu sụ pẹ: “Nta bẹ mu nweru ẹka mu a-gbabe ọkpa meshia ndu Filisitayinu iphe ike; ọphu ọta taa dudu mu iya.”

⁴Ọo ya bụ; ọ tughua je akpukoo uphega lẹ ndzu; kpụta pẹ ukporo iri l'ise; gude pẹ l'ite-odzu ligbabechea pẹ ẹbo ẹbo. Ọ bya eworu ọwá lipyabechea pẹ lẹ mgbaka ite-odzu ono.

⁵Ọ bya anwuru ọku yekọta l'ọwá ono; parụ uphega ono hashichaa ẹka l'ẹka witi ndu Filisitayinu nọ. Ọ tuktota ọku lẹ witi, e gbushiwaru egbushi; mẹ ndu ọphu e teke egbushidu egbushi; je akpaa l'opfu-vayinu mękpoo oshi olivu pẹ.

⁶Tọbudu iya bụ; ndu Filisitayinu sụ: “? Bụ onye meru iphe ọwa?” A sụ pẹ: “L'ọo Samụsinu, bụ ọgo nwoke Timuna bẹ meru iya nụ; kele e dutaru nyee ya kee ọnyà

iya.” Oo ya bu ndu Filisitayinu tugbuepho je egude nyee Samusunu ono; waa nna iya kpoo oku.

⁷Samusunu su phe: “Eshinu unu gbę mee egube-a be mu ta abyadu aha unu; jasụ mu emelataada unu!”

⁸O tsoo phe ugu ehuka ehuka; gbushia ndu du igwerigwe l'ime phe. O mechaa bya atugbua je anodu l'ogba, no l'oke mkpuma le mkpukpu Etamu.

⁹Tobudu iya bu; ndu Filisitayinu wufu je adoru l'alị Jiuda k'ogu; nochaa jasụ le mkpukpu Lehi.

¹⁰Ndu Jiuda jia su: “? Bukwa ole be unu byaru anyi etso ugu?” Ephe su: “Anyi byaru g'anyi gude Samusunu melata iya ugu iphe, o meru anyi.”

¹¹Oo ya bu; unu nemadzu esaa l'ukporo iri, shi l'alị Jiuda zafu jepfushia Samusunu l'ogba, no l'oke mkpuma le mkpukpu Etamu ono je asu iya: “? Bu egube gunu be i meru anyi owana? ? Ti madu l'anyi no l'eka ndu Filisitayinu?” O su phe: “Oo iphe, ephe meru mu be mu melataru phe.”

¹²Ephe su iya: “Anyi byakwaru g'anyi kee ngu egbu; kputa je anu ndu Filisitayinu.” Samusunu su phe: “Unu riaru mu angu l'unu te egbudu mu l'onwunu.”

¹³Ephe su iya: “Waawaa; anyi te egbukwa ngu. A kwa egbu be anyi e-ke ngu kpoloko; kputa ngu je anu phe.” Ephe bya egude okpukpu ophuu labo kee ya egbu; bya akpufuta iya l'oke mkpuma ono.

¹⁴O rwutashia le mkpukpu Lehi; ndu Filisitayinu turu oko kpua ya; gbapfushia ya. Unme Chipfu bya iya l'ehu k'ike. Okpukpu ono, e kekotaru iya l'eka ono ribushihuephoo g'eba-oghu, e gude oku dabua; egbu ono, e kekotaru iya ono gbabushihukota iya l'eka dashihu.

¹⁵O humaeqwapho okpu-agba nkafu-igara, du ophuu ophuu; o dzukotae l'ia pho; gude iya chigbushia unu umadzu labo l'umadzu ukporo iri.

¹⁶Tobudu iya bu; Samusunu su: “Okpu-agba nkafu-igara be mu gude mee; ephe kuta l'ikpo l'ikpo; mbu; l'oo okpu-agba nkafu-igara be mu gude gbushia unu umadzu labo l'umadzu ukporo iri.”

¹⁷O pfuebechaa nno; o tuphaa okpu-agba nkafu-igara ono; woru eka ono gube “Ramatu-Lehi” , bu iya bu “obvudu okpu-agba” .

¹⁸Tobudu iya bu; egu-mini bya agushiaha ya ike; o raku Chipfu; su iya: “Oo ngu be meru g'onye-ozu ngu lwu-kpe k'ophu paru eka egube-a. Nta; ? bu chia egu-mini be agbe gbua mu; mu adaba ndu ono, bugba akpapyi ono l'eka?”

¹⁹Chileke woru eka du nsuda le mkpukpu Lehi gbawaa; mini soshiahaa ya. Samusunu bya anguchaa mini ono; ike bya adu iya; obu guzeta iya. O woru eka ono gube Enu-Hakore, bu iya bu “obvu-mini onye rakuru nu” . Obvu-mini ono nepho le mkpukpu Lehi byasu ntanu.

²⁰Samụsinu bụru Onye Ikpe ndu Ízurelu ụkporo apha lẹ teke kẹ ndu Filisitayinu ono.

Ikpe 16

Samụsinu aphokata oguzo, eeshije abahụ lẹ mkpukpu Gaza

¹Samụsinu bya ejee mkpukpu Gaza; je ahuma nwanyị ụkpara; o jee yee ya kwaa.

²Tobudu iya bụ; a bya epfuaru ndu Gaza sụ: “Samụsinu bẹ byakwaru l'eka-a!” Oo ya bụ; ndu mkpukpu ono je aso-phae eka ono nodu kwabekotaru iya l'enyashi ono l'ophu; nodukota nggujungguji l'onu eka eeshije abahụ lẹ mkpukpu ono kwabekotaru iya l'enyashi ono l'ophu asuje: “L'iphóró nchi-abohu bẹ anyi e-woru iya gbua.”

³Samụsinu zẹ l'eka ono jeye l'echilabọ abalị. O gbẹ teke ono gbalihu je aphokata mgbo-oguzo, e yeru l'onu-abata mkpukpu ono; phokatachaa yee itso labọ, e gude yee oguzo ono; mbụ phota mẹ mgbo-ígwe g'ohakota dee l'ukuvu. O vutakota iya je enyihu mkpakponu úbvú ono, nọ gha iphu lẹ mkpukpu Hẹburonu ono.

Samụsinu yee Delayila

⁴Tobudu iya bụ; a nonyaepho; o bya eje eyee nwanyị, bu lẹ nsuda Soreku obu. Epha nwanyị ono bụ Delayila.

⁵Ndu-ishi ndu Filisitayinu bya ejepfu nwanyị ono je asụ iya: “Dejibekpoe ya pho g'o goshi ngu eka okpehu iya ono, parụ eka ono nokpoo; dekwaa ya pho g'o karu ngu g'anyi e-shi gude iya kee ya egbu; bya akapyabẹ iya.” Epe sụ nwanyị ono l'ephe anuchaa ya eka mkpola-ochaa iri lẹ nanu l'ehu l'ehu.

⁶Oo ya bụ; Delayila jepfu Samụsinu je asụ iya: “Jiko kanuru mu iphe, meru g'o gude ejo okpehu du ngu egube-a; ikafuaru mu egube ee-me gudekpoo ngu kee ngu egbu; mee ngu ewere.”

⁷Samụsinu sụ iya: “O -buru l'e gude okpukpu esaa, a swiru k'ophúú, ta akpohuduru nkụ kee mu egbu; bẹ mu a-byaepho adu arwuhu; mu abya adu g'onye ozo du.”

⁸Tobudu iya bụ; ndu-ishi ndu Filisitayinu bya achie Delayila okpukpu esaa, a swiru k'ophúú, ta akpohuduru nkụ; o gude iya kee ya egbu.

⁹A chiru nemadzu domishia l'ime mkpuru; ephe nodu kwagebe akwagebe. O keebachaa ya ya; o sụ iya: “Samụsinu! Ndu Filisitayinu abyakwa ngu egude!” O gbabushia okpukpu ono g'o bụ eba-oghu bẹ e gude oku dabua. Oo ya bụ l'a ta chovuduru eka okpehu iya nọ.

¹⁰No iya; Delayila sụ Samụsinu: “Ichi mu eswe; bya adzu-pheru mu uka. Jiko kanuru mu g'ee-shikpo kee ngu egbu.”

¹¹O sụ iya: “Oo e -gude eri ophúú, ta adudu iphe, e mejewaru iya kee mu pyataa; mu abya adu arwuhu; du g'onye ozo du.”

¹²Oo ya bụ; Delayila bya achita okpukpu ophúú gude kee ya egbu. O nweru unwoke, domiru onwophe l'ime mkpuru; kwaberu iya. O sụ iya: “Samụsinu! Ndu Filisitayinu

abyakwa ngu egude!” O lwubilihu; woru okpukpu ono, o keru iya l'eka ono gbabushia g'ọ bu eba-oghu.

¹³Delayila bya asu Samusinu: “Ime teke i shikwanu chita mu eswe; bya adzu-pheru mu uka. Kanuru mu egube ee-shikpo kee ngu egbu obu.” O su iya: “O -buru li hakaharu egbushi mu-a uzo esaa; bya eworu iya ganga l'iphe, eegudeje ekwe ekwa; mbu kwepyaechaa egbushi mu ono l'iphe iigudeje ekwe ekwa ono; bya egude ngga, i gudeje ekwe ekwa kpopyabeshia ya ike l'iphe iikweje ekwa ono be mu a-bya adu arwuhu; mbu bya adu g'onye ozo du.”

¹⁴Tobudu iya bu; Samusinu kuerupho mgbenya; Delayila bya alota egbushi ono, a hakaharu uzi esaa ono kwepyahe l'oghu, e gudeje ekwe ekwa; bya egude ngga, e gude ekwe ekwa kpopyabeshia ya ikike. O bya asu iya: “Samusinu! Ndu Filisitayinu abyakwa ngu egude!” O zilihu le mgbenya, ooku; mi-lita ngga ono; waa iphe, e gudeje ekwe ekwa; me ogu, e gudeje ekwe ekwa ono.

¹⁵O su iya: “? Denu g'ii-shi su li yeru mu obu l'ebe abu l'obu ngu no l'eka mu no? Owaa kwewa ugbo eto, i chikotachaaru mu eswe; ophu i kwedu koru mu eka okpehu ngu ono, paru eka ono nokpoo.”

¹⁶Tobudu iya bu; o tu-chinyaa ya nchi; epfupheru iya iphe ono mbokumboku; mbu pfutabe iya k'ophu bu l'ike bvuchaaru Samusinu bv esha iya.

¹⁷Oo ya bu; o bya eworu obu iya pfukotaru iya; su iya: “A ta adajeduru mu akwo l'ishi; kele mu shi l'epho ne mu buru onye duru Chileke iche.” Su iya: “O -buru l'a kpushiru mu ishi; ike mu alufu mu l'ehu; mu abya adu arwuhu; mbu du g'onye ozo mmanu.”

¹⁸Delayila maerupho l'o pfuwaru iya obu iya; o zia ozi g'e je ezia ndu-ishi ndu Filisitayinu ono; su phe-a: “Unu lwafua azu ogiya-a l'o pfugbuwaru mu iphemiphe.” Oo ya bu; ndu-ishi ndu Filisitayinu gude okpoga ono, ephe kweru iya ukwe iya ono byatashia.

¹⁹O bya emee Samusinu o nodu iya l'utapfu kuru mgbenya. O kua nwoke lanu; o bya akpushia ya egbushi iya ono, a swingashiru uzi esaa ono. O kpushichaa ya ya; Delayila kapyabe iya; okpehu iya ono phefuwa iya l'ehu.

²⁰Tobudu iya bu; o su iya: “Samusinu! Ndu Filisitayinu abyakwa ngu egude!” O bya etehu le mgbenya ono gbe ria su: “Ge mu bya emee ge mu emejhawaa; mu a-nyikofu nweru onwomu.” Ophu o to madu le Chipfu be pawaru iya haa.

²¹No iya; ndu Filisitayinu bya egude iya; woru iya enya swoshia; kpuru iya jeshia mkpukpu Gaza. Ephe bya ekee ya egbu; woru egbirigba onyirubvu tua ya; kpota iya ye le mkporo o je egweaha ereshi l'ulo mkporo.

²²A nonyaa egbushi, no iya l'ishi ono bya erwutaaha ozo g'a kpushicharu iya ya ono.

Anwuhu Samusinu

²³Ndu-ishi ndu Filisitayinu bya edzukobe g'ephe gwee ngweja, paru eka nu agwa phe, bu iya bu Dagonu; tekwaapho eswa; kele ephe epfu su: "Agwa anyi be wowaru onye ohogu anyi, bu Samusinu ye anyi l'eka."

²⁴Ndu ono humerupho Samusinu; ephe wata etu agwa phe epha; asuje: "Agwa anyi be wowaru onye ohogu anyi ye anyi l'eka; mbu onye ono meru; ali anyi buru mkpurupyata ono; mbu onye bu iya gbushiru igwerigwe l'ime anyi ono."

²⁵Emereme jie phe pho eh; ephe tushia uzu; su: "G'e dufutaedurunu anyi Samusinu g'o meeru anyi iphe, ezi onochi." Oo ya bu; a bya edufuta iya l'ulo-mkporo; o bya emeahaaru phe iya. O be teke ephe meru iya o pfuru le mgbaka itso, gudegbaa ulo ono;

²⁶Samusinu pfuluru nwokoro, sekpu iya l'eka su: "Meekwa mu ge mu mevuchaa itso ono, gudechaa ulo ono k'ophu bu le mu a-daphube iya."

²⁷Ulo ono be unwoke me unwanyi jiru ejiji tsua erupfu. Iphe, bu ndu-ishi ndu Filisitayinu g'ephe ha be nokota l'eka ono. L'eli ulo ono be unwoke l'unwanyi, no iya nu rwuru unu esaa l'ukporo iri, bu ndu nokota ele Samusinu l'eka oomeru phe iphe, ezi onochi ono.

²⁸Tobudu iya bu; Samusinu bya epfuru nu Chipfu su iya: "Gube Nnajiuphu, bu Chipfu; nyatanu mu! Gube Chileke; jiko menaa g'ike dufua mu ugbo lanu-a; k'ophu mu e-gude ugbo lanu-a gwata ndu Filisitayinu ugwo enya mu ephenebo-a."

²⁹No iya; Samusinu bya aworu eka l'itso labo, bu iya gude ulo ono. O bya azubeshichaa ya eka ike; mbu zu-be ophu no iya l'ekutara; bya azube ophu no iya l'ekicha.

³⁰Samusinu bya asu: "Ge mu le ndu Filisitayinu tukowaro nwushihukota!" O bya atsu-rweta; gude ike iya l'ophu nwubekota l'itso labo ono; ulo ono daa; tupyabekota ndu-ishi ono; me ndu ozo nokota l'ime ulo ono. Oo ya bu le ndu Samusinu gburu le teke o nwuhuru be ka igwerigwe eme le ndu ophu o gbushiru teke o no ndzu.

³¹Tobudu iya bu; unwunna iya waa ndibe phe tugbu je apata iya. Ephe je eworu iya lia le mgbaka mkpukpu Zora waa mkpukpu Eshutolu l'ilu Manowa, bu nna iya. Samusinu be kperu ikpe le Izurelu ukporo apha.

Ikpe 17

Mayika agwo obvu

¹O duru nwoke lanu, epha iya bu Mayika, shi l'ali ubvu ubvu ndu Ifuremu.

²O nonyaepho o su ne iya: "Ekpa mkpola-ochaa iri le nanu ngu ono, e wotajerupho; mbu mu numajeru eka iitu onye wotaru iya nu onu ono be bukwa mu gude iya; mbu l'oo mbedua be wotaru iya nu." Ne iya ono su iya: "Ge Chipfu kebekwa ngu l'oma; nwa mu!"

³O bya eworu unu mkpola-ochaa labo l'ukporo mkpola-ochaa iri l'ise ono nu-phu ne iya azu. Ne iya ono su: "Mkpola-ochaa, shikota mu l'eka be mu tukowaru doberu

Chipfu iche gę nwa mu gude iya meta ntękpe, a pyiru apyipyi; waa ọbvụ, a kpuru akpukpu. Ọo ya bụ lę nta-a bę mu a-nụ-phu ngu iya azụ.”

⁴Ọo ya bụ; ọ bya eworu mkpọla-ọchaa ono nụ-phukọta ne iya ono azụ; ne iya ono ye ẹka lę mkpọla-ọchaa ono wota iya ukporo mkpọla-ọchaa iri je achie onye akpuje mkpọla-ọchaa. O gude iya kpụta ntękpe; waa ọbvụ. E je eworu iya dobekọta l'ulo Mayika.

⁵Mayika nweru ọlo-nshi; bya enwekwarupho uwe-ukuvu; mękwapho ọbvụ ọzobaa. O woru onye lanụ l'unwu iya unwoke mee onye agwaję iphe.

⁶Teke ono bę ndu Ízurelu eshidu nweru ndu eze; onyemonye nọdu anọduje eme g'ọ dụ iya.

⁷Tọbudu iya bụ; o duru nwokorọbya lanụ, bụ onye Lívayi, shi lę mkpukpu Bętlehemu, nọ l'alị Jiuda. O shi buru l'echilabọ ndu ipfu Jiuda.

⁸Nwoke ono lufu lę mkpukpu ono tugbua jeshia achọ ẹka ọzo, oo-buru. O jenyaa bya abahụ ibe Mayika l'alị úbvú úbvú ndu Ifuremu ono.

⁹Mayika jia ya sụ: “? Bụ awe bę i shi?” Ọ sụ iya: “Mu bukwa onye Lívayi. Mu shi lę Bętlehemu, nọ l'alị Jiuda; mu nọdu achọ ẹka mu e-buru.”

¹⁰Tọbudu iya bụ; Mayika sụ iya: “Gę mu lę ngu bunuru; g'ị buru nna mu waa onye a-nọduje agwaru mu iphe. Mu a-nuje ngu mkpọla-ọchaa iri l'apha; akporu ngu uwe; bya azukwa ngu phọ lę nri.”

¹¹No iya; onye Lívayi ono kweta gę yęe nwoke ono buru. Nwokorọbya-a bya adu Mayika g'ọ bụ onye lanụ l'unwu iya.

¹²Tọbudu iya bụ; Mayika bya emee onye Lívayi ono onye agwajęru iya iphe; ọ bya aburu onye gwaaharu iya iphe; buwaruroo ya l'ibe Mayika.

¹³Ọo ya bụ Mayika pfua sụ: “Nta-a bę mu makpọoru lę Chipfu ee-me g'iphe duru mu lę ree; eshi ọphu onye Lívayi bụwa iya agwajęru mu iphe.”

Ikpe 18

Ndu Danu achọ alị, ẹphe e-buru

¹Teke ono bę ndu Ízurelu te nwedu onye eze. Ọ buru teke ono bę ipfu Danu shi achọ ẹka ẹphe e-buru; kele ọ tọ dudu alị, a heru phę, g'ọ buru oke alị phę l'echilabọ ọkpa-ipfu ndu Ízurelu.

²Ọo ya bụ; ndu Danu ono bya ezia ndu ojogu umadzu ise, shi lę mkpukpu Zora waa mkpukpu Eshutolu g'ẹphe je anwua ngge l'alị ono; maru g'ọ gbaru. Ndu ono bę nọ-chikotaru ęnya unuphu phę g'ọ ha. ẹphe sụ phę g'ẹphe tugbua je anwua ngge l'alị ono. Ndu ono jerwua l'alị úbvú úbvú ndu Ifuremu; bya abahụ l'ibe Mayika je akwaa akwakwa l'enyashi ono.

³ẹphe nọ-kubeępho ibe Mayika ntse; ẹphe numa olu-opfu nwokorọbya, bụ onye Lívayi phọ; bya amamobeęrpho l'ọo ya bę epfu opfu. Ọo ya bụ; ẹphe bahụ l'ẹka ono;

je ajia ya su: “? Bu onye du ngu bya l'eka-a? ? Bu gunu be iime l'eka-a? ? Bu gunu meru iphe, i no l'eka-a?”

⁴Q bya edoshikotaru phe iphe, Mayika meshikotaru iya; su phe: “Mayika be butaru mu ebuta ge mu buru onye agwajeru iya iphe.”

⁵Tobudu iya bu; ephe su iya: “Jiko jitaeduru anyi Chileke g'anyi maru ije anyi-a; ? oonweru-a ishi?”

⁶Onye uke ono su phe: “Unu jee le chiriri werere. Chipfu be towaru unu uzo l'ije unu ono.”

⁷Tobudu iya bu; umadzu ise ono tugbua bya ejerwua mkpukpu Layishi. Ephe rwua l'eka ono bya ahuma ge ndu bu iya nu tusaru eh. Ephe bukpoepho nwajii; nweru onwophe ge ndu Sayidonu bu; kele o to dudu onye-ishi, emekpa phe eh l'ali ono m'ilile. Ephe bukwapho ndu Sayidonu uzanya; ophu o dudu ndu ozo, ephe l'ephe emegbaa.

⁸Ephe bya alaphu azu le Zora; me le Eshutolu. Unwunna phe jia phe su: “? Denu g'unu jeru iya?”

⁹Ephe su: “Unu wulihu g'anyi je etsoo phe ugu; kele anyi humawaru l'ali obu be du rengurengu. Mb; ? unu nokwadia gbuligbuli? Unu te ejekwa anmarwube k'eje alwuta ali ono.

¹⁰Teke unu rwuerupho eka ono be unu a-huma ge ndu bu iya nu tuzoshihukotaru eh; humakwapho g'ali ono ha ke phorokotokongu. Chileke woakwaru ali ono ye unu l'eka; mb; ali, ta adudu iphe, du le mgboko-a duru ophu du iya uko.”

¹¹Tobudu iya bu; unu unwoke le unwoke ukporo iri, bu ndu ipfu Danu ono bya akwaa ngwogu shi le Zora me Eshutolu wufu jeshia.

¹²Ephe jenya; ephe je adoru le mgboru mkpukpu Kiriyatu-Jiarimu, no l'ali Jiuda. Oo ya meru iphe, uzo enyanwu-ariba Kiriyatu-Jiarimu aza Mahane-Danu, bu iya bu “odu Danu” byasu ntanu-a.

¹³O buru eka ono be ephe shi jeshia l'ali ubvu ubvu ndu Ifuremu; bya awuba ibe Mayika.

Ndu Danu apata obvu Mayika

¹⁴Tobudu iya bu; umadzu ise ono, jeru anwua ngge l'ali ndu Layishi ono pfuaru unwunna phe ono su: “? Unu maru l'ulo-a, nokota egube-a be o nweru uwe-ukuvu; waa obvu unuphu; mekwapho ntekepe, a pyiru apyipyi; waa ophu a kpuru akpukpu nogbaa ya nu? Nta-a buakwaaro g'unu; maru iphe, unu ee-me.”

¹⁵Oo ya bu; ephe swiba l'eka ono; bahu l'ulo ophu nwokorobya bu onye Livayi ono bu l'ibe Mayika. Ephe bya ekele iya ekele.

¹⁶Ndu Danu ono, du unu nemadzu l'ukporo iri ono, bukota ndu kwaru onwophe ngwogu pho tuko pfukotaru l'onu oguzo.

- 17 Umadzu ise pho, jejeru anwua ngge l'ali ono pho bahu l'ulo nshi ono je apata ntekpe, a pyiru apyipyi ono; waa uwe-ukuvu ono; waa obvu unuphu ono; me ntekpe, a kpuru akpukpu ono. Onye agwaje iya nu pfuru l'onu oguzo yele unu umadzu ukporo iri ono, kwaru onwophe ngwogu pho.
- 18 O be teke ndu ono bahuru l'ulo Mayika je achikoo ntekpe ono, a pyiru apyipyi ono; waa uwe-ukuvu ono; me obvu unuphu ono; mekpoo ntekpe, a kpuru akpukpu ono; onye ono, agwaje iphe ono jia phe; su: “? Bu gunu be unu eme egube ono?”
- 19 Ephe su iya: “Dobekwa onu doo. Te epfukwa me akpuru opfu lanu. Bya etsoru anyi g'i buru nna anyi waa onye a-nodu agwajeru anyi iphe.” Su iya: “? O ka ngu ree g'o buru unuphu onye lanu be ii-nodu agwajeru iphe; eme le g'i gwajeru ipfu waa ndu unuphu ndu Izurelu iphe?”
- 20 Tobudu iya bu; ehuru tsoahaa onye agwaje iphe ono ntumatu. O bya ewota uwe-ukuvu ono; waa obvu unuphu; me ntekpe, a pyiru apyipyi ono tsoru ndu ono.
- 21 Ephe bya adakobe o buru phe atugbu. Ephe kparu unwegirima vuru uzo; me iphedobe phe; mekpoo iphemiphe, ephe nweru enweru.
- 22 Ephe jeribeerupho uzanya; me a -gbe l'ibe Mayika; a bya ekukoo ndu bunyabe Mayika; ephe zefu je agbabua ndu Danu iphu.
- 23 Ephe wata echi mkpu eekpu ndu Danu. Ndu Danu ghakobe su Mayika: “? Bu gunu eme ngu meru g'o gude i chita nemadzu byatashia anyi etso ogu?”
- 24 O su phe: “Unu gwetaruru obvu mu; bya eduta onye agwajeru mu iya nu tugbua.” Su phe: “? Bu gunu be bu iphe, mu nwebakwadaaru ozobaa? ? Denuhunu g'unu gbe jiahaa mu su: ‘? Bu gunu be e me ngu nu?’ “
- 25 Ndu Danu ono su iya: “Ta byakwa apfuru g'anyi le ngu saka iya; odumeka be ndu obu oku a-byakwa ngu l'ehuru; gu le ndibe ngu e-tuphaa ishi ndu unu.”
- 26 Oo ya bu; ndu Danu wuru tugbua jeshia iphe, ephe eje. Mayika bya ahuma l'ephe ka iya okpahu; o kwe doo ghakobe; o buru iya ala unuphu.
- 27 Tobudu iya bu; ephe gweta iphe ono, Mayika meshiru ono; duta onye ono, agwajeru iya iphe ono tugbua. Ephe jeshia Layishi je etsoo ndu ono, bukpopho le nchi odoo; tusaru ehuru ono ogu. Ephe gude ogu-echi gbua phe pyaapya; woru oku tufu le mkpukpu ono.
- 28 Ophu o to dudu onye byaru adzota phe nu; kele ephe bu ndu Sayidonu uzanya; teme ophu o dudu iphe, ephe le ndu ozo emegbaje. Eka mkpukpu ono, bu Layishi no be bu le nsuda ubvu, no-kube mkpukpu Betu-Rehobu. Ndu Danu woru mkpukpu ono kpukwaa; buru.
- 29 Ephe gube mkpukpu ono Danu, bu iya bu epha nna phe oche, bu onye ono a nwuru Izurelu. Ole iphe, mkpukpu ono shi aza be bu Layishi.

³⁰Oo l'eka ono be ndu Danu doberu ntekpe ono, a kpuru akpukpu ono. O buru Jionatanu nwa Geshomu; mbu nwanwa Manase waa unwu iya be bu ndu gwaaharu ndu ipfu Danu iphe gbiriri jasu teke a byaru akpua ndu ali ono le ndu.

³¹G'ulo Chileke no-bekporu le Shilo be ephe gwakotaerupho ntekpe Mayika ono; mbu ntekpe ono a pyiru apyipyi ono.

Ikpe 19

Onye Lívayi yee nwanyi, o to ludu okpobe alulu

¹Teke ndu Izurelu te enwedu onye eze be o duru nwoke lanu, bu onye Lívayi, bu l'imime ali ubvu ubvu ndu Ifuremu. O duta nwanyi, o to ludu okpobe alulu le mkpukpu Betulehemu, no l'ali Jiuda.

²Ole nwamgboko ono wataru agba ukpara; bya alufu lashia ibe nna iya le Betulehemu, no l'ali Jiuda. O nochapho onwa eno l'ibe nna iya ono;

³Ji iya gbeshi jeshia ya arworwo g'o lwa azu. O gbeshi kputa nkafu-igara labo; duta nwozi iya ephe swiru jeshia. Ephe rwua; nwamgboko ono duta iya; ephe bahu l'ulo nna iya ono. Nna nwamgboko ono huma e ya pho; bya egude ehu-utso gba iya ndzuta.

⁴Ogo iya ono, bu iya bu nna nwamgboko ono sede iya; yee ya noo ujiku eto. O nodu l'eka ono eri; angu bya ekujekwapho mgbenya l'eka ono.

⁵Tobudu iya bu; o be le mboku k'eno; ephe tehu l'onmewa utsu; o kwakobe g'o lashia; nna nwamgboko ono su ogo iya ono: "Ria nri g'ehu shihu ngu ike teme l'ilashijewaro."

⁶Oo ya bu; ephenebo toko nodukota ria; ngua. E mecha; nna nwamgboko ono su iya: "Jiko nodufunaa l'enyashi-a; mee g'ehu tsufua ngu utso."

⁷Nwoke ono bya agbeshi ge ya lashia; ogo iya ono rwopyabe iya; k'ophu bu l'o kwafuaru akwakwa l'enyashi mboku ono.

⁸O bya erwua l'utsu mboku, kwe iya ujiku ise; o gbeshi le ya alawa; nna nwamgboko ono sukwa iya: "Ria iphe g'ehu du ngu gbukuu; g'inodu teke o beru l'eswe l'ilashiwaro." Oo ya bu; ephenebo bya atuko nodu; rigba nri.

⁹Tobudu iya bu; o be teke nwoke ono; yee nyee ya ono; me nwozi iya pho gbeshiru g'ephe lashia; ogo iya ono, bu iya bu nna nwamgboko ono su iya: "Lenu; nta-a be o buakwaa uzenyashi; jiko kwafua akwakwa l'enyashi-a. Mbu-a; lenu le nchi ejihuakwa. Nodukwa; kwaa akwakwa l'enyashi-a g'ehu tsoo ngu utso. Teke o beru l'onmewa utsu echele; igbeshi lashia unuphu ibe ngu."

¹⁰Obenu le nwoke ono be o to duedu g'o kwabaa akwakwa ozo. O gbeshi tugbua; o buru iya alala. O duta nyee ya ono; kputa nkafu-igara labo ono, o bochaaru ivu; o buru phe atugbu kwaseru uzo mkpukpu Jiebusu, bu iya bu Jierusalemu.

¹¹Ephe nodepho Jiebusu ntse; nchi nodu ejihugbuwa. Nwozi ono pfuaru nnajuphu iya ono su iya: "Jiko bya g'anyi bahu le mkpukpu ndu Jiebusu je akwaa l'enyashi-a."

- 12**Nnajiuphu iya ono sụ iya: “Waawaa; anyi taa bahudu mkpukpu ndu ohozo, ta abudu ndu Izurelu. Anyi e-jechia jerwua mkpukpu Gibiya.”
- 13**Sụ iya: “Bya g'anyi kukebe ehu jerwua mkpukpu Gibiya; ozoo mkpukpu Rama g'anyi akwaa l'eka lanu l'eka ono.”
- 14**Oo ya bu; ephe tugbukwa; nchi jipfu phe le g'ephe eruwaa mkpukpu Gibiya, no l'alị Benjiaminu.
- 15**Ephe rwua; bya aswiba; bahu le mkpukpu Gibiya g'ephe kwaa l'eka ono. Ephe je anodu l'edupfu mkpukpu ono; kele o to dudu onye dutaru phe nu g'ephe bahu ibe iya je akwaa.
- 16**No iya; a bya ele enya; nwoke ogerenya shiwaa l'ozị egu eje alwa l'uzenyashi ono. Nwoke ono be bu onye shi l'alị ubvu ubvu ndu Ifuremu. O bu ebubu le Gibiya. Ndu bu l'eka ono be bu ndu Benjiaminu be ephe bu.
- 17**Nwoke ogerenya ono bya apalia enya huma onye ije, no l'edupfu ono; o jia ya; sụ: “? Bu awe be iije? Teme ? bu aweya be i shi?”
- 18**O sụ iya: “Anyi shikwa Betulehemu, no l'alị Jiuda eje ala l'imime alị ubvu ubvu ndu Ifuremu. Oo l'eka ono be mu bu. Mu shi je Betulehemu; mu nodu alawa l'ulo Chipfu; ophu o dudu onye dutaru mu duba l'ibe iya.
- 19**Anyi gudekwaru nkapfu-igara anyi eswa okponku, ephe a-ze azee; waa nri, ephe eri; bya egudekwapho nri waa mee k'anyiibe ndu-ozị ngu; mbu ke mbedua; waa ke nwozi ngu ke nwanyi; me ke nwokoro-a, anyi l'iya toko swiru-a. O to dukwa iphe, uko iya duru anyi.”
- 20**Oo ya bu; nwoke ogerenya ono; sụ phe: “G'ehu dukwa unu guu. Unu hakporo eka; mu e-meeru unu iphe, mkpa iya duru unu. Unu be jekwa k'aze l'edupfu.”
- 21**No iya; o duta phe; lashia ibe iya. O bya anukota nkapfu-igara nwoke ono nri. Ephe bya akwoebechaa okpa; bya eria; ngua.
- 22**Ephe nodukwadu-a eme emereme; ndu iwashi shi le mkpukpu ono bya agbaa ulo ono, ephe no ono mgburugburu. Ephe bya etsuaha eka le mgbo; epfuru nwoke ogerenya, nwe ulo ono asuje: “Dufutaru anyi nwoke ono, bataru l'ulo ngu ono g'anyi jepfu!”
- 23**Onye ono, nwe ulo ono bya ekpufu etezi je asu phe: “Ndu mu; waawakwa! Unu te eweshinu iwashi. Unu te emeshinu egube iphe-iphere owana; eshinu nwoke-a bu ibe mu be o byaru.
- 24**Waa nwa mu nwanyi, nwoke teke ejepfuswee baa; wakwapho nwanyi, nwoke ono ta aludu okpobe alulu. Mu e-dufuta phe nta-a g'unu gude phe jepfu; mee phe egube dukpoepho unu ree. Ole-a; unu te ejekwa eme nwoke-a egube iphe-iphere du nno.”
- 25**Ole ndu ono ta ngaduru iya nchi. Oo ya bu; nwoke ono, byaru ebyaa ono bya edufuta nwanyi ono, o to ludu okpobe alulu ono l'etezi; nu phe. Ephe gude iya phakota iya l'enyashi ono mgburugburu. Nchi bohujeeppo; ephe paru iya haa; g'o tugbua.

²⁶Nchi bōhushia; nwanyị ono kpōta onwiya je adaa gburugudugungu l'ōnu mgbo ụlo nwoke ono, nnajīuphu iya nō ono. Ọ dabyiru l'ēka ono gbiriri jeye nchi bōhu.

²⁷Nnajīuphu nwanyị ono bya etehu l'utsu; gūhaa ụzo gē ya lūfu lashia; nwanyị ono ọ tō lūdu ọkpobe alūlu ono dabyiwaru l'ōnulo ono; wūshi ēka l'ōnu-abata.

²⁸Ọ sū iya: “Gbēshi g'anyi la!” Ọ buri rīgbidii. O kwe bya apata iya tū-kobe l'eli nkapfū-igara iya; ọ buri iya ala unuphu.

²⁹Ọ larwua unuphu bya ewota mma gbubushia nwanyị ono, ọ tō lūdu ọkpobe alūlu ono lē nkwo lē nkwo. Kwakashia ụzo iri l'ēbo; chīta je ekeeru ndu Ízurelu l'ipfu l'ipfu.

³⁰Onyemonye hūmaru iya nū; nōdu asuje: “Egube iya ọwa bē ẹnya ta ahūmajekwaru l'alī Ízurelu; ọphu e te mejekwaru egube iya ọwa e shikpōo teke ndu Ízurelu shi l'alī Ijiputu lūfuta gbiriri byasū ntanū-a. Unu rīkwaa ya ọriri; unu achiaru iya idzu; pfua iphe, anyi e-me.”

Ikpe 20

Ndu Ízurelu akwakōbe etso ndu Benjaminu ọgu

¹Tōbudu iya bū; ndu Ízurelu l'ophu bya azafutakota e shi lē mkpukpu Danu jeye lē mkpukpu Biye-Sheba; mbū jeye l'alī Giladu. Ikpoto ọha ono bya edzukōbe g'onye lanū l'iphu Chipfu lē mkpukpu Mizupa.

²Ndu-ishi Ízurelu l'ipfu l'ipfu l'alī Ízurelu l'ophu bya edzukōta l'iphu ndu kē Chileke, dzukōberu nū ono. Iphe, ndu ojogu phē, gude ọkpa; bya apagbaaru ogu-echi dū bē bū unu ugbo unu labo l'unu ụkporo iri.

³Ndu Benjaminu bya anūma lē ndu Ízurelu bē jerwuwaru mkpukpu Mizupa. Tōbudu iya bū; ndu Ízurelu bya asū: “Unu kōkpeeduru anyi g'ējo-iphe ọwana shikpōo nwua.”

⁴No iya; onye Lívayi ono, bū iya bē alū nwanyị ono, e gburu ono bya akōahaa ya sū: “Mu lē nyee mu bē bahuru lē mkpukpu Gibiya, nō l'alī Benjaminu g'anyi je akwaa akwakwa.

⁵O be l'enyashi; unwoke ndu Gibiya byapfutashia mu; bya agbaa ụlo, mu nō mgburugburu. Epe nōdu eme g'ephe gbua mu. Ọ buri nyee mu bē epe guderu k'ehuka jepfu jasū ọ nwūhu.

⁶Tōbudu iya bū; mu pata nyee mu ono gbubushia; chīta iya wojechaa l'alī Ízurelu mgburugburu; kēle epe rwuru alī; bya emee ebyi l'alī Ízurelu.

⁷Nta-a; unubē ndu Ízurelu l'ophu; unu pfua g'ee-me iya.”

⁸No iya; ndu Ízurelu wulihukōta g'onye lanū; sū: “Ọ tō dukwa m'onye lanū l'ime anyi byaru a-la unuphu. Mbū l'ọ tō dudu m'onye byaru a-la ibe iya.

⁹Ọle nta-a bē iphe, anyi e-me ndu Gibiya ta adukwa abudu g'anyi tūa ido; egube ido ono meru bē bū g'anyi e-me phē.

10L'okpa-ipfu Ízurelu l'ophu bẹ e-wofuta umadzu iri l'ime ndu ophu du ukporo ise; a hota umadzu ukporo ise l'ime ndu ophu du unu labo l'ukporo iri; a bya ahota unu umadzu labo l'ukporo iri l'ime unu ukporo l'ise g'ephe buru ndu a-nodu evujeru ndu ojogu nri. Oo ya bukwanu ephe -jerwua mkpukpu Gibiya, no l'ali Benjaminu; ephe emee phe iphe, gbaru phe nu le k'ebyi ono, ephe meru l'ali Ízurelu ono."

11Oo ya bu; ndu Ízurelu l'ophu bya edzukobekota g'onye lanu g'ephe tsoo mkpukpu ono ogu.

12No iya; okpa-ipfu ndu Ízurelu bya ezia unwoke; ephe jegbabe ipfu Benjaminu su phe: “? Ebyi owana, e meru l'echilabo unu-a bukpoogunu?”

13Unu dufutaru anyi ndu iwashi ono nta-a; mbu ndu Gibiya ono g'anyi gbushia; g'anyi shi nno wofu ejo-iphe ono l'ali Ízurelu.” Ole ndu Benjaminu ta ngaduru nchi l'iphe ono, unwunna phe, bu ndu Ízurelu pfuru phe ono.

14O buru iphe, ndu Benjaminu meru bu l'ephe jeru edzukobe le mkpukpu Gibiya g'ephe tsoo ndu Ízurelu ogu.

15Ephe bya edzukobe ukporo unu nemadzu eto l'unu ise, bukota ndu pagbaa ogu-echi, bu ndu shikota le mkpukpu ke ndu Benjaminu; teme waa unu nemadzu l'umadzu ukporo iri l'ise, bu ndu e shi le mkpukpu Gibiya hota.

16L'ime ndu ojogu ono g'ephe ha be unu l'ukporo iri l'ise bu ndu a hotaru, emegbaa ekicha. Ephe bu ndu maru g'agba mgbeka l'ehu l'ehu; k'ophu bu l'ephe a-du ike gude mkpuma gbata akporu egbushi lanu; ophu ephe agbasweddu iya agbaswe.

17Ndu Ízurelu; a -gufukwa ndu Benjaminu; bya edzukobe unu unwoke ugbo unu labo l'unu ukporo iri, bu ndu pagbaa ogu-echi. G'ephe ha bukota ndu alwuje ogu.

Ndu Ízurelu etso ndu Benjaminu ogu

18Oo ya bu; ndu Ízurelu bya awu-lihu jeshia mkpukpu Betelu; je ajitaada Chileke; su: “? Bu ndu ole l'ime anyi be e-vuru uzo je etsoo ndu Benjaminu ogu?” Chipfu su phe: “Oo ndu Jiuda be e-vuru uzo je.”

19Tobudu iya bu; o be l'utsu iya; ndu Ízurelu wu-lihu je adoru kwaberu mkpukpu Gibiya.

20Ndu Ízurelu bya awufu jeshia etso ndu Benjaminu ogu. Ephe woru onwophe dozichaa g'ephe a-nodu tsoo phe ogu ono le mkpukpu Gibiya.

21Ndu Benjaminu bya eshi le mkpukpu Gibiya wufuta bya egbua ndu Ízurelu ukporo unu umadzu labo l'unu iri l'ise le mboku ono.

22Ole ndu Ízurelu be byaru eyeeru nwibe phe njima; bya edozichaa onwophe k'ogu l'eka ono, ephe shi nodugbaa le mboku k'ivuzo ono.

23No iya; ndu Ízurelu bya awufu je araa ekwa l'iphu Chipfu gbiriri jasu l'uzenyashi. Ephe jikwaapho Chipfu su iya: “? Bu g'anyi je etsobaa unwunna anyi, bu ndu Benjaminu ogu ozo to?” Chipfu su phe: “Unu jenu.”

²⁴Tɔbudu iya bụ; o be lẹ mbọku k'ẹbo; ndu Ízurelu wufutakwa bya g'ẹphe tsoo ndu Benjiaminu ọgu.

²⁵Lẹ mbọku k'ẹbo iya ono bẹ ndu Benjiaminu byaru eshikwaphọ lẹ Gibiya wufuta je etsoo ndu Ízurelu ọgu. Ẹphe gbua ndu Ízurelu ụkporo ụnu ụmadzu labọ l'unu ise, bụkota ndu pagbaa ọgu-echi.

²⁶Tɔbudu iya bụ; ndu Ízurelu l'ophu wufu jeshia Bẹtelu je anọdu kwaa ẹkwa l'iphu Chipfu. Ẹphe swikota ẹgu mbọku ono jasụ l'uzenyashi. Ẹphe bya egweeru Chipfu ngweja-akpo-ọku waa ngweja-ẹhu-guu.

²⁷Oo ya bụ; ndu Ízurelu bya ajita Chipfu; kele teke ono bẹ bụ l'ẹka ono bẹ okpoko ogbandzu Chileke shi nọdu.

²⁸O bụru Finehasu nwa Eleyaza; mbụ nwanwa Eronu bẹ bụ onye eleta iya ẹnya. Ẹphe jia Chipfu sụ iya: “? Bụ g'anyi je je etsoo ndu Benjiaminu, bụ ụnwunna anyi ọgu ọzo; tọ g'anyi te ejeshi?” Chipfu sụ phẹ: “Unu je; kele echele bẹ mu e-woru phẹ ye unu l'ẹka.”

Ndu Ízurelu alwụ ndu Benjiaminu

²⁹Tɔbudu iya bụ; ndu Ízurelu bya eye ndu nemadzu; ẹphe kpukọtaru ekpuru gbaa mkpukpu Gibiya mgburugburu.

³⁰Ndu Ízurelu bya awufu jepfushia ndu Benjiaminu ọgu lẹ mbọku k'ẹto ono. Ẹphe je edozichaa onwophe ẹgube ono, ẹphe emejehawa iya ono nọdu kwaberu ndu Gibiya.

³¹No iya; ndu Benjiaminu wufuta g'ẹphe bapfu ndu Ízurelu. Ndu Ízurelu defuta phẹ edefuta. Ẹphe shi lẹ mkpukpu phẹ ono wufuta. Ẹphe bya awata egbushi ndu Ízurelu ẹgube ono, ẹphe egbujehawaa phẹ ono; k'ophu bụ lẹ ndu Ízurelu, ẹphe gbushiru l'egu; mẹ lẹ gbororo ụzo, e shi eje Bẹtelu; mẹ ophu e shi eje Gibiya bẹ dụ ụkporo ụmadzu l'ụmadzu iri.

³²Tɔbudu iya bụ; ndu Benjiaminu nọdu epfu sụ: “Anyi egbushiakwaa phẹ ẹgube anyi gbushiru phẹ lẹ k'ivuzọ phọ!” Ndu Ízurelu nọdu epfu sụ: “Unu g'anyi kpọlaa azụ g'ẹphe wufuta-gbua lẹ mkpukpu; bya anọdukota lẹ gbororo.”

³³No iya; ndu Ízurelu l'ophu lufukota l'ẹka ẹphe nọ; je akwakachaa k'ọgu lẹ mkpukpu Belu-Tama. Ndu Ízurelu, bụ ndu ophu kpugbaaru ekpuru l'ẹgbudu shichaa l'ẹka ẹphe nọ zefuta l'uzo ẹnyanwu-arịba mkpukpu Gibiya.

³⁴Tɔbudu iya bụ; ụkporo ụnu nemadzu l'unu ụmadzu ise, a họtaru l'ime ndu Ízurelu l'ophu bya awufu jeshia etso ndu Gibiya ọgu. Ọgu ono kpohu ọku; k'ophu bụ lẹ ndu Benjiaminu ta amadụ lẹ teke ẹphe a-buru mkpurupyata bẹ rwuwaru nụ.

³⁵Chipfu gude ndu Ízurelu lwua ndu Benjiaminu mbọku ono. Ndu Ízurelu gbua ndu Benjiaminu ono ụkporo ụnu nemadzu ẹto l'unu labọ l'ụkporo ụmadzu iri l'ise, bụ ndu pagbaa ọgu-echi.

³⁶Oo ya bu; ndu Benjaminu huma l'a lwu-kpewaru phe. Ndu Izurelu paru ndu Benjaminu haa laphushia azu; kele epe kporu obu ye le ndu k'ono, epe yeru epe kwakaa l'egbudu le mgboru mkpukpu Gibiya ono.

³⁷No iya; ndu ono, domishiru onwophe l'egbudu ono gbaepho egwegwa bapfu ndu Gibiya; bya agbakashihu gude ogu-echi gbushikota ndu bu le mkpukpu ono l'ophu.

³⁸Ndu Izurelu be epe le ndu ono, domishiru onwophe l'egbudu ono chihawaru iya achichi l'epe e-me g'enwuru-oku kpufu le mkpukpu ono.

³⁹Oo ya bu; teke ono ndu Izurelu ghakoberu tsu-phuahaazulu l'ogu ono; ndu Benjaminu wata egbushi ndu Izurelu; gbua phe ukporo umadzu l'umadzu iri pho; be ndu Benjaminu wataru epufu asuje: "Anyi alwakwaa phe egube anyi lwuru phe le mboku k'ivuzo pho!"

⁴⁰Enwuru oku kpufuepho le mkpukpu ono; ndu Benjaminu bya aghaa enya huma le mkpukpu phe ono l'ophu be enwuru-oku, shi iya nu akpu ke tututu ala l'akpaminigwe.

⁴¹Tobudu iya bu; ndu Izurelu ghakobe wupyaabe phe. Ndu-agugu rwuta ndu Benjaminu; kele epe mawaru le teke epe a-buru mkpurupyata be rwuwaru nu.

⁴²Oo ya bu; epe chie okpa l'oso gbalaaharu ndu Izurelu; agba ala l'uzo echiogu. Ole epe ta awaduru l'ogu ono. Ndu Izurelu ndu ophu shi le mkpukpu ono awufuta be kwabutaru phe woru phe gbushia l'eka ono.

⁴³Epe gbaa ndu Benjaminu mgburugburu; chia phe je agbabua phe iphu; zo phe pyakapyaka gbiriri jasulu l'uzo enyanwu-awawa mkpukpu Gibiya.

⁴⁴Ndu Benjaminu, e gburu egbu be du ukporo unu nemadzu labo l'unu ise, bukota ndu ojogu, ike du l'ogu.

⁴⁵Epe ghakobe gbaru lashia l'echiogu l'oke mkpuma Rimonu. Ndu Izurelu gbutsukwaapho unu umadzu iri l'ebo l'ukporo umadzu iri le gbororo. Epe chia ndu Benjaminu kpabekpabe jasulu le mkpukpu Gidomu; bya egbutsushifua unu umadzu ise ozo.

⁴⁶Mboku ono be ndu Benjaminu, e gburu egbu, bu iya bu ndu pagbaa ogu-echi be du ukporo unu nemadzu eto l'unu umadzu labo l'ukporo umadzu iri. G'epe hakota be bugbaa ndu ike du l'ogu.

⁴⁷Ole unu nemadzu l'ukporo umadzu iri be duru ike nahu gbarwua echiogu oke mkpuma, Rimonu. Epe nokota l'eka ono onwa eno mgburugburu.

⁴⁸No iya; ndu Izurelu bya alaphu azu; bapfu ndu Benjaminu; je egude ogu-echi tuko ndu bu le mkpukpu ono gbushikota; mbu gbukota iphe-edobe; mekpoo iphemiphe, epe humaru. Iphe, bukpo mkpukpu, epe jepfuru be epe tushichaarulu oku.

Ikpe 21

Unwanyi, ndu Benjaminu a-luru

- ¹Ndu Ízurelu bẹ ribuhawaru angu lẹ mkpukpu Mizupa sụ l'ọ tọ dudu m'onye lanu l'ime phe byaru ekuta nwada iya kee onye Benjiaminu.
- ²Oo ya bu; ndu Ízurelu ono zafu je akuru lẹ Betelu; nodu l'iphu Chileke kwaa ekwa kwashia ya ike; gbiriri jasụ l'uzenyashi.
- ³Ephe nodu ara sụ: “Oowaa! Gube Chipfu, bu Chileke ke ndu Ízurelu; ? bu gunu kparu iphe, egube iphe owana dapfutaru ndu Ízurelu? ? Bu gunu kparu iphe, ipfu lanu a-nodu achihu achihu lẹ Ízurelu ntanu?”
- ⁴O beepho l'onmewa utsu lẹ nchitabohu iya; ephe woru oru-ngweja kpua l'eka ono; bya egwee ngweja-akpo-oku; waa ngweja-ehuguu l'eli iya.
- ⁵No iya; ndu Ízurelu bya ajia sụ: “? Bu ndu ole l'ipfu ndu Ízurelu l'opfu bẹ te etsodu bya g'anyi dzukoo l'iphu Chipfu l'eka-a?” Noo kele ephe ribuhawaru oke nte sụ l'onye ta abyaduru g'ephe dzukobe l'iphu Chipfu lẹ mkpukpu Mizupa bẹ e-gbu egbugbu.
- ⁶Tobudu iya bu; aphụ rwua ndu Ízurelu l'ehu l'opfu unwunna phe ono, bu ndu Benjiaminu. Ephe sụ: “Nta-a bẹ ipfu lanu chihuru lẹ Ízurelu.”
- ⁷Sụ: “? Denukpoo g'anyi e-me lushiaru ndu ophu phoduru nu nwanyi; eshinu anyi gudewaa epha Chipfu ribua nte l'ọ tọ dudu nwada anyi, anyi byaru eke phe-a.”
- ⁸Oo ya bu ephe bya ajia sụ: “? Bunu-a ndu ole l'ipfu ndu Ízurelu bẹ ta abyaduru g'anyi dzukobe l'iphu Chipfu lẹ mkpukpu Mizupa?” No iya; ephe bya amaru lẹ ndu mkpukpu Jiabeshi-Giladu bẹ ta adudu m'onye lanu, byaru nu;
- ⁹noo kele ephe byaru edzua onwophe maru l'ọ tọ dudu ndu Jiabeshi-Giladu m'onye lanu no l'eka ono.
- ¹⁰Tobudu iya bu; ndu ono, dzukoberu l'eka ono bya eye ukporo unu ndu ojogu l'unu ndu ojogu iri g'ephe je egude ogu-echi gbushikota ndu bu lẹ Jiabeshi-Giladu; je akpachaa l'unwanyi; me unwegirima.
- ¹¹Ephe sụ phe: “Iphe, unu ee-me baa: Unu gbushia iphe, bukpo unwoke; me unwanyi, nwoke jepfujewaru.”
- ¹²L'ime ndu ono, bu lẹ Jiabeshi-Giladu ono bẹ bu unu unwumboko bẹ ephe humaru, bu ndu nwoke teke ejepfuswee. Ephe duta phe jeshia l'odu phe lẹ mkpukpu Shilo l'ali Kénanu.
- ¹³Tobudu iya bu; ndu ono, dzukoberu nu ono l'opfu bya ezia ozi g'e je ezia ndu Benjiaminu ono, no l'oke mkpuma Rimonu l'ephe l'ephe bẹ duwaa lẹ ree.
- ¹⁴Oo ya bu; ndu Benjiaminu lwatashia lẹ teke ono; a bya eduru unwumboko ono, a haru ephe nodu ndu, bu ndu shi Jiabeshi-Giladu pho nu phe g'ephe luru; obenu l'unwumboko ono ta asudu phe.
- ¹⁵No iya; aphụ ndu Benjiaminu bya erwua phe l'ehu; kele Chipfu yewaru uwara l'ipfu ndu Ízurelu.

16Tɔbudu iya bụ; ndu bụ ọgerenya ị ọdu ono, dzukọberu nụ ono bya asụ: “? Denu g'anyi e-me k'unwanyi, ndu ọphu phoduru nụ a-luru; g'a tukowaru unwanyi, nọ l'ali ndu Benjiaminu gbushigbua?”

17Ephe sụ: “O tọ dukwa g'ee-me gẹ ndu Benjiaminu, phoduru nụ te enweru okiphe; k'ọphu bukwanu l'ipfu lanu ta a-chihudu ị Ịzurelu.”

18Sụ: “Ole anyi te e-kekwanu pẹ unwada anyi; eshinu anyibe ndu Ịzurelu ribuwaru nte sụ: ‘Onye keru ndu Benjiaminu nwada iya; g'onye ọbu bukwaru onye a turu onu!’ “

19Ephe sụ: “Lenu! Anyi nwekwaru ọbo-iphe, anyi abọjeru Chipfu l'aphagapha ị Shilo, nọ l'uzo isheli mkpukpu Betelu; mbụ l'uzo enyanwu-awawa uzo, shiru Betelu jeshia mkpukpu Shẹkemu; waa l'uzo ndohali mkpukpu Lebona.”

20Oo ya bụ; ephe pfiaru ndu Benjiaminu sụ pẹ: “Unu tugbua je edomishia onwunu l'opfu-vayinu;

21kwagebekpọepho. Teke unwumboko Shilo wufutaerupho bya ete ebvu; g'onyenonu gbafutachaa l'opfu-vayinu ono je egude nwamgboko lanu, ọo-luru; gude gbaru lashia ali ndu Benjiaminu.

22Teke ndu nna unwumboko ono; ọzoo unwune pẹ unwoke jeru epfupfu bẹ anyi asụ pẹ g'ephe meeruro anyi ree; yetaru unu ẹka; kele ọ tọ dudu nwoke, anyi gbuphoduru nwanyi, ọo-luru ị teke anyi lwuru ọgu ono. L'iswi dukwa pẹ mma; eshinu ọ tọ budu ephebedua kutaru unwada pẹ kee unu.”

23Oo ya bụ; ndu Benjiaminu mee nno. O be teke unwumboko ono ete ebvu; nwoke nonu gbafutachaa je azu-gude nwamgboko lanu; pata iya gbalaa g'o je a buru nyee ya. No iya; ephe lashia l'oke ali pẹ; je eworu mkpukpu ono kpukwa-zia; buru.

24Tɔbudu iya bụ; ndu Ịzurelu wukahụ l'ẹka ono teke ono; onyenonu lashia unuphu l'ipfu nkiya; mbụ onyenonu shi l'ẹka ono lashia l'oke ali nkiya.

25Teke ono bẹ ndu Ịzurelu eshidu nweru onye bụ eze pẹ; onyemonye shi anọduje eme g'ọ du iya.

Rutu

Rutu 1

Nawomi yee Rutu

¹Teke ndu-ikpe shi abujekwaduru ndu-ishi ndu Ízurelu be okpa-nri byaru l'alì ono. O duru nwoke lanu, shi le mkpukpu Betulehemu, no l'alì Jiuda; yee nyee ya; me unwu iya unwoke ephenebo gbeshi lashia alì Mówabu.

²Epha nwoke ono bu Elimeleku; epha nyee ya buru Nawomi. Epha unwoke labo, o nwutaru buru Mahulonon waa Kiliyonu. Epe bu ndu mkpukpu Betulehemu, no le Ifurata, l'alì Jiuda. Epe gweta lashia alì Mówabu je eburu.

³Epe bunyaa l'eka ono; Elimeleku, bu iya bu ji Nawomi nwuhu; gbado nwanyi ono yee unwu iya unwoke labo pho.

⁴Epe bya aluchaa unwanyi Mówabu. Unyomu phe ono be onye lanu aza Opa; onye ophuu buru Rutu. Epe buepho l'eka ono iphe, rwuru apha iri;

⁵Mahulonon yee Kiliyonu bya anwushihukotakwapho. Oo ya bu; ephenebo gbado Nawomi egube ono, ji iya gbadokwaru iya pho ono.

⁶A nonyaa o numa le Chipfu byawaru agbaaru ndibe iya mkpu; mee g'ephe nweru nri eriri; Nawomi; yee unyomu unwu iya ephenebo jikobe shi l'eka ono lashia ibe phe.

⁷Noo ya; yee unyomu unwu iya ono ephenebo tuko shi l'alì ono, epe shi buru ono gbeshi; kwaseru uzo, shiru lashia alì Jiuda.

⁸Nawomi bya epfuaru unyomu unwu iya ono ephenebo su: “Unu tugbukwaa la azu lapfuchaa ne unu l'ulo phe. Ge Chipfu mekwaaru unu ree g'unu meru iya ndu ophu nwuhuwaru nu-a; waa mbedua.

⁹Mbu; ge Chipfu mekwaa ge meji nmapfuru unu l'ibe onye unu a-lucharu l'ehu l'ehu.” O pfuebe nno o tsutsuchaa phe onu; epe tuko bungee ekwa; raa ntumatu;

¹⁰su iya: “Waawaa-o! Anyi a-tuko swiru lapfu ndibe unu.”

¹¹Ole Nawomi suru phe: “Unwada mu; ophu g'unu laphu azu. ? Bu k'ishi gunu be unu e-gude tsoru mu? ? Bu ge mu a-nwutakwadu unwu; k'ophu aa-su l'oo g'ephe aluru unu?

¹²Unu laphu azu unwada mu; kele mu kahunukaakwaru k'alù ji ozo; ole o - bukpoorunu l'oo ge mu su le mu elekwadu enya k'alù ji; mbu; mu -luru ji l'enyashi-a; bya anwushia unwegirima unwoke;

¹³? unu a-nodukpoephe kwaberu phe g'ephe vutaada too? Mbu-a; unu a-ha eje aluru ji; nodukpoephe kwaberu phe too? Waawaa; unwada mu; kele mbedua be o kakwa aburu aphu eme l'unubedua; noo kele Chipfu be tufuwaru eka byia mu l'ehu.”

¹⁴O pfuchaa nno; epe tuko waa ekwa ozo. No iya; Opa kwe bya etsutsua ne ji iya ono onu; o buru iya ala azu. Obenu l'onye ophu bu Rutu turu Nawomi swiswi-a.

- ¹⁵Nawomi sụ iya: “Lenu; nyee nwune ji ngu alapfuakwa ndibe phẹ; waa agwa phẹ. Tsokwaru iya la azu.”
- ¹⁶Rutu sụ iya: “Ta asuhe mu ge mu haa ngu; ozoo ge mu laphu azu; l’o kwa eka iije be mu e-je. O buru eka i kwaru be mu a-kwakwapho. Ndibe unu a-buru ndibe nkemu; Chileke ngu abukwarupho Chileke nkemu.
- ¹⁷Eka i nwuhuru be mu a-nwuhu. O bukwarupho eka e liru ngu be ee-li mu. Ge Chileke mekwaa mu ophu, ka njo m’o budu anwuhu bu iphe, e-kekaha mu le ngu.”
- ¹⁸Nawomi maerupho le Rutu pfuwaru iya obu iya; o paru iya haa.
- ¹⁹Tobudu iya bu; unwanyi labo ono kpochibe iya; jee gbiriri jasụ epe rwua Betulehemu. Epe bahuepho Betulehemu; mkpukpu ono l’opfu swongahu l’opfu ehu phe. Unwanyi nodu ebu mkpu asuje: “? Mbụ; bu Nawomi du egube-a to?”
- ²⁰O sụ phe: “Ndu mu; unu te ekuhekwa mu Nawomi. Unu kujechia mu ‘Mara’; kele Okalibe-kangokotaru-nu mewaru; ndzu mu buru nwa-otso-ilu.
- ²¹Teke mu eje ejeje be mu vu l’ishi paru l’eka. Ole Chipfu mewaru ge mu gbaru eka lwatashia. ? Bu k’ishi gunu be unu a-nodu eku mu Nawomi l’eka Chipfu nwaru mu chiipfu? Mbụ le Okalibe-kangokotaru-nu meakwaru iphe-ehuka dapfuta mu.”
- ²²Oo ya bu; Nawomi yee nyee nwa iya, bu Rutu, bu onye Mowabu tuko swiru lwarwuta Betulehemu le g’aabahụ le teke akpataje balị.

Rutu 2

Rutu eje akpa l’opfu Bówazu

- ¹O nweru nwoke lanu, yee ji Nawomi bu abubu. Nwoke ono bu onye unuphu Elimeloku phe. O bu onye nweru iphe shii. Epha iya bu Bówazu.
- ²O be ujiku lanu; Rutu, bu iya bu nwanyi, shi Mowabu ono sụ Nawomi: “Jiko ge mu jenu l’okabyi ndiphe je amaru; ? o duru onye mu a-tuba l’anya, e-kwe ge mu je akpa l’okabyi iya.” Nawomi sụ iya: “Jenu nwada mu.”
- ³Oo ya bu; o tugbua je akpaahaa akpa; etsokpoe pho ndu akpata iphe l’okabyi azu l’azu akpa mkpakwa iya. Iphe emeje iphe; o buerupho l’opfu Bówazu, bu onye shi l’anya unuphu Elimeloku phe be o bahuru obu.
- ⁴A bya ele anya; Bówazu shiwaa le Betulehemu bya. O bya ekele phe su: “Ge Chipfu swikwaru unu-o!” Epe sụ iya: “Ge Chipfu kebekwa ngu l’oma.”
- ⁵Tobudu iya bu; Bówazu bya ajia onye-ishi ndu akparu iya iphe l’egu ono sụ iya: “? Bu nwamgboko ibe onye bu owa-a?”
- ⁶Onye-ishi ndu akpata iphe l’egu ono sụ iya: “O kwa nwamgboko, shi Mowabu, tso Nawomi lwa.

- ⁷Ọ sụkwaru: Jiko g'a hanaa ya g'o tsoru ndu ebu balị l'azu; kpa mkpakwa iya ophu nashihuru l'upfu iya ophu, e keshiru ekeshi. O shiepho l'utsu jeta ozi byasu nta; gbahaepho ugbo lanu be o je atuta unme nwanshii l'ime Mkpù.”
- ⁸No iya; Bówazu su Rutu: “Ngaberu mu nchi jiko nwada mu. Ba adukwa teke ii-je akpa l'egu k'onye ozo. Ta atugbubaekwa l'eka-a. Ge gu l'unwumboko, ejeru mu ozi tukokwa nodu l'eka-a.
- ⁹Leta enya l'eka-a, ephe akpata iphe l'okabyi-a. Tsojekpoe phe pho l'azu. Mu pfuakwaru unwokorobya ono su g'o bo dukwa onye a-cho ngu opfu. Teke mini gutaru ngu; jeje anguta mini, unwoke ono kutaru ye l'itemini pho.”
- ¹⁰Bówazu pfuchaa nno; Rutu gbushi ikpere; bya ephozeta ishi l'alị kele iya ekele su: “? Bu gunu meru iphe, mu gude du-beru ngu l'obu egube-a; mbu ke gi nyata mube onye ohozo?”
- ¹¹Bówazu su iya: “A kokotaakwaru mu iphemiphe, i mekotaru ne ji ngu ono; k'eshi teke ono, ji ngu nwuhuru; mekwapho gi gude haa nna ngu; waa ne ngu; me ali eka a nwuru ngu anwunwu ono bya ge gu le ndu i ti mahaada buru.
- ¹²Ge Chipfu pfukwaa ngu ugwo iphe, i meru ono. Ge Chipfu, bu Chileke ke ndu Izurelu, bu iya bu onye ono, i gbatataru l'ime iya bya ezeru ndzu ono; pfukwaa ngu ugwo iya mpfu-ngo le k'oma.”
- ¹³Ọ su iya: “Nnajiuphu mu; jiko ge mu dujenu ngu l'obu tekenteke ge mu du ngu iya-a; kele i gudewaa opfu oma ngu dua onye-ozu ngu nwanyi obu; l'ebe abu le mu dukpoo nu g'onye lanu l'unwumboko, ejeru ngu ozi.”
- ¹⁴Ọ gbabeepho l'eri nri; Bówazu su iya: “Bya anodu l'eka-a taa buredi; gi tsutaje iya le mee-veniga; taa.” Oo ya bu; o bya ano-kubeepho ndu ono, egbu balị ono; Bówazu woru balị, a huru ahuhu nu iya. O taa ya tajia epho; taphodo ataphodo.
- ¹⁵Ọ gbeshiepho akpa ukpa balị ozo; Bówazu su ndu-ozu iya g'ephe hakwaa ya g'o kpajechaa ukpa iya kpa l'opfu, e swekoberu eswekobe; g'o to dukwa onye e-je iya abaru mba.
- ¹⁶Iphe, unu a-gbe mejechia bu g'unu lekebeje enya hata ophu unu sweru esweswe wushi k'opfu oo-tutuje iya. Unu ta abakwaru iya mba.
- ¹⁷No iya; Rutu kpaepho ukpa balị l'opfu ono jasụ l'uzenyashi. O bya echishia ophu, o kpataru ono; o buru iphe, du ge nkweka labo be balị ono jiru.
- ¹⁸O vuta iya lashia unuphu. Ne ji iya ono huma g'opfu o kpataru ha. Rutu bya ewofutafua nri, o riphodoru eriphodo l'eka ono; woru nu iya.
- ¹⁹Ne ji iya ono jia ya su: “? Bu awe be i jeru akpa ke ntanu? ? Bu awe be i jeru iya? G'onye ono, nyataru ngu nu ono bukwaru onye a goru onu-oma nu!” Oo ya bu; Rutu bya epfuaru ne ji iya ono onye o jeru akpa l'egu iya. O su iya: “Epha onye mu jeru l'egu iya ntanu bukwa Bówazu.”

²⁰Nawomi sù nyee nwa iya ono: “Gẹ Chipfu kebekwa iya l'oma; mbù onye taa ahajèdu egoshi ndu nò ndzù mē ndu nwùhuru anwùhu lẹ ya yeru phẹ obu.” Ọ sùkwa iya phọ: “Nwoke ono bẹ anyi l'iya bukwa okpobe abubu; mbù l'oo onye lanu lẹ ndu o gbaru g'ephe leta anyi enya.”

²¹No iya; Rutu, bụ nwanyi Mówabu ono sù iya: “L'ophu kachakpoo nù bukwa l'ọ sùru gẹ mu byajekpoeppo bya etsoru ndu-ozì iya jasù teke ee-gbuẹbe balì nkiya.”

²²Nawomi sù Rutu; mbù nyee nwa iya ono: “Ọ dukwa ree nwada mu; g'i tsojeru unwumboko, ejeru iya ozi; kele i -jee ẹka ozo bẹ aa-chokwa ngu opfu.”

²³Oo ya bụ; Rutu tsoahaa unwumboko, ejeru Bówazu ozi; akpajekpoeppo ukpa witi; waa balì jeye teke e bueberu iya. No iya; Rutu yee ne ji iya ono tukokpoeppo buru g'ephe bu.

Rutu 3

Rutu yele Bówazu l'ẹka eechije balì

¹O be ujiku lanu; Nawomi, bụ ne ji Rutu sù iya: “Ada mu; ? tọ dudu ree gẹ mu chotaru ngu unuphu ẹka aa-nodu eleta ngu enya ree; mbù ẹka ẹhu a-du ngu guu?”

²Bówazu; mbù onye ono, gù l'unwumboko, ejeru iya ozi shi atukoje nodu ono bẹ bukwa okpobe abubu anyi. L'enyashi ntanu-a bẹ oo-nodukwa aphucha balì l'ẹka eechije balì ono.

³Wuchachaa ẹhu ree; nyia manù, eshi mkpo; chita uwe ngu ophu kachaa ree yee. I mechaa nno; tugbua jeshia l'ẹka ono, eechije balì ono; ole oo g'i tii mekwa g'ọ maru l'i nọ l'ẹka ono jasuru oo-righee nri; ngua iphe, angungu.

⁴Teke o zẹ-zetaerupho azee; tonwube enya maru ẹka o zẹ; tugbua je aphu-lia ya iphe, o phukputeru onwiya l'okpa; zẹ-kube iya. Oo-karu ngu-a iphe, ii-me.”

⁵Rutu sù iya: “Iphemiphe, i sùru gẹ mu mee bẹ mu e-mekota.”

⁶Oo ya bụ; o tugbua jeshia l'ẹka ono, eechije balì ono je emekota iphemiphe ono, ne ji iya sùru iya g'o mee ono.

⁷No iya; Bówazu richaa nri; ngua iphe angungu; ẹhu tsoahaa ya utso; o je aze l'ishi ẹka a kuberu balì ono. Rutu pyakpoeppo mpya je aphufu iya iphe l'okpa bya aze-zeta azee.

⁸O beppo l'echi-abali; o lwu-bilihu; chizia nchizi; bya amaru l'ọ duru nwanyi, zẹ l'uzo okpa iya.

⁹O sù: “? Bù onye bẹ i bụ?” Rutu sù: “Ọ kwa mbedua Rutu; onye-ozì ngu. Hepyabenu mu; kele oo ngu bụ abubu anyi, gbaru g'o leta anyi enya.”

¹⁰Bówazu sù iya: “Gẹ Chipfu kebekwa ngu l'oma; nwada mu. Ree ophu i meru l'ikpazu-a kakwa ophu i mehawaru lẹ mbù pho shii; kele i ti kpaduru ishi g'i gbaru tsoru unwokoro; m'ephe nweru iphe-o; m'ọ bụ l'ephe daru ukpa-o.

¹¹Sụ-a nwada mu; ba tsushi ebvu; mu e-mekotaru ngu iphemiphe, i rworu; kele onyemonye, no le mkpukpu-a be makotaru li bu nwanyi, umere iya dushi ree ike.

¹²O bu eviya l'abubu mu l'unu du ntse shii; ole o nweru onye ozo, abubu unu liya kabaa nkemu ntse.

¹³Notu l'eka-a l'enyashi-a. Teke o beru l'utsu; o -buru l'oo-meru ngu iphe, gbaru g'abubu nemadzu meeru iya be o dukwa ree g'o mee ya. Teke o bu l'o to meduru ngu iphe, gbaru g'abubu nemadzu meeru iya be eshinu Chipfu no ndzu g'o no iya-a; be mu e-meru ngu-a iphe, g'onye bu abubu nemadzu emejeru iya. Zero l'eka jasụ ge nchi bōhu.”

¹⁴Oo ya bu; Rutu ze l'uzo okpa iya jasụ l'utsu. O gbalihu l'onma-ewa-utsu l'ahuma onye ama epha iya tugbushia. Bówazu sụ iya: “Be mekwa g'a maru le nwanyi byaru l'ekikiya-a, eechishije balị-a.”

¹⁵O sukwa iya pho: “Tofuta ukpo, i gude phukpute onwongu ono; tosa ya atosa.” O bya eworu iya tosa; Bówazu bya egude iphe gbata balị ono ugbo ishii yeru iya l'ekwa ono; woru iya bo iya; o vuru lasha.

¹⁶Tobudu iya bu; Rutu lwafutaepho ne ji iya, bu Nawomi; o jia ya su: “? O nwuru inwa; nwada mu?” O tuko iphe-oma, nwoke ono meru iya dokotaru iya;

¹⁷sụ iya: “O gude iphe gbata balị ono ugbo ishii nu mu; bya asu ge mu ta agbashiru eka lapfu ne ji mu.”

¹⁸Nawomi sụ iya: “Notukpoepho doo nwada mu; jasuru teke ii-maru iphe, e-me nu; kele nwoke ono ta abyakwa atuta unme ntanu-a jasụ teke o humaru iya ishi.”

Rutu 4

Bówazu alu Rutu

¹Noo ya; Bówazu tugbua je notu l'onu-abata mkpukpu. A bya ele enya; onye k'ono, ephe liya ka abubu ono, Bówazu pfuru opfu iya pho notu aghatawa. O kua ya oku sụ iya g'o byakpodapho bya notu ano. O lapfu azu je ano-zeta ano.

²Bówazu bya ekua ndu bu ogerenya iri le mkpukpu ono sụ phe: “Unu byakwa bya ano ano l'eka-a.” Ephe kwe bya ano-zeta.

³O bya asu abubu phe: “Nawomi, bu onye ono shi l'ali Mówabu lwa ono be abyaakwaa ere ali nwanna anyi, bu Elimeloku.

⁴Oo ya bu; mu ria sụ le mu e-pfuru ngu gi notu l'ataphu ndu-a, no l'eka-a zu ya; waa l'iphu ndu bu ogerenya anyi-a. O -buru l'ii-gbata iya; gbatawa iya. Teke o bu li tii gbatadu iya; karu mu ge mu maru. Kele o to nwedu onye ozo, o rwuberu l'agbata iya; agufu gubedua. A -kpo ghata gubedua; bu mu be o rwuberu.” Nwoke ono sụ: “Mu a-gbata iya-a.”

⁵Bówazu sù iya: “Ì -zùwa Nawomi yèe Rutu, bù nwanyì Mówabu alì ono bè ì-lùpyabekwapho nyee nwoke ono, nwùhuwaru nù ono; k'òphu ọo-tọgbo akọ mee g'èpha onye ono, nwùhuwarunu ono te echihu l'alì iya ono.”

⁶Onye abùbu phẹ ono sù: “Ọ -dùkwa nno bè mu taa gbatakwa iya; kele mu e-shi nno woru okiphe mu tsebe l'ọnu ẹta. Gbatachiwaru mu iya rọ; kele mu ta agbatakọtadu iya.”

⁷Lẹ teke k'ichee lẹ Ízùrẹlu bè ọobujeru; ọ -bùru l'aagbata iphe agbata; ọzoo l'aagbanweta iya agbanweta bè onye lanù eyetajẹ akpọkpa iya nù onye ọphuu. Ọ bùru ẹgube ono bè eeshije goshi l'iphe bè e mewaru; o keru ekeru lẹ Ízùrẹlu.

⁸Ọo ya bù; abùbu phẹ ono sù Bówazu: “Zúnáa ya gùbedua.” Ọ bya eyefuta akpọkpa iya.

⁹Bówazu bya asù ndu bù ọgerenya; mẹ ndu ono l'ophu: “Unu bukwa ndu ekebe lẹ ntanù-a bè Nawomi rekọtawaru mu iphemiphe, bù kẹ Elimeleku; mẹ kẹ Kiliyọnu; waa kẹ Mahulun.

¹⁰Tẹme mu lùpyabeakwapho Rutu, bù nwanyì Mówabu; g'ọ bùru nyee mu; mbù onye ono, ìi iya, bù Mahulun nwùhuwaru ono; k'òphu ọo-tọgbo akọ mee g'èpha onye ono, nwùhuwarunu ono te echihu l'alì iya. Mbù g'èpha iya ta achihu l'ọkpoku ibe phẹ; ọphu ọ chìhu lẹ mkpukpu phẹ. Ntanù-a bè unu tükowaru bùru ndu ekebe mu.”

¹¹Tọbudu iya bù; ndu bù ọgerenya ono; mẹ iphe, bù ndu nọkota l'ọnu-abata ono zùà mgbede sù: “Anyi bukota ndu ekebe. Gẹ Chipfu mekwaa nwanyì ono, alwa ibe ngu ono g'ọ dù gẹ Rechiẹlu waa Lii; bù phẹ bù ndu nwùshiru ipfu ndu Ízùrẹlu. Gẹ gùbedua nwekwarù iphe l'alì Ifurata; bukwaru onye a maru amaru lẹ Bètulehemu.

¹²Gẹ Chipfu shikwa l'unwu, oo-me gẹ nwata nwanyì ono nwùshiaru ngu mee g'ọnulo ngu dù gẹ kẹ Pérezu, bù onye ono Tema yeru Jiuda.”

Eri Dévidi

¹³Ọo ya bù; Bówazu duta Rutu luru. Ọ bya ejepfu iya; Chipfu mee ya; ọ tsùta ime; nwà nwa nwoke.

¹⁴Unwanyì tükọ epfuru Nawomi sù: “G'ajaja bukwaru kẹ Chipfu; mbù onye ono meru g'i nweru abùbu, l'e-leta ngu ẹnya ntanù-a. G'èpha iya tükokwa Ízùrẹlu ngakọta.

¹⁵Ọ bù iya e-me g'i tsefu ẹpa; bya abùru iya e-le ngu nka. Noo kele ọo nyee nwa ngu ono, yeru ngu obu ono; mbù onye ono, ka ngu ree eme l'unwu-nwa-nwoke ẹsaa ono bè nwùru nwata ọbu.”

¹⁶Tọbudu iya bù; Nawomi bya ekuta nwata ono heru l'ùtapfu. Ọ bùwaru iya rọ ehe iya.

¹⁷Unwanyì obutobu iya pfua sù: “Nawomi bè a nwùtawaru nwa nwoke!” Ẹphe gùà ya Óbèdu. Óbèdu bù nna Jiesi; Jiesi bùru nna Dévidi.

¹⁸Waa oshilọkpa Pérezu baa: Pérezu bù nna Hẹzuronu.

¹⁹Hezuronu b̄uru nna Ramu. Ramu b̄uru nna Amínadabu.

²⁰Amínadabu b̄uru nna Náshonu. Náshonu b̄uru nna Sálumonu.

²¹Sálumonu b̄uru nna Bówazu. Bówazu b̄uru nna Óbèdu.

²²Óbèdu b̄uru nna Jiesi. Jiesi b̄uru nna Dévidi.

1 Sámeḷu

1 Sámeḷu 1

Hana yẹe Penina

¹Ọ duru nwoke lanu, shi le mkpukpu Ramatayimu-Zofimu; mbu l'ali ubvu ubvu ndu Ifuremu. Epha nwoke ono bu Elukana; nwa Jierohamu; mbu nwanwa Elihu. Elihu ono bu nwa ke Tohu; Tohu buru nwa ke Zufu, bu onye Ifuremu.

²Elukana ono be luru unwanyi labo; onye lanu aza Hana; onye ophuu nodu aza Penina. Penina be nwushiru unwegirima; obenu le Hana ta adudu nwa, o nwutaru.

³Aphagapha be nwoke ono eshije le mkpukpu iya jeshia mkpukpu Shilo je abaru Chipfu, bu Okalibe-Kakota-Ike aja; gweru ngweja nu iya. O buru unwu Elayi, epha phe bu Hofini waa Finehasu be bu ndu-uke ke Chipfu l'eka ono.

⁴Ọ nodu abujeru teke Elukana gweru ngweja ono; o woru oke anu hee nyee ya, bu Penina; bya ahechaa unwu iya unwoke; me unwu iya unwanyi.

⁵Ole Hana be onmeje anu anmee; kele o yeru iya obu; egudekporo le Chipfu mechiru iya ekpa nwa; ophu ootsudu ime.

⁶Ọ buru kele Chipfu mechiru iya ekpa nwa; ophu o tsudu ime ono kpataru iphe, nyeji iya anoduje aduka iya l'onya ono gude akpatsushi iya aphu.

⁷Ọ buru nno bu g'onoduje anwu aphagapha. O nodu abujeru ge Hana jekporu l'ezeulo Chipfu; nyee ji iya ono akpatsu iya aphu; k'ophu bu l'okwaje ekwa; jika eri nri.

⁸Elukana, bu ji iya abya asu iya: "Hana; ? bu gunu be iikwaru ekwa ke te eri nri? ? Bu gunu be aphu jiru ngu obu? Mu ta akadụ ngu unwu iri aburu iphe to?"

⁹Tobudu iya bu; Hana kwolihu g'ephe righechaaru nri; bya angua iphe-angungu le Shilo. Teke onoya be Elayi, bu onye uke Chileke no anoo l'oshi, du l'onu eze-ulo Chipfu.

¹⁰Hana gude obu aphu raa ekwa; pfuru nu Chipfu.

¹¹O ribua nte su: "Gube Chipfu, bu Okalibe-kakota-ike; o -buru l'ii-le enya l'aphu, byaru mube nwozi ngu; mbu nyata mu; ophu i ti zohaduru mube nwozi ngu; i -mewaa mu nwuta nwa nwoke be mu e-woekwaru iya pho nu gube Chipfu g'o buru nkengu jasụ g'oo-no-bekporu ndu. Ophu rizo abyadu erwu iya l'ishi."

¹²Tobudu iya bu: o nodu epfu anu Chipfu ono; Elayi nodu elekpoe ya pho enya l'onu.

¹³Hana gudekpoe pho obu iya epfu anu Chileke; o buru ogbogboromonu be eme iya ukporo; ole a ta numakwanuru iphe, oopfu. Elayi nodu arị l'oo mee atsu iya.

¹⁴Ọ bya asu iya " ? Bu teke ole be ii-ngubekporu mee? Panuru mee haa!"

¹⁵Hana su iya: "O to dukwa nno; nnajiuphu mu. Mu bukwa nwanyi, aphu jiru obu. Mu ta angukwaru mee; ozoo iphe ozo, atsu atsutsu. O kwa g'o haru mu l'obu be mu shi akoshiru Chipfu.

¹⁶Ta arikwa le nwozi ngu nwanji bu onye iphere bvuru l'iphu. O kwa g'aphu ono habe mu shii; waa g'otsu-be mu l'ehu be mu shi teke ono pfushitaru Chileke.”

¹⁷Oo ya bu Elayi su iya: “Laa l'ehu-guu! Ge Chileke ke Izurelu mekwaaru ngu iphe, i rworu iya.”

¹⁸Hana su iya: “Ge nwozi ngu nwanji dukwa ngu l'obu.” Oo ya bu; Hana tugbua je eria nri; iphu bya atusahu iya.

¹⁹O -rwua l'onmewa utsu echele iya; ephe gbeshi bya abaarụ Chipfu eja tugbua laphushia azu l'ibe phe le mkpukpu Rama. Elukana bya ejepfu nyee ya ono, bu Hana; Chipfu nyata nwanji ono.

²⁰Tobudu iya bu; o tsuta ime. O rwue ya pho l'ezeda; o nwua nwa nwoke. O gua ya Samelu su: “Iphe, kparu iya nu bu l'oo Chipfu be mu rwotaru iya.”

Hana eye Samelu l'eka Chileke

²¹O be teke nwoke ono, bu Elukana yee ndibe iya tugburu jeshia anu Chileke ngweja; mekwapho g'o mee iphe, o kweru Chileke ukwe iya, bu g'oomeje aphagapha;

²²ophu Hana ejeduru; kele o suru ji iya: “Mu tee jekwa jasuru teke a nafuadaru nwata-a era; ge mu ekutakwa nu iya je edobe l'ulo Chipfu. O buwaruro l'eka ono be oo-buru jasuru asuru.”

²³Ji iya, bu Elukana su iya: “Mee egube dukpoe ngu pho ree. Nodunu jasuru teke ji-nafu iya era. Oo ge Chipfu mee g'opfu iya vua.” Oo ya bu; nwanji ono nodu l'unuphu; hee nwa iya ono gbiriri jasuru o nafu iya era.

²⁴O nafuchaepho nwata ono era; o kuta iya; yee ya swiru; bya akputa oke-eswi, gbaru apha eto; wota ukpokutu-nri, jiru, nkweka labo; bya egude otumu mee; duru iya jeshia l'ulo Chipfu le mkpukpu Shilo; e -gudekpooro le nwata ono hakwadu nwanshi.

²⁵Ephe gbuchaa oke-eswi ono; ephe duta nwata ono dujeru Elayi.

²⁶Hana bya asu Elayi: “Eshinu i no ndzu g'i no iya-a; nnajiuphu mu; be o kwa mu bu nwanji ono, pfu-kubejeru ngu nu l'eka-a; epfu anu Chipfu ono.

²⁷Mu rworu g'o nu mu nwata-a; Chipfu mewaaru mu iphe ono, mu rworu iya ono.

²⁸Oo ya bu le nta-a be mu ekuwaru iya anu Chipfu. Oo-buru ke Chipfu jasukpooru g'oo-no-beru.” Ephe baaru Chipfu eja l'eka ono.

1 Samelu 2

Hana epfu anu Chileke

¹Tobudu iya bu; Hana pfuru nu Chipfu su: “Obu mu ete eswa l'ime Chipfu; o buru l'ime Chipfu ono be a paliru mpu mu imeli. Mu nodu asawaa kpaakpaa l'iphu ndu ohogu mu; kele mu ete eswa l'i dzotaru mu.

²O to dukwa onye dubaa nsog ge Chipfu; ophu o dukwa onye ozo, l'aturu ngu nu. O to nwedu oke mkpuma, du ge Chileke anyi.

³Ophu g'unu haa egude etsetse aba l'abaa; g'opfu etsetse te eshihewa unu l'onu afushi; noo kele Chipfu bu Chileke, bu iya nwe mmamiphe. O buru iya bu onye enyochaje umere, nemadzu emekota ememe.

⁴Apfu ndu okpehu be anyakwoshiakwaru; ole ndu ike bvuru be a kwawaru okpehu g'onye kwaru ngwogu.

⁵Ndu rijiru epho be wowaru onwophe nu l'opfu nri; obenu le ndu ophu mbà shi atu be egu ta abyadu agubaa. Nwanyi ono, te eshidu atsụ ime be nwutawaru unwu esaa; ole onye ophu nwushiru unwu igwerigwe be anwupyashihuwaa anwupyashihu.

⁶Oo Chipfu aduje ike gbua egbugbu; o bukwaru iya pho emeje g'a dzuru ndzu. Oo ya be enwubaje nemadzu l'ali-maa; o bukwaru iya pho emeje g'e teta nodu ndzu.

⁷Oo Chipfu be emeje g'a daa ukpa; o bukwaru iya pho be emeje g'e nweru iphe. Oo ya ewozetaje nemadzu ali; o bukwaru iya pho bu onye ewolije nemadzu eli.

⁸Ookulije ndu ukpa, gworu l'urwuku; ndu adudu g'o du phe be ookufutaje l'ikpozu. Owojeru phe dobe l'echilabo ndu-ishi; mbu dobe phe l'eka ephe anoduje eri ubvu. Eka a turu okpali mgboko bukota ke Chipfu; o buru l'eli iya be o bvugaberu mgboko.

⁹Oo-noduje aboru ndu duru iya nsọ ụzo; ole ndu ejo-ememe be oomeje g'ephe tabuhu onu l'ochii. O to bukwa okpehu be nemadzu egudeje phafuta ishi;

¹⁰ndu achọ Chipfu opfu be aa-nyakwoshi yegiriyegiri. Oo-shi l'imigwe gude egbigwe bapfuta phe; oo Chipfu e-kpe mgboko l'ophu ikpe jasụ l'eka o jeberu. Oo-nu Onye eze iya ike; mbu woru mpu onye nkiya, a wuru manụ l'ishi palia eli.”

¹¹Tobudu iya bu; Elukana phe tugbua lashja ibe phe le mkpukpu Rama. Nwata ono, bu Samelu nodu l'eka Elayi, bu onye uke ke Chileke jeahaaru Chipfu ozi.

Iwashị unwegirima ibe Elayi

¹²Unwegirima ibe Elayi bya abukotaru ndu iwashị; ophu ephe ta agubeduru Chipfu iphe.

¹³Iphe, ndu-uke Chileke emejekpo bu l'obujeru teke o nweru onye gweru ngweja; be nwozi onye uke Chileke egudeje oji, nweru onu eto bya me anu ono shikwaduru l'epfu.

¹⁴O -bya l'oo-bvua ya l'ite-oku ono; ozoo nwitoshi ono; ozoo l'eze ite ono; ozoo l'ite ono, e gude eshi anu ono. Iphe, oji ono rwutaru be onye uke ke Chileke ewotaje l'oburu nkiya. Noo g'ephe emegbabeje iya iphe, bukpo ndu Izuru l'ophu, gude iphe-ngweja bya le Shilo bu ono.

¹⁵Teme o nodu abujeru; a -bya l'akpo eba-iphe ono, e gude egwe ngweja ono oku; nwozi onye uke Chileke ono abyapfuta onye obu, egwe ngweja obu; bya asu iya: “Nukwa mu anu, onye uke Chileke a-hu ahuhu; l'o to natakwa ophu e shiru eshishi; gbahaa k'oyii.”

¹⁶Ọ -buru l'onye ono, byaru egwe ẹja ono sūru: “G'e vuadaru ọzo kpoo ẹba-anu ono oku; teme l'ii-wotawarọ egube dukpoe ngu pho ree.” Nwozi ono asu: “Waawaa! Ye mu iya l'eka nta-a; o dudu mu ewota iya k'ehuka.”

¹⁷Iphe-ẹji, unwokorobyanya ono eme kwata paa ẹka apaa l'anya Chipfu; noo kele iphe, a nuru Chipfu be ephe anoduje emebyishi emebyishi.

Sámẹlu ejeru Chipfu ozi

¹⁸Sámẹlu bu nwata nwokoro nshii, ejeru Chipfu ozi, eyeje akpawuru uwe ocha, ndu-uke Chileke eyeje.

¹⁹Aphagapha be ne iya akwaje nwa uwe kpowula-kpowula; chitaru iya me yee ji iya je egwe ẹja, ephe egweje aphagapha.

²⁰Elayi nodu agojeru onu-oma nu Elukana yee nyee ya ono su: “Ge Chipfu mee ge nwanyi-a nwutaru ngu unwegirima, l'a-no-chi enya Sámẹlu, onye ono, nwanyi-a rwojeru Chipfu; o mecha kuru iya nu-phu Chipfu azu-a.” E -mecha ephe atugbua lashia ibe phe.

²¹Chipfu bya emeeru Hana iphe-oma; o tsuta ime bya anwutafua unwegirima unwoke eto; waa unwanyi labo. Nwata ono, bu Sámẹlu nodu l'iphe Chipfu vuta.

Elayi abaru unwegirima ibe iya mba

²²Nta-a be Elayi kahwaru okpobe akahu. O nodu anumakotaje iphemiphe, unwegirima ibe iya eme ndu Izurelu l'opfu; waa l'ephe ejepfufe unwanyi, eje ozi l'onu-abata ulo-ekwa-ndzuko.

²³Oo ya bu; o su phe: “? Bu gunu meru g'o gude unu nodu eme egube iphe, du nno? Onyemonye be epfukotaeru mu pho k'iwashi, unu ewegbabe.”

²⁴Waawakwa unwu mu. Iphe ono, mu anu l'eka epfu iya l'echilabo ndu ke Chileke ono ta abukwa iphe, du ree be o bu; ke g'unu noduje eme ndibe Chipfu g'ephe shiswee ọzo.

²⁵Ọ -buru le nemadzu mesweru nemadzu ibiya be bukwa Chileke e-doshiru phe iya; ole o -bukwanuru l'oo Chipfu be nemadzu mesweru; ? bu onye a-gbaru nemadzu ono odzori?” Unwegirima ibe iya ono nyiele-a nchi manu l'opfu nna phe ono; noo kele Chipfu tu-buwaru le ya e-gbushi phe.

²⁶Nwokoro nshii ono, bu Sámẹlu nodu evukpopho evuvu eje. O buru onye du Chipfu me ndiphe l'obu.

Ejo-iphe, a-dapfuta onu-ulo Elayi

²⁷Onye ke Chileke bya abyapfuta Elayi bya asu iya: “Wakwa iphe, Chipfu epfu baa: ‘? Mu te ewonuru-a onwomu goshi onu-ulo nna ngu rengurengu le teke ono, ephe no Fero l'eka l'ali Ijiputu ono to?”

²⁸? To bunaa mbedua hotaru nna ngu l'ime ipfu ndu Izurelu l'opfu g'o buru onye uke nkemu; g'o buru iya e-jeje l'oru-ngweja mu; g'o kpoje unwu-isensu oku; yeje uwe-

ukuvu nōdu mu l'iphu? ? Mu ta atukoduru iphe ngweja, ndu Ízurelu nuru, ee-gude kpoo oku nukotakwapho onu-ulo nna ngu?

²⁹? Bu gunu meru iphe, unu ta agubeduru ngweja mu iphe; me iphe, aanuje mu anunu ono, mu turu ekemu su g'a nuje mu l'eze-ulo eka mu bu ebubu ono? ? Bu gunu meru g'o gude i ka akwabe unwegirima ngu ubvu eme le mbedua; mbu unu nōdu agbavu iphe, kakota ree l'iphe, ndibe mu, bu ndu Ízurelu nuru mu anunu; eri iya ada repfurepfu?"

³⁰“Oo ya bu le Chipfu, bu Chileke ke ndu Ízurelu epfu su-a: ‘Oo eviya le mu pfuru su l'oo onu-ulo ngu; waa onu-ulo nna ngu bu phe a-noduje eje ozi l'iphu mu jasu le tuutuutu le mijimimii’; ole nta-a be mube Chipfu epfu su-a: ‘G'o to bukwaru mu! L'o kwa ndu akwabe mu ubvu be mu akwabeje ubvu. Ndu ophu akpo mu ebo l'afu be a taa gubedu iphe ilile.

³¹Tubekwa nvō l'oo-gbabeakwa teke mu e-gbushi ndibe ngu; me ndu onu-ulo nna ngu; k'ophu bu l'o too nweduru m'onye lanu, bu ogerenya, a-dubaa nu l'enya unuphu ibe unu.

³²Ii-gude enya ngu huma g'eka ono, mu bu ono no l'iphe-ehuka. Iphe, du ree be mu e-mekpokwaru ndu Ízurelu; ole-a; l'enya unuphu ibe unu be ta adudu onye bu ogerenya, byaru l'adubaa ya nu.

³³Onyemonye l'ime unu, bu onye mu te ebufuduru l'oru-ngweja mu ono be a-nodukwa-a ndzu; ole oo-buru unu iphe-aphu; mbu iphe, unu a-kwa eka enya adu unu ragaraga. Iphe, bu ndu-shi l'onulo ngu be a-gbabujuje nwuhu l'oyii.

³⁴“Iphe, a-nwu l'ehu unwegirima unwoke ngu ono ephenebo, bu Hofini yee Finehasu be a-buru ngu iphe-ohubama. Ephe a-tuko nwushihukota l'ujiku lanu.

³⁵Mu e-gude eka mu hota onye a-buru uke mube Chileke; mbu onye e gude ire iya eka; bya aburu onye anoduje eme uche mu; waa obu mube Chileke. Mu e-me g'onulo onye obu pfushia ike. Oo-nōdu l'iphu onye nkemu ono, mu wuru manu l'ishi ono eje ozi jasuru asuru.

³⁶O buru g'oo-nwu bu l'iphe, bu onye phoduru nu l'enya unuphu ibe unu l'a-byaje bya ephozeru iya; arwo iya okpoga; waa nri; arwokwa iya pho g'e ye iya ge ya buru onye-ozu l'eka ndu-uke Chileke anoduje eje ozi; k'ophu ya a-turutajekponu ekpu nri ria.” “

1 Sámelu 3

Chipfu eku Sámelu oku

¹Nwata nwokoro ono, bu Sámelu nodukpoepfo l'eka Elayi ejeru Chipfu ozi. Teke ono be Chipfu te eshidu akwatajekwadu epfu eyeru nemadzu; ophu e shidu akwatajekwadu aphu ophulanya.

²O rwua l'enyashi ujiku lanu; Elayi ze l'eka ozeje. Teke ono be nka lawaru iya l'enya k'ophu bu l'o to kwatadu aphu-rwekwadu aphu-rwe.

- ³Ophu orọku, dū l'eze-ulo Chileke teke anyihudu teke ono. Sámẹlu zẹ azẹe l'ime eze-ulo Chipfu ono l'ẹka okpoko ọgbandzu Chileke nọ.
- ⁴Chipfu bya ekua Sámẹlu oku. Sámẹlu za iya: “Waa mu baa!”
- ⁵O gude ọso gbapfushia Elayi je asu iya: “Waa mu baa; ? I kuru mu oku?” Elayi su iya: “Mu te ekukwaru ngu; jekwa azẹ azẹe!” Oo ya bu; ọ tugbua je azẹ-zetakwa azẹe ọzo.
- ⁶Chipfu byakwa ekua ya oku ọzo su: “Sámẹlu!” Sámẹlu gbalihukwa bya ejepfushia Elayi je asu iya: “Waa mu baa; ? I kuru mu oku?” Elayi su iya: “Nwa mu; mu te ekukwaru ngu oku; jekwa je azẹ azẹe.”
- ⁷Teke ono bẹ Sámẹlu teke amaduru Chipfu; ophu Chipfu teke emedu g'ọ maru opfu nkiya.
- ⁸Chipfu byakwa ekua Sámẹlu oku k'ugbo ẹto; Sámẹlu zilihukwa jepfushia Elayi je asu iya: “Waa mu baa; ? I kuru mu oku?” O bya erwua Elayi l'ẹhu l'ọo Chipfu bẹ eku nwata ono oku.
- ⁹Oo ya bu; Elayi su Sámẹlu: “Tugbua je azẹ azẹe. O -kuẹ ngu phọ ọzo; su iya: ‘Pfuia iphe, ọ bu Chipfu; kele nwozi ngu ngaberu-a nchi.’ “ Sámẹlu bya atugbua je azẹ-zetakwa azẹe l'ẹka ọ zehawaa.
- ¹⁰Chipfu bya bya apfuru l'ẹka ono; bya ekuahaa ya g'o shihawaa eku iya teke ophu su: “Sámẹlu! Sámẹlu!” Sámẹlu bya asu: “Pfuia iphe, ọ bu; kele nwozi ngu ngaberu-a nchi.”
- ¹¹Chipfu bya epfuaru Sámẹlu su iya: “Lenu; iphe, mu a-bya ememe l'alị Ízurelu bẹ a-buru onye numaru iya nu; ọo-gbaa ya anwirinwa lẹ nchi.
- ¹²Lẹ mbọku ono bẹ mu e-me g'iphe, mu pfuru l'ẹhu ọnu-ulo Elayi nwukota; e -shi l'ishi jeye l'ẹka ọ bvuru.
- ¹³Mu pfuwaru Elayi lẹ mu abyawaa anu ọnu-ulo iya aphu shita nta-a jasuru asuru lẹ k'ejo-iphe ono, ọ machacharu l'unwu iya eme ono; mbu l'ephe bu ndu anọduje epfubyi epha Chipfu; ophu o selajeduru phe azu g'ephe te eme nno.
- ¹⁴Oo ya meru g'o gude mu riaru ọnu-ulo Elayi angu su l'ejo-iphe, ọnu-ulo Elayi metaru kpua onwophe bẹ ngweja; ọzoo iphe-anunu ta asukwa asafu jaswaroya.”
- ¹⁵Sámẹlu zẹwaro jasu l'utsu; bya agbeshi je aguhaa ọzo ọlo Chipfu ono. Olo Sámẹlu bẹ ndzu agu g'oo-shi pfuaru Elayi iphe, e pfuru iya l'ophulenyanya ono.
- ¹⁶Tobudu iya bu; Elayi bya ekua ya oku su iya: “Nwa mu, Sámẹlu.” Sámẹlu za iya: “Waa mu baa!”
- ¹⁷O jia Sámẹlu su: “? Bu gunu bẹ Chipfu pfuru ngu-a? Be ewohakwaru mu iya ewoha. Teke o nweru iphe ono, o pfuru ngu ono duru ophu i woharu mu ewoha ophu iipfuduru mu iya; ge Chipfu mekwaa ngu iphe ono; mbu-a; g'o mekwaa ngu ophu kabaarọ shii.”

¹⁸Oo ya bu; Sámèlu tuko iphe ono pfushikotaru iya; ophu o dudu ophu o wachiru iya awachi. Elayi bya asu: “O bu iya bu Chipfu; g'o mekwaa iphe, dukpoe ya pho ree.”

¹⁹Sámèlu nodu evukpoepho eje; Chipfu swieru iya pho eswiru; ophu o dudu opfu, o pfuru, adaje l'alì gbaru eka.

²⁰Iphe, bukota ndu Ízurelu; e -shikpoo le mkpukpu Danu jasu le mkpukpu Biye-Sheba makotaerupho le Sámèlu bu okpobe onye mpfuchiru ke Chipfu.

²¹Chipfu bya achafuta le Shilo; kele ooshije l'opfu iya egoshi Sámèlu onwiya.

1 Sámèlu 4

Ndu Filisitayinu alwuta okpoko oghandzu Chipfu

¹Tobudu iya bu; iphe, Sámèlu pfuru nwukotaru ndu Ízurelu l'opfu. Le teke ono be ndu Ízurelu wufuru g'ephe je etsoo ndu Filisitayinu ogu. Ndu Ízurelu je akwabè k'ogu le Ebeneza; ndu ke Filisitayinu nodu kwabè le mkpukpu Afeku.

²Ndu Filisitayinu bya edzuchaa onwophe k'ogu bya abapfushia ndu Ízurelu. Ogu ono shihuepho ike; ndu Filisitayinu lwu-kpee ndu Ízurelu; gbua iphe, rwuru unu umadzu iri l'iphu ogu ono.

³Ndu ojogu ndu Ízurelu laphuepho azu l'odu phe; ndu bu ogerenya phe jia phe su: “? Bu gunu meru iphe, Chipfu kweru ge ndu Filisitayinu lwu-kpee anyi l'ogu ntanu-a? G'anyi je apata okpoko oghandzu Chipfu le Shilo k'opfu oo-tsoru anyi je adzota anyi l'eka ndu ohogu anyi.”

⁴Oo ya bu; ndu ono bya ezia ndu tugburu jeshia Shilo je apata okpoko oghandzu Chipfu, bu Okalibe-Kakota-Ike ono; mbu onye ono, bvugaru l'eli chierobu ono. Hofini yee Finehasu, bu unwegirima Elayi nokwapho l'eka ono; waa okpoko oghandzu Chileke ono.

⁵A pabataepho okpoko oghandzu Chipfu ono l'odu ndu Ízurelu; uzu tu ke woo; k'opfu bu l'alì nmahuchaaru jijijijii.

⁶Ndu Filisitayinu numaeppho ge ndu Ízurelu atu uzu ono; ephe jahaa su: “? Bukpoo gunu be aatu oke uzu owana l'odu ndu Hiburu?” Tobudu iya bu; ephe bya amaru l'oo okpoko oghandzu Chipfu be a pabataru l'odu ono.

⁷Ndzu guhu ndu Filisitayinu ono. Ephe pfuaha su: “Oke-agwa be bataakwaru l'odu ndu Ízurelu!” “Anyi lashakwaru mma! Egube iphe, owa-a teke anwu-swekwaa!”

⁸Nshio anyi! ? Bu onye a-dzota anyi l'eka oke-agwa owa? O kwa phe bu agwa ono, gudegbaa ejo iphe-ememe, dugbaa l'udu iya l'udu iya gbushia ndu Ijiputu l'echiegu ono-a.

⁹Unu shihukwa ike; unube ndu Filisitayinu! Unu mekwaa ge nwoke; g'unu ta aburu ohu ndu Hiburu egube ono ephe shihawaa buru ohu unu ono-a. Oo ya bu; unu rukota onwunu tsoo phe ogu ge nwoke!”

¹⁰Oo ya bu; ndu Filisitayinu lwua ogo ono; lwu-kpee ndu Izurelu k'ophu onyenonu gbalachaaru lashia ibe iya. Ndu e gburu egbugbu kwata paa aka apaa; kele unu nemadzu ugbo ukporo eto l'iri l'ise, bu ndu ojogu eje l'okpa le ndu Izurelu be laru l'ogu ono.

¹¹Ephe lwuta okpoko Chileke ono. E gbua unwegirima ibe Elayi ephenebo, bu Hofini waa Finehasu l'ogu ono.

Anwuhu Elayi

¹²L'ujiku lanu onokwapho be onye Benjiaminu gude oso shi l'iphu ogo ono jeshia Shilo; yee uwe iya, o gbajashiru agbajashi; waa aja, o kporu kpua onwiya l'ishi.

¹³Teke o bataru be Elayi noepho anoo le nggada iya ele enya l'uzo; noo kele obu ete iya ophe le k'okpoko Chileke ono. Nwoke ono bata l'ime mkpukpu; bya epfua iphe, nwuru nu. Uzu-ekwa buru wo le mkpukpu ono l'ophu.

¹⁴Elayi bya anumaepho uzu-ekwa ono; o jahaa su: “? Bu gunu be aatukpooru wowoowoo ophuna?” Nwoke ono meepho egwegwa bya ejepfu Elayi.

¹⁵Elayi be du ukporo apha eno l'apha iri l'esato. Ophu o kwataeduru aphu uzo ree; mbu l'ophuwaa ragaraga.

¹⁶Nwoke ono su Elayi: “Mu bukwa onye shi l'iphu ogo. O kwa oso be mu gude shi l'iphu ogo ono gbalaa ntanu-a.” Elayi bya ajia su: “Nwa mu; ? Denu g'o nwuru?”

¹⁷Nwoke ono, byaru ezi ozi ono su iya: “Ndu Izurelu be gbakwaru oso l'iphu ndu Filisitayinu. Ndu Izurelu be e gburu k'ophu paru aka apaa. Teme l'unwegirima ibe ngu ephenebo; mbu Hofini waa Finehasu be nwuhucharu nu; a bya anatakwapho okpoko Chileke.”

¹⁸No iya; teke o kuerupho okpoko Chileke ono; Elayi shi le nggada ono dafu dalaa azu l'aguga onu-abata aka ono. O daa suru olu ye l'ekwe; o buru iya anwuhu; kele o buwaa nwoke ogerenya; bya anyikwapho erwa. O buru ukporo apha labo be o buru onye-ishi ndu Izurelu.

¹⁹Nyee nwa iya, bu Finehasu, be du ime; o gbabewa iya l'ezeda. Nwanyi ono numaepho l'okpoko Chileke be a nataru; teme le nna, nwuru ji iya waa ji iya be nwuhuwuru nu; ime wata iya ememe; o buru iya ezeda. Ole ime ono megharu iya aka.

²⁰O jiphuaepho ajiphu k'anwuhu; unwanyi, eswi iya ime su iya: “Gude aka l'obu; oo nwa nwoke be i nwuru.” Ophu o pfuduru opfu yeru phe; ophu o ngaduru phe nchi.

²¹O bya agwa nwata ono Ikabodu su: “Odu-biribiri Chileke be lufuwaru l'ali Izurelu.” Ishi iya bu l'a nataru okpoko Chileke; teme waa le nna, nwuru ji iya; waa ji iya nwuhuru.

²²O bya asu: “Odu-biribiri Chileke be lufuwaru l'ali Izurelu; kele okpoko Chileke be a natawaru.”

1 Samelu 5

Ndu Filisitayinu ẹphe l'okpoko ọgbandzu Chileke

- ¹Ndu Filisitayinu natachaa okpoko Chileke ono; bya apafu iya le Ebeneza je edobe le mkpukpu Ashidodu.
- ²Ephe paru iya je edobe l'ime ulo agwa phe, bu Dagonu; woru iya dokube Dagonu l'onwiya.
- ³O bya ebe ge ndu Ashidodu tehuru l'onmewa utsu le nchitabohu iya; Dagonu dawaa; kpube iphu l'ali l'ataphu okpoko Chileke ono. Ephe bya apalia Dagonu woru iya dophu azu l'eka o shi du.
- ⁴Ephe bya etehukwa l'onmewa utsu ophu tsotaru mboku k'ono; bya ejeshia ele enya; Dagonu dawaa; kpube iphu l'ali l'ataphu okpoko Chipfu ono. Ishi iya me eka iya tuko chikwoshihu dabyiru l'oma ulo; o buru ogwehu kpoloko be phoduru nu.
- ⁵Oo ya kparu iphe ndu agwaje Dagonu le mkpukpu Ashidodu; mekpoo ndu abahuje l'ulo Dagonu taa zojedu okpa l'onu-eswa ulo ono byasu ntanu-a.
- ⁶Chipfu gude ke njo ada ndu Ashidodu eka l'ehu; mewaro ndu obutobu phe. O mee phe umerekete; mbu loru oke-ejo-onwo tu phe; gude iya mekpaaha phe eh.
- ⁷Unwoke Ashidodu bya ahuma g'onwuru phe; ephe su: "Okpoko Chileke ke ndu Izurelu be taa noduekwa eswiru anyi l'eka-a; noo kele o gudewaa ke njo adawaa anyi l'agwa anyi, bu Dagonu eka l'ehu."
- ⁸Oo ya bu; ephe zia ozi; kukoo ndu-ishi ndu Filisitayinu l'ophu; bya ajiahaa phe su: "? Bukpoo imeagha be anyi e-me okpoko Chileke ke ndu Izurelu-a?" Ephe su: "G'a pafukwa okpoko Chileke ke ndu Izurelu je edobe le mkpukpu Gatu." Oo ya bu; ephe pafu okpoko Chileke ke ndu Izurelu ono.
- ⁹Tobudu iya bu; ephe pafuchae ya pho paba le Gatu; Chipfu ghaziaru iya ndu mkpukpu k'ono; gude ke njo daahakwa phe pho eka l'ehu; mbu k'ophu ndzu-agugu rwutaru phe. O mee oke-ejo-onwo phokashiahaa ndu mkpukpu ono; mbu egirima me ogerenya.
- ¹⁰Oo ya bu; ephe gulia okpoko Chileke ono je edobe le mkpukpu Ekuronu. Okpoko Chileke ono nodu abahu le mkpukpu Ekuronu; ndu Ekuronu chishia su: "Ephe pataakwaru okpoko Chileke ndu Izurelu bya edobe l'eka-a g'o gbushia anyi le ndibe anyi-o!"
- ¹¹Oo ya bu; ephe bya ezia ozi; kukoo ndu-ishi ndu Filisitayinu l'ophu; bya asu phe: "Unu pafu okpoko Chileke ke ndu Izurelu g'o laphu azu l'eka o shi; o -dudu be oobushibebekwa anyi le ndibe anyi." Mgbu-onwu dzurupho mkpukpu ono l'ophu; mee ndzu-agugu rwuta phe. Noo kele Chileke gude ke njo ada phe eka l'ehu.
- ¹²Ndu ophu nwuhu-phoduru nu be oke-ejo-onwo phokashiru; ekwa, ndu mkpukpu ono ara rwua imigwe.

1 Samelu 6

Okpoko ọgbandzu Chileke alaphu azu l'alì Ízurelu

- ¹Okpoko Chipfu ono ọọ ọnwa ẹsaa l'alì ndu Filisitayinu.
- ²Ndu Filisitayinu bya ekukọo ndu l'agbajẹ eja mẹ ndu jibya bya ajia phẹ sù: “? Bù imeagha bẹ anyi e-me k'okpoko Chipfu ono? Unu pfiaru anyi g'anyi e-gude paphu iya azu l'ẹka o shi.”
- ³Ndu agbajẹ eja mẹ ndu jibya ono, e kukọru ono sù: “Teke ọbu l'unu ewola okpoko Chileke kẹ ndu Ízurelu; unu ta agbabẹkwa iya ẹka ọto wolaa. Unu gwekwaru ngweja-apfù-ugwo nù iya. Ọo ya bù unu agbẹ teke ono dù iche l'iphe-ememe, eme unu; tẹme unu abyakwaphọ amaru iphe, meru g'o gude ọphu o tokọ hadu egude kẹ njọ ada unu ẹka l'ẹhu.”
- ⁴Ndu Filisitayinu ono bya ajia sù: “? Bù gunu gbaru kẹ g'anyi nù iya lẹ kẹ ngweja-apfù-ugwo ọbu?” Ẹphe sù phẹ: “Ọo Oke-ejo-onwo ise, e gude mkpọla-ododo kpua; waa okerepfu ise, e gude mkpọla-ododo kpua, bù iya bù gẹ ndu-ishi ndu Filisitayinu hatabe l'igwe. Noo kẹle ọọ nchika-ẹhu lanu bẹ shi tuko eme unu lẹ ndu-ishi unu.
- ⁵Unu kpua iphe, dù g'oke-ejo-onwo ono, aphọ unu ono; waa okerepfu ono, eyi alì unu iyi ono; unu abya akwabẹ Chileke kẹ ndu Ízurelu ùbvù; g'a maru; ? ọo-tuwo ẹka l'egude kẹ njọ ada unu l'agwa unu; mẹ alì unu ẹka l'ẹhu?
- ⁶“? Denuhunu g'o gude unu kpochia obu gẹ ndu Ijiputu waa Fero kpochiru nkepẹ? Teke ono Chileke meshiaharu phẹ iphe-ohumalenya ono; ? ẹphe te emechaeduru paleru-a ndu Ízurelu haa?
- ⁷Ọo ya bù; unu mee ọgba-kperekpere ọphúú. Unu akputa ne-eswi labọ, he unwu; mbu ọphu e teke gudeswee odogoro tugbabe ẹbo. Unu woru ne-eswi labọ ono tugbabe l'ọgba-kperekpere ono. Unu apata unwu eswi ono paphuchaa azu l'unuphu; pahaaru phẹ iya ne phẹ ono.
- ⁸Unu aparu okpoko Chipfu ono tukobe l'ọgba-kperekpere ono bya eworu iphe ono, unu gude mkpọla-ododo kpushia ono; mbu ngweja-apfù-ugwo ono ye l'ime okpoko, dù l'aguga okpoko Chipfu ono. Unu mecha nno; unu ewehaa ya; g'ọ lashia ẹka o shi.
- ⁹Ọle ọọ g'unu lekpọe ya phọ ẹnya. Ọ -bùru l'ọ tugburu; chebe ọzo ẹka o shi; l'uzo mkpukpu Bẹtu-Shemeshi; unu amaru l'ọ Chipfu bẹ meru g'oke ejo-iphe ono dapfuta anyi. Teke ọ tọ dudu; anyi amaru l'ọ tọ budu iya gbushiru anyi ono; l'a nonyakpoerupho iphe ono melahaa anyi.”
- ¹⁰Ọo ya bù; ẹphe mee ya nno. Ẹphe woru ne-eswi labọ ono libe l'ọgba-kperekpere ono; bya achita unwu iya je akpo-chishia l'ọka-eswi l'unuphu.
- ¹¹Ẹphe paru okpoko Chipfu ono tukobe l'ọgba-kperekpere ono; paru okpoko, a chiru okerepfu mkpọla-ododo ono; waa iphe ono, dugbaa g'oke-ejo-onwo phẹ ono, e gudekwaphọ mkpọla-ododo kpushia ono ye iya.
- ¹²Ọo ya bù; ne-eswi labọ ono kwaseerupho ọzo Bẹtu-Shemeshi nhamunha. Ẹphe kwasekpoeopho gbororo ono; egbukpoeopho ọrà eje; ọphu ọ tọ dudu ẹka ẹphe swijiru

aswiji. Ndu-ishi ndu Filisitayinu nọdu etso pẹ azu azu jasụ l'oke ẹphe lẹ mkpukpu Betu-Shemeshi.

¹³Teke ono bẹ ndu Betu-Shemeshi akpata witi lẹ nsuda nsuda alì pẹ. Ẹphe bya apalia ẹnya; hụma okpoko Chileke ono; ẹhu tsoo pẹ ntumatu l'ẹphe hụmaru iya.

¹⁴Ogba-kperekpere ono rwua l'ẹgu Jioshuwa kẹ Betu-Shemeshi; bya apfuru l'aguga eze mkpuma, nọ l'ẹka ono. Ndu ono gbujashia oshi, e gude kua ogba-kperekpere ono egbujashi; bya eworu ne-eswi labo ono gude gwee ngweja-akpo-oku nu Chipfu.

¹⁵Ndu Lívayi bya apazeta okpoko Chipfu ono waa okpoko ono, e yeru iphe ono, a kpushiru lẹ mkpola-ododo pho; bya eworu iya tukobekota l'eli eze mkpuma ono. Ndu Betu-Shemeshi bya egweeru Chipfu ngweja-akpo-oku; waa ngweja ozo lẹ mboku ono gedegede.

¹⁶Ndu-ishi ndu Filisitayinu ẹphe n'ise nọduchaa hụma iphe ono g'oonwu; ẹphe dakobe laphushia azu lẹ mkpukpu Ekuronu lẹ mboku ono kwapho.

¹⁷Owana bẹ bu mkpola-ododo ono, a kpushiru o du g'oke-ejo-onwo ono; mbu ono, ndu Filisitayinu nuru Chipfu g'o buru ngweja-apfu-ugwo ono. Mkpukpu Ashidodu nuru nanu; nanu buru kẹ ndu Gaza; nanu buru kẹ mkpukpu Ashikelonu; nanu buru kẹ ndu Gatu; nanu buru kẹ ndu Ekuronu.

¹⁸Okerepfu ono, e gude mkpola-ododo kpua pho bẹ hatabeepho igwerigwe ge mkpukpu, ndu Filisitayinu, ndu-ishi ise pho bu eze pẹ pho; mbu mkpukpu ono, a kpu-phegbaaru mgburugburu; mẹ mkpukpu mkpukpu, dugbaa ya nu. Eze mkpuma ono, atu-koberu okpoko Chileke ono; nọepho buru iphe, ohubama l'ẹgu Jioshuwa kẹ Betu-Shemeshi byasụ ntau-a.

¹⁹Chileke bya awata echigbushi unwoke ndu Betu-Shemeshi; kele ẹphe nyoru okpoko ogbandzu Chipfu enyonyo. O chigbua ukporo umadzu eto l'umadzu iri. Ndu Izurelu gua aphu kele ndu Chileke chigbushiru bẹ kwataru paa ẹka apaa.

²⁰Ndu Betu-Shemeshi su: “? Bu onye a-du ike pfuru Chipfu, bu Chileke, du nso l'iphu? ? Bukpoo onye bẹ anyi a-pajeru iya?”

²¹Tobudu iya bu; ẹphe bya ezia ndu-ozì g'ẹphe jepfu ndu mkpukpu Kiriya-tu-Jiarimu je ezia pẹ su: “Ndu Filisitayinu bẹ palataakwaru okpoko Chipfu. Unu byakwa apata iya je edobe l'ibiya k'unu!”

1 Sámẹlu 7

¹Oo ya bu; unwoke mkpukpu Kiriya-tu-Jiarimu bya eje apata okpoko Chipfu ono. Ẹphe paru iya je edobe l'ulo Abinadabu l'eli ubvu; bya edobe nwa iya, bu Eleyaza nso g'o letaje okpoko Chipfu ono ẹnya.

Aadzota ndu Izurelu l'eka ndu Filisitayinu

²Tobudu iya bu; okpoko ogbandzu ono nokpoo odu lẹ mkpukpu Kiriya-tu-Jiarimu. O noru iya ukporo apha ophu. Ndu Izurelu tuko akwakota ekwa; acho Chipfu.

- ³Tɔbudu iya bɔ; Sámɛlu bya epfuaru ndu Ízurelu l'ophu sɔ: “O -bɔru l'unu gudewaa obu unu g'ɔ ha alwapfuta Chipfu; unu wofuchaa agwa ndu ɔhozo ono; waa agwa Ashitoretu. Unu kpɔru obu unu ye l'ɛka Chipfu nɔ; g'ɔ bɔru iya kpoloko bɛ unu a-nɔdu abarɔ eja; ɔo ya bɔ l'ɔ nafɔtakwanu unu l'ɛka ndu Filisitayinu.”
- ⁴Oo ya bɔ; ndu Ízurelu wofukɔta agwa Balu waa kɛ Ashitoretu, ephe dobegbaaru; bya abaaharɔ Chipfu eja nwɛkinyi ya.
- ⁵Sámɛlu bya asɔ: “Unu tɔko dzukɔbe lɛ mkpɔkpu Mizupa unubɛ ndu Ízurelu l'ophu; gɛ mu pfuru nɔ Chipfu l'iswi ɛhu unu.”
- ⁶No iya ephe dzukɔbeephe lɛ mkpɔkpu Mizupa ono; ephe kuta mini gbashɔ l'alɔ l'iphu Chipfu. Ephe swia ɛgu; nɔdu l'ɛka ono pfushikɔta iphe-eji phɛ sɔ: “Anyi mesweakwaru Chipfu.” O bɔru Sámɛlu bɔ onye-ikpe ndu Ízurelu lɛ Mizupa.
- ⁷Ndu Filisitayinu byaɛpho anuma lɛ ndu Ízurelu bɛ dzukɔberu nɔ lɛ mkpɔkpu Mizupa; ndu-ishi ndu Filisitayinu jeshia g'ephe tsoo ndu Ízurelu ɔgu. Ndu Ízurelu nɔmae ya phɔ; ndzɔ ndu Filisitayinu wata phɛ agɔgu.
- ⁸Oo ya bɔ; ndu Ízurelu pfuaru Sámɛlu sɔ: “Ta ahakwa araku Chipfu, bɔ Chileke anyi l'iswi ɛhu anyi; k'ophu ɔo-gbafɔta anyi l'ɛka ndu Filisitayinu!”
- ⁹Sámɛlu kwe; bya ewota nwaturu, angukwadu ɛra gweeru Chipfu ngweja-akpɔ-ɔku. O bya araku Chipfu l'iswi ɛhu ndu Ízurelu. Chipfu nɔma olu iya.
- ¹⁰Sámɛlu gudekwadua ngweja-akpɔ-ɔku ono l'ɛka egwe; ndu Filisitayinu zakubewaa ndu Ízurelu ntse k'ɔgu. Chipfu bya egude egbigwe raarɔ ndu Filisitayinu oke ɔrà lɛ mbɔku ono; mbɔ tɔ phɛ ɛberebete.
- ¹¹Ndu Ízurelu wɔfuta lɛ Mizupa; bya achipfuru ndu Filisitayinu ono; egbutsushi phɛ l'uzo jeye lɛ mkpɔda mkpɔkpu Bɛtu-Karɔ.
- ¹²Oo ya bɔ; Sámɛlu woru mkpuma dobe l'echilabɔ mkpɔkpu Mizupa waa Shɛnu; bya eworu iya gɔbe Ebeneza; bya epfua sɔ: “Chipfu bɛ yetakɔtaru anyi ɛka byasɔ nta-a.”
- ¹³Oo ya bɔ; ndu Ízurelu kapyabɛ ndu Filisitayinu; ophu ephe te eyebaɛduru ɔkpa l'alɔ ndu Ízurelu ɔzo. Chipfu gude kɛ njɔ adaɛpho ndu Filisitayinu ɛka l'ɛhu jasɔ gɛ Sámɛlu nɔ-beru ndzɔ.
- ¹⁴Mkpɔkpu, ndu Filisitayinu shi nataɔta ndu Ízurelu bɛ ndu Ízurelu byaru anataphukɔta azɔ; mbɔ e shikpɔo lɛ mkpɔkpu ɛkuronu jasɔ lɛ mkpɔkpu Gatu. Ndu Ízurelu nafɔtachaa ndu ephe l'ephe bukube l'ɛka ndu Filisitayinu. Nchɔ bya adɔ doo l'echilabɔ ndu Ízurelu ephe lɛ ndu Amɔru.
- ¹⁵Sámɛlu bɔru iya bukɔtaru ishi ndu Ízurelu jasɔ g'ɔ nɔ-beru ndzɔ.
- ¹⁶Aphagapha bɛ o shijeɛpho lɛ mkpɔkpu Bɛtelu bahɔ lɛ mkpɔkpu Gilugalu; lufu lɛ mkpɔkpu Mizupa; eekperu ndu Ízurelu ikpe l'ɛka ono g'ɔ hakɔta.

¹⁷Ọ nọdu abujeru; o -jehaa g'o jeru; l'ọ laphu azu le mkpukpu Rama, bu eka ibe iya no. O buru l'eka ono be onoduje edoshiru ndu Izurelu opfu. O kpuru Chipfu oru-
ngweja l'eka ono.

1 Samelu 8

Ndu Izurelu achọ onye a-buru eze phe

¹Tobudu iya bu; Samelu kahuepho; o chiru unwegirima iya unwoke ye g'ephe kpejeru ndu Izurelu ikpe.

²Epha okpara iya be bu Jiowelu; epha otsota iya buru Abayijia. Eka ephe tukoru buru ndu-ikpe bu le mkpukpu Biye-Sheba.

³Obenu l'unwu iya ono te etsodu uzo, o tsoru. Iphe, ephe gharu iphu bu eri urwu l'uzo, apfuduru-oto; bya eriphe uphalazu; ekpephe ikpe, apfuduru nhamunha.

⁴Oo ya bu; ndu bu ogerenya ndu Izurelu bya edzukobe; jepfu Samelu le mkpukpu Rama.

⁵Ephe su iya: "Lenu; nta-a be i kahwaru akahu; teme ophu unwu ngu te eshidu uzo ono, i shiru ono. Nta-a bukwa g'i hotaru anyi onye a-buru eze anyi egube ono ndu ozo nwegbaarụ ono."

⁶Iphe ono, ephe pfuru su g'a nu phe onye a-buru eze phe ono du Samelu eji. O woru iya pfuaru Chipfu.

⁷Chipfu pfuaru Samelu su iya: "Ngabekwaru ndu ono nchi l'iphe, bukpo iphe, ephe epfuru ngu opfu iya. O to bukwa ngu be ephe jikaru; o gbekwaa buru mube Chipfu be ephe jikaru ge mu ta abuheru eze phe.

⁸Oo egube ono, be ephe shi e -shi ke mboku, mu dufutaru phe l'ali Ijiputu meta byasu ntanu-a; mbu k'ophu bu l'ephe gwoberu mu; je abaaharu agwa ndu ozo eja. Nokwapho g'ephe gwoberu gubedua bu ono.

⁹Ngabekpooru phe roo nchi l'iphe, ephe epfu. Ole oo g'i nmashiaru phe okwa ike; mee g'ephe maru g'onye obu, a-buru eze phe obu a-nodu eme."

¹⁰Oo ya bu; Samelu bya atuko iphe, Chipfu pfuru iya ono dooru ndu ono, epfu g'o goshi phe onye a-buru eze phe ono.

¹¹O su phe: "Waa iphe, onye a-buru eze unu a-nodu e-me baa: Oo-chiko unwu unu unwoke dobe g'ephe gbajeru iya ugbo-inya; me inya l'onwiya gude ejeru iya ozi; mbu l'ephe e-vutajeru ugbo-inya iya ono uzo.

¹²O nweru ndu ophu oo-haru zia g'ephe buru ishi ndu ojogu, du unu labo l'ukporo iri iri; ndu ophu aburu ndu-ishi ukporo ndu ojogu labo le ndu ojogu iri iri; nweru ndu ophu a-nodu akoru iya okoro l'egu; me ndu ophu a-nodu akpataru iya iphe, o meberu l'ali; me ndu ophu a-nodu emeru iya ngwogu waa ngwa, l'etsoje ugbo-inya iya.

¹³Oo-chiru unwada unu ye g'ephe meje manu, eshi mkpo. Hakwaru phe pho mee ndu eshije nri; me ndu egheje iphe egheghe.

- ¹⁴Oo-nashichaa unu alì unu; waa opfu-vayinu unu; mę mgbabu oshi olivu unu, ophu kachakpoo ree; woru iya nukota ndu-ozi iya.
- ¹⁵Oo-vuko ereshi unu; waa akpuru vayinu unu oke lanu iya l'ime uzo iri woru nu ndu-ishi mę ndu-ozi iya.
- ¹⁶Ohu unu unwoke mę unwanyi; mękpoo unwokorobya unu ndu ophu ike ozi kachakpoo; mę nkafu-igara unu bę oo-tuko chitakota g'ephe jejeru iya ozi.
- ¹⁷Aturu unu mę eghe unu bę oo-rwuta uzi lanu l'ime uzo iri. Unubedua l'onwunu atuko ejekotaru iya ozi.
- ¹⁸O -rwuepho teke ono bę unu a-raswerekwa g'a nafuta unu l'eka onye ono, unu gude eka unu hota g'o buru eze unu ono; ole Chipfu bę ta abyadu angaru unu nchi le teke ono.”
- ¹⁹Obenu le ndu ono jikaru angaberu Samelu nchi. Ephe su iya: “Waawaa-o! G'a hotaru anyi eze-o;
- ²⁰k'ophu anyi a-du ge ndu alì ozo dugbaa; nweru onye a-buru eze anyi; vutajeru anyi uzo; alwuru anyi ugu, anyi alwukpo alwulwu.”
- ²¹Samelu bya anumakotachaa iphemiphe ono, ndu ono pfuru ono; o tuko iya kokotaru Chipfu.
- ²²Chipfu pfuaru Samelu su: “Numa iphe, ephe pfuru ngu; woru onye eze nu phe.” Tobudu iya bu Samelu pfuaru unwoke Izurelu su: “G'onyenonu lashichaa mkpukpu iya.”

1 Samelu 9

Samelu awu Solu manu l'ishi

- ¹O nweru nwoke, bu onye Benjaminu, epha iya bu Kishi; nwa Abiyelu; Abiyelu bu nwa Zero; Zero buru nwa Bekoratu; Bekoratu buru nwa Afaya onye Benjaminu. Kishi ono bu onye okpehu paru eka.
- ²O nwutaru nwata nwoke, epha iya bu Solu; mbu nwokoro, amaghe mma amaghe; k'ophu bu l'o to dudu onye aturu iya nu le ndu Izurelu. Shitakpoo l'ukuvu kwaseru uzo imeli bę o kakota onyemonye l'eli.
- ³O be teke nkafu-igara Kishi, bu nna Solu tuphashihuru; Kishi pfuaru nwa iya ono, bu Solu su: “Duta nwozi lanu ge gu l'iya je achogbaa nkafu-igara ono.”
- ⁴Oo ya bu; ephe tugbua ghajaa alì ubvu ubvu ndu Ifuremu; bya aghajaa alì Shalisha; ophu ephe ta ahumaduru iya. Ephe bya atugbua; shia uzo alì ndu Shalimu; ophu o to dudu nkafu-igara ono, ophu no l'eka ono. Ephe tuko eka iya ke ndu Benjaminu jekota; ophu ephe ta ahumaduru iya.
- ⁵Ephe bya erwuepho l'alì Zufu; Solu pfuaru nwozi ono, yee ya swi ono su: “Bya g'anyi laphu azu; odumeka bę nna mu a-gbekwa haa ari ke nkafu-igara; wata aku photophoto k'ehu anyi.”

⁶Nwozi ono sụ iya: “Lenu; o nwekwaru onye ke Chileke bu le mkpukpu-a. O bu onye aakwabẹ ùbvù shii; teme iphemiphe, o pfuru nodu erekotaje g'o pfuru iya. G'anyi jeedukwa eka ono; je amaru; ? oo-karu anyi eka anyi a-huma iya?”

⁷Solu bya asu iya: “? Ole-a; lekpodanu; o -buru l'anyi jeru; ? bu gunu be anyi a-nu nwoke obu? Nri, du le nweda anyi be bvwuru nu; ophu o dudu iphe, anyi a-nyako onye ke Chileke ono. ? Bukpoo gunu be eka anyi tu-pheru?”

⁸Nwozi ono bya eyeeru Solu onu ozo sụ iya: “Lenu; iphe, du mu l'eka be bukwa mkpola-ochaa, erwa iya du nkeru-eno shekelu. Mu e-woru iya nu onye ke Chileke ono k'ophu oo-karu anyi uzo ophu anyi e-shi iya.”

⁹Teke mbu l'alì Izurelu be shi abujeru -nemadzu nodu eje ajita Chileke iphe; l'oo-su: “Unu bya g'anyi jepfu onye aphu ophulenyia.” Noo kele ndu ono, eekuje ndu mpfuchiru Chileke nta-a ono be e shi ekuje ndu aphu ophulenyia le teke ono.

¹⁰Solu sụ nwozi iya ono: “I pfuru ree! Ngwa bya g'anyi je.” Oo ya bu; o buru phe eje mkpukpu ono, onye ke Chileke bu ono.

¹¹Ephe nodu enyikpopho òbvù abahu le mkpukpu ono, ephe l'unwumboko, eje ekuta mini dzuda. Ephe jia phe su: “? Bu eka-a be onye aphuje ophulenyia-a bu?”

¹²Unwumboko ono sụ phe: “Ee! O no-a unu l'uzo atatiphu l'eka ono. Unu mekebe egwegwa nta-a; kele o bu-a ntanu be o byaru mkpukpu-a; noo kele ndu oha be egwe ngweja l'eka aagwaje iphe.

¹³Unu -bahupho l'ime mkpukpu ono be unu a-huma iya; teme l'oo-jeshia l'eka aagwaje iphe jeshia eri nri. Noo kele ndu ono tee ridu nri jasuru l'oo-bya; kele o-gofutajeadaru onu-oma ye l'aja, e gweru ono; e -mechaa; ndu e yeru le nri ono eriwaro nri. Unu tugbua je nta-a; unu a-huma iya-a!”

¹⁴Ephe tugbua je abahu le mkpukpu ono. Ephe nodu abahu le mkpukpu ono; a bya ele enya Samelu nodu ejewa abyapfuta phe; eje ala l'eka aagwaje iphe.

¹⁵Ole Chipfu goshihawaru Samelu iphe ono l'unyaphu iya teme Solu bya ono sụ:

¹⁶“Egube nta echele be mu e-zi nwoke, shi l'alì ndu Benjaminu g'o byapfuta ngu. O -byarwutaepho; wua ya manu l'ishi g'o buru iya a-buru onye-ishi, ndibe mu ono, bu Izurelu; je anafuta phe l'eka ndu Filisitayinu. Le mu lewaru ndibe mu enya; ekwa, ephe ara rwuwa mu le nchi.”

¹⁷Ahuma, Samelu ahuma Solu; Chipfu sụ iya: “Lekwa nwoke ono, mu pfuru ngu opfu iya ono; oo ya be a-buru eze ndibe mu.”

¹⁸Oo ya bu; Solu bya ejepfu Samelu l'onu-abata mkpukpu ono bya ajia ya sụ: “Jiko kanuru mu ulo, eka onye ono, aphuje ophulenyia ono bu.”

¹⁹Samelu sụ iya: “Oo mbedua bu onye aphuje ophulenyia obu. Vuru mu uzo nyihu eli eka ono, aagwaje iphe ono; noo l'enyashia be mu le ngu a-tuko rigba nri. Teke e rwuerupho l'utsu; mu ahaa unu g'unu lashwaro; mu akakotakwaru ngu pho iphe, du ngu l'obu.

²⁰A bya lẹ kẹ nkafụ-igara unu ono, tuphashihuru e -shi k'abali ẹto, larụ alala ono; unu ta arihe oriri iya; noo kẹle a humakotawaru iya. Sụ: ? Tọ bunu ngu-a bẹ iphe ono, ndu Ízurelu tukoru achoshi ike ono kwaru l'eka? Mbụ; ? tọ bunua gubedua; waa onu-ulo nna ngu bẹ obu?"

²¹Solu sụ iya: "Ole-a; ? o kwa lẹ mu bu onye Benjaminu; mbụ l'ọo ipfu, kakota alwa alị l'ipfu ndu Ízurelu bẹ mu shinu-a; teme o buru unuphu ibe anyi bẹ kakota nwanshiji l'ipfu Benjaminu? ? Bu gunu kparu iphe iipfuru mu egube iphe-a?"

²²Oo ya bu; Samelu bya eduta Solu yee nwozi iya bahu l'ime phorokoto ulo, du l'eka ono, aagwaje iphe ono; bya eworu phe dobe g'ephe nodu l'ishi ndu ono, e yeru g'ephe bya, bu ndu rwuru ukporo umadzu l'umadzu iri ono.

²³Samelu bya epfuaru onye eshi nri sụ: "Wota nu anu ono, mu nuru ngu ono; mbụ onoya, mu suru g'i dobe iche pho."

²⁴Oo ya bu; onye ono, eshi nri ono bya ewolia utapfu anu ono yee iphe, tukoru iya nu; bya edoberu iya Solu l'iphu. Samelu sụ: "Nokwa iphe, e doberu ngu. Ria ya; noo kẹle ọo gubedua be e doberu iya kwaberu e -shi teke ono, mu pfuru sụ lẹ mu eshiru ndu nemadzu ite ebyaa ono." No iya; Solu yee Samelu tuko rigba nri lẹ mboku ono.

²⁵E mecha; ephe tuko shi l'eli eka ono, aagwaje iphe ono lufuta bahushia l'ime mkpukpu. Samelu yee Solu nodu l'eli ulo iya bo ọja.

²⁶Ephe bya etehu l'onmewa lẹ teke nchi abohuwaa; Samelu kua Solu l'eli ulo ono; bya asu iya: "Gbeshi ge mu dukwa ngu." Oo ya bu Solu bya agbeshi; yee Samelu tuko lufushia etezi.

²⁷Ephe nodu ejerwuwaa ishishi mkpukpu ono; Samelu sụ Solu: "Pfuaru nwozi ono g'ọ tugbua vuru anyi ọzo." "Gubedua angabe nwanshiji k'ophu mu e-zi ngu ozi, Chileke ziru." Nwozi ono bya evuru ọzo tugbua.

1 Samelu 10

¹Oo ya bu; Samelu wota mgbere, manụ du; woru manụ ono wua Solu l'ishi bya etsutsua ya onu sụ: "Chipfu bẹ wuwaru ngu manụ l'ishi g'i buru onye-ishi, a-nodu edu ndibe iya, bu ndu Ízurelu.

²I -hae mu pho tugbua ntanu-a bẹ o nweru unwoke labo, gu l'ephe e-dzuda lẹ mgboru ilu Rechielu lẹ mkpukpu Zeluza l'oke alị ndu Benjaminu. Ephe a-su ngu lẹ nkafụ-igara ono, i jeru achochi ono bẹ a humakotaakwaru; teme lẹ nna ngu ta ariekwa kẹ nkafụ-igara; l'ọ gbekwanu ayọ oshi ngu; epfu sụ: ' ? Bu imeagha bẹ mu e-me kẹ nwa mu-a?'

³"O buru l'eka ono bẹ ii-shiwaro lufu l'upfu eze oshi, du lẹ Tabo. Oo l'eka ono bẹ gu l'unwoke ẹto, eje mkpukpu Betelu je abaru Chileke eja e-dzuda. Onye lanu bẹ a-kpuru unwu-eghu ẹto; onye ophuu achiru ishi buredi ẹto; onye ophuu aparu otumu mee.

⁴Ephe e-kele ngu ekele; bya achiru ishi buredi labo nu ngu; l'i nata phe iya.

⁵“E -mechaa bẹ ii-jerwu l'úbvú Chileke, dọ lẹ mkpụkpu Gibiya; mbụ ẹka ono, ndu Filisitayinu kwakachaaru ono. I -rwujeepho mkpụkpu ono bẹ ii-huma ndu mpfuchiru Chileke l'ẹka ẹphe dzeberu shi l'eli ẹka aagwajẹ iphe chiru ogumogu; mẹ nkwa; mẹ opu; waa une akụ eje l'uzo. Ẹphe a-nọdu epfuchiru Chileke.

⁶Noo teke Unme Chipfu a-bya ngu l'ẹhu ẹhuka ẹhuka; l'i tsoru pẹ pfuchiaharu Chileke bya agbanwee teke ono buru onye dọ iche.

⁷Iphe-ohubama-a -mekotaepho; mee iphemiphe, ii-dọ ike mee; noo kele Chileke nọwaa swiru ngu.

⁸“Oo ya bụ l'ii-vuru mu ọzo jeshia Gilugalu. E -mechaa bẹ mu a-byapfuta ngu l'ẹka ono; bya egwee ngweja-akpo-oku; wakwapho ngweja-ẹhu-guu. Olee oo g'i kwabẹ nọ ujiku ẹsaa jasuru mu abyapfuta ngu bya egoshi ngu iphe, ii-me.”

⁹Solu ghakobepho gẹ ya haa Sámẹlu tugbua; Chileke gbanwee obu iya; iphe-ohubama ono mekotaepho mbọku ono.

¹⁰Ẹphe bya erwua mkpụkpu Gibiya ono; ẹphe lẹ ndu mpfuchiru Chileke, dzeberu nọ bya edzuda. Unme Chileke bya iya l'ẹhu ẹhuka ẹhuka; yẹ ẹphe tọko pfuchiaharu Chileke.

¹¹Tobudu iya bụ; ndu mahawaru iya nọ bya ahuma iya gẹ yẹ ndu mpfuchiru Chileke tukuroru epfuchiru Chileke; ẹphe jiahaa onwophe sụ: “? Bụkwa ole bẹ byapfutaru nwatibe Kishi? Solu; ? o yifua lẹ ndu mpfuchiru Chileke tọ?”

¹²Nwoke, bu l'ẹka ono sụ: “? Bụ onye bẹ bụ nna pẹ?” Oo ya bụ; a nmalahaa ya l'etu sụ: “Solu; ? o yifua lẹ ndu mpfuchiru Chileke tọ?”

¹³Solu pfuchibuhuerupho Chileke ono; o tugbua jeshia l'ẹka eegweje ngweja.

¹⁴Tobudu iya bụ; nwune nna Solu bya ajia yẹ nwozi iya ono sụ: “? Bụ aweya bẹ unu shi jee?” Solu sụ: “Anyi shikwa je achọ nkafu-igara-a. Anyi chonyaa ya; bya amaru l'anyi taa humadu iya; anyi choru Sámẹlu jeshia.”

¹⁵Nwune nna Solu ono sụ iya: “Jiko pfunaaru mu iphe, Sámẹlu pfuru unu.”

¹⁶Solu sụ iya: “O pfuru iya anyi hoo haa l'a humachawaru nkafu-igara obu.” Olee o to pfukwanuru iya iphe ono, Sámẹlu pfuru iya lẹ k'aburu eze pọ.

Eeme Solu eze ndu Ízurelu

¹⁷Sámẹlu bya ekukobe ndu Ízurelu l'iphu Chipfu lẹ mkpụkpu Mizupa.

¹⁸O bya epfuaru ndu Ízurelu sụ: “Wakwa iphe, Chipfu, bụ Chileke ke ndu Ízurelu epfu baa: ‘Mu dufutaru unubẹ ndu Ízurelu l'alị ndu Ijiputu; nafuta unu l'ẹka ndu Ijiputu; mekpoo l'ẹka ndu alị ndu ọzo, shi akpa unu ẹhu.’¹⁹Obenu lẹ nta-a bẹ unu jikawaru Chileke unu ono, adzotaje unu l'oke iphe-ẹhuka mẹ l'oke aphụ ono. Unu sụ: ‘Waawaa; l'oo g'e doberu unu onye a-buru eze unu.’ Oo ya bụ lẹ-a; unu bya edoo onwunu l'iphu Chipfu; unu edoo onwunu l'ipfu l'ipfu; mẹ l'unuphu l'unuphu unu.”

²⁰Sámèlu bya achikobechaa ipfu ndu Ízurelu l'èka lanu; o buru ipfu Benjiaminu be a hotaru.

²¹O bya achikobe ipfu Benjiaminu ono l'unuphu l'unuphu l'iphu Chileke; o buru unuphu ke Matiri be a hotaru. E mechaa; o buru Solu; nwa Kishi be a hotaru. A choahaa ya; ophu a humaduru iya.

²²Oo ya bu; ephe bya eje ajitabaa l'iphu Chipfu su: “? Onye obu; o nowa-a l'èka-a too?” Chipfu su: “Ee; o domiru onwiya l'èka a kuberu ivu.”

²³Ephe gude oso je akpufuta iya l'èka ono. O pfuru apfuru. O gbè l'ukuvu kakota onyemonye l'eli.

²⁴Sámèlu bya asu ndu nokota l'èka ono: “? Unu humawaru onye Chipfu hotaru? O to dukwa onye du g'o du le ndu Ízurelu l'ophu.” Ndu Ízurelu ono tua uzu su: “Nodukwa ndzu ogologo gube eze!”

²⁵Sámèlu bya epfuaru ndu Ízurelu ekemu, du nu le k'onye eze ono. O tuko iya dekota edede l'ekwo; bya eworu iya dobe l'iphu Chipfu. Oo ya bu; Sámèlu haa phe; onyenonu lashia ibe iya.

²⁶Solu lashikwaapho ibe iya le mkpukpu Gibiya. Ndu okpehu du, bu ndu Chileke yeru iya l'obu tsoru iya.

²⁷Obenu l'o nweru ndu mkpaka suru “? Denu g'onye owana e-shi dzoo anyi?” Ephe kpoo ya ebo l'afu; ophu o dudu iphe, ephe nuru iya. Ole Solu te eyeduru phe onu.

1 Sámèlu 11

Solu Adzo mkpukpu Jiabeshi

¹Oo ya bu; Nahashi, bu eze ndu Amonu tugba je ekephee mkpukpu Jiabeshi-Giladu k'ogu. Ndu Jiabeshi l'ophu su iya: “G'anyi le ngu gbanaa ndzu g'anyi jeahaaru ngu ozi.”

²Eze ndu Amonu ono, bu Nahashi su phe: “Teme anyi l'unu agbaa ndzu buepho me mu tukoru unu l'ehu l'ehu swoshichaa enya ekutara; shi nno meru iphe-iphere kpua ndu Ízurelu l'ophu.”

³Ndu bu ogerenya ndu Jiabeshi su iya: “Nu anyi abali esaa g'anyi ye ndu-ozu g'ephe zidzuru ozi l'ali Ízurelu. O -buru l'o to dudu onye a-dzota anyi; anyi atukonu wuru byapfutashia ngu.”

⁴Tobudu iya bu; ndu ezi ozi ono bya erwua mkpukpu Gibiya, bu iya bu eka Solu bu; bya epfuaru ndu ono iphe ono. Ephe tuko tushia uzu-ekwa.

⁵O buerupho teke ono be Solu shi l'egu chiru oke-eswi alwa. O jia su: “? Bu gunu be eme ndu-a meru g'o gude ephe nodu ara ekwa?” Oo ya bu; ephe bya epfuaru iya iphe ono, ndu Jiabeshi pfuru ono.

⁶Tobudu iya bu; Solu numachaa iphe ono, ephe pfuru ono; Unme Chileke bya iya l'ehu ehuka ehuka; ehua wata iya eghushi egu ike.

⁷Ọ kputa oke-eswi labo gbua; bya ebushia anu iya ebushi chiru nu ndu-ozu g'ephe goshidzuru iya l'ali Izuru lu l'ophu. Epeh e nodu ara iya arara asuje: "Oo egube-a be bu g'ee-me oke-eswi onye ono, te ekwedu etso Solu yee Samelu." Tobudu iya bu; nduzu-agugu Chipfu rwupyabe ndu ono; epeh tuko meepho ke kpukumu byakota-gbua.

⁸Solu bya agukota phe ugu le mkpukpu Bezeku. Unwoke ndu Izuru lu du unu umadzu ugbo unu; l'unu ukporo iri l'esaa l'unu iri. Ndu ke Jiuda be du unu ukporo eto l'iri l'ise.

⁹Epeh bya ezia ndu-ozu ono, byaru nu ono su: "Unu zia unwoke mkpukpu Jiabeshi-Giladu l'aa-dzota phe echele le teke anwu eswe shihuwerupho ike." O -rwua ge ndu-ozu ono jeerupho ezia ndu Jiabeshi ozi ono; ehu tsoo phe utso.

¹⁰Ndu Jiabeshi bya epfuaru ndu Amonu su: "O -rwua echele be anyi a-wu-pfuta unu; g'unu mee anyi g'o du unu ree."

¹¹O bya erwua echele iya ono; Solu woru ndu nkiya kee uzi eto. A bya erwua teke echeje nche ikpazu l'enyashi; epeh wuba l'ime odu ndu Amonu je egbua phe pyaapyaas jasuru anwu eswe shihu ike. Ndu ophu phoduru nu gbaa nanu nanu; k'ophu bu l'o to dudu onye yee ibe iya gbaru uzo lanu.

¹²Tobudu iya bu; ndu Izuru lu ono bya asu Samelu: "? Denu onye ono, suru: 'Solu ? oo-du-a ike buru onye eze anyi-a?' Dufutaru anyi ndu ono g'anyi gbushia."

¹³Solu su: "O to dukwa onye eegbu egbugbu ntanu; kele oo ntanu-a be Chipfu dzoru ndu Izuru lu."

¹⁴Samelu bya asu ndu ono: "Unu bya g'anyi je mkpukpu Gilugalu; je emee ge k'aburu eze iya ono kabaa evuru ire l'eka ono."

¹⁵Oo ya bu; epeh tuko g'ephe ha jeshia mkpukpu Gilugalu je anodu l'iphu Chipfu mee Solu onye eze. Epeh bya egweeru Chipfu ngweja-ehu-guu l'eka ono. Solu me ndu Izuru lu l'ophu tuko teshia eswa ike l'eka ono.

1 Samelu 12

Opfu, Samelu pfuru nu ndu Izuru lu

¹Tobudu iya bu; Samelu bya epfuaru ndu Izuru lu l'ophu su: "Mu numakotaru iphemiphe, unu pfuru mu; bya ewowaru eze, a-buru onye-ishi unu doberu unu.

²Nta-a be unu nwewaa eze, a-nodu edu unu. Mbdua l'onwomu be kahwaru akahu; ishi bukotawaru mu ewo. Unwu mu unwoke be unu l'ephe tukokwaru nodu. Mu shi le nwata duta unu byasu ntanu-a.

³Unu eleanaa; waekwa mu pho baa. Unu gbaeshidu mu ekebe l'iphu Chipfu waa l'iphu onye ono, o wuru manu l'ishi ono l'oo waa iphe, du eji, mu yejeru eka. ? Bu eswi onye be mu kputajeru? ? Toonkapfu-igara onye be mu kputajeru? ? Bu onye be mu mekputajeru? ? Bu onye be mu kpajekporu ehu? Toon? mu rijeru onye iphe uphalazu shi nno mee enya g'o to nwedu iphe, mu humaru? O -buru l'o nweru iphe ono ophu mu mejeru be mu a-pfuepho ugwo iya."

- ⁴Ephe sụ iya: “I ti mekputajekwaru anyi; ophu i ti kpajekwaru anyi ehu; ophu o nwekwa onye i natajeru iphe.”
- ⁵Sámèlu sụ phẹ: “O kwa Chipfu bẹ bụ onye-ekebe; onye-a, e meru eze-a bukwarupho onye-ekebe ntanu-a l'ọ to dudu iphe, unu a-gbabe okpa ebo mu ibo.” Ephe zua sụ: “Oo ya bẹ bụ onye-ekebe.”
- ⁶Sámèlu bya asụ phẹ: “Oo Chipfu bẹ hotaru Mosisu yee Eronu; bya edufutakwapho nna unu phẹ l'alị Ijiputu.
- ⁷Oo ya bụ; unu pfukwaru g'unu pfuru; ge mu nyataru unu l'iphu Chipfu iphe ono, bukota iphe, du ree, Chipfu meshiru unu waa nna unu phẹ ono.
- ⁸Teke Jiékpọ lachaaru l'alị Ijiputu; nna unu phẹ bya araku Chipfu g'ọ gbaaru phẹ mkpu; bẹ Chipfu yeru Mosisu yee Eronu, bụ ndu dufutaru nna unu phẹ l'alị Ijiputu; bya emee ephe buru l'eka-a.
- ⁹Obenu l'ephe zoharu Chipfu, bụ Chileke phẹ; o nwuru phẹ ye l'eka Sizera, bu onye-ishi ojogu ndu Hazo; woru phẹ yekwapho l'eka ndu Filisitayinu; me l'eka eze ndu Mówabu, bụ ndu tsochaaru phẹ ogu.
- ¹⁰Ephe bya araku Chipfu sụ: ‘Anyi meakwaru iphe-eji; kele anyi paru Chipfu haa bya abaaharu Balu me Ashitoretu eja. Oke-a; dzonaaro anyi l'eka ndu ohogu anyi l'anyi a-baru ngu-a eja.’
- ¹¹Oo ya bụ; Chipfu bya ezia Jieru-Balu; me Baraku; me Jiefuta; waa Sámèlu; gude phẹ nafuta unu l'eka ndu ohogu unu, no-pheru unu ano-phe ono. Unu bya eburu l'ehuguu.
- ¹²O be teke unu byaru ahuma le Nahashi, bụ eze ndu Amonu bẹ abyawaa unu etso ogu; unu sụ mu: Waawaa; g'a nu unu onye a-buru eze unu; l'eka Chipfu, bụ Chileke unu gbekwa buru onye eze unu.
- ¹³“Nta bụ g'unu huma onye eze obu, unu hataru obu; mbu onye ono, unu suru g'a nu unu-a. Unu huma iya le Chipfu nuwaru unu onye eze obu.
- ¹⁴O -buru l'unu a-nodu atsụ Chipfu ebvu; ejeru iya ozi; anuru iya opfu; ophu unu ekwefujedu ike l'eme ekemu Chipfu ono; mbu-a; unu l'onye ono, bụ onye eze unu ono tuko etso Chipfu, bụ Chileke unu; bẹ o dukwa-a ree.
- ¹⁵Obenu l'ọ -buru l'unu ta anuduru Chipfu opfu; mbu unu nodu ekwefuje ike l'ekemu, o turu bẹ oo-gudekwa ke njo byia unu eka l'ehu; egube o byiru iya nna unu phẹ ono.
- ¹⁶Nta-a bụ g'unu gebekpøekwapho g'unu ahuma eze iphe, Chipfu e-me l'anya unu.
- ¹⁷? Too bunaa onanwu teke aakpataje witi baa? Mu a-kpoku Chipfu g'ọ tua egbigwe; dzee mini. Oo ya bụ g'unu eshikwanu nno maru g'ejo-iphe, unu metaru l'iphu Chipfu habe shii; mbu le k'onye eze ono, unu suru g'a nu unu ono.”
- ¹⁸Oo ya bụ; Sámèlu bya araku Chipfu. Chipfu tua egbigwe; bya edzee mini le mboku ono. Ndu ono g'ephe ha wata atsushi Chipfu yee Sámèlu ebvu ike.

¹⁹Ndu Ízurelu ono tuko su Sámelu: “Pfunuru nu Chipfu, bu Chileke ngu l'opfu ehu ndu-ozu ngu g'anyi ta anwushihu; kele anyi byaru eyekobe ejo-ememe l'iphe-eji ono, anyi meru ono; g'anyi byaru epfuahaa g'a nu anyi onye eze.”

²⁰Sámelu su phe: “Unu ba atsushi ebvu. O bu eviya l'unu mekotaru ejo-iphe ono; ole o o g'unu ba agwobekwa etso Chipfu; unu gbekhwaa gude obu unu g'o ha jeeru Chipfu ozi.

²¹Unu ta adakobekwa tsoahaa agwa, bu iphe-mmanu; iphe, taa badu urwu; ophu o nafutadu unu; noo kele ephe bukota iphe-mmanu.

²²Chipfu e-gudekwa l'epha iya paru eka apaa; o too midu ndibe iya enya; kele o l'o du iya ree be o gude mee unu g'unu buru ndibe iya.

²³A -bya le mbedua; tswekwa! G'iphe ophu e-me ge mu ta anodu epfu anu Chipfu l'iswi ehu unu; mbu shi nno meswee Chipfu ta abyakwaru mu. Mu e-zi unu uzo, du ree; bya aburu uzo, pfuru oto.

²⁴Oo ephe g'unu tsuje Chipfu ebvu; unu egude ire-lanu; wofuta obu unu abaru iya eja. Unu nyatakwa eze iphe, o megbaberu unu.

²⁵Ole o -buru l'unu kwaseru l'eme ejo-ememe be unu l'eze unu obu a-tukokwa buru ola-l'iswi.”

1 Sámelu 13

Ndu ojogu Solu waa ke ndu Filisitayinu alwu ogu

¹Solu be du ukporo apha l'apha iri teke o wataru aburu eze. O buru eze ono nochaeppo apha labo;

²O hota ndu Ízurelu unu unwoke esaa l'ukporo unwoke iri dobe. Unu umadzu ise be ephe le Solu ono tukoru nodu le mkpukpu Mikumashi; waa l'ali ubvu ubvu mkpukpu Betelu. Ndu ophu du unu labo l'ukporo iri be ephe le Jionatanu tukoru nodu le mkpukpu Gibiya, no l'ali ndu Benjiaminu. Ndu ophunapho be o suru g'ephe tuko lashichaa ibe phe.

³Jionatanu lwu-kpee ndu Filisitayinu, no l'odu-ogu phe le mkpukpu Geba. Ndu Filisitayinu ono numa-dzuru iya. Solu gbua opu l'ali ono l'opfu su: “Ge ndu Hiburu numakwa iya-o!”

⁴Oo ya bu; ndu Ízurelu numa-dzuru le Solu be tsowaru ndu Filisitayinu ogu l'odu-ogu phe; teme le ndu Ízurelu be du-tabewa ndu Filisitayinu ashi; k'opfu ephe eshichiwaa phe imi. A bya ekukobe ndu Ízurelu su g'ephe jepfu Solu le mkpukpu Gilugalu.

⁵Ndu Filisitayinu bya atugba nanu jeshia etso ndu Ízurelu ogu. Ephe chilia ugbo-inya phe, du unu ugbo ukporo eto l'unu ukporo iri l'ise; waa ndu ugbo-inya, du unu umadzu iri l'ise gude eje. Ndu ojogu mmanu ghashierupho g'eja, no l'aguga eze-enyimu. Ephe wulihu je akwakaa k'ogu le mkpukpu Mikumashi l'uzo enyanwu-awawa mkpukpu Betu-Avenu.

- ⁶Ndu Ízurelu bya ahuma l'alì arwuhuwa arwuhu; le ndu nkephe be udele atuwaa onu le meji; ephe domishiahaa onwophe l'ime ogra; me l'ime epfukala; me le mkpula oke mkpuma; me l'ime iduma; mekpoo l'ime obvu mini.
- ⁷O nwechaaru ndu Hibururu ono haru dafuchaa azu enyimu Jiordanu azu iya ophuu bahu l'alì Gadu; me l'alì Giladu. Solu no-kirishia le mkpukpu Gilugalu. Ndu ojogu ophu yee ya swi tuko anmagbaa pyaapyaapya l'eka ndzu agu phe.
- ⁸Solu nokota l'eka ono ujiku esaa, bu iya bu teke Samelu turu onu abyabya; obenu le Samelu ta abyaduru mkpukpu Gilugalu. Ndu ephe le Solu no gbakashihuaha agbakashihu.
- ⁹Oo ya bu; Solu su: "Wotaru mu nu iphe ngweja-akpo-oku ono; waa iphe ngweja-ehuguu ono." Solu bya eworu ngweja-akpo-oku ono gwee.
- ¹⁰O kwada g'oome gweghee ngweja-akpo-oku ono; a bya ele enya Samelu ruwaa. Solu gbeshi gba iya ndzuta g'o kele iya ekele.
- ¹¹Samelu jia ya su: "? Bu gunu be i meru ono?" Solu su iya: "O kwa le mu byaru elee enya le ndu mu l'ephe swi be agbakashihuwa agbakashihu; ophu i ti byaduru teke i turu onu; teme ndu Filisitayinu nodu edzuwaa le mkpukpu Mikumashi.
- ¹²Mu ria su: 'Nta be ndu Filisitayinu a-byapfutaakwa mu ugu le Gilugalu l'eka-a l'ebe abu le mu rowaru Chipfu g'o doberu mu obu-omaa ya.' Su iphe ono tsutabe mu l'ehu k'ophu mu woru ngweja-akpo-oku ono gwee."
- ¹³Samelu su iya: "Oo iphe onye-eswe be i meru ono. I ti dobeduru ekemu, Chipfu, bu Chileke ngu turu nu ngu. O -bu l'i doberu iya me Chipfu gege emekwa-a g'abubu i bu eze ndu Izurelu shihu ike jaswaruroya.
- ¹⁴Obenu le nta-a be i tii bueduru eze kwaseru; kele Chipfu humawaru nwoke lanu, du iya ree l'obu; bya atwa iya aka g'o buru iya a-buru onye-ishi ndibe iya; noo l'i ti dobeduru ekemu Chipfu turu nu ngu."
- ¹⁵Oo ya bu; Samelu shi le Gilugalu tugba; o buru iya eje mkpukpu Gibiya, no l'alì Benjiaminu. Solu bya agua unwoke, ephe l'iya tukoru nodu l'eka ono ugu. Ephe du unu l'ukporo iri.
- ¹⁶Solu yee nwa iya, bu Jionatanu; me ndu ephe l'iya swi tuko nodu le mkpukpu Gibiya, du l'alì Benjiaminu. Ndu Filisitayinu nmaa anmanma ugu le mkpukpu Mikumashi.
- ¹⁷Ndu o-lwua-olaa bya edzebe uzo eto shi l'odu ndu Filisitayinu wufuta. Uzo lanu be wuru shia uzo mkpukpu Ofura, no l'alì Shuwalu.
- ¹⁸Uzo lanu ozo wuru kwaseru uzo mkpukpu Betu-Horonu; ndu ophuu phobe ibiya k'oke-alì ono, no laaru nsuda mkpukpu Zebowimu ono; mbu no chebe iphu l'echiegu ono.

¹⁹Ophu ọ dudu mę onye-úzá lanu, du l'alí Ízurelu mgburugburu; kele ndu Filisitayinu te ekwedu. “Epehe suru l'a -hawaa phe be ndu Hiburu ono a-wata akpushi ogu-echi ozoo arwa!”

²⁰O buru l'alí ndu Filisitayinu be ndu Ízurelu ejeje je abaa iphe, epehe egudeje atupya ali; mę ogu; mę ogbunku; waa mma phe.

²¹Epehe nodu apfuje ugwo, ha shii gude baa iphe, eegudeje atupya ali; waa ikworo; mę ayo; mę ogbunku; mekpoo gude iya mee g'iphe, eegudeje achí eswi tupya onu.

²²Oo ya bu; o be mboku, aa-lwu ogu ono; ophu ọ dudu ndu ojogu Solu waa Jionatanu duru m'onye lanu, gude ogu-echi; ozoo arwa l'eka. O buerupho Solu yee nwa iya, bu Jionatanu be gude iya nu.

²³Ndu Filisitayinu bya ahakata ndu ojogu phe; epehe wufu je anochia uzo le mkpukpu Mikumashi.

1 Sámelu 14

Jionatanu etso ndu Filisitayinu ogu

¹O be ujiku lanu; Jionatanu; nwa Solu su nwokorobia, achijeru iya ngwogu: “Bya g'anyi je azu iya ophuu l'eka ndu Filisitayinu doru.” Ole o to pfukwanuru iya nna iya.

²Solu nodu l'ime ime mkpukpu Gibiya l'upfu itorokuma, no le mkpukpu Miguronu. Ndu epehe l'iya tukoru nodu be rwuru unu nemadzu l'ukporo iri;

³teme waa Ahayijia, bu onye yeru uwe-ukuvu, ndu-uke Chileke eyeje. Ahayijia ono be bu nwa Ahitubu, bu nwanna Ikabodu. Onye nwuru Ahitubu buru Finehasu, bu nwatibe Elayi, bu onye uke Chipfu le mkpukpu Shilo. Ophu ọ dudu onye maru le Jionatanu be tugbuwaru nu.

⁴Le mgbaka ubvu ono, Jionatanu eme g'o shia ghata je l'eka ndu Filisitayinu doru ono be mkpuma kpukotaru oronmono nochikota ibekobo. Eka lanu be eekuje Bozezu; eka ibe iya ophuu buru Sene.

⁵Mkpuma ono be nanu bvugaru l'uzo isheli laaru mkpukpu Mikumashi. Ophuu bvugaru l'uzo ndohali laaru uzo mkpukpu Geba.

⁶Jionatanu bya asu nwokorobia ono, achiru iya ngwogu ono: “Bya g'anyi daghata je l'eka ndu ono, ebuduru ubvu onoya doru ono. ? A maru; Chipfu alwu-chiru anyi ogu? Kele ọ to dudu egube iphe, kpobaru Chipfu egude dzoo nemadzu; mę a du igwerigwe; mę a ha nwanshii.”

⁷Onye ono, achiru iya ngwogu ono su: “Mekpopho iphe, du ngu l'obu. Mu pfuru ngu l'azu; ọ buru uche ngu bu uche mu.”

⁸Jionatanu su: “Ngwa g'anyi jenu. Anyi e-nyighataepho jepfu ndu ono; mee k'ophu epehe a-huma anyi.

⁹O -buru l'ephe suru anyi: ‘Unu ngabe g'anyi byapfuta unu’; anyi apfuru no-kirishia l'eka anyi no; anyi tee jeedu phe jepfu.

¹⁰Teke ẹphe sùru: ‘Unu nyipfutanu anyi’; anyi amaru lẹ Chipfu wowaru phẹ ye anyi l'ẹka.”

¹¹Ọo ya bụ; ẹphenebo bya ephuphee onwophe l'iphu ndu Filisitayinu. Ndu Filisitayinu ono sù: “Lekpodapho!” “Ndu Hiburu bẹ ekpufutaakwa l'ime ẹnu, l'ẹka ẹphe shi domishia onwophe.”

¹²Unwoke ono, ọru kwakachaa k'ọgu ono raaru Jionatanu yee onye ono, achiru iya ngwogu ono ọrà sù: “Unu byapfutanu anyi g'anyi bya egoshi unu ọzo!” Ọo ya bụ; Jionatanu sù onye ono, achiru iya ngwogu: “Nyikota tso mu l'azu lẹ Chipfu wowaru phẹ ye ndu Ízurelu l'ẹka.”

¹³Jionatanu gude ọkpa yee ẹka enyikokpọepho ẹka ono. Onye ono, achiru iya ngwogu ono nọdu etso iya l'azu. Ndu Filisitayinu nọdu adashi ọọpoo l'iphu Jionatanu; onye ono, achiru iya ngwogu ono tsoru iya egbushikwa phẹ phọ.

¹⁴L'ọgu kẹ mbu ono, bẹ Jionatanu yee onye ono achiru iya ngwogu ono gburwuru ọmadzu ọkporo. Ogologo alẹ ẹka e tsopyabẹru ndu ono gbushia bẹ hakwa gẹ nkeru-ẹbo ẹka e gude eswi labọ tọpyaa atọpya.

¹⁵Akparajiji iya tuko ndu ojogu ono l'ọphu gudeshichaa; mbu ndu ọphu nọ l'ẹka ẹphe ọru; mẹ l'egu; mbu je akpaa lẹ ndu ọphu nọ kwakachaa k'ọgu; waa ndu k'ọ-lwua-ọlaa. Alẹ nmahụ jiiijiii. Akparajiji ọbu paa ẹka apaa.

Ndu Ízurelu achika ndu Filisitayinu

¹⁶Ndu ojogu Sọlu ndu ọphu nọ lẹ nche lẹ mkpukpu Gibiya, du l'alẹ Benjaminu bya ahuma g'ikpoto ndu ono anmagbaa rwuurwuu; ebu ishi kpurukpuru.

¹⁷Sọlu bya asu ndu ẹphe l'iya nọ: “Unu dzuẹdukwa ndu ojogu ono g'a maru onye ọphu lufuru nọ l'ime anyi.” A bya edzua phẹ; ọ buru Jionatanu yee onye ono, achiru iya ngwogu ono bẹ ta anọedu iya.

¹⁸Sọlu sù Ahayijia: “Pataẹkwaru mu okpoko Chileke ono.” Ishi iya bụ l'okpoko Chileke ono nọkwadu swiru ndu Ízurelu lẹ teke ono.

¹⁹Sọlu nọdu epfu eyeru onye uke Chileke ono; ọzu ono nọdu ada adashi ike l'odu-ogu ndu Filisitayinu; mbu kabaa aswo-lihu eje. Ọo ya bụ; Sọlu sù onye uke Chileke ono: “Hawa iya ro!”

²⁰Sọlu yee ndu ojogu iya bya edzukoo; ọ buru phẹ eje ọgu. Ẹphe bya ahuma lẹ ndu Filisitayinu ta amaedu iphe, ẹphe eme; noo l'ẹphe gudegbaa ogu-echi phẹ egbushi nwibe phẹ.

²¹Ndu Hiburu ono, bụ ndu ọphu shi turu ikẹ yeru ndu Filisitayinu lẹ mbu; tsoru phẹ laa l'ẹka ẹphe nmaru anmanma ọgu phọ; bya atua ike ituphu wu-pfushia ndu Ízurelu ọphu nọ l'ẹka iya kẹ Sọlu yele Jionatanu.

²²O be teke ndu Ízurelu ono, domishiru onwophe l'alẹ ọbvú ọbvú, ndu Ifuremu nọmaru lẹ ndu Filisitayinu bẹ l'agbawaa ọso; ẹphe wufuta; chipyabeshia phẹ ikike l'ọgu ono.

²³Ephe lwua ogo ono gbiriri jasụ ephe ghata mkpukpu Betu-Avenu. Oo ya bu; Chipfu nafuta ndu Izurelu le mboku ono.

Jionatanu eri manụ-enu

²⁴Mboku ono be ndu Izurelu jeru iphe-ehuka; kele Solu guderu phe; nua phe nte su: “Onye wotaru nri ria teme e rwua l’uzenyashi be buakwa onye a turu onu; mbu onye ta anodu kwabe jasụ teke mu gwatadaaru ndu ohogu mu ugwo iphe, ephe meru mu ono.” Oo ya bu; ophu o dudu onye ophu riru nri.

²⁵Ndu Izurelu ono l’ophu toko zehu wuba l’oswa. Ali ono buru eka manụ-enu du.

²⁶Ephe wubachaa l’ime oswa ono; ephe huma ge manụ-enu ono alwashihu; ophu o to dudu onye meru iya eka dee l’onu; kele ephe atsu ebvu nte pho, ephe riru pho.

²⁷Ole Jionatanu te eshidu numa le nna iya nuru ndu Izurelu nte; o je eworu ishishi mgboro, o gude l’eka rwua l’ebakala enwu ono; bya akpaa ya eka dee l’onu; o bya arokota ike.

²⁸Onye lanu le ndu ono su iya: “Nna ngu gudekwaru anyi; anyi ribua nte su: ‘Onye wotaru nri ria ntanu-a be buakwa onye a turu onu!’ Oo ya meru iphe mba atushi onyemonye-a.”

²⁹Jionatanu su: “Nnana mu be meakwaru g’iphe-ehuka dapfuta ndu ali-a. Lewaru g’anya byaru ekosahu mu nta-a le nwa manụ-enu, ha nwanshii-a, mu deru l’onu-a.

³⁰Mbu-a; ? Iphe tege akabadaa ree; ome a haru ndu Izurelu; ephe haru ria iphe, ephe kwataru l’okwata l’eka ndu ohogu phe ntanu-a? ? Ephe tege akadụ egbushi ndu Filisitayinu obu igwerigwe to?”

³¹Mboku ono be ephe gbushikporu ndu Filisitayinu e -shi le mkpukpu Mikumashi jasụ le mkpukpu Ajialonu. A nonyaa; mba tushiahaa ndu Izurelu ono.

³²Ephe bya avupyabe iphe, a kwataru l’okwata ono; kpukaa egbu; me aturu; waa eswi; yee unwu iya; woru phe gbushia l’ali ono; taa l’oyii.

³³Tobudu iya bu; e pfuaru Solu su iya: “Lekwa-a; le ndu Izurelu egbukwa anu; ata l’oyii; gude nno emeswe Chipfu.” Solu su: “Unu ta apfushiekwaru ike l’iphe, unu pfuru; unu swiritaru mu eze mkpuma ntanta!”

³⁴Su: Unu tugbua jechaa l’echilabo ndu ono je asu phe g’onyenonu wotachaa mu eswi waa aturu l’ehu l’ehu; bya eworu iya gbushia l’eka-a taa. G’ephe ha ata anu, mee no gude nno emeswe Chipfu.” Oo ya bu; onyenonu kputachaa eswi nkiya l’enyashi ono bya egbu l’eka ono.

³⁵Solu bya akpuru Chipfu oru-ngweja. Onoya buru ke mbu, Solu kpuru Chipfu oru-ngweja.

³⁶Solu su: “Unu g’anyi bapfu ndu Filisitayinu l’enyashi; je akwaa iphe phe l’okwata jasụ le nchiabohu. G’o to dukwa m’onye lanu, anyi e-dobe ndzu l’ime phe.” Ephe su:

“Iphe, dukpoe ngu pho ree mee ya.” Onye uke Chileke su: “G'anyi kpaadakwaa Chileke ishi l'eka-a.”

³⁷Oo ya bu; Solu bya ajia Chileke su: “? Bu ge mu bapfuwaro ndu Filisitayinu too? ? Ii-woru phe-a ye ndu Izurelu l'eka too?” Ophu Chileke eyeduru iya onu mboku onoya.

³⁸Solu kwe bya asu: “Unu byakota l'eka-a unube ndu ono, bukota ndu-ishi-ojogu ono; g'anyi choeshekwa g'anyi gude meswee le ntanu-a.

³⁹Eshinu Chipfu, bu onye ono, adzoje ndu Izurelu no ndzu g'o no iya-a; be o betakporu o buru okpara mu, bu Jionatanu be o nmaru; be o nwuhufutajekwa.” Ophu o dudu m'onye lanu l'ime ndu ono yeru iya onu.

⁴⁰Solu bya epfuaru ndu Izurelu l'ophu su: “Unu pfuru l'eka pho; g'anyi l'okpara mu, bu Jionatanu pfuru l'eka-a.” Ndu ono pfua su iya: “Iphe, dukpoe ngu pho ree; mee ya.”

⁴¹Solu bya epfuru nu Chipfu, bu Chileke ke ndu Izurelu su: “Yenaaru mu okpobe onu.” A bya atua ido; o buru Jionatanu waa Solu be o nmaru. Ophu eka ndu ophu adudu iya.

⁴²Solu su: “Unu tueduru mu le nwa mu, bu Jionatanu ido obu.” A bya atua ya; o buru Jionatanu be o nmaru.

⁴³Tobudu iya bu; Solu bya asu Jionatanu: “Pfu dukwaru mu iphe, i meru.” Oo ya bu; Jionatanu su iya: “Oo nwa manu-enwu, mu gude mgboro, mu gude l'eka rwukata be mu kparu l'onu. Wakwa mu baa; mu nwuhufutajenu!”

⁴⁴Solu su iya: “Ge Chileke mekwaa mu nno; mbu g'o mekwaa mu ophu ka-njo; m'o -buru li tji nwuhuduru; gube Jionatanu.”

⁴⁵Ndu ono bya asu Solu: “? O gbaru ge Jionatanu nwuhu; mbu onye ono, dzoru ndu Izurelu ndzu k'ophu paru eka apaa? Tuswekwa! Eshinu Chipfu no ndzu g'o no iya-a; be o to dukwa me egbushi lanu, shi iya l'ishi, byaru a-darwu ali; noo kele oo Chileke be yetaru iya eka; o mee iphe ono le ntanu.” Ndu Izurelu shi nno nafuta Jionatanu; ophu e gbu eduru iya.

⁴⁶Solu paru achi ndu Filisitayinu oso haa; ndu Filisitayinu wuphu azu lashia ali phe.

Ndu Solu tsogbaaru ogu

⁴⁷Le teke ono, Solu byaru aburu eze ndu Izurelu ono; be o tukoru ndu ohogu phe, nogbaa mgburugburu tsokota ogu, bu iya bu ndu Mowabu; me ndu Amonu; me ndu Edomu; me ndu eze ndu Zoba; me ndu Filisitayinu. Ndu ophu o ghachiru jepfu ogu; be onujeepho aphu.

⁴⁸O lwuru ogu mkparawa lwu-gbua ndu Amaleku; shi nno nafuta ndu Izurelu l'eka ndu shi kwagbaa iphe phe l'okwata.

⁴⁹Unwoke, Solu nwushiru bu: Jionatanu; waa Ishivi; waa Malukishuwa. Epha nwa iya nwanyi k'ogerenya bu Merabu; epha ke nwata buru Mikalu.

⁵⁰Èpha nyee ya bụ Ahinowamu, bụ nwada Ahimaazu. Èpha onye-ishi ndu ojogu Sọlu bu Ábuna; nwa Nèru. Nèru bụkwanuru nwune nna Sọlu.

⁵¹Nna Sọlu bụru Kishi; yee nna Ábuna, bụ Nèru bẹ tukuru bụru unwu Abiyelu.

⁵²Teke Sọlu shi bụru eze bẹ buepho ogu ogu bẹ ephe le ndu Filisitayinu shi anodeje alwu-phe. O nodu abujeru Sọlu -huma onye bụ mkparawa; ozoo l'oo onye ike du l'ogu; l'ooduta iya yeru onwiya.

1 Sámelu 15

Aalwu-kpee ndu Amaleku

¹Tobudu iya bụ; Sámelu bya asu Sọlu: “Oo mbedua bẹ bụ onye ono, Chipfu ziru ge mu bya awua ngu manu l'ishi g'i bụru eze ndibe iya, bụ ndu Ízurelu. Sụ-a; ngabe nchi l'ozu, Chipfu ziru g'e zia ngu.

²Waa iphe, Chipfu, bụ Okalibe-Kakota-Ike eepfu baa: ‘Mu a-nu ndu Amaleku aphu iphe ono, ephe meru ndu Ízurelu le teke ono, ephe jeru akwaaru phe l'uzo g'ephe shi l'ali Ijiputu alufuta ono.

³Tugbua nta-a je etsoo ndu Amaleku ono ogu. Tukokpoo iphe, bụ iphe, ephe nweru enweru mebyishikota. Ta aphukwaru phe obu-imemini. Gbushikota unwoke me unwanyi; unwegirima me ndu e he l'eka; me eswi; me aturu; me inya-kamelu; mekpoo nkafu-igara.’ “

⁴Oo ya bụ; Sọlu bya akpako-dzua ndu Ízurelu le mkpukpu Telayimu. O gua phe ogu. Ndu ojogu, eje l'okpa du ukporo unu nemadzu ugbo ukporo l'ise; ndu ophu shi l'ali Jiuda du unu nemadzu ugbo ukporo l'ise.

⁵Sọlu phe tugbua jeshia mkpukpu ndu Amaleku; je edomishia onwophe kwabegbaaru phe le nsuda.

⁶O bya asu ndu Kenu: “Unu tugbukwaa lufu l'echilabo ndu Amaleku; k'ophu anyi ta atukodu unu l'ephe gbushia; noo kele unu meru ndu Ízurelu l'ophu ree teke ono, ephe shi l'ali Ijiputu lufuta ono.” Oo ya bụ; ndu Kenu shi l'echilabo ndu Amaleku wufu.

⁷No iya; Sọlu bya eshi le Havila tsua ndu Amaleku epfu jasụ l'echiegu Shuru, no l'uzo enyanwu-awawa ali Ijiputu.

⁸O kputa Agagu, bụ eze ndu Amaleku le ndzu. O gude ogu-echi tuko ndu ke Agagu ono gbushikota.

⁹Obenu le Sọlu yee ndu ojogu iya doberu Agagu ndzu; me iphe, bukota aturu, kachaa ree; me eswi; me unwu eswi, tsugbaaru eba; me unwu aturu. Mbu l'ephe hakotaru iphemiphe, du ree; ophu ephe te emebyishikotaduru iya. O buri unwu jogojogojogo iphe; me iphe, ta abadu urwu bẹ ephe mebyishiru.

Chipfu anafu Sọlu okwa-eze iya

¹⁰Tobudu iya bụ; Chipfu bya epfuaru Sámelu su iya:

- 11“Mu taru onwomu uto le mu meru Solu g'ọ buru eze; kele ọ gbakutawaru mu azu; haa etso mbedua; ophu o to mejedu iphe, mu turu ekemu iya.” Iphe ono tsua Samelu l'ehu shii. O rakota ekwa l'enyashi ono l'ophu raku Chipfu.
- 12O be l'onmewa utsu; Samelu bya agbalihu jepfushia Solu. E pfuaru Samelu su iya le Solu be jeshiakwaru ubvu Kamelu. L'o kpukwaru iphe, ee-gudeje nyata iya; bya adachi jeshia mkpukpu Gilugalu.
- 13Samelu jepfuepho Solu; Solu su iya: “Ge Chipfu gokwaru onu-oma nu ngu. Mu meakwaru iphe, Chipfu suru g'e mee.”
- 14Samelu su iya: “? Ora aturu pho, mu anu-a ? bu gunu? ? Eswi, egbugbaa ora pho ? buru gunu be o bu?”
- 15Solu su iya: “Ono bukwa ophu ephe shi le Amaleku gude lwa. Ndu ophu kakota ree l'aturu phe me l'eswi phe be e dobekotaru ndzu, ee-gude gweeru Chipfu, bu Chileke ngu ngweja. Ndu ophuu be anyi tukoru mebyishikota kpakparakpa.”
- 16Samelu su Solu: “Ngabekpodapho ge mu karu ngu iphe, Chipfu pfuru mu l'enyashi.” Solu su iya: “Ngwa; pfunaaru mu iya.”
- 17Samelu su: “Teke ono, i shi ha onwongu nwanshii l'anya; ? to bunu ngu-a be e woru mee onye-ishi l'okpa-ipfu ndu Izurelu to? Chipfu bya awukwa ngu pho manu l'ishi gi buru eze ndu Izurelu.
- 18Chipfu ziru ngu ozi su gi je atuko ndu ejo-ememe ono, bu ndu Amaleku gbushikota; gi je etsoo phe ugu jeye teke ephe a-bukotaru mkpurupyata.
- 19? Bu gunu kparu iphe, i ti meduru iphe, Chipfu pfuru? ? Denu g'o gude unu gbaa egwegwa je avupyabe iphe-okwata; mbu shi nno mee ejo-ememe l'anya Chipfu?”
- 20Solu bya asu Samelu: “Mu mekwaru-a iphe, Chipfu pfuru; bya ejee ozi ono, Chipfu ziru mu ono. Mu tukoru ndu Amaleku gbushikota; bya akputa Agagu, bu eze phe kpulata.
- 21Ole ndua kwakwanuru okwata. Ephe kpukoru aturu; me eswi ndu ophu kakota ree l'iphe ono, e doberu k'emebyishi ono; g'ee-gude iya gweeru Chipfu, bu Chileke ngu ngweja le mkpukpu Gilugalu.”
- 22Samelu su: “? I dobesu le ngweja akpokotaru oku me ngweja mmanu ozowaro be ka adu Chipfu ree; karia eme opfu iya g'o suru g'e mee ya to? Lekwa-a! Eme iphe, a suru g'e mee kakwa ree karia egwe ngweja; mbua; anuma iphe le nchi kakwa ree karia egude anu tsuru eba gwee ngweja.
- 23Ekweifu-ike be duta-bekwa eji g'agwo obvu; eku onwonye duta-bekwapho eji g'agwo nshi. Eshi ophu i jikaru opfu, Chipfu pfuru; be o jikaakwaru ngu pho gi ti buheru eze.”
- 24Oo ya bu; Solu bya asu Samelu: “Mu mewaru iphe-eji. Mu mebyiakwaru ekemu Chipfu waa opfu i pfuru. O kwa kele ndzu ndua l'agu mu meru g'o gude mu kweta mee iphe, ephe pfuru.

- ²⁵Nta-a jiko; gūnaaru mu nvu l'iphe-ēji, mu meru. Tsonuru mu laphu azu ge mu je abaaru Chipfu eja.”
- ²⁶Sámēlu sū iya: “Mu te etsokwaru ngu alaphu azu. Noo kele i jikaru Opfu Chipfu. Chipfu jikaakwa ngu pho g'i ti buheru eze ndu Ízurelu!”
- ²⁷Sámēlu bya aghakobe ge ya tugbua; Solu woru eka l'onu uwe-mgbalanu iya; o lakahu.
- ²⁸Sámēlu sū iya: “Ntanu-a be Chileke lakafutaakwaru ali-eze ndu Ízurelu l'eka ngu; mbu woakwaru iya nu onye lanu le ndu obutobu ngu phe; mbu onye ophu ka ngu aburu okpobe nemadzu.
- ²⁹Chipfu, bu iya bu okpehu ke ndu Ízurelu be ta abyakwa adzu uka; ophu oogbanweddu iphe, du iya l'uche; noo kele o to budu nemadzu mmanu; k'ophu bu l'ogbanwe iphe, du iya l'uche.”
- ³⁰Tobudu iya bu; Solu sū iya: “Mu meswewaru. Ole-a; jiko kwabenu mu ubvu l'iphu ndu bu ogerenya ndibe mu; mekwapho l'iphu ndu Ízurelu; mbu g'i tsoru mu ro laphu azu k'ophu bu le mu a-baru Chipfu, bu Chileke ngu eja.”
- ³¹Sámēlu kwe bya etsoru Solu laphushia azu; Solu baaru Chipfu eja.
- ³²Sámēlu bya asu: “Kputaru mu Agagu, bu eze ndu Amaleku ono l'eka-a!” Agagu bya egude ehu-utso jepfushia ya; bya asu: “O doru mu enya le teke anwuhu shi erwuphe mu be ghatawaru nu.”
- ³³Obenu le Samelu suru: “Oo egube ono, i gude ogu-echi mee unwanyi; epe gbaru eka nwa ono; bukwapho ge ne ngu a-buru onye gba eka nwa l'echilabo unwanyi.” Samelu woru Agagu gbua pyaapya l'iphu Chipfu le mkpukpu Gilugalu.
- ³⁴Oo ya bu; Samelu tugbua lashia mkpukpu Rama. Solu tugbua lashia mkpukpu Gibiya, bu ibe iya.
- ³⁵Ophu Samelu te ejebaeduru ge ya huma Solu jasuru mboku, yebe Samelu nwuhuru. Iphe ono, Solu meru ono buru aphu tsoru Samelu. Chipfu su le ya tege emedu Solu eze ndu Ízurelu.

1 Samelu 16

Sámēlu awu Dévidi manū l'ishi g'ọ buru eze

- ¹Tobudu iya bu; Chipfu bya asu Samelu; “? Bu teke ole be ii-gu-bekporu aphu Solu; l'eka mu gbē jikawa iya g'ọ to buhe eze ndu Ízurelu. Gbajia manū l'upyi ngu tugbushia ge mu zia ngu ibe Jiesi, bu onye Betulehemu; noo le mu hotawaru onye lanu l'unwu iya unwoke g'ọ buru eze.”
- ²Sámēlu sū: “? Mu e-me imeagha jee? Solu -numa iya be oo-gbukwa mu.” Chipfu sū: “Kputa nwada eswi; su l'oo Chipfu be i byaru egweru ngweja.
- ³Zia Jiesi g'ọ bya l'eka ono, eegwe ngweja ono. Mu e-goshi ngu-a iphe, ii-me. Oo onye ophu mu pfuru ngu be ii-wuru mu manū l'ishi g'ọ buru eze obu.”

⁴Sámèlu bya emee iphe, Chipfu pfuru. O -rwuèpho mkpukpu Bètulehemu; ndu bu ogerenya mkpukpu ono tũko anma rwuurwu lè k'abyabya, o byaru ono. Èphe nõdu ajigbaa: “? Bũ-a k'oma bè ì byaru?”

⁵Sámèlu sũ phè: “Ee; o kwa-a k'oma. Oo Chipfu bè mu byaru egweru ngweja. Unu je eme onwunu g'unu dũ nsò; g'unu abya etsoru mu je kè ngweja obu.” Oo ya bũ; o bya emee Jiesi yèe unwu iya unwoke; èphe dũ nsò k'eje kè ngweja ono. O bya ekua phè g'èphe bya ngweja ono.

⁶Èphe tũko jerwuèpho; Sámèlu hũma Eliyabu; bya ariã sũ: “O doru enya l'oo onye ono, Chipfu hotaru g'a wũa manũ l'ishi ono bè pfuru Chipfu l'iphu-a.”

⁷Obenu lè Chipfu sũru Sámèlu: “Te eleshirò enya l'ugbugba iya; ozoo g'ò habe l'eli; noo lè mu jikaru iya ajika. Noo kèlè o tò bũdu gè nemadzũ eleje enya l'iphe, bũ gè Chipfu eleje iya. Nemadzũ anòduje ele ugbugba eli èhu; obenu lè Chipfu anòduje ele enya l'ime obu.”

⁸Oo ya bũ; Jiesi bya ekua Abinadabu; bya emee g'ò ghabua l'iphu Sámèlu. Sámèlu sũ: “Onye owana bè Chipfu ta ahòtakwarupho.”

⁹Jiesi bya emee gè Shama ghabua. Sámèlu sũ: “Onye owana bè ta abũkwapho onye ophu Chipfu hotaru.”

¹⁰Jiesi mee g'unwu iya unwoke esaa ghagbua l'iphu Sámèlu. Sámèlu sũkota l'ò tò dũdu onye ophu Chipfu hotaru l'ime phè.

¹¹Sámèlu bya ajĩa Jiesi sũ: “? Bũ mkpakò unwegirima ngu unwoke baa?” Jiesi sũ iya: “O phòdukwaduru onye ophu kachakpoo abũru nwata; òlè oochekwanu atũru.” Sámèlu sũ: “Ye nemadzũ g'e je ekua ya; kèlè anyi taa nõdukwa anòo jasũ l'oo-bya.”

¹²Oo ya bũ; o zia e je ekua ya o bya. Nwata ono dũ kè nwa putuputu. Enya nõdu egbu iya kè nwa shiishii; o dũ ùbvù l'enya. No iya; Chipfu sũ Sámèlu: “Gbalihu wũa ya manũ l'ishi; kèlè oo ya bè bũ onye ophu obu.”

¹³Sámèlu bya ewota upyi ono, o yeru manũ ono bya egude wũa ya manũ ono l'ishi l'iphu unwune iya. E -shi mbòku ono; Unme Chipfu bya Dévidi l'èhu k'ike. Sámèlu tũgbuwaro lashĩa mkpukpu Rama.

Dévidi akpòru Sòlu une

¹⁴Nta-a bè Unme Chipfu lufuwaru Sòlu l'èhu; Chipfu bya ezia èjo maa; o kpangashĩahaa ya èhu.

¹⁵Ndu ozi Sòlu sũ iya: “? Lewarò; nta-a bè èjo maa, Chileke ziru akpangashĩa ngu èhu?”

¹⁶Gè gũbe nnajiuphu anyi zinaa anyibe ndu-ozì ngu g'anyi je achoo onye maru g'aakpoje une; k'ophu bũ èjo maa ono, Chileke ziru ozi ono -kparwutaè ngu phò l'èhu; onye ono akpòoru ngu iya; l'ì-ka nwa mma.”

¹⁷Oo ya bũ; Sòlu sũ ndu-ozì iya: “Unu chòo onye akpoje une rengurengu dutaru mu.”

¹⁸Onye lanu le ndu-ozu ono su iya: “O nweru nwata mu humaru le mkpukpu Betulehemu; nwatibe Jiesi. Nwata o bu be akpo une doru enya ree. O bu onye okpehu du-ghe adu-ghe; buru onye ike du l'ogu; bya amaru g'eepfufe opfu ree; bya amakwapho mma; buru onye Chipfu swiru eswiru.”

¹⁹Solu bya ezia ndu oozije ozu g'ephe je ibe Jiesi je asu iya: “Denaa mu nwa ngu nwoke ono, bu Dévidi, bu iya bu onye ophu eche aturu ono.”

²⁰Oo ya bu; Jiesi bya akputa nkafu-igara; chiru buredi doo ya l'eli; pata otumu mee bya akputa nweghu ye iya; bya eduru nwatibe iya ono, bu Dévidi nu phe g'ephe dujeru Solu.

²¹No iya; Dévidi lapfu Solu je ejeahaaru iya ozu. Solu kwatakpo ye Dévidi obu okpobe eyeye. Dévidi bya abwaruro onye achijeru iya ngwogu.

²²Tobudu iya bu; Solu bya ezia ozu g'e ziaru iya Jiesi su: “Jiko hanaa ge Dévidi buwaruro jeru mu ozu; kele o du mu l'obu.”

²³O nodu abujeru teke ejo maa ono, Chileke ziru ono kparwutaerupho Solu l'ehu; Dévidi ewota une iya kpohaa. Solu agbe teke ono bya enweru onwiya; l'o bya aka mma; ejo maa ono aparu iya haa.

1 Samelu 17

Dévidi yee Golayatu

¹Ndu Filisitayinu bya atuko ndu ojogu phe kpakoo k'ogu. Ephe dzukobe le mkpukpu Soko, du l'ali Jiuda. O buru le mkpukpu Efesu-Damimu, no le mgbaka Soko yee mkpukpu Azeka be ephe nmaru anmanma ugu.

²Solu yee ndu Izurelu dzukobe bya anmaa anmanma ugu le nsuda Ela bya akpo giriri g'ephe tsoo ndu Filisitayinu ugu.

³Ndu Filisitayinu nodu l'eli ubvu lanu; ndu Izurelu nodu l'eli ubvu lanu l'ibiya ophu. O buru nsuda ubvu labo ono be no-buharu phe l'echi.

⁴Tobudu iya bu; onye bu o-lwua-odoru, shi le mkpukpu Gatu, epha iya bu Golayatu bya eshi l'odu ndu Filisitayinu lufuta. Ogologo iya be du nkwo-eka tete.

⁵Okpu-igwe, o kpuchiru ishi be bu onyirubvu be e gude mee ya. Teme uwe-ogu, o yeru l'ehu be bukwapho onyirubvu be e gude mee ya; teme e mee ya o du ekiri ekiri. Uwe-ogu ono be erwa iya du unu shekelu iri l'ebo l'ukporo iri.

⁶O woru iphe, e gude onyirubvu mee kechia ogboro; bya ewofuaru arwa, e gude onyirubvu mee nyakoru l'azu.

⁷Oshi arwa iya ophu o gude l'eka dupeho g'igwe, shihuru ike, onye ekweje ekwa egudeje ekwe ekwa. Pyipyipyi igwe, e moberu l'ishishi arwa iya ono be erwa iya du unu shekelu l'ukporo shekelu iri. Onye apajeru iya iphe, l'oogbobeje ezeru onwiya bya evutaru iya uzo.

⁸Golayatu bya ebvuru; raaru ndu ojogu ndu Ízurelu órà sù phẹ: “? Denu g'o gude unu futa bya akpoo giriri k'ogu? Mbèdua bụ onye Filisitayinu; unubèdua bụru ndu-ozì Sòlu. Unu hòta onye lanu l'ime unu g'ò byapfuta mu ogu!

⁹O -bùru l'òo-dù ike tsoo mu ogu; gbua mu; anyi anòdu unu l'èka; òle ò -bùkwanuru lẹ mbèdua kapyaberu iya; woru iya gbua; unu aburu ndu a-nòdu anyi l'èka; jeahaaru anyi ozi!”

¹⁰Onye Filisitayinu ono bya asu: “Ntanu-a bẹ mu tunwaaru ndu ojogu ndu Ízurelu! Unu hòta onye lanu yeru mu gẹ mu l'iya zùgbabe iya!”

¹¹Sòlu yẹe ndu Ízurelu nùmaephe iphe, onye Filisitayinu ono pfuru; ẹhu rwushihu phẹ; oke ndzu-agugu rwuta phẹ.

Dévidi abya agbaphe ndu Ízurelu

¹²Dévidi bẹ bụ nwatibe onye Ifurata ono, ẹpha iya bụ Jiesi, shi lẹ mkpukpu Bètulehemu, nò l'alì Jiuda. Jiesi bẹ nwutaru unwoke ẹsato. O bụwaa ogerenya shii; bụru onye yì lẹ ndu kawaru nka nò odu teke Sòlu bụ eze.

¹³Unwu Jiesi umadzu ẹto ophu kachaa aburu ogerenya bẹ tso Sòlu jee ogu. Ẹpha okpara iya bụ Eliyabu. Otsota bụru Abinadabu. Onye k'ẹto bụru Shama.

¹⁴O bụru Dévidi bẹ kakòta aburu nwata l'ime phẹ. Umadzu ẹto ophu kachaa aburu ogerenya bẹ tso Sòlu.

¹⁵Dévidi nòdu eshije l'ibe Sòlu eje eche aturu nna iya lẹ Bètulehemu. O -jehaa; l'ò laphushia azu l'ibe Sòlu.

¹⁶Ukporo abalì labo bẹ onye Filisitayinu ono afutakotaje l'utsu mẹ l'uzenyashi bya ebvugabe onwiya.

¹⁷Tòbudu iya bụ; Jiesi sù nwa iya, bụ Dévidi: “Wota nkweka ereshi, a huru ahuhu waa ishi buredi iri-a mee ẹgwegwa wojeru iya unwune ngu l'èka ẹphe doru k'ogu ono.

¹⁸Gudekwapho chiizu-a ẹphe n'iri; woru nù onye-ishi ndu ojogu phẹ. L'ì maru mẹ ? ẹhu dua unwune ngu ono ree? L'ìbyawaro edooru mu g'onodu phẹ dù.

¹⁹Ẹphe lẹ Sòlu; mẹ ndu Ízurelu l'ophu bẹ tukoru nòdu lẹ nsuda Ela etso ndu Filisitayinu ogu.”

²⁰Oo ya bụ; o be l'onmewa utsu; Dévidi gbeshi paru aturu iya haaru onye eletaru iya ya ẹnya; bya akwakobe ivu tugbua jeshia gẹ nna iya, bụ Jiesi ziru iya ono. O bụru teke o rwuru l'odu ono bụ teke ndu ojogu ono azu ebvu ogu; awufu ejewaa l'iphu ogu.

²¹Ndu Ízurelu waa ndu Filisitayinu bya akpoo giriri chebegbaaru onwophe iphu.

²²Dévidi tuko ivu ono, o gude bya; haaru onye l'eche ivu ndu ojogu nche; gude oso gbapfu unwune iya l'èka a kporu giriri k'ogu je ekele phẹ.

- ²³Ephe kpukwaduraa opfu l'onu; o-lwua-odoru ndu Filisitayinu, bu Golayatu, bu onye shi le mkpukpu Gatu; shiepho l'eka ephe kporu giriri k'ogu hefuta; bya awata atunwa ndu ojogu ndu Izurelu g'ootunwajehawa phe pho. Dévidi numa iya.
- ²⁴Ndu Izurelu l'ophu bya elevu nwoke ono; ndzu-agugu rwutanu phe; ephe tuko tsu oso.
- ²⁵Ndu Izurelu tuko epfu su: “? Unu humaru-a ge nwoke-a l'anodujeepho afuta-phe tekenteke? Iphe, ofutajeepho bu g'o tunwaa ndu Izurelu. Onye duru ike gbua ya be eze e-vukwaru eku, paru eka apaa nu. Oo-kekwapo onye obu nwada iya; bya agufu ndu unuphu ibe nna onye obu l'atu akiriko l'ali Izurelu.”
- ²⁶Dévidi bya ajia ndu pfu-kube iya nu su: “? Bu gunu be ee-meru onye gburu nwoke Filisitayinu ono; wofu ndu Izurelu iphe-iphere owana l'iphu? ? Bu gunu be onye Filisitayinu-a, te ebuduru ubvu-a bu ke g'o tunwaa ndu ojogu ke Chileke ophu no ndzu?”
- ²⁷Ephe bya eyeeru iya onu; su iya: “Oo iphe ono, anyi shi pfuhawaa ono be ee-meru onye gburu iya nu.”
- ²⁸Eliyabu, bu nwune Dévidi k'ogerenya bya anuma ge yee ndu ono epfu; o voru oku wua ehu l'iphe ono, Dévidi pfuru ono su: “? I byaru eme gunu l'eka-a? Mbụ ? bu onye be i gbadoru aturu olemole pho l'echiegu? Mu maru-a g'i kube onwongu; bya amakwarupho g'ejo okpoma du-be ngu. Iphe, i byanuru bu g'i bya ahuma g'e gude alwu ogu.”
- ²⁹Dévidi su iya: “? Bu gunu be mu meru nta-a? ? Bu ge mu te epfushi opfu?”
- ³⁰O ghakobe ghaaru onye ozo iphu wata aji iphe, ooji. A bya epfukwaaru iya iphe ono, e pfuhawaru iya pho.
- ³¹Ndu ozo numa onu, Dévidi yeru; bya atugbua je edooru iya Solu. Solu zia g'e je ekua ya.
- ³²Dévidi bya asu Solu: “G'o to dukwa onye obu e-te ophe l'opfu ehu onye Filisitayinu-a. Nwozi ngu be e-je-a etsoo ya ogu.”
- ³³Solu su iya: “I ti hakwa k'eje etso onye Filisitayinu ono ogu; i bukwadu nwata nwokoro nshii; obenu le yebedua buwaa onye bu ogerenya, shi teke o bu okorobya lwuta ogu.”
- ³⁴Dévidi sukwanu Solu: “Nwozi ngu be bu aturu nna iya be o shihawaa uzanya cheta. Teke oduma; ozoo ejo anu, bu biye byaru apata nwaturu mu lanu l'eka ephe doru;
- ³⁵be mu etsopyabeje iya; chia ya iphe; nafu iya nwaturu ono l'onu. Teke o ghakoberu tsopfuru mu; mu aworu iya; kwaa ya agba; woru iya gbua.
- ³⁶Nwozi ngu be gbuwaru oduma yee ejo anu, bu biye. Onye Filisitayinu-a, te ebuduru ubvu-a je l'adu egube ono; noo kele o tunwaru ndu ojogu ke Chileke ophu no ndzu.

- ³⁷Chipfu ono, bu onye dzotaru mu l'anya-nvo oduma waa l'anya-nvo ejo anu, bu biye ono be bu iya a-dzota mu l'eka onye Filisitayinu ono." Solu su Dévidi: "Jeshia. Ge Chipfu swikwaru ngu eswiru-o!"
- ³⁸Solu bya achita akpawuru uwe iya kpua Dévidi; bya eworu okpu-ogu, e meru l'ope kpube iya l'ishi; bya achita uwe-ogu iya yefua ya.
- ³⁹Dévidi bya eworu ogu-echi iya kepyabe l'uwe-ogu ono; bya ejeshia g'o gude iya jephee ejephe; ophu o dudu ike; kele o toko kwoduru iya ehu; mbu egube ngwa ono. O su Solu: "Mu ta adukwa ike eye egube iphe owa-a eje; kele o toko kwoduru mu ehu." Oo ya bu; o woru iya yeshikota.
- ⁴⁰O bya ewota oshi-mpaleka iya kpapfuru; bya ahota mkpuma, a gba enu uzo ise, akwogbachaa akwokwo le nggele l'eka ono; chiru ye le nwekpa, no l'eda, ndu eche aturu o gude. O gude robo iya l'eka; bya ejepfushia onye Filisitayinu ono ogu.
- ⁴¹No iya; onye Filisitayinu ono kparu onye apajeru iya iphe, eegudeje gbobuta onwonye vuru uzo; ejekpopho abyapfuta Dévidi.
- ⁴²O bya elevu Dévidi; bya ahuma l'o bu nwata nwokoro nshii, du nwa putuputu; bya acha nwa rweerweerwe; o gbegbe lephee ya enya.
- ⁴³O su Dévidi: "? Mu bu nkuta meru iphe i chi oshi abyapfuta mu?" Onye Filisitayinu ono gude agwa ibe phe ephu Dévidi iphu;
- ⁴⁴bya asu iya: "Bya l'eka-a ge mu eworu anu ngu keeru anu-egbudu yee enu, ephe l'eli!"
- ⁴⁵Dévidi su onye Filisitayinu ono: "O bu eviya l'i gude ogu-echi; me arwa, du iche iche abyapfuta mu ogu; obenu le mbedua gude epha Chipfu, bu Okalibe-kangokotaru-nu; mbu Chileke ke ndu ojogu ndu Izurelu, bu iya bu onye ono, i tunwaru ono.
- ⁴⁶Ntanu-a be Chipfu l'e-me gi daba mu l'eka; mu echitsua ngu l'ali; gbuta ngu ishi. Ntanu-a be mu l'e-me g'anu-egbudu yee enu, ephe l'eli ria odzu ndu ojogu ndu Filisitayinu. Oo ya bu ge mgboko l'ophu amakwanuru le Chileke dua le Izurelu.
- ⁴⁷Teme ndu-a, doru l'eka-a be a-makwarupho l'o to budu ogu-echi yee arwa be Chipfu egudeje adzo nemadzu; kele ogu-a be bu ke Chipfu. Oo-chikotaru unu ye anyi l'eka."
- ⁴⁸O be g'onye Filisitayinu ono jepfushiaru iya ntse k'ogu; Dévidi gude oso agba eje l'iphu ogu ono g'ephe l'iya zugbabe iya.
- ⁴⁹Dévidi bya eye eka l'ekpa iya; wofutaepho mkpuma lanu; bya eye le robo iya ono; bya esetae ya pho gbaa; o je adaepho onye Filisitayinu ono l'egedegee onu-iphu. Mkpuma ono buru iya ke tsurumu l'egedegee onu-iphu ono. O behuepho ebehu daa ke gworogodogo woru iphu bua l'ali.
- ⁵⁰Oo ya bu; Dévidi gude mkpuma waa robo lwu-kpee onye Filisitayinu ono; mbu gbatsua ya; woru iya gbua; ophu o dudu me ogu-echi, o gude l'eka.

⁵¹Dévidi gude ọso je apfukota iya l'eli. Ọ wọru ẹka l'ogu-echi onye Filisitayinu ono; mifuta iya l'obo iya; gude ogu-echi ono gbua ya; bya egbuta iya ishi. Ndu Filisitayinu humaepfo l'ọ-lwua-ọodoru pẹ ono bẹ nwuhuwaru nū; ẹphe dakọbe ye ọkpa l'oso.

⁵²Unwoke Ízurelu waa ndu kẹ Jiuda wulihu atụ oko; achi ndu Filisitayinu; chia pẹ chi-rwua mkpukpu Gatu; mẹ l'ẹka eeshije abahu lẹ mkpukpu Ẹkuronu. Ndu Filisitayinu, e gbushiru dakachaa l'uzo, e shi eje mkpukpu Sharayimu; mbụ jasụ lẹ mkpukpu Gatu mẹ Ẹkuronu.

⁵³Ndu Ízurelu chi-gheepfo ndu Filisitayinu ono lwaphuta azụ; bya eje akwaa ọkwata l'odu ndu Filisitayinu ono.

⁵⁴E mechaa; Dévidi pata ishi onye Filisitayinu ono je edobe lẹ Jierúsalemu. Ọ bya achikoo ngwogu onye Filisitayinu ono dobe l'ulo-ekwa yẹbe Dévidi gẹgedede.

Edu Dévidi edupfu Sọlu

⁵⁵No iya; Sọlu bya ahuma Dévidi g'oojepfu onye Filisitayinu ono ọgu; ọ jiahaa onye-ishi ndu ojogu iya, bụ Ábuna; sụ: “? Nwata ono bunaa nwatibe onye?” Ábuna sụ iya: “Gube eze; gẹ ndzụ dukwa ngu. Mu ta amakwa nwata obu.”

⁵⁶Eze sụ iya: “Kpataedukwa ishi nwatibe onye nwokorọbya ono bụ.”

⁵⁷Dévidi lwaepfo egbu onye Filisitayinu ono; Ábuna duta iya dupfutashia Sọlu lẹ gẹ Dévidi pakwadua ishi onye Filisitayinu ono l'ẹka.

⁵⁸Sọlu bya ajja ya sụ: “Nwokorọbya; ? i bunaa nwatibe onye?” Dévidi sụ iya: “Mu bukwa nwatibe nwozi ngu, bụ Jiesi kẹ mkpukpu Bẹtulehemu.”

1 Sámeļu 18

Ọnyà Dévidi yẹ Jionatanu

¹Dévidi yẹ Sọlu bọ-ghechaepfo ọja ono; obu Jionatanu yẹ kẹ Dévidi je atugba; Jionatanu yee Dévidi obu g'o yeru onwiya.

²E shi mboku ono, bẹ Sọlu kutaphuru Dévidi azụ swibe onwiya; ọphu o to kwebaedu g'ọ laphu azụ l'ibe nna iya.

³Dévidi yẹ Jionatanu woru ndzụ gbaa kẹle o yeru Dévidi obu g'o yeru onwiya.

⁴Jionatanu yefu uwe-mgbalanu, o yeru l'ehu chie Dévidi; yẹ uwe-ogu iya; mẹ ogu-echi iya; mẹ apfu iya; waa akpo, ookebeje l'uwe.

⁵Iphe, Sọlu zikotaru Dévidi g'o mee bẹ oomekotajeepfo rengurengu. Sọlu woru iya mee onye-ishi ndu ojogu iya. Ọ tuko atsokota ndu Ízurelu utso; jeakpaa lẹ ndu-ozu Sọlu.

Dévidi aduwaa Sọlu ashi

⁶Ndu ojogu wataepfo alwa ọgu ono gẹ Dévidi gbuchaaru onye Filisitayinu pho; unwanyi shi lẹ mkpukpu lẹ mkpukpu, dū lẹ Ízurelu l'ophu wufuta chiru nkwa; mẹ une; azụ ebvu ẹhu-utso; bya ete iya etete gude agba eze pẹ, bụ Sọlu ndzuta.

⁷Ephe nọdu agụ ebvu ono; ete asuje: “Sọlu gbuwaru unubuku ndu ojogu; Dévidi gbukwanaa unubuku ugbo iri.”

⁸Tọbudu iya bụ; ẹhu ghuahaa Sọlu ẹghu shii; kele iphe ono, ephe epfu ono bẹ dọ iya eji. O bya arịa sụ: “Dévidi bẹ eepfu l'o gburu unubuku ugbo iri; mbedua buru unubuku lanu kpoloko. ? Bụ gunu bẹ ọo-natabaa ọzo; ta abụadaa ali-eze ndu Ízurelu?”

⁹E shi ke mbọku ono bẹ Sọlu jiahaaru Dévidi ijięnya.

¹⁰O rwua nchitabọhu iya; ejo maa, shi l'eka Chileke; bya eji Sọlu l'ẹhu k'ike. O nọdu anọduje epfushi ọbvụ ọbvụ l'ime ọlo iya. Dévidi nọdu anọduje akporu iya une egube ọokpojehawaa iya ono. Sọlu nọdu egudejekwanu arwa l'eka.

¹¹Sọlu bya arịa sụ: “Gẹ mu bya egude arwa-a tųpyabe Dévidi l'igbulọ.” O tua ya ugbo labọ; Dévidi zekọta iya.

¹²Sọlu tsuahaara Dévidi ebvu; kele Chipfu pawaru iya haa; je eswiwaru Dévidi eswiru.

¹³Oo ya bụ; Sọlu bya edufu Dévidi l'eka yebe Sọlu nọ; woru iya mee onye-ishi unu ndu ojogu labọ l'ukporo iri. Dévidi nọdu edujeru ndu ono eje ọgu.

¹⁴Iphemiphe, o yeru ẹka nọdu abujeeru iya phọ upete; kele Chipfu nọ swiru iya eswiru.

¹⁵Sọlu humaepho g'iphe gude ekweberu Dévidi; ọ tsuahaara ya ebvu.

¹⁶Obenu l'iphe, bụ ndu Ízurelu; mę ndu Jiuda l'ophu tųkoru ye Dévidi obu; kele ọo ya anọduje edu phe eje ọgu.

Dévidi alu nwada Sọlu

¹⁷Sọlu bya asu Dévidi: “Waa Merabu, bụ nwada mu k'ogeranya baa. Ọoepho g'i gude ike ngu g'ọ ha jeru mu ozi; l'i lwu-chiru Chipfu ọgu ẹhu mu.” Noo lẹ Sọlu riru l'ime onwiya sụ; “Mu te ebyikpọdaa Dévidi ẹka. G'ọ bururo ndu Filisitayinu bẹ oo-bugbaru ephe l'ia!”

¹⁸Noo ya; Dévidi sụ Sọlu: “? Bụ onye bẹ mu bukwanu? ? Bụ gunu bẹ ndu unuphu anyi; ọzo ipfu nna mu bukwanu l'ali Ízurelu ke gẹ mu bya aburu ọgo eze?”

¹⁹Tọbudu iya bụ; ọ gbabe teke ọ gbaru g'e kee Dévidi nwada Sọlu ono, bụ Merabu; a gbẹ woru iya kee Adurelu, bụ onye mkpukpu Mehola.

²⁰Mikalụ, bukwapo nwada Sọlu bya eyee Dévidi obu. E je edooru iya Sọlu; ẹhu tsoo ya ntumatu.

²¹Sọlu rịa sụ: “Mu e-woru iya kee ya g'ọ buru ọnyà nmata iya; k'ophu ndu Filisitayinu a-daaha ya ẹka njo l'ẹhu.” Oo ya bụ; Sọlu bya asu Dévidi: “Nta bẹ bụwaa k'ugbo ẹbo, ọzo duru ngu g'i buru ọgo mu.”

²²Oo ya bụ; Sọlu zia ndu-ozii iya sụ: “Unu kuchi Dévidi ekuchi sụ iya: ‘Lenu; i dukwa eze ree; teme ndu-ozii iya yekọta ngu obu. Bụnuru ọgo eze obu nta-a.’ “

²³Ndu ozi ono je eworu iphe ono pfiaru Dévidi. Dévidi sù: “? Unu dobesu l'ò dù nphe aburu ògo eze? Lẹ mube onye adudu g'ò dù mu; òphu a ta kwatadu maru mu amaru.”

²⁴Ndu ozi Sọlu je epfiaru iya iphe, Dévidi pfuru;

²⁵Sọlu sù: “Unu sù Dévidi lẹ-a: ‘Eze te eledu ẹnya g'a kwaaruu iya aswa l'ishi nwanị ono; iphe oole ẹnya bụ g'e butaru iya akpapyị ndu Filisitayinu ụkporo ise; kele oomee g'o shi nno melata ndu òhogu iya ono.’ “ Iphe, Sọlu gude eme iphe ono bụru g'o mee gẹ Dévidi daba ndu Filisitayinu l'ẹka.

²⁶Ndu ozi eze bya epfuchaaru Dévidi iphe, eze pfuru ono; ò bya adu iya ree g'ò buri ògo eze. Oo ya bụ; òphu o toko rwukpòdanu teke a tuburu;

²⁷Dévidi gbalihu yee ndu etsoje iya nù je egbua ndu Filisitayinu ụkporo ụmadzu iri. O chilata akpapyị pẹ; bya agụ-dzua ya agụ-dzu nù eze; k'òphu òo-bukwanuru ògo eze. Sọlu bya ekuru nwada iya ono, bụ Mikalu kee ya; ò luru.

²⁸Tòbudu iya bụ; Sọlu bya amaru lẹ Chipfu nọ swiru Dévidi eswiru; bya ahuma lẹ nwatibe iya kẹ mgboko, bụ Mikalu yekwaru iya pho obu;

²⁹Sọlu bya akabaa ya atsu ebvu. Dévidi bwaruro òhogu Sọlu jaswaruro ya.

³⁰Ndu ojogu ndu Filisitayinu nodu anoduje ejepfu ndu Ízurelu ògu njepyabe. Ephe - byaa ògu ono; Dévidi akaephe emekpe ndu òhogu pẹ; e me lẹ ndu-ishi ndu ojogu Sọlu l'òphu. E shiwaro nno; epha Dévidi deahaa edede.

1 Sámẹlu 19

Sọlu eme g'o gbua Dévidi

¹Sọlu bya ezia nwa iya, bụ Jionatanu mẹ ndu-ozii iya l'òphu g'ephe gbua Dévidi. Obenu lẹ Jionatanu bẹ yeru Dévidi obu shii.

²Jionatanu je je edooru Dévidi sù iya: “Nna mu, bụ Sọlu bẹ achokwa ụzo, oo-shi gbua ngu. Oo ya bụ; kwabekwaru onwongu ẹnya l'utsu echele. Jekwa anodu l'ẹka dù l'icha domia onwongu.

³Mu e-tsoru nnana mu je anodu l'egu l'ẹka ono, i nọ ono; mu a-chi-koshiedu iya idzu ehu ngu. Iphe, mu numaru iya l'onu k'idzu ehu ngu ono; mu abya edooru ngu iya.”

⁴Jionatanu pfushiaru Sọlu, bụ nna iya kẹ Dévidi l'oma sù iya: “Gube eze; te emekwa nwozi ngu Dévidi eji. O tọ dukwa ẹka o mewaru ngu eji. Iphe, o megbaberu bẹ i ritakporu urwu, ha shii.

⁵Kele-a; ò turu ishi ndzu iya teke ono, o jeru egbua onye Filisitayinu pho. Chipfu dzoo ndu Ízurelu l'òphu; k'òphu paru ẹka apaa. I humakwaru iya; bya etee eswa. ? Denuhunu g'o gude i je emeswe onye adudu iphe, o meru; mbu g'i woru Dévidi gbua l'ebe adu iphe, ii-guru nù iya?”

⁶Sọlu numa iphe, Jionatanu pfuru bya eribua nte sù: “Eshinu Chipfu nọ ndzu g'ò nọ iya-a bẹ a ta abyadu egbu Dévidi.”

- ⁷Oo ya bu; Jionatanu bya ekua Dévidi tuko iphe ono dokotaru iya. O mechaa duta Dévidi dujeru Solu; ephe tuko nodu g'ephe shihawaa nodu le mbu.
- ⁸Ogu bya adakwaa ozo; Dévidi gbalihukwa je etsoo ndu Filisitayinu ogu. O tsua phe otsu-epfu; ephe gbachaa ikpabaka.
- ⁹Chipfu bya ezia ejo maa; o bya Solu l'ehu le g'o no l'ime ulo iya ujiku lanu paru arwa l'eka. Dévidi gudekwadu une iya l'eka akpo;
- ¹⁰Solu meahaa ge ya gude arwa ono tupyabe Dévidi l'igbulo; Dévidi zee ya; arwa ono je eguru l'igbulo. Dévidi pyofu gbalaa l'enyashi ono.
- ¹¹Solu bya ezia ndu-ozu g'ephe je l'ulo Dévidi je eche iya nche; g'ephe egbua ya l'utsu. Mikalu, bu nyee Dévidi pfuaru iya ya su: "O -buru li ti dzoduru ishi ndzu ngu l'enyashi-a be ee-gbukwa ngu echele."
- ¹²Oo ya bu; Mikalu shi le windo kuzeta iya; o gbafu gbalaa.
- ¹³Mikalu bya ewota nteke nyebe l'iphe-azee; bya achiru ekwa phukpute iya; bya eworu pyilo, e meru l'iji egbu dobe iya l'uzo ishi.
- ¹⁴O beepho teke Solu ziru g'e je egude Dévidi; Mikalu su phe: "Iphe emekwa iya."
- ¹⁵Solu bya eziphu ndu ono azu ozo g'ephe je ahuma Dévidi; bya asu phe: "Unu pata iya l'iphe-azee obu bya k'ophu mu e-gbuwa iya ro."
- ¹⁶Obenu le ndu ono byaru abata; o buru nteke be ze l'iphe-azee ono; waa pyilo, e meru l'iji egbu, no iya l'uzo ishi.
- ¹⁷Solu su Mikalu: "? Denu g'o gude i ghoro mu ugho egube-a; mbu woru ohogu mu dufu g'o gbalaa?" Mikalu su Solu: "O kwa l'oo l'o suru mu ge mu haa ya ge ya gbalaa! O -dudu be ya e-gbukwa mu!"
- ¹⁸Dévidi nahuepho gbalaa ono; o jepfushia Samelu le mkpukpu Rama je atuko iphe, Solu mekotaru iya dooru iya. Oo ya bu; yee Samelu swiru jeshia mkpukpu Nayotu je anodu.
- ¹⁹Ozi bya erwua Solu nchi le Dévidi be no le mkpukpu Nayotu, du le mkpukpu Rama.
- ²⁰O zia g'e je egude Dévidi. E jerwua bya ahuma ogbo ndu mpfuchiru Chileke l'eka ephe epfuchiru Chileke. O buru Samelu be pfuru l'eka ono; buru onye-ishi phe. Unme Chileke bya ndu ono, Solu ziru ozi ono l'ehu; ephe pfuchiahaaru Chileke.
- ²¹A bya epfuaru iya Solu; o zia ndu ozo; ephe jerwua bya epfuchikwarupho Chileke. Solu bya ezia ndu k'eto; ephe pfuchikwarupho Chileke.
- ²²Tobudu iya bu; o bya atugbua jeshia Rama l'onwiya bya erwua l'eze welu ono, du le Seku; o jia su: "? Bu awe be Samelu yee Dévidi no?" Ephe su iya: "Ephe nokwa le Nayotu, du le mkpukpu Rama."
- ²³Oo ya bu; Solu tugbua jeshia Nayotu, du le Rama ono; Unme Chileke byakwa iya pho l'ehu; o tsoru uzo epfuchiru Chileke jasuru o rwua Nayotu, du le Rama.

²⁴Ọ lafuchaa uwe iya gbaru ọto pfuchiaharu Chileke l'iphu Sámẹlu. Ọ gbaru ọto dabyiru l'ẹka ono eswe mẹ l'enyashi ono l'ophu. Ọo ya meru iphe, ndiphe asuje: “Sọlu ? ọ yifua lẹ ndu mpfuchiru Chileke ọtọ?”

1 Sámẹlu 20

Jionatanu yẹle Dévidi

¹Dévidi bya eshi lẹ Nayotu, dọ lẹ mkpukpu Rama gbalaa jepfushia Jionatanu je asu iya: “? Bukpoo gunu bẹ mu meru? ? Bu gunu bu ẹjo-iphe, mu mekpọru? ? Bu iphe-ẹji gunu bẹ mu meru nna ngu, meru g'o gude ọ nọdu achọ ishi ndzọ mu?”

²Jionatanu sọ iya: “Tuswekwa! Ishi ngu tee tuphahukwa. Lekpọdapho; nna mu ta adukwa iphe, ọ byaru eme; ophu o vuru ọzo pfuadaru mu iya; m'obeta ọ buru iphe, ha shii ọzoo ophu ha nwanshii. ? Denu g'o gude o je l'emeru mu ọwana lẹ mpya? Ọ ọtọ dukwa nno!”

³Dévidi bya eria angu sọ: “Nna ngu bẹ o doru ẹnya ree lẹ mu lẹ ngu dọ lẹ ree. O pfuwa iya hoojaa l'ime onwiya sọ: 'Jionatanu ta abyadu amaru iphe ya eme. Ọ -maru bẹ oo-ghu iya eghu.' Ọle-a; eshinu Chipfu nọ ndzọ g'ọ nọ iya-a; gubedua nọdu ndzọ g'i nọ iya-a; bẹ bukwapo g'ọ bu ire-lanu lẹ ndzọ mu tsọ-geewaru atsọ-geru.”

⁴Jionatanu sọ Dévidi: “Iphe, i sukporu gẹ mu meeru ngu bẹ mu l'e-meru ngu.”

⁵Ọo ya bu; Dévidi sọ iya: “Lenu; echele bukwa onwa ọphúú; ọ gbaru gẹ mu l'eze tuko rigba nri. Ọle-a; haa mu gẹ mu je edomia onwomu l'egu jasọ l'uzenyashi nwarechi.

⁶Ọ -buru lẹ nna ngu kpajeru ishi mu; sọ iya lẹ mube Dévidi bẹ rwoshikwaru ngu ike g'i haa mu gẹ mu gbaru je Bẹtulehemu, bu ibe anyi; kele eegwe ngweja, ndu ipfu anyi l'ophu eegweje aphagapha l'ẹka ono.

⁷Ọ -buru l'ọ sọru l'ọ dua ree; l'i maru lẹ mube nwozi ngu bẹ a-dzọ-a. Ọ -bukwanu l'ehu ghuru iya eghu; l'i maru l'ooriru mu ẹjo oriri.

⁸A -bya lẹ ke gubedua; mejekwaru mube nwozi ngu iphe-oma; noo kele mu lẹ ngu tukokwaru nọdu l'iphu Chipfu gbaa ndzọ. O -nweru ẹjo-iphe, mu meru; gbukwaa mu l'onwongu. Kele-a ? bu ke gunu bẹ ii-gude kpuru mu je anu nna ngu?”

⁹Jionatanu sọ: “Tuswekwa! Ọ -buru lẹ mu maru lẹ nna mu ariru ngu ẹjo oriri; ? mu te epfuduru ngu iya ọtọ?”

¹⁰Dévidi jia ya sọ: “? Bu onye e-pfukwanuru mu iya; m'ọ -buru lẹ nna ngu yeru ngu iya onu karabaa?”

¹¹Jionatanu sọ: “Bya g'anyi je l'egu obu.” Ọo ya bu; ephe bya atuko jeshia l'egu ono.

¹²Jionatanu bya asu Dévidi: “Gẹ Chipfu, bu Chileke ke ndu Ízurelu bukwaru onye-ekebe anyi; lẹ mu a-jita nnana mu iphe ono egube nta-a echele; ọzoo nwarechi. Ọ -buru l'ochiru ngu idzu oma bẹ mu e-pfuru ngu iya-a g'i maru.

- 13**Ọ -bukwanuru ọ́ ọ́ nna mu ọ́ ọ́ l'achọ́ g'ọ́ meka ngu iphe; gẹ́ Chipfu mekwaa mọ́be Jionatanu ọ́phu ka njo; m'ọ́ -bọ́ru ọ́ ọ́ mu te emeduru g'ị́ maru; mbụ́ dufu ngu g'ị́ gbalaa l'ẹ́hu-guu. Tẹ́me gẹ́ Chipfu swikwaru ngu eswiru g'ọ́ shi swiru nna mu ono.
- 14**Ole-a; jasukpooru gẹ́ mu a-nọ́-bekpọ́ru ndzụ́; goshijeekwa mu phọ́ n-yemobu, shi l'ẹ́ka Chipfu; mbụ́ g'e shi ẹ́gube ono g'e te egbu mu.
- 15**Mbụ́-a; gẹ́ n-yemobu ngu ono te ebuhukwa ebuhu l'ẹ́hu ndibe mu; m'ọ́ betakpooru Chipfu wofukotachaa ndu ọ́hogu gube Dévidi l'eli mgboko-a.”
- 16**Oo ya bụ́; Jionatanu yẹ́ ọ́nu-ọ́lo Dévidi gbaa ndzụ́. Ọ́ sụ́: “Gẹ́ Chipfu jikwaa ndu ọ́hogu Dévidi 'ọ́ka-ọ́-aji.”
- 17**Jionatanu bya emee gẹ́ Dévidi ribuaru iya nte; gude goshi iya l'ọ́ yeru yẹ́be Jionatanu obu; noo kẹ́le Jionatanu yeru Dévidi obu g'ọ́ yeru onwiya.
- 18**Jionatanu bya asụ́ Dévidi: “Echele ọ́ ọ́ bụ́ ọ́bo-iphe k'ọ́nwa ọ́phúú. A taa humadu ngu; oshi, iinoduje egheru ọ́nu.
- 19**Teke o beru nwarechi; je anọ́du l'ẹ́ka phọ́, i domijeru onwongu ọ́ teke ono, iphe-a wataru adada ọ́ mbụ́ phọ́. Nọ́du kwabẹ́ l'aguga mkpuma ono, bụ́ Ezełu.
- 20**Mu -bya ọ́ ọ́ mu a-gba ọ́nu apfụ́ ẹ́to l'uzo ibiya ono; mbụ́ gbaa ya g'ọ́ bụ́ l'ọ́ nweru iphe, mu tọ́beru agbagba.
- 21**Teke ono ọ́ ọ́ mu e-zi nwata nwokoro sụ́ iya: ‘Tugbua je achọ́ apfụ́ ono.’ Teke mu sụ́ru iya g'ọ́ chita apfụ́ ọ́bu; l'ọ́ kwa iya nọ́ iya l'uzo ẹ́ka ibiya ọ́phuu; futawaro teke ono; ono goshiru l'eshinu Chipfu nọ́ ndzụ́ g'ọ́ nọ́ iya-a ọ́ ọ́ tọ́ dudu iphe, bya l'eme ngu nụ́.
- 22**Teke bukwanu ọ́ ọ́ mu sụ́ru nwata nwokoro ono: ‘Lenu; apfụ́ ọ́bu ọ́ ọ́ dukwadu ngu l'uzo atatiphu!’ Ọ́o ya bụ́; l'ị́ tugbua; kẹ́le Chipfu ọ́ ọ́ dufuwaru ngu g'ị́ tugbua.
- 23**A -bya abya l'iphe ọ́phu anyi shi pfua; nyatakwa l'ọ́ Chipfu bụ́ onye-ekebe mu ọ́ ọ́ ngu jasụ́ l'ojejeje.”
- 24**Oo ya bụ́; Dévidi domia onwiya l'ẹ́gu. Ọ́ bya erwua g'ọ́bo ọ́nwa ọ́phúú ono rwuru; eze bya anọ́du gẹ́ ya ria nri ọ́bo-iphe ono.
- 25**Eze nọ́du l'ẹ́ka ọ́onoduje ọ́ ọ́ mgboru igbulọ́. Jionatanu nọ́du anọ́ ghaaru iya iphu. Ábuna nọ́-kube Sọ́lu ọ́ ọ́ mgbureku. Obenu l'ẹ́ka Dévidi anọ́duje dabyiru iphoru.
- 26**Ọ́phu Sọ́lu te nwedu iphe, o pfuru mbọ́ku ono; kẹ́le ọ́ rikwanuru sụ́: “O nweruphọ́ g'ọ́ nwuru Dévidi ọ́phu ọ́ tọ́ dudu nsọ́. Sụ́ l'ọ́o-buru phọ́ eviya l'ọ́o nsọ́ ọ́ ọ́ Dévidi ta adudu.”
- 27**O be ọ́ ọ́ nchitabọ́hu iya, bụ́ iya bụ́ mbọ́ku k'ẹ́bo l'ọ́nwa ọ́phúú ono; ẹ́ka Dévidi anọ́duje dabyikwaru iphoru ọ́zo. Ọ́o ya bụ́; Sọ́lu sụ́ nwatibe iya, bụ́ Jionatanu: “? Bụ́ gunu meru iphe, nwatibe Jiesi ta abyaduru eri nri unyaphu ọ́zoo ntanụ́?”
- 28**Jionatanu sụ́ iya: “Dévidi rwoshikwaru mu ike gẹ́ mu haa ya gẹ́ ya je Bẹ́tulehemu.

²⁹O sūru l'ọo gẹ ya je; kele ndu ipfu phe be eegwe ngweja le mkpukpu phe; nwune iya sukwanu gẹ ya bya. L'ọ -buru le ya du mu l'obu; gẹ ya jenu gẹ yee unwune iya humagbabe. Noo iphe, meru g'o gude ophu o to byaduru eri nri eze bu ono."

³⁰Teke ono Solu tukoshi Jionatanu ehu-eghu su iya: "Gube nwa, ejo nwanyi; mbu nwa, nwanyi, ekwefuje ike nwuru-a! ? O du ngu gẹ mu ta amadu li turu ikè yeru nwatibe Jiesi; eme iphe-iphere ekpu unu le ne, nwuru ngu nu?"

³¹Le gẹ nwatibe Jiesi a-no-bekporu ndzu le mgboko-a be ehu ngu me ali-eze ngu ta abyakwa l'ekeru ekeru. Ngwa; zia g'e je ekuaru mu iya nta-a; kele o nwuhufutaje!"

³²Jionatanu bya ajia nna iya su: "? Bu k'ishi gunu be ee-gude gbua ya? ? Bu gunu be o meru?"

³³Solu woerupho arwa iya tua ya gẹ ya nmagbua ya. O tuswee ya. Jionatanu maekwarupho le nna iya chibuwaru l'oo-gbu Dévidi.

³⁴Jionatanu gude ehu-eghu, enwu iya phuruphuru g'oku l'ehu shi l'eka a no eri nri ono kwolihi lufu. O gude aphu k'iphe-iphere ono, nna iya eme ekpu Dévidi ono; ophu o to riduru nri le mboku k'ebbo l'onwa ophuú ono.

³⁵O be l'utsu iya; Jionatanu gbeshi jepfushia Dévidi l'egu g'ephe l'iya dzuda. O duta nwata nwokoro nshii; ephe l'iya swiru.

³⁶O su nwata ono: "Gbagbua je achoo apfu-a, mu abya agbagba-a." Nwata ono nodu agbagbukwadu; o gbaa apfu ono l'uzo atatiphu nwata ono.

³⁷Nwata bya erwu l'eka apfu ono, Jionatanu gbaru pho daru; o kua nwata oku su: "? Tobudu l'uzo atatiphu ngu be apfu ono daru?"

³⁸O rashiaru nwata ono ora ike su iya: "Mee egwegwa! Lobaru ije! Ta apfukwaru apfuru!" Nwata ono turuta apfu ono; gbagfutashia nnajiuphu iya.

³⁹Ophu nwata ono amakpodanu iphe, akọ nu; gbahaepho Jionatanu yee Dévidi maru iphe, anwu nu.

⁴⁰Oo ya bu; Jionatanu chiru ngwogu iya chie nwata su iya: "Jewarọ; chiru iya chilaa unuphu."

⁴¹Nwata ono tugbuchaepho; Dévidi shi l'aguga mkpuma ono l'uzo ndohali bya bya ebuaru Jionatanu iphu l'ali ugbo eto. Ephe bya etsutsua onwophe onu; bya atuko chiswee ekwa; ole Dévidi ka ara ekwa obu.

⁴²Jionatanu su Dévidi: "Laa l'ehu-guu; kele anyi gudewaa epha Chipfu ribua nte le mu le ngu be a-buru onya. 'O kwa Chipfu be bu onye-ekebe mu le ngu; mbu me oshilokpa ngu waa oshilokpa nkemu jasụ l'ojeje.' " Oo ya bu; Dévidi tugbushia; Jionatanu laphushia azu l'unuphu.

1 Sámelu 21

¹Dévidi tughua jepfushia Ahimeleku, bu onye uke Chileke le mkpukpu Nobu. Ehu nmaa Ahimeleku anmanma g'ọ humaru Dévidi. O su Dévidi: “? Bu gunu meru iphe, i swi nwekinyi ngu? ? Bu gunu meru iphe o to nwedu onye unu l'iya swi?”

²Dévidi su Ahimeleku, bu onye uke Chileke: “Eze be nweru iphe, o ziru mu ge mu mee. O suru mu g'ọ to dukwa onye mu e-me g'ọ maru iphe ono, o ziru mu ono; mbu iphe ono, o turu mu ekemu iya ono. Ndu ozi mu be o nwewaru eka mu suru g'anyi l'ephe dzuda.

³Su-a; ? o nweru g'ọ du ngu l'eka to? Nunu mu ishi buredi ise; ozokpoephe iphe ozo, du ngu nu.”

⁴Onye uke Chileke ono su Dévidi: “Buredi mmanu ta adukwa mu; gbahaephe buredi, du nsọ. Le mu anu ngu iya bukwa m'ọ buru l'unwokoro ono be ephe l'unwanyi ta akwaduru.”

⁵Dévidi yeeru onye uke Chileke ono onu su: “Iphe, bu ire-lanu bu l'anyi l'unwanyi te emegbakwaru e -shi k'ujiku eto, anyi gbeshiru ije. Ono buru g'odujekpoo me anyi -gbeshi ije. Mbu l'ehu-nwoke agbejenu du nsọ me anyi -nodu eje iphe mmanu ozo; ophu o buro ke ntanu-a!”

⁶Oo ya bu; onye uke Chileke ono woru buredi ono, du nsọ ono woru nu iya; eshi ophu o to duedu buredi ozo, du l'eka ono; gbahaephe buredi k'ono e shi dobe l'iphe Chipfu ono. Mbu buredi k'ono, a chifuru bya egude ophu evu oku dochia enya iya le mboku ono, e wofuru iya ono.

⁷Noo ya onye lanu le ndu ejeru Solu ozi nodu l'eka ono mboku ono. Kele iphe sederu iya nu bu g'oo-shi meebe nsọ nsọ abaru Chileke eja. Epha iya bu Dowegu; o bu onye Edomu; buru onye-ishi ndu eche-aturu Solu.

⁸Dévidi jia Ahimeleku su: “? Unu nweru arwa; ozoo ogu-echi l'eka-a? Kele mu te egudedu ogu-echi mu; ozoo ngwogu ozo; noo kele ozi ono, eze ziru ono be du oku oku.”

⁹Onye uke Chileke ono su: “Oo ogu-echi Golayatu, bu onye Filisitayinu ono, i gburu le nsuda Ela be du l'eka-a. A phu-chiru iya l'ekwa dobe l'azu uwe-ukuvu, onye uke, eyeje. O -buru l'ii-wota ono; l'i wota iya; eshinu o to duedu ogu-echi ozo, du l'eka-a; gbahaa onoya.” Dévidi su: “O to dudu ophu dubaa g'ono; nu mu iya ro.”

¹⁰Le mboku ono be Dévidi gbafuru lapfushia Akishi, bu eze mkpukpu Gatu l'eka o o gbalaru Solu.

¹¹Ndu ozi Akishi su iya: “? To bunaa Dévidi owa be bu eze ndu ali ono-a? ? To bunaa yebdua be ephe agu-kuje l'ebvu l'eka ephe ete ebvu su: ‘Solu gbuwaru unubuku ndu ojogu; Dévidi gbukwanaa unubuku ndu ojogu ugbo iri?’ “

¹²Ophu ono rwua Dévidi l'ehu; o tsushiahaa Akishi, bu eze ndu Gatu ebvu ike.

¹³Ọ bya elekebe ẹnya ghaa umere; meahaa ọbvụ ọbvụ l'ataphu phẹ l'ẹka ono; mbụ nọdu phẹ l'ẹka meahaa g'onye ọbvụ eme. Ọ nọdu akakashị mgbo, e yeru l'ọnu-oguzo; alwashị ọnu-mini ekpu onwiya l'ẹji-agba.

¹⁴Akishi sụ ndu-ozi iya: “Unu lenu; ọbvụ emekwa nwoke-e! ? Bụ ọnu bẹ unu dutashiaru mu iya?”

¹⁵? Ndu ọbvụ eme bẹ akọru mu ọko meru g'o gude unu duta onye-a g'ọ bya emeahaa ọbvụ ọbvụ l'iphu mu. ? Ọ bụ ekemu l'onye-a batafütajeru mu l'ulo tọ?”

1 Sámẹlu 22

Sọlu egbushi ndu-uke Chileke

¹No iya; Dévidi shi lẹ mkpụkpu Gatu gbaru je anọdu l'ogba, dū lẹ mkpụkpu Adulamu. Unwune iya waa ndibe nna iya l'ophu nūma ẹ ya phọ; ẹphe wuru jepfushia ya l'ẹka ono.

²Ndu bukpo ndu iphe atsū l'ẹhu; mẹ ndu ji ụgwo; waa ndu iphe, eemgbabẹ l'alị ono ta adudu ree tuko wu-pfuta iya bya adọ-pee ya mgburugburu. Ọ bya aburu onye-ishi phẹ. Unwoke, yẹ ya tukuru nọdu bẹ dū unu nemadzū.

³Ọ buru l'ẹka ono bẹ Dévidi shi jeshia mkpụkpu Mizupa, dū l'alị Mówabu. O rwua je asū eze ndu Mówabu: “? Jiko kwenu gẹ ne mu waa nna mu lwapfuta ngu gẹ gū l'ẹphe nọdu jeye teke mu a-maru iphe, Chileke l'e-meru mu?”

⁴Ọo ya bụ; ọ parū phẹ haarū eze ndu Mówabu; yẹle ẹphe bukọtaru mkpụrumkpuru teke ono Dévidi bukọtaru l'ogba ẹka ọ gbaru laa je anọdu ezeru ndzū ono.

⁵Onye mpfuchiru Chileke, bụ Gadu bya asū Dévidi: “Ba nọduhekwa l'ogba ezeru ndzū. Tugbukwa lashia alị ndu Jiuda.” Ọo ya bụ; Dévidi shi l'ẹka ono lufu laa l'oswa Heretu.

⁶Sọlu bya anuma l'a humawaru Dévidi waa ndu etsoje iya nū. Teke ono bẹ Sọlu nọ lẹ mkpula oshi tamarisuku, nọ l'eli úbvú, dū lẹ mkpụkpu Gibiya. Sọlu gude arwa l'ẹka; ndu-ozi iya l'ophu tuko pfu-pee ya mgburugburu.

⁷Sọlu sū phẹ: “Unu ngabekpodapho; unubẹ ndu Benjaminu! Nwatibe Jiesi; ? l'ọonukota unu okabyi; waa opfu-vayinu tọ? ? Oo-mekota unu ndu-ishi unu ndu ojogu labo l'ukporo iri iri; mẹ ndu-ishi ukporo ndu ojogu ise ise tọ?”

⁸Mbụ meru iphe g'unu hakota agbaru mu ẹjo idzu; ophu ọ tọ dudu onye ophu meru gẹ mu maru teke okpara mu waa nwatibe Jiesi gbaru ndzū. Ophu ọ tọ dudu g'unu ha onye ophu kparū mu ishi; ọzoo pfuaru mu l'okpara mu bẹ yewaru nwozi mu, bụ Dévidi dube dube g'o je edomia onwiya kwaberu mu; mbụ ẹgube ọ kwagebenuru mu-a ntanu-a.”

⁹Tobudu iya bụ; Dowegu, onye Edomu, yẹle ndu-ishi ozi Sọlu tukuru pfuru l'ẹka ono sū: “Mu humakwaru nwatibe Jiesi g'ọ byapfutaru Ahimeleku nwa Ahitubu lẹ mkpụkpu Nobu.

- ¹⁰Ahimeleku jee akpataru iya ishi l'eka Chipfu. O gwekwarupho iphe, eri eriri gweru nu iya; woru ogu-echi Golayatu, onye Filisitayinu pho woru nufua ya.”
- ¹¹Noo ya; eze bya ezia g'e je ekuaru iya onye uke Chileke, bu Ahimeleku nwa Ahitubu; me ndibe nna iya l'ophu, bu ndu ono, bu ndu-uke Chileke le mkpukpu Nobu. Epe toko wu-pfuta eze.
- ¹²Solu bya asu: “Ngabe nchi nta-a gube nwa Ahitubu!” Ahimeleku su iya: “Hm; najiuphu mu.”
- ¹³Solu su iya: “? Bu gunu meru g'o gude unu le nwatibe Jiesi gbaaru mu ejo idzu. Mbụ i nu iya buredi yee ogu-echi; bya akpataru iya ishi l'eka Chileke; k'ophu o byaru ekwefuru mu ike; je akwageberu mu g'o kwagebenuru mu-a ntanu-a?”
- ¹⁴Ahimeleku yeeru eze onu su: “? Denukpoo onye ozo, egudebakpoo ire iya eka le ndu-ozu ngu l'ophu g'ogo eze, bu Dévidi; mbụ onye-ishi le ndu eche ngu nche; bya aburu onye a kakota akwabe ubvu le ndibe ngu l'ophu?”
- ¹⁵? Bu mboku ono bu mboku mbu, mu kpataru ishi opfu ehu iya l'eka Chileke? Tuswekwa! Ge gube eze te ejekwa atukobe nwozi ngu opfu; ozo m'onye lanu le ndibe nna mu; noo kele nwozi ngu ta amadu iphe, ada nu.”
- ¹⁶Eze su iya: “I buakwaa maa Ahimeleku; mbu gubedua l'ishi onwongu waa ndibe nna ngu l'ophu.”
- ¹⁷Eze su ndu eche iya nche, no-kube iya nu: “Unu ghakobe gbushia ndu-uke Chipfu; noo kele epebedua tukwarupho ikè yeru Dévidi. Epe machacharu teke oogbala; ophu epe abyaduru epfuaru mu iya.” Ole ndu-ozu eze ta adudu onye ophu o du npe ge ya halia eka gbua ndu-uke Chipfu.
- ¹⁸Eze bya asu Dowegu: “Ngwa; ghakobe gbushia ndu-uke Chileke ono!” Oo ya bu; Dowegu, onye Edomu bya aghakobe gbushiahaa phe. Le mboku ono be o gburu ukporo umadzu eno l'umadzu ise, bu ndu yeru uwe-ukuvu.
- ¹⁹O gudekwapho ogu-echi toko ndu Nobu, bu mkpukpu ndu-uke Chileke gbushikota; mbu gbushikota unwoke, bu iya nu; me unwanyi; me unwegirima; je akpaa le ndu ophu angukwadu era; mekpoo eswi; me nkapfu-igara; me aturu.
- ²⁰Ole nwoke lanu, epha iya bu Abyiyata, bu onye lanu l'ime unwegirima unwoke, Ahimeleku nwa Ahitubu nwataru nahuru gbalaa; gbapfushia Dévidi.
- ²¹Abyiyata dooru Dévidi le Solu be tokokwaru ndu-uke Chipfu gbushikota.
- ²²Dévidi bya asu Abyiyata: “Mu mameru-a mboku ono le Dowegu, bu onye Edomu be pfufutajeru iya Solu; eshi ophu o no l'eka ono. Egbugbu ono, e gbushikotaru ndu unuphu ibe nna ngu ono be bu mbedua be o shi l'eka.
- ²³Ta atsushi ebvu; nodu l'eka-a; kele onye ono l'achọ ishi ndzu ngu ono be l'achokwapho ke mbedua, bu Dévidi. O to nwedu iphe, e-me ngu nu me mu le ngu - nodu.”

1 Sámẹ̀lu 23

Dévidi adzọ ndu mkpukpu Keyila

- ¹Tọ̀budu iya bụ; a bya edooru Dévidi sụ iya: “Lenu; ndu Filisitayinu bẹ etsoakwa ndu mkpukpu Keyila ọgu; bya anawa phẹ nfu l'ẹka ẹphe echije bali phẹ.”
- ²Dévidi bya akpata Chipfu ishi sụ: “? Bụ gẹ mu je etsoo ndu Filisitayinu ono ọgu tọo?” Chipfu sụ iya: “Jenu je etsoo ndu Filisitayinu ọbu ọgu; dzọta ndu Keyila.”
- ³Ndu ẹphe lẹ Dévidi aswiye sụ iya: “Lewarọ; l'alị ndu Jiuda l'ẹka-a bẹ anyi atsukpoda ebvu. ? Denukwanu g'ọo-dụwaro mẹ ọ -buru l'anyi jeshiaru etso ndu Filisitayinu ọgu lẹ mkpukpu Keyila!”
- ⁴Dévidi byakwa akpata Chipfu ishi ọzo. Chipfu sụ iya: “Gbalihu jeshia Keyila; noo kele mu e-woru ndu Filisitayinu ye ngu l'ẹka.”
- ⁵Oo ya bụ; Dévidi yẹe ndu etsoje iya nụ tugbua jeshia mkpukpu Keyila je etsoo ndu Filisitayinu ọgu; gbua phẹ pyaapyaa; rwukọo ẹku phẹ; shi nno dzọta ndu mkpukpu Keyila.
- ⁶Teke ono, Abyiyata nwa Ahimeleku gbalaru gbapfuta Dévidi lẹ mkpukpu Keyila ono bẹ ọ chị uwe-ukuvu ono.
- ⁷E je edooru Sọlu lẹ Dévidi bẹ nọkwa lẹ Keyila. Sọlu sụ: “Chileke mewaru gẹ Dévidi daba mu l'ẹka; kele ọ kwawaru; eshinu o jeru abahu lẹ mkpukpu, e gude igbulọ kpupheta mgburugburu; yee ya mgbo waa mkpurukpu-ígwè, eegudeje atuchi iya atuchi.”
- ⁸Sọlu bya atuko ndu ojogu iya kukọbe k'ọgu; mbụ g'ẹphe jeshia mkpukpu Keyila je ekephee Dévidi yẹe ndu ẹphe l'iya swi.
- ⁹O be gẹ Dévidi byaru amaru lẹ Sọlu bẹ achiwaru iya ẹjo idzu; ọ sụ Abyiyata, bụ onye uke Chileke: “Chitaru mu nụ uwe-ukuvu ono.”
- ¹⁰Dévidi bya asụ: “Gube Chipfu, bụ Chileke kẹ ndu Ízurelu; mube nwozi ngu bẹ o tsuwaru etsutsu lẹ nchị lẹ Sọlu bẹ eme g'oo-shi bya Keyila bya egude opfu ẹhu mu mebyishia mkpukpu-a.
- ¹¹? Ndu Keyila a-kputa mu nụ iya tọo? Gube Chipfu, bụ Chileke kẹ ndu Ízurelu; pfiaruro mube nwozi ngu gẹ mu maru: ? Sọlu a-bya l'ẹka-a dọ gẹ mu numaru iya ono?” Chipfu sụ iya: “Oo-byakwa.”
- ¹²Dévidi bya ajikwaa ya ọzo: “? Ndu Keyila a-kputa mu lẹ ndu-a, l'etsoje mu nụ-a nụ Sọlu tọo?” Chipfu sụ: “Ee; ẹphe a-kpukwaru unu nụ iya.”
- ¹³Oo ya bụ; Dévidi yẹe ndu ẹphe l'iya swi, bụ ndu rwuru unu nemadzu l'umadzu ukporo iri gbeshi lufushia lẹ mkpukpu Keyila; tsoru je aghapheahaa l'ẹka ẹphe jebekpọerupho. A bya edooru Sọlu lẹ Dévidi gbafuwaru lẹ mkpukpu Keyila; ọphu o to jeeduru ẹka ono.

Dévidi nọ l'echiegu

14Dévidi nọ-kirishiwaro l'ime oḡba mgbegu-evevee; mbu nọduwaro l'alì úbvú úbvú l'echiegu, nọ le mkpukpu Zifu. Sọlu nọdu etsojeru achọ-phe iya mbokumboku; obenu le Chileke te ekwedu ge Dévidi daba iya l'eka.

15O buru ge Dévidi nọ l'alì Horeshi l'echiegu, nọ le mkpukpu Zifu be o nọmaru le Sọlu l'abya g'o gbua ya.

16Jionatanu, bu nwa Sọlu gbeshi jepfushia Dévidi le Horeshi. O bya eyetaru iya eka mee g'okpoma shihu iya ike l'ime Chileke.

17O su Dévidi: “Ta atsukwa ebvu; kele eka nna mu, bu Sọlu ta abyakwa erwu ngu l'ehu. Oo ngu l'a-buru eze ndu Ízurelu; mbedua e-kwe ngu ebo. Nna mu, bu Sọlu be makaharu onoya.”

18Ephenebo bya atuko gbaa ndzu l'iphu Chipfu. E mechaa; Dévidi nọ-kirishiwaro ya l'alì Horeshi ono; Jionatanu lashia ibe iya.

19No iya; ndu Zifu wupfu Sọlu le mkpukpu Gibiya je asu iya: “Dévidi domikwaru onwiya l'echilabo anyi. O nokwa l'ogba, nọ l'alì Horeshi; mbu l'eli úbvú Hakila, nọ le ndohali Jieshimonu.

20Ole-a gube eze; nta-a bu g'i bya teke dukpoe ngu pho ree k'abyabya; oo anyibedua be o duwaruro g'anyi kpata iya ye gube eze l'eka.”

21Sọlu su phe: “Ge Chipfu gokwaru onu-oma nu unu; kele unu phutaru mu.

22Unu je akwakobebaa; unu eje achọ eka Dévidi obu anoduje; humakwanu eka obu; makwarupho onye ophu humawaru iya nu; kele mu nọmaru l'o gbanukaru eregede.

23Oo ya bu; g'unu je elerweta enya getachaa eka oodomije onwiya; unu alwaphutakwanu azu bya epfuaru mu okpobe-opfu. Unu -byakwanu; mu l'unu aswiharuro: o -buru l'o nọ l'alì eka ono be mu l'a-chokota iya l'enya-unuphu, dukota l'ipfu Jiuda mgburugburu.”

24No iya; ephe tugbua vuru Sọlu uzo jeshia mkpukpu Zifu. Dévidi yee ndu ephe l'iya swi be gbẹ nọduwaa l'echiegu mkpukpu Mawonu; mbu le nsuda Araba, nọ l'uzo ndohali Jieshimonu.

25Sọlu me ndu yee ya tukoru swiru bya awata achokashi Dévidi. A bya edooru iya Dévidi; o tugbua lashia eze mkpuma ono, nọ l'echiegu Mawonu je anodu. Sọlu bya anuma iya; bya achiru Dévidi jeshia l'eka ono.

26Sọlu nọdu eje l'azu úbvú ono eka iya ophuu; Dévidi yee ndu nkiya nọdu eje l'azu ibiya ophuu; agba g'ephe gbalaaru Sọlu. O be ge Sọlu yee ndu ojogu iya eme g'ephe gbaa Dévidi phe mgburugburu g'ephe gude phe;

27onye ezije ozi rwua bya asu Sọlu: “Bya egwegwa-o! Ndu Filisitayinu be byaakwaru etso ndu alì anyi oḡu.”

28Sọlu ghakobeekwapho paru achì Dévidi haa; o buru iya ejepfu ndu Filisitayinu. Oo ya kparu iphe, ephe ekuje eka ono Sela-Hamalekotu.

²⁹Dévidi bya eshi l'ẹka ono tųgbua je eburu l'ọgba, nọ lẹ mkpụkpu Enu-Gedi.

1 Sámelụ 24

Dévidi edobe Sọlu ndzụ

¹Tọbudu iya bụ; Sọlu chifuchaepho ndu Filisitayinu ono bya alwa; a bya edooru iya lẹ Dévidi nọkwa l'echiegu, nọ lẹ mkpụkpu Enu-Gedi.

²Ọo ya bụ; Sọlu bya achita unu umadzu esaa l'ụkporo iri, bụ ndu a hotaru ahota l'ime ndu Izurelu l'ophu ephe wufu choru Dévidi yee ndu l'etsoje iya nụ jeshia l'ibiya ke "Mkpuma Eghu Oswa".

³Sọlu bya erwua l'ẹka a kpuru nwulo aturu l'aguga gbororo; o nweru ọgba, nọ l'ẹka ono; Sọlu bahu l'ime ọgba ono ge ya je atuta unme. A ma lẹ Dévidi waa ndu yee ya swi; nọ l'ime ime ọgba ono.

⁴Ndu ono, etso Dévidi ono su iya: "Lewaro ya! O kwa ntanu-a bu mboku ono, Chipfu pfuru ngu opfu iya su gi huma le ya e-woru ndu ohogu ngu ye ngu l'eka; gi woru phe mee g'o du ngu ree." Oo ya bu; Dévidi bya epyofuta toepho nwehu pyaa mpya je ebyibuta onu uwe-mgbalanu Solu.

⁵E mechaepho; obu wata anma Dévidi ikpe kele o byibutaru onu uwe-mgbalanu Solu ono.

⁶O su ndu ono, l'etsoje iya nu ono: "Ge Chipfu te ekwekwa ge mu mee nnajiuphu mu egube iphe ono; mbu onye ono, Chipfu wuru manu l'ishi ono; ozoo ke ge mu halia aka denyi iya; kele o bu onye Chipfu wuru manu l'ishi."

⁷O buru opfu ono be Dévidi gude gboru ndu etsoje iya nu uja; ophu o to haduru phe g'ephe tsoo Solu ogo. No iya; Solu shi l'ogba ono lufu jeshia mkpa iya.

⁸Dévidi mecha bya eshi l'ime ọgba ono lufuta kuahaa Solu oku su: "Nnajiuphu mu, bu eze!" Solu bya aghaa enya l'azu. Dévidi bya adaa kpurumu phozeta; bya eworu iphu kpube l'ali;

⁹su Solu: "Bu gunu kparu iphe, jinoduje angaru ndiphe nchi; mbu ndu anoduje edoru ngu lẹ Dévidi l'achọ g'o meka ngu iphe?"

¹⁰Humanu! Ntanu-a be i gudewaa enya ngu huma ge Chipfu meru; i daba mu l'eka l'ime ọgba pho. O nweru ndu suru ge mu gbua ngu; obenu le mu dobeleru ngu-a ndzu. Mu su le mu ta abyakwa ahali aka mu byia nnajiuphu mu; noo kele o bu onye Chipfu wuru manu l'ishi g'o buru eze.

¹¹Nna mu; lekpodapho enya; humawaro onu uwe-mgbalanu ngu ge mu gude iya l'eka! Mu byibutaru onu uwe ngu ono; ophu mu te egbuduru ngu. G'o dokwaa ngu enya nta-a teme l'ji-makwarupho le mu te emesweduru ngu; ophu mu te ekwefuduru ngu ike. O to dudu ejo-iphe, mu meru ngu; ole ichie mu pho kpabekpabe g'i gbua mu.

¹²Ge Chipfu kpekwa ikpe ehu mu le ngu; mbu ge Chipfu gwatakwa ngu ugwo ejo-iphe ono, iime mu ono; ole ? mu yahunuru edenyi ngu aka.

- ¹³Ọ ẹ̀da g'ẹ̀tu ndiche, nmaru sù: ‘Ejo-ememe bu l'ẹ̀ka ndu iwashi be ooshije’; obenu le mbedua ta abyadu l'edenyi ngu ẹ̀ka.
- ¹⁴? Bunu onye be eze ndu Izurelu pafutaru onwiya g'o gbu? ? Bu onye be jichi oso? ? To buna odzu nwankuta-a? ? To buna nwogu, agbaduru eba-a?
- ¹⁵Ọo Chipfu be e-kperu mu le ngu ikpe; pfua onye ophu iswi adudu mma. G'o lee ya enya; haaru mu enge nafuta mu l'ẹ̀ka ngu.”
- ¹⁶Dévidi pfughechaepho nno; Solu jia ya su: “? Bu gubedua epfu iphe ono; nwa mu, Dévidi?” Solu bya echishia mkpu ẹ̀kwa.
- ¹⁷Ọ bya asu: “Oowa-e! I kakwa mu apfubekoto; noo kele iimeru mu ree; obenu le mbedua eme ngu ejo-iphe.
- ¹⁸Le ntanu-a be i goshiwaru l'iimeru mu ree; mbu le Chipfu meru mu daba ngu l'ẹ̀ka; ophu i ti gbuduru mu.
- ¹⁹Teke nemadzu humaru ohogu iya; ? oohaje iya g'o laa ke mmanu? Ọo ya bu ge Chipfu pfukwaa ngu ugwo iphe-oma ono, i meru mu ntanu-a ono!
- ²⁰Ọle nta-a be o dowaru mu enya l'i bufutaje eze; temanu o buru ngu be ali-eze ndu Izurelu l'ophu a-du l'ẹ̀ka.
- ²¹Gude epha Chipfu ribuaru mu angu nta-a su l'i ti byadu l'akpabufu awa mu akpabufu; ozoo mee g'epha mu chihu achihu l'unuphu ibe nna mu!”
- ²²Ọo ya bu; Dévidi bya eribuaru Solu angu egube ono. Solu lashia ibe iya. Dévidi yee ndu etsoje iya nu wufu laphushia azu l'ogba.

1 Samelu 25

Nebalu aswaru Dévidi uswara

- ¹Ọo ya bu; Samelu bya anwuhu; ndu Izurelu bya edzukobe raa ẹ̀kwa iya. Ephe bya elia ya l'ibe iya le mkpukpu Rama. Dévidi bya atugbua lashia echiegu Paranu.
- ²Ọ duru nwoke lanu bu le mkpukpu Mawonu. Ọ bu onye nweru ẹ̀ku le mkpukpu Kamelu; bya aburu onye nweru iphe shii. Aturu, o nweru enweru du unu esaa l'ukporo iri. Eghu iya du unu labo l'ukporo iri. Ọ nodu le Kamelu eseshi aturu iya eji l'ehu.
- ³Epha nwoke ono bu Nebalu; epha nyee ya buru Abigelu. Nyee ya ono buru onye maru iphe okpobe amaru; bya amakwapho mma. Ọle ji iya be du ehuka bya aburu onye ejo-obu l'iphe, oomekpoo ememe. Ọ bu onye shi l'eri Kalebu.
- ⁴Dévidi nodu l'echiegu numa le Nebalu be eseshi aturu iya eji l'ehu.
- ⁵Ọ bya ezia umadzu iri l'ime unwokorobya, ephe l'iya swi su phe: “Unu jepfu Nebalu le mkpukpu Kamelu; unu ekeleru mu iya.
- ⁶Unu su iya: ‘Ge ndzu ngu tsekwa ogologo. G'ehu dukwa ngu guu le ndibe ngu; mekpoo iphemiphe, i nweru enweru!

⁷Mu nūmaru l'i bushi aturu ngu eji. Teke anyi lẹ ndu nche-aturu ngu shi tuko nodu l'eka lanu be anyi te emekpajekwaru phe ehu; ophu o to dudu iphe phe, phuhujeru nu l'iphe, bu teke anyi l'ephe nokotaru le Kamelu.

⁸I -jia ya ndu-ozu ngu be ephe a-koru ngu iya-a. Oo ya bu; g'obu ngu dunu l'eka unwokorobyia mu-a no eshi ophu anyi byaru l'obo-iphe-a. Jiko nunu ndu-ozu ngu; me nwa ngu, bu Dévidi iphe, eka ngu rwukpocerupho.' "

⁹Ndu ozi Dévidi ono rwuepho; ephe bya eworu ozi ono, Dévidi ziru ono bya ezia Nebalu; bya adaa ngaberu iya.

¹⁰Nebalu bya asu ndu-ozu Dévidi ono " ? Bu onye bu Dévidi? Mu suru: nwa Jiesi ? o bu onye? Ndu nta-a be dukwaa igwerigwe anashihu nnajuphu phe agbakashihu.

¹¹? Bu k'ishi gunu be mu e-wota nri mu waa mini; me anu, mu gburu ndu ebushiru mu aturu mu eji woru nu ndu mu ta amadu eka ephe shi?"

¹²Unwokorobyia ono dakobe laphushia azu je edokotaru Dévidi iphe ono, o pfuru ono.

¹³Dévidi su phe: "Ngwa; onyenonu wota ogu-echi iya turu!" Oo ya bu; onyenonu bya ewotachaa ogu-echi iya turu. Dévidi bya etukwarupho nkiya. Ndu ophu tso Dévidi be rwuru unu nemadzu. Umadzu ukporo iri nodu swiru ivu phe.

¹⁴Nwokorobyia lanu l'ime ndu-ozu Nebalu je edooru nyee Nebalu, bu Abigelu su: "Lekpodapho le Dévidi be no l'echiegu zia ndu-ozu iya g'ephe bya ekeleru iya nnajuphu; o gbẹ meru iphe-iphere kpua phe.

¹⁵Ole ndu ono mekwanuru anyi ree shii; ophu ephe emekpajeduru anyi ehu; ophu iphe anyi te ephuhujeduru le teke ono, anyi l'ephe tukuru nokotakpo le mgbeğu ono.

¹⁶Eswe l'enyashi mbokumboku be ephe shi abujeru igbo-ulo gbobuta anyi le teke ono, anyi shi ano-kubeje phe eche aturu anyi ono.

¹⁷Nta bukwa gi riedu iya oriri maru iphe, ii-me; noo kele ejo-iphe abyakwa adapfuta nnajuphu anyi yee ndibe iya l'ophu; kele o kwataru buru onye iwashi k'ophu bu l'o to dudu onye ejiru iya onu dee."

¹⁸Abigelu bya emekebe egwegwa je achita ishi buredi ukporo iri; waa otumu mee labo; waa aturu ise, e gburu huchaa ya ahuhu; bya ajaa ya ajaja dobe; waa akpe, a huru yejia ogbongu ise; waa echa-mbekee ukporo ise, e gude akpuru vayinu ghee; waa echa-mbekee ophu du ukporo iri, e gude akpuru figu ghee. O gwekoo ya tukobegbaa l'eli nkapfu-igara.

¹⁹O bya asu ndu-ozu iya: "Unu tugbua vuta uzo; mu a-nodu-a etso unu l'azu." Ole o to pfukwanuru iya ji iya, bu Nebalu.

²⁰O nodu l'eli nkapfu-igara iya agba agbazeta l'uwuru, no l'ubvu ono; o bya l'amaru Dévidi yele ndu ephe l'iya swi nodu agbazetawaa abyapfuta iya. O bya agba phe ndzuta.

- 21**Ọ bụru teke ono bẹ Dévidi pfukwaduru-a sụ: “Ọ tọ dudu urwu, ọ baru mu mbu echeche, mu shi echeru nwoke-a ẹku iya l'echiegu; mbu chekota iya k'ophu bu l'ọ tọ dudu iphe, o nweru enweru duru ophu tuphahuru nu. Ọ bụru ẹjo-iphe bẹ o gude pfua mu ugwo ree, mu meru iya.
- 22**Gẹ Chileke mekwaa mu iphe, o meru ndu ohogu Dévidi; m'ọ bụru l'e rwuru l'utsu mu dobe m'onye lanu, bu nwoke ndzu le ndu o nwekotaru.”
- 23**Abigelu bya ahumaepho Dévidi; o nyizetakebe l'eli nkafu-igara iya ono; bya ephozeta l'iphu Dévidi bya eworu iphu kpube l'ali.
- 24**Nwanyị ono daa gbushi ikpere l'iphu Dévidi sụ iya: “Nnajiuphu mu; g'ọ bụru mu ro bẹ aa-ta uta iya nwekinyi mu. Jiko gẹ mube nwozi ngu nwanyị pfunuru opfu yeru ngu. Ngabenuru mube nwozi ngu nwanyị nchi.
- 25**Ọ -buru ke nnajiuphu mu; ba ngakwaru mkpokoro nwoke ono, bu Nebalu nchi; kele oo epho g'epha iya du bu g'ọ du. Ooza onye-eswe l'epha; teme o nodu emehukwapho eswe. Obenu le mube nwozi ngu nwanyị gbẹ ophu mu ta ahumaduru ndu-ozu ono, gube nnajiuphu mu yeru ono.
- 26**Ole-a nnajiuphu mu; bẹ eshinu Chipfu sephuwaru ngu azu g'i ti je egbugbu ochi waa g'i ti gwata ugwo iphe, e meru ngu l'eka onwongu; bẹ Chipfu -nodu-a ndzu g'ọ no iya-a; gubedua nodu; bẹ bukwa gẹ Nebalu du bu gẹ ndu ohogu ngu waa iphe, bukota ndu l'achọ g'ephe e-shi mekata gube nnajiuphu mu a-du.
- 27**G'e wonuru iphe-a, mube nwozi ngu nwanyị guderu gube nnajiuphu mu-a nu unwokorobyia ono, unu l'ephe swi ono.
- 28**Jiko guaruro nwozi ngu nwanyị nvu l'eka mu mesweru; noo kele a makahawaru le Chipfu e-me g'abu eze ke gube nnajiuphu mu noo odu; kele oo odu Chipfu bẹ iilwu. G'ọ tọ dukwa ẹjo-iphe, aa-huma ngu l'ehu jasụ teke ii-no-beru.
- 29**Ọ betakporu nemadzu nodu achi ngu k'egbugbu bẹ Chipfu, bu Chileke ngu ewoerupho ndzu gube nnajiuphu mu kwachia rengurengu l'ite ndzu. Ole ndzu ndu ohogu ngu phe bẹ aa-gbaphu egube aagbaphuje mkpuma robo-a.
- 30**Tobudu iya bu; teke Chipfu meerupho gube nnajiuphu mu iphe, du ree ono, o kweshigbaaru ngu ukwe iya ono; bya eworu ngu mee onye-ishi l'ali Izurelu;
- 31**Ọ tọ bueduru nnajiuphu mu aphu; ozoo g'obu waahaa ngu mini l'i gburu ochi enwedu ishi; ozoo l'i gwataru ugwo iphe, e meru ngu. Le teke ono, Chipfu e-meshiru gube nnajiuphu mu iphe, du ree ono; nyatakwa mube nwozi ngu nwanyị.”
- 32**Dévidi sụ Abigelu: “G'ajaja buri ke Chipfu, bu Chileke ke Izurelu; mbu onye ziru ngu g'i gba mu ndzuta ntanu-a.
- 33**Gẹ mmamiphe ngu bukwaru iphe, a goru onu-oma nu; teme g'a gokwarupho onu-oma nu gubedua gbobutaru mu ge mu te egbu ochi le ntanu-a; waa ge mu te egude eka onwomu gwata ugwo iphe, e meru mu.

³⁴Ome ọ tọ bụ l'ì gbaru ẹgwegwa bya mu ndzuta-a; bẹ mu shiakwa ribua nte sụ: 'L'eshinu Chipfu, bụ Chileke kẹ ndu Ízurelu nọ ndzụ g'ọ nọ iya-a; mbụ onye ono, gbobutaru ọphu mu te emekaeduru ngu iphe ono; bẹ ọ tọ dukwa onye nwoke l'ibe Nebalu m'onye lanu mu gege egbuphodo mę ọ -rwutashia l'utsu echele.' “

³⁵Oo ya bụ; Dévidi bya anata iya iphe ono, o gwetaru iya ono; sụ iya: “Tọkwa ẹhu. Mu nımawaru iphe, i pfuru bya ekwetawaa iphe, i rworu.”

³⁶Abigelu bya alapfu Nebalu je ahuma l'ọ nọroo abọ-iphe l'ibe iya; ẹgube ono, onye eze emeje ono. ẹhu nọdu atso Nebalu uto; kele męe atsushi iya ike. Ọphu ọ tọ dudu iphe, Abigelu pfuru iya jasụ nchi bọhu.

³⁷O -rwua l'utsu iya lę teke męe ono sahuwaru Nebalu; nyee ya bya atuko iphemiphe ono dokotaru iya; meji tofu iya; ọ kpo-kerehu gę mkpuma.

³⁸A bya anochaa iphe, du g'abalı iri; Chipfu chitsua Nebalu; ọ buru iya anwuhu.

Dévidi aluta Abigelu

³⁹O be teke Dévidi byaru anuma lę Nebalu nwuhuwaru ọ sụ: “G'ajaja buru kę Chipfu; mbụ onye ono, gwataru ugwo iphe-iphere ono, mu nataru l'eka Nebalu. Ọ bya egbobutakwapho mube nwozi iya gę mu te eye ęka l'ejo-iphe. Chipfu bę wowaru ejo-ememe, Nebalu meru kpukposhi iya l'ishi nkiya.” Oo ya bụ; Dévidi zia g'e je ezia Abigelu g'ọ bya gę ya luru iya.

⁴⁰Ndu ozi Dévidi jeshia mkpukpu Kamelu je ezia Abigelu sụ iya: “Dévidi bę zikwaru anyi g'anyi bya eduta ngu g'ı buru nyee ya.”

⁴¹Abigelu gbalihu bya ephozeta iphu iya l'alı sụ: “Waa mube nwozi unu nwanyi baa; mbụ onye a-nodu asaje ndu-ozı nnajiuphu mu okpa.”

⁴²Abigelu jikobe ẹgwegwa bya eduta unwumboko ise, l'ejeru iya ozi yeru onwiya; o nyikota eli nkafu-igara tsoru ndu ono, Dévidi ziru ozi ono; o je aluru Dévidi.

⁴³Dévidi bę aluhawaa Ahinowamu, bụ onye shi lę mkpukpu Jiezerelu; yę Abigelu bya atuko buru unyomu Dévidi.

⁴⁴Teke ono bę Solu kutawaru nwada iya, bụ Mikalu; mbụ nyee Dévidi woru kee Paliti nwa Layishi; mbụ onye shi lę mkpukpu Galimu.

1 Sámelu 26

Dévidi aha Solu ndzụ ozobaa

¹Ndu mkpukpu Zifu bya atugbua je edooru Solu lę mkpukpu Gibiya sụ: “Dévidi bę domikwaru onwiya l'ubvú Hakila, nọ gha iphu lę Jieshimonu.”

²Solu bya atugbua jeshia l'echiegu mkpukpu Zifu; yę unu unwoke esaa l'ukporo iri, a hotaru l'alı Ízurelu tuko swiru jeshia achọ Dévidi.

³Solu phe bya adoru l'aguga gbororo l'ubvú Hakila ono, nọ gha iphu lę Jieshimonu. Dévidi nọduro ya l'echiegu. Ọ humaepho lę Solu chowaru iya byatashia ęka ono;

- ⁴o zia ndu anwụ ngge ẹphe jee; bya eme ọ marweta l'ọo eviya lẹ Sọlu byawaru.
- ⁵Ọo ya bụ; Dévidi gbeshi bya ejeshia l'ẹka ono, Sọlu phẹ dọru ono. O -rwua je ahuma ẹka Sọlu yee Ábuna nwa Nẹru, bụ onye-ishi ndu ojogu zẹ. Sọlu zee l'ime ọdu ono; ndu ojogu iya dọ-pee ya mgburugburu.
- ⁶Dévidi bya ajia Ahimeleku, bụ onye Hetu waa Abishayi nwa Zeruya; mbụ nwune Jiowabu sụ phẹ: “? Bụ onye ole be e-tsoru mu g'anyi jepfu Sọlu l'ẹka ẹphe dọru ono?” Abishayi sụ: “Ọo mbedua l'e-tsoru ngu je.”
- ⁷Ọo ya bụ; Dévidi yee Abishayi tugbua jepfu ndu ojogu ono l'enyashi. Ẹphe jerwua bya ahuma Sọlu l'ẹka ọ zẹ eku mgbenya l'ime ime ọdu ono; yee arwa iya, o woru bvube l'alị l'uzo ishi iya. Ábuna yee ndu ojogu ono zẹ-pee ya mgburugburu.
- ⁸Abishayi sụ Dévidi: “Ntanu-a be Chileke mewaru g'ohogu ngu daba ngu l'ẹka. Jiko hanaa nta-a ge mu gude arwa-a supyabe iya l'alị ugbo lanu; mu ta a-sukwa iya ya ugbo ẹbo.”
- ⁹Obenu lẹ Dévidi sụru Abishayi: “Te emeghekwa nkiya! Mbụ-a; ? Bụ onye a-hali ẹka byia onye ono, Chipfu wuru manụ l'ishi g'ọ buru eze; g'e -mecha g'onye ono laa ke mmanụ?”
- ¹⁰“Eshinu Chipfu nọ ndzụ g'ọ nọ iya-a be bukwa Chipfu l'onwiya be l'e-gude ẹka iya chigbua ya. Ophuu l'anwuhu iya rwuru; ọ nwuhu; ọzoo l'o jeru ọgu; je alaa l'ọgu.
- ¹¹Ge Chipfu te ekwekwa ge mu halia ẹka byia onye ono, Chipfu wuru manụ l'ishi ono. Iphe, e-me nụ bụ g'i wota arwa ono waa iphe, aangụ mini ono, nọ iya l'uzo ishi ono g'anyi tugbua.”
- ¹²Ọo ya bụ; Dévidi tuta arwa ono; bya ewota iphe, aangụ mini ono, nọ Sọlu l'uzo ishi ono ọ buru phẹ atugbu. Ophu ọ tọ dudu onye humaru iya nụ; ophu ọ dudu onye maru nụ; ophu ọ dudu onye ophu tehuru etehu. Ẹphe tukoeppo ekugbaa mgbenya; kele Chipfu meru g'oke mgbenya tų phẹ.
- ¹³No iya; Dévidi bya adafu azu iya ophuu; je enyikota eli úbvú; nọdu nwuzenya uzanya. Ẹka nọ-buharu phẹ l'echilabọ kwatakpoọ dų ọsa shii.
- ¹⁴Dévidi bya ekua ndu ojogu ono oku; kua me Ábuna nwa Nẹru sụ phẹ: “Ábuna; t'ii zadu ẹnu; Ábuna?” Ábuna za ẹnu bya asụ: “? I bụ onye; gube nwophu eku eze oku?”
- ¹⁵Dévidi sụ Ábuna: “? Tị bunaa nwoke, dų ike l'ọgu? ? Bụ onye be atukpooru ngu nụ l'alị Ízurelu? ? Denu g'ọ nwuru i ti letaduru nnajiuphu ngu, bụ eze ẹnya; k'ophu bụ l'o nweru onye byaru ge ya gbua nnajiuphu ngu, bụ eze?”
- ¹⁶Iphe ono, i meru ono ta adukwa ree. Eshinu Chipfu nọ ndzụ g'ọ nọ iya-a; be iphe, gbaru unu g'unu ha bukwa anwuhu. Noo kele unu te eletaduru nnajiuphu unu ẹnya; mbụ onye ono, Chipfu wuru manụ l'ishi ono. Chikaedu ẹnya achika. ? Denu arwa eze yee iphe, ọonguje mini, o shi dobe lẹ mgboru ishi iya ono?”
- ¹⁷Sọlu maekwarupho l'ọo olu-opfu Dévidi bya asụ: “? Bụ olu-opfu ngu bụ ono nwa mu, bụ Dévidi?” Dévidi sụ iya: “Ee! Ọ kwa iya-a nnajiuphu mu, bụ eze.”

18 O sūkwap̄ho: “? Bū kẹ ɡunu bẹ ɡube nnaj̄iuphu mu ach̄ihunuru nwozi ngu? ? Buhunu ɡunu bẹ mu meru? ? Bū ejo-ipe ɡunu bẹ ẹka mu dukpoo?”

19 Jiko ɡẹ ɡube nnaj̄iuphu mu, b̄ eze ngab̄enuru nwozi ngu nch̄i nta. O -b̄uru l'oo Chipfu bẹ kpaliru ngu ɡ'i ch̄iahaa mu nno; ɡ'ọ natakwa ngweja. Teke ọbu l'oo ndiphe bẹ eme iya n̄; ɡ'ẹphe bukwaru ndu vu ọnu l'atatip̄hu Chipfu. Nta-a bẹ ẹphe ch̄ifuwaru mu l'echilab̄o ndibe Chipfu. Ẹphe s̄u ɡẹ mu je ejeahaaru agwa ọzo ozi!

20 Ole-a; ɡẹ mee mu te egedakwa l'al̄i l'ẹka d̄u ẹnya l'ip̄hu Chipfu; kele eze ndu Ízurēlu bẹ lufutawaru bya ach̄iahaa nwogu, teke agbadu ẹb̄a ɡ'onye ach̄i nta ọkw̄a l'úbvú.”

21 T̄obudu iya b̄u S̄olu s̄u: “Mu meakwaru ip̄he-ẹji. Lwan̄u az̄u; nwa mu, Dévidi. Mu taa t̄ubaedu ama emeka ngu ip̄he ọzo; noo kele ị ɡuberu ndz̄u m̄ube S̄olu ip̄he ntan̄u-a. Oo eswe bẹ mu meru; mb̄u lẹ mu meswekp̄owaru k'ophu par̄u ẹka apaa.”

22 Dévidi s̄u: “Wakwa arwa ɡube eze baa. G'unwokoro ngu onye lan̄u t̄ughata bya ewota iya.

23 Oo Chipfu a-p̄f̄u onyen̄onu ụɡwo ap̄f̄ubekoto iya waa k'ap̄f̄ushi ike l'ip̄he, onye pfuru. Ntan̄u-a bẹ Chipfu meru; ị daba mu l'ẹka; ọle mu taa halikwan̄u ẹka ebyi onye ono, Chipfu w̄uru man̄u l'ishi ono.

24 ɡ'ọ b̄unuru ɡẹ mu ɡuberu ndz̄u ngu ip̄he ntan̄u-a; bukwap̄ho ɡẹ Chipfu a-ɡube ndz̄u nkemu ip̄he; mb̄u ɡ'ọ naf̄utakota mu l'ip̄he-ẹhuka, byaru mu n̄u.”

25 Oo ya b̄u; S̄olu bya as̄u Dévidi: “G'e kebekwa ngu l'oma nwa mu, b̄u Dévidi. Ii-me ip̄he, nȳiberu anȳibe; mb̄u mee ya mek̄ota!” Oo ya b̄u; Dévidi t̄ugbushia; S̄olu laphushia az̄u l'ibe iya.

1 Sám̄elu 27

Dévidi alapfu ndu Filisitayinu

1 Dévidi bya ar̄ia l'ime onwiya s̄u: “Nta bẹ ujiku lan̄u bẹ mu e-mechakwaa shi l'ẹka S̄olu laa l'iyi. O to nwed̄u ip̄he ọzo, kabakp̄oo ree; ta ab̄udu ɡẹ mu ɡbaru lash̄ia al̄i ndu Filisitayinu. Oo ya b̄u S̄olu akab̄e haa mu ach̄o-p̄he l'al̄i Ízurēlu; mb̄u mu e-shi nno ya nah̄u iya.”

2 Oo ya b̄u; Dévidi ȳe unwoke ono, d̄u ụnu nemadz̄u l'ukporo iri ono, b̄u ndu ȳe ya aswije ono ɡb̄eshi lapfushia Akishi, b̄u onye eze mkp̄ukpu Gatu; mb̄u nwatibe Maw̄oku.

3 Dévidi ph̄e lapfu Akishi je eburu lẹ mkp̄ukpu Gatu. Onyen̄onu bẹ ȳele ndibe iya t̄ukocharu buru. Dévidi bẹ ȳele unyomu iya lab̄o t̄ukoru buru; mb̄u Ahinowamu ke mkp̄ukpu Jiezer̄lu waa Abigelu ke Kam̄elu, b̄u iya b̄u nwanȳi ono, ji iya, b̄u Nebalu ta an̄oedu-a.

4 O be teke e dōerup̄ho S̄olu lẹ Dévidi ɡbalawaru lash̄ia Gatu; ophu ọ t̄o ch̄obaeduru iya.

⁵Oo ya bu Dévidi bya asu Akishi: “O -buru le mu du ngu l'obu; wofutano mkpukpu lanu l'ali-a; nu mu ge mu buru. ? Denu g'o bu mube nwozi ngu be unu l'iya atuko buru le mkpukpu lanu l'eka eze bu?”

⁶Oo ya bu; Akishi woru mkpukpu Zikulagu woru nu iya mboku ono. O buru iya meru iphe Zikulagu bu mkpukpu ndu eze ndu Jiuda byasu ntanu-a.

⁷Dévidi be bugbaru apha ophu l'onwa eno l'ali ndu Filisitayinu ono.

⁸Dévidi yee ndu etsoje iya nu bya atugbua je alwua ndu Geshu; me ndu Gizi; me ndu Amaleku. Ndu-a be shihawaa teke du enya butaru l'ali ono; mbu shitakpo me a -nodu eje Shuru jasu l'ali ndu Ijiputu.

⁹O nodu abujeru ndu ophu Dévidi bapfuwaru l'ogu ono; l'oogbushikota phe. O to dudu nwoke ozoo nwanyi, oodobeje ndzu. O bya akpuko aturu; me egu; me eswi; me nkafu-igara; me inya-kamelu; bya achikochaa uwe. O -mechaa; oolapfushia Akishi.

¹⁰Teke Akishi jiru iya: “? Bu ibiya ole be i jeru alwua ntanu-a?” Dévidi asu iya: “O kwa echiegu ndohali mkpukpu Jiuda.” Ozoo l'osu iya l'oo echiegu ndohali ke mkpukpu ndu Jierahumu; ozoo l'oo echiegu ndohali Kenu.

¹¹O to dudu nwoke ozoo nwanyi, oodobeje ndzu ke kpuru bya Gatu; kele onoduje ari su: “Ephe e-jekwa agba anyi ama su l'owakwa iphe, Dévidi meru baa.” O buru ge Dévidi shi emeje iya bu ono le teke o bukotaru l'ali ndu Filisitayinu.

¹²Akishi daru Dévidi ye l'ehu; asuje onwiya: “Dévidi be a-buwaruro nwozi mu jasuru asuru; noo kele ndibe phe, bu ndu Izurelu be kpwaru iya ashi mebyi akpokpo.”

1 Samelu 28

¹O bya erwua teke ono; ndu Filisitayinu bya akpakoo ndu ojogu phe g'ephe tsoo ndu Izurelu ugu. Akishi je asu Dévidi: “G'o dokwaa ngu enya ree l'unu l'unwoke ngu be e-dujekwa mu ugu.”

²Dévidi su iya: “O n'iya bu l'ii-humawaro iphe, onye-ozu ngu e-me.” Akishi su Dévidi: “O dupeho ree; mu e-mewaa ngu ro gi buru onye a-nodu eche mu nche jeye ndzu mu abvu.”

Solu yee nwanyi, aphuje ophulanya, bu le Enudo

³Nta-a be Samelu nwuhwaru; ndu Izurelu l'ophu tuko raa ekwa iya; bya elia ya le mkpukpu iya le Rama. Solu be tukowaru ndu emeje omamansi; me ndu aphuje ophulanya rwushikota l'ali ono.

⁴Ndu Filisitayinu bya edzokobe bya adoru k'ogu le mkpukpu Shunemu. Solu bya akpakoo ndu Izurelu l'ophu ephebedua doru nkephe l'ubvu Gilubowa.

⁵O be ge Solu humaerupho ndu ojogu ndu Filisitayinu; ndzu guhu iya; teme obu nodu etekwa iya pho ophe.

⁶O mee g'o kpata Chipfu ishi; ophu Chipfu ta adudu iphe, o gbete le nrwo; ozoo l'ido urimu pfuaru iya; ozokpoonu l'onu ndu mpfuchiru iya.

- ⁷Sọlu bya asụ ndu ejeru iya ozi: “Unu leeru mu ẹnya nwanyi, aphuje ọphuleny k'ọphu mu e-je akpata iya ishi.” Ẹphe sụ iya l'o nweru onye lanu, bu le mkpukpu Enu-Doru.
- ⁸Sọlu bya eworu onwiya gbugabe; chita uwe mmanu yee. O be l'enyashi yee unwoke labo swiru jepfushia nwanyi ono. Sọlu rwua bya asụ iya: “Kpataeduru mu maa ishi. Onye ọphu mu kukpoerupho epha iya be ii-kpokuta.”
- ⁹Nwanyi ono sụ iya: “Lenu; i manurua iphe, Sọlu meru. Mbụ le ndu ajije iphe; me ndu aphuje ọphuleny be o tukoru rwushikota l'ali-a. ? Denu g'o gude i bya ekweberu mu eregede; ge mu eshi nno nwuhu?”
- ¹⁰Sọlu bya egude epha Chipfu ribuaru iya angu sụ: “Eshinu Chipfu no ndzu g'o no iya-a be o to dukwa aphu, a bya l'anu ngu l'opfu iphe-a.”
- ¹¹Nwanyi ono bya ajia ya sụ: “? Bu onye be mu a-kpokuru ngu?” O sụ iya: “Oo Samelu be ii-kpoku.”
- ¹²Nwanyi ono bya ahumaepho Samelu bya echishia mkpu sụ Sọlu: “? Denu g'o gude i gbaaru mu eregede? O kwa ngu bu Sọlu!”
- ¹³Eze, bu Sọlu bya asụ nwanyi ono: “Ta atsushi ebvu. ? Bu gunu be i humaru?” Nwanyi ono sụ iya: “Mu humaru maa g'o shi l'ali afuta.”
- ¹⁴O jia ya sụ: “? O dukwanu idagha?” Nwanyi ono sụ: “Oo akahu nwoke ogerenya, yeru uwe-mgbalanu be alufutanu obu.” Sọlu maekwarupho l'oo Samelu. O phozeta woru iphu kpupyabe l'ali.
- ¹⁵Samelu bya epfua opfu sụ Sọlu: “? Bu gunu be iikuru mu; i gude akposhi mu atuta unme, mu atuta-a?” Sọlu sụ iya: “Mu no l'oke iphe-ehuka; kele ndu Filisitayinu be etso mu ogu; teme Chileke pawaru mu buhaa; ọphu ooyejeedu onu yeru mu e -shi le ndu mpfuchiru iya; ozoo le nrwo. Oo ya kpataru iphe, mu eku ngu g'i karu mu uzo, mu e-shi iya.”
- ¹⁶Samelu sụ iya: “? I choru mu gunu nta-a, Chipfu pawaru ngu buhaa; o buwaru onye opfu ngu-a?”
- ¹⁷Oo iphe ono, Chipfu shi mu l'onu gbaaru ngu ama iya ono be avukota nno. Chipfu be nafuwaru ngu aba eze ono woru iya nu onye ozo, bu Dévidi.
- ¹⁸Kele i ti meduru Opfu Chipfu; mbu l'i ti tukoshiduru ndu Amaleku oke-ehu-eghu Chipfu. O buru iya meru g'o gude; o mee ngu iphe ono, o meru ngu ntanu-a ono.
- ¹⁹Ọphu kachakpo nu bu le Chipfu a-chiru unu le ndu Izurelu ye ndu Filisitayinu l'eka; mbu l'echele owa-a be unu l'unwu ngu unwoke a-lwapfuta mu le maa. Nokwapho ge Chipfu a-chiru ndu ojogu ndu Izurelu chiru ye ndu Filisitayinu l'eka.”
- ²⁰Ndzu-agugu iphe ono, Samelu pfuru ono gude Sọlu; o ngabufu daa l'ali teke ono teke ono. Ike bvụ iya; kele o to riduru nri eswe me ke enyashi mboku ono l'ophu.

²¹Nwanyị ono bya bya ahuma g'ehu anmashiberu Sọlu anmanma ike bya asu iya: “Lenu; mube nwozi ngu nwanyị be nukwaru ngu opfu; mee iphe, i ziru mu ememe. Mu turu ishi ndzu mu mekota iphemiphe, i suru ge mu mee.

²²Oo ya bu jikonu; ngabenuru nwozi ngu nwanyị nchi; mbu ge mu nunu ngu nri g'ia; k'opfu ike a-du ngu g'i gude lashia.”

²³Solu jika su le ya te eridu nri. O le ndu-ozi iya waa nwanyị ono tukoru rwoahaa ya; o gbete teke ono kweta. O bya agbeshi l'eka o ze l'ali bya ano-zeta l'iphe-azee.

²⁴Nwanyị ono be nweru nweswi, tsuru eba, no l'ulo iya. O woru iya gbua teke ono teke ono. O bya ewota ukpokutu-nri gwophube gude ghee buredi, eeyeduru iphe, ekoje buredi.

²⁵Nwanyị ono bya akwashiaru Sọlu phe iphe ono; epe ria. E mechaa; epe tugbua l'enyashi ono lashia.

1 Samelu 29

Ndu-ishi ndu Filisitayinu achifu Dévidi l'iphu ogu

¹Ndu Filisitayinu bya edzokobe-gbua ndu ojogu phe le mkpukpu Afeku. Ndu Izurelu je anmaa anmanma ogu le mgboru eka mini anoduje anwushi le mkpukpu Jiezerelu.

²O be ge ndu-ishi ndu Filisitayinu keshiru ndu ojogu phe; epe dzebegbaa ukporo ise ise; ndu ophu adu unu labo l'ukporo iri iri; Dévidi yee ndu etsoje iya nu nodu awu etso phe azu azu epe le Akishi.

³Ndu-ishi ndu Filisitayinu bya ajia su: “? Bu gunu be ndu Hiburu owana eme l'eka-a?” Akishi su phe: “O kwa Dévidi ono, shi buru nwozi Sọlu, bu eze ndu Izurelu-a. Mu l'ia bughataakwaru apha ophu. O le eshinu o gbafutaru l'ibe Sọlu lwapfuta mu be ta adukwa ntucha, mu humajeru iya l'ehu.”

⁴Ehu ghuaaha ndu-ishi ndu Filisitayinu ono egu; epe su iya: “Duphukwa phe azu g'ephe je anoduro l'eka ono, i nuru phe g'ephe buru ono. G'o to tsokwaru anyi je ogu; a-nonyanu; e rwua le teke aalwu ogu; o gbete ghakobe tsoahaa anyi ogu. Kele-a; ? to kabadaa npe g'ee-shi ge yee nnajiuphu iya bya adu le ree ozo me o -gbushia anyi ishi?

⁵? To bunaa Dévidi owana be epe aguje l'ebvu ete su: ‘Solu gbuaru unubuku ndu ojogu; Dévidi gbukwanaa unubuku ndu ojogu ugbo iri?’ “

⁶Oo ya bu; Akishi bya ekua Dévidi su iya: “Eshinu Chipfu no ndzu g'o no iya-a be i buepho onye pfuru oto; teme o duhukwa mu pho ree ke g'i tsoru anyi g'anyi tuko swiru jee ogu-a; noo kele e -shi mboku ono, i lwapfutaru mu ono byasu ntanu-a be o to dudu ntucha, mu humajeru ngu l'ehu. O le oo ndu-ishi ono be i ti dudu ree l'enya.

⁷Ghakobe lashia le nchi-odoo; be ejekwa eme iphe, ta adudu ndu-ishi ndu Filisitayinu ree.”

⁸Dévidi jia ya sù: “? Búkwanu gunu bẹ mu mehunuru? ? Búkpoò gunu bẹ i húmaru l'ẹhu mube nwozi ngu shitakpoo lẹ mboku, mu lwapfutaru ngu byasù nta-a? ? Denu iphe, bu lẹ mu tee jedu etsoo ohogu gube nnajiuphu mu, bu eze ogu?”

⁹Akishi sù iya: “Mu maru-a l'i dù mu ree l'ẹnya; mbù l'i dù-tabee mu pho g'ojozimigwe Chileke; o le ndu-ishi ndu Filisitayinu pfuwaru sù l'i ti byadu etso anyi je ogu ono.

¹⁰Nta-a búkwa g'i tehu l'onma ewa utsu unu lẹ ndu-ozì nnajiuphu ngu ono; mbù ndu ono, unu l'ẹphe tukurù swìru ono; g'unu tugbua lẹ geregere nchi-abohu.”

¹¹Oo ya bú; Dévidi yele ndu etsoje iya nù gbeshi l'onmewa utsu laphushia azu l'ali ndu Filisitayinu; ndu Filisitayinu tugbua; o buru phe eje Jiezerelu.

1 Sámẹlu 30

Dévidi etso ndu Amaleku ogu

¹O bya ebe gẹ Dévidi yee unwoke iya rwuerupho mkpukpu Zikulagu lẹ mboku ophu kwe iya ẹto, ẹphe gbeshiru; ẹphe húma lẹ ndu Amaleku byawaru alwua ndu bu l'echiegu ndohali waa ndu mkpukpu Zikulagu alwulwu. Ẹphe lwuru Zikulagu woru oku tufu iya.

²Ndu Amaleku ono kpukotachaa unwanyi, no iya nù lẹ ndzu; kpukotachaa ẹgirima me ogerenya. Ophu o to dudu me onye lanu ẹphe gburu egbugbu; gbahaepho akpuko be ẹphe kpukoru phe lashia.

³Noo ya; Dévidi yee unwoke iya ono bya abyarwuta Zikulagu; bya ahuma g'oku mebyishiru iya; teme a kpukoo unyomu phe; me unwegirima phe lẹ ndzu.

⁴Tobudu iya bú; Dévidi yee ndu ono, yee ya tukurù swìru ono chishia mkpu ekwa; rae ya pho jasù ike ekwa bvushikota phe.

⁵Unyomu Dévidi ẹphe n'ẹbo, bu iya bu Ahinowamu, onye Jiezerelu; me Abigelu, ophu ji iya, bu Nebalu nwuhuwaru; mbu onye Kamelu be a kpukotachaa.

⁶Iphe ono tsushia Dévidi l'ẹhu ike; kele ndu ono be epfu g'ẹphe tugbua ya lẹ mkpuma. Onyenonu l'ime phe be ẹhu gbangahuchaaru lẹ k'unwu phe unwoke me unwada phe, a kpukotaru. O le Dévidi be gbataru onwiya ike l'ime Chipfu, bu Chileke iya.

⁷Tobudu iya bú; Dévidi bya epfuaru Abyiyata, onye uke Chileke; mbu nwa Ahimeleku sù iya: “Wotaru mu nù uwe-ukuvu ono!” Abyiyata chita iya chijeru iya.

⁸Dévidi bya ajia Chipfu sù: “? Bù gẹ mu chipfuru ikpoto ndu o-lwua-ola-a? ? Mu agbapfu phe-a to?” O sù iya: “Chipyabe phe; ii-gbapfu phe-a; mbu nashichaa phe iphe ono g'ò ha.”

⁹Dévidi yee unwoke, yee ya swi, dù unu l'ukporo iri bya agbarwua nggele Beso. O rwua l'eka ono o nweru ndu ophu haru noshia;

¹⁰kele umadzu ukporo iri l'ime phe be ike bvueberu k'ophu ẹphe ta adudu ike daa nggele ono. O buru Dévidi waa unu nemadzu k'ophuu be chikwaseru ndu ono.

- 11** Ɛphe gbata je ahuma onye Ijiputu le mgbegu. Ɛphe duta iya dupfu Dévidi. Ɛphe bya eworu nri nu iya o ria; bya echebe iya mini o ngua.
- 12** Ɛphe woru ibiribe echa-mbekee, e gude akpuru oshi figu mee nu iya; wafua ophu e gude akpuru vayinu ghee. O bya eria ya rokota ike; kele o to riduru nri; ophu o to nguduru mini e -shi k'abali eto; eswe l'enyashi.
- 13** Dévidi jja ya su: “? Bu onye ke ndu ole be i bu? Teme ? bu awe be i shi bya?” Nwokoꝛoꝛbya ono su iya: “Mu bukwa onye Ijiputu; bukwarupho nwohu onye Amaleku. Nnajiuphu mu gbadoru mu e -shi k'abali eto, laru alala; kele iphe-ememe zupyaiberu mu.
- 14** Anyi jeru alwua ndu Kereti, bu l'uzo ndohali; me ndu bu l'eka iya ke ndu Jiuda; me ndu Kalebu, bu l'echiegu ndohali. Anyi tua oku le mkpukpu Zikulagu.”
- 15** Dévidi jja ya su: “? Ii-du ike duru mu je egoshi mu ikpoto ndu o-lwua-olaa ono?” O su: “I -gude epha Chileke ribuaru mu nte l'i ti byadu l'e-gbu mu; ophu i kpuduru mu anu nnajiuphu mu; mu e-duru ngu je egoshi ngu eka epe no.”
- 16** O duru Dévidi phe rwua. Ndu Amaleku ono doru l'ali ono; eri angu; bya eme emereme k'ikpoto iphe ono, epe gwekoruru l'ali ndu Filisitayinu; me ke ndu Jiuda ono.
- 17** Dévidi phe datso phe ugu; shi l'uzenyashi mboku ono lwua phe jasu l'uzenyashi echele iya. Ophu o to dudu m'o onye lanu, gbalaru nu; a -gufuepho unu unwokoroꝛbya, nyihuru eli inya-kamelu gbala.
- 18** Dévidi phe tukokpoo iphemiphe ono, ndu Amaleku gwekoruru pho nafutachaa; lufuchaa l'unyomu iya pho epe n'ebo.
- 19** Ophu o dudu iphe phe ophu tuphahuru etuphahu; onye upfu me onye nta; unwokoro me unwumboko; iphe, a kwataru l'okwata; mekpoo iphe mmanu ozo, epe gwekoruru egweko. Dévidi phe toko iya naphutachaa azu.
- 20** Dévidi phe bya akpukochaa aturu ndu Amaleku; me eghe phe; me eswi phe. Ndu ojoꝛu Dévidi kparu eku ono vuru uzo asuje: “Owa-a bu iphe, Dévidi kwataru l'okwata.”
- 21** Oo ya bu; Dévidi bya abyapfuta umadzu ukporo iri pho bu ndu ono, ike bvushiru k'ophu epe ta aduedu ike tsoru iya pho; mbu ndu ono, a haru l'azu nggele Beso azu iya ophu-a. Ɛphe wufuta g'ephe gba Dévidi yee ndu ophu yee ya swi ndzuta. Dévidi jerwua bya ekele phe ekele.
- 22** Ndu ejo nemadzu me ndu mkpaka l'ime ndu ono, tso Dévidi ono bya asu: “Eshi ophu anyi l'ephe ta aswidu jee ugu be anyi tee kekwa iphe ono, anyi kwataru l'okwata ono agba phe. Iphe, e-mechia nu bu l'onyenonu l'e-duta nyee ya waa unwu iya lashia.”
- 23** Dévidi su phe: “Waawakwa; unwunna mu; unu be jekwa egude iphe, Chipfu nuru anyi mee nno. Oo Chipfu bu onye gbobutaru anyi; bya eworu ndu byaru anyi etso ugu ye anyi l'eka.

²⁴? Ọ dū unu g'onye angaru unu nchì l'iphe ono, unu epfu ono? Iphe, onye nọ swiru ivu ketarū bẹ bụ iphe, onye tso je ọgu e-keta. Ẹphe e-ketagbaa iphe lanu.”

²⁵Dévidi tua ya; ọ bụru ekemu bya aburu omelalì ndu Ízurelù e -shi mbọku ono byasuru ntanu-a.

²⁶Dévidi bya alarwuepho mkpukpu Zikulagu; ọ haru iphe ono, ẹphe kwataru l'okwata ono nu g'e je anu ndu ẹphe l'iya eshi ònyà, bụ ndu bụ ọgerenya ndu Jiuda. Ọ sụ g'a sụ phe: “Owaa bụ iphe, mu anu unu l'iphe, anyi nataru ndu ọhogu Chipfu l'ogu.”

²⁷Ọ nuru iphe ono g'a nu ndu ọphu bu lẹ mkpukpu Bẹtelu; mẹ ndu ọphu bu lẹ mkpukpu Ramotu, dū l'echiegu ndohali; mẹ ndu kẹ mkpukpu Jiatiru;

²⁸mẹ ndu kẹ mkpukpu Arowa; mẹ ndu kẹ mkpukpu Sifumotu; mẹ ndu kẹ mkpukpu Eshutemowa;

²⁹mẹ ndu kẹ mkpukpu Rakalu; mẹ ndu kẹ mkpukpu ndu Jierahumelu; mẹ ndu kẹ mkpukpu ndu Kénu;

³⁰mẹ ndu kẹ mkpukpu Homa; mẹ ndu kẹ mkpukpu Borashanu; mẹ ndu kẹ mkpukpu Ataku;

³¹mẹ ndu kẹ mkpukpu Hẹburonu; mẹwaro ndu ẹka Dévidi mẹ ndu nkiya shi anọduje aghaphegbaa.

1 Sámelù 31

Anwuhu Sọlu yee unwu iya

(1Iphe 10:1-12)

¹Tọbudu iya bụ; ndu Filisitayinu wata etso ndu Ízurelù ọgu; ndu Ízurelù yeru phe ọkpa l'oso. E gbushia ndu Ízurelù ndu ọphu dū igwerigwe l'úbvú Gilubowa.

²Ndu Filisitayinu chipfuru Sọlu waa unwu iya ẹhuka ẹhuka. Ẹphe gbua unwu iya, bụ Jionatanu; mẹ Abinadabu; waa Malukishuwa.

³Ọgu ono kpohu ọku mebyi ekpohu l'ibe iya ọphu Sọlu nọ. Ndu chì apfu chipyabe Sọlu woru apfu gbaa ya; meka iya iphe ọkpobe emeka.

⁴Sọlu sụ onye achijeru iya ngwogu: “Mifuta ogu-echi ngu nmagbua mu; a -nonyaa nu ndu ono, ebuduru úbvù ono rwua bya eworu mu nmagbua; meru iphere kpua mu.” Ọle onye ono, achijeru iya ngwogu ono bẹ ndzụ agụ; ọphu o kwedu gbua ya. Ọo ya bụ; Sọlu woru ogu-echi iya gha igharaphu; woru ẹpho chie ya.

⁵Onye achijeru Sọlu ngwogu ono hūmaepho lẹ Sọlu nwuhuwaru; ọ dafua l'eli ogu-echi nkiya; ẹphe l'iya tuko nwushihu.

⁶Ọo ya bụ; Sọlu yee unwu iya unwoke ẹphe n'eto; mẹ onye achijeru iya ngwogu; mẹ ndu ojogu iya g'ẹphe ha tuko nwushihukota l'ujiku lanu ono.

⁷Ọ be teke ndu Ízurelù ọphu bu l'azu nsuda azu iya ọphuu; mẹ ndu ọphu bu l'aguga enyimu Jiódanu hūmaerupho lẹ ndu ojogu Ízurelù bẹ yewaru ọkpa l'oso; bya

ahumakwapho le Solu yee unwu iya unwoke tukowaru nwushihu; ephe tuko haa mkpukpu phe gbalachaa; ndu Filisitayinu bya bya eburu iya.

⁸O beepho le nchitabohu iya; ge ndu Filisitayinu byaru g'ephe yeshia ndu ono, e gburu l'ogu ono iphe, ephe yeru l'ehu; ephe huma odzu Solu yee unwu iya unwoke ephe n'eto g'ephe dabyigbaaru l'ubvu Gilubowa.

⁹Ephe bya egbuta Solu ishi; yeshikota iya ngwogu, o kwaru onwiya; bya eye ndu-ozu g'ephe jedzuru ali Filisitayinu mgburugburu je arakashia ya k'ophu agwa phe; me ndiphe a-numa-dzuru iya.

¹⁰Ephe woru ngwogu iya ono dobe l'ulo agwa, bu Ashitoretu; bya eworu ogwehu iya kpopyabe l'igbulo mkpukpu Betu-Shanu.

¹¹O be teke ndu bu le mkpukpu Jiabeshi-Giladu numaerupho iphe ono, ndu Filisitayinu meru Solu ono;

¹²unwoke l'ophu, bu ndu okpehu du le mkpukpu ono tuko wufu l'enyashi jeshia Betu-Shanu. Ephe je apazeta odzu Solu yee k'unwu iya l'eli igbulo Betu-Shanu; pata jeshia Jiabeshi je akpochaa phe oku.

¹³Ephe bya atutukobe okpu phe lia l'upfu oshi tamarisuku, du le Jiabeshi; bya aswia egu abali esaa.

2 Sámèlu

2 Sámèlu 1

Anwùhu Sòlu erwu Dévidi lẹ nchi

- ¹Tòbodu iya bụ; Sòlu nwùhuchaepo; Dévidi shi l'ògu ono, o gbushiru ndu Amaleku ono lwa; bya anọo abali labo lẹ mkpukpu Zikulagu.
- ²O -rwua mboku ophu kwe iya eto; a bya ele enya; nwoke lanu, shiwaa l'odu-ogu Sòlu phe rwua; yee uwe iya, a gbajashichaaru agbajashi; kporu urwuku kpua onwiya l'ishi. O byapfutaepo Dévidi; bya adaa kpurumu l'ali gude kwabe iya ubvu.
- ³Dévidi jia ya su iya: “? Bu aweya be i shi?” O su Dévidi: “Mu shikwa l'odu-ogu ndu Izurelu gbalaa.”
- ⁴Dévidi su iya: “? Denu g'o nwuru? Jiko koshiduru mu iya.” O su Dévidi: “Ndu Izurelu gbakashihukwaru l'iphu ogu ono. Ndu ophu du igwerigwe be daru nwushihu; k'ophu bu lẹ Sòlu yee nwa iya, bu Jionatanu be tukoru nwushihukota.”
- ⁵Tòbodu iya bụ; Dévidi bya ajia nwokorobyanya ono, byaru bya akooru iya iphe ono su iya: “? Denu g'i shi maru lẹ Sòlu yele nwa iya, bu Jionatanu be tukoru nwuhuchaa?”
- ⁶Nwokorobyanya ono, byaru akooru Dévidi iphe ono su: “O nweerupho g'o meru; mu nodu l'ubvu Gilubowa; Sòlu l'onwiya nodu l'eka ono nmakpuru l'eli arwa iya. Ugboinya ndu ohogu iya; yele ndu agba l'inya ono nodu achiwa iya kpabe kpabe.
- ⁷No iya; Sòlu bya aghaa enya l'azu huma mu; bya araku mu. Mu jia ya su: “? Bu ge mu mee gunu?”
- ⁸O jia mu: “? Bu onye be i bu?” Mu su iya lẹ mu bu onye Amaleku.
- ⁹O su mu jiko ge mu bya apfu-kube iya gbua ya; noo kele ya no ndzu, onwu ka mma!
- ¹⁰Mu jenu apfu-kube iya; woru iya gbua; noo kele o doru mu enya l'o -darwuwa ali be o buwaa iya onwu. Mu bya ekputa iya okpu-eze, o kpu l'ishi; bya agbata iya echi, o gba l'eka; o buru iya be mu gude wotaru gube nnajuphu mu l'eka-a.”
- ¹¹Noo ya; Dévidi yele ndu ephe l'iya swi ye eka l'uwe phe gbajashichaa.
- ¹²Ephe toko raa ekwa; gua aphu; swia egu jeye l'uzenyashi l'opfu ehuru Sòlu; me nwa iya nwoke, bu Jionatanu; me ke ndu ojogu Chipfu, bu onu-ulo Izurelu ono, e gude ogu-echi gbushia ono.
- ¹³Dévidi bya ajia nwokorobyanya ono, byaru iya edoru iphe ono su iya: “? I bu onye awe?” O su: “Mu bukwa nwatibe onye Amaleku, bu mbyambya.”
- ¹⁴Dévidi jia ya su: “? Bu gunu be i ti tsuduru ebvu k'ahali eka gbua onye Chipfu wuru manu l'ishi?”
- ¹⁵Dévidi bya ekua onye lanu l'unwokorobyanya iya su: “Je egbuta nwoke ono tua!” O je egbuta iya tua; o nwuhu.

¹⁶Dévidi sụ iya: “G'ochi ngu tukokwaru ngu l'ishi; noo kele i gudewaa ọnu ngu gbaa onwongu ama sụ l'ọo ngu gburu onye Chipfu wuru manụ l'ishi.”

Dévidi agụ aphụ Sọlu yẹle Jionatanu

¹⁷Tọbudu iya bụ; Dévidi bya agua ebvu-aphụ ẹhu Sọlu yee nwa iya, bụ Jionatanu;

¹⁸bya asụ g'e zia ndu Jiuda g'aaguje ebvu-aphụ ono. Ẹpha ebvu ono bụ “apfụ.” Ẹka e deru ebvu ọbu bụ l'ẹkwo Jiasha.

¹⁹“Úbvù, ì dụ gùbe Ízurelu bẹ e gbuwaru tọgbo l'eli úbvù! Gẹ ndu ọkpehu dụ tuko dabyigbaaru!

²⁰G'e te pfukwa iya le mkpukpu Gatu; ọphu a rakwa iya arara tsoru gbororo ọma mkpukpu Ashikelonu; a -nonyaa; ẹhu je atsoahaa unwada Filisitayinu utso; mbụ a -nonyaa; unwada ndu ono, e buduru úbvù ono tūahaa okoo.

²¹Unubẹ úbvù úbvù Gilubowa; g'iji ta akwabaekwa kpua unu; ọphu mini edzebaekwaru unu; ọphu unu enweekwaru alì, emehuje iphe. Noo kele ọo l'eli unu bẹ a nọ merwua iphe, ndu ọkpehu dụ egudeje egbobuta onwophe l'ogu. Mbụ l'iphe, Sọlu egudeje egbobuta onwiya l'ogu bẹ a taa nyibaedu manụ.

²²Apfụ Jionatanu bẹ ta akpọlajeduru azụ g'ọ tọ nmọpfuta ẹba ndu ọkpehu dụ; ọphu ogu-echi Sọlu ta alwajeduru l'ẹbe abụ l'o gburu nemadzụ jasuru o ji iya.

²³Sọlu waa Jionatanu; teke unu nọ ndzụ bẹ unu shi ama ntumatu; teme unu buru ndu e yeru obu. Ọphu unu ekekahaduru ekekahaa jasụ l'onwu. Unu shi ka ugo eme barabara; teme unu shikwapho ka oduma ọkpehu.

²⁴Unubẹ unwada Ízurelu; unu kwaa ẹkwa Sọlu; mbụ onye ono, yeru unu uwe uswe-uswe, ama mma ono; onye ono, gude mkpọla-ododo memashia uwe, unu yeru l'ẹhu ememashi ono.

²⁵Lewarọ gẹ ndu ọkpehu dụ dabyigbaaru l'eka ẹphe larụ l'ogu! L'eli úbvù bẹ e gburu Jionatanu tọgbo.

²⁶Mu agụ aphụ ẹhu ngu; nwune mu Jionatanu. I shi bunukaru mu onye vu oke aswa. N-yemobu, i shi yee mu bẹ dukwa biribiri. O ka n-yemobu k'unwanyị adụ biribiri.

²⁷Lewarọ gẹ ndu ọkpehu dabyigbaaru! Ngwogu, eegudeje alwụ ọgu bukotawa ọla-liswi!”

2 Sámẹlu 2

Eechi Dévidi eze ndu Jiuda

¹Tọbudu iya bụ; e mechaa; Dévidi je akpata Chipfu ishi; sụ: “? Bụ gẹ mu tugbua lashia mkpukpu lanụ le Jiuda?” Chipfu sụ iya: “Ngwanụ!” Dévidi jia ya sụ: “? Bụ aweya bẹ mu a-la?” Chipfu sụ iya: “Lashinaa Hẹburonu!”

²Ọo ya bụ; Dévidi lashia ẹka ono; yẹle unyomu iya ẹphenebo; mbụ Ahinowamu ke Jiezerelu; waa Abigelu ke Kamelu, bụ nwanyị ono, ji ya, bụ Nebalụ anọedu ono.

³Dévidi bya achitakwapho unwoke yee ya swi; onyenonu duta ndibe iya; ephe je eburu le mkpukpu Heburonu waa mkpukpu le mkpukpu, nogbaa ya nu.

⁴Oo ya bu; ndu Jiuda byatashia Heburonu. O buru l'eka ono be ephe no wua Dévidi manu l'ishi g'o buru eze ndu onu-ulo Jiuda. A bya epfuaru Dévidi l'oo ndu Jiabeshi-Giladu be liru Solu.

⁵Dévidi bya ezia ndu oozije ozi g'ephe je ezia unwoke mkpukpu Jiabeshi-Giladu su phe: "Ge Chipfu goru onu-oma nu unu k'ubvu ono, unu kwaberu Solu, bu nnajuphu unu; woru iya lia ono.

⁶Ge Chipfu goshikwa unu n-yemobu omaa ya; goshikwapho unu le ya gbaru g'e gude ire iya eka l'opfu ehununu! Mbèdua, bu Dévidi l'onwomu e-mekwarupho unu iphe-oma eshi ophu unu meru egube iphe-a.

⁷Oo ya bu; g'eka shihukwa unu ike; unu aburu ndu ike du; noo kele nnajuphu unu, bu Solu be nwuhwaru nu; ndu onu-ulo Jiuda wuwa mu manu l'ishi ge mu buru eze phe."

Echi Ishibosheti eze ndu Izurelu

⁸Abuna nwa Neru, bu onye-ishi ndu ojogu Solu bya edufuta nwatibe Solu, bu Ishibosheti duru bya le mkpukpu Mahanayimu.

⁹O bya emee ya eze ndu Giladu; me ndu Ashuru; me ndu Jiezerelu; mecha ndu Ifuremu; me ndu Benjaminu; mewaro ndu Izurelu l'ophu.

¹⁰Nwatibe Solu ono, bu Ishibosheti be nowaru ukporo apha labo teke e meru iya eze ndu Izurelu. Iphe, o noru l'aba-eze ono bu apha labo. Ole ndu onu-ulo Jiuda bu Dévidi be ephebedua awu etso.

¹¹Dévidi buru le mkpukpu Heburonu buru eze ndu onu-ulo Jiuda. Iphe, o noru l'aba-eze bu apha esaa l'onwa ishii.

Ogu adaru ndu ke Dévidi; ephe le ndu ke Ishibosheti

¹²No iya; Abuna nwa Neru yele ndu ejeru Ishibosheti, bu nwa Solu ozi shi le Mahanayimu tugbua jeshia mkpukpu Gibiyonu.

¹³Jiowabu; nwa Zeruya yele ndu ejeru Dévidi ozi tugbua jepfushia phe l'okpuru, no le Gibiyonu. Ndu ophuu doru l'azu okpuru ono ibe lanu; ndu ophuu doru l'ibiya ophuu.

¹⁴Abuna bya asu Jiowabu: "G'unwokorobya-a haeduru gbalihu l'iphu anyi je g'ephe le nwibe phe lwupfuru." Jiowabu su: "Ngwanu; g'ephe gbalihunu je."

¹⁵Oo ya bu; ephe bya awu-lihu; a bya aguta phe umadzu iri l'ebo l'eka iya ke ndu Benjaminu yele Ishibosheti, bu nwa Solu; bya guta umadzu iri l'ebo l'eka iya ke Dévidi.

¹⁶Oo ya bu; onyenonu bya awocharu nwibe iya l'ishi; woru ogu-echi nmachaa ibe phe le mgbureku; ephe toko daa nwushihu l'ugbo lanu. Noo iphe, meru g'o gude e kuahaa eka ono "Egu Ogu-echi". Eka ono be no le mkpukpu Gibiyonu.

¹⁷Ogu mboku ono kpohu oku. Ndu ke Dévidi lwu-kpee Abuna yele unwoke Izurelu.

2 Sámèlu 3

¹Ọnu-ùlo kẹ Sọlu waa kẹ Dévidi bẹ ọgu, daru phẹ nù bẹ ẹphe lwùkporu nọ ọdu. Ọkpehu kẹ Dévidi nọdu aka shii eje; ike ka abvù ọnu-ùlo kẹ Sọlu abvùbvù eje.

Ụnwegirima, a nwùshiru Dévidi lẹ Hẹburonu

(1Iphe 3:1-4)

²A nwùshiru Dévidi unwoke teke o bu lẹ Hẹburonu. Ọkpara iya bụ Amunonu. Onye nwuru iya nù bụ Ahinowamu kẹ Jiezerelu.

³Nwa iya k'ẹbo bụ Kilabu. Onye nwuru iya nù bụ Abigelu, bụ onye shi buri nyee Nebalu kẹ Kamelu. Nwa iya k'ẹto bụ Abusalomu. Onye nwuru iya nù bụ Maka nwada Talumayi, bụ eze ndu Geshu.

⁴Nwa iya k'ẹno bụ Adonijia. Onye nwuru iya nù bụ Hagitu. Nwa iya k'ise buri Shefataya. Onye nwuru iya nù bụ Abitalu.

⁵Nwa iya k'ishii buri Ituramu. Onye nwuru iya nù bụ nyee ya, bụ Egula. Ndu-a bẹ a nwùshikotaru Dévidi teke o bu lẹ Hẹburonu.

Ábuna etsoru Dévidi

⁶No iya; ọ buri teke ono, ọgu adaru ndu ọnu-ùlo Sọlu waa ndu ọnu-ùlo Dévidi ono bẹ Ábuna nọ l'ẹka ọlo kẹ Sọlu; alwùshi ọgu ike.

⁷Sọlu bẹ nweru nwanyi, o to shidu alu ọkpobe alulu. Epha iya bụ Rizupa, nwada Aya. O be ujiku lanu; Ishibosheti bya ekua Ábuna su iya: “? Denu iphe, meru g'o gude unu lẹ nwanyi, nna mu ta ludu ọkpobe alulu nọdu akwaje?”

⁸Tobudu iya bụ; ẹhu ghushiahaa Ábuna eghu ike lẹ k'opfu ono, Ishibosheti pfuru ono. O su Ishibosheti: “? Iri lẹ mu bụ oke nkuta ndu Jiuda; k'opfu mu e-shi eshi teke ono bya eye ntanu-a; gude obu mu g'ọ ha turu ikè yeru nna ngu Sọlu; mẹ ndibe iya; mẹ ndu yee ya eshi onyà. Mu nọdu alwùkpoepfo ọgu ẹhu unu gẹ ndu kẹ Dévidi ta alwuta unu; i gbẹ nta-a bya ekobe mu opfu ẹhu nwanyi-a.

⁹Gẹ Chileke gwakwa mu ọchi; mbu g'o mekwa mu ọphu ka njo m'ọ buri lẹ mu te emeduru Dévidi iphe ono, Chipfu riburu lẹ nte; kwee ya ukwe iya ono;

¹⁰mbu lẹ mu a-nafu ọnu-ùlo Sọlu aba-eze ono; woru Dévidi mee g'ọ buri eze ndu Ízurelu mẹ Jiuda; e -shi lẹ Danu jasụ lẹ Biye-Sheba.”

¹¹Ọphu Ishibosheti ahalibaeduru onu k'epfu opfu yeru Ábuna ọzo; kele ọotsu iya ebvu.

¹²Ọo ya bụ; Ábuna bya ezia ndu oozije ozi g'ẹphe jeru iya ibe Dévidi lẹ Hẹburonu je asu iya: “? Bunaa onye bẹ alı-a du l'ẹka? Gẹ mu lẹ ngu gbanaa ndzu; gẹ mu eyeta ẹka mee gẹ ndu Ízurelu l'ọphu lwakota ngu l'ẹka.”

¹³Noo ya; Dévidi su: “O du ree! Mu lẹ ngu a-gba ndzu obu. O le mu elekwanu enya iphe lanu l'ẹka ngu, bụ iya bụ g'i ti shitakwa ẹka mu nọ gbahaa l'i du Mikalu, bụ nwada Sọlu dutaru mu m'i byajepfo gẹ mu lẹ ngu huma!”

¹⁴Dévidi bya eye ndu-ozí g'èphe jepfu Ishibosheti, bú nwa Sòlu je asù iya: “Dee mu nyee mu Mikalu, bú onye ono mu butaru akpapyí ndu Filisitayinu ùkporo ise gude kwaa aswa iya ono.”

¹⁵Oo ya bú; Ishibosheti zia; e je anata Mikalu l'èka jí iya, bú Palùtelu nwa Layishi.

¹⁶Ji nwanyí ono nõdu ara èkwa etso iya l'azù jeye èphe jerwua mkpùkpu Bahurimu. Ábuna sù iya: “Tùgbule-a lashia ibe ngu!” O laphushia azù.

¹⁷Ábuna bya ekua ndu bú ògerenya ndu Ízurelu l'idzù sù phè: “Unu shiwaa teke dù enya seta g'unu e-shi mee Dévidi eze unu.

¹⁸Ngwa; unu mee ya ya nta! Noo kèle Chipfu kwewaru Dévidi ukwe sù: ‘Oo l'èka nwozi mu, bú Dévidi bè mu e-shi nafùta ndibe mu, bú ndu Ízurelu l'èka ndu Filisitayinu; mè l'èka ndu òhogu phè l'ophu.’ “

¹⁹Ábuna l'onwiya bya epfukwarùpho yeru ndu Benjiaminu. O bya atùgbua jeshia Hèburonu je edooru Dévidi iphemiphe, ndu Ízurelu; mè ndu ipfu Benjiaminu l'ophu abya ememe.

²⁰O beèpho teke Ábuna yèle unwoke ùkporo, yèe ya swí jeru ibe Dévidi lè mkpùkpu Hèburonu; Dévidi shiaru iya nri; yèe ndu yèe ya swí.

²¹Ábuna bya asù Dévidi: “Gè mu bya eje nta-a je ekukòoru gùbe eze, bú nnajìuphu mu ndu Ízurelu l'ophu gè gù l'èphe gbaa ndzù; k'òphu jì-bùkotaru eze ndu ono, òogu obu ngu ègu g'ì búru ono.” Oo ya bú; Dévidi dukwa Ábuna; ò tùgbua lashia l'èhu-guu.

Jiowabu egbu Ábuna

²²O bùkpoerupho teke ono bè ndu-ozí Dévidi waa Jiowabu shi ògu ndu ò-lwà-òlaa, èphe jeru bata; vuru iphe, parù èka èphe kwatarù l'òkwata lwa. Olee Ábuna ta anòekwanu l'ibe Dévidi lè Hèburonu; kèle Dévidi dukwawaru iya; ò tùgbua lashia l'èhu-guu.

²³Jiowabu yèle ndu ojògu, yèe ya swí bataèpho; e pfiaru iya lè Ábuna nwa Nèru bè shikwa byapfuta eze; o dukwawa iya ò lashia l'èhu-guu.

²⁴Oo ya bú; Jiowabu jepfushia eze je asù iya: “? Bù gùnu bè i meru ègube ono? ? Bù gùnu meru g'o gude Ábuna byapfuta ngu; ì haa ya; ò lashia? Nta-a bè ò lashighawaru!

²⁵Mbù-a; ì maru-a onye Ábuna nwa Nèru bú. O kwa ùgho bè ò byaru ngu aghòru; bya g'ò makòtcharu g'ijje iya ala; gè ya makòtaru iphemiphe, iimekpòo ememe.”

²⁶Jiowabu bya atùgbua lùfu l'iphu Dévidi. O bya ezia ndu-ozí iya g'èphe gbapfu Ábuna. Èphe gbapfu Ábuna lè wèlu Sira kuphuta iya azù; òphu Dévidi ta amadu.

²⁷Ábuna lwaphutaèpho azù lè Hèburonu; Jiowabu kuchi iya ekuchi l'ònu-òguzo g'ò bú l'ò nweru iphe, oome g'ò pfiaru iya lè mpya. O búru l'èka ono bè Jiowabu nõ nmafua ya èpho; ò nwùhu. O shi nno gwata ùgwo òchi nwune iya phò bú Asahèlu.

²⁸E mechaa; Dévidi bya anùma iya. O sù: “Mu lè ndu alì-eze mu bè ikpe ta anmakwaru l'iphu Chipfu jasùru asùru lè k'egbugbu, e gburu Ábuna nwa Nèru.

²⁹G'ò bụkwaru Jiowabu; mę ọnu-ulo nna iya l'ophu bę ọchi Ábuna a-tu-koru l'ishi! G'onye vu atashi ta abvukwa abvubvu l'onulo Jiowabu; ọzoo onye ekpenta eme; ọzoo onye gude mgboro ete okpa; mę onye e gburu l'ike; mę onye akpa nri.”

³⁰O bụru Jiowabu yele nwune iya nwoke, bụ Abishayi bę gburu Ábuna kele ọo ya gburu Asahelu, bụ nwune phe l'ogu le mkpukpu Gibiyonu.

Eeli Ábuna

³¹Dévidi bya asu Jiowabu mę ndu ephe l'iya no: “Unu gbajashia uwe unu; unu achita uwe-aphu yee; tuko raa ekwa Ábuna.” Eze, bụ Dévidi nodu etso igbe-odzu ono l'azu.

³²Ephe lia Ábuna le Hęburonu; eze kwaa idemini l'ilu Ábuna. Ndu nokota l'eka ono rakota ekwa.

³³Eze, bụ Dévidi bya agwa ebvu-aphu ehu Ábuna su: “? O gbaru g'ò bụru Ábuna bę anwuhu anwuhu onye-eswe-a?”

³⁴E te keduru ngu egbu l'eka; ophu a tuduru ngu mkporo l'okpa. I laru l'ike g'onye dabaru ndu ejo-iphe l'eka.” Ndu nokota l'eka ono tuko tu uzu-ekwa iya ozo.

³⁵Ndu ono g'ephe ha bya atuko rwoahaa Dévidi g'o ria nri le teke o bukwadu l'eswe. Obenu le Dévidi riburu nte su: “Ge Chileke gwakwa mu ọchi; mbu g'o mekwa mu ophu ka njo mę mu wotawaa nri dee l'onu; ọzoo wota iphe ozo, ria teme enyanwu ariba!”

³⁶Ndu ono l'ophu tube iphe ono nvo; teme o tsoo phe utso; mbu-a; iphemiphe, eze Dévidi meru dukota phe ree.

³⁷Oo ya bu; ndu ono g'ephe ha; je akpaa le ndu Izurelu l'ophu tuko maru l'eze, bụ Dévidi bę eka iya ta adudu l'egbugbu ono, e gburu Ábuna nwa Neru.

³⁸E mecha; eze je asu ndu-ozu iya: “? Unu ta amadu l'onye-ishi; mbu oke amadu bę nwuhuru nu l'ali Izurelu ntanu-a?”

³⁹O bu eviya l'a wuru mu manu l'ishi ge mu buri eze; obenu l'ike ta adudu mu ntanu-a; noo kele unwegirima Zeruya bę nabaru mu eka. Ge Chipfu pfukwa ndu eme eji ugwo g'ejo-ememe, ephe meru habe!”

2 Samelu 4

Eegbu Ishibosheti

¹Tobudu iya bu; Ishibosheti; nwa Solu numapho le Ábuna bę nwuhuwuru nu le Hęburonu; ike bvụ iya; ndzu guhu ndu Izurelu l'ophu.

²Nwa Solu ono bę nweru unwoke labo, bụ ndu-ishi o-lwua-olaa. Epha onye lanu bu Bana; epha onye ophuu buri Rekabu. Ephe tukoru buri unwu Rimonu, bụ onye ipfu Benjaminu bya aburu onye mkpukpu Berotu. Berotu ono bę a gukoberu l'ekiya ke Benjaminu;

³Kele ndu Berotu gbaru ọso laa mkpukpu Gitayimu je ebuwaruro l'eka ono buru ndu lwaru alwalwa byasu ntanu-a.

⁴No iya; Jionatanu, bu nwa Solu be nweru nwa iya nwoke, iphe lonwuru okpa labo. O buru teke nwata ono nowaru apha ise be e shi le Jiezerelu bya edoo k'anwuhu Solu yele Jionatanu. Nwanyi, ehe nwata ono numaepho iphe ono; o kwoo gburumu jeshia ge ya kuta nwata ono gbalaa; nwata nyifu iya daa; mechaa buru eniyeni. Epha nwata ono bu Mefibosheti.

⁵Noo ya; Rekabu waa Bana, bu unwu Rimonu, bu onye Berotu ono bya atugbua mboku ono; o buru phe eje ibe Ishibosheti. O buru l'echilabo eswe be ephe jerwuru ibe Ishibosheti le teke o no atuta unme eswe.

⁶Ephe bya abahu l'ime ulo iya g'o bu l'ephe eje ahata witi. Ephe nmafua ya ephe l'ime eka ono; bya epyofu; gbalaa.

⁷O buru teke Ishibosheti ze aze l'iphe-azee ya be ephe bapfuru iya l'ime mkpuru l'eka ozeje l'ime ulo iya. Ephe nmaa ya mma; nmagbua ya; bya egbuta iya ishi. Ephe pata ishi iya ono tugbua jekota ije l'uzo nsuda Araba l'enyashi mboku ono l'ophu.

⁸Ephe pata ishi iya ono pataru Dévidi le Heburonu; bya asu iya: “Waa ishi nwa Solu ono, bu Ishibosheti ba; mbu ohogu ngu ono, shi achọ ishi ndzu ngu ono. Ntanu-a be Chipfu gwatawaru Solu yele eri iya ugwo iphe, ephe meru gube nnajiuphu anyi, bu eze.”

⁹No iya; Dévidi bya eyeeru Rekabu yele nwune iya nwoke, bu Bana onu; mbu unwu Rimonu, bu onye Berotu ono; su phe: “Eshinu Chipfu no ndzu g'o no iya-a; mbu onye ono, nafutaru mu l'iphe-ehuka;

¹⁰be oo-nwuru unu g'o nwuru onye ono teke o byaru asu mu le Solu be nwuhwakwaru nu ono. O gbenu arị le ya byaru mu ezi ozi, du ree; obenu le mu zuguderu iya gbua le mkpukpu Zikulagu. Ono buru obunggo, mu buru iya l'ozi, o byaru ezizi.

¹¹? Too kabadaro njo l'eka o bu ndu ejo-iphe jeru egbua nwoke, adudu iphe, o meru l'ime ulo iya; mbu l'iphe, ozeje aze? ? To buedupho ge mu gwata unu ugwo mee ochi iya l'ishi unu nta; mbu wofu unu le mgboko-a?”

¹²Oo ya bu; Dévidi bya ezia unwokorobya iya; ephe gbushia phe. Ephe kwashia phe eka yee okpa; pakoo ogwehu phe je ekobe le mgboru okpuru, no le Heburonu. Ephe pata ishi Ishibosheti je elia l'ilu Abuna le Heburonu.

2 Samelu 5

Eeme Dévidi eze ndu Izurelu l'ophu

(1phe 11:1-9)

¹Tobudu iya bu; ipfu ndu Izurelu l'ophu toko byapfuta Dévidi le Heburonu bya su iya: “Anyi le ngu tukoru buru mee lanu waa ogwehu lanu.

²Teme; teke Solu shi buru eze anyi; be bukwa gubedua shi edujeru ndu Izurelu eje ejeje alwa alwalwa l'ogu. O buru ngu be Chipfu suru l'oo ngu a-nodu eche ndu nkiya, bu ndu Izurelu g'onye eche aturu; mbu l'oo ngu a-buru onye-ishi phe.”

³Oo ya bu; iphe, bu ndu bu ogerenya Izurelu bya awu-pfu eze, bu Dévidi le Heburonu; ephe l'iya gbaa ndzu l'iphu Chipfu; ephe wua Dévidi manu g'o buru eze ndu Izurelu.

⁴Dévidi nowaru ukporo apha l'apha iri teke e meru iya eze. Iphe, o noru l'aba-eze bu ukporo apha labo.

⁵Teke o bu le Heburonu be o noru l'aba-eze ndu Jiuda apha esaa l'onwa ishii. O bya anodu le Jierusalemu buru eze ndu Izurelu l'ophu yele ndu Jiuda ukporo apha l'apha iri l'eto.

⁶Eze, bu Dévidi yele ndu nkiya wuru jeshia ogo le Jierusalemu, bu iya bu Jiebusu. O buru ndu Jiebusu be bu l'ali ono teke ono. Ndu Jiebusu ono bya asu Dévidi: “? A suru ngu l'i du ike abata l'eka-a; mbu l'o kwa ndu atsü ishi; me ndu eniyeni be a-chiphu ngu azu; me i -byatashia.” No kele ephe riru le Dévidi ta abyadu adu ike bata l'ali phe.

⁷Ole Dévidi mechalewu-a lwuta eka a kpushiru ike, no l'eli ubvu Zayonu, mecharu buru mkpukpu Dévidi.

⁸Mboku ono be Dévidi suru: “Onye a-du ike lwua ndu Jiebusu be e-toru oswa-mini bapfu ndu atsü ishi me ndu eniyeni ono, du Dévidi ashü ono.” Oo ya bu iphe ono, eepfufe su: “Ndu atsü ishi me ndu eniyeni ta abyadu a-bahu l'ulo.”

⁹Dévidi bya akwata unuphu l'eka ono, a kpushiru ike ono. O woru iya gua mkpukpu Dévidi. O kpu igbulu mkpukpu ono mgburugburu. O shi l'agbarike igbulu mkpukpu ono kpu ya bahu l'ime.

¹⁰Dévidi nodu aka ike ejekpopho; kele Chipfu; mbu Chileke, bu Okalibe-Kakota-Ike swiru iya eswiru.

¹¹Tobudu iya bu; Hiram, bu eze ndu Taya bya eye ndu-ozu iya g'ephe vutaru Dévidi oshi sida; bya eyekwapho ndu kapyinta; me ndu edoje eja ulo; ephe toko swiru je akparu Dévidi ulo.

¹²Dévidi bya amaru le Chipfu be mewaru ge ya nguru anguru l'abu eze ndu Izurelu; teme le Chipfu be gudewaa iswi ehü ndibe iya ono, bu ndu Izurelu palia ali-eze iya imeli.

¹³Dévidi bya alufutachaephe le Heburonu; o latabaa unwanyi, ndu ophu abu-zidu unyomu iya le Jierusalemu; bya alushia igwerigwe unwanyi. A bya nwushibakwaru iya pho unwegirima; unwoke me unwanyi.

¹⁴Waa epha unwegirima, a nwushiru iya le Jierusalemu baa: Shamuwa; me Shobabu; me Nétanu; me Sólomonu;

¹⁵me Ibuha; me Elishuwa; me Nefegu; me Jiafiya;

¹⁶me Elishama; me Eliyada; me Elifeletu.

Dévidi alwụ-kpee ndu Filisitayinu

(1Iphe 14:8-17)

¹⁷Ndu Filisitayinu bya anumaepho l'a wụwaru Dévidi manụ l'ishi g'ọ bụru eze ndu Ízurelu; ephe tuko zelihi; chọru Dévidi jeshia. Dévidi numa iya; bya abahu l'eka ono, a kpushiru ike ono.

¹⁸Ndu Filisitayinu bya bya ejerwua je edokaa onwophe; ephe dzuru nsuda Refayimu.

¹⁹Oo ya bu; Dévidi bya eje ajita Chipfu su: “? Bu ge mu jepfu ndu Filisitayinu ogu too? ? Ii-woru phe-a ye mu l'eka?” Chipfu yeeru iya onu su iya: “Jerọ ya; le mu e-woru-a ndu Filisitayinu obu ye ngu l'eka.”

²⁰Oo ya bu; Dévidi jeshia mkpukpu Belu-Perazimu; je alwụ-kpee phe l'eka ono. O su: “Oo g'ukporo-mini ekpoje-a bu ge Chipfu kpotaru ndu ohogu mu l'ataphu mu.” Oo ya meru g'o gude a gua eka ono Belu-Perazimu.

²¹Ndu Filisitayinu gbadochaa agwa phe l'eka ono; Dévidi yele ndu nkiya chitakota iya tugbua.

²²E mechaa; ndu Filisitayinu byakwa bya edokaa onwophe dzuru nsuda Refayimu.

²³Dévidi byakwa eje ajita Chipfu ozo; Chipfu su iya: “Unu te eshikwa phe ataphu nhamunha; unu shichikwaa phe okotazu; no-pee phe mgburugburu l'iphu eka ono, oshi balusamu pfugbaaru ono tsoo phe ogu.

²⁴Teke unu bebeerupho numa iphe, ada g'igiji okpa l'eli oshi balusamu ono; unu emekebe egwegwa; noo kele oo teke ono be Chipfu vutawaru unu uzo g'unu je egbushia ndu ojogu ndu Filisitayinu.”

²⁵Noo ya; Dévidi mee ya egube ono, Chipfu ziru iya ono. O shiepho le mkpukpu Geba gbushia ndu Filisitayinu jasụ le mkpukpu Geza.

2 Sámelu 6

Eedobe Okpoko Ogbandzu Chileke l'ibe Óbedu-Edomu

(1Iphe 13:1-14; 15:1—16:3,43)

¹Dévidi byakwa akpako-dzua ndu a hotaru le ndu Ízurelu. Iphe, ephe du bu ukporo unu umadzu ugbo eto l'unu iri l'ise.

²Dévidi yele ndu nkiya l'ophu tugbua jeshia mkpukpu Belu, no l'ali Jiuda g'ephe je apalata okpoko Chileke; mbu okpoko ono, a guru epha Chipfu, bu Okalibe-Kakota-Ike; mbu onye ono, aba-eze iya no le mgbaka cherubimu ono.

³Ephe bya apafuta okpoko Chileke ono l'ulo Abinadabu paru tukobe l'eli ogbakperekpere ophuu. Ulo Abinadabu ono tukoru l'eli ubvu. O buru Uza waa Ahiyo, bu unwu Abinadabu ke nwoke be anga ogbakperekpere ophuu ono.

⁴Ephe ngaru ogbakperekpere ono, a tukoberu okpoko Chileke ono lufuta l'ibe Abinadabu. Ahiyo vuru okpoko ono uzo.

- ⁵Dévidi yee ndu Ízurelu l'ophu tuko gude ike phe g'ò ha ete eswa l'iphu Chipfu. Epehwe ndu agu ebvu; akpo ogumogu; me une; bya aku nkwa; egbu opu; aku ogelenda.
- ⁶Epehwe rwuepho eka eechishije eswa le balì le Nakonu; Uza tufu eka ge ya wota okpoko Chileke ono; kele eswi, alokpu ogha-kperekpere, a tukoberu iya ono be vukotaru iphe.
- ⁷Chipfu tukoshi Uza ehu-eghu iya; kele o to soduru okpoko Chileke ono nsò. Chileke woru iya chigbua; o nwuhu le mgboru okpoko Chileke l'eka ono.
- ⁸Ehu daa Dévidi ke dzuu; kele oke-ehu-eghu Chipfu dapfutaru Uza. A ndu ekuje eka ono Pérezu-Uza byasu ntanu.
- ⁹Oo ya bu; ndu Chipfu guhu Dévidi le mboku ono; o su: “? Denukpoo g'e-me palata okpoko Chipfu-a?”
- ¹⁰Ophu o to vuedu Dévidi evuvu g'ò palata okpoko Chipfu ono le mkpukpu Dévidi. O patawa iya ro je edobe l'ibe Obedu-Edomu, bu onye Gatu.
- ¹¹Okpoko Chipfu ono no onwa eto l'ibe Obedu-Edomu onye Gatu. Chipfu kebe Obedu-Edomu waa ndibe iya l'ophu l'oma.

Eevulata okpoko Chileke le Jierusalemu

(1Ipe 15:25-29)

- ¹²Noo ya; a bya edooru eze, bu Dévidi su: “Chipfu gudekwa k'okpoko Chileke-a kebewaa ndibe Obedu-Edomu l'oma; mekpoo iphemiphe, o nweru enweru.” Oo ya bu; Dévidi teru eswa je apafuta okpoko Chileke ono l'ibe Obedu-Edomu; palaa le mkpukpu Dévidi.
- ¹³O ndu abujeru; ndu pa okpoko Chipfu ono -tua ntokpa ishii; Dévidi egbua oke-eswi waa nweswi, eba du gude gweeru Chileke ngweja.
- ¹⁴Dévidi nmaru ekwa ochaa l'upfu; bya egude ike iya g'ò ha ete ebvu l'iphu Chipfu.
- ¹⁵Noo ya; Dévidi yele ndu Ízurelu l'ophu ndu apalata okpoko Chipfu ono; akpo okwe etso iya; bya egbu opu.
- ¹⁶A ndu apabata okpoko Chipfu ono le mkpukpu Dévidi; nwada Solu, epha iya bu Mikalu pyofu enya le windo; huma eze, bu Dévidi g'onma-lihuje anmalihu bya ete ebvu l'iphu Chipfu; o nmaa ya phulaphula l'ime obu iya.
- ¹⁷Oo ya bu; epehwe bya apabata okpoko Chipfu ono; woru iya dobe l'eka rwuberu iya nu l'ime ulo-ekwa ono, Dévidi kpoberu g'e dobe iya ono. Dévidi bya egweshia ngweja-akpo-oku; me ngweja-ehu-guu l'iphu Chipfu.
- ¹⁸Dévidi gweghechaepho ngweja-akpo-oku ono; waa ngweja-ehu-guu ono; o gude epha Chipfu, bu Okalibe-Kakota-Ike goru onu-oma nu ndu Ízurelu.
- ¹⁹O bya ekeeru ndu ono ishi buredi nanu nanu l'ehu l'ehu; me akara, e meru l'akpuru oshi detu; me akara, e meru l'akpuru vayinu; kedzuru iya ndu Ízurelu ono l'ophu;

unwoke; mę unwanyi. E mechaa; ndu ono l'ophu wukashihu lashichaa ibe phę l'ęhu l'ęhu.

²⁰O be teke Dévidi larwuru; g'ọ ọọru ọnu-ọma nų ndibe iya; nwada Sọlu, bų Mikalu gbafuta gba Dévidi ndzuta bya asų iya: “Eze ndu Ízurelu bvubenụkakarwu onwiya ebvube ntanų-a. Ọ gbabęchakarwu onwiya ọto l'iphu unwumboko, bų ohu ndu e jeru iya ozi; mbų ęgube ono, iphere abvųje mkpokoro nemadzu l'iphu; l'ogbabe onwiya ọto-a.”

²¹Dévidi sų Mikalu: “Ọo l'iphu Chipfu bę ọ bų; mbų onye ono, harų nna ngu mę onye ọzo, shi l'onulo nna ngu hotachia mbędua gę mu bųru onye-ishi ndu kę Chipfu ono, bų ndu Ízurelu; mbų-a; mu a-nọdu ete ęswa l'iphu Chipfu.

²²Mu a-kabakpokwanu eme g'o to nwedu iphe, mu bų; eme l'owana, mu meru-a. L'ęnya nkemu bę mu a-bųru onye e wozetaru alį; obenu l'unwumboko ono, bų ohu, iipfuru ono bę a-gbenu akwabę mu ọbvų.”

²³Ọo ya bų; ophu nwada Sọlu ono, bų Mikalu anwutaduru nwa jasų mbọku, ọ nwuhuru.

2 Sámęlu 7

Ozi, Nétanu ezi Dévidi

(1Iphe 17:1-15)

¹Tọbodu iya bų; ọ bya ebe teke eze bukpọwaa ebubu l'ibe iya; Chipfu mewa; obu rwua ya alį; ophu ọ tsuhedu ebvu ndu ọhogu iya, nọ-pheru iya mgburugburu;

²eze pfiaru onye mpfuchiru Chileke, bų Nétanu sų iya: “Lenu; mbędua bu l'ulo, e gude oshi sida kpua; okpokọ Chileke bųru l'ulo-ękwa bę ọ nọ.”

³Nétanu sų iya: “Iphe, bukpoo iphe, dų ngu l'obu; tugbua je emee ya; lę Chipfu bę swiru ngu eswiru.”

⁴O be l'ęnyashi mbọku ono; Chipfu pfuru yeru Nétanu; sų iya:

⁵“Je ezia nwozi mu, bų Dévidi lę mųbe Chipfu sųru-a: ? Bų gbędua bę bų onye akpuru mu ọlo, mu e-buru?”

⁶Eshi mbọku, mu dufutaru ndu Ízurelu l'alį Ijiputu byasų ntanų-a bę mu te ebujekwaru l'ulo. Mu shihawaa jepheta ejephe; bukpọerupho l'ulo-ękwa.

⁷L'ękameka ono, mu lę ndu Ízurelu jekotaru ono; ? o nweru teke mu jįjeru ndu-ishi ipfu Ízurelu; mbų ndu ono, mu sųru g'ęphe cheje ndibe mu, bų Ízurelu g'onye eche aturu ono iphe, meru g'o gude ophu ęphe akpuduru mu ọlo sida?

⁸“Sų nwozi mu Dévidi lę-a: ‘Mųbe Okalibe-Kakota-Ike, bų Chipfu sųru-a: Mu dufutaru ngu l'ęgu; ęka ęku ataję nri; g'i ti tsopheę aturu; g'i byachia bya aburu onye-ishi ndibe mu, bų Ízurelu.

⁹Mu shi eswijekpoeru ngu pho l'ekameka, iije; mu tuko ndu ohogu ngu g'ephe ha gbufu l'iphu ngu. Nta-a be mu e-me epha ngu g'o paa eka g'epha ndu oke amadu, e nwegbaarū le mgboko.

¹⁰Mu a-nu ndibe mu, bu Izurelu ali eka phe. Mu a-dzabe phe g'oshi l'ali ono; k'opu epe e-buru l'ali eka phe. Eka ono ta adudu onye byaru l'a-chobaa phe opfu ozo. Ophu ndu ejo-iphe ta abyadu emekpabaa phe ehu g'e shi emekpa phe iya le mbu pho;

¹¹mbu g'e shi emekpa phe iya; a -gbete teke ono, mu hotaru ndu-ikpe g'ephe dua ndibe mu, bu Izurelu ono. Mu e-mekwapho g'ogu dabuhuru gu le ndu ohogu ngu; obu erwua ngu ali. Mube Chipfu be epfukwaru ngu pho le mu e-me g'onulo ngu nguru anguru.

¹²Teke ndzu ngu bvuerupho; mbu i -lapfuepho nna ngu phe; be mu e-shi l'unwu ngu wofuta onye a-no-chi enya ngu; mbu onye e-shi l'ehu ngu gedegede. Mu emee g'ali-eze iya nguru anguru.

¹³O buru onye ono be a-kpuru mube Chileke ulo. Mu emee g'aba-eze iya nguru anguru jasū le tuutuutuu le mijimiimii.

¹⁴Mu a-buru nna iya; yebdua aburu nwa mu. O -mee ejo-iphe; mu egude echachi ndiphe hua ya ahuhu; mbu chia ya echachi unwu-eliphe.

¹⁵Mu ta abyadu e-wofu n-yemobu mu l'ehu phe; egube ono, mu wofuru iya l'ehu Solu; mbu onye ono, mu wofuru l'iphu ngu ono.

¹⁶Onu-ulo ngu waa ali-eze ngu be e-keru ekeru l'iphu mu jasū le tuutuutuu le mijimiimii. Mbu-a; aba-eze ngu be ee-me g'o nguru anguru jasū le tuutuutuu le mijimiimii.' “

¹⁷Noo ya; Netanu kokotaru Dévidi iphe ono egube e pfuru iya ya; me g'o humaru iya l'ophulenyā.

Dévidi epfu anu Chileke

(1phe 17:16-27)

¹⁸Oo ya bu; eze, bu Dévidi gbeshi bahu l'ime ulo-ekwa Chileke je anodu l'iphu Chipfu bya asu: “Gube Nnajiuphu, bu Chipfu; ? bu onye be mu bu? teme onu-ulo mu ? bukwanu gunu; ke g'i wolia mu je apfube l'eka ha l'eli egube-a?”

¹⁹Ophu ono atsudu iya gube Nnajiuphu, bu Chipfu l'enya; i bya atufua onu g'onulo onye-ozu ngu a-du l'iphu yekobefua ya. ? Bu egube ono bu g'igudeje ehe nemadzu; gube Nnajiuphu, bu Chipfu?

²⁰? Bu gunu ozo be mube Dévidi e-pfubaaru ngu? I makotaru ge mube onye-ozu ngu gbaru; gube Nnajiuphu, bu Chipfu.

²¹I gude k'iphe, i pfuru; waa g'o du ngu l'obu; mee eze iphe, ha egube-a; bya emee ge mube onye-ozu ngu maru iya.

²²“Egube g'i habekwanu shii gube Nnajiuphu, bu Chipfu! O to dudu onye du ge ngu; ophu o dudu Chileke ozo, du nu; gbahaa gubedua; mbu egube ono, anyi gude nchi anyi numawa iya ono.

²³? Denukpoo ndu ozo, dubaa ge ndu nkengu, bu ndu Ízurelu; mbu oha lanu le mgboko-a, gube Chileke jeru je agbafuta g'ephe buru ndu nkengu; bya egude phe mee g'a maru epha ngu amaru; bya emee iphe, pagbaaru eka; bya adu biribiri l'ali phe; l'iphu ndibe ngu ono, bu ndu ono, i gbafutaru l'eka ndu Ijiputu; teme i chikashikwaapho ohamoha ozo yele agwa, ephe agwagbaa l'iphu ndibe ngu ono?

²⁴I mewaru ge ndu nkengu, bu ndu Ízurelu nguru anguru; buru ndu nkengu gedegede jeyewaroya; teme gube Chipfu bya abuwaru Chileke phe.

²⁵“Gube Chipfu, bu Chileke; mekwa g'o keru; mbu ukwe-iphe ono, i kweru l'ehu mube onye-ozu ngu; me l'ehu onu-ulo mu ono. G'o rekwaa g'i pfuru jasu le tuutuutuu le mimiimii. Mekwaa g'i pfuru;

²⁶k'ophu epha ngu a-pa eka apaa jasu le tuutuutuu le mimiimii. O buru teke ono be ndiphe a-su l'oo gube Chipfu, bu Okalibe-Kakota-Ike be bu Chileke ke ndu Ízurelu! Teme onu-ulo mube onye-ozu ngu, bu Dévidi angukwarupho anguru l'iphu ngu.

²⁷“Eshi ophu o bu gube Chipfu, bu Okalibe-Kakota-Ike; bya aburu Chileke ke ndu Ízurelu be goshiru mube onye-ozu ngu iphe-a su l'ii-me g'onulo mu nguru anguru; be bu iya meru g'o gude onu du mube onye-ozu ngu k'anodu epfu anu ngu.

²⁸Gube Nnajiuphu, bu Chipfu; oo ngu bu Chileke! Opfu ngu be bukota okpobe-opfu. I bya ekweshia mube onye-ozu ngu ukwe iphe-oma, dugbaa egube-a.

²⁹G'o dunu ngu l'obu; mbu gi goru onu-oma obu nuwaro onu-ulo onye-ozu ngu; k'ophu ephe a-nodu eje kwaseru l'iphu ngu; noo kele oo gube Nnajiuphu, bu Chipfu be pfuru iya nu. G'onu-oma ngu ono dukwaru onu-ulo onye-ozu ngu jasu l'ojejoje.”

2 Samelu 8

Ogu, Dévidi Iwugbaberu

(1Iphe 18:1-17)

¹E mechaa; Dévidi bya alwu-kpee ndu Filisitayinu; mee ephe nodu iya l'eka. O nafu ndu Filisitayinu ono mkpukpu Metegama.

²Dévidi bya alwu-kpekwaapho ndu Mowabu; mee ephe zeshikota azee; kpoo onwophe giriri l'ali. O bya ewota eri, du ogologo tua phe g'ephe ze giriri ono. Oobujeru; o -tuta eri ono ugbo labo l'o woru ndu k'ono gbushikota. O bya atuta k'eto l'o dobe ndu k'ono ndzu. Oo ya bu; ndu Mowabu nodu Dévidi l'eka; bya atukwapho utu anu iya.

³Dévidi bya alwu-kpekwapo Hadadeza nwa Rehobu, bu eze ndu Zoba le teke o jeru ge ya mee g'ali, noru je akpaa l'enyimu Yufurétisu lwakota iya l'eka.

⁴Dévidi nata iya ugbo-inya, du unu labo l'ukporo iri; bya anatakwa iya pho ndu ojogu o-je-l'okpa, du ukporo unu ugbo labo l'unu iri.

⁵Ndu Aramu, bu le Damasukosu byaepho g'ephe yetaru eze ndu Zoba, bu Hadadeza eka; Dévidi gbua phe ukporo unu ugbo labo l'unu iri l'ise.

⁶Dévidi bya emeta ọdu ndu ojọgu l'alì ndu Arámu kẹ Damasukosu; haru ndu ojọgu iya chita dobe iya. Ndu Arámu ono nọdu Dévidi l'ẹka; atụ utu anụ iya. Chipfu nọdu emejeepho gẹ Dévidi lwu-kpee l'ekameka, o jekporu ọgu.

⁷Dévidi chikoo iphe, ndu-ozì Hadadeza egbobeje gude ezeru onwophe ọphu e gude mkpọla-ododo meshia chilata lẹ Jierusalemu.

⁸Dévidi shikwapho lẹ mkpukpu Beta; mę lẹ mkpukpu Berotayi, bukota mkpukpu, nọ l'ẹka Hadadeza; vukoo onyirubvu, hakpoo shii.

⁹Tobudu iya bu; Toyi, bu eze ndu Hamatu numaepho lẹ Dévidi bẹ lwu-kpekotawaru ndu ojọgu Hadadeza;

¹⁰o ye nwa iya nwoke, epha iya bu Jióramu g'o je ekele eze, bu Dévidi ekele; jaa ya ajaja; kele o lwu-kperu Hadadeza. O buru iphe, kparu iya nu bu lẹ Hadadeza bẹ yele Toyi shi anọduje alwu ọgu. O buru iphe, Jióramu gude bya bu ivu, e megbaaru lẹ mkpọla-ochaa; mę mkpọla-ododo; mę l'onirubvu.

¹¹Eze, bu Dévidi woru ivu ono dobechaaru Chipfu iche; egube ono, o dobehawaru mkpọla-ochaa; ye mkpọla-ododo, shikota l'ohamoha, o lwu-kpekotaru pho;

¹²mbu ọphu shi lẹ Edomu; mę Mówabu; mę kẹ ndu Amonu; mę ndu Filisitayinu; waa ndu Amaleku. Nokwapho g'o woru iphe, o nataru eze ndu Zoba, bu Hadadeza nwa Rehobu l'ogu doberu Chipfu iche bu ono.

¹³Dévidi bya aburu onye a maru amaru g'o shichaepho Nsuda Únú lwa; mbu ẹka ono, o nọ gbua ndu Edomu ukporo unu nemadzụ ugbo labo l'unu ise.

¹⁴O bya emeshia ọdu ndu ojọgu l'alì ndu Edomu l'ophu; chita ndu ojọgu yekota iya. Ndu Edomu l'ophu nọdukota Dévidi l'ẹka. Chipfu nọdu emeje gẹ Dévidi lwu-kpee l'ekameka, o jekporu ọgu.

¹⁵Oo ya bu; Dévidi buru eze ndu Ízurelu l'ophu; ekperu ndu nkiya ono l'ophu ikpe l'uzo, du ree; mę l'uzo, pfuru oto.

¹⁶O buru Jiowabu nwa Zeruya bẹ bu onye-ishi ndu ojọgu. Jiehoshafatu nwa Ahiludu buru onye akwakobeje iphe, meru ememe.

¹⁷Zadoku nwa Ahitubu; yele Ahimeleku nwa Abyiyata buru ndu-uke Chileke; Seraya buru onye edeje ekwo.

¹⁸Benaya nwa Jiehoyada buru onye-ishi ndu Kereti waa ndu Peleti, bu ndu anọduje eche eze nche. Unwu Dévidi unwoke buru ndu mgbazi eze.

2 Sámelụ 9

Iphe-oma, Dévidi meru Mefibosheti

¹Tobudu iya bu; Dévidi bya ajia su: “? O nwekporu onye shi l'onulo Solu, phoduru nu gẹ mu gude iswi ehu Jionatanu meeru onye obu iphe-oma?”

²O nweru nwozi ndu ọnu-ọlo Sọlu, ẹpha iya bụ Ziba. Ẹphe kua ya; ọ bya l'iphu Dévidi. Eze, bụ Dévidi jĩa ya sụ: “? Bụ gubedua bẹ bụ Ziba?” Ziba sụ iya: “Ọ kwa-a mụbe nwozi ngu bẹ bụ iya nù.”

³Eze jĩa ya sụ: “? O nwekpọru onye phọduru nù l'ọnulo Sọlu gẹ mu meeru iya iphe-oma, shi l'ẹka Chileke?” Ziba bya asụ eze: “O nweru nwa Jionatanu lanu, nọkwadu nù, bụ onye ọkpa labọ nwuhuru anwuhu.”

⁴Eze jĩa ya sụ: “? Bụ l'awe bẹ ọ nọ?” Ziba sụ l'ọ nọkwa l'ibe Makiya nwa Amiyelu le mkpukpu Lodeba.

⁵No iya; eze, bụ Dévidi zia g'e je Lodeba l'ibe Makiya nwa Amiyelu je eduta iya.

⁶Nwanwa Sọlu ono, bụ Mefibosheti; nwa Jionatanu ono rwuepho l'iphu Dévidi; ọ daa l'alị phozeru Dévidi gude kwabe iya ùbvù. Dévidi bya ekua ya sụ: “Mefibosheti!” Ọ za iya ẹnu sụ: “Ọo nwozi ngu bẹ mu bụ.”

⁷Dévidi sụ iya: “Ta atsukwa ebvu; noo kele mu e-gude iswi ẹhu nna ngu, bụ Jionatanu meeru ngu iphe-oma. Alị nna ngu oche, bụ Sọlu bẹ mu a-nuphukota ngu azu; teme ọ buru le teburu mu bẹ ịi-nọduje eri nri mbokumboku.”

⁸Mefibosheti phozeta l'alị sụ: “? Bụ gunu bẹ mube nwozi ngu bukwanu ke g'i nyata odzu nkuta, du ge mbedua?”

⁹Ọo ya bụ; eze bya ekua Ziba, bụ nwozi Sọlu bya asụ iya: “Mu wowaru iphe, bụ iphe ke Sọlu je akpaa le ke ndu ọnu-ọlo iya gedegede woru nù nwanwa nnajiuphu ngu.

¹⁰Gubedua waa unwu ngu; me ndu-ozu ngu bẹ a-kojeru iya alị iya ono; kotaje nri k'ophu nri a-duru nwanwa nnajiuphu ngu. Ọzo bụ le nwanwa nnajiuphu ngu ono, bụ Mefibosheti bẹ a-nọduje eri nri le teburu mbedua, bụ Dévidi.” Teke ono bẹ Ziba nwutaru unwoke iri l'ise; bya enweru ndu-ozu ukporo.

¹¹Tobudu iya bụ; Ziba sụ eze: “Mube nwozi ngu bẹ e-mekotaephe iphe, gube nnajiuphu mu, bụ eze ziru mu gẹ mu mee.” No iya; Mefibosheti riahaa nri le teburu Dévidi g'ọ bụ nwatibe eze.

¹²Mefibosheti bẹ nwutaru nwata nwoke nshii, ẹpha iya bụ Mayika. Ndibe Ziba l'ophu tukoru bukotaru ndu-ozu Mefibosheti.

¹³Ọo ya bụ; Mefibosheti buru le Jierúsalemu; kele ọo-nọduje eri nri le teburu eze; teme ọ buru ẹniyenu, ọkpa labọ nwushihuchaaru anwushihu.

2 Sámẹlu 10

Ọgu, Dévidi yele ndu Amonu alwu (1phe 19:1-19)

¹A nonyaa; eze ndu Amonu bya anwuhu. Nwa iya nwoke, bụ Hanunu bya aburu eze nochia ẹnya iya.

²Dévidi bya epfua sụ: “Mu e-meru Hanunu nwa Nahashi ree; egube nna iya meru mbedua.” Oo ya bu; Dévidi zia ndu-ozii g'ephe je akporu Hanunu iphu nna iya ono. O be ge ndu-ozii Dévidi ono rwuru ali ndu Amonu;

³ndu-ishi ndu Amonu sụ Hanunu, bu nnajuphu phe: “? Iiri l'oo ubvu be Dévidi akwabe nna ngu egube ono meru g'o gude o zia g'a bya akporu ngu iphu nna ngu? ? Tobudu ezizi be Dévidi ziru g'ephe nwua mkpukpu-a ngge; genwushia ya ehu; woru iya lwua?”

⁴Oo ya bu; Hanunu gudeshia ndu ono, Dévidi ziru ozi ono kpushichaa phe ejí-agba ibe lanu ibe lanu; bya eshi le nhamunha ike bukashia uwe-mgbalanu phe; nwufu phe; ephe lashia.

⁵O be teke e pfuru iya Dévidi; o zia g'a gba phe ndzuta; kele e meru phe iphe-iphere paru aka. Eze zia ozi sụ phe: “Unu ndu le Jieriko jeye teke ejí-agba unu erwudzu; teme unu alwatashiwaro.”

⁶Ndu Amonu bya amaerupho l'ephe eshiwaa tukurubaa l'imi Dévidi; ephe je ebuta ndu ojogu ndu Aramu, bu le Betu-Rehobu; me ndu ke Zoba. Ephe tukoru buru ndu ojogu, eje l'okpa. Iphe, ephe tukoru du bu ukporo unu unwoke ugbo labo l'unu unwoke iri. Ephe butafua eze ndu Maka; yele ndu ojogu, du unu labo l'ukporo iri; bya ebutafua ndu Tobu unu unwoke ukporo l'iri yeru onwophe.

⁷Anuma, Dévidi anuma iya; o yefu Jiowabu yee ndu ojogu iya g'ephe ha.

⁸Ndu Amonu wufuta bya akporo giriri k'ogu l'iphu aka eeshije abahu le mkpukpu ono. Ndu ke Aramu pho, shi le Zoba; me Rehobu; me ndu shi l'ali Tobu; waa ndu ke Maka ndu l'oma egu.

⁹Jiowabu humaepho l'e gburu iya giriri iphu l'azu k'ogu ono; o hokoo ndu Izurelu ndu ophu kachaa amaru k'ogu chiru phe ye g'ephe kwaberu ndu ke Aramu.

¹⁰O chiru ndu ophuu dobe g'ephe ndu nwune iya, bu Abishayi l'eka kwaberu ndu ke Amonu.

¹¹Jiowabu sụ: “O -buru le ndu Aramu-a lwukpeaharu mu; unu abya eyetaru mu aka; teke o bukwanu l'oo ndu ke Amonu lwukpeaharu unu; anyi abya eyetaru unu aka.

¹²G'obu shihu unu ike; g'anyi lwua ogu ehu ndibe anyi ge ndu bu mkparawa; mbu g'anyi lwua ogu l'iswi ehu mkpukpu ke Chileke. Chipfu e-me-a iphe, du iya ree l'enya nkiya.”

¹³Oo ya bu; Jiowabu yele ndu nkiya toko wu-pfuahaa ndu Aramu k'ogu ono; ephe ye okpa l'oso gbalaaharu iya agbala.

¹⁴Ndu ke Amonu humaepho le ndu Aramu gbaru; ephebedua yefua okpa l'oso nkephe gbalaaharu Abishayi; gbaru gbaba l'ime mkpukpu phe. Oo ya bu; Jiowabu shi l'ogu ephe le ndu Amonu ono lwatashia Jierusalem.

¹⁵Ndu Aramu humaepho le ndu Izurelu lwu-kpewaru phe; ephe je edzuko.

¹⁶Hadadeza zia ndu Arámu, nọ l'azu ẹnymu Yufurétisu; ẹphe bya. Shobaku, bu onye-ishi ndu ojogu Hadadeza duta pẹ; ẹphe wuru laa mkpukpu Helamu.

¹⁷E pfueru iya pho Dévidi; o kpakoo ndu Ízurelu l'ophu; ẹphe daa azu ẹnymu Jiódanu jeshia Helamu. Ndu Arámu ono kpoo giriri; tsoo Dévidi pẹ ogu.

¹⁸Ndu Arámu ono mechaa gbaaru ndu Ízurelu oso. Dévidi gbua ndu ugbo-inya, du unu l'ukporo iri l'ise; bya egbua ndu ojogu o-je-l'okpa, du ukporo unu ise; bya egbutsua Shobaku, bu onye-ishi ndu ojogu pẹ; o nwuhu l'eka ono.

¹⁹Oo ya bu; ndu eze ono, ẹphe lẹ Hadadeza shi tuko nmagba buru nanu ono humapho lẹ ndu Ízurelu lwu-kpewaru pẹ; ẹphe je; ẹphe lẹ ndu Ízurelu doshia; ẹphe nodu ndu Ízurelu l'eka. Ndu Arámu tsuaha ebvu jika eyetaru ndu Amonu eka ozo.

2 Sámelụ 11

Dévidi anata Uráya nyee ya

¹O be lẹ mini-oduu; mbu teke ndu eze ejeje ogu; Dévidi bya ezia Jiowabu yele ndu-ozu iya; me ndu Ízurelu l'ophu; ẹphe je emebyishia ndu Amonu; kephee mkpukpu Raba. Dévidi l'onwiya nodukwanu lẹ Jierúsalemụ.

²O be l'uzenyashi ujiku lanu; Dévidi gbeshi l'iphe-azee ya ge ya kpaphe akpaphe l'eli ulo ibe-eze iya. O nodu l'eli eka ono tufu enya huma nwanyi, awu ehu. Nwanyi ono nodu amashikpoo mma ike.

³Oo ya bu; Dévidi zia nemadzu g'o je akpaaru iya ishi onye nwanyi ono bu. Onye o ziru su iya: “O kwa Batusheba, bu nwada Eliyamu. O bu nyee Uráya, bu onye Hetu.”

⁴Dévidi bya eye ndu-ozu iya g'ẹphe je edutaru iya ya. Batusheba byaepho; Dévidi duta iya; yee ya kwaa. O buru teke ono be Batusheba futaeupho l'eme nsọ aswafu nturuwu, eemeje me nwanyi no-ghechaa nsọ nwanyi. E mechaa nwanyi ono tugbua lashia.

⁵Nwanyi ono bya atsuta ime; bya ezia Dévidi su iya lẹ ya dukwa ime.

⁶Oo ya bu; Dévidi bya ezia Jiowabu su iya g'o ziaru iya Uráya, bu onye Hetu g'o lwa. Jiowabu bya ezia Uráya g'o je aza Dévidi enu.

⁷Uráya bya abyapfuta iya; Dévidi jia ya aji Jiowabu; me ndu ojogu iya; me g'ogu eje ala.

⁸Oo ya bu; Dévidi bya asu Uráya: “Lashiwaro ibe ngu je atuta unme.” Oo ya bu; Uráya bya agbeshi l'ibe eze tugbushia. Eze gweru iphe nu g'e wolaaru iya unuphu.

⁹Obenu lẹ Uráya be mechaaru kwaa l'onu-abata ibe eze. ẹphe lẹ ndu ejeru nnajiuphu iya ozi tuko zee l'eka ono. Ophu o larwueduru unuphu ibe iya.

¹⁰A bya epfuaru Dévidi lẹ Uráya ta laekwaru unuphu. O bya ajia ya su: “? To bunaa eka du enya be i shi lwa nta? ? Bu gunu meru iphe i ti larwuduru unuphu?”

¹¹Uráya su Dévidi: “Okpoko Chipfu; me ndu Ízurelu; me ndu Jiuda; me nnajiuphu mu, bu Jiowabu; me ndu-ozu iya pẹ be tuku wushi l'egu ogu. ? Denu g'ee-shi ge

mbèdua lashia unuphu je eria; ngua; mu lè nyee mu akwaa? Eshinu ì nò ndzù g'ì nò iya-a bè mu ta abyakwa e-me nno!”

12Tòbudu iya bù; Dévidi sù iya: “Nò-gbufuwaro ntanù-a; o -rwua echele mu aha ngu g'ì laphushia azù.” Oo ya bù; Uráya nò lè Jierúsalemù mbòku ono; waa echele iya.

13Dévidi bya ekua ya; o bya; yèlè iya tũko ria ngua. Dévidi kwatakpoò cheshia ya mée ike. E mechaèla; o rwua l'enyashi; Uráya gbeshikwa je azèè l'èka o zè unyaphu iya; ephe lè ndu ejeru nnajiuphu iya ozi; ophu o tò laduru ibe iya.

14O be l'utsu; Dévidi deeru Jiowabu èkwo-ozi; woru nù Uráya g'ò nù iya.

15O deru l'èkwo-ozi ono sù: “Duru Uráya ye l'atatiphu èka ogu kachaa ekpohu oku. I - ducharu iya ye; unu alaphu azù g'e meka ya iphe; g'ò nwùhu.”

16E mechaa; o bùru teke Jiowabu chíru ndu ojogu iya gbaa mkpukpu ono mgburugburu bè o duru Uráya ye l'èka o maru l'òo èka ono bè ndu ohogu iya phè, ike kachaa adùdu nò.

17Ndu mkpukpu ono wufutaepho jepfu Jiowabu phè ogu; a harù ndu ojogu Dévidi gbushia. Uráya, bù onye Hetu yìru lè ndu nwùhuru nù.

18Jiowabu bya ezia ozi kòoru Dévidi g'ògu ono gude jee.

19Jiowabu pfiaru onye ono, o ziru sù iya: “I -doghechaerupho eze g'ògu obu jeru la;

20bè o -bùru l'èhu-eghu byaru iya l'èhu; o -jiahaa ngu sù: ‘? Denu g'o gude unu je anòdunuka mkpukpu obu ntse alwù ogu? ? Unu ta amahaada l'ephe a-gbè l'eli igbulò agba apfu?

21? Bùnaa onye bè gburu Abimeleku nwa Jierubeshetu? ? Tò bùnaa nwanyì, nò l'eli igbulò mkpukpu Tebezu gude mkpuma, eegudeje egwe nri tugbua ya; o nwùhu? ? Denu g'o gude unu je anòdunuka igbulò obu ntse?’ Sù-a; o -bùru l'ò jìru ngu egube ono; sù iya lè nwozi iya, bù Uráya onye Hetu bè nwùhufukwarupho ya.”

22Nwozi ono tugbua jeshia. O jerwua je atũko iphe, Jiowabu ziru iya zikòta Dévidi.

23Nwozi ono sù iya: “Ndu ono bè nabarù anyi èka; wùru wù-pfuta anyi ogu l'oma egu. O lè anyi chí-phuru phè azù jeye anyi rwua l'ònu èka eeshije abahù lè mkpukpu phè.

24Oo ya bù; ndu chí arwa nòdu l'eli igbulò atù ndu-ozi ngu arwa. Ephe harù tũgbushia ndu-ozi gbè eze. Ozo bù lè nwozi ngu, bù Uráya onye Hetu yìkwapho lè ndu nwùhuru nù.”

25Dévidi bya ezia nwozi ono; sù iya: “Iphe, ii-pfuru nù Jiowabu bù lè mu sùru g'èhu be jekwa unu arwùshihu; noo kèlè oò gè nkogo tarù ishi onye lanù bù g'òo-ta k'onye ozo. Unu kukebekwa èhu tsoo mkpukpu ono ogu; lwù phè lwùta. Je epfiaru Jiowabu egube ono gude mee g'obu shihu iya ike.”

26Nyee Uráya nùmaepho lè jì iya nwùhuwaru; o raa èkwa iya.

²⁷Batusheba raghechaephō ẹkwa ono ẹgube arajẹ iya; Dévidi je eduta iya lụahaa. Ọ nwụaru iya nwa nwoke. Ọle iphe ono, Dévidi meru ono dụ Chipfu ẹji.

2 Sámẹlu 12

Nétanu abarụ Dévidi mba k'ẹjo-iphe, o meru

¹Tọbudu iya bụ; Chipfu bya ezia Nétanu g'o je ibe Dévidi. Nétanu jerwua bya asụ iya: “O nweru unwoke labọ, bu lẹ mkpụkpu lanụ. Onye lanụ bẹ nweru iphe; onye ọphuu buru onye ụkpa.

²Onye k'ono nweru iphe ono bẹ kwatakpọoru nweru aturu waa eswi, parụ ẹka apaa.

³Obenu l'onye ụkpa phọ te enwedu iphe, o nweru; gbahaa nwada aturu, ọ zutaru azuta; chee ya jasụ ọ nọdu yele unwegirima ibe iya l'ẹka vuta. Nwoke ono yele aturu iya ono nọdu anọduje erigba nri; tuko angụ mini l'okoro lanụ; mbụ je akpachaa k'ọphu bụ l'oohejeru nwaturu ono eheru l'o ku mgbenya. Aturu ono nọdu onodu nwada iya.

⁴Tọbudu iya bụ; ẹbyaa byaru nwoke ono, nweru iphe ono; ọ haa akpata aturu iya ono nanu; ọzoo eswi iya phọ nanu gbua gude shiaru onye byaru ibe iya nri; ọ gbẹ-chia je akpata nwada aturu k'onye ụkpa phọ gbua gude shiaru onye byaru nụ ono nri.”

⁵Dévidi vọru ọku wụa ẹhu l'opfu ẹhu onye ono; bya asụ Nétanu: “Eshinu Chipfu nọ ndzu g'ọ nọ iya-a bẹ iphe, gbaru onye meru ẹgube iphe ono bẹ bukwa anwuhu!

⁶Ọ pfufutaje ugwo aturu ono ugbo ẹno; eshinu o meru ẹgube iphe ono; ọphu imemini onye ụkpa ono adudu iya.”

⁷Tọbudu iya bụ; Nétanu sụnu Dévidi: “Ọo gubedua bụ onye ọbu! Chipfu, bụ Chileke ke Ízurelu pfuru sua: ‘Mu wuru ngu manụ l'ishi g'ị buru eze, ndu Ízurelu. Mu byakwaphọ anafuta ngu l'ẹka Sọlu.

⁸Mu woru ọlo Sọlu, bụ nnajjuphu ngu ye ngu l'ẹka; wocharu unyomu iya ye ngu l'ẹka. Mu woru alị-eze ndu Ízurelu; mę ke Jiuda woru ye ngu l'ẹka. Mbụ; ọ -buru l'iphemiphe ono bẹ pehuru nụ; bẹ mu gege eyekwabakpọru ngu iya iphe.

⁹? Denu g'o gude; ọ buru Opfu Chipfu bẹ ị kpọru ẹbo l'afụ; shi nno mee iphe, dụ iya ẹji l'ẹnya? I gude ogu-echi gbua Uráya onye Hetu; duta nyee ya lụahaa. Ọ buru ogu-echi ndu Amonu bẹ ị gude gbua ya.

¹⁰Iphe, ịi-maru bụ l'egbu ọchi ta abyadu abvụ abvubvu l'ibe ngu jasuru asuru; noo kele o to nwedu iphe, ị guberu mu; teme ị nata Uráya, bụ onye Hetu nyee ya lụahaa.’

¹¹“Chipfu sụru-a: ‘Mu e-shi l'ibe ngu vofuta ẹjo-iphe kpube ngu l'ẹhu. Ịi-nọdu rakafu ẹnya; mu anashia ngu unyomu ngu phẹ woru nụ onye ọzo; mbụ l'oo-jepfu unyomu ngu phẹ ono l'echilabọ eswe ọchaa.

¹²I meru nkengu lẹ mpya; ọle mu e-mekwanu ngu nkengu l'ataphu ndu Ízurelu l'ophu; l'echilabọ eswe ọchaa.’ “

¹³Dévidi sụ Nétanu: “Mu meswekwaru Chipfu.” Nétanu sụ iya: “Chipfu guwaru ngu nvu l'iphe-ẹji, i meru ono. Ị tịi nwuhudu.

14Obenu l'eshinu ndu ọhogu Chipfu gudewaa iphe-a, i meru-a epfubyishi iya; be nwata ono, a nwuru ngu ono ta adzukuraru ndzu.”

15E mecha; Nétanu tugbua; ọ buru iya ala unuphu.

Anwuhu nwatibe Dévidi ono

Tobudu iya bu; Chipfu danaa nwata ono ẹka ke njo; mbu nwata ono, nyee Uraya nwutaru ono. Iphe-ememe zupya be nwata ono.

16Dévidi rwohaa Chileke l'iswi ẹhu nwata ono. Ọ swia ẹgu; bahu l'ime ọlo iya je azekota l'alì l'enyashi ono l'ophu.

17Ndu bu ọgerenya l'ibe iya bya apfu-kube iya g'ephe kpulì ya l'oma alì ono, ọ ze ono; ophu o to kwedu; teme ophu o kwekwapho tsoru phe ria nri.

18O be le mboku k'esa; nwata ono nwuhu. Ndu ozi Dévidi nodu atsù ebvu g'ephe e-me pfiaru iya le nwata ono nwuhuwaru; kele ephe suru: “Teke nwata ono nokwadu ndzu be anyi pfuru yeru Dévidi; ophu ọ to ngaduru anyi nchi. ? Denu g'anyi e-shi pfiaru iya le nwata obu nwuhuwaru? Oo-mekakwa onwiya iphe.”

19Dévidi bya ahuma ge ndu-ozi iya achi-phe nwirinwiri l'ime onwophe; o rwua ya l'ehu le nwata ono be nwuhuwaru nu. Ọ jia phe su: “? Nwata obu nwuhuwaru to?” Ephe su iya: “Ee; ọ nwuhuwaku.”

20Oo ya bu; Dévidi bya agbeshi l'omali ẹka ọ ze ono je awua ẹhu; nyia manu. Ọ bya agbanwee uwe iya bahu l'ime ọlo Chipfu je abaru iya aja. O mecha nno bya alashia ibe iya. Ọ larwua bya asu g'a nu iya nri ge ya ria. A nu iya ya; o ria.

21Ndu ozi iya bya ajia ya; su: “? Denu g'o gude i nodu emee egube umere ọwa-a? Teke nwata ono nokwadu ndzu be i shi akwa ẹkwa; aswi ẹgu. Ọ bu-chiaru nta-a, ọ nwuhuwaru-a be i gbeshiru ria nri!”

22Dévidi su phe: “Mu shi akwa ẹkwa; aswi ẹgu teke nwata ono shi nodukwadu ndzu; kele mu riru su: “? Bu onye maru me Chipfu e-meru mu eze-iphe-oma dobe nwata ono ndzu?”

23Ole nta-a g'ọ nwuhuwaru-a; ? bu gunu be mu a-nodu aswi-doru ẹgu? ? Mu a-du ike wophuta iya azu ozo to? Mu e-mecha jepfu iya; ọle yebedua ta alwadu azu alwapfuta mu ozo.”

Anwunwu Sólomonu

24Oo ya bu; Dévidi bya adu nyee ya, bu Batusheba obu. Ọ bya alapfu iya; yee ya kwaa. Ọ nwuru iya nwa nwoke. Dévidi gua nwata ono Sólomonu. Chipfu yee nwata ono obu.

25Chipfu gude ke n-yemobu ono, o yeru iya ono zia onye mpfuchiru iya, bu Nétanu g'o je agua ya Jiedidaya, bu iya bu “onye Chipfu yeru obu.”

Jiowabu alwuta mkpukpu Raba

(1phe 20:1-3)

- ²⁶No iya; Jiowabu je etsoo mkpukpu Raba oḡu. Mkpukpu ono dū l'alī ndu Amḡnu. O lwua ya lwuta ẹka onye eze phe bu.
- ²⁷Jiowabu bya ezia ndu-ozī iya g'e je ezia Dévidi ozi; sū iya-a: “Mu tsoakwaru mkpukpu Raba oḡu; natachawa phe ẹka ẹphe shi angu mini.
- ²⁸Oo ya bu; kpakoo ndu ojogu ophu phoduru nu bya ekepheta mkpukpu ono; nata iya; teke mu a-gbe nata iya; e woru ẹpha mu gua mkpukpu ono.”
- ²⁹Oo ya bu; Dévidi bya akpakoo ndu ojogu ono g'ẹphe ha; bya achiru phe jeshia mkpukpu Raba. O -rwua; bya abapfu phe oḡu; lwuta mkpukpu ono.
- ³⁰O kputa eze phe okpu-eze, o kpu l'ishi. Erwa mkpola-ododo, e gude mee okpu-eze ono be dū talentu lanu. O buru mkpuma, vu oke aswa be no iya nu. E woru okpu-eze ono kpube Dévidi l'ishi. Dévidi kwatakwapḡ okwata, paru ẹka le mkpukpu ono.
- ³¹O rwukoo ndu mkpukpu ono dobe g'ẹphe gudeje soya; yele ikworo-igwe; waa ogbunku jeaha ozi; bya eye phe g'ẹphe yoje ẹja ulo. O buru egube ono be o mekotaru mkpukpu, nokota l'alī ndu Amḡnu l'ophu. E mechaa; Dévidi yele ndu ojogu iya l'ophu laphushia azu le Jierusalemu.

2 Sámelū 13

Amḡnonu emerwu nwanna iya, bu Tama

- ¹Abusalomu; nwa Dévidi nweru nwune nwanyi, ama mma, ẹpha iya bu Tama. A nonyaa; nwa nwoke Dévidi ozo, aza Amḡnonu bya eyee Tama obu.
- ²Ehu gbangahu Amḡnonu k'ophu o buwaro iphe-ememe zupyaabe iya le k'opfu ehu nwanna iya ono, bu Tama. O buru iphe, nyiberu Amḡnonu g'oo-shi ge ya kpabata iya; kele Tama bu nwamgboko, yee nwoke ta akwajeduru.
- ³Noo ya; Amḡnonu ono be nweru onya, ẹpha iya bu Jionadabu nwa Shimeya; mbu nwa nwune Dévidi. Jionadabu ono bu onye ẹregede.
- ⁴O bya ajia Amḡnonu su: “? Bu gunu kparu iphe, o bu nnata gube nwatibe eze abujeru utsu g'utsu; li nwupyashihu egube-a? ? Tii kaduru mu iphe obu?” Amḡnonu su iya: “Mu yeru Tama obu; mbu nwune Abusalomu, bu nwanna mu ono.”
- ⁵Jionadabu su iya: “Je aze aze l'iphe-aze ngu; mekiritaru g'iphe-ememe eme ngu. Nna ngu -byae ngu pho ajiji; su iya l'irwo iya go haa Tama, bu nwanna ngu nwanyi g'o bya anu ngu nri g'ria. G'o nodukwanu ngu l'iphu mee nri obu gude ẹka iya nu ngu iya g'ria.”
- ⁶Oo ya bu; Amḡnonu kwe je aze g'onye iphe-ememe eme. Eze byae ya pho ajiji; Amḡnonu su iya: “Jiko ge nwanna mu nwanyi, bu Tama byanu bya anodu mu l'iphu ghee akara nu mu ge mu taa.”
- ⁷Toḡudu iya bu; Dévidi zia g'e zia Tama l'eka o no l'unuphu; su iya g'o tugbua je l'ulo nwanna iya, bu Amḡnonu je emeeru iya nri.

- ⁸Tama bya atugbua jeshia l'ulo nwanna iya Amunonu; o rwua; Amunonu ze azee. Tama bya ekpota ukpokutu iphe, eegudeje eme akara bya agwokobe iya gude mee akara l'iphu iya; bya eworu iya ghee egheghe.
- ⁹O bya achiru akara ono ye le gbamugbamu woru nu iya. O jika iya eriri. Amunonu su: "Karụ onyenonu g'ọ lufukota l'eka-a!" Onyenonu bya atuko lufuchaa.
- ¹⁰Oo ya bu; Amunonu bya asu Tama: "Wobata nri obu l'ime mkpuru gude eka ngu nuje mu iya ge mu ria." Oo ya bu; Tama pata akara ono, o gheru ono wojeshiaru nwanna iya, bu Amunonu l'ime mkpuru iya.
- ¹¹Tama bya ewoerupho nri ono nu iya g'o ria; Amunonu zukobe iya su iya: "Bya ge mu le ngu kwaa; nwanna mu."
- ¹²Tama su iya: "Waawakwa; nwanna mu! Te egudekwa mu k'ike! E te emekwa egube iphe ono l'alị Izurelu! Ophu te emekwa ebyi owana.
- ¹³A -bya l'ehu nkemu; ? bu awaya be mu a-paru egube iphe-iphere owa je? Teme gubedua l'onwongu be a-yikwaru le ndu emeshi eswe ike l'alị Izurelu. Jiko pfunuru yeru eze; o toọ jikadu g'i ti lu mu."
- ¹⁴O pfua nta; pfua imo; ophu Amunonu angaduru iya nchi; o gude iya jepfu k'ike; kele o ka iya okpehu.
- ¹⁵E mechaa; Tama bya adu Amunonu ashị k'ophu paru eka apaa. Ashi, o du iya bya aka shii; e me le g'o shi yeberu iya obu. Amunonu bya asu iya: "Gbeshi tugbua lashia!"
- ¹⁶Tama jika; su iya: "Waawaa! Achichi owa-a, ichi mu ge mu lufu-a kabakwa eji; eme l'ophu i mewaru mu." Ophu Amunonu angaduru iya ro nchi.
- ¹⁷O kua onye-ozu iya, eyetajeru iya eka su iya: "Kpufuru mu nwanyi-a l'iphu; guburu iya ye l'etezi; swo-chia iphe le mgbo!"
- ¹⁸Oo ya bu; nwozi iya ono nwufu iya; guburu iya ye l'etezi swobe iphe le mgbo ono. Tama be yeru eguru uwe mgbalanu, nweru eka ogologo; kele oo egube uwe ono be unwada eze ndu ophu bukwađu unwumgboko, nwoke teke ejepfuswee eyeje.
- ¹⁹Tama kpota ntụ kpube onwiya l'ishi; woru eguru uwe mgbalanu ono, o ye ono gbajashia. O chiru eka kwee l'ishi; raru ekwa lashia.
- ²⁰Nwune iya, bu Abusalomu huma iya bya ajia ya su: "? O du ge nwanna ngu, bu Amunonu mebyiwaru ngu? Noduro nwadoo nwune mu. Oo nwanna ngu be o bu; te ejekwa evuru iphe ono l'obu." Oo ya bu; Tama je eburu l'ibe nwune iya Abusalomu nodu buru nwanyi, e bufuru ebufu.
- ²¹Eze Dévidi numaepho iphe nwuru nu; ehu ghushiahaa ya eghe ike.
- ²²Abusalomu gbaa nkuchi; ophu o pfujeduru opfu oma; ozoo ejo opfu yeru Amunonu. Amunonu du iya ashị; kele o guderu nwune iya nwanyi, bu Tama jepfu k'ike.

Abusalomu egbu Amunonu

- ²³A bya anọchaa apha labọ lẹ teke ndu ebushijeru Abusalomu aturu iya éjí nọ lẹ mkpukpu Belu-Hazọ, nọ-kube oke alị ndu Ifuremu; Abusalomu zia iphe, bụ unwoke, eze nwuru nzi g'ephe byakotaru iya lẹ nri.
- ²⁴Abusalomu jepfu eze l'onwiya je asụ iya: “Mube nwozi ngu bẹ ndu ebushije aturu éjí byakwaru ozi. Mu nọdu arwọ gube eze gẹ gu lẹ ndu-ozi ngu tsonuru mu je ẹka ono.”
- ²⁵Eze sụ iya: “Waawaa; nwa mu. Anyi ta atukodu abya; kele anyi a-bya aburu ivu-erwa duru ngu.” Ọ rwọo ya nta-a rwọo imo; ophu o to kwedu lẹ ya e-je. Ọ buru onu-oma bẹ ọ goru nụ iya.
- ²⁶Abusalomu bya asụ iya: “Ọ -buru l'ị tị byadu; jiko gẹ nwanna mu Amunonu tsonuru anyi je!” Eze jia ya; sụ: “? Bụ ke gunu bẹ oo-gude tsoru unu je?”
- ²⁷Abusalomu rwoshiahaa ya ike; o kweta gẹ Amunonu yele unwu eze Dévidi ndu k'ophuu tsokotaru iya je.
- ²⁸Noo ya; Abusalomu bya akaru ndu-ozi iya; sụ phẹ: “Unu tonwube ọnya maru teke Amunonu nguwaru mee; ọ nọdu atsụ iya atsutsu. Mu -sụ unu g'unu chitsua Amunonu; unu woru iya chigbua. Unu ta atsukwa ebvu. Ọo mbedua ziru iya unu. Unu shihu obu ike; mee okpehu!”
- ²⁹Ndu ozi Abusalomu mee Amunonu iphe, o ziru g'ephe mee ya. Ọo ya bụ; unwoke, eze nwushiru ono wu-lihu; onyenonu pfukotachaa inya-mulu iya; gbalaa.
- ³⁰Ephe nọdukwaduro l'uzo; ozi gbẹ ruwanu Dévidi nchị lẹ Abusalomu gbushikotawaru unwoke, eze nwuru; l'o to nwedu onye ophu phoduru nụ.
- ³¹Eze zilihu; ye ẹka l'uwe iya gbajashia. Ọ gwodoshihu l'alị. Ndu ozi iya pfu-kube iya l'ẹka ono tuko uwe phẹ gbajashikwaapho.
- ³²Jionadabu; nwa Shimeya; mbụ nwa nwune Dévidi bya asụ: “Nnajiuphu mu; ba arishi l'unwu-eze bẹ e gbushikotawaru. Ọo Amunonu kpoloko bẹ nwuhuru nụ. Ọo iphe Abusalomu shihawaa rita k'ememe e -shi mboku ono, Amunonu guderu nwune iya nwanyi, bụ Tama k'ehuka jepfu pho.
- ³³Sụ-a; gẹ nnajiuphu mu, bụ eze ba chishiru uche ye l'a sụru l'unwu-eze nwushihukotawaru. Ọo Amunonu kpoloko bẹ nwuhuru nụ.”
- ³⁴E mechaa; Abusalomu ye okpa l'oso gbala. Ọo ya bụ; nwoke, echeje nche palia ọnya huma ikpoto ndu nọ lẹ gbororo l'uzo azu iya; g'ephe shi l'aguga úbvú eje abya.
- ³⁵Jionadabu bya asụ eze: “Lenu; unwu gube eze alwaakwa. Ọo epho gẹ mube nwozi ngu pfuru bụ g'ọ nwuru.”
- ³⁶Ọo ya bụ; epfughe, oopfughe nno; unwu-eze ono wubata; chiahaa mkpu ẹkwa. Eze yele ndu-ozi iya g'ephe ha tuko chiswee ẹkwa; rashikpoo ya ike.
- ³⁷Abusalomu gbalaa lapfushia Talumayi; nwa Amihudu; mbụ eze ndu Geshu. Dévidi nọdu anọduje ara ẹkwa nwa iya ono mbokumboku.

³⁸Abusalomu gbaru laa Geshu ono je anọo apha ẹto l'ẹka ono.

³⁹A nonyaa; oghoroko Abusalomu bya adushia eze, bu Dévidi ike; kele a dutawaru iya le k'anwuhu Amunonu.

2 Sámẹlu 14

Abusalomu alwaphuta azu le Jierusalẹmu

¹Noo ya; Jiowabu; nwa Zeruya bya amaru l'oghoroko Abusalomu be dushi eze ike.

²Oo ya bu; o bya eye nemadzụ g'o je mkpukpu Tekowa je ekuaru iya nwanyi, maru iphe l'ẹka ono; su iya: “Mekiritaru gi bu onye no l'aphu. Yee uwe onye no l'aphu. Ta anyikwa manu mbeleke. Mekpoeppo gi bu nwanyi, shi teke du enya noduta l'aphu onye nwuhuru anwuhu.

³L'i jepfu eze je epfuaru iya egube ono.” Oo ya bu; Jiowabu bya ezikota iya iphe oopfu.

⁴Nwanyi Tekowa ono bya jepfu eze ge ya pfuru yeru iya; bya adaa kpurumu l'iphu iya; woru iphu kpuke l'ali gude kwabe iya ubvu. O bya asu eze: “Gube eze; jiko yenuru mu aka!”

⁵Eze jia ya su: “? Bu gunu be atsu ngu l'ehu?” O su iya: “Mu bu nwanyi, ji iya anodedu; mbu le ji mu nwuhuwaru.

⁶Mube nwozi ngu nwanyi buru unwoke labo be mu nwutaru. Su-a; ephebo wata alwu ogo l'egbudu; ophu o dudu onye no l'eka ono; k'ophu e gbokaharu phe. Onye lanu chita ibe iya tua; woru iya chigbua.

⁷Noo ya; ndibe anyi l'ophu wu-lihu ripyabe mube nwozi ngu nwanyi su mu ge mu kpufutafuaru phe onye ophuu chigburu nwune iya nwoke pho g'ephe gbua gude gwata ugwo ochi nwune iya nwoke ono, o gburu ono; mbu l'ephe e-wofufua ndzu onye ophu e-ri iphe nna phe. Su-a; ephe eshi nno menyia nwa akpuru icheku-oku lanu ono, mu togboru ono; mbu mee g'epha ji mu me awa iya chihu l'eliphe-a.”

⁸Eze bya asu nwanyi ono: “Tugbua lasha ibe ngu; ge mu bya aturu ekemu nu phe l'opfu ehun.”

⁹Nwanyi Tekowa ono bya asu iya: “Gube nnajiuphu mu, bu eze; g'uta, e gege ata ngu tukokwaru mu l'ishi; me l'ishi onu-ulo nna mu. G'o to dukwaro onye eje ata eze; yee aba-eze iya uta.”

¹⁰Eze su iya: “O -nwekpowaru onye jeru ngu epfuru; duta iya byapfuta mu; g'onye obu aha ngu epfuchi nchi.”

¹¹Oo ya bu; nwanyi ono su: “Jiko gube eze kpo-kunu Chipfu, bu Chileke ngu; k'ophu onye o du l'eka; mbu agwata ugwo ochi ono a-ha egbu nwa mu nwoke ono.” Eze su iya: “Eshinu Chipfu no ndzu g'o no iya-a be egbushi, no nwa ngu l'ishi ta abyakwa erifu me nanu daa l'ali.”

12Noo ya; nwanyị ono sụ: “Gẹ mụbe nwozi ngu nwanyị pfufunaaru akpuru opfu lanu yeru gube nnajuphu mu, bu eze.” O sụ iya: “Pfunkporoo ya.”

13Nwanyị ono sụ iya: “? Denu g'o gude gube eze mee ndibe Chileke egube ejo-iphe owa-a? ? T'o budu ikpe be gube eze anma onwongu l'iphe ono, iipfu nta-a ono; kele nwa ngu pho, a chifuru achifu pho be gube eze teke eduphutadazu.

14G'anyi ha nwuhufutaje anwuhu. Anyi du ge mini, wushihuru l'ali, te nweedu g'ee-shi kukobe iya l'iphe ozobaa. O to nwedu onye Chileke gufuru anwuhu l'ehu iya. O chia iphe, oomeje bu l'ochoje uzo, ee-shi g'onye a chifuru achifu lwaphuta azu lwapfuta iya.

15Su-a; mu byaru ge mu pfuaru iya gube nnajuphu mu, bu eze; kele ndiphe mewaru ndzu nodu agu mu. Mube nwozi ngu nwanyị ria sụ le mu e-pfuru yeru gube eze; ? a maru; ? l'i-meru nwozi ngu iphe, o rwo ngu.

16Mbu; ? a maru gube eze a-numa opfu mu nafuta mube nwozi ngu l'eka nwoke ono, achọ uzo, oo-shi gbua mu le nwa mu; nafu anyi okiphe, Chileke nuru anyi ono?

17Oo ya bu; mube nwozi ngu nwanyị pfua sụ: ‘Jiko g'opfu gube nnajuphu mu, bu eze mekwaa ge meji nmapfuru mu’; noo kele nnajuphu mu, bu eze du g'ojosi Chileke, amajeru iphe, du ree waa iphe, du eji. Ge Chipfu, bu Chileke ngu swikwaru ngu eswiru.”

18Oo ya bu; eze bya ajia nwanyị ono sụ: “Ta awachikwaru mu iphe-a, mu eme ge mu jia ngu-a awachi.” Nwanyị ono sụ iya: “Jinaa mu iphe obu; gube nnajuphu mu, bu eze.”

19Eze bya ajia ya sụ: “? Eka Jiowabu du l'iphemiphe-a, iipfu-a to?” Nwanyị ono sụ iya: “Gube nnajuphu mu, bu eze; eshinu i no ndzu g'i no iya-a ? bu onye be a-lokata iphe, gube nnajuphu mu, bu eze pfuru shia ekutara; ozoo loru laa l'ekicha? Ee; o nwozi ngu Jiowabu be bu onye ziru ge mu mee iphe-a; o bukwaru iya pho be suru ge mu pfua ge mu epfua.

20Oo nwozi ngu, bu Jiowabu be meru iphemiphe ono; k'ophu onodu-a, a no nta-a l'agbanwe. Gube nnajuphu be maru mmamiphe g'ojosi Chileke; k'ophu bu l'i makotaru iphemiphe, eme le mgboko-a.”

21No iya; eze bya asu Jiowabu: “O du ree; mu e-me iphe ono. Tugbua je edulata nwokorobya ono, bu Abusalomu.”

22Jiowabu daa kpurumu woru iphu kpube l'ali gude kwabe iya ubvu; bya etua eze epha. O pfua sụ: “Ntanu-a be mube nwozi ngu marwetu le mu du gube nnajuphu mu, bu eze l'obu; noo kele i meru mu iphe, mu pfuru g'i meeru mu.”

23Oo ya bu; Jiowabu tugbua jeshia mkpukpu Geshu je eduphuta Abusalomu azu le Jierusalemu.

24Ole eze sukwanuru g'o jeekwapho eburu l'ulo eka iya; g'o to humakwa iya enya. Noo ya; Abusalomu je eburu l'ulo nkiya; ophu o to humajeduru eze ataphu.

Jiowabu edoshiru Abusalomu yee Dévidi opfu

²⁵L'alì Ízurelu mgburugburu bẹ ọ tọ dudu nwoke ọzo, a jaberu ajaja ke mma, ọoma g'a ja Abusalomu. E -shi l'ishi jasụ l'ọbochi-ọkpa bẹ ọ tọ dudu ẹka iphe, takuru iya l'ehu.

²⁶Ọ nọdu abujeru; ọ -kpushia ẹgbushi, dū iya l'ishi; kele ọokpuje iya aphagapha m'ọ nyijee ya pho ẹrwa; l'ọ wota iya tūa atūtū maru g'onyita-be ẹrwa. Ẹrwa ẹgbushi iya buru shekelu ọkporo iri bẹ ọobujeru; mẹ e -gude iphe, ndu eze egudeje atū ẹrwa iphe tūa ya.

²⁷Unwegirima unwoke ẹto; waa nwata nwanyị lanu bẹ Abusalomu nwutaru. Ẹpha nwa iya nwanyị ono bu Tama; ọ buru nwanyị, ama mma.

²⁸Abusalomu bua apha labo le Jierusalemu; ọphu ọ tọ humajeduru eze iphu.

²⁹Ọo ya bu; Abusalomu zia g'e ziaru iya Jiowabu g'ọ bya ge ya zia ya ibe eze. Ọphu Jiowabu ekwedu bya iya aza enu. Ọ bya ezia ya k'ugbo ẹbo; ọ jikakwapho abyabya.

³⁰Tobudu iya bu; ọ bya ezia ndu-ozu iya; su phe: “Unu lenu; ẹgu, Jiowabu koru balì bẹ no-kube nkemu. Unu je atua ya ọku.” Ndu ozu iya ono tugbua je eworu ọku tūa ya.

³¹Ọo ya bu; Jiowabu tugbua jepfu Abusalomu l'ibe iya je asu iya: “? Bu gunu meru g'o gude ndu-ozu ngu je atua ọku l'egu mu?”

³²Abusalomu su Jiowabu: “Mu ziru ozu g'e zia ngu g'i bya ge mu zia ngu g'i jepfu eze je aja ya: ‘? Buhunu gunu meru iphe, mu shi mkpukpu Geshu Iwatashia? O gege akaru mu ree le mu nokwadu l'eka ono.’ Ọo ya bu le-a; mee ge mu huma eze iphu. Ọ -buru l'ọ nweru ẹjo-iphe, mu meru; g'o gbua mu ro egbugbu.”

³³Ọo ya bu; Jiowabu tugbua je epfuaru eze iphe ono. Eze bya ekua Abusalomu. Ọ byarwuta l'atathu iya; bya adaa kpurumu woru iphu kpube l'alì. Eze bya etsutsua Abusalomu onu.

2 Sámẹlu 15

Ẹjo idzu, Abusalomu achiru Dévidi

¹Tobudu iya bu; Abusalomu bya enweru ugbo-inya; waa inya k'ekiya; waa unwoke ukporo labo l'iri, bu ndu evutajeru iya uzo.

²Ọ nọdu abujeru o -rwua l'onmewa utsu; Abusalomu agbeshi je apfuru l'aguga gbororo eeshije bahu l'ime mkpukpu ono. Teke ọ bu l'ọ nweru onye eje echiru eze ichi g'eze kpee opfu ono; Abusalomu ekua ya jia ya su: “? Bu mkpukpu awe bẹ i shi?” Onye ono asu iya: “Nwozi ngu shikwa l'ipfu lanu l'ime ipfu ndu Ízurelu.”

³Onye obu -pfuchaa iphe ọ byaru; Abusalomu asu iya: “Iphe, i pfuru dukwa ree; bya aburu iphe, pfuru oto; obenu l'ọ to nwedu onye a-no-chi enya eze numa iphe, adaru unu.”

⁴Iphe ọzo, Abusalomu epfujefua bu: “Ọme ọ bu l'ọo g'a hotaekwadu mu pho ge mu buru onye-ikpe l'alì-a; m'ọ bujekwaru iphe, bu onye wotaru mu opfu; ọzoo onye byaru echia mu ichi; mu ekpejeepho ikpe ono; kperu iswi-odu-mma nu iya.”

⁵Nokwapho g'ọ bujeru; ọ -duru onye byapfutaru iya nọ gę ya phozeta l'iphu iya; kele iya ekele; l'ọ machia ęka; nmatachia onye obu akpa; tsutsua ya onu.

⁶Noo gę Abusalomu shi emeje iphe, bu ndu Ịzurelu, gude ikpe abya ibe eze bu ono. O shi nno mee; ọ buru yebedua be ndu Ịzurelu yeru obu.

⁷Apha ęno lachaepho; Abusalomu su eze: “Jiko; hana mu gę mu je mkpukpu Heburonu je emeeru Chipfu iphe, mu kweru iya ukwe iya.

⁸Noo kele teke ono, mube nwozi ngu nokwadu le mkpukpu Geshe l'alı Aramu be mu kweru ukwe su: ‘Chipfu -mewaa mu lwaphuta azu le Jierusalemu be mu a-baru iya eja.’ “

⁹Eze su iya: “Jekwaa l'ehu-guu!” Oo ya bu; ọ tughua jeshia Heburonu.

¹⁰Abusalomu bya ezia ndu-ozı epe je ejekota le mpya l'ipfu ndu Ịzurelu l'ophu su phe: “Unu -numaepho oda opu; unu tua uzu su: ‘Abusalomu buakwa eze le Heburonu.’ “

¹¹Ndu epe le Abusalomu shi le Jierusalemu swiru be du unwoke ukporo iri. Ndu ono be bu ndu e ziru nzi g'ephe bya ebyaa. Epe gude obu iphoro jeshia; ophu epe amadu iphe, anwu nu.

¹²Abusalomu gudekwadu ngweja ono l'eka egwe; bya ezia g'e je ekuaru iya Ahitofelu, bu onye mkpukpu Gilo le mkpukpu iya bu Gilo g'ọ bya. Ahitofelu ono be bu onye mgbazi Devidi. Noo ya; ejo idzu ono, aachiru Devidi kabaa eshihu ike; ndu awu etso Abusalomu nodu aka shii eje.

Devidi agbafu le Jierusalemu

¹³Tobudu iya bu; nwozi lanu gbaru bya asu Devidi: “? I maru-a l'obu ndu Ịzurelu l'ophu buwaa l'eka Abusalomu no be o dukota?”

¹⁴Devidi bya epfuru yeru ndu-ozı iya g'ephe ha, bu ndu yee ya tukoru nodu le Jierusalemu su phe: “Unu wu-lihukwa g'anyi gbalachaa; odumeka be o to dukwa onye byaru l'ananu Abusalomu. Unu mekebe egwegwa g'anyi tughua; a nonyanu o mee egwegwa ghabuta anyi bya emeru ejo-iphe kpua anyi; mbu gude ogu-echi gbugbushia ndu mkpukpu-a.”

¹⁵Ndu ozı eze toko su iya: “Oo iphe, gube nnajiphu anyi, bu eze turu eka l'oo iphe, ee-me be anyibe ndu-ozı ngu e-mekotaepho.”

¹⁶Oo ya bu; eze tughua; ndibe iya l'ophu tsoru iya. Eze bya ahaa umadzu iri, bu unwanyi, ndu ophu abu-zidu unyomu iya g'ephe letaru iya ęnya l'unuphu.

¹⁷Oo ya bu; eze tughua; waa ndu yee ya swikota; epe jekpopho jerwua eka du ęnya; teme epe bebe doshia.

¹⁸Ndu ozı iya bya awughakota iya; mbu ndu Kereti; me ndu Peleti; me unu nemadzu l'ukporo iri ono, shi le mkpukpu Gatu tsoru iya pho. Epe ghata eze; vuta uzo.

- ¹⁹Tobudu iya bu; eze bya asu Itayi, bu onye Gatu: “? Bu gunu meru g'o gude i tsoru anyi? Laphukwa azu lapfu eze, bu Abusalomu; kele i bu onye ohozo; teme i buru onye akpuru le ndzu l'ibe unu.
- ²⁰? Denu g'ee-shi l'oo-buru gube onye byaru unyaphu be buwaa ntanu-a mu abya emee g'i tsoru anyi ghapheaha aghaphe l'ebe abu le mu maru aka mu eje ala. Chita ndibe unu laphu azu. Ge Chipfu phukwaaru ngu obu-imemini; goshi ngu l'o bu onye apfushije ike l'iphe, o pfuru.”
- ²¹Noo ya; Itayi yeeru eze onu; su iya: “Eshinu Chipfu no ndzu g'o no iya-a; teme gube nnajiuphu mu, bu eze nodu ndzu g'i no iya-a; be bukwa aka gube nnajiuphu mu, bu eze no be mube nwozi ngu a-nodu; me le ndzu; me l'onwu.”
- ²²Devidi su Itayi: “Ngwa; ghata vuru uzo g'anyi je!” Oo ya bu; Itayi, bu onye Gatu bya aghata; me ndu yee ya swi; waa unwegirima, tso iya nu.
- ²³Noo ya; uzu-ekwa nodu atu wooooowo l'ali ono l'ophu ge ndu ono tukoru awughagbaa. Eze waa ndu ono, yee ya swi ono je adaghaa nggele Kidironu; kwaseru chebe uzo echiegu.
- ²⁴Abyiyata bya aghata; Zadoku ghatakwapho; me ndu Livayi l'ophu, bu ndu pa okpoko oghandzu Chileke. Ephe bya apazeta okpoko Chileke ono dobe l'ali jeye teke ndu ono tukoru wufutakota le mkpuku ono.
- ²⁵Eze su Zadoku: “Paphu okpoko Chileke ono azu l'ime mkpuku ono. O -buru le mu du Chipfu l'obu be oo-duphuta mu-a azu; mee ge mu humabaa okpoko Chileke ono ozo; waa aka ono, onoduje ono.
- ²⁶Teke o bu l'ehu ta tsodu Chileke utso l'opfu eh mu; wanaa mu-a baa; g'o mekwaa mu g'o du iya ree.”
- ²⁷Eze pfukwaarupho Zadoku, bu onye uke Chileke ono su iya: “? Tii bunaa onye aphuje ophulenyia? Laphushia azu l'ime mkpuku ono l'ehu-guu; unu le nwa ngu, bu Ahimaazu; waa Jionatanu, bu nwa Abyiyata.
- ²⁸Mu a-nodu kwabe l'okpa enyimu Jidanu l'ibe iya ophu eerwuje iya erwurwu l'uzo echiegu jas u nu ezia ozi g'e zia mu.”
- ²⁹Oo ya bu; Zadoku yee Abyiyata pata okpoko Chileke ono laphushia azu le Jierusalemu je anokirishia l'aka ono.
- ³⁰Devidi tugbua kwaseru ara ekwa enyikota eli ubvu olivu. O kpuchia iphe l'ishi gbaru okpa oto eje. Ndu ephe l'iya swi g'ephe ha toko kpuchishikota iphe l'ishi awu etso iya; bya ara ekwa g'ephe ejekpopho ono.
- ³¹A bya epfuaru Devidi su iya: “Ahitofelu be tsokwa Abusalomu achi ojo idzu ono.” Oo ya bu; Devidi pfuru nu Chileke su: “Jiko Chipfu; menaa ge mgbazi ono, Ahitofelu agbazi ono buru iphe-mmanu.”

³²Dévidi nyirwuèpho mkpakponu úbvú ono, bụ ẹka aanọduje abarụ Chileke ẹja; ọ bya amaru Hushayi, bụ onye Akụ gbawa iya ndzuta. Uwe Hushayi gbajashihucha agbajashihu; tẹme o kporu ntụ kpua l'ishi.

³³Dévidi sụ iya: “I -tsowaru mu bẹ ịi-bụkwaru ivu-erwa duru mu.

³⁴Ọ -buru l'ị laphuru azụ ị Jierúsalemụ je asụ Abusalomu: ‘Mu a-buru nwozi ngu gube eze; mbụ ẹgube ono, mu shi buru nwozi nna ngu Dévidi phọ. Nta-a bẹ mu a-buru nwozi ngu.’ I -mee nno; bẹ ii-yetarụ mu ẹka gbanwe ẹjo idzu ono, Ahitofelu achi ono.

³⁵Zadoku yele Abyiyata, bụ ndu-uke Chileke bẹ unu l'ephe a-tukona-a nọdu l'ẹka ono. Iphemiphe, ị nūmakporu l'ibe eze; pfujeru phẹ iya.

³⁶Unwu phẹ ẹphenebo; mbụ Ahimaazu nwa Zadoku; waa Jionatanu nwa Abyiyata bẹ ẹphe l'ephe tukoru nọdu l'ẹka ono. Iphe, bụkpoo iphe, Ị nūmaru zia phẹ g'ẹphe bya epfuaru mu iya.”

³⁷Oo ya bụ; erwurwu, ọnyà Dévidi, bu Hushayi erwu Jierúsalemụ; Abusalomu nọdu abatakpọepho abata l'ime mkpukpu ono.

2 Sámelụ 16

Dévidi yele Ziba

¹Tọbodu iya bụ; Dévidi jeribeerupho nwanshii ị mkpakponu úbvú ono; ọ bya l'amaru; ọ hụma nwozi Mefibosheti, bụ Ziba g'ọ nọwa kwaburu iya g'ọ gba iya ndzuta. Ọ chiru nkafụ-igara olemole, e dozichaaru ree bya ebo iya ishi buredi ukporo iri; waa ẹcha-mbekee ukporo ise, e gude akpuru vayinu ghee; waa akpuru oshi-omi ukporo ise; waa otumu mee lanu.

²Eze bya ajia Ziba sụ iya: “? Bụ kẹ gụnu bẹ i vutaru iphe ọwa-a?” Ziba sụ iya: “Nkapfụ-igara ono bụ iphe, ndibe eze a-nọ-kojeru agbaphe. Ọphu bụ buredi; yee akpuru oshi-omi phọ bẹ bụ iphe, unwoke, tso ngu nụ a-nọduje ata. Mee phọ bụ ndu ike bvuru l'echiegu bẹ a-ngutaje iya gude rokota ike.”

³Eze jia ya sụ: “? Denu nwanwa nnajiuphu ngu?” Ziba sụ iya: “Ọ nọkwa ị Jierúsalemụ; epfuje sụ ị ntanụ-a bẹ ndu Ízurelu e-woru alị-eze nna iya oche nū-phu iya azụ.”

⁴Oo ya bụ; eze sụ Ziba: “Iphemiphe, shi buru iphe Mefibosheti bẹ bụwaa nkengu nta.” Ziba sụ iya: “Mu wozeru onwomu alị ephozeru ngu; jiko gẹ mu tubajekwa ngu l'anya gube nnajiuphu mu, bụ eze.”

Shimeyi ephu Dévidi iphu

⁵O be teke eze, bụ Dévidi erwu mkpukpu Bahurimu; a bya l'amaru nwoke lanu, yee Sọlu shi l'anya-unuphu lanu shiwaa l'ẹka ono futa. Epha iya bụ Shimeyi; nwa Gera. Ọ nọdu ephushi iphu eje abya.

⁶O t̄ahaa Dévidi; ȳele ndu-oz̄i iya g'̄ephe ha mkpuma; l'̄eka ndu ȳe ya sw̄i m̄e ndu oj̄ogu iya n̄okakwaru iya r̄o l'̄ekutara m̄e l'̄ekicha.

⁷Shimeyi n̄odu ephu iphu ono asuje: “Tuḡbua! Tuḡbua; ḡube oḡbu-̄ochi ono; ḡube onye ̄ejo-iphe ono!

⁸Chipfu gwatawaru ngu uḡwo ̄ochi ndu i gbushiru l'̄onulo S̄olu; mb̄u onye ono, i n̄o l'aba-eze, o shi n̄odu ono. Chipfu naf̄uwaru ngu al̄i-eze ono woru n̄u nwa ngu, b̄u Abusalomu. H̄umanu l'̄ejo-ememe, iime gudeshiwaru ngu; k̄ele i b̄u o-ḡbu-̄ochi!”

⁹Oo ya b̄u; Abishayi; nwa Zeruya s̄u eze: “? D̄enu g'o gude odzu nk̄uta-a n̄odu ephu gube nnajiuphu mu, b̄u eze iphu? Jiko hanaa mu ḡe mu je eḡbubufu iya ishi.”

¹⁰Eze s̄u iya: “? B̄u ḡunu b̄e mu l'unu jigba; unub̄e un̄wu Zeruya? O -b̄uru l'̄oo Chipfu ziru iya g'̄o phu mu iphu ̄obu; ? b̄u onye a-d̄u ike j̄ia ya s̄u: “? B̄u ḡunu kpar̄u iphe, iime nno?” “

¹¹No iya; Dévidi bya epfuaru Abishayi ȳele ndu-oz̄i iya g'̄ephe ha s̄u: “Unu lewaro l'̄oo nwa mu, shi mu l'̄ep̄ho b̄e ach̄o ishi ndz̄u mu. ? B̄u-chia onye ̄owana, b̄u onye Benjiaminu-a b̄e ta a-kabadar̄o n̄jo? Unu par̄u iya haa g'o phu mu iphu ̄obu; k̄ele ̄o Chipfu ziru iya ya.

¹²O nweru-a g'̄oo-d̄u; Chipfu elee ̄enya h̄uma ̄egube ̄ejo-iphe, dapfutaru mu n̄u; l'oo-meeru mu iphe-̄oma gude pf̄ua mu uḡwo iphu-a, eephushi mu ntan̄u-a.”

¹³Noo ya; Dévidi ȳele ndu nkiya ono kwasekpoerupho gbororo ̄uzo ono; Shimeyi kwas̄eru aḡuga úbvú, n̄o chebe iphu l'ibiya ̄ophu Dévidi n̄o. O n̄odu eje bya ephushi iya iphu; at̄u iya mkpuma; bya aph̄uru iya nt̄u.

¹⁴Eze ȳele ndu ono, ȳe ya t̄uko sw̄iru ono bya e-jerwu ̄eka ̄ephe eje; ike bv̄ushikotawa ph̄e; ̄ephe jerwua bya an̄odu l'̄eka ono r̄okota ike.

Ahitof̄elu ezi Abusalomu ̄ejo-nzi

¹⁵T̄obudu iya b̄u; Abusalomu ȳele ndu ono l'ophu; mb̄u unwoke Ízurelu w̄uru zebata l̄e Jierúsalem̄u. Ahitof̄elu tsokwaru ph̄e ph̄o.

¹⁶Oo ya b̄u; Hushayi, b̄u onye Ak̄u, b̄u ̄onyà Dévidi jepfu Abusalomu je as̄u iya: “N̄odukwa ndz̄u ogologo; ḡube eze! Ḡube eze! N̄odukwa ndz̄u ogologo!”

¹⁷Abusalomu bya as̄u Hushayi: “? B̄u n-yemobu, i yeru ̄onyà ngu ̄obu-a baa? ? B̄u ḡunu meru g'o gude ̄ophu unu l'̄onyà ngu ta asw̄idu?”

¹⁸Hushayi s̄u Abusalomu: “Waawaa; k̄ele ̄o onye ̄ophu Chipfu; m̄e ndu-a; waa ndu Ízurelu l'ophu h̄otar̄u b̄e mu a-b̄uru nkiya. O b̄uru iya b̄e mu l'iya a-n̄oduwaro ya.

¹⁹T̄emanu; ? b̄u onye b̄e ̄o ḡbaru ḡe mu jeru ozi; b̄u nna t̄oo nwa? Oo nwa b̄e mu e-jeru ozi. Oo ̄egube mu shi ejeru nna ngu ozi b̄u ḡe mu e-jekwarupho ḡubedua ozi.”

²⁰Abusalomu bya as̄u Ahitof̄elu: “Ch̄i-koshikwa mu idzu iphe, anyi e-me.”

²¹Ahitofelu pfunaaru Abusalomu su iya: “Je ejepfukota unwanyi ono, ndu ophu abuzidu unyomu nna ngu ono; mbu g'unu l'ephe kwa akwakwa nwoke yeke nwanyi; mbu unwanyi ono, o haru g'ephe leta ibe eze enya ono. Oo teke ono be ndu Izurelu l'ophu a-numa l'i mewaru onwongu i nodu eshiwaa nna ngu tukuruba; teme obu akabakwapho eshihu ndu ono, etso ngu nu ono ike.”

²²Oo ya bu; a bya akpoberu Abusalomu ulo-ekwa l'eli mkpotsu-ulo ibe eze; Abusalomu jepfu unwanyi ono, abuzidu unyomu nna iya ono l'eka ndu Izurelu l'ophu ele iya enya.

²³Teke ono be mgbazi Ahitofelu shi adujeepho g'egube, eejeje l'aji l'eka Chipfu-a. O buru egube ono be Devidi yeke Abusalomu shi ewotaje mgbazi Ahitofelu.

2 Samelu 17

Hushayi ezi Abusalomu ejo-nzi

¹Ahitofelu bya ekua Abusalomu su iya: “Haa ge mu hota unu unwoke ukporo l'iri g'anyi tugbua je achia Devidi oso l'enyashi-a.

²Mu a-bapfu iya teke ike bvushiwaru iya; o duwaa gologolo. Mu emee ge ndzu-agugu rwuta iya ge ndu ono, yee ya swi l'ophu ono gbakashihu. Mu agbe teke ono woru eze gbugbua nwekinyi iya.

³Mu e-duphutakotaru ngu ndu ono azu. Onye ono, ijicho -nwuhuwaa be ndu ophuu g'ephe ha lwakotawaru azu. Ndu ono g'ephe ha be ta adudu me onye lanu, a byaru emerwu ehu.”

⁴Iphe ono toko du Abusalomu yee ndu bu ogerenya ndu Izurelu l'ophu ree.

⁵Abusalomu bya asu: “Unu kufua Hushayi, bu onye Aku g'anyi numafua iphe, oopfu.”

⁶Hushayi byapfuta e ya pho; Abusalomu su iya: “Wakwa iphe Ahitofelu pfuru baa. ? Bu g'anyi mee iphe, o pfuru? Teke odumeka yekwaa onu nkengu.”

⁷Oo ya bu; Hushayi bya asu Abusalomu: “Idzu, Ahitofelu chi-koshiru ngu k'ogiya-a ta adukwa ree.

⁸I mahawaru ge nna ngu gbaru; me ndu nkiya. Ephe bukota ndu ike du l'ogu; emebe ehuka g'agu, a chitaru unwu iya. A -gufukpooro ono be nna ngu bu onye k'ogu doru enya; yeke ndu ophuu ta abyadu aze l'eka lanu l'enyashi-a.

⁹Lenu; nta-a be o domiwaru onwiya l'ime ogba ozoo l'eka ozo. O -buru l'o futaru bya etsoo unu ogo nta-a; ndu ojogu ngu haru nwuhu; be onye numakporu iya nu a-sukwa: ‘E gbushiakwaru nemadzu shii l'echilabo ndu etso Abusalomu.’

¹⁰Je akpachaa le ndu ike du l'ogu; mbu ndu ono, obu shihuchaaru ike g'oduma ono be ndzu-agugu e-rwutachakwaa; noo kele ndu Izurelu l'ophu be maru le nna ngu be bu onye ike du l'ogu; teme ndu yee ya swi bu-chaaru ndu okpehu du.

¹¹Sụ-a; iphe, bụ idzu nkemu bụ gę ndu Ízurelu l'ophu dzukọbe byapfuta ngu; e shikpoo lę Danu jasụ lę Biye-Sheba; mbụ g'ęphe zahụ g'ęja, nọ l'aguga eze-ęnyimu; gubedua l'onwongu e-duru pę jeshia ogu obu.

¹²Oo ya bụ; anyi etsoo ya ogu l'ęka anyi chọ-vukpoeru iya pho. Anyi adapyabę iya ęgube ono, iji utsu anọduje adashi l'alı-a. Yębedua l'onwiya waa ndu yęe ya swı l'ophu bę ta adudu onye ophu e-dobe ndzụ m'onye lanu.

¹³O -buru l'o nweru mkpukpu, o pyobaru; ndu Ízurelu l'ophu e-gude eri bya lę mkpukpu ono; bya eworu iya lo-tsua; loo ya wuruwuru nwuru ye lę nsuda; k'ophu bụ l'a ta abyadu a-huma m'ibiribe ęja lanu l'ęka ono.”

¹⁴Abusalomu mę ndu Ízurelu l'ophu tuko zua sụ: “Idzu kę Hushayi, onye Akụ bę kakwa kę Ahitofelu ree.” Iphe, kparu iya nu bụ lę Chipfu chi-buwaru gę ya shi nno kpakashia okpobe idzu ono, Ahitofelu chi-koshiru ono; k'ophu Chipfu e-shi nno mee g'ęjo-iphe dapfuta Abusalomu.

Ama gbaru Dévidi; o gbalaa

¹⁵Tobudu iya bụ; Hushayi bya akaru Zadoku yęe Abyiyata, bụ ndu-uke Chileke idzu ono, Ahitofelu chi-koshiru Abusalomu yęle ndu bụ ogerenya ndu Ízurelu ono; waa ophu yębedua l'onwiya chi-koshiru pę.

¹⁶Sụ: “Unu mee ęwegwa zia ozi g'e zia Dévidi sụ iya g'o to kwakwa akwakwa l'ęka eerwuje ęnyimu Jiđdanu erwurwu l'ęchiegu ono. G'o to dukwa iphe, e-me g'o to dafu azu iya ophuu; o -dudu bę aa-tukokwa yębedua bụ eze waa ndu yęe ya swı kpo g'ęekpoje ntụ-a.”

¹⁷Teke ono bę Jionatanu yęle Ahimaazu anọduje lę Enu-Rogelu; kęle ęphe ta tudu ama abahu lę mkpukpu Jierusalemu. O buru nwata nwamgboko, eje ozi bę eezije g'o je ezia pęe ozi; ęphe eje ezia ya eze, bụ Dévidi.

¹⁸Ole o nweru nwokorobyala lanu humaru pęe nu; o je edooru iya Abusalomu. ęphenebo meępho ęwegwa lufu l'ęka ono tugbua jeshia ibe nwoke, bu lę mkpukpu Bahurimu. Nwoke ono nweru węlu l'oma-unuphu ibe iya. ęphe nyiba l'ime węlu ono.

¹⁹Nyee nwoke ono chita iphe kpuchite onu węlu ono; bya eworu akpuru mebyi iphe susaa l'eli iya. Ophu o to dudu onye maru nu.

²⁰Ndu ozi Abusalomu byapfutaępho nwanyi ono l'ulo; ęphe jia ya sụ: “? Bụ aweya bę Ahimaazu yęe Jionatanu nọ?” Nwanyi ono sụ pęe l'ęphe daakwaru azu nggele pho tugbua. ęphe choo pęe; ophu ęphe ahumaduru pęe; ęphe laphushia azu lę Jierusalemu.

²¹Ndu ono lashichaepho; Ahimaazu yęe Jionatanu shi lę węlu ono nyifuta tugbua jeshia ezi eze, bụ Dévidi ozi ono. ęphe rwua bya akooru iya ęgube idzu, Ahitofelu chiru; bya asu iya g'o tugbuekwapho nta-a dafu azu ęnyimu azu iya ophuu.

²²Noo ya; Dévidi yęe ndu yęe ya swı tugbua je adaa ęnyimu Jiđdanu. Nchi bohushia; ophu o nweedu onye ophu phoduru nu; ęphe dafukotawa azu ęnyimu Jiđdanu.

²³Ahitofelu hūmaepho l'ọ tọ bụdu idzu nkiya bẹ e tsoru; o nyikota eli nkapfu-igara iya gbagbua; ọ bụru iya ala ibe iya lẹ mkpukpu, o shi. Ọ larwua bya edozichaa ibe iya g'oo-du; o je aswi-gbua onwiya. Ọo ya bụ; ọ nwuhu; e lia ya l'ilu nna iya.

²⁴Dévidi tugbua jeshia mkpukpu Mahanayimu; Abusalomu yee unwoke ndu Ízurelu l'ophu, ephe l'iya swi, daa enyimu Jiódanu kwaseru.

²⁵Abusalomu woru Amasa mee onye-ishi ndu ojoḡu iya l'ozo Jiowabu. Amasa bẹ bụ nwatibe onye Ízurelu, ephe iya bụ Itura. Itura ono bẹ luru Abigelu, nwada Nahashi bya aburu nwune Zeruya, bụ ne Jiowabu.

²⁶Abusalomu yee ndu Ízurelu je adọru l'alị Giladu.

²⁷Dévidi byarwutaepho Mahanayimu; Shobi nwa Nahashi ke mkpukpu Raba, du l'alị ndu Amonu; me Makiya nwa Amiyelu ke mkpukpu Lodeba; me Bazilayi, bu onye Giladu, shi le mkpukpu Rogelimu;

²⁸vukoo iphe vutaru Dévidi yee ndu yee ya swi g'ephe riye. Iphe, ọ bu buru iphe-azee; me eze gbamugbamu; me iphe, a kpushiru l'aja; me witi; me balị; me ereshi, e gweru egwegwe; me ophu a huru ahuhu; me azamu; me okpa;

²⁹me manu-enwu; me mini era-eswi, toru atoto; me aturu; me mini era-eswi, hukoru ahuko. Noo kele ephe suru le Dévidi phe be egu aguwa; ike bvushiwa phe; teme egu mini nodu agukwa phe pho l'echiegu.

2 Sámelụ 18

Anwuhu Abusalomu

¹Tobudu iya bu; Dévidi bya akpakoo ndu yee ya swi; bya ahota ndu-ishi ojoḡu ke ndu ophu du unu labo l'ukporo iri iri; bya ahota ndu-ishi ojoḡu ke ndu ophu du ukporo ise ise.

²Dévidi bya eye ndu ojoḡu ono g'ephe tugbua. Nkereto le ndu ojoḡu ono be bu Jiowabu bu onye-ishi phe; nkereto ozo buru Abishayi; nwa Zeruya; mbu nwune Jiowabu, bu onye-ishi phe; nkereto ozo buru Itayi onye Gatu be bu onye-ishi phe. Eze su ndu ono: “Mbèdua l'onwomu a-futakwapho bya etsoru unu jeshia.”

³Obenu le ndu ono suru iya: “Ọ tọ dukwa iphe bya eme g'i tsoru anyi je; kele ọ -buru l'anyi yeru okpa l'oso be ephe ta akpadu anyi ishi. Ọ -buru le nkeru-ebo l'ime anyi nwushihuru be ephe ta abyadu akpa anyi ishi. Gubedua l'onwongu ha g'anyibedua ukporo unu nemadzu l'unu ise. Su-a; iphe, kachia ree bu g'i noduchia le mkpukpu; gbẹ l'eka ono buchiaru agbarike anyi.”

⁴Eze su phe: “Ọo iphe, unu rikpoerupho l'ọ kaa ree be mu e-me.” Ọo ya bu; eze bya apfucha l'aguga onu-abata mkpukpu ono; ndu ono nodu awughatagbaa; ndu ophu adu ukporo ise ise; ndu ophu adu unu labo l'ukporo iri iri.

⁵Eze nmaru okwa nu Jiowabu; me Abishayi; me Itayi su: “Unu gudekwaro iswi ehụ mbèdua haa eme nwokorobyaa ono, bu Abusalomu iphe kpanganga-a.” Ndu ono l'ophu numakota g'eze nmaru okwa ehụ Abusalomu yechaa ndu-ishi ndu ojoḡu ono l'eka.

⁶Oo ya bu; ndu ono wuru jeshia l'oma egu je etsoo ndu Izurelu ogo. O buru l'oswa Ifuremu be ephe no lwua ogo ono.

⁷Ndu ke Dévidi nodu l'eka ono lwu-kpee ndu ojogu ndu Izurelu. Ndu e gburu egbugbu mboku ono paa aka apaa. Ephe du ukporo unu nemadzu ugbo labo l'unu iri.

⁸Ogo ono swokobe dzuru ali ono l'ophu. Ndu nwuhuru nu l'ime oswa mboku ono ka ndu ophu e gude ogo-echi gbushia.

⁹A nodu alwu ogo ono; Abusalomu ye ndu ojogu Dévidi dzugbabe. Teke ono be Abusalomu agba inya-mulu iya; inya-mulu ono gbaba le mkpula eze achi. Ekali achi ono kota Abusalomu l'ishi; o kwaa iphe l'echi; kuaaha eregede l'ekali achi. Inya-mulu ono, o shi agba ono gbakwaseru tugbua.

¹⁰Nwoke lanu huma iya; je edooru iya Jiowabu su: "Lenu; mu humakwaru Abusalomu g'o kwakoru aku eregede l'achi."

¹¹Jiowabu ja nwoke ono, pfuru iya iphe ono su: "? I suru l'oo gunu? ? I humaru iya l'enya too? ? Bu gunu meru g'o gude ophu i ti chitaduru iya tua l'ali l'eka ono. Mu gege anue ngu pho shekelu mkpola-ochaa iri; waa akpo, eekebutaje l'upfu."

¹²Nwoke ono su Jiowabu: "Obetakpo e jee aparu shekelu mkpola-ochaa, du unu labo l'ukporo iri dee mu l'eka; mu tege ahalikwa aka k'egbutu nwatibe eze; l'eka anyi numakwaru-a okwa, eze nmaru ye unu le Abishayi; me Itayi l'eka su: 'G'unu gudekwa ke yebe eze gbobuta nwokorobyanya ono, bu Abusalomu.'

¹³Su-a; o -bu le mu jeru etsebe ndzu mu l'onu eta; woru Abusalomu gbua; g'o to nwedu iphe, eedomiru eze edomi-a; me unu apfuribecharu je apfuru paru mu buhaa."

¹⁴Tobudu iya bu; Jiowabu su: "Mu taa kwabekotaduru ngu egube ono." O chita arwa eto je anmaa Abusalomu l'obu; le ge Abusalomu nokwadu ndzu l'eli achi ono.

¹⁵Unwokorobyanya iri, bu ndu achijeru Jiowabu ngwogu no-pee Abusalomu mgburugburu woru iya gbugbua; o nwuhu.

¹⁶Noo ya; Jiowabu bya egbua opu gude sephuta ndu ojogu ono azu. Oo ya bu; ephe haa achi ndu Izurelu oso.

¹⁷Ephe bya apata odzu Abusalomu chie leze iduma, no l'oswa l'eka ono; kwaa ikpo mkpuma kube iya l'eli. Ndu Izurelu gbete teke ono toko tsukah; onyenonu lashia ibe iya.

¹⁸Teke Abusalomu no ndzu be o pataru obvuru je ebube le Nsuda Eze g'o buru iphe, ee-gudeje nyata iya; kele o riru su: "Mu te enwedu nwa nwoke, ee-gudeje nyata epha mu." O woru epha nkiya gube obvuru ono. A nodu anoduje eku iya iphe, e gude anyata Abusalomu byasu ntanu-a.

Eepfuru Dévidi k'anwuhu Abusalomu

¹⁹No iya; Ahimaazu nwa Zadoku su: "Ge mu bya agbagbua je ezia eze le Chipfu be nafutawaru iya l'eka ndu ohogu iya."

20Jiowabu sụ iya: “Ọ tọ bụdu gbuedua bẹ ọ gbaru g'i jeshia ezi ozi ntanu-a. O -rwua mbọku ọzo; l'i jewarọ ezia ya ozi. Ọ -buru ke ntanu-a bẹ ọ tọ gbaduru g'i je ezia ya ozi; noo kele nwatibe eze bẹ nwuhuru nu.”

21Ọo ya bụ; Jiowabu pfiaru nwoke, shi l'alị Kushi sụ iya: “Tugbua je akọoru eze iphe, i humaru.” Onye Kushi ono phozeru Jiowabu iphu l'alị; bya agbagbua; ọ buru iya ejeje.

22Ahimaazu nwa Zadoku bya epfukwaaru Jiowabu ọzo; sụ iya: “Haarọ ge mu gbatsoru onye Kushi ono azu l'azu; obetakpoo gunu je e-me.” Jiowabu sụ iya: “Nwa mu; ? bụ gunu meru g'o gude ọ du ngu g'i je? O to nweduru obunggo, ee-bu ngu l'ozu ono.”

23Ọ sụ iya: “Obetakpoo gunu je e-mee bẹ mu jefutaje.” Ọo ya bụ; Jiowabu sụ iya: “Gbagbunaa!” Ọo ya bụ; Ahimaazu gbagbua shia uzu nsuda enyimu Jiordanu shi nno gbaghata onye Kushi pho.

24Teke ono bẹ Dévidi nọ lẹ mgbaka echilabọ onu-abata ime mkpukpu ono; waa ophu nọ mę a -nọdu alufu alufu. Onye-nche nyihu eli igbulọ ono, e gude kpua onu-abata ono je apfuru l'eli iya. Onye-nche ono jeshia ele enya; ọ huma nwoke, agbakpopho ọso nwekinyi iya.

25Onye-nche ono kua eze oku; pfiaru iya ya. Eze sụ: “Ọ -buru l'ọ swi nkinyi iya; bẹ bụ ozi, du ree bẹ ooby ezizi.” Nwoke ono nọdu agbakpopho abya ntse ntse.

26Ọo ya bụ; onye-nche ono tufu enya huma nwoke ọzo, agbakwapho ọso abya. O kua onye-nche onu-abata mkpukpu sụ: “Lenu; onye ọzo agbakwa ọso nwekinyi iya abya!” Eze sụ: “Ọo ozi, du ree bẹ oobyakwapho ezizi.”

27Onye-nche ono sụ: “Onye ke mbu pho bẹ ọso iya gbẹ du mu g'ọ bụ ke Ahimaazu nwa Zadoku.” Eze sụ: “Ọo okpobe nemadzu bẹ obu; ọ buru ozi, du ree bẹ oobyaje ezizi.”

28Noo ya; Ahimaazu gbarwuta bya ekua eze sụ iya: “Iphemiphe dukotaekwapho ree-o!” O phozeta buaru eze iphu l'alị sụ: “G'ajaja buru ke Chipfu, bụ Chileke ngu! O wofuwaru ndu ono, haliru eka g'ephe gbua gube nnajiuphu mu, bụ eze.”

29Eze jia ya sụ: “? To nwedunu iphe, meru nwokorobia ono, bụ Abusalomu?” Ahimaazu sụ iya: “Mu humaru g'aatu ejo uzu lẹ teke ono, Jiowabu eme g'o zia mube nwozi gube eze ozi-a. Ole mu ta amakwanu ishi uzu ono, aatu ono.”

30Eze sụ iya: “Ghakobe pfuru l'eka-a.” Ọo ya bụ; ọ bya aghachi pfuru l'eka ono.

31Ọo ya bụ; onye Kushi ono byarwuta bya asu: “Gube nnajiuphu mu, bụ eze; numakwa ozi ehu-utso! Lẹ ntanu-a bẹ Chipfu nafutakotawaru ngu l'eka ndu wulihuru etso ngu opfu.”

32Ọo ya bụ; eze jia onye Kushi ono sụ iya: “? To nwedunu iphe, meru nwokorobia ono, bụ Abusalomu?” Onye Kushi ono sụ iya: “G'iphe, bukpuo ndu ohogu nnajiuphu

mu, bu eze; mekpoo iphe, bu ndu wulihuru etso ngu opfu dukotaekwapho ge nwokorobya ono.”

³³Iphe ono rwua eze l'ehu shii; o nyigobe jeshia l'ulo ophu a kpuru l'eli onu-abata mkpukpu je anodu raahaa ekwa. O nodu eje bya araje su: “Gube nwa mu Abusalomu; nwa mu-ee; nwa mu Abusalomu! O -bu l'oo mbedua nwuhuru; gubedua noduroya. Gube nwa mu Abusalomu; nwa mu-ee; nwa mu-ee!”

2 Samelu 19

Jiowabu abaru Dévidi mba

¹Tobudu iya bu; e je edooru Jiowabu su iya: “Eze be agukwa aphu; bya ara ekwa Abusalomu.”

²Alwu-kpe ono, ndu ojogu l'wukperu mboku ono bya aghaa igharaphu buru ndu ojogu ono g'ephe haa iphe aphu; noo kele ephe numaru g'aasuje l'eze be akwakwa ekwa nwa iya ono nwuhuru nu ono.

³Ephe to nwehu zitachaa onwophe ezita pyoba l'ime mkpukpu mboku ono; g'egube ono, ndu iphere du l'ephe gbaru oso l'ogu ezitaje onwophe ezita pyobata ono-a.

⁴Eze kpuchia onwiya iphe l'iphu chia mkpu ekwa su: “Gube nwa mu Abusalomu! Oowa-e Abusalomu nwa mu; nwa mu-ee!”

⁵Noo ya; Jiowabu bya ejepfu eze l'ime ulo je asu iya: “Nta-a bu ndu nkengu, dzoru ngu ndzu; dzoo unwu ngu; me unyomu ngu; me unwanyi, abu-zidu unyomu ngu-a be i tukoru meru iphe-iphere kpua ntanu-a;

⁶O buru ndu i du ashi be i yeru obu; kpo-chia ndu yeru ngu obu ashi. Umere ngu ntanu-a mewaru o doo enya l'o to dudu iphe, i guberu ndu-ishi ndu ojogu ngu; waa ndu-ozu ngu phe. Mu humawaru l'ehu gege agbe atso ngu utso ome o -bu le Abusalomu no ndzu ntanu-a; anyibedua tuko g'anyi ha nwushihukota.

⁷Ngwa; tugbukwaa jepfu ndu-ozu ngu je eyeru phe njima. Mu gudekwa epha Chipfu eriburu ngu angu; l'o -buru li ti gbeshiduru je; be anyi a-wufu-gbukwa gbado ngu; o to nwedu me onye lanu ihumakwadu le mgboru ngu l'enyasi-a. O buru ono a-bya akakota ngu atsu l'ehu eme l'ejo-iphe, shikpo teke i bu nwokorobya nwataru ngu byasu ntanu-a.”

⁸Oo ya bu; eze bya agbeshi pata oshi iya je anodu l'onu eka eeshije abahu le mkpukpu ono. A bya akoru ndu ono su phe: “Unu lenu; eze nokwa l'onu eka eeshije abata le mkpukpu-a.” Ndu ono tuko g'ephe ha wu-pfuta iya.

Dévidi alaphu azu le Jierusalemu

Teke ono be ndu Izurelu gbakashihuwaru; onyenonu lashichawa ibe iya.

⁹Ndu Izurelu g'ephe ha swaha uswo l'ipfu nonu; ndu nonu ephe epfugbaa; asuje: “Oo eze be nafutaru anyi l'eka ndu ohogu anyi; bya adzota anyi l'eka ndu Filisitayinu. Obenu le nta-a be o gbafuru l'ali-a; o buru opfu ehu Abusalomu be o gude gbafu obu.

¹⁰Abusalomu-a, bu onye ono, anyi wuru manụ l'ishi g'ọ buru eze anyi ono-a byawanu anwuhu l'ogu. Sụ-a; ? bu gunu meru g'o gude ophu e te yedu onu g'ee-shi g'e duphuta eze azu?"

¹¹Eze, bu Dévidi bya ezia ozi g'e zia Zadoku yele Abyiyata, bu ndu-uke Chileke sụ: "Unu jiedu ndu bu ogerenya ndu Jiuda sụ phe: '? Bu gunu meru g'o gude o buru unubedua eme g'unu kperu azu l'eme g'eze lwaphuta azu l'ibe iya; l'eka iphemiphe, ndu Izurelu l'ophu epfu rwuchawaru l'eka mube eze no l'ibe mu?"

¹²Unubedua be bu unwunna mu; mbu le mu l'unu tukoru buru anu-ehu waa mee lanu. Sụ-a; ? denuhunu g'o gude; o buru unubedua bu ikpazu le g'ee-shi mee g'eze lwaphuta azu?"

¹³Unu asu Amasa le mu suru-a: '? Mu le ngu ta abudu anu-ehu lanu waa mee lanu too? Oo gubedua be mu e-gude dochia enya Jiowabu gi buru ishi ndu ojogu mu shita ntanu-a kwaseru; o -dudu nno; ge Chileke gwakwa mu ochi; mbu g'o mekwa mu ophu ka njo!' "

¹⁴Oo ya bu; o pfubuta ndu Jiuda; obu bya aburu phe nanu. Epe bya ezia sụ g'e zia eze sụ iya g'ephe le ndu nkiya tuko lwatashia.

¹⁵Eze bya alwatashia; lwaberu enyimu Jiordanu. Teke ono be ndu Jiuda jewaru anodu le mkpukpu Gilugalu g'ephe gba iya ndzuta; g'ephe edughatawa iya ro l'enyimu Jiordanu.

¹⁶Tobudu iya bu; Shimeyi; nwa Gera, bu onye Benjiaminu ke mkpukpu Bahurimu mekebeepho egwegwa tsoru ndu Jiuda; epe jeshia agba eze, bu Dévidi ndzuta.

¹⁷Ndu ipfu Benjiaminu, epe l'iya swi be du unu labo l'ukporo iri; waa onye-ozu onu-ulo Solu, bu Ziba; yele unwu iya unwoke, du iri l'ise; waa ndu-ozu iya umadzu ukporo. Epe mee egwegwa je agba eze ndzuta l'onenyimu Jiordanu l'eka o no.

¹⁸Epe rwughata enyimu Jiordanu g'ephe kughata ndibe eze; teme waa g'ephe meeru eze iphe, o du iya g'e meeru iya.

Dévidi aguru Shimeyi nvu

O be ge Shimeyi; nwa Gera daerupho enyimu Jiordanu; o daa kpurumu l'ataphu eze;

¹⁹sụ iya: "Pakwaru haa; jiko nnajiuphu mu l'eka mu mesweru ngu. Te ejekwa anyata iphe, du eji, mube nwozi ngu meru gube nnajiuphu mu, bu eze le mboku ono, i shi Jierusalemu tugbua ono. Eze; jiko wofukwa iya l'obu ngu.

²⁰Noo kele mube nwozi ngu maru-a le mu meru iphe-eji; ole o kwanu mbedua bu onye ivuzo l'onulo Jiosefu l'ophu, byaru ntanu-a bya agba gube nnajiuphu mu, bu eze ndzuta."

²¹Oo ya bu; Abishayi; nwa Zeruya sụ: "O gbaru g'e gude k'iphe-a gbua Shimeyi; noo kele oo iphu be o phuru onye Chipfu wuru manụ g'ọ buru eze."

²²Dévidi sù: “? Bù gunu bẹ mu l'unu jigba; unubẹ unwu Zeruya; meru g'o gude unu je a-buru ndu etso mu opfu lẹ ntanụ-a? ? O gbaru g'o nweru onye ee-gbu egbugbu l'alì Ízurelu ntanụ-a? ? Tọ lẹ mu ta amadụ l'ọo mbèdua bù eze ndu Ízurelu ntanụ-a?”

²³Oo ya bù; ọ sù Shimeyi: “E tee gbudu ngu rọ ya.” Eze kwee ya ukwe ribuaru iya nte.

Dévidi emeru Mefiboshèti iphe-oma

²⁴Nwanwa Sọlu, bù Mefiboshèti tugbukwapho jeshia eze ndzuta. O tọ nwùbejeduru ọkpa iya ẹnya; ọphu ọ tọ kpùbotajeduru éjì-agba iya akpùbota; ọphu ọ sajèduru uwe iya asasa e -shi mbọku ono, eze lufuru tugbua; jasù mbọku, ọ lwaphutaru azù l'èhu-guu.

²⁵O shièpho Jierúsalemù bya gẹ ya gba eze ndzuta; eze jìà ya sù: “Mefiboshèti; ? bù gunu meru g'o gude ọphu i ti tsoduru mu tugbua?”

²⁶O sù: “Gùbe nnajìuphu mu, bù eze; eshinu mube nwozi ngu bù ẹniyeni bẹ mu sùkwaru nwozi mu g'o doziaru mu nkapfù-igara mu gẹ mu nọdu iya gbaru tsoru gùbe eze; obenu lẹ nwozi mu ono, bù Ziba ghọru mu ụgho.

²⁷Tẹme ọ byawa bya epfutoşhia mube nwozi ngu l'èka gùbe nnajìuphu mu, bù eze nọ. O lẹ gùbe nnajìuphu mu, bù eze bẹ dọ-a g'ojozì Chileke. Iphe, dukpoe ngu phọ ree; mee ya.

²⁸Iphe, shi rwube ndu ọnu-ulo nna mu l'ọphu bù g'èphe nwùshihu l'iphu nnajìuphu mu, bù eze; ọle e mecharu i woru mube Mefiboshèti, bù nwozi ngu dobe gẹ mu yìru lẹ ndu a-nọduje eri nri lẹ teburu nkengu gèdegede. O to rwubeèkwaru mu mẹ ililekpọo gẹ mu rajèbaaru kpua gùbe eze.”

²⁹Eze sù iya: “? Bù opfu èhu ngu bẹ ii-gudewarọ epfupfu? Mu sùwaru gẹ gù lẹ Ziba kekaha alì ono!”

³⁰Mefiboshèti sù eze: “Haa gẹ Ziba wotakọtaro iphemiphe; eshinu e mecharu gùbe nnajìuphu mu, bù eze lwarwuta ibe ngu l'èhu-guu.”

Dévidi emeru Bazilayi iphe-oma

³¹Bazilayi kẹ Giladu bẹ shi lẹ mkpukpu Rogelimu bya gẹ ya tsoru eze daa ẹnymu Jìódanu; mbù gẹ ya dughata iya ẹnymu Jìódanu.

³²Bazilayi bẹ bùwaa ọgerenya shii. O nọwaru ụkporo apha ẹno. O bù nwoke nweru iphe shii k'ọphu bù l'ọo ya shi anuje eze nri teke ọ nọ lẹ Mahanayimu.

³³Eze sù Bazilayi: “Tsoru mu daa ẹnymu-a; g'anyi je anọdu lẹ Jierúsalemù k'ọphu mu a-nọdu eleta ngu ẹnya ree.”

³⁴Bazilayi sù eze: “? Mu a-nọfua apha ole nta-a kẹ gẹ mu tsoru gùbe eze lashia Jierúsalemù?”

³⁵Iphe, mu nọwaru nta-a bukwa ụkporo apha ẹno. ? Mu makwaduru iphe, dọ ree waa iphe, dọ èjì? Tọ ? mu adù ike amakwaduru ụtsò iphe, mu eri eriri; ọzoo ọphu mu angu

angungu? Tọ ? mu adu ike anumakwadu olu-ebvu unwoke; ozoo k'unwanyi? ? Bu ke gunu be mube nwozi ngu a-bya aburu ivu-erwa duru gube nnajiuphu mu, bu eze?

³⁶Mube nwozi ngu bua ge mu duriberu ngu nwanshii l'azu enyimu Jiordanu azu iya ophuu. ? Bu ke gunu be gube eze e-gude bua mu obunggo ophu ha egube ono?

³⁷Haarọ ge mube nwozi ngu lashia k'ophu mu a-nodu le mkpukpu eka mu shi nwuhu; mbu l'eka no-kube ilu nna mu waa ke ne mu ntse. Su-a; waa nwozi ngu, bu Kimuhamu baa; g'o tsoru gube nnajiuphu mu, bu eze dafu azu iya ophuu; l'iimeeru iya iphe, dukpoe ngu pho ree."

³⁸Eze su iya: "Kimuhamu be e-tsoru mu-a dafu azu iya ophuu; o buru iphe, du ngu ree be mu e-meru iya. Ozo buru l'oo iphe, i sukpoerupho ge mu meeru ngu be mu e-meru ngu."

³⁹Oo ya bu; ndu ono l'ophu dafukota azu enyimu Jiordanu azu iya ophuu; eze bya adafukwapho. Eze bya eworu onu tsutsua Bazilayi; goru onu-oma nu iya. Bazilayi lashia ibe iya.

Ndu Izurelu ekoru ndu Jiuda okophoo

⁴⁰Eze bya adaa enyimu ono jeshia mkpukpu Gilugalu; Kimuhamu tsokwaru iya pho. Ndu Jiuda l'ophu me nkeru-ebo ndu Izurelu toko tsoru edu eze.

⁴¹Noo ya; iphe, bu ndu Izurelu l'ophu zahu byapfuta eze bya asu iya: "? Denu g'o gude unwunna anyi phe, bu ndu Jiuda bya eduta gube eze le mpya; mbu duta gu le ndibe ngu; me ndu gu l'ephe swi l'ophu dafuta azu enyimu Jiordanu?"

⁴²Ndu Jiuda l'ophu toko g'ephe ha yeeru ndu Izurelu onu su phe: "Iphe, kparu iya nu be bu l'anyi l'eze be ka abubu. Su-a; ? bu gunu meru iphe, eh eghu unu eghu le k'iphe ono? ? O nweru iphe, shi eze l'eka anyi riru? Tọ; ? o nweru iphe, anyi nataru g'o buru nkanyi?"

⁴³Oo ya bu; ndu ke Izurelu yeeru ndu Jiuda onu; su phe: "Eka anyi dukwa l'ehu eze ugbo iri. Ozo bukpooru nu l'anyi kakwa iya unu enweru. ? Dahunu g'o gude; ophu unu agubeduru anyi iphe? ? Tọ buna anyibedua vu uzo wata epfu g'ee-shi g'e duphuta eze azu?" Ole ndu ke Jiuda gb kabaanu eyeru ndu Izurelu onu ehuka ehuka.

2 Samelu 20

¹Tobudu iya bu; o nweru ogalemkpa nemadzu, no l'eka ono, epha iya bu Sheba nwa Bikiri. O bu onye ipfu Benjiaminu. O woru opu gbua chishia mkpu su: "O to dukwa okè, anyi nweru l'ehu Dévidi. O to dukwa okiphe, anyi nweru l'ehu nwa Jiesi! Unube Izurelu; g'onyenonu lashia ibe iya-o!"

²Oo ya bu; ndu Izurelu l'ophu gbadochaa Dévidi je awu-tsoru Sheba nwa Bikiri. Ole ndu ke Jiuda noepho nonyabe eze shitakpoo l'enyimu Jiordanu jasu le Jierusalemu.

³Dévidi bya alarwua ibe iya le Jierusalemu; bya achita unwanyi iri ono, abu-zidu unyomu iya ono, o haru g'ephe nodu leta ibe eze enya ono. O chiru phe ye l'ulo eka a

nọ eche phẹ nche. O nọdu azu phẹ lẹ nri; ọle o to jepfujeduru phẹ. E wuchia phẹ l'ime ulo; ephe nọdu onodu unwanyi, ji phẹ anọedu jasuru ephe nwushihu.

⁴No iya; eze bya bya ezia Amasa sụ iya: “Gude ujiku ẹto kukọoru mu ndu Jiuda g'unu l'ephe tuko wu-pfuta mu l'eka-a.”

⁵O be teke Amasa jeru gẹ ya kukọo ndu Jiuda ọbu; o je anọghata teke eze tu-buru iya.

⁶Dévidi bya asu Abishayi: “Ejo-iphe, Sheba nwa Bikiri e-me anyi bẹ kakwa ọphu Abusalomu meru. Chita ndu-ozu mube nnajuphu ngu chipyabe iya; odumeka bẹ ọo-bahukwa lẹ mkpukpu, a kpu-pheru igbulọ mgburugburu; nahu anyi gbalaa.”

⁷Oo ya bu; Abishayi chitanu ndu ojogu Jiowabu; me ndu Kereti; me ndu Peleti; me ndu bukpo ndu ike du l'ogu; ephe shi lẹ Jierusalemu tugbua jeshia achi Sheba nwa Bikiri.

⁸O be teke ephe nokwadu l'oke mkpuma, nọ lẹ mkpukpu Gibiyonu; Amasa byapfutashia phẹ. Teke ono bẹ Jiowabu yeru uwe ojogu iya; gude akpo, o we l'upfu gude kebuta ogu-echi, a tsuru ọbo. O jeshia ahata okpa; ogu-echi ono shi l'obo iya mifu daa.

⁹Jiowabu bya aja Amasa sụ iya: “? Ehu du ngu-a ree; nwanna mu?” Jiowabu bya eworu ekutara dee Amasa l'aji-agba gẹ ya tsutsua ya onu.

¹⁰Ọphu Amasa te elerwetaduru enya huma ogu-echi, Jiowabu kpapyaberu l'eka. Oo ya bu; Jiowabu woru iya nmaa ya l'epho; akurepho iya kposhihu l'ali. Ophu o nmaeduru iya ogu-echi ono ozo; o buwaru iya nu anwuhu. Oo ya bu; Jiowabu yele nwune iya, bu Abishayi chipyabe Sheba nwa Bikiri.

¹¹Onye lanu lẹ ndu ojogu Jiowabu je apfuru lẹ mgboru Amasa asuje: “Onye suru lẹ Jiowabu du iya l'obu; mbu onye suru lẹ ya bu ke Dévidi; g'onye obu tsonuru Jiowabu!”

¹²Noo ya; Amasa dabyiru l'echilabo gbororo l'eka ono arwaswi onwiya lẹ mee ya. O nọdu abujeru; onye jetaru rwua eka ono; l'ọ kpoo beru. Nwoke ono humaepho l'obujeru; onye jetaru rwua eka ono; l'ọ kpoo beru; o locha Amasa l'egbudu; chita kpowula-kpowula uwe phukputa iya.

¹³O buru g'a pafuru iya pho l'uzo ono bẹ ndu ojogu ono l'ophu tukoru wuru tsoru Jiowabu chihaa Sheba nwa Bikiri.

¹⁴Sheba ghajakota iphe, bu ipfu, du l'ali ndu Izurelu je akpaa lẹ mkpukpu Abelu-Betu-Maka. Ndu shi l'ipfu Bikiri g'ephe ha kpakodzua wu-tsoru iya.

¹⁵Jiowabu me ndu ojogu iya phẹ bya bya ekephee mkpukpu Abelu-Betu-Maka mgburugburu; kebuta Sheba l'eka ono. Ephe bya akube eja gude kpu-buta mkpukpu ono; eja ono nọdu rwua l'igbulọ mkpukpu ono. Ephe nọdu etsukposhi igbulọ mkpukpu ono; g'ophofukwanu daa.

¹⁶O nweru nwanyị maru mmamiphe, bu ịe mkpụkpu ono, ara ọrà sụ: “Unu ngabekpodapho-o! Unu ngabekpodapho-o! Jiko ziaru mu Jiowabu g'ọ bya ge mu pfuru yeru iya.”

¹⁷Jiowabu bya ejekubeshia ya; nwanyị ono jĩa ya sụ: “? Bụ gubedua be ị Jiowabu?” O sụ iya: “Ee.” Nwanyị ono sụ iya: “Ngabekwa nchi l'iphe, mube nwozi ngu nwanyị abya epfufu.” Jiowabu sụ iya: “Mu ngaberu-a nchi.”

¹⁸Nwanyị ono sụ: “Teke ndiche be e shi asuje: ‘G'e jekwa akpata ishi ịe mkpụkpu Abelu!’ A -kpatawa ishi ono; eeshi nno doshia opfu, ada nụ.

¹⁹Sụ-a; anyi ị ndu ị àgù; teme anyi ị ndu e gude ire anyi ẹka l'alị Ízurelu. Nta-a be iime g'i mebyishia mkpụkpu, nọ ọnodu ne l'alị Ízurelu. ? Denu g'o gude ị ndu eme g'i lwua ndu ị okiphe Chipfu?”

²⁰Jiowabu sụ: “Tuswekwa! Tuswekwa! G'ọ tọ ịkwaru mu a-lwu mkpụkpu unu; ọzoo mebyishia ya.

²¹O tọ ịkwara g'ọ ị ndu ono. O ịe o nwekwanuru nwoke lanu, epha iya ị Sheba nwa Bikiri, shi l'alị úbvú úbvú ndu Ifuremu, ị ndu onye kwefuru eze, ị ndu Dévidi ike. Unu -kpatawa nwoke ono ye mu l'eka; mu alufu ịe mkpụkpu-a.” Nwanyị ono sụ Jiowabu: “Ee-shi l'eli igbulọ tufuru ngu ishi nwoke ọbu.”

²²Tobudu iya ị ndu; nwanyị ono gude mmamiphe iya ono jepfu ndu mkpụkpu ono; epe gbuta ishi Sheba nwa Bikiri woru tufuru Jiowabu. O woru opu gbua; ndu ojogu ono wufu ịe mkpụkpu ono; onyenonu lashichaa ibe iya. Jiowabu laphu azu jepfushia eze ịe Jierúsalemu.

Ndu-ishi Dévidi

²³Oo Jiowabu be ị ndu onye-ishi iphe, ịkwara ndu ojogu l'alị ndu Ízurelu. Benaya nwa Jiehoyada ị ndu onye-ishi ndu Kereti me ndu Peleti.

²⁴Adoniramu ị ndu onye-ishi ọgbo ozi. Jiehoshafatu nwa Ahiludu ị ndu onye akwakobeje iphe, meru ememe.

²⁵Sheva ị ndu onye edeje ekwo. O ị ndu Zadoku ye Abyiyata ị ndu-uke Chileke.

²⁶Ira ke mkpụkpu Jayi kwarupho onye uke Chileke ke Dévidi.

2 Sámelu 21

Egu-ememe waa g'e gude gbushia unwu Sọlu

¹O nweru teke egu mejeru l'alị Ízurelu mkpurumkpuru apha eto ịe teke Dévidi ị ndu eze. Dévidi bya akpaa Chipfu ishi iphe ono. Chipfu sụ: “Iphe, kpara iya nụ ị ndu l'ikpe ọchi tukuru Sọlu ye onu-ulo iya l'ishi; kele o gbushiru ndu Gibiyonu.”

²Ndu Gibiyonu ono be ta abudu ndu Ízurelu gedegede. Epe ị ndu phoduru nụ ị ndu Amoru. Ndu Ízurelu riburu phe nte l'ephe e-dobe phe ndu. Sọlu gudekwanu 'amenya ke ndu Ízurelu waa ndu Jiuda bya egbushigbua phe. Oo ya ị ndu; eze, ị ndu Dévidi bya akpakọ ndu Gibiyonu pfuru yeru phe.

³Ọ jia phẹ sụ: “? Bụ ọnu bẹ mu e-meru unu? ? Denu ọ ọ mu e-me mezita unu; k'ophu unu a-ọnu ọnu-oma nū ndu ono, bụ okiphe Chipfu?”

⁴Ndu Gibiyonu ono sụ iya: “Anyi ta akpadu ishi mkpọla-ọchaa ọzoo mkpọla-ododo, shi Sọlu l'ẹka; ọzoo ophu shi l'ẹka ndibe iya. Ophu o tọ dukpodanu anyi l'ẹka g'anyi gbua nemadzu l'alị Ízurelu.” O sụ phẹ: “Oo iphe, unu sukpoerupho ọ mu meeru unu bẹ mu e-meru unu.”

⁵Oo ya bụ; ephe sụ eze: “Oo nwoke ono, bụ iya gbushiru anyi ono; bya achipyaa g'ee-shi g'e gbushigbua anyi; g'anyi ta aphoduhe l'alị Ízurelu l'ophu ono;

⁶bẹ ee-duta unwegirima iya unwoke ẹsaa dufutaru anyi g'anyi je megbushia l'iphu Chipfu lẹ Gibiya, bụ mkpukpu Sọlu, bụ onye ono, Chipfu hotaru ono.” Oo ya bụ; eze bya asụ phẹ: “Mu e-duta phẹ nū unu.”

⁷Obenu l'eze, bụ Dévidi gude k'ogbandzu yele Jionatanu, bụ nwa Sọlu nọ l'iphu Chipfu gbaa dobe Mefibosheti ndzụ. Mefibosheti bụ nwa Jionatanu; bya aburu nwanwa Sọlu.

⁸O buru Amoni waa Mefibosheti, bụ unwoke labo, Rizupa, bụ nwada Aya nwutaru Sọlu bẹ o kpuru nū phẹ. O kpatakwapo unwoke ise, nwada Sọlu, bụ Merabu nwutaru nū phẹ. Epha ji nwanyi ono bẹ bụ Adurelu nwa Bazilayi, bụ onye shi mkpukpu Mehola.

⁹Dévidi kpuru phẹ nū ndu Gibiyonu ono; ephe je megbushia phẹ l'eli úbvú l'iphu Chipfu. Ephe n'ẹsaa ono lakota l'ugbo lanu. O buru mboku mbu lẹ teke aawataje akpata iphe, e meberu l'alị; mbukpoepo lẹ teke aabya awata egbu balị bẹ e gbushiru phẹ.

¹⁰Noo ya; Rizupa, bụ nwada Aya je achita uwe-aphu phushi l'eli oke mkpuma; zee. Nwanyi ono shi lẹ teke aawataje akpata iphe, e meberu l'alị; nodu l'ẹka ono swiru odzu unwu iya ono jeye mini, shi l'igwe dzeru kpua phẹ. Ophu o to kwejeduru g'ọ duru ẹnu, ephe l'eli, a-bya ebvua odzu phẹ ọnu l'eswe; ọzoo anu-egbudu a-byapfuta phẹ l'enyashi.

¹¹E pferupho Dévidi iphe, nwada Aya ono, bụ Rizupa meru; mbu nwanyi ono, Sọlu ta ludu okpobe alulu ono;

¹²Ọ tugbua je achita okpu Sọlu yee ke nwa iya, bụ Jionatanu l'ẹka ndu mkpukpu Jiabeshi-Giladu wushiru iya. Ndu Jiabeshi jeru lẹ mpya je achita iya l'eze edupfu, nọ lẹ mkpukpu Betu-Shanu l'ẹka ndu Filisitayinu gburu phẹ woru kobe l'eli úbvú Gilubowa.

¹³Dévidi tuko okpu Sọlu me ke nwa iya, bụ Jionatanu g'ọ ha chilata e -shi l'ẹka ono; mekpoo ke ndu ophu e megbushiru emegbushi.

¹⁴E mechaa; ephe woru okpu Sọlu yee ke nwa iya, bụ Jionatanu je elia lẹ mkpukpu Zela, nọ l'alị ndu Benjaminu l'ilu Kishi, bụ nna Sọlu. Ephe tuko iphe, eze karu phẹ g'ephe mee; mekota. E mechaa; Chileke meeru phẹ iphe, ephe rworu iya l'opfu ẹhu alị ono.

Ogu ozo, ndu Ízurelu waa ndu Filisitayinu nọ lwugbabe

(1Iphe 20:4-8)

- 15**A nonyakwaa ozo; ogu daru ndu Filisitayinu waa ndu Ízurelu. Dévidi tugbua yee ndu ojogu iya jeshia etso ndu Filisitayinu ogu. A nonyaa; ophu ike aduedu Dévidi.
- 16**Ishibibenobu, bu onye lanu l'eri Rafa ria l'owa ge ya gbua Dévidi. Nwoke ono be erwa arwa iya du shekelu onyirubvu ukporo iri l'ise. Teme o turu ogu-echi ophu.
- 17**Ole Abishayi nwa Zeruya be byaru agbataru Dévidi; bya echitsua onye Filisitayinu ono; woru iya gbua. Oo ya bu; ndu ojogu Dévidi ribuaru iya angu su l'o to byadu etsobaa phe je ogu ozo k'opu a taa tsonyidu oroku ndu Ízurelu.
- 18**Tobudu iya bu; e mecha; ogu ozo daaru epe le ndu Filisitayinu le mkpuku Gobu. O buru teke ono be Sibekayi, bu onye mkpuku Husha gburu Safu, bu onye lanu l'eri Rafa.
- 19**Ogu ozo bya adaar epe le ndu Filisitayinu le mkpuku Gobu. Eluhananu nwa Jiayi, bu onye mkpuku Betulehemu gbua Lahumi, bu nwune Golayatu, bu onye Gatu; mbu onye ono, igbidigbi arwa, o gude du ge k'oshi, onye ekweje ekwa egudeje ekwe ekwa.
- 20**Ogu ozo bya adaa le mkpuku Gatu. L'eka ono be o nweru nwoke lanu, haepo ke kpikpirikpii. O fuchaaru mkpushi-eka ishii ishii l'eka iya ephenebo; waa mkpushi-okpa ishii ishii l'okpa iya ephenebo. Mkpushi-eka iya; me k'okpa iya tukoru du ukporo l'eno. Nwoke ono bukwapho eri Rafa.
- 21**Nwoke ono bya awataepo ako ndu Ízurelu onu; nwa nwune Dévidi, bu Jionatanu nwa Shimeya woru iya gbua.
- 22**Ndu ono ephen'eno shikota l'eri Rafa, bu onye mkpuku Gatu. O buru l'eka Dévidi yele ndu-ozu iya be epe shikota nwushihu.

2 Samelu 22

Ebv u ajaja, Dévidi guru

(Ebv u 18:1-50)

- 1**Dévidi guru ebvu-a nu Chipfu le mboku, Chipfu nafutakotaru iya l'eka ndu ohogu iya l'opu; kekele ke Solu.
- 2**O guru su: Oo Chipfu bu agbara-mkpuma nkemu; bya aburu ulo-ezeru-ndzu mu; buru onye agbafutaje mu nu.
- 3**Oo Chileke mu bu agbara-mkpuma, mu agbabaje je edomia onwomu. Oo ya egbobutaje mu g'o to du iphe, e-me mu nu. O buru iya bu onye eegudeje okpehu iya dzoo mu. Oo l'ime iya be mu agbabaje je anodu zeeru ndzu. Teme o buru iya bu onye ndzota mu; oo yebedua adzoje mu l'eka ndu eme mu mkpawere.
- 4**Oo Chipfu ono, bu onye gbaru g'a jaje iya ajaja ono be mu arakuje; l'o dzota mu l'eka ndu ohogu mu.

- ⁵Anwuhu shiwaa chie mu egbirigba l'olu. Ola-l'iswi nodu aso gborogboro ge mini aso-pfuta mu.
- ⁶Ekpa oyi ali-maa nwua mu kpalaa. Anwuhu shiwaa woru onya gbaberu mu.
- ⁷Ole teke mu eje iphe-ehuka be mu rakuru Chipfu. Mu rakuru Chileke mu. O gbegbe l'eze-ulo iya numa olu mu; mkpu, mu chiru chiku iya rwua ya nchi.
- ⁸Noo ya bu; eliphe l'ophu tehu kparikpari; nmakota jijijijii. Eka a turu okpa imigwe l'ophu nmaghukota anmaghu; kele Chileke be ehueghueghu.
- ⁹Enwuru oku, shi iya l'imi akpu ke tututuutu. Oku, shi iya l'onu afushi tukoeppo iphemiphe ekepyashi. Icheku-oku iphe, o kepyashiru toko ekameka ata pfupfupfu.
- ¹⁰O dojaha akpaminigwe ke tararara; o buru iya alufuta. Ochii, gbahuru ke tsukiribaa nodu iya le mkpula okpa.
- ¹¹O nodu l'eli chierobu phezeta. O buru le nku pherephere be o degeru ezi phuphupu.
- ¹²O woru ochii kpuchia onwiya; mbu l'urwukpu, mini jiru ejiji be no-pheru iya mgburugburu.
- ¹³Icheku-oku, ata pfupfupfu shi l'ogbunwiiinwii ya agushihugba.
- ¹⁴No iya; Chipfu gbegbe l'akpaminigwe tua egbigwe. A numa olu onye ono, bu Okalibe-kakota-shii ono.
- ¹⁵O gbaa apfu gude chikaa ndu ohogu iya. Ebemu-igwe be o kuru ke phoo; ephe zekota l'oso gbalachaa.
- ¹⁶Chipfu ziru unme fuu gboru ndu ohogu iya uja. Eze Enyimu sokahu ebo; k'ophu a humachaa ru ohu-enyimu l'enya; kpuhachaa eka a turu okpa-ali mgboko; a huma.
- ¹⁷Chipfu gbegbe l'imigwe tufu eka; zu mu gburumu; gufuta mu l'ogbu-mini.
- ¹⁸O nafutakwaru mu pho l'eka ndu ohogu mu, okpehu du; me l'eka iphe, bukpuo ndu mu du ashi; noo kele ephe kariru mu eka.
- ¹⁹Mboku ono, mu eje iphe-ehuka ono be ephe tsoru mu ogu; obenu l'oo Chipfu gbataru mu ike.
- ²⁰Oo yebedua kutaru mu dobe l'eka mu no tusaru ehue. O yeru mu eka nafuta mu l'ogu; kele mu du iya l'obu.
- ²¹Chipfu buru mu nggo; kele mu bu onye pfuberekoto; mbu kele mu bu onye iswi du mma.
- ²²Noo kele o buepho uzo, Chipfu toru be mu anoduje etso. Ophu mu egudejedu eme ejo-iphe gbakuta Chileke azu.
- ²³Ekemu Chipfu be mu nwubekotaru enya g'ohu. Teme ophu mu aghajeduru iphe, o suru g'e meje okotazu.

- 24O tọ dukpoodaa ẹka uta du mu l'ehu l'atatiphu iya. Mu sedekpøerupho onwomu; ophu o dudu ẹjo-iphe, mu yejeru ẹka.
- 25Chipfu buru mu nggo; kele mu bu onye pfulberokoto; mbu l'o buru mu nggo; kele mu bu onye iswi du mma l'iphu iya.
- 26Ndu yeru ngu obu be iigoshije l'i yeru obu. Ndu debe ree be iduebejeru ree.
- 27Ndu obu phe guru iphoro be iidobejeru obu iphoro. I nodu emejeru ndu doberu uzo phe nggodogo nggodogo g'umere phe gbaru.
- 28Ndu wozeru onwophe ali be iidzotaje; obenu l'anya ngu aduje l'eka ndu eku onwophe no g'i wozeta phe ali.
- 29Oo gubedua, bu Chipfu bu oroku mu. Oo gube Chipfu emeje g'iphoro duru mu l'eka ochii agba.
- 30Eshinu iyeru mu ẹka be mu e-tso ikpoto ndu ojogu ugu. Igbulo mkpukpu phe be mu e-nyi; eshinu mu le Chileke swi.
- 31Uzo Chileke be ntucha adudu m'ilile; opfu Chipfu bukota okpobe opfu. Oogbobutaje ndu gbabarū l'ime iya je anodu ezeru ndzu.
- 32? Bu onye bubaa Okalibe, du nu, abudu Chipfu kpoloko? ? Bu onye buba agbara-mkpuma, abudu Chileke anyi?
- 33Oo Chileke emeje g'ike du mu. O buru iya meru uzo mu; ophu ntucha adudu iya.
- 34Oomeje ge mu pfu shoshoo ge mgbada; mbu l'oomeje ge mu pfuru pfushia ike l'eli ubvu.
- 35O ziru mu; mu maru g'aalwuje ugu; k'ophu bu l'o tọ dudu m'obeta o buru apfu, e kweru l'igwe; mu aduele-a ike gbaa ya.
- 36Oo gube Chipfu egbobutaje mu; shi egube ono dzoo mu ndzu. Eka iyeru mu ekutseje mu.
- 37I mesataru uzo mu osa; g'okpa te echiswafu mu.
- 38Mu gude oso chia ndu ohogu mu; gwee phe arakabya; ophu mu anmaduru nggu; jasū mu mee phe; ephe buru mkpurupyata.
- 39Mu chiru phe pyakapyaka; k'ophu ephe ta aduedu ike gbelibaa ishi ozo. Ephe zegbaepho ke manyoo le mgboru okpa mu.
- 40Oo ike nkengu be mu gude eje ugu. Ndu etso mu opfu be i meru; ephe gbushiru mu ikpere.
- 41Ndu ohogu mu be i meru; ephe chie okpa l'oso. I mee; mu tuko ndu mu du ashi gbushikota.
- 42Ephe chia mkpu; ophu o dudu onye gbaru phe mkpu. Ephe raku Chipfu; ophu o yeduru phe onu.

⁴³Mu gweru phe uji mee phe; epe du g'urwuku, du l'ali. Mu tsua phe otsuepfu; zo phe tolitoli g'epuchi, no le gbororo.

⁴⁴I nafutaru mu l'eka ndu etso mu opfu; bya emee mu; mu buru ishi ohamoha; k'opfu ndu mu eshidu maru byaru alwakota mu l'eka.

⁴⁵Ndu ohozo ephozekotaru mu. Epe -numa l'owa-a iphe, mu suru g'e mee baa; epe emee ya egwegwa.

⁴⁶Meji tofukota iphe, bu ndu ohozo ono; teme epe nodu eshijegbaa l'eka epe shi wohaa onwophe phuru yeyeye byapfuta mu.

⁴⁷Chipfu nokwa ndzu; unu tua agbara-mkpuma nkemu ono epha! Unu kutsee Chileke; l'oo ya bu onye adzoje mu nu!

⁴⁸Oo Chileke ejeje agwata ugwo iphe, ndu ohogu mu meru mu. O meru; unwu-eliphe nodu mu le mkpula.

⁴⁹Oonafutaje mu l'eka ndu ohogu mu; oowolije mu eli woru mu doghaa ndu etso mu opfu. Ogbafutaje mu l'eka ndu emeje nemadzu iphe-kpangangaa.

⁵⁰Noo g'o gude mu je a-pfuru l'iphu ohamoha kele gube Chipfu ekele. Mu a-gu ebvu gude tua ngu epha.

⁵¹Onye eze, o hotaru be oomeje g'o mekpee l'ogu. N-yemobu iya be onoduje egoshi onye o wuru manu l'ishi, bu Dévidi yee oshilokpa iya jasu le tuutuutuu le miimiimii.

2 Sámelu 23

Opfu ikpazu, Dévidi pfuru

¹Owaa bu opfu ikpazu Dévidi: “Owaa bu iphe, Dévidi; nwa Jiesi pfuru; mbu opfu nwoke ono, Chileke woliru eli; mbu nwoke ono, Chileke ke Jiekopu wuru manu l'ishi g'o buru eze ono; mbu onye ono, agujeru ndu Izurelu ebvu, atso utso ono.

²Unme Chipfu be shi l'onu mu epfu opfu. Opfu iya degeru mu edegeru l'ire.

³Chileke ke Izurelu be pfuwaru opfu. Oke mkpuma ke ndu Izurelu be suru mu le-a: ‘Teke eze eme iphe, pfuru oto; mbu teke oome atsu Chileke ebvu

⁴be oduje g'iphoro nchi-abohu le teke enyanwu awa awawa; mbu le mboku igwe du korokoro. Oduje g'anwu, emeje g'eswa, akpo-futa akpo-futa l'ali sha ke biribiri me mini dzeghepho.’

⁵Oo egube ono be ndibe mu epe le Chileke du le ree. Noo kele o meru; mu l'iya gbaa ndzu, a-no jasu l'ojejoje. O meru iya o nguru anguru l'iphemiphe; bya emee ya g'o to du iphe, e-mebyi iya nu. Chileke e-me ge ndzota mu dzua oke; teme iphemiphe, agu mu nu be oo-meru mu.

⁶Obenu le ndu bu ogalemkpa be ee-tuphachaa etupha g'onye tupharu obvu; kele e te egudejedu eka achita phe.

⁷Onye edenyi ẹka l'obvu ono gudefutaje iphe-ígwè ọzoo oshi arwa; ọ buru ọku bẹ aakpokotaje iya l'ẹka ọ wushiru.”

Ndu a maru amaru ẹ ndu ojogu Dévidi

(1Iphe 11:10-19)

⁸Waa ẹpha ndu ojogu, ike kakota ẹ ndu ojogu Dévidi baa: Ishubelu onye Hakumonu. Oo ya shi buru onye-ishi umadzu ẹto, kachakpoo mkparawa. O gudeje arwa jepfu unu umadzu labo ogu; gbushikota phe l'ugbo lanu.

⁹Onye ophu etsota iya nu bu Eleyaza nwa Dodo; onye shi l'eri Ahowa. Yẹbedua yikwapho l'umadzu ẹto ono, kachakpoo mkparawa ono. O tso Dévidi pfubyishia ndu Filisitayinu ẹ teke ẹphe dzukoberu k'ogu ẹ Pasu-Damimu. Ndu Izurelu tsulaaharu azu;

¹⁰yẹbedua pfushiepho ike gbua ndu Filisitayinu jasuru ẹka tsushihu iya mee; mbu ẹka kwekobecheaa ya ekwekobe nyakuru l'ogu-echi, ọ pa. Chipfu mee; ọ lwu-kpee k'ophu paru ẹka apaa ẹ mboku ono. E mechaa; ndu ophu wu-phu azu. O buwaru iphe, ẹphe wu-phudoru azu bu g'ẹphe gwee ivu ndu e gbushiru egbushi.

¹¹Onye k'ẹto, etsota iya nu bẹ bu Shama nwa Agee; onye Hararu. Ujiku lanu bẹ ndu Filisitayinu kpako-dzujeru onwophe k'ogu ẹ Lehi; mbu l'egu, azamu jiru ejiji ono. Ndu ojogu ndu Izurelu yekota okpa l'oso gbalachaa.

¹²Obenu ẹ Shama pfushierupho ike l'echilabo ẹgu ono; tsoo ndu Filisitayinu ogu; gbushia phe. Chipfu mee; ọ lwu-kpee k'ophu paru ẹka apaa.

¹³O be ẹ teke akpata iphe l'alẹ; umadzu ẹto l'ime ukporo umadzu l'umadzu iri, bugbaa ndu-ishi ogu wuru jepfu Dévidi l'ogba Adulamu. Teke ono bẹ ikpoto ndu Filisitayinu wufutaru bya adoru ẹ nsuda Refayimu.

¹⁴Teke ono bẹ Dévidi no l'ime ẹka ọ kpuru; o shihu ike. Ndu ojogu ndu Filisitayinu doru ẹ mkpukpu Betulehemu.

¹⁵Ẹgu-mini wata agushi Dévidi ike; ọ su: “Oowa-e; ọ du mu g'a su l'o nweru onye gbẹ je ekutaru mu mini ẹ welu, no-kube ẹka eeshije abahu ẹ Betulehemu gẹ mu ngua!”

¹⁶Oo ya bu; unwoke ẹto ono, kachakpoo mkparawa ono kpata uto ghata ndu ojogu ndu Filisitayinu l'ẹka ẹphe doru ono; je ekuta mini ẹ welu ono, no-kube l'ẹka ono, eeshije abahu ẹ Betulehemu ono; wotaru Dévidi. Ole Dévidi te ekwedu ngua mini ono; o woru iya wushiaru Chipfu;

¹⁷bya asu: “Tuswekwa! Jiko Chipfu; te ekwekwa gẹ mu mee egube iphe owa-a. ? Mini-a ta aduada ududu gẹ mee ndu-a, woru ndzu phe tsebe l'onu ẹta g'ee-shi g'e kuta iya-a too?” Oo ya bu; ophu ọ nguduru mini ono. Nochaa eze iphe, unwoke ẹto ono, kachakpoo mkparawa ono megbaberu bu ono.

¹⁸Abishayi, bu nwune Jiowabu nwa Zeruya bu onye-ishi umadzu ẹto ono. Abishayi bẹ gudeje arwa iya jepfu umadzu ukporo iri l'ise ogu; gbushikota phe; e shiwaro nno; a maru ẹpha iya gẹ k'umadzu ẹto ono.

- ¹⁹Oo yēbedua bē a kachaa akwabē ùbvù l'ime ùmadzu ẹto ono. O buri yēbedua bu onye-ishi phē; ọle a ta gụkwānuru iya ye l'ùmadzu ẹto ono.
- ²⁰Benaya nwa Jiehoyada bu onye ọkpēhu dū shii. Ẹka o shi bu Kabūzēlu. Yēbedua mekwārūpho eze iphe, parū ẹka apaa. Oo yēbedua gburu unwoke Mówabu labo ono, ọkpēhu dū-be g'oduma ono. O bụkwaru iya pho jejeru egbua oduma l'ime nsu le mboko, akamini, kpukoru akpuko dashiru.
- ²¹Benaya gbujekwarūpho oke mkparawa onye Ijiputu, pa arwa. Iphe, yēbedua gude bapfu iya bu mgboro; bya anata nwoke Ijiputu ono arwa, o gude l'eka; gude nmagbua ya.
- ²²Noo ge Benaya nwa Jiehoyada meberu ike bu ono. E shiwaro nno; a maru epha iya ge k'umadzu ẹto pho, kachakpo mkparawa pho.
- ²³O bu onye a kwatakpo akwabē ùbvù l'ime ukporo umadzu l'umadzu iri pho. O le a ta gụkobeduru iya l'ime umadzu ẹto pho. Dévidi meru iya onye-ishi le ndu ojogu, eche iya nche.
- ²⁴Asahelu, bu nwune Jiowabu yi l'ime ukporo umadzu l'umadzu iri ono. Ndu ozo bu Eluhananu nwa Dodo ke Betulehemu;
- ²⁵waa Shama ke Harodu; waa Elika ke Harodu;
- ²⁶waa Helezu ke Peleti; waa Ira nwa Ikeshi ke Tekowa;
- ²⁷waa Abiyeza ke Anatotu; waa Mebunayi ke Husha;
- ²⁸waa Zalumu, bu onye shi l'eri Ahowa; waa Maharayi ke Netofa;
- ²⁹waa Helebu nwa Bana ke Netofa; waa Itayi nwa Ribayi ke Gibiya, du l'ali ndu Benjaminu;
- ³⁰waa Benaya ke Piratonu; waa Hidayi, shi l'uzo nggele Gashi;
- ³¹waa Abiyalubonu ke nsuda Jiordanu; waa Azumavetu ke Bahurimu;
- ³²waa Eliyahuba ke Shalubonu; waa unwu Jiashenu; waa Jionatanu;
- ³³waa Shama ke Hararu; waa Ahayamu nwa Shararu ke Hararu;
- ³⁴waa Elifeletu nwa Ahasubayi ke Maka; waa Eliyamu nwa Ahitofelu ke Gilo;
- ³⁵waa Hezuro ke Kamelu; waa Parayi ke Arabu;
- ³⁶waa Igalu; nwa Netanu ke Zoba; waa Bani; onye ipfu Gadu;
- ³⁷waa Zeleku, bu onye Amonu; waa Naharayi ke Berotu, bu onye achijeru Jiowabu nwa Zeruya ngwogu;
- ³⁸waa Ira ke Itiru; waa Garebu ke Itiru kwapho;
- ³⁹meɸua Uraya, bu onye Hetu. Ephe tukoru du ukporo umadzu l'umadzu iri l'esaa.

2 Sámeļu 24

Dévidi agụ ndu Ízureļu oḡu

(1Iphe 21:1-6)

¹Tòbudu iya bụ; Chipfu vọru oku wua ẹhu l'opfu ẹhu ndu Ízureļu. O kpalia Dévidi g'o mee g'iphe-ẹhuka dapfuta phe; bya asụ iya: “Tugbua je agua ndu Ízureļu waa ndu Jiuda oḡu.”

²Oo ya bụ; eze, bụ Dévidi zia Jiowabu; me ndu-ishi ndu ojogu, ẹphe l'iya no su: “Unu jegbabekota ipfu, dukota le Ízureļu; e -shi le mkpukpu Danu je akpaa le mkpukpu Biye-Sheba gukota phe oḡu k'ophu mu a-maru g'ẹphe ha.”

³Jiowabu su: “Ge Chipfu, bu Chileke ngu mekwaa ge ndu ono kabaa igwerigwe ugbo ukporo ise eme le g'ẹphe ha nta-a; teme ge gube nnajiuphu mu, bu eze gudekwapho enya ngu huma iya. Ole ? bukwanu ke gunu meru g'o gude gube nnajiuphu mu, bu eze nodu eme gi mee ẹgube iphe ono?”

⁴E mechaa; opfu eze dagbunaa ke Jiowabu; yele ke ndu-ishi ndu ojogu iya ono. Oo ya bụ; Jiowabu waa ndu-ishi ndu ojogu ono shi l'iphu eze tugbua jeshia agụ ndu Ízureļu oḡu ono.

⁵Ẹphe bya adaepho enyimu Jiòdanu; ẹphe doshia le mgboru mkpukpu Arowa; mbu l'uzo ndohali mkpukpu, no l'echilabo nsuda; bya agbe l'eka ono jeshia l'ali ndu Gadu jerwuchaa mkpukpu Jiaza.

⁶Ẹphe bya abahu l'ali Giladu; me mkpukpu Tatimu-Hodushi. Ẹphe gbẹ l'eka ono bahu le mkpukpu Danu-Jianu; bya agbajia lufu jeshia mkpukpu Sayidonu.

⁷Ẹphe bya eshi nno chebwaro mkpukpu ndu Taya, a kpushiru ike; jekota mkpukpu, dukota l'ali ndu Hevu yele ndu Kėnanu. Ẹphe mechaa kpochia ya ishi le mkpukpu Biye-Sheba, no l'echiegu ndohali l'ali ndu Jiuda.

⁸Ẹphe jeru iya onwa tete l'ujiku ukporo teme ẹphe lwaphuta azu le Jierusalemu.

⁹Jiowabu bya akporu eze, bu Dévidi ge ndu ono, o guru oḡu ono hakotakpoo. Ndu Ízureļu du ukporo unu unwoke ugbo ukporo ise, bu ndu ike du l'ogụ; bya aburu ndu aduje ike paa ogu-echi. Ndu Jiuda du ukporo unu unwoke ugbo ukporo eto l'unu unwoke ugbo ukporo labo l'iri.

¹⁰Dévidi guchaepo ndu ono oḡu ono; meji tsukaha iya. Oo ya bu; o su Chipfu: “Mu meakwaru iphe-ẹji, paru eka le k'iphe-a, mu meru-a. Ole-a; jiko Chipfu; wofunu ejo- iphe ono, mube onye-ozu ngu meru ono; kele oo eswe be mu meru ono.”

¹¹Dévidi bya etehushia le nchitabohu iya; Chipfu pfuwaru Gadu, bu onye mpfuchiru Chileke; mbu onye aphujeru Dévidi ophulenyia su iya:

¹²“Je asu Dévidi le Chipfu suru-a: Uzi iphe eto be mu doberu ngu; gi hata nanu, mu e-me ngu.”

¹³Oo ya bu; Gadu jepfu Dévidi je asu iya: “? Bu g'ejo okpa-nri byapfuta ngu noo apha eto l'ali-a? To ? bu gi gbaa oso onwa eto l'eka ndu ohogu ngu achi ngu? To ? bu

g'ejo iphe-ememe bya emee n̄o ujiku ẹto l'alì ngu? Nta-a bukwa g'ì rĩa ya arìri karu mu; gẹ mu maru iphe, mu e-je epfuaru onye ono, ziru mu n̄u ono.”

14Dévidi bya asu Gadu: “Mu n̄oakwa l'oke iphe-ẹhuka. Ọle ọ kakwa ree g'anyi daba l'ẹka Chipfu; eme l'anyi dabaru nemadzu l'ẹka; noo kele obu-imemini Chipfu paru ẹka apaa.”

15Ọo ya bu; Chipfu loru ejo iphe-ememe tu ndu Ízurelu shita l'utsu mboku ono jeye mboku, ọ tu-buru phe. E -shi le Danu jasụ le Biye-Sheba be ephe du ukporo unu nemadzu ugbo esato l'unu iri l'ise nwushihu.

16Ojozi-imigwe ono machiepho ẹka gẹ ya mebyishia mkpukpu Jierusalemu; o rwua Chipfu l'ehu; mbu ejo-iphe ono, dapfuru phe nu ono. O pfuaru ojozi-imigwe ono, egbushi ndu ono su iya: “Ọ duwaa ree! Sephu ẹka ngu azu paru phe haa!” Teke ono be ojozi Chipfu ono nowaa l'oma ẹka Arawuna, bu onye Jiebusu anoduje echishi eswa le balì iya.

17Dévidi humapho g'ojozi-imigwe ono gude echitsushi ndu ono; ọ su Chipfu: “Oowa-e; ọ kwa mbedua meru iphe-eji; mbu l'oo mbedua be meru iphe, adudu ree. ? Unwu aturu-a mehunuru ole? G'ọ bu-chiaru mbedua waa ndibe nna mu be ii-da ejo ẹka l'ehu!”

18Ọ buru mboku ono be Gadu byaru abyapfuta Dévidi bya asu iya: “Tugbua je akpuru Chipfu oru-ngweja l'oma ẹka ono, Arawuna, bu onye Jiebusu anoduje echishi eswa le balì ono.”

19Ọo ya bu; Dévidi tugbua jeshia eme egube ono, Chipfu shi l'onu Gadu zia ya ono.

20Arawuna tufuepho enya huma eze, bu Dévidi yele ndu-ozì iya g'ephe eje abyapfuta iya; o je je adaa kpurumu l'ataphu eze phozeta kwabe iya ubvu.

21Arawuna su: “? Bukwa ole be nnajiuphu mu, bu eze byapfutasharu onye-ozì iya?” Dévidi su iya: “Mu byaru gẹ mu zua ngu ẹka iichishije balì gẹ mu kpuru Chipfu oru-ngweja; k'ophu ejo iphe-ememe-a, emenua e-buhu.”

22Arawuna su Dévidi: “Gẹ gube nnajiuphu mu, bu eze wotakpoepho iphe, du ngu ree gude gwee ngweja obu. Waa eswi, ee-gude gwee ngweja-akpo-oku nu Chipfu; waa iphe, eegudeje echishi eswa l'ereshi; me odogoro, eegudeje tugbabe eswi g'ọ buru nku.

23Gube eze; iphemiphe ono g'ọ ha bu mube Arawuna nuru ngu iya.” Arawuna bya asukwa iya pho: “Gẹ Chipfu, bu Chileke ngu natakwaro ngweja ngu.”

24Eze, bu Dévidi su Arawuna: “Waawakwa; mu a-pfu ngu ugwo iya. Mu te egudedu iphe, adudu iphe, o phuru mu egweru Chipfu, bu Chileke mu ngweja-akpo-oku.” Ọo ya bu; Dévidi zua oma ẹka anoduje echishi eswa le balì ono azuzu; me eswi ono. Ọ buru mkpola-ochaa, erwa iya du ukporo shekelu labo le shekelu iri be o gude zua ya.

25Dévidi bya akpuru Chipfu oru-ngweja l'ẹka ono; bya egwee ngweja-akpo-oku; me ngweja-ehu-guu l'eli iya. Chipfu numa arworwo, ọ rworu iya l'opfu ehu ali Ízurelu ono; ejo iphe-ememe ono, eme nu ono mebuhi.

1 Ndu eze

1 Ndu eze 1

Teke Dévidi bụwaa ọgerenya

¹Teke ono bę eze, bụ Dévidi kahụwaru; nọwaa apha, dụ igwerigwe. Oyi nọdu anọduje atsu iya m'obeta a phukputechaa ya ukpo.

²Ọo ya bụ; ndu-ozii iya bya asụ iya: “G'anyi lenaaruu gube nnajiiuphu anyi, bụ eze ęnya nwamgboko, nwoke teke ejepfuswee; g'ọ bya eswiru gube eze; letaję ngu ęnya. Tęme ọoze-kubeje ngu; k'ophu bụ l'oo-meje g'ęhu vu gube nnajiiuphu anyi, bụ eze ọku.”

³Ọo ya bụ; ęphe tuko alii Ízuręlu l'ophu tukota jii; l'ęka ęphe achọ nwamgboko, ama mma. ęphe bya ahuma nwamgboko, ępha iya bụ Abishagu; onye mkpukpu Shunemu. ęphe dutaru iya eze.

⁴Nwamgboko ono bę ama ntumatu. O nọdu eletaję eze ęnya; bya ejeru iya ozi. Ọle eze te ejepfujeduru iya.

Adonijia eme g'o mee onwiya eze ndu Ízuręlu

⁵Noo ya; Adonijia, bụ nwatibe nwanyii ono, bụ Hagitu wata ekuli onwiya eli asuje: “Mu a-buru eze.” O bya akwakoberu onwiya ugbo-inya; mę ndu agbaję l'inya; bya edobe ukporo umadzu labo l'umadzu iri g'ęphe vutajęru iya ọzo.

⁶Ọphu nna iya abajęduru iya mba lę k'iphe ono kę g'ọ jii ya sụ: “? Bụ gunu meru g'ọ gude i nọdu eme iphe, dụ nno?” Adonijia ono bę amashii mma ike. O buru iya bę a nwuru tsobe Abusalomu.

⁷Adonijia je achii-koshi Jiowabu, bụ nwatibe nwanyii aza Zeruya; waa Abyiyata, bụ onye uke idzu iya; ęphe tsoru iya; tųru ikę yeru iya.

⁸Obenu lę Zadoku, bụ onye uke Chileke; mę Benaya; nwa Jiehoyada; mę Nętanu, bụ onye mpfuchiru Chileke; waa Shimeyi; mę Reyi; mę ndu ojogu, eche Dévidi nche ta adudu g'ęphe ha, tųru ikę yeru Adonijia.

⁹Adonijia je anodu lę “mkpuma agwo” lę mgboru Enu-Rogelu gbushia aturu; mę oke-eswi; mę eswi, tsugbaaru ęba gude shia nri. O kua unwanu iya l'ophu, bụ iya bụ unwu eze; bya ekukwapho unwoke ndu Jiuda, bụ ndu eje ozi l'ibe eze lę nri ono.

¹⁰Ọle o to kuduru Nętanu, bụ onye mpfuchiru Chileke; ọphu o kuduru Benaya; mę ndu ojogu, eche eze nche; waa Sólomonu, bụ nwanna iya.

Batusheba ejepfu Dévidi l'opfu ęhu Adonijia

¹¹Tobudu iya bụ; Nętanu bya epfuaru Batusheba, bụ ne Sólomonu; sụ iya: “? Tii numaduru lę Adonijia, bụ nwa kę Hagitu bę bụwaa eze; ọphu nnajiiuphu anyi amadu?”

¹²Byakwapho nta-a gę mu karu ngu g'ii-me dzota ishi ndzu ngu; waa kę nwa ngu, bụ Sólomonu.

13Tugbuekwapho nta-a bapfu eze, bu Dévidi je asu iya: “Nnajiuphu mu, bu eze; ? ti ribunuru-a mube nwozi ngu nte l'oo nwa ngu, bu Sólomonu be a-buru eze no-tsota ngu l'aba-eze ngu? ? O nwuhunuru inwuagha be o gbẹ buwarunu Adonijia bu eze obu?”

14Su: teke ono, i no l'eka ono; unu l'eze kpuru opfu ono l'onu epfu ono; be mu a-bata bya agbaru ido yeru ngu l'opfu ono.

15Oo ya bu; Batusheba bya atugbua bapfu eze l'ulo iya. Eze l'onwiya buwaa okpobekpo nwoke ogerenya. Abishagu, bu onye Shunemu ono buru iya eleta iya enya.

16Batusheba bya adaa kpurumu byishi ikpere l'iphu eze. Eze jia ya su: “? Bu gunu be mu e-meru ngu?”

17Batusheba su iya: “Nnajiuphu mu; i gude epha Chipfu, bu Chileke ngu ribuaru mube nwozi ngu nwanyi nte su le nwa ngu, bu Sólomonu be a-buru eze no-tsota ngu l'aba-eze ngu.

18Ole-a; humawaro le Adonijia gbẹ buwaru nu eze obu nta-a; ophu gube nnajiuphu mu, bu eze ta amadu.

19O gbushiwaru ikpoto oke-eswi; me eswi, tsuchaaru eba; me aturu; bya ekuwa unwu eze l'opfu; kua Abyiyata, bu onye uke Chileke; me Jiowabu, bu onye-ishi ndu oogu; ophu o to kuduru nwa ngu, bu Sólomonu.

20Gube nnajiuphu mu, bu eze; nta-a be ndu Izurelu l'opfu noakwa ele ngu enya; g'ephe maru onye ii-mechaa su g'o nodu l'aba-eze gube nnajiuphu mu, bu eze no-tsota ngu.

21Teke o dudu be oo-bukwaru a -nonyaepho mgbenya tu ngu; i lapfushia nna ngu phe; aawata eme mu le nwa mu, bu Sólomonu ge ndu meru ejo-iphe.”

22Noo ya; Batusheba yee eze kpukwaduru-a opfu ono l'onu epfu; Nétanu, bu onye mpfuchiru Chileke bata.

23A bya ezia eze le Nétanu, onye mpfuchiru Chileke be byakwaru nu. O bata; bya adaa kpurumu l'atathu eze phozeru iya.

24Nétanu bya asu: “Gube nnajiuphu mu, bu eze; ? o du gi suwaru l'oo Adonijia a-buru eze nochia enya ngu; mbu l'oo ya a-nodu l'aba-eze ngu?”

25Ntanu-a be o jewaru egbushia oke-eswi; me eswi, tsuchaaru eba; me ikpoto aturu; teme o kuwa unwu eze l'opfu; bya ekua ndu-ishi ndu oogu, bu Jiowabu; me Abyiyata, bu onye uke Chileke; mbu le nta-a be epe nokwa eri; angu epfuje su: ‘Nodukwa ndu ogologo; eze, bu Adonijia!’**26**Ole mbedua, bu onye-ozu ngu; me Zadoku, bu onye uke Chileke; me Benaya; nwa Jiehoyada be o to kuduru; ophu o kuduru nwozi ngu, bu Sólomonu.

27? Bu gube nnajiuphu mu, bu eze be meru iphe, du nno; ophu i ti kabedu mee g'anyi be ndu-ozu ngu maru l'ophu onye ophu a-nodu l'aba-eze ngu no-tsota ngu?”

Dévidi eme Sólomõnu eze

²⁸Tõbudu iya bụ; eze, bụ Dévidi sụ: “Kuaru mu nụ Batusheba.” Oo ya bụ; ọ bata bya apfuru l'iphu eze.

²⁹Eze ribua nte sụ: “Eshinu Chipfu nọ ndzu g'ọ nọ iya-a; mbụ onye ono, nafutaru ndzu mu l'iphe-ehuka l'ophu ono;

³⁰bẹ nte ono, mu gude epha Chipfu, bụ Chileke ke Ízurelu ribuaru ngu ono bẹ mu e-mekotakwa ntanụ-a; mbụ nte ono, mu riburu sụ l'oo nwa ngu, bụ Sólomõnu bẹ a-buru eze l'ozori mu; ọ buru iya a-nochi enya mu l'aba-eze mu ono.”

³¹Tõbudu iya bụ; Batusheba daa kpurumu; phozeta kwabẹ eze ùbvù; bya asụ: “Gẹ nnajiuphu mu, bụ eze Dévidi nọdukwa ndzụ ojejoje!”

³²Eze, bụ Dévidi sụ: “Kuaru mu nụ Zadoku, bụ onye uke Chileke; mę Nétanu, bụ onye mpfuchiru Chileke; mę Benaya; nwa Jiehoyada.” Oo ya bụ; epe byarwuta l'iphu eze.

³³Eze sụ pẹ: “Unu lẹ ndu-ozì mube nnajiuphu unu swiru. Gẹ Sólomõnu, bụ nwa mu nwoke nọdu l'eli inya-mulu ke mbedua g'unu duru iya jeshia lẹ nggele Gihonu.

³⁴Unu -rwuepho eka ono; gẹ Zadoku, bụ onye uke Chileke; waa Nétanu, bụ onye mpfuchiru Chileke wua ya manụ l'ishi g'ọ buru eze ndu Ízurelu. Teke ono; unu egbua opu; raa ya sụ: ‘Nọdukwa ndzụ ogologo; eze, bụ Sólomõnu!’

³⁵E -mechaa; unu awuru tsoru iya g'ọ bya anọdu l'aba-eze mu buru eze l'ozori mu; noo kele mu tawaru iya eka g'ọ buru iya a-buru eze ndu Ízurelu; buru eze ndu Jiuda.”

³⁶Benaya nwa Jiehoyada zua mgbede sụ: “Nokwa g'ọ dọ! Gẹ Chipfu, bụ Chileke ke gube nnajiuphu mu, bụ eze pfufukwaa g'i pfuru ono.

³⁷G'ọ bukwaru gẹ Chipfu swiru gube nnajiuphu mu, bụ eze bụ g'oo-swiru Sólomõnu; bya emee g'abubu ọ bụ eze kangoo ke nnajiuphu mu, bụ eze Dévidi.”

³⁸Oo ya bụ; Zadoku, bụ onye uke Chileke; mę Nétanu, bụ onye mpfuchiru Chileke; mę Benaya nwa Jiehoyada; męwaro ndu Kereti mę ndu Pẹleti doziaru Sólomõnu inya-mulu eze, bụ Dévidi; ọ nọdu iya l'eli agba; epe jeshia Gihonu.

³⁹Epe jerwuepho eka ono; Zadoku, bụ onye uke Chileke shi l'ulo-ekwa wota upyi, manụ nọ; wua Sólomõnu l'ishi. Tõbudu iya bụ; epe gbua opu; onyenonu tuko tua uzu sụ: “Nọdukwa ndzụ ogologo; eze, bụ Sólomõnu!”

⁴⁰Ndu ono g'ẹpe ha nọdu awu etso iya l'azu. Epe nọdu egbu opu; atụ uzu ehu-utso; k'ophu alì anmachaa jiiijiii l'uzu, epe atụ.

Ndzụ Sólomõnu agụ Adonijia

⁴¹Adonijia yee ndu o kuru lẹ nri ono buru g'ẹpe erighewa nri ono bẹ epe numaru uzu, aatu. Jiowabu bya anuma ọda opu, eegbu; ọ jia sụ: “? Bụ uzu gunu ada l'ime mkpukpu egube pho?”

⁴²Ọ kpukwaduru iya l'onu epfu; Jionatanu nwa Abyiyata, bu onye uke Chileke buru phereketeke. Adonijia su iya: “Gude ozi-oma bata; kele i bu okpobe nemadzu.”

⁴³Jionatanu su iya: “Tuswekwa! Nnajiuphu anyi, bu eze, bu Dévidi be meakwaru Sólomonu eze.

⁴⁴Eze be yeru iya Zadoku, bu onye uke Chileke; me Nétanu, bu onye mpfuchiru Chileke; me Benaya; nwa Jiehoyada; me ndu Kereti; me ndu Peleti. Epe mee Sólomonu o nodu l'eli inya-mulu eze agba.

⁴⁵Ọ buru le Gihonu ono be Zadoku, bu onye uke Chileke; waa Nétanu, bu onye mpfuchiru Chileke wuru iya manu l'ishi g'o buru eze. Epe shiwaa l'eka ono gude ehu-utso wufuta; k'ophu bu le mkpukpu be phuhuru ephu. O kwa iya bu uzu ono, unu anu ono.

⁴⁶Mbu le Sólomonu gbekwa noduwana l'aba-eze obu.

⁴⁷Ndu ozi eze nodukwapho etu nnajiuphu anyi, bu eze Dévidi epha asuje: ‘Ge Chileke ngu mekwa epha Sólomonu g'o ka nkengu edede; bya emekwaapho g'aba-eze iya ka nkengu shii!’ Eze l'onwiya noduwaa l'iphe-azee ya phozeta baaru Chileke eja;

⁴⁸bya asu: ‘G'ajaja buru ke Chipfu, bu Chileke ke Izurelu, bu onye ono, doberu mu ndzu; ge mu gude enya mu labo huma onye bu eze nochia enya mu ntanu-a!’ “

⁴⁹Ndzu-agugu rwuta ndu ono, Adonijia kuru le nri ono. Onyenonu gbalihu; epe gbakashihu.

⁵⁰Ndzu Sólomonu nodu agu Adonijia; o gbagbua je akwee eka le mpu, e moberu l'oru-ngweja Chipfu.

⁵¹Ama bya agbaaru Sólomonu su iya le Adonijia gudekwa ndzu gube Sólomonu, agu iya nu je akwee eka le mpu, e moberu l'oru-ngweja Chipfu; epfufe su: “G'eze, bu Sólomonu ribuaru mu nte ntanu-a l'o to byadu egude ogu-echi gbua mube onye-ozu iya!”

⁵²Sólomonu su: “O -buru l'oo-nodu egoshi le ya bu okpobe nemadzu; be egbushi ta abyadu eshi iya l'ishi darwua ali me nanu. Ole o -buru l'a humaru ejo-iphe le ndzu iya be o lajekwa maa.”

⁵³Oo ya bu; eze, bu Sólomonu bya eye ndu jeru je edufuta iya l'oru-ngweja ono. Adonijia bya ephozeru eze, bu Sólomonu. Sólomonu su iya: “Tugbua lashia ibe ngu.”

1 Ndu eze 2

Dévidi eke ekpe anụ Sólomonu

- ¹Ọ gbabeępho teke Dévidi abya anwụhu; o keru ekpe nụ nwa iya, bụ Sólomonu sụ:
- ²“Ọ gbabewaru mu l'alala, bụ iphe, duru ndiphe l'ophu. Shihukwa ike; goshije l'ị bu nwoke.
- ³Mejekwa iphe, Chipfu, bụ Chileke ngu ele ęnya iya; mbụ g'i tsoru ụzo iya; l'iimeje iphe, ọ toru ọkpa iya; mę ekemu iya; mę omelalị iya; mę iphe, o pfuru; ęgube ono, e deru iya l'ekwo ekemu Mosisu; k'ophu bụ l'ekameka; mę iphemiphe, iime a-bujeeru ngu pho upete;
- ⁴wafua k'ophu Chipfu e-meębe iphe ono, o kweru mu ukwe iya sụ: ‘Ọ -buru l'unwu ngu kwaberu onwophe ęnya; gude obu phe g'ọ ha; mę ndzu phe g'ọ ha pfushia ike l'etsotso, ęphe etso mu; bę nwa ngu nwoke ta abyadu a-nodu-bujuje l'aba-eze ndu Ízurelu anọ-dubuhu.’
- ⁵“Ozo bụ; l'ị manuru-a iphe, Jiowabu nwa Zeruya meru mu. Mbụ iphe ono, o meru umadzu labo, bụ ndu-ishi ndu ojogu Ízurelu ono, bụ Ábuna nwa Nęru; yę Amasa nwa Jieta. O gbushiru phe lę teke nchị dọ doo; woru phe gbushia g'ọ bụ l'ọo teke aalwụ ogu. Ọ gbę buru mbędua bę byaru evuru ishi ọchi phe; ana mburonu iya.
- ⁶Gude mmamiphe ngu maru iphe, ii-me iya; ọle ọo g'i ti kwekwa g'ọ kaa nka nwụhu anwụhu mgboshi.
- ⁷“A -bya l'unwu Bazilayi kę mkpukpu Giladu; mejeru phe ree. G'ęphe yikwaru lę ndu a-noduje eri nri lę teburu ngu; noo kęle ọo g'ęphebedua mekwaru mu pho ree bụ ono lę teke ono, mu shi agbalaru nwanna ngu, bụ Abusalomu.
- ⁸“Onye ọzo bụ Shimeyi nwa Gera; onye mkpukpu Bahurimu, dọ l'alị Benjiaminu. Ọo yębedua phuru mu ęjo iphu mbọku ono, mu jeru Mahanayimu. Ọle teke ọ byapfutaru mu lę Jiordanu bę mu gude ępha Chipfu ribuaru iya angu lę mu ta abyadu egude ogu-echi gbugbua ya.
- ⁹Ọle ọ bụ; nta-a ba ahakwa iya kę mmanu. I bụ onye maru iphe. Ii-maru-a iphe, ii-me iya. Mee ya g'ọ gude ishi-ęwó iya ono lọkaru mee kpuba l'ilu.”

Anwụhu Dévidi

(1Iphe 29:26-28)

- ¹⁰Tobudu iya bụ; Dévidi bya anwụhu lapfushia nna iya phe; e lia ya lę mkpukpu Dévidi.
- ¹¹Iphe, ọ noru l'aba-eze ndu Ízurelu bụ ukporo apha labo. Ọ buru eze apha ęsaa lę Hęburonu; bya anọo l'aba-eze lę Jierusalemu ukporo apha l'apha iri l'ęto.
- ¹²Ọo ya bụ; Sólomonu bya anodu l'aba-eze nna iya, bụ Dévidi. Alị-eze iya bya anguru anguru k'ophu paru ęka apaa.

Eegbu Adonija

- ¹³Noo ya; Adonijia, bu nwa Hagitu bya ejepfu Batusheba, bu ne Sólomõnu. Batusheba jia ya su: “? Bu-a k'õma be i byaru?” Adonijia su: “Ee; o kwa-a k'õma; “
- ¹⁴bya asu: “O nweru iphe, mu byaru ngu epfuru.” Batusheba su iya: “Pfunaa iphe obu.”
- ¹⁵Adonijia bya awata epfupfu su: “I maru l'õo mbedua be o gbaru ge mu buru eze. Teme ndu Ízurelu l'ophu buru mu be ephe shi ele enya l'õo mbedua a-buru eze. O le mecharu o nwua inwu-phu; o buru nwanna mu be o laru l'eka; noo kele o Chipfu be meru g'o buru nkiya.
- ¹⁶Ole nta-a be o nweru iphe lanu, mu eme ge mu rwota ngu. Ta ajikakwa.” Batusheba su iya: “Pfunaa iphe obu.”
- ¹⁷Oo ya bu; Adonijia su iya: “Jiko pfunaaru eze, bu Sólomõnu g'o dee mu Abishagu, bu nwamgboko ono, shi Shunemu g'o buru nyee mu. O to jikadu m'i pfuaru iya ya.”
- ¹⁸Batusheba su: “O du ree.” “Mu e-pfuru-a yeru eze l'iswi ehu ngu.”
- ¹⁹Oo ya bu; Batusheba tugbua jepfu Sólomõnu g'o pfuaru iya opfu ehu Adonijia. Eze gbalihu gba iya ndzuta; bya ephozeta l'iphu iya; bya anõ-zeta anõo l'aba-eze iya; bya eye; e je apata aba-eze doberu ne iya ono; o nõdu anõo l'uzo ekutara iya.
- ²⁰Batusheba bya asu: “O nweru iphe, ha nwanshii, mu eme ge mu rwoo ngu.” “Jiko ba ajikakwa.” Eze su iya: “Rwõo iphe obu ne mu; mu taa jikadu iya ememe.”
- ²¹Batusheba su iya: “G'e dunuru Abishagu, onye Shunemu kee nwanna ngu, bu Adonijia g'o buru nyee ya.”
- ²²Eze, bu Sólomõnu yeeru ne iya õnu su: “? Bu k'ishi gunu be i gude su g'e duru Abishagu, onye Shunemu kee Adonijia? I gege asufuna g'a haaru iya ali-eze-a; eshi ophu o bu nwanna mu k'õgerenya; mbu g'a haaru iya yee Abyiyata, bu onye uke Chileke waa Jiowabu nwa Zeruya!”
- ²³Noo ya; eze, bu Sólomõnu gude epha Chipfu ribua angu su: “Ge Chileke gwakwa mu ochi; mbu mee mu ophu ka nõo m'o -buru l'ishi Adonijia ta aladuru l'iphe ono, o pfuru ono!”
- ²⁴Eshinu Chipfu nõ ndzu g'o nõ iya-a; mbu onye ono, meru mu kpõo abara l'aba-eze nna mu, bu Dévidi ono; bya emewaa ge mu nweru õnu-ulo, ndu eze e-shije futa bya aburu eze; egube ono, o kweru mu ukwe iya; be ee-gbukwa Adonijia ntanu-a.
- ²⁵Oo ya bu; eze, bu Sólomõnu zia Benaya; nwa Jiehoyada; o je egbugbua Adonijia.

Iphe meru Abyiyata; yee Jiowabu

- ²⁶A bya le ke Abyiyata, bu onye uke Chileke; eze su iya: “Tugbua lashia eka i shi; le mkpukpu Anatotu. I gbaru k'anwuhu; o le mu tee gbudu ngu nta; noo kele o ngu shi apajeru okpoko Nnajiuphu, bu Chileke le teke nna mu, bu Dévidi bu eze; teme i tsoru nna mu jekota iphe-ehuka, byapfutakotaru iya nu.”

- 27**No iya; Sólomõnu wofu Abyiyata g'ò tò bùhe onye-uke kẹ Chipfu. Eshi nno; opfu, Chipfu pfujeru lẹ mkpukpu Shilo l'opfu ẹhu ọnu-ulo Elayi vua.
- 28**Jiowabu bya anumaepho iphe, nwuru nu; ọ gbaba l'ulo-ekwa Chipfu je akwẹe ẹka lẹ mpu, e mobegbaaru l'oru-ngweja Chipfu; kẹle Jiowabu bẹ shi etso Adonijia; ọle o to tsojeduru Abusalomu.
- 29**A bya epfuaru eze, bụ Sólomõnu lẹ Jiowabu bẹ gbakwaru laa l'ulo-ekwa Chipfu; mbụ l'ọ pfukubekwa ọru-ngweja. Ọo ya bụ; Sólomõnu zia Benaya; nwa Jiehoyada sụ: “Je egbua ya.”
- 30**Ọo ya bụ; Benaya jeshia l'ulo-ekwa Chipfu ono je asụ Jiowabu: “Eze sụkwaru g'ị lufuta l'ẹka ono!” Jiowabu sụ: “Waawaa. Ọo l'ẹka-a bẹ mu a-nwuhu.” Benaya laphushia azụ je akaru eze iphe, Jiowabu yeru ọnu.
- 31**Eze sụ iya: “Mee ya g'o pfuru. Gbugbua ya; woru lia; k'ophu bụ lẹ mbedua waa ọnu-ulo nna mu te evueduru ọchi ndu ono, o gbushiru l'ẹbe adụ iphe, ẹphe meru ono.
- 32**Chipfu e-me g'ugwo ọchi, o gburu tukoru iya l'ishi. Mbụ ọchi ụmadzu labọ ono, o tsoru ọgu gbugbushia ọphu nna mu, bụ Dévidi amadụ ono; mbụ egbugbu ono, o gburu Ábuna nwa Nẹru, bụ onye-ishi ndu ojogu Ízurelu; waa Amasa nwa Jieta, bụ onye-ishi ndu ojogu Jiuda. Ndu ono bẹ kakota iya apfubekoto; bya aka iya ree.
- 33**G'ochi phẹ tukokwaru Jiowabu waa oshilokpa iya l'ishi jeye lẹ tuutuutu lẹ mĩmĩmĩ. Obenu lẹ Dévidi; mẹ oshilokpa iya; mẹ ọnu-ulo iya; mẹ aba-eze iya bẹ Chipfu a-nụ ẹhu-guu jasụ lẹ tuutuutu lẹ mĩmĩmĩ.”
- 34**Tobudu iya bụ; Benaya nwa Jiehoyada tũgbua je egbua Jiowabu. E je elia ya l'ibe iya l'echiẹgu.
- 35**Eze bya ewota Benaya nwa Jiehoyada dochia ẹnya Jiowabu g'ọ buru onye-ishi ndu ojogu; bya eworu Zadoku, bụ onye uke Chileke dochia ẹnya Abyiyata.
- 36**Tobudu iya bụ; eze bya ezia ozi; e je ekua Shimeyi. Ọ sụ iya: “Kpua ulo lẹ Jierúsalemuru buru. Ba adukwa teke ị-lufu alufu l'ẹka ono jee ẹka ọzo.
- 37**Mbọku, ị lufuru daa nggele Kidironu bẹ bukwa g'o doo ngu ẹnya l'ii-nwuhu; ọchi ngu a-tukoru ngu l'ishi.”
- 38**Shimeyi sụ eze: “Iphe, ị pfuru dụ ree. Ọo gẹ gube nnajuphu mu, bụ eze pfuru bụ gẹ mube onye-ozu ngu e-me.” Ọo ya bụ; Shimeyi buru lẹ Jierúsalemuru; bukpoọ ya ọo ọdu.
- 39**A bya anọo apha ẹto; ohu Shimeyi dụ ụmadzu labọ gbafu gbapfushia Akishi nwa Maka, bụ eze ndu Gatu. A bya epfuaru iya Shimeyi sụ iya: “Ohu ngu phẹ nọkwa lẹ Gatu.”
- 40**Shimeyi gbalihu bya edozia nkapfu-igara iya gbagbua; ọ buru iya eje Gatu l'ibe Akishi je ele ẹnya ohu iya phẹ ono. O je eduta ohu iya phẹ ono lẹ Gatu.

⁴¹E je edooru Sólomõnu lẹ Shimeyi shi lufu lẹ Jierúsalem̄u jee Gatu; bya alwaphutawa azu.

⁴²Eze bya ezia nzi; e je ekua Shimeyi. O sù iya: “? Mu te emenuru ngu-a g'i gude epha Chipfu ria nte; teme mu bya anmashiaru ngu okwa iya ike sù ngu; g'o dokwaa ngu enya lẹ mboku, i lufuru alufu jee eka ozo bẹ ii-nwuhu? ? Ti suduru l'ọ dukwa ngu-a ree; mbu l'ii-mekwaa nno?”

⁴³? Buhunu gunu meru g'o gude ophu i ti meeduru iphe, i riburu Chipfu angu l'ii-meru iya ono; waa ekemu ono, mu turu nu ngu ono?”

⁴⁴Eze bya asukwapho Shimeyi: “Lime obu ngu bẹ i makotaru ejo-iphe, i meru nna mu, bu Dévidi. Nta-a bẹ Chipfu a-tukobe ngu ejo-iphe ono, i meru l'ishi.

⁴⁵Ole eze, bu Sólomõnu bẹ aa-goru onu oma nu; teme aba-eze Dévidi bẹ a-nguru anguru l'iphu Chipfu jasù lẹ tuutuutu-mjimiimii.”

⁴⁶Oo ya bu; eze bya akaru Benaya nwa Jiehoyada; o je egbugbua Shimeyi. O buru teke ono bẹ alì-eze ono byaru anguru anguru l'eka Sólomõnu.

1 Ndu eze 3

Sólomõnu epfu gẹ Chipfu nu iya mmamiphe

(2Iphe 1:1-13)

¹Sólomõnu bya aluta nwada Fero, bu eze ndu Ijiputu; epha shi nno gbaa ndu. O duta nwada Fero ono bya edobe lẹ mkpukpu Dévidi; o nodu l'eka ono jasù o kpughee ulo-ibe-eze iya; me ulo Chipfu; me igbulo, no-pheru Jierúsalem̄u mgburugburu.

²O buru l'eka aagwaje iphe bẹ ndu Izurelu shi agwaje Chileke; kele e teke akpuđu ulo Chipfu teke ono.

³Sólomõnu yee Chipfu obu; bya etsokota iphe, Dévidi, bu nna iya toru okpa iya. A gufuepho l'o shi egweje ngweja; bya akpoje unwu-isensu oku l'eka aagwaje iphe.

⁴Eze, bu Sólomõnu bya ejeshia egwe ngweja lẹ Gibiyonu, bu ishi eka aagwaje iphe; bya eworu ngweja-akpo-oku unu labo l'ukporo iri gwee l'oru-ngweja, no l'eka ono.

⁵O -rwua l'enyashi; Chipfu byapfuta Sólomõnu lẹ nrwọ lẹ Gibiyonu l'eka ono bya asu iya: “Pfu iphe, bukpo iphe, o du ngu gẹ mu nu ngu.”

⁶Sólomõnu su: “I goshiwaru l'i yeru nwozi ngu Dévidi, bu nna mu obu shii; kele o bu onye ire-lanu; bya aburu onye pfuberekoto; bukwarupho onye obu guru iphoro l'iphu ngu. O buru n-yemobu ono bẹ i yekporu iya pho; k'ophu i nuru iya nwa, a-nodu l'aba-eze iya ntanu-a.

⁷“Gube Chipfu, bu Chileke mu; nta-a bẹ i mewaru mube onye-ozu ngu gẹ mu buru eze nochia enya nna mu, bu Dévidi; lẹ mube nwatanshi, ta amadu gẹ mu e-shije mee iphe, gbaru mu l'ememe.

⁸Mube nwozi ngu bẹ nowaa l'echilabo ndu ono, i hotaru; mbu ndu ono, paru eka apaa; bya aburu aguta aguta ono.

⁹Oo ya bu; nūnu mūbe nwozi ngu egomunggo mu e-gude buru eze ndibe ngu obu; waa ge mu majeru iphe, du ree; l'iphe, du eji. Noo kele o to dudu onye suru aburu eze ndibe ngu-a l'ophu.”

¹⁰Iphe ono, Sólomōnu rwozu ono du Nnajiuphu ree.

¹¹Oo ya bu; Chileke su Sólomōnu: “Eshi ophu o bu iphe ono be i suru g'e meeru ngu; ophu i pfuduru ke ndzu ogologo; ophu i suduru g'a nu ngu eku; ophu i pfuduru ke ge ndu ohogu ngu nwushihu; o bu-chiaru egomunggo, ii-gude buru eze l'uzo, pfuru oto be i suru g'a nu ngu;

¹²be mu e-meeru ngu pho iphe ono, i pfuru su g'e meeru ngu ono. Mbū le mu a-nu ngu mmamiphe bya anu ngu egomunggo; k'ophu bu l'o to dudu onye eze ozo byaru aturu ngu nu, dujeru nu; ophu o dudu onye eze ozo byaru aturu ngu nu, byaru a-du nu.

¹³Mu a-nukwa ngu pho iphe, i ti rwozuru ge mu nu ngu; mbū le mu e-me g'i nweru iphe; bya emee g'a kwabeje ngu ubvu; k'ophu bu l'o to dudu eze ozo, bya a-turu ngu nu le ndzu ngu.

¹⁴O -buru l'i tsoru uzo mu; bya eme iphe, mu toru okpa iya; waa ekemu mu egube ono nna ngu, bu Dévidi meru ono; be mu e-me g'i kaa nka.”

¹⁵Teke ono; Sólomōnu tehu le mgbenya ono; bya amaru l'oo nrwo be ya shi arwo. Tobudu iya bu; o lwatashia Jierúsalemu; o je apfuru l'iphu okpoko oghandzu Chipfu gwee ngweja-akpo-oku; waa ngweja-ehu-guu; bya abooru ndu-ozu iya g'ephe ha obo- iphe.

Sólomōnu ekpe ikpe, atsu l'ehu

¹⁶O nweru unwanyi ukpara labo, byapfutaru eze bya apfuru iya l'iphu.

¹⁷Onye lanu su: “Nnajiuphu mu; mu le nwanyi-a be gba mgba buru l'ulo lanu; mu bya ezeda. Mu l'iya tuko buru l'ulo ono teke mu zedaru.

¹⁸Le mboku, kwe iya eto ge mu zedacharu ono be yebdua byaru ezedakwapho nkiya. Ophu o to dudu onye ozo, no l'ulo ghaha anyi n'ebo be no iya nu.

¹⁹“O -rwua l'enyashi; o gude njo azee dagbua nwa nkiya.

²⁰O beepho l'echi-abali le teke mube nwozi ngu ekuwaa mgbenya; o gbalihu pata odzu nwa iya ono bya enyekube mu; bya ekuta nwa ke mbedua nyekube onwiya.

²¹A futa l'utsu iya; mu bya agbalihu ge mu chebe nwa mu era; o buwaru nu odzu. Nchi bohuepho ree; mu bya ato nwehu lerwee nwata ono enya; bya ahuma l'o to budu nwa nkemu.”

²²Nwanyi ophuna swo-lihu su: “Waawaa! Nwata ophu no ndzu be bu nwa mu; nwata ophu nwuhuru anwuhu buru nwa nkengu.” Nwanyi k'ivuzo pho su: “Waawaa; nwata ophu nwuhuru anwuhu bu nwa nkengu; nwata ophu no ndzu buru nwa nkemu.” Ephe nodu adzokashi iya nno l'iphu eze.

²³Tobudu iya bu; eze bya asu: “Onye owa-a suru: ‘Le nwa, no ndzu bu nkiya; onye ophu nwuhuru anwuhu buru nwa k'onye ophuu.’ Onye ophuu su: ‘Waawaa; l'oo nwa nkengu nwuhuru; o buru nwa nkemu no ndzu.’”

²⁴Eze bya asu: “Unu wotaeshikwaru mu nu ogu-echi.” A bya ewotaru eze ogu-echi ono.

²⁵O su: “Ngwa; sukaha nwata ophu no ndzu ebo; woru ibe lanu nu onye lanu; li woru ibe lanu nu onye ophuu.”

²⁶Tobudu iya bu; imemini nwata ono bya adushia nwanyi ophu nwa iya no ndzu ike. O chishia su eze: “Jiko nnajiuphu mu; kururo nwata ono, dzu ndzu ono kee ya; g'e te egbukwa iya egbugbu!” Nwanyi ophuna su: “Mu le ngu ta adudu onye ophu e-nweru nwa ono. G'a sukaha iya ebo!”

²⁷Tobudu iya bu; eze bya ebua ikpe ono; su: “Kuru nwata ono nu nwanyi ivuzo pho. Te egbuhakwa iya egbugbu. Oo nwanyi ono bu ne, nwuru iya nu.”

²⁸Ndu Izurelu l'ophu numaepho g'eze gude kpee ikpe ono; ephe tsuahaa ya ebvu; kele ephe maru l'oo Chileke be nuru iya mmamiphe, o gude kpee ikpe, pfuru oto nno.

1 Ndu eze 4

Ndu gude okwa l'aba-eze Solomonu

¹Noo ya; eze, bu Solomonu buru eze ndu Izurelu l'ophu.

²Waa ndu gude okwa l'aba-eze iya baa: Azariya nwa Zadoku be bu onye uke Chileke.

³Elihorefu yee Ahayijia, bu unwu Shisha be bu ndu ederu eze ekwo. Jiehoshafatu; nwa Ahiludu buru onye akwakobeje iphe, meru ememe.

⁴Benaya; nwa Jiehoyada bu onye-ishi ndu ojogu. Zadoku waa Abyiyata buru ndu-uke Chileke.

⁵Azariya nwa Netanu bu onye-ishi ndu ochi-oha. Zabudu nwa Netanu buru onye uke Chileke; wakwapho onye agbazijeru eze idzu.

⁶Ahisha bu onye-ishi l'ibe-eze. Adoniramu; nwa Abuda buru onye-ishi ogbo ozi.

Ndu Solomonu meru ndu-ishi; me ekali ibiya ophu ephe bugbaa ishi

⁷Solomonu be nweru ndu-ishi iri l'ebo, bu ndu-ishi Izurelu l'ophu. O buru phe anoduje ewotaru eze yee ndibe iya nri, ephe erije. Onye lanu ewotajeru iya nri l'onwa lanu l'ime apha.

⁸Waa epha ndu ono baa: Nwa Huru bu ishi l'ali ubvu ubvu Ifuremu.

⁹Nwa Deka buru ishi le Makazu; me Shalubimu; me Betu-Shemeshi; waa Elonu-Betuhananu.

¹⁰Nwa Hesedu buru ishi le Arubotu. Soko; me ali Hefa l'ophu bukotaru nkiya.

¹¹Nwa Abinadabu, bụ ishi ndu Nafatu-Doru, bụ iya bẹ alụ nwada Sólomonu, bụ Tafatu.

¹²Bana, bụ nwa Ahiludu bụru ishi lẹ Tanaku; mę Megido; mę Bętu-Shanu l'ophu; mbụ ęka ono, nọ-kube Zaretanu; nọ lẹ nsuda Jiezeręlu; mbụ e -shi lẹ Bętu-Shanu je akpaa lẹ Abęlu-Mehola; je aghaa Jiokumeyamu.

¹³Nwa Geba bụ ishi lẹ Ramotu, nọ l'alị Giladu. Mkpukpu Jiayi, bụ iya bụ ęka nwa Manase shi buru lẹ Giladu l'ophu bukotaruru nkiya; mę ękali mkpukpu Agobu l'alị Beshanu; mbụ eze mkpukpu ukporo ęto ono, e gude igbulọ kpu-phetagbaa ono; bya egudeje mgboro onyirubvu kpo-chia onu-oguzo iya ono.

¹⁴Ahinadabu nwa Ido bụru ishi lẹ Mahanayimu.

¹⁵Ahimaazu ophu alukwapho nwada Sólomonu ono, bụ Basumatu nọdu bụru ishi lẹ Nafutali.

¹⁶Bana nwa Hushayi bụ ishi lẹ Asha mę Beyalotu.

¹⁷Jiehoshafatu nwa Paruwa bụru ishi lẹ Isaka.

¹⁸Shimeyi nwa Ela bụ ishi lẹ Benjiaminu.

¹⁹Geba nwa Uri bụru ishi lẹ Giladu, bụ iya bụ alị, ęka Sihonu shi; onye shi bụru eze ndu Amoru; bukwarupho alị, ęka Ogu shi; onye shi bụru eze ndu Beshanu. O bụru yębedua kpoloko shi bụru ochi-oha l'alị ono.

Iphe, eewotajęru Sólomonu l'ujiku lanu

²⁰Ndu Jiuda mę ndu Izurelu bę ha igwerigwe g'ęja, nọ l'aguga eze-ęnyimu. Epe nọdu anọduje eri; bya angu; ęhu nọdu anọduje atso phe utso.

²¹Sólomonu bụru eze ndu alị ono l'ophu; e -shi l'ęnyimu Yufurętisu jasụ l'alị ndu Filisitayinu; je akpaa l'oke epe lẹ ndu Ijiputu. Iphe, bụ alị-eze, nọkota l'uswe iya ono g'ępe ha nọdu atukota akiriko anu Sólomonu; teme epe nọdukota iya l'ęka jasụ g'o nọ-beru.

²²Iphe, eewotajęru Sólomonu mbokumboku bę bụ ękpa ukpokutu ereshi, e tsuru etsutsu ukporo ękpa l'ękpa iri; waa ękpa ereshi, a kworu akwokwo, du ękpa ukporo ęto;

²³mę eswi iri, tsuchaaru ębà; mę ukporo eswi, akpa l'onwiya; mę ukporo aturu ise; mękwapho ele; mę mgbada; mę anigo; mę oku, phuru l'ęnya.

²⁴Sólomonu bụru eze alị ono, dukota l'uzo ęnyanwu-ariba ęnyimu Yufurętisu ono l'ophu; mękpoo ndu eze, bukota l'uzo ęnyanwu-ariba ęnyimu ono; mbụ e -shi lẹ Tifusa je akpaa lẹ Gaza. Teme nchi dukota iya doo mgburugburu egede.

²⁵Teke Sólomonu nọ ndzụ bę ndu Jiuda mę ndu Izurelu tukoru buru lẹ ntusarehu; e -shi lẹ Danu je akpaa lẹ Biye-Sheba. Onyenonu nwegbaarụ opfu-vayinu; mę oshi figu nkiya.

²⁶Sólomõnu bẹ nweru ụlo, dụ ụnu ụkporo ise, bụ ẹka oodobeje inya, anọduje akpu ụgbo-inya iya; bya enweru ụkporo ụnu nemadzu iri, bụ ndu agbaje inya.

²⁷Ndu ọchi-ọha ono bẹ ewotajeru eze, bụ Sólomõnu nri; mekwapho ke ndu ọonu nri. Onyenõnu bẹ ewotaje nkiya l'õnwa ọphu rwuberu iya nụ. O tọ dudu iphe, ẹphe ekweje g'uko iya duru iya.

²⁸Nokwapho g'ẹphe ewotaje balị; me ẹswa ẹreshi, inya-ogu; waa inya ozo mmanu ataje bya edobe l'eka gbaru nụ. Onyenõnu ewotaje iphe, gbaru iya l'ewota.

Mmamiphe Sólomõnu

²⁹Chileke bẹ nuru Sólomõnu mmamiphe; bya emee g'iphe doje iya ẹnya k'ọphu paru ẹka apaa; bya eye iya egomunggo, ha g'ẹja, dụ l'aguga eze-ẹnyimu l'ẹhu.

³⁰Sólomõnu bẹ mmamiphe iya kangokotaru mmamiphe ke ndu ụzo ẹnyanwu-awawa l'ọphu; bya akangokwapho mmamiphe ke ndu Ijiputu l'ọphu.

³¹Mmamiphe nkiya kakota ke nemadzu ozo l'ọphu shii. Mmamiphe iya kakwapho ke Etanu, bụ onye shi l'eri Ẹzura; bya aka ke Hemanu; me ke Kalukolu; me ke Dada, bụ unwu Maholu. Ụdù Sólomõnu ono ngakota ọhamoha, nọ-pheru iya mgburugburu.

³²Ẹtu ẹtu, ọ nmashiru dụ ụnu ẹsaa l'ụkporo iri ; bya agua ụnu ebvu labo l'ụkporo iri l'ebvu ise.

³³Ọotuje onu ụgbugba oshi; mbụ e shikpo l'ụgbugba oshi sida, dụ le Lébanõnu je akpaa l'ẹswa isopu, efushije l'igbulo. Nokwapho g'ootuje onu ụgbugba anu; me ẹnu; me ụgbugba anu, l'awu l'ẹpho; me ke ẹma.

³⁴Ndu eze ọhamoha, nokota le mgboko-a bẹ numakotaru ke mmamiphe Sólomõnu ono; ẹphe nodu eyeje ndu e-je anuma opfu mmamiphe, oopfu obu.

1 Ndu eze 5

Sólomõnu akwakobe akpu eze-ulo Chipfu

(2Iphe 2:1-16)

¹Hiramu, bụ eze ndu Taya bẹ yee Dévidi shi eshi ọnyà. O numaepho le Sólomõnu bẹ a wụwaru manụ l'ishi g'ọ buru eze, a-nochi ẹnya nna iya, bụ Dévidi; o zia ndu-ozu iya g'ẹphe byapfuta Sólomõnu.

²Sólomõnu l'onwiya bya ezia Hiramụ ozi sụ:

³“I mawaru le Dévidi, bụ nna mu ta akpuduru Chipfu, bụ Chileke iya ụlo; mkpata iya buru ọgu ono, ndu ọhogu iya shi eshije l'ekameka etso iya ono; jasuru Chipfu mee ndu ọhogu iya ono nodukota iya le mkpula ọkpa.

⁴Obenu le nta-a bẹ Chipfu, bụ Chileke mu mewaru; nchi dụ mu doo l'ekameka; o to nwedu onye opfu duru mu l'iya; ọphu ọ dudu ejo-iphe, dapfutawaru mu nụ.

⁵Ọo ya bụ; mu nodu arị k'akpuru Chipfu, bụ Chileke mu ụlo; ẹgube ono o pfuru iya nna mu, bụ Dévidi sụ: ‘Ọo nwa ono, mu e-dobe g'ọ nochia ẹnya ngu l'aba-eze ngu bẹ a-kpuru mu ụlo.’

⁶“Nta bukwa g'i zia ndu e-je egbuaru mu oshi sida, dụ ịe Lébanonu. Ndu ozi mu be ephe ịe ndu-ozị nkengu a-tuko yekota ẹka l'ozị, dụ iya nụ. Mu a-pfu ngu ugwo ozi ndu nkengu ono; iphe, ị sukpoerupho ge mu pfua; kele ị manuru-a l'ọ to dudu onye maberu enya g'eegbuje oshi l'ime anyi ge ndu Sayidonu.”

⁷Tobudu iya bu; Hiramụ numaepho ozi ono, Sólomonu ziru ono; ẹhu tsoshia ya utso ike. O su: “G'ajaja buru ke Chipfu ntanu-a; mbu onye ono, nuru Dévidi nwa, maru iphe egube-a g'ọ buru ishi oha, paru ẹka ono!”

⁸Hiramụ bya ezia Sólomonu su iya: “Mu numawaru ozi, i ziru mu. Mu e-mekotacha iphe, ị suru ge mu mee ịe k'oshi sida me oshi payinu ono.

⁹Ndu ozi mu e-shi ịe Lébanonu vua oshi ono vufutakota l'onu eze-enyimu. Mu esweshi iya esweshi gude iya kpoghata l'eze-enyimu; je edobe l'eka ị turu ẹka g'e dobe iya. Oo l'eka ono be ee-dokashi iya; unu abya evutawa iya ro. Iphe, dụ mu ree g'i meeru mu iya bu g'i nuje ndibe mu nri.”

¹⁰No iya; Hiramụ nukota Sólomonu oshi sida me oshi payinu, mkpa iya duru iya g'oha.

¹¹Sólomonu nodu anuje Hiramụ unu ẹkpa witi mgbo ukporo labo l'unu iri g'ọ buru nri, ndibe iya; bya eye iya unu ite-mkpa manu olivu, a tsuru l'ikwe unu ukporo labo l'iri. O buru ge Sólomonu anuje iya Hiramụ bu ono l'aphagapha.

¹²Chipfu nerupho Sólomonu mmamiphe g'o kweru iya ukwe iya. Sólomonu yee Hiramụ tuko nodu ịe nchi-odoo; ephebebo woru ndzu gbaa.

Ndu ogbo-ozị Sólomonu

(2Iphe 2:17-18)

¹³Eze, bu Sólomonu bya ahota ndu ogbo-ozị l'alị Izurelu l'ophu. Ndu ogbo-ozị ono be tukoru dụ ukporo unu unwoke eto l'unu iri l'ise.

¹⁴O nodu ezije phe ukporo unu l'unu ise ise g'ephe je Lébanonu; ephe nodu ejeje je anoo onwa ophu l'eka ono; ephe alwa bya anoo onwa labo l'unuphu. O buru Adoniramụ be bu onye-ishi ndu ogbo-ozị ono.

¹⁵Sólomonu be nwekwarupho ukporo unu umadzu ugbo esato l'unu iri l'ise, bu ndu evuje iphe; bya enweru ukporo unu umadzu ugbo iri, bu ndu anoduje awa mkpuma l'ubvu ubvu ali ono.

¹⁶Teme wafukwapho unu umadzu esato l'umadzu ukporo ise, bu ndu-ishi, eleta enya l'ozị ono.

¹⁷Eze bya atua ekemu su g'ephe gbakposhia oke mkpuma, vu aswa kwachashia ya g'e gude tua okpa ulo ono.

¹⁸Oo ya bu; ndu emeru Sólomonu ona; waa ndu emeru Hiramụ ona; me ndu Gebalu bya egbushia oshi woru kwakobe; bya agbakposhia mkpuma, ee-gude kpua ulo ono.

1 Ndu eze 6

Sólomõnu akpũ eze-ulo Chipfu

(2Iphe 3:1-14)

- ¹Tõbudu iya bũ; Sólomõnu wata akpũ eze-ulo Chipfu ono l'apha, kwe ndu Ízurelu unu apha l'ukporo apha eno g'ephe shichaa l'alì ndu Ijiputu futa; mbũ apha, kwe Sólomõnu apha eno, e -shi teke o watarũ abũru eze ndu Ízurelu; mbũ l'onwa, onwa Zivu, bũ iya bũ onwa k'ẽbo l'apha.
- ²Eze-ulo ono, eze, bũ Sólomõnu kpũru Chipfu ono bẽ ogologo iya dũ ukporo nkwo-eka eto; uswekete iya dũ ukporo nkwo-eka; eli iya dũ ukporo nkwo-eka lẽ nkwo-eka iri.
- ³Nwũlo, a kpũru; dupfube l'ataphu eze-ulo ono bẽ ogologo iya dũ ukporo nkwo-eka. Ogologo iya bẽ yẽle uswekete eze-ulo ono l'onwiya ha enya nhamunha. Uswekete kẽ nwũlo ono dũ nkwo-eka iri.
- ⁴Eze-ulo ono bẽ windo, o yeru iya dugbaa wẽrere wẽrere.
- ⁵O kpũ-phetaru igbulõ eze-ulo ono; waa ime eka-kakõta-adũ-nsõ mgburugburu. O kpua ya nno; bya eyekõta iya mkpuru; o nõ-pee ulo ono mgburugburu.
- ⁶Ulo k'alì iya bẽ osa iya dũ nkwo-eka ise; osa iya k'echilabõ buru nkwo-eka ishii; osa iya k'eto buru nkwo-eka esaa. A kpũshiru òbvũrũ doo mgburugburu l'azũ eze-ulo ono. O buru l'eli òbvũrũ ono bẽ a tukobegbaaru oswebe; k'ophu bũ l'o tõ dũdu iphe, asupfukwadũru l'ime igbulõ eze-ulo ono.
- ⁷Teke aakpũ eze-ulo ono bẽ mkpuma, e gude kpua ya bũ l'eka aanõduje agbakposhi mkpuma bẽ a nõ kwachakõta mkpuma õbu. Ophu o tõ dũdu teke a numajeru õda õngu; õzoo õda ogbunkũ; ophu a numajeduru õda iphe-ìgwè, e gudeje eme k'ulo teke aakpũ iya.
- ⁸Onu eka eeshije abahũ l'õma ulo ono k'alì bẽ nõ laaru ũzo ndõhali eze-ulo ono. O nweru eka eenyije enyinyi nyiba lẽ mkpopfu ulo ono k'echilabõ; bya agbewaro lẽ k'echilabõ ono nyihu mkpopfu k'eto.
- ⁹Noo ya; Sólomõnu kpua eze-ulo ono kpũ-tsee. O gude oswebe oshi sida; mẽ oshi sida, a washũru awashì gude kũ-chia eli iya.
- ¹⁰A kpũshikwarupho nwũlo, dũ mkpopfu mkpopfu; o dũ-pfuchaaru l'eze-ulo ono mgburugburu. Iphe, ephe dugbaa l'eli bũ nkwo-eka ise ise. O buru oshi sida bẽ e gude gbapfube iya l'eze-ulo ono.
- ¹¹Chipfu bya epfuru yeru Sólomõnu sũ:
- ¹²“A -bya lẽ k'eze-ulo-a, ìkpu-a; o -buru l'itsoje iphe, mu tõru okpa iya g'e tsoje; bya edobe nsõ mu; bya edobekõta ekemu mu g'o ha; bya emeje iya ememe; bẽ mu e-shi l'eka ngu mee g'opfu ono, mu pfuru nna ngu, bũ Dévidi ono vukota.
- ¹³Mbũ lẽ mu e-buru l'echilabõ ndu Ízurelu; ophu mu ta abyadũ aha ndibe mu ono, bũ ndu Ízurelu.”

G'e mengashũru ime eze-ulo ono; o dũ

(2Iphe 3:8-14)

- 14** Oo ya bu; Sólomonu bya akpua eze-ulo ono kpu-tsee.
- 15** O gude oshi sida, a washiru awashi kwechishia igbulọ ime eze-ulo ono; shita l'okpa-ali jeye l'eli iya eka a ku-chiru aku-chi. Oma-ulo iya buru oshi payinu be o gude kwechishia ya.
- 16** O gude oshi sida, a washiru awashi ku-butu eka du ukporo nkwo-eka l'ime ime eze-ulo ono gude meta mkpuru, bu iya bu eka-kakota-adu-nsọ. E shi l'oma iya kua ya oshi sida ono jeye l'eli iya.
- 17** Nwulo ophu du l'iphu eka-kakota-adu-nsọ ono be ogologo iya du ukporo nkwo-eka labo.
- 18** Ime eze-ulo ono be bu oshi sida be e gude kwechishikota iya l'ophu; k'ophu bu l'o to dudu mkpuma, e gude kpu ulo ono duru ophu a humaru l'enya. A pyishigbaa iphe, du g'otumu; me okoko, jawaru ajaja l'oshi sida ono.
- 19** O kpuru eka-kakota-adu-nsọ dobe l'ime ime eze-ulo ono g'o buru eka aasubeje okpoko ogbandzu Chipfu.
- 20** Eka-kakota-adu-nsọ l'ime ime ulo ono be du ukporo nkwo-eka l'ogologo iya. Uswekete iya du ukporo nkwo-eka; eli iya du ukporo nkwo-eka. O wukota iya mkpola-ododo, guru egugu. O gudekwapho oshi sida kuta oru-ngweja.
- 21** Sólomonu gude okpobe mkpola-ododo kwechishikota ime eze-ulo ono l'ophu; bya eswebushia gwogirigwo, e gude mkpola-ododo mee l'onu ime mkpuru eka-kakota-adu-nsọ ono; bya awua ya mkpola-ododo gude kwechia ya.
- 22** Eze-ulo ono l'ophu be o wukotaru mkpola-ododo l'ime iya. Nokwapho g'o wukotaru mkpola-ododo l'oru-ngweja ono, du l'eka-kakota-adu-nsọ ono.
- 23** O gude oshi olivu meta chierobu labo, eli iya dugbaa nkwo-eka iri iri woru pfube l'eka ono, kakota-adu-nsọ ono.
- 24** Nku chierobu ono nanu be du nkwo-eka ise; nanu ophu du nkwo-eka ise. E -shi l'ishishi nku ophuu jasụ l'ophuu be du nkwo-eka iri.
- 25** Chierobu k'ebo be dukwapho nkwo-eka iri l'eli. Chierobu ono ephenebo be hakota enya nhamunha; gbakota ugbugba lanu.
- 26** Chierobu ono nanu be du nkwo-eka iri l'eli; o buru nno bu g'ophuu du.
- 27** O pfubekota chierobu ono l'ime eka ono, kakota nsọ l'eze-ulo ono. Nku phe tuko jashichaa ajashi. Nku ke chierobu lanu be no je asu-pfuru l'igbulọ ibe lanu; nku k'ophuu nodu je asu-pfuru l'igbulọ ibe iya ophuu. Nku phe ono bya asu-pfuchaaru le ke nwibe phe l'echilabo ulo ono.
- 28** O buru mkpola-ododo be o wuru l'eli chierobu ono.
- 29** O pyishia chierobimu; pyishia mpfu; me okoko l'eli igbulọ ime ulo, du nsọ ono; mekota azu iya mgburugburu.

- 30** Oma eze-ulo ono be o wukotaru mkpola-ododo l'ime iya me azu iya.
- 31** L'onu-abata aka-kakota-adu-nsọ be o yeru mgbo, du nkwegba labo, e gude oshi olivu pyia. Okpa mgbo ono k'imeli yee ke mgbureku be tukoru nweru mgbureku ise.
- 32** O pyishia chierobimu; me mpfu; waa okoko, jawaru ajaja l'eli mgbo labo ono, e gude oshi olivu pyia ono; bya ekwekota phe mkpola-ododo l'eli. O woru mkpola-ododo wua l'eli chierobu waa mpfu ono.
- 33** Nokwapho g'o meru okpa mgbo, nweru mgbureku eno, e gude oshi olivu mee; woru ye l'onu eze-ulo ono gedegede.
- 34** O bya egude oshi payinu pyia mgbo labo. Mgbo ono be aagujeru tukobe l'ibe iya.
- 35** O pyishikwaapho chierobu; me mpfu; waa okoko, jawaru ajaja l'eli mgbo ono; bya egude mkpola-ododo kwee l'eli iphe ono, o pyishiru le mgbo ono; mbu chibechaa ya echibe.
- 36** O kpu-butaru oma-unuphu ye l'ime eze-ulo ono. Igbulo, e gude kpu-buta iya be aatu-kobeje oshi sida lanu l'eli mkpuma, a kwacharu akwacha, e doru mkpopfu eto.
- 37** Solomonu turu okpa eze-ulo Chipfu ono l'apha, kwe iya apha eno, o wataru aburu eze; mbu l'onwa Zivu.
- 38** O buru l'apha, kwe iya apha iri le nanu, o shi butaru eze; l'onwa Bulu, bu iya bu onwa k'esato be a kpu-tsekotaru ulo ono l'ophu; kpukota iya egube, a riru k'akpukpu iya. O buru apha esaa be Solomonu gude kpu ula ono.

1 Ndu eze 7

Solomonu akpu ulo ibe-eze iya

- 1** Solomonu gude apha iri l'eto kpu ula ibe-eze iya kpu-tse.
- 2** Ulo ibe-eze ono be o gude oshi sida, shi l'oswa ubvu ubvu Lebanonu kpu. Ogologo ulo ono du ukporo nkwo-eka ise; uswekete iya du ukporo nkwo-eka labo le nkwo-eka iri; eli iya du ukporo nkwo-eka le nkwo-eka iri. Ulo ibe-eze ono be a kporu itso akpaa sida giriri uzi eno; bya eworu oswebe oshi sida swee l'eli itso ono.
- 3** O buru oshi sida be e gude kpuchia ya l'eli oswebe ono, e swebegbaaru l'eli itso ono. Itso ono be du ukporo labo l'ise. Iphe, o du l'ogiri l'ogiri buru iri l'ise ise.
- 4** Windo, e yeru iya be a kporu giriri uzi eto; o nodu chegbabegbaa windo ibe iya iphu.
- 5** Mgbo, e yekotaru l'ulo ono; me windo, e yeru iya be e meru okpa iya o nweru mgbureku eno eno. Windo ono be a kporu giriri uzi eto; ephe ghagbabegbaa windo ibe phe iphu.
- 6** O bya emeta oma-ulo ophu bu Ulo-Itso. Ogologo iya du ukporo nkwo-eka labo le nkwo-eka iri; uswekete iya du ukporo nkwo-eka le nkwo-eka iri. O nweru nwulo ophu a kporu du-pfube l'onu aka eeshije abahu iya; bya ekpua ya iphe l'eli; o buru itso ono gudeshe iya.

⁷Ọ bya akpata Oma-ulo Aba-Eze, bu iya bu Oma Ulo-Ikpe; mbu aka o-nduje ekpe ikpe. O buru oshi sida be e kweru iya; e -shi l'oma iya jasụ l'eli iya.

⁸Ọphu bukpo ulo-ebubu Sólomonu be no le nkulahụ oma-unuphu ono, du l'uzo ulo-ikpe ono. Ulo ono be e meru; o gbaa ugbugba lanu. O bukwarupho egube ulo lanu ono be o kpuru nyee ya; mbu nwada Fero, bu eze ndu Ijiputu pho, o lutaru pho.

⁹Ulo ono g'o hakota shita l'eka a turu okpa iya jasụ l'eli iya; mekwapho gbẹ l'etezi jasụ l'eze oma-unuphu ono be bu mkpuma, vu oke aswa be e gude kpukota iya. Mkpuma ono be a gbakposhiru g'o ha; o nweru mgbureku; bya egude soya kwachashia ya iphu lazụ iya.

¹⁰Mkpuma, e gude tua okpa ulo ono be vugbaa oke aswa bya ahagbaa shingushingu. O nweru ndu ophu du nkwo-eka esato; bya enweru ndu ophu du nkwo-eka iri.

¹¹E gude mkpuma, a washiru awashi, vugbaa oke aswa; waa oswebe oshi sida doo l'eli iya.

¹²A kpu-pheru igbulo mgburugburu gude meta eze oma-unuphu. Igbulo ono abujeru; a -kpua mkpopfu mkpuma eto; a tu-kobe iya oswebe oshi sida lanu l'eli egube ono, e meru iya l'igbulo, e gude kpu-pheta oma-unuphu eze-ulo Chipfu pho; waa nwulo ono, eeshije abahu l'eze-ulo Chipfu ono.

Iphe, e meru dobe l'eze-ulo Chipfu

(2Iphe 3:15-17; 4:1-10)

¹³Eze, bu Sólomonu bya ezia g'e je ekuaru iya Hiramụ le mkpukpu Taya.

¹⁴Hiramụ ono be bu nwatibe nwanyi, ji iya anodedu, shi l'ipfu Nafutali. Nna iya be bu onye Taya; bya aburu onye maru g'e gudeje onyirubvu eme ona. Hiramụ be bu onye nweru mmamiphe; iphe nodu edoje iya enya; o makotaru g'e gudeje onyirubvu eme ona. O bya ibe Sólomonu bya emekota iphemiphe, a suru g'o mee.

Itso, e meru l'onnyirubvu

(2Iphe 3:15-17)

¹⁵Ọ bya egude onyirubvu kpua itso labo, duchaa nkwo-eka iri l'esato l'eli; waa nkwo-eka iri l'ebo le mgburugburu iya.

¹⁶O gudekwapho onyirubvu, a dazeru adaze kpata nchi-itso labo, aa-tu-kobe l'eli itso ono. Nchi-itso ono l'ehu l'ehu be bu iphe, o duchaa l'eli be bu nkwo-eka ise ise.

¹⁷Ọ bya akpata iphe, du g'ugbu; waa iphe, du ge gwogirigwo yechaa le nchi-itso ono, du l'eli itso ono. Iphe, o duchaa bu esaa esaa le nchi-itso lanu.

¹⁸Teme o bya emeshia iphe, du g'akpuru itorokuma doo giriri uzi labo l'eli nchi-itso ono gude dophechaa iphe ono, a kparu akpakpa pho mgburugburu; gude memashia ya ememashi.

¹⁹Nchi-itso ono, a tu-koberu l'eli itso ono, a kpoberu l'onu nwulo ono, eeshije abahu l'eze-ulo Chipfu ono be o kpuru; o du g'ojimbvu. O buru nkwo-eka eno be o duchaa l'eli.

²⁰O bụru l'eli nchi-itso ono g'ephe ha; mbụ l'eka e meru; ọ gwọo kokoroko ono, nọ-kube iphe, a kparụ akpakpa ono bẹ e doru iphe ono, dọ g'akpuru itorokuma ono giriri uzi labọ. Ishi itso ono l'ehu l'ehu bẹ e dokotaru ukporo akpuru itorokuma iri iri gbaa mgburugburu.

²¹O bya akpobe itso ono ephenebo l'iphu nwulo ono, eeshije abahụ l'eze-ulo Chipfu ono. Itso ophu ọ kpoberu l'uzo ndohali bẹ ọ guberu Jiakinu. Ophu ọ kpoberu l'uzo isheli bẹ ọ guberu Bówazu.

²²Nchi-itso ono g'ọ hakota bẹ e mekotaru ọ dọ g'ojimbvu. Oo ya bụ; ozi k'itso bvụ.

Iphe, e meru l'onvirubvu dobe g'e yeje mini

(2Iphe 4:2-5)

²³Tobudu iya bụ; Hiramụ bya adazee onvirubvu gude kputa iphe, dọ mgburugburu, ee-yeje mini g'ọ doru chi ririri. Igburonu iya mgburugburu bẹ dọ nkwo-eka iri. G'ọ habe l'eli bụ nkwo-eka ise. Mgburugburu iya dọ ukporo nkwo-eka lẹ nkwo-eka iri.

²⁴Lẹ mkpula igburonu iya bẹ a kpopyaberu iphe, dọ g'otumu uzi iri iri l'enya nkwo-eka nanu nanu; woru iya kpoo giriri uzi labọ. E mee ya; yeje mini ono, echi ririri ono rwagbabe.

²⁵Iphe ono, ee-yeje mini ono bẹ a doberu l'eli oke-eswi iri l'ebo, a kpuru l'onvirubvu. Oke-eswi ono eto bẹ a gharu iphu l'uzo isheli; ghaa eto iphu l'uzo enyanwu-ariba; ghaa eto iphu l'uzo ndohali; ghaa eto iphu l'uzo enyanwu-awawa; ghakota phe ike ye l'uzo ime iya.

²⁶Iphe ono, ee-yeje mini ono bẹ igbidigbi iya ha g'mpfupfumeka. Igburonu iya bẹ o meru; ọ dọ g'igburonu okoro; mbụ ọ dupeho g'okoko ojimbvu. Mini, alaje iya nu bẹ e-rwu iphe, dọ g'unu galonu ukporo labọ l'iri.

²⁷O gudekwapho onvirubvu meta ogba-kperekpere iri. Ogba-kperekpere ono l'ehu l'ehu duchaa nkwo-eka eno eno l'ogologo; waa nkwo-eka eno l'uswekete iya; eli iya dọ nkwo-eka eto.

²⁸Waa g'e gude mee ogba-kperekpere ono bụ owa: O nweru iphe, e gude degbabe iya, e swabhacharu iya l'echilabo.

²⁹L'eli iphe ono, o swabhacharu l'echilabo iya ono bẹ ọ kpuru oduma; waa oke-eswi; me chierobu dobegbaa. O bya egude ongu tsua onvirubvu jeye ọ dọ g'iphe, a kparụ akpakpa; woru iya hebe l'eli oduma ono; me oke-eswi ono; hebekwa iya pho lẹ mkpula iya.

³⁰Ogba-kperekpere ono nwechaaru okpa eno l'ehu l'ehu, e meru l'ope; bya enweru iphe, emeje g'okpa iya ono wephe ewephe, bukwaphe onvirubvu bẹ e gude mee ya. O gude onvirubvu meta iphe, aasubeje eze gbamugbamụ lẹ mgbureku iya eno; bya akpaa iphe akpakpa; gude memashia ya ememashi.

³¹Eli ogba-kperekpere ono bẹ a kpofuru uzo; bya eyephee ya iphe mgburugburu l'uzo ono. Eka ono, a kpofuru iya uzo ono bẹ omilomi iya dọ nkwo-eka lanu. Uzo ono bẹ gbaru mgburugburu dọ g'iphe, a doberu iya adobe lẹ mkpula. Onu iya yeje iphe ono, e

yeru iya lẹ mkpula ono tuko du nkwo-eka lẹ mkpirikpu iya. A pyishia iphe, du iche iche gude gbakota eka ono, a kpofuru iya uzo ono mgburugburu. A kuru ogba-kperekpere ono; o nweru mgbureku eno; a ta kuduru iya mgburugburu.

³²E meru okpa iya ephen'eno ye lẹ mkpula iphe ono, e gude kua ogba-kperekpere ono. Iphe ono, emeje okpa iya ewephe ono be e meru; o lipfuchaaru elipfuru l'ogba-kperekpere ono. Okpa iya nanu be du nkwo-eka lẹ mkpirikpu iya l'eli.

³³Okpa iya ono be e meru; o du g'okpa ugbo-inya. O buru onyirubvu be a dazeru adaze gude meta iphe ono, emeje g'okpa iya wephe ewephe ono; me igburonu okpa iya; me nggara supoku iya; waa iphe, aagajeru nggara supoku ye.

³⁴Ogba-kperekpere ono nwekotaru iphe, adobeje iphe uzo eno eno. Iphe ono be nochaa nanu nanu lẹ mgbureku iya. Iphe ono be e meru; yee ogba-kperekpere ono tuko lipfuru.

³⁵L'eli ogba-kperekpere ono be e yeru iphe, du mgburugburu, du uzi eto l'ime nkeru-ebo nkwo-eka lanu l'eli. Iphe ono, aadobeje iphe ono; waa iphe, e gude kua ogba-kperekpere ono be e meru; o tuko lipfuru l'eli iya ono.

³⁶O bya apyishia chierobu; me oduma; me mpfu l'eli iphe ono, aadobeje iphe ono; pyishikwaa ya pho l'eli iphe ono, e gude kua ogba-kperekpere ono; mbu l'eka ta adudu iphe no-chiru iya nu; bya akpaa iphe-akpakpa l'eli iya gude mee ya ona.

³⁷Noo g'o gude mee ogba-kperekpere iri bu ono. O meru iya; o buru iphe lanu; epe hakotaru enya nhamunha; gbakota ugbugba lanu.

³⁸O bya egude onyirubvu mee eze gbamugbamu iri. Ophu nonu be anataje ukporo galonu mini ugbo iri lẹ nanu lẹ galonu iri. Gbamugbamu ono l'ehu l'ehu be duchaa nkwo-eka eno eno l'osa. Gbamugbamu ono be aa-dobechea nanu nanu l'ogba-kperekpere ono epe n'iri.

³⁹O bya apfube ogba-kperekpere ono ise l'uzo ndohali eze-ulo Chipfu; bya apfube ise l'uzo isheli eze-ulo ono. Eka o doberu eze iphe pho, ee-yeje mini pho bu l'ekutara l'eze-ulo ono; laaru uzo enyanwu-awawa l'ibiya k'uzo ndohali.

⁴⁰Iphe ozo, Hiram mefuru bu ite; me iphe, eegudeje ekpo ntu; waa gbamugbamu.

Mkpako iphe, Hiramu kpushiru dobe l'eze-ulo Chipfu

(2Iphe 4:11-22)

Tobudu iya bu; Hiram tuko ozi ono, o jeru eze, bu Solomonu l'eze-ulo Chipfu ono jeebekota. Owaa bu iphe, o kpushiru l'eze-ulo Chipfu ono:

⁴¹Itso labo; waa nchi-itso labo, gwocharu ke kokoroko, o tu-kobecharu l'eli itso labo ono; me iphe-akpakpa labo, o kparu gude memashia nchi-itso labo ono, gbaru yororo ono;

⁴²me akpuru itorokuma, dukota unu lanu, o dopheru iphe, a kparu akpakpa labo ono. O doru iya giriri uzi labo lẹ nchi-itso ono, gbaru yororo ono; mbu l'eli itso ono;

⁴³me ogba-kperekpere iri; waa eze gbamugbamu iri, a dobechaaru iya l'eli;

- ⁴⁴mẹ iphe, eeyeje mini, echi ririri; mẹ oke-eswi iri l'ẹbo, a doberu iphe ono l'eli;
- ⁴⁵mẹ ite; mẹ iphe, eegudeje ekpo ntu; waa gbamugbamu. Iphemiphe, Hiram meshikotaru eze, bu Sólomonu lẹ k'eze-ulo Chipfu ono be bu onyirubvu, aphugbaa ke ngerengere be o gude mekota iya.
- ⁴⁶Eze be ziru g'a dazee onyirubvu ono gude kpushia iphe ono lẹ phorokoto ali Jiódanu; mbu ali urwa, du lẹ mgbaka Sukotu waa Zaretanu.
- ⁴⁷Sólomonu ta tuduru erwa iphe ono atutu; kele o panukaru igwerigwe. Erwa onyirubvu, laru iya nu be a ta makahadu g'o habe.
- ⁴⁸Sólomonu meshikotaru ivu, du l'eze-ulo Chipfu ono, bu iya bu: Oru-ngweja, e gude mkpola-ododo mee; mẹ teburu, e gude mkpola-ododo mee, eedobeje buredi, du nso l'iphu Chipfu;
- ⁴⁹mẹ iphe, aapfubeje oroku, e meru l'okpobe mkpola-ododo. Ise be o doberu l'ekutara; dobe ise ophuu l'ekicha l'iphu mkpuru eka-kakota-adu-nsọ ono; mẹ iphe, du g'okoko; mẹ oroku; mẹ iphe, eegudeje akpapyata iphe. Iphemiphe ono be e mekotaru lẹ mkpola-ododo;
- ⁵⁰mẹ gbamugbamu; mẹ iphe, apaje oghu oroku; mẹ ago; mẹ iphe, aaguje oku. E gudekota okpobe mkpola-ododo mekota iya; mẹ enya okpa-mgbo ime mkpuru, bu iya bu mkpuru eka-kakota-adu-nsọ; yee enya okpa-mgbo eze-ulo ono l'onwiya, e gude mkpola-ododo mee.
- ⁵¹Noo ya; ozi, eze, bu Sólomonu ejekota l'eze-ulo Chipfu ono bya abvukota. O bya ewobatakota iphemiphe, Dévidi, bu nna iya shi dobe nso bya eworu dobe l'eka eedobeje eku l'eze-ulo Chipfu ono; mbu mkpola-ochaa; mẹ mkpola-ododo; mẹ ivu, du iche iche.

1 Ndu eze 8

Aapabata okpoko Chipfu l'eze-ulo Chipfu

(2Iphe 5:2—6:2)

- ¹Tobudu iya bu; Sólomonu bya ekukoo ndu bu ogerenya ndu Ízurelu; mbu ndu-ishi l'ipfu l'ipfu; mẹ ndu-ishi l'enya-unuphu ndu Ízurelu; g'ephe byapfuta iya lẹ Jierúsalemu; k'opfu ephe a-pafuta okpoko oghandzu Chipfu l'ubvu Zayonu, bu iya bu mkpukpu Dévidi.
- ²O -rwuepho teke ephe aboje iphe l'onwa Etanimu, bu iya bu onwa k'esaa; unwoke Ízurelu l'opfu tuko g'ephe ha dzukoo l'iphu Sólomonu.
- ³Ndu bu ogerenya ndu Ízurelu l'opfu dzukoo; ndu-uke Chileke pata okpoko ono.
- ⁴Ephe pata okpoko Chipfu; bya aphota ulo-ekwa-ndzukoo; gwetakota iphe, bu ivu, du nso, du iya nu. O buru ndu-uke Chileke waa ndu Liviya be vutaru iya nu.

⁵Eze, bu Sólomõnu me ikpoto ndu Ízurelu, ephe l'iya dzukoberu l'eka ono tuko nõdu l'iphu okpoko ono; egbushi aturu me eswi. Ephe gbushiru ikpoto anu, a ta tukotadu onu iya; teme ophu a ta gutadu iya l'ogu.

⁶Noo ya; ndu-uke Chileke ono pata okpoko oghandzu Chipfu ono je edobe l'eka du nsõ, e metaru doberu iya l'ime mkpuru eze-ulo ono, bu iya bu eka-kakõta-adu-nsõ; woru iya dobe le mkpula nkù chierobu.

⁷Chierobu ono be sashigbaaru nkù l'eli eka ono, okpoko ono nõ ono; shi nno gbobuta okpoko ono; waa oshi, eegudeje apa iya.

⁸Oshi ono be du ogologo k'ophu bu l'aagbeje l'eka-du-nsõ ono, du l'iphu eka-kakõta-adu-nsõ ono ele ishishi iya g'o tsefutaru. Ole a ta gbejekwanu l'eka ozo huma iya. Ephe dukwa-a l'eka ono byasu le ntanu.

⁹O to dudu iphe, du l'okpoko ono; gbahaa mkpuma labõ, du bachibachi, Mõsisu yeru iya l'ubvú Horebu l'eka ono, Chipfu yee ndu Ízurelu nõ gbaa ndzu g'ephe futaru l'alì Ijiputu ono-a.

Odu-biribiri Chipfu

(2Iphe 5:11-14)

¹⁰Ndu uke Chileke ono shiepho l'eka-du-nsõ lufuta; urwukpu bya eji eze-ulo Chipfu ono ejiji.

¹¹Urwukpu ono mee k'ophu ndu-uke Chileke ono ta aduedu ike jee ozi, ephe eje; noo kele õdu-biribiri Chipfu be jiru eze ulo Chipfu ono.

Opfu, Sólomõnu pfuru

(2Iphe 6:3-11)

¹²Tõbudu iya bu; Sólomõnu sù: “Chipfu sùru l'õo l'urwukpu, gbahuru ke tsukiribaa be ya e-buru.

¹³Nta-a be mu kpõwaru ngu eze-ulo, parõ eka apaa, bu eka ii-buru jasù le tuutuutuu le mjimimii.”

¹⁴Ndu Ízurelu ono, dzukoberu nu ono pfuru l'eka ono; Sólomõnu bya aghachiru phe iphu; goru õnu-õma nu phe;

¹⁵sù phe: “G'ajaja buru ke Chipfu, bu Chileke ke Ízurelu; mbu onye ono, gude õnu iya kwee Dévidi, bu nna mu ukwe; bya egudewaa eka iya meebekota iya g'o pfuru. Kele o pfuru sù:

¹⁶‘Eshi mbõku, mu dufutaru ndibe mu, bu ndu Ízurelu l'alì Ijiputu be õ to dudu mkpukpu, mu hõfutaru l'ipfu Ízurelu l'ophu g'õ buru eka aa-kpuru mu ulo; g'epha mu reje ire l'eka ono. Ole mu hotaru Dévidi g'õ buru onye-ishi ndibe mu, bu ndu Ízurelu.’

¹⁷“Nna mu, bu Dévidi be o shikpõo du g'a sù l'õ kpuru Chipfu, bu Chileke ke ndu Ízurelu eze-ulo.

¹⁸Obenu le Chipfu sùru nna mu, bu Dévidi: ‘Eshi ophu i vu iya l'obu g'ì kpõaru mu eze-ulo be õ dukwa-a ree l'õ du ngu l'obu.

19Ole-a; ọ tọ bụdu gụbedua bẹ a-kpụ ụlo ọbu. Onye a-kpụ iya nụ bụ nwa ngu, ị nwuru anwunwu. Ọo yẹbedua bẹ a-kpuru mu eze-ulo ọbu.’

20“Nta bẹ Chipfu meebewaru ukwe ono, o kweru; kele mu futawaru bya anọ-chia ẹnya nna mu, bụ Dévidi; mu nọduwaa l'aba-eze ndu Ízurelu egube ono, Chipfu kweru ukwe iya; teme mu bya akpụwa eze-ulo Chipfu, bụ Chileke ke Ízurelu ono.

21Ọ bụru l'eka ono bẹ mu metawaru eka okpoko Chipfu nọ; mbụ okpoko ono, e yeru ekwo ogbandzu ono, Chipfu yee nna anyi phe gbaru le teke ono, o dufutaru phe l'alị Ijiputu ono.”

Sólomonu epfu anụ Chileke

(2Iphe 6:12-42)

22Tobudu iya bụ; Sólomonu pfuru l'iphu ọru-ngweja Chipfu; l'iphu edzudzu-oha ndu Ízurelu ono; chilia eka iya labo imeli;

23pfuaha sụ: “Gube Chipfu, bụ Chileke ke Ízurelu; ọ tọ dudu Chileke ọzo, dūbaa ge gubedua l'imigwe waa l'eliphe; mbụ gube onye edobeje ogbandzu, unu le ndibe ngu gbaru; bya egoshije l'i yeru ndu-ozu ngu obu; mbụ ndu gude obu phe g'ọ ha etso ụzo ngu.

24Gube onye ono, mekotaru ukwe-iphe, i kweru onye-ozu ngu ono, bụ nna mu Dévidi. I gude onu ngu kwee ya ukwe-iphe; bya egude eka ngu mee iphe, i kweru iya ukwe iya; g'i meru iya ntanụ-a.

25“Gube Chipfu, bụ Chileke ke Ízurelu; nta-a bụ g'i mefunaa ukwe-iphe ono, i kweru onye-ozu ngu ono, bụ nna mu Dévidi; mbụ ono, i kweru iya sụ: ‘Ọ tọ dudu iphe, bya l'e-me g'unwu ngu nọ-buhu l'aba-eze ndu Ízurelu; m'ọ bụru-a l'unwu ngu ọbu bẹ a-kwaberu onwophe ẹnya; etso ụzo mu; egube ono, gubedua tsoru iya ono.’

26Jiko Chileke ke Ízurelu; g'opfu ono, i pfuru yeru onye-ozu ngu, bụ nna mu Dévidi ono vukotakwa.

27“Obenu; ? Chileke e-buru l'eliphe k'eviya ọo? Sụ-a; igwe; mbụ igwe ophu kakota l'eli ta asudu ngu anodu; ? bụ-chia eze-ulo ọwa-a, mu kpuru-a l'asuru ngu?

28Ole-a; numanu epfufu, onye-ozu ngu epfu anụ ngu; me arworwo, oorwo ngu. Gube Chipfu, bụ Chileke mu; ngabenu nchi le mkpu, onye-ozu ngu echiku ngu; waa epfufu, ọ nọ l'iphu ngu epfu anụ ngu ntanụ-a.

29Mbụ; g'ẹnya ngu dujenu l'eze-ulo-a eswe l'enyashi. Mbụ eka-a ị suru l'ii-buru-a; k'ophu bụ teke mube onye-ozu ngu gharu iphu l'eze-ulo-a pfuru nụ ngu; l'i ngaberu mu nchi.

30Ngabejenu nchi l'arworwo, onye-ozu ngu; me ndibe ngu, bụ ndu Ízurelu arwo ngu; le teke ephe gharu iphu l'eka-a epfu anụ ngu. Shikwa l'imigwe, bụ eka i bu ebubu numa iya. Teke ị nūmaru iya; gūkwaaru phe nvu l'iphe-eji phe.

31“Ọ -buru l'o nweru onye mesweru ibe iya; a nodu ele ẹnya g'onye ọbu ria nte; onye ono -bya l'ọru-ngweja ngu, nọ l'eze-ulo-a; bya eria nte ọbu;

³²shikwa l'imigwe numa iya; l'iimee iphe, gbaru ngu nū. Kpee ndu-ozī ngu ono ikpe l'onwongu. Onye ophu ikpe nmaru; nmaa ya ikpe; tū-kobe iya iphe, o metaru l'ishi. Onye ophu iswi dū mma; haaru iya enge; meeru iya iphe, gbaru iya nū lē k'apfubekoto iya.

³³“O -buru l'ohogu lwu-kperu ndibe ngu, bu ndu Ízurelu; kele ephe mesweru ngu; ephe -bya aghaa umere lwapfuta ngu; bya ekuahaa epha ngu; nodu l'eze-ulo-a pfuru nū ngu; rwo ngu;

³⁴shikwa l'imigwe numa iya; l'i guaru ndibe ngu ono, bu ndu Ízurelu nvu l'iphe-eji phe ono. L'i bya eduphuta phe azu l'ali ono, i nuru nna phe ono.

³⁵“Teke o bu l'igwe buru mini; mini dzebuhu; kele o l'ephe meru iphe-eji; ephe byakwanu aghaa iphu l'uzo aka-a pfuru nū ngu; kuahaa epha ngu; bya agbakuta iphe-eji phe ono azu; kele i mewaru ephe jee iphe-ehuka;

³⁶shikwa l'imigwe numa iya; guaru ndu-ozī ngu ono, bu ndu Ízurelu nvu l'iphe-eji ono. L'i zia phe uzo, pfuru oto, ephe a-nodu etso. L'i mee ge mini dzee l'ali ono, i nuru ndibe ngu g'o buru okiphe phe ono.

³⁷“O -buru l'oo egu-ememe byaru l'ali-a; ozoo ejo iphe-ememe; m'obu iphe, emebyishije nri, a koru l'opfu; ozoo ophu emeje g'o tsua evu; ozoo igube; m'obu ntaka, atakashije iphe; ozoo l'oo ohogu phe byaru bya ekepheta phe le mkpukpu, du l'ali phe; mbu; o betakporu o buru ejo iphe-ememe gunu; ozoo iphe-ememe, du idu-agma be byaru nu;

³⁸o -nwekporu onye machiru aka iya l'uzo ulo-a pfuru nū ngu; ozoo l'oo ndibe ngu, bu ndu Ízurelu l'ophu be pfuru nū ngu; bya arwo ngu; kele o onyenonu maru g'iphe-ehuka ono atsu-beru iya l'ehu l'obu iya;

³⁹shikwa l'imigwe, bu aka ono, i bu ebubu ono numa iya. Gukwaaru phe nvu; mee iphe, gbaru ngu nū; l'i meeru onyenonu g'iphe, oome gbaru; eshi ophu i maru obu onyemonye. Noo kele o gubedua kpoloko be maru obu unwu-eliphe l'ophu;

⁴⁰k'ophu ephe a-nodu atsu ngu ebvu mbokumboku; jeye g'ephe a-no-bekporu l'ali-a, i nuru nna anyi phe-a.

⁴¹“A bya l'onye bu onye ohozo; mbu onye ta abudu onye Ízurelu, bu ndibe ngu; mbu onye ono, gude k'epha ngu shi l'eka du enya bya;

⁴²kele ndiphe a-numa k'epha ngu ono, paru aka apaa ono; me k'okpehu ngu; waa k'iphe, du biribiri, inoduje emegbabe. Teke onye obu byaru bya aghaa iphu l'eze-ulo-a; pfuru nū ngu;

⁴³shikwa l'imigwe, bu aka i bu ebubu; numa iya; meeru onye ohozo ono iphemiphe, o gude araku ngu; k'ophu ndu mgboko l'ophu a-madzuru epha ngu; shi nno atsu ngu ebvu ge ndibe ngu, bu ndu Ízurelu atsu ngu. Teme ephe amakwarupho l'eze-ulo-a, mu kpuru-a be bu epha ngu be e gude kpua ya.

- 44“O -buru lẹ ndu nkengu jeru etso ndu ọhogu phẹ ọgu l'ẹka bụkpoo ẹka i ziru phẹ; ẹphe -chebewa iphu lẹ mkpukpu-a, i ọtaru-a; mẹ l'eze-ulo-a, mu kpuru ngu-a pfuru nụ gube Chipfu;
- 45nọdukwa l'imigwe numa epfupfu ono, ẹphe pfuru nụ ngu ono; mẹ arwọwo, ẹphe rwọru ngu; bya agbaaru phẹ mkpu.
- 46“Teke ọ bụ l'ọo iphe-ẹji bẹ ẹphe meru ngu; kele ọ tọ dudu onye te emejedu iphe-ẹji; ẹhu ghuahaa ngu egbu; i woru phẹ ye ndu ọhogu l'ẹka; k'ọphu bụ l'ọhogu kpuru phẹ lẹ ndzu lashia alị phẹ l'ẹka dū ẹnya; ọzoo ẹka dū ntse;
- 47ẹphe -nọdu l'alị ono, a kpuru phẹ lẹ ndzu laa ono; egomunggo lwa phẹ azu; izimanu lwa phẹ azu; ẹphe nọdu l'alị ndu ono, kpuru phẹ lẹ ndzu ono rwo ngu sụ l'ẹphe mewaru iphe-ẹji; bya emewaa iphe, ta apfuduru-oto; mewaa ẹjo-ememe;
- 48mbu; ọ -buru l'ẹphe nọ l'alị ndu ọhogu phẹ ono, kpuru phẹ lẹ ndzu ono gude obu phẹ g'ọ ha; mẹ ndzu phẹ g'ọ ha lwapfuta ngu ọzo; ẹphe gha iphu l'alị-a, bụ alị, i nuru nna phẹ-a; mbu lẹ mkpukpu-a, i ọtaru-a; mẹ l'eze-ulo-a, mu kpuru ngu-a; pfuru nụ ngu;
- 49shikwa l'imigwe, bụ ẹka i bu ebubu numa epfupfu ono, ẹphe pfuru nụ ngu ono; mẹ arwọwo ono, ẹphe rwọru ngu ono; gbaaru phẹ mkpu.
- 50Guaru ndibe ngu ono, meru ngu iphe-ẹji ono nvu. Guaru phẹ nvu l'emeswe, ẹphe mesweru ngu. L'i mee gẹ ndu ono, lwutaru phẹ nụ ono phujeru phẹ obu-imemini.
- 51Noo kele ẹphe bụ ndibe ngu; bya aburu okiphe nkengu ono, i dufutaru lẹ Ijiputu; mbu l'ẹjo ọ-ta-ririri ọku ono, adazeje iphe-igwe ono.
- 52G'ẹnya dunu ngu l'iphe, nwozi ngu arwo ngu; waa iphe, ndibe ngu ono, bụ ndu Izurelu arwo ngu; ngabejenuru phẹ nchi teke bụkpoo teke ẹphe rakuru ngu.
- 53Noo kele; ẹphe bụ ndu i wofutaru dobe iche l'echilabo ohamoha, dukota lẹ mgboko-a; g'ẹphe buru okiphe ngu; mbu egube ono, i shi l'onu onye-ozu ngu, bụ Mosisu pfua ya lẹ teke ono, gube Okalibe-Kakota-Ike, bụ Chipfu dufutaru nna anyi phẹ lẹ Ijiputu pho.”
- 54No iya; Solomonu bya epfughechaepho nụ Chipfu; arwokota iya iphemiphe ono; ọ gbalihu l'oru-ngweja Chipfu ono, o byishiru ikpere ono woru ẹka labo chi-lia imeli.
- 55O bya apfuru apfuru; wolia olu ewoli; gọoru edzudzu-oha Izurelu ono l'ophu onu-oma sụ:
- 56“G'ajaja buru ke Chipfu, bụ onye ono, meru gẹ ndu Izurelu tuta unme; egube, o kweru ukwe iya. Ukwe-iphe, dū ree ono, o shi l'ẹka onye-ozu iya, bụ Mosisu kwee ono bẹ ta adudu mẹ nanu, laru ke mmanu.
- 57Gẹ Chipfu, bụ Chileke anyi swiru anyi eswiru; egube ono, o swiru nna anyi phẹ ono. G'ọ tọ pakwaru anyi haa; ophu ọ gwobekwa anyi.

⁵⁸G'o mekwaa g'anyi kpõru obu anyi yeru iya; tsoje ụzo iya l'ophu; meje ekemu iya; me iphe, ọ tọru ọkpa iya g'e tsoje; me omelali iya, bu iya bu iphe, o pfuru nna anyi phe.

⁵⁹G'epfupfu ọwa-a, mu no l'iphu Chipfu pfuru nu iya-a ndukwa yebe Chipfu, bu Chileke anyi ntse eswe l'enyashi; k'ophu ọo-gbajeru nwozi iya; me ndibe iya, bu ndu Izurelu mkpu le mkpa, duru phe nu mbokumboku.

⁶⁰K'ophu bu le ndu mgboko l'ophu a-maru l'oo Chipfu be bu Chileke obu; l'o to duedu Chileke ozo, du nu.

⁶¹Su-a; unu wotakota obu unu g'o ha ye l'eka Chipfu, bu Chileke no; unu etsoje iphe, o tọru ọkpa iya; meje iphe, ekemu iya pfuru; mbu g'o du ntanu-a.”

Eeye eze-ulo Chipfu l'eka Chileke

(2Iphe 7:4-10)

⁶²Tobudu iya bu; eze yele ndu Izurelu l'ophu, bu ndu yele iya no l'eka ono woru ngweja gwee l'iphu Chipfu.

⁶³Anu, Solomonu gburu gude gweeru Chipfu ngweja-ehu-guu be du ukporo unu eswi ugbo labo l'unu iri l'ise ; me ukporo unu aturu ugbo iri l'ise . Oo ya bu; eze yele ndu Izurelu ono g'ephe ha tugba woru eze-ulo ono ye Chipfu l'eka.

⁶⁴O bukwarupho mboku ono be eze doberu echilabo oma-unuphu ono, no l'atatiphu eze-ulo Chipfu ono nsọ. O buru l'eka ono be o no gwee ngweja-akpo-oku; me ngweja-nri; me eba-anu, e gude gwee ngweja-ehu-guu. Noo kele oru-ngweja ono, e gude onyirubvu mee ono, no l'iphu Chipfu ono be ha nwanshii; k'ophu bu le ngweja-akpo-oku ono; me ngweja-nri ono; me eba-anu, e gude gwee ngweja-ehu-guu ono taa lakotadu iya.

⁶⁵Oo ya bu; Solomonu me ndu Izurelu g'ephe ha ono, ephe l'iya no l'eka ono; mbu ikpoto oha, shi le mkpukpu Lebo-Hamatu; je akpaa le nggele Ijiputu tuko nodu teke ono boo obo-iphe l'iphu Chipfu, bu Chileke anyi; mbu boo ya abali esaa; bya abokwase iya abali esaa ozo; mbu boo ya ujiku iri l'eno.

⁶⁶O be le mboku k'esato; o su phe g'ephe lashia. Ephe goru onu-oma nu eze; bya awukashihu lashia; eje ete eswa le k'iphe-oma, Chipfu mekotaru onye-ozu iya bu Dévidi; me ndibe iya, bu ndu Izurelu.

1 Ndu eze 9

Chipfu epfu eyeru Solomonu

(2Iphe 7:11-22)

¹Noo ya; Solomonu kpụ-tsechaa eze-ulo Chipfu; me ulo nkiya; bya emekota iphemiphe, o tumberu k'ememe;

²Chipfu byapfuta iya k'ugbo ebo egube ono, o byapfutahawaru iya le Gibiyonu pho.

³Chipfu bya asu iya: “Mu numawaru epfufu, i pfuru nu mu; waa iphe, i rwo ru mu. Mu dobewaru eze-ulo-a, i kpuru-a nsò; bya emewaa iya g’o buru eka epha mu a-nodu ere ire jasù l’ojejoje. Eya mu; waa obu mu be a-duje l’eka ono tekenteke.

⁴“A bya le gubedua; o -buru l’ii-gude obu, guru iphoro etso mu egube ono Dévidi, bu nna ngu meru; bya eme iphemiphe, mu turu ngu l’ekemu;

⁵be mu e-me g’aba-eze ngu le Izurelu nguru anguru jasuru asuru; egube ono, mu kweru iya nna ngu, bu Dévidi ukwe iya le teke ono, mu suru iya l’o to nwedu iphe, bya l’eme ge gu l’unwu ngu no-buhu l’aba-eze ndu Izurelu.

⁶“Ole-a; o -buru le gubedua; ozoo unwegirima ngu nonyaaru ophu unu te etsoedu mu; teme ophu unu emejeedu ekemu ono, mu turu unu ono; mbu unu je agwaahaa agwa; baaharu phe eja;

⁷be mu e-wofukwa Izurelu l’ali ono, mu nuru phe ono; mu amia enya l’eze-ulo-a, mu doberu nsò g’epha mu reje ire-a. Izurelu aburu ndu ndu ozo a-nodu anma l’ejo etu; buru ndu aa-nodu eme iphe ochi.

⁸Eze-ulo-a, ha imelimeli egube-a be a-buru onye aghata iya nu; ishi anyia ya edzu; l’o kpo-ya ukuvu su: ‘? Bu gunu meru g’o gude Chipfu mee ali-a; waa eze-ulo-a egube-a?’

⁹Ndiphe epfua su: ‘Oo kele ephe haru Chipfu, bu Chileke phe; mbu onye dufutaru nna phe l’ali Ijiputu; gbè woru obu phe kporu yeru agwa; gwaahaa ya; abaru iya eja. Noo iphe, meru g’o gude Chipfu wopfuta phe egube ejo iphe-ehuka-a.’ “

Iphe ozo, Sólomonu megbaberu

(2Iphe 8:1-18)

¹⁰Noo ya; ukporo apha ono bvuchaepfo, bu iya bu teke Sólomonu gude kpa ulo labo pho; mbu eze-ulo Chipfu yee ulo nkiya;

¹¹eze, bu Sólomonu woru mkpukpu ukporo, du le Galili nu Hiram, bu eze ndu Taya. Noo kele oo Hiram be nukotaru iya oshi sida; me oshi payinu; me mkpola-ododo g’o guru iya.

¹²Hiram bya eshi le Taya bya ge ya huma mkpukpu obu, Sólomonu nuru iya obu. O humachaa ya; ophu o to dudu iya ree.

¹³Tobudu iya bu; o jia su: “? Bu egube mkpukpu gunu be i nuru mu egube-a?” O woru mkpukpu ono gube ali Kabulu, bu iya bu ali, nwahuru anwahu. E kumaru iya epha ono byasu ntanu-a.

¹⁴Iphe, Hiram nuru eze bu mkpola-ododo, erwa iya du ukporo talentu ishii.

¹⁵Owaa bu iphe, ndu ogbo-ozu ono, eze Sólomonu hotaru ono megbaberu; mbu ndu o hotaru g’ephe kpa eze-ulo Chipfu; me ulo nkiya; waa igbulu Jierusalemu; me agbarike iya; me mkpukpu Hazo; me mkpukpu Megido; waa mkpukpu Geza.

- 16**Fero, bu eze ndu Ijiputu be jeru ogu le mkpukpu Geza je alwuta iya; tufu iya oku; bya egbushia ndu Kénanu, bu phe bu le mkpukpu ono; bya eworu iya nu nwa iya nwanyi ono, Sólomonu luru ono; g'ò buru iphe, o gude laa ji.
- 17**Oo ya bu; Sólomonu bya akpukwaa mkpukpu Geza ono. O kpua mkpukpu Betu-Horonu ophu no l'uzo ndohali;
- 18**me mkpukpu Balatu. O bya akpua mkpukpu Tama ono, no l'echiegu ali Jiuda;
- 19**kpukwapho mkpukpu, ookwakobeje iphe; me mkpukpu, ee-dobeje ugbo-inya iya; me ophu ndu agbaru iya inya a-noduje. Sólomonu tukoru iphemiphe, du iya g'ò kpua ya le Jierúsalemu kpukota; me l'úbvú úbvú Lébanonu; mekpoo l'ali-eze iya l'ophu.
- 20**A bya le ndu ophu phoduru nu le ndu Amoru; me ndu Hetu; me ndu Pérezu; me ndu Hevu; me ndu Jiebusu; mbu ndu ono, ta abudu ndu Ízurelu ono;
- 21**be awa ndu ono, phoduru nu l'ali ono; mbu ndu ophu ndu Ízurelu ta adudu ike gbushikota; be Sólomonu meru g'ephe buru ohu, eje ozi mkponwu-ehu byasu ntanu-a.
- 22**A bya le ndu Ízurelu be o to dudu onye ophu Sólomonu meru ohu. Epebedua be o meru ndu ojogu iya; me ndu-ishi ozi iya; me ndu-ishi ndu ojogu iya; me ndu-ishi ugbo-inya iya; me ndu agbaru iya inya.
- 23**Oo ephe bu ndu-ishi l'iphe, Sólomonu gude l'eka eme; ephe du unu nemadzu l'umadzu ukporo esaa l'iri bu ndu eleta ndu-ozu ono enya.
- 24**Oo ephe ge nwada Fero pho shi le mkpukpu Dévidi lwa bya eburu l'ulo ono, Sólomonu kpuru iya ono; be Sólomonu kpuru agbarike igbulo mkpukpu ono.
- 25**Ugbo eto l'apha be Sólomonu egweje ngweja-akpo-oku; me ngweja-ehu-guu l'eli oru-ngweja ono, o kpuru Chipfu ono. O nodu akpojekwapho unwu-isensu oku l'iphu Chipfu; shi nno mebekota iphemiphe, eemeje l'eze-ulo Chipfu.
- 26**Eze, bu Sólomonu bya akushia ugbo-mini dobe le Eziyonu-Geba ono, no-kube mkpukpu Elatu ophu du l'ali ndu Edomu l'aguga Eze-enyimu Uswe-uswe.
- 27**Noo ya; Hiram ye ndu nkiya, maru g'aakpoje ugbo-mini, bu ndu mahawaru eze-enyimu ono; g'ephe tsoru ndu ke Sólomonu meje k'ugbo ono.
- 28**Ephe jeshia ali Ofi; bya eshi l'eka ono wolata mkpola-ododo, erwa iya du unu talentu le talentu ukporo bya akuberu eze, bu Sólomonu.

1 Ndu eze 10

Eze-nwanyi ndu Sheba akpafuta Sólomonu

(2Iphe 9:1-12)

- 1**Tobudu iya bu; eze-nwanyi ndu Sheba bya anuma udu Sólomonu; waa ge yee Chipfu gude nodu; o bya g'ò gude aji, shihuru ike dalee ya.

²Ọ chiru ikpoto nemadzu bya Jierusalemu; chiru inya-kamelu, vugbaa manu, eshi kwekweekwee; waa igwerigwe mkpola-ododo; me mkpuma, vugbaa oke aswa. Ọ byapfuta Sólomonu; bya atuko iphemiphe, du iya l'obu pfukotaru iya.

³Sólomonu yekotaru iya onu l'aji, o jikotaru iya. Ophu o dudu aji, o jiru eze, kpuru iya eka l'enya ke g'o to saru iya ya.

⁴Eze-nwanyị ndu Sheba ono bya ahumaephe egube mmamiphe, Sólomonu nweru; waa egube ulo, o kpuru;

⁵me egube nri, oorije; me udu oshi, ndu-ozu iya anoduje anoo; me ge ndu-ozu iya gude eje ozu; waa egube uwe, ephe eye l'ehu; me ndu etsujeru iya onu le mee; mekpoo ngweja-akpo-oku, oogweje l'ulo Chipfu; o tufu iya eh.

⁶Ọ bya asu eze: “Akọ, mu no l'ali anyi numa k'opfu iphe, i meshiru; me ke mmamiphe ngu be bukota eviya.

⁷Mu te eshidu kweta l'ako ono bu eviya; jasụ ge mu byaru bya egude enya mu humakota iya-a. Lenu; a ta kojahaduru mu iya ebo. Mmamiphe ngu; waa iphe, i nweru be ka g'a turu onu iya.

⁸Oo ephe le ndibe ngu be iphe kweru! Iphe kweru ndu-ozu ngu phe, bu ndu anoduje l'iphe ngu mkpurumkpuru anuma opfu mmamiphe, iipfu!

⁹G'ajaja buru ke Chipfu, bu Chileke ngu, bu onye ono, i du ree; o woru ngu dobe l'aba-eze ndu Izurelu. Oo kele Chipfu yeru ndu Izurelu obu ojejoje meru g'o gude; o mee ngu eze phe; k'opfu ii-nodu ekpe ikpe, pfuru nhamunha; meje iphe, pfuru oto.”

¹⁰To budu iya bu; eze-nwanyị ono bya eworu mkpola-ododo, erwa iya du ukporo talentu ishii nu eze; bya anu iya manu, paru eka apaa, eshi kwekweekwee; waa mkpuma, vugbaa oke aswa. Manu ono, eze-nwanyị ndu Sheba nuru eze, bu Sólomonu ono be paru eka shii; k'opfu bu l'o to dudu manu, a nujebaaru iya habe g'onoya.

¹¹Ugbo-mini Hiramụ nodu eshije l'ali Ofi vulata mkpola-ododo. Nokwapho g'ooshije l'eka ono evulata oshi alugumu, ha igwerigwe; me mkpuma, vugbaa oke aswa.

¹²Ọ buru oshi alugumu ono be eze gude meshia itso ye l'ulo Chipfu; me l'ulo ibe eze; bya egudekwa iya pho mee une; waa ogumogu, ndu ebvu egudeje agu ebvu. Oshi alugumu, ha egube ono be e te vulatabaeduru; ophu a ta humajeduru udu iya ono byasu ntau-a.

¹³Eze, bu Sólomonu bya anukota eze-nwanyị ndu Sheba ono iphemiphe, du iya ree, o suru g'o nu iya; a -gufukwa ebyaa, o sahawaru obu iya kwaarụ iya. Oo ya bu; eze-nwanyị ono dakobe lashia ali phe; yele ndu-ozu iya.

Ẹku Sólomonu (2Iphe 1:13-17; 9:13-28)

¹⁴Mkpola-ododo, eevulatajeru Sólomonu aphagapha be erwa iya aduje unu talentu; l'ukporo talentu iri l'eto le talentu ishii;

- 15**a -gufukwa iphe, l'eshije l'eka ndu ngho; me l'eka ndu agba eze ngho; waa ophu eshije l'eka ndu eze ndu Arabu; me ophu eshije l'eka ndu ochi-oha ali ono.
- 16**Eze, bu Solomonu gude mkpola-ododo, e tsusaru osa meta iphe, eegudeje egbobuta onwonye, hagbaa galagala; uzo ukporo iri. Mkpola-ododo, laru le nanu be duchaa unu shekel; le shekelu ukporo iri.
- 17**O gudekwapho mkpola-ododo, e tsusaru osa meta iphe ono, eegudeje egbobuta onwonye ono ke nshii; uzo ukporo iri l'ise. Mkpola-ododo, laru le nanu bu shekelu ukporo esaa; le shekelu iri. Eka eze doberu iya bu l'ulo ono, e gude oshi, shi l'oswa, no l'ubvu ubvu Lebanonu kpua ono.
- 18**Nokwapho g'eze gude eze-enyi meta aba-eze, ha shii; bya awukota iya okpobe mkpola-ododo l'eli.
- 19**Eka eshije enyikota aba-eze ono, be du ntokpa ishii; eka aadaphubeje iya be eli iya du ke kokoroko. E metaru iya eka aatukobeje eka ibekobo; kpua oduma labo pfukubechaa iphe ono, aatukobeje eka ono ephenebo.
- 20**A kpua oduma iri l'ebo pfubechaa ibekobo l'eli ntokpa ishi ono, e shije enyikota aba-eze ono. O to dudu aba-eze ozo, e mejewaru; o du egube ono.
- 21**Iphe, eze egudeje angu iphe-angungu bu mkpola-ododo be e gude mekota iya. Ivu, dukota l'ulo ono, e gude oshi, shi l'oswa ubvu ubvu Lebanonu kpua ono be bu okpobe mkpola-ododo be e gude mee ya. O to dudu iphe ono, duru ophu e meru le mkpola-ochaa; noo kele o to dudu iphe, a guberu mkpola-ochaa le teke Solomonu bu eze.
- 22**Eze nwegbaaruu ugbo-mini, e gude agbaru iya ngho. Ugbo-mini ono be epho l'ugbo-mini ke Hiram atukoje swiru. O buru ugbo lanu l'ime apha eto be ugbo-mini ono alwaje; vulata mkpola-ododo; me mkpola-ochaa; me eze-enyi; me adaka; me enwe.
- 23**O buru eze, bu Solomonu be kakota enweru eku; buru iya kakota enweru mmamiphe l'iphe, bu ndu eze ndu mgboko l'ophu.
- 24**Eliphe l'ophu nodu abyaje l'iphu Solomonu g'ephe anuma opfu mmamiphe, Chileke nuru iya.
- 25**Aphagapha abujeru: onye -byatashia; l'o gude iphe bya anu iya; mbu iphe, e meru le mkpola-ochaa; me ophu e meru le mkpola-ododo; me uwe mgbalanu; me ngwo; me manu, eshi kwekweekwee; me inya; mekpoo inya-mulu. Iphe, aanuje iya be apaje eka apaa.
- 26**Solomonu bya akuberu onwiya ugbo-inya; me ndu agba l'inya. O nweru unu ugbo-inya eto l'ukporo iri; bya enweru ndu agba l'inya, du ukporo unu l'unu iri. O nweru ndu ophu yebe eze doberu le mkpukpu, eedobeje ugbo-inya; dobe ndu ophuu le Jierusalem swibe onwiya.
- 27**Eze be meru; mkpola-ochaa kuru g'aja le Jierusalem; bya emee g'oshi sida dzuru ekameka g'oshi sikamo, tukoru ali okpa ubvu, no l'uzo enyanwu-ariba sweta-a.

²⁸Oo l'alì Ijiputu yẹle alì Kuwe bẹ e shi anmatajẹru Sólomọnu ìnya. Ọ bọru ndu agbaru eze nghọ shi anmatajẹru iya ìnya ọbu.

²⁹Iphe, ẹphe shi egudeje azu ugbo-ìnya lẹ Ijiputu bu unu shekelu mkpọla-ọchaa lẹ shekelu mkpọla-ọchaa iri; bya egudeje ukporo shekelu mkpọla-ọchaa ẹsaa l'iri nmata ìnya. Ndu ono, agbaru eze nghọ ono; shikwaphọ evujejeru ndu eze ndu Hetu; mẹ ndu eze ndu Arámu iphe, shi l'alì nkepẹ.

1 Ndu eze 11

Sólomọnu alùshi igwe nwanyị

¹Noo ya; Sólomọnu bya eyee igwerigwe unwanyi ndu ọhozo obu. O je alùshia unwanyi, shi Mówabu; mẹ Amọnu; mẹ Edọmu; mẹ Sayidonu; waa Hetu; yekọberu nwada Fero phọ, ọoluhawaa phọ.

²Ndu ono shikọta l'ọha ono, Chipfu nmaru unwu Ízurelu ọkwa iya sụ: “Unu l'ẹphe te kegbakwaru nwanyị; noo kele ẹphe e-mekwa g'unu kporu obu unu yeru agwa phẹ.” Ọle Sólomọnu gbẹ yeshia phẹ obu ike.

³Unyomu iya bẹ du unu unwanyi l'unwanyi ukporo mgbo iri l'ise. Ẹphe tukuru bukotaru ada-eze ada-eze. Ọ bya enweru unwanyi, ndu ọphu abụ-zidu unyomu iya, du unwanyi ukporo mgbo iri l'ise. Unyomu iya ono mee; obu iya lufu l'ẹka Chipfu nọ.

⁴Ọ bọru gẹ Sólomọnu kahụwaru bẹ unyomu iya meru ọ kporu obu ye l'agwa; ọphu obu iya l'ọphu aduedu l'ẹka Chipfu, bu Chileke iya nọ; ẹgube ono, obu nna iya, bu Dévidi shi du iya ono.

⁵Sólomọnu bya etsoaha Ashitoretu, bu agwa ndu Sayidonu; mẹ Molẹku, bu ejo agwa ndu Amọnu.

⁶Oo ya bu; Sólomọnu mee ejo-ememe l'ẹnya Chipfu; ọphu o to gudeedu obu iya g'ọ ha tsoo Chipfu; ẹgube nna iya, bu Dévidi tsoru iya.

⁷L'úbvú ọzo ẹnyanwu-awawa Jierúsalemu bẹ Sólomọnu kpuru ẹka aagwajẹ agwa Kemoshi, bu ejo agwa ndu Mówabu; mẹ Molẹku, bu ejo agwa ndu Amọnu.

⁸Nokwaphọ g'ọ kpushiru unyomu iya ono, shigbaa ọhozo ono ẹka ẹphe anọduje akpo unwù-isensu ọku; agwa agwa phẹ.

⁹Chipfu bya edoberu Sólomọnu ẹhu-eghu; noo kele obu iya lufuwaru l'ẹka yẹbe Chipfu, bu Chileke kẹ Ízurelu nọ; mbụ onye ono, byapfutacharu iya mgbo labọ ono.

¹⁰Chipfu tūhawaru Sólomọnu ekemu; sụ iya g'ọ to tsokwa agwa. Obenu l'ọ jikaru edobe iphe ono, Chipfu tūru iya ekemu iya ono.

¹¹Oo ya bu; Chipfu sụ Sólomọnu: “Eshi ọphu i meru iphe, du ẹgube-a; mbụ ọphu i ti dobeduru ọgbandzu mu; waa iphe, mu tọru ọkpa iya; mbụ iphe ono, mu tūru ngu ekemu iya-a; bẹ mu a-nafu ngu alì-eze ono; woru iya ye onye-ozì ngu l'ẹka.

¹²Ọle mu e-gude kẹ nna ngu, bu Dévidi; haa ya anafu nta-a, i nọ ndzụ-a. Mu a-nafu ngu iya l'ẹnya kẹ nwa ngu nwoke.

13Ole-a; mu ta anafu-gbudu iya ali-eze ono g'ọ ha. Mu e-gude k'onye-ozu mu, bu Dévidi; me ke Jierusalẹmu, bu ẹka mu hotaru ono; woru ipfu lanu nu nwa ngu nwoke.”

Ndu ohogu Sólomonu

14Tobudu iya bu; Chipfu bya emee ge Hadadu, bu onye Edomu buru onye a-nodu etso Sólomonu opfu. O bu onye shi l'eri ndu eze ndu Edomu.

15O buru teke Dévidi yee ndu Edomu lwujeru ogu; be Jiowabu, bu onye-ishi ndu ojogu jeru eli odzu ndu e gbushiru l'ogu ono; o jerwua je atuko unwoke Edomu ono gbushia.

16Jiowabu yee ndu Izurelu noo onwa ishii l'eka ono; jasụ epe gbushikota unwoke ndu Edomu g'epe ha.

17Ole Hadadu tso ru ndu Edomu, shi egeru nna iya ozi gbalaa lashia ali ndu Ijiputu. Teke ono be o bukwadu nwatanshi.

18Epe shi le Midiyanu gbeshi; bya alufuta le Paranu. Epe shi le Paranu chita unwoke; epe l'epe swiru jeshia Ijiputu; epe bya ejepfu Fero, bu iya bu eze ndu Ijiputu. O nu Hadadu ulo; nu iya ali; bya anu iya nri.

19Hadadu bya atuba Fero l'enya shii; k'ophu bu le Fero keru iya nwune nyee ya g'ọ luru; mbu nwune eze-nwanyi ono, bu Tahupenesu.

20Nwune Tahupenesu ono bya anwataru iya nwa nwoke, epha iya bu Genubatu. Tahupenesu, bu eze-nwanyi hee nwata ono hetsee l'ibe-eze. Genubatu yee unwu Fero tuko buru vuta.

21Hadadu bya anodu le Ijiputu numa le Dévidi nwuhuwaru lapfushia nna iya phe; teme le Jiowabu, bu onye-ishi ndu ojogu be nwuhuwaru nu; o su Fero: “Haa ge mu tugbua lashia ali mu.”

22Fero su iya: “? Bu gunu be uko iya duru ngu l'eka mu no; meru g'ọ gude i nodu acho g'i lashia ali unu?” Hadadu su iya: “Haa mu ro ge mu lashia.”

23Chileke bya akpalia onye ozo, epha iya bu Rezonu nwa Eliyada; o buru onye tsoharu Sólomonu opfu. Rezonu be gbafujeru l'ibe nnajiuphu iya, bu Hadadeza, bu eze ndu Zoba.

24Le ge Dévidi gbushichaaru ndu ojogu ndu Zoba; be Rezonu chitaru ndu nemadzu swikaa onwiya; woru onwiya mee onye-ishi phe; bya eme phe g'epe kwefuje ike. Epe tugbua jeshia Damasukosu. Epe je eburu l'eka ono buru ndu-ishi.

25Rezonu be tsokotaerupho ndu Izurelu opfu jeye ge Sólomonu no-beru; yekobewaro emekpa ehu, Hadadu shi emekpa phe. Rezonu obu buru eze ndu Aramu; bya emekpa ndu Izurelu ehu.

Jierobowamu ekwefuru Sólomonu ike

- 26**Jierobowamu nwa Nebatu bya awatakwapḥo ekwefuru Sólomḥonu ike. O shi bḥuru onye lanḥ l'ime ndu-ozí Sólomḥonu. O bḥu onye ipfu Ifuremu; eka o shi bḥuru mkpḥkpḥu Zereda. Ne iya bḥe bḥu nwanyí, jí iya anḥedu, epha iya bḥu Zeruwa.
- 27**Waa g'o shi kwefuru Sólomḥonu ike oḥu baa: Sólomḥonu bḥe kpuru agbarike igbulḥ, e gude kpḥ-pheta mkpḥkpḥu Dévidi, bḥu nna iya mgburugburu; bya akpḥ-chishia eka gbaru oḥu l'igbulḥ ono.
- 28**Jierobowamu bukwanuru nwoke dḥu ike. Tḥbudu iya bḥu; Sólomḥonu bya ahḥma lḥ nwokorḥbya ono bḥe bḥu onye ejeshi ozi ike; o mee ya onye-ishi ndu oḥbo ozi oḥu-ḥlo Jíósefu l'ophu.
- 29**O -rwua teke ono; Jierobowamu shi lḥ Jierúsalemu jeshia iphe; Ahayijia, bḥu onye mpfuchiru Chileke, shi mkpḥkpḥu Shilo hḥma iya lḥ gbororo. Ahayijia yeru uwe oḥphúú. O bḥuru ephenebo ono nḥ nweka pḥe lḥ mgbeḥu ono.
- 30**Oo ya bḥu; Ahayijia ye eka l'uwe oḥphúú ono, o yeru ono; zijaha uzi iri l'ebo;
- 31**bya asḥ Jierobowamu: “Hata mpekala uwe-a iri, oḥu ii-nworu. Noo keḥe Chipfu, bḥu Chileke ke Ízureḥu sḥru-a: ‘Mu abyawaa a-nafḥ alí-eze ono l'eka Sólomḥonu; nḥ ngu ipfu iri.
- 32**Ole mu e-gude k'onye-ozí mu, bḥu Dévidi; me ke Jierúsalemu, bḥu mkpḥkpḥu, mu ḥḥtaru l'ipfu ndu Ízureḥu l'ophu; haarḥu iya ipfu lanḥ kpoloko.
- 33**Iphe, mu e-gude mee ya nno bḥe bḥu l'eḥe harḥ mbḥdua; baaharḥ Ashḥtoretu, bḥu agwa ndu Sayidonu eja; me Kemḥshi, bḥu agwa ndu Mówabu; waa Molḥku, bḥu agwa ndu Amḥnu. Oḥu o to tsoduru ḥzo mu; meje iphe, pfuru nhamḥnha l'enya mu; mee iphe, mu tḥru oḥpa iya; me omelalí mu; eḥube ono, nna iya, bḥu Dévidi tsoru iya.
- 34**“Ole-a; mu taa nafḥ-gbukwa iya alí-eze ono l'ophu l'eka. Mu e-gude k'onye-ozí mu, bḥu Dévidi, bḥu onye mu ḥḥtaru; bya aburu onye doberu iphe, ekemu mu pfuru; me iphe, mu tḥru oḥpa iya; haa ya g'o bḥuru onye-ishi jeye g'ḥo-nḥ-beru.
- 35**Oo l'eka nwa iya nwoke bḥe mu a-nafḥ alí-eze ono; woru ipfu iri l'ime iya nḥ ngu.
- 36**Nwa iya bḥe mu a-nḥ ipfu lanḥ; k'ophu onye-ozí mu, bḥu Dévidi e-nweru onye a-buru ishi lḥ Jierúsalemu, bḥu mkpḥkpḥu, mu ḥḥtaru dobe g'o bḥuru eka epha mu a-nḥdu ere ire.
- 37**Gḥbedua l'onwongu bḥe mu e-me g'í bḥuru ishi l'eka ono, oḥgu ngu g'í bḥuru ishi ono; mbḥu l'ii-buru ishi lḥ Ízureḥu.
- 38**Oo ya bḥu; o -bḥuru l'í ngaberu mu nḥi l'iphemiphe, mu tḥru ngu ekemu iya; etso ḥzo nkemu; bya eme iphe, pfuru nhamḥnha l'enya mu; mbḥu etso iphe, mu tḥru oḥpa iya; me ekemu mu; eḥube onye-ozí mu, bḥu Dévidi tsoru iya; bḥe mu e-swíru ngu eswíru; mee g'alí-eze ngu nḥduwaro jasuru ge ke Dévidi. Mu eworu Ízureḥu nḥkota ngu.
- 39**Mu e-gude k'iphe ono, meru nḥ ono hḥa ḥnwu Dévidi ahḥhḥ. Ole ahḥhḥ ono bḥe taa bḥduru jasuru asuru.’ “

⁴⁰Tɔbudu iya bụ; Sólomɔnu chọkashiahaa ụzo ya e-shi gbua Jierobowamu. Jierobowamu gbalaa lashia Ijiputu; lapfushia Shishaku, bụ eze ndu Ijiputu. Ọ nɔduwaro lẹ Ijiputu jasuru Sólomɔnu nwụhu.

Anwụhu Sólomɔnu

(2Iphé 9:29-31)

⁴¹Iphé ọzo, Sólomɔnu megbaberu; mę kę mmamiphe iya; bę e dekotaru l'ękwo-ako, e deshuru iphe, Sólomɔnu meru.

⁴²Sólomɔnu bę nọ lẹ Jierúsalemụ bụru eze ndu Ízurelu ụkporo apha labo.

⁴³Tɔbudu iya bụ; ọ nwụhu lapfushia nna iya phę. E lia ya lẹ mkpụkpu Dévidi, bụ nna iya. Nwa iya nwoke, bụ Rehobówamu bụru eze nọchia ęnya iya.

1 Ndu eze 12

Ndu Ízurelu ekwefuru Rehobówamu ike

(2Iphé 10:1-19)

¹Tɔbudu iya bụ; Rehobówamu tųgbua jeshia Shękemu; kęle ndu Ízurelu l'ophu wụwaru jeshia l'ęka ono g'ęphe mee ya eze.

²Teke ono bę Jierobowamu nwa Nebatu nọkwadu lẹ Ijiputu, bụ ęka ono, ọ gbaru laa teke ọogbaru eze, bụ Sólomɔnu ọso. Ọ numa kę Rehobówamu ono; o shi lẹ Ijiputu lwatashia.

³Ọo ya bụ; e zia g'e je ekua ya; yele ndu Ízurelu g'ęphe ha bya awụ-pfu Rehobówamu je asụ iya:

⁴“Nna ngu boru anyi ivu, anyi ęrwa. Ọ -buru l'ii-me g'ozu aphụ ono, nna ngu shi kpabe anyi ono; mę ivu ono, o boru anyi ono ka alwa alị; bę anyi a-nọdukwa-a ejeru ngu ozi.”

⁵Rehobówamu sụ phę: “Unu lashia je anọo ujiku ęto; g'unu alwaphutawarọ azụ.” Ọo ya bụ; ęphe wụkashihu.

⁶Tɔbudu iya bụ; eze, bụ Rehobówamu jeshia akpata ishi l'ęka ndu bụ ọgerenya ono, shi ejeru nna iya, bụ Sólomɔnu ozi teke ọ nọ ndzụ ono. Ọ jia phę sụ: “? Dęnu g'unu sụru gę mu yeeru ndu-a ọnu?”

⁷Ęphe sụ iya: “Ọ -buru l'ii-buru onye-ozu ndu-a ntanụ-a; mbụ wụaru phę ępho l'alị; bya epfuaru phę opfu ọma; bę ęphe a-bụkwaru ndu-ozu ngu jasuru asuru.”

⁸Obenu lẹ Rehobówamu jikaru idzu ono, ndu bụ ọgerenya chitaru iya ono. Ọ jepfushia ụnwokorobya, bụ ndu yeę ya tukuru bụru ọgbo; teme ęphe nọdu ejeru iya ozi; gę ya kpata phę ishi.

⁹Ọ jia phę sụ: “? Dęnu g'unubędua sụru gę mu yeeru phę ọnu? ? Bụ gunu bę anyi e-pfuru ndu-a, sụru gę mu mee g'ivu, nna mu boru phę ka alwa alị-a?”

¹⁰Unwokorobya ono, bu unwu ogbo iya ono su iya: “Iphe, ii-pfuru ndu ono, suru ngu le nna ngu boru phe ivu, anyi erwa ono; l’o g’i mee ya g’o ka alwa ali ono bu le-a: mkpushi-eka-nwotsutso ngu be ka upfu nna ngu igbi.

¹¹L’eshi ophu nna ngu boru phe ivu, anyi erwa be ii-me g’o kaba anyi erwa. Eshi ophu o bu echachi be nna ngu shi echije phe be ii-gbaahaa phe akpi.”

¹²Oo ya bu; o -rwuepho le mboku k’eto ono; Jierobowamu ye le ndu Izurelu l’ophu byapfuta eze, bu Rehobowamu ozo; egube ono, o pfuru phe g’ephe bya le mboku k’eto ono.

¹³Eze jika idzu pho, ndu bu ogerenya chikoshiru iya pho; yeeru ndu ono onu ehuka ehuka.

¹⁴O je etsoru idzu ono, unwokorobya chikoshiru iya ono su phe: “Nna mu boru unu ivu, anyi erwa; ole mbedua e-me g’o kaba anyi erwa. Nna mu bu echachi be o shi echije unu; ole mbedua be a-gbaahaa unu akpi.”

¹⁵Oo ya bu; ophu eze angaduru ndu Izurelu ono nchi; noo kele oo Chipfu be meru g’o du nno; k’ophu iphe ono, Chipfu shije l’onu Ahayijia ke mkpukpu Shilo pfuaru Jierobowamu nwa Nebatu ono a-vukota.

¹⁶Ndu Izurelu ono l’ophu bya ahumaepho l’eze ta angaduru phe nchi; ephe su iya: “? Bu gunu be anyi le Devidi jigba? O to dukwa okiphe, anyi nweru l’ehu nwa Jiesi. Unube Izurelu; g’onyenonu lashia unuphu ibe iya-o! Ge Devidi letawaro onu-ulo nkiya enya!” Oo ya bu; ndu Izurelu wukashihu lashia unuphu ibe phe.

¹⁷O buwaruro ndu Izurelu ophu bu le mkpukpu le mkpukpu, du l’ali Jiuda be Rehobowamu bu eze phe.

¹⁸Tobudu iya bu; eze, bu Rehobowamu zia Adoniramamu, bu onye-ishi ogbo ozi; g’o jepfu ndu Izurelu. O -rwua; ephe toko g’ephe ha gude mkpuma tugbua ya. Eze, bu Rehobowamu mekebe egwegwa nyita ugbo-inya iya gbalaa; o buru iya ala Jierusalemu.

¹⁹E shi teke ono; ndu Izurelu wata ekwefuru onu-ulo Devidi ike byasu ntanu-a.

²⁰Noo ya; ndu Izurelu l’ophu numa le Jierobowamu be lwawaru nu; ephe zia g’e je ekua ya. O bya le ndzuko phe; ephe mee ya eze ndu Izurelu l’ophu. Ophu o duedu ndu ozo, ephe l’onulo ke Devidi tugbaru; gbahaa ipfu Jiuda kpoloko.

Ozi, Shemaya ezi Rehobowamu

(2Iphe 11:1-4)

²¹Rehobowamu larwuepho Jierusalemu; o chikobe iphe, bu ndu ojogu ndu Jiuda; me ndu ipfu Benjaminu; ukporo unu unwoke ugbo ukporo l’iri l’ebo, bu ndu a hotaru ahota; g’ephe je etsoo ndu Izurelu ogo; k’ophu ephe a-nataphu ali-eze ono azu woru nu Rehobowamu, bu nwa Solomonu.

²²Obenu le Chileke byaru epfuru yeru Shemaya, bu onye ke Chileke; su:

²³“Je akaru Rehobówamu nwa Sólomõnu; mbụ eze ndu Jiuda; l'ì karu ndu Jiuda; me ndu Benjaminu l'ophu; mewaroya ndu ophuu g'ephe ha

²⁴Ì Chipfu sụru-a: ‘Unu te ejekwa etso unwunna unu, bụ ndu Ízurelu oḡu. G'onyenõnu lashikwaa ibe iya; noo kele ọ mu bẹ iphe ono shi l'ẹka.’ “ Ọo ya bụ; ephe numa iphe, Chipfu pfuru; laphu azụ egube ono, Chipfu pfuru ono.

Nwa eswi labọ, e gude mkpọla-ododo kpua

²⁵Tobudu iya bụ; Jierobowamu bya akpua mkpukpu Shekemu l'alì úbvú úbvú Ifuremu kpushia ya ike; buru l'ẹka ono. Ọ buru l'ẹka ono bẹ o shi je akpua mkpukpu Peniyelu.

²⁶Jierobowamu bya epfua l'ime obu iya sụ: “Alì-eze-a bẹ e-mechakwaa laphu ọnu-ulo Dévidi azụ l'ẹka.

²⁷Ọ -buru lẹ ndu-a ejeje egwe ngweja l'eze-ulo Chipfu; lẹ Jierúsalemu bẹ obu phẹ a-laphukwa azụ l'ẹka nnajuphu phẹ nọ; mbụ Rehobówamu, bụ eze ndu Jiuda. Ephe eworu mu gbua; laphushia Rehobówamu, bụ eze ndu Jiuda.”

²⁸Ọo ya bụ; eze bya ejecha akpata ishi; o gude mkpọla-ododo kpua unwu-eswi labọ; bya asụ phẹ: “Eje Jierúsalemu bẹ dunukaru unu ẹnya. Unubẹ ndu Ízurelu; unu waa Chileke unu baa; mbụ onye dufutaru unu l'alì Ijiputu!”

²⁹O woru nanu dobe lẹ mkpukpu Bẹtelu; dobe nanu ophuu lẹ mkpukpu Danu.

³⁰Iphe ono buru iphe-ẹji; noo kele ephe baaharu unwu-eswi ono ẹja; je akpaa l'ophu nọ lẹ Danu.

³¹Jierobowamu kpushikwapho ulo-agwa l'ẹka aagwajẹ iphe; bya eshi l'ime ndu Ízurelu ono l'ophu họtta ndu abudu ndu Lívayi ephe nọdu anọduje egwe ẹja l'ẹka ono.

³²Ọ bya edobe ọbo-iphe l'onwa ẹsato lẹ mbọku, ọ dọ l'abalì iri l'ise, bukwaphe egube ọbo-iphe ophu aaboje l'alì Jiuda. Teme ọ nọdu egwejewarọ ngweja l'oru-ngweja. Nokwaphe g'o meru iya lẹ Bẹtelu bụ ono; mbụ ọ wata agwa unwu-eswi ono, ọ kpushiru ono. Ọ bya edobekwaphe ndu a-nọduje egwe ngweja lẹ Bẹtelu l'ẹka ono, aagwajẹ iphe ono.

³³O -rwephe g'onwa ẹsato dọ l'abalì iri l'ise, bụ iya bụ mbọku ono, ọ hofutaru l'obu iya doberu ndu Ízurelu g'ephe boje ọbo-iphe ono; ọ bya eje l'oru-ngweja ono, ọ kpuru lẹ mkpukpu Bẹtelu ono; je anọdu iya kpọo unwù-isensu ọku.

1 Ndu eze 13

Onye kẹ Chileke, shi l'alì Jiuda

¹Noo ya; ọ buerupho gẹ Jierobowamu pfuru l'iphe ọru-ngweja ono akpọ unwù-isensu ọku ono bẹ onye kẹ Chileke shi l'alì Jiuda gude opfu, shi Chipfu l'onu byarwuta Bẹtelu.

²Onye ono raa opfu ono, Chipfu pfuru ono arara kpua ọru-ngweja ono sụ: “Gube ọru-ngweja-a! Chipfu sụru-a: ‘Ee-mechaa nwua nwa nwoke l'onulo Dévidi. Epha iya a-buru Jiosáya. Nwata ono bẹ e-gude ndu-uke ono, egweje ẹja l'eli ẹka ono, aagwajẹ

iphe ono gwee eja; mbu ndu ono, anoduje ngu l'eli akpo unwu-isensu oku ono. Okpu nemadzu be aakpo oku l'eli ngu!" "

³Onye ke Chileke ono bya emee iphe-ohubama su: "Owaa bu iphe-ohubama, Chipfu pfuru opfu iya su: 'Oru-ngweja-a be a-dakposhihu; ntu, du iya nu awushihu!' "

⁴Eze, bu Jierobowamu numaepho iphe ono, onye ke Chileke ara ekpu oru-ngweja ono, no le mkpukpu Betelu ono; o gbe l'oru-ngweja ono machia aka su: "Unu gude iya!" Eka ono, o maberu iya ono nwua ya lwaa; kpo hu iya nku k'opu bu l'o to duedu ike sephu iya azu.

⁵Oru-ngweja ono dakposhihu; ntu iya wushihu, bu iya bu iphe-ohubama ono, onye ke Chileke pfuhawaru le Chipfu suru l'oo-me ono.

⁶Eze su onye ke Chileke ono: "Rwona Chipfu, bu Chileke ngu; mbu pfunuru nu iya l'iswi ehu mu; k'opu aka mu a-du g'o shi du." Onye ke Chileke ono bya arwo Chipfu; o mee; aka eze du g'o shihawaa du le mbu.

⁷Eze su onye ke Chileke ono: "Tsuru mu g'anyi je l'unuphu giiria nri; ge mu anyakokwa ngu pho iphe."

⁸Onye ke Chileke ono su eze: "O betakporu i jee e-ke iphe, du l'ulo ngu ebo; nu mu uzi lanu; be mu tee tsodu ngu abahu. Teme ophu mu ta abyadu e-ri nri; ozoo ngu-a mini l'eka-a.

⁹Noo kele Chipfu nmaru mu okwa iya anmanma su: 'Be rikwa nri; ophu i ngukwa mini; g'o to bukwaru uzo, i shiru bya be ii-shi laa.' "

¹⁰Oo ya bu; o tsoru uzo ozo; ophu o buedu uzo ophu o shiru g'oo bya Betelu be o shiru lashia.

Onye mpfuchiru Chileke, shi Betelu

¹¹O nweru nwoke ogerenya, bu onye mpfuchiru Chileke, bu le Betelu. Unwu nwoke ono je edokotaru iya iphemiphe, onye ke Chileke pho byaru emee le Betelu mboku ono. Opfu, o pfukotaru eze be ephe pfukotaru nna phe ono.

¹²Nna phe jia phe su: "? Bu uzo ole be o shiru?" Oo ya bu; unwegirima iya ono bya egoshi iya uzo ophu onye ke Chileke ono, shi Jiuda ono shiru.

¹³O su unwegirima iya ono: "Ngwa; unu doziaru mu nkafu-igara!" Oo ya bu; ephe doziaru iya nkafu-igara ono; o nyikota iya;

¹⁴gbagbua chipyabe onye ke Chileke ono. O je ahuma iya l'eka o no ano l'upfu achi. O jia ya su: "? Bu gubedua bu onye ke Chileke ono, shi Jiuda?" O su iya: "Ee; oo mbedua."

¹⁵O su iya: "Tsuru mu g'anyi je l'unuphu gi-ria nri."

¹⁶Onye ke Chileke ono su iya: "Mu tee tsokwaru ngu alaphu azu; ophu mu etsokwaru ngu abahu ibe ngu; ophu mu erikwa nri; ophu mu angukwa mini l'eka-a.

¹⁷Noo kele Chipfu turu mu ekemu su ge mu te erikwa nri; ophu mu angukwa mini l'eka-a; teme g'o to bukwaru uzo ophu mu shiru bya be mu e-shi laa."

¹⁸O su iya: "Mbedua l'onwomu bukwapo onye mpfuchiru g'i bu. Ojozi, shi l'eka Chipfu be pfuru yeru mu su ge mu bya eduphuta ngu azu g'anyi je ibe mu; g'i ria nri; ngua mini." Obenu l'oo uka be o dzuru iya egube ono.

¹⁹Oo ya bu; onye ke Chileke ono tsoru iya; ephe je eria; ngua l'ibe iya.

Oduma adzu-gbu onye ke Chileke, shi Jiuda

²⁰Noo ya; ephe gudekwadu nri l'eka eri; Chipfu pfuru yeru onye mpfuchiru, ophu ka aburu ogerenya ono, duphutaru iya azu pho.

²¹O raswerehu su onye ke Chileke ono, shi Jiuda ono: "Chipfu suru-a: 'L'eshinu i ti meduru iphe, Chipfu pfuru ngu; ophu i ti dobeduru ekemu ono, Chipfu, bu Chileke ngu turu ngu ono;

²²i lwaphuta azu; bya eria nri; ngua mini l'eka ono, o suru ngu g'i ti rikwa nri; ophu i ngukwa mini ono; be e tee likwa odzu ngu l'ilu nna ngu phe!" "

²³Onye ke Chileke ono richaepo nri; ngua mini; onye mpfuchiru ono, duphutaru iya azu ono je edoziaru iya nkafu-igara iya.

²⁴O lashia; yee oduma dzuda l'uzo. Oduma ono dzu-gbu ya; paru odzu iya togbo le gbororo; nkafu-igara iya; me oduma ono pfuru iya le mgboru.

²⁵Ndu nemadzu ghatashia; bya ahuma odzu iya g'o dabyiru l'uzo; waa oduma, pfuru iya le mgboru; ephe bahu le mkpukpu, nwoke ogerenya, bu onye mpfuchiru pho bu; je edoo ya.

²⁶Teke onye mpfuchiru ono, bu iya dubataru iya l'ibe iya ono numaru iphe, meru nu; o su: "O kwa onye ke Chileke ono, te emeduru iphe, Chipfu pfuru ono. Chipfu wowaru iya nu oduma; o dzu ya; dzu-gbu; egube ono, Chipfu pfuru iya ya ono."

²⁷O su unwegirima iya: "Unu doziaru mu nkafu-igara." Ephe bya edozia ya.

²⁸O je je ahuma odzu ono g'o dabyiru l'uzo. Nkafu-igara; waa oduma pfuru iya le mgboru. Ophu oduma ono ta ataduru odzu iya ono; ophu o dzu-gbuduru nkafu-igara ono.

²⁹Tobudu iya bu; onye mpfuchiru ono pata odzu onye ke Chileke ono tukobe l'eli nkafu-igara; vulaa mkpukpu iya; je araa ekwa iya; woru iya lia.

³⁰O buru l'ilu nkiya be o liru iya. Ephe raa ekwa iya su: "Oowa-e; nwune mu-e!"

³¹O lichae ya pho; o su unwegirima iya: "Mu -nwuhuepho; unu lia odzu mu l'ilu ono, e liru onye ke Chileke ono; unu chiru okpu mu dokube okpu nkiya.

³²Noo kele ozi ono, Chipfu ziru iya; o bya araru kpua oru-ngweja ono, du le mkpukpu Betelu ono; me ulo-agwa ono, dugbaa l'eka aagwaje iphe le mkpukpu, dukota l'ali Sameriya ono be a-vukotakwa."

³³Iphe ono mechakpo; ophu Jierobowamu ta aghaduru umere; haa eme ejo-iphe, oome. Iphe, o mechiaru bu l'ọ gbẹ bya ahotagbaa ndu a-nodu egwe eja l'eka aagwaje iphe ono. Iphe, bu onye o du g'ọ buru uke gweje ngweja l'eka ono, aagwaje iphe ono be onabataje; doo ya nsọ; mee ya onye egweje ngweja l'eka aagwaje iphe ono.

³⁴Iphe ono bya aburu iphe-ẹji, du l'onulo Jierobowamu. O buru iya kpataru iphe, e meru ephe chihu le mgboko; woru phe mee ephe buru mkpurupyata.

1 Ndu eze 14

Ozi, Chipfu ziru Ahayijia g'o zia Jierobowamu

¹Le teke ono be iphe-ememe guderu Abayijia, bu nwa Jierobowamu.

²Jierobowamu su nyee ya: “Gbeshi; mee onwongu gi gbaa iche; g'ọ to du onye a-hube ngu ama li bu nyee mube Jierobowamu. Tugbua jeshia mkpukpu Shilo. Ii-huma onye mpfuchiru Chileke, bu Ahayijia l'eka ono; mbu onye ono, suru le mu a-buru eze ndu Izurelu ono.

³Guderu iya ishi buredi iri; waa akara; me ite manu-enu; g'ọ karu ngu iphe, e-mechaa nwua l'ehu nwata-a.”

⁴Nyee Jierobowamu bya emee ya nno; bya agbeshi tugbua; o buru iya eje mkpukpu Shilo l'ibe Ahayijia. Ahayijia be ta aphu-rweedu aphu-rwe; kele nka lawaru iya l'anya.

⁵Ole Chipfu be pfuhawaru Ahayijia su: “Nyee Jierobowamu be abyakwa ngu akpata ishi ehuru nwa iya, iphe eme. O buru iphe, ii-pfuru iya bu egube-a; waa egube-a. Noo kele teke o byarwutaru; be oo-meahaa g'ọ bu onye ozo du iche.”

⁶No iya; Ahayijia bya anumaepho igiji okpa iya g'ooje abya l'onu ulo; o su: “Bata-o; nyee Jierobowamu! ? Bu gunu meru g'ọ gude i nodu eme g'a su li bu onye ozo? E zikwaru mu ozi, du eji ge mu zia ngu.

⁷Lashia; je ezia Jierobowamu su iya le Chipfu, bu Chileke ke Izurelu suru-a: ‘Mu kutseru ngu l'echilabo ndu Izurelu; mee ngu; i buru onye-ishi ndibe mu, bu Izurelu.

⁸Mu bukafu ali-eze ono l'onulo ke Dévidi woru iya nu ngu; ophu i ti dudu ge nwozi mu, bu Dévidi, bu onye ono, mekotaru ekemu mu; bya egude obu iya g'ọ ha tsoo mu; bya abuerupho iphe, pfuru nhamunha kpekpu be o shi emeje l'iphu mu.

⁹Ejo-iphe, i meru be kakota ke ndu ophu vu ngu uto. I meshiru onwongu agwa; gude igwe kpushia unwu ntẹkpe; shi nno kpatsua mu ehuru-eghu; teme i wowaru mu docha edocha l'azu ngu.

¹⁰“Su-a; iphe ono, i meru ono; be e-mekwa ge mu wobata ejo-iphe l'ibe Jierobowamu. Iphe, bu nwa nwoke shi l'ibe iya; m'ọ bu ohu; m'ọ bu amadu le Izurelu be mu e-me g'ephe chihu. Oo g'ekpoje ntu-a bu ge mu e-kpofu ndibe Jierobowamu; jasuru ibe iya l'ophu abvukota.

¹¹Onye shi l'onulo Jierobowamu -nwuhu le mkpukpu be bu nkuta a-ta anu iya; onye ophu nwuhuru l'azu egu bu udele be a-vuka anu iya. Nokwa ge Chipfu pfuru bu ono.’

12“ A bya lẹ gùbedua; tǔgbua lashià ibe ngu. I -bebeephò tǔa òkpa lẹ mkpukpu unu bẹ nwata ono a-nwùhu.

13Ndu Ízurelu l'ophu bẹ a-kwa ẹkwa nwata ono; woru iya lia. Ọo ya kpoloko l'iphe, bụ unwu Jierobowamu bụ onye ee-li elili; noo kele ọo ya kpoloko bụ onye Chipfu, bụ Chileke kẹ Ízurelu humaru iphe, dū ree l'ẹhu l'ibe Jierobowamu l'ophu.

14“ Ọzo bụ l'ọo Chipfu l'onwiya a-pfube onye a-buru eze ndu Ízurelu. Ọ buru onye ono e-kpo ndibe Jierobowamu g'eekepoje ntụ-a. Mbụ; ọ buakwaa iphe nta; e tee dobeekewa iya edobe.

15Chipfu bẹ a-da ndu Ízurelu ẹka kẹ njo l'ẹhu; k'ophu ẹphe a-dụ g'ekperema, enwunga enwunga lẹ mini. Oo-pheshi phe epheshi l'alì oma ono, ọ nuru nna phe ono; woru phe tũkashia nanu nanu l'azu ẹnymu Yufurétisu. Noo kele ẹphe gudewaa itso Ashera ono, ẹphe kpobegbaaru ono kpatsu Chipfu ẹhu-eghu.

16Oo-gude k'iphe-ẹji ono, Jierobowamu meru ono; mẹ k'iphe-ẹji ono, o meru ndu Ízurelu ye ẹka ono; mĩa ndu Ízurelu ẹnya.”

17Tobudu iya bụ; nyee Jierobowamu gbalihu; ọ buru iya ala Tiza. Atutu, ọtutu òkpa l'onulo; nwata ono nwùhu.

18Ízurelu l'ophu lia ya; kwaa ẹkwa iya ẹgube ono, Chipfu shi l'onu onye-ozì iya, bụ Ahayijia, onye mpfuchiru Chileke pfuhawa iya ono.

Anwùhu Jierobowamu

19Iphe ọzo, nwugbaberu nù teke Jierobowamu bụ eze; mẹ ọgu, ọ lwuru; mẹ g'o gude buru eze bẹ e dekotaru l'ekwo-akọ, e deshuru iphe, ndu eze ndu Ízurelu meru.

20Jierobowamu bẹ buru eze ukporo apha l'apha labọ. Ọ nwùhu lapfushia nna iya phe. Nadabu, bụ nwa iya buru eze nochia ẹnya iya.

Teke Rehobowamu bụ eze ndu Jiuda

21Rehobowamu; nwa Sólomonu buru eze lẹ Jiuda. Ọ nọwaru ukporo apha labọ l'apha lanu; teke ọ bya aburu eze obu. Iphe, ọ nọru l'aba-eze bụ apha iri l'ẹsaa lẹ Jierúsalem, bụ iya bụ mkpukpu ono, Chipfu hofutaru l'ipfu Ízurelu l'ophu g'ọ buru ẹka ẹpha iya e-reje ire ono. Ẹpha ne iya bụ Nama onye Amonu.

22Ndu Jiuda bya emee ẹjo-ememe l'ẹnya Chipfu. Iphe-ẹji, ẹphe meru kpatsu Chipfu okophoo; kele ẹphe meru iphe-ẹji, ka ophu nna phe meru.

23Ẹphe kputakwarupho ẹka aagwaje iphe doberu onwophe; dobegbaa mkpuma, dū nsọ; mẹ itso Ashera l'úbvú; mẹ lẹ mkpula mkpula oshi, kpugbaaru kẹ gayii.

24L'alì ono l'ophu bẹ ẹphe nwekwarupho unwoke, agba ukpara l'ulo agwa phe. Urwuali ono, ohamoha shi arwu ono; mbụ ohamoha ono, Chipfu chifuru l'alì phe woru iya nù ndu Ízurelu ono; bẹ ẹphe arwukota g'ọ ha.

Ndu Ijiputu ezebata lẹ Jierúsalem

(2Iphe 12:1-11)

²⁵O be l'apha, kwe Rehobówamu apha ise, ọ wataru aburu eze; Shishaku, bu eze ndu Ijiputu byatashia ọgu le Jierúsalem.

²⁶Ọ bya evukochaa ẹku, du l'ulo Chipfu; me ẹku, du l'ulo eze. O vutakota iphemiphe; mbu chitachaa iphe, eegudeje egbobuta onwonye ono g'ọ ha, Sólomonu gude mkpola-ododo kpushia pho.

²⁷Tobudu iya bu; eze, bu Rehobówamu bya egude onyirubvu kpu-phukota iphe ono azu; gude dochia enya iya ophuu; bya eworu iya ye l'eka ndu-ishi ndu eche onu eka eeshie abahu l'ibe eze nche; g'ephe leta iya enya.

²⁸Ọ nodu abujeru teke eze eje l'ulo Chipfu; ndu nche ono aparu iphe, eegudeje egbobuta onwonye ono. E -mechaa; ephe ewophuta iya azu bya edobe l'ulo-nche.

Anwuhu Rehobówamu

(2Iphe 12:15-16)

²⁹Iphe ọzo, Rehobówamu megbaberu; me iphemiphe, o mekotaru be e dekotaru l'ekwo-ako, e deshiru iphe, ndu eze ndu Jiuda meru.

³⁰Rehobówamu yee Jierobowamu ta alwu-buhjeduru ọgu alwu-buhu.

³¹Rehobówamu bya anwuhu lapfushia nna iya phe. E lia ya l'eka e liru nna iya phe le mkpukpu Dévidi. Epha ne iya bu Nama onye Amonu. Abyjiam, bu nwa iya nwoke buru eze nochia enya iya.

1 Ndu eze 15

Teke Abyjiam bu eze ndu Jiuda

(2Iphe 13:1—14:1)

¹O be l'apha, kwe Jierobowamu nwa Nebatu apha iri l'esato, ọ wataru abu eze ndu Izurelu; Abyjiam bahu l'aba-eze ndu Jiuda.

²Iphe, ọ noru l'aba-eze le Jierúsalem bu apha eto. Epha ne iya bu Maka nwada Abishalomu.

³Abyjiam be mekotaru iphe-aji, nna iya mehawaru. Obu iya l'opu be ọ to kpoduru ye l'eka Chipfu, bu Chileke iya no; egube ono obu Dévidi, bu nna iya oche shi du pho.

⁴Ọle ọo opfu ehu Dévidi be Chipfu, bu Chileke iya gude nu iya nwa, a-nochia enya iya le Jierúsalem; bya emee ge Jierúsalem pfushia ike.

⁵Iphe, kparu iya nu buru le Dévidi be meru iphe, pfuru oto l'enya Chipfu. Ọ to hajeduru eme iphe, Chipfu turu iya ekemu iya jasu g'ọ no-beru; a -gufuepho k'opfu ehu Uraya, bu onye Hetu.

⁶Ọgu gudepho adapheru Rehobówamu yee Jierobowamu jeye ge Abyjiam no-beru.

⁷Iphe ọzo, Abyjiam megbaberu; me iphemiphe, o mekotaru be e dekotaru l'ekwo ako, e deshiru iphe, ndu eze ndu Jiuda meru.

⁸Oo ya bụ; Abyijiam nwuhu lapfushia nna iya phe. E lia ya le mkpukpu Dévidi. Asa, bu nwa iya nwoke buru eze nochia enya iya.

Teke Asa bu eze ndu Jiuda

(2Iphe 15:16—16:6)

⁹L'apha, kwe Jierobowamu ukporo apha, e -shi teke o beberu buru eze ndu Izurelu be Asa byaru aburu eze ndu Jiuda.

¹⁰Iphe, o noru l'aba-eze bu ukporo apha labo l'apha lanu le Jierusalemu. Epha ne iya oche bu Maka nwada Abishalomu.

¹¹Asa be meru iphe, pfuru oto l'enya Chipfu; egube Dévidi, bu nna iya meru.

¹²O chishikotaru iphe, bu unwoke, agba ukpara l'ulo agwa l'ali ono l'ophu; bya alwukota nshi, nna phe gwotaru dobe.

¹³O nafucharu Maka, bu ne iya oche okwa eze-nwanyi, o bu; kele o doberu ejo itso agwa Ashera. Asa be gbukwoshiru itso Ashera ono je akpo ya oku le nsuda nggele Kidironu.

¹⁴A -gufukpooro le Asa ta aphoshiduru eka ono, aagwaje iphe ono; obu iya g'o ha be o kpokotaru ye l'eka Chipfu no jeye g'o no-beru.

¹⁵O wotaru iphe, nna iya doberu nsọ; me iphe, yebdua doberu nsọ bya edobe l'eze-ulo Chipfu; mbu mkpola-ochaa; me mkpola-ododo; mewaro ivu ozo.

Asa etso Basha ogu

(2Iphe 16:1-6)

¹⁶Ogu gudeepho adaru Asa yee Basha, bu eze ndu Izurelu teke ephenebo bu ishi.

¹⁷Basha, bu eze ndu Izurelu bapfu ndu Jiuda ogu; bya akpuaha mkpukpu Rama g'o shihu ike; g'ee-shi g'o to du onye e-shi le ke Asa, bu eze ndu Jiuda lufu; ozoo bahu iya abahu.

¹⁸Tobudu iya bu; Asa wotakota mkpola-ochaa; me mkpola-ododo, phoduru nu l'eku, du l'eze-ulo Chipfu; me l'eku, du l'ibe eze; woru ye ndu-ozu iya l'eka; bya ezia phe g'ephe je ibe Benu-Hadadu nwa Taburimonu; mbu nwanwa Heziyonu, bu eze ndu Aramu. Eka o bu bu le Damasukosu. G'ephe je ezia ya su:

¹⁹“Ge mu le ngu tugbanu buru nanu; egube nna mu yele nna ngu shi tugba ono. Owaa bu mkpola-ochaa; me mkpola-ododo, mu achie ngu. Jiko tugbunaa je emebyia atugba ono, unu le Basha, bu eze ndu Izurelu tugbaru ono; k'ophu oo-paru mu haa.”

²⁰Oo ya bu; Benu-Hadadu kweta iphe ono, eze, bu Asa pfuru ono. O yefu ndu-ishi ndu ojogu iya; ephe jeshia ogu le mkpukpu, dugbaa l'ali Izurelu. Ephe lwuta mkpukpu Ijionu; me mkpukpu Danu; me mkpukpu Abelu-Betu-Maka; me mkpukpu Kineretu l'ophu; mekpoo ali ndu Nafutali l'ophu.

²¹Basha numaeppo iphe, meru nu; o haa akpu mkpukpu Rama g'o shihu ike; o buru iya ala Tiza.

²²Tobudu iya bu; eze, bu Asa bya atuaru ndu Jiuda l'ophu ekemu; ophu o dudu onye o gufuru. O su g'ephe je evutakota mkpuma ono; yee oshi ono, Basha shi gude akpu mkpukpu Rama g'o shihu ike ono. O buru iya be eze, bu Asa gude kpu mkpukpu Geba, du l'ali Benjiaminu; o shihu ike; waa mkpukpu Mizupa.

Anwuhu Asa

(2Iphe 16:11-14)

²³Iphe ozo, Asa megbaberu; me ehuka ehuka, o mekotaru; waa iphemiphe, o meru; mekpoo mkpukpu, o kpushiru be e dekotaru l'ekwo-ako, e deshuru iphe, ndu eze ndu Jiuda meru. O buru g'o kahwaru buru ogerenya be iphe-ememe meaharu iya l'okpa.

²⁴Oo ya bu; Asa bya anwuhu lapfushia nna iya phe; e lia ya l'eka e liru nna iya phe le mkpukpu Dévidi, bu nna iya. Jiehoshafatu, bu nwa iya nwoke buru eze nochia enya iya.

Teke Nadabu bu eze ndu Izurelu

²⁵Nadabu, bu nwa Jierobowamu bya aburu eze ndu Izurelu l'apha, kwe Asa, bu eze ndu Jiuda apha labo. Iphe, Nadabu noru l'aba-eze ndu Izurelu bu apha labo.

²⁶O mee ejo-ememe l'enya Chipfu; tsokota uzo nna iya tsoru; mbu mee iphe-eji ono, o kpataru ndu Izurelu ye eka ono.

²⁷Basha nwa Ahayijia k'onulo Isaka bya agbaaru Nadabu ejo-idzu; woru iya gbua le mkpukpu Gibetonu, du l'ali Filisitayinu; le teke ono, Nadabu yee ndu Izurelu l'ophu kephetaru mkpukpu ono.

²⁸O buru l'apha, kwe Asa apha eto, o bu eze ndu Jiuda be Basha gburu Nadabu; bya aburu eze nochia enya iya.

²⁹Basha bebeerupho buru eze; o gbushikota ndibe Jierobowamu g'ephe ha. Ophu o dudu onye o haru g'o nodu ndzu l'ibe Jierobowamu. O tuko phe g'ephe ha gbushikota egube ono, Chipfu shi l'onu onye-ozu iya, bu Ahayijia ke Shilo pfua l'oo-du ono.

³⁰O buru iphe, kparu iya nu bu k'iphe-eji ono, Jierobowamu meru; me ophu o kpataru ndu Izurelu ye eka ono; me k'ehu-eghu ono, o kpatsuru Chipfu, bu Chileke Izurelu.

Anwuhu Nadabu

³¹Iphe ozo, nwugbaberu nu teke Nadabu bu eze; me iphemiphe, o meru be e dekotaru l'ekwo-ako, e deshuru iphe, ndu eze ndu Izurelu meru.

³²Ogu gudeepho adaru Asa yee Basha, bu eze ndu Izurelu teke ephenebo bu ishi.

Teke Basha bu eze ndu Izurelu

³³O buru l'apha, kwe Asa apha eto, o bu eze ndu Jiuda; be Basha nwa Ahayijia byaru aburu eze ke ndu Izurelu le mkpukpu Tiza. Iphe, o noru l'aba-eze ono bu ukporo apha l'apha eno.

³⁴O mee ejo-ememe l'enya Chipfu; tsoepho uzo ke Jierobowamu; mekota iphe-eji ono, o kpataru ndu Izurelu mee ono.

1 Ndu eze 16

¹Tobudu iya bu; Chipfu bya epfuaru Jiehu; nwa Hanani iphe laru le k'ehu Basha su:

²“Eshi ophu mu kulitaru ngu l'ime urwuku; bya emee ngu g'i buru onye edu ndibe mu, bu ndu Izurelu; i gbe ghaa ohu tsochiaru uzo ke Jierobowamu; bya emewaa ge ndibe mu, bu ndu Izurelu mee iphe-eji; mbu g'ephe gude iphe-eji phe ono kpatsu mu ehueghu;

³be mu e-me ge Basha; me ndibe iya chihu. Mu e-me ndibe ngu egube ono, mu meru ndibe Jierobowamu; nwa Nebatu.

⁴Ndibe Basha phe onye ophu, nwuhuru le mkpukpu bu nkuta a-ta iya. Onye ophu, nwuhuru le mgbeu aburu enu, ephe l'eli a-vuka anu iya.”

Anwuhu Basha

⁵Iphe ozo, nwugbaberu nu teke Basha bu eze; me iphe, o meru; me ehuka ehuka, o mekotaru be e dekotaru l'ekwo-ako, e deshuru iphe, ndu eze ndu Izurelu meru.

⁶Basha bya anwuhu lapfushia nna iya phe; e lia ya le mkpukpu Tiza. Ela, bu nwa iya nwoke buru eze nochia enya iya.

⁷Opfu, Chipfu ono, onye mpfuchiru Chileke, bu Jiehu; nwa Hanani pfuru l'opfu ehue Basha yele ndibe iya pho vukotaepho. O buru iphe, kparu iya nu bu k'ejo-iphe, o megbaberu l'enya Chipfu; shi nno kpatsu iya ehueghu; mbu bya emeahaa ge ndibe Jierobowamu; ole o gbekwa buru yebedua gbushuru phe.

Teke Ela bu eze ndu Izurelu

⁸O buru l'apha, kwe Asa ukporo apha l'apha ishii, o shi butaru eze ndu Jiuda; be Ela nwa Basha byaru aburu eze ndu Izurelu. Iphe, o noru l'aba-eze ono bu apha labo le Tiza.

⁹Onye-ozu iya, bu Zimiri, bu onye-ishi nkeru-ebo ugbo-inya iya bya agbaaru iya ejo-idzu. Teke ono be Ela noro l'ulo Aza, bu onye-ishi l'ibe-eze le mkpukpu Tiza angu mee angu-sweshi iphu.

¹⁰Zimiri bapfu iya je echitsua ya l'ali; woru iya gbua. O buru l'apha, kwe Asa ukporo apha l'apha esaa, o shi butaru eze ndu Jiuda be Zimiri gburu Ela obu; bya aburu eze nochia enya iya.

¹¹Zimiri buerupho eze; o buru anozeta, o nozetaru l'aba-eze ono; o tuko ndibe Basha gbushikota. Ophu o dudu nwa nwoke, o gbuphodoru me nanu. O gbukotaru abubu iya phe; me ndu ephe l'iya eshi onya.

¹²Oo ya bu; Zimiri bya emee; ndibe Basha l'ophu bukotaru mkpurupyata. E shi nno; o vua mbu opfu ono, Chipfu shi l'onu Jiehu, bu onye mpfuchiru iya pfua le k'ehu Basha ono.

¹³Iphe, kpataru iya nu buru iphe-aji ono, Basha yee nwa iya, bu Ela meshiru; teme ephe kpata ge ndu Izurelu mekwaa ya pho ono; mbu gude ogalemkpa agwa ono, ephe agwa ono; shi nno kpatsu Chipfu, bu Chileke ke Izurelu ehu-eghu.

¹⁴Iphe ozo, nwugbaberu nu teke Ela bu eze; me iphe, o meshiru be e dekotaru l'ekwo-akwo, e deshiru iphe, ndu eze ndu Izurelu meru.

Teke Zimiri bu eze ndu Izurelu

¹⁵O buru l'apha, kwe Asa ukporo apha l'apha esaa, o shi butaru eze ndu Jiuda; be Zimiri noru abali esaa l'aba-eze le mkpukpu Tiza. Teke ono be ndu ojogu ndu Izurelu doru le mkpukpu Gibetonu ono, du l'ali Filisitayinu.

¹⁶Ndu ono, doru nu ono bya anuma le Zimiri be gbaru eze ejo-idzu; gbu ya; ephe nodu mboku ono l'eka ono, ephe doru ono mee Omuri, bu onye-ishi ndu ojogu ono g'o buru eze ndu Izurelu.

¹⁷Oo ya bu; Omuri yee ndu Izurelu ono, yee ya nokota le Gibetonu; shi l'eka ono wufu tugbu je ekephee mkpukpu Tiza.

¹⁸Zimiri humaeapho l'aanatawa mkpukpu ono; o bahu l'ime ulo, du l'ibe-eze, bu eka aanoduje zeeru onwonye; nodu iya l'ime nwuru oku ye l'ulo-eze ono; o tsugbu ya.

¹⁹Mkpata iya buru iphe-aji, o megbaberu. O meru ejo-iphe l'enya Chipfu; bya etsoo uzo Jierobowamu; mee iphe-aji ono, o kpataru ge ndu Izurelu ye eka ono.

²⁰Iphe ozo, nwugbaberu nu teke Zimiri bu eze; me ejo-idzu, o gbaru be e dekotaru l'ekwo-akwo, e deshiru iphe, ndu eze ndu Izurelu meru.

Teke Omuri bu eze ndu Izurelu

²¹Tobudu iya bu; ndu Izurelu bya ekekaha onwophe ebo. Ndu lanu turu ikè yeru Tibuni; nwa Ginatu g'ephe mee ya eze; ndu ophu turu ikè yeru Omuri.

²²Ole ndu ophu tsoru Omuri be ka ndu ophu tsoru Tibuni; nwa Ginatu okpehu. E mechaa; Tibuni nwuhu; Omuri buru eze.

²³O buru l'apha, kwe Asa ukporo apha l'apha iri le nanu, o shi butaru eze ndu Jiuda; be Omuri byaru aburu eze ndu Izurelu. Iphe, o noru l'aba-eze bu apha iri l'ebo. Apha ishii be o buru eze le mkpukpu Tiza.

²⁴O bya azuta ubvu Sameriya l'eka Shemeru. O buru mkpola-ochaa, erwa iya du talentu labo be o zuru iya. O bya akpu mkpukpu l'eli ubvu ono; woru iya gua Sameriya, bukwapho epha Shemeru ono, bu onye shihawaa nweru ubvu ono.

²⁵Omuri be meru ejo-ememe l'enya Chipfu. Ejo-iphe, o meru be kakota ke ndu vuhawa iya uzo.

²⁶Noo kele o tsoru uzo Jierobowamu; nwa Nebatu; bya emee iphe-aji ono, o meru ge ndu Izurelu ye eka ono; mbu gude agwaphe ogalemkpa agwa shi nno kpatsua Chipfu, bu Chileke ke Izurelu ehu-eghu.

Anwuhu Omuri

²⁷Iphe ọzo, nwugbaberu nū teke Omuri bụ eze; mę iphe, o meru; mę ẹhuka ẹhuka, o mekọtaru bę e dekọtaru l'ẹkwo-akọ, e deshuru iphe, ndu eze ndu Ízurelu meru.

²⁸Omuri nwuhu lapfushia nna iya phe. E lia ya le Sameriya. Ehabu, bu nwa iya nwoke buru eze nochia enya iya.

Teke Ehabu bu eze ndu Ízurelu

²⁹O buru l'apha, kwe Asa ukporo apha l'apha iri l'esato, e -shi g'ọ byaru aburu eze ndu Jiuda; be Ehabu nwa Omuri byaru aburu eze ndu Ízurelu. Iphe, o noru l'aba-eze bu ukporo apha l'apha labo le Sameriya.

³⁰Ehabu nwa Omuri bya emee ejo-ememe l'enya Chipfu kangokotachaa ndu ophu vuhawa iya uzo buru eze.

³¹O to bulekwa l'o meru iphe-aji ono, Jierobowamu nwa Nebatu meru kpoloko; obenu l'o lukwarupho Jiezebelu nwada Etu-Belu, bu eze ndu Sayidonu. O gwaru agwa ono bu Balu; bya abaru iya aja.

³²O kpuru Balu oru-ngweja l'ulo Balu, o kpuru le mkpukpu Sameriya.

³³Ehabu dobekwarupho nteke Ashera; bya emebaa iphe ọzo gude kpatsu Chipfu, bu Chileke ke Ízurelu ehu-eghu; mbu kangokota ndu ophu vuhawa iya uzo.

³⁴Oo teke Ehabu bu eze be Hiyelu ke Betelu kpuru mkpukpu Jieriko. Teke o turu okpa igbulo mkpukpu ono be o phuru iya ishi okpara iya nwoke, bu Abiramu; o phua ya ishi mbuhu ime iya nwoke, bu Segubu teke ooye onu eka ee-shije abahu le mkpukpu ono. O dupho egube ono, Chipfu pfuhawaru iya e -shi l'onu Jioshuwa nwa Nunu.

1 Ndu eze 17

Okpoko-ohà aanu Elayijia nri

¹Noo ya; Elayijia, bu onye mkpukpu Tishibe, du l'ali Giladu bya asu Ehabu: "Eshinu Chipfu, bu Chileke ke Ízurelu no ndzu g'ọ no iya-a; mbu onye ono, mu ejeru ozi; be iji ta abyadu l'a-da; ophu mini ta abyadu e-dze l'ime apha olemole; gbahaepho le mu suru g'ọ dzee."

²Chipfu bya epfuaru Elayijia su:

³"Tugbua lufu l'eka-a; swia uzo enyanwu-awawa je edomia onwongu le mgboru nggele Keritu, du l'uzo enyanwu-awawa Jiordanu.

⁴Oo le nggele ono be ii-nguje mini; teme mu pfuwaru okpoko-ohà g'ọ patajeru ngu nri l'eka ono."

⁵Oo ya bu; Elayijia tugbua je emee ge Chipfu suru iya g'ọ mee. O tugbua je anodu le mgboru nggele Keritu ono, du l'uzo enyanwu-awawa Jiordanu.

⁶Okpoko-ohà nodu apatajeru iya nri waa anu l'utsu; pataru iya nri waa anu l'uzenyashi. O buru le nggele ono be onguje mini.

⁷A nonyaa; nggele ono tahu; kele igwe te edzeduru mini l'ali ono.

Elayijia yee nwanyi Zarefatu, ji iya anodedu

⁸Tobudu iya bu; Chipfu bya epfuaru Elayijia su:

⁹“Gbalihuekwapho jeshia mkpukpu Zarefatu ono, du le Sayidonu je anodedu l'eka ono. O nweru nwanyi, ji iya anodedu bu l'eka ono, mu pfuwaru g'o nuje ngu nri.”

¹⁰Oo ya bu; Elayijia tugbua; o buru iya eje mkpukpu Zarefatu. O -rwuepho onu-abata mkpukpu ono; o nweru nwanyi, ji iya anodedu, no l'eka ono akpata nku. Elayijia kua ya su: “Jiko kutaeshikwa nwamini ye l'iphe wotaru mu ge mu ngua”

¹¹Nwanyi ono tugbua ge ya je ekutaru iya mini obu; Elayijia kua ya su: “Jiko wotafukwaaru mu ro nwibiribe buredi.”

¹²Nwanyi ono su: “Oo ge Chipfu, bu Chileke ngu no ndzu g'o no iya-a; bu g'o bu irelanu le mu te enwedu buredi. Iphe, mu nweru kpoloko bukwa nwamkpoji-eka nwa ukpokutu-nri, du l'ite; waa nwa manu, du l'ite-mkpa. Oo ya be mu akpata nku-a ge mu ala je emee ya ge mu le nwa mu ria. Anyi -richaa ya; anyi anodeduwaro egu jasu anyi anwuhu.”

¹³Elayijia su iya: “Ta atsushi ebvu. Laa je emee ya egube ono, i pfuru ono. Ole oo g'i vuadaru uzo gude nwukpokutu iphe ono ghetta akara, ha nwanshi wotaru mu. E -mechaa; l'i ghetawaro ke gu le nwa ngu.

¹⁴Noo kele Chipfu, bu Chileke ke Izurelu suru-a: ‘Nwa ukpokutu-nri ono taa byadu abvu abvubvu l'ite ono; ophu ite-mkpa manu ono ta abyadu a-du iphoro gbiriri jasu mboku, Chipfu e-me g'igwe dzee mini le mgboko.’ “

¹⁵O tugbuekwapho je emee ge Elayijia pfuru iya. Noo ya; nwanyi ono waa ndibe iya; me Elayijia bya enweru nri ephe erije mbokumboku.

¹⁶Ophu nwa ukpokutu-nri ono abvujeduru abvubvu l'ite ono; teme ophu ite-mkpa ono ta adujeduru iphoro; egube ono, Chipfu shi l'onu Elayijia pfua ya ono.

¹⁷A nonyaa iphe-ememe gude nwa nwanyi ono, bu iya nwe ulo ono. Iphe-ememe obu nodu aka iya njo eje; jasu o woru iya gbua.

¹⁸Nwanyi ono su Elayijia: “Gube onye ke Chileke; ? bu gunu be ji-su le mu mekataru ngu? ? I byaru g'i nyataru mu iphe-eji, mu meru; shi nno gbua nwa mu-a?”

¹⁹Elayijia su iya: “Kee mu nwa ngu obu!” Elayijia bya ekuta iya l'utapfu nwanyi ono; bya ekuba l'ulo eli, l'eka onoduje; je enyebe iya l'oshi-azee ya.

²⁰O bya araku Chipfu; su: “Gube Chipfu, bu Chileke mu; ? i mefuaru g'ejo akpamara owa-a dapfuta nwanyi-a, ji iya anodedu-a, mu no l'ibe iya-a; mbu ke g'i mee ge nwa iya nwuhu?”

²¹Tobudu iya bu; Elayijia dakoru nwata ono l'eli ugbo eto machia onwiya; bya araku Chipfu su: “Jiko Chipfu, bu Chileke mu; menaa ge ndzu nwata-a lwaphutaru iya azu!”

²²Chipfu n̄ma olu Elayijia. Ndzu nwata ono bya alwaphutaru iya azu; o gbakerehu.

²³Elayijia kulita nwata ono shi l'ulo-eli ono nyizeta le k'ali. O kuru iya nu ne iya su: "Wa nwa ngu baa; o nowa ndzu."

²⁴Nwanyi ono su Elayijia: "Oo nta-a be mu maru li bu onye ke Chileke; teme l'opfu, Chipfu shi l'onu ngu pfua be bu okpobe-opfu."

1 Ndu eze 18

Elayijia yee Obedaya

¹A nonyakpowaro-o; no-rwua apha k'eto; Chipfu su Elayijia: "Je egoshi Ehabu onwongu; ge mu bya e-me g'igwe dzee mini le mgboko."

²Oo ya bu; Elayijia jeshia egoshi Ehabu onwiya. Teke ono be egu kabaa emeshi ike le Sameriya.

³Ehabu bya ekua Obedaya, bu onye-ishi l'ibe iya. Obedaya bu onye Chipfu duru le nsu shii.

⁴Noo kele teke Jiezebelu shi egbushi ndu mpfuchiru Chipfu be bu Obedaya chitaru ndu mpfuchiru Chipfu ono ukporo umadzu ise je edomishia l'ogba. O dobecharu phe ukporo labo l'umadzu iri iri l'ogba lanu; azu phe le nri; bya ekeje phe mini.

⁵Ehabu su Obedaya: "G'anyi jegbabekota ali-a l'eka obvu-mini du; me nsuda nsuda dukota nu; g'a maru; ? anyi a-huma irwu-eswa; shi nno dzoo inya anyi; me inya-mulu anyi ndzu. G'o to nweru ophu anyi e-gbu l'opfu l'egu emeshiwa iya ike."

⁶Oo ya bu; ephe bya ekee ali ono ekeke g'ephe e-shi jegbabekota iya. Ehabu tsoru eka lanu; Obedaya tsoru eka iya ophu.

⁷Obedaya jenyakpoeppo; yee Elayijia bya edzuda. Obedaya hubekwa iya pho ama; bya ephozeru iya iphu l'ali su: "Nnajiuphu mu, bu Elayijia! ? Bu ngu baa?"

⁸Elayijia su iya: "Oo mbedua be o bu. Tugbua je akaru nnajiuphu ngu le Elayijia no l'eka-a."

⁹Obedaya su: "? Bu ejo-iphe gunu be mu meru; meru g'o gude i nodu eme g'i nwuru mube nwozi ngu ye l'eka Ehabu; g'o woru mu gbua?"

¹⁰Oo ge Chipfu, bu Chileke ngu, no ndzu; g'o no iya-a; be bukwapho g'o bu ire-lanu l'o to dudu oha; me ali-eze, nnajiuphu mu teke ezidu g'e je achoo ngu. Oha; ozoo ali-eze ophu suru li ti nodu le ndu phe; l'o nua phe nte g'ephe ria l'ephe ta ahumaduru ngu.

¹¹O buru iya be i byaru nta-a bya asu ge mu tugbua je akaru nnajiuphu mu le gube Elayijia no l'eka-a.

¹²? Mu maru eka Unme Chipfu e-duta ngu je edobe me mu hae ngu pho tugbua. Mu -jeepho je epfuaru iya Ehabu; o bya; ophu o to humaduru ngu; l'o woru mu gbua. Ole mube onye-ozu ngu be Chipfu shikwa teke mu bu nwokoro dutaru le nsu.

¹³Nnajiuphu mu; ? ti n̄majeduru iphe, mu meru teke ono, Jiezebelu shi egbushi ndu mpfuchiru Chipfu; mbu ge mu gude wohaa ndu mpfuchiru Chipfu ono ukporo ise l'ogba? Mu wohachaaru phe ukporo labo l'umadzu iri iri l'ogba lanu; azu phe le nri; bya eku mini anu phe.

¹⁴O buru nta-a be i byaru asu ge mu tugbua je akaru nnajiuphu mu le Elayijia no l'eka-a. Oo-gbukwa mu!”

¹⁵Elayijia su iya: “Eshinu Chipfu, bu Okalibe-Kakota-Ike no ndzu g'o no iya-a; mbu onye ono, mu ejeru ozi; be mu goshifutajekwa Ehabu onwomu ntanu-a.”

Ehabu yele Elayijia edzuda

¹⁶Oo ya bu; Obedaya tugbua jepfushia Ehabu je ezia ya ya. Ehabu jepfushia Elayijia.

¹⁷Ehabu humaeopho Elayijia bya asu iya: “? Bu ngu baa; gube onye ono, l'akpa ndu Izurelu ehu-a?”

¹⁸Elayijia su: “O to bukwa mbedua akpa ndu Izurelu ehu. O kwa gubedua; gu le ndibe nna ngu be o bu; kele unu haru eme ekemu Chipfu; tsoahaa Balu.”

¹⁹“Ngwa; zia g'e je ekua ndu Izurelu l'ophu g'ephe byapfuta mu l'ubvu Kamelu. Chita unu umadzu l'ukporo labo l'iri ono, bu ndu epfuchiru Balu; waa unu nemadzu ono, bu ndu epfuchiru Ashera; mbu ndu ono, Jiezebelu anu nri ono g'ephe bya.”

Elayijia yee ndu epfuchiru Balu

²⁰Oo ya bu; Ehabu bya ezia nzi ekukota ndu Izurelu l'ophu; waa ndu epfuchiru Balu; ephe dzukota l'ubvu Kamelu.

²¹Elayijia bya apfuru ndu Izurelu ono l'iphu g'ephe ha su: “? Bu jasu teke ole be unu a-no-bekporo ogazi-enya-labo ono unu no ono? O -buru l'oo Chipfu be bu Chileke; unu tsoru iya. Teke obu l'oo Balu be bu Chileke; unu tsonuru iya.” O pfuchaa nno; ophu ephe epfuduru opfu yeru iya.

²²Tobudu iya bu; Elayijia su ndu ono: “Oo mbedua kpoloko be phoduru nu le ndu epfuchiru Chipfu. Obenu le ndu epfuchiru Balu be du unu nemadzu l'ukporo labo l'iri.

²³G'a kputaru anyi oke-eswi labo. G'ephe hata oke-eswi lanu; gbua; bokashia; doo l'eli nku; ole oo g'ephe ta nwukwaru oku ye iya. Mbedua be e-gbu oke-eswi lanu ophuu; bokashia; doo l'eli nku; mu taa nwuduru oku eye iya.

²⁴Unu araku epha agwa unu; ge mbedua arakukwapho epha Chipfu. Onye ophu gude oku za enu; aamaru l'oo ya bu Chileke.” Ndu ono g'ephe ha zukota mgbede su: “Iphe, i pfuru du ree.”

²⁵Elayijia su ndu epfuchiru Balu: “Unu vuru uzo hata oke-eswi lanu gbua; eshi ophu unu du igwerigwe. Unu araku epha agwa unu; ole oo g'unu ta anwukwaru oku ye l'anu ono.”

²⁶Ephe bya akputa oke-eswi lanu l'ime oke-eswi, a nuru phe; gbua. Ephe kpo-kua epha Balu shita l'utsu jasus l'eswe asuje: “Gube Balu; zanu anyi oku!” Ophu o dudu

ophu, meru nu; mbu ophu e yeduru phe onu. Ephe tsoru oru-ngweja ono, e phe meru ono etephe ebvu mgburugburu.

²⁷O be l'eswe; Elayijia chiaha phe ochi; su phe: “Unu kushibaa ya oku ike; kele o agwa be o bu. ? A maru; ? o no l'oke oriri; ? too oome iphe; ? too o jeru iphe; ? too bu mgbenya be ooku; g'unu ekutee ya.”

²⁸Oo ya bu; e phe rashia ya ike; gude mma; me arwa ebvujashi onwophe l'uzo omelali phe; jasu mee, shi phe l'ehu alwashi.

²⁹Echi-eswe bya aghata g'ephe chiphenyaru okorobo mkpu ono, e phe echi ono. A bya erwua teke eegweje ngweja uzenyashi; ophu o dukwapho ophu meru nu; ophu e yeduru phe onu; mbu ophu o dudu iphe nwuru nu.

Chipfu gude oku eke ngweja Elayijia

³⁰Tobudu iya bu; Elayijia su ndu ono g'ephe ha: “Unu wuritaru mu ntse.” Ephe bya awupfu iya ntse. Elayijia bya edozia oru-ngweja Chipfu ono, e nwutsushiwaru enwutsushi ono.

³¹O bya apata mkpuma iri l'ebo, no-chiru enya ipfu iri l'ebo, bu unwu Jiekopu; mbu onye ono, Chipfu pfujeru su: “Epha ngu a-buru Izurelu-a.”

³²O gude mkpuma ono kpokoberu Chipfu oru-ngweja. O bya ebvua nsu, ha osa bvuphee oru-ngweja ono mgburugburu.

³³O bya edoo nku g'oo-du; bya egbua oke-eswi ono bokashia; doo l'eli nku ono. O su: “Unu je ekujishia mini l'ite-mini eno; bya awua l'eli ngweja-akpo-oku-a; waa le nku-a.”

³⁴O su phe: “Unu je ekutafua ya ke mgbo ebo” Ephe je ekutafua ke mgbo labo. O su phe: “Unu je ekutafua ke mgbo eto.” Ephe je ekuta iya ke mgbo eto.

³⁵Mini ono nodu asoshihu l'eli oru-ngweja ono; bya eji nsu ono, e bvupheru mgburugburu ono ejiji.

³⁶O be teke eegweje ngweja uzenyashi; Elayijia, bu onye mpfuchiru Chipfu bya akpuritaru ntse su: “Gube Chipfu, bu Chileke ke Ebirhamu; me ke Ayizaku; me ke Izurelu; menaa g'a maru ntanu-a l'oo ngu be bu Chileke le Izurelu; teme waa g'a maru le mu bu onye-ozu ngu; waa l'iphe-a, mu meru-a be bu iphe, i suru ge mu mee.

³⁷Zanu mu oku gube Chipfu; zanu mu oku; k'ophu ndu-a a-maru l'oo gube Chipfu bu Chileke; teme o buru ngu bu onye e-me g'obu phe lwaphuta azu l'eka i no.”

³⁸Tobudu iya bu; oku shi l'eka Chipfu buru phaa; bya ekekota ngweja-akpo-oku ono; me nku ono; me mkpuma ono; me urwuku, no l'ali; bya erichachaa mini ono, doru le nsu ono ericha.

³⁹Ndu ono l'ophu huma iphe ono; bya adashihu kpurumu; rashia su: “Oo Chipfu be bu Chileke! Oo Chipfu be bu Chileke!”

⁴⁰Elayijia sù phẹ: “Unu gudechaa ndu mpfuchiru Balu. Unu te ekwekwa g'ò dùru onye ophu e-pyofu l'ime phẹ!” Epehe gude phẹ; Elayijia chita phẹ je lẹ nsuda Kishonu je eworu phẹ gbushikota l'eka ono.

Igwe abya mini

⁴¹No iya; Elayijia sù Éhabu: “Tugbua je eria; ngua; kele ephu oke mini aphuwaa.”

⁴²Éhabu tugbua gẹ ya je eria; ngua. Elayijia nyihu mkpakponu úbvú Kamelu ono; phozeta kpupyabẹ iphu lẹ mgbaka ikpere iya.

⁴³Ọ sù nwozi iya: “Tugbua nta-a je eleedu ẹnya l'uzo eze-ẹnymu.” Nwozi iya ono tugbua je elee ẹnya; bya asù iya: “Ọ tọ dukwa iphe, nọ l'eka ono.” O zia ya nno mgbo esaa.

⁴⁴O be lẹ k'esaa; nwozi iya ono sù: “Lenu; urwukpu, habeeḡpho nwanshii gẹ mpfupfumeke nemadzù bẹ shi l'eze-ẹnymu erwu eje abya.” Elayijia sù iya: “Tugbua je akaru Éhabu sù iya: ‘Dozia ugbo-inya ngu gbagbua lashia; a -nonyaa oke mini nmaburu ngu ye.’”

⁴⁵A notaepho nwanshii; igwe rwua erwurwu; jihu kpakpalu; pherephere ziahaa; oke mini wata edzedze. Éhabu gbaru lashia mkpukpu Jiezerelu.

⁴⁶Ike Chipfu bya Elayijia l'ehu; ọ rikota iphe, o yeru l'ehu; gbagbua je agbaghata Éhabu; vuru iya uzo gbarwua mkpukpu Jiezerelu.

1 Ndu eze 19

Elayijia agbaru Jiezebelu oso

¹Éhabu bya akokotaru Jiezebelu iphemiphe, Elayijia meru; waa g'o gude ogu-echi gbushikota ndu mpfuchiru Balu.

²Oo ya bu; Jiezebelu zia nzi g'e je ezia Elayijia sù: “G'agwa gwakwa mu ochi; mbu g'o mekwaa mu ophu ka njo m'o -betashia egube nta-a echele ophu mu emeduru ndzu ngu g'ò dù g'i meru ke ndu mpfuchiru Balu ono.”

³Elayijia tsuhu ebvu; bya agbaahaa oso ndzu iya. O -rwuepho mkpukpu Biye-Sheba, du l'ali Jiuda; ọ haa nwozi iya l'eka ono.

⁴Yebedua l'onwiya jee ije ujiku ophu bahu l'echiegu. O -rwua l'upfu oshi junipa; ọ nọ-zeta anọ; bya epfuahaaru Chileke g'o mee gẹ ya nwuhu. Ọ sù Chileke: “O jiwaru mu epho; jiko Chipfu; wotanù ndzu mu; kele mu ta akadù ndiche mu phẹ ree.”

⁵O pfuchaa nno; bya aze-zeta l'upfu oshi ono; mgbenya tu iya. A bya l'amaru; ojozi-imigwe lanu bya akpaa ya eka sù: “Gbeshi; ria nri.”

⁶Elayijia bya achikaa ẹnya huma ishi buredi, e gheru l'ovokoku waa ite, mini nọ, a suberu iya l'uzo ishi. Ọ bya eria; ngua; bya aze-zeta ozo.

⁷Ojozi Chipfu ono bya alwaphuta azu ke mgbo labo; bya akpaa ya eka sù: “Gbeshi; ria nri; odumeka bẹ ije obu a-panukakwa ngu eka.”

⁸Ọ bya agbalihu ria; ngua. O gude ike nri ono, o riru ono jee ije ụkporo abalị labo; eswe l'enyashi jasụ o jerwua úbvú Horebu, bụ iya bụ úbvú Chileke.

⁹Ọ bụru l'ẹka ono bẹ ọ bahuru l'ogba je akwaa l'enyashi iya. Chipfu bya epfuaru iya opfu sụ: “? Bụ gunu bẹ iime l'ẹka-a Elayijia?”

¹⁰Elayijia sụ: “Iphe kẹ gube Chipfu; mbụ Chileke, bụ Ọkalibe-Kakota-Ike bẹ aphụ mu l'obu aphushi mu iya ike. Noo kẹle ndu Ízurelu bẹ gwọbewaru ogbandzu ngu; bya enwutsushiwa ọru-ngweja ngu; gude ogu-echi tuko ndu mpfuchiru ngu gbushia; ọ bụwaru mbẹdua nkinyi mu bẹ phoduru nụ. Nta-a bẹ ephe achofuwaa ishi ndzu mu.”

¹¹Chipfu sụ: “Ngwa; lufu je apfuru l'iphu Chipfu l'eli úbvú; kẹle Chipfu abya aghata.” Tọbudu iya bụ; oke pherephere, parụ ẹka bya eziahaa; agbawashi úbvú ono; bya agbakposhi eze mkpuma, dugbaa l'úbvú ono kẹ yogiri yogiri l'iphu Chipfu. Ọle Chipfu ta anodu lẹ pherephere ono. Pherephere ono zibuhuepho; alị wata anma jijijijii. Ophu Chipfu ta nodu l'alị-ọnma-jijijijii ono.

¹²Alị ono, nmabuhuepho jijijijii; ọku bya nkiya; ophu Chipfu ta nodu l'ọku ono. Ọku ono nyihuepho; e pfua nwa nwirinwiri opfu.

¹³Elayijia numa iya; bya egude uwe iya kwechia onwiya iphu; lufuta bya apfuru l'onu ogba ono. Ọ duru olu-opfu suru iya: “? Bụ gunu bẹ iime l'ẹka-a Elayijia?”

¹⁴Elayijia sụ: “Iphe kẹ gube Chipfu; mbụ Chileke, bụ Ọkalibe-Kakota-Ike bẹ aphụ mu l'obu aphushi mu iya ike; noo kẹle ndu Ízurelu bẹ gwọbewaru ogbandzu ngu; teme ephe nwutsushiwa ọru-ngweja ngu; gude ogu-echi tuko ndu mpfuchiru ngu gbushia; ọ bụwaru mbẹdua nkinyi mu bẹ phoduru nụ. Nta-a bẹ ephe achofuwaa ishi ndzu nkemu.”

¹⁵Chipfu sụ iya: “Laphu azụ shia ụzo ophu i shiru jeshia echiegu Damasukosu. Teke i jerwuerupho; wua Hazelu manụ l'ishi g'ọ bụru eze ndu Arámu.

¹⁶L'i wua Jiehu; nwa Nimushi manụ l'ishi g'ọ bụru eze ndu Ízurelu; l'i wua Elayisha nwa Shafatu kẹ mkpukpu Abelu-Mehola manụ l'ishi g'ọ nochia enya ngu bụru onye mpfuchiru Chileke.

¹⁷Onye ophu gbalaru nụ ophu Hazelu e gudedu ogu-echi gbua ya; Jiehu egbua ya. Onye gbalaru nụ ophu Jiehu e gudedu ogu-echi gbua ya; Elayisha egbua ya.

¹⁸G'ọ duhabekponu bẹ mu dobeeleru-a unu umadzu iri l'esaa l'ukporo umadzu iri l'alị Ízurelu, bụ ndu te wotajeduru ikpere pẹ gbushiru Balu; baaru iya eja; ophu ephe te tsutsujeduru iya onu.”

Elayijia yẹ Elayisha

¹⁹Ọo ya bụ; Elayijia shi l'ẹka ono lufu; je ahuma Elayisha nwa Shafatu l'ẹka o gude oke-eswi ụkporo l'eno, a jigbaaru ẹbo ẹbo arwaze alị. Elayijia jeru jepfushia ya; bya ewota ukpo iya gbaphua ya l'ehu.

²⁰Elayisha gbadogbua oke-eswi ono; gbatoru Elayijia. Elayisha sù: “Gẹ mu tsutsufua ne mu waa nna mu onu gẹ mu abyawarọ etsoru ngu.” Elayijia sù iya: “Laphu azu. ? Ii-tsoru mu kẹ gunu?”

²¹Elayisha parù iya haa laphushia azu; je egbushikọta oke-eswi iya phọ. O gude oshi ono, e gude gakọo phẹ ono shia anu phẹ; woru iya kekashiaru ndiphe; ephe taa. O gbe teke ono gbalihu tsoru Elayijia; jeahaaru iya ozi.

1 Ndu eze 20

Benu-Hadadu etso ndu Samériya ogu

¹Benu-Hadadu, bu eze ndu Arámu bya achikobe ndu ojogu iya l'ophu. Yẹle ndu eze ukporo l'iri l'ẹbo tuko swiru; waa inya; mẹ ugbo-inya. Ephe je ekepheta mkpukpu Samériya; tsoo phẹ ogu.

²O zia ndu-ozì g'e je l'ime mkpukpu je ezia Éhabu, bu eze ndu Ízurelu sù iya lẹ Benu-Hadadu sùru-a:

³“Mkpọla-ọchaa ngu waa mkpọla-ododo ngu bukotawa nkemu; unyomu ngu waa unwegirima ngu ndu ophu kakọta ama mma bukwarupho nkemu.”

⁴Eze ndu Ízurelu sù: “Gube eze, bu nnajiuphu mu; ọo g'i pfuru buẹpho g'ọ dọ; mbẹdua mẹ iphemiphe, mu nweru bẹ bukota nkengu.”

⁵Ndu ozi ono bya alaphu azu ọzo je asù: “Benu-Hadadu bẹ sùru lẹ-a: ‘Mu zihawaru g'i chita mkpọla-ọchaa ngu; mẹ mkpọla-ododo ngu; mẹ unyomu ngu phẹ; waa unwegirima ngu nù mu.

⁶Ole-a; egube nta-a echele bẹ mu e-ye ndu-ozì mu g'ephe bya etsoru ọlo ngu; mẹ ọlo ndu-ozì ngu vọchachaa pfurupfuru. Iphe, bukpo iphe, dọ ngu ùbvù l'ẹnya bẹ ephe e-gwetakọta.’ “

⁷Tọbodu iya bu; eze ndu Ízurelu bya ekukọbe ndu bu ọgerenya alì ono l'ophu sù phẹ: “? Unu humadupho gẹ nwoke-a achọ mu opfu? O ziru ozi gẹ mu nù iya unyomu mu; mẹ unwegirima mu; mẹ mkpọla-ọchaa mu; waa mkpọla-ododo mu; ophu mu ta jikakwaru.”

⁸Ndu bu ọgerenya ono g'ephe ha; mẹ ndu Ízurelu l'ophu sù: “Ta ngashiru iya nchi; ophu i kwetakwa iphe, o pfuru.”

⁹Oo ya bu; Éhabu ziphu ndu ono, Benu-Hadadu ziru ozi ono azu sù: “Unu karu nnajiuphu mu, bu eze sù iya lẹ-a: ‘Iphe ono, i vu ọzo sù gẹ mube onye-ozì ngu mee ono bẹ mu e-mekọta. Ole k'ikpazu-a bẹ mu ta adudu ike eme-o!’ “ Ndu ono, byaru ozi ono lufu; je ezia Benu-Hadadu iphe, e ziru phẹ.

¹⁰Benu-Hadadu bya ezia Éhabu ozi ọzo; sù: “G'agwa gwakwa mu ọchi; mbu g'o mekwaa mu ophu ka njo m'urwuku, nọ lẹ mkpukpu Samériya phodukpowaa ophu sùru gẹ ndu tso mu nù e-kpotachaa ya mkpoji-ẹka.”

¹¹Eze ndu Ízurelu sù: “Unu karu iya l'onye kwaru onwiya ngwogu ta abajedu aba; gbahaepho teke o lwu-kpecharu l'ogu.”

¹²O buru ge Benu-Hadadu no le mkpu angu mee yee ndu eze, yee ya no be a byaru ezia ya ozi ono. O su ndu nkiya: “Unu kwakobe k'ogu.” Oo ya bu; ephe kwakobe onwophe k'etso mkpukpu Sameriya ogo.

Éhabu alwu-kpee Benu-Hadadu

¹³No iya; o nweru onye mpfuchiru Chileke, byapfutaru Éhabu, bu eze ndu Ízurelu bya asu iya: “Chipfu suru-a: ‘? I humaru ikpoto ndu-a? Mu e-woru phe ye ngu l'eka ntanu-a; g'ii-makwanuru l'oo mu bu Chipfu.’ “

¹⁴Éhabu su: “? Bu onye be e-me iya nu?” Onye mpfuchiru Chileke ono su: “Chipfu suru: ‘Oo unwokorobyia ndu ojogu ndu-ishi ohamoha ono be e-me iya nu.’ “ Tobudu iya bu: Éhabu su: “? Bu ndu ole a-wata ogo obu?” Onye mpfuchiru Chileke ono su: “Oo unubedua.”

¹⁵Tobudu iya bu; o bya achikobe unwokorobyia, bu ndu ojogu ndu-ishi ohamoha ono. Iphe, ephe du buru ukporo umadzu iri le nanu l'umadzu iri l'ebo. E mecha; o bya achikobe ndu Ízurelu ndu ophu tukoru du unu nemadzu iri l'esaa l'ukporo umadzu iri.

¹⁶O buru l'eswe be ephe tugburu jeshia; mbu teke Benu-Hadadu no le mkpu nguwa mee k'ophu o tsu iya atsutsu; yele ndu eze ukporo l'iri l'ebo pho, eeyetaru iya eka pho.

¹⁷Unwokorobyia ndu ojogu ndu-ishi ohamoha ono vuru uzo tugbua. Ndu Benu-Hadadu yefuhawaru g'ephe kwabe; bya agbaaru iya ama; su: “Unwoke shikwa le Sameriya eje abya.”

¹⁸Benu-Hadadu su: “Teke ephe byaru ke nchi-odu-doo; unu kpukoo phe le ndzu; teke o bu k'ogu be ephe abya; unu kpukokwa phe pho le ndzu.”

¹⁹Unwokorobyia ndu ojogu ono vuru uzo wufuta le mkpukpu; ndu ojogu ozo nodu etso phe etsotso.

²⁰Onyenonu gbukotaepho onye ophu ye ya wogbaberu ogo. O nwuepho nno; ndu Aramu yee okpa l'oso; ndu Ízurelu chipyabe phe. Benu-Hadadu, bu eze ndu Aramu nodu l'eli inya iya gbalaa. Yee ndu agbaru iya l'inya tuko gbalaa.

²¹Eze ndu Ízurelu chipyabe phe je egudegbaa inya phe; me ugbo-inya phe; bya egbua ndu Aramu k'ophu paru eka apaa.

²²E mechaepho; onye mpfuchiru Chileke ono byapfuta eze ndu Ízurelu ono bya asu iya: “Unu jekwa emee onwunu g'unu kaba esihu ike; maru iphe, unu e-me. Noo kele apha gbaerupho be eze ndu Aramu a-byakwa etsoo ngu ogo ozo.”

²³No iya; ndu-ishi ozi eze ndu Aramu bya epfuaru iya su: “Iphe, meru g'o gude ndu Ízurelu ka anyi okpehu bu l'agwa phe bu agwa eli ubvu. O -buru l'anyi l'ephe lwuru ogo ono l'eka du baswaa; be anyi a-kakwa phe okpehu.

²⁴Iphe, ii-me bu g'i wofuchaa ndu eze pho l'onodu phe; wotachia ndu-ishi ndu ojogu dochia enya phe.

²⁵L'i chita ndu ojogu, ha ge ndu e gburu egbugbu yekwaa le ndu ojogu; me inya, ha g'ophu tuphashihuru nu; me ugbo-inya, ha g'ophu tuphashihuru nu kwapho; g'anyi jepfu phe ugu l'eka du baswaa. Anyi kafutaje phe okpehu." Oo ya bu; Benu-Hadadu kweta; bya emee iphe, ephe pfuru iya.

²⁶Apha sugbaepho ishi; Benu-Hadadu chikobe ndu Aramu; ephe jeshia mkpukpu Afeku; g'ephe je etsoo ndu Izurelu ugu.

²⁷A bya akpakoo ndu Izurelu; ephe kwakobekwapho; bya awu-pfushia phe. Ndu Izurelu doru uzi labo g'unwu ndokobe egu; ghaaru ndu Aramu iphu; obenu le ndu Aramu tukoru obotegu sweta.

²⁸Onye ke Chileke bya eje asu eze ndu Izurelu: "Chipfu suru-a: 'Eshi ophu ndu Aramu gude onu phe su le Chipfu be bu agwa, ereje ire l'eli ubvu; l'o to budu agwa ereje ire le nsuda nsuda; be mu a-chita ikpoto ndu-a g'ephe ha ye ngu l'eka; gi makwanuru l'oo mu bu Chipfu.' "

²⁹Ephe doru chebegbachaa ibe phe iphu egube ono abali esaa. O be le mboku k'esaa; ephe wogbabe ugu ono. Ndu Izurelu gbua ndu Aramu ukporo unu unwoke iri l'ebo; l'unu iri , bu ndu ojogu o-je-l'okpa l'ujiku lanu.

³⁰Ndu ophu e gbuphodoru gbaba le mkpukpu Afeku; igbulu mkpukpu ono zeshihu tugbua ukporo unu nemadzu ugbo eto; l'unu esaa; l'ukporo umadzu iri . Benu-Hadadu gbalaa je edomia onwiya l'ime ime ulo, du le mkpukpu ono.

Éhabu edobe Benu-Hadadu ndzu

³¹Ndu ozi Benu-Hadadu bya asu iya: "Lenu; anyi numaru le ndu eze ndu Izurelu be aphuje obu-imemini. G'anyi gbaphua uwe-aphu l'upfu; rikua onwanyi eri l'ishi; jepfushia eze ndu Izurelu. ? A maru; o-dobe ngu ndzu."

³²Oo ya bu; ephe bya agbaphua uwe-aphu l'upfu; rikua eri l'ishi jepfushia eze ndu Izurelu je asu iya: "Onye-ozu ngu Benu-Hadadu suru jiko g'i dobe nu iya ndzu." Eze jia su: "? O nokwadu-a ndzu? Oo nwune mu be o bu."

³³Ndu ozi Benu-Hadadu ono nodu egekpoepho iphe, e-shi iya l'onu futa. Ephe nalitakebe iya opfu ono l'onu; su: "Ee; mbu nwune ngu Benu-Hadadu." O su phe: "Unu je eduta iya g'o bya." Benu-Hadadu byaepho; Éhabu mee g'o nyikota ugbo-inya iya.

³⁴Benu-Hadadu su iya: "Mkpukpu ono, nna mu nataru nna ngu ono be mu a-nu-phukota ngu azu; l'i meta eka aa-noduje azuru ngu aswa le Damasukosu egube ono, nna mu meru le Sameriya." Éhabu su: "Mu e-gude k'ogbandzu-a haa ngu g'i lashia." Oo ya bu; yee ya gbaa ndzu; Éhabu paru iya haa; o lashia.

Aanma Éhabu ikpe ehu Benu-Hadadu

³⁵O nweru onye lanụ l'ime ọgbo ndu mpfuchiru Chileke, Chipfu byaru epfuaru g'ọ sụ onye ọphuu: “Jiko chia mu iphe.” Onye ono jịka iya echi iphe ono.

³⁶Tọbudu iya bụ; onye mpfuchiru Chileke ono sụ iya: “Lenu; eshi ọphu ị jikaru eme iphe, Chipfu pfuru; bẹ i -bebeephoo haa mu l'ẹka-a lufu; oduma adzugbua ngu.” Alufu, nwoke ono haru iya lufu; oduma huma iya woru iya dzugbua.

³⁷Onye mpfuchiru Chileke ono bya ahuma onye ọzo bya asu iya: “Jiko chia mu iphe.” Onye ono wagochaa ya awago; chibashia ya ehu ọnyá.

³⁸Onye mpfuchiru Chileke ono lufu; je apfuru l'aguga ọzo; ọdu kwaburu eze. O gude iphe kechia onwiya iphu; g'a ta maru iya.

³⁹O be teke eze ghatajerupho; onye mpfuchiru Chileke ono kua ya oku sụ: “Mube onye-ozu ngu bẹ bahuru l'echilabo ọgu; o nweru nwoke lanu ghakoberu duta onye ọ kputaru le ndu bya asu mu: ‘Chee onye-a nche; ọ -buru l'ọ gbalaru; bẹ ii-gude ishi ndu nkengu pfua ugwo iya; teke odumeka l'i pfua mkpola-ochaa, erwa iya du talentu lanu.’

⁴⁰Tọbudu iya bụ; mube onye-ozu ngu gbẹ phube iphu eme iphe ọzo; nwoke ono gbalaa.” Eze ndu Izuru sụ iya: “Oo iphe, gbaru ngu nu bu ono. O buru ngu bẹ o shiekwapo l'onu.”

⁴¹Oo ya bụ; onye mpfuchiru Chileke ono; bya apufu-kebe iphe ono, o gude kechia onwiya iphu ono; eze ndu Izuru bya amaru l'oo onye lanu le ndu mpfuchiru Chileke bẹ ọ bụ.

⁴²O sụ eze: “Chipfu suru-a: ‘Eshinu ị haru onye mu suru g'e mee omeliwe; ọ laa ke mmanu; bẹ ishi ndu ngu a-laa l'ugwo ishi ndu nkiya; ndu nkengu alaa l'ugwo ndu nkiya.’ “

⁴³Eze ndu Izuru gude iwe; me ehu-eghu tugbua lashia ibe iya le Sameriya.

1 Ndu eze 21

Mgbabu vayinu Nabotu

¹O nweru opfu-vayinu, no le mkpukpu Jiezeru le mgboru ibe Ehabu, bu eze le Sameriya. Onye nwe iya nu bu Nabotu, onye mkpukpu Jiezeru.

²A nonyaa; Ehabu sụ Nabotu: “Nunu mu opfu-vayinu ngu-a ge mu mee mgbabu, mu a-kobeje eba; eshi ọphu ọ no-kube ibe mu. Mu e-gude opfu-vayinu ọphu kakporoo ya ree gbanweta ngu iya; ọzo le mu gude okpoga pfua ngu aswa iya; me obeta aswa iya buru gunu.”

³Nabotu sụ Ehabu: “Ge Chipfu te ekwekwa ge mu woru oke ali nna mu phe nu ngu.”

⁴Ehabu gude ehu-eghu; vua ovuma lashia ibe iya; kele Nabotu, bu onye Jiezeru be suru le ya taa ndu iya oke ali nna iya phe. O je aze l'iphe-aze ya; gbanwube iphu; jika eri nri.

⁵Jiezebelu, bu nyee ya bya abyapfuta iya; bya asu iya: “? Bu gunu kpataru iphe, ehu egu ngu egu ke gi ti ri nri?”

⁶Ehabu su iya: “Iphe, kparu iya nu bu le mu pfuru Nabotu onye Jiezerelu go nu mu opfu-vayinu iya ge mu pfua ya aswa iya l'okpoga; odumeka ge mu gbetchia nu iya opfu-vayinu ozo l'ugwo iya; m'o -buru lo du iya ree. Obenu lo suru le ya ta anudu mu opfu-vayinu iya anunu ophu.”

⁷Nyee ya ono, bu Jiezebelu su iya: “? Bukwadu ngu-a bu eze ndu Izurelu to? Gbalihu ria nri; g'ehu tsoo ngu utso. Mu a-nataru ngu-a opfu-vayinu Nabotu, bu onye Jiezerelu ono.”

⁸No iya; Jiezebelu bya egude epha Ehabu deshia ekwo-ozu; gude iphe-ohubama, Ehabu egudeje anyachishi ekwo ozi nyachishia ya; woru iya keshiaru ndu bu ogerenya; me ndu nweru enya, bu ndu ephe le Nabotu tukoru buru le mkpukpu.

⁹Iphe, o deru l'ekwo-ozu ono bu: “Unu tua onu mboku unu a-swige gu. O -be mboku ono; unu dobe Nabotu l'onodu, ha shii l'echilabo oha.

¹⁰Unu eyeru iya ndu bu ogalemkpa nemadzu labo g'ephe nodu iya l'iphu; boo ya ibo; su lo pfubyiru Chileke; bya epfubyia eze. Teke ono; unu akpufu iya je atugbua le mkpuma.”

¹¹Tobudu iya bu; ndu mkpukpu ono; mbu ndu bu ogerenya; me ndu nweru enya, bu le mkpukpu Nabotu phe mee ge Jiezebelu pfuru phe l'ekwo-ozu ono, o deru keshiaru phe ono.

¹²Ephe bya atua onu mboku aswige gu; woru Nabotu dobe l'onodu, ha shii l'echilabo phe.

¹³Ndu ogalemkpa labo bata bya anodu iya l'iphu; boahaa ya ibo su: “Nabotu pfubyishiru Chileke; bya epfubyishikwapho eze.” Noo ya bu; ephe kpufu iya l'azu mkpukpu; je atugbua ya le mkpuma.

¹⁴Tobudu iya bu; ephe zia Jiezebelu; su: “A tugbuakwaru Nabotu le mkpuma; o nwuhuwaa obu.”

¹⁵Anuma, Jiezebelu anuma la tu-gbuwaru Nabotu le mkpuma; o su Ehabu: “Tugbua je anata opfu-vayinu Nabotu onye Jiezerelu pho; mbu ono, o jikaru le ya taa nudu ngu gi pfua ya okpoga ono. Noo kele Nabotu ta anohedu ndzu; o nwuhuwaru.”

¹⁶Tobudu iya bu; Ehabu numaepho le Nabotu be nwuhuwaru nu; o gbalihu jeshia l'opfu-vayinu Nabotu, bu onye Jiezerelu ono; ge ya nata iya nworu.

Elayjia epfu iphe, e-me Ehabu

¹⁷Noo ya; Chipfu bya epfuaru Elayjia, bu onye Tishibe su:

¹⁸“Gbalihu; je Sameriya; jepfu Ehabu, bu eze ndu Izurelu ono. Eka o no nta-a bu l'opfu-vayinu Nabotu; l'eka-a, oome go nata iya nworu.

¹⁹Karū iya lẹ Chipfu sūru-a: ‘? I gbuchaaru nemadzu; bya anafua ya iphe iya?’ Sū iya lẹ Chipfu sūru-a: ‘Oo ẹka ono, nkuta nọ richaa mee Nabotu ono bẹ nkuta a-nodu richaa mee nkengu!’ “

²⁰Éhabu sū Elayijia: “? I chowaru mu bya; gube onye ohogu mu?” Elayijia sū iya: “Ee; mu chowaru ngu bya; kele i wowaru onwongu haarū eme ejo-ememe l'anya Chipfu.

²¹Huma ahuma lẹ mu e-me g'ejo-iphe dapfuta ngu. Awa ngu bẹ mu a-za l'eza; teme iphe, bukpo onye bu nwoke l'ibe gube Éhabu bẹ mu e-kpo g'e kpoje ntu-a l'alì Ízurelu: ohu; me amadu.

²²Mu e-me onu-ulo ngu ge ke Jierobowamu nwa Nebatu; me ke Basha nwa Ahayijia; noo kele i kpatsuru mu ehueghu; teme i mee ge ndu Ízurelu mee iphe-eji.

²³“A bya l'ehu Jiezebelu bẹ Chipfu pfukwarupho su: ‘Oo nkuta a-ta Jiezebelu l'ime mkpukpu Jiezerelu.’

²⁴“Ndibe Éhabu phe onye ophu nwuhuru lẹ mkpukpu bẹ bu nkuta a-ta onye obu. Onye ophu nwuhuru l'oma egu bẹ bu enu, ephe l'eli a-vuka anu iya.”

²⁵O to dudu onye ejo-iphe nkiya duta-bejeru ge ke Éhabu. O woru onwiya ree eme ejo-ememe l'anya Chipfu. O buru nyee ya, bu Jiezebelu bẹ kwaru iya ye.

²⁶O meru akpamara; kele o gwaru agwa ge ndu Amoru ono, Chipfu chifuru l'iphu ndu Ízurelu ono.

Iphe, Ehabu meru erwu iya l'ehu

²⁷Noo ya; Éhabu numachaepho opfu ono; o gbajashia uwe iya; yee uwe-aphu; swiahaa egu; azejeepho l'uwe-aphu ono; bya anoduje ejephe ke gologolo.

²⁸Chipfu bya epfuaru Elayijia, bu onye Tishibe su:

²⁹“? I humaru ge Éhabu gbẹ bya ewozeta onwiya alì l'iphu mu? Eshinu o wozetaru onwiya alì l'iphu mu bẹ mu tee meedu g'ejo-iphe ono bya teke o nọ ndzu. Mu e-doheru iya onu-ulo iya yele unwu iya.”

1 Ndu eze 22

Mayikaya aphu ophulanya ehuehabu

(2Iphe 18:2-27)

¹A nọ apha eto; ophu ndu Aramu waa ndu Ízurelu ta alwuduru ogo.

²O buru l'ime apha k'eto ono bẹ Jiehoshafatu, bu eze ndu Jiuda kpapfuru Éhabu, bu eze ndu Ízurelu.

³Eze ndu Ízurelu bẹ pfuhawaru ndu-ozì iya su: “? Unu maru-a l'oo anyibedua nwe mkpukpu Ramotu, du l'alì Giladu; ophu o dudu iphe, anyi eme g'ee-shi g'anyi je anata iya eze ndu Aramu?”

⁴Oo ya bu; o jiahaa Jiehoshafatu; su: “? Ii-tsoru mu jee ogu le mkpukpu Ramotu, du l’ali Giladu too?” Jiehoshafatu su eze ndu Izurelu ono: “Mu le ngu tukokwaru buru nanu. Ndibe mu; waa ndu nkengu buru nanu; inya mu; me inya nkengu buru nanu.”

⁵Jiehoshafatu su iya: “Vuadaru uzo maru iphe, Chipfu e-pfu.”

⁶Tobudu iya bu; eze ndu Izurelu bya achikobe ndu mpfuchiru, rwuru l’unu nemadzu bya ajia phe; su: “? Bu ge mu je etsoo ndu mkpukpu Ramotu, du l’ali Giladu ogu; too ge mu te ejeshi?” Epe su iya: “Jeshia; le Nnajiuphu e-woru-a mkpukpu ono ye gube eze l’eka.”

⁷Jiehoshafatu su: “? To duedu onye mpfuchiru ke Chipfu, no l’eka-a g’anyi kpata iya ishi?”

⁸Eze ndu Izurelu su Jiehoshafatu: “O nwefukwaru onye lanu, anyi e-shi l’eka iya kpata Chipfu ishi obu. Ole o du mu ashi; noo kele o to pfujeduru opfu oma l’ehu mu; gbahaepho ejo iya. Onye o bu be bu Mayikaya nwa Imula.” Jiehoshafatu su: “Eze; te epfubaekwa egube ono.”

⁹Tobudu iya bu; eze ndu Izurelu bya ekua onye-ozu iya lanu su iya: “Je ekua Mayikaya nwa Imula g’o bya ntanta-a.”

¹⁰No iya; eze ndu Izurelu yee Jiehoshafatu, bu eze ndu Jiuda yegbachaa uwe eze phe; sugachaaru l’aba-eze phe l’eka eechije bali, no l’onu-abata mkpukpu Sameriya; ndu mpfuchiru ono g’ephe ha nodu phe l’iphu epfugbaa iphe, ephe epfu.

¹¹Zedekaya, bu nwa Kenana bya egude iphe-igwe meshia upyi; bya asuje: “Chipfu suru-a: ‘Oo upyi-a be ii-du ndu Aramu jasuphe alakota l’iyi.’ “

¹²Ndu mpfuchiru ono g’ephe ha nodu epfukota iphe lanu; asuje: “Jeshia ogu le mkpukpu Ramotu, du l’ali Giladu; je alwu-kpee; kele Chipfu e-woru-a mkpukpu ono ye gube eze l’eka.”

¹³Tobudu iya bu; onye-ozu ono, jeru eku Mayikaya ono bya asu iya: “Lenu; ndu mpfuchiru ophuu be tukokwaru wua onu nanu; toko epfu le k’oma a-duru eze. Jiko g’opfu unu l’ephe bukwaru nanu; g’i pfua opfu, du ree.”

¹⁴Mayikaya su: “Eshinu Chipfu no ndzu g’o no iya-a be buepho iphe, Chipfu pfuru mu be mu e-pfu.”

¹⁵Mayikaya bya ejerwua ibe eze; eze su iya: “Mayikaya; ? bu g’anyi jee ogu le mkpukpu Ramotu, du l’ali Giladu; too g’anyi te ejeshi?” Mayikaya su iya: “Ngwanu! Unu jenu je alwu-kpee phe. Chipfu e-woru-a mkpukpu ono ye gube eze l’eka.”

¹⁶Eze bya asu iya: “? Bu ugbo ole be mu a-rwo ngu g’i gude epha Chipfu ribuaru mu angu l’o to dudu iphe ozo, ii-pfuru mu; gbahaepho okpobe-opfu?”

¹⁷Oo ya bu; Mayikaya su: “Mu humaru ge ndu Izurelu l’ophu gbakashihuru nanu nanu aghaphe l’oma ubvu g’aturu, enwedu onye-nche. Chipfu su: ‘Ndu-a be te enwedu nnajiuphu; g’onyenonu lashia ibe iya l’ehu-guu.’ “

- 18**Eze ndu Ízurelu sù Jiehoshafatu: “? Mu ta asùduru ngu l'ò tò byadu epfu iphe, dù ree l'ishi mu; gbahaepho ejo iya?”
- 19**Mayíkaya nõdu epfu iphe, oopfu sù: “Ngwa; ngabẹ nchì nùma iphe, Chipfu pfuru: Mu humaru Chipfu g'ò nõ l'aba-eze iya; ndu ojozi-imigwe pfu-pee ya mgburugburu; pfuru iya l'uzo ẹkutara; mẹ l'uzo ẹkicha.
- 20**Chipfu sù phẹ: “? Bù onye e-je epfubuta Éhabu g'o jeshia ogu lẹ mkpukpu Ramotu, dù l'alì Giladu; k'ophu oo-je anwuhu l'ẹka ono?” “Onye lanu -futa; l'ò sù l'oo g'ee-me iya baa; onye ozo -bya; l'ò sù l'oo g'ee-me iya bù ophuu.
- 21**E mecha; ojozi lanu futa bya apfuru l'iphu Chipfu sù: ‘Oo mbedua e-pfubuta iya.’
- 22**“Chipfu sù iya: ‘? Denu g'ii-shi pfubuta iya obu?’ “O sù: ‘Mu e-je je aburu nwamaa ntuphu-ire je anodu l'onu ndu mpfuchiru Éhabu.’ “Chipfu sù iya: ‘Je; l'ii-pfubuta iya-a; je emee ya nno.’
- 23**“Oo ya bù g'i maru lẹ Chipfu yewaru nwamaa ntuphu-ire; o nõdukota ndu mpfuchiru ngu-a l'onu; teme Chipfu pfuwaa lẹ ya e-merwu ngu ẹhu.”
- 24**Tobudu iya bù; Zedekaya nwa Kenana je erepyaa Mayíkaya ẹka l'upfuru nchì; sù: “? Denu gẹ Unme Chipfu shi lufu mu l'ẹhu; bya epfuru yeru ngu?”
- 25**Mayíkaya sù: “Mboku, ii-maru bù mboku ono, ii-je edomia onwongu l'ime ime mkpuru ono.”
- 26**Eze ndu Ízurelu bya asù: “Unu kputa Mayíkaya kpu-pfu Amonu, bù ochi-oha mkpukpu; waa Jiowashi, bù nwa eze.
- 27**Unu asù phẹ l'eze sùru-a: ‘Unu tu-chia onye-a l'oka-mkporo; nuje iya nri, ha nwanshii; waa mini jasù mu ejee lwa l'ẹhu-guu.’ “
- 28**Mayíkaya sù: “I -lwawaa l'ẹhu-guu; l'i maru l'ò tò budu Chipfu bẹ gbẹ mu l'onu pfua opfu.” O bya asù ndu nõ l'ẹka ono g'ẹphe tibe nvọ l'opfu iya ono.

Eegbu Éhabu l'ogu

(2Iphe 18:28-34)

- 29**Tobudu iya bù; eze ndu Ízurelu waa Jiehoshafatu, bù eze ndu Jiuda chita ndu ojogu phẹ tugbua jeshia mkpukpu Ramotu ono, dù l'alì Giladu.
- 30**Eze ndu Ízurelu bya asù Jiehoshafatu: “Mu e-me onwomu g'a ta maru onye mu bù; bahù l'ogu ono. Gubedua eyeekpawuru-uwe ngu.” Eze ndu Ízurelu bya emee onwiya g'a ta maru iya bahù l'ogu ono.
- 31**Eze ndu Arámu bẹ pfuhawaru ndu-ishi ugbo-inya iya, dù umadzu ukporo l'iri l'ẹbo; sù phẹ: “Unu te etsokwa onye upfu m'ò bù onye nta ogu. Onye unu a-nodu etso ogu kpoloko bù eze ndu Ízurelu.”
- 32**Ndu-ishi ugbo-inya ono humaeapho Jiehoshafatu; ẹphe sù: “Wakwa eze ndu Ízurelu obu-o!” Oo ya bù; ẹphe ghaaru iya iphu g'ẹphe tsoo ya ogu. Jiehoshafatu chishia mkpu.

³³Ndu-ishi ugbo-inya ono bya amaru l'ọ tọ bụdu eze ndu Ízurelu; ephe dakọbe haa ya achichi.

³⁴O nweru onye ophu agbaepho apfu iya l'eka o humaru; woru iya gbaa eze ndu Ízurelu l'ehu le mgbaka eka ngwogu, o kwaru onwiya dzepefuru edzepefuru. Eze rashiaru onye angaru iya ugbo-inya su: “Kpolaa azu; pafu mu l'ogu-a; kele e mekaru mu iphe okpobe emeka.”

³⁵Ogu ono kpohu oku le mboku ono; e keyyabe eze ekeyyabe l'ugbo-inya ono; ephe le ndu Aramu nodu alwu ugu ono. Mee, shi l'eka ono, e mekaru iya iphe ono nodu asoshihu l'oma ugbo-inya ono. O be l'uzenyashi iya; o nwuhu.

³⁶Enyanwu ribajeeppo; e chishia mkpu l'eka ndu ojogu ono no su: “G'onyenonu lashia mkpukpu iya-o; g'onymonye lashia ali iya!”

³⁷Tobudu iya bu; eze nwuhu; a palata odzu iya le mkpukpu Sameriya bya elia.

³⁸Ephe je asaa ugbo-inya ono asasa l'okpuru, du le mkpukpu Sameriya, bu eka ndu agba ukpara awuje eh. Nkuta richaa mee ya egube ono, Chipfu pfuhawaru iya ono.

³⁹A bya l'iphe ozo, nwugbaberu nu teke Ehabu bu eze; me iphemiphe, o mekotaru; me k'ulo-eze, o kpuru gude eze-enyi memaa ya; me ke mkpukpu, o kpushigbaaru ike be e dekotaru l'ekwo-ako, e deshuru iphe, ndu eze ndu Ízurelu meru.

⁴⁰No iya; Ehabu kua mgbenya ikpazu; bya alapfushia nna iya phe. E hazaya, bu nwa iya nwoke buru eze nochia enya iya.

Teke Jiehoshafatu bu eze ndu Jiuda

(2Iphe 20:31—21:1)

⁴¹Jiehoshafatu nwa Asa bya aburu eze ndu Jiuda l'apha, kwe Ehabu apha eno, e -shi teke o wataru aburu eze ndu Ízurelu.

⁴²Jiehoshafatu nowaru ukporo apha l'apha iri l'ise teke o wataru aburu eze. O noo l'aba-eze iya ukporo apha l'apha ise le Jierusalemu. Epha ne iya bu Azuba nwada Shilihi.

⁴³Jiehoshafatu bya etsokotae pho uzo, nna iya, bu Asa tsoru. Ophu o dudu ophu o haru me nanu. O meru iphe, pfuru oto l'enya Chipfu. Ole o to lwuduru eka aagwaje iphe. Ndu Ízurelu nodu ejeje egwe ngweja; bya akpo unwu-isensu oku l'eka ono.

⁴⁴Jiehoshafatu mekwarupho; ye eze ndu Ízurelu nodu le nchi-odoo.

⁴⁵Iphe ozo, Jiehoshafatu megbaberu; me ehuka ehuka, o mekotaru; waa g'o gude lwua ugu be e dekotaru l'ekwo-ako, e deshuru iphe, ndu eze ndu Jiuda meru.

⁴⁶Unwoke, anoduje agba ukpara l'ulo agwa, bu ndu ophu phoduru nu le teke nna iya bu eze; be o chishikotaru l'ali ono.

⁴⁷Teke ono be ndu Edomu te enwedu onye eze; o buru onye no-tsotaru eze be bu onye-ishi.

⁴⁸Jiehoshafatu bya achiru ugbo-mini, ee-gude agbaru iya ngho ye g'e gude je ali Ofi je evuta mkpola-ododo. Oke ugbo-mini ono tsukpohihuru le Eziyonu-Geba; ophu o to jeeduru.

⁴⁹O buru teke onoya be Ehazaya nwa Ehabu suru Jiehoshafatu: "Ge ndu-ozu mu waa ndu-ozu ngu swijenuru l'ugbo-mini ono." Jiehoshafatu jika.

⁵⁰Noo ya; Jiehoshafatu kuru mgbenya ikpazu; bya alapfushia nna iya phe. E lia ya l'eka e liru nna iya phe le mkpukpu Devidi, bu nna iya. Jiehoramu, bu nna iya nwoke buru eze nochia enya iya.

Teke Ehazaya bu eze ndu Izuru

⁵¹Ehazaya nwa Ehabu bya aburu eze ndu Izuru l'apha, kwe Jiehoshafatu apha iri l'esaa, o bahuru l'aba-eze ndu Jiuda; o buru eze ndu Izuru apha labo le Sameriya.

⁵²O mee ejo-ememe l'enya Chipfu; bya etsoo uzo nna iya; me ke ne iya; bya etsoo uzo Jierobowamu nwa Nebatu; mbu onye ono, kpataru; ndu Izuru mee iphe-eji ono.

⁵³O baru Balu aja; bya ephozeru iya; shi nno kpatsu Chipfu, bu Chileke ke Izuru ehu-eghu, bu iphe, nna iya meru.

2 Ndu eze

2 Ndu eze 1

Éhazaya ezi g'e jeru iya l'agwa Balu-Zebobu

- ¹Tobudu iya bu; Éhabu nwuhuepho; ndu Mówabu wata ekwefuru ndu Ízurelu ike.
- ²O buru teke ono be Éhazaya shi l'onuzo ulo-eli iya le Samériya kabafu bya adaa meka iphe. O bya ezia ndu-ozí; sù phe: “Unu jeeshikwa l'aji le Balu-Zebobu, bu agwa ndu Èkuronu g'a maru ? mu l'a-kaa mma l'iphe-a, mu mekaru-a?”
- ³Ole ojozi Chipfu jeru asu Elayijia, onye mkpukpu Tishibe: “Gbalihu jepfu ndu-ozí eze ndu Samériya pho je asu phe: ‘? Bu le Chileke ta nodu l'alí ndu Ízurelu meru g'o gude; unu nodu eje l'aji le Balu-Zebobu, bu agwa ndu Èkuronu?’
- ⁴Oo ya bu le-a; Chipfu suru-a: ‘I ti byadu agbeshi agbeshi l'iphe-azee, eka i dabyiru ono. I nwuhufutajekwa.’ “ Oo ya bu; Elayijia jeshia.
- ⁵Ndu ozi ono lwaphuta azu; bya abyapfuta eze; o sù phe: “? Denu g'o nwuru; unu lwatasharu azu?”
- ⁶Éphe sù iya: “O nweru nwoke, byapfutaru anyi bya asu anyi: ‘Unu jepfu eze ono, ziru unu ozi ono je asu iya le Chipfu suru-a: ? Bu le Chileke ta anodu l'alí Ízurelu meru g'o gude i zia g'e jeru ngu l'aji le Balu-Zebobu, bu agwa ndu Èkuronu? Sù-a; i ti byadu agbeshi agbeshi l'iphe-azee eka i dabyiru ono. I nwuhufutajekwa.’ “
- ⁷Eze bya asu phe: “? O du idu-agma; mbu nwoke ono, byapfutaru unu bya epfuaru unu iphe ono?”
- ⁸Éphe sù iya: “O yeru uwe, e meru l'ejí anu; iphe, o keru l'upfu buru akpo-anu.” Éhazaya sù: “O kwa Elayijia ke Tishibe be o bu.”

Éhazaya ezi g'e je egude Elayijia

- ⁹Tobudu iya bu; eze bya ezia onye-ishi ndu ojogu ukporo labo l'iri; bya eyeru iya ndu ojogu iya ono g'ephe je egude Elayijia. Éphe rwua; onye-ishi ndu ojogu ono bya ejepfu Elayijia le mkpakponu ubvu l'eka o no; je asu iya: “Gube onye ke Chileke; eze suru g'i nyizeta!”
- ¹⁰Elayijia sù onye-ishi ndu ojogu ukporo labo l'iri ono: “O -buru le mu bu onye ke Chileke; g'oku shikwa l'imigwe bya ekegbushia unu le ndu ojogu ukporo labo l'iri ono, unu l'ephe swi ono.” Tobudu iya bu; oku shinu l'imigwe bya ekegbushia ye le ndu ojogu ukporo labo l'iri ono.
- ¹¹Eze byakwa ezia onye-ishi ndu ojogu ukporo labo l'iri ozo; bya eyeru iya ndu ojogu ukporo labo l'iri g'ephe je egude Elayijia. Éphe rwua; onye-ishi ndu ojogu ono sù iya: “Gube onye ke Chileke; eze suru g'i nyizeta egwegwa!”
- ¹²Elayijia sù: “O -buru le mu bu onye ke Chileke; g'oku shikwa l'imigwe bya ekegbushia unu le ndu ojogu ukporo labo l'iri ono, unu l'ephe swi ono.” Tobudu iya

bụ; ọku ke Chileke shi l'imigwe bya ekegbushikọta yele ndu ojogu ukporo labo l'iri ono.

¹³Oo ya bu; eze byakwa ezia onye-ishi ndu ojogu ukporo labo l'iri k'eto iya; bya eyeru iya ndu ojogu ukporo labo l'iri ono. Epehewu; onye-ishi ndu ojogu ukporo labo l'iri k'eto iya ono nyikota; bya ejepfu Elayijia; je adaa gbushi ikpere l'iphu iya; rwoahaa ya; su: "Gube onye ke Chileke; jiko gbenu ndzu mu iphe; me ndzu umadzu ukporo labo l'iri-a, bu ndu-ozu ngu-a. Gbenu phe iphe l'enya nkengu.

¹⁴Lewaro g'oku shi l'imigwe bya ekegbushia ndu-ishi ndu ojogu labo pho, vuhawa uzo bya; me ndu ojogu ukporo labo l'iri iri pho, epehewu swigbaa pho. Jiko gbero ndzu mu iphe l'enya nkengu."

¹⁵Tobudu iya bu; ozozi Chipfu su Elayijia: "Tsuru iya nyize. Ba atsushi iya ebvu!" Oo ya bu; Elayijia gbalihu tsuru iya nyizeta; epehewu jepfu eze.

¹⁶Elayijia su eze: "Chipfu suru-a: '? Bu le Chileke ta anodu l'ali ndu Izurelu be meru g'o gude i zia ndu-ozu g'ephe jeshiaru ngu l'aji le Balu-Zebubu, bu agwa ndu Ekuronu. Eshi ophu i meru iya nno be i ti byadu agbeshi agbeshi l'iphe-azee ono, i dabyiru ono. I nwuhufutajekwa.'" "

¹⁷No iya; Ehzaya nwuhu egube ono, Chipfu shi l'onu Elayijia pfua ya ono. Jioramu bya aburu eze nochia enya iya; kele Ehzaya ta anwaduru nwa nwoke. O buru l'apha, kwe Jiehoramu, bu nwa Jiehosafatu apha labo, o shi butaru eze ndu Jiuda be Jioramu, bu iya bu nwune iya byaru aburu eze ndu Izurelu.

¹⁸Iphe ozo, nwuru nu teke Ehzaya bu eze; me iphe, o meru be e dekotaru l'ekwo-ako, e deshiru iphe, ndu eze ndu Izurelu megbaberu.

2 Ndu eze 2

Chipfu ekuba Elayijia l'imigwe

¹Teke Chipfu abya egude oke pherephere, l'aswore aswore kuba Elayijia l'imigwe be Elayijia yele Elayisha no l'ije a -gbe le mkpukpu Gilugalu.

²Elayijia su Elayisha: "Nodukwa l'eka-a; kele Chipfu zikwaru mu ge mu je mkpukpu Betelu." Elayijia su iya: "Eshinu Chipfu no ndzu g'o no iya-a; teme gbuedua nodu ndzu g'i no iya-a; bu g'o bu ire-lanu le mu ta byadu aha ngu." Oo ya bu epehewu swiru jeshia Betelu.

³O buru le Betelu be ogbo ndu mpfuchiru Chileke, bu iya nu wu-pfutaru Elayisha bya asu iya: "? I maru-a le Chipfu abya ekuta nnajuphu ngu ntanu-a?" Elayisha su: "Ee; mu makwaru-a; olobu; unu haaru ono."

⁴Elayijia su Elayisha: "Nodukwa l'eka-a Elayisha; kele Chipfu zikwaru mu ge mu je mkpukpu Jieriko." Elayisha su iya: "Oo ge Chipfu no ndzu g'o no iya-a; teme gbuedua nodu ndzu g'i no iya-a; bu g'o bu ire-lanu le mu ta abyadu aha ngu." Oo ya bu; epehewu swiru jeshia Jieriko.

⁵Ndu ọgbo mpfuchiru Chileke, bu ẹ Jieriko bya awu-pfu Elayisha; bya asu iya: “? I maru-a ẹ Chipfu abya ekuta nnajuphu ngu ntanu-a?” Elayisha su: “Ee; mu makwaru-a; ọlobu; unu haarọ ono.”

⁶Tobudu iya bu; Elayijia su Elayisha: “Nodukwa l'eka-a; ẹ Chipfu zikwaru mu ge mu je enyimu Jiordanu.” Elayisha su: “Eshinu Chipfu no ndzu g'o no iya-a; teme gubedua nodu ndzu g'i no iya-a; bu g'o bu ire-lanu ẹ mu ta abyadu aha ngu.” Oo ya bu; ephenebo kpochibe iya.

⁷Umadzu ukporo labo l'umadzu iri ẹ ndu ọgbo ndu mpfuchiru Chileke tsoru phe; je apfuru uzenya ele phe g'ephenebo pfuru l'aguga enyimu Jiordanu ono.

⁸Elayijia yefuta uwe-mgbalanu iya; bya aphukoo ya aphuko; chia ẹ mini ono; mini ono kekaha ebo; ophuu wuru laa l'ibe iya ophuu; ophuu wuru laa l'ibe iya ophuu; k'ophu bu l'ephenebo ghaburu l'ali okponku.

⁹Ephe ghabuchaepho; Elayijia su Elayisha: “Pfuaru mu iphe, mu e-meru ngu temanu l'e kuta mu kufu l'eka i no.” Elayisha su: “Jiko g'unme, ha ge nkengu ugbo labo dunu mu l'ehu.”

¹⁰Elayijia su: “Iphe i pfuru g'e mee atsukwa l'ehu ememe. O-le-a; o -buru l'i humaru mu me Chileke kutaje mu pho be oo-bukwaru-a nkengu; o -dudu be o todu dukwano.”

¹¹Noo ya; ephe nodu aboshikpoepho uja eje; a bya l'amaru; ugbo-inya, enwu oku; me inya, enwugbakwapho oku chaa phe l'echilabo; bya ekekaha phe. Elayijia tsoru oke pherephere ono, aswore aswore ono bahu l'imigwe.

¹²Elayisha huma iya; o chishia su: “Nna mu-e! Nna mu-e! Gube onye ono, bu ugbo-inya; bya aburu o-gba-l'inya-ogu ndu Izurelu!” O huma-beru iya. Elayisha ye eka l'uwe, o yeru l'ehu zijaha ebo.

Elayisha awata eje ozi iya

¹³No iya; Elayisha chita uwe Elayijia, dafuru nu; ghakobe laphu azu je apfuru l'onu enyimu Jiordanu.

¹⁴O woru uwe Elayijia ono, dafuru nu ono chia ẹ mini; su: “? Denu Chipfu; mbu Chileke ke Elayijia?” O chie ya pho ẹ mini ono; o bukaha ebo; ophuu wuru laa ibiya ophuu; ophuu wuru laa ibiya ophuu. Elayisha ghata.

¹⁵Ndu ọgbo mpfuchiru Chileke pho, shi Jieriko pho; mbu ndu pho, shi pfuru uzenya ele phe enya pho; humaepho Elayisha; ephe su: “Unme Chileke ono, shi du Elayijia l'ehu ono dukwaa Elayisha l'ehu-o!” Ephe zefu je agba iya ndzuta; bya ephozeta l'ali l'iphu iya.

¹⁶Ephe su iya: “Lenu; anyibe ndu-ozu ngu be nweru ukporo umadzu labo l'umadzu iri, okpehu dukota. Jiko g'ephe jenu achoo nnajuphu ngu; g'a maru; ? Unme Chipfu pataru iya je edobe l'ubvu; ozoo ẹ nsuda.” Elayisha su phe: “Waawakwa; unu te ezikwa phe.”

¹⁷Ephe pfunyaaru iya ya; iphere iya du iya; o su phe: “Ngwa; unu zinaa phe iya.” Oo ya bu; ephe zia ukporo umadzu labo l'umadzu iri ono. Ephe choo ya abali eto ophu ephe ta ahumaduru iya.

¹⁸Ephe lwaphutaepho azu byapfuta Elayisha l'eka o no le mkpukpu Jieriko; o su phe: “? Mu ta asunuru-a unu g'unu te ejeshi?”

Iphe ohumalenya, Elayisha meshigbaberu

¹⁹No iya; unwoke mkpukpu ono bya epfuaru Elayisha su: “Nnajiuphu anyi; lekpodapho le mkpukpu-a be nokpoo l'eka du ree; ole mini, no iya nu be du eji; teme ophu ali-a te emehujedu iphe.”

²⁰Elayisha su phe: “Unu jeye unu le gbamugbamu ophu wotaru mu.” Oo ya bu; ephe bya ewotaru iya ya.

²¹O bya atugbua jeshia l'enya-mini ono je agharu unu ono ye iya su: “Chipfu suru-a: ‘Mu mewaru mini-a g'o du ree. O to byadu e-gbubaa egbugbu ozo; ophu o byadu emebaa g'ali-a te emehujeha iphe ozobaa.’” ²²Mini ono bya adu ree; bya asu ntanu-a, bu iya bu egube ono, Elayisha pfuru iya.

²³Elayisha shi l'eka ono jeshia Betelu. O nodu eje l'uzo; unwokoro shi l'ime mkpukpu ono wufuta; bya achiahaa ya ochi; asuje iya: “Tugbua je iphe iije; gube ishi-onmo ono! Tugbua; gube ishi-onmo ono!”

²⁴Elayisha bya aghakobe huma phe; o gude epha Chipfu tua phe onu. Ejo anu-egbudu labo, bu biye, bugbaa nyee ya shi l'oswa futa bya alabushia anu unwokoro ukporo umadzu labo l'umadzu labo ono alabushi.

²⁵Elayisha shi l'eka ono o buru iya eje l'ubvu Kamelu; o buru l'eka ono be o shi lashia Sameriya.

2 Ndu eze 3

Ogu, ndu Izurelu; waa ndu Mowabu

¹Jiehoramu nwa Ehabu be byaru aburu eze ndu Izurelu l'apha, kwe Jiehoshafatu apha iri l'esato, o shi butaru eze ndu Jiuda. Eka Jiehoramu no buru eze bu le Sameriya. Iphe o noru l'aba-eze bu apha iri l'ebo.

²O mee ejo-ememe l'enya Chipfu; ole o to mebeduru iya ge nna iya; me ge ne iya meru. O phofuru itso, duru Balu nso ono, nna iya kperu ono.

³Obenu l'o yeleru-a eka l'iphe-eji ono, Jierobowamu nwa Nebatu meru; mbu iphe-eji ono, o meru ndu Izurelu mee ono. O to dudu ophu o haru ememe.

⁴No iya; Mesha, bu eze ndu Mowabu be azu aturu. Aphagapha be ookpujeru ukporo unu unwu aturu iri l'ebo l'unu iri kpee eze ndu Izurelu; nukwa iya pho eji, shi l'ebili ukporo unu iri l'ebo l'unu ebili iri.

⁵Ole Ehabu nwuhuerupho; eze ndu Mowabu wata ekwefuru eze ndu Izurelu ike.

- ⁶Oo ya bu; eze, bu Jiehoramu lufu le Sameriya je akpakoo ndu Izurelu l'ophu.
- ⁷O bya ezia Jiehoshafatu, bu eze ndu Jiuda su: "Eze ndu Mowabu be kwefukwaru mu ike. ? Ii-toru mu g'anyi je etsoo ndu Mowabu ogo to?" Jiehoshafatu su iya: "Mu e-toru ngu-a je. Mbueda be duwaa ge gubueda; ndibe mu duwaa g'ephe bu ndu nkengu; inya mu duakwapho g'o bu inya nkengu."
- ⁸O jia su: "? Bu uzo ole be anyi e-shi jeshia ogo obu?" Jiehoramu su: "Anyi e-shi echiegu ndu Edomu."
- ⁹Oo ya bu; eze ndu Izurelu; waa eze ndu Jiuda; me eze ndu Edomu toko swiru jeshia. Ephe jeeppo ngbango uzo abali esaa mgburugburu; mini phe bvu; ophu o duedu ophu ndu ojogu ono; me eku, ephe chi a-ngu.
- ¹⁰Eze ndu Izurelu chishia su: "Hae! Chipfu kuakwaru anyibe ndu eze eto-a g'o chiru anyi ye ndu Mowabu l'eka."
- ¹¹Jiehoshafatu jia su: "? To dudu onye mpfuchiru Chipfu, no l'eka-a; k'ophu anyi e-shi iya l'eka jita Chipfu g'ije anyi gbaru?" Onye lanu l'ime ndu-ozu eze ndu Izurelu su: "Elayisha nwa Shafatu bukwa l'eka-a. Oo ya shi agbashije Elayijia mini l'eka."
- ¹²Jiehoshafatu su: "O kwa onye Opfu Chipfu bu l'ehu be o bu." Oo ya bu; eze ndu Izurelu waa Jiehoshafatu; me eze ndu Edomu jepfushia ya.
- ¹³Elayisha su eze ndu Izurelu: "? O nweru iphe, mu le ngu jigba to? Jepfu ndu mpfuchiru ono, nna ngu; me ne ngu shi ejepfuje ono." Eze ndu Izurelu su iya: "Waawakwa. O kwa Chipfu kukobewaru anyibe ndu eze eto-a g'o chiru anyi ye ndu Mowabu l'eka."
- ¹⁴Elayisha su: "Oo ge Chipfu, bu Okalibe-Kakota-Ike no ndzu g'o no iya-a; mbu onye mu ejeru ozi; be bu g'o bu ire-lanu; le mu tege eledu ngu enya; ophu o bu ke ge mu huma ngu; ome o to bu Jiehoshafatu, bu eze ndu Jiuda, nonu-a be mu akwabebu ubvu.
- ¹⁵Ngwa-a; unu je ekuaru mu onye akpoje ogumogu." Onye ogumogu ono byaephe bya awata iya akpokpo; ike Chipfu bya akparwuta Elayisha l'ehu.
- ¹⁶O su: "Waa iphe, Chipfu epfu baa: 'Unu tushia nsu g'o toko nsuda nsuda-a sweta.'
- ¹⁷Kele Chipfu suru-a: 'Unu ta abyadu a-huma eka pherephere ezi; ophu o buro kele oo mini eedze; ole mini e-jikota nsuda ono pyimu. Oo ya bu g'unubueda; me eswi unu; me anu unu angua mini.
- ¹⁸O bu iphe, du nphe l'enya Chipfu. Oo-wokwarupho ndu Mowabu ye unu l'eka.
- ¹⁹Iphe, bukota mkpukpu, a kpushiru ike be unu a-lwukota; me mkpukpu, nwegbaaru enya. Unu egbutsushikota iphe, bu oshi, du ree; toko enya-obvu mini nwuchishia; kwakoo mkpuma kubechaa l'okpobe ali phe; gude mebyishia ya.' "
- ²⁰O be l'utsu echele iya; le teke egweje ngweja utsu; mini shi l'uzo ibe iya ke Edomu aso gborogboro; bya ejikota ali ono ejiji.

²¹Ndu Mówabu nũaaepfo lẹ ndu eze ono byaru phẹ etso ọgu; ẹphe bya ekukọbe unwoke, a-du ike kwaa ngwọgu; e -shi lẹ ndu ha nwanshii je akpaa lẹ ndu ha shii; ẹphe je apfukachaa l'oke alị phẹ.

²²Ẹphe tehushia l'ọnmewa ọtsu; anwụ ọtsu ọdu echi lẹ mini ono. Ndu Mówabu hũa mini ono l'azụ iya ọphuu; ọ du phẹ uswe-uswe l'ẹnya gẹ mee.

²³Ẹphe sụ: “Ọ kwa mee du ẹgube phọ! Ndu eze ono lwuakwaru ọgu gbushia onwophẹ. Unubẹ ndu Mówabu; ngwa; g'anyi je akwaa iphe phẹ l'ọkwata.”

²⁴Ndu Mówabu wũa nụ l'ọdu ndu Ízurelu. Ndu Ízurelu wụ-lihu tsoahaa phẹ ọgu; jeye ẹphe ye ọkpa l'ọso. Ndu Ízurelu zehu tsoru phẹ; zeba l'alị phẹ; je awata phẹ egbushi.

²⁵Ẹphe mebyishikọta mkpukpu lẹ mkpukpu phẹ l'ophu. Onyenonu kwaa mkpuma kubechaa l'ọkpobe alị phẹ; gude mebyishia ya; jeye ẹphe kụ-jikọta mkpuma l'alị ndu ẹka ono. Ẹphe nwuchishichaa ẹnya-obvu mini phẹ; gbutsushichaa oshi, du ree lẹ mkpukpu ono. Ẹka ẹphe haru mkpuma, nọ iya nụ ọ ọdu l'ẹka ọ nọ bẹ bu mkpukpu Kiru-Harẹsetu kpoloko. Ọle ndu agbajẹ mgbẹka nọ-phẹkwanuru iya mgburugburu; lwua ya lwuta.

²⁶Eze ndu Mówabu hũaaepfo l'ọgu ono nabawaru iya ẹka; ọ chita unu ọmadzu ọkporo l'ọmadzu iri l'ise, bu ndu chigbaa ọgu-echi; g'ẹphe kpata ọzo jepfushia eze ndu Edomu. Ọle ẹphe ta akpataduru ọzo.

²⁷Tọbudu iya bu; ọ kputa ọkpara iya nwoke, bu onye gege aburu eze nọchia ẹnya iya gude gwee ngweja-akpo-ọku l'eli igbulọ mkpukpu ono. Ndu rwuta ndu Ízurelu; ẹphe tsuphu azu; lashia alị phẹ.

2 Ndu eze 4

Manu, nwanyi, ji iya anọedu

¹O nweru nwanyi, bu onye lanu l'ogbo ndu mpfuchiru shi alu iya. O byapfuta Elayisha bya araku iya su: “Onye-ozu ngu, bu iya bu ji mu be nwuhuakwaru nu. O doru ngu ẹnya l'onye-ozu ngu ono shi atsu Chipfu ebvu. Ọle nta-a be onye o ji ugwo be byaru g'ọ nata mu unwu mu: unwokoro mu labo l'opfu ugwo ono; g'ẹphe buru ohu iya.”

²Elayisha su nwanyi ono: “? Bu gunu be mu e-meru ngu? ? Bu gunu bu iphe, i nweru l'ulo ngu? Karu mu iya.” Nwanyi ono su: “Nwozi ngu nwanyi ta adukwa iphe, o nweru l'ulo; gbahaepfo nwite-mkpa manu lanu.”

³Tọbudu iya bu; ọ su: “Je arwokokpo ndu obutobu unu phẹ ite iphoro. Rwotakpoo ya igwerigwe.

⁴Teke i mechaaru nno; g'unu l'unwu ngu bahu l'ulo; swo-chia onwunu l'uzo. Unu wu-jishikota ite ono g'ọ hakota lẹ manu; ophu jierupho; unu edocha iya.”

⁵Oo ya bu; nwanyi ono haa ya lufu; je aswo-chite onwiya; me unwegirima iya l'ulo. Ẹphe ọdu apatagbaaru iya ite ono; ọ ọdu awu manu eye iya.

⁶O be g'ite ono jikotachaa ru g'ọ ha; ọ sụ nwa iya: “Patabanaaru mu ite ọzo!” Ọ sụ iya: “Ọ tọ dọkwa ite ọzo, dọkwadu nụ.” Tọbudu iya bụ; manụ ono soshi-buhu.

⁷Nwanyị ono tųgbua je epfuaru iya onye kẹ Chileke ono. Ọ sụ iya: “Je ereshia manụ ono gude pfua ụgwọ ọbu. Unu l'unwu ngu egude ọphu phoduru nụ buru.”

Eme nwatibe nwanyị Shunemu g'ọ teta nọdu ndzụ

⁸O -rwua ujiku lanụ; Elayisha jeshia mkpukpu Shunemu. O nweru nwanyị, nweru iphe, bu l'ẹka ono, shiru iya ite ẹbyaa. Ọ nọdu abụjewaruro; ọ -nọdu aghata l'ẹka ono; l'ọ bahụ je eria nri.

⁹Tọbudu iya bụ; nwanyị ono sụ ji iya: “Lenu; nta-a bẹ mu humawaru lẹ nwoke-a, anọduje abya ẹka-a tekenteke-a bẹ bụ onye kẹ Chileke, dọ nsọ.

¹⁰G'anyi meta nwulo nshii kpọ-pfube l'eli iya nkanyi; doberu iya ya iphe-azẹ; mẹ teburu; mẹ oshi-anọ; mẹ iphe, aapfubeje orọku; k'ọphu bụ ọ -byaephọ; l'ọ nọduje iya.”

¹¹O be ujiku lanụ gẹ Elayisha byaru l'ẹka ono; ọ bahụ lẹ nwulo ono je azẹ.

¹²Ọ sụ nwozi iya, bụ Gehazi: “Je ekuaru mu nụ nwanyị Shunemu ono.” O kua ya; ọ bya bya apfuru iya l'iphu.

¹³Elayisha sụ nwozi iya g'ọ sụ nwanyị ono: “? Bụ gunu bẹ ee-meru ngu lẹ k'onwongu, ịlashi lẹ k'iswi ẹhu anyi-a? ? Bụ g'anyi pfuru opfu ẹhu ngu yeru eze; tọ g'anyi pfua ya yeru onye-ishi ndu ojogu?” Nwanyị ono sụ: “Ọ tọ dọkwa iphe mkpa iya duru mu. Mu bukwa tųsaru ẹhu l'echilabọ ndu nwe mu nụ.”

¹⁴Elayisha jia sụ: “? Bụ gunu bẹ ee-meru nwanyị ono?” Gehazi sụ: “Okpobe opfu bụ l'ọ tọ nwutaduru nwa; tẹme ji iya kahuwaa akahu.”

¹⁵Elayisha sụ: “Kueshidukwa iya.” O bya ekua ya; nwanyị ono jeta bya apfuru l'onu mgbo.

¹⁶Elayisha sụ: “Egube nta-a apha ọzo bẹ l'ii-hewaru nwa nwoke l'ẹka.” Nwanyị ono sụ: “Waawaa; nnajuphu mu; ba kabeshinu dųaru mu ụka gube onye kẹ Chileke.”

¹⁷E mechaa; nwanyị ono tsuta ime; nwua nwa nwoke l'egube teke ono, Elayisha pfuru iya opfu iya ono lẹ mgbatapha iya.

¹⁸O be ujiku lanụ gẹ nwata ono vutawaru; ọ tųgbua jepfushia nna iya l'egu l'ẹka yẹ ndu akpata iphe, ọ kọru l'opfu tųkoru nọdu.

¹⁹A nonyaa; ọ rasharu nna iya sụ: “Ishi mu-o! Ishi mu-o!” Nna iya sụ onye-ozu iya: “Kuta iya kulaaru ne iya.”

²⁰Onye-ozu iya ono bya ekuta nwata ono kulaaru ne iya; ne iya heru iya l'utapfu jeye o rwua l'eswe; nwata ono nwuhu.

²¹O je eworu iya nyebe l'iphe-azẹ onye kẹ Chileke ono; gụ-buru iya ye l'ime ụlo ono; tųgbushia.

- 22**Tobudu iya bu; o bya ekua ji iya su: “Jiko yenuru mu onye-ozu lanu; waa nkapfu-igara lanu ge mu gbaru egwegwa je ibe onye ke Chileke; ge mu alwa.”
- 23**Ji iya su: “? Bukwa gunu be iije ibe iya ntanu-a; g'o to budu l'oo onwa ophuu; ozoo eswe-atuta-unme-a?” Nwanyị ono su: “O bukwa k'oma be o bu.”
- 24**Oo ya bu; o dozia nkapfu-igara ono; su nwozi ono: “Gbaru iya g'anyi je; te ejekwa iya ato nwehu; gbahaa le mu suru g'i to nwehu.”
- 25**Nwanyị ono gbagbua; bya ejepfu onye ke Chileke l'ubvu Kamelu. Teke o nokwadro uzanya be onye ke Chileke ono humaru iya; o su Gehazi, bu onye-ozu iya: “Lenu; o kwa nwanyị Shunemu pho bu ophuu.
- 26**Gbagbua je agba iya ndzuta; g'i jia ya su: ? Bua k'oma? ? Ehu dua ji iya ree? ? Nwatibe iya be ehu dua ree?” Nwanyị ono su iya: “O bukwa oma ayi ayi.”
- 27**Nwanyị ono byapfutaepho onye ke Chileke ono, l'ubvu ono; o woru iya aka l'okpa. Gehazi byatashia ya enwufu; onye ke Chileke ono su: “Paru iya haa; kele aphu jiru iya obu. Ophu Chipfu ta abudu l'o meru ge mu maru; teme ophu o pfuduru mu iya.”
- 28**Tobudu iya bu; nwanyị ono su: “Nnajiuphu mu!? Mu pfunaru ngu-a opfu nwa? ? Mu ta asunuru ngu-a g'i ti kobeshi mu obu l'eli?”
- 29**Elayisha su Gehazi: “Rukota onwongu; wota oshi-mpaleka mu pho gude jeshia. Teke unu le nemadzu dzudaru; te kelekwa iya ekele; ophu o dukwa onye ii-kwe ekele me o -kele ngu. Je atu-kobe nwata ono oshi-mpaleka mu ono l'ataphu!”
- 30**Ne nwata ono su: “Oo ge Chipfu no ndzu g'o no iya-a; teme gubedua nodua ndzu g'i no iya-a; bu g'o bu ire-lanu le mu ta abyadu aha ngu!” Oo ya bu; Elayisha gbalihu tsoru iya jeshia.
- 31**Gehazi vuru uzo tugbua je atu-kobe nwata ono oshi-mpaleka ono l'ataphu. Ophu nwata ono ta tsukpodaru nu me pfuu; ozoo mee ukporo. Oo ya bu; o laphu azu jepfu Elayisha je asu iya: “Nwata obu te etetakwaru.”
- 32**Elayisha bya abahu l'ulo; bya ahuma ge nwata ono nwuhuru; nyeru l'iphe, oozeje aze.
- 33**Oo ya bu; o bahu l'ime ulo; bya aswo-chia uzo; o buru yee nwata ono be no l'ulo ono; o nodu epfu anu Chipfu.
- 34**O bya agbalihu je aze-koru nwata ono l'eli; woru onu nkiya tsupfube iya l'onu nkiya; pfube iya enya iya l'enya nkiya; woru aka iya dobe l'eka nkiya. O machinyaepho onwiya l'eli nwata ono; ehu bya evuahaa nwata ono oku.
- 35**Elayisha bya agbalihu; jephee l'ulo ono; bya alaphu azu je aze machia onwiya l'eli nwata ono. Nwata zee uze ugbo esaa; bya eworu enya saa.
- 36**Tobudu iya bu; Elayisha kua Gehazi su: “Kueshidu nwanyị Shunemu-a!” Oo ya bu; o kua ya. Nwanyị ono bya abya; Elayisha su iya: “Kutawaro nwa ngu.”

³⁷Nwanyị ono bata bya adaa kpurumu l'iphu Elayisha; phozeru iya; bya eduta nwa iya o buru iya atugbu.

Ine, egbu egbugbu, nọ l'ite

³⁸O be teke Elayisha lashjaru mkpukpu Gilugalu; egu nodu eme l'ali ono. Ogbo ndu mpfuchiru bya adoru iya l'iphu; o su nwozi iya: “Wota eze ite pho gwooru ndu ogbo mpfuchiru ine g'ephe ria.”

³⁹No iya; onye lanu tugbua bahu l'egbudu ge ya kpata eba, ee-ye l'ine ono. O je ahuma vayinu oswa. O wokoo mebyi iya; phukobe uwe-mgbalanu iya chiru iya yejia ya eyeji. O lwaepho; o byia ya ebyibi chiru ye l'ite ono, e shiberu ine ono; ophu o dudu onye maru iphe o bu.

⁴⁰A gwoghe ya pho; a wufuta iya yeru ndu ono g'ephe ria. Ephe rijeepho ine ono; ephe chishia mkpu; su: “Gube onye ke Chileke; iphe, nọ l'ite-a egbukwa egbugbu!” Ophu ephe aduhedu ike ria ya.

⁴¹Elayisha su: “Kpotaeduru mu ukpokutu iphe.” E kpotaru iya ya. O kpota iya ye l'ite ono; bya asu: “Wufutawa iya ro; nu ndu ono g'ephe ria.” A wufuta iya; ophu o duedu iphe, egbu egbugbu nokwadu le nri ono.

Elayisha anu umadzu ukporo ise nri

⁴²No iya; nwoke lanu, shi le mkpukpu Belu-Shalisha wotaru onye ke Chileke ishi buredi ukporo, e gude ukpokutu bali, bu akpuru-iphe-mbu ghee; me ishi akpe olemole, o gbutaru k'ophuu ye l'eda iya. Elayisha su nwozi iya: “Woru iya nu ndu ono g'ephe ria.”

⁴³Nwozi iya ono su: “? Denu ge mu e-shi doberu umadzu ukporo ise iphe-a l'iphu?” Elayisha su: “Woru iya nu phe roo g'ephe ria; kele Chipfu suru-a: ‘Ephe e-ri iya riphodo eriphodo.’ “

⁴⁴Oo ya bu; o bya edoberu phe iya l'iphu; ephe ria ya riphodo eriphodo; bu iphe ono, Chipfu pfuru ono.

2 Ndu eze 5

Nemanu; onye ekpenta

¹Nemanu bu onye-ishi ndu ojogu eze ndu Aramu. O bu oke amadu l'enya nnajiuphu iya; teme o buru onye aakwabeg oke ubvu; kele oo l'eka iya be Chipfu shi mee ndu Aramu nodu alwu-kpeje l'ogu. O bubekpo onye ojogu, ike du l'ogu egube ono; ole ekpenta emekwanu iya.

²O nweru teke ndu ojogu o-lwua-olaa, shi l'ali Aramu jeru ogu l'ali Izurelu; ephe kpata nwamgboko lanu le ndzu bya edobe; o nodu ejeru nyee Nemanu ozi.

³O -rwua ujiku lanu; nwamgboko ono su nyee nnajiuphu iya ono: “O du mu g'a su le nnajiuphu mu jeru ahuma onye mpfuchiru Chileke, no le Sameriya. O gege eme iya l'o ka mma l'ekpenta ono, eme iya nu ono.”

⁴Oo ya bu; Nemanu je epfuaru nnajiuphu iya ono su: “Nwamgboko ono, shi l'ali ndu Izurelu ono be pfukwaru egube-a; bya epfua egube-a.”

⁵Eze ndu Aramu su: “Jewaro. Mu e-deru-a ekwo-ozu nu g'e je anu eze ndu Izurelu.” Oo ya bu; Nemanu tugbuna jeshia. Iphe, o gude bu mkpola-ochaa, erwa iya du talentu iri; waa mkpola-ododo, erwa iya du unu shekelu iri l'ise; waa akpawuru-uwe iri.

⁶O je eworu ekwo-ozu ono nu eze ndu Izurelu. Ekwo-ozu ono be suru: “Mu gude ekwo-ozu-a ezi onye-ozu mu, bu Nemanu g'o byapfuta ngu; g'i mee ya g'o ka mma l'ekpenta, eme iya nu.”

⁷Eze ndu Izurelu bya agua ekwo-ozu ono; bya eworu uwe iya zijashia; bya echishia; su: “? Bu mu bu Chileke? ? Mu a-du ike gbua egbugbu bya anu-phu ndu azu ozo too; mbu meru g'o gude nwoke-a zia onye-a g'o bya ge mu mee ya g'o ka mma l'ekpenta, eme iya nu? Unu lewa iya ro enya; to budu g'o daru mu l'iya be ocho ono.”

⁸Elayisha onye ke Chileke bya anuma l'eze ndu Izurelu be zijashiru uwe iya; o zia eze nzi su: “? Bu gunu meru iphe, i zijashiru uwe ngu? Ge nwoke ono byapfuta mu; g'omaru l'onye mpfuchiru Chileke no le Izurelu.”

⁹Oo ya bu Nemanu chiru inya iya; me ugbo-inya iya byarwuta onu-ulo Elayisha; bya apfuru.

¹⁰Elayisha zia onye-ozu g'o je asu iya: “Je je awua ehu ugbo esaa l'enyimu Jiordanu! Oo ya bu; ehu ngu abya adu g'o shi du; l'ibya adu iche.”

¹¹Obenu le Nemanu gude ehu-eghu tugbua asuje: “Mu gbekwa ria l'o gege afuta byapfuta mu; bya apfuru kpoku epha Chipfu, bu Chileke iya; mbu phuphechakponu eka iya l'eka ono, ekpenta l'eme mu ono; bya emee mu ge mu du iche.

¹²Enyimu Abana; me enyimu Farupa, dugbaa le Damasukosu; ? ta akakotadu mini, dukota le Izurelu ree? Mu e-jenu je awua ehu obu l'eka ono duwaro iche obu.” Oo ya bu; o ghakobe gude ehu-eghu tugbua lashia.

¹³Ndu ozi Nemanu jepfu iya je asu iya: “Nna; o -bu l'onye mpfuchiru Chileke ono suru g'i mee iphe ozo, kabaa shii; ? ti g'i medu iya too? ? Denuwaro g'o du l'eka o suru ngu g'i je awua ehu; du iche?”

¹⁴Oo ya bu; Nemanu tugbua je atsua otsiri l'enyimu Jiordanu ugbo esaa egube ono, onye ke Chileke pfuru ono; akpehu iya bya alwa azu du ge ke nwatanshii; o bya ewekorohu.

¹⁵Teke ono; Nemanu yee ndu-ozu iya swiru laphu azu jepfu onye ke Chileke ono. O rwua bya apfuru iya l'iphu su: “Nta-a be mu kabewa maru l'o to dudu eka Chileke nobaa le mgboko-a l'ophu; gbahaa le Izurelu. Jiko natanu iphe, mube nwozi ngu anu ngu.”

¹⁶Elayisha su: “Eshinu Chipfu no ndu g'o no iya-a; mbu onye ono, mu ejeru ozi; be o bu ire-lanu l'o to dudu iphe, mu anata.” Nemanu rwokota iya nta rwo imo g'o nata iya; o jika.

¹⁷Nemanu sù: “Ọ -bùru l'ì tìi natadù iya; jiko kponaa m̀be onye-ozì ngu ẹja, ìnya-mulu labọ a-dù ike vua. Noo kẹle m̀be onye-ozì ngu ta abyadù egwebaa ngweja-akpọ-ọku; m'ọ b̀ ngweja ọzo nù agwa ọzo; gbahaephọ Chipfu.

¹⁸Ole-a; gẹ Chipfu g̀aru m̀be onye-ozì ngu nvù l'iphe lanù kpoloko. Iphe ono b̀ ọ -bùru lẹ nnajìuphu mu jeshiaru l'ùlo agwa Rìmonu eje iya abarù ẹja; mu duru iya ọ nọdu eje; mu -jerwua je etsoru iya phozetakwaphọ l'ùlo agwa Rìmonu ono; jiko gẹ Chipfu g̀naaru iya m̀be onye-ozì ngu nvù.”

¹⁹Elayìsha sù iya: “Tọkwa ẹhu-o.” Nemanu bya atugbua jeriberu ụzenya nwanshii;

²⁰Gehazi, b̀ onye-ozì onye kẹ Chileke, b̀ Elayìsha pfuahaa l'ime onwiya; sù: “Nta-a bẹ nnajìuphu mu harù Nemanu, onye Arámu-a kẹ mmanù; ọphu ọ dudu iphe, o gude bya, ọ natarù iya. Eshinu Chipfu nọ ndzù g'ọ nọ iya-a; bẹ ọbu g'ọ b̀ ire-lanù lẹ mu agbapfu iya je anata iya iphe.”

²¹Ọo ya b̀; Gehazi gbapfushia Nemanu. Nemanu h̀maephọ onye agba agbapfuta iya nù; o shi l'ugbo-ìnya iya nyizeta jeshia ya ndzuta; bya asù iya: “? B̀-à k'oma tọo?”

²²Gehazi sù “Ee; ọ bukwa-a k'oma. Ọo nnajìuphu mu bẹ ziru mu gẹ mu bya asù ngu l'ọo nta-a bẹ unwokoro labọ, b̀ ndu shi l'ogbo ndu mpfuchiru gbẹ shi l'alì úbvú úbvú ndu Ifuremu bya ibe iya. Sù-a; jiko g'ì nunu phẹ mkpọla-ọchaa, ẹrwa iya d̀ talentu lanù; waa upfu ẹkwa labọ.”

²³Nemanu sù: “Wotarọo ya mkpọla-ọchaa, ẹrwa iya d̀ talentu labọ.” Ọ rwoahaa Gehazi g'ọ nata iya rọ. O kekọbe mkpọla-ọchaa, ẹrwa iya d̀ talentu labọ l'ime ẹda labọ; ye iya akpawuru-uwe labọ ono woru bo ndu-ozì iya ụmadzu labọ; ẹphe vuta iya vuru Gehazi ụzo.

²⁴Gehazi rwephọ l'úbvú ono; ọ nata ndu-ozì ono iphe ono woru pahaa l'ùlo. Ọ bya edufu ndu ono; ẹphe lashia.

²⁵Tọbudu iya b̀; ọ bya abahù l'ùlo je apfuru l'iphu nnajìuphu iya. Elayìsha jiahaa ya sù: “Gehazi; ? B̀ awe bẹ i shi jee?” Gehazi sù: “Ọ tọ dukwa ẹka onye-ozì ngu shi jee.”

²⁶Elayìsha sù iya: “? Unme mu te eshinu-a etso ngu teke ono, nwoke ono shi l'ugbo-ìnya iya nyizeta byapfutashia ngu phọ? ? B̀ nta-a bẹ ọ gbaru g'a nata okpoga; mẹ ẹkwa; mẹ mgbabu olivu; mẹ opfu-vayinu; mẹ igwe aturu; mẹ eswi; mẹ ndu-ozì unwoke mẹ unwanyì?”

²⁷Ekpenta ono, shi eme Nemanu l'e-sweru unu l'awa ngu jasù l'ojejeje.” Ọo ya b̀; Gehazi shi l'iphu Elayìsha lufu; ekpenta dzuru iya ẹhu. Ọ chanwehu; chaaha g'akamini-suno.

2 Ndu eze 6

Ire ogbunkù, ese eli

¹Ọ rwuru ujiku lanù; ogbo ndu mpfuchiru sù Elayìsha: “Lenu; ẹka-a, anyi lẹ ngu tukuru buru-a ta asụekwa anyi eburu.

²G'anyi jenu Jiódanu, bu ẹka onyenonu e-gbuta oswebe, anyi e-gude meta ẹka anyi l'a-nóduje l'ẹka ono." Elayisha su: "Unu jenu."

³Tóbudu iya bu; onye lanu l'ime phe su: "Jiko tsonuru anyibe ndu-ozu ngu jee." Elayisha su: "Mu e-je-a."

⁴Oo ya bu; o tsoru phe jeshia. Epe rwuepho Jiódanu; epe wata egbutsushi oshi.

⁵Onye lanu nodu egbuta oswebe nkiya; ire ogbunku, o gude kpofo dalahu le mini. O chishia mkpu; su: "Nnajiuphu mu-e; nshio mu-e! O kwa anguta be mu ngutaru iya-o."

⁶Oo ya bu; Elayisha, bu onye ke Chileke ono su: "? Bu l'awe be o dalahuru?" O goshi iya ẹka o dalahuru. Elayisha gbuta oshi chiee l'ẹka ono. Ire ogbunku ono see eli.

⁷O su: "Ngwa-a; gutawa iya ro." Nwoke ono machia ẹka guta iya.

Ndu ojogu ndu Aramu atsushi

⁸A nonyaa; eze ndu Aramu tsoahaa ndu Izurelu ogu. Yee ndu-ishi ojogu iya bya achia idzu su: "Eka pho; me ẹka du egube pho be mu e-dobe odu-ogu."

⁹Onye ke Chileke bya ezia eze ndu Izurelu; su: "Kwabekwaru onwongu enya gi ti ghata ẹka ono aghata; kele ndu Aramu ejekwa ala l'ẹka ono."

¹⁰Oo ya bu; eze ndu Izurelu zia g'e jeshia l'ẹka ono, onye ke Chileke pfuru iya opfu iya ono. Elayisha nodu anoduje agbaru eze ama tekenteke; k'ophu o kwabekwanuru onwiya enya l'egube ẹka du nno.

¹¹Iphe ono ghushiaha eze ndu Aramu egu ike. O bya ekua ndu-ishi ojogu iya su phe: "Unu karu mu onye ophu turu ikè yeru eze ndu Izurelu l'ime anyi."

¹²Onye lanu l'ime ndu-ishi ono su: "Nnajiuphu mu, bu eze; o to dukwa. Oo Elayisha, bu onye mpfuchiru Chileke, bu l'ali Izurelu be epfukotajeru iya iphemiphe, i no l'ime mkpuru-azee ngu pfua."

¹³Eze ndu Aramu su: "Unu je achoo ẹka Elayisha obu no; k'ophu mu e-ye ndu e-je egude iya nu." A bya epfuaru iya l'o no le mkpukpu Dotanu.

¹⁴O bya eyefu ikpoto ndu ojogu; epe chigbaaru inya; me ugbo-inya. Epe gude enyashi je je aso-pee mkpukpu ono mgburugburu.

¹⁵O be teke nwozi onye ke Chileke ono tehuru l'onmewa utsu; bya alufu etezi. O jeshia ele enya; ikpoto ndu ojogu; me inya phe; waa ugbo-inya phe so-phewaa mkpukpu ono mgburugburu. Nwozi iya ono chishia su: "Owa-e! Nnajiuphu mu; ? Bu gunu be anyi e-me?"

¹⁶Onye mpfuchiru Chileke ono su: "Ba tsushi ebvu; noo kele ndu ophu no swiru anyi be ka ndu ophu no swiru epebedua shii."

¹⁷Elayisha bya epfuru nu Chileke su: "Jiko Chipfu; menaa g'enya sahu nwozi mu-a; k'ophu oo-huma uzo." Oo ya bu; Chipfu bya eme enya sahu nwokoro ono; o huma

l'iphe, jiru úbvú ono gbaphe Elayisha mgburugburu bu inya; me ugbo-inya, l'enwugbaa oku.

¹⁸Gẹ ndu ojogu Arámu ono abyapfuta Elayisha ogu be o pfuru nu Chipfu su: “Mena ge ndu-a tsukotaaha ishi.” Chipfu meru ishi tu phe; egube ono, Elayisha pfuru nu iya ono.

¹⁹Tobudu iya bu; Elayisha su phe: “Eka-a ta abukwa uzo; ophu o to bukwa mkpukpu ono baa. Unu tsoru mu ge mu duta unu jepfu onye unu acho.” O duru phe jeshia Sameriya.

²⁰Ephe bahuepho le Sameriya; Elayisha pfuru nu Chipfu su: “Gube Chipfu; mena ge ndu-a saa enya; phuahaa uzo.” Oo ya bu; Chipfu bya emee enya sahu phe. Ephe bya elee enya huma l'oo l'echilabo Sameriya be ephe no.

²¹Tobudu iya bu; eze ndu Izurelu hūmae phe pho; o su Elayisha: “Nnana mu; ? Bu ge mu gbushia phe to? ? Mu gbushiwa phe ro?”

²²Elayisha su iya: “Te gbushikwa phe. ? Ndu i gude ogu-echi ngu waa apfu ngu kputa le ndzu be iigbushije to? Nu-chia phe nri; l'i doberu phe mini; k'ophu ephe e-ri; ngua; lapfushia nnajiuphu phe.”

²³Oo ya bu; eze ndu Izurelu bya eshiaru phe okpobe ite ebyaa. Ephe rijishia ephe; ngu-jishia ephe; o dufu phe; ephe lapfushia nnajiuphu phe. Oo ya bu; ndu ojogu olwua-olaa, shi l'alì ndu Arámu byaberu ogu l'alì ndu Izurelu.

Okpa-nri, du le Sameriya

²⁴E mecha; Benu-Hadadu, bu eze ndu Arámu bya akpakoo ndu ojogu iya l'ophu; chita phe; ephe jeshia je ekephee mkpukpu Sameriya.

²⁵Okpa-nri bya apaa eka le mkpukpu Sameriya ono. Ephe kepheru iya noo odu k'ophu bu l'e reaharu ishi nkafu-igara lanu ukporo mkpola-ochaa ugbo eno; bya ereaha nshi ndo, habe nwahabe mkpola-ochaa ise.

²⁶O be teke eze ndu Izurelu eje aghata l'eli igbulo, e gude kpu-pheta mkpukpu ono mgburugburu; nwanyi lanu rasharu iya su: “Nnajiuphu mu, bu eze; gbanaaru mu mkpu!”

²⁷Eze su: “O -buru le Chipfu ta agbaduru ngu mkpu; ? bu awe be mu e-shi gbaaru ngu mkpu? ? Mu e-shi l'eka eechije bali; to l'eka aazoshije mee?”

²⁸Eze bya ajia ya su: “? Bu gunu eme ngu?” Nwanyi ono su iya: “Oo nwanyi-a be suru ge mu wota nwa mu g'anyi taa anu iya ntanu; o -rwua echele; o wota nwa nkiya g'anyi taa anu iya.

²⁹Oo ya bu; anyi woru nwa nkemu shia taa anu iya. O be le nchitabohu iya; mu su iya g'o wota nwa nkiya g'anyi taa anu iya; o wowaru iya wohaa.”

³⁰Eze numachaephe iphe ono, nwanyi ono koru ono; bya alajashia uwe iya. Teke ooghata l'eli igbulo ono; ndu no l'eka ono lee enya huma g'o yeru uwe-aphu l'ime ehu.

³¹O pfua sụ: “Gẹ Chileke gwakwaa mu ọchi; mbụ g'o mekwaa mu ọphu ka njo m'ọburu l'ishi Elayisha nwa Shafatu bẹ kpopfuru iya nụ ntanu-a!”

³²Teke ono bẹ Elayisha yee ndu bu ọgerenya mkpukpu tukokporuro nodu l'ibe iya. Eze bya ezia onye-ozu; o vuru iya uto jeshia ibe Elayisha. Onye obu, e ziru ozu obu bya ejerwu; Elayisha vuwaru uto pfuaru ndu bu ọgerenya ono sụ: “? Unu humawaro onye mgbugbumadzu-a g'o yeru onye a-bya egbuta mu ishi? Onye ono, o ziru ozu ono -byaepho; unu gu-chia uto; swo-chia ya iphe g'o to bata. ? Tobudu igiji-okpa nnajuphu iya bẹ mu anu g'ootso iya l'azu pho?”

³³Elayisha kpukwaduru-a iphe ono l'onu epfu; onye ono, e ziru ozu ono byapfutawa iya. Eze sụ: “Iphe-ehuka-a bu l'eka Chipfu bẹ o shi. ? Bu ke gunu bẹ mu a-da ngabebaaru Chipfu ozobaa?”

2 Ndu eze 7

¹Tobudu iya bu; Elayisha sụ: “Unu numadupho iphe, Chipfu pfuru. Chipfu suru-a: ‘Egube nta-a echele bẹ aa-nodu ere ogbongu utu-iphe, eegudeje eme buredi mkpola-ochaa, erwa iya du shekelu lanu; l'e ree ogbongu bali labo mkpola-ochaa, erwa iya dukwapho shekelu lanu l'onu-abata Sameriya.’ “

²Onye-ishi, anoduje eyeru eze eka sụ onye ke Chileke ono: “Ooyapho! O-betakpo Chipfu guhashia uto eku k'imigwe bẹ o to byadu adu nno.” Elayisha sụ iya: “Ii-gude enya ngu huma iya; ole i ti byadu atso iya onu.”

Ndu ojogu Aramu agba oso

³O nweru umadzu eno, ekpenta emegbaa, anoduje l'onu eka eeshije abahu le mkpukpu Sameriya. Ephe sụ nwibe phe: “? Bu gunu meru iphe anyi a-nodu l'eka-a jasụ anyi anwushihu?”

⁴Anyi -sụ g'anyi bahu l'ime mkpukpu bẹ anyi a-nwushihu; kele egu eme l'eka ono. Teke anyi no l'eka-a; anyi anwuhukwapho. G'anyi jechia l'odu-ogu ndu Aramu je eworu onwanyi nu phe. Ephe -haa anyi; oo ya bu anyi anodu ndzu; teke ephe gburu anyi; anyi anwushihu nu.”

⁵O be le nchi-atu-chite; ephe gbalihu jeshia l'odu-ogu ndu Aramu ono. Ephe rwuepho l'aguga odu-ogu ono; ophu o to dudu m'onye nokwadu l'eka ono;

⁶kele Chipfu meru ge ndu ojogu ndu Aramu numa igiji ikpoto ugbo-inya; me k'inya; me igiji ikpoto ndu ojogu; k'ophu ephe suru nwibe phe: “Unu lekpodapho! Eze ndu Izurelu bẹ butaakwaru eze ndu Hetu; me eze ndu Ijiputu g'ephe bya etsoo anyi odu.”

⁷Oo ya bu; o be le nchi-atu-chite; ephe wulihu; gbalachaa; gbadochaa ulo-ekwa phe; me inya phe; me nkapfu-igara phe. Ephe gbado odu-ogu phe ono g'o du; gbakashihu; gbaahaa oso ndu phe.

⁸Ndu ekpenta ono rwuepho l'aguga odu-ogu ono; ephe bahu l'ulo-ekwa lanu; ria; bya angua; vuta mkpola-ochaa; me mkpola-ododo; me ekwa je eworu domia. Ephe bya alaphuta azu; bya abahu l'ime ulo-ekwa ozo; vukoo iphe, du iya nu; je edomikwapho.

⁹Tɔ̀budu iya bụ; ẹ̀phe sù nwibe pẹ̀: “Anyi te emekwa ree. Ntanu-a bẹ̀ bụ eswe ozi-oma; ọ̀le anyi gbẹ̀ nọ-kirishia. Ọ̀ -buru l'anyi kwabẹ̀ru jeye l'utsu bẹ̀ aa-nukwa anyi aphụ. Unu g'anyi jeekwapho nta-a je epfuaru iya ndibe eze.”

¹⁰Ọ̀o ya bụ; ẹ̀phe tũgbua je ekua ndu echeje nche l'onu-abata mkpukpu ono pfuaru pẹ̀ iya sù: “Anyi jeru l'odu-ogu ndu Arámu; ọ̀phu ọ̀ dudu m'onye lanu, nọ l'eka ono; ọ̀phu anyi ta numaduru ukporo nemadzu. Ọ̀ buru inya; mẹ̀ nkapfụ-igara bẹ̀ likachaaru l'eka ono; ọ̀lo-ekwa pẹ̀ dũepho g'ọ̀ du.”

¹¹Ndu nche ono raa ozi ono arara; e je epfua ya l'ibe eze.

¹²Eze gbalihu l'enyashi ono; bya asu ndu-ozi iya: “Mu a-karu unu iphe, ndu Arámu meru anyi nta. Ẹ̀phe maru l'egu eme anyi. Ọ̀o ya meru g'o gude ẹ̀phe lufu l'odu-ogu pẹ̀ ono je edomishia onwopẹ̀ l'egu. Ọ̀riri pẹ̀ bụ l'anyi futajenu pho afuta; g'ẹ̀phe akpuko anyi lẹ̀ ndzu; zebata l'ime mkpukpu-a.”

¹³Onye lanu lẹ̀ ndu-ozi eze ono sù: “G'anyi haru zia unwoke g'ẹ̀phe gude inya ise, phoduru lẹ̀ mkpukpu-a jeshia. E -gudeshia pẹ̀ bẹ̀ onodu pẹ̀ a-duhukwapho gẹ̀ kẹ̀ ndu Izurelu ono, a haru l'eka-a. Mbụ l'ẹ̀phe a-dũepho g'ikpoto ndu Izurelu ono, lawaru l'iyi ono. Ọ̀o ya bụ g'anyi ziekwapa pẹ̀ g'ẹ̀phe je amaru iphe, meru nu.”

¹⁴Ọ̀o ya bụ; ẹ̀phe bya achita ugbo-inya labo; megbaa inya. Eze bya ezia g'a choru ndu ojogu ndu Arámu jeshia; bya asu pẹ̀: “Unu je amaru iphe, nwuru nu.”

¹⁵Ẹ̀phe choo pẹ̀ jasụ l'enyimu Jiordanu; ẹ̀phe huma g'uwe mẹ̀ ivu, ndu Arámu tuphashiru l'eka ẹ̀phe agba egwegwa agbala jiru lẹ̀ gbororo. Ọ̀o ya bụ; ndu ono, jeru ozi ono laphushia azu je epfuaru iya eze.

¹⁶Tɔ̀budu iya bụ; ẹ̀phe tũgbua je egwekoo iphe l'odu-ogu ndu Arámu ono. Noo ya; e mechaa ree ogbongu utu-iphe, eegudeje eme buredi mkpola-ochaa, ẹ̀rwa iya du shekelu lanu; bya eree ogbongu balı labo mkpola-ochaa, ẹ̀rwa iya dukwapho shekelu lanu; egube ono Chipfu pfuru l'oo-du ono.

Aazo onye-ishi ozi eze pyakapyaka

¹⁷Eze ndu Izurelu yeru onye-ishi ozi, eyejeru iya eka g'o leta enya l'onu-abata mkpukpu ono. Ọ̀ buru l'eka ono bẹ̀ e gude okpa zo ya pyakapyaka; ọ̀ nwuhu; egube ono, onye kẹ̀ Chileke pfuhawaru iya teke ono, eze jeru ibe iya-a.

¹⁸Kẹ̀le teke ono, onye kẹ̀ Chileke pfuru eze sù: “Egube nta-a echele bẹ̀ ee-re ogbongu utu-iphe, eegudeje eme buredi mkpola-ochaa, ẹ̀rwa iya du shekelu lanu; bya eree ogbongu balı labo mkpola-ochaa, ẹ̀rwa iya dukwapho shekelu lanu l'onu-abata Sameriya; “

¹⁹bẹ̀ onye-ishi ozi ono, eyejeru eze eka ono sù: “Ooyapho! Ọ̀ to byakwa l'eme nno; o betakporu Chipfu ghashia uzo eku k'imigwe.” Elayisha sukwanu iya: “Ii-gude enya ngu huma iya; ọ̀le i ti byadu eri iya.”

²⁰Ọ̀ buru g'ọ̀ nwuru iya bụ ono; mbu lẹ̀ ndiphe zoru iya pyakapyaka; ọ̀ nwuhu l'onu-abata mkpukpu ono.

2 Ndu eze 8

Aanụ-phu nwanị Shunemu alị iya azụ

¹O nweru teke Elayisha pfujeru nwanị ono, o mejeru nwa iya, nwuhuru anwuhu; o teta nọdu ndzụ pho sụ: “Gbeshi; duta ndibe ngu g'unu lufu je anọdu l'eka unu e-jekpopho anọdu; kele Chipfu be kuwaru okpa-nri oku g'ọ bya l'alị-a. Okpa-nri ono be a-nọ apha esaa.”

²Oo ya bụ; nwanị ono gbeshi bya emee iphe, onye ke Chileke ono pfuru; duta ndibe iya; ephe lufu; je anọ apha esaa l'alị ndu Filisitayinu.

³A nọchaepho apha esaa ono; nwanị ono shi l'alị ndu Filisitayinu lwa. O bya ejefu eze je arwọahaa ya g'a nụ-phu iya ụlo iya me alị iya azụ.

⁴Teke ono be eze epfuru Gehazi, bụ onye-ozị onye ke Chileke asuje: “Kakotanuru mu iphe-ohumalenya, Elayisha meshikotaru?”

⁵Gehazi nọdu akọru eze ge Elayisha gude mee g'onye nwuhuru anwuhu teta nọdu ndzụ ozo; a bya l'amaru; nwanị ono, Elayisha meru nwa iya o teta nọdu ndzụ ono bata bya arwọahaa eze g'a nụ-phu iya ụlo iya azụ; yee alị iya. Tọbudu iya bụ; Gehazi sụ: “Gube nnajiuphu mu, bụ eze; ọo nwanị obu ba; yee nwa iya ono, Elayisha mejeru; o teta nọdu ndzụ ono.”

⁶Eze bya ajia nwanị ono k'iphe ono; o kọkotaru iya ya. Oo ya bụ; eze bya eduru onye-ozị lanu yeru iya sụ: “woru iphe, bụ ke nwanị ono g'ọ ha nụ-phukota iya azụ. Nukota iya iphe, shikota l'alị iya futa; e -shi mboku, o lufuru l'alị-a byasụ nta.”

Hazelu egbu Benu-Hadadu

⁷Tọbudu iya bụ; Elayisha bya ejee Damasukosu. Teke ono be iphe-ememe guderu Benu-Hadadu, bụ eze ndu Aramu. A bya epfuaru iya l'onye ke Chileke be byaru nụ.

⁸Eze sụ Hazelu: “Wota iphe, ii-nu onye ke Chileke ono gude; g'i shi iya l'eka kpataedu Chipfu ishi sụ: ‘? Mu a-ka-a mma l'iphe, eme mu n-a tọ?’ “

⁹Oo ya bụ; Hazelu bya ewota iphe, dugbaa iche iche, kakota ree, shi le Damasukosu dojia l'eli inya-kamelu ukporo labo gude jepfushia Elayisha. O rwua bya apfuru iya l'iphu sụ: “Nwa ngu, bụ Benu-Hadadu, bụ eze ndu Aramu be ziru mu ge mu bya ajia ngu me ya ? a-ka-a mma l'iphe, eme iya nū?”

¹⁰Elayisha sụ iya: “Je asụ iya l'oo-ka-a mma; ole Chipfu be goshikwanuru mu l'ọ nwuhufutaje.”

¹¹O woru enya dazibe Hazelu jeye iphere gude iya. Onye ke Chileke ono, raahaa ekwa.

¹²Hazelu sụ: “Nnajiuphu mu; ? bụ gunu be iiraru?” Elayisha sụ: “Ishi ekwa mu bụ le mu mawaru ejo-iphe, ii-me ndu Izurelu. Ii-tushikota oku l'ekameka, ephe kpuru; o shihu ike; teme unwokoro phe be ii-gude ogu-echi gbushia; gwee unwegirima phe arakabya; kpfushia unyomu phe, du ime ephe.”

¹³Hazelu su: “? Denu ge mube onye-ozu ngu, buepho nkuta be obu e-shi mee iphe, paru aka nno?” Elayisha su: “Chipfu be goshiwaru mu l’ii-mechaa buru eze ndu Aramu.”

¹⁴Oo ya bu; Hazelu haa Elayisha lapfushia nnajiuphu iya, bu Benu-Hadadu. Benu-Hadadu jia ya su: “? Bu gunu be Elayisha pfuru ngu?” Hazelu su: “O sukwaru mu l’ii-ka-a mma.”

¹⁵O rwua le nchitabohu iya; Hazelu wota ukpo tsee le mini; o ngugua ya angugu; o wota iya kwechia Benu-Hadadu iphu; o nwuhu. Hazelu buru eze nochia enya iya.

Teke Jiaramu bu eze ndu Jiuda

(2Iphe 21:1-20)

¹⁶L’apha, kwe Jiaramu nwa Ehabu apha ise, o wataru aburu eze ndu Izuru, bu iya bu teke Jiehoshafatu shi buru eze ke ndu Jiuda; be Jiaramu nwa Jiehoshafatu byaru aburu eze ndu Jiuda.

¹⁷Jiaramu be nowaru ukporo apha l’apha iri l’ebo teke o wataru aburu eze. Iphe, o noru l’aba-eze buru apha esato le Jierusalemu.

¹⁸O tsoo aka ndu eze ndu Izuru; mee ge ndibe Ehabu meru; kele o luru nwada Ehabu. O meru ejo-iphe l’anya Chipfu.

¹⁹Ole Chipfu gude k’onye-ozu iya, bu Devidi; ophu o too vudu iya evuvu g’o mebyishia ndu Jiuda; kele o kwehawaru Devidi ukwe l’unwu iya; me awa iya ta abyadi abubuhuru eze jasuru asuru.

²⁰Teke Jiaramu bu eze; be ndu Edomu kwefuru ndu Jiuda ike; bya ahotaruru onwophe onye a-buru eze phe.

²¹Noo ya bu; Jiaramu chita ugbo-inya iya g’o ha jeshia mkpukpu Zayi. Ndu Edomu bya ekepee yee ndu-ishi ugbo-inya ono mgburugburu. O be l’enyashi; o gbeshi bapfu ndu Edomu ono ogo. Ole ndu ojogu iya gbaru nanu nanu lashia ibe phe.

²²O buru ge ndu Edomu kwefuru ndu Jiuda ike bu ono byasu ntanu O bukwarupho teke ono be ndu Libuna kwefuru ike nkephe.

²³Iphemiphe ozo, Jiaramu megbaberu be e dekotaruru l’ekwo-akọ ke ndu eze ndu Jiuda.

²⁴Oo ya bu; Jiaramu nwuhu lapfushia nna iya phe; e lia ya l’eka e liru nna iya phe le mkpukpu Devidi. Nwa iya nwoke, bu Ehazaya buru eze nochia enya iya.

Teke Ehazaya bu eze ndu Jiuda

(2Iphe 22:1-6)

²⁵L’apha, kwe Jiaramu nwa Ehabu apha iri l’ebo, o bu eze ndu Izuru be Ehazaya nwa Jiaramu byaru aburu eze ndu Jiuda.

²⁶Ehazaya nowaru ukporo apha l’apha labo teke o wataru aburu eze. Iphe, o noru l’aba-eze bu apha lanu le Jierusalemu. Epha ne iya bu Atalaya, bu nwanwa Omuri, bu onye ono, bu eze ndu Izuru ono.

²⁷O tsoo ẹka ndibe Éhabu; mee ẹjo-iphe l'ẹnya Chipfu ẹgube ndibe Éhabu meru; kele ọ bu ọgo ndu unuphu ibe Éhabu.

²⁸O tsoo Jióramu nwa Éhabu; ẹphe jepfu Hazelu, bu eze ndu Arámu ọgu le mkpukpu Ramotu, du l'alì Giladu. Ndu Arámu ono meka Jióramu iphe.

²⁹Oo ya bu; eze, bu Jióramu lashia mkpukpu Jiezerelu g'o je anodu nyaa iphe-ehuka ono, ndu Arámu mekaru iya le mkpukpu Ramotu teke ono, o tsoo Hazelu, bu eze ndu Arámu ọgu ono. No iya; Éhazaya nwa Jióramu, bu eze ndu Jiuda jeshia aji Jióramu nwa Éhabu le mkpukpu Jiezerelu l'iphe-ehuka ono, e mekaru iya ono.

2 Ndu eze 9

Aawu Jiehu manu l'ishi g'ọ buru eze ndu Ízurelu

¹Onye mpfuchiru Chileke, bu Elayisha bya ekua onye lanu l'ogbo ndu mpfuchiru su iya: “Jikobe; wota mgbere manu-a jeshia mkpukpu Ramotu, du l'alì Giladu.

²Teke i rwuru ẹka ono; lee ẹnya Jiehu nwa Jiehoshafatu; mbu nwanwa Nimushi. Kuchi iya ekuchi l'eka unwunna iya no; duru iya g'unu bahu l'ime ulo.

³Teke ono be ii-wota mgbere manu ono; woru manu ono wua ya l'ishi su: ‘Chipfu suru-a: Mu wuru ngu manu l'ishi g'i buru eze ndu Ízurelu.’ I -mechaa nno; gūhaa ọzo gbagba; ba kpokwa upfu!”

⁴Oo ya bu; nwokorọbya ono, bu onye mpfuchiru ono tugbua jeshia mkpukpu Ramotu, du l'alì Giladu.

⁵O -rwuepho; ọ huma ndu-ishi ndu ojogu g'ẹphe no ndzuko; ọ su: “Onye-ishi ojogu; mu nwekwaru ozi, mu e-ziekwa ngu.” Jiehu jia ya su: “? Bu onye ole l'ime anyi be iipfuru?” O su iya: “Oo gubedua; onye-ishi ojogu.”

⁶Oo ya bu; Jiehu gbalihu ẹphe bahu l'ime ulo. Onye mpfuchiru ono woru manu ono wua ya l'ishi su: “Chipfu, bu Chileke ke Ízurelu suru-a: ‘Mu wuwuru ngu manu l'ishi g'i buru eze ndibe ke Chipfu; mbu ndu Ízurelu.

⁷Ii-tuko ndu onu-ulo ibe Éhabu, bu nnajuphu ngu gwee arakabya; k'ophu mu e-shi nno gwata ugwo ochi ndu-ozu mu ono, bu ndu mpfuchiru; waa k'iphe, bukpuo ndu-ozu Chipfu, bu ndu Jiezebelu gbushikotaru.

⁸Ndibe Éhabu l'ophu a-buru mkpurupyata. Mu e-gbufu iphe, bukpuo nwa nwoke l'onulo ibe Éhabu l'alì ndu Ízurelu; m'ọ bu ohu m'ọ bu amadu.

⁹Mu e-me ibe Éhabu g'ọ du g'ibe Jierobowamu nwa Nebatu; mekwapho g'ọ du g'ibe Basha nwa Ahayjia.

¹⁰Jiezebelu be bu nkuta a-ta iya l'egu, du le Jiezerelu. O to dudu onye e-li iya elili.’ “ O pfuchaa nno; bya agūhaa ọzo gbafu.

¹¹E mechaa; Jiehu bya ejepfushia ndu-ishi ndu ojogu ophuna; onye lanu jia ya su: “? Bu-a k'oma? ? Bu gūnu be onye obvu ono achọ-doru ngu?” Jiehu su: “G'unu mahawaru onye obu bya amaru g'oopfufe opfu-a.”

¹²Ephe sụ: “Oo ụka bẹ ọbu! Pfiaru anyi iphe ọbu.” Jiehu sụ: “Iphe, o pfuru mu bu le Chipfu sụru le ya wụwaru mu manụ l'ishi ge mu buru eze ndu Ízurelu.”

¹³Ephe mekebe egwegwa je achikoo uwe phe bya atọru iya l'alị g'ọ zọ ọkpa. Ephe nọdu egbu opu asuje: “Jiehu buakwaa eze!”

Jiehu egbu Jióramu

¹⁴Noo ya; Jiehu nwa Jiehoshafatu; mbụ nwanwa Nimushi bya agbaaru Jióramu ejo idzu. Teke ono bẹ Jióramu yee ndu Ízurelu l'ophu shi etso Hazelu, bu eze ndu Arámu ọgu g'ephe e-shi gbobuta mkpukpu Ramotu, du l'alị Giladu.

¹⁵Ole eze, bu Jióramu bẹ larụ mkpukpu Jiezerelu je anyaa iphe-ehuka ono, ndu Arámu mekaru iya ono; teke ephe le Hazelu, bu eze ndu Arámu lwuru ọgu ono. Oo ya bu Jiehu sụ: “O -buru l'ọo uche unu bu ono; g'ọ tọ dukwa onye e-shi le mkpukpu-a pyofu jeshia mkpukpu Jiezerelu je edoo iphe-a.”

¹⁶Tobudu iya bu; Jiehu nyihu ugbo-inya iya gbaru jeshia mkpukpu Jiezerelu; kele ọọ eka ono bẹ Jióramu zẹ. Éhazaya, bu eze ndu Jiuda bẹ jeru iya ajiji.

¹⁷O be teke onye-nche, pfuru l'ulo eli, du le mkpukpu Jiezerelu ono humaru Jiehu; me ndu awu etso iya nu g'ephe dzeberu abya; o chishia mkpu sụ: “O nwekwaru ndu mu humaru, awu abyanu-o!” Jióramu sụ: “G'a chota onye agba l'inya zia g'ọ gba phe ndzuta je ajia phe sụ: ‘? Bu-a k'oma to?’ “

¹⁸Onye agbaje inya gbagbua je agba Jiehu ndzuta sụ iya: “Eze sụru: ‘? Bu-a k'oma to?’ “ Jiehu sụ iya: “? Unu gude k'oma eme gunu? Ghakobe; tso mu l'azu!” Onye-nche ono sụ eze: “Onye e ziru jepfuakwaru phe; ole ọ tọ lwaedu azu.”

¹⁹Oo ya bu; eze; bya ezia onye agbaje inya le k'ugbo ẹbo. O bya ejepfu phe bya asu: “Eze sụru-a: ‘? Bu-a k'oma to?’ “ Jiehu sụ iya: “? Unu gude k'oma eme gunu? Ghakobe; tso mu l'azu!”

²⁰Onye-nche ono sụ eze: “O jepfuakwaru phe; ole ọ tọ lwakwapho azu. G'onye ọbu gude agba bẹ ọ dukwa ge Jiehu nwa Nimushi; kele ọogba ehuka ehuka.”

²¹Jióramu sụ: “Doziaru mu ugbo-inya mu.” E doziaru iya ya. Jióramu, bu eze ndu Ízurelu; yee Éhazaya, bu eze ndu Jiuda gbagbua jepfushia Jiehu. Onyenonu nọduchaa l'ugbo-inya nkiya. Eka ephe gbapfuru iya bu l'alị Nabotu, bu onye Jiezerelu.

²²Jióramu humaepho Jiehu bya ajia ya sụ: “Jiehu; ? bu-a k'oma to?” Jiehu sụ: “? Denu ge k'oma e-shi du; l'eka urwuali; me agwo nshi ono, shi ne ngu, bu Jiezebelu l'eka; kutaru l'ikpo l'ikpo egube-a?”

²³Oo ya bu; Jióramu ghakobe; gbagbua arajeru Éhazaya sụ: “Éhazaya; ọ bu ọgu-o!”

²⁴Jiehu gudeepho ike iya g'ọ ha seta apfu iya gbaa Jióramu le mgbaka ukuvu; o foo ya l'obu; ọ daa dakoru l'eli ugbo-inya iya.

²⁵Oo ya bu; Jiehu pfiaru onye-ishi ugbo-inya iya, epha iya bu Bidika su: “Pata iya je etuphaa l’ali Nabotu, onye Jiezerelu pho. Nyatakwa le teke pho, mu le ngu tukojeru gude ugbo-inya agbatso nna iya, bu Ehabu l’azu pho be Chipfu pfuru opfu ehu iya su:

²⁶‘Unyaphu be mu humaru mee Nabotu; me mee k’unwu iya, e gburu egbugbu. Nnajiuphu pfua su; mu a-gwata ngu ugwo iya l’ali-a. Noo iphe, Chipfu epfu bu ono.’ Oo ya bu; pata iya je etuphaa l’ali ono; egube Chipfu pfuru iya ono.’”

Eegbu Ehazaya

²⁷Ehazaya, bu eze ndu Jiuda humapho iphe, e me nu; o ye okpa l’oso tsoru uzo, shiru bahu le mkpukpu Betu-Haganu gbalaaha. Jiehu chipyabe iya; asuje: “Gbagbufua ya l’eli ugbo-inya ono!” Epe gbaa ya apfu l’eka o no l’uzo, jeru lashia mkpukpu Guru, du le mgboru mkpukpu Ibulamu. O gbaru laa mkpukpu Megido; je anwuhu l’eka ono.

²⁸Ndu ozi iya gude ugbo-inya pata iya jeshia Jierusalemu je elia l’ilu iya l’eka e liru nna iya phe le mkpukpu Dévidi.

²⁹O buru l’apha, kwe Jióramu; nwa Ehabu apha iri le nanu, o shi butaru eze ndu Izurelu be Ehazaya byaru aburu eze ndu Jiuda.

Eegbu Jiezebelu

³⁰Noo ya; Jiehu tugbua jeshia mkpukpu Jiezerelu. Jiezebelu numapho l’o byaru; o tee pensuru enya; memaa egbushi iya emema; je eworu enya pyofu le windo.

³¹Jiehu bya abyarwuta l’onu-abata; Jiezebelu su: “? Bu-a k’oma Zimiri; mbu gube onye ono, gburu nnajiuphu ngu?”

³²Jiehu palia enya l’uzo windo ono su: “? Bu onye be turu ikè yeru mu nu? ? Bu onye?” Tobudu iya bu; iphe, du g’umadzu labo; ozoo umadzu eto, bu ndu eleta ibe eze enya shi le windo lee ya enya.

³³Jiehu su phe: “Unu gbè l’eka ono pata Jiezebelu zee ogbu g’o bya ada!” Oo ya bu; epe tufu iya o bya adaa. Mee ya pfukashihu kpua l’igbulo; me inya, nogbaa l’eka ono. Jiehu gude inya gbaa ya eli; zoo ya tolitoli.

³⁴Jiehu bahu l’ime ulo je eria; ngua su: “Unu pata nwanyi ono, vu onu ono je elia; kele o bu pho nwada eze!”

³⁵Epe lufushia g’ephe je elia ya; o buwaru iphe, epe humaru kpoloko bu okpokoroko ishi iya; me okpu ogboro iya; waa okpu oshi-eka iya.

³⁶Epe laphu azu je epfiaru iya Jiehu; o su: “Oo ya bu iphe ono, Chipfu shi l’onu onye-ozu iya, bu Elayijia ke Tishibe pfua su: ‘Oo l’ali, du le mkpukpu Jiezerelu be nkuta a-ta anu Jiezebelu.’”

³⁷Jiezebelu be odzu iya a-du ge nshi, a nyiru tukaa nanu nanu l’ali, du le Jiezerelu; k’ophu bu l’o to dudu onye byaru a-hube iya ama ke g’o su: ‘Oo Jiezebelu baa.’ “

2 Ndu eze 10

Eegbushi ndibe Ehabu

¹Éhabu bẹ ụnwu iya dụ ụkporo ẹto l'ụmadzu iri lẹ Samériya. Oo ya bụ; Jiehu bya edeshia ẹkwo-ozi keshiaru ndu-ishi lẹ mkpụkpu ono; mę ndu bụ ọgerenya; mę ndu bụ phẹ mefutaru ụnwu Éhabu ono. Ẹkwo-ozi ono bẹ o deru sụ:

²“Eshi ọphu unu l'ụnwegirima nnajịuphu unu tukuru nọdu; tẹme unu nweru ụgbo-inya; nweru inya bya enweru ngwọgu; nweru mkpụkpu, a kpushiru ike; bẹ bụ ẹkwo-ozi-a -bebeephro rwu unu ẹka;

³unu họta onye kachaa ree; mbụ onye ọ gbaru g'unu họta l'ụnwu nnajịuphu unu; mee ya eze; g'unu lwua ọgu see iswi ọnu-ulo nnajịuphu unu.”

⁴Ole ndzụ-agugu rwutaru phẹ; ẹphe sụ: “lewaro; ndu eze labo pho ta adudu ike pfuru wota iya ọgu. ? Denu g'anyịbedua e-shi dụ ike pfuru wota iya ọgu?”

⁵Tobudu iya bụ; onye bụ ishi l'ibe eze; mę onye bụ ishi mkpụkpu; mę ndu bụ ọgerenya; waa ndu bụ phẹ mefutaru ụnwu Éhabu zia Jiehu ozi sụ: “Anyi bụ ndu-ozi ngu; ọo iphe, ị sụru g'anyi mee bẹ anyi e-me. O to nwe du onye anyi eme eze; mekpọepho iphe, ị riru l'ọ pfuru ọto.”

⁶Jiehu bya edeeru phẹ ẹkwo-ozi k'ugbo ẹbo sụ: “O -buru l'unu turu ikè yeru mu; unu je a-nodu eme iphe, mu sụru g'unu mee; unu gbukọo ishi ụnwu nnajịuphu unu ono g'ẹphe ha vutaru mu lẹ mkpụkpu Jiezerelu ẹgube nta-a echele.” Ụnwu ibe Éhabu ono, bụ iya bụ ụmadzu ụkporo ẹto l'iri ono bẹ bụ ẹphe lẹ ndu oke amadu lẹ mkpụkpu ono shi nọdu; ọ buru ndu ono metseshiru phẹ.

⁷Ẹkwo-ozi ono rwuepho ndu ono ẹka; ẹphe kputa ụnwu ibe eze ono; gbushikota ẹphene ụkporo ẹto l'iri ono. Ẹphe parụ ishi phẹ yechaa lẹ nkata; vulaaru Jiehu lẹ mkpụkpu Jiezerelu.

⁸Onye-ozi bya ezia Jiehu sụ: “E vulataakwaru ishi ụnwu Éhabu ọbu.” Jiehu sụ: “Kube phẹ l'ikpo labo l'ọnu-abata mkpụkpu g'ẹphe nọdu l'ẹka ono jeye l'utsu.”

⁹O be l'utsu; Jiehu lufu je apfuru pfuaru ndu ono g'ẹphe ha sụ: “Uta ta adukwa unu l'ehu. Oo mbedua bẹ gbaru nnajịuphu mu ẹjo-idzu; woru iya gbua. Ole ọ bụ; ? bukwanu onye bẹ gbushiru ndu ọwana?”

¹⁰Oo ya bụ g'unu maru l'ọ to dudu opfu, Chipfu pfuru lẹ k'ehu ndibe Éhabu duru ọphu tee mekotadu nụ. Chipfu bẹ mewaru iphe, o shi l'ọnu onye-ozi iya, bụ Elayijia pfua.”

¹¹Oo ya bụ Jiehu gbushikota iphe, bụ ndibe Éhabu, phoduru lẹ mkpụkpu Jiezerelu. O gbukotaru ndu oke amadu, o nweru; mę ndu ẹguru ọnyà iya; mekpoo ndu-uke, o nweru; ọphu ọ to dudu m'onye lanu, ọ haru; ọ nọdu ndzụ l'ime phẹ.

Jiehu egbushi ndu abubu eze Éhazaya

¹²Noo ya; Jiehu bya agbeshi jeshia mkpụkpu Samériya; o jetabeephro rwua ẹka ndu nche aturu anoduje ebushi aturu ẹji;

¹³yee ndu bụ abubu Éhazaya ono, shi buru eze ndu Jiuda pho dzuda. O jia phẹ sụ: “? Unu bụ ndu ole?” Ẹphe sụ iya: “Anyi bukwa abubu Éhazaya. Iphe, anyi abya bụ g'anyi kele ụnwu ibe eze; mę ụnwu ibe eze-nwanyị.”

14Jiehu sụ: “Unu kpukoo phe le ndzu.” Ephe bya akpukoo phe le ndzu je egbushia; chiru ye l'iduma, du l'eka ono, ndu nche aturu anoduje ebushi aturu eji ono. Ephe du umadzu ukporo labo l'ebo. E gbushia phe; ophu o to dudu onye ophu a haru; o nodu ndzu m'onye lanu.

Eegbufufua ndibe Éhabu, phoduru nu

15Jiehu bya alufu l'eka ono; o huma Jiehonadabu nwa Rekabu g'oboyapfuta iya. Jiehu kele iya ekele bya asu: “? Obu ngu guru-a iphoro l'eka mu no; g'obu nkemu guru l'eka i no-a?” Jiehonadabu sụ iya: “Ee; obu mu gukwaru-a iphoro.” Jiehu sụ iya: “O -buru l'o du nno; machiaru mu eka ngu.” O bya amachiaru iya eka; Jiehu selita iya lobata l'ugbo-inya.

16Jiehu sụ iya: “Tsoru mu g'i huma ge ke Chipfu aphu-beru mu l'ehu.” Oo ya bu; o pata iya l'ugbo-inya.

17Jiehu phe rwuepho Sameriya; o tuko iphe, bu ndibe Éhabu, phoduru nu l'eka ono gbushikota. O gwekota phe arakabya g'ephe ha; egube ono, Chipfu shi l'onu Elayijia pfua ya ono.

Egbushi ndu abaru Balu eja

18Jiehu bya akpakoo ndu Izurelu l'ophu sụ phe: “Éhabu be bapeteru Balu eja; mbedua a-baru iya eja; barweru iya ya abarwe.

19Ngwa; unu kukota ndu mpfuchiru Balu g'ephe ha; me ndu abaru iya eja; me ndu bugbaa uke iya. G'o to dukwa onye a-gbala nu; noo kele mu abya egweru Balu ngweja, paru eka. Onye gbalaru nu be ta adzukuraru ndzu.” Obenu le Jiehu gude eregede eme ge ya mee ge ndu abaru Balu eja bukotaru mkpurupyata.

20Jiehu sụ: “Unu tua ndzuko; g'e dzukoo gude kwabe Balu ubvu.” Ephe bya araa ke ndzuko obu arara.

21Jiehu bya atuko ali Izurelu l'ophu zidzuru ozi; ndu bukpo ndu abaru Balu eja g'ephe ha byakota; ophu o to dudu m'onye lanu, ta abyaduru nu. Ephe wubakota l'ime eze ulo Balu ono; jikota iya pyimu; shita l'ishi iya ophuu je akpaa l'ishi iya ophuu.

22Jiehu bya epfuaru onye eleta enya l'ulo, eedobeje uwe sụ iya: “Chitaru ndu abakotakporu Balu eja awurukpata uwe g'ephe yee!” O bya achitaru phe iya.

23Tobudu iya bu; Jiehu yee Jiehonadabu; nwa Rekabu bahu l'ime ulo Balu ono. Jiehu sụ ndu ono, abaru Balu eja ono: “Unu lerwee enya maru; ? to dukwanu onye ke Chipfu tso unu nodu l'eka-a; abuedupho ndu abaru Balu eja kpoloko.”

24Oo ya bu; ephe bya abahu jeshia egwe eja; me ngweja-akpo-oku. Jiehu be wowaru umadzu ukporo eno ye g'ephe kwakaa l'etezi; bya asu phe: “O -nwewaru onye haru m'onye lanu le ndu-a, mu eye unu l'eka-a; o gbalaa be e-gude ishi ndzu nkiya pfua ugwo iya.”

25Egweghe, Jiehu egweghe ngweja-akpo-oku ono; o sụ ndu nche; me ndu-ishi: “Unu wubawaro je egbushikota phe! G'o bo dukwa onye ophu a-gbala nu!” Oo ya bu; ephe

gude ogu-echi gbugbushikọta phẹ. Ndu nche ono; waa ndu-ishi ono tufuchaa odzu phẹ l'etezi. Ndu nche ono bya abamihuchaa l'ime ime ụlo Balu ono.

²⁶Ephe pafutagbaa ntekpe, du l'ulo Balu ono; kpoo ya oku.

²⁷Ephe bya etsukposhia ntekpe Balu; nwukposhia ulo Balu ono. O buru nshi be aanoduje anyi iya byasu ntanu-a.

²⁸Noo ya bu; Jiehu mebyia k'abarụ Balu eja l'alị Ízurelu.

²⁹Ole Jiehu te wofuduru eka l'eme iphe-ẹji ono, Jierobowamu nwa Nebatu kpatarụ ge ndu Ízurelu mee ono. Mbụ eja ono, ephe baru unwu-eswi pho, e gude mkpola-ododo kpua dobe le mkpukpu Betelu; me le mkpukpu Danu pho.

³⁰Chipfu su Jiehu: “Eshinu i meru iphe, du ree; mee iphe, pfuru nhamunha l'enya nkemu; bya emee ndibe Éhabu iphe, du mu l'obu g'e mee phẹ iya; be awa ngu a-nodu l'aba-eze ndu Ízurelu jasụ l'ogbo k'eno.”

³¹Ole Jiehu te egudegbudu obu iya g'o ha dobe iphe, ekemu Chipfu, bu Chileke ke Ízurelu pfuru. O to haduru eme iphe-ẹji ono, Jierobowamu meru; mbụ ono, o kpatarụ ge ndu Ízurelu mee ono.

Anwuhu Jiehu

³²Teke ono be Chipfu wataru akpa ndu Ízurelu mkpa-eka. Hazelu lwu-kpekota mkpukpu le mkpukpu ndu Ízurelu l'ophu;

³³shita l'uzo enyanwu-awawa enyimu Jiordanu; mbu ali Giladu l'ophu; me ali ndu Gadu; me ke ndu Rubenu; me ke ndu Manase e -shi le mkpukpu Arowa, du le mgboru nsuda Anonu je akpaa le Giladu; waa Beshanu.

³⁴Iphe ozo, nwugbaberu nu teke Jiehu bu eze; waa iphemiphe, o meru; me ehuka ehuka, o mekotaru be e dekotaru l'ekwo-ako ndu eze ndu Ízurelu.

³⁵Tobudu iya bu; Jiehu nwuhu lapfushia nna iya phe; e lia ya le mkpukpu Sameriya. Jiehowahazu, bu nwa iya nwoke buru eze nochia enya iya.

³⁶Iphe, Jiehu noru l'aba-eze ndu Ízurelu le Sameriya bu ukporo apha l'apha esato.

2 Ndu eze 11

Atalaya yee Jiowashi

(2Iphe 22:10—23:15)

¹Tobudu iya bu; Atalaya, bu ne Éhazaya humae pho le nwa iya nwuhuwaru; o gbeshi je atuko ndibe eze g'ephe ha saa osa-mpfu.

²Ole Jiehosheba, bu nwada eze, bu Jioramu; bya aburu nwune Éhazaya ke nwanyi be dutaru Jiowashi, bu nwa Éhazaya dufu l'echilabo unwu eze ono, eeme g'e gbushia ono. O duta Jiowashi yele onye ehe iya nu je edomia le mkpuru-azee; shi nno wohaaruru iya Atalaya; k'ophu bu l'o to gbuduru iya.

³E domiru Jiowashi; yele onye ehe iya nū l'eze-ulo Chipfu apha ishii ge Atalaya bukpoepho ishi l'alī ono.

E kwefuru Atalaya ike

(2Iphe 23:1-15)

⁴O be l'apha k'esa; Jiehoyada bya ezia g'e je ekua ndu bugbaa ishi ndu ojogu ukporo ise ise, bu ndu anoduje eche eze; me ndu anoduje eche ibe iya; g'e duru phe byapfuta iya l'eze-ulo Chipfu. Ephe l'ephe woru ndzu gbaa; o mee; ephe ribuaru iya nte l'ulo Chipfu l'eka ono. O bya egoshi phe Jiowashi, bu nwatibe eze ono.

⁵O bya atuaru phe ekemu su: "Waa iphe, unu e-me baa; unube ndu ono, anoduje le nche l'eswe-atuta-unme; unu kee onwunu uzi eto. G'uzi lanu je anodu chee nche l'ibe eze;

⁶uzi lanu eje anodu eche le Onu-abata Suru; uzi lanu ophuu a-nodu l'azu ndu nche ono; mbu l'azu oguzo ono azu iya ophuu. Noo g'unu e-shi bu ono chee ulo ono nche.

⁷Uzi labo l'ime unube ndu anoduje le nche l'eswe-atuta-unme be a-nodukwapho eche eze-ulo Chipfu nche; gude gbobuta eze; g'o to du iphe e-me iya nu.

⁸Unu pagbaarū ngwogu unu l'eka no-pee eze, bu Jiowashi mgburugburu. Iphe, bukpo onye shitaru eka unu no; unu gbua onye obu. Ekameka, eze ejekpo; unu swiru iya eswiru."

⁹Ndu-ishi ndu ojogu ukporo ise ise ono mee ge Jiehoyada, bu onye uke Chileke pfuru phe ono. Onyenonu chita ndu nkiya, bu ndu echeje nche l'eswe-atuta-unme; me ndu ophu afuta le nche l'eswe-atuta-unme ono; ephe byapfutashia Jiehoyada, bu onye uke Chileke ono.

¹⁰Onye uke Chileke ono bya achita arwa; me iphe, eegudeje egbobuta onwonye ono, shi buru ke Devidi ono; mbu ono, e doberu l'eze-ulo Chipfu ono; woru keshiaru ndu bugbaa ishi ndu ojogu ukporo ise ise ono.

¹¹Ndu nche ono pagbaarū ngwogu phe l'ehu l'ehu pfuru gbaphee eze mgburugburu le mgboru oru-ngweja Chipfu; waa eze-ulo ono gedegede; shita l'uzo ekutara jeye l'uzo ekicha.

¹²Jiehoyada bya edufuta nwatibe eze ono, bu Jiowashi; bya eworu okpu-eze kpube iya; woru ekwo, e deru ekemu Chileke dee ya l'eka su l'oo ya bu eze. Ephe bya awua ya manu l'ishi; bya atuko aku eka; atu uzu su: "Nodukwa ndzu ogologo; gube eze!"

¹³Atalaya numaepho wowoowoo, ndu nche; me ndu oha atu; o tugbua jepfushia phe l'eze-ulo Chipfu.

¹⁴O bya eje elee enya; bya ahuma eze g'o pfuru le mgboru itso, bu iya bu g'ephe emeje iya l'omelali phe; bya ahumakwapho ndu-ishi ndu ojogu; me ndu egbuje opu g'ephe pfu-kubegbaaru iya; me ge ndu ali ono l'ophu tukoru etegbaa eswa; egbu opu; o gbajashia uwe iya chishia su: "Ebyi anwua-o! Ebyi anwua-o!"

¹⁵Tobudu iya bu; Jiehojada, bu onye uke Chileke bya aturu ndu-ishi ndu ojogu ukporo ise ise ono ekemu su: “Unu kpufuta nwanyi ono l'echilabo ndu nche ono. Iphe, bu onye ephe l'iya swi; unu gude ogu-echi gbua ya.” Noo kele onye uke Chileke ono be suru g'e tee gbukwa iya l'eze-ulo Chipfu.

¹⁶Oo ya bu; ephe gude iya; kpu-rwua onu aka inya eshije abahu l'ibe eze; ephe woru iya gbua l'eka ono.

Jiehojada edozi ali Jiuda

(2Iphe 23:16-21)

¹⁷No iya; Jiehojada bya emee eze ephe le Chipfu gbaa ndzu; bya emekwapho ndu ono ephe le Chipfu gbakwapho ndzu. Ogbandzu obu bu l'ephe a-buru ndibe Chipfu. O mekwapho eze; ephe le ndu ono gbaa ndzu nkephe.

¹⁸Ndu Jiuda l'ophu jeshia l'eze-ulo Balu je enwutsushia ya. Ephe toko iphe, bu oru-ngweja Balu; me ntekepe iya tsukposhichaa yogiri yogiri. Ephe gbua Matanu, bu onye uke Balu l'iphu oru-ngweja Balu. Oo ya bu; Jiehojada, bu onye uke Chileke bya eye ndu nche; ephe cheahaa eze-ulo Chipfu nche.

¹⁹O chita ndu-ishi ndu ojogu ukporo ise ise ono, bu ndu anoduje eche eze; waa ndu anoduje eche ibe iya; me ndu ali ono l'ophu; ephe dufuta onye eze ono l'eze-ulo Chipfu. Ephe shia aka ndu nche eshije abahu duba iya l'ibe eze. Oo ya bu; eze je anodu l'aba-eze.

²⁰Noo ya; ehuru kwatakpo tsoro ndu ali ono l'ophu okpobe atsotso. Nchi bya adu doo le mkpukpu ono; kele e gbuwaru Atalaya l'ibe eze.

²¹Jiowashi nowaru apha esaa teke o wataru aburu eze.

2 Ndu eze 12

Teke Jiowashi bu eze ndu Jiuda

(2Iphe 24:1-16)

¹L'apha, kwe Jiehu apha esaa, e -shi teke o beberu buru eze ndu Izurelu; be Jiowashi bataru l'aba-eze ndu Jiuda. Iphe, o noru l'aba-eze ono le Jierusalemu bu ukporo apha labo. Epha ne iya bu Zibaya. Eka ne iya obu shi bu le mkpukpu Biye-Sheba.

²Jiowashi be mekotaru iphe, pfuru oto l'enya Chipfu l'apha ono g'o ha, Jiehojada, bu onye uke Chileke kpo-zikotaru iya uzo.

³Obenu l'eka aagwaje iphe ono be a ta alwuduru; ndu ali ono nodu egweje aja bya akpo unwu-isensu oku l'eli aka ono.

⁴Tobudu iya bu; Jiowashi bya epfuaru ndu-uke Chileke su phe: “Unu nakobe iphe, bu okpoga, du nsoro, eewobataje l'eze-ulo Chipfu; mbu okpoga, atutaje l'utu; me okpoga, e ketaru onyenonu g'o pfuje; me okpoga, nemadzu gude obu iya bya anu l'eze-ulo Chipfu.

⁵Gę ndu-uke Chileke l'ehu l'ehu nakota okpoga ono l'eka ndu edobeje okpoga g'e gude iya mekwakota iphe, mebyihuru emebyihu l'ulo Chipfu; l'eka bukpo eka a humaru mebyihuru emebyihu.”

⁶Ole a noru jeye l'apha, kwe Jiowashi ukporo apha l'apha eto; ophu ndu-uke Chileke ono te emekwaduru iphe, mebyishihuru l'eze-ulo Chipfu ono.

⁷Tobudu iya bu; eze, bu Jiowashi bya ekua onye uke Chileke, bu Jiehoyada; me ndu-uke Chileke ozo jia phe su: “? Bu gunu meru iphe, unu te emekwaduru iphe, mebyishihuru l'eze-ulo Chipfu obu? Ngwa; g'o bo dukwa okpoga ozo, unu a-natabaa l'eka ndu edobeje okpoga. Iphe, unu e-mechia bu g'unu toko iphe, bu okpoga unu natawaru nu g'e gude mekwaa eze-ulo obu.”

⁸Oo ya bu; ndu-uke Chileke ono kweta l'ephe taa nakodu ndu ono okpoga; ophu ephe emekwadu eze-ulo Chipfu ono l'onwophe.

⁹Noo ya bu; onye uke Chileke, bu Jiehoyada bya apata okpoko; swofua uzo l'opfu iya; dokube iya oru-ngweja Chipfu l'ekutara; me a -nodu abahu l'eze-ulo Chipfu ono. Ndu uke Chileke, eche onu-abata nche toko okpoga, e wobataru l'eze-ulo ono yekota l'okpoko ono.

¹⁰O nodu abujeru; okpoga ono -haepho shii l'okpoko ono; onye ederu eze ekwo; me onye-ishi ndu-uke Chileke abya agua okpoga ono ugu; chiru ye l'ekpa kechia.

¹¹Ephe pyachaa okpoga ono g'oo-du; ephe eworu iya nu ndu-ishi ozi obu, eeje l'eze-ulo ono. Ephe nodu eshije l'okpoga ono pfua ndu eje ozi l'eze-ulo Chipfu ono ugu; mbu ndu kapyinta; me ndu akpu ulo obu akpukpu;

¹²me ndu edo eja edodo; me ndu akwacha mkpuma. O buru l'okpoga ono be ephe eshije zuta oshi; me mkpuma, a gbakposhiru agbakposhi, e gude emekwa eze-ulo Chipfu ono. O buru iya be ephe eshije emephu okpoga l'iphe, l'ala, l'iphe, eemekwa emekwa l'eze-ulo ono.

¹³Ole o to budu okpoga ono, e wobataru l'eze-ulo Chipfu ono be e gude mee gbamugbamu mkpola-ochaa; me iphe, apaje oghu oroku; me gbamugbamu ozo; me opu; mewaro iphe ozo, e gude mkpola-ododo; me mkpola-ochaa mee dobe l'eze-ulo Chipfu ono.

¹⁴O buepho ndu eje ozi l'eze-ulo ono be a nuru iya g'ephe gude mekwaa eze-ulo ono.

¹⁵A ta sujeduru ndu a nuru okpoga ono g'ephe bya edoo g'ephe gude mepushia okpoga ono; kele ephe bu ndu gude ire-lanu eje ozi obu.

¹⁶Okpoga, shi le ngweja-apfu-ugwo; me ke ngweja-iphe-eji; be e te ewobatajedu l'eze-ulo Chipfu; ndu nwe iya nu bu ndu-uke Chileke.

¹⁷O buru teke ono be Hazelu, bu eze ndu Aramu jeru etsoo mkpukpu Gatu ugu; lwua ya lwuta. O bya adakobe jeshifua ugu le Jierusalem.

¹⁸Jiowashi, bu eze ndu Jiuda wota iphemiphe, nna iya phe, bu Jiehoshafatu; me Jiehoramu; me Ehazaya, bu ndu shi buru eze ndu Jiuda doberu Chipfu iche; me ophu

yẹbedua doberu Chipfu iche; məkota mkpola-ododo, a humaru l'eka eedobeje ẹku l'eze-ulo Chipfu; me l'ulo ibe eze; wolaaru Hazelu, bu eze ndu Aramu. O buru teke ono be Hazelu bebe paru Jierusalemu haa tugbua.

¹⁹Iphe ozo, nwugbaberu nu teke Jiowashi bu eze; me iphemiphe, o meru be e dekotaru l'ekwo-ako ndu eze ndu Jiuda.

²⁰Ndu ozi Jiowashi bya agbaaru iya ejo-idzu; woru iya gbua l'ulo Betu-milo l'uzo, shiru jeshia Sila.

²¹Ndu ozi iya, gburu iya nu obu bu Jiozaka nwa Shimeyatu; me Jiehozabadu; nwa Shoma. Tobudu iya bu Jiowashi nwuhu; e lia ya l'eka e liru nna iya phe le mkpukpu Dévidi. Amazaya, bu nwa iya buru eze nochia enya iya.

2 Ndu eze 13

Jiehowahazu bu eze ndu Izurelu

¹L'apha, kwe Jiowashi; nwa Ehazaya ukporo apha l'apha eto; e -shi teke o beberu buru eze ndu Jiuda be Jiehowahazu nwa Jiehu byaru aburu eze ke ndu Izurelu le mkpukpu Sameriya. Iphe, o noru l'aba-eze bu apha iri l'esaa.

²O mee ejo-ememe l'enya Chipfu. O tsokotaru ejo-iphe ono, Jierobowamu; nwa Nebatu meru ono; mbu ono, o meru ndu Izurelu mee ono. O to gbakutaduru ejo-ememe ono azu.

³Oo ya bu; Chipfu woru oke-ehu-eghu iya swibe ndu Izurelu. O paru phe haru Hazelu bu eze ndu Aramu; waa nwa iya bu Benu-Hadadu ephe ka phe okpehu no odu.

⁴Jiehowahazu bya epfuru nu Chipfu; Chipfu ngaberu iya nchi; kele o humaru g'eze ndu Aramu gude akpaberu ndu Izurelu eh.

⁵Tobudu iya bu; Chipfu bya anu ndu Izurelu onye dzoru phe nu; o buru iya bu l'ephe anahu ndu Aramu. Ndu Izurelu bya eburu l'ibe nkephe g'ephe shihawaa buru iya.

⁶Obenu l'ephe ta tu-woduru aka l'eme iphe-eji ono, ndibe Jierobowamu meru; mbu ono, o meru ndu Izurelu g'ephe mee ono. O tukoru iya mekota. Nokwapho g'itso Ashera du le Sameriya g'o du iya.

⁷Ophu o dudu ndu ojogu Jiehowahazu phoduru nu; a -gufuepho ndu ojogu ukporo labo l'iri, bu ndu agbaje l'inya; me ugbo-inya iri; waa unu ndu ojogu ugbo ukporo l'ise, bu ndu ojogu oje-l'okpa; kele eze ndu Aramu be sakotaru phe osampfu; bya egude okpa gwee phe uji l'ali.

Anwuhu Jiehowahazu

⁸Iphemiphe, nwugbaberu nu teke Jiehowahazu bu eze; waa iphe, o meberu; me ehuka ehuka, o mekotaru be e dekotaru l'ekwo-ako ndu eze ndu Izurelu.

⁹Jiehowahazu bya anwuhu; lapfushia nna iya phe; e lia ya le mkpukpu Sameriya. Jiowashi, bu nwa iya nwoke buru eze nochia enya iya.

Jiowashi bu eze ndu Izurelu

¹⁰Ọ bụru l'apha, kwe Jiowashi ụkporo apha l'apha iri l'ẹsaa, e -shi teke o beberu bụru eze ndu Jiuda; bẹ Jehowashi nwa Jiehowahazu byaru aburu eze ndu Ízurelu. Iphe, ọ nọru l'aba-eze bụ apha iri l'ishii lẹ Samériya.

¹¹O mee ẹjo-ememe l'ẹnya Chipfu. Ọ tọ haduru eme iphe-ẹji ono, Jierobowamu nwa Nebatu meru; mbụ ono, o meru ndu Ízurelu ẹphe mee ono. Iphe-ẹji ono bẹ o yeru ẹka l'ememe.

Anwụhu Jiowashi

¹²Iphe ọzo, nwụgbaaru nụ lẹ teke Jiowashi bụ eze; mę iphemiphe, o meru; mę ọkpehu iya, o gude tsoo Amazaya, bụ eze ndu Jiuda ọgu; bẹ e dekotaru l'ẹkwo-akọ ndu eze ndu Ízurelu.

¹³Ọo ya bụ; Jiowashi nwụhu lapfushia nna iya phez; e lia ya l'ẹka e liru ndu eze ndu Ízurelu lẹ Samériya. Jierobowamu, bụ nwa iya bya anọdu l'aba-eze nọchia ẹnya iya.

Anwụhu Elayisha

¹⁴Lẹ teke iphe-ememe, bụ iya mechaaru gbua Elayisha gudeshiru iya ike bẹ Jiowashi, bụ eze ndu Ízurelu jeru iya ajiji. O rwua bya araaha ẹkwa l'iphu iya sụ: “Nna mu-e! Nna mu-e! Gube onye bụ ugbo-inya; bya aburu ọ-gba-l'inya-ọgu ndu Ízurelu!”

¹⁵Elayisha sụ iya: “Wota uta yee apfu.” Jiowashi bya ewota iya.

¹⁶Elayisha bya asụ eze ndu Ízurelu ono: “Seta apfu ono!” Ọ bya eseta iya. Elayisha bya atụ-kobe eze ono ẹka l'ẹka nkiya.

¹⁷Elayisha sụ iya: “gụhaa windo ọphu nọ laaru ọzo ẹnyanwu-awawa!” Ọ gụhaa ya. Elayisha sụ iya: “Gbaa apfu ono!” Ọ gbaa ya. Elayisha pfua sụ: “Ọwa-a bụ apfu Chipfu, e-gude lwụ-kpee! Ọo apfu, ee-gude lwụ-kpee ndu Arámu; kele ịi-lwụ ndu Arámu lẹ mkpukpu Afeku; mbụ woru phez saa ọsampfu.”

¹⁸Ọ sụkwa iya phọ: “wota apfu ono!” O wota iya. Ọ sụ eze ndu Ízurelu ono: “Wata iya asụ l'alị!” Ọ sụa ya ugbo ẹto; bya ahaa ya.

¹⁹O mee; ẹhu ghuahaa onye kẹ Chileke ono egbu; ọ sụ: “I gege asụ iya ugbo ise m'ọbu ugbo ishii; k'ọphu i gege alwụ-kpekwanu ndu Arámu jasụ ịi-mebyishikota phez. Ọle nta-a bụ ugbo ẹto kpoloko bẹ ịi-lwụ-kpe phez.”

²⁰Tọbudu iya bụ; Elayisha nwụhu; e lia ya. Ndu ojogu ọ-lwua-ọlaa, shi l'alị ndu Mówabu bẹ ezebatajẹ l'alị Ízurelu; mę a bahuepho l'apha ọphúú.

²¹O be teke o nweru ndu eli odzu; ẹphe bya amaru; ndu ojogu ọ-lwua-ọlaa ono bụwaru phereketeke; ẹphe parụ odzu nwoke ono tya l'ilu Elayisha. Odzu nwoke ono je edenyi l'okpu Elayisha; o teta bya anọdu ndzụ ọzo; gbeshi pfuru apfuru.

Ọgu ndu Ízurelu waa ndu Arámu

²²Hazelu, bụ eze ndu Arámu bẹ kpakotaru ndu Ízurelu ẹhu teke Jiehowahazu bụ eze.

²³Ọle Chipfu l'anọduje emeru ndu Ízurelu eze-iphe-ọma; aphuru phez obu-imemini; teme ọ ghakwaaru phez phọ iphu. Ọ bụru iphe, kparụ iya nụ bụ ọgbandzu ono, yee

Ébirihamu; me Áyizaku; waa Jiékoṗu gbaru ono. Byasụ ntanu-a be ọ to bụdu uche iya g'o mebyishia phe; ọzoo g'ọ chifu phe l'atatiṗu iya.

²⁴Teke Hazelu, bu eze ndu Aramu nwuhuru; be nwa iya, bu Benu-Hadadu byaru aburu eze nochia enya iya.

²⁵Ọ buru teke ono be Jiowashi, bu nwa Jiehowahazu tukoru mkpukpu le mkpukpu ono, Hazelu shi natakota nna iya, bu Jiehowahazu l'ogu ono naphutakota azu. Jiowashi lwu-kpekotaru iya ugbo eto; shi nno naphutakota mkpukpu ndu Izurelu ono azu.

2 Ndu eze 14

Teke Amazaya bu eze ndu Jiuda

(2Iphe 25:1-24)

¹Ọ be l'apha, kwe Jiowashi nwa Jiehowahazu apha labo, e -shi teke ọ wataru aburu eze ndu Izurelu; Amazaya nwa Jiowashi bya aburu eze ke ndu Jiuda.

²Ọ nowaru ukporo apha l'apha ise teke ọ wataru aburu eze. Iphe, ọ noru l'aba-eze buru ukporo apha l'apha tete le Jierusalemu. Epha ne iya bu Jiehowadinu. Eka ne iya obu shi bu Jierusalemu.

³Amazaya be meru iphe, pfuru oto l'enya Chipfu. Ole o to mebeduru iya g'ochooroke iya, bu Devidi meru. O mekotaerupho ge nna iya, bu Jiowashi meru.

⁴Obenu l'ọ to lwuduru eka aagwaje iphe ono; ndu Jiuda nodu anoduje egwe eja; bya akpo unwu-isensu oku l'eli eka ono.

⁵Ali-eze ono laepho Amazaya l'eka okpobe alala; o gbushia ndu-ozu iya ono, bu phe gburu nna iya teke ọ bu eze pho.

⁶Ole o to gbuduru unwegirima ndu mgbugbumadzu ono; kele o tsoru iphe ono, e deru lekwo ekemu Mosisu l'eka ono, Chipfu turu ekemu su: "Ndu nwuru nwa be e tee gbudu l'ugwo iphe, unwu phe metaru; ophu eegbukwapho unwegirima l'ugwo iphe, nna, nwuru phe nu metaru; onyenonu be aa-laje l'iphe-eji, o metaru."

⁷Ọo yebedua be gburu ndu Edomu unu ugbo ukporo l'ise le nsuda ali Unu; bya alwuta mkpukpu Sela l'ogu; woru iya gube Jioikutelu. Ọ buru epha ono be ọza byasụ ntanu-a.

⁸Tobudu iya bu; Amazaya bya ezia ozi g'e je ezia eze ndu Izurelu, bu Jiowashi nwa Jiehowahazu mbu nwanwa Jiehu; su iya: "Bya g'anyi le ngu zugbabe ogu."

⁹Jiowashi, bu eze ndu Izurelu ziphu Amazaya, bu eze Jiuda ozi azu su: "Oshi uke, du l'ubvu ubvu Lebanonu be ziru oshi sida, dukwapho l'ubvu ubvu Lebanonu su iya: 'Kena nwatibe mu ke nwoke nwada ngu g'ọ luru.' Tobudu iya bu; anu-egbudu, bu l'ubvu ubvu Lebanonu ono ghatajephho; ọ zo oshi ukèè ono pyaapya.

¹⁰I lwu-kpeanaru ndu Edomu; i nodu ekuanaa onwongu. Nodule-a l'ibe ngu ku onwongu; k'alwu-kpe, i lwu-kperu. ? Bu gunu be iime g'i kpataru onwongu opfu, e-me g'unu le ndu Jiuda daa?"

¹¹Ole Amazaya ta ngaduru iya nchi. Oo ya bu; Jiowashi, bu eze ndu Ízurelu chita ndu ojoḡu iya jeshia; ephe l'eze ndu Jiuda, bu Amazaya je aghaa ya le mkpukpu Betu-Shemeshi, no l'ali Jiuda.

¹²Ndu Ízurelu lwu-kpee ndu Jiuda; mee phe; ephe gbaa nanu nanu lashichaa ibe phe.

¹³Jiowashi, bu eze ndu Ízurelu bya egude Amazaya nwa Jiowashi; mbu nwanwa Éhazaya; mbu eze ndu Jiuda le mkpukpu Betu-Shemeshi. O jekwapho Jierusalemu je enwutsushia igbulo Jierusalemu; a -gbe le Onu-abata Ifuremu; je erwua l'onu-abata Mgbureku. Eka o nwutsuru be ogologo iya rwuru unu nkwo-eka.

¹⁴O chitakota mkpola-ododo; me mkpola-ochaa; mewaro ivu, o humaru l'eze-ulo Chipfu; me ophu du l'eka eedobeje eku l'ulo eze. O chitakwapho ndu a tu-chiru atu-chi lasha Sameriya.

¹⁵Iphe, nwugbaberu nu teke Jiehowashi bu eze; mbu iphe, o meberu; me ehuka ehuka, o mekotaru; waa ge yee Amazaya, bu eze ndu Jiuda gude l'wua oḡu; be e dekotaru l'ekwo-ako ndu eze ndu Ízurelu.

¹⁶To budu iya bu; Jiehowashi nwuhu lapfushia nna iya phe; e lia ya l'eka eelije ndu eze le mkpukpu Sameriya. Oo ya bu; Jierobowamu, bu nwa iya buru eze nochia enya iya.

¹⁷Amazaya, bu nwa Jiowashi; mbu eze ndu Jiuda bya anofua apha iri l'ise; ge Jiowashi nwa Jiehowahazu, bu eze ndu Ízurelu nwuhuchaaru.

¹⁸Iphe ozo, Amazaya megbaberu be e dekotaru l'ekwo-ako, ndu eze ndu Jiuda.

¹⁹Le Jierusalemu be a no gbaaru Amazaya ejo-idzu; o gbalaa lasha mkpukpu Lakishi. Ephe ye ndu jepfuru iya le Lakishi l'eka ono je egbua ya.

²⁰Ephe gude inya palata iya bya elia le Jierusalemu l'eka e liru nna iya phe le mkpukpu Dévidi.

²¹Ndu Jiuda l'ophu wofuta Azariya, bu onye nowaru apha iri l'ishii mee ya eze l'ozo nna iya, bu Amazaya.

²²O buru Azariya ono mechaaru; kpukwaa mkpukpu Elatu woru iya nu-phu ndu Jiuda azu ge Amazaya nwuhuchaaru lapfushia nna iya phe.

Jierobowamu k'ebbo bu eze ndu Ízurelu

²³O be l'apha, kwe Amazaya nwa Jiowashi apha iri l'ise, o shi butaru eze ndu Jiuda; Jierobowamu nwa Jiehowashi bya aburu eze ke ndu Ízurelu. Iphe, o noru l'aba-eze iya bu ukporo apha labo l'apha lanu le Sameriya.

²⁴O mee ejo-ememe l'enya Chipfu. O to haduru eme iphe-aji ono, Jierobowamu nwa Nebatu meru; mbu ono, o meru ndu Ízurelu mee ono.

²⁵Oo ya be e shi l'eka; a nataphukota oke ali ndu Ízurelu azu; e -shi le mkpukpu Lebo-Hamatu jeye l'eze-enyimu nsuda Araba . O shi nno vua; mbu iphe ono, Chipfu, bu

Chileke kẹ ndu Ízurèlu shihawaa l'ònu onye-ozi iya, bụ Jiona nwa Amítayi pfua; mbụ onye mpfuchiru Chileke ono, shi lẹ mkpụkpu Gatu-Hefa.

²⁶Chipfu bẹ humawaru g'iphe-ehuka, ndu Ízurèlu eje habe shii; mbụ lẹ g'ephe ha bẹ o rwubekotaru eka; mbụ iphe ehuka ono; shita l'ohu je akpaa l'amadu; ophu o dudu onye a-gbaru pẹ mkpu.

²⁷Ole eshinu Chipfu ta asuduru lẹ ya e-me g'epha ndu Ízurèlu chihu lẹ mgboko-a bẹ o shi l'eka Jierobowamu, bụ nwa Jiowashi dzota pẹ.

²⁸Iphe, nwugbaberu nụ teke Jierobowamu bụ eze; mę iphe, o meeberu; mę ehuka ehuka, o mekotaru; waa k'ogu, o lwugbaberu; mewaro g'o shi nataphu mkpụkpu Damasukosu; mę mkpụkpu Hamatu azu l'eka ndu Jiuda woru nụ ndu Ízurèlu bẹ e dekotaru l'ekwo-akọ ndu eze ndu Ízurèlu.

²⁹Tobudu iya bụ; Jierobowamu nwuhu lapfushia nna iya pẹ, bụ ndu eze ndu Ízurèlu. Zekaraya, bụ nwa iya nwoke buru eze nochia enya iya.

2 Ndu eze 15

Teke Azariya bụ eze ndu Jiuda

(2Iphe 26:1-5)

¹O be l'apha, kwe Jierobowamu ukporo apha l'apha esaa, e -shi teke o wataru aburu eze ndu Ízurèlu; Azariya nwa Amazaya bata l'aba-eze ndu Jiuda.

²O nowaru apha iri l'ishi teke o wataru aburu eze. Iphe, o noru l'aba-eze buru ukporo apha labo l'apha iri l'ebo lẹ Jierusalemu. Epha ne iya bụ Jiekolaya. Eka ne iya obu shi bụ Jierusalemu.

³Azariya bẹ meru iphe, pfuru oto l'enya Chipfu; egube ono, nna iya, bụ Amazaya meru.

⁴Obenu l'o to lwuduru eka aagwaje iphe; ephe nodu egweje eja l'eka ono; bya akpo unwu-isensu oku.

Ekpenta eme Azariya

(2Iphe 26:16-23)

⁵Chipfu bya aloru ekpenta tu eze ono; ekpenta ono mee ya jasụ mboku, o nwuhuru. O buru l'ulo iche. O buru Jiótamu, bụ nwa iya nwoke bẹ bụ onye-ishi l'ibe eze; buru iya bụ onye bụ ishi ndu alị ono.

⁶Iphe ozo Azariya megbaberu bẹ e dekotaru l'ekwo-akọ ndu eze ndu Jiuda.

⁷No iya; Azariya nwuhu lapfushia nna iya pẹ. E lia ya l'eka e liru nna iya pẹ lẹ mkpụkpu Dévidi. Jiótamu, bụ nwa iya nwoke buru eze nochia enya iya.

Zekaraya bụ eze ndu Ízurèlu

⁸O buru l'apha, kwe Azariya ukporo apha l'apha iri l'esato, e -shi teke o beberu bya aburu eze ndu Jiuda; bẹ Zekaraya nwa Jierobowamu; byaru aburu eze ndu Ízurèlu. Iphe, o noru l'aba-eze bụ onwa ishii lẹ Sameriya.

⁹Zekaraya mee ejo-ememe l'anya Chipfu gę nna iya phe. O to haduru eme iphe-eji, Jierobowamu nwa Nebatu meru; mbu iphe-eji ono, o meru ndu Izurelu mee ono.

¹⁰Oo ya bu; Shalumu nwa Jiabeshi gbaaru iya ejo-idzu; nodu l'iphu ndu Izurelu gbua ya; bya aburu eze nochia enya iya.

¹¹Iphe, nwugbaberu nu teke Zekaraya no be e dekotaru l'ekwo-ako ndu eze ndu Izurelu.

¹²Oo ya bu; iphe ono, Chipfu pfuru Jiehu vua; mbu iphe ono, o pfuru iya su: "Oshilokpa ngu bu phe a-nodu l'aba-eze ndu Izurelu; buru eze jeye l'ogbo k'eno."

Shalumu bu eze ndu Izurelu

¹³Shalumu nwa Jiabeshi bya aburu eze l'apha, kwe Uzaya ukporo apha l'apha iri le tete, e -shi teke o beberu bya aburu eze ndu Jiuda. Iphe, o noru l'aba-eze bu onwa lanu le Sameriya.

¹⁴Menahemu nwa Gadi bya eshi le mkpukpu Tiza jeshia Sameriya. O nodu le Sameriya l'eka ono tsoo Shalumu nwa Jiabeshi ogu; gbua ya; buru eze nochia enya iya.

¹⁵Iphe, nwugbaberu nu teke Shalumu bu eze; me ejo-idzu, o gbaru be e dekotaru l'ekwo-ako ndu eze ndu Izurelu.

¹⁶Teke onoya be Menahemu gbę le mkpukpu Tiza tsoo ndu mkpukpu Tifusa ogu; woru phe lwua; me ndu bukube phe nu; kele phe jikaru iya. O kpfunghicha unwanyi, du ime epho.

Menahemu bu eze ndu Izurelu

¹⁷O be l'apha, kwe Azariya ukporo apha l'apha iri le tete, e -shi teke o byaru aburu eze ndu Jiuda; Menahemu nwa Gadi bahu l'aba-eze ndu Izurelu. Iphe, o noru l'aba-eze bu apha iri le Sameriya.

¹⁸Menahemu mee ejo-ememe l'anya Chipfu. Teke o bu eze be o to haduru eme iphe-eji ono, Jierobowamu nwa Nebatu meru ono; mbu ono, o meru ndu Izurelu mee ono.

¹⁹Eze ndu Asiriya, bu Pulu bya achita ndu ogu zebata l'alı ndu Izurelu. Menahemu nu iya mkpola-ochaa, erwa iya du unu talentu labo l'ukporo talentu iri; g'o mee g'o noshia ike l'aba-eze iya.

²⁰O buru l'alı Izurelu be Menahemu shi wofuta okpoga ono. Ndu nweru iphe be o keshiru utu ono; onyenonu be o keru mkpola-ochaa, erwa iya du ukporo shekelu labo le shekelu iri nu; g'a chikobe nu eze ndu Asiriya. Oo ya bu; eze ndu Asiriya ono tugbua laphushia azu; ophu o to nodubaeduru l'alı ono.

²¹Iphe ozo, nwugbaberu nu teke Menahemu no; me iphe, o mekotaru be e dekotaru l'ekwo-ako ndu eze ndu Izurelu.

²²Menahemu kuru mgbenya ikpazu; o buru iya alapfu nna iya phe. Pekahaya, bu nwa iya buru eze nochia enya iya.

Pekahaya bu eze ndu Ízurelu

²³O be l'apha, kwe Azariya ukporo apha labo l'apha iri, e -shi teke o beberu buru eze ndu Jiuda; Pekahaya nwa Menahemu bahu l'aba-eze ndu Ízurelu. Iphe, o noru l'aba-eze bu apha labo le Sameriya.

²⁴Pekahaya be meru ejo-ememe l'enya Chipfu. O to haduru eme iphe-eji ono, Jierobowamu nwa Nebatu meru ono; mbu ono, o meru ndu Ízurelu ephe mee ono.

²⁵Onye-ishi ndu ojogu Pekahaya, epa iya bu Peka nwa Remalaya gbaaru iya ejo-idzu; gbata ukporo umadzu labo l'iri le Giladu; ephe tsoru iya je etsoo Pekahaya ogu l'eka a kpuru o shihu ike l'ulo-eze le Sameriya; ephe gbua ya; gbukwapho Agobu; me Ariye yeru iya. Oo ya bu; Peka gbua Pekahaya; buru eze nochia enya iya.

²⁶Iphe ozo, nwugbaberu nu teke Pekahaya bu eze; me iphe, o mekotaru be e dekotaru l'ekwo-akwo ndu eze ndu Ízurelu.

Peka bu eze ndu Ízurelu

²⁷O be l'apha, kwe Azariya ukporo apha labo l'apha iri l'ebo, o byaru aburu eze ndu Jiuda; Peka nwa Remalaya bahu l'aba-eze ndu Ízurelu. Iphe, o noru l'aba-eze ono bu ukporo apha le Sameriya.

²⁸Peka meru ejo-ememe l'enya Chipfu. O to haduru eme iphe-eji ono, Jierobowamu; nwa Nebatu meru; mbu ono, o meru ndu Ízurelu mee ono.

²⁹Teke Peka bu eze ndu Ízurelu be Tigulatu-Pilesa, bu eze ndu Asiriya nataru mkpukpu Ijionu; me mkpukpu Abelu-Betu-Maka; waa mkpukpu Jianowa; me mkpukpu Kadeshi; me mkpukpu Hazo. O natakwarupho ali Giladu; me ali Galili, bu iya bu ali ndu Nafutali l'ophu; kpukoo ndu eka ono le ndzu lashia Asiriya.

³⁰O be l'apha, kwe Jiotalamu nwa Uzaya ukporo apha, e -shi teke o beberu bya aburu eze ndu Jiuda; Hosiya nwa Ela gbaaru Peka nwa Remalaya ejo-idzu; woru iya gbua; buru eze nochia enya iya.

³¹Iphe ozo, nwugbaberu nu teke Peka bu eze; me iphe, o mekotaru be e dekotaru l'ekwo-akwo ndu eze ndu Ízurelu.

Teke Jiotalamu bu eze ndu Jiuda

(2Iphe 27:1-9)

³²O be l'apha, kwe Peka nwa Remalaya apha labo, e -shi teke o wataru aburu eze ndu Ízurelu; Jiotalamu nwa Uzaya bahu l'aba-eze ndu Jiuda.

³³Iphe, o noru bu ukporo apha l'apha ise teke o wataru aburu eze. Iphe, o noru l'aba-eze le Jierusalemu bu apha iri l'ishii. Epa ne iya bu Jierusha nwada Zadoku.

³⁴Jiotalamu meru iphe, pfuru oto l'enya Chipfu egube ono, nna iya, bu Uzaya meru.

³⁵Obenu l'o to lwuduru eka aagwaje iphe. Ndu Jiuda nodu egweje eja; bya akpo unwu-isensu oku l'eka ono. Jiotalamu bu iya kpukwaru onu-abata ono, eeshije abahu l'eze-ulo Chipfu ono, bu iya bu Onu-abata Imeli.

³⁶Iphe ọzo, Jiótamu megbaberu bẹ e dekotaru l'ẹkwo-akọ ndu eze ndu Jiuda.

³⁷Oo teke ono bẹ Chipfu byaru awata ezi Rezinu, bụ eze ndu Arámu; mę Peka nwa Remalaya g'ẹphe je etsoo ndu Jiuda ọgu.

³⁸No iya; Jiótamu nwuhu lapfushia nna iya phe; e lia ya l'ẹka e liru nna iya phe le mkpukpu Dévidi, bụ ochooroke iya. Nwa iya, bụ Éhazu bya aburu eze nochia ęnya iya.

2 Ndu eze 16

Teke Éhazu bụ eze ndu Jiuda

(2Iphe 28:1-4)

¹O be l'apha, kwe Peka nwa Remalaya apha iri l'ęsaa, e -shi teke ọ wataru aburu eze; Éhazu nwa Jiótamu bya aburu eze ke ndu Jiuda.

²Éhazu bẹ nowaru ukporo apha teke ọ wataru aburu eze. Iphe, ọ noru l'aba-eze le Jierúsalemu bụ apha iri l'ishii. O to meduru iphe, pfuru oto l'ęnya Chipfu, bụ Chileke iya ęgube ochooroke iya, bụ Dévidi meru.

³O tsoru ẹka ndu eze ndu Ízurelu. O kpọru nwa iya nwoke oku gude gwee ęja, bụ iya bụ ębyi ono, ọha ono, Chipfu chifuru l'iphu ndu Ízurelu shi anọduje eme ono.

⁴O gweru ęja; kpoo unwù-isensu oku l'ẹka aagwaje iphe; mę l'úbvú úbvú; mękpoo le mkpula mkpula oshi, jakashiru ajakashị.

⁵Tobudu iya bụ; Rezinu, eze ndu Arámu; mę Peka nwa Remalaya, eze ndu Ízurelu bya ęje ọgu le Jierúsalemu; ẹphe kepheta Éhazu; ọle ẹphe ta alwu-kpeduru iya.

⁶Ọ buru teke ono bẹ eze ndu Edomu lwuta-phuru mkpukpu Ilatu azu nu ndu Edomu. O chishikotaru ndu Jiuda le mkpukpu Elatu ono; ndu Edomu bya ebuchishia ya byasu ntanu-a.

Éhazu arwo n-yemęka l'ẹka ndu Asiriya

(2Iphe 28:16-21)

⁷Oo ya bụ; Éhazu bya ezia ndu-ozu g'e je ezia Tigulatu-Pilesa, bụ eze ndu Asiriya su: “Mu bụ onye-ozu ngu; teme mu buru nwa ngu; byanu bya anafuta mu l'ẹka eze ndu Arámu; mę l'ẹka eze ndu Ízurelu, bụ ndu etso mu ọgu.”

⁸Éhazu bya achikoo mkpola-ochaa; mę mkpola-ododo, du l'eze-ulo Chipfu; mę ophu du l'ulo ẹku l'ibe eze nu g'a nu eze ndu Asiriya onoya.

⁹Eze ndu Asiriya bya ekweta iphe, Éhazu rworu iya; chita ndu ojogu iya ẹphe wuru jeshia Damasukosu je alwuta iya; kpukoo ndu bu l'ẹka ono le ndzu lashia ali Kiru; bya eworu Rezinu gbua.

¹⁰Noo ya; eze, bụ Éhazu tugbua jeshia Damasukosu ge ya je ahuma Tigulatu-Pilesa, bụ eze ndu Asiriya. O jerwua; bya ahuma oru-ngweja le Damasukosu; o woru ophu du ęgube ono see esese nu g'e wolaaru Uraya, bụ onye uke; dekota ugbugba iya; mę ęgube, ee-gude kpua ya woru nu iya.

¹¹Oo ya bu; Uráya, bu onye uke ono kpua oru-ngweja; mbu ophu dupeho g'ono, Éhazu shi Damasukosu nu iya ono. O kpu-gheru iya teme eze, bu Éhazu shi Damasukosu lwa.

¹²Eze bya eshi Damasukosu lwa; bya ahuma oru-ngweja ono. O bya ejerwua ya; bya egwee ngweja l'eli iya.

¹³O gweru ngweja, a kpokotaru oku; me ngweja-nri; me ngweja-mee; bya ephee mee anu, o gburu ke ngweja-ehuguu l'eli oru-ngweja ono.

¹⁴Oru-ngweja ono, e gude onyirubvu mee, shi nodu l'iphu Chipfu ono be o pafutaru l'ataphu ulo ono; mbu ono, du le mgbaka oru-ngweja ono, a kpuru k'ophuu; yele eze-ulo Chipfu; woru iya dobe l'uzo isheli oru-ngweja ono, o kpuru ono.

¹⁵No iya; eze, bu Éhazu bya aturu Uráya, bu onye uke ekemu su: "Oo l'eli oru-ngweja-a, a kpuru k'ophuu-a be ii-gweje ngweja-akpo-oku, eegweje l'utsu; gwee ya ngweja-nri, eegweje l'uzenyashi; me ngweja-akpo-oku; waa ngweja-nri, shi eze l'eka; me ngweja-akpo-oku, shi ndu ali-a l'eka; me ngweja-nri phe; me ngweja-mee phe. Nokwapho g'ii-pheje iya mee anu, ngweja-akpo-oku; me mee anu, e gude gwee ngweja ozo. Oru-ngweja ono, e meru l'onyirubvu ono be mu e-jeje akpata ishi iphe."

¹⁶Uráya, bu onye uke ono mekota iphe, eze, bu Éhazu kakotaru iya g'o mee.

¹⁷Eze, bu Éhazu bya akpokashia iphe ono, e swebegbaru le mgbureku mgbureku ogba-kperekpere pho; pashikwaapho eze gbumugbamu, shi nodugbaa ya l'eli. O pafukwarupho eze durongu mini pho, e doberu l'eli oke-eswi, a kpuru l'onyirubvu pho; mbu ono, shi nodu iya le mkpula ono; woru iya tu-kobe l'eli mkpuma.

¹⁸O gude ge ya mee iphe, a-du eze ndu Asiriya ree l'obu pafu eka oshi-eze atu-kojeru; bya agu-chia eka eze eshije abahu l'eze-ulo Chipfu.

Anwuhu Éhazu (2Iphe 28:26-27)

¹⁹Iphe ozo, Éhazu megbaberu be e dekotaru l'ekwo-ako ndu eze ndu Jiuda.

²⁰No iya; Éhazu nwuhu lapfushia nna iya phe; e lia ya l'eka e liru nna iya phe le mkpukpu Dévidi. Hezekaya, bu nwa iya nwoke buru eze nochia enya iya.

2 Ndu eze 17

Hosiya bu eze ndu Izurelu

¹O be l'apha, kwe Éhazu apha iri l'ebo, e -shi teke o byaru aburu eze ndu Jiuda; Hosiya nwa Ela bahu l'aba-eze ndu Izurelu. Iphe, o noru l'aba-eze ono buru apha tete le Sameriya.

²Hosiya be meru ejo-ememe l'enya Chipfu. Iphe o bupeho kpoloko bu l'ejo-iphe, o meru te erwuduru ge ke ndu vuhawa iya uzo buru eze l'ali Izurelu.

³Shalumanesa, bu eze ndu Asiriya bya ejepfu Hosiya ogu; je alwu-kpee ya. Hosiya bya awata iya ejeru ozi; bya ataha akiriko nahaa ya.

⁴Eze ndu Asiriya bya amaru lẹ Hosiya achiru iya ẹjo-idzu; kele Hosiya ziru ndu-ozu g'ephe je ezia So, bu eze ndu Ijiputu g'o yetaru iya ẹka; ophu o tuedu akiriko anu eze ndu Asiriya egube ono, o shi atuje iya aphagapha ono. Oo ya bu; eze ndu Asiriya gude Hosiya tu-chia lẹ mkporo.

⁵No iya; eze ndu Asiriya chita ndu ojogu iya ephe zebata l'ali Izurelu l'ophu; ephe wuba lẹ Sameriya kephee ya apha eto.

⁶O buru l'apha, kwe Hosiya apha tete, e -shi teke o bataru l'aba-eze; be eze ndu Asiriya lwutaru Sameriya; kpukoo ndu Izurelu lẹ ndzu chita lashia Asiriya; je edobe phe ephe buru lẹ mkpukpu Hala; waa l'uzo enyimu Habo lẹ mkpukpu Gozanu; bya achita ndu ophu o chitaru dobe; ephe buru lẹ mkpukpu lẹ mkpukpu, du l'ali Midiya.

Iphe-ẹji, ndu Izurelu waa ndu Jiuda megbaberi

⁷Iphe, meru g'o gude o nwuru ndu Izurelu nno bu l'oo l'ephe mesweru Chipfu, bu Chileke phe; mbu onye ono, dufuturu phe l'ali Ijiputu l'eka Fero, bu eze ndu Ijiputu ono. Ephe baaharu agwa aja;

⁸teme ephe tsoru meahaa g'oha ono, Chipfu chishiru l'iphe ephebe ndu Izurelu ono shi eme; mbu meahaa iphe ono, ndu eze ndu Izurelu wobataru l'ali ono.

⁹Ndu Izurelu ono nodu anoduje l'edomi eme Chipfu, bu Chileke phe iphe, apfuduru-oto. Lẹ mkpukpu lẹ mkpukpu phe be ephe kpushiru ẹka aagwaje iphe dobegbaaru onwophe. Ephe kpushiru iya lẹ mkpukpu lẹ mkpukpu, hagbaa nwanshi je akpaa lẹ mkpukpu, a kpuru; o shihu ike.

¹⁰L'ubvu ubvu, nogbaa l'ali ono; me lẹ mkpula mkpula oshi, jakashiru ajakashu be ephe dobekotaru agwa; kpobegba itso Ashera.

¹¹Ephe nodu anoduje akpo unwu-isensu oku l'eka ono, aagwaje iphe ono; egube ono, ndu oha ono, Chipfu chifuru ephe shi akpoje iya ono. Ephe meru ẹjo-ememe gude kpatsua Chipfu ehu-eghu.

¹²Ephe baaru agwa aja; mbu iphe ono, Chipfu suru phe: "Unu be emekwa iphe, du nno-a!"

¹³Chipfu shi l'onu ndu mpfuchiru iya l'ophu; me ndu aphu ophulanya loo ndu Izurelu me ndu Jiuda ẹka lẹ nchi su: "Unu haa eme ẹjo-ememe, unu eme. Unu meje ekemu mu; me iphe, mu toru okpa iya; mbu ekemu ono, mu turu nu nna unu phe ono; mbu ono, mu shi l'eka ndu-ozu mu phe, bu ndu mpfuchiru nu unu ono."

¹⁴Obenu l'ephe ta angaduru nchi; ephe kwefuru ike; ge nna phe ono, te ekwetaduru ke Chipfu, bu Chileke phe ono.

¹⁵Ephe jikaru eme iphe, o toru okpa iya; me ogbandzu ono, yele nna phe gbaru ono; ephe kwefuru ike l'iphe, o nmaru phe okwa iya. Ephe tsoru abapheru agwa, adudu iphe, o yi aja; ephebedua l'onwophe bya abufuaru ndu ta adudu iphe, ephe yi. Ephe tsoru ẹka ndu oha ono, bupheru phe mgburugburu, bu iya bu ndu ono, Chipfu suru g'ephe te emekwa ge ndu ono eme ono.

¹⁶Ekemu, Chipfu, bu Chileke phe tukotaru phe l'ophu be epe jikakotaru. Epe kpuru agwa labo, du g'unwu oke-eswi doberu onwophe; bya edobekwapho itso Ashera; bya abaahaaru kpokpode; me Balu eja.

¹⁷Epe kpuru unwu phe unwoke; me unwada phe oku; gude gwee eja. Epe nodu anoduje ejekwapho l'eja; bya eme omamanshi. Epe woru onwophe togboru eme ejo-ememe l'enya Chipfu; gude nno akpatsu iya ehu-eghu.

¹⁸Oo ya bu; ndu Izurelu mee; ehu ghushiaha Chipfu eggu ike; o chifu phe l'iphu iya. Ndu ophu o haru kpoloko buru ndu okpa-ipfu Jiuda.

¹⁹Ophu ndu Jiuda edobekwarupho ekemu Chipfu, bu Chileke phe. Epe jekwapho eye eka l'eme iphe ono, ndu Izurelu wobataru ono.

²⁰Chipfu jikakota iphe, bu oshilokpa Izurelu; nua phe aphu bya enwuru phe nu ndu kwaru phe l'okwata; jeye o chifukota phe l'atatiphu iya.

²¹Teke Chipfu bufuerupho Izurelu l'onulo Dévidi be epe meru Jierobowamu nwa Nebatu eze phe. Jierobowamu mee ndu Izurelu epe haa etso Chipfu; bya akpata epe mee iphe-eji, paru eka apaa.

²²Ndu Izurelu be yekotaru eka l'eme iphe-eji ono, Jierobowamu meru ono. Epe ta ahaduru iya ememe;

²³jeye teke Chipfu chifuru ndu Izurelu ono l'iphu iya egube ono, o shihawaa l'onu ndu-ozu iya, bu ndu mpfuchiru pfua l'oo-du ono. Noo ya; a kpukoo ndu Izurelu l'ali phe chiru lashia Asiriya byasu ntanu-a.

Ndu ohozo byaru ebuchishia Samériya

²⁴Eze ndu Asiriya je achita nemadzu l'ali Babilonu; me le Kuta; me le Ava; me le Hamatu; me le Sefavayimu je edobe phe g'ephe buru le mkpukpu le mkpukpu, du l'ali Samériya l'ozo ndu Izurelu. Oo ya bu; epe nweru ali Samériya; toko mkpukpu, du iya nu buchishikota.

²⁵Le mbu teke epe bya eburu l'eka ono be epe te eshidu abajeru Chipfu eja. Oo ya bu Chipfu yenu oduma; o nodu l'echilabo phe; haru phe gbushiaha.

²⁶E pfuaru iya eze ndu Asiriya su: “Ndu-a i chitaru dobe g'ephe buru le mkpukpu le mkpukpu, du l'ali Samériya-a be ta amakwa nsu Chileke ali ono. O ye oduma; o nodu l'echilabo phe egbushi phe; kele epe ta amadu nsu Chileke ali ono.”

²⁷Tobudu iya bu; eze ndu Asiriya tua ekemu su: “Unu duta onye lanu le ndu-uke Chileke ono, unu kputaru l'eka ono; g'o je eburu eburu l'eka ono; g'o zia phe nsu Chileke ali ono.”

²⁸No iya; onye lanu le ndu-uke Chileke ono, epe shi le Samériya kputa jenu je eburu le mkpukpu Betelu; ziahaa phe g'ephe e-shi abajeru Chipfu eja.

²⁹Ole oha, nonu be metacharu agwa ali phe swibe onwophe le mkpukpu, epe bugbaa; woru iya dobecha le nwulo-agwa, ndu Samériya kpushiru l'eka epe agwaje iphe.

- 30**Ndu ophu shi l'ali Bábilonu metaru agwa Sukotu-Benotu; ndu ophu shi l'ali Kutu; meta agwa ophu bu Négalu; ndu ophu shi l'ali Hamatu meta agwa, bu Ashima;
- 31**ndu ophu shi le Ava meta agwa, bu Nibuhazu yee Tatau. Ndu ophu shi l'ali Sefavayimu meta agwa, bu Adurameleku; yee Anameleku. Ndu Sefavayimu ono be akpoje unwu phe oku gude gweeru agwa phe eja.
- 32**Ephe abajekwarupho Chipfu eja. Ole iphe, ephe meru bu l'oo ndu nkephe be ephe hotaru g'ephe gwajeru phe iphe le nwulo-agwa, dugbaa l'eka aagwaje iphe ono.
- 33**Ephe nodu abajeru Chipfu eja; obenu l'ephe abajekwarupho agwa phe eja l'uzo ndu ali eka ephe shi emeje.
- 34**Ephe emeepho g'ephe shi emejhawaa ono byasu ntanu-a. Ephe ta abaduru Chipfu eja; ophu ephe emedu iphe, o toru okpa iya; me omelali iya; ophu ephe emedu ekemu iya; waa ekemu ono, o turu nu oshilokpa Jiekopu, bu onye ono, o guberu Izurelu.
- 35**Teke Chipfu yee ndu Izurelu gbaru ndzu be o suru phe: “G'o to dukwa agwa ozo, unu a-baru eja; ozo phozeru iya; ozo jeeru iya ozi; ozo gwaa ya agwagwa.
- 36**Oo Chipfu, bu onye gude ike iya, paru eka; me okpehu iya dufuta unu l'ali Ijiputu be unu a-bajeru eja. Oo yebedua be unu e-phozejeru; o buru iya be unu e-gwejeru eja nu.
- 37**Unu kwabekwa enya meje iphe, mu toru okpa iya; me omelali mu; me iphe, mu suru g'e meje; waa ekemu ono, mu deru doberu unu ono jasuru asuru. Unu ta abajekwaru agwa eja.
- 38**Unu ta azohakwa ogbandzu ono, mu l'unu gbaru ono; ophu unu abajekwaru agwa eja.
- 39**Oo Chipfu, bu Chileke unu be unu a-bajechiaru eja. Oo ya bu onye a-nafuta unu l'eka ndu ohogu unu l'ophu.”
- 40**Ole ephe ta angaduru nchi; ephe kwaa l'eme g'ephe shi emejhawaa pho.
- 41**Noo ya; oha ono nodu abaru Chipfu eja; bya abakwarupho agwa nkephe eja. Unwu phe je akpaa le nwanwa phe buru ge nna phe meru bu g'ephebedua eme byasu ntanu.

2 Ndu eze 18

Teke Hezekaya bu eze ndu Jiuda

(2Iphe 29:1-2)

- 1**O be l'apha, kwe Hosiya nwa Ela apha eto, e -shi teke o wataru aburu eze ndu Izurelu; Hezekaya, bu nwa Ehazu bahu l'aba-eze ndu Jiuda.
- 2**O nowaru ukporo apha l'apha ise teke o wataru aburu eze. Iphe, o noru l'aba-eze le Jierusalemu buru ukporo apha l'apha tete. Epha ne iya bu Abi nwada Zekaraya.
- 3**Hezekaya be meru iphe, pfuru oto l'enya Chipfu egube ochoroke iya, bu Devidi meru.

⁴Ọ lwuru ẹka aagwaje iphe; bya akupyashia mkpuma, e doberu nsọ; bya egbutsushichaa itso Ashera. O tsupyashikwarupho agwo ono, Mosisu gudeje onyirubvu mee pho; kele jasụ le teke ono be ndu Izurelu shi akpojekwadu unwu-isensu oku anu iya. E shi ekuje agwo ono Nehushutanu.

⁵Hezekaya be dakoberu Chipfu, bu Chileke ke Izurelu. O to dudu onye eze ozo, dubaa g'oo ya le ndu eze ndu Jiuda g'ephe ha; mbu je akpaa le ndu ophu vu iya uzo buru eze; me ndu ophu tsotaru iya nu.

⁶Noo kele o turu Chipfu swiswia. O to tsonyadaru Chipfu o tsobuhu iya. O dobekotaru ekemu ono, Chipfu turu nu Mosisu ono.

⁷Chipfu swiru iya okpobe eswiru; k'ophu bu l'iphemiphe, o yeru ẹka l'abujeru iya pho upete. O kwefuru eze ndu Asiriya ike; ophu o to jeduru iya ozi.

⁸Ọ lwu-kperu ndu Filisitayinu; e -shi le mkpukpu, ha nwanshii je akpaa le mkpukpu phe, a kpuru; o shihu ike; mbu je akpaa le mkpukpu Gaza; yee mkpukpu, gbapheru iya mgburugburu.

⁹O be l'apha, kwe Hezekaya apha eno, e -shi teke o byaru aburu eze ndu Jiuda, bu iya bu apha, kwe Hosiya nwa Ela apha esaa, e -shi teke o bahuru l'aba-eze ndu Izurelu; Shalumanesa, bu eze ndu Asiriya jee ogu le Sameriya; je ekephee ya mgburugburu.

¹⁰A noepho apha eto; ephe naa mkpukpu ono. O buru l'apha, kwe Hezekaya apha ishii be a nataru Sameriya, bu iya bu apha, kwe Hosiya apha tete, e -shi teke o bahuru l'aba-eze ndu Izurelu.

¹¹Eze ndu Asiriya chita ndu Izurelu lashia Asiriya; je edobe phe le mkpukpu Hala; me l'uzo enyimu Habo le mkpukpu Gozanu; me le mkpukpu le mkpukpu, du l'ali Midiya.

¹²Iphe, kparu iphe o du nno bu le ndu Izurelu jikaru eme iphe, Chipfu, bu Chileke phe suru g'ephe mee; ephe mebyiru ogbandzu Chileke ono. Iphe, Mosisu, bu onye-ozu Chipfu pfukotaru phe be ephe ta angaduru nchi; ophu ephe emeduru iya.

Senakeribu eye ndu Jierusalemu ebvu

(2Iphe 32:1-19; Azá 36:1-22)

¹³Tobudu iya bu; o rwua l'apha, kwe eze, bu Hezekaya apha iri l'eno, o wataru aburu eze; Senakeribu, bu eze ndu Asiriya bya ogu l'ali ndu Jiuda; bya atuko mkpukpu phe g'o ha, bu mkpukpu, a kpushiru ike lwua lwuta.

¹⁴No iya; Hezekaya, bu eze ndu Jiuda bya ezia ozi g'e je ezia eze ndu Asiriya l'eka o no le mkpukpu Lakishi su: "Mu chowaru ngu opfu. Jiko laphuro azu. Iphe, i sukpoerupho ge mu pfua be mu a-pfu." Eze ndu Asiriya ono su Hezekaya, bu eze ndu Jiuda g'o nu iya mkpola-ochaa, erwa iya du ukporo talentu iri l'ise; yee mkpola-ododo, erwa iya du ukporo talentu le talentu iri.

¹⁵Oo ya bu; Hezekaya chitakota mkpola-ochaa, nokota l'eze-ulo Chipfu; me l'ulo eku ibe eze woru nu eze ndu Asiriya ono.

16Teke ono be Hezekaya kweshiru mkpola-ododo, o kweru le mgbo; me ophu o kweru l'okpa mgbo eze-ulo Chipfu woru nu eze ndu Asiriya ono.

17No iya; eze ndu Asiriya ono bya agbe le mkpukpu Lakishi zia umadzu eto, bu ndu-ishi ojogu iya; yeru phe ndu ojogu, du igwerigwe g'ephe jepfu eze, bu Hezekaya le Jierusalemu. Epe jerwua Jierusalemu; bya eje apfuru l'ishi mgba-mini okpuru uzo eli, du l'uzo ono, eeshije eje aka aasaje uwe.

18Epe zia g'e je ekuaru phe eze; o buru Eliyakimu nwa Hilikaya, bu onye-ishi l'ibe eze; waa Shebuna, onye edeje ekwo; waa Jiowa nwa Asafu, bu onye nkwakobe be lufutaru byapfutashia phe.

19Onye-ishi ndu ojogu ono bya asu phe: "Unu je akaru Hezekaya le-a: Wakwa iphe, o pfuru; mbu Okalibe eze, bu eze ndu Asiriya. O suru-a: ? Bu le gunu be i chiru nwupfu ophu i nweru kwee?"

20I suru l'i machawaru eregede ugu bya enweru ike, e gude alwu ugu. Obenu l'opfu ngu bu okorobo opfu. ? Bu onye be i dakoberu ekwefuru yebe eze ndu Asiriya ike?

21Lenu nta-a; o kwa ndu Ijiputu be i dakoberu; mbu Ijiputu ono, bu mgbawa-echara, abujeru: onye dakoberu iya nu; l'o yejashia ya aka meka iya iphe onoya. O kwa egube ono be Fero du; mbu eze ndu Ijiputu. O kwa nno bu g'o duru iphe, bukpo ndu dakoberu iya nu.

22Teke i sukwanuru mu l'oo Chipfu, bu Chileke unu be unu dakoberu; ? to budu Chipfu obu bu ophu Hezekaya lwuru aka aagwaje iya; bya emebyishia oru-ngweja iya; bya asu ndu Jiuda epe le ndu Jierusalemu g'ephe byaje abaarū oru-ngweja ono, du le Jierusalemu ono eja-a?

23"Byalekwa-a g'idzu buru unu le nnajiuphu mu, bu eze ndu Asiriya nanu. Mu akpuru unu inya ise kpee ngu; me o -buru l'ii-du ike yechaa ya ndu a-nodu agba iya nu.

24Odumeka; ? denu g'i riru l'ii-du ike kpafu l'iphu onye-ishi ndu ojogu nnajiuphu mu; m'obeta o buru onye enya kachaa alwalwa le ndu-ishi ndu ojogu iya; l'eka o bu ndu Ijiputu be i dakoberu g'ephe chie ngu ugbo-inya; chie ngu ndu agbaje inya-ogu?

25Ozo bu le-a; ? i dobesu l'o to budu Chipfu be mu no l'eka bya ugu l'eka-a ge mu mebyishia ya? O kwa Chipfu l'onwiya ziru mu ge mu bya ugu l'ali-a mebyishia ya."

26To budu iya bu; Eliyakimu nwa Hilikaya; yee Shebuna; waa Jiowa bya asu onye-ishi ndu ojogu ono-a: "Jiko gude opfu-ali ndu Aramu pfuru yeru anyibe ndu-ozu ngu; eshinu anyi anu iya ree. Te egudeshi opfu-ali ndu Jiuda pfuru yeru anyi; kele ndu no l'eli igbulu anukwa iya."

27Onye-ishi ndu ojogu ono su phe: "? Bu unu le nnajiuphu unu kpoloko be o du unu ge nnajiuphu mu ziru mu ge mu bya ezia ozi-a? Waawakwa. O kwa unu le ndu ono, no l'eli igbulu ono; mbu ndu ono, unu l'ephe e-mechaa ria nshi unu l'onu; ngua mamini, unu gboru be mu epfuru iya."

²⁸Onye-ishi ndu ojogu ono bya apfuru bya egude opfu ndu Jiuda bya arashia ya ike su: “Unu numakwa iphe, o pfuru; mbu Okalibe eze ono, bu eze ndu Asiriya!

²⁹Wakwa iphe, eze ndu Asiriya pfuru: Unu te ekwekwa ge Hezekaya dephua unu. O too dukwa ike adzota unu l'eka mu!

³⁰Ophu unu ekwekwa ge Hezekaya deta unu g'unu dakobe Chipfu; l'eka oopfuru unu asuje le Chipfu ta adukwa iphe, e-me g'o to dzota unu. Le mkpukpu-a taa lakwa l'eka eze ndu Asiriya.

³¹Unu ta angakwaru Hezekaya nchi; kele eze ndu Asiriya sukwaru g'unu wufutakwa wu-pfuta iya ge yele unu doshia. Oo ya bu g'onymonye le g'unu ha eria akpuru shi le vayinu iya; ria akpuru, shi l'oshi figu iya; bya angua mini, du le welu iya;

³²jasu teke ya a-bya eduta unu; lashia ali, du ge k'unu; mbu ali, ereshi du; me ophuu du iya; ali, nri du; teme opfu-vayinu du iya; oshi olivu du iya; bya aburu ali, manuwu du; k'ophu unu a-nodu ndzu; haa anwuhu. “Unu ta angakwaru Hezekaya nchi l'eka oodephu unu edephu asuje unu le Chipfu l'a-dzota-a unu.

³³? O dukporu oha ophu agwa ali phe nafutajewaru l'eka eze ndu Asiriya?

³⁴? Bu awe be agwa ndu Hamatu yee ke ndu Apadu no? Agwa ndu Sefavayimu; me ke ndu Hena; me ke ndu Iva; ? ephe no l'awe? ? Ephe duru-a ike dzoo ndu Sameriya l'eka yebe eze ndu Asiriya too?

³⁵? Bu agwa ole l'ime agwa ndu ali ono be duru ike nafuta ndu ali iya l'eka iya? ? Denu ge Chipfu e-shi du ike nafuta ndu Jierusalemu l'eka iya?”

³⁶Ndu Jiuda ono, oopfuru eyeru ono noduepho nggujungguji; ophu o dudu onye ophu pfuru opfu yeru iya; kele eze, bu Hezekaya turu ekemu su g'o to dukwa onye e-yeru iya onu.

³⁷Tobudu iya bu; Eliyakimu nwa Hilikaya, bu onye-ishi l'ibe eze; yee Shebuna, bu onye edeje ekwo; waa Jiowa nwa Asafu, bu onye nkwakobe tugbua; o buru phe jepfu Hezekaya. Ephe gbajachaa uwe phe agbaja. Ephe jerwua bya eje akporu iya iphe, onye-ishi ndu ojogu ono pfuru.

2 Ndu eze 19

Eepfu le Chileke a-dzota Jierusalemu

(Azá 37:1-37)

¹Eze, bu Hezekaya numaepho iphe ono; o ye eka l'uwe yebe eze; gbajaa ke tarara; bya achita uwe-aphu yee; o buru iya eje l'eze-ulo Chipfu.

²O bya ezia Eliyakimu, bu onye-ishi l'ibe eze; yee Shebuna, bu onye edeje ekwo; waa ndu-ishi le ndu-uke Chileke; g'ephe jepfu onye mpfuchiru Chileke ono, bu Azaya nwa Emozu. Ephe tuko yee uwe-aphu jeshia.

³Ephe je je asu iya: “Hezekaya suru-a: ‘Ntanu-a bukwa mboku, oke iphe-ehuka dapfutaru anyi; bya aburu mboku, aanu anyi aphu; bya aburu mboku, iphe-iphere jiru

anyi iphu. Ọ dukwa g'egube ime anọduje eme nwanyi; ọ ọto dudu ike nyia ọnyi nwua nwata obu-a.

⁴? Bụ onye maru; Chipfu, bụ Chileke ngu nūmaru iphe ono, onye-ishi ndu ojogu ono pfuru ono; mbụ onye ono, nnajūphu iya, bụ eze ndu Asiriya yeru g'ọ bya epfutoşhia Chileke, nọ ndzū ono; k'ophu bụ lẹ Chipfu a-barū iya mba l'opfu ono, yẹbe Chipfu, bụ Chileke ngu nūmaru ono. Ọo ya bụ; pfuru nū Chileke l'opfu ẹhu ndu ọphu phoduru nū.' “

⁵Ọo ya bụ; ndu ono, eze, bụ Hezekáya ziru ono bya abyapfuta Azáya;

⁶Azáya sū phẹ: “Unu je asū nnajūphu unu lẹ Chipfu sūru-a: ‘Ba atsukwa ebvu lẹ k'iphe ono, i nūmaru ono; mbụ opfu ono, ndu-ozī eze ndu Asiriya gude bya mu epfutoşhi ono.

⁷Hūma lẹ mu e-woru unme lanū ye iya l'ẹhu; k'ophu bụ l'ọo-nūma asūlasu; lashia alī phẹ; mu emee g'e gude ogu-echi gbua ya l'alī phẹ gẹdegede.’ “

⁸Onye-ishi ndu ojogu ndu Asiriya bya anūma l'eze ndu Asiriya lūfuwaru lẹ mkpukpu Lakishi; ọ lwatashia; je ahūma l'eze ndu Asiriya ono bẹ etsowa ndu Libuna ọgu.

⁹Noo ya; a bya ezia Senakeribu ozi lẹ Tirihaka, bụ eze ndu Kushi bẹ abyapfutawa iya ọgu; o zia ndu-ozī g'ephe je ezia Hezekáya sū:

¹⁰“Iphe, unu e-pfuru Hezekáya baa; mbụ eze ndu Jiuda: ‘B'ekwekwa gẹ Chileke ngu, bụ onye i dakoberu duphua ngu; l'ẹka oopfu lẹ Jierúsalemū ta alwadu l'ẹka mube eze ndu Asiriya.

¹¹Ọphu doru ẹnya bụ l'i nūmahawaru iphe, ndu eze ndu Asiriya meru ndu alī ọzo; mbụ l'o mebyishikotaru phẹ. ? Aa-nafuta-chia gubedua ọto?

¹²Mbū-a; ọhamoha ono, nna mu oche phẹ mebyishiru ono; ? agwa phẹ nafutaru phẹ-a ọto? Mbū agwa ndu Gozanu; yee ke ndu Haranu; waa ke ndu Rezufu; me ke ndu Eđenu, bụ ndu shi ọdu lẹ Telasa.

¹³? Bụ awe bẹ eze ndu Hamatu nọ nta-a; me eze ndu Apadu; me eze ndu mkpukpu Sefavayimu; ọzo eze ndu Hena; ọzo eze ndu Iva?’ “

¹⁴Tobudu iya bụ; Hezekáya nata ẹkwo-ozī ono l'ẹka ndu e ziru iya; bya eworu iya gua. Ọ bya abahū l'eze-ulo Chipfu bya eje eworu iya tosaa l'iphu Chipfu.

¹⁵Hezekáya bya epfuru nū Chipfu sū: “Gube Chipfu, bụ Chileke ke ndu Izurelu; onye sugaru l'aba-eze iya l'echilabo chierobu. Ọo ngu kpoloko bụ Chileke, nwekota alī-eze, du lẹ mgboko mgburugburu. Ọo ngu meru igwe bya emee eliphe.

¹⁶Ngabenu nchi gube Chipfu; nūma iphe, mu epfu. Sanaa ẹnya hūmakpodapho. Ngabekpodapho nchi; nūma opfu ono, Senakeribu ziru g'e gude bya epfutoşhia gube Chileke, nọ ndzū ono.

¹⁷“Gube Chipfu; ọ kwa eviya lẹ ndu eze ndu Asiriya mebyishiwaru ọhamoha; waa alī phẹ.

¹⁸Ephe chiwaru agwa ndu ono ye l'oku; o kepyashia; kele agwa phe obu ta adudu iphe, ozo o bu; gbahaa nku; yee mkpuma, bu iphe, nemadzu gude eka mee.

¹⁹Oo ya bu le-a; gube Chipfu, bu Chileke anyi; jiko dzonaa anyi l'eka eze ndu Asiriya; k'ophu ali-eze, dukota le mgboko l'ophu a-maru l'oo gubedua kpoloko; mbu gube Chipfu be bu Chileke.”

Azaya aphu ophuleny a gę Senakeribu e-gude daa

²⁰Tobudu iya bu; Azaya nwa Emozu bya ezia Hezekaya ozi su: “Chipfu, bu Chileke ke ndu Izurelu suru-a: ‘Iphe, i pfuru nu mu l'opfu ehu Senakeribu, bu eze ndu Asiriya be mu numawaru.

²¹Waa iphe, Chipfu pfuru l'opfu ehu Senakeribu baa: “ “Nwada Zayonu, nwoke teke ejepfuswee; ta adukwa iphe, o guberu ngu; teme o nodu aja ngu ewenu. Nwada Jierusalem ekwe l'ishi l'eka igba oso ndzu.

²²? Bu onye bu onye ono, i shi ephu iphu; bya epfutoshi iya ono? ? Bu onye be i shi atu uzu ekpu-a; mbu onye ono, i gude eku-onwonye voru enya ono? O kwa Onye du Nso ke Izurelu!

²³I ziru ndu-ozu ngu; ephe bya eburu iphu nyabe Nnajiuphu. I suru l'i gudewaa ikpoto ugbo-inya-ogu ngu nyirwuchaa mkpakponu ubvu ubvu. Mbu l'i nyirwuwaru mkpakponu, eka ubvu ubvu Lebanonu jeberu; bya egbutsushiwa oshi sida, du iya nu, bu ndu ophu kachaa etse ogologo; me oshi payinu iya ophu kachaa adu ubvu l'enya; bya ejeruwaa eka o kachaa aburu epfukala; me eka o kachaa aburu oswa, du ree.

²⁴Mbu l'i tuwaru welu l'ali ndu ohozo; bya angua ya mini; bya egudewaa obochi-okpa ngu zoo iphe, bu ngele, dukota l'ali Ijiputu tolitoli; jasu o tashihukota.

²⁵Su-a; ? o du gi ti numajeduru iya? Oo mu tubehawaru g'o du nno teke duhawaa enya. Mbu l'oo teke ndiche be mu chihawaru iya roo dobe. O buru nta-a be mu meru iya g'o vaa; mbu mee; i woru mkpakpu, a kpugbaaru o shihu ike mebyishia; o buru ikpo mkpuma.

²⁶O buru iya bu; ike bvu ndu bu iya nu; ephe buru ndu a turu eberebete; e meru iphe-iphere kpua phe. Ephe bya adu g'iphe, a kuru l'opfu; g'iphe, rwuru irwu k'ophuu; mbu du g'eswa, furu le mkpotsu ulo, anwu chigbushiru l'ebe adu g'o vutaberu l'eli.

²⁷Obenu le gubedua be mube Chileke maru eka i no. Mu maru teke jibata abata; maru teke itugbu atugbu; bya amaru g'iiba-taberu hanyihanyi ekpu mu.

²⁸Eshi ophu o bu mube Chileke be jibaru hanyihanyi; teme beebabee, iipfuru mu rwuwa mu nchi; be mu e-woru ikokoro mu dzube ngu l'imi; woru mkpurukpu-igwe mu ye ngu l'onu g'inya. Mu emee ngu g'i shia ophu i shiru laphu azu l'eka i shi.”

²⁹“A -bya le gubedua, bu Hezekaya; waa iphe, a-buru ngu iphe-ohubama baa: apha-a be ii-ri iphe, daru eda. O -be apha ozo l'i ria ophu shi l'ono futa. O -rwua l'apha k'eto iya; koo opfu kpata iphe, i koru iya. Gbaa opfu-vayinu; ria akpuru, e-shi iya nu.

³⁰Sụ-a; nwa ndu ono, a-phodu nụ l'onulo Jiuda bẹ a-gba ogbarabvu l'ime alị; mĩa mebyi l'eli mgboko;

³¹noo kele o nweru nwa ndu a-waa nụ lẹ Jierúsalem. Ikpoto ndu phoduru nụ e-shi l'úbvú Zayonu. Ọ bụru Chipfu, bụ Okalibe-Kakọta-Ike e-gude g'ọ phụ-beru iya l'ehu mee g'ọ dụ nno.

³²“Ọo ya bụ; waa iphe, Chipfu pfuru l'ehu eze ndu Asiriya baa: “Ọ tọ byadu a-bata lẹ mkpukpu-a; ophu ọ byadu agba g'ọ ka mma l'ọo apfụ l'ẹka-a. O too gudekpodanu iphe, eegbobutajẹ onwonye abyakube iya ntse; ophu ọ byadu ebvuphe iya ose-ọgu.

³³Ọo ọzo, o shiru bya bẹ oo-shi laa. Ọ tọ byadu abata lẹ mkpukpu ọwa abata ophu. Nokwa iphe, Chipfu eepfu.

³⁴Sụ-a; mu e-gude k'ẹpha mu; mę ke Dévidi, bụ onye-ozu mu gbobuta mkpukpu-a; dzọo ya.” ’ “

³⁵Tọbudu iya bụ; o rwua l'enyashi mbọku ono; ojozi Chipfu tugbuepho bya eje l'ẹka ndu ojogu Asiriya dọru; bya eje egbua ukporo unu umadzu ugbo ukporo l'eto l'unu umadzu labo l'ukporo umadzu iri l'ime ndu ojogu ono. E tehushia l'utsu; odzu zeshiwaa ke baarii.

³⁶Noo ya; Senakeribu, bụ eze ndu Asiriya tugbua; ọ bụru iya alaphu azu. Ọ laphushia azu lẹ Ninive je anodu.

³⁷O be ujiku lanu; ọ nodu agwa agwa iya, bụ Nisuroku; unwu iya, bụ Adurameleku; mę Shareza je egude ogu-echi gbugbua ya; gbaru lashia alị Araratu. Ọo ya bụ; Esahadonu, bụ nwa iya bụru eze nochia ẹnya iya.

2 Ndu eze 20

Iphe-ememe guderu Hezekáya

(Azá 38:1-8,21-22; 2Iphe 32:24-26)

¹A nonya iphe-ememe gude Hezekáya; k'ophu bụ l'ọ byawa anwuhu. Onye mpfuchiru Chileke, bụ Azáya nwa Emožu bya ejepfu iya je asu iya: Chipfu sụru-a: “Dozia ibe ngu ree; kele iibiyawa anwuhu; i tji kadu mma.”

²Noo ya; Hezekáya bya aghaa iphu l'uzo igbulọ pfuru nụ Chipfu sụ:

³Gube Chipfu; nyatanu ge mu bu-be onye gude ire-lanu; mę obu mu g'ọ ha tsoo uzu nkengu; mę ge mu gude meberu iphe, dụ ree l'ẹnya ngu. Hezekáya raa ẹkwa kpoo pfula pfula.

⁴Tọbudu iya bụ; temanu Azáya ghata oma-unuphu k'echilabo; bẹ Opfu Chipfu kparwutaru iya l'ehu bya asu:

⁵“Laphu azu je akaru Hezekáya, bụ onye-ishi ndibe mu lẹ Chipfu, bụ Chileke ke nna ngu, bụ Dévidi sụru-a: ‘Mu numawaru epfupfu, i pfuru nụ mu; bya ahumawaa ẹnyamini, shi ngu l'ẹnya. Mu e-me ngu g'i wekorohu. Lẹ mbọku k'eto bẹ ii-je l'eze-ulo Chipfu.

⁶Mu e-yekwafua apha iri l'ise le ndzu ngu. Ozo bu le mu a-nafuta ngu; nafuta mkpukpu-a l'eka eze ndu Asiriya. Mu e-gude k'epha mu; waa k'epha Dévidi ono, bu onye-ozu nkemu ono; gbaaru mkpukpu-a odzori.' “

⁷No iya; Azaya su: “Unu meta iphe oshi figu.” Ephe meta iya tufube Hezekaya l'ejonwo ono, phokashiru iya l'ehu ono; o wekorohu.

⁸Hezekaya bya ajia Azaya su: “? Bu gunu bu iphe-ohubama, e-goshi le Chipfu e-me-a ge mu wekorohu; teme le mu e-je l'eze-ulo Chipfu le mboku k'eto?”

⁹Azaya su: “Waa iphe-ohubama, Chipfu e-goshi ngu baa; g'i gude maru le Chipfu e-me-a iphe ono, o pfuru ono. Mbua; ? bu g'ononyo jeru laa l'iphu jeberu ntokpa iri? To ? bu g'o jeru laa azu jerwua ntokpa iri?”

¹⁰Hezekaya su: O dukwa nphe g'ononyo jeru laa l'iphu jeberu ntokpa iri; g'o jechiaro laa azu jeberu ntokpa iri.

¹¹Oo ya bu; onye mpfuchiru Chileke, bu Azaya bya araku Chipfu; Chipfu mee g'ononyo ono, shi jerwuwa ntokpa iri l'ulo-eli Ehazi; tsu-phu azu jeberu ntokpa iri.

Ndu ozi, shi Babilonu

¹²O buru teke ono be Merodaku-Baladanu; mbu nwa Baladanu, bu eze ndu Babilonu deshuru ekwo-ozu nu g'e je anu Hezekaya; bya eyekwaru iya ya pho iphe-oma g'e gude bya iya ajiji; kele o numaru l'iphe shi eme iya; o kawaa mma.

¹³Hezekaya nabata ndu ono, e ziru ozi ono; bya egoshi phe iphe, nokota l'ulo-eku iya; mbu goshi phe mkpola-ochaa; yee mkpola-ododo; me manu, eshi mkpo; me ngwogu iya; me iphe, bukota eku iya. O to dudu iphe, du l'ibe iya; ozoo iphe, du l'ali-eze iya l'opfu, o to goshiduru ndu ono; mbu Hezekaya.

¹⁴To budu iya bu; Azaya, onye mpfuchiru Chileke bya ejepfu eze, bu Hezekaya je ajia ya su: “? Bu awe be ndu owa-a shi bya? ? Bu gunu be ephe pfuru?” Hezekaya su iya: “Ephe shikwa aka du enya bya. Ephe shi Babilonu.”

¹⁵Azaya bya ajia ya su: “? Bu gunu be ephe humaru l'ibe ngu?” Hezekaya su iya: “Ephe tukokwaru iphemiphe, du l'ibe mu huma-gbua. O to dukwa iphe, du g'eku, mu nweru enweru, mu te goshiduru phe.”

¹⁶Noo ya; Azaya bya asu Hezekaya: “Numa opfu, shi Chipfu l'onu.

¹⁷O suru-a: Le mboku abyawaa teke iphemiphe, du l'ulo eze ngu; me iphe ono, nna ngu phe setaru dobe; o noo byasu nta-a a-buru iphe, ee-vuta lashia Babilonu. O to dudu m'opfu ee-wophodo. Noo iphe, Chipfu epfu.

¹⁸Teme unwu ngu unwoke, bu ndu a nwutaru ngu be aa-haru kpukaa; ephe eje aburu ndu anoduje eleta ibe eze ndu Babilonu enya.”

¹⁹Hezekaya su iya: “Opfu, i suru le Chipfu pfuru dukwaa ree.” Iphe, Hezekaya gude pfua nno bu l'o riru su: ? o kwa le nchi a-du-a doo nta-a; mbu l'o to byadu ememe nta-a, mu nokwadu ndzu-a.

Anwụhu Hezekáya

(2Iphe 32:32-33)

²⁰Iphe ọzo, Hezekáya megbabèru; mę ẹhuka ẹhuka, o mekọtaru; mekpoo g'o gude tụa okpuru; bya ebvua ọswa-mini, bu ẹka mini e-shije asọbata l'ime mkpukpu ono be e dekọtaru l'ẹkwo-akọ ndu eze ndu Jiuda.

²¹Oo ya bu; Hezekáya nwụhu lapfushia nna iya phe. Manáse, bu nwa iya bya aburu eze nochia ęnya iya.

2 Ndu eze 21

Teke Manáse bu eze ndu Jiuda

(2Iphe 33:1-20)

¹Manáse be nowaru apha iri l'ẹbo teke ọ wataru aburu eze. Iphe, ọ noru l'aba-eze le Jierúsalemu buru ukporo apha labo l'apha iri l'ise. Epha ne iya bu Hefuziba.

²O mee iphe, du eji l'ęnya Chipfu; ęyi, oha ono, Chipfu chifuru l'ataphu ndu Ízurelu ono shi eme; be yębedua mekọtakarupho.

³Eka ono, aagwaje iphe ono, nna iya, bu Hezekáya mebyishiru ono be o woru kpukwaa; bya edobegbaa ęnya ẹka aagwaje Balu; kpo be itso Ashera ęgube ono, Éhabu, shi buru eze ndu Ízurelu meru. O phozekwarupho kpokpode, nogbaa l'igwe; bya abakwaaru iya pho eja.

⁴Ọ kpushia ęnya ẹka aagwaje iphe l'eze-ulo Chipfu, bu iya bu ẹka ono, Chipfu pfuru su: Ọo Jierúsalemu be mu e-me g'ępha mu reje ire.

⁵L'oma-unuphu labo, du l'eze-ulo Chipfu ono be ọ kpushiru ęnya ẹka aagwaje kpokpode, nogbaa l'igwe.

⁶Ọ kporu nwa iya ke nwoke oku gude gwee eja. O meru mgbashi; gwoo obvu; bya ejeje l'aji l'eka ndu maa; me l'eka ndu aphu ophuleny. O meru ejo-iphe, paru ẹka l'ęnya Chipfu; shi nno kpatsua ya ẹhu-eghu.

⁷Ọ pyiru ntekpe Ashera woru iya je edobe l'eze-ulo Chipfu, bu ẹka ono, Chipfu suru Dévidi waa nwa iya, bu Sólomonu: “Ọo l'eze-ulo-a; me le Jierúsalemu, bu mkpukpu, mu hotaru l'ipfu ndu Ízurelu l'ophu be mu e-me g'ępha mu reje ire jasụ l'ojejoje.

⁸Ophu mu ta abyadu eme ge ndu Ízurelu shi l'ali ono, mu nuru nna phe ono hata okpa lufu alufu ọzo; m'ọ -buru-a l'ephe letaru ęnya emekota iphe, mu suru g'ęphe meje; bya emekota ekemu ono, Mosisu, bu onye-ozu mu turu nu phe ono.”

⁹Ole ndu Ízurelu ta angaduru nchi. Manáse be dusweru phe uto; k'ophu bu l'ephe meru ejo-iphe, ka ophu ndu oha ono, Chipfu mebyishiru l'iphu ndu Ízurelu megbabèru.

¹⁰Noo ya; Chipfu bya e -shi l'onu ndu-ozu iya, bu ndu mpfuchiru pfua su:

11“Eshi ophu Manáse, bu eze ndu Jiuda mewaru akpamara; bya emewaa ejo-ememe, ka ophu ndu Amoru, bu ndu vu iya uzo meru; bya emekwapho ge ndu Jiuda ye eka l'agwa nshi; shi nno mee iphe, du eji;

12be Chipfu, bu Chileke ke Izurelu suru-a: mu e-wota ejo-iphe bya edoberu ndu Jierusalemu me ndu Jiuda; mbu udu iya ophu bu onye numaru iya nu; nchi agbachaa ya anwirinwa.

13Mu e-wota iphe, mu meru ndu Sameriya; me iphe, mu meru ndibe Ehabu mee ndu Jierusalemu. Mu e-hucha ndu Jierusalemu egube ono, onye asa gbamugbamu ehuchaje iya kpube iya iphu ono.

14Ndu ophu phoduru nu l'okiphe mu ono be mu a-gwobe; woru phe ye l'eka ndu ohogu phe; g'a l'wua phe alwulwu; kwaa iphe phe l'okwata.

15Iphe, kparu iya nu buru l'ephe meru ejo-iphe l'enya nkemu; kpatsua mu ehu-eghu; e-shi mboku, nna phe shi l'ali Ijiputu lufuta bya asu ntanu-a.”

16Ophu ka njo buru le Manase be gbushiru ndu adudu iphe, ephe metaru; k'ophu bu le mee ochi ono tukoru Jierusalemu l'ophu jikota shita l'ishi iya ophuu rwua l'ishi iya ophuu. Ono je adakpuaru iphe-eji ono, o kpataru ndu Jiuda mee; shi nno mee ejo-iphe l'enya Chipfu ono.

Anwuhu Manase

(2Iphe 33:18-20)

17Iphe ozo, Manase megbaberu; me iphe-eji, o meshiru; be e dekotaru l'ekwo-akwo ndu eze ndu Jiuda.

18Oo ya bu; Manase nwuhu lapfushia nna iya phe; e lia ya le mgbabu ibe iya; mbu le mgbabu Uza. Amonu, bu nwa iya buru eze nochia enya iya.

Teke Amonu bu eze ndu Jiuda

(2Iphe 33:21-25)

19Amonu be nowaru ukporo apha l'apha labo teke o wataru aburu eze. Iphe, o noru l'aba-eze le Jierusalemu bu apha labo. Epha ne iya bu Meshulemetu nwada Haruzu. Eka ne iya shi bu mkpukpu Jiotuba.

20Amonu meru iphe, du eji l'enya Chipfu ge nna iya, bu Manase.

21O tsokotaru uzo, nna iya tsoru; mbu l'agwa, nna iya baru eja be o bakwarupho eja bya ephozejegbaaru phe.

22O paru Chipfu, bu Chileke ke nna iya phe haa; jika etso uzo ke Chipfu.

23Ndu ozi Amonu gbaaru iya ejo-idzu; woru iya gbua l'ibe iya.

24Ndu Jiuda bya eworu ndu ono, gbaru eze, bu Amonu ejo-idzu ono gbushikota. Ephe bya eworu Jiosaya, bu nwa iya mee eze nochia enya iya.

25Iphe ozo, Amonu megbaberu be e dekotaru l'ekwo-akwo ndu eze ndu Jiuda.

²⁶Èka e liru iya bu lẹ mgbabu Uza. Oo ya bu Jiosáya, bu nwa iya buru eze nochia enya iya.

2 Ndu eze 22

Teke Jiosáya bu eze ndu Jiuda

(2Iphe 34:1-2)

¹Jiosáya be nowaru apha esato teke o wataru aburu eze. Iphe, o noru l'aba-eze le Jierúsalemu buru ukporo apha l'apha iri le nanu. Epha ne iya bu Jiedida nwada Adaya. Èka ne iya shi bu lẹ mkpukpu Bozukatu.

²Jiosáya meru iphe, pfuru oto l'anya Chipfu. O tsokotaru uzo ochooroke iya, bu Dévidi tsoru. O to dudu ophu o mephodoru; me nanu.

A humaru ekwo ekemu

(2Iphe 34:8-28)

³O be l'apha, kwe eze, bu Jiosáya apha iri l'esato, o wataru aburu eze; o zia onye edeje ekwo, bu Shafanu, bu nwa Azalaya; mbu nwanwa Meshulamu g'o jee l'eze-ulo Chipfu. O ziru iya su:

⁴“Jepfu Hilikaya, bu onye-ishi ndu-uke Chileke; g'o gukota okpoga, e wobataru l'eze-ulo Chipfu; mbu okpoga, ndu ono, eche nche l'onu eze-ulo Chipfu nataru ndu nemadzụ.

⁵G'e woru okpoga ono ye l'eka ndu eleta enya l'ozi ono, eeje l'eze-ulo Chipfu; mbu g'ephe woru iya nu ndu ono, eje ozi l'eze-ulo Chipfu g'ephe gude kpukwaa ya;

⁶mbu ndu kapyinta; me ndu akpu ulo; me ndu edo eja ulo. Ephe egudekwa iya pho zua oshi; me mkpuma, a gbakposhiru agbakposhi, ee-gude kpukwaa eze-ulo ono.

⁷O to gbaduru g'a kpaa phe ishi g'ephe gude mephua okpoga ono; noo kele ephe bu ndu e gude ire phe eka.”

⁸Hilikaya, bu onye-ishi ndu-uke Chileke pfiaru Shafanu, bu onye edeje ekwo; su: “Mu humakwaru ekwo ekemu l'eze-ulo Chipfu.” O bya eworu ekwo ekemu ono nu Shafanu; o gua.

⁹Oo ya bu; Shafanu, bu onye edeje ekwo laphu azu je akaru eze; su: “Ndu ozi ngu be wotaakwaru okpoga obu, du l'eze-ulo Chipfu ye l'eka ndu eleta enya l'ozi ono, e je l'ulo Chipfu ono.”

¹⁰Shafanu, bu onye edeje ekwo bya agbe teke ono pfiaru eze su: “O nweru ekwo onye uke Chileke, bu Hilikaya nuru mu.” Shafanu bya eworu iya gua l'iphe eze.

¹¹Eze numaephe iphe, o gutaru l'ekwo ekemu ono; o gbajashia uwe yebe eze.

¹²O bya ekua Hilikaya, bu onye uke Chileke; me Ahikamu nwa Shafanu; me Akubo nwa Mayikaya; me Shafanu, bu onye edeje ekwo; me Asaya, bu onye-ozi eze su phe:

¹³“Unu je akpataru mu Chipfu ishi l'iswi ehu mu; me l'iswi ehu ndu-a; waa l'iswi ehu ndu Jiuda l'opfu l'opfu iphe-a, a gufutaru l'ekwo ono, a humaru ono. Noo kele oke

ẹhu-eghu Chipfu bẹ paakwaru ẹka; nọdu swiru anyi; kele nna anyi phe ta angaduru nchi l'iphe, du l'ekwo-a; ophu ephe emeduru iphe, e deru anyi l'ekwo ekemu ono.”

¹⁴Oo ya bu; Hilikaya, bu onye uke Chileke; me Ahikamu; me Akubo; me Shafanu; me Asaya jeshia ibe nwanyi, bu onye mpfuchiru Chileke, epa iya bu Huluda. Huluda be bu nyee Shalumu, nwa Tikuva; mbu nwanwa Hahasu. Shalumu bu onye eletaje uwe ndu-uke Chileke enya. Eka o bu bu le mkpukpu k'ebo le Jierusalemu.

¹⁵Nwanyi ono su phe: “Waa iphe, Chipfu, bu Chileke ke Izurelu pfuru baa: Unu je ezia onye ziru unu g'unu byapfuta mu le-a;

¹⁶le Chipfu suru-a: Mu a-byaakwa ewotaru mkpukpu Jierusalemu; waa ndu bu iya nu ejo iphe-ehuka; mbu egube ono, o du l'ekwo ekemu ono, eze ndu Jiuda guru ono.

¹⁷Eshi ophu ephe gwoberu mu; kpohaa unwu-isensu oku anu agwa; o buru iphe, ephe gude eka mee be ephe gude akpatsu mu ehu-eghu; be oke ehu-eghu mu a-noduepho ata pfupfufu g'oku l'ehu ndu eka-a; ophu e tee gbobotadu iya egbobuta.

¹⁸A bya l'ehu eze ndu Jiuda l'onwiya, bu onye ziru unu g'unu bya akpata ishi l'eka Chipfu; unu karu iya le Chipfu, bu Chileke ke Izurelu be suru-a: Le k'opfu ono, i numaru ono;

¹⁹be eshi ophu iphe ono rwuru ngu l'obu; i bya ewozeta onwongu ali l'iphu Chipfu teke ono, i numaru iphe, mu pfuru le k'eka-a; me ndu bu iya nu; mbu ke l'ephe a-buru mkpurupyata; buru ndu a turu onu; mbu i gude k'iphe ono gbajashia uwe ngu; raa ekwa l'iphu mu; be mu numawaru iphe, i pfuru. Noo iphe, Chipfu pfuru bu ono.

²⁰Su-a; mu e-me gi lapfu nna ngu phe; e-lia ngu jii. Enya ngu ta abyadu ahuma ejo iphe-ehuka ono, mu e-wopfuta mkpukpu eka-a ono.” Oo ya bu; ephe lwa bya akooru eze ge nwanyi ono pfuru.

2 Ndu eze 23

Jiosaya agbaphu ogbandzu Chipfu azu

(2Iphe 34:3-7,29-33)

¹Tobudu iya bu; eze bya ezia; e je ekuko ndu bu ogerenya ndu Jiuda; me ke ndu bu le Jierusalemu.

²Eze yele unwoke ndu Jiuda ono g'ephe ha; me ndu bu le Jierusalemu; me ndu-uke Chileke; me ndu mpfuchiru Chileke; mekpoo ndu Jiuda l'ophu; ndu upfu me ndu nta; bya atuko swiru jeshia l'eze-ulo Chipfu. O woru ekwo ogbandzu ono, a humaru l'eze-ulo Chipfu ono guru ye phe le nchi.

³O bya apfuru le mgboru itso eze-ulo ono; ephe le Chipfu gbaa ndzu; o kwee ukwe le ya a-nodu etso Chipfu; gude obu iya g'o ha; me ndzu iya g'o ha eme ekemu iya; me iphe, o suru g'e meje; me iphe, o toru okpa iya; shi nno eme iphe, ogbandzu ono pfuru, bukwa iya pho bu iphe, e deru l'ekwo ogbandzu ono. Ndu ono toko zua mgbede le k'ogbandzu ono.

⁴Noo ya; eze bya ezia Hilikaya, bu onye-ishi ndu-uke Chileke; me ndu-uke Chileke ophu no-tsoaru Hilikaya; me ndu eche onu eze-ulo Chipfu nche g'ephe je achishikota ivu, eegudeje abaru Balu eja; me ke Ashera; me ke kpokpode l'eze-ulo ono. Oo ya bu; eze je akpo ivu ono oku l'oma egu Kidironu l'azu Jierusalemu; kpota ntụ iya lashia Betelu.

⁵O chishikota ndu ono, ndu eze Jiuda yeru g'ephe kpoje unwu-isensu oku l'eka ono, aagwaje iphe, dugbaa le mkpukpu Jiuda ono; me ophu no-pheru Jierusalemu mgburugburu; mbu ndu ono, akpoje unwu-isensu oku nu Balu; me enyanwu; me onwa; me iphe, bu kpokpode, nonu ono.

⁶O phofu itso Ashera, a kpoberu l'eze-ulo Chipfu; je akpo oku le nsuda Kidironu l'azu Jierusalemu; gwee ya nukuru nukuru jeye o buru ntụ; kpota ntụ iya wushia l'eka eelije unwu-eliphe.

⁷O nwutsushia ulo-ebubu unwoke, agba ukpara, du l'eze-ulo Chipfu, bukwa iya pho bu eka unwanyi, anoduje akpa uwe, eewebeje Ashera.

⁸O bya achitakota ndu-uke, bu ndu shi le mkpukpu, dugbaa l'ali Jiuda; bya aturwua eka aagwaje iphe; mbu eka ono, ndu ono shi akpoje unwu-isensu oku ono; e -shi le mkpukpu Geba jeye le mkpukpu Biye-Sheba. O mebyishia eka aagwaje iphe ono, du l'onu-oguzo Jioshuwa, bu onye-ishi mkpukpu ono, bu ophu du l'ekicha m'i -nodu l'onu-abata mkpukpu ono.

⁹Ndu uke ono, shi egweje ngweja l'eka aagwaje iphe ono te etsojekwa egwe ngweja l'oru-ngweja Chipfu, bu ophu du le Jierusalemu; ole ephe etsojeru unwunna phe taa buredi, ekoduru ekoko.

¹⁰O turwua Tofetu, bu eka aagwaje iphe, du le nsuda unwu Hinomu; k'ophu o todu duedu onye a-kpojekwadu nwa iya nwoke; ozoo nwa iya nwanyi oku gude gwee eja nu Moleku.

¹¹O wofukota inya, ndu eze Jiuda nuru enyanwu, bu ophu no l'onu eka ono, eeshije abahu l'eze-ulo Chipfu; bya anwuru oku ye l'ugbo-inya, e shi dobekwarupho enyanwu iche; oku kepyashia ya. Eka ephe shi nodu bu l'oma eka ono, du le mgboru ulo ono, onye eleta ibe eze enya, bu Netanu-Meleku bu.

¹²O nwutsushia oru-ngweja ono, ndu eze ndu Jiuda kpuru l'ulo-eli Ehazu; nwutsushia oru-ngweja, Manase kpuru l'oma-unuphu labo, du l'eze-ulo Chipfu. O kupyashiru phe l'eka ono; kua ya pyaapya; chita iphiriba iya je enwuru ye le nsuda Kidironu.

¹³Eze turwukota eka aagwaje iphe, du l'uzo enyanwu-awawa Jierusalemu; lekutara ubvu ejo-ememe; mbu eka aagwaje iphe, Solomonu kpuru doberu Ashitoretu, bu ejo agwa ndu Sayidonu; me Kemoshi, bu ejo agwa ndu Mowabu; me Moleku, bu ejo agwa ndu Amonu.

¹⁴Jiosaya bya aku-kwoshikota ntekepe, du l'eka ono; gbukwoshia itso Ashera; woru okpu ndu nwuhuru anwuhu kube l'eka ono.

15O mebyishichaaru ọru-ngweja, ụ́ ụ́ ụ́ mkpụ́kpụ Bẹ́telu; mbụ́ ẹ́ka aagwajẹ́ iphe, Jierobowamu nwa Nebatu kpuru; mbụ́ onye ono, kpatarụ́ ndu Ízuru ụ́ mee iphe-ẹ́jị́ ono. Ọ́ru-ngweja; mẹ́ ẹ́ka aagwajẹ́ iphe bẹ́ o nwutsushikotaru. Ọ́ bya atụ́a ọ́ku l'ẹ́ka aagwajẹ́ iphe; tsupyashikota iya; ọ́ buru ntu; bya anwuru ọ́ku ye l'itso Ashera.

16No iya; Jiosáya bya achikaa ẹ́nya hụ́ma ilu, ụ́gbaa l'úbvú́ ono; o zia; e je avoshiaru iya ọ́kpụ́, ụ́ l'ilu ono; ọ́ kpọ́o ya ọ́ku l'eli ọ́ru-ngweja ono; shi nno turwua ya. Ọ́o ya bu; ọ́ vua; mbụ́ iphe ono, Chipfu shi l'onu onye mpfuchiru iya pfua ono.

17Noo ya bu; Jiosáya bya ajia sụ́: “? Bu gunu bẹ́ a kpuru ẹ́gube pho, mu ele ẹ́nya pho?” Ndu shi mkpụ́kpụ́ ono sụ́ iya: Ọ́ kwa ilu onye kẹ́ Chileke pho, shije alí́ Jiuda; bya epfua k'iphe-a, i meru ọ́ru-ngweja Bẹ́telu-a.

18Ọ́ sụ́ phẹ́: “Unu hakwaa ya; g'ọ́ tọ́ ụ́kwaa onye e-me ẹ́ka l'okpu.” Ọ́o ya bu; ephe parụ́ ọ́kpụ́ onye kẹ́ Chileke ono haa; mẹ́ k'onye mpfuchiru Chileke ọ́phu shi mkpụ́kpụ́ Samériya.

19Ọ́ buru gẹ́ Jiosáya mebyishiru ẹ́ka aagwajẹ́ iphe, ụ́kwota ụ́ mkpụ́kpụ́ Bẹ́telu bu g'o mebyishikwarupho ẹ́ka aagwajẹ́ iphe, nọ́gbaa ụ́ mkpụ́kpụ́ Samériya; mbụ́ ọ́phu ndu eze ndu Ízuru ụ́ kpushiru; shi nno kpatsụ́ Chipfu ẹ́hu-eghu ono.

20Ọ́ tuko iphe, bu ndu agwajẹ́ iphe l'ẹ́ka ono, aagwajẹ́ iphe ono gbushikota l'eli ọ́ru-ngweja ono; bya akpọ́o ọ́kpụ́ ndiphe ọ́ku l'eli ọ́ru-ngweja ono. E mechaa; ọ́ tughua laphushia azụ́ ụ́ Jierúsalemụ́.

A bọ́haaru ọ́bo Ojaghata ọ́zo

(2Iphe 35:1-19)

21Tọ́budu iya bu; eze bya epfuaru ndu Jiuda l'ophu sụ́: “Unu bọ́oru Chipfu, bu Chileke unu ọ́bo Ojaghata ẹ́gube e deru iya l'ẹ́kwo ọ́gbandzu.”

22Ọ́ tọ́ ụ́dudu ọ́bo Ojaghata ọ́phu a bọ́jewaru g'a bọ́ru ono. A ta abọ́jeduru iya nno teke ndu-ikpe shi buru ishi l'alí́ Ízuru ụ́; ọ́phu abọ́jeduru iya nno teke ndu eze nọ́ l'alí́ Ízuru ụ́; mẹ́ teke ndu eze nọ́ l'alí́ Jiuda.

23Ọ́ buru l'apha, kwe Jiosáya apha iri l'ẹ́sato, e -shi teke ọ́ wataru aburu eze bẹ́ a bọ́ru Chipfu ọ́bo Ojaghata ono ụ́ Jierúsalemụ́.

24Iphe ọ́zo, Jiosáya meru bu l'ọ́ chishikotaru ndu ejeje akpata ishi l'ẹ́ka maa; mẹ́ ndu mgbashi; tuko iphe, bu agwa; mẹ́ ẹ́jo akpamara, ụ́kwota ụ́ Jierúsalemụ́; mẹ́ l'alí́ ndu Jiuda l'ophu wofukota. Iphemiphe ono o mekotaru ono mee ọ́ vukota mbụ́ iphe, e deru l'ẹ́kwo ekemu ono, Hilikaya, bu onye uke Chileke hụ́maru l'eze-ulo Chipfu ono.

25Ọ́ tọ́ ụ́dudu eze ọ́zo, ụ́ gẹ́ Jiosáya ụ́ ndu vu iya ụ́zo buru eze; mẹ́ ndu ọ́phu, etso iya l'azụ́, bu onye gudeje obu iya g'ọ́ ha; mẹ́ ndzụ́ iya g'ọ́ ha; mẹ́ ike iya g'ọ́ ha ghaaru Chipfu iphu, bu iya bu g'ọ́ ụ́ l'ẹ́kwo ekemu Mosisu.

26Obenu l'oke ẹ́hu-eghu Chipfu, ata pfupfupfu, o kpukposhiru ndu Jiuda ono; bẹ́ ta tuzetaduru atụ́-zeta. Ọ́ buru iphe, kparu iya nụ́ bu iphemiphe ono, Manáse megbaberu gude kpatsụ́ iya ẹ́hu-eghu ono.

²⁷Oo ya meru iphe, Chipfu pfuru sụ: “Mu e-wofufua ndu Jiuda l'atatiphu mu egube ono, mu wofuru ndu Ízurelu; mu ajika Jierúsalemu, bu mkpukpu ono, mu hotaru; me eze-ulo ono, mu suru l'oo eka epha mu a-nodu ere ire ono.”

Anwuhu Jiosaya

(2Iphe 35:20—36:1)

²⁸Iphe ozo, Jiosaya megbaberu be e dekotaru l'ekwo-ako ndu eze ndu Jiuda.

²⁹O buru teke Jiosaya bu eze ono be onye eze ndu Ijiputu, bu Neko, chi ndu ojogu iya jeshia enyimu Yufuretisụ ge ya yetaru eze ndu Asiriya eka l'ogu. Eze, bu Jiosaya chita ndu ojogu nkiya tugbua jepfushia ya ogu. Eze ndu Ijiputu ono bu Neko humae ya pho bya eworu iya gbua le mkpukpu Megido.

³⁰Ndu ozi iya shi le Megido gude ugbo-inya palata odzu iya le Jierúsalemu; bya elia ya l'ilu nkiya. Ndu Jiuda wofuta nwa Jiosaya ke nwoke, epha iya bu Jiehowahazu; wua ya manu l'ishi; o buru eze nochia enya nna iya.

Teke Jiehowahazu bu eze ndu Jiuda

(2Iphe 36:2-4)

³¹Jiehowahazu be nowaru ukporo apha l'apha eto teke o wataru aburu eze. Iphe, o noru l'aba-eze le Jierúsalemu bu onwa eto. Epha ne iya bu Hamutalu nwada Jieremaya ke mkpukpu Libuna.

³²Jiehowahazu be meru iphe, du eji l'enya Chipfu ge nna iya oche phe meru.

³³Eze ndu Ijiputu bu Neko tu-chiru iya le mkporo le mkpukpu Ribula l'ali Hamatu; k'ophu bu l'o to nohedu le Jierúsalemu buru eze. O bya atu-buaru ndu Jiuda g'ephe pfua mkpola-ochaa, erwa iya du ukporo talentu ise; waa mkpola-ododo, erwa iya du talentu lanu.

³⁴O bya eworu Eliyakimu, bu nwa Jiosaya mee eze l'ozo nna iya, bu Jiosaya. O gbanwee epha iya gube iya Jiehowakimu. Oo ya bu; o dufu Jiehowahazu je edobe l'ali Ijiputu; o nodu l'eka ono nwuhu.

³⁵Jiehowakimu pfua Eze ndu Ijiputu bu Neko mkpola-ochaa; me mkpola-ododo ono, o tu-buru ndu Jiuda ono. O keru utu nuchaa ndu Jiuda g'ike beru onyemonye; shi nno gbata mkpola-ochaa; waa mkpola-ododo ono.

Teke Jiehowakimu bu eze ndu Jiuda

(2Iphe 36:5-8)

³⁶Jiehowakimu nowaru ukporo apha l'apha ise teke o wataru aburu eze. Iphe, o noru l'aba-eze le Jierúsalemu buru apha iri le nanu. Epha ne iya bu Zebida nwada Pedaya ke mkpukpu Ruma.

³⁷Jiehowakimu meru iphe, du eji l'enya Chipfu ge nna iya oche phe g'ephe ha meru.

2 Ndu eze 24

¹Ọ bụru teke ono, Jiehoyakimu bụ eze bę Nebukadineza, bụ iya bụ eze ndu Bábilonu jeru ọgu l'alị ono. Jiehoyakimu nọdu iya l'ẹka apha ẹto. A nonyaa; ọ ghachi kwefuahaaru iya ike.

²Chipfu bya zia ndu ojogu ọ-lwua-ọla, shi alị Bábilonu; mę kę ndu Arámu; mę kę ndu Mówabu; mę kę ndu Amonu; ẹphe byapfutashia Jiehoyakimu ọgu; mbụ g'ẹphe bya emebyishia Jiuda ẹgube ono, Chipfu shi l'ọnu ndu-ozu iya, bụ ndu mpfuchiru iya pfua l'ọo-dụ ono.

³Iphe, doru ẹnya bụ l'iphe ono, nwukotaru l'ẹhu ndu Jiuda ono; bę bụ Chipfu sụru g'ọ nwua; g'ọ shi nno wofu phę l'atatiphu iya l'opfu iphe-ẹji, Manáse megbabęru; męwaro iphemiphe, o meshiru;

⁴mękwapho kę ndu ono, adudu iphe, ẹphe meru, o gbukotaru; ọ tukoru Jierúsalemu l'ophu gbujia ndu te nwedu iphe, ẹphe meru egbuji. Ophu ọ dudu Chipfu ree; g'ọ gua nvụ l'ono.

⁵Iphe ọzo, Jiehoyakimu megbabęru bę e dekotaru l'ẹkwo-akọ ndu eze Jiuda.

⁶Ọo ya bụ; Jiehoyakimu nwuhu lapfushia nna iya phę. Jiehoyakinu, bụ nwa iya bụru eze nọchia ẹnya iya.

⁷Ophu Eze ndu Ijiputu eshibaędu l'alị iya fıtabaa; kęle eze ndu Bábilonu bę natakotaru alị, bụ k'eze ndu Ijiputu; e -shi lę nggele Ijiputu je akpaa l'enyimu Yufurétisu.

Teke Jiehoyakinu bụ eze ndu Jiuda

(2Iphe 36:9-10)

⁸Jiehoyakinu bę nọwaru apha iri l'ẹsato teke ọ wataru aburu eze. Iphe, ọ nọru l'aba-eze lę Jierúsalemu bụru ọnwa ẹto. Ẹpha ne iya bụ Nehushita; nwada Ẹlunatanu kę Jierúsalemu.

⁹Jiehoyakinu meru iphe, dų ẹji l'ẹnya Chipfu gę nna iya meru.

¹⁰Ọ bya erwua teke ono; ndu-ozu Nebukadineza, bụ eze ndu Bábilonu wuru byatashia Jierúsalemu bya ekepheta mkpukpu ono.

¹¹Nebukadineza l'onwiya bya abyapfuta ndu-ozu iya ono lę Jierúsalemu l'ẹka ẹphe kephetaru iya ono.

¹²Tọbudu iya bụ; Jiehoyakinu, bụ eze ndu Jiuda; mę ne iya; mę ndu-ozu iya; mę ndu-ishi iya; mę ndu eleta ibe iya ẹnya tuko woru onwophe nų eze ndu Bábilonu. Ọ bụru l'apha, kwe eze ndu Bábilonu apha ẹsato, ọ byaru aburu eze bę ọ kpọtaru Jiehoyakinu lę ndzụ.

¹³Ọ woshikọta ẹku, dų l'eze-ulo Chipfu; mę k'ulo-eze; bya evutakọta ivu ono, Sólomonu gude mkpọla-ododo mekọta, dobe l'eze-ulo Chipfu; teke ono, ọ bụ eze ndu Ízurelu ono. O vutakotaru iya ẹgube ono, Chipfu pfujehawaru opfu iya ono.

¹⁴Ọ kpukota ndu Jierúsalemu l'ophu lę ndzụ lashia alị Bábilonu; kputa ndu-ishi; mę ndu ojogu; mę ndu eme ọna; mę ndu akpu ọzu. Iphe, ẹphe dų bụ unu ọmadzu ugbo

ụkporo l'ise ; ọ kpua phẹ. Ọphu ọ dudu onye phoduru nu; gbahaa ndu kachaa aburu ndu ukpa l'alị ono.

¹⁵Nebukadineza bya eshi le Jierusalemu kpua Jiehoyakinu le ndzu laa alị Babilonu; kputa ne Jiehoyakinu; me unyomu iya; me ndu eleta ibe iya enya; me ndu ike du l'alị ono.

¹⁶Eze ndu Babilonu ono kputaru ndu ojogu, du unu iri l'esa l'ukporo ndu ojogu iri, bu ndu okpehu du; bya aburu ndu maru enya ogo; bya akputa unu umadzu labo l'umadzu ukporo iri, bu ndu eme ona; me ndu l'akpu uzu.

¹⁷Oo ya bu; o wota Matanaya, bu nwune nna Jiehoyakinu mee eze l'ozo Jiehoyakinu. O gbanwee epha iya gube iya Zedekaya.

Teke Zedekaya bu eze ndu Jiuda

(2Iphe 36:11-12; Jier 52:1-3)

¹⁸Zedekaya be nowaru ukporo apha l'apha lanu teke o wataru aburu eze. Iphe, o noru l'aba-eze le Jierusalemu buru apha iri le nanu. Epha ne iya bu Hamutalu nwada Jieremaya ke Libuna.

¹⁹O meru iphe, du eji l'enya Chipfu ge Jiehoyakimu meru.

²⁰O buru ehu-eghu, eghu Chipfu be iphe ono gude nwua l'ehu ndu Jierusalemu; me l'ehu ndu Jiuda; jeye teke o chifuru phe l'ataphu iya. Zedekaya nonyaa; bya ekwefuaharu eze ndu Babilonu ike.

2 Ndu eze 25

Adada Jierusalemu

(2Iphe 36:13-21; Jier 39:1-10; 52:3-11)

¹Tobudu iya bu; o be l'apha, kwe Zedekaya apha tete, o wataru aburu eze; l'abalị k'iri l'onwa iri; eze ndu Babilonu, bu Nebukadineza chita ikpoto ndu ojogu iya; epe byatashia Jierusalemu. Epe no-pee ya mgburugburu. Epe kepheta mkpukpu ono; bvuphee ya ose-ogu mgburugburu.

²Epe kepheta mkpukpu ono jeye l'apha, kwe eze, bu Zedekaya apha iri le nanu; e -shi teke o wataru aburu eze.

³O rwua abalı ke tete l'onwa eno; egu-ememe, du le mkpukpu ono kabaa njo; k'ophu ndu bu iya nu te nwehedu nri, epe e-ri.

⁴O rwua mboku ono; e tsukpoo igbulo mkpukpu ono. O be l'enyashi iya; onye eze, bu Zedekaya yele ndu ojogu l'ophu tsukahụ gbala. Eka epe shiru gbalaa bu l'onu oguzo ono, du le mgbaka igbulo labo ono, du le mgboru mgbabu eze. Teke ono be ndu ojogu ndu Babilonu kepheru mkpukpu ono mgburugburu. O buru eka epe shiru bu uzo nsuda Araba.

⁵Ole ndu ojogu ndu Babilonu chipyaberu eze, bu Zedekaya je egude iya le baswaa alị, du le Jieriko. Ndu ojogu iya buhaa ya tsukashihu.

⁶Ephe kpua eze, bu Zedekaya le ndzu; kpuru iya kpu-pfu eze ndu Babilonu le mkpukpu Ribula, bu aka o no nmaa ya ikpe.

⁷Ephe gbushia unwu Zedekaya; o nodu ele phe enya; a nodu egbushi phe. E mechaa bya aswoshia yebdua akpuru-enya; gude egbirigba, e meru l'onwirubvu tua iya mkporo kputa lashia Babilonu.

Eemebyishi Jierusalemu; me eze-ulo Chipfu

(Jier 52:12-23)

⁸O bya erwua g'onwa ise du l'abali esaa; l'apha, kwe Nebukadineza apha iri le tete, e - shi teke o wataru aburu eze ndu Babilonu; Nebuzaradanu, bu onye-ishi ndu ojogu, eche Nebukadineza nche; mbu onye-ozu eze ndu Babilonu ono jeshia Jierusalemu.

⁹O je atua oku l'eze-ulo Chipfu; me l'ulo-eze; me l'ulo, dukota le Jierusalemu; mbu l'ulo ndu oke amadu be o tukotaru oku.

¹⁰Ndu ojogu, onye-ishi ojogu ono, echeje eze nche chitaru je l'eka ono; be tsukposhiru igbulu, e gude kpu-pheta Jierusalemu mgburugburu.

¹¹Nebuzaradanu, bu onye-ishi ndu ojogu, echeje eze nche ono bya atuko iphe, bu ndu ophu phoduru le mkpukpu ono rwukoo lashia Babilonu; ephe le ndu lapfuru eze ndu Babilonu alafu; mekpoo ndu phoduru nu g'ephe ha.

¹²Onye-ishi ndu ojogu ono be ndu ophu o haru haa bu ndu ophu kachakpoo aburu ndu ukpa l'ali ono; g'ephe jeje ozu l'opfu-vayinu; me l'opfu.

¹³Itso onwirubvu, du l'eze-ulo Chipfu; me ogba-kperekpere; me iphe ono, e shi eyeje mini ono, e gude onwirubvu kpua, du iya nu; be ndu Babilonu kupyashichaa akupyashi; vuta onwirubvu ono lashia ali Babilonu.

¹⁴Ephe vutakwarupho ite; me iphe, eegudeje ekpo ntu; me iphe, apaje oghu oroku; me gbumgbamu; waa iphe, bukpu iphe, a kpuru l'onwirubvu, eegudeje eje ozu l'eze-ulo Chipfu;

¹⁵me iphe, aaguje oku; me gbumgbamu; waa iphemiphe, e mekotaru le mkpola-ododo; me le mkpola-ochaa be onye-ishi ndu ojogu ono vutakotaru.

¹⁶Onwirubvu, lakotaru l'itso labo ono; me l'iphe ono, e shi eyeje mini ono; me l'ogba-kperekpere ono, buchaa iphe, Solomonu meshiru dobe l'eze-ulo Chipfu; be erwa, du iya nu dakiri atu onu iya.

¹⁷Itso ono be eli iya dugbaa nkwo-eka iri l'esato l'ehu l'ehu. O buru onwirubvu be e gude kpua nchi-itso tu-kobe l'eli itso ono ephenebo. Nchi-itso ono du nkwo-eka eto eto l'eli; bya enwegbaaru iphe, du g'ugbu; waa iphe, du g'itorokuma, a kpuchaa l'onwirubvu, no-pheru iya mgburugburu. Itso k'ebo; yee iphe ono, du g'ugbu, du iya nu ono be bu iphe lanu yee ophuu.

A kpuru ndu-ishi ndu Jiuda le ndzu

(Jier 52:24-27)

¹⁸Noo ya; onye-ishi ndu ojogu ono, bu ndu anoduje eche eze nche ono bya akputa Seraya, bu onye-ishi ndu-uke Chileke le ndzu; kputa Zefanaya, bu onye-uke, etsota Sereya; me umadzu eto, echeje nche l'onu-abata eze-ulo Chipfu.

¹⁹A bya abya le ndu ophu nokwadu le mkpukpu; o bya akputa onye-ishi ndu ojogu; me umadzu ise, shi agbazijeru eze idzu; kputa onye edejeru onye-ishi ndu ojogu ekwo, bu iya bu onye-ishi ndu akputaje ndu aka ono mee phe ephe aburu ndu ojogu; me ukporo umadzu eto, bu unwoke ali ono, a humaru le mkpukpu ono.

²⁰Nebuzaradanu, bu onye-ishi ndu ojogu, anoduje eche eze nche ono toko g'ephe ha kputa kpu-pfuta eze ndu Babilonu le mkpukpu Ribula.

²¹O buru le Ribula l'aka ono, du l'ali Hamatu be eze ndu Babilonu no gbushia phe. Noo g'e shi kpu ndu Jiuda le ndzu l'ali phe laa ali ozo bu ono.

Teke Gedalaya bu ochi-oha ndu Izuru

(Jier 40:1—41:15)

²²Nebukadineza, bu eze ndu Babilonu bya ahotu Gedalaya, bu nwa Ahikamu nwa Shafanu g'o buru ochi-oha; buru onye-ishi ndu ophu phoduru nu l'ali Jiuda.

²³O be ge ndu-ishi ndu ojogu ndu Jiuda g'ephe ha; ephe le ndu nkephe numaru l'eze ndu Babilonu hofutawaru Gedalaya g'o buru ochi-oha; ephe wu-pfuta Gedalaya le mkpukpu Mizupa. Ndu byaru nu bu Ishimelu nwa Netanaya; yee Jiohananu nwa Kareya; waa Seraya nwa Tanuhumetu, bu onye Netofa; me Jiazanaya, bu nwa onye Maka; ephe le ndu nkephe.

²⁴Gedalaya bya eribuaru ephe le ndu nkephe ono nte su: “Unu ta tsushi ndu-ishi ndu Babilonu ebvu. Unu nodukoephe l'ali ono jeeru eze ndu Babilonu ozi g'o duru unu le ree.”

²⁵No iya; o be l'onwa k'esaa l'apha ono; Ishimelu, bu nwa Netanaya, bu nwa Elishama; mbu onye shi l'unuphu ndu eze; chita umadzu iri jeshia mkpukpu Mizupa je egbua Gedalaya; me ndu Jiu; me ndu Babilonu ono, ephe l'iya nokota le mkpukpu Mizupa ono.

²⁶Iphe ono mee; ndu Jiuda l'ophu; ndu upfu me ndu nta; je akpaa le ndu-ishi ndu ojogu phe; ephe gude ntsu-mebvu ndu Babilonu gbaru lashia ali ndu Ijiputu.

A tufutaru Jiehoyakinu l'ulo-mkporo

(Jier 52:31-34)

²⁷O rwua l'apha, kwe Jiehoyakinu, bu eze ndu Jiuda ukporo apha l'apha iri l'esaa, e - shi teke a kpuru iya le ndzu; Evilu-Merodaku, bata l'aba-eze ndu Babilonu. O buru g'onwa iri l'ebo du l'ukporo abali l'abali esaa; be o tufutaru Jiehoyakinu, bu eze ndu Jiuda ono l'ulo-mkporo.

²⁸O pfuru opfu oma yeru Jiehoyakinu; bya edobe iya l'onodu, kakota ke ndu eze ozo shi, a tukoru yele ephe kpu le ndzu laa ali Babilonu.

²⁹O buru iya bu le Jiehoyakinu eyefu uwe mkporo iya; bya awata eri nri le teburu eze gbiriri jasu g'o no-beru.

³⁰Mbókumboku bẹ eze anuje iya okpoga, oo-gudeje eme mkpa iya jeye g'ọ nọ-beru.

1 Iphe, ndu eze meru

1 Iphe, ndu eze meru 1

Ndu a nwuru e -shi l'ogbo Ádamu jasụ l'ogbo kẹ Ébirihamu

(Mbụ 5:1-32; 10:1-32; 11:10-26)

- 1¹Ádamu bụ nna Sẹtu; Sẹtu bụru nna Ẹnoshi;
- 2²Ẹnoshi bụru nna Kénanu; Kénanu bụru nna Mahalalẹlu; Mahalalẹlu bụru nna Jiaredi;
- 3³Jiaredi bụru nna Inọku; Inọku bụru nna Metusela; Metusela bụru nna Lamẹku;
- 4⁴Lamẹku bụru nna Nuwa. Ụnwu Nuwa bụ Shemu; Hamu; waa Jiafẹti.
- 5⁵Ụnwu Jiafẹti bụ Goma; mẹ Magogu; mẹ Madayi; mẹ Jiavanu; mẹ Tubalu; mẹ Mেষheku; mẹ Tirasu.
- 6⁶Ụnwu Goma bụ Ashikenazu; mẹ Difatu; mẹ Togarama.
- 7⁷Ụnwu Jiavanu bụ Elisha; mẹ Tashishi; mẹ Kitimu; mẹ Rodaniyimu.
- 8⁸Ụnwu Hamu bụ Kushi; mẹ Ijiputu; mẹ Putu; mẹ Kénanu.
- 9⁹Ụnwu Kushi bụ Seba; mẹ Havila; mẹ Sabuta; mẹ Rama; mẹ Sabuteka. Ụnwu Rama bụru Sheba waa Dedanu.
- 10¹⁰Kushi bụ nna Nimurodu. Nimurodu ono mechaaru bụru onye ojoḡu, ọkpehu du l'eliphe.
- 11¹¹Ijiputu bụ nna ndu Ludu; mẹ ndu Anamu; mẹ ndu Lehabu; mẹ ndu Nafutuhu;
- 12¹²mẹ ndu Paturosu; mẹ ndu Kasuluhu. Kasuluhu bụ ẹka ndu Filisitayinu shi futa. Mizuremu bukwarupho nna ndu Kafuto.
- 13¹³Kénanu bụ nna Sayidonu. Sayidonu bụ ọkpara iya. Kénanu bukwarupho nna Hetu;
- 14¹⁴mẹ ndu Jiebusu; mẹ ndu Amoru; mẹ ndu Gigashi;
- 15¹⁵mẹ ndu Hevu; mẹ ndu Aku; mẹ ndu Sini;
- 16¹⁶mẹ ndu Avadu; mẹ ndu Zamaru; mẹ ndu Hamatu.
- 17¹⁷Ụnwu Shemu bụ Elamu; mẹ Ashuru; mẹ Afakusadu; mẹ Ludu; mẹ Arámu; mẹ Uzu; mẹ Hulu; mẹ Geta; mẹ Mেষheku.
- 18¹⁸Afakusadu bụ nna Shela; Shela bụru nna Eba.
- 19¹⁹Eba nwutaru unwoke labo. Ẹpha onye lanu bụ Pẹlegu. Noo kele a nwuru iya teke ndiphe kekashiru onwophe ekekashi. Ẹpha nwune iya nwoke bụru Jiokutanu.
- 20²⁰Jiokutanu bụ nna Alumodadu; mẹ Shelefu; mẹ Hazamaveti; mẹ Jiera;
- 21²¹mẹkwapho Hadoramu; mẹ Uzalụ; mẹ Dikila;
- 22²²mẹ Ebalu; mẹ Abimelu; mẹ Sheba;

²³mẹ Ofi; mẹ Havila; mẹfua Jiobabu. Ẹphe tukuru bukotaru unwu Jiokutanu.

²⁴Shemu bu nna Afakusadu; Afakusadu buru nna Shela;

²⁵Shela buru nna Eba; Eba buru nna Pelegu; Pelegu buru nna Rewu.

²⁶Rewu buru nna Sérugu; Sérugu buru nna Nahọ; Nahọ buru nna Tera.

²⁷Tera buru nna Ebiramu, bu iya bu Ébirihamu.

Eri Ishimelu

(Mbu 25:12-16)

²⁸Unwu Ébirihamu bu Áyizaku waa Ishimelu.

²⁹Waa eri phe baa: Nebayotu bu okpara Ishimelu. Ndu ozo bu Keda; mẹ Adubelu; mẹ Mibusamu;

³⁰mẹ Mishima; mẹ Duma; mẹ Masa; mẹ Hadadu; mẹ Tema;

³¹mẹ Jieturu; mẹ Nafishi; mẹ Kedema. Ẹphe bukota unwu Ishimelu g'ẹphe ha.

³²Nwanyị, Ébirihamu ta ludu okpobe alulu, ẹpha iya bu Ketura be nwutaru iya Zimuranu; mẹ Jiokushanu; mẹ Medanu; mẹ Midiyanu; mẹ Ishibaku; mẹ Shuwa. Unwu Jiokushanu bu Sheba; mẹ Dedanu.

³³Unwu Midiyanu buru Ifa; mẹ Ife; mẹ Hanọku; mẹ Abida; mẹ Eludaa. Ndu ono g'ẹphe ha bukota unwu Ketura.

Eri Iso

(Mbu 36:1-19)

³⁴Ébirihamu bu nna Áyizaku. Unwu Áyizaku bu Iso waa Ízurelu.

³⁵Unwu Iso bu Elifazu; mẹ Ruwele; mẹ Jieyushi; mẹ Jielamu; mẹ Kora.

³⁶Unwu Elifazu bu Temanu; mẹ Omaru; mẹ Zefi; mẹ Getamu; mẹ Kenazu; mẹ Timuna; waa Amaleku.

³⁷Unwu Ruwele bu Nehatu; mẹ Zera; mẹ Shama; mẹ Miza.

Ndu ivuzọ, buru l'alij Edomu

(Mbu 36:1-19)

³⁸Unwu Siye bu Lotanu; mẹ Shobalu; mẹ Zibiyonu; mẹ Ana; mẹ Dishonu; mẹ Eza; mẹ Dishanu.

³⁹Unwu Lotanu bu Hori; mẹ Homamu. Timuna bu nwune Lotanu ke nwanyị.

⁴⁰Unwu Shobalu bu Alayanu; mẹ Manahatu; mẹ Ebalu; mẹ Shefi; mẹ Onamu. Unwu Zibiyonu bu Aya; mẹ Ana.

⁴¹Nwa, Ana nwutaru bu Dishonu. Unwu ke Dishonu bu Hamuranu; mẹ Eshubanu; mẹ Ituranu; mẹ Keranu.

⁴²Unwu Eza bu Bilihanu; mẹ Zevanu; mẹ Jiakanu. Unwu Dishanu bu Uzu; mẹ Aranu.

Ndu eze ndu Edomu

(Mbu 36:31-43)

- ⁴³Waa ndu eze, nɔadaru l'aba-eze l'alì Edomu; temekpooro ndu Ízurelu bebe nweru eze baa: Bela; nwa Beyo. Epha mkpukpu iya bu Dinuhaba.
- ⁴⁴Bela nwuhuepho; Jiobabu nwa Zera ke mkpukpu Bozura buru eze nochia enya iya.
- ⁴⁵Jiobabu nwuhuepho; Hushamu, bu onye alì Temanu buru eze nochia enya iya.
- ⁴⁶Hushamu bya anwuhu; Hadadu nwa Bedadu buru eze nochia enya iya. Oo yebedua be lwu-kperu ndu Midiyanu l'alì ndu Mówabu. Epha mkpukpu iya bu Avitu.
- ⁴⁷Hadadu nwuhuepho; Samula, bu onye mkpukpu Measureka buru eze nochia enya iya.
- ⁴⁸Samula nwuhuepho; Shawulu, bu onye mkpukpu Rehobotu, no le mgboru enyimu Yufurétisu buru eze nochia enya iya.
- ⁴⁹Shawulu nwuhuepho; Belu-Hananu nwa Akubo buru eze nochia enya iya.
- ⁵⁰Belu-Hananu nwuhuepho; Hadadu buru eze nochia enya iya. Epha mkpukpu iya bu Payi. Epha nyee ya buru Mehetabelu; nwada Maturedi. Maturedi bu nwada Mezahabu.
- ⁵¹Hadadu bya anwuhu. Ndu owa-a buru ndu-ishi ndu Edomu: Timuna; me Aluva; me Jietetu;
- ⁵²me Oholibama; me Ela; me Pinonu;
- ⁵³me Kenazu; me Temanu; me Mibuza;
- ⁵⁴me Magudelu; me Iramu. Ndu ono shi bukotaru ndu-ishi ndu Edomu.

1 Iphe, ndu eze meru 2

Unwu Ízurelu

- ¹Owaa bu unwu Ízurelu: Rúbenu; me Simiyonu; me Lívayi; me Jiuda; me Isaka; me Zebulun;
- ²me Danu; me Jiósefu; me Benjiaminu; me Nafutali; me Gadu waa Asha.
- ³Unwu Jiuda bu: Eru; me Onanu; me Shela. Onye nwutaru iya umadzu eto ono bu Batushuwa, bu nwanyi Kénanu. Ole Eru, bu iya bu okpara Jiuda be meru ejo-iphe l'enya Chipfu. Chipfu woru iya gbua.
- ⁴Tema, bu nyee nwa Jiuda bya anwutakwaru iya pho Pérezu waa Zera. Iphe, unwu Jiuda tukoru du bu ise.
- ⁵Unwu Pérezu bu Hezuronu waa Hamulu.
- ⁶Unwu Zera bu Zimiri; me Etanu; me Hemanu; me Kalukolu; me Dara. Iphe, epe tukoru du bu ise.

⁷Nwa Kami bụ Ekanu. Oo ya bę meru iphe-ęhuka dapfuta ndu Ízurelu; kele o mebyiru iphe ono, e pfuru sụ g'ọ tọ dukwa onye e-wota iphe, e doberu Chileke iche ono.

⁸Nwa Etanu bụ Azaríya.

⁹Unwu, a nwutaru Hezuronu bụ Jierahumelu; me Ramu; waa Kelubayi.

¹⁰Ramu bụ nna Amínadabu; Amínadabu buru nna Náshonu, onye bụ iya bụ onye-ishi ndu Jiuda.

¹¹Náshonu bụ nna Saluma; Saluma buru nna Bówazu;

¹²Bówazu buru nna Óbedu; Óbedu buru nna Jiesi.

¹³Jiesi bę nwutaru okpara iya nwoke, bụ Eliyabu; Abinadabu buru otsota; Shimeya buru k'eto;

¹⁴Netanelu buru k'eno; Radayi buru k'ise;

¹⁵Ozemu buru k'ishii; Dévidi buru k'esaa.

¹⁶Unwune phe unwanyi bụ: Zeruya waa Abigelu. Unwoke eto, Zeruya nwutaru bụ: Abishayi; me Jiowabu; waa Asahelu.

¹⁷Abigelu bụ ne Amasa. Nna Amasa buru Jieta, bụ oshilokpa Ishimelu.

Eri Hezuronu

¹⁸Kalebu nwa Hezuronu bę shi l'eka nyee ya, bụ Azuba nwuta Jieriyotu. Unwu nwanyi ono ozo bụ Jiesha; me Shobabu; me Adonu.

¹⁹Azuba bya anwuhuepho; Kalebu je aluta Ifuratu; o nwutaru iya Huru.

²⁰Huru bụ nna Uri; Uri buru nna Bezalelu.

²¹E mechaa; Hezuronu jepfu nwada Makiya, bụ nna Giladu. O luru iya teke yębe Hezuronu nowaru ukporo apha eto; o nwutaru iya Segubu.

²²Segubu bụ nna Jiayi; onye ukporo mkpukpu le mkpukpu eto l'alı Giladu shi du l'eka.

²³Ole ndu Geshu waa ndu Aramu bę nataru phe mkpukpu Havotu-Jiayi; waa Kenatu; me unwu mkpukpu le mkpukpu, nopheru iya mgburugburu. Mkpukpu obu tukoru du mkpukpu ukporo eto. Ndu ono, bukota oshilokpa Makiya, bụ nna Giladu.

²⁴Hezuronu, bụ nna Kalebu nwuhuchaepho; o lupyabe Ifurata, bụ nyee nna iya; o nwutaru iya Ashuru. Ashuru nwuta Tekowa.

Eri Jieramelu; nwa Hezuronu

²⁵Unwu Jierahumelu, bụ okpara Hezuronu bụ: Ramu, bụ okpara iya; me Buna; me Orenu; me Ozemu; me Ahayijia.

²⁶Jierahumelu bę lukwarupho nwanyi ozo, epha iya bụ Atara. Yębedua bụ ne Onamu.

²⁷Unwu Ramu, bụ okpara Jierahumelu bụ: Mazu; me Jiaminu; me Eka.

- 28 Ụnwu Onamu bụ: Shamayi waa Jiada. Ụnwu Shamayi bụru Nadabu waa Abishuru.
- 29 Ẹpha nyee Abishuru bụ Abihelu. Ọ nwutaru iya Ahụbanu waa Molidu.
- 30 Ụnwu Nadabu bụ: Seledu waa Apemu. Seledu nwuhuru; ophu ọ to togboduru akọ.
- 31 Nwa Apemu bụ Ishi. Ishi bụru nna Sheshanu; Sheshanu bụru nna Ahụlayi.
- 32 Ụnwu Jiada; mbụ nwune Shamayi kẹ nwoke bụ: Jieta waa Jionatanu. Jieta nwuhuru; ophu ọ to togboduru akọ.
- 33 Ụnwu Jionatanu bụ: Peleti waa Zaza. Ndu ono bukota oshilokpa Jierahumelu.
- 34 Sheshanu ta anwutaduru unwoke. Ọo unwanyi bẹ ọ nwushiru kpoloko. O shi nweru onye Ijiputu, shi ejeru iya ozi, epha iya bụ Jiaruha.
- 35 Sheshanu woru nwa iya nwanji kee Jiaruha, bụ onye-ozi iya g'ọ luru. Ọ nwutaru iya Atayi.
- 36 Atayi bụ nna Nétanu; Nétanu bụru nna Zabadu;
- 37 Zabadu bụru nna Efulalu; Efulalu bụru nna Óbèdu;
- 38 Óbèdu bụru nna Jiehu; Jiehu bụru nna Azaríya;
- 39 Azaríya bụru nna Helezu; Helezu bụru nna Eleyasa;
- 40 Eleyasa bụru nna Sisumayi; Sisumayi bụru nna Shalumu;
- 41 Shalumu bụru nna Jiekamaya; Jiekamaya bụru nna Elishama.

Eri Kalèbu

- 42 Ụnwu Kalèbu, bụ nwune Jierahumelu kẹ nwoke bụ: Misha, bụ okpara iya. Misha ono bụ nna Zifu. Nwa Kalèbu ozo bụ Maresha, bụ iya bụ nna Heburonu.
- 43 Ụnwu Heburonu bụ: Kora; mẹ Tapuwa; mẹ Rẹkemu; mẹ Shema.
- 44 Shema bụ nna Rahamu. Rahamu bụru nna Jiokamu. Rẹkemu bụ nna Shamayi.
- 45 Nwa Shamayi bụru Mawonu. Mawonu bụru nna Bètu-Zuru.
- 46 Nwanji, Kalèbu ta aludu okpobe alulu, epha iya bụ Efa bẹ nwutaru Haranu; mẹ Moza waa Gazezu. Haranu bụ nna Gazezu.
- 47 Ụnwu kẹ Jiahudayi bụ Rẹgemu; mẹ Jiótamu; mẹ Geshanu; mẹ Peleti; mẹ Efa; mẹ Shafu.
- 48 Nwanji, Kalèbu ta aludu okpobe alulu, epha iya bụ Maaka bẹ nwuru Sheberu waa Tirihana.
- 49 Ọ bukwaru iya pho nwuru Shafu, bụ onye bụ nna Madumana; bya anwuta Sheva, bụ onye bụ nna Makubena waa Gibiya. Nwada Kalèbu bẹ bụ Akusa.
- 50 Ndu ono bukota oshilokpa Kalèbu. Ụnwu Huru, bụ okpara Ifuratu bụ: Shobalu, bụ onye bụ nna Kiriya-tu-Jiarimu;

- ⁵¹mẹ Saluma, bụ onye bụ nna Bẹtulehemu; mẹ Harefu, bụ onye bụ nna Bẹtu-Gaderu.
- ⁵²Unwu Shobalu, bụ nna Kiriyatu-Jiarimu bụ: Harowe; waa nkeru-ẹbo ndu Menuhotu.
- ⁵³Enya-unuphu Kiriyatu-Jiarimu bụ: ndu Itiru; mẹ ndu Putu; mẹ ndu Shumatu; mẹ ndu Mishira. Ọ bụru l'eri ndu ono bẹ ndu Zora; mẹ ndu Eshutolu shi futa.
- ⁵⁴Unwu Saluma bụ: ndu mkpukpu Bẹtulehemu; mẹ ndu mkpukpu Netofa; mẹ ndu mkpukpu Atarotu-Bẹtu-Jiowabu; mẹ nkeru-ẹbo ndu mkpukpu Manahatu; mẹ ndu mkpukpu Zora.
- ⁵⁵Ndu bụ enya-unuphu ndu edeje ẹkwo, bụ ndu bu ẹ mkpukpu Jiabezu bụ: ndu Tiratu; mẹ ndu Shimeya; mẹ ndu Suka. Ndu ono bụ ndu Kenu; mbụ ndu shi l'eri Hamatu, bụ nna ndu onu-ulo Rekabu.

1 Iphe, ndu eze meru 3

Unwu, Dévidi nwushiru ẹ Hẹburonu

(2Sám 3:2-5)

- ¹Waa unwu Dévidi baa; mbụ ndu a nwushiru iya teke o bu ẹ Hẹburonu. Ọkpara iya bụ Amunonu. Onye nwuru iya nụ bụ Ahinowamu ke Jiezerelu. Nwa iya k'ẹbo bụ Danelu. Onye nwuru iya nụ bụ Abigelu ke Kamelu.
- ²Nwa iya k'eto bụ Abusalomu. Onye nwuru iya nụ bụ Maka nwada Talumayi, bụ eze ndu Geshu. Nwa iya k'eno bụ Adonijia. Onye nwuru iya nụ bụ Hagitu.
- ³Nwa iya k'ise bụru Shefataya. Onye nwuru iya nụ bụ Abitalu. Nwa iya k'ishii bụru Ituramu. Onye nwuru iya nụ bụ nyee ya, bụ Egula.
- ⁴Umadzu ishii bẹ Dévidi nwutaru teke o bu ẹ Hẹburonu, bụ ẹka ọ noru bụru eze apha esaa l'onwa ishii. Ọ nokwarupho l'aba-eze ukporo apha l'apha iri l'eto ẹ Jierusalemu.
- ⁵Ndu a no ẹ Jierusalemu nwushiaru iya bụ: Shimeya; mẹ Shobabu; mẹ Nétanu; mẹ Sólomonu. Onye nwutaru iya umadzu eno ono bụ Batusheba nwada Amiyelu.
- ⁶Unwu iya ozo bụ Ibuha; mẹ Elishama; mẹ Elifeletu;
- ⁷mẹ Noga; mẹ Nefegu; mẹ Jiafiya;
- ⁸mẹ Elishama; mẹ Eliyada; mẹ Elifeletu; umadzu tete ono.
- ⁹Ndu ono l'ophu bukota unwoke, Dévidi nwushiru a -gufukwa unwoke ophu unwanyi, abụ-zidu unyomu iya nwushiru. Tama bẹ bụ nwune pẹ ke nwanyi.

Ndu-eze Jiuda

- ¹⁰Nwa Sólomonu bụ Rehobowamu; Abayijia bụru nwa Rehobowamu; Asa bụru nwa Abayijia; Jiehoshafatu bụru nwa Asa.
- ¹¹Jioramu bụru nwa Jiehoshafatu; E hazaya bụru nwa Jioramu; Jiowashi bụru nwa E hazaya;

¹²Amazaya b̄uru nwa Jiowashi; Azaríya b̄uru nwa Amazaya; Jiótamu b̄uru nwa Azaríya;

¹³Éhazu b̄uru nwa Jiótamu; Hezekáya b̄uru nwa Éhazu; Manáse b̄uru nwa Hezekáya;

¹⁴Amõnu b̄uru nwa Manáse; Jiosáya b̄uru nwa Amõnu;

¹⁵Unwu Jiosáya b̄u: Jiohananu b̄u òkpara iya; Jiehoyakimu b̄uru otsota; Zedekaya b̄uru k'eto; Shalumu b̄uru k'eno.

¹⁶Unwu Jiehoyakimu b̄u: Jiëkonáya b̄u nwa Jiehoyakimu; Zedekaya b̄uru nwa Jiëkonáya.

Unwu Jiëkonáya

¹⁷Unwu Jiëkonáya, b̄u nwoke ono, a kp̄uru l̄e ndz̄u ono, b̄u: Sheyalutiyeļu;

¹⁸m̄e Malukiramu; m̄e Pedaya; m̄e Shenaza; m̄e Jiekamaya; m̄e Hoshama; m̄e Nedabaya.

¹⁹Unwu Pedaya b̄u Zerúbabelu waa Shimeyi. Unwu Zerúbabelu b̄uru Meshulamu waa Hananaya. Shelomotu b̄e b̄u nwune ph̄e k̄e nwanyi.

²⁰Ò nw̄utakwarupho ùmadzu ise ozo, epha ph̄e b̄u Hashuba; m̄e Oh̄elu; m̄e Berekaya; m̄e Hasadaya; m̄e Jiushabu-H̄esedu.

²¹Unwu k̄e Hananaya b̄u: Pelataya; m̄e Jieshaya; m̄e unwu Refaya; m̄e unwu Ananu; m̄e unwu Obedaya; m̄e unwu Shekanaya.

²²Unwu Shekanaya b̄uru: Shemaya m̄e unwu iya, b̄u Hatushi; m̄e Igalu; m̄e Baraya; m̄e Neyaraya; m̄e Shafatu. Epha t̄ukoru d̄u ishii.

²³Unwu Neyaraya b̄u Eliyowenayi; m̄e Hezekáya; m̄e Azurikamu. Epha t̄ukoru d̄u eto.

²⁴Unwu Eliyowenayi b̄u Hodavaya; m̄e Elyashibu; m̄e Pelaya; m̄e Akubu; m̄e Jiohananu; m̄e Delaya; m̄e Anani. Epha t̄ukoru d̄u esaa.

1 Iphe, ndu eze meru 4

Oshilòkpa Jiuda

¹Unwu Jiuda b̄u: Pérezu; m̄e H̄ezuronu; m̄e Kami; m̄e Huru; m̄e Shobalu.

²Shobalu b̄u nna Reyaya. Reyaya b̄uru nna Jiahatu. Jiahatu b̄uru nna Ah̄umayi; m̄e Lahadu. Ndu ono b̄ukota ēnya-unuphu ndu Zora.

³Waa unwu Etamu baa: Jiezer̄elu; m̄e Ishima; m̄e Idubashi. Epha nwune ph̄e k̄e nwanyi b̄u Hazeleponi.

⁴Penuw̄elu b̄u nna ndu Gedo. Eza b̄uru nna Husha. Ndu ono b̄u unwu Huru, b̄u iya b̄u òkpara Efuratu; bya ab̄uru iya b̄u nna ndu B̄etulehemu.

⁵Ashuru, b̄u nna ndu Tekowa. Ò l̄uru unwanyi lab̄o; epha ph̄e b̄u Hela; m̄e Nara.

- ⁶Nara bẹ nwutaru iya Ahuzamu; mẹ Hefa; mẹ Temeni; waa Hahashutari. Ndu ono bu unwu Nara.
- ⁷Unwu ke Hela bu Zeretu; mẹ Zoha; mẹ Etunanu;
- ⁸Kozu bu nna Anubu; mẹ Zobeba; bya abukwarupho nnaji ndu enya-unuphu Ahahelu, bu nwa Harumu.
- ⁹Jiabezu be a ka akwabe ubvu eme l'unwunna iya. Ne iya be guberu iya Jiabezu su: "Mu jeru iphe-ehuka teme mu nwua ya."
- ¹⁰Jiabezu raku Chileke ke Izurelu su iya: "Jiko kebenu mu l'oma. Menaa g'oke ali mu ka osa. Gudenu eka ngu heru mu jiko Chileke. Wofujenuru mu ejo-iphe; g'o to mekaje mu iphe!" Oo ya bu; Chileke meeru iya iphe, o suru g'o meeru iya.
- ¹¹Kelubu, bu nwune Shuha be bu nna Mehuru. Mehuru bya aburu nna Eshutonu.
- ¹²Eshutonu buru nna Betu-Rafa; mẹ Paseya; mẹ Tehina; onye bu nna ndu Iru-Nahashi. Ndu ono bu phe bu unwoke mkpukpu Reka.
- ¹³Unwu Kenazu bu Otuniyelu; mẹ Seraya. Unwu ke Otuniyelu buru Hatatu mẹ Meyonotayi.
- ¹⁴Meyonotayi ono buru nna Ofura. Seraya bu nna Jiowabu, onye bu nna ndu Ge-harashimu. Ge-harashimu ono bu nsuda ndu emeje ona; kele ndu bu iya nu bu ndu emeje ona.
- ¹⁵Unwu Kalebu, bu nwa Jiefune bu Iru; mẹ Ela; mẹ Namu. Nwa ke Ela bu Kenazu.
- ¹⁶Unwu Jiehalelelu bu: Zifu; mẹ Zifa; mẹ Tiraya; waa Asarelu.
- ¹⁷Unwu Ezura bu Jieta; mẹ Meredu; mẹ Ife; mẹ Jialonu. Nye Meredu be nwuru Miriyamu; mẹ Shamayi; mẹ Ishiba, bu nna ndu Eshutemowa.
- ¹⁸Nwanyị ozo, Meredu lutaru l'ipfu Jiuda be nwutaru iya Jieredu, bu nna ndu Gedo; bya anwuta Heba, bu nna ndu Soko; teme o nwutakwapho Jiekutiyelu, bu nna ndu Zanowa. Ndu ono bukota unwu Bitiya, bu nwada Fero, Meredu luru.
- ¹⁹Unwu nye Hodaya, bu nwune Nahumu ke nwanyị be bu phe bu nna Keyila, bu onye Gami; mẹ nna Eshutemowa, bu onye Maka.
- ²⁰Unwu Shimonu bu Amunonu; mẹ Rina; mẹ Benu-Hanani waa Tilonu. Unwegirima ibe Ishi bu: Zohetu waa Benu-Zohetu.
- ²¹Unwu Shela, bu nwa Jiuda bu: Eru, bu nna Leka; mẹ Lada, bu nna Maresha; bya abukwaru iya pho bu nna ndu enya-unuphu ono, anoduje ekwe ekwa-ochaa le mkpukpu Betu-Ashubeya;
- ²²mẹ Jiokimu; mẹ unwoke Kozeba; mẹ Jiowashi; mẹ Sarafu, bu onye ono, shi buru ishi l'ali Mowabu; mbu onye ono, mechaaru laa mkpukpu Betulehemu. Iphe ono be shi l'ichee.

²³Oo p̄h̄e b̄u ndu akpuje ite, bu l̄e mkp̄ukpu Netayimu; m̄e l̄e mkp̄ukpu Gedera. Ēphe bu l'̄eka ono ejeru eze p̄h̄e ozi.

Oshilokpa Simiyonu

²⁴Unwu Simiyonu b̄u: Nem̄elu; m̄e Jiaminu; m̄e Jiaribu; m̄e Zera; m̄e Shawulu.

²⁵Shalumu b̄u nwa k̄e Shawulu; Mibusamu buru nwa Shalumu; Mishima buru nwa k̄e Mibusamu.

²⁶Nwa k̄e Mishima b̄u Ham̄elu; Zaku buru nwa Ham̄elu; Shimeyi buru nwa Zaku.

²⁷Shimeyi nw̄utaru unwoke iri l'ishii; bya anw̄uta unwanyi ishii. Ōle unwune iya k̄e nwoke ta anw̄ushiduru unwu igwerigwe. Ō buru iya meru ōphu ̄enya-unuphu p̄h̄e akwatadu jaa àjàjà ̄egube ndu Jiuda jaru.

²⁸Èka ̄ephe bugbabe b̄u l̄e mkp̄ukpu Biye-Sheba; m̄e l̄e mkp̄ukpu Molada; m̄e l̄e mkp̄ukpu Haza-Shuwalu;

²⁹m̄e l̄e mkp̄ukpu Biliha; m̄e l̄e mkp̄ukpu Ezemu; m̄e l̄e mkp̄ukpu Toladu;

³⁰m̄e l̄e mkp̄ukpu Betuw̄elu; m̄e l̄e mkp̄ukpu Homa; m̄e l̄e mkp̄ukpu Zikulagu;

³¹m̄e l̄e mkp̄ukpu B̄etu-Makabotu; m̄e l̄e Haza-Susimu; m̄e l̄e B̄etu-Biri; m̄e l̄e mkp̄ukpu Sharayimu. Ōo l̄e mkp̄ukpu ono g'ò ha b̄e ̄ephe shi buru jas̄u teke Dévidi b̄u eze.

³²Unwu mkp̄ukpu p̄h̄e b̄u: Etamu; m̄e Aȳinu; m̄e R̄imonu; m̄e Tokenu waa Ashanu. Mkp̄ukpu ise b̄e ō t̄ukoru d̄u;

³³yekoberu unwu mkp̄ukpu l̄e mkp̄ukpu, n̄o-pheru mkp̄ukpu ono mgburugburu je akpaa l̄e mkp̄ukpu Belu. Noo ̄eka ̄ephe bugbabe b̄u ono. Ēphe nwekwarupho ̄ekwo, ak̄o g'e gude nw̄ushia p̄h̄e.

³⁴Meshobabu; m̄e Jiamuleku; m̄e Jiosha; nwa Amazaya;

³⁵m̄e Jiow̄elu; m̄e Jiehu; nwa Jioshibaya. Jioshibaya buru nwa Seraya; Seraya buru nwa Asiȳelu;

³⁶Eliyowenayi; m̄e Jiakoba; m̄e Jieshohaya; m̄e Asaya; m̄e Adiȳelu; m̄e Jiesim̄elu; m̄e Benaya;

³⁷m̄e Ziza; nwa Shifi. Shifi b̄u nwa Al̄onu; Al̄onu buru nwa Jiedaya; Jiedaya buru nwa Shimiri; Shimiri buru nwa Shemaya.

³⁸Ndu ono, a gushiru ̄epha p̄h̄e ono bugbaa ndu-ishi l'̄enya-unuphu p̄h̄e. Onu-ulo nna p̄h̄e b̄e zuru azuzu k'ophu par̄u ̄eka apaa.

³⁹Ēphe buru je akpaa l'̄onu ̄eka eeshije abah̄u l̄e mkp̄ukpu Gedo; mb̄u jeye l'uzo ̄enyanwu-awawa nsuda ono l'̄eka ̄ephe ach̄o nri, ̄eku p̄h̄e a-n̄oduje ata.

⁴⁰O buru ẹka ono be ẹphe cho-vuru ọkpobe nri; me nri, du ree, ẹku phe a-taje. Ali obu be ha ọsa shii; bya ejia oyi; teme nchi du doo l'eka ono. Ndu shi buru l'eka ono bu ndu shi l'eri Hamu.

⁴¹Ndu ono, e deshiru ẹpha phe ono be byaru mkpukpu Gedo le teke Hezekaya shi buru eze ndu Jiuda. ẹphe tsoo oshilokpa Hamu ono ọgu l'eka ẹphe bu; mekwapho ndu Meyuni, ẹphe humaru l'eka ono. ẹphe woru phe mee ẹphe buru mkpurupyata, bu iya bu g'ẹphe du byasu ntanu-a. ẹphe bya ebuchishia ẹka ẹphe shi buru; kele nri duru ẹku phe l'eka ono.

⁴²Unwu Simiyonu ono haru tugbua jeshia l'ubvu Siye. Iphe, ẹphe du bu unu unwoke l'unwoke ukporo ise. Ndu du phe nu bu: Pelataya; me Neyaraya; me Refaya waa Uzelu. ẹphe bu unwegirima ibe Ishi.

⁴³ẹphe gbushikota ndu phoduru nu le ndu Amaleku ono, gbalajeru nu pho. ẹphe buru l'eka ono byasu ntanu-a.

1 Iphe, ndu eze meru 5

Oshilokpa Rubenu

¹Unwu Rubenu, bu iya bu okpara Izurelu; (Oo yebedua bu okpara; ole o jepfuru nyee nna iya; e shi nno nafu iya onodu okpara ono, o bu; woru iya nu unwu Jiosesu, bukwapho nwa Izurelu. O buru iphe ono meru g'o gude ophu e deduru l'oo ya bu okpara lekwo, e deshiru g'e shiru nwua phe.

²E -gudekpoo l'oo Jiuda kachakpoo ike l'unwunna iya; teme o buru l'eri iya be onyeshi shi futu; obenu l'onodu okpara bule-a Jiosesu be o laru.)

³Unwu Rubenu, bu okpara Izurelu bu: Hanoku; me Palu; me Hezuronu waa Kami.

⁴Eri Jiowelu bu: Jiowelu bu nna Shemaya; Shemaya buru nna Gogu; Gogu buru nna Shimeyi.

⁵Shimeyi buru nna Mayika; Mayika buru nna Reyaya; Reyaya buru nna Belu;

⁶Belu buru nna Bera. Bera be Tigulatu-Pilesa, bu eze ndu Asiriya kpuru le ndzu. O bukwaru iya pho shi buru ishi l'ipfu Rubenu.

⁷Waa ndu bu abubu phe l'anya-unuphu l'anya-unuphu phe; me le g'e shi dee ẹpha phe lekwo, e deshiru g'e shiru nwua phe baa: Onyeshi phe bu Jieyelu; me Zekaraya;

⁸me Bela; nwa Azazu. Azazu bu nwa Shema; Shema buru nwa Jiowelu. Eka o bu bu le mkpukpu Arowa. O bua nno je akpaa le mkpukpu Nebo; me le mkpukpu Belu-Meyonu.

⁹O bukwapho je akpaa l'uzo enyanwu-awawa; bua jasu l'eka eeshije abahu l'echiegu, noru jasu l'enyimu Yufurétisu; kele ẹku phe zushiru kabaa igwerigwe l'ali Giladu.

¹⁰Le teke Solu shi buru eze be ipfu Rubenu tsoru ndu Hega ọgu; lwu-kpee phe; buchishia ulo-ekwa eri Hega ono l'ali, dukota l'uzo enyanwu-awawa ali Giladu l'ophu.

Oshilokpa Gadu

11Unwu Gadu be bu ghaaru unwu Rubenu iphu l'ali Beshanu; bua je akpaa le mkpukpu Saleka.

12Jiowelu bu onye-ishi phe. Shafamu buru onye etsota iya nu. Ndu ozo bu Jianayi; me Shafatu le ndu bu l'ali Beshanu.

13Ndu bu abubu phe l'enya-unuphu l'enya-unuphu phe bu: Mayikelu; me Meshulamu; me Sheba; me Jiorayi; me Jiakanu; me Ziya; me Eba. Epe tukoru du esaa.

14Waa unwu Abihelu nwa Huri baa: Huri bu nwa Jiarowa; Jiarowa buru nwa Giladu; Giladu buru nwa Mayikelu; Mayikelu buru nwa Jieshishayi; Jieshishayi buru nwa Jiahudo; Jiahudo buru nwa Buzu.

15Ahi, bu nwa Abudiyelu; bya aburu nwanwa Guni be shi buru ishi l'enya-unuphu ibe nna iya.

16O buru l'ali Giladu be epe bu; me l'ali Beshanu; me le mkpukpu le mkpukpu, no iya nu; bya enwekotaru ali aka eku phe ataje nri l'ali Sharonu je akpaa l'aka o jeberu.

17Ndu ono g'ephe ha be e dekotaru epha phe l'ekwo, e deshuru g'e shuru nwua phe. Teke e deru iya bu le teke Jiotamu shi buru eze ndu Jiuda; Jierobowamu buru eze ndu Izurelu.

18Ndu ipfu Rubenu; me ndu ipfu Gadu; me nkeru-ebo ipfu Manase be nweru ndu mkparawa ojogu; mbu ndu aduje ike gude iphe, eegudeje egbobuta onwonye; me oguechi; mbu ndu agbaje apfu; bya aburu ndu k'ogu doru enya ree. Epe du ukporo unu ndu ojogu ugbo ise l'unu iri le nanu; l'ukporo iri lesato; bukotaru ndu ejeje ugu.

19Epe tsoru ndu Hega ugu; me ndu Jieturu; me ndu Nafishi; mekpoo ndu Nodabu.

20Chileke yetaru phe aka mee ge ndu Hega; me ndu epe l'ephe tugbaru la phe l'aka; kele epe rakuru Chileke l'ogu ono; bya akporu obu yeru iya; o meeru phe iphe, epe suru g'o meeru phe.

21Epe rwukoo eku ndu Hega. Inya-kamelu, epe kputaru be du ukporo unu ishii l'unu ise. Aturu, epe kputaru du ukporo unu ugbo ukporo l'iri le nanu l'unu ise. Nkapfu-igara, epe kputaru du unu ise. Nemaazu, epe kpuru le ndu du ukporo unu ugbo iri l'ebo l'unu iri.

22Ndu du igwerigwe be e gburu egbugbu; kele oo Chileke be alwu ugu ono. Ndu Rubenu buchishia aka ono jeye teke a kpuru phe lashia ali ozo.

Nkerobo ipfu Manase

23Nkerobo ipfu Manase be du igwerigwe shi; o buru phe bu l'ali ono. Epe shi l'ali Beshanu bua jeye le mkpukpu Belu-Hamonu; me l'ubvu Seniru; bya ebua jasu l'ubvu Hamonu.

²⁴Waa ndu bugbaa ndu-ishi l'ęnya-unuphu ibe nna phe baa: Eferu; me Ishi; me Eliyęlu; me Azuriyęlu; me Jieremaya; me Hodavaya; me Jiahudiyęlu. Ephe bukota ndu ojogu, ike du; buru ndu a maru amaru; bya aburu ishi l'ęnya-unuphu ibe nna phe.

²⁵Ole ephe te egoshiduru l'ọ gbaru ge Chileke ke nna phe gude ire phe eka; ephe bya awata abaru agwa ndu ali ozo eja; mbu ndu ali ono, Chileke meru ephe buru mkpurupyata l'ataphu phe ono.

²⁶Oo ya bu; Chileke ke Izurelu kpalia obu Pulu, bu eze ndu Asiriya, bu iya bu Tigulatu-Pilesa, o kpu ipfu Rubenu; me ipfu Gadu; me nkeru-ębo ipfu Manase le ndzu; kpuru lashia mkpukpu Hala; me Habo; me Hara; me ęnyimu mkpukpu Gozanu. O buru l'eka ono be ephe no byasu ntanu-a.

1 Iphe, ndu eze meru 6

Ipfu Lıvayi

¹Unwu Lıvayi, bu unwoke bu: Geshonu; me Kohatu; me Merari.

²Unwu Kohatu, bu unwoke bu: Amuramu; me Izuha; me Hęburonu; me Uzelu.

³Unwu Amuramu, bu Eronu; me Mosisu waa Miriyamu. Unwu Eronu, bu unwoke bu Nadabu; me Abihu; me Eleyaza; me Itama.

⁴Eleyaza bu nna Finehasu; Finehasu buru nna Abishuwa;

⁵Abishuwa buru nna Buki; Buki buru nna Uzi;

⁶Uzi buru nna Zerahaya; Zerahaya buru nna Merayotu;

⁷Merayotu buru nna Amaraya; Amaraya buru nna Ahitubu;

⁸Ahitubu buru nna Zadoku; Zadoku buru nna Ahimaazu;

⁹Ahimaazu buru nna Azariya; Azariya buru nna Jiohananu;

¹⁰Jiohananu buru nna Azariya. Oo ya shi buru onye uke Chileke l'eze-ulo Chileke ono, Solomonu kpuru le Jierusalemu ono.

¹¹Azariya buru nna Amaraya; Amaraya buru nna Ahitubu;

¹²Ahitubu buru nna Zadoku; Zadoku buru nna Shalumu;

¹³Shalumu buru nna Hilikaya; Hilikaya buru nna Azariya;

¹⁴Azariya buru nna Seraya; Seraya buru nna Jiehozadaku.

¹⁵Jiehozadaku be a kputaru le ndzu lashia ali ozo le teke ono, Chipfu shi l'eka Nebukadineza kpukoo ndu Jiuda waa ndu Jierusalemu le ndzu lashia ali ozo ono.

¹⁶Unwu Lıvayi, bu unwoke bu Geshonu; me Kohatu; me Merari.

¹⁷Waa epha unwu Geshonu baa: Libuni; me Shimeyi.

¹⁸Unwu Kohatu bu Amuramu; me Izuha; me Hęburonu; me Uzelu.

- ¹⁹Unwu Merari bu Mahuli waa Mushi. Waa ndibe Lívayi l'ènya-unuphu l'ènya-unuphu phe:
- ²⁰Eri Geshonu bu: Libuni bu nwa Geshonu. Jiahatu buru nwa Libuni. Zima buru nwa ke Jiahatu;
- ²¹Jiowa buru nwa Zima; Ido buru nwa Jiowa; Zera buru nwa Ido; Jieyaterayi buru nwa Zera.
- ²²Eri Kohatu bu: Aminadabu bu nwa Kohatu; Kora buru nwa Aminadabu; Asiru buru nwa ke Kora;
- ²³Elukana buru nwa Asiru; Ebyasafu buru nwa Elukana; Asiru buru nwa Ebyasafu;
- ²⁴Tahatu buru nwa Asiru; Uriyelu buru nwa Tahatu; Uzaya buru nwa Uriyelu; Shawulu buru nwa Uzaya.
- ²⁵Unwu Elukana bu Amasayi waa Ahimotu.
- ²⁶Elukana bu nwa Ahimotu; Zofayi buru nwa Elukana; Nahatu buru nwa Zofayi;
- ²⁷Eliyabu buru nwa Nahatu; Jierohamu buru nwa Eliyabu; Elukana buru nwa Jierohamu; Samelu buru nwa Elukana.
- ²⁸Waa unwu Samelu baa: Jiowelu bu okpara iya. Abayijia buru nwa iya k'èbo.
- ²⁹Waa eri Merari baa: Mahuli bu nwa Merari; Libuni buru nwa Mahuli; Shimeyi buru nwa Libuni; Uza buru nwa Shimeyi;
- ³⁰Shimeya buru nwa Uza; Hagaya buru nwa Shimeya; Asaya buru nwa Hagaya.

Ndu aguje ebvu l'eze-ulo Chileke

- ³¹Waa unwoke, Dévidi yeru g'èphe buru ndu-ishi ebvu l'ulo Chipfu le g'e dobechaaru okpoko Chileke l'èka ono bu owana.
- ³²Ozi phe bu g'èphe guje ebvu l'atathu ulo-ekwa Chileke, bu iya bu ulo-ekwandzukò ono. Èphe nodu anoduje iya nno jasù Sólomonu kpua eze-ulo Chipfu le Jierusalemu. Èphe nodu ejeje ozi phe egube o gbaru g'èphe jeje iya.
- ³³Waa unwoke ono, shi buru ogbo-ebvu ono waa unwu phe nwoke baa: Ndu ophu shi l'eri Kohatu bu: Hemanu; onye aguje ebvu agugu. Hemanu bu nwa Jiowelu; Jiowelu buru nwa Samelu;
- ³⁴Samelu buru nwa Elukana; Elukana buru nwa Jierohamu; Jierohamu buru nwa Eliyelu; Eliyelu buru nwa Towa;
- ³⁵Towa buru nwa Zufu; Zufu buru nwa Elukana; Elukana buru nwa Mahatu; Mahatu buru nwa Amasayi;
- ³⁶Amasayi buru nwa Elukana; Elukana buru nwa Jiowelu; Jiowelu buru nwa Azariya; Azariya buru nwa Zefanaya;

- ³⁷Zefanaya buru nwa Tahatu; Tahatu buru nwa Asiru; Asiru buru nwa Ebyasafu; Ebyasafu buru nwa Kora;
- ³⁸Kora buru nwa Izuha; Izuha buru nwa Kohatu; Kohatu buru nwa Lívayi; Lívayi buru nwa Ízurelu.
- ³⁹Onye notsotarú Hemanu bú Asafu. Ó buru yébedua anóduje Hemanu l'èkutara. Asafu bú nwa Berekaya; Berekaya buru nwa Shimeya;
- ⁴⁰Shimeya buru nwa Mayìkelu; Mayìkelu buru nwa Baseya; Baseya buru nwa Malukayijia;
- ⁴¹Malukayijia buru nwa Etuni; Etuni buru nwa Zera; Zera buru nwa Adaya;
- ⁴²Adaya buru nwa Etanu; Etanu buru nwa Zima; Zima buru nwa Shimeyi;
- ⁴³Shimeyi buru nwa Jiahatu; Jiahatu buru nwa Geshonu; Geshonu buru nwa Lívayi.
- ⁴⁴Onye ózo, etsoje Hemanu bú Etanu, bú onye shi l'eri Merari. Yébedua anóduje Hemanu l'èkicha. Etanu bú nwa Kishi; Kishi buru nwa Abudi; Abudi buru nwa Maluku;
- ⁴⁵Maluku buru nwa Hashabaya; Hashabaya buru nwa Amazaya; Amazaya buru nwa Hilikiya;
- ⁴⁶Hilikiya buru nwa Amuzi; Amuzi buru nwa Bani; Bani buru nwa Shemeru;
- ⁴⁷Shemeru buru nwa Mahuli; Mahuli buru nwa Mushi; Mushi buru nwa Merari; Merari buru nwa Lívayi.
- ⁴⁸Únwunna phẹ, bú ndu Lívayi bè e yeru g'èphe jeje ozi ózo, dughbaa lẹ mkpu eze-ulo Chileke.

Ụnwu Erọnu

- ⁴⁹Oo Erọnu yẹlẹ ụnwu iya bè egweje ngweja l'ọru-ngweja ẹka eegweje ngweja-akpọ-ọku; mẹ l'ọru-ngweja ẹka aakpoje ụnwù-isensu ọku. Ó buru phẹ bè k'ẹka-kakọta-adu-nsọ dọ l'ẹka; mẹkpoo ngweja k'apfu ugwo iphe-ẹji, ndu Ízurelu meshiru; ẹgube ono, Mósisu, bú onye-ozí Chileke tọru iya l'ekemu.
- ⁵⁰Waa eri Erọnu baa: Eleyaza bú nwa Erọnu; Finehasu buru nwa Eleyaza; Abishuwa buru nwa Finehasu;
- ⁵¹Buki buru nwa Abishuwa; Uzi buru nwa Buki; Zerahaya buru nwa Uzi;
- ⁵²Merayotu buru nwa Zerahaya; Amaraya buru nwa Merayotu; Ahitubu buru nwa Amaraya;
- ⁵³Zadóku buru nwa Ahitubu; Ahimaazu buru nwa Zadóku.
- ⁵⁴Owaa bú ẹka ẹphe bu ebubu; mbụ oke alí, a nuru phẹ g'èphe buru. Ẹka ono bú oshilọkpa Erọnu; mbụ eri Kohatu bè a nuru iya ẹphe buru; noo kele ọo phẹ bè ido mbụ daru.

- 55 A nuru phe mkpukpu Heburonu, no l'ali Jiuda; me ali eka eku ataje nri, no-pheru iya mgburugburu.
- 56 Ole egu, du le mkpukpu ono; me unwu mkpukpu ozo, nokota iya nu be a nuru Kalebu; nwa Jiefune.
- 57 O buru oshilokpa Eronu be a nuru mkpukpu, eezeje ndzu, bu Heburonu; me Libuna; me Jiatiru; me Eshutemowa; yele ali eka eku ataje nri, nokotagbaa le mkpukpu ono.
- 58 Eka ozo bu mkpukpu Hilenu; yele ali eka eku ataje nri, nokota iya nu; me mkpukpu Debi; yele ali eka eku ataje nri, nokota iya nu;
- 59 me mkpukpu Ashanu; yele ali eka eku ataje nri, nokota iya nu; me mkpukpu Betu-Shemeshi; yele ali eka eku ataje nri, nokota iya nu.
- 60 Mkpukpu, e shi l'ipfu ke Benjaminu nu phe bu; mkpukpu Geba; yele ali eka eku ataje nri, nokota iya nu; me mkpukpu Alemetu; yele ali eka eku ataje nri, nokota iya nu; me Anatotu; yele ali eka eku ataje nri, nokota iya nu. Mkpukpu, a nuru eri Kohatu l'enya-unuphu l'enya-unuphu be tukoru du iri l'eto.
- 61 A bya atua ido shi le mkpukpu k'enya-unuphu nkeru-ebo ipfu Manase keta mkpukpu iri nu ndu phoduru nu l'eri Kohatu.
- 62 E shi le mkpukpu ipfu Isaka; me k'ipfu Asha; me k'ipfu Nafutali; me k'ipfu Manase, bu ndu ophu bu l'ali Beshanu keta mkpukpu iri l'eto nu eri Geshonu; l'enya-unuphu l'enya-unuphu.
- 63 E shi le mkpukpu k'ipfu Rubenu; me l'ipfu Gadu; me ipfu Zebulun tu ido keta mkpukpu iri l'ebo nu eri Merari; l'enya-unuphu l'enya-unuphu.
- 64 Oo ya bu; ndu Izurelu woru mkpukpu le mkpukpu ono nu eri Livi; nuchaa phe ali eka eku ataje nri, nokota iya nu.
- 65 Ndu Izurelu tukwapho ido shi le mkpukpu ipfu ndu Jiuda; me ipfu Simiyonu; me ipfu Benjaminu woru mkpukpu ono nu phe, bu iya bu mkpukpu le mkpukpu ono, a gushiru epha phe ono.
- 66 O nweru ndu ophu shi l'enya-unuphu eri Kohatu, e shi l'ipfu Ifuremu nu mkpukpu, ephe bugbaa.
- 67 L'ali ubvu ubvu Ifuremu, be a nuru phe mkpukpu Shekemu, bu iya bu mkpukpu, eezeje ndzu; yele ali eka eku ataje nri, nokota iya nu; me mkpukpu Geza; yele ali eka eku ataje nri, nokota iya nu;
- 68 me mkpukpu Jiokumeyamu; yele ali eka eku ataje nri, nokota iya nu; me mkpukpu Betu-Horonu; yele ali eka eku ataje nri, nokota iya nu;
- 69 me mkpukpu Ajialonu; yele ali eka eku ataje nri, nokota iya nu; me mkpukpu Gatu-Rimonu; yele ali eka eku ataje nri, nokota iya nu.

⁷⁰Enya-unuphu, phoduru nū l'eri Kohatu bē e shi l'alī nkeru-ēbo ipfu Manáse nū mkpukpu Ana; yele alī ẹka ẹku ataje nri, nokota iya nū; me mkpukpu Bilamu; yele alī ẹka ẹku ataje nri, nokota iya nū.

⁷¹Unwu Geshonu bē e shikwapho l'alī nkeru-ēbo ipfu Manáse nū mkpukpu Golanu, du l'alī Beshanu; yele alī ẹka ẹku ataje nri, nokota iya nū; me mkpukpu Ashitoretu; yele alī ẹka ẹku ataje nri, nokota iya nū.

⁷²E shi l'alī ipfu Isaka nū phe mkpukpu Kadeshi; yele alī ẹka ẹku ataje nri, nokota iya nū; me mkpukpu Daberatu; yele alī ẹka ẹku ataje nri, nokota iya nū;

⁷³me mkpukpu Ramatu; yele alī ẹka ẹku ataje nri, nokota iya nū; me mkpukpu Anemu; yele alī ẹka ẹku ataje nri, nokota iya nū.

⁷⁴E shi l'alī ipfu Asha nū phe mkpukpu Mashalu; yele alī ẹka ẹku ataje nri, nokota iya nū; me mkpukpu Abudonu; yele alī ẹka ẹku ataje nri, nokota iya nū;

⁷⁵me mkpukpu Hukoku; yele alī ẹka ẹku ataje nri, nokota iya nū; me mkpukpu Rehobu; yele alī ẹka ẹku ataje nri, nokota iya nū.

⁷⁶E shi l'alī ipfu Nafutali nū phe mkpukpu Kadeshi, no le Gálili; yele alī ẹka ẹku ataje nri, nokota iya nū; me mkpukpu Hamonu; yele alī ẹka ẹku ataje nri, nokota iya nū; me mkpukpu Kiriayatayimu; yele alī ẹka ẹku ataje nri, nokota iya nū.

⁷⁷Ndu phoduru nū l'eri Merari bē e shi l'alī ipfu Zebulun keta mkpukpu Rimonu; yele alī ẹka ẹku ataje nri, nokota iya nū; me mkpukpu Tabo; yele alī ẹka ẹku ataje nri, nokota iya nū woru nū.

⁷⁸E shi l'alī ipfu Rúbenu, no l'azu enyimu Jiordanu azu iya ophuu l'uzo enyanwu-awawa mkpukpu Jieriko nū phe mkpukpu Beza, no l'echiegu; yele alī ẹka ẹku ataje nri, nokota iya nū; me mkpukpu Jiahazu; yele alī ẹka ẹku ataje nri, nokota iya nū;

⁷⁹me mkpukpu Kedemotu; yele alī ẹka ẹku ataje nri, nokota iya nū; me mkpukpu Mefahatu; yele alī ẹka ẹku ataje nri, nokota iya nū.

⁸⁰E shi l'alī ipfu Gadu nū phe mkpukpu Ramatu, no l'alī Giladu; yele alī ẹka ẹku ataje nri, nokota iya nū; me mkpukpu Mahanayimu; yele alī ẹka ẹku ataje nri, nokota iya nū;

⁸¹me mkpukpu Heshibonu; yele alī ẹka ẹku ataje nri, nokota iya nū; me mkpukpu Jiaza; yele alī ẹka ẹku ataje nri, nokota iya nū.

1 Iphe, ndu eze meru 7

Oshilokpa Isaka

¹Unwu Isaka bu Tola; me Puwa; me Jiashubu; me Shimuronu. Ephe tukoru du umadzu eno.

²Unwu ke Tola bu Uzi; me Refaya; me Jieriyelu; me Jiahumayi; me Ibusamu; me Samelu. Ephe bukota ndu-ishi l'enya-unuphu nna phe, bu Tola. Ephe bukota ndu

ojoḡu, ike dū l'ogbo nkephẹ. Teke Dévidi shi bụru eze bẹ ẹphe dū ụkporo ụnu ugbo labo l'unu nemadzu ugbo iri l'ishii l'ụkporo iri.

³Nwa ke Uzi bu Izurahiya. Unwu nwoke Izurahaya bu Mayikelu; me Obedaya; me Jiowelu; me Ishaya. G'ephe hakota ephe n'ise tukoru bukotaru ndu-ishi l'ehu l'ehu.

⁴Ephe lushiru unwanyi igwerigwe; nwushia unwu igwerigwe. L'eri nkephẹ l'anya unuphu nna phe be e nweru ukporo unu ugbo eno l'unu umadzu iri, buchaa ndu suwaru eje oḡu.

⁵Ipfu Isaka l'ophu; mbu enya unuphu phe me abubu phe be ndu bu ojoḡu dū ukporo unu ugbo iri; l'unu nemadzu ugbo iri l'esaa l'ukporo iri; mbu egube e deru iya l'ekwo, e deshiru g'e shiru nwua phe.

Oshilokpa Benjaminu

⁶Unwu Benjaminu bu Bela; me Beka; me Jiediyelu. Ephe dū umadzu eto.

⁷Unwu ke Bela bu Ezubonu; me Uzi; me Uzelu; me Jierimotu; me Iri. Ephe tukoru dū umadzu ise; buchaaru ndu-ishi l'anya unuphu ibe nna phe; bya abukotaru ndu ike dū l'ogū. L'ekwo, e deshiru g'e shiru nwua phe be ephe dū ukporo unu ugbo labo; l'unu ugbo iri l'ise; l'ukporo l'iri l'eno.

⁸Unwu ke Beka bu Zemira; me Jiowashi; me Eliyéza; me Eliyowenayi; me Omuri; me Jieremotu; me Abáyijia; me Anatotu; me Alemetu. G'ephe ha tukoru bukotaru unwu Beka.

⁹L'ekwo, e deru g'e shi nwua phe be ephe dū ukporo unu ugbo labo; l'unu iri l'ukporo iri. Ephe bukota ndu-ishi l'anya unuphu ibe nna phe; bya abukotaru ndu ojoḡu.

¹⁰Nwa Jiediyelu bu Bilihanu. Unwu ke Bilihanu bu Jieyushi; me Benjaminu; me Ehudu; me Kenana; me Zetanu; me Tashishi; me Ahishaha.

¹¹Unwu Jiediyelu ono g'ephe ha bukota ndu-ishi l'anya unuphu ibe nna phe; bya aburu ndu ojoḡu. Ndu suwaru eje oḡu be dū ukporo unu ugbo labo l'unu eto.

¹²Shupimu me Hupimu be bu unwu Iri; Hushimu buru nwa Aha.

Oshilokpa Nafutali

¹³Unwu Nafutali bu Jiahazelu; me Guni; me Jieza; me Shalumu. Ephe bu eri Biliha.

Oshilokpa Manase

¹⁴Unwu Manase bu: Asurelu, onye ophu nwanyi Aramu, o to ludu okpobe alulu nwutaru iya; me Makiya, bu nna Giladu.

¹⁵Makiya bya aluaru Hupimu yele Shupimu nwanyi. Epha nwune Makiya ke nwanyi bu Maka. Epha onye k'ebo buru Zelofehadu. Zelofehadu be bu unwanyi be o nwushiru kpoloko.

¹⁶Nyee Makiya ono, epha iya bu Maka be nwutaru nwa nwoke; bya agube iya Pereshi. Epha nwune Pereshi buru Shereshi. Unwu Pereshi buru Ulamu waa Rekemu.

¹⁷Nwa ke Ulamu bu Bedanu. Ndu ono bu eri Giladu. Giladu bu nwa Makiya; Makiya buru nwa Manase.

¹⁸Nwune iya nwanyi, bu Hamoleketu be nwutaru Ishodu; me Abiyeza; me Mahula.

¹⁹Unwu ke Shemida bu Ahayanu; me Shekemu; me Likih; me Anayamu.

Oshilokpa Ifuremu

²⁰Ifuremu bu nna Shutela; Shutela buru nna Beredu; Beredu buru nna Tahatu; Tahatu buru nna Eleyada; Eleyada buru nna Tahatu;

²¹Tahatu buru nna Zabadu; Zabadu buru nna Shutela. Eza waa Eleyadu be jeru ezita oshi eku le mkpukpu Gatu; ndu a nwuru l'eka ono gude phe gbushia.

²²Nna phe, bu Ifuremu raa ekwa phe noo odu; unwunna iya phe bya akporu iya iphu.

²³Ifuremu byakwa ejepfu nyee ya ozo; o tsuta ime nwua nwa nwoke. Epha, o guru iya bu Beraya; kele ejo-iphe nwuru l'ibe iya.

²⁴Ifuremu be nwutaru nwa nwanyi, epha iya bu Shera. O buru iya kpuru mkpukpu Betu-Horonu, du l'uzo nsuda; yeke k'isheli; bya akpua mkpukpu Uzenu-Shera.

²⁵Onye nwoke ozo, Ifuremu nwutaru bu Refa. Refa bu nna Reshefu; Reshefu buru nna Tela; Tela buru nna Tahanu;

²⁶Tahanu buru nna Ladanu; Ladanu buru nna Amihudu; Amihudu buru nna Elishama;

²⁷Elishama buru nna Nunu; Nunu buru nna Jioshuwa.

²⁸Ali, bu nkephe; mbu eka ephe bu ebubu bu mkpukpu Betelu; me mkpukpu, no-pheru iya mgburugburu; je akpaa le mkpukpu Naranu, l'uzo enyanwu-awawa; me mkpukpu Geza, du l'uzo enyanwu-ariba; yeke mkpukpu, nokota iya nu; mewaro mkpukpu Shekemu; me mkpukpu, nokota iya nu; waa mkpukpu Aya; me mkpukpu, nokota iya nu.

²⁹Ndu buru kwaseru oke ali unwu Manase bu mkpukpu Betu-Shanu; me Tanaku; me Megido; me Doru; me iphe, bu mkpukpu dukota iya nu. Mkpukpu ono g'o ha bu oshilokpa Jiosefu, bu nwa Izurelu bukota iya.

Oshilokpa Asha

³⁰Unwu nwoke Asha bu Imuna; me Ishiva; me Ishivi; me Beraya. Nwune phe ke nwanyi bu Sera.

³¹Unwu Beraya bu Heba; me Malukelu, bu nna Biruzayitu.

³²Heba bu nna Jiafuleti; me Shoma; me Hotamu. Nwune phe ke nwanyi bu Shuwa.

³³Unwu Jiafuleti ke nwoke bu Pasaku; me Bimuhalu; me Ashuvatu. Noo unwu Jiafuleti bu ono.

³⁴Unwu Shema bu Ahi; me Rohuga; me Huba; me Aramu.

³⁵Unwu nwoke ke Helemu bu Zofa; me Imuna; me Sheleshi; me Amalu.

³⁶Unwu Zofa bu Suwa; me Hanefa; me Shuwalu; me Beri; me Imura;

³⁷me Beza; me Hodu; me Shama; me Shilusha; me Ituranu; me Bera.

³⁸Unwu Jieta bu Jiefune; me Pisupa; me Ara.

³⁹Unwu Ula ke nwoke buru Ara; me Hanelu; me Riziya.

⁴⁰Ndu ono g'ephe ha bukota eri Asha. Ephe bukota ndu-ishi l'enya unuphu ibe nna phe; buchaaru ndu a horu ahoho; bya aburu ndu ojogu; buchaaru ndu-ishi. L'ekwo, e deru g'e shi nwua phe be ephe tukoru du ukporo unu ugbo eto l'unu ise, bu ndu suwaru eje ogu.

1 Iphe, ndu eze meru 8

Ipfu Benjaminu

¹Benjaminu bu Bela bu okpara iya; Ashibelu, bu nwa iya nodu etsota iya; Ahara buru onye k'eto;

²Nohahu, buru k'eno. Onye k'ise buru Rafa.

³Unwu Bela bu Adaru; me Gera; me Abihudu;

⁴me Abishuwa; me Nemanu; me Ahowa;

⁵me Gera; me Shefufanu; waa Huramu.

⁶Unwu Ehudu bukota ndu-ishi l'enya unuphu ibe ndu shi buru le mkpukpu Geba. Ole a chitaru phe lashia mkpukpu Manahatu.

⁷Epha phe bu: Nemanu; me Ahayijia; me Gera, bu onye chitaru phe nu; bya aburu iya bu nna Uza waa Ahihudu.

⁸Shaharayimu be nwutaru unwu l'ali ndu Mowabu g'o chifucharu unyomu iya, bu Hushimu yele Bara.

⁹Nwanyi ozo, o luru, epha iya bu Hodeshu bya anwutaru iya Jiobabu; me Zibiya; me Meshu; me Malukamu;

¹⁰me Jieyuzu; me Sakaya; me Mirima. Ndu ono bukota unwu iya; teme ephe bukotaru ndu-ishi l'enya unuphu phe.

¹¹O shikwapho l'eka Hushimu nwuta Abitubu yele Elupalu.

¹²Unwu Elupalu bu: Eba; me Mishamu; me Shemedi, bu onye bu iya metaru mkpukpu ono, bu Ono; waa Lodu; me mkpukpu, dukota iya nu.

¹³Beraya; me Shema be bu ndu-ishi l'enya unuphu ndu bu le mkpukpu Ajialonu; buru phe chifuru ndu shi buru le Gatu.

¹⁴Unwu Beriya bu Ahiyo; me Shashaku; me Jieremotu;

¹⁵me Zebadaya; me Aradu; me Eda;

- 16mẹ Mayikelu; mẽ Ishupa; mẽ Jioha.
- 17Unwu Elupalu bu Zebadaya; mẽ Meshulamu; mẽ Hiziki; mẽ Heba;
- 18mẹ Ishimerayi; mẽ Izulaya; mẽ Jiobabu.
- 19Unwu Shimeyi bu Jiakimu; mẽ Zikiri; mẽ Zabudi;
- 20mẹ Eliyenayi; mẽ Ziletayi; mẽ Eliyelu;
- 21mẹ Adaya; mẽ Beraya; mẽ Shimuratu.
- 22Unwu ke Shashaku bu Ishupanu; mẽ Eba; mẽ Eliyelu;
- 23mẹ Abudonu; mẽ Zikiri; mẽ Hananu;
- 24mẹ Hananaya; mẽ Elamu; mẽ Anatotayijia;
- 25mẹ Ifudeya; mẽ Penuwelu.
- 26Unwu ke Jierohamu bu Shamusherayi; mẽ Sheharaya; mẽ Atalaya;
- 27mẹ Jiareshaya; mẽ Elayijia; mẽ Zikiri.
- 28Ndu ono bukota ndu-ishi l'enya-unuphu nna phe; egube e deru iya l'ekwo, e deshuru g'e shiru nwua phe. Eka ephe bu bu le Jierusalemu; bugbaaru ndu-ishi.
- 29Nna ndu Gibiyonu, bu Jieyelu bu le Gibiyonu be o bu. Epha nyee ya bu Maka.
- 30Okpara iya bu Abudonu. O gbeteke ono nwua Zuru; mẽ Kishi; mẽ Belu; mẽ Nadabu;
- 31mẹ Gedo; mẽ Ahiyo; mẽ Zeka;
- 32mẹ Mikulotu. Mikulotu bu nna Shimeya. Ephebedua be bukubekwapho unwunna phe le Jierusalemu.
- 33Neru bu nna Kishi; Kishi buru nna Solu; Solu buru nna Jionatanu; mẽ Malukishuwa; mẽ Abinadabu; mẽ Eshibelu.
- 34Nwa, Jionatanu nwutaru bu Meribu-Belu; Meribu-Belu buru nna Mayika.
- 35Unwu Mayika bu Pitonu; mẽ Meleku; mẽ Tareya; mẽ Ehazu.
- 36Ehazu bu nna Jiehowada; Jiehowada buru nna Alemetu; mẽ Azumavetu; mẽ Zimiri. Zimiri buru nna Moza;
- 37Moza buru nna Bineya; Bineya buru nna Rafa; Rafa buru nna Eleyasa; Eleyasa buru nna Azelu.
- 38Azelu be nwutaru unwoke ishii. Epha phe bu Azurikamu; mẽ Bokeru; mẽ Ishimelu; mẽ Sheyaraya; mẽ Obedaya; mẽ Hananu. Ndu ono g'ephe ha bukota unwu Azelu.
- 39Unwu ke nwune iya nwoke, bu Esheku bu: Ulamu, bu iya bu okpara iya; Jieyushi bu k'eto; Elifeletu buru k'eto.

⁴⁰Unwu Ulamu bukota ndu ojoḡu, ike dṹ; buru ndu maru k'apfṹ. Ephe nwushiru unwu igwerigwe bya enweru unwu nwanwa. Iphe, ephe tukoru dṹ bu ukporo esaa l'iri. Ndu ono g'ephe ha tukoru bukotaru oshilokpa Benjaminu.

1 Iphe, ndu eze meru 9

Ndu a kpuru le ndzu laa Babilonu, alwa azu le Jierusalemu

¹Noo ya; e deshikota epha ndu Izurelu l'ophu l'ekwo g'e shi nwua phe. G'ephe ha be e deshuru l'ekwo ndu eze ndu Izurelu. Ndu Jiuda be a kpuru le ndzu laa Babilonu; kele ephe mesweru Chileke.

²Ndu mbu, vuchakpo ozo bya ebubaaru ozo l'ali ono, bu nkephe ono; mbu le mkpukpu phe ono bu ndu Izurelu; me ndu-uke Chileke; me ndu Liviayi; me ndu ejeje ozi l'eze-ulo Chileke.

³Ndu ophu bu ndu Jiuda; me ndu Benjaminu; me ndu Ifuremu; me ndu Manase, bu le Jierusalemu bu:

⁴Utayi, bu nwa Amihudu; Amihudu buru nwa Omuri; Omuri buru nwa Imuri; Imuri buru nwa Bani; Bani shi l'eri Perezu, bu nwa Jiuda.

⁵A bya le ndu ophu shi l'eri Shilo; o buru Asaya, bu iya bu okpara; me unwu iya.

⁶A bya le ndu ophu shi l'eri Zera; o buru Jiyuwelu. Ndu shi l'eri Jiuda be du unu nemadzu l'ukporo iri l'eno; l'umadzu iri.

⁷A bya le ndu ophu shi l'eri Benjaminu; o buru Salu, bu nwa Meshulamu; Meshulamu buru nwa Hodavaya; Hodavaya buru nwa Hasenuwa;

⁸teme waa Ibunayijia, bu nwa Jierohamu; me Ela, bu nwa Uzi; Uzi buru nwa Mikiri; me Meshulamu, bu nwa Shefataya; Shefataya buru nwa Ruwelu; Ruwelu buru nwa Ibunayijia.

⁹Ndu shi l'eri Benjaminu be du unu nemadzu ugbo labo; l'ukporo esaa l'umadzu iri l'ishii. G'ephe ha bugbaa ishi l'anya-unuphu ibe nna phe.

¹⁰A bya le ndu-uke Chileke; o buru Jiedaya; me Jiehoyaribu; me Jiakinu;

¹¹me Azariya, bu nwa Hilikaya; Hilikaya buru nwa Meshulamu; Meshulamu buru nwa Zadoku; Zadoku buru nwa Merayotu; Merayotu buru nwa Ahitubu, bu onye-ishi ulo Chileke.

¹²Onye ozo bu Adaya, bu nwa Jierohamu; Jierohamu buru nwa Pasho; Pasho buru nwa Malukayijia; me Masayi, bu nwa Adiyelu; Adiyelu buru nwa Jiahuzera; Jiahuzera buru nwa Meshulamu; Meshulamu buru nwa Meshilemitu; Meshilemitu buru nwa Ima.

¹³Ndu bu abubu ndu-uke Chileke ono; mbu ndu-ishi l'anya unuphu ibe nna phe be du unu eno l'ukporo umadzu esato. Ephe bu ndu ike du l'eje ozi, du l'ulo Chileke.

- 14**A bya lẹ ndu ophu bu eri Lívayi; o buru Shemaya, bu nwa Hashubu; Hashubu buru nwa Azurikamu; Azurikamu buru nwa Hashabaya, bu onye shi l'eri Merari;
- 15**teme waa Bakubaka; me Hereshi; me Galalu; me Matanaya, bu nwa Mayika; Mayika buru nwa Zikiri; Zikiri buru nwa Asafu;
- 16**me Obedaya, bu nwa Shemaya; Shemaya buru nwa Galalu; Galalu buru nwa Jiedutunu; waa Berekaya, bu nwa Asa; Asa buru nwa Elukana, bu onye bu lẹ nwa mkpukpu ndu Netofa.
- 17**A bya lẹ ndu nche eze-ulo Chileke; o buru Shalumu; me Akubu; me Talumonu; me Ahimanu; me unwune phe. Shalumu bu onye-ishi phe.
- 18**Eka e doberu phe g'ephe che nche bu Onu-oguzo Eze, no laaru uzo enyanwu-awawa; mbu bya asu ntanu-a. Oo ephebedua shi echeje aka eeshije abahu l'eka ndu Lívayi bu.
- 19**Shalumu bu nwa Kore; Kore buru nwa Ebyasafu; Ebyasafu buru nwa Kora. Shalumu yele unwunna iya, bu iya bu ndu enya unuphu phe, bu unwu Kora be o shi du l'eka; mbu eche aka eeshije abahu l'ulo-ekwa Chipfu. Nokwapho ge nna phe shi eche aka eeshije abahu l'eka Chipfu bu.
- 20**Lẹ teke ndiche bu Finehasu nwa Eleyaza shi buru onye-ishi phe. Chipfu shi swiru iya eswiru.
- 21**Zekaraya, bu nwa Meshelemaya be shikwapho eche onu aka eeshije abahu l'ulo-ekwa-ndzukọ ono.
- 22**Iphe, bukota ndu a hotaru g'ephe cheje nche l'onu aka eeshije abahu ono be du ukporo umadzu iri l'umadzu iri l'ebo. E dekotaru epha phe l'ekwo, e deshuru g'e shiru nwua phe lẹ mkpukpu lẹ mkpukpu phe. O Dévidi yele Sámelu, bu onye aphuje ophulanya be woru ozi ono ye phe l'eka; kele ephe bu ndu gbaru g'e gude ire phe aka.
- 23**Oo ya bu; o buru ephe l'unwu phe be o du l'eka g'ephe cheje nche aka eeshije abahu l'ulo Chipfu, bu iya bu ulo-ekwa.
- 24**Ndu nche ono anodukotaje lẹ mgbureku eno k'eze-ulo ono. Ephe anoduje l'uzo enyanwu-awawa; nodu l'uzo enyanwu-ariba; nodu l'uzo isheli; me uzo ndohali.
- 25**Unwunna phe eshije l'ime mkpukpu bya echebude phe nche abali esaa. O buru g'ephe emeje iya bu ono tekenteke kpo.
- 26**Umadzu eno, shi l'eri Lívayi, bu ndu-ishi nche ono be anodujeepho l'ozi phe mkpurumkpuru. Oo phe be echeje mkpuru; me ulo, aakwakobeje eku l'ulo Chipfu.
- 27**Ephe ano-pheje eze-ulo Chileke ono mgburugburu; kwaa akwakwa; noo kele oo ephebedua anoduje eche aka ono nche; teme o buru phe aguhaje ulo ono l'utsu g'utsu.
- 28**L'ime phe be o nweru ndu ophu eleta enya l'ivu, eegudeje eje ozi l'eze-ulo Chileke. Oo ephebedua be aguje iya ugu lẹ teke a chibatara iya; me lẹ teke a chifuru iya achifu.

²⁹O nweru ndu ọp̄hu a t̄ukwarupho ẹka g'ẹp̄he b̄uru ndu-ishi, eleta ngwa, d̄u l'eze-ulo ono ẹnya; m̄e ivu, d̄ukota ns̄o; m̄e ukpokutu ip̄he; m̄e m̄e-vayinu; m̄e man̄u; m̄e un̄w̄u-is̄ensu; m̄e man̄u, eshi mkp̄o.

³⁰O nweru ndu-uke Chileke ono, ozi p̄h̄e b̄u g'ẹp̄he gwak̄obeje man̄u, eshi mkp̄o.

³¹Onye L̄ivayi, ẹpha iya b̄u Matitaya; mb̄u ọkpara Shalumu, b̄u eri Kora b̄e b̄u ozi nkiya b̄u eḡhe ip̄he, b̄ukpoo ip̄he, eḡheje eḡheḡhe l̄e gbam̄ugbam̄u.

³²Nokwaph̄o g'o nweru un̄wunna p̄h̄e, b̄u eri Kohatu, ọ d̄u l'ẹka mb̄u eme buredi, eedobeje l'ip̄hu Chileke, b̄u iya b̄u buredi eswe at̄uta-unme.

³³E nwekwarupho ndu ọḡbo ebvu. Ẹp̄he b̄uḡbaa ndu-ishi l'ẹnya unup̄hu ibe nna p̄h̄e l'ip̄fu L̄ivayi. Ẹka ẹp̄he bu ebubu b̄u l'eze-ulo Chileke. O to nweđu ozi ọzo, a ḡuru p̄h̄e ye; noo k̄ele ẹp̄he an̄oduje l'ozi eswe l'enyashi.

³⁴Ndu ono g'ẹp̄he ha b̄e b̄ukota ndu-ishi l'ẹnya-unup̄hu ndu L̄ivayi; noo g'e deru iya l'ẹkwo, e deshiru g'e shiru nw̄ua p̄h̄e. Ẹp̄he b̄uḡbaa ndu-ishi, bu l̄e Jierusalem̄u.

Eri S̄olu

(1Ip̄he 8:29-38)

³⁵Jieȳelu, b̄u nna Gibiȳonu, b̄u onye bu l̄e mkp̄ukpu Gibiȳonu. Ẹpha nyee ya b̄u Maka.

³⁶Ọkpara iya b̄u Ab̄odonu. Ọ gb̄e teke ono nw̄ua Zuru; m̄e Kishi; m̄e Belu; m̄e N̄eru; m̄e Nadabu;

³⁷m̄e Gedo; m̄e Ahiyo; m̄e Zekaraya; m̄e Mikulotu.

³⁸Mikulotu b̄u nna Shimeyamu. Ẹp̄hebedua b̄e bukubekwaph̄o un̄wunna p̄h̄e l̄e Jierusalem̄u.

³⁹N̄eru b̄u nna Kishi; Kishi b̄uru nna S̄olu; S̄olu b̄uru nna Jionatanu; m̄e Malukishuwa; m̄e Abinadabu; m̄e Eshibelu.

⁴⁰Nwa, Jionatanu nw̄utaru b̄u Meribu-Belu; Meribu-Belu b̄uru nna Maȳika.

⁴¹Un̄wu Maȳika b̄u: Pit̄onu; m̄e M̄eḷeku; m̄e Tahureya; m̄e Ẹhazu.

⁴²Ẹhazu b̄u nna Jiara; Jiara b̄uru nna Alemetu; m̄e Azumavetu; m̄e Zimiri. Zimiri b̄uru nna Moza;

⁴³Moza b̄uru nna Bineya; Bineya b̄uru nna Refaya; Refaya b̄uru nna Eleyasa; Eleyasa b̄uru nna Az̄elu.

⁴⁴Az̄elu b̄e nw̄utaru unwoke ishii. Ẹpha p̄h̄e b̄u Azurikamu; m̄e Bokeru; m̄e Ishim̄elu; m̄e Sheyaraya; m̄e Obedaya; m̄e Hananu. Ndu ono b̄ukota un̄wu Az̄elu.

1 Ip̄he, ndu eze meru 10

Anw̄uhu S̄olu ȳe un̄wu iya

(1S̄ám 31:1-13)

- ¹Tɔ̀budu iya bu; ndu Filisitayinu wata etso ndu Ízurèlu ọ̀gu; ndu Ízurèlu yeru phe ọ̀kpa l'oso. E gbushia igwerigwe ndu Ízurèlu l'úbvú Gilubowa.
- ²Ndu Filisitayinu chipfuru Sọ̀lu waa unwu iya ehuaka ehuaka. Epe gbua unwu iya, bu Jionatanu; me Abinadabu; waa Malukishuwa.
- ³Ogu ono kpohu oku mebyi ekpohu l'ibe iya ophu Sọ̀lu no; ndu apfu chipyabe Sọ̀lu woru apfu gbaa ya; meka iya iphe.
- ⁴Sọ̀lu su onye achijeru iya ngwoḡu: “Mifuta ogu-echi ngu nmagbua mu; a -nonyaa nu ndu ono, ebuduru ubvu ono rwua bya emeru iphere kpua mu.” Oe onye ono, achijeru iya ngwoḡu ono be ndzu agu; ophu o kwedu nmagbua ya. Oo ya bu; Sọ̀lu woru ogu-echi iya gha igharaphu; woru epho chie ya.
- ⁵Onye achijeru Sọ̀lu ngwoḡu ono humaeḡu le Sọ̀lu nwuhuwaru; o dafua l'eli ogu-echi nkiya nwuhufua.
- ⁶Oo ya bu; Sọ̀lu yeḡe unwu iya epe n'eto; me ndibe iya tuko g'ephe ha nwushihukota.
- ⁷Ndu Ízurèlu ndu ophu bu le nsuda bya ahumaephe le ndu ojogu yewaru okpa l'oso; teme le Sọ̀lu yeḡe unwu iya be nwushihuwaru nu; epe haa mkpukpu phe gbalachaa; ndu Filisitayinu bya ebuchia ya.
- ⁸O beephe le nchitabohu iya; ge ndu Filisitayinu byaru g'ephe yeshia ndu ono, e gburu l'ogu ono iphe, epe yeru l'ehu; epe huma odzu Sọ̀lu yeḡe unwu iya g'ephe dabyigbaaru l'úbvú Gilubowa.
- ⁹Epe yeshia Sọ̀lu iphe, o yeru l'ehu; bya egbuta iya ishi; chikoo ngwoḡu iya; bya eye ndu-ozu g'ephe jedzuru ali Filisitayinu mgburugburu je arakashia ya k'ophu agwa phe me ndiphe a-numa-dzuru iya.
- ¹⁰Epe woru ngwoḡu Sọ̀lu je edobe l'ulo agwa phe; woru ishi iya kobe l'ulo agwa, bu Dagonu.
- ¹¹O be teke ndu bu le mkpukpu Jiabeshi-Giladu numaeruphe iphemiphe ono, ndu Filisitayinu meru Sọ̀lu ono;
- ¹²unwoke l'ophu, bu ndu okpehu du le mkpukpu ono tuko wufu je apata odzu Sọ̀lu yeḡe k'unwu iya palata mkpukpu Jiabeshi. Epe lia okpu phe l'upfu eze oshi, du le Jiabeshi; bya aswia egu abali esaa.
- ¹³Sọ̀lu be nwuhuru nu; kele o mesweru Chipfu. O to meduru iphe, Chipfu pfuru; teme o jee l'aji l'eká ndu maa g'ephe kpo-ziaru iya uzo;
- ¹⁴ophu o to kpataduru Chipfu ishi. Oo ya bu; Chipfu woru iya gbua; woru ali-eze ono nu Dévidi, bu nwa Jiesi.

1 Iphe, ndu eze meru 11

Eeme Dévidi eze ndu Ízurèlu l'ophu

(2Sám 5:1-10)

- ¹Tɔbudu iya bụ; ndu Ízurelu l'ophu tuko wu-pfuta Dévidi lẹ mkpukpu Heburonu bya asu iya: “Anyi lẹ ngu tukuru buru mee lanu waa ogwehu lanu.
- ²Teke Solu shi buru eze; be bukwa gubedua shi edujeru ndu Ízurelu eje ejeje; alwa alwalwa l'ogu. Teme o buru ngu be Chipfu, bu Chileke ngu suru l'oo ngu a-nodu eche ndu nkiya, bu ndu Ízurelu g'onye eche aturu; mbu l'oo-buru ngu a-buru onye-ishi phe.”
- ³Oo ya bu: iphe, bu ndu bu ogerenya Ízurelu bya awu-pfu eze, bu Dévidi lẹ Heburonu; ephe l'iya gbaa ndu l'iphu Chipfu; ephe wua Dévidi manu g'o buru eze ndu Ízurelu; egube ono, Chipfu shi l'onu Samelu pfua ya ono.
- ⁴Dévidi yele ndu Ízurelu l'ophu wuru jeshia ogo lẹ Jierusalemu, bu iya bu Jiebusu. Ndu Jiebusu be bu phe bu l'ali ono.
- ⁵Ndu Jiebusu ono su Dévidi: “I ti byadu adu ike bata l'eka-a.” Ole Dévidi mechaleru-a lwuta eka a kpushiru ike, no l'eli ubvu Zayonu, mecharu buru mkpukpu Dévidi.
- ⁶Dévidi be pfuhawaru su l'onye bu iya vuchakpo ozo gbua onye Jiebusu be a-buru ishi; teme onye obu abukwarupho onye-ishi ndu ojogu. Jiowabu; nwa Zeruya vuru uzo tugbua; oo ya bu; o bya aburu onye-ishi ono.
- ⁷Dévidi woru unuphu kwaa l'eka ono, a kpushiru ike ono. E kuahaa ya mkpukpu Dévidi.
- ⁸O kpua igbulu mkpukpu ono mgburugburu. O shi l'agbarike igbulu mkpukpu ono kpua ya jeye l'igbulu ono gedegede. O buwaruro Jiowabu be dozi-fufuaru eka phoduru lẹ mkpukpu ono.
- ⁹Dévidi nodu aka ike ejekpopho; kele Chipfu, bu Okalibe-Kakota-Ike swiru iya eswiru.

Ndu a maru amaru lẹ ndu ojogu Dévidi

(2Sam 23:8-39)

- ¹⁰Waa ndu-ishi lẹ ndu ojogu Dévidi baa; mbu ndu ephe lẹ ndu Ízurelu l'ophu turu ikè yeru Dévidi okpobe eyeru l'aba-eze iya; teme o buru phe tugbaru mee ya eze; egube ono, Chipfu kweru ndu Ízurelu ukwe iya ono.
- ¹¹Waa epha ndu ojogu, ike kakota lẹ ndu ojogu Dévidi baa: Jiashobamu, bu onye Hakumonu. Oo ya shi buru onye-ishi umadzu eto, kachakpo mkparawa. O gudeje arwa iya jepfu umadzu ukporo iri l'ise ogo; gbushikota phe l'ugbo lanu.
- ¹²Onye ophu etsota iya nu bu Eleyaza nwa Dodo; onye shi l'eri Ahowa. Yebedua yikwapho l'umadzu eto ono, kachakpo mkparawa ono.
- ¹³O tso Dévidi nodu lẹ Pasu-Damimu lẹ teke ono, ndu Filisitayinu dzukoberu k'ogu l'eka ono. O nweru egu, a kuru bali; o buru l'eka ono be ndu Ízurelu yeru okpa l'oso gbalaaharu ndu Filisitayinu agbala.
- ¹⁴Yebedua yee Dévidi pfushiepho ike l'echilabo egu ono; tsoo ndu Filisitayinu ogo; gbushia phe. Chipfu mee; ephe lwu-kpee k'ophu paru eka apaa.

15 Umadzu ẹto l'ime ụkporo umadzu l'umadzu iri, bụgbaa ndu-ishi ọgu wuru jepfu Dévidi ịe mkpuma, nọ l'ogba Adulamu. Ikpoto ndu Filisitayinu wufuta bya adoru ịe nsuda Refayimu.

16 Teke ono be Dévidi nọ l'ime ẹka ọ kpuru; o shihu ike. Ndu ojogu ndu Filisitayinu doru ịe mkpukpu Betulehemu.

17 Egu-mini wata agushi Dévidi ike; ọ sụ: “Oowa-e; ọ dụ mu g'a sụ l'o nweru onye gbe je ekutaru mu mini ịe welu ono, nọ-kube ẹka eeshije abahu ịe Betulehemu ono ge mu ngua!”

18 Noo ya; unwoke ẹto ono kpata uzo ghata ndu ojogu ndu Filisitayinu l'ẹka ephe doru ono; je ekuta mini ịe welu ono, nọ-kube l'ẹka ono, eeshije abahu ịe Betulehemu ono; wotaru Dévidi. Oke Dévidi te ekwedu ngua mini ono; o woru iya wushiaru Chipfu;

19 bya asụ: “Tuswekwa! Jiko Chileke; te ekwekwa ge mu mee egube iphe ọwa-a. ? Mini-a ta aduda ge mee ndu-a, woru ndzu phe tsebe l'onu ẹta g'ee-shi g'e kuta iya-a too?” Oo ya bu; ọphu ọ nguduru mini ono. Noo ehuka ehuka, unwoke ẹto ono, kachakpo mkparawa ono meru bu ono.

20 Abishayi, bu nwune Jiowabu nwa Zeruya bu onye-ishi umadzu ẹto ono. Abishayi be gudeje arwa jepfu umadzu ụkporo iri l'ise ọgu; gbushikota phe; e shiwaro nno; a maru epha iya ge k'umadzu ẹto ono.

21 Oo yebedua be a kachaa akwabe ubvu l'ime umadzu ẹto ono. O buru yebedua bu onye-ishi phe; ole a ta gukwanuru iya ye l'umadzu ẹto ono.

22 Benaya nwa Jiehojada bu onye okpehu du shii. Eka o shi bu Kabuzelu. O meru ehuka k'ophu paru eka apaa. Oo yebedua gburu unwoke Mowabu labo ono, okpehu du-be g'oduma ono. O bukwaru iya pho jejeru egbua oduma l'ime nsu ịe mboku, akamini, kpukoru akpuko dashiru.

23 Benaya gbujekwarupho nwoke Ijiputu, du nkwo-eka ise l'ogologo. Arwa, nwoke ono pa l'eka be ha g'oshi, onye ekwe ekwa egudeje ekwe ekwa. Obenu l'iphe, yebedua gude bapfu iya bu mgboro; bya anata nwoke Ijiputu ono arwa, o gude l'eka; gude nmagbua ya.

24 Noo okpehu, Benaya nwa Jiehojada meru bu ono. E shiwaro nno; a maru epha iya ge k'umadzu ẹto pho, kachakpo mkparawa pho.

25 O bu onye a kwatakporu akwabe ubvu l'ime ụkporo umadzu l'umadzu iri pho. Oke a ta gukobeduru iya l'ime umadzu ẹto pho. Dévidi meru iya onye-ishi ịe ndu ojogu, eche iya nche.

26 Epha ndu ono, ike du l'ogu ono bu: Asahelu, bu nwune Jiowabu; waa Eluhananu nwa Dodo ke Betulehemu;

27 waa Shamotu ke Haroru; waa Helezu ke Pelonu;

28 waa Ira nwa Ikeshi ke Tekowa; waa Abiyeza ke Anatotu;

- ²⁹waa Sibekayi ke Husha; waa Ilayi, bu onye shi l'eri Ahowa;
- ³⁰waa Maharayi ke Netofa; waa Heledu nwa Bana ke Netofa;
- ³¹waa Itayi nwa Ribayi ke Gibiya, du l'ali ndu Benjiaminu; waa Benaya ke Piratonu;
- ³²waa Hurayi, shi l'uzo nggele Gashi; waa Abiyelu ke nsuda Jiodanu;
- ³³waa Azumavetu ke Baharumu; waa Eliyaha ke Shalubonu;
- ³⁴waa unwu Hashemu ke Gizonu; waa Jionatanu nwa Shage ke Hararu;
- ³⁵waa Ahayamu nwa Saka ke Hararu; waa Elifalu nwa Uru;
- ³⁶waa Hefa ke Mekera; waa Ahayijia ke Pelonu;
- ³⁷waa Hezuro ke Kamelu; me Narayi nwa Ezubayi;
- ³⁸waa Jiowelu, bu nwune Netanu; waa Mibuha nwa Hagiri;
- ³⁹me Zeleku, bu onye Amonu; waa Naharayi ke Berotu, bu onye achijeru Jiowabu nwa Zeruya ngwogu;
- ⁴⁰waa Ira ke Itiru; waa Garebu ke Itiru kwapho;
- ⁴¹waa Uraya, bu onye Hetu; me Zabadu nwa Ahulayi;
- ⁴²waa Adina nwa Shiza, bu onye okpa-ipfu Rubenu. Oo ya bu onye-ishi ndu ke Rubenu; bya aburu iya bu onye-ishi ndu ojogu ukporo l'iri, ephe l'iya tukoru nodu.
- ⁴³Me Hananu nwa Maka; waa Jioshafatu ke Mitanu;
- ⁴⁴waa Uzaya ke Ashitoretu; waa Shama yeke Jieyelu, bu unwu Hotamu, bu onye Arowa;
- ⁴⁵waa Jiediyelu nwa Shimiri; Jioha, bu nwune iya. Ephe bu ndu Tizu;
- ⁴⁶me Eliyelu, bu onye Mahava; waa Jieribayi yeke Jioshavaya, bu unwu Elunamu; me Ituma ke Mowabu;
- ⁴⁷me Eliyelu; me Obedu; me Jiasiyelu, bu onye Mezoba.

1 Iphe, ndu eze meru 12

Ndu ojogu, shi l'ipfu Benjiaminu

- ¹Waa ndu byapfutaru Devidi le mkpukpu Zikulagu bu owa; teke Solu nwa Kishi meru iya ophu o kpadu ntusarehu. Ndu ono yi le ndu ojogu, yetaru iya aka l'ogu.
- ²Ephe chi uta; bya amaru g'eegudeje ekutara waa ekicha agba apfu; ozo atu mkpuma. Ephe bu abubu Solu, bu ndu shi l'ipfu Benjiaminu.
- ³Onye-ishi phe bu Ahiyeza; onye ozo buru Jiowashi. Ephe tukoru buru unwu Shema, bu onye mkpukpu Gibiya; teme waa Jieziyelu; me Peleti, bu unwu Azumavetu; me Beraka; me Jiehu ke mkpukpu Anatotu.

⁴Ishimaya, bu onye mkpukpu Gibiyonu yiru iya. O bu onye okpehu du, tso le ndu ojogu ukporo l'iri pho; temanu o buru iya bu onye-ishi phe; me Jieremaya; me Jiahazyelu; me Jiohananu; me Jiozabadu, bu onye mkpukpu Gedera;

⁵me Eluzayi; me Jierimotu; me Beyalaya; me Shemaraya; me Shefataya ke mkpukpu Harufu.

⁶Ndu ozo bu Elukana; me Ishaya; me Azarelu; me Jioweza; me Jiashobamu, bu onye shi l'eri Kora;

⁷me Jiowela; me Zebadaya, bu unwu Jierohamu ke mkpukpu Gedo.

Ndu ojogu, shi l'ipfu Gadu

⁸A bya l'ipfu Gadu; o duru ndu ophu bufuru onwophe jepfu Dévidi l'eka a kpushiru ike l'echiegu. Ndu obu bu ndu okpehu du; buru ndu ojogu, k'ogu doru enya; buru ndu aduje ike paru iphe, eegudeje egbobuta onwonye l'ogu; me arwa. Ephe gbaru igiri igiri g'oduma; bya emebe barabara ge mgbada, no l'ubvu.

⁹Onye-ishi phe bu Eza; onye k'ebo bu Obedaya; onye k'eto bu Eliyabu;

¹⁰onye k'eno buru Mishimana; onye k'ise buru Jieremaya;

¹¹onye k'ishii bu Atayi; onye k'esaa buru Eliyelu;

¹²onye k'esato bu Jiohananu; onye ke tete buru Eluzabadu;

¹³onye k'iri bu Jieremaya; onye k'iri le nanu buru Makubanayi.

¹⁴Ndu ipfu Gadu ono bukota ndu-ishi ojogu l'ehu l'ehu. Onye ophu enya kachaa alwalwa l'ime phe bu onye-ishi ndu ojogu ukporo ise; onye ophu kakota ike l'ime phe buru onye-ishi unu ndu ojogu labo l'ukporo iri.

¹⁵Oo ndu ono dajeru enyimu Jiordanu l'onwa ke mbu; le teke o byajeru utso sofuta l'onu iya; je achikashia iphe, bu ndu bukota le nsuda nsuda je akpaa l'uzo enyanwu-awawa; me l'uzo enyanwu-ariba.

Ndu ojogu, shi l'ipfu Benjaminu; me ipfu Jiuda

¹⁶O nwekwarupho ndu ophu shi l'ipfu Benjaminu; me l'ipfu Jiuda; jepfuru Dévidi l'eka ono, a kpushiru ike ono.

¹⁷Dévidi lufu je agba phe ndzuta bya asu phe; "O -buru l'oo nchi-odoo be unu gude byapfuta mu g'unu yeru mu eka; be obu mu l'unu a-tugbakwa-a buru nanu. Teke o bu l'iphe, unu byaru bu g'unu seru mu ye l'eka ndu ohogu mu; l'ebe abu l'eka mu du l'ejophe; be bukwa ge Chileke ke nna anyi phe lee ya enya; gboru unu uja."

¹⁸Tobudu iya bu; unme Chileke bya Amasayi, bu onye-ishi ndu ojogu ukporo l'iri pho l'ehu; o su: "Anyi bukwa nkengu Dévidi! Anyi turu ikè yeru gube nwa Jiesi! Ge nchi dukwa ngu doo! Ge nchi dukwa ngu doo! Ge nchi dukwa ndu yeru ngu eka doo; Noo kele Chileke ngu e-yeru ngu eka." Oo ya bu; Dévidi nata phe; bya emee phe ndu-ishi ndu ojogu o-lwua-qlaa nkiya.

Ndu ojogu, shi l'ipfu Manáse

¹⁹O nwekwarupho ndu shi l'ipfu Manáse, bukafuru tsoru Dévidi lẹ teke ono, yẹle ndu Filisitayinu swi jepfu Sọlu oḡu ono. Oḡe Dévidi mechaaru; ophu o to yetaḡduru ndu Filisitayinu ẹka; keḡe ndu-ishi phe chichaaru idzu; bya achifu iya g'o to tsoshiru phe. Epe sụ l'ishi phe e-je; me Dévidi bukafu tsoru nnajiuphu iya, bu Sọlu.

²⁰O buru ge Dévidi eje mkpukpu Zikulagu be ndu ipfu Manáse-a wu-pfutaru iya; mbu Aduna; me Jiozabadu; me Jiediyelu; me Mayikelu; me Jiozabadu; me Elihu; me Ziletayi. Ndu ono bukota ndu-ishi, bu ishi unu ndu ojogu labo l'ukporo iri iri l'ipfu Manáse.

²¹Epe yetaru Dévidi ẹka tsoo ndu o-lwua-olaa oḡu. Epe bukota ndu ojogu, ike du; teme epe buru ndu-ishi lẹ ndu ojogu iya.

²²Mbokumboku be ndu nemadzu anoduje abya g'ephe yetaru Dévidi ẹka; jasuru epe buru ikpoto ndu ojogu, du ge ndu ojogu Chileke.

Ge ndu ojogu Dévidi ha

²³Owaa bu unwoke ole, epe du mbu ndu ono kwaru onwophe ngwogu k'ogu; mbu ndu ono, byapfutaru Dévidi lẹ mkpukpu Hẹburonu g'ephe nafu Sọlu ali-eze ono woru nu Dévidi; egube ono, Chipfu pfuru l'oo-du ono.

²⁴Ndu k'ipfu Jiuda; mbu ndu pa iphe, e gude egbobuta onwonye; me arwa be du unu iri l'esaa; bukotaru ndu kwaru ngwogu.

²⁵Ndu k'ipfu Simiyonu be du unu ndu ojogu iri l'esaa l'ukporo iri l'ise; bukotaru ndu ojogu, ike du k'ogu.

²⁶Ndu k'ipfu Lívayi be du unu iri lẹ nanu l'ukporo umadzu iri;

²⁷yekoberu Jiehoyada, bu onye-ishi onu-ulo Eronu. Ndu epe l'iya swi be du unu tete l'ukporo ise.

²⁸Teme waa Zadoku, bu nwokorobyia bya aburu onye ojogu, ike du l'alwu oḡu. Ndu-ishi ndu ojogu, shi l'onulo nna iya be du ukporo l'ebo.

²⁹Ndu k'ipfu Benjaminu, bu iya bu abubu Sọlu be du unu esaa l'ukporo umadzu iri. Ndu ophu ka igwerigwe l'ime phe be tukwaduru ike yeru Sọlu jeye teke ono.

³⁰Ndu k'ipfu Ifuremu be du ukporo unu ugbo labo; l'unu iri l'ebo; bukotaru ndu ojogu, ike du; teme epe buru ndu a maru epha phe l'enya unuphu ibe nna phe.

³¹Lẹ nkeru-ẹbo ipfu Manáse be epe du ukporo unu ugbo labo l'unu ise. Ndu ono bu ndu e wofutaru epha phe g'ephe bya etsoru mee Dévidi eze.

³²Ndu k'ipfu Isaka be bukota ndu k'ogu doru enya; epe makotaru iphe, gbaru ge ndu Izurelu mee ya. Epe du ukporo iri; bukotaru ndu-ishi. Ndu abubu phe nodu phe l'eka.

³³Ndu k'ipfu Zebulun be du ukporo unu ugbo ishii; l'unu umadzu ise; bukotaru ndu maru k'ogu shii; teme epe nweru ngwogu, du iche iche. Epe gude obu lanu bya g'ephe yeru Dévidi ẹka.

³⁴Ndu k'ipfu Nafutali be du unu labo l'ukporo iri; bukotaru ndu-ishi ndu ojogu. Ndu tso phe nu be du ukporo unu ugbo eno l'unu umadzu iri l'ebo l'ukporo iri; buru ndu pa iphe, e gude egbobuta onwonye; me arwa.

³⁵Ndu k'ipfu Danu be du ukporo unu ugbo eto l'unu iri le nanu l'ukporo iri; bukotaru ndu k'ogu doru enya.

³⁶Ndu k'ipfu Asha be du unu ukporo ise; bukotaru ndu maru k'ogu shii; buru ndu kwakoberu k'ogu.

³⁷Ndu k'ipfu Rubenu; me ndu k'ipfu Gadu; me ndu ke nkeru-ebo ipfu Manase, bu iya bu ndu k'ono, bu l'azu enyimu Jidani azu iya ophuu be du unu ukporo ugbo iri l'ise; buru ndu nweru ngwogu, du iche iche.

³⁸Ndu ojogu ono g'ephe ha be kwakotaru ngwogu l'ehu l'ehu. Ephe gudekota obu phe g'o ha byapfuta Davidi le mkpukpu Heburonu g'ephe mee ya eze ndu Izurelu l'ophu. O kwapho egube ono be obu ndu Izurelu ophuu bukota nanu g'e mee Davidi eze ono.

³⁹Ndu ono be ephe le Davidi noru abali eto l'eka ono. Ephe nodu eri; bya angu; noo kele ndibe phe tukoru phe nri eriri.

⁴⁰Nokwapho ge ndu obutobu phe; je akpaa le ndu shi l'ipfu Isaka; me l'ipfu Zebulun; me l'ipfu Nafutali kebegbaaru nri l'eli nkafu-igara vutaru phe; me l'eli inya-kamelu; me l'eli inya-mulu; mekpoo l'eli oke-eswi. Nri du k'etsusu iya; mbu utu-ereshi; me echa-figu; me wopfulaa akpuru vayinu, a miru amimi; me mee; me manu; me eswi; me aturu; kele ehutu be jiru Izurelu ejiji.

1 Iphe, ndu eze meru 13

Eedobe Okpoko Chileke l'ibe Obedu-Edomu

(2Sam 6:1-11)

¹Tobudu iya bu; Davidi bya ejepfu ndu-ishi, unu ndu ojogu labo l'ukporo iri iri; me ndu-ishi ukporo ndu ojogu ise ise g'ephe l'iya chia idzu.

²Davidi bya epfuaru edzudzu-oha ndu Izurelu su phe: "O -buru l'o du unu ree; teme o buru uche Chipfu, bu Chileke anyi; g'anyi zikwaa ozi g'o rwukota unwune anyi phe nchi l'ali Izurelu l'ophu; zikwaa ya pho ndu-uke Chileke; me ndu Liviayi, yee phe tukoru buru le mkpukpu phe l'eka eecheje eku; g'ephe bya g'anyi l'ephe toko tugba;

³mbu g'anyi je apalata okpoko Chileke anyi ono; kele teke Solu shi buru eze be anyi ta akpaduru ishi iya."

⁴Ndzuko ono l'ophu kwetakota g'e mee ya nno; kele iphe ono bu iphe, du ree l'enya ndu ono l'ophu g'e mee ya.

⁵Oo ya bu; Davidi bya akpako-dzua Izurelu l'ophu; shita l'enyimu Shihol'ali Ijiputu jeye l'eka eeshije abahu mkpukpu Hamatu; g'ephe je apafuta okpoko Chileke ono le mkpukpu Kiriyatu-Jiarimu.

⁶Dévidi yéle ndu Ízurelu l'ophu zaru jeshia mkpukpu Bala, bu iya bu Kiriyatu-Jiarimu, no l'ali Jiuda g'ephe je apalata okpoko Chileke ono; mbu okpoko ono, a guru epha Chipfu ono; mbu onye ono, aba-eze iya no le mgbaka chierobu ono.

⁷Ephe bya apafuta okpoko Chileke ono l'ulo Abinadabu paru tukobe l'eli ogba-kperekpere ophuu. O buru Uza waa Ahiyo be anga ogba-kperekpere ono.

⁸Dévidi yéle ndu Ízurelu l'ophu tuko gude ike phe g'o ha ete eswa l'iphu Chileke. Ephe nodu agu ebvu; akpo ogumogu; me une; bya aku nkwa; me ogelenda; egbu opu eye iya.

⁹Ephe rwuepho eka eechishije eswa le bali le Kidonu; Uza tufu eka ge ya wokobe okpoko Chileke ono; kele eswi, alokpu ogba-kperekpere, a tukoberu iya ono be vukotaru iphe.

¹⁰Chipfu tukoshi Uza ehu-eghu iya; woru iya chigbua; kele o tufuru eka denyi l'okpoko ono. Oo ya bu; o nodu l'atatiphu Chileke l'eka ono nwuhu.

¹¹Ehu daa Dévidi ke dzuu; kele oke-ehu-eghu Chipfu dapfutaru Uza. A nodu ekuje eka ono Pérezu-Uza byasu ntanu.

¹²Oo ya bu; ndzu Chileke guhu Dévidi le mboku ono. O su: “? Denu ge mu e-shi bya aparu okpoko Chileke-a dobe l'unuphu ibe mu?”

¹³Ophu Dévidi apalataeduru okpoko Chileke ono le mkpukpu Dévidi. O buru iphe, o gbetchia mee bu l'o pataru iya je edobe l'ibe Obedu-Edomu, bu onye Gatu.

¹⁴Okpoko Chileke ono yee ndibe Obedu-Edomu noo l'unuphu iya onwa eto. Chipfu kebe ndibe Obedu-Edomu l'oma; mekpoo iphemiphe, o nweru enweru.

1 Iphe, ndu eze meru 14

Ndibe Dévidi

¹Tobudu iya bu; Hiram, bu eze ndu Taya bya eye ndu-ozu iya g'ephe vutaru Dévidi oshi sida; bya eyekwapho ndu edoje eja ulo; me ndu kapyinta; ephe tuko swiru; g'ephe je akpuru Dévidi ulo.

²Dévidi bya amaru le Chipfu be mewaru ge ya nguru anguru l'aburu eze ndu Ízurelu; teme l'ali-eze iya be e gudewaa iswi ehu ndu nkiya ono, bu Ízurelu palia imeli.

³No iya; Dévidi bya alushibaa unwanyi igwerigwe le Jierusalemu; bya anwushibaa unwegirima; unwoke me unwanyi.

⁴Waa epha unwegirima, a nwushiru iya le Jierusalemu baa: Shamuwa; me Shobabu; me Nétanu; me Sólomonu;

⁵me Ibuha; me Elishuwa; me Elupeletu;

⁶me Noga; me Nefegu; me Jiafiya;

⁷me Elishama; me Beluyada; me Elifeletu.

Dévidi alwụ-kpee ndu Filisitayinu

(2Sám 15:11-16)

⁸Ndu Filisitayinu bya anụmaepho l'a wụwaru Dévidi manụ l'ishi g'ọ buru eze ndu Ízurelu l'ophu; ephe tuko g'ephe ha jeshia ya egude k'ehuka. Dévidi numa iya; bya ejepfushia phe.

⁹Teke ono be ndu Filisitayinu byawaru egwee tutua le nsuda Refayimu.

¹⁰Oo ya bu; Dévidi bya eje ajita Chileke su: “? Bu ge mu jepfu ndu Filisitayinu ogu too? ? Ii-woru phe-a ye mu l'eka?” Chipfu yeeru iya onu su iya: “Jeroo ya; mu e-woru phe-a ye ngu l'eka.”

¹¹Oo ya bu; Dévidi waa ndu nkiya jeshia mkpukpu Belu-Perazimu; je alwụ-kpee phe l'eka ono. O su; “Oo g'ukporo-mini ekpoje-a bu ge Chileke shiwa a l'eka mu kpota ndu ohogu mu.” Oo ya meru g'o gude a gua eka ono Belu-Perazimu.

¹²Ndu Filisitayinu gbadochaa agwa phe l'eka ono. Dévidi tua ekemu g'a kpoo ya oku.

¹³E mechaa; ndu Filisitayinu byakwa egwee tutua le nsuda ono ozo.

¹⁴Dévidi byakwa eje ajita Chileke ozo; Chileke su iya: “Te eshikwa phe atatiphu nhamunha; shichia okotazu gbaa phe mgburugburu l'iphu eka ono, oshi balusamu pfugbaaru ono tsoo phe ogu.

¹⁵Teke unu bebeerupho numa iphe, ada g'igiji okpa l'eli oshi balusamu ono; unu emekebe egwegwa jeshia alwụ ogu; noo kele oo teke ono be Chileke vutawaru unu uzo g'unu je egbushia ndu ojogu ndu Filisitayinu.”

¹⁶Noo ya; Dévidi meepho ge Chileke ziru iya. O shiepho le mkpukpu Gibiyonu gbushia ndu ojogu ndu Filisitayinu jasụ le mkpukpu Geza.

¹⁷Tobudu iya bu; údù Dévidi tuko mgboko l'ophu ngakota. Chipfu mee; ohamoha nodu atsukota iya ebvu.

1 Iphe, ndu eze meru 15

Aapafu okpoko Chileke l'ibe Óbedu-Edomu

¹Dévidi bya akpushichaaru onwiya ulo le mkpukpu Dévidi; bya e dozia eka okpoko Chileke a-du; bya akpoberu iya ulo-ekwa.

²Tobudu iya bu; Dévidi su: “O to dudu onye ozo, a-paru okpoko Chileke; gbahaepho ndu Lívayi; noo kele oo ephe be Chipfu hotaru g'ephe paję okpoko Chipfu ono; waa g'ephe jeru iya ozi jeyewaroya.”

³Dévidi bya ekukobe ndu Ízurelu g'ephe ha le Jierúsalemu; g'ephe je apata okpoko Chipfu ono bya edobe l'eka ono, o kwakoberu iya g'oo-du ono.

⁴O kukobe oshilokpa Eronu; me ndu Lívayi.

⁵Oshilokpa Kohatu, o kuru be du ukporo umadzu ishii. O buru Uriyelu bu onye-ishi phe.

- ⁶Oshilokpa ke Merari be du ukporo umadzu iri le nanu. O buru Asaya bu onye-ishi phe.
- ⁷Oshilokpa ke Geshonu be du ukporo ishii l'umadzu iri. O buru Jiowelu bu onye-ishi phe.
- ⁸Oshilokpa ke Elizafanu be du ukporo umadzu iri. O buru Shemaya bu onye-ishi phe.
- ⁹Oshilokpa Heburonu be du ukporo umadzu eno. O buru Eliyelu bu onye-ishi phe.
- ¹⁰Oshilokpa Uzelu be du ukporo ise l'umadzu iri l'ebo. O buru Aminadabu bu onye-ishi phe.
- ¹¹Tobudu iya bu; Dévidi bya ekua Zadoku; yele Abyiyata, bu ndu-uke Chileke; me Uriyelu; me Asaya; me Jiowelu; me Shemaya; me Eliyelu; me Aminadabu, bu ndu Lívayi.
- ¹²O su phe: “Oo unubedua bu ndu-ishi l'enya unuphu ibe nna unu l'ipfu Lívayi. Unu je edobe onwunu nsọ; unu l'unwunna unu phe; k'ophu unu a-pata okpoko Chipfu, bu Chileke ke Ízurelu bya edobe l'eka mu kwakoberu iya g'o du.
- ¹³Oo kele o to budu unubedua be pataru iya le mbu pho; be Chipfu, bu Chileke gude tukoshi anyi ehu-eghu pho; kele anyi ta ajitaduru iya g'e-gude paa ya; k'ophu anyi a-pa iya g'o suru g'apaje iya.”
- ¹⁴Oo ya bu; ndu-uke Chileke ono; me ndu Lívayi ono bya edoo onwophe nsọ; k'ophu ephe e-je apata okpoko Chipfu, bu Chileke ke Ízurelu ono.
- ¹⁵Ndu Lívayi ono bya atukoru oshi, e gude apa okpoko Chileke ono l'ukuvu gude paru iya, bu iya bu ge Mosisu turu iya l'ekemu; mbu egube Chipfu pfuru iya.
- ¹⁶Tobudu iya bu; Dévidi bya asu ndu-ishi ndu Lívayi g'ephe tua unwunna phe eka g'ephe buru ndu a-nodu agu ebvu; mbu gude ngwa-ebvu, bu une; me ogumogu; me ogelenda; mbu g'ephe gude ehu-utso gushia ebvu ike.
- ¹⁷Oo ya bu; ndu Lívayi bya atua Hemanu; nwa Jiowelu eka; me Asafu; nwa Berekaya, bu onye lanu l'unwunna iya; me Etanu; nwa Kushaya, bu oshilokpa Merari.
- ¹⁸Unwunna phe ozo, ephe hotaru tsobe phe bu Zekaraya; me Jiaziyelu; me Shemiramotu; me Jiehiyelu; me Uni; me Eliyabu; me Benaya; me Maseya; me Matitaya; me Elifelehu; me Mikuneya; me Óbedu-Edomu; me Jieyelu, bu ndu nche onu-oguzo.
- ¹⁹Ndu ono agu ebvu agugu ono, bu iya bu Hemanu; me Asafu; me Etanu be anoduje aku ogelenda, e meru l'onvirubvu.
- ²⁰Zekaraya; me Aziyelu; me Shemiramotu; me Jiehiyelu; me Uni; me Eliyabu; me Maseya; me Benaya buru phe a-nodu akpo ogumogu g'o daje gengugengu.
- ²¹Matitaya; me Elifelehu; me Mikuneya; me Óbedu-Edomu; me Jieyelu; me Azazaya buru ndu akpo une g'o daje zinguzingu.

²²Kenanaya, bu onye-ishi ebvu ndu Lívayi be bu iya a-nodu akpo-zi k'ebvu ono; kele o doru iya enya.

²³Berekaya; yele Elukana buru ndu nche onu eka okpoko Chileke no.

²⁴Shebanaya; me Jioshafatu; me Netanelu; me Amasayi; me Zekaraya; me Benaya; me Eliyeza, bu phe bu ndu-uke Chileke be a-nodu egbu opu l'ataphu okpoko Chileke ono. Obedu-Edomu waa Jiehaya be a-bukwarupho ndu nche onu eka okpoko ono no.

Aapalata okpoko Chileke le Jierusalemu

(2Sam 6:12-22)

²⁵Oo ya bu; Devidi; me ndu bu ogerenya ndu Izurelu; me ndu-ishi unu ndu ojogu labo l'ukporo iri iri wube; gude ehutu jeshia apata okpoko ogbandzu Chipfu ono l'ibe Obedu-Edomu.

²⁶Ephe gbua oke-eswi esaa waa ebili esaa; kele Chileke be eyetaru ndu Lívayi ono, pa okpoko ogbandzu Chipfu ono eka.

²⁷Devidi yee akpawuru uwe ochaa; mekpoo ndu Lívayi ono, apa okpoko ono; mekpoo ndu ebvu; me Kenanaya, bu onye-ishi ebvu ono. Devidi nmakwarupho ekwa ochaa l'upfu.

²⁸Noo ya; ndu Izurelu l'ophu nodu apalata okpoko ogbandzu Chipfu ono; akpo okwe etso iya; aphu upyi; bya egbu opu; aku nkwa; bya egude ogumogu me une azu ebvu.

²⁹A nodu apabata okpoko ogbandzu Chipfu ono le mkpukpu Devidi; nwada Solu, epha iya bu Mikalu pyofu enya le windo; huma eze, bu Devidi g'onma-lihuje anmalihu ete ebvu; o nmaa ya phulaphula l'ime obu iya.

1 Iphe, ndu eze meru 16

¹Oo ya bu; ephe pabata okpoko Chileke ono; woru iya dobe l'ime ulo-ekwa ono, Devidi kpoberu g'e dobe iya ono. Ephe bya egweshia ngweja-akpo-oku; me ngweja-ehuguu l'iphu Chileke.

²Devidi gweghechaepho ngweja-akpo-oku ono; me ngweja-ehuguu ono; o gude epha Chipfu goru onu-oma nu ndu Izurelu.

³O bya ekeeru ndu ono ishi buredi nanu nanu l'ehu l'ehu; me akara, e meru l'akporu oshi detu; me akara, e gheru l'akporu vayinu; kedzuru iya ndu Izurelu ono l'ophu; unwoke; me unwanyi.

⁴O bya a haru ndu Lívayi hota g'ephe jeje ozi l'ataphu okpoko Chipfu ono; mbu g'ephe rwoje Chileke iphe; me g'ephe tuje iya epha; jaje Chipfu, bu Chileke ke Izurelu ajaja.

⁵Asafu bu ishi; Zekaraya buru otsota. Ndu ozo bu Jieyelu; me Shemiramotu; me Jiehyelu; me Matitaya; me Eliyabu; me Benaya; me Obedu-Edomu; me Jieyelu. Ephebedua be a-noduje akpo une; me ogumogu. Asafu aku ogelenda.

⁶Benaya yẹle Jiahaziyẹlu, bụ ndu-uke Chileke bẹ a-nọduje egbu opu tekenteke l'atatiphu okpokoko oḡbandzu Chileke ono.

Ebvụ-ekele

(Ebvụ 105:1-15; 96:1-13; 106:1,47-48)

⁷Mbọku ono bẹ Dévidi vuru ụzo pfiaru Asafu; mę ndu oḡbo-ebvụ iya g'ẹphe ụa ebvụ ekele nụ Chipfu.

⁸Unu kele Chipfu ekele; unu kua ẹpha iya! Unu mee g'ọhamoha madzuru iphe, o meru!

⁹Unu guku iya l'ebvụ! Unu ụa ebvụ gude tua ya ẹpha! Unu pfukashikwapho iphe, bukpo iphe, dụ biribiri, ọonoduje eme!

¹⁰Unu gude ẹpha iya ono, dụ nsọ tua onwunu ẹpha! G'obu ndu achọ Chipfu teje ẹswa!

¹¹Unu wojeru ẹnya dabẹ lẹ Chipfu mę ọkpehu iya! Unu achoje iphu iya mkpụrumkpuru!

¹²Unu nyatakwa iphe, dụ biribiri, o mekotaru; waa iphe-ọhumalenya, o meshigbaaru; waa ikpe, o kperu;

¹³unubẹ oshilokpa Ízurelu, bụ onye-ozí iya; unubẹ unwu Jiékpọ, bụ ndu o gude ẹka iya họtá!

¹⁴Ọ kwa iya bụ Chipfu; bya aburu Chileke anyi; ikpe o kperu tukuró mgboko l'ophu sweta.

¹⁵Unu nyatajẹ oḡbandzu iya jasuru asuru. Ukwe-iphe, o kweru bẹ anoje; e -shi l'ogbo sweru oḡbo.

¹⁶Oḡbandzu ono, yẹle Ébirihamu gbaru ono; mbụ angụ ono, o riburu Áyizaku ono;

¹⁷bẹ o meru; ọ bụru ekemu l'ẹhu Jiékpọ. Ndu Ízurelu bẹ o meru iya; ọ bụru oḡbandzu, a-nọ ojejoje;

¹⁸sụ phẹ: “Ọo unu bẹ mu a-nụ alí Kénanu g'ọ bụru okiphe, unu ketaru.”

¹⁹Teke ono bẹ ẹphe shi habe nwahabe; mbụ teke ẹphe shi ha nwa chịaka-chịaka; bụru ndu lwarụ alwalwa l'alí ono.

²⁰Ẹphe shi etsojeru ọhamoha aghaphe. Ẹphe -shi l'alí-eze ọwa-a; ẹphe alufu l'alí-eze ọphuu.

²¹Ọphu ọ dudu onye o kweru g'o mee phẹ ewere. Ọ nọdu egudeje opfu ẹhu phẹ baaru ndu eze mba;

²²sụ phẹ: “Unu te edenyikwa ndibe mu, mu, a wuru manụ, ẹka! Ba adukwa iphe, unu e-me ndu epfuchiru mu nụ!”

²³Unu ụa ebvụ nụ Chipfu; unubẹ eliphe l'ophu! Unu rajẹ iya arara mbokumboku l'oodzoje nemadụ!

- ²⁴Unu t̄aru ndu ọhozo ọnu g'ọ d̄-be biribiri! Unu epfuaru ndiphe l'ophu iphe, d̄ biribiri, oomeje!
- ²⁵Noo kele Chipfu par̄ ẹka; bya aburu onye gbaru g'a jaj̄e iya ajaja. G'a tsujekwa iya ph̄o ebvu l'ọ kak̄ota iphe, b̄ agwa ndu mgboko l'ophu shii.
- ²⁶Kele agwa ndiphe l'ophu b̄kota iphe, e gude ẹka mee; obenu l̄ Chipfu b̄ iya gude ẹka iya mee igwe l'onwiya.
- ²⁷Akpabiri ȳe ogbunw̄iinwii b̄e n̄o iya l'atatiphu; t̄eme ọkp̄ehu waa ẹhu-ut̄so t̄uko ẹka o bu sweta.
- ²⁸Unub̄e ipfu l'ipfu, d̄ l̄ mgboko-a; unu kwab̄e Chipfu ùbv̄ù! Unu pfua g'ọ d̄-be biribiri; ȳe g'ọkp̄ehu iya habe shii!
- ²⁹Unu kwab̄e Chipfu ùbv̄ù, gbaru ẹpha iya. Unu gude iphe bya l'iphu iya. Unu yee ad̄u ns̄o g'onye yeru uwe baar̄u Chipfu ẹja.
- ³⁰Unu nmah̄ukwa pyaapyaapya l'iphu iya; unub̄e eliphe l'ophu. Mgboko b̄e e mewaru ọ nguru anguru; ọphu ọ d̄udu iphe, s̄uru iya enwubata.
- ³¹G'imigwe l'ophu tee ẹswa; ẹhu at̄so ndiphe l'ophu ut̄so! G'ẹphe kar̄u ọhamoha l'ọo Chipfu b̄u eze.
- ³²G'eze-ẹnyimu ȳe iphemiphe, n̄o iya l'ime t̄ukokwa t̄ua oke akparamini. G'ẹgu l'ophu m̄ekpoo iphemiphe, n̄o iya n̄u t̄uko gb̄oo ọgb̄oo!
- ³³Noo teke iphe, b̄u oshi, d̄ l'oswa a-gu ebvu ẹhu-ut̄so l'iphu Chipfu. Noo kele ọobyawaa ḡe ya kpee unwu-eliphe ikpe.
- ³⁴Unu kele Chipfu ekele kele ọ b̄u onye ọma! N-yemobu nkiya anoj̄e jas̄u l'ojejeje.
- ³⁵Unu rar̄u kpua ya s̄u: “Dz̄onaa anyi; ḡube Chileke, b̄u onye ndz̄ota anyi! Rwuk̄obenu anyi; dz̄ota anyi l'ẹka ndu ọhozo ono; k'ophu anyi e-tu ngu ẹpha; ḡube onye ono, ẹpha ngu d̄u ns̄o ono; gude ajaja, anyi a-ja ngu baa aba.
- ³⁶G'ajaja buru k̄e Chipfu, b̄u Chileke k̄e Ízurelu; e -shi l̄ gbururu jeye l̄ gbururu.” Noo ya; ndu Ízurelu l'ophu t̄uko z̄ukota mgbede s̄u: “Nokwa g'ọ d̄u. G'ajaja buru k̄e Chipfu.”

Eke ozi

- ³⁷Ọo ya b̄u; Dévidi bya ahaa Asafu m̄e ndu ọgbo-ebvu iya l'atatiphu okpoko ọgbandzu Chipfu ono; g'ẹphe jeje ozi d̄u l'ẹka ono tekenteke; mb̄u g'ọ gbar̄u g'e jeje iya mb̄okumboku.
- ³⁸Ọ hakwar̄upho Ób̄edu-Ed̄omu waa unwunna iya, d̄u ọkporo ẹto l'umadzu ẹsato. Ób̄edu-Ed̄omu nwa Jiedutunu; ȳele Hosa n̄odu eche ọnu ẹka ono nche.
- ³⁹Ọ haa Zad̄oku, b̄u onye uke Chileke; waa unwunna iya, b̄ukwapho ndu-uke Chileke g'ẹphe n̄odu l'atatiphu ọlo mkpu Chipfu, d̄u l'ẹka aagwaj̄e iphe l̄ mkp̄ukpu Gibiȳonu ono.

⁴⁰Ozi phẹ bu g'ephe gwejeru Chipfu ngweja-akpo-oku l'oru-ngweja; eswe l'enyashi; mbu tekenteke; egube ono, e deru iya l'ekwo ekemu, Chipfu turu nu ndu Izurelu ono.

⁴¹Ndu a guru yeru phẹ bu Hemanu; me Jiedutunu; mewaro ndu a hotaru kua phẹ l'epha l'epha g'ephe keleje Chipfu ekele ke n-yemobu iya ono, anoje jasụ l'ojejeje ono.

⁴²Hemanu; yele Jiedutunu be egbu opu duru; me aku ogelenda; mewaro ngwa-ebvu ozo, e gude agu ebvu, du nsọ. Unwu Jiedutunu be bu ndu eche onu-oguzo.

⁴³Tobudu iya bu; ndu Izurelu l'ophu wukashihu lashia ibe phẹ. Dévidi lashia ibe nkiya g'o goru onu-oma nu ndibe iya.

1 Iphe, ndu eze meru 17

Ozi, Nétanu ziru Dévidi

(2Sám 7:1-17)

¹Tobudu iya bu; o bya ebe teke Dévidi bukpowa ebubu l'ibe iya; o su onye mpfuchiru Chileke, bu Nétanu: “Lenu; mbedua bu l'ulo, e gude oshi sida kpua; okpoko ogbandzu Chipfu buru l'ulo-ekwa be o no.”

²Nétanu su iya: “Iphe, bukpo iphe, du ngu l'obu; tugbua je emee ya; le Chipfu be swiru ngu eswiru.”

³O be l'enyashi mboku ono; opfu Chileke kparwuta Nétanu l'ehu bya asu iya:

⁴“Je ezia nwozi mu, bu Dévidi le mube Chipfu suru-a: ‘O to budu gubedua be a-kpuru mu ulo, mu e-buru.

⁵E -shi mboku, mu dufutaru ndu Izurelu l'alị Ijiputu byasu ntanu-a be mu te ebujekwaru l'ulo. Oo mu -shi l'ulo-ekwa owa; mu abahu l'ulo-ekwa ozo; mu -shi le mkpu owa mu abahu le mkpu ozo.

⁶L'ekameka ono, mu le ndu Izurelu jekotaru ono; ? O duru teke mu jjeru ndu-ishi ipfu Izurelu; mbu ndu ono, mu suru g'ephe cheje ndibe mu, bu Izurelu g'onye eche aturu ono; “? Bu gunu meru g'o gude ophu unu akpuduru mu ulo sida?” ’

⁷“Su nwozi mu Dévidi le-a: ‘Mube Okalibe-Kakota-Ike, bu Chipfu suru-a: Mu dufutaru ngu l'egu; eka eku ataje nri; g'i ti tsophehe aturu; g'i byachia aburu onye aburu ishi ndibe mu, bu Izurelu.

⁸Mu shi eswijekpoeru ngu pho l'ekameka, iije; mu toko ndu ohogu ngu g'ephe ha gbufu l'iphu ngu. Nta-a be mu e-me epha ngu g'o paa eka g'epha ndu oke amadu, e nwegbaarụ le mgboko.

⁹Mu a-nu ndibe mu, bu Izurelu alị eka phẹ. Mu a-dzabe phẹ g'oshi l'alị ono; k'ophu epe e-buru l'alị eka phẹ. Eka ono te nweddu onye byaru l'a-chobaa phẹ opfu ozo. Ophu ndu ejo-iphe ta abyadu emekpabaa phẹ ehu g'e shi emekpa phẹ iya le mbu pho;

¹⁰mbu g'e shi emekpa phẹ iya a-gbe teke ono, mu hotaru ndu-ikpe g'ephe dua ndibe mu, bu ndu Izurelu ono. Ndu ohogu ngu phẹ be mu a-kapyabekota. Iphe ozo, mu epfuru ngu bu le Chipfu e-meru ngu ulo.

11Teke ndzụ ngu bvụerupho; mbụ ị -lapfuẹpho nna ngu phẹ; bẹ mu e-shi l'unwu ngu họta onye a-nọ-chi ẹnya ngu; mbụ onye bụ nwa ngu gèdegede. Mu emee g'alì-eze iya nguru anguru.

12O bụru onye ono bẹ a-kpuru mu ụlo. Mu emee g'aba-eze iya nguru anguru jasụ lẹ tuutuutuu lẹ mịimiimii.

13Mu a-buru nna iya; yẹbedua aburu nwa mu. Mu ta abyadụ e-wofu n-yemobu mu l'ẹhu iya; ẹgube ono, mu wofuru iya l'ẹhu onye ono, vu ngu ụzo ono.

14Tẹmanu; mu e-dobe iya g'ọ bụru onye-ishi l'ụlo mu; mẹ l'alì-eze mu jeye lẹ tuutuutuu lẹ mịimiimii. Nokwaphọ g'aba-eze iya bẹ ee-me g'ọ nguru anguru jasụ lẹ tuutuutuu lẹ mịimiimii.' “

15Noo ya; Nétanu kọkotaru Dévidi iphe ono ẹgube e pfuru iya ya; mẹ g'ọ humaru iya l'ophulenya.

Dévidi epfu anụ Chileke

(2Sám 7:18-29)

16Oo ya bụ; eze, bụ Dévidi gbeshi bahụ l'ime ụlo-ekwa Chileke je anọdu l'iphu Chipfu bya asụ: “Gube Nnajiuphu, bụ Chipfu; ? bụ onye bẹ mu bụ? Teme; ? onu-ulo mu bukwanu gunu? ke g'i woliamu je apfube l'eka ha l'eli ẹgube-a?

17Ophu ono atsudu iya gube Chileke l'ẹnya; ị bya atufua onu g'onulo onye-ozu ngu a-du l'iphu yekobefua ya. I wotaru mu mee mu buri onye bụ iya bẹ ndiphe kachaa apali eli; gube Chipfu, bụ Chileke?

18? Bụ gunu ozo bẹ mube Dévidi e-pfubaaru ngu l'ẹgube ụbvù owa-a, ị kwaberu mube onye-ozu ngu-a? Ị makotaru ge mube onye-ozu ngu gbaru.

19Gube Chipfu; ị gudewaa iswi ẹhu onye-ozu ngu; waa g'ọ du ngu l'obu; meshia eze iphe, hagbaa ẹgube-a; bya emee ge mu makotaru eze iphe owa-a.

20O to dudu onye du ge ngu; gube Chipfu; ophu o dudu Chileke ozo, du nu; gbahaa gubedua, mbụ ẹgube ono, anyi gude nchi anyi numawa iya ono.

21? Denukpoo ndu ozo, dubaa ge ndu nkengu, bụ ndu Ízurelu; mbụ oha lanu lẹ mgboko-a, gube Chileke jeru je agbafuta g'ephe buri ndu nkengu; bya egude phe mee g'a maru epha ngu amaru; bya emee iphe, pagbaaru eka; bya adu biribiri l'iphu ndu nkengu. Mbụ ndu ono, ị gbataru l'alì Ijiputu; teme ị chikashikwaapho ohamoha ozo l'iphu ndibe ngu ono?

22I meru ge ndu nkengu, bụ ndu Ízurelu buri ndu nkengu gèdegede jasumaroya; teme gube Chipfu bya abwaru Chileke phe.

23“Gube Chipfu; mekwaa g'ọ keru; mbụ ukwe-iphe ono, ị kwere l'ẹhu mube onye-ozu ngu; mẹ l'ẹhu onu-ulo mu ono. G'ọ rekwa g'ọ pfuru jasụ lẹ tuutuutuu lẹ mịimiimii. Mekwaa g'ọ pfuru;

24g'ọ kekwaru; k'ophu epha ngu a-pa eka apaa jasụ lẹ tuutuutuu lẹ mịimiimii. O buri teke ono bẹ ndiphe a-sụ lẹ gube Chipfu, bụ Okalibe-Kakota-Ike; mbụ lẹ Chileke ke

Ízurelu bẹ bụ Chileke ndu Ízurelu eviya! Teme onu-ulo mube onye-ozu ngu, bụ Dévidi a-ngukwarupho anguru l'iphu ngu.

²⁵“Oo kele oo gube Chileke mu bẹ goshiru mube onye-ozu ngu iphe-a su l'ii-me g'onulo mu nguru anguru; bẹ bụ iya meru g'o gude onu du mube onye-ozu ngu k'anodu epfu anu ngu.

²⁶Gube Chipfu; oo ngu bẹ bụ Chileke obu! I kweshiwaru mube onye-ozu ngu ukwe iphe-oma, dugbaa egube-a.

²⁷Nta-a bẹ o byaru adu ngu ree gi goru onu-oma obu nuwaro onu-ulo onye-ozu ngu; k'ophu ephe a-nodu kwaseru l'iphu ngu; noo kele oo gube Chipfu bẹ goru onu-oma nu iya; o je l'aburu onu-ulo, a goru onu-oma nu jasụ l'ojejeje.”

1 Iphe, ndu eze meru 18

Ọgu, Dévidi lwugbaberu

(2Sám 18:1-18)

¹E mechaa; Dévidi bya alwu-kpee ndu Filisitayinu; mee ephe nodu iya l'eka. O nata ndu Filisitayinu ono mkpukpu Gatu; yele nwa mkpukpu le mkpukpu, dukota iya nu.

²Dévidi bya alwu-kpekwaapho ndu Mowabu; mee ephe nodu iya l'eka; bya atukwapho utu anu iya.

³Dévidi bya alwu-kpekwapfo Hadadeza, bu eze ndu Zoba; je akpaa le mkpukpu Hamatu; le teke o jeru g'o mee g'alị, noru je akpaa l'enyimu Yufurétisu lwakota iya l'eka.

⁴Dévidi nataru iya ugbo-inya, du unu labo l'ukporo iri; bya anata iya ndu agba l'inya, du unu iri l'esa l'ukporo iri; bya anatakwa iya pho ndu ojogu o-je-l'okpa, du ukporo unu ugbo labo l'unu iri. Dévidi tuko inya, anoduje alokpu ugbo-inya gbubushikota akwara azu okpa; bya eworu ukporo ise dobe.

⁵Ndu Aramu, bu le Damasukosu byaepfo g'ephe yetaru eze ndu Zoba, bu Hadadeza eka; Dévidi gbua phe ukporo unu ugbo labo l'unu iri l'ise.

⁶Dévidi bya emeta odu ndu ojogu l'alị ndu Aramu ke Damasukosu; haru ndu ojogu iya chita dobe iya. Ndu Aramu ono nodu Dévidi l'eka; atukwapho utu anu iya. Chipfu nodu emejeepfo ge Dévidi lwu-kpee l'ekameka, o jekporu.

⁷Dévidi chikoo iphe, ndu-ozu Hadadeza egbobeje gude ezeru onwophe ophu e gude mkpola-ododo meshia chilata le Jierusalemu.

⁸Dévidi shikwapfo le mkpukpu Tibuhatu; me le mkpukpu Kunu, bukota mkpukpu, du l'alị, Hadadeza bu ishi iya; vukoo onyirubvu, ha shii. O buru iya be Solomonu mechaaru gude mee eze iphe, eeyeje mini, no l'eze-ulo Chileke; me itso; mewaro iphe ozo, o gude onyirubvu meshia.

⁹Tobudu iya bu; Towu, bu eze ndu Hamatu numaepfo le Dévidi be lwu-kpekotawaru ndu ojogu Hadadeza, bu eze ndu Zoba;

¹⁰o ye nwa iya nwoke, bu Hadoramu g'o je ekele eze, bu Dévidi ekele; jaa ya ajaja; kele o lwu-kperu Hadadeza. O buru iphe, kparu iya nu bu le Hadadeza be yele Towu shi anoduje alwu ogu. O buru iphe, Hadoramu gude bya bu ivu, e megbaaru le mkpola-ododo; me mkpola-ochaa; me l'onvirubvu.

¹¹Eze, bu Dévidi woru ivu ono dobechaaru Chipfu iche; egube ono, o dobehawaru mkpola-ochaa yele mkpola-ododo, o natagbaaru ndu ohozo pho; mbu ndu Edomu; me ndu Mowabu; me ndu Amonu; me ndu Filisitayinu; waa ndu Amaleku.

¹²Abishayi nwa Zeruya gburu ndu Edomu ukporo unu nemadzu ugbo labo l'unu umadzu ise le Nsuda Unu.

¹³O bya emeshia odu ndu ojogu l'ali ndu Edomu; chita ndu ojogu yekota iya. Ndu Edomu l'ophu nodukota Dévidi l'eka. Chipfu nodu emeje ge Dévidi lwu-kpee l'ekameka, o jekporu.

¹⁴Oo ya bu; Dévidi buru eze ndu Izurelu l'ophu; ekperu ndu nkiya ono l'ophu ikpe l'uzo, du ree; me l'uzo, pfuru oto.

¹⁵O buru Jiowabu nwa Zeruya be bu onye-ishi ndu ojogu. Jiehoshafatu nwa Ahiludu buru onye akwakobeje iphe, meru ememe.

¹⁶Zadoku nwa Ahitubu; yele Ahimelekunwa Abyiyata buru ndu-uke Chileke; Shavusha buru onye edeje ekwo.

¹⁷Benaya nwa Jiehoyada buru onye-ishi ndu Kereti waa ndu Peleti, bu ndu anoduje eche eze nche. Unwu Dévidi unwoke buru ndu-ishi, anonyabeje yebe eze.

1 Iphe, ndu eze meru 19

Ogu, Dévidi yele ndu Amonu lwuru (2Sam 10:1-19)

¹A nonyaa; Nahashi, bu eze ndu Amonu bya anwuhu. Nwa iya nwoke bya aburu eze nochia enya iya.

²Dévidi bya epfua su: “Mu e-meru Hanunu nwa Nahashi ree; egube nna iya meru mbedua.” Oo ya bu; Dévidi zia ndu-ozu g'ephe je akporu Hanunu iphu nna iya ono. O be ge ndu-ozu Dévidi ono rwuru ali ndu Amonu bya erwua ibe Hanunu g'ephe kporu iya iphu ono;

³ndu-ishi ndu Amonu su Hanunu: “? Iiri l'oo ubvu be Dévidi akwabé nna ngu egube ono meru g'o gude o zia g'a bya akporu ngu iphu nna ngu? ? Tobudu iphe, ndu-ozu iya ono byaru bu g'ephe nwua ali-a ngge; genwushia ya ehuru; woru iya lwua?”

⁴Oo ya bu; Hanunu gudeshia ndu ono, Dévidi ziru ozi ono; kpushia phe ejí-agba; bya e -shi le nhamunha ike bukashia uwe-mgbalanu phe; nwufu phe ephe lashia.

⁵Tobudu iya bu; o nweru ndu tugburu je epfuaru Dévidi g'e meru ndu ono; o zia g'a gba phe ndzuta; kele e meru phe iphe-iphere shii. Eze zia su phe: “Unu nodu le Jieriko jeye teke ejí-agba unu erwudzu; teme unu alwatashiwaro.”

⁶Ndu Amonu bya amaerupho l'ephe eshiwaa tukurubaa l'imi Dévidi; Hanunu me ndu Amonu wota mkpola-ochaa, erwa iya du unu talentu labo l'ukporo talentu iri gude je ebuta ugbo-inya; me ndu agbaje inya l'ali Mesopotemiya; me l'ali ndu Aramu-Maka; me l'ali ndu Aramu-Zoba.

⁷Ephe je ebuta ugbo-inya, du ukporo unu ugbo eno; butafua eze ndu Maka yele ndu ojogu iya. Ephe bya adoru l'ataphu mkpukpu Medeba. Ndu ke Amonu shigbaa le mkpukpu phe gbakodzua futa k'ogu ono.

⁸Anuma, Dévidi anuma iya; o zia Jiowabu yele ndu ojogu iya g'ephe ha; ephe jepfushia phe.

⁹Ndu Amonu wufuta bya akpo giriri k'ogu l'iphu eka eeshije abahu le mkpukpu ono. Ndu eze pho, byaru nu pho nodu l'oma egu.

¹⁰Jiowabu humaepho l'e gburu iya giriri iphu l'azu k'ogu ono; o hokoo ndu Izurelu ndu ophu kachaa amaru k'ogu chiru phe ye g'ephe kwaberu ndu ke Aramu.

¹¹O chiru ndu ophuu dobe g'ephe nodu nwune iya, bu Abishayi l'eka kwaberu ndu ke Amonu.

¹²Jiowabu su: “O -buru le ndu Aramu-a be kariahara mu eka; unu abya eyetaru mu eka; teke o bukwanu l'oo ndu ke Amonu be kariahara unu eka; anyi abya eyetaru unu eka.

¹³G'obu shihu unu ike; g'anyi lwa ogo ehu ndibe anyi ge ndu bu mkparawa; mbu g'anyi lwa ogo l'iswi ehu mkpukpu ke Chileke. Chipfu e-me-a iphe, du iya ree l'enya nkiya.”

¹⁴Oo ya bu; Jiowabu yele ndu nkiya toko wu-pfuahaa ndu Aramu k'ogu ono; ephe ye okpa l'oso gbalaaharu iya agbala.

¹⁵Ndu ke Amonu humaepho le ndu Aramu gbalaru; ephebedua yefua okpa l'oso nkephe gbalaaharu Abishayi, bu nwune Jiowabu; gbaru gbaba l'ime mkpukpu phe. Oo ya bu; Jiowabu laphushia azu le Jierusalemu.

¹⁶Ndu Aramu humaepho le ndu Izurelu lwu-kpewaru phe; ephe zia; e je achitakota ndu Aramu ndu ophu no l'azu enyimu Yufuretsu. O buru Shofaku, bu onye-ishi ndu ojogu Hadadeza be edu phe nu.

¹⁷E pferu iya pho Dévidi; o kpakoo ndu Izurelu l'ophu; ephe daa azu enyimu Jiodanu jepfushia phe; je akpo giriri g'ephe tsoo phe ogo. Dévidi bya akpochaa ndu ojogu iya ono giriri ono; ephe le ndu Aramu ono wata ogo.

¹⁸Ndu Aramu ono gbaaru ndu Izurelu oso. Dévidi gbua ndu Aramu ono unu unwoke iri l'esaa l'umadzu ukporo iri, bu ndu egudeje ugbo inya alwu ogo; waa ndu ojogu o-je-l'okpa, du ukporo unu ise; gbukwapho Shofaku, bu onye-ishi ndu ojogu phe.

¹⁹Oo ya bu; ndu eze ono, ephe le Hadadeza shi toko nmagba buru nanu ono humaepho le ndu Izurelu lwu-kpewaru phe; ephe wupfu Dévidi; ephe l'iya doshia; ephe nodu iya l'eka. Ophu ndu Aramu ejebeaduru eyeru ndu Amonu eka ozo.

1 Iphe, ndu eze meru 20

Jiowabu alwuta mkpukpu Raba

(2Sám 12:26-31)

¹Tobudu iya bu; apha -bvuepho, bu teke ndu eze alufuje jeshia ogu; Jiowabu chita ndu ojogu; ephe je alwukota ali ndu Amonu alwulwu. Ephe jeshia mkpukpu Raba je ekepee ya. Dévidi nodukporoo ya le Jierusalemu. Jiowabu tsoo ndu Raba ono ogu; mee ephe buru mkpurupyata.

²Dévidi kputa eze phe okpu-eze mkpola ododo, o kpu l'ishi kpuru l'ishi nkiya. Erwa iya buru talentu ophu. O buru mkpuma, vu oke aswa be e gude mee ya ona. Dévidi kwatakwapo okwata, paru eka le mkpukpu ono.

³O rwukoo ndu mkpukpu ono dobe g'ephe gude soya jeahaa ozi; me ogu, e meru l'igwe; me ogbunku. O buru egube ono be Dévidi mekotaru mkpukpu, nokota l'ali ndu Amonu l'ophu. E mecha; Dévidi yele ndu ojogu iya l'ophu laphushia azu le Jierusalemu.

Ogu ozo, ndu Izurelu waa ndu Filisitayinu no lwugbabe

(2Sám 21:15-22)

⁴Tobudu iya bu; e mecha; ogu daaru ephe le ndu Filisitayinu le mkpukpu Geza. O buru teke ono be Sibekayi, bu onye mkpukpu Husha gburu Sipayi, bu onye lanu l'eri Rafa. A kapyabe ndu Filisitayinu enya.

⁵Ogu ozo bya adaaru ephe le ndu Filisitayinu. Eluhananu, bu nwa Jiayi gbua Lahumi, bu nwune Golayatu, bu onye Gatu; mbu onye ono, igbidigbi arwa, o gude du ge k'oshi, onye ekweje ekwa egudeje ekwe ekwa.

⁶Ogu ozo bya adaa le mkpukpu Gatu. L'eka ono be o nweru nwoke lanu, haephe ke kpikpirikpii. O fuchaaru mkpushi-eka ishii ishii l'eka iya ephenebo; waa mkpushi-okpa ishii ishii l'okpa iya ephenebo. Mkpushi-eka iya; me k'okpa iya tukoru du ukporo l'eno. Nwoke ono bukwapho eri Rafa.

⁷Nwoke ono bya awataephe ako ndu Izurelu onu; nwa nwune Dévidi, bu Jionatanu nwa Shimeya woru iya gbua.

⁸Ndu ono shikota l'eri Rafa, bu onye mkpukpu Gatu. O buru l'eka Dévidi yele ndu-ozu iya be ephe shikota nwushihu.

1 Iphe, ndu eze meru 21

Dévidi agu ndu Izurelu ogu

(2Sám 24:1-25)

¹Tobudu iya bu; Nsetanu gbeshi ge ya mekata ndu Izurelu; bya akpalia Dévidi g'o gua ndu Izurelu ogu.

²Oo ya bu; Dévidi su Jiowabu me ndu-ishi ndu ojogu: “Unu je agua ndu Izurelu ogu. Unu shi le mkpukpu Biye-Sheba gua ya je akpaa le mkpukpu Danu. Unu -guchae ya pho; unu abya akaru mu; k'ophu mu a-maru g'ephe ha.”

³Jiowabu sụ: “Gẹ Chipfu mekwaa gẹ ndibe iya kabaa igwerigwe ugbo ụkporo ise e - me lẹ g'ephe ha nta-a. Ọle-a; gube nnajjuphu mu, bụ eze; ? ndu-a ta abụkotanu-a ndu- ozi ngu? ? Denuhunu iphe, meru g'o gude gube nnajjuphu mu nọdu eme g'i mee egube iphe ono? ? Bụ gunu meru iphe, ọ bụ yẹbedua bẹ a-gbẹ meta iphe-eji kpube ndu Ízurelu?”

⁴E mechaa; opfu eze dagbunaa kẹ Jiowabu. Ọo ya bụ; Jiowabu lufu je atuko Ízurelu l'ophu jegbabekota; bya alwaphuta azu lẹ Jierúsalem.

⁵Jiowabu bya akọoru Dévidi gẹ ndu ono, ọ guru ọgu ono hakotakpoo. Ndu Ízurelu l'ophu bẹ dụ ụkporo unu unwoke ugbo ụkporo ishii l'iri l'ẹsaa l'unu iri, bụ ndu aduje ike paa ogu-echi. Ndu Jiuda dụ ụkporo unu unwoke ugbo ụkporo labọ l'iri l'ẹsato l'unu iri l'ise, bụkwapho ndu aduje ike paa ogu-echi.

⁶Ọle ọ tọ gụkobeduru ipfu Lívayi; waa ipfu Benjiaminu l'ọgu ono; kẹle iphe ono, eze pfuru ono bẹ ta adudu iya ree.

⁷Iphe ono, ọ sụru g'e mee ono bụru iphe, dụ Chileke eji; ọo ya bụ; ọ nua ndu Ízurelu aphụ.

⁸Dévidi bya asụ Chileke: “Mu mewaru iphe-eji, parụ ẹka lẹ k'iphe-a, mu meru-a. Ọle mu arwọ ngu g'i wofunu ẹjo-iphe ono, mube onye-ozi ngu meru ono; kẹle ọo eswe bẹ mu meru ono.”

⁹No iya; Chipfu pfuru nụ Gadu, bụ onye aphujeru Dévidi ọphulenyia sụ iya:

¹⁰“Je asụ Dévidi lẹ Chipfu sụru-a: Ụzo iphe ẹto bẹ mu doberu ngu; g'i hata nanu, mu e-me ngu.”

¹¹Ọo ya bụ; Gadu bya ejepfu Dévidi je asụ iya: “Wakwa iphe, Chipfu epfu baa: Hata nanu.

¹²? I hatarụ g'okpa-nri dụ apha ẹto? Tọo ? gẹ ndu ọhogu unu phẹ gude ọnwa ẹto mee unu umerekete; mbụ g'ephe gude ogu-echi gbushia unu? Tọo ? i hatarụ ogu-echi kẹ Chipfu abali ẹto, bụ iya bụ teke ẹjo iphe-ememe a-dụ l'alị-a; mbụ g'ojosi Chipfu tükokpoepho mkpukpu Ízurelu l'ophu mebyishia? Nta bükwa g'i pfiaru mu iphe, mu e-je epfiaru onye ziru mu ozi ọbu.”

¹³Dévidi bya asụ Gadu: “Mu nọakwa l'oke iphe-ẹhuka. Ọle ọ kakwa ree gẹ mu daba l'ẹka Chipfu; eme lẹ mu dabarụ nemadzụ l'ẹka; noo kẹle obu-imemini Chipfu pakporu ẹka paa.”

¹⁴Ọo ya bụ; Chipfu loru ẹjo iphe-ememe tū ndu Ízurelu. Ndu nwushihuru nū dū ụkporo unu nemadzụ ugbo ẹsato l'unu iri l'ise.

¹⁵Chipfu zia ojozi-imigwe ono g'o je emebyishia Jierúsalem. Ọle ojozi-imigwe ono mejeerupho g'o mebyishia Jierúsalem; Chipfu hūma iya; o rwua ya l'ẹhu; mbụ ẹjo- iphe, dafuru phẹ nū ono. Ọ pfiaru ojozi-imigwe ono, egbushi ndu ono sụ iya: “Ọ dūwaa ree! Sephu ẹka ngu azu parụ phẹ haa!” Teke ono bẹ ojozi Chipfu ono nọwaa l'oma ẹka Onanu, bụ onye Jiebusu anọduje echishi ẹswa lẹ balị iya.

16Dévidi bya apalia ɛnya imeli huma ojozi Chipfu ono g'ò p̄furu lẹ mgbaka igwe yẹ alì; m̄futa ogu-echi mabẹ lẹ Jierúsalem̄u. Teke ono bẹ Dévidi yẹ ndu bụ ọgerenya t̄koru yegbaa uwe-aph̄u; daa kpubechaa iphu l'alì.

17Dévidi bya asu Chileke: “Ò kwa m̄bedua bẹ t̄ru ekemu g'a gua ndu-a ọgu ono. Mb̄u-a; ọo m̄bedua bẹ meru iphe-ẹjì; mb̄u l'ọo m̄bedua bẹ meru iphe, ad̄udu ree. ? Unwu at̄ru-a mehunuru ole? Jiko Chipfu, bụ Chileke mu; iphe, mu arwo ngu bụ g'ò buru m̄bedua waa ndibe nna mu bẹ ịi-da ẹjo ẹka l'ẹhu. Te kweshinu g'ẹjo-ẹhu-a d̄uru ndibe ngu!”

18T̄obudu iya bụ; ojozi Chipfu ono s̄ Gadu g'o je epfuaru Dévidi g'o je akp̄aru Chipfu ọru-ngweja l'oma ẹka ono, Ọnanu, bụ onye Jiebusu an̄duje echishi ẹswa lẹ balì ono.

19Ọo ya bụ; Dévidi t̄gbua jeshia eme ẹgube ono, Gadu gude ẹpha Chipfu pfuaru iya ya ono.

20Teke ono bẹ Ọnanu echishi witi; ọ bya aghak̄obe huma ojozi-imigwe ono; yẹle unwegirima iya ẹno, yẹle iya n̄ t̄ko domichaa onwop̄e.

21Dévidi bya ejepfushia Ọnanu; Ọnanu lee ɛnya bya ahuma Dévidi g'ooje abyapfuta iya; o shi l'ẹka oochi witi ono l̄futa; je ephozeta iphu l'alì l'atatiphu Dévidi.

22Dévidi s̄ Ọnanu: “N̄nu mu alì-a, bụ ẹka iichije balì-a gẹ mu kp̄aru Chipfu ọru-ngweja; k'ophu ẹjo iphe-ememe-a l'eme ndu-a l'e-buhu. Ree mu iya erere gẹ mu p̄f̄-dzua ngu ụgw̄o iya.”

23Ọnanu s̄ Dévidi: “Wota iya roya. Gẹ ḡbe nnajiuphu mu, bụ eze gudekp̄e ya ph̄ mee iphe, d̄u ngu ree. Mu a-n̄ eswi, ee-gude gwee ngweja-akp̄o-ọku ọbu. Mu an̄ iphe, eegudeje echishi ẹswa l'ereshi g'ò buru nk̄u; n̄ witi g'e gude gwee ngweja-nri. Iphe ono g'ò ha bẹ mu a-n̄kota.”

24Eze, bụ Dévidi s̄ Ọnanu: “Waawakwa; mu a-p̄f̄-dzu aswa iya ap̄f̄-dzu. Mu te ewotadu iphe, bụ iphe ngu n̄ Chipfu. Ọphu mu egudedu iphe, ad̄udu iphe, o phuru mu egwe ngweja-akp̄o-ọku.”

25Ọo ya bụ; Dévidi p̄f̄ Ọnanu mkp̄ola-ododo, ẹrwa iya d̄u un̄ sh̄kelu l'ukporo sh̄kelu iri g'ò buru ụgw̄o alì ono.

26Dévidi bya akp̄aru Chipfu ọru-ngweja l'ẹka ono; bya egwee ngweja-akp̄o-ọku; m̄ ngweja-ẹhu-guu l'eli iya; bya araku Chipfu; Chipfu shi l'imigwe gude ọku bya aza iya oku l'eli ọru-ngweja ono.

27T̄obudu iya bụ; Chipfu kar̄u ojozi ono; g'ò m̄-phu ogu-echi ono az̄u l'ọbo iya.

28Teke ono; Dévidi bya ahuma lẹ Chipfu bẹ zar̄u iya oku l'ẹka ono, Ọnanu, bụ onye Jiebusu echishije ẹswa lẹ balì ono; ọ n̄du l'ẹka ono gweshia ngweja.

29Ishi iya bụ lẹ teke ono bẹ ụlo-ẹkwa Chipfu ph̄, M̄osisu meru l'echīgu ph̄; yẹle ọru-ngweja ẹka eegweje ngweja-akp̄o-ọku; bẹ bukota l'ẹka aagwajẹ iphe lẹ mkp̄kpu Gibiȳonu bẹ ọ n̄kota.

³⁰Ole Dévidi te ejeduru l'iphu ẹka ono g'ọ jita Chileke; kele ọotsu ogu-echi ojozi Chipfu ono ebvu.

1 Iphe, ndu eze meru 22

¹Tọbudu iya bu; Dévidi su: “Ọo ẹka-a be ọlo Chipfu, bu Chileke a-du; ọ buru l'ẹka-a be ọru-ngweja a-dukwapho; mbu ẹka ndu Ízurelu a-nọduje egwe ngweja-akpo-oku.”

Aakwakọbe k'akpu eze-ọlo Chileke

²Ọo ya bu; Dévidi tua ekemu g'a chikobe ndu bu nlwamulwa, no l'alí Ízurelu. Ọ bya eshi l'ime phe hota ndu a-nọdu akwachashi mkpuma g'ephe kwachaa mkpuma, ee-gude kpua ọlo Chileke ono.

³Ọ nukwarupho mkpurukpu-ígwè, du igwerigwe g'e gude kpushia nggu, aakupyabechea le mgbo onu-oguzo; m'ophu ee-gude jigbabe iphe ajigbabe; bya anukwapho onyirubvu, du igwerigwe k'ophu a ta amadu g'ee-shi tua ẹrwa iya.

⁴Ọ bya anu oshi sida, bu aguta aguta; noo kele ndu Sayidonu; me ndu Taya be vulataru Dévidi oshi sida, du igwerigwe.

⁵Dévidi su: “Nwa mu Sólomonu be bu nwatanshi, adudu iphe, ọ mawaru. Temẹ ọlo obu aa-kpuru Chipfu obu be a-kwata paa ẹka apaa. Ọlo obu be aa-nọdu atu onu iya; temẹ l'ọ du-dzuru ndiphe l'ophu biribiri. Ọo ya bu le mu a-kwakọbe ẹka iya akwakọbe.” Ọo ya bu; Dévidi kwakọbe g'ee-gude kpua ọlo ono; ọkpobe akwakọbe temẹ ọ nwuhuje.

⁶Tọbudu iya bu; o kua nwa iya, bu Sólomonu; tọaru iya ekemu su iya g'ọ kpuaru Chipfu, bu Chileke ke Ízurelu ọlo.

⁷Dévidi su Sólomonu: “Nwa mu; o shi du mu l'obu ge mu kpuaru Chipfu, bu Chileke mu ọlo.

⁸Obenu le Chipfu byaru epfuaru mu su: ‘I gbunukawaru ọchi; lwuwa ọgu, paru ẹka apaa. Ọ to budu ngu a-kpuru mu ọlo. I gbunukawaru ọchi l'eliphe-a l'ẹnya nkemu.

⁹Aa-nwutaru ngu nwa nwoke. Nwata obu be a-buru onye emeje ge nchi du doo. L'oo-me ge yele ndu ohogu iya mgburugburu zee jii. Epha iya be a-buru Sólomonu. Ọ buru teke ọ bu eze be mu e-me ge nchi du ndu Ízurelu doo; ekameka adakotaru phe jii.

¹⁰Ọ buru yebedua be a-kpuru mu ọlo. Ọo-buru nwa mu. Mbẹdua aburu nna iya. Mu emee g'abubu ọ bu eze le Ízurelu nguru anguru jasuru asuru.’

¹¹“Nwa mu; ge Chipfu swikwaru ngu eswiru; k'ophu bu l'ii-kpu ọlo Chipfu, bu Chileke ngu ono kpukota; egube ono, o pfuru iya l'ehu ngu ono.

¹²Ọo ge Chipfu nu ngu oriri; mee g'iphe doje ngu ẹnya; k'ophu bu le teke o meru g'ike du ngu; g'i buru onye-ishi ndu Ízurelu; be ii-buru onye a-nọduje eme ekemu Chipfu, bu Chileke ngu ono.

¹³Teke ono bu; o -buru l'i nwuberu enya eme iphe, o turu okpa iya; me omelali ono, Chipfu karu Mosisu ge ndu Izurelu meje ono; be iphe a-noduepho ejehuru ngu. Shihukpopho ike; shihu obu ike. Ta atsukwa ebvu; ophu ike abvukwa ngu.

¹⁴“Mu jeru iphe-ehuka ge mu e-shi dobe iphe, ee-gude mee k'ulo Chipfu ono. Mu doberu mkpola-ododo, erwa iya du ukporo unu talentu ugbo iri l'ebo l'unu talentu iri; bya edobe mkpola-ochaa, erwa iya du ukporo unu talentu ugbo unu eto l'ukporo labo l'iri; bya akwatakpo dobe onyirubvu; me mkpurukpu-igwe, du shingushingu k'ophu a ta atukotadu erwa iya atutu. Mu dobekwarupho oshi; bya edobe mkpuma. E -mechaa, l'ii-yekwabawa iya ro iphe.

¹⁵Ndu ozi be i nweru nweru k'etsutsu iya. I nweru ndu akwachashi mkpuma; nweru ndu edoje eja ulo; nweru ndu kapyinta; mewaro ndu eme ona l'uzo, du iche iche;

¹⁶ndu emeje ona le mkpola-ododo no iya; me ndu ke mkpola-ochaa; me ndu k'onnyirubvu; teme ndu ke mkpurukpu-igwe nodukwa iya pho. Ephe bu aguta aguta. Gbalihu wata ozi obu. Ge Chipfu swikwaru ngu eswiru!”

¹⁷Devidi bya akakwarupho ndu-ishi ndu Izurelu l'ophu g'ephe yetaru nwa iya, bu Solomonu eka; su phe:

¹⁸“? Chipfu, bu Chileke unu ta anonaa swiru unu to? ? To meduru ge nchi du unu doo l'ekameka to? O mewaru ge ndu bu l'ali-a lwakota mu l'eka; teme a kapyabewa ndu ali-a enya l'iphu Chipfu; me l'eka ndu nkiya no.

¹⁹Nta-a bukwa g'unu gude ndzu unu; me obu unu choo Chipfu, bu Chileke unu. Unu wu-lihu kpa eka-du-nso ke Chipfu, bu Chileke; k'ophu aa-pata okpoko oghandzu Chipfu; me ivu, du nso, bu ke Chileke bya edobe l'ulo ono, aa-kpuru Chipfu ono.”

1 Iphe, ndu eze meru 23

Ozi, duru ndu Lívayi

¹Devidi kahuepho; nowaa apha, du igwerigwe; o mee nwa iya, bu Solomonu eze ndu Izurelu.

²O bya ekukobekwapho ndu-ishi ndu Izurelu l'ophu; me ndu-uke Chileke; me ndu Lívayi.

³Ndu Lívayi, nowaru e -shi l'ukporo apha l'apha iri kwaseru be a gukotaru ogo. Iphe, unwoke phe tukoru du buru ukporo unu ugbo eno l'unu iri l'ise.

⁴Devidi su: “Ukporo unu unwoke ugbo eto l'ime ndu ono be a-nodu eleta enya l'ozi, eeje l'ulo Chipfu ono. Unu unwoke iri l'ise aburu ndu-ishi; me ndu-ikpe.

⁵Unu unwoke iri a-buru ndu nche onu-oguzo; unu unwoke iri ozo; e gude ngwa-ebvu, mu metaru g'e gudeje gu ebvu ajaja; gude agu ebvu aja Chipfu.”

⁶Devidi bya ekee phe l'okpa l'okpa g'ephe du l'awa Lívayi, bu iya bu Geshonu; me Kohatu; waa Merari.

⁷Ndu ophu eketaru yeru ndu Geshonu bu: Ladanu; me Shimeyi.

- ⁸Unwu Ladanu bu Jiehiyelu, bu okpara; waa Zetamu; me Jiowelu. Eto be ephe tukoru du.
- ⁹Unwu ke Shimeyi bu Shelomotu; me Haziyele; me Haranu. Eto be ephe tukoru du. Ephe bukotaru ndu-ishi l'anya unuphu ibe Ladanu.
- ¹⁰Ndu ophu bu eri Shimeyi bu: Jiahatu; me Zina; me Jieyushi; me Beraya. Eno be ephe tukoru du.
- ¹¹Jiahatu bu okpara; Ziza buru otsota. Jieyushi waa Beraya be ta nwutaduru unwoke igwerigwe; a gua phe ge ndu enya-unuphu lanu.
- ¹²Unwu Kohatu buru: Amuramu; me Izuha; me Hiburunu; me Uzele. Eno be ephe tukoru du.
- ¹³Unwu ke Amuramu bu: Eronu; me Mosisu. Eronu be e doberu iche; mbu yebedua waa unwu iya g'ephe buru ndu e-wojeru iphe, kakota adu nsọ dobe nsọ; kpoje unwu-isensu oku l'iphu Chipfu jasuru asuru. O buru phe a-nodu ejeru Chipfu ozi; gude epha iya ago onu-oma jasuru l'ojejeje.
- ¹⁴A bya le Mosisu, bu onye ke Chileke be a guru unwu iya yeru ndu Liviayi.
- ¹⁵Unwu Mosisu bu: Geshonu me Eliyeza.
- ¹⁶Unwu ke Geshonu buru: Shebele, bu okpara.
- ¹⁷Unwu ke Eliyeza bu: Rehabaya; yebedua bu okpara. Eliyeza ta nwutaeduru nwa nwoke ozo; ole unwoke, Rehabaya nwushiru dukwanu igwerigwe shii.
- ¹⁸Unwu ke Izuha bu: Shelomotu, bu iya bu okpara.
- ¹⁹Unwu ke Hiburunu bu: Jieraya, bu okpara; Amaraya buru otsota; Jiahaziyele buru k'eto; Jiekameyamu buru k'eno.
- ²⁰Unwu ke Uzele bu: Mayika, bu okpara; Ishaya buru otsota.
- ²¹Unwu ke Merari bu: Mahuli waa Mushi. Unwu ke Mahuli buru: Eleyaza waa Kishi.
- ²²Eleyaza nwuhuru; ophu o nwutaduru unwoke. Oo unwanyi be o nwushiru kpoloko. O buru unwu Kishi, bu abubu phe be lukotaru phe nu.
- ²³Unwu ke Mushi bu: Mahuli; me Eda; waa Jieremotu. Eto be ephe tukoru du.
- ²⁴Ndu ono bukota eri Liviayi l'anya-unuphu l'anya-unuphu phe. Ephe bukota ndu-ishi l'anya-unuphu ibe nna phe; egube e deru epha phe l'ekwo; bya agua phe ogo l'ehu l'ehu; mbu ndu ono, nowaru e -shi l'ukporo apha kwaseru; bya aburu ndu eje ozi l'ulo Chipfu ono.
- ²⁵Noo kele Davidi be pfuhawaru su: "Chipfu, bu Chileke ke Izurele be mewaru ge nchi du ndibe mu doo; teme o buwaru le Jerusalemu g'oo-buru iya jasuru le tuutuutu le mimiimii.
- ²⁶O to gbaeduru ge ndu Liviayi vupheje ulo-mkpu; me iphe, e gude eje ozi l'ime iya."

²⁷Ọ bụru opfu ikpazu, Dévidi pfuru bẹ meru g'o gude a gụa ndu Lívayi ọgu e -shi lẹ ndu nọwaru ụkporo apha kwaseru.

Ozi, duru ndu Lívayi l'ulo Chipfu

²⁸Ozi, duru ndu Lívayi bu g'ephe yetajeru unwu Eronu eka l'ozi, eeje l'eze-ulo Chipfu; mbu l'oma-unuphu eze-ulo ono; me le mkpuru, dugbaa ya nu; mekpoo emecha iphemiphe, du nsọ emecha; mewaru ozi ozo, eeje l'eze-ulo Chileke ono.

²⁹Ozi ozo, duru phe nu bu ke buredi, eedobeje l'iphu Chileke; me k'ukpokutu-nri, eegudeje egwe ngweja-nri; me k'echa-mbekee, te ekoduru ekoko; me k'eghe iphe egheghe; me k'iphe, bukpoo iphe, aagwoje agwogwo; mewaro atu iphe atutu; maru ole, o du; me g'o habe.

³⁰Utsugutsu be ephe aa-pfujeru ekele Chipfu ekele; aja iya ajaja. Ephe e-mejekwa iya pho nno l'uzenyashi;

³¹mekpoo teke e gwee ngweja-akpo-oku k'eswe-atuta-unme; me k'onwa ophuú; me k'obo-iphe, a turu teke aaboje iya. Ephe a-noduje eje ozi l'atatiphu Chipfu tekenteke; mbu egube a tuburu phe g'ephe meje iya.

³²Oo ya bu l'oo phe be o du l'eka; mbu ozi, eeje l'ulo-ekwa-ndzukọ; me k'eka-du-nsọ; mbu g'ephe yetajeru unwunna phe, bu unwu Eronu eka l'ozi, du l'ulo Chipfu ono.

1 Iphe, ndu eze meru 24

Ọgbo uke Chileke

¹Waa g'e gude keshia unwu Eronu baa. Unwu Eronu bu: Nadabu; me Abihu; me Eleyaza; waa Itama.

²Nadabu yele Abihu be vu nna phe uzo nwuhu; ophu o dudu onye ophu nwutaru nwa. Oo ya bu; Eleyaza yele Itama jeaha ozi ndu-uke Chileke.

³Zadoku, bu oshilokpa Eleyaza; yele Ahimeleku, bu oshilokpa Itama be yetaru Dévidi eka kee phe g'ephe a-nodugba eje ozi, duru phe nu.

⁴L'oshilokpa Eleyaza be a ka enweru ndu-ishi eme l'oshilokpa ke Itama. Waa g'ephe gude keshia phe bu owa: l'oshilokpa ke Eleyaza be e ketaru umadzu iri l'ishii, bugbaa ndu-ishi l'enya-unuphu l'enya-unuphu; bya eketa umadzu esato, bugbaa ndu-ishi l'enya-unuphu l'enya-unuphu l'eri ke Itama.

⁵A turu ido gude kee phe; ephe haru enya nhamunha; noo kele oo g'e nweru ndu-ishi ozi eka-du-nsọ; me ndu-ishi ozi Chileke l'oshilokpa Eleyaza bu g'e nweru iya l'oshilokpa ke Itama.

⁶Onye edeje ekwo, bu Shemaya; nwa Netanelu; mbu onye Lívayi be no l'iphu eze deshia epha phe; me l'iphu ndu-ishi, bu Zadoku, bu onye uke Chileke; me Ahimeleku, bu nwa Abyiyata; me l'iphu ndu-ishi enya-unuphu ndu-uke Chileke; me ndu Lívayi. E vuru uzo hota enya-unuphu lanu l'eri Eleyaza; bya agbe teke ono hota enya-unuphu lanu l'eri Itama.

- ⁷A tūru ido kẹ mbụ; ọ daaru Jiehoyaribu; a tūa ido k'ẹbo; ọ daaru Jiedaya.
- ⁸Ido k'ẹto daaru Harimu; ido k'ẹno daaru Seyorimu;
- ⁹k'ise daaru Malukayijia; k'ishii daaru Mijiaminu.
- ¹⁰Ido k'ẹsaa daaru Hakozu; k'ẹsato daaru Abáyijia;
- ¹¹kẹ tete daaru Jieshuwa; k'iri daaru Shekanaya;
- ¹²k'iri lẹ nanu daaru Elyashibu; k'iri l'ẹbo daaru Jiakimu;
- ¹³k'iri l'ẹto daaru Hupa; k'iri l'ẹno daaru Jieshebeyabu;
- ¹⁴k'iri l'ise daaru Biliga; k'iri l'ishii daaru Ima;
- ¹⁵k'iri l'ẹsaa daaru Heziru; k'iri l'ẹsato daaru Hapizezu;
- ¹⁶k'iri lẹ tete daaru Petahaya; k'ụkporo daaru Jiehezekẹlu;
- ¹⁷k'ụkporo lẹ nanu daaru Jiakinu; k'ụkporo l'ẹbo daaru Gamulu;
- ¹⁸k'ụkporo l'ẹto daaru Delaya; k'ụkporo l'ẹno daaru Mazaya.
- ¹⁹Noo g'e gude gbaa pẹ g'ẹpẹ jeje ozi bụ ono lẹ teke ẹpẹ bahuru l'ulo Chipfu; ẹgube ono, ocheoroke pẹ, bụ Eronu tūru pẹ ẹka iya, bụ iya bụ gẹ Chipfu, bụ Chileke kẹ Izurelu tūru iya ya l'ekemu.
- ²⁰A bya l'eri Lívayi ndu ọphu phoduru nū: L'unwu Amuramu bẹ a hotaru Shubelu; l'unwu kẹ Shubelu buru Jiehudeya.
- ²¹A bya l'eri kẹ Rehabiya; onye shi l'unwu Rehabaya bụ Ishaya, bụ ọkpara.
- ²²Onye shi l'eri kẹ Izuha bụ Shelomotu; onye shi l'unwu Shelomotu buru Jiahatu.
- ²³L'eri Heburonu bụ Jieraya, bụ iya bụ ọkpara; Amaraya buru otsota; Jiahaziyelu buru onye k'ẹto; Jiekameyamu buru k'ẹno.
- ²⁴L'eri kẹ Uzẹlu bụ Mayika; onye shi l'unwu Mayika buru Shamiru.
- ²⁵Nwune Mayika kẹ nwoke bụ Ishaya. Onye shi l'unwu Ishaya buru Zekaraya.
- ²⁶L'unwu kẹ Merari bẹ bụ Mahuli waa Mushi. A hota Beno; nwa Jiazaya.
- ²⁷L'eri kẹ Merari bẹ ndu shi l'unwu Jiazaya bụ: Beno; mẹ Shohamu; mẹ Zaku; mẹ Ibiri.
- ²⁸L'eri Mahuli bụ Eleyaza. Eleyaza ta anwutaduru unwoke.
- ²⁹A bya l'eri Kishi bẹ bụ nwa Kishi, bụ Jierahumelu.
- ³⁰L'unwu kẹ Mushi buru Mahuli; mẹ Eda; waa Jierimotu. Ndu ono bukota eri Lívayi l'ẹnya-unuphu pẹ l'ẹnya-unuphu pẹ.
- ³¹Ẹphebdua bẹ tukwarupho ido; ẹgube ono, unwunna pẹ, bụ oshilokpa Eronu tūru pho. Ẹpẹ nọ l'iphu eze, bụ Dévidi; mẹ l'iphu Zadoku; mẹ Ahimeleku; mẹ l'iphu ndu-

ishi ɛnya-unuphu ndu-uke Chileke; mɛ kɛ ndu Lívayi tɔa ido ono. Ɔ bɔru g'e meru ɛnya-unuphu ɔnwunna phɛ k'ogerenya bɔ g'e meru ndu ophu bɔ nwata.

1 Iphe, ndu eze meru 25

Ndu aguje ebvu

¹Dévidi yɛle ndu-ishi ndu ojogu tɔko shi l'unwu Asafu; mɛ Hemanu; mɛ Jiedutunu hɔta ndu e-gudeje ogumogu; mɛ une; mɛ ogelenda epfuchiru Chileke. Waa ɛpha ndu eje ozi ono bɔ ɔwa:

²L'unwu kɛ Asafu bɔ: Zaku; mɛ Jiósɛfu; mɛ Netanaya; mɛ Asharela. Unwu Asafu ono bɛ bɔ Asafu bɔ onye anɔduje egoshi phɛ iphe, ɛphe e-me. Asafu l'onwiya bɔru eze bɛ ɔ nɔ l'ɛka epfuchiru Chileke.

³A bya lɛ Jiedutunu; ndu ophu shi l'unwu iya bɔ: Gedalaya; mɛ Zeri; mɛ Jieshaya; mɛ Shimeyi; mɛ Hashabaya; mɛ Matitaya. Ɛphe dɔ ɔmadzu ishii. Ɔ bɔru nna phɛ, bɔ Jiedutunu bɛ bɔ onye ɛphe nɔ l'ɛka egudeje ogumogu agu ebvu ekele; mɛ ebvu ajaja; shi nno epfuchiru Chipfu.

⁴A bya l'unwu Hemanu; ndu ophu shi l'unwu iya bɔru: Bukaya; mɛ Matanaya; mɛ Uzɛlu; mɛ Shebɛlu; mɛ Jierimotu; mɛ Hananaya; mɛ Hanani; mɛ Ɛliyata; mɛ Gidaliti; mɛ Romamiti-Eza; mɛ Jioshubekasha; mɛ Maloti; mɛ Hotiru; mɛ Mahaziyotu.

⁵Ndu ono g'ɛphe ha bɔkota unwu Hemanu, bɔ onye aphujeru eze ophulɛnya. Ɔ bɔru shita l'ukwe, Chileke kweru iya bɛ o shi nwushia phɛ; k'ophu oo-shi nno bɔru onye ike dɔ. Chileke bɛ nɔru Hemanu nwa nwoke iri l'ɛno; waa unwada ɛto.

⁶G'ɛphe ha shi nɔdukota nna phɛ l'ɛka. Ɔ bɔru iya egoshije phɛ ebvu, ɛphe a-nɔdu agu l'ulo Chipfu. Ɛphe egudeje ogelenda; mɛ une; mɛ ogumogu agu ebvu ono l'ulo Chileke. Asafu; mɛ Jiedutunu; mɛ Hemanu bɛ shi nɔdukota l'ɛka eze; eme iphe, ɔ suru g'ɛphe mee.

⁷Iphe, ɛphe dɔkota; mbɔ ndu aguje ebvu ono bɛ bɔ ɔkporo iri l'ɛno l'umadzu ɛsato. Ɛphe bɔkota ndu e ziru k'ebvu ono ezizi; bya abɔru ndu k'ebvu, aaguru Chipfu doru ɛnya.

⁸Ɛphe tɔru ido l'ɛhu l'ɛhu gude haa ozi phɛ; mbɔ ɛgirima mɛ ɔgerɛnya; mɛ onye ezi iphe; mɛ ndu ophu eezi iya ezizi.

⁹Ido kɛ mbɔ bɛ a tɔru Asafu; ɔ daaru Jiósɛfu; k'ɛbo daaru Gedalaya. Yɛbedua mɛ unwunna iya; waa unwu iya bɛ dɔ iri l'ɛbo.

¹⁰K'ɛto daaru Zaku; yɛle unwu iya; mɛ unwunna iya. Ɛphe dɔ iri l'ɛbo.

¹¹Ido k'ɛno daaru Izuri; yɛle unwu iya; mɛ unwunna iya. Ɛphe dɔ iri l'ɛbo.

¹²K'ise daaru Netanaya; yɛle unwu iya; mɛ unwunna iya. Ɛphe dɔ iri l'ɛbo.

¹³K'ishii daaru Bukaya; yɛle unwu iya; mɛ unwunna iya. Ɛphe dɔ iri l'ɛbo.

¹⁴K'ɛsaa daaru Jiesharela; yɛle unwu iya; mɛ unwunna iya. Ɛphe dɔ iri l'ɛbo.

- ¹⁵K'ēsato daaru Jieshaya; yeḗle ụnwu iya; me ụnwunna iya. Eḗphe dụ iri l'ẹbo.
- ¹⁶Kẹ tete daaru Matanaya; yeḗle ụnwu iya; me ụnwunna iya. Eḗphe dụ iri l'ẹbo.
- ¹⁷K'iri daaru Shimeyi; yeḗle ụnwu iya; me ụnwunna iya. Eḗphe dụ iri l'ẹbo.
- ¹⁸K'iri lẹ nanụ daaru Azarelu; yeḗle ụnwu iya; me ụnwunna iya. Eḗphe dụ iri l'ẹbo.
- ¹⁹K'iri l'ẹbo daaru Hashabaya; yeḗle ụnwu iya; me ụnwunna iya. Eḗphe dụ iri l'ẹbo.
- ²⁰K'iri l'ẹto daaru Shubelu; yeḗle ụnwu iya; me ụnwunna iya. Eḗphe dụ iri l'ẹbo.
- ²¹K'iri l'ẹno daaru Matitaya; yeḗle ụnwu iya; me ụnwunna iya. Eḗphe dụ iri l'ẹbo.
- ²²K'iri l'ise daaru Jieremotu; yeḗle ụnwu iya; me ụnwunna iya. Eḗphe dụ iri l'ẹbo.
- ²³K'iri l'ishii daaru Hananaya; yeḗle ụnwu iya; me ụnwunna iya. Eḗphe dụ iri l'ẹbo.
- ²⁴K'iri l'ẹsaa daaru Jioshubekasha; yeḗle ụnwu iya; me ụnwunna iya. Eḗphe dụ iri l'ẹbo.
- ²⁵K'iri l'ēsato daaru Hanani; yeḗle ụnwu iya; me ụnwunna iya. Eḗphe dụ iri l'ẹbo.
- ²⁶K'iri lẹ tete bẹ daru Maloti; yeḗle ụnwu iya; me ụnwunna iya. Eḗphe dụ iri l'ẹbo.
- ²⁷K'ụkporo daaru Eliyata; yeḗle ụnwu iya; me ụnwunna iya. Eḗphe dụ iri l'ẹbo.
- ²⁸K'ụkporo lẹ nanụ daaru Hotiru; yeḗle ụnwu iya; me ụnwunna iya. Eḗphe dụ iri l'ẹbo.
- ²⁹K'ụkporo l'ẹbo bẹ daru Gidaliti; yeḗle ụnwu iya; me ụnwunna iya. Eḗphe dụ iri l'ẹbo.
- ³⁰K'ụkporo l'ẹto daaru Mahaziyotu; yeḗle ụnwu iya; me ụnwunna iya. Eḗphe dụ iri l'ẹbo.
- ³¹K'ụkporo l'ẹno bẹ daru Romamiti-Eza; yeḗle ụnwu iya; me ụnwunna iya. Eḗphe dụ iri l'ẹbo.

1 Iphe, ndu eze meru 26

Ndu nche ọnu-abata eze-ulo Chileke

- ¹G'e gude keshia ndu eche ọnu-abata nche bẹ bụ: Ndu shi l'eri Kora bụ Meshelemaya, bụ nwa Kore, bụ oshilokpa Asafu.
- ²Meshelemaya bẹ nwushiru unwoke: Zekaraya bụ ọkpara iya; Jiediyelu buru otsota; Zebadaya buru onye k'ẹto; Jiaturiyelu buru onye k'ẹno;
- ³Elamu buru onye k'ise; Jiehohananu buru onye k'ishii; Eliyowenayi buru onye k'ẹsaa.
- ⁴Óbedu-Edomu nwushikwarupho unwoke: Shemaya bụ ọkpara; Jiehozabadu buru otsota; Jiowa buru onye k'ẹto; Saka buru onye k'ẹno; Netanelu buru onye k'ise;
- ⁵Amiyelu buru onye k'ishii; Isaka buru onye k'ẹsaa; Peyuletayi buru onye k'ēsato; noo kele Chileke goru ọnu-oma nụ Óbedu-Edomu.
- ⁶Nwa Óbedu-Edomu, bụ Shemaya bẹ nwushikwarupho unwoke, bugbaa ndu-ishi l'ẹnya-unuphu nna phe; kele eḗphe buchaa ndu tsuru lẹ nwoke.

- ⁷Unwu Shemaya bu: Otuni; me Refayelu; me Óbedu; me Eluzabadu. Unwunna phe, bu Elihu; me Semakaya be bukwapho ndu tsuru le nwoke.
- ⁸Ndu ono g'ephe ha be bukota oshilokpa Óbedu-Edomu. Ephe l'unwu phe me unwunna phe bukota ndu tsuru le nwoke; nweru ike k'eye ozi ono. Ephe du ukporo eto l'umadzu labo; mbu oshilokpa Óbedu-Edomu ono.
- ⁹Meshelemaya be nweru unwu; nweru unwunna, tsugbaaru le nwoke. Iri l'esato be ephe kpakota du.
- ¹⁰Hosa, bu oshilokpa Merari be nwushiru unwu. Shimiri bu okpara. O to budu yebdua bu okpara gedegede; ole nna iya wotaru iya mee okpara.
- ¹¹Hilikaya bu otsota; Tebalaya buru k'eto; Zekaraya buru k'eno. Unwu Hosa g'ephe ha; me unwunna iya be tukoru du iri l'eto.
- ¹²Ndu nche onu-abata ono be e keshigbaaru le ge ndu-ishi phe du. Ephe nwegbaaru ozi, ephe eje l'ulo Chipfu egube ono unwunna phe nweru ono.
- ¹³Ephe tua ido l'enya-unuphu l'enya-unuphu gude keshia onu-abata ono; mbu onye upfu me onye nta.
- ¹⁴Ido, a turu le k'onu-abata ophu no laaru uzo enyanwu-awawa be daru Shelemaya. A bya aturu nwa iya, bu Zekaraya ido; o daaru iya; mbu k'onu-abata ophu no l'uzo isheli. Zekaraya bu onye mgbazi, nweru egomunggo.
- ¹⁵Óbedu-Edomu be nkiya daru l'onu-abata ophu no l'uzo ndohali. O buru unwu iya be ido k'ulo, aakwakobeje iphe daru.
- ¹⁶Shupimu yele Hosa be bu ido k'onu-abata ophu no chebe uzo enyanwu-ariba be daru phe nu; yele oguzo Shaleketu, no l'aguga gbororo uzo imeli. Nche ono be a gbaru agbagba.
- ¹⁷L'oguzo k'uzo enyanwu-awawa be ndu Livayi aduje ishii eche le mboku. L'uzo isheli be ephe aduje eno le mboku; bya aduje eno l'uzo ndohali le mboku; bya aduje ebo ebo l'ulo, aakwakobeje iphe.
- ¹⁸A bya l'oma-unuphu ono, ibiya ophu no chebe uzo enyanwu-ariba be aaduje eno le gbororo; du ebo eche oma-unuphu ono gedegede.
- ¹⁹Noo g'e kekashiru ndu nche onu-abata ono bu ono; mbu oshilokpa Kora waa Merari.

Ulo eku k'ulo Chileke

- ²⁰Ulo eku k'ulo Chileke bu ndu Livayi ibe phe be o du l'eka; me ulo eku k'eka aakwakobeje iphe, e doberu nsọ. Onye bu ishi phe buru Ahayijia.
- ²¹A bya l'eri Ladanu; mbu oshilokpa Geshonu ono, ndu ophu shi l'eri Ladanu; mbu ndu bugbaa ishi l'enya-unuphu Ladanu, bu onye Geshonu be bu Jiehiyeli.
- ²²Jiehiyeli bu nna Zetamu. Nwune Zetamu buru Jiowelu. Oo phe be eku k'ulo Chipfu du l'eka.

²³A bya l'eri Amuramu; me eri Izuha; me eri Heburonu; me eri Uzelu bu:

²⁴Shebelu be bu onye-ishi eku k'eze-ulo Chileke ono. O bu oshilokpa Geshonu, bu nwa Mosisu.

²⁵A bya l'unwunna iya, bu eri Eliyeza: Eliyeza bu nna Rehabaya; Rehabaya buru nna Jieshaya; Jieshaya buru nna Jioramu; Jioramu buru nna Zikiri; Zikiri buru nna Shelomotu.

²⁶O buru Shelomotu yele unwunna iya be o du l'eka; mbu eka ono, aakwakobeje iphe, e doberu nsọ; mbu iphe, eze, bu Devidi; me ndu-ishi enya-unuphu ibe nna phe; me ndu-ishi unu ndu ojogu labo l'ukporo iri; me ndu-ishi ndu ojogu ukporo ise; me ndu-ishi ndu ojogu ozo doberu nsọ.

²⁷Iphe, ephe gwetaru l'ogu be ephe haru dobe nsọ g'e gude mekwaa ulo Chipfu ono.

²⁸Iphe, bukpo iphe, ephe doberu nsọ; mbu Samelu, bu onye aphuje ophulanya; waa Solu; nwa Kishi; waa Abuna nwa Neru; wafua Jiowabu; nwa Zeruya; be bu Shelomotu; yele unwunna iya be eletakota iya enya.

Ndu e yeru l'ishi

²⁹E shi l'eri Izuha tua Kenanaya; yele unwu iya eka g'ephe buru ndu a-nodu eje ozi, abudu l'eze-ulo Chileke. A turu phe eka g'ephe buru ndu-ishi ozi waa ndu ogbo-ikpe ke Izurelu.

³⁰E shi l'eri Heburonu hota Hashabaya; yele unwunna iya g'ephe buru ndu eleta ndu Izurelu enya; l'uzo enyanwu-ariba enyimu Jiodanu le k'iphe, bukpo ozi, e jeru Chipfu; me ozi, eejeru eze. Ephe du unu unwoke eno l'ukporo ise; bukpotaru ndu tsuru le nwoke.

³¹O buru Jieraya be bu onye-ishi l'eri Heburonu, bu iya bu g'e deru iya l'ekwo, e deshuru g'e shiru nwua phe l'enya-unuphu phe. L'apha, kwe Devidi ukporo apha labo e -shi teke o beberu bya aburu eze; be o gu-vuru l'ekwo l'o nweru ndu shi l'eri ono, bu ndu tsuru le nwoke, bu le mkpukpu Jiaza l'ali Giladu.

³²Eze, bu Devidi bya ahota Jieraya yele unwunna iya g'ephe buru ndu-ishi, eleta ipfu Rubenu enya; me ipfu Gadu; me nkeru-ebo ipfu Manase; l'iphe, eeme l'uzo ke Chileke; me iphe, eeme l'opfu ehuzo eze. Ephe du unu unwoke ishii l'ukporo iri l'ise; bukpotaru ndu tsugbaaru le nwoke; bya abucharu ndu-ishi l'enya-unuphu ibe nna phe.

1 Iphe, ndu eze meru 27

Ndu ojogu

¹Owaa bu epha ndu Izurelu; mbu ndu-ishi l'enya-unuphu; me ndu-ishi unu ndu ojogu labo l'ukporo iri iri; me ndu-ishi ndu ojogu ukporo ise ise; me ndu-ishi, bu ndu ejeru eze ozi le k'iphe, lakporo le k'ibiya ophu e ketaru phe ye. Oobujeru ndu ophu eje ejeje; ndu ophu alwa alwalwa l'onwa l'onwa jeye apha asugba ishi. A gbachaaru phe unu ukporo eto eto.

²Onye-ishi ndu ojogu ivuzo; mbu ndu k'onwa ke mbu be bu Jiashobamu nwa Zabudelu. Ndu e keru yeru iya du unu ugbo ukporo eto.

³Jiashobeyamu be shi l'eri Perezu. O buru iya bu onye-ishi ndu-ishi ojogu l'onwa k'ivuzo.

⁴Onye-ishi ndu ojogu k'ebo mbu ndu k'onwa k'ebo be bu Dodayi, bu onye shi l'eri Ahowa. Mikulotu be yikwapho le ndu-ishi. Ndu nkiya be dukwapho unu ukporo eto.

⁵Onye-ishi ndu ojogu k'eto; mbu ndu k'onwa k'eto be bu Benaya; nwa Jiehoada, bu onye uke Chileke. Ndu nkiya be du unu ukporo eto.

⁶Oo yebedua bu Benaya ono, yi le ndu ojogu ukporo l'iri pho; buru iya bu onye-ishi ndu ojogu ukporo l'iri ono. Nwa iya, bu Amizabadu be bu ishi le ndu ojogu, e keru yeru iya ono.

⁷Onye-ishi ndu ojogu ke eno; mbu ndu k'onwa k'eno be bu Asahelu, nwune Jiowabu. Nwa iya, bu Zebadaya be mecharu buru onye-ishi l'ozo iya. Ndu nkiya be du unu ukporo eto.

⁸Onye-ishi ndu ojogu k'ise; mbu ndu k'onwa k'ise be bu Shamuhutu, bu onye eri Izura. Ndibe nkiya be du unu ukporo eto.

⁹Onye-ishi ndu ojogu k'ishii; mbu ndu k'onwa k'ishii be bu Ira; nwa Ikeshi, bu onye eri Tekowa. Ndibe nkiya be du unu ukporo eto.

¹⁰Onye-ishi ndu ojogu ke esaa; mbu ndu k'onwa k'esaa be bu Helezu, bu onye shi l'eri Pelonu; mbu onye ipfu Ifuremu. Ndibe nkiya be du unu ukporo eto.

¹¹Onye-ishi ndu ojogu k'esato; mbu ndu k'onwa k'esato be bu Sibekayi, bu onye eri Husha; mbu onye shi l'eri Zera. Ndibe nkiya be du unu ukporo eto.

¹²Onye-ishi ndu ojogu ke tete; mbu ndu k'onwa ke tete be bu Abiyeza ke Anatotu; onye ipfu Benjaminu. Ndibe nkiya be du unu ukporo eto.

¹³Onye-ishi ndu ojogu k'iri; mbu ndu k'onwa k'iri be bu Maharayi ke Netofa; onye shi l'eri Zera. Ndibe nkiya be du unu ukporo eto.

¹⁴Onye-ishi ndu ojogu k'iri le nanu; mbu ndu k'onwa k'iri le nanu be bu Benaya ke Piratonu; onye okpa-ipfu Ifuremu. Ndibe nkiya be du unu ukporo eto.

¹⁵Onye-ishi ndu ojogu k'iri l'ebo; mbu ndu k'onwa k'iri l'ebo be bu Heludayi ke Netofa; onye shi l'eri Otuniyelu. Ndibe nkiya be du ukporo eto.

Ndu bugbaa ndu-ishi l'okpa-ipfu ndu Izurelu

¹⁶Ndu bugbaa ndu-ishi l'okpa-ipfu ndu Izurelu bu owana: Onye bu ishi l'okpa-ipfu Rubenu be bu Eliyeza nwa Zikiri. Onye bu ishi l'okpa-ipfu Simiyonu buru Shefataya nwa Maka.

¹⁷Onye bu ishi l'okpa-ipfu Livayi be bu Hashabaya nwa Kemelu. Onye bu ishi l'okpa-ipfu Eronu buru Zadoku.

- ¹⁸Onye bụ ishi l'okpa-ipfu Jiuda bę bụ Elihu, bụ nwune Dévidi. Onye bụ ishi l'okpa-ipfu Isaka bụru Omuri nwa Mayikelu.
- ¹⁹Onye bụ ishi l'okpa-ipfu Zebulun bę bụ Ishimaya nwa Obedaya. Onye bụ ishi l'okpa-ipfu Nafutali bụru Jierimotu nwa Azuriyelu.
- ²⁰Onye bụ ishi l'okpa-ipfu Ifuremu bụ Hosiya nwa Azazaya. Onye bụ ishi lę nkeru-ębo okpa-ipfu Manase bụru Jiowelu nwa Pedaya.
- ²¹Onye bụ ishi kę nkeru-ębo okpa-ipfu Manase ophu bu l'alı Giladu bę bụ Ido nwa Zekaraya. Onye bụ onye-ishi l'okpa-ipfu Benjaminu bụru Jiasiyelu nwa Abuna.
- ²²Onye bụ ishi l'ipfu Danu bę bụ Azarelu nwa Jierohamu. Noo ndu-ishi l'okpa-ipfu ndu Izurelu bụ ono.
- ²³Dévidi bę ta aguduru ndu ophu nowaru ukporo apha; ozoo ndu ophu teke erwudu iya nu; kele Chipfu bę kweru ukwe lę ya e-me gę ndu Izurelu habe igwerigwe gę kpokpode, no l'igwe.
- ²⁴Jiowabu; nwa Zeruya bę wataru agu ogu ono; ophu o to gufuduru iya l'ishi. O buri k'ogu, a guru ono bę Chipfu gude tukoshi ndu Izurelu oke ehu-eghu iya. Ophu e te deduru ogu ono l'ekwo, e deshiru iphe, e meru lę teke Dévidi bụ eze.

Ndu-ishi ibe eze

- ²⁵Onye bụ ishi l'ulo, eze akwakobeje eku iya bę bụ Azumavetu; nwa Adiyelu. Onye bụ ishi ulo, aakwakobeje eku k'alı ono buri Jionatanu; nwa Uzaya; mbu ulo eku, du lę mkpukpu lę mkpukpu; me lę mkpukpu kę nshı; mekpoo l'ulo-eli l'ulo-eli.
- ²⁶Onye-ishi ndu eje ozi egu, bu iya bu ndu akọ ofu buri Ezuri; nwa Kelubu.
- ²⁷Onye bụ ishi ofu-vayinu bę bụ Shimeyi kę mkpukpu Rama. Onye bụ ishi, k'emefuta me l'ofu-vayinu; me k'eka aakwakobeje iya buri Zabudi kę mkpukpu Shifamu.
- ²⁸Onye-ishi, k'oshi olivu; me oshi sikamo, no l'alı okpa ubvu, no l'uzo enyanwu-ariba du l'eka bę buri Belu-Hananu kę mkpukpu Geda. Onye bụ ishi, l'eka eedobeje manu buri Jiowashi.
- ²⁹Onye-ishi, eleta enya l'eku, ata nri l'alı Sharonu bę buri Shiturayi, bu onye shi Sharonu. Onye bụ ishi, eleta enya l'eku ophu no lę nsuda nsuda buri Shafatu; nwa Adulayi.
- ³⁰Onye bụ ishi, eleta k'inya-kamelu bę buri Obilu, bu oshilokpa Ishimelu. Onye bụ ishi, eleta kę nkafu-igara buri Jiehudeya, bu onye Meronotu.
- ³¹Onye bụ ishi, eleta k'eghu; me aturu bę buri Jiazizu, bu oshilokpa Hega. Ndu ono g'ephe ha bę bukota ndu eleta iphe Dévidi enya.
- ³²Nwune nna Dévidi, bu Jionatanu bę buri onye mgbazi. O bu onye enya erwuje alı; bya aburu onye edeje ekwo. Yele Jiehiyelu; nwa Hakumoni bę buri ndu eleta unwegirima eze enya.

³³Ahitofelu be bu onye mgbazi eze. Hushayi, bu oshilokpa Akụ be bu eguru ònyà eze.

³⁴Ahitofelu be bu Jiehoyada nwa Benaya; me Abyiyata be mecharu nochia enya iya. O buru Jiowabu bu onye-ishi ndu ojogu eze.

1 Iphe, ndu eze meru 28

Okwa, Dévidi nmaru le g'ee-gude kpua ulo Chipfu

¹No iya; Dévidi bya ekua ndu-ishi ndu Izurelu ndzuko le Jierusalemu. O kuru ndu-ishi l'ipfu l'ipfu; mekpoo ndu bu ndu-ishi ndu ojogu ono shigba le g'e gude keshia phe iche iche, ejeru eze ozi ono; me ndu-ishi unu ndu ojogu labo l'ukporo iri iri; me ndu-ishi ndu ojogu ukporo ise ise; bya ekua ndu eleta iphe eze; yele k'unwegirima iya enya; me ndu-ishi, eleta eku eze me k'unwegirima iya enya; mekwapho ndu eleta ibe eze enya; me ndu okpehu du; mekpoo ndu maru enya k'ogu.

²Tobudu iya bu; eze, bu Dévidi gbalihu bya apfuru apfuru su: "Unwunna mu; me ndibe mu; unu ngaberu mu nchi. O shi du mu l'obu ge mu kpua ulo eka okpoko ogbandzu Chipfu a-noduje; mbu okposhi, Chileke a-tukobeje okpa. Mu shi kwakobewaa k'akpu ulo ono.

³Ole Chileke be suru mu l'o to budu mu a-kpuru iya ulo ono; kele mu bu ojogu; mu gbuwa ndu du igwerigwe.

⁴Obenu le Chipfu, bu Chileke ke Izurelu be hotaleru mu-a l'onulo nna mu l'ophu ge mu buru eze ndu Izurelu jaswaroya. Oo ya be hotaru ipfu Jiuda g'o buru ishi; bya eshi l'ulo ke Jiuda hota onu-ulo nna mu. A bya l'unwunna mu; o buru mbedua be du iya ree g'o mee mu eze ndu Izurelu g'ephe ha.

⁵O nuru mu unwegirima, du igwerigwe. A bya l'unwu mu ono; o buru nwa mu, bu Solomonu be o hotaru g'o nodu l'aba-eze k'ali-eze Chipfu; buru eze ndu Izurelu.

⁶"O suru mu: 'Oo nwa ngu Solomonu be a-kpuru mu ulo; me oma-unuphu mu; kele mu hotawaru iya g'o buru nwa mu; mbedua aburu nna iya.

⁷Mu e-me g'ali-eze iya, nguru anguru jasuru asuru; me o -buru-a l'oomeje ekemu mu; waa iphe, mu toru okpa iya; egube ono, oome iya nta ono.'

⁸"Nta bu iphe, mu epfuru unu l'ataphu ndu Izurelu l'ophu, bu iya bu edzudzu-oha ke Chipfu; teme mu nodu epfu iya ge Chipfu numa; bukwa g'unu nwube enya meje iphe, Chipfu turu l'ekemu; k'ophu unu e-nweru ali oma-a; teme l'o nodu no-doru unwegirima unu, bu ndu ophu etso unu etsotso g'o buru okiphe phe jeye le tuutuutu le mimiimii.

⁹"Gubedua, bu nwa mu Solomonu; makwaru Chileke ke nna ngu. L'i gude obu ngu g'o ha; me uche ngu g'o ha ejeru iya ozi; noo kele o bu Chipfu enyochaje obu; teme iphe, nemadzu vu l'uche; me ophu o riru l'oriri nodu edokotaje iya enya. I -choo ya be ii-choatakwa iya. Ole o -buru l'i gwoberu iya be oo-jikakwa ngu jasu le tuutuutu le mimiimii.

- ¹⁰Kwabeekwapho ɛnya nta; noo kele Chipfu hotawaru ngu g'i kpuaru iya ulo, a-buru eka-du-nsɔ. Shihuɛkwapho ike jee ozi ono.”
- ¹¹Tɔbudu iya bu; Dévidi woru ugbugba nwulo, aa-kpu du-pfube l'onu eze-ulo ono woru nu nwa iya, bu Sólomonu. O nukwa iya pho ugbugba g'ulo ono, a-dukota; me ugbugba mkpuru eka aa-kwakobeje iphe l'ulo ono; me k'ulo-eli iya; me k'ulo ime iya; me k'eka aa-nɔduje pfua ugwo iphe-eji.
- ¹²O byakwapho eworu g'ugbugba oma-unuphu ulo Chipfu ono a-du nu iya; me ke mkpuru, a-gba iya mgburugburu; bya anu iya k'ulo eku k'ulo Chileke; me ulo eku, bu eka aa-kwakobeje iphe, e doberu nsɔ. Iphemiphe ono be o nuru egube o du iya l'uche g'a kpa ya.
- ¹³O bya epfua g'ee-gude keshia ndu-uke Chileke; me ndu Lívayi; bya epfua k'ozi, eejekota l'ulo Chipfu; me k'ivu, ee-gude eje ozi l'ulo Chipfu ono.
- ¹⁴O bya egoshi ɛrwa mkpola-ododo, a-suru eme ivu, eeme le mkpola-ododo; bya egoshi ɛrwa mkpola-ochaa, a-suru eme ivu, eeme le mkpola-ochaa; mbu ophu ee-gude eje ozi, du iche iche.
- ¹⁵O goshi ɛrwa mkpola-ododo, ee-gude kpushia iphe, aapfubeje oroku, e meshiru le mkpola-ododo; me k'oroku l'onwiya; mbu g'ɛrwa iphe, aapfubeje oroku ono, a-hagbaa l'ehu l'ehu; me k'oroku a-nɔdu iya nu; bya egoshi ɛrwa mkpola-ochaa, ee-gude kpushia iphe, aapfubeje oroku, e meru le mkpola-ochaa; me k'oroku l'onwiya; mbu egube a-sukpoerupho iphe, aapfubeje oroku ono l'ehu l'ehu.
- ¹⁶O bya egoshi ɛrwa mkpola-ododo, ee-gude kpushia teburu, eedobejeru Chileke buredi; me ɛrwa mkpola-ochaa, ee-gude mee teburu mkpola-ochaa.
- ¹⁷O goshikwapho ɛrwa mkpola-ododo, guru egugu, ee-gude mee oji; me ophu ee-gude mee gbamugbamu; me okoro; bya egoshichaa ɛrwa mkpola-ododo, ee-gude meshia gbamugbamu mkpola-ododo l'ehu l'ehu; goshi ɛrwa mkpola-ochaa ophu a-suru emeshi gbamugbamu mkpola-ochaa.
- ¹⁸O bya egoshi ɛrwa mkpola-ododo, a huru l'oku, a-suru eme oru-ngweja unwù-isensu. O goshikwapho ugbugba ugbo-inya, ee-me le mkpola-ododo doberu chierobu ono, sashiru nkù asashi gude gbobuta okpoko ogbandzu Chipfu ono.
- ¹⁹Dévidi suru: “Iphe ono g'o hakota bu Chipfu be goshiru mu iya nu; mu dee ya edede. Mbu l'oo ya meru; o doo mu ɛnya g'oo-gbakota ugbugba.”
- ²⁰Dévidi bya epfukwarupho nwa iya Sólomonu su: “Shihukpoepho ike; gude eka l'obu jee ozi ono. Ta atsukwa ebvu; ophu meji atofukwa ngu; noo kele Chipfu, bu Chileke; mbu Chileke ke mbedua be swiru ngu eswiru. O to byadu agbakuta ngu azu; ophu o byadu aha ngu jasu teke ozi, dukota l'ulo Chipfu ono a-bvukota.
- ²¹Ogbo ndu-uke Chileke; me ke ndu Lívayi be nowa anono le k'iphe, bukpo ozi, eeje l'ulo Chileke ono. Ndu unu l'ephe a-gbaru mba jee ozi ono; be bu ndu eme ona l'iphe dugbaa iche iche, ephe buru ndu-ozi ono evu evuvu. Nokwapho ge ndu-ishi; me ndu Izurelu l'ophu a-nɔdu emekotakpoo iphe, i suru g'ephe mee.”

1 Iphe, ndu eze meru 29

Iphe, a nuru g'e gude kpua eze-ulo Chileke

¹Tobudu iya bu; eze, bu Dévidi bya epfuaru edzudzu-oha ono l'ophu su: “Sólomonu, bu nwa mu ono, Chileke hotaru be bukwađu nwatanshii, adudu iphe, o maru; teme ozi ono buru ozi, paru eka; kele eze-ulo ono be ta abudu nemadzu be aakpuru iya; oo Chipfu, bu Chileke be aakpuru iya.

²Mu dobewaru iphe, ee-gude mee k'eze-ulo Chileke mu ono g'ike beru mu. Mu doberu mkpola-ododo, ee-gude mee iphe, eeme le mkpola-ododo; dobe mkpola-ochaa, ee-gude mee iphe, eeme le mkpola-ochaa; dobe onyirubvu, ee-gude mee iphe, eeme l'onyirubvu; dobe mkpurukpu-igwe, ee-gude mee iphe, eeme le mkpurukpu-igwe; me oshi, ee-gude mee iphe, eeme l'oshi. Nokwapho ge mu kuberu ikpoto mkpuma onikusu; me mkpuma, ee-do edodo; me mkpuma, aphugbaa ke ngerengere; mewaro mkpuma, du iche iche, vugba oke aswa; me mkpuma-egbe mabulu.

³Ozo bu le-a; eshinu k'ulo Chileke mu ono du mu l'obu shii be mu anukwapho mkpola-ododo; me mkpola-ochaa k'eka mu gedegede; mbu anu iya anughata ophu ka ophu mu shi kwakobehawa g'e gude kpua ulo nsu ono.

⁴Mu anu mkpola-ododo, erwa iya du unu talentu esaa l'ukporo talentu iri, bu mkpola-ododo, shi l'ali Ofi; mu nodu anukwapho mkpola-ochaa, erwa iya du unu talentu iri l'esaa l'ukporo talentu iri; g'e gude wukota l'eli igbulu ulo ono. Mkpola-ochaa ono be a huru; o gbuchafu egbuchafu.

⁵Mkpola-ododo ono be ee-gude mee iphe, eeme le mkpola-ododo; gude mkpola-ochaa mee iphe, eeme le mkpola-ochaa; me iphemiphe, ndu eme ona emekota. ? Nta-e? ? Bu onye be oovu evuvu g'o woru onwiya ye l'ejeru Chipfu ozi ono?”

⁶Tobudu iya bu; ndu-ishi l'enya-unuphu l'enya-unuphu; me ndu-ishi l'ipfu l'ipfu; me ndu-ishi unu ndu ojogu labo l'ukporo iri iri; me ndu-ishi ndu ojogu ukporo ise ise; mekpoo ndu-ishi-ozu eze woru iphe nu egube, oovu phe evuvu g'ephe nu.

⁷Iphe, ephe nuru g'e gude mee k'ulo Chileke ono bu: mkpola-ododo, erwa iya du unu talentu iri l'ebo l'ukporo talentu iri; me ukporo unu dariku l'unu ise; me mkpola-ochaa, erwa iya du ukporo unu talentu l'unu talentu ise; me onyirubvu, erwa iya du ukporo unu talentu ugbo labo l'unu talentu ise; me iphe-igwe, erwa iya du ukporo unu talentu iri l'ebo l'unu talentu iri.

⁸Iphe, bukpo onye nweru mkpuma, vu oke aswa be nuru iya g'e dobe l'ulo eku eze-ulo Chipfu ono. O buru Jiehiyelu, bu onye Geshonu be eleta iya enya.

⁹Oo ya bu; ndu Izurelu tekota eswa; kele ndu ono be o vuru evuvu g'ephe nu iphe ono; mbu l'ephe gude obu phe g'o ha nu Chipfu iphe ono. Eze, bu Dévidi tekwaapho eswa shii.

Dévidi epfu anu Chileke

10Tɔbudu iya bụ; Dévidi wata aja Chipfu ajaja l'iphu edzudzu-ọha ono asuje: “G'ajaja bụru nkengu; gube Chipfu, bụ Chileke kẹ nna anyi, bụ Ízurelu; shita l'ojejoje jasụ l'ojejoje.

11Gube Chipfu bẹ parụ ẹka apaa; tẹme ike; mẹ ùbvù; mẹ ọdu-biribiri bụkotaru nkengu. Iphemiphe, nọ l'igwe; mẹ ọphu nọ l'eliphe bẹ bụkota nkengu. Ọo ngu bụ eze; gube Chipfu; ọ bụru ngu bụ ishi iphemiphe.

12Ẹku yẹle ọkwabe ùbvù bụ ngu bẹ o shikọta l'ẹka. Ọ bụru ngu bụ ishi iphemiphe. Ọo ngu bẹ ike yẹle ọkpehu kwarụ l'ẹka. Eme nemadzu g'ọ bụru oke amadu; bụru onye ike dụ bẹ bụ ngu bẹ ọ dụ l'ẹka.

13Nta-a bẹ anyi ekele ngu ekele; gube Chileke anyi; anyi nọdu aja ẹpha ngu ono, dụ akpabiri ono ajaja.

14“Ole ọ bụ; ? bụ onye bẹ mu bụ? Tọo ? bụ gunu bẹ ndibe mu bụ; kẹ g'o vu anyi evuvu g'anyi dụ ike nù iphe ẹgube-a? Ọo ngu bẹ iphemiphe shikọta l'ẹka; ọ bụru iphe, shi ngu l'ẹka bẹ anyi wotaru bya anụ ngu ono.

15L'atatiphu ngu bẹ anyi bụ ndu mbyambya; bụru ndu nọ l'ije; ẹgube ono, nna anyi phẹ shi bụru iya. Ndzu, anyi nọ l'eliphe-a bẹ agba phuruphuru g'ononyo; kele ọ tọo nọdu jasuru asuru.

16Gube Chipfu, bụ Chileke anyi; ikpoto iphe ọwana, anyi wofutarụ g'e gude kpuaru ngu ọlo, bụ k'ẹpha ngu, dụ nsọ ono bẹ bụkwa l'ẹka ngu bẹ o shi bya; tẹme g'ọ ha bụkotaru ngu nwe iya.

17Chileke mu; mu maru l'iidaleje obu; ọ bụru obu, guru ìphóró aduje ngu ree. Ọ bụru obu, guru ìphóró bẹ mu gude nùkota ngu iphe-a g'ọ ha ẹgube oovu mu evuvu. Nta-a bẹ mu humawaru ndibe mu, bụ ndu ọphu nọ l'ẹka-a g'o vu phẹ evuvu; ẹphe gude ẹhu-utso anụ ngu iphe.

18Jiko Chipfu, bụ Chileke kẹ nna anyi phẹ, bụ Ébirihamu; mẹ Áyizaku; mẹ Ízurelu; mekwaa g'ẹgube ọriri ono dụ l'obu ndibe ngu jasuru asuru; l'i mee g'obu phẹ dụ l'ẹka ì nọ.

19Mee gẹ nwa mu, bụ Sólomonu gude obu iya g'ọ ha meje ekemu ngu; mẹ iphe, ì suru g'e meje; mẹ iphe, ì tọru ọkpa iya; mbụ g'o mekọtaje iphemiphe ono g'ọ ha; l'ọ kpua eze-ọlo ono, mu dobewaru iphe, ee-gude kpua ya ono.”

20No iya; Dévidi bya asụ edzudzu-ọha ono: “Unu jaa Chipfu, bụ Chileke unu ajaja.” Edzudzu-ọha ono tuko jaa Chipfu, bụ Chileke kẹ nna phẹ ajaja. Ẹphe bya ephozeta; baarụ Chipfu ẹja; bya ephozeru eze.

Eeme Sólomonu eze

21O be lẹ nchitabọhu iya; ẹphe gweeru Chipfu ngweja. Ẹphe gburu oke-eswi, dụ unu labọ l'ụkporo iri; gbua ebili, dụ unu labọ l'ụkporo iri; mẹ unwu aturu, dụ unu labọ l'ụkporo iri; gude gweeru Chipfu ngweja-akpo-ọku; yẹle ngweja-mee, ayijegbaaru iya nù. Ẹphe gwee ikpoto ngweja mmanụ ọzo l'iswi ẹhu ndu Ízurelu.

²²Ephe gude oke ẹhu-utso ria; ngua l'iphu Chipfu mboku ono. Ephe bya emee Sólomonu, bu nwa Dévidi eze k'ugbo labo. Ephe nodu l'iphu Chipfu wua ya manu l'ishi g'ọ buru onye-ishi phe; Zadoku buru onye uke Chileke.

²³Oo ya bu; Sólomonu nodu l'aba-eze, Chipfu doberu; buru eze nochia ẹnya nna iya, bu Dévidi. Iphe nodu ejehuru iya; ndu Ízurelu l'ophu nodu emeje iphe, ọ suru g'e mee.

²⁴Iphe, bu ndu-ishi; me ndu ojogu; mekpoo unwu Dévidi, g'ephe ha; tukotaru ike yeru eze, bu Sólomonu.

²⁵Chipfu mee Sólomonu buru oke amadu l'ẹnya ndu Ízurelu l'ophu; bya eworu ọdu-biribiri k'onye eze ye iya l'ẹhu; mbu udu iya ophu ta adudu onye eze, vu iya uzo nwejeru iya nu.

Anwuhu Dévidi

(1Ndu 2:10-12)

²⁶Noo ge Dévidi nwa Jiesi gude noo l'aba-eze ndu Ízurelu.

²⁷Iphe, Dévidi noru l'aba-eze le Ízurelu bu ukporo apha labo. O bu eze noo apha esaa le Heburonu; bya aburu eze le Jierúsalemu ukporo apha l'apha iri l'eto.

²⁸O nwuhuru teke o kahwaru okpobe akahu. O noru apha, du igwerigwe; buru onye nweru ẹku; ria ubvu. Nwa iya, bu Sólomonu bya aburu eze nochia ẹnya iya.

²⁹Iphemiphe, eze Dévidi megbaberu; e -shi l'ishi jasụ l'eka o jeberu be e dekotaru l'ekwo, ephe deshuru iphe, meru nu; mbu Samelu, bu onye aphuje ophulenyia; me Netanu, bu onye mpfuchiru Chileke; me Gadu, bu onye aphuje ophulenyia.

³⁰E dekotaru iphemiphe o mekotaru teke o bu eze mekpoo ehuka ehuka o megbaberu me iphemiphe dapfutagbaru iya nu; me ophu dapfutaru ndu Ízurelu; mewaru iphe, dapfutaru ali-eze ono l'ophu.

2 Iphe, ndu eze meru

2 Iphe, ndu eze meru 1

Sólomõnu arwo mmamiphe

(1Ndu 3:1-15)

¹Tõbudu iya bu; Sólomõnu, bu nwa Dévidi bya akpõ onwiya g'abara l'alì-eze iya. Chipfu, bu Chileke iya swiru iya òkpobe eswiru; bya emee ya; ò buru onye parù òka mebyikpõo apaa.

²Sólomõnu bya ekukõ ndu Ízurelu l'ophu. Ndu o kukõru bu ndu-ishi ndu ojõgu, du unu labõ l'ukporo iri iri; me ndu-ishi ndu ojõgu, du ukporo ise ise; me ndu-ikpe; me iphe, bu ndu-ishi ndu Ízurelu g'ephe ha; mbu ndu-ishi l'enyà-unuphu ibe nna phe.

³Sólomõnu yele edzudzu-õha Ízurelu tugbua jeshia l'òka aagwajè iphe, nõ le mkpukpu Gibiyõnu; kele õo l'òka ono be ulo-ekwa-ndzukõ Chileke nõ; mbu ono, Mõsisu, bu onye-õzi Chipfu meru l'echiègu phõ.

⁴Dévidi be pafutawaru okpoko Chileke le mkpukpu Kiriya-tu-Jiarimu bya edobe l'òka o metaru iya; kele õ kpõberu iya ulo-ekwa le Jierúsalem.

⁵Õle õru-ngweja, Bezalelu meru l'on-yirubvu; be du le Gibiyõnu l'òka ono; l'iphu ulo-ekwa Chipfu. Bezalelu bu nwa Uri; Uri buru nwa Huru. Sólomõnu yele edzudzu-õha ono choahaa Chipfu l'òka ono.

⁶Sólomõnu bya ejeshia le Gibiyõnu je anõdu l'atati-phu õru-ngweja, e meru l'on-yirubvu ophu nõ l'iphu ulo-ekwa-ndzukõ ono; mbu l'iphu Chipfu gwee ngweja-akpõ-õku, du unu labõ l'ukporo iri.

⁷O rwua l'enyashi; Chipfu byapfuta Sólomõnu bya asu iya: “Pfuaru mu iphe, bukpo iphe, õ du ngu ge mu meeru ngu.”

⁸Sólomõnu su Chileke: “I goshiwaru l'i yeru Dévidi, bu nna mu obu shii; bya emewaa ge mu buru eze nõchia enya iya.

⁹Jiko Chipfu, bu Chileke; g'iphe ono, i kweru nna mu, bu Dévidi ukwe l'ii-meru iya ono vukota nu; kele i mewaru ge mu buru eze ikpoto ndu-a, ha g'eja, nõ l'alì-a.

¹⁰Nunu mu mmamiphe yele nkwa-menya, mu e-gude meeru ndu-a iphe, gbaru mu l'ememe; noo kele õ tõ dudu onye suru aburu ishi ndu nkengu-a, parù òka egube-a.”

¹¹Chileke yeeru Sólomõnu õnu su: “Eshi ophu õ bu iphe ono agõ ngu egu l'obu; ophu i suduru g'a nu ngu õku; õzoo iphe-enweru; õzoo g'e mee g'a kwabeje ngu ubvu; ophu i suduru g'e mee ge ndu õhõgu ngu nwushihu; ophu i suduru g'a nu ngu ndzu ogologo; gbahaa g'a nu ngu mmamiphe; waa nkwa-menya, ii-gude buru eze ndibe mu ono, mu meru g'i buru eze phe ono;

¹²be mu a-nu ngu mmamiphe; me nkwa-menya ono. Mu a-nukwa ngu phõ õku waa iphe-enweru; mee g'a kwabeje ngu ubvu, adudu onye eze akwabejeruwaru iya le ndu

ophu vu ngu ụzo; ophu ọ dukwapho onye ọzo; abyaru akwabebaa ya le ndu ophu etso ngu etsotso.”

¹³Oo ya bu; Sólomonu shi l'eka aagwaje iphe le Gibiyonu ono nyizeta; mbu l'iphu ulo-ekwa-ndzuko ono; ọ buru iya ala Jierúsalemu je anodu buru onye eze ndu Ízurelu.

Èku Sólomonu

(1Ndu 10:14-29; 2Iphe 9:13-28)

¹⁴Sólomonu kuberu onwiya ugbo-inya; me ndu agba l'inya. O nweru unu ugbo-inya eto l'ukporo iri; bya enweru ndu agba l'inya ukporo unu l'unu iri. O nweru ndu ophu eze doberu le mkpukpu, eedobeje ugbo-inya; dobe ndu ophu le Jierúsalemu swibe onwiya.

¹⁵Eze be meru; mkpola-ochaa kuru g'aja le Jierúsalemu; bya emee g'oshi sida sweta ekameka; g'oshi sikamo, tuko ali okpa ubvu, no l'uzo enyanwu-ariba sweta.

¹⁶Oo l'ali Ijiputu yele ali Kuwe be e shi anmatajeru Sólomonu inya. O buru ndu agbaru eze ngho shi ejeje ali Kuwe je apfua ugwo iya nmata iya.

¹⁷Aswa, ephe shi apfuje gude zua ugbo-inya le Ijiputu be bu unu shekelu mkpola-ochaa l'ukporo shekelu mkpola-ochaa iri. Inya be ephe shi egudeje ukporo shekelu mkpola-ochaa esaa le shekelu iri nmaa. Ephe shikwapho evujejeru iya ndu eze ndu Hetu; me ndu eze ndu Aramu.

2 Iphe, ndu eze meru 2

Sólomonu akwakobe k'akpu eze-ulo Chipfu

(1Ndu 5:1-18)

¹No iya; Sólomonu bya epfua ya hoo haa le ya a-kpuru Chipfu eze-ulo; teme ya abya akpua ulo-eze dobe k'eka iya.

²O bya aguta ukporo unu unwoke ugbo esato l'unu iri l'ise g'ephe buru ndu a-nodu evu iphe; guta ukporo unu unwoke ugbo iri g'ephe buru ndu a-nodu awashi mkpuma l'ubvu ubvu ali ono; bya aguta unu unwoke tete g'ephe buru ndu eleta phe enya l'ozi ono.

³Sólomonu bya ezia Hiram, bu eze ndu Taya ozi su: “G'ọ bukwaru egube ono, i meru nna mu, bu Dévidi; nu iya oshi sida g'ọ kpua ulo-ebubu iya ono bu g'ii-meru mbedua.

⁴Nta-a be mu abya akpuru Chipfu, bu Chileke mu ulo; doberu iya ya nsọ g'ọ buru eka aa-kpoje unwu-isensu, eshi kwekweekwee oku l'iphu iya; mekwapho g'e dobeje iya buredi, eedobeje l'iphu Chileke tekenteke; bya aburu eka ee-gweje ngweja-akpo-oku eswe l'uzenyashi; me l'eswe-atuta-unme; me l'onwa ophu; me l'obo-iphe, geru egeru, aabojeru Chipfu, bu Chileke anyi. Iphe ono be e doberu g'ọ buru omelali, duru ndu Ízurelu jasuru asuru.

⁵Ulo ono, mu abya akpukpu ono be a-pa eka; noo kele Chileke anyi be kangokotaru agwa l'ophu.

⁶Ole ọ bu; ? bu onye be sūru g'oo-kpuru iya ọlo? Eshi ọphu imigwe; me imigwe ọphu kakota l'eli ta asudu iya anodu; ? bu onye be mu bu ke ge mu kpuru iya ọlo? Oo ọpho g'akputa aka aa-kpojeru iya unwu-isensu oku.

⁷Nta-a bukwa g'i yeru mu onye emeje ona le mkpola-ododo; me le mkpola-ochaa; me l'onirubvu; me le mkpurukpu-igwe; bya aburu onye maru g'eegudeje oghu uswe-uswe; me oghu, eke mee-mee me oghu, du urwukpu-urwukpu eme ona. Onye obu a-bukwarupho onye apyi iphe apyipyi doru enya. Yele ndibe mu, bu ndu eme ona, nna mu Dévidi doberu be a-tuko eje ozi le Jierusalem; me l'ali Jiuda.

⁸"G'i nukwa mu pho oshi sida; me oshi payinu; me oshi alugumu, shigba l'ubvu ubvu Lebanonu; kele mu maru le ndu nkengu be awa oshi doru enya. Ndu ozi mu be ọphe le ndu-ozi nkengu a-tuko yekota aka l'ozi, du iya nu;

⁹k'ọphu ọphe a-kwakoberu mu oshi ono k'etsutsu iya; kele ọlo obu, mu abya akpukpu obu be a-pakwa aka apaa; teme l'ọ dukwapho biribiri.

¹⁰Ndu nkengu ono, egbu oshi ono be mu a-nu ukpokutu witi, jiru ukporo unu aka ugbo labo l'unu aka iri. Mu anu phe bali, jiru ukporo unu aka ugbo labo l'unu aka iri; bya anu phe ite mee, du ukporo unu labo l'unu iri; bya anu phe ite manu, du ukporo unu labo l'unu iri."

¹¹Tobudu iya bu; Hiram, bu eze ndu Taya dee ekwo-ozi gude yeeru Solomonu onu su: "Oo kele Chipfu yeru ndibe iya obu meru g'o gude o mee g'i buru eze phe."

¹²Hiram pfukwaapho su: "G'ajaja buru ke Chipfu, bu Chileke ke Izurelu; mbu onye ono, meru igwe mee eliphe; mbu onye ono, nuru eze, bu Dévidi nwa, maru iphe; kwaa enya; bya aburu onye iphe edoje enya; g'ọ buru onye a-kpuru Chipfu eze-ọlo; kpuru onwiya ọlo-eze.

¹³Nta-a be mu ziwaru nwoke, maru eme ona; mbu onye iphe, edoje enya, aza Hiram-Abi g'ọ byapfuta ngu.

¹⁴"O bu nwatibe nwanyi, shi l'ipfu Danu. Nna iya buru onye Taya. O maru g'e shi eme ona le mkpola-ododo; me le mkpola-ochaa; me l'onirubvu; me le mkpurukpu-igwe; me le mkpuma; mekpoo l'oshi; teme o maru g'eegudeje oghu uswe-uswe; me oghu, du urwukpu-urwukpu; me oghu, eke meeme; me okpobe ekwa-ochaa eme ona. O maru g'aapyije iphe-apyipyi, du iche iche; teme egube erengete, a sūru g'o mee be oomekotaepho. Yele ndu nkengu, bu ndu eme ona; me ndu eme ona ono, nnajuphu mu, bu Dévidi, bu iya bu nna ngu doberu be a-tuko jee ozi ono.

¹⁵Nta-a bukwa ge gube nnajuphu mu nuwaro ndu-ozi ngu witi; me bali; me manu; me mee ono, i pfuru opfu iya ono.

¹⁶Oo ya bu; g'anyi eje awataru ngu oshi, dukpoe ngu pho ree l'ubvu ubvu Lebanonu; sweshia ya esweshi kpoghaa ya eze-enyimu; je edobe iya le Jiopa, bu aka ọo-du; li vuta iya lashia Jierusalem."

Ndu ọgbo-ozi Solomonu

(1Iphe 5:13-18)

¹⁷Tobudu iya bu; Sólomonu bya agua ndu lwaru alwalwa, bukota l'ali Ízurelu ogo; mbu egube ono, nna iya, bu Dévidi guru phe ono. Mkpako iphe, ephe du buru ukporo unu ugbo iri le tete l'unu eno .

¹⁸O woru ukporo unu nemadzu ugbo esato l'unu iri l'ise dobe g'ephe buru ndu evuje iphe; dobe ukporo unu nemadzu ugbo iri g'ephe buru ndu agbakposhi mkpuma l'ubvu ubvu ali ono; bya edobe unu tete g'ephe buru ndu-ishi, eleta enya l'ozi ono; k'ophu ephe a-nodu eme ge ndu ono je ozi ono.

2 Iphe, ndu eze meru 3

Sólomonu akpu eze-ulo Chileke

(1Ndu 6:1-36)

¹Tobudu iya bu; Sólomonu wata akpu eze-ulo Chipfu ono le Jierusalemu l'ubvu Moriya, bu aka ono, Chipfu byapfutajeru nna iya, bu Dévidi ono; mbu l'oma aka Onanu, bu onye Jiebusu echije bali, bu iya bu aka ono, Dévidi doberu g'a kpu ya ono.

²O buru l'abali k'ebu l'onwa k'ebu l'ime apha k'eno e -shi teke o wataru aburu eze be o wataru iya akpuku.

³Waa ge Sólomonu gude tua okpa-ulo ono, aa-kpuru Chileke ono baa: A -bya l'o-gba-le-mbu iphe, e shi egudeje atu iphe; be ogologo iya du ukporo nkwo-eka eto; uswekete iya du ukporo nkwo-eka.

⁴Nwulo, a kpuru; dupfube l'ataphu eze-ulo ono be ogologo iya du ukporo nkwo-eka. Ogologo eze-ulo ono be yele uswe iya ha enya nhamunha. Eli nwulo ono du ukporo nkwo-eka ishii. L'ime iya be bu okpobe mkpola-ododo be a wukotaru iya.

⁵O gude oshi Sayipurosus kwechishia igbulu ime eze-ulo ono; bya awukota iya mkpola-ododo, guru egugu; bya esengashia ya mpfu me gwogirigwo l'eli iya gude mee ya ona.

⁶O gude mkpuma, vugbaa oke aswa memaa ulo ono emema. Mkpola-ododo, o gude mee ulo ono be bu mkpola-ododo, shi l'ali Pavayimu.

⁷O wukota mkpola-ododo l'ulo ono l'ophu. O wukotaru iya l'oswebe; me l'onu-ulo ono; me l'igbulu ulo ono; mekpoo mgbo iya; bya apyishia chierobu doo l'eli igbulu ono.

⁸O bya akputa mkpuru aka-kakota-adu-nsu. Ogologo ulo ono be o kpuru; yele uswekete iya buru iphe lanu. O kpuru ogologo iya; o du ukporo nkwo-eka; uswekete iya du ukporo nkwo-eka. O wukota iya okpobe mkpola-ododo, erwa iya du unu talentu l'ukporo talentu iri.

⁹Nggu mkpola-ododo, e gude mee k'ulo ono be erwa iya du shekelu ukporo labo l'iri. O wukotakarupho mkpola-ododo l'ulo k'eli iya.

¹⁰Le mkpuru aka-kakota-adu-nsu be o kpuru chierobu labo akpuku dobe; wukota iya mkpola-ododo.

11 Ìkù chierobu ono ẹphenebo bẹ tukuru dọ ụkporo nkwo-ẹka. Ìkù lanu bẹ dọ nkwo-ẹka ise l'ogologo; nọdu je asụ-pfuru l'igbulọ ọlo ono; nanu ophuu dọ nkwo-ẹka ise; nọdu je asụ-pfuru lẹ ñkù chierobu ophuu.

12 Ìkù chierobu ono ophuu dọ nkwo-ẹka ise l'ogologo; nọdu je asụ-pfuru l'igbulọ ọlo ono; nanu ophuu dọ nkwo-ẹka ise; nọdu je asụ-pfuru lẹ ñkù kẹ nanu ophuu.

13 Chierobu ono bẹ sashichaaru ñkù phẹ asashi; ọ dọ ụkporo nkwo-ẹka. Ẹphe pfuru ghagbaa iphu lẹ mkpuru ono gẹdegede.

14 O gude oghu, dọ urwukpu-urwukpu; mẹ oghu uswe-uswe; mẹ oghu eke meeme; mẹ ọkpobe ẹkwa-ọchaa kwee ẹkwa-mgbochi; bya eseshia chierobu l'eli iya.

Itso, e meru l'onirubvu

(1Ndu 7:15-22)

15 L'onu-ọlo ono bẹ o meru itso labọ bvube. O duchaa ụkporo nkwo-ẹka lẹ nkwo-ẹka iri l'ise l'eli; bya emeta nchị-itso, eli iya dọ nkwo-ẹka ise tukobegbaa l'eli iya iche iche.

16 O bya akpata iphe, dọ gẹ gwogirigwo yechaa lẹ nchị-itso ono, dọ l'eli itso ono; bya akpata iphe, dọ g'itorokuma, dọ ụkporo ise swọbechaa lẹ gwogirigwo ono.

17 O bya akpobe itso ono ẹphenebo l'iphu eze-ọlo ono. Nanu bẹ ọ kpọberu l'uzo ndohali ọlo ono; kpọbe ophuu l'uzo isheli. Ophu ọ kpọberu l'uzo ndohali bẹ ọ guberu Jiakinu; gube ophu nọ l'uzo isheli Bówazu.

2 Iphe, ndu eze meru 4

Ọru-ngweja, e meru l'onirubvu

(1Ndu 7:23-51)

1 Tọbodu iya bu; ọ bya egude onirubvu meta ọru-ngweja, dọ ụkporo nkwo-ẹka l'ogologo; uswekete iya dọ ụkporo nkwo-ẹka; eli iya dọ nkwo-ẹka iri.

Iphe, e meru l'onirubvu dobe g'e yeje mini

(1Ndu 7:23-26)

2 Tọbodu iya bu; Hiram bya adazee onirubvu gude kpata iphe, dọ mgburugburu, eeyeje mini g'ọ dọru chi ririri. Igburonu iya mgburugburu bẹ dọ nkwo-ẹka iri. G'ọ habe l'eli bu nkwo-ẹka ise. Mgburugburu iya dọ ụkporo nkwo-ẹka lẹ nkwo-ẹka iri.

3 Lẹ mkpula igburonu iya bẹ a kpọyaberu iphe, dọ g'oke-eswi uzi iri l'anya nkwo-ẹka lanu; woru iya kpọo giriri uzi labọ. E meru iya; yeje mini ono, echi ririri ono rwagbabe.

4 Iphe ono, eeyeje mini ono bẹ a dọberu l'eli oke-eswi iri l'ẹbo, a kpuru l'onirubvu. Oke-eswi ono ẹto bẹ a gharu iphu l'uzo isheli; ghaa ẹto iphu l'uzo ẹnyanwu-ariba; ghaa ẹto iphu l'uzo ndohali; ghaa ẹto iphu l'uzo ẹnyanwu-awawa; ghakota phẹ ike ye l'uzo ime iya.

⁵Iphe ono, eeyeje mini ono be igbidigbi iya ha ge mpfupfumeka. Igburonu iya be o meru; o du g'igburonu okoro; mbu o duopho g'okoko ojimbvu. Mini, alaje iya nu be erwu iphe, du g'unu galonu ukporo eto l'iri l'ise.

⁶O mekwarupho eze gbamugbamu iri, ee-gudeje asa iphe. Ise be o suseru l'uzo ndohali; suse ise l'uzo isheli. O buru eze gbamugbamu ono be ephe asaje iphe, e gude mee ke ngweja-akpo-oku. Eze iphe pho, eeyeje mini pho buru ophu ndu-uke Chileke asaje onwophe.

⁷O bya egude mkpola-ododo meta iphe, aapfubeje oroku uzo iri dobe l'eze-ulo ono. O buru g'a suru g'e mee ya bu g'o meru iya. O woru ise dobe l'uzo ndohali; dobe ise l'uzo isheli.

⁸O mekwaapho teburu iri dobe l'eze-ulo ono. Ise be o doberu l'uzo ndohali; dobe ise l'uzo isheli. O gude mkpola-ododo mee gbamugbamu ukporo ise.

⁹O bya emeta oma-unuphu ke ndu-uke Chileke; me eze oma-unuphu; me mgbo, eeyegbaa l'onu oma-unuphu ono. O wukota onyirubvu le mgbo iya.

¹⁰O pata eze iphe pho, eeyeje mini pho suse l'uzo ndohali; mbu l'uzo enyanwu-awawa ndohali ulo ono.

¹¹Iphe ozo, Huramu mefuaru bu ite; me iphe, eegudeje ekpo ntu; me gbamugbamu.

Mkpako iphe, Hiramu kpushiru dobe l'eze-ulo Chipfu

(1Ndu 7:40-51)

Tobudu iya bu; Huramu toko ozi ono, o jeru eze, bu Solomonu l'eze-ulo Chileke ono jeebekota. Owaa bu iphe, o kpushiru l'eze-ulo Chipfu ono:

¹²Itso labo; waa nchi-itso labo, gwocharu ke kokoroko, o tu-kobecharu l'eli itso labo ono; me iphe-akpakpa labo, o kparu gude memashia nchi-itso labo ono, gbaru yororo ono;

¹³me akpuru itorokuma, dukota unu lanu, o dopheru iphe, a kparu akpakpa ono mgburugburu. O doru iya giriri uzi labo le nchi-itso ono, gbaru yororo ono; mbu l'eli itso ono;

¹⁴me ogba-kperekpere; waa eze gbamugbamu, a dobechaaru iya l'eli;

¹⁵me iphe, eeyeje mini, echi ririri; me oke-eswi iri l'ebo, a doberu iphe ono l'eli;

¹⁶me ite; me iphe, eegudeje ekpo ntu; waa oji; mewaro unwu ivu ozo, gbaru nu. Iphemiphe, Hiramu-Abi meshikotaru eze, bu Solomonu le k'eze-ulo Chipfu ono be bu onyirubvu, aphugbaa ke ngerengere be o gude mekota iya.

¹⁷Eze bya ezia g'a dazee onyirubvu ono gude kpushia iphe ono le phorokoto ali Jiordanu; mbu ali urwa, du le mgbaka Sukotu waa Zaretanu .

¹⁸Solomonu be meshiru iphemiphe ono o du igwerigwe k'ophu bu l'erwa onyirubvu, laru iya nu be a ta amakahadu g'o habe.

¹⁹Sólomõnu meshikõtari ivu, ðu l'eze-ulo Chipfu ono, bu iya bu: Oru-ngweja, e gude mkpõla-ododo mee; me teburi, eedobeje buredi, ðu nsõ l'iphu Chipfu;

²⁰me iphe, aapfubeje orõku, e meru l'õkpobe mkpõla-ododo; yele orõku, a pfubegbaaru iya g'o nwuje õku l'iphu eka-kakõta-adu-nsõ; egube ono, a suru g'õ ðu;

²¹me iphe, ðu g'okoko; me orõku; me iphe, eegudeje akpapyata iphe. Iphemiphe ono be e mekõtari l'õkpobe mkpõla-ododo;

²²me iphe, apaje oghu orõku; me gbamugbamu; me ago; me iphe, aaguje õku. E gudekõta õkpobe mkpõla-ododo mekõta iya; mekpoo mgbo eze-ulo ono, bu iya bu mgbo k'ime mkpuru eka-kakõta-adu-nsõ; me mgbo k'eze-ulo ono l'onwiya.

2 Iphe, ndu eze meru 5

¹Noo ya; ozi, Sólomõnu ejekõta l'eze-ulo Chipfu ono bya abvukota. O bya ewobatakõta iphemiphe, Dévidi, bu nna iya shi dobe nsõ bya eworu dobe l'eka eedobeje eku l'eze-ulo Chipfu ono; mbu mkpõla-õchaa; me mkpõla-ododo; me ivu, ðu iche iche.

Aapabata okpoko Chipfu l'eze-ulo Chileke

(1Ndu 8:1-9)

²Tõbudu iya bu; Sólomõnu bya ekukõõ ndu bu õgerenya ndu Ízurelu le Jierúsalem; mbu ndu-ishi l'ipfu l'ipfu; me ndu-ishi l'anya-unuphu ndu Ízurelu; k'õphu epehe a-pafuta okpoko õgbandzu Chipfu l'úbvú Zayõnu, bu iya bu mkpukpu Dévidi.

³O -rwuepho teke epehe aboje iphe l'õnwa esaa; unwoke Ízurelu l'õphu dzukõta l'iphu eze.

⁴Ndu bu õgerenya ndu Ízurelu l'õphu dzukõõ; ndu Lívayi pata okpoko ono.

⁵Epehe pata okpoko ono; bya aphõta ulo-ekwa-ndzukõ; gwetakõta iphe, bu ivu, ðu nsõ, ðu iya nu. O buru ndu-uke Chileke waa ndu Lívayi be vutaru iya nu.

⁶Eze, bu Sólomõnu me ikpoto ndu Ízurelu, epehe l'iya dzukõberu l'eka ono tuko nõdu l'iphu okpoko ono; egbushi aturu me eswi. Epehe gbushiru ikpoto anu, a taa tukõtadu õnu iya; teme õphu a taa gõtadu iya l'õgu.

⁷Noo ya; ndu-uke Chileke pata okpoko õgbandzu Chipfu õbu je edobe l'eka e metaru g'õ nõduje l'ime mkpuru eze-ulo ono, bu iya bu eka-kakõta-adu-nsõ; woru iya dobe le mkpula nkù chierobu.

⁸Chierobu ono be sashigbaaru nkù l'eli eka ono, okpoko Chipfu nõ ono; shi nno gbobuta okpoko ono; waa oshi, eegudeje apa iya.

⁹Oshi ono be ðu ogologo k'õphu bu l'aagbeje l'eka-ðu-nsõ, ðu l'iphu eka-kakõta-adu-nsõ ele enya l'ishishi iya g'o tsefutaru. O le a ta agbejekwanu l'eka õzo huma iya. Epehe dukwa-a l'eka ono byasõ ntanu-a.

¹⁰Ọ tọ dudu iphe, du l'okpoko ono; gbahaa mkpuma labo, du bachibachi, Mosisu yeru iya l'ubvu Horebu l'eka Chipfu yee ndu Izurelu no gbaa ndzu g'ephe futaru l'ali Ijiputu ono-a.

Ọdu-biribiri Chipfu

(1Ndu 8:10-11)

¹¹Tobudu iya bu; ndu-uke Chileke bya eshi l'eka-du-nsọ wufuta. Ndu uke Chileke ono, bu ndu ophu no l'eka ono be dobehawaru onwophe nsọ g'ephe hakota; ophu ephe akpaduru ishi k'ogbo ophu ephe yi.

¹²Asafu; me Hemanu; me Jiedutunu; me unwu phe; me abubu phe; mbu ogbo-ebvu ono, shi l'eri Livayi ono l'ophu bya bya apfuru l'uzo enyanwu-awawa oru-ngweja ono. Ephe yekota uwe, e meru l'okpobe ekwa-ochaa; chiru ogelenda; me une; me ogumogu aku ebvu. Ndu uke Chileke, du ukporo ishii toko tsoru phe egbu opu.

¹³Ọda opu ono; waa olu ebvu ndu ono, agu ebvu ono toko awukotaepho nanu. Ephe nodu agu ebvu ajaja; me ebvu ekele anu Chipfu. Ephe nodu agu ebvu ono egbu opu eye iya; aku ogelenda; mewaro ngwa-ebvu ozo eye iya. Olu phe nodu aha gengugengu l'eka ephe aguru Chipfu ebvu ajaja asuje: “Chipfu bu onye oma; nyemobu iya a-noje jasụ l'ojejoje.” Tobudu iya bu; urwukpu bya eji ulo ono ejiji; mbu ulo Chipfu ono.

¹⁴Urwukpu ono mee k'ophu bu le ndu-uke Chileke ono ta aduedu ike takebe eje ozi phe; kele ọdu-biribiri Chipfu byaru bya eji eze-ulo Chileke ono ejiji.

2 Iphe, ndu eze meru 6

Opfu, Sólomonu pfuru

(1Ndu 8:12-21)

¹Tobudu iya bu; Sólomonu su: “Chipfu suru l'oo l'urwukpu, gbahuru ke tsukiribaa be ya e-buru.

²Nta-a be mu kpwaru ngu eze-ulo, paru eka apaa, bu eka ii-buru jasụ le tuutuutu le mjimiimii.”

³Ndu Izurelu ono, dzukoberu nu ono pfuru l'eka ono; Sólomonu bya aghachiru phe iphu; goru onu-oma nu phe;

⁴su phe: “G'ajaja buru ke Chipfu, bu Chileke ke Izurelu; mbu onye ono, gude onu iya kwee Dévidi, bu nna mu ukwe; bya egudewaa eka iya meebekota iya. Kele o pfuru su:

⁵'E -shi mboku, mu dufutaru ndibe mu l'ali Ijiputu be o to dudu mkpukpu, mu hotaru l'ipfu Izurelu l'ophu g'o buru eka aa-kpuru mu ulo; g'epha mu reje ire l'eka ono; teme ophu o dudu onye mu hotaru g'o buru onye-ishi ndibe mu, bu ndu Izurelu.

⁶Ole nta-a be mu hotawaru Jierusalemu g'o buru eka epha mu e-reje ire; teme mu hotawa Dévidi g'o buru onye-ishi ndibe mu ono, bu ndu Izurelu.’

⁷“Nna mu, bu Dévidi be shikpo dobesu le ya a-kpuru Chipfu, bu Chileke ke Izurelu eze-ulo.

⁸Obenu lẹ Chipfu sūru nna mu, bụ Dévidi: Eshi ophu i vu iya l'obu g'i kpuaru mu eze-ulo bẹ o dukwa-a ree l'o du ngu l'obu.

⁹Ole-a; o to budu gubedua bẹ a-kpu ulo obu. Onye a-kpu iya nu bu nwa ngu, i nwuru anwunwu. Oo yebedua bẹ a-kpuru mu eze-ulo.

¹⁰“Nta bẹ Chipfu mekotawaru iphe o kweru ukwe iya; kele mu futawaru bya anochia enya nna mu, bụ Dévidi; mu noduwaa l'aba-eze ndu Ízurelu egube ono, Chipfu kweru ukwe iya; teme mu bya akpuwa eze-ulo Chipfu, bụ Chileke ke Ízurelu ono.

¹¹O buru l'eka ono bẹ mu doberu okpoko Chipfu; mbu okpoko ono, e yeru ekwo ogbandzu ono, Chipfu yele ndu Ízurelu gbaru ono.”

Sólomonu epfu anu Chileke

(1Ndu 8:22-53)

¹²Tobudu iya bu; Sólomonu pfuru l'iphu oru-ngweja Chipfu; l'iphu edzudzu-oha ndu Ízurelu ono; chilia eka iya labo imeli.

¹³Sólomonu bẹ gude onyirubvu meta eka aapfu-kojeru apfu-koru; ogologo iya du nkwo-eka ise; osa iya du nkwo-eka ise; eli iya du nkwo-eka eto. O buru eka o doberu iya bu l'oma-unuphu ono; pfu-koru l'eli iya. O gbushi ikpere l'ataphu edzudzu-oha Ízurelu ono; bya achilia eka imeli;

¹⁴pfuahaa su: “Gube Chipfu, bụ Chileke ke Ízurelu; o to dudu Chileke ozo, dubaa ge gubedua l'imigwe waa l'eliphe; mbu gube onye edobeje ogbandzu, unu le ndibe ngu gbaru; bya egoshije l'i yeru ndu-ozu ngu obu; mbu ndu gude obu phe g'o ha etso uzo ngu.

¹⁵Gube onye ono, meebekotaru ukwe, i kweru onye-ozu ngu ono, bu nna mu Dévidi. I gude onu ngu kwee ya ukwe; bya egude eka ngu meebekota iya egube o du ntanu-a.

¹⁶“Gube Chipfu, bụ Chileke ke Ízurelu; nta-a bu g'i mefunaa ukwe-iphe ophu, i kweru onye-ozu ngu ono, bu nna mu Dévidi; mbu ono, i kweru iya su: ‘O to dudu iphe, bya l'e-me gunwu ngu no-buhu l'aba-eze ndu Ízurelu; m'o buru-a l'unwu ngu obu bẹ akwaberu onwophe enya; meje ekemu mu; egube ono, i shi emeje iya ono.’

¹⁷Jiko Chipfu, bụ Chileke ke Ízurelu; g'opfu, i pfuru yeru onye-ozu ngu, bu nna mu Dévidi vukotakwa.

¹⁸“Obenu; ? Chileke yele nemadzu mmanu e-bukotaru l'eliphe-a k'eviya too? Su-a; igwe; mbu igwe ophu kakota l'eli ta asudu ngu anodu; ? bu chia eze-ulo owa-a, mu kpuru-a bẹ l'asuchiaru ngu nu?

¹⁹Ole-a; numanu epfufu, onye-ozu ngu epfu anu ngu; me arworwo, oorwo ngu. Gube Chipfu, bụ Chileke mu; ngabenu nchi le mkpu, onye-ozu ngu echiku ngu; waa epfufu, o no l'iphu ngu epfu anu ngu.

²⁰Mbu; g'enya ngu dujenu l'eze-ulo-a eswe l'enyashi. Mbu eka-a i suru l'ii-buru-a; k'ophu bu teke mube onye-ozu ngu gharu iphu l'eze-ulo-a pfuru nu ngu; l'i ngaberu mu nchi.

21Ngabejenu nchi l'arworwo, onye-ozu ngu; me ndibe ngu, bu ndu Izurelu arwo ngu; le teke ephe gharu iphu l'eka-a epfu anu ngu. Shikwa l'imigwe, bu eka i bu ebubu numa iya. Teke i numaru iya; gukwaaru phe nvu l'iphe-eji phe.

22“O -buru l'o nweru onye mesweru ibe iya; a nodu ele enya g'onye obu ria nte; onye ono -bya l'oru-ngweja ngu, no l'eze-ulo-a; bya eria nte obu;

23shikwa l'imigwe numa iya; li mee iphe, gbaru ngu nu. Kpee ndu-ozu ngu ono ikpe l'onwongu. Onye ophu ikpe nmaru; nmaa ya ikpe; tu-kobe iya iphe, o metaru l'ishi. Onye ophu iswi du mma; haaru iya enge; meeru iya iphe, gbaru iya nu le k'apfubekoto iya.

24“O -buru l'ohogu lwu-kperu ndibe ngu, bu ndu Izurelu; kele ephe mesweru ngu; ephe -bya aghaa umere lwapfuta ngu; bya ekuahaa epha ngu; nodu l'eze-ulo-a pfuru nu ngu; rwo ngu;

25shikwa l'imigwe numa iya; li guaru ndibe ngu ono, bu ndu Izurelu nvu l'iphe-eji phe ono. Li bya eduphuta phe azu l'ali ono, i nuru nna phe ono.

26“Teke o bu l'igwe buru mini; mini dzebuhu; kele o l'ephe meru iphe-eji; ephe byakwanu aghaa iphu l'uzo eka-a pfuru nu ngu; kuahaa epha ngu; bya agbakuta iphe-eji phe ono azu; kele i mewaru ephe jee iphe-ehuka;

27shikwa l'imigwe numa iya; guaru ndu-ozu ngu ono, bu ndu Izurelu nvu l'iphe-eji ono. Li zia phe uzo, pfuru oto, ephe a-nodu eshi. Li mee g'igwe dzeje mini l'ali ono, i nuru ndibe ngu o buru okiphe phe ono.

28“O -buru l'oo egu-ememe byaru l'ali-a; ozoo ejo iphe-ememe; m'obu iphe, emebyishije nri, a koru l'opfu; ozoo ophu emeje g'o tsua evu; ozoo igube; m'obu ntaka, atakashije iphe; ozoo l'oo ohogu phe byaru ekepheta phe le mkpukpu, du l'ali phe; mbu o betakporu o buru ejo iphe-ememe gunu; ozoo iphe-ememe, du idu-agma be byaru nu;

29o -nwekporu onye machiru eka iya l'uzo ulo-a pfuru nu ngu; ozoo l'oo ndibe ngu, bu ndu Izurelu l'ophu be pfuru nu ngu; bya arwo ngu; kele o onyenonu maru g'iphe-ehuka ono atsü-beru iya l'ehu l'obu iya;

30shikwa l'imigwe, bu eka i bu ebubu numa iya. Gukwaaru phe nvu; mee iphe, gbaru ngu nu; li meeru onyenonu g'iphe, oome gbaru; eshi ophu i maru obu onyemonye. Noo kele o gubedua kpoloko be maru obu unwu-eliphe l'ophu;

31k'ophu ephe a-nodu atsü ngu ebvu mboku-mboku; jeye g'ephe a-no-bekporu l'ali-a, i nuru nna anyi phe-a.

32“A bya l'onye bu onye ohozo; mbu onye ta abudu onye Izurelu, bu ndibe ngu; mbu onye ono, gude ke epha ngu; waa k'okpehu, du ngu nu; waa k'iphe, du biribiri, iinoduje emegbabe; shi l'eka du enya bya. Teke onye obu byaru bya aghaa iphu l'eze-ulo-a; pfuru nu ngu;

³³shikwa l'imigwe, bu ẹka i bu ebubu; numa iya; meeru onye ọhozo ono iphemiphe, o gude araku ngu; k'ophu ndu mgboko l'ophu a-madzuru ẹpha ngu; shi nno atsu ngu ebvu ge ndibe ngu, bu ndu Ízurelu atsu ngu. Teme ẹphe amakwarupho l'eze-ulo-a, mu kpuru-a be bu ẹpha ngu be e gude kpua ya.

³⁴“O -buru le ndu nkengu jeru etso ndu ọhogu phe ọgu l'ẹka bukpuo ẹka i ziru phe; ẹphe -ghawaa iphu le mkpukpu-a, i hotaru-a; me l'eze-ulo-a, mu kpuru ngu-a pfuru nu gube Chipfu;

³⁵nodukwa l'imigwe numa epfupfu, ẹphe pfuru nu ngu; me arworwo, ẹphe rworu ngu; bya agbataru phe.

³⁶“Teke o bu l'oo iphe-eji be ẹphe meru ngu; kele o to dudu onye te emejedu iphe-eji; ẹhu ghuaaha ngu egu; i woru phe ye ndu ọhogu l'ẹka; k'ophu bu l'ohogu kpuru phe le ndzu lashia l'ẹka du ẹnya; ọzoo ẹka du ntse;

³⁷ẹphe -nodu l'ali ono, a kpuru phe le ndzu laa ono; egomunggo lwa phe azu; izimanu lwa phe azu; ẹphe nodu l'ali ndu ono, kpuru phe le ndzu ono rwo ngu su l'ẹphe mewaru iphe-eji; bya emewaa iphe, ta apfuduru-oto; mewaa ejo-ememe;

³⁸mbu; o -buru l'ẹphe no l'ali ono, a kpuru phe le ndzu laa ono gude obu phe g'o ha; me ndzu phe g'o ha lwafuta ngu ozo; ẹphe gha iphu l'ali-a, bu ali, i nuru nna phe-a; mbu le mkpukpu-a, i hotaru-a; me l'eze-ulo-a, mu kpuru ngu-a; pfuru nu ngu;

³⁹shikwa l'imigwe, bu ẹka i bu ebubu numa epfupfu, ẹphe pfuru nu ngu; me arworwo, ẹphe rworu ngu; gbaaru phe mkpu. Li guaru ndibe ngu ono, mesweru ngu nu ono nvu.

⁴⁰“Jiko Chileke mu; g'ẹnya ngu dujenu l'epfupfu, a no l'ẹka-a epfu anu ngu; l'ingabejekwa iya pho nchi.

⁴¹“Nta bukwa gi gbalihu gube Chipfu, bu Chileke; jeshia l'okpoku ngu. “Gbalihu gu l'okpoku ngu ono, egoshi li bu onye okpehu du ono. Gube Chipfu, bu Chileke; ge ndu-uke nkengu bukwaru ndu ee-ye ndzota egube eeyeje uwe-a. Ge ndu duru ngu nso tekwa eswa l'iphe, du ree, iimeru phe.

⁴²Jiko Chipfu, bu Chileke; ta ajikakwa onye-ozu ngu ono, i hotaru bya emee ya o buru eze ono. Nyatakwa n-yemobu ono, i yeru Dévidi, bu onye-ozu ngu ono.”

2 Iphe, ndu eze meru 7

¹Solomonu pfughechaepho nu Chileke; oku shi l'imigwe buru ke phaa bya ekekota ngweja-akpo-oku; me ngweja ozo, e gweru. Odu-biribiri Chipfu bya eji ulo ono ejiji.

²Ophu ndu-uke Chileke adudu ike bahu l'ime ulo Chipfu ono; kele odu-biribiri Chipfu jiru iya ejiji.

³Ndu Ízurelu humaepho oku ono g'o nwuru; bya ahuma g'odu-biribiri Chipfu ono no l'eli ulo ono; ẹphe phozeta kpubegbaa iphu l'ali l'eli ẹka e gude mkpuma kpu-lia akpu-

li; ephe baaharu Chipfu ẹja ekele iya ekele asuje: “Chipfu bu onye oma; n-yemobu iya anoje jasụ l'ojejoje.”

Eeye Eze-ulo Chipfu l'eka Chileke

(1Ndu 8:62-66)

⁴Tobudu iya bu; eze yele ndu Izurelu l'ophu tuko gwee ngweja l'iphu Chipfu.

⁵Anu, eze, bu Solomonu gburu gude gwee ngweja be du ukporo unu eswi ugbo labo l'unu iri l'ise; me ukporo unu aturu ugbo iri l'ise. Oo ya bu; eze yele ndu Izurelu ono g'ephe ha tugba woru eze-ulo ono ye Chipfu l'eka.

⁶Ndu uke Chileke tuko pfuru l'onodu phe. Nokwapho ge ndu Livayi pfuru le nkephe; gude ngwa ebvu Chipfu; mbu ono, eze, bu Devidi meru dobe g'e gude guje ebvu ekele nu Chipfu, bu iya bu ngwa ebvu ono, o shi egudeje agu ebvu ekele asuje: “N-yemobu iya anoje jasụ l'ojejoje.” Ndu uke Chileke ono nodu ghaaru ndu Livayi iphu egbu opu; ndu Izurelu l'ophu pfugbaaru apfuru.

⁷Solomonu dobe echilabo oma-unuphu ono, no l'ataphu ulo Chipfu ono nsọ. O buru l'eka ono be o no gwee ngweja-akpo-oku; me eba-anu, e gude gwee ngweja-ehu-guu. Noo kele oru-ngweja, e gude onyirubvu mee, no l'iphu Chipfu be ha nwanshii; k'ophu bu le ngweja-akpo-oku; me ngweja-nri; me eba-anu, e gude gwee ngweja-ehu-guu ono taa alakotadu iya.

⁸Oo ya bu; Solomonu me ndu Izurelu g'ephe ha, bu ndu ephe l'iya no l'eka ono; mbu ikpoto oha, shi le mkpukpu Lebo-Hamatu; je akpaa le nggele Ijiputu, bu ndu tukoru nodu teke ono; bo Obo-iphe ono abali esaa.

⁹O be le mboku k'esato; ephe no ndzuko, gbaru iche; noo kele ephe meru k'edobe oru-ngweja ono nsọ ujiku esaa; bo obo-iphe ujiku esaa.

¹⁰O be le mboku, onwa esaa du l'ukporo abali l'abali eto; o gbasaa ndu ono g'ephe lashia ibe phe. Ephe gude ehu-utso lashia; me obu-utso le k'iphe-oma, Chileke meru Devidi; me Solomonu; me ndibe iya, bu ndu Izurelu.

Chipfu epfu eyeru Solomonu

(1Ndu 9:1-9)

¹¹Oo ya bu; Solomonu kp-tsechaepho eze-ulo Chipfu obu; me ulo nkiya; mbu tuko iphemiphe, o tuberu k'ememe l'eze-ulo Chipfu ono; me l'ulo nkiya mekota;

¹²Chipfu byapfuta iya l'enyashi bya asu iya: “Mu numawaru epfupfu, i pfuru nu mu; bya ahotawa eka-a g'o buru eka aa-noduje egweru mu ngweja.

¹³O -buru le mu guchiru igwe; k'ophu bu l'o to dzeduru mini; ozoo le mu turu igube ekemu g'o tuko iphe, du l'ali ono tapyashia; ozoo le mu ziru ejo iphe-ememe g'o bya l'echilabo ndibe mu;

¹⁴O -buru le ndibe mu ono, bu ndu eeku epha ala l'epha mu ono; wozetaru onwophe ali; pfuru nu mu; choo ataphu mu; bya adakobe haa ejo-ememe, ephe eme; be mu e-shikwa l'imigwe numa epfupfu, ephe epfu anu mu; guaru phe nvu l'iphe-eji phe; mee g'ali phe du iche.

- ¹⁵Nta-a bẹ ẹnya mu; mẹ nchị mu a-duje l'epfupfu, eepfu anụ mu l'ẹka-a.
- ¹⁶Mu hotawaru eze-ulo-a; bya edobewa iya nsọ; mewaa iya g'ọ buru ẹka ẹpha mu a-nọduje ere ire jasuru asuru. Ẽnya mu; waa obu mu a-duje l'ẹka ono tekenteke.
- ¹⁷“A bya lẹ gubedua; ọ -buru l'i tso ru ụzo mu ẹgube ono, nna ngu Dévidi tso ru iya ono; eme iphemiphe, mu turu ngu l'ekemu;
- ¹⁸bẹ mu e-me g'onodu ngu l'aba-eze ndu Ízurelu nguru anguru; ẹgube ono, mu lẹ nna ngu, bu Dévidi gbaru iya lẹ ndzu lẹ teke ono, mu suru iya l'o to nweddu iphe, byaru e-me g'unwu iya nọ-buhu l'aba-eze ndu Ízurelu.
- ¹⁹“Ole-a; ọ -buru l'i nonyaaru ophu iitsoedu mu; gwọbe ekemu ono, mu turu unu ono; mbụ je agwaahaa agwa abaru phe ẹja;
- ²⁰bẹ mu a-vukwa phe l'ogbarabvu vufu l'alị ono, mu nuru phe ono; mu amia ẹnya l'eze-ulo-a, mu doberu nsọ g'ẹpha mu reje ire-a. Mu e-me iya g'ọ buru iphe, ndiphe e-gude anma l'ejo ẹtu; waa iphe, aa-nodu eme iphe ọchi.
- ²¹Eze-ulo-a, ha imelimeli ẹgube-a bẹ a-buru onye aghata iya nu; ishi anyia ya ẹdzu; l'ọ kpọ-yiaru iya ukuvu sụ: ‘? Bụ gunu meru g'o gude Chipfu mee alị-a; waa eze-ulo-a ẹgube-a?’
- ²²Ndiphe epfua sụ: ‘Oo kele ẹphe haru Chipfu, bu Chileke ke nna phe; mbụ onye ono, dufutaru phe l'alị Ijiputu ono; gbẹ woru obu phe kpọru yeru agwa; gwaahaa ya; abaru iya ẹja. Noo iphe, meru g'o gude Chipfu wopfuta phe ẹgube ẹjo iphe-ẹhuka-a.’ “

2 Iphe, ndu eze meru 8

Iphe ọzo, Sólomonu megbabẹru

(1Ndu 9:10-28)

- ¹Noo ya; a nọepho ụkporo apha sụgba ishi, bu iya bu teke Sólomonu gude kpua eze-ulo Chipfu ono; yee ulo nkiya;
- ²ọ tuko mkpukpu, Hiramụ nuru iya kpukwashia; bya eworu ndu Ízurelu yekota iya g'ẹphe bugbaaru iya.
- ³Sólomonu bya eje ọgu lẹ mkpukpu Hamatu-Zoba; je alwuta iya.
- ⁴Ọ kpua mkpukpu Tadumo l'echiegu; bya akpushia mkpukpu, aakwakobeje iphe lẹ mgboru Hamatu.
- ⁵Ọ kpukwaa mkpukpu Betu-Horonu k'imeli; mẹ ophu nọ l'uzo alị; kpua ya; o shihugbaa ike. O gude igbulọ kpụ-pheta iya; bya eyee ya ọguzo; mẹ mgborígwè, e gude aswo-chi iya aswo-chi;
- ⁶bya akpua mkpukpu Balatu; kpushia mkpukpu, ookwakobeje iphe; mẹ mkpukpu, eedobeje ugbo-inya iya; mẹ ophu ndu agbaru iya inya a-nọduje. Sólomonu tukoru iphemiphe, du iya g'ọ kpua ya lẹ Jierúsalemu kpukota; mẹ l'úbvú úbvú Lébanonu; mekpoo l'alị-eze, nokota iya l'ẹka l'ophu.

⁷A bya lẹ ndu ophu phoduru nụ lẹ ndu Hetu; mę ndu Amoru; mę ndu Pérezu; mę ndu Hevu; mę ndu Jiebusu; mbụ ndu ono, ta abudu ndu Ízurelu ono;

⁸bę awa ndu ono, phoduru nụ l'alí ono; mbụ ndu ophu ndu Ízurelu te egbushiduru; bę Sólomonu meru g'ęphe buru ohu, ejeru iya ozi byasụ ntanụ-a.

⁹A bya lẹ ndu Ízurelu bę ọ tọ dudu onye ophu Sólomonu meru ohu, ejeru iya ozi. Ęphebedua bę o meru ndu ojogu iya; mę ndu-ishi ozi iya; mę ndu-ishi ugbo-inya iya; mę ndu agbaru iya inya.

¹⁰Oo ęphe bụ ndu-ishi ozi Sólomonu. Ęphe dụ ukporo umadzu iri l'ębo l'umadzu iri buru ndu-ishi l'ozi ono.

¹¹Sólomonu bya eshi lẹ mkpukpu Dévidi dufuta nwada Fero pho bya edobe l'ulo ono, ọ kpuru iya ono; kele Sólomonu bę suru lẹ nyee ya tee budu l'ulo Dévidi, bụ eze ndu Ízurelu; noo kele iphe, bụ ęka okpoko Chipfu bahugbaaru bę dukota nsọ.

¹²Sólomonu bya egweeru Chipfu ngweja-akpo-oku l'eli ọru-ngweja Chipfu, ọ kpuru l'ataphu eze-ulo ono.

¹³Ngweja ono bę oogweje ęgube ọ gbaru g'e gweje iya mboku-mboku; mbụ ęgube ekemu Mosisu pfuru g'e gweje iya l'eswe-atuta-unme; mę l'onwa ọphúú; mę l'obo-iphę ęto, aaboje aphagapha ono: bụ iya bụ Obo-Buredi, ekoduru ekoko; mę Obo-Idzu; mę Obo-Mkpù.

¹⁴O tsoru ęgube ono, nna iya Dévidi toru okpa iya gude hoo ogbo ndu-uke Chileke dobe phę l'ozi, ęphe a-nodu eje; mę ogbo kę ndu Lívayi g'ęphe bujeru ishi l'agu ebvu ajaja; mę g'ęphe yejeru ndu-uke Chileke ęka l'ozi ęgube ọ gbaru lẹ mboku-mboku; ọ gbaa ogbo ndu nche dobegbaa phę l'oguzo g'ęphe chee nche; kele ọo ęgube ono bę Dévidi, bụ onye kę Chileke turu iya l'ekemu.

¹⁵Ophu ọ dudu iphe, eze turu ekemu iya doberu ndu-uke Chileke; mę ndu Lívayi g'ęphe meje, duru ophu ęphe haru ememe; je akpaa lẹ k'ęka aakwakọbejegba ęku.

¹⁶Noo ya; ozi Sólomonu ono buru iphe, e jekotaerupho e -shi lẹ mboku, a turu okpa eze-ulo Chipfu ono jasuru a kpu-tsee ya. O buru iya bụ l'aakpu-ghe ulo Chipfu ono.

¹⁷Tobudu iya bụ; Sólomonu bya atugbaa jeshia Eziyonu-Geba; mę Elatu ophu dụ l'alí Edomu l'aguga eze-enyimu.

¹⁸Hiramu ye ndu nkiya, bụ ndu mahawaru eze-enyimu ono; ęphe pataru Sólomonu ugbo-mini. Ęphe lẹ ndu kę Sólomonu tuko jeshia alí Ofi; bya eshi l'ęka ono wolata mkpola-ododo, ęrwa iya dụ unu talentu l'ukporo talentu labo lẹ talentu iri bya akuberu eze, bụ Sólomonu.

2 Iphe, ndu eze meru 9

Eze-nwanyị ndu Sheba akpafuta Sólomonu

(1Ndu 10:1-13)

¹Tɔbudu iya bụ; eze-nwanyị ndu Sheba bya anuma ụdù Sólomonu; ọ byatashia Jierúsalemu g'o gude aji, shihuru ike dalee ya. Ọ chiru ikpoto nemadzu; me inyakamelu, vugbaa manụ, eshigbaa kwẹkwewe; waa igwerigwe mkpola-ododo; me mkpuma, vugbaa oke aswa. Ọ byapfuta Sólomonu; bya atuko iphemiphe, ọ riru k'epfupfu pfukotaru iya.

²Sólomonu yekotaru iya onu ree l'aji, ọ jikotaru iya. Mbụ l'ọ tọ dudu aji, ọ jiru Sólomonu, ọ madu yeru iya onu ree.

³Eze-nwanyị ndu Sheba ono bya ahuma egube mmamiphe, Sólomonu nweru; waa egube ụlo, ọ kpuru;

⁴me egube nri, oorije; me udu oshi, ndu-ozu iya anoduje anoo; me ge ndu-ozu iya gude eje ozu; waa egube uwe, ephe eye l'ehu; me ndu etsujeru iya onu le mee; me egube uwe, ephe eye l'ehu; mekpoo ngweja-akpo-oku, oogweje l'ulo Chipfu. Ọ bya ahumakotachaa iphemiphe ono; ọ tufu iya ehụ.

⁵Ọ bya asu eze: “Akọ, mu nọ l'alị anyi numa k'iphe, i meshiru; me ke mmamiphe ngu be bukota eviya.

⁶Mu te eshidu kweta l'akọ ono be bu eviya; jasụ ge mu byaru nta-a bya egude enya mu humakota iya-a. Lenu; ge ke mmamiphe ngu ono gude habe shii be a ta kojahaduru mu ebo; noo kele i dakiri g'aturu onu ngu.

⁷Ọo ephe le ndibe ngu be iphe kweru! Iphe kweru ndu-ozu ngu phe, bu ndu anoduje l'iphu ngu mkpurumkpuru anuma opfu mmamiphe, iipfu!

⁸G'ajaja buru ke Chipfu, bu Chileke ngu; bu onye ono, i du ree; o woru ngu dobe l'aba-eze iya gi buru eze l'iswi ehụ iya. Ọo kele Chileke ngu yeru ndu Izurelu obu ojejoje meru g'o gude; o mee ngu eze phe; k'ophu ii-nodu ekpe ikpe, pfuru nhamunha; meje iphe, pfuru oto.”

⁹Tɔbudu iya bụ; eze-nwanyị ono bya eworu mkpola-ododo, erwa iya du ukporo talentu ishii nu eze; bya anu iya manụ, paru eka apaa, eshi kwẹkwewe; waa mkpuma, vugbaa oke aswa. Manu ono, eze-nwanyị ndu Sheba nuru eze, bu Sólomonu ono paru eka shii; k'ophu bu l'ọ tọ dudu manụ, a nujebaaru iya habe g'onoya.

¹⁰Teme ndu ke Hiram; me ndu ke Sólomonu, bu ndu ono, evutaje mkpola-ododo l'alị Ofi ono be evutajekwapho oshi alugumu; me mkpuma, vugbaa oke aswa.

¹¹Ọ buru oshi alugumu ono be eze gude meta eka aazoje okpa enyihu ulo Chipfu ono; me k'ulo ibe eze; bya egudekwa iya pho mee une; waa ogumogu, ndu ebvu egudeje agu ebvu. Oshi alugumu, ha egube ono be a ta ahumajebaeduru l'alị Jiuda.

¹²Eze, bu Sólomonu bya anukota eze-nwanyị ndu Sheba ono iphemiphe, du iya ree, ọ suru g'ọ nu iya; a -gufukwa ophu eze-nwanyị ono nuru eze l'onwiya. Ọo ya bu; eze-nwanyị ono yele ndu-ozu iya dakobe lashia alị phe.

Ẹku Sólomonu

(1Ndu 10:14-25)

- 13**Mkpọla-ododo, eevulatajeru Sólomọnu aphagapha bẹ ẹrwa iya aduje ọnu talentu; l'ukporo talentu iri l'eto lẹ talentu ishii;
- 14a** -gufukwa iphe, eshije l'eka ndu ngho, ephe agba ha nwanshii me l'eka ndu agba eze ngho. Mkpọla-ododo; waa mkpọla-ochaa bẹ eeshijekwapho l'eka ndu eze ndu Arabu; me l'eka ndu ochi-oha ali ono evulataru Sólomọnu.
- 15**Eze, bu Sólomọnu gude mkpọla-ododo, e tsusaru ọsa meta iphe, eegudeje egbobuta onwonye, hagbaa galagala; ọzo ukporo iri. Mkpọla-ododo, laru lẹ nanu bẹ duchaa ọnu shekelu; lẹ shekelu ukporo iri.
- 16**O gudekwapho mkpọla-ododo, e tsusaru ọsa meta iphe ono, eegudeje egbobuta onwonye kẹ nshii; ọzo ukporo iri l'ise. Mkpọla-ododo, laru lẹ nanu iya bu ukporo shekelu iri l'ise. Eka eze doberu iya bu l'ulo ono, e gude oshi, shi l'oswa, no l'ubvu ubvu Lebanonu kpua ono.
- 17**Nokwapho g'eze gude eze-enyi meta aba-eze, ha shii; bya awukota iya okpobe mkpọla-ododo l'eli.
- 18**Aba-eze ono bẹ bu ntokpa ishii; bya enweru okposhi, e meru lẹ mkpọla-ododo ye iya g'a tukobeje okpa. E meru iya eka aatukobeje eka ibekebo; kpua oduma labo pfukubecha iphe ono, aatukobeje eka ono ephebebo.
- 19**A kpuru oduma iri l'ebo pfube l'eli ntokpa ishii ono. O pfugbaaru l'ibe lanu; waa l'eka ibe iya ophuu. O to dudu aba-eze ozo, e mejewaru o du egube ono.
- 20**Iphe, eze egudeje angu iphe-angungu bu mkpọla-ododo bẹ e gude mekota iya. Ivu, dukota l'ulo ono, e gude oshi, shi l'oswa ubvu ubvu Lebanonu mee ono be bu okpobe mkpọla-ododo bẹ a wukotaru iya. O to dudu iphe ono, duru ophu e meru lẹ mkpọla-ochaa; noo kele o to dudu iphe, a guberu mkpọla-ochaa lẹ teke Sólomọnu bu eze.
- 21**Eze nwegbaaru ugbo-mini, e gude agbaru iya ngho. Ugbo-mini ono bẹ ephe lẹ ndu-oziri Hiram atukoje swiru. O buru ugbo lanu l'ime apha eto bẹ ugbo-mini ono alwaje; vulata mkpọla-ododo; me mkpọla-ochaa; me eze-enyi; me adaka; me enwe.
- 22**O buru eze, bu Sólomọnu bẹ kakota enweru eku; buru iya kakota enweru mmamiphe l'iphe, bu ndu eze ndu mgboko l'ophu.
- 23**Ndu eze ndu mgboko l'ophu nodu abyaje l'iphu Sólomọnu g'ephe numa opfu mmamiphe, Chileke nuru iya.
- 24**Aphagapha abujeru: onye -byatashia; l'o gude iphe bya anu iya; mbu iphe, e meru lẹ mkpọla-ochaa; me ophu e meru lẹ mkpọla-ododo; me uwe mgbalanu; me ngwogu; me manu, eshi kwekweekwee; me inya; mekpoo inya-mulu. Iphe, aanuje iya bẹ apaje eka apaa.
- 25**Sólomọnu bẹ nweru eka oodobeje inya; me ugbo-inya. Eka ono bẹ du ọnu iri. O nwekwarupho ndu agba l'inya ukporo ọnu l'unu iri. O nweru ndu ophu eze doberu lẹ mkpukpu, eedobeje ugbo-inya; dobe ndu ophuu lẹ Jierusalem swibe onwiya.

²⁶Ọ bụru iya bụ ishi iphe, bụ ndu eze; e -shi l'enyimu Yufurétisu je akpaa l'alì ndu Filisitayinu; je akpaa l'oke alì ndu Ijiputu.

²⁷Eze meru; mkpọla-ọchaa kuru gę mkpuma lę Jierúsalemu; bya emee g'oshi sida dzuru ẹkameka g'oshi sịkamo, tuko alì ọkpa úbvú, nọ l'uzo ẹnyanwu-arịba sweta.

²⁸A nọdu eshije l'alì Ijiputu męwaro alì ndu ọzo anmataru Sólomonu inya.

Anwụhu Sólomonu

(1Ndu 10:28)

²⁹Iphe ọzo, Sólomonu megbabęru; e -shi l'ishi jeye l'ẹka o jeberu; bę e dekotaru l'ẹkwo, Nétanu, bụ onye mpfuchiru Chileke; mę l'ẹkwo mpfuchiru Ahayijia, bụ onye Shilo; mę l'ẹkwo ọphulenyanya Ido, bụ onye aphuje ọphulenyanya; mbụ ọphulenyanya, ọ phuru lę k'ẹhu Jierobowamu nwa Nebatu.

³⁰Sólomonu bę nọ lę Jierúsalemu bụru eze ndu Ízurelu ụkporo apha labọ.

³¹Tọbudu iya bụ ọ nwụhu lapfushia nna iya phę. E lia ya lę mkpukpu Dévidi, bụ nna iya. Nwa iya nwoke, bụ Rehobówamu bụru eze nọchia ęnya iya.

2 Iphe, ndu eze meru 10

Ndu Ízurelu Ekwefuru Rehobówamu ike

(1Ndu 12:1-20)

¹Tọbudu iya bụ; Rehobówamu tugbua jeshia Shẹkemu; kele ndu Ízurelu l'ophu wụwaru jeshia l'ẹka ono g'ẹphe mee ya eze.

²Teke ono bę Jierobowamu nwa Nebatu nọkwadu lę Ijiputu, bụ ẹka ono, ọ gbaru lashia teke ono, ọogbaru eze, bụ Sólomonu ọso ono. Ọ numa kę Rehobówamu ono; ọ shi lę Ijiputu lwatashia.

³Ọo ya bụ; e zia g'e je ekua ya. Jierobowamu yele ndu Ízurelu g'ẹphe ha bya awụ-pfu Rehobówamu je asụ iya:

⁴“Nna ngu boru anyi ivu, anyi ęrwa. Ọ -bụru l'ii-me g'ozì aphụ ono, nna ngu shi kpabe anyi; mę ivu ono, ọ boru anyi ono ka alwa alì; bę anyi a-nọdukwa-a ejeru ngu ozi.”

⁵Rehobówamu sụ phę: “Unu lashia je anọo ujiku ęto; g'unu alwaphutawarọ azu.” Ọo ya bụ; ẹphe wụkashihu.

⁶Tọbudu iya bụ; eze, bụ Rehobówamu jeshia akpata ishi l'ẹka ndu bụ ọgerenya ono, shi ejeru nna iya, bụ Sólomonu ozi lę teke ọ nọ ndzụ ono. Ọ jia phę sụ: “? Dęnu g'unu sụru gę mu yeeru ndu-a ọnu?”

⁷Ẹphe sụ iya: “Ọ -bụru l'ii-nọdu emeru ndu-a iphe-ọma; emeru phę ree; bya epfuru phę opfu ọma; bę ẹphe a-bụkwaru ndu-ozì ngu jasuru asuru.”

⁸Obenu lę Rehobówamu bę jikaru idzu ono, ndu bụ ọgerenya chitaru iya ono. Ọ jepfushia unwokorobya, bụ ndu ẹphe l'iya tukuru tsee, ejeru iya ozi; gę ya kpata phę ishi iphe.

⁹O jia phe su: “? Denu g'unubedua suru ge mu yeeru phe onu? ? Bu gunu be anyi e-pfuru ndu-a, suru ge mu mee g'ivu, nna mu boru phe ka alwa ali-a?”

¹⁰Unwokorobya ono, bu unwu ogbo iya ono su iya: “Iphe, ii-pfuru ndu ono, suru ngu le nna ngu boru phe ivu, anyi erwa ono; l'oo g'i mee ya g'o ka alwa ali ono bu le-a: mkpushi-eka otsutso ngu be kakwa upfu nna ngu igbi.

¹¹L'eshi ophu nna ngu boru phe ivu, anyi erwa be ii-me g'o kaba anyi erwa. Eshi ophu o bu echachi be nna ngu shi echije phe be ii-gbaahaa phe akpi.”

¹²Oo ya bu; o -rwuepho le mboku k'eto ono; Jierobowamu ye le ndu Izurelu l'ophu wu-pfuta eze, bu Rehobowamu ozo; egube ono, o pfuru phe g'ephe bya le mboku k'eto ono.

¹³Eze, bu Rehobowamu jika idzu, ndu bu ogerenya pho chikoshiru iya; eyeeru phe onu ehuka ehuka.

¹⁴O je etsoru idzu ono, unwokoro pho chikoshiru iya su: “Nna mu boru unu ivu, anyi erwa; ole mbedua be e-me g'o kaba anyi erwa. Nna mu bu echachi be o shi echije unu; ole mbedua be a-gbaahaa unu akpi.”

¹⁵Oo ya bu; ophu eze angaduru ndu Izurelu ono nchi; noo kele o Chileke be meru g'o du nno; k'ophu iphe ono, o shije l'onu Ahayijia ke mkpukpu Shilo pfuaru Jierobowamu nwa Nebatu ono a-vukota.

¹⁶Ndu Izurelu ono l'ophu bya ahumaepho l'eze ta angaduru phe nchi; ephe su iya: “? Bu gunu be anyi le Devidi jigba? O to dukwa okiphe, anyi nweru l'ehu nwa Jiesi. Unube Izurelu; g'onyenonu lashia unuphu ibe iya-o! Ge Devidi letawaro onu-ulo nkiya enya!” Oo ya bu; ndu Izurelu l'ophu wukashihu lashia unuphu ibe phe.

¹⁷O buwaruro ndu Izurelu ophu bu le mkpukpu le mkpukpu, du l'ali Jiuda be Rehobowamu bu eze phe.

¹⁸Tobudu iya bu; eze, bu Rehobowamu zia Adoniramu, bu onye-ishi ogbo ozi; g'o jepfu ndu Izurelu. O rwua; ephe gude mkpuma tugbua ya. Eze, bu Rehobowamu mekebe egwegwa nyita ugbo-inya iya gbalaa; o buru iya ala Jierusalemu.

¹⁹E -shi teke ono be ndu Izurelu shi kwefutaru onu-ulo Devidi ike byasu ntau.

2 Iphe, ndu eze meru 11

Shemaya Ezi Rehobowamu Ozi

(1Ndu 12:21-24)

¹Rehobowamu larwuepho Jierusalemu; o chikobe ndu onu-ulo Jiuda; me ndu Benjaminu; ukporo unu unwoke mgbo ukporo l'ebo l'unu unwoke iri, bu ndu a hotaru ahota; g'ephe je etsoo ndu Izurelu ogo; k'ophu ephe a-nataphu ali-eze ono azu woru nu Rehobowamu.

²Tobudu iya bu; Chipfu bya epfuaru Shemaya, bu onye ke Chileke su:

³“Je akaru Rehobówamu nwa Sólomõnu; mbụ eze ndu Jiuda; l'ị karụ ndu Ízurelu l'ophu, bụ ndu ophu nọ lẹ Jiuda mę lẹ Benjaminu

⁴lẹ Chipfu sụru-a: ‘Unu te ejekwa etso ụnwunna unu phẹ ọgu. G'onyenõnu lashia ibe iya; noo kele ọo mu bẹ iphe ono shi l'ẹka.’ “ Ọo ya bụ; ẹphe numa iphe, Chipfu pfuru; laphu azu. Ophu ẹphe ejeeduru etso Jierobowamu ọgu.

Rehobówamu akpụ Jiuda; g'o shihu ike

⁵Rehobówamu bẹ bu lẹ Jierúsalemụ. O kpushia mkpụkpu lẹ mkpụkpu, dụ l'alị Jiuda; o shihuchaa ike; k'ophu oo-gbobutajẹ phẹ l'ọgu.

⁶Mkpụkpu, ọ kpuru bụ Bẹtulehemu; mę Etamu; mę Tekowa;

⁷mę Bẹtu-Zuru; mę Soko; mę Adulamu;

⁸mę Gatu; mę Maresha; mę Zifu;

⁹mę Adoremu; mę Lakishi; mę Azeka;

¹⁰mę Zora; mę Ajialõnu; mę Hẹburonu. Mkpụkpu ono bẹ bukota mkpụkpu, a kpushiru ike l'alị Jiuda; mę l'alị Benjaminu.

¹¹O mekwarupho ẹka eedomije onwonye; o shihugbaa ike; bya achịta ndu-ishi ndu ojogu yechaa ya. O meta ụlo ẹka aakwakọbeje nri; mę manụ; mę mee yechaa ya.

¹²O yekotaru iphe, eegudeje egbobuta onwonye; mę arwa lẹ mkpụkpu nonu; bya emee; mkpụkpu ono shihu ike ọkpobe eshihu. Ọo ya bụ; Jiuda; mę Benjaminu bụwaru iya bẹ ọ dụ l'ẹka.

Ndu uke Chileke; mę ndu Lívayi alwa Jiuda

¹³No iya; ndu-uke Chileke; mę ndu Lívayi, nọkota l'alị Ízurelu bya aturu ike yeru iya.

¹⁴Ndu Lívayi parụ alị ẹka ẹku phẹ atajẹ nri; mę alị phẹ haa; lashia Jiuda; mę Jierúsalemụ; kele Jierobowamu yele ụnwu iya chifuru phẹ g'ẹphe te ejeshiru Chipfu ozi ndu-uke.

¹⁵Jierobowamu gude ẹka iya họtá ndu e-gweje ngweja l'ẹka aagwajẹ iphe; mę ndu a-gwajẹ nwamkpi; yele oke-eswi, ọ kpushiru dobe.

¹⁶Iphe, bụ ndu doberu obu phẹ g'ẹphe chọo ụzo ke Chipfu, bụ Chileke ke Ízurelu shi l'ipfu nonu lẹ Ízurelu wufu tsoru ndu Lívayi jeshia Jierúsalemụ; g'ẹphe gweeru Chipfu ngweja; mbụ Chileke ke nna phẹ.

¹⁷Ẹphe mee; alị-eze ndu Jiuda ka eshihu ike; turu ikè yeru Rehobówamu, bụ nwa Sólomõnu apha ẹto. Ẹphe nọdu etsokota ụzo, Dévidi; mę Sólomõnu toru l'ime apha ẹto ono.

Ndibe Rehobówamu

¹⁸Rehobówamu bẹ luru Mahalatu, bụ nwada Jierimotu. Jierimotu bụ nwa Dévidi ke nwoke. Jierimotu ono lua Abihelu, bụ nwada Eliyabu. Eliyabu bụ nwa Jiesi ke nwoke.

- ¹⁹Mahalatu nwutaru iya unwoke, epha phe bu: Jieyushi; me Shemaraya; me Zahamu.
- ²⁰O luchaa ya; bya alua Maka, bu nwada Abusalomu. O nwutaru iya Abayijia; me Atayi; me Ziza; me Shelomiti.
- ²¹Rehobowamu buru Maka, bu nwada Abusalomu ono be o kachaa eye obu eme l'unyomu iya ndu ophu; mekpoo unwanyi, ndu ophu abu-zidu unyomu iya. O luru unwanyi iri l'esato. O nweru unwanyi ukporo eto, bu ndu ophu abu-zidu unyomu iya. O nwuta unwoke ukporo l'esato; bya anwuta unwanyi ukporo eto.
- ²²O buru Abayijia, bu nwa ke Maka be o turu eka g'o buru onye-ishi l'echilabo unwunna iya; noo kele oo ya be oome ge ya mee eze.
- ²³O meru g'onye maru iphe; bya edokaa unwu iya; epe dzuru ali Jiuda; me ke Benjaminu; mbu le mkpukpu ono, a kpugbaaru; o shihu ike ono; mbu nu phe nri k'etsutsu iya; bya alushiaru phe nwanyi.

2 Iphe, ndu eze meru 12

Ndu Ijiputu ezebata le Jierusalemu

(1Ndu 14:25-28)

- ¹O be teke Rehobowamu meerupho aba-eze iya o nguru anguru shihu okpobe ike; yele ndu Izurelu g'ephe ha gwobe ekemu Chipfu.
- ²Eshinu epe ta apfushiduru ike l'eka Chipfu; Shishaku, bu eze ndu Ijiputu byatashia ogo le Jierusalemu l'apha kwe Rehobowamu apha ise o wataru aburu eze.
- ³O chiru unu ugbo-inya eto; me ndu agba l'inya, du unu umadzu ugbo ukporo esaa l'unu iri bya ogo ono. Ndu yee ya shi le Ijiputu swiru bya ogo ono buru aguta aguta; mbu ndu Libiya; me ndu Sukimu; me ndu Kushi.
- ⁴O natakota iphe, bu mkpukpu, a kpushiru ike le Jiuda; mbu epe byarwutachaa Jierusalemu.
- ⁵Tobudu iya bu; Shemaya, bu onye mpfuchiru Chileke byapfuta Rehobowamu; yele ndu-ishi ndu Jiuda g'ephe dzukoberu le Jierusalemu l'eka epe atsui Shishaku ebvu. O su phe: "Wakwa iphe, Chipfu epfu baa: Unu pawaru mu haa; oo ya meru iphe, mbedua paru unu haaru Shishaku."
- ⁶Oo ya bu; ndu-ishi ndu Izurelu ono waa eze bya ewozeta onwophe ali su: "Chipfu bu onye pfuberekoto."
- ⁷Chipfu bya ahumaepho l'ephe wozetaru onwophe ali; Chipfu byakwa epfuaru Shemaya su: "Eshinu epe wozetawaru onwophe ali be mu te emebyishiedu phe; mu e-mechia g'a nafuta phe. Mu te eshiedu Shishaku l'eka tu-koshi Jierusalemu oke ehueghu mu.
- ⁸Ole-a; epe a-nodu ejeru iya ozi; k'ophu epe a-maru iphe, du iche l'ejeru mu ozi waa ejeru ndu eze ndu ali ozo ozi."

⁹Oo ya bu; Shishaku, bu eze ndu Ijiputu byatashia ogo le Jierusalemu; bya evukochoaa eku, du l'ulo Chipfu; me eku, du l'ulo eze. O vutakota iphemiphe; mbu chitachaa iphe, eegudeje egbobuta onwonye pho, Solomonu gude mkpola-ododo kpushia pho.

¹⁰Tobudu iya bu; eze, bu Rehobowamu bya egude onyirubvu kpu-phukota iphe ono azu; gude dochia enya iya ophuu; bya eworu iya ye l'eka ndu-ishi ndu eche onu eka eeshije abahu l'ibe eze nche; g'ephe leta iya enya.

¹¹O nodu abujeru teke eze eje l'ulo Chipfu; ndu nche ono aparu iphe, eegudeje egbobuta onwonye ono tsoru iya. E -mechaa; ephe ewophuta iya azu bya edobe l'ulonche.

¹²Rehobowamu wozetaepho onwiya ali ono; Chipfu vu-buhuru iya ovuma; k'opu bu l'o to meduru iya g'o buru mkpurupyata; teme iphe bya aduharu ndu Jiuda le ree.

¹³Noo ya; eze, bu Rehobowamu eze le Jierusalemu; kpo onwiya g'abara. O nowaru ukporo apha labo l'apha lanu teke o wataru aburu eze. Iphe, o noru l'aba-eze iya bu apha iri l'esaa le Jierusalemu, bu iya bu mkpukpu ono, Chipfu hofutaru l'ipfu Izurelu l'opu g'o buru ono. Epha ne iya bu Nama onye Amonu.

¹⁴O meru ejo-iphe; kele o to gudedu obu iya choo Chipfu.

Anwuhu Rehobowamu

(1Ndu 14:29-31)

¹⁵Iphe, Rehobowamu megbaberu; e -shi l'ishi jeye l'eka o bvuru be e dekotaru l'ekwo Shemaya, bu onye mpfuchiru Chileke; me l'ekwo Ido, bu onye aphuje ophulenyaa. Ophu Rehobowamu ye le Jierobowamu alwu-buhujeduru ogo alwu-buhu.

¹⁶Rehobowamu bya anwuhu lapfushia nna iya phe. E lia ya le mkpukpu Devidi. Abayijia, bu nwa iya nwoke buru eze nochia enya iya.

2 Iphe, ndu eze meru 13

Teke Abayijia bu eze ndu Jiuda

(1Ndu 15:1-8)

¹L'apha, kwe Jierobowamu apha iri l'esato, o wataru aburu eze ndu Izurelu be Abayijia wataru aburu eze ndu Jiuda.

²Iphe, o noru l'aba-eze le Jierusalemu bu apha eto. Epha ne iya bu Mayikaya nwada Uriyelu ke mkpukpu Gibiya. Abayijia ye le Jierobowamu shi anoduje alwu-phe ogo.

³Abayijia bya atugbua jeshia ogo ono; chita ndu ojogu, du ukporo unu ugbo ukporo labo l'iri, buchaa ndu ike du l'ogu; buru ndu ojogu, a horu ahoho. Jierobowamu chita ndu nkiya, du ukporo unu ndu ojogu ugbo ukporo ise, bukwapho ndu a horu ahoho; ephe je akwaberu Abayijia k'ogu ono.

⁴Tobudu iya bu; Abayijia je apfu-koru l'eli ubvu Zemarayimu ophu no l'ali ubvu ubvu Ifuremu; pfushiahaa su: "Gube Jierobowamu me Izurelu l'opu; unu ngaberu mu nchi!"

- 5?** Unu ta amadu le Chipfu, bu Chileke ke Izurelu be gude ogbandzu, ta abyadu anwahu anwahu woru abu eze ndu Izurelu nu Dévidi yele oshilokpa iya jasụ l'ojeje?
- 6** O buru iya be Jierobowamu nwa Nebatu, bu onye-ozu Sólomonu nwa Dévidi gbalihuru bya ekwefuru nnajiuphu iya ike.
- 7** Ogalemkpa nemadzu phe, bu mkpokoro nemadzu je eswiphee ya mgburugburu. Epe noduru Rehobowamu nwa Sólomonu l'ukukanyi; mbu le teke Rehobowamu bukwaduro nwatanshii, adudu iphe, o maru; ophu o to dudu ike kpafulu phe l'iphu.
- 8** “Nta-a bu iphe, unu tuseru bu g'unu tsoo ali-eze Chipfu ugu; mbu ali-eze ono, no l'eka unwu Dévidi ono. Unu bukpoozu ikpoto nemadzu; teme unu l'unwu oke-eswi mkpola-ododo ono, Jierobowamu meshiru g'o buru agwa unu ono tuko nodu.
- 9** Ole-a; ? to bunaa unu be chishiru ndu-uke ke Chipfu-a; mbu oshilokpa Eronu ono; me ndu Lívayi; mbu gude eka unu dobe ndu egweru unu ngweja egube ono, ndu ohozo emeje ono? Iphe, bu onye gude oke-eswi; yele ebili esaa bya ge ya swaa onwiya eja be abujewaru nu onye egweru agwa ono, adudu iphe, o bu ngweja.
- 10** “Obenu l'anyibedua be bu Chipfu bu Chileke nkanyi; anyi teke ahakwa iya. Anyi nweru ndu-uke Chileke, bu oshilokpa Eronu. O buru phe ejeru Chipfu ozi; ndu Lívayi nodu eyetaru phe eka.
- 11** Utsugutsu; me uzenyashi nonu be epe egwejeru Chipfu ngweja-akpo-oku; waa ngweja unwu-isensu, eshi kwekweekwee; bya edoo buredi, eedobeje l'iphu Chileke l'eli teburu ono, e mecharu emecha ono. L'uzenyashi be epe eyeje oku l'oroku ono, a tukoberu l'iphe, e meru le mkpola-ododo, aapfubeje oroku ono. O buru iphe, kparu iya nu bu l'anyibedua eme iphe, Chipfu, bu Chileke anyi suru g'emeje. Obenu l'unubedua be pawaru Chipfu haa.
- 12** Chileke be swiru anyi eswiru. Oo ya bu onye-ishi anyi. Ndu uke iya be egbuwaru unu opu-ogu eje abya. Unube unwu Izurelu; unu te etsokwa Chipfu ugu; mbu Chileke ke nna unu phe; noo kele o too jehukwaru unu.”
- 13** Jierobowamu be gbeyewanu ndu ojogu kpugbaaru ekpuru k'ophu epe e-shi l'azu ndu Jiuda ono. Jierobowamu phe nodu ndu Jiuda l'iphu; ndu ojogu iya ophu kpuru ekpuru pho nodu ndu Jiuda ono l'azu.
- 14** Ndu Jiuda bya aghaa enya; huma l'e shi l'iphu me l'azu etso phe ugu ono. Epe raku Chipfu; ndu-uke Chileke woru opu gbua.
- 15** Tobudu iya bu; ndu Jiuda chishia mkpu ugu. Epe chiepho mkpu ugu ono; Chileke tu Jierobowamu; me ndu Izurelu l'ophu eberebete l'iphu Abáyijia; yele ndu Jiuda.
- 16** Ndu Izurelu gbaaru ndu Jiuda oso; Chileke woru phe ye ndu Jiuda l'eka.
- 17** Abáyijia yele ndu nkiya lwu-kpee phe; gbua phe pyaapya; k'ophu bu le ndu epe gburu egbugbu le ndu ojogu ndu Izurelu ono be du ukporo unu ugbo ukporo eto l'ebo l'unu iri, bu ndu ojogu, a horu aho.

¹⁸Oo ya bu; a kapyabe ndu Ízurelu le teke ono. Ndu Jiuda lwu-kpee; kele epe dakoberu Chipfu, bu Chileke ke nna phe.

¹⁹Abáyijia chipyabe Jierobowamu; je anaa ya mkpukpu Betelu; yele unwu mkpukpu, nokota iya nu; me mkpukpu Jieshana; yele unwu mkpukpu, nokota iya nu; me mkpukpu Efuronu; yele unwu mkpukpu, nokota iya nu.

²⁰Ophu Jierobowamu aduedu ike palihubaa ozo teke Abáyijia bu eze. Tɔbudu iya bu; Chipfu chita iya tua; o nwuhu.

²¹Ole Abáyijia be ike kaba shi eje. O lua unwanyi iri l'eno; nwuta unwoke ukporo l'ebo; nwuta unwanyi iri l'ishii.

²²Iphe ozo, Abáyijia megbaberu be e dekotaru l'ekwo ako onye mpfuchiru Chileke, bu Ido.

2 Iphe, ndu eze meru 14

¹Oo ya bu; Abáyijia nwuhu lapfushia nna iya phe. E lia ya le mkpukpu Dévidi. Asa, bu nwa iya nwoke buru eze nochia enya iya. Teke Asa bu eze be ali ono noru le nchi-odoo apha iri.

Teke Asa bu eze ndu Jiuda

²Asa be meru iphe, du ree; me iphe, pfuru oto l'enya Chipfu, bu Chileke iya.

³O wofuru enya aka eegwejeru agwa ndu ohozo ngweja; wofu aka aagwaje iphe; bya akupyashia mkpuma, e doberu nsɔ; gbutsushia itso Ashera.

⁴O bya atɔaru ndu Jiuda ekemu su g'ephe choo Chipfu; mbu Chileke ke nna phe; waa g'ephe meje ekemu iya me iphe, o sɔru g'e meje.

⁵Nokwapho g'o wofuru aka aagwaje iphe, dukota le mkpukpu ndu Jiuda; me enya aka aakpoje unwu-isensu oku, du iya nu. Ali-eze ono nodu le nchi-odoo teke o bu eze.

⁶O kpushia mkpukpu, a kpu-phetaru mgburugburu l'ali Jiuda; kele ali ono be no le nchi-odoo. Ophu o dudu onye tsoru iya ogo l'apha ono; kele Chipfu be meru; nchi du iya doo.

⁷O bya asu ndu Jiuda: “Unu g'anyi kpua mkpukpu-a; gude igbulo kpu-pee ya mgburugburu; kpushia ya ulo-eli; yekota iya oguzo; me mgborigwe, ee-gudeje aswo-chi iya aswo-chi. Ali-a be bukwadu nkanyi; kele anyi choru Chipfu, bu Chileke anyi; o mewaa ge nchi du anyi doo ibekeboebo.” Oo ya bu; epe kpua ya; o jehuru phe.

⁸Asa be nweru ndu ojogu, shi l'ipfu Jiuda, ndu du ukporo unu unwoke ugbo ukporo l'ugbo iri l'esaa l'unu iri. Ndu ono egudeje eze iphe, eegudeje egbobuta onwonye; me arwa. O nweru ndu ojogu, shi l'ipfu Benjaminu, ndu du ukporo unu unwoke ukporo l'iri l'ise. Epebedua apaje iphe, eegudeje egbobuta onwonye ke nshii; me apfu. G'ephe ha bukota ndu ike du l'ogu.

Asa lwu-kperu Zera

⁹No iya; Zera, bu onye Kushi bya achita unu-kuru-unu ndu Ojogu byapfutashia ndu Jiuda ogo; chiru ugbo-inya, du ukporo iri l'ise; ephe byarwutacha mkpukpu Maresha.

¹⁰Asa phe bya ejepfushia Zera phe ogo. Ephe bya akpo giriri k'ogu ono le nsuda Zefata le mkpukpu Maresha.

¹¹Tobudu iya bu; Asa bya araku Chipfu, bu Chileke iya su: "Jiko Chipfu; o to dukwa onye ozo, du ge gubedua, bu onye e-yetaru onye okpehu adudu aka ge yele onye okpehu du ghaa ya. Yetanuru anyi aka; gube Chipfu, bu Chileke anyi; kele oo ngu be anyi dakoberu; teme o buru epha ngu be anyi gude abyapfuta ikpoto ndu-a ogo. Gube Chipfu; oo ngu bu Chileke anyi; te ekwekwa ge nemadzu ka ngu ike."

¹²Oo ya bu; Chipfu dukaa ndu Kushi ono l'iphu Asa yele ndu Jiuda. Ndu Kushi ono ye okpa l'oso.

¹³Asa me ndu yee ya swi chia phe jeye le mkpukpu Gera. E gbushia ndu Kushi ono jeye ophu o dudu onye e gbuphodoru. E gwee phe arakabya l'iphu Chipfu yele ndu ojogu iya. Ndu Jiuda kwatakpo kwaa okwata k'ophu paru aka.

¹⁴Mkpukpu, no-phekotaru mkpukpu Gera mgburugburu be ephe mebyishikotaru; kele ndzu-agugu, shi l'aka Chipfu be byaru ndu mkpukpu ono l'ehu. Ephe gwekota ivu ndu mkpukpu ono; kele iphe, aakwata l'okwata paru iya aka.

¹⁵Ephe kwatsushikwaapho ulo-ekwa ndu nweru iphe-edobe; kpukoo ikpoto aturu waa egbu ndu ono; me inya-kamela phe. Ephe gbete teke ono lwatashia Jierusalemu.

2 Iphe, ndu eze meru 15

Iphe, Asa meziru emezi

¹Tobudu iya bu; Unme Chileke bya Azariya nwa Odedu l'ehu.

²O lufu jepfushia Asa je asu iya: "Asa; me ndu Jiuda; me ndu Benjaminu l'ophu; unu ngaberu mu nchi. Chipfu be a-tukwaru ikè yeru unu; me o -buru l'unu turu ikè yeru iya. Unu -chọ ya be unu a-chota iya. Ole unu -haa ya; l'o haa unu.

³A nowaru odu, ndu Izurelu no; ophu ephe enwedu okpobe Chileke; ophu ephe enwedu ndu-uke Chileke, ezije phe iphe; teme ophu ephe enwedu ekemu Chileke.

⁴Ole ephe noepho l'iphe-ehuka; ephe dakobe lwapfuta Chipfu, bu Chileke ke Izurelu; ephe chọ ya; chota iya.

⁵Teke ono be nemadzu te ejedu g'o du iya ree; iphe emee ya; noo kele iphe, bukpo ndu bu l'ali ono noepho l'aghamehu.

⁶Oha anoduje egwe oha ibe phe arakabya; mkpukpu anodu egwe mkpukpu ibe phe arakabya; kele Chileke be gude iphe-ehuka, du iche iche akpa phe owechorocho.

⁷Ole oo g'unubedua shihukpopho ike. G'ike ta abvukwa unu; noo kele ozi, unu jeru be ee-bu unu obunggo iya."

⁸Asa n̄maep̄ho op̄fu; mb̄u ozi, Azaríya nwa Od̄edu ziru; obu shihu iya ike. O bya ewofuk̄ota ejo agwa, d̄u l'ali Jiuda; m̄ekpoo ophu d̄u l̄e mkp̄ukpu Benjaminu l'ophu; m̄ekpoo ophu d̄u l̄e mkp̄ukpu, o lw̄utakotaru l'úbv̄u úbv̄u al̄i Ifuremu. O bya emekwaa oru-ngweja Chipfu, n̄o l'atatip̄hu eze-ulo Chipfu ono.

⁹T̄obudu iya b̄u; o ch̄ikobe ndu Jiuda; m̄e ndu Benjaminu l'ophu; m̄e ndu ophu shi l'ip̄fu Ifuremu; m̄e ndu k'ip̄fu Manáse; m̄e ndu k'ip̄fu Simiyonu; mb̄u ndu ono, ep̄he l'iya bu; kele igwerigwe b̄e kekatarun̄u l̄e ndu Ízurelu w̄u-pfuta Asa g'ep̄he h̄umaru l̄e Chipfu, b̄u Chileke iya b̄e swiru iya eswiru.

¹⁰Oo ya b̄u; ep̄he dzua l̄e Jierúsalem̄u l'onwa k'eto l'apha, kwe Asa apha iri l'ise e -shi teke o watar̄u ab̄uru eze.

¹¹Ep̄he gweeru Chipfu ngweja l̄e mb̄oku ono. O b̄uru an̄u, ep̄he kp̄ukoru l'ogu b̄e ep̄he hatar̄u gude gwee ngweja ono; mb̄u un̄u eswi l'uk̄poro iri l'ise; m̄e un̄u at̄uru iri l'esa l'uk̄poro iri.

¹²Ep̄he gbaa ndzu s̄u l'ep̄he e-gude obu ph̄e l'ophu; m̄e ndzu ph̄e l'ophu ch̄oo Chipfu, b̄u iya b̄u Chileke k̄e nna ph̄e;

¹³l'onye ta ach̄oduru Chipfu, b̄u Chileke k̄e Ízurelu b̄e ee-gbu egbugbu; obeta o b̄uru nwata ozoo ogerenya; ozoo nwoke ozoo nwanȳi.

¹⁴Ep̄he chia mkpu; t̄ua uzu; gbua opu; ph̄ua up̄yi gude ribuaru Chipfu nte.

¹⁵Ndu Jiuda l'ophu tek̄ota ̄eswa k̄e nte ono, ep̄he riru ono; kele ep̄he gude obu ph̄e g'o ha ribua ya; t̄eme ep̄he kwatak̄poo ch̄oo Chileke ok̄pobe ach̄ocho; ep̄he ch̄ota iya. Chipfu bya emee; ep̄he t̄uta unme ibek̄eboebo.

¹⁶Eze, b̄u Asa naf̄u ne iya, b̄u Maka ok̄wa k'ab̄u ne eze-nwanȳi; kele o doberu ejo agwa, b̄u Ashera. Asa gbujishia nt̄ekpe Ashera ono; gwee ya arakabya; woru iya kp̄oo ok̄u l̄e nggele Kidironu.

¹⁷Ole o to wofuduru ̄eka aagwaj̄e ip̄he l̄e Ízurelu. Obenu l̄e nt̄ucha ta ad̄udu l'obu Asa l'eka Chipfu n̄o jeye g'o n̄o-beru.

¹⁸O wota ip̄he, nna iya doberu ns̄o; m̄e ip̄he, ȳeb̄edua doberu ns̄o bya edobe l'eze-ulo Chileke; mb̄u mkp̄ola-ochaa; m̄e mkp̄ola-ododo; m̄e ivu ozo.

¹⁹Ophu ogu ozo adaj̄eeduru jeye l'apha, kwe Asa uk̄poro apha l'apha iri l'ise, e -shi teke o watar̄u ab̄uru eze.

2 Ip̄he, ndu eze meru 16

Asa Etso Basha Ogu

(1Ndu 15:16-22)

¹O be l'apha, kwe Asa uk̄poro apha l'apha iri l'ishii, e -shi teke o watar̄u ab̄uru eze; Basha, b̄u eze ndu Ízurelu bap̄fu ndu Jiuda ogu; bya akp̄uaha mkp̄ukpu Rama g'o shihu ike; g'ee-shi g'o t̄o d̄u onye e-shi l̄e k̄e Asa, b̄u eze ndu Jiuda lufu; ozoo bah̄u iya abah̄u.

²Tɔbudu iya bụ; Asa wota mkpọla-ọchaa; mę mkpọla-ododo, shi l'ẹku, dụ l'eze-ulo Chipfu; mę l'ẹku, dụ l'ibe eze; wojeru eze ndu Arámu, bụ Benu-Hadadu; mbụ onye ono, bu lę Damasukosu; bya asụ iya:

³“Gę mu lę ngu tųgbanu bųru nanų; ęgube ono, nna mu yele nna ngu shi tųgba bųru nanų ono. Ọwaa bų mkpọla-ọchaa; mę mkpọla-ododo, mu anų ngu. Jiko tųgbunaa je emebyia atųgba ono, unu lę Basha, bų eze ndu Ízurelu tųgbaru ono; k'ophu ọo-parų mu haa.”

⁴Ọo ya bụ; Benu-Hadadu kweta iphe ono, eze, bụ Asa pfuru ono. O zia ndu-ishi ndu ojogu iya; ęphe jeshia ọgu lę mkpųkpu, dųgbaa l'alị Ízurelu. Ęphe lwuta mkpųkpu Ijionu; mę mkpųkpu Danu; mę mkpųkpu Abelu-Mayimu; mękpoo mkpųkpu ęka aakwakọbeje iphe l'alị Nafutali l'ophu.

⁵Basha numaepho iphe, meru nų; ọ haa akpų mkpųkpu Rama g'o shihu ike; gwọbe ozi, o gude l'ęka.

⁶Tɔbudu iya bụ; eze, bụ Asa chitakota ndu Jiuda l'ophu; ęphe je evutakọta mkpuma, yeę oshi, Basha shi gude akpų mkpųkpu Rama g'o shihu ike. Ọ bųru iya bę Asa gude kpųa mkpųkpu Geba; o shihu ike; waa mkpųkpu Mizupa.

⁷Ọ bųru teke ono bę Hanani, bụ onye aphuje ọphulenyia byapfutaru Asa, bụ eze ndu Jiuda bya asụ iya: “Eshi ọphu i dakoberu eze ndu Arámu; ọphu i dakobeduru Chipfu, bụ Chileke ngu; bę ndu ojogu eze ndu Arámu ono pyofuchawaru ngu l'ęka.

⁸?Ndu Kushi; mę ndu Libiya ta abuna ikpoto ndu ojogu, chị igwerigwe ųgbo-inya mę ndu agba l'inya tọo? Obenu l'ọo l'i dakoberu Chipfu bę o gude woru phę ye ngu l'ęka.

⁹Ęnya Chipfu bę ejekwa warawara lę mgboko l'ophu; achọ ndu kpọru obu phę l'ophu yeru iya g'o mee g'ęphe kaba eshihu ike. I mewaru umere onye-eswe; ọo ya bụ lę shita nta-a kwaseru bę ọgu a-nọduepho etso ngu.”

¹⁰Ọo ya bụ; Asa vọru ọku wua ęhu l'ęka onye ono, aphuje ọphulenyia ono nọ; o woru iya ye l'ọka-mkpọro; kele ęhu eghushi iya eghu ike lę k'iphe ono. Asa nweru ndu ọphu ọ watarų akpa ęhu lę teke ono.

Anwųhu Asa

(1Ndu 15:23-24)

¹¹Iphe, Asa megbaberu; e -shi l'ishi jeye l'ęka o bvuru bę e dekotaru l'ękwo ndu eze ndu Jiuda mę kę ndu Ízurelu.

¹²Ọ bųru l'apha, kwe Asa ųkporo apha l'apha iri lę tete, e -shi teke ọ watarų aburu eze; bę iphe-ememe meaharu iya l'ọkpa. Iphe-ememe ono kabaa ya njọ. Mbųkponu teke iphe eme iya ono bę ọ tọ chọkwaru Chipfu; ọ bųru ndu eme ọbvụ bę ọ chọchiaru g'ęphe yeru iya ęka.

¹³Ọo ya bụ; Asa bya anwųhu lapfushia nna iya phę. Ọ bųru l'apha, kwe iya ųkporo apha labọ l'apha lanų, e -shi teke ọ watarų aburu eze bę ọ nwųhuru.

¹⁴Ephe kua ya l'igbe odzu a wuru manụ ụ l'udu iya l'udu iya, eshigbaa kwẹkweekwee; teme ọ buru ndu emeje manụ meru iya l'onwophe; bya e woru iya lia l'ilu, ọ tūru doberu onwiya le mkpukpu Dévidi. Ephe kpobe oku enwu phoophoophoo gude kwaa ya.

2 Iphe, ndu eze meru 17

Jiehoshafatu; eze ndu Jiuda

¹Tobudu iya bu; Jiehoshafatu, bu nwa Asa ke nwoke buru eze nochia enya iya. O bya emee onwiya; ike kabaa ya adudu k'etso ndu Izurelu ogu.

²O dokashia ndu ojogu l'iphe, bu mkpukpu, e gude igbulo kpu-pheta mgburugburu, no l'ali Jiuda; bya edobe odu-ogu l'ali Jiuda; me le mkpukpu le mkpukpu ndu Ifuremu, bu aka ono, nna iya, bu Asa natakotaru l'ogu ono.

³Chipfu swikpoerupho Jiehoshafatu eswiru; kele teke o wataru aburu eze be o tsoru aka ochoroke iya, bu Dévidi. O to gwaduru agwa Balu.

⁴Oo Chileke ke nna iya be o choru; eme ekemu iya; ophu o to tsoduru aka ndu Izurelu.

⁵O buru iya meru g'o gude Chipfu mee g'ali-eze ono kwata lwa Jiehoshafatu l'aka okpobe alwalwa. Ndu Jiuda g'ephe ha nodu abyaje anu iya iphe; o bya enweru iphe k'ophu paru aka; buru onye aakwabe ubvu, paru aka.

⁶O wofutaru obu iya dobe l'aka Chipfu no. Ozo buru l'o wofuru aka aagwaje iphe; me itso Ashera l'ali Jiuda.

⁷O be l'apha, kwe iya apha eto, e -shi teke o wataru aburu eze; o zia ndu-ishi iya, bu Benu-Hayilu; me Obedaya; me Zekaraya; me Netanelu; me Mayikaya; g'ephe je ezia iphe le mkpukpu, dukota l'ali Jiuda.

⁸Ndu Lívayi, o yeru phe bu Shemaya; me Netanaya; me Zebadaya; me Asahelu; me Shemiramotu; me Jiehonatanu; me Adonijia; me Tobayijia; me Tobu-Adonijia. Ndu ophu bu ndu-uke Chileke buru Elishama; waa Jiehoramu.

⁹Ephe zigbabekota iphe l'ali Jiuda; gude ekwo ekemu Chipfu ezi iya. Ephe jebbabekota mkpukpu, nokota l'ali Jiuda ezi phe iphe.

¹⁰Iphe, bu ndu eze ndu ali ono, buphegbaaru ndu Jiuda mgburugburu ono wata atsu Chipfu ebvu; k'ophu bu l'ephe te etsoduru Jiehoshafatu ogu.

¹¹Ndu Filisitayinu haru wotaru Jiehoshafatu iphe; gude mkpola-ochaa turu utu nu iya. Ndu Arabu kputaru iya ebili, du unu iri le tete l'ukporo ise; me mkpi, du unu iri le tete l'ukporo ise.

¹²Jiehoshafatu nodu aka ike akaka eje. O bya akpushia aka eedomije onwonye; kpushia mkpukpu aka aakwakobeje iphe l'ali Jiuda;

¹³bya enweru iphe, o kubechaaru ke nyimunyimu le mkpukpu, dugbaa l'ali Jiuda. O bya enweru ndu ojogu, bu ndu ike du l'ogu le Jierusalemu.

¹⁴Waa g'e shi doo phe l'anya-unuphu l'anya-unuphu baa: L'ipfu Jiuda be onye bu onye-ishi ndu ojogu, dugbaa unu labo l'ukporo iri iri be bu Aduna. Ndu ojogu, o bu ishi phe be du ukporo unu unwoke ugbo ukporo l'iri l'esaa l'unu unwoke iri.

¹⁵Onye etsota iya nu be bu onye-ishi ndu ojogu, bu Jiehohananu. Ndu ojogu, yebedua bu onye-ishi phe be du ukporo unu unwoke ugbo ukporo l'iri l'ise.

¹⁶Onye ophu tsotaru iya nu buru Amazaya nwa Zikiri. Yebedua be wofutaru onwiya k'ejeru Chipfu ozi. Ndu ojogu, o bu onye-ishi phe du ukporo unu unwoke ugbo ukporo l'ise; mbu ndu bukota ndu ike du l'ogu.

¹⁷L'ipfu ke Benjaminu be o bu Eliyada, bu onye ike du l'ogu. Ndu ojogu, yebedua bu onye-ishi phe be du ukporo unu unwoke ugbo ukporo l'ise, bu ndu pagbaa uta; me iphe, eegudeje egbobuta onwonye.

¹⁸Onye etsota iya nu be bu Jiehozabadu. Ndu ojogu, yebedua bu onye-ishi phe be du ukporo unu unwoke ugbo ukporo l'ebo l'unu unwoke iri.

¹⁹Ndu ono bu ndu ejeru eze ozi; a -gufukwa ndu ophu eze doberu le mkpukpu, o kpuru; o shihugbaa ike l'alì Jiuda l'ophu.

2 Iphe, ndu eze meru 18

Mayikaya aphu ophulenyia ehu Éhabu

(1Ndu 22:1-28)

¹Teke ono be Jiehoshafatu nweru iphe, paru eka; bya aburu onye aakwabè ubvù, paru eka. Yee Éhabu gbaa ndzu alugba nwanyi.

²A nochaa apha olemole; o tugbaa kpapfushia Éhabu le mkpukpu Samériya. Éhabu gbushiaru yele ndu yee ya swi ikpoto aturu; me eswi; bya akwata iya g'o je etso mkpukpu Ramotu, du l'alì Giladu ogo.

³Éhabu, bu eze ndu Ízurelu bya asu Jiehoshafatu, bu eze ndu Jiuda: “? Ii-tsoru mu je ogo le mkpukpu Ramotu, du l'alì Giladu too?” Jiehoshafatu su iya: “Mu le ngu tukoru buru nanu. Ndibe mu me ndibe nkengu buru nanu. Anyi le ngu a-tugbabe lwua ogo ono.”

⁴Jiehoshafatu su iya: “Vuadaru uzo maru iphe, Chipfu e-pfu.”

⁵Tobudu iya bu; eze ndu Ízurelu bya achikobe ndu mpfuchiru, du unu nemadzu bya ajia phe su: “? Bu g'anyi je etsoo ndu mkpukpu Ramotu, du l'alì Giladu ogo; too g'anyi te ejeshi?” Ephe su iya: “Jeshia; le Chileke be e-woru-a mkpukpu ono ye gube eze l'eka.”

⁶Jiehoshafatu su: “? To duedu onye mpfuchiru ke Chipfu, no l'eka-a g'anyi kpata iya ishi?”

⁷Eze ndu Ízurelu su Jiehoshafatu: “O nwefukwaru onye lanu, anyi e-shi l'eka iya kpata Chipfu ishi obu. Ole o du mu ashi; noo kele o toko pfuswe opfu oma l'ehu mu;

gbahaepho ejo iya. Onye obu bu Mayikaya nwa Imula.” Jiehoshafatu su: “Eze; te epfubaekwa egube ono.”

⁸Tobudu iya bu; eze ndu Izurelu bya ekua onye-ozu iya lanu su iya: “Tugbua je ekua Mayikaya nwa Imula g’o bya ntanta-a.”

⁹No iya; eze ndu Izurelu yee Jiehoshafatu, bu eze ndu Jiuda yegbaa uwe eze phe; sugachaaru l’aba-eze phe l’eka eechije bali, no l’onu-abata mkpukpu Sameriya; ndu mpfuchiru ono g’ephe ha nodu phe l’iphu epfugbaa iphe, ephe epfu.

¹⁰Zedekaya, bu nwa Kenana bya egude iphe-igwe meshia upyi; bya asuje: “Chipfu suru-a: ‘Oo upyi-a be ii-du ndu Aramu jasuteke ephe a-lakota l’iyi.’”

¹¹Ndu mpfuchiru ono g’ephe ha nodu epfukota iphe lanu; asuje: “Jeshia ugu le mkpukpu Ramotu, du l’ali Giladu; je alwu-kpee; kele Chipfu be e-woru-a mkpukpu ono ye gube eze l’eka.”

¹²Tobudu iya bu; onye-ozu ono, jeru eku Mayikaya ono bya asu iya: “Lenu; ndu mpfuchiru ophuu be tukokwaru wua onu nanu; toko epfu le k’oma a-duru eze. G’opfu unu l’ephe bukwaru nanu; g’i pfua opfu, du ree.”

¹³Mayikaya su: “Eshinu Chipfu no ndzu g’o no iya-a be buepho iphe, Chileke mu pfuru be mu e-pfu.”

¹⁴Mayikaya bya ejerwua ibe eze; eze su iya: “Mayikaya; ? bu g’anyi je ugu le mkpukpu Ramotu, du l’ali Giladu; too ge mu kposhia ya?” Mayikaya su: “Ngwa jenu je alwu-kpee; ee-woru phe-a ye ngu l’eka.”

¹⁵Eze bya asu iya: “? Bu ugbo ole be mu a-rwo ngu g’i gude epa Chipfu ribuaru mu angu l’o to dudu iphe ozo, ii-pfuru mu; gbahaepho okpobe-opfu?”

¹⁶Oo ya bu; Mayikaya su: “Mu humaru ge ndu Izurelu l’opu gbakashihuru nanu nanu aghaphe l’oma ubvu g’aturu, enwedu onye-nche. Chipfu su: ‘Ndu-a be te nwedu nnaji; g’onyenonu lashia ibe iya l’ehu-guu.’”

¹⁷Eze ndu Izurelu su Jiehoshafatu: “? Mu ta asuduru ngu l’o to byadu epfu iphe, du ree l’ishi mu; gbahaepho ejo iya?”

¹⁸Mayikaya nodu epfu iphe, oopfu su: “Ngwa; ngabe nchi numa iphe, Chipfu epfu: Mu humaru Chipfu g’o no l’aba-eze iya; ndu ojozi-imigwe pfu-pee ya mgburugburu; pfuru iya l’uzo ekutara; me l’uzo ekicha.

¹⁹Chipfu su phe: “? Bu onye e-je epfubuta Ehabu, bu eze ndu Izurelu g’o jeshia ugu le mkpukpu Ramotu, du l’ali Giladu; k’opu oo-je anwuhu l’eka ono?” “Onye lanu -futa l’o su l’oo g’ee-me iya baa; onye ozo -bya l’o su l’oo g’ee-me iya bu ophuu.

²⁰E mecha; ojozi lanu futa bya apfuru l’iphu Chipfu su l’oo yebedua e-pfubuta iya. “Chipfu su iya: ‘? Denu g’ii-shi pfubuta iya obu?’

²¹“O su le ya e-je je aburu nwamaa ntuphu-ire nodu l’onu ndu mpfuchiru Ehabu. “Chipfu su iya: ‘Je; l’ii-pfubuta iya-a; je emee ya nno.’

²²“Oo ya bu g’i maru le Chipfu yewaru nwamaa ntuphu-ire; o je anodukota ndu mpfuchiru ngu-a l’onu; teme Chipfu pfuwa l’ejo-iphe a-dapfuta ngu.”

²³Tobudu iya bu; Zedekaya nwa Kenana je erepyaa Mayikaya aka l’upfuru nchi su: “? Denu ge Unme Chipfu shi lufu mu l’ehu; bya epfuru yeru ngu?”

²⁴Mayikaya su: “Mboku, ii-maru bu mboku ono, ii-je edomia onwongu l’ime ime mkpuru ono.”

²⁵Eze ndu Izurelu bya asu: “Unu kputa Mayikaya kpu-pfu Amonu, bu ochi-oha mkpukpu; waa Jiowashi, bu nwa eze.

²⁶Unu asu phe l’eze suru-a: ‘Unu tu-chia onye-a l’oka-mkporo; teje iya nri atee; waa mini jeye mu ejee lwa l’ehu-guu.’ “

²⁷Mayikaya su: “I -lwawaa l’ehu-guu; li maru lo to budu Chipfu be gbe mu l’onu pfua opfu.” O bya asu ndu no l’eka ono g’ephe tube nv o l’opfu iya ono.

Ehabu ala l’ogu

(1Ndu 22:29-35)

²⁸Tobudu iya bu; eze ndu Izurelu waa Jiehoshafatu, bu eze ndu Jiuda chita ndu ojogu phe tugbua jeshia mkpukpu Ramotu ono, du l’ali Giladu.

²⁹Eze ndu Izurelu bya asu Jiehoshafatu: “Mu e-me onwomu g’a ta maru onye mu bu; bahu l’ogu ono. Gubedua eyee akpawuru-uwe ngu.” Eze ndu Izurelu bya emee onwiya g’a ta maru iya; ephe bahu l’ogu ono.

³⁰Eze ndu Aramu be pfuhawaru ndu-ishi ugbo-inya iya su phe: “Unu ta etsokwa onye upfu m’o bu onye nta-a ogu. Onye unu a-nodu achi oso kpoloko bu eze ndu Izurelu.”

³¹Ndu-ishi ugbo-inya ono humaepho Jiehoshafatu; ephe su: “Oo eze ndu Izurelu be o bu!” Oo ya bu; ephe gharu iya iphu; meahaa g’ephe tsoo ya ogu. Jiehoshafatu chishia mkpu; Chipfu gbaaru iya mkpu; mee ephe haa ya.

³²Ndu-ishi ugbo-inya ono bya amaru lo to budu eze ndu Izurelu; ephe dakobe haa ya achichi.

³³O nweru onye ophu agbaepho apfu iya l’eka o humaru; o woru iya gbaa eze ndu Izurelu l’ehu le mgbaka aka ngwogu, o kwaru onwiya dzepfuru edzefuru. Eze rasharu onye angaru iya ugbo-inya su: “Kpolaa azu; pafu mu l’ogu-a; kele e mekaakwaru mu iphe okpobe emeka.”

³⁴Ogu ono kpohu oku le mboku ono; e keyyabe eze ekeyyabe l’ugbo-inya ono; ephe le ndu Aramu nodu alwu ogu ono jasu l’uzenyashi. Enyanwu ribajeepho; o nwuhu.

2 Iphe, ndu eze meru 19

Mba, onye mpfuchiru Chileke baru Jiehoshafatu

¹Tobudu iya bu; Jiehoshafatu, bu eze ndu Jiuda bya alwa ibe iya le Jierusalemu l’ehu-guu.

²Jiehu, bụ nwa Hanani; mbụ onye aphiye ophulenyanya lufu g'o je agba iya ndzuta. O su eze, bụ Jiehoshafatu: “? O gbaru ke g'i yetaru onye ejo-iphe eka? ? O gbaru g'i yee ndu kporu Chipfu ashị obu? Eshi ophu i meru nno; be oke ehu-eghu Chipfu dapfutaakwaru ngu.

³Ole g'o dūhabe be iphe, du ree haru du ngu l'ehu; kele i wofukotaru itso Ashera, dukota l'alī-a; teme i woru obu ngu dobe l'achọ Chipfu.”

Iphe, Jiehoshafatu meziru emezi

⁴Jiehoshafatu be bu le Jierusalemu. O shi l'eka ono jepfu ndu Izurelu; mbụ ndu shi le mkpukpu Biye-Sheba bua jeye l'ubvu ubvu ali Ifuremu; je emee ephe buru ke Chipfu, bu Chileke ke nna phe ozo.

⁵O woru ndu ogbo-ikpe dobekota le mkpukpu, e gude igbulọ kpu-pheta mgburugburu, no l'alī Jiuda; dobegbaa phe le mkpukpu le mkpukpu.

⁶O su ndu ogbo-ikpe ono: “Unu nwubekwa enya l'iphe, unu eme; noo kele o to bukwa nemadzu be unu ekperu ikpe; onye unu ekperu iya bukwa Chipfu, bu onye ono, anoduje swiru unu l'ikpe, unu ekpe ono.

⁷Nta-a bukwa g'unu tsua Chipfu ebvu; unu akwabẹ enya l'iphe, unu eme; kele Chipfu, bu Chileke anyi be eka iya ta adukwa l'ikpe, apfuduru-oto; ophu o ledu nemadzu enya l'iphu; teme ophu o ridu uphalazu.”

⁸Le Jierusalemu be Jiehoshafatu hakwarupho dobe ndu Līvayi; me ndu-uke Chileke; me ndu-ishi l'enya-unuphu l'enya-unuphu g'ephe kpeje ikpe ke Chipfu; waa g'ephe doshije opfu. O buru le Jierusalemu be ephe bu.

⁹O pfiaru phe su: “Wakwa g'umere unu a-duje baa: Unu tsua Chipfu ebvu; pfushia ike l'iphe, unu pfuru; gude obu unu l'ophu mee iphe, unu eme.

¹⁰Iphe, bu opfu, unwunna unu phe shi le mkpukpu, ephe bu wotaru unu g'unu doo; mbụ opfu l'e gburu ochi; ozoo opfu, laru le k'ekemu; ozoo k'omelali; unu loje phe eka le nchi k'ophu ephe tee metadu iphe, ikpe a-nma phe l'iphu Chipfu. Odumeka be oke ehu-eghu Chipfu a-dapfutakwa unu l'unwunna unu ono. Noo g'unu e-me iya bu ono; g'ikpe ta nma unu.

¹¹“Oo Amaraya, bu onye-ishi ndu-uke Chileke be a-buru onye-ishi unu l'iphe, eeme ala le ke Chipfu. Zebadaya nwa Ishimelu, bu ochi-oha ipfu Jiuda be a-buru onye-ishi l'iphe, eeme ala le k'eze. Ndu Līvayi be a-buru ndu-ishi unu. G'obu shihukwa unu ike l'iphemiphe, unu eme. Ge Chipfu swikwaru ndu eme iphe, pfuru oto.”

2 Iphe, ndu eze meru 20

Jiehoshafatu alwu-kpee ndu Mowabu; waa ndu Amonu

¹E mechaa; ndu Mowabu; me ndu Amonu; me ndu ophu haru buru ndu Meyuni byatashia g'ephe tsoo Jiehoshafatu ogu.

- ²O nweru ndu haru bya epfuaru Jiehoshafatu su iya: “Ikpoto nemadzu awukwa abyapfuta ngu ogu. Ephe shikwa l'azu eze-enyimu abya; mbu l'ephe shi le Edomu. Ephe noduwaa le Hazazonu-tama, bu iya bu Enu-Gedi.”
- ³Ndzu guhu Jiehoshafatu; o woru onwiya ghaa l'achọ Chipfu. O bya araa ya arara g'a swikota egu l'ali Jiuda l'ophu.
- ⁴Oo ya bu; ndu Jiuda tuko g'ephe ha dzukobe g'ephe choo n-yemeka l'eka Chipfu. Ephe shi le mkpukpu, dukota l'ali Jiuda l'ophu byakota g'ephe choo Chipfu.
- ⁵Tobudu iya bu; Jiehoshafatu bya apfuru l'ataphu edzudzu-oha ndu Jiuda; me ndu Jierusalemu, dzukoberu l'iphu oma-unuphu ophu, du l'eze-ulo Chipfu;
- ⁶bya asu: “Gube Chipfu, bu Chileke ke nna anyi phe; ? to budu ngu bu Chileke l'imigwe? ? Tobudu ngu bu ishi ali-eze, no l'ohamoha to? Ike me okpehu be bu l'eka ngu be o dukota; k'ophu bu l'o to dudu onye suru ngu akpafu l'iphu.
- ⁷Gube Chileke anyi; ? to bunaa gubedua be chifuru ndu shi buru l'ali-a l'ataphu ndibe ngu, bu ndu Izurelu; bya eworu ali obu nu oshilokpa Ebirhamu, bu onya ngu g'o buru nkephe jasu le tuutuutu le mimiimii?
- ⁸Ephe buwa iya ebubu; noduwa iya kparu ngu ulo, bu eka epha ngu a-noduje ere ire; bya epfu su:
- ⁹O -buru l'ejo-iphe be byapfutaru anyi; o betakporu o buru ogu; ozoo l'ii-nu anyi aphu; ozoo ejo iphe-ememe; m'o bu okpa-nri byaru; be anyi a-pfuru l'ulo-a; mbu l'ataphu ngu-a; rarụ kpua ngu l'iphe-ehuka, anyi eje; l'ii-numa olu anyi dzoo anyi; kele i bu ebubu l'ulo-a.
- ¹⁰“Su-a; lewaro unwoke ndu Amonu; me ndu Mowabu; me ndu kubvu ubvu ali Siye; mbu ndu ono, i ti kwedu ge ndu Izurelu zeba l'ali phe le teke ono, ephe shi l'ali Ijiputu futa ono. Ephe kwe gbangoo phe; haa phe emebyishi ono.
- ¹¹Lewaro l'oo iphe, ephe gude apfu anyi ugwo iya bu l'ephe abya anyi achifu l'iphe, anyi nwe enwenwe; mbu l'ali-a, i nuru anyi g'o buru okiphe anyi-a.
- ¹²Oowaa Chileke anyi; ? tii gwadu phe ochi? Noo kele anyi te nwedu ike, anyi gude ejepfu ikpoto ndu-a, eze gidigidi abyapfuta anyi-a ogu. Anyi ta amakwa iphe, anyi eme; ole oo ngu be anyi chiru enya dziee.”
- ¹³Ndu Jiuda l'ophu tuko pfuru l'ataphu Chipfu; yele ndu ophu hagbaa nwanshi; me unyomu phe; me unwegirima phe.
- ¹⁴No iya; Unme Chipfu bya Jiahaziyele l'ehu l'echilabo edzudzu-oha ono. Jiahaziyele be bu nwa Zekaraya; Zekaraya buru nwa Benaya; Benaya buru nwa Jieyele; Jieyele buru nwa Matanaya. Jiahaziyele ono be bu onye Livi; buru oshilokpa Asafu.
- ¹⁵O su: “Unu ngabe nchi; unube ndu Jiuda g'unu ha; me ndu bu le Jierusalemu; me eze, bu Jiehoshafatu. Wakwa iphe, Chipfu epfu baa: ‘Unu ta atsukwa ebvu; ophu ike avukwa unu opfu l'unu humaru ikpoto ndu-a; kele ogu ono ta abudu unu a-lwu iya; oo Chileke be a-lwu iya nu.

16Unu gbalihu echele jepfu phe ọgu. Epehe e-shi ọzo, nọ l'ibiya k'úbvú Zizu abya; ẹka unu a-huma phe bu l'ishishi nsuda, nọ l'ataphu echiegu Jieruwelu.

17Mkpa g'unu lwua ọgu alwulwu ta adudu. Unu dozichaa onwunu; pfulu nwadoo; huma adzota, Chipfu a-dzota unube ndu Jiuda; me ndu Jierusalemu.' Unu ta atsushi ebvu; ophu ehu arwushihukwa unu. O -be echele; unu jepfu phe; Chipfu e-swiru unu eswiru."

18Tobudu iya bu; Jiehoshafatu phozeta iphu l'ali. Ndu Jiuda l'ophu; me ndu bu le Jierusalemu tukọ g'ephe ha dakota kpurumu l'ataphu Chipfu; baahaaru iya eja.

19Ndu Lívayi, bu ndu ophu shi l'eri Kohatu; me ndu ophu shi l'eri Kora wulihu wata arashi ọrà ike gude aja Chipfu, bu Chileke ke Izurelu ajaja.

20O be l'onmewa utsu; epehe gbalihu jeshia l'echiegu mkpukpu Tekowa. Epehe jenya Jiehoshafatu pfulu apfulu su: "Unu numa iphe, mu epfu; unube ndu Jiuda; me ndu bu le Jierusalemu! Unu kweta ke Chipfu, bu Chileke unu; k'ophu unu a-nguru anguru. Unu ekweta iphe, ndu mpfuchiru iya epfu; k'ophu iphe a-nodu ejehuru unu."

21Jiehoshafatu jechaa l'ndzù; bya atua eka le ndu a-guru Chipfu ebvu; mbu ndu a-nodu aja iya ajaja; yee uwe, du nsọ vutaru ndu ojogu ono ọzo; asuje: "Unu kele Chipfu ekele; kele n-yemobu iya anoje jasọ l'ojejoje."

22Epehe wataepho agu ebvu gude aja Chipfu ajaja; Chipfu woru ndu ojogu dobe g'ephe kpuru ekpuru wata etso ndu Amonu ono ọgu; me ndu Mowabu; me ndu ubvu ubvu ali Siye, bu iya bu ndu ono, byapfutaru ndu Jiuda ọgu ono. Ndu Jiuda lwu-kpee phe l'ogu ono.

23Ndu Amonu; me ndu Mowabu zelihi wuppyabe ndu k'ubvu ubvu ali Siye; mebyishikota phe; epehe buru mkpurupyata. Epehe gbushigheepho ndu k'ubvu ubvu ali Siye ono; epehe gbushiaha onwophe.

24Ndu Jiuda bya erwua l'eka aagbeje lee enya l'echiegu; epehe bya ele enya l'uzo eka ikpoto ndu ono kuru. Iphe, epehe humaru buru odzu, dabyigbaaru l'ali; mbu ophu o to dudu onye ophu nahuru nu.

25Oo ya bu; Jiehoshafatu ye le ndu nkiya wuru jeshia egwe ivu ndu ono; je asu-vu ikpoto iphe-edobe; me ivu, bu aguta aguta; me ekwa; me iphe, vugbaa oke aswa; mbu iphe, habe shii k'ophu epehe ata dudu ike egwetagbudu iya. Iphe okwata ono be ha shii; k'ophu epehe gweru iya ujiku eto.

26O be le mboku ophu kwe iya eno; epehe dzukota le nsuda Beraka; nodu l'eka ono jaa Chipfu ajaja. Oo ya meru g'o gude epehe kuahaa eka ono nsuda Beraka byasu ntanu.

27Tobudu iya bu; ndu Jiuda l'ophu; me ndu Jierusalemu tukọ lwatashia Jierusalemu. O buru Jiehoshafatu bu onye-ishi phe. Epehe gude ehu-utso awu alwa; kele Chipfu be mewaru g'ephe turu okoo kpua ndu ohogu phe.

28Epehe wubata le Jierusalemu; akpo une; me ogumogu; bya egbu opu gude abahu l'ulo Chipfu.

²⁹No iya; iphe, bu ndu eze ndu ali ozo l'ophu numaepho le Chipfu tsoru ndu ohogu ndu Izurelu ogo; ephe tsuahaa ya ebvu.

³⁰Oo ya bu; ali-eze Jiehoshafatu dakota jii; kele Chileke iya be meru g'o tuta unme ibekeboebo.

Mkpochi-ishi abu eze Jiehoshafatu

(1Ndu 22:41-50)

³¹O buru iya bu le Jiehoshafatu aburu eze ndu Jiuda. Iphe, o noru bu ukporo apha l'apha iri l'ise teke o wataru aburu eze. O noo l'aba-eze ono ukporo apha l'apha ise le Jierusalemu. Epha ne iya bu Azuba nwada Shilihi.

³²Jiehoshafatu tsoru uzo, nna iya, bu Asa tsoru. O to dudu ophu o haru me nanu. O meru iphe, pfuru oto l'enya Chipfu.

³³Ole o to lwuduru eka aagwaje iphe; teme ophu ndu Jiuda te edobeduru obu phe l'eka Chileke ke nna phe no.

³⁴Iphe ozo, Jiehoshafatu megbaberu; e -shi l'ishi jeye l'eka o bvuru be e dekotaru l'ekwo, e deru iphe, meru nu teke Jiehu nwa Hanani no ndzu; mbu ophu e deru l'ekwo ndu eze ndu Izurelu.

³⁵E mechaa; Jiehoshafatu, bu eze ndu Jiuda; yele Ehazaya, bu eze ndu Izurelu je atugba buru nanu; mbu onye ono, meru ejo-iphe ono.

³⁶Yele iya be tugbaru pyishia ugbo-mini, ee-gude agbaru iya ngho. O buru le mkpukpu Eziyonu-Geba be ephe no pyishia ugbo-mini ono.

³⁷Tobudu iya bu; Eliyeza, bu nwa Dodavahu ke mkpukpu Maresha bya epfuru maberu Jiehoshafatu su: "Eshi ophu gu le Ehazaya tugbaberu be Chipfu a-tuko iphe, i mekotaru mebyishikota." Ugbo ono kpukota; ophu ephe egudeedu iya agba ngho.

2 Iphe, ndu eze meru 21

Teke Jioramu bu eze ndu Jiuda

(2Ndu 8:16-24)

¹Noo ya; Jiehoshafatu bya anwuhu lapfushia nna iya phe. E lia ya l'eka e liru nna iya phe le mkpukpu Devidi. Jioramu, bu nwa iya nwoke buru eze nochia enya iya.

²Jioramu be nweru unwune nwoke, bukwapho unwu Jiehoshafatu. Epha unwune iya ono bu: Azariya; me Jiehiyelu; me Zekaraya; me Azariya; me Mayikelu; me Shefataya. G'ephe ha bukota unwu Jiehoshafatu, bu eze ndu Jiuda.

³Nna phe be nuru phe igwerigwe mkpola-ochaa; me mkpola-ododo; me ivu, vugba oke aswa; bya anukota phe mkpukpu, a kpugbaaru o shihu ike l'ali Jiuda. O woru ali-eze nu Jioramu; kele oo ya bu okpara iya.

⁴Jioramu byaepho bya aburu eze; nodu l'aba-eze nna iya ono; mbu kpoo g'abara; o tuko unwunna iya gbushikota; hakwarupho ndu-ishi ndu Izurelu gbushia.

- ⁵Jióramu nòwaru ùkporo apha l'apha iri l'èbo teke ọ wataru aburu eze. Iphe, ọ nòru l'aba-eze buru apha esato le Jierúsalem.
- ⁶O tsoo eka ndu eze ndu Ízurelu; mee ge ndibe Éhabu meru; kele ọ luru nwada Éhabu. O meru ejo-iphe l'anya Chipfu.
- ⁷Ole Chipfu be gude k'ogbandzu, yee Dévidi gbaru haa onu-ulo Dévidi ono; ophu o to mebyishiduru iya; kele o kwehawaru Dévidi ukwe l'unwu iya; me awa iya ta abyadu alufubaa l'aba-eze ono jeaduru aduru.
- ⁸O buru teke Jióramu bu eze be ndu Edomu kwefuru ndu Jiuda ike; bya echia onye ibe phe eze; woru iya dobe l'aba-eze phe.
- ⁹Oo ya bu; Jióramu chita ndu-ishi ndu ojogu iya; me ugbo-inya iya l'ophu gbapfushia phe. Ndu Edomu bya ekepee yee ndu-ishi ugbo-inya iya ono mgburugburu. O be l'enyashi; ọ gbeshi bapfu ndu Edomu ono ogu.
- ¹⁰O buru ge ndu Edomu ekwefuru ndu Jiuda ike bu ono byasu ntanu. O bukwarupho teke ono be ndu Libuna kwefuru ike nkephe; kele Jióramu gwoberu Chipfu, bu Chileke ke nna iya phe.
- ¹¹Nokwapho ge Jiehoramu megbaaru eka aagwaje iphe l'ubvu ubvu ali Jiuda. O mee ge ndu bu le Jierúsalem du gheleghelehele; teme o duswee ndu Jiuda uzo.
- ¹²Tobudu iya bu; ekwo-ozu, shi l'eka Elayijia, bu onye mpfuchiru Chileke bya erwua Jióramu eka. Ekwo-ozu ono epfu su: “Waa iphe, Chipfu, bu Chileke ke nna ngu Dévidi pfuru baa: Eshi ophu i ti tsoduru uzo ophu nna ngu, bu Jiehosafatu tsoru; ophu i ti tsoduru ke Asa, bu eze ndu Jiuda;
- ¹³ọ bu-chiaru eka ndu eze ndu Ízurelu be i tsoru; bya emee ge ndu Jiuda; me ndu bu le Jierúsalem du gheleghelehele; egube ono, ndibe Éhabu meru ono; teme i gbushikwaapho unwunna ngu, bu ndibe nna ngu phe; mbu ndu ono, ka ngu mma ono;
- ¹⁴bukwa g'i huma ahuma le Chipfu e-gude ejo iphe-ememe daa ndibe unu eka; me unwegirima unu; me unyomu unu; me eku unu l'ophu.
- ¹⁵Gubedua l'onwongu bu epho-ekoko a-byapfuta ngu; mbu ejo ehu, eme l'epho. Ehu ono e-me ngu; epho achaa ngu nkiriri. Akurepho ngu achabushihu ada ppopoo mboku-mboku.”

Anwuhu Jióramu

- ¹⁶No iya; Chipfu bya akpalia ndu Filisitayinu; me ndu Arabu, bu iya bu ndu ono, bukube ndu Kushi; Jióramu du phe ashị.
- ¹⁷Ephe bya ogu l'ali Jiuda; zebata l'ali ono; vutakota iphemiphe, epe humaru l'ulo eze; kpukoo unwu iya unwoke; me unyomu iya; k'ophu bu l'o to dudu nwa iya nwoke, a haru iya; gbahaa Éhazaya, bu onye ophu kachakpo aburu nwata l'unwu iya nwoke.
- ¹⁸Iphemiphe ono nwuchaepho; Chipfu bya aloru iphe-ememe, bu alagala tu Jióramu l'akuru-epho.

¹⁹A nonyaa; g'apha labo bvuru; iphe-ememe ono mee ya; epho chaa ya nkiriri. O taa kpookpookpo nwuhu. Ophu ndibe phe ta akpobeduru iya oku gude kwabe iya ubvu; egube ono, a kpoberu nna iya phe.

²⁰Jiaramu nowaru ukporo apha l'apha iri l'ebo teke o wataru aburu eze. Iphe, o noru l'aba-eze buru apha esato le Jierusalemu. O nwuhu; ophu o dudu onye yoru oshi iya. E lia ya le mkpukpu Dévidi; ole e te liduru iya l'ilu ndu eze.

2 Iphe, ndu eze meru 22

Teke Éhazaya bu eze ndu Jiuda

(2Ndu 8:25-29; 9:21-28)

¹Tobudu iya bu; ndu bu le Jierusalemu mee Éhazaya, bu nwa nwoke Jiaramu onye ophu kachaa aburu nwata g'o buru eze nochia enya nna iya; kele ndu o-lwua-olaa; yele ndu Arabu swi wubata l'odu-ogu ono be tukoru ndu ophu bu ogerenya gbushikota. Oo ya bu; Éhazaya nwa Jiaramu bya aburu eze ndu Jiuda.

²Éhazaya be nowaru ukporo apha ebo l'apha labo teke o wataru aburu eze. Iphe, o noru l'aba-eze bu apha lanu le Jierusalemu. Epha ne iya bu Atalaya, bu nwanwa Omuri.

³O tsokwarupho eka ndibe Éhabu; kele ne iya be kpo-ziru iya uzo g'o mee ejo-iphe.

⁴O mee ejo-iphe l'enya Chipfu; egube ono, ndibe Éhabu meru ono; kele nna iya nwuhuchaaru; epe kpo-ziaharu iya uzo; shi nno loru iya ye l'eka ola-l'iswi.

⁵O tsoru uzo, epe kpo-ziru iya; je etsoru Jiaramu nwa Éhabu, bu eze ndu Izurelu; epe jepfu Hazelu, bu eze ndu Aramu ugu le mkpukpu Ramotu, du l'ali Giladu. Ndu Aramu ono meka Jiaramu iphe.

⁶Oo ya bu; o lashia mkpukpu Jiezerelu g'o je anodu nyaa onya eka ono, ndu Aramu mekaru iya iphe le mkpukpu Ramotu teke ono, o tsoru Hazelu, bu eze ndu Aramu ugu ono. No iya; Éhazaya nwa Jiaramu, bu eze ndu Jiuda jeshia aji Jiaramu nwa Éhabu le mkpukpu Jiezerelu le k'iphe-ehuka ono, e mekaru iya ono.

Jiehu Egbu Éhazaya

⁷Éhazaya tugbua jeshia ibe Jiaramu; je alaa l'iswi. O buru Chileke be o shi l'eka. Kele Éhazaya byaru erwua eka ono; yele Jiehoramu je adatso Jiehu nwa Nimushi ugu; mbu onye ono, Chipfu turu eka g'o gbushigbua ndibe Éhabu ono.

⁸No iya; o buru ge Jiehu agwa ndibe Éhabu ochi; be o humaru ndu-ishi ndu Jiuda; me unwu unwune Éhazaya, bu ndu ejeru Éhazaya ozi; o tuko phe gbushikota.

⁹O wata achokashi Éhazaya; e je egude iya l'eka o domiru onwiya le Sameriya; kpuru iya kpu-pfu Jiehu; e woru iya gbua. Epe lia ya elili; kele epe suru l'o bu nwa Jiehoshafatu, bu onye ono, gude obu iya l'ophu choo Chipfu ono. Oo ya bu; ophu o to nweedu onye ozo, shi l'ibe Éhazaya, bu onye a-du ike buru ishi l'ali-eze ono.

Atalaya yele Jiowashi

(2Ndu 11:1-3)

¹⁰Tobudu iya bu; Atalaya, bu ne Éhazaya hūmaepho lẹ nwa iya nwūhuwaru; ọ gbeshi je atuko ndibe ndu eze, shi l'onu-ulo Jiuda g'ephe ha saa osampfu.

¹¹Ole Jiehosheba, bu nwada eze, bu Jiehoramu be dutaru Jiowashi, bu nwa Éhazaya dufu l'echilabo unwu eze ono, eeme g'e gbushia ono. O duta Jiowashi yele onye ehe iya nu je edomia le mkpuru-azee. Noo ge Jiehosheba, bu nwada eze, bu Jiehoramu; bya aburu nyee Jiehojada, bu onye uke Chileke shiru wohaa Jiowashi ge Atalaya ta ahuma iya bu ono; k'ophu bu l'o to gbuduru iya; kele Jiehosheba be bu nwune Éhazaya ke nwanyi.

¹²E domiru Jiowashi; yele phe nodu l'ulo Chileke apha ishii ge Atalaya bu eze l'ali ono.

2 Iphe, ndu eze meru 23

E kwefuru Atalaya ike

(2Ndu 11:4-16)

¹O be l'apha k'esaa; Jiehojada bya akata obu. Yele ndu-ishi, bugbaa ishi ukporo ndu ojogu ise ise woru ndzu gbaa; me Azariya nwa Jierohamu; me Ishimelu nwa Jiehojananu; me Azariya nwa Obedu; me Maseya nwa Adaya; me Elishafatu nwa Zikiri.

²Ephe tuko ali Jiuda jegbabekota; je ekuko ndu Liviayi, bu le mkpukpu, dukota l'ali Jiuda l'ophu; kua ndu-ishi l'enya-unuphu l'enya-unuphu ndu Izurelu. Ephe dzukota le Jierusalemu.

³Eze waa edzudzu-oha ono l'ophu nodu l'ulo Chileke gbaa ndzu. Jiehojada bya asu phe: “Unu lekwa nwa eze! Oo ya a-buru eze; egube ono, Chipfu pfuru iya l'ehu unwu Dévidi ono.

⁴Waa iphe, unu e-me baa: Unube ndu-uke Chileke; me ndu Liviayi ono, bu ndu anoduje le nche l'eswe-atuta-unme; unu kee onwunu uzi eto. G'uzi lanu je anodu chee onu-abata nche;

⁵uzi lanu eje anodu eche ibe eze; uzi lanu ophuu eche Onu-abata Okpa-ulo. Ndu ophuu l'ophu be a-nodugbaa l'oma-unuphu eze-ulo Chipfu.

⁶G'o to dukwa onye e-je abahu l'ulo Chipfu; gbahaepho ndu-uke Chileke; me ndu Liviayi, bu ndu eje ozi. Oo phe bu ndu a-bahuje iya; noo kele ephe du nsọ. Obenu le ndu ophuu be a-kwabeje enya l'iphe, Chipfu suru g'a kwabe enya.

⁷Ndu Liviayi a-no-pee eze ono mgburugburu. Onyenonu a-pakotaru ngwogu iya l'eka. Iphe, bukpo onye bahuru l'ulo ono; unu gbua onye obu. Ekameka, eze ejekpo unu swiru iya eswiru.”

⁸Ndu Liviayi ono; me ndu Jiuda l'ophu mee ge Jiehojada, bu onye uke Chileke pfuru phe ono. Onyenonu chita ndu nkiya; mbu ndu anoduje le nche l'eswe-atuta-unme; me ndu ophuu afuta le nche l'eswe-atuta-unme ono; kele Jiehojada, bu onye uke Chileke ta adudu ogbo ophu o hawaru g'ephe lashia.

⁹Jiehoyada, bu onye uke Chileke ono bya achita arwa; me iphe, eegudeje egbobuta onwonye ophu ha shii me ke nshii ono, shi buru ke Dévidi; mbu ono, e doberu l'eze-ulo Chileke ono; woru keshiaru ndu-ishi bugbaa ishi ndu ojogu ukporo ise ise ono.

¹⁰O woru ndu Jiuda l'ophu kpo giriri; ephe pagbaaru ngwogu phe l'ehu l'ehu; pfuru gbaphee eze mgburugburu le mgboru oru-ngweja Chipfu; waa eze-ulo ono gedegede; shita l'uzo ekutara jeye l'uzo ekicha.

¹¹Ephe bya edufuta nwatibe eze ono, bu Jiowashi; bya eworu okpu-eze kpube iya; su l'oo ya bu eze; bya eworu ekwo, e deru ekemu Chileke dee ya l'eka. Jiehoyada yele unwu iya wua ya manu l'ishi; tua uzu; su: "Nodukwa ndu ogologo; gube eze!"

¹²Atalaya numaepho wowoowoo, ndu Jiuda atu l'eka ephe agba oso; bya aja eze ajaja; o tugbua jepfushia phe l'eze-ulo Chipfu.

¹³O bya eje elee enya; bya ahuma eze go pfuru le mgboru itso l'onu-abata eze ulo ono; bya ahumakwapho ndu-ishi ndu ojogu; me ndu egbu opu g'ephe pfu-kubegbaaru iya; teme ndu ali ono l'ophu nodu etegbaa eswa; egbu opu; ndu ebvu chiru ngwa-ebvu phe azu ebvu ajaja. Atalaya gbete teke ono gbajashia uwe iya chishia mkpu su: "Ejo-iphe anwua-o! Ejo-iphe anwua-o!"

¹⁴Tobudu iya bu; Jiehoyada, bu onye uke Chileke bya edufuta ndu-ishi ndu ojogu ukporo ise ise ono; bya asu phe: "Unu kpufuta nwanji ono l'echilabo ndu nche ono. Unu te egbukwa iya l'ulo Chipfu. Iphe, bu onye ephe l'iya swi; unu gude ogu-echi gbua ya."

¹⁵Oo ya bu; ephe gude iya; kpuru iya jerwuepho Onu-abata Inya, no l'ibe eze; ephe woru iya gbua l'eka ono.

Jiehoyada edozi ali Jiuda

(2Ndu 11:17-20)

¹⁶No iya; Jiehoyada yele ndu Jiuda l'ophu waa eze l'onwiya; bya agbaa ndu. Ogbandzu obu bu l'ephe a-buru ndu ke Chipfu.

¹⁷Ndu Jiuda l'ophu jeshia l'eze-ulo Balu je enwutsushia ya. Ephe toko iphe, bu oru-ngweja Balu; me nteke tsukposhichaa ke yogiri yogiri. Ephe gbua Matanu, bu onye uke Balu l'iphu oru-ngweja Balu.

¹⁸Oo ya bu; Jiehoyada bya eye ndu nche; ephe cheahaa ulo Chipfu nche. Ephe nodu l'eka ndu-uke Chileke, bu oshilokpa Liviayi; me l'eka ndu Liviayi ono, Dévidi yeru ozi ulo Chipfu l'eka bya edobe g'ephe gweje ngweja-akpo-oku nu Chipfu; egube ono, e deru iya l'ekwo-ekemu Mosisu. Ehu nodu atso phe utso; ephe nodu agu ebvu eme iya, egube ono, Dévidi turu iya l'ekemu doberu phe ono.

¹⁹O woru ndu nche ono yekota l'onu-abata eze-ulo Chipfu; k'ophu bu lo to dudu onye aaso nso, a-bahu iya nu.

²⁰O chita ndu-ishi ndu ojogu ukporo ise ise ono; me ndu oke amadu; me ndu-ishi ndu Jiuda; me ndu ali ono l'ophu; yeru onwiya; ephe dufuta onye eze ono l'eze-ulo Chipfu ono. Ephe shia uzo onu-oguzo imeli duba iya l'ibe eze; bya emee ya; o nodu l'aba-eze.

²¹Noo ya; ɛhu kwatakpoo tsoo ndu ali ono l'ophu okpobe atsotso. Nchi bya adu doo le mkpukpu ono; kele e gbuwaru Atalaya l'ibe eze.

2 Iphe, ndu eze meru 24

Teke Jiwashi bu eze ndu Jiuda

(2Ndu 12:1-16)

¹Jiwashi be nowaru apha esaa teke o wataru aburu eze. Iphe, o noru l'aba-eze le Jierusalemu bu ukporo apha labo. Epha ne iya bu Zibaya. Eka ne iya obu shi bu le mkpukpu Biye-Sheba.

²Jiwashi be mekotaru iphe, pfuru oto l'enya Chipfu jeye ge Jiehoyada, bu onye uke Chileke no-beru.

³Jiehoyada be luru Jiwashi unwanyi labo; o nwushia unwoke; me unwanyi.

⁴A nonyaa; Jiwashi bya achipyaa ya l'obu iya su le ya e-dobe ulo Chipfu l'onodu, gbaru iya nu.

⁵O bya ekukobe ndu-uke Chileke waa ndu Liviayi; su phe: "Unu tuko mkpukpu, dukota l'ali Jiuda jegbabekota; naa ndu Izurelu okpoga, ee-gudeje emekwa ulo Chileke l'aphagapha. Unu mee egwegwa nakoo ya." Oe ndu Liviayi ono te emeduru iya egwegwa.

⁶Oo ya bu; eze kua Jiehoyada, bu onye-ishi ndu-uke Chileke; su iya: "? Buhunu gunu meru g'o gude ophu i suduru ndu Liviayi g'ephe wolata okpoga akiriko ono, shi l'ali Jiuda; me Jierusalemu ono; mbu ono, Mosisu, bu onye-ozu Chipfu tu-buru g'edzudzuoha ndu Izurelu pfuje g'e gude mee k'ulo-ekwa, e doberu ekemu Chipfu ono?"

⁷Unwu Atalaya, bu nwanyi iwashi ono be wubatawaru l'ulo Chipfu; mbu gudechaa iphe, e doberu nsu l'ulo Chipfu ono gwaa Balu.

⁸Oo ya bu; eze bya asu g'e meta okpoko dobe l'azu onu eka eeshije abahu l'ulo Chipfu.

⁹A bya araa ya arara l'ali ndu Jiuda; me le Jierusalemu; g'e wolataru Chipfu okpoga akiriko ono, Mosisu, bu onye-ozu Chileke keru nu ndu Izurelu teke ephe no l'echiegu ono.

¹⁰Ndu-ishi; me ndu Jiuda l'ophu gude ehutuwo wolata okpoga akiriko ono; bya ewojeru iya chie l'ime okpoko ono; jasuru ephe wolatagbua ya; o bu.

¹¹O nodu abujeru; teke ndu Liviayi pataru okpoko ono pajeru ndu-ishi ozi eze; ephe - bya ahuma l'okpoga be ha iya shii; onye edejeru eze ekwo; yele onye-ozu onye-ishi ndu-uke Chileke abya ephoo okpoko ono olu; pata iya je edobenwee l'eka oduje. O buru egube ono be ephe emeje iya mboku-mboku; shi nno nata okpoga ono nata k'etsutsu iya.

¹²Eze yele Jiehoyada woru okpoga ono nu ndu-ozu ono, eeje ozi l'ulo Chipfu ono du l'eka. Ephe gude iya buta ndu edoje eja ulo; me ndu kapyinta g'ephe mezia ulo Chipfu

ono g'ò dú g'o shi dú. Nokwaphò g'èphe gude iya buta ndu gude mkpùrukpu-ìgwè; mè ope eje ozi g'èphe gude iya mekwaa ùlo Chipfu ono.

¹³Ndu eje ozi ono bè nwùberu iya ẹnya. Èphe nòdu emekwa ùlo ono eje l'ìphu l'ìphu. Èphe bya akpùkwa ùlo Chileke ono; ò dú g'o shi dú lẹ mbù; mee ya; o shihu ike.

¹⁴Èphe meghechaèpho ùlo ono; èphe wota okpoga òphu phòduru nù bya anù eze yẹle Jiehoyada. Ò búru iya bè e gude meshia ivu, e doberu l'ùlo Chipfu ono; mbù ivu, e gude eje ozi; mè ivu, e gude eme kẹ ngweja-akpò-òku; mè gbamùgbamu; mè ivu, e meru lẹ mkpòla-ododo; mè kẹ mkpòla-òchaa. Èphe gweahaa ngweja-akpò-òku l'ùlo Chipfu ono tekenteke jeye gẹ Jiehoyada nò-beru.

Anwùhu Jiehoyada

¹⁵Ole Jiehoyada bè kakpòoru nka nòo apha, dú igwerigwe; tẹme ò nwùhu. Ò nòwaru ùkporo apha ishii l'apha iri teke ò nwùhuru.

¹⁶Èphe lia ya l'ẹka e liru ndu eze lẹ mkpùkpu Dévidi; kẹle o meru iphe, dú ree lẹ Ízurelù; meeru iya Chileke; waa eze-ùlo Chileke ono.

Iwashì, Jiowashi weru

¹⁷Gẹ Jiehoyada nwùhuchaaru bè ndu-ishi ndu Jiuda byaru bya ephozeru eze; eze ngàberu phẹ nchì.

¹⁸Èphe parù ùlo Chipfu, bú Chileke kẹ nna phẹ haa; gwaahaa itso Ashera; mè agwa òzo. Chileke tukoshi ndu Jiuda; mè ndu Jierúsalemù ẹhu-eghu iya; kẹle ikpe nmarù phẹ.

¹⁹Chipfu bya ezichaakpò ndu mpfuchiru iya g'èphe duphuta phẹ azù l'ẹka ò nò; ndu mpfuchiru ono pfua nta pfua imo; òphu èphe ta ngaduru nchì.

²⁰Tòbudu iya bú; Unme Chileke bya Zekaraya nwa Jiehoyada, bú onye uke Chileke l'ẹhu. O phèkoru ndu ono sù phẹ: “Waa iphe, Chileke pfuru baa: ? Bù gùnù meru iphe, unu emebyishi ekemu Chileke; g'iphe te ejehuru unu? Eshi òphu unu harù Chipfu bè Chipfu haakwaru unubèdua.”

²¹Oo ya bú; èphe gbaaru iya ẹjo-idzu; eze sù phẹ g'èphe tugbua ya lẹ mkpuma. Èphe woru iya tugbua l'òma-unuphu eze-ùlo Chipfu.

²²Òphu eze, bú Jiowashi anyataduru ẹguru iphe-òma, Jiehoyada, bú nna Zekaraya meru iya; o woru nwa iya nwoke gbua. Zekaraya nwùhuje; ò sù: “Gẹ Chipfu hùmakwa iphe, unu meru-a; gwata unu ùgwo iya!”

Anwùhu Jiowashi

²³Apha gbaerupho; ndu ojògu ndu Arámu bapfu Jiowashi ògu. Èphe zebata l'alì Jiuda; mè lẹ Jierúsalemù bya atùko ndu-ishi ndu Jiuda l'òphu gbushikòta. Èphe vutakòta iphe, èphe kwatarù l'òkwata wolaaru eze phẹ lẹ Damasùkosu.

²⁴Ndu ojògu ndu Arámu ono bè bú-a ndu habe nwahabe bè èphe chì bya ògu ono; obenu lẹ Chipfu bè yeru phẹ igwerigwe ndu ojògu ndu Jiuda l'ẹka; kẹle èphe harù Chipfu, bú Chileke kẹ nna phẹ. Ò búru g'èphe shi bú ono nà Jiowashi aphù.

²⁵Ndu Arámu ono tũgbuchaepfo; kele ephe mekawaru Jiowashi iphe okpobe emeka; ndu-ozì iya chiaru iya ejo-idzu; woru iya gbua l'iphe-azee ya; le k'ishi ochi nwatibe Jiehojada ono, bu onye uke Chileke, o gburu pho. Oo ya bu; Jiowashi nwuhu; ephe lia ya le mkpukpu Dévidi. Ole ephe te eliduru iya l'ilu ndu eze.

²⁶Ndu ono chiru iya ejo-idzu ono bu: Zabadu nwa Shimeyatu, bu nwanyi Amonu nwuru iya; me Jiehozabadu nwa Shimiritu, bu nwanyi Mowabu nwuru iya.

²⁷A bya l'ako ehu unwegirima iya; me igwerigwe ozi, Chipfu zigbaberu l'ishi iya; me g'o gude mezia ulo Chileke g'o du g'o shi du; be e dekotaru l'ekwo, e deshiru iphe, ndu-eze meru. Oo ya bu; Amazaya, bu nwa iya nwoke buru eze nochia enya iya.

2 Iphe, ndu eze meru 25

Teke Amazaya bu eze ndu Jiuda

(2Ndu 14:1-6)

¹Amazaya be nowaru ukporo apha l'apha ise teke o wataru aburu eze. Iphe, o noru l'aba-eze buru ukporo apha l'apha tete le Jierusalemu. Epha ne iya bu Jiehowadanu. Eka ne iya obu shi bu le Jierusalemu.

²Amazaya be meru iphe, pfuru oto l'enya Chipfu. Ole o to gudegbudu obu iya mee ya.

³Aba-eze Amazaya bya anguerupho anguru; o gbushia ndu-ozì iya ono, bu phe gburu nna iya teke o bu eze pho.

⁴Ole o to gbuduru unwegirima ndu ono; kele o tsoru iphe ono, e deru l'ekemu; mbu l'ekwo Mosisu; l'eka ono, Chipfu turu ekemu su: "Ndu nwuru nwa be e tee gbudu l'ugwo iphe, unwu phe metaru; ophu eegbukwapho unwegirima l'ugwo iphe, nna, nwuru phe nu metaru; onyenonu be aa-laje l'iphe-eji, o metaru."

⁵Amazaya bya ekukobe ndu Jiuda; doo phe l'enya-unuphu l'enya-unuphu ndu bu nna l'ipfu Jiuda me l'ipfu Benjiaminu; g'ephe nodu l'eka ndu-ishi, bu ishi unu ndu ojogu labo l'ukporo iri iri; me l'eka ndu-ishi, bu ishi ndu ojogu ukporo ise ise. Ndu o gutaru be bu ndu nowaru shita l'ukporo apha kwaseru. O bya ahuma l'iphe, ephe du bu ukporo unu ugbo ukporo l'iri l'esaa l'unu iri. Ndu ono bukota ndu a horu ahoho; mbu ndu suwaru eje ugu; buru ndu a-du ike paru arwa; me iphe, eegudeje egbobuta onwonye.

⁶Nokwapho g'o pfuru mkpola-ochaa, erwa iya du ukporo talentu ise gude buta ndu ojogu ndu Izurelu, du ukporo unu unwoke ugbo iri l'ebo l'unu iri, bu ndu ike dukota.

⁷No iya; onye ke Chileke byapfuta iya bya asu iya: "Gube eze; ge gu le ndu ojogu ndu Izurelu ta aswikwaru jee ugu ono; noo kele Chipfu te eswikwaru ndu Izurelu; ophu o to swiduru ndu Ifuremu.

⁸Ole-a; i -jewaa be obetakpoo ike ugu duchakpoo ngu idu-agma; be Chileke e-chitsukwa ngu l'iphu ndu ohogu ngu; noo kele oo Chileke bu onye nweru ike, oo-gudeje yeta eka; bya enweru ike, oo-gude chitsua nemadzu."

⁹Amazaya sụ onye ke Chileke ono: “? Bụ ụnu be anyi e-mekwanu le mkpola-ochaa ono, erwa iya du ukporo talentu ise ono, mu nuru ndu ojogu ndu Izurelu pho?” Onye ke Chileke ono sụ iya: “Chileke be a-dukwa ike nu ngu ophu ka ono shii.”

¹⁰Tobudu iya bu; Amazaya chifuta ndu ojogu ono, shi l'ali Ifuremu byapfuta iya ono; sụ phe g'ephe lashia ibe phe. Iphe ono mee ehu ghushia phe eghu ike. Ephe taru ehu chorocho ro lashia ibe phe.

¹¹Obu bya eshihu Amazaya ike; o duta ndu nkiya; o buru phe eje le nsuda ali Unu; je egbushia ndu Siye; unu unwoke ugbo ukporo l'ise.

¹²Unwoke ndu Jiuda ono kputakwapho unu unwoke ugbo ukporo l'ise le ndzu; chita phe je edobe l'eli eze mkpuma; bya eshi l'eka ono nwuhaa phe; ephe bya adaa; gwee onwophe arakabya.

¹³Ole ndu ojogu ono, Amazaya chiphuru azu g'ephe te etsoshi iya jee ugu ono; wubaru le mkpuku ndu Jiuda; je eshilepho le Sameriya lwa phe nlu lanu jasụ le Betu-Horonu; gbua unu umadzu esaa l'umadzu ukporo iri le ndu Jiuda ono; bya egwee ivu phe shii.

¹⁴Teke ono Amazaya shi l'eka o gbushiru ndu Edomu alwa ono be o chigbaa agwa ndu Siye. O dobe agwa ono; o buru nkiya; bya abaaharu iya aja; akporu iya unwu-isensu oku.

¹⁵Oo ya bu; Chipfu tanwuberu Amazaya ehu-eghu iya; o zia onye mpfuchiru; o jepfu Amazaya je asu iya: “? Bụ ụnu meru g'o gude o buru agwa, ta adudu ike nafuta ndu nkiya l'eka ngu be i choharu?”

¹⁶Onye mpfuchiru ono kpukwaduru-a opfu ono l'onu epfu; eze jipfube iya sụ iya: “? Bụ ngu be anyi taru eka g'i buru onye mgbazi eze? Dobe onu doo! O -dudu be eegbukwa ngu.” Oo ya bu; onye mpfuchiru ono no-kirishia; bya agbe teke ono sụ: “Mu maru le Chileke chipyawaru g'o mee g'i laa l'iyi; kele i meru iphe, du nno; teme ophu i ngabeduru nchi l'idzu, mu chi-koshiru ngu.”

Ogu, daru ndu Jiuda waa ndu Izurelu

(2Ndu 14:8-14)

¹⁷Tobudu iya bu; Amazaya, bu eze ndu Jiuda yele ndu agbazijeru iya idzu bya achia idzu. O zia ozi g'e je zia eze ndu Izurelu, bu Jiowashi nwa Jiehowahazu mbu nwanwa Jiehu sụ iya: “Bya g'anyi le ngu daleedu onwanyi l'ogu.”

¹⁸Jiowashi, bu eze ndu Izurelu bya eziphu Amazaya, bu eze ndu Jiuda ozi azu sụ: “Oshi uke, du l'ubvu ubvu Lebanonu be ziru oshi sida, dukwapho l'ubvu ubvu Lebanonu sụ iya: ‘Kena nwatibe mu ke nwoke nwada ngu g'o luru.’ Tobudu iya bu; anu-egbudu, bu l'ubvu ubvu Lebanonu ono ghatajephoh; o zoo oshi uke ono pyaapya.

¹⁹Iphe, iipfunu bu g'a humanu l'i lwu-kpewaru ndu Edomu. O buru iya meru g'o gude i nodu ekuanaa onwongu. Nodule-a l'ibe ngu. ? Bụ ụnu be iime g'i kpataru onwongu opfu, e-me g'unu le ndu Jiuda daa?”

- ²⁰Obenu lẹ Amazaya ta ngaduru iya nchi; kele ọo Chileke bẹ o shi l'ẹka k'ophu ooworu phe ye ndu ọhogu phe l'ẹka; noo kele ephe choaharu agwa ndu Edomu.
- ²¹Oo ya bu; Jiowashi, bu eze ndu Ízurelu chita ndu ojogu iya jeshia; ephe l'eze ndu Jiuda, bu Amazaya je aghaa ya lẹ mkpukpu Betu-Shemeshi, no l'ali Jiuda.
- ²²Ndu Ízurelu lwu-kpee ndu Jiuda; mee onyenonu gbalaa lashichaa ibe phe.
- ²³Jiowashi, bu eze ndu Ízurelu bya egude Amazaya nwa Jiowashi; mbu nwanwa Éhazaya; mbu eze ndu Jiuda lẹ mkpukpu Betu-Shemeshi. Jiowashi kpuru iya rwua Jierusalemu; bya enwutsushia igbulọ Jierusalemu; a -gbẹ lẹ Onu-abata Ifuremu je rwua lẹ Onu-abata Mgbureku. Eka o nwutsuru bẹ ogologo iya rwuru unu nkwo-eka.
- ²⁴Ọ chitakota mkpola-ododo; mẹ mkpola-ochaa; mẹ iphe, bu ivu, ọ humaru l'eze-ulo Chileke, bu ndu ophu no l'ẹka Óbedu-Edomu. Ọ chitakwapho iphe, bu ẹku, du l'ulo eze; mẹ ndu atu-chiru atu-chi, lashia Sameriya.
- ²⁵Amazaya, bu nwa Jiowashi; mbu eze ndu Jiuda bya anofua apha iri l'ise; ge Jiowashi nwa Jiehowahazu, bu eze ndu Ízurelu nwuhuchaaru.
- ²⁶Iphe ọzo, Amazaya megbaberu; e -shi l'ishi jeye l'ẹka ọ bvuru bẹ e dekotaru l'ekwo ndu eze ndu Jiuda mẹ kẹ ndu Ízurelu.
- ²⁷Eshi teke Amazaya haru etso Chipfu bẹ a no lẹ Jierusalemu gbaaru iya ejo-idzu; ọ gbalaa lashia mkpukpu Lakishi. Ephe ye ndu jepfuru iya lẹ Lakishi l'ẹka ono je egbua ya.
- ²⁸Ephe gude inya palata odzu iya; bya eworu iya lia l'ẹka e liru nna iya phe lẹ mkpukpu Dévidi.

2 Iphe, ndu eze meru 26

Teke Uzaya bu eze ndu Jiuda

(2Ndu 14:21-22; 15:1-7)

- ¹Tobudu iya bu; ndu Jiuda l'ophu duta Uzaya, bu onye nowaru apha iri l'ishii eshinu, a nwuru iya; mee ya eze; ọ nochia enya nna iya, bu Amazaya.
- ²Oo ya bẹ kpukwaru mkpukpu Elatu woru iya nu-phu ndu Jiuda azu; ge Amazaya nwuhuchaaru lapfushia nna iya phe.
- ³Uzaya bẹ nowaru apha iri l'ishii e -shi teke a nwuru iya teme ọ bya aburu eze ono. Iphe, ọ noru l'okwa-eze buru ukporo apha labo l'apha iri l'ẹbo lẹ Jierusalemu. Epha ne iya bu Jiekolaya. Eka ne iya obu shi bu lẹ Jierusalemu.
- ⁴Uzaya bẹ meru iphe, pfuru oto l'enya Chipfu; egube ono, nna iya, bu Amazaya meru.
- ⁵Ọ choru Chileke lẹ teke Zekaraya no ndzu; ọ buru Zekaraya ono bẹ kpo-ziru iya ọzo g'ọ tsuje Chileke ebvu. Jasukpoo g'ọ no-beru buru onye acho Chipfu; bẹ Chileke meerupho; iphe nodu ejehuru iya.

⁶Uzáya tǔgbua je etsoo ndu Filisitayinu ọgu; nwutsushia igbulọ mkpụkpu Gatu; mę igbulọ mkpụkpu Jiabune; mę igbulọ mkpụkpu Ashidodu. Ọ bya akpụshia mkpụkpu l'alị Ashidodu; męwaro l'ẹka ọzo l'alị Filisitayinu.

⁷Chileke yetarụ iya ẹka o tsoo ndu Filisitayinu ọgu; mę ndu Arabu ono, bu l'alị Guru-Belu; bya eyekwaru iya phọ ẹka o tsoo ndu Meyuni ọgu.

⁸Ndu Amọnu tǔfuaha utu anụ Uzáyá ono. Ụdù iya ngakọta je akpaa l'oke alị ndu Ijiputu; kele ọ byaru aburu onye atsụ ebvu shii.

⁹Ọ kpụshikwarupho ụlo-eli lẹ Jierúsalemụ lẹ Ọnu-abata Mgburẹku; mę lẹ Ọnu-abata Nsuda; mę lẹ nkui nkui igbulọ ono; kpua ya; o shihugbaa ike.

¹⁰Ọ kpụshia ụlo-eli l'echięgu; bvushia iduma mini, dụ igwerigwe; kele o nweru iphe-edobe shii l'alị ọkpa úbvú, nọ l'uzo ẹnyanwu-arịba; mę lẹ phorokoto alị. O nweru ndu akọru iya opfu; mę ndu eletaru iya opfu-vayinu ẹnya l'alị úbvú úbvú; mę l'alị, emehuje iphe; kele emebe iphe l'alị bẹ o yenụkaru ẹnya.

¹¹Uzáya nweru ndu ojọgu, e ziru k'ọgu ọkpobe ezizi. Ẹphe anọduje l'odze l'odze eje ọgu; mbụ ẹgube a guru phẹ g'ẹphe nọduje. Ndu guru phẹ nụ bụ Jieyelu, bụ onye edeje ẹkwo; waa Maseya, bụ onye-ishi ozi. Ọ bụru onye lanụ lẹ ndu-ishi ojọgu eze, bụ Hananaya bẹ kpọ-ziru phẹ g'aa-gụ iya.

¹²Iphe, ndu-ishi l'ẹnya-unuphu, bụ ndu-ishi ndu ojọgu ono dụ bẹ bụ unu ishii l'ụkporo iri.

¹³Ndu ojọgu, ẹphe bụ ishi phẹ dụ ụkporo unu ụmadzu ugbo ụkporo l'ẹsato; l'unu ụmadzu ẹsato; l'ụmadzu ụkporo iri l'ise. Ẹphe bụ ndu gude ọkpehu alwụ ọgu alwụ-chiru eze gude emekperu iya ndu ọhogu iya.

¹⁴Uzáya nụkota ndu ojọgu ono iphe, eegudeje egbobuta onwonye; mę arwa; mę okpu-igwe; mę uwe-ígwè; mę apfụ; mę mkpuma, eegudeje agba rọbo.

¹⁵Lẹ Jierúsalemụ bẹ o meshiru ugbo-igwe, a-nọduje agba apfụ; bya atụ mkpuma, ha shii dobegbaa l'eli ụlo-eli; mę l'eli nkui nkui igbulọ mkpụkpu. Ndu meru iya nụ bụ ndu eme ọna. Ụdù Uzáyá ngakọta ẹkameka; kele Chileke yetarụ iya ẹka l'uzo, dụ biribiri jasuru; ọ bụru onye aatsụ ebvu.

Ekpenta eme Uzáyá

(2Ndu 15:5-7)

¹⁶Ọle Uzáyá wataerupho eme ike ike ono; o kuahaa onwiya; eku-onwonye ono mee ya ọ bụru ọla-l'iswi. Ọ tọ pfushiduru ike l'ẹka Chipfu, bụ Chileke iya; kele ọ bahuru l'eze-ulo Chipfu gẹ ya kpọo ụnwù-isensu ọku l'oru-ngweja ụnwù-isensu.

¹⁷Onye uke Chileke, bụ Azaríya; waa ndu-uke Chipfu, dụ ụkporo ụmadzu ẹno; bụkotaru ndu ike dụ; tsopyabẹ Uzáyá bahụ l'eze-ulo ono.

¹⁸Ẹphe kwachia ya uzo; sụ iya: “Gube Uzáyá; ọ tọ bụdu ngu bẹ ọ gbaru g'ị kpọoru Chipfu ụnwù-isensu ọku. Ndu ọ gbaru bẹ bụ ndu-uke Chileke, bụ phẹ bụ oshilokpa Erọnu; mbụ ndu ono, e doberu nsọ g'ẹphe kpọje ụnwù-isensu ọku ono. Shi l'ẹka dụ

nsọ ono lufu; kele i mewaru iphe, adudu ree; mbu l'i nafuwaru onwongu ubvu, shi l'eka Chipfu, bu Chileke.”

¹⁹No iya; ehu ghuahaa Uzaya egbu. Teke ono be o gudewaa iphe, eegudeje akpo unwu-isensu oku l'eka ge ya kpo unwu-isensu oku. Ehu watae ya pho egbu egbu l'opfu ono ndu-uke Chileke epfu ono; ekpenta mifuta iya l'egedegee onu-iphu; l'eka o pfuru le mgboru oru-ngweja unwu-isensu, no l'ime ulo Chipfu ono. Ndu uke Chileke ono toko ele iya enya.

²⁰Azariya, bu onye-ishi ndu-uke Chileke ono; waa ndu-uke Chileke ono g'ephe ha bya elee ya enya; ephe huma g'ekpenta tokoru iya egedegeee onu-iphu. Ephe mekebe egwegwa nwufu iya l'eka ono. Yebedua l'onwiya mekebekwapho egwegwa lufu; kele Chipfu byiwaru iya eka.

²¹Ekpenta ono be meerupho eze, bu Uzaya jasu mboku, o nwuhuru. O vuru ekpenta ono buru l'ulo iche. E bufu iya ebufu l'eze-ulo Chipfu. O buru Jiottamu, bu nwa iya nwoke be bu onye-ishi l'ibe eze; buru iya bu onye-ishi ndu ali ono.

²²Iphe ozo, Uzaya megbaberu; e -shi l'ishi jeye l'eka o bvuru be bu onye mpfuchiru Chileke, bu Azaya nwa Emozu be deshuru iya nu.

²³No iya; Uzaya nwuhu lapfushia nna iya phe. E lia ya l'eka e liru nna iya phe; mbu l'egu, no-kube eka eelije ndu eze; kele ephe suru l'o bu onye ekpenta. Jiottamu, bu nwa iya nwoke buru eze nochia enya iya.

2 Iphe, ndu eze meru 27

Teke Jiottamu bu eze ndu Jiuda

(2Ndu 15:32-38)

¹Jiottamu be nowaru ukporo apha l'apha ise teke o wataru aburu eze. Iphe, o noru l'aba-eze le Jierusalemu bu apha iri l'ishii. Epha ne iya be bu Jierusha nwada Zadoku.

²Jiottamu meru iphe, pfuru oto l'enya Chipfu egube ono, nna iya, bu Uzaya meru. Ophu o to bahukwanuru l'eze-ulo Chipfu ejo abahu ge nna iya; teme ndu Jiuda nduele-a arwu urwuali, ephe arwu.

³O kpukwaru onu-abata, du ephekerephe, eeshije abahu l'eze-ulo Chipfu. Bya akpukwawapho igbulu Ofelu eka ha shii.

⁴Nokwapho g'o kpushiru mkpukpu l'ubvu ubvu ali ndu Jiuda; o kpushia eka eedomije onwonye; me ulo-eli l'eka oswa dugbaa.

⁵Jiottamu be tsoru eze ndu Amonu ogu; lwu-kpee ya. L'apha ono be ndu Amonu nuru iya mkpola-ochaa, erwa iya du ukporo talentu ise; me ogbongu witi, du ukporo unu l'unu ise; me ogbongu balu, du ukporo unu l'unu ise. Ndu Amonu ono be nukwaru iya pho ophu ha egube ono l'apha k'ebo iya; me l'apha k'eto iya.

⁶Oo ya bu; Jiottamu buru onye paru eka; noo kele o tsoerupho uzo ke Chipfu, bu Chileke iya kwaseru.

⁷Iphe ọzo, Jiótamu megbabèru; mę ọgu, ọ lwùkotaru; bę e dekotaru l'ẹkwo ndu eze ndu Ízurelu; mę kę ndu Jiuda.

⁸Ọ nọwaru ụkporo apha l'apha ise teke ọ wataru aburu eze ono. Iphe, ọ nọru l'aba-eze buru apha iri l'ishii lę Jierúsalemụ.

⁹No iya; Jiótamu nwuhu lapfushia nna iya phę; ephe lia ya lę mkpukpu Dévidi. Nwa iya, bu Éhazu buru eze nọchia ęnya iya.

2 Iphe, ndu eze meru 28

Teke Éhazu bu eze ndu Jiuda

(2Ndu 16:1-4)

¹Éhazu bę nọwaru ụkporo apha teke ọ wataru aburu eze. Iphe, ọ nọru l'aba-eze lę Jierúsalemụ bu apha iri l'ishii. Ophu o meduru iphe, pfuru oto l'ęnya Chipfu ęgube ochoroke iya, bu Dévidi meru.

²O tsoru ẹka ndu eze ndu Ízurelu; kpushiaru Balu ntẹkpe.

³Ọ kpoo ùnwù-isensu ọku lę nsuda Hınomu; kpoo unwu iya unwoke ọku gude gwee ẹja, bu iya bu ẹyi ono, ọha ono, Chipfu chifuru l'iphu ndu Ízurelu shi anọduje eme ono.

⁴O gweru ẹja; kpoo ùnwù-isensu ọku l'ẹka aagwaję iphe; mę l'úbvú úbvú; mękpoo lę mkpula mkpula oshi, jakashiru ajakashị.

⁵Oo ya bu; Chipfu, bu Chileke iya woru iya ye l'ẹka eze ndu Arámu. Ndu Arámu lwu-kpee ya; kpua ikpoto ndu nkiya lę ndzu; kpuru phę laa Damasukosu. E wokwaru iya pho ye l'ẹka eze ndu Ízurelu, bu onye gbushiru ndu kę Éhazu ono k'ophu paru ẹka apaa.

⁶Peka nwa Remalaya bę gburu ụkporo unu unwoke ugbo iri l'ise l'ali Jiuda l'ujiku lanu; mbu ndu bukota ojogu, ike du. Iphe, kparu iya nu buru l'ephe gwoberu Chipfu, bu Chileke kę nna phę.

⁷Zikiri, bu onye ojogu, ike du, shi l'ipfu Ifuremu bę gburu Maseya, bu nwa eze; mę Azurikamu, bu onye-ishi l'ibe eze; gbukwaapho Elukana, bu onye etsota eze l'okwa.

⁸Ndu Ízurelu kpukoo ụkporo unu umadzu ugbo ụkporo l'ise lę ndzu l'ime ndu Jiuda ono, bu abubu phę ono. Ephe kpukoru unwanyi; mę unwu phę unwoke; mę unwu phę unwanyi; bya egwekwaapho ivu k'ophu paru ẹka apaa vuru laa Samériya.

⁹Ole o nweru onye mpfuchiru Chipfu, epa iya bu Odędu, bu lę Samériya. O tugbua je agba ndu ojogu ono ndzuta g'ephe shi ọgu alwa Samériya; je asu phę: “Unu lenu; Chipfu, bu Chileke nna unu phę bę gude lę ndu Jiuda bę meru ẹhu nọdu egbu iya egbu; o woru phę ye unu l'ẹka. Ole unu gudewaa ẹhu-iwe ophu rwuru imigwe gbushia phę.

¹⁰Nta-a bẹ unu tɔberu g'unu dobe ndu Jiuda ono; mɛ ndu Jierúsalemu ono; mbu unwoke phẹ mɛ unwanyi phẹ g'ẹphe buru ohu unu. O-ẹ-a; ? unubɛdua te emeadaru Chipfu, bu Chileke unu iphe-ẹji tɔo?

¹¹Unu ngaberu mu nchi nta. Unu duphu ndu abubu unu ono, unu kpukoru lẹ ndzu ono azu; kele oke ẹhu-eghu Chipfu bẹ dapfutaakwaru unu.”

¹²Tɔbudu iya bu; Azariya nwa Jiehohananu; mɛ Berekaya nwa Meshilemotu; mɛ Jiehezekaya nwa Shalumu; mɛ Amasa nwa Hadulayi, bu iya bu ndu-ishi ndu Ifuremu kwachia ndu ojogu ono ɔzo, mbu ndu ojogu ono, shi ogu alwa ono;

¹³sɔ phẹ: “Unu te edubatakwa ndu ono, unu kpuru lẹ ndzu ono l'ẹka-a; kele iphe, unu tɔberu bẹ bu g'unu metabaa iphe-ẹji; mɛ iphe, Chipfu e-gude nmaa anyi ikpe; yekobe l'ophu anyi mewaru ememe. Ikpe, nmaru anyi bẹ panukaru ẹka k'ophu oke ẹhu-eghu Chipfu atawa ririiriii l'ẹhu ndu Izurelu.”

¹⁴Oo ya bu; ndu ojogu ono noɔdu l'iphu ndu-ishi; mɛ edzudzu-oha ono haa ndu ono, ẹphe kpukoru ono; mɛ ivu, ẹphe gwekoru l'ogu ono.

¹⁵Tɔbudu iya bu; unwoke, a guru ẹpha phẹ bya achita ndu ono, a kpuru lẹ ndzu ono; bya eye ẹka l'ivu ono, e gwekoru ono chita uwe yee ndu ophu gba oto l'ime phẹ. Ẹphe nu phẹ iphe eye l'ẹhu; mɛ akpokpa; mɛ nri; mɛ iphe-angungu; bya edebe phẹ manu l'ẹka onyá, du phẹ l'ẹhu. E gude nkapfu-igara pata ndu ophu ike bvushiru; duru phẹ dulaaru ndu abubu phẹ lẹ Jieriko, bu iya bu ndu Oha-mpfu. Oo ya bu; ẹphe lwatashia Sameriya.

Éhazu arwo n-yemeka l'ẹka ndu Asiriya

(2Ndu 16:7-9)

¹⁶O buru teke ono bẹ eze, bu Éhazu ziru ndu eze ndu Asiriya g'ẹphe bya eyetaru iya ẹka.

¹⁷Noo kele ndu Edomu bẹ byaru bya etsoo ndu Jiuda ogu ozo; kpukoo ndu ẹphe kpukoru lẹ ndzu.

¹⁸Ndu Filisitayinu bẹ zebatakwarupho lẹ mkpukpu, noɔbaa l'ali okpa ubvu, no l'uzo enyanwu-ariba; mɛ l'echiegu ndohali l'ali ndu Jiuda. Ẹphe lwuta mkpukpu Betu-Shemeshi; mɛ Ajialonu; mɛ Gederotu; mɛ Soko; yele unwu mkpukpu, nokota iya nu; bya alwuta mkpukpu Timuna yele unwu mkpukpu, no iya nu; mɛ mkpukpu Gimuzo yele unwu mkpukpu, no iya nu. Ẹphe buru l'ẹka ono.

¹⁹Chipfu gude k'iphe, Éhazu, bu eze ndu Izurelu meru wozeta ndu Jiuda ali; kele Éhazu bẹ rwuru urwuali, du shii l'ali Jiuda; ophu Chipfu egudedu ire iya ẹka.

²⁰Oo ya bu; Tigulatu-Pilesa, bu eze ndu Asiriya labeshia ophu oo yeru iya ẹka; o gbe byapfuta iya; bya anua ya nshi kpurukpuru.

²¹Éhazu shichakpo l'ulo Chipfu; mɛ l'ulo eze; mɛ l'ulo ndu-ishi hata iphe nu eze ndu Asiriya ono; ophu o to yetaduru iya ẹka.

Iphe-ẹji, Éhazu meru

²²Teke ono, eze, bụ Éhazu eje iphe-ẹhuka ono bẹ ọ kabaa aburu onye Chipfu te egudedu ire iya ẹka.

²³O gweru eja nụ agwa ndu Damasukosu, bụ iya bụ ndu ono, lwu-kperu iya nụ ono. O su le ya e-gwe eja nụ agwa ndu Aramu g'ephe yetaru iya ẹka; eshi ophu ephe yetaru ndu eze ndu Aramu ono ẹka. Obenu l'oo ya mecharu mee yebedua waa ndu Izurelu l'ophu laa l'iyi.

²⁴Éhazu bya achikobe ivu, du l'ulo Chileke; gbupyashia ivu ono ke yogiri yogiri. O gu-chia mgbo ulo Chipfu ono agu-chi; tuko ekameka le Jierusalemu dokaa enya-agwa.

²⁵Iphe, bukpuo mkpukpu le mkpukpu, dukota l'alij Jiuda bẹ o metakotaru ẹka aakpoje unwu-isensu oku l'enya-agwa. O shi nno kpatsu Chipfu, bụ Chileke ke nna iya phe ehu-eghu.

Anwuhu Éhazu

(2Ndu 16:19-20)

²⁶Iphe ozo Éhazu megbaberu e -shi l'ishi jeye l'eka o bvuru bẹ e dekotaru l'ekwo ndu eze ndu Jiuda me ke ndu Izurelu.

²⁷No iya; Éhazu nwuhu lapfushia nna iya phe. Ephe lia ya le mkpukpu Jierusalemu. Ole e te liduru iya l'ilu ẹka eelije ndu eze ndu Izurelu. Hezekaya, bụ nwa iya nwoke buru eze nochia enya iya.

2 Iphe, ndu eze meru 29

Teke Hezekaya bu eze ndu Jiuda

(2Ndu 18:1-3)

¹Hezekaya bẹ wataru aburu eze teke o nowaru ukporo apha l'apha ise. Iphe, o noru l'aba-eze iya le Jierusalemu bu ukporo apha l'apha tete. Epha ne iya bu Abayijia nwada Zekaraya.

²Hezekaya meru iphe, pfuru oto l'enya Chipfu egube ochoroke iya, bu Devidi meru.

Hezekaya emecha eze-ulo Chipfu

³L'onwa mbu l'apha mbu, Hezekaya wataru aburu eze bẹ o ghashiru mgbo eze-ulo Chipfu; bya emekwachaa ya emekwa.

⁴O bya edubata ndu-uke Chileke; me ndu Livi; kukobe phe l'edupfu, no l'uzo enyanwu-awawa;

⁵bya asu phe: “Unube ndu Livi; unu ngaberu mu nchi! Unu dobe onwunu nsọ nta-a; unu edobe eze-ulo Chipfu, bu Chileke ke nna unu phe nsọ. Unu wofukota iphe, aaso oyi, no l'eka ono, du nsọ ono.

⁶Noo kele nna anyi phe shi buru ndu e gudedu ire phe ẹka; ephe mee iphe, du eji l'enya Chipfu, bu Chileke anyi. Ephe paru iya haa; wofu iphu l'eka Chipfu bu ebubu; bya agbakuta iya azu.

⁷Ḑphe gụ-chishikwarupho mgbo nwụlo, eeshije abahụ l'eze-ulo Chipfu; menyishicha oku l'oroku, du l'ulo ono; teme ephe kpọ-buhu ụnwù-isensu oku; ephe gwebuhuru Chileke ke Ízurelu ngweja-akpọ-oku l'eka ono, du nsọ ono.

⁸Ọ buru iya meru g'o gude oke ẹhu-eghu Chipfu dapfuta ndu Jiuda; me ndu Jierusalemu. O mee; ephe buru iphe, anyi ishi edzu; mbu mee phe; ephe buru iphe, aaso oyi bya anmaru ota; egube unu gude enya unu elenu iya-a.

⁹Ọo ya meru iphe, e gude ogu-echi gbushia nna anyi phe. Ọ buru iphe ono meru iphe, unwu anyi unwoke; me unwanyi; me unyomu anyi phe bu ndu no l'eka a kpuru phe le ndzu laa.

¹⁰“Iphe, du mu l'obu nta-a be bu ge mu le Chipfu gbaa ndzu; mbu Chileke ke Ízurelu; k'ophu ẹhu-eghu iya ono, ata pfupfufu ono a-lufu anyi l'ehu.

¹¹Unwu mu; unu te eyekwaru ozi unu aka lanu nta-a; noo kele Chipfu be hotaru unu g'unu pfuru l'iphu iya; egeru iya ozi; mbu g'unu buru iya ndu-ozi; me ndu anoduje akporu iya ụnwù-isensu oku.”

¹²Tobudu ya bu; ndu Lívayi ono jikobe k'ozi ono. Oshilokpa Kohatu, tso iya nu be bu Mahatu nwa Amasayi; yee Jiowelu nwa Azariya. Oshilokpa Merari, tso iya nu buru Kishi nwa Abudi; yee Azariya nwa Jiehalelelu. Oshilokpa Geshonu, tso iya nu be bu Jiowa nwa Zima; yee Edeenu nwa Jiowa.

¹³Oshilokpa Elizafanu, tso iya nu be bu Shimiri; yee Jiyuwelu. Oshilokpa Asafu, tso iya nu buru Zekaraya; yee Matanaya.

¹⁴Oshilokpa Hemanu, tso iya nu buru Jiehiyelu; yee Shimeyi. Oshilokpa Jiedutunu, tso iya nu buru Shemaya; yee Uzelu.

¹⁵Ḑphe bya achikobechaa unwunna phe; bya emee onwophe; ephe du nsọ. Ọo ya bu; ephe bahu je emechaa ulo Chipfu emecha; egube ono, eze tu-buru phe iya; mbu egube ono, Opfu Chipfu pfuru iya.

¹⁶Ndu uke Chileke bya abahu l'ime ime eze-ulo Chipfu ono je emechaa ya emecha. Iphemiphe, ephe humaru, aaso nsọ, no l'eze-ulo Chipfu ono be ephe chifutakotaru l'oma-unuphu ulo ono. Ndu Lívayi ye iya aka vuta vufu je awushi le nsuda nggele Kidironu.

¹⁷Eze-ulo ono be ephe wataru emecha le mboku mbu l'onwa mbu. O be le mboku k'esato l'onwa ono ephe metabe iya rwua le nwulo ono, eeshije abahu l'eze-ulo Chipfu ono. Ọo ya bu ephe gude abali esato mecha eze-ulo Chipfu ono l'onwiya. Ọ buru ujiku iri l'ishii l'onwa mbu ono be ephe megheru iya.

Eeyephu ulo Chileke azu l'eka Chileke

¹⁸Tobudu iya bu; ephe jepfu eze, bu Hezekaya je asu iya: “Anyi mechaakwaru eze-ulo Chipfu ono l'ophu; me oru-nweja aka eegweje ngweja-akpọ-oku; me iphe, bu ivu, aduje iya nu; me teburu ono, eedobeje buredi, eedobeje l'iphu Chileke ono; yee ivu, aduje iya nu.

- ¹⁹Iphe, bu ivu ono, eze Éhazu woshiru l'eze-ulo ono teke o bu eze; mbu teke ono e te gudedu ire iya eka ono be e dobephuwaru azu; teme anyi mechawa iya emecha. Ephe dukotawa l'iphu oru-ngweja Chipfu.”
- ²⁰No iya; o be l'onmewa utsu; eze, bu Hezekaya gbalihu je ekukota ndu-ishi mkpukpu ono; ephe jeshia l'ulo Chipfu ono.
- ²¹Ephe kpuru oke-eswi esaa; me ebili esaa; me unwu aturu esaa; me mkpi esaa, ephe e-gude gwee ngweja-iphe-eji l'iswi ehu ali-eze ono; me l'iswi ehu eze-ulo Chileke; me l'iswi ehu ndu Jiuda. Eze su ndu-uke Chileke, bu oshilokpa Eronu g'ephe gwee ngweja ono l'oru-ngweja Chipfu.
- ²²Oo ya bu; ephe gbua oke-eswi ono; ndu-uke Chileke nata mee ya; phee l'oru-ngweja. Ephe gbukwapho ebili ono; phee mee ya l'oru-ngweja. Ephe bya egbua unwu aturu pho; phee mee ya l'oru-ngweja.
- ²³Mkpi ono, e gude egwe ngweja-iphe-eji ono be a kputakotaru je anu eze; yeledzudzu-oha ono; ephe byibegbaa phe eka.
- ²⁴Ndu uke Chileke gbushia mkpi ono; bya eworu mee ya gwee ngweja-iphe-eji l'oru-ngweja; gude pfua ugwo iphe-eji, ndu Izurelu l'ophu mekotaru; kele eze be turu ekemu su g'e gwee ngweja-akpo-oku ono; me ngweja-iphe-eji ono l'iswi ehu ndu Izurelu l'ophu.
- ²⁵O bya achiru ndu Livayi ye l'ulo Chipfu; nu phe ogelenda; me une; me ogumogu; egube ono, ephe turu l'ekemu; mbu Devidi; yee Gadu, bu onye aphujeru eze ophulanya; me Netanu, bu onye mpfuchiru Chileke. Ekemu ono be bu ekemu, Chipfu shi l'eka ndu mpfuchiru iya tua.
- ²⁶Oo ya bu; ndu Livayi pfuru gudegbaa ngwa-ebvu Devidi ono; ndu-uke Chileke gudegbaa opu phe.
- ²⁷No iya; Hezekaya tua ekemu su g'e gwee ngweja-akpo-oku l'oru-ngweja. A wataepho egwe ngweja ono; a wata agu ebvu anu Chipfu; bya egbu opu eye iya; aku ngwa-ebvu, bu ke Devidi ono, bu eze ndu Izurelu.
- ²⁸Edzudzu-oha ono l'ophu nodu abaru Chipfu eja; ndu ebvu nodu agu ebvu; ndu opu nodu egbu opu. E mee ya nno jeye e gweghee ngweja-akpo-oku ono.
- ²⁹E gwegheepho ngweja ono; eze me iphe, bu ndu yeledu iya no l'eka ono tuko g'ephe ha phozeta baaru Chipfu eja.
- ³⁰Eze, bu Hezekaya; yeledu ndu-ishi ndu Jiuda bya epfuaru ndu Livayi g'ephe gua ebvu ajaja nu Chipfu; mbu g'ephe gua ya l'uzo Devidi; yeledu Asafu, bu onye aphuje ophulanya guru iya. Oo ya bu; ephe gude ehu-utso gua ebvu ajaja ono; bya ephozeta baaru Chipfu eja.
- ³¹Tobudu iya bu; Hezekaya su: “Nta be unu dobewaru onwunu Chipfu iche. Unu gude ngweja; me ngweja-ekete bya l'ulo Chipfu.” Oo ya bu; edzudzu-oha ono wota ngweja;

mẹ ngweja-ekele ono. Iphe, bukpo ndu oovu evuvu l'obu wotagbaa iphe, ee-gude gwee ngweja-akpo-oku.

³²Anu, edzudzu-oha ono nuru g'e gude gwee ngweja-akpo-oku ono be du oke-eswi ukporo eto l'iri; me ukporo ebili ise; me ukporo unwu aturu iri. Anu ono g'o ha be bukota ophu ee-gude gweeru Chipfu ngweja-akpo-oku.

³³Anu, e doberu nsọ k'egwe ngweja ono be du unu oke-eswi l'ukporo oke-eswi iri; waa unu aturu esaa l'ukporo iri.

³⁴Ole ndu-uke Chileke be ha nwanshii; k'ophu bu l'ephe ta adudu ike swashikota akpo l'anu ono, e gude egwe ngweja-akpo-oku ono. O buru unwunna phe, bu ndu Lívayi be yetaru phe eka ge ndu ozo, bu ndu-uke Chileke dobefua onwophe nsọ; ephe yeru phe eka ono jasụ ozi, du iya nu bvụ; kele ndu Lívayi be o ka erwu l'ehu ke g'ephe dobe onwophe nsọ eme le ndu-uke Chileke.

³⁵Anu, e gude eme ke ngweja-akpo-oku ono be ha igwerigwe; mekwapho eba-anu, e gude egwe ngweja-ehu-guu; me ngweja-mee, ayijeru le ngweja-akpo-oku ono. Noo ya; ozi, eeje l'ulo Chipfu bya alwa azu l'onodu iya.

³⁶Hezekaya yele ndu Jiuda g'ephe ha tekota eswa k'iphe, Chipfu meru ndu nkiya; kele iphe ono be e mekotaru egwegwa egwegwa.

2 Iphe, ndu eze meru 30

Aakwakobe k'obo Ojehata

¹Tobudu iya bu; Hezekaya bya ezikota iphe, bu ndu Izurelu me ndu Jiuda ozi; dekwarupho ekwo-ozu nu ndu Ifuremu; me ndu Manase g'ephe byakota l'eze-ulo Chipfu le Jierusalem; k'ophu ephe a-boru Chipfu, bu Chileke ke Izurelu obo Ojehata.

²Eze yele ndu-ishi; me edzudzu-oha ono, no le Jierusalem bya achipyaa ya l'oo l'onwa k'ebo be ephe a-bo obo Ojehata ono.

³Ephe ta aboduru iya teke aaboje iya; noo kele ndu doberu onwophe nsọ le ndu-uke Chileke ta ahadu shii; ozo bu le ndu Izurelu te eshidu dzukowaa le Jierusalem.

⁴Iphe ono, ephe chitaru idzu iya ono tuko du eze yele ndu Jiuda l'ophu ree.

⁵Tobudu iya bu; ephe pfua ya hoo haa su l'aa-ra iya arara l'ali Izurelu mgburugburu; e -shi le Biye-Sheba jasụ le Danu ge ndu Izurelu wuru byatashia Jierusalem bya aboru Chipfu, bu Chileke ke Izurelu obo Ojehata ono; noo kele ephe ta adudu igwerigwe zefuta bya abo obo-iphe ono egube e deru iya l'ekwo.

⁶Eze tua ekemu ge ndu okpa-egwa jegbabekota ali Izurelu; me ali Jiuda. Ephe gude ekwo-ozu, eze yele ndu-ishi iya deru jeshia. Iphe, e deru l'ekwo-ozu ono be suru: "Unube ndu Izurelu; unu lwaphuta azu lwapfuta Chipfu; mbu Chileke ke Ebirihamu; me Ayizaku; me Izurelu; k'ophu oo-ghachiru unu iphu ozo; mbu unube nwa ndu ophu wafuru l'eka ndu eze ndu Asiriya ono.

⁷Unu ta adukwa gę nna unu phe; me unwunna unu phe, bu ndu ono, duru Chipfu, bu Chileke ke nna phe ghelegheleghele k'ophu bu le Chipfu meru phe; epe buru mkpurupyata egube unu humanuru-a.

⁸Unu te kwefukwa ike gę nna unu phe. Iphe, unu e-mechia bu g'unu woru onwunu ye Chipfu l'eka. Unu bya l'eze-ulo iya ono, du nsọ; mbu ulo ono, o mewaru g'o du nsọ jasụ le tuutuutu le mimiimii ono. Unu abajeru Chipfu, bu Chileke unu eja; k'ophu ehu-eghu iya ono, ata pfupfufu ono a-lufu unu l'ehu.

⁹O -buru l'unu lwapfutaru Chipfu ọzo; be ndu kpuru unwunna unu; me unwegirima unu phe le ndzu a-phuru phe obu-imemini; haa phe epe alwaphuta azu l'ali-a; kele Chipfu, bu Chileke unu be bu onye emeje eze-iphe-oma; bya aburu onye aphuje obu-imemini. O to byadu ewofu iphu iya l'eka unu no; me o -buru l'unu lwapfutaru iya.”

¹⁰Oo ya bu; ndu okpa-egwa ono tuko mkpukpu le mkpukpu jegbabekota l'ali ipfu Ifuremu; me k'ipfu Manase jasụ l'ali ipfu Zebulun. Obenu l'oo ochi be aachi phe; aja phe ewenu.

¹¹Ole o nweluru-a ndu ophu haru shi l'ipfu Asha; me ipfu Manase; me ipfu ke Zebulun, bu ndu kweru wozeta onwophe ali byatashia Jierusalemu.

¹²Nokwapho g'eka Chipfu du l'ehu ndu Jiuda; o mee k'ophu obu phe bu nanu; epe nodu eme iphe, Chipfu pfuru egube eze yee ndu-ishi suru phe g'ephe mee.

Aabo obo Ojaghata ono

¹³No iya; ikpoto nemadzu bya edzukoo le Jierusalemu g'ephe bo obo-iphe ono, aataje buredi, ekoduru ekoko l'onwa k'ebo. Epe dzukoberu k'ophu paru eka apaa.

¹⁴Epe wu-lihu; tuko enya eka e shi agwaje iphe le Jierusalemu wofukota. Epe vutakwapho enya eka aakpoje unwu-isensu oku je enwuru ye le nsuda Kidironu.

¹⁵O rwua l'abali iri l'eno l'onwa k'ebo ono; epe gbuawaturu Ojaghata ono. Iphere bya adu ndu-uke Chileke ono; me ndu Liviayi. Epe je emechaa onwophe emecha; gude anu, ee-gude gwee ngweja-akpo-oku byatashia l'ulo Chipfu ono.

¹⁶Epe je anodukota l'onodu, epe anoduje; egube ono, o pfuru iya; mbu ekemu Mosisu, bu onye ke Chileke. Ndu uke Chileke ono woru mee-iphe ono, epe nataru l'eka ndu Liviayi ono phekota l'oru-ngweja ono.

¹⁷Igwerigwe, ndu no l'igwe-oha ono be te emechaduru onwophe emecha. O buru iya meru g'o gude ndu Liviayi gbuaru ndu ono, aaso nsọ ono nwaturu Ojaghata nkephe; k'ophu epe e-me iya g'o duru Chipfu nsọ.

¹⁸Ndu ophu ka l'otu le ndu shi l'ipfu Ifuremu; me ipfu Manase; me ipfu Isaka; me ke Zebulun be te emechaduru onwophe emecha; ole epe rikwanuru iphe Ojaghata ono. Eriri, epe riru iya ta abukwa egube ono be e deru iya l'ekwo. Ole Hezekaya pfukwanuru nu Chipfu l'iswi ehu phe su: “Ge Chipfu, bu onye ono, du ree ono guaru

¹⁹onyemonye nvu; mbu onye gude obu iya l'ophu achọ Chipfu, bu Chileke ke nna iya phe; e -gudekpọoro l'onye obu te emeduru onwiya g'ọ dube ree g'ekemu k'eze-ulo Chileke pfuru.”

²⁰Oo ya bu; Chipfu numa epfufu, Hezekaya pfuru nu iya; bya emee; ehu du ndu ono ike.

²¹Ndu Izuru, bu ndu ophu no le Jierusalemu gude ehu-utso bo obo-iphe, aataje buredi, ekoduru ekoko ono ujiku esaa. Ndu Liviayi me ndu-uke Chileke nodu anoduje agu ebvu anu Chipfu mboku-mboku; epeh nodu egudeje ngwa-ebvu, ada oda agu ebvu ono.

²²Hezekaya pfuru opfu, agba unme nu ndu Liviayi, goshiru l'o doru phe enya; mbu ozi, epeh ejeru Chipfu. Abali esaa ono be epeh rikotaru iphe; egwe ngweja-ehu-guu; bya ekele Chipfu, bu Chileke ke nna phe ekele.

²³Ndu ono l'ophu bya ekweta l'ephe a-bofua obo-iphe ono ujiku esaa ozo. Oo ya bu; epeh gude ehu-utso bo obo-iphe ono abali esaa ozo.

²⁴Hezekaya, bu eze ndu Jiuda bya anu ndu ono unu oke-eswi labo l'ukporo iri; me unu aturu iri l'esaa l'ukporo iri. Ndu-ishi nu phe unu oke-eswi labo l'ukporo iri; me unu aturu ugbo ukporo l'ise g'ephe gbushia gude bo obo-iphe ono. Igwerigwe le ndu-uke Chileke mechaa onwophe emecha.

²⁵Iphe, bu ndu Jiuda l'ophu tekota eswa; me ndu-uke Chileke; me ndu Liviayi; mekpoo ndu shi Izuru bya nduko ono; mekwapho ndu lwaru alwalwa, shi l'ali Izuru bya; mekpoo ndu ophu bu ebubu l'ali Jiuda.

²⁶Ehu-utso kwatakpo ha shi le Jierusalemu; kele e -shi le teke Solomonu, bu nwa Davidi, shi buru eze ndu Izuru be ta adujeduru iphe, du nno, dujeru le Jierusalemu.

²⁷Tobudu iya bu; ndu-uke Chileke; me ndu Liviayi wulihu goru onu-oma nu ndu ono; Chileke numa olu phe; epfufu, epeh epfu anu Chileke rwua imigwe, bu eka ono, du nsọ, o bu ebubu ono.

2 Iphe, ndu eze meru 31

¹E meghechaepho iphemiphe ono; ndu Izuru l'ophu, no l'eka ono wu-lihu bahu l'ime mkpukpu ndu Jiuda; je atuko mkpuma, e dobegbaaru nsọ kupyashikota akupyashi. Epeh gbutsushia itso Ashera; bya enwutsushia eka aagwaje iphe; me iphe, bu enya eka aagwaje iphe, nokota l'ali Jiuda l'ophu; me ke Benjaminu; me ke Ifuremu; me ke Manase. Epeh mee ya nno jasụ epeh mebyishikota iphemiphe ono. E mecha; ndu Izuru lashichaa mkpukpu phe; onyenonu lashia ibe iya.

Iphe, a nuru g'e gude baaru Chipfu eja

²Hezekaya bya agbaa ndu-uke Chileke; me ndu Liviayi l'ogbo l'ogbo. O kechaaru ozi nu ogbo nonu; mbu ozi, gbaru ndu-uke Chileke; me ozi, gbaru ndu Liviayi. Ozi phe bu egwe ngweja-akpo-oku; me egwe ngweja-ehu-guu; me anodu l'onu-ulo Chipfu eje ozi; ekele Chipfu ekele; agu ebvu ajaja anu iya.

³Eze bya eshi l'iphe, o nweru enweru hata anụ nụ g'e gude gwee ngweja-akpo-oku l'utsu me l'uzenyashi; me k'eswe-atuta-unme; me k'onwa ophuu; mewaro k'obo-iphe, geru egeru; mbu egube ono, e deru iya l'ekemu Chipfu.

⁴O bya atua ekemu ge ndu bu le Jierusalemu woru okiphe, rwuberu ndu-uke Chileke; me ndu Liviayi nu phe; k'ophu epe e-yeru ehu l'eme ekemu Chipfu.

⁵Ekemu ono bya angaa ekameka; teke ono teke ono; ndu Izuru lu nuaha akpuru-iphe-mbu phe; mbu ereshi; me mee ophuu; me manu olivu; me manu-enwu; mekpoo iphemiphe, shi legu. Epe vubatakwapo oke-lanu-l'uzo-iri, shi l'iphemiphe, epe nweru; o nyibe anyibe.

⁶Ndu Izuru lu; me ndu Jiuda, bukota le mkpuku, nogbaa le Jiuda wotakwapo oke-lanu-l'uzo-iri, shi l'eswi phe; me l'aturu phe; me l'eghu phe bya anu. Epe nukwapo oke-lanu-l'uzo-iri, shi l'iphe, du nsu, e doberu Chipfu, bu Chileke phe nsu. Epe kube iya l'ikpo l'ikpo.

⁷Epe wataru akube iphe ono l'ikpo l'ikpo l'onwa k'eto; o buru l'onwa k'esaa ya be epe megheru iya.

⁸Teke Hezekaya yee ndu-ishi byaru ahuma g'iphe ono kutaru l'ikpo l'ikpo; epe jaa Chipfu ajaja; bya agoru onu-oma nu ndibe iya, bu ndu Izuru lu.

⁹Hezekaya bya ajjahaa ndu-uke Chileke; me ndu Liviayi g'ee-me iphe ono, kutaru l'ikpo l'ikpo ono.

¹⁰Azariya, bu onye-ishi ndu-uke Chileke ono; mbu onye onu-ulo Zadoku bya eyee onu su: "Anyi wataru eriji epho e -shi teke a wataru evubata iphe ono l'eze-ulo Chipfu; teme ophu aphoduje aphodu paa eka; noo kele Chipfu be keberu ndibe iya l'oma. Oo ya meru iphe, eze iphe, ha egube-a tsufutaru etsufuta."

¹¹Hezekaya bya epfuaru phe g'ephe dozia mkpuru, aakwakobeje iphe l'ulo Chipfu; epe bya edozia ya.

¹²Epe yeru ehu vubakota iphe ono, a nuru ono l'ime mkpuru ono; mekpoo oke-lanu-l'uzo-iri pho; me iphe, e doberu nsu. O buru Konanaya, bu onye Liviayi be bu onye-ishi, eleta phe enya. Onye etsota iya nu buru nwune iya, bu Shimeyi.

¹³Eze, bu Hezekaya; me onye-ishi eze-ulo Chipfu, bu Azariya bya ahota ndu a-nodu l'eka Konanaya yele nwune iya, bu Shimeyi eleta iphe ono enya. Ndu epe hotaru bu: Jiehiyelu; me Azazaya; me Nahatu; me Asahelu; me Jierimotu; me Jiozabadu; me Eliyelu; me Isumakaya; me Mahatu waa Benaya.

¹⁴O buru Kore, bu nwatibe onye Liviayi, bu Imuna; mbu onye-nche onu-abata uzo enyanwu-awawa be iphe, a nuru Chileke egube oovu nemadzu evuvu l'obu du l'eka. Iphe, a nuru Chipfu; me iphe, kachakpo adu nsu bu iya anoduje ekeshi iya.

¹⁵Ndu yekporu ehu eyetaru iya eka le mkpuku eka ndu-uke Chileke bu ebubu be bu: Edenu; me Minyaminu; me Jieshuwa; me Shemaya; me Amaraya; me Shekanaya.

Ḑphe yetarū ẹka ekeshiru ndu-uke Chileke ibe p̄he iphe, gbaru p̄he nū. Ḑphe keshiru iphe ono l'ogbo l'ogbo. Ọ buru g'a nuru ogerenya bu g'a nuru nwata.

¹⁶Ndu ọzo, ẹphe keru iphe gbaa bẹ bu unwoke, nọwaru shita l'apha ẹto kwaseru, bu ndu ẹpha p̄he nọ l'ẹkwo, e deshiru g'e shiru nwua p̄he; keru gbaa iphe, bukpo ndu abahuje l'ulo Chipfu je eje ozi mboku-mboku. Ẹphe keru p̄he iya g'ozi, ẹphe ejegbaa gbaru; mẹ l'ogbo l'ogbo p̄he.

¹⁷Ẹphe bya ekeru gbaa ndu-uke Chileke, e deru ẹpha p̄he l'ẹnya-unuphu p̄he ẹgube e shi nwua p̄he; mẹ ndu Lívayi, nọwaru shita l'ukporo apha kwaseru. Ẹphe keeru p̄he iphe ono g'ozi p̄he gude dū; mẹ l'ogbo l'ogbo p̄he.

¹⁸E deshichaaru ẹpha unwegirima p̄he; mẹ unyomu p̄he; mẹ unwu p̄he unwoke; mẹ unwu p̄he unwanyi lẹ mkpukpu ono l'ophu l'ẹkwo, e deshiru g'e shiru nwushia p̄he; kele ẹphe gbaru g'e gude ire p̄he ẹka l'edobe onwophe nsọ.

¹⁹A bya lẹ ndu-uke Chileke, bu oshilokpa Eronu; mbu ndu ono, bu l'egu, nọ-pheru mkpukpu p̄he mgburugburu; ẹphebedua bẹ a gutaru unwoke lẹ mkpukpu lẹ mkpukpu g'ẹphe keeru unwoke oshilokpa Eronu ono iphe nkep̄he; mękpoo ndu e deru ẹpha p̄he l'ẹkwo, e deshiru g'e shi nwushia ndu Lívayi.

²⁰Iphe ono bẹ bu iphe, Hezekáya meru l'alì ndu Jiuda l'ophu. O meru iphe, dū ree; mẹ iphe, pfuru ọto; bya aburu onye e gude ire iya ẹka l'ẹka Chipfu, bu Chileke nọ.

²¹Iphemiphe, o yeru ẹka k'ememe l'ozi, dū l'ulo Chileke; mẹ l'eme ekemu; mẹ eme iphe, a suru g'e meje; mbu l'achọ Chileke iya; bẹ o gudekọta obu iya l'ophu mee. Eshi nno iphe nọdu ejehuru iya.

2 Iphe, ndu eze meru 32

Senakeribu abya ọgu lẹ Jierúsalemu

(2Ndu 18:13-27; 19:14-19,35-37; Azá 36:1-22; 37:8-38)

¹Hezekáya meghechaep̄ho iphemiphe ono, o yeru ẹhu mee ono; eze ndu Asiriya, bu Senakeribu chita ndu ojogu iya; ẹphe zebata l'alì Jiuda; bya ekephetagbaa mkpukpu, a kpushiru ike. Ọ buru iphe, ọori bu lẹ ya a-lwutacharu iya onwiya.

²Hezekáya bya ahumaep̄ho lẹ Senakeribu byaru; tẹme l'iphe, ọ gbaru ẹnya iya bya bu g'ọ lwua Jierúsalemu.

³O jepfu ndu-ishi iya mẹ ndu ojogu iya l'idzù; ẹphe sù l'ẹphe a-tuko je enwuchishia ẹnya-mini, dū l'azu mkpukpu ono g'ọ gbabuhu mini. Ẹphe yetarū iya ẹka mee ya.

⁴Ikpoto nemadzu dzukobe; ẹphe je enwuchishia ẹnya-mini ono g'ọ ha; mẹ nggele, asoghataje l'alì ono. Ẹphe sù l'ẹphe tee kwedu gẹ ndu eze ndu Asiriya huma mini, ẹphe a-ngu; m'ẹphe -byaep̄ho.

⁵Hezekáya bya ephube iphu kpukwachaa ẹka daru adada l'igbulọ mkpukpu ono; bya akpushia ọlo-eli ọlo-eli l'eli igbulọ ono. L'azu igbulọ ono bẹ ọ kpuru igbulọ ọzo. Ọ bya emee agbarike igbulọ mkpukpu Dévidi; ọ kabaa eshihu ike. Ọ kpushikwaapho ngwoḡu, dū igwerigwe; mẹ iphe, eegudejegba egbobuta onwonye.

⁶Ọ bya edobe ndu ojogu, a-buru ishi ndu Ízurelu. Ọ bya ekukobe phe; ephe byapfuta iya l'edupfu, no l'onu mkpukpu ono. O pfiaru phe opfu, e-me g'obu shihu phe ike su:

⁷“Unu shihukwa ike; ge ndzu ta agukwa unu. Unu ta tsukwa ebvu; ophu ehuru arwushihukwa unu le k'eze ndu Asiriya; yele ikpoto ndu ephe l'iya swi; kele onye no swiru anyi be kakwa onye ophu no swiru phe nu okpehu.

⁸Iphe, o nweru be bu ngwogu nemadzu mmanu; obenu l'anyibedua nweru Chipfu, bu Chileke anyi, bu onye e-yetaru anyi eka lwu-chiru anyi ogo.” Iphe ono, Hezekaya, bu eze ndu Jiuda pfuru ono mee; meji nmapfuru ndu Jiuda.

⁹A nonyaa; eze ndu Asiriya, bu Senakeribu; mbu onye ono, chi ndu ojogu iya kepheta mkpukpu Lakishi ono bya ezia ndu-ozu iya g'ephe je Jierusalemu je ezia Hezekaya, bu eze ndu Jiuda; me iphe, bu ndu Jiuda, no le Jierusalemu ozi su:

¹⁰“Waa iphe, Senakeribu, bu eze ndu Asiriya pfuru baa: ? Bu le gunu be unu chiru upfu kwee; meru g'o gude unu noshia le Jierusalemu l'eka e kephetaru unu ekepheta?

¹¹? Unu maru-a l'oo eduphu be Hezekaya eduphu unu l'eka osuje unu le Chipfu, bu Chileke unu a-nafuta unu l'eka eze ndu Asiriya? Iphe, oome bu g'egu-nri; me egu-mini gbushia unu.

¹²? Tobudu Hezekaya ono be wofuru eka aagwaje iya; bya emebyishia oru-ngweja iya; bya asu ndu Jiuda ephe le ndu Jierusalemu l'oo l'ataphu oru-ngweja lanu be ephe a-baje eja; o buru l'eka ono be ephe a-kpoje unwu-isensu oku?

¹³“? Unu ta amadu iphe, mu le nna mu phe meru iphe, bu ndu ali ozo? ? Agwa ohamoha ono dukporu-a ike nafuta ali phe l'eka mu?

¹⁴A bya l'oha ono, nna mu phe meru; ephe buru mkpurupyata ono; ? denu agwa ohamoha ono ophu duru ike nafuta ndu nkiya l'eka mu? ? Denu ge Chileke nkunu e-shi du ike nafuta unu l'eka mu?

¹⁵Ophu g'unu te ekwekwa ge Hezekaya ghogbua unu; dephushia unu g'odephushi unu ono. Unu te ekwetashi nkiya; kele o to dukwa agwa oha; ozoo k'ali-eze ophu dujewaru ike nafuta ndibe iya l'eka mu; ozoo l'eka nna mu phe. ? Denuwaro g'o buchia Chileke unu a-nafuta unu l'eka mu?”

¹⁶Ndu ozi Senakeribu ono pfutoshibakwapho Chipfu, bu Chileke; me onye-ozu Chipfu ono, bu Hezekaya.

¹⁷Eze, bu Senakeribu dekwaapho ekwo-ozu gude pfungashia Chipfu, bu Chileke ke Izurelu ehuru; mbu epfubyishi iya asuje: “Oo egube ono, agwa ndu ali ozo ta adudu ike nafuta ndu nkiya l'eka mu pho; bu ge Chileke ke Hezekaya ta adukwapho ike anafuta ndu nkiya l'eka mu.”

¹⁸Ndu ozi Senakeribu ono gude opfu ndu Jiuda rashia ya ike ge ndu Jierusalemu ono, no l'eli igbulo mkpukpu ono numa iya; g'ephe shi nno mee ge ndzu guhu phe; ephe atsahaa ebvu; k'ophu ephe e-shi nno nata mkpukpu ono.

¹⁹Ephe pfuaharu Chileke ke Jierúsalemu sukusuku g'ò bu agwa ndiphe, bu iphe, nemadzu gude eka iya mee.

²⁰Eze, bu Hezekáya waa onye mpfuchiru, bu Azáya nwa Emožu bya epfuru nu Chileke; raku iya; o rwua l'imigwe le k'iphe ono.

²¹Chipfu zia ojozi; o bya echigbushia iphe, bu ndu ojoğu, ike du l'ogu; me ndu-ishi ndu ojoğu; me ndu-ishi ozo, no l'odu-ogu eze ndu Asiriya ono. Eze ndu Asiriya ono gude iphere laphushia azu l'alı iya. Olwa bya abahu l'eze-ulo agwa iya; o duru unwu iya unwoke gude ugu-echi je egbuta iya tua.

²²Oo ya bu; Chipfu shi nno dzo Hezekáya yele ndu bu le Jierúsalemu l'eka Senakeribu, bu eze ndu Asiriya; mewaro l'eka ndu ozo. O nwuberu phe enya ibekeboebo.

²³Igwerigwe vuta iphe bya anu Chipfu le Jierúsalemu; me iphe, eregbaa ire, ephe nuru Hezekáya, bu eze ndu Jiuda. E -shi teke ono be ohamoha byaru edobe iya l'onodu, ha shii.

Iphe-ememe guderu Hezekáya

(2Ndu 20:1-3,12-19; Azá 38:1-3; 39:1-8)

²⁴A nonyaa iphe-ememe gude Hezekáya; k'ophu bu l'o nowaa l'onu onwu. O pfuru nu Chipfu; o za iya; bya emeru iphe-ohumalenya nu iya.

²⁵Hezekáya gbę wata etse etsetse l'ime obu iya; ophu o dudu iphe, o meru le k'iphe-oma ono, o nataru ono. Oo ya bu; oke ehu-eghu Chipfu dapfuta iya; me ndu Jiuda; me ndu Jierúsalemu.

²⁶Tobudu iya bu; izimanu etsetse ono lwa Hezekáya yele ndu Jierúsalemu azu. Oo ya bu; Chipfu haa phe atu-koshi oke ehu-eghu iya le teke Hezekáya bu eze.

Iphe, Hezekáya nweru

²⁷Hezekáya be nweru iphe shii; teme a nodu akwabe iya ubvu, ha shii. O metaru onwiya mkpuru eka okwakobeje mkpola-ochaa; me mkpola-ododo; me mkpuma, vugbaa oke aswa; me manu, eshi mkpo; me iphe, eegudeje egbobuta onwonye; mewaro ivu ozo, vugbaa oke aswa.

²⁸O kpukwarupho ulo eka oodobeje ereshi; me eka oodobeje me; me manu; nweru oka-eswi, du iche iche anoduje; me mgbabu eka aturu anoduje.

²⁹O kpushiaru onwiya mkpuku le mkpuku; nweru ikpoto aturu; me eghu; me eswi; kele Chileke nuru iya eku, paru eka apaa.

³⁰Oo Hezekáya be mechiru eka mini Gihonu eshije l'uzo imeli asofu; bya eshi l'uzo alı iya gbuhaarı iya uzo l'uzo enyanwu-arıba mkpuku Dévidi. Hezekáya mekota iphemiphe, o meru; o jehuru iya.

³¹O be teke ndu-ishi ndu Babilonu yeru ndu abya amaru ge k'iphe-ohumalenya pho, Chipfu meru l'alı ono meru; Chileke haa ya g'ò dalee ya; maru iphe, dukota iya l'obu.

Anwuhu Hezekáya

(2Ndu 20:20-21)

³²Iphe ọzo, Hezekáya megbabèru; mę g'o gude goshi l'o yeru Chileke obu; bę e dekọtaru l'ophulenyanya onye mpfuchiru, bụ Azáya nwa Emožu; mę l'ekwo ndu eze ndu Jiuda; mę kę ndu Ízurelu.

³³Oo ya bụ; Hezekáya nwuhu lapfushia nna iya phę. E lia ya l'okpa úbvú ẹka e liru iphe, bụ Nwa Dévidi. Ndu Jiuda l'ophu mę ndu Jierúsalemu kwabę iya úbvú teke ọ nwuhuru. Manásę, bụ nwa iya buru eze nọchia ęnya iya.

2 Iphe, ndu eze meru 33

Teke Manásę bụ eze ndu Jiuda

(2Ndu 21:1-9,17-18)

¹Manásę bę nọwaru apha iri l'ẹbo teke ọ wataru aburu eze. Iphe, ọ nọru l'aba-eze lę Jierúsalemu buru ụkporo apha labọ l'apha iri l'ise.

²O meru iphe, dụ ẹji l'ęnya Chipfu; ẹbyi, ọha ono, Chipfu chifuru l'atatiphu ndu Ízurelu ono shi eme; bę yębedua mekọtakwarupho.

³Eka ono, aagwaję iphe ono, nna iya, bụ Hezekáya mebyishiru ono bę o woru kpukwaa; bya edobegbaa ęnya ẹka aagwaję Balu; kpọbechaa itso Ashera. O phozekwarupho kpokpode, nọgbaa l'igwe; bya abakwaaru iya phọ eja.

⁴Ọ kpushia ęnya ẹka aagwaję iphe l'eze-ulo Chipfu, bụ iya bụ ẹka ono, Chipfu pfuru sụ: “Jierúsalemu bę ẹpha mu a-dụ jeye lę tuutuutuu lę mịimiimii.”

⁵L'oma-unuphu labọ, nọ l'eze-ulo Chipfu ono bę ọ kpushiru ęnya ẹka aagwaję kpokpode, nọgbaa l'igwe.

⁶Ọ kporu unwu iya unwoke ọku gude phę gwee eja lę nsuda Hınomu. O meru mgbashi; gwọo ọbvụ; mee ọmamanshi; bya ejeje l'aji l'ẹka ndu maa; mę l'ẹka ndu aphụ ophulenyanya. O meru ejo-iphe, parụ ẹka l'ęnya Chipfu; shi nno kpatsu iya ẹhughu.

⁷Ọ pyiru ntękpe dobe l'eze-ulo Chileke, bụ ẹka ono, Chileke pfuru Dévidi waa nwa iya, bụ Sólomonu sụ: “Oo l'eze-ulo-a; mę lę Jierúsalemu, bụ mkpukpu ono, mu họtaru l'ipfu ndu Ízurelu l'ophu bę mu e-me g'ẹpha mu reje ire jasụ l'ojejoje.

⁸Ọphu mu ta abyadu eme gę ndu Ízurelu shi l'alị ono, mu turu nna phę ẹka ono hata ọkpa lufu alufu ọzo; m'ọ -buru-a l'ẹphe letaru ęnya emekọta iphe, mu turu phę l'ekemu ono, mu shi l'ẹka Mosisu nụ phę ono; mę iphe, bụ iphe, mu tọru ọkpa iya.”

⁹Manásę bę dusweru ndu Jiuda; mę ndu bu lę Jierúsalemu; ẹphe mee ejo-iphe, ka ophu ndu ọha ono, Chipfu mebyishiru l'iphu ndu Ízurelu ono megbabèru.

Izimanụ Alwa Manásę Azụ

¹⁰Chipfu pfuru yeru Manásę; yęle ndu nkiya; ọphu ẹphe angaduru nchi.

11 Ọo ya bụ; Chipfu chita ndu-ishi ndu ojogu eze ndu Asiriya; ephe bapfu phe. Ephe gude ikokoro kota Manase l'imi; tua ya egbirigba, e meru l'onwirubvu kpuru lashia Babilonu.

12 Iphe ono tsujee ya pho l'ehu; o choahaa g'oo-shi tuba Chipfu, bu Chileke iya l'enya; o kwata wozeta onwiya ali l'iphu Chileke ke nna iya phe.

13 O pfuru nu Chileke. Opfu ono o pfuru ono, rwua Chipfu l'ehu; o numa opfu iya; bya eduphuta iya azu le Jierusalemu; o bya anodu l'ali-eze iya. Manase gbete teke ono bya amaru l'oo Chipfu bu Chileke.

14 E mechaa; o kpukwaa igbulo mkpukpu Devidi ekibiya ophu no l'a -nodu afuta afuta; mbu le nsuda, no l'uzo enyanwu-ariba obvu-mini Gihonu; kpa ya jeye le Onu-abata Ema; bya akpu-pee ubvu Ofelu mgburugburu. O kpukwaru iya pho; o kabaa l'eli. O bya edokaa ndu-ishi ndu ojogu l'iphe, bu mkpukpu, a kpuru; o shihukota ike l'ali Jiuda.

15 O wofukota obvu, e jetaru ejeta; bya ewofu nteke pho l'eze-ulo Chipfu; bya emebyishia enya aka aagwaje iphe, o kpushiru l'ubvu aka eze-ulo Chipfu du; me le Jierusalemu. O vuta phe tuphaa l'azu mkpukpu.

16 O bya edozia oru-ngweja Chipfu; bya egwee ngweja-ehu-guu; me ngweja-ekele l'eli iya. O pfuaru ndu Jiuda g'ephe bageru Chipfu, bu Chileke ke Izurelu eja.

17 Ole g'o duhabe be ndu Jiuda ta ahakwanuru egwe ngweja l'eka aagwaje iphe; ole o Chipfu, bu Chileke phe be ephe anoduje egwe iya anu kpoloko.

Anwuhu Manase

(2Ndu 21:17-18)

18 Iphe ozo, Manase megbaberu; me epfupfu, o pfuru nu Chileke; me iphe, ndu aphu ophulanya gude epha Chipfu, bu Chileke ke Izurelu pfuru nu iya; be e dekotaru l'ekwo-ako ndu eze ndu Izurelu.

19 Epfupfu, o pfuru nu Chileke; me g'iphe, o rworu gude rwua Chileke l'ehu; mekpoo iphe-eji, o meshiru; je akpaa le ndzu gheleghelehele, du iya l'ehu; mekpoo aka o kpushiru, aagwaje iphe; m'eka o doberu itso Ashera me nteke; teme o wozetaje onwiya ali; be e dekotaru l'ekwo-ako onye aphuje ophulanya, bu Hozayi.

20 Ọo ya bụ; Manase nwuhu lapfushia nna iya phe. Ephe lia ya l'ibe iya. Amonu, bu nwa iya buru eze nochia enya iya.

Teke Amonu bu eze ndu Jiuda

(2Ndu 21:19-26)

21 Amonu be nowaru ukporo apha l'apha labo teke o wataru aburu eze. Iphe, o noru l'aba-eze le Jierusalemu bu apha labo.

22 O mee iphe, du eji l'enya Chipfu ge nna iya, bu Manase. Iphe, bu nteke Manase, bu nna Amonu doberu be o gweru ngweja nu; baaru iya eja.

²³O to wozeduru onwiya alì l'iphu Chipfu ẹgube nna iya, bụ Manáse wozetaru onwiya. Amọnu buepho ikpe bẹ oomekọ ekpu onwiya.

²⁴Ndu ozi iya gbaaru iya ẹjo-idzu; woru iya gbua l'ibe iya.

²⁵Ndu Jiuda bya eworu ndu ono, gbaru eze, bụ Amọnu ẹjo-idzu ono gbushikọta. Ẹphe bya eworu Jiosáya, bụ nwa iya mee eze; ọ nochia ẹnya iya.

2 Iphe, ndu eze meru 34

Teke Jiosáya bụ eze ndu Jiuda

(2Ndu 22:1-2)

¹Jiosáya bẹ nọwaru apha ẹsato teke ọ wataru aburu eze. Iphe, ọ nọru l'aba-eze lẹ Jierúsalemu buru ukporo apha l'apha iri lẹ nanu.

²Jiosáya meru iphe, pfulu ọto l'ẹnya Chipfu. O tsokotaru ọzo, ochooroke iya, bụ Dévidi tsoru. Ọ tọ dudu ophu o mephodoru; mę nanu.

³L'apha, kwe iya apha ẹsato, ọ wataru aburu eze bẹ ọ wataru achọ ọzo kẹ Chipfu, bụ Chileke k'ochooroke iya, bụ Dévidi. Teke ono bẹ ọ bukwauro nwatanshii. O be l'apha k'iri l'ẹbo iya; ọ gwọahaa mkpukpu Jiuda; waa Jierúsalemu; mbu woshiahaa ẹka aagwajẹ iphe, nọgbaa ya nu; mę itso Ashera; mę ntekpe, a pyiru apyipyi; mę ophu a kpuru akpukpu.

⁴O zia g'e tsukposhia ẹnya ẹka aagwajẹ Balu. O nwutsushia ẹnya ẹka aakpoje unwù-isensu oku, du l'ẹka ono. Itso Ashera; mę ntekpe, a pyiru apyipyi; mę ophu a kpuru akpukpu bẹ o gwekotaru ọ du rwukuru rwukuru; o woru iya je ephekaa l'ilu ndu shi agwajẹ phe nu.

⁵Ndu egweru agwa ono ẹja bẹ ọ kpokotaru okpu phe oku l'eli ẹnya ẹka ono, aagwajẹ agwa ono. Ọ tuko Jiuda waa Jierúsalemu mechakọta emecha.

⁶Lẹ mkpukpu ẹka ndu Manáse; mę ndu Ifuremu; mę ndu Simiyonu bukọta; mbu je akpaa lẹ kẹ ndu Nafutali; mę l'ẹka nọ-pheru iya mgburugburu, e meru; ọ buru mkpurupyata;

⁷bẹ o nwutsushiru ẹnya ẹka aagwajẹ iphe; bya egwepyashia itso Ashera; mę ntekpe, du iya nu; ọ du rwukuru rwukuru. Ọ tuko ẹnya ẹka aakpoje unwù-isensu oku, dukota l'alì Ízurelu nwutsushikọta. E mecha; Jiosáya laphushia azu lẹ Jierúsalemu.

A humaru ẹkwo ekemu

(2Ndu 22:3-20)

⁸O be l'apha, kwe Jiosáya apha iri l'ẹsato, ọ wataru aburu eze; teke ono bẹ o wofuchawaru iphe, du ẹji l'alì ono; o zia Shafanu, bụ nwa Azalaya; mę Maseya, bụ ọchi-ọha mkpukpu ono; mę Jiowa, bụ nwa Jiowahazu, bụ onye nkwakọbe; g'ẹphe je emekwaa ọlo Chipfu, bụ Chileke iya.

⁹Ẹphe bya ejepfu Hilikaya, bụ onye-ishi ndu-uke Chileke je eworu okpoga, e wobataru l'eze-ọlo Chileke nu iya; mbu okpoga ono, ndu Lívayi, bụ ndu eche nche

l'onu eze-ulo nataru l'eka ndu Manase; me l'eka ndu Ifuremu; me l'eka ndu Benjaminu l'ophu; me l'eka ndu bu le Jierusalemu.

¹⁰Ephe woru okpoga ono ye l'eka ndu eleta enya l'ozi, eeje l'eze-ulo Chipfu. Ephebedua woru iya nu ndu ono, eje ozi l'ulo Chipfu ono g'ephe gude kpukwaa ya; mezia ya emezi.

¹¹Ephe woru okpoga ono nu ndu kapyinta; me ndu akpu ulo ono g'ephe gude zua mkpuma, a gbakposhiru agbakposhi; me oshi, aagbaje uko l'ulo; me oswebe, eswebeje l'ulo; kele ndu ophu shi du iya nu be ndu shi buru eze, le Jiuda hakotaru o lakota l'iyi.

¹²Unwoke ono bya eyeru ehu jee ozi ono. Ndu e doberu g'ephe leta enya le g'e gude eje ozi ono be bu Jiahatu; me Obedaya. Ndu ono be bu ndu Lívayi, shi l'eri Merari. Ndu ozo be bu Zekaraya; me Meshulamu, bu oshilokpa Kohatu. Ndu Lívayi ono, bu ndu ophu emeje ona l'aku ngwa ebvu

¹³be bu ndu-ishi ke ndu ophu evu iphe, e gude eme k'ulo ono; o buru phe eleta ndu eje ozi ono enya l'ozi, dugbaa ya nu. Ndu Lívayi ono be haru buru ndu edeje ekwo; me ndu-ishi ozi; me ndu nche onu oguzo.

¹⁴O buru g'ephe ewofuta okpoga ono, e wobataru l'eze-ulo Chipfu ono be Hilikaya, bu onye uke Chileke humaru ekwo ekemu ono, Chipfu shi l'eka Mosisu nu ono.

¹⁵Hilikaya pfiaru Shafanu, bu onye edeje ekwo; su: “Mu humakwaru ekwo ekemu l'eze-ulo Chipfu.” O bya eworu ekwo ekemu ono nu Shafanu.

¹⁶Oo ya bu; Shafanu gude ekwo ono jepfu eze; bya akaru iya su: “Iphemiphe, e yeru ndu-ozu ngu l'eka g'ephe mee be ephe emekwa-a.

¹⁷Ephe wotaakwaru okpoga, du l'eze-ulo Chipfu ye l'eka ndu-ishi ozi; me ndu ophu eje ozi obu.”

¹⁸Shafanu, bu onye edeje ekwo bya agbe teke ono pfiaru eze su iya: “O nweru ekwo onye uke Chileke, bu Hilikaya nuru mu.” Shafanu bya eworu iya gua l'iphe eze.

¹⁹Eze numaephe iphe, o gutaru l'ekwo ekemu ono; o woru uwe iya gbajashia.

²⁰O bya ekua Hilikaya; me Ahikamu nwa Shafanu; me Abudonu nwa Mayika; me Shafanu, bu onye edeje ekwo; me Asaya, bu onye-ozu eze su phe:

²¹“Unu je akpataru mu Chipfu ishi l'iswi ehu mu; me l'iswi ehu ndu phoduru nu le Izurelu; me le Jiuda; k'iphe ono, e deru l'ekwo ono, a humaru ono. Noo kele oke ehu-eghu, Chipfu a-tu-koshi anyi be paakwaru eka; kele nna anyi phe be te emeduru iphe, Chipfu pfuru; teme ophu ephe emeduru iphe, e deru l'ekwo-a.”

²²Oo ya bu; Hilikaya; me ndu ono, eze ziru ozi ono jeshia ibe nwanyi, bu onye mpfuchiru Chileke, epha iya bu Huluda. Huluda be bu nyee Shalumu, bu nwa Tokuhatu nwa Hasura. Shalumu bu onye eletaje uwe ndu-uke Chileke enya. Eka o bu bu le mkpukpu k'ebbo le Jierusalemu. Ephe bya epfiaru iya k'iphe ono.

²³Nwanyị ono sụ phẹ: “Waa iphe, Chipfu, bụ Chileke kẹ Ízurelu pfuru baa: Unu je ezia onye ziru unu g'unu byapfuta mu lẹ-a;

²⁴lẹ Chipfu sụru-a: Mu a-byaakwa ewotaru mkpukpu Jierúsalemu; waa ndu bu iya nù ẹjo iphe-ẹhuka; mbụ iphe, bụ mburọnu ono, e deshuru l'ẹkwo ono, a guru l'iphu eze ndu Jiuda ono.

²⁵Eshi ọphu ẹphe gwọberu mu; kpọahaa ụnwù-isensu ọku anụ agwa; ọ bụru iphe, ẹphe gude ẹka mee bẹ ẹphe gude akpatsu mu ẹhu-eghu; bẹ mu a-tukoshi ẹka-a oke ẹhu-eghu mu; ọphu e tee gbobutadu oke ẹhu-eghu mu ono egbobuta.

²⁶A bya l'ẹhu eze ndu Jiuda l'onwiya, bụ onye ziru unu g'unu bya akpata ishi l'ẹka Chipfu; unu karu iya lẹ Chipfu, bụ Chileke kẹ Ízurelu bẹ sụru-a: Lẹ k'opfu ono, i nūmaru ono;

²⁷bẹ eshi ọphu iphe ono rwuru ngu l'obu; i bya ewozeta onwongu alị l'iphu Chileke teke ono, i nūmaru iphe, mu pfuru lẹ k'ẹka-a; mẹ ndu bu iya nù; mbụ eshi ọphu i gude k'iphe ono wozeta onwongu alị l'iphu mu; bya agbajashia uwe ngu; raa ẹkwa l'iphu mu; bẹ mu nūmawaru iphe, i pfuru. Noo iphe, Chipfu pfuru bụ ono.

²⁸Sụ-a; mu e-me g'ị lapfu nna ngu phẹ; e-lia ngu jii. Ẹnya ngu ta abyadu ahuma ẹjo iphe-ẹhuka ono, mu e-wopfuta mkpukpu ẹka-a; mẹ ndu bu iya nù ono.” Oo ya bụ; ẹphe lwa bya akọoru eze gẹ nwanyị ono pfuru.

Jiosáya agbaphu ọgbandzu Chipfu azụ

(2Ndu 23:1-20)

²⁹Tọbudu iya bụ; eze bya ezia; e je ekukọo ndu bụ ọgerenya ndu Jiuda; mẹ kẹ ndu bu lẹ Jierúsalemu.

³⁰Eze yẹle unwoke ndu Jiuda ono g'ẹphe ha; mẹ ndu bu lẹ Jierúsalemu; mẹ ndu-uke Chileke; mẹ ndu Lívayi; mękpoo ndu Jiuda l'ọphu; ndu upfu mẹ ndu nta; bya atuko swiru jeshia l'eze-ulo Chipfu. O woru ẹkwo ọgbandzu ono, a humaru l'eze-ulo Chipfu ono guru ye phẹ lẹ nchị.

³¹O bya apfuru lẹ mgboru itso iya; ẹphe lẹ Chipfu gbaa ndzu; o kwee ukwe lẹ ya a-nodu etso Chipfu; gude obu iya g'ọ ha; mẹ ndzu iya g'ọ ha eme ekemu iya; mẹ iphe, ọ sụru g'e meje; mẹ iphe, ọ toru ọkpa iya; shi nno eme iphe, ọgbandzu ono pfuru, bụkwa iya pho bụ iphe, e deru l'ẹkwo ọgbandzu ono.

³²O mee g'iphe, bụ ndu nọ lẹ Jierúsalemu; mẹ lẹ Benjaminu kweta iphe ono, o pfuru ono. Oo ya bụ; ndu bu lẹ Jierúsalemu mee iphe, ọgbandzu Chileke kẹ nna phẹ ono pfuru.

³³Jiosáya wofukọta ẹjo agwa, nọ l'alị kẹ ndu Ízurelu l'ọphu. O mee g'iphe, bụ ndu nọkota lẹ Ízurelu baje ru Chipfu, bụ Chileke phẹ ẹja. Ọphu ẹphe ta ahajeduru etso Chipfu, bụ Chileke kẹ nna phẹ jasụ g'ọ nọ-beru.

2 Iphe, ndu eze meru 35

A bọharu ọbo Ojehata ọzo

(2Ndu 23:21-23)

- ¹Tɔbodu iya bụ; Jiosáya bya abọoru Chipfu ọbo Ojeghata ị Jierúsalem. E gbua nwaturu Ojeghata ono ị g'onwa mbụ ụ abalị iri l'eno.
- ²O dobe ndu-uke Chileke l'ozi, gbaru phẹ nụ; bya agbaa phẹ unme sụ phẹ g'ephe leta ẹnya l'ozi, ụ l'ulo Chipfu.
- ³Ọ bya epfuru yeru ndu Lívayi, bụ ndu ezije ndu Ízurelu l'ophu iphe; bya aburu ndu ụ nsọ l'eka Chipfu nọ sụ phẹ: “Unu woru okpoko ono, ụ nsọ ono dobe l'ulo, Sólomonu nwa Dévidi, bụ eze ndu Ízurelu kpuru. Unu ta apaphehewa iya l'ukuvu ozo. Unu jeeru Chipfu, bụ Chileke unu yele ndibe iya, bụ ndu Ízurelu ozi nta-a.
- ⁴Unu kwakọbe onwunu l'anya-unuphu l'anya-unuphu egube unu ụ l'ogbo l'ogbo, bụ iya bụ egube ono, Dévidi, bụ onye ono, shi buru eze ndu Ízurelu; yele nwa iya, bụ Sólomonu deru iya l'ekwo doberu unu ono.
- ⁵“Unu pfuru l'eka ono, ụ nsọ ono; unu pfa egube e gude keshia unwunna unu l'anya-unuphu l'anya-unuphu ndu Ízurelu. Ogbo ndu Lívayi apfu-kubecha ndu ophu nonu.
- ⁶Unu egbua nwaturu Ojeghata ono; mee onwunu g'unu ụ nsọ; kwakọbe nwaturu ono k'ophu unwunna unu phẹ a-nodu eme iya gẹ Chipfu shi l'eka Mosisu tya ekemu iya.”
- ⁷Ndu Ízurelu mmanu, bụ ndu nọ l'eka ono bẹ Jiosáya nuru nwaturu; mę nweghu, tukoru ụ ukporo unu ugbo eto l'unu iri l'ise g'ephe gude mee kẹ ngweja ọbo Ojeghata ono. Ọ nukwa phẹ phọ eswi, ụ unu ęsa l'ukporo iri. Anu ono bẹ shikota l'eku, eze nweru.
- ⁸Nokwapho gẹ ndu-ishi Jiosáya woru iphe, shi phẹ l'obu nụ ndu Ízurelu ono; mę ndu-uke Chileke; mę ndu Lívayi. Hilikaya; mę Zekaraya; mę Jiehiyelu, bụ ndu-ishi ulo Chileke bya eworu unu nwaturu ishii l'ukporo iri; mę eswi ukporo iri l'ise nụ ndu-uke Chileke g'ephe gude gwee ngweja Ojeghata ono.
- ⁹Konanaya; mę Shemaya yele Netanelu, bụ unwunna iya; mę Hashabaya; mę Jieyelu; mę Jiozabadu; bụ ndu-ishi ndu Lívayi bẹ nuru ndu Lívayi unwu-aturu; yele unwueghu, ụ unu iri l'ebo l'ukporo iri; nukwa phẹ phọ unu eswi l'ukporo ise; g'ephe gude gwee ngweja Ojeghata ono.
- ¹⁰A kwakọbechaa nkwakọ Ojeghata ono; ndu-uke Chileke je apfuru l'onodu phẹ; ndu Lívayi nodu egube e keshiru phẹ; mbụ egube ono, eze suru g'ephe mee.
- ¹¹Ephe gbushia unwu-aturu Ojeghata ono. Ndu uke Chileke nata mee ya phee; ndu Lívayi swashia anu ono akpo.
- ¹²Ephe woru anu, e gude eme kẹ ngweja-akpo-oku dobe iche; k'ophu ephe e-keshiru iya ndu Ízurelu l'anya-unuphu l'anya-unuphu; g'ephe gude eka phẹ gweeru iya Chipfu; egube ono, e deru iya l'ekwo Mosisu. Ọ bukwarupho g'ephe meru anu eswi bụ ono.

¹³Unwu-aturu Ojeghata ono bẹ ẹphe huru ahuhu l'ọku; ẹgube omelali iya du. Ẹphe gude ite-ọku; mẹ nwtoshi; mẹ ite-ophe shia ngweja ọzo, du nsọ eshishi; bya emekebe ẹgwegwa pajeru iya ndu Ízurelu l'ophu.

¹⁴Ẹphe mechaa ono; bya akwakọbe nkepẹ; mẹ kẹ ndu-uke Chileke; noo kẹle ndu-uke Chileke, bu oshilọkpa Eronu bẹ phuberu iphu egwe ngweja-akpo-ọku; mẹ ẹba-anu ono jasụ nchi jihu. Ọ buru iya meru g'o gude ndu Lívayi kwakọbe nkepẹ waa ophu ndu-uke Chileke, bu oshilọkpa Eronu riru.

¹⁵Ndu ọgbo-ebvu; mbu oshilọkpa Asafu nọdu l'onodu pẹ, bu iya bu onodu, Dévidi; mẹ Asafu; mẹ Hemanu; mẹ Jiedutunu, bu onye aphujeru eze ophulenyaa doberu pẹ. Ndu nche nọduchaa l'oguzo l'oguzo; ophu ọ dudu onye gbadoru ozi nkiya; noo kẹle unwunna pẹ, bu ndu Lívayi bẹ eshiru pẹ nri.

¹⁶Tobudu iya bu; e jekota ozi, e jeru Chipfu mboku ono gude boo obo Ojeghata ono; gwee ngweja-akpo-ọku ono l'oru-ngweja Chipfu; ẹgube ono, eze, bu Jiosáya karu g'e mee ya.

¹⁷Ndu Ízurelu, bu ndu ophu nọ anono l'ẹka ono boo obo Ojeghata ono teke ono; bya aboo Obo-iphe ono, aatajẹ buredi, ekoduru ekoko ujiku ẹsaa.

¹⁸Ẹgube obo Ojeghata ono bẹ a ta bojeduru l'ali Ízurelu e -shi teke onye mpfuchiru Chileke, bu Sámelu bu ishi. Ophu ọ dudu onye eze ndu Ízurelu, bojeru obo Ojeghata ophu dujeru g'ophu Jiosáya boru ono; mbu yele ndu-uke Chileke; mẹ ndu Lívayi; mẹ ndu Jiuda l'ophu; mẹ ndu Ízurelu, nọ l'ẹka ono; mẹ ndu bu lẹ Jierúsalemu.

¹⁹Obo Ojeghata ono bẹ a boru l'apha, kwe Jiosáya apha iri l'ẹsato, e -shi teke ọ wataru aburu eze.

Anwuhu Jiosáya

(2Ndu 23:28-30)

²⁰E meghebebechaepho iphemiphe ono; Jiosáya bya edozichaa ọlo Chipfu; ọ du ree; Neko, bu eze ndu Ijiputu chita ndu ojogu iya; ẹphe jeshia ọgu lẹ Kakemishi, du lẹ mgboru ẹnyimu Yufurétisu; Jiosáya chita ndu ojogu nkiya jeshia gẹ ya wota iya ọgu.

²¹Ole Neko bẹ yeru ndu jeru ezia Jiosáya sụ iya: “? Bu gunu bẹ adaru mu lẹ ngu; gube eze ndu Jiuda? Ọ to bukwa ngu bẹ mu byapfutaru ọgu ntanu; ndu mu byapfutaru bukwa ndu ono, mu l'ẹphe alwu ọgu ono. Chileke bẹ ziru mu gẹ mu mekebe ẹgwegwa. Ta pfu-chikwa Chileke ọzo l'ọ kwa iya swiru mu eswiru; ọ -dudu bẹ oomekwa g'i laa l'iyi.”

²²Ole Jiosáya te ekwedu haa ya; bya emee onwiya g'a ta hube iya ama gẹ yele iya lwua ọgu. Ọ jika lẹ ya ta angadu nchi l'opfu Neko, bu iya bu opfu, shi l'onu Chileke; ọ tugbule-a jepfushia ya ọgu lẹ phorokoto ali mkpukpu Megido.

²³No iya; ndu agba apfu gbanaa eze, bu Jiosáya apfu; ọ sụ ndu-ozii iya: “Unu pafu mu l'ẹka-a; kẹle e mekaru mu iphe okpobe emeka.”

²⁴Oo ya bu; ndu-ozii iya ono pata iya pafu l'ugbo-inya iya; paru iya ye l'ugbo-inya iya ophu kwe ebo palata Jierusalem. O buru l'eka ono be o nwuhuru; e lia ya l'eka e liru nna iya phe. Ndu Jiuda l'ophu; me ndu Jierusalem raa ekwa iya.

²⁵Jieremaya gua ebvu-aphu ehu Jiosaya. Unwoke; me unwanyi, agu ebvu nodu aguje ebvu ehu Jiosaya m'ephe -nodu erwu erwubvu. O buru g'o du bu ono byasu ntanu-a. Ephe mee ya; o buru omelali, du l'ali Izurelu; teme e dee ya edede l'ekwo ebvu-aphu.

²⁶Iphe ozo, Jiosaya megbaberu; me g'o gude mee iphe-oma l'uzo, o du l'ekemu Chipfu;

²⁷mevaro iphe, o mekotaru; e -shi l'ishi jeye l'eka o bvuru be e dekotaru l'ekwo ndu eze ndu Izurelu; me ke ndu Jiuda.

2 Iphe, ndu eze meru 36

Teke Jiehowahazu bu eze ndu Jiuda

(2Ndu 23:31-35)

¹Tobudu iya bu; ndu ali ono wofuta Jiehowahazu, bu nwa Jiosaya ke nwoke; mee ya o buru eze le Jierusalem nochia enya nna iya.

²Jiehowahazu be nowaru ukporo apha l'apha eto teke o wataru aburu eze. Iphe, o noru l'aba-eze le Jierusalem bu onwa eto.

³Eze ndu Ijiputu chifu iya l'aba-eze iya le Jierusalem; bya asu ge ndu Jiuda tua mkpola-ochaa, erwa iya du ukporo talentu ise; waa mkpola-ododo, erwa iya du talentu lanu.

⁴Eze ndu Ijiputu ono bya eworu Eliyakimu, bu nwune Jiehowahazu ke nwoke; mee o buru eze ndu Jiuda; me Jierusalem. O gbanwee epha iya gube iya Jiehowakimu. Ole Neko be kputaru nwune Eliyakimu ono, bu Jiehowahazu lashia Ijiputu.

Teke Jiehowakimu bu eze ndu Jiuda

(2Ndu 23:36—24:7)

⁵Jiehowakimu nowaru ukporo apha l'apha ise teke o wataru aburu eze. Iphe, o noru l'aba-eze le Jierusalem buru apha iri le nanu. O mee iphe, du eji l'enya Chipfu, bu Chileke iya.

⁶Nebukadineza, bu eze ndu Babilonu bya bya etsoo ya ogo; tua ya egbirigba onyirubvu kpuru lashia Babilonu.

⁷Nebukadineza be hakwarupho ivu, du l'ulo Chipfu vuta lashia Babilonu je edobe l'ulo agwa iya le Babilonu l'eka ono.

⁸Iphe ozo, Jiehowakimu megbaberu; me ebyi, o mekotaru; me ejo-iphe, a humaru l'oome; iphemiphe ono be e dekotaru l'ekwo ndu eze ndu Izurelu; me ke ndu Jiuda. Jiehowakinu, bu nwa iya nwoke buru eze nochia enya iya.

Teke Jiehowakinu bu eze ndu Jiuda

(2Ndu 24:8-17)

⁹Jiehoyakinu bẹ nọwaru apha iri l'ẹsato teke ọ wataru aburu eze. Iphe, ọ nọru l'aba-eze lẹ Jierúsalemú buru ọnwa ẹto l'abalí iri. O mee iphe, dú ẹji l'ẹnya Chipfu.

¹⁰Apha sùgbaepfo ishi; eze, bú Nebukadineza zia ozi g'e je ekua ya g'ọ bya Bábilonu; l'ọo-chiru ivu, eregbaa ire, shi l'ulo Chipfu bya. O woru nwune nna Jiehoyakinu ono, bú Zedekaya mee eze ndu Jiuda waa Jierúsalemú.

Teke Zedakaya bú eze ndu Jiuda

(2Ndu 24:18-20; Jier 52:1-3)

¹¹Zedekaya bẹ nọwaru ọkporo apha l'apha lanu teke ọ wataru aburu eze. Iphe, ọ nọru l'aba-eze lẹ Jierúsalemú buru apha iri lẹ nanu.

¹²O mee iphe, dú ẹji l'ẹnya Chipfu, bú Chileke iya. Ọphu o wozetaduru onwiya alí l'iphu Jieremaya, bú onye mpfuchiru Chipfu.

Adada Jierúsalemú

(2Ndu 25:1-7; Jier 39:1-10; 52:3-11)

¹³Zedekaya bẹ kwefukwarupho eze, bú Nebukadineza ike, bú iya bú onye ono, meru o gude ẹpha Chileke ribua angu ono. Ọ kporu gagaraga; teme ọ kpo-chia obu; ọphu ọ to ghaduru Chipfu, bú Chileke kẹ Ízurelu iphu.

¹⁴Ozo buru lẹ ndu-ishi ndu-uke Chileke; mẹ ndu Jiuda l'ọphu bẹ ghelegheleghele nkepẹ kabaa njo. Ẹphe yekotaru ẹka l'akpamara ono, ọhamoha ono anọduje eme; teme ẹphe merwushia eze-ulo Chipfu, bú ẹka ono, o doberu nsọ lẹ Jierúsalemú ono.

¹⁵Chipfu, bú Chileke kẹ nna pẹ nọdu eshije l'onu ndu-ozí iya epfu opfu anu pẹ; o - pfuchaa l'o pfubaa; kẹle imemini ndibe iya; waa ẹka ono, o bu ebubu ono bẹ dú iya nu.

¹⁶Obenu l'ọo ewenu bẹ ẹphe anọduje aja ndu-ozí Chileke ono; akpo opfu iya ẹbo ẹbo l'afu; achi ndu mpfuchiru iya ọchi. Ẹphe mee ya nno jasú teke oke ẹhu-eghu Chipfu tangirihuru l'ẹhu ndibe iya; ọ buru a-ma-g'eme iya.

¹⁷Tobudu iya bú; Chipfu duta eze ndu Bábilonu dobe g'ọ tsoo pẹ ọgu. O gude oguechi gbugbushia unwokorobyia pẹ l'eze-ulo Chileke. Ọphu ọ dudu onye ọphu ọ haru l'unwokorobyia pẹ; mẹ l'unwumboko pẹ; mẹ l'unwoke, búwaa ọgerenya; mẹ ndu ọphu kahwaru akahu. Chileke tuko pẹ g'ẹphe ha yekota Nebukadineza l'ẹka.

¹⁸O gwetakota ivu, dú l'eze-ulo Chileke lashia Bábilonu; mbu ọphu ha shii mẹ ndu ọphu ha nwanshii. O vutakwapho ẹku, dú l'eze-ulo Chipfu; mẹ ẹku k'onye eze; waa kẹ ndu-ishi iya.

¹⁹Ẹphe tufu ọku l'eze-ulo Chileke; bya enwutsushia igbulọ, e gude kpupheta Jierúsalemú mgburugburu. Ẹphe tufukota ọku l'ulo ndu eze, dukota iya nu. Ẹphe tukokpoo iphe, ere ire, nọ l'ẹka ono mebyishikota.

²⁰Ọ chita nwa ndu ọphu phoduru nu lashia Bábilonu; ẹphe jeahaaru iya ozi; ejeru unwu iya ozi jasú teke ndu Peshiya wataru abu eze.

21Alì ono bya atùta nwune lẹ teke ono, ọ dabyiru bụru ochobu ono; nọo ụkporo apha eto l'apha iri. O shi nno vùkota; mbụ opfu, Chipfu shi l'ọnu Jieremaya pfua.

Sayirosu eme gẹ ndu a kpuru lẹ ndzụ laphu azụ

(Ezu 1:1-4)

22O be l'apha kẹ mbụ, Sayirosu wataru aburu eze ndu Peshiya; Chipfu nwusaa ya obu; mbụ eze ndu Peshiya obu; ọ raa ozi arara l'alì-eze iya l'ophu; bya edekwapho ozi ono edede l'ekwo. Iphe ono bụru g'ee-shi g'opfu ono, Chipfu shi l'ọnu Jieremaya pfua ono vùkota.

23“Waa iphe, Sayirosu, bụ eze ndu Peshiya pfuru baa: “Chipfu, bụ Chileke k'imigwe nukotawaru mu alì-eze, nọkota lẹ mgboko-a; bya asụwa mu gẹ mu kpuru iya ụlo lẹ Jierusalemu ono, du l'alì Jiuda. Iphe, bụkpoo onye kẹ Chileke, nọ l'echilabo unu; gẹ Chipfu, bụ Chileke iya swikwaru iya ọkpobe eswiru; teme g'onye ono tųbukwaa lashia ẹka ono.”

Ezura

Ezura 1

Sayirosu atụ ekemu gę ndu a kpuru lę ndzụ laphu azụ

(2Iphe 36:22-23)

¹O be l'apha kę mbụ, Sayirosu wataru aburu eze ndu Peshiya; Chipfu nwusaa Sayirosu, bu eze ndu Peshiya obu; o raa ozi arara l'ali-eze iya l'ophu; bya edekwapho ozi ono edede l'ekwo. Iphe ono buru g'ee-shi g'opfu ono, Chipfu shi l'onu Jieremaya pfua ono vukota.

²Waa iphe, Sayirosu, bu eze ndu Peshiya pfuru baa: “Chipfu, bu Chileke k'imigwe nukotawaru mu ali-eze, nokota lę mgboko-a; bya asuwa mu gę mu kparu iya ulo lę Jierusalemu ono, du l'ali Jiuda.

³Iphe, bukpo onye kę Chileke, no l'echilabo unu; gę Chileke iya ono swikwaru iya okpobe eswiru. G'onye obu tugba lashia Jierusalemu ono, du l'ali Jiuda je akpuo ulo Chipfu, bu Chileke kę Izurelu; mbu Chileke ono, no lę Jierusalemu.

⁴A -bya lę ndu phoduru nu l'eka-a ephe lwaru alwalwa-a; gę ndu ephe bu l'eka iya nkephe gude mkpola-ochaa; me mkpola-ododo yetaru phe eka; ephe anu phe ivu ozo, du iche iche; me iphe-edobe; mewaro iphe ozo, shi phe l'obu futa g'ephe gude je akpuo ulo Chileke lę Jierusalemu.”

⁵Tobudu iya bu; ndu bugbaa ishi l'unuphu l'unuphu; l'ipfu Jiuda; me kę Benjiaminu; me ndu-uke Chileke; me ndu Livayi; mbu iphe, bukpo onye Chileke yeru iya l'obu tuko wulihu jeshia akpuo ulo Chipfu ono lę Jierusalemu.

⁶Ndu obutobu phe gweru ivu mkpola-ododo me mkpola-ochaa nu phe gude yetaru phe eka; me ivu ozo, du iche iche; me iphe-edobe; me iphe, vugbaa okaswa; a -gufukwa iphe, shi phe l'obu futa, ephe nucharu phe.

⁷Eze, bu Sayirosu gwefutakwapho ivu ulo Chipfu ono, Nebukadineza shi gweta lę Jierusalemu je edobe l'ulo agwa iya pho.

⁸O buru onye edobeje okpoga, epha iya bu Mitedatu be Sayirosu, eze ndu Peshiya shi l'eka iya gwefuta ivu ono. Onye ono woru iya gua ogo nu Sheshubaza, bu onye-ishi ndu Jiuda.

⁹Waa g'ivu ono ha baa: Gbamugbamu mkpola-ododo be du ukporo l'iri; gbamugbamu mkpola-ochaa du unu labo l'ukporo iri; iphe, eegudeje akpo unwu-isensu oku, e meru lę mkpola-ochaa du ukporo lę tete.

¹⁰Ochi, e meru lę mkpola-ododo du ukporo l'iri. Ochi, e gude mkpola-ochaa mee, l'udu iya l'udu iya du unu ochi l'ochi iri. Unwu ivu ozo, dugbaa nu du unu l'ukporo iri.

¹¹Ivu, e meru lę mkpola-ododo; me kę mkpola-ochaa be du unu iri l'eto l'ukporo iri. Ivu ono g'o ha bu ivu, Sheshubaza gwelataru teke ndu ono, a kpuru lę ndzụ laa ali Babilonu ono lwaru Jierusalemu.

Ezura 2

Ndu Iwaru nū lē ndu ono a kpuru lē ndzu ono

- ¹Waa ndu Ízurelu ono, shi l'alì Bábilonu lwa; mbu ndu ono, a kpuru lē ndzu laa alì ozo, bu iya bu ndu Nebukadineza, bu eze ndu Bábilonu kpukojeru laa Bábilonu. Epe Iwaru Jierúsalemu; me Jiuda; onyenu lashichaa mkpuku eka o shi.
- ²Ndu epe tso lwa be bu Zerubabelu; me Jieshuwa; me Nehemaya; me Seraya; me Relaya; me Modekayi; me Bilishanu; me Misupa; me Biguvayi; me Rehumu; waa Bana. Waa ge ndu Ízurelu ono ha bu owana:
- ³Oshilokpa Paroshi be du unu ise l'ukporo umadzu esato; l'umadzu iri l'ebo.
- ⁴Oshilokpa Shefataya du ukporo umadzu iri l'esato l'umadzu iri l'ebo.
- ⁵Oshilokpa Ara du unu l'ukporo iri l'esato l'umadzu iri l'ise.
- ⁶Oshilokpa Pahatu-Mowabu, bu iya bu ndu shi l'eri Jieshuwa yele Jiowabu be du unu esaa l'iri l'ebo.
- ⁷Oshilokpa Elamu du unu eto l'umadzu ukporo labo l'umadzu iri l'eno.
- ⁸Oshilokpa Zatu du unu labo l'ukporo esaa l'umadzu ise.
- ⁹Oshilokpa Zakayi du unu l'umadzu ukporo iri l'esato.
- ¹⁰Oshilokpa Bani du unu l'umadzu ukporo ugbo iri l'ebo l'umadzu labo.
- ¹¹Oshilokpa Bebayi du unu l'umadzu ukporo iri le nanu l'onye lanu.
- ¹²Oshilokpa Azugadu du unu eto l'umadzu ukporo l'ebo.
- ¹³Oshilokpa Adonikamu du unu l'umadzu ukporo iri l'eto l'umadzu ishii.
- ¹⁴Oshilokpa Biguvayi du unu umadzu ise l'umadzu ukporo labo l'umadzu iri l'ise.
- ¹⁵Oshilokpa Adinu du unu l'umadzu ukporo labo l'iri l'eno.
- ¹⁶Oshilokpa Ateya, bu iya bu ndu shi l'eri Hezekaya be du ukporo eno l'umadzu iri l'esato.
- ¹⁷Oshilokpa Bezayi du ukporo umadzu iri l'ishii l'umadzu eto.
- ¹⁸Oshilokpa Jiora du ukporo ise l'umadzu iri l'ebo.
- ¹⁹Oshilokpa Hashumu du ukporo iri le nanu l'umadzu eto.
- ²⁰Oshilokpa Gibaru du ukporo eno l'umadzu iri l'ise.
- ²¹Unwoke, shi le Betulehemu be du ukporo ishii l'umadzu eto.
- ²²Ndu ke Netofa be du ukporo labo l'umadzu iri l'ise.
- ²³Ndu ke Anatotu du ukporo ise l'umadzu esato.
- ²⁴Ndu ke Azumavetu be du ukporo labo l'umadzu labo.

- ²⁵Ndu ke Kiriyatu-Jiarimu; me Kefira; me Berotu be du unu l'umadzu ukporo iri l'esaa l'umadzu eto.
- ²⁶Ndu ke Rama yee Geba du unu l'umadzu ukporo iri le nanu l'umadzu eto.
- ²⁷Ndu ke Mikumashi du ukporo ishii l'umadzu labo.
- ²⁸Ndu ke Betelu; me Eyayi du ukporo iri le nanu l'umadzu eto.
- ²⁹Ndu ke Nebo du ukporo labo l'umadzu iri l'ebo.
- ³⁰Ndu ke Magubishi du ukporo esaa l'umadzu iri l'ishii.
- ³¹Ndu ke Elamu ophunapho be du unu eto l'ukporo labo l'umadzu iri l'eno.
- ³²Ndu ke Harimu du ukporo iri l'ishii.
- ³³Ndu ke Lodu; me Hadidi; me Ono be du unu l'umadzu ukporo iri l'ishii l'umadzu ise.
- ³⁴Ndu ke Jieriko du ukporo iri l'esaa l'umadzu ise.
- ³⁵Ndu ke Senaa du unu tete l'ukporo l'iri.
- ³⁶A bya le ndu-uke Chileke: Oshilokpa Jiedaya, bu iya bu ndu shi l'onu-ulo ndibe Jieshuwa be du unu labo l'ukporo esato l'umadzu iri l'eto.
- ³⁷Oshilokpa Ima du unu labo l'ukporo iri l'ebo l'umadzu iri l'ebo.
- ³⁸Oshilokpa Pasho du unu eto l'ukporo labo l'umadzu esaa.
- ³⁹Oshilokpa Harimu du unu labo l'ukporo iri l'umadzu iri l'esaa.
- ⁴⁰A bya le ndu Liviayi: Oshilokpa Jieshuwa; me Kadumelu, bu iya bu ndu shi l'eri Hodavaya be du ukporo eto l'umadzu iri l'eno.
- ⁴¹A bya le ndu aguje ebvu: Oshilokpa Asafu be du ukporo ishii l'umadzu esato.
- ⁴²A bya le ndu anoduje eche nche l'onu-abata eze-ulo Chileke: Oshilokpa Shalumu; me oshilokpa Ateya; me oshilokpa Talumonu; me oshilokpa Akubu; me oshilokpa Hatita; me oshilokpa Shobayi; be tukoru du ukporo ise l'umadzu iri le tete.
- ⁴³A bya le ndu anoduje eje ozi l'eze-ulo Chileke bu: Oshilokpa Ziha; me oshilokpa Hasufa; me oshilokpa Tabayotu;
- ⁴⁴me oshilokpa Kerosu; me oshilokpa Siyaha; me oshilokpa Padonu;
- ⁴⁵me oshilokpa Lebana; me oshilokpa Hagaba; me oshilokpa Akubu;
- ⁴⁶me oshilokpa Hagabu; me oshilokpa Shamulayi; me oshilokpa Hananu;
- ⁴⁷me oshilokpa Gidelu; me oshilokpa Gaharu; me oshilokpa Reyaya;
- ⁴⁸me oshilokpa Rezinu; me oshilokpa Nekoda; me oshilokpa Gazamu;
- ⁴⁹me oshilokpa Uza; me oshilokpa Paseya; me oshilokpa Besayi;

- 50mẹ oshilọkpa Asuna; mẹ oshilọkpa Meyuni; mẹ oshilọkpa Nefisimu;
- 51mẹ oshilọkpa Bakubuku; mẹ oshilọkpa Hakufa; mẹ oshilọkpa Hahuru;
- 52mẹ oshilọkpa Bazulutu; mẹ oshilọkpa Mehida; mẹ oshilọkpa Hasha;
- 53mẹ oshilọkpa Bakosu; mẹ oshilọkpa Sizera; mẹ oshilọkpa Tema;
- 54mẹ oshilọkpa Nezaya; mẹ oshilọkpa Hatifa.
- 55A bya l'oshilọkpa ndu ojozi Sólomonu bẹ bụ: Oshilọkpa Sotayi; mẹ oshilọkpa Hasoferá; mẹ oshilọkpa Peruda;
- 56mẹ oshilọkpa Jiala; mẹ oshilọkpa Dakonu; mẹ oshilọkpa Gidelu;
- 57mẹ oshilọkpa Shefataya; mẹ oshilọkpa Hatilu; mẹ oshilọkpa Pokeretu-Hazebayimu; mẹ oshilọkpa Ami.
- 58Ndu anọduje eje ozi l'eze-ulo Chileke g'ẹphe ha; mẹ oshilọkpa ndu ojozi Sólomonu bẹ dọ ọkporo iri lẹ tete l'umadzu iri l'ẹbo.
- 59Waa ndu ọphu shi lẹ mkpukpu Tẹlu-Mela; mẹ lẹ mkpukpu Tẹlu-Hasha; mẹ lẹ mkpukpu Kerubu; mẹ lẹ mkpukpu Adanu; mẹ lẹ mkpukpu Ima lwa bụ ọwana: Ọle ndu ono ta adudu ike goshi ipfu, ẹphe bụ; mẹ oshilọkpa onye ẹphe bụ; k'ọphu ee-shi nno maru l'ẹphe bụa ndu Ízurelu.
- 60Oshilọkpa Delaya; mẹ oshilọkpa Tobaya; mẹ oshilọkpa Nekoda bẹ dọ unu l'ukporo iri l'ẹbo l'umadzu iri l'ẹbo.
- 61A bya l'oshilọkpa ndu-uke Chileke: oshilọkpa Habaya; mẹ oshilọkpa Hakozu; mẹ oshilọkpa Bazilayi; nwoke ono, luru nwada Bazilayi kẹ Giladu; a nọdu ekuwa iya rọ ẹpha ala l'ẹpha iya.
- 62Ndu ono bẹ a chọru ẹpha phẹ l'ẹkwo, e deru g'e gude nwushia phẹ; ọle a ta humaduru ẹpha phẹ l'ẹkwo ono. Ọo ya bụ; e wofu phẹ l'onodu ndu-uke Chileke mee phẹ ẹphe buru ndu aasọ nsọ.
- 63Ọchi-ọha bya asu g'ẹphe te tsojeshi ria nri, kakọta adu nsọ jeye teke onye uke Chileke, e-gude Urimu; waa Tumimu kpata ishi l'ẹka Chipfu.
- 64Mkpakọ ndu ono, lwaru nu ono g'ẹphe ha dọ ọkporo unu ise l'unu ise l'ukporo iri l'ẹsato;
- 65a -gufukwa ndu-ozí phẹ unwoke; mẹ unwanyi. Ndu k'ono dọ unu iri l'ẹsato l'ukporo ishii l'umadzu iri l'ẹsaa. Ẹphe nwekwarupho ndu aguje ebvu, dọ ọkporo iri; unwanyi yẹ unwoke.
- 66Inya phẹ dọ unu l'ukporo iri l'ishii; l'inya iri l'ishii; inya-mulu phẹ dọ ọkporo iri l'ẹbo l'inya-mulu ise.
- 67Inya-kamẹlu phẹ dọ unu l'ukporo l'iri l'ise; nkapfu-igara dọ unu iri l'ishii l'ukporo iri l'ishii.

⁶⁸Ephe rwua l'ulo Chipfu le Jierusalemu; o duru ndu bugbaa ishi l'onu-ulo l'onu-ulo wotaru iphe, shi phe l'obu nu g'e gude kpukwaa ulo Chileke ono g'o du g'oshi du.

⁶⁹Ephe meru g'ike phe beru woru mkpola-ododo, du ukporo unu ugbo esaa; l'unu iri l'ebo; l'ukporo iri; nu g'e dobe l'ulo eku, ee-gudeje jee ozi ono; bya anu mkpola-ochaa, du ukporo unu ugbo ukporo l'iri le nanu; l'unu ise; bya anufua uwe ndu-uke Chileke, du ukporo ise.

⁷⁰Ndu uke Chileke; me ndu Lívayi; me uphodu ndu ono; me ndu aguje ebvu; me ndu echeje onu-oguzo nche; me ndu anoduje eje ozi l'eze-ulo Chileke be buchaa le mkpukpu nkephe. Ndu Izurelu g'ephe ha bukwarupho le mkpukpu nkephe.

Ezura 3

Aakpukwa oru-ngweja Chileke

¹O rwua l'onwa k'esaa; ndu Izurelu tuko g'ephe ha gude obu lanu dzukobe le Jierusalemu. Teke ono be ndu Izurelu bukotawaa le mkpukpu eka ephe shigbaa.

²Tobudu iya bu; Jieshuwa, nwa Jiozadaku ephe l'unwunna iya, bu iya bu ndu-uke Chileke; me Zerubabelu, nwa Sheyalutiyelu ephe l'unwunna nkiya wulihu kpuaaha oru-ngweja Chileke ke Izurelu; k'ophu ephe e-gwe ngweja-akpo-oku l'eli iya; g'e deru iya lekwo-ekemu Mosisu, bu onye ke Chileke.

³Ephe kpua oru-ngweja ono l'eli eka e shi tuhawa okpa iya; kele ephe atsụ ndu ono, bu l'ali ono ebvu; bya egweeru Chipfu ngweja-akpo-oku l'eli iya; mbu ephe gwee ngweja ono l'utsu me l'uzenyashi.

⁴Ephe bokwapho Obo-Mkpù; bo o ya g'e deru iya lekwo; bya egwee ngweja-akpo-oku, eegweje mboku-mboku l'obo-iphe ono. Ngweja ono be ephe gweru ugbo ole, ekemu iya suru g'e gweje iya le mboku le mboku.

⁵E mechaa; ephe bya egweaha ngweja-akpo-oku ono, eegweje tekenteke ono; me ngweja, eegweje l'obo onwa-afufu; me ngweja ozo, eegweje l'obo-iphe e dobegbaaru Chipfu iche; mekwapho ophu onyemonye wotagbaaru iphe, o turu obu iya onyo nu Chipfu.

⁶E -shi le mboku mbu l'onwa k'esaa ono be ephe wataru egwe ngweja-akpo-oku anu Chipfu. Obenu l'e teke atudu okpa eze-ulo Chipfu teke ono.

Aakpukwa eze-ulo Chipfu

⁷Ephe woru okpoga nu ndu akpuje ulo; me ndu kapyinta; woru nri; me iphe-angungu; me manu nu ndu Sayidonu; me ndu Taya k'ophu ephe e-shi l'ubvu ubvu Lebanonu vufutaru phe oshi sida l'eze-enyimu; mbu vufutaru phe iya le Jiopa, bu iya bu ge Sayirosu, bu eze ndu Peshiya kweru g'ephe vuta.

⁸L'onwa k'ebo l'apha, kwe apha labo, ephe byarwutaru l'ulo Chileke le Jierusalemu be Zerubabelu, bu nwa Sheyalutiyelu; me Jieshuwa, bu nwa Jiozadaku ephe l'unwunna phe ndu ophuna, bu iya bu ndu-uke Chileke; me ndu Lívayi; mewaro ndu ono, e shi kpua le ndzu, bu ndu ono, lwaru Jierusalemu ono bya atuko g'ephe ha wata ozi ono.

Ɖphe hɔtagbaa ndu Lívayi, a -gbẹ lẹ ndu nɔwaru ƙpɔro apha kwaseru g'ephe buru ndu eleta ɛnya l'ozì, eeje l'eze-ulo Chipfu.

⁹Ɖ buru Jieshuwa yee oshilokpa iya; mẹ abubu iya; mẹ Kadumelu yee oshilokpa iya, bu unwu Jiuda bẹ bu ndu eleta ɛnya l'ozì, eeje l'ulo Chipfu; mękwapho oshilokpa Henadadu; mẹ ndu Lívayi, unwu phẹ unwoke mẹ abubu phẹ.

¹⁰Ndu akpu eze-ulo Chipfu ono tɔepho okpa iya; ndu-uke Chileke chita uwe uke phẹ yee; bya apagbaaru opu. Ndu Lívayi, bu unwu Asafu gudegbaa nkwa futa; ephe wata aja Chipfu ajaja l'uzo, Dévidi, bu eze ndu Ízurelu tɔru phẹ okpa iya.

¹¹Ebvú nɔdu ada; ephe tuko ekwe iya ekwekwe aja Chipfu ajaja; ekele iya ekele asuje: “Ɖ bu onye du ree. N-yemobu iya l'anoje jasú lẹ tuutuutu lẹ mimiimii l'ehu ndu Ízurelu.” Ndu ono g'ephe ha tuko tɔa oke uzu gude jaa Chipfu ajaja; kele a turu okpa ulo Chipfu.

¹²Ole ikpoto ndu-uke Chileke; mẹ ndu Lívayi; mẹ ndu-ishi l'ipfu; mbu ndu ono buwaa ogerenya ono, humahawaru ulo ke mbu pho bẹ rarú ekwa rashia ya ike g'ephe humaru g'aatu okpa ulo ono. Igwerigwe nɔdu aturo uzu ehu-utso atushi iya ike;

¹³k'ophu bu lẹ ndiphe ta amadu ophu bu uzu ehu-utso; ozo uzu-ekwa, ephe atu; kele uzu tukerupho swokobe atu ke wowoowoo; a nɔdu ɔzenya anugbaa ya.

Ezura 4

Ndu akposhi g'a ta kpu ulo Chileke

¹Noo ya; ndu ohogu ndu Jiuda yee ke ndu Benjaminu numaepto lẹ ndu ono, e shi kpua lẹ ndzu ono akpuwa eze-ulo Chipfu, bu Chileke ke Ízurelu;

²ephe byapfuta Zerúbabelu; mẹ ndu-ishi l'onu-ulo l'onu-ulo bya asu phẹ: “G'anyi tsonuru unu yeta eka kpua ulo ono; kele anyibedua abakwaru-a Chileke unu eja g'unubedua. Kele anyi shihawaa ɔzenya gweta ngweja anu iya. Anyi shiro lẹ teke Esahadonu bu eze ndu Asiriya; mbu onye ono, duru anyi lwa eka-a ono gweta ngweja obu.”

³Obenu lẹ Zerúbabelu; mẹ Jieshuwa; mẹ ndu ozo, bu ishi l'onu-ulo l'onu-ulo lẹ Ízurelu bẹ suru phẹ: “Ɖ tɔ dudu iphe, anyi l'unu jigba lẹ k'akpuru Chileke anyi ulo. Ɖo anyibedua nwekinyi anyi bẹ a-kpuru Chipfu, bu Chileke ke Ízurelu ulo gẹ Sayirosu, bu eze ndu Peshiya tu-buru iya anyi.”

⁴Ɖo ya bu; ndu ali ono mee ndu Jiu tsahaa ebvu; ephe tu-gbee eka l'akpu ulo ono.

⁵Ndu ono je ebukoo ndu mkpaka g'ephe bya akposhia iphe, ephe tɔberu k'ememe. Ephe shiepto teke Sayirosu, bu eze ndu Peshiya; kpakashita iphe, ephe eme gbiriri jasú lẹ teke Dariyosu bu eze ndu Peshiya.

⁶O be teke Kuzakusesu bataru l'aba-eze; ndu ohogu ono dee ekwo gude epfu iphe, ephe suru lẹ ndu bu lẹ mkpukpu Jiuda meru; mẹ ndu bu lẹ mkpukpu Jierusalemu.

⁷O be teke Atakuzakuzesu bu eze ndu Peshiya; Bishilamu; me Mituredatu; me Tabelu; waa ndu ozo, ephe l'ephe aswije; dee ekwo-ozu nu iya. Ekwo-ozu ono be e gude aka-ekwo ndu Aramu dee; o bukwarupho opfu-ali ndu Aramu be e gude dee ya.

⁸O buru Rehumu, bu nnajioha; yee Shimushayi, bu onye edeje ekwo be deru ekwo-ozu ono nu eze Atakuzakuzesu gude pfubyishia ndu Jierusalemu. Iphe, ephe deru l'ekwo-ozu ono bu:

⁹“Ekwo-ozu owa shi l'eka Rehumu, bu nnajioha; me Shimushayi, bu onye edeje ekwo; waa ndu ozo, ephe l'ephe aswije; mbu ndu-ikpe; me ndu eze; me ndu-ishi ndu Peshiya; me ndu-ishi ndu Ereku; me ndu-ishi ndu Babilonu; me ndu-ishi ndu Susa, bu iya bu ndu Elamu;

¹⁰newaro iphe, bu ohamoha ono, paru aka; bya enwegbaaru enya ono, bu ndu Osunapa chishiru; ephe je ebugbaaru le mkpukpu le mkpukpu, du le Sameriya; me l'eka ozo, duchaa l'azu enyimu.”

¹¹Waa iphe, e deru l'ime ekwo-ozu, ephe deru nu Atakuzakuzesu baa: “Ekwo-ozu-a be anyi ede anu gube eze Atakuzakuzesu. “Ndu ede iya nu bu ndu-ozu ngu; mbu anyibe ndu ono, bu l'azu enyimu:

¹²“Ge gube eze makwaru le ndu Jiu ono, bu ndu shi ngu l'eka lwapfuta anyi-a be jeshiwaru Jierusalemu. Ephe akpukwawa mkpukpu ono, ekwefuje ike; bya abukwarupho mkpukpu ejo-ememe ono. Ephe akpu-phuwa igbulu iya azu; atukwafuwa okpa iya.

¹³Iphe ozo bu ge gube eze makwaru l'a -kpuwa mkpukpu ono; kpu igbulu iya be ephe ta tubakwa utu ali ozo; me utu aswa; me utu uzo; shi nno mee g'uzo, okpoga shi erwu ndu eze aka rwuhu.

¹⁴Eshi ophu o bu l'ibe eze be anyi shi eri nri; teme ophu o dudu ree g'anyi huma aka eeme eze iphe-iphere meru iphe anyi ezi ozi g'eze maru;

¹⁵k'ophu bu l'e -nyochaa ekwo, nna unu phe deshuru iphe, meru nu; unu ahuma l'ime ekwo ono le mkpukpu-a bu mkpukpu ekwefuje ike; emejekwapho g'iphe tsu ndu eze l'ehu; me iphe, bukpoo ali-eze ali-eze; mbu l'ejo-ememe ono bukpowa iphe, ephe shi teke du enya meta. O buru iya meru iphe e mebyishuru mkpukpu ono.

¹⁶Anyi eme ge gube eze maru l'a -kpuwa mkpukpu ono; bya akpu igbulu iya be o to dudu iphe, byaru e-shikwadu l'azu enyimu erwu ngu aka ozo.”

¹⁷Eze bya eyee onu su: “Mu ekele Rehumu, bu nnajioha ekele; bya ekelekwapho Shimushayi, bu onye edeje ekwo; me ndu ono, bu ndu ephe l'ephe aswije ono, bu le Sameriya; me ndu ophu bu l'eka ozo, du iche iche l'azu enyimu azu iya ophu.

¹⁸“Ekwo-ozu, unu nuru anyi be a guwaru gbanwee l'ataphu mu.

¹⁹Mu bya atuwaa ekemu; a bya enyochawa huma le mkpukpu-a te emejedu iphe, ndu eze pfuru e -shi teke ndiche; me l'ephe ekwefuje ike; eme ge ndu ozo ta anodujeshi eme iphe, ndu eze pfuru.

²⁰Tẹmanu; lẹ Jierúsalemu shi nweru ndu eze, ọkpehu dọ; tẹme mkpukpu dọ igwerigwe shi nọdu phẹ l'ẹka l'azu ẹnyimu. E shi anọduje aturu phẹ utu alị; mẹ utu aswa; mẹ utu ọzo.

²¹Nta-a bọ g'unu tẹ ekemu sọ gẹ ndu ono te jehẹkwa ozi ono, ẹphe eje ono. G'ẹphe ta akpuekwa mkpukpu ono ọzo jasọ teke mu a-sọ g'a wata iya akpukpu.

²²Unu te ewekwa ozi ono gbẹgele gbẹgele; l'a taa ahakwa iphe, emebyi iphe g'o vu evuvu eje; shi nno emekata ndu eze.”

²³Tọbudu iya bọ; a guẹpho iphe ono, eze, bọ Atakuzakuzẹsu deru l'ẹkwo-ozi ono, o deru nọ Rehumu; mẹ Shimushayi, bọ onye edeje ẹkwo; mẹ ndu ẹphe l'ẹphe aswije ono; ẹphe mekebe ẹgwegwa jepfushia ndu Jiu ono, nọ lẹ Jierúsalemu ono; je ekebuta phẹ k'ike; g'ẹphe te ejehe ozi ono, ẹphe eje ono.

²⁴Noo ya; ozi ono, e gude l'ẹka eje l'ulo Chileke lẹ Jierúsalemu ono; kwaa g'o jeberu; ọphu e tee jehẹdu iya jeye o rwua l'apha, kwe Dariyosu, bọ eze ndu Peshiya apha labọ, ọ wataru aburu eze.

Ezura 5

Aakuphu eze-ulo Chileke azu lẹ Jierúsalemu

¹Tọbudu iya bọ; ndu mpfuchiru Chileke, bọ Hagayi yẹle Zekaraya nwa Ido bya awata epfu opfu Chileke nọaha ndu Jiu, bu lẹ Jierúsalemu; mẹ l'alị ndu Jiuda; mbọ l'ẹphe gude ẹpha Chileke kẹ ndu Ízurelu, pfuaharu phẹ iya.

²Ọo ya bọ; Zerúbabelu nwa Sheyalutiyẹlu; yẹle Jieshuwa, bọ nwa Jiozadaku wata akpu ulo Chileke ono; mbọ ulo ọphu dọ lẹ Jierúsalemu. Ndu mpfuchiru Chileke tsokwaru phẹ phọ eyetaru phẹ ẹka.

³Ọ bọru teke ono bẹ Tatenayi, bọ ọchi-ọha ndu bu l'azu ẹnyimu; mẹ Sheta-Bozenayi yẹle ndu ẹphe l'ẹphe aswije wu-pfutaru phẹ bya asọ phẹ: “? Bọ onye karu unu g'unu kpọ ulo-a dozia?”

⁴Ẹphe jikwaa phẹ phọ sọ: “? Bọ gunu bugbaa ẹpha ndu ono akpu ulo ono?”

⁵Ọle Chileke bẹ nwuberu ndu bọ ọgerenya ndu Jiu ono ẹnya; k'ọphu bọ lẹ ndu ono ta akpohiduru phẹ eje ozi, ẹphe eje; jeye teke opfu ono rwuru Dariyosu lẹ nchi; o dee ẹkwo-ozi nọ g'abya akarọ phẹ onu ya yeru lẹ k'opfu ono.

⁶Ọwaa bọ iphe, e deru l'ẹkwo-ozi ono, Tatenayi, bọ ọchi-ọha ndu bu l'azu ẹnyimu deru; yẹ Sheta-Bozenayi; mẹ ndu ẹphe l'ẹphe aswije, bọ ndu nọ l'oke-ọkwa, bu l'azu ẹnyimu; mbọ ẹkwo-ozi ono, ẹphe deru nọ eze Dariyosu.

⁷Ẹkwo-ozi ono, ẹphe deru nọ iya ono bẹ e deru sọ: Ẹkwo-ozi-a bẹ anyi ede anọ gube eze Dariyosu. Anyi ekele ngu ekele!

⁸Ọwaa bọ gẹ gube eze maru l'anyi jeru l'ẹka ndu Jiuda bu. Anyi jeshia l'ulo Chileke ono, bọ onye parọ ẹka ono; bya ahuma lẹ ndu ono gudewaa mkpuma, ha shii akpu ulo

ono; ẹphe zubechaa eze-itso l'ime igbulọ ono. Ẹphe yeru ẹhu l'ozi ono; ọ nọdu eje ẹgwegwa ẹgwegwa l'ẹka pẹ.

⁹Anyi jia ndu ọphu bu ọgerenya ndu Jiuda ono su pẹ: “? Bu onye karu g'unu kpua ulo ono dozia?”

¹⁰Anyi bya ajikwaa pẹ phọ ẹpha pẹ; k'ọphu anyi e-de ẹpha pẹ ono edede nu ngu g'i maru ndu-ishi ozi ono.

¹¹Ọwaa bu ọnu, ẹphe yeru anyi: “Anyi bu ndu-ozi ke Chileke, nwe igwe; nweru ali. Anyi akpukwa ulo ono, a kpuhawaru teke du ẹnya ono; mbu ulo, onye eze ndu Izurelu ono, paru ẹka apaa ono kpujeru kpu-tse ono.

¹²Ọ buru l'ọo le nna anyi pẹ kpatsuru Chileke k'imigwe ẹhu-eghu meru g'o gude o woru pẹ ye l'ẹka Nebukadineza, bu eze ndu Babilonu; mbu onye Kaludiya ono, bu iya mebyishiru ulo-a bya achita ndu ali-a chiru lashia Babilonu.

¹³Ọ buru iya bu l'o rwua l'apha, kwe Sayirosu, bu eze ndu Babilonu apha lanu, ọ wataru aburu eze; ọ tua ekemu; mbu eze, bu Sayirosu g'a kpukwaa ulo Chileke ono.

¹⁴Ivu, e meru le mkpola-ododo; me ndu ọphu e meru le mkpola-ochaa dobe l'ulo Chileke, bu iya bu ono, Nebukadineza gwetajeru l'eze-ulo ono, du le Jierusalemu je edobe l'eze-ulo agwa ndu Babilonu be bu eze bu Sayirosu ono l'onwiya jeru egweta iya l'eze-ulo agwa ndu Babilonu ono. Eze Sayirosu gweru ivu ono ye l'ẹka onye eekuje Sheshubaza; onye o meru ọchi-ọha;

¹⁵bya asu iya: ‘Gweta ivu-a gweru je edobe l'eze-ulo, du le Jierusalemu. Ozo bu g'a kpukwaa ulo Chileke g'ọ nọdu-phu azu l'ẹka onohawa.’

¹⁶Nokwa iya bu le Sheshubaza abya atua ọkpa ulo Chileke le Jierusalemu. Eshi teke ono bya eye nta-a be e shi kputa iya; ọphu a kpu-gheduru iya.”

¹⁷“Oo ya bu; ọ -buru l'ọ du gube eze ree; i haa g'a vochaada ulo ẹka aakwakobeje iphe ndu eze deru le Babilonu l'ẹka ono g'a maru; ? bua eviya l'eze, bu Sayirosu turu ekemu su g'a kpukwaa ulo Chileke, le Jierusalemu. Ge gube eze ezilatakwanuru anyi iphe, i chi-taru l'idzu l'obu ngu l'opfu-a.”

Ezura 6

A choru ekemu, eze, bu Sayirosu turu chota

¹Tobudu iya bu; eze, bu Dariyosu bya atua ekemu; e tsoru ulo ẹka akwakobeje iphe vochaaha le Babilonu; mbu ẹka a kuberu ekwo, e deshuru iphe, meru l'ali ono.

²Ọ buru le mkpukpu Ekubatana, bu ishi mkpukpu ndu Midiya be a vofutaru ekwo, a phuru aphuphu. Iphe, e deru l'ekwo ono be suru:

³“L'apha ke mbu, Sayirosu wataru abu eze be ọ turu ekemu g'a kpua ulo Chileke ono, du le Jierusalemu; su g'a kpukwaa ulo ono, bu ẹka aanoduje egwe ngweja; mbu g'a tukwaa ọkpa iya atukwa. G'oo-habe l'eli aburu ntu-ọkpa ukporo ẹno l'iri; mgbureku iya adu ntu-ọkpa ukporo ẹno l'iri.

⁴Aakpopfube iya mkpuma, ha shii uzi ẹto; aapfube iya itso lanu. Uḡwo iya bẹ ee-shi l'ulo ẹku ndu eze pfa.

⁵Ozo bu; ivu, e meru le mkpola-ododo; me ke mkpola-ochaa, bu ophu Nebukadineza shi l'eze-ulo ono, du le Jierusalemu ono gweta je edobe le Babilonu; g'e gwetakota iya je edobephu azu l'eka o shi du l'eze-ulo ono.

⁶“Oo ya bu ge gube Tatenayi, bu ochi-oha l'azu enyimu; me Sheta-Bozenayi; me ndu unu l'ephe aswije, bu ndu no l'oke-okwa toko g'unu ha buru ubara yeru eka ono.

⁷Ba adukwa g'unu ha onye e-je akposhi ozi ono, eeje l'ulo Chileke ono. Unu haa g'ochi-oha ndu Jiu; me ndu bu ogerenya ndu Jiu kpukwaa ulo Chileke ono g'o pfuru l'onodu iya.

⁸Ozo bu le mu atu ekemu iphe, unu e-meru ndu bu ogerenya ndu Jiu ono g'ephe gude kpukwaa ulo Chileke ono su: G'a pfu-dzukotaje ndu ono ugwo, ephe gude eme k'ulo ono rengurengu. Eka ee-shi pfa phe iya bu l'ulo ẹku ndu eze; mbu shita l'utu, ndu bu l'azu enyimu turu; oo ya bu g'o to du iphe, a-kposhi ozi ono akposhi.

⁹Iphe, bu iphe, mkpa iya duru phe; g'a nujekwa phe iya; du g'unwu oke-eswi; me ebili; m'o bu nwaturu, ee-gude egwe ngweja-akpo-oku nu Chileke k'imigwe; me witi; me unu; me mee; me manu; mbu egube ono, ndu-uke Chileke le Jierusalemu sukpoerupho g'a nu phe be aa-nukotajekwa phe mboku-mboku; g'a ba hakwa phe iya anunu;

¹⁰k'ophu ephe e-gwe ngweja, du ree nu Chileke k'imigwe; pfukwarupho nu iya g'o kebe eze l'oma; yee unwu iya.

¹¹“Ozo bu le mu atukwapho ekemu su l'onye gbanweru opfu mu ono be aa-phota itso, gude ulo iya nanu; gude tsebe onye obu etsebe; teme l'e mee ulo iya obu g'o buru ikpozu.

¹²Ge Chileke ono, bu iya hotaru eka ono g'o buru eka oo-buru eburu ono mebyikwaa iphe, bu ndu eze; waa iphe, bu ndu e-me g'ephe gbanwee opfu-a; ozoo machia eka g'ephe mebyia ulo Chileke-a, du le Jierusalemu. Oo mbedua, bu eze, bu Dariyosu be turu ekemu-a. G'unu doo enya le mini mee iphe, ekemu-a pfuru.”

Eeye eze-ulo Chileke ono l'eka Chileke

¹³Tobudu iya bu; Tatenayi, bu ochi-oha l'azu enyimu; me Sheta-Bozenayi; me ndu ephe l'ephe aswije; bya emee iphe ono, eze, bu Dariyosu suru g'e mee ono egwegwa.

¹⁴Oo ya bu; ndu bu ogerenya ndu Jiu ono nodu akpu ulo ono eje l'iphu l'iphu shita l'opfu Chileke, Hagayi, bu onye mpfuchiru Chileke yele Zekaraya, bu nwa Ido epfu. Ephe kpa ulo ono jasu ephe kpu-ghee ya o du ge Chileke ke Izurelu suru g'ephe kpa ya g'o du; me l'uzo Sayirosu; me Dariyosu; me Atakuzakuzesu, bu ndu eze Peshiya turu phe ekemu iya.

¹⁵Ephe kpa ulo ono kpu-ghee l'abalı k'eto l'ime onwa Ada; l'apha, kwe eze Dariyosu apha ishii, o waturu aburu eze.

¹⁶Tobudu iya bu; ndu Ízurelu; mbu ndu-uke Chileke; me ndu Lívayi; mewaro ndu ono, e shi kpua le ndzu ono tuko g'ephe ha gude ehu-utso, bo iphe; woru ulo ono ye Chileke l'eka.

¹⁷Ephe gude ukporo oke-eswi ise; me ukporo ebili iri; me unu unwu aturu gwee ngweja, ephe gude yee ulo Chileke ono l'eka Chileke. Ephe gude mkpi iri l'ebo gwee ngweja-iphe-eji l'iswi ehu ndu Ízurelu l'ophu. Mkpi iri l'ebo ono no-chiru enya ipfu iri l'ebo, Ízurelu nweru.

¹⁸Ephe bya edobe ndu-uke Chileke l'ogiri l'ogiri; dobe ndu Lívayi l'ogbo l'ogbo phe g'ephe a-nodu eje ozi Chileke le Jierúsalemu; egube e deru iya l'ekwo Mosisu.

Obo Ojehata

¹⁹O rwua l'abali k'iri l'eno l'ime onwa mbu; ndu ono, e shi kpua le ndzu ono bo obo Ojehata.

²⁰Ndu uke Chileke; me ndu Lívayi be a sachakotaru; ephe tuko g'ephe ha buru ndu mmerwu adudu l'ehu. Ndu Lívayi gbua nwaturu obo Oje-aghata l'iswi ehu ndu ono, e shi kpua le ndzu ono; bya egbudoru iya unwunna phe ono, bu ndu-uke Chileke; bya egbudokwaru iya pho onwophe.

²¹Oo ya bu; ndu Ízurelu ono, e shi kpua le ndzu ono, lwaru nu ono tuko ria ya; mewaro ndu ono, woru onwophe dobe iche l'urwuali ono, ndu ta amadu Chileke l'ali ono emegbabe; shi nno abaru Chipfu, bu Chileke ke Ízurelu eja.

²²Abali esaa be ephe gude ehu-utso bo Obo-iphe aataje buredi ekoduru ekoko; kele Chipfu be meru g'ehu tso phe utso shii; bya emee g'eze ndu Asiriya kporu obu yeru phe; k'ophu bu l'o meru g'eka shihu phe ike l'akpu ulo Chileke ono, bu Chileke ke Ízurelu.

Ezura 7

Ndu Ezura du Iwa Jierúsalemu

¹Tobudu iya bu; abya anoo gbiriri jeye teke Atakuzakuzesu wataru abu eze ndu Peshiya; Ezura gbalihu alala. Ezura ono bu nwa Seraya; Seraya buru nwa Azariya; Azariya buru nwa Hilikaya;

²Hilikaya buru nwa Shalumu; Shalumu buru nwa Zadoku; Zadoku buru nwa Ahitubu;

³Ahitubu buru nwa Amaraya; Amariya buru nwa Azariya; Azariya buru nwa Merayotu;

⁴Merayotu buru nwa Zerahaya; Zerahaya buru nwa Uzi; Uzi buru nwa Buki;

⁵Buki buru nwa Abishuwa; Abishuwa buru nwa Finehasu; Finehasu buru nwa Eleyaza; Eleyaza buru nwa Eronu. Eronu buru onye-ishi ndu-uke Chileke.

⁶O buru Ezura ono gbalihuru shi le Babilonu lwatashia. Ezura ono bu onye ede ekwo; bya aburu onye k'ekemu Mosisu doru enya rengurengu; mbu ekemu, Chipfu, bu

Chileke ke Ízurelu turu. Eze mekotaru iya iphemiphe, o rworu iya g'o meeru iya; kele eka Chipfu, bu Chileke iya du iya l'ehu.

⁷O dukwarupho ndu Ízurelu, lwakwarupho Jierúsalemu teke ono; mbu l'apha, kwe eze, bu Atakuzakuzesu apha esaa, o wataru aburu eze. Ndu uke Chileke hakwarupho yiru iya; me ndu Lívayi; me ndu aguje ebvu; me ndu echeje onu-oguzo nche; me ndu eje ozi l'eze-ulo Chileke.

⁸Ezura l'onwiya be jerwuru Jierúsalemu l'onwa k'ise, bukwapho apha, kwe eze apha esaa l'abu eze iya.

⁹O shi le Babilonu gbeshi ije iya g'onwa mbu du l'abali mbu; rwua Jierúsalemu g'onwa ise du l'abali mbu; noo kele eka-oma ke Chipfu, bu Chileke iya be du iya l'ehu.

¹⁰Noo kele Ezura be ziberu obu iya g'o nwuta ekemu Chipfu; mekwapho iphe, o pfuru; me g'o zia iphe, Chipfu toru okpa iya; me nsọ iya l'ali Ízurelu.

Ekwo-ozí, eze, bu Atakuzakuzesu deru nu Ezura

¹¹Owaa bu iphe, e deru l'ekwo-ozí, eze, bu Atakuzakuzesu nuru Ezura, bu onye uke Chileke; buru onye edeje ekwo; mbu onye iphe, Chipfu turu l'ekemu; me iphe, o toru ndu Ízurelu okpa iya doru enya:

¹²“Ekwo-ozí-a be shi l'eka mube eze, bu Atakuzakuzesu, bu onye eze ka ndu eze. Onye mu ede iya anu bu Ezura, bu onye uke Chileke; buru onye edeje ekwo k'ekemu Chileke k'imigwe. “Mu ekele ngu ekele.

¹³“Mu turu ekemu dee ya edede su l'iphe, bu onye Ízurelu, no l'ali-eze mu; mekpoo ndu-uke Chileke; me ndu Lívayi, bu onye oogu ala Jierúsalemu; g'onye obu tsokwaru ngu lashia.

¹⁴Mube eze; me umadzu esaa, l'agbazijeru mu idzu be ezi unu g'unu je amaru g'onodu du le Jiuda; me le Jierúsalemu; unu amaru g'e gude emebe ekemu Chileke unu l'eka ono, bu iya bu ekemu ono, no unu l'eka ono.

¹⁵Iphe ozo, unu e-mefua bu g'unu chita mkpola-ochaa; me mkpola-ododo ono, mube eze; me ndu ono, agbazijeru mu idzu ono gude obu anyi nu Chileke ke Ízurelu; bu onye ono, bu ebubu le Jierúsalemu.

¹⁶Unu achitafua mkpola-ochaa; me mkpola-ododo, unu a-nata le Babilonu l'ophu yekobe iya; mefua iphe ndu Ízurelu; me ndu-uke Chileke e-gude obu phe nu g'e gude mee k'ulo Chileke phe obu le Jierúsalemu.

¹⁷“Unu huma l'unu gundefutaje okpoga ono zuta oke-eswi; me ebili; me nwaturu, unu e-gude gwee ngweja; yele ngweja-nri, etsoje iya nu; me ngweja iphe-angungu, l'etsojekwa iya pho. Unu e-gwe ngweja ono l'eli enya eka eegweje ngweja l'ulo Chileke unu le Jierúsalemu.

¹⁸A bya le mkpola-ochaa; me mkpola-ododo ophu phoduru nu; ge gube Ezura; me ndu Jiu ophuna gude iya mee iphe, du unu ree l'uzo, o bu uche Chileke unu.

¹⁹Iphemiphe, a nʉkotaru unu g'unu gude jeje ozi l'ulo Chileke unu ono be unu e-gweshikota dobe l'iphu Chileke le Jierusalemu.

²⁰Iphe ozo, du unu mkpa, bu iphe unu ee-gude eme k'ulo Chileke unu ono; o -buru iphe, unu nufutaje; unu eshi l'ulo eku eze wota iya nu.

²¹“Nta be mbɛdua, bu eze Atakuzakuzesu atu ekemu ede iya edede anu iphe, bu ndu akwakobeje okpoga l'azu enyimu azu iya ophuu su: Iphe, bu iphe Ezura, bu onye uke Chileke; bya aburu onye edeje ekwo k'ekemu Chileke k'imigwe suru g'unu nu iya; unu nujekwa iya iphe o bu.

²²Je akpaa l'okpoga mkpola-ochaa, du ukporo ise; me ogbongu witi, du ukporo ise; me ite-mee, du ukporo ise; me ekpemu manu, du ukporo ise; me unu; ole unu b'a ta sudu l'o waa g'oo-jeberu.

²³Iphe, Chileke k'imigwe turu l'ekemu; g'e mekwaa ya rengurengu; mbu iphe, a turu l'ekemu g'e mee l'ulo Chileke k'imigwe; a -nonyanu oke ehu-eghu iya dafuta ali-eze iya; yee k'unwu iya.

²⁴Ozo bu l'anyi emekwapho g'o doo unu enya l'a dachiwaru unu anata utu-ali; me utu-aswa; me utu-uzo l'eka ndu-uke Chileke; me l'eka ndu Livayi; me l'eka ndu aguje ebvu; me l'eka ndu echeje onu-oguzo nche; me l'eka ndu eje ozi l'eze-ulo Chileke; me l'eka ndu ozo, ejekpo ozi l'ulo Chileke.

²⁵“Ge gube Ezura gude mmamiphe, Chileke ngu nuru ngu gude hota ndu-ikpe; me ndu a-noduje edoshi opfu g'ephe kpeje ikpe, pfuru oto l'opfu ehu iphe, bukpo ndu bu l'azu enyimu; mbu iphe, bukpo ndu maru ekemu Chileke ngu. Unu eworu ekemu ono zia ndu amadu ekemu g'ephe maru iya.

²⁶Iphe, bu onye jikaru eme iphe, ekemu Chileke ngu pfuru; me iphe, ekemu eze pfuru; g'e kpee onye obu ikpe, shihuru ike; g'e kpee ya mpfugbu; ozoo l'achifu onye obu achifu; ozoo l'e gweta iphe, o nweru; ozoo l'a tua ya mkporo.”

Ezura etu Chileke epha

²⁷G'ajaja buru ke Chipfu; mbu Chileke ke nna anyi phe; onye meru g'egube iphe owa du eze l'obu ke g'o mee g'ulo Chipfu ono, du le Jierusalemu buru eka du ubvu.

²⁸Yebe onye meru ge n-yemobu eze; me ke ndu anoduje agbaziru eze idzu rwube mu eka; me n-yemobu ke ndu bukpo ndu ike du, bu ndu-ozu eze. Obu be shihuru mu ike shii; noo kele eka Chileke be du mu l'ehu. O buru iya meru g'o gude mu du ike chikota ndu-ishi le Izurelu; ephe tsoru mu; anyi lashia.

Ezura 8

Epha ndu epha le Ezura swi lwa

¹Owaa bu epha ndu bugbaa ishi l'onu-ulo nna phe; temanu owa-a buru ekwo, e deshuru epha phe g'e gude nwua phe; mbu ndu ono, mu l'ephe shi le Babilonu swiru lwa teke Atakuzakuzesu bu eze:

²Onye-ishi ndu oshilokpa Finehasu bu Geshomu. Onye-ishi ndu oshilokpa Itama buru Danelu. Onye-ishi ndu Nwa Dévidi buru Hatushi,

³bu nwa Shekanaya. Onye-ishi ndu oshilokpa Paroshi bu Zekaraya. Ndu ephe l'iya swi, bukwanu ndu e deru l'ekwo, e deshuru g'e gude nwua phe du unwoke ukporo esaa l'iri.

⁴Onye-ishi ndu oshilokpa Pahatu-Mowabu bu Eliyowenayi nwa Zerahaya. Ndu ephe l'iya swi du unwoke ukporo iri.

⁵Onye-ishi ndu oshilokpa Zatu bu Shekanaya nwa Jiahaziyele. Ndu ephe l'iya swi du unwoke ukporo iri l'ise.

⁶Onye-ishi ndu oshilokpa Adinu bu Ebedu nwa Jionatanu. Ndu ephe l'iya swi du unwoke ukporo labo l'iri.

⁷Onye-ishi ndu oshilokpa Elamu bu Jieshaya nwa Atalaya. Ndu ephe l'iya swi du unwoke ukporo eto l'iri.

⁸Onye-ishi ndu oshilokpa Shefataya bu Zebadaya nwa Mayikelu. Ndu ephe l'iya swi du unwoke ukporo eno.

⁹Onye-ishi ndu oshilokpa Jiowabu bu Obedaya nwa Jiehiyele. Ndu ephe l'iya swi du unwoke ukporo iri l'unwoke iri l'esato.

¹⁰Onye-ishi ndu oshilokpa Bani bu Shelomiti nwa Jiosifaya. Ndu ephe l'iya swi du unwoke ukporo esato.

¹¹Onye-ishi ndu oshilokpa Bebaya bu Zekaraya nwa Bebaya. Ndu ephe l'iya swi du unwoke ukporo l'esato.

¹²Onye-ishi ndu oshilokpa Azugadu bu Jiohananu nwa Hakatanu. Ndu ephe l'iya swi du unwoke ukporo ise l'unwoke iri.

¹³Onye-ishi ndu oshilokpa Adonikamu be bu phe byakpechaaru azu. Epha phe bu Elifeletu; me Jiyuwelu; me Shemaya. Ndu ephe l'ephe swi du unwoke ukporo eto.

¹⁴Onye-ishi ndu shilokpa Biguvayi bu Utayi; me Zaku. Ndu ephe l'ephe swi du unwoke ukporo eto l'unwoke iri.

Əzura Achə ndu a-nədu eje ozi l'eze ɯlo Chileke

¹⁵Mu bya achikobe phe l'aguga enyimu ono, l'aso ala Ahava. Anyi kpobe ɯlo-ekwa anyi l'eka ono noo ujiku eto. Mu bya elekota enya le ndu ono g'ephe ha; me ndu-uke Chileke; huma l'o to dudu m'onye Lívayi, no l'eka ono.

¹⁶Tobudu iya bu; mu zia g'e je ekua Eliyéza; me Ariyele; me Shemaya; me Elunatanu; me Jiaribu; me Elunatanu; me Nétanu; me Zekaraya; me Meshulamu, bu ndu-ishi. Mu kukwapho Jioyaribu; me Elunatanu, bu ndu iphe edoje enya.

17Ọ bụru Ido, bụ onye-ishi phẹ lẹ mkpukpu Kasifiya bẹ mu ziru phẹ g'ephe jepfu. Mu karu phẹ iphe, ephe e-pfuru Ido; mę ndu nkiya phẹ; mbu ndu ono, l'ije ozi l'eze-ulo, du lẹ Kasifiya l'eka ono; g'ephe zia ndu a-byapfuta anyi bya eje ozi l'ulo Chileke anyi.

18Ọ bụru l'oo lẹ Chileke doberu anyi eka oma iya l'ehu meru g'o gude ephe dutaru anyi onye iphe edoje enya; mbu oshilokpa Mahuli, epha iya bu Sherebaya. Mahuli bu nwa Lívayi; Lívayi bụru nwa ke Ízurelu. Unwu Sherabaya; mę ndibe phẹ bẹ du iri l'esato.

19Ndu ozo bu Hashabaya; mę Jieshaya, bu oshilokpa Merari. Ndibe phẹ mę unwune iya k'unwoke bẹ du ukporo.

20Ndu ozo, ephe dutafuru lẹ ndu eje ozi l'eze-ulo ono du ukporo iri lẹ nanu. Ndu ono bu ndu Dévidi; yele ndu-ishi ozi iya hotaru g'ephe yetajeru ndu Lívayi eka. Ndu ono g'ephe ha bẹ e deshikotaru epha phẹ l'ekwo.

Aswi egu epfu anu Chileke

21Tobudu iya bu; mu bya araa ya arara su g'a swia egu l'eka ono; mbu l'enyimu Ahava ono. K'ophu anyi e-shi nno wozeta onwanyi ali l'ataphu Chileke anyi; rwo ya g'o duru anyi l'unwegirima anyi; mę ivu anyi shia uzo ophu ka ree.

22Kele iphere du mu ke ge mu jepfu eze je arwo ya g'o yeru anyi ikpoto ndu ojogu; mę ndu agba l'inya g'ephe dua anyi l'uzo m'obvu ndu ohogu. Eshi ophu anyi gudewaa onu anyi su eze: “Eka-oma Chileke anyi bẹ aduje l'ehu ndu bukpo, ndu achọ iya nu g'ee-shi g'o duru phẹ lẹ ree. Ole okpehu iya; mę oke ehu-eghu iya bẹ aduje l'ehu iphemiphe bu ndu jikaru iya nu.”

23Oo ya bu; anyi swia egu rwo Chileke anyi k'iphe ono. O meeru anyi iphe, anyi suru g'o meeru anyi.

Iphe, a nuru g'e gude mee iphe l'eze-ulo Chileke

24Tobudu iya bu; mu woru umadzu iri l'ebo pho, bu ndu-ishi ndu-ishi-uke Chileke dobe iche; mbu Sherebaya; mę Hashabaya; mewaro ndibe phẹ umadzu iri ophuna.

25Mu bya atukota erwa mkpola-ochaa; mę mkpola-ododo; mę ivu; mekpoo iphemiphe, ndu eze; mę ndu-uke Chileke; mę ndu l'agbazijeru eze idzu; mę ndu o meru ishi; mę ndu Ízurelu l'ophu, no l'eka ono nuru g'e gude eje ozi l'ulo Chileke.

26Mu tua erwa iphe ono goshi phẹ. Iphe, erwa mkpola-ochaa du buri unu talentu l'ukporo talentu iri l'ebo lẹ talentu iri; ivu, e meru lẹ mkpola-ochaa bẹ erwa iya du ukporo talentu ise. Erwa ke mkpola-ododo du ukporo talentu ise.

27Iphe ozo bu gbamugbamu, e meru lẹ mkpola-ododo, dataru unu dariku labo l'ukporo iri; mę ivu labo, e meru l'okpobe onyirubvu, eke ododo ododo, vukwapho onu aswa ge ke mkpola-ododo.

28Mu su phẹ: Unu duru Chipfu nsọ; onokwapho g'ivu-a g'o ha dukotaru iya nsọ bu ono. Mkpola-ochaa; mę mkpola-ododo ono bu iphe, ndiphe turu obu phẹ onyo nu Chipfu, bu Chileke ke nna unu phẹ.

²⁹Unu letakwa phe ɛnya ree jeye teke unu a-tu ɛrwa iya l'atatiphu ndu-ishi ndu-uke Chileke; me ndu-ishi ndu Lívayi; me ndu-ishi l'ɔnu-ulo nna phe le Ízurelu. O buru l'ime mkpuru, duchaa l'ulo Chileke le Jierúsalemu be unu a-nodu tua ɛrwa iphe ono goshi phe.

³⁰Oo ya bu; ndu-uke Chileke chita mkpola-ochaa ono; me mkpola-ododo ono; me ivu ono, a tuwaru ɛrwa iya atutu ono; gude jeshia l'ulo Chileke anyi le Jierúsalemu.

³¹Tɔbudu iya bu; o rwua g'onwa mbu du l'abali iri l'ɛbo; anyi shi l'enyimu Ahava gbalihu jeshia Jierúsalemu. Eka Chileke anyi du anyi l'ɛhu; o shi nno nafuta anyi l'eka ndu ohogu; me l'eka ndu ana nfu, kwakachaa anyi l'uzo.

³²Anyi rwua Jierúsalemu bya anoo ujiku ɛto l'eka ono.

³³O be mboku k'eno iya; anyi nodu l'ulo Chileke tua ɛrwa mkpola-ochaa; me mkpola-ododo; me ivu ozo, du nsɔ; woru ye l'eka Meremotu, bu nwa Uraya, bu onye uke Chileke. Eleyaza nwa Finehasu be yee ya nogbabe. Ndu tso phe nodu l'eka ono bu ndu Lívayi; me Jiozabadu nwa Jieshuwa; me Nowadaya nwa Binuyi.

³⁴Iphemiphe ono be a guru ogo; tua ɛrwa iya atutu; bya edeshikota ɛrwa iya ono l'ekwo teke ono.

³⁵Ozo bu le ndu ono, e shi kpua le ndzu ono; mbu ndu ono, shi l'eka ono, e shi kpua phe le ndzu lwa ono be gweru ngweja-akpo-oku nu Chileke ke Ízurelu. Epe gburu oke-eswi iri l'ɛbo l'ɛhu ndu Ízurelu l'ophu; gbua ebili ukporo eno l'iri l'ishii; me unwu aturu ukporo ɛto l'iri l'esaa; bya egbua mkpi iri l'ɛbo, e gude gwee ngweja-iphe-eji. Ngweja ono g'o ha be a kpokotaru oku nu Chipfu.

³⁶Epe zia ozi ono, eze ziru ndu no-chiru ɛnya eze; me ndu bu ochi-oha; lazɔ enyimu azu iya ophu. Ndu ono bya eyeru ndu Jiu ono eka; yetakwapho eka l'akpu ulo Chileke ono.

Ezura 9

Ezura epfu anu Chileke ke ndu Jiu, alu nwanyi eghirigha

¹E mechaepho iphemiphe ono; ndu-ishi byapfutashia mu bya asu mu: “Ndu Ízurelu je akpaa le ndu-uke Chileke; me ndu Lívayi be jikakwaru edobe onwophe iche l'eka ndu ali-a no; epe tsoakwaru eyephe eka l'akpamara, ndu ali-a l'anoduje emegbabe; mbu ndu Kėnanu; me ndu Hetu; me ndu Pėrezu; me Jiebusu; me ndu Amonu; me ndu Mówabu; me ndu Ijiputu; me ndu Amoru.

²Epe watawaru aluta unwada ndu ali-a k'onwophe; bya alutakwaru phe pho unwu phe; k'ophu bu le ndu ono, du nsɔ ono be watawaru onwophe tugbabe l'ɛhu ndu ali-a. O buru ndu-ishi; me iphe, bu ndu no l'oke okwa be eka phe kangoru l'eme ejo-iphe ono.”

³Mu numaeppo iphe ono; mu lajashia uwe mu; lajashia uwe mgbalanu mu; mu pheta onwomu egbushi l'ishi; pheta eji l'agba; bya anoo-zeta anoo; edzu nodu eswi mu l'ɛhu.

⁴Tɔbudu iya bɔ; iphe, bɔkpoo ndu ndzɔ gɔhuru l'ɛka ɛphe nɔmaru opfu, o pfuru mbɔ Chileke kɛ Ízurelu lɛ k'emeswe ono, ndu ono, a kpuru lɛ ndzɔ phɔ, lwaru nɔ phɔ mesweru ono; bya egbuphe mu mgburugburu; mu nɔdu gɛ mu nɔ jeye teke eegweje ɛja ɔzenyashi; ɛdzu nɔdu eswiɛ mu phɔ l'ɛhu.

⁵O beɛpho l'egwe ɛja ɔzenyashi ono; mu shi l'ɛnyoru, mu gwɔru gbalihu; yɛle uwe mu phɔ, mu lajashiru phɔ; mɛ uwe mgbalanu mu phɔ, mu lajashiru phɔ; bya ephureta gbushi ikpere l'alɔ chiliaru Chipfu, bɔ Chileke mu ɛka mu labɔ imeli;

⁶pfuru nɔ iya sɔ: “Gɔbe Chileke nkemu; iphere dɔ mu; tɛme ɛhu rwuhukwa mu phɔ gɛ mu e-shi palia ɛnya lee gɔbe Chileke mu; iphe, kparu iya nɔ buru l'ɛjo-iphe, anyi eme bɛ kawa anyi l'eli; tɛmanu ikpe, nmaru anyi rwuwaa imigwe.

⁷E -shi teke nna anyi phɛ nɔ; rwua ntanu-a bɛ ikpe, paru ɛka nmaakwaru anyi. O buru ɛjo-iphe, anyi emegbabɛ bɛ meru g'o gude e woru anyibedua; mɛ ndu eze anyi phɛ; mɛ ndu-uke Chileke anyi phɛ ye ndu eze ndu alɔ-a l'ɛka ɛphe gude ogu-echi gbushia anyi; kpukoo anyi lɛ ndzɔ; kwaa iphe anyi l'ɔkwata; ɛphe nɔdu eme anyi iphe-iphere ɛgube ono, ɛphe eme iya anyi ntanu-a.

⁸Ole kɛ nwanta bɛ gɔbe Chipfu, bɔ Chileke mewaru anyi iphe-ɔma; kɛle i meru anyi nweru nwa ndu ɔphu, phɔduru nɔ; bya emee g'anyi nguru anguru l'ɛka-a, duru ngu nsɔ-a; k'ɔphu bɔ lɛ gɔbe Chileke anyi e-me g'ɛnya sahu anyi; bya emekwaphɔ g'anyi shi l'abu ohu, anyi bɔ-a jakerehu.

⁹Anyi shi buru ndu ohu; ɔle gɔbe Chileke ta ahaduru anyi g'anyi kwawarɔo ya l'abu ohu ono. I goshiru l'iphuru anyi obu-imemini l'atatiphu ndu eze ndu Peshiya; i meru anyi jakerehu; shi nno mee g'anyi kpukwaaru gɔbe Chileke anyi ɔlo ngu; mɛ g'anyi kpukwachaa ɛka o mebyishihuru; tɛme i mee g'anyi nweru igbulɔ lɛ Jiuda mɛ lɛ Jierusalemu.

¹⁰“Gɔbe Chileke anyi; ? bɔ gɔnu bɛ anyi e-pfu mɛ e -mechaa; kɛle anyi gwɔbewaru eme ekemu ngu ono.

¹¹Mbɔ ekemu ono, i tɔru shita l'ɛka ndu-ozɔ ngu ono, bɔ ndu mpfuchiru sɔ: ‘Alɔ ono, unu eje eburu ono bɛ bɔ alɔ, ndu bu iya nɔ pharwushiru apharwushi. O buru akpamara, ɛphe eme; yɛle ahuma ahuma bɛ jiru alɔ ono shita l'ishi iya lanu rwua l'ishi iya ɔphuu.

¹²Oo ya bɔ; g'unu b'e wokwaru unwada unu kee unwu phɛ unwoke; ɔphu unu alutakwa unwada nkepɛ duru nɔ unwu unu unwoke. Unu l'ɛphe ba anɔdukwa lɛ nchi-adu-doo; ɔzoo g'unu chɔo iphe a-nɔdu ejehuru phɛ nɔ; k'ɔphu unu e-shihu ike; ria iphe-ɔma, shi l'alɔ ono; unu eme g'ɔ buru okiphe unwu unu jasuru l'ojejoje ono.’

¹³Iphe, nwuru anyi buru l'ɛjo-iphe, anyi meru; mɛ l'ikpe, nmaru anyi ono bɛ o shi. Ole iphe, dɔ ɛji, anyi meru bɛ ka shii eme l'ahuhu gɔbe Chileke anyi huru anyi; tɛmanu i mee g'anyi nweru nwa ndu ɔwana, phɔduru nɔ-a.

¹⁴? O gbaru g'anyi mebyibaa ekemu ngu ọzo; ke g'anyi le ndu ono, eme akpamara ono kegbajeru nwanyi ọzo? ? Anyi te emedu ehu eghua ngu eghu ghumihu k'ophu ii-me anyi alakota l'iyi k'ophu o to duedu onye aphodu nu; ophu o duedu onye anahu nu?

¹⁵Gube Chipfu, bu Chileke ke Izurelu; i bu onye pfuberekoto; kele anyi nweru nwa ndu ophu phoduru nu ntanu-a; mbu nwa ndu ophu nahuru nu. Huma g'anyi pfuru l'iphu ngu buru ndu-ikpe nmaru; mbu l'o meru ophu o to dudu onye a-du ike pfuru l'ataphu ngu.”

Ezura 10

Ndu Jiu akoshiru Chileke iphe-aji phe

¹Ge Ezura epfu anu Chileke; akoshiru Chileke iphe, du eji, ephe megbaberu; ara ekwa; echi onwiya gbaagbaa l'ali l'ataphu ulo Chileke; ndu Izurelu zefuta igwerigwe wu-pfuta iya; unwoke; me unwanyi; me unwegirima; ephebedua nodu arakwapho ekwa nkephe arashi iya ike.

²Shekanaya, bu nwa Jiehiyelu; onye lanu l'ime ndu shi l'eri Elamu bya epfuru nu Ezura su iya: “Anyi meakwaru ge Chileke anyi te egudehe ire anyi eka; noo kele anyi jeru je alushia unwanyi ndu ohozo; mbu unwanyi ndu ali-a. Oke g'o duhabe be ndu Izurelu dulekwarua iphe, ephe a-nodu ele enya iya.

³Oo ya bu; g'anyi le Chileke anyi gbanaa ndzu; l'anyi l'a-chishikota unwanyi ono, anyi lushiru ono; me unwegirima, ephe nwushiru, bu iya bu egube ono nnajiuphu mu chiru idzu iya; me ndu ono, anoduje atsu ekemu Chileke anyi ebvu ono. Ozo bu l'anyi e-me iya g'ekemu pfuru.

⁴Gbalihu; o kwa ngu be opfu-a du l'eka; anyibedua be aa-pfukwaru ngu-a l'azu. Shihu obu ike mee ya.”

⁵Oo ya bu; Ezura gbalihu; bya emee ge ndu-ishi ndu-uke Chileke; me ndu Liviayi; me ndu Izurelu l'ophu ribua nte l'ephe e-me iphe ono g'e pfuru iya. Ephe tuko g'ephe ha ria nte ono.

⁶Noo ya; Ezura bya alufu l'ataphu ulo Chileke ono; tugbua o buru iya eje l'ulo Jiehohananu nwa Eliyashibu. O rwua eka ono; o jika eri nri; jika angu mini; kele oogukwadu aphu le ndu ono, e shi kpua le ndzu ono be e te gudedu ire phe eka.

⁷A bya atuko Jiuda; me Jierusalemu l'ophu raa ya arara ge ndu ono, e shi kpua le ndzu ono tuko dzukota le Jierusalemu.

⁸L'iphe, bu onye ta abyaduru l'ime abali eto iya be ee-gwe ivu iya; chifu onye obu g'o bo yihe l'ogbo, e shi kpua le ndzu. O buru ge ndu-ishi; me ndu bu ogerenya chiru idzu iya bu ono.

⁹Tobudu iya bu; unwoke ndu Jiuda me ndu ke Benjiaminu tuko g'ephe ha dzukota le Jierusalemu l'ime abali eto ono. Mboku ono bu mboku onwa ke tete du l'ukporo abali. Ndu ono g'ephe ha nodugbaa l'oma etsuzo l'ataphu ulo Chileke l'eka ono. Iphe ono; yee eze mini ono, edze nu ono mee; ehu nodu etegbaa phe etete.

¹⁰Ẹzura, bụ onye uke Chileke gbalihu sụ phẹ: “Unu mewaru; ọp̄hu egudedu ire unu ẹka; kele unu l̄shiru ụnwanyi ndu ọhozo; shi nno mee g'ikpe kaba anma unubẹ ndu Ịzurelu.

¹¹Ọo ya bụ; unu tuko iphe-ẹji, unu meru koshiaru Chipfu, bụ Chileke ke nna unu phẹ; unu awata eme iphe, dū iya ree. Unu bufu onwunu l'ẹka ndu alị-a nọ; m̄ l'ẹka ụnwanyi ndu ọhozo ono, unu l̄shiru ono nọ.”

¹²Ndu ono, dzukọberu l'ẹka ono t̄a ụzu sụ: “Ọ kp̄ep̄ho iphe, i pfuru bẹ anyi e-me.

¹³Obenu lẹ ndu kuru l'ẹka-a parū igwerigwe; t̄me ọ buru udzumini; k'ọp̄hu anyi taa ap̄f̄kotaduru l'etezi. Ọzo bụ l'iphe-a ta abudu iphe, ee-mek̄ota ujiku lanu; ọzoo ujiku labo; noo kele iphe ono mewaru anyi meswewa shingushingu.

¹⁴Gẹ ndu-ishi igwe-ọha-a p̄funuru; g'iphe, buk̄poo ndu ndu-anyi lẹ mkp̄ukpu lẹ mkp̄ukpu, bụ ndu luru ụnwanyi ndu ọhozo; byak̄ota l'ip̄hu phẹ; g'ep̄he byajẹ mb̄oku, a s̄uru g'ep̄he bya. Ẹp̄he -n̄odu abya; ep̄he lẹ ndu ọgerenya lẹ mkp̄ukpu lẹ mkp̄ukpu aswijeru; m̄kwapho ndu-ikpe; jeye teke Chileke e-wofu oke ẹhu-eghu iya ono, l'enwu g'oku l'ẹhu anyi ono.”

¹⁵Ọ b̄erup̄ho Jionatanu nwa Asah̄elu; ȳle Jiazaya nwa Tikuva kpoloko bẹ bụ ndu j̄karu iphe ono, e pfuru ono. Meshulamu; m̄ Shabetayi n̄odu agba eyeru phẹ.

¹⁶Ndu ono, e shi kp̄ua lẹ ndz̄u ono, lwaru n̄u ono mee iphe ono, e pfuru ono. Ẹzura, bụ onye uke Chileke h̄ota unwoke, bụ ndu-ishi l'onu-ulo nna phẹ; deshia ep̄ha phẹ l'ekwo. Ọ h̄ota phẹ g'onu-ulo phẹ hak̄ota. O beep̄ho l'abalị mb̄u l'onwa k'iri; ep̄he n̄odu pfushia op̄fu ono.

¹⁷Ọ buru g'onwa ke mb̄u dū l'abalị mb̄u bẹ ep̄he pfugheru op̄fu ẹhu ndu ono, luru ụnwanyi ndu ọhozo ono.

Unwoke, luru ụnwanyi ndu ọhozo

¹⁸A -bya l'echilabo ndu-uke Chileke bẹ bụ ndu ọwa-a luru ụnwanyi ndu ọhozo ono: Ndu shi l'eri Jieshuwa nwa Jiozadaku; ȳe unwune iya ke nwoke, luru ụnwanyi ndu ọhozo ono bụ: Maseya; m̄ Eliȳeza; m̄ Jiaribu; m̄ Gedalaya.

¹⁹Ndu ono g'ep̄he ha bẹ t̄koru kweta ukwe l'ep̄he a-ch̄ishikota unyomu phẹ ono, ep̄he luru l'ọhozo ono. Onyen̄onu l'ime phẹ shi l'igwe-at̄uru iya kp̄uta ebili lanu n̄u g'e gude gwee ngweja-ap̄fu-ugwo.

²⁰Ndu shi l'eri Ima, luru phẹ n̄u bụ: Hanani; m̄ Zebadaya.

²¹Ndu shi l'eri Harimu, luru phẹ n̄u bụ: Maseya; m̄ Elayijia; m̄ Shemaya; m̄ Jiehiȳelu; m̄ Uz̄aya.

²²Ndu shi l'eri Pasho, luru phẹ n̄u bụ: Eliyowenayi; m̄ Maseya; m̄ Ishim̄elu; m̄ Netan̄elu; m̄ Jiozabadu; m̄ Eleyasa.

²³A bya lẹ ndu L̄ivayi; ndu luru ụnwanyi ndu ọhozo bụ: Jiozabadu; m̄ Shimeyi; m̄ Kelaya, buk̄wapho onye eekuje Kelita; m̄ Petahaya; m̄ Jiuda; m̄ Eliȳeza.

- ²⁴A bya lẹ ndu aguje ebvu bẹ bụ Ẹliyashibu bụ onye luru nwanyị ndu ọhozo. Lẹ ndu nche-ọnu-oguzo bụru Shalumu; mẹ Tẹlemu; mẹ Uri bụ ndu luru ụnwanyị ndu ọhozo.
- ²⁵A bya lẹ ndu Ízurelu ọzo, luru ụnwanyị ọhozo ono: Ndu shi l'eri Paroshi, luru phẹ nụ bụ: Ramaya; mẹ Izaya; mẹ Malukayijia; mẹ Mijiaminu; mẹ Eleyaza; mẹ Hashabaya; mẹ Benaya.
- ²⁶Ndu shi l'eri Elamu, luru phẹ nụ bụ: Matanaya; mẹ Zekaraya; mẹ Jiehiyelu; mẹ Abudi; mẹ Jieremotu; mẹ Elayijia.
- ²⁷Ndu shi l'eri Zatu, luru phẹ nụ bụ: Eliyowenayi; mẹ Ẹliyashibu; mẹ Matanaya; mẹ Jieremotu; mẹ Zabadu; mẹ Azayiza.
- ²⁸Ndu shi l'eri Bebayi, luru phẹ nụ bụ: Jiehohananu; mẹ Hananaya; mẹ Zabayi; mẹ Atụlayi.
- ²⁹Ndu shi l'eri Bani, luru phẹ nụ bụ: Meshulamu; mẹ Maluku; mẹ Adaya; mẹ Jiashubu; mẹ Sheyalu; mẹ Jieremotu.
- ³⁰Ndu shi l'eri Pahatu Mówabu, luru phẹ nụ bụ: Aduna; mẹ Kelalu; mẹ Benaya; mẹ Maseya; mẹ Matanaya; mẹ Bezalelu; mẹ Binuyi; mẹ Manáse.
- ³¹Ndu shi l'eri Harimu, luru phẹ nụ bụ: Eliyéza; mẹ Ishaya; mẹ Malukayijia; mẹ Shemaya; mẹ Simiyonu;
- ³²mẹ Benjiaminu; mẹ Maluku; mẹ Shemaraya.
- ³³Ndu shi l'eri Hashumu, luru phẹ nụ bụ: Matenayi; mẹ Matata; mẹ Zabadu; mẹ Elifeletu; mẹ Jieremayi; mẹ Manáse; mẹ Shimeyi.
- ³⁴Ndu shi l'eri Bani, luru phẹ nụ bụ: Madayi; mẹ Amuramu; mẹ Uweļu;
- ³⁵mẹ Benaya; mẹ Bedeya; mẹ Keluhi;
- ³⁶mẹ Vanaya; mẹ Meremotu; mẹ Ẹliyashibu;
- ³⁷mẹ Matanaya; mẹ Matenayi; mẹ Jiasu.
- ³⁸Ndu shi l'eri Binuyi, luru phẹ nụ bụ: Shimeyi;
- ³⁹mẹ Shelemaya; mẹ Nétanu; mẹ Adaya;
- ⁴⁰mẹ Makunadebayi; mẹ Shashayi; mẹ Sharayi;
- ⁴¹mẹ Azarelu; mẹ Shelemaya; mẹ Shemaraya;
- ⁴²mẹ Shalumu; mẹ Amaraya; mẹ Jiósẹfu.
- ⁴³Ndu shi l'eri Nebo, luru phẹ nụ bụ: Jieyelu; mẹ Matitaya; mẹ Zabadu; mẹ Zebina; mẹ Jiadayi; mẹ Jiowelu; mẹ Benaya.
- ⁴⁴Ndu ono g'ẹphe ha bẹ shi lụkota ụnwanyị ndu ọhozo; mbụ l'ọ duru ndu ọphu ụnwanyị ono shi yechawaru ụnwegirima.

Nehemaya

Nehemaya 1

¹Qwaa bu opfu Nehemaya nwa Hakalaya.

Nehemaya vutaru ivu ẹhu Jierúsalemu

L'onwa Kisilewu l'apha k'ukporo ge mu no le Susa, bu ishi mkpukpu;

²be Hanani, bu onye lanu l'ime unwune mu yele unwoke ozo tukoru shi l'ali Jiu bya. Mu jia phe aji ndu Jiuda, phoduru nu; mbu ndu ono, shi l'ali, e shi kpuru phe le ndzu laa; laphu azu ono. Mu bya ajikwaa phe pho aji Jierúsalemu.

³Ephe su mu le-a: “Ndu ono, e shi kpua le ndzu laa ali ozo; ephe mechaa laphu azu l'ali ndu Jiuda ono be onodu phe dukwa eji shii; mbu l'onodu phe be iphere iya dukwa. Igbulo Jierúsalemu be e nwukposhichaaru enwukposhi; teme onu-abata iya be oku tsukotaru.”

⁴Mu numachaa iphe ono, ephe pfuru ono; mu no-zeta anoo wata ara ekwa. Mu no ujiku olemole gukota aphu; aswi egu epfu anu Chileke k'imigwe.

⁵Iphe, mu pfuru bu: “Gube Chipfu, bu Chileke k'imigwe; mbu Chileke ono, paru aka bya adu ebvu ono; onye ono, edobeje ogbandzu iya l'ehu ndu yeru iya obu bya eme iphe, o pfuru; teme o nodu egoshije phe le ya yeru phe obu.

⁶Ngabenu nchi; le mu enya; numa epfupfu, mube onye-ozu ngu epfu anu ngu; mbu epfupfu, mu anoduje l'iphu ngu epfu anu ngu eswe l'enyasi l'iswi ẹhu ndu-ozu ngu, bu ndu Izurelu. Mu epfufuta iphe-eji, anyibe ndu Izurelu megbaberu ngu; mbu iphe-eji, mbedua me ndibe nna mu phe meru ngu.

⁷Anyi mewaru ngu ejo-iphe, ha shii; mbu l'anyi pawaru eme ekemu ono, i turu ono haa; bya ahaa eme iphe, i toru okpa iya su g'e meje; me eme omelali, i doberu, bu iya bu iphe, i turu l'ekemu nu onye-ozu ngu, bu Mosisu.

⁸Nyatanu opfu ono, i pfuru onye-ozu ngu, bu Mosisu su: ‘O -buru l'e te egudedu ire unu aka be mu a-tukashikwa unu nanu nanu l'echilabo ohamoha.

⁹Ole o -buru l'unu dakoberu lwapfuta mu; bya edobe ekemu mu; eme iya ememe; o betakpo aka a chiru unu laa buru l'ohu aka igwe beru ali beru; be mu e-shi l'eka ono rwukobe unu; duphuta unu azu l'eka ono, mu hotaru g'o buru aka mu e-buru eburu ono.’

¹⁰“Oo ndu-ozu ngu be ephe bu; bya aburu ndibe ngu; mbu ndu i gude eze ike ngu; me okpehu ngu gbafuta.

¹¹Gube Nnajiuphu; ngabenu nchi l'epfupfu, onye-ozu ngu epfu anu ngu; me l'epfupfu, ndu-ozu ngu epfu anukwa ngu pho; mbu ndu ono, bu ndu oduje ree g'ephe tsu ngu ebvu ono. Jiko menaa g'iphe jeeru mube onye-ozu ngu le ree ntanu-a; mbu g'i mee

g'imemini mu dụ nwoke-a, bụ eze.” Teke ono bẹ bụ mu shi bụru onye agbajeru eze mee.

Nehemaya 2

Aaha Nehemaya g'o je Jierúsalemụ

¹O be l'ónwa Nisanu l'apha, kwe Atakuzakuzesu ụkporo apha, ọ wataru aburu eze; g'a pataru iya mee; mu pata mee ono; gbaahaaru eze. Ophu o toko dụ-swee teke mu gbanwubejeru iphu l'iphu eze.

²Eze jia mu su: “? Bụ gunu meru iphe iidzu iphu l'ebe abụ iphe-ememe eme ngu? O to nwedu iphe ọzo gbahaa l'obu ta atsođu ngu uto.” Teke ono; ndzu wata mu agushi ike.

³Mu bya asu eze: “Ge gube eze nodukwa ndzu jasuru asuru. ? Bụ ke gunu bẹ mu ta anodudu adzu iphu; le mube onye mkpukpu mu dakposhihuru adakposhihu; mbu eka ono, e liru nna mu oche phe; teme oguzo iya buru iphe, oku tsukotaru?”

⁴Tobudu iya bu; eze su mu: “? Bụ gunu bẹ ọ dụ ngu ge mu meeru ngu?” Mu bya atakpeeru Chileke k'imigwe opfu;

⁵bya asu eze: “O -buru l'ọ dụ gube eze ree; mbu ọ -buru le mube nwozi ngu dụ ngu l'obu; hanaa mu ge mu jeshia ali Jiuda; je le mkpukpu ono, e liru nna mu oche phe ono; je akpukwaa ya.”

⁶Eze yele eze-nwanyi, bu onye no-kube iya nu jia mu su: “? Denu g'ii-no-beru l'ije ngu obu? ? Bụ teke ole bẹ ii-lwa?” O dụ eze ree ge mu je; mu bya atuaru iya onu.

⁷Mu pfukwaarupho eze su iya: “O -buru l'ọ dụ gube eze ree; denuru ekwo-ozu nu mu ge mu nu ndu bu ochi-oha l'azu enyimu; k'ophu ephe a-ha mu ge mu ghata jeshia ali ndu Jiuda.

⁸Dekwaapho ekwo-ozu ophu mu a-nu Asafu, bu onye eleta oswa eze enya; g'ọ nu mu oshi, mu e-gude mee mgbo onu-abata ulo-mgbobuta eze-ulo Chileke; me oshi, mu e-gude mezia igbulo mkpukpu ono; me ophu mu e-gude mee ulo, mu e-buru.” Iphemiphe, mu rworu eze bẹ o mekotaru mu; kele eka-oma ke Chileke mu bẹ dụ mu l'ehu.

Nehemaya agbaphe igbulo Jierúsalemụ

⁹Mu bya ejerwua azu enyimu; mu bya eworu ekwo-ozu ono, eze deru ono nu ndu ochi-oha ono. Eze bẹ duwaru ndu-ishi ndu ojogu; waa ndu agba l'inya yeru mu ge mu l'ephe swiru.

¹⁰Teke Sambalatu, bu onye Horonu; me Tobaya, bu onye-ishi l'ali Amonu numaerupho l'o nweru onye byaru acho g'ee-shi g'iphe duru ndu Izurelu le ree; ọ dụ phe eji dushia phe iya ike.

¹¹Noo ya; mu bya abata le Jierúsalemụ; noo ya abali eto.

¹²O be l'enyashi ujiku lanu; mu gbalihu; mu l'unwoke olemole; anyi tugbua. Ophu o dudu onye mu pfuwaru iphe, Chileke mu yeru mu l'obu ge mu meeru Jierusalemu. Ophu o dukwapho anu-agbagba ozo, mu gude ghahaepho ophu mu l'agba.

¹³O buru l'echi abali be mu gude tugbua. Eka mu shiru bu Onu-abata Nsuda lufuta le Welu Nkuta-oswa; shia ono futa le Onu-abata Ikpogu; ejekpopho agbaphe igbulu Jierusalemu ono, e tsukposhiru etsukposhi ono; yele oguzo iya ono, oku tsukotaru ono.

¹⁴Mu bya eshi l'eka ono tugbua shia uzo Onu-abata Enya-nwobvu; waa Okpuru Eze; ole anu, mu agba agbagba te nwedu eka oo-shi ghata.

¹⁵Tobudu iya bu; mu gude enyashi ono tugbua kwaseru uzo nsuda; agbaphe igbulu ono. Mu gbaphechaa ya; bya alwaphuta azu shia Onu-abata Nsuda bahu l'ime mkpukpu.

¹⁶Ophu ndu-ishi amadu eka mu jeru; ozoo iphe, mu meru; kele o toko dudu iphe, mu pfuwaru ndu Jiu; me ndu-uke Chileke; me ndu a maru epha phe; me ndu-ishi; mewaro ndu ozo, bu ndu e-mechaa eje ozi ono.

Nehemaya epfu le ya a-kpukwa igbulu Jierusalemu

¹⁷Tobudu iya bu; mu su phe: "Unu humawaru egube iphe-otsulehu, anyi no l'ime iya; mbu ge Jierusalemu gude dakposhihu; oku tsukota oguzo iya. Unu byakwa g'anyi kpukwaa igbulu Jierusalemu; k'ophu anyi e-mefu onwanyi iphe-iphere l'ehu."

¹⁸Mu bya epfukwaaru phe pho g'eka-oma ke Chileke mu gude du-be mu l'ehu; waa k'iphe, eze pfukotaru mu. Ephe su: "Ngwa; g'anyi wata iya akpukpu." Ephe kwakobeahaa eka k'awata eguru ozi ono.

¹⁹Sambalatu, bu onye Horonu; yele Tobaya, bu onye-ishi l'ali Amonu; me Geshemu, bu onye Arabu numaeppo iphe ono, anyi chiru idzu iya k'ememe ono; epe chiahaa anyi ochi jaahaa anyi ewenu asuje: "? Bu gunu be unu eme nno? ? Bu ike be unu ekwefuru eze to?"

²⁰Mu bya eyeeru phe onu su phe: "O kwa Chileke k'imigwe be e-me g'anyi mee iphe, anyi eme mekota. Anyibe ndu-ozi iya abya awata akpu igbulu obu; ole unubedua te nwedu oke le Jierusalemu; ophu eka unu adudu iya; ophu ndiche unu ebujeduru iya."

Nehemaya 3

Aakpukwa igbulu Jierusalemu

¹No iya; Eliyashibu, bu onye-ishi uke Chileke; yele ndu ozo, bu ndu-uke Chileke bya agbeshi je atuko kpukwaa Onu-abata Aturu. Epe kpuchaa ya; bya eyeshia ya mgbo. Epe kpuru igbulu iya o futa l'ulo-ephekerephe "Ukporo-ise" me le Ulo-ephekerephe "Hananelu." Epe mechaa ya bya eworu iya ye Chileke l'eka.

²Eka ophu etsota eka ono be bu unwoke mkpukpu Jieriko be kpuru iya nu. Zaku nwa Imuri kpu tsota phe.

- ³Unwu Hasena bụ phẹ kpuru Onu-abata Ema. Epe gbaru iya oshi l'eli iya; yeshia ya mgbo; me iphe, eegudeje aswo-chi iya aswo-chi; me mgborigwe.
- ⁴Onye kpu-tsotaru phẹ nu bụ Meremotu nwa Uraya, mbu nwanwa Hakozi. Meshulamu nwa Berekaya, bu nwanwa Meshezabelu kpuru tsota Meremotu. Zadoku nwa Bana kpu-tsota Meshulamu.
- ⁵Ndu mkpukpu Tekowa kpuru eka etsota iya nu. Ole ndu ophu a maru epha phẹ le mkpukpu ono te ekwedu wozeta onwophe ali jee ozi, ndu-ishi-ozi ono suru g'ephe jee.
- ⁶Jioyada nwa Paseya; me Meshulamu nwa Besodeya be kpukwaru Akahu Onu-abata. Epe gbaru iya oshi l'eli iya; yeshia ya mgbo; me iphe, e gude aswo-chi iya aswo-chi; me mgborigwe.
- ⁷Ndu kpukwaru eka etsota iya nu bu Melataya, bu onye Gibiyonu; me Jiadonu, bu onye Meronotu; me unwoke Gibiyonu yele Mizupa. Eka ono bukota eka ndu ochi-oha azu enyimu bu ishi.
- ⁸Onye kpukwaru eka etsota iya nu bu Uzelu nwa Hahaya. Uzelu yi le ndu akpuje uzu mkpola-ododo. Onye kpuru tsota iya nu buru Hananaya. Hananaya be yi le ndu emeje manu-mbeleke, eshi mkpo. Epe kpuru igbulo Jierusalemu ono jasụ le Igbulo-osa.
- ⁹Refaya nwa Huru be kpu-tsotaru phẹ nu. Refaya bu onye-ishi nkeru-ebo uswekete Jierusalemu.
- ¹⁰Onye kpu-tsotaru phẹ nu bu Jiedaya nwa Harumafu. Eka o kpukwaru be bu nhamunha ataphu ibe iya. Hatushi nwa Hashabuneya kpukwaa eka tsotaru iya nu.
- ¹¹Malukayijia nwa Harimu; me Hashubu nwa Pahatu-Mowabu be kpukwaru eka igbulo ibiya ozo; bya akpu ulo-ephekerephe, "Otapfupfufu-oku."
- ¹²Onye kpukwaru eka tsotaru iya nu bu Shalumu nwa Haloheshi. O bu onye-ishi, nkeru-ebo uswekete Jierusalemu. O buru yee unwada iya tukoru kpu ya.
- ¹³Hanunu yele ndu bu le mkpukpu Zanowa be kpukwaru Onu-abata Nsuda. Epe kpuru iya bya eyeshikota iya mgbo; me iphe, egudeje aswo-chi iya aswo-chi; me mgborigwe; bya akpu igbulo ono eka du unu nkwo-eka labo l'ukporo nkwo-eka iri; kpu ya jeye le Onu-abata Ikpuzu.
- ¹⁴Onye kpuru Onu-abata Ikpuzu bu Malukayijia nwa Rekabu, bu onye-ishi uswekete Betu-Hakeremu; o kpuru iya yeshikota iya mgbo; me iphe, e gude aswo-chi iya aswo-chi; me mgborigwe.
- ¹⁵Shalumu nwa Kolu-Hoze, bu onye-ishi ndu bu l'uswekete Mizupa be bu iya kpukwaru Onu-abata Enya-nwobvu. O kpuru iya bya ekpu ya iphe l'eli; yeshia ya mgbo; me iphe, e gude aswo-chi iya aswo-chi; me mgborigwe. O kpukwakwarupho igbulo Okpuru Shela, no le mgboru mgbabu eze; kpu ya futa l'eka eeshije le mkpukpu Devidi agbazeta.

- ¹⁶Onye kpụ-tsotaru iya nụ bu Nehemaya nwa Azubuku; onye bu onye-ishi, nkeru-ẹbo uswekete Betu-Zuru. O kpuru nkiya je akpaa l'iphu ilu Dévidi; kpua ya o futa l'okpuru ono, e gude ẹka tua ono; wafua l'eka ndu ojogu bu.
- ¹⁷Ndu kpụ-tsotaru iya nụ bu ndu Lívayi. Ẹphe nọ l'eka Rehumu nwa Bani kpua ya. Onye kpuru tsota iya bu Hashabaya, bu onye-ishi, nkeru-ẹbo uswekete Keyila.
- ¹⁸Ẹka tsotaru iya nụ be bu onye kpukwaru iya nụ bu Bavayi nwa Henadadu, bu onye-ishi nkeru-ẹbo uswekete Keyila lanu ophuu; yele unwunna iya.
- ¹⁹Onye kpuru tsota iya bu Eza nwa Jieshuwa. O kpukwaru ibiya ophu du l'iphu ẹka eeshije enyiba l'ulo, eedobeje ngwogu; mbu le nkulahu nggoji igbulọ ono. Eza l'onwiya be bu onye-ishi, ndu Mizupa.
- ²⁰Ẹka tsotaru iya nụ be bu Baruku nwa Zabayi be gude g'ophu iya l'ehu kpukwaa ya. O shi le nkuku igbulọ ono kpua ya jeye l'onu-oguzo ibe Eliyashibu, bu onye-ishi uke Chileke.
- ²¹Meremotu nwa Uráya; mbu nwanwa Hakozu be kpuru tsota Zabayi. O shi l'onu-oguzo ibe Eliyashibu kpua ya jeye l'eka ibe Eliyashibu jeberu.
- ²²Ndu ozo, kpụ-tsotaru iya nụ bu ndu-uke Chileke. Ẹphebedua shigbaa le mkpukpu, no-pheru Jierusalẹmu mgburugburu.
- ²³Ndu kpukwaru tsota phe be bu Benjiaminu waa Hashubu. Ẹka ẹphe kpukwaru bu atatiphu ibe phe. Onye kpuru tsota phe be bu Azaríya nwa Maseya; mbu nwanwa Ananaya. Yebedua kpukwaru ẹka nọ le mgboru ibe phe.
- ²⁴Onye kpukwaru ibe iya ozo, tsotaru iya nụ be bu Binuyi nwa Henadadu; yebedua kpuru shita l'ibe Azaríya jasụ le nkuku igbulọ ono.
- ²⁵Palalu nwa Uzayi be kpukwaru ẹka du l'iphu nkuku igbulọ ono; yele ulo-ephekerephe ono, sefutaru ishi l'ibe eze l'eka iya ophu du l'uzo imeli mkpukpu ono le mgboru oma ẹka ndu nche anoje. Onye kpukwaru tsota iya nụ bu Pedaya nwa Paroshi.
- ²⁶Ndu eje ozi l'eze-ulo Chileke, bu ndu bu l'úbvú, Ofelu bya akpukwaa nkephe futa l'iphu Onu-Abata-Mini, nọ l'uzo ẹnyanwu-awawa; yele ulo-ephekerephe ono, sefuru esefu ono.
- ²⁷Ndu kpụ-tsotaru phe nụ, kpuru ibiya ozo be bu unwoke ndu Tekowa. Ẹphe kpukwaru iphu oke ulo-ephekerephe ono, sefuru esefu ono; kpua ya jeye o sibe l'igbulọ Ofelu.
- ²⁸Ndu uke Chileke be kpukwaru a -gbẹ le Onu-abata Inya kwaseru; onyenonu kpuru atatiphu ibe iya.
- ²⁹Onye kpuru tsota phe nụ be bu Zadoku nwa Ima. Yebedua kpukwaru atatiphu ibe iya. Onye ophu kpuru tsota iya nụ buru Shemaya nwa Shekanaya. Yebedua bu onye-nche Onu-abata Ẹnyanwu-awawa.

³⁰Ndu ọzo, kpuru tsota iya nū bụ Hananaya nwa Shelemaya; yēle Hanunu, bụ onye k'ishii l'unwu Zalafu. Meshulamu nwa Berekaya kpuru tsota phẹ; ẹka ọ kpukwaru bụ ataphu ụlo iya.

³¹Onye ọphu kpuru tsota iya bụ Malukayijia. Yēbedua yi lẹ ndu akpuje uzu mkpola-ododo. Ọ kpukwaru igbulọ nkiya jeye l'ulo ndu eje ozi l'eze-ulo Chileke; mē kē ndu ngho l'ataphu Onu-abata Nlele; ọ kpukwaa ya pho futa lẹ nwulo, du l'eli nkuku igbulọ ono.

³²Ndu akpuje uzu mkpola-ododo; mē ndu ngho bē kpukwaru mgbaka nwulo ono, du l'eli nkulahu nggoji igbulọ ono; ẹphe kpua ya jeye lẹ Onu-abata Aturu.

Nehemaya 4

Ndu mkposhi ozi ono

¹Sambalatu numaepho l'anyi akpukwawaa igbulọ ono; ẹhu-eghu ghuahaa ya; mbu ọ voru ọku wua ẹhu wata aja ndu Jiu ewenu.

²Ọ nodu l'iphu ndibe phẹ; mē l'iphu ndu ojogu Samériya pfuahaa su: “? Bụ gunu bē ndu Jiu-a, bụ ndu arwuhu-a eme? ? Ẹphe eme g'ẹphe kpukwaa igbulọ ono too gunu? Mbū-a; ? ẹphe e-mechaa gwee ngweja too? ? Ẹphe eme g'ẹphe kpu-ghee ya l'ujiku lanu too? ? Bụ g'ẹphe a-du ike mee gē mkpuma ono dūbaa ree ọzo? mbu mkpuma ono, ẹphe voshiru lẹ mkpokpo igbulọ ono, ọku gbanwushiru ono.”

³Tobaya, bụ onye Amonu, nọ iya lẹ mgboru su: “Igbulọ mkpuma obu, ẹphe akpu obu ? o nweru ishi? Iphe, bụ agulo -gbakotakpo ya nū l'ọ dakposhihu!”

⁴“Sū-a; jiko Chileke anyi; ngabenuru anyi nchi; kele ọ to dudu iphe, a guberu anyi. Menaa g'ewenu, ẹphe aja anyi tukoru phẹ l'ishi. L'i mee g'a lwuta phẹ l'ogu lashia ali ọzo.

⁵Ta agukwaru phẹ nvu l'ejo-iphe, ẹphe meru; te ehuchafukwa iphe-eji phẹ l'iphu ngu; kele ẹphe gudewaa okonu kwechia ndu ono, akpukwa igbulọ ono iphu.”

⁶Noo ya; anyi kpua igbulọ ono kpujaha iya ẹbo lẹ g'o shi hahawaa; kele ndu ono phuberu iphu eje ozi ono.

⁷Teke Sambalatu; mē Tobaya; mē ndu Arabu; mē ndu Amonu; mē ndu Ashidodu numaerupho l'aakpukwa-a igbulọ Jierusalemu ono g'aakpu iya; teme l'eka uzo du iya bē aakpu-chishiwaa; ẹhu wata phẹ eghushi egu ike.

⁸Ẹphe nokobe chia idzu g'ẹphe bya ọgu lẹ Jierusalemu; bya akuru utsu yeru phẹ.

⁹Tobudu iya bu; anyi bya epfuru nu Chileke anyi; woru ndu nche ye g'ẹphe cheje mkpokpu ono nche eswe l'enyashi; g'ẹphe be eme iphe, ẹphe chiru idzu iya.

¹⁰Ọ buru teke ono bē ndu Jiuda wataru epfu su: “Ike abvukwa ndu l'eje ozi obu; teme mkpokpo igbulọ pakwadu-a ẹka; k'ophu bụ l'anyi ta amadu g'anyi e-shi kpukwaa igbulọ obu.”

- 11**Ndu ọhogu anyi nọdu epfukwapho sụ l'anyi -bya amaru; mbụ l'anyi -bya ahuma phe; be ephe nọwaa l'echilabọ anyi egbushi anyi; k'ophu eje ozi ono e-buhu.
- 12**No iya; ndu Jiu, bukube phe nụ byapfutawa anyi iphe, rwuru ugbo iri bya akaru anyi l'iphe, bukpoobiya ophu anyi shiru be ndu ọhogu anyi ono e-shikwa byapfuta anyi ọgu.
- 13**Ọo ya bụ; mu bya eye ndu nche l'azụ igbulọ ono; g'ephe cheje nche l'eka igbulọ ono kachaa mkpurali; mbụ eka a kpụ-beru iya ubele. Mu gbaa ndu nche ono l'ipfu l'ipfu; ephe pagbaarụ ogu-echi phe; me arwa phe; me apfu phe.
- 14**Mu bya ahuma g'iphe dū; mu gbalihu pfiaru ndu a maru epha phe; me ndu-ishi; mewaro ndu ọzo sụ phe: “Unu ta atsushi ndu-a ebvu! Unu nyatanu Nnajiuphu ono, bu onye paru eka; bya aburu onye dū ebvu ono! Unu lwua ọgu ehu ndibe unu; me k'unwu unu unwoke; me k'unwada unu; me k'unyomu unu; me k'unuphu ibe unu.”
- 15**Teke ndu ọhogu anyi nūmaru l'ejo idzu ono, ephe chiru anyi ono be anyi mawaru; mbụ le Chileke mebyiwaru iya; ọo ya bụ anyi tuko g'anyi ha laphu azu je akpuaha igbulọ ono ọzo.
- 16**E -shi le mboku ono kwaseru be nkeru-ebo l'unwoke, ejeru mu ozi bu phe jeahaaru ozi ono; nkeru-ebo ophuna nodu le nche; paru arwa; me iphe, eegudeje gbobuta onwonye; me apfu; yee uwe-ogu. Ndu-ishi pfuru ndu onu-ulo Jiuda l'ophu l'azụ;
- 17**ephe nodu akpu igbulọ ono. Ndu ophu evu iphe, e gude eje ozi ono gude eka lanu eje ozi ono; gude eka ophu paru ngwogu.
- 18**Ndu ophu akpu igbulọ ono l'ehu l'ehu tucharu ogu-echi phe l'upfu akpu iya. Onye egbuje opu pfuru mu l'aguga.
- 19**Tobudu iya bụ; mu pfiaru ndu a maru epha phe ono; me ndu-ishi ono; me ndu ọzowaro sụ phe-a: “Ozi-a pakwaru eka; teme o ha osa shii; o mee anyi nodu onwanyi uzanya uzanya l'igbulọ-a.
- 20**Iphe, bukpoobiya eka unu nūmaru oda opu ono; unu wuru byapfuta anyi l'eka ono. Chileke anyi a-lwuchiru-a anyi ọgu!”
- 21**Noo g'anyi shi jee ozi ono; nkeru-ebo nodu apajeru arwa e -shi le nchi-abohu jeye l'enyashi teke kpokpode lufutawaru.
- 22**Iphe ọzo, mu pfukwarupho ndu ono teke ono bu: “G'onyenonu yele onye ejeru iya ozi zejewa l'ime Jierusalemu l'enyashi; k'ophu ephe a-buru anyi ndu nche l'enyashi; teke o beru l'eswe ephe ejee ozi.”
- 23**G'anyi ha; mbedua; me unwune mu; me ndu-ozu mu; me ndu nche, mu l'ephe no be ta adudu onye eyefuje iphe, o yeru l'ehu eyefu. Onyenonu apajeru ngwogu iya; o betakporu o buru mini be onye obu eje ekuta.

Nehemaya 5

Nehemaya eyeru ndu ukpa eka

- ¹A nonyaa; unwoke ndu Jiuda; waa unyomu phe wata echi mkpu iphe, ndu Jiuda ibe phe l'eme phe.
- ²O nweru ndu ophu epfu su: “Anyi l'unwegirima anyi unwoke me unwanyi be ha igwerigwe; oo ya bu g'a hanaa anyi g'anyi chota akpuru ereshi ria nodu ndzu.”
- ³O dukwarupho ndu ophu epfu su: “Anyi yeru ali anyi l'itumo; yechaa opfu-vayinu anyi; me ulo anyi g'ee-shi g'anyi huma ereshi ria l'egu, eme nu.”
- ⁴O duru ndu ophu suru: “Anyi jiwaru ugwo tua utu ali anyi; me k'opfu-vayinu anyi nu eze.
- ⁵A makwaru-a l'anyi le ndu Jiu ibe anyi phe be gbaru ugbugba lanu. O buru g'unwegirima phe du ree bu g'unwegirima nkanyi dukwapho; obenu l'unwegirima anyi unwoke me unwanyi be anyi dobewaru l'onodu ohu. Unwada anyi nwekwaru ndu ophu gbewaru nu ohu nta; ophu anyi ta amadu g'anyi e-me gbafuta phe; kele ali anyi me opfu-vayinu anyi bukotawa ke ndu ozo.”
- ⁶Mu numaepho mkpu ono, ephe echi ono; yeke iphe ono, ephe epfukashi ono; ehuru wata mu eghushi eguru ike.
- ⁷Mu bya arichaa iphe ono l'ime onwomu; mu bobee iya ndu a maru ephe phe me ndu-ishi. Mu su phe: “O kwa ndu Jiu ibe unu be unu anataje ugwo ntukwase.” Mu bya ekua ndzuko, ha shii g'a chia idzu g'ee-shi nua phe chipfuu.
- ⁸Mu su phe: “Nta-a be anyi kukeberu ehuru gbafuta unwune anyi, bu ndu Jiu, e shi ree ndu ohozo. Unubedua bya nta-a bya ereshiahaa unwune unu ono ozo g'anyi zu-phuaha phe azu.” Mu pfuchaa nno; ephe daa ke nyonyoronyo; ophu ephe ta amadu iphe, ephe e-pfu.
- ⁹Mu sukwa phe pho ozo: “Iphe, unu eme ta adukwa ree. ? To gbaduru g'unu tsua Chileke anyi ebvu k'opfu ndu ohozo, bu ndu ohogu anyi ata watadu anyi aja ewenu?”
- ¹⁰Mbedua; me unwune mu; me ndu-ozu mu be ejiejekwa ndibe anyi ugwo okpoga me ugwo ereshi. Ole oo g'anata ugwo ntukwase laa!
- ¹¹Unu nu-phukota phe ali phe azu ntanu-a; me opfu-vayinu phe; me mgbabu olivu phe; me ulo phe. Unu eworu ntukwase, unu nataru phe l'okpoga; me l'ereshi; me le mee; me le manu nu-phukota phe azu.”
- ¹²Ephe toko su: “Anyi a-nu-phukota iphe ono azu. O to dudu iphe, anyi a-suba g'ephe nu anyi ozo. Oo ephe g'i suru g'anyi mee bu g'anyi e-me.” Mu bya ekua ndu-uke Chileke; woru nte nu ndu a maru ephe phe ono; me ndu-ishi g'ephe mee iphe ono, ephe kweru ukwe iya ono.
- ¹³Mu bya ajia uwe mu phulaphula su: “G'o bukwaru egube-a be Chileke a-jifu ndu te emeduru iphe, ephe kweru ukwe iya; mbu jifu phe l'ulo phe; me l'iphe, ephe nweru. G'o bukwaru nno bu g'aa-jifu onye ono; gbabe iya eka oto!” Ndzuko ono l'opfu toko zu mgbede su: Nokwa g'o du. Ephe jaa Chipfu ajaja. Ndu ono mee iphe ono, ephe kweru ukwe iya ono.

Nehemaya ta abudu ẹhu iya b'ọ maru nwẹkiya

14E -shi lẹ teke a turu mu ẹka gẹ mu buru ọchi-ọha l'alị Jiuda; mbu l'apha, kwe Atakuzakuzesu apha ukporo jeye l'apha, kwe iya ukporo apha l'apha iri l'ẹbo, ọ wataru aburu eze; l'ime apha iri l'ẹbo ono bẹ mbẹdua; mẹ unwunna mu ta adudu onye ophu rijeru nri, gbaru ọchi-ọha.

15Obenu lẹ ndu ọchi-ọha ophu vu mu ọzo buru ishi bẹ shi bo ndu Jiuda ivu anyinyi; shi anakoje phẹ nri mẹ mẹe; bya eyekoberu mkpola-ochaa, ẹrwa iya du ukporo shekelu labo, ẹphe shi atuje. Nokwapho gẹ ndu shi ejeru phẹ ozi shi akpa ndu Jiuda ono ẹhu. Oke mbẹdua gude atsụ Chileke ebvu ophu mu te emeduru ẹgube ono.

16Mu gbẹ yechiaru ẹhu lẹ k'akpu igbulọ ono; ophu ọ dudu alị, anyi zuru m'ilile. Ndu ozi mu g'ẹphe ha dzukotapho eje ozi ono l'ẹka ono.

17Ozo buru lẹ ukporo umadzu ẹsaa l'umadzu iri; mbu ndu Jiu; mẹ ndu bu ndu-ishi bẹ anọduje eri nri lẹ teburu mu; yekoberu ndu eshije l'ohamoha, no-pheru anyi mgburugburu byapfuta anyi.

18Mboku-mboku bẹ eegbuje oke-eswi lanu; waa aturu ishii, ẹhu du ree; mẹ oku gude shiaru mu nri. Abali iri, nwutaru anwuta bẹ eevutajeru mu mẹe, du iche iche; vuta iya k'etsutsu. A makwaru-a l'iphemiphe ono dukota; oke mu ta asujeduru g'a nu mu oke nri, rwuberu ọchi-ọha; noo kele ivu-erwa ndu Jiuda vu bẹ panukaru ẹka.

19Jiko Chileke mu; nyatakwa mu ro lẹ k'oma l'iphemiphe-a, mu mekotaru ndu-a.

Nehemaya 6

Ejo idzu, a chiru Nehemaya

1Sambalatu; mẹ Tobaya; mẹ Geshemu, bu onye Arabu; mẹ ndu ohogu anyi ozo bya anuma lẹ mu kpu-ghewaru igbulọ ono; ophu ọ to dudu ẹka ghekwaduru iya onu; oke teke ono bẹ mu teke yeshidu mgbo l'oguzo iya.

2Sambalatu yele Geshemu zia mu ozi su gẹ mu bya gẹ mu l'ẹphe dzuda lẹ mkpukpu lanu, du lẹ baswaa alị, aza Ono. Obenu l'iphe, ẹphe chiru idzu iya bu g'ẹphe meka mu iphe.

3Mu zia ndu-ozi g'ẹphe je ezia phẹ su phẹ: “Ozi, mu gude l'ẹka bẹ pakwaru ẹka. Mu ta abyakotakwa. ? Denu gẹ mu e-shi paru ozi ono haa g'ọ rwuhu lẹ mu abya unu aza oku?”

4Ugbo eno bẹ ẹphe ziru mu ozi lanu ono; ọ buru onu, mu yehawaru bẹ bu onu, mu yekotaru phẹ.

5O be lẹ k'ise iya; Sambalatu zia nwozi iya g'o gude ozi lanu ono byapfuta mu. O buru ekwo-ozi, e gheberu onu bẹ o gude bya.

6L'ime ekwo ono bẹ o deru su: “Iphe, ngakotaru ohamoha; teme Geshemu gbakwaapho ama iya bu lẹ gu lẹ ndu Jiu bẹ agba idzu g'unu kwefu ike; ọ buru iya

meru iphe unu akpukwa igbulọ ono. Iphe ọzo, e pfuru ye iya bu l'ọo gubedua eme g'i buru eze phe.

⁷Ọzo bu l'i gbẹ hotawa ndu mpfuchiru g'ephe je araa k'opfu ehu ngu arara le Jierusalemu su l'i bu eze ndu Jiuda. O doru ngu enya l'opfu ono e-rwu eze le nchi. Ọo ya bu l'ọ kakwa ree g'i byakwa g'anyi chi-zia ya achi-zi.”

⁸Mu ziphu iya ozi azu su iya: “Iphe ono, iipfu ono ta adukwa ophu meru ememe ilile; o kwa l'obu ngu be i ritaru iya pfua.”

⁹Iphe ono bu iphe, ephe eme g'anyi tsuhu ebvu; kele ephe riru l'anyi a-paru ozi ono haa; anyi te ejefuadu iya l'ishi. Ole mu rworu Chileke su iya: “Jiko menaa g'eka shihu mu ike.”

¹⁰O be teke mu jeru l'ulo Shemaya nwa Delaya, mbu nwanwa Mehetabelu, bu onye ta lufujedu alufu l'ibe iya; o su ge mu l'iya dzuda l'ulo Chileke; l'ime ime eze-ulo ono; g'anyi gu-chishia mgbo, du l'eze-ulo ono agu-chishi; l'o nweru ndu l'a-bya mu egbugbu; l'ọo l'enyasi be ephe a-bya mu egbugbu obu.

¹¹Ole iphe, mu pfuru bu: “? Bu onye du ge mbedua be a-gbalaaha agbala? Mbu ? bu onye du ge mbedua be a-gbaru lashia l'eze-ulo Chileke ge mu dzota ndzu mu? Mu te ejedu.”

¹²Ọ buru teke ono be o byaru edoo mu enya l'ọ to budu Chileke be ziru iya nu; l'ọo Tobaya yele Sambalatu pfuru iya ugwo g'o pfua iphe, a-tsuru mu nu.

¹³Ephe pfuru iya ugwo g'o yee mu ebvu; k'opfu mu e-me iphe, o suru ge mu mee; shi nno mee iphe-aji; g'ephe e-nweru iphe, ephe a-gbabe okpa gube mu ejo epha; mee mu iphe-iphere.

¹⁴Gube Chileke mu; ta azohakwa iphe, Tobaya yele Sambalatu meru mu. Nokwapho g'i ti zohakwapho nwanyi mpfuchiru ono, bu Nowadaya; me ndu mpfuchiru ọzo, shi eme g'ephe yee mu ebvu.

Aakpu-ghe igbulọ ono

¹⁵Noo ya; iphe, a kpuru igbulọ ono bu ukporo abali labo l'abali iri l'ebo. Mboku, a kpu-gheru iya bu l'ukporo abali l'abali ise l'onwa Elulu.

¹⁶Ndu ohogu anyi l'opfu; me iphe, bu ndu ohozo, bupheru anyi mgburugburu numae ya pho; ephe pehu onwophe l'enya; noo kele o byaru edoo phe enya l'ozi ono be bu Chileke anyi yeru anyi aka; anyi jefu iya l'ishi.

¹⁷Le teke ono be ndu a maru epha phe l'ali Jiuda nuru Tobaya ekwo-ozu, du igwerigwe. Ekwo-ozu ophu shi Tobaya l'eka nodu anodujekwapho abyaru phe.

¹⁸Noo kele ndu du igwerigwe l'ali Jiuda be riru nte turu ikè yeru iya; kele o bu ogo Shekanaya nwa Ara; teme nwa iya nwoke, bu Jiehohanu lukwaapho nwada Meshulamu nwa Berekaya.

¹⁹Teme ephe ndu anodujekwapho epfushiru mu iphe, du ree, Tobaya l'emegbabe. Iphe, mu pfuru; ephe aturuta iya je edooru iya. Tobaya ndu edetajeru mu ekwo ge ya gude yee mu ebvu.

Nehemaya 7

¹A kpu-ghechaa igbulo ono; mu bya eyeshikota iya mgbo. A bya ahoo ndu nche onu-oguzo; me ndu ebvu; me ndu Liviayi.

²Ndu mu meru ishi ndu Jierusalemu bu nwune mu Hanani; yele Hananaya, bu onye-ishi ulo-mgbobuta. Noo kele Hananaya bu onye e gude ire iya eka; teme o ka atsu Chileke ebvu eme l'igwerigwe ndu ozo.

³Iphe, mu pfuru phe bu: "G'a ta aguhajekwa onu-abata Jierusalemu ghebe onu l'ebe abu l'enyawu gbakotaru. O -buru le ndu nche nokwadu le nche; g'a gu-chishije mgbo iya agu-chishi swobechaa ya mgborigwe. Unu shi le ndu bu le Jierusalemu hota ndu nche; g'ephe cheje nche l'eka du k'echi nche; ndu ophu anodu l'iphu ulo phe eche."

Ndu shi l'eka a kpuru phe le ndzu lwa

(Ezu 2:1-70)

⁴Jierusalemu bu eze mkpukpu, ha shii bya aha ke phorokotokongu; ophu ndu no iya nu abadu nwishi; teme ophu o dudu ulo, a kpuwaru iya.

⁵Tobudu iya bu; Chileke mu yee mu iya l'obu ge mu kukoo ndu ono, a maru epha phe ono; me ndu-ishi; mewaro ndu ozo g'e deshia epha phe l'eri phe l'eri phe. Mu bya ahuma ekwo, e deshiru epha ndu vu uzo, shi l'eka a kpuru phe le ndzu lwa; mbu ekwo, e deshiru phe l'eri phe l'eri phe. Iphe, mu humaru, e deru l'ekwo ono bu:

⁶Waa ndu Izurelu ono, shi l'ali Babilonu lwa; mbu ndu ono, a kpuseru le ndzu laa ali ozo, bu iya bu ndu Nebukadineza, bu eze ndu Babilonu kpukoju laa Babilonu ono. Ephe lwaru Jierusalemu; me Jiuda; onyenonu lashichaa mkpukpu eka o shi.

⁷Ndu ephe tso lwa be bu Zerubabelu; me Jieshuwa; me Nehemaya; me Azariya; me Ramaya; me Nahamani; me Modekayi; me Bilishanu; me Misuperetu; me Biguvayi; me Nahumu; me Bana. Waa ge ndu Izurelu ono ha bu owana:

⁸Oshilokpa Paroshi be du unu ise l'ukporo esato l'umadzu iri l'ebo.

⁹Oshilokpa Shefataya du ukporo iri l'esato l'umadzu iri l'ebo.

¹⁰Oshilokpa Ara du unu nemadzu l'ukporo iri l'ebo l'umadzu iri l'ebo.

¹¹Oshilokpa Pahatu-Mowabu, bu iya bu ndu shi l'eri Jieshuwa yele Jiowabu be du unu esaa l'iri l'esato.

¹²Oshilokpa Elamu du unu eto l'ukporo labo l'umadzu iri l'eno.

¹³Oshilokpa Zatu du unu labo l'ukporo labo l'umadzu ise.

¹⁴Oshilokpa Zakayi du unu nemadzu l'ukporo iri l'esato.

¹⁵Oshilokpa Binuyi du unu l'umadzu ukporo iri l'ebo l'umadzu esato.

- 16 Oshilokpa Bebayi du unu l'umadzu ukporo iri le nanu l'umadzu esato.
- 17 Oshilokpa Azugadu du unu ise l'ukporo iri l'ishii l'umadzu labo.
- 18 Oshilokpa Adonikamu du unu l'ukporo iri l'eto l'umadzu esaa.
- 19 Oshilokpa Biguvayi du unu ise l'ukporo eto l'umadzu esaa.
- 20 Oshilokpa Adinu du unu ukporo iri l'ebo l'umadzu iri l'ise.
- 21 Oshilokpa Ateya, bu iya bu ndu shi l'eri Hezekaya be du ukporo eno l'umadzu iri l'esato.
- 22 Oshilokpa Hashumu du ukporo iri l'ishii l'umadzu esato.
- 23 Oshilokpa Bezayi du ukporo iri l'ishii l'umadzu eno.
- 24 Oshilokpa Harifu du ukporo ise l'umadzu iri l'ebo.
- 25 Oshilokpa Gibiyonu du ukporo eno l'umadzu iri l'ise.
- 26 Unwoke, shi le Betulehemu me Netofa be du ukporo tete l'umadzu esato.
- 27 Ndu ke Anatotu du ukporo ishii l'umadzu esato.
- 28 Ndu ke Betu-Azumavetu be du ukporo labo l'umadzu labo.
- 29 Ndu ke Kiriyatu-Jiarimu; me Kefira; me Berotu du unu l'ukporo iri l'esaa l'umadzu eto.
- 30 Ndu ke Rama; me Geba du unu l'ukporo iri le nanu l'onye lanu.
- 31 Ndu ke Mikumashi du ukporo ishii l'umadzu labo
- 32 Ndu ke Betelu; me Eyayi du ukporo iri le nanu l'umadzu eto.
- 33 Ndu ke Nebo ophunapho be du ukporo labo l'umadzu iri l'ebo.
- 34 Ndu ke Elamu ophunapho be du unu eto l'ukporo labo l'umadzu iri l'eno.
- 35 Ndu ke Harimu du ukporo iri l'ishii.
- 36 Ndu ke Jieriko du ukporo iri l'esaa l'umadzu ise.
- 37 Ndu ke Lodu; me Hadidi; me Ono be du unu l'ukporo iri l'ishii l'onye lanu.
- 38 Ndu ke Senaa du unu tete l'ukporo iri l'ishii l'umadzu iri.
- 39 A bya le ndu-uke Chileke: Oshilokpa Jiedaya, bu iya bu ndu shi l'onu-ulo Jieshuwa be du unu labo l'ukporo esato l'umadzu iri l'eto.
- 40 Oshilokpa Ima du unu labo l'ukporo iri l'ebo l'umadzu iri l'ebo.
- 41 Oshilokpa Pasho du unu eto l'ukporo labo l'umadzu esaa.
- 42 Oshilokpa Harimu du unu labo l'ukporo iri l'umadzu iri l'esaa.

⁴³A bya lẹ ndu Lívayi: Oshilọkpa Jieshuwa; me Kadumelu, bu iya bu ndu shi l'eri Hodavaya be du ukporo eto l'umadzu iri l'eno.

⁴⁴A bya lẹ ndu aguje ebvu: Oshilọkpa Asafu be du ukporo esaa l'umadzu esato.

⁴⁵A bya lẹ ndu nche onu-abata: Oshilọkpa Shalumu; me oshilọkpa Ateya; me oshilọkpa Talumonu; me oshilọkpa Akubu; me oshilọkpa Hatita; me oshilọkpa Shobayi be tukoru du ukporo ishii l'umadzu iri l'esato.

⁴⁶Ndu anoduje eje ozi l'eze-ulo Chileke bu: Oshilọkpa Ziha; me oshilọkpa Hasufa; me oshilọkpa Tabayotu;

⁴⁷me oshilọkpa Kerosu; me oshilọkpa Siya; me oshilọkpa Padonu;

⁴⁸me oshilọkpa Lebana; me oshilọkpa Hagaba; me oshilọkpa Shamulayi;

⁴⁹me oshilọkpa Hananu; me oshilọkpa Gidelu; me oshilọkpa Gaharu;

⁵⁰me oshilọkpa Reyaya; me oshilọkpa Rezinu; me oshilọkpa Nekoda;

⁵¹me oshilọkpa Gazamu; me oshilọkpa Uza; me oshilọkpa Paseya;

⁵²me oshilọkpa Besayi; me oshilọkpa Meyuni; me oshilọkpa Nefisimu;

⁵³me oshilọkpa Bakubuku; me oshilọkpa Hakufa; me oshilọkpa Hahuru;

⁵⁴me oshilọkpa Bazulutu; me oshilọkpa Mehida; me oshilọkpa Hasha;

⁵⁵me oshilọkpa Bakosu; me oshilọkpa Sizera; me oshilọkpa Tema;

⁵⁶me oshilọkpa Nezaya; me oshilọkpa Hatifa.

⁵⁷A bya lẹ ndu bu oshilọkpa ndu-ozu Sólomonu bu: Oshilọkpa Sotayi; me oshilọkpa Soforetu; me oshilọkpa Perida;

⁵⁸me oshilọkpa Jiala; me oshilọkpa Dakonu; me oshilọkpa Gidelu;

⁵⁹me oshilọkpa Shefataya; me oshilọkpa Hatilu; me oshilọkpa Pokeretu-Hazebayimu; me oshilọkpa Amonu.

⁶⁰Ndu eje ozi l'eze-ulo Chileke g'ephe ha; me oshilọkpa ndu-ozu Sólomonu be du ukporo iri lẹ tete l'umadzu iri l'ebo.

⁶¹Ndu owana bu ndu ophu shi lẹ mkpukpu Telu-Mela; me lẹ mkpukpu Telu-Hasha; me lẹ mkpukpu Kerubu; me lẹ mkpukpu Adonu; me lẹ mkpukpu Ima Iwa. Ole ndu ono ta adudu ike goshi onu-ulo, ephe shi futu; me oshilọkpa onye ephe bu; k'ophu eeshi nno maru ? ephe bua ndu Izurelu?

⁶²Oshilọkpa Delaya; me oshilọkpa Tobaya; me oshilọkpa Nekoda be du unu l'ukporo iri l'ebo l'umadzu labo.

⁶³A bya l'oshilọkpa ndu-uke Chileke: oshilọkpa Hobaya; me oshilọkpa Hakozu; me oshilọkpa Bazilayi; nwoke ono, luru nwada Bazilayi k'alig Giladu; a nodu ekuwa iya ro epha ala l'epha iya.

⁶⁴Ndu ono bẹ a chọru ẹpha phẹ l'ẹkwo, e deru g'e gude nwushia phẹ; ọle a ta ahumaduru ẹpha phẹ l'ẹkwo ono. Oo ya bu; e wofu phẹ g'ẹphe ta abuhuru ndu-uke Chileke; dobe phẹ gẹ ndu aaso nsọ.

⁶⁵Ochi-oha bya asu g'ẹphe ta ayijeshiru ria nri, kakota adu nsọ jasụ teke ee-nweru onye uke Chileke, e-gude ido Urimu; waa Tumimu kpata Chipfu ishi.

⁶⁶A -kpakota igwe-oha ono bẹ ẹphe du ukporo unu ise l'unu ise l'ukporo iri l'esato;

⁶⁷a -gufukwa ndu-ozi phẹ unwoke; me unwanyi, ndu du unu iri l'esato l'ukporo ishii l'umadzu iri l'esaa. Ẹphe nwekwarupho ukporo umadzu iri l'ebo l'umadzu ise, bu unwoke yele unwanyi, anoduje agu ebvu;

⁶⁸bya enweru inya, du unu l'ukporo iri l'ishii l'inya iri l'ishii. Ẹphe nweru inya-mulu, du ukporo iri l'ebo l'inya-mulu ise.

⁶⁹Inya-kamelu phẹ du unu l'ukporo l'iri l'ise; bya enweru nkafu-igara, du unu iri l'ishii l'ukporo iri l'ishii.

⁷⁰O nweru ndu-ishi l'enya-unuphu ibe nna phẹ, nuru iphe g'e gude yeta ẹka jee ozi ono. Ochi-oha bẹ yeru ẹkpa mkpola-ododo iri l'ulo-eku; me gbamugbamu, du ukporo labo l'iri; me uwe ndu-uke Chileke, du unu uwe l'ukporo ishii l'iri.

⁷¹Ndu bugbaa ishi l'enya-unuphu ibe nna phẹ haru woru mkpola-ododo, du ukporo unu ugbo labo l'unu iri; nu g'e dobe l'ulo ẹku, ee-gudeje jee ozi ono; bya anu mkpola-ochaa, du ukporo unu ugbo iri l'eto l'unu iri l'ise.

⁷²Mkpako iphe, ndu ozo nuru bu mkpola-ododo, du ukporo unu ugbo labo l'unu iri; me mkpola-ochaa, du ukporo unu ugbo iri l'ebo l'unu iri; me uwe ndu-uke Chileke, du ukporo eto l'esaa.

⁷³Tobudu iya bu; ndu-uke Chileke; me ndu Liviayi; me ndu nche onu-oguzo; me ndu aguje ebvu; me ndu eje ozi l'eze-ulo Chileke; mewaro ndu ozo; me ndu Izurelu g'ẹphe ha tuko buchaaru le mkpukpu le mkpukpu phẹ.

Nehemaya 8

Ẹzura agu ẹkwo ekemu Chileke

¹O rwua l'onwa k'esaa teke ndu Izurelu bukotawa le mkpukpu le mkpukpu phẹ; ndu Izurelu g'ẹphe ha dzukota l'edupfu, no l'iphu mkpochi-oguzo, Onu-Abata-Mini. Ẹphe su Ẹzura, bu onye edeje ẹkwo g'o wofuta ẹkwo ekemu Mosisu, bu iya bu ekemu, Chipfu turu nu ndu Izurelu.

²O be l'abali mbu l'onwa esaa; Ẹzura, bu onye uke Chileke wofuta ẹkwo ekemu ono l'iphu edzudu-oha l'eka unwoke me unwanyi; me ndu iphe edoje enya doru.

³O nodu l'edupfu ono, du l'iphu Onu-Abata-Mini ono gua ẹkwo ekemu ono l'eka unwoke me unwanyi; me ndu ono, iphe edoje enya doru ono. O shi l'onmewa utsu gua ya jasụ l'echilabo eswe. Edzudzu-oha ono ngabe nchi ree l'iphe, ẹkwo ekemu ono epfu.

⁴Ẹzura, bu onye edeje ekwo be pfuru l'eli eka a gbaru oshi agbagba, bu eka e meru medoru k'iphe, ephe eme ono. Ndu pfuru iya l'ekutara bu Matitaya; me Shema; me Anaya; me Uraya; me Hilikaya; me Maseya. Ndu pfuru iya l'ekicha buru Pedaya; me Mishelu; me Malukayijia; me Hashumu; me Hashubadana; me Zekaraya; me Meshulamu.

⁵Ẹzura bya ekpuhaa ekwo ono; ephe humakota; noo kele eka o pfuru be o kakota ndu ono l'eli. Teke o kpuharu iya be ephe tukoru wulihu pfuru apfuru.

⁶Ẹzura jaa Chipfu ajaja; mbu Chileke ono, paru eka ono. Ndu ono chilikota eka phe imeli zua su: "Nokwa g'o du! Nokwa g'o du-o!" Ephe phozeta kpube iphu l'ali baaru Chipfu eja.

⁷Ndu Lívayi, bu Jieshuwa; me Bani; me Sherebaya; me Jiaminu; me Akubu; me Shabetayi; me Hodaya; me Maseya; me Kelita; me Azariya; me Jiozabadu; me Hananu; me Pelaya be yetaru eka mee g'ekemu ono doo ndu ono enya g'ephe pfukwaduru l'eka ono.

⁸Ephe gua iphe, du l'ekwo ekemu Chileke ono risaa; bya akoo iphe o bu; mee iphe ono, a guru ono dokota enya.

⁹Ochi-oha, bu Nehemaya; me Ẹzura, bu onye uke Chileke; buru onye edeje ekwo; me ndu Lívayi, bu ndu ezi ndu ono ekemu ono bya epfukota opfu nu ndu ono su phe: "Ntanu bukwa mboku, duru Chipfu, bu Chileke unu nsọ. Unu ta agukwa aphu; ophu unu arakwa ekwa." Iphe, kpataru ephe pfua nno bu le ndu ono g'ephe ha wataru ara ekwa g'ephe numaru iphe, ekemu ono pfuru.

¹⁰Nehemaya su phe: "Unu lashiwaro je eria okpobe nri; unu angua mee, l'atso rengurengu; unu ewota je anu ndu ophu te enwedu ophu ephe shiru g'ephe ria. Ntanu-a dukwaru Nnajiuphu nsọ. Unu ta arashi ekwa; noo kele ehutu-utso ophu shi l'eka Chipfu be bu ike, du unu."

¹¹Ndu Lívayi gboo ndu ono g'ephe ha ekwa; asuje phe: "Unu nodu doo; kele ntanu-a bukwa mboku, du nsọ. Unu ta arashi ekwa."

¹²Ndu Ízurelu g'ephe ha wukashihu lashia je eria ngua; wojechaaru ndu ozo nri; mbu gude ehutu-utso bo obo-iphe ono; noo kele opfu ono, a guru phe ono be doru phe enya.

Obo-Mkpù

¹³O be le mboku k'ebo iya; ndu-ishi, shi l'enya-unuphu l'enya-unuphu ndu Ízurelu; me ndu-uke Chileke; me ndu Lívayi wuru bya ado-pee Ẹzura, bu onye edeje ekwo g'ephe nwua iphe, ekemu ono pfuru.

¹⁴Ephe huma l'e deru l'ime ekwo ekemu ono le Chipfu shi l'eka Mosisu tua ekemu su; le ndu Ízurelu be e-bujeru l'ime mkpù le teke aabo obo-iphe l'onwa esaa.

¹⁵Wakwapho l'oo g'ephe raa ya arara; mee g'a numa-dzuru iya le mkpukpu phe l'ophu; yele Jierusalemu su: "Unu tugbua je l'ubvu je egbukoo ekali-oshi olivu; me ekali-oshi

payinu; me ke mituru; me igu; me ekali-oshi ozo, nweru ekwo; g'e gude tushia m̀kp̀u egube ono, e deru iya l'ekwo ekemu ono.”

¹⁶Oo ya bu; ephe tugbua je egbukoo ekali-oshi ono bya atushiaru onwophe m̀kp̀u; onyenonu tua nkiya l'eli ulo iya; me l'oma-unuphu phe; me l'oma-unuphu eze-ulo Chileke; me l'edupfu ono, no-kube Onu-Abata-Mini; me ophu no-kube Oguzo Ifuremu.

¹⁷Igwe-oha ono, bu ndu shi l'eka a kpuru phe le ndzu lwa ono; tushikota m̀kp̀u ono buru. Mbụ le ndu Izurelu ta atujeduru egube M̀kp̀u ono; e -shi teke Jioshuwa nwa Nunu no jeye mboku ono. Ehu tsoo phe utso shii.

¹⁸Ezura shiepho e -shi ke mboku mbu, a wataru abo obo-iphe ono aguepho iphe, e deru l'ekwo ekemu Chileke ono; ague ya pho mboku-mboku; jeye le mboku ikpazu iya. Ephe bo obo-iphe ono abali esaa; o be le mboku k'esato; ephe nweru ndzuko, du iche egube ekemu pfuru iya.

Nehemaya 9

Ndu Izurelu akoshi iphe-eji, ephe meshiru

¹Onwa ono duepho l'abali ukporo l'eno; ndu Izurelu dzukota swiahaa egu. Ephe yee uwe-aphu; kporu eja kpua onwophe l'ishi.

²Ndu ophu bu oshilokpa ndu Izurelu bufu onwophe l'ehu ndu ohozo. Ephe pfuru koshia iphe-eji, ephe meshigbaberu; me ejo-ememe, nna phe megbaberu.

³Ephe pfuru l'eka ephe pfuru gua iphe, e deru l'ekwo ekemu Chipfu, bu Chileke phe ono awa eto; ephe gude awa eto ozo koshia iphe-eji, ephe meshiru; bya abaarụ Chipfu, bu Chileke phe eja.

⁴Ndu pfuru l'eli mkpogobe eka ono e metaru ndu Liviayi ono bu: Jieshuwa; me Bani; me Kadumelu; me Shebanaya; me Buni; me Sherebaya; me Bani; me Kenani. Ephe chiru mkpu ekwa chiku Chipfu, bu Chileke phe.

⁵Ndu Liviayi, bu Jieshuwa; me Kadumelu; me Bani; me Hashabuneya; me Sherebaya; me Hodaya; me Shebanaya; me Petahaya bya asu: “Unu gbalihu jaa Chipfu, bu Chileke unu ajaja; mbu onye ono, shi l'ojejeje nodu ndzu; teme o je a-no jasụ l'ojejeje ono.” G'a jakwaa epha ngu ono, du akpabiri ono ajaja; mbu epha ngu ono, daghataru ajaja, aaja iya; bya adaghata ekele, ekeleje iya ono.

⁶Oo ngu kpoloko kpekpu bu Chipfu. Oo ngu meru igwe; mee igwe ophu kakota igwe l'eli; me iphemiphe, dukota iya nu. O buru ngu meru ali; me iphemiphe, dukota iya nu. O buru ngu meru eze-enyimu; me iphemiphe, nokota iya nu. O buru ngu meru; ephe nodukota ndzu. Iphe, dugbaa l'imigwe anoduje abakotaru ngu eja.

⁷Oo gubedua bu Chipfu, bu Chileke ono, bu onye hotaru Ebiramu; dufuta iya le mkpukpu Uru l'ali Babilonu bya agbanwee epha iya; o buru Ebirhamu.

⁸I humaru l'o bu onye e gude ire iya eka; gu l'iya woru ndzu gbaa. I kwee ya ukwe l'ini-nukota yele awa iya ali ndu Kenanu; me ali ndu Hetu; me ali ndu Amoru me ke ndu

Pérezu; mę kę ndu Jiebusu; mę kę ndu Gigashi. Ukwe-iphe ono, i kweru ono bę i mekotaru kele i bu onye pfuberu-ęka-oto.

⁹I humaru iphe-ęhuka, nna anyi pę jeru l'ali Ijiputu. Tęme i numakwapho ękwa, ęphe raru l'aguga Eze-ęnyimu Uswe-uswe.

¹⁰I meshiru iphe-ohumalenya mę iphe, du biribiri kpua Fero mę ndu-ozi iya l'ophu; mękpoo ndu ali iya l'ophu; kele i maru gę ndu Ijiputu gude eku-onwonye gwaa ndibe ngu maa. I meru a maru ępha ngu; o du ęgube ono byasu ntanu.

¹¹I meru eze-ęnyimu; o kekaha ębo l'iphu pę; k'ophu bu l'ęphe jeru ije l'ali okponku ghaa eze-ęnyimu ono. Obenu lę ndu achi pę oso bę i tųbaru l'ohu mini ono; gę mkpuma, a tųbaru l'ime mini, abya gbųkugbuku.

¹²Eswe bę i gude urwukpu, kpuru oronmono dua ndibe ngu. L'ęnyashi bę i gude oku, kpuru oronmono dua pę; g'o buru iphóró, a-nodu egoshi pę ųzo, ęphe e-shi.

¹³I nyizetaru l'eli úbvú Sayinayi; i nodu l'imigwe pfuru opfu nu pę. I nuru pę omelali, pfuru nhamunha; mę ekemu, bu okpobe iya; mę iphe, i toru okpa iya, bu iphe, du ree.

¹⁴I meru; ęphe maru mboku, i doberu g'o buru eswe-atuta-unme ngu, du nsọ. I shi l'ęka nwozi ngu, bu Mosisu karu pę ekemu, ęphe a-nodu etso.

¹⁵Teke ęgu guru pę bę i nuru pę nri, shi l'imigwe. I kee pę mini, shi l'eze mkpuma g'ęphe ngua; teke mini guru pę. I suru pę g'ęphe tugbua je anata ali ono, i riburu nte l'ii-nu pę ono.

¹⁶Ole ęphebe nna anyi pę ono bę kuaharu onwophę ekuku; kwefu ike jįka eme iphe, i suru g'e meje.

¹⁷Ęphe jįkaru eme iphe, i suru g'ęphe mee; zohashicha iphe, du biribiri, i meshiru l'echilabo pę. Ęphe kwefuru ike gude ekwefu ike hota onye-ishi, e-duphu pę azu lę Ijiputu, bu ęka ono, ęphe shi buru ohu ono. Obenu l'i bu Chileke, l'aguje nvu; i buru onye emeje eze-iphe-oma; mę onye obu-imemini; tęme i buru onye ęhu te eghujedu eghu ęgwegwa; mbu onye n-yemobu iya nyįberu anyįbe; o buru iya meru g'o gude ophu i paduru pę haa.

¹⁸Je akpaa lę teke ęphe kpuru onwophę nweswi su: Owaa bu Chileke unu, bu onye dufutaru unu l'ali Ijiputu! Mę teke ęphe pfubyishiru ępha ngu njọ epfubyishi ono.

¹⁹Obenu l'i gude eze obu-imemini ngu ono ophu i ti paduru pę haa l'ęchiegu. Urwukpu ono, kpuru oronmono ono ta ahajęduru pę l'eswe. O duę pę phọ shikota l'ųzo, ęphe shiru. Ophu oku ono, kpuru oronmono ono ahajęduru pę l'ęnyashi. O nodu abųjeru iphóró, egoshi pę ųzo, ęphe eshi.

²⁰I nuru pę Unme ngu ono, du ree ono g'o kpọ-zijeru pę ųzo. Ophu i ti kwedu g'ęphe ribuhu Mana, shi ngu l'ęka. Tęme i nukwa pę phọ mini g'ęphe ngua lę k'ęgu mini, agu pę nu.

- 21**Apha ụkporo labo be i heru phe l'echiegu. Ophu o to dudu iphe, uko iya dujeru phe. Uwe phe ta akahujeduru akahu. Ophu okpa ta abyajeduru phe erwa.
- 22**"I meru; ephe lwuta ali-eze; me oha, du iche iche; bya eworu ali ndu ono keshiaru phe g'o buru oke ali phe. Ephe nataru ali Heshibonu, bu ali-eze Sihonu; me ali Beshanu, bu ali-eze Ogu.
- 23**I meru g'oshilokpa phe ha igwerigwe ge kpokpode, no l'igwe. I dua phe dubata l'ali ono, i suru nna phe g'ephe bahu je anata ono.
- 24**O buru unwu phe bahuru je anata ali ono. I lwu-kpeeru phe ndu bu l'ali ono, bu iya bu ndu Kenuanu. I meru ge ndu Kenuanu; me ndu eze phe; me ndu ali ono l'ophu lakota phe l'eka; k'ophu ephe e-me phe g'o du phe.
- 25**Ephe lwutakota mkpukpu le mkpukpu, a kpushigbaaru ike; me ali, emehuje iphe; natakota ulo, ivu, dugbaa ree, du iche iche jiru ejiji. Ephe natakwapho welu, a tuwaru atutu; me opfu-vayinu; me k'olivu; me oshi-omi, du iche iche. Ephe ria ephe ji phe; dachaa okporokpo. Eguru iphe ono, i nukotaru phe ono; be ephe riru o tsoo phe utso.
- 26**Obenu l'ephe te ekwedu mee iphe, i suru g'ephe mee; teme ephe kwefuru ngu ike; woru ekemu ngu nwucha l'azu. Ephe gbushiru ndu mpfuchiru ngu, bu ndu loru phe aka le nchi g'ee-shi g'ephe gha iphu l'eka i no. Ephe pfubyishia ephe ngu njo epfubyishi.
- 27**O buru iya meru g'o gude i woru phe ye l'eka ndu ohogu phe, bu ndu mekpaaharu phe eh. Teke ephe no l'iphe-ehuka ono be ephe rakuru ngu. I gbe l'imigwe ngaberu phe nchi; bya egude obu-imemini ngu, paru aka nu phe ndu nafutaru phe l'eka ndu ohogu phe.
- 28**Nchi bya adule phe pho doo; ephe mee ejo-iphe l'iphu ngu ozo. I wokwaru phe ye l'eka ndu ohogu phe ozo; ephe buru ishi phe. Ephe byakwa araku ngu ozo; i gbe l'imigwe ngaberu phe nchi. I phuhahaaru phe obu-imemini; nafuta phe ugbo olemole.
- 29**I loru phe aka le nchi g'ee-shi g'ephe laphu azu meahaa ekemu ngu. Ole ephe wataleru-a eku onwophe jika eme iphe, i suru g'e meje. Ephe mee iphe-eji gude mebyia omelali ngu; mbu omelali ngu ono, bu nemadzu -dobe iya; l'o nodu ndzu ono. Ephe gude l'ephe bu ekwegekwe gbakutaru ngu azu; teme ephe kwefu ike jika angaberu ngu nchi.
- 30**Apha, du igwerigwe be i takotaru phe nshi. Teme i gude Unme ngu loo phe aka le nchi shita l'onu ndu mpfuchiru ngu. Ole ephe ta angaduru iya nchi. O buru iya meru g'o gude i woru phe ye l'eka ndu ali ozo, bukube phe nu.
- 31**Obenu l'i gude k'obu-imemini ngu ono, paru aka; ophu i ti kwedu g'ephe chihu; ophu i kwedu haa phe; kele i bu Chileke ophu emeje eze-iphe-oma; bya aburu onye aphuje obu-imemini.
- 32**Oo ya bu; gube Chileke anyi; mbu gube Chileke, paru aka; buru Okalibe; bya aburu onye du ebvu; mbu gube onye ono, edobeje ogbandzu ngu; ophu n-yemobu ngu abvudu abvubvu; jiko g'iphe-ehuka-a, anyi ejegbabe-a ta adukwa ngu mkpee mkpee

l'enyā; bụ iya bụ iphe-ẹhuka, dapfutaru anyi lẹ ndu eze anyi-a; mę ndu-ishi anyi; mę ndu-uke Chileke anyi; mę ndu mpfuchiru Chileke anyi; mbụ iphe-ẹhuka ono, dapfutaru nna anyi phẹ; mę ndibe ngu l'ophu; e -shi lẹ teke ndu eze ndu Asiriya bụ ishi byasụ ntanụ-a.

³³Iphemiphe ono, dapfutakọtaru anyi ono bẹ iswi dukotakwa ngu mma. I meru iphe, pfuru nhamunha; obenu l'anyibedua meru ejo-iphe.

³⁴Noo kele ndu eze anyi phẹ; mę ndu-ishi anyi; mę ndu-uke Chileke anyi; mę nna anyi phẹ te emeduru ekemu ngu. Ophu ẹphe ta ngaduru nchị l'iphe, ị sụru g'e mee; mę l'ẹka ị loru phẹ lẹ nchị;

³⁵je akpaa lẹ teke ẹphe nọ l'alị-eze phẹ l'ẹka ẹphe eri ẹguru iphe, parụ ẹka ị nukotaru phẹ; bya anọdu l'alị ono, ha ọsa ono; mbụ alị, emehuje iphe, bụ ẹka ị nuru phẹ ono; bẹ ẹphe te ejeduru ngu ozi; ophu ẹphe adakọbeduru haa ejo-ememe, ẹphe eme.

³⁶Lewarọ g'anyi bụ ohu nta-a l'alị ono, ị nuru nna anyi oche phẹ ono; mbụ g'ẹphe ria iphe, shi iya futa; mę iphe-oma, dū iya nū ono. Lewarọ g'anyi bụ ohu.

³⁷O bụru ndu eze ono, i doberu g'ẹphe bụru ndu-ishi anyi-a bẹ iphe, shi l'alị ono a-alakọtaje l'ẹka. Iphe, kparụ iya nū bụru iphe-eji, anyi meshiru. Ẹphe gude anyibedua; mę ẹku anyi eme iphe, dū phẹ ree. Anyi nọkwa l'oke iphe-ẹhuka!”

Ndu byaru ẹka l'ẹkwo ọgbandzu

³⁸“O kwa iphe ono meru g'o gude anyi nọdu agba ọgbandzu-a, geru egeru-a; bya edekwa iya phọ edede l'ẹkwo gẹ ndu-ishi anyi; mę ndu Lívayi anyi; mę ndu-uke Chileke anyi mee ya iphe-ọhubama.”

Nehemaya 10

¹Ndu meru iphe-ọhubama l'ẹkwo ọgbandzu ono bụ: ọchi-ọha, bụ Nehemaya nwa Hakalaya; mę Zedekaya;

²mę Seraya; mę Azariya; mę Jieremaya;

³mę Pashọ; mę Amaraya; mę Malukayijia;

⁴mę Hatushi; mę Shebanaya; mę Maluku;

⁵mę Harimu; mę Meremotu; mę Obedaya;

⁶mę Danẹlu; mę Ginetonu; mę Baruku;

⁷mę Meshulamu; mę Abáyijia; mę Mijiaminu;

⁸mę Mazaya; mę Biligayi; mę Shemaya. Ndu ono bukota ndu-uke Chileke.

⁹Ndu kẹ Lívayi bụ: Jieshuwa nwa Azanaya; mę Binuyi, bụ onye shi l'eri Henadadu; mę Kadumelu;

¹⁰mę unwunna phẹ, bụ Shebanaya; mę Hodaya; mę Kelita; mę Pelaya; mę Hananu;

¹¹mę Mayika; mę Rehobu; mę Hashabaya;

¹²mẹ Zaku; mẽ Sherebaya; mẽ Shebanaya;

¹³mẹ Hodaya; mẽ Bani; mẽ Beninu.

¹⁴Ndu-ishi ndu Ízureḷu, mekwarupho iphe-ohubama l'ekwo ogbandzu ono bu: Paroshi; mẽ Pahatu-Mówabu; mẽ Elamu; mẽ Zatu; mẽ Bani;

¹⁵mẹ Buni; mẽ Azugadu; mẽ Bebayi;

¹⁶mẹ Adonijia; mẽ Biguvayi; mẽ Adinu;

¹⁷mẹ Ateya; mẽ Hezekáya; mẽ Azuru;

¹⁸mẹ Hodaya; mẽ Hashumu; mẽ Bezayi;

¹⁹mẹ Harifu; mẽ Anatotu; mẽ Nebayi;

²⁰mẹ Magupiyashi; mẽ Meshulamu; mẽ Heziru;

²¹mẹ Meshezabelu; mẽ Zadoku; mẽ Jiaduwa;

²²mẹ Pelataya; mẽ Hananu; mẽ Anaya;

²³mẹ Hosiya; mẽ Hananaya; mẽ Hashubu;

²⁴mẹ Haloheshi; mẽ Piliha; mẽ Shobeku;

²⁵mẹ Rehumu; mẽ Hashabuna; mẽ Maseya;

²⁶mẹ Ahaya; mẽ Hananu; mẽ Ananu;

²⁷mẹ Maluku; mẽ Harimu; mẽ Bana.

Ọgbandzu, a gbaru

²⁸Ndu Ízureḷu ozo, phoduru nu; mẽ ndu-uke Chileke; mẽ ndu Lívayi; mẽ ndu nche-onu-oguzo; mẽ ndu aguje ebvu; mẽ ndu eje ozi l'eze-ulo Chileke; mẽ iphe, bu ndu gude k'ekemu Chileke ono bufu onwophe l'ehu ndu ohozo; mewaro unyomu phe; mẽ unwu phe unwoke; mẽ unwada phe, bu ndu ophu iphe edowa enya;

²⁹tuko g'ephe ha tsoru unwunna phe; mẽ ndu a maru epha phe kporu enwa kpua onwophe; ria nte l'ephe a-nodu eme ekemu Chileke; mbu ekemu ono, Chileke shi l'eka Mosisu, bu nwozi iya tua; teme l'ephe a-nodu eme iphe, Chipfu, bu Nnajiuphu suru g'e meje; meje omelali iya; mẽ iphe, o toru okpa iya.

³⁰“Anyi nodu ekwe ukwe l'anyi tee kuduru unwada anyi kee ndu ali ozo; ophu anyi ta alutaduru unwu anyi unwoke unwada nkephe.

³¹“O -buru le ndu ali ozo be wobataru ngwaswa phe; mẽ ereshi phe bya erere l'eswe atuta unme be anyi ta azudu phe aswa l'eswe-atuta-unme; ozoo mboku ozo, du nsọ. Apha k'esaa be anyi taa kodu ali akoko; teme iphe, bu ugwo, e ji anyi ejiji be anyi ahakotaje g'o laa ke mmanu.

³²“Iphe ozo, anyi kwetaru l'anyi a-nodu eme bu l'aphagapha be anyi e-wotaje mkpola-ochaa, erwa iya du nkereto shekelu bya anu g'e gude eje ozi, du l'ulo Chileke anyi.

³³Mbụ g'e gudeje iya zūta iphe, e gude eme buredi, eedobejeru Chileke nsọ; gude iya zūta iphe, e gude egwe ngweja-nri, eegweje tekenteke; mę iphe, e gude egwe ngweja-akpọ-ọku, eegweje tekenteke; mę iphe, e gude egwe ngweja, eegweje l'eswe-atūta-unme; mę ophu eegweje l'ọbo ọnwa ọphúú; mę l'ọbo-iphe ọzo, bụ ọbo-iphe, geru egeru; mę ngweja ọzo, dū nsọ; mę kę ngweja-iphe-eji, e gude apfu ugwo iphe-eji, ndu Ízurelu meshiru; męwaro iphe, bụkpoo ozi, eeje ejeje l'ulo Chileke anyi.

³⁴“Anyibe ndu-uke Chileke; mę ndu Lívayi; mę ndu Ízurelu mmanụ bę tuakwaru ido gude gbaa g'ee-shije akpa nkụ, e wobata l'ulo Chileke anyi aphagapha. A gbaru akpa nkụ ọbu l'ęnya-unuphu l'ęnya-unuphu; tubukwaapho teke aa-kpataję iya; mbụ nkụ, e gude akpọ ngweja ọku l'oru-ngweja Chipfu, bụ Chileke anyi; ęgube ono, e deru iya l'ekemu ono.

³⁵“Akpuru-iphe-mbụ, shi l'iphe, anyi meberu l'alị; yele akpuru mbụ oshi-omi anyi mītaru bę anyi e-wobataję l'ulo Chipfu aphagapha.

³⁶“Nokwapho g'anyi e-kutaję ọkpara l'unwoke, a nwuru anyi; kpūta anụ, bụ ivuzo l'eswi anyi; mę aturu anyi; mę egbu anyi; gude je l'ulo Chileke anyi; je anụ ndu-uke Chileke, bụ ndu eje ozi l'ulo Chileke anyi ono; ęgube ono, e deru iya l'ekemu ono.

³⁷“Anyi e-wotakwapho ereshi mbụ anyi, e gweru egwegwe; yele iphe ọzo, gbaru g'anyi nū Chileke; dū g'akpuru mbụ, oshi-omi anyi mītaru; yele mę ọphúú anyi; mę manụ; je anụ ndu-uke Chileke g'e dobegbaa l'ulo, aakwakọbeje iphe l'ulo Chileke. Anyi e-wota oke-lanụ-l'uzo-iri l'iphe, anyi metaru l'alị nū ndu Lívayi; noo kęle ọo ndu Lívayi bę anakọje oke-lanụ-l'uzo-iri lę mkpukpu lę mkpukpu ęka aakọbeje iphe.

³⁸Onye uke Chileke, bụ onye shi l'eri Eronu bę a-nọduje swiru ndu Lívayi ono m'ephe nakọje oke-lanụ-l'uzo-iri ono. Ndu Lívayi ono e-shi l'ime oke-lanụ-l'uzo-iri ono, ephe nakoru ono wofuta oke-lanụ-l'uzo-iri je edobe l'ulo, aakwakọbeje iphe l'ulo-ęku, dū l'ulo Chileke anyi.

³⁹Ndu Ízurelu mę ndu Lívayi bę a-tuje ereshi; mę mę ọphúú; mę manụ wobata l'ulo, aakwakọbeje iphe, bụ ęka ivu k'eze-ulo Chileke aduje; mę l'ęka ndu-uke Chileke, l'eje ozi teke ono anọduje; mę ęka ndu nche-onu-oguzo; mę ndu aguje ebvu anọduje; mbụ l'anyi taa haędu ulo Chileke anyi.”

Nehemaya 11

Ndu byaru eburu lę Jierúsalemu

¹Teke ono bụ ndu-ishi ndu Ízurelu bu lę Jierúsalemu. Ndu Ízurelu ophuna bya atua ido gude hōta ndu e-je eburu lę Jierúsalemu, bụ mkpukpu, dū nsọ ono. O buru onye lanu bę ephe ahotaję l'ime umadzu iri; ephe ahaa tete ophuu g'ephe buru lę mkpukpu pę.

²Ndu kweru wofuta onwophe l'ephe e-buru lę Jierúsalemu bę ndu Ízurelu jaru ajajà.

³Ndu ọwa-a bụ ndu ophu bụ ndu-ishi mkpukpu lę ndu ophu bu lę Jierúsalemu; obenu lę ndu ophuu, bụ iya bụ ndu Ízurelu; mę ndu-uke Chileke; mę ndu Lívayi; mę ndu eje ozi l'eze-ulo Chileke; mę oshilokpa ndu ejeru Sólomonu ozi bę onyenonu l'ęhu l'ęhu bukōta l'alị k'ęka iya lę mkpukpu pę l'alị Jiuda.

⁴Oshilokpa Jiuda me oshilokpa Benjiaminu be haru buru le Jierusalemu. Ndu ophu bu oshilokpa Jiuda, bu le Jierusalemu bu: Ataya; Ataya bu nwa Uzaya; Uzaya buru nwa Zekaraya; Zekaraya buru nwa Amaraya; Amaraya buru nwa Shefatiya; Shefataya buru nwa Mahalalelu, bu onye shi l'eri Perezu.

⁵Temē waa Maseya; Maseya bu nwa Baruku; Baruku buru nwa Kolu-Hoze; Kolu-Hoze buru nwa Hazaya; Hazaya buru nwa Adaya; Adaya buru nwa Jioyaribu; Jioyaribu buru nwa Zekaraya, bu onye shi l'eri Shilo.

⁶Oshilokpa Perezu, bu le Jierusalemu be tukoru du unu l'ukporo eto l'umadzu esato; bukotaru mkparawa.

⁷Ndu bu oshilokpa Benjiaminu, bu le Jierusalemu bu: Salu; Salu bu nwa Meshulamu; Meshulamu buru nwa Jiowedu; Jiowedu buru nwa Pedaya; Pedaya buru nwa Kolaya; Kolaya buru nwa Maseya; Maseya buru nwa Itiyelu; Itiyelu buru nwa Jieshaya.

⁸A bya eyeru iya unwunna Salu phe, bu Gabayi; me Salayi. Iphe, ephe tukoru du bu unu labo l'ukporo ishii l'umadzu esato.

⁹Onye bu onye-ishi phe bu Jiowelu; nwa Zikiri; Jiuda, bu nwa Hasenuwa buru onye etsota onye-ishi le mkpukpu ono.

¹⁰Ndu uke Chileke, bu le Jierusalemu ono bu: Jiedaya nwa Jioyaribu; me Jiakinu;

¹¹me Seraya nwa Hilikiya; Hilikaya buru nwa Meshulamu; Meshulamu buru nwa Zadoku; Zadoku buru nwa Merayotu; Merayotu buru nwa Ahitubu, bu onye-ishi l'ulo Chileke.

¹²A bya eyeru iya unwunna phe, bu ndu eje ozi l'eze-ulo Chileke. Iphe, ephe tukoru du bu unu labo l'ukporo umadzu l'umadzu labo. Onye ozo bu Adaya nwa Jierohamu; Jiehoramu buru nwa Pelalaya; Pelalaya buru nwa Amuzi; Amuzi buru nwa Zekaraya; Zekaraya buru nwa Pasho; Pasho buru nwa Malukayijia.

¹³A bya eyeru iya unwunna iya, bukota ndu-ishi l'enya-unuphu ibe nna phe. Iphe, ephe tukoru du buru ukporo iri l'ebo l'umadzu labo. Onye ozo bu Amashayi nwa Azarelu; Azarelu buru nwa Ahuzayi; Ahuzayi buru nwa Meshilemotu; Meshilemotu buru nwa Ima.

¹⁴A bya eyeru iya unwunna iya ndu bukota mkparawa. Iphe, ephe tukoru du bu ukporo ishii l'umadzu esato. Onye-ishi phe bu Zabudelu nwa Hagedolimu.

¹⁵Ndu Livayi, bu le Jierusalemu bu: Shemaya nwa Hashubu; Hashubu buru nwa Azurikamu; Azurikamu buru nwa Hashabaya; Hashabaya buru nwa Buni.

¹⁶Ndu ozo bu: Shabetayi yele Jiozabadu, bu ndu-ishi ndu Livayi mbu ndu eleta enya l'ozi, eeje l'azu ulo Chileke.

¹⁷Onye ozo bu: Matanaya nwa Mayika; Mayika buru nwa Zabudi; Zabudi buru nwa Asafu, bu onye-ishi ebvu-ekele; me epfu anu Chileke. Bakubukaya bu onye k'ebo l'unwunna Matanaya. Onye ozo bu Abuda nwa Shamuwa; Shamuwa buru nwa Galalu; Galalu buru nwa Jiedutunu.

¹⁸Ndu Lívayi, bu lẹ mkpukpu ono, du nsọ ono bẹ tukuru du ukporo iri l'eno l'umadzu eno.

¹⁹Ndu nche-onu-oguzo, bu lẹ Jierúsalemú bụ: Akubu; mę Talumonu; mę unwunna phe, bu ndu anọduje eche nche l'onu-oguzo. Iphe, ephe du bu ukporo esato l'umadzu iri l'ebo.

²⁰Ndu Ízurelu ozo, phoduru nu; mę ndu-uke Chileke; mę ndu Lívayi ozo, bu ndu phoduru nu bẹ bukota lẹ mkpukpu lẹ mkpukpu, nogbaa l'alí Jiuda. Onyenonu bugbaa l'oke alí nkiya.

²¹Ndu eje ozi l'eze-ulo Chileke buru l'eli úbvú Ofelu. O buru Ziha yele Gishipa bu ndu-ishi ndu ono, eje ozi l'eze-ulo ono.

²²Ndu bu ndu-ishi ndu Lívayi ono, bu lẹ Jierúsalemú bụ: Uzi nwa Bani; Bani bu nwa Hashabaya; Hashabaya buru nwa Matanaya; Matanaya buru nwa Mayika, bu onye shi l'eri Asafu. Eri Asafu bẹ bu ndu-ishi ebvu, aagu agugu l'eze-ulo Chileke.

²³Ephebe ndu aguje ebvu ono bẹ eze turu ekemu swiberu; o buru iya anọduje egoshi iphe, ephe a-nodu eme mboku-mboku.

²⁴Onye no-chiru enya ndu Ízurelu l'iphu eze bẹ bu Petahaya nwa Meshezabelu; mbu onye shi l'eri Zera nwa Jiuda.

Ndu Ízurelu, bu lẹ mkpukpu, ta abudu Jierúsalemú

²⁵A bya l'unwu mkpukpu ozo mę egu, du iya nu; unwu Jiuda bẹ haru buru lẹ Kiriyatu-Araba; mę unwu mkpukpu, dukota iya nu. Ephe hakwarupho buru lẹ Dibonu mę unwu mkpukpu, dukota iya nu; mę Jiekabuzelu mę unwu mkpukpu, dukota iya nu.

²⁶Ephe buru lẹ Jieshuwa; mę Molada; mę Betu-Peletu;

²⁷mę Haza-Shuwalu; mę Biye-Sheba; yele unwu mkpukpu, dukota iya nu;

²⁸mę lẹ Zikulagu; mę Mekona; yele unwu mkpukpu, dukota iya nu;

²⁹mę lẹ Enu-Rimonu; mę Zora; mę Jiarumutu;

³⁰mę Zanowa; mę Adulamu; yele unwu mkpukpu, dukota iya nu; mę lẹ Lakishi; yele egu, nokota iya nu; mę lẹ Azeka yele unwu mkpukpu, dukota iya nu. Oo ya bu l'ephe bu e -shi lẹ Biye-Sheba jeye lẹ nsuda Hınomu.

³¹Oshilokpa Benjaminu bẹ shi lẹ Geba bua kwaseru; ephe bu lẹ Mikumashi; mę Ayijia; mę Betelu; yele unwu mkpukpu, dukota iya nu;

³²mę lẹ Anatotu; mę Nobu; mę Ananaya;

³³mę Hazo; mę Rama; mę Gitayimu;

³⁴mę Hadidi; mę Zebowimu; mę Nebalatu;

³⁵mę Lodu; mę Ono; yele nsuda "Nsuda ndu eme ona."

³⁶Ndu Lívayi, bu ndu ephe l'ipfu Jiuda shi buru bẹ a haru keru yeru ipfu Benjaminu.

Nehemaya 12

Ndu uke Chileke waa ndu Lívayi

- ¹Waa ndu-uke Chileke; mę ndu Lívayi, ęphe lę Zerúbabelu nwa Sheyalutiyęlu; mę Jieshuwa swi shi l'ęka a kpuru phę lę ndzu lwa baa: Seraya; mę Jieremaya; mę Ęzura;
- ²mę Amaraya; mę Maluku; mę Hatushi;
- ³mę Shekanaya; mę Rehumu; mę Meremotu;
- ⁴mę Ido; mę Ginetoyi; mę Abáyijia;
- ⁵mę Mijiaminu; mę Madaya; mę Biliga;
- ⁶mę Shemaya; mę Jioyaribu; mę Jiedaya;
- ⁷mę Salu; mę Amọku; mę Hilikaya; mę Jiedaya. Ndu ono shi bukotaru ndu-ishi ndu-uke Chileke; buru ishi unwunna phę teke Jieshuwa bu ishi.
- ⁸Ndu kę Lívayi bu: Jieshuwa; mę Binuyi; mę Kadumelu; mę Sherebaya; mę Jiuda; mę Matanaya. O buru Matanaya yele unwunna iya be bu ndu k'ebvu-ekele du l'ęka.
- ⁹Unwunna phę, bu Bakubukaya; yele Uni buru ndu anọduje ekweru phę ebvu ono.

Eri Jieshuwa, bu onye-ishi ndu-uke Chileke

- ¹⁰Jieshuwa bu nna Jioyakimu; Jioyakimu buru nna Ęliyashibu; Ęliyashibu buru nna Jioyada;
- ¹¹Jioyada buru nna Jionatanu; Jionatanu buru nna Jiaduwa.

Ndu-ishi l'ęnya-unuphu ndu-uke Chileke

- ¹²Ndu shi buru ishi l'ęnya-unuphu ndu-uke Chileke lę teke Jioyakimu bu ishi bu: Onye-ishi kę ęnya-unuphu Seraya bu Meraya. Onye-ishi kę ęnya-unuphu Jieremaya buru Hananaya.
- ¹³Onye-ishi kę ęnya-unuphu Ęzura buru Meshulamu. Onye-ishi kę ęnya-unuphu Amaraya buru Jiehohananu.
- ¹⁴Onye-ishi kę ęnya-unuphu Maluku buru Jionatanu. Onye-ishi kę ęnya-unuphu Shebanaya buru Jióşefu.
- ¹⁵Onye-ishi kę ęnya-unuphu Harimu buru Aduna. Onye-ishi kę ęnya-unuphu Merayotu buru Hęlukayi.
- ¹⁶Onye-ishi kę ęnya-unuphu Ido buru Zekaraya. Onye-ishi kę ęnya-unuphu Ginetonu buru Meshulamu.
- ¹⁷Onye-ishi kę ęnya-unuphu Abáyijia buru Zikiri. Onye-ishi kę ęnya-unuphu Minyaminu yele kę Mowadaya buru Pilitayi.
- ¹⁸Onye-ishi kę ęnya-unuphu Biliga buru Shamuwa. Onye-ishi kę ęnya-unuphu Shemaya buru Jiehonatanu.

¹⁹Onye-ishi ke ɛnya-unuphu Jioyaribu buru Matenayi. Onye-ishi ke ɛnya-unuphu Jiedaya buru Uzi.

²⁰Onye-ishi ke ɛnya-unuphu Salayi buru Kalayi. Onye-ishi ke ɛnya-unuphu Amoku buru Eba.

²¹Onye-ishi ke ɛnya-unuphu Hilikaya buru Hashabaya. Onye-ishi ke ɛnya-unuphu Jiedaya buru Netanelu.

Edeshi ɛpha ndu-uke Chileke waa ke ndu Lívayi l'ɛkwo

²²Teke ɛliyashibu bu ishi; me Jioyada; me Jiohananu; me Jiaduwa be e dekotaru ɛpha ndu-ishi ndu Lívayi; me ke ndu-ishi ndu-uke Chileke l'ɛkwo; ɛpha ono be e deru teke Dariyosu bu eze ndu Peshiya.

²³Unwu Lívayi, bu ndu-ishi l'ɛnya-unuphu ibe nna phe be e dekotaru ɛpha phe l'ɛkwo, e deshuru iphe, e meru teke ono. ɛpha ono be e deru jeye teke ke Jiohananu, bu nwa ɛliyashibu.

Ekeshi ozi eze-ulo Chileke

²⁴Ndu-ishi ndu Lívayi bu: Hashabaya me Sherebaya; me Jieshuwa, bu nwa Kadumelu. Unwunna phe be apfujeru ghaaru phe iphu; agu ebvu-ajaja yele ebvu-ekele. Teke ndu ophuu guru iya; ndu ophuu ekwee ya ekwekwe egube ono, Dévidi, bu onye ke Chileke toru phe okpa iya.

²⁵Matanaya; me Bakubukaya; me Obedaya; me Meshulamu; me Talumonu; me Akubu be bu ndu nche, anoduje eche nche l'ulo, eedobeje iphe l'onu-abata eze-ulo Chileke.

²⁶Ndu ono be jeru ozi le teke ke Jioyakimu nwa Jieshuwa; mbu nwanwa Jiozadaku; me teke ke Nehemaya, bu ochi-oha; mekwapho teke ke Ezura, bu onye uke Chileke bya aburu onye edeje ekwo.

Eye igbulo Jierusalemu l'eka Chileke

²⁷O be teke ee-woru igbulo Jierusalemu ono ye l'eka Chileke; a choo ndu Lívayi jekota l'ekameka, ephe bu; g'ephe byakota Jierusalemu bya egude ehu-utso; me ebvu-ekele; kua ogena; kpoo une; me ogelenda; gude woru igbulo ono ye l'eka Chileke.

²⁸Ndu Lívayi, bu ndu ogbo-ebvu ono shi l'iphe, bu ali, no-pheru Jierusalemu mgburugburu; me unwu mkpukpu, du le Netofa toko dzukobe.

²⁹Ndu ophu shi le Betu-Giligalu; me l'uzo Geba; me Azumavetu dzukotaru; kele ndu ogbo-ebvu ono be metaru mkpukpu buphee Jierusalemu mgburugburu.

³⁰Ndu uke Chileke me ndu Lívayi doo onwophe nsọ; bya edokwaapho ndu Izurelu nsọ; bya edoo onu-abata Jierusalemu yele igbulo ono nsọ.

³¹Teke ono be mu byaru eduta ndu-ishi ndu Jiuda; ephe nyihu eli igbulo ono. Mu bya agbaa uzi ndu ebvu labo, hagbaa shi, bu ndu a-nodu agu ebvu-ekele. Uzi lanu wuru shia eli igbulo ono uzo ekutara futu le Onu-abata Ikpozo.

³²Ndu l'etso phẹ l'azụ bụ Hoshaya yele nkeru-ẹbo ndu-ishi ndu Jiuda;

³³mẹ Azaríya; mẹ Ezura; mẹ Meshulamu;

³⁴mẹ Jiuda; mẹ Benjiaminu; mẹ Shemaya; mẹ Jieremaya;

³⁵mẹ ndu ozo, shi l'eri ndu-uke Chileke, chigbaa opu; mękwapho Zekaraya, bụ nwa Jionatanu; Jionatanu bụ nwa Shemaya; Shemaya bụru nwa Matanaya; Matanaya bụru nwa Mayíkaya; Mayíkaya bụru nwa Zaku; Zaku bụru nwa Asafu;

³⁶yeẹ ụnwunna iya, bụ Shemaya; mẹ Azarelu; mẹ Milalayi; mẹ Gilalayi; mẹ Mayi; mẹ Netanelu; mẹ Jiuda; mẹ Hanani. Ephemedia bẹ gude ụdudu ngwa-ebvu, Dévidi, bụ onye kẹ Chileke sụru g'e gudeje. O bụru Ezura, bụ onye edeje ẹkwo bẹ vutaru phẹ ụzo.

³⁷Ephe rwuepho Onu-abata Enya-nwobvu; epe kwaseru je enyikota ẹka eeshije enyiba lẹ mkpukpu Dévidi; mbụ mẹ a -nọdu enyikota igbulọ ono enyikota. Epe kwaseru eli igbulọ ụlo Dévidi ono futa lẹ Onu-Abata-Mini, nọ l'uzo ẹnyanwu-awawa.

³⁸Ndu ebvu ophunapho wuru shia ụzo ẹkicha. Mbedia mę nkeru-ẹbo ndu Ízurelu nọdu etso phẹ l'azụ l'eli igbulọ ono. Anyi shi l'ulo-ephekerephe Otapfupfufu-ọku futa lẹ Igbulo-osa.

³⁹Anyi shi l'eka ono wuru je aghaa Onu-abata Ifuremu; mę Akahụ Onu-abata; mę Onu-abata Ema; mę Ulo-ephekerephe Hananelu; mę Ulo-ephekerephe, aza Ukporeise; shi nno futa lẹ Onu-abata Aturu. O bụru l'onu-abata Nche bẹ epe jeberu.

⁴⁰Ndu ogbo-ebvu labọ ono, aguje ebvu-ekele ono bya anọdu l'onodu phẹ l'ulo Chileke. Mbedia mę nkeru-ẹbo ndu-ishi ono nọdukwapho l'onodu k'anyi.

⁴¹Ndu uke Chileke, bụ Eliyakimu; mę Maseya; mę Minyaminu; mę Mayíkaya; mę Eliyowenayi; mę Zekaraya; mę Hananaya nọdu l'onodu nkephẹ pagbaaru opu l'eka.

⁴²Ndu ozo bụ Maseya; mę Shemaya; mę Eleyaza; mę Uzi; mę Jiehohananu; mę Malukayijia; mę Elamu; mę Eza. Ndu ebvu ono wata agu ebvu; onye bụ ishi ebvu phẹ bụru Jiezurahaya.

⁴³Mboku ono bẹ epe gweru ngweja, paru ẹka apaa; ẹhu tsoo phẹ uto; noo kele Chileke bẹ meru g'ẹhu tsoo phẹ uto shii. Ụnwanyi mę unwegirima tuko ete eswa. A -gbẹ l'eka du ẹnya anụ ụzu ẹhu-uto, aatụ lẹ Jierusalemu.

Iphe, a nuru g'e gude baaru Chileke ẹja l'ulo iya

⁴⁴O bụru mboku ono bẹ a hotaru ndu a-nọdu eletaje ẹnya l'ulo, eedobeje iphe, a turu atutu; mę akpuru-iphe-mbụ; mę oke-lanu-l'uzo-iri. Ndu ono e-shije l'opfu, a kọkotaru lẹ mkpukpu ono mgburugburu wobata iphe bya edobe l'ulo ono, eedobeje iphe ono ẹgube ekemu sụru g'e mejeru iya ndu-uke Chileke mę ndu Lívayi. Kele ndu-uke Chileke; mę ndu Lívayi ono, eje ozi ono meru; ẹhu nọdu atso ndu Jiuda uto.

⁴⁵Ephe eje ozi Chileke phe; bya eje ozi k'asafu nturwu; egube ono, ndu ebvu me ndu nche-onu-oguzo ejekwapho ozi, rwuberu phe nu; egube ono, Devidi me nwa iya, bu Solomonu suru g'e meje iya.

⁴⁶Noo kele teke Devidi me Asafu no ndzu; mbu teke ndiche be e shi nweru ndu-ishi ndu ebvu; nweru ebvu, e gude aja Chileke ajaja; me ebvu, e gude ekele iya ekele.

⁴⁷Teke Zerubabelu yee Nehemaya bu ishi be ndu Izurelu g'ephe ha ewotaje iphe, rwuberu ndu ebvu me ndu nche-onu-oguzo nu phe mboku-mboku. Nokwapho g'ephe edobeje iphe nsọ nu ndu Lívayi; ndu Lívayi edobe iphe nsọ nu oshilokpa Eronu.

Nehemaya 13

Ebufu ndu ohozo l'eka ndu Izurelu no

¹Mboku ono be ephe guru iphe, e deru l'ekwo Mosisu; ndu Izurelu numa-dzuru iya. Iphe, a guvuru l'ekwo ono bu g'o to dukwa onye Amonu; ozoo l'oo onye Mowabu e-je abata l'eka ndibe Chileke dzukoberu;

²noo kele ephe te gudedu nri me mini gba ndu Izurelu ndzuta; o buchiaru Belamu be ephe butaru g'o bya bya atua phe onu. O to bu le Chileke anyi gharu onu ono ighaphu; o buru onu-oma.

³Oo ya bu; ndu Izurelu numaepho iphe, ekemu ono pfuru; ephe bufukota ndu shi l'ohozo l'eka ndu Izurelu no.

Nehemaya edozi iphe

⁴Temanu iphe ono mee be Eliyashibu, bu onye uke Chileke; mbu onye a turu eka g'o buru onye-ishi eka edobeje iphe l'eze-ulo Chileke; be yele Tobaya du le ree shii.

⁵Eze mkpuru ono, e shi edobeje ngweja-nri; me unwu-isensu; me ivu, e gude eje ozi l'eze-ulo Chileke; me oke-lanu-l'uzo-iri k'ereshi; me ke mee; me ke manu, aasuje g'e wotaru ndu Lívayi; me ndu ebvu; me ndu nche-onu-oguzo; mbu mkpuru ono, e shi edobeje iphe, a turu utu nu ndu-uke Chileke be Eliyashibu nuru Tobaya.

⁶Teke ono, iphe ono eme ono be mu ta nodu le Jierusalemu. Noo kele apha, kwe Atakuzakuzesu ukporo apha l'apha iri l'ebo, e meru iya eze ndu Babilonu be mu laphuru azu l'ibe eze. A noepho nwanshii; mu rwoo eze g'o haa mu ge mu lashia.

⁷Mu bya alwarwuta Jierusalemu bya ahuma ejo-iphe ono, Eliyashibu meru l'opfu ehu Tobaya ono; mbu anunu ono, o nuru iya mkpuru, du l'eze-ulo Chileke o buru ono.

⁸Iphe ono ghushikpo mu eghu ike; mu chitakota ivu ulo, bu ke Tobaya, no le mkpuru ono; tuphashia l'etezi.

⁹Mu bya akaru; a bya emechaa mkpuru ono emecha; mu bya egwetakota ivu, eegudeje eje ozi l'ulo Chileke bya edobephu azu l'eka ono; me ngweja-nri; me unwu-isensu.

10 Mu bya amakwarupho l'a taa nujedu ndu Lívayi iphe, rwuberu phe nu; o mee k'ophu bu le ndu Lívayi; me ndu l'aguje ebvu, bu ndu l'eje ozi l'eze-ulo Chileke ono be gbakashihuru nu; onyenonu kọahaa opfu iya.

11 Oo ya bu mu baaru ndu-ishi mba su phe: “? Bu gunu meru g'o gude a paru eze-ulo Chileke gbado egube-a?” Mu bya achikobe ndu Lívayi; me ndu ono, aguje ebvu ono dobephu phe azu l'onodu phe.

12 O buru teke ono be ndu Jiuda l'ophu wobataaharu oke-lanu-l'uzo-iri, shi l'ereshi; me mee; me manu l'ulo, eedobeje iphe.

13 Ndu mu turu eka g'ephe buru ndu-ishi ulo ono, eedobeje iphe ono bu: Shelemaya, bu onye uke Chileke; me Zadoku, bu onye edeje ekwo; me onye Lívayi, epha iya bu Pedaya. Onye mu hotaru swibe phe g'o yejeru phe eka bu Hananu nwa Zaku; buru nwanwa Matanaya; noo kele ndu ono be a guru le ndu e gude ire phe eka. Ozi phe bu g'ephe kejeru unwunna phe iphe.

14 “Gube Chileke mu; nyatakwa mu roo ya l'iphe-a, mu meru-a. Be huchafukwa iphe, du ree, mu megbaberu eze-ulo gube Chileke mu; me l'ozi, eeje l'eka ono.”

15 Teke ono be mu humaru ndu no le Jiuda azoshi mee l'akpuru vayinu l'eswe-atuta-unme; gude nkafu-igara evubatagbaa ereshi; me mee; me akpuru vayinu; me akpuru figu; me ivu ozo, du iche iche. Ephe nodu evu iya ala le Jierusalemu l'eswe-atuta-unme. Mu loo phe eka le nchi g'ephe haa ere nri le mboku ono.

16 Ndu Taya, bu ndu bukwapho le Jierusalemu be evubataje ema; me ngwaswa ozo, du iche iche ere ndu Jiuda le Jierusalemu l'eswe-atuta-unme.

17 Oo ya bu; mu baaru ndu a maru epha phe le Jiuda mba su phe: “? Ejo-iphe owa, unu eme-a bu gunu; ke g'unu merwushi eswe-atuta-unme?”

18 ? Tobudu egube iphe ono be nna unu phe meru; meru iphe, Chileke anyi meru g'ejo iphe-ehuka-a dapfuta anyi waa mkpukpu-a? Unu byakwa nta-a bya awata emerwushi eswe-atuta-unme; shi nno eme g'oke ehu-eghu Chileke kabaa azupyabe ndu Izurelu.”

19 O be l'uzo nchi-ejihu le mboku, bu nchitabohu iya a-buru eswe-atuta-unme; mu tua ekemu su g'a gbachishikota mgbo onu-abata Jierusalemu; sukwapo g'a ta guhakwa iya aguha jeye eswe-atuta-unme a-bvada. Teme mu haru ndu-ozu mu dokachaa l'onu-abata ono g'o to dushi ivu, ee-vubata l'eswe-atuta-unme ono.

20 Ndu ngho; me ndu ere ngwaswa, du iche iche kwachaa akwakwa l'azu Jierusalemu ugbo lanu; ozoo ugbo ebo.

21 Mu bya alooru phe eka le nchi su phe: “? Bu gunu meru g'o gude unu nodu akwaje l'azu igbulo ono? Unu -mebaa ya ozo be mu a-dakwa unu eka.” Shita teke ono kwaseru be ephe byabuhuru l'eswe-atuta-unme.

22 Mu su ndu Lívayi g'ephe sachaa onwophe asacha je anodu cheje nche l'onu-abata ono; k'ophu ee-dobe eswe-atuta-unme ono nso. Nyatakwa mu pho l'iphe-a, mu meru-

a; gube Chileke mu. Guderọ n-yemobu ngu ono, parụ ẹka ono phuru mu obu-imemini.

²³Lẹ teke ono bẹ mu humakwarupho ndu Jiu, lushiru unwanyi, shi lẹ Ashidodu; mẹ lẹ Amonu; mẹ lẹ Mówabu.

²⁴Nkerẹbo l'unwegirima phẹ nọdu epfu opfu ndu Ashidodu; ọzoo opfu ndu ibiya nkepẹ; ọphu ẹphe ta amadu g'epfu opfu-alị ndu Jiu.

²⁵Mu bya abaarụ phẹ mba tua phẹ ọnu. O nweru ndu ọphu mu chiru iphe; lashiya phẹ ẹgbushi l'ishi. Mu sụ phẹ g'ẹphe gude ẹpha Chileke ria nte sụ: “Anyi ta abyadu e-kuta unwada anyi kee unwu phẹ nwoke; ọphu anyi ta abyadu alutaru unwu anyi unwoke unwada phẹ; ọphu anyi ta alutadu phẹ k'onwanyi.

²⁶? Tọ bunaa k'unwanyi, du nno bẹ Sólomonu, bu eze ndu Ízurelu gude mee iphe-eji tọ? L'ohamoha bẹ ta adukwa eze ọzo, du gẹ yẹbedua. Teme ọ buru onye Chileke iya yeru obu; Chileke mee ya g'ọ buru eze ndu Ízurelu l'ọphu. Obenu l'ọo unwanyi ọhozo bẹ kpataleru-a o mee iphe-eji.

²⁷? Ọ du ree g'anyi gude nchị anyi numa l'unu l'eme ejo-iphe, ha ẹgube-a; mbụ l'unu lushiru unwanyi ọhozo; shi nno buru ndu mesweru Chileke anyi tọ?”

²⁸Onye lanu l'unwu Jioyada; nwa Eliyashibu, bu onye-ishi ndu-uke Chileke bẹ bu ọgo Sambalatu, bu onye Horonu. Ọo ya bu; mu chifu iya g'o shi l'ẹka mu nọ lufu.

²⁹Nyatakwa phẹ; gube Chileke mu; noo kele ẹphe turuwuru okwa ndu-uke Chileke; bya aturwua oibandzu, gu lẹ ndu-uke Chileke mẹ ndu Lívayi gbaru.

³⁰Tobudu iya bu; mu safukota phẹ nturuwu, ẹphe chitaru l'ẹhu ndu alị ọzo; bya anuchaa phẹ ozi, gbaru ndu-uke Chileke; mẹ ndu Lívayi; onyenonu jeahaa ozi, gbaru iya nu.

³¹Mu mekwapho g'e vutaje nkụ yele akpuru-iphe-mbụ l'orwuberu iya. Gube Chileke mu; nyatakwa mu ro lẹ k'oma.

Esuta

Esuta 1

Eze-nwanyị, bụ Vashiti ekwefuru ji iya ike

- ¹Owa-a bụ iphe, nwuru teke Kuzakusesu shi buru eze; mbu Kuzakusesu ono, shi buru ishi mkpuku ukporo ishii l'esa; e -shi l'ali Indiya jasu l'ali Kushi.
- ²Teke ono be eze, bu Kuzakusesu shi nodu l'aba-eze iya le mkpuku Susa, bu ishi mkpuku ali ono.
- ³O be l'apha, kwe iya apha eto, o wataru abu eze; o shiaru ndu-ishi l'ali-eze iya nri; waa ndu-ozu iya g'ephe ha. Ndu-ishi ndu ojogu ndu Peshiya; yele ke ndu Midiya; waa ndu nweru enya; me ndu-ishi le mkpuku le mkpuku, nokota iya l'eka g'o ha be o yekotaru le nri obu.
- ⁴Obo-iphe ono be o boru ukporo abali tete mgburugburu. O gude teke ono goshi ge ya bu-be eze, nwenukaru iphe; waa ge ya habe shii bya adu-bekwapho biribiri.
- ⁵A bo-ghechaepho obo-iphe ono; eze kua ndu bu le mkpuku Susa, bu ishi mkpuku ali-eze iya le nri ephe noru ujiku esaa k'iche. Eka ephe no bo obo-iphe k'ono bu l'eka du g'oma-unuphu l'ime mgbabu ibe-eze. Onyemonye be o yeru le nri ono; ndu ha shii me ndu ha nwanshi.
- ⁶Iphe, e gude dozia aka obu g'o maa mma bu upfu ekwa-ochaa; waa ophu du urwukpu-urwukpu. E gude oghu ochaa; waa k'urwukpu urwukpu likota l'ishishi upfu ekwa ono. E wota ishi oghu ono ishi iya ophuu woru lia l'echi mkpola-ochaa, e moberu l'itso, e meru l'ogbu-nwijnwii mkpuma, a kpobegbaaru l'eka ono. L'oma aka ono be e gude mkpuma ere ire, du iche iche chia oma ali iya; bya eworu iphe, aaze aze, e meru le mkpola-ododo; yele mkpola-ochaa doo ya.
- ⁷Upyi, e gude ngua mee mboku ono be e mekotaru le mkpola-ododo; teme o gbakota iche iche. O to nwedu ophu yee ibe iya gbagba nanu. Mee, ndu eze anguje dukpoo shii; kele eze saru aka okpobe asasa kwakobe obo-iphe ono.
- ⁸Eze turu ekemu su g'a haa ndu ebyaa ono g'onyenonu ngua g'o du iya. Iphe, meru nu buru l'eze suhawaru ndu e yeru ke mee l'eka g'ephe nuje onyemonye iphe, o suru g'a nu iya.
- ⁹Eze-nwanyi, bu Vashiti shikwaarupho unwanyi nri obo-iphe l'unuphu ibe eze, bu Kuzakusesu.
- ¹⁰O be le mboku, kwe iya esaa; eze, bu Kuzakusesu nguchaa mee; ehuru tsqahaa ya utso l'eka mee atsu iya. O zia umadzu esaa, anoduje eleta ibe eze enya, epha phe bu Mehumanu; waa Bizuta; waa Habona; waa Biguta; waa Abaguta; waa Zetaru; waa Karukasu;
- ¹¹g'ephe je ekuaru iya eze-nwanyi, bu Vashiti. O su g'o kpuru okpu eze-nwanyi iya gude bya egoshi ndu-ishi; me onyemonye no l'eka ono onwiya; g'ephe huma g'o mabe mma; noo kele o du ubvu l'enya.

- ¹²Noo ya; ndu-ozì onò jechaa je ezia iphe, eze zìru; eze-nwanyì, bụ Vashiti jìka ejeje. Eze nùmaephe l'onoo iphe, o pfuru; ẹhu ghuahaa ya egbu; ọ vọru ọku wua ẹhu.
- ¹³Eshinu ọ bụ omelalì g'eze kpatajẹda ndu maru k'ekemu-alì; waa k'ikpe, pfuru ọto ishi; tẹme l'o mee iphe, ọobyà ememe; bẹ eze chì-koshìru phẹ idzu; mbụ ndu mmamiphe, bụ ndu maru iphe, gbaru l'ememe;
- ¹⁴bya aburu ndu kachaa ya anọdu ntse. Ndu ọ chì-koshìru iya bụ Kashena; waa Sheta; waa Adumata; waa Tashishi; waa Meresu; waa Masena; waa Memukanu. Umadzu ẹsaa onò, shi l'alì Peshiya; waa alì Midiya bụ ndu kachaa anọdu eze ntse; bya aburu phẹ kachaa shii lẹ ndu ejeru eze ozi l'alì onò mgburugburu.
- ¹⁵Ọ jia phẹ sụ: “? Bụkpoo gunu bẹ ekemu-alì sùru g'e mee eze-nwanyì, bụ Vashiti? Eshinu ọ bụ ozi, mu zìru ndu-ozì mu g'ẹphe je ezia ya bẹ ọ jìkaru lẹ ya te emedu.”
- ¹⁶Noo ya; Memukanu nọdu l'iphe eze yẹle iphe ndu-ishi ọphuu sụ: “Eze-nwanyì, bụ Vashiti ta abụekwa eze bẹ o mesweru kpoloko, l'o meswefuakwaru ndu-ishi; mękpoo iphe, bụ ndu bukọta l'iphe, bụkpoo mkpukpu, nọgbaa l'alì-eze Kuzakusesu.
- ¹⁷Noo kẹle iphe, eze-nwanyì, bụ Vashiti meru onò bẹ unwanyì l'ophu a-numakwa. Ẹphe -numae ya phọ; ẹphe ekoaha jì phẹ ọkpa l'ishi sụ: ‘Ọ kwa l'eze-nwanyì, bụ Vashiti bẹ eze-nwoke, bụ Kuzakusesu zìru g'e dutaru iya; ọ jìka ejeje.’
- ¹⁸Sụ-a; nchi -bya ejihu ntanụ-a bẹ unwanyì ndu-ishi ndu Peshiya; waa kẹ ndu Midiya ndu nùmaru iphe, eze-nwanyì meru a-watakwa epfuru jì phẹ iphe, meru nù. E -shi nno; unwanyì taa kwabẹdu jì phẹ ùbvù, rwuberu phẹ nù. Unwanyì emee ẹhu awata egbu unwoke, alù phẹ nù egbu.
- ¹⁹Ọo ya bụ; ọ -buru lẹ gube eze bẹ e-kwe bükwa iphe, ii-me bụ g'ì taa ekemu g'eze-nwanyì, bụ Vashiti ta afutabahe l'iphe ngu. G'eze wokwaru ọkwa eze-nwanyì, ọ bụ; nù nwanyì ọzo, ka iya ree. G'e wokwarupho ekemu onò dee l'ẹkwo, e deru ekemu, ndu Peshiya; waa ndu Midiya, bụ ekemu, a taa gbanwejedu agbanwe.
- ²⁰Ekemu onò, ii-tù onò -ngadzuẹrupo alì-eze ngu l'ophu, bụ alì-eze, parù ẹka; unwanyì awata akwabẹ jì phẹ ùbvù; shita l'onye kachaa shii je akpaa l'onye ọphu kachaa nwanshii.”
- ²¹Idzu onò, Memukanu chitaru onò dọ eze ree; yẹle ndu-ishi iya. Ọo ya bụ; eze mee g'o pfuru.
- ²²Eze zia ozi g'e jedzuru l'iphe, bụkpoo mkpukpu onò, ọ bụ ishi phẹ onò; je akarù phẹ l'eze sùru gẹ nwoke nọnu buru ishi l'ibe iya. A nọdu edejeru ndu nọnu ẹkwo-ozì onò lẹ g'ẹphe egudeje ede ẹkwo nkepẹ; tẹme ọhamoha nọnu bẹ eedeje iya l'opfu-alì phẹ nù phẹ.

Esuta 2

Esuta bẹ e meru eze-nwanyì

- ¹E mechaa g'ehu-eghu ono jidatachaerupho eze Kuzakusesu; o wata arị ke Vashiti; mbu k'iphe, ono, Vashiti meru iya ono; waa k'ekemu ono, yebedua turu tu-doru Vashiti ono.
- ²Ndu ejeru eze ozi chitaru iya idzu su iya: "G'e jenu achokoo unwumboko, ama mma, nwoke teke ejepfuswee; dutaru eze.
- ³G'eze hotakwa ndu e-je achikobe unwumboko ono, ama mma ono, nwoke teke ejepfuswe ono; l'iphe, bukpo mkpukpu, nokota gube eze l'eka g'o ha duta bya edobe l'ulo unwany l'ibe eze le Susa, bu ishi mkpukpu ali-eze iya. G'e dujekwaru phe onye-ozu ngu, bu Hegayi, bu onye eletajeru eze unwany iya enya. Ge Hegayi mee phe iphe, o gbaru g'e mee phe g'ephe kabaa ama mma.
- ⁴Teke e mecharu; nwamgboko, kachaa eze ree l'ime unwumboko ono g'ephe ha; g'onye k'ono buru eze-nwanyi nochia enya Vashiti." Idzu ono tsoo eze ntumatu. O tsoo ya egube ono.
- ⁵Le mkpukpu Susa, bu ishi mkpukpu ali-eze Kuzakusesu be o duru onye Jiu, shi l'okpa-ipfu Benjaminu bu iya nu. Epha nwoke obu bu Modekayi nwa Jiayi. O bu nwanwa Shimeyi; buru nwanwanwanwanwa Kishi.
- ⁶Kishi ono yi le ndu Nebukadineza kpuru le ndzu le Jierusalemu; yele Jiehoyakinu, bu eze ndu Jiu, kpuru lashia ali Babilonu.
- ⁷Modekayi be ephe le nwamgboko, bu nwa nwune nna iya bu. Epha nwamgboko ono bu Hadasa. O buru yebedua mefutaru nwata ono; noo kele ne iya; yele nna iya togboru iya nwa maa. Nwamgboko ono, epha iya ozo bu Esuta be ama mma bya adu ubvu l'enya. Ge ne iya; yele nna iya nwuhuchaaru be Modekayi wotaru iya dobe ge nwa iya, o nwuru l'epho iya.
- ⁸Noo ya; o be teke e gudeepho ekemu, eze turu je ara arara; e duta unwumboko, du igwerigwe bya le Susa, bu ishi mkpukpu; duru phe nu Hegayi g'o leta phe enya. E dutakwapho Esuta bya l'ibe eze; bya eduru nu Hegayi, bu onye anoduje eleta ulo unwany eze enya g'o leta enya.
- ⁹Nwamgboko ono, bu Esuta du Hegayi ree l'obu; o je atuko iphe, o gbaru g'e mee ya g'o kabaa ama mma mekota iya teke ono teke ono; bya anu iya nri, gbaru iche. O duta iya je edobe l'ulo, kakota ree l'ulo unwany eze ono; bya eduta unwumboko esaa l'ibe eze duru nu iya g'ephe yejeru iya aka.
- ¹⁰Ophu Esuta akoduru oha, o shi; ozoo aka a nwuru iya; noo kele Modekayi suru iya g'o to pfushi iya.
- ¹¹Modekayi be anoduje ejephe le mgboru oma-unuphu ulo unwany eze ono mbokum-boku g'o maru ? eh du-a Esuta ree; waa g'o maru g'oome ala.
- ¹²Tememe nwamgboko ejeshia l'iphu eze Kuzakusesu; be oo-nodzuada onwa iri l'ebo mekota iphe, a gushiru g'unwany gudeje mee onwophe ome-mma. Onwa ishii be ephe e-gude nyia manu meru. Onwa ishii k'ophuu be ephe e-gude manu mbeleke; waa ophu eete etete gude memaa onwophe ree.

¹³Onye ophu o gbaru l'eje l'iphe eze be iphe, o sukpooru l'o du iya ge ya gude je l'ibe eze; be aa-nuje onye obu l'ulo unwanyi eze.

¹⁴Onye obu alapfu eze l'uzenyashi; o be l'utsu echele iya l'o bahu je anodu l'ulo ozo, bukwapho ulo unwanyi eze. Onye eleta ibe iya ono enya bu onye ejeru eze ozi, bu Shashugazu, bu onye eletaje unwanyi, ndu ophu abu-zidu unyomu eze enya. Nwamgboko k'ono ta alapfubaedu eze gbahaa l'eze kuru iya l'onwiya.

¹⁵Esuta, bu iya bu nwamgboko ono, Modekayi eme ge nwa iya ono; mbu onye ono, bu nwune nna Modekayi, aza Abihelu be nwuru iya nu ono; be o rwubeerupho l'alapfu eze; ophu o dudu iphe ozo, o suru g'a nu iya, abuedupho iphe, Hegayi suru g'o gude; mbu onye ono, ejeru eze ozi ono; bya aburu onye eleta unwanyi eze enya. Esuta dukota ndu humaru iya nu l'obu le g'o gude amabe mma.

¹⁶Mboku, e dutaru Esuta jepfu eze Kuzakusesu l'ibe iya bu l'onwa k'iri, bu iya bu l'onwa Tebeti l'apha k'esaa, o wataru aburu eze.

¹⁷Eze ka eye Esuta obu eme l'unwanyi ophu. Mbu le Esuta ka atuba iya l'enya eme l'unwumboko ophu. O buru yebedua be eze nataru. O woru okpu-eze-nwanyi kpupe iya; mee ya; o buru eze-nwanyi nochia enya Vashiti.

¹⁸Eze bya eshiaru ndu-ishi; waa ndu-ozi iya nri paru aka. Onye o shidoru nri ono buru Esuta. O zia g'e mee g'a madzuru iya l'iphe, bukpoo ohamoha, nokota iya l'eka; g'onnyemonye tuta unme ozi mboku ono. O mekotaru ndiphe iphe-oma, gbaru onye eze l'ememe.

Modekayi agbaru eze ama

¹⁹Teke e kukoru unwumboko ono k'ugbo ebo ono; be Modekayi no l'onu-oguzo ibe eze.

²⁰Teke ono be Esuta teke akokwa oha, o shi; ozoo aka a nwuru iya; noo kele Modekayi suru iya g'o to koshi iya. Esuta angabejekpoerupho Modekayi nchi g'o shi angabejeru iya teke ono, o shi emefuta iya ono.

²¹Teke ono, Modekayi no l'onu-oguzo ibe eze ono; be Bigutanu; waa Tereshi; ndu-ozi eze labo, eche oguzo ibe eze nche be eh u wataru eghu eghu; ephe chaha idzu g'ephe e-shi gbua eze Kuzakusesu.

²²Modekayi numanu idzu ono; bya epfuaru iya eze-nwanyi, bu Esuta. Esuta tugbua je akoru iya eze su l'oo Modekayi pfuru iya ya.

²³E je enyochaa ya; bya amaru l'oo eviya; e woru umadzu labo ono je aswi-gbua l'eli oshi. A nodu l'iphe eze dee iphe ono edede l'ekwo ako, eedeje iphe, meru l'ali-eze iya.

Esuta 3

Ejo idzu, Hamanu achiru ndu Jiu

¹E mechaa; eze, bu Kuzakusesu bya akwabe Hamanu nwa Hamedata; onye shi l'eri Agagu ubvu. O kwaberu iya ubvu wolia ya dobe; o kakota ndu-ishi, ephe l'iya tukoru nodu l'udu okwa lanu, shii; l'ali-eze iya.

²Ndu ozi eze g'ephe ha, no l'onu-oguzo ibe eze nodu egbuje ikpere eburu Hamanu iphu l'ali; noo kele eze turu ekemu su g'e meje iya nno. Obenu le Modekayi te egbujeduru iya ikpere; ophu oobujeduru iya iphu l'ali.

³Ndu ozi eze, no l'onu-oguzo ibe eze su Modekayi: “? Denu g'o nwuru i tii mejedu iphe, eze pfuru?”

⁴Mboku-mboku ephe epfuru iya Modekayi; obenu l'o too yejedu onu yeru phe. Ephe woru iya dooru Hamanu g'a maru ? ephe ahaa Modekayi g'o mee g'oome; kele o pfuwaru phe le ya bu onye Jiu.

⁵Teke Hamanu humaru le Modekayi te egbushiduru iya ikpere; ophu oobuduru iya iphu l'ali; o voru oku wua eh.

⁶O numachaepho oshilokpa ndu Modekayi bu; o haa k'ari g'e-shi gbua Modekayi kpoloko. O choahaa ge ya e-shi mee ge ndu Jiu, bu ndu ke Modekayi g'ephe ha chihu l'ali-eze Kuzakusesu l'ophu.

⁷O be l'apha, kwe eze Kuzakusesu apha iri l'ebo, o wataru aburu eze; l'onwa mbu, bu iya bu onwa Nisanu; a tua “puru” , bu iya bu ido l'iphu Hamanu; shi nno hota onwa lanu; waa ujiku lanu. Ephe tua ido ono; o daaru onwa k'iri l'ebo, bu iya bu l'onwa Ada.

⁸Noo ya; Hamanu su eze Kuzakusesu: “O dukwaru oha, gbakashihuru dzuru ekameka l'iphe, bukpo ohamoha, nokota l'ali-eze ngu l'ophu. Omelali phe gbafuru iche l'eka omelali iphe, bu ohozo no; ophu ephe edobejedu ekemu, eze turu. Uchiru ndu ono be a -haa phe eka be o to bukwaru iphe, a-duru eze le ree.

⁹O -buru l'o du eze ree; g'eze tunaa ekemu g'e gbushia phe. E -mewa iya nno be mu a-pfu mkpola-ochaa, erwa iya du unu talentu ukporo l'ise; g'e woru iya yekoberu eze l'eku iya.”

¹⁰Noo ya; eze bya agbata echi-eka iya gbep Hamanu, bu nwa Hamedata; oshilokpa Agagu; onye bu ohogu ndu Jiu.

¹¹Eze su iya: “Dobekporo okpoga ngu; je emee ndu ono g'o du ngu.”

¹²O be le mboku, onwa ke mbu du l'abali iri l'eto; e kukoo ndu ederu eze ekwo. Ephe bya atuko iphemiphe, Hamanu suru g'ephe dee woru dee l'ekwo nugbaa ndu no-chiru enya eze; waa ndu-ishi l'ohamoha, no l'eka eze; nukwaa ya pho ndu-ishi ndiphe l'ophu. Ekwo ono be e deru nu ohamoha le g'ephe egudeje ede ekwo nkephe. Ndu nokota nu be e deru iya l'opfu-ali phe nu phe. O buru epha eze, bu Kuzakusesu be e gude dee ekwo ono; bya eworu echi-eka iya mee ya iphe-ohubama.

¹³E zia ndu ezilaje ekwo-ozu ephe gude ekwo ozi ono je ekedzuru l'iphe, bukpo ohamoha, nogbaa l'ali-eze Kuzakusesu l'ophu; mbu ekwo ono, e deru ekemu, a turu g'a tuko gbushikota iphe, bu ndu Jiu l'akpuru enyanwu lanu; egirima me ogerenya.

Mbụ g'egbuchaa ụnwanyi mę ụnwegirima; mę ọnwā k'iri l'ẹbo, bụ iya bụ ọnwā Ada dūepho l'abalị iri l'eto. Ekemu ono sụkwarupho: teke e gbuchaaru phẹ; g'a kwaa iphe phẹ l'okwata.

¹⁴Iphe e deru l'ekwo ono bę a tūru ọ buri ekemu sụ g'anuduru iya l'ohamoha g'ọ buri ekemu duru phẹ; wafua g'e mee g'onyenonu maru k'ophu ephe a-kwakobekwanu aka ke mboku ono.

¹⁵Eze bya ezia sụ g'e gude ekwo-ozī ono tūgbua je ezikashia. Ndu okpa egwa gbeshi; ọ buri phẹ ejeje. E vuadaru ụzo zia ekemu ono lę Susa, bụ ishi mkpukpu. Eze yele Hamanu nodu angu mee; ndu bu lę Susa deru yekete g'ephe nūmachaaru ozi ono.

Esuta 4

Modekayi epfuru Esuta g'o yeru phẹ aka

¹Tobudu iya bụ Modekayi maerupho iphe, anwu nū; o ye aka l'uwe iya zijaha ẹbo; bya achita uwe-aphu ye; kpushi onwiya ntū; gbafulu oma mkpukpu ara ekwa arashi iya ike.

²O jeeepho onu-oguzo ibe eze; ọ pfuru; noo kele ọ to dudu onye yeru uwe-aphu, eekweje g'ọ bata.

³Iphe, bukpoohamoha, a nuru ekwo ono, e deru ekemu, eze tūru ono bę aphu atsojeerupho ndu Jiu, bu iya nū. Ephe agu aphu; aswi egu; ara ekwa. Igwerigwe yee uwe-aphu bya ekpua onwophe ntū.

⁴Unwumboko; waa ndu ejeru Esuta ozi bya akooru iya ke Modekayi; ọ buri aphu tsoru iya shii. O chiru uwe nū g'a chijeru iya g'o yee; g'o to yehe uwe-aphu. E gude uwe obu je; ophu o kwedu iya anata.

⁵Esuta bya ekua Hataku, bụ onye-ozī eze; mbu onye e yeru g'o jejeru yebe Esuta ozi; zia ya g'o je amaru iphe, atsu Modekayi l'ehu; waa iphe, kpataru iya nū.

⁶Noo ya; Hataku bya ejepfu Modekayi l'eka ọ pfuru l'edupfu mkpukpu ono, no l'atatiphu onu-oguzo ibe eze.

⁷Modekayi bya atuko iphemiphe, nwuru nū kokotaru iya; kokwaaru iya pho mkpola-ochaa ole, Hamanu kweru ukwe lę ya a-nu g'e ye l'eka eedobejeru eze eku iya; g'e gude mee g'e gbushia ndu Jiu.

⁸Ọ bya ewota ekwo, e deru iphe, e deru l'ekwo ekemu pho, eze tūru sụ g'e gbushia ndu Jiu ono; mbu ekwo ono, e keshidzuru lę mkpukpu Susa ono; nū Hataku g'o goshi Esuta; gude kooru iya ya g'o doo ya enya. O zikwapho g'e zia Esuta g'o jepfu eze je arwo ya g'ọ phuaru ndu Jiu obu-imemini.

⁹Hataku tūgbua je atuko iphe, Modekayi doru iya dokotaru Esuta.

¹⁰Esuta ziphu iya azu g'o je akaru Modekayi sū:

¹¹“Iphe, bụ ndu-ozī eze; je akpaa l'iphe, bụ ndu bu l'ohamoha, dukota l'alī-eze iya g'ọ ha; mawaru l'ọ to dudu nwoke mę nwanyi, byaru atugbu jepfushia eze lę teke ọ no

l'okpoku; ophu o buda l'eze kuru iya. Onye meru nno bukwa iphe, ekemu pfuru bu g'e gbua onye obu egbugbu; gbahaa l'o bu uche eze g'onye ono nodu ndzu; o machiaru onye obu mgboro-eze, e meru le mkpola-ododo pho. Eze noakwaru ukporo abali l'abali iri; o to kuduru mu oku."

¹²A bya ezia Modekayi ozi, Esuta ziru;

¹³o ziphu ozi azu g'o je asu iya: "Ta arikwa l'eshi ophu i no l'ibe eze be gubedua aburu onye Jiu lanu, a-wafu nu g'e te egbu ngu;

¹⁴kele o -buru li no-kirishiru nta-a; ophu i yeduru onu be ee-shikwa l'uzo ozo dzota ndu Jiu. Ole gubedua; me ndibe nna ngu a-bukwanuru mkpurupyata. ? Buhunu onye maru ? bu iphe, meru g'o gude e mee ngu; i nodu l'okwa eze-nwanyi bu gi yeta aka l'iphe, anwu nta-a?"

¹⁵Esuta ziphukwa ozi azu ozo g'e je ezia Modekayi su iya:

¹⁶"Tugbua je akpakoo ndu Jiu, bu le Susa g'ephe ha l'eka lanu; unu aswia egu pfuru nu Chileke l'iswi ehmu. G'unu noo ujiku eto eswe l'enyashi; g'unu te erishi nri; ophu unu etsushi okoro l'onu. Mbueda ye le unwumboko, ejeru mu ozi e-mekwapho nno. E-mechaa nno be mu e-jepfu eze. A makwaru-a l'ekemu suru l'o to dudu ree. Ole mu e-je; o -buru le mu a-nwuhu ge mu nwuhuro."

¹⁷Modekayi tugbua je emekota iphe, Esuta ziru iya g'o ha.

Esuta 5

Iphe, Esuta rworu eze

¹O be le mboku k'eto; Esuta wota uwe eze-nwanyi iya yee; bya atugbua je apfuru l'oma-unuphu ibe eze; mbu l'ataphu ulo aka eze anoduje. Teke ono be Eze no l'aba-eze iya l'eka ono woru iphu ghaa l'onu-oguzo.

²O tufuepho enya huma eze-nwanyi, bu Esuta aka o pfuru l'oma-unuphu; ehmu tsoo ya ntumatu. O woru mgboro-eze, e meru le mkpola-ododo, o pa l'eka machiaru iya; Esuta byarwuta bya edenyi mgboro-eze ono aka.

³Noo ya; eze jia ya su: "? Bu gunu; eze-nwanyi, bu Esuta? ? Bu gunu be o du ngu g'eze meeru ngu? O -beta o buru ge mu kee ali-eze mu ebo nu ngu nanu; mu emeeru ngu iya."

⁴Esuta su: "O -buru l'o du eze ree; ge gube eze gu le Hamanu swinuru byaru mu le nri ntanu-a; g'unu bya eria nri, mu shiberu gube eze."

⁵Eze zia ozi su l'onye ya byaru ahuma g'o buakwaru Hamanu; k'ophu ephe l'iya atugbu je aza Esuta enu. Oo ya bu; eze ye le Hamanu tugbua jeshiaru Esuta le nri, o yeru phe.

⁶Ephe tuko ngunyaepho mee; eze jikwa Esuta ozo su iya: "? Bu gunu bu mkpa ngu obu ge mu meeru ngu iya? Mbu; ? bu gunu be o du ngu ge mu meeru ngu? O betakpo o buru ge mu kee ali-eze mu ebo nu ngu nanu; mu emeeru ngu iya."

⁷Esuta sụ: “Iphe, bụ mkpa mu bya aburu iphe, ọ dū mu g'e meeru mu bụ:

⁸Ọ -buru lẹ mu dū gube eze l'obu; tẹme ọ dū gube eze g'i meeru mu iphe, mu arwo ngu; bẹ iphe, mu arwo bụ gẹ gube eze gụ lẹ Hamanu byanuru mu lẹ nri, mu e-shiru unu echele. Teke unu byaerupho echele; mu eyee onu l'aji ono, gube eze jiru mu ono.”

Hamanu achị idzu egbu Mọdekayi

⁹Mboku ono bẹ Hamanu gude ẹhu-utso teru ẹswa lashia. Obenu l'ọ hūmaerupho Mọdekayi l'onu-oguzo ibe eze; bya ahuma l'ọ tọ gbeshiduru agbeshi; ọphu o goshiduru l'okwabe iya ùbvù; ẹhu ghushiahaa Hamanu egbu ike.

¹⁰Ọ meshikpọepho ike byabẹ ẹka l'obu lashia; mbụ Hamanu. Ọ larwua bya ezia; e je ekukọo ndu ọnyà iya phẹ; waa nyee ya, bụ Zẹreshi.

¹¹Ọ nọdu l'atatiphu phẹ wata aba abaa gẹ ya nweberu iphe; waa gẹ ya nwuta-beru unwu igwe; waa g'eze gude kwabẹ-beru iya ùbvù, ha shii; bya emee ya; ọ buru iya kachaa shii lẹ ndu eze meru ishi; waa ndu ejeru eze ozi.

¹²Ọ sụ: “Ọ kwa mbẹdua kpoloko bụ onye eze-nwanyị, bụ Esuta sūru g'o tsoru eze byaru iya lẹ nri. Ọ yekwaru mu phọ lẹ nri gẹ mu tsoru eze echele.

¹³Obenu l'iphemiphe ono te emeduru mu ẹhu-utso; eshinu ọobujeru; mu -ghatashia; mu ahuma onye Jiu phọ, bụ Mọdekayi l'onu-oguzo ibe eze.”

¹⁴Nyee ya ono, bụ Zẹreshi; yele ndu ọnyà iya phẹ ono g'ephe ha sụ iya: “Zia g'e je emetaru ngu oswebe, aaswịgbuje nemadzu; g'e mee ya g'eli iya dū ukporo nkwo-ẹka labọ lẹ nkwo-ẹka iri. O -rwuepho l'utsu echele; l'i pfiaru eze g'a kpata Mọdekayi je aswị-gbu l'eli oswebe ono. Oo ya bụ; g'iigude ẹhu-utso tsoru eze; unu ejeshia l'ẹka e yeru unu lẹ nri.” Idzu ono dū Hamanu ree shingushingu; ọ tūgbua je ezia; emee oswebe, aaswịgbuje nemadzu ọbu dobe.

Esuta 6

Eze akwabẹ Mọdekayi ùbvù

¹Ọ be l'enyashi mboku ono; ọphu mgbenya te ekwedu atụ eze; o zia g'e je ewotaru iya ẹkwo akọ iphe, e deru iphe, anwu l'alị-eze iya. A bya aguaru iya ya.

²L'ẹkwo ono bẹ a gutaru lẹ Mọdekayi gbajeru ama lẹ Bìgutana; yele Tẹreshi, bụ ndu-ozì eze, shi echeru eze oguzo ibe iya nche; chiru idzu g'ephe gbu eze, bụ Kuzakusesu.

³Eze jia sụ: “? Bụ ùbvù gūnu bẹ a kwabẹjeru Mọdekayi mee g'a maru ẹpha iya lẹ k'iphe ono, o meru ono?” Ndu ejeru eze ozi sụ: “Ọ tọ dukwa iphe, e meru iya.”

⁴Eze jia sụ: “? Ọ duru onye nọ l'oma-unuphu ibe mu?” Ọ buru teke ono bẹ Hamanu abatakpọepho l'oma-unuphu, nọ l'azu ibe eze; gẹ ya pfiaru eze k'aswị-gbu Mọdekayi l'eli oswebe ono, ọ kwakọberu, aa-swị-gbu iya ono.

⁵Ndu ozi iya sụ iya: “Ọ kwa Hamanu nọ l'oma-unuphu.” Eze sụ g'e kua ya g'ọ bata.

⁶Hamanu bataepho; eze jia ya su: “? Bupoo gunu be ee-meru onye eze eme g'ọ kwabe ubvu?” Oriri, gbatataru Hamanu l'obu teke ono bu l'ọ to dudu onye ozo, eze anodu ari k'akwabe ubvu, abudu yebedua.

⁷Tobudu iya bu; Hamanu su eze: “Iphe, ee-meru onye o du eze g'ọ kwabe ubvu

⁸bukwa g'a chita uwe, eze yejewaru; l'a kputa inya, eze gbajewaru; mbu inya ophu e kpuberu okpu-eze l'ishi.

⁹G'a chita uwe ono; kputa inya ono nu onye lanu le ndu-ishi, a kachaa amaru epha phe l'ali-eze ngu-a. G'e yee onye ono, eze eme g'ọ kwabe ubvu ono uwe ono. G'onye ono nodu l'eli inya ono g'e gude iya ngu-phekota edupfu mkpukpu-a; araru iya oha arara su: ‘Waa iphe, ee-mejeru onye eze eme g'ọ kwabe ubvu baa-oo!’ “

¹⁰Eze su Hamanu: “Ngwa! Je achita uwe ono; waa inya ono je atuko g'i pfushiru ono meeru Modekayi, bu onye Jiu, anoduje l'onu-oguzo ibe eze. G'ọ to dukwa iphe ono, i pfushiru ono me nanu, ii-mephodo!”

¹¹Noo ya; Hamanu bya achita uwe ono; bya akputa inya pho. O woru uwe ono kpua Modekayi; bya edoberu iya inya ono; o nyikota nodu iya anoo l'eli okpurukpu; o duru iya kwaseru ngu-phekota angungu l'edupfu mkpukpu ono; ara iya arara asuje: “Waa iphe, ee-mejeru onye eze eme g'ọ kwabe ubvu baa-oo!”

¹²E mechaa; Modekayi laphu azu l'onu-oguzo ibe eze. Obenu le Hamanu nyigobeerupho mekebe egwegwa; guru aphu vuru eka l'ishi lasha unuphu ibe iya.

¹³O larwua je atuko iphe, nwukotaru nu kokotaru nyee ya, bu Zereshi; waa ndu epe l'iya eshi onya g'ephe ha. Ndu akpo-zijeru iya uzo; waa nyee ya ono, bu Zereshi su iya: “O -buru eviya le Modekayi bu onye Jiu; mbu onye ono, iphe e-me ngu nu gbubewaru ishi l'eka o no ono; be o too dukwa iphe, ii-du ike emebata iya. Oo ya be e shifutaje l'eka kponya ngu enya.”

¹⁴Epe gudekwadu iphe ono l'eka epfu; ndu-ozu eze bya ekua ya. Epe gude oso duru iya jeshia le nri ono, Esuta kwakoberu ono.

Esuta 7

Aaswi-gbu Hamanu

¹Tobudu iya bu; eze yele Hamanu jeshia ibe eze-nwanyi, bu Esuta g'ephe rigba nri.

²Epe wataepho angu mee le mboku k'ebo ono; eze jia ozo su: “Eze-nwanyi, bu Esuta; ? bu gunu bu mkpa ngu obu? Pfu ya ge mu meeru ngu iya. ? Bu gunu bu iphe obu, o du ngu ge mu meeru ngu? O betakporu o buru ge mu kee ali-eze mu ebo be i rworu mu; be ee-mekwaru ngu iya.”

³Eze-nwanyi, bu Esuta su iya: “Gube eze; iphe, mu arwo ngu bu: O -buru le mu du ngu l'obu; teme o dukwa ngu pho ree; jiko hanaa mu ge mu nodu ndzu. Teme li hafukwapho ndibe mu g'ephe nodu ndzu; o kwa iya bu iphe, o du mu g'i meeru mu.

⁴Noo kele mu le ndibe mu be e rewaru g'e gbushikota l'opfu. Mbụ l'e rewaru anyi g'e mee g'anyi buru mkpurupyata. O -bụ l'e rekpoorunu anyi g'anyi buru ohu me mu te epfukwa opfu; kele egube iphe-ehuka ono ta agbaduru g'e gude iya papfuta eze bya iya epfuchi nchi."

⁵Eze Kuzakusesu jia eze-nwanyi, bu Esuta su iya: "? Bu onye be o bu? Denu nwoke, turu ama eme iphe, du nno?"

⁶Esuta su: "Onye ohogu anyi obu; bya aburu onye achi anyi le njo obu bukwa ejo Hamanu-a!" Ndu rwuta Hamanu l'iphu eze; yele eze-nwanyi.

⁷Eze gude ehu-eghu gbeshi; paru mee ono haa; jeshia le mgbabu ibe iya. Hamanu humaepfo l'eze be chibuwaru l'ime obu iya l'oo-meghe nkiya; o tsukpaa l'azu ge ya rwoo eze-nwanyi, bu Esuta g'a hakpoo ya nu ge ya nodu ndzu.

⁸O buerupho teke Hamanu daru kpurumu l'iphu eze-nwanyi arwo iya l'eka o no anoo; dakobe oshi be eze shiepho le mgbabu pho buru phereketete. Eze bua mkpu su: "? O gbemefuanu g'o gude eze-nwanyi jepfu l'atiphu mu; l'ibe mu-a?" O buru epfuzeta, eze epfuzeta iya; e gude Hamanu kechia ya iphu.

⁹Habona; onye lanu le ndu-ozu eze su: "O nwekwaru oswebe, aaswi-gbuje nemadzu, du ukporo nkwo-eka labo le nkwo-eka iri l'eli, Hamanu meru dobe l'ibe iya. Onye o meru iya doberu buru Modekayi; bu onye gbajeru ama ejo idzu pho, a chijeru gube eze pho; shi nno dzoo ndzu ngu-a." Eze su: "Unu je aswi-gbua ya l'oswebe ono!"

¹⁰Noo ya; e je eworu Hamanu swi-gbua l'eli oswebe, aaswi-gbuje nemadzu, o shi mee doberu Modekayi ono. E mecha nno; obu jidata eze.

Esuta 8

Ekemu, eze turu tu-doru ndu Jiu

¹Mboku onokwapho be eze, bu Kuzakusesu woru ulo Hamanu, bu onye ohogu ndu Jiu nu eze-nwanyi, bu Esuta. Modekayi wata abya l'atiphu eze; noo kele Esuta koru eze g'ephe l'iya gude buru.

²Eze bya agbata echi-eka iya, o nataru Hamanu nu Modekayi. Esuta bya emee Modekayi onye eleta ulo, Hamanu shi nweru enya.

³Esuta bya epfuru opfu yeru eze ozo; bya adaa kpurumu le mgboru okpa eze; raahaa ekwa; wata iya arworwo g'o mebyinaa ejo idzu ono, Hamanu, onye shi l'eri Agagu chiru l'ehu ndu Jiu ono.

⁴Eze ono woru mgboro-eze e meru le mkpola-ododo machiaru Esuta; o gbalihu bya apfuru iya l'atiphu.

⁵O su: "O -buru l'o du gube eze ree; o -buru le mu du gube eze l'obu; teme i nodu arikwapho l'oo iphe, pfuru oto; mu bya adu ngu ree l'enya; g'eze tunaa ekemu dee ya edede; g'o to dukwa onye a-tu ama eme iphe ono, Hamanu nwa Hamedata, onye shi l'eri Agagu deru lekwo g'e mee ge ndu Jiu, bu l'iphe, bu ohamoha, nogbaa l'alieze ngu mgburugburu; buru mkpurupyata.

6? Denu ge mu e-shi tamia ya le nshi; nodu huma l'eka ejo-iphe abyapfuta ndibe mu? Mbu-a; ? denu ge mu e-shi tamia ya le nshi; nodu ele ndu nwuru mu nu enya; eka eeme g'ephe buru mkpurupyata?"

7Eze Kuzakusesu su eze-nwanyi Esuta yele Modekayi onye Jiu: "O kwa le Hamanu meru g'o gbushia ndu Jiu be mu gude wota ulo iya nu Esuta; bya asu g'e je aswi-gbua ya.

8Nta-a bu g'unu gude epha eze tua ekemu ozo l'iswi ehuru ndu Jiu; dee ya edede g'oo-du unu ree l'obu; wota echi-eka eze mee ya iphe-ohubama; noo kele o to dudu iphe, e deru woru echi-eka eze mee ya iphe-ohubama, duru onye bya ephugha iya nu."

9Mboku ono gedegede be e yeru nemadzu; e je ekukota ndu edejeru eze ekwo. Mboku ono be onwa k'eto, bu iya bu onwa Sivanu du l'ukporo abali l'abali eto. A tuko ekemu, Modekayi turu dekota l'ekwo g'a nu ndu Jiu; waa ndu no-chiru enya eze; waa ndu eze; waa ndu-ishi, nogbaa l'ohamoha ukporo ishii l'esaa ono, no l'ali-eze Kuzakusesu, a - gbale l'ali Indiya rwua l'ali Kushi. Ekemu ono g'o ha be e gude eka-ekwo ohamoha nonu dee; waa l'opfu-ali ndu nokota l'ali-eze ono. Ndu Jiu be e dekwaru iya pho nu l'opfu-ali phe; waa g'ephe egudeje ede ekwo nkephe.

10O buru epha eze, bu Kuzakusesu be Modekayi gude dee ekwo ono; bya eworu echi-eka eze mee ya iphe-ohubama; woru iya nu ndu ezilaje ekwo-ozu, ndu egudeje inya, agba oso shii, a zufuta-doru eze; eje ozu g'ephe zilaa.

11Ekemu ono, eze turu ono; mee ge ndu Jiu, bu le mkpukpu le mkpukpu nweru ike; ephe dzukobeaha wata akwaberu onwophe enya. K'ophu bu o -duru mkpukpu; ozoo ohamoha, dzukoberu g'ephe tsoo phe ugu g'ephebe ndu Jiu emee phe g'ephe buru mkpurupyata. G'ephe atuko ephe l'unwanyi phe; yele unwegirima phe gbushikota; kwaa iphe ndu ono l'okwata.

12Mboku, a turu onu ge ndu Jiu mee iphe ono l'iphe, bukpo ohamoha, no l'ali-eze Kuzakusesu; bu mboku, onwa k'iri l'ebo, bu iya bu onwa Ada a-du l'abali iri l'eto.

13Ekemu ono be e ziru g'e dee ya l'ekwo keshikota l'ohamoha, nokota nu; bya atua ya; o buru ekemu g'e mee ya ge ndu nonu numakota; k'ophu ndu Jiu a-kwakobekwanu eka emelata ndu ohogu phe mboku ono.

14Eze tua ekemu ge ndu ezilaje ekwo-ozu iya; ndu agbagbaa l'inya ibe eze, bu inya, agba oso shii; tugbaa teke ono teke ono je ezikashia ozu ono. Ephe tugbaa je ezikashia ya. E zikwapho ekemu ono le Susa, bu ishi mkpukpu ali-eze Kuzakusesu.

15Modekayi shi l'iphe eze futashia; o yewaa uwe eze, du urwukpu-urwukpu; waa ophu acha ucha; yele okpu-eze, e gude mkpola-ododo mee; waa uwe kpowula-kpowula, e gude okpobe oghu ocha kpa. Ndu bu le Susa tushia uzu ehuru-utso teahaa eswa.

16Ehuru nodu atso ndu Jiu; ephe nodu ete eswa; mbu ehuru nodu atso phe ntumatu; a nodu akwabekwa phe pho ubvu.

17Iphe, bu ohamoha, nonu; waa mkpukpu le mkpukpu, nokota nu, a nataru ekemu ono, eze turu ono be ndu Jiu, bukota iya nu tekotaru eswa; ehuru nodu atso phe utso.

Mbọku ono bụru phẹ eswe ọbo-iphe waa eswe ẹhu-utso. Igwerigwe ndu ọhozo bya aburu ndu Jiu; kele ẹphe atsụ ndu Jiu ebvu.

Esuta 9

Ndu Jiu alwụ-kpe ndu ọhogu phẹ

¹Onwa k'iri l'ẹbo, bụ iya bụ ọnwa Ada; bya adu l'ujiku iri l'eto, bụ iya bụ mbọku, ee-me iphe ono, eze turu l'ekemu ono. Mbọku ono bụ mbọku, ndu ọhogu ndu Jiu shi ari k'akapyabẹ ndu Jiu. Obenu l'o mechaaru gha igharaphu; ndu Jiu kapyabẹ ndu ẹphe du ashị.

²Ndu Jiu dzukọbekota lẹ mkpukpu, ẹphe bukọta g'ọ ha; l'ohamoha, eze Kuzakusesu bụ ishi phẹ g'ọ hakọta; g'ẹphe tsoo ndu achị phẹ ọkpa akpọhu ọgu; ọphu ọ dudu onye duru ike kpafu phẹ l'iphu; noo kele ndiphe l'ophu atsukota phẹ ebvu.

³Ndu-ishi l'ohamoha ono l'ophu; mę ndu nọ-chiru ẹnya eze; mę ndu-ishi ọha; mę ndu ẹjeru eze ozi; yekotaru ndu Jiu ẹka; kele ẹphe atsụ Mọdekayi ebvu.

⁴A kabaa amaru Mọdekayi l'ibe eze; tẹme ụdù iya ngadzuru ọhamoha ono, nọkota nọ ono g'ẹphe ha. Tẹme ọ nọdu akakwaphọ enweru ọkpehu eje.

⁵Ndu Jiu gude ogu-echi gbushikọta ndu ọhogu phẹ g'ẹphe ha; mee phẹ g'ẹphe bụru mkpurupyata. Ẹphe woerupho ndu kpọru phẹ ashị mee g'ọ du phẹ ree.

⁶Lẹ Susa bụ ishi mkpukpu alị-eze ono bẹ ndu Jiu gburu unu ụmadzu l'ukporo ụmadzu ise.

⁷Ẹphe gbukwarupho Pashandata; waa Dalufonu; waa Asupata;

⁸waa Porata; waa Adalaya; waa Aridata;

⁹waa Pamashuta; waa Arisayi; waa Aridayi; waa Vayizata.

¹⁰Ẹphe n'iri bụ unwu Hamanu nwa Hamedata, bụ onye ọhogu ndu Jiu. Ọle ẹphe ta akwaduru iphe phẹ l'okwata.

¹¹Mbọku ono gędegede bẹ e jeru edooru eze ụmadzu ole, e gburu lẹ Susa, bụ ishi mkpukpu alị-eze ono.

¹²Eze sụ eze-nwanyị bụ Esuta: “Ndu Jiu gbuakwaru unu ụmadzu l'ukporo ụmadzu ise; waa unwu Hamanu ẹphe n'iri; l'ishi mkpukpu alị-eze mu-a, bụ Susa. ? Bụ onye maru iphe, ẹphe meru l'ohamoha ndu ọphuu? ? Bụ gunu bụ mkpa ngu; gę mu meeru ngu iya? Mbụ-a; ? bụ gunu bẹ ọ du ngu gę mu meeru ngu? Pfuaru mu iya; g'e meeru ngu iya.”

¹³Esuta sụ iya: “Ọ -buru l'ọ du gube eze ree; jiko nunu ndu Jiu, nọ lẹ Susa ike g'ẹphe woru iphe, eze turu l'ekemu g'e mee ntanu mefua echele; waa g'ẹphe je ekobe unwu Hamanu ẹphe n'iri l'eli oswebe, aaswi-gbuje nemadzu.”

¹⁴Ọo ya bụ; eze taa ekemu g'e mee ya nno. E woru ekemu ono zia lẹ Susa; a pata unwu Hamanu ẹphe n'iri je ekobe l'eli oswebe.

¹⁵Ndu Jiu, nọ lẹ Susa dzukọbe lẹ mbọku, ọnwa Ada dụ l'abalị iri l'ẹno. Ẹphe gbua unwoke ụkporo iri l'ise lẹ Susa; obenu l'ẹphe ta akwataduru iphe pẹ l'ọkwata.

¹⁶Ndu Jiu, phọduru nụ, bụ ndu ono, bukọta l'ọhamoha ọphu, nọkota l'alị-eze Kuzakuseşu bẹ dzukọbekwarupho g'ẹphe dzọta ishi onwophe; shi nno tuta nwa unme; ọphu ọ dudu iphe ndu ọhogu pẹ mebaaru pẹ. Ndu ẹphe gburu dụ ụkporo unu tete l'unu ẹsaa l'ụkporo iri; ọle ẹphe ta akwataduru iphe pẹ l'ọkwata.

¹⁷Iphe-a nwuru mbọku, ọnwa Ada dụ l'abalị k'iri l'ẹto; o be lẹ mbọku k'iri l'ẹno; ẹphe tuta unme. Ẹphe woru mbọku ono mee eswe ọbo-iphe; waa eswe ẹhu-utso.

¹⁸Obenu lẹ ndu Jiu, nọ lẹ Susa dzukọberu mbọku, ọnwa Ada dụ l'abalị iri l'ẹto; waa k'iri l'ẹno; o be lẹ mbọku k'iri l'ise; ẹphe tuta unme; mee ya eswe ọbo-iphe; yee eswe ẹhu-utso.

¹⁹Ọo iphe ono meru iphe, ndu Jiu, bu l'ime nwa mkpukpu woru mbọku, ọnwa Ada dụ l'abalị iri l'ẹno dobe ọ buru eswe ọbo-iphe; yee eswe ẹhu-utso; waa mbọku, onyenonu eshije nri je anụ nwibe iya.

Ọbo-Purimu

²⁰Mọdekayi tuko iphemiphe ono, nwuru nụ ono dekọta l'ẹkwo. O deru ẹkwo-ozu nụ ndu Jiu, bukọta l'ọhamoha, nọgbaa l'alị-eze Kuzakuseşu g'ọ ha; ndu bu ụzenya; me ndu bu ntse;

²¹sụ pẹ: Aphağapha lẹ mbọku, ọnwa Ada dụ l'abalị iri l'ẹno; waa k'iri l'ise g'ẹphe nọduje ọbo-ọbo-iphe;

²²kẹ mbọku ono, ndu Jiu kabẹ tuta nwa unme alwu ọgu ẹphe lẹ ndu ọhogu pẹ; bya aburu ọnwa, apha pẹ gbanweru buru ẹhu-utso; ẹkwa pẹ gbanwee buru ọbo-iphe. O deru pẹ ẹkwo sụ g'ẹphe dobe eswe mbọku ono eswe ọbo-iphe; yee eswe ẹhu-utso; waa mbọku, ẹphe e-shije nri je anụ nwibe pẹ; waa mbọku, ẹphe e-mejeru ndu adudu g'ọ dụ pẹ iphe-oma.

²³Ọo ya bụ; ndu Jiu kweta iphe, Mọdekayi deru pẹ l'ẹkwo sụ g'ẹphe meje; mbu g'ẹphe boje ọbo-iphe ono, ẹphe watawaru ono.

²⁴Noo kẹle Hamanu nwa Hamedata, onye shi l'eri Agagu, bụ onye ọhogu ndu Jiu g'ẹphe ha bẹ chijeru idzu g'oo-shi mee gẹ ndu Jiu buru mkpurupyata; bya atụwa “puru” , bụ iya bụ ido; gude maru mbọku, ee-gwe pẹ arakabya g'ẹphe buru mkpurupyata.

²⁵Obenu teke ẹjo idzu ono rwuru eze nchi; ọ tuta ekemu dee ya l'ẹkwo g'e wota iphe ono, Hamanu shi chija doberu ndu Jiu ono; mee Hamanu l'onwiya. G'e wota ẹphe l'unwu iya je ekobe l'eli oswebe, aaswi-gbuje nemadzu.

²⁶Ọ buru iphe ono meru g'ọ gude e kua mbọku labo ono “Purimu.” Ẹka opfu ono shi bụ l'akpuru-opfu, bụ “puru.” Ọ buru shita l'iphe ono, e deru l'ẹkwo-ozu ono; waa l'iphe, ẹphe humakotaru, nwuru pẹ nụ ono;

²⁷bẹ ndu Jiu meru iya; ọ bụru omelali, dūru phẹ nū; k'ophu ẹphebedua; waa oshilokpa phẹ; waa ndu lwapfutaru phẹ nū e-dobeje ujiku ẹbo ono iche g'e deru iya l'ekwo nū phẹ; teme ẹphe nọdu emeje iya teke a sūru g'ẹphe meje iya.

²⁸Gẹ ndu unuphu, nonu; mẹ mkpukpu, nonu; waa ohamoha, nonu nyatajẹ mbọku ono dobe iya iche; e -shi l'ogbo sweru ogbo. Gẹ ndu Jiu ta azohajekwa abo obo-iphe ono; ophu oshilokpa phẹ azohakwa eswe mbọku ono.

²⁹Tobudu iya bu; eze-nwanyi, bu Ẹsuta nwada Abihelu; yele Modekayi onye Jiu bya edee ekwo k'ẹbo, meru gẹ k'obo-iphe purimu kabaa eshihu ike.

³⁰Ẹphe dee ekwo-ozu ono nukota ndu Jiu, bukota l'ohamoha ukporo ishii l'esaa, nogbaa l'ali-eze Kuzakusesu. L'ekwo-ozu ono bẹ ẹphe pfuru phẹ opfu oma; bya akaru phẹ gẹ ndzu ba agushi phẹ;

³¹g'ẹphe boje obo-iphe purimu teke gbaru iya nū, bu iphe, Modekayi onye Jiu; waa eze-nwanyi, bu Ẹsuta tūru phẹ ekemu; bukwarupho g'ẹphebedua yele awa phẹ dobewaru eswe aswi ẹgu; yee k'agu aphu.

³²Ekemu, Ẹsuta tūru mee; ekemu k'obo-iphe purimu kabaa eshihu ike; e woru iya dee l'ekwo.

Ẹsuta 10

Modekayi akabaa ajata ẹnya eje

¹Eze Kuzakusesu bya atua ekemu gẹ ndu bukota l'ali-eze iya g'o ha je akpaa le ndu bukube eze-enyimu tuje akiriko nū iya.

²Iphemiphe, o mekotaru gude goshi g'okpehu iya habe shii; wakwapho g'o meru gẹ Modekayi buri onye paru ẹka bẹ e dekotaru l'ekwo ako iphe, meru l'ali ndu Peshiya; waa ndu Midiya.

³Modekayi onye Jiu buri iya no-tsotaru eze Kuzakusesu l'okwa; buri onye paru ẹka l'ehu ndu Jiu; teme o du igwerigwe ndu Jiu, bu unwunna iya l'obu. O nodu anoduje eme iphe, a-duru ndu Jiu ibe iya le ree; bya anoduje epfu iphe, e-me g'ehu du phẹ guu.

Jiobu

Jiobu 1

Akọ ẹhu Jiobu

¹O nweru onye alì Uzu lanù; teke o shi nọdu bẹ ẹpha iya bụ Jiobu. Nwoke ọbu bụ nwoke, ụta adudu lẹ ndzụ iya bya aburu onye p̄fuberekoto. Ọ bụ onye atsuhuje Chileke ebvu haa eme ẹjo-ememe.

²Iphe, ọ nwutaru bụ unwoke ẹsaa waa unwanyi ẹto.

³O nwekwarupho ẹku. Aturu iya dū unu iri l'ẹsaa l'ukporo iri. Inya-kamelu iya dū unu ẹsaa l'ukporo iri. Eswi, a turu njigba ẹbo ẹbo dū unu njigbabe eswi ugbo labo l'ukporo ise. Ne nkafu-igara iya dū unu l'ukporo ise. Ndu bụ nemadzū, ejeru Jiobu ozi kwatakpo dū igwerigwe mebyikpo. O buẹpho l'oo ya bụ onye shi kakota shii l'iphe, bukpo nemadzū, a nwuru anwunwu l'uzo ẹnyanwu-awawa l'ophu.

⁴Unwu iya ndu ophu bụ nwoke nọdu aboje ọbo-iphe l'ibe phe. Onye ọwa-a -bọ ọgiya; ọgiya ọzo onye ọzo abọ; ẹphe -nọdu abọ ọbo-iphe ọbu; ẹphe ezia unwune phe ndu ophu bụ unwanyi pho ẹphe n'eto; ẹphe abya lẹ nri ono.

⁵Ọ nọdu abujeru; a -bochaa iphe ono teke ẹphe abọ iya; Jiobu ekua phe bya edoo phe nsọ. Nchita-abọhu iya l'ọ bya egweeru Chileke ngweja-akpo-oku l'iswi ẹhu phe l'ẹhu l'ẹhu. Kẹle ọoriye sū: “? A maru ? unwu iya te eme adaru nū iphe-ẹji? ? A maru ? ẹphe te egude adanū obu phe kọo Chileke ọnu?” Ọ buru nno bụ gẹ Jiobu shi emeje iya tekenteke.

Nsetanu ahụ Jiobu ama

⁶Obenu ujiku lanù; unwu Chileke bya g'ẹphe goshi onwophe l'iphu Chipfu. Nsetanu tsokwaru phe pho bya.

⁷Chipfu sū Nsetanu: “? Bụ awe bẹ i shi bya?” Nsetanu sū Chipfu: “Mu ejenupho ejeje alwa alwalwa l'eliphe. Mu tsonurupho oma mgboko aghaphe botorii.”

⁸Chipfu sū Nsetanu: “? Ẹnya tsuru ngu l'eka onye-ozu mu, bụ Jiobu nọ? Mbụ l'ọ to duedu nemadzū, dū g'oo ya lẹ mgboko l'ophu. Ọ bụ nwoke, p̄fuberekoto bya aburu onye ụta adudu lẹ ndzụ iya; buru onye atsuhuje Chileke ebvu; haa eme ẹjo-ememe.”

⁹Tobudu iya bụ; Nsetanu bya eyeeru Chileke ọnu sū iya: “? Iipfu to? ? Jiobu nonyaerupho tsuahaa gube Chileke ebvu?”

¹⁰? Tobudu ngu kpọru ọkpokuu kpọ-pee ye ndibe iya mgburugburu; mekpoo iphemiphe, o nweru? Iphemiphe, oome l'eka bẹ i meru; ọ buru upete; k'ophu bụ l'eku iya tukoru ẹkameka.

¹¹Machinaa ẹka nta-a denyi l'iphemiphe, o nweru enweru g'ihuma l'oo-pfuru l'ataphu ngu kọo ngu ọnu.”

¹²Tɔbudu iya bụ; Chipfu sụnu Nsetanu: “Ọ dū ree; iphemiphe, o nweru dūwaa ngu l'ẹka; ọo ẹpho gẹ mkpūshi-ẹka ngu te erwu iya l'ẹhu.” Nsetanu kwoẹpho gburumu; ọ bụeru iya phọ eshi l'iphu Chipfu l'ẹka ono tūgbua.

¹³Tɔbudu iya bụ; o be ujiku lanụ; ụnwu Jiobu ndu kẹ nwoke mẹ ndu kẹ nwanyi dzukọbe l'ulo ọkpara nna phẹ kẹ nwoke abọ iphe; eri nri; angu mẹe.

¹⁴Onye-ozì bụerupho phẹreketete l'iphu Jiobu bya asụ iya: “Oke-eswi, eegudeje eje ozi ẹgu bẹ e gudegbaa eje ozi ẹgu; nkafụ-igara dọkwarupho l'aguga ẹka ono ata nri.

¹⁵Ndu Sheba fūaru phẹ; bya atuko phẹ rwuta; bya egbushia ndu ejeru ngu ozi. Ọ bụru mbèdua kpoloko bụ onye gbalaru nū sū gẹ mu bya epfuaru ngu g'ọda.”

¹⁶Onye k'ono kpukwaduru-a opfu l'onu epfu; onye ọzo kwobata bya asụ: “Ọku, shi l'ẹka Chileke bẹ shiẹpho l'igwe daa bya atuko aturu ngu l'ophu kee; kechaa kee ndu-ozì ngu kefu; ọ bụru mbèdua kpoloko bụ onye gbalaru nū sū gẹ mu bya epfuaru ngu g'ọda.”

¹⁷Onye k'ono kpukwaduru-a opfu l'onu epfu; onye ọzo kwobata bya asụ: “Ndu ọ-lwua-olaa, shi lẹ Babilonu buru ọgbo ẹto tūa lẹ mkpa lẹ mkpa bya awụpyabe inyakamelu ngu g'ọ ha rwuta; bya egude ogu-echi gbugbushia ndu ejeru ngu ozi. Ọ bụru mbèdua kpoloko bụ onye gbalaru nū sū gẹ mu bya epfuaru ngu g'ọda.”

¹⁸Onye k'ono kpukwaduru-a opfu l'onu epfu; onye ọzo kwobata bya asụ: “Ụnwu ngu unwoke mẹ ụnwu ngu ụnwanyi dọkwaru abọ iphe; eri nri angu mẹe l'ibe nwune phẹ nwoke k'ogerenya.

¹⁹A bya ele ẹnya; oke phẹrephere shiẹpho l'echiẹgu ziru taphutaphu rwua bya enwungaa ụlo ono l'ophu; ụlo zee zepyabẹ ụnwu ngu ono g'ephe ha; ẹphe nwūshihu; ọ bụru mbèdua kpoloko bụ onye gbalaru nū sū gẹ mu bya epfuaru ngu g'ọda.”

²⁰Tɔbudu iya bụ; Jiobu bya agbalihu bya eworu uwe yèbedua, bụ Jiobu zijaa; bya eworu ishi kpūshia; bya eworu onwiya tūa gbii l'alì baaru Chileke ẹja;

²¹sụ: “Ọo ọto bẹ mu gba teke mu shi l'ẹpho ne mu daa l'alì. Ọ bụkwarupho ọto bẹ mu a-gbaru laa. Ọo Chipfu nūru; ọ bụru Chipfu wotaru iphe, ọ nūru. G'e tukwaa Chipfu ẹpha.”

²²Iphemiphe-a mekọtaru Jiobu; ophu o mekwaru Chileke iphe-ẹji; ophu ọ sūkwaru lẹ Chileke meru iphe, erwubeduru iya nū.

Jiobu 2

Nsetanu ahụ Jiobu ama k'ugbo ẹbo

¹Noo ya; o bekwa mbọku ọzo; ụnwu Chileke byakwa g'ẹphe goshi onwophẹ l'iphu Chipfu. Nsetanu tsokwaru phẹ phọ bya egoshi onwiya.

²Chipfu sū Nsetanu: “? Bụ awe bẹ i shi bya?” Nsetanu sū Chipfu: “Mu ejenupho ejeje; alwa alwalwaa l'eliphe. Mu tsonurupho oma mgboko aghaphe bọtorii.”

³Tɔ̀budu iya bụ; Chipfu sụ Nsetanu: “? Ẹnya tsuru ngu l'ẹka onye-ozu mu, bụ Jiobu nọ? Mbụ l'ọ tọ duedu nemadzu, dū g'ọo ya lẹ mgboko l'ophu. Ọ bụ nwoke, obu guru iphóró; bya aburu onye ụta adudu lẹ ndzu iya; buru onye atsuhuje Chileke ebvu haa eme ejo-ememe. I kpatachakpooru; mu mekpaa ya ẹhu; mebyishia ya l'ẹbe ọ dū iphe, o meru. O gudesiẹle-a onwiya g'o gudesi onwiya.”

⁴Nsetanu sụ Chileke: “Hanaa g'a rwunaa ya ẹka l'akpuru-ẹnya-oji! ? Tị madu lẹ nemadzu a-mikota ẹnya l'iphemiphe, o nweru enweru g'ọ buru lẹ ya anodu ndzu?”

⁵Mbụ lẹ-a; machinaa ẹka rwua ya l'okpu yele anu-ẹhu g'ii-huma l'oo-pfuru l'atatiphu ngu l'ẹka ono koo ngu onu.”

⁶Chipfu sunu Nsetanu: “Ngwanu; ọ nọ ngu l'ẹka. Ọle ọ bụ; dobekwa iya ndzu!”

⁷Tɔ̀budu iya bụ; Nsetanu shiepho l'iphu Chileke l'ẹka ono; ọ buru iya atugbu bya eje ewoerupho ejo ẹkpa-ebyi chĩa Jiobu l'ẹhu. O shiepho l'okpa zakotae ya pho barii l'ẹhu jasụ l'ishi.

⁸Jiobu gbeshiepho je agwo l'ikpozu. Ọ buru agbagba mbeji be oogudeje gude ako onwiya oko.

⁹Ọ buru iya bụ l'ọ nonyaepho; nyee ya sụ iya: “? I gudeshipoepho onwongu g'i gude iya? ? Tii kodu Chileke onu nwuhu?”

¹⁰Ọ sụ iya: “Opfu ngu gbẹ adakwa g'i bụ onye lanu l'ime unwanyi, amadu iphe. ? Buepho iphe-oma be anyi a-nodu anata l'ẹka Chileke? ? Anyi taa kabekpoedu nata ejo iya?” Iphemiphe ono mekotakpoo Jiobu; ophu ọ saduru onu pfuswee Chileke.

Ndu ọnyà Jiobu

¹¹O be teke ndu ẹphe lẹ Jiobu eshi ọnyà; umadzu ẹto; numaru ejo-iphe, anwugbaaru iya nu; ẹphe shigbaa l'ekameka, ẹphe shi byatashia ya agbaru mkpu; k'ophu ẹphe a-du iya obu. Ndu byaru nu bụ Elifazu, onye Temanu; waa Bilidadu, bụ onye Shuwa; wafukwapho Zofa, bụ onye Nama. Ẹphe n'eto ono tugbaberu onu eswe ujiku lanu bya g'ẹphe gbaaru Jiobu mkpu dua ya obu.

¹²Ẹphe byarwuta bya agbe ụzenya huma iya; ophu ẹphe ahubeeduru iya ama. Ẹphe tuko kwata tu uzu-ekwa ke wo; bya eyegbaa ẹka l'uwe phe lajashia; bya ekpotagbaa urwuku ekpugbaa onwophe l'ishi.

¹³Ẹphe gwodoshihu l'alị l'ẹka ono; ẹphe l'iya gwokoru nno noo abali esaa; eswe l'enyashi. Ọ kpoo phe opfu; ophu ọ dudu onye ophu duru ike saa onu pfuru opfu yeru Jiobu. Noo kele ẹphe humaru l'iphe-ehuka, ooje kwata shihu ike mebyi esihu.

Jiobu 3

Opfu, shi Jiobu l'onu

¹Tɔ̀budu iya bụ; e mechaepho; Jiobu saa onu wata epfu opfu; bya awata ephu eswe, a nwuru iya iphu.

²O pfushiahaa sụ:

- ³“G'eswe, a nwuru mu bukwaru ọla-l'iswi! G'enyashi, a tsuru ime mu bukwarupho enyashi, laru l'iswi!
- ⁴Gẹ mbọku ono gbahukwa ọchii! Gẹ Chileke ọphu bu l'eli ta agubehekwa iya iphe; ọphu ọ dukwa iphe, du g'iphóró, adukwadu mbọku ono!
- ⁵G'ọchii yẹ tsukiribaa tsunyikwaa eswe ono ẹnya! G'urwukpu sopyabekwa iya! G'eswe mbọku ono gbahukotakwa tsurikitiki!
- ⁶Mbụ-a; g'ẹjo dadishi tukwa enyashi mbọku ono gburumu swiswia! G'a ta guhekwaru iya ye l'eswe, nwuru l'apha! Ọphu a gukwaru iya ye l'eswe lanu l'onwa!
- ⁷Mu suru-a; g'enyashi mbọku ono bukwaru mbọku, gba ẹka nwa! G'ọ to dukwa olu emereme, aa-numa iya l'ime!
- ⁸Gẹ ndu atuje mbọku onu tukwaa mbọku ono onu; mbụ ndu kwakoberu akwakobe emete ẹjo-oke-agiyi.
- ⁹Gẹ kpokpode nchi-abọhu iya gbahukwa ọchii. G'o lekwa ẹnya l'iphóró abya adudu; e -mechaa l'ọ buru ke mmanu; ọphu ọ humakwa geregere utsu ẹnya ahuma ọphu.
- ¹⁰Noo kele o to mechiduru ẹpho ne mu g'a ta nwu mu mbọku ono; k'ọphu aphu ọwa ata atsoduru mu.
- ¹¹Mbụ-a; ? bunaa gunu meru g'o gude ọphu ọ budu teke aanwu mu; mbụ l'oo teke ono, mu shi l'ẹpho afuta ono be mu gege atụ-buhu unme nwuhu?
- ¹²? Bunaa gunu meru g'o gude utapfu hee mu hefuta? Mbụ; ? denuanu g'o gude era du k'ọphu mu nguru iya angungu ọphu?
- ¹³Kele nta-a be mu gege azekpooro nwadoo. Mu gege anoro ge mu ze le mgbenya. Oo ya bu me mu anoduro pyakoo onwomu nwa nggujungguji;
- ¹⁴mu le ndu eze me ndu mgbazi unwu-eliphe; ndu kwashiru unuphu doberu onwophe l'eliphe-a; ole nta-a be o bukotawa ochobu.
- ¹⁵Mu le ndu-ishi, bu ndu shi nweru mkpola-ododo; ndu shi doo mkpola-ochaa dojia ulo phe godogodo.
- ¹⁶Ozokwanu le-a; ? bunaa gunu kparu iphe, mu adudu ge nwa, a byaru anwu; o nwuhuwaa ne iya l'ẹpho; e woru iya je elia; mbụ ge nwaswa, asakpodarunu ẹnya asasa ọphu.
- ¹⁷Eka ono be ndu ejo-iphe a-babuhu hanyihanyi. Ndu ike bvuru a-nodu iya tutaahaa unme.
- ¹⁸Alị-maa ono be ndu mkporo yichaa le ndu no iya atuta unme. Epe ta anuhedu olu ndu anoduje achi phe g'ohu.
- ¹⁹Ndu ha nwanshi no l'eka ono; ndu ha shii nodu iya. Ọphu ndu shi buru ohu anodedu l'eka nnajiuphu phe.

²⁰? Denu g'o gude iphoro ndu adujeru ndu ejegbu onwophe l'iphe-ehuka. A ndu ahajekwadu ndu aphu tsoru g'ephe dzukwaduru ndu;

²¹mbu ndu anwuhu agu egu; ophu o kwedu phe egbugbu; ndu anoduje achọ iya ge ndu achọ eku, ere ire, e domiru edomi.

²²Ndu eteje eswa ntumatu; mbu kwata mee emereme m'ephe bahu l'ime ilu.

²³? Denuanu g'o gude iphoro ndu adujekwarupho onye e domiru uzo iya edomi; teme Chileke gude okpokuu kpo-pee ya mgburugburu; o kwaa l'ime iya?

²⁴Noo kele o buwaa atsü ude bu nri, epyoje mu onu. Mgbede, mu ata dupeho g'eka mini aso gborogboro.

²⁵Iphe, mu atsushi ebvu ike bupeho iphe, mechaaru byaru mu nu. O bu ru iphe ono, mu anmaru pyaapyaapya mechaaru mee l'ehu mu.

²⁶Ehu ta adujeduru mu guu; ophu mu atutajeduru unme; ophu ehu ebvujeduru mu ebvuru. Oo epho iphe-ehuka be mu l'iya anoduje eme.”

Jobu 4

Onu, Elifazu yeru

¹Tobudu iya bu; Elifazu onye Temanu bya eyee onu su:

²Nemadzu -sukwanu ge ya yee nwonu nwilile; ? to kpatsudu ngu nu iwe? Olobu ? bu g'iphe aduje baa nemadzu edobe onu doo?

³Leanaoya; gube onye ziwaru ikpoto nemadzu iphe. Ndu dahwaru adzulakpa be i meru; epe gbakerehu.

⁴Onye ada adada be i pfuru opfu yeru; opfu ngu kwolia ya. Mbu l'ikpere ngwokinaki be i meru; o pfuru kekereke.

⁵Nta-a be iphe-ehuka byapfutaru gubedua l'ishi onwongu. Aphu ji ngu obu egube owa-a; mbu l'o turu ngu gbaa l'ehu; meji tofu ngu.

⁶Eshinu i bu onye atsü Chileke ebvu; dakobenu iya! L'i chiru enya yeru abubu, i bu onye uta adudu le ndu iya.

⁷Rinaa ya ariri; ? bu onye be i makporu, bu onye iswi du mma, lajeru l'iyi? ? Bu awe be i humajeru l'onye pfuberekoto chihuru le mgboko?

⁸O chikwaa iphe, mu ahumaje bu le ndu woru ejo-ememe ako g'onye ako opfu; bya eworu iphe-ehuka anma iya bukwapho iphe ono be epe akpataje iya.

⁹Chileke -zikwadaa unme fuu; epe ephukashihu. Teke ehu egu iya swolihuru; epe aburu ola-l'iswi.

¹⁰Oduma asujekwa ekiri; baa hanyihanyi; byaa enari; obenu l'oduma, dafuru ibogolo be eekwoshije-ele-a eze.

¹¹Oduma, ahumaduru iphe, oo-ri alaje l'iswi; unwu oduma agbaa nanu nanu.

- 12“Mbu-a; o nwekwaru iphe, e pfujeru mu le mpya. O buru-a nwiphiphe be mu numabutaru iya.
- 13Mu nodu arwo ejo nrwo l'enyashi; le teke ono, ndiphe adajewa odamgbenya ono.
- 14Ndzu guahaa mu; ehunmaahaa mu pyaapyaapya; k'ophu okpu, no mu l'ehunmakotaru yilayila.
- 15A nonyaepho; nwamaa bya eshie mu pho l'ataphu ghata. Edzu swie mu pho l'ehu; ishi nyia mu ke kpalaa.
- 16Maa ono bya apfuerupho kekereke; ophu mu adukwanu ike ako g'o gbaru. O buepho l'o nweru iphe, pfuru mu l'iphu. Ekameka dakotapho nyonyoronyo. A nonyaa; mu numa olu-opfu onye suru mu:
- 17? O nweru g'oo-dunaa nemadzu mmanu abya aka Chileke apfubekoto? ? O nwenuru-a g'oo-du nemadzu abya aka onye meru iya nu adubebe ree?
- 18Eshinu Chileke te egudedu ire ndu ejeru iya ozi aka; teme o nodu abajeru unwo-jozi-imigwe iya mba l'iphe, ephe mesweru;
- 19? buchia nemadzu be oo-ha; mbu nemadzu ono, bu l'ulo epuchi, a turu okpa iya l'ali; ndu azo-gbu phe ka nphe eme l'azo-gbu mbeberibe!
- 20A -bya eshi l'utsu no jasugeni jihu be e gwewaru phe uji. Ephe alaa l'iyi jeye le tuutuutuu le miiimii; o to dudu onye enya erwu l'aka ono.
- 21O -buru l'a gbabufuru eri, gude ndzu phe; ? ephe ta anwuhudu l'ebe enwe egomunggo?”

Jiobu 5

- 1Kunaa oku nta-a maru me ? o nweru onye a-za ngu enu. ? Denu unwo imigwe ono ophu ii-gharu iphu g'o gbaaru ngu mkpu?
- 2Ovuma egbujekwa onye-eswe; teme iji enya nodu aphuje onye amazidu iphe terii.
- 3Mu humajeakwaru aka onye-eswe agba ogbarabvu; ophu o dudu g'o no-beru; atuphuwa iya l'onu.
- 4Unwu iya kwatakpo awa awawa; mbu l'eegweje phe arakabya l'aka ekpe ikpe. O to nwedu onye agbaru phe odzori.
- 5O buru ndu egu agu erifuje iphe, o kpataru l'egu iya; mbu l'ephe ewotajecha wota ophu no l'aka o pheduru eswa. Ndu ehunachi oku nodu alwuje iya alwulu.
- 6Kele mkpawere te eshijedu l'urwuku futa; ophu iphe-ehuka efutajedu l'ali.
- 7Ole o bu; nemadzu be a nwukwaru ye l'eye iphe-ehuka egube-a, ekoroku bu: o -gbaa l'o phelihu-a.
- 8Mbu l'ome oo mu; me mu edooru iya Chileke; mbu me mu ewoerupho g'o daru mu shi ishi lanu dokotaru iya.

- ⁹Lẹ Chileke emeje iphe, dughbaa biribiri, bugbaa akpavu l'ishi; mbu l'oomeje iphe, du ebvu igwerigwe kpo.
- ¹⁰Eliphe be oodzejeru mini. O nodu asojeru mini soba l'egu.
- ¹¹Ookulije ndu lwaru ali imeli imeli; teme o nodu ekulije ndu agu aphu dobe l'eka adudu iphe, byaru eme phe nu.
- ¹²Ndu eregede be oomeje; o too jehuduru phe g'ephe tuberu; k'ophu bu l'eka phe ta adudu iphe, ephe emefuje onya.
- ¹³Ndu maru iphe be oogudeje eregede, ephe agba nmata. Temanu mmamiphe ndu ntuphu-ire be oomeje l'o daa idaphu.
- ¹⁴Nchi ejipfufe phe l'echilabo eswe. Ephe eje dadishi l'echi gbadagbada eswe g'onye eje l'echi abali.
- ¹⁵Ndu adudu g'o du phe be oodzotaje l'ejo onu phe. O nodu adzotaje phe l'eka ndu du ike;
- ¹⁶k'ophu bu le ndu ukpa be ele enya g'adzoo phe. O mee iphe, apfuduru-oto mee onu sutukumu.
- ¹⁷Ehu-utso be a goru nu onye Chileke abajeru mba; k'ophu bu: Okalibe-kangokotaru-nu
-nodu alo ngu eka le nchi; ta anmakwa iya phulaphula;
- ¹⁸kele oolojeru onya tu nemadzu l'ehu; l'o bya epfube iya iphe l'onya obu. O nodu emekaje nemadzu iphe; e -mechaa l'o mee ya l'o kpo.
- ¹⁹Iphe-ehuka a-byaru ngu akpo ishii; l'o dzochaa ngu; mekpoo akpo esaa; ole o too kwedu g'o duru iphe, oo-me ngu.
- ²⁰Lẹ teke akpa-nri; bu iya a-gbaru ngu mkpu g'i ti kpagbu onwongu le nri. Teke aalwu ugu l'o mee g'e te egbu ngu mma.
- ²¹E -pfuaru ngu ejo opfu; o too kwedu g'o rwua ngu l'ehu; ophu iitsudu ebvu me ola-l'iswi rwua.
- ²²Oo ochi be ii-noduje achi ola-l'iswi yee okpa-nri; ophu i tsudu anu-egbudu k'eliphe-a ebvu;
- ²³kele gu le mkpuma, no l'egu a-gbachaa ndzu. Unu l'anu, bu l'egbudu a-duchaa le ree.
- ²⁴Ibe ngu be ii-makporu l'o to dudu iphe, e-me iya nu. L'i bya agua iphe, bukpo iphe, i nweru enweru ugu; huma l'o to dudu ophu etuphahu etuphahu.
- ²⁵L'i maru l'unwu ngu a-du igwerigwe. Awa ngu a-kpofushi g'eswa, furu l'ali.
- ²⁶L'i kappoo nka kaghee ya akaghe teme l'i bahuje l'ilu. L'i du g'ereshi, e gburu l'oge iya.

²⁷Anyi nyokpɔwaru iphe-a enyonyo huma l'ò bụ ire-lanụ. Mbụ-a; n̄makwa iya woru iya ye l̄ ndzụ ngu!

Jiobu 6

Ọnu, Jiobu yeru

¹Tɔbudu iya bụ; Jiobu yee ọnu sụ:

²Ọ dū mu g'a sụ g'e wota mgburwashị ẹhu mu t̄a at̄t̄t̄ g'a huma g'onyi-be ẹrwa. Mbụ g'a t̄ko iphe-ẹhuka mu chiru ye l'iphe, aat̄je ẹrwa iphe.

³Ọ t̄o dudu g'e meru g'ò t̄o ka ẹja, n̄o l'eze-enyimu anyi ẹrwa. Ọ b̄uru iya kparu iphe, opfu mu adan̄ka kpaakpaa.

⁴K̄ele apf̄u, Ọkalibe-kangokotaru-n̄u gbakash̄iru mu gugbaaru mu eguru l'ẹhu. Ụphu, ọophu mu n̄odu al̄o mu ẹka l̄e meji; mbụ l̄e Chileke eyeẹ mu ph̄o ebvu mkp̄e-lanụ.

⁵Nkapf̄u-igara-ọswa ? ọoraje

órà m̄e ọ -n̄odu ata ẹswa? T̄oo eswi ? oogbuje órà m̄e nri, oori dukwadu?

⁶? Eerije nri, enwedu uto l'ẹbe e ye iya únú? T̄oo ? ọ duru uto, dū l'ẹka ono, achaje ucha l'ẹkwa-ọku, e shiru eshishi ono?

⁷Mu te ekwejedu iya edenyi ẹka; k̄ele ẹgube nri ono abyaj̄e mu ẹgbo l'onu.

⁸O gogo dukwaru mu ree; ọme ee-meru mu iphe, mu epfu g'e meeru mu; mbụ l̄e Chileke gege akab̄enu n̄u mu iphe, mu ele ẹnya iya;

⁹mbụ l̄e Chileke gege at̄kpoep̄ho obu iya onyo gwee mu uji; g'ò t̄hakpoep̄ho ẹka t̄a mu l'ẹhu k̄e paa; mee ḡe mu chiru l̄e mgboko.

¹⁰Ọo ya bụ m̄e ọ bukwanuru iphe, gege an̄odu adu mu obu; mee g'ẹhu tsokpoo mu n̄u l'iphe-a, l'atakposhi mu g'otakposhi mu-a; noo k̄ele mu ta ahaj̄eduru eme olu onye ono, dū ns̄o ono.

¹¹? Bụ ike ḡunu b̄e mu nwekwaduru k'an̄odu elekwadu ẹnya iphe? ? Mu maru iphe, kp̄o-chiru ndzụ mu ishi ọphu mu e-pfukwadu k'ata nshi?

¹²Ọkpehu nkemu ? ọ b̄u ọkpehu agbara-mkpuma? T̄oo an̄u-ẹhu nkemu ? ọ b̄u akp̄o-igwe?

¹³? Mu nwekwaduru ụvo, mu e-gude yeru onwomu ẹka nta-a, a natawaru mu ike, mu shi nweru-a?

¹⁴Onye meji at̄ofu at̄ofu gbakp̄oru g'onyà iya ph̄e an̄odu aphuru iya obu-imemini; m'o betakp̄o ọphu ọ tsuhedu Ọkalibe-kangokotaru-n̄u ebvu.

¹⁵Obenu l'unwune nkemu b̄e e te gudedu ẹka. Ẹphe dū g'oke nggele, mini tahuru l'onanwu; ọle o -be l'udzumini; ọ byaa utso t̄ko ẹkameka sweta;

¹⁶m̄e mini, d̄oru iya n̄u, shi hukoo ah̄uko dazeshihuepho; ọ b̄uru iphe, swetaru iya n̄u b̄u aka-mini-sunoo.

- ¹⁷Ole ọnanwu -chaepfo l'ọ tuko buru sọtukumu. Mbụ okpomoku -kpoahaepfo; ọ tọ duedu ọphu a-dụkwadu l'ogba iya.
- ¹⁸Ndu ije aparu ọzo pẹ haa lashia l'okorobo-egu je anodu l'eka ono buru ọla-l'iswi.
- ¹⁹Ndu ije ọphu shi lẹ Tema choru mini ono achochu. Ndu ije ọphu shi lẹ Sheba lee enya iya; ọ buru k'iphoro.
- ²⁰Iphere gudewaru pẹ; kele eka ephe shi kporu obu yeru be ephe rwuru; ọphu ọ dudu g'ephe riru.
- ²¹Unubedua l'onwunu bya egoshikwapho l'o tọ dudu urwu, unu aba. Unu humaru iphe, eye ebvu; unu tsuahaa ebvu.
- ²²? Mu sijekpooru g'e meeru mu iphe-oma? Tọo ? o nweru onye mu sjeru g'o gude iphe, o nweru je anuru mu uphalazu?
- ²³G'unu bya adzota mu l'eka ndu ohogu mu; ozoo g'unu bya agbafuta mu l'eka ndu ewebushi akurepho.
- ²⁴Zinaa mu iphe; ge mu e-dobe onu doo! Goshinu mu eka mu jeberu; ọzo kpọ-swehu!
- ²⁵Lewarọ g'ire-lanu emebeje ehuka l'ehu! Obenu lẹ-a; iphe-a, unu epfu-a; ? o goshikporu gunu?
- ²⁶? Bu mba be unu byaru mu abaru? Mbụ-a; ? unu eme g'unu sụ l'opfu onye ono, ejegbu onwiya l'iphe-ehuka ono bu opfu, laru lẹ pherephere?
- ²⁷Ono du-a g'onye aturu nwogbee, enweddu nna ido; bya aburu ere onye unu l'iya eshi onya erere.
- ²⁸Ole g'ọ du nta-a bukwa lẹ-a; aswaru, unu a-swaru mu bukwa g'unu lekpada mu nu ọphu bu enya; kele-a; ? mu a-kabehunu nodu unu l'iphu dzua uka?
- ²⁹Jikonu; unu tunaa mgbeleke nwanshi; hanaa eme iphe, apfuduru-oto! Unu ri-phunu oriri azu; kele apfubekoto mu dukwapho g'ọ du.
- ³⁰? O nweru iphe, apfuduru-oto, mu pfuru nta-a? Tọo ? mu ta akabeddu maru teke mu pfuru ejo opfu?

Jiobu 7

- ¹Nemadzu ? tọ budu iphe, ọ byadoru eliphe, bu ese akanya; mbu lẹ ndzu, ọ no duepho ge ndzu onye e butaru g'o jee ozi.
- ²Ọ du g'ohu, eje ozi, bu iphe, ọonoduje ele enya iya bu ge nchi e-me jihu; dukwapho g'onye e butaru ozi, bu iphe, ọonoduje ele enya iya bu ugwo, aa-pfu iya.
- ³Ọo egube ono be e meru onwa l'onwa nodu abukotajeru mu ke mmanu. Iphe, bukpoonyashi nodu abukotajeru mu mgburwashiehu.

⁴Mu -zẹe azẹe; mu echiru l'oriri su: ? Mu e-kukpoo mgbenya owa-a jasụ teke ole? Ẹnyashi nọdu anọduje akpụ onwiya gologolo. Mu nọdu echijeepho gburugburu jasụ nchi abọhu.

⁵Inyi tuko mu ẹhu sweta;

èkà nọdu atụ mu rikarika l'ẹhu; mbụ l'ẹhu mu l'ophu kejashihucharu ekejashihu; ọnyá, nọ iya nụ nọdu atụ rikarika.

⁶Eswe ndzụ mu nọdu agba warawara gẹ ngga, e gude ekwe ẹkwa; mbụ lẹ ndzụ mu eje mgbabirishi l'ẹbe adu iphe, mu levuru ẹnya iya.

⁷Jiko Chileke; nyatakwa lẹ ndzụ mu ta adudu iphe ozo, o bu gbahaa udzu-onu. Ẹhu ta atsobaedu mu utso lẹ ndzụ mu owa-a ozo.

⁸Onye humaru mu nta-a e-mechaa; o too humabaedu mu ozo; mbụ l'ii-mechaa choo mu achocho; ole i tii humabaedu mu.

⁹Oo g'igwe erwuje erwurwu gbaka-a; o too lwabaedu azu-a bu g'onye e kpochiru l'ilu ta alwajeedu azu ozo;

¹⁰mbụ l'onye ono ta alwajebaedu azu l'ulo iya ozo; ophu unuphu ibe iya ahumajeedu iya ẹnya ozo.

¹¹“Noo g'o gude ophu mu edobedu onu doo. Mu a-nodu ata kpookpookpo gẹ mu ata-a. Mu epfunu iya pho gẹ mu epfu iya-a. Mu a-tukonupho g'ooghube obu mu gu-gbua l'aphu.

¹²? Mu bu eze-enyimu; too ? mu bu ejo-oke-agiyi; k'ophu unu yeru ndu nche; a nodu eche mu nche?

¹³Mu gbẹ arị l'iphe-azẹe, mu zẹ azẹe e-me g'ẹhu du mu guu; mbụ l'etemu-anamu mu e-me gẹ nggumaphu lwa mu ali.

¹⁴Obenu l'i gudela-a ejo nrwo eme gẹ ndzụ gu mu; bya egude ophulanya eye mu ebvu;

¹⁵k'ophu bu l'aswi-gbu onwonye byaru aka mu ree. Anwuhu ka mu ree eme l'udu ndzụ owa-a, mu dzu nta-a.

¹⁶Mu ta agubeeduru ndzụ mu iphe; mbụ l'o to dukpoedu mu g'a su lẹ mu no ndzụ anono ophu jasụ lẹ tuutuutu lẹ mimiimii. Pakpoeru mu pho haa; lẹ ndzụ, mu no nta-a buwaa iphe-mmanu!

¹⁷? Nemadzu bu gunu ke g'i meje iya g'o ha shii? ? Ke g'ikpojeru obu yeru iya?

¹⁸? Ke g'i lerweje iya ẹnya elerwe l'utsu mboku-mboku; ahụ iya ama tekenteke?

¹⁹? Tii-kabekpoda wofu mu ẹnya; ozoo g'i hakpo mu nu gẹ mu no nwekinyi mu nwanshii nwanshii?

²⁰Ọ -buru lẹ mu meru Chileke iphe-ẹji; ? mu meru gubedua gunu? mbu gube onye eche nemadzu nche. ? Denu g'o gude o buru l'ehu mu be enya ngu du? ? Mu anyiwa ngu erwa to?

²¹? Denukpoo g'o gude ophu i kabekpodaa guaru mu nvu l'eka mu meswekpoo; mbu pawarunu haa l'ejo-iphe obu, mu eme obu; kele o to dukwa g'oo-no-beru l'e kpochia mu eja. L'i choo mu nta choo imo; i tii humaedu mu."

Jobu 8

Onu ke Bilidadu

¹Tobudu iya bu; Bilidadu, bu onye Shuwa bya eyeeru iya onu su iya:

²? Ii-pfukpoo udu opfu ono pfuberu teke ole? Opfu ngu dukwa ge pherephere, ezi taphutaphu.

³? Chileke ekpeje ikpe l'eregede to? Okalibe-kangokotaru-nu ? oogbanweje iphe, pfuru nhamunha?

⁴Ọ kwa iphe-ẹji, unwu ngu meru iya be o buru phe nggo iya.

⁵Obenu teke o bu l'i gbapfuru Chileke; mbu wata arwo Okalibe-kangokotaru-nu arworwo;

⁶o -buru l'i duebe ree bya aburu onye ire-lanu be o to dudu m'obeta o buru nta-a ophu oo-rikota onwiya gbaaru ngu mkpu; woru ngu dophu azu l'eka shi rwube ngu nu.

⁷Teke i wataru iya be oo-du nwa mkpeemkpee; obenu o -rwua l'iphu be ii-wata aba yoyoyo.

⁸Jinaa ndu shihawaa nu; g'ephe kooru ngu iphe, shi anwujeru ndiche phe;

⁹kele anyibedua bu-a unyaphu be a nwuru anyi; ophu o dudu iphe, anyi mawaru; teme ndzu anyi l'eliphe-a duepho ke nwa tsokere.

¹⁰Ndu ono e-zi ngu-a iphe pfua opfu ye ngu le nchi; mbu l'ephe e-gude mmamiphe phe saaru ngu opfu.

¹¹Eji; ? oovuje ogologo aka epuchi adudu. Mbu-a; eswa, du l'uda ? obaje yoyoyo me mini adudu l'uda?

¹²Oobujeru; o -nodu ezekwadu-a; e tee gbudu iya egbugbu; ephe akposhihu nku; mbu ka eswa akpohu nku egwegwa.

¹³Noo g'oda-pfuje iphe, bukpuo ndu zoharu Chileke. O buru egube ono bu g'ele enya iphe ndu amadu Chileke alaje l'iyi.

¹⁴Iphe, o dakoberu aduje phuge phuge. Iphe, o kporu obu yeru buru udude.

¹⁵Teke o dakoberu ugbu elwu-elwu iya ono l'o rikashihi; l'o bya agbakua ya aka; o to dudu ophu eme nu.

¹⁶Q dū g'iphe, a kuru l'anwu agba iya mini. O rwushia irwu òphúú wushi kẹ jashii l'ime mgbabu ono;

¹⁷bya agbaa ogbarabvu je agbakua l'agbara-mkpuma; buru ẹka ọcho bu ẹka dū epfu-epfu.

¹⁸Obenu teke e phefuru iya l'ẹka ono, ọ kporu ono; ẹka ono ajika iya sū lẹ ya teke ahumaswekwaa ya.

¹⁹G'e lekeberu ẹnya epfu; ndzū iya anwulwashihu; iphe, a kuru akuku ọzo eshi l'ali l'ẹka ono wata efushi.

²⁰Mbū lẹ-a; Chileke ta ajikajekwa onye adudu iphe, o meru; ọphu ọ bujekwanuru agbarike onye ejo-iphe.

²¹Oo-mecha mee; ọnu aburu ngu ọchi ọchi. Ogbogboromonu ngu aburu iphe, e-ji iya nū bu okoo ngu.

²²Ndu ọhogu ngu bẹ ee-ye iphere g'uwe; l'a phokashia ulo-ẹkwa, ndu ejo-iphe kweberu buru.

Jiobu 9

Ọnu, Jiobu eye

¹Tobudu iya bu; Jiobu bya eyee ọnu sū:

²Tororo bu ishi opfu bu lẹ mu maru l'ọo eviya. Obenu lẹ-a; ? denu gẹ gwopya-gwopya iphe-a, bu nemadzu-a e-me pfube-ẹka-oto l'iphu Chileke?

³Onye ọ dū gẹ yẹ Chileke tua ya bẹ ọo-jikwa unu-kuru-unu aji; ọ too zadu g'ọ ka mma l'ọo nanu.

⁴Q maru iphe maghee ya amaghe; bya adu okpehu du-ghee ya adu-ghe. ? Bu onye kwefujeru iya ike; e mecha; ọ duru iya lẹ ree?

⁵Úbvú bẹ oonwuribejeru; úbvú ta amakpodanu l'e nwuriberu iya; ọ nodu egudeje ẹhu-eghu ghaa ya igharaphu.

⁶Mgboko l'ophu bẹ ọnmaghuje anmaghu mee itso, e gude kpoḅe iya g'o tee kpaakpaakpaa.

⁷Enyanwu bẹ oopfujeru opfu yeru; l'o chibuhu; ìphóró, dū lẹ kpokpode bu iya byanyibotaru iya.

⁸Q buru yẹbedua kpoloko susaru akpaminigwe g'ọ susaru ono; bya aburu iya bu onye ahaje ọkpa l'eli akparamini, atū l'echi eze-ẹnyimu.

⁹Qo ya meshiru oke kpokpode kpokpode, dugbaa nū; mbū kpokpode, bu biye; yẹ orayonu; waa peleyadesu; meward eze kpokpode kpokpode, noḅbaa l'uzo ndohali.

¹⁰Oomeje iphe, dū biribiri, adudu ẹtu, iya dū nū; teme iphe-ohumalenya nkiya buru aguta aguta.

- 11 Oobujeru; a -nonyaa l'ọ bya aghata mu; mu ta ahụmadu iya; teke ooje l'iphu l'iphu mu ta amadu.
- 12 O -nata nemadzu iphe; ? bu onye a-su iya g'o to meshi? ? Bu onye suru g'oo-ji iya su: ? Bu gunu be iime egube ono?
- 13 Ehu -nodu egbu Chileke egbu be o too selajekwa aka azu; mbu le ndu ojogu Rehabu daru kpurumu le mgboru okpa iya.
- 14 ? Denu ge mu e-jeje ge mu l'iya je eme opfu? ? Mu doberu onu l'awe ke ge mu l'iya bya awata atu ego opfu?
- 15 O -betakponu ophu o dudu iphe, mu meru; mu te ejekwa iya asaru opfu. Iphe, mu a-noduekwapho eme bukwa ge mu rwonupho yebe onye-ikpe mu ono g'o phuaru mu obu-imemini.
- 16 Mu -kukpoo ya nu oku; o -za mu enu be mu ta arikpokwanu l'oo-yeru mu onu.
- 17 Oo oke pherephere be oo-gude bya bya egwee mu arakabya; bya emee onya, tukoru mu ehua-ka shii l'ebe adu iphe, mu meru.
- 18 O too kwedu g'unme rwua mu ohu-epho. O chia mkpawere be oo-gude tsua ndzu mu ntsugiji.
- 19 O -buru l'iphe, eepfu bu k'okpehu; o bu onye ike du shii. Teke o bu k'ikpe; ? bu onye suru iya eku ikpe?
- 20 O -betakponu ophu o dudu iphe, mu meru be opfu, shi mu l'onu anmale mu-a ikpe. Iswi -dukpoo mu nu mma; l'ọ sula-a l'ikpe nmaru mu.
- 21 A makwaru-a l'ọ to dudu iphe, mu meru; ole mu ta ayodu oshi onwomu. Ndzụ mu duwaa mu ashi.
- 22 Mbu l'ọ tukoru buru iphe lanu; o buru iphe ono meru g'o gude mu su: "Oomebyishije ndu adudu iphe, ephe meru; yee ndu bu ndu ejo-iphe."
- 23 Eze-iphe-ehuka -dapfuta ndu adudu iphe, ephe meru; meahaa g'ọ pyi-gbua phe; k'ophu meji tofuaru phe atofu; bule-a ochi be onoduje achi phe.
- 24 Mgboko dabaru l'eka ndu ejo-iphe. O gude aka pyi-chishia ndu-ikpe iya enya. O -budu iya eme iya ? buhunu onye be eme iya nu?
- 25 "Eswe ndzu mu kakwa onye maru oso eme egwa. Oophegbaepho phaaphaaphaa epheghashi; ophu o dudu g'ọ ka mma l'oo nwa ehua-utso, ha nwanshi, du iya nu.
- 26 Oochikotaje bururu chighaa g'ugbo, e meru l'owa-uda; zia phaa zighaa g'ugo, ephe ejepfu iphe, oo-ri.
- 27 Mu -su ge mu zohaa k'agu aphu bu iphe, mu e-me bu ge mu gbanwee iphu wata anwuja onu-ochi.
- 28 Obenu l'iphe-ehuka, mu eje be mu atsukwadu-a ebvu; kele mu maru l'i ti byadu ekwe l'ọ to dudu iphe, mu meru.

- ²⁹Eshinu a nmawaru mu ikpe; ? mu a-yobahunaa oshi k'ole?
- ³⁰O to dukwa m'obeta mu saa onwomu du g'eberugo; bya egude ncha kwoo aka mu; o nodu ama mma
- ³¹be yi-patalekwu mu-a chie wuu l'ime iduma, echi bururu butubu; k'ophu bu l'uwe, mu yeru l'ehu be mu a-duchaa ashi.
- ³²Chileke ta bukwa nemadzu ge mu bu-a; me mu eyekwaaru iya-a onu; me mu l'iya eje edogbabe iya l'ulo-ikpe.
- ³³Ophu o dukwanu onye egbogbo g'o gbokahu anyi, bu onye e-seta anyi l'eka doshiaru anyi opfu;
- ³⁴mbu onye a-nafu Chileke echachi ono, oowa mu l'ehu g'owa mu iya-a; k'ophu ebvu, ooye mu a-kabe lwa mu ali l'ehu.
- ³⁵Noo teke mu e-pfu g'onu ha mu; mu ta atshedu iya ebvu. Obenu g'o du nta-a be mu ta adukwa ike epfugbu g'onu ha mu.

Jiobu 10

- ¹Anodu ndzu dukwaa mu enyiru. Oo ya bu le-a; ge mu bya evushia mgburwashu-ehu mu kube; mbu le mu e-pfugbuopho g'ooghube mu l'obu.
- ²Mu a-su Chileke: Ta anmashinu mu ikpe! Gushichiaru mu iphe, bu iphe, iisu l'oo ya bu iphe, mu meru!
- ³Too ? bukpoepho iphe, du ngu ree bu g'i mee mu mkpawere; g'i gbuphua iphe, i gude aka ngu mee; ole idzu, ndu ejo-iphe chiru be bule-a onu-ochi be jinwujajeru iya?
- ⁴Bu enya nemadzu mmanu be i nweru? Mbu ? bu ge nemadzu eleje iphe enya bu ge gubedua eleje?
- ⁵Bu ge nemadzu ano-bejeru bu ge yi-no-beru? Mbu ? bu apha ole, nemadzu anoje be yi-nokwapho?
- ⁶mbukwanu meru g'o gude i nodu avokpoepho achu aka o deru mu; akpa ishi iphe, mu meru ngu eji.
- ⁷Ole i makwaru l'ikpe ta anmaduru mu; teme ophu o dudu onye a-nafuta mu l'eka ngu.
- ⁸Oo ngu gude aka ngu mee mu ge mu du-a. ? Ii-bya aghakobe nta-a bya emebyishiehukwa mu pho?
- ⁹Nyatakwa l'i kpuru mu g'eegudeje urwa kpa iphe. ? Ii-bya bya egwee mu uji ozo too?
- ¹⁰? Tobudu g'aawuje era-eswi-a bu g'i wuru mu ye; bya emee mu; mu daa adada g'ohu-manu?
- ¹¹I bya eworu akpo-ehu yee anu-ehu yee mu g'onye yeru uwe; bya egude okpu yee umi-okpu dzepfua mu nanu.

- ¹²Oo ngu meru; mu nọdu ndzụ; tẹme ị nọdu egoshi l'i yeru mu obu. O bụru g'i gude ehe mu meru g'o gude ị nọdu eche ndzụ mu nche.
- ¹³Ole i woleru-a iphe-a domia l'ime ọkpoma ngu; mbụ lẹ mu maru-a l'ọo iphe, ị tūru atūtù dobe l'ime obu ngu;
- ¹⁴lẹ mu -mee iphe-ẹji bẹ ịi-nọdukpoepo ege mu ngge; ọphu ịigujeduru mu nvụ mẹ mu meswee.
- ¹⁵Ikpe -nmaa mu; bẹ ọ bụkwapho aphụ tsọru mu! Iswi -dụkpoo mu nụ mma; mu ta apalidu ishi apali; kele iphere dushi mu ike; tẹme iphe-ẹhuka, mu eje ripyabewa mu.
- ¹⁶Mu -woru ishi ngakobe; l'ị chịaha nta mu g'eka oduma achi nta iphe, oo-ri; l'i woru ọkpehu ngu ono, dū biribiri ono tukoshi mu.
- ¹⁷Tekenteke bẹ ịichikobeje ndu a-nọdu agba mu ekebe; tẹme ị nọdu anọduje avuru mu ọvuma. Ndu ojogu ngu nọdu atụ kpereree abya mu etso ọgu.
- ¹⁸Mbụ-a; ? bụnaa ọunu meru g'o gude i kufuta mu l'ọphu l'ọphu l'ẹpho ne mu? O dū mu g'a sụ lẹ nemadzu
-byaru ahuma mu ọnya; mu nwuhuwaa.
- ¹⁹O gege aka mu ree; ọme mu ta adujekpodarunu adudu ọphu; ọzoo ọme a nwuru mu paa mu eli eli jeye l'ilu.
- ²⁰Nwujiku olemole, mu nweru; ? tọo bvuada? Wofunu iphu l'eka mu nọ; k'ọphu ẹhu a-tsokpo mu nwa ililekpoo;
- ²¹tẹme mu alashiwaro ẹka bụ: a -laa; a lwagu azu; ẹka agba ọchii bya adu tsukiribaa;
- ²²ẹka ọnyashi nkiya bụ abali-ishi; ẹka bụ iphe, dū iya nū bụ tsukiribaa; iphemiphe, dū iya nū ghalashihu aghalashihu; ẹka nwiphe, dū g'iphóró, dū iya nū dū g'eka ọchii agba l'ibiya-a.”

Jiobu 11

Zofa ebo iya Jiobu

- ¹Tọbudu iya bụ; Zofa, bụ onye Nama bya eyee ọnu sụ:
- ²Ikpotọ opfu ọwa-a a-lakota ke mmanu g'e te eye iya ọnu tọo? ? Aa-haru onye ọwa-a, epfu opfu igwerigwe-a enge tọo?
- ³Tukpo-tukpo-tukpo ono, iipfu ono; ? ọo-kpo nemadzu opfu tọo? ? Tọo ọ bụ i -mecha ndiphe sukuuku ono, iime phe onoya; ọ tọ dudu onye agboru ngu uja tọo?
- ⁴Kele ị sūru l'iphe, iipfu geru asa; bya asukwapho l'ị dube ree l'ọnya Chileke.
- ⁵Ole ọ bụ; ọ dū mu g'a sụ lẹ Chileke e-ye ọnu l'onwiya; mbụ saa ọnu pfuru opfu nū ngu;

⁶mbu kpuhaa iphe, pharu le mmamiphe woru gheberu ngu onu; kele okpobe mmamiphe aduje mkpopfu mkpopfu. Ophu ii-makpoadaru; Jiobu; bu l'iphe, Chileke eme ngu ta ahakpokwanu g'ejo-iphe, i megbaberu.

⁷? Ii-du ike chokpoepo chofuta iphe, du omilomi, no l'ime Chileke? ? Ii-du ike vokpoepo vofuta aka Okalibe-kangokotaru-nu jeberu?

⁸O kakwa akpaminigwe ephekerephe. ? Ii-mekwanu iya ime-agma nta-a? O dukwapho omilomi ka ali-maa omilomi; ? bu gunu be ii-du ike maru?

⁹Ogologo be o ka mgboko-a l'ophu ogologo. Teme osa iya ka eze-enyimu phosa phosa.

¹⁰O -bya nta-a; bya akputa ngu tu-chia; bya ekua ngu ikpe; ? bu onye suru iya akposhi?

¹¹Ophu e-do ngu enya ree bu l'o makotaru ndu eregede. Too teke o humaru ejo-iphe; ? o du ngu g'o too tubejedu iya nvu?

¹²To buchidaa iphe, o bu bu le teme onye-eswe enweru egomunggo bu me nkapfu-igara-oswa nwua nwata-okoro.

¹³“Ole o bu; i -wowaru okpoma ngu doziaru Chileke bya amachiaru iya aka labo;

¹⁴bya atuko iphe-eji, du ngu l'eka hakota ememe; ophu i kwedu g'o duru ejo-iphe, a-du l'ibe ngu;

¹⁵noo teke ii-pali iphu ephekerephe; iphere ta aduedu ngu. L'i pfuru ke kwaragadagangu; ndzu ta aguedu ngu.

¹⁶Noo teke ii-tuko iphe-ehuka ngu zoha-gbua. L'o du ngu g'egube-a, utso agbajechaa l'o kprofua.

¹⁷Ndzu ngu abya egbuchafu bya aka echi eswe agu iphoró. Ochii abya agusahuru ngu dupeho g'eka nchi abo hu abo hu.

¹⁸L'i kpoo g'abara; kele o duru iphe, iile enya iya. L'i leaha enya mgburugburu; atutakporo nwunme, ituta; o to dudu iphe, byaru eme ngu nu.

¹⁹L'i zee azee; o to dudu onye byaru eye ngu ebvu. L'a du igwerigwe byaahaa g'i yeru phe aka.

²⁰Obenu l'enya e-mechakwaa pyashihu ndu ejo-iphe. Epehe a-cho uzo agbala; o too duduru phe. Iphe, epehe a-nodu ele enya iya aburu atu-buhu unme.”

Jiobu 12

Onu, Jiobu eyeru Zofa

¹Tobudu iya bu; Jiobu bya eyeeru iya onu su:

²A taa tudu iya atutu; oo unu bu o-pfuchaa-o-bvu. O buru unu le mmamiphe a-swí laa.

- ³Ole egomunggo dukwa mu-a g'ò dù unubèdua. Ọ tò dukwa ẹka ẹnya lwawaru mu l'ẹka unu nọ. ? Bù onye ta makọtadu iphemiphe ono g'ò ha?
- ⁴Nta-a bẹ mu bụwaa iphe, ezi ndu mu l'ẹphe eshi
 ọnyà ọnu-ọchi; l'ẹka mu shikwa ekuje Chileke oku; l'ò numa olu mu. Mu bya abụwaru nù onye aachi p̄f̄uripfuri lẹ mube onye p̄f̄uberekoto bya aburu onye iswi dù mma.
- ⁵Ndu ẹhu dù guu emeje ndu iphe-ẹhuka byapfutaru sukusuku; sù l'ọo ẹpho onye ẹpurukutu chikọtaru abya atụ l'alị bẹ ọobyapfutaje.
- ⁶Ole ndu abalidebvu bukwa ntusarehu; ọphu ọ dukwa onye asuje ndu ono sùu, bù ndu anọduje akpatsu Chileke iwe; mbù ndu Chileke p̄hẹ bù l'ọbochi-ẹka p̄hẹ bẹ ọ nọ.
- ⁷Obenu lẹ-a; unu je ajia anụ; ẹphe a-kọru-a unu iphe, mu abya epfupfu-a. Ọdumeka unu ajia ya ẹnu, ẹphe l'eli; ẹphe a-kọru iya unu.
- ⁸Teke ọ dudu unu abọoru ụja yeru alị g'ò zia unu iphe. Ọzoo unu angabẹ nchị g'ema, nọ lẹ mini zia unu iphe.
- ⁹? Bù onye ole lẹ ndu ono, mu gushiru ono ta amadu l'ọo Chipfu gude ẹka iya mee iphe-a, meru nù-a?
- ¹⁰Ọo Chileke bẹ ndzụ iphemiphe, e meru dobe nọkota l'ẹka. Ọ buri l'ẹka iya bẹ unme, onyemonye atụ nọ.
- ¹¹Nchị ? te egejedu iphe, ọ numaru egege tọo; mbù ẹgube ono, ire edejeada l'iphe, ọnu e-ri ono?
- ¹²? Mmamiphe ta abudu l'ẹka aahumaje iya bù l'ẹhu ndu kahwaru nù? ? Tọbudu onye karu nka ogologo bẹ iphe edoje ẹnya ree?
- ¹³Ọo Chileke nwe mmamiphe; bya enweru ike. Ìdzù yee nkwamenya bukwarupho nkiya.
- ¹⁴Iphe, ọ lashiru alashi bẹ ọ tò dukwa onye sùru iya ekpukwa; ọphu ọ dukwa onye sùru atufu onye ọ turu mkporo.
- ¹⁵Ọo ya bù; ọ -sephu mini azụ; alị akpọo jegengu. Teke ọ gbaharu mini ẹka l'ọ tuko ẹkameka sọaha gborogboro l'alị.
- ¹⁶Ọo ya bẹ ọkphehu yee ọkpobe mmamiphe dù l'ẹka. Onye a ghọru ụgho; yee onye ghọru iya ya nù tuko dù yèbedua, bù Chipfu l'ẹka.
- ¹⁷Ndu akpọ-zijeru ndu ọzo ụzo bẹ ọogbabeje ọkpa ọto duta p̄hẹ dufu; tẹme ọ nọdu emeje ndu-ikpe g'ẹphe buri ndu egomunggo swehuru.
- ¹⁸Ndu eze bẹ ọonafuje ọkwa eze p̄hẹ; mee p̄hẹ; ẹphe aburu ohu.
- ¹⁹Ndu bù uke bẹ ọogbabeje ọkpa ọto duta p̄hẹ dufu; tẹme ọ nọdu akwatsuje onye shihawaa ụzenya buri onye noshiru ike.

²⁰Ndu e gude ire phe ẹka be oomeje g'ephe ta mahe iphe, ephe e-pfu. Temе o nodu anafuje ndu bu ogerenya iphe, gege edo phe enya ree.

²¹Ndu a maru epha phe be onmaje phulaphula. Temе o nodu anashije ndu okpehu du ike, ephe nweru.

²²Oo ya egoshije iphe, du omilomi, no l'ochii. Temе o nodu ewofutaje iphe, gbaru tsukiribaa togbo l'iphoro.

²³Oo ya emeje oha g'o ha shii; temе o bukwaru iya pho emebyishije phe. Oo ya emeje oha g'ephe zua azuzu ha osa; temе o nodu ehujekwa phe pho adagba nchi l'ali.

²⁴Oo ya emeje ge ndu bu ndu-ishi unwu-eliphe mehu phukunaa. O nodu enwujeru phe ye g'ephe je etsoru okorobo-egu ghaphee l'eka gbororo adudu.

²⁵Ephe -gbeshi; ephe eje etsoru aghaphe l'ochii l'eka iphoro adukpoda adudu ophu. L'o mee phe; ephe akpo kulakula g'onye mee atsu.

Jiobu 13

¹Mbedua gudeakwa enya mu humakota iphemiphe ono. Mu gudewaa nchi mu numa iya; o doo mu enya.

²Iphe, unu maru be mu makwaru-a. Enya ta alwakwaru mu l'eka unu no.

³Ole o du mu g'a su le mu e-pfuru opfu nu Okalibe-kangokotaru-nu. Ge mu le Chileke l'onwiya tua ya.

⁴Obenu l'unubedua gude ntuphu-ire eme mu nrwa pomupomu. Unu bukota mkpokoro ndu eme obvu g'unu hakota!

⁵O du mu g'a su l'unu a-tukokpoephe dobe onu doo; mbu l'ono gege abukpoerupho unu mmamiphe.

⁶Unu ngabewaro nchi numa oke onu mu! Unu ngabe nchi l'opfu, shi mu l'onu!

⁷? Bu unu -nodu epfu egube ejo-opfu ono, unu epfu ono; unu asu l'oo Chileke be unu epfu iya etuku too? Mbu-a; ? buchakwaa ya pho be unu epfutura opfu eregede eregede ono, unu epfugbaa ono?

⁸? Unu a-nodu abo nemadzu ebo etuku iya too? ? Unu eme g'unu yeeru Chileke oke onu iya?

⁹? Oo-du-a ree me o -jeshia unu enyocha? ? Unu a-dua ike nmaa ya phulaphula ge nemadzu anmaje nwibe iya-a?

¹⁰Chileke bafutajekwaru unu mba me unu gude mpya le mpya abo nemadzu ebo.

¹¹? Akpabiri iya ta akabeduru eye unu ebvu? ? Ndu-agugu iya ta akabedu gudepyabe unu?

¹²Kpaakpaa ono, unu asagbaa ono bukota etu etu, wulahuru le nu. Edodo, unu edo g'unu dofu iya onwunu l'ehu buru edo, kwaru l'epuchi.

- 13**Mbụ-a; unu nọdukpoekwapho doo gę mu pfua phee onwomu. Iphe, e-mekpoo mu nụ g'o mee!
- 14**Mu e-tsebe ndzụ mu l'ọnu ẹta; bya atụa ndzụ mu ntumatu.
- 15**Ọ tọ dukwa m'obeta ọ phua mu aphuphu; mu adakobelekwa iya-a gę mu dakoberu iya. Mu a-pfuekwaru iya pho l'iphu adzo onwomu.
- 16**Mbụ l'ọ kwa iphe ono a-buru iphe, a-dzota mu nụ; kele ọ tọ dudu onye ta atsudu Chileke ebvu a-dụ ike akpafu iya l'iphu.
- 17**Unu ngabekpoekwapho nchi ree numa iphe-a, mu epfu-a! G'iphe-a, mu epfu-a bamikwa unu abami le nchi!
- 18**Le nta-a, mu edowa opfu mu ishi ria be mu makwaru-a l'aa-gbaru mu odzori.
- 19?** Ọ duru onye a-bya apfuru pfua iphe, ọo-su le mu meru? Ọ -duwaa nno; mu a-takpube onu nwuhu.
- 20**Su-a; gube Chileke; menaru mu iphe labo-a, mu abya ngu arworwo-a; gę mu ahaa edomi onwomu edomi l'iphu ngu!
- 21**Wofukpoe mu pho ẹka l'ehu ewofu ophu. L'i haa mu eyephe ebvu ono, iye mu ono.
- 22**Noo teke bu: i -kua mu oku; mu aza ngu enu. Teke odumeka; haa gę mu pfuje epfufu g'i yejeru mu onu.
- 23?** Bu emeswe ole yee iphe-eji ole be mu mekpoo? Goshieshikwa mu ẹka o deru mu yee iphe-eji, mu meru.
- 24?** Denu g'o gude ophu ji ghaduru mu iphu; i woru mu mee onye opfu ngu?
- 25?** Bu mkpekwo, pherephere apa be ji-nu chiipfu? Tọ ? bu eswa, a phushiru l'iphe be ji-wata achi oso?
- 26**Noo kele iphe, i deshira le mu meru buchaa iphe, rwuru mu l'anu-mee; teme i tuko ejo-iphe, mu meshiru teke mu bu okorobya byabe mu l'ishi.
- 27**I chiru mu okpa ye le mkporo; teme i nodu anoduje enyocha iphemiphe, mu emekpoo ememe l'ophu; mbu mechaa mu ohubama l'ichirupfu okpa; k'ophu ji-majeru ẹka mu zoru okpa.
- 28**Noo g'o gude nemadzu nodu erwushihuje g'iphe, rehuru erehu; mbu le nemadzu alaje pyetee g'uwe, mkpu tapyashiru.

Jiobu 14

- 1**Nemadzu, nwanyi nwuru-a be eswe ndzu iya adudu igwerigwe. Teme o buerupho iphe-ehuka bu iphe, jiru iya nu.
- 2**Oojataje egwegwa g'okoko; l'ọ buhukwaru iya pho anwulwashihu. Ọ buru g'ononyo, a taa noribejeduru-a bu g'ọ tọ dudu ẹka onono-bejeru.

- ³? Bụ ẹgube nemadzu ono bẹ iije eworu ẹnya swobe? ? Ii-jeje iya akputa bya g'i kpee ya ikpe l'iphu ngu?
- ⁴? Bụ onye sūru g'oo-ye ẹka l'iphe, aduebedu ree wofuta iya iphe, duebe ree? Ọ tọ dudu!
- ⁵Eshinu a gūwaru eswe, nemadzu a-nọ-beru ndzu ọgu doberu iya; ẹme i bya atubuwaru iya ọnwa ole, ọo-nọ l'eliphe-a; bya egoshiwa iya g'oo-jebejeru l'eliphe-a;
- ⁶wofunu iya ẹnya; hanaa ya g'ọ tūsarū ẹhu; jasū l'o jee oke ozi iya jeghee g'onye e butaru ozi.
- ⁷Kẹle-a; oshi, bvuru l'alī nwekwarū iphe, oole ẹnya iya; mbū l'e -gbutsua ya l'ọomita ọzo l'upfu iya. Ono, ọ mītaru k'ọphúú ono abya adzuru ọzo.
- ⁸Ọgbarabvu iya erehu kwaa l'ime alī. Upfu iya anọdu l'alī nwūhu.
- ⁹Teke igwe dzeerupho mini l'ọ kpọ-futa; mbū l'o rwua irwu ọphúú g'iphe, a kuru akuku.
- ¹⁰Obenu lẹ nemadzu abujeru; ọ -nwūhu; nkiya abvu. Ọ -tūwaa unme ikpazu; ọ tọ tūbaedu ọzo.
- ¹¹Ọo g'eze-ẹnyimu aduje mẹ mini tabọta iya-a; ọzoo g'aguga aguga nggele aduje nkwagbo-nkwagbo mẹ ọ tahu-a;
- ¹²noo gẹ nemadzu aze-zetaje; ọ tọ gbeshibaedu jasū teke igwe ta aduhedu. Ọ tọ byadu agbeshibaa; ọphu e metebaedu iya lẹ mgbenya ono, tūru iya nū ono.
- ¹³Ọ dū mu g'a sū l'ii-wotakpọe mu phọ je edomia l'alī-maa; mbū kpuchia mu iphe l'ẹka ono jasū ẹhu eghubuhu ngu eghu. Ọ dū mu g'a sū l'i gege atukpoe pho sū l'owa-a g'ọo-nọ-beru baa; ẹme l'i nyatabaa mu.
- ¹⁴Mbū-a; nemadzu
-nwūhuchaa; ? ọo-dzuru ndzu ọzo? Mbū eswe ujiku olemole-a, mu eje ozi mkponwu ẹhu-a bẹ mu gege angabepho g'o rwua eswe mboku, ee-me mu gẹ mu dū k'ọphúú k'ọphúú.
- ¹⁵Noo teke bụ: i -kua mu oku; mu aza ngu ẹnu. Onye ono, bụ ngu gude ẹka ngu mee ya dobe ono aduha ngu ree l'ẹnya.
- ¹⁶Noo teke ii-nọdu agukwanu ije mu ọgu. I tii nyochaekwanu iphe-ẹji, mu meru.
- ¹⁷Iphe, bukpo emeswe, mu mesweru ngu aburu iphe, ii-chiru ye l'ẹda kechia. L'i woru iphe kpuchia l'iphe-ẹji, mu meshiru ngu.
- ¹⁸Obenu lẹ-a; ọo g'úbvú anonya l'o ribashihuaha eribashihu pho; ọ buru g'aanonya l'a phofu oke agbara-mkpuma l'ẹka ọ kpọru pho;
- ¹⁹mbū lẹ-a; ọo gẹ mini emeje mkpuma l'o chi swacha swacha pho; ẹme ọchioku-mini nọdu asochataje ẹja, nọ l'alī pho; noo g'iisotaje iphe, nemadzu ele ẹnya iya sọfukpoe pho asofu.

²⁰Oo ugbo lanu be ikapyabeje nemadzu enya lo buru iya atugbu. Li mee ya go gbanwube iphu li chifu iya.

²¹Teke aakwabe unwu iya ubvu; o to dudu iphe ono, duru ophu o makwaduru. Teke eehu phe adagba-nchi l'ali; o to dudu ophu oohumakwadu.

²²O buwaru iphe, erwuje iya l'ehu bu iphe, eme iya ehuka l'ehu nkiya. O -nodu agu aphu lo guwaru iya ro onwiya.

Jiobu 15

Elifazu epfu le Jiobu nmawaru onwiya ikpe

¹Tobudu iya bu; Elifazu onye Temanu bya eyee onu su-a:

²Onye maru iphe; ? oopfuje opfu, enwedu ishi; ozoo tsukoo okpomoku, shi le pherephere enyanwu-awawa tsu-jia onwiya epho?

³? Bu mkpokoro-opfu be onye maru iphe egudeje eye onu l'opfu; mbu epfupheepho opfu, adudu me nanu, baru urwu?

⁴Mbu le gubedua wokporupho k'atsi Chileke ebvu hua l'ali; bya akposhikwapho g'e te pfujehe nu Chileke epfufu ophu;

⁵Kele oo iphe-eji ngu ezi onu ngu iphe, oo-pfu; mbu l'oo ire onye eregede be i gude epfu opfu.

⁶I gudeakwa onu ngu anma onwongu ikpe. O to buakwa mbedua anma ngu ikpe. O buru ogbogboromonu ngu agba ngu ekebe.

⁷? Bu ngu bu nwa mbu, e beberu nwua? ? O du g'i vu ubvu ubvu uzo nodu l'eliphe-a?

⁸? O du g'i numaru idzu, Chileke chiru? ? To o jiri l'oo ngu maru iphe nwekinyi ngu?

⁹? Bu gunu be i maru, anyibedua amadu? ? Bu gunu bu iphe, edoje ngu enya, te edodu anyibedua?

¹⁰Ndu ishi buwaa ewo ewo; mbu ndu kahwaru akahu be anyi l'ephe nokwa l'eka-a; mbu ndu a nwadaru teme a nwua nna ngu.

¹¹? O du g'obu ono, Chileke adu ngu ono paru ngu nwanshii l'enya; mbu opfu ono, a toru nwehu rwebe ehue erwebe epfu anu ngu ono?

¹²? Denu g'o gude i haa okpoma ngu g'o duta ngu dufu? Mbu-a; ? denu g'o gude enya nodu atu ngu vaavaavaa g'ootu ngu ono

¹³ke g'i woru ehue-eghu ngu atu-koshi Chileke; teme opfu, dugbaa egube ono shigbaa ngu l'onu afushi?

¹⁴? Bu gunu be nemadzu bu ke ge o bya aduebe ree? Mbu-a; ? bu gunu be nemadzu ono, bu nwanyi nwuru iya ono bu ke g'o pfube-eka-oto?

¹⁵O -buru le Chileke te egudedu ire ndu nkiya eka; ophu imigwe aduebedu ree l'enya iya;

- 16? tọ kadunu ta agube nemadzu iphe; mbu nemadzu ono, adudu iphe, o bu; teme urwuali ji iya ehu; teme o nodu angu ejo-iphe g'onye angu mini?
- 17Ngaberu mu nchi ree ge mu mee g'iphe doghee ngu enya edoghe; ge mu kooru ngu iphe, mu gudewaa enya mu huma;
- 18mbu iphe, ndu maru iphe pfuru togbo iya eba; ophu o dudu iphe, ndiche phe pfuru phe duru ophu ephe domiru edomi.
- 19Ndiche phe ono bu phe gedegede be a nuru ali-a; ophu o dudu onye lwaru alwalwa, tuswaru l'echilabo phe.
- 20Su-a; onye ejo-iphe anodujekwa atsụ pfupfufu mkpurumkpuru jasukpoo g'oo-no-beru; ndu ewebushi akurepho nodu anoduje aghakotaepho gburugburu le nwime apha olemole, e doberu phe l'eliphe-a.
- 21Iphe, anoduje aphu iya gbudugbudu le nchi buerupho iphe, eye ebvu. Teke iphe dukpoo rengurengu kpọ; noo teke ndu abalidebvụ abyaje ibe iya.
- 22O to byadu ekwe le ya a-lwa ndzu l'ime ochii ono, o bahu ru ono. O buru l'ogu-echi be oo-mecha laa.
- 23Ootsojeru aghaphe achọ eka ya a-kpata nri. O -nodu l'ooji su: “? Bu awe be o no?” O maanaru-a l'eswe, a-gba ochii be nokwa iya ntse.
- 24Ejo iphe-ehuka yee iphe-aphu abyaje abyabe iya ndzu-agugu l'ehu. Ephe anodu echeru iya eka mgba g'onye eze, doziru onwiya abya eje ugu.
- 25O buru iphe, tukoru iya kpa a bu l'ootsuru Chileke eka l'okpoma. Teme o nodu ekoshi ophoo l'iphu Okalibe-kangokotaru-nu.
- 26Oogudeje olu, aha kpaakpaa agba biribiri etso iya ugu; paru phosa phosa iphe, shihuru ike, ya e-gude gboberu onwiya l'ogu, yee ya alwu.
- 27“A makwaru-a l'iphu aza iya tootootoo; o tsua anu ke nyimunyimu l'upfu;
- 28obenu l'eka oo-mecha buru bu mkpuku, buwaa ochobu; buru l'okorobo ulo, adudu onye bu iya nu; ulo, a hawaru; o buru ikpozu.
- 29O too nweheduru iphe; ophu eku iya a-noribeduru; ophu iphe, o setaru eseta ejedzuduru ali iya.
- 30O too nahudu ochii. Teme o buru oku e-mechaa kee irwu, o rwuru. Chileke a-phua ya onu phukashia.
- 31G'o to jekwa eme onwiya eswe l'akporu obu ye l'iphe, abudu iphe; kele o to dudu iphe, oo-rita iya.
- 32O too no-rwudu ndzu l'ishi; l'a pfuwaa ya ugu iphe, oome pfu-dzua ya ya apfu-dzu; ophu ekali iya ajadu ajaja.
- 33Oo-du ge vayinu, e chikoshiru akpuru iya l'ebe o cha achacha; mbu l'oo-duepho g'oshi olivu, tuchaaruru ige; o rishihu;

³⁴kele iphe, bukpo ndu ta atsudu Chileke ebvu a-gbakotaru eka nwa. O buru oku e-tsufu ulo ndu yeru obu l'eri uphalazu.

³⁵Egube ndu ono atsutaje ime ncho-kopfu. E -mechaa; ephe anwua ejo-ememe. Eregede du phe l'epho evu evuvu.”

Jiobu 16

Jiobu epfu l'onya iya phe duru iya ehuka

¹Tobudu iya bu; Jiobu bya eyee onu su:

²Mu anumajehaakwa egube opfu-a, unu epfu-a. Ayọ oshi k'unu be unu gudekwa ayopyashi nemadzu ayopyashi.

³Opfu, pherephere apa ono, unu epfu ono; ? too bvudu abvubvu? ? Bu gunu be kpatsuru unu k'epfu g'unu epfu ono?

⁴Mbedua gege epfukwa g'unu epfu ono; ome o duru unu g'o duru mu-a. Mu gege anodukwa epfu erengete opfu gude eyeru unu onu; ekweru unu une.

⁵Ole mu gege akabekwa gude onu mu dua unu obu; mbu l'oshi, mu gude obu mu pho yooru unu gege emekwa g'ehu gua unu phoo.

⁶Ole o bu; mu -pfua opfu ge mu epfuhabe; iphe, eme mu nu emele mu-a l'eka oome mu. Teke mu haru epfufu; ? bu g'o ka mma?

⁷Mbu-a; Chileke mewaru; ike bvu mu; bya eworu ndibe mu l'ophu mee; ephe lakota l'iyi.

⁸O mewaru mu; mu gbajoshihuchaa agbajoshi. Ono buru iphe, ekebe du. Awufu, mu wufuru buru okpu bukwaru pho iphe, agba mu ekebe.

⁹Chileke gudewaa ehu-eghu lajashia mu alajashi; mu bya adu iya ash; teme o nodu ataru mu eze nyikinyiki. Onye ohogu mu ono nodu agba mu enya agbagba.

¹⁰Ndiphe anoduje ebvu mu onu l'ehu. Teme ephe nodu anoduje echi mu eka le nchi gude eme mu iphe-iphere; mbu tugba nanu g'ephe kponya mu enya.

¹¹Chileke nwuwaru mu yeru ndu ejo-iphe; mbu-a; o nwuwaru mu ye ndu ejo-iphe l'eka.

¹²Ehu shikpoekwapho du mu gubala; o bya anyakashia mu togbo; pyita mu l'ekpiri woru mu hua ehurugehu. O woru mu mee iphe, o gude anwu agba mgbeka.

¹³Apfu iya shi mu l'iphu shi mu l'azu ada mu l'ehu purumu purumu. Ophu imemini mu adukpoda ya g'oosufushi mu meji. Otsu-ilu mu nodu awu l'ali ke torotoro.

¹⁴O -gude l'o yeru mu oru l'o yekwase mu iya ozo. O nodu azuje mu gburumu pfurii g'onye ogbogu.

¹⁵Mu chitawaru uwe-aphu kpube onwomu; bya eworu ukuu-enya mu nwua l'imime urwuku.

¹⁶Mu rawaru ẹkwa; ẹnya chakọta mu ẹ tọroro; mbu l'ẹnya gbahukotawaru mu ẹ tsukiribaa.

¹⁷Ole ọ tọ dukwanu iphe-kpanganga, mu asu ẹ mu mejeru. Teme epfupfu, mu anọduje epfu anu Chileke buru iphe, doru risaa.

¹⁸Gube ali; te erikwa mee mu! Jiko ge mkpu, mu echi ba adamihukwa adamihu!

¹⁹Mbu ẹ ntaakponu be onye-ekebe mu nokwa l'imigwe. Onye agbaru mu odzori anodukwapho l'ephekerephe.

²⁰Oo ndu mu l'ephe eshi onya ekweru mu une. Ole onye mu arakwanu ẹkwa ekpu bu Chileke.

²¹E gege akabekpoo rwo Chileke l'iswi ẹhu nemadzu egube ono, nemadzu arwoje arwowo l'iswi ẹhu nemadzu ibiya ono.

²²“O kwa nwapha olemole phoduru; mu ejeshia iphe-ozo ono, bu: mu -jee ya mu ta alwabaedu onoya.

Jiobu 17

¹Okpoma ta adekwa mu ree. Eswe ndzu mu be e meakwaru; ọ tsu-phu azu. Ilu echeakwa mu echeche.

²Mbu ẹ ndu noru mu mgburugburu bukotaepho ndu ekweru mu une. O buerupho ẹka ẹnya mu atubaje bu l'aphu, ephe akpatsushi mu.

³Natanu mu mkpaleka; jiko Chileke; kele ọ tọ dudu onye ozo, suru g'ona mu mkpaleka gbahaa gubedua.

⁴I mechiwaru phe ẹkpa egomunggo; ophu ọ dudu iphe, edoje phe ẹnya. Oo ya bunu l'i tii kwedu g'ephe mekpee mu.

⁵Onye jikaru ndu yele iya eshi onya l'opfu g'e bua ya nggo bukwa unwu iya be ẹnya e-mechaa nyishihu.

⁶Chileke mewaru mu iphe, onyemonye gude atu phukuku. Mu buru onye ndiphe agbu onu-mini l'iphu.

⁷Mu jewaru iphe-ehuka jasu mu nodu aphuwaa ragaraga; mbu l'ehu mu l'ophu erewa uphere.

⁸Ndu obu phe guru iphoro be ọ tufuru ẹhu. Ndu iswi du mma swolihu tsoru ndu te emedu ele Chileke.

⁹Ole g'o duhabe; ndu pfuberekoto a-buenurupho onye ephe bu; teme ndu iswi du mma a-nodu akaepho okpehu eje.

¹⁰Obenu l'unubedua; unu bya atuko g'unu ha nokobe. Ole ọ bu; mu ta ahumakwa g'o ka mma l'oo onye lanu, maru iphe ẹ g'unu ha.

¹¹Eswe ndzụ mu bvụakwaru; iphemiphe, mu rịru k'ememe buakwaa ke mmanụ. Nokwapho g'iphe guru mu egu ememe dukwapho.

¹²L'unubedua woru enyashi kua echi eswe. O buru l'eka ochii gbaru tsukiribaa be ephe no su: Ha! Iphoro aduakwanu.”

¹³O -buru le mkpako unuphu mu ele enya iya bu ali-maa; o -buru l'eka mu e-je agbaa iphe-azee bu l'eka gbaru tsukiribaa;

¹⁴O -buru le mu suru ilu l'oo ya bu nna mu; bya ekua aka nene mu; ozoo kua ya nwune mu;

¹⁵? bubahunaa gnu ozo be mu e-lebaa enya iya-a? ? Bu onye a-subaa mu l'owa-a iphe, mu a-nodu ele enya iya bu owa-a?

¹⁶? Oo-tsoru mu nwuda l'ali-maa too? Anyi l'iya a-tuko buru wurumu l'ilu too?

Jobu 18

Bilidadu abaru Jobu mba

¹Tobudu iya bu; Bilidadu, bu onye Shuwa bya eyeeru iya onu su iya:

²? Denukpoo teke ii-pfubuhu g'iipfu owa-a? G'egomunggo dunu ngu; k'ophu anyi amaru g'anyi e-gude eye onu l'iphe-a.

³? Denu g'o gude anyi du g'anu l'enya ngu; mbu li tukoru anyi kua ndu mmanu?

⁴Gube nwophu ehu ghutaberu egu; k'ophu i woru onwongu labushia nanu nanu; ? bu g'a gbadoru ngu mgboko l'ophu? Too ? bu g'e je aphoshiaru ngu agbara mkpuma g'o to duhe l'eka o du?

⁵“Sua; iphoro, duru ndu ejo-iphe be aa-phunyikwa; ophu oku iya enwuekwa enwunwu.

⁶Iphoro, shi du l'ulo iya a-bukwaru ochii. Oku anyihu l'oroku, o su-kuberu onwiya.

⁷Okpa ono, o shi azoje gbunyingu gbunyingu ono ta aduekwa ike, adu iya nu. O buru iphe, o chiru idzu ememe e-nwuta iya tua kpurumu l'ali.

⁸Okpa, o zoru azozo bu l'eka o zoru iya bu l'ugbu, e geru doberu iya. Teme o buru l'eli igbudu be oo-zo okpa.

⁹Agburu, e kweberu iya a-tu iya l'ichiripfu okpa. O-tu-gburumu atua ya swiswia.

¹⁰A turu obu-ali domiaru iya l'uzo, ooshi; bya agbabe-kwaru iya pho onya le gbororo.

¹¹N-yembvu emeje ge ndzu gu iya l'ekameka, ooshi. Teme o nodu anoduje etsoe ya pho purupuru l'iphe, bukpo aka o zoru okpa.

¹²Ike shi du iya; obenu le nta-a be ookpuwaa rigorigo. Teme eze iphe-ehuka nodu le mgboru iya kwaberu iya m'obvu teke oo-da.

¹³Akpọ, dū iya l'ẹhu bẹ ọonoduje atapyashi. Ọkpara anwūhu nọdu atukoje iya ọkpa yẹ ẹka tajishia.

¹⁴Aa-kpūta iya l'ọkpehu kpūfu l'òbú iya, bụ ẹka ọ kpọru obu ye; dūbe iya ẹka je enwuru yeru onye eze n-yemebvu.

¹⁵Ọ tọ duedu iphe, nọ l'ulo iya ọphu ẹka iya a-dū. Ọ buru ọku nshì-egbe bẹ ee-woru kpua l'ulo iya.

¹⁶Ọo-kpọhu nkū jasū l'ogbarabvu; nwūa lwaa jasū l'ẹkali iya.

¹⁷Ọ tọ dūdu onye anyatabaa ya nū l'eliphe-a; ọphu oonwehēdu ẹpha lẹ mgboko-a.

¹⁸Aa-chifuta iya l'ẹka iphóró dū; chíru iya je eye l'ẹka agba ọchii; mee ya l'ọ chíhu lẹ mgboko mgburugburu.

¹⁹Ọ too dobedu nwa; ọphu o nweēdu abubu lẹ ndu ẹka o shi. Ndibe iya ta adūdu adūdu ọphu l'ẹka o bujeru.

²⁰Ndu shi l'uzo ẹnyanwu-ariba

-bya bya ahuma g'oonwuru iya; ndzū erwuta phe. Ndu shi l'uzo ẹnyanwu-awawa
-huma iya; ishi anyia phe ẹdzu.

²¹Hoo haa; nokwa g'ọduje l'ibe onye eme ẹjo-iphe, bụ onoya. Ọ kwa ẹgube ono bụ g'ọduje l'unuphu onye amadū Chileke.”

Jobu 19

Jobu epfu g'opfu ono gude erwube iya l'ẹhu

¹Tọbudu iya bụ; Jiobu bya eyee ọnu sū:

²“? Unu a-nukpoo mu aphū ọwa-a, unu anū mu ọwa-a jasū teke ole? ? Bụ teke ole be unu e-gweberu mu uji ọwa-a, unu gude opfu egwe mu g'unu egwe mu ọwa-a?

³Ọwaa kwewaa ugbo iri, unu kọru mu ọnu; ọphu iphere adūdu unu ẹka unu abya mu l'iphu ẹhuka-ẹhuka.

⁴Ọme ọ bukpoonu l'ọo eviya lẹ mu shiswewaru ọzo; emeswe ọbu, mu mesweru ọbu bukwa mu bẹ ọ nọ swiru.

⁵Unu -nọdu etu onwunu ọphushugbu eje abyapfuta mu; bya egude iphe-iphere, anwuru mu nū abarū mu mba;

⁶unu maẹkwarupho l'ọ kwa Chileke meru mu ẹji. Ọo ya woru ọgbu-egege iya woru lọphee mu mgburugburu.

⁷Mu chia mkpu sū l'eemekwa mu ẹji; ọphu ọ dūdu onye yeru mu ọnu. Mu chia sū g'a gbaaru mu mkpu; ọphu ọ dūdu onye harū mu enge.

⁸Ọo Chileke nọ-chiru mu ọzo gẹ mu ta aghatashi. Ọ bya emee; ọzo, mu eshi gbakọta ọchii.

- ⁹Ọ nafuru mu ùbvù, e shi akwabeje mu; bya eye ẹka kputa mu okpu-eze, mu shi kpuru.
- ¹⁰Ọ tọ ẹkpodaa ọzo, o to shidu alajashi mu ke tarara tarara jasi mu bvu ge mu bvuru-a. Iphe, mu ele enya l'oo-me l'ehu mu be o pefuwaru g'onye pefuru oshi.
- ¹¹Ehu-eghu iya be o mewaru; o nwuhu oku l'ehu mu; bya aguru mu yeru ndu ohogu iya.
- ¹²Ojogu iya phe nodu aso kpereree abyapfuta mu. Epe kepee mu ekepee; bya anophage ẹka mu bu mgburugburu.
- ¹³Ndu mu l'ephe bu nwune be o bukafuru mu l'ephe; bya emee ndu mu l'ephe shi aswi oswi; epe gbakashihu.
- ¹⁴Ndu mu l'ephe bu ipfu gbawa nanu-nanu. Eguru onya mu phe zohashia mu.
- ¹⁵Ebyaa, byaru mu nu; me ndu bu ohu mu gu mu l'onye lwaru alwalwa. Epe nodu asuje le mu bu onye ohozo.
- ¹⁶Mu -kua ohu mu oku; o to zadu mu enu; l'eka mu gudekpokwaa onu mu rwo ya arwo.
- ¹⁷Udu onu mu nodu eshijechaa nyee mu ishi. Unwune mu gedegede nodu ebuhachaa mu ebuha;
- ¹⁸mbu l'unwegirima nshii yichakwa le ndu epfutoshi mu nu. Epe -huma mu; epe achi mu ochi.
- ¹⁹Ndu mu l'ephe shi nodu phakuu be mu dukotawaa ashi. Ndu mu yeru obu ghaa ohu meahaa iphe, a-tsuru mu nu.
- ²⁰Nta-a ta adedu iphe, mu bu, abudu phulaphula akpo yee ojogorogo okpu. Nta-a buwaa iphe, phoduru mu l'onu, gege aburu eze bu egbu kpoloko.
- ²¹Unu kabenu phuru mu obu-imemini unubedu, mu l'unu eshi onya. G'imemini mu kabenu du unu; l'o kwa Chileke chiru mu ẹka-a, mu l'iya eme-a.
- ²²? Denu g'o gude unu je anodu achikwa mu pho ge Chileke achi mu? ? Unu teke atajikpodaa anu mu epho?
- ²³Ọ du mu g'a su l'iphe-a, mu epfu-a be eede edede l'ekwo; mbu g'a su l'e ebyiru iya ebyiby l'ekwo dobe;
- ²⁴l'e gude mkpurukpu-igwe dee ya l'eli mkpuma; mbu kaa ya akaka l'agbara mkpuma g'o nowaro ojeje.
- ²⁵Ole ophu mu maru bu l'onye a-gbafuta mu nu no-a ndu; l'e -mechakpopho l'ikpazu iya be oo-pfuru-a l'eliphe-a.
- ²⁶Le teke e mebyishichakporunu akpo-ehu mu owa-a be mu e-gudele-a anu-ehu mu huma Chileke.

²⁷Oo mbɛdua l'onwomu e-gude ɛnya mu hɛma iya gɛdegede; ɔ tɔ bɛdu onye ɔzo; mbɛ l'oovukpoo mu evuvu l'okpoma shii.

²⁸Unu -jee l'asɔ: ‘? Anyi a-chihunuru iya gunu; l'ɛka ɔ bɛ iya bɛ iphe-ɛhuka ono l'ophu shi l'ɛka.’

²⁹Unu tsɛnapho ogu-echi Chileke ebvu; unubɛdua l'onwunu; kɛle oke ɛhu-eghu bukwa ogu-echi bɛ oowotajɛru nemadzɔ. ɔ bɛru teke ono bɛ unu a-maru l'ikpe dɔ.”

Jiobu 20

Onu, Zofa yeru

¹Tɔbɛdu iya bɛ; Zofa, bɛ onye Nama bya eyee ɔnu sɔ:

²ɔ kwa l'egomunggo agbanɔka mu gharaghara meru g'o gude mu nɔdu eye ɔnu-a, mu abya eyeye-a; kɛle ɛhu te ebvuduru mu ebvuru.

³Mbɛ lɛ mba ono, mu anɔ ono bɛ iphere iya dɔ mu. ɔ bɛru iya l'akpali mu eye ɔnu.

⁴Ire-lanɔ bɛ opfu bɛ l'i maru-a g'iphe dukpoo e -shi lɛ ndiche; mbɛ eshi ɔphu e meru nemadzɔ dobe l'eliphe.

⁵I maru-a l'onye ɛjo-iphe bɛ ɛhu-utso nkiya abujele-a tsokere; mbɛ l'onye amadɔ Chileke bɛ ta adɔdu g'ootebejeru ɛswa.

⁶A makwarɔ-a l'eku-onwonye nkiya erwuje akpaminigwe. ɔ nɔdu apangobeje ishi ɛhuka-ɛhuka; k'ophu ishi iya ejeje asɔ-pfuru l'urwukpu.

⁷Ole ɔo gɛ nshi, o nyiru anyinyi erekashihuje-a bɛ g'oo-rekashihu jasɔ l'ojejoje. Ndu shi ahɔmaje iya nɔ e-mechaa ajije sɔ: ? O jehunuru awe?

⁸Oo gɛ nrwɔ ephukashihuje-a bɛ g'oo-phukahɔ; ɔphu a hɔmabaedu iya ɔhumalenya; mbɛ l'oo-me phosamu g'ophulanya, a phuru l'ɛnyashi.

⁹Onye shi hɔma iya nɔ -nɔnyaa bɛ ɔ tɔo hɔmahedu iya ɔzo. ɔkpoku ibe iya ta ahɔmabaedu iya ɛnya ɔzobaa.

¹⁰ɔ bɛru unwu iya e-mechaa pfua ndu akpa nri ugwo iphe, o meru phɛ. Mbɛ l'ɛphe e-mechaa gude ɛka phɛ nɔ-phuchaa phɛ ɛku phɛ ono azɔ.

¹¹Okpehu okpehu ono, o shi eme k'okorɔbya ono etsoru iya bɛru wurumu l'ilu.

¹²A makwarɔ-a l'ɛjo-iphe atsoje iya utso l'ɔnu. ɔ nɔdu akpujeru ɛjo-iphe l'ɔnu; gude ire sɔ-mia ya.

¹³A makwarɔ-a l'ɔ tɔo dujedu ike haa ɛjo-iphe g'o je; l'o wojeru iya kpuru akpuru l'ɔnu.

¹⁴Ole nri, o riru eriri e-mechakwanaa nɔdu iya l'ɛpho shiahaa ishi. Nri ɔbu e-mechaa dɔ iya l'ɛhu g'onye ɔghɔ tsɔru ɔnu.

¹⁵Noo teke ɔo-gbɔshi ɛku ono, o shi elwee kawɔmu kawɔmu onoya; mbɛ lɛ Chileke e-me g'ɛpho iya tɔko iya nwashia g'o ha.

- ¹⁶L'ò wata ericha ọnu-mini óghù. Ọ búru ire, óghù meru nmeremu e-mechaa kpọ-nyia ya ẹnya.
- ¹⁷Ọ-sọ-gborogboro ono taa adọdu iya k'ele ẹnya; mbụ nggele ono, bú iphe, agba iya dederere bú manụ-ẹnwu yẹe mini ẹra-eswi ono.
- ¹⁸Iphe ono, o seru akanya iya ono bẹ oo-mecha nụ-phu azụ; o too ridu iya l'ọnu. Urwu, dabarụ iya lẹ nghọ, ọ gbaru ta atsohedu iya uto.
- ¹⁹Iphemiphe ono búru opfu l'o mewaru ndu akpa nri mkpawere woru phẹ togbo mgbegere. O yeru ẹka nata ndiphe ọlo, ọ tọ kpuduru.
- ²⁰Hoo haa; eshinu ọ tọo nmapfujeduru anmapfuru l'eme ụghoro bẹ ọ tọ dukwa iphemiphe ono, agụ iya nụ ono duru ophu oo-nweru; ophu ẹku iya adzokwanu iya.
- ²¹Ọ tọ dọdu iphe, duru iya nụ, bú iphe, oo-gude ria gwọo-gwọo. Ẹku iya ta adukwa ẹka ọo-nọ-beru.
- ²²Ọo teke ọ nọ eri g'ọ dọ iya bẹ ọla-l'iswi atuje iya l'upfu; mbụ aphụ asọru kpulakpula bya asọ-kputa iya ishi.
- ²³Ẹpho -bya eji iya; Chileke atukoepho oke ẹhu-eghu iya byabẹ iya l'ishi; chie ya pho gbaa-gbaa.
- ²⁴Teke o ketarụ ọso nahụ mgbo-igwè; apfu, e kweru l'onwirubvu eguru iya l'okpurukpu.
- ²⁵L'ò bya ephefu iya l'okpurukpu iya; mbụ phefu iya mpyipyi iphe-igwè ono, charu ọku gbarara ono lẹ meji. Ndzụ-agụgu emee ya omeliwe.
- ²⁶Ẹku iya l'ophu aburu iphe, kuru l'ochii. Ọku, e nweziduru enwezi enwulihu woru iya kepyashia tsupyashichaa mẹ nwa ndu phoduru l'ọlo iya.
- ²⁷Akpaminigwe l'ophu atuko ẹjo-iphe, o mekotaru kpuhaa ghebe ọnu. Alị agbalihu gbaa ya ekebe.
- ²⁸Mini abyaa utso bya ekpota ọlo iya; mbụ ọ-gba-gborogboro mini a-bya mbọku, Chileke a-tụ-koshi iya ẹhu-eghu iya.
- ²⁹Noo ẹgube obunggo, Chileke ebuje ndu ẹjo-iphe; tẹme ọ búru okiphe, Chileke gude ẹka iya keru nụ phẹ.

Jiobu 21

Jiobu epfu gẹ ndu ẹjo-iphe ababeje ọba

- ¹Jiobu bya eyee ọnu sụ:
- ²Unu ngabekwa nchi ree l'opfu-a, mu epfu-a. G'ono bukpoorunu obu unu dọ mu iya.
- ³Unu takpọepho nshi haa gẹ mu pfughee. Mu -pfuchaa; unu emeahawa mu rọ sukusuku obu.
- ⁴Aphụ, mu agụ; ? bú nemadzụ bẹ mu aguru iya? ? Denu ẹka mu e-gude taa nshi?

- ⁵Unu lee mu ɛnya ree; huma l'unu a-kpɔ beru. Unu woru ɛka hua l'onu.
- ⁶Oobujeru; mu -riɲyaa iphe-a; ndzɔ aguaha mu; ɛhu aphukota mu kpaakpaakpaa.
- ⁷? Dɛnu g'o gude ndu ɛjo-iphe nɔdu anɔduje ndzɔ; kaa nka; ɛphe aburu ndu ike du?
- ⁸ɛphe anɔdu huma; unwu phe ekofutachaa bya ebuchaaru shihu ike nɔ-pee phe mgburugburu. ɛphe anɔdu gude ɛnya phe humachaa nwanwanwanwanwa phe nno kwapho.
- ⁹Unuphu ibe phe adakota jii; o to dudu ndzɔ-agugu, adu iya nu; ophu Chileke echidu phe ɛchachi.
- ¹⁰Oke-eswi ibe phe eyeepho eswi ime l'o rwuberu iya. Eswi phe ono atsuepho ime eje; o to dudu ophu ekwo nwa.
- ¹¹ɛphe anɔdu azushi unwu g'ikpoto aturu. Unwegirima ono -teru ebvu shia ɛkiya-a; ɛphe eteru iya shia ɛkiya-a.
- ¹²ɛphe egude ogumogu gude une agu ntumatu. ɛphe eme emereme egbu opu eye iya.
- ¹³ɛphe eria gwoogwoo; tusaru ɛhu jasɔ g'ɛphe a-nɔ-beru. Mboku, ɛphe a-nwuhu; ɛphe anwuhuepho le nchi-odoo.
- ¹⁴ɛphe asuje Chileke g'o paru phe haa; l'o to gudu phe ɛgu amaru uzo iya.
- ¹⁵ɛphe asu: ? Bu onye be Okalibe-kangokotaru-nu bu ke g'ɛphe jeeru iya ozi? ? Bu gunu be ɛphe erita l'epfu anu iya?
- ¹⁶Ophu ɛphe amadu l'ajaja, ɛphe jaru ta abudu phe be o shi l'eka. Noo ɛka mu gude ophu mu ayidu l'idzu, ndu ɛjo-iphe achi.
- ¹⁷Ole o bu; ? o dukpooru teke aaphunyije oku ndu ɛjo-iphe? ? O dukpooru teke eze iphe-ɛhuka abyapfutaje phe; bu iya bu obunggo ono, Chileke egudeje ɛhu-eghu bua ono?
- ¹⁸? O dukpooru teke aanonyaje; ɛphe adu g'ɛswa okponku, a kuberu l'eka pherephere ezi; mbu ɛphe adu g'ɛswa ereshi, oke pherephere ezikashi?
- ¹⁹A sukwaru le Chileke ewoju iphe, o gogo me nemadzu doberu unwu iya. Ole o bu; g'o woju iphe obu mee onye meru iya nu; k'ophu onye ono a-maru l'oola ula iphe, o meru.
- ²⁰G'o gude ɛnya iya huma ola-l'iswi, a-byapfuta iya nu. G'oke ɛhu-eghu Okalibe-kangokotaru-nu tukokwaru iya l'ishi.
- ²¹Kele nwa onwa olemole, a nuru iya l'eliphe-a -bvua. ? O kpakwadu ishi ndu o haru l'eliphe me o towaa azu?
- ²²Su-a; ? o duru onye suru g'oo-zi Chileke mmamiphe; eshinu o bu iya ekpeje ndu kakota shii ikpe?

²³A -nonyaa; nwoke agbakwohu nwuhu; onye ẹhu dụ guu; ọphu ọ dudu iphe, atsu iya l'ẹhu;

²⁴onye ẹhu dubebe nwa pukalapukala; umi tsuru iya l'okpu.

²⁵Onye ozo ejekpoeppo iphe-ẹhuka teme l'oonwuhuje; mbu l'ẹhu teke atso-swee ya utso.

²⁶E -mechaa l'a tuko phe libe l'ali;

ekà atuko phe ripyabe.

²⁷Iphe, unu ari dokwaru mu ẹnya ree; mbu iphemiphe ono, unu gude oriri kpakoo bo mu onoya.

²⁸Unu pfuru su: ? Bu awe be ulo oke amadu nahunu; mbu ulo ono, ndu ejo-iphe shi bugbaaru onoya?

²⁹? Unu teke aji-swekpoo ndu ije aji? ? Unu teke atso-swee nwehu gbua igo l'iphe, ephe gude onu phe ako?

³⁰Su l'oke iphe-ẹhuka byaru oha; ọphu ọ dudu iphe, o meru onye ejo-iphe. Chileke bya atu-koshi ndiphe oke ẹhu-eghu iya; ọphu ọ dudu iphe, o meru onye ejo-iphe.

³¹? Bu onye apfujeru iya l'iphu gbaa ya iphe, oome? ? Bu onye apfuje iya ugwo iphe, o meru?

³²Eelije iya l'ilu lirwee elirwe. A gbenu eche ilu iya echeche g'ọ to dụ iphe, e-me iya nu.

³³Eja, shi le nsuda a-du iya ree l'ẹhu. Ndiphe l'ophu awu etso iya l'azu; teme ndu ọphu bu aguta aguta vuwaru iya uzo wuru jeshia.

³⁴“Su-a; ? bu mkpokoro opfu ono, unu epfu ono bu obu, unu nodu adu mu iya nta-a too? Kele iphe, bu onu, unu eye ta adukwa iphe, du iya nu, abudu uka be unu adzushi.”

Jiobu 22

Elifazu ebo iya Jiobu ozo

¹Tobudu iya bu; Elifazu onye Temanu bya eye ọnu su-a:

²? Bu Chileke be nemadzu abaru urwu? Mbu-a; onye maru iphe; ? oo-bakporu iya nu urwu?

³? Bu udu ẹhu-utso gunu be oo-meru nu Okalibe-kangokotaru-nu m'ọ buru l'i bu onye pfuberekoto? ? Bu gunu be oo-rita iya; ome ọ ke g'a su l'ọ to dudu uta, du ngu l'ẹhu?

⁴? Bu l'i bu onye atsuje iya ebvu be oobaru ngu mba iya? ? Bu iya be o gude kua ngu ikpe too?

⁵Ọo ejo-iphe ngu pakporu eka apaa. Iphe-eji, iimeshi bu aguta aguta.

- ⁶Mkpaleka, iipfu g'unwune ngu naa ngu te nwekwa ishi. Gube onye atotaje ndiphe ekwa, ephe nma l'upfu gbase phe oto.
- ⁷Onye ike bvuru be i ti chebeduru mini. I paru nri domiaru onye egu agu g'o to ri iya.
- ⁸Ole i bukwa oke amadu, nweru ali aka ngu; bya aburu onye aakwabe ubvu buru l'ali obu.
- ⁹Unwanyi, ji phe anodu
-gbapfuta ngu l'i chiphu phe azu; gbase phe aka oto; teme i nodu emeje g'ike bvuru ndu enwedu nna.
- ¹⁰Oo iphe ono meru g'o gude a gbaa onya gbaphee ngu mgburugburu. Otulupfu, eye ngu ebvu nodu atsụ ngu l'ehu.
- ¹¹Oo iphe ono meru g'o gude ekameka gbahukota ngu ochii; k'ophu o to duedu iphe, ihumaje. O buru iphe ono meru g'o gude utso gbawa gbamia ngu.
- ¹²Eka Chileke no bukwa aka kachaa ephekerephe l'imigwe. Humawaro ge kpokpode no-be ephekerephe!
- ¹³I gbe su: "Chileke ? o maru ole? ? Ogbeje l'aka agba ochii egube ono ekpe ikpe?"
- ¹⁴? Mbụ l'oke urwukpu soyyaberu iya; k'ophu o too humajedu anyi enya m'o nodu aghaphe le mgbaka igwe yee ali."
- ¹⁵? Bụ ụzo, ii-nodu eshi bụ akahụ ụzo ono, bụ ụzo, ndu ejo-iphe toru?
- ¹⁶Ndu ono be a kpo-kwofukwaru akpo-kwofu; ephe laa teke o teke agbadu phe k'alala. Ukporo-mini bya avua phe l'ogbarabvu.
- ¹⁷Ephe su Chileke: "Paru anyi haa! ? Bụ gunu be Okalibe-kangokotaru-nu e-me anyi?"
- ¹⁸Ole o kwa iya vukoru iphe, du ree vujia ulo phe evuji. Noo aka mu gude ophu mu ayidu l'idzu, ndu ejo-iphe achi.
- ¹⁹Ndu pfuluberu-aka-oto ahumaje iyi, yiru phe nu tee eswa. Ndu iswi du mma achia phe ochi su:
- ²⁰Tororo; ndu ohogu anyi be a kabekwa mebyishia. Oku tsuakwaru eku phe.
- ²¹Su-a; wodurupho onwongu see ase l'aka Chileke; k'ophu gu l'iya a-du le ree. Oo ya bu g'oojehuru ngu.
- ²²Natadupho anma okwa, shi iya l'onu. Woru opfu iya doo giriri l'okpoma ngu.
- ²³L'i -lwaphuta azu lwapfuta Okalibe-kangokotaru-nu be oo-dophu ngu azu l'onodu ngu. I -tuko ejo-iphe, du l'ibe ngu woshikota;
- ²⁴bya eworu mkpola-ododo ngu l'ophu rwua le ntụ; mbu tuko mkpola-ododo Ofi ngu je achiru ye l'ogba g'o buru mkpuma no le mini;

²⁵noo teke Okalibe-kangokotaru-nu a-buru mkpola-ododo ngu; buru mkpola-ochaa, kakota ree, i nweru;

²⁶noo teke Okalibe-kangokotaru-nu atsoaha ngu utso; l'i paliaha iphu lee Chileke.

²⁷Teke ono be ii-pfuru nu Chileke; l'o numa olu ngu; teme l'i mekwaaru iya pho iphe, i kweru ukwe iya.

²⁸Ii-toje okpa iphe; l'e mee ya g'i toru iya. Iphoro abya aduru ngu l'uzo, iishi.

²⁹Teke e wozeru nemadzu ali; i -su g'e wolia onye ono eli; Chileke adzo onye ono, e wozeru ali ono;

³⁰mbu l'oo-dzo ndu iswi adudu mma. O buru iphe, oo-gude dzoo phe bu le gubedua l'onwongu du chiriri.

Jobu 23

¹Jobu bya eyee onu su:

²Ntanu owa-a be aphu, mu agu erwukwa mu le meji. Eka Chileke anyilekwaa tuduu l'ehu mu l'eka mu atsukpokwaa ude-a, mu atsua.

³Ome mu makporu eka mu a-cho-vu Chileke. O du mu g'a su le mu a-du ike jerwua eka o bu;

⁴me mu apfuru iya l'iphu pfua g'ooghu mu; me mu l'iya atue ya pho jasu mu epfugbua g'o jiru mu onu.

⁵Noo teke mu gege amawaruro iphe, o gogo yeru mu onu; me iphe, oopfu edokwanaa mu enya.

⁶? Oo-gude ike-okpu ge mu l'iya kpegba ikpe to? Waawakwa; o togo dukwa iphe, o g'aguru nu mu l'onoo iphe, mu meru.

⁷Oo l'iphu eka ono be onye pfuberekoto gege apfuru koru iya iphe, atsua iya l'ehu; me o dzoo mu l'eka onye-ikpe mu; mu enweru onwomu jasua l'ojejoje.

⁸Obenu le g'o du nta; mu -choo ya shia uzo enyanwu-awawa; mu ta ahumadu iya; teke mu choru iya shia uzo enyanwu-ariba; mu ta ahumakwa iya pho.

⁹O -nodu le ndegu eje ozi iya; mu ta ahumadu iya. Teke o shiru uzo ndohali; mu ta ahumakpodaa ya ro ahuma ophu.

¹⁰Ole mbedua ta adukpodaa uzo, mu shiru, o madu. O buru iya bu o -huchaa mu ama; mu amaaha mma ge mkpola-ododo.

¹¹Okpa mu etsoekwapho eka o zoru okpa purupuru. O buekwapho uzo, o toru be mu tsoru; ophu mu ahajekwaru iya shiahaa uzo ozo.

¹²Iphe, o suru g'e meje be mu teke ahaswekwaa ememe. Opfu, shi iya l'onu be mu kakwa agube iphe eme le nri, mu erije mboku-mboku.

¹³Obenu l'ọ pfuru akatakpa ẹka iya; ẹme ? bukwanu onye sọru iya akwachị ọzo? Ọo iphe, ọ iya ree ememe be oomeje.

¹⁴Ọ chiru idzu mee iphe, ọ iya ree l'ẹhu mu. Ọ chirakwaaro egube idzu ono igwerigwe woru kwachiaru onwiya.

¹⁵Ọo iphe ono meru g'o gude ọ ọdu abujeru; mu -ọdu l'ẹka ọ ọ; ndzu agushi mu ike. Teke mu ritaru iya; ndzu aguahaa mu.

¹⁶Chileke mewaru mu; meji ọdu emewaa mu pheripheri; mbu le Okalibe-kangokotaru-nu yewaru mu ebvu.

¹⁷Ọ to budu ochii, l'agba nu meru ge mu dobe onu doo; mbu ochii ono, tukoru mu iphu rachia ono.

Jiobu 24

Umere ndu ẹjo-iphe

¹? Bu gunu kparu iphe, Okalibe-kangokotaru-nu te edobejedu mboku, oo-kpe ikpe? Denu g'o gude ndu maru Chileke ọdu anoduje ele enya egube eswe mboku ono; ọ to dudu ophu ephe ahuma?

²Mkpuma a kporeru gude kpaa oke ali be amadu aphoribejeru. Ephe ọdu echechaa eche aturu, ephe rwutaru l'iphuru.

³Ephe ọdu achifuje nkafu-igara nwogbee; bya anataje nwanyi, ji iya anodu oke-eswi iya l'itumo.

⁴Ndu ukpa be ephe achiribejeru l'uzo; ẹme ephe ọdu akpataje ge ndu akpa nri domishia onwophe.

⁵Ọo ge nkafu-igara-oswa etsojeru echiegu aghaphe-a bu ge ndu ukpa etsojeru aghaphe acho ẹka ephe a-kpata nri. Ọ buru l'okorobo-egu be ephe akpatajeru unwu phe nri.

⁶Iphe, bu mkpako nri, ephe erije bu iphe, ephe tsoru oma egu kpata l'akpa. Ẽme ephe ọdu ejechaa akpa obu eje iya l'egu ndu ẹjo-iphe.

⁷Eshinu ephe enwedu uwe be ephe agbajeru oto zee futu utsu. Oyi -tsua g'o tsuhabe; ephe te nweduru iphe, ephe e-gude kpuchia onwophe.

⁸Igwe -wata edze eze mini; mini, shi l'ubvu ono anmaa phe; ephe adu shegele. Ọ buru l'agbara mkpuma be ephe ejeje anmakoru; kele ọ to dudu ẹka ọzo, ephe a-gbaba je ekpuru.

⁹Nwa, enwedu nna be a nataru ne iya teke ongukwadu era. Ndu akpa nri be a naru unwu phe opfu l'ephe ji ugwo.

¹⁰Eshinu ephe enwedu uwe be ephe agbajeru oto tsoru aghaphe. Egu anoduje eme phe; ephe evukwaru iphe, e meberu l'opfu evulata.

- 11** Ẹphe anọduje lẹ mgbabu olivu mee manụ olivu. Ẹphe abya akua mee-vayinu kuta; l'oggu phe; ẹphe te ededu iya ire.
- 12** Ude, ndu anwuhu anwuhu atsu be adashi ike le mkpukpu; teme maa ndu e mekaru iphe nodu echi mkpu achọ onye e-yeru phe aka; ophu o dudu onye Chileke angajeru nchi l'iphe, oopfu.
- 13** O nweru ndu ophu kpọru ìphóró ono ashi. Ẹphe ta amadu ọzo iya amama ophu; ophu ẹphe eshidu gbororo iya ililekpoo.
- 14** Oobujeru; ekameka -gbahuepho ochii; mgbugbumadzu agbalihu je egbua onye ukpa yee onye adudu g'o du iya. O buru l'enyashi be onoduje apya g'onye-oshi.
- 15** Ozo bu l'onye eri ogori bu iphe, onoduje ele enya iya bu nchi-eji. Oriri iya aburu: "Nta-a be mu maru l'o to dudu onye humaru mu nu!" L'o woru iphu mee g'a ta hube iya ama.
- 16** Oo l'ochii be ndiphe ejeje etsufua ulo nwibe phe bahu. Teke o beru l'eswe; ẹphe agu-chia onwophe ọzo nodu; noo kele ìphóró aduje phe ashi.
- 17** L'ehu nkephe g'ẹphe hakota bu ochii, agbashi ike bu nchi-aboju nkephe. O buru n-yembvu, no l'ochii be ẹphe l'ẹphe eshi onya.
- 18** "Obenu l'ẹphe bu uphu-mini, tukoru l'eli mini. Oke-ali phe be a turu onu; k'ophu o to dudu onye agba okpa l'eka ẹphe koru opfu.
- 19** Oo egube ono, okpomoku yee anwu erwubashije aka-mini-sunoo-a; bu g'ilu anoduje alwuko ndu emeje iphe-eji.
- 20** Ẹpho ne phe eworu phe zohaa.
- Ẹkà akpaa phe nri l'ehu. Ndu ejo-ememe ta adukwa onye anyataje phe nu. O kwa g'aagbakwoshije oshi-a bu ge aagbakwotaje phe.
- 21** Unwanyi, ta atudu ime yee ndu ophu enwedu nwa be ẹphe egudeje azu onwophe; ophu ẹphe aphujeduru unwanyi, ji phe anodu obu-imemini.
- 22** Obenu le Chileke egudeje ike iya loo ndu nweru ike phelèphèlè. A makwaru-a l'ẹphe angujeru anguru l'eliphe-a; obenu l'ẹphe ta amajedu ? ẹphe a-nodu ndzu to ẹphe ta adzudu.
- 23** Oopajekpokwaaru phe ro haa g'ẹphe tuta unme; ẹphe nodu tuzowaruro eh; ole enya iya duopho l'iphe, ẹphe eme.
- 24** E -mee g'e kuliru phe eli; a -noepho nwanshii; ẹphe ephukahụ. L'a bya ekuzetakpoo phe ali; onwu eworu phe gbua g'oogbuje ndu ozo. L'e gbua phe g'onye egbu ishi akpe.
- 25** Teke o bu l'o to dudu ge mu pfuru ono; g'onye a-gba mu iya nu gbawa mu iya ro. G'onye ono byawaro apfuru su l'iphe-a, mu epfu-a ta adudu iphe, o bu!"

Jiobu 25

Bilidadu epfu l'o to dudu onye pfuberekoto l'iphu Chipfu

- ¹Tɔbudu iya bụ; Bilidadu, bụ onye Shuwa bya eyeeru iya ọnu sụ iya:
- ²“Oo Chileke bẹ aburu ishi dū l'ẹka; tẹme ọ bụru iya bẹ ọha l'ophu gbaru g'ephe tsuje ebvu. Oomeje gẹ nchị dū doo l'ephekerephe.
- ³? Bụ onye adu ike aguta ojogu iya l'ogu? ? Tɔ bụ onye bẹ iphóró, shi iya l'ẹka te erwudu l'ẹhu?
- ⁴? Denu g'eeshi gẹ nemadzu buri onye pfuberekoto l'iphu Chileke? ? Denu g'eeshi gẹ nemadzu, nwanyi nwuru buri onye dube ree?
- ⁵Ọ -bukpoorunu l'onwa te echizidu echichi; ophu kpokpode egbudu nwijnwii ree l'iphu iya;
- ⁶? buchia nemadzu, bu ẹkà-alì bẹ ọ guberu iphe; mbu nwa, nemadzu nwuru, bu mgbashiride bẹ ọ bụ?”

Jiobu 26

Jiobu epfu gẹ Chileke habe shii

- ¹Tɔbudu iya bụ; Jiobu bya eyee ọnu sụ:
- ²Lewarọ egube mkpu, ñigbaru onye adudu ike, dū iya nù! Lewarọ egube g'i gude dzoo onye ẹka tsuhuru mee!
- ³Lewarọ egube eguru idzu, ñ chiru nù onye amadu iphe; mekpoo iphe, dū omilomi, ñ chifutacharu ghebe ọnu.
- ⁴? Bụ onye pfubuderu ngu iphemiphe ono, ñ pfukotaru ono? ? Bụ unme onye gbẹ ngu l'onu pfua ya?
- ⁵Ndu nwuhuru anwuhu bẹ ndzu-agugu mekwaru; ephe nodu aphu kparikpari; mbu ndu maa, bu lẹ mkpula mini; me ndu ophu bu iya l'ime.
- ⁶Alì-maa gbakwa oto l'iphu Chileke. Ola-l'iswi ghekwarupho ọnu l'iphu iya.
- ⁷Akpaminigwe, no l'isheli bụ iya gbaru iya ogodo dobe; ophu ọ dudu l'eli iphe, ọ tukoberu iya. Mgboko-a l'ophu bẹ o meru dobe; ophu ọ dudu l'eli iphe, ọ tu-koberu iya.
- ⁸Oke mini bụ iya kpukoru iya dobe l'urwukpu; ophu urwukpu agbawashihujedu.
- ⁹Ọo ya phu-chiru atatiphu aba-eze iya; mbu woru urwukpu nkiya phushi iya l'eli.
- ¹⁰Okoke, bụ enya-erwu bẹ ọ togbowaru l'eli eze-mini. Ono buri okoke, ọ kparu doberu iphóró yee ochii.
- ¹¹Ọobujeru ọ -baa mba; itso, gude igwe anmaa jiiijiii tsuhu ebvu.
- ¹²Ọo ike nkiya bẹ o gude mee g'oke-enyimu deru yekete. Ọ buri mmamiphe iya bẹ o gude gbua Réhabu.

¹³Oo unme bẹ ọ tūru atutu; akpaminigwe nọdu ama ntumatu ono. Teme ejo-agwo ono, akpu wuruwuru ono bu iya nmafuru iya epho.

¹⁴Su-a; iphemiphe ono hacharu buru iphe, oomeje; ole udu iya ta adudu eka o jeberu. Ole o bu; ike iya ono, adaje g'egbigwe ono; ? bu ono suru g'oo-do iya enya?

Jiobu 27

¹Jiobu nodu epfukwaro iphe, oopfu eje. O su:

²Eshinu Chileke no ndzu g'o no iya-a; mbu onye ono, te ekwedu haaru mu enge; bya aburu yebe Okalibe-kangokotaru-nu ono, meru g'obu mu gbua ire l'iphe, atso ilu.

³Eshinu ophu ndzu nokwadu mu l'ime ililekpo. Unme, Chileke kuru nu mu nodu eshijekwadu mu l'imi akpushi;

⁴bẹ mu ta abyakwa egude ogbogboromonu mu pfua ejo-opfu; ophu ire mu owa-a abyadu epfu iphe, bu eregede opfu.

⁵Tuswekwa! Mu ta abyakwa ekwe l'iphe, unu epfu bu okpobe-opfu; ophu mu abyakwa l'ekweta l'iswi ta adudu mu mma jasū mu anwuhu.

⁶Apfubekoto mu ono be mu e-gudeshiepho ge mu gudeshi iya; ophu mu abyadu aha iyaahaha ophu; ophu ekpa-egomunggo mu abyadu abaru mu mba jasū ge mu a-noberu.

⁷Su-a; ge ndu ohogu mu dukwa ge ndu ejo-iphe du. Ge ndu mu du ashi dukwa ge ndu apfubeduru eka oto.

⁸Le-a; ? bu gunu be onye amadu Chileke elekwadu enya iya me o chihuwa; mbu me Chileke wofuwaa ndzu iya?

⁹Egube onye ono be Chileke ta angajekwaaru nchi l'olu me oke iphe-ehuka byapfuta iya;

¹⁰ophu Okalibe-kangokotaru-nu adujeekwa iya ree; ophu o bukwa tekenteke be oora-kuje Chileke.

¹¹Gebe ge mu bya egoshi unu g'ike du-be Chileke; mbu l'uzo ke Okalibe-kangokotaru-nu ono be mu te edomikpodaanu edomi.

¹²Eshinu unu humakotawaru iphe ono l'onwunu; ? denuhunu g'o gude unu nodu epfuhunu opfu, enwedu ishi owa-a?

¹³Nokwa egube obunggo, Chileke ebuje ndu ejo-iphe; teme o buru okiphe, ndu iwashi eketaje l'eka Okalibe-kangokotaru-nu bu onoya.

¹⁴O to dukpoda g'unwu iya a-habe l'otu; iphe, no swiru phe nu bu l'aa-phu phe tetarii. Awa iya ta abyakpoda ahumaje nri, suru phe eriri.

¹⁵O buru ejo iphe-ememe be e-gbushi awa iya ndu ophu wafuru nu; ophu unwanyi, epe haru l'ulo-maa aradu ekwa phe.

- ¹⁶A makwaru-a l'ọ kparu okpoga kube l'ikpo l'ikpo g'onye kuberu eja; bya anmaa uwe kube g'onye kuberu eja-ulo;
- ¹⁷obenu l'uwe ono, ọ kuberu ono bu ndu pfulberekoto e-mechaa yee ya. Ọ buru ndu iswi du mma e-mechaa kee okpoga phe ono.
- ¹⁸Ulo, ọ kpuru dobe dule-a phuge phuge g'eka udude kweru; mbu l'ọ du ge nwobu, onye-nche kpuru nodu.
- ¹⁹Ọ ze aze onye nweru iphe; ọle ọ too zebaekwanu iya. Ọ -bya asa enya ta adudu iphe ono ophu oohumakwadu.
- ²⁰Ndzu-agugu asopyabeje iya g'onye mini sopyaberu. Oke pherephere nodu abyaje ezikota iya l'enyasi.
- ²¹Pherephere, shi l'uzo enyanwu-awawa apataje iya pamihu; a taa humabaedu iya; mbu loozikotaje iya pafukpoe ya pho l'ibe iya apafu ophu.
- ²²Ootuje iya gbaagbaa; imemini iya ta adudu l'eka oogbalaru ike iya.
- ²³L'oochi iya eka gbaagbaa; l'ophuru iya swooswooswooo gude zikota iya zifu l'ibe iya.

Jobu 28

- ¹Su-a; eka eebvutaje mkpola-ochaa du.
Uzu, aakpuje mkpola-ododo dukwapho.
- ²Igwè bukwa l'ali be eebvutaje iya. Ọ buru akpaga be eegudeje meta onyirubvu.
- ³Mbu le nemadzu bvuwaru ochii omilomi omilomi; bvurwukpopho eka ali kachaa omilomi; eka ephe achọ iphemiphe ono l'ime ali.
- ⁴E shi l'eka nemadzu bu ebubu l'eli ali bvua ogba omilomi omilomi; bvurwua eka okpa teke azobeswee ililekpoo; nodu l'omilomi eka ono, adudu onye no iya nu ono aku eregede aku akukunvu.
- ⁵Ọ buru ali ono, bu iya be eemefutaje nri ono be e jerwuru je ekwongaa ya; ọ nodu enwu phuruphuru g'oku.
- ⁶Ọ buru agbara-mkpuma, no l'ime eka ono be mkpuma, bu safaya shi. Nshi mkpola-ododo du l'urwuku shi iya etsushihu.
- ⁷Ọ to dudu enu, eri anu, pheswetajewaru uzo ibiya ono; ophu ivu amadu iya uzo.
- ⁸Anu-egbudu -kua onwiya g'ookuhabe; okpa iya ta atudu l'eka ono; ophu oduma ejedu iya akpa nri.
- ⁹Ọ buru nemadzu gude eka iya egbukposhi igbangu igbangu mkpuma ono; ebvulitajero ubvu ebvulita gha igharaphu.

- 10** Ookukposhi mkpuma atọ owere eje; shi nno gude ɛnya tɔkokpoo ɛku ɛku, dukota iya nu humachaa.
- 11** Oogudeje eja nwuchia ɛnya mini ɛka nggele eshije aso asoso; l'o jee je ewofuta iphe, e shi domia edomi bya atogbo l'ebederebadara.
- 12** Obenu le-a; ? bu awe be aa-humakwanu mmamiphe? ? Bu awe be nkwamenya bukpo?
- 13** Nemadzụ ta adujedu ike makotaru ge mmamiphe erebe ire; mbu l'o to dudu onye maru iya nu l'eliphe-a, e bu ebubu-a l'ophu l'ophu.
- 14** A jiru ogbu-mini; o su l'o to dukwa l'ime iya. Oke-ɛnyimu su: Ophu o dukwa ophu du l'ime nkemu.
- 15** Mkpola-ododo, kakota ama mma be e tee gudekotakwa azu iya; ophu aatukwanu aswa iya eyeru mkpola-ochaa.
- 16** A taa zu-butadu iya le mkpola-ododo Ofi; ophu e gudedu mkpuma onikusu ozoo safaya azu-buta iya;
- 17** ophu a tudu iya eyeru mkpola-ododo ozoo mkpuma, aphu ngerengere; ophu e gudedu iya agbanweta unwu-erengete-iphe, e gude okpobe mkpola-ododo meshia;
- 18** ophu e jeduro epfu ke l'eewota mmamiphe atu eyeru mkpuma koralu; yee mkpuma jiasupa; mbu l'aswa mmamiphe kakwa aswa mkpuma rubi shii;
- 19** ophu e wokwarupho mmamiphe atuberu mkpuma topazu, shi l'ali Kushi; ophu e gudedu mkpola-ododo, debee ree azu iya.
- 20** ? Bukwanu awe be mmamiphe shi? Nkwamenya ? bu aweya be o bukpo ebubu?
- 21** Ono be e domiru g'o to du iphe, dzu ndzu a-huma iya nu; mbu l'e kpuchiru iya ekpuchi g'ɛnya ta ahuma iya je akpachaa l'enu, ephe l'eli.
- 22** Ola-l'iswi yee onwu l'onwiya tukuru su-a l'ephebedua bukwa tafutafu iya rwuru phe nchi.
- 23** Oo Chileke maru uzo iya. O buru iya kpoloko maru eka o bu ebubu;
- 24** kele oo ya be ɛnya erwuje l'eka eliphe jeberu; teme o nodu atukoje iphemiphe, no igwe le mkpula humakota.
- 25** Teke o meru ike nu pherephere; bya atua mini atutu dobe;
- 26** teke o turu ekemu dobe l'owa-a g'igwe e-gudeje edze mini; bya atoo gbororo togboru ire egbigwe;
- 27** noo teke o leri mmamiphe ɛnya tua onu iya. O bya apfubeshia ya ike bya ahua ya ama;
- 28** bya asu unwu-eliphe-a: Atsu Nnajuphu ebvu bukwa iya bu mmamiphe. Ajika eme ejo-iphe, buru nkwamenya.

Jiobu 29

- ¹Jiobu nọdu epfukwaphọ iphe, oopfụ eje. O sụ:
- ²O dū mu g'a sụ l'ọnwá l'ọnwá ono, chiwarụ nyihu ono a-lwaphutagbaa azụ; mbụ mbọku lẹ mbọku ono, bụ teke Chileke shi anọduje eche mu nche ono;
- ³teke orọku iya shi asujeru mu l'uzo ishi eke paapaapa. Mu shi egudeje ìphóró iya ghaa ẹka ọchii agba.
- ⁴Sụ-a; teke ono, iphe shi ejehuru mu; noo teke eshi ọnyà mu lẹ Chileke shi abujeru iphe, jiru ụlo mu bushihu.
- ⁵Teke ono bẹ Ọkalibe-kangokotaru-nụ shikwadu swiru mu eswiru. Ụnwu mu nọ-pee mu mgburugburu.
- ⁶Teke ono bẹ ụzo, mu eshi shi akwoje teretere g'a wụru iya mini ẹra-eswi. Agbara-mkpuma nọdu anwuru mu shokoshoko anwushi manụ olivu.
- ⁷Teke mu jeru l'ọnu-abata mkpukpu; bya eje gẹ mu nọdu l'ẹka ibe mu nọ l'oma edupfu;
- ⁸bẹ ụnwokorobyá hụmaru mu bya etochiru mu. Ndu bụ ọgerenya wụ-lihu pfulu apfulu.
- ⁹Ndu-ishi daa ikpigbi; bya eworu ẹka dẹ l'ọnu.
- ¹⁰Ọnu kpọru ndu a maru ẹpha pẹ opfu. Ire nyakuru pẹ l'akpo.
- ¹¹Iphe, bukpuo onye nūmaru ẹka mu epfu opfu goru mu ọnu-oma; tẹme ndu hūmaru mu nū jaa mu ajaja.
- ¹²Iphe, kparụ iya nū buru lẹ ndu ukpa, rarụ g'a gbaaru pẹ mkpu bẹ mu shi agbajeru mkpu. Nokwaphọ gẹ mu shi adzoje ụnwu-ogbee, enwedu nna; ọphu ẹphe enwedu onye gbaaru pẹ mkpu.
- ¹³Onye ala l'iswi shi agojeru ọnu-oma nū mu; tẹme mu shi emeje g'obu nwanyị, ji iya anọedu gụa ebvu ẹhu-utso.
- ¹⁴Apfubekoto nkemu bẹ mu shi yee g'onye yeru uwe. Ikpe, pfulu ọto buru mu awurukpata uwe mgbalanu; yee okpu, mu kpu l'ishi.
- ¹⁵Mu shi buru ẹnya, ndu atsụ ishi gude aphụ ụzo; bya aburu okpa, ndu ẹniyeni gude eje ije.
- ¹⁶Ndu nọ lẹ mkpa bẹ mu shi buru nna pẹ. Mu shi agbajeru onye mu amadụ ọdzori.
- ¹⁷Ndu ejo-iphe bẹ mu shi anyakwashije agba; nata pẹ ndu ẹphe tabewaru ẹru eme g'ẹphe tagbua.
- ¹⁸Mu shi dobesukpọepfo lẹ mu a-zẹkpọepfo l'ulo mu nwuhu. L'apha, mu a-nọ l'eliphe-a a-dụ igwerigwe g'ẹja, nọ l'ali.

¹⁹Mu shi dobesu l'ogbarabvu mu a-jakp̄ep̄ho bahu l'ime mini. L'iji a-n̄odu akwa putuputu l'eli ekali, mu jakashiru mkp̄urumkpuru;

²⁰L'akpabiri mu a-d̄ep̄ho

òphúú òphúú l'ime mu. Ap̄fu mu ad̄ukwapho

òphúú òphúú n̄odu mu l'eka jas̄u l'ojejoje.

²¹Ndiphe shi an̄oduje anga mu n̄chi l'olu g'ep̄he nw̄uta iphe. Ep̄he shi adaj̄e gb̄e ngab̄e n̄chi l'idz̄u, mu ach̄iru ph̄e.

²²O shi ab̄ujeru; mu -yewaa onu; o t̄o d̄udu iphe, ep̄he ep̄fubaa ozo. Op̄fu mu ejeep̄ho gurumaa gurumaa abah̄u ph̄e l̄e n̄chi.

²³Ep̄he shi an̄oduje kwab̄eru mu g'on̄ye kwab̄eru yegeyege mini; t̄eme ep̄he shi anguje op̄fu mu g'on̄ye anḡu mini ishi-apha.

²⁴Mu -nw̄ujaaru ph̄e onu-ochi obu ejizeta ph̄e. Ep̄he lee mu en̄ya l'ip̄hu; ep̄he ajakerehu.

²⁵Oo mu shi an̄oduje egoshi ph̄e uz̄o; t̄eme mu shi buru eze ph̄e. Mu shi as̄ugajeru g'eka eze sugaru l'echilab̄o ndu ojogu iya ph̄e. Mb̄u l̄e ndu aph̄u ts̄oru b̄u mb̄edua shi aduje ph̄e obu.

Jobu 30

¹Obenu l̄e n̄ta-a b̄e ep̄he ach̄iwaa mu ochi; mb̄u ndu mu b̄u ogerenya; ndu b̄u egube ndu mu gege enwujeru nna ph̄e ye g'ep̄he l̄e nk̄uta, echeru mu ek̄u t̄uko z̄e.

²? B̄u urwu ḡunu b̄e ok̄pu eka ph̄e bar̄u mu; eshinu ike ad̄edu ph̄e?

³Ep̄he an̄oduje eje phururugbada eje eje l'en̄yashi l̄e mḡbegu al̄i ok̄ponku; eka ejeka d̄u ph̄e; t̄eme eḡu n̄odu eme ph̄e.

⁴Ep̄he etsojeru ime eḡbudu akpak̄o ek̄wo, at̄so únú-únú ata. O buru ogbarabvu oshi, am̄ishije ekali g'ez̄a b̄e ep̄he av̄utaje ata.

⁵Ndu-a b̄u ndu a ch̄iru ach̄ichi g'ep̄he ta an̄oshi l'eka nemadz̄u ibe ph̄e n̄o. A n̄odu at̄u ph̄e uz̄u g'ep̄he b̄u ip̄huru.

⁶E kebutaru ph̄e; ep̄he je eburu l'oma nggele, mini tahuru; buru l̄e mḡbaka agbara mkpuma; mb̄u utubuku ime al̄i.

⁷Ep̄he an̄oduje l'ime eḡbudu l'eka ono ara m̄imimi eme kwop̄fukwop̄fu l̄e mkpula irwu l'eka ono.

⁸Ndu b̄u ndu mman̄u; bya ab̄uru ndibe ndu enwed̄u ep̄ha; ndu e chiru ech̄achi gude ch̄ifu l̄e mkp̄ukpu.

⁹O buru egube ndu ono b̄e un̄wu ph̄e gb̄e n̄ta-a wata mu aguru ebvu phuahaa mu ip̄hu. Mu bya bya ab̄uru iphe, ep̄he gude at̄u phukuku.

- 10** Mu dū phẹ ashị; ẹphe nọdu anọduje akpa mu ụzenya; ọphu ẹphe ezejeedu ezeze agbụ tuphekwa l'iphu mu.
- 11** O bụru iphe, kparū iya nū bụ lẹ Chileke tōshiwaru ụdo mu; bya eyewaa mu ọru; ọphu ọ duedu iphe, ẹphe asoje nsọ k'anọdu mu l'iphu mee.
- 12** O bụru l'ẹkutara mu bẹ ụnwu-ogbolanu ono eshije abya mu ọgu. Ẹphe agbakashia ọnyà dobegbaa l'ẹka mu a-zọ ọkpa; bya ekephee mu mgburugburu.
- 13** Ẹphe tochishia ụzo mu; bya emekpọepho jasū ẹphe mebyishia mu; ọphu ọ dudu g'ọ ka mma l'ọo onye lanū, gbaru mu mkpu.
- 14** Ẹphe nọdu asọ kpereree eje abya; awū gbūtugbutu; eshi ụzo, dū l'igbulọ mkpukpu ono, ẹphe tsukpọshiru ono eje abya.
- 15** Ndzū rwuta mu; nwubvu, e shi akwabeje mu bẹ a chiru ọso. O phakashihu g'iphe, pherephere pataru. Ẹku mu phukashihu g'ẹka urwukpu phukashihuru l'igwe.
- 16** Nta-a bẹ ndzū mu eribufuwa. Iphe, zuru mu gburumu pfulii bụwaa eswe iphe-ẹhuka.
- 17** Ẹnyashi anọduje anyapyashi mu ọkpu. Ẹka-iphe-nọ-mu ono, anọduje ata mu kwaramu kwaramu ono l'anọdujeecho ata mu nno mkpūrumkpuru.
- 18** Chileke gude ọkpehu iya lọkota uwe mu nmaa ẹrupfureru; bya eworu mbẹdua l'ọphu tsupfua gẹ mu atsupfuje olu uwe mu-a.
- 19** O parū mu chie l'ime ẹpuchi. Mu nọdu l'ẹka ono; o woru mu gwee arakabya.
- 20** Mu chiku ngu lẹ mkpu gube Chileke; ọphu i yeduru mu ọnu. Mu gbalihu pfulu apfulu; ọ buleru-a ẹnya bẹ i leri mu kpoloko.
- 21** I bya aghaarū mu iphu bya eworu mu mee omeliwe. I gude ogboro ẹka ngu, ha ntumatu eme mu omeliwe.
- 22** I palia mu ephekerephe woru mu t̄aru pherephere. I nọdu apanga mu g'onye oke pherephere apanga.
- 23** Mu makwarū-a lẹ i kpūwa mu ala maa. I kpūwa mu ala ẹka ono, e doberu iphe, bụ onye nọ ndzū.
- 24** Sū-a; ọ tọ dukwa onye ahumajechaa onye ike bvw̄waru bya ejeshia ya echi iphe. L'ẹka oochi ojileka t̄ogbo l'iphe, eme iya nū.
- 25** ? O kwa lẹ mbẹdua shi abujeru; mu -huma onye eje iphe-ẹhuka; mu araaharu iya ẹkwa? ? Mu te eshidu abujeru; mu -huma onye ụkpa; meji awashihu mu awashihu?
- 26** Obenu lẹ mu leri ẹnya iphe, dū ree; ọ bụru ejo iya bẹ mu humaru. Mu lee ẹnya l'iphóró a-duru mu; ọ bụru ọchii t̄koru ẹkameka gbachia.
- 27** Iphe, asw̄orishi mu ime ẹhu ta adudu teke ọononyaje haa mu asw̄orishi. O buepho l'ọo eswe iphe-ẹhuka t̄uru mu sw̄iswia.

²⁸Mu tsoru aghaphe; gbachihuchaa agbachihu; ophu o budu l'oo anwu chiru mu; mu gbachihu obu. Mu pfuru l'echi edzudzu-oha chia ojileka-togbo.

²⁹Mu bya bya aburu nwune nkuta-oswa. O buru mu le mgbashi-ujiku aswi oswi.

³⁰Akpọ ehu mu jihuwaru nchi aswashihu waa aswashihu. Ehu nodu enwu mu phuruphuru erekuta anu.

³¹Ogumogu, mu shi akpoje buwaa mu aphu. Ototo, mu shi aphuje buwaru erwubvu.

Jobu 31

¹Mu l'anya mu pfuru iya gbaa ya ndzu le mu ta abyadu ele nwamgboko anya k'ejepfu;

²kele-a; ? bu gunu be nemadzu e-keta l'eka Chileke, bu l'igwe? ? Bu gunu bu iphe, Okalibe-kangokotaru-nu, no l'ephekerephe nweru, a-dasweru nemadzu?

³? Tobudu ndu ejo-iphe be ola-l'iswi duru. Eze iphe-ehuka duru ndu te emedu ree?

⁴? To humaduru uzo, mu eshi? To ? to gudu nu okpa mu ogo?

⁵O -buru le mu tsoru iphe, abudu iphe; ozoo le mu gude okpa mu-a chipyabe iphe, abudu ire-lanu;

⁶mbu-a; ge Chileke tuwa mu roo l'iphe, otuje ndu ire-lanu; g'o huma l'uta ta adudu mu l'ehu.

⁷Su-a; o -buru le mu shiswejeru uzo; ozoo anya mu duphujeru okpoma mu uzo; ozoo le mu yejeru eka l'iphe, du eji;

⁸oo ya bu ge ndu ozo rikwa iphe, mu koberu l'ali; teme g'iphe, mu kuru akuku bukwaru iphe, ee-pheshi epheshi.

⁹Mbu-a; teke o bu l'o nweru onye nwanyi, mebyijeru mu okpoma; ozoo le mu jejeru ngge l'ibe obutobu mu;

¹⁰oo ya bu ge nyee mu bukwaru onye e-mechaa ejeru onye ozo ozi; teme ge yee nwoke ozo watakwa akwakwa;

¹¹kele oo egube iphe ono gege aburu iphe-eji, iphere iya gege adu. O buru iya bu iphe, gbaru g'e kpee mu ikpe iya.

¹²Ono bukwa oku, etsujewarọ tsurwua ali-maa. O buru iya gege ekegbushi iphe, mu gege akpata l'egu.

¹³Su-a; o -buru l'ohu mu lanu byaru echia mu le mu meru phe iphe, egbu phe egbu; ophu mu eyeduru phe onu;

¹⁴? mu e-mebaa gunu me Chileke tsoahaa mu opfu? ? Bu gunu be mu e-pfuje me a su ge mu bya epfua g'o nwuru mu l'iya?

¹⁵? Tobudu Chileke meru mu ye l'epho ne mu; meru yebedua? ? Tobudu onye lanu ono tukoru mu l'iya mee g'anyi a-du l'epho ne anyi?

- 16Sụ-a; ọ -buru l'onye ụkpa rwojeru mu iphe; mu jịka iya ya anụnu; ọzoo ị mu hajeru nwanyi, ji iya anọedu; ọ kwata ishi;
- 17Ọ -buru ị mu wojeru nri mu dobe k'eri nwẹkinyi mu; ọphu mu ekeduru iya unwu ogbee, enwedu nna;
- 18obenu l'eshinu mu bu nwata be mu shiepho heta iya g'onye nna iya ehe; teme mu shiepho eshi ọphu a nwuru mu eleta nwanyi, ji phe anọedu ọnya.
- 19Mbụ-a; mu -humajekwa onye emebyihu emebyihu opfu l'o to nwedu iphe, anma l'upfu; ọzoo onye adudu g'ọ du iya, enwedu uwe eye l'ehu;
- 20ọphu ọ goduru onu-oma nu mu; opfu ị mu gude eji aturu ibe mu meta ukpo gude gbobuta iya oyi.
- 21Ọ -buru l'o nweru iphe, mu halijeru ẹka mee ndu enwedu nna; opfu ị mu bu onye onu erwu l'opfu l'ulo-ikpe;
- 22G'eka kwahukwa mu l'ukuvu; g'o shikwaa inwo rifu erifu.
- 23Sụ-a; eshinu mu atsu Chileke ebvu l'oo-nu mu aphu; teme mu nodu atsu akpabiri iya ebvu be mu te emejekwaru egube iphe ono.
- 24Ome mu chiru upfu ye l'okpoga mkpola-ododo; ọzoo ị mu suru okpobe mkpola-ododo l'ọ kwa iya gude ndzu mu;
- 25ome mu tejeru eswa kpua iphe, mu nweru; mbu ẹku, mu gude ẹka mu kpata;
- 26ome mu wojeru ọnya dabẹ l'enyawu, egbu nwiiinwii; ọzoo ị mu wojeru ọnya dabẹ l'onwa, echi phuuphuu;
- 27k'ọphu bu l'iphe ono byaru bya esweta mu okpoma; mu gude ẹka mu ọwa-a baaharu phe eja ị mpya;
- 28noo iphe, gege aburu iphe-eji, gbaru g'e kpee mu ikpe iya bu onoya; kele mu -nodu eme nno bu iphe obu bu ị mu ta akpoduru obu yeru Chileke, bu l'igwe.
- 29Ome ehụ tsojeru mu utso l'onye ohogu mu laru l'iyi; ọzoo ị mu tejeru eswa kpua iphe-ehuka, byapfutaru iya nu;
- 30mbụ-a; mu teke egudeswekwaa onu mu-a mee iphe-eji; k'atu ndzu onye ohogu mu onu.
- 31Ọ to dukwa onye no l'ibe mu sujeru ị ya te erijiduru epho l'ibe Jiobu.
- 32Mbụ l'o toko duswee onye shi eshishi, kwajeru ị gbororo; kele mu shi eghebejeepho ibe mu onu; ge ndu eje iphe bata bya akwaa.
- 33Mu teke emeswe iphe-eji, woru domia egube ndiphe emeje domia-a; mbu woru ikpe, nmaru mu nu domia l'ime okpoma mu;
- 34kele mu atsu ikpoto oha ebvu; gude ndzu-agugu k'iphe, ee-pfuru mu kwaa l'ulo; ọphu mu afutajedu afuta.

³⁵Gege ọ dukpooru onye e-ye ọnu l'iphe-a, mu epfu-a! Mu doakwaru edo mu ye ẹka l'ẹkwo. Ge Ọkalibe-kangokotaru-nu gbawa mu iya ro! Gege iphe-a, ndu epfuru mu nu suru le mu meru-a be ephe deru l'ẹkwo dobe;

³⁶me mu ewojeeru iya pho jikoru l'ukuvu; mbu le mu gege ewoeru iya pho kpuru g'onye kpu okpu-eze;

³⁷me mu eshikwanu ishi lanu dooru iya edo ehu mu nanu nanu; me mu abyakpopho bya apfuru iya l'iphu g'onye pfuru l'iphu ndu-ishi.

³⁸“O -buru l'ali mu e-chi mkpu kpua mu; mbu le mgbawara, no iya nu bu enya-mini anwu iya shokoshoko;

³⁹o -buru le mu riru iphe, mu koru iya le mu ba pfu ugwo ozi iya; ozoo le mu mebyiru ndzu ndu eje iya ozi;

⁴⁰g'o bukwaru ewu-obvu e-fushi iya. Ge witi, mu koru iya te emekwa ememe; eswa mmanu efushia ya l'ozo bali, a kuru iya.” Nta-a be Jiobu yeghewaru onu.

Jiobu 32

Opfu Elihu

¹Tobudu iya bu; umadzu eto ono haa eye onu yeru Jiobu; kele o pfuberekoto l'enya nkiya.

²Noo ya; Elihu tangirihu. Opfu ehu Jiobu mee; ehu ghuhaa ya egu; kele Jiobu haru eme Chileke onye pfuberekoto bya emechia onwiya onye pfuberekoto. Elihu bukwanu nwa Barakelu, bu onye Buzu; oshilokpa Ramu.

³nyà iya pho ephe n'eto mekwapho; ehu nodu egu iya egu; kele ephe ta adudu ike pfukpee Jiobu; ole ephe nmakwaru iya nu ikpe.

⁴Iphe, kparu iphe, Elihu nokpopho doo ge ndu ophuu pfugbukpoda g'o du phe teme o yejeru Jiobu onu bu l'ephe buchaa ya ogerenya.

⁵O be g'o nonyaaru; o huma l'umadzu eto ono ta maedu iphe, ephe e-pfu; o ghuhaa ya egu.

⁶Tobudu iya bu; Elihu, bu nwa Barakelu, bu onye Buzu bya eyee onu su: Mbèdua bukwa nwata; unubèdua buwaru ndu bu ogerenya. O buru iphe ono meru g'o gude mu shi aso unu enya; ophu mu ejeduru atu ama k'epfuru unu ge mu mataberu.

⁷Mu shi ria su: G'ogerenya pfunaa opfu. G'onye nowaru apha olemole zinaa mmamiphe.

⁸Obenu l'oo maa, no nemadzu l'ime; mbu unme Ọkalibe-kangokotaru-nu be emeje ge nemadzu maru iphe.

⁹O to bukwapo ogerenya amajeru iphe; ophu o bukwapo onye akahwanu be iphe edoje enya ree.

- ¹⁰Noo g'o gude mu sù: Unu gebekpòdapho. Mbèdua e-pfufukwarùpho unu iphe, mu maru.
- ¹¹Mu shikpòekwapho daa gbèe; unu nòdu epfu k'unu. Mu shi ngabèkpoephe nchì èka unu tsoru achòkashi iphe, unu e-pfu.
- ¹²Mu ngabèkpooru unu nchì rengurengu; òle ò tò dùdu g'o ka mma l'òo onye lanù l'ime unu, dùru ike goshi Jiobu l'o meru èji. Ophu ò dùdu g'unu ha onye dùru ike zaa ya aji, ò jìru unu.
- ¹³Unu ta asùkwa l'unu ahùmawaa mmamiphe. Gè Chileke mawarùro ònu, oo-yeru Jiobu; l'ò tò bùdu nemadzu maru ònu, oo-yeru iya.
- ¹⁴Sù-a; eshinu Jiobu abùdu mu bè oopfuru bè mu te epfukwaru iya; ophu mu eyekwaru iya ònu ègube unu yeru iya.
- ¹⁵Ee! O tùwaru phè èberebete; ophu ephe amaèdu iphe, ephe e-pfu.
- ¹⁶? Bù gè mu ngabèhunuru gùnu nta-a, g'èphe nòwaa nggujungguji-a; g'èphe nmamoru l'èka phò; ophu ephe amaèdu iphe, ephe e-pfua?
- ¹⁷Mbèdua kwaphò nwekwarùpho ònu, mu e-ye. Mbèdua l'e-pfukwaphò gè mu maberu.
- ¹⁸Noo kèle opfu jiru mu ònu ebushihu ebushihu; tème ophu obu mu ekwedu gè mu dobe ònu doo.
- ¹⁹L'ime onwomu bè mu dùephe gè mèe, a gbaru ye l'ime ekpemu kpuchia. Mu dùephe g'ite òphúú, e yeru mèe; ò nòdu abya agbawahù.
- ²⁰Mu e-pfu opfu g'èhu agua mu phoo. Mu a-sa ònu yee ònu.
- ²¹O tò dùkpodaa onye mu agba eyeru; ophu ò dùkwa onye mu aja ajaja mkpè;
- ²²kèle òme ò kwòru mu èhu; mbù aja nemadzu ajaja mkpè; mè onye ono, meru mu dobe ono ewofu ndzù mu ègwegwa.

Jiobu 33

- ¹Noo g'o gude mu sù-a: Jiobu; jiko ngabèkpoekwapho nchì rengurengu l'iphemiphe-a, mu epfu-a!
- ²Mu abyakwa asa ònu wata epfu opfu; mbù l'iphe, mu abya epfupfu degekwaru mu edegeru l'ònu.
- ³Opfu, mu epfu bè mu gudekwa obu, gùru ìphóró epfu. Ogbogboromònu mu bùru iphe, ò maru bè oopfù.
- ⁴O kwa Unme Chileke meru mu dobe. O bùru Unme Okalibe-kangokòtaru-nù bè mu gude nòdu ndzù.
- ⁵Zanaa mu iphe-a, mu abya epfupfu-a m'i -je l'adù ike. Dozia onwongu gè mu lè ngu pfuta iya.

- ⁶Oo g'i dū bụ gē mu dū l'iphu Chileke. Oo g'e gude ẹja mee ngu bụ g'e gude ẹja mee mbẹdua.
- ⁷Gē ndzū mu te ejekwa ngu agūgu; ọzo bụ l'ẹka mu bya ngu ebyibi-a ta anyibedu ngu rọ ẹrwa kẹ nno.
- ⁸I gudekpoo onu ngu pfua ya; mu numa; mbụ lẹ mu numakpooru iphe, i pfuru gēdegede teke i pfuru iya.
- ⁹“L'i dūbe ree; ophu iphe-ẹji adudu ngu l'ẹhu. L'i dū iche; ophu ọ dudu uta, dū ngu l'ẹhu;
- ¹⁰tẹme Chileke nọdu etsokwa ngu pho opfu. O woru ngu gwa l'onye opfu iya;
- ¹¹bya akporu ngu okpa ye lẹ mkporo; tẹme ọ nọdu anọduje enyocha iphemiphe, iimekpoo ememe ophu.”
- ¹²Ole iphe, mu emekwanu g'i maru l'ẹka ono Jiobu bụ l'iswi ta adudu ngu mma; kẹle Chileke kakwa nemadzu shii.
- ¹³? Denu g'o gude i nọdu ayoru iya oshi asuje l'otoo yejedu onu l'opfu ẹhu unwueliphe?
- ¹⁴Kẹle Chileke epfuje opfu; o -pfua ya l'uzo iya owa-a; l'o pfua ya l'uzo iya ozo. O too dokwapho nemadzu ẹnya.
- ¹⁵Oopfu iya lẹ nrwo; mẹ l'ophulanya ẹnyashi; teke oke mgbenya tushigbawaru nemadzu; ẹphe nọdu eku mgbenya l'eli iphe-azee phe.
- ¹⁶Noo teke oopfuje opfu ye phe lẹ nchi; mee; ndzū aguhu phe l'okwa, onmaru phe;
- ¹⁷g'eeshi gē nemadzu haa emeswe iphe; mekwapho g'o to kuhẹ onwiya;
- ¹⁸g'eeshi g'a dzota iya g'ọ tọ dalahu l'iduma; dzotakwapho ndzū iya g'e te gude oguechi supyashia ya.
- ¹⁹Ọ duru ophu Chileke egudeje iphe-ememe hua nemadzu ahuhu obu; gburu iya togbo l'iphe-azee ya anyapyashi iya okpu;
- ²⁰k'ophu bụ l'onye obu bẹ nri aduje ashi. Nri, kachakpoo utso aburu iphe, anodu atso iya ilu.
- ²¹L'ọ joo ẹhu buru okpu. Okpu iya ono, e te shidu ahumaje l'ẹnya ono awushiru ke jashii.
- ²²L'ookpo geegee akpo ala l'ilu. Ndzū iya eje alapfu unwu-ozii ali-maa.
- ²³Obenu lẹ-a; ọ -buru l'o nweru ojozi-imigwe, nọ iya l'aguga buru onye nọ l'echilabo; onye lanu l'ime unu unwu ojozi labo l'unu iri; g'o pfuaru nemadzu iphe, gbaru iya l'ememe;
- ²⁴g'o meeru iya eze-iphe-oma su: “Jiko g'a dzoo ya rọ g'ọ tọ daba l'iduma; lẹ ya humawaru onye a-noduru iya l'itumo.”

²⁵Noo teke akpọ ẹhu iya a-bya enwee dụ ọ ọ nwata nshii. L'ọ bya alaphu azu je adukpooro g'ọ dụ teke ọ bu nwokoro.

²⁶O -pfuru nu Chileke; l'ọ meeru iya iphe, o pfuru; l'ọ huma iphu Chileke tee okpobe ẹswa, Chileke abyakwa emee ya l'ọ buru onye pfulberokoto ọzo.

²⁷Noo teke ọo-pfuru l'edzudzu-ọha pfua ya hoo haa su: “Mu meakwaru iphe-ẹji; ọme mu mebyiwaa iphe, pfuru nhamunha; ọphu a gwataduru mu ugwo iphe, mu meru.

²⁸Ọ gbafutaru ndzu mu; ọphu mu adabaduru l'iduma. Nta-a be mu a-dzuru ndzu; huma ẹka iphoro du.”

²⁹Lewaro; Chileke emejekwaru nemadzu iphemiphe ono ugbo labo; mee ya ugbo ẹto;

³⁰g'eeshi g'ọ nafuta ndzu iya g'ọ to dalahu l'iduma; k'ọphu iphoro ke ndzu-a l'a-ndu echikwaduru iya.

³¹Su-a; ndukpoekwapho doo Jiobu; ngaberu mu nchi. Ndukpoekwapho doo ge mu pfu iphe, mu efu.

³²Teke i nweru onu, ii-ye; yeeru mu iya. Pfua iphe, du ngu k'epfufu; kele ọ du mu g'a su l'e kpefuru ngu.

³³Teke ọ to dudu; ngabekpoeru mu pho nchi. Ndukpoepho doo ge mu zia ngu mmamiphe!

Jiobu 34

¹Elihu byakwa eyee onu bya asu-a:

²Unu ngabekwa nchi l'opfu, mu efu; unube ndu maru iphe. Unu ngabekwaru mu nchi; unube ndu nwuru iphe anwunwu;

³kele ọo g'eedeje onu le nri g'a maru utso iya-a; bu g'aangaje nchi l'opfu.

⁴G'anyi hotanu iphe, pfuru nhamunha l'onwanyi. G'anyi tukonu nwua iphe, du ree.

⁵Mbu le Jiobu suru l'iswi du iya mma; ọphu Chileke ekwedu iya aharu enge.

⁶L'ọ kaleru iya; a sukwapo le ya adzu uka. L'ọ to dudu iphe, ikpe iya nmaru iya; ole onya, o gburu iya bu agwota agwota.

⁷? Unu humajeru onye ọphu du ge Jiobu; onye ọphu angu ekwe une g'onye angu mini?

⁸Ndu epe l'iya achi idzu lanu bu ndu eme ejo-ememe. Ọ buru ndu ejo-iphe be epe l'iya aswi oswi;

⁹kele ọ suru l'ọ to dudu iphe, nemadzu erita l'eme iphe, du Chileke ree.

¹⁰Su-a; unu ngabekwaru mu nchi; unube ndu iphe edoje enya. Tuswekwa! Chileke ta abyakwa eme ejo-ememe! Okalibe-kangokotaru-nu ta abyakwa eme iphe, adudu ree!

¹¹Ọ kwa ugwo be ọpfuje nemadzu l'iphe, o meru. Ọ ndu ewotajeru iya iphe, gbaru umere, oome.

- 12Mbu-a; okpobe opfu kpo bu le Chileke te emejekwa iphe, adudu ree. Okalibe-kangokotaru-nu ta anmaswejekwa ikpe anmaswe.
- 13? Bu onye meru Chileke g'o buru onye eliphe-a l'opfu du l'eka? ? Bu onye bu onye suru iya g'o lekota mgboko-a gbaa mgburugburu?
- 14O -buru l'o bu uche iya; o seta ndzu sephu azu; bya erwuta unme, aatuje atutu doberu onwiya;
- 15nemadzu l'opfu atukoepho buru mkpurupyata mgbo lanu. Nemadzu anwuhu je aburu eja, no l'ali.
- 16O -buru l'iphe edoje ngu enya; ngabekwa nchi; numakwa iphe-a, mu abya epfufu-a.
- 17? Bu onye ono, ikpe pfuru oto du ashi a-bya aburu onye bu ishi? ? I suru g'ii-nma iya ikpe; mbu onye ono, pfuru oto bya aburu onye paru eka ono?
- 18Tobudu iya bu onye ono, asuje ndu eze: O to dudu iphe, unu bu! L'o su ndu nweru enya: Ejo-iphe paru unu eka l'ehu!
- 19Oo ya bu onye ono, ta agbajeduru nemadzu odzori opfu l'o bu onye-ishi; ophu oowotadu iphe, o gogo meru onye ukpa meeru onye eze opfu l'o bu eze; kele ephebo tukoru buru iya gude eka iya mee phe.
- 20Epe anwuhuje buregedegengu l'echi abali. Onmaghukota igwe oha anmaghu; epe anwushukota. Ndu oke amadu be oowofujekwa; ole o to bukwa nemadzu egudeje eka wofu phe.
- 21“Su-a; enya Chileke tukokwaru iphe, ndiphe eme humakota; teme o nodu ahumakotaje eka epe zoru okpa.
- 22O to dudu eka agba ochii, du nu; ophu o dudu egube dadishi, du nu, bu eka ndu eme ejo-ememe e-je edomia onwophe.
- 23O to dudu Chileke mkpa ke ge ya bya awata enyocha nemadzu ozobaa; mbu ke g'ephe bya anodu iya l'iphu k'ikpe ozobaa.
- 24O too jejedu akpata ishi teme l'o chikaa ndu oke amadu; bya ahoo ndu ozo dochia enya phe.
- 25Eshinu o makotaru iphe, epe eme be oomekpeje phe l'enyashi gwee phe arakabya.
- 26L'o hua phe ahuhu ejo-iphe, epe eme l'edzudzu-oha; eka onyemonye a-huma phe;
- 27opfu l'ephe haru etso Chileke; ophu o dudu iphe, o suru g'e mee, duru ophu epe akpaje ishi ememe.
- 28Epe emeje; ndu akpa nri echi mkpu, erwuje Chileke le nchi; k'opfu Chileke anumaje ekwa ndu adudu g'o du phe.

²⁹Ole ọ bu; ọ -sukwanu le ya te eyekpodaa onu; ? bu onye suru iya anma ikpe? O -domia iphu iya; ? bu onye bya adu ike huma iya? Ole ọ kwa iya nwe nemadzu bya enweru oha l'ophu.

³⁰Oomeje g'onye te emedu ele Chileke ta aburu onye-ishi; k'ophu ọ to watadu agbaru ndiphe onya.

³¹Ọ -buru ke ge nemadzu su Chileke: 'O dekwaru mu; ophu mu alaphubaekwa azu l'iphe-eji ono ozo;

³²Zinaa mu iphe, mu taa dudu ike ahuma. Mu -mewaa eji; mu tee emehedu iya ozobaa.'

³³Su-a; ? bu g'ọ du ngu ree bu g'i dobesu le Chileke a-pfu ngu ugwo l'eka i ti kwedu g'izimanu lwa ngu azu? Ọ kwa ngu e-pfukpopho l'onwongu; ọ to bukwa mbedua. Pfukwaa iphe, i maru.

³⁴Ge ndu iphe edoje enya yena onu. Ge ndu mmamiphe, l'anu iphe-a, mu epfu-a pfunaa su:

³⁵'Jiobu epfukwa opfu onye enweddu egomunggo; mbu l'opfu iya ta adukwa omilomi.'

³⁶Ọ du g'a su le Jiobu be aa-hukpopho ama hu-rwua ya l'ishi; kele oopfu g'onye ejo-
iphe.

³⁷O meru iphe-eji; teme ọ nodu eko Chileke okpa l'ishi. Onoduje l'echilabo anyi aku eka aja anyi ewenu; teme ọ nodu epfu ejo opfu mpfukwase ekpu Chileke."

Jiobu 35

¹Elihu nodu eyekwaro onu, ooye.

²Su-a; ? i dobesu l'iphe ono bu apfubekoto; g'i suru l'apfubekoto nkengu ka ke Chileke?

³Ọle i jikwaru iya nu su: ? Bu urwu gunu be iirita iya? Su: ? Bu gunu bu obunggo, du iya nu l'i haru eme iphe-eji?

⁴Gebe ge mu bya eyeeru ngu onu; gu le ndu unu l'iya eshi onya.

⁵Palikpodapho enya lee l'akpaminigwe. Tabekpodapho enya tatata l'urwukpu ono, no ephekerephe ephekerephe l'uzo ishi ngu ono.

⁶I -mee iphe-eji; ? i mekataru Chileke l'awe? Iphe-eji ngu -dukpoo igwerigwe g'ọ duhabe; ? oo-mebata iya gunu?

⁷Teke ọ bu l'i pfuberekoto; ? i nuru iya gunu? To ọ bu gunu be onata l'eka ngu?

⁸Ejo-iphe, iime buepho onye du ge ngu be oomekata. Apfubekoto ngu bukwarupho unwu-eliphe be ọ duru.

⁹"Oobujeru; e -menuka ndiphe ewere; ephe eye mkpu l'onu. Ephe echiaha: 'Ojileka togbo'; kele ndu ike du l'ebyi phe eka l'ehu.

¹⁰Ole ọ to dudu onye asuje: ? Bụ awe bẹ Chileke, bụ onye meru mu nụ nọ; onye ewojeru ebvu-oma nụ nemadzu l'enyashi;

¹¹onye ka anyi ezi iphe eme lẹ g'oozi anụ, bu l'eliphe; bya emee; anyi ka ọnu, ephe l'eli amaru iphe.

¹²O to yejeduru nemadzu ọnu mę ọ -nọdu echi mkpu. Ọ bụru iphe, kparụ iya nụ bụ lẹ ndu ejo-iphe kunukaru onwophe.

¹³Tororo iya bụ lẹ Chileke te eyejeduru ọnu l'arworo iphoro, ephe anọduje arwo; mbụ lẹ Ọkalibe-kangokotaru-nụ te eyejeduru ọnu l'egube iphe ono.

¹⁴? Denu g'ọ buchia gube onye sụru l'ị tị humaduru iya ahuma ophu bẹ ọo-nọdu angaru nchi; mbụ gube onye sụru l'ikpe ngu dabyiru l'ataphu iya; i je l'anodu echeru iya?

¹⁵Teme ị sukwapo l'ehu-eghu Chileke ta adudu iphe, oomeje; ophu ọokpajedu onye eme ejo-iphe ishi.

¹⁶Ọo ya bụ lẹ gube Jiobu epfu mkpokoro opfu. Iipfu mpfukwase opfu, enwedu ishi.”

Jiobu 36

¹Ophu Elihu ahakwaru iphe, oopfu.

²Tabakpoekwapho nshi nwanshi; gę mu goshi ngu l'o nwebakwaru-a iphe, ee-pfu l'opfu ọhu kę Chileke.

³Ęka mmamiphe mu shi dukwa ęnya. Mu jekwa egoshi l'ikpe kaleru onye ono, meru mu nụ ono.

⁴G'o dokwaa ngu ęnya ree l'opfu, mu epfu ta adukwa ophu bụ ọka. L'onye iphe doru ęnya doębe bę unu l'iya tukokwaru nọdu l'ęka-a.

⁵Chileke pakwaru ęka; ọle o to lephuduru nemadzu ęnya. Ọ parụ ęka bya ekeru jimumimu l'iphe edo ęnya.

⁶Ndu ejo-iphe bę o too dobejeduru ndzu. Ọ nọdu anujekwanu ndu aakpa ọhu iphe, rwuberu pę nụ.

⁷Ęnya ta alufujedu iya alufu l'ęka ndu pfuberekoto nọ. Oomeje; ephe lẹ ndu eze atuko bụru eze; teme ọ nọdu ekutseje pę ephekerephe jasụ l'ojejoje.

⁸Obenu teke ọ bụ l'a turu nemadzu mkporo; l'udo iphe-ehuka turu iya swiswia;

⁹bụ iphe, Chileke eme bụ l'oogoshi pę iphe, ephe meru; l'ephe meru iphe-ęji l'ęka ephe eku onwophe.

¹⁰Iphe, oome bụ g'ephe ngabe nchi l'uzo, aakpo-ziru pę; bya asukwa pę pho g'izimanu ejo-ememe, ephe eme lwa pę azu.

- 11** Ẹphe -mee iphe, o pfuru bya ejeahaaru iya ozi; nweswe ndzụ phẹ ọp̄hu phọduru nū aburu phẹ eswe ẹhu-ọdu-guu. Nwapha olemole ono, phọduru lẹ ndzụ phẹ ono aburu apha, a-buru phẹ k'oma k'oma.
- 12** Obenu teke ẹphe jikaru l'ẹphe te eyeduru iya ọnu; ọoburu ogu-echi bẹ ee-gude saa phẹ ọsampfu. Ẹphe anwuhu l'ẹbe ẹphe enwe egomunggo.
- 13** Obenu lẹ ndu Chileke adudu l'obu phẹ ewojeru ẹhu-eghu gude suchia obu phẹ ọbu; mbu o -kekpoọ phẹ ẹgbu g'ookehabe; ẹphe ta aradu g'e yeru phẹ ẹka.
- 14** Ẹphe agbakwohuje nwuhu teke ẹphe bukwađu okoroḅya; tsoru unwoke, a goru lẹ nshi, agba ukpara laa l'ite lanu.
- 15** Obenu lẹ ndu eje iphe-ẹhuka bẹ ọnafutaje l'iphe-ẹhuka ono. Ọ nọdu epfuje opfu gude ọdu phẹ obu m'ẹphe nọdu eje iphe-ẹhuka ọbu.
- 16** Ọ kwa mkpu bẹ ọogbaru ngu. Oome g'ọ phafuta ngu l'asha iphe-ẹhuka dobe ngu lẹ phorokotoko ẹka adukpoedu iphe, akpakube ngu nu; teme nri, e doberu ngu g'i ria buru nri, kachaa ree.
- 17** Obenu lẹ nta-a bẹ ikpe, e kperu ngu bu ikpe, gbaru onye ẹjo-iphe. Ikpe, pfuru ọto yẹ iswi-odumma tuwaru ngu swiswia.
- 18** Tọkwa ẹhu g'ọ tọ du onye e-gude ẹku deru ngu ye. B'ekwekwa g'oke uphalazu chechi ngu iphu.
- 19** Ẹku ono; ? oo-me g'i ti nọduhe l'iphe-ẹhuka-a? Tọo ? ii-gude ọkpehu ngu l'ophu gude nahu iya?
- 20** Be lekwa ẹnya ọdu ẹnyashi ono, emeje gẹ ndiphe shi l'ibe phẹ chihu ono.
- 21** Tọnupho ẹhu g'i ti je aghaarū ẹjo-ememe iphu, bu iphe, mu ele ẹnya l'i ka ahata eme l'ẹje iphe-ẹhuka.
- 22** Chileke bẹ e kutseru kele ike du iya shii. ? Bu onye bu O-zì-iphe, aatū eyeru iya?
- 23** ? Bu onye sūru asū Chileke: Waa iphe, ii-me baa. Tọo ? bu onye sūru iya asū l'iphe, o meru bẹ o mekwaru ẹji?
- 24** Nyatajẹkwa kwolita ozi Chileke, bu iphe, ndiphe agū ebvu gude etu iya ẹpha.
- 25** Nemadzū l'ophu hūma-dzuwaru iya. A nọdu agbeje ọzenya ele iya phoriphori.
- 26** Chileke pakwarū ẹka mebyi apapa; daghata gẹ mmamiphe anyi ha. Ọ tọ dukwa onye adū ike agūta apha ole ọ nọwaru ndzū.
- 27** Ọomeje mini; l'ọoda paapaa. Ọ buru mini ono l'edzeje wọwoowoo awū ala l'oma nggele l'oma nggele.
- 28** Igwe avuje tsutsutsu; l'o dzekwapho mini, parū ẹka wushiru unwu-eliphe.
- 29** G'ogudeje erwu erwurwu ta adukwa onye o doru ẹnya; ọp̄hu ọ dukwa onye maru g'omeje shi l'okpoku iya atū egbigwe tarara tarara.

³⁰Humanu g'o woru ebemu-igwe iya doo onwiya mgburugburu; bya egude iya ekpuhaje ẹka kachaa omilomi l'eze-ẹnyimu.

³¹Oo ẹgube ono bu g'o gude elekota eliphe l'ophu. O nodu emefuta nri eme k'etsutsu iya.

³²Iphe, jiru iya mkpoji-ẹka bu egbigwe. O buru ẹka du iya ree be ootuje iya.

³³Oo ririri be oodeje l'a maru l'oobyawaa edze oke mini; mbu je akpaa l'eswi, eeche echeche egoshijechakwaa l'igwe emewaa ome mini.

Jiobu 37

¹Nta be meji etekwa mu ophe; mbu le meji akufukwa mu akufu.

²Unu ngabekpodapho! Unu ngabe nchi numakpodapho olu Chileke! Unu numakpodapho ekiri, o gude onu iya asu!

³Oomeje; ebemu-igwe alo waawaa l'igwe; l'o rwuchaa ẹka igwe beru ali beru.

⁴Teke e mechaerupho; o raahaa ora; l'o gude oke olu iya atu egbigwe. Ophu o dudu ophu oodopuje azu me ora iya gbufuwa.

⁵G'olu Chileke egudeje edebe ririri be du oke ebvu. O nodu emeje iphe, paru ẹka; meghata g'oodobe nemadzu enya.

⁶Oo ya asuje aka-mini-sunoo g'o daa l'eliphe. L'o bya asukwapho igwe: Ngwa; dzee mini dzeshia ya ike!

⁷Oomeje ge nemadzu jebuhu ozi; shi nno goshi onyemonye g'ozi, ya eje habe shii.

⁸Unwu anu anoduje ekpu ekpukpu ndzu. Epe ejeje edomichaa onwophe l'ime ogba phe.

⁹Oke pherephere eshije l'ogba iya; teme oyi-atsutsu nodu eshije le taphutaphu pherephere.

¹⁰Mkpukorophu akamini bu unme, Chileke turu atutu be ooshije. O -tua ya; phosa phosa mini, doru nyimunyimu akpukoo ophu.

¹¹Urwukpu be oogudeje tsutsutsu mini wu-jia awu-ji. O buru urwukpu ono anoduje atu egbigwe gbaagbaa.

¹²O nodu abujeru; o -zia phe; epe alojashia onwophe waawaa l'eliphe l'ophu; wata eje ozi, o ziru phe.

¹³Erwurwu be o gude bya g'o gude iya hua unwu-eliphe ahuhu; ozo gude iya gbaa mini l'eliphe gude goshi n-yemobu iya.

¹⁴Ngabekpodapho nchi l'iphe-a Jiobu! Hapopho iphe, iime; gbukpodapho igo l'odu-biribiri Chileke!

- 15? I makp̄ooru ḡ Chileke egudeje esede urwukpu l'akpaminigwe? ? I maru g'oogudeje al̄ ebemu phaaphaa?
- 16? I maru g'urwukpu adojeru l'eli iya aw̄unga l'akpaminigwe? Ono bukwa eguru ozi, o jeru; mb̄ onye t̄koru iphemiphe mak̄otaru onoya;
- 17mb̄ ḡbe onye uwe ngu ekpo okpom̄oku l'eka mgboko deru yekete. O buru iphe, kpar̄u iya n̄ bu ph̄erephere, shi l'uzo nd̄ohali.
- 18? Ii-d̄u-a ike mee iphe, o meru; mb̄ mee; akpaminigwe ph̄ushi; g'o meru nkiya ph̄ushi l̄ mgboko-a; o kp̄oo gbengu g'onyo, a w̄uru aw̄uwu?
- 19“Kan̄uru anyi iphe, anyi e-pfuru iya. Anyi ta ad̄ukwa ike rikobe iphe, anyi e-pfu. O buru iphe, kpar̄u iya n̄ bu l'uzo anyi gban̄ukaru ōchii.
- 20? Ee-je epfuaru iya l̄ mu ach̄o epfu opfu t̄oo? ? O nweru onye a n̄onyaa rw̄oahaa arw̄orwo g'e lwee ya t̄oo?”
- 21“A bya l̄ nta-a; nemadz̄u te elejekwa ̄nya l'enyanywu, echi echichi; mb̄ m̄ igwe b̄oo gbarara.
- 22Chileke abyaakwaa. O dukwa ebvu l'enyanya bya ad̄u akpabiri. O shikwa l'isheli abya; kwaa onwiya akwa l̄ mkp̄ola-ododo.
- 23O kwa iya bu Okalibe-kangok̄otaru-nu; buru onye ̄ka anyi ta abyad̄u erwu erwurwu ophu. O par̄u ̄ka l'ike-okpu; m̄ l'ekpe ikpe, pfuru ōto. Apf̄ubekoto nkiya par̄u ̄ka; ophu oomedu nemadz̄u ewere.
- 24Noo g'o gude ndiphe n̄odu at̄su iya ebvu. Ndu ar̄i l'ephe maru iphe b̄e t̄o ḡubeduru iphe.”

Jobu 38

Chipfu watar̄u eye ̄nu

- 1T̄obudu iya bu; a n̄onyaep̄ho; oke ph̄erephere wata ezizi. Chipfu gb̄e l'oke ph̄erephere ono wata eyeru Jobu ̄nu. O s̄u Jobu:
- 2? Bu onye epfu iphe ph̄o? ? Bu onye woru enweru egomunggo mu rw̄utoshia; l'̄be ab̄u l'onye ̄bu maru iphe, oopfu?
- 3R̄ikota onwongu ḡe nwoke; ḡe mu bya aj̄ia ngu aj̄i! O kwa g'i zaje mu iya!
- 4S̄u-a; ? bu awe b̄e i n̄o teke mu t̄uru okpa mgboko-a l'ophu? Kar̄u mu iya; m'o buru l'o doru ngu ̄nya!
- 5? Bu onye t̄uru iya ̄nyeka s̄u l'owa-a g'̄oo-habe baa? ? I maru iya? ? Bu onye gude eri tua l'uswekete iya?
- 6? Bu l̄e gunu b̄e a kp̄obecharu okpa iya? T̄oo ? bu onye gbuberu ishi mkpuma, gude mgboko;

- ⁷mbụ teke ono, e mechaaru; kpokpode nchi-aboḥu tū ụzu wata agụ ebvu; ụnwu-ojozi-imigwe g'ephe hakota gbọaha kwakokoo.
- ⁸? Bụ onye gụru ụzo gburumu gu-buru eze-enyimu ye l'azu teke ono, o meru kpukungu kpofuta l'ephe ne iya ono?
- ⁹Noo teke mu woru urwukpu mee uwe yee ya; bya eworu tsukiribaa ochii phua ya g'ekwa;
- ¹⁰bya akpaaru iya oke aka oo-jeberu; bya asu-chia ya woru iya gua kpukpurukpu.
- ¹¹Noo teke mu suru: "Lekwa aka ii-jeberu; ba ghatakwa aka ono! Lekwa aka akparamini ngu e-ku onwiya jeberu gburu."
- ¹²? I sujewaru nchi-aboḥu l'owa-a iphe, oo-me baa? ? Ozoo karu geregere utsu l'owa-a aka rwuberu iya nu baa?
- ¹³? I sujewaru iya g'o je egudegbaa aka l'igburonu igburonu mgboko jia ya phulaphula jishia ya ndu ejo-iphe?
- ¹⁴Mgboko l'ophu kpuru oronmono g'urwa, e gude eme ohubama; teme o nodu aduje rwarji g'uwe.
- ¹⁵Ndu ejo-iphe be e te ekwedu g'iphoro duru; teme a nyakwoshichaa phe aka ephe shi palichawa ephekerephe.
- ¹⁶? I jejewaru ije jerwua aka oke-enyimu agba deredere? ? I jejewaru ije l'aka enyimu bu utubuku?
- ¹⁷? E goshijewaru ngu onu-abata ali-maa? ? I humajewaru aka eeshije abahu l'ononyo onwu?
- ¹⁸? I rijekpowaru iya; o doo ngu enya su ge mgboko-a l'ophu habe phorokotoko? Karu mu iya me o -buru li tukoru iphemiphe-a makotaru!
- ¹⁹? Bu awe be eeshije eje aka iphoro bu? ? Bu awe be ochii chiru upfu yee?
- ²⁰? I du-a ike dua ndu ono g'ephe lagbaa aka ephe shigbaa? ? I maru uzo, eeshije eje aka ephe akwaje?
- ²¹Mu maru-a li makotaru iphemiphe ono; eshinu a nwadaru ngu teme e mee iphemiphe ono. I nowaru ndzu nobawaa apha, du igwerigwe!
- ²²? I bahujewaru l'ulo aka aakubeje aka-mini-sunoo? Too ? i humajewaru ulo ophu aakubeje ire egbigwe,
- ²³buro iphe, mu doberu kwaberu teke iphe-ehuka a-bya; mbu kwaberu mboku ugu ada.
- ²⁴? Denu gbororo, eeshije eje aka iphoro futaru; ozoo aka pherephere uzo enyanwu-awawa eshije dzuru mgboko?

- 25? Bụ onye gbuwaru ọswawara togbo; ọ bụru ụzo, mini eshije edze; bya atogboru egbigwe ụzo, ọo-nodu eshi.
- 26? Ọ nodu egudeje iya agba mini l'eka nemadzu te ebudu ebubu; mbu echięgu, adudu onye bu iya nu;
- 27? gude iya mee ge ncharacha ali, adudu iphe, du iya nu ngu-jia epho wata efushi eswa ophuu.
- 28? Mini ono, igwe edzeje ono; ? o nweru nna too? Mbu-a ? bu onye nwuru iji, akwa akwakwa?
- 29? Bu nwanyi ole nwuru mkpukorophu mini oyi? ? Bu onye tsuru ime mkpukorophu iji mini ono, eshije l'imigwe adashihu ono,
- 30? bu iya emeje mini l'o kpukoo ophu du ge mkpuma; mbarabata ogbumini ahuko?
- 31? Ii-du-a ike swikobe kpokpode, Puleyadesu? Too ? i du ike atoshi kpokpode, Orayonu g'o nodu nanu nanu?
- 32? I du ike eme kpokpode, dugbaa nu g'ephe futaje teke gbaru phe nu? Too ? i du ike edu kpokpode, Beya; yee unwu iya?
- 33? I maru ekemu, a turu doberu iphe, bu l'imigwe? ? I-du ike mee g'o buru g'o du l'imigwe bu g'o-du l'eliphe?
- 34? I du ike ara ora g'o rwua eka urwukpu no; ozoo g'i ratsua mini l'a-gba utso, e-ri ngu nu?
- 35? Bu ngu atufuje ire egbigwe g'o tsoru ụzo iya? Epe -jeshia; ? epe abya asu ngu l'ephe ejeakwa ozi, i ziru phe?
- 36? Bu onye nuru okpoma egomunggo; bya emee g'iphe doje uche enya?
- 37? Bu onye be mmamiphe iya rwuru k'aguje urwukpu odu? ? Bu onye awushije itemini, suru l'imigwe;
- 38? me urwuku hukopho ahuko; bya anmaa agbadagba.
- 39? " Bu ngu ejeje akparu nyee oduma nri; bya anu-jije unwu iya epho g'egu ta aguhe phe;
- 40? m'ephe tuko nodu l'ime oga phe; ozoo l'ephe tukoru geparu l'ote eka epe e-gbu anu?
- 41? Bu onye anuje okpoko-oha nri, epe erije; teke ono, unwu iya anoduje echiru Chileke mkpu nri tsoru ekameka aghaphe achu nri, epe e-ri?"

Jiobu 39

- 1? Imajeru teke eghu-oswa, bu l'ubvu nwuru nwa? ? Ihubeje ama l'owa-a teke ne ele anwu nwa baa?

- 2? Iiguje onwa ole, ephe anoje teme ephe atsua ime? ? I maru teke ephe ezedaje gedegede?
- 3Oobujeru; ephe -bya ezeda; ephe egbushi ikpere l'ali woru nwa phe nwua. Ime, shi eme phe nu aburu sarimu.
- 4Unwu iya obu agbashia ike nodu l'ime egbudu l'eka ono vua vughee. Ephe aparu ne phe ono haa gbakashihu; ephe ta lwapfutabaedu iya.
- 5? Bu onye haru nkafu-igara-oswa; o nodu akpape; ophu o dudu iphe, eme iya nu? ? Bu onye toshiru phe haa; ephe nodu ejeje eka du phe ree?
- 6Echiegu ali okponku be mu nukpoeru iya pho su g'o buru; bya emee ali ono, buepho unu unu ono g'o buru eka oo-buru eburu.
- 7Wooowoo, aanoduje atu le mkpukpu be onoduje achi ochi; ophu onodu gbagbagba, ndu udumali anoduje ara.
- 8Ubvú úbvú be otukoje gbaa ophorokpo acho iphe, oo-ri; achokpoepho nwa rwushirwushi eswa ge ya taa.
- 9? Atsu e-kwe-a bya anodu meahaa iphe, i suru g'o mee? Mbua-a; ? ii-dobe iya-a g'o nodu l'eka eeyejeru anu nri; l'o nodu iya l'enyashi?
- 10? O duru ophu ii-du ike tua eri kpata kpuru g'o jeeru ngu ozi egu; ? ozoo ii-gude iya-a koo okoro le nsuda?
- 11? Ii-chiru upfu kwee ya su l'o shihuru ike? ? Ii-paru-a ozi ngu eka o shihuru ike paru haaru iya?
- 12? Ii-kweta haa ya g'o je evulataru ngu ereshi ngu; vuru iya je akube l'ulo, eechishije bali?
- 13Oke-enu osuturichi egudeje ehutu-utso chia nkú pyaa. Ole i tii tuduru ebà iya eyeru ebà korokoro.
- 14Oke-enu osuturichi ono atuje ekwa l'ali. O buru l'ali be onoduje kpua ya.
- 15O too kpadu ishi k'a nonyaa a zoo ya okpa zopyaa; ozoo l'unwu anu l'a-zopyashi iya.
- 16Unwu iya be onoduje ehe anuka anuka g'ephe ta abudu unwu iya; ophu o kpadu ishi ke l'akanya, o seru bu ola-l'iswi;
- 17noo kele Chileke ta anuduru iya mmamiphe. Ophu o keduru oke k'egomunggo nu yebedua.
- 18Ole o -wokwanuru nkú iya phushia ke ge ya wata agba oso l'o nyighaaro inya yee onye no iya l'eli chia phe ebyi.
- 19Su-a; ? bu ngu nuru inya ike, du iya nu? Too ? bu ngu gbaru nza-inya phushi iya l'olu; o du ke nwa buyabuya ono?

- 20? Bụ ngu meru iya; ọ nọdu anọduje apfụ shọshoo g'igube ono; o -zia unme fuu; ndzụ aguhu unwu-eliphe?
- 21Oozoje garamu garamu; ẹhu atso iya ntumatu l'ike dū iya. Looje ẹnari ẹnari ejepfu ọgu, dūru iya nū.
- 22Ochi bẹ ọochije ndzụ-agugu; kele ọ tọ dudu iphe, ọotsu ebvu; ọphu ọola-phujedu azu mẹ a haliaru iya ogu-echi.
- 23Ikpoto apfụ, kuru l'ekpa apfụ, nọ iya lẹ mgburẹku anọduje azu iya yogoro yogoro; yele o-gbungerengere arwa.
- 24G'o gude awu ke wugelengu wugelengu bẹ ooghudujechaa mẹ o lwee ali elwelwe; ọphu ọ byadu apfuru doo mẹ e gbua opu.
- 25E -gbua opu ono l'o woru okwe rwua. Ogu -nọdukwaduro uzanya; l'ọ kpọtawa ẹgburu iya. L'ọ nwaro olu ndu-ishi ojogu ono; waa mkpu-ogu, ada nū.
- 26“Sụ-a; ? bụ mmamiphe ngu bẹ ọkpo-ngwere gude ephe l'eli? ? Bụ ngu meru iya; ọ nọdu ewojeru nkù jasaa l'uzo ndohali ono?
- 27? Bụ ngu ezije ugo g'o phee phaa phemihu imeli imeli je anọdu kpaa ẹpfune iya l'eka dū ephekerephe ephekerephe?
- 28Eka ọonoduje bụ l'uji, nọ ephekerephe ephekerephe; nwaro l'eka ono jasụ nchi abohu. O buru l'eka ono bẹ oodomije onwiya.
- 29O buru ẹka ono bẹ ọonoduje levu iphe, oo-ri. O -nọdukwaduro uzanya; ẹnya iya arwutawa iya.
- 30Unwu iya amije mee. O buru ẹka odzu dabyiru bẹ yebedua anọduje.”

Jiobu 40

- 1Chipfu nọdu epfukwaro eyeru Jiobu sụ iya:
- 2“Gube nwophu abaru Okalibe-kangokotaru-nu mba; ? i suru g'ikajeru iya iphe, oo-me? Ge gube onye ono, ebo Chileke ibo ono yena ọnu l'opfu-a, oopfu-a!”
- 3Tobudu iya bụ; Jiobu bya eyeeru Chipfu ọnu sụ iya:
- 4“Mu bukwa onye ta abadu lẹ mkpa. ? Denu ge mu e-shi jeye ọnu l'iphe, iipfu? Mu woakwaru ẹka ẹe l'onu.
- 5Mu pfuakwaru akpo opfu lanu; ọphu mu adukwanu ike eye ọnu l'ọphu iipfu. Mu bya epfuwa akpo labo; nta-a bẹ mu tee pfubaekwa ozo.”
- 6Noo ya bụ; Chipfu bya agbekwa l'oke pherephere ono pfuru yeru Jiobu sụ iya:
- 7Rikota onwongu ge nwoke; ge mu bya aja ngu aji. Oo ẹpho g'i yejekwa ọnu l'iphe, mu aji ngu.

- 8? Ii-dụ ike mebyia ikpe, mu kperu? ? Ii-dụ ike nma mu ikpe; k'ophu ikpe a-kaleru gubedua?
- 9Odzu-ẹka ngu; ? ọ ha gẹ kẹ Chileke? Tọo ? i dụ ike egude olu ngu atụ egbigwe g'ọtuje ono?
- 10Ngwanụ; gudenụ o-gbu-nwịnwii yẹ akpabiri kwaa onwongu akwa! Yena akwabe ùbvù yẹ enweru ẹnya g'onye yeru uwe!
- 11Gbanwụbenu iphu ẹhuka ẹhuka gude goshi l'ẹhu egu ngu egu! Lenaa ẹnya hụma iphe, bukpo ndu eku onwophẹ kuzeta phẹ alị;
- 12mbụ lee ẹnya hụma iphe, bukpo ndu eku onwophẹ mee phẹ g'ẹphe darwua alị! Tụkonu iphe, bukpo ndu ẹjo-iphe mebyishikọta l'ẹka ẹphe pfuru!
- 13Tụko phẹ g'ẹphe ha lia elili l'alị! Woru phẹ iphu kpupyabe ekpupyabe l'ime ilu!
- 14Noo teke mu e-kweta ngu l'ẹkutara ngu a-dụ-a ike dzọo ngu.
- 15Lenaa oke anụ ono, bụ behemotu, bụ anụ, mu tukuru gụ l'iya mee dobe; tẹme ọ bụru anụ, ata ẹswa l'alị g'eswi.
- 16Sụ-a; lenaa ẹgube ike, dụ iya l'okpa! Hụmawaro ẹgube ike, dụ iya l'akwara akwara, gbashiru iya l'ẹpho!
- 17Odzu iya anọduje enwunga g'oshi sida. Anụ anụ, dụ iya l'utapfu ligbachaaru eligba.
- 18Okpu iya bụ mkpụrukpu onyirubvu bẹ ọ bụ. Oshi-okpa iya bụru mgborígwè.
- 19Oo ya kachaa shii l'iphe, bukpo iphe, Chileke meshiru dobe lẹ mgboko; ọle onye ono, meru iya nụ ono egudejele-a ogu-echi iya zaa ya ntse.
- 20Úbvú úbvú anọduje ewotaru iya iphe, ẹphe metaru; tẹme anụ, bu l'egbudu g'ẹphe ha nọdu anọduje iya ntse ebvu ebvu.
- 21Oozeje lẹ mkpula oshi lotusu; woru onwiya domia lẹ mkpula ẹswa, nọ l'ụda.
- 22Oshi lotusu ono egudeje ẹpfukala, dụ iya nụ gude domia ya. Ẹkali oshi wilo nọ-pee ya mgburugburu.
- 23Mini -nọdu atụ kpereree; o too yedu iya ebvu. Ophu ọ dudu iphe, eme iya nụ m'obetakpoo ẹnyimu Jíódanu gbaa utso sùbe iya l'ọnu.
- 24? Bụ onye sùru iya egude m'ọ nọdu ele iya ẹnya? Tọo ? bụ onye sùru g'ọo-nmata iya swọo ya imi?

Jiobu 41

- 1? Ii-dụ-a ike gude ịkokoro nmata ẹjo-oke-agiyi, bụ Leviyatanu; ọzoo tụa ya eri l'ire woru libe elibe?
- 2? Ii-dụ ike ye iya eri l'imi lipyia; ọzoo woru ịkokoro dzube iya l'agba?

- 3? Ii-dụ-a ike mee ya g'ọ wata ngu arwọ sụ g'ị phụaru iya obu-imemini? ? Oo-gọzeta olu pfuru opfu nụ ngu?
- 4? Ii-dụ-a ike mee g'unu l'iya gbaa ndzụ g'ọ buru ohu ngu jasụ g'ii-nọ-beru?
- 5? Ii-dụ-a ike mekoshi iya g'eemekoshije nwenu-a? Ii-woru iya haarụ unwumboko ibe ngu g'ephe gude bvụ ebvụ?
- 6Ndu agba nghọ; ? ephe e-kwe ngu iya-a onu? Tọo ? ephe e-ke iya l'ẹhu l'ẹhu g'ephe ha agba nghọ obu?
- 7? Ii-dụ-a ike gude mkpirikpu mkpirikpu igwe gbajashia ya akpọ? Tọo ? ii-dụ ike gude ikekee sụwaa ya ishi?
- 8I -byikpọo ya ẹka ebyibyi ophu bẹ ii-nyata-a iphe, gụ l'iya jeru. I tii laphubaedu iya azụ ememe.
- 9I -dobekpọo ẹnya l'ii-mekpe iya; maru l'ọo ụka bẹ i dzuru. I -humakpoo ya nụ ahuma bẹ ike bvụwaru ngu.
- 10Eshinu ọ dudu onye agirigo, nọ iya l'ẹhu sụru kẹ g'o je akpatsu ẹjo-oke-agiyi; ? buchia mube Chileke bẹ nemadzụ sụru k'etso opfu?
- 11? Bụ onye abya asụ l'owa-a iphe iya, ẹka mu dụ baa gẹ mu pfua ya ugwo iya? Noo kele iphemiphe, nọ lẹ mgboko bụ nkemu.
- 12“Mu taa hakwa gẹ mu ta tū onu okpa ẹjo-oke-agiyi ono; taa onu g'ọ dụ-be okpẹhu yee g'ọ bụ-be anụ, dū ùbvù l'ẹnya.
- 13? Bụ onye sụru iya aswa akpọ? ? Bụ onye a-dụ ike parụ odogoro eje iya l'iphu lẹ ya eje iya ya eyeye?
- 14? Bụ onye a-tụkponu ama k'eje iya ajaha onu, o gude phengara phengara eze kpọo okpokuu gbaa mgburugburu?
- 15Okpurukpu iya bẹ iphe, kpọru iya giriri bụ iphe-mgbobuta-ogu, nọchaa huru ahuru; bya anoduchaa nwibe iya ntsentse;
- 16mbụ l'ephe nọchaa onwophẹ ntsentse shingushingu; k'ophu pherephere te eshidu mgbaka iya abahụ iya l'ẹhu.
- 17Ephe rakubecharu nwibe phẹ arakube. Ephe tugbaru nanụ k'ophu a taa tūwadu iya ẹbo.
- 18O -zee uze; icheku-ọku aghashihu. Ẹnya iya dū g'ẹka ẹnyanwu keru paa lẹ nchi-abọhu.
- 19Oku-owa anoduje enwu iya phoophoophoo l'onu. Ẹkoro-ọku eshi iya agba kpitikimu kpitikimu kpitikimu.
- 20Enwuru-ọku eshi iya l'imi akpụ tūtutuu g'ite, e shiberu chiru ẹswa kùbe iya.

- ²¹O -kushi unme l'icheku, oku adudu l'ok gbanwuhu oku; teme oku, enwu phoophoophoo nodu eshije iya l'onu agushihu.
- ²²Okpehu du iya l'olu; k'ophu oomeje ge meji tofu iphe, bukpo onye humaru iya nu.
- ²³Igbigirigbi akpo eh iya rakugbaerupho l'ehu nwibe iya; k'ophu o dudu onye suru iya arakufu.
- ²⁴Okpoma iya kporu gbengugbengu ge mkpuma; mbu l'o shihuru ike ge mkpuma, eegweje iphe.
- ²⁵O -gbalihu agbalihu; ndzu erwuta ndu ike du. Epe egude eh-anmanma gbaphu azu.
- ²⁶E -gbua ya ogu-echi; o to dudu iphe, oo-me iya; ophu o dudu iphe, arwa; ozoo ikekee; ozoo agugu emeje iya.
- ²⁷Igwè be onyajishije g'onye anyapyashi owa. O nodu emeje onyirubvu g'onye eme oshi, rehuru erehu.
- ²⁸Apfu te emejedu iya g'o gbaa oso gbalala. Mkpuma robo nodu adujele iya-a g'o bu udzu, etsushi ekpu iya.
- ²⁹E -chia ya mgboro l'ok gbè du iya g'e chiru iya oshi owa. A -nodu atu iya arwa swiiswiiswii l'ok chile iya-a ochi.
- ³⁰Mkputepho iya atsù nkò g'igburonu ibiribe mbeji. O -wua awuwu l'epuchi l'ok du g'eka e swiru igwe, e gude echi ereshi.
- ³¹O -rwuba l'ogbumini l'ok phuhu uphu g'ite, e shiberu l'oku. Teke o rwubaruru l'eze-enyimu l'ok tsu gbudugbudu g'eka e shiberu manù urwazi.
- ³²Eka o gbaru be mini asoje raa bukahu ebo acha ke phuuphuu. Onye loru enya le mini teke ono l'ok dobesu l'ogbu-mini furu ewo.
- ³³O to dudu iphe, du le mgboko-a, aatu eyeru iya. O bu iphe, e meru dobe le mgboko; ophu ndzu agujeedu iya.
- ³⁴G'iphe ahahabe l'eli; o to dudu iphe, oo-gube iya. Oo ya bu eze l'iphe, bukpo iphemiphe, eku onwiya ekuku."

Jiobu 42

- ¹To budu iya bu; Jiobu bya eyeeru Chipfu onu bya asu iya:
- ²Mu maru-a li suru eme iphemiphe; l'ok to dudu iphe, i tberu k'ememe, a byaru agbanwe agbanwe.
- ³I jiru su: "O bu onye woru enweru egomunggo ke gube Chileke rwutoshia; l'ebe abu l'onye obu maru iphe, oopfu?" Mu kwetakwaru le mu shi epfu iphe, mu amadu ishi iya; iphe, du biribiri k'ophu mu ta asudu iya amaru.
- ⁴I pfukwarupho su: "Ngabekwa nchi; ge mu bya aja ngu aji. O kwa gi zaje mu iya."

⁵O kwa lẹ nchị bẹ mu shi anụmaje ẹka a tū ọnu ngu. Obenu lẹ nta-a bẹ mu hụmawaru ngu l'enyà.

⁶Noo g'o gude mu lawarọ onwomu ashị. Izimanụ lwawaru mu azụ. Wakwa mu l'ophu l'ime urwuku yẹle ime ntụ.

Akpochi opfu ọbu ishi

⁷Tọbodu iya bụ; Chipfu pfuchaa iphemiphe ono yeru Jiobu bya epfukwarupho yeru Elifazu onye Temanu sụ iya: “Ehu eghukwa mu eghu; ọ bụru gụ l'ònyà ngu phẹ ẹphenebo kpatsuru mu iya; kele unu te epfuduru mu iphe, pfuru nhamunha g'onye-ozimu, bụ Jiobu pfuru.

⁸Nta-a bụ iphe, unu e-mekwa bụ g'unu kpụta oke-eswi ẹsaa; yẹ ebili ẹsaa jepfu onye-ozimu, bu Jiobu g'o gude iya gwee ngweja-akpo-ọku nụ mu l'opfu ẹhu unu. Onye-ozimu, bụ Jiobu epfuru nụ Chileke l'iswi ẹhu unu; mu anata epfupfu, o pfuru nụ mu. Mu te emeedu unu iphe, mu gege eme unu l'esweswe ono, unu meru ono. Noo kele unu te epfuduru mu iphe, pfuru nhamunha g'onye-ozimu, bụ Jiobu pfuru.”

⁹Noo ya bụ; Elifazu onye Temanu; yẹ Bilidadu onye Shuwa; waa Zofa, bụ onye Nama gbeshi bya emee iphe, Chipfu sụru g'ẹphe mee. Jiobu bya epfuru nụ Chipfu; ọ nata iphe, o pfuru nụ iya.

¹⁰Tọbodu iya bụ; Jiobu bya epfuchaepho nuchaa Chileke l'iswi ẹhu ọnyà iya phẹ onoya; Chipfu bya emee ya; ọ byakwa enweru ẹku ọzo. Ọ bya emee ya iphe, bukpo iphemiphe, o shi nweru hakota g'o shi ha ugbo labo.

¹¹Unwune iya unwoke mẹ unwanyi; mekpoo onyemonye, shi mahawaru iya nụ byaahaa ibe iya ọzo; ẹphe l'ẹphe riaha nri ọzo. Ẹphe kpọaharu iya iphu; dụaha ya obu k'iphe-ẹhuka ono g'ọ ha, bụ iphe, Chipfu shi woru tukobe iya ono. Ọ nọdu abujeru onye byatashiaru nụ l'ooguderu iya kobo bya egudekwaru iya pho iphe-nchị, e gude mkpola-ododo mee.

¹²Chipfu bya agoru ọnu-oma nụ Jiobu lẹ ndzụ ophu o mechaaru nọfua eme lẹ ndzụ ophu o vuru ọzo nọ. Aturu, o mechaaru nweru dụ ụkporo unu aturu l'unu iri l'ise. Inya-kamelu dụ unu iri l'ise. Eswi iya, e jigbaru ẹbo ẹbo dụ unu ise. Nkapfu-igara dụ unu labo l'ụkporo iri.

¹³Ọ nwuta unwoke ẹsaa bya anwuta unwanyi ẹto.

¹⁴Okpara iya kẹ nwanyị bẹ ọ guru Jiemima bya agua otsota iya Kezaya bya agua k'eto Kerenu-Hapuku.

¹⁵E -jegbabe ẹkameka l'alị ono ta adudu ẹka aahuma onye nwanyị, mapfuru unwu ada Jiobu lẹ mma. Nna phẹ, bụ Jiobu keru iphe, o nweru gbaa phẹ teke o keru iya unwu iya kẹ nwoke.

¹⁶Gẹ Jiobu jechaaru iphe-ẹhuka ono bẹ ọ dzufuaru ndzụ nọ ụkporo apha ẹsaa. Ọ nọdu ndzụ gude enya huma unwu iya; yẹ unwu nwanwa iya phẹ; mekpoo unwu nwanwanwanwanwa; mekpoo nwanwanwanwanwa nwanwa iya.

¹⁷Tɔbudu iya bụ; o mechaa nwụhu kakpọo nka karwee akarwe; nọkpoo ikpoto apha, dū igwerigwe igwerigwe.

Ebvu-oma

Ebvu-oma 1

- ¹ Ehu-utso be a goru nu onye ono, yee ndu ejo-iphe ta achidu idzu lanu; ophu ooshiswetajedu uzo ndu iphe-eji; ophu o nodujedu l'eka ndu epfubyishi ke Chileke no;
- ² mbu onye buepho iphe, aduje iya ree bu ekemu Chipfu; o buru ekemu Chipfu ono be oonoduje arị l'oriri eswe l'enyashi.
- ³ Onye ono du g'oshi, e yeru l'aguga nggele; o nodu ami mebyi l'orwuberu iya; ophu ekwo iya anwulwashihujedu anwulwashihu. Iphe, bukpo iphemiphe, oome abujeeru iya pho upete.
- ⁴ Obenu l'o to budu egube ono be odujeru ndu ejo-iphe. Ephebedua du g'eswa ereshi, pherephere anoduje ezikashi ezikashi.
- ⁵ Oo ya bu le ndu ejo-iphe be ikpe Chileke a-nma; ophu oodobedu ndu iphe-eji l'eka ndu pfuberekoto no.
- ⁶ Noo kele Chipfu aburu ndu pfuberekoto uzo; obenu l'uzo ke ndu ejo-iphe e-me; ephe aburu mkpurupyata.

Ebvu-oma 2

- ¹ Bu gunu kparu iphe, ohamoha gude ehu-eghu aba hanyihanyi? ? O nwuru inw-
agha be ndiphe achi ejo idzu, enwedu ishi?
- ² Ndu eze, bu ishi ndiphe akwakobe k'ogu; ndu-ishi dzukobe; g'ephe tsoo Chipfu ogu; tsokwapho onye ono, o hotaru g'o buru eze ono ogu.
- ³ Ephe suru: "Unu g'anyi nyakashia mkporo ono, ephe gude tugbabe anyi ono! Unu g'anyi gbabushia egbirigba ono, ephe gude kee anyi egbu ono."
- ⁴ Olobuele-a ochi be onye ono, sugaru l'aba-eze iya l'imigwe ono achije phe; mbu l'oo ochi be oonoduje ezi Nnajiuphu.
- ⁵ O -nonyaepho l'o gbanwube iphu pfuaru phe opfu ehu-eghu; l'o gude oke ehu-eghu iya mee ge ndzu rwuta phe.
- ⁶ Oo-su phe: "Mu gudewaa eka mu mee onye mu hotaru; g'o buru eze l'ubvu Zayonu; mbu ubvu ono, mu doberu nsọ ono."
- ⁷ Onye obu, o hotaru obu su: "Mu e-wotaepho ekemu Chipfu tua jala. Noo kele Chipfu suwaru mu; Oo ngu bu Nwa mu. E -shi ntanu-a be mu buakwaa Nna, nwuru ngu nu.
- ⁸ Mu e-woerupho oha l'ophu nu ngu g'o buru okiphe ngu. Mu e-woru mgboko l'ophu nu ngu g'o buru ali-ihe ngu; m'o buru li rworu mu iya.
- ⁹ O buru mgborigwe be ii-gude buru ishi phe; gude iya kua phe pyaapyaa g'ite urwa."

¹⁰Oo ya bụ; unubę ndu bụkwanu eze; unu kwakwaa ęnya! Unubę ndu-ikpe ke mgboko-a; unu ngabękwa nchị l'ọkwa ono, aanmaru unu ono!

¹¹Unu gudekwa ndzụ-agugu wata ejeru Chipfu ozi! Unu egude ęhu-anmanma tee ęswa!

¹²Unu phozeta tsutsua Nwa iya ọbu ọnu l'ọkpa. A nonyaa ęhu wata iya egghu egghu; o mee g'unu bụru mkpurupyata lę gbororo; kele ọ kwa nwiphe, ha nwanshii bę akpatsuje iya ęhu-egghu. ęhu-utso bę a gọru nụ ndu gbapfuru iya nụ; je anọdu iya l'ęka zee ndzụ.

Ebvu-oma 3

Ebvu-oma, Dévidi deru teke ọogbalaru nwa iya Abusalomu

¹Oowaa Chipfu; ndu achị mu lę njọ paakwaru igwerigwe! Ndu wulihuru etso mu opfu bụkwa aguta aguta.

²Ndu epfuru mu nụ sụ lę Chileke ta adzọtadu mu pakwaphọ igwerigwe.

³Ọlobu Chipfu; ọ kwa ngu bụ onye egbobutaję mu nụ. Ọo ngu bụ onye emeje; l'aakwabę mu ùbvù; bya aburu ngu anọduje ekutse mu.

⁴Mu woliru olu mu raku Chipfu. Ọ gbę l'úbvú ono, o doberu nsọ ono zaa mu ęnu.

⁵Mu zę-zeta kuru mgbenya; kua ya teta; kele ọo Chipfu gude ndzụ mu.

⁶Unubuku nemadzụ ugbo iri ono, kwakacharu nọ-pheru mu mgburugburu ono bę mu ta atsukwa ebvu.

⁷Kwolihuro Chipfu; Chileke mu; jiko dzọo mu rọ! Chinaa ndu ọhogu mu ęka lę nchị; chitsushia phe; l'i chishia ndu ejo-iphe eze l'ọnu.

⁸Ọo gube Chipfu adzoje nemadzụ. Gonuru ọnu-oma ngu nụ ndu nke ngu.

Ebvu-oma 4

Ebvu-oma, Dévidi deru nụ onye-ishi ebvu; g'a kpọru une ye iya

¹Zaa mu ęnu mę mu raku ngu; jiko Chileke mu; onye pfuberekoto. I gbaru mu mkpu teke mu shi eje iphe-ęhuka. Jiko phuru mu obu-imemini; numaru epfufu, mu epfu anu ngu!

²Bu teke ole bę unubę unwu-eliphe a-ha egude ùbvù, a kwaberu mu eme iberezi? Bu teke ole bę unu e-yeberu obu l'iphe, enwedu ishi; mbu woru onwunu haaru iphe, abudu ọkpobe iphe?

³Ọle ọphu unu a-maru bu lę Chipfu hotawaru ndu yeru iya obu doberu onwiya. Mu -chiku Chipfu bę ọozaje mu ęnu.

⁴ęhu -ghuahaa unu egghu; unu te ekwekwa g'ęhu-egghu ọbu kpataru unu eme iphe-ęji. Unu zękpoeppo nwapyakọo l'iphe, unu azeje aze; tọo nwehu ria ya ariri; nọ-kirishia.

⁵Gẹ ngweja, unu a-nodu egwe anu Chileke bukwaru ngweja, du iya ree. Unu adakobeje Chipfu.

⁶Ikpoto nemadzu asuje: “? Jiko Chipfu; mebanaaru anyi iphe oma. Mena g'iphe duru anyi le ree!”

⁷Obenu l'ehu-utso ophu i meru; o nodu atso mbedua be kakwa ophu atsoje phe nu; me iphe, epe meberu l'opfu phe mehu shingushingu.

⁸Mu a-tokpoepo nwehu ze-zeta kuru mgbenya l'ehu-guu; kele oo gube Chipfu kpoloko emeje ge mu maru l'o to dudu iphe, suru mu emebata.

Ebvu-oma 5

Ebvu-oma, Dévidi deru nu onye-ishi ebvu; g'a phuru ototo ye iya

¹Jiko Chipfu; ngabenu nchi numa olu mu; Jiko ge ude, mu atsu rwua ngu ro l'ehu!

²Gube Chileke mu, bu onye Eze mu; ngabenu nchi numa mkpu, mu echi echiku ngu! Noo kele oo ngu be mu epfu anu.

³Gube Chipfu; utsu g'utsu be inumaje olu mu. Mu ewojeru mkpa mu dooru ngu giriri; daa ngaberu ngu utsu g'utsu.

⁴Chileke; i ti budu onye ejo-iphe aduje ree. Ophu iikwejedu ge ndu eme ejo-ememe no-kube ngu.

⁵Ndu eku onwophe ta adudu ike apfuru l'iphu ngu. Iphe, bukpo ndu eme iphe, adudu ree be dukota ngu ashi.

⁶Iphe, bukpo ndu anoduje adzu uka be iimeje g'ephe buru mkpurupyata. Ndu egbu ochi; yee ndu ugho be gube Chipfu anoduje akpofu akpofu.

⁷Obenu le mbedua a-byaje l'ulo ngu; eshinu i yeru mu obu. O buru nsumebvu be mu e-gudeje gha iphu l'eze-ulo ngu, du nsọ baaru ngu eja.

⁸Kpo-ziaru mu uzo jiko Chipfu eshinu i bu onye pfuberekoto. Kpo-zinaaru mu uzo; m'obvu ndu achi mu le njo. Mena g'uzo, icho ge mu shia doo mu enya.

⁹O to dudu opfu, shi phe l'onu me nanu, e gude eka. Obu phe bu iwashi tukoru iya sweta. Ire phe be epe egudeje aja nwibe phe ajaja; obenu l'iphe, no phe l'ime obu anoduje eshi ishi g'ilu, gheru onu.

¹⁰Jiko Chileke; mena g'iphe-eji, epe eme tukoru phe l'ishi! G'idzu, epe chiru nmakwaa phe g'onya. Chishichaa phe Chileke; noo kele epe kwefunukawaru ngu ike; teme epe nodu anoduje atupya ngu tekenteke.

¹¹Obenu-a; g'ehu-utso bukwaru ke ndu agbabaje l'ime ngu je anodu zeeru ndzu. G'ephe guje ebvu ehutso jasu le tuutuutu le mimiimii. Gbochitenu phe Chileke! G'iphe, bukpo ndu yeru epha ngu obu etee eswa.

¹²Noo kele oo gube Chipfu agojeru onu-oma nu ndu pfuberekoto. Iigudeje l'oo l'ephe du ngu l'obu gbobuta phe.

Ebvu-oma 6

Ebvu-oma, Dévidi deru nù onye-ishi ebvu; g'e gude olu-edede gụa ya; g'a kpọru une ye iya

- ¹Gube Chipfu; te egudekwa ẹhu-eghu baaru mu mba! Te egudekwa ẹnya, ata ngu kpitikpiti hụa mu àhùhù!
- ²Phuaru mu obu-imemini jiko Chipfu; kele mu eyifuwa eyifu. Mee g'ẹhu dụ mu ike; kele ẹhu mu l'ophu tuko aphukota mu kparikpari.
- ³Teme meji nodu atofukwa mu pho atofu. Su-a; gube Chipfu; ? bukpo a -noo jasụ teke ole b'ii-gbaru mu mkpu?
- ⁴Lwaphutanu azu Chipfu; bya agbafuta mu ge mu dzuru ndzu. Phunaaru mu obu-imemini; dzo mu ro!
- ⁵Kele; onye nwuhuru nu ta anyataekwaru ngu. ? Bu onye a-gbe l'ali-maa ekele ngu ekele?
- ⁶Mu tsuakwaru ude jasụ ike bvụ mu. Enyashi mboku-mboku be mu azeje l'iphe-azee mu kwakota ekwa mkpurumkpuru. Ophu o dudu mboku, a noghajeru g'anya-mini ta agba utso l'iphe, mu azeje aze.
- ⁷Aphu, tsoru mu nu mewaru; mu raa ekwa aphu ragaraga. O mewaru; ophu mu aphu-rweedu aphu-rwe; o buru iphe, ndu achị mu le njo kparu.
- ⁸Unu tuko paru mu haa; unube ndu ono, eme iphe, adudu ree ono; kele Chipfu numawaru olu ekwa mu.
- ⁹Chipfu numawaru arworwo, mu rworu iya. Epfufu, mu epfu anu iya rwuwaru iya nchi.
- ¹⁰G'e kpukwaa ndu ohogu mu iphu le ntu; ge meji tofukwa phe. G'ephe tsekwa iphu egwegwa gude iphere laphu azu.

Ebvu-oma 7

Ebvu-aphu, Dévidi guru nu Chipfu le k'iphe, Kushi, bu oshilokpa Benjaminu pfuru

- ¹Gube Chipfu, bu Chileke mu; o kwa l'ime ngu be mu gbabarụ je ezeeru ndzu mu. Dzonaa mu dzota l'eka iphe, bu ndu achị mu nu; jiko nafuta mu ro!
- ²Odumeka be ephe e-gudekwa mu labushia nanu nanu; g'onye agu dzugburu; ebe adu onye ozo, mu nweru, a-gbaru mu mkpu.
- ³Gube Chipfu, bu Chileke mu; a -gufukwa le-a: l'o nweru iphe, apfuduru-oto, mu mejeru;
- ⁴mbu m'o -buru l'o nweru onye opfu aduduru mu l'iya, mu mejeru ejo-iphe; ozoo le mu natajeru ndu achị mu le njo iphe k'ehuka; le be adu iphe, kparu iya nu;

⁵Ọo ya bu ẹ ndu ọhogu mu ono chia mu gude; zowa mu ro ọtitoli; wowaruro ubvu ono, aakwabeje mu ono rwua le ntu.

⁶Gube Chipfu; kwolihunu l'ehu-eghu! Jiko gbeshinu; nochia ndu ono, l'achi mu le njo ono uzo; mbu ndu ono, atu kpereree abyapfuta mu ono. Kwolihuro Chipfu; kele o kwa gubedua turu ekemu su ẹ ndiphe kpeje ikpe, pfuru oto.

⁷Jiko chikobenu oha l'ophu ono, dzukoberu nu ono; g'ephe gbaa ngu mgburugburu. Li no-zeta l'aba-eze ngu l'ephekerephe.

⁸Oo gube Chipfu bu onye e-kpe ndu ono ikpe. Jiko Chipfu hanaru mu enge; kele mu bu onye pfuberekoto; ophu o dudu eka uta du mu l'ehu.

⁹Gube Chileke, bu onye pfuberekoto; gube onye enyochaje ime obu waa egomunggo; jiko menaa g'ejo-ememe, ndu ejo-iphe anoduje eme buru bugemu! Mee ẹ ndu pfuberekoto nguru anguru!

¹⁰Chileke bu onye egbobutaje mu nu. Oo yebedua adzoje ndu obu phe guru iphoró.

¹¹Chileke bu onye ekpeje ikpe, pfuru oto; bya aburu onye egoshije oke ehueghu iya mboku-mboku.

¹²O -lenyaa enya l'izimanu a-lwa onye ejo-iphe azu; ophu o dudu; be oo-wokwaru ugu-echi iya baa ababa. Uta iya be o setaanaru-a ke kikiki kwaberu ndu obu.

¹³Ejo ngwogu iya ono be o meakwaru dobe; bya edoziwaa apfu iya, o meru o nodu ekegbaa pfupfufu.

¹⁴Lewaro le ndu ejo-iphe tsutagbaaru ime iphe-eji. Ephi bewaru phe l'ezeda ejo eregede. O buru ntuphu-ire be epe e-mechaa nwua.

¹⁵Epe buru iduma; bya ebvumia ya ebvumi; ole oo epebedua e-mechaa dalahu l'iduma obu.

¹⁶Eregede, epe agba l'e-mechakwapho daphutaru phe azu; bya adakoru phe l'ishi. Tem epe-kpanganga, epe meru ndu ozo be a-lwaphutakotaru phe azu.

¹⁷Mbedua a-noduepho ekele Chipfu ekele l'o bu onye pfuberekoto. Mu agua ebvu gude tua onye ono, bu Okalibe-kakota-shii onoya epha.

Ebvu-oma 8

Ebvu-oma, Dévidi deru nu onye-ishi ebvu; g'e gudeje ngwa ebvu, jita gua ya

¹Gube Chipfu, bu Nnajiuphu anyi; epha ngu nyiberu anyibe le mgboko l'ophu. Gube onye woru odu-biribiri ngu dobe doghaa igwe.

²I mewaru unwegirima; waa ndu angu era; epe wata ngu aja ajaja; m'obvu ndu ohogu ngu; shi nno mee g'onu buru ndu ohogu ngu ono; waa ndu eme g'ephe gwata ngu ugwo iphe kpurukudukuu.

³Teke mu leri enya l'igwe l'ophu, bu iphe, i gude mkpushi-eka ngu mee; mbukpoo onwa me kpokpode, buchaa iphe, i meru ememe dobe;

⁴bẹ mu asuje: “? Bụ ụnu bẹ nemadzu bu; kẹ g'iiri-vuje iya? ? Bụ ụnu bẹ unwuliphe, bu kẹ g'iiletajẹ phe ẹnya?”

⁵I meru iya; ophu iphe, unwu imigwe gude sengoo ya ahakpodanu g'ẹnya-nvo. I kpuberu iya o-gbu-nwiiinwii g'okpu-eze; bya akwabẹ iya ubvu, paru ẹka.

⁶I nuru iya ike g'o letakota iphemiphe, i meru ememe ẹnya; bya emee g'iphemiphe nodukota iya l'ẹka;

⁷mbu g'aturu; yee egbu; waa eswi; waa anu-egbudu g'ephe hakota;

⁸mẹ ẹnu, ephe l'eli; waa ẹma, bu lẹ mini; mewaro iphemiphe, bu lẹ mini g'ephe ha nodukota iya l'ẹka.

⁹Gube Chipfu, bu Nnajiuphu anyi; ẹpha ngu nyiberu anyibe lẹ mgboko l'ophu.

Ebvu-oma 9

Ebvu-oma, Dévidi deru nu onye-ishi ebvu; g'e gude olu ebvu, “Ekwá Nwa” gúa ya

¹Gube Chipfu; mu e-gude obu mu l'ophu ekele ngu ekele. Mu a-nodu epfukashi iphe, du biribiri, iimeshigbaa.

²Ehu a-nodu atso mu utso; mu egude ngu ete eswa. Mu agu ebvu etu ngu ẹpha; gube Okalibe-kangokotaru-nu!

³Ndu ohogu mu tsuphuwaru azu! Ephe vukotawaru iphe daa; buru mkpurupyata l'atatiptu ngu!

⁴Noo kele i kpewaru ikpe, pfuru oto bya ahaaru mu enge. I no l'aba-eze ngu kpee ikpe, pfuru nhamunha.

⁵I bawaru ohamoha mba; bya emee ndu ejo-iphe; ephe buru mkpurupyata. I mewaru g'ẹpha phe chihu achihu jasụ lẹ tuutuutu lẹ mimiimii.

⁶Ndu ohogu mu phe bẹ nkephe bvwaru. Ibe phe a-buerupho ochobu jasuru asuru. Mkpukpu phe bẹ i vwaru l'ogbarabvu; ophu o duedu onye nyataru iya nu.

⁷Chipfu a-buru eze jasụ lẹ tuutuutu lẹ mimiimii. O mewaru aba-eze iya ono g'o nguru anguru; k'ophu oo-nodu iya kpee ikpe.

⁸Oo-kpe ndu mgboko ikpe, pfuru oto. Ikpe, ookpeje apfujeru nhamunha.

⁹Ndu eemekpa ehú agbabajẹ Chipfu l'ẹka je ezeeru ndzu. Ndu iphe-ehuka byaru agbabajekwa iya pho l'ẹka je edomia onwophe.

¹⁰Iphe, bukpuo ndu maru ngu nu bu ngu bẹ ephe dakoberu; kele gube Chipfu teke agbadoswee ndu achọ ngu amaru.

¹¹Unu gúa ebvu gude tua Chipfu ono, bu eze lẹ Zayonu ono ẹpha. Unu taru ohamoha onu iphe, o meru.

¹²Noo kele yebdua, akpajẹ ishi ochi onye e gburu egbugbu; bẹ nyatakwaru phe nu. Ndu iphe-ehuka byaru -chia mkpu bẹ o too gbajekwa phe nkuchi.

- ¹³Gube Chipfu; phuru mu obu-imemini! Lewaro ge ndu achi mu le njo akpabe mu ehu! Lofutano mu l'onu-oguzo maa!
- ¹⁴Oo ya bu ge mu anodu l'onu-abata Nwada Zayonu ono jaa ngu ajaja; bya etekwaapho eswa l'i dzotaru mu.
- ¹⁵Ohamoha dalahuru l'iduma, epe buru nweka phe. Epe jewaru ekoda l'ugbu, epe geru l'onwophe.
- ¹⁶Ipe, e gude maru Chipfu bu g'oogudeje ekpe ikpe. Ndu ejo-ipe egudeje ejo-ememe, epe eme gbaberu onwophe onya dalahu.
- ¹⁷Ndu ejo-ipe be aa-chiru ye l'ali-maa; mbu l'ipe, bukpo oha, zoharu Chileke be alakota l'ali-maa.
- ¹⁸Obenu le ndu adudu g'o du phe be o to zohajekwa jasuru; ophu iphe, ndu ukpa ele enya le Chipfu e-meru phe abyadu ala ke mmanu.
- ¹⁹Gbalihukpodapho gube Chipfu; g'o to bu nemadzu l'agbe ka ngu ike! G'e kpee ohamoha ikpe l'iphu ngu!
- ²⁰Chipfu; menaa ge ndzu-agugu rwuta phe; k'ophu ohamoha ono a-maru l'oo nemadzu mmanu be epe bu.

Ebvuo-oma 10

- ¹? Denu g'o gude i je apfuru uzanya Chipfu? ? Denu g'o nwuru i domiru onwongu nta-a, iphe-ehuka byaru-a?
- ²Ndu ejo-ipe egudeje eku onwophe achi nta ndu ukpa. Ge ndu ejo-ipe ono nmalahukwa l'idzu, epe chiru dobe!
- ³Ipe, ndu ejo-ipe egudeje aba abaa bu iphe, epe riru dobe l'obu phe. Chileke be epe anoduje epfutoshi; o buchiaru ndu iphe taa asujeduru asuru be epe anoduje ekutse.
- ⁴Ndu ejo-ipe egudeje eku onwophe jika achu Chileke; ophu epe arivujedu Chileke ililekpo.
- ⁵Ole iphemiphe, epe eme anodujele-a ejehuru phe. Ndu achi phe le njo be epe akakputeje l'anya; ophu epe ahumajedu ikpe ono, Chipfu e-mechaa kpee phe ono.
- ⁶Ipe, epe arije l'obu phe bu l'epe buwaa enwubata enwubata; l'epe ta abyadu epe iphe ehuka.
- ⁷Ipe, ejije phe onu ebushihu ebushihu bu ephu iphu; waa agho ugho waa emekpa nwibe phe ehu. Ipe, epe akpujeru l'onu buerupho eregede yee iphe, adudu ree.

⁸Ephe ewohaję onwophe l'aguga mkpukpu. O buru ęka ono, ephe domiru onwophe; kwaberu ndu a-nmada phe l'ęka ono be ephe anoduje gbushia ndu enwedu iphe, ephe meru.

⁹Oo g'oduma edomije onwiya l'ęgbudu kwaberu unwu-anu-a bu g'ephe edomije onwophe kwaberu ndu ukpa. Teke ephe nmataeru phe pho; ephe akpuru phe lasha.

¹⁰Ndu nmadaru phe l'ęka be ephe egweje arakabya; jasę ephe eworu ęnya kurwua. Ephe egudeje okpehu phe kua ndu ukpa ono pyaapya.

¹¹Ephe arije le Chileke zohakotawaru iphe, ephe meru; mbu le Chileke ghawaru okotazu; ophu o byaędu aghaba ęnya l'azu huma iphe ono, ephe meshiru ono.

¹²Gube Chipfu; gbalihukpodapho agbalihu! Gube Chileke; palikpodapho ęka ngu apali! Ta azohashinu ndu ono, aakpa ęhu ono!

¹³? Dęnu g'o nwuru ndu ejo-iphe anoduje epfutoshi Chileke? ? Bu gunu meru iphe, ephe anoduje ari le Chileke ta adudu iphe, oome phe?

¹⁴Obenu l'itukoje iphemiphe humakota. Iihumaje ndu eje iphe-ęhuka; waa ndu agu aphu. Ophu ichijeduru ęka ye l'iphu utapfu. Ndu ukpa bu gubedua be ephe woru ndzu phe ye l'ęka. Ndu nna phe anodudu buru gubedua agbajeru phe mkpu.

¹⁵Nyakwona ndu ejo-iphe ęka; me ndu eme ejo-ememe. Vokwaa ejo-iphe, ephe eme g'oha. Ba ahakwa me nanu.

¹⁶Oo Chipfu bu Eze jasę le tuutuutuu le mijimiimii. Ndu ohozo a-chihu l'alę ke Chipfu.

¹⁷Gube Chipfu; iphe, ndu du agu rworu ngu be i numawaru. Oo gubedua emeje g'obu nmapfuru phe; teme i nodu anumaje olu phe.

¹⁸Haaru ndu nna phe anodudu enge; waa ndu eemekpa ęhu. G'unwu-eliphe haa phe akpapa ishi.

Ebvu-oma 11

Ebvu, Dévidi deru nu onye-ishi ebvu

¹Mu woru onwomu ye Chipfu l'ęka. ? Dęnu g'o nwuru unu suru ge mu phee ephephe g'ęnu je edomia onwomu l'ęka ubvu du?

²No kele ndu ejo-iphe woharu onwophe seta apfu phe ke kikiki g'ephe gbaa ndu obu phe guru iphoró.

³Eshi ophu e mebyishiwaru itso, gude mkpukpu; ? buhunu gunu b'a suru g'onye-pfuberekoto mebaa ozo?

⁴Chipfu nokwa l'eze-ulo iya, du nsó. ęka aba-eze Chipfu no bukwa l'imigwe. O buru l'ęka ono be onoduje ele ęnya le mgboko. ęnya iya atuko unwu-eliphe l'ophu humagbua.

⁵Chipfu enyochajekwa ndu pfuberekoto; me ndu ejo-iphe enyocha. Obenu le ndu bu iphe, aduje phe ree bu eme ndu ozo iphe kpanganga aduje iya ashi.

⁶Ndu ẹjo-iphe ono bẹ oo-mechaa dzeeru icheku-ọku yẹ ọku-nshiegbe g'igwe edzeje mini-a. Ọ buru ẹjo pherephere, ekpo ọku a-buru okiphe phe.

⁷Chipfu bu onye pfulerekoto. Ndu eme iphe, pfulu nhamunha aduje iya ree. Ndu obu phe guru iphoro e-mechaa huma iphu iya.

Ebvu-oma 12

Ebvu-oma, Dévidi deru nu onye-ishi ebvu; g'e gude olu-edede gua ya

¹Gube Chipfu; bya agbaa mkpu le ndibe ngu bvukwaru! Ọ to dukwa aka aahumakwadu onye ire-lanu.

²Onyemonye anoduje aduru nwibe iya uka; gude opfu-enwunwu eduphushi nwibe phe.

³Gube Chipfu; menaa g'ephe chihu; mbu ndu ono, enwuru nwibe phe opfu-enwunwu ono; waa ndu ono, anoduje etu onwophe oke epha ono.

⁴Mbu ndu ono, asuje l'ephe a-nodu epfu g'o du phe; l'o to dudu onye suru akpo-buru opfu ye phe l'onu. ? Bukwanu onye aturu phe iphe, epe e-pfu?

⁵Obenu le Chipfu byakwanu eyeru phe onu bya asu phe: “O rwuakwaru teke ya a-byapfuta unu; kele ndu ukpa be unu kpatashiwaru ehu; teme ndu adudu g'o du phe gunukawa aphu unu. Nta-a be o rwuwaru teke ya a-gbaru phe mkpu ono, epe ele enya iya ono.”

⁶Iphe, Chipfu pfulu bu okpobe opfu. Opfu iya ono du g'okpobe mkpola-ochaa, a huru l'oku-uzu mgbo esaa g'o gbuchafu egbuchafu.

⁷⁻⁸Ndu ẹjo-iphe dzuakwaru ekameka; teme iphe, unwu-eliphe gharu iphu buwaru ẹjo-ememe. Obenu l'oo gube Chipfu anoduje eche anyi. Ọo ngu eletaje anyi enya mkpurumkpuru g'eka ndu ẹjo-iphe te erwu anyi l'ehu.

Ebvu-oma 13

Ebv, Dévidi deru nu onye-ishi ebvu

¹Gube Chipfu; ? bu jasu teke ole be ii-zoha-beru mu gi zoharu mu owa-a? ? Bu jasu l'ojojoke to? ? Bu jasu teke ole be ighaberu mu azu?

²? Mu a-takpo nshi jasu teke ole? ? Bu je eberu iberu-agma be aphu e-ji mu obu eswe l'enyashi egube owa-a? ? Bu teke ole be ndu ohogu mu a-tu-beru okoo kpua mu?

³Lenaa mu enya gube Chipfu, bu Chileke mu; yenaaru mu onu! Menaa ge mu huma uzo; a nonyaa mu nwuhu!

⁴K'ophu ndu ohogu mu ata asujedu l'ephe mekpewaru mu. Noo kele ndu achi mu le njo be e-tekwa eswa me mu daa.

⁵Obenu l'oo n-yemobu ngu be mu dakoberu. Mu ete eswa; kele mu maru l'ii-dzota mu.

⁶Mu a-nodu agu ebvu anu Chipfu; kele o nwubenukaru mu enya.

Ebvú-oma 14

Ebvú, Dévidi deru nù onye-ishi ebvú

- ¹Ndu eswe anọduje ari l'ime obu phe le Chileke ta adudu. Epe mebyishiwaru onwophe; bya emewaa iphe, Chileke kpọru ashi; ophu o dudu m'onye lanu eme iphe, du ree.
- ²Chipfu gbẹ l'imigwe lee enya le mgboko-a; mbu l'ehu unwu-eliphe; ge ya maru ? o nweru onye kwaru enya? Mbu g'o maru ? o nweru onye acho yebe Chileke?
- ³Ole g'ephe ha tukowaru haa uzo jephuhu. Epe tukowaru g'ephe ha mebyishihukota. O to dudu g'o ka mma l'oo onye lanu eme iphe, du ree.
- ⁴O dukwa ge ndu ono, eme ejo-ememe ono te nwedu egomunggo; mbu ndu ono, anọduje eri ndibe mu g'onye eri nri; ophu epe epfujedu anu Chipfu.
- ⁵Epe bu ndu ndzu-agugu rwutaru; obenu le Chileke no-kube ogbo ndu pfuberekoto.
- ⁶Oobujeru; ndu ukpa -chichaa idzu; unube ndu ejo-iphe akposhia ya. Ole onye epe gbabarú l'ime iya je anodu ezeru ndzu phe bukwa Chipfu.
- ⁷O du mu g'e shi le Zayonu bya adzo ndu Izurelu. Jiekopu e-te eswa; ehu atsọ Izurelu utso me Chipfu dophuepho ndibe iya azu l'onodu phe.

Ebvú-oma 15

Ebvú-oma, Dévidi deru

- ¹Gube Chipfu; ? bu onye e-buru l'ibe ngu? ? Bu onye du idu-agma e-buru l'ubvu ngu, du nsọ?
- ²Oo onye enwedu aka uta du iya l'ehu; bya abuerupho iphe, pfuru oto be onoduje eme; mbu onye efuje ire-lanu, shi iya l'obu;
- ³mbu onye ete evujedu nwibe iya nvu-azu; ophu o mejedu nwibe iya eji; teme ophu opfubuyishijedu nwibe iya efbuyishi.
- ⁴Onye akpoje ndu du Chileke eji ashi. Obenu le ndu atsú Chileke ebvu be ookwabeje ubvu. Onye abujeru; o -ribua nte le ya e-me iphe; l'o mee iphe obu; m'obeta o jee ebuta iya.
- ⁵Onye bu; o -jie nemadzu ugwo; o too ledu enya ntukwase; ophu oorijedu uphalazu l'ishi ndu iswi du mma. Onye eme nno be a ta byakpoda enwubata enwubata jasuru asuru.

Ebvú-oma 16

Ebvú-oma, Dévidi deru

- ¹Gbochite mu gube Chileke; kele oo ngu be mu gbabarú l'eka je ezeeru ndzu.
- ²Mu suru Chipfu; "Oo ngu bu Nnajiuphu nkemu. Iphe, bu iphe, du ree, mu nweru bu ngu be o shi l'eka."

³A bya lẹ ndu duru Chileke nsọ, bu l'eliphe-a; ọo ẹphe bu ndu du akpabiri; buru phe kachaa mu adu l'obu.

⁴Ndu anọduje akpo ephuhuru agwa be mgburwashị-ẹhu phe anọduepho aka shii eje. Mee anu, shi mu l'eka ta abyadu ebe agwa phe ono l'onu; ophu mu abyadu egude onu mu owa-a kpọ-ku phe.

⁵Ọo Chipfu bu okiphe, mu ketaru; bya aburu iya buwaa mu mkpakọ lẹ nswiko; mbu l'oo gube Chipfu be iphe, mu a-buru no l'eka.

⁶Iphe, e ketaru mu du ree dugharu iya eka; mbu l'okiphe nkemu dukpoo ree.

⁷Mu a-nọduje etu Chipfu epha; mbu onye akpo-ziru mu uto. Oobujeru; o -be l'enyashi; obu mu eziahaa mu iphe.

⁸Mu anọdujephọ arị ke Chipfu tekenteke. Tekenteke be o no mu l'ekutara; k'ophu a ta abyadu enwubata mu enwubata.

⁹Noo g'o gude ẹhu nodu atso mu utso. Mu nodu ete eswa l'ime obu mu; kele o to dudu iphe, byaru emebata mu nu.

¹⁰Noo kele mu maru l'i tii hadu mu l'ali-maa. I tii hadu onye nkengu, du nsọ g'o rehu erehu.

¹¹Obenu l'i goshichiaru mu uto ndzu. Anono, mu anọduje l'iphe ngu tekenteke emeje g'ẹhu-utso ji mu obu. Mbu l'anono, mu anọduje l'ekutara ngu e-me g'ẹhu tsoo mu utso jasọ l'ojejoje.

Ebvu-oma 17

Epfufu, Dévidi pfuru nu Chileke

¹Gube Chipfu; ngabe nchi! Numa arworwo, mube onye pfuberekoto arwo ngu! Togbo nchi numa mkpu, mu echi echiku ngu; l'i gbobe nchi numa epfufu, mu epfu anu ngu; kele o to budu ugho be mu agho.

²Jiko byanu ahaaru mu enge! Byanu elee ya enya; maru onye iswi du mma!

³I nyochawaru ime obu mu; teme i huwa mu ama l'enyashi; bya elerwewa mu enya okpobe elerwe. Obenu l'o to dudu iphe-aji, i humaru mu l'ehu. Onu mu be mu kwaberu enya g'o to du ejo opfu, e-shi iya nu.

⁴A -bya l'iphe, nemadzu emegbabe; be mu mekwarupho iphe, i pfuru; buru ubara yeru ndu iwashi.

⁵O bu okpa, i toru be mu anọduje etso; ophu o dudu teke okpa chiswafujeru mu.

⁶Iphe, mu gude epfu anu ngu Chileke bukwa l'ingajeru mu nchi. Gbobenu nchi; numa olu mu!

⁷Jiko menaa ge mu huma n-yemobu ngu ono, du biribiri ono; gube onye abujeru; ndu -gbabarų ngu l'eka je ezeeru ndzu l'i gude ekutara ngu dzota phe l'eka ndu ohogu phe.

- ⁸Jìfujeru mu ẹjo-iphe; ẹgube ono, aajìfuje iphe-ọnuka g'ọ tọ rwupya akpuru ẹnya ono. Woru mu domia lẹ mkpula ñkù ngu;
- ⁹gẹ ndu ẹjo-iphe ta akpa mu ẹhu; mbụ ndu ọhogu mu ono, nọ-pheru mu mgburugburu eme g'ẹphe gbua mu ono.
- ¹⁰Imemini nemadzu ta adujedu phe; teme ẹphe nọdu egudeje onu eku onwophe.
- ¹¹Nta-a abujeru; ẹkameka, mu shiru; ẹphe etsophe mu; nọ-pheru mu mgburugburu; eme g'ẹphe kwatsua mu.
- ¹²Ẹphe adzugabejecha g'agu, ẹgu àgú; ọ nọdu achọ anu, ọo-dzu-gbu; mbụ l'ẹphe aduje g'ẹjo agu, nmakpuru anmakpuru kwabẹru iphe e-shita iya iphu.
- ¹³Gbalihunu gube Chipfu; fọaru phe! Menaa g'ẹphe gbushi ikpere huaru ngu onu l'ali! Gudenu ogu-echi ngu dzọo mu l'ẹka ndu ẹjo-iphe!
- ¹⁴Gudenu ike nkengu nafuta mu l'ẹka phe; mbụ l'ẹka ndu okiphe nkephe kpajiru l'iphe ke mgboko-a; mbụ ndu i meru; ẹphe nweru ẹku; nweru iya k'etsutsu iya; k'ọphu unwu phe me unwu nwanwa phe e-nweru iphe nweru k'anyinyi.
- ¹⁵Obenu lẹ mbẹdua bẹ e-gude apfubekoto huma iphu ngu. Mu -tehuepho bẹ ẹhu-utso e-ji mu obu; noo kele mu a-huma ugbugba ngu.

Ebvu-oma 18

Ebvu, Dévidi, bụ onye-ozì Chipfu deru nù onye-ishi ebvu
Ebvu-a bẹ ọ gụru gude kele Chipfu lẹ mbọku, Chipfu nafutakotaru iya l'ẹka ndu
ọhogu iya l'ophu; kelekele ke Sọlu
 (2Sám 22)

- ¹Mu yeru ngu obu Chipfu. Ọo ngu bụ ike mu.
- ²Ọo Chipfu bụ agbara-mkpuma nkemu; bya aburu ọlo-ezeru-ndzu mu; buru onye agbafutaje mu nù. Ọo Chileke mu bụ agbara-mkpuma, mu agbabajẹ je edomia onwomu. Ọo ya egbobutaje mu g'ọ tọ du iphe, e-me mu nù. Ọ buru iya bụ onye egudeje ọkpehu iya dzọo mu. Ọo l'ime iya bẹ mu agbabajẹ je anọdu zeeru ndzu.
- ³Ọo Chipfu ono, bụ onye gbaru g'a jajẹ iya ajaja ono bẹ mu arakuje; l'ọ dzọo mu l'ẹka ndu ọhogu mu.
- ⁴Anwuhu shiwaa chie mu ẹgbirigba l'olu. Ọla-l'iswi nọdu asọ gborogboro gẹ mini asọ-pfuta mu.
- ⁵Ẹkpa-oyi alì-maa nwua mu kpala. Anwuhu shiwaa woru ọnyà gbabẹru mu.
- ⁶Ọle teke mu eje iphe-ẹhuka bẹ mu rakuru Chipfu. Mu rakuru Chileke mu; sù g'ọ dzọo mu. Ọ gbẹ l'eze-ọlo iya numa olu mu. Mkpu, mu chiru chiku iya rwua ya lẹ nchi.
- ⁷Noo ya bụ; eliphe l'ophu tehu kparikpari; nmakota jiiijiii. Ọkpa úbvú l'ophu nmaghukota anmaghu; kele Chileke bẹ ẹhu eghu eghu.

- ⁸Enwuru oku shi iya l'imi akpu ke tutuutuu. Oku, shi iya l'onu afushi tukoeppo iphemiphe ekepyashi. Icheku-oku iphe, o kepyashiru toko ekameka ata pfupfupfu.
- ⁹O dojaha akpaminigwe ke tararara; o buru iya alufuta. Ochii, gbahuru ke tsukiribaa nodu iya le mkpula okpa.
- ¹⁰O nodu l'eli chierobu phezeta. O buru le nku pherephere be o degeru ezi phuphuphu.
- ¹¹O woru ochii kpuchia onwiya; mbu l'urwukpu, mini jiru ejiji be no-pheru iya mgburugburu.
- ¹²Urwukpu; waa akamini-mkpuma; waa icheku-oku, ata pfupfupfu shi l'ogbunwijnwii ya agushihugba.
- ¹³No iya; Chipfu gbẹ l'akpaminigwe tua egbigwe. A numa olu onye ono, bu Okalibe-kakota-shii ono; bya ahuma akamini-mkpuma; waa icheku-oku, ata pfupfupfu.
- ¹⁴O gbaa apfu iya gude chikaa ndu ohogu iya. Ebemu-igwe be o kuru ke phoo. Epe zekota l'oso gbalachaa.
- ¹⁵Gube Chipfu ziru unme fuu gboru ndu ohogu ngu uja. Eze Enyimu sokahu ebo; k'ophu a humachaa ru ohu-enyimu l'enya; kpuhachaa eka a turu okpa-ali mgboko; a huma.
- ¹⁶Chipfu gbẹ l'imigwe tufu eka; zu mu gburumu; gufuta mu l'ogbu-mini.
- ¹⁷O nafutakwaru mu pho l'eka ejo ohogu mu; me l'eka iphe, bukpuo ndu mu du ashi; noo kele epe kariru mu eka.
- ¹⁸Mboku ono, mu eje iphe-ehuka ono be epe tsoru mu ogu; obenu l'oo Chipfu gbataru mu ike.
- ¹⁹Oo yebedua kutaru mu dobe l'eka mu no tusaru eh. O yeru mu eka nafuta mu l'ogu; kele mu du iya l'obu.
- ²⁰Chipfu buru mu nggo; kele mu bu onye pfuberekoto; mbu kele mu bu onye iswi du mma.
- ²¹Noo kele o buepho uzo, Chipfu toru be mu anoduje etso. Ophu mu egudejedu eme ejo-iphe gbakataru Chileke azu.
- ²²Ekemu Chipfu be mu nwubekotaru enya g'o ha. Teme ophu mu aghajeduru iphe, o suru g'e meje okotazu.
- ²³O to dukpoda eka uta du mu l'ehu l'atatiphu iya. Mu sedekpoerupho onwomu; ophu o dudu ejo-iphe, mu yejeru eka.
- ²⁴Chipfu buru mu nggo; kele mu bu onye pfuberekoto; mbu l'o buru mu nggo; kele mu bu onye iswi du mma l'iphu iya.
- ²⁵Ndu yeru ngu obu be iigoshije l'i yeru phe obu. Ndu duebe ree be iiduebejeru ree.

- ²⁶Ndu obu p̄hẹ ̄ḡuru ìphóró bẹ iidobejeru obu ìphóró. Ì n̄odu emejeru ndu doberu Ẹzo p̄hẹ nḡḡodogo nḡḡodogo g'umere p̄hẹ ḡbaru.
- ²⁷Ndu wozeru onwop̄hẹ alì bẹ ìdzotaje; obenu lẹ ndu eku onwop̄hẹ bẹ iiwozeje alì l'onwongu.
- ²⁸Oo ̄ḡube Chipfu eyejeru mu ọku l'oroku mu. Oo ̄ḡube Chileke mu emeje g'ìphóró d̄uru mu l'ẹka ọchii agba.
- ²⁹Eshinu iyeru mu ẹka bẹ mu e-tso ikpoto ndu ojogu ọgu. Igbulo mkpukpu p̄hẹ bẹ mu e-nyi; eshinu mu lẹ Chileke swì.
- ³⁰Ẹzo Chileke bẹ nt̄ucha ad̄udu m'ilile. Opfu Chileke bukota ọkpobe opfu. Oogbobutaje ndu gbabar̄u l'ime iya je an̄odu zee ndzu.
- ³¹? B̄u onye b̄uba Ọkalibe, d̄u n̄u, ab̄udu Chipfu kpoloko? ? B̄u onye b̄uba agbara-mkpuma, ab̄udu Chileke anyi?
- ³²Oo Chileke emeje g'ike d̄u mu. O b̄uru iya meru Ẹzo mu; ọphu nt̄ucha ad̄udu iya.
- ³³Oomeje ̄ḡe mu p̄f̄u sh̄oshoo ̄ḡe mḡbada; mb̄u l'oomeje ̄ḡe mu p̄f̄uru p̄f̄ushia ike l'eli úbvú.
- ³⁴O z̄uru mu; mu maru g'aalwuje ọgu; k'ọphu b̄u l'ọ t̄o d̄udu m'obeta ọ b̄uru ap̄f̄u, e kweru l'igwe; mu ad̄uele-a ike ḡbaa ya.
- ³⁵Oo ̄ḡube Chipfu egbobutaje mu; shi ẹgube ono dz̄o mu. O b̄uru ẹkutara ngu bẹ iigudeje gudeshia mu. Ẹka iyeru mu ekutseje mu.
- ³⁶I mesataru Ẹzo mu ọsa; g'ọkpa te echiswafu mu.
- ³⁷Mu gude ọso ch̄ia ndu ọhogu mu gude; ọphu mu anmad̄uru nḡgu; jas̄u mu mee p̄hẹ; ẹphe b̄uru mkpurupyata.
- ³⁸Mu chiru p̄hẹ pyakapyaka; k'ọphu ẹphe ta ad̄edu ike gbelibaa ishi ọzo. Ẹphe z̄egbaep̄ho kẹ manyo lẹ mgboru ọkpa mu.
- ³⁹Oo ike nkengu bẹ mu gude eje ọgu. Ndu etso mu opfu bẹ i meru; ẹphe gbushiru mu ikpere.
- ⁴⁰Ndu ọhogu mu bẹ i meru; ẹphe ye ọkpa l'ọso. I mee; mu t̄uko ndu mu d̄u ashì gbushik̄ota.
- ⁴¹Ẹphe chiru mkpu; ọphu ọ d̄udu onye ḡbaru p̄hẹ mkpu. Ẹphe raku Chipfu; ọphu o yed̄uru p̄hẹ onu.
- ⁴²Mu gweru p̄hẹ uji mee p̄hẹ; ẹphe d̄u g'urwuku, p̄h̄erephere zikash̄iru. Mu w̄ushia p̄hẹ g'epuchi lẹ gbororo.
- ⁴³Ì naf̄utaru mu l'ẹka ndu etso mu opfu; bya emee; mu mu b̄uru ishi ọhamoha; k'ọphu ndu mu eshidu maru byaru alwak̄ota mu l'ẹka.

- ⁴⁴Ephe -nụma l'owa-a iphe, mu sụru g'e mee baa; ephe emee ya egwegwa. Ndu ohozo noḍu ephozekotaru mu.
- ⁴⁵Meji tufukota iphe, bu ndu ohozo ono; teme ephe noḍu eshijegbaa l'eka ephe shi wohaa onwophe phuru yeyeye byapfuta mu.
- ⁴⁶Chipfu nokwa ndzu; unu tua agbara-mkpuma nkemu ono epha! Unu kutsee Chileke; l'oo ya bu onye adzoje mu nu!
- ⁴⁷Oo Chileke ejeje agwata ugwo iphe, ndu ohogu mu meru mu. O meru; unwu-eliphe noḍu mu le mkpula.
- ⁴⁸Oonafutaje mu l'eka ndu ohogu mu. Oowolije mu eli woru mu doghaa ndu etso mu opfu. Oogbafutaje mu l'eka ndu emeje nemadzu iphe-kpangangaa.
- ⁴⁹Noo g'o gude mu je a-pfuru l'iphu ohamoha kele gube Chipfu ekele. Mu a-gu ebvu gude tua ngu epha.
- ⁵⁰Onye eze, o hotaru be oomeje g'o mekpee l'ogu. N-yemobu iya be onoduje egoshi onye o wuru manụ l'ishi, bu Dévidi yee oshilokpa iya jasụ le tuutuutuu le mimiimii.

Ebvu-oma 19

Ebvu-oma, Dévidi deru nu onye-ishi ebvu

- ¹Igwe l'ophu atụ onu ge Chileke du-be biribiri. Akpaminigwe noḍu egoshi g'oomebe ona.
- ²Eswe mboku-mboku atụ onu iya; teme enyashi noḍu emeje g'a kabaa ya amaru.
- ³A taa ndu olu phe; ophu o dudu iphe, ephe epfu, aanu le nchi;
- ⁴Obenu l'olu phe tukoru eliphe l'ophu ngakota. Ozi, ephe ezi jerwuchaa eka mgboko beru. Oo Chileke kpuru ulo doberu enyanwu l'imigwe.
- ⁵Enyanwu noḍu eshije l'ulo iya obu kpufuta ge nwoke, luru nwanyi k'ophuu. Ehu noḍu atso iya ge mkparawa, ike du, l'eje atụ ego oso.
- ⁶Oowaje l'akpaminigwe l'ishi lanu; o shi l'ishi iya ono jee jasụ l'ishi iya ophuu. Ophu o dudu iphe, a-su le ya no l'eka okpomoku iya te erwudu iya l'ehu.
- ⁷Ekemu Chipfu du-be ree. Oomeje g'obu gu-zeta nemadzu. Omelali, Chipfu doberu ta angadu anganga. Oomeje g'onye amazidu iphe kabaa amaru iphe.
- ⁸Iphe, Chipfu turu okpa iya pfukwaru nhamunha. Oomeje g'ehu tsoo nemadzu utso. Iphe, Chipfu sụru g'e meje doru risaa. Oomeje nemadzu g'o huma-rweta uzo ree.
- ⁹Ntsumebvu Chipfu du ree. Oo-no jasụ l'ojejoje. Iphe, Chipfu turu l'ekemu bu eviya. O pfukotaruru nhamunha.
- ¹⁰O ka mkpola-ododo agu egu; ge mkpola-ododo ono aduhabe ree. Teme o tsohaa manụ-enwu l'utso; m'o rwuhaa o buru ebakala-enwu.

¹¹Qonoduje alo mube onye-ozu ngu aka le nchi. Obunggo duru iya onye anoduje eme iphe, o pfuru.

¹²Ole o bu; ? bu onye amajeru teke ya eme iphe-aji? Jiko sachafukwa mu iphe-aji, mu meru ophu mu amadu.

¹³Yetaru mube onye-ozu ngu aka jiko ge mu te elekebeje enya mee iphe-aji. Te kwekwa g'iphe-aji kapyabeje mu enya. Oo ya bu ge mu a-dube ree; teme l'a haaru mu enge le mu ta tupa jeduru gube Chipfu.

¹⁴Jiko Chipfu; g'opfu, shi mu l'onu; me iphe, mu aru l'ime obu mu duje ngu ro ree; kele o ngu bu agbara-mkpuma mu; bya aburu onye agbafutaje mu nu.

Ebvu-oma 20

Ebvu-oma, Dévidi deru nu onye-ishi ebvu

¹Ge Chipfu numero olu ngu nta-a, iphe-ehuka byaru ngu-a! Ge Chileke ke Jiekopu jiko gbobutakwa ngu!

²G'o shikwa l'ulo iya, du nsu bya agbaaru ngu mkpu! G'o shinu le Zayonu bya agbaaru ngu odzori!

³G'o nyatakwa iphemiphe, i miru enya nu iya! G'o natakwa ngweja-akpo-oku, i gweru nu iya!

⁴G'o nukwa ngu iphe, du ngu l'obu! G'o mekwaa g'iphe, i tuberu jee g'i tuberu iya!

⁵Oo ya bukwanu g'anyi atua okoo m'anyi numaeppo l'eka nkengu kangoru. Anyi achiliaru Chileke anyi ekwa-ohubama. Ge Chipfu mekwaru ngu iphemiphe, i rwokotaru iya!

⁶Nta-a be mu mawaru le Chipfu dzotawaru onye nkiya, a wuru manu l'ishi. Oogbeje l'imigwe, du nsu ono za iya enu. O nodu egudeje okpehu iya mee g'eka onye eze kangoo.

⁷O nweru ndu achijeru upfu kwee l'ugbo-inya. O nwekwarupho ndu ophu akpojeru obu ye l'inya-ogu phe. Obenu l'anyibedua bu epha Chipfu, bu Chileke anyi be anyi dakoberu.

⁸Ephebedua vukotawaru abali dagbua ochii; obenu l'anyibedua gbeshiru pfuru pfushia ike.

⁹Jiko Chipfu; menaa g'eka onye eze anyi kangoo! Numero olu anyi nta-a, anyi araku ngu-a!

Ebvu-oma 21

Ebvu-oma, Dévidi deru nu onye-ishi ebvu

¹Gube Chipfu; eh u atso eze utso l'okpehu ngu paru aka. Lewaro egube eswa, oote li meru; aka iya kangoo!

- ²I mekpøeru iya phø iphe, dù iya l'obu; øphu ø dùdu iphe, ø saru ønu sù g'i meeru iya, i ti meduru iya.
- ³I gude iphe-øma, nyiberu anyibe gba iya ndzuta; bya eworu okpu-eze, e meru l'økpobe mkpøla-ododo kpube iya l'ishi.
- ⁴O rwøru ngu ndzu; ì nùekwa iya ya phø; mbù mee g'eswe ndzu iya buru ojejoje.
- ⁵Emekpe ono, i meru; o mekpee ono meru; a nõdu akwabè iya ùbvù, parù èka apaa. I meru; ø dù akpabiri; egbu nwìnwii.
- ⁶Mbù-a; l'ì gowaru iya ønu-øma ojejoje; bya emee g'èhu tsoje iya útso; noo kèlè ì nõ swiru iya.
- ⁷Eshinu eze dakoberu Chipfu; tème Okalibe-kakøta-shii yee ya obu bè a ta abyakwa enwubata iya enwubata.
- ⁸Èka ngu a-kpachaarù ndu øhogu ngu g'èphe hakøta. Ndu ì dù ashì bè ii-gude èkutara ngu zù pfùurii.
- ⁹Teke ii-me g'a hùma ngu bè ìi-hù phè l'òku, enwu phoophoophoo; mbù lè Chipfu a-tukoshi phè oke èhu-eghu iya; gude øku tsupyashia phè.
- ¹⁰Ii-mebyishi awa phè lè mgboko-a l'øphu; mekwaaphø g'unwu phè chihu lè mgboko-a.
- ¹¹Èphe a-nødu achikpooru ngu èjo idzu; gbachaarù ngu kè njø; ølè ø tø dùdu øphu e-nweru ishi.
- ¹²Kèlè ii-me g'èphe ye økpa l'oso; m'ì setaèpho apfù ngu kè kíkiki g'ì gbaa phè.
- ¹³Gùbe Chipfu; g'e kutsee ngu l'økpehu parù ngu èka. Anyibedua a-nødu agù ebvu etu ngu èpha l'ike dùnukaru ngu.

Ebvù-øma 22

Ebvù-øma, Dévidi deru nù onye-ishi ebvu; g'e gude olu, “Ele Nchi-abøhu” gù ya

- ¹Chileke mu! Chileke mu! ? Bù gùnu bè o gude ì haa mu nkinyi mu? ? Bù gùnu meru g'o gude ì haa mu adzøta je anødu mu ùzenya? ? I je anødu g'ì tì nùma ude, mu atsu?
- ²Gùbe Chileke mu; eswe l'ènyashi bè mu arakuje ngu; ì tìi zadù mu ènu; obenu lè mu ta anøkirishijedu.
- ³Ole ì dùnaa nsø g'ì dù; mbù gùbe onye eze ndu Ízurèlu anøduje etu èpha.
- ⁴Oo ngu bè nna anyi phè dakoberu. Èphe dakoberu ngu; ì nafùta phè.
- ⁵Èphe rakuru ngu; ì dzøø phè. Èphe dakobe ngu; øphu ì kpuduru phè iphu lè ntù.
- ⁶Obenu lè mbèdua bù mgbashiride; mu ta abùdu nemadzu. Mu bù onye ùnwu-eliphe emeje iphe-iphè; bya abùru onye adùdu iphe, ndiphe gùberu iya.

- ⁷Iphe, bukpo ndu ele mu ɛnya achi mu ochi; aphuru mu egbonu; bya ekweru mu une; su:
- ⁸“O kwa l'ọ sūru l'ọo Chipfu bẹ ya boru mkpa iya. Ngwa; gẹ Chipfu obu nafutanu iya! G'ọ gbafutanu iya; eshinu ọ sūru lẹ ya dū Chipfu l'obu.”
- ⁹Ole ọ kwa ngu-a kufutaru mu l'ẹpho ne mu. O buri ngu meru; mu dakobe ngu; e - shiro teke mu angukwadu ẹra.
- ¹⁰A nwuru mu bya ekuru mu ye ngu l'ẹka. E -shi teke mu no l'ẹpho ne mu bẹ i buhawaa Chileke mu.
- ¹¹Ba nodukwa mu urennya; kele iphe-ehuka nokwa mu phakuu; ophu mu enwekwa onye gbaru mu mkpu.
- ¹²Oke-eswi, du igwerigwe no-pheru mu ano-pee; mbu le obobena ndu Beshanu gbaru mu mgburugburu.
- ¹³Ephe sagbaaru onu galaba eje abyapfuta mu g'oduma, l'agbo uja, ejepfu anu, oobu; taa.
- ¹⁴A wushiru mu ge mini. Iphe, bu okpu, no mu l'ehu gbughashihu. Nta-a be obu mu duwaa g'unwu. O nowa mu l'ime zashihu azashihu.
- ¹⁵Ike bvwuru mu; ophu uvohu aduhedu mu m'ilile. Ire nyakwuru mu l'akpo. I woru mu gwophua l'urwuku ge mu nodu nwuhu.
- ¹⁶Nkuta no-phewaru mu mgburugburu. Ikpoto ndu eme ejo-ememe gbaphewaa mu mgburugburu; kpo-fushia mu aka yee okpa.
- ¹⁷Nta-a be ẹgara agwa mu ọgu. Ndiphe tukowa chiru ɛnya dzee mu ele mu ke phoripho.
- ¹⁸Ephe kee uwe mu l'ehu l'ehu; o be l'ophu mu eyeje l'ime eh; epe tua ido g'ephe maru onye a-chita iya nu.
- ¹⁹Jiko gube Chipfu; ba nodukwa mu urennya! Gube mkpakọ ike mu; bya egwegwa bya agbaaru mu mkpu!
- ²⁰Gbafuta ndzu mu g'e te gude ogu-echi phua mu! Gbafutaro mkpakọ iphe ono, mu nweru ono, bu ndzu mu; ge nkuta ta takashi iya!
- ²¹Jiko dzotanu mu l'onu oduma; waa le mgbaka mpu atsu. Eshinu i zawaru mu enu;
- ²²be mu a-ra epha ngu arara g'unwunna mu phe numa-dzuru. Mu anodu l'edzudzu-oha jaa ngu ajaja.
- ²³Unube ndu atsu Chipfu ebvu; unu jaa ya ajaja! Iphe, bukpo g'unu ha buru oshilokpa Jiekopu; unu kwabeje iya ubvu! Unube oshilokpa Izurelu l'ophu; unu bageru iya eja!

²⁴Kele onye iphe-ehuka byaru b'ẹ o too lejedu olegbulenya; mbu l'ọ tọ gbadojedu onye eje iphe-ehuka; ophu ọ ghajeduru iya azu. Onumaje-chia olu, o gude chiku iya le mkpu.

²⁵Mu a-nodu l'edzudzu-oha jaa ngu ajaja iphe, i meru mu. O buru l'iphu ndu atsu ngu ebvu be mu a-nodu mekota iphe, mu riburu angu ememe.

²⁶Ndu ukpa be epho e-ji. Ndu achọ Chipfu ajaa ya ajaja. "Ge ndzu unu buru ojejoje."

²⁷Unwu-eliphe l'ophu e-mechaa nyata iphe, nwuru nu. Epe adakobe lwapfuta Chipfu. Mbu-a; iphe, bukota ipfu, nokota l'ohamoha be e-mechaa bya abakotaru iya aja.

²⁸Kele iphe, bukotakpoo ali-eze ndiphe l'ophu bukota ke Chipfu; teme o buru iya achikota ohamoha.

²⁹Iphe, bukpuo ndu nweru iphe l'eliphe-a be e-mechaa booru iya obo-iphe; bakwaaru iya pho aja; teme iphe, bukotakpoo ndu e-mechaa buru aja be e-mechakwapho gbua ikpere l'ataphu iya; mbu ndu ta adudu ike edobe onwophe ndzu.

³⁰Ogbo, no l'iphu e-jeru iya ozi. Ogbo, a-bya nu be aa-koru ke Nnajiuphu.

³¹Aa-raru iya ndu e teke anwukpodanu anwunwu le Nnajiuphu bu onye pfuberekoto; mbu l'oo yebedua meru iya.

Ebvu-oma 23

Ebvu-oma, Dévidi deru

¹Chipfu eche mu g'onye eche aturu; ophu ọ dukpoda iphe, uko iya bya aduru mu.

²Oomeje ge mu zee tuta unme l'eka irwu eswa du. O nodu eduje mu eje l'aguga mini, doru nyimunyimu.

³Oomeje g'obu gu-zeta mu. O buru uzo, pfuru oto be oodujeru mu shia g'ee-shi g'epha iya apfuru.

⁴Obetakpoo o buru uzo, du le nsuda, gbahuru tsukiribaa be mu eshi o to dudu ejo-iphe, mu atsu ebvu iya; kele i no swiru mu eswiru. Mgboro me oshi-mpaleka ngu anoduje adu mu obu.

⁵Igweshijeru mu nri ge mu ria l'iphu ndu achi mu le njo. I nodu eteje mu manu, eshi mkpo l'ishi g'eemeje onye a kwaru ebyaa. Okoro mu be iimeje; l'o ji pyimu pyimu ebushihu ebushihu.

⁶O buepho k'oma waa n-yemobu Chipfu a-nodu etso mu jasukpoo ge mu a-no-beru. Mu ebuerupho l'ulo Chipfu jaswaruroya.

Ebvu-oma 24

Ebvu-oma, Dévidi deru

¹Mgboko; yee iphemiphe, no iya nu bukota ke Chipfu; mbu eliphe-a l'ophu; mekpoo ndu bu iya nu;

²Kele ọọ l'eli eze-onyimu be ọ turu ọkpa iya; bya emee ya; ọ nguru anguru l'eli onyimu ime-ali.

³? Bu onye a-du ike nyihu ubvu Chipfu? ? Bu onye a-du ike pfuru l'eka o doberu nsọ?

⁴Oo onye obochi-eka iya labo adudu iphe-eji, du iya nu; teme obu iya gua iphoro; onye te ewoduru obu iya ziberu iphe, bu ugho; teme ophu okpapyabejedu iphe, o meru gua enwa.

⁵Onye ono be Chipfu a-goru onu-oma nu; teme Chileke ono, bu onye adzoje iya nu ono ahaaru iya enge.

⁶Noo g'ogbo, achọ ngu nu aduje bu onoya; mbu ndu achọ g'ephe huma iphu gube Chileke ke Jiekopu.

⁷Unu guhashia onu-abata ono g'o gheru onu! Unu guhashia mgbo ndiche ono; k'ophu eze akpabiri a-bata.

⁸? Bu onye bukpo eze akpabiri obu? Oo Chipfu, bu onye nwe ike yee okpehu; mbu Chipfu onye ejeje ugu lwu-kpee.

⁹Unu guhashia onu-abata ono g'o gheru onu! Unu guhashia mgbo ndiche ono; k'ophu eze akpabiri a-bata.

¹⁰? Bu onye bukpo eze akpabiri ono? Oo Chipfu, bu Okalibe-Kakota-Ike bu eze akpabiri obu.

Ebvu-oma 25

Ebvu, Dévidi deru

¹Oo gube Chipfu be mu gude obu mu g'o ha epfu anu.

²O buru gube Chileke mu be mu dakoberu. Te kwekwa g'e kpua mu iphu le nu; ophu i kwekwa ge ndu ohogu mu turu okoo kpua mu.

³O to dukpoda onye enya du l'eka i no, e kpuleru iphu le nu. Obenu le ndu eme umere, agbaduru phe nu; ebe adu iphe, kparu iya nu be ee-kpu iphu le nu.

⁴Jiko Chipfu; goshinu mu gbororo ngu; menaa g'uzo ngu doo mu enya ree!

⁵Goshi mu uzo, mu e-shije eme okpobe opfu ngu; li zia mu iphe l'onwongu; kele o ngu bu Chileke, l'adzoje mu nu. O buru l'eka i no be enya mu aduje mboku-mboku.

⁶Gube Chipfu; jiko nyatakwa obu-imemini; yee n-yemobu ngu; kele ephe shi l'ojejoje.

⁷Ta nyatakwa iphe-eji, mu meshiru l'okorobya; ophu i nyatakwa le mu shi kwefuru ngu ike. Gude kele i yeru mu obu nyata mu ro; kele i du ree Chipfu.

⁸Chipfu du ree bya aburu onye obu iya guru iphoro. O buru iphe ono meru g'o gude o nodu ezije ndu iphe-eji uzo iya ono.

⁹Ndu wozeru onwophe ali l'iphu iya be onoduje edu g'ephe mee iphe, pfuru nhamunha. O nodu anoduje ezi phe uzo iya.

¹⁰Ndu eme iphe, dụ l'ogbandzu Chipfu; bya eme iphe, ọ sọru g'e meje bẹ Chipfu egoshije lẹ ya yeru obu; bya aburu o-me-g'o-pfuru; mbụ ndu edobeje iphe, ogbandzu ephe l'iya pfuru.

¹¹A makwaru-a l'ejo-iphe, mu meshiru ngu parụ ẹka. Olobu Chipfu; jiko gwaru mu rọ nvụ g'epha ngu apfuru.

¹²? Bụ onye bụkpoo onye atsụ Chipfu ebvu? Onye ono bẹ ọo-kpọ-ziru ọzo, gbaru iya l'eshishi.

¹³Onye ono bẹ iphe a-nọdu aduru lẹ ree mkpürumkpuru. O bụru oshilokpa iya e-nweru alị ono.

¹⁴Ndu Chipfu kpọru obu yeru bụ ndu atsụ iya ebvu. O bụru ndu ono bẹ oomeje g'ephe maru ogbandzu ephe l'iya.

¹⁵Enya mu buepho lẹ Chipfu bẹ ọduje; kele ọ bue ya pho kpoloko bụ onye a-dụ ike zofu mu l'onyà.

¹⁶Ghanaaru mu iphu; phunaaru mu obu-imemini; kele mu nọ nkinyi mu; aphụ tsokwaru mu pho.

¹⁷Iphe, egburwashị mu ẹhu paakwaru igwerigwe. Byanụ ekufuta mu l'iphe-ehuka mu ono!

¹⁸Lenaa enya l'aphu ono, byaru mu nụ ono; yee ejo onodu, mu nọ. Gukotanuru mu nvụ l'iphe-ẹji, mu meru g'ọ ha!

¹⁹Lewarọ ge ndu ohogu mu habe igwe! Lewarọ enya huma ge mu dụ-be phe ashị kparu!

²⁰Chenu ndzụ mu nche; jiko nafuta mu rọ; g'e te kpu mu iphu lẹ ntụ; kele ọo l'ime ngu bẹ mu nọ; ezeru ndzụ.

²¹G'iphe, a-nọdu adzọ mu nụ bụru kele mu bụ onye uta adudu l'ẹhu; bya aburu onye obu guru iphóró; eshinu ọ bụ l'ẹka i nọ bẹ enya mu dụ.

²²Jiko Chileke; gbafutanu ndu Ízurelu l'iphe-ehuka, ephe ejekota g'ọ ha!

Ebvu-oma 26

Ebvü, Dévidi deru

¹Haaru mu enge gube Chipfu; kele ọ tọ dudu ẹka uta dụ lẹ ndzụ mu. Ọo ngu bẹ mu dakoberu Chipfu; ophu ọ dudu teke mu ngajeru anganga.

²Hunaa mu ama Chipfu! Nyochana mu enyocha! Lerwenaa enya elerwe l'ime obu mu waa l'egomunggo mu.

³Kele ọo obu, i yeru mu anọduje akpọ-ziru mu ọzo tekenteke; teme mu nọdu emeje iphe, i pfuru.

- ⁴Mu lẹ ndu ẹregede ta anọgbajekwa; ọphu mu lẹ ndu bu tuko-l'ẹhu-atuko-l'obu aswidu ọswi.
- ⁵Ndzuko ndu anọduje eme ẹjo-ememe bẹ mu akpo-yiru ukuvu; ọphu mu lẹ ndu ẹjo-
iphe anọgbajedu.
- ⁶Mu akwoje ẹka gude goshi l'iswi du mu mma. Mu abya ejephe ọru-ngweja gube
Chipfu mgburugburu;
- ⁷akwa ẹvu; etu ngu ẹpha; epfukashi k'iphe, du biribiri, jinoduje eme.
- ⁸Ulo gube Chipfu bẹ mu yeru obu; mbu ẹka o-gbu-nwiiinwii ngu du.
- ⁹Ba sakobekwa mu lẹ ndu iphe-ẹji o-sa-mpfu; ọphu i dobekwa mu lẹ ndu egbu ọchi
l'oshi lanu;
- ¹⁰mbu ndu buẹpho iphe-ẹji bẹ ẹphe maru ememe; bya aburu eri uphalazu bu iphe,
doru phe ẹnya.
- ¹¹Obenu lẹ ndu nkemu bẹ uta ta adudu m'ilile. Oo ya bu; phunaaru mu obu-imemini;
gbafuta mu ro!
- ¹²Mu pfuru l'eka okpa rwuru mu ali. Mu je l'anodu l'edzudzu-oha tua Chipfu ẹpha.

Ebvu-oma 27

Ebvu, Dévidi deru

- ¹Oo Chipfu bu iphoro, duru mu nu bya aburu onye adzoje mu nu. ? Bu onye bẹ mu
atsukwanu ebvu ozo? Oo Chipfu bu ulo-ezeru-ndu mu. ? Bu onye bẹ ndu iya a-odu
agubaa mu ozo?
- ²Teke ndu eme ẹjo-ememe; mbu ndu achi mu lẹ njo; waa ndu ohogu mu turu kpereree
byapfuta mu g'ẹphe vaa anu mu avuvu; ẹphe evukota abali dagbua ochii.
- ³Obetakpo ndu ojogu no-pee mu mgburugburu; bẹ obu te etedu mu etete. Mbu; o
betakpo nu ndu ohogu mu wulihu tsoo mu ogu; mu adakobe-ẹle-a Chipfu.
- ⁴Oo iphe lanu bẹ mu arwo Chipfu; o buru iphe ono bẹ mu acho. Iphe obu bu ge mu
nodu l'ulo Chipfu jasu lẹ ge mu a-oberu lẹ mgboko-a; ge mu nodukpoephe egbu igo
l'o-du-ubvu Chipfu; teme mu anodukwapho l'eze-ulo Chipfu kpataje iya ishi iphe.
- ⁵Kele mboku, ẹjo-iphe byaru mu bẹ oo-dobe mu l'eka o no; l'o domia mu l'ime mkpù-
ekwa iya; bya eworu mu pfube ephekerephe l'eli mkpuma.
- ⁶Oo ya bu; mu esengoo ndu ohogu mu, no-pheru mu mgburugburu. Mu anodu l'ulo-
ekwa Chileke tua oko gude gwaa Chipfu; gua ebvu; kua nkwa gude tua ya ẹpha.
- ⁷Jiko Chipfu; numanu olu mu me mu raku ngu! Phunaaru mu obu-imemini; zanu mu
enu!
- ⁸Iphe, obu mu pfuru mu bu ge mu choo iphu ngu. O buru iphu gube Chipfu ono bẹ mu
achọ-a.

⁹Ta aghakwaru mu azu; ophu i gudekwa ehu-eghu ngu nwufu mube onye-ozu ngu; kele o bukwawa ngu pho bu onye shi eshinu yetaru mu aka. Ta ajikakwa mu; ophu i gwobekwa mu; gube Chileke, bu onye adzoje mu nu!

¹⁰Nna mu yee ne mu

-gbadokpo mu nu; be Chipfu e-letale mu-a enya.

¹¹Zia mu uzo ngu; jiko Chipfu! Dunaa mu shia uzo, pfuru nhamunha m'obvu ndu akpa mu ehu.

¹²Ta ahakwa mu ge ndu achu mu le njo mee mu g'o du phe; kele ndu agba mu ejo-kekebe wulihuru ebo mu ibo; anmaru mu onwu ehuka ehuka.

¹³Obenu l'iphe, mu chiru upfu kwee bu le mu a-nodu ndzu huma iphe, du ree, shi Chipfu l'eka.

¹⁴Nodu kwaberu Chipfu! Shihukpopho ike; gude aka l'obu; kwaberu Chipfu.

Ebvu-oma 28

Ebvu, Dévidi deru

¹Oo ngu be mu araku Chipfu, bu oke mkpuma nkemu. Ba gbakwa mu nkuchi; kele i -nokirishia be mu le ndu eja taru a-bukwaru iphe lanu.

²Numarokmpu, mu echiku ngu g'i yeru mu aka; ge mu chiliru aka mabe l'uzo akakota-adu-nsu ngu ono.

³Ba tukokwa mu le ndu ejo-iphe kputa kpufu; mbu ndu anoduje eme iphe, adudu ree; ndu anoduje epfuru nemadzu ibe phe opfu emereme l'eli onu; obenu l'iphe, du phe l'obu bu mgbashi.

⁴Pfua phe ugwo iphe, ephe meru; me ugwo ejo-ememe, ephe megbaberu. Pfua phe ugwo iphe, ephe gude aka phe meta; l'i wota iphe, gbaru phe nu wophutaru phe azu.

⁵Eshinu o dudu iphe, ephe guberu ozi, Chipfu jeru; mbu iphe, Chipfu gude aka iya mee l'onwiya; be oo-gude aka iya dojashia phe adojashi; ophu o byadu agbakwaba phe agbakwa.

⁶Unu tua Chipfu epha; kele o numaru mkpu, mu chikuru iya su g'o phuaru mu obu-imemini.

⁷Oo Chipfu bu ike mu; bya aburu onye egbobutaje mu nu. O buru iya be mu dakoberu; o nodu eyeru mu aka. Mu anoduje ete eswa l'ime obu mu. Mu a-gu ebvu gude kele iya ekele.

⁸Oo Chipfu bu ike ndu nkiya; bya aburu ulo-ezeru-ndzu onye o teru manu l'ishi.

⁹Dzotanu ndibe ngu; gonuru onu-oma nu ndu bu okiphe ngu! Chejenu phe nche g'onye eche aturu; l'i heru phe eheru jasu l'ojejeje!

Ebvu-oma 29

Ebvu-oma, Dévidi deru

- ¹Unube unwu imigwe; unu kwabe Chipfu ùbvù! Unu pfua g'òkphehu iya habe shii!
- ²Unu kwabe Chipfu ùbvù, gbaru epha iya! Unu baaru Chipfu eja; mbu onye du nsò bya adu akpabiri.
- ³Olu Chipfu tukoru eze-enyimu ngakota. O buru Chileke ono, du akpabiri ono atu egbigwe; mbu le Chipfu atu egbigwe l'eli eze-enyimu.
- ⁴Olu Chipfu dukwa okpemu; mbu l'olu Chipfu anoduje ada kpa kpa.
- ⁵Olu Chipfu agbawashije oshi sida; mbu le Chipfu agbajashije oshi sida, pfugbaaru l'ubvu ubvu Lebanonu.
- ⁶Oomeje g'ubvu ubvu Lebanonu nmahu jijijiii ge nweawi, apfu ke shoshoo. O nodu emeje ubvu Siriyonu; g'o nma pfula pfula ge nwa atsu, apfu ntụ.
- ⁷Olu Chipfu akuje g'ebemu-igwe.
- ⁸Olu Chipfu anmaje echiegu jijijiii; mbu le Chipfu anmaje echiegu Kadeshi jijijiii.
- ⁹Olu Chipfu anmaje achi yigayiga. Ojishije ekwo l'oswa; mee ya; l'o gheru karaphongu. Onyemonye, no l'ime eze-ulo iya a-nodu epfu; su: "Chileke dukwa biribiri!"
- ¹⁰Chipfu sugaru l'aba-eze iya; utso nodu iya le mkpula; teme o je a-buru eze jasụ l'ojeje.
- ¹¹Chipfu emeje g'ike du ndibe iya. Chipfu agojeru onu-oma nchi-adu-doo nu ndibe iya.

Ebvu-oma 30

Ebvu-oma, Dévidi deru

A guru iya gude woru eze-ulo Chileke ye Chileke l'eka

- ¹Mu a-nodu ekutse gube Chipfu; kele i nalitaru mu lofuta mu l'ime nsu; ophu i kwedu ge ndu ohogu mu teru eswa kpua mu.
- ²Gube Chipfu, bu Chileke mu; mu rakuru ngu g'i yeru mu eka. I bya emee; ehu du mu ike.
- ³Su-a; gube Chipfu; oo ngu lo-litaru mu lofuta mu l'ime ali-maa. I mee ge mu ta abu onye eja taru.
- ⁴Unu gua ebvu gude tua Chipfu epha; unube ndu duru iya nsò! Unu kele iya ekele; l'epha iya du nsò!
- ⁵Kele ehu te eghujedu iya ehu no odu. Obenu l'obu-omaa ya anoduje jasụ teke onye onoya l'a-no-beru. Enya-mini bu-a l'enyashi be aakwashije iya; o -be l'utsu; ebvu ehu-utso adahaa.
- ⁶Teke ehu du mu guu be mu suru l'o to dukpodaa iphe, byaru enwubata mu nu.

⁷Gùbe Chipfu; teke i shi emeru mu obu-oma bẹ i meru; mu nguru anguru g'úbvú. Obenu lẹ teke i gharu mu azu bẹ meji tofuru mu.

⁸Oo gùbe Chipfu bẹ mu rakuru. O buru gùbe Nnajiuphu bẹ mu rworu g'i phuru mu obu-imemini.

⁹Mu sùru: “? Bù urwu gunu bẹ anwuhu mu a-baru ngu? Mbu-a? denu urwu, ii-rita iya me a tua mu eja? ? Bù urwuku, du l'ali a-wata ngu ajaja? ? Bù iya a-ra iya arara l'i bu onye apfushije ike l'iphe, i pfuru?”

¹⁰Jiko Chipfu; nùmaro olu mu; phunaaru mu obu-imemini! Jiko Chipfu; yeru mu ro eka!”

¹¹Ekwa, mu raru bẹ i gbanweru mee; mu teahaa ebvu. I bya eyefu mu uwe-aphu, mu yeru; woru ehu-utso yee mu g'uwe.

¹²Iphe ono bukpoerupho g'ee-shi g'obu mu aguhaha ebvu gude etu ngu epha; g'o to nohe nggujunguji. Gùbe Chipfu, bu Chileke mu; oo ngu bẹ mu a-noduje ekele jasù l'ojeje.

Ebvú-oma 31

Ebvú-oma, Dévidi deru nu onye-ishi ebvu

¹Oo gùbe Chipfu bẹ mu no l'eka ezeru ndzu. B'ekwekwa g'e kpua mu iphu lẹ ntù jasù l'ojeje. Eshinu i bu onye pfuberekoto; nafutanu mu.

²Gbobenuru mu nchi. Bya egwegwa bya agbafuta mu. Bunuru mu agbara-mkpuma, mu a-gbabaje je ezeru ndzu; mbu ulo-ezeru-ndzu, a-dzota mu nu.

³Eshinu i buru mu agbara-mkpuma; bya aburu mu ulo-ezeru-ndzu; dunaa mu l'onwongu; kpo-ziaru mu uzo g'epha ngu apfuru.

⁴Nafuta mu l'onya ono, a gbaberu mu onoya; kele oo l'ime ngu bẹ mu gbabarù je akwachia ndzu mu.

⁵Mu yeru ngu unme mu l'eka. Gbafutanu mu; jiko Chipfu, bu Chileke, apfushije ike l'iphe, i pfuru.

⁶Ndu akpojeru obu yeru ola-l'iswi ono, bu agwa adujekwa mu ashi. Onye mbedua dakoberu bukwa Chipfu.

⁷Mu ete eswa; ehu nodu atso mu utso l'i yeru mu obu; kele i humaru iphe-ehuka, mu jeru; bya amaru lẹ pfupfufu shi egbu mu egbugbu;

⁸ophu i woduru mu ye l'eka ndu ohogu mu. O chia l'i kufutaru mu je edobe l'eka mu no tusaru ehu.

⁹Jiko Chipfu; phunuaaru mu obu-imemini; kele mu nokwa l'oke mkpamehu. Mu rawaru ekwa-aphu jasù mu nodu aphu ragaraga; teme o mekwaapho; ike bvushikotawa mu.

¹⁰Mu gu-gbuakwaru onwomu l'aphu. Mu tsuwa ude; kahụ l'okpehu. Ike bvukotaakwaru mu; kele mu menukawaru ejo-iphe. Okpu, no mu l'ehu nodu akaephe nyegenyege eje.

¹¹Ikpoto ndu achị mu le njo mewaru; mu buru onye ndu obutobu mu akpo ebo l'afu. Ndu mu l'ephe eshi onya be atsuchawa mu ebvu. Iphe, bu ndu humaru mu le gbororo anoduje agbaru mu oso.

¹²Ephe tuko zohaa mu g'aazohaje onye nwuhuru anwuhu-a; mbu le mu duwaa g'ite, tukposhuru atukposhihu.

¹³Kele mu numawaru nvu azu, ikpoto nemadzu anoduje evu mu. Nta-a ta adudu eka mu no ge ndzu ta anodu agu mu. Ephe anoduje achiru mu ejo idzu. Iphe, ephe tberu bu g'ephe wofu ndzu mu.

¹⁴Obenu l'oo ngu be mu dakoberu gube Chipfu. Mu epfu l'oo ngu bu Chileke mu!

¹⁵Ge mu a-no-beru l'eliphe-a bu ngu be o du l'eka. Nafutanu mu l'eka ndu ohogu mu; me l'eka ndu achị mu nu.

¹⁶Lena mube onye-ozu ngu enya-oma! Guderu n-yemobu ngu dzoo mu!

¹⁷Jiko Chipfu; b'ekwekwa g'e kpua mu iphu le ntu; kele mu chikuwaru ngu le mkpu. Oo ndu ejo-iphe ono be ee-kpuchia iphu le ntu; g'onu je a-buru phe kpurukudukuu l'ali-maa.

¹⁸G'onu ono, ephe gude adzu orotophomu ono buru phe kpurukudukuu; kele ephe egudeje eku onwophe; waa akpo nemadzu ebo l'afu; epfubyishi ndu pfuberekoto.

¹⁹Lewaru g'adu ree ngu habe shii; mbu ree ono, i doberu ndu atsu ngu ebvu ono. O buru l'iphu unwu-eliphe be ii-pfuru; meeru ndu gbabaruru l'ime ngu; ezeru ndzu ree ono.

²⁰Iwojeru phe domia le mgboru eka i no; g'ejo idzu, unwu-eliphe chiru ta vu l'ehu phe. O buru l'ibe ngu be iidobeje phe; ge njo opfu te erwu phe l'ehu.

²¹G'e tua Chipfu epa; kele o goshiru mu n-yemobu iya, du biribiri teke mu no le mkpukpu, ohogu no-pheru mgburugburu.

²²Mu chia mkpu su: "Ephuhu mu l'iphu ngu-o!" I numaele-a mkpu, mu chikuru ngu; bya agbaaru mu mkpu.

²³Unu yee Chipfu obu; unube ndu duru iya nso g'unu haa; le ndu Chipfu eleta enya bukwa ndu apfushije ike l'iphe, ephe pfuru. Obenu le ndu eku onwophe be oopfuje ugwo iphe, ephe eme pfurwua phe iya l'ishi.

²⁴Unu shihukpopho ike gude eka l'obu; unube ndu daru ngaberu Chipfu!

Ebvu-oma 32

Évù, Dévidi kwaru

¹Ehu-utso be a goru nu onye Chileke guru nvu l'emeswe, o mesweru iya; mbu onye Chipfu safuru iphe-eji iya.

- ²Èhu-ùtso bẹ a gòru nù onye Chipfu ta agùkoeduru èjo-iphe, o meru; mbù onye te nwedu èregede, dù iya l'èhu.
- ³Teke mu shi nòdu nggujungguji bẹ òkpù, nò mu l'èhu shièpho tsua gworigwori. Ò buru iphe, kparù iya nù bù ude, mu shi anòduje atsu mbòku-mbòku.
- ⁴Kèle eswe l'ènyashi bẹ ìinoduje ada mu èka l'èhu. I shi ègube ono mìchatachaa nwike, dù mu nù g'onye ùguru guderu.
- ⁵Tòbudu iya bù; mu bya emee g'ì maru iphe-èji, mu meru; òphu ò dùdu èjo-iphe, mu meru, dùru òphu mu domiru ngu edomi. Mu sù lẹ mu e-woerupho atùpya, mu tùpyaru Chileke kòshiaru iya. E mechaa; ì bya aguaru mu nvù l'èjo-iphe, mu meshiru.
- ⁶Òo ya bù; g'iphe, bùkpoo ndu eme iphe, dù gùbe Chileke ree pfujeru nù ngu teke èphe nò lẹ mkpa; g'òo-buru teke Eze Ènyimu iphe-èhuka ono byaerupho g'utso; o too rwudu phẹ l'èhu.
- ⁷Òo ngu bù èka mu agbajèru je edomia onwomu. Ò buru ngu a-nòdu eleta mu ènya g'iphe-èhuka ta adapfuta mu; gude ebvu, e gude atù okoo gbaa mu mgburugburu.
- ⁸Òo mu a-nòdu atù-ziru ngu èka; ezikwa ngu phò ùzo, ìi-nòdu eshi. Mu a-nòduru ngu lẹ mgbazi; eletakwa ngu phò ènya.
- ⁹Ba adùkwa g'ìnya; òzoo g'ìnya-mulu; kẹle èphe ta amadù onwophe èkicha. Iphe, eegudeje agò phẹ bù agadagba waa odogoro. I -meduru iya nno; ì tii gòtadu phẹ.
- ¹⁰Ndu èjo-iphe anòduje eje iphe-èhuka, dù igwerigwe! Obenu l'onye dakoberu Chipfu bẹ n-yemobu iya anò-pheje mgburugburu.
- ¹¹G'iphe, Chipfu anòduje eme mee g'èhu tsòo unu ùtso; tẹme unu etekwaphò èswa; unubẹ ndu pfùberekoto! Unu gùa ebvu èhu-ùtso; unubẹ ndu obu gùru ìphóró!

Ebvù-òma 33

- ¹Unu gùa ebvu èhu-ùtso nù Chipfu; unubẹ ndu pfùberekoto! Ò gbaru gẹ ndu obu phẹ gùru ìphóró jajẹ iya ajaja.
- ²Unu kpòo une gude kele Chipfu ekele! Unu gude ogumogu gùa ebvu gude tua ya èpha!
- ³Unu gùa ebvu òphúú nù iya! Unu kùa ya k'èrengete; unu agbòoru iya ògboo!
- ⁴Kèle Opfu Chipfu pfùru nhamunha. Ò buru o-me-g'o-pfuru l'iphemiphe, oome ememe.
- ⁵Iphe, aduje Chipfu ree bù ikpe, pfùru nhamunha; mẹ iphe, pfùru òto. N-yemobu Chipfu jiru mgboko bushihu.
- ⁶Òo opfu-ònu bẹ Chipfu gude mee igwe. Ò buru unme, ò turu atutu bẹ o gude mee iphemiphe, nòkota iya nù.

⁷Ọ bya azakọbe mini, nọ l'enyimu l'ẹka lanu; ọ dọru nyimunyimu. Eze-enyimu bẹ ọ kpachaaru oke ẹka oo-jeberu.

⁸G'eliphe l'ophu tsuje Chipfu ebvu. G'iphe, bukpo ndu nọ lẹ mgboko mgburugburu yejeru iya nsọ;

⁹Kele o pfuru opfu; mgboko l'ophu du. Ọ turu ekemu; iphemiphe dukota.

¹⁰Chipfu emeje g'ìdzù, ohamoha chiru buru iphe-mmanu. Iphe, ndiphe tuberu k'ememe bẹ ookposhije.

¹¹Obenu l'ìdzù ophu Chipfu chiru l'aduje g'ọ chiru iya; jasọ l'ojejoje. Iphe, ọ tuberu k'ememe bẹ oomeje; l'o shi l'ogbo sweru ogbo.

¹²Ehu-utso bẹ a goru nu oha ono, bu Chipfu bu Chileke phe; mbu ndu ọ hotaru; epe buru okiphe nkiya.

¹³Chipfu anọduje l'imigwe lee enya l'eliphe-a humakota unwu-eliphe l'ophu.

¹⁴Oonoduje l'ẹka o bu l'imigwe humakota ndu bu lẹ mgboko g'ephe ha.

¹⁵Ọo yebedua meru oriri nu phe; teme iphemiphe, epe emekota nodu edoje iya enya.

¹⁶Eze ta alwujedu ogu lwuta; opfu l'oo l'ọ chi igwerigwe ndu ojogu. Ophu onye ike du abudu okpehu iya bẹ oogudeje nahu.

¹⁷Inya-ogu bu iphe-mmanu; ọ too dzotadu nemadzu l'egu ogu. G'ike aduhabekwa iya; ọ too dzodu ndzu.

¹⁸Obenu lẹ-a; enya Chipfu dukwa l'ehu ndu atsọ iya ebvu; mbu ndu ono, daru ngaberu n-yemobu iya;

¹⁹k'ophu oo-nafuta phe l'onu onwu; dobe phe ndzu me egu nodu eme.

²⁰Anyi adaje ngaberu Chipfu; kele oo ya bu onye eyejeru anyi ẹka; bya aburu onye egbobutaje anyi.

²¹Oomeje g'obu tsọo anyi utso; kele oo epha iya, du nsọ bẹ anyi dakoberu.

²²Gube Chipfu; jiko goshinu l'i yeru anyi obu; eshinu ọ bu ngu bẹ anyi daru ngaberu.

Ebvu-oma 34

Ebvu, Dévidi deru teke o meaharu g'onye obvu eme l'iphu Abimeleku; Abimeleku chifu iya

¹Mu anọduje etu Chipfu epha tekenteke. Ọ to dudu teke mu byaru ajabuhu iya ajaja.

²Ọo Chipfu bẹ mu gude eku onwomu. Ndu aakpa ehu -numae ya pho; ehu atsọ phe utso.

³Bya ge mu lẹ ngu tuko tua onu Chipfu l'ọ paru ẹka. G'anyi tuko kutsee epha iya.

⁴Mu rakuru Chipfu; ọ za mu enu; bya emee; ndzu gu-buhu mu.

- ⁵Ndu ele ɛnya iya bɛ aa-nwɔja ɔnu-ɔchi; ɔphu ɔ dɔdu teke iphere bya eme pɛ.
- ⁶Mɔbe onye adɔdu g'ɔ dɔ mu chiru mkpu; Chipfu zaa mu ɛnu; bya adzɔtakota mu l'iphe-ɛhuka, mu eje g'ɔ ha.
- ⁷Ojozi-imigwe kɛ Chipfu anɔ-pheje ndu atsɔ Chipfu ebvu mgburugburu. Ọonoduje adzɔ pɛ tekenteke.
- ⁸Unu byanɔ g'unu lɛ Chipfu megbabɛ iphe g'unu ahuma l'ɔ dɔ ree. Ẹhu-utso bɛ a ɔrɔ nɔ ndu gbabarɔ iya l'ɛka je ezeeru ndzɔ.
- ⁹Unu tsuje Chipfu ebvu; unubɛ ndu dɔru iya nsɔ; lɛ ndu atsɔ iya ebvu ta adɔkwa iphe, ɔko iya adɔjeru pɛ.
- ¹⁰Unwu oduma nwechaaru mkpa; tɛme ɛgu nɔdu agujechaa pɛ; obenu lɛ ndu aɔhɔ Chipfu bɛ ɔko iphe-oma ta abyadɔ adɔru.
- ¹¹Unu byaɛdu unubɛ unwegirima; bya angabɛru mu nchi; gɛ mu zia unu g'aatsuje Chipfu ebvu.
- ¹²? Bɔ onye bɛ ɔ dɔ g'asɔ lɛ ndzɔ iya e-tse ogologo; tɛme ɔ dɔkwa iya pɔhɔ g'asɔ lɛ mbɔku-mbɔku a-bujeru iya k'oma?
- ¹³G'onye ono hakwa epfu njo-opfu; hakwaphɔ aghɔ ɔgho.
- ¹⁴Gbakɔtaru eme ɛjo-ememe azɔ; watachia eme iphe, dɔ ree. Kukebeje ɛhu ɔhɔ iphe, e-me gɛ nchi dɔ doo. I -chɔta iya; ta tɔ-wokwa iya ɛka ememe.
- ¹⁵Chipfu anɔduje eleta ndu pɔbɔbɔkoto ɛnya. Ọ nɔdu egbobeje nchi nɔma olu pɛ m'ɛphe raku iya.
- ¹⁶Obenu lɛ ndu eme ɛjo-ememe bɛ ɔogbanwubejeru iphu; bya emee; ɛphe anwɔhu chihu lɛ mgboko.
- ¹⁷Ndu pɔbɔbɔkoto abujeru; ɛphe -raku Chipfu; l'ɔ za pɛ ɛnu; bya anafɔta pɛ l'iphe-ɛhuka, ɛphe eje g'ɔ ha.
- ¹⁸Chipfu anɔ-kubeje ndu mee ala l'opfuru. Ndu eswe bɔ ɛnyashi bɛ ɔodzofutaje.
- ¹⁹Onye pɔbɔbɔkoto ejeje iphe-ɛhuka, dɔ igwerigwe; obenu lɛ Chipfu anafɔtakotaje iya l'iphe-ɛhuka ono g'ɔ hakɔta.
- ²⁰Okpu, nɔ iya l'ɛhu bɛ ɔo-nwubejeru ɛnya; g'ɔ tɔ dɔ mɛ nanɔ, aa-kɔ-ji akɔ-ji.
- ²¹Obenu l'onye ɛjo-iphe, bɔ ɛjo-ememe iya ono e-gbu iya. Ndu kɔrɔ ndu pɔbɔbɔkoto ashɔ bɛ aa-nmaa ikpe.
- ²²Chipfu agbafɔtaje ndu ɛjeru iya ozi; ɔphu ɔ dɔdu onye gbabarɔ l'ime iya je anɔdu zee ndzɔ, a bya anma ikpe m'onye lanɔ.

Ebvu-oma 35

Ebvu, Dévidi deru

- ¹Gùbe Chipfu; ndu etso mu opfu bukwa ngu e-tsolata phe! Ndu ophu etso mu ogu bukwapho gubedua e-je etsolata phe!
- ²Gbalihu; chita ngwogu; waa iphe-mgbobuta-ogu ngu; bya egude gbaaru mu mkpu!
- ³Palia arwa ngu; gude kwachia ndu achi mu le njo uzo! Sunu mu l'ji-dzo mu-a!
- ⁴Ge ndu acho uzo, epe e-shi gbua mu buru ndu e meru iphe-iphere. G'a chiphukwa ndu achiru mu ejo idzu azu. G'a tu phe eberebete!
- ⁵G'ephe du g'eswa ereshi, pherephere zikashiru teke ojozi-imigwe Chipfu a-nodu achi phe oso.
- ⁶G'uzo phe gbakotakwa ochii; chikwapho ke burukutuku teke Ojozi-imigwe Chipfu a-nodu achi phe ikpabaka.
- ⁷Eshinu o dudu iphe, mu meru phe; epe je agbaberu mu onya; bya eworu nsu bua ge mu nwulahu;
- ⁸g'ola-l'iswi tukwaa phe l'upfu. G'onya, epe gbaberu l'onwophe nmatakwa phe. G'ephe nwudakpoe ya pho ke wurukutukumu.
- ⁹Oo ya bu ge mu etee eswa l'ime Chipfu. Ehu atsoahaa mu lo dzotaru mu.
- ¹⁰Mu e-gudekpoo obu mu go ha su: “? Bu onye aturu gube Chipfu? Oo ngu adzotaje ndu ukpa l'eka ndu ka phe okpehu. Mbụ l'inafutaje ndu ukpa; waa ndu adudu go du phe l'eka ndu ana phe nfu.”
- ¹¹Ndu ejo-ekebe wulihuru ebo mu ibo. Epe chikoo iphe, mu amadu kube su loo mu be o shi l'eka.
- ¹²Epe gude ejo-ememe pfa mu ugwo iphe-oma. Oo ya bu le mu duwaa g'onye a togboru nwa maa.
- ¹³Obenu le teke iphe-ememe shi zuu phe be mu wotaru uwe-aphu yee; bya ewoze onwomu ali aswi egu epfu anu Chipfu; ole Chipfu ta anumaduru olu mu.
- ¹⁴Mu nodu aghaphe egbu onwomu egbu l'ekwa go bu onya mu; ozo nwune mu be iphe-ememe zupyaberu. Mu nodukpoo dee eka l'agba g'onye akwa ekwa ne iya, nwuhuru nu.
- ¹⁵Obenu l'opfu duru mbedua; epe gude ehu-utso dzukobe. Epe swiphee mu mgburugburu tsua mu iphe teke mu akwabeduru enya; bya egude njo-opfu alabushi anu mu nanu nanu.
- ¹⁶Ndu gudewaa echi ndu ozo eswe merwushia onwophe l'iphu Chipfu; nodu atagbaru mu ikireze ke nyikinyiki.
- ¹⁷Gube Chipfu; ? bu teke ole be ii-jipyaberu onwongu elekpoepho anyi enya? Dzona mu; a -nonya epe mee mu; mu buru ola-l'iswi! Dzotaro mkpakọ iphe ono, mu nweru ono, bu ndzu mu g'oduma ta adzugu iya!

¹⁸Ọ buru l'ẹka ọha l'ophu dzukọberu bẹ mu a-nọdu kele ngu ekele; mbụ lẹ mu a-nọdu l'iphu ikpoto nemadzu jaa ngu ajaja.

¹⁹B'ekwekwa gẹ ndu ọhogu mu teru ẹswa kpua mu; mbụ ndu kpọru mu ashị; ẹbe adu iphe, mu meru phẹ. Ọphu i kwekwa gẹ ndu ono, mu du ashị ono bvua mu ẹnya ria.

²⁰Kẹle ẹphe te epfujedu opfu nchị-adu-doo; obenu l'iphe, abujeru ozi, duru phẹ nù bu achị idzu g'ẹphe e-shi ghooru ndu du àgù lẹ mkpukpu ugho.

²¹Ẹphe saru ọnu galaba wata mu ebo ibo sù: “Ee! Anyi gudekpoo ẹnya anyi huma iphe, i meru!”

²²Ọle gube Chipfu humanuru-a iphemiphe ono. Jiko ba agbakwa mu nkuchi ọphu i nọdukwa mu ụzenya!

²³Tehu etehu; kwolihuro bya ahaaru mu enge! Gbaaru mu ọdzori; jiko Nnajiuphu mu, bu Chileke mu!

²⁴Gude apfubekoto nkengu haaru mu ro enge; jiko Chipfu, bu Chileke mu! Te kwekwa g'ẹphe teru ẹswa kpua mu!

²⁵Te kwekwa g'ẹphe ria l'obu phẹ sù: “Nta bẹ anyi cho-vuwaru iphe, anyi acho!” Ọzoo g'ẹphe sù: “Nta-a bẹ anyi patawaru iya lwee!”

²⁶G'iphe, bukpuo ndu ete ẹswa ekpu ẹjo-iphe, byaru mu nu bukwaru ndu ee-meru iphere kpua bya atu phẹ ẹberebete. G'e gudekwa iphere dejia phẹ ẹpho; mbụ ndu ono, etu onwophe ophushugbu eje abyapfuta mu ono!

²⁷Gẹ ndu ele ẹnya g'a haaru mu enge gwa ebvu ẹhu-utso tee ẹswa! G'iphe, ẹphe akpujeru l'onu bukwarupho: “G'a tva ọnu Chipfu l'ọ parụ ẹka; mbụ onye ọduje ree me onye-ozu iya nọdu buru l'ẹhu-guu.”

²⁸Ọo ya bu; mu egude ọnu mu pfua k'apfubekoto nkengu. Ọ bukwarupho gẹ mu a-nọdu etu ngu ẹpha mboku-mboku bu onoya.

Ebvu-oma 36

Ebvu, Dévidi, bu onye ejeru Chipfu ozi deru nu onye-ishi ebvu

¹Ọo umere ndu ẹjo-iphe eme emeje gẹ mu pfua l'ime obu mu sù l'ẹphe ta atsukpoda Chileke ebvu atsutsu ophu.

²Kẹle ọonoduje aja onwiya ajaja; mbụ jataberu onwiya k'ophu bu l'ọ toọ humajedu ẹjo-iphe, oome; k'ophu ọo-kpo iya ashị.

³Opfu, eshije iya l'onu bukotaepho ẹjo opfu; waa agho ugho; ophu oomejeedu g'onye kwaru ẹnya; ophu oomekwapho iphe, du ree.

⁴Ọ zewaa l'iphe-azee ya rikobe iphe-ẹji, oo-me. Ọo ẹpho l'uzo, apfuduru-oto bẹ ọopfujeru; ophu ọ dudu iphe, du ẹji, ọojikaje ememe.

⁵Gube Chipfu; n-yemobu nkengu tukokwaru igwe l'ophu voo pfurupfuru. O-me-g'ọ pfuru, i bu rwucharu akpaminigwe.

⁶Apfubekoto nkengu nọdu etse rigorigo g'úbvú, parụ ẹka apaa. Ikpe nkengu dụ wukirima g'eze ẹnnyimu-ime-alị. Gube Chipfu; ọo ngu tukuru anụ, bu l'egbudu yele nemadụ dobe ndzụ.

⁷Lewarọ gẹ n-yemobu ngu bu-be iphe, vu oke-aswa! Ọo iphe ono meru g'o gude unwu-eliphe gbaba lẹ mkpula oke ñkù ngu je anọdu ezeru ndzụ.

⁸Ephe anọduje l'ulo ngu eri gwogwoo lẹ nri, kuru iya nụ; teme i nọdu emeje g'ephe ngua mini l'enyimu ẹhu-utso nkengu.

⁹Kẹle ọo l'eka i nọ bẹ ndzụ futaru. Ọ buru l'eka iphóró nkengu nọ bẹ anyi a-nọdu hụma iphóró.

¹⁰Jiko yekpoekwapho ndu maru ngu nụ obu g'i yeru phe iya; L'i pfubekpoekwapho ẹka ngu ọto g'i pfuberu iya l'ẹhu ndu obu phe guru iphóró.

¹¹B'ekwekwa gẹ ndu eku onwophe zo-sweta mu okpa; ophu i kwekwa gẹ ndu ejo-iphe gude ẹka phe nwufu mu.

¹²Humawaro g'a wushiru ndu anọduje eme iphe, adudu ree; ephe dabyigbaaru; ophu ephe abyadu agbeshibaa agbeshi.

Ebvu-oma 37

Ebvu, Dévidi deru

¹G'onodu ndu eme ejo-ememe te eghujekwa ngu egbu; ophu i kojekwaru ndu apfubeduru ẹka ọto okophoo.

²Kẹle ọ to dukwa g'aa-nọ-beru; ephe anwulwashihu g'eswa; teme ophu ọ dukwapho g'aa-nọ-beru; ephe akposhihu nkụ g'irwu oshi.

³Dakobe Chipfu; meje iphe, dụ ree! Buru l'alị ono buru o-me-g'o-pfuru!

⁴Nodukwa Chipfu l'eka tee eswa; g'oo-nukwanu ngu iphe, bu iphe, agụ ngu nụ.

⁵Woru iphemiphe, iime ememe ye Chipfu l'eka. Dakobe iya; l'oo-meru ngu iya.

⁶Oo-me g'apfubekoto nkengu nwua ke phoo g'iphóró; mbụ lẹ Chipfu a-harụ ngu enge; mee g'iswi-odu-mma nkengu gbua ke nwjinwii g'enyanywu.

⁷Zekpoepheo kupa l'eka Chipfu; taa nshi kwaberu iya. G'ẹhu te eghukwa ngu egbu teke iphemiphe, ndu ejo-iphe eme ejehuru phe; mbụ teke ejo-idzu, ephe achi anọduje eje g'ephe chiru iya.

⁸G'ẹhu te eghujekwa ngu egbu; ophu i vojekwaru oku wua ẹhu. G'ẹhu te eghujekwa ngu egbu; anonya i mee ejo-iphe.

⁹Kẹle ndu anọduje eme ejo-ememe bẹ ee-me g'ephe chiru; obenu l'oo ndu daru ngaberu Chipfu bẹ e-nweru mgboko.

¹⁰Ọ to dudu g'oo-nọ-beru l'e mee gẹ ndu ejo-iphe ta aduhe. Ii-le enya phe; ọle i tii hūmaedu phe.

- 11 Oo ndu dụ àgù bẹ mgboko-a a-buru nkepẹ; tẹme ẹphe enweru ẹhu-guu; nweru iya k'etsutsu iya.
- 12 Ndu ẹjo-iphe achi ẹjo idzu edoberu ndu p̄f̄uberekoto; ataru p̄hẹ ikireze kẹ nyikinyiki.
- 13 Olobuele-a ọchi bẹ Chipfu achi p̄hẹ; kẹle o maru lẹ teke ee-mebyishi p̄hẹ l'abya-a.
- 14 Ndu ẹjo-iphe m̄itaru ogu-echi p̄hẹ; g'ẹphe gbushia ndu ọzo p̄hẹ p̄f̄uru nhamunha; bya eseta ap̄f̄u p̄hẹ kẹ k̄ikiki g'ẹphe gbatsushia ndu ọkpa waa ndu adudu g'ọ dụ p̄hẹ.
- 15 Obenu l'ogu-echi p̄hẹ ono e-mechaa nmabaa p̄hẹ ẹpho; l'a nata p̄hẹ ap̄f̄u p̄hẹ ono nyakwoshia.
- 16 Nwiphe, abadu ishi, ndu p̄f̄uberekoto nweru bẹ kakwa ree eme l'ẹku, ndu ẹjo-iphe dụ igwerigwe kpa k̄ube.
- 17 Kẹle ndu ẹjo-iphe bẹ aa-nafu iphe, ẹphe gude eme ike; obenu lẹ ndu p̄f̄uberekoto bẹ Chipfu b̄u agbarike p̄hẹ.
- 18 Chipfu maru gẹ ndu ọta adudu l'ẹhu a-nọ-beru. Okiphe p̄hẹ a-nọ jas̄u lẹ tuutuutu lẹ m̄imiimii.
- 19 Teke eeje iphe-ẹhuka; bẹ a ta abyadu ekpu p̄hẹ iphu lẹ nt̄u; tẹme ọkpa nri -byaẹpho; nri adule p̄hẹ-a shingushingu.
- 20 Obenu lẹ ndu ẹjo-iphe a-buru mkpurupyata. Ndu ọhogu Chipfu e-phekashihu nanu nanu g'okoko, nọ l'egu. Ẹphe e-phukashihu g'ẹnwuru-ọku.
- 21 Ndu ẹjo-iphe abujeru; ẹphe -jita ọgwo ẹphe eria ya. Obenu lẹ ndu p̄f̄uberekoto bẹ anọduje emeru ndiphe iphe-ọma.
- 22 Oo ndu Chipfu ḡoru ọnu-ọma n̄u e-nweru mgboko-a; obenu lẹ ndu ọ t̄ukwanuru ọnu bẹ a-chihu n̄u.
- 23 Oo Chipfu anọduje akp̄o-ziru nemadzu ọzo g'oo-gudeje aha ọkpa; mee onye ono g'ọ nguru anguru; mb̄u onye eme iphe, dụ Chipfu ree.
- 24 Ụp̄fu -d̄ukpoo ya n̄u; ọ t̄o darwudu ali; kẹle ọo Chipfu gude ẹka iya agbata iya ike.
- 25 Mu shikwa teke mu b̄u nwata n̄owaa jas̄u mu buru ọgerenya nta-a; ọle mu teke ahuma-swee ẹka Chipfu gbadoru onye p̄f̄uberekoto; ọzo ẹka unwu iya arwo nri.
- 26 Onye p̄f̄uberekoto anọduje eme iphe-ọma tekenteke; ọ n̄odu ejieje nemadzu ọgwo. Ee-shi l'ẹhu unwu iya kebe ndu ọzo l'ọma.
- 27 Gbakutaru eme ẹjo-ememe azu; watachia eme iphe, dụ ree; g'iiburu l'ali-a jas̄u l'ojejoje.
- 28 Chipfu bẹ ọ dụ ree g'unwu-eliphe kpeje ikpe, p̄f̄uru nhamunha; ọphu ọ hajedu ndu yeru iya obu ẹka. Ọokwa-chije p̄hẹ akwachi jas̄u l'ojejoje; obenu l'awa ndu ẹjo-iphe bẹ oo-me g'ẹphe chihu.

- ²⁹Ndu p̄f̄uberekoto e-mechaa nweru al̄i-a; buru iya jas̄u l̄e tuutuutuu l̄e m̄iimiimii.
- ³⁰Op̄fu, eshije onye p̄f̄uberekoto l'onu f̄uta b̄u mmamiphe. Ire iya buru iphe, aduje iya n̄u b̄u ep̄fu iphe, p̄f̄uru ọto.
- ³¹Iphe, aduje iya l'obu tekenteke b̄u ekemu Chileke; ọphu ọ haswejedu ọkpa l'ememe iya.
- ³²Ndu ẹjo-iphe ejeje ewoha onwophe kwaberu ndu p̄f̄uberekoto; g'ee-shi g'ọ buru ẹphe
-ghatashia; ẹphe egbua phe.
- ³³Obenu l̄e Chipfu te ekwejedu g'ẹphe daba phe l'ẹka; ọphu a byadu anma ndu p̄f̄uberekoto ikpe; m̄e a kp̄uru phe bya l'ulo-ikpe.
- ³⁴N̄odukpoep̄ho kwaberu Chipfu; tsoje ọzo iya! Ọo ya e-kutse ngu mee ngu l'i nworu al̄i-a. Ii-gude ẹnya ngu h̄uma teke ee-me ḡe ndu ẹjo-iphe ch̄ihu.
- ³⁵Mu h̄umajewaru onye b̄u onye ẹjo-iphe. Ọ dukpoep̄ho g'oshi, ẹhu d̄u guu, jaru d̄u ke kpuchi.
- ³⁶Obenu l'ọ t̄o d̄udu g'a n̄o-beru ọphu ọ d̄uedu. Mu ch̄oo ya nta ch̄oo imo; ọphu mu ah̄umaeduru iya;
- ³⁷Lena ndu ọta ad̄udu l'ẹhu ẹnya; mb̄u-a; gbunaa ndu obu phe ḡuru iph̄oro igo; h̄uma l̄e ndu eme ḡe nch̄i d̄u doo b̄e an̄oduje eje l'ip̄hu l'ip̄hu.
- ³⁸Obenu l̄e ndu emeswe Chipfu b̄e aa-t̄ukoep̄ho mebyishia. Iphe, buk̄poo oshil̄okpa ndu ẹjo-iphe b̄e ee-me g'ẹphe ch̄ihu.
- ³⁹Ọo Chipfu adz̄otaje ndu p̄f̄uberekoto. Ọo ya ab̄ujeru agbarike phe m'ẹphe n̄odu eje iphe-ẹhuka.
- ⁴⁰Mb̄u l̄e Chipfu eyejeru phe ẹka naf̄uta phe. Ọonafutaje phe l'ẹka ndu ẹjo-iphe; shi nno dz̄oo phe; kele ẹphe gbabar̄u l'ime iya je ezeru ndzu.

Ebv̄u-ọma 38

Ebv̄u-ọma, Dévidi ḡuru gude nyatar̄u Chipfu iphe

- ¹Ḡube Chipfu; te egudekwa ẹhu-eghu ngu baar̄u mu mba! Ọphu i gudekwa oke ẹhu-eghu ngu h̄ua mu ah̄uh̄u!
- ²Kele ap̄f̄u nkengu gūekwaru mu ph̄o eguru l'ẹhu; t̄eme ẹka ngu n̄odu apyipyashi mu apyipyashi.
- ³Ẹhu-eghu ngu meru; ọphu ẹhu mu l'ọphu enwedu ẹka te emedu mu ẹhuka. Iphe-ẹji, mu meru ngu woerup̄ho ọkpu mu gbaghashia.
- ⁴Kele ẹjo-iphe, mu meshiru ripyabewaru mu. Ọ n̄odu anyitaberu ẹrwa k'ọphu mu ad̄uedu ike evuvu iya.
- ⁵Onwo, aba mu n̄u eshiwaa t̄ukuruba. Ọ buru iphe, kpar̄u iya n̄u b̄u eswe, mu meru.

- ⁶Mu nɔwa kpɔyoo dɛɛ ɛka l'agba gɔkota aphɔ mkpɔrumkpuru.
- ⁷Okpurukpu kwatakpoo emeshi mu ɛhuka ike; mbɔ l'ɔ tɔ dudu ɛka ɛhu te emedu mu ɛhuka mɛ nanɔ.
- ⁸ɛhu mu l'ophu dahuwaru adzɔlakpa; tɛme obu mu tsukɔtawa gworigwori. Obu te ebvuduru mu ebvuru k'ophu bɔ lɛ mu atsɔshi ude ike.
- ⁹Gɔbe Chipfu; iphe bɔkpoo iphe, agu mu nɔ bɛ i makɔtaru. Ude, mu atsɔ bɛ e te emeduru ngu lɛ mpya.
- ¹⁰Obu etsu mu gbudugbudu; ophu ike adɔkpooedu mu ililekpoo. Mu nɔdu aphɔwaa ragaraga.
- ¹¹Ndu yeru mu obu; yɛɛ ndu mu l'ɛphe eshi
 ɔnyà bufuwaru mu iche. O bɔru iphe-ɛhuka, dapfutaru mu nɔ kparɔ iya. Ndu mu l'ɛphe bɔ abɔbu je apfɔchaaru ɔzenya.
- ¹²Ndu achɔ ɔzo, ɛphe e-shi gbua mu woru ɔnyà gbakarɔ mu. Ndu tɔberu g'ɛphe meka mu iphe nɔdu anmarɔ mu ɔnwu. Oo ɛpho idzu g'ɛphe e-shi ghɔoru mu ɔgho bɛ ɛphe anɔduje achɔ eswe l'enyashi.
- ¹³Mbɛdua dɔkwa g'onye ada nkɔchi; k'ophu bɔ l'ɔ tɔ dudu iphe, mu anɔmaje. Mu dɔkwapho g'onye ete epfudu opfu; woɛrupho ɔnu mu dobe doo.
- ¹⁴Mu dɔwaa g'onye eepfu opfu eyeru; ophu o yedu ɔnu; keɛle o tɔ dudu iphe, eepfu, mu nɔmaru.
- ¹⁵Obenu l'obu mu daru ngabɛru gɔbe Chipfu. O bɔru gɔbe Nnajiuphu, bɔ Chileke mu bɛ a-za mu oku, mu eku ngu.
- ¹⁶Mu sɔru-a: “B'ekwekwa g'ɛphe teru ɛswa kpua mu! Nta-a, ɔkpa chiswafuru mu-a bɛ ɛphe tɔkwaru etu onwophɛ ophushugbu.”
- ¹⁷Keɛle mu anga anganga; tɛme aphɔ nɔdu ejijeɛ mu phɔ obu tekenteke.
- ¹⁸Mu e-pfushi ejo-iphe, mu meshiru ngu. Iphe-eji, mu meru erwukwa mu phɔ l'ɛhu.
- ¹⁹Obenu lɛ ndu ɔhogu mu dɔ igwerigwe ebu jajaja; tɛme ndu mu dɔ ashɔ l'ɛbe adɔ iphe, mu meru phɛ pakwaapho igwerigwe.
- ²⁰Ndu egudeje iphe, dɔ eji pfɔa ɔgwo iphe-ɔma, e meru phɛ bɛ etso mu opfu; keɛle mu anɔduje achɔ iphe, dɔ ree.
- ²¹Ta agwɔbekwa mu gɔbe Chipfu! Gɔbe Chileke nkemu; ba nɔdukwa mu ɔzenya!
- ²²Bya ɛgwɛgwa bya eyeru mu ɛka; gɔbe Chipfu, bɔ onye ndzɔta mu!

Ebvu-ɔma 39

Ebvu-ɔma, Dévidi deru nɔ onye-ishi ebvu, bɔ Jiedutunu

¹Mu sūru lẹ mu a-kwaberu ọzo mu ẹn्या; gẹ mu te egude ọnu mu pfuta ẹjo-iphe. Ọnu mu bẹ mu akuje ngga; mẹ ndu ẹjo-iphe nọ-kube mu.

²Mu woru ẹka hua l'ọnu nọ-kirishia; gẹ mu te epfukponu g'ọ ka mma l'ọo iphe, dū ree. Ole mgburwashị-ẹhu mu akaẹle-a shii eje.

³A nọnyaa; obu wahuahaa mu awahụ; mbụ mu nọdu rinyae ya phọ; ọ gbanwuhu mu l'ẹhu g'ọku. Mu sanaa ọnu wata epfu opfu sụ:

⁴Gube Chipfu; menaa mu gẹ mu maru gẹ mu a-nọ-beru; gẹ mbọku e-beru mu anwuhu! Menaa gẹ mu maru gẹ ndzụ mu dū-be mkpirikpu.

⁵I meru ndzụ mu; ọ dū tsokere. Gẹ ndzụ mu a-nọ-beru ta adudu iphe, ọ bụ l'iphu ngu. Nemadzụ l'ophu tukoerupho buri udzu ọnu.

⁶Nemadzụ g'ogha-phe nno buẹpho pherephere mmanu bẹ ọ bụ. Kpanga kpanga kpanga, ọonoduje eme buẹpho g'ọ buri. Ookpaje ẹku kuberu onwiya; ọle ọ tọ makwanu onye e-mechaa ria ya nu.

⁷Nta-a Chipfu; ? bukpuo gunu bẹ mu ele ẹn्या iya? Ọ kwa ngu bẹ mu daru ngaberu.

⁸Nafuta mu l'emeswe ono, mu mesweru ngu ono! Be mekwa mu gẹ mu buri onye ndu eswe e-kweru une!

⁹Mu shi woru ẹka hua l'ọnu nọ-kirishia; noo kele ọo gubedua bẹ iphe ono, anwukotaru mu nu ono shi l'ẹka.

¹⁰Hanaa mu echi echachi-a, iichi mu-a; kele ẹka iichi mu gbaa gbaa bẹ ike abvukwa mu ree.

¹¹I -baaru nemadzụ mba gude goshi iya ẹjo-iphe, oome bẹ buẹpho gẹ nsu, asukashije iphe-a bụ g'ii-noduje asukashi iphe, dū ree, onye ono nweru. Nemadzụ g'ephe ha bukota udzu ọnu bẹ ephe bụ.

¹²“Numanu epfupfu, mu epfu anu ngu gube Chipfu! Ngabenu nchi lẹ mkpu, mu echiku ngu! Ba gbakwa nkuchi g'i ti numa ekwa, mu ara ekpu ngu! Kele mu bụ onye lwaru alwalwa, lwapfutaru ngu nu; egube ono, ndiche anyi phe shikwapho buri ono.

¹³Jiko hafua mu ro; k'ophu ẹhu a-kabe tso mu utso ozo; teme mu alashiwaro maa.”

Ebvu-oma 40

Ebvu-oma, Dévidi deru nu onye-ishi ebvu

¹Mu takpoerupho nshi kwaberu Chipfu; jasụ ọ ngaberu mu nchi bya anuma olu mu.

²Ọ bya ekufuta mu lẹ nsu, anyi ishi edzu; mbụ kufuta mu l'epuchi, echi eturu, mu nọ ono; bya eworu mu pfube l'eli mkpuma, kporu gbengu; mee mu; mu nguru anguru.

³Ọ bya eworu ebvu ophuu ye mu l'ọnu. Mu gude ebvu ono wata aja Chileke anyi ajaja. Ikpoto nemadzụ a-huma iphe, nwuru nu; ndzụ erwuta phe. Ephe alwaphuta azu bya adakobe Chipfu.

- ⁴Ehu-utso be a goru nu onye bu Chipfu be o dakoberu; ophu o ghaduru ndu eku onwophe iphu; ophu o buro ke ndu shisweru uzo; chiru upfu kwee l'iphe, adudu iphe, o bu.
- ⁵Gube Chipfu, bu Chileke mu; iphe, du biribiri, i meshiru; waa iphe, du ree, i doberu k'emere anyi pakwaru igwerigwe. O to dudu onye suru ngu iya agushigburu. Mu - jeshia ya agushi nanu nanu be o bu aguta aguta.
- ⁶Iphe, agu ngu nu ta abukwa g'a gwaje ngu agwagwa; ozoo g'e wotaru ngu ngweja; obenu le mbedua be i hawaru okpu nchi. Ngweja-akpo-oku; waa ngweja-iphe-eji ta adudu ophu jiru ngu epho.
- ⁷Noo ya bu; mu su: "Waa mu Chileke! Mu byawaru ge mu mee g'e deru ke nkemu le Ekwo Ekemu.
- ⁸Gube Chileke mu; iphe, aduje mu ree bu ge mu mee iphe, du ngu l'uche. Ekemu ngu adujee mu pho l'obu tekenteke."
- ⁹Mu gudewaa onu mu raa k'apfubekoto ngu arara l'eka oha l'ophu dzukoberu. Gube Chipfu; i mawaru le mu te edobedu onu doo.
- ¹⁰Mu ta sumiduru apfubekoto ngu l'ime obu mu. Mu epfukashije l'i bu o-me-g'o-pfuru; bya aburu onye ndzota; ophu mu ahaduru epfuru oha l'ophu g'i yeberu nemadzu obu; teme waa l'i bu onye ire-lanu.
- ¹¹Gube Chipfu; jiko ba ahakwa mu aphuru obu-imemini. Ge n-yemobu waa ire-lanu ngu ono chekwaa mu mkpurumkpuru!
- ¹²Iphe-ehuka, bu aguta l'ogu no-phewaru mu mgburugburu. Ejo-ememe, mu meshiru ripyabewaru mu; k'ophu bu le mu ta aphuedu uzo. O ka egbushi, du mu l'ishi igwerigwe. Nta-a be mu amaedu ge mu e-me iya.
- ¹³Gube Chipfu; jiko dzonaa mu! Byanu egwegwa bya eyeru mu ro eka; jiko Chipfu!
- ¹⁴G'iphe, bu ndu achu uzo, epe e-shi gbua mu bukwaru ndu ee-meru iphere kpua; g'a tukwa phe eberebete. Chiphunu ndu agbaru mu ejo egomunggo azu. G'iphere ji phe iphu!
- ¹⁵G'e meru ujikputeru nu ndu ekweru mu hee.
- ¹⁶G'iphe, bukpo ndu achu ngu nu buru ndu eh u a-tso. Epe anodu ngu l'eka tee eswa. Ge ndu o du g'a su l'i dzoru ndu bukwaru iphe, epe a-kpuru l'onu epfu bu: "Unu tuu onu Chipfu l'o paru eka!"
- ¹⁷Obenu le mbedua bu onye ukpa bya aburu onye adudu g'o du mu; ole Nnajiuphu arile-a oriri eh mu; mbu l'oo gube Chileke bu onye eyejeru mu eka; bya aburu onye adzoje mu nu. Jiko Chileke nkemu; b'akpokwa upfu!

Ebvu-oma 41

Ebvu-oma, Dévidi deru nu onye-ishi ebvu

- ¹Èhu-ùtso bẹ a gọru nù onye anọduje eyeru ndu ụkpa ẹka; kele Chipfu a-dzota iya me ọ -nọdu eje iphe-ẹhuka.
- ²Chipfu l'a-kwachi iya; bya edobe iya ndzụ. L'ọ buru onye a gọru ẹhu-ùtso nù l'eliphe; ọphu Chipfu enwuduru iya eye l'iphe, agụ ndu ọhogu iya.
- ³Chipfu a-gbaru iya mkpu me ọ zẹe l'ẹhu. Oo-me iya l'ọ ka mma l'iphe-ememe, byapfutaru iya nù.
- ⁴Mu sùru Chipfu: Phụnaaru mu obu-imemini. Mu mewaru ngu iphe-ẹji gube Chipfu; jiko menaa ge mu wekọrohu.
- ⁵Ndu ọhogu mu anọduje epfuru mu ẹjo opfu sù l'ọ dụ phe g'a sù le mu nwuhuru; g'a zọhaa mu l'eliphe-a.
- ⁶Teke nemadzụ byaru mu ajiji; oopfuru mu opfu, te erwuduru iya ọhu-ẹpho. Obenu l'iphe, ọochiko edo l'obu iya bụ ịkpoki ntumatu. Ọ -lụfuepho l'ọ jeshia ya edokashi.
- ⁷Iphe, bụkpoo ndu kpọru mu ashi anọduje adzụ-phe taba taba gude epfutoshi mu. Ọ buerupho iphe, bụ iya kachaa ẹji bẹ ọduje phe g'ọ mee mu.
- ⁸Èphe asụ: “Tụswekwa! Ọ kwa ẹjo iphe-ememe eme iya. Ọ turweakwaru iya k'ọphu ọ tọ gbeshibaedu.”
- ⁹Mbụ je akpachaa l'onye mu l'iya eshi ọkpobe eshishi; bya aburu onye mu dakoberu; mbụ l'onye mu l'iya erigbaje nri gbẹchaakwa eme iphe, a-tsuru mu nù.
- ¹⁰Ọlobu gube Chipfu; phụnaaru mu obu-imemini! Meerọ ge mu wekọrohu; k'ọphu mu a-pfu phe ụgwo iphe-a, ẹphe eme mu-a.
- ¹¹Mu maru le mu dụ ngu l'obu; kele i ti kwedu ge ndu ọhogu mu turu okoo kpua mu.
- ¹²Eshinu ụta adudu mu l'ẹhu bẹ ị turu mu gburumu kuru mu dobe l'atatiphu ngu ge mu nọdu jasụ l'ojejeje.
- ¹³G'e tua Chipfu ẹpha; mbụ Chileke ke ndu Ízurelụ; e -shi le gbururu jeye le gbururu. Nokwa g'ọ dụ; bya aburu g'ọ dụ.

Ebvu-oma 42

Èvù, a kwarụ nù onye-ishi ebvu g'ụnwu Kora gụ

- ¹Ọo ge ne ele anọduje atụ heehee achọ nggele, asọ gborogboro g'ọ ngụa mini; bụkwapho g'obu mu atụ heehee achọ gube Chileke.
- ²Èkpiri Chileke; mbụ Chileke, dzụ ndzụ akpọ mu jegiri-jegiri. ? Bụ teke ole bẹ mu a-bya apfuru l'iphu Chileke?
- ³Ènya-mini mu bụwaa nri eswe l'enyashi mu; kele ọ tọ dudu teke ẹphe ta ajidu mu sù: “? Denu ẹka Chileke ngu nọ?”

⁴Nta-a, mu t̄k̄oru iphe, n̄o mu l'obu epfushi-a b̄e mu nyatar̄u ḡe mu shi edujeru igwe ̄oha; anyi at̄uko aw̄u eje ala l'̄ulo Chileke. T̄eme anyi aḡu ebvu ̄ehu-̄utso; bya ekele Chileke ekele l'echilab̄o igwe ̄oha, byaru ̄obo-iphe ono.

⁵Ḡube obu mu; ? d̄enu g'o gude ì n̄odu kp̄oyoo? ? D̄enu g'o gude ì n̄odu etsu mu ophe? G'̄enya ngu d̄u l'̄eka Chileke n̄o; k̄ele mu e-mechaa kele iya ekele; mb̄u onye b̄u iya b̄u onye adzoje mu n̄u;

⁶bya ab̄uru Chileke mu. Obu mu n̄o kp̄oyoo. Noo g'o gude mu n̄odu l̄e mgboru Jīodanu nyata ngu; mb̄u l'alì Ham̄onu l'eli úbvú Miza.

⁷Ogbumini akp̄oru ogbumini okwe. Akparamini ngu m̄e gborogboro, ̄oso s̄o-kputewaru mu.

⁸Ole ̄oobujeru; o -be l'eswe b̄e Chipfu egoshije mu n-yemobu iya. O -be l'̄enyashi l'̄o buerupho iphe, mu a-kp̄uru l'̄onu b̄u aḡu ebvu nkiya. Mu epfukwaph̄o an̄u Chileke ono, b̄u iya gude ndz̄u mu ono.

⁹Mu s̄uru Chileke, b̄u agbara-mkpuma nkemu: “? D̄enu g'o gude ì z̄ohaa mu? ? B̄u gunu kpar̄u iphe, ndu ̄ohogu mu akpa mu ̄ehu; mu n̄odu aḡu aph̄u ejephe?”

¹⁰Ndu achì mu l̄e n̄j̄o an̄oduje ekweru mu une mb̄oku-mb̄oku; s̄u mu: “? D̄enu ̄eka Chileke ngu n̄o?” Iphe ono, ̄ephe an̄oduje epfuru mu ono t̄ukowa ̄okpu mu l'ophu gwee arakabya.

¹¹Ḡube obu mu; ? d̄enu g'o gude ì n̄odu kp̄oyoo? ? D̄enu g'o gude ì n̄odu etsu mu ophe? G'̄enya ngu d̄u l'̄eka Chileke n̄o; k̄ele mu e-mechaa kele iya ekele; mb̄u onye b̄u iya b̄u onye adzoje mu n̄u; bya ab̄uru Chileke mu.

Ebvu-̄oma 43

¹Hanaaru mu enge; Chileke; jiko gbanaaru mu ̄odzori; naf̄ut̄anu mu l'̄eka ndu ono, te eyeduru ngu obu ono! Gbaf̄uta mu l'̄eka ndu ̄ugh̄o; waa ndu apf̄ubeduru-̄eka-̄oto.

²Eshinu ̄o b̄u ḡubedua, b̄u Chileke b̄u agbarike mu; ? d̄enu g'̄o nw̄uru ì gbadoru mu? ? B̄u gunu kpar̄u iphe, ndu ̄ohogu mu akpa mu ̄ehu; mu n̄odu eje ogbee-ogbee?

³Menaa g'̄o b̄uru ìph̄or̄o nkengu; ȳe ire-lan̄u ngu l'a-n̄odu edu mu. G'̄ephe dua mu durwua úbvú nkengu ono, d̄u ns̄o ono; mb̄u g'̄ephe durwua mu ̄eka ì bu ḡedegede.

⁴Noo teke mu a-byarwuta ̄oru-ngweja gube Chileke; mb̄u byapfutakp̄o Chileke ono, b̄u ̄ehu-̄utso mu; bya ab̄uru onye mu ete ̄eswa iya ono. Mu a-kp̄o une gude kele ngu ekele gube Chileke, b̄u Chileke mu.

⁵Ḡube obu mu; ? d̄enu g'o gude ì n̄odu kp̄oyoo? ? D̄enu g'o gude ì n̄odu etsu mu ophe? G'̄enya ngu d̄u l'̄eka Chileke n̄o; k̄ele mu e-mechaa kele iya ekele; mb̄u onye b̄u iya b̄u onye adzoje mu n̄u; bya ab̄uru Chileke mu.

Ebvu-̄oma 44

Évù, a kwar̄u n̄u onye-ishi ebvu g'̄unwu Kora ḡua

- ¹Gùbe Chileke; anyi gudekwa nchì anyi nùma; tème nna anyi oche phẹ kọkwaaru iya phọ anyi; mbụ iphemiphe ono, i mekọtaru phẹ teke ndiche ono.
- ²L'ọo gùbedua l'onwongu chìshiru ndu ọhozo l'alì phẹ; bya eworu ẹphebedua dzabẹ l'alì ono. Lẹ ndu dụ igwerigwe bẹ i mebyishiru; obenu lẹ nna anyi oche phẹ bẹ i meru g'ẹphe jaa àjàjà.
- ³Ọ tọ bụdu ogu-echi phẹ bẹ ẹphe gude lwuta alì ono; tème ọphu ọ bụdu ọkphehu phẹ bẹ ẹphe gude lwu-kpee. Obenu l'ọo ẹkutara ngu; yẹe ọkphehu nkengu; waa anọ-kube ono, i nọ-kube phẹ ono bẹ meru; ẹphe lwu-kpee; noo kele ẹphe túbáru ngu l'ẹnya.
- ⁴Ọo gùbedua bụ Chileke mu; bya aburu onye eze nkemu; mbụ onye emeje g'oshilọkpa Jiékpọ lwu-kpee l'ọgu.
- ⁵Ọo l'ẹka ngu bẹ anyi anọduje nwuta ndu achì anyi lẹ njọ nwuphu azụ. Ọ bụru ẹpha ngu bẹ anyi egudeje zọo ndu wulihuru etso anyi opfu pyakapyaka.
- ⁶Mu ta chiduru upfu kwẹe l'apfu, mu chí; tème mu maru l'ogu-echi mu ta adzọdu mu.
- ⁷Obenu l'ọo ike nkengu bẹ anyi gude lwu-kpee ndu achì anyi lẹ njọ. Ndu anyi dụ ashì bẹ i meru iphere kpua.
- ⁸Ọ kwa Chileke bẹ anyi egudeje eku onwanyi mbọku-mbọku. Ọ bụru gùbe Chileke bẹ anyi e-keleje ekele jasụ lẹ tuutuutu lẹ mịmimii.
- ⁹Ọle ì jìkaru anyi; bya ekpua anyi iphu lẹ ntụ; ọphu iitsojeeduru ndu ojọgu anyi eje ọgu.
- ¹⁰Ị haru ndu ọhogu anyi; ẹphe chiphu anyi azụ; ndu anyi dụ ashì bya atụko ẹku anyi kwaa ọkwata.
- ¹¹Ị gbadoru anyi g'aturu, e doberu k'egbushi. Ị chíja anyi; anyi daa ighagha l'ọhamoha ọzo.
- ¹²Ị wowaru ndibe ngu reshia ọ-du-l'urwu; k'ọphu bụ l'ọ tọ dudu urwu, i ritaru l'ishi phẹ.
- ¹³Ị meru; ndu obutobu anyi nọdu ekweru anyi une. Ndu nọ-pheru anyi mgburugburu nọdu anọduje epfubyishi anyi; bya achì anyi ọchi.
- ¹⁴Ị meru; anyi bụru iphe, ndu ọhozo gude anmaku l'ẹjo ẹtu; bụru ndu bụ: a -nyata phẹ l'e phuphee ishi.
- ¹⁵Mbọku-mbọku bẹ aanọduje eme mu iphe-iphere mmekwase. Iphere nọdu ejije mu iphu pyimu;
- ¹⁶noo kele ndu ọhogu mu; waa ndu eme g'ẹphe gwata mu ugwo-iphe anọduje ekweru mu une; epfutoshi mu.
- ¹⁷Iphemiphe-a mekọtaru l'ẹhu anyi; ọle anyi ta zọhaduru ngu; ọphu anyi emebyiduru ogbandzu anyi lẹ ngu.

- 18** Ophu obu anyi alufuduru l'eka i no; ophu anyi ahataduru okpa zobe k'eshiswe uto ngu.
- 19** Obenu l'i gweru anyi arakabya l'egu nkuta-oswa; bya eworu dadishi-nwamaa phukpute anyi.
- 20** Ome anyi zoharu Chileke anyi; bya achi-liaru agwa ndu ohozo aka;
- 21**? Chileke tege avodu iya vofuta too; eshinu o makotaru iphe, e domiru edomi, du nemadzu l'obu.
- 22** Ole o bu; oo l'iswi ehu ngu be o to dudu teke onwu ta anodujedu eme g'o gbua anyi; teme l'eeme anyi g'aturu, a chitaru eje egbushi.
- 23** Gube Nnajiuphu; tehu etehu! ? Denu g'o gude i je anodu eku mgbenya? Tehu etehu; ba ajikashi anyi ojejoje!
- 24**? Denu g'o gude ophu i yeheduru anyi onu? ? Denu g'o gude i zohaa iphe-ehuka, anyi eje; bya azohaa l'aakpa anyi ehu?
- 25** E mewaru anyi; anyi daa; nmaa epho l'ali; k'ophu bu l'ishi tsutawaru anyi aja.
- 26** Gbalihu yeru anyi aka! Guderu n-yemobu ngu gbafuta anyi!

Ebvu-oma 45

Évù, a kwaru nu onye-ishi ebvu g'unwu Kora gu; g'e gude olu ebvu, "Ojimbvu" gu ya; ebvu ekele-nwanyị

- 1** Obu mu be opfu oma jiru ke pyimu pyimu. Onye mu epfu eyeru bukwa eze anyi. Ire mu duwaa ge mkpara-ekwo onye maru ede ekwo egwegwa.
- 2** I kakota nemadzu, a nwukpooru anwunwu ama mma. Eze-iphe-oma jiru ngu onu ejiji; kele Chileke goru onu-oma ojejoje nu ngu.
- 3** Gube O-gbua-o-turu-ugo; wota ogu-echi ngu kee l'upfu! Gbaphua onwongu akpabiri yee o-gbu-nwijnwii!
- 4** Dunu akpabiri akpabiri nyikoru l'ugbo-inya ngu gbaru kwaakwaakwaa je alwua lwukpee! See iswi ire-lanu; yee ewoze onwonye ali; yee apfubekoto. G'eka-utara ngu mekwaa iphe, du ebvu.
- 5** G'apfu ngu, atsụ nkọ mejeepho tsurumu l'obu ndu ohogu gube eze. G'ohamoha dajekwa kpurumu l'iphu ngu.
- 6** Gube Chileke; oo g'i bu eze nta-a bu g'ii-buru iya jasụ le tuutuutuu le mimiimii. Ikpe, pfuru oto be i gude buru eze; l'eka i bu eze.
- 7** Iphe, pfuru oto du ngu ree; ejo-iphe dukwanu ngu ashi. Noo g'o gude Chileke, bu Chileke ngu hota ngu l'echilabo ndu unu l'ephe bu ogbo; bya awua ngu manu ehu-utso l'ishi.

⁸Uwe ngu g'ọ ha bẹ mkpọ meru; waa alowe; yẹ kashia tuko vọ pfurupfuru. Une, a - gbẹ l'iphe, bukpo unuphu ibe gbẹ eze akpogbaa nọdu emeje g'ẹhu tsoo ngu utso; mbu unuphu ophu e gudegbaa eze-enyi mematagbaa.

⁹Unwada eze hachakwaaru yiru l'unwanyi aakwabẹ ùbvù l'ibe ngu. Oo l'ekutara ngu bẹ eze-nwanyị pfuru. Iphe, o yeru l'ẹhu buru iphe, e meru lẹ mkpọla-ododo Ofi.

¹⁰Ngabẹ nchị gbẹ ada-eze! Jiko rikwaa iphe-a, mu abya epfupfu-a ariri! Zohakota ndibe unu; waa ndu nna ngu phẹ!

¹¹Lẹ mma, iima meakwaru; i nọdu agụ eze ẹgu. Eshinu o bu iya bu nnajiuphu ngu; phozejekwaru iya!

¹²Ndu Taya a-nukwa ngu iphe kẹ mmanu; teme ndu nweru iphe emeahaaru ngu ree; g'eeshi g'ephe tuba ngu l'anya.

¹³Ada eze bẹ nọ l'o-gbu-nwiiinwii iya; e duba iya l'ulo. Uwe iya bẹ e gude oghu mkpọla-ododo kwee.

¹⁴E yeru iya uwe, e meru ẹrengete duru ejepfu eze. Unwumboko ibe iya nọdu etso iya l'azu. Ephebedua bẹ eedukwapho eduju eze.

¹⁵Ehu atso phẹ utso; ephe nọdu ete ẹswa; e duru phẹ abahu l'ibe eze.

¹⁶Gbẹ eze; oo unwu ngu bẹ a-nochi ẹnya ochochoroche ngu phẹ buru eze. O buru phẹ bẹ ii-me g'ephe buru ishi lẹ mgboko mgburugburu.

¹⁷Mu e-me g'a nyatajẹ ngu; e -shi l'ogbo sweru ogbo. Oo ya bu g'ohamoha ekeleje ngu ekele jasu lẹ tuutuutuu lẹ mimiimii.

Ebvu-oma 46

Ebvu, e deru nọ onye-ishi ebvu g'unwu Kora gude olu unwumboko gụ

¹Oo Chileke bẹ bu onye anyi nọ l'eka ezeru ndzu; bya aburu iya bu ike anyi. Ookwagebeje akwagebe eyeru anyi ẹka m'anyi nọdu eje iphe-ehuka.

²Oo ya bu l'anyi ta abyakwa l'atsụ ebvu; m'obeta mgboko gha igharaphu; mbu m'obeta a pata úbvú l'ophu parụ je echiee l'echi ogbu-enyimu;

³mini, nọ iya nọ phua oke epfu; byaa gbulagbula byaa mebyikpoo gbukuu-gbukuu; k'ophu úbvú angagbaa anganga.

⁴O nweru enyimu ophu du nọ. Mini, shi iya nọ emeje g'ẹhu tsoo mkpukpu kẹ Chileke utso; mbu ẹka du nsọ, Okalibe-kakota-shii bu.

⁵Chileke nokwa lẹ mkpukpu iya; k'ophu bu l'ọ to dudu iphe, byaru eme iya nọ. Nchi - bya abohu l'obyawaa bya agbaaru iya mkpu.

⁶Ndu ohozo gude ẹhu-eghu aba hanyihanyi. O mee; ali-eze phẹ nọdu angakota anganga; ole Chileke wolierupho olu gbọoru phẹ uja; Eliphe l'ophu rwushihu.

⁷Chipfu, bu Ọkalibe-Kakọta-Ike bẹ nọkwa swiru anyi. Ọ kwa Chileke kẹ Jiékoju bu onye anyi nọ l'ẹka ezeru ndzụ.

⁸Byanụ ahụma iphe, Chipfu meru! Bya ahụma g'o meru; mgboko buru mkpurupyata!

⁹Oogboje oju l'eliphe l'ophu. Ọogba-jishije apfu bya emebyishia arwa; bya eworu ugbo-inya oju kpokota oku.

¹⁰Ọ suru: “Unu nọdu doo; g'unu amaru l'oo yẹbedua bu Chileke. Ndu ọhoro a-tu onu lẹ yẹbe Chileke parụ ẹka; mbụ l'aa-tu onu iya l'eliphe mgburugburu lẹ ya parụ ẹka.”

¹¹Chipfu, bu Ọkalibe-Kakọta-Ike bẹ nọkwa swiru anyi. Ọ kwa Chileke kẹ Jiékoju bu onye anyi nọ l'ẹka ezeru ndzụ.

Ebvu-oma 47

Ebvụ, e deru nụ onye-ishi ebvu g'ụnwu Kora gụ

¹Unu kua ẹka unubẹ ụnwu-eliphe l'ophu! Unu gude ebvu ẹhu-utso gbọoru Chileke ogboo!

²Noo kẹle Chipfu, bu Ọkalibe-kakọta-shii gbaru g'a tsuje iya ebvu. Kẹle oo yẹbedua bu Ọkalibe eze, achikota ndiphe l'ophu.

³Oomeje g'anyi kapyabẹ ndiphe; bya emee gẹ ndu ọhoro nọdu anyi lẹ mkpula.

⁴Oo yẹbedua hotaru anyi alị, anyi bu; mbụ alị ono, Jiékoju, onye Chileke yeru obu egudeje eku onwiya.

⁵Chileke kwolihuwaru jeshia l'aba-eze iya. Ndiphe tushia uzu agbo ogboo; egburu iya opu.

⁶Unu gụ ebvu gude tua Chileke ẹpha! Unu tua ya ẹpha! Unu gụ ebvu gude tua eze anyi ẹpha! Unu tua ya ẹpha!

⁷Kẹle oo Chileke bu eze ndu mgboko mgburugburu. Unu kwaa ẹvù gude jaa ya ajaja!

⁸Ọ kwa Chileke bu eze ọhamoha. Ọ nọkwa l'aba-eze iya, dụ nsọ.

⁹Ndu nweru ẹnya l'eliphe dzukobeakwaru gẹ ndibe Chileke kẹ Ébirihamu; kẹle ndu eze, egbobutaje ụnwu-eliphe, bukwa Chileke nwe phẹ. Ọ kwa Chileke bẹ kangokotaru nụ.

Ebvü-oma 48

Ebvü-oma, Ụnwu Kora gürü

¹Chipfu parụ ẹka. G'a jakwaa ya pho ajaja, rwuberu iya nụ lẹ mkpukpu kẹ Chileke anyi; mbụ l'úbvú ono, dụ nsọ ono.

²Úbvú Zayonu ono ama ntumatu bya adu akpabiri; bya aburu ẹhu-utso ụnwu-eliphe l'ophu. Ọ nọ l'uzo isheli mkpukpu Jierusalemu, bu mkpukpu onye eze, parụ ẹka.

³Chileke nọakwa l'ulo ndu mkpukpu ono anọduje ezeru ndzu. O mewaru g'a maru l'ọo yẹbedua bu a

-gbabe-ezeeru-ndzu.

⁴Ndu eze chikoberu ndu ojogu phe; bya awuru bya g'ephe tsoo mkpukpu ono ogu.

⁵Ephe byarwutaepho bya ebun iya ishi. O tufu phe ehu; ndzu ghu phe; ephe gbalachaa.

⁶Ndzu-agugu, guderu phe l'eka ono tsuru phe l'ehu ge nwanji, ime eme.

⁷I mebyishiru phe ge pherephere, shi l'uzo enyanwu-awawa emebyishije ugbo-mini Tashishi.

⁸Oo iphe, anyi numaru be anyi humakwarupho le mkpukpu ke Chipfu, bu Okalibe-Kakota-Ike, bu iya bu mkpukpu Chileke anyi; mbu l'oo Chileke emeje g'o nguru anguru jasu l'ojeje.

⁹Anyi anọduje l'ime eze-ulo gube Chileke ari k'obu ono, i yeru anyi ono.

¹⁰Gube Chileke; oo g'epha ngu ngadzuru ekameka; bukwapho g'aanọduje aja ngu ajaja le mgboko l'ophu. O buru ikpe, pfuru oto be i gude buru eze.

¹¹Ehu atso ubvu Zayonu utso; mkpukpu Jiuda nodu ete eswa. O buru iphe, kparu iya nu bu g'iigudeje ekpe ikpe.

¹²Unu jegbabada oma Zayonu. Unu jephee ya mgburugburu; gu ulo-ephekerephe, o nweru ogu.

¹³Unu gbuchakwaa igo l'igbulo, e gude kpu-pee ya mgburugburu! Unu elerwekwaapho enya l'ulo-ezeru-ndzu, nogbaa ya nu. Oo ya bu g'unu akoro iya ogbo ophu no l'iphu.

¹⁴Noo kele Chileke-a a-buru Chileke anyi jasu le tuutuutu le mimiimii. O buru iya a-nodu edu anyi jasu g'anyi a-no-beru.

Ebvu-oma 49

Ebvu-oma, e deru nu onye-ishi ebvu g'unwu Kora gu

¹Unube ndiphe; unu numakwa iphe-a! Unu ngabekwa nchi; unube ndu bu le mgboko l'ophu!

²Ge ndu ha shii ngabe nchi; ndu ha nwanshi angabe. Ge ndu nweru iphe yee ndu ukpa tukokwa ngabe nchi.

³Opfu, shi mu l'onu a-buru opfu onye maru iphe. Iphe, mu ritaru l'obu emeje g'iphe doo enya.

⁴Ge mu bya eworu nchi goberu etu. Mu akpo une gude mee g'ilu, mu turu doo enya.

⁵Ndzu ta abyadu agu mu me mboku oke iphe-ehuka rwuepho. O to dudu m'obeta ndu achi mu le njo no-pee mu mgburugburu; mu ta atsukpodaa phe ebvu;

- ⁶mbụ ndu ono, achijeru ụp̄fu kw̄e l'ẹku, ẹphe kpatarụ; gude akanya, ẹphe setarụ eku onwophe.
- ⁷Ọle ọ tọ dukwa onye a-dụ ike a-gbafuta nwibe iya; ọphu ọ dudu onye ọphu a-dụ ike apfụ Chileke aswa ishi nemadzu ibiya.
- ⁸Kẹle aswa pakwaru ẹka l'iphe, e gude agbata ndzu. Ọ tọ dukwa iphe, nemadzu a-pfụ g'ọ suru iya;
- ⁹mbụ ụgwo, ọo-pfụ nọdu ndzu ojejoje; g'o t'o rehu erehu.
- ¹⁰Onyemonye eleanaa lẹ ndu mmamiphe anwushihujechaa. Ndu eswe mę ndu eme bębeebę nọdu abahujechaa l'ilu. G'ẹphe ha atukoje woru ẹku pẹ haaru ndu ọzo.
- ¹¹Iphe, ẹphe anọduje arị bu l'ẹphe a-nọ jasụ l'ojejoje; l'unuphu pẹ a-buru oje-lẹ-nwanwa; ẹphe ewochaaru ẹpha pẹ gushia alị-ihe pẹ.
- ¹²Obenu l'ẹku nemadzu ta akpọshidu iya anwuhu. Ọ bu-a g'anụ-ẹgbudu anwuhuje-a bu g'oo-mecha nwuhu.
- ¹³Humawaro g'oonwujeru ndu amadu iphe; waa g'oodapfutaje ndu awu etso pẹ nụ; mbụ ndu iphe, ẹphe anọduje epfu aduje ree.
- ¹⁴Iphe, e-mechaa mee pẹ nụ bu l'ẹphe a-nwuhu g'aturu. Ọ buru onwu a-bya erwuta pẹ; ndu pfuberekoto atua okoo kpua pẹ; mę o -bee l'utsu. Ogwehu pẹ ono erekashihu mę e -shiepho l'eguru ulo pẹ ono; parụ pẹ je adẹ l'ilu.
- ¹⁵Obenu lẹ mbedua bę Chileke a-gbafuta gę mu ta abahu l'alị-maa; kẹle oo-mecha kuta mu dokube onwiya.
- ¹⁶Ọ -buru lẹ nemadzu nonyaaru bya enweru iphe shii; k'ọphu ndiphe wataru iya akwabę ụbvù; gę ndzu ta agukwa ngu.
- ¹⁷Noo kẹle ọ tọ dudu ọphu oo-gude ala m'ọ lashia. Ọphu ụbvù iya ọbu etsokwa iya pho ala l'ilu.
- ¹⁸Ọ bu eviya lẹ teke ọ nọ ndzu bę o shi gukobe onwiya lẹ ndu a goru onu-oma nụ; teme ndiphe shikwapho anọduje aja iya ajaja l'ọ bu onye ẹka-atutu.
- ¹⁹Ọle oo-mechaẹle-a lapfu ndiche iya pẹ l'alị-maa; ẹka a ta abyadu ahuma iphoro.
- ²⁰Onye nweru iphe; ọphu ọ madu iphe bu-a g'anụ-ẹgbudu anwuhuje-a bu g'oo-mecha nwuhu.

Ebvu-oma 50

Ebvu-oma, Asafu deru

- ¹Ọ kwa Okalibe, bu Chileke; bya aburu Chipfu epfu opfu-a. Ooku mgboko l'ọphu oku; eshikpoo l'uzo enyanwu-awawa jasụ l'uzo enyanwu-ariba.
- ²Chileke nọ lẹ Zayonu egbu nwjinwii; mbụ Zayonu ono ama ntumatu ono.

- ³Chileke anyi abyaakwa; ọle ọ tọ nọdu nggujungguji abya. Ọku, ata ririri nọ iya l'uzo iphu. Oke pherephere nọ-phee ya mgburugburu.
- ⁴Ooku igwe; eku alị; g'ephe bya aburu ekebe iya; g'ephe bya anọdu huma gẹ ya gude ekpe ndu nkiya iya ikpe.
- ⁵“Unu chikoberu mu ndu bu nkemu g'ephe ha; mbu ndu mu l'ephe gude ngweja gbaa ndzu.”
- ⁶Imigwe l'ophu anọduje atụ onu gẹ Chileke bu-be onye pfuberekoto; kele Chileke l'onwiya bu Onye-ikpe.
- ⁷“Ndu mu; unu ngabe nchi; gẹ mu pfua opfu yeru unu. Gẹ mu gbaa unube ndu Izurelu ekebe. Ọ kwa mube Chileke bu Chileke unu.
- ⁸Ọ tọ bukwa ke ngweja, unu egweje anu mu; ozoo ke ngweja-akpo-oku, unu egwejeru mu be mu abaru unu mba iya; kele ndu k'ono be unu anọduje emekota l'o rwuberu iya.
- ⁹Ọ tọ dukwa eswi, shi l'oka unu, mu a-nata; ophu ọ dukwa g'ọ ka mma l'oo mkpi, shi l'ikpoto eku unu, mu a-nata;
- ¹⁰kele iphe, bukpo anu, nokota l'oswa bukota nkemu; mekpoo eswi, doru l'unubuku ubvu.
- ¹¹Enu, ephe l'eli be mu makotaru g'ephe ha; anu-egbudu l'ophu bukotaru iphe mu.
- ¹²Ome l'oo egu agu mu; me mu tege abyapfutakwa unu; kele oo mbedua nwekota mgboko-a l'ophu; yee iphe, nọ iya nu.
- ¹³? Unu riru le mu ataje anu eswi? ? Too unu dobesu le mu anguje mee egu?
- ¹⁴Ngweja, unu e-gwejeru nu mube Chileke bu g'unu keleje mu ekele. Unu emekotaje iphe, unu riburu angu l'unu e-meru mube Okalibe-kakota-shii.
- ¹⁵Unu -kua mu oku me iphe-ehuka byaru unu; mu adzota unu; oo ya bu g'unu akwabeje mu ubvu.”
- ¹⁶Obenu l'onye ejo-iphe be Chileke suru: “? Denu g'o gude i nodu anoduje agu ekemu mu g'onye agu ebvu? ? Denu g'o gude i nodu egudeje onu ngu pfukuta ogbandzu mu?
- ¹⁷L'eka i jikaru su gẹ mu ta aloshi ngu eka le nchi; woru opfu mu l'ophu nwuru ye l'azu.
- ¹⁸I -huma onye-oshi; l'i je eshita iya onya; teme unu le ndu eri ogori nodu aswi oswi.
- ¹⁹Onu ngu buepho njo-opfu be iigudeje iya epfu; iinodu egudeje ire ngu agba eregede.
- ²⁰I -nodu; l'i pfutoshi nwune ngu. Ọ buru nwune ngu nwoke, unu l'iya shi l'epho lanu be iinoduje evu nvu-azu.
- ²¹Iphemiphe ono be i mekotaru; mu noduele-a nggujungguji. I gbẹ dobesuwanu le mu le ngu bu iphe lanu. Ọle mu a-bakwanuru ngu mba iya; tua ngu ejo-iphe ono, l'iime ono jalaa l'iphu.”

²²“Unu ngabẹ nchị l'iphe-a, mu abya epfupfu-a; unubẹ ndu zoharu mube Chileke! Odumeka mu alajashia unu iphiriba iphiriba; l'ebe abụ l'ọ duru onye suru unu anafuta.

²³Iphe, bukpuo onye woru ekele mee ngweja iya be bu onye akwabẹ mu ubvù. O buru iphe, bu onye eme iphe l'uzo, pfuru oto be mu e-goshi le mube Chileke adzotaje nemadzu.”

Ebvu-oma 51

Ebvu-oma, Dévidi deru nu onye-ishi ebvu

Teke o deru iya bu g'onye mpfuchiru Chileke, bu Nétanu byachaaru ibe iya bya epfuaru iya l'o meru eji l'o jefuru Batusheba

¹Phunaaru mu obu-imemini; jiko Chileke; eshinu n-yemobu ngu te nwedu echihu. Huchafunu atupya ono, mu tupyaru ngu ono; eshinu iphuje obu-imemini; phua k'etsutsu iya.

²Sanaa mu rengurengu; safukota mu ejo-iphe, mu megbaberu; l'i huchafu mu iphe-eji, mu meshiru ngu!

³Kele mu maru ge mu tpyaberu ngu; ophu mu azohajedu iphe-eji mu azoha.

⁴Oo gubedua gedegede be mu mesweru; mbu l'oo gubedua be mu meru iphe-eji. Iswi du ngu mma l'ikpe, i kperu mu; ophu uta adudu ngu iya l'ikpe, i nmaru mu.

⁵Mbu-a; mu shikwa teke a nwuru mu buru onye ejo-iphe. Mbu le mu shiro teke ne mu tsutaru ime mu butaru onye eme iphe-eji.

⁶Iphe, iile enya iya le ndzu amadu bu ire-lanu. Zinaa mu mmamiphe nkengu.

⁷Gude isopu saa mu asasa ge mu duebe ree! Saa mu ge mu chaa pemu pemu g'akamini-sunoo!

⁸Mee g'ehu tsoo mu utso; ge mu tee eswa; k'ophu okpu mu ono, i nyajishiru ono a-gbakerehu.

⁹Gbakutaru iphe-eji, mu meshiru azu! L'i hufukota ejo-iphe, mu mekotaru g'o ha!

¹⁰Jiko Chileke; menaa g'obu mu gua mu iphoró; l'i nu mu unme ophu, a-nodu anuru ngu opfu.

¹¹Ta chifukwa mu l'ataphu ngu! Ophu i nafukwa mu Unme-du-Nso nkengu!

¹²Nu-phunu mu ehutso ono azu; mbu ehutso ono, shi l'adzota, i dzotaru mu ono. Mee g'eme uche ngu heje mu ihee; k'ophu o-gbata mu ike.

¹³Oo ya bu ge mu ezia ndu anoduje atupya ngu nu uzo ngu. Ndu iphe-eji adakobe lwapfuta ngu.

¹⁴Dzonaa mu l'ikpe ochi, mu gburu; jiko Chileke! L'oo ngu bu Chileke, adzoje mu nu. Oo ya bu ge mu egude ire mu gua ebvu ehutso su l'i pfuberekoto.

¹⁵Gube Nnajiuphu; kuhaa mu onu; k'ophu mu a-ja ngu ajaja.

¹⁶Ome ọo ngweja bẹ iile ẹnya iya; mẹ mu egwekwaru iya nū ngu. Obenu lẹ ngweja m'obeta ọ bụru ngweja-akpo-ọku te emekwa g'ẹhu tsoo ngu uto.

¹⁷Kele ngweja ọphu Chileke anatajẹ bụ aphụ-eji-obu. Onye aphụ jiru obu l'iphe o meru; izimanu lwa iya azu bẹ gube Chileke ta anmajekwa phulaphula.

¹⁸Mena Zayonu g'ọ jaa ajajà; eshinu ọ du ngu l'obu. Kpuna igbulọ Jierusalem!

¹⁹Oo ya bụ g'eegweaharu ngu ngweja, pfuru oto; ngweja-akpo-ọku atsoahaa ngu uto; l'a wataru ngu egburu oke-eswi l'oru-ngweja ngu.

Ebvu-oma 52

Évù, Dévidi kwaru nu onye-ishi ebvu

Teke ọ kwaru iya bu teke Dowegu, onye Edomu byaru bya agbaaru Solu ama su iya lẹ Dévidi no l'ibe Ahimeleku

¹? Denu g'ọ gude i nodu eku onwongu l'eme ejo-iphe; oke, du ike? ? Ti madu lẹ n-yemobu Chileke a-no jeye l'ojejoje?

²Iphe, iigudeje ire ngu epfu l'ii-me buepho ejo-iphe; mbu l'ire ngu atsụ nkọ g'akwo, a baru ababa. Iphemiphe, iimekpoo ememe bukotaru ughoshi.

³I ka eye ejo-iphe obu eme l'iphe, du ree. Adzu uka ka ngu ree eme l'epfu iphe, pfuru nhamunha.

⁴Iphe, i yeru obu bu epfubyishi nemadzu; gube onye ono, adzu-gbu onwongu l'uka ono!

⁵Su-a; Chileke e-mebyishikwa ngu; mee ngu l'i buru mkpurupyata jasuru asuru. Oo-wofu ngu; mee ngu g'i ti buhe l'ibe ngu; l'o phefu ngu ephefu l'ali ndu no ndzu.

⁶Ndu pfuberekoto -huma iya; ephe atsuhu ebvu; ephe achia ya ochi su:

⁷“Unu lewaro; onye owa-a bu onye jikaru lẹ ya te ewoduru Chileke eme agbaru-ike iya. O kporu obu yeru eku, o nweru nwegharu iya eka; bya egude ejo-iphe, onoduje emeshi eko dzudzudu.”

⁸Obenu lẹ mbedua du g'oshi olivu, jaru ajajà nodu kpukala l'ime eze-ulo Chileke. Mu a-chiru upfu kwere lẹ n-yemobu Chileke jeye l'ojejoje.

⁹Mu a-nodu ekele ngu ekele jeye l'ojejoje; kele ọo gubedua l'onwongu meru iya. Mu anodukpoepho nwadoo ele ngu ẹnya l'eka; kele epha ngu du ree. Teme mu anodukwapho l'iphu ndu duru ngu nsọ tua ngu epha.

Ebvu-oma 53

Évù, Dévidi kwaru nu onye-ishi ebvu; g'e gude olu aphu kwaa ya

¹Ndu eswe anoduje arị l'ime obu phe lẹ Chileke ta adudu. Ephe mebyishiwaru onwophe; iphe, ephe eme buru akpamara; ọphu ọ dudu m'onye lanu eme iphe, du ree.

²Chileke gbẹ l'imigwe lee ẹnya lẹ mgboko-a; mbụ l'ẹhu ụnwu-eliphe; gẹ ya maru ? o nweru onye kwarụ ẹnya? Mbụ g'ọ maru ? o nweru onye achọ yẹbe Chileke?

³Ọlẹ g'ẹphe ha tūkowaru haa ụzo jephuhu. Ẹphe tūkowaru g'ẹphe ha mebyishihukọta. Ọ tọ dudu g'ọ ka mma l'ọo onye lanụ eme iphe, dụ ree.

⁴Ọ dūkwa gẹ ndu ono, eme ẹjo-ememe ono te nwedu egomunggo; mbụ ndu anọduje eri ndibe mu g'onye eri nri; ọphu ẹphe epfujedu anụ Chipfu.

⁵Ẹphe bụ ndu ndzụ-agugu rwutaru; l'ẹka adudu iphe ndzụ-agugu, dụ iya nụ; teke Chileke e-woru ọkpụ ndu tsoru ndibe iya ọgu tūkashia nanụ nanụ; meru iphe-iphere kpua phe; kele ọ jikawaru phe.

⁶Ọ dụ mu g'e shi lẹ Zayonu bya adzọta ndu Ízurelu. Jiékoju e-te ẹswa; ẹhu atsọo Ízurelu uto me Chileke dophuepho ndibe iya azụ l'onodu phe.

Ebvu-oma 54

**Évù, Dévidi kwarụ nụ onye-ishi ebvu; g'a kpọru une ye iya
Teke ọ kwarụ iya bụ gẹ ndu Zifu byaru bya asụ Sọlu lẹ Dévidi wohakwaru onwiya
l'echilabọ phe**

¹Gudenu ẹpha ngu dzọo mu; gube Chileke! Gudenu ọkpehu ngu haarụ mu enge!

²Numanu epfupfu, mu epfu anụ ngu; jiko Chileke. Ngabenu nchi; numa iphe, shi mu l'onu.

³Kele ndu shi eshishi wuru bya mu etso opfu; Ndu ewebushi akurepho nọdu achọ mu egbugbu; mbụ ndu ata akpadu Chileke ishi m'ilile.

⁴Obenu l'ọo Chileke bụ onye eyejeru mu ẹka. Ọo Nnajiuphu bụ onye gude ndzụ mu.

⁵Gẹ Chileke mekwaa g'ejo-iphe, ndu achị mu lẹ njọ meru mu laphuru phe azụ! Gẹ Chileke mebyishikwaa phe gude nno goshi l'ọopfushije ike l'iphe, o pfuru.

⁶Mu a-tụ obu mu onyo gwetarụ ngu ngweja. Mu abya ekele ngu ekele gube Chipfu; kele ẹpha ngu dụ ree.

⁷Teme ọ bụru ngu dzotakotaru mu l'iphe, bukpo iphe-ẹhuka, byapfutaru mu nụ. Mu byakwaphọ ahuma l'e mekperu ndu ọhogu mu phe.

Ebvu-oma 55

Évù, Dévidi kwarụ nụ onye-ishi ebvu; g'a kpọru une ye iya

¹Numarọ epfupfu, mu epfu anụ ngu gube Chileke! Ba agbakwa mu nkuchi; ke g'ị ba anuma arworo, mu arwo ngu.

²Ngaberu mu nchi zaa mu ẹnu l'oku, mu eku ngu! Oriri mu anọduje egburwashị mu ẹhu; k'ọphu o meru; mu nọdu anọduje atsụ oke ude.

³Iphe, kparụ iya nụ bụru olu ndu ọhogu mu, mu anụ; waa mkpawere, ndu ẹjo-iphe eme mu; kele ẹphe anọduje achiru mu ẹjo idzu; bya egude ẹhu-ẹghu epfubyishi mu.

- ⁴Aphụ jiru mu obu; anwuhu nọdu eye mu ebvu eyeshikpọ mu iya ike.
- ⁵Ndzu agụ mu agushikpoo mu ike; ẹhu nọdu aphukota mu kpaakpaakpaa. Ishi nọdu anyị mu ẹdzu.
- ⁶Mu sụ l'ọ dū mu g'a sụ lẹ mu furu ñkù gẹ ndo; mẹ mu ephefuepho je achọo ẹka mu a-nọdu tuta unme;
- ⁷mẹ mu epheepho phemihu je eburu l'echiegu;
- ⁸mẹ mu emeepho ẹgwegwa lashia l'ulo-mgbobuta mu; mbụ ẹka oke pherephere adudu.
- ⁹Mebyishinaa idzu ndu ẹjo-iphe jiko Nnajiuphu! L'ighashia phe olu-opfu! Kele mu humaru lẹ ndu mkpukpu ono eme nwibe phe mkpawere; teme ephe nọdu ese opfu.
- ¹⁰Ephe anọduje awu-phe l'igbulọ mkpukpu ono: eswe l'enyashi. Iphe-ẹji yee iphe-ehuka nọdu azogba g'ọ dū phe l'ime mkpukpu ono.
- ¹¹Ẹjo-iphe pfukwarupho l'echilabọ iya; teme ophu mkpamehu yee ughoshi alufujedu alufu l'edupfu phe.
- ¹²Ọme ọ bụ l'ọo ndu ohogu mu anma mu phulaphula; mẹ mu -atamikwaa ya lẹ nshi. Ọzoo ọme l'ọo onye mu dū ashị bẹ etu onwiya ophushugbu l'ẹka mu nọ; mẹ mu -edomikwaaru iya onwomu.
- ¹³Obenu l'ọo gubedua, bụ onye ẹbo mu; bya aburu onye mu l'iya aswị ọswi; bya eshikwaphọ ọnyà bẹ ọ gbẹ buru.
- ¹⁴Mbụ onye mu l'iya kwatakpọo eshi uto; bya aburu onye mu l'iya atukoje swiru eje l'eze-ulo Chileke.
- ¹⁵G'onwu byakwa egbukwota ndu ohogu mu egbukwota! G'ephe bukwaru ndu ee-li lẹ ndzu! Kele ẹjo-iphe kwawaru ikwato l'ime obu phe.
- ¹⁶Obenu lẹ mbedua bụ Chileke bẹ mu araku; kele mu maru lẹ Chipfu e-mechaa bya adzọo mu.
- ¹⁷Mu egudeje olu aphụ echiku iya lẹ mkpu l'uzenyashi; mẹ l'utsu; waa l'eswe. Mu maru-a l'oo-mecha numa olu mu.
- ¹⁸Ọo-nafuta mu l'ẹka ndu etso mu ọgu. Ephe -dukpokwaa igwerigwe g'ephe aduhabe bẹ ọo-nafutaele mu-a. Ọ tọ dudu iphe, ephe eme mu.
- ¹⁹Chileke, bụ onye shi l'ichee nọduta l'aba-eze iya bẹ a-numa olu mu; bya anua phe chiipfu. Kele ephe jikaru agbanwe; teme ophu ephe atsudu Chileke ebvu.
- ²⁰Onye mu l'iya shi aswị ọswi tsoru ọnyà iya ọgu; shi nno mebyia oibandzu, ephe l'iya gbaru.
- ²¹Opfu, shi iya l'onu nọdu echi buruburu g'ukpa; ọle iphe, jiru iya obu bụ ndumashi. Mbụ l'opfu iya atụ atutu gẹ manụ urwazi; ọle ọotsu nkọ g'ogu-echi, a bataru nkọ.

²²Woru iphe ono, e boru ngu g'i vuru ono haaru Chipfu. Oo-du-a ike gudeshia ngu; kele o to byadu aha ndu pfuberekoto g'ephe daa.

²³Obenu l'oo gubedua, bu Chileke l'e-duru ndu ejo-iphe duba l'ime ilu; eka ephe anodu rekashihu. Ndu egbu ochi waa ndu ntuphu-ire be i tii kwedu g'ephe kpoo upfu l'eliphe-a. Obenu le mbedua bu ngu be mu dakoberu.

Ebvu-oma 56

Ebvu-oma, Dévidi deru nu onye-ishi ebvu; g'e gude olu ebvu, "Ndo beru l'achi, no uzanya" gaa ya

Teke o deru iya bu ge ndu Filisitayinu guderu iya le Gatu

¹Gube Chileke; phunaaru mu obu-imemini; a -nonyaa; ndiphe woru mu lwee elwelwe; le ndu ohogu mu anoduje akpa mu ehu mkpurumkpuru.

²Mkpurumkpuru be ndu achi mu le njo anoduje achi mu kpabekpabe; mbu l'a du igwerigwe gude eku-onwonye etso mu ogu.

³Ndzu -nodu agu mu; bue ngu pho be mu adakobeje.

⁴Oo Chileke ono, mu anoduje aja opfu iya ajaja ono be mu dakoberu. Ophu ndzu agudu mu; ? bu gunu be nemadzu mmanu suru mu ememe?

⁵Tekenteke be ephe ewojeru opfu mu gha igharaphu. Iphe, bukpo iphe, ephe arikpo ariri buepho g'ephe eshi mee mu ejo-iphe.

⁶Ephe dzukoberu bya edomishia onwophe. Mbu l'ephe anoduje edo okpa mu achokpopho uzo, ephe e-shi gbua mu.

⁷? Ephe e-gude eme ejo-ememe ono nahu too? Jiko Chileke; gudenu oke ehu-eghu ngu chitsushia ndu ono l'ophu.

⁸I mawaru g'ootsube mu l'ehu. I mawaru ge mu kwashiberu enya-mini. ? Ti tukoduru iphemiphe ono dekota l'ekwo ngu?

⁹Mu -rakue ngu pho be ndu ohogu mu adakobe gbaphu azu. Ophu doru mu enya bu le Chileke no l'eka iya nkemu.

¹⁰Oo Chileke ono, mu anoduje aja opfu iya ajaja ono; mbu Chipfu ono, mu anoduje aja opfu iya ajaja ono;

¹¹Oo Chileke ono be mu dakoberu; ophu ndzu agudu mu; ? bu gunu be nemadzu suru mu ememe?

¹²Gube Chileke; iphe, mu rifuru angu le mu e-meru ngu bukwa mu be o tukoru l'ishi. Mu a-bya egweru ngweja-ekele nu ngu;

¹³noo kele i nafutaru ndzu mu l'eka onwu; bya emekwapho ge mu te vukota iphe daa iko. Oo ya bu ge mu azoo ije l'iphu Chileke l'eka iphoró duru ndu no ndzu.

Ebvu-oma 57

Ebvu-oma, Dévidi deru nù onye-ishi ebvu; ishi ebvu iya bụ “Be mekwa gę mu laa l'iyi”

Teke o deru iya bụ teke ọ nahuru Sọlu gbala; je anọdu l'ime ogba

¹Gube Chileke; meeru mu eze-iphe-oma! Jiko meeru mu ọ eze-iphe-oma! Kele ọ l'eka ngu be mu ọ ezeru ndzu. Mu a-ọdu le mkpula oke nkù ngu ezeru ndzu; jasụ teke ejo-iphe-ehuka, byaru mu nù-a a-bvubebe.

²Mu araku Chileke; mbụ Okalibe-kakota-shii; mbụ Chileke, atukoje iphemiphe mekotaru mu.

³Ọo-gbe l'imigwe zia g'a bya adzo mu; bya emeru iphere tu ndu ono, achi mu kparekpabe ono. Chileke e-goshi mu l'o yeru mu obu; bya aburu onye apfushije ike l'iphe, o pfuru.

⁴Mu ọ l'echilabo oduma; mbụ-a; mu zekwa l'echilabo anu-egbudu, ataje anu nemadzu. Ndu ezụ phe du g'arwa; du g'apfu; teme ire phe ọdu atsụ nkọ g'ogu-echi.

⁵Goshinu ndiphe g'i paberu eka; mbụ l'i noghataru akpaminigwe anoghata; gę ndiphe l'ophu ahuma g'i du-be biribiri.

⁶Ephe geru ugbu kwaberu mu l'uzo, mu eshi. Ọo ya bụ; ehu rwushihue mu pho arwushihu. Ephe gbeshi je ebua nsu dobe mu l'ataphu. Ọle epe mecharu daba le nsu obu l'onwophe.

⁷Obu shihukwaru mu ike Chileke; k'ophu bụ le mu e-gude obu mu g'ọ ha agu ebvu etu ngu epha.

⁸Obu mu; tehu nwuru enya. Unu tehu nwuru enya; unube ogelenda yee une; kele mbedua e-gudekwa ebvu kutee geregere nchi-abo hu le mgbenya.

⁹Mu a-ọdu l'echilabo ndiphe kele ngu ekele gube Nnajiuphu. Mu anodukwapho l'echilabo oha l'ophu gua ebvu gude tua ngu epha.

¹⁰Noo kele n-yemobu ngu paru eka. Ọ tukoru imigwe l'ophu ọo pfurupfuru. Teme ire-lanu nkengu dzuru akpaminigwe.

¹¹Goshinu ndiphe g'i paberu eka; mbụ l'i noghataru akpaminigwe anoghata; gę ndiphe l'ophu ahuma g'i du-be biribiri.

Ebvu-oma 58

Ebvu-oma, Dévidi deru nù onye-ishi ebvu; ishi ebvu iya bụ “Be mekwa gę mu laa l'iyi”

¹Unube ogbo-ikpe; ? ọ dukporu-a teke opfu, pfuru oto eshije unu l'onu futa? ? Unu pfubejekporu-a eka oto kpee unwu-eliphe ikpe?

²Waawakwa! Iphe, unu arije l'ime obu unu buepho g'unu e-shi mee iphe, apfuduru-oto. Ọ buru mkpawere be unu anoduje eme unwu-eliphe.

³Ndu ejo-iphe eshije le teke epe ọ l'epho ne phe shiswee uzo. Epe akpaphuje le teke a dukwadro ime phe. Adzu uka eshi phe le dedede.

⁴Èru, èphe atajè egbu egbugbu g'èru èjo agwò. Èphe swò-chishiru nchì ada nkùchi g'oghu;

⁵mbù ogbu, ata anèdu opu, onye rwaru iya èka l'iphu egbu; gude epfuru iya opfu; m'o betakpò o gbua ya k'èrengete igbu-agma.

⁶Kpaa phè eze, nò phè l'ònu jiko Chileke! Jiko Chipfu; swòshinaa oduma ono èpyii ono, nògbaa phè l'ònu ono!

⁷G'èphe tashìhukwa g'èka mini sòru sòghata. Èphe -setaèpho ùta phè kè kíkiki g'èphe gbaa; mekwaa g'apfù phè bùru inyiribachi!

⁸G'èphe dù g'èji, rwubashìhuru erwubashìhu. G'èphe te egudekwa ènya phè hùma ènyanwu gè nwata, ne iya kworu ekwokwo.

⁹K'òphu bù; èswa, a tsùberu l'ite -bya eme g'òku ngaa ènishi ite ono; Chileke egudewaa oke èhu-eghu iya zikòta ite ono g'oke phèrèphèrè; m'o beta iphe, e shiberu l'ite ono dùkwadu oyi; òzoo l'òobyawaa eghehu.

¹⁰Ndu pfùberekoto bè èhu a-tso ùtso; m'èphe hùmaèpho lè Chileke apfùwa ndu èjo- iphe ùgwò iphe-èji, èphe meru; mbù m'èphe wataèpho azò ndu èjo- iphe pyaapyaa.

¹¹Oo ya bù; ndiphe epfuahaa sù: “Ndu pfùberekoto bè obunggo dùkwaru eviya; mbù l'ò kwa ire-lanù l'o nweru Chileke, ekpeje eliphe-a ikpe!”

Ebvù-òma 59

Ebvù-òma, Dévidi deru nù onye-ishi ebvù; ishi ebvù iya bù “Be mekwa gè mu laa l'iyi”

Teke ò gùru iya bù teke Sòlu yeru ndu nche, èje anòdu eche ùlo, ò nò nche g'e gbua ya

¹Nafùta mu l'èka òhogu mu; jiko Chileke mu! Gbaarù mu òdzori l'iphu ndu wulihuru vùpyabe mu!

²Nafùta mu l'èka ndu eme èjo-ememe! Dzòo mu l'èka ndu mgbugbùmadzu!

³Kèlè-a; gùbe Chipfu; lewarò l'èphe domishiru onwophè kwabè g'èphe gbua mu. Ndu nweru òkpèhu wulihuru etso mu opfu; èbe abù l'ò dùru ekemu, èphe tùru, mu mebyijèru; tème òphu ò dùdu g'èphe ha, mu tùpyajèru.

⁴Èphe gbaru je edozia onwophè g'èphe tsoo mu ògu; l'èbe adù iphe, mu meru phè. Jiko gbalihu; bya eyeru mu èka! Lenaa èjo ònodu, mu nò!

⁵Jiko Chipfu; mbù Chileke, bù Òkalibe-Kakòta-Ike; bya abùru Chileke kè ndu Ízurèlu; tehu etèhu; je anù òhamoha, bu lè mgboko aphù! Ba adùkwa ndu èjo- iphe ono, elekebeje ènya eme iphe, a-tsùru nwibe phè ono, ìi-phùru obu-imemini!

⁶Qobujèru; èphe -lwa l'ùzenyashi; èphe aba hanyìhanyi gè nkùta; tsoru mkpùkpu èjephe.

- ⁷Lewarọ ẹn̄ya; ẹ̀phe -saa ọ̀nu ọ̀phẹ ọ̀ta nkọ ẹ̀ ẹn̄kuta; Ogu-echi eshi ọ̀phẹ l'ire ngushihu. Ẹ̀phe edobesuro l'ọ ọ̀tọ ọ̀dudu onye n̄maru iphe, ẹ̀phe epfu.
- ⁸Ọlobuele-a ọ̀chi ọ̀bẹ ọ̀gube Chipfu achije ọ̀phẹ. Ọo ọ̀chi ọ̀bẹ ọ̀hamoha ono anọduje ezi ngu.
- ⁹Ọo ọ̀gube Chileke ọ̀bẹ agbarike mu. Mu chiru ẹn̄ya mu dzee l'ẹka ị nọ. Ọ ọ̀buru l'ime ngu ọ̀bẹ mu gbabarụ je ezeeru ndzụ.
- ¹⁰Chileke, ọ̀bẹ onye yeru mu obu ọ̀bẹ a-gba mu ndzuta. Chileke e-kwe ẹ̀ ọ̀mu gude ẹn̄ya mu h̄uma l'e mekperu ndu ọ̀hogu mu.
- ¹¹Be gbukwa ọ̀phẹ egbugbu ọ̀gube Chipfu, ọ̀bẹ onye mgbobuta anyi! Ọdumeka ọ̀bẹ ndibe anyi a-zohakwa iya. Gudechia ike nkengu chikashia ọ̀phẹ! Mee ọ̀phẹ; mekpee ọ̀phẹ!
- ¹²Iphe, ọ̀bukotakpoo opfu, eshije ọ̀phẹ l'ọnu abujeerupho mkpọkoro opfu. Mbụ l'opfu, eshije ọ̀phẹ l'ogbogboromonu futa abukotajeerupho iphe-ẹji. Teme ẹ̀phe nọdu egudeje ọ̀nu ọ̀phẹ adzụ ọ̀ka; bya egude iya atụ nwibe ọ̀phẹ ọ̀nu. Ọo ya ọ̀bẹ; g'ekuku ono, ẹ̀phe anọduje eku onwophe ono nmakwaa ọ̀phẹ g'ọnyà.
- ¹³Gudenu oke ẹ̀hu-eghu ngu mebyishia ọ̀phẹ! Mbụ g'iimebyishia ọ̀phẹ gbiriri jasụ teke ẹ̀phe a-bvube! Ọo ya ọ̀bẹ g'unwu-eliphe l'ophu amaru l'ọo Chileke ọ̀bẹ Eze ndu Ízuru; teme l'ọ ọ̀bẹ eze unwu-eliphe mgburugburu.
- ¹⁴Ọobujeru; ẹ̀phe -lwa l'uzenyashi; ẹ̀phe aba hanyihanyi ẹ̀ ẹn̄kuta; tsoru mkpukpu ejephe.
- ¹⁵Ẹ̀phe anọduje awuphe achọ ẹka ẹ̀phe e-ri nri. Ọ -buru l'ẹ̀phe te erjiduru ẹ̀pho; ẹ̀phe agbohaha ire ẹ̀ ẹn̄kuta.
- ¹⁶Obenu ọ̀bẹ mbẹdua a-gụ ebvu gude ọ̀ta ọ̀nu g'okpehu ngu habe shii. Ọtsu mbọku-mbọku ọ̀bẹ mu agụje ebvu ẹ̀hu-utso gude goshi g'eye obu ngu habe. Noo kele ọo l'ime ngu ọ̀bẹ mu agbabajẹ je edomia onwomu. Teme ọ ọ̀buru ngu ọ̀bẹ mu agbabajẹ l'ime je ezeeru ndzụ; me mu nọdu eje iphe-ẹhuka.
- ¹⁷Ọ̀gube ike, ọ̀dụ mu nụ; mu a-gụ ebvu tua ngu ẹ̀pha. Noo kele ọo l'ime ọ̀gube Chileke ọ̀bẹ onye yeru mu obu ọ̀bẹ mu gbabarụ je edomia onwomu.

Ebvu-oma 60

Ebvu-oma, Dévidi deru n̄ onye-ishi ebvu; g'e gude olu ebvu, “Ojimbvu Ọgbandzu” gụa ya.

Teke o deru iya ọ̀bẹ teke ẹ̀phe ọ̀bẹ ndu Arámu-Naharayimu waa ndu Arámu-Zoba lwuru ọ̀gụ; mbụ teke ono, Jiowabu lwaru bya etsoo ndu Edomu ọ̀gụ bya lwu-kpee ọ̀phẹ; gbua unu ọ̀jọgu ọ̀kporo l'iri ọ̀bẹ Nsuda Únú.

- ¹Ọ̀gube Chileke; ị jikawaru anyi woru anyi tukaa nanu nanu. I shi avuru anyi ovuma. Ole nta-a ọ̀bẹ anyi arwo ngu su g'i ghanaaru anyi iphu ozo jiko.
- ²Ọo ngu meru eliphe; ọ nmaa jijijijii; bya emee ya; ọ gbawashihu. Nta-a ọ̀bẹ g'i menaa g'ẹka i mekaru iya iphe kpochite; kele ọongakwa anganga.

³I hawaru ndibe ngu; ephe jee iphe-ehuka; bya echee anyi mee; anyi ngua akpo kulakula.

⁴Obenu le ndu atsū ngu ebvu be i nuru ekwa-ohubama; g'ephe chilia gude lwua ogu k'okpobe opfu ono.

⁵Gudenu okpehu ngu dzota anyi; zanu anyi enu; k'ophu ee-shi nno dzoo ndu i yeru obu.

⁶Chileke nowaa l'ulo iya, du nsō pfua opfu su: “Mu e-gude agbo ogboo kewashia ali ndu Shekemu. Teme mu eworu nsuda Sukotu bushia.

⁷Giladu bu nkemu; Manase bukwarupho nkemu. Ifuremu bu okpu, mu kpu l'ishi. Jiuda bukwanuru mgboro-eze, mu apaje l'eka.

⁸Mowabu bu ochi, mu akwoje okpa. O bukwanuru le Edomu be mu eyeshije akpokpa mu dobe. Ndu Filisitayinu be mu gbowaru ogboo kpua.”

⁹? Bu onye e-du mu chiriri werere duba le mkpukpu ono, a kpuru kpushia ike ono? Mbua; ? bu onye e-duru mu duba le Edomu?

¹⁰O kwa gubedua Chileke bu onye obu. Obenu li gbē jika anyi; ophu i tii tsojeduru ndu ojogu anyi eje ogu.

¹¹Yeru anyi aka jiko g'anyi mekpee ndu ohogu anyi; kele eye aka k'unwu-eliphe, bu iphe-mmanu.

¹²Obenu l'anyi -noduwaa Chileke l'eka be anyi e-mekpe phe ge mkparawa. O buru iya e-hu ndu ohogu anyi agbagba-nchi l'ali.

Ebvu-oma 61

Ebvū, Dévidi deru nū onye-ishi ebvu; g'a kpōru unu ye iya

¹Numanu mkpu, mu echi jiko Chileke! Ngabe nchi l'epfupu, mu epfu anu ngu!

²Mu no l'eka igwe beru ali beru echiku ngu le mkpu. Noo kele meji atofu mu atofu. Dunuru mu je edobe l'oke mkpuma, ka mu l'eli!

³Kele oo ngu be mu gbabarū l'ime ngu je edomia onwomu; bya abukwaru ngu pho bu ulo-mgbobuta, mu bahuru shi nno nahu ndu ohogu mu.

⁴Oogukwa mu egu ge mu buru l'ibe ngu jasū l'ojejeje; mbu ge mu nodujewaro le mkpula eze nkū ngu ezeru ndzu.

⁵Kele gube Chileke numawaru iphe, mu rifuru angu le mu e-meru ngu. I mewaru ge mu tsoru ndu akwabē epha ngu ubvū; keta iphe-oma, imejeru phe.

⁶Mena g'eze nodu ndzu ogologo! G'apha, oo-no l'eliphe-a shinu l'ogbo sweru ogbo!

⁷G'aba-eze iya nodunu l'atatiphu Chileke jasū l'ojejeje! Jiko g'iphe, ii-gude eche iya nche bukwaru n-yemobu ngu; yee apfushi ike, iipfushije l'iphe, i pfuru.

⁸Oo ya bu ge mu agua ebvu gude tua ngu epha jasụ l'ojejoje; bya emeḗbekota iphemiphe, mu rifuru angụ ememe mbọku-mbọku.

Ebvu-oma 62

Ebvu-oma, Dévidi deru nụ onye-ishi ebvu, bu Jiedutunu

- ¹Oo epho Chileke kpoloko be mu daru ngaberu. Kele oo ya bu onye a-dzota mu nu.
- ²Oo yebedua nwekiya be bu agbara-mkpuma nkemu; bya aburu iya bu Chileke, adzoje mu nu; bya aburu onye mu agbabaje l'ime iya l'oodomia mu. Oo ya bu l'o to dudu onye byaru l'enwubata mu enwubata.
- ³? Bu teke ole be unu e-tsuberu nwoke owa-a otsukputu? G'unu hakota be e-mechaa tuko buru mkpurupyata; g'eka igbulo; ozo mgbabu zero tu-gbushia ndu no phe l'ime.
- ⁴Iphe, unu shiberu ite iya bu g'unu nwufu iya l'aba-eze iya ono. Adzu uka nodu atso unu ntumatu. Unu nodu egudeje ogbogboromonu unu agoru nwibe unu onu-oma. Obenu l'ime obu unu be unu anoduje atu phe ejo onu.
- ⁵Gube obu mu; nodukwa kwaberu Chileke nwekiya. Kele oo ya bu onye mu ele enya l'eka kpoloko.
- ⁶Oo yebedua nwekiya be bu agbara-mkpuma nkemu; bya aburu iya bu Chileke, adzoje mu nu; bya aburu onye mu agbabaje l'ime iya l'o domia mu. Oo ya bu l'o to dudu onye byaru l'enwubata mu enwubata.
- ⁷L'aa-dzota mu bu l'eka Chileke be o no. L'aa-kwabe mu ubvu bukwaru iya pho be o no l'eka. Oo Chileke bu eze agbara-mkpuma mu; teme o bukwaru iya pho be mu no l'eka ezeru ndzu.
- ⁸Unu dakobe iya tekenteke kpoo unube unwu-eliphe! Unu woru obu unu gheberu iya onu. L'o kwa Chileke bu onye anyi no l'ime iya ezeru ndzu.
- ⁹Amadu bu udzu-onu. Ohu buru iphe, adudu iphe, o bu. O -buru g'atua erwa phe l'iphe, e gudeje tua erwa nemadzu be ephe tuko buru iphe-iphoro.
- ¹⁰Unu ta akpokwaru obu ye l'eme ndu ozo ewere! Ophu unu egudekwa ana nfu eku onwunu! O betakponu eku nodu abyarununu nyimunyimu; unu ta akpokwaru obu ye iya!
- ¹¹Chileke pfuakwaru iphe-a mgbo lanu. Mbedua numawa iya ugbo labo; mbu l'ikemike bu Chileke nwekota iya.
- ¹²Teme l'oo gube Nnajiuphu be n-yemobu kuru ishi l'eka. Noo kele ipfufe onyemonye ugwo g'iphe, o meru gbaru.

Ebvu-oma 63

Ebvu-oma, Dévidi deru teke o no l'echiegu Jiuda

- ¹Gube Chileke; ọo ngu bu Chileke mu! Ọo ngu bu onye mu anọduje ele ẹnya iya eswe l'enyashi. Ẹkpiri gube Chileke anọduje akpọ obu mu jegirijegiri. Oghoroko ngu aduje mu l'echiegu; mbu l'alị okponku, mini adudu.
- ²Mu humawaru g'ike du-be ngu; yee g'i du-be akpabiri; ge mu shi ahumaje iya l'ulo ngu, du nsọ.
- ³Mu e-gude onu mu jaa ngu ajaja; noo kele n-yemobu ngu ka ndzu ree.
- ⁴Mu a-nọduje ekele ngu ekele jasụ ge mu a-nọ-beru. Teme o buru epha ngu be mu e-gudeje chilia eka imeli pfuru nu ngu.
- ⁵Obu mu be epho e-ji g'onye riru nri, e gude eba-anu; waa umi okpu iya shia. Onu mu e-gudekwanu ebvu ehu-utso, du mu l'ogboromonu tua ngu epha.
- ⁶Oobujeru; mu -zee l'iphe-azee mu; mu anyata ngu. Enyashi l'ophu be mu arikotaje ke nkengu.
- ⁷Mu no le mkpula oke nkù ngu agu ebvu ehu-utso. Noo kele ọo ngu bu onye eyejeru mu eka.
- ⁸Mu anọduje ngu ntse tekenteke. O buru ektara ngu be gudesi mu nu.
- ⁹Ndu achọ ụzo, epe e-shi gbua mu mebyishia ndzu mu be aa-chiru ye l'alị-maa.
- ¹⁰Ee-gude ogu-echi gbua phe pyaapya. Epe aburu nri, a kpataru doberu nkuta-oswa.
- ¹¹Obenu le Chileke e-me g'ehu tsoo eze utso. Ipe, bukpo ndu egudeje epha Chileke eri angu be e-tu iya epha. Onu ndu ntuphu-ire aburu phe kpurukudukuu.

Ebvu-oma 64

Ebvu-oma, Dévidi deru nu onye-ishi ebvu

- ¹Jiko Chileke; numanu mkpu, mu echi eka mu epfu anu ngu! Gbochite mu ge mu ta noduhe atsụ ndu ohogu mu ebvu.
- ²Domia mu g'ejo-idzu, ndu ejo-iphe achiru mu te erwu mu l'ehu; mbu hanyihanyi, epe aba ekpu mu; mbu ndu eme ejo-ememe.
- ³Ndu abaje ire phe g'onye aba mma. Mbu ndu anọduje agba njo opfu phe g'onye agba apfu.
- ⁴Epe edomije onwophe kwaberu onye duebe ree. Onye ono -bya amaru; apfu abwaru iya nu l'ehu ke pfuu. O to nwedu iphe, ndzu iya agu phe me nanu.
- ⁵Epe anọduje eyeru nwibe phe okpu-ikike g'ephe kebe ehu l'eme iphe-eji. Epe epfuje su l'ephe e-je agbakacha onya phe le mpya. Epe pfuchaa nno; epe asu: “? Bukwanu onye abya phe ahuma?”
- ⁶Oo ya bu; epe -chichaa ejo-idzu; epe asu: “Idzu, anyi chiru nta-a dukpo ree dughee ya adu-ghe!” Uche amadu yee obu iya be eregede pakwaru eka.
- ⁷Obenu le Chileke e-seta apfu; epe -bya amaru be o-gbakata phe tua l'alị.

⁸Chileke e-me g'ẹphe vukota abali dagbua ọchii. Ọ buru iphe, opfu ọnu phẹ kpataru. Iphe, bukpo ndu humaru iya nu be e-kwe l'ishi gude kweru phẹ une.

⁹Ndzu e-rwuta amadu l'ophu. Ẹphe e-pfukashia iphe ono, Chileke meru ono; bya ebvuru shii ria ya oriri.

¹⁰G'ẹhu tso ndu pfuberekoto utso l'ime Chipfu! G'ẹphe gbabakwa l'ime iya je domia onwophe! G'iphe, bukpo ndu obu phẹ guru iphoro tukwaa ya epha!

Ebvu-oma 65

Ebvu-oma, Dévidi deru nu onye-ishi ebvu

¹Gube Chileke; o du ree g'anyi nodu le Zayonu tua ngu epha! Anyi e-medzukotaru ngu iphe, anyi riburu angu l'anyi e-meru ngu.

²Oo gube onye ono, azaje oku m'e pfuru nu ngu be onyemonye a-wu-pfuta.

³Teke iphe-eji shi kapyabe anyi be i shiele-a anoduje aguru anyi nvu l'ejo-iphe anyi.

⁴Ehu-utso be a goru nu onye ono, i hotaru dokube onwongu Ge gu l'iya nodu l'ibe ngu. Iphe, du ree, no l'ibe ngu ejije anyi epho; mbu iphe, du ree, no l'eze-ulo ngu, du nso.

⁵Gube Chileke, bu onye ndzota anyi; iphe, iigudeje zaa anyi enu bu iphe, du ebvu, egoshi apfubekoto nkengu. Ndu bu l'eka igwe beru ali beru; waa ndu bu le mgboru enyimu, kachakpo anodu enya bu ngu be epe tuko chiru upfu kwee;

⁶mbu gube onye bu okpehu ngu be i gude mee ubvu; epe nguchaaru anguru l'eka epe nogbaa. I keru onwongu okpehu g'onye keru akpo l'upfu.

⁷Enyimu, aso gborogboro be iimeje l'oderu yekete; mbu l'ootu-buhu akpara. Ohamoha-nodu aba hanyihanyi be iimeje; epe adaa ke nyonyoronyo.

⁸Ndu bu uzanya be anoduje anma pyaapyaapya M'ẹphe numa k'iphe, du biribiri, imegbabe. Ndu shi l'uzo enyanwu-awawa; waa ndu uzo enyanwu-ariba be iimeje g'ẹphe tua uzu-ẹhu-utso.

⁹I gbaru mini l'eliphe teke i byaru iya agbaphe; shi nno mee ya; o buru ali oma. Enyimu nkengu be i meru ge mini ji ejiji. Ndiphe l'ophu be i meru g'iphe, epe koberu l'ali nodu emehuru; kele oo egube ono be i meru iya g'o du.

¹⁰Mini be i dzeru; o doru adoru l'enyoru. I bya alwaa yegeyege mini gude mee igbo; o du nwuhanwuha; shi nno goru onu-oma nu iya mee iphe, a koberu iya wata efushi.

¹¹I bya eworu eka-atutu nkengu kpube apha g'okpu-eze. Teme iphe, bukpo uzo, i shiru be i dzeru iphe, du ree ge mini.

¹²Eswa bya erwushia nodugbaa ke nyimunyimu l'echiegu. Teme ehu-utso doerupho ke nyimunyimu l'ubvu.

¹³Eka eecheje iphe-edobe be aturu kuru ata nri. Nsuda bu iphe, jiru iya nu bu iphe-akuku, a kuru iya. Iphemiphe ono tukoru akwa evu; agu ebvu ehu-utso.

Ebvu-oma 66

Ebvu-oma, e deru nū onye-ishi ebvu

- ¹Unu tua ụzu ẹhu-ụtso gude jaa Chileke; unube ụnwu-eliphe l'ophu!
- ²Unu gua ebvu gude kutsee ẹpha iya! Unu etua ya ẹpha; jaa ya ajaja!
- ³Unu sụ Chileke: “Ha! Iphemiphe, ịinoduje eme dukwa ebvu! Ike ngu paru ẹka k'ophu bu le ndu ohogu ngu adaje kpurumu l'iphu ngu; ẹka ndzu agu phe.
- ⁴Ndiphe mgburugburu adaje kpurumu l'iphu ngu baaru ngu aja; gua ebvu nu ngu; mbu l'ephe aguje ebvu gude kutsee ẹpha ngu.”
- ⁵Unu byanu ahuma ozi, Chileke jeru! Chileke dukwa ebvu l'iphe, oomeru unwu-eliphe.
- ⁶Onye meru enyimu; o buru ali, kpohuru nku. Ephe gude okpa ghaa enyimu ono. Ehu-utso ozi, o jeru tsoru anyi teke anyi no l'eka ono.
- ⁷O gude ike okpu nkiya buru eze ojejoje. Enya iya nodu ahumakotaje ohamoha! Oo ya bu g'o to dukwa ndu ejo okpoma ono l'e-je iya atupya!
- ⁸Unu tua Chileke anyi ẹpha; unube unwu-eliphe! G'a numanu ajaja, unu a-ja iya!
- ⁹L'oo ya doberu anyi ndzu; bya emee g'okpa nguru anyi anguru g'o to chifu.
- ¹⁰Noo kele gube Chileke hwaru anyi ama; bya emee anyi; anyi du ree ge mkpola-ochaa, a huru l'oku.
- ¹¹I dutaru anyi duru ye l'onya; bya eworu oke ivu tukobe anyi l'okpurukpu.
- ¹²I meru g'unwu-eliphe wee anyi ishi kperekpere. Anyi jeru iphe, anwu chiru anyi; mini nmaa anyi. Ole i mechaaru duta anyi bya edobe l'eka anyi tusaru ehu.
- ¹³Mu e-gude ngweja-akpo-oku je l'ulo ngu. Mu emedzuketaru ngu iphe, mu rifuru angu le mu e-meru ngu.
- ¹⁴Mbu iphe, mu gude ogbogboromonu mu kweta; bya egude onu mu pfua le mu e-meru ngu; teke mu eje iphe-ehuka.
- ¹⁵Mu a-kputa ebili, tsuru eba je egude gweeru ngu ngweja-akpo-oku. Mu egbuaru ngu oke-eswi; gbushiaru ngu eghu.
- ¹⁶Unu byakpodapho bya angabe nchi; iphe, bukpo unube ndu atsụ Chileke ebvu; ge mu kooru unu iphe, o meru le ndzu mu.
- ¹⁷Mu gude onu mu owa-a raku iya. Mu gude ire mu tua ya epha.
- ¹⁸Ome mu meru iphe-eji kwachia l'obu mu; me Nnajiuphu tege angabekwa nchi anuma olu mu.
- ¹⁹Obenu le Chileke ngaberu nchi; numa olu mu okpobe anuma teke mu epfu anu iya.

²⁰G'e tukwaa Chileke epha; mbu onye ajikaduru angabe nchi numa epfupfu, mu epfu anu iya; teme ophu o haduru egoshi le ya yeru mu obu.

Ebvu-oma 67

Ebvu-oma, e deru onye-ishi ebvu; g'a kporu une ye iya

¹Ge Chileke meeru anyi eze-iphe-oma; goru onu-oma nu anyi; mekwapho g'iphu tusahu iya l'ehu anyi.

²K'opu unwu-eliphe a-maru uzo ngu; teme ohamoha amakwarupho l'idzotaje nemadzu.

³G'unwu-eliphe kelenu gube Chileke ekele! G'iphe, bukpo nemadzu mgburugburu kele ngu ekele!

⁴G'ehu tsonaa ohamoha utso; g'ephe tunaa uzu ehu-utso! Kele ndiphe l'opu be iikpeje ikpe, pfuru oto; teme o buru ngu anoduje akpo-ziru ohamoha, no l'eliphe uzo.

⁵G'unwu-eliphe kelekwa gube Chileke ekele! G'iphe, bukpo nemadzu mgburugburu kele ngu ekele!

⁶Oo ya bu; g'iphe, a koberu l'ali emehukwanu emehu. Teme Nnajiuphu, bu Chileke anyi ono agoru onu-oma nu anyi.

⁷Chileke a-goru onu-oma nkiya ono nu anyi. Oo ya bu ge ndiphe l'opu jasu l'eka igwe beru ali beru awatakwanu iya atsu ebvu!

Ebvu-oma 68

Ebvu-oma, Dévidi deru nu onye-ishi ebvu

¹Ge Chileke zilihu; ge ndu ohogu iya agbaa nanu nanu! Ge ndu o du ashi shikwa iya pho l'iphu gbalachaa!

²Zikashinaa phe nanu nanu; ge pherephere ezikashije enwuru-oku-a. Oo g'unwu adazehuje le mgboru oku-a bu ge ndu ejo-iphe a-la l'iyi l'iphu Chileke.

³Obenu le ndu pfuberekoto be ehu a-tso utso. Ephe a-nodu ete eswa l'iphu Chileke. Ephe egude ehu-utso tee eswa teshia ya ike.

⁴Unu gua ebvu nu Chileke; gua ebvu gude tua ya epha! Unu kutsee onye ono, anoduje l'ugbo-inya iya agba l'urwukpu onoya. Epha iya bu Chipfu; unu nodukwa iya l'iphu tee eswa.

⁵Chileke no l'ibe iya, du nsu buru Nna ndu enweddu nna; bya aburu onye agbajeru unwanyi, ji phe anodudu odzori.

⁶Chileke ewojeru ndu bu nkinyi doo l'ipfu l'ipfu; teme o nodu edufutaje ndu a turu mkporo l'ulo-mkporo. Obenu le ndu kwefuru iya ike bu l'ali, ejo anwu echi be ephe bu.

- ⁷Gùbe Chileke; teke ì gbèshiru duta ndu nkengu; duru phẹ ghaa alì, dabyiru mgbegere;
- ⁸bẹ alì nmaru jiiijiii. Igwe bya edzee mini l'iphu gùbe Chileke, bu onye kẹ Sayinayi; mbu gùbe Chileke kẹ Ízurèlu.
- ⁹Gùbe Chileke; ọo ngu dzeru ogbodogo mini; gude gbaa alì-ihe ngu unme teke ike bvuru iya.
- ¹⁰Ndibe ngu bya alaa l'ime iya je eburu; tẹme i shi l'ikpoto iphe, i nweru nu ndu ukpa iphe, mkpa iya duru phẹ.
- ¹¹Ọ bu-a epfufu, Chipfu pfuru opfu obu; a du igwerigwe mee g'a madzuru iphe, o pfuru.
- ¹²Ọ suru: "Ndu eze me ndu ojoḡu unu mee egwegwa gude oso gbafu!" Unwanyi, kuru l'unuphu; wufuta bya ekee iphe, a kwataru l'okwata.
- ¹³Ndu ono shi zeshia l'odu aturu du ge ndo, a wukotaru nkù iya mkpola-ochaa; bya egude mkpola-ododo mekota eba iya; o nodu egbu nwijnwii.
- ¹⁴Teke Okalibe-kangokotaru-nu chikashiru ndu eze l'alì ono be o duẹpho g'aka-mini-sunoo, dashiru l'eli ubvu Zalumonu.
- ¹⁵Ubuvu ubvu, nogbaa le Beshanu bugbaa oke ubvu, paru eka; mbu l'ubvu Beshanu bu ubvu, nwegbaarū mpfukashi.
- ¹⁶Unube eze ubvu, nwegbaarū mpfukashi; ? Denu g'o nwuru unu ejiru ubvu Chileke ijiyenya? Mbu ubvu ono, Chipfu, bu Chileke hotaru je eburu buru eze ndibe iya jasū l'ojejoje ono.
- ¹⁷Ugbo-inya kẹ Chileke bukwa unu-kuru-unu. Nnajiuphu shi le Sayinayi bya ibe iya; eka o doberu nsọ, bu ubvu Zayonu.
- ¹⁸Teke ono, ì gbèshiru lashia l'ephekerephe ono be i dutaru igwerigwe ndu ì kpuru le ndzu lashia. Ndiphe gweru iphe nu ngu kẹ mmanu; mbu je akpachaa le ndu shi anoduje ekwefuru ngu ike; k'ophu gùbe Chipfu, bu Chileke a-nodu l'echilabo phẹ.
- ¹⁹G'ajaja buru kẹ Nnajiuphu; mbu Chileke ophu bu onye ndzota anyi; bya aburu onye evutaje ivu ehu anyi vuru mboku-mboku.
- ²⁰Chileke anyi bu Chileke, adzoje ndzu. O buru l'eka Chipfu, bu Nnajiuphu ono be eeshije nahu anwuhu.
- ²¹Chileke e-chikposhi ndu ohogu iya ishi; mbu okpokoro ishi ndu emekwadu ejo-ememe.
- ²²Nnajiuphu suru: "Mu e-shi le Beshanu duta unu duphuta azu. Mu e-je l'ohu eze-enyimu je aguta unu gude lwa;
- ²³k'ophu unu a-bya azoo ndu ohogu unu pyakapyaka. Nkuta unu eketakwapho oke ophu rwuberu phẹ nu."

- ²⁴Gùbe Chileke; onyemonye gbèwaa nta-a hùma gè ndibe ngu dzeberu awù alwa; mbù lè ndibe Chileke, bù eze mu dzebewaru awù ala l'ùlo iya, dù nsò.
- ²⁵Ndu nò l'iphu bù ndu agùru phè ebvu. Ndu etso ndu k'ono bùru ndu akpò une eye iya. Akatikpo ùnwumboko, nòdu akùkwapho nkwa etso phè.
- ²⁶Janaa Chileke ajaja l'edzudzu-òha! Jaa Chipfu ajaja l'echi èka ndu Ízurelu dzukòberu!
- ²⁷Sù-a; ndu edu phè nù bù òkpa-ipfu Benjaminu, bù òkpa-ipfu kè nwata. Ndu-ishi òkpa-ipfu Jiuda; waa kè Zebulònu; waa kè Nafùtali nòdu eze gbiigbiigbi etso phè.
- ²⁸Gùbe Chileke; rùkotanu ike ngu! Goshinu anyi òkpehu ngu Chileke; mbù ike ono, i shi gudehawaa ree ire l'opfu èhu anyi ono.
- ²⁹Ndu eze e-gude k'eze-ùlo ngu, nò lè Jierúsalemù bya emeeru ngu iphe-òma.
- ³⁰Baarù èjo-oke-agiyi ono, nò l'èjì ono mba; mbù òha ono, achì ndiphe kpabèkpabe g'oke-eswi, eme èna achì nweswi òso ono; jasù teke onyemonye ewoze onwiya alì; gude mkpòla-òchaa bya l'iphu ngu. Chikashia ndu ono, alwù ògu anòduje agù g'ègu-nri ono!
- ³¹Ndu-ishi Ijiputu; waa ndu Kushi bè a-bya achì-liaru Chileke èka.
- ³²Unu gùà ebvu nù Chileke; unubè alì-eze ùnwu-eliphe l'opfu! Unu gùà ebvu gude tua Nnajiuphu èpha!
- ³³Unu gùà ya nù onye ono, anòduje l'ugbo-inya iya agba l'ephekerephe urwukpu ichee ono; mbù onye egudeje oke olu tùa egbigwe.
- ³⁴Unu tùa ònu g'ike Chileke habe shii; mbù onye akpabiri iya tùkoru Ízurelu sweta; onye bù akpaminigwe egoshi g'ike iya habe shii.
- ³⁵Gùbe Chileke; ì dù ebvu l'ùlo ngu, dù nsò. Òo gùbe Chileke ndu Ízurelu emeje g'ike dù ndibe ngu; òkpehu adù phè. G'ajaja bùru kè Chileke!

Ebvù-òma 69

Ebvù, Dévidi deru nù onye-ishi ebvu; g'e gude olu ebvu, “Ojimbvu” gùà ya

- ¹Dzòo mu jiko Chileke; kèlè mini wòwaru mu l'èkpiri.
- ²Mu emiwa emimi emiba l'èpuchi; èka adùdu iphe, kòbe nvo, dù iya nù. Mu darwuwaru òhu-mini; utso woru mu ria.
- ³Mu chiwaru mkpu chita ike mu. Èkpiri gòwaa mu agògo. Tème mu nòdu aphùwaa ragaraga; èka mu nò ele ènya Chileke mu.
- ⁴Ndu mu dù ashì l'èbè adù iphe, mu meru phè kakwa ègbushi, nò mu l'ishi igwerigwe. Mbù lè ndu òhogu mu pakpòoru igwerigwe; mbù ndu anòduje achò ùzo, èphe e-shi mebyishia mu; l'èbè ò dùkpoo iphe, mu meru phè. Èphe ekebutajè mu; mu apfùà ugwo iphe, mu ezitaduru.

- ⁵Gube Chileke; i mawaru ge mu shi emeberu eswe; ophu o dudu iphe-aji mu ophu eemeru ngu le mpya.
- ⁶Gube Nnajiuphu, bu Chipfu; bya aburu Okalibe-Kakota-Ike; te ekwekwa g'e gude iswi ehu mu mee ndu ele enya ngu iphe-iphere! Ophu i kwekwa g'e gude iswi ehu mu meru iphere kpua ndu acho ngu nu; jiko Chileke ke Izurelu!
- ⁷Kele oo l'iswi ehu ngu be e gude ekweru mu une; bya eme iphe-iphere ekpu mu.
- ⁸Ndibe anyi be mu duwaa ge mu bu onye byaru abyabya; mbu unwune mu gedegede gube mu onye ohozo.
- ⁹Kele obu, mu yeru ulo ngu rimiwaru mu ishi. Iphe, bukpoone, e kweru ngu buru mbedua vutaru onwu iya.
- ¹⁰Mu rarū ekwa swia egu l'iphu Chileke. Iphe ono tukochaa buru iphe, ephe gude kweru mu une.
- ¹¹Mu yee uwe-aphu; ephe gude iya gaharu mu ebvu.
- ¹²Ndu doru l'onu-abata nodu epfuru mu. Mu buru onye ndu angu mee gude agu ebvu-mee.
- ¹³Ole oo gube Chipfu be mu anoduje epfu anu. Gube Chileke; gude n-yemobu ngu ono zakpoe mu pho enu teke du ngu ree; bya adzoo mu okpobe adzozo.
- ¹⁴Lofuta mu l'epuchi; b'ekwekwa g'o ria mu! Nafutanu mu l'eka ndu mu du ashi! Bya agufuta mu l'echi ogbumini ono!
- ¹⁵B'ekwekwa g'utso ria mu! B'ekwekwa ge mu darwua ohu-mini! Ophu iikwekwa g'e lia mu le ndzu!
- ¹⁶Zanu mu enu gube Chipfu; kele n-yemobu ngu du ree. Ghanaaru mu iphu Chileke; kele i phunukaru obu-imemini.
- ¹⁷Be domikwaru mube onye ejeru ngu ozi iphu! Zanu mu enu egwegwa; kele mu eje iphe-ehuka.
- ¹⁸Kpiritanuru ntse bya adzoo mu! Gbafuta mu ro m'obvu ndu mu l'ephe du l'opfu!
- ¹⁹I mawaru g'ephe kweberu mu une; bya amakwarupho g'ephe meberu mu iphe-iphere kparu. Ndu bu ohogu mu be i makotanuru-a.
- ²⁰E kwekwaru mu une jasū okpoma wahuaha mu awahu. Nta-a be o mewaru mu; ophu ike adudu mu. Mu leri enya onye a-phuru mu obu-imemini; ophu o dudu. Mu bya elee enya onye a-du mu obu; ophu o dudu onye mu humaru.
- ²¹Ephe wotaru mu iphe, egbu egbugbu ge mu ria g'o buru mu nri; bya edoberu mu mee-veniiga ge mu nguru ye iya.
- ²²Mekwaa ge nri, ephe doberu l'iphu phe buru igbudu tupyabe phe. G'anu, ephe gburu gude gwaa Chileke bukwaru

ónyà nmata phẹ.

²³G'ènya gbahukwa phẹ ọchii g'ẹphe phụ-buhu ọzo. G'okwebe nyajikwaa phẹ ẹbo; g'ẹphe nyaa mgbaku jasụ l'ojejoje.

²⁴Tukoshinụ phẹ ẹhu-eghu ngu! Gudenu oke ẹhu-eghu ngu kpegbushia phẹ!

²⁵G'ibe phẹ bukwaru ochobu. G'ọ tọ dukwa onye e-buru l'ẹka ẹphe kwaru unuphu.

²⁶Kele ndu ẹphe anọduje akpa ẹhu bu ndu i chiru ẹchachi. Teme ọ buru ndu i mekaru iphe be ẹphe anọdujekwapho epfubyishi.

²⁷Haa phẹ g'ẹphe mebaa ẹjo-iphe yekobe l'ọphu ẹphe mewaru; ọphu i kwekwa g'ẹphe keta oke l'apfubekoto nkengu.

²⁸G'e hufukwa ẹpha phẹ l'ẹkwo, e deru ẹpha ndu nọ ndzu. Ọphu e dekwa ẹpha phẹ l'ẹka e deru ẹpha ndu pfuberekoto.

²⁹Mu daru ukpa; teme aphụ tsube mu onu. Gube Chileke; ge ndzota nkengu dobenụ mu l'ẹka ta adudu iphe, e-me mu nụ.

³⁰Ọo ya bu ge mu agua ebvu gude tua Chileke ẹpha. Teme mu egude ebvu-ekele kutsee ya ọkpobe ekutse.

³¹Ono be a-ka Chileke atso uto eme l'a turu iya eswi; ọzo l'a turu iya oke-eswi, mpu iya hagbaa ke phengara phengara; teme ọpyi ọkpa pheshihuchaa ya epeshihu.

³²Ndu wozeru onwophe ali humae ya pho; ẹhu atso phẹ uto. G'obu unube ndu acho Chileke nodukwa ndzu!

³³Chipfu anumaje olu ndu adudu g'ọ du phẹ. Teme ndibe iya, a turu mkporo be ọ tọ gbakutajedu azu.

³⁴Ge ndu bu l'imigwe yee unwu-eliphe tua ya ẹpha! G'enyimu yee iphe bu l'ime iya tukokwapho tua ya ẹpha!

³⁵Kele Chileke a-dzo Zayonu; bya akpukwaa mkpukpu, nọ le Jiuda. Ndiphe alaa ya je eburu mee ya l'oo-buru iphe phẹ.

³⁶Unwu ndu ejeru iya ozi emee ya l'oo-buru okiphe phẹ. Iphe, bukpo ndu yeru ẹpha iya obu be e-buru l'ali ono.

Ebvu-oma 70

Ebvu, Dévidi deru nụ onye-ishi ebvu gude nyataru Chipfu iphe

¹Gube Chileke; jiko menaa egwegwa bya adzo mu! Byanu egwegwa bya eyeru mu ẹka; jiko Chipfu!

²G'iphe, bukota ndu acho ọzo, ẹphe e-shi gbua mu bukwaru ndu ee-meru iphere kpua; g'a tukwa phẹ eberebete. Chipfunu ndu agbaru mu ẹjo egomunggo azu. G'iphere ji phẹ iphu!

³G'e meru ujikputeru nụ ndu ekweru mu hee.

⁴G'iphe, bukpo ndu acho ngu nu buru ndu ehu a-tso. Epe anodu ngu l'eka tee eswa. Ge ndu o du g'a su l'i dzotaru phe buru iphe, epe akpuru l'onu epfu bu: "Unu tua onu Chileke l'o paru eka!"

⁵Obenu le mbedua bu onye ukpa bya aburu onye adudu g'o du iya; mbu l'oo gube Chileke bu onye eyejeru mu eka; bya aburu onye adzoje mu nu. Jiko Chipfu; b'akpokwa upfu!

Ebvu-oma 71

¹Oo gube Chipfu be mu no l'eka ezeru ndzu. B'ekwekwa g'e kpua mu iphu le ntụ jasụ l'ojejoje.

²Eshinu i bu onye pfuberekoto; nafutanu mu! Yeru mu eka ge mu nahu! Gbobenuru mu nchi; dzoo mu!

³Bunuru mu agbara-mkpuma, mu a-gbabaje je ezeeru ndzu! Tunaa ekemu su g'a dzoo mu! Kele oo ngu bu oke mkpuma nkemu; bya aburu ulo-mgbobuta mu.

⁴Jiko Chileke mu; gbafuta mu l'eka ndu ejo-iphe; mbu l'eka ndu apfubeduru eka phe oto; waa ndu iwashi.

⁵Kele oo ngu bu onye mu ele enya iya; gube Nnajiuphu, bu Chileke. Teme o buru ngu be mu dakoberu e -shi teke mu bu nwata.

⁶Eshinu a nwuru mu bue ngu pho bu agbarike mu. Mu a-noduepho etu ngu epha jasụ l'ojejoje; noo kele oo ngu kufutaru mu l'epho ne mu.

⁷Ndzu mu buwaru ndu du igwerigwe iphe-etu; obenu l'oo l'ime ngu be mu anoduje ezeru ndzu.

⁸Eswe l'enyasi be mu anoduje etu ngu epha; bya atu onu g'akpabiri ngu habe shii.

⁹Jiko ba jikakwa mu nta-a, mu buwaa ogerenya-a! Ba gbakutakwa mu azu nta-a, ike buwaru mu-a!

¹⁰Kele ndu ohogu mu epfukwaru mu ejo opfu. Teme ndu domishiru onwophe kwabe g'ephe gbua mu nodu anokobeje achi idzu mu.

¹¹Epe asuje: "Chileke jikaakwaru iya. Unu chia ya gude; kele o to dukwa onye abya iya agbaru mkpu."

¹²Ba nodukwa mu uzanya jiko Chileke! Bya egwegwa gube Chileke nkemu; bya eyeru mu eka!

¹³G'iphe, bukpo ndu ebo mu ibo bukwaru ndu iphere e-me g'ephe chihu. Ge ndu ono, eme g'ephe meka mu iphe ono bukwaru ndu ee-kweru une bya ajaa ewenu.

¹⁴Obenu le mbedua buepho l'eka i no be enya mu a-du. Mu a-noduepho aka ngu etu epha eje.

¹⁵Mu e-gude ọnu mu pfua ya mkpụrumkpuru pfushia ya ike sụ l'ị pfuberekoto; ọme ị nọdu adzoje nemadzu. Apfubekoto ngu ono waa ndzota nkengu ono habe shii k'ophu bu le mu ta agutadu iya l'ogu.

¹⁶Mu e-gude ike gube Nnajiuphu, bu Chileke je epfua l'oo ngu kpoloko bu onye pfuberekoto.

¹⁷Gube Chileke; i shiwaa teke mu bu nwata zita mu iphe! Iphe, du biribiri, iimeje be mu shiepho teke ono tuta onu iya jasụ nta-a.

¹⁸Nta-a, mu buwaa ogerenya, ewo jiru ishi-a; jiko Chileke; ba gbakutakwa mu azu; gbiriri jasụ mu akoeberu ogbo ophu abya nu g'ike ngu habe shii; mbu kooru iphe, bukpo ndu ee-mechaa nwua l'okpehu ngu paru aka.

¹⁹Apfubekoto ngu rwuru akpaminigwe; gube Chileke; mbu gube onye ono, meru iphe, paru aka; ? Bu onye aturu ngu; gube Chileke?

²⁰A makwaru-a l'i mewaru mu; mu jee ikpoto iphe-ehuka, paru aka bya adu ejo eji; ole mu maru-a l'ii-mechaa mezia ndzu mu; mbu l'ii-kufuta mu l'ime ilu.

²¹Ii-me; aa-ka mu akwabẹ ubvu; ọme l'ị dukwa mu pho obu ozo.

²²Gube Chileke mu; mu a-kpo une gude tua ngu epha l'ị bu onye apfushije ike l'iphe, i pfuru. Mu e-gude ogelenda gua ebvu tua ngu epha; gube Onye du Nso ke Izurelu.

²³Ogbogboromonu mu ephenebo a-tu uzu ehu-utso nu ngu; me mu nodu agu ebvu gude etu ngu epha; mbu mube onye ị gbafutaru.

²⁴Eswe l'enyashi be ire mu a-noduepho epfu iphe, i meshiru gude goshi l'ị pfuberekoto; kele ndu shi achi mu le njo be a jaru ewenu; ọme e mee; iphere ji phe iphu.

Ebvu-oma 72

Ebvụ, Sólomonu deru

¹Jiko Chileke; menaa g'eze kpeje ikpe g'iikpeje! Menaa ge nwatibe eze pfube-aka-oto g'i pfuleru!

²Oo ya bu g'o kpeje ndibe ngu ikpe, pfuru oto; mbu hajeru ndu aakpa ehu enge nhamunha.

³Iphe, e-shigba l'oke ubvu abyaru unwu-eliphe a-buru ehu-guu. O bukwarupho ehu-guu ono e-shigba l'unwu ubvu. O buru iphe, a-kpa iya nu bu apfubekoto onoya.

⁴Ndu eeme ewere, bu l'echilabo oha be oo-haru enge; l'o dzota unwegirima ibe ndu adudu g'o du phe; zopyashia ndu eme phe ewere ishi.

⁵Ephe a-nodu atsu ngu ebvu jasụ g'enyanwu; waa onwa a-noberu; mbu e -shi l'ogbo sweru ogbo.

⁶Oo-du g'eka mini edze l'eli osu, a suru asusu; mbu g'eka igwe ayoru mgboko eyo mini.

⁷Teke ọo-buru eze ono bẹ ndu p̄fuberekoto a-jà àjàjà. Ẹhu-guu a-tuko ẹkameka sweta; mbu ọo gbiriri jasụ teke ọnwa a-fubuhu l'eliphe.

⁸Ọo-buru eze ndu shi l'eze-ẹnyimu ọwa-a bua jasụ l'eze-ẹnyimu ọphuu; mbu ndu shi l'ẹnyimu Yufurétisu bua jasụ l'ẹka igwe beru alị beru.

⁹Ndu bu l'echięgu a-bya ephozeru iya; tẹme ndu ọhogu iya etsua ọnu l'ẹja.

¹⁰Ndu eze ndu Tashishi mẹ ndu bukube eze-ẹnyimu anọdu atụ akirikọ anụ iya. Ndu eze ndu Sheba yẹe kẹ ndu Seba a-nọdukwapho egudeje iphe-oma abya ibe iya.

¹¹Ndu bukotakpoo eze mgburugburu l'e-phozeru iya. Ọhamoha l'ophu e-jekotaru iya ozi.

¹²Kẹle ndu adudu g'ọ dụ phẹ

-raku iya bẹ ọo-dzọta phẹ; mbu ndu iphe-ẹhuka byaru; ọphu ẹphe enwedu onye gbaru phẹ mkpu.

¹³Ndu ike adudu; mẹ ndu adudu g'ọ dụ phẹ bẹ ọo-phuru obu-imemini; bya adzọta phẹ mee g'ọnwu te egbu phẹ.

¹⁴Ọo-gbafuta phẹ l'ẹka ndu emekpa phẹ ẹhu; waa l'ẹka ndu eme phẹ mkpawere; noo kẹle mee phẹ bẹ ọ guberu iphe.

¹⁵Gẹ ndzụ ogologo bukwaru nkiya! G'e gwekwaru mkpola-ododo ndu Sheba nụ iya g'ọ bukotaru nkiya! Gẹ ndiphe p̄fujekwaru op̄fu ẹhu iya nụ Chileke! Tẹme ẹphe agojekwarupho ọnu-oma nụ iya mbọku-mbọku!

¹⁶G'iphe, a kuru l'op̄fu sọkwaa kpukakpuka l'alị-a! Gẹ pherephere zikwa mee ẹkwo iphe, a kọberu akọbe l'eli úbvú g'ọ t̄a ụzu; g'ẹkwo oshi, p̄fugbaru l'úbvú úbvú Lébanonu! Gẹ nemadzụ zushikwa buru ẹswa l'igu lẹ mkpukpu ono!

¹⁷G'ẹpha iya nọdukwa jasụ l'ojejoje. G'údù iya jedzukwaru ẹkameka g'ẹnyanwu. Ọhamoha bẹ aa-gbẹ iya l'ẹka gọru ọnu-oma nụ; tẹme ọha l'ophu ekua ya onye a gọru ẹhu-utso nụ.

¹⁸G'ajaja buru kẹ Chipfu, bu Chileke; mbu Chileke kẹ ndu Ízurelu; onye bue ya pho kpoloko emeje iphe, dụ biribiri.

¹⁹G'ajaja bukwarupho k'ẹpha iya ono, dụ biribiri ono jasụ lẹ tuutuutu lẹ m̄imiimii! G'ogbunw̄iinwii ya t̄ukokwa mgboko l'ophu sweta! Nokwa g'ọ dụ; bya aburu g'ọ dụ!

²⁰Nokwa mkpochi-ishi ep̄fupfu, Dévidi nwa Jiesi pfuru nụ Chileke.

Ebvu-oma 73

Ebvu-oma, Asafu deru

¹Gẹ mu gbua ya tororo; Chileke dukwaru ndu Ízurelu ree; mbu ndu ono, obu phẹ guru ìphóró.

- ²Obenu lẹ mbẹdua bẹ ọ phọduru nwanshii mẹ ọkpa echifu mu; mbụ l'ọ phọduru nwanshii mẹ mu ta aduhe ike p̄furu l'iphe, mu p̄furu;
- ³ẹka mu wataru ejiru ndu etu onwophe ẹpha ijienya; kele mu humaru lẹ ndu ejo-iphe bẹ ẹhu dụ guu.
- ⁴Ọ tọ dudu iphe, atsụ phẹ l'ẹhu. Ẹhu dụ phẹ ree; tẹme ẹphe shihu ike.
- ⁵Ọphu ọ dudu iphe, atsụ ndu ọzo l'ẹhu atsuje phẹ l'ẹhu; ọphu ẹhu, emeje ndiphe emedu phẹ.
- ⁶Ọ buru iphe ono meru g'o gude eku-onwonye buru ọleka, ẹphe woru tukpoo onwophe l'olu. Eme nemadzu mkpawere buru uwe, ẹphe eye l'ẹhu.
- ⁷Ẹphe daa okporokpo jasụ ẹnya ribachaa phẹ ariba. Tẹme ejo-idzu ji phẹ ọkpoma ebushihu ebushihu.
- ⁸Ẹphe egudeje ejo opfu aja nemadzu ewenu. Ẹphe anọduje etu onwophe ọphushugbu; tẹme uja, ẹphe anọduje abọ buerupho g'ẹphe e-me mee ndu ọzo ewere.
- ⁹Ẹphe anọduje epfuru Chileke, bu l'imigwe ejo opfu. Ire phẹ nọdu eje phururugbadaa l'eliphe.
- ¹⁰Noo iphe, meru g'o gude ndibe mu ghakọbe tsoru phẹ; bya atuko iphemiphe, shi phẹ l'ẹka nguru ye l'ẹpho wutukumu.
- ¹¹Ẹphe nọdu asuje: “? Denu gẹ Chileke e-shi maru? Okalibe-kakota-shii; ? ọ duru ọphu ọ maru?”
- ¹²Waa gẹ ndu ejo-iphe dụ baa: Ọ tọ dudu iphe, erwuje phẹ l'ẹhu; tẹme ẹku nọdu anọduje abyaru phẹ gbukugbuku.
- ¹³Su-a; mbẹdua, s̄uru lẹ mu e-me obu mu g'ọ gua ìphóró bukwa onye-eswe bẹ mu bu. Mbụ l'ẹka mu kworu l'iswi-odumma tukochaa buru iphe-mmanu.
- ¹⁴Kele ọ tọ dudu mbọku-mbọku a taa nudu mu aphu; tẹme ọphu ọ dudu mbọku, mu nohajeru g'iphe-ẹhuka ta adapfuta mu.
- ¹⁵Ọ mẹ mu -jeru epfugbua g'ọ dụ mu; mẹ ọ -bukwaru mgbamu bẹ mu agba ọgbo ọwa-a, bu unwu Chileke-a.
- ¹⁶Qobujeru; mu -jee eme g'iphe ono kabekpoo doo mu ẹnya ilile; ọ gbẹ kabaa mu nu egburwashị ẹhu;
- ¹⁷gbiriri jasụ mu bya abahu l'ulo Chileke, dụ nsọ. Ọ buru ẹka ono bẹ mu nọ; o doo mu ẹnya; mbụ iphe, e-mechaa nwuaru phẹ nu.
- ¹⁸Su-a; iiwojeru phẹ dobe l'ẹka echi ẹturu; gbahaa phẹ ẹka; ẹphe abya adaa l'ali mebyishihu.
- ¹⁹Ọ tọ dudu g'ọo-nọ-bejeru; ẹphe aburu okorobo iphe. L'e yee phẹ ebvu jasụ l'a zata phẹ wushia.

- ²⁰Ephe aduje ge nrwo, a rwo; o -be l'utsu a zohaa ya. Nokwapho g'ephe achihuje l'iphu gube Chipfu m'i gbalihu.
- ²¹Teke ono, mu shi agu aphu ono; mbu teke ono, aphu shi tsoru ime obu mu ono;
- ²²be mu shi buru onye-eswe, amadu onwiya ekicha. Teme mu shi du g'anu-egbudu l'ataphu ngu.
- ²³Obenu l'inodujee mu pho ntse tekenteke. I setaeru mu pho l'ekutara gudeshia.
- ²⁴Oo ephe g'i chiru idzu l'ii-nodu edu mu bu g'inoduje edu mu; k'ophu bu e -mechaa; g'i duru mu laa l'o-gbu-nwiiinwii nkengu.
- ²⁵? Bu onye be mu nwebaru l'imigwe, abudu gubedua? Eshinu mu le ngu no ta adukwa iphe, no l'eliphe; agukwadu mu egu.
- ²⁶Ike abvuje mu l'ogwehu bvu mu l'obu; obenu l'oo Chileke bu onye agbataje mu ike l'ime obu. O buru iya bu okiphe mu jasu l'ojeje.
- ²⁷Ndu no ngu enya a-buru mkpurupyata; l'i mebyishia ndu i gudedu ire phe aka.
- ²⁸Obenu le mbdua be eh u anoduje atso utso le mu no-kube Chileke; mbu le mbdua wowaru Nnajiuphu, bu Chipfu; mee aka mu a-noduje ezeru ndzu. Oo ya bu le mu e-gude onu mu kokota iphe, du ree, iime l'ehu mu.

Ebvu-oma 74

Evu, Asafu kwaru

- ¹Gube Chileke; ? denu g'o gude i jika anyi jasu l'ojeje? ? Denu g'o gude oke ehueghu ngu nodu akpu tututuutu l'iphu igwe aturu, iiche echeche?
- ²Nyatakwa igwe oha ono, i zururo teke du enya enya ono; mbu okpa-ipfu ono, i gbataru l'itumo mee phe; ephe buru okiphe ngu ono. Nyatakwapho ubvu Zayonu ono, i bu ebubu ono.
- ³Shikpodapho uzo ono huma g'e mebyishibeberu iya; mbu ejo-iphe, ndu ohogu ngu meru o nwuru ulo ngu ono, du nsu ono.
- ⁴Ndu achu ngu le njo wubatakwaru l'ulo-ndzuko ngu; bya agboru ogboo kpua ya. Ephe woru echii kpobe iya gude goshi l'o kaleru phe.
- ⁵Ephe nodu eme g'onye pa ogbunku tsoru egbudu egbudu; egbutsushi iphe, bukpooshi, o humaru.
- ⁶Iphe, bukpooshi iphemiphe, a pyiru apyipyi b'ephe gude ogbunku gude ongu kukposhichaa akukposhi.
- ⁷Ulo ngu, du nsu b'ephe nwuru oku yee o tsua tsurwua ali. Ephe woru aka ono, i hotaru g'o buru aka ii-buru eburu ono pharwushia.
- ⁸Ephe nodu epfuje l'ime okpoma phe su: "Anyi e-mebyishichaa ya g'o hakotakpo!" Ephe tuko ekameka, e shi anoduje abaru Chileke eja tukota oku o tsua ya tsufu.

⁹Ophu ọ dudu iphe-ọhubama, du biribiri, eemejekwaduru anyi; teme ophu ọ dudu ndu mpfuchiru phoduru nu; ophu ọ dudu g'ọ ka mma l'ọo onye lanu l'echilabo anyi, maru g'egube iphe ọwa-a l'a-no-beru.

¹⁰?Ndu ohogu ngu a-nmakpoo ngu phulaphula jasu teke ole gube Chileke? ? Ndu i du ashi egudewaro epfubyishi epha ngu jasu l'ojejoje to?

¹¹? Bu gunu kparu iphe, iisela eka ngu azu; mbu ekutara ngu? Chifuta eka l'iphu utapfu gude mebyishia phe.

¹²Obenu l'ọo gube Chileke bu eze nkemu, e -shi l'edenwede. Oo ngu byaru adzo unwu-eliphe.

¹³Oo gubedua gude ike ngu chiwaha eze-enyimu ebo. Ejo-anu, bu le mini b'i chikposhicharu ishi echikposhi.

¹⁴Oo gubedua zopyashiru ejo-oke-agiyi ishi; woru iya nu anu, bu l'echiegu g'ọ buru nri iya.

¹⁵Oo gubedua gbafushiru oga yee nggele; mini shi iya soshihu. I bya amichata mini le enyimu, aso gborogboro.

¹⁶Eswe bu nkengu; enyashi buru nkengu. O buru ngu meru enyanwu yee onwa dobe; ephe keru jimujimu.

¹⁷Oo gubedua tubuhawaru eka oke ali a-kpagbaa le mgboko-a mgburugburu; bya edobe onanwu dobe udzumini.

¹⁸Nyatakwa ge ndu ohogu ngu chiberu ngu ochi Chipfu; mbu ge ndu-eswe pfubyishiberu epha ngu.

¹⁹B'e wokwaru ndu nwa-ndo-nwenu ngu woru ye l'eka ejo anu-egbudu! Ba zohakwa ndibe ngu, bu ndu eje iphe-ehuka. Ba hakwa phe g'ephe nodu iya nno ojejoje!

²⁰Nyatakwa ogbandzu anyi le ngu; noo kele mkpawere dukwa l'iphe, bukpo eka agba ochii l'ali-a.

²¹B'ekwekwa ge ndu eemekpa ehugude iphere tsuphu azu. Ge ndu ukpa me ndu adudu g'ọ du phe janaa epha ngu ajaja!

²²Gbalihunu gube Chileke pfua l'onu onwongu! Nyatakwa ge ndu eswe eshije l'utsu chia ngu ochi jasu nchi ejihu.

²³Ba zohakwa hanyihanyi, ndu achu ngu le njo aba; mbu woowoowo, ndu wulihuru etso ngu opfu atu mkpurumkpuru sekpu ngu.

Ebvu-oma 75

Ebvu-oma, Asafu deru nu onye-ishi ebvu; ishi ebvu iya bu "B'ekwekwa ge mu laa l'iyi"

¹Anyi ekele ngu ekele gube Chileke; anyi ekele ngu ekele. Ndu eku epha ngu atu onu iphe, du biribiri, iimeje.

²Oo gubedua, bu Chileke suru: “Mu dobewaru teke mu e-kpe ikpe; kpee ya nhamunha.

³Teke eliphe l'ophu; me iphe, bu ndu nu iya nu anma jijijiii; bu yebedua be egudeje itso iya gudeshia ya ike.

⁴Ndu eku onwophe be ya asuje: Unu hanaa eku onwunu! Ya asu ndu ejo-iphe: Unu ta malihe mpu unu imeli!

⁵Unu ta amalishiru igwe mpu! Unu te ewoshinuru olu pfube kanganaa asa kpaakpaa!”

⁶Ekutse amadu te eshidu l'uzo enyanwu-awawa; ophu o shidu l'uzo enyanwu-adada; ophu o shikwapho l'uzo echiegu.

⁷Oo Chileke bu onye ekpeje ikpe. Oo ya ekudaje onye owa-a; l'o kutsee onye ozo.

⁸Chipfu pa okoro l'eka. Iphe, jiru iya nu buru mee, ata kpitikpiti, adudu iphe, e yeduru iya gude mee ya o shihu ike. O nodu abujeru; a -nonyaa l'o wushia ya. Iphe, bu ndu ejo-iphe, kuru l'eliphe angua ya jasu l'o bvu.

⁹Obenu le mbedua a-nodu ete eswa jasu l'ojejoje. Mu a-noduepho agu ebvu etu Chileke ke Jiekopu epha.

¹⁰Mu a-swoshicha ndu ejo-iphe mpu, epe gude eme ike; wolia mpu ke ndu pfuberekoto g'o pfuru kanganaa.

Ebvu-oma 76

Ebvu-oma, Asafu deru nu onye-ishi ebvu; g'a kporu une ye iya

¹Chileke be a maru amaru le Jiuda. Epha iya tukowaru ali Izurelu ngakota.

²Eka ulo iya no bu le Salemu. Eka o bu ebubu buru l'ubvu Zayonu.

³Oo l'eka ono be o no gbakwoshia apfu, enwu oku, ndu ohogu iya shi agba. O bya anyakwoshikwapho ogu-echi phe; waa iphe, epe shi egbobeje gude zeeru onwophe; mekpoo iphemiphe, epe shi egudeje alwu ogu.

⁴Onye akpabiri be i bu. I du biribiri dughata ubvu ubvu, bu iphe, jiru iya nu bu anu-egbudu.

⁵Ndu gbaru mkparawa be a kwawaru iphe phe okwata. Epe kua mgbenya ikpazu phe; ophu o dudu ndu okpehu du m'onye lanu, duru ike mee eka ukporo.

⁶Gube Chileke ke Jiekopu; o bu-a mba be i baru phe; inya phe; waa ugbo-inya phe l'ophu keshiru l'eka lanu.

⁷Oo ngu nwekinyi ngu be o gbaru g'a tsuje ebvu. ? Bu onye a-du ike pfuru pfushia ike l'iphu ngu m'ehu wata ngu egu egu?

⁸⁻⁹Gube Chileke; teke i gbalihuru g'i kpee ikpe; shi nno dzota ndu aakpa ehuru l'eliphe; be i no l'imigwe bua ikpe. Ali tsuhu ngu ebvu daa nyonyoronyo.

¹⁰Oo ya bu l'obujeru; i -tukoshi ndiphe oke ehu-eghu ngu be aagbejenu tuahaa ngu epha. Nwa ndu ophu ehu-eghu ngu obu haphodoru aburu ndu akpo egomunggo okpolohu.

¹¹O -buru l'unu rifuru Chipfu, bu Chileke unu angu su l'owa-a iphe, unu e-meru iya; unu wotakwa iphe obu bya emeekokota iphe, unu kweru ukwe iya. G'iphe, bukpo ndu bupheru phe mgburugburu wota iphe-oma; bya emeeru onye lanu ono, gbaru g'a tsuje iya ebvu ono.

¹²Oogwerishije okpoma ndu-ishi egwerishi. Ndu eze unwu-eliphe nodu atsu iya ebvu.

Ebvu-oma 77

Ebvu-oma, Asafu deru nu onye-ishi ebvu, bu Jiedutunu

¹Mu chikuru Chileke le mkpu g'o yeru mu aka. Mu chikuru Chileke su g'o numa olu mu; o numa olu mu.

²Teke mu eje iphe-ehuka be mu choru Nnajiuphu. Enyashi ophu be mu chilikotaru aka imeli epfu anu Chileke; ophu ike abvuduru mu. Teme ophu obu mu ekweddu g'a duta iya aduta.

³Mu nyataru gube Chileke bya atsua ude. Obu mu bya ebvuru shii rikota oriri jasu ike bvu mu.

⁴I meru ophu mgbenya atuduru mu. Iphe ono tsutabe mu l'ehu k'opu o kporu mu opfu.

⁵Mu bya egude egomunggo bya elee enya le teke ndiche; mbu apha, dukpowaa enya enya.

⁶Mu bya anyata egube ebvu, mu shi anoduje agu l'enyashi. Mu bya ebvuru shii rikota oriri mkpurumkpuru. A nonyaa; mu jia obu mu su:

⁷“? Nnajiuphu a-jikawaro anyi jasu l'ojejoje too? ? To dukpoedu teke oo-nonya l'ogoshi l'anyi du iya-a l'obu?”

⁸? O pfuru le n-yemobu iya ono te erwubaedu anyi aka jasu l'ojejoje too? ? O du g'o to byaedu emebaru anyi iphe, o kweru ukwe le ya e-meru anyi too?

⁹? Chileke zohawaru obu-imemini nkiya too? ? O du g'o vuharu ovuma su le ya taa phueduru anyi obu-imemini?”

¹⁰Tobudu iya bu; mu su: “Waa iphe, kachakpo mu atsu l'ehu baa. Ole mu anyata teke Okalibe-kakota-shii ono shi egudeje ekutara iya eme ike.”

¹¹Mu a-nyata iphe-kpaakpaa, Chipfu shi emeje; mbu le mu a-nyatakota iphe, du biribiri, i shi emeje.

¹²Mu e-bvuru shii ria oriri l'iphe, i mekotaru teke ono. Mbu Okalibe oka-ngo, i shi emeje teke ndiche be mu a-rivucha l'oriri.

¹³Gube Chileke; uzo ngu du nsu! ? Denu agwa, habe shii ge Chileke anyi?

- ¹⁴Oo ngu bu Chileke, emeje ohumalenya. Iimeje ge ndiphe huma g'ike du-be ngu.
- ¹⁵I gude okpehu ngu gbafta ndibe ngu; mbu gbafta oshilokpa Jiekopu yee Jiosefu.
- ¹⁶Su-a; mini humaru gube Chileke; mbu l'enyimu, aso asoso humaru ngu; ndzu rwuta iya; teme ogbumini nmahuchaa pyaapyaapya.
- ¹⁷Igwe dzeru mini; akpaminigwe raa gbagbagba; teme ebemu-igwe nodu alo phaaphaa l'ekameka.
- ¹⁸A numaru oda ebgigwe, iitu l'echi oke pherephere. Ebemu, iilo phaaphaa buru iphoro, e gude ahuma uzo l'eliphe; Ali l'ophu tsuhu ebvu; nmahu jiiijiii.
- ¹⁹I togboru gbororo l'echi eze-enyimu. I shijaru eze-ogbu-enyimu, paru eka ghata; ophu o budu l'a humaru eka i zoru okpa.
- ²⁰I gbẹ l'eka Mosisu yee Eronu dua ndibe ngu g'onye edu aturu.

Ebvu-oma 78

Évù, Asafu kwaru

- ¹Unube ndu mu; unu numa iphe, mu ezi! Unu ngabe nchi numa opfu, shi mu l'onu!
- ²Ge mu bya asaa onu nmaru etu nu unu; ge mu bya avoshichaa opfu, e domiru edomi e -shi teke ndiche.
- ³Iphe ono bu iphe, anyi numajehawaru; bya aburu iphe, anyi maru. O bu iphe, nna anyi oche phe shi akojehawaru anyi.
- ⁴G'ike Chipfu habe shii; teme waa iphe, gbaru k'etu epha; yee iphe, du biribiri, o mekotaru be anyi te edomiduru unwu phe edomi; Anyi e-pfucharu iya ogbo ophu dukwadu l'iphu.
- ⁵O doberu unwu Jiekopu omelali, epe e-tsoje; bya atua ekemu dobe; o nguru anguru l'ali Izurelu; bya akaru ndiche anyi phe g'ephe zikwaa ya unwegirima phe.
- ⁶K'ophu ogbo ophu abya nu a-maru iya; mbu ndu ophu e teke anwukpoda nu anwunwu. Epehedua egudekwa iya pho zia unwu nkephe.
- ⁷Oo ya bu g'ephe akporu obu ye le Chileke. Epe ta azohaedu iphe, o meshiru. Epe edobedzua ekemu iya g'o ha.
- ⁸Epe ta aduedu ge nna phe oche phe shi buru ogbo ejo okpoma; buru ogbo, kwefuru Chileke ike; mbu ogbo, adudu teke obu phe ngujeru anguru l'eka Chileke no; teme ophu o dudu teke epe pfushijeru ike l'iphu iya.
- ⁹A makwaru-a l'unwoke Ifuremu gude apfu kwaa onwophe ngwogu; obenu l'ogu tsuru; epe ye okpa l'oso gbalachaa.
- ¹⁰Ogbandzu epe le Chileke be epe mebyiru; ophu epe emeduru kunyabe iphe, o turu l'ekemu.
- ¹¹Epe zohaa iphe, Chileke meshiru; mbu iphe, du biribiri, o meshiru goshi phe.

- 12**O meshiru iphe, dụ biribiri l'iphu nna phẹ oche l'alị Ijiputu lẹ mgbẹgu Zowanu.
- 13**Eze Ẽnyimu bẹ o keru ẹbolechiko dua phẹ dughata. O mee mini; ọ kpua oronmono g'igbulo.
- 14**Iphe, o gude dua phẹ l'eswe bụ urwukpu; bya egude iphóró ọku dua phẹ l'enyashi mbọku-mbọku.
- 15**Agbara-mkpuma bẹ ọ gbajaharu ẹbo l'echiegu; shi l'eka ono nụ phẹ mini, dọru nyimunyimu g'oke-enyimu.
- 16**Ọ bụru ẹka mkpuma gbaru ọru bẹ o meru; mini soshihu soaha gborogboro ge nggele.
- 17**Obenu l'ephe emeele iya-a iphe-ẹji. Ephe noele-a l'echiegu ono ekwefuru Okalibe-kakota-shii ike.
- 18**Ephe lekebekpoo enya wata ahụ Chileke ama; mbụ kebekpopho g'ọ nụ-dzujeru phẹ udu nri, agụ phẹ nụ.
- 19**Ephe pfiaru Chileke ẹjo opfu sụ: “? Bụ ge Chileke adu ike zua anyi l'echiegu-a?”
- 20**Teke o chiru iphe l'agbara-mkpuma bẹ mini shi iya soshihu; nggele bụru gborogboro. Ọle ọ bụ; ? bụ g'oo-dufua ike nụ anyi nri? Tọo ? ọo-dufukwapho ike nụ anyi anụ?”
- 21**Chipfu -nūmae ya phọ; ẹhu ghua ya oke egu. O woru onwu taphutaphu ọku kpoberu Jiékpou; mbụ woru oke ẹhu-eghu iya doberu ndu Ízurelu.
- 22**Kele ephe te ekwetaduru lẹ Chileke duru iphe, ọ bụ; teme ophu ephe ekwetakarupho l'oo-du ike dzoo phẹ.
- 23**Obenu l'ọ sụru akpaminigwe l'owa-a iphe, oo-me; o mee ya; teme ọ ghashia ọzo imigwe;
- 24**bya edzeeru ndu Ízurelu nri ono, bụ mana ge mini. Ọ bụru akpuru-iphe, shi l'igwe bẹ ọ nuru phẹ egube ono.
- 25**Amadu ria nri unwu imigwe. Chileke nụ-dzukotaru phẹ nri, sụru phẹ eriri.
- 26**Pherephere, eshije l'uzo enyanwu-awawa bụ yebdua tūharu iya ọzo imigwe; ọ wata ezizi. Nokwapho g'o gude ike iya nwuhaa ophu eshije l'uzo ndohali; ọ wata ezizi.
- 27**Anụ, aata atata b'o dzeru phẹ; ọ nođu etsu gbiigbiigbi g'udzu, no l'alị. Ẽnu, ephe l'eli bẹ o nwuru nụ phẹ; ọ ghakashihuru phẹ g'ẹja, kuru l'aguga enyimu.
- 28**O mee; ephe phebatashaa l'eka ephe dọru. Ulo-ekwa phẹ bẹ o shi anodujecha ephephe mgburugburu.
- 29**Ephe ria nri jasụ ephe jigharu phẹ ẹka; kele ọ nuru phẹ iphe, agụ phẹ nụ.
- 30**Ọle ephe byaru erighe nri ono, shi agụ phẹ nụ ono; mbụ l'ephe kpukwadu iya l'onu;

- ³¹Chileke watawaa phe atukoshi oke ehu-eghu iya. O tukoeppo ndu kachaa okporokpo l'echilabo phe gbushia; mbu lo tukoru unwokorobya Izurelu ono mebyishia.
- ³²O mechakpokwa phe egube ono; epe nodu emekwapho iphe-eji. O mechakporu phe iphe-ohumalenya ono; ophu epe ekwekwapho lo duru iphe, o bu.
- ³³Noo g'o gude o mee ndzu phe chihu g'udzu onu; bya egude keteketekpaa mebyia ndzu phe.
- ³⁴Teke o haeru phe pho gbushia; epe agbe teke ono choahaa ya; mbu epe alwukorohu dakobe; ghaaru iya iphu ozo lwapfuta iya.
- ³⁵Epe anyata le Chileke shi buru agbara-mkpuma phe; lo Chileke ono, bu Okalibe-kakota-shii ono bu onye gbafutaru phe nu.
- ³⁶Ole epe gude onu phe aja iya ewenu; mbu l'epe gude ire phe adzuru iya uka.
- ³⁷Obu phe ta anodu l'eka o no; ophu o dudu teke epe pfujeru pfushia ike l'ogbandzu epe l'iya.
- ³⁸Ole Chileke aphujele-a obu-imemini guaru phe nvu l'ejo-iphe ono, epe anoduje emegbabe ono; ophu o mebyishiduru phe. Ugbo olemole be o lo-phuchawaru ehu-eghu iya azu; ophu o tukoduru oke ehu-eghu iya ono go ha wua phe l'ishi.
- ³⁹O nodu anyataje l'epe bu anu-ehu; l'epe bu pherephere, ezi ezizi, ete eziphujedu azu m'o zighatawa.
- ⁴⁰Ugbo olemole be epe kwefuwaru iya ike teke epe eje l'echiegu; mbu kpatsu iya iwe l'ali, dabyiru mgbegere.
- ⁴¹Tekenteke kpo be epe shi anoduje ahu Chileke ama. Epe shi anoduje eme Onye du Nso ke ndu Izurelu iphe ehu-eghu.
- ⁴²Ophu epe anyataeduru okpehu iya ono; mbu okpehu ono, o gude gbafuta phe l'eka ndu shi eme phe mkpawere ono;
- ⁴³bu iya bu mboku, o meru; a huma-dzuru iphe, du biribiri, o meru le Ijiputu; me iphe, du ebvu, o meshiru le mgbegu Zowanu.
- ⁴⁴O meru nggele nggele phe; o ghoshia mee. O mee ophu mini, doru l'enyimu adudu k'angungu.
- ⁴⁵O chiru ijiji ye; o turu wowowo bya anua phe chiipfuu; bya achiru mbara ye; o mebyishia ali phe.
- ⁴⁶Iphe, epe kuru l'ali be o chiru inyarinya yee; o tapyashia; bya achiru igube yeru ndu ophu miru amimi; o tafu iya.
- ⁴⁷Oshi sikamo phe be o gude akamini tapyashia; bya egude iji uguru mebyishia akpuru vayinu phe.

- 48Eswi phẹ bẹ o gude ẹjo akamini ono tugbushichaa; bya egude ire egbigwe tugbushikọta iphe-edobe phẹ g'ọ ha.
- 49O tuko oke ẹhu-eghu iya g'ọ ha vuru byabẹ phẹ l'ishi. O chita unwu-ojozi-imigwe ye g'ẹphe je emeghe nkepẹ.
- 50O toru ẹhu-eghu iya ono owere; ophu o machiduru ẹka iya nafuta phẹ g'ẹphe ta anwuhu. O woru phẹ haaru ẹjo iphe-ememe g'ọ meghee nkepẹ.
- 51Iphe, bukpo ndu bu okpara l'alì Ijiputu bẹ o gbukotaru egbugbu; mbu mebyishichaa nwa, vuru ọzo kpoo onyemonye iphu l'alì Hamu.
- 52Obenu lẹ ndibe iya bẹ o toru nwehu rwua g'onye erwu aturu rwufuta; bya echee phẹ g'eecheje aturu-a gude dughaa echiẹgu.
- 53O dukpoeru phẹ pho chiriri werere; gẹ ndzu ba gu phẹ; obenu lẹ ndu ohogu iya bẹ o haru; eze-enyimu rigbushikọta.
- 54Tobudu iya bu; o dua phẹ durwua ẹka bu oke alì iya, du nsọ; mbu durwua phẹ l'ubvu ono, o gude ẹkutara iya lwuta ono.
- 55O chia ndu ohozo ikpabaka chifuchaa l'iphu phẹ; bya eworu alì phẹ keeru ndu Izurelu g'ọ buru okiphe phẹ. O chiru okpa-ipfu Izurelu ye; ẹphe buchishia alì phẹ ono.
- 56Ole ẹphe mechaeru-a hua Chileke ama; bya ekwefuru Okalibe-kakota-shii ike; mekota iphe, bukpo iphe, o suru g'ẹphe te emejeshi.
- 57Epe tsoo okpa nna phẹ oche; gbakotaru Chileke azu; teme ẹphe buru ndu adudu onye gude ire phẹ ẹka. Onye daphuberu phẹ nu du g'onye daphuberu okpete.
- 58Epe gude ẹka ẹphe agwaje iphe, ẹphe dobegbaaru l'ekameka; gude kpatsua Chileke iwe; mbu kpatsu iya; o koaharu ntekepe, ẹphe pyishiru okophoo.
- 59Ge Chileke humaru iya bẹ ẹhu ghushiru iya eghu ike. O jikapho ndu Izurelu jikanyia enya.
- 60O no-buhu l'ulo-ekwa nkiya ono, du lẹ Shilo; mbu ulo-ekwa ono, bu yebedua gude ẹka iya kpobe l'echilabo unwu-eliphe.
- 61O woru okpoko ogbandzu iya haa; ndu ohogu iya lwuta l'ogu; mbu okpoko ogbandzu, bu iya egoshije g'ike iya habe shii; bya aburu iphe, egoshije g'ọ du-be biribiri bẹ o paru haa l'eka ndu ohogu iya.
- 62O haru ndibe iya; e gbushia phẹ; noo kele ndu ono, bu okiphe iya ono bẹ kpatsuru iya iwe.
- 63Nwada phẹ ta adudu onye byaru phẹ aluta; noo kele unwokorobyia phẹ bẹ oku tsugbushiberu.
- 64Ndu uke Chileke phẹ bẹ e gude mma gbushia; ophu unwanyi, ji phẹ nwuhuru anojedu l'ulo-maa ndu shi alu phẹ nu.

⁶⁵A -nonyaa; Nnajiuphu kwolihu g'onye shi eku mgbenya; mbu kwolihu g'onye shi ngua mee; o lota iya phube;

⁶⁶bya enwuphu ndu ohogu iya azu; mee phe iphe-iphere, ichi iya te nweddu echihu jasu l'ojeje.

⁶⁷Oshilokpa Jiosesu l'ophu be o jikakotaru; mbu l'okpa-ipfu Ifuremu be o to hotaduru.

⁶⁸Obenu l'o gbetchia hota okpa-ipfu Jiuda; bu iya bu ubvu Zayonu ono, o yeru obu ono.

⁶⁹O bya eworu ulo iya, du nsu kpa; o ha g'oke ubvu; mbu kpa ya; o du g'eliphe, o turu okpa iya; o buru iphe, a-no jasu l'ojeje.

⁷⁰O hotaru onye-ozu iya, bu Devidi; bya edufuta iya l'eka o no l'odu aturu.

⁷¹O dufutaru iya l'eka ooche aturu g'o bya eleta ndibe iya, bu unwu Jieko bu enya; mbu g'o kpo-zijeru unwu Izuru, bu okiphe iya uzo.

⁷²Devidi gudekpopho obu, guru iphoro leta phe enya; bya egude okpobe mmamiphe chikota phe le chiriri werere.

Ebvu-oma 79

Ebvu-oma, Asafu deru

¹Gube Chileke; humanu le ndu ohozo so-kputewaru ali ono, bu okiphe ngu ono. Epe pharwushiwuru eze-ulo ngu ono, du nsu ono; bya emewaa Jierusalem; o buru ikpozu.

²Odzu ndu egeru ngu ozu be epe wowaru togbogbaaru enu, epe l'eli g'o ria; mbu l'odzu ndu duru ngu nsu be epe wowaru taru anu-egbudu nanu nanu.

³Jierusalem l'ophu gba mgburugburu be epe gbashuru mee nemadzu ge mini; ophu o duedu onye nokwadu nu, e-gburu eja tukobe ndu ono, wushuru egube ono.

⁴Ndu obutobu anyi phe me ndu bupheru anyi mgburugburu toko ekweru anyi une bya achi anyi ochi.

⁵? Bu teke ole be ehu e-ghuberu ngu egu gube Chipfu? ? Ehu e-ghuwa ngu ro egu jasu l'ojeje to? ? Bu teke ole be okophoo ngu e-nwuberu phuruphuru g'oku kparu?

⁶Wonuru ehu-eghu ngu tukoshi ndu ohozo ono, amadu ngu nu ono! Tukoshikwa iya pho ali-eze ono, ete ekujedu epha ngu ono!

⁷Kele epe gbuwaru oshilokpa Jieko pyaapya; bya emebyishiwa unuphu ibe phe.

⁸Te emekwa g'anyi nwua onwu iphe-eji, nna anyi oche phe meru! Phuru anyi obu-imemini egwegwa; kele anyi dabyiwuru mgbegere.

⁹Yeru anyi eka jiko Chileke; mbu gubedua, bu onye ndzota anyi; k'ophu ee-shi nno kwabe epha ngu ubvu. Guru anyi nvu l'iphe-eji anyi; nafuta anyi; g'epha ngu apfuru!

¹⁰? Denu g'o gude ndu ohozo je a-nduje aji-phe su: “? Denu aka Chileke phe no?” Nodunu l'iphu anyi mee ge ndu ohozo ono madzuru l'i gwataru ugwo ochi ndu ejeru ngu ozi ono, e gbushiru ono.

¹¹G'ude, ndu no l'oka mkporo atsu rwunaa ngu nchi! Gudenu okpehu ngu mee ge ndu e kperu mpfugbu nweru onwophe.

¹²Pfua obutobu anyi phe ugwo iphe, ephe meru ngu ugbo esaa; mbu iphe-iphere, ephe mekotaru kpua gube Chipfu.

¹³Oo ya bu g'anyiibe ndibe ngu etua ngu epa jeye l'ojeje; mbu anyiibe aturu, iiche echeche ono; mbu l'anyi e-tu ngu epa; e -shi l'ogbo sweru ogbo.

Ebvu-oma 80

Ebvu-oma, Asafu deru nu onye-ishi ebvu; g'e gude olu ebvu, “Ojimbvu Ogbandzu” gya ya

¹⁻²Ngabenu anyi nchi l'olu; gube onye eche Izurelu g'onye eche aturu; bya aburu onye anoduje erwu Jiosefu g'onye erwu igwe aturu eje le nri. Ge gube onye ono, sugaru l'echilabo chierobu ono chinaa g'anwu l'iphu ndu Ifuremu; waa ndu Benjiaminu; yee ndu Manase! Jiko rukotanu ike ngu bya adzota anyi!

³Dophunu anyi azu l'onodu anyi jiko Chileke! G'iphu ngu gbua nwainwii l'ehu anyi; k'ophu aa-dzota anyi.

⁴Gube Chipfu bu Chileke; bya aburu Okalibe-Kakota-Ike; ? eh e-ghukpo ngu egu ghuberu teke ole; mbu ke gi ti numaje epfufu, ndibe ngu epfu anu ngu?

⁵Nta-a be i mewaru phe; enya-mini buru phe nri eriri; bya emee phe; ephe ngua enya-mini, jiru ochi njaka-onu.

⁶I mewaru; ndu obutobu anyi phe nodu ekweru anyi une; teme ndu ohogu anyi nodu achi anyi ntumatu.

⁷Dophunu anyi azu l'onodu anyi; jiko Chileke, bu Okalibe-Kakota-Ike! G'iphu ngu gbua nwainwii l'ehu anyi; k'ophu aa-dzota anyi.

⁸Oo ngu shi l'ali Ijiputu gude akpuru vayinu wolata; bya atuko ndu ohozo chifuchaa l'ali phe; bya eworu iya kua.

⁹Oo ngu gude aka ngu gbuchaa aka i kpoberu iya egbucha. O bya agbaa ogbarabvu, tukoru ali ono l'ophu jedzuru.

¹⁰O jaa ajaja jachikota ubvu l'ophu; mbu l'ekali iya haepho ephekerephe ephekerephe g'eze oshi sida.

¹¹Epukala iya jedzuru oke-enyimu. O tuko ekameka kpofushia jasu l'enyimu Yufuretis.

¹²? Denu g'o nwuru o gbetchia buru nta-a be i jeru eworu mgbabu iya phokashia; k'ophu onyemonye, aghata nu ejeje je awoo akpuru iya g'o du iya?

¹³Ezi-ọswa shi l'oke ọswa wụ-pfuta iya bya atakwoshia ya; ọme ụnwu anụ, i meru dobe l'ẹgbudu buru iya bẹ ẹphe gude azụ onwophe.

¹⁴Lwaphutanụ azụ lwapfuta anyi; jiko Chileke, bụ Ọkalibe-Kakọta-Ike! Gbenu l'imigwe lefu ọnya humakpodapho iphe, anwụ nū. Jiko letanụ vayinu ngu-a ọnya;

¹⁵mbụ ọgbarabvu iya ono, bụ gubedua gude ẹkutara ngu yee ya; mbụ nwa nwoke, bụ gubedua gude ẹka ngu zua ya zụ-tsee.

¹⁶Ome vayinu ngu ono bẹ e gbubushiakwaru. E gudeakwa oku tsupyashia ya. O buru mba, i gbanwuberu iphu baaru ndibe ngu meru iphe, ẹphe wataru alaa l'iyi.

¹⁷Wonuru ẹka tukobe nwoke ono, no ngu l'ẹkutara ono; mbụ nwa nwoke ono, bụ gubedua gude ẹka ngu zua ya zụ-tsee ono.

¹⁸Oo ya bụ g'anyi aghabuhuru ngu okotazu. Jiko phunwunaa anyi g'oku; g'anyi awata eku ẹpha ngu ozo.

¹⁹Dophonu anyi azu l'onodu anyi; jiko Chipfu, bụ Chileke; bya aburu Ọkalibe-Kakọta-Ike! G'iphu ngu gbua nwiniwii l'ehu anyi; k'ophu aa-dzota anyi.

Ebvu-oma 81

Ebvụ, Asafu deru nụ onye-ishi ebvu; g'e gude ngwa ebvu, jita gya ya

¹Unu gua ebvu ẹhu-utso nū Chileke; onye bụ iya bụ ike anyi! Unu gude ẹhu-utso gbọo ọgboo l'iphu Chileke ke Jiékpọ!

²Unu watanu agu ebvu; kuru nkwa ye iya! Unu akporu iya ogumogu; waa une erengete!

³Unu gbunaa opu m'onwa fupho k'ophuu! Unu gbukwaa ya pho m'onwa dzuepho edzuzu; a wata obo-iphe.

⁴L'iphe ono bukwa omelali, a turu doberu ndu Izurelu; mbụ l'oo iphe, Chileke ke Jiékpọ toru okpa su g'e tsoje.

⁵Oo ekemu, o meru o shihu ike; bya asu ge Jiófufu meje iya; mbụ teke ono, o tsoru ndu Ijiputu ọgu onoya. Olu, mu anu te edokwaru mu ọnya.

⁶Olu ono suru: Oo mbedua pafuru phe oke ivu ono, shi nodu phe l'ukuvu ono; mbụ bya ezia phe nkata ivu ono, ẹphe shi vuru ono.

⁷Teke unu eje iphe-ehuka bẹ unu kuru mu oku; mu nodu l'urwukpu gude egbigwe za unu ọnu bya adzota unu. Mu gude mini Meriba hua unu ama.

⁸Unube ndibe mu; unu ngabekpodapho; ge mu loo unu ẹka le nchi! Unube ndu Izurelu; unu ngabekpodaru mu pho nchi!

⁹G'ọ to dukwa iphe ozo, unu e-dobe agwa agwagwa l'echilabo unu! Ọme ophu o dukwa iphe ozo, unu a-bajeru aja.

¹⁰Noo kele ọo mbedua bu Chipfu; bya aburu Chileke unu. Ọo mbedua bu onye dufutaru unu l'ali Ijiputu; mbu-a; unu sakpodapho onu unu gabala ge mu wu-jia ya awu-ji!

¹¹“Obenu le ndibe mu te eyeduru mu onu; mbu le Izurelu te ekwedu nodu mu l'eka.

¹²Tobudu iya bu; mu wonuru phe haaru ejo okpoma phe; g'ephe tsowaruro iphe, ephe ritaru l'obu phe.

¹³Su-a; ọme ọo ke ge ndibe mu ngaberu mu nchi; ọme ọo ke ge ndu Izurelu tsoo ọzo, mu toru phe;

¹⁴emekpe ndu ohogu phe ta adukpoda iphe, o gege aburu mu. Mu gege ewoerupho eka byabe ndu achi phe le njo; chia phe okpu-akpohu.

¹⁵Ono gege eme ge ndu mube Chipfu du ashi woze onwophe ali l'iphu mu; odumeka mu ahua phe ahuhu jasu l'ojejoje.

¹⁶Obenu l'unubedua be mu gege egude okpobe ereshi zu; bya egude manu-enwu, shi l'agbara-mkpuma nu-jia unu epho.”

Ebvu-oma 82

Ebvu-oma, Asafu deru

¹Chileke bataakwaru le ndzuko ndu-ikpe. O no l'eka ono g'o kpee phe ikpe.

²Su-a: “? Bu teke ole be unu e-kpeberu ikpe, apfuduru-oto? Mbu-a; ? bukpo teke ole be unu a-gbaberu ndu ejo-iphe odzori?

³Unu hanaaru ndu ukpa waa ndu enwedu nna enge! Unu kpnaaru ndu aakpa ehu waa ndu akpa nri ikpe, pfuru oto!

⁴Unu gbafutanu ndu ukpa waa ndu adudu g'o du phe; shi nno nafuta phe l'eka ndu ejo-iphe!”

⁵O to dudu iphe, ephe maru; teme ophu o dudu iphe, edoje phe enya. Ephe anoduje erwu dadishi l'ochii. Eka a turu okpa eliphe-a l'ophu tukoakwaru anga anganga.

⁶Mu suru-a: “Mu makwaru-a l'unu no-chiru enya mube Chileke; mbu le g'unu ha bukota unwu Okalibe-kakota-shii;

⁷Obenu l'unu e-mechaa nwuhu ge nemadzu mmanu. Unu e-mechaa daa ge ndu-ishi ozo adaje.”

⁸Gbalihunu gube Chileke; kpee ndiphe ikpe! Kele ohamoha bukota iphe, i nwe enwenwe.

Ebvu-oma 83

Ebvu-oma, Asafu deru

- ¹Gube Chileke; ta agbashinu nkuchi! Su-a; gube Chileke; ba nodushinu nggujungguji! Jiko ba adashinu kōkoroko!
- ²? I humawaru ge ndu ohogu ngu aphu temutemu; waa ge ndu i du ashị eseli ishi.
- ³Ephe gude eregede achị idzu ndibe ngu; mbu achị iphe, ephe e-me ndu du ngu l'obu.
- ⁴Ephe epfu su: “Unu bya g'anyi tuko oha ono l'ophu lwua. G'anyi mee g'epha Ízurelu chihukpoepo l'ophu l'ophu.”
- ⁵Ephe buru obu lanu; idzu phe wua nanu. Ephe riwaru nte l'ephe e-me ngu ejo-iphe.
- ⁶Ndu onu-ulo Edomu; yee ndu Ishimelu; waa oshilokpa Hega; waa ke Mówabu.
- ⁷Waa ndu Gebalu; yee ndu Amonu; waa ndu Amaleku. Ndu Filisitayinu yikwa iya pho; ndu Taya yiru iya.
- ⁸Temu ndu Asiriya bya ayikwaru iya pho. Ephe chikoberu onwophe g'ephe buru agbaru-ike ndibe Lotu.
- ⁹Mena phe iphe, i meru Midiyanu. Mee phe g'i meru Sizera yee Jiabinu l'okpa enyimu Kishonu;
- ¹⁰mbu ndu ono, i meru ephe buru mkpurupyata le Enu-Doru; bya emee; ephe reshiu kuru l'ali; buwaruro ikpozu, emekwa ali.
- ¹¹Mena ndu eze phe iphe, i meru Orebu; waa iphe, i meru Zeyebu. Mekwaapho ndu-ishi phe iphe, i meru Zeba waa Zalumuna.
- ¹²Mbu ndu ono, sujeru: “Unu g'anyi lwua ali Chileke l'ophu lwuta nworu.”
- ¹³Jiko Chileke nkemu; mena phe g'ephe du g'eswa ekpofu; mbu g'ephe du g'eswa ereshi, pherephere zikashiru.
- ¹⁴G'o buru g'oku anoduje alwa wowoowoo l'oswa-a; ozoo g'oku etsuje ubvu-a
- ¹⁵bu g'ii-nwuru phuruphuru g'oke pherephere chia phe oso; teme l'i gude oke pherephere ngu ono mee ge ndzu rwuta phe.
- ¹⁶Mena g'iphere ji phe iphu; k'ophu ndiphe a-wata acho uzo, ephe e-shi maru epha gube Chipfu.
- ¹⁷G'e meje phe iphe-iphere; mejeru ndzu-agugu ye phe l'iphu mkpurumkpuru! G'ephe gudekwa iphere laa maa!
- ¹⁸G'ephe eshi nno maru l'oo gube onye ono, epha ngu bu Chipfu ono bu Okalibe-kakota-shii le mgboko mgburugburu.

Ebvu-oma 84

Ebvu-oma, e deru nu onye-ishi ebvu g'unwu Kora gua; g'e gude ngwa ebvu, jita gua ya

- ¹Gube Chipfu, bu Okalibe-Kakota-Ike; Iphe, aka i bu amakwanu!

²Oogushi obu mu ike; mbụ lẹ meji atọfuakwa mu atọfu ẹka ọọgu mu anọdu l'eze-ulo Chipfu. Obu mu; m'ogwẹhu mu l'ophu ara araku Chileke ono, dzụ ndzụ ono.

³Lenu l'unwu ogbe nwechaaru ẹka ẹphe bugbaa l'eze-ulo ngu ono. Agbeta nwekwarupho ẹka ẹphe akpajẹ ẹfunne; mbụ ẹka ẹphe anọduje zushia unwu. Ẹka ono bụ lẹ mgboru ọru-ngweja gube Chipfu, bụ Chileke mu; bya aburu Okalibe-Kakota-Ike; bya abukwarupho Eze mu.

⁴Ẹhu-utso bẹ a ọru nụ ndu bu ebubu l'eze-ulo ngu; noo kele ẹphe anọduje l'ẹka ono etu ngu ẹpha mkpurumkpuru.

⁵Ẹhu-utso bẹ a ọru nụ ndu bụ ngu bụ agbaru-ike pẹ; mbụ ndu bụ iphe, uche iya echije pẹ ẹhu bụ g'ẹphe e-me jerwua úbvú Zayonu.

⁶Oobujeru; ẹphe -nọdu awughata lẹ nsuda Baka; l'ọ dọ g'ẹka mini asọ gborogboro; teme l'ọ dukwa pẹ phọ g'ẹka mini udzumini dzeshiru ike; tuko ẹkameka tukashia okpuru okpuru.

⁷Ẹphe eshije l'ike dasweru ike gbiriri jasụ teke ẹphe a-tuko je apfuru l'iphu Chileke l'úbvú Zayonu.

⁸Gube Chipfu, bụ Chileke, bya aburu Okalibe-Kakota-Ike; numanu epfupfu, mu epfu anụ ngu! Ngaberu mu nchị; gube Chileke kẹ Jiékoju!

⁹Lenaa ẹnya huma onye ono, egbobutaje anyi ono gube Chileke! Lenaa onye ono ẹnya; mbụ onye ono, ị wuru manụ l'ishi; gude mee ya; ọ buru eze ono! Meeru iya eze-ipe-oma!

¹⁰Anọ ujiku ophu l'eze-ulo ngu kakwa ree eme l'anọ unu apha labọ l'ukporo apha iri l'ẹka ọzo. O kakwa mu ree gẹ mu buru onye aguhajeru ndu abata l'eze-ulo Chileke uzo; eme lẹ mu jeru atusaru ẹhu l'ibe ndu ejo-ipe.

¹¹Kele Chipfu, bụ Chileke dọ g'ẹnyanwu; bya aburu onye egbobutaje anyi. Chipfu emejeru ndiphe eze-ipe-oma; bya emeje g'a kwabẹ nemadzu úbvù. O tọ dudu iphe, dọ ree, o kejeru ẹka mbvu l'ọ tọ nudu iya ndu uta adudu lẹ ndzụ pẹ.

¹²Gube Chipfu, bụ Okalibe-Kakota-Ike; ẹhu-utso bẹ a ọru nụ onye dakoberu ngu nụ.

Ebvu-oma 85

Ebvu-oma, e deru nụ onye-ishi ebvu g'unwu Kora gụa

¹Gube Chipfu; ị goshiru l'alị ngu dọ ngu l'obu. O buru iphe ono meru g'o gude ị duphuta ndibe Jiékoju azụ l'alị pẹ; mbụ ndu e shi kpua lẹ ndzụ.

²Ejo-ipe, ndibe ngu meshiru bẹ ị guru pẹ nvu; bya eworu iphe kpube l'ipe-ẹji, ẹphe meshiru g'ọ ha.

³Ị tukowaru oke ẹhu-eghu ngu g'ọ ha gwobe; bya apakotaru ẹhu-eghu ono, meru; ẹnya nọdu ata ngu kpitikipiti ono parụ haa.

- ⁴Dophunu anyi azu l'onodu anyi; jiko Chileke, bu onye ndzota anyi. Hanaa avuru anyi ovuma!
- ⁵? Iphe, anyi meru ngu e-ghuwa ngu ro egbu jasụ l'ojejeje to? Mbụ-a; ? ii-hawaro egbu-egbu ngu ono g'o shi l'ogbo sweru ogbo to?
- ⁶? Tii kabekpoda mee g'anyi jakerehu ozo; shi nno mee g'egbu kabekpoo tsoo ndibe ngu utso?
- ⁷Goshinu anyi l'i yeru anyi obu jiko Chipfu! Dzona anyi l'onwongu!
- ⁸Ge mu numaeshikwa iphe, Chileke, bu Chipfu epfu. O kweru ukwe su le ya e-me g'egbu du ndibe iya guu; mbu ndu duru iya nsọ. Oe iphe, ephe a-kwa enya bu g'ephe ta laphubahe azu l'eme eswe.
- ⁹Iphe, doru enya bu le ndu atsụ Chipfu ebvu be oobyaakwa adzota; k'ophu o-gbu-nwiiwii ya a-nodu l'ali anyi.
- ¹⁰N-yemobu yee ire-lanu a-gba onwophe ndzuta; apfubekoto yee egbu-guu anmaa onwophe akpa.
- ¹¹Ire-lanu e-shi l'eliphe mifutachaa; teme apfubekoto agbe l'imigwe lee enya l'eliphe.
- ¹²Chipfu a-buru iphe, du ree be oo-nukota; bya emee g'iphe, anyi meberu l'ali anyi mehu emehu.
- ¹³Apfubekoto e-vutajeru iya uzo; je atooru iya gbororo, oo-nodu eshi.

Ebvu-oma 86

Epfufu, Dévidi pfuru nu Chileke

- ¹Ngabenu nchi; gube Chipfu; zanu mu enu! Kele mbedua bu onye ukpa; bya aburu onye adudu g'o du iya.
- ²Letanu mu enya; kele mu yeru ngu obu. Oo ngu bu Chileke mu; dzona mube onye-ozu ngu, dakoberu ngu nu.
- ³Phuaru mu obu-imemini; jiko Nnajiuphu; kele mu eku ngu oku mkpurumkpuru.
- ⁴Mena g'egbu tsoo mube onye-ozu ngu utso; kele oo gube Nnajiuphu be obu mu l'ophu araku.
- ⁵Gube Nnajiuphu bu onye oma; bya aburu onye agujeru nemadzu nvu. Iphe, bukpuo ndu arakuje ngu nu be iyeje obu yegharu iya aka.
- ⁶Numanu epfufu, mu epfu anu ngu jiko Chipfu! Ngabenu nchi numa mkpu, mu echiku ngu g'i meeru mu eze-iphe-oma!
- ⁷Iphe -nodu atsụ mu l'egbu be mu a-kpo-kuje ngu; kele mu maru l'ii-numa olu mu.
- ⁸Agwa, nokota nu ta adudu ophu aturu gube Nnajiuphu; ophu o dudu iphe, ephe eme, duru ophu aatu eyeru ophu gubedua eme.

⁹Ohamoha ono, i gude ẹka ngu mee ono l'e-mechaa byakota bya abaarū gube Nnajiuphu ẹja; bya etua ngu ẹpha.

¹⁰Noo kele i parū ẹka; teme i nodu emeje iphe, du biribiri. Oo ngu kpoloko kpeekpu be bu Chileke.

¹¹Jiko Chipfu; zinaa mu ọzo ngu; k'ophu mu a-nodu etso ọzo ire-lanu ngu ono. Menaa g'oriri mu ta agbashī mu ọzo ọtu l'ẹka i no; k'ophu mu a-nodu atsū ẹpha ngu ebvu.

¹²Mu gude obu mu g'o ha ekele ngu ekele; gube Nnajiuphu, bu Chileke mu. Mu e-tu ngu ẹpha jasū l'ojejoje;

¹³kele i yeru mu obu yegharū mu iya ẹka. Noo kele i nafutaru ndzu mu l'ali-maa.

¹⁴Oowaa Chileke! Ndu eku onwophe wulihuakwaru bya mu etso ọgu. Teme ndu ewebushi akurepho dzukobe g'ephe gbua mu; mbu ndu ono, te eyeduru gube Chileke onu ono.

¹⁵Obenu le gube Nnajiuphu bu Chileke, aphuje obu-imemini; bya aburu onye emeje eze-iphe-oma. Ehu te eghujedu ngu egu egwegwa; teme i nodu eyeje obu yegharū iya ẹka; bya aburu onye apfushije ike l'iphe, i pfuru.

¹⁶Ghanaaru mu iphu; meeru mu eze-iphe-oma! Wonuru ike ngu ye mube onye-ozī ngu l'ehu! Dzōnaa mube nwa, nwanyi ono, ejeru ngu ozi ono nwuru!

¹⁷Goshinu mu iphe-ohubama, e-me ge mu maru l'i bu onye oma; k'ophu ndu ohogu mu a-huma iya; iphere egude phe; noo kele gube Chipfu gbaru mu mkpu bya adua mu obu.

Ebvū-oma 87

Ebvū-oma, unwu Kora guru

¹Chipfu tuwaru okpulo iya l'eli ubvū, du nsō.

²O yeru Zayonu enya; yeghata iya g'o yeberu iphe, bukpo ẹka ozo, unwu Jiéko bu.

³Gube eze mkpukpu ke Chileke; iphe, du biribiri be eepfukwa akunyabe ngu:

⁴“Ndu Réhabu; yee ndu Babilonu be mu guakwaru ye le ndu maru mu nu. Ndu Filisitayinu; yee ndu Taya; waa ndu Kushi be mu gukwarupho ye iya. Ndu ono g'ephe ha be aa-tuko guru ye le ndu a nwuru le Zayonu.”

⁵Mbu le-a; ee-pfuje phota Zayonu su: “Onye owa-a; yee onye ophuu be a nwukwaru l'ime iya. O buru Okalibe-kakota-shii l'onwiya l'e-me iya g'o nguru anguru.”

⁶Chipfu e-de l'ekwo, o deru ẹpha ndiphe su: “Onye owa-a be a nwuru le Zayonu.”

⁷Ndu agu ebvu; waa ndu ete iya etete a-tuko gua ebvu su: “Oo le Zayonu be mini ndzu gbē asoshiru phe!”

Ebvū-oma 88

**Ebvu-oma; évù, Hemanu, bụ oshilokpa Èzura kwarụ nụ onye-ishi ebvu g'ụnwu
Kora gụ; g'e gude olu aphụ kwaa ya**

- ¹Jiko Chipfu, bụ Chileke, adzoje mu nụ; mu nọwaa l'iphu ngu kwaa ẹkwa onwomu; kwakọta iya eswe l'enyashi.
- ²G'epfupfu, mu epfu anụ ngu rwunaa ẹka ị nọ! Ngabenu nchị l'olu ẹkwa mu!
- ³Kẹle ndzụ mu l'ophu bụwaa iphe-ẹhuka jiru iya; ẹme ndzụ mu nọduwaa ilu phakuu.
- ⁴A gụwaru mu ye ẹ ndu aabyawaa ekpochi ẹja l'ilu. Mu dụwaa gẹ nwoke, ike bvruru.
- ⁵E wowaru mu gbadoru ndu maa. Mu dụwaa g'onye e gburu togbo l'ime ilu; mbụ gẹ ndu ono, ta aduedu g'ephe ha duru onye ophu ị nyataru ono; mbụ ndu ono, unu l'ephe bukafuwaru; ophu iiletabaedu phe ẹnya ono.
- ⁶I chiewaru mu l'ilu ophu bụ iya kachaa omilomi; bya aburu iya kakọta agba ọchii.
- ⁷Oke ẹhu-eghu ngu zupyareshiru mu ike. I gudewaa akparamini nkengu byaru mu ye l'ime mini.
- ⁸Ị natawaru mu ndu mu l'ephe shi eshi okpobe ọnyà. I mewaa; ephe nọdu ebujeru ubara yeru mu; ẹme i gubuwaru mu ye l'ime ọlo k'ophu mu taa agbaladu.
- ⁹Mu jewaru iphe-ẹhuka jasụ ẹnya gbahụ mu ọchii. Mbọku-mbọku bẹ mu anọduje eku gube Chipfu. Lekwa ẹka mu ephebebo gẹ mu chiliru ngu iya.
- ¹⁰? Iimeje iphe, ụ biribiri gude egoshi maa ọọ? Ndu nwuhuru anwuhu; ? ephe a-gbeshi tuahaa ngu ẹpha ọọ?
- ¹¹? Aanọduje l'ime ilu atụ ọnu g'i yeberu nemadzu obu? Ọọ ? aanọduje l'ẹka eegwe nemadzu arakabya pfua g'i bụ-be onye apfushije ike l'iphe, i pfuru?
- ¹²Ọọ ? aanọduje l'ẹka gbahuru tsukiribaa maru iphe, ụ biribiri, iimeshi? Ọọ ? aanọduje l'alị ẹka a taa nyatajedu onye laru iya nụ pfua g'apfubekoto ngu habe shii?
- ¹³Obenu ẹ mu eku ngu g'i bya agbaarụ mu mkpu gube Chipfu. Ụtsu g'utsu bẹ mu anọduje epfu anụ ngu.
- ¹⁴? Denu g'o gude gube Chipfu jika mu? ? Ọ nwuru inwu-agma bẹ iiwoharu mu iphu ngu ewoha?
- ¹⁵Eshinu mu bụ nwata bẹ iphe-ememe shi kpata mu ẹhu; k'ophu bụ ẹ mu nọwa ọnwu ntse. I mewaru mu jee iphe-ẹhuka jasuru ike bvrwa mu; ophu mu amakpoedu gẹ mu e-me iya.
- ¹⁶Oke ẹhu-eghu ngu kpowaru mu kpofu; ẹme eye ebvu nkengu mewaa mu; mu buru ọla-l'iswi.
- ¹⁷Mbọku-mbọku bẹ ephe aso-pheje mu g'onye utso gbaburu haa. Ephe woru mu guchia kpurukudukuu.

¹⁸I natawaru mu ndu mu l'ephe shi aswi oswi; me ndu yeru mu obu. Nta-a buwaa ochii bu onye ebo mu.

Ebvu-oma 89

Évù, Etanu, bu oshilokpa Ezura kwaru

¹Mu a-gu ebvu gude pfua ge n-yemobu Chipfu habe shii. Mu a-gu iya jasụ l'ojejoje. Mu e-gude onu mu pfua g'ogbo l'ogbo maru l'i bu onye apfushije ike l'iphe, i pfuru.

²N-yemobu ngu a-du g'o du jasụ l'ojejoje. Oo g'akpaminigwe nguru anguru-a bu g'apfushi ike l'iphe, i pfuru angujeru.

³I sụru l'onye i hotaru be gu l'iya gbawaru ndzu; mbu l'i rifuwaru Dévidi, bu onye-ozu ngu angu su:

⁴“Awa ngu be mu e-me g'o nguru anguru no ojejoje; mee g'aba-eze ngu kpoo g'abara shi l'ogbo sweru ogbo.”

⁵Imigwe l'ophu atu onu g'i du-be biribiri gube Chipfu; teme o nodu egoshikwapho ndu duru ngu nsọ l'i bu onye apfushije ike l'iphe, i pfuru.

⁶Kele-a; ? bu onye no l'imigwe bu onye aa-nodu atu eyeru Chipfu? ? Mbu denu onye imigwe ophu aa-nodu atu eyeru Chipfu?

⁷Eka ndu du nsọ k'imigwe dzukoberu be aanodujekwa atsu Chileke ebvu. O kakota ndu no-pheru iya mgburugburu adu ebvu.

⁸Gube Chipfu, bu Chileke, bu Okalibe-Kakota-Ike; ? bu onye du ge ngu? I paru eka gube Chipfu; teme i nodu apfujeru pfushia ike l'iphemiphe, i pfuru gbaa mgburugburu.

⁹Oo ngu anoduje eleta oke akparamini eze-enyimu enya; teme o -buru l'akparamini soru ke kpukumu; l'i mee ya l'o daa gbée.

¹⁰Réhabu be i chitaru tua l'alí. O dabyiru g'onye e gburu l'ogu. I gude ike ngu chia ndu ohogu ngu; ephe gbaa nanu nanu.

¹¹Igwe l'ophu bu nkengu. Eliphe l'ophu bukwarupho nkengu. Oo gubedua turu okpa mgboko l'ophu; yee iphemiphe, no iya nu.

¹²Ndegu iya me ndohali iya bukota gubedua meru phe dobe. Úbvú Tabo; yee úbvú Hamonu aguje ebvu ehu-utso m'ephe numa epha ngu.

¹³Oshi-eka ngu bu iphe, swetaru iya nu bu okpehu. Eka ngu shihuru ike; ekutara ngu kangoo.

¹⁴Aba-eze ngu bu apfubekoto yee ikpe, pfuru oto be e gude tua okpa iya. I nodu akpajeru n-yemobu ngu; yee apfushi ike l'iphe, i pfuru vuru uzo l'iphemiphe, iimekpoo ememe.

¹⁵Ehu-utso be a goru nu ndu maru g'eetuje ngu epha; mbu ndu bu iphóró, shi l'eka gube Chipfu no be ephe egudeje eje ekameka, ephe eje.

- 16 Ɖphe egudeje Ɖpha ngu ete Ɖswa mkp̄urumkpuru. Ɖphe n̄odu an̄oduje ekutse ngu l'ì b̄u onye pf̄uberekoto.
- 17 Kele ọo ngu b̄u ike, d̄u biribiri, Ɖphe nweru. Ɖ b̄uru l'ọo l'anyi d̄u ngu l'obu meru iphe, iimeje g'ike anyi kangoo.
- 18 Mb̄u l̄e-a; l'onye mgbobuta anyi b̄ukwa Chipfu b̄e n̄uru iya anyi; mb̄u l'eze anyi b̄ukwa Onye Nso ke ndu Ízurelu b̄e o shi l'eka.
- 19 O nweru teke i gudeje ọphulenyia zia ndibe ngu ozi; s̄u l'i mewaru g'okpehu kal̄eru ojogu lan̄u. I byaru l'echilab̄o ndibe ngu bya ah̄ota nwokor̄obyia lan̄u; mee g'ọ b̄uru onye ndiphe a-n̄odu ekutse.
- 20 I h̄umawaru onye-ozì ngu, b̄u Dévidi. I woru man̄u ngu, d̄u ns̄o w̄ua ya l'ishi.
- 21 S̄u l'ọo ẹka ngu b̄e ii-gude mee ya l'ọ nguru anguru; mb̄u l'ọ kwa oshi-ẹka ḡube Chileke a-n̄oduje eme g'ike ka iya ad̄udu.
- 22 Ɖ t̄o d̄udu ndu ọhogu iya, d̄uru ndu ọphu a-d̄u ike ekebuta iya g'ọ t̄uru ph̄e utu; ọphu ndu ẹjo-iphe as̄udu iya emekpa ẹhu.
- 23 Ndu ach̄i iya l̄e nj̄o b̄e ii-n̄odu l'iphu iya zopyashia; l'i chitsushik̄ota ndu ọ d̄u ash̄i.
- 24 N-yemobu ngu waa apf̄ushi ike l'iphe, i pfuru l'a-n̄odu swiru iya. Ɖ b̄uru Ɖpha ngu b̄e oo-gudeje mab̄e mpu iya gugugu.
- 25 Al̄i-eze iya b̄e ii-me g'ọ jaa àjàjà; mb̄u g'ọ shi l'eze-ẹnyimu n̄oo jas̄u l'ẹnyimu Yufurétisu.
- 26 Ɖo-n̄odu arakuje ngu s̄u: “Ɖo ngu b̄u nna mu; bya ab̄uru Chileke mu; bya ab̄uru agbara-mkpuma, l'adzoje mu n̄u.”
- 27 Ḡubedua l'onwongu emekwanaa ya l'ọ b̄uru ọkpara ngu; mb̄u l'ọ b̄uru iya a-kachaa shii l'iphe, b̄ukpoo ndu eze, n̄o l'eliphe l'ophu.
- 28 N-yemobu, i yeru iya l'a-b̄uru ojejoje. Ɖgbandzu ḡu l'iya apf̄uru pf̄ushia ike.
- 29 Awa iya b̄e ii-me; Ɖphe anguru anguru jas̄u l'ojejoje. Al̄i-eze iya b̄u g'igwe l'ophu n̄o-beru b̄u g'ọo-n̄o-beru.
- 30 Ɖ -b̄uru l'unwu iya j̄ikaru eme ekemu ngu; ọphu Ɖphe etsodu iphemiphe, i t̄uru ọkpa iya s̄u g'e tsoje;
- 31 Ɖphe -mebyia omelal̄i, i doberu ph̄e; bya aj̄ika eme iphe, i s̄uru g'Ɖphe meje;
- 32 l'i gude mgboro bya echia ph̄e pyaapya gude h̄ua ph̄e ah̄uh̄u; mb̄u bya echia ph̄e ẹchachi gude h̄ua ph̄e ah̄uh̄u k'ẹjo-iphe, Ɖphe eme.
- 33 Ɖle ọ t̄o k̄p̄oshikwanu g'i ti yehe iya obu g'i yeru iya ya; ọphu ọ d̄udu teke j̄ibya aha apf̄ushi ike l'iphe, i pfuru l̄e k'ẹhu iya.
- 34 I tii mebyikwa ọgbandzu ngu l'ẹhu iya. Ɖphu j̄igbanwekwa iphe, i sawaru ọnu pfua.

- ³⁵Eshinu ì bú onye dù nsò bè i riru angù mgbo lanù sefu ẹka; sù l'ì tì byadu adzùru Dévidi ọka;
- ³⁶sù l'awa iya a-nò jasù l'ojejoje. Ọ búru g'ẹnyanwu keru ngu l'iphu bú g'alì-eze iya e-keru damudamu;
- ³⁷mbù l'oo-keru jìmujimu jasù l'ojejoje g'ònwa, bú iphe, agba ekebe l'akpaminigwe; l'e gude ire iya ẹka.
- ³⁸Obenu l'onye ono, ì wùru manù l'ishi ono bè ì jìkawaru; bya avùaharu iya ọvuma.
- ³⁹Ì jìkawaru ọgbandzu, gù l'onye-ozì ngu gbaru. I wowaru okpu-eze iya woru gwọọ l'urwuku.
- ⁴⁰Igbulọ iya l'ophu bè i tsukpòshichawaru etsukpòshi. I woru ọlo-mgbobuta iya tsua yọgiri yọgiri.
- ⁴¹Iphe, búkpoo ndu aghata aghata gwee ya tụtù-a. Ndu obutobu iya nọdu ekweru iya une.
- ⁴²I tuliru ndu achì iya lẹ njọ ẹka l'eli; bya emee ndu ọhogu iya; ẹphe nọdu ete ẹswa.
- ⁴³Atatiphu ogu-echi iya bè i woru ghachaa ìgharaphu; ọphu iimejeẹdu g'ọ pfushia ike l'iphu ọgu.
- ⁴⁴I mee; ọphu ọ dọdu akpabiri; bya eworu aba-eze iya rwua lẹ ntù.
- ⁴⁵I meru iya ọ kahù lẹ nwokoro; bya eworu iphere yee ya g'onye yeru akpawuru uwe.
- ⁴⁶? Ọo-dù ẹgube ọwa-a jasù teke ole gùbe Chipfu? ? Ii-domiwarọ onwongu jasù l'ojejoje tọ? ? Bù teke ole bè ẹhu-eghu ngu e-nwu phuruphuru g'ọku nwuberu?
- ⁴⁷Jiko nyatakwa gẹ ndzù mu dù-be mkpirikpu; kele nemadzù, i meru búephò udzu ọnu mmanù.
- ⁴⁸Lẹ-a; ? dẹnu nemadzù, a-nọdu ndzù g'ọ tọ nwùhu anwùhu; ọzoo g'ọ dzọo onwiya g'ọ tọ la maa?
- ⁴⁹Gùbe Nnajiuphu; ? bú awe bè i doberu eze n-yemobu ngu ono, i shi egoshije mu ono; mbù n-yemobu ono, i gude apfùshije ike l'iphe, i pfuru rifuru Dévidi angù l'ì-nù iya ono?
- ⁵⁰Nnajiuphu; nyatanù g'a chì-bewaru onye-ozì ngu ọchi; waa gẹ mu tabewarù nshi l'iphu, ndiphe nọ akwagọ mu;
- ⁵¹mbù iphu ono, ndu ọhogu gùbe Chipfu anọduje akwagọ onye ì wùru manù l'ishi ono. Ẹkameka, ọ nọ bè ẹphe anọduje akwagọ iya iphu gude eme iya iphe-iphere.
- ⁵²G'ajaja búru kẹ Chipfu jasù l'ojejoje! Nokwa g'ọ dù; bya abùru g'ọ dù.

Ebvù-ọma 90

Epfulu, Mósìsù onye kẹ Chileke pfuru nù Chileke

- ¹Gùbe Chipfu; ọ bụhawaa ngu bụ onye anyi bu ebubu l'ime iya eshikpoo l'ogbo sweru ogbo.
- ²Oke úbvú bya a-buru iphe, dú adudu; mbụ l'ị byaru e-me eliphe l'ophu; yee mgboko gbaa mgburugburu; ị nọduhawaa; teme i je a-nodu jasụ l'ojeje.
- ³Nemadzu be iizije g'ọ laphu azu l'alị. Iisuje iya: “Unu laphu azu l'alị; unube unwe-eliphe!”
- ⁴Kele unu-kuru-unu apha l'anya ngu duale ngu-a g'ujiku lanu; mbu l'ọ dujee ngu pho ge nche enyashi lanu.
- ⁵Nemadzu be iigudeje anwuhu kpofo g'onye kpofofo eswa; kele ephe du rwushirwushi g'eswa.
- ⁶L'utsu be onoduje asha biribirí abya pulapula. O -betashia l'uzenyashi l'ọ nwulwashihuwa kposhihu nkụ.
- ⁷Oke ehu-eghu ngu nmaswikotawaru anyi g'oku; teme ehu-eghu ngu mee; meji gbabuhu daa anyi l'ohu epho.
- ⁸Ejo-iphe, anyi meshiru be ị kporu giriri l'iphu ngu. I bya atuko iphe-eji, anyi meru le mpya mee; ọ dabyikotaru eba l'ataphu ngu.
- ⁹Oke ehu-eghu ngu mewaru ndzu anyi; ọ nodu agbaje mkpirikpu. O buru atsu ude be anyi egudeje tsugbua nwapha olemole ophu ị haru anyi.
- ¹⁰Iphe, anyi anọ-bejeru bu ukporo apha eto l'apha iri. Teke ọ bu onye ike du l'ọ norwua ukporo apha eno. Ole ọ bu; iphe, ejije iya nu abukotajeerupho eje iphe-ehuka yee aphu; ophu ọ dudu g'aanọ-bejeru l'ọ bvụ; ndzu anyi ephukashihu.
- ¹¹? Bu onye maru g'ehu-eghu ngu shiheru ike? ? Bu onye be o dokporu enya; mbu g'oke ehu-eghu ngu habe shii; k'ophu ọo-nodu atsu ngu ebvu?
- ¹²Menaa g'anyi maru l'ọ to dudu g'anyi a-nọ-beru l'eliphe-a; k'ophu oo-me g'anyi maru iphe.
- ¹³Lwanu azu jiko Chipfu. ? Egube owa-a a-du jasụ teke ole? Phunaaru anyibe ndu-ozu ngu obu-imemini!
- ¹⁴Ge n-yemobu ngu jijenụ anyi epho l'utsu; k'ophu anyi a-noduje agu ebvu ete eswa mboku-mboku.
- ¹⁵Menaa g'ehu tsoo anyi utso tso-rwua g'ehu shi du-beru anyi eji; mbu g'i mee; ehu atsoo anyi utso g'apha, anyi jeru iphe-ehuka ha.
- ¹⁶G'anyibe ndu-ozu ngu humanu iphe, iimeshi. G'awa anyi humakwapho g'ike ngu du-be biribiri.
- ¹⁷Gube Nnajiuphu, bu Chileke; g'eze-iphe-oma nkengu nodukwa swiru anyi eswiru! Menaa g'iphemiphe, anyi eme nguru anguru! Ee! Jiko Chipfu; mekwaa ya g'ọ nguru anguru!

Ebvu-oma 91

- ¹Onye nọ lẹ mkpula Okalibe-kakota-shii l'e-buru eburu lẹ mkpula ibvu Okalibe-kangokotaru-nu.
- ²Gẹ mu e-pfu ke Chipfu bu l'ọ bu iya bu onye mu nọ lẹ mkpula ezeru ndzu; bya aburu iya bu agbaru-ike mu. Oo ya bu Chileke; onye mu dakoberu.
- ³O kwa yebedua l'a-dzota ngu g'i ti nmalahu l'igbudu, ndu achi nta ngu gbaberu ngu; bya adzotakwa ngu pho l'ejo iphe-ememe, tsoru pherephere eje.
- ⁴Oo nkù iya be oo-gude kpuchia ngu. O buru lẹ mkpula nkù iya be ii-gbaba je edomia onwongu. O buru ike, oopfushije l'iphe, o pfuru a-buru iphe, e-gbobutaje ngu nu; bya aburu iphe, i gude ezeru onwongu.
- ⁵Iphe, anoduje eye ebvu l'enyashi be i tii tsudu ebvu; ophu iitsukwapho apfu, ezi phuphupu l'eswe ebvu.
- ⁶Teme ejo iphe-ememe, anoduje eze kojokojo l'echi abali ta adudu ophu iitsu ebvu; mbu je akpachaa lẹ ndu ophu etsu nemadzu pyaapya l'echi eswe.
- ⁷Unu labo l'umadzu ukporo iri l'a-da ngu lẹ mgbureku; teme ndu rwuru unubuku adabyiru ngu l'uzo ekutara; ole o to dudu iphe, bya eme ngu nu.
- ⁸Oo enya be ii-gudeje huma aphu, aanu ndu ejo-iphe; obenu lẹ gubedua be o to jidu me mgbodzu.
- ⁹O kwa gube Chipfu bu onye mu nọ lẹ mkpula ezeru ndzu. Eshi ophu i nọ lẹ mkpula Okalibe-kakota-shii;
- ¹⁰O to dudu iphe, byaru eme ngu nu; ophu o dudu mgbuka, bya eshita uzo ibe ngu;
- ¹¹kele oo-karu-a unwu-ojozi-imigwe iya g'ephe leta ngu enya; chee ngu nche l'iphe, bukpo uzo, iishikpo.
- ¹²Ephe e-gude eka pata ngu apata; a nonyaa; i kpoo okpa lẹ mkpuma.
- ¹³Oduma; yee oghu be ii-zopyabeje l'okpa; mbu l'oke oduma; yee ejo-agwo be ii-gudeje okpa zo-gbua.
- ¹⁴Chipfu sukwaru: "Eshinu o yeru mu obu be mu a-noduepho anafutaje iya; mbu lẹ mu a-noduepho egbobutaje iya g'o to du iphe, e-me iya nu; kele o guberu epha mu iphe.
- ¹⁵Oo-ku mu oku; mu aza iya enu. O -nodu eje iphe-ehuka; mu anodu swiru iya eswiru. Mu anafuta iya bya akwabẹ iya ubvu.
- ¹⁶Mu e-gude ndzu ogologo zu-jia ya epho; goshi iya ge mu egudeje adzo nemadzu."

Ebvu-oma 92

Ebvu-oma eswe-atuta-unme

- ¹Oo iphe, du ree g'a jaje Chipfu ajaja; mbu g'e gudeje ebvu tua gube Okalibe-kakota-shii epha;
- ²mbu g'a gbeshije l'utsu je epfukashiaru ndiphe ke n-yemobu ngu ono. Teke o rwuru l'enyashi; eeje epfuaru phe g'i bu-be onye apfushije ike l'iphe, i pfuru.
- ³Iphe, ee-gude aku iya le nkwa bu une, a kparu l'udo iri; yee ogelenda, aha gengugengu;
- ⁴kele gube Chipfu gudewaa iphe, du ree, iimeje mee g'ehu tsoo mu utso. Mu aguje ebvu ehutu me mu humapho iphe, i gude eka meshigbaa dobe.
- ⁵Gube Chipfu; lewaro g'iphe, iime habe shii. Teme oriri ngu paa omilomi.
- ⁶Obenu l'onnye egomunggo swehuru ta amadu l'onoo g'o du; ophu o dokwarupho onyeeswe enya egube ono;
- ⁷mbu l'a makwaru-a le ndu ejo-iphe akpo-fushi g'eka eswa efushi; teme le ndu iwashi be iphemiphe, epe eme bukotaepho upete; ole ee-mechakwanaa mebyia phe jasu l'ojejoje.
- ⁸Obenu le gube Chipfu paru eka jasu le tuutuutuu le mijimiimii.
- ⁹Gube Chipfu; ndu ohogu ngu e-mechakwaa buru mkpurupyata; mbu-a; ndu ejo-iphe g'ephe hakotakpoo be ee-mechakwaa chika nanu nanu.
- ¹⁰Obenu l'i meru; okpehu mu du ge k'atsu. I bya eworu manu, eshi mkpo wua mu l'ishi.
- ¹¹Mu gudewaa enya mu huma le ndu ohogu mu phe be e mekperu; bya egude nchi mu numa le ndu ejo-iphe, wulihuru etso mu opfu be a vwaru l'ogbarabvu.
- ¹²Ndu pfuberekoto a-nodu aja ajaja ge mpfu. Epe a-nodu evu evuvu g'oshi sida k'ubvu ubvu Lebanonu,
- ¹³e yeru l'ime ulo ke Chipfu. Epe a-nodu l'okpoku Chileke anyi aso pulapula.
- ¹⁴Epe -kahuchakpoo akahu; epe amile-a mebyi. Epe aduele-a nwata nwata; bya amaale-a roroo;
- ¹⁵k'ophu epe e-shi nno goshi le Chipfu bu onye pfuberekoto; bya aburu agbara-mkpuma nkemu; teme ophu o dudu iphe, apfuduru-oto, oomeje.

Ebvu-oma 93

- ¹Chipfu buakwaa eze! Akpabiri be o gbaphuru g'onnye gbaphuru ekwa; bya agbaphukwapho okpehu g'onnye gbaphuru ekwa. Mgboko be o meru; o nguru anguru; k'ophu bu l'o to dudu onye suru iya enwubata.
- ²Aba-eze ngu nguru anguru e shi l'edenwede. Gubedua shiro l'ojejoje noduta.

³Gùbe Chipfu; eze-ènyimu byaakwaru utso; mbù l'eze-ènyimu bè aanuakwa ukporo iya l'èka ooso ké gborogboro; tème eze-ènyimu nòdu atùwa oke akparamini gude abya utso.

⁴Obenu lè Chipfu, bu l'igwe parù èka; k'òphu bù l'olu nkiya daghataru mgbèka, eze-ènyimu anòduje echi. Tème okpehu nkiya ka k'oke akparamini eze-ènyimu shii.

⁵Gùbe Chipfu; iphe, ì toru okpa iya sù g'e tsoje bè i meru; ò pfulu pfushia ike. Ulo ngu bù iphe, meru iya; ò dù ùbvù l'ènya bù l'ò dù nsò; tème ò buru g'òo-dù iya bù ono gbiriri jasù lè tuutuutu lè m̀jimiimii.

Ebvù-oma 94

¹Gùbe Chipfu, bù Chileke, bù onye agwatajè ugwo iphe; jiko wanaa g'ènyanwu g'a hùma ngu!

²Gbalihunu gùbe onye ekpeje mgboko l'ophu ikpe! Jiko pfulanaa ndu eku onwophe ugwo, gbaru phè nù!

³Gùbe Chipfu; ? ndu èjo-iphe a-gbòkpo kwakoko-a, èphe agbò-a jasù teke ole?

⁴Ndu eme èjo-ememe anòduje etu onwophe ophushugbu. Èphe efunukaje okporokpo opfu, onu phè asudu epfupfu.

⁵Ndibe gùbe Chipfu bè èphe egweje uji; mbù ndu ono, bù okiphe ngu ono bè èphe akpapyashì ishi.

⁶Unwanyi, jì phè nwuhuru; yèe ndu lwarù alwalwa bè èphe aphuje aphuphu. Èphe eworu ndu enwedu nna gbushia.

⁷Oobujeru; èphe -nòdu; èphe asù: “Chipfu ta adukwa iphe, oohumaje; mbù lè Chileke ké Jiékòpu ta adukwa iphe, okpa ishi iya.”

⁸G'òwa-a dokwaa unu ènya; unubè ndu egomunggo swehuru l'echilabò unwu-eliphe; mbù-a; unubè ndu eme eswe; ? bù teke ole bè unu a-makporu iphe?

⁹? Bù onye ono, bù iya pfuleru nemadzù nchì ta anudu iphe lè nchì? Tòò ? bù onye ono, moberu nemadzù ènya ta aphudu ụzo l'onwiya?

¹⁰? Bùchia onye ono, agbèje ahù ndu amadu iya nù ahùhù ono te edobedu unu g'unu adù; mbù ? bù yèbedua ono, anòduje ezi nemadzù mmamiphe gbèchia ophu ò madu iphe l'onwiya?

¹¹Chipfu makotaru iphe, nemadzù anòduje arì. Ò maru l'oriri phè bukota iphe-mmanù.

¹²Sù-a; èhu-utso bè a goru nù onye gùbe Chipfu ahùje ahùhù; mbù onye iigudeje ekemu ngu ezi iphe.

¹³Onye ono bè iimeje gè meji nmapfuru m'ò nòdu eje iphe-èhuka; jasù mbòku, ee-bu nsù gè ndu èjo-iphe wùlahu.

¹⁴Noo kẹle Chipfu ta abyakpọdaa aha ndibe iya; ọphu ọ byakpọdaa ekwe gẹ ndu bu okiphe iya laa l'iswi.

¹⁵Noo kẹle ndu-ikpe a-wata ekpe ikpe, pfulu ọto. Ọ buerupho ndu obu phe guru iphoro bu ndu a-du ike tsokota ikpe ono.

¹⁶? Bu onye a-gbeshi pfulu-doru mu; mekpeeru mu ndu ejo-iphe? ? Bu onye a-pfulu l'ekiya nkemu lwu-kpeeru mu ndu eme ejo-ememe?

¹⁷Ọ to bu le Chipfu gbaru mu mkpu; me mu anoduhawaro l'ali ọ-laru-ndu-nggujungguji teke du enya.

¹⁸Teke mu chiru mkpu su l'epurukutu echikotaakwa mu be n-yemobu nkengu wotaru mu gẹ mu ta ada.

¹⁹Teke mu wataru ari oke oriri be i duru mu obu mee; ehu tsoahaa mu utso.

²⁰? Ii-kwe gẹ gu le ndu-ishi, ete emedu iphe, pfulu ọto megba iphe; mbu ndu egudeje ekemu emekpa ndu ephe achi ehu?

²¹Ephe edzukobeje g'ephe kpapya ndu pfuluberekoto ishi. Ephe woru onye adudu iphe, o meru kpee mpfugbu.

²²Obenu l'oo Chipfu bu onye egbobutaje mu nu. Ọo Chileke mu bu oke agbara-mkpuma ono, mu agbabaje je edomia onwomu ono.

²³Ọo ya a-pfulu phe ugwo iphe-eji, ephe eme; teme ọ buru iya e-mebyishi phe k'ejo-iphe ono, ephe eme ono. Ọo Chipfu, bu Chileke anyi e-mebyishi phe.

Ebvu-oma 95

¹Unu bya g'anyi gu ebvu ehu-utso gude jaa Chipfu! Unu g'anyi tu uzu ehu-utso gude kwabe iya ubvu; mbu onye ono, bu agbara-mkpuma, adzoje anyi ono!

²Unu g'anyi bya l'iphu iya bya ekele iya ekele! Anyi egude ebvu-oma tu uzu ehu-utso gude kwabe iya ubvu!

³Kẹle Chipfu bu Chileke, paru eka; bya aburu onye eze, paru eka; onye kakota agwa, ndu mgboko l'ophu shii.

⁴Eka omilomi ali jeberu bu iya be ọ du l'eka. Mkpakponu oke ubvu buru iya nwe iya.

⁵Eze Enyimu bu nkiya kẹle ọo ya meru iya; teme ọ buru iya gude eka iya meta ali-okponku dobe.

⁶Unu bya g'anyi phozeta baaru iya eja! G'anyi gbua ikpere l'iphu Chipfu ono, bu iya meru anyi ono.

⁷Kẹle ọo ya bu Chileke anyi. Anyi buru ndu ooche g'onye eche aturu; mbu anyi buru unwu aturu, no iya l'eka. Ọo ya bu; teke unu numaru olu iya ntanu owa;

⁸Unu ta akpochikwa obu unu gẹ ndiche unu phe kpochiru iya le Meriba. Waa g'ephe kpochiru iya le Masa l'echiegu;

⁹mbu ẹka ono, ndiche unu phe nọru hua yẹbe Chileke ama bya adalekwaa ya pho adale; l'ẹka ẹphe gudechaa ẹnya phe huma iphe, ya meru.

¹⁰Ukporo apha labo mgburugburu be ogbo ono mekotaru yẹbe Chileke iphe-eghu. Ya suru l'egomunggo phe jephuhuwaru l'eme iphe-ẹji; ophu ẹphe ekwedu alwaphuta azu bya eshia uto, ya goshiru phe.

¹¹Oo ya bu; mu gude ẹhu-eghu buta angu ria su: “Epe ta abyadu abata l'ẹka mu l'ẹphe a-nodu tuta unme.”

Ebvu-oma 96

¹Unu gua ebvu ophuu nu Chipfu! G'unwu-eliphe l'ophu gunaa ebvu nu Chipfu!

²Unu gua ebvu nu Chipfu; unu tua ya ẹpha! Unu raje iya arara mboku-mboku l'oodzoje nemadzu!

³Unu taru ndu ohozo onu g'o du-be biribiri! Unu epfuaru ndiphe l'ophu iphe, du biribiri, oomeje!

⁴Noo kele Chipfu paru ẹka; bya aburu onye gbaru g'a jaje iya ajaja. G'a tsujekwa iya pho ebvu l'o kakota iphe, bu agwa ndu mgboko l'ophu shii.

⁵Kele agwa ndiphe l'ophu bukota iphe, e gude ẹka mee; obenu le Chipfu bu iya gude ẹka iya mee igwe l'onwiya.

⁶Akpabiri yee ogbunwiiwii be no iya l'atatiphu; teme okpehu waa odu-biribiri tukoeppo ulo iya, du nsọ sweta.

⁷Unube ipfu l'ipfu, du le mgboko-a; unu kwabe Chipfu ubvu! Unu pfua g'o du-be biribiri; yee g'okpehu iya habe shii!

⁸Unu kwabe Chipfu ubvu, gbaru iya nu! Unu bya anu Chileke iphe l'okpoku iya!

⁹Unu yee adu nsọ g'onye yeru uwe baaru Chipfu eja! Unube ndiphe l'ophu; unu tsuje iya ebvu!

¹⁰Unu karu ohamoha le Chipfu buakwaa eze; teme l'eliphe l'ophu be e mewaru g'o nguru anguru; k'ophu bu l'o to dudu iphe, suru iya enwubata. O buru Chipfu ono e-kpe unwu-eliphe mgburugburu ikpe, pfuru oto.

¹¹G'imigwe l'ophu tee eswa; ẹhu atsoo ndiphe l'ophu utso! Geze-enyimu yee iphemiphe, no iya l'ime tukokwa tua oke akparamini!

¹²G'egu l'ophu mekpoo iphemiphe, no iya nu toko gboo ogboo! Noo teke iphe, bu oshi, du l'oswa a-gu ebvu ẹhu-utso l'iphu Chipfu.

¹³Epe a-nodu l'iphu Chipfu gua ebvu kele oobyawaa ekpe unwu-eliphe ikpe. Oo-gude apfubekoto iya kpee mgboko l'ophu ikpe; bya egude ire-lanu kpee ndiphe ikpe.

Ebvu-oma 97

- ¹Chipfu buakwaa eze; g'ehu tsò ndiphe l'ophu uto! G'iphe, bukpo ohamoha, bukube eze-enyimu tekwa eswa!
- ²Urwukpu me ochii no-pheru iya mgburugburu. O buru apfubekoto yee ikpe, pfuru oto be e gude tua okpa aba-eze iya.
- ³Oku evujeru uzo je atuko ndu ohogu iya, no-pheru iya mgburugburu kepyashia.
- ⁴Ebemu, oolo phaaphaa buru iphoro, e gude ahuma uzo l'eliphe. Ndiphe l'ophu -huma iya; ephe anmahu jijijiji.
- ⁵Ubvú l'ophu azashihuje g'unwu m'ephe nodu l'iphu Chipfu; mbu m'ephe nodu l'iphu Nnajiuphu ophu nwe mgboko l'ophu.
- ⁶Akpaminigwe l'ophu atu onu l'o bu onye pfuberu-eka-oto; teme ndiphe l'ophu nodu ahumaje g'o du-be biribiri.
- ⁷Iphe, bukota ndu abaru iphe, a pyiru apyipyi eja; mbu ndu gude nshi eku onwophe be e mekotaru iphe-iphere. Unube nshi l'ophu; unu bya abaru Chileke eja!
- ⁸Ndu bu le Zayonu numaru iya; ephe teahaa eswa. Ndu Jiuda be ehú atso uto le ge gube Chipfu egudeje ekpe ikpe.
- ⁹Kele gube Chipfu bu Okalibe-kakota-shii le mgboko mgburugburu. I kangokotaru agwa, no le mgboko-a l'ophu.
- ¹⁰Ge ndu yeru Chipfu obu kpokwa ejo iphe-ashi; kele o kwa ndu duru iya nsò be ooletaje enya. O buru phe be onafutaje l'eka ndu ejo-iphe.
- ¹¹Iphoro be e meru g'o duru ndu pfuberekoto. Ndu obu guru iphoro be e meru g'ehu-uto ji ehú.
- ¹²Unu nodu l'eka Chipfu tee eswa; unube ndu pfuberekoto! Unu tua ya epha; l'epha iya du nsò.

Ebvú-oma 98

Ebvú-oma

- ¹Unu gua ebvu ophuú nu Chipfu; kele o meru iphe, du biribiri. Oo ekutara iya; waa oshi-eka iya ono, du nsò ono be o gude lwu-kpee okpobe alwu-kpe.
- ²Chipfu mewaru g'a maru l'oodzofutaje; bya emewaa g'ohamoha maru l'o bu onye pfuberekoto.
- ³O nyatawaru n-yemobu, o yeru onu-ulo Izurelu; yee ire-lanu, oomeru phe. Je akpaa l'eka igwe beru ali beru be a huma-dzuwaru ge Chileke anyi egudeje adzo nemadzu.
- ⁴Unu tua uzu ehú-uto gude kwabe Chipfu ubvu; unube unwu-eliphe l'ophu! Unu gua ebvu-oma gushia ya ike gude jaa Chipfu!
- ⁵Unu gude une gua ebvu-oma gude tua Chipfu epha. Unu egudekwapho une; yee ebvu-ekwekwe jaa ya ajaja.

⁶Unu gburu opu ye iya; phua upyi ye iya. Unu tua uzu ehu-utso gude kwabe Chipfu, bu eze ubvu.

⁷G'oke enyimu yee iphemiphe, no iya l'ime tukokwa tua oke akparamini. Mgboko l'ophu atua uzu; yee iphemiphe, bu l'ime iya.

⁸G'enyimu enyimu, nogbaa nu toko kua eka. Ubvu ubvu anokobe gua ebvu l'ehu atso phe utso.

⁹G'ephe toko nodu l'iphu Chipfu gua ebvu; kele oobyawaa ekpe unwu-eliphe ikpe. Ndu mgboko l'ophu be oo-kpe ikpe, pfuru oto; teme l'o hakwarupho ndiphe l'ophu enge, pfuru nhamunha.

Ebvu-oma 99

¹Chipfu buakwaa Eze. Ge ndiphe nmahukwa pyaapyaapya. Aba-eze iya no l'echilabo chierobu. Ge mgboko l'ophu nmaa yigayiga.

²Chipfu pakwaru eka; mbu onye ono, bu le Zayonu. E woliru iya eli; o kakota ohamoha shii.

³G'ephe jaa epha ngu, bu Okalibe ajaja; mbu epha ngu ono du nsọ; ndiphe nodu atsu iya ebvu.

⁴Eze obu paru eka. Iphe, aduje iya ree bu ikpe, pfuru oto. Eme iphe enya-nhamunha be i meru dobe; o nguru anguru. L'ehu unwu Jiekopu be i meru iphe, pfuru oto; waa umere, pfuru nhamunha.

⁵Unu kutsee Chipfu, bu Chileke anyi. Unu bya ephozeta le mgboru okpa iya baaru iya eja. O du nsọ.

⁶Mosisu yee Eronu shi yiru le ndu bu uke ke Chileke. Samelu shi yiru le ndu shi akpo-kuje epha iya. Ndu ono shi ekuje epha Chipfu; l'o za phe enu.

⁷O shi anoduje l'urwukpu, kpuru oronmono pfuru opfu nu phe. Ephe shi edobeje ekemu iya bya eme omelali, o toru phe okpa iya.

⁸Gube Chipfu, bu Chileke anyi; i shi azaje phe enu. A makwaru-a l'i shi ahuje ndu Izurelu ahuhu m'ephe shiswee uzo ngu; obenu l'i shi buru phe Chileke, agujeru onye meru iphe-eji nvu.

⁹Unu kutsee Chipfu, bu Chileke anyi. Unu baaru iya eja l'ubvu iya, du nsọ; kele Chipfu, bu Chileke anyi dukwa nsọ.

Ebvu-oma 100

Ebvu-oma, e gude ekele Chipfu ekele

¹Unu tua uzu ehu-utso gude kwabe Chipfu ubvu; unube unwu-eliphe l'ophu.

²Unu gude ehu-utso jeru Chipfu ozi. Unu gude ebvu ehu-utso gude bya l'iphu iya.

³Unu makwaru le Chipfu bu Chileke. Oo ya meru anyi; teme anyi buru nkiya. Anyi bu ndibe iya; bya aburu aturu, ooche echeche.

⁴Unu gude ebvu-ekele bahu ibe iya. Unu egude ebvu-ajaja jerwua l'okpoku iya. Kele iya ekele tua ya epha.

⁵Kele Chipfu bu onye oma; teme n-yemobu nkiya nodu anoje jasu l'ojejoje. Oopfushije ike l'iphe, o pfuru; e -shi l'ogbo sweru ogbo.

Ebvu-oma 101

Ebvu-oma, Dévidi deru

¹Mu a-gu ebvu guku n-yemobu ngu; yee ikpe ngu, pfuru oto. Mu a-gu ebvu gude tua gube Chipfu epha.

²Ndzu mu be mu a-to nwehu mee g'o to du eka uta a-du iya. ? Bukpoo teke ole be ji-kpafuta mu? Mu e-gude obu, adudu eka uta du iya buru l'ibe mu.

³O to dudu ejo-iphe, mu bya ekwe g'o shisweta mu iphu. Umere ndu te etsodu okpobe opfu ono du mu ashi; ophu mu ahadu ge mu l'ephe rakuru.

⁴Ndu uzo phe gberu nggo be mu a-chifuje l'eka mu no; ophu o dudu iphe, anyi l'ejo-iphe jigba.

⁵Ndu anoduje evu nwibe phe nvu-azu be mu e-me g'ephe buru ola-l'iswi. Ndu etu onwophe ophushugbu; waa ndu eku-onwonye du l'obu be mu ta atagbukwa le nshi.

⁶Ndu apfushije ike l'iphe, ephe pfuru le mkpukpu-a be mu a-nodu eleta enya; k'opfu anyi l'ephe a-tuko buru jasuru; mbu l'onye uta adudu l'iphe, oome e-mechaa ejeru mu ozi.

⁷O to dudu ndu eregede m'onye lanu, mu bya ekwe g'o buru l'ibe mu; ophu o dukwapho ndu atu kporoko m'onye lanu, mu bya ekwe g'o pfuru pfushia ike l'iphu mu.

⁸Utsu mboku-mboku be mu e-meje g'iphe, bu ndu ejo-iphe, no l'ali-a dobe onu doo. Mu a-tuko ndu eme iphe-eji bufu le mkpukpu ke Chipfu.

Ebvu-oma 102

Epfufu, onye eje iphe-ehuka epfu anu Chileke

Opfu, o pfuru teke ike abvu iya abvubvu; guru aphu, no iya l'obu nu Chipfu

¹Numanu epfufu, mu epfu anu ngu jiko Chipfu! Ge mkpu, mu echi rwunaa ngu nchi!

²Ta agbakutakwaru mu azu nta-a, mu eje iphe-ehuka-a! Ngabenuru mu nchi! Zanu mu enu egwegwa nta-a, mu eku ngu oku-a!

³Kele ndzu mu l'opfu phukahwaru g'enwuru-oku. Okpu mu nodu enwu phuruphuru g'icheku-oku.

- ⁴Obu mu be e gburu pyaapyaa; o nwua lwaa g'esda; k'ophu o meru mu; mu zohaa eri nri.
- ⁵Mu tsuwaru oke ude gbiriri jasu mu wufu koru g'eda akpo; bya aburu okpu wushiru.
- ⁶Mu du ge mgbashi-ujiku, kwaru l'echiegu; ge mgbashi-ujiku, beru l'eka e meru umerekete.
- ⁷Mu ze nwuru enya. Mu duwaa ge nwenu, beru nkinyi iya l'eli mkpotsu-ulo.
- ⁸Ndu ohogu mu anoduje ekweru mu une mkpurumkpuru. Teme ndu achi mu le njo gudewaa epha mu ephu iphu.
- ⁹Oo ntu be mu erije l'o buru mu nri. Mu nodu ewojeru enya-mini gwakobe l'iphe, mu angu angungu.
- ¹⁰O buru iphe, kparu iya nu bu l'ehu eghushi ngu eghe ike; kele i woliwaru mu bya eworu tuphaa etupha.
- ¹¹Nwujiku ole, mu a-no l'eliphe-a duwaa g'ononyo uzenyashi. Mu anodujeepho anwu lwaalwaa g'esda.
- ¹²Obenu le gube Chipfu suru gedemu l'aba-eze ngu ojejeje; ophu a byadu azoha epha ngu azoha; e -shi l'ogbo sweru ogbo.
- ¹³Ii-gbalihu-a phuaru Zayonu obu-imemini; kele o rwuwaru teke ii-meru iya eze-iphe-oma; mbu me teke ono, a hotakpooru ahota dobe ono rwuepho;
- ¹⁴kele mkpuma iya du ndu egeru ngu ozi mkpa. Obujeru; o -kpu udzu tuuu; imemini iya adushia phe ike.
- ¹⁵Ohamoha a-tsu epha gube Chipfu ebvu. Ndu eze, nokota le mgboko l'ophu a-kwabe o-gbu-nwainwii ngu ubvu;
- ¹⁶kele Chipfu e-gude eka iya kpukwaa Zayonu; bya egude o-gbu-nwainwii ya lufuta.
- ¹⁷Oo-ngabe nchi l'epfufu, ndu adudu g'o du phe epfu anu iya; ophu oohudu arworwo, ephe arwo iya l'ali.
- ¹⁸G'e dee owa-a l'ekwo doberu ogbo ophu aa-nwu l'iphu; k'ophu ndu ono, e teke atsutakpodaanu ime phe ono e-tu Chipfu epha.
- ¹⁹Le Chipfu gbekwa l'eze-ulo iya l'ephekerephe eka onojje; mbu l'o gbje l'imigwe gbua igo l'eliphe;
- ²⁰ge ya numa ude, ndu mkporo atsuj; shi nno mee ge ndu e kperu mpfugbu nweru onwophe.
- ²¹Oo ya bu g'aa-koo ke Chipfu le Zayonu; tua ya epha le Jierusalemu;
- ²²me ohamoha waa ali-eze ndiphe l'ophu dzukobeephe g'ephe baaru Chipfu eja.
- ²³Le mu byakwa ejejaha uzo ndzu mu ebo; o tukowa ike, shi du mu nu nashichaa mu; bya egubota ndzu mu.

²⁴Oo ya bu; mu su: Te kutashinu mu; jiko Chileke mu; l'ebe adu ge mu no-bewaru le mgboko; le gubedua be apha nkengu a-nokwa shi l'ogbo sweru ogbo.

²⁵Eshikpoo le mbu bu ngu turu okpa eliphe l'ophu. Teme o buru ngu gude aka ngu mee igwe.

²⁶Iphemiphe ono e-mechaa lakota l'iyi; obenu le gubedua l'a-du gi du; mbu-a; l'iphemiphe ono e-mechakwaa kashihu g'uwe. Oo g'aagbanweje uwe-a bu g'ii-mechaa gbanwee phe; nkephe abvu.

²⁷Obenu le gubedua buepho onye i bu be i bu; ophu apha nkengu abvudu abvubvu.

²⁸Unwu, ndu ejeru ngu ozi nwutaru l'e-buru kwaseru; l'e mekwapho g'awa phe nguru anguru l'iphu ngu.

Ebvu-oma 103

Ebvu, Dévidi deru

¹Gube obu mu; tua Chipfu epha. Iphe, bukpo iphe, du mu l'ime ehu; tua onye ono, epha iya du nso ono epha.

²Obu mu; jiko tua Chipfu epha; ophu o dukwa urwu, eeritaje iya l'eka me nanu, iizoha azoha

³Oogujeru mu nvu l'iphe-eji, mu meru g'o ha; teme o nodu emeje ge mu ka mma l'iphe, bukpo iphe, eme mu nu.

⁴Oogbafutaje ndzu mu g'o to la l'ilu; bya ekpube mu n-yemobu; waa obu-imemini g'okpu-eze.

⁵Oogudeje iphe, du ree zu-jia mu epho; teme o nodu emeje ge mu lwa azu le nwepa g'ugo.

⁶Chipfu emeje iphe, pfuru oto; teme o nodu ekpeje ndu e eme ewere ikpe, pfuru nhamunha.

⁷O meru ge Mosisu maru uzo iya; bya emee ge ndu Izurelu maru iphemiphe, oome.

⁸Chipfu bu onye aphuje obu-imemini; bya aburu onye emeje eze-iphe-oma. Ehu te eghujedu iya egwu egwegwa; teme o nodu eyeje obu yegharu iya aka.

⁹O too bajedu mba tekenteke; ophu ovujedu ovuma jaswaruroya.

¹⁰O too lejedu g'iphe-eji anyi gbaru eme anyi; ophu opfujedu anyi ugwo ejo-iphe, anyi emegbabe.

¹¹Kele oo g'igwe no-be ali ephekerephe bu g'o habe; mbu eye obu, o yeru ndu atsu iya ebvu.

¹²O buru g'uzo enyanwu-awawa du-be enya l'uzo enyanwu-adada; bu g'eka o wofuru emeswe, anyi mesweru iya je edobe habe enya l'eka anyi no.

- ¹³Ọ bụru gę nna aphujeru nwa iya obu-imemini-a; bukwapo gę Chipfu aphujeru ndu atsụ iya ebvu obu-imemini.
- ¹⁴Kele ọo ya maru g'e gude mee anyi. Ọonyataje l'ọo urwuku mmanụ bę anyi bụ.
- ¹⁵L'a -bya lę nemadzụ bę eswe ndzụ iya dụ g'ęswa. Ọonoduje aba yoyoyo g'okoko, nọ l'ęgu.
- ¹⁶Pherephere -ziepho kpua ya nwanshii l'o phukashihu. Eka o shi nọdu ta anyatabedu iya ọzo.
- ¹⁷Obenu lę-a; e -shi lę gbururu jeye lę gbururu bę n-yemobu kę Chipfu aduje l'ęhu ndu atsụ iya ebvu; tẹme l'o wokwarupho apfubekoto nkiya doberu unwu nwanwanwanwanwa ndu ono;
- ¹⁸mbụ l'ęhu ndu ọphu edobeje ọgbandzu iya; bya anyataję dobe ekemu, ọ tųru doberu phe.
- ¹⁹Chipfu mewaru g'aba-eze iya nguru anguru l'imigwe; tẹme abubu, ọ bụ eze dzuru ọha l'ophu.
- ²⁰Unubę unwu-ọjozi-imigwe kę Chipfu; unu tua ya ępha; mbụ unubę ndu ike dụ, bya aburu ndu eme opfu iya.
- ²¹Unu tua Chipfu ępha; unubę unwu imigwe l'ophu; mbụ unubę ndu-ozii iya, l'eme iphe, bụ uche iya.
- ²²Unu tua Chipfu ępha; unubę iphe, o meru ememe dobe l'ęka ọ bụ eze. Gube obu mu; tua Chipfu ępha.

Ebvu-oma 104

- ¹Gube obu mu; tua Chipfu ępha. Gube Chipfu, bụ Chileke mu; i parụ ęka apaa. I gbaphuru adu-ubvu yęe adu-akpabiri g'onye gbaphuru ękwa.
- ²Iphoro bę i yeru g'onye yeru uwe. Imigwe l'ophu bụ gubedua gude ęka ngu phushi iya g'onye phushiru ọlo-ękwa;
- ³bya eworu uko ọlo ngu gbaa l'eli akpaminigwe. I meru urwukpu; ọ bụru ugbo-inya ngu. I nọdu atukojeru pherephere lę nkù ephe.
- ⁴I meru pherephere; ọ bụru onye-ozii ngu; bya emee onwu-phuruphuru-oku; ọ bụru onye iizije ozi.
- ⁵Ọo ngu tųru ọkpa eliphe l'ophu; k'ophu bụ l'a ta abyadu enwubata iya enwubata jasụ l'ojejeje.
- ⁶I woru eze-ęnyimu kpua ya g'onye kpuru uwe; k'ophu mini ha l'eli kakota ubvu l'ophu l'eli.
- ⁷Obenu l'ọo mba bę i barụ eze-ęnyimu ono; o keta ọso gbaa mgbalanụ; mbụ l'ọ numacerupho ọrà, i gbę l'imigwe raa; ọ gbalachaa.

- ⁸Ọ nọdu asọ gborogboro awù oke-úbvú awùwù asọ ala l'o-bua-ozee ọkpa úbvú. Ọ sọkwaseru ọzo, i tọru iya ọkpa iya.
- ⁹I kpawaru iya oke ẹka ọ tọ sọghatajedu; k'ọphu ọ tọ byadu erimigbuba mgboko ọzo.
- ¹⁰Ọ mewaru gẹ mini shije l'ogba gbaa dẹredere kwaseru ọkpa-úbvú. Ootsojeru mgbaka úbvú epyophe.
- ¹¹Ọ bọru iya echebeje unwu anu, bu l'ẹgbudu mini g'ẹphe ha. Nkapfu-igara-ọswa nọdu angu iya mini.
- ¹²Enu, ẹphe l'eli nọdu anọduje l'aguga nggele ono akpa ẹpfune. Ẹphe nọdu anọduje ebephe l'ẹkali-oshi ono agu ebvu.
- ¹³Ọ nọdu agbeje l'ẹka o bu agba mini l'úbvú. Mgboko l'ọphu bẹ iphe, oome jikporu ẹpho.
- ¹⁴Ẹswa bẹ o meru; ọ nọdu erwushije k'ọphu iphe-edobe a-tajẹ nri; bya emee iphe-akoko dobe gẹ nemadzu gudeje kọ opfu kọbe iphe l'ali;
- ¹⁵gude kuta mee, aanguje g'obu tso uto; bya emeta manu, aanyije g'iphu maa mma; waa nri, eerije gẹ ndzu du.
- ¹⁶Oshi Chipfu bẹ ọgbaje mini ree; mbu oshi sida ọphu du l'úbvú úbvú Lébanonu, bu oshi ọphu o yeru l'onwiya.
- ¹⁷Ọ bọru l'eli ẹka ono bẹ enu akpajẹ ẹpfune. Eze-ọku-eswi-uda woru ephekerephe oshi payinu mee unuphu ibe iya.
- ¹⁸Oke-úbvú oke-úbvú bu ndu bu iya nu bu egbu-ọswa. Ọgba bọru ẹka nchi-ọgba anọduje ezeru ndzu.
- ¹⁹Ọ meru onwa g'e gudeje gu apha. Enyanwu nọdu amajeru teke ya a-riba.
- ²⁰Ọobujeru; teke i meru; ọchii wata agbagba l'ọ bọru iya bu lẹ nchi ejihu. Iphe, bukpo anu, nọ l'ọswa eshi l'ẹka ẹphe nọ wufukota jeshia achọ iphe, ẹphe e-ri.
- ²¹Oduma asuaha ekiri achọ nri, oo-ri; mbu nri, shi l'ẹka Chileke.
- ²²Teke enyanwu waerupho; ẹphe ezita onwophe ezita; je domia l'ogba phe.
- ²³Nemadzu agbeshi teke onoya jeshia l'egu. Ooje anodu l'egu jee ozi jasu l'uzenyashi.
- ²⁴Gube Chipfu; ozi, iijekota bukwa aguta aguta. Iphemiphe ono bukotaru mmamiphe nkengu bẹ i gude mekota iya; mbu lẹ mgboko l'ọphu bẹ iphe, jiru iya nu bukota iphe, i gude ẹka mee.
- ²⁵Eze-enyimu ha shii bya adu asa. Ọ bọru l'ime iya bẹ aguta aguta anu bu; mbu iphe, nọ ndzu; ndu ọphu ha shii; me ndu ọphu ha nwanshii.
- ²⁶Ọ bọru l'eli iya bẹ aanọduje angaphe ugbo-mini. Temе ejo-oke-agiyi ono, bu ngu gude ẹka ngu mee ya ono nọdu ebvu mini l'ime iya.
- ²⁷Iphemiphe ono bu ngu bẹ ẹphe tuko ele enya l'ẹka g'i nuje phe nri l'orwuberu iya.

- ²⁸Teke ì nùru phẹ iya; ẹphe achikobe iya l'onwophe. Teke ì saru ẹka; iphe, du ree enwushihu; ẹphe egude iya rijia ẹpho.
- ²⁹Teke i domiru phẹ iphu ngu; ndzu-agugu erwuta phẹ. Teke ì nataru phẹ unme, ẹphe atu; ẹphe anwuhu buru ẹja ali.
- ³⁰Teke i kuru Unme ngu ye phẹ l'ẹhu; ẹphe aburu iphe, e meru k'òphúú. Ì nọdu emeje iphu mgboko l'ophu g'ọ du òphúú òphúú.
- ³¹G'o-gbu-nwijnwii Chipfu dukwa g'ọ du jasụ l'ojejoje. G'ozì, Chipfu gude ẹka iya jee mekwa g'ẹhu tsọo ya uto;
- ³²mbu onye abujeru; o -lee eliphe l'ophu ẹnya; l'ọ nmahu pyaapyaapya. Teke ọ byaru ẹka l'eli úbvú; úbvú obu akpuhu tuutuutu.
- ³³Mu a-nọduje agu ebvu anu Chipfu le ndzu mu l'ophu. Mu a-guje ebvu gude etu Chileke mu ẹpha jasụ ge mu a-nọ-beru.
- ³⁴Jiko ge ke nkiya-a, mu ari-a tsokwaa ya uto; noo kele iphe, Chipfu anọduje eme emeje g'ẹhu tsọo mu uto.
- ³⁵Jiko ge ndu iphe-ẹji chihu l'eliphe l'ophu; ophu ndu ejo-iphe aduhe adudu ophu. Gube obu mu; jiko tua Chipfu ẹpha. G'ajaja buru ke Chipfu.

Ebvu-oma 105

- ¹Unu kele Chipfu ekele; unu kua ẹpha iya! Unu mee g'ohamoha madzuru iphe, o meru!
- ²Unu guku iya l'ebvu! Unu gua ebvu gude tua ya ẹpha! Unu pfukashikwapho iphe, bukpo iphe, du biribiri, onoduje eme!
- ³Unu gude ẹpha iya ono, du nsọ tua onwunu ẹpha! G'obu ndu achọ Chipfu teje ẹswa!
- ⁴Unu wojeru ẹnya dabẹ le Chipfu me l'okpehu iya! Mbua unu choje iphu iya mkpurumkpuru!
- ⁵Unu nyatakwa iphe, du biribiri, o mekotaru; waa iphe-ohumalenya, o meshigbaaru; waa ikpe, o kperu;
- ⁶unubẹ oshilokpa Ébirihamu, bu onye-ozì iya; unubẹ unwu Jiékpọ, bu ndu o gude ẹka iya họta.
- ⁷Ọ kwa iya bu Chipfu; bya aburu Chileke anyi. Ikpe iya tukoru mgboko vọ pfurupfuru.
- ⁸Ọgbandzu iya be onyataje jasụ le tuutuutu le mimiimii. Ukwe-iphe, o kweru be eshije l'ogbo sweru ogbo.
- ⁹Ọgbandzu ono, yele Ébirihamu gbaru ono; mbu angu ono, o riburu Áyizaku ono;
- ¹⁰be o meru; ọ buru ekemu l'ẹhu Jiékpọ. Ndu Ízurelu be o meru iya; ọ buru ọgbandzu, a-nọ ojejoje;

- 11sụ phẹ: “Oo unu bẹ mu a-nụ alị Kénanu g'ọ buru okiphe, unu ketaru.”
- 12Teke ono bẹ ẹphe shi habe nwahabe; mbụ teke ẹphe shi ha nwa chiaka-chiaka; buru ndu lwaru alwalwa l'alị ono.
- 13Ẹphe shi etsojeru ohamoha aghaphe. Ẹphe -shi l'alị-eze owa-a; ẹphe alufu l'alị-eze ophuu.
- 14Ophu ọ dudu onye o kweru g'o mee phẹ ewere. O nọdu egudeje opfu ẹhu phẹ baaru ndu eze mba;
- 15sụ phẹ: “Unu te edenyikwa ndibe mu, mu hofutaru ẹka! Unu ba adukwa iphe, unu e-me ndu epfuchiru mu nụ!”
- 16O meru; okpa-nri bya l'eliphe; shi nno woru nri, ẹphe nweru enweru mebyishichaa.
- 17O ye nwoke lanu g'o vuru phẹ ụzo; mbụ Jiófẹfu, onye ono, e reru; ọ buru ohu ono.
- 18Ẹphe tua ya mkporo l'okpa; huswashia ya okpa; bya eworu agadagba-ígwè ye iya l'olu;
- 19gbiriri jasụ mbọku, o pfuru opfu; ọ vua g'o pfuru iya; mbụ jasụ opfu, Chipfu pfuru mee g'a maru l'ọ bụ onye ire-lanu.
- 20Noo ya bụ; eze zia sụ g'e je ewehaa ya. Onye bụ ishi oha woru iya wehaa; o nweru onwiya.
- 21O woru iya mee onye-ishi unuphu ibe iya l'ophu; mbụ onye elekota iphemiphe, o nweru enweru;
- 22sụ iya g'ọ hùje ndu-ishi ahùhù teke dụ iya ree; l'o zije ndu bụ ogerenya l'alị-eze iya mmamiphe.
- 23Oo ya bụ; ndu Ízurelu lanaa Ijiputu. Ndibe Jiékopu jenu aburu ndu lwaru alwalwa l'alị Hamu.
- 24Chipfu bya emee ndibe iya; ẹphe nọdu azụ azụzù shii. O mee phẹ; ẹphe paa igwerigwe; shi nno kapyabẹ ndu ohogu phẹ.
- 25O woru obu ndu ohogu phẹ ono ghaphua. Ndibe Chipfu ono bya adu ndu ono ashị. Ẹphe wata achiru ndu-ozu iya ono ẹjo idzu.
- 26O bya ahota Mosisu, bụ onye-ozu iya; bya ahota Eronu bya eworu phẹ zia;
- 27ẹphe je emeshia iphe-ohumalenya nkiya l'echilabọ phẹ; bya egoshi phẹ iphe, dụ biribiri kẹ Chipfu l'alị Hamu.
- 28O ziru ochii ozu; o je emee alị ono; ọ gbahụ tsukiriba; noo kẹle ndu Ijiputu kwefuru opfu Chileke ike.
- 29O bya emee; mini, nọ l'alị phẹ ghokota mee. Ema, dụ iya nụ tuko nwushihukota.
- 30Mbara tuko alị phẹ mgburugburu jikota pyimu kwochaa nkwoťankwo; bahuchaa le mkpuru ẹka ndu-ishi alị phẹ akwajẹ akwakwa.

- 31O bwa opfu be o pfuru; ijiji tsuaha gbiigbiigbi; teme mkpulumkpu tukoeppo ali eka ono sweta.
- 32Igwe haa edze mini wata atu akamini; bya atuhaha egbigwe gbaagbaa l'ali phe l'ophu;
- 33bya atupyashia vayinu phe me oshi figu phe; bya atuko oshi, no l'ali phe l'ophu zijashikota.
- 34O gbeshikwa ozo bya epfua opfu; igube wata etsutsu; mbu ogu, etsu gbiigbiigbi buru aguta aguta.
- 35Epe tuko iphe, dzu ndzu, ekwo du tapyashikota l'ali phe l'ophu; mbu tuko iphe, epe meberu l'ali g'o ha tapyashia.
- 36O gbete teke ono bya atuko ndu bu okpara l'ali phe gbushia; mbu tuko nwa, vuru uzo kpoo phe iphu mee umerekete.
- 37O bya edufuta ndu Izurelu; kporu mkpola-ododo yee mkpola-ochaa kpojia phe eka; ophu o dudu unwu Izurelu ono g'o ka mma l'oo onye lanu, mkpo kporu l'okpa.
- 38Ehu tsoo Ijiputu ntumatu g'ephe tugbuerupho; kele epe shi atsua ndu Izurelu ebvu shingushingu.
- 39O bya aphushiaru phe urwukpu gude kpuchia phe; bya akpoberu phe oku g'ephe gude huma iphoro l'enyashi.
- 40Epe suru g'a nu phe nri; Chipfu bya achiru okwa nu phe; bya egude nri, shi l'igwe zu-jia phe epho.
- 41Oke mkpuma be o tularu uzo; mini shi iya soshihu; mbu aso ge nggele l'echiegu ono;
- 42noo kele o nyataru ukwe-iphe, du nso, o kweru nu onye-ozu iya, bu Ebirhamu.
- 43O dufuta ndibe iya; ehu nodu atso phe. Epe nodu atu uzu ehu-utso gude eje afuta; mbu ndu ono, o hotaru ono.
- 44O woru ali ndu ohozo woru nu phe. O buru eka ndu ozo riru aphu iya be epe wotaru; o buru okiphe phe;
- 45k'ophu epe a-wata eme omelali iya; dobeahaa ekemu, shi iya l'eka. G'ajaja buru ke Chipfu.

Ebvu-oma 106

- 1G'ajaja buru ke Chipfu. Unu kele Chipfu ekele; kele o bu onye oma. N-yemobu nkiya anoje jasu l'ojejoje.
- 2? Bu onye a-du ike tua onu g'iphe, Chipfu eme habe shii? Too; ? denu onye a-du ike tugbabe Chipfu epha iphe, oomebe?

- ³Èhu-ùtso bẹ a ọ́oru nù ndu anọ́duje eme iphe, dù nhamunha; mbù ndu ono, anọ́duje eme iphe, p̄furu ọ́to tekenteke.
- ⁴Nyatakwa mu jiko Chipfu; teke ìi-wata egoshi lẹ ndibe ngu dù ngu l'obu! Byakwa agbaaru mu mkpu m'ì byatashia p̄hẹ adzọta!
- ⁵K'ọ́phu mu a-huma ọ́-dù-ree, i doberu ndu ì họtaru; tsokwaru p̄họ ọ́ha ono, bù nkengu ono tee ẹswa; mbù tsoru ndu ono, bù okiphe ngu ono tua ngu ẹpha.
- ⁶Anyi meakwaru iphe-ẹjì gẹ nna anyi oche p̄hẹ meru. Anyi mekwaru ẹjọ-iphe; mbù l'anyi mewaru iphe, ap̄fuduru-ọ́to.
- ⁷Teke nna anyi oche p̄hẹ shi nọ́du lẹ Ijiputu bẹ iphe, dù biribiri, i shi emeje te eshidu edoje p̄hẹ ẹnya. Ọ́phu ọ́ dudu ikpoto iphe-oma ngu, duru ọ́phu ẹphe nyataru. Ẹphe kwefuru ngu ike l'aguga Eze-ẹnyimu Uswe-uswe ono.
- ⁸Ọ́le o gudeẹle-a g'ẹpha iya ap̄furu dzọ́ p̄hẹ; k'ọ́phu aa-maru l'ẹpha iya parù ẹka apaa.
- ⁹Ọ́ baru Eze-ẹnyimu Uswe-uswe mba; mini, nọ́ iya nù tashihu. O dua p̄hẹ ghaa echi ogbu-mini g'onye agha echiẹgu.
- ¹⁰Ọ́ dzọ́taru p̄hẹ l'ẹka ndu ọ́hogu p̄hẹ; gbafuta p̄hẹ l'ẹka ndu ẹphe dù ashì.
- ¹¹Mini rikọ́ta ndu achì p̄hẹ lẹ njo; ọ́phu ọ́ dudu g'ọ́ ka mma l'ọ́o onye lanu, waru nù.
- ¹²Noo teke ẹphe kwetarù l'iphe, o kweru ukwe ememe bẹ oomeje; bya agua ebvu gude tua ya ẹpha.
- ¹³Ọ́phu ọ́ dudu g'ọ́ nọ́-beru; ẹphe zọ́haa iphe ono, o meru ono; tẹme ọ́phu ẹphe angabejeedu g'ọ́ chì-koshi p̄hẹ idzu.
- ¹⁴Ẹphe rwua l'echiẹgu ono; ẹphe wata eme iphe, agu p̄hẹ nù; mbù ọ́ buru l'alì ono, dabyiru mgbegere ono bẹ ẹphe huru Chileke ama.
- ¹⁵Ọ́o ya bù; ọ́ nunu p̄hẹ iphe, ẹphe suru g'a nù p̄hẹ. Ọ́ nuchanaa p̄hẹ iya; bya evuru ẹjọ iphe-ememe byabẹ p̄hẹ l'ishi.
- ¹⁶Ẹphe rwua l'ẹka ẹphe kpọ́beru ọ́lo-ẹkwa p̄hẹ g'ẹphe butọ́ta. Ọ́ duru ndu wataru ejiru Mosisu yẹ Erọ́nu ijienya; mbù umadzu labọ́ ono, Chipfu họtaru dobe iche ono.
- ¹⁷Noo ya; alì ghekahù ẹbo lwee Detanu; bya atuko Abiramu yẹ ndu ẹphe l'iya swì lia lẹ ndzù.
- ¹⁸Tẹme ọ́ku nwulihu kẹ phoophoophoo bya etsufu ndu etsoje p̄hẹ nù. Ọ́ku ono tukoepho ndu ẹjọ-iphe ono tsufu.
- ¹⁹Ẹphe rwukwaa l'úbvù Horebu; ẹphe je eworu agwa dobe; mbù gude mkpọ́la-ododo wua nweswi dobe baahaaru iya ẹja.
- ²⁰Ẹphe gude ọ́du-biribiri p̄hẹ ono, bù Chileke gude je agbanweta iphe, a kpuru; ọ́ dù g'eswi, ata ẹswa.

- 21** Ẹphe zohaa Chileke ono, dzọru phẹ nù ono; mbụ onye ono, meru iphe, parụ ẹka l'alì Ijiputu;
- 22** bya emee iphe, dọ biribiri l'alì Hamu; bya emekwaphọ iphe, dọ ebvu l'aguga Eze-nyimu Uswe-uswe ono.
- 23** Oo ya bụ; ọ sù lẹ ya e-mebyishi phẹ; obenu lẹ Mosisu, bụ onye ọ họtaru jeru apfuchia ụwara, o shi abya; g'o to gude oke ẹhu-eghu iya mebyishikọta g'ẹphe ha.
- 24** E mechaa; ẹphe woru ẹguru alì ono nmaa phulaphula; ọphu ẹphe ekwetaduru l'iphe, Chileke kweru ukwe ememe bẹ ọo-dụkwadu ike mee.
- 25** Ẹphe nọdugbaa l'ime ụlo-ẹkwa phẹ wata agụ aphụ; ọphu ẹphe ekweedu eme iphe, Chipfu sùru g'ẹphe mee.
- 26** Oo ya bụ; ọ chilia ẹka eli riaru phẹ angu sù lẹ ya e-me g'ẹphe daa pọpoo l'echiẹgu;
- 27** tẹme ya erwuta ụnwu nwanwa phẹ jeye ndu ọhogu phẹ l'ẹka. Ẹphe achikashia phẹ; ẹphe agbaa nanụ nanụ dzuru eliphe l'ọphu.
- 28** Ẹphe gbeshi je eworu onwophẹ gọo l'ẹka Balu-Peyọ; bya awata eri iphe, e gburu l'agwa, ta adzudu ndzu.
- 29** Ẹphe menaa; Chipfu vuhaa ọvuma l'ẹjo-ememe, ẹphe nọ megbabẹ. Mgbu-ọnwu dabanụ l'echilabọ phẹ.
- 30** Ole Finehasu gbeshiru bya egboo ọgu ono sù g'ono ta nwukwa; shi nno gboo mgbu-ọnwu ono.
- 31** A guaru iya ono l'apfubekoto, e-shi l'ẹhu iya sweru oshilokpa iya jasù l'ojejoje.
- 32** Ẹphe rwukwaa l'aguga mini Meriba; ẹphe kpatsu Chipfu iwe. Mosisu shi phẹ l'ẹka meta kpua onwiya.
- 33** Oo kele ẹphe kwefuru Unme Chileke ike meru iphe, Mosisu gude pfua iphe, o togo pfudu.
- 34** Ophu ẹphe alwuebeduru ndu ono, ẹphe jepfuru l'alì ono; gẹ Chipfu tọru phẹ ekemu sù g'ẹphe lwua phẹ.
- 35** O buchiaru iphe, ẹphe meru bụ l'ẹphe jeru eworu onwophẹ tükobe lẹ ndu ono. Ẹphe ghaa ẹghirigha wata eme omelalì phẹ.
- 36** Ẹphe wata abarụ agwa phẹ ẹja. Iphe ono mechaa bọru ọnyà nmata phẹ.
- 37** Ẹphe gude nwa phẹ nwoke; mẹ ke nwanyị gude wata agwa ẹjo ọbvu.
- 38** Ẹphe wata egbushi ụnwu phẹ, adudu iphe, ẹphe meru; gude agwa ọbvu ndu Kénanu. Ẹphe gude mee ụnwu phẹ ono merwushia alì ono;
- 39** bya eshikwaphọ nno merwushia onwophẹ; mbụ shi nno bọru ndu agba ụkpara.

⁴⁰Noo g'o gude Chipfu vuahaaru ndibe iya ovuma; mbu kpo-yiaharu ndu ono, bu okiphe iya ono ukuvu.

⁴¹O chiru phe ye l'eka ndu ohozo. Ndu ephe du ashị buru eze chiahaa phe.

⁴²Ndu ohogu phe kpaahaa phe ehū. Ndibe Chileke bya anodu phe l'eka.

⁴³O dzotakpooru phe teke du igwerigwe; ole eka uche adujee phe pho bu l'eme iphe, a suru g'ephe te emeshi. Ephe shi nno nodu l'iphe-aji phe yifu.

⁴⁴Ole oobujeru; iphe-ehuka -byapfuta phe; ephe -raku Chileke; l'o rwua Chileke l'ehu egwegwa; l'o numa olu phe.

⁴⁵L'o gude opfu ehū phe nyata ogbandzu iya. O gude ke l'o yeru phe obu selaa eka azu.

⁴⁶O mee g'iphe, bukpo ndu kpuru phe le ndzu phuru phe obu-imemini.

⁴⁷Dzonaa anyi; jiko Chipfu, bu Chileke anyi. Shinu l'ohamoha ono rwukobe anyi ozo; k'ophu anyi e-tu ngu epha; gube onye ono, epha ngu du nsọ ono gude ajaja, anyi a-ja ngu baa aba.

⁴⁸G'ajaja buru ke Chipfu, bu Chileke ke ndu Izurelu gbururu jeye le gbururu. G'onyemonye sukwa: "Nokwa g'o du!" G'ajaja buru ke Chipfu!

Ebvū-oma 107

¹Unu kele Chipfu ekele; kele o bu onye oma. N-yemobu nkiya anoje jasū l'ojejoje.

²Gē ndu Chipfu gbafutaru kele iya ekele l'o bu onye oma; mbu ndu o gbataru l'eka ndu achi phe le njo;

³ndu ono, o shi l'ohamoha rwukoo; mbu ndu o jeru l'uzo enyanwu-awawa; bya ejee l'uzo enyanwu-ariba; je uzo isheli bya ejee ndohali je erwukoo.

⁴O duru ndu ophu bu l'echiegu be ephe tsoru aghaphe; mbu l'ali, dabyiru mgbegere, adudu iphe, du iya nu; ophu ephe amadu uzo, ephe e-shi jerwua mkpukpu, ephe e-je ebupyabe.

⁵Egu-nri guru phe; egu-mini gua phe. Ephe nodu l'eka ono joo ehū wufu.

⁶Tobudu iya bu; ephe raku Chipfu g'ephe no l'iphe-ehuka ono. O bya anafuta phe l'iphe-ehuka, ephe eje obu.

⁷O bya edua phe shia uzo, pfuru oto; durwua phe mkpukpu, ephe e-buru.

⁸G'ephe kele Chipfu ekele l'o yenukaru phe obu; waa l'oomeru unwu-eliphe iphe, du biribiri.

⁹Kele onye mini agu be oochejije iya epho; l'o gude iphe, du ree zu-jia onye egu agu epho.

- 10** Ọ duru ndu ọphu shi nọdu l'ẹka agba ọchii bya adu tsukiribaa; mbu buru ndu no mkporo eje iphe-ẹhuka l'ẹka e gude iphe-ígwè tųgbabe phe ọkpa;
- 11** kele ẹphe kwefuru ike l'ẹphe te emedu opfu Chileke; mbu jika l'ẹphe le Okalibe-kakota-shii ta achidu idzu lanu.
- 12** Tọbudu iya bu; o paru phe haa; ẹphe jeaha ozi mkponwehu. Ẹphe jee ya jasụ ẹphe nọdu aphohuje daa; ọphu o dudu onye gbaru phe mkpu.
- 13** Noo ya; ẹphe raku Chipfu g'ẹphe no l'iphe-ẹhuka ono. O bya adzoo phe l'iphe-ẹhuka, ẹphe eje obu.
- 14** O bya edufuta phe l'ẹka agba ọchii, gbahuru ke tsukiribaa, bu ẹka ẹphe shi nọdu; bya agbushia ẹgbirigba, e shi gude tųgbabe phe ọkpa.
- 15** G'ẹphe kele Chipfu ekele l'o yenukaru phe obu; waa l'oomeru unwu-eliphe iphe, du biribiri;
- 16** Kele onyakashije oguzo, a kparu l'onirubvu; bya egbubushije mgborigwe, e gude gbachishia uzo.
- 17** O nweru ndu ọphu wataru eme eswe. O buru iphe, kparu iya nu bu l'ẹphe kwefuru Chileke ike; teme e mekpaa phe ẹhu; opfu l'ẹphe bu ndu meru ejo-iphe.
- 18** Ehu phe nafuchaa phe nri. Ẹphe nọdu anwuhu phakuu.
- 19** Tọbudu iya bu; ẹphe raku Chipfu g'ẹphe no l'iphe-ẹhuka ono; O bya adzoo phe l'iphe-ẹhuka ono, byapfutaru phe nu ono.
- 20** O buru opfu onu be o pfuru; o mee; ẹhu dukota phe ike; shi nno dzota phe l'ilu.
- 21** G'ẹphe kele Chipfu ekele l'o yenukaru phe obu; waa l'oomeru phe iphe, du biribiri.
- 22** G'ẹphe gweru ngweja-ekele nu iya. Ẹphe agua ebvu ẹhu-utso gude mee g'a maru g'iphe, oome gbaru.
- 23** O duru ndu ọphu gude ugbo-mini tsoru eze-enyimu agba ngho.
- 24** Ndu k'ono humaru ozi, Chipfu jeru; ozi, du biribiri, o jeru l'echi ogbu-mini;
- 25** kele o bu-a opfu be o pfuru l'onu; oke pherephere wata ezizi. O shi nno mee; oke akparamini ono wata atushi ike.
- 26** Ugbo-mini phe nọdu awulihuje ephekerephe ephekerephe. L'o byakwa atsubakpoo omilomi omilomi. Oke iphe-ẹhuka, ẹphe eje ono mee; obu phe zashihu azashihu.
- 27** Ẹphe nọdu anga anganga; akpo garigari ge ndu ngushiru mee ike. Mmamiphe phe l'ophu buru phe ola-l'iswi.
- 28** Tọbudu iya bu; ẹphe raku Chipfu g'ẹphe no l'iphe-ẹhuka ono. O bya anafuta phe l'iphe-ẹhuka, ẹphe eje obu.
- 29** Enyimu, aphu oke gborogboro be o meru; o phuahaa nwa swiswisi; bya abaaruu oke akparamini mba; o daa nyonyoronyo.

- ³⁰Ehu tsòahaa phẹ ụtso g'ò daru nyonyoronyo ono. O dua phẹ gbiriri jasụ ẹphe jerwua odu ugbo-mini ẹka ẹphe eje.
- ³¹G'ẹphe kele Chipfu ekele l'o yenụkaru phẹ obu; waa l'oomeru phẹ iphe, dụ biribiri.
- ³²G'ẹphe kutsee ya l'ẹka e dzukọberu edzukọbe; tua ya ẹpha l'ẹka ndu bụ ọgerenya dọru achị idzu.
- ³³Enyimu bẹ ọ mịshiru mini; ọ buru echięgu. Ọ bya emee nggele, asọ asoso; ọ buru alị, mini tahuru.
- ³⁴O meru alị, bụ ọsu; ọ buru jakpọro jakpọro alị únú; kẹle ndu shi buru l'ẹka ono menụkaru ejo-iphe.
- ³⁵Echięgu bẹ o meru; ọ buru okpuru, mini jiru ejiji; bya emee alị, shi dụ kpọkoro kpọkoro; ọ buru ishi nggele.
- ³⁶Ọ buru ẹka dụ ẹgube ono bẹ o dutaru ndu ẹgu agụ je edobe g'ẹphe buru. Ẹphe je eburu l'ẹka ono buru mkpukpu ẹka phẹ.
- ³⁷Ẹphe woru opfu kọo; bya agbaa opfu-vayinu l'ẹka ono. Ẹphe jeshia ya akpata; ọ mịchaa mebyi migharu iya ẹka.
- ³⁸O keberu phẹ l'oma; ẹphe wata aka shii mebyi akaka; ọphu o kwedu g'iphe-edobe phẹ wata alwa alị alị.
- ³⁹E mechaa; Chipfu gude mkpamẹhu; waa iphe-ẹhuka; yẹe aphụ lọ-zeta phẹ. Ẹphe wata alwa alị alị.
- ⁴⁰Mbụ onye ono, ewodajẹ ndu a maru ẹpha phẹ alị; woru phẹ mee; ẹphe ghapheahaa l'alị, dabyiru iphoro, adudu gbororo, dụ iya nụ.
- ⁴¹O bekwanụ lẹ ndu adudu g'ò dụ phẹ bẹ o setarụ l'ẹka sefuta l'iphe-ẹhuka, ẹphe eje. Ọ bya emee; ndibe phẹ wata azushi g'aturu.
- ⁴²Ndu obu phẹ guru iphóró abujeru; ẹphe -huma iphe ono; ẹphe eworu ẹswa tee; obenu lẹ ndu eme iphe, apfuduru-oto g'ẹphe ha abujeru; ẹphe -huma iya; l'ọ kpọo phẹ onu opfu.
- ⁴³Gẹ ndu maru iphe wokwaru iphe-a je asụ-mia l'ime obu phẹ. Ẹphe arịa gẹ n-yemobu Chipfu habe shii!

Ebvu-oma 108

Ebvu-oma, Dévidi deru

- ¹Obu shihukwaru mu ike Chileke; k'ọphu bụ lẹ mu e-gude obu mu g'ò ha agụ ebvu etu ngu ẹpha. Obu mu; tehu nwuru ẹnya.
- ²Unu tehu nwuru ẹnya; unubẹ ogelenda yẹe une; kẹle mbẹdua e-gudekwa ebvu kutee geregere nchi-abọhu lẹ mgbenya.

- ³Mu a-nòdu l'echilabò ndiphe kele ngu ekele gùbe Chipfu. Mu anòdukwapo l'echilabò òha l'ophu gùa ebvu gude tua ngu èpha.
- ⁴Noo kẹle n-yemobu ngu parù ẹka. Ọ tùkoru imigwe l'ophu kakòta ephekerephe. Tẹme ire-lanù nkengu dzuru akpaminigwe.
- ⁵Goshinu ndiphe g'ì paberu ẹka; mbù l'ì nòghataru akpaminigwe anòghata; gẹ ndiphe l'ophu ahùma g'ì dù-be biribiri.
- ⁶Gudenu ọkphehu ngu dzoo anyi; zanu anyi enu; k'ophu ee-shi nno dzoo ndu i yeru obu.
- ⁷Chileke nòwaa l'ùlo iya, dù nsò pfua opfu sù: “Mu e-gude agbò ọgboo kee alì ndu Shẹkemu. Tẹme mu eworu nsùda Sukòtu bushia.
- ⁸Giladu bù nkemu; Manásẹ bükwarupho nkemu. Ifuremu bù okpu, mu kpu l'ishi. Jiuda bükwanuru mgboro-eze, mu apajẹ l'ẹka.
- ⁹Mówabu bù ochi, mu akwoje ọkpa. Ọ bükwanuru lẹ Edomu bẹ mu eyeshije akpokpa mu dobe. Ndu Filisitayinu bẹ mu gbòwaru ọgboo kpua.”
- ¹⁰? Bù onye e-du mu chiriri werere duba lẹ mkpukpu ono, a kpuru kpushia ike ono? Mbù-a; ? bù onye e-duru mu duba lẹ Edomu?
- ¹¹Ọ kwa gùbedua Chileke bù onye obu. Obenu l'ì gbẹ jìka anyi; ophu i tii tsojẹduru ndu ojogu anyi eje ọgu.
- ¹²Yeru anyi ẹka jiko g'anyi mekpee ndu ohogu anyi; kẹle eye ẹka k'unwu-eliphe, bù iphe-iphoro.
- ¹³Obenu l'anyi -nòduwaa Chileke l'ẹka bẹ anyi e-mekpe phẹ gẹ mkparawa. Ọ buri iya e-hu ndu ohogu anyi agbagba-nchì l'alì.

Ebvù-oma 109

Ebvù-oma, Dévidi deru nù onye-ishi ebvu

- ¹Gùbe Chileke, mu etu èpha; ba nòdushinu nggujungguji;
- ²kẹle ndu èjo-iphe mẹ ndu ẹregede sawaru onu epfuru mu èjo opfu; bya adzushi ọka ekpu mu.
- ³Èphe gudewaa opfu ndumashi gbaa mu mgburugburu. Èphe nòdu abya mu l'iphu; èbe adù iphe, mu meru phẹ.
- ⁴Mu -gbẹ emekoshi phẹ k'ònyà; èphe agbẹ ebo mu ibo; obenu lẹ mbèdua anòdujẹepho l'epfu anù Chileke epfushi iya ike.
- ⁵Èphe egudeje èjo-iphe pfua mu ugwo iphe-oma, mu meru phẹ. Obu, mu yeru phẹ bù ndumashi bẹ èphe egudeje sata mu iya.
- ⁶Yenu onye èjo nemadzù g'o je akwachia ya ọzo. Zinaa onye a-nòdu ebo iya ibo g'o je apfuru iya l'iphu gbaa ya ekebe.

- ⁷E -kpee ya ikpe; g'ikpe obu nmakwa iya. Gẹ Chileke gụkwaru epfupfu, oopfu anụ iya ye l'iphe-eji, o meru.
- ⁸G'eswe ndzụ iya gbakwaa mkpirikpu. G'onye ozo nọ-chikwa ọnya iya l'eje ozi, o shi eje.
- ⁹G'ọ tọgbokwa unwegirima ibe iya nwamaa. L'ọ haa nyee ya l'ulo-maa.
- ¹⁰G'unwegirima ibe iya wushikwaru ghaphee rwo arwo! G'a chifukwa phe g'ephe te ebukponu le mkpokpo unuphu ibe phe obu!
- ¹¹Gẹ ndu o ji ugwo tukokwa iphe, o nweru enweru natachaa. Gẹ ndu a madu eka ephe shi tukokwa akanya, o seru esese gweta.
- ¹²G'ọ to dukwa onye e-mejeru iya iphe-oma; ophu o dukwa onye a-phujeru unwegirima ono, o tọgboru nwamaa ono obu-imemini.
- ¹³G'awa iya chihukwa. G'epha phe ta aduhekwa l'ogbo ophu abya nu.
- ¹⁴Gẹ Chipfu ta adukwa teke oo-zoha ejo-iphe, nna iya oche phe mekotaru; ophu o hufukwa iphe-eji, ne iya meru ehufu ophu.
- ¹⁵G'iphe-eji phe ono tukoekwapho kwaa l'iphu Chipfu; k'ophu oo-me g'ephe chihu l'eliphe; g'a ta nyatabahe phe!
- ¹⁶Kele o to rijeduru ke g'o meeru nemadzu iphe-oma. O buchianu iphe, ooshibeje ite iya bu g'oome dulaa ndu ukpa maa; waa ndu adudu g'ọ du phe; waa ndu obu phe tsuru gworigwori.
- ¹⁷Eshinu iphe, aduje iya ree bu atu onu; g'ọ bukwaru onye a turu onu. Su-a; eshinu ago onu-oma aduje iya eji; g'onu-oma nodukwa iya uzenya uzenya.
- ¹⁸Eshinu o yeru onwiya atu onu g'onye yeru uwe; g'atu onu ono sodakwa iya l'epho ge mini. L'o mibachaa ya l'okpu ge manu.
- ¹⁹G'a phukwaa ya ya g'onye a phuru ukpo. L'e kee ya ya g'onye keru akpo l'upfu jasụ l'ojeje.
- ²⁰G'iphe ono, mu gushiru ono bukwaru ugwo, Chipfu a-pfu ndu ono, anoduje ebo mu ibo ono; mbu ndu ono, anoduje epfuru mu ejo-opfu ono.
- ²¹Obenu gube Chipfu, bu Nnajuphu mu; menaru mu ree g'epha ngu apfuru. Gudenu n-yemobu ngu ono, dunukaru ree ono nafuta mu;
- ²²Kele mu bu onye ukpa bya aburu onye adudu g'ọ du iya; teme e mewaa mu iphe, rwuru mu le meji.
- ²³Mu esewa gerere g'ononyo uzenyashi; teme a nmakofuwa mu g'onye nmakofuru igube.
- ²⁴Ikpere mu ta adudu ophu shihuru ike l'eka mu aswi egu; teme mu jowaa ehuru buru okpu.

²⁵Nta-a bẹ ndu anọduje ebo mu ibo ekweru mu une. Ẹphe -huma mu; ẹphe egude ekwe l'ishi sụ mu hẹe.

²⁶Yenuru mu ẹka jiko Chipfu, bụ Chileke mu. Eshinu ị bụ onye n-yemobu; dzonaa mu.

²⁷Menaa ya g'ẹphe shi nno maru l'o shi ngu l'ẹka; mbụ g'ẹphe maru l'ọo gube Chipfu meru iya l'onwongu.

²⁸Ẹphe a-nọdu ephu mu iphu; obenu ịe gubedua a-nọdu agoru mu onu-oma. Ọ -buru l'ẹphe byaru mu etso ọgu; l'e mee phe iphe-iphere; obenu ịe mube onye-ozu ngu buepho eswa bẹ mu a-nọdu ete.

²⁹Ndu anọduje ebo mu ibo bẹ ee-ye iphere g'onye yeru uwe. L'a phua phe iphere g'onye phuru ukpo.

³⁰Onu mu bẹ mu e-gude jaa Chipfu okpobe ajaja. Mu anodu l'edzudzu-oha tua ya epha;

³¹kele oopfujeru l'ekutara onye adudu g'ọ du iya; g'ọ dzota ndzu iya l'ẹka ndu ekpe iya mpfugbu.

Ebvu-oma 110

Ebvu-oma, Dévidi deru

¹Chipfu suru Nnajiuphu mu: “Nọdu mu l'ekutara; jasụ teke mu e-me g'ị zopyabe ndu-ohogu ngu l'okpa.”

²Chipfu a-gbẹ ịe Zayonu nụ ngu mgboro-eze, egoshi g'ike ngu habe shii. Ọo-sụ ngu: “Buru onye eze ndu ohogu ngu!”

³Ndu ojogu ngu bẹ ọo-nọdu ehe ihee eje ọgu l'eswe ọgu. Ọo g'iji nchi-abohu anọduje akwa-a bụ g'unwokorobya ngu a-wu-pfuta ngu l'ubvú, du nsọ ono.

⁴Chipfu ribuwaru angu; ophu oogba-nweedu iphe, o pfuru. Ọ suru: “Ii-buru onye uke Chileke jasụ ịe tuutuutu ịe miiimii; bụ iya bụ gẹ Melikizedeku bụ.”

⁵Nnajiuphu nọ l'ekutara gube Chipfu. Ndu eze bẹ oo-gwe pyakapyaka mboku, ehu eghu iya eghu.

⁶Oo-kpe ohamoha ikpe; woru ndu nwuhuru anwuhu kukobe l'ikpo l'ikpo; bya atuko ndu eze mgboko l'ophu gwee arakabya.

⁷Ọo ịe nggele, nọ l'aguga gbororo bẹ ọo-nguta mini. Ọo ya bụ l'o mee ya g'ọ ngakerehu.

Ebvu-oma 111

¹G'ajaja buru ke Chipfu. Mu e-gude obu mu g'ọ ha kele Chipfu ekele. Mu e-kele iya l'ẹka ndu obu phe guru iphoro nọ l'idzu; kele iya l'ẹka ẹphe nọ ndzuko.

²Iphemiphe, Chipfu eme paru ẹka. Iphe, bukpo ndu ọ du ree ejeje arị iya oriri.

- ³Iphe, Chipfu emeje dụ ùbvù bya adù akpabiri; tème apfùbekoto iya nòdu anoje jasù l'ojejoje.
- ⁴O mewaru g'a nyata iphe, dụ biribiri, oomeje. Chipfu eme eze-iphe-oma tème ọ nòdu aphù obu-imemini.
- ⁵Ndu atsù iya ebvu bẹ ọonoduje anù nri. Ọgbandzu iya bẹ ọonyataje jasù lẹ tuutuutuu lẹ m̀jimiimii.
- ⁶Ndibe iya bẹ ọ goshiwaru ike, dụ l'ozi, ooje; kẹle ọ natarù ndu ọhozo alì phẹ woru nù phẹ.
- ⁷Iphe, ọ gude ẹka iya eme bụ ire-lanù bya aburu iphe, pfuru ọto. Ekemu, ọ tũru pfushiru ike.
- ⁸Ekemu ono a-kpọru g'abara jasù l'ojejoje; tème e gude obu, gũru ìphóró; waa ire-lanù eme iya.
- ⁹Ndu nkiya bẹ ọ gbafutaru; bya atũa ekemu sù g'ogbandzu iya dũkwa ojejoje. Ẹpha iya dụ nsọ bya adù ebvu.
- ¹⁰Atsù Chipfu ebvu bụ egbube ishi mmamiphe. Iphe, bũkpoo ndu etso ekemu iya bẹ iphe edoje ẹnya ree. G'e tua ya ẹpha jasù l'ojejoje.

Ebvù-oma 112

- ¹G'ajaja bũru kẹ Chipfu. Ẹhu-utso bẹ a gọru nù onye atsù Chipfu ebvu; onye ekemu iya atsoshije utso ike.
- ²Unwu iya a-bũru ndu ike dụ l'eliphe. Oshilokpa ndu obu phẹ gũru ìphóró bẹ a-bũru ndu a gọru ọnu-oma nù.
- ³Iphe-enweru yẹ ẹku a-tũko ibe iya sweta; tème apfùbekoto iya je a-nòdu jasù l'ojejoje.
- ⁴Mbũkponu l'ẹka agba ọchii bẹ ìphóró awajẹ g'ẹnyanwu l'ẹhu onye obu iya gũru ìphóró; mbù onye emeje eze-iphe-oma; bya aburu onye obu-imemini; bya abũkwarupho onye pfùberekoto l'iphu Chileke.
- ⁵Ọ bũepho k'oma a-nòdu etso onye emeje iphe-oma bya ejieje ụgwo m̀ia ya ẹnya; onye iphemiphe, oome bẹ oomeje k'ọphu aa-harù iya enge.
- ⁶Mbù lẹ-a; a ta abyakwa enwubata iya enwubata. Onye pfùberekoto bẹ aa-nòduepho anyatajẹ jasù l'ojejoje.
- ⁷Ọo-nòdu anù ẹjọ nzi; ọle nzi ono ta abyadù eme gẹ ndzù gũa ya. Obu e-shihuje iya ike; kẹle onye ọ dakoberu bụ Chipfu.
- ⁸Obu a-kpọ iya abara; ọphu ndzù abyadù agù iya; jasù l'o gude ẹnya iya hũma l'e mekperu ndu ọhogu iya.

⁹Oosaje obu iya asasa nu ndu adudu g'ò du phe iphe. Apfubekoto nkiya a-nò jasù l'ojejoje. Aa-tuli iya éka eli gude kwabé iya ùbvù.

¹⁰Onye ejo-iphe -huma iya; éhu awata iya egu egu. L'o gude éhu-egu taa kpookpookpo jasù l'ò jòò éhu wufu. Iphe, agu onye ejo-iphe ono ta abyakwa erwu iya éka.

Ebvù-oma 113

¹G'ajaja buru ké Chipfu. Unubé ndu ejeru Chipfu ozi; unu jaa Chipfu ajaja.

²G'e tua Chipfu épha shita nta-a jasù l'ojejoje.

³O gbaru g'e shi l'éka ényanwu awajé jaa Chipfu ajaja jasù l'éka oribaje.

⁴Chipfu parù éka; ò kakòta ohamoha shii. O-gbu-nwìnwii ya nò-ngokòta imigwe l'ophu.

⁵? Bù onye bé aatù eyeru Chipfu, bù Chileke anyi; mbù onye nò l'aba-eze iya l'imigwe?

⁶Onye ewozeje onwiya alì g'ò huma iphe, nò l'imigwe waa iphe nò l'eliphe.

⁷Ookulije onye ukpa l'urwuku éka ò gwòru. O nòdu ekulije onye adudu g'ò du iya l'ikpòzu éka ò dabyiru.

⁸L'ò bya eworu phe dobe; yé ndu-ishi aharu énya nhamunha; mbù ndu-ishi ndu alì iya.

⁹Nwanyi, ata atsudu ime bé okwabeje ùbvù l'ibe ji iya; mbù mee ya l'ò buru nwanyi, éhu du guu, nwushiru unwu gé gunu. G'ajaja buru ké Chipfu.

Ebvù-oma 114

¹Teke ndu Ízurelu shi lé Ijiputu futa; mbù teke oshilokpa Jiékopu shi l'éka ndu opfu phe eswe uswe lé nchì futa;

²bé Jiuda byaru bya aburu onye dùru Chileke nsò. Ndu Ízurelu bya aburu ndu o nwe enwenwe.

³Eze Ényimu huma iya bya eye okpa l'oso; teme ényimu Jiódanu dakòbe lashia azu.

⁴Oke úbvù nòdu apfugba ké shòshoo g'ebili. Úbvù nòdu apfù ké karagidingu karagidingu gé nwaturu.

⁵Sù-a; gùbe Eze Ényimu; ? ì gbaru gunu? Gùbe Jiódanu; ? bù ole bù k'ala azu?

⁶Unubé oke úbvù; ? bù gunu bé unu gude apfugba ké shòshoo g'ebili? Unubé úbvù; ? bùhunu ole bé unu gude apfù ké karagidingu karagidingu gé nwaturu?

⁷Eliphe l'ophu nmakwaa jiiijiii l'iphu Nnajiuphu; mbù l'iphu Chileke ké Jiékopu.

⁸Onye gbazeru mkpuma; ọ bụru okpuru; bya eworu ali, dị epfu epfu mee; ọ bụru ishi nggele.

Ebvu-oma 115

¹Ọ tọ bụkwa anyi bẹ aa-kwabẹ ùbvù jiko Chipfu; ọ tọ bụkwa anyi. Ọ kwa epha ngu kpoloko bẹ gbaru g'a kwabẹ iya ùbvù. Noo kele i yenụkaru anyi obu; tẹme i nọdu apfushije ike l'iphe, i pfuru.

²? Denu g'o gude ndu ọhozo nọdu asuje anyi: “? Denu Chileke unu?”

³Chileke anyi nonu l'imigwe. Ọ bụru iphe, dị iya ree bẹ oomeje.

⁴Obenu l'agwa phẹ bụ mkpola-ododo yẹ mkpola-ochaa; bụ iphe, nemadzụ gude ẹka mee.

⁵Ephe nweru onu; ophu epe epfudu opfu. Ephe nweru enya; ophu epe aphudu iya ụzo.

⁶Ephe nweru nchi; ophu epe anudu iya iphe. Ephe nweru imi; ophu epe egudedu iya akpọ ishishi iphe.

⁷Ephe nweru ẹka; ophu epe egudedu iya ewota iphe. Ephe nweru okpa; ophu epe ejedu ije; tẹme ophu epe egudedu ẹkpiri phẹ epfufuta opfu.

⁸Ndu agwo phẹ nụ; mekpoo ndu dakoberu phẹ nụ a-dụ g'agwa ono dū.

⁹Su-a; unubẹ ndibe Ízurelu; unu dakobe Chipfu; kele ọo ya eyejeru unu ẹka bya aburu iya egbobutaje unu.

¹⁰Unubẹ ndibe Eronu; unu dakobe Chipfu; kele ọo ya eyejeru unu ẹka bya aburu iya egbobutaje unu.

¹¹Unubẹ ndu atsụ Chipfu ebvu; unu dakobe Chipfu; kele ọo ya eyejeru unu ẹka bya aburu iya egbobutaje unu.

¹²Chipfu anyataje anyi; ọo-goru onu-oma nụ anyi. Ọo-goru onu-oma nụ ndibe Ízurelu; bya agoru onu-oma nụ ndibe Eronu.

¹³Ọo-goru onu-oma nụ ndu atsụ yẹbe Chipfu ebvu; ndu upfu mę ndu nta.

¹⁴Gẹ Chipfu mekwaa g'unu jaa àjàjà ka l'otu; unubedua l'onwunu mekpoo unwegirima ibe unu.

¹⁵Gẹ Chipfu gọkwaru onu-oma nụ unu; mbụ onye ono, bụ iya meru igwe bya emee eliphe l'ophu ono.

¹⁶Imigwe l'ophu bụkota kẹ Chipfu; obenu l'eliphe bẹ o wowaru nụ ndiphe.

¹⁷Ọ tọ bụkwa ndu nwuhuru anwuhu ajajẹ Chipfu ajaja; mbụ ndu lawaru ali ọ-laru-nọdu-nggujungguji.

¹⁸Ọ kwa anyịbedua a-nọdu etu Chipfu ẹpha. Anyi a-nọdu etu iya ẹpha nta-a; etu iya ya jasụ l'ojeje. G'ajaja buru kẹ Chipfu.

Ebvu-oma 116

¹Mu yeru Chipfu obu; kẹle ọ nūmawaru olu mu. Ọ nūmaru mkpu, mu chikuru iya sụ g'o meeru mu eze-iphe-oma.

²Eshinu ọ ngaberu mu nchị bẹ mu a-nọdujeepho araku iya jasụ gẹ mu a-nọ-beru.

³Anwuhu shiwaa chie mu ẹgbirigba l'olu. Ẹkpa oyi alị-maa nọdu anwu mu kẹ kpalaa. Iphe-ẹhuka; waa aphụ shiepho nọ-pee mu mgburugburu.

⁴Tọbodu iya bụ; mu bya araku Chipfu sụ iya: “Gube Chipfu; dzonaa mu!”

⁵Chipfu bukwa onye emeje eze-iphe-oma; bya aburu onye pfulerekoto; mbụ lẹ Chileke anyi bukwa onye aphuje obu-imemini.

⁶Ndu amazidu iphe bẹ bukwa Chipfu anọduje eleta phe ẹnya. Teke mu shi nọdu l'oke mkpa bụ iya dzoru mu.

⁷Obu mu; jiko kabekwa dzutabaa ike ọzo; kẹle Chipfu nwubenukaru ngu ẹnya.

⁸Oo gube Chipfu nafutaru ndzụ mu gẹ mu ta anwuhu. Teme ọ buru ngu hucharu mu ẹnya-mini; bya egbobuta mu gẹ mu te vukota iphe daa iko;

⁹k'ophu mu a-nọdu ejephe g'ọ dụ mu l'iphu Chipfu l'alị ndu dzụ ndzụ.

¹⁰Mu woru onwomu ye Chileke l'eka. Ono mee mu; mu sụ: “Iphe-ẹhuka kpaakwaru mu ẹhu shii.”

¹¹Teme mu pfubulihukwapho sụ: “Ndiphe l'ophu bukotakwa ndu ntuphu-ire.”

¹²? Denukpoo gẹ mu e-shi pfula Chipfu ugwo iphe-oma, o mekotaru mu g'ọ ha?

¹³Mu a-pali okoro goshiru l'i bụ ọ-dzo-nwa gude kutse Chipfu.

¹⁴Iphe, mu rifuru angu emeru Chipfu bẹ mu e-meru iya l'iphu ndu bụ nkiya.

¹⁵Anwuhu ndu duru Chipfu nsọ; bẹ ọ guberu iphe.

¹⁶Gube Chipfu; mu bukwa onye-ozu ngu okpobe abubu. Mu bukwa onye-ozu ngu; bya aburu nwa, nwanyi ono, ejeru ngu ozi ono nwuru. I mewaru gẹ mu nweru onwomu lẹ mkporo ono, e shi tua mu ono.

¹⁷Mu e-gweru ngu ngweja-ekele; teme mu abyakwapho araku ẹpha gube Chipfu.

¹⁸Iphe, mu rifuru angu emeru Chipfu bẹ mu e-mekotaru iya l'iphu iphe, bụ ndu nkiya.

¹⁹Ọ buru ẹka mu a-nọdu mee ya bụ l'okpoku eze-ulo Chipfu l'echilabo unube ndu Jierusalemu. G'ajaja buru kẹ Chipfu.

Ebvu-oma 117

- ¹Unu jaa Chipfu ajaja unube ọhamoha. Unu tua ya ẹpha unube ndiphe l'ophu;
²kele o yeru anyi obu yegharu iya ẹka; teme Chipfu ndu apfushije ike l'iphe, o pfuru jasụ le tuutuutuu le mimiimii. G'ajaja buru ke Chipfu.

Ebvu-oma 118

- ¹Unu kele Chipfu ekele l'ọ bu onye oma; kele n-yemobu iya anoje jasụ l'ojejoje.
²Gẹ ndu Ízurelu tuko sụ: “N-yemobu iya anoje jasụ l'ojejoje.”
³Gẹ ndibe Eronu tukokwapho sụ: “N-yemobu iya anoje jasụ l'ojejoje.”
⁴Gẹ ndu atsụ Chipfu ebvu sukwapo: “N-yemobu iya anoje jasụ l'ojejoje.”
⁵Teke mu eje iphe-ẹhuka be mu rakuru Chipfu. O zaa mu ẹnu bya emee mu; mu nweru onwomu.
⁶Chipfu no-kubewa mu; ophu ndzu agudu mu. ? Bukwanu gunu be nemadzu mmanu suru mu emebata?
⁷Chipfu no-kube mu; ọo yebedua bu onye n-yemeka mu. Mu e-mechaa gude ẹnya mu humu l'e mekperu ndu mu du ashi.
⁸Anodu l'ime Chipfu ezeru ndzu kakwa ree eme l'adakobe nemadzu.
⁹Anodu l'ime Chipfu ezeru ndzu kakwa ree eme l'adakobe ndu-ishi.
¹⁰Iphe, bu ọhamoha kepheru mu mgburugburu etso mu ọgu; ọle mu gude ẹpha Chipfu lwu-kpekota phe g'ephe ha.
¹¹Ephe no mu ibe k'ẹbo ẹbo; ọle mu gude ẹpha Chipfu lwu-kpekota phe g'ephe ha.
¹²Ephe ripyaberu mu g'enwu; ọle ephe meekwarupho kpuru-kpuru-kpuru l'ali nwushihukota g'ekperema okponku, oku tsupyashiru. O buru ẹpha Chipfu be mu gude lwu-kpekota phe g'ephe ha.
¹³E nwuru mu daphuu nwuphu azu; mu bya ada iko; obenu le Chipfu yeru mu ẹka.
¹⁴Oo Chipfu bu ike mu; bya aburu onye mu agu-ku l'ebvu. Oo ya bu onye adzoje mu nu.
¹⁵Olu ẹhu-utso yee agbo ogboo be ada wowoowoo l'eka ndu pfuberekoto no. Ephe tuko ephu sụ: “Chipfu gudeakwa ẹkutara iya mee iphe paru ẹka.”
¹⁶O kwa ẹkutara Chipfu be o paliru imeli. O gude ẹkutara iya ono mee iphe, paru ẹka.”
¹⁷Mu ta anwuhudu; mu a-dzuru ndzu pfukashia iphe, Chipfu meru mu g'a numadzuru.
¹⁸Chipfu hwaru mu ahuhu hushia mu ike; ọle o to kwedu g'onwu gbua mu.
¹⁹Kpohanaaru mu oguzo apfubekoto; ge mu shi iya bahu je etua Chipfu ẹpha.

- ²⁰Ọwa-a bụ ọguzo kẹ Chipfu. Ọ bụ ẹka ndu p̄f̄uberekoto eshije abahụ.
- ²¹Mu e-kele ngu ekele l'ị zaru mu ọnu. Nta-a bẹ ị bụwaa onye adzoje mu nụ.
- ²²Mkpuma, ndu akpụ ụlo jikaru; mechaaru bya aburu mkpuma, gude ụlo.
- ²³Ono buru iphe, Chipfu meru. Ọ dū anyi biribiri l'anya.
- ²⁴Ntanu-a bụ mboku, Chipfu meru. G'ehu tsoo anyi utso; anyi etekwapho eswa ntanu ono!
- ²⁵Jiko Chipfu; dzotanu anyi! Mekwaa g'iphemiphe, anyi eme bukotaruru anyi upete; gube Chipfu!
- ²⁶Onu-oma bẹ a goru nū onye ono, bụ Chipfu ziru iya g'ọ bya ono. Anyi gbẹ l'ulo Chipfu agoru ngu onu-oma.
- ²⁷Ọ kwa Chipfu bụ Chileke. O meakwaru g'iphóró, shi iya l'eka nwaruru anyi. Unu taa anu, unu gude abya egweru Chipfu ngweja eri; kpata bya lẹ mgboru mpu, a nmaberu l'oru-ngweja iya.
- ²⁸Ọo ngu bụ Chileke mu; ọ buru ngu bẹ mu a-nodu ekele ekele. Ọo ngu bụ Chileke mu; ọo ya bụ l'ọo ngu bẹ mu a-nodu ekutse.
- ²⁹Jiko unu kele Chipfu ekele l'ọ bụ onye oma. Teme n-yemobu iya nodu anoje jasuru l'ojeje.

Ebvu-oma 119

- ¹Ehu-utso bẹ a goru nū ndu te emejedu iphe, aa-ta p̄hẹ uta; ndu etsoep̄ho ekemu, Chipfu turu.
- ²Ehu-utso bẹ a goru nū ndu etso iphe, ọ turu l'ekemu; bya egude obu p̄hẹ g'ọ ha acho iya achoshi iya ike.
- ³Ndu adukpoda iphe, apfuduru-oto, ep̄he emeje; buep̄ho uto, ọ toru bẹ ep̄he eshije.
- ⁴Ị kawaru anyi iphe, ị suru g'e meje merwua l'ishi.
- ⁵Ọ dū mu g'a sū l'umere mu nguru anguru; gẹ mu tsoje iphe ono, ị toru okpa iya ono;
- ⁶k'ophu ọ tọ dudu iphe, iphere iya bya eme mu; noo kele mu daberu ọnya l'iphemiphe, ị suru g'e meje.
- ⁷Mu e-gude obu, guru iphóró jaa ngu ajaja; eshi ophu mu anwu ikpe ngu ono, pfuru oto ono.
- ⁸Mu e-tso iphe, ị toru okpa iya sū g'e tsoje. Jiko ba jikakwa mu phuruphuru gberegedege.
- ⁹? Denukpoo gẹ nwokorobyaa e-me dobe uto iya g'ọ dube ree? G'oo-me iya bụ g'ọ meje iphe, e deru l'opfu ngu.

- 10 Mu gude obu mu g'ọ ha achọ ngu. B'ekwekwa gẹ mu phua ọzo l'etso iphe, ị sụru g'e meje.
- 11 Opfu ngu bẹ mu domiwaru l'ime obu mu. Ọo ya bụ g'ọ tọ dukwanu teke mu e-me ngu iphe-eji.
- 12 G'ajaja bụru nkengu gube Chipfu. Jiko zinaa mu gẹ mu e-me tsoje iphe, ị tọru ọkpa iya sụ g'e tsoje.
- 13 Ọo ogbogboromonu mu-a bẹ mu gudewaa gushikota iphe, bukotakpoo ikpe, i kperu l'onu ngu.
- 14 Ehu anọduje atso mu uto me mu nọdu eme iphe, ị tọru l'ekemu; egube ono, ehu atsoje onye kparu eku kpashia ya ike ono.
- 15 Mu anọduje nggujungguji arị iphe, ị karu g'e meje ariri. Mu adabekwapho enya l'uzo, ị tọru g'e shije.
- 16 Iphe, ị tọru ọkpa sụ g'e tsoje aduje mu ree ememe; ophu mu abyadu agbakutaru opfu ngu ono azu.
- 17 Menaaru mube onye-ozu ngu iphe, du ree; k'ophu mu e-shi nno nọdu ndzu meje opfu ngu.
- 18 Mena gẹ mu saa enya; huma iphe, du biribiri, dugbaa l'ekemu ngu.
- 19 Mu bukwa onye lwaru alwalwa l'eliphe-a. Jiko ba adukwa iphemiphe, ị sụru g'e meje ophu ii-domiru mu edomi.
- 20 Obu awahwa mu awahu; eka mu achọ ikpe ngu achoshi iya ike tekenteke.
- 21 Ndu etu onwophe epha; bya aburu ndu a tọru onu bẹ iibajeru mba; mbu ndu ono, ahaje iphe, ị sụru g'e meje eme iphe ozo ono.
- 22 Mena g'e te kweru mu une; ophu a nma mu phulaphula; kele iphe, ị tọru l'ekemu bẹ mu emekotaepho.
- 23 A makwaru-a le ndu-ishi anokobeje achiru mu ejo idzu; obenu l'iphe, mube onye-ozu ngu anọduje arị bu gẹ mu e-me tsoje iphe, ị tọru ọkpa iya sụ g'e tsoje.
- 24 Ọo eme iphe, ị tọru l'ekemu bu iphe, aduje mu ree. O buri iya anọduje akpo-ziru mu uzo iphe, mu e-me.
- 25 E wozekpoeru mu pho woru mu dee adee l'urwuku. Mephunu ndzu mu azu g'ọ buri k'ophuu, bu iya bu iphe ono, opfu nkengu pfuru ono.
- 26 Mu doru ngu g'uzo mu gbaru; ị ngaberu mu nchi. Zinaa mu iphe, ị tọru ọkpa iya sụ g'e tsoje.
- 27 Mena g'iphe, ị karu g'e meje doo mu enya. Ọo ya bu gẹ mu ato nwehu ria k'iphe, du biribiri, iimeshi.

- ²⁸Mu guwaru aphụ jasụ ike bvụebe mu ree. Jiko menaa g'ike dụ mu, bụ iya bụ iphe, opfu ngu pfuru.
- ²⁹Phufu mu gę mu ta anọdu l'uzo ęregede. Menaarụ mu eze-iphe-oma; zia mu ekemu ngu.
- ³⁰Mu hatawaru eme ire-lanụ. O bụru ikpe ngu g'ọ ha bę mu wowaru dobe onwomu l'uzo iphu.
- ³¹Iphe, mu gudeshi ike ememe bụ iphe, gube Chipfu turu l'ekemu. B'ekwekwa g'e mee mu iphe-iphere.
- ³²Uzo, mu anọduje agba etso bụ eme iphe, i sụru g'e meje; kele i mewaru g'ęhu-utso ji mu obu ejiji.
- ³³Jiko Chipfu; zinaa mu gę mu e-shije etso iphe, i toru okpa iya sụ g'e tsoje. Oo ya bụ gę mu emekwanaa ya jasụ l'ikpazụ iya.
- ³⁴Menaa g'iphe doje mu ęnya; k'ophu mu a-duje ike dobe ekemu ngu ono; bya egude obu mu g'ọ ha emekotaje iya ememe.
- ³⁵Goshi mu uto, mu e-shije eme iphe, i sụru g'e meje; kele o bue ya pho bụ iphe, atsoje mu utso ememe.
- ³⁶Go-zinaa obu mu g'ọ gha iphu l'eme iphe, i turu l'ekemu. G'ọ to gha iphu l'eri ndu ozo urwu.
- ³⁷Menaa gę mu te eworu ęnya dabę l'iphe-mmanụ. Mephunu ndzụ mu azụ g'ọ bụru k'ophuú, bụ iya bụ iphe, opfu ngu pfuru.
- ³⁸Menaarụ mu iphe, i kweru ukwe l'ii-meru mube onye-ozu ngu; k'ophu aa-wata ngu atsụ ebvu.
- ³⁹Wofunuru mu iphe-iphere ono, mu atsụ ebvu ono; kele ekemu ngu dụ ree.
- ⁴⁰Iphe, i karụ g'e meje agushikpoo mu ike ememe. Jiko gudenu kele i bụ onye pfuberekoto dobe mu ndzụ.
- ⁴¹Goshinu mu n-yemobu ngu ono jiko Chipfu. Dzotanụ mu; noo kele oo iphe, i kweru ukwe l'ii-meru mu.
- ⁴²Oo ya bụ gę mu amaru iphe, mu a-sarụ yeru ndu ekweru mu une; kele mu kporu obu ye l'opfu ngu.
- ⁴³Ta anafukwa mu ire-lanụ, dụ mu l'onu; kele mu chiru upfu kwęe l'ikpe, i kperu.
- ⁴⁴Oo iphe, ekemu ngu pfuru bę mu e-meje jasụ le tuutuutu le mimiimii.
- ⁴⁵Mu e-nwekporu onwomu tsoru aghaphe; kele mu tukochawaru iphe, i karụ g'e meje maęberu.
- ⁴⁶Mu a-pfuru l'iphu ndu eze pfua k'iphe, i turu l'ekemu. Ophu iphere abyadụ adụ mu.
- ⁴⁷Iphe, aduje mu ree bụ eme iphe, i sụru g'e meje; noo kele mu yeru iya obu.

- 48Mu amachije ẹka mu labo ge mu nata iphe, i suru g'e meje, bu iya bu iphe ono, mu yeru obu ono; teme mu nodu anoduje nggujungguji ari k'iphe ono, i toru okpa iya su g'e tsoje ono.
- 49Nyatakwa opfu, i pfuru yeru mube onye-ozu ngu; noo kele i mewaru; mu lehaa enya iphe.
- 50Iphe, aduje mu obu me mu nodu eje iphe-ehuka bu le-a: L'ukwe-iphe, i kweru mu emeje ge ndzu mu buru k'ophuu.
- 51Ndu eku onwophe be achije mu ochi kpokirihuchaa akpokirihu; ole o too mejedu mu ge mu haa eme iphe, ekemu ngu pfuru.
- 52Gube Chipfu; oobujeru; mu -nyata ikpe ngu ono, shiro teke ndiche ono l'o dua mu obu.
- 53Ehu-eghu azuje mu pfurii; o buru ndu ejo-iphe akpaje iya; mbu ndu ono, jikaru edobe ekemu ngu ono.
- 54Iphe, i toru okpa iya su g'e tsoje abujeru ishi ebvu mu l'iphe, bukpo uo, mu zekporu l'uzo ije mu-a.
- 55L'enyashi be mu anyataje epha gube Chipfu; l'o mee mu ge mu dobe ekemu ngu.
- 56Iphe, mu aghaje iphu ememe teke bukpo teke mu no bu eme iphe, i karu g'e meje.
- 57Oo ngu bu okiphe nkemu gube Chipfu. Mu kwewaru ngu ukwe le mu a-nodu eme opfu ngu.
- 58Mu gudewaa obu mu g'o ha ele ngu enya l'eka. Menaaru mu eze-iphe-oma, bu iphe, i kweru mu ukwe iya.
- 59Mu lewaru uzo mu enya uswe lee ya ogologo; bya eshiwaa iya futu bya awata eme iphe, i turu l'ekemu.
- 60Mu e-me egwegwa; mu ta akpodu upfu eme iphe, i suru g'e meje.
- 61O -betachakpo ndu ejo-iphe kee mu egbu; mu ta abyadu azoha ekemu ngu.
- 62Oobujeru; a -nonyaa l'echi abali; mu agbalihu kele ngu ekele k'ikpe ngu ono, pfuru oto ono.
- 63Iphe, bukpo ndu ats'u ngu ebvu be mu l'ephe eshikota onya; mbu ndu ono, tukoru iphe, i karu g'e meje g'o ha emekota ono.
- 64Eliphe l'ophu be n-yemobu gube Chipfu jiru ke pyimu pyimu. Jiko zinaa mu iphe ono, i toru okpa iya su g'e tsoje ono.
- 65Jiko Chipfu; menaar'u mube onye-ozu ngu iphe-oma; eshinu o bu iphe, i kweru ukwe iya.
- 66Zinaa mu mmamiphe; yee ekpe ikpe, du nhamunha; kele mu kwekwaru eme iphe, i suru g'e meje.

- 67A byaru awata mu anụ chiipfuu; mu shiswehawarọ ụzo; obenu lẹ nta-a bẹ mu kwewaru eme opfu ngu.
- 68I bụ onye oma; ịme ị nọdu emejekwaphọ iphe, ị ree. Zinaa mu etso iphe, ị tọru okpa iya sụ g'e tsoje.
- 69A makwaru-a lẹ ndu eku onwophẹ anọduje adzushi ụka ekpu mu; obenu lẹ mu gudeepho obu mu g'ọ ha emekota iphe, ị karu g'e meje.
- 70Ndu ono bẹ imemini nemadzu ta adujedu. Obenu lẹ mbedua bụ eme iphe, ekemu ngu pfuru aduje mu ree.
- 71Chiipfuu ono, a nuru mu ono dukwa-a ree; k'ophu mu a-nwuta etso iphe, ị tọru okpa iya.
- 72Ekemu, shi ngu l'onu bẹ mu kakwa agube iphe eme l'unubuku mkpola-ododo waa mkpola-ochaa.
- 73Oo eka ngu bẹ i gude kpua mu; bya emee mu; mu nguru anguru. Jiko menaa ge mu maru iphe k'ophu mu a-nwu eme iphe, ị suru g'e meje.
- 74Ge ndu atsu ngu ebvu tekwa ẹswa m'ephe huma mu; noo kele iphe, mu daru ngaberu bụ opfu nkengu.
- 75Gube Chipfu; mu makwaru-a l'ikpe ngu pfuru oto; ịme l'ị pfu-shiru ike l'iphe, i pfuru nua mu chiipfuu.
- 76Ge n-yemobu ngu bunuru iphe, a-nọduje adu mube onye-ozu ngu obu; eshi ophu o bụ iphe, i kweru mu ukwe iya.
- 77Phunaaru mu obu-imemini k'ophu mu a-nodu ndzu; kele iphe, aduje mu ree bụ ekemu nkengu.
- 78G'e menuru iphere kpube ndu eku onwophẹ; kele ephe mesweru mu; l'ebe o du iphe, mu meru phe. Obenu lẹ mbedua anodujeepho arị iphe, ị karu g'e meje l'oriri.
- 79Ge ndu atsu ngu ebvu byapfutajekwa mu; mbu ndu iphe, ị turu l'ekemu doru enya.
- 80Ge mu tukokwa iphe, ị tọru okpa iya sụ g'e tsoje tsokota; g'ọ tọ dukwa eka uta a-du mu l'ehu; ophu e shi nno mee mu iphe-iphere.
- 81Meji atofuakwa mu atofu eka oogu mu g'a dzota mu; obenu l'eka obu mu du bụ l'opfu ngu.
- 82Enya anyiwa mu erwa; eka mu ele enya teke ii-me iphe, i kweru ukwe iya. Mu asuje: “? Bukpohunaa teke ole bẹ ii-du mu obu?”
- 83A makwaru-a lẹ mu du g'akpo, a miberu l'enwuru-oku; mbu akpo, eeyeje mee. Obenu lẹ mu ta azohajedu iphe, ị tọru okpa iya sụ g'e tsoje.
- 84? Bụ teke ole bẹ mube onye-ozu ngu a-taberu nshi? Kporu mu teke ii-bebe hua ndu akpa mu ehuhù.

- ⁸⁵Ndu eku onwophe ebvujeru mu nsu ge mu daba. Ono buru iphe, i turu ekemu su g'e te emejeshi.
- ⁸⁶Iphemiphe, i suru g'e meje be pfukotaru nhamunha. Yenuru mu aka; kele ndiphe akpa mu ehu l'ebe adu iphe, mu meru phe.
- ⁸⁷O bufua nwanshii; m'ephe ehufu mu ge mu ta noduhe l'eliphe-a; obenu le mu ta agwobeduru eme iphe, i karu g'e meje.
- ⁸⁸Eshinu i yeru mu obu; kwachinaa ndzu mu g'o to du iphe, e-me iya nu; k'ophu mu e-meje iphe, i gude onu ngu tua l'ekemu su g'e meje.
- ⁸⁹Opfu gube Chipfu a-no jasu l'ojejoje. O keru ke jingujingu l'akpaminigwe.
- ⁹⁰Ipfushije ike l'iphe, i pfuru; e -shi l'ogbo sweru ogbo. I meru eliphe dobe; o kporu g'abara.
- ⁹¹Ikpe, i kperu g'o hakpo kpoerupho g'abara byasu ntanu-a; kele iphemiphe ejeru ngu ozi.
- ⁹²O to bu l'ekemu ngu shiepho eshinu buru iphe, aduje mu ree; me mu alakwa l'iyi le teke ono, mu shi eje iphe-ehuka ono.
- ⁹³Mbu le mu ta abyadu azoha eme iphe, i karu g'e meje; kele oo ya be i gude mephu ndzu mu azu; o buru k'ophuu.
- ⁹⁴Dzonna mu; kele mu bu nkengu; teme mu bya atukowa iphe, i karu g'e meje g'o ha maaberu.
- ⁹⁵Ndu ejo-iphe kwageberu akwagebe g'ephe mebyishia mu; ole mu a-tukoepho iphe, i turu l'ekemu kwakobe l'ime obu mu aru iya oriri.
- ⁹⁶Iphe, a suru l'o duebe ree be mu ahumajeeppo l'o duru aka o phoduru; obenu l'iphe, i suru g'e meje duebe ree.
- ⁹⁷Ekemu ngu be mu yekwaru obu yegharu iya aka. Oo ya be mu anoduje aru l'oriri l'ime obu mu mkporumkpuru.
- ⁹⁸Eme iphe, i suru g'e meje mewaru; mu ka ndu ohogu mu amaru iphe; kele onoduje swiru mu mkporumkpuru.
- ⁹⁹Enya kakwa mu erwu ali e -me le ndu ezi mu iphe; kele mu anoduje aru k'iphe, i turu l'ekemu l'oriri.
- ¹⁰⁰Mu ka ndu bu ogerenya amaru iphe; kele mu emeje iphe, i karu g'e meje.
- ¹⁰¹Okpa mu labo be mu meerupho ophu ooshiswetajedu uzo, bu ejo uzo; k'ophu mu e-meje opfu ngu.
- ¹⁰²Mu ta ahajekwaru ikpe, i kperu; kele oo gubedua l'onwongu ziru mu iphe.
- ¹⁰³Egube g'iphe, i pfuru atso-bekwanu mu utso! O kakwa mu utso; e -me le manunenwu.

- 104Urwu, mu eritaję l'eme iphe, i karu g'e meje be bu nkwamenya. O buru iya meru g'o gude iphe, bukpoou uzo ughoshi dukota mu ashi.
- 105Opfu ngu bu oroku, mu egudeje huma eka mu a-zobe okpa; bya aburu iphorou, du l'uzo mu eshi.
- 106Mu gudewaa obu mu pfua ya hoo haa; bya eriru angu ye iya; le mu a-noduepho eme iphe, ikpe ngu ono, pfuru oto ono pfuru.
- 107Mu jenukawaru iphe-ehuka. Gube Chipfu; mephunu ndzu mu azu g'o buru k'ophuu, bu iya bu iphe, opfu ngu pfuru.
- 108Jiko Chipfu; natanu ajaja owa-a, mu gude obu mu aja ngu-a. Zikwaa mu pho g'ikpe ngu gbaru.
- 109A makwaru-a le mu achijeru ndzu mu l'eka tekenteke; obenu le mu ta abyakwa azoha ekemu ngu.
- 110Ndu ejo-iphe gbaewaru mu onya; ole o too medu mu ge mu haa eme iphe, i karu g'e meje.
- 111Iphe, i turu l'ekemu bu okiphe mu jasu le tuutuutu le mimiimii. O buru iya emeje g'ehu tso mu utso l'ime obu mu.
- 112Eka mu phoberu bu l'etso iphe, i toru okpa iya su g'e tsoje jasukpoepho ge mu a-no-beru.
- 113Ndu anoduje abo obu ebo be du mu ashi; obenu l'ekemu nkengu be mu yekwanuru obu.
- 114Oo ngu bu eka mu edomije onwomu; bya aburu onye mu no l'eka iya ezeru ndzu. Eka mu chiru upfu yee bu l'opfu ngu.
- 115Unu pakwaru mu haa; unube ndu eme ejo-iphe; k'ophu mu a-nodu emeje iphe, Chileke mu suru g'e meje.
- 116Bunuru agbarike mu; l'o bu iphe, i kweru ukwe iya; ge mu anodu ndzu. B'ekwekwa g'iphe ono, mu ele enya iya ono mebyia mu iphu.
- 117Gudeshinaa mu ike; k'ophu aa-dzota mu. Mu a-nodujeepho akwabe iphe, i toru okpa su g'e tsoje ono ubvu.
- 118Ndu haru etso okpa iphe, i toru tsoahaa iphe ozo be ijikaje ajika ophu; kele eregede, ephe agba bu ke mmanu.
- 119Iphe, bukpoou ndu ejo-iphe, no l'eliphe be iikpoje g'e kporu nu. Noo g'o gude mu yee obu l'eme iphe, i turu l'ekemu.
- 120Ogwehu mu aphukota jijijiii eka mu atsu ngu ebvu; bya atsukwapho ikpe ngu ebvu.
- 121Mu mewaru iphe, pfuru oto bya aburu iphe, du nhamunha. Jiko ba pakwaru mu haaru ndu eme mu ewere.

- 122 Jiko kwena onye-ozu ngu ukwe l'ii-nodu-a eleta iya enya. Te ekwekwa ge ndu eku onwophe mee mu ewere.
- 123 Enya anyiwa mu erwa aka mu ele enya gi bya adzota mu; bu iya bu iphe, gube onye pfuberekoto kweru mu ukwe iya.
- 124 Menaaru mube onye-ozu ngu iphe, du ree; eshinu i yeru mu obu. Zinaa mu iphe, i toru okpa iya su g'e tsoje.
- 125 Mbedua bu onye-ozu ngu; jiko menaa g'iphe doje mu enya; k'ophu iphe, i turu l'ekemu e-do mu enya.
- 126 Gube Chipfu; mekwaa ire nta-a; kele ekemu, i turu be e tee tsohedu.
- 127 Oo l'ole mu yeru iphe, i suru g'e meje obu; yeghata iya ge mu yeru okpobe mkpola-ododo;
- 128 teme mu kweta l'iphe, i karu g'e meje be pfuchaaru oto; meru g'o gude uzo ughoshi dukota mu ashi.
- 129 Iphe, i turu l'ekemu du biribiri. Noo g'o gude mu nodu etso iya l'o rwuberu iya.
- 130 Eka opfu ngu bataru be iphoro etsojeru iya; teme o nodu emeje ge ndu amazidu iphe maru iphe.
- 131 Mu saru onu wata atu hehehe; aka egu eme iphe, i suru g'e meje agu mu.
- 132 Ghanaaru mu iphu; jiko meeru mu eze-iphe-oma; g'iimejeru iphe, bukpo ndu yeru epha ngu obu.
- 133 Menaa ge mu haje okpa gi suru g'a haje iya. Te kwekwa g'iphe-eji, kapyabe mu enya.
- 134 Gbafuta mu l'eka ndu eme mu ewere; k'ophu mu a-nodu emeje iphe, i karu g'e meje.
- 135 Menaa g'iphu ngu gbua nwijnwii l'ehu mube onye-ozu ngu. Zinaa mu iphe, i toru okpa iya su g'e tsoje.
- 136 Enya-mini aso mu gborogboro l'enya; kele e tee etsodu ekemu ngu.
- 137 I bu onye pfuberekoto gube Chipfu; teme ikpe ngu pfuru nhamunha.
- 138 Iphe, i tushiru l'ekemu dobe pfukotaru nhamunha; teme ephe bukotaru ire-lanu.
- 139 Obu, mu yeru ngu rimiwaru mu ishi; kele ndu ohogu mu ta agubeduru opfu ngu iphe.
- 140 Iphe, i kweshiru ukwe ememe be a towaru nwehu dalekota adale. Mube onye-ozu ngu bya eyee phe obu ntumatu.
- 141 A maru-a le mu bu iphe-mmanu; teme ophu o dudu iphe, a guberu mu; obenu le mu ta zohaduru eme iphe, i karu g'e meje.

- 142 Apfubekoto nkengu a-dụwaro jeye l'ojejoje; ịeme ekemu ngu buru ire-lanụ.
- 143 Ejo iphe-ehuka; waa aphụ sọ-kputeru mu; obenu ịe mu yeluru-a iphe, ị sụru g'e meje obu.
- 144 Iphe, ị turu l'ekemu dobe dụ nhamunha jasụ ịe tuutuutuu ịe mịimiimii. Mena ge mu nweru egomunggo k'ophu mu a-nọdu ndzụ.
- 145 Mu gude obu mu g'ọ ha kua ngu oku; zanu mu enu jiko Chipfu; k'ophu mu a-nọdu etso iphe, ị toru okpa iya sụ g'e tsoje.
- 146 Oo ngu be mu kuru oku; dzonaa mu; k'ophu mu a-nọdu eme iphe, ị turu l'ekemu.
- 147 Mu gbeshiru ịeme nchi bohū wata echi mkpu g'e yeru mu aka; aka enya mu dū bụ l'opfu ngu.
- 148 Enya adujee mu pho sasarasa jasū nchi abohū; k'ophu mu a-to nwēhu rīa oriri l'ukwe-iphe, ị kweshiru.
- 149 Numanu olu mu; k'ophu yee n-yemobu ngu a-dagba. Mephunu ndzū mu azū g'ọ buru k'ophūú; jiko Chipfu, bụ iya bụ iphe, ị kperu l'ikpe.
- 150 Ndu anoduje achiru mu ejo idzu noakwa mu ntse; obenu l'ekemu ngu no phe uzanya.
- 151 Gube Chipfu noakwapho ntse; ịeme iphe, ị sụru g'e meje tukoru bukotarū ire-lanū.
- 152 Teke duhakpowaro enya be mu shi l'iphe, ị turu l'ekemu nwuta l'ị toru okpa iya dobe g'ọ noo jasū l'ojejoje.
- 153 Lenea enya l'iphe-ehuka, mu eje; dzoo mu; kele mu ta zohajeduru ekemu ngu.
- 154 Hanaaru mu enge; gbafuta mu; Mephunu ndzū mu azū g'ọ buru k'ophūú, bụ iya bụ iphe, ị kweru ukwe iya.
- 155 Ndzota no ndu ejo-iphe uzanya; kele ephe te esejedu g'ephe e-me maru iphe, ị toru okpa iya sụ g'e tsoje.
- 156 Aphū obu-imemini ke gube Chipfu paru aka. Mephunu ndzū mu azū g'ọ buru k'ophūú, bụ iya bụ iphe, ị kperu l'ikpe.
- 157 Ndu achī mu ịe njo pakwarū igwerigwe; ole iphe ono ta akposhiduru mu eme iphe, ị turu l'ekemu.
- 158 Ndu e gudedu ire phe aka be agbarwuje mu ephe me mu hūma phe; kele ephe te emejedu iphe, opfu ngu pfuru.
- 159 Hūmawaro ge mu yeberu obu l'eme iphe, ị karū g'e meje. Gudenu kele ị yeru mu obu kwachia ndzū mu jiko Chipfu.
- 160 Opfu ngu l'ophu bukota okpobe opfu; ịeme ikpe, pfuru oto ono, iikpeje ono bukotarū iphe, a-no jasū l'ojejoje.

¹⁶¹Ndu-ishi anọduje akpa mu ẹhu l'ẹbe adu iphe, mu meru phe; obenu l'iphe, mu aphujeru kpaakpaakpaa kpoloko bu opfu ngu.

¹⁶²Ukwe-iphe, i kweru mu emeje g'ẹhu tsoo mu utso; g'onye kwataru iphe, ha shii l'okwata.

Ebvu-oma 120

Ebvu, aaguje me a -nodu eje Jierusalẹmu

¹Mu rakuru Chipfu teke mu eje iphe-ẹhuka; o numa olu mu.

²Dzotanu mu jiko Chipfu l'eka ndu ntuphu-ire; me l'eka ndu ẹregede.

³Unube ndu ẹregede; ? bu gunu be unu ari l'oo-me unu? Mbụ ? bukpoogun be unu ari l'oo iphe, oo-gude byapfuta unu?

⁴Oo-zi ndu ojogu; ẹphe egude apfu, tųpyiru zinguzingu bya ahua unu ahuhu. ẹphe emee unu; unu adabyiru l'eka ono ata pfupfupfu g'icheku oku.

⁵Nshio mube onye jeru ahata ali Mesheku buru; mbu mube onye bu l'ulo-ekwa ndu Keda.

⁶Mu le ndu nchi-adu-doo du ashii shiwaa ụzenya butaru;

⁷obenu le mbedua, bu onye anoduje eme ge nchi du doo-a abujeru; mu -nodu epfuru phe opfu belebele; ẹphe akpaa vulavula g'ẹphe bya etsoo mu ogu.

Ebvu-oma 121

Ebvu, aaguje me a -nodu eje Jierusalẹmu

¹Mu paliru ẹnya lee l'eli ubvu ubvu ono su: “? Bu awe be n-yemeka mu eshije?”

²N-yemeka mu eshije l'eka Chipfu; onye meru igwe mee mgboko.

³Onye ono, eche ngu nche ono be mgbenya ta abyadu ezinwuta ẹnya; teme ophu o kwedu g'okpa chiswafu ngu.

⁴Mbu le-a; onye ono, eche ndu Izurelu nche ono be mgbenya ta abyadu ezinwuta ẹnya; ophu o buro k'eje iya ekuru ekuru.

⁵Oo Chipfu eche ngu nche; bya aburu iya bu mkpu, a turu doberu ngu; teme o buro iya anoduje ngu l'ekutara egbobuta ngu.

⁶Anwu, echi l'eswe ta adudu iphe, oo-me ngu; ophu o buro k'onwa, echi l'enyashi.

⁷Oo Chipfu ephufuje ngu l'eka ejo-iphe nokota. Oo yebdua anoduje eche ndzu ngu nche.

⁸Oo Chipfu l'eduje ngu ije l'ejeje me l'alwalwa; shita nta-a jasụ l'ojejoje.

Ebvu-oma 122

Ebvu, aaguje me a -nodu eje Jierusalẹmu; onye deru iya nu bu Dévidi

- ¹Èhu tsoru mu uto teke epe suru mu: “G'anyi je l'eze-ulo Chipfu!”
- ²Anyi zobeakwaru okpa l'onu-abata gube Jierusalemu.
- ³Jierusalemu bu eze mkpukpu, a kpuru; o nokobe l'eka lanu ama ntumatu.
- ⁴Oo eka ono be bu eka okpa-ipfu anoduje awu ala; mbu okpa-ipfu ke Chipfu; awu eje etu Chipfu epha; bu iya bu iphe, i turu l'ekemu doberu ndu Izurelu.
- ⁵Oo l'eka ono be aba-eze, a no ekpe ikpe no; mbu aba-eze, shi l'ulo Dévidi.
- ⁶Pfuru nu Chileke ge nchi du doo le Jierusalemu: “G'iphemiphe, bukwaru ndu yeru ngu obu k'oma k'oma.
- ⁷Ge nchi dukwa ndu igbulu ngu no-pheru mgburugburu doo. G'ehu-guu bukwaru ke ndu bu l'ime ulo-mgbobuta ngu.”
- ⁸Mu gude iswi ehu unwune mu; yee onya mu phe asu: “Ge nchi dukwa doo l'ime gube Jierusalemu!”
- ⁹Mu gude iswi ehu eze-ulo Chipfu, bu Chileke anyi achu g'iphemiphe bukotaru k'oma k'oma le Jierusalemu.

Ebvu-oma 123

Ebvu, aaguje me a -nodu eje Jierusalemu

- ¹Mu paliru enya mu lee l'eka i no; mbu l'eka i no gube onye ono, sugaru l'aba-eze ngu l'imigwe ono.
- ²Oo egube ono nwoke, bu ohu anoduje ele nnajiuphu iya enya l'eka-a; bya aburu egube ono nwanyi, bu ohu anoduje ele nwanyi, nwe iya nu enya l'eka-a; bukwapho g'anyibedua a-nodu ele Chipfu, bu Chileke anyi enya l'eka gbiriri jasuteke o-phuru anyi obu-imemini.
- ³Meeruro anyi eze-iphe-oma jiko Chipfu. Jiko meeruro anyi eze-iphe-oma; l'ike bvwaru anyi anuma eka ndu ozo epfu l'o to nwedu iphe, anyi bu.
- ⁴Mbu ike bvwaru anyi anuma ochi, ndu eku onwophe achi anyi; waa anuma eka ndu etu onwophe epha epfu l'o to nwedu iphe, anyi bu.

Ebvu-oma 124

Ebvu, aaguje me a -nodu eje Jierusalemu; onye deru iya nu bu Dévidi

- ¹O to bu le Chipfu no-kube anyi ... Ngwa; g'unube ndu Izurelu tuko pfua su:
- ²O to bu le Chipfu no-kube anyi; teke ndiphe tsoru anyi ugu;
- ³mbu teke ono, ehu-eghu phe shi nwuhu phuruphuru g'oku l'ehu anyi ono; m'ephe elwekwaa anyi le ndzu;
- ⁴mbu-a; epe gege erikwa anyi tubukungu g'utso; buru ochioku mini sota anyi tugbua;

⁵buru ukporo-mini kpota anyi; anyi eje aburu ọla-l'iswi.

⁶G'ajaja buru ke Chipfu, bu onye ono, te ekwedu g'ephe gude eze takashia anyi atakashị ono.

⁷Anahụ, anyi nahuru phe duwaa g'enu, nahuru onye agba ọnyà-enu.

Ọnyá ọbu be a gbajishiru; anyi shi nno nahu gbalala.

⁸N-yemeka anyi eshije l'eka Chipfu; onye meru igwe mee mgboko.

Ebvu-oma 125

Ebvu, aaguje me a -nodu eje Jierusalemu

¹Ndu dakoberu Chipfu du g'ubvu Zayonu, e tee nwubatadu enwubata; bya aburu ubvu, a-nowaro jasụ l'ojejeje.

²Oo g'ubvu no-pheru Jierusalemu mgburugburu-a; bu ge Chipfu a-no-pheje ndibe iya mgburugburu shita nta-a jasụ le tuutuutuu le mijimiimii.

³Ndu ejo-iphe taa bukwaru ishi ndu pfuberekoto; odumeka be ndu ono pfuberekoto ono e-yekwa eka l'eme ejo-iphe.

⁴Jiko Chipfu; menaru ndu oma ree; mbu ndu obu phe guru iphoro.

⁵Ole iphe, bukpo ndu eshi uzo, apfuduru nhamunha be Chipfu a-tuko ephe le ndu eme ejo-iphe l'ali-a wofukota. G'ehu-guu bukwaru ke ndu Izurelu.

Ebvu-oma 126

Ebvu, aaguje me a -nodu eje Jierusalemu

¹Teke Chipfu duphutaru ndu ono, a kpuru le ndzu ono azu le Zayonu be o du anyi g'o bu le nrwọ be anyi arwo iya.

²Onu-ochi kojachaa anyi asha ekoja. Ire pfuru anyi oto l'agu ebvu ehutu. Ndu ohozo wata epfu su: "Chipfu meakwaru phe iphe, paru eka."

³Chipfu meakwaru anyi iphe, paru eka. O buru iya meru g'o gude ehutu atso anyi ntumatu.

⁴Jiko Chipfu; duphunu anyi azu l'onodu anyi ono; egube ono, i meru; nggele sohaa gborogboro l'echiegu ndohali ono;

⁵k'ophu ndu gude enya-mini kua iphe l'ali e-gude ebvu ehutu kpata iya akpata;

⁶mbu l'onye ono, gude enya-mini aku iphe l'ali be a-guru ebvu ehutu lwa; vuru wopfula-wopfula iphe, o metaru l'opfu iya.

Ebvu-oma 127

Ebvu, aaguje me a -nodu eje Jierusalemu; onye deru iya nu bu Solomonu

¹Ọ -bụdu ị Chipfu kpuru ụlo l'onwiya bẹ ndu akpụ iya nụ akpụkwa kẹ mmanụ. Ọ -bụdu ị Chipfu cheru mkpụkpu nche l'onwiya bẹ ndu nche pfukwaru nche kẹ mmanụ.

²Ọ tukuru bụru kẹ mmanụ bẹ iitehuje ị nchi-abọhu; laa l'ulo l'echi abali; ẹka iise akanya nri, ii-ri; kele ndu Chipfu yeru obu azejekwadro ị mgbenya; l'o wotawaru phe iphe, ẹphe e-ri.

³Ụnwegirima bụ okiphe, shi l'ẹka Chipfu. Atsụ ime bụru obunggo, shi l'ẹka Chipfu.

⁴Ụnwegirima, a nwuru l'okoro bya bẹ dụ g'apfụ, nọ l'ẹka onye ojoju.

⁵Ẹhu-utso bẹ a goru nụ onye chi iya chi-jia ẹkpa iya. Iphere ta abyadu eme iya m'ẹphe ị ndu ohogu iya nọdu aba mba l'onu-abata mkpụkpu.

Ebvu-oma 128

Ebvụ, aaguje mę a -nọdu eje Jierúsalemụ

¹Ẹhu-utso bẹ a goru nụ iphe, bukpo ndu atsụ Chipfu ebvu; mbụ ndu bụ ụzo iya bẹ ẹphe etso.

²Onye ono a-nọdu ndzụ ria iphe, o setarụ l'akanya; teme ẹhu-utso waa k'oma a-buru nkiya.

³Nyee ngu a-nọdu l'ibe ngu dọpho gẹ vayinu, amishi amimi ike; teme unwu ngu adu g'ẹkali-oshi olivu nọ-pee teburu ngu mgburugburu.

⁴Noo g'onye a goru onu-oma nụ a-dụ bụ ono; mbụ onye atsụ Chipfu ebvu.

⁵Gẹ Chipfu shikwa ị Zayonu goru onu-oma nụ ngu. Teme l'ị nọdukwapo hụma g'ụba Jierúsalemụ a-dụ-be shii jasụ g'ii-nọ-beru l'eliphe-a.

⁶Ii-nọdukwapo ndzụ hụma unwu nwanwanwanwanwa ngu. G'ẹhu-guu bukwaru kẹ ndu Ízurelu.

Ebvü-oma 129

Ebvü, aaguje mę a -nọdu eje Jierúsalemụ

¹Ẹphe mewaru mu ewere megharụ mu iya ẹka e -shi teke mu bụ nwata ... Ngwa; g'unube ndu Ízurelu tuko pfua sụ:

²Ẹphe mewaru mu ewere megharụ mu iya ẹka e -shi teke mu bụ nwata; obenu l'ẹphe te emekpeduru mu.

³Ẹphe gudewaa ẹchachi chia mu kpachacha.

Ónyá, ẹphe chibashiru mu l'okpurukpu dabyichaerupho dụ g'ẹka a waru oswawara.

⁴Obenu ị Chipfu bụ onye pfuberekoto. Ọ gbeshiru bya atọo mu l'ẹgbu, ndu ẹjo-iphe shi kee mu; mu nweru onwomu.

⁵G'iphe, bukpo ndu Zayonu dụ ashị bukwaru ndu e-gude iphere laphu azụ.

⁶G'ẹ̀phe ɖukwa g'ẹ̀swa, furu l'eli ẹ̀swulo, abujeru: Ọ -bya asuru evuvu; anwu ewowaru iya chigbua.

⁷Ẹ̀swa ono ahatabeje nwanshii k'ọ̀phu bu l'onye jeru iya egbuta abujeru; o -gbua nta gbua imo; o too gbutadu ẹ̀swa, jiru iya ọ̀bochi-ẹ̀ka; ọ̀phu ọ̀ buru k'asuru upfu ẹ̀swa.

⁸G'iphe, bukpo ndu aghata aghata ghajekwa phe iswi ekele. G'ọ to dukwa onye a-su phe g'onu-oma ke Chipfu buru nkephe; ozoo l'ẹ̀phe gude ẹ̀pha Chipfu agoru phe onu-oma.

Ebvu-oma 130

Ebvu, aaguje me a -nodu eje Jierusalemu

¹Mu no l'echi ogbumini k'iphe-ehuka araku gube Chipfu;

²Jiko Nnajiuphu; numanu olu mu. Ngabenuru mu nchi le mkpu, mu echi g'i meeru mu eze-iphe-oma.

³Ome gube Chipfu edobeje iphe-ẹ̀ji, onyemonye eme; ? bu onye gege adu ike pfuru l'ataphu gube Nnajiuphu?

⁴Obenu le gubedua aguje nvu. Ọ buru iphe ono meru g'o gude a nodu atsu ngu ebvu.

⁵Mu no kwaberu Chipfu; teme obu mu nodu elekwapho enya iya. Ọ buru l'opfu iya be mu daru ngaberu.

⁶Obu mu no ele enya Nnajiuphu leghata g'onye-nche anoduje ele ge nchi bohukebe; mbu l'obu mu ka ele enya Chipfu eme le ge ndu nche anoduje eleberu enya nchi-abohu.

⁷Jiko Izurelu; g'enya unu duro l'eka Chipfu no; kele Chipfu bu onye eyeje obu yegharu iya eka; teme o nodu agbafutaje nemadzu l'iphe-ẹ̀ji iya g'ọ ha.

⁸Ọ buru yebedua l'onwiya a-gbafutakota ndu Izurelu l'iphe-ẹ̀ji, ẹ̀phe meshiru.

Ebvu-oma 131

Ebvu, aaguje me a -nodu eje Jierusalemu; onye deru iya nu bu Dévidi

¹Mu te egudedu obu mu eku onwomu; jiko Chipfu; ọ̀phu mu aradu enya k'etsetse. Mu ta ayojedu oshi l'iphe, paru eka; ọ̀phu mu ejejedu ekobe eka l'iphe, mu asudu.

²Iphe, mu mechiaru bu le mu toru nwehu woru obu mu dobekpopho nwadoo. Ọo ge nwata, a mifuru onu l'era anoduje nwapyaa le mgboru ne iya; bukpoepho g'obu mu no l'ime mu.

³Jiko unube ndu Izurelu; g'enya unu dunu l'eka Chipfu no; shita nta-a jasu le tuutuutu le mimiimii.

Ebvu-oma 132

Ebvu, aaguje me a -nodu eje Jierusalemu

- ¹Gùbe Chipfu; nyatanu Dévidi yee iphe-ehuka, o no jegbabe.
- ²O guru enwa; ria nte l'iphu Chipfu; mbu ria angu l'iphu Okalibe ke Jiekopu su:
- ³“Mu te eyedu ishi l'ulo mu; ophu mu abyadu abahu eka mu azeje aze.
- ⁴Mu ta abyadu ekwe ge mgbenya shisweta mu enya; mbu le mu ta abyadu ekwe ge mgbenya mia mu eka l'enya;
- ⁵jasu mu ahuma eka mu a-chotaru Chipfu g'o buru; mbu eka Okalibe ke Jiekopu e-buru.”
- ⁶Anyi numaru l'o no le Ifurata. Anyi tugbua je ahuma iya l'oma egu Kiriyatu-Jiarimu.
- ⁷Unu g'anyi jenu l'ulo-ekwa Chileke. Unu g'anyi jenu apfukube iya baaru iya eja.
- ⁸Gbalihunu jiko Chipfu; bya l'okpoku ngu; gu l'okpoko ogbandzu ngu ono, egoshi ike ngu ono.
- ⁹Ge ndu-uke ngu yenea apfubekoto g'uwe. Ndu duru ngu nsu agua ebvu ehutu.
- ¹⁰Gudenu iswi ehutu Dévidi, bu onye-ozu ngu nyata onye ono, i wuru manu l'ishi gude mee ya; o buru eze ono.
- ¹¹Chipfu riburu Dévidi angu; mbu angu, keru jingujingu, o to byadu emebyi emebyi. O suru iya: “Oo onye lanu le ndu bu oshilokpa ngu be mu e-me g'o nodu l'aba-eze ngu.
- ¹²O -buru l'unwu ngu doberu ogbandzu mu l'ephe; bya eme iphe, mu turu l'ekemu; oo ya bu; unwu phe anowaro l'aba-eze ngu jasu l'ojejeje.”
- ¹³Chipfu gudewaa eka iya hota Zayonu; kele eka ono du iya ree k'eburu; noo kele o suru:
- ¹⁴“Oo eka-a be mu e-me okpoku mu jasu le tuutuutuu le mijimiimii; teme o buru eka-a be mu e-dobe aba-eze mu sugu; noo kele oo g'o du mu ree bu ono.
- ¹⁵Mu a-goru onu-oma nu iya g'o nweru iphe nweru k'etsutsu iya. Ndibe iya ndu ophu daru ukpa be mu a-nodu azu-ji epho.
- ¹⁶Ndu uke Chileke nkiya be mu adzota okpobe adzota; mbu le ndu duru Chipfu nsu a-noduepho agu ebvu ehutu.
- ¹⁷O buru eka ono be mu a-gbe mee g'onye ike du shi l'onu-ulo Dévidi futu; teme mu anwuru oku ye l'oroku onye mu wuru manu l'ishi gude mee ya; o buru eze.
- ¹⁸Mu e-me g'iphere du ndu ohogu iya okpobe adudu; obenu le yebedua be mu e-kpube okpu-eze, a-nodu eke paapaapa.”

Ebvu-oma 133

Ebvu, aaguje me a -nodu eje Jierusalemu; onye deru iya nu bu Dévidi

- ¹Lewaro g'o du-be ree bya adu ubvu l'enya; ke g'unwunna bukobe tugba buru nanu.

²Ọ d̄ep̄ho g'okpobe man̄u, eshi mkp̄o, a w̄uru Er̄onu l'ishi; o shi iya l'ishi s̄ofuta iya l'èjì-agba; gbaa ya gorogoro s̄ofuta l'igbur̄onu uwe iya.

³Ọ d̄ukwapho g'èka iji, shi l'úbvú Ham̄onu akwa l'eli úbvú Zaȳonu. Ọo l'echilab̄o ndu d̄u nno b̄e Chipfu agojeru ọnu-ọma nkiya n̄u; mb̄u ọnu-ọma ọphu b̄u ndz̄u ojejoje.

Ebv̄u-ọma 134

Ebv̄u, aaguje m̄e a -n̄odu eje Jierúsalem̄u

¹Unu jaa Chipfu ajaja unub̄e ndu-ozi Chipfu g'unu ha; unub̄e ndu an̄oduje ejeru Chipfu ozi l'ùlo nkiya l'enyashi.

²Unu palia èka unu imeli l'ùlo, d̄u ns̄o k̄e Chipfu; kele iya ekele!

³Ḡe Chipfu, b̄u onye meru igwe mee mgboko gb̄e l̄e Zaȳonu ḡoru ọnu-ọma n̄u ngu.

Ebv̄u-ọma 135

¹Unu jaa Chipfu ajaja. Unu tua Chipfu ẹpha. Unu tua ya ẹpha; unub̄e ndu ejeru Chipfu ozi;

²mb̄u unub̄e ndu eje ozi l'eze-ùlo Chipfu; m̄e l'ọma-unuphu Chileke anyi.

³Unu tua Chipfu ẹpha k̄ele Chipfu d̄u ree. Unu gua ebvu gude tua ya ẹpha; k̄ele ọo iphe, gbaru n̄u b̄u ono;

⁴k̄ele Chipfu h̄otawaru Jiék̄opu g'ọ b̄uru nkiya; mb̄u l'ọ hatawuru Ízurelu g'ọ b̄uru ndu o nwe enwenwe ḡedegede kp̄o.

⁵O doru mu ẹnya l̄e Chipfu par̄u èka; mb̄u l̄e Nnajiuphu anyi t̄ukoru agwa l'ọphu kak̄ota shii.

⁶Ọo iphe, d̄u Chipfu ree b̄e oomeje l'imigwe m̄e l'eliphe l'ọphu. Ọ bukwarupho iphe, d̄u iya ree b̄e oomeje l'ime eze-ẹnyimu m̄e l'ime ogbumini, d̄u iya n̄u.

⁷Igwe -n̄odu erwu erwurwu b̄e oomeje g'ọ shi l'èka igwe beru al̄i beru wata erwurwu. Ọ n̄odu emeje g'egbigwe daa m'ọ n̄odu edze mini; t̄eme ọ n̄odu emeje ḡe ph̄erephere shi l̄e mkpuru èka ọ t̄u-chiru iya wata ezizi.

⁸Iphe, buk̄poo ọkpara, n̄o l̄e Ijiputu b̄e o chigbushiru; mb̄u iphe, b̄u ọkpara l̄e nemadzu ȳele iphe-edobe.

⁹Iphe-ọhumalenya iya; waa iphe, d̄u biribiri b̄e o mek̄otaru unub̄e ndu Ijiputu. Ono b̄uru iphe, o gude h̄ua Fero ȳe ndu-ozi iya ah̄uh̄u.

¹⁰Ọhamoha, d̄u igwerigwe b̄e o chitsushiru; bya egbushikwaph̄o ndu eze, ọkp̄ehu d̄u.

¹¹O gburu Sih̄onu, b̄u eze ndu Am̄oru; bya egbua Ọgu, b̄u eze ndu Beshanu; bya egbushikwaph̄o eze ndu K̄ėnanu g'ẹphe hak̄ota.

¹²O woru al̄i ph̄e wash̄iaru ndu nkiya, b̄u Ízurelu; g'ọ b̄uru okiphe ph̄e.

- ¹³Èpha gube Chipfu anoje ojejoje. Ophu a byadu azoha ngu azoha; e -shi l'ogbo sweru ogbo;
- ¹⁴kele Chipfu a-haru ndibe iya enge; shi nno dua ndu ejeru iya ozi obu.
- ¹⁵Agwa ndu ohozo bugbaa mkpola-ododo yee mkpola-ochaa, bu iphe, nemadzu gude eka mee.
- ¹⁶Èphe nweru onu; ophu ephe epfudu opfu. Èphe nweru enya; ophu ephe aphudu iya uzo.
- ¹⁷Èphe nweru nchi; ophu ephe anudu iya iphe; teme ophu o dudu unme ndzu, no phe l'ime.
- ¹⁸Ndu agwo phe nu a-duepho g'èphe du; mekpoo ndu dakoberu phe nu.
- ¹⁹Unube ndibe Izurelu; unu tua Chipfu epha. Unube ndibe Eronu; unu tua Chipfu epha.
- ²⁰Unube ndibe Liviayi; unu tua Chipfu epha. Unube ndu atsu Chipfu ebvu; unu tua Chipfu epha.
- ²¹G'a gbekwa le Zayonu tua Chipfu epha; mbu onye ono, bu le Jierusalemu ono. Unu jaa Chipfu ajaja.

Ebvu-oma 136

- ¹Unu kele Chipfu ekele; kele o bu onye oma. N-yemobu iya anoje jasu l'ojejoje.
- ²Unu kele Chipfu ophu kakota agwa l'ophu shii. N-yemobu iya anoje jasu l'ojejoje.
- ³Unu kele Nnajiuphu ndu bu nnajiuphu l'ophu. N-yemobu iya anoje jasu l'ojejoje.
- ⁴Kele onye bu yebdua kpoloko emeje iphe-ohumalenya, paru eka. N-yemobu iya anoje jasu l'ojejoje.
- ⁵Onye bu mmamiphe iya be o gude mee eligwe. N-yemobu iya anoje jasu l'ojejoje.
- ⁶Mbu onye woru mgboko-a l'ophu phushi l'eli mini. N-yemobu iya anoje jasu l'ojejoje.
- ⁷O buru iya meshiru eze iphe-a, emeje g'iphoro du-a, dugbaa biribiri-a. N-yemobu iya anoje jasu l'ojejoje.
- ⁸O meru enyanwu g'o chije l'eswe. N-yemobu iya anoje jasu l'ojejoje.
- ⁹O mee onwa; waa kpokpode g'èphe chije l'enyashi. N-yemobu iya anoje jasu l'ojejoje.
- ¹⁰Unu kele onye chigbushiru ndu shi buru okpara le Ijiputu. N-yemobu iya anoje jasu l'ojejoje.
- ¹¹Onye dufutaru unwu Izurelu l'echilabo phe. N-yemobu iya anoje jasu l'ojejoje.

- ¹²Q b̄uru l'ike ọkp̄u iya b̄e o gude dufuta ph̄e. N-yemobu iya anoje jas̄u l'ojejoje.
- ¹³Unu kele onye b̄u iya kekaharu Eze-onyimu Uswe-uswe ẹbo. N-yemobu iya anoje jas̄u l'ojejoje.
- ¹⁴Onye duru ndu Ízurelu ghabua ya ẹbo. N-yemobu iya anoje jas̄u l'ojejoje.
- ¹⁵O kpota Fero ȳe ndu ojogu iya l'ophu kporu ye l̄e Eze-onyimu Uswe-uswe ono. N-yemobu iya anoje jas̄u l'ojejoje.
- ¹⁶Unu kele onye b̄u iya duru ndibe iya ije l'echīegu. N-yemobu iya anoje jas̄u l'ojejoje.
- ¹⁷Onye chigbushiru ndu eze, ọkp̄ehu d̄ugbaa. N-yemobu iya anoje jas̄u l'ojejoje.
- ¹⁸Onye gbushikwarupho ndu eze, a maru ẹpha ph̄e. N-yemobu iya anoje jas̄u l'ojejoje.
- ¹⁹O gburu Sihonu, b̄u eze ndu Amoru. N-yemobu iya anoje jas̄u l'ojejoje.
- ²⁰Q bya egbua Ogu, b̄u eze ndu Beshanu. N-yemobu iya anoje jas̄u l'ojejoje.
- ²¹O woru al̄i ph̄e n̄u onye ọzo g'ọ b̄uru okiphe iya. N-yemobu iya anoje jas̄u l'ojejoje.
- ²²Oo onye-oz̄i iya, b̄u Ízurelu b̄e ọ n̄uru iya. N-yemobu iya anoje jas̄u l'ojejoje.
- ²³Oo ya nyataru anyibe ndu adudu iphe, anyi b̄u. N-yemobu iya anoje jas̄u l'ojejoje.
- ²⁴Q bya anafuta anyi l'ẹka ndu ach̄i anyi l̄e nj̄o. N-yemobu iya anoje jas̄u l'ojejoje.
- ²⁵Q bya abukwaru iya ph̄o azukota iphemiphe, n̄o ndz̄u. N-yemobu iya anoje jas̄u l'ojejoje.
- ²⁶Unu kele Chileke k'imigwe ekele. N-yemobu iya anoje jas̄u l'ojejoje.

Ebv̄u-oma 137

- ¹Anyi rwuru l'aguga onyimu Babilonu. Anyi noshia anoo kwaa ẹkwa; ẹka anyi nyataru Zayonu.
- ²Anyi woru une anyi kobe l'ẹkali-oshi wilo l'ẹka ono;
- ³kele anyi rwuru ẹka ono; ndu kpuru anyi l̄e ndz̄u s̄u g'anyi gutaru ph̄e ebvu. Ndu ono, eme anyi omeliwe ono s̄u g'anyi metaru ph̄e ẹmereme. Ẹphe s̄uru anyi: “Unu chonaa ebvu ndu Zayonu nanu ḡaru anyi!”
- ⁴Qle ? denu g'anyi e-shi pata ebvu, e gude ekutse Chipfu je aguhaha l'al̄i ndu ohozo?
- ⁵Q -b̄uru l̄e mu zoharu ḡube Jierusalemu; g'ẹka-utara mu zohakwa iphe, ọ maru ememe.
- ⁶G'ire nyakukwaru mu l'akpo; m'ọ b̄uru l̄e mu ta anyataduru ngu; mbu m'ọ bukpodaa gube Jierusalemu b̄e mu meru mkpukpu, emeje g'ehu kachaa mu atso utso.
- ⁷Gube Chipfu; nyatakwa iphe, ndu Edomu meru mboku, Jierusalemu daru! Ẹphe tukoru tushia uzu s̄u: “Unu tsukposhia ya. Unu tsukposhia ya tsurwua ẹka a turu ọkpa iya.”

⁸Gùbe nwada Bábilónu; iphe, swiru ngu nù bükwa òla-l'iswi. Èhu-ùtso bè a gòru nù onye a-pfù ngu ùgwò iphe, i meru anyi-a;

⁹mbù onye a-nata ngu ùnwu, ì nwùru k'òphúú kù pyaapya lè mkpuma.

Ebvù-òma 138

Ebvù, Dévidi deru

¹Gùbe Chipfu; mu e-gude obu mu g'ò ha jaa ngu ajaja. Mu a-nòdu l'iphu agwa gù ebvù gude tua ngu èpha.

²Mu a-gha iphu l'ùzo eze-ùlo ngu, dù nsò baarù ngu èja. Mu e-tu ngu èpha kèlè ì bu onye n-yemobu; bya abùru onye apfùshije ike l'iphe, i pfuru; kèlè i meru èpha ngu yèè opfu ngu; èphe kakòta iphemiphe l'eli.

³Mu rakuru ngu; ì za mu ènu. I meru òkpehu nù mu; bya emee mu; mu nyaaha òndù.

⁴Iphe, bükpoo eze ùnwu-eliphe l'ophu a-ja ngu ajaja gùbe Chipfu; m'èphe nùma opfu, shi ngu l'ònu.

⁵Èphe e-gude ùzo kè Chipfu ono gù l'ebvù; kèlè o-gbu-nwìnwii kè Chipfu parù èka.

⁶A makwarù-a lè Chipfu nò l'èphekerèphe; obenu l'ènya iya adùjeele-a l'èka ndu lwazeru nù nò; mbù lè ndu eku onwophè bè òogbeje ùzenya maru.

⁷Ò tò dùdu m'òbeta mu je aghajaa echilabò iphe-èhuka; l'ì kpuchièlè mu-a; ò tò dùdu iphe, eme mu nù. Ìmachije èka nwuphu ndu gude èhu-èghu achì mu lè njò azù. Ò bùru èkutara ngu ono bè iigudeje dzòo mu.

⁸Iphe, bükpoo iphe, Chipfu kweru ukwe lè ya e-me bè oo-mekòtaru mu. Gùbe Chipfu; n-yemobu ngu anòje jasù l'òjejoje. Jiko be buhakwa ozi ono, i gude l'èka èje ono.

Ebvù-òma 139

Ebvù-òma, Dévidi deru nù onye-ishi ebvù

¹Gùbe Chipfu; ì vòchawaru mu obu. Nta-a bè ì mawaru gè mu gbaru.

²Ì maru teke mu nò anò; maru teke mu gbèshiru agbèshi. Ìnoduje ùzenya maru iphe, mu arì l'obu mu.

³Ìmajeru teke mu agbèshi èje iphe; waa teke mu zè azèè. Iphe, bù ùzo mu l'ophu dokòtaru ngu ènya.

⁴Òobujeru; opfu -bya eshi mu l'ònu fùta; l'ì makòtawaru iphe, mu abya epfupfu gùbe Chipfu.

⁵Ì nò-pheru mu mgburugburu iphu l'azù. I wowaru èka ngu byabè mu l'ishi.

⁶Amama ono, ì maru mu ègube ono dùkwa mu oke biribiri; bya apaa mu ephekerèphe k'òphu uche mu te erwudu iya.

- 7? Bụ awe bẹ mu a-nọdu, bụ ẹka Unme nkengu anọdu? ? Bụ awe bẹ mu a-gbaru laa, bụ ẹka i ti humaduru mu?
- 8Mu -pheru lashia l'imigwe bẹ i nọwaa l'ẹka ono. Teke mu jeru je agbaa iphe-azẹe l'ali-maa zẹe bẹ i nọkwa iya pho.
- 9Mu -chita nkù nchi-aboḥu kpube onwomu; gude iya phee pherwua ẹka ẹnyimu so-beru gburu;
- 10mbukponu l'ẹka ono bẹ i-noduelekwa-a edu mu; teme ẹkutara ngu egudele mu-a gudeschia mu ike.
- 11Teke mu sūru le mu maru-a l'ochii e-domi mu-a; l'iphoro a-buru-a ẹnyasi nọ-pheru mu mgburugburu;
- 12I' bya egoshi l'ochii ono ta abudu ochii l'ẹka i nọ. Ẽnyashi ono taa bukpodaru ngu nū ochii. Ẽnyashi ono a-noduele-a echi swachaswacha g'echi-eswe; kele gubedua bẹ ochii duele-a g'iphoro.
- 13Kele iphemiphe, nọ mu l'ime ẹhu bụ ngu meru iya; teme o buru ngu dzepfuru mu nanu teke mu nọ l'epho ne mu.
- 14Iphe, mu ekele ngu ekele iya bụ l'i meru mu l'uzo, du ebvu bya adu biribiri. Iphe, doru mu ẹnya rengurengu bụ l'ozu, iijeje du biribiri.
- 15Okpu okpu, nọ mu l'ehu g'o ha ta adudu ophu e domiru ngu edomi teke ono, eeme mu l'ochii ono. Teke mu nọ l'ime epho; e mengashia mu dzepfua mu; mu buru nanu-a;
- 16bẹ i gudehawaa ẹnya ngu huma ogwe mu ophu adukpoda g'e mewaru iya. Ujiku ole, a tuburu le mu a-nọ l'eliphe-a bẹ e dekotahawaru l'ekwo ngu; teme mu bebe nọ g'o ka mma l'oo ujiku ono nanu.
- 17Egube g'oriri, iiriru mu du-bekwanu mu mkpa; gube Chileke. A -chikobe iya bẹ o pakwaru ẹka apaa.
- 18O -buru ge mu wata iya agugu bẹ o kakwa eja, nọ l'ali l'otu. Mu -shikpo le mgbenya tehu; mu -tehushia mu le ngu anodukwa g'anyi nọ.
- 19Gube Chileke; o du mu g'a su l'i tukoru ndu ejo-iphe gbushia. Unu paru mu haa; unube ndu ono, egbu ochi anoduje agu g'onye mini agu ono.
- 20Ndu ono anoduje achiru gube Chileke ejo idzu; teme epe nọdu achu ngu le njo; bya eku ngu oku-eswe.
- 21Iphe, bụ ndu kporu gube Chipfu ashu bẹ mu kpokwarupho ashu; teme iphe, bukpo ndu kwolihuru etso ngu opfu bẹ mu anoduje akpo-yiru ukuvu.
- 22Epe du mu ashu mebyi adudu; mbu le mu agukobeje phe le ndu ohogu mu.
- 23Vochanaa okpoma mu jiko Chileke; maru iphe, du mu l'obu. Hunaa mu ama maru g'oriri mu gbaru.

²⁴Lenaa mu ɛnya maru; ? ọ duru ẹka ọzo kpɔswehuru mu? Ọ -buru l'ọ duru; jiko duphutanu mu azu l'uzo ndzu ojejoje.

Ebvu-oma 140

Ebvu-oma, Dévidi deru nu onye-ishi ebvu

¹Nafutanu mu l'eka ndu ẹjo-iphe jiko Chipfu. Letanu mu ɛnya ge mu ta adaba l'eka ndu emeje nemadzu mkpawere.

²Ndu buɛpho ẹjo-iphe be ɛphe anɔduje achi idzu iya l'ime obu phe; bya abuerupho ọgu be ɛphe anɔduje akpali mboku-mboku.

³Ire phe be ɛphe emeje l'otsu nko g'ire ẹjo agwo. Opfu, eshije phe l'onu nodu egbu egbugbu g'eri ogiji.

⁴Gudeshinaa mu jiko Chipfu; ge mu ta adaba l'eka ndu ẹjo-iphe. Phufunu mu l'eka ndu emeje nemadzu mkpawere; mbu ndu achọ ọzo, ɛphe e-shi chikota mu okpa!

⁵Ndu eku onwophe gbabewaru mu onya. ɛphe gebecharu ọgu phe kwaberu mu; bya atua igbudu dokaa l'iphe, bukpo ọzo, mu eshi eshishi.

⁶Gube Chipfu; iphe, mu epfuje bu l'oo ngu bu Chileke mu. Jiko Chipfu; numanu mkpu ono, mu echi su g'i menaru mu eze-iphe-oma ono.

⁷Gube Chipfu, bu Nnajiuphu anyi; gube onye ike du; bya aburu onye adzoje mu nu; gube onye egbobutaje ishi mu me a -nodu alwu ọgu;

⁸be mekwaru ndu ẹjo-iphe iphe ono, agu phe nu ono; jiko Chipfu. B'ekwekwa g'ldzu, ɛphe achi jee g'ɛphe achi iya. Odumeka be ɛphe a-watakwa eku onwophe.

⁹G'iphe, e-rikpute ndu ono, kepheru mu mgburugburu ono ishi bukwaru iphe-ehuka, ɛphe gude ire phe kpataru onwophe.

¹⁰G'icheku-oku, ata pfupfufu bukwaru iphe, aa-zube phe l'ishi. G'a pakwaru phe chie echie l'oku, enwu phoophoophoo; mbu l'ime nsu, ɛphe ta abyadu afutaba afuta.

¹¹Ge ndu njo-opfu ta angukwaru anguru l'ali-a. G'ẹjo-iphe chikwa nta ndu mkpawere ono.

¹²Mu maru-a le Chipfu ahajeru onye ukpa enge; teme o nodu emeje g'ikpe kaleru onye adudu g'o du iya.

¹³Ge mu gbukwaa ya tororo; ndu pfuberekoto e-kelekwa ngu ekele; teme o buru l'iphu ngu be ndu obu phe guru iphoro e-buru eburu.

Ebvu-oma 141

Ebvu-oma, Dévidi deru

¹Gube Chipfu; mu araku ngu. Gbanaaru mu mkpu egwegwa. Numanu olu mu me mu raku ngu.

- ²G'epfufu, mu epfu anụ ngu shikwa ngu mkpọ g'ụnwù-isensu. G'ẹka, mu chiliru imeli epfu anụ ngu dukwa ngu g'anụ, e gburu wotaru ngu l'ụzenyashi.
- ³Yenu ndu nche g'ephe chee ọnu mu nche; jiko Chipfu. Jiko chenu ogbogboromonu mu nche.
- ⁴Te ekwekwa g'obu mu ghaaru eme ẹjo-iphe iphu; mbụ gẹ mu tsoru ndu ẹjo-iphe wata eme ẹjo-ememe; ọphu mu etsokwaru pẹ ria iphe, ẹphe kwakọberu mu shi nno rirwua onwomu.
- ⁵G'onye pfuberekoto chia mu rọ iphe. Ọo-dụ mu rọ g'ọ bụ iphe-oma bẹ o meru mu. G'ọ baaru mu rọ mba. Ono a-gbero dụ mu g'ọ bụ manụ, eshi mkpọ bẹ ọowu mu l'ishi. Ishi mu bẹ ọo-gbenu atso ntumatu. Obenu lẹ mu anọdujeepho epfu anụ ngu sụ g'i mee g'ẹjo idzu ndu ẹjo-iphe ta vù.
- ⁶Ndu-ishi pẹ bẹ ee-nwufu lẹ mkpakponu ẹka ẹphe degeru. Ọo ya bụ gẹ ndu ẹjo-iphe amaru l'iphe, mu pfuru bẹ mu pfuru nhamunha.
- ⁷Ephe asụ: “Ọo g'aakoje okoro gbubashia alị-a; bụ g'a tukashiru okpu anyi nanu nanu l'onu ilu.”
- ⁸Obenu lẹ mbedua bụ l'ẹka i nọ bẹ mu daberu ẹnya gube Chipfu, bụ Nnajiuphu anyi. Ọo l'ime ngu bẹ mu gbabarụ je anọdu ezeru ndzụ. Jiko te enwukwaru mu haaru ọnwu.
- ⁹Menaa gẹ mu ta adalahụ l'onyà, ẹphe gbaberu mu; mbụ l'igbudu, ndu ẹjo-iphe turu doberu mu.
- ¹⁰Gẹ ndu ẹjo-iphe dalahukwa l'ugbu, ẹphe geberu. Gẹ mbedua ghata pẹ g'ọ tọ dụ iphe, e-me mu nụ.

Ebvu-oma 142

Évù, Dévidi kwarụ teke ọ nọ l'ogba epfu anụ Chileke

- ¹Mu chiru mkpu chishia ya ike chiku Chipfu. Iphe, mu chidoru mkpu ono bụ g'ọ meeru mu eze-iphe-oma.
- ²Mu woru iphe, atsu mu l'ẹhu woru dooru iya; mbụ lẹ mu woru iphe-ẹhuka, mu eje g'ọ ha dokotaru iya.
- ³Teke ike abvukpowa mu abvubvu bụ gubedua aboru mu ụzo. L'uzo, mu eshikpoo eshishi bẹ ndiphe gbakaerupho ọnyà gẹ mu nmalahụ.
- ⁴Lenaa ẹnya l'ekutara mu; huma l'ọ tọ dudu onye akpa mu ishi. Mu te nwedu ẹka bụ: mu -gbabata iya; mu anọdu iya zee ndzụ; noo kele ọ tọ dudu onye akpa ndzụ mu ishi.
- ⁵Ọ buru gube Chipfu bẹ mu chikuru lẹ mkpu. Mu sụru-a: “Ọo l'ime ngu bẹ mu anọduje ezeru ndzụ; teme ọ buru ngu bụ okiphe nkemu l'alị ndu nọ ndzụ.”
- ⁶Ngabenu nchị numa mkpu, mu echi; kele ọ duru iphe, atsushikpo mu l'ẹhu ike. Jiko nafutanu mu l'ẹka ndu achị mu lẹ njọ; kele ẹphe ka mu okpehu.

⁷Gbafutanu mu lẹ mkporo-a, mu nọ-a; k'ophu mu e-kele ngu ekele iya. Oo ya bu gẹ ndu pfuberekoto anọ-phae mu mgburugburu; noo kele i nwubenukaru mu ẹnya.

Ebvu-oma 143

Ebvu-oma, Dévidi deru

¹Gube Chipfu; numanu epfupfu, mu epfu anu ngu. Ngabenu nchi numa mkpu, mu echi su g'i meeru mu eze-iphe-oma. Eshinu i bu onye pfuberekoto bya aburu onye apfushije ike l'iphe, i pfuru; jiko zanu mu ẹnu!

²Jiko te ekpeshinu mube onye-ozu ngu ikpe; kele o to dudu nemadzu, dzu ndzu, pfuberekoto l'iphu ngu.

³Onye ohogu mu chiru mu gude; bya echita mu tua l'ali; bya emee mu; mu ndu l'eka gbakotaru ochii g'akahu maa, nwuhuru le ndiche.

⁴Noo g'o gude ike wata mu abvubvu. Obu wata mu aku photophoto.

⁵Mu nyata g'o shi aduje teke ndiche. Mu bya anodu nggujungguji riahaa iphe, bukpo iphe, i mekotaru anyi; bya elerwebaa ẹnya ree l'iphemiphe, i gude ẹka ngu mee.

⁶Mu chiliaru ngu ẹka mu labo imeli. Egu ngu gahaa obu mu g'egu-mini anoduje agu ali-okponku-a.

⁷Zanu mu ẹnu egwegwa jiko Chipfu; kele ike abuwaa mu l'ele ẹnya ngu. Be domikwaru mu iphu ngu edomi; odumeka be mu a-dukwa gẹ ndu e liru l'ilu.

⁸O -rwutashia echele gẹ mu numanu opfu, a-ndu akoru mu ke n-yemobu ngu; kele oo ngu be mu dakoberu. Jiko goshinu mu uzo, mu e-shije; kele oo l'eka i no be obu mu no.

⁹Nafutanu mu l'eka ndu ohogu mu phe jiko Chipfu; kele oo l'ime ngu be mu domiru onwomu.

¹⁰Zia mu iphe, bu uche ngu gẹ mu meje; kele oo ngu bu Chileke mu. Jiko gẹ Unme nkengu, bu okpobe Unme ono dunaa mu shia uzo, pfuru nhamunha.

¹¹Kebenu ndzu mu l'oma jiko Chipfu; g'epha ngu apfuru. Gudenu apfubekoto nkengu nafuta mu l'iphe-ehuka-a, mu eje-a.

¹²Gudenu kele i yeru mu obu; mee g'onu buru ndu ohogu mu kpurukudukuu. L'i tuko ndu achi mu le njọ g'ephe ha mee g'ephe buru mkpurupyata; noo kele mu bu onye ejeru ngu ozi.

Ebvu-oma 144

Ebvu, Dévidi deru

¹G'e tua Chipfu, bu agbara-mkpuma mu epha. Oo yebdua ezi mu g'eka shihu mu ike l'ogu; mbu l'oo yebdua ezi mkpushi-eka mu g'aalwuje ogu.

- ²Chileke yeru mu obu; teme o buru onye mu agbabaje l'ime iya je edomia ndzu mu. O bu onye egbobutaje mu nu; bya abukwarupho onye adzoje mu nu; teme o nodu emeje unwu-eliphe g'ephe nodu mu le mkpula.
- ³Gube Chipfu; ? bu gunu be nemadzu bu ke g'i rivuje iya? ? Bu gunu be unwu-eliphe bu ke g'i letaje phe enya?
- ⁴Nemadzu dupeho g'udzu onu. Eswe ndzu iya aduje g'ibvu oshi, abujeru; o -kpoo upfu nwanshii l'a huma-buhu iya.
- ⁵Chijanaa igwe tarara jiko Chipfu. Shi l'eka ono nyizeta bya apfuru l'eli ubvu; g'ubvu awata akpu tutuutuu.
- ⁶Tunaa egbigwe gude chikashia ndu ohogu mu achikashi. Gbaa phe apfu ngu gude mebyishia phe.
- ⁷Gbenu l'ephekerephe eka ono, i no ono machia eka dzota mu. Nafuta mu l'echi asogaso-enyimu; mbu l'eka ndu shi ohozo.
- ⁸Ndu bu iphe, jiru phe onu pyimu bu adzu uka; teme ekutara phe buru iphe, ephe egudeje iya eme bu ughoshi.
- ⁹Mu a-gu ebvu ophuu nu ngu gube Chileke. O buru ogelenda, a kparu l'udo iri be mu a-ku gude guaru ngu ebvu obu;
- ¹⁰mbu gube onye emeje g'eze lwa ugu lwu-kpee; bya aburu onye anafutaje onye-ozii iya, bu Dévidi g'e te gude ugu-echi nmagbua ya.
- ¹¹Jiko dzonaa mu! Nafutanu mu l'eka ndu ohozo; mbu ndu bu iphe, ejije phe onu pyimu bu adzu uka; teme ekutara phe buru iphe, ephe egudeje iya eme bu ughoshi.
- ¹²Mee g'unwu nwa nwoke, anyi nwuru du g'iphe, a kuru akuku teke ephe bu nwata. G'ephe du g'iphe, a kuru akuku, e letaru enya mee g'o vu okpobe evuvu. Teme l'i mee g'unwu anyi nwanyi du g'igbulo, a kpuru; o nodu ama mma; e gude iya mee unuphu ibe eze; o nodu ama ntumatu.
- ¹³L'i mekwapho ge nri, dulaje iche iche ji oba anyi ejiji. Teme l'i mekwapho g'aturu anyi zushia azuzu ike; k'ophu oogudeje unubuku aturu ka shii apha g'apha l'egu adobeje iya.
- ¹⁴Eswi anyi eshijekwapho ike vuje oke ivu. Etsukposhi igbulu mkpukpu anyi ta aduhedu. Ophu o duedu ndu akpukwadu anyi le ndzu; ophu o dukwa iphe, e-me k'ophu aa-ra ejo ekwa tsoru uzo ndu anyi.
- ¹⁵Ehu-utso be a goru nu ndu o du nno l'ibe phe. Ehu-utso be a goru nu ndu Chileke phe bu Chipfu.

Ebvu-oma 145

Ebvu-ekete, Dévidi deru

- ¹Mu a-nodu ekutse gube Chileke mu, bu eze. Mu a-nodu etu ngu epha jasii l'ojejoje.

- ²Mu a-nòdu etu ngu ẹpha mbòku-mbòku. Mu a-ja ngu ajaja jasù lẹ tuutuutuu lẹ m̀jimiimii.
- ³Chipfu parù ẹka; ọ b̀ru iya bẹ ọ gbaru g'a kachaa etu ẹpha. G'ọ habe shii ta adùdu onye suru iya amaẹberu.
- ⁴Ogbo, nonu a-nòdu atujeru ogbo, etso phẹ nù ọnu iphemiphe, iimekọta. Ẹphe a-kojeru phẹ iphe, dù biribiri, iimeje.
- ⁵Ẹphe a-nòdu atù ọnu g'iigbube nw̄inwii waa g'akwabẹ ùbvù ngu habe shii. Mbèdua a-nòdu nggujingguji r̄ia g'iphe, iime dù-be biribiri.
- ⁶Ẹphe a-nòdu atù ọnu g'ike dù-be l'ozì, dù biribiri, iije. Mbèdua atùkwapho ọnu iphe, parù ẹka iimekọtaje.
- ⁷G'ẹphe ha a-tùko pfukashia g'ì dù-be ree. Ẹphe abya egude ẹhu-ùtso gua apfubekoto ngu l'ebvu.
- ⁸Chipfu b̀ru onye emeje eze-iphe-oma bya aburu onye aphuje obu-imemini. Ẹhu te eghujedu iya egu ẹgwegwa; tẹme ọ nòdu eyeje obu yegharù iya ẹka.
- ⁹Chipfu nwuberu onyemonye ẹnya. Iphemiphe, o mekpòru ememe bẹ ọophujeru obu-imemini.
- ¹⁰Iphemiphe, i meru ememe a-nòdu aja ngu ajaja gube Chipfu. Ndu dùru ngu nsọ a-nòdu etu ngu ẹpha.
- ¹¹Ẹphe a-tù ọnu g'ẹka ì b̀ru eze dù-be biribiri; bya atua ọnu g'òkpehu ngu habe shii;
- ¹²k'òphu onyemonye a-makotaru iphe, parù ẹka iimeje; bya amakwarupho g'ẹka, ì b̀ru eze dù-be akpabiri.
- ¹³Ìi-buru eze jasù l'ojejoje; bya achia; e -shi l'ogbo sweru ogbo. Chipfu b̀ru onye apfushije ike l'iphemiphe, o kweru ukwe iya; tẹme o yekọta iphemiphe, o meru ememe obu.
- ¹⁴Iphe, bukpuo ndu abya ada iko bẹ Chipfu abujeru agbarike phẹ; bya apaliye ndu e wozeru alì.
- ¹⁵G'ẹphe ha atukoje ele ngu ẹnya l'ẹka; tẹme ì nòdu anujekwanu phẹ nri l'orwuberu iya.
- ¹⁶Ìisaje ọbochi-ẹka ngu gude mee g'ẹpho ji iphemiphe, nọ ndzù.
- ¹⁷Chipfu pfuberekoto l'iphemiphe, oome; tẹme o yee iphemiphe, o meru ememe obu.
- ¹⁸Chipfu anòduje ndu rakuru iya nù ntse; mbù ndu gude ire-lanù raku iya.
- ¹⁹Ndu atsù iya ebvu bẹ oomejeru iphe, agù phẹ nù; tẹme ọ nòdu anumaje mkpu, ẹphe echi je adzọta phẹ.
- ²⁰Onyemonye yeru Chipfu obu bẹ ọonoduje eche nche; obenu lẹ ndu ẹjo-iphe bẹ oo-mebyishikọta.

²¹Onu mu bẹ mu e-gude etu Chipfu ẹpha. G'iphemiphe, o meru dobe lẹ mgboko kelejewa iya ekele jasụ lẹ tuutuutu lẹ m̄imiimii.

Ebvu-oma 146

¹Unu jaa Chipfu ajaja. Obu mu; jiko jaa Chipfu ajaja.

²Mu a-nọdu aja Chipfu ajaja jasụ gẹ mu a-nọ-beru. Mu a-nọdu agụ ebvu gude etu Chileke mu ẹpha jasuru asuru.

³Ba kpokwaru obu yeru ndu-ishi; mbụ nemadzu mmanụ, ta adudu ike adzota ndzu nemadzu.

⁴Ndu abujeru; unme, nọ phẹ l'ime -phefuwa; ẹphe alaphu azụ je aburu ẹja. O buru mboku ono gẹdegede bẹ iphe, ẹphe chiru idzu ememe abvukotaje.

⁵Ẹhu-utso bẹ a goru nụ onye bụ Chileke kẹ Jiékọpu bẹ eyejeru iya ẹka; mbụ onye bụ ẹka obu iya aduje bụ lẹ Chipfu, bụ Chileke iya;

⁶mbụ Chileke ono, bụ onye meru igwe mee ali; bya emee eze-enyimu; waa iphemiphe, nọ iya nụ; bya aburu onye apfushije ike l'ire-lanu jasụ l'ojejoje.

⁷Ndu eeme ewere bẹ oohajeru enge; teme o nọdu anuje ndu ẹgu agụ nri. Chipfu emeje gẹ ndu a turu mkporo nweru onwophe.

⁸Chipfu emeje gẹ ndu atsụ ishi wata aphụ ụzo. Ookulije ndu e wozeru ali; teme o nọdu eyeje ndu pfuberekoto obu.

⁹Chipfu anọduje eche ndu lwaru alwalwa nche. O buru iya egudeje ndzu ndu enwedu nna yee unwanyi, ji phẹ anọdu; obenu l'uzo ndu ẹjo-iphe bẹ oogbuchije.

¹⁰Chipfu a-buru eze jasụ l'ojejoje; mbụ lẹ Chileke kẹ gube Zayonu a-buru eze; e -shi l'ogbo sweru ogbo. Unu jaa Chipfu ajaja.

Ebvu-oma 147

¹Unu jaa Chipfu ajaja. Agụ ebvu gude ekele Chileke anyi ekele du ree. Aja Chipfu ajaja bụ iphe ẹhu-utso; bya aburu iphe, rwuberu iya nụ.

²Oo Chipfu gude ẹka iya akpu Jierusalemu. Nta-a bẹ o rwutawaru ndu Ízurelu, a kpuru lẹ ndzu gude alwaphuta azụ.

³O bụ onye emeje gẹ ndu obu phẹ tsuru gwogiri-gwogiri nọdu ndzu; teme o nọdu asachaje phẹ

onyá ẹka e mekaru phẹ iphe.

⁴Oo ya guru kpokpode ogu maru ole, o gbaru g'ọ du; bya agukota phẹ ẹpha l'ẹhu l'ẹhu.

⁵Chipfu k'anyi paru ẹka; teme ike iya buru ike, nyiberu anyibe. Nkwamenya nkiya ta adudu onye suru atụ onu g'ọ habe shii.

⁶Oo Chipfu gude ndzu ndu wozeru onwophe alị; obenu le ndu ejo-iphe be oochitaje tua l'alị.

⁷Unu gunaa ebvu gude kele Chipfu ekele. Unu gudenụ une kuaru Chileke anyi nkwa.

⁸Oo ya gude urwukpu kwechia akpaminigwe l'ophu. O nọdu edzejeru eliphe mini; bya emeje g'ęswa rwushia l'eli ńbvú.

⁹Oo ya anụ iphe-edobe nri; bya aburu iya anuje unwu okpoko-óhà nri m'ephe raa órà iya.

¹⁰O tọ bụdu ike, dụ l'inya emeje g'ęhu tsoo ya uto; ophu o bụdu apata-okpa nemadzu emeje g'ęhu tsoo ya uto.

¹¹Ndu emeje g'ęhu tsoo Chipfu uto bu ndu atsụ iya ebvu; mbu ndu bu eka ęnya phe aduje bu le n-yemobu Chileke.

¹²Gube Jierusalemu; janaa Chipfu ajaja. Tuna Chileke ngu epha gube Zayonu.

¹³Kele oo ya emeje g'okpokuu onu-abata ngu shihu ike; teme o nọdu agojeru onu-oma nu ndu no ngu l'ime.

¹⁴Oomeje ge nchi du doo l'oke alị ngu l'ophu; teme o nọdu egudeje okpobe ereshi azuji ngu epho.

¹⁵Oo iphe, o suru g'o mee l'eliphe emeje. Opfu ngu abujeru; epfuzeta, iipfuzeta iya l'o tuko mgboko l'ophu ngadzuru.

¹⁶O bu onye ewojeru aka-mini-sunoo phushi g'onye phushiru ukpo; bya eworu ijimini phekaa l'o dzuru ekameka g'onye phuru ntụ.

¹⁷Ookpotaje akamini jia g'onye jiru eja. ? Bu onye a-du ike nọdu g'oyi akamini ono tsua ya?

¹⁸Olobule-a opfu-onu be oopfuje; akamini ono adazehu. Oomeje ge pherephere wata ezizi. Pherephere ono -ziahaepho; akamini ono adazehu wata aso asoso.

¹⁹Opfu iya be o kpuhawaru goshi Jiekopu; mbu l'ikpe, o kperu; yee iphe, o toru okpa iya su g'e tsoje be o kpuhawaru goshi Izurelu.

²⁰O tọ dudu ohozo, o mejewaru egube ono. Ndu k'ono ta amadu ikpe, o kpewaru dobe. Unu jaa Chipfu ajaja.

Ebvu-oma 148

¹Unu jaa Chipfu ajaja. Unu shi l'imigwe jaa Chipfu ajaja. Unu nọdu l'eka kachaa ephekerephe jaa ya ajaja.

²Unube unwu ojozi iya l'ophu; unu jaa ya ajaja. G'iphe, bukpo o jogu imigwe l'ophu jaa ya ajaja.

³Unu jaa ya ajaja; unube ęnyanwu yee onwa. Unu jaa ya ajaja; unube kpokpode, egbu nwjinwii.

⁴Unu jaa ya ajaja; unube akpaminigwe; mekpoo unube mini, nogharu akpaminigwe anogha.

⁵Unu tuko g'unu ha jaa Chipfu ajaja; kele oo ya suru g'unu du; unu du.

⁶O buru iya suru unu l'owa-a eka unu a-nodugbaa baa. O buru eka o suru g'unu nodu be unu nogbaa. Unu je a-nodu iya jasu l'ojejoje. Iphe ono, o toru okpa iya ono ta abyadu echihu echihu.

⁷Unu nodunu l'eliphe jaa Chipfu ajaja; unube iphe, dugbaa biribiri, o meshiru dobe l'eze-enyimu; waa ophu nogbaa le mini-ime-ali.

⁸Unu jakwapho Chipfu ajaja; unube egbigwe; me aka-mini-sunoo; mekpoo urwukpu; waa oke pherephere, emeje iphe, o pfuru.

⁹Unube oke ubvu me iphe, bu ubvu nshii; waa oshi-omi; mekpoo oshi sida; unu jakwaa ya pho ajaja.

¹⁰G'anu-egbudu; me iphe-edobe; waa unwehu; mekpoo enu, ephe l'eli tukokwapho jaa ya ajaja.

¹¹Unube ndu eze, no l'eliphe; me unube iphe, bu ohamoha; waa unube ndu-ishi; me iphe, bu ndu eze mgboko l'ophu;

¹²me unube unwokorobya; waa unube unwumgboko; teme waa unube ndu bu ogerenya me unwegirima; unu jajekwa iya pho ajaja.

¹³Unu tuko g'unu ha jaa Chipfu ajaja; kele oo epha iya kpoloko bu epha, kakota l'eli. Odu-biribiri iya dagharu mgboko l'ophu bya adaghaa imigwe.

¹⁴O meru g'onye ike du futaru ndu nkiya. O buru onye ono be ndu duru iya nsọ, bu ndu Izurelu anoduje aja ajaja ono; mbu ndu ono, du iya l'obu ono. Unu jaa Chipfu ajaja.

Ebvu-oma 149

¹Unu jaa Chipfu ajaja. Unu gua ebvu ophuu nu Chipfu. Unu gua ebvu gude jaa ya ajaja l'eka ndu duru iya nsọ dzukoberu.

²Ge ndu Izurelu tee eswa l'eka onye meru phe nu. G'onye eze ndu Zayonu mee g'ehu tsọo phe utso.

³G'ephe tuko gude ete ebvu jaa epha iya ajaja. Teme ephe egude nkwa yee une gude gua ebvu nu iya;

⁴noo kele Chipfu be ndibe iya du l'obu. Ndu wozeru onwophe ali be ookpubeje ndzota g'okpu-eze.

⁵Ge ndu duru Chileke nsọ teje eswa l'egube ubvu owa-a, a kwaberu phe-a. Teme ephe agukwapho ebvu ehutu m'ephe ze azee l'iphe-azee phe.

⁶G'aja Chileke ajaja buru iphe, ephe a-kpuru l'onu. Teme ephe atsua ogu-echi, atsu akpatiphu labo l'eka;

⁷gude iya je agwata ndu ohozo ugwo iphe, ephe meru phe; bya egude iya nua unwuliphe aphu.

⁸Teme ephe egudekwa iya pho tua ndu eze phe egbirigba; mbu tua ndu nweru enya mkporo.

⁹Oo ya bu g'ephe eshi nno meebekota iphe, onye-ikpe deru l'ekwo su g'ephe mee ndu ohogu phe ono. Owa-a bu iphe, o gude kwabe ndu duru iya nsọ ono ubvu. Unu jaa Chipfu ajaja.

Ebvu-oma 150

¹Unu jaa Chipfu ajaja. Unu nodu l'ulo Chileke, du nsọ jaa ya ajaja. Unu nodu l'imigwe, o gude okpehu iya mee jaa ya ajaja.

²Unu jaa ya ajaja k'iphe, paru eka o meshigbaru. Unu jaa ya ajaja; kele apa eka nkiya nyiberu anyibe.

³Unu gbua opu gude jaa ya ajaja. Unu akpoo une yee ogelenda gude jaa ya ajaja.

⁴Unu kua nkwa tee ebvu gude jaa ya ajaja. Unu kua ogelenda phua upyi gude jaa ya ajaja.

⁵Unu kua eze ogena, ada dunguu-dunguu gude jaa ya ajaja. Unu egude ogena, ada gengugengu gude jaa ya ajaja.

⁶G'iphemiphe, bukpoo iphe, atu unme tuko jaa Chipfu ajaja. Unu jaa Chipfu ajaja.

Ètu

Ètu 1

Urwu, dù l'ètu

¹Ètu, Sólomonu, bù nwa Dévidi nmashiru; mbù eze ndu Ízurelu. Iphe, e dedoru iya bù;

²gẹ nemadzu egude iya maru iphe; bya aburu onye a hùru ahùhù. Tẹme waa g'opfu, dù omilomi doo ẹnya.

³G'a nọdu ndzu buru onye a hùru ahùhù; yẹe onye kwaru ẹnya; bya aburu onye a-nọdu eme iphe, dù ree; waa iphe, pfuru ọto.

⁴G'e gude iya mee gẹ ndu enwedu egomunggo kwa ẹnya; mekwapho g'okoro bya maru iphe; makwarupho eye onu l'opfu.

⁵Gẹ ndu maru iphe ngabẹ nchị yekwabaa iphe l'iphe, ẹphe nwutaru. Tẹme ndu iphe edoje ẹnya angabekwapho nchị g'a kpọ-zibaaru phẹ ọzo.

⁶Tẹme g'e gudekwa iya pho mee g'etu doo ẹnya; bya emekwapho g'ilù, ndu maru iphe atụ; yẹe opfu phẹ doo ẹnya.

⁷Ọ kwa atsụ Chipfu ebvu bù egbube ishi mmamiphe. Obenu lẹ ndu eswe bẹ ta adudu iphe, ẹphe agubeje mmamiphe yẹe ahùhù.

Ọkwa, a nmaru unwokorobyia

⁸Su-a; nwa mu; ngabeje nchị mẹ nna ngu nọdu abaru ngu mba. Ọphu i wokwaru iphe, ne ngu ezi ngu kpọo ẹbo l'afu.

⁹Kẹle opfu phẹ ono a-bukwaru okpulishi, e-me l'ị dù ùbvù. Tẹme l'ọ buru iyagba-olu, a-tukpo ngu l'olu gude mee l'ị buru ẹguru.

¹⁰Nwa mu; teke ndu iphe-ẹji ede ngu edede; b'ekwekwa g'ẹphe deta ngu.

¹¹Ọ -buru l'ẹphe suru ngu g'ị bya etsoru phẹ; g'unu je egeparu gbua nemadzu; mbù g'unu je edomia onwunu kwaberu onye adudu iphe, o meru;

¹²g'unu je elwee phẹ lẹ ndzu g'ilu elweje odzu-a; mbù lwee phẹ wọo gẹ ndu bahuru l'iduma;

¹³mbù m'obetachakpo ẹphe sù ngu l'unu a-natakwa iphe, eregbaa ire; mbù l'unu e-gudekwa iphe, unu nataru lẹ nfụ dojia ọlo unu edoji;

¹⁴ẹphe -sù ngu ngwa; g'unu l'ẹphe tuko swiru; k'ọphu unu l'ẹphe a-gbaru mgba l'eda okpoga obu;

¹⁵Nwa mu; te etsokwaru phẹ! Te eyekwa okpa l'uzo, ẹphe eshi!

¹⁶Kẹle okpa phẹ anọduje ekwo gburumu ala l'eme iphe-ẹji. Tẹme ọphu egbu nemadzu adudu iphe, ọobujeru phẹ.

¹⁷L'onye wotaru ónyà-enu je ekweberu ɛnu l'ɛka ɛnu ele iya ɛnya bukwa iphe-iphoro bɛ oome.

¹⁸Ɔ kwa mee nkephɛ bɛ ɛphe geparu kwabɛru. Ɔ kwa onwophɛ bɛ ɛphe domiru onwophɛ echeru.

¹⁹Mbɛ l'oo ɛgube ono bu g'oo-du iphe, bukpuo ndu ana ndu ozo iphe phɛ l'ike. Urwu, e ritaru l'uzo, du nno egbukwa onye ritaru iya nu.

Ɔkwa, a nmaru ndu jikaru mmamiphe

²⁰Mmamiphe tsoru gbororo echi mkpu. Ɔ no l'echi edupfu akpo okwe.

²¹Ɔobujeru; o -rwua l'ishi uzo l'o chia mkpu. Teke o byaru l'onu-abata mkpukpu l'o pfuru saaru oha opfu su:

²²Unubɛ ndu enwedu egomunggo; ? bu teke ole bɛ unu e-mebekporu eswe? ? Bukpuo teke ole bɛ achɛ ndu ozo ochi e-bebekpo tso-buhu ndu anoduje achɛ iya nu utso? Mbua; ? bu gunu meadaa teme mmamiphe adu-buhu ndu eswe ashɛ?

²³Unu ghakwaaru mu iphu numa mba, mu abaru unu; k'ophu mu e-goshi unu obu mu; mbu mee g'unu maru g'o du mu l'obu!

²⁴Obenu eshinu unu jikaru mu teke mu kuru unu oku; mu machiaru unu ɛka; ophu o dudu onye yeru mu onu;

²⁵eshinu unu woru idzu, mu chi-koshiru unu hua l'ali; ophu unu anataduru mba, mu baru unu;

²⁶bɛ mbedua e-mechakwaa chia unu ochi; mɛ iphe-ehuka dapfutaepho unu. Mu ekwekwaru unu une mɛ ndzu-agugu rwutaepho unu;

²⁷mbu teke ndzu-agugu e-zi g'oke pherephere bya ezikota unu; ozo teke iphe-ehuka e-gude oke pherephere bya anmakota unu; mbu mɛ iphe-ehuka yɛ aphu byapfutaepho unu.

²⁸“Noo teke ɛphe e-ku mu oku; mu ta azadu phɛ ɛnu. Ɔphe elee ɛnya mu; ɛphe ta ahumadu mu.

²⁹Su: eshinu mmamiphe du phɛ ashɛ; ophu ɛphe ahataduru etso uzo atsu Chipfu ebvu;

³⁰eshinu mu chi-koshiru phɛ idzu; ophu ɛphe ekwedu mu angabɛru nchi; teme ɛphe jika mba, mu baru phɛ;

³¹bɛ ɛphe e-mechaa ria urwu ejo uzo, ɛphe etso; mbu ria urwu ejo idzu, ɛphe achɛ; rijia ya ɛpho.

³²Ejo uzo ono, ndu enwedu egomunggo hataru ono e-gbukwa phɛ. Teme ejiji, ndu eswe jiru onwophɛ ɛnya ono e-mekwapho; ɛphe aburu ola-l'iswi.

³³Obenu l'onye ngabɛru mube mmamiphe nchi bɛ ta adudu iphe, byaru eme iya nu. Ehu a-du iya guu; o to dudu iphe, ootsu ebvu k'a -nonyakwaa; o mee ya.”

Etu 2

Urwu, eerita lẹ mmamiphe

- ¹Nwa mu; i -kwe nata opfu mu; bya eworu iphe, mu sūru g'e meje doo l'ime obu ngu;
- ²mbu i -nọdu angabejeru mmamiphe nchi; bya eworu obu ngu ziberu nkwaṁnya;
- ³o -buru l'i kuru amaru iphe, du omilomi; bya echiku nkwaṁnya lẹ mkpu;
- ⁴mbu-a; teke oogu ngu egu g'onye mkpola-ochaa agu; teme i nọdu achọ iya g'onye achọ ẹku, e domiru edomi;
- ⁵oo ya bu; atsū Chipfu ebvu edoo ngu ẹnya; teme l'i makwarupho Chileke.
- ⁶Kele oo Chipfu bu onye emeje g'a maru iphe; mbu l'oo l'onu iya be mmamiphe yee nkwaṁnya eshije.
- ⁷Okpobe mmamiphe be o kwachiru akwachi doberu ndu obu phe guru iphoro. Ndu uta ta adudu l'iphe, epe eme buru iya be epe egudeje gbobuta onwophe.
- ⁸Uzo ndu pfuberekoto buru iya anoduje eleta iya ẹnya. Teme o nọdu anwubejeru ndu yeri iya obu ẹnya.
- ⁹Noo teke oo-do ngu ẹnya; mbu iphe, du ree; yee iphe, pfuru oto; mekpoo iphe, bukpo uzomuzo, bu uzo, du ree.
- ¹⁰Noo kele mmamiphe a-bahu l'ime obu ngu; amaru iphe atsoaha ngu utso.
- ¹¹O buru iphe, a-nọdu egbochi ngu nu bu amaru eye onu l'opfu; nkwaṁnya awata ngu awata ngu akpo-ziru uzo.
- ¹²Mmamiphe a-nafuta ngu l'uzo ndu ejo-iphe; bya adzota ngu l'eka ndu opfu phe apfuduru-oto;
- ¹³mbu ndu ahaje uzo, pfuru nhamunha je etsoru ochii;
- ¹⁴ndu bu iphe, aduje phe ree bu eme ejo-iphe; teme eshi uzo, gberu nggo nọdu atsoje phe utso;
- ¹⁵mbu ndu uzo phe l'ophu dukota nggodogo nggodogo; ophu e gudedu ire phe eka l'iphemiphe, epe eme.
- ¹⁶Oo-dzokwa ngu pho l'eka nwanyi-ovuoba; mbu l'eka nwanyi-ukpara yele opfu erengete iya.
- ¹⁷Onye lufutaru l'ibe ji iya, kuru iya le nwamgboko; bya aghaarū oghandzu, epe gbaru l'iphu Chileke okotazu;
- ¹⁸kele ulo nwanyi, du egube ono bukwa eka eeshije alufu alufu anwuhu; teme gbororo uzo iya buru uzo, e shi ala maa.
- ¹⁹O to dudu onye jepfujeru iya nu mechaa lwa; ozoo mechaa shibaa uzo ndzu.
- ²⁰Oo ya bu le-a; tsoru eka ndu eme ree. Shije gbororo, ndu pfuberekoto eshi.

²¹Kele ndu obu phe guru ìphóró l'e-buru l'eliphe. Ndu ụta adudu l'ehu anodukwa iya pho.

²²Obenu le ndu ejo-iphe be e-mekwa g'ephe chihu l'eliphe. Teme ndu e gudedu ire phe aka be ee-phefu ephefu.

Etu 3

Idzu, aachi-koshi unwokorobya

¹Nwa mu; ta zohakwa iphe, mu ezi ngu. Wochikwaaru iphe ono, mu suru g'i mee ono kwakobe l'ime obu ngu;

²Kele oo-me g'eswe ndzu ngu kabaa ogologo; mbu l'oo-me li kaa nka; teme l'oo mekwapho g'ehu du ngu guu.

³B'ekwekwa ge n-yemobu yee ire-lanu nahu ngu. Woru iya tukpoo l'olu g'oleka; li woru iya dee pfube l'ime obu ngu.

⁴Oo ya bu li buru onye a-tuba Chileke yele nemadzu l'enya; teme l'i nweru epha oma.

⁵Gude obu ngu g'o ha dakobe Chipfu. Ba chikwaru upfu kwee le nkwa menya nkengu.

⁶I -nodu emekpoo iphemiphe, iimekpoo ememe; nyataje Chipfu; kele oo ya e-me g'uzo ngu pfuru oto.

⁷Ta arijekwa li maru iphe. O chikwa gi tsuje Chipfu ebvu; kpo-yijeru iphe-eji ukuvu.

⁸Noo iphe, e-me g'ehu du ngu ike; mee g'okpu shihukwa ngu pho ike.

⁹Gude eku ngu; yele iphe-mbu, i kpataru l'opfu ngu; kwabe Chipfu ubvu.

¹⁰Oo ya bu ge nri eji oba ngu bushihu ebushihu; teme mee ejikwapho mgbaja ngu ejiji.

¹¹Nwa mu; Chipfu -nodu abaru ngu mba; b'e wokwaru iya hua l'ali; ophu i dzurubejekwa me o -nodu alo ngu aka le nchi.

¹²Kele ndu Chipfu ahuje ahuhu bu ndu o yeru obu; egube ono nna, ahuje nwa, o yeru enya ono.

¹³Ehu-utso be a goru nu onye chotaru mmamiphe; mbu onye nataru nkwa menya.

¹⁴Kele o ka mkpola-ochaa aba urwu; teme o nodu anwuta iphe, ka shii eme l'ophu mkpola-ododo anwuta.

¹⁵O ka mkpuma, aswa du ere ire. O to dudu iphe, agu ngu egu gi nweru iya me nanu, aa-nodu atu eyeru iya.

¹⁶Iphe, o gude l'ekutara bu ndzu ogologo; ophu o gude l'ekicha buru enweru iphe yee akwabe ubvu.

¹⁷Etso uzo iya bu ehu-utso; teme gbororo iya bukotaru ehu-guu.

- 18 Ọ bụ oshi, anụje ndzụ l'ẹhu ndu nmataru iya akpa. Ndu tūru iya gburumu l'a-buru ndu a ọru ẹhu-utso nū.
- 19 Ọo mmamiphe bẹ Chipfu gude tūa ọkpa mgboko-a l'opfu. Ọ buru nkwaṁnya iya bẹ o gude dobe igwe.
- 20 Ọ buru amaru iphe iya bẹ o gude mee ọ mini ime alị nwūshije; bya emee g'iji shije l'urwukpu kwaa.
- 21 Nwa mu; iphe, ii-gudeshi ike bụ ọkpobe mmamiphe; yele amaru eye ọnu l'opfu. B'ekwekwa g'ọ nahū ngu.
- 22 Ọo ya a-buru ngu ndzụ; bya aburu iyagba, a-tukpo ngu l'olu gude mee l'ị buru ẹguru.
- 23 Ọo ya bụ l'iijekpọepfo l'uzo ngu chiriri werere. Opfu ta adudu ngu l'okpa.
- 24 Ị -zẹe azẹe; ndzụ ta aguedu ngu. Mbụ-a; mgbenya atsoaha ngu ntumatu mẹ ị zẹe azẹe.
- 25 Ejo iphe-ẹhuka -tū ngu l'upfu; b'atsukwa ebvu! Ọphu ị tsukwa iphe, emeje ọ ndu ejo-iphe buru mkpurupyata ebvu mẹ ọ dapfu ngu!
- 26 Ọo Chipfu a-buru agbara-ike ngu. Ọo ya bụ l'oo-me g'ị tị nmalahū l'onyà.
- 27 Ta lọ-phukwa iphe, dū ree azū g'ọ to rwu ndu o rwuberu ẹka; mẹ ọ -dū ngu l'ẹka ememe.
- 28 Ọphu ị sukwa nemadzū ibe ngu g'ọ bya echele bya anata iphe ọ bụ; l'ẹka ị gbekwa gude iphe, ọ bụ l'ẹka ono.
- 29 Ta achijekwaru nemadzū ibe ngu ejo idzu; mbụ onye unu l'iya bu tūsarū ẹhu.
- 30 Te bokwa nemadzū ibo eswe; l'ẹbe abū l'o mekarū ngu iphe.
- 31 Te kokwaru onye buẹpho iphe ike aduje iya ree okophoo! Ọphu ọ dukwa ọzo iya ọphu ịi-hota sū l'ọ dū ngu ree!
- 32 Kele onye eegudedu ire iya ẹka dukwa Chipfu ashị; obenu l'onye obu iya guru ịphóró bẹ amajeru iya ime.
- 33 Chipfu tūakwaru ọnu-ulo ndu ejo-iphe ọnu; obenu l'oonoduje ago ọnu-oma anū unuphu ndu pfulberekoto.
- 34 Ndu achị ndu ọzo ọchi bẹ Chipfu achilatajekwa; ọ nọdu emejeru ndu wozeru onwophẹ alị eze-iphe-oma.
- 35 Ndu maru iphe bẹ okiphe phẹ bụ akwabẹ ubvù; obenu lẹ ndu eswe bẹ oogbobejeru iphere.

Ètù 4

Mmamiphe kachaa ree

- ¹Sụ-a; ụnwu mu; unu ngabekpodaru mu pho nchi g'unu angabejeru nna unu; me o - nođu alo unu aka le nchi. Unu kpa iphe le nchi; g'iphe edoje unu enya.
- ²Iphe, mu ezi unu bu okpobe mmamiphe. Oo ya bu; unu te wokwaru iya nmaa phulaphula.
- ³Teke mu bu nwokoro buru l'ibe nna mu; mbu teke mu bukwadu ogbo lanu; bya aburu nwa lanu, ne mu nwutaru
- ⁴be nna mu ziru mu iphe su mu: "Gudekwa obu ngu g'o ha gbakua aka l'opfu-onu mu! Meje iphemiphe, mu suru g'i meje g'iinodu ndzu!
- ⁵Makwaru iphe; g'iphe dojekwa ngu enya! Ta azohajekwa opfu-onu mu; ophu i shikwa iya kpoogege kpofu!
- ⁶Te ewokwaru mmamiphe nmaa phulaphula; oo ya bu g'ooleta ngu enya. Yee ya obu; oo ya bu g'oocheje ngu echeche g'o to du iphe, e-me ngu nu.
- ⁷Oo mmamiphe bu ishi; oo ya bu g'i choo mmamiphe! Obetakpoo o je ephu ngu gunu; ta ahakwa acho nkwa menya!
- ⁸Kutsee ya; g'oopalia ngu ephekerephe! Nma iya akpa; g'ookwabeje ngu ubvu!
- ⁹Oo-woru okpulishi, e-me g'i du ubvu l'enya kpube ngu; bya eworu okpu-eze, du akpabiri see ngu l'ishi."
- ¹⁰Ngabekpodapho nchi nwa mu; g'iphe, mu epfu bahukwa ngu le nchi; g'eswe ndzu ngu akabaa igwerigwe!
- ¹¹O kwa uzo mmamiphe be mu ziru ngu. O buru gbororo, pfuru nhamunha be mu duru ngu shia;
- ¹²K'opfu bu i -nođu eje ije; o to dudu iphe, akposhi ngu ahata okpa. Teke jigba oso; upfu ta adudu ngu l'okpa.
- ¹³Gudeshia ahuhu, a huru ngu ike; ba hakwa iya g'o gbala! Letakwa iya enya ree; kele o kwa iya bu ndzu, i dzu.
- ¹⁴Ta atukwa okpa atutu ophu l'uzo ndu ejo-iphe; ophu i shikwa uzo ndu eme ejo ememe.
- ¹⁵Gbangoo ya; be shikwa iya eshishi ophu. Gbakutaru uzo ono azu; shia uzo ozo jeshia iphe, iije.
- ¹⁶Kele ephe te ekujedu mgbenya; m'ephe emeduru ejo-ememe; ophu mgbenya eshitajedu phe enya eshita ophu; gbahaa l'ephe meadaru ge nemadzu daa.
- ¹⁷Iphe, abujeru nri phe bu eme ejo-iphe. Mee, ephe anguje buru eme iphe-ike.
- ¹⁸Uzo, ndu pfuberekoto etso aduje g'iphoro geregere utsu, l'atoje nwehu abohu gbiriri jasu nchi asafu.

- ¹⁹Obenu l'uzo ndu ejo-iphe aduje ge tsukiribaa ochii; k'ophu bu l'ephe ta amadu iphe, ephe evukotaje daa iko.
- ²⁰Nwa mu; ngabekwa nchi l'iphe, mu epfu. Gbobe nchi egbobe l'opfu-onu mu.
- ²¹B'ekwekwa g'ephe lufu ngu l'iphu. Dobe phe l'ime okpoma ngu.
- ²²Kele ephe bu ndzu l'ehu ndu humaru phe nu; bya emeje g'ehu amadu l'ophu wekorohu.
- ²³Ophu kachakponu bu g'i cheje obu ngu nche; kele oo ya bu aka ndzu shi.
- ²⁴Tukokpo iphe, gberu nggo wofukota l'onu ngu. G'ire ngu te epfujekwa opfu, apfuduru nhamunha.
- ²⁵G'enya ngu dukwa l'iphu. Tabekpoephe enya l'ataphu ngu nhamunha nhamunha.
- ²⁶Lerwejeadakwa enya l'uzo teme l'itsojeru iya. G'uzo, ii-tsoru bujekwaru okpobe uzo, shihuru ike.
- ²⁷Te etsokwaru uzo ekutara; ophu i shikwa ekicha. Wofutakwa okpa l'ejo ememe; kwasekwarupho nhamunha.

Etu 5

Anma okwa eri ogori

- ¹Nwa mu; kwata ngaberu mmamiphe nkemu nchi. Woru nchi pfube epfube numa opfu nkwananya, mu epfu anu ngu;
- ²k'ophu ii-maru eye onu l'o rwuberu iya; teme opfu, shi ngu l'onu egoshi l'i maru iphe.
- ³Kele opfu, shi nwanyi, eme eji l'onu be anoduje atso ge manu-enwu; mbu l'ookwo teretere ge manu-urwazi.
- ⁴Ole o -rwuepho l'ikpazu iya l'o tsahaa g'age; tsahaa nko g'ogu, atsu nko iphu labo.
- ⁵Onye tsoru iya nu laakwaru maa. Uzo iya edubaje nemadzu l'ilu.
- ⁶O too kpajedu ishi etsoru uzo ndzu. Uzo iya l'ophu dukotaephe nggodogo nggodogo; ophu o madu.
- ⁷Noo g'o gude mu su unube unwu mu g'unu ngaberu mu nchi. G'o to dukwa teke unu a-ha iphe, mu pfuru meahaa ozo.
- ⁸G'uzo, ii-nodu eshi bukwaru uzo, no iya uzanya. B'e shiswetakwa uzo onu-mgbo ulo ibe iya;
- ⁹a -nonyaa i woru ubvu, rwuberu ngu nu haaru ndu ozo; bya eworu ndzu ngu togboru onye enwedu obu-imemini;
- ¹⁰mbu a -nonyaa ndiphe bya ebvukaa eku ngu; oo ya bu; akanya, i seru awuru laa ibe onye ozo.

- 11Teme ndzu ngu bvujeeepho l'i tsuahaa ude; mbu teke akpo-ehu ngu me ogwehu ngu a-gbajoshihukota.
- 12Noo teke ii-su: “? Denuanu g'o gude e shi alo mu aka le nchi; ophu mu agubejedu iya iphe; mbu e shi abajeru mu mba; ophu o rwujedu mu l'ehu?”
- 13Ndu ezi mu iphe be mu jikaru le mu te emedu iphe, ephe shi ezi mu; ophu mu eshidu eyeje onu yeru onye shi akpo-zijeru mu uzo.
- 14Nta-a be mu abyawaa aburu onye laru l'iyi l'edzudzu-oha.”
- 15Mbu-a; ge nyee ngu buru ngu obvu-mini, a-buru nkengu kpoloko. Mbu mini, agba ke toritori, shi le welu, i turu l'onwongu.
- 16? Denu g'ii-shi paru ogba, a nwushiru ngu mini haa g'o soo gborogboro le gbororo? ? Mbu paru okpuru ngu haa g'o soru je adoru l'echi edupfu?
- 17Mee ya g'o buru nkengu ke nwekinyi ngu. G'unu le ndiphe ta agbakwaru iya mgba.
- 18G'e kebekwa enya aka iikuje mini l'oma! G'ehu tsokwa gu le nwanyi, i luru l'okorobyia utso!
- 19G'o dukwa g'umoro-enyimu, ama ntumatu. G'era iya mejekwa g'ehu tsoo ngu utso. Ge n-yemobu iya sepyabejekwa ngu l'unuphu.
- 20? Denu g'o nwuru umere nwanyi, eme eji anoduje agba ngu igiri; nwa mu? ? Denu g'o gude o buru utapfu nyee onye ozo be iinoduje arwaphu onwongu?
- 21Kele uzo, onyemonye eshi be Chipfu makotakwaru. Teme o nodu atukojeepho iphemiphe, oome egbu igo.
- 22Ejo-ememe, onye ejo-iphe eme l'anmajekwa iya g'onya; mbu l'iphe-eji, oome adujekwa g'udo kee ya kpukpurukpu.
- 23O buru iphe, e-gbu iya nu bu ahuhu, a huduru iya; teme eswe eswe ono, oome ono je eme iya l'o buru ola-l'iswi.

Etu 6

Okwa, aanmaru onye eme eswe

- 1Nwa mu; o -buru l'i naru nemadzu ibe ngu mkpaleka; o -buru l'i woru onwongu suberu onye ozo l'itumo;
- 2o -buru l'opfu ono buwaa
onyà nmaa ngu; mbu l'opfu, shi ngu l'onu buwaa igbudu tu ngu;
- 3wakwa iphe, ii-me baa; nwa mu; g'i nweru onwongu; eshinu i dabawaru l'eka obutobu ngu. Je ewoze onwongu ali; rwokpoepho obutobu ngu jasu l'i rwo-buta iya.
- 4B'ekwekwa ge mgbenya zinwuta ngu enya! Ophu i kwekpokwanu g'o shita aka i no eshita ophu!

- ⁵Kukebe ẹhu dzoo onwongu ẹ mgbada adzoje onwiya l'eka ndu achi nta; mbu g'enu, ephe l'eli, a nmataru l'onya; e mecha o nahu.
- ⁶Jekubenu unwehu; gube onye enyiru! Gbua igo l'iphe, oome gude maru iphe!
- ⁷Lenu l'unwehu te nwedu onye-ishi; ophu ephe enwedu onye edu phe nu; ozoo onye agbapheje ozi, ephe eje;
- ⁸Ole o bujeru; o -rwua l'onanwu; l'ookukebe ẹhu seta nri; mbu le ndiphe -nodu ebu ereshi; yebedua apako nkiya.
- ⁹? Bu teke ole be ii-zekpo egube ono ze-beru; gube onye enyiru? ? Bu teke ole be ii-tehu le mgbenya ophu iiku?
- ¹⁰Iisuje l'o kwa-a g'i kuta mgbenya nwanshi; mbu g'i dobe ishi l'oshi ilile; mbu l'o kwa-a g'i jiru aka ye l'iphu utapfu tuta unme nwanshi; teme li gbeshi je aharu ẹhu ngu zoo okpa.
- ¹¹Ole g'i makwaru l'okpa-nri a-fukwaru ngu g'onye ndu abalidebv byaru ibe iya; mbu l'uko-iphe akwatakwa ngwogu byapfuta ngu.
- ¹²Unu ngabe nchi ge mu pfiaru unu ke mkpokoro nemadzu; mbu onye ejo-iphe; onye buepho opfu, gberu nggo be oogudeje tsoru aghappe;
- ¹³onye anoduje ataburu nwibe iya enya; teme o nodu egudeje okpa eme iphe-ohubama; bya ajajeru nwibe iya aka.
- ¹⁴Onye egudeje eregede, du iya l'obu chia idzu eme ejo-iphe; teme o nodu anoduje akpa opfu.
- ¹⁵Noo g'o gude eze-iphe-ehuka je atu iya l'upfu. A -bya aji enya birimu be ee-mebyiwa iya k'opfu e tee mekotabaedu iya.
- ¹⁶O duru iphe ishii, du Chipfu ashi; mbu uzo iphe esaa, bu ebyi l'iphu iya.
- ¹⁷Iphe ono bu: eku-onwonye; adzu aka egbu ndu adudu iphe, ephe meru;
- ¹⁸ari k'eme ejo-iphe; ekwo gburumu gbaba l'eme ejo ememe;
- ¹⁹agba ekebe eregede; mbu onye opfu, eshije iya l'onu abukotajeru aka; waa akpa opfu l'unuphu.

Anma okwa eri ogori

- ²⁰Nwa mu; mejekwa iphe, nna ngu suru g'i mee; ophu i zohakwa eme iphe, ne ngu ziru ngu.
- ²¹Kee ya kpukpurukpu l'obu ngu g'o noo ojejoje! Li wokwaru iya pho tukpoo onwongu l'olu!
- ²²Noo kele i -nodu eje ije; bu iya a-nodu edu ngu. I -nodu eku mgbenya; bu iya a-nodu eche ngu nche. O -buru li tehuru nwuru enya; l'oopfu eyeru ngu.

- ²³Kele iphe, a sūru g'i meje ono bu oroku; teme iphe ono, e ziru ngu ono buru iphóró; teme mba, a baru ngu gude gbooru ngu uja buru uto ndzu.
- ²⁴Oo ya e-phufuje ngu l'eka ejo nwanyi ono no; bya aburu iya e-selaje ngu azu l'eka o no mbu nwanyi-ukpara, opfu iya anoduje akwo teretere.
- ²⁵Ge mma, nwanyi ukpara ama te emekwa g'o wata ngu agugu l'ime obu ngu! Ophu i kwekwa g'o gude enya deritaru ngu!
- ²⁶Kele nwanyi-ukpara be bukwa g'i buru onye mmanu be oomeje. Mbu-a; nwanyi, eri ogori bukwa ishi ndzu ngu be onoduje achi nta iya.
- ²⁷? O duru onye a-guta oku kpo be onwiya l'utapfu; g'oku te eke uwe iya?
- ²⁸Mbu-a; ? o duru onye e-je ije l'eli ovokoku; g'oku ta ahụ iya l'okpa?
- ²⁹Nokwa g'onye yee nyee nwibe iya akwa du bu ono. Onye denyiru nyee nwibe iya eka be a taa hakwa ke mmanu!
- ³⁰Ndiphe te epfubyishiekwa onye egu eme; m'o tugbua je ezita nri, oo-ri.
- ³¹Ole o -buru l'e guderu iya be o too kposhiekwa g'o to pfu ugwo iphe ono, o zitaru ono mgbo esaa; m'obetakoruru o je l'atuko iphe, du l'ulo iya reshigbua gude pfua ya.
- ³²Obenu l'onye jepfuru nyee nwibe iya be egomunggo swehuru; kele onye eme nno bu onwiya be oomebyishi.
- ³³Urwu, ooritaje iya bu eka-nchi yee iphe-iphere, eemeje iya; teme ujikputeru, o meru onwiya buru iphe, e te hufubaedu ehufu.
- ³⁴Kele oo okophoo-nwanyi akpatsuje nwoke ehueghu; ophu ophujedu obu-imemini; m'o bya emelata onye jepfuru nyee ya.
- ³⁵Ophu o dudu iphe, e gude arwo iya duru ophu o bya anata; teme ophu o dudu m'obeta i nu iya gunu g'o nworu ke mmanu, o bya iya ebyi eka.

Etu 7

Okwa, aanmaru ndu ejeje ke nwanyi-ukpara

- ¹Nwa mu; meje olu mu! Woru iphe, mu sūru g'i meje kwachia akwachi l'ime obu ngu!
- ²I -nodu emewaa iphe, mu sūru g'i meje be ii-nodu ndzu. Oo g'iiletaje enya l'akporu-enya-oji ngu-a bu g'ii-leta iphe, mu ezi ngu enya.
- ³Gbaru iya l'eka g'o buru ngu echi mkpushi-eka! L'i woru iya dee edede l'ime obu ngu!
- ⁴Kua mmamiphe nwune ngu nwanyi! L'i kua nkwa menya onye gu l'iya bu ndu unuphu!
- ⁵Oo phe a-nodu ephufuje ngu l'eka nwanyi-ovuoba; mbu l'eka nwanyi-ukpara, opfu onu iya akwo teretere.

- ⁶A sụ ngu lẹ-a; mu gbẹ lẹ windo ọlo mu lee ẹnya; mbụ-a; mu gbẹkwa lẹ windo ọlo mu pyofu ẹnya l'etezi;
- ⁷mu hụma l'echi ẹka ndu amadụ iphe dọru; mbụ l'echilabọ unwokoroby; l'o nweru onye ọphu egomunggo swehuru.
- ⁸Yẹbedua tsoru gbororo eje eshita ẹka nwanyị ovuoba ono bu; mbụ gha iphu eje l'uzo ẹka ọlo nwanyị ono nọ.
- ⁹Teke ono bụ ụzenyashi; gẹ nchi ejihuwaa; mbụ g'ochii atukpuwa ẹhu.
- ¹⁰Tobudu iya bụ; nwanyị lanụ futa byapfutashia ya; kwaa akwa nwanyị-ukpara; teme ẹregede jikwa iya pho obu.
- ¹¹Nwanyị obu bẹ anọduje atụ kwokwokwo; teme ọphu o dudu onye ookweje g'onu iya rwu iya l'ẹhu; ọphu ikè etsupfuduru iya l'oshi.
- ¹²Teke i shiru ụzo gbororo; l'i hụma iya. I -lufushia l'edupfu-oha l'o nọduwa iya. Owojeru onwiya tsukpaa l'ekameka.
- ¹³Noo ya; o bya eduta nwokorobyanya ono bya anma iya akpa; bya eworu iphu gbua teterete ghaaru iya iphu sụ iya:
- ¹⁴“Anụ, mu botaru lẹ ngweja-ẹhu-guu, mu shi je egwegwe nọkwa l'unuphu; noo kẹle o kwa ntanụ-a bẹ mu meebekotaru iphe, mu riburu angụ lẹ mu e-me.
- ¹⁵Oo iphe ono meru g'o gude mu futa bya ele ẹnya ngu. Nta-a bẹ mu chọwaru ngu jasụ mu hụma ngu!
- ¹⁶Iphe-azẹe mu bẹ mu gudewaa ẹkwa, turu iphe poopoo dozia; mbụ ẹkwa, e kweruro lẹ Ijiputu.
- ¹⁷Iphe-azẹe mu bẹ mu wukotaru manụ, eshi kwẹekweekwee. Mu wuru iya meru; yẹe alowe; waa sinamonu.
- ¹⁸Bya g'anyi zẹe l'ibe mu gbiriri jasụ l'utsu! Bya g'anyi kwaa gude mee g'ẹhu tsoo anyi utso.”
- ¹⁹Ji mu ta anọkwa l'unuphu. O jeru ẹka kwatakpo o du ẹnya.
- ²⁰Eda, ooyeje okpoga bẹ o yejiru okpoga eyeji wota gude jeshia; k'ọphu bụ l'o -bya alwa bẹ onwa e-dzuakwanu edzudzu.
- ²¹O gudeepho epfu opfu ẹrengete ono gbiriri jasụ o jita iya. O buru ire iya, akwo teterere ono bẹ o gude dephua ya.
- ²²Teke ono teke ono o phukuru tsoru iya g'eswi, a kpụ eje egbugbu; ọzoo g'ele, eje adalahụ l'onyà;
- ²³jasụ apfu buru iya lẹ meji purumu; mbụ g'enu, ephe eje ala l'ẹka a gbaberu ọnyà, ata makpodanu lẹ ndzụ iya tsewaru l'onu ẹta.

²⁴Ntamanu-a; unube unwu mu; unu ngaberu mu nchi! Unu togbokwa nchi g'iphe, mu epfuru unu bahu iya!

²⁵Unu te ewojekwaru obu unu ziberu nwanji ono; ophu unu ekwekwa g'o duswee unu uzo; duru unu lashia uzo, ooshi.

²⁶Kele ikpoto nemadzu be o chitaakwaru tua; teme ndu o gburu egbugbu dukwapho igwerigwe.

²⁷Ulo iya bu gbororo uzo ali-maa. Uzo ono kwasekpoerupho gbiriri jasu l'ime mkpuru eka onwu gbaru iphe-azee buru.

Etu 8

Mmamiphe eku ngu oku

¹? Tobudu oku be mmamiphe eku egube pho? Mbu ? to budu olu nkwanenya ada g'oda pho?

²Oo l'eka du ephekerephe, no l'aguga gbororo; mbu le mgbakata-uzo be o jeru je apfuru.

³O pfuru l'aguga onu-abata eka eeshije abahu l'ime mkpukpu ono. Oo l'onu mgbo mkpukpu ono gedegede be o pfuru echi mkpu su:

⁴O kwa unube nemadzu l'ophu be mu eku; mbu l'oo ndiphe g'unu ha be mu akporu okwe.

⁵Unube ndu enwedu egomunggo; g'iphe dojenu unu enya! Unube ndu eme eswe; unu kwanaa enya!

⁶Unu ngabe nchi; kele iphe, mu epfu bukwa okpobe iphe. Mu sakwaru onu k'epfu iphe, pfuru nhamunha.

⁷Iphe, mu epfuje bu ire-lanu; kele ejo-iphe adujekwa mu ashi.

⁸Iphe, bu opfu, shi mu l'onu bukota opfu, pfuru oto. O to dudu opfu, gberu nggo; ozoo ophu apfuduru-oto, eshije mu l'onu.

⁹Onye iphe edoje enya maru le g'o hakota pfuru oto. Ndu maru iphe be maru l'opfu ono pfugbaaru nhamunha.

¹⁰Hakwa mkpola-ochaa; hatachia mba, mu abaru ngu! Mmamiphe kakwa okpobe mkpola-ododo ree!

¹¹Kele mmamiphe kakwa mkpuma, aswa du ere ire. O to dukwa iphe, aguje nemadzu egu enweru me nanu, aa-nodu atu eyeru iya.

¹²Mube mmamiphe be yee nkwanenya bukwa l'eka lanu. Amaru iphe ye eye onu l'opfu tukokwaru buru mu nwe iya.

- 13Atsu Chipfu ebvu bukwa akpo ejo-iphe ashị. Iphe, du mu ashị bukwanu eku-onwonye yee etu onwonye ophushugbu; yee eme ejo-ememe; waa epfu iphe, apfuduru-oto.
- 14Okpobe idzu yee mmamiphe bu nkemu. Nkwamenya yee ike bukwarupho nkemu.
- 15Ndu eze gude mube mmamiphe nodu l'aba-eze phe. Ndu-ishi gude mu atu ekemu, pfuru nhamunha.
- 16Oo mu be ndibe ndu eze gude nodu l'aba-eze phe; mekpoo iphe, bukpo ndu ha shii, nokota l'okwa buru ishi unwu-eliphe.
- 17Ndu yeru mu obu be mu yekwaru obu; teme ndu achọ mu nu achoshi mu ike je l'achota mu.
- 18Enweru iphe; yee akwabe ubvu bukota nkemu. Eku, a-no jasụ l'ojejoje; waa apfubekoto tuko nodu mu l'eka.
- 19Urwu, eeritaje le mbedua kakwa okpobe mkpola-ododo ree; teme iphe, mu agbataje tukobe onwomu kakwapho ree eme l'okpobe mkpola-ochaa.
- 20Uzo, mu eshije bu uzo apfubekoto. O buru gbororo k'ikpe, pfuru nhamunha be mu etsoje.
- 21Ndu yeru mu obu be mu emeje g'ephe baa uba; teme mu nodu emeje g'ulo-eku phe ji ejiji.
- 22Oo mube mmamiphe be Chipfu vuchakpo uzo nweru; teme o wata eme iphemiphe ono, o meshiru le teke ndiche ono.
- 23A hotahawaru mu ro teke aama; mbu le mbulembukpo; teme e meje mgboko.
- 24Teke oke-enyimu teke adukpodanu be mu nohawa; mburo teke ogba, mini jiru ejiji eteke eshidu du.
- 25Teme e mee ubvu ubvu dobegbaa l'onodu iya; mbu teme e mee ubvu, hagbaa nwanshi be mu nohawa.
- 26Teme Chipfu mee eliphe-a l'ophu; yee obotegu, du iya nu; mbukponu teme e mee urwuku, jiru mkpoji-eka.
- 27Mu nokwa l'eka ono teke o meru igwe dobe; mbu teke o meru akpaminigwe; o phoze je agebe onu l'oke-enyimu.
- 28Teke o meru urwukpu dobe; bya edobegbaa ogba ogba, mini ime ali shi asofuta le mgboko.
- 29Teke ono, o kparu eze-enyimu oke; k'ophu bu le mini ta asoghatadu eka o suru g'o so-beru; mbu teke ono, o turu okpa eliphe-a l'ophu;
- 30be bukwa mube mmamiphe bu nnajiuphu, shi nodu iya le mgbureku emeru iya ona. Mu meru; ehu nodu anoduje atso iya utso mboku-mboku; teme mu shi anodujekwapho ete eswa l'iphu iya mkpurumkpuru.

³¹Mube mmamiphe be mgboko, o meru shi emeje; ehu-utso eji mu obu; teme ndiphe l'ophu nodu adujekwa mu pho ree.

³²Oo ya bu; unube unwu mu; unu ngabenuru mube mmamiphe nchi. Ehu-utso be a goru nu onye etso uzo mu.

³³Unu ngabe nchi numa mba, mu abaru unu; g'unu amaru iphe! B'e wokwaru iya hua l'ali!

³⁴Ehu-utso be a goru nu onye ngaberu mu nchi l'olu; onye anoduje l'onu mgbo ibe mu eche nche mboku-mboku; mbu onye anoduje l'onu-ulo mu ngaberu mu.

³⁵Kele onye choru mube mmamiphe chota bukwa ndzu be o chotaru; teme onye ono buwaru onye tubaru Chipfu l'enya.

³⁶Obenu l'onye jikaru achota mube mmamiphe bukwa onwiya be oometa iya. Iphe, bukpoo onye mu du ashị bukwa onwu be o yeru obu.

Etu 9

Mmamiphe eku oku; emeswe nodu eku

¹Mmamiphe gbeshiru je eworu itso esaa kpobe gude mee ulo iya.

²O bya egbua anu shia dobe bya agwaa mee dobe; bya eshia ite dobe;

³bya ezia unwumgboko, ejeru iya ozi; ephe je apfuru eku oku. Eka bu eka kachaa l'eli le mkpukpu be ephe pfuru eku oku su:

⁴“G'iphe, bukpoo ndu amazidu iphe bata l'ulo l'eka-a!” O be le ndu enwedu egomunggo; o su phe:

⁵“Unu bya eria nri, mu shiru dobe; ngua mee, mu gwaru dobe.

⁶Unu haa b'e nwe egomunggo ono bya anodu ndzu! G'iphe dojenu unu enya!

⁷Onye abaru onye mgbonu mba bukwa onye e-phu iya iphu be ocho. Onye alokwanu onye ejo-iphe eka le nchi bukwarupho okonu be ooku oku.

⁸Ta abajekwaru onye mgbonu mba; odumeka be ookpokwa ngu ashị. Bachiru onye maru iphe mba; huma l'oo-ye ngu obu.

⁹Loru onye maru iphe eka le nchi huma l'oo-kabaa amaru iphe eje. Zia onye pfuberekoto iphe huma l'oo-yekwabaa iphe l'iphe, o maru.

¹⁰L'o kwa atsụ Chipfu ebvu bu egbube ishi mmamiphe. Amaru onye ono, du nsọ ono buru iphe edo enya.

¹¹Kele oo mube mmamiphe e-me g'i kaa nka. Mbu-a; mu e-me g'e yekwabaaru ngu apha l'apha olemole i gege anọ l'eliphe-a.

¹²I -maru iphe; mmamiphe ngu ono ebua ngu nggo. Teke i bukwanu onye mgbonu; l'o buru gubedua l'onwongu e-je iphe-ehuka iya.”

¹³Olu ke nwanyi ono, bu iya bu eme-eswe nodu adakwapho adashi ike. O bu onye a huduru ahuhu; teme ophu o madu iphe.

¹⁴Yebedua je anodu l'onu-abata ibe iya; mbu l'okposhi, o doberu l'eka kakota l'eli le mkpukpu.

¹⁵Noo eka o no eku iphe, bukpo ndu aghata aghata; ndu pfulberuro ije phe nhamunha eje iphe, ephe eje. O su phe:

¹⁶“G'iphe, bukpo ndu amazidu iphe bata l'ulo l'eka-a!” O be le ndu enweddu egomunggo; o su phe:

¹⁷“Mini, e zitaru l'oshi adujekwa ree. O buru nri, e riru le mpya kachaa utso!”

¹⁸Ophu ephe amaswetakpoda amama ophu l'unwu-maa doru l'eka ono; le ndu byaru iya ebyaa nowaa l'ali-maa anono.

Etu 10

Etu, Solomonu nmashiru

¹Ndu owa-a bu etu, Solomonu nmashiru: Nwata maru iphe emejekwa g'ehu tsoo nna, nwuru iya nu utso. Obenu le nwa, eme eswe bu aphu tsoo ne iya.

²Eku, a kparu ejo akpakpa ta adukwa urwu, o baru. Obenu l'apfubekoto adzotaje nemadzu l'eka onwu.

³Chipfu ta ahajekwa onye pfuberekoto g'egu mee ya. Obenu l'onye ejo-iphe be o to kwejedu g'iphe, agu iya nu rwube iya eka.

⁴Eme enyiru emejekwa amadu g'o daa ukpa. Obenu l'eka e gude ese akanya emeje g'a baa uba.

⁵Onye kparu iphe, o koru dokobe edokobe l'onanwu bu onye kwaru enya. Obenu l'onye anoduje eku mgbenya teke eemeta iphe, e meberu l'ali bukwa onye-eswe be o bu.

⁶Onu-oma bu okpu-eze, onye pfuberekoto kpu l'ishi. Obenu l'iphe, jiru onu onye ejo-iphe bu eme nemadzu mkpawere.

⁷Anyata, a nyataru onye pfuberekoto abujeru onye nyataru iya nu iphe-ekweru. Obenu l'epha onye ejo-iphe a-chihu.

⁸Onye maru iphe l'ime obu iya emeje iphe, a suru g'e meje. Obenu l'onye epfu jogojogogo alaje l'iyi.

⁹Onye uta adudu le ndzu iya be obu shihuru ike. Obenu l'onye eshi uzo, du nggodogo nggodogo be ee-mechanu-a huma.

¹⁰Onye ebvu enya ehuka ehuka bu aphu be okpatsu. Teme onye epfu jogojogogo nodu alaje l'iyi.

- 11 Onu onye p̄f̄uberekoto b̄u ishi nggele mini ndz̄u. Obenu l'iphe, jiru ɔnu onye ɛjo-
iphe b̄u iphe-kpangangaa.
- 12 Ndumashi akpatsu esemopfu. Obenu l̄e n-yemobu ekpuchije iphe-ɛji g'o ha.
- 13 Onu onye iphe edoje ɛnya b̄u mmamiphe eshije iya afushi. Obenu l'onye enwedu
egomunggo b̄u ɛchachi n̄o swiru iya.
- 14 Ndu mmamiphe b̄e ewojeru iphe, ɛphe maru kwakɔbe. Obenu l'ɔnu ndu eswe b̄u
ɔla-l'iswi b̄e ɛphe anɔduje eku oku.
- 15 Uba onye nweru iphe b̄u mkpukpu, ɔ kpuru kpushia ya ike. Ukpa bukwanuru iya
emebyishije onye enwedu iphe.
- 16 Ugwo ozi, aapfu onye p̄f̄uberekoto emeje ḡe ndz̄u d̄u iya. Obenu l'okpoga, onye ɛjo-
iphe akpata b̄e emeje g'o mee iphe-ɛji.
- 17 Onye angabeje nchi l̄e mba, aabar̄u iya bukwa ɔzo ndz̄u b̄e ooshi. Obenu l'onye
abujeru; a -n̄odu ah̄u iya ah̄uh̄u l'ɔ d̄u iya ash̄i l'edusweshije ndu ɔzo ɔzo.
- 18 Onye domiru ndumashi l'obu b̄e adz̄u uk̄a d̄u l'ogbogborom̄onu. T̄eme onye asu
asulasu buru onye-eswe.
- 19 Opfu -paa igwerigwe b̄e iphe-ɛji haakwaru bah̄u iya. Obenu l'onye aduje ike sede ire
iya b̄e kwaru ɛnya.
- 20 Ire onye p̄f̄uberekoto b̄u ɔkpobe mkpola-ɔchaa. Obenu l'iphe, shi l'obu onye ɛjo-
iphe ta adudu urwu, ɔ kwataru baa.
- 21 Olu-opfu onye p̄f̄uberekoto azujije ndu d̄u igwerigwe ɛpho. Obenu l̄e ndu eswe
anwuhuje l̄e b'enwe egomunggo.
- 22 Onu-oma k̄e Chipfu l'emeje g'e nweru iphe. Ophu ɔ dudu iphe-ɛhuka, ooyeje iya.
- 23 Onye eswe b̄u iphe, aduje iya ree b̄u ɛjo-ememe. Obenu l'onye iphe edoje ɛnya b̄u
iphe, aduje iya ree b̄u mmamiphe.
- 24 Iphe, onye ɛjo-iphe atsu ebvu; a -n̄onyaa o mee ya; e-mekota iya kpamu. Iphe,
agukwanu onye p̄f̄uberekoto g'e meeru iya b̄e ee-mekotaru iya.
- 25 Oo ḡe oke-pherephere ezije tuutuutu zighata-a b̄u g'onye ɛjo-iphe achihuje. Obenu
l'onye p̄f̄uberekoto esihuje dungudungu jas̄u l'ojejoje.
- 26 Oo ḡe mee-venīga aduje l'eze-a; mbu g'enwuru-oku aduje l'ɛnya-a b̄u g'onye ɛnyiru
aduje onye ezi iya ozi.
- 27 Atsu Chipfu ebvu akporiberu ndz̄u. Obenu l̄e ndz̄u onye ɛjo-iphe b̄e eegbuje
mkpirikpu.
- 28 Iphe, onye p̄f̄uberekoto ele ɛnya iya b̄u ɛhu-utso. Obenu l'iphe, onye ɛjo-iphe daru
ngaberu emechaj̄e buru iphe-mmanu.

²⁹Eshi ụzo Chipfu bụ iphe, edomije ndu p̄f̄uberekoto bya abụkwanuru iphe, etsupyashije ndu emeje iphe, adudu ree.

³⁰Onye p̄f̄uberekoto bę a ta abyakwa enwubata enwubata. Obenu lę ndu ęjo-iphe tee buduru l'alı ono.

³¹Onu onye p̄f̄uberekoto bụ iphe, eshije iya nụ bụ mmamiphe. Obenu l'ire, ap̄f̄uduru-oto bę ee-mechaa sebufu.

³²Onu onye p̄f̄uberekoto maru iphe, bụ: e -pfua ya l'ọ dū nhamunha. Obenu l'onu onye ęjo-iphe bụ iphe, ọ maru kpoloko bụ iphe, dū nggōdogo nggōdogo.

Etu 11

¹Eme iphe, eegudeje atū ęrwa iphe l'ụzo ęregede; bükwa ębyi l'ęnya Chipfu. Obenu l'iphe, aduje Chipfu ree bụ eme ire-lanụ.

²Eku-onwonye nōdu ęje abya; iphere etso iya etsotso. Obenu l'iphe, anōduje etso adū àgù l'obu bę bụ mmamiphe.

³Ụta ta adū lę ndzū onye p̄f̄uberekoto bükwa iya anōduje edu iya. Obenu lę ndu e gudedu ire phę ęka bụ iphe, emebyije phę nū bụ ntuphu-ire phę.

⁴Ęku ta adükwa urwu, adükwadu iya nū mbọku, ęhu e-ghu Chileke oke eghu. Obenu l'ap̄f̄ubekoto adzoje nemadzū l'ęka ọnwu.

⁵Ap̄f̄ubekoto k'onye ụta adudu lę ndzū iya atogbojeru iya ụzo nhamunha. Obenu l'iphe, akwatsuje onye ęjo-iphe bụ eme ęjo-iphe iya.

⁶Ap̄f̄ubekoto k'onye obu iya gūru ìphóró l'adzoje iya. Obenu l'onye e gudedu ire iya ęka bụ ęgu ęjo-iphe, agū iya nū anmaję iya g'ónyà.

⁷Onye ęjo-iphe -nwūhu; iphe, ọori l'oo-mecha mee l'ęhu iya; alaru iya l'iyi. Iphemiphe kpọ, bụ iphe, o shi dobesū lę ya e-gude ike iya mee aburu iphe-mmanụ.

⁸Onye p̄f̄uberekoto bę aanafutaje l'ęka iphe-ęhuka. Iphe-ęhuka ọbu ejechia atū-koru l'ishi onye ęjo-iphe.

⁹Onye te emedu ele Chileke bụ opfu ọnu bę oogudeje mebyishia nemadzū ibiya. Obenu l'onye p̄f̄uberekoto egudeje nkwamenya nahụ.

¹⁰Ọobujeru teke iphe ejehuru onye p̄f̄uberekoto; ndu bu lę mkpukpu ete ęswa. Teke onye ęjo-iphe larū ọla-l'iswi; ndiphe agbọo ọgboo.

¹¹Onu-oma k'onye obu iya gūru ìphóró akwọ-lije mkpukpu. Obenu l'opfu-ọnu onye ęjo-iphe emebyije iya emebyi.

¹²Onye enwedu egomunggo akpoje nemadzū ibiya ębo l'afū. Obenu l'onye nweru egomunggo bę l'esedeje ire iya.

¹³Onye asū asulasu epfuję iphe, e domiru edomi. Obenu l'onye e gude ire iya ęka edomikotaje iphe, dū ęgube ono.

- ¹⁴Oha, a taa kpọ-ziduru ọzo adajękwa. Obenu a -dụ igwe akpọ-ziru ọha ọzo; l'aadzọta ọha ono.
- ¹⁵Onye narụ onye ọ madụ mkpalęka ta adụkwa iphe, e-me g'ọ tọ je iphe-ẹhuka. Obenu l'onye sụru lę ya te eyekwa ẹka l'iphe, ana mkpalęka ta adụkwa iphe, e-me iya nụ.
- ¹⁶Nwanyị, eme odoo abụjeru; a -kwabę iya ùbvù; l'ọ naa ya ẹka labọ. Unwoke, ewebushi akųrepho nọdu atųje ẹku gburumu swiswia.
- ¹⁷Onye iphe-oma bụ onwiya bę oome iya edoberu. Onye dų ẹhuka bukwanuru iphe-ẹhuka bę oometaru onwiya.
- ¹⁸Iphe, ndu ẹjo-iphe setarų l'akanya a-bųru phę iphe-mmanų. Obenu l'onye akų apfubekoto gę mebyi-iphe, aakų l'alị bę l'a-wọta ọkpobe iphe, ọ kuru.
- ¹⁹Onye pfuberekoto ọkpobe apfube bę ndzų aduje. Obenu l'onye agba etso eme ẹjo-iphe agbaję tsoru iya jasų l'ọ gbaba l'onwu.
- ²⁰Ndu ọkpoma dų ẹji emekwa ẹbyi l'ęnya Chipfu. Obenu lę ndu ọta adudu lę ndzų phę aduje Chipfu ree shii.
- ²¹Ophu ịi-makaharų bų lę ndu ẹjo-iphe bę a taa hadų g'a ta hù phę ahùhù. Obenu l'oshilọkpa ndu pfuberekoto ta adudu iphe, ee-me phę nụ.
- ²²Nwanyị, amashi mma ike; mmamiphe pehukwanu iya l'ẹhu; dų g'iphe-nchi, e gude mkpọla-ododo mee; woru ye ezi l'imi.
- ²³Iphe, agų onye pfuberekoto bų ẹka ọosubeje ishi bų l'iphe-oma. Obenu l'iphe onye ẹjo-iphe ele ęnya iya bų l'ẹka ọosubeje ishi bų l'oke-ẹhu-eghu, Chileke a-tukoshi iya.
- ²⁴Onye bų omeluko bę iphe iya anọduje aka shii eje. Obenu l'onye aswị aswị emechaję kpabua nvọ.
- ²⁵Onye eme iphe-oma bę ẹka a-nọdu agba ọpete. Mbų l'onye agbaję nwibe iya mini l'obu bę aa-gbakwaphọ mini l'obu.
- ²⁶Ndiphe anọduje ephu nemadzų iphu mę ọ -gbushia ereshi gbachishia l'iphe. A nọdu ajaję onye reru nkiya l'orwuberu iya ajaja.
- ²⁷Onye achọ iphe, du ree bę atubaję ndiphe l'ęnya. Obenu l'onye achọ ẹjo-iphe bę ẹjo-iphe abyapfutaję.
- ²⁸Onye kpọru obu yeru ẹku iya a-dakwa. Obenu l'onye pfuberekoto a-nọdu aja àjàjà g'ẹkwo oyii.
- ²⁹Nwoke, esetaru ndibe iya opfu bukwa pherephere bę a-bųru okiphe iya. Teme ọ bųru onye eme eswe l'e-mechaa bųru onye ejeru onye maru iphe ozi.
- ³⁰Mebyi, onye pfuberekoto amị bukwa oshi emeje g'a nọdu ndzų. Ọzo bų l'ọo onye aduje ike pfubuta nemadzų bų onye maru iphe.
- ³¹Eshinu aa-pfų onye pfuberekoto ọgwo iphe, oome l'eliphe-a; bę aa-pfukwa iya pho ndu te emedu ele Chileke yęe ndu iphe-ẹji; pfua phę iya pfugharu phę iya ẹka.

Etu 12

- ¹Onye aabarụ mba; ọ dị iya ree bukwa mmamiphe bē dị iya ree. Obenu l'onye ọ dị ashị l'aahụ iya ahụhụ ta amadụ iphe.
- ²Onye ọma bē tūbaru Chipfu l'enyā. Obenu lē Chipfu anmajē onye ẹregede ikpe.
- ³Nwoke ta abukwa eme ẹjo-iphe bē oo-gude nguru anguru. Obenu l'onye p̄f̄uberekoto ta adudu onye e-phefu iya ephefu.
- ⁴Okpobe nwanyị bukwa okpu-eze, ji iya kpu l'ishi. Obenu l'ẹjo nwanyị dị g'okpu, rehuru erehuru nọ ji iya l'ẹhu.
- ⁵Iphe, ndu p̄f̄uberekoto tūberu k'ememe abujeru iphe, p̄f̄uru nhamunha. Obenu l'idzù ndu ẹjo-iphe achị bukota ughoshi.
- ⁶Opfu onye ẹjo-iphe egepajeru egeparu achọ onye oo-gbu. Obenu l'olu-opfu onye obu iya guru iphóró adzoje ndzụ.
- ⁷Ndu ẹjo-iphe bē ee-mechaa mebyishikọta; ẹphe achihu. Obenu l'onu-ulo onye p̄f̄uberekoto apfujeru jimujimu.
- ⁸Oo gē nkwa menya onyemonye jeberu bụ g'aajabejeru iya ajaja. Obenu l'onye bụ ẹjo-iphe jiru iya obu bē a ta agubejedu iphe.
- ⁹Ọ kakwa ree l'ị bụ onye a gubeduru iphe; i nwekanuru onye-ozii; eme l'ị guberu onwongu iphe l'ẹbe ọ dị nri, i nweru.
- ¹⁰Onye p̄f̄uberekoto agubeje iphe lē mkpa, duru anụ, o nweru l'ibe iya. Obenu l'obu-imemini, onye ẹjo-iphe aphujeeru p̄hē bụ aduru p̄hē ẹhuka.
- ¹¹Onye jeru ozii l'alị iya bē nri a-duru dūa k'etsutsu iya. Obenu l'onye achị iphe-iphoro oso te nweddu egomunggo.
- ¹²Onye ẹjo-iphe bē iphe, ndu ẹjo-ememe narụ lē n̄f̄u anọduje agụ ẹgu. Obenu l'ogbarabvu onye p̄f̄uberekoto anọduje abya pulapula.
- ¹³Onye ẹjo-ememe bē ẹjo-epfupfu, oogudeje onu iya epfu anmajē g'onyà. Obenu l'onye p̄f̄uberekoto anahuje iphe-ẹhuka.
- ¹⁴Nemadzụ egudeje opfu-onu pfutaru onwiya iphe-oma. Nokwapho g'oogudeje iphe, oome l'eka metaru onwiya obunggo.
- ¹⁵Iphemiphe, onye-eswe eme aduje iya ree l'enyā nkiya. Obenu l'onye maru iphe angabeje nchị numa idzu-oma, a chī-koshiru iya.
- ¹⁶Onye eswe abujeru: a -kpatsu iya iwe; oomep̄ho g'a maru teke ono teke ono l'ẹhu eḡhu iya eḡhu. Obenu l'onye nweru egomunggo ta adudu iphe, ọgubeje okonu.
- ¹⁷Onye agba ekebe iphe, bụ ire-lanụ bē opfu iya apfujeru ọto. Obenu l'onye ẹjo-ekebe adzushi ụka.

- ¹⁸Mkpokoro opfu adzufe paramu g'ogu-echi. Obenu l'ire onye maru iphe eguje ehu egugu.
- ¹⁹Ogbogboromonu, epfu ire lanu anoje jasu l'ojejoje. Obenu l'ire, adzu uka ta adudu g'oono-bejeru.
- ²⁰Ughoshi du l'okpoma ndu achi ejo idzu. Obenu le ndu achi idzu ehu-guu bu ehu-utso aduje l'okpoma nkephe.
- ²¹O to dudu ejo-iphe, emeje onye pfuberekoto. Obenu le ndu ejo-iphe bu iphe, ejije phe eka bu iphe-ehuka.
- ²²Iphe, aduje Chipfu eji bu ogbogboromonu, adzu uka. Obenu le ndu aduje iya ree bu unwoke, epfu ire-lanu.
- ²³Onye nweru egomunggo ta arakashijedu iphe, o maru arakashi. Obenu l'okpoma ndu eswe anoduje avoshi jogojogojogo opfu.
- ²⁴Onye gude eka iya eseshi akanya ike l'e-mechaa buru ishi. Obenu l'onye eme enyiru e-mechaa buru ohu.
- ²⁵Ayo oshi emeje g'ike bvụ nemadzu egwegwa. Obenu l'opfu-oma anoduje ekutse nemadzu ekutse.
- ²⁶Onye pfuberekoto akwaje enya le g'o gude eshi onya. Obenu l'uzo, onye ejo-iphe eshi edujeru iya duswee eduswe.
- ²⁷Onye enyiru ta amijedu anu, o gburu amimi. Obenu l'onye ese akanya enwejeru iphe, vu oke aswa.
- ²⁸Uzo, a pfuberekoto eshi be ndzu du. Mbụ le gbororo iya be anwuhu adukpodaa ililekpoo.

Etu 13

- ¹Nwa, maru iphe; angabeje nchi le mba, nna iya abaru iya. Obenu l'onye mgbonu ta angajedu nchi l'uja, aagboru iya.
- ²Nemadzu egudeje opfu-onu pfuta iphe-oma. Obenu l'onye e gudedu ire iya eka bu iphe, ekpiri iya aduje iya bu eme mkpawere.
- ³Onye eche onu iya nche bu ndzu iya be ooche nche. Obenu l'onye epfugbuje g'onu ha iya e-mechaa buru ola-l'iswi.
- ⁴Onye enyiru be ekpiri iphe aduje; ole o to dudu iphe, erwuje iya eka. Obenu l'iphe, agu onye akanya erwuje iya eka okpobe erwurwu.
- ⁵Onye pfuberekoto be iphe, aadzu uka aduje ashị. Obenu l'onye ejo-iphe bu iphe-iphere yee mkparwu bu iphe, oomeje.
- ⁶Onye uta adudu le ndzu iya bu iphe, anoduje eche iya nche bu apfubekoto. Obenu l'iphe, emekpeje onye iphe-eji bu eme ejo-ememe.

- ⁷O nweru onye anọduje eme onwiya g'onye nweru iphe; ọle ọ tọ dukwa iphe, o nweru. Onye ọphuu anọduje eme g'onye akpa nri; ọle o nwekwanuru iphe nweshia ya ike.
- ⁸Ẹku nemadzu l'a-dukwa ike gbafuta ndzu iya. Obenu l'onye ukpa be e te yejedu ebvu.
- ⁹Iphoro, duru onye pfuberekoto anoduje enwu phoophoophoo. Obenu l'iphoro oroku k'onye ejo-iphe bu aphunyi be aaphunyiye iya.
- ¹⁰Ẹku-onwonye bu iphe, onoduje azushi bu aba mba. Obenu le ndu angabeje nchi l'idzu, a chi-koshiru phe bu ndu maru iphe.
- ¹¹Okpoga, a kpataru l'ughoshi anoduje ala azu azu. Obenu l'onye gude aka iya akpa okpoga nwanshi nwanshi l'emeje iya l'ooka shii eje.
- ¹²Iphe, e leru enya iya no odu anoduje agbawashi okpoma agbawashi. Obenu l'ememe, e meru nemadzu iphe, oole enya iya aduje g'o wotaru oshi, eerije nodu ndzu.
- ¹³Onye akpofu alo aka le nchi akpofu l'e-je iphe-ehuka. Obenu l'onye emeje iphe, a suru g'e meje be obunggo iya duru.
- ¹⁴Iphe, onye maru iphe ezi du g'aka mini anuje ndzu futaru. Oomeje ge nemadzu ta adaba l'onya, anwuhu gbaberu.
- ¹⁵Iphe edo enya okpobe edodo l'emeje nemadzu l'o du ndiphe l'obu. Obenu l'uzo onye e gudedu ire iya aka esihujeru iya ike.
- ¹⁶Onyemonye bukpo onye nweru egomunggo emeje iphemiphe, oome l'okwenya. Obenu l'omata ewojeru eme eswe iya tua jala.
- ¹⁷Onye ejo-iphe, e ziru ozi; o nodu eje iya adabaje l'iphe-ehuka. Obenu l'ozi, e ziru onye e gude ire iya aka; o nodu eje iya eguje ehugugu.
- ¹⁸Onye ewojeru mba, aabaruru iya arwutoshi arwutoshi emechaje daba l'okpa-nri me l'iphe-iphere. Obenu l'onye a huru ahuru; o numa iya be aakwabeje ubvu.
- ¹⁹Iphe, agushi egu ike -mee be otsoje obu utso. Obenu l'onye gbakutaru eme ejo-iphe azu; l'eme ebyi l'enya omata.
- ²⁰Onye yee ndu mmamiphe aswi oswi a-buru onye maru iphe. Obenu l'onye etso omata e-je iphe-ehuka.
- ²¹Ejo-iphe ejo-iphe aanoduje anwuru ndu iphe-eji. Obenu l'aka atutu bukwanu obunggo ndu pfuberekoto.
- ²²Okpobe nemadzu akpaje eku dobe l'e ria ya ria le nwanwa. Obenu l'eku, onye iphe-eji akpa bu ndu pfuberekoto be okpaje iya edoberu.
- ²³Onye akpa nri -koo opfu be oomehujekpo; nri adukpoo duchaa k'etsutsu iya. Obenu le be ekpe ikpe, pfuru oto atukoje iya chita.
- ²⁴Onye esela echachi azu le ya te echidu iya nwa iya bukwa ashi be o kporu nwa iya. Obenu l'onye yeru iya obu edeje enya le mini hua ya ahuru.

²⁵Onye pfuberekoto erije nri gudekpoo obu iya kwe l'o jiwaru iya. Obenu l'onye ejo-
iphe ta adudu teke egu ta agudu iya.

Etu 14

¹Nwanyi, maru iphe anoduje edozi onu-ulo iya edozi. Obenu l'onye ophu bu onye-
eswe anoduje achikashi iya achikashi.

²Onye iphe, oome pfuru nhamunha l'anoduje atsu Chipfu ebvu. Obenu l'onye uzo iya
du nggodogo nggodogo ta adudu iphe, o guberu Chileke.

³Onye eswe -pfua opfu; echachi aburu iya l'okpurukpu gbaa. Obenu l'oo
ogboromonu ndu maru iphe anoduje eche phe nche.

⁴Eka eswi, e gude eje ozi adudu be oba adabyijeru iphoro. Oo eswi -jeshia ozi ike;
iphe, a kpataru l'opfu akuru akuru.

⁵Onye agba ekebe, e gude ire iya aka ta adzujekwa aka. Obenu l'onye agba ejo-ekebe
bu aka be onoduje adushi.

⁶Onye mgbonu achoje mmamiphe; o to dudu ophu oohuma. Obenu l'amaru iphe
atojeele-a nwehu ejepfu ndu iphe edoje enya.

⁷Nodukwa omata uzanya; kele i ti humakwa iya mmamiphe l'ogboromonu.

⁸Onye nweru egomunggo be bu iphe, egoshije l'o maru iphe bu l'uzo, ooshi edoje iya
enya. Obenu l'iphe, egoshije l'onye-eswe bu omata bu l'oogudeje ughoshi eme
iphemiphe.

⁹Ndu eme eswe egudeje iphe-eji agba le mgbonu. Obenu le ndu obu phe guru iphoro
be onoduje agu g'ephe mee iphe g'o pfuru nhamunha.

¹⁰Okpoma nemadzu l'ehu l'ehu makotaru iphe, atsu iya l'ehu. Ophu o dudu onye yee
ya agbaje mgba l'ehu-utso, du iya nu.

¹¹Onu-ulo onye ejo-iphe be ee-mechakwaa lwa. Obenu le nwobu, onye pfuberekoto
kporu a-noduepho aja ajaja eje.

¹²O duru uzo, abujeru; nemadzu -nodu eshi iya l'oburu iya okpobe uzo. Obenu l'eka
uzo ono jeberu bu l'onwu.

¹³Je akpachakponu l'achi ochi be aahajekwaru tsua okpoma pharamu; teme ehuru nodu
ahajeru tsoo utso tsoa l'iphe-ehuka.

¹⁴Onye ekwetaduru nu be aa-pfu ugwo uzo, ooshi pfu-dzua ya ya apfu-dzu. L'e bua
onye oma obunggo uzo nkiya l'o dzua edzudzu.

¹⁵Onye amazidu iphe atukoje iphemiphe kweta l'onoo g'o du. Obenu l'onye nweru
egomunggo arijeada oriri teme l'o zobe okpa.

¹⁶Onye maru iphe atshuje Chipfu ebvu jika eme ejo-ememe. Obenu l'omata
edghajeru igiji aka dobesu l'o to dudu iphe, byaru eme iya nu.

- 17 Onye obu-ọku emeje iphe, onye-eswe onye-eswe. Teme a nọdu akpoje onye ẹregede ashị.
- 18 Onye amazidu iphe bẹ okiphe iya abujeru eme eswe. Obenu l'onye nweru egomunggo ekpujeru mmamiphe g'okpu-eze.
- 19 Ndu eme ẹjo-ememe e-phoze l'iphu ndu du ree; ndu ẹjo-iphe ephoze l'onu-oguzo ndu pfuberekoto.
- 20 Ndu akpa nri bẹ aakpoje ashị; kpochaa kpoo lẹ ndu ephe l'ephe bu obutobu. Obenu lẹ ndu nweru iphe nweru ikpoto ọnyà.
- 21 Onye agubeduru obutobu iya iphe emekwa iphe-ẹji. Obenu l'a goru ẹhu-utso nu onye emejeru onye o tsuru iphe-oma.
- 22? Tọbodu ndu achị ẹjo idzu ephuje ụzo? Obenu lẹ ndu achị idzu-oma bẹ eeyeje obu; teme a nọdu emejeru pẹ ire-lanu.
- 23 Iphe, bukpo ozi, e jeshiru ike bẹ urwu adujekwa. Obenu opfu, eepfuepho l'onu l'onu emeje g'a kpaahaa nri.
- 24 Eku onye maru iphe bu okpu-eze iya. Obenu l'eme eswe k'omata bu iphe, oomitaje bu eme eswe.
- 25 A -gbaa ekebe, bu ire-lanu bẹ aadzoje ndzu. Obenu l'ekebe, aagba ophu e pfudu ire-lanu bẹ bukwa ughoshi.
- 26 Onye atsụ Chipfu ebvu bẹ ẹka o dakoberu kpọru akpaa. Teme o buwaruro ẹka unwu iya a-gbabaje je anodu zee ndzu.
- 27 Atsụ Chipfu ebvu bu ẹka mini, emeje g'anodu ndzu futaru; o nọdu emeje g'amadu ta annalahu l'onyà, anwuhu gbaberu.
- 28 Oha, tsuru erupfu abujeru akpabiri eze. Obenu l'oke amadu, enwedu nemadzu bẹ iyi yifuru.
- 29 Onye nweru ota-nshi bẹ iphe, edoje iya ẹnya pakwaru ẹka. Obenu l'onye obu-ọku egoshije g'oomebe eswe.
- 30 Onye doberu okpoma guu emeje gẹ ndzu du ogwehu. Obenu l'ijięnya emeje g'okpu, no l'ehu repyahu.
- 31 Onye eme onye ukpa ewere bukwa Chileke, meru iya nu bẹ ookwe une. Obenu l'onye emejeru onye adudu g'o du iya iphe-oma bu Chileke bẹ ookwabe ubvu.
- 32 Iphe, l'enwutaje ndu ẹjo-iphe tua kpurumu l'alị; bu ẹjo-iphe ono, ephe eme ono. Obenu lẹ ndu pfuberekoto nweru ẹka ephe a-nodu zeeru ndzu m'obeta ephe nwuhuchakpoo anwuhu.
- 33 Mmamiphe aduje l'iphe, bukpo obu ndu iphe edoje ẹnya ree. Mbụ je akpaa l'echilabo ndu bu omata bẹ oogoshijekwapho onwiya.
- 34 Apfubekoto ekutse oha l'ophu. Obenu l'iphe-ẹji bu iphe-iphere l'ehu ohamoha.

³⁵Onye-ozì, maru iphe bẹ atubaje onye eze l'enyà. Obenu l'onye-ozì ophu bu iphe-iphèrè bẹ eze atukoshije ẹhu-eghu iya.

Ètu 15

¹Opfu, e pfuru; a tọ nwẹhu yee ya onu eselajẹ oke ẹhu-eghu azu. Obenu l'epfu opfu, eme ẹhuka akpatajẹ ovuma.

²Ire onye maru iphe emeje mmamiphe g'ọ dọ ree k'anuma. Obenu l'onu omata bu iphe, anoduje alwa iya torotoro bu epfu rwoorwoorwo.

³Enya Chipfu dzuru ẹkameka; k'ophu o huma-dzuru onyemonye; mbu ndu ẹjo-iphe mẹ ndu oma.

⁴Ire epfu iphe, e-me g'e wekorohu bukwa oshi, amije ndu gẹ mebyi. Obenu l'ire ughoshi etsuje ndu pyaapyaa.

⁵Oo onye-eswe abujeru; nna iya -baaru iya mba; o too yedu iya onu. Obenu l'onye a huru ahuhu; ahuta iya egoshi l'o nweru egomunggo.

⁶Ulo onye pfuberekoto bẹ iphe, vu oke aswa dọ igwerigwe. Obenu l'okpoga onye ẹjo-iphe akpata bẹ l'akpatajeru iya opfu.

⁷Ogbogboromonu onye maru iphe anoduje araka nkwaanya araka. Obenu l'o tọ budu g'okpoma dọ omata bu ono.

⁸L'enyà Chipfu bẹ ngweja, onye ẹjo-iphe egwe abujeru iya ẹbyi. Obenu l'epfufu, onye obu iya guru iphoro epfu anu iya atsoje iya rikpotoo.

⁹Uzo ndu ẹjo-iphe abukotajeru ẹbyi l'iphu Chipfu. Obenu lẹ ndu eme g'ephe buru ndu pfuberekoto bẹ o yeru obu.

¹⁰O kwa chiipfu bẹ aa-nu onye haru okpobe uzo. Teme onye o dukwanu ashị; l'ahuhu iya ahuhu l'e-mechakwaa nwuhu.

¹¹Alì-maa yee alì ọla-l'iswi tukokwaru gheru onu l'iphu Chipfu. ? Bu-chia okpoma amadu te egheduru onu l'iphu iya?

¹²Onye mgbonu te eyejedu ahuhu aahu iya obu. Ophu o jejedu akpata ishi l'ibe onye maru iphe.

¹³Onye ẹhu atso utso bẹ iphu atusahje atusahu. Obenu l'onye iwe jiru obu; edejeru yokoo.

¹⁴Okpoma onye iphe edoje enya ree l'anoduje eme g'ọ maru iphe. Obenu l'onu onye bu omata bu nri iya bẹ bu eme eswe.

¹⁵Iphe, bukpo eswe ndu ndu eje iphe-ẹhuka abukotajeeru phe pho mgburwashì ẹhu. Obenu l'onye okpoma atusahje atusahu bẹ tekenteke abujeru iya obo-iphe.

¹⁶O kakwa ree l'e nweru ẹku nwanshii; a nodu atsu Chipfu ebvu; eme l'eku, jiru ẹkameka; ẹgharashi dukwanu.

- 17O kakwa ree l'iphe, bu nri, eeri bu nweba, e yeru l'ophe; n-yemobu dukwanu; eme l'e gburu eswi, tsuru eba ata; mkpomashi dukwanu.
- 18Onye obu-okwu akpalije opfu akpali. Obenu l'onye ataru opfu nshi abyanyije uswo abyanyi.
- 19Uzo onye enyiru eshi be eegudeje obvu tu-chishia atu-chishi. Obenu l'uzo onye obu iya guru iphoros eshi abujeru oji, akwo teretere.
- 20Nwata, maru iphe emeje g'ehu tso nna iya utso. Obenu l'omata ta adudu iphe, ogubeje ne, nwuru iya nu.
- 21Eme eswe atsoje onye enwedu egomunggo utso. Obenu l'onye iphe edoje enya ree bu iphe, pfuru nhamunha be oomeje.
- 22Iphe, nemadzu riru k'ememe be o to mekotajekwa me a -chikoshiduru iya okpobe idzu. Obenu a -du igwe chikoshi nemadzu idzu l'o mee iphe, o tuberu.
- 23Amadu be eh u atsoje utso me o -yee onu l'opfu ree. Mb u le-a; l'onu, e yeru l'o rwuberu iya atsoje rikpotoo.
- 24Uzo ndzu anoduje eje ala l'eli l'eli l'eka onye kwaru enya no. O buru iya emeje g'o to lwa ali ali larwua ali-maa.
- 25Chipfu alashije ulo onye eku onwiya. Obenu l'okoke ali nwanyi, ji iya anodu be okpoje okpo-kuu.
- 26Oriri, onye ejo-iphe riru abujeru Chipfu ejo ebyi. Obenu l'ophu ndu duebe ree riru atsoje iya utso.
- 27Onye ughoro buepho opfu be onoduje akpa l'ibe iya. Obenu l'onye kporu uphalazu ash i be ndzu a-du.
- 28Onye pfuberekoto egudeje okpoma iya riada iphe oo-pfu ariri teme l'o pfua ya. Obenu l'onu onye ejo-iphe bu njo-opfu eshije iya alwa torotoro.
- 29Chipfu no ndu ejo-iphe uzanya. Obenu l'onumaje olu ndu pfuberekoto m'ephe -pfuru nu iya.
- 30Enya, a tusaru iphu atusa lee emeje g'ehu-utso ji okpoma. Teme ozi oma nodu emeje g'okpu gbashia ike.
- 31Onye ngaberu nchi le mba, a baru iya; mbu mba ophu emeje g'a nodu ndzu be yee ndu maru iphe e-mechaa no l'okpoku lanu.
- 32Onye ta adudu iphe, o guberu mba, aabar u iya bukwa onwiya be o to gubeduru iphe. Obenu l'onye abujeru; a -nodu ah u iya ahuh u l'ooaba iya le nchi enwejeru egomunggo.
- 33Atsu Chipfu ebvu ezije nemadzu mmamiphe. Ewoze onwonye ali nodu esekutaje akwab e ubvu.

Etu 16

- ¹Iphe, nemadzu riru l'okpoma iya bu iya be o duru. Obenu l'ophu e pfuru l'onu bu Chipfu be o duru.
- ²Iphemiphe, nemadzu emekpoo duebe ree l'enya nkiya. Obenu le Chipfu maru iphe, du iya l'uche teke o meru iya.
- ³Woru iphe, bukpo iphe, iimekpoo ememe ye Chipfu l'eka; huma l'iphe, bukpo iphe, i chiru idzu ememe e-mejeepho g'i chiru iya.
- ⁴Iphemiphe, Chipfu meru be o meru doberu onwiya; mbu je akpaa le ndu ejo-iphe be o meru doberu eswe eze iphe-ehuka.
- ⁵Ndu eku onwophe bukwa ebyi be ephe eme l'enya Chipfu. Ophu ii-makahukporu bu l'a taa hadu phe g'a ta hu phe ahuhu.
- ⁶Oo n-yemobu yee epfu ire-lanu be e gude edoshi ejo-iphe. O buru atsu Chipfu ebvu emeje g'amadu te eme ejo-ememe.
- ⁷Teke iphemiphe, nemadzu eme du Chipfu ree be oomejehaa mee ge yee ndu ohogu iya du le ree.
- ⁸O kakwa ree l'e nweru iphe nwanshii; a pfubekwanu aka oto; eme l'urwu paru aka; o buru l'uzo, apfuduru-oto be o shi.
- ⁹Iphemiphe, nwoke e-me bu l'ime okpoma iya be orije iya dobe. Obenu l'oo Chipfu emeje ge nzokpa iya nguru anguru.
- ¹⁰Onye eze be opfu, shi iya l'onu adaje g'ozi, shi Chileke l'eka. Ophu oogudejedu onu iya pfuswee m'o nodu ekpe ikpe.
- ¹¹Chipfu eele enya g'e gudeje iphe, gbaru nu tu erwa iphe; erwa iphe, atutuduru l'uzo eregede be du Chipfu ree. O-nyi-tudu, nokota l'eda g'o ha bukota iya meru iya.
- ¹²Ndu eze be eme ejo-iphe abujeru ebyi; kele onye eze bu apfubekoto be oogudeje mee g'o nguru anguru.
- ¹³Iphe, aduje ndu eze ree bu onye epfu iphe, pfuru oto. Mbu l'onye epfu iphe, pfuru nhamunha be ephe agubeje okpobe iphe.
- ¹⁴Oke ehu-eghu onye eze bukwa iphe, ejeru onwu ozi. Obenu l'onye maru iphe abyanyije iya.
- ¹⁵Iphu -tusahu onye eze; l'a maru le ndzu du; mbu l'i -tuba onye eze l'enya be o duje g'eka igwe rwuru erwurwu k'edze mini ishi-apha.
- ¹⁶Humawaro g'o kabe ree enweru mmamiphe eme l'enweru mkpola-ododo. Mbu ahota nkwanenya haa mkpola-ochaa.
- ¹⁷Uzo, a turu mkpoli, ndu pfuberekoto toru te eshitajekwa aka ejo-ememe du. Onye eche uzo iya nche bu ndzu iya be ooche nche.
- ¹⁸Eku-onwonye evujeru uzo; ola-l'iswi etso iya. Teke etu onwonye epha gbeshiru; adarwu ali etsokwaru iya pho.

- ¹⁹Ọ kakwa mma l'ì bụ onye wozeru onwiya alì; ì yìru lẹ ndu dọ àgù; eme l'unu lẹ ndu eku onwophẹ swì tũko eke iphe, unu kwataru l'okwata.
- ²⁰Onye angabeje nchì l'opfu Chileke bụ k'oma anọduje etso iya. Teme onye a goru ehu-utso nù bẹ ọ bụ; mbụ onye dakoberu Chipfu.
- ²¹Ndu maru iphe l'ime obu phẹ bụ ndu eekuje ndu iphe edoje ẹnya ree. Teme opfu, atso utso lẹ nchì nọdu emeje g'a ka anwuta iphe.
- ²²Nkwamenya bụ ishi nggele mini ndzụ l'ehu ndu nweru iya nù. Obenu l'abaru onyeswe mba bukwa iphe-eswe bẹ ọ bụ.
- ²³Okpoma onye maru iphe anọduje eche onu iya nche. Teme ogbogboromonu iya nọdu emeje g'a nwuta iphe.
- ²⁴Opfu, atso utso lẹ nchì dọ g'ebakala manụ-ẹnwu. O meje g'ehu tso nemadzu utso. Teme ọ nọdu emeje g'okpu gbakerehu l'iphe-ememe, eme iya nù.
- ²⁵Ọ duru ọzo, abujeru: nemadzu -nọdu eshi iya l'oburu iya okpobe ọzo. Obenu l'eka ọzo ono jeberu bẹ ọ bụ ọzo onwu.
- ²⁶Ọo iphe, agụ onye akanya anọduje ejeru iya ozi. Ọ buru egu, agụ iya nù anọduje akwaru iya evu.
- ²⁷Ejo nemadzu anọduje achì idzu eme ejo-iphe. Teme opfu, shi iya l'onu nọdu aduje g'icheku oku, ata ririri.
- ²⁸Onye eregede anọduje akpa opfu. Teme onye asulasu nọdu ebukahuje ndu eshishi ọnyà ike.
- ²⁹Onye anọduje eme ndu ọzo mkpawere bụ edephu bẹ ọonoduje edephu nwibe iya; duru iya shia ọzo, adudu ree.
- ³⁰Onye ataburu nwibe iya ẹnya bukwa eregede bẹ ọogba. Teme onye tagbaberu onu buru ejo-iphe bẹ ọocho ememe.
- ³¹Aka nka bụ okpu-eze, dọ biribiri. Ọ buru onye ndzụ iya pfuru ọto bẹ oorwuje eka.
- ³²Ọ ka ree l'ì bụ onye atajeru iphe nshi eme l'ì bụ onye ka ike l'ogu. Mbụ l'onye esedeje onwiya kakwa ree; eme l'onye alwuje ogu lwuta Oha l'ophu.
- ³³Ido bụ atutu bẹ aatuje iya. Obenu l'ọo Chipfu maru iphe, oo-me.

Etu 17

- ¹Ọ kakwa mma l'a takpọerupho nwẹcha, kpohuru nkụ; nchì dukwanu doo l'unuphu; eme l'unuphu, eegbushi anụ gẹ ndu abọ iphe; opfu nọdu adaphekwanu iya.
- ²Onye-ozì, maru iphe bẹ l'e-mechaa buru ishi nwa nnajiuphu iya; mbụ nwa ophu anọduje eme iphe-iphere ekpu ndu nwuru iya nù. Ooje l'emecha keta iphe nnajiuphu g'unwu iya ketaru.

- ³Ite bẹ e gude eghe mkpọla-ọchaa egheghe. E gude ọku ahụ mkpọla-ododo ama. Obenu l'ọo Chipfu bụ onye ahụje obu amadụ ama.
- ⁴Onye eme ẹjo-ememe angabeje nchị l'ogbogboromonu, epfu ẹjo epfupfu. Onye adzujẹ ụka nọdu angabeje nchị l'ire, epfu tuphutuphutuphu.
- ⁵Onye achị onye ụkpa ọchi; bukwa Chileke, meru iya nụ bẹ ọoko onu. Onye ete ẹswa ekpu eze iphe-ẹhuka, byaru nwibe iya bẹ ta adukwa g'e meru g'a ta hụ iya ahụhù iya.
- ⁶Enweru unwu nwanwa bẹ bụ okpu-eze, e kpuberu onye-ishi-ewó. Teme nna bukwanuru iphe, unwegirima gude eku onwophe.
- ⁷Onye egomunggo swehuru te epfujedu opfu, nweru ishi. Nokwaphọ g'onye bụ ishi agbaduru g'ọ tų-phuje ire.
- ⁸Uphalazu dų gẹ mkpuma, vu oke aswa l'ẹhu onye anuje iya nų; k'ophu bų: ọ -ghaa ẹkiya-a bų upete; ọ -ghaa ẹkiya-a bų upete.
- ⁹Onye aguje nvų l'atųpya, a tųpyaru iya bų n-yemobu bẹ ookutse. Obenu l'onye akpatsu opfu akpatsu bų ndu eeshishi
ònyà ike bẹ oobukahuje.
- ¹⁰A -baaru onye iphe edoje ẹnya ree mba bẹ oorwuje iya l'ẹhu; eme l'onu ẹchachi ukporo ise, e chiru omata.
- ¹¹Onye ẹjo-ememe buẹpho iphe, oophubeje iphu ememe bų eme iphe, a sųru g'o to meshi. Ole onye-ozì, ta aphujedu obu-imemini e-mechakwanaa bya ahụa ya ahụhù.
- ¹²Ọ kakwa mma lẹ ne oduma, a kutaru unwu iya furu ngu l'uzo; eme l'i jepfuru omata l'ẹka oome eswe eswe.
- ¹³Ọ -buru lẹ nemadzų gude ẹjo-iphe pfua ugwo iphe-oma, e meru iya bẹ ẹjo-iphe ta abyakpoda abvų abvubvu l'ibe iya.
- ¹⁴Awata aba mba dų g'egbuha nggele, e gbuchiru egbuchi. Ọo ya bų lẹ-a; haa opfu teme uswo abata iya.
- ¹⁵Aharų onye ẹjo-iphe enge; yẹe anma onye pfuberekoto ikpe tųkokwaru buru eme ẹbyi l'iphu Chipfu.
- ¹⁶? Bų urwu gunu bẹ okpoga barų l'ẹka onye bų omata; eshinu mmamiphe ta agudu iya agugu?
- ¹⁷Ndu eshi ònyà eyeje nwibe phe obu mkpurumkpuru. Teme nwune buru iphe, e swiberu ngu iya bų g'ọ gbajeru ngu mkpu teke iije iphe-ẹhuka.
- ¹⁸Onye enwedu egomunggo anajẹ nwibe iya mkpaleka; bya eworu onwiya sùbe l'itumo.
- ¹⁹Onye yeru aswo uswo obu bukwa iphe-ẹji bẹ o yeru obu. Onye wolinukaru egomunggo iya imeli buru ọla-l'iswi bẹ oole ẹnya iya.

- ²⁰Onye ọkpoma dị eji bụ k'oma ta abyajekwaru. Onye ire iya bụ ụgho jiru iya nọdu adabaję l'iphe-ehuka.
- ²¹Onye nwutaru nwa nwoke; ọ bụru omata bę aphụ tsokwaru. Ophu ehu atsojedu nna, egomunggo swehuru nwa iya utso.
- ²²Obu, atso utso bụ ọkpobe ọbvụ. Obenu l'obu agbabuhu emeje g'okpu kpo hu nkụ.
- ²³Onye ejo-iphe anataję uphalazu lę mpya; k'ophu oo-me g'iphe, pfuru oto du nggodogo nggodogo.
- ²⁴Onye iphe edoje enya ree bụ mmamiphe bę oodobeje l'egomunggo. Obenu l'omata bę enya iya ejerwuje eka igwe beru alị beru.
- ²⁵Omata abujeru aphụ tsoru nna iya; bya aburu iphe, atso ilu l'ehu nwanyi, nwuru iya nụ.
- ²⁶Ọ tọ dukwa ree ere onye adudu iphe, o meru nre. Ophu ọ dukwapho ree g'e chia ndu-ishi iphe l'ephe meru iphe, pfuru oto.
- ²⁷Onye nweru egomunggo epfuję opfu zee onu. Teme onye obu-agu buri onye iphe edoje enya.
- ²⁸Je akpaa l'onye eme eswe bę eedobesujekwa l'ọ maru iphe mę ọ -buri l'ọ nọ nwa nggujungguji. Teme a nọdu edobesuje l'ọ bụ onye iphe edoje enya ree mę ọ -buri l'oosedeję ire iya.

Etu 18

- ¹Onye akpa nkinyi iya buepho iphe, onoduje achọ bụ iphe, a-duru iya lę ree. Teme okpobe mmamiphe nọdu eghuje iya eghu.
- ²Omata bę nkwamenya ta adujedu ree. Iphe, atsoje iya utso bụ g'o pfu iphe, ee-me nụ.
- ³Ejo-iphe -bya bę ntupya anoduje etso iya. Teke iphe-iphere byaru; ekwe une etsokwaru iya pho.
- ⁴Opfu, shi nemadzu l'onu abujeru echi ogbu-mini. Obenu l'ishi eka mmamiphe futaru bę bụ nggele, aso gborogboro.
- ⁵Ọ tọ dukwa ree; mbu eme eyeru onye ejo-iphe. Ophu ọ dukwapho ree; mbu anma onye adudu iphe, o meru ikpe.
- ⁶Iphe, omata pfutaru l'onu bę yę ya emeje. Teme ọ buri onu iya obu bę oogudeje eku echachi oku.
- ⁷Ọo onu omata emebyije iya. Teme ogbogboromonu iya buri onya, e gude anmata ndzu iya.
- ⁸Asulasu anoduje atso ntumatu. Otukoje iphe, bụ ehu voo pfurupfuru.
- ⁹Onye tu-gberu eka l'ozi, ooje bę yę onye emebyishi iphe emebyishi bukwa nwune.

- ¹⁰Èpha Chipfu bukwa ọlo-eli ephekerephe, shihuru dũngudungu. Ndu pfuberekoto nõdu agbabajẹ iya je anọdu; ọ tọ duedu iphe-ọnuka, emekwadu phẹ nụ.
- ¹¹Uba onye nweru iphe bụ mkpukpu, ọ kpuru kpushia ya ike. Oo ya bụ igbulọ-ephekerephe, ephe doberu g'o gbobeje g'ọ tọ dụ iphe, e-me phẹ nụ.
- ¹²Amadụ bụ eku-onwonye l'ime ọkpoma bẹ ọokpajeru vuru ọzo mẹ ọ -bya l'ala l'iswi. Ewoze onwonye alị bukwanuru akwabẹ ùbvù bẹ oosetajẹ.
- ¹³Onye teke anumadu iphe, eepfu; o vuwaru ọzo tsee ya onu bẹ ọ bụ eme eswe bya abukwaru iya phọ eme iphe-iphere.
- ¹⁴Ọ kwa obu nemadzu esedeje ndzu iya mẹ iphe nõdu eme iya. Obenu l'obu korofuwa; a taa nyaedu iya.
- ¹⁵Onye iphe edoje enya ree bẹ bụ iya akajẹ amaru iphe tekenteke. Teme onye mmamiphe nõdu angabeje nchị g'ọ numa iphe, e-me g'ọ kabaa amaru iphe.
- ¹⁶Eme iphe-oma asujeru onye eme iya nụ ọzo. Ọ nõdu emeje iya g'o jerwua iphu onye parụ aka.
- ¹⁷Onye lanu -vuru ọzo doo edoo l'ọ dụ g'iswi dụ iya mma jasuru onye k'ẹbo abya eyeahaa onu.
- ¹⁸Iphe, eese opfu bụ: a -turu iya ido; opfu alaa; l'eegude nno gboo ndu eseshi opfu ike.
- ¹⁹Arwo-buta nwune ngu, i mesweru kakwa ehuka eme l'alwu ọgu lwuta mkpukpu, kpuru akpaa. Teme opfu, gu le nwune ngu ese dukwa g'e gude igwe kpa oguzo yechia onu-ulo, a kpushiru ike.
- ²⁰Nemadzu egudeje opfu-onu pfutaru onwiya iphe, e-ji iya ephe. Ọ buru iphe, shi iya l'ogbogboronu bẹ oogudeje kpajia opfuru.
- ²¹Ire tukokwaru ike ke ndzu yee k'onwu chiru. Ọ buru ndu yeru iya obu e-ri mebyi, ọ mitaru.
- ²²Onye achọ nwanyi, ọo-lu achokwa iphe, dū ree. Onye ono abujekwaru onye dū Chipfu l'obu.
- ²³Onye akpa nri anoduje arwo g'a phuru iya obu-imemini. Obenu l'onye nweru iphe anoduje aba mba.
- ²⁴Onye eshi igwerigwe
onyà e-mechakwaa laa l'iswi. Obenu l'o nweru eguru onyà, akajẹ ngu anọ ntse eme le nwune ngu.

Ètu 19

- ¹Onye bụ onye akpa nri bya aburu onye uta adudu le ndzu iya kakwa ree eme l'omata, eegudedu ire iya aka.

- ²Ọ tọ ụkwa ree ị nemadzu bu onye iphe ehe ihee ọphu o madu iphe. Ọzoo ge nemadzu gude eme egwegwa je eshiswee ụzo.
- ³Eswe, amadu eme emebyijekwa ndzu iya; e -mechaa l'o woru iya bobbe Chipfu.
- ⁴Ẹku -nọdu abya be ọnyà aduje igwe etso iya. Obenu l'ụkpa achikaje ọnyà.
- ⁵Onye agba ekebe, abudu ọkpobe opfu be ta anahukwa g'o to je iphe-ehuka iya. Ọphu onye adzujje ụka aladu mmanu g'o to du iphe e-me iya nu.
- ⁶Ikpoto nemadzu anoduje akpa ụzo g'ephe buru ndu du onye-ishi l'obu. Teme onyemonye buru ọnyà onye emejeru nemadzu iphe-oma.
- ⁷Onye akpa nri be adukotaje ndu ephe l'iya bu ashi. Nokwapho ge ndu ephe l'iya eshi ọnyà anoduje agbaru iya oso. Ọonodujekpoo agba etso phe arwo phe g'ephe shiru; ole o to duedu onye ọphu ọhuma.
- ⁸Onye maru iphe eyeje onwiya obu. Teme o buru onye iphe edoje enya ree be k'oma etsoje.
- ⁹Onye agba ekebe, abudu ọkpobe opfu be ta anahukwa g'o to je iphe-ehuka iya. Teme onye adzujje ụka l'a-bukwaru ọla-l'iswi.
- ¹⁰Ọ kwa g'o to dudu nhamunha ke g'omata ri gwoogwoo bukwapo g'o kabaa eji g'ohu buru onye-ishi unwu eze.
- ¹¹Ọ kwa mmamiphe amadu emeje g'o taru iphe nshi. Ọ bukwarupho onwiya be ookutse me e -mee ya iphe-eji; ọphu o yeduru iya ro onu.
- ¹²Eze -wata aba mba be ọodujekwa g'eka oduma asu ekiri. Obenu ị nemadzu -du iya l'obu be ọoduje g'eka iji dashiru l'eli eswa.
- ¹³Nwa, eme eswe bukwa ọla-l'iswi be o buru nna iya. Nwanyị, anoduje abapheru ji iya mba dukwapo ge mini-odzeru, shi l'eswa-ulo ada paapaa.
- ¹⁴Ulo yele ẹku onye eshijekwa l'onye nwe iya nu sweru nwa iya. Obenu l'okpobe nwanyị bu Chipfu be ooshije l'eka.
- ¹⁵Enyiru atuje oke mgbenya. Ọ buru onye eme enyiru be ẹgu emeje.
- ¹⁶Onye emeje iphe, a suru g'e meje bukwa ndzu iya be ooch nche. Obenu l'onye iphemiphe, oome jiru ephe e-mechaa nwuhu.
- ¹⁷Onye emeru ndu ukpa iphe-oma bukwa Chipfu be oojie ugwo. Teme o buru Chipfu e-mechaa bua ya nggo iphe, o meru.
- ¹⁸Huje nwa ngu ahuhù; teke iile enya l'ii-huta iya iphe. B'ejekwa egude g'ooghu ngu l'ehu woru iya chigbua.
- ¹⁹Ọ kwa onye obu-oku be obu-oku iya ebutaje. I -dzoo ya ị nanu; be i dzojenu iya pho l'ozo.

- ²⁰Nujeru nemadzu opfu; ngabeje nchi nata iphe, aaloru ngu aka le nchi iya; l'e - mechaa be ii-buru onye maru iphe.
- ²¹Amadu enwejekwaru ikpoto iphe, onoduje ari k'ememe; obenu l'oo ophu Chipfu chiru dobe mefutaje.
- ²²Iphe, aguje egu l'ehu nemadzu bukwa eme ree ya. O kakwa ree le nemadzu bu onye ukpa eme l'o bu onye ntuphu-ire.
- ²³Atsu Chipfu ebvu edujeru amadu duba le ndzu. O buru teke o du nno be oojije onye obu epho; ophu o dudu ejo-iphe, erwuje onye obu l'ehu.
- ²⁴Onye enyiru abujeru; o -je etsuta nri; aka akwaa ya l'ochi. O to duedu ike apali iya eye l'onu.
- ²⁵I -chia onye mgbonu iphe; onye amazidu iphe egude iya nwuta iphe. Teke i baru onye iphe edoje enya ree mba; l'o gude iya kabaa amaru iphe.
- ²⁶Onye ana nna iya nfu; bya achifuje ne iya bu iphe-iphere; bya aburu mkpatsu-aphu.
- ²⁷Nwa mu; i -haa angabe nchi l'iphe, eezi ngu; l'i phua uzo amaru iphe.
- ²⁸Onye agba ejo-ekebe achi iphe, pfuru oto ochi. Teme onu onye ejo-iphe buerupho ejo-ememe be onoduje elwee kwagbu kwagbu.
- ²⁹Ndu njo-opfu be e dobeakwaru iphe, ee-me phe edobe. E dobeakwapho echachi ala l'okpurukpu ndu-eswe.

Etu 20

- ¹Onye mgbonu be mee bu; mbu le mee, atsu atsutsu bukwa onye aba hanyihanyi. Onye o duphuru uzo ta amakwa iphe.
- ²Ehu -wata egu eze egu be odujekwa g'eka oduma asu ekiri. Onye kpatsukwanuru iya iwe tuphawaru ndzu iya.
- ³Onye agbalaru opfu l'uzo be ubvu anodujekwa etso. Obenu l'oo onye-eswe akwagebeje akwagebe aba mba.
- ⁴Onye enyiru ta akojedu opfu teke aakoje iya. O -rwua l'akpakpa iya l'o wata arwo arwo; o to dudu iphe, oo-rwota.
- ⁵Iphe, nemadzu riru dobe l'okpoma dukwa g'o no l'ogbu-mini. O buru onye iphe edoje enya ree atsutaje iya.
- ⁶Ndu du igwerigwe asuje l'ephe nweru n-yemobu. Ole ? bu awe be ihumakwanu onye apfushije ike l'iphe, o pfuru?
- ⁷Onye pfuberekoto be uta ta adujedu l'iphemiphe, oome. O -nochaa laa; unwu iya aburu ndu a goru ehutu ntu.
- ⁸Onye eze -nodu l'aba-eze iya ekpe ikpe be o humaje ejo-iphe hube iya ama.

- ⁹? Bụ onye a-sụ l'obu dubebe iya sarisari; le ya dubebe ree ophu ya teke meswee iphe-
eji?
- ¹⁰E -gude iphe-ughoshi gude atụ erva iphe; ozoo atụ ogologo iya bukotaepho ebyi
l'anya Chipfu.
- ¹¹Oo umere nwa atuje onu iya. Oomeje g'a maru ? umere iya guru egugu bya apfuru
nhamunha?
- ¹²Nchi, anu iphe; yee enya, aphu uzo bu Chipfu tukoru iya mee.
- ¹³Ge mgbenya ta atsonukajekwa ngu utso; odumeka be ii-kpakwa nri. Nwujeru enya;
huma l'ii-nweru nri nweru k'etsutsu iya.
- ¹⁴Onye azu aswa asuje l'aswa, ozu renukaru ire. Ole o -tugbuepho l'o gude iphe obu,
o zuru obu kuahaa onwiya.
- ¹⁵Mkpola-ododo du; mkpuma, oke aswa du toko ekameka. Obenu l'onu, epfu opfu,
egoshi mmamiphe bukwa o-du-uko-le-mba.
- ¹⁶Nemadzu -su l'oo onye o madu be ya a-noduru l'itumo; natakwa iya uwe iya.
Gudeshikwaa ya me o -buru onye ohozo be o noru l'itumo obu.
- ¹⁷Nri, a kparu l'ugho atsoje utso me a -nodu eri iya. Ole e -mechaepho; onu aburu
onye riru iya nu ejirija.
- ¹⁸I -nodu achu idzu iphe, ii-me; kpajada ishi. Teke iibya eje ugu; kpaada ishi g'e
goshi ngu g'ii-me iya.
- ¹⁹Onye asu asulasu l'edoje iphe, a suru iya g'o to dukwa onye oo-doru iya. Oo ya bu; i
-huma onye phenukaru opfu; kparu iya l'aphara.
- ²⁰Onye ephu nna iya; ozoo ne iya iphu be oku, o gutaru a-nahukwa iya nyihu l'echi
abalishi.
- ²¹Eku, a kparu le gburugburu ta abukwaru onye kparu iya nu iphe-oma l'ikpazu iya.
- ²²B'asukwa l'oo gubedua l'a-pfu nemadzu ugwo iphe-eji, o meru ngu. Nodu kwaberu
Chipfu; l'oo ya a-dzo ngu.
- ²³Ndu gude iphe-ughoshi gude atụ erva iphe bukwa ebyi be ephe eme ekpu Chipfu.
Mbu l'egude iphe-eregede atụ erva iphe ta adudu iya ree.
- ²⁴Eshinu o bu Chipfu anoduje akpo-ziru nemadzu uzo; ? denu ge nemadzu e-shi mee
g'uzo iya doo ya enya?
- ²⁵O bukwa agbaru onwonye
onyà me nemadzu dobe iphe iche su l'o bu ke Chileke l'ebe o ri iya ariri. E -mechaa; o
taaha onwiya uta iphe ono, o riburu nte iya ono.
- ²⁶Onye eze, maru iphe aphuchaje oha iya g'onye aphucha eswa ereshi shi nno hoshia
ndu ejo-iphe; bya egude iphe, e gude echi ereshi chia phe pyakapyaka.

²⁷Obu nemadzu bukwa iya bu oku oroku Chipfu. Oogudeje iya avofutagbaa iphemiphe, du nemadzu l'ime.

²⁸Onye eze, yeru ndu o bu eze phe obu bya apfube ire iya oto l'iphu phe ta adukwa iphe-onuka, emeje iya nu. O buru n-yemobu emeje g'aba-eze iya ono shihu dungudungu.

²⁹Iphe, unwokorobyia gude etu onwophe epha bukwa ike phe. Ewo, du l'ishi bukwanuru iphe, ogerenya gude egbu nwijnwii.

³⁰O kwa eka-nchi yee echibashi

onyá l'ehu be eegudeje safu ejo-ememe; mbu l'oo gbabugbabu be e gude edozi ime okpoma amadu.

Etu 21

¹Okpoma onye eze bukwa nggele, no l'eka Chipfu, bu eka Chipfu suru g'o soru shia be ooshije.

²Iphemiphe, nemadzu eme apfujeru nhamunha l'enya onye obu. Obenu l'oo Chipfu maru obu onyemonye.

³Eme iphe, du ree bya apfuru nhamunha be Chipfu kakwa anata eme l'egweru ngweja nu iya.

⁴Ekobe enya l'eli waa ekunuka onwonye; mbu ororo, ndu ejo-iphe atu bukotakwa iphe-eji l'iphu Chipfu.

⁵Iphe, onye akanya chiru idzu ememe be eeritaje urwu. Nokwapho g'achi iphe oku atuje ukpa.

⁶Ekú, a kparu le tuphutuphutuphu ta adudu g'oono-bejeru l'oophukashihu. Teme ndu akpa eku l'uzo, du nno bu onwu be ephe acho.

⁷Oo ehuka ehuka, ndu ejo-iphe eme be e-kpofu phe ekpofu. Kele ephe jikaru eme iphe, pfuru nhamunha.

⁸Ndu ejo-iphe be anoduje eshi uzo, apfuduru-oto. Obenu l'umere onye iswi du mma apfujeru nhamunha.

⁹O kakwa ree g'i kwata je eburu le mgborulo eme le gu le nwanyi, anoduje abaphe mba tekenteke bu l'ulo.

¹⁰Obu onye ejo-iphe buepho ejo-iphe anoduje evu iya evuvu ememe. Ophu oophujeduru ndu ephe l'iya bu obutobu obu-imemini.

¹¹A -húa onye mgbonu ahuhù; onye amazidu iphe egude iya nwuta iphe. Teke i kpoziru onye maru iphe uzo; yebedua l'onwiya egude iya kabaa amaru iphe.

¹²Onye ono, pfuberekoto ono tubekwaru nvò l'iphe, oo-me ulo ndu ejo-iphe. Mbu l'oopalitaje phe tua gbaa; ephe aburu mkpurupyata.

- ¹³Onye tsuchiru nchị gę ya ta numa olu-ękwa onye ¼kpa l'a-ranaa nkiya ujiku lanu; ọ tọ dudu onye angaru iya nchị.
- ¹⁴Iphe-oma, e meru lę mpya egboje ęhu-eghu. Tęme ¼phalazu, a phaberu l'uwe nu nọdu echinyijekwapho oke ęhu-eghu.
- ¹⁵E -kpee ikpe, pfuru ọto bę ọotsoje ndu pfuberekoto ¼tso. Ọ nọdu eyejekwanu ndu ęjo-iphe ebvu.
- ¹⁶Onye lekeberu ęnya haa eshi ¼zo nkwa menya je eshia ¼zo ọzo bu ęka oojeje atutu unme bu l'ęka ¼nwu maa turu ndzukọ.
- ¹⁷Onye yeru obu l'ęmereme l'e-mechaa kpa nri. Ọphu onye yenukaru obu lę męe yęe manu abyadu aburu onye nweru iphe.
- ¹⁸Ndu ęjo-iphe l'alaję l'ochi ndu pfuberekoto. Nokwapho gę ndu e gudedu ire phe ęka adabajeru ndu obu phe guru iphoro.
- ¹⁹Ọ kakwa ree g'i kwata je eburu l'echięgu eme l'ijilu nwanyi, gu l'iya bu; ęhu nọdu anọduje eghu iya eghu; ọ nọdu anọduje abaphe mba tekenteke.
- ²⁰L'ulo onye maru iphe bę eenwejeru mkpuru, ọkpobe nri du mę ọkpobe manu. Obenu l'omata atukoje iphe, o nweru rifu.
- ²¹Onye achị nta apfubekoto yęe nta n-yemobu l'achotaje ndzu. L'okpaa ęku bya aburu onye akwabę ¼bvù.
- ²²Onye maru iphe bę aduje ike tsoo mkpukpu onye ike ọgu; kwatsushia akpaa akpaa, ęphe kpo-pheru onwophe dakobe.
- ²³Onye eche onu iya nche bya eche ire iya nche bę ezehujeru ọla-l'iswi.
- ²⁴Onye eku onwiya bya etse etsetse bę ępha iya bu onye mgbonu. Onye ono bę umere iya l'ophu abukotajeru eku-onwonye eku-onwonye.
- ²⁵Ọ kwa iphe, agu onye ęnyiru egbuje iya; kele ęka iya ęphenebo te ekweddu eje ozi.
- ²⁶Mboku-mboku bu iphe, anọduje agu iya nu bu g'ọ kabaa enweru iphe. Obenu l'onye pfuberekoto emeje iphe-oma mĩa ya ęnya.
- ²⁷Ngweja, onye ęjo-iphe egwe bukwa ębyi bę ọonoduje eme. Ọphu ọ buro onye eje epfu k'ophu o gude ęjo egomunggo bya egweeru iya.
- ²⁸Onye agba ekebe, abudu ọkpobe opfu a-bukwaru ọla-l'iswi. Tęme onye ngaberu iya nchị bę ee-mebyishikwa jasụ l'ojejoje.
- ²⁹Onye ęjo-iphe bę agbanwubeje iphu ęhuka ęhuka. Obenu l'onye obu iya guru iphoro l'emeje g'uzo iya nguru anguru.
- ³⁰Ọ tọ dukwa mmamiphe; ọzoo iphe edo ęnya; ọzoo idzu, aachị achichi, aa-sụ l'ọo g'e mee ya mebata Chipfu.

³¹Ịnya bụ iphe, e meru iya kwabere bụ mbọku eje ọgu. Obenu l'onye bụ iya bụ l'e mekpee l'ọgu ọbu bụ Chipfu.

Etu 22

¹Okpobe epha kakwa ree ahata eme l'enweru iphe, parụ eka. Teme eme odoo ka mkpola-ochaa yele mkpola-ododo ree.

²Iphe lanu, du l'ehu onye nweru iphe bya adu l'ehu onye akpa nri bu l'oo Chipfu mekotaru ephenebo.

³Onye nweru egomunggo ahumaje iphe, bu ejo-ememe domia onwiya. Obenu onye amazidu iphe anodujeepho eje dukuu dukuu g'ooje jeye l'odalahu l'iphe-ehuka, no iya nu.

⁴Ewoze onwonye ali yee atsu Chipfu ebvu l'emeje g'e nweru iphe; teme o nodu emeje g'a kwabe amadu ubvu bya emekwapho g'e nweru ndzu.

⁵Iphe, a toru l'uzo, onye ejo-iphe eshi bukwa obvu yele onya. Obenu l'onye eche ndzu iya nche be anoduje iphemiphe ono uzanya.

⁶Zia nwata uzo, gbaru iya l'eshishi. O -buerupho ogerenya; o to byadu aha iya ahaha.

⁷Oo onye nweru iphe abujeru ishi onye akpa nri. Teme o buru onye ji ugwo abujeru onye-ozu onye o jitaru iya.

⁸Onye aku eme ejo-iphe g'akpuru iphe be bu iphe, onoduje awoko bu iphe-eji. Teme mgboro ehueghu, o pa e-mechaa darwua ali.

⁹Onye eme iphe-oma shii be aa-goru onu-oma nu; kele owojeru nri iya ekeru ndu ukpa.

¹⁰A -chia onye mgbonu; opfu alaa.

¹¹Onye yeru okpoma charachara obu; teme opfu iya nodu aduje belebele be e-shita onye eze onya.

¹²Chipfu anoduje eleta enya g'o to du iphe, e-me onye maru iphe. Obenu l'opfu onye eegudedu ire iya eka be oomeje g'o to du iphe, oo-bu.

¹³Onye enyiru asuje: "Tuswekwa! Oduma nokwa l'uzo! Oo-gbukwa mu me mu lufu gbororo!"

¹⁴Onu nwanyi ovuoba bukwa iduma, du wukirima. O buru onye Chipfu atukoshi oke ehueghu iya a-daba iya.

¹⁵Eme eswe swekokwaru onwiya nodu l'okpoma nwatanshii. O buru echachi, e gude ahụ iya ahụhù l'a-chi-mihu iya g'o to duhe iya.

¹⁶Onye eme onye ukpa ewere ge ya a-ka enweru iphe; yele onye anoduje anu ndu nweru iphe iphe; e-mechaa toko buru ndu ukpa.

Akpuru opfu ukporo l'iri, shi l'onu ndu maru iphe

- ¹⁷Ngabẹ nchị numa olu-opfu ndu maru iphe. L'i woru ọkpoma ngu kporu ye l'iphe, mu ezi.
- ¹⁸Noo kele ọo-duru ngu le ree me i woru iya dobe l'ime ọkpoma ngu. L'i kpukwaru iya pho l'onu tekenteke.
- ¹⁹Oo ya bu k'ophu ii-kporu obu yeru Chipfu. O kwa mu ezi gubedua gedegede iphe ntanu.
- ²⁰Etu etu obu, mu ezi obu be mu dekwaru edede l'ekwo deta iya ukporo l'iri; mbu akpuru-opfu, l'agba amadu unme; teme o buru opfu, bu: i -mee ya l'o duru ngu le ree.
- ²¹O bu opfu, mu pfuru gude zia ngu ọkpobe opfu; yee opfu, gbaru k'adakobe; k'ophu ii-maru ọkpobe onu, ii-yeru onye ziru ngu nu.
- ²²B'anakwa onye ukpa nwophu o nweru opfu l'o to dudu g'o du iya. Ophu i gwekwa onye iphe-ehuka byaru arakabya l'ulo-ikpe.
- ²³Kele Chipfu e-mechakwaa gbaaru phe odzori; gude ndu ono, shi ana phe nfu ono nalata phe nfu nkephe.
- ²⁴Ge gu l'onye obu-oku te eshikwa onya. Ophu unu l'onye ehu eghuge egwu egwegwa aswika oswi.
- ²⁵O -dumeka be ii-nwukwa aka iya; l'i je adalahu l'iphe, i gbaduru enya iya.
- ²⁶B'abukwaru onye eyeje aka l'eye iphe l'itumo. Ozo onye anaje oji-ugwo mkpaleka;
- ²⁷kele i nwedu iphe, ii-gude pfua ya; be aa-pachakwa paa iphe, i zeje aze.
- ²⁸Ta aphofukwa mkpuma ndiche unu phe gude kpaa oke ali.
- ²⁹I -humakpoo onye chiru upfu yee l'ozi, ooje ejeshi iya ike; maerupho l'oo-mecha jeeru ndu eze ozi. O too jeduru ndu aamadu epha phe ozi.

Etu 23

- ¹Unu l'onye bu ishi -tuko nodu abya erigba nri; makwaru egube onye gu l'iya no.
- ²Wokwaru mma dabẹ onwongu l'ekpiri me i -buru onye ekpiri.
- ³B'aphukwaru nri, onu ngu kpaakpaakpaa; kele nri ono bukwa nri ohutama.
- ⁴B'emebyishikwa onwongu le g'ii-me nweru iphe. Makwaru iphe jetaje ghaa enya.
- ⁵Kele eku abujekwaru: a -bya aji enya birimu l'o buwaru phuchamu. Epe asashichaa ebà g'ugo phehuchaa pheba l'akpaminigwe.
- ⁶B'erijekwa nri, onye uswara shiru; mbu g'eguru iphe, o shiru ta agujekwa ngu egu;
- ⁷kele o kwa g'oriri, du iya bu g'o gbaru. Oo-ngukpokwaru ngu nri su ngu: "Riaro nri! Ngero ngua!" Ole iphe ono, oopfu ono be oopfukota l'eli onu.
- ⁸I -ria ya be ii-gbokwa nwophu i riru. Ajaja, i jaru iya aburu ngu ola-l'iswi.

- ⁹B'epfujekwa opfu yeru omata; kele oo-wokwaru mmamiphe ono, shi ngu l'onu ono nmaa phulaphula.
- ¹⁰Ta aphofukwa mkpuma, a kpoberu e -shi le ndiche gude kpaa oke ali. Ophu i gbuswetakwa okè bahu l'ali onye nna iya anodedu;
- ¹¹kele onye agbaru iya mkpu shihunukakwaru ike. O je l'e-mechakwaa gbaaru iya odzori.
- ¹²Ngabeje nchi nwuta iphe, eezi ngu. Mbụ-a; wojeru nchi gboberu opfu onye maru iphe.
- ¹³B'ahakwa ahụ nwata ahùhù, gbaru iya nù; l'ọ tọ nwuhukwa me i chia ya iphe.
- ¹⁴Chia ya ro echachi dzotachia ndzu iya g'ọ tọ la maa.
- ¹⁵Nwa mu; iphe, e-me g'ehu tsoo mu utso bukwa l'i bu onye maru iphe.
- ¹⁶Mbụ l'ime obu mu be ehu a-tso ntumatu me onu ngu -nodu epfuje-a iphe, pfuru nhamunha.
- ¹⁷B'ekwekwa g'i gude obu ngu koaharu ndu iphe-eji okophoo. Iphe, a-noduje evu ngu evuvu buchikwaaru atsu Chipfu ebvu.
- ¹⁸Noo l'i maru l'iphu a-duru ngu le ree. Ophu iphe ono, agu ngu nu ono ejedu mgbabirishi.
- ¹⁹Ngabe nchi nwa mu; maru iphe. Wojeru obu dobe l'uzo, pfuru oto.
- ²⁰B'etsokwa ndu ngunukaru mee; ozoo ndu rinukaru nri.
- ²¹Kele ndu ngunukaru mee yee ndu ekpiri akpajekwa nri. Mbụ l'enyiru e-mechakwaa nmabe phe nkirika ekwa.
- ²²Ngabejeru nna ngu nchi; mbụ onye ono, bu iya yeru ime ngu ono. Ophu i sukwa le ne ngu ta aduedu iphe, i guberu iya opfu l'ọ buwaa ogerenya.
- ²³Zuta ire-lanu! Be rep hukwa iya azu! Maru iphe! Buru onye a huru ahuhù; yee onye iphe edoje enya.
- ²⁴Nna onye pfuberekoto be ehu atsoje utso shii. Teme onye maru iphe nodu aduje onye nwuru iya nu ree.
- ²⁵Ge nna ngu yee ne ngu tekwaaw eswa ehu ngu! Mbụ-a; g'onye ono, huru mgbu ngu ono tekwaaw ebvu ehu ngu!
- ²⁶Nwa mu; woruro okpoma ngu nu mu! G'enya dunu ngu l'iphemiphe, mu eme.
- ²⁷Kele nwanyi-ovuoba bukwa iduma, dalahuru tukirima. Nwanyi, eme eji buru obvu, turu enu omilomi.
- ²⁸O kwa ge ndu abalidebv u akwabejeru nemadzu l'egbudu-a bu g'onoduje kwabe. Teme o nodu emeje ge ndu e gudedu ire phe eka paa igwerigwe l'echilabo unwuliphe.

²⁹? Bụ onye bụ onye a tūru ọnu? ? Bụ onye anọduje agu aphụ? ? Bụ onye esephe opfu opfu? ? Bụ onye epfuphe l'e mee ya ọphuu mee ya ọphuu? ? Bụ onye bẹ eemekaje iphe-eheni? ? Bụ onye bẹ ọnya eke meeme?

³⁰Oo ndu anoje eriri nggerringge lẹ mee. Ndu etsojeru aghaphe achọ mee, a gwagheru agwaghe.

³¹Te elejekwa mee ọnya teke ooke uswe-uswe; teke ọota kpitikipiti l'okoro, e yeru iya; teke ọ toru nwehu alwa kpetee.

³²E -mechaa bẹ ọotaje ọru g'agwo. Ọru iya nọdu ereje ire g'ọru ogiji.

³³Noo teke ọnya ngu a-wata ahuma iphe, dū ọduge. Egomunggo ngu awata arị iphe, gbachiru ọnya.

³⁴Noo teke ii-dū g'onye zẹ azẹ l'echilabọ eze-onyimu; mbụ g'onye zẹ l'eli iphe, e bvuberu l'eli ugbo-mini.

³⁵L'i wata ara sụ: “Epehe etsugbua mu-o! Ọle e te mekakwaru mu iphe. Epehe etsukwa mu otsukputu; ọle o to rwudu mu l'ehu. ? Bụ teke ole bẹ mu a-gbalihukpọ? Mu -gbeshi bẹ mu a-watakwa achọ mee ọzo.”

Etu 24

¹B'ekokwaru ndu anọduje eme ẹjo-ememe okophoo! G'ogbo pẹ b'agujekwa ngu ẹgu etsotso!

²Kẹle obu pẹ anọduje achị idzu mkpamehu. Ọ buerupho eme opfu bẹ epehe egudeje ọnu pẹ achị idzu iya.

³Oo mmamiphe bẹ eegudeje akpụ ọlo. Ọ buru nkwaanya bẹ eegudeje mee ya g'o shihu ike.

⁴Ọ buru egomunggo bẹ eegudeje dozia ọma-ọlo iya; chiru ngwa-ọlo, ere ire; teme ọ nọdu ama mma gude dozia ya.

⁵Onye maru iphe bẹ ike dukwa shii. Onye nweru egomunggo nọdu anọduje anwuta iphe tekenteke.

⁶I -nọdu abya eje ọgu bẹ onye ii-nọdu ele ọnya iya bụ onye e-goshi ngu iphe, ii-me. Teke ọ dukwanu ngu g'i mekpee ndu unu l'ephe alwu ọgu; ndu ii-nọdu ele ọnya pẹ aburu ndu a-nọdu akpọ-ziru ngu ọzo.

⁷Mmamiphe panukakwaru phengara l'ehu onye-eswe. Ọ -jee l'eka e dzuru opfu l'edupfu; o to nweduru ọnu-opfu.

⁸Onye anọduje achị idzu ẹjo-iphe tekenteke bẹ aa-sụ l'ọ bụ onye ẹregede.

⁹Achị idzu eme eswe bụ iphe-ẹji. Ọphu onye mgbonu adujedu ndiphe ree.

¹⁰Ike -adudu ngu teke iije iphe-ehuka bẹ i dukwa arwuhu ọkpobe adudu.

- 11**Dzọtanu ndu a kpụ eje egbugbu. Sephunu phẹ azụ; mbụ ndu ono l'akpọ galagala eje ala l'ẹka aa-phụ phẹ ịterii ono.
- 12**Teke ị sụru: “? Anyi makwanuru iphe, eme nū?” bẹ onye ono, enyoje obu nemadzu ono manaru-a iphe, iime. Onye ono, bu iya edozi ndzu ngu ono manurupho iphe, eme nū. O buru iya e-mechaa pfa onyemonye ugwo g'iphe, o meru gbaru.
- 13**Rije manụ-ẹnwu; nwa mu; kele o du ree. Mbụ le manụ-ẹnwu, e metaru l'ebakala-ẹnwu a-tso ngu utso l'onu shingushingu.
- 14**Makwarupho le mmamiphe du ree le ndzu ngu. I -maru iphe bẹ obunggo dukwaru ngu iya. Ophu iphe ono, agu ngu nū ono ejedu mgbabirishi.
- 15**Su-a; gube onye ejo-iphe; b'ejekwa ibe onye pfuberekoto je akwageberu iya; ophu i jekwa ibe iya je iya akwagwo!
- 16**Kele onye pfuberekoto -dakwaa iko me o -daru ugbo esaa; o gbalihujekwapho. Obenu l'onye ejo-iphe bu ola-l'iswi akwatsuje iya.
- 17**G'o to tsojekwa ngu utso l'onye opfu ngu daru. Ophu i tekwa eswa l'okpoma ngu l'upfu duru iya.
- 18**Odumeka bẹ Chipfu a-numakwa ochi ono ịichi iya ono; l'o du iya eji; l'o paru onye ono haa; o to duedu iphe, o mekwadu iya.
- 19**G'iphe, eme l'ehu ndu eme ejo-ememe te erwujekwa ngu l'ehu. Ophu i kojekwaru ndu ejo-iphe okophoo.
- 20**Kele onye ejo-ememe be e tee bukwa obunggo-oma. Teme oroku onye ejo-iphe je l'eme tsurikitiki.
- 21**Nwa mu; tsujekwa Chipfu ebvu; l'itsukwapho onye eze ebvu. Ophu i tsokwa ndu ekwefujeru phẹ ike;
- 22**kele Chipfu yee onye eze ono bẹ e-mekwa g'ola-l'iswi tu ngu l'upfu. ? Bu onye maru ge mgbupya phẹ e-jeberu phẹ l'ehu?
- 23**Ndu owa-a bukwapo opfu, shikwapho ndu mmamiphe l'onu: Abọ nemadzu ebo me a -nodu ekpe ikpe ta adukwa ree.
- 24**Mbụ l'onye saru onu su onye-ikpe nmaru l'oo ya bẹ iswi du mma bẹ ee-phukwa iphu le mkpukpu le mkpukpu; teme ohamoha ajikakota iya.
- 25**Obenu l'oo-duru ndu ono le ree; mbụ ndu ekpeje ikpe nmaa ya onye o rwuberu. Ndu ono bẹ ee-kebe l'oma okpobe ekebe.
- 26**Epfu ire-lanu gude yee onu l'opfu bukwa n-yemobu bẹ o bu.
- 27**Vukpodaru uzo jechaa ozi, duru ngu l'etezi; L'i bya ejeebekpoo ozi, duru ngu l'egu; teme l'i wataro akpu ulo ngu.
- 28**B'agbakwaru nwibe ngu ekebe l'ebe o du iphe, o meru. Ophu i gudekwa onu ngu ono duphua nemadzu.

- ²⁹B'asukwa l'ii-melata iya iphe, o meru ngu; l'ii-pfu nwoke ono ugwo iphe, o meru.
- ³⁰Mu ghatajeru eka onye enyiru koru opfu. Mbụ le mu jeru je eshisweta opfu-vayinu onye enwedu egomunggo.
- ³¹O tukoeppo ekameka fukota ewu-obvu ke garawuu. Teme eswa mmanu toko opfu obu nata. Igbulo mkpuma, e shi gude gbaa ya mgbabu dakashihuchawaa.
- ³²Mu bya awata ari iphe ono, mu humaru ono l'ime okpoma mu; bya egude iphe ono, mu humaru ono gude nwuta iphe.
- ³³L'o bu: I -kua mgbenya nwanshii; mgbenya rwee ngu nwanshii. Mbụ-a; i -chikobe eka nwanshii su g'i tuta unme;
- ³⁴akpa nri afuaru ngu g'onye abalidebvụ byaru ibe iya. Mbụ ejeka adue ngu pho g'onye nwoke ibe iya chi ngwogu bapfuta.

Etu 25

Etu ozoba Sólomonu nmashigbaru.

- ¹Ndu owa-a bugbakwaa etu etu ozo, Sólomonu nmashiru. Ndu deru iya l'ekwo bu ndibe Hezekaya, eze ndu Jiuda.
- ²Edomi iphe edomi ekutse Chileke ekutse. Obenu l'ophu ekutse ndu eze bu avo iphe kota iya ohu.
- ³Oo g'igwe habe ephekerephe; o buru g'alị du-be omilomi bu g'obu onye eze bu-be iphe, a taa vo-rwudu avo-rwu.
- ⁴Rwushia erwu le mkpola-ochaa huma l'onye akpu mkpola-ochaa nwewaru eguru iphe, oo-gude kpua iphe, ookpu.
- ⁵Rwushia ndu ejo-iphe l'iphu onye eze huma l'aba-eze iya be oo-gude apfubekoto mee g'o pfushia ike.
- ⁶B'anodukwa l'iphu onye eze ekutse onwongu! Ophu i jekwa asugaru l'eka ndu oke-amadu kuru!
- ⁷O kakwa ree l'oo ya suru ngu: "Gbeshi bya anodu l'eguru eka-a!" Eme l'o pfuru l'iphu oke-amadu mee ngu iphe-iphere.
- ⁸B'egudekwa k'iphe, i humaru l'enya keta oso jeshia l'ulo-ikpe. Le-a; ? ii-mekwanu iya ime-agma l'ikpazu iya; me e -mechaa; nemadzu ibe ngu pfuru iphe-iphere kpua ngu?
- ⁹Teke gu le nemadzu ibe ngu atu igoligoli; b'ewokwaru iphe, nemadzu pfuru ngu le mpya woru rakaa araka.
- ¹⁰Odumeka be onye numaru iya nu e-mekwa ngu iphe-iphere. Ophu ejo epha, ii-vuta achihubaekwa achihu l'ehu ngu.
- ¹¹Opfu, e pfuru l'o rwuberu iya du g'igopoto akpuru udara, a garu ye l'iyagba mkpola-ochaa.

- ¹²Mba, onye maru iphe abaru onye angabeje nchi l'opfu, eepfuru iya be du g'iphe-nchi, e gude mkpola-ododo mee; ozoo g'iphe ozo, e gude akwa onwonye akwa, e gude okpobe mkpola-ododo mee.
- ¹³Oo g'akamini-sunoo ejije oyi gua ehugugu l'okpaji-a bu ge nwozi, e gude ire iya aka eguje ehugugu ndu ziru iya ozi. Mbụ l'oomeje g'obu guzeta ndu nwe iya nu.
- ¹⁴Oo g'urwukpu, rwuru erwurwu zia pherephere; ophu oodzeduru mini du; bu ge nwoke, eku onwiya le ya emeje iphe-oma, o to mejedu du.
- ¹⁵O kwa nshirima l'e-me g'onye-ishi mee iphe, o shidu kwe le ya e-me. Mbụ l'ire, atu gwelegwele egbujijekwa okpu.
- ¹⁶I -huma manugwu; ritakwa iya l'okiya. I -rinuka iya l'i gbo ya.
- ¹⁷Jeta ibe nemadzu ibe ngu l'ahuma. I -jenuka iya l'i du iya ashi.
- ¹⁸Oo ge mgboro, emeje ehuka-a; ozoo ogu-echi; ozoo apfu; noo g'oduje; mbụ nwoke agba ekebe le nemadzu ibiya meru iphe, o meduru.
- ¹⁹Adakobe onye eegudedu ire iya aka teke iphe atsu nemadzu l'ehu dukwa g'onye eme g'o taa iphe l'eze, eme iya rikwo rikwo; ozoo onye eniyeni, eme g'o jee ije l'okpa, nwuhuru iya anwuhu.
- ²⁰Agụ ebvu eyeru onye okpoma du eji du g'e yefuru iya uwe gbabe iya ehugugu oto l'aka oyi atsu iya. O du ge mee-veniga, e woru wua l'eli okanwa.
- ²¹Teke o bu l'onye opfu duru gu l'iya be egu agu; nu iya nri g'o ria. Teke egu mini agu iya; chooru iya mini g'o ngua;
- ²²le teke iime nno be bu iphere be iimeta ekpu iya l'ishi; iphe ono ahua ya oku l'ehu. Ozo bu le Chipfu e-bu gubedua nggo.
- ²³Oo ge pherephere, shi l'isheli ezitsutaje mini-a; nokwapho ge nvu-azu akpataje adzu iphu.
- ²⁴O kakwa ree g'i kwata je eburu le mkpotsu-ulo eme l'i lu nwanyi, gu l'iya bu; o nodu anoduje abaphe mba mboku-mboku.
- ²⁵Oo ge mini, eji oyi eguzetaje obu onye mini agu-a bu g'ozima, shi uzanya emeje okpoma onye e ziru iya.
- ²⁶Onye pfuberekoto -paru onwiya haaru onye ejo-iphe; be o dukwa g'ishi nggele, a sworu erwu; o du g'obvu-mini, a turwuru aturwu.
- ²⁷O kwa g'o to dudu ree erinuka manugwu bukwapho g'o to dukwapho ubvu l'enya me nemadzu gude aka eme g'a kwabe iya ubvu.
- ²⁸Nemadzu, ta adujedu ike sede onwiya dukwa ge mkpukpu, e shi gude igbulu kpu-pee mgburugburu; a nonyaa; e tsukoshia ya.

Etu 26

- ¹Akwabẹ ùbvù te ekweduru onye-eswe. Ọ dọ g'ẹka aka-mini-sunoo l'ada l'ọnanwu. Ọ dọ g'ẹka igwe edze mini teke emeta iphe e meberu l'alì.
- ²Ọnu, a tọru onye adudu iphe, o meru ta adukwa iphe, oo-me onye obu. Ọ dukwa g'ẹka ogbe eme peremu peremu peremu; ozoo g'ẹka agbeta ezi swiiswiiswii.
- ³Echachi be echije inya; a nodu egudeje okpukpu akpu nkafu-igara. Nokwapho g'egudeje mgboro echi onye-eswe l'okpurukpu.
- ⁴B'eyekwaru onye-eswe onu le mkpokoro opfu, oopfu. Odumeka be gu l'iya atukokwa buru ndu eswe.
- ⁵Yechikwaaru onye-eswe onu ehuka ehuka le mkpokoro opfu, o pfuru. Odumeka be oo-dobesukwa le ya maru iphe.
- ⁶Onye ezi onye-eswe ozi bu onwiya be o ribushi okpa. Teme o nodu akpataru onwiya opfu.
- ⁷Oo g'okpa atugbaa onye eniyeni lwakpalwakpa bu g'etu, onye eme eswe anma atu lwakpalwakpa.
- ⁸Akwabẹ onye-eswe ùbvù dukwa g'eye mkpuma le robo.
- ⁹Eka onye-eswe anma etu dukwa g'eka onye mee atsu akpa onwiya obvu, dzuru iya l'eka.
- ¹⁰Onye ekuje onye-eswe; ozoo onye aghata aghata g'o jeeru iya ozi dukwa g'onye ojogu, egudeje apfu iya meka onyemonye iphe.
- ¹¹Oo ge nkuta anwaje enwa laphu azu je erichaa ya-a bu g'onye eswe abujeru: o -mechaa rigbarigba l'o laphu azu je emephu iya azu.
- ¹²?I humaru onye arì le ya maru iphe? Onye ono be onye eme eswe kaepho mma.
- ¹³Onye enyiru suru l'oduma no le gbororo; l'oduma tsoru gbororo azo-phe.
- ¹⁴Oo ge mgbo anoduje aghaphu onwiya l'ariwa-a bu g'onye enyiru anoduje aghaphu onwiya l'iphe-azee ya.
- ¹⁵Onye enyiru abujeru: o -jee etsuta utara l'ophe; eka akwaa ya l'ochi. Enyiru te ekwedu iya g'o ye eka l'onu.
- ¹⁶Onye enyiru arije le ya maru iphe maghata umadzu esaa, maru eye onu l'opfu.
- ¹⁷Onye aghata aghata bya ahuma eka aaswo uswo bya eworu onwiya chie ya dukwa g'onye humaru nkuta bya aloa iya le nchi.
- ¹⁸O kwa g'onye obvu eme, agba apfu enwu oku phoophoophoo bya atu icheku-oku phuuphuuphu;
- ¹⁹bu g'o du mbu onye meru nemadzu ibiya mkpurukpuru-enya bya emechaa bya asu iya l'o kwa ebvu be ya ebvukoshi iya.
- ²⁰Nku -adudu l'oku; oku anyihu. Asulasu -adudu l'opfu; uswo anyihukwapho.

- ²¹Oo g'icheku aphunwu oku-uzu; bya aburu ge nku aphunwu oku mmanu bu g'onye opfu aphunwuje opfu.
- ²²Asulasu anoduje atso ntumatu. Otukoje iphe, bu ehu voo pfurupfuru.
- ²³Erengete opfu edomije okpoma mgbashi; egube nshi mkpola-ochaa etechije ite, a kpuru l'urwa-a.
- ²⁴Onye nemadzu du ashi egudeje opfu-onu domia onwiya. Ole o domiru ejo-iphe l'ime okpoma iya.
- ²⁵O -nodu epfukpoo opfu, atso ntumatu; b'eyekwaru iya onu; kele ejo-ahuma, no iya l'okpoma rwukwaru l'esaa.
- ²⁶Ashi, ndiphe du iya be oogudeje eregede domia. Ole ejo-iphe, oome be ee-mechaa tua too l'edzuzu-oha.
- ²⁷Onye ebu iduma bu iya e-mechaa daba iya. O buru onye eswi mkpuma be mkpuma ewephutaje azu bya eswipyabe.
- ²⁸Onye atuphu ire be akpoje ndu o mebyiru ehu ashi. Teme onu, enwu opfu enwunwu nodu emebyije iphe emebyi.

Etu 27

- ¹E kukwa onwongu ke l'owa-a iphe, ii-me echele; kele i ti madu iphe, mboku e-wota.
- ²Haa g'onye ozo jaa ngu ajaja. B'egudeshi onu ngu jaa onwongu. Haarū iya onye ozo; g'o to bushi gubedua l'onwongu.
- ³Mkpuma anyikwa erwa; teme eja buru oke-ivu. Obenu l'onye-eswe -kpatsu ngu iwe be o kakota iphe labo ono anyi erwa.
- ⁴Ehu-eghu te enweddu obu-imemini; ovuma nodu abya enari. Obenu ? bu onye adu ike apfuru l'iphu ijiyenya?
- ⁵Mba, a baru nemadzu le sagaa kakwa ree eme l'eye obu, e yeru le mpya.
- ⁶Onye gu l'iya du l'opfu -nmaa ngu akpa bukwa akpa eregede be o nmaru ngu. Obenu l'onya, onye gu l'iya eshi onya gburu ngu be ntucha adudu.
- ⁷Onye epho jiru be manū-enwu adujechakwaa eji. Obenu l'onye egu agu be iphe, atso ilu atukoje atsocha rengurengu.
- ⁸Onye gbeshiru l'ibe iya tugbua bya akpaphuhu dukwa g'enu, shi l'epfune iya phelihu phefu bya ephuaha uzo epfune iya obu.
- ⁹Manu eshi mkpo yee manū isensu, emeje g'obu nodu atso utso. Nokwapho g'akpo-zi uzo, shi l'eka onya nemadzu emeje; ehu akpo-vohu iya.
- ¹⁰B'ahakwa onye gu l'iya eshi onya; yee onye yee nna ngu eshi

ònyà. Ọphu i gbakwaru jeshia ibe nwune ngu nwoke me ejo iphe-ehuka dapfuta ngu. L'obutobu ngu, no ngu ntse kakwa ree eme le nwune ngu, bu ngu uzanya.

¹¹Manuru iphe; nwa mu; menaa g'obu kpo-vohu mu; k'ophu mu e-yeje onu yeru onye anma mu phulaphula.

¹²Onye nweru egomunggo ahumaje iphe, bu ejo-ememe domia onwiya. Obenu l'onye amazidu iphe anodujeepho eje dukuu dukuu g'ooje je ejee iphe-ehuka, no iya nu.

¹³Nemadzu -su l'oo onye o madu be ya a-noduru l'itumo; natakwa iya uwe iya. Gudeshikwaa ya me o -buru onye ohozo be o noru l'itumo obu.

¹⁴Amadu -gbeshi le nchi-abohu ara gbagbagba; l'eka ogo onu-oma anu obutobu iya be oo-dukwa g'o bu iphu be oophu iya.

¹⁵Nwanyi, anoduje abapheru ji iya mba; dukwa ge mini-odzeru, atu paapaa.

¹⁶Egbogbo iya dukwapho g'onye egbo pherephere g'o to zih. Ozo g'onye gude aka egbobuta man, alwa torotoro.

¹⁷Oo g'ikpegiri abaje igwe-a bu g'amadu abajeru okwenya nu ibe iya.

¹⁸Oo onye dzaru oshi figu erije akpuru, o mitaru. O buru onye eleta nnajuphu iya enya be okwabeje ubvu.

¹⁹Oo g'amadu eleje enya le mini huma onwiya iphu bu g'okpoma amadu egoshije ugbugba iya.

²⁰Epho te ejikwa ali-maa; ophu epho ejidu ali ola-l'iswi. Nokwapho g'epho te ejijedu enya l'iphe, oohumaje.

²¹Ite be e gude eghe mkpola-ochaa egheghe. E gude oku ahụ mkpola-ododo ama. Obenu l'amadu bu ajaja, aja iya be e gude ahụ iya ama.

²²O to dukwa m'obeta i tsua onye-eswe l'ikwe; mbu gude odzu gwee ya g'onye egwe ereshi; i tii mekwa g'o haa eme-eswe.

²³Makwaru l'i maru g'eku ngu gbaru okpobe amaru. Obu ngu adukwapho l'eka oka-eswi ngu du.

²⁴Kele iphe-enweru ta anojedu ojejoje. Ophu okpu-eze anojedu shi l'ogbo sweru ogbo l'ishi onye lanu.

²⁵E -kpofu akahu eswa, e shi gbutaru eku ngu; o bya erwua irwu ophu; a bya eje l'eli ubvu je egbua eswa ophu;

²⁶unwu-aturu ngu anuaha ngu uwe eye l'ehu; iireaha egbu ngu gude ereta iphe, ii-gude zu ali.

²⁷Ii-nweru era-eghu du shii, ii-gude azu onwongu gu le ndibe ngu; gude iya azu nwamgboko, gu l'iya bu ebubu.

Etu 28

- ¹Onye ẹjo-iphe anọduje agba ọso l'ẹbe adu onye achi iya nu. Obenu l'onye pfuberekoto esihuje obu ike g'oduma.
- ²Teke ndu bu le mkpukpu du njo be ndu abujeru ishi phe aduje igwerigwe. Obenu l'onye maru iphe; mbu onye iphe edoje enya -buru ishi; l'onoo odu.
- ³Onye akpa nri, anọduje eme ndu ukpa ewere dukwa g'ochioku mini, tukoru iphe, a kuru l'opfu kpota.
- ⁴Ndu jikaru eme iphe, a turu l'ekemu anọduje aja ndu ẹjo-iphe ajaja. Obenu le ndu eme iphe, a turu l'ekemu bu odu be epe etso ndu ẹjo-iphe.
- ⁵Ndu ẹjo-iphe be iphe, pfuru nhamunha te edojedu enya. Obenu le ndu achọ g'ephe maru Chipfu be oodoje enya doghee ya edoghe.
- ⁶Onye ukpa, te emetajedu iphe uta kakwa ree eme l'onye nweru iphe; ophu o mejekwanu iphe, pfuru oto.
- ⁷Nwa, emeje iphe, a turu l'ekemu bukwa nwa, maru iphe; obenu l'onye yee ndu ekpiri aswi oswi emetaje iphe-iphere kpube nna iya l'ishi.
- ⁸Onye gude ugwo-onwurunwa akpa eku bukwa onye aphuru ndu ukpa obu-imemini be ookpa eku obu edoberu.
- ⁹Onye jikaru le ya ta angabedu nchi l'ekemu be mbukponu epfufu, oopfu anu Chileke adujechaa g'o bu ebyi be oome.
- ¹⁰Onye dutaru onye obu iya guru iphoro je eshiaha ẹjo uzo bukwa l'onya ono, o gbaberu l'onwiya ono be oo-daba. Obenu l'onye ete emedu iphe, aata iya uta be e-keta okiphe, du ree.
- ¹¹Onye nweru iphe; edobesuje le ya maru iphe. Obenu l'onye bu onye ukpa; iphe nodu edoje iya enya enyovuje iya ime.
- ¹²Oobujeru; onye pfuberekoto
-nodu atu okoo; ehu atso-dzuru onyomonnye utso. Teke onye ẹjo-iphe nyibaru l'okwa; unwu-eliphe achoha eka epe e-domi onwophe.
- ¹³Onye edomi iphe-eji, o meru edomi be ta awafujekwa awafu. Obenu l'onye pfufutaru iphe, o meru; ophu o mebaeduru iya ozo be aaphujeru obu-imemini.
- ¹⁴Ehu-utso be a goru nu onye atsuje Chipfu ebvu. Obenu l'onye okpoma kporu gbengu adabajẹ l'ẹje iphe-ehuka.
- ¹⁵Onye ẹjo-iphe -buru eze ndu bu ndu ukpa; be o dukwa g'eka oduma asu ekiri; ozoo g'eka agu abya enari.
- ¹⁶Onye eze, duru ndibe iya ehuka te nwekwa egomunggo. Obenu l'onye, o du ashi; mbu eku, aakpa l'ugho be a-no ndzu ogologo.
- ¹⁷Onye gburu ochi; ochi ono gude iya be aghaphepho botorii jasu l'o nwuhu. Ophu o dukwa onye a-gbaru iya mkpu.

- ¹⁸Onye ụta adụdu lẹ ndzụ iya bẹ ta adụkwa iphe, byaru eme iya nụ. Obenu l'onye ụzo iya gberu nggọ akpọ-kwofuje akpọ-kwofu daa.
- ¹⁹Onye kọru alị iya bẹ nri adujeru. Obenu l'onye etso iphe-mmanụ bẹ a-kpashị nri ike.
- ²⁰Onye e gude ire iya ẹka bẹ onu-oma iya a-dụ igwerigwe. Obenu l'onye enweru iphe agunuka ẹgu bẹ ọ tọ dükwa iphe, e-me g'a ta nụ iya chiipfu.
- ²¹Abọ nemadzụ ẹbo ta adụkwa ree. Ọle nemadzụ emeswejele-a iphe l'opfu nri.
- ²²Onye ọkpoma mgbashị bẹ enweru iphe anọduje agụ ẹgu. Ọphu ọomajedu l'ọ-kpa-nri apfụ echeru iya.
- ²³Onye abarụ nemadzụ mba bẹ ee-mechaa ka emeru iphe-oma eme l'onye gude ire iya enwu opfu enwunwu.
- ²⁴Onye ana nna iya ọzoo ne iya nfu bya asụ l'ọ tọ dūduro ẹji; bẹ yee nwa mmebyi bukwa iphe lanụ.
- ²⁵Onye ughoro akpalije esemopfu. Obenu l'onye kporu obu yeru Chipfu bẹ ọo-ka aduru lẹ ree.
- ²⁶Onye kporu obu ye l'oriri onwiya bu onye mmanụ. Obenu l'onye gude egomunggo eme iphe ta adụdu iphe, byaru eme iya nụ.
- ²⁷Onye anuje onye akpa nri iphe bẹ ta adụkwa iphe, bya aduru iya ụko. Obenu l'onye ewofuje ẹnya g'ọ tọ hūma ndu ụkpa bẹ aatuje onu, dū igwerigwe.
- ²⁸Onye ẹjo-iphe -nyiba l'okwa; ndiphe achọo ụzo domishia onwophẹ. Teke ndu ẹjo-iphe lakwanuru l'iswi; ndu pfuberekoto aka shii eje.

Etu 29

- ¹Onye aabajeru mba tekenteke; ọ nọdu emerọ iphe, oome bẹ a -bya aji ẹnya birimu bẹ e mebyishiwaru iya. Ọphu eemekotabaedu iya emekota.
- ²Ndu pfuberekoto -nọdu aka shii eje bẹ ẹhu atsoje ndiphe uto. Teke onye ẹjo-iphe bu ishi; ndiphe atsuhaha pfuu.
- ³Onye yeru mmamiphe obu emeje g'ẹhu tso nna iya uto. Obenu l'onye yee unwanyi-ukpara aswi ọswi anọduje eripya ẹku iya.
- ⁴Onye eze, ekpeje ikpe, pfuru oto emeje g'alị iya pfuru pfushia ike. Obenu l'onye ẹnya uphalazu dū alakashije iya alakashị.
- ⁵Onye enwuru nemadzụ ibiya opfu enwunwu bu ugbu-egege bẹ oogeru iya g'ọ chie ọkpa.
- ⁶Onye njo bẹ iphe-ẹji, oome anmajẹ iya g'onyà. Obenu l'onye pfuberekoto anọduje agụ ebvu ete ẹswa.
- ⁷Onye pfuberekoto anọduje arị g'eeme kpeeru onye ụkpa ikpe, pfuru oto. Obenu l'onye ẹjo-iphe bẹ ẹgube iphe ono te erwudu l'ẹhu.

- ⁸Ndu mpfubyishi akpatajẹ ùtsú lẹ mkpukpu. Obenu lẹ ndu maru iphe abyanyije ẹhu-eghu.
- ⁹Onye maru iphe -kpuru onye-eswe eje l'ulo-ikpe bẹ onye-eswe obu a-nodule-a atu kwokwokwo aba mba eye iya; ophu nchi abyakwa adu doo.
- ¹⁰Ndu egbu ekere bẹ onye uta adudu lẹ ndzu iya aduje ashi; obenu lẹ ndu obu phe guru iphoro anoduje echekwa ndzu onye du nno.
- ¹¹Oo onye mmanu emegbuje g'o ghuru iya. Obenu l'onye maru iphe esedeje onwiya me ẹhu
-nodu eghu iya eghu.
- ¹²Onye bu ishi -nodu angaje nchi l'uka; iphe, bukpo ndu ejeru iya ozi abukotaerupho ndu ejo-iphe.
- ¹³Onye akpa nri yee onye akpa nemadzu ẹhu bẹ o duru iphe lanu, anwuje l'ehu ephenebo: Oo Chipfu agusaje ephenebo ono ẹnya.
- ¹⁴Onye eze -nodu egudeje ire-lanu ekpe ndu ukpa ikpe bẹ aba-eze iya e-keekwarupho jingujingu g'o keru.
- ¹⁵Echachi, e gude ahụ nwa ahụhụ emeje ge nwata maru iphe. Obenu lẹ nwata, a haru ẹka emeje ne iya iphe-iphere.
- ¹⁶Ndu ejo-iphe -nodu aka shii eje; iphe-iji akakwapho shii eje. Obenu lẹ ndu pfuberekoto e-gude ẹnya huma teke epe a-nodu ada.
- ¹⁷Hua nwa ngu ahụhụ huma l'oo-me g'ehu du ngu guu. Oo-me g'obu tsohu ngu rikpotoo.
- ¹⁸Eka ophulanya adudu bẹ onyemonye anoduje eme g'o du iya. Obenu l'onye eme iphe, a turu l'ekemu bẹ bu onye e keberu l'oma.
- ¹⁹Ohu ta abuledaa opfu-onu bẹ e gude ezi iya iphe; kele o -dochakpo ya nu ẹnya bẹ o too yekpodanu onu.
- ²⁰? I humaru onye awoje opfu kpokokongu? Onye ono bẹ eelekwa ẹnya l'onye-eswe bẹ a-gbekwanu ka akukuta-iphe eme lẹ yebedua.
- ²¹Nwoke -swanukaru onye-ozu iya aswaru; l'o nua ya aphu l'ikpazu iya.
- ²²Onye ẹhu eghu akpatsuje nseka. Teme onye obu-oku nodu emeje iphe-iji, du igwerigwe.
- ²³Amadu -kuahaa onwiya; l'o woze iya ali. Obenu l'onye wozeru onwiya ali bẹ aakwabeje ubvu shii.
- ²⁴Onye yee onye-oshi emegbaa bukwa ohogu onwiya. Oo-numa ẹka eri nte; ole o to dudu iphe, oopfu.

²⁵Atsu nemadzu ebvu bu onya be ogbabeje. Obenu l'onye bu onye kporu obu yeru Chipfu ta adudu iphe, byaru eme iya nu.

²⁶Aadu je igwerigwe achọ g'onye-ishi meeru phe iphe-oma; obenu l'onye ekpejeru nemadzu ikpe, pfuru oto be bu Chipfu.

²⁷Onye pfuberekoto be onye apfubeduru aka oto aduje ashi. Onye obu guru iphoro nodu adujekwanu onye ejo-iphe ashi.

Etu 30

¹Owaa bu opfu-onu Aguru, bu nwa Jiake; ozi, Chipfu ziru iya: Nwoke ono pfuru iya Itiyelu; mbu l'o pfuru iya Itiyelu pfuaru iya Ukalu su:

²O kwa mu kachaa b'a ama iphe l'iphe, bukpo unwoke. Egomunggo nemadzu ta adukwa mu l'ehu.

³Mmamiphe be mu ta nwukpodaaru ilile. Ophu mu amadu Onye nsọ ono amama ophu.

⁴? Bu onye bahujewaru l'imigwe; bya eshi iya lwazeta? ? Bu onye gudejewa aka kpokobe pherephere? ? Bu onye gudejewa uwe iya kechia mini mini, nogbaa nu? ? Bu onye meru g'aka mgboko l'ophu beru kpo g'abara? ? Epha onye ono bu gunu? ? Bu gunu be nwa iya aza? Kanuru mu iya me o -buru l'i maru iya.

⁵Opfu Chileke l'ophu l'ophu dokwaru risaa. Teme o buru onye egbobutaje iphe, bukpo ndu gbabarụ l'ime iya je anodu eze ndu.

⁶B'e yekwakwa iphe l'opfu iya. Odumeka be o-bakwaru ngu mba goshi oha l'i bu onye adzue aka.

⁷Iphe labo be mu akpa ngu ishi iya jiko Chipfu. Mekwaaru mu iya jiko teme mu anwuhu.

⁸Mena ge atukporoko yee adzu aka nodu mu enya. B'emekwa ge mu kpaa nri; ophu i mekwa ge mu nweru iphe. Iphe, ii-nuje mu pho bu nri, asuje mu eriri mboku-mboku.

⁹Odumeka be mu e-nwenkakwaru iphe shi nno jika ngu: pfuahaa su: ? Bu onye bu Chipfu obu? Ozoo le mu jeru je akpanuka nri; je ezia iphuru; shi nno mebyia epha Chileke mu.

¹⁰Ta anodukwa l'iphu nnajiuphu pfubyishia onye-ozu iya. Odumeka be o-tukwa ngu onu, a-vuru ngu nu.

¹¹O nwekwaru ndu anoduje ephu nna phe iphu. Ophu epe agojedu onu-oma anu ne phe.

¹²Mbu ndu duebe ree l'enya nkephe. Ole a ta safukwaru phe ideyideyi, epe du.

¹³Ndu anoduje avoru nemadzu enya; bya elephuje nemadzu ibe phe.

- ¹⁴Eze, dū phẹ l'onu bụ ogu-echi; Iphe, doru phẹ joo l'onu buru okarara, ephe e-gude tuko ndu ukpa tagbushikota g'ephe bvụ l'eliphe; tuko ndu adudu g'ọ dū phẹ lwua g'ephe ta phodu l'echilabo ndu no ndzu.
- ¹⁵Etu-uda nwutaru unwumboko labo. O buru iphe, ephe anodujeepho ara mkpurumkpuru bu: Nu mu! Nu mu! Mbụ l'o nweru iphe eto, ephe te ejijedu ejiji; mbụ iphe eno, teke asuswee: O jiwaru mu!
- ¹⁶Mbụ ali-maa; yee ephe nwanyi, ta atsudu ime; yee ali; kele ali teke angunyadaa mini bya asu le ya ta anguedu; waa oku, enwu enwunwu; oku, enwu enwunwu teke anonyakpoo bya asu: O jiwaru mu!
- ¹⁷Onye asu nna iya enya ruu; ophu o kpadu ishi eme iphe, ne iya suru g'o mee be okpoko-ohà e-shi le wukirima bya aguta enya onye obu. O buru udele l'e-ri iya.
- ¹⁸O duru iphe eto, dū mu oke biribiri; mbụ iphe eno, te edokpodaru mu enya edodo ophu:
- ¹⁹uzo ugo l'akpaminigwe; waa uzo agwo l'eli mkpuma; waa uzo ugbo-mini l'eze-enyimu; yele uzo nwoke waa nwamgboko.
- ²⁰Waa ge nwanyi ovuoba emeje iya baa: Oorije nri woru onu huchachaa; su: O to dukwa iphe, dū eji, mu meru.
- ²¹O duru iphe eto, mgboko l'ophu anoduje le mkpula anma jijijijii; mbụ l'o duru mkpula iphe eno, mgboko ta adukpodaa ike apfuru apfuru ophu.
- ²²Mbụ le nwata-ozu phelihuru bya aburu onye eze; waa l'onye-eswe wafuru bya enweru nri;
- ²³nwanyi, a kporu ashi, luru ji; ozoo nwamgboko, yee nemadzu bu; o kapyabe onye obu enya.
- ²⁴O duru iphe eno, dū l'eliphe, ha nwanshii; ole ephe mashiru iphe ike.
- ²⁵Ndada bu iphe, e meru dobe l'eliphe; ophu ike aduzidu iya; ole ephe akwaje nri l'onanwu dobe, ephe e-ri l'udzumini.
- ²⁶Nchi-ogba bu iphe, e meru dobe l'eliphe; ophu okpehu aduzidu iya; ole ephe ebvuje agbara-mkpuma dozia buru.
- ²⁷Igube te enweddu onye-eze; ole ephe anoduje ephe l'ogbo l'ogbo.
- ²⁸Ngwere ta adudu m'obataru o buru aka be egude achu iya; ophu egude iya; ole onodujechaa nodu l'oke-unuphu ibe eze.
- ²⁹O duru iphe eto, anoduje agu ije ogu; mbụ l'o duru iphe eno, ije iya dushi ree ike.
- ³⁰Oduma bu iya kachaa okpehu l'iphe, bu anu; ophu o dudu anu, oogbaru oso.
- ³¹Ozo bu oke-oku, azo pfukangu pfukangu; mkpi; yee onye eze yee ndu ojogu iya, no-pheru iya mgburugburu.

³²Ọ -buru l'i shi mewaa iphe onye-eswe; mbụ l'i shi ekutse onwongu; ọzoo l'ọ duru idzu ejo-iphe, i shi chiwaa; dekwaa ẹka l'ọnu!

³³Kele ọo g'a pyije ẹra-eswi meta iya manụ-a; ọ buru g'ọ bujeru; a -swikpoo imi aswikpo l'ọ lwaa mee-a bụ g'ọ bujeru; a -kpatsu ẹhu-eghu; opfu abya.

Ètu 31

Opfu-ọnu onye eze ono, bụ Lemelu

¹Ọwa-a bụ opfu-ọnu onye eze ono, bụ Lemelu. Ọ bụ ozi, ne iya ziru iya:

²Gube nwa mu; gube nwa, mu tsuru ime iya; nwa, mu kwetaru l'ukwe-iphe;

³b'a pakwaru ike ngu l'ophu ziaru eme k'unwanyị! Te ewokwaru okpemu ngu hagbuaru ndu ono, emebyije ndu eze onoya.

⁴Jiko Lemelu; ge ndu eze ta angujekwa mee. Mbụ l'angu mee ta abukwa iphe, rwuberu ndu eze. Mbụ ke ge ndu-ishi wata angu mee, l'atsụ atsutsu ta adukwa ree.

⁵A -nonyaa; ẹphe ngua mee zoha iphe, ekemu pfuru; woru ikpe, rwuberu onye eemekpa ẹhu gbanwee.

⁶Woru mee, atsụ atsutsu nụ ndu ala l'iswi. Woru mee nụ ndu aphụ tsoru;

⁷g'ẹphe ngua zohaa ọ-kpa-nri phe; mbụ zohaa ejo onodu, ẹphe no.

⁸“Pfuje opfu ẹhu ndu ono, ata dudu ike pfua opfu ẹhu onwophe ono. Dzoje iphe, rwuberu ndu bụ unwu-ogbee.

⁹Pfuje iphe, rwuberu ngu l'epfufu; l'i kpeje ikpe nhamunha. Gbajeru ndu iphe-ehuka byaru; yee ndu adudu g'ọ du phe odzori.”

Nwanyị, umere iya du ree

¹⁰? Bụ onye a-dukpoo ike chota; okpobe nwanyị? Egube nwanyị ono kakwa mkpuma, vu oke aswa ere ire.

¹¹Ji, alu iya nụ gude ire iya ẹka; ophu ọ dudu okpobe iphe, uko iya duru iya.

¹²Iphe, oowotajeru ji iya bụ iphe-oma; ọ to budu ejo-iphe; mbụ ge nwanyị ono a-ọberu l'eliphe-a.

¹³Ẹji ebili yee oghu ocha bẹ ohoje aho ho hota; gude ẹka iya jee ya ozi l'oohe iya ihee ejeje.

¹⁴Ọ du g'ugbo-mini ogbangho; kele oojeje ẹka du ẹnya je akpata nri.

¹⁵Teke ootehuje le mgbenya bụ le geregere utsu mee nri doberu ndibe iya; bya anukwapho unwumboko, ẹphe l'iya bu oke iya nkephe.

¹⁶Alị bẹ oolerwejeada ẹnya elerwe teme l'oozujee iya. Ọ nodu egudeje nwa okpoga, erwuje iya ẹka gbaa opfu-vayinu.

¹⁷Ọ -gbeshi eje ozi l'ogbakpoo ẹhu jeshia ya ike. Ẹka eshihujee iya ike l'ozii.

- 18Ngho, oogba be oogbaje iya rita iya urwu. Ophu oroku iya anyihudu anyihu l'enyashi.
- 19Oo gudeje aka iya gbaa oghu gude kpaaru onwiya ekwa.
- 20Oosajeru ndu akpa nri aka iphe-oma; mbu le ndu adudu g'o du phe be oomejeru iphe-oma.
- 21Igwe -nodu atu akamini-sunoo; o too tsudu ebvu ke ? amaru; to dudu nu iphe, oome ndibe iya? kele onyemonye le ge ndibe iya ha be yekotaru uwe-oyi.
- 22Oogudeje aka iya kwee ekwa, oophushije l'iphe, ephe azeje aze. Teme uwe iya buru okpobe ekwa ocha yee k'uswe-uswe.
- 23Ji iya be aakwabeje ubvu l'edupfu me o -nodu l'edzudu-oha ndu bu ogerenya mkpukpu.
- 24Oogudeje aka iya kwee uwe ekwa ocha ereshi ereshi. O buru iya evujeru ndu agba ngho iphe, eekebeje l'upfu.
- 25Okpehu yee adu ubvu be o yeru g'onye yeru uwe. K'ophu bu l'e -mecha be oomecha nwujaa onu-ochi.
- 26Oogudeje mmamiphe epfu opfu. Teme ire nodu apfujeru iya oto me o -nodu ezi iphe.
- 27Ndibe iya be ooswijeru eswiru eleta phe enya. Ophu oorijedu nri meahaa enyiru.
- 28Unwegirima iya etehuje kua ya onye a goru ehutu nu. Ji iya nodu ekukwa iya pho nno; teme o nodu anoduje aja iya ajaja.
- 29“Unwanyi, du igwerigwe emejekwa eguru iphe, du igwerigwe. Ole oo ngu kachaa ememe!”
- 30Onmogo bukwa ughoshi. Teme ama roroo buru iphe-mmanu. Obenu le nwanyi, atsu Chipfu ebvu be gbaru g'a jaa ya ajaja;
- 31bua ya obunggo, rwuberu iya nu. Mbu-a; g'ozi, o gude aka iya eje mekwaa g'e tua ya epha l'oma edupfu.

Oziphe

Oziphe 1

- ¹Ọwa-a bụ olu O-zì-iphe; mbụ nwa Dévidi, bụ eze ọ Jierúsalemu.
- ²O-zì-iphe suru-a: “Iphe-mmanụ yee iphe-mmanụ bụ iphe-mmanụ! Iphemiphe tukuru buru iphe-mmanụ!”
- ³? Bụ urwu gunu be nemadzu erita l'iphe, bukpo akanya, oosegbu onwiya ọ mkpula enyanwu-a?
- ⁴Oobujeru; ogbo ọwa -futa l'ọ nọ jasụ l'ọ bvụ. Ogbo ọzo afutakwa bya anọ jasụ l'ọ bvukwapho. Obenu ọ mgboko-a anọdujeepo g'ọ nọ.
- ⁵Enyanwu awaje chia nyihu; gbaru kparakpara; gbaphu azu l'eka ooshije waa.
- ⁶Pherephere -zita l'ọ ziru laa ndohali; ziru laa isheli; ziphee mgburugburu mgburugburu; ziru laphu azu l'ibiya ophu o shi wata ezizi.
- ⁷Nggele l'ophu asokota asoba l'enyimu. Oe enyimu te ejidu ejiji. O buru eka nggele shi asofutagbaa be ooso-phukwapho azu.
- ⁸Iphemiphe tuko tufukotawa ehu; k'ophu onu amaedu g'oo-pfu iya. Enya ta aphunyadaa uzo l'ọ su ọ ya huma-ghewaru; ophu nchi anunyadaa iphe l'ọ su ọ ya nujiwaru.
- ⁹Iphe, shi du nu bu iphe, e-mechaa du nu. O buru iphe, e mehawaru be ee-mephu azu; k'ophu bu l'ọ to dudu iphe, bu iphe ophuú ọ mkpula enyanwu-a.
- ¹⁰? O duru iphe, du nu, nemadzu a-su g'e lenu; l'iphe ọwa-a bukwa iphe ophuú? Iphe ono dujehaakwa uzanya uzanya. O dujehawa teme o rwua l'ogbo k'anyi.
- ¹¹Iphe, gbahawaru nu be a ta nyataeduru; teme ophu e-mechaa du nu be ogbo ophu e-mechaa tsota iya nu ta anyatakwapo.

Mmamiphe bu iphe-mmanu

- ¹²Su-a; mbedua, bu O-zì-iphe-a shi buru ọ Jierúsalemu buru eze ndu Izurelu.
- ¹³Mu woru okpoma zia l'egude mmamiphe choo mekpoo nwua iphemiphe, eemekpo ọ mkpula igwe-a. O buepho l'oo akanya aphu be Chileke meru g'unwu-eliphe seje.
- ¹⁴Mu lewaru enya l'iphemiphe, eeme ọ mkpula enyanwu-a bya ahuma l'ọ tuko buru iphe-mmanu; bya aburu achi pherephere oso.
- ¹⁵Iphe, gberu nggo be e tee mekotaekwa g'ọ pfuru nhamunha; ophu aagujedu iphe, adudu adudu ophu l'ogu.
- ¹⁶Mu bya aria l'ime obu mu su ọ mmamiphe be mu makpooru shii; mbu maghata iphe, bukpo ndu vuhawa mu uzo buru eze ọ Jierúsalemu. O to dukpoda ge mmamiphe; yee nkwenya jeru iya, mu atukoadaru mafushichaa.

¹⁷Mu bya eyemia ishi l'eme ge mmamiphe doo mu enya; bya emekwapho g'eme beebabee doo mu enya; waa eme eswe. Obenu l'iphe, mu nwutaru bu l'iphemiphe onoya bu achi pherephere oso;

¹⁸kele oke mmamiphe be oke nggumaphu tso l'azu; mbu le nemadzu -nodu aka amaru iphe; iphe, a-nodu akpatsu iya aphu aka shii.

Oziphe 2

Ehu-utso bu iphe-mmanu

¹Mu bya aria l'ime obu mu su: “Ge mu bya ahueshikwa ehu-utso ama ge mu maekwaru g'ootso-be utso.” E mecha; mu humakwapho l'ono bukwaphe iphe-mmanu.

²Achi ochi be mu humaru l'oo iphe-eswe; teme ? o duru urwu, amadu e-rita l'ehu-utso to?

³Mu bya eyemia ishi l'angu me; gude iya duha onwomu obu; ge mu eshi nno nmata eme eswe akpa. Ole mmamiphe mu meleru-a; mu maru iphe, mu eme; k'ophu mu eshi l'eka ono maru iphe, gbaru nemadzu l'ememe le nwujiku olemole, epe a-no le mkpula igwe-a.

⁴Mu bya eyemia ishi l'oke akanya. Mu bya akpushiaru onwomu ulo; bya agbashiaru onwomu opfu-vayinu.

⁵Mu bya agbashia mgbabu; bya akpushia eka atuta iphoro ye iya; bya eshi ishi lanu yeshia oshi-omi, dugbaa l'udu iya l'udu iya l'ime iya.

⁶Mu bya atushia okpuru, ee-gudeje agba mini l'oshi, mu yeshiru eyeshi.

⁷Mu bya agbashia ohu; unwoke me unwanyi; teme a nodu anwushikwaru mu pho ohu l'unuphu. Mu nwekwarupho eswi; nweru aturu; me egu; mbu nweru iphe-edobe, kakota iphe, ndu vuhawaa mu uzo buru eze le Jierusalem nwejeru shii.

⁸Mu bya akpaaru onwomu eku mkpola-ochaa waa mkpola-ododo; mekpoo eku, shi l'eka ndu eze; waa ndu ohozo. Mu bya aho ogo ebvu; unwanyi me unwoke; bya edophee onwomu unwanyi, bu ndu emeje g'ehu tso unwoke utso.

⁹Tobudu iya bu; mu bya enweru iphe, kakota iphe, ndu vuhawaa mu uzo buru eze le Jierusalem shi nweru. Mu ha shii egube ono; bya egudeekwapho mmamiphe mu ge mu gude iya.

¹⁰Ophu o dudu iphe, enya mu humaru; o gu mu egu, mu ahaje; ophu o dukwapho iphe, emeje g'ehu tso obu mu utso, mu haju ememe. Akanya, mu esekpo esese be emeje g'obu tso mu utso. O buru iphe ono bu urwu, mu ritaru iya.

¹¹Ole o bu; teke mu byaru bya egbu igo l'iphemiphe ono, mu gude eka mu mekota ono; mbukpoo iphe ono, mu sekotaru akanya iya ono; mu maru l'iphemiphe ono bukota iphe-mmanu yee achi pherephere oso; l'o to dudu urwu, nemadzu ritaru le mkpula enyanwu-a.

- 12Tobudu iya bu; mu bya eworu egomunggo mu zia l'ari ke mmamiphe; yee obvu-ememe; yee eme eswe. Mbua; ? buba gunu be onye a-no-tsota eze e-mebaa, a-ka ophu o mewaru?
- 13Mu bya ahuma le mmamiphe ka eme eswe ree; egube ono, iphoro ka ochii ree ono.
- 14L'onye maru iphe gude enya aphu uzo; obenu l'onye-eswe anoduje erwu ije orwu l'ishi. Mu humakwanu l'ephenebo ono a-tuko laa l'ite lanu. L'oo iphe, meru onye mmamiphe bukwapho iphe, e-me onye-eswe.
- 15Mu bya aria l'ime obu mu su: "Iphe-a, meru onye-eswe-a l'e-mechakwaa mee mbedua. ? Buhunu gunu be mu ritaru l'abubu, mu bu onye maru iphe?" Mu byakwa aria l'ime okpoma mu su: "Iphemiphe-a tukokwarupho buru iphe-mmanu."
- 16Noo l'oo g'oo-du onye mmamiphe bukwapho g'oo-du onye-eswe. O to dudu g'aa-no-beru l'a nyatabuhu onye maru iphe; ophu o dukwapho g'aa-no-beru l'a nyatabuhukwapho onye-eswe. Mu bya ahumakwapho l'e -rwua l'ataphu be aa-tuko g'ephe ha zohakota azoha. L'oo g'anwuhu e-gbu onye maru iphe bu g'oo-gbu onye-eswe.
- 17Noo g'o gude ndzu du mu ashi; kele iphemiphe, eeme le mkpula enyanwu-a bukota mu mkpatsu-aphu. G'o ha tukoru bukotaru mu iphe-mmanu buru achi pherephere oso.
- 18Iphemiphe, mu seru akanya iya l'eliphe-a bya adukota mu ashi; eshinu mu e-mechaa haaru iya onye a-no-tsota mu nu;
- 19lebe ama onye obu ? oo-buru onye maru iphe too onye-eswe? Ole oo onye ono, a-no-tsota mu nu ono e-nweru iphemiphe ono, mu deru enya le mini see akanya iya l'eliphe-a ono. Iphemiphe ono tukokwarupho buru iphe-mmanu.
- 20Mu bya ataaha onwomu uta su: ? Bunaan gunu be mu gudekpoo seahaa akanya esese ophu kpole le mkpula enyanwu-a?
- 21Le nemadzu e-gude mmamiphe iya yee nkwananya iya seebekpoo akanya; see erengete iya; l'o woru iphemiphe ono, o nweru ono haaru onye eriduru aphu iya. Mu bya elee iphe ono enya huma l'o bu iphe-mmanu; bya aburu ejo-ememe.
- 22Mbua; ? bu gunu be nemadzu eseta l'akanya; yee photophoto, ooku gude erigbu onwiya l'aphu ozi, ooje le mkpula enyanwu-a?
- 23Kele anono, o no ndzu l'ophu be o nokota iya eje iphe-ehuka; ozi, ooje nodu abujeru aphu duru iya; o -be l'enyasi; egomunggo ta anodudu iya l'eka lanu. Su-a; iphemiphe ono tukokwaru buru iphe-mmanu.
- 24Oo ya bu l'iphe, ka ree bu ge nemadzu riye g'o du iya; nguje g'o du iya; akanya, oose eji iya epho; kele ono be mu humaru l'o shi l'eka Chileke.
- 25Kele-a; Chileke ta adu; ? bu onye gege erije nri? Too ? bu onye be ehugge atsoje utso?

²⁶Kele Chileke emeje g'onye du iya l'obu buru onye maru iphe; kwaa enya; teme ehu atsoje iya utso. Obenu l'onye iphe-eji be olojeru iphu ye l'akpa eku kuberu onye du Chileke l'obu. Onoya bukwarupho iphe-mmanu bya aburu achi pherephere oso.

Oziphe 3

Iphemiphe nweru teke emeje iya

¹Iphemiphe nwekwaru teke eemeje iya; mbu l'iphemiphe, eeme ememe nweru teke eemeje iya le mkpula igwe-a.

²Teke aanwu nemadzu anwunwu du; teke aanwuhu anwuhu dukwapho. Teke eemebe iphe l'ali du; teke aakpata iphe, e meberu l'ali akpata dukwapho.

³Teke eeme g'a nwuhu anwuhu du; teke eeme g'a ka mma l'iphe-ememe dukwapho. Teke eetsukposhi etsukposhi du; teke aakpu-li akpu-li dukwapho.

⁴Teke aara ekwa du; teke aachi ochi dukwapho. Teke aagu aphu du; teke eete ebvu dukwapho.

⁵Teke eetuphashi mkpuma etuphashi du; teke aatutukobe mkpuma atutukobe dukwapho. Teke aanma akpa du; teke eesela onwonye azu dukwapho.

⁶Teke aachọ iphe achocho du; teke aami enya l'iphe dukwapho. Teke aakwakobe iphe akwakobe du; teke eetupha iphe etupha dukwapho.

⁷Teke aalajashi iphe alajashi du; teke aagbakwa iphe agbakwa dukwapho. Teke aanodu ngguingguji du; teke eeye onu l'opfu dukwapho.

⁸Teke eeye obu du; teke aadu ashı dukwapho. Teke aalwu ogu du; teke nchi-adu-doo dukwapho.

⁹? Bu gunu be onye akanya erita l'akanya, oose?

¹⁰Mu humawaru ivu, Chileke boru ndiphe.

¹¹O deru enya le mini mee iphemiphe; o nodu l'oge iya. O bya emee amadu g'o rije k'ojeje. Ole amadu ta adudu ike maerberu iphe, Chileke meru e -shi l'ishi jeye l'eka o bvuru.

¹²Ophu mu maru bu l'o to dudu iphe, kabaru amadu ree; abudu g'ehu tsoje iya utso; l'oome iphe, du ree teke o no ndzu.

¹³G'onnyemonye rije g'o du iya nguje g'o du iya; akanya, oose eji iya epho. Oo ono bu iphe-oma, Chileke eme.

¹⁴Iphe, mu maru bu l'iphemiphe, Chileke eme a-no ojeje. O to dudu iphe, ee-yekwa iya eyekwa; ophu o dudu iphe, ee-wofu iya ewofu. Iphe, o gude mee ya nno bu g'amadu humaje iya tsua yebe Chileke ebvu.

¹⁵L'iphemiphe, du nu shikpo duhawaa. Iphe, l'e-mechaa du nu shikwapho duhawaa. O buru Chileke e-me g'a nyata iphe, a zoharu azoha.

Ejo-ememe, jiru mgboko

¹⁶Mu byakwa ahuma iphe ozo le mkpula enyanwu-a: L'eka e gege anodu kpee ikpe, pfuru nhamunha be a gbę nodu eme ejo-iphe; eka e gege anodu eme iphe, pfuru oto be a nokwapho eme ejo-iphe.

¹⁷Mu bya aria l'ime obu mu su: "Chileke e-mechakwaa tuko ndu pfuberekoto me ndu ejo-iphe kpee ikpe; kele iphemiphe nweru ogę; mbu l'iphemiphe, eeme ememe nweru ogę teke eemeje iya."

¹⁸Mu byakwa aria ozo su: "Chileke ahujekwa nemadzu ama gude goshi phe l'ephe l'anu-egbudu bu iphe lanu.

¹⁹Oo iphe, eme nemadzu emekwapho anu-egbudu; mbu l'oo iphe, swiru anu-egbudu swiru nemadzu. Oo g'onwu egbu ophuu bu g'oogbu ophuu; o buru g'ophuu atu unme bu g'ophuu atu. O to dudu iphe, nemadzu nweru gude ka anu-egbudu. Iphemiphe tukoru buru iphe-mmanu.

²⁰G'ephe ha tukoru ala eka lanu. G'ephe ha tuko shi l'eja; o buru l'eja be ephe tukoru ala.

²¹? Bu onye maru me maa nemadzu alajepho l'eli eviya; k'anu-egbudu nodu alaje l'ali?"

²²Mu huma l'o to dudu iphe, kabaru nemadzu ree, abudu g'akanya, oose tso iya utso; kele owa iya bu okiphe iya. Kele-a; ? bu onye suru iya eduphu azu g'o bya ahuma iphe, l'e-mechaa nwua l'okotazu iya?

Oziphe 4

¹Mu byakwa elee enya bya ahuma mkpawere, dugbaa le mkpula enyanwu-a. Mu bya ahuma enya-mini ndu eeme mkpawere; l'ebe ephe enwe onye gberuma. Teme ndu ono, eme phe ewere ono nwekwarupho iphe, bu agbaru-ike phe; obenu ephebedua te nwedu onye asu phe gberuma.

²Mu su le ndu onwu gbuwaru, bu iya bu ndu ophu nwuhuwaru anwuhu; be eh u kakwa utso eme le ndu nokwadu ndu nta-a.

³Ole onye ophu eh u-utso nkiya ka k'umadzu labo ono shii bu onye ophu e teke anwukpodanu anwunwu ophu; mbu onye ophu teke ahumakpodanu ejo-iphe, eeme le mkpula enyanwu-a ahuma ophu.

⁴Noo ya; mu bya ahuma l'akanya, eesekpo esese; me ophu e setawaru eseta bu eka o shikota bu l'ekoru nwibe onye okophoo. Onoya bukwapho iphe-mmanu; bya aburu achi pherephere oso.

⁵Onye eswe achijeru eka ye l'iphu utapfu bya eria onwiya la ke mmanu.

⁶Ole o bu; o kakwa ree l'e nweru iphe, jiru mkpoji-eka lanu; eh u du onye obu guu; eme l'a chiru eka kwee l'akanya; eme g'eka labo ji, bu iphe, tukoru buru achi pherephere oso.

⁷Mu byakwa ahuma iphe-mmanu ozo, du le mkpula enyanwu-a.

⁸O duru nwoke, bu nkinyi, enwedu nwa nwoke; ophu o nwedu nwune nwoke. O nodu anoduje ese akanya mkpurumkpuru. Ophu eku, o kpataru ejijedu iya epho ejiji. Ophu o teke aji-swee onwiya su: “? Bunaa onye be mu eseru akanya-a? ? Bunaa gunu be mu anashinaa onwomu ehu-utso egube-a?” Iphe, du nno bukwa iphe-mmanu; bya aburu nsegbu akanya.

⁹Adu ebo kakwa ree eme l'aswi nkinyi onye; kele umadzu labo a-kakwa onye lanu eseta iphe.

¹⁰Noo le teke onye lanu daru iko; onye ophuu akwo-lia ya. Obenu l'onye daru nu; ophu o nwedu onye kwo-lia ya dukwa k'ayoru oshi.

¹¹Ozoo bu l'umadzu labo -zee l'oshi be oyi ta atsudu phe. Obenu l'o -buru onye lanu; ? denu g'ee-shi g'oyi ba nodu atsua iya?

¹²Onye lanu be eemekpejekwa. Obenu ? a du ebo ebe aakpa onye? Teme okpukpu, a chiru eto eto swia be agbabu iya ta adukwa nphe.

¹³Nwokorobya, enwedu iphe bya amaru iphe kakwa ree eme l'onye eze, nweru iphe bya aburu onye-eswe; buru opfu nkiya anu nkiya;

¹⁴m'obeta nwokorobya ono shi l'oka-mkporo; ozoo l'unuphu ndu akpa nri futu bya abahu l'okwa eze iya.

¹⁵Mu bya elee enya huma g'onymonye, no ndzu le mkpula enyanwu-a wufutaru je awu-tsoru nwokorobya ono; mbu onye eeme g'e gude dochia enya nwoke ono, nweru iphe ono.

¹⁶Ndu wu-tsoru nwokorobya ono bukwa aguta aguta. Obenu l'ogbo ophu e-mechaa bya nu ta abyadu ekwe l'o duru iphe, nwokorobya ono metakporu emeta ililekporo. Ono bukwa iphe-mmanu; bya aburu achi pherephere oso.

Oziphe 5

Eri angu bu iphe-mmanu

¹Makwaru g'i gude eje ije me i nodu abahu l'eze-ulo Chileke. L'i jeru angabe nchi l'iphe, eepfu kakwa ree eme l'i jeru egwe eja onye-eswe; kele ndu eswe ta amajekwaru l'oo iphe-eji be ephe eme nno.

²G'ire ba atsunukakwa ngu nko; ophu okpoma anodukwa etsu ngu gbudugbudu k'epfukebe opfu l'iphu Chileke; kele Chileke nokwa l'igwe; gubedua nodu l'eliphe-a; noo g'o gude opfu je alwa ngu ali l'onu!

³Oo g'arwoje nrwo me oriri paa eka-a bu ge mkpokoro opfu apaje eka me e pfunuka opfu igwerigwe.

⁴I -kwee ukwe emeru Chileke iphe; ba nokwa odu ememe iya; kele umere onye-eswe ta adujekwa Chileke ree.

⁵O kakwa ree mę i ribuduru angu eme iphe ililekpoo; eme l'i rifuru angu ememe iya; e mechaa ophu i meeduru iya g'i pfuru.

⁶G'o to bukwa iphe, i pfutaru l'onu e-duba ngu l'eme iphe-eji. Ophu i sukwa onye eje ozi l'eze-ulo Chileke l'iphe ono, i rifuru angu iya ono be i ti madu teke i pfuru iya. Odumeka be ii-gudekwa onu pfuta iphe, e-ghu Chileke egu; l'o mebyishia eguru iphe, i shihawaa mee.

⁷Mbu-a; arwo ikpoto nrwo; yee epfu ikpoto opfu tukokwaru buru iphe-mmanu. Oo ya bu le-a; tsujeepho Chileke ebvu.

Ēku bu iphe-mmanu

⁸O -duru eka i no; i huma l'e me ndu ukpa ewere l'eka ono; k'ophu bu l'e te kpejedu phe ikpe, pfuru oto; ophu e mejeduru nemadzu iphe, rwuberu iya nu; g'o to dukwa ngu biribiri; kele onye ha shii be onye ozo, ka iya shii arajekwaru akpuru-enya; teme l'o dukwarupho ndu ozo, akaje ephenebo ono shii.

⁹Iphe, e meberu l'egu be onyemonye atukojekwa keta oke l'urwu, du iya nu; teme onye eze nodu eritajekwapho urwu l'iphe, a kpataru l'egu.

¹⁰Onye yeru enya l'okpoga be okpoga te ejijekwa epho. Ophu urwu ejijedu onye yeru enya l'akpa eku ejiji. Ono bukwapho iphe-mmanu.

¹¹Ēku -nodu abya; ndu e-ri iya nu abyakwapho. ? Bukwanu gunu be onye nwe iya nu erita iya; abudu g'o le iya l'enya?

¹²Onye ese akanya be mgbenya atsojekwa utso; ? me o riru nri shii; ? me o riru nwanshii. Obenu l'oke eku, onye nweru iphe kparu arwuje iya mgbenya.

¹³O duru akpamara, mu humaru le mkpula enyanwu-a. L'eku be onye nwe iya nu kparu dobe g'o gburwashii iya ehu.

¹⁴A nonyaa uburu bya ebuta nwoke ono; eku iya ono laa l'iswi; ophu o dudu eku iya ono ophu o doberu nwa iya; kele o bvueberu.

¹⁵O kwa g'o du teke o shi l'epho ne iya bu g'oo-du laa; mbu l'o gba eka teke o byaru; ophu o dudu akanya ono, oose ono, duru ophu oo-gude ala.

¹⁶Ono bukwapho akpamara. Mbu l'oo g'o du teke o byaru bu g'oo-du laa. ? Bu urwu gunu be o ritaru l'akanya, o seru doberu pherephere;

¹⁷yee anono, o nokotaru l'ochii l'eliphe-a mgburugburu takota kpookpookpo; bya atsukota pfupfupfu; teme e mekota iya iphe ehu-eghu?

¹⁸Oo ya bu l'iphe, mbedua humaru l'o du ree; bya aburu iphe, gbaru l'ememe bu g'amadu ria g'o du iya; ngua g'o du iya; tusaru ehu l'akanya, oose le mkpula enyanwu-a le nwujiku olemole, oo-no l'eliphe-a, bu nwophu Chileke nuru iya; kele oo ono bu okiphe nkiya.

¹⁹Teme onyemonye, Chileke nuru eku; yee iphe-enweru; yee ike, oo-gude ria ya; mbu onye duru ike nata oke ophu o keru nu iya; g'onye ono gudekwa ehutu-so see akanya, oose; l'ono bukwa iphe-oma, shi Chileke l'eka.

²⁰Egube onye ono ta adukwa teke oobvujeru shii ari ke nwujiku olemole, oo-no le mgboko-a; noo kele Chileke meru; ehutu-so ji iya obu; k'ophu bu l'uzo ari udu oriri ono ta aduduru iya.

Oziphe 6

¹O nwekwarupho ejo-iphe ozo, mu humaru le mkpula enyanwu-a. Iphe ono buru oke ivu, anyitsuta nemadzu l'erwa.

²Le Chileke emeje nemadzu g'o nweru eku; yee iphe-edobe; teme g'o buru onye aakwabe ubvu; k'ophu bu l'o to dudu iphe, agu iya nu, ete erwujedu iya eka. Obenu l'e mechaaru ophu Chileke ekwedu g'o ria ya; o buchiaru onye ohozo riru iya. Iphe ono buru iphe-mmanu; bya aburu akpamara.

³Nemadzu a-nwutachakpoo unwegirima nwu-rwua ukporo ise; bya akakpoo nka shingushingu; ole o to dukpoda g'o kahabe nka; o -buru l'o to riduru eku ono, o seru akanya iya ono; ophu e liduru iya okpobe elili be mbedua sukwaru le nwa, nwuhuru l'epho teme a nwua ya ka iya mma.

⁴L'egube nwa ono be iphe, o byaru ije iya bukwa ke mmanu; kele o tseru ishi l'abali lashia; epha nwata ono no l'ime ochii phuhu.

⁵A makwaru-a l'o toko huma-swee enyanwu; ophu o dudu iphe, o maru; ole o kaepho nwoke pho enweru ehugu;

⁶m'obetakpokwaru nwoke ono no ndzu nohata unu apha ise; l'ebe o ri eku, o setaru. Noo kele oo l'eka lanu be ephe tukoru ala.

⁷Akanya, nemadzu esekpo esese bukwa onu be a tukoru iya eseru; ole onu teke asu-swee le ya ritawaru g'o du iya ree.

⁸? Bu gunu be onye maru iphe gude ka onye-eswe? ? Bu urwu gunu be onye ukpa ritaru l'amaru g'eeme umere, du ree l'iphu ndiphe?

⁹Iphe, nemadzu nwewaa enwenwe kakwa ree eme l'ophu agu iya g'o nweru iya; obenu l'o toko rwudu iya eka. Ono bukwapho iphe-mmanu bya aburu achi pherephere oso.

¹⁰Iphemiphe, du adudu nwehawaru epha; teme iphe, nemadzu bukpoo be a mahawaru l'ono bu iphe, oo-buru; ophu nemadzu ejejedu awata abaru onye ka iya ike mba.

¹¹Opfu -paa igwe; mkpokoro iya aka shii. Goshinu mu urwu, egube iphe ono abaru nemadzu.

¹²? Bu onye maru iphe, du nemadzu ree nta-a, o no ndzu-a; mbu le nwujiku olemole, o no mkpokoro ndzu l'eliphe-a, eme pherephere g'ononyo-a? ? O dukpooru onye a-du ike karu iya iphe, e-mechaa mee le mkpula enyanwu-a me o -nwuhuchaa?

Oziphe 7

Mmamiphe

- ¹Ēpha ɔma kakwa manụ-mbeleke, eshi mkpọ ree; tẹme mbọku, nemadzu nwuhuru ka ree eme lẹ mbọku, a nwuru iya anwunwu.
- ²Eje l'unuphu, agalaba nwuru kakwa ree eme l'eje ẹka aabọ iphe. Noo kele anwuhu bu iphe, nọ swiru onyemonye. Ge ndu ophu nọ ndzu nyatajekwa l'oo-dukwaphe pho nno.
- ³Aphu kakwa ree eme l'achi ochi; kele eeshije l'iphu, adu eji mee g'obu tusahu.
- ⁴Ēka obu onye maru iphe anoduje bu l'unuphu, agalaba nwuru; obenu l'eka obu k'onye-eswe anoduje bu l'eka eeri gwogwoo.
- ⁵Angabe nchi lẹ mba, onye maru iphe abaru ngu kakwa ree eme l'angabe nchi l'ebvu, ndu eswe agu.
- ⁶Oo ge nku-agbagba anoduje agba kpitikimu kpitikimu l'oku, e shiberu ite-a bu g'ochi, onye-eswe achi aduje. Ono bukwaphe iphe-mmanu.
- ⁷Onye maru iphe; o nodu eme nemadzu ewere buakwa onye-eswe; o buru egube ono be eri uphalazu emebyi obu nemadzu.
- ⁸Teke eemeghe iphe emeghe kakwa ree eme lẹ teke a wataru iya awata. Onye nweru nshirima kakwa onye eku onwiya ree.
- ⁹Ta abukwaru onye obu-oku; kele oo onye-eswe edoje opfu l'okpoma.
- ¹⁰Ba sukwa: “? Banaa gunu meru g'o gude teke ndiche ka nta-a ree?” Kele egube aji ono te erwubeduru onye maru iphe.
- ¹¹O kwa g'enweru iphe du ree bu ge mmamiphe dukwaphe; kele onye maru iphe be iphe kwewaru lẹ mkpula enyanwu-a.
- ¹²Oo g'okpoga edomije onye nweru iya nu-a bu ge mmamiphe edomijekwaphe onye maru iphe. Obenu l'eka amaru iphe gude kangoo bu l'onye nweru mmamiphe akaje nka shii.
- ¹³Leanao enya l'ozi, Chileke eje. ? Bu onye suru eme iphe, Chileke meru o gbee nggo g'o pfuru nhamunha?
- ¹⁴Mboku -duru ngu ree bu g'i tee eswa; teke mboku dukwanuru ngu eji g'i nyataje l'o kwapho Chileke meru mboku oma bya emee njo mboku. Oo ya bu l'o to dudu onye maru iphe, a-nwuru iya nu l'iphu.
- ¹⁵Lẹ mkpokoro ndzu-a, mu dzu-a be mu humakwaru iphe-a ephenebo. Mbụ lẹ mu humaru onye pfuberekoto ẹka oola l'iphe, pfuru oto; bya ahuma onye ejo-iphe ẹka ooka nka eje emekwaphe ejo-iphe, oome.
- ¹⁶Ta apfubenukakwa ẹka oto; ophu i manukakwaru iphe; ono bukwa eyi onwongu iyi.

- ¹⁷Be menukakwa ejo-iphe; ophu i bukwaru onye-eswe. Ono e-mekwa l'i nwuhu teke i tigi nwuhudu.
- ¹⁸Iphe, ka ree bu g'i gude ophuu gude ophuu; l'onye atsu Chileke ebvu ta adukwa iphe, o byiru aka te ekeduru nu.
- ¹⁹Mmamiphe emejekwa onye nweru iya nu g'o ka umadzu iri, bu ishi mkpukpu okpehu.
- ²⁰O to dukwa onye pfuberekoto l'eliphe-a l'ophu, a-su l'o toko meswee iphe-eji.
- ²¹Ta angabe-dzujekwaru nchi l'iphe, ndiphe epfu; odumeka be ii-numakwa aka onye-ozu ngu ako ngu onu.
- ²²Te me i mawaru-a l'onwongu le gubedua kowaru ndu ozo onu ugbo olemole.
- ²³Iphemiphe ono bukota mmamiphe be mu gude hua ya ama; mbu le mu suru ge mu bya abukpoerupho onye maru iphe. Obenu le mu jeru iya ememe; ophu mu asudu iya.
- ²⁴Mu maru l'iphe ono, eeku mmamiphe no uzanya uzanya; bya adu omilomi shii; k'ophu bu l'o to dudu onye suru iya achu-vu.
- ²⁵Mu bya aghaa iphu l'iphe edo enya; bya egbushi ikpere meahaa ge mu maru: ? mu a-rwavu aka mmamiphe? mbu ge mu maru g'iphe mgboko eje ala; mu amakwarupho g'eme ejo-ememe; waa eme beebabee bu-be iphe-eswe.
- ²⁶Mu huma iphe, ka anwuhu atso ilu; mbu nwanyi, obu iya bu onya; bya aburu ugbu, e gude anmata ndiphe; g'o chi mkporo l'eka labo k'atuphu onye oo-buru yee ya. O buepho onye du Chileke l'obu be a-du ike nahu iya nu. Obenu l'onye iphe-eji be oo-zu gburumu pfurii.
- ²⁷O-zu-iphe-a sukwapo: "Unu lekpodapho; " "wakwa iphe, mu rwavuru baa." "Mu shi abujeru; mu -wota owa; mu eyekoberu iya ozo; ge mu shi nno maru g'iphemiphe gude anwukota.
- ²⁸O buru teke mu achu iya ophu mu ahumaduru iya ono; be mu humaru ndu du unu labo l'ukporo iri; o buru nwoke lanu kpoloko bu onye obu guru iphoro. Obenu l'o to dudu nwanyi lanu, mu humaru, obu guru iphoro l'ime phe.
- ²⁹O buru iphe, mu chu-vuru kpoloko bu le Chileke meru nemadzu g'o buru onye obu guru iphoro. Obenu le nemadzu wataru akpa ejo uzo."

Oziphe 8

¹? Bu onye a-su le ya maru iphe? ? Bu onye be iphemiphe doru enya? L'o kwa mmamiphe emeje g'iphu tusahu nemadzu; mbu l'oomeje g'iphu gbapfube-buhu nemadzu agbapfube.

Eme iphe, onye eze pfuru

²Mejekwa iphe, onye eze suru g'i mee. Iphe, mu gude pfua nno bu l'i riburu angu l'iphu Chileke l'ii-meje iya.

³Te erijekwa nkwoli l'iphu onye eze; ophu i pfujekwaru l'ejo-iphe; kele o kwa iphe, du eze ree be oomeje.

⁴Su-a; eshinu iphemiphe, onye eze pfuru buwaa aka o jeberu o gburu; ? bu onye be onu dukwanu k'asu iya: “? Bu gunu be iime nno?”

⁵Onyemonye, eme iphe, eze pfuru ta adukwa iphe byaru eme iya nu. O bukwanuru onye maru iphe a-maru teke oo-me iphe, o pfuru; maru g'oo-gude mee ya.

⁶A makwaru-a l'iphe-ehuka, nemadzu eje buwaa oke ivu, anyi erwa dapyabe iya. Obenu l'iphemiphe nwekwaru ogè; nweru g'eegudeje eme iya.

⁷Eshinu o dudu onye maru iphe, e-me l'iphu; ? bukwanu onye a-su iya l'owa-a iphe, e-mechaa mee nu baa?

⁸O to dukwa onye suru esede pherephere; nokwapho g'o to dudu onye suru esede ndzu iya me mboku anwuhu iya rwuepho. Oo g'o to dudu onye aagufuje g'o to jeshi ogu; me a -nodu alwu ogu-a; bu g'eme ejo-iphe ta abyadu aha ndu eme iya nu.

Ndu ejo-iphe waa ndu pfuberekoto

⁹Iphemiphe ono be mu humaru ge mu byaru bya eworu egomunggo mu zia l'iphemiphe, eemekpo ememe le mkpula enyanwu-a. Mbụ teke ndu-ishi anoduje emekpa ndu no phe l'eka ehu.

¹⁰Mu bya ahuma aka eeli ndu ejo-iphe. Mbụ ndu ono, shi anoduje eje nggede eje nggede alwa l'eze-ulo Chileke ono; mbụ ndu ono, e shi anoduje aja ajaja l'ime mkpukpu ono, epe shi nodu eme ejo-iphe ono. Egube iphe ono bukwapo iphe-mmanu.

¹¹Oo kele e teke ahụ-kebedu ndu ejo-iphe ahuhù egwegwa meru iphe, o buepho iphe, jiru ndiphe obu bu eme ejo-iphe.

¹²O to dukwa m'obeta onye ejo-iphe mechakpo iphe-eji merwua ya ugbo ukporo ise; bya akaele-a nka noo odu; be mu maekwarupho l'onye atsu Chileke ebvu be oo-karu ree; mbụ ndu akwabè Chileke ubvù.

¹³Kele ndu ejo-iphe be o too dukwaru le ree; ophu ndu phe etsekwa rigorigo g'ononyo. Noo l'ephe ta atsudu Chileke ebvu.

¹⁴O dukwarupho iphe ozo, bu iphe-mmanu, du l'eliphe-a. Iphe ono buru l'o duru ndu pfuberekoto, anataje ugwo, e gege apfu ndu ejo-iphe; bya adukwarupho ndu ejo-iphe, anataje ugwo, e gege apfu ndu pfuberekoto. Ono be mu sukwarupho l'o bu iphe-mmanu.

¹⁵Oo ya bu l'iphe, mbedua arì l'o ka ree ge nemadzu meje iya bu g'ehu tsoje iya utso. Kele o to dudu iphe, kabaaru nemadzu ree le mkpula enyanwu-a, abudu g'o rije g'o du iya nguje g'o du iya buru onye ehu atso. Oo ya bu; ehu atsokwanu iya me o -nodu ese akanya iya le ndu owa-a, Chileke nuru iya le mkpula enyanwu-a.

¹⁶Teke mu shi woru egomunggo mu zia l'amaru iphe, bu mmamiphe yee ele enya l'akanya, amadu ese l'eliphe-a; mbu l'akanya, oosekotaje eswe l'enyashi; mgbenya te eshitadu iya enya;

¹⁷be mu byaru ahuma iphemiphe, Chileke meru; bya amaru l'o to dudu onye iphemiphe, eme le mkpula enyanwu-a byaru edo enya. Nemadzu a-tukokwa ike iya mekota g'o doo ya enya; ole o to dudu onye a-du ike arwavu iya l'eka. Onye mmamiphe -suchakponu le ya maru iya be o too dokwanu iya enya okpobe edodo.

Oziphe 9

¹Mu bya atuko iphemiphe ono rja bya elechaa ya enya maru l'onye pfuberekoto; me onye maru iphe; me iphemiphe, ephe eme tukoru dukota l'eka Chileke. Teme ophu o dudu onye amaje ophu e doberu iya ? bu n-yemobu too ndumashi?

²G'ephe ha bu iphe lanu anwukota l'ehu phe; mbu onye pfuberekoto me onye ejo-iphe; onye eme ree me onye eme eji; onye aaso nso me onye a ta sodu nso; me ndu agwa iphe; me ndu ta agwadu. Oo g'onwu l'ehu onye du ree bu g'onwu l'ehu onye iphe-eji. O buru g'onwu l'ehu onye guru enwa bu g'onwu l'ehu onye atsü ebvu agu enwa.

³Waa iphe, bu ejo-iphe, du l'iphemiphe, anwukota le mkpula enyanwu-a baa. Iphe ono bu l'onnyemonye bu iphe lanu anwukota l'ehu phe. Teme ophu ka njo buru l'obu amadu buepho ejo-iphe jiru iya; teme eme iphe eswe nodu aduje phe l'obu eka ephe no ndzu; ole e -mechakwa-a, onye ono alakwaa maa.

⁴Ole o bu; onnyemonye, nokpo ndzu be nwekwarupho iphe, oole enya iya. Le nkuta, no ndzu kakwa oduma, nwuhuru anwuhu mma.

⁵Kele ndu no ndzu maru l'ephe e-mechaa nwuhu anwuhu. Obenu le ndu nwuhuru anwuhu ta aduedu ophu ephe maru. Ndu nwuhuru anwuhu te enweedu obunggo; teme ophu a nyataeduru phe ililekpoo.

⁶N-yemobu onye ono; yee ndumashi iya; me okophoo ya g'ephe ha tukowaru phukashi. Ophu o duedu iphemiphe, eeme le mkpula enyanwu-a, eka iya dukwadu.

⁷Oo ya bu; g'ehu tsoje ngu utso me i nodu eri nri ngu. Teme l'iimeje eswa l'ime obu ngu me i nodu angu mee ngu; kele o kwa nta-a be iphe, iime du Chileke ree.

⁸Yejekwa uwe, acha phuuphuu tekenteke; ophu manu, eshi mkpo abvujekwa ngu abvubu l'ishi.

⁹G'ehu tsoje ngu utso gu le nyee ngu ono, i yeru obu ono; jeye g'unu a-no-bekporu ndzu le mkpokoro ndzu-a, Chileke nuru ngu le mkpula enyanwu-a. Mbu le mkpokoro mboku-mboku ono, Chileke nuru ngu ono; waa akanya, iisegbu onwongu le mkpula enyanwu-a be bukwa ehutso ono, bu okiphe, i ketaru iya.

¹⁰Iphe, eka rwubekporu ngu l'ememe; gude ike ngu l'ophu mee ya; kele ali-maa, bu eka ije be ozi ta adudu; ophu achi idzu iphe, ee-me adudu iya; teme ophu mmamiphe yee nkwanenya adukwa iya pho.

¹¹Sụ-a; mu hụmakwarupho iphe ọzo lẹ mkpula ẹnyanwu-a. Ọ tọ bụdu onye ka ọso agbatajẹ ọso; ọphu ọ bụdu onye ọkphehu ka bẹ alwụkpeje l'ọgu. Teme ọphu ọ bụdu onye maru ẹkwo kachaa enweru nri; ọphu ọ bụdu onye maru iphe kachaa enweru iphe; ọphu ọ bụdu onye kachaa amaru ẹkwo bẹ eemejeru iphe-oma. G'ephe ha bẹ eso yee ẹheni tukururu etsokota.

¹²Ọzokwapho bụ l'ọ tọ dudu onye amajeru teke ọo-byaru iya. Ọo g'eegudeje ejo ụgbu nmata ẹma-a; bya aburu g'aagbabeje ọnyà nmata ẹnu-a bụ g'ejo mboku adapfuje ndiphe; mbụ l'oozujee phe pho gburumu pfulii teke ephe te eledu ẹnya iya.

Mmamiphe kakwa eme eswe ree

¹³Mu byakwapho anodu lẹ mkpula ẹnyanwu-a huma iphe, mmamiphe meru; ọ du mu biribiri.

¹⁴Ọ duru mkpukpu lanu, ha nwanshii, nonu; ọ buru-a nwa umadzu olemole bu iya. Onye eze, ọkphehu du shingushingu bya afuaru mkpukpu ono; bya egude ojogu iya nophée ya mgburugburu; bya akpo-chia ya mkpo-chi.

¹⁵Ọ dukwanuru nwoke lanu, bu lẹ mkpukpu ono. Nwoke ono akpa nri; ole ọ bu onye maru iphe. Ọ buru iya mechaaru gude mmamiphe iya dzoo mkpukpu ono. Ole ọ tọ dudu onye nyatajeru nwoke ono, akpa nri ono.

¹⁶Ọ buru iphe ono meru g'o gude mu su lẹ mmamiphe kakwa ọkphehu ree. Ole onye ukpa bẹ a taa gubejedu mmamiphe nkiya iphe; ọphu ọ dudu onye angaje nchi l'opfu iya.

¹⁷Onye maru iphe -tọo nwehu pfua opfu bẹ ọ kakwa ree g'i ngabe iya nchi eme lẹ gbagbagba, onye-ishi ndu eswe ara.

¹⁸Mmamiphe kakwa ngwogu ree. Obenu l'onye iphe-ẹji lanu emebyijekwa iphe, du shii.

Oziphe 10

¹Ijiji, nwuhuru anwuhu -daba lẹ manu-mbeleke bẹ oomeje iya l'ooshi tukurubaa. Noo g'umere onye-eswe; g'ọ hahabe nwanshii emeje mmamiphe yee akwabe ubvu g'ọ tọ du iphe, ọo-bu.

²Egomunggo onye maru iphe emeje iya g'o mee iphe, pfuru nhamunha; obenu l'onye-eswe bẹ egomunggo iya emeje l'oome ekicha ekicha.

³Ọ tọ dudu m'obeta ọ buru lẹ gbororo bẹ onye-eswe eje ije; l'oogoshiepho lẹ ya bu itorito; mbụ l'oonodujeepho egoshi onyemonye lẹ ya bu idokpamkpata.

⁴Ọ -buru l'onye bu ishi bẹ i meru; ẹhu wata egu egu; ta agbeshikwa l'eka i no su l'ilawa. Jichikwaa obu oyi; noo l'odoo emeje g'a palia pazeta.

⁵Ọ nweru ejo-iphe ọzo, mu humaru lẹ mkpula ẹnyanwu-a. Iphe ono buru emeswe, shi l'eka onye bu ishi.

⁶Aagbeje bya ewota onye-eswe je edobe l'onodu, ha shii; bya ewota onye nweru iphe dobe l'onodu, ha nwanshii.

⁷Mu humaru eka o gbę buru ndu bu ohu gbę ndu l'eli inya; ndu bu unwu eze gbęchia gude okpa eje gę ndu bu ohu.

⁸Su-a; o kwa onye buru nsu e-mehaa dalahu le nsu obu. O buru onye epyo mgbaka igbulo be agwo ataje.

⁹O kwa onye akukposhi mkpuma be oomekaje iphe. O buru onye awa nku be anoduje ezeru mgbahahu iya.

¹⁰O -buru l'ogbunku ta atsudu nko; ophu onye awa nku abaduru iya ababa be otukoje g'ike ha iya egbu; teme l'o gbufu nku onya. Obenu l'o kwa mmamiphe emeje g'iphe, nemadzu eme nweru iya ishi.

¹¹Onye egudeje omamanshi eme g'agwo ta ata eru -gbę haa ya; o taada teme o meahaa ya be iphe, oome buanaa ke mmanu.

¹²Opfu, shi onye maru iphe l'onu emeje g'a kwabe iya ubvu. Obenu l'onye-eswe bu iphe, o pfutaru l'onu egbuje iya.

¹³Iphe, onye-eswe saru onu wata epfufu abujeru iphe, enwedu ishi. Teke o pfugheru iya epfughe; iphe, o pfushiru aburu beriberiberi iphe, adudu iphe, o bu.

¹⁴Opfu onye-eswe be anoduje anwushi anwushi. O to dudu onye maru iphe, e-me l'iphu. Ebe o dudu onye adu ike akaru iya iphe, e-mehaa mee nu me o toepho azu.

¹⁵Nsegbu akanya, onye-eswe ese emeje ike abvu iya; o to maeduru uzo unuphu.

¹⁶Su-a; nshio oha ophu bu nwatanshii bu eze phe; teme ndu-ishi l'oha ono buerupho gwogwoo be ephe agbeshije l'utsu eri.

¹⁷Ehu-utso be a gokwanuru nu oha ophu eze phe shi l'oke unuphu; teme ndu-ishi l'oha ono buru ndu eri iphe l'orwuberu iya; ndu eri iphe g'ehu shihu phe ike; ndu abuedupho olwe-kporokporo be ephe bu.

¹⁸Onye enyiru be ulo iya ezejekwa kpuru. O buru teke o jiru eka ye l'iphu utapfu be ulo obu awataje eshi eshi.

¹⁹Obo-iphe bukwa iphe, aabo-dojeru iya bu g'e mee kwakiri kwakiri. Mee buru g'ehu tso utso be aangu-dojeru iya. O bekwanu l'oo okpoga bu eka iphemiphe jeberu o sube ishi.

²⁰Su-a; ta adukwa teke aa-nonyia l'i phuahaa onye eze iphu; o rwuhaa o buru l'ime obu ngu. Ebe o dukwa teke aa-nonyia g'i ndu l'ime ulo ngu su l'iiphu onye nweru iphe iphu. Noo le nwenu, ephegbaa ephephe; me iphe ozo, nweru nku be a-turutakwa iya je edooru iya.

Oziphe 11

Umere onye kwaru enya

- ¹Woru nri ngu chie lẹ mini; kele a -noepho ujiku olemole be ii-huma iya-a.
- ²Hata iphe ngu keeru umadzu esaa; mbu-a; keeru iya umadzu esato; kele i ti madu ejo-iphe, e-mechaa nwua l'eliphe-a.
- ³Igwe -rwua ji ali be oodzejeru eliphe mini. Oshi, daru adada -daru laa l'uzo ndohali-o; o daru laa l'uzo isheli-o; o buepho eka iya ophu o daru laa be oo-ze.
- ⁴Onye eme ele pherephere be ta akobekwa iphe l'ali. Ophu onye ele igwe enya l'iphu adukwa iphe, oo-meta l'opfu iya.
- ⁵Oo g'i ti madu uzo, pherephere eshije; ophu i madu ge nwaswa eshije kpua l'epho ne iya-a; bukwapho g'iphe, Chileke eme tee dodu ngu enya; mbu Chileke, meru iphemiphe.
- ⁶Kua mebyi iphe, iiku akuku l'utsu. Ophu i dobekwa eka doo l'uzenyashi; kele i ti madu ophu e-mechaa du ree. ? Bu owa-a; too ophu; too ephenebo e-mechaa dukota ree?
- ⁷Iphoro du ree; teme enyanwu nodu aduje ree ele enya.
- ⁸Nemadzu -dzukpoo ndzu noo apha olemole; g'o nohabe; g'ehu tsoje onye ono utso l'apha ono g'o hakota. G'o nyatajekwa nchi ejihu iya; kele mboku k'ono a-dukwapo igwerigwe. Iphemiphe, abyakpo ememe tukokwaru bukotaru iphe-mmanu.

Anyata Chileke l'okorobya

- ⁹G'ehu tsoje ngu utso; gube nwokorobya; teke i bu okorobya. Tejekwa eswa teke ehunwata dukwadu ngu. Iphe, ii-nodu etso bu iphe, obu ngu pfuru ngu; yee iphe, i gude enya ngu huma. Ole oo g'i nyatakwa l'iphemiphe ono be Chileke e-mechakwaa kpee ngu ikpe iya.
- ¹⁰Oo ya bu; haa ayo oshi l'ime obu ngu! Tuko iphe, egburwashu ngu ehunwata dukwadu dukwadu; kele abu okorobya; yee teke okpehu ngu dzuru edzumedzu tukokwaru buru iphe-mmanu.

Oziphe 12

- ¹Su-a; nyatakwa onye meru ngu nu teke i bukwadu okorobya; teme ejo mboku ono erwua; mbu apha g'apha ono, ii-wata epfu su: "Iphemiphe-a ta adukwa ophu atso mu utso."
- ²Teke ono be enyanwu a-wata ngu adu inyeku inyeku. Iphoro l'opfu; me onwa; waa kpokpode atukokwapo du ngu inyeku inyeku. Teke ono be mgboko a-du g'eka igwe dzechaaru mini; urwukpu gbakahu.
- ³Teke ono be ndu eche unuphu nche a-wata aphu kpaakpaakpaa. Teme umadzu labo ono, bu oke, du ike ono awata eje ephuru ephuru. Ndu egwe iphe egwegwe egwebuhu iya; noo kele ephe ta aduedu igwerigwe. Teme ndu ono, agbeje le windo pyofu enya ono awata aphu ragaraga.

⁴Teke ono bẹ aa-guchishi ọguzo, nọ l'uzo, e shi abahụ lẹ mkpukpu. Iphe, eegwe egwegwe adahaa ngu inchi inchi. Teke ono bẹ nemadzu e-tehuje me iphe-odu ha enu. Ole olu ebvu phe a-noduje ada iya enyi enyi.

⁵Teke ono bu teke amadu atsuwa iphe, ha l'eli ebvu; bya atsuwa ebvu iphe-ehuka, nọ l'uzo; mbu teke oshi alumundu atu ige; teme igube nodu akpuwa rigorigo; teme ophu egu ejepfu nwanyi aguhedu. Noo teke nemadzu a-tuchi lashia aka oo-no ojejoje; ndu akwa iya nu e-toru gbororo erwu erwubvu iya.

⁶Nyatakwa onye meru ngu nu; teme l'a gbabua udo, e gude mkpola-ochaa swia; mbu teme l'a tukpo ochi mkpola-ododo, eegudeje ese mini le welu ono. Nyatakwa iya; teme l'eetsukposhia ite-mini, eesejeru mini obu ye; mbu teme l'eemebyishia igwe, eekobeje eri ono, e gude ese mini le welu ono.

⁷Noo teke ogwehu, bu aja ali a-laphu azu l'aja ali aka o shi; unme ndu alapfu Chileke onye nuru iya nu.

⁸"Su-a; iphe-mmanu yee iphe-mmanu bu iphe-mmanu. Iphemiphe tukoru buru iphe-mmanu!" Noo olu mube O-zì-iphe.

Mkpochi-ishi iya

⁹Su-a; onye ziru iphe-a ta abulekwa-a l'o maru iphe; obenu l'o meru ndu ozo ephe nwuta iphe. O riru oriri bya avoo iphe avovo; bya anmaa etu etu doo giriri.

¹⁰O-zì-iphe ono toru nwehu hoo opfu, rwuberu l'epfufu ahoho; k'opfu bu l'iphe, o deru pfuru nhamunha bya aburu okpobe opfu.

¹¹L'opfu onye maru iphe adujekwa ge mpyipyi oshi, unwu-eswi egudeje eche eswi. Teme etu etu, Onye Eche Aturu ono nmashiru kube nodu angubajeeppo anguba ge nggu, a kpoberu kposhia ike.

¹²Oo ya bu; nwa mu; g'iphe owa-a, mu abya epfufu-a bukwaru iphe, a-nodu alo ngu aka le nchi. Aa-nodukwa ede ekwo, du igwerigwe igwerigwe; ophu e debuhudu iya edebuhu. Obenu l'anwunuka ekwo emejekwa ge nemadzu kpojohu.

¹³Nta-a be a tukowaru iphemiphe numakota. Waa iphe, bu mkpochi-ishi iya baa: Tsuje Chileke ebvu meje iphe, o suru g'i mee; kele oo ya bu iphe, rwuberu amadu l'ememe.

¹⁴Kele iphemiphe, nemadzu eme be Chileke e-mechakwaa kpee ya ikpe iya; mekpoo iphemiphe, nemadzu mekotaru l'edomi; me ndu ophu du ree; me ndu ophu du eji.

Ebvu Sólomõnu

Ebvu Sólomõnu 1

¹Ebvu, kakõta ree l'iphe, bu ebvu, a guru agugu, bu iya bu ebvu ophu Sólomõnu guru.

Iphe eepfu l'õkpoku ibe eze

²O du mu g'a su l'ii-tsutsu mu õnu; kele n-yemobu ngu kakwa mee eme ehu-utso.

³Manu, i nyiru eshikwa mkpo shii. Epha ngu tuko ekameka ngaa g'eka manu, eshi mkpo wushihuru. O buru iphe ono kparu iphe, unwumboko yeru ngu obu.

⁴Duta mu; g'anyi tugbu-kebe! Eze be dubatawaru mu l'ulo iya; mbu l'eka anyi a-nodu; ehu atsoo anyi utso; anyi etee eswa ngu; bya aburu eka anyi a-tuko nodu jaa n-yemobu ngu ajaja jaghata g'aajaje mee. O gbarupho g'unwumboko yeje ngu obu!

⁵Unube unwada Jierusalemu; a makwaru-a le mu eji uji; ole mu dukwanu ubvu l'enya. Mbu le mu jitabekwaru uji g'ulo-ekwa ndu Keda; obenu le mu dukwanu ubvu l'enya g'ekwa, Sólomõnu gebegbaaru l'ulo iya.

⁶Unu ta anodukwa ele mu phoripori opfu l'anwu chiru mu; jasu mu nodu eji uji; O kwa l'ehu, eghu unwune mu eghu meru g'o gude ephe nwuru mu yee ge mu noduje l'ozu opfu-vayinu mkpurumkpuru; ophu o dudu teke uzo dujeru mu k'eleta onwomu enya.

⁷Gube onye mu yeru obu; kanuru mu eka iicheje aturu ngu! Yele eka idobeje aturu ngu obu l'echi-eswe g'ephe tuta unme! Ge mu te ejeshi anodu aghaphe ge nwanyi ovuoba l'odu aturu ndu ozo.

Iphe nwoke ono epfu

⁸Gube nwanyi ophu bu ngu kakõta ama mma l'iphe, bu unwanyi g'ephe ha; o -buru li ti madu uzo; tsopyabeepho owere aturu ono; li je echee unwu-eghu ngu le mgboru ulo-ekwa ndu eche aturu ono.

Eze egoshi n-yemobu iya

⁹Iphe, mu a-turu gube onye ono, du mu l'obu yeru; bu ada-inya, no l'ugbo-inya Fero.

¹⁰Asha ngu be iphe-nchi, i yeru meru; o nodu ama ntumatu. Iyagba, i doru l'olu be kwekwaru ngu ntumatu.

¹¹Anyi e-gude mkpola-ododo, a tugbaru mkpola-ochaa paapaa metaru ngu iyagba.

Nwanyi ono arj k'onye o yeru obu

¹²Eze noro laguga teburu iya; mkpo manu-nadu, mu nyiru bya avoo ekameka pfurupfuru.

¹³Onye mu yeru obu du mu g'unwu meru, eshi kwekweekwee, mu tu-koberu l'obu.

¹⁴Onye mu yeru obu due mu pho ge jipfujipfu okoko hena, ama ntumatu, shi l'opfu-vayinu ndu Enu-Gedi.

Iphe nwoke ono epfu

¹⁵Gùbe onye ono, mu yeru obu ono; ì òkwa ùbvù! Ire-lanù opfu; ì òkpoo ùbvù òkpobe adùdu! Ènya ngu òepho g'ènya ndo-nwènu.

Iphe nwanyị ono epfu

¹⁶Gùbe onye mu yeru obu; iphe, ìmakwanu l'òo mma! Ì ò k'eye obu eviya eviya! Èka anyi azeje azeè ò kè kpuchikala.

Iphe nwoke ono epfu

¹⁷Oswebe, anyi gude gbaa uko anyi bù oshi sida. Oshi, anyi swebushiru iya bù oshi payinu.

Ebvù Sólomõnu 2

¹Mu òkwa g'okoko lè nsùda Sharõnu; mu òkwapho g'ojimbvu, jashiru lè nsùda-ùbvù.

²Ò bù egube ono abujeru; ojimbvu yèlè óbvù -nògbabe; l'ò kakòta phè ama mma-a; bù g'onye ono, ò mu l'obu ono kakòta ùnwumboko òzo ama mma g'èphe ha.

Iphe nwanyị ono epfu

³Ò kwa egube ono, ùdara akakòtaje ama mma l'iphe, bù oshi, nò l'òswa bù g'onye ono, mu yeru obu ono esengoje l'echilabò ùnwokorobya òzo. Oobujeru mu -nòdu iya lè mkpula l'òotso mu ntumatu; tème akpuru iya nòdu atsojekwa mu phò ùtso.

⁴O dutaru mu je l'ùlo èka a nò eri nri òbo-iphe. Iphe, o gude mee g'obu shihu mu ike bù obu, o yeru mu.

⁵Gudenu akpuru vayinu, e gheru egheghe mee g'ike ò mu. Tème l'i gude ùdara mee g'obu shihu mu ike; kèlè mu avèhuakwa avèhu l'obu, mu yeru ngu.

⁶Èkicha iya bè o yeru mu l'ishi; bya rìkua mu èkutara iya.

⁷Unubè ùnwada Jierúsalemù; unu kwee mu ukwe l'unu ta akpatsudu n-yemobu jasù l'ò bya l'onwiya; kèlè n-yemobu bè bukwa g'eedoje òkpa anigo-a; mè òkpa ele-a bù g'eedoje iya.

⁸Ngabèkpodapho! Ò kwa olu onye mu yeru obu bè mu anù nno! Lenu g'o gude apfù shooshoo apfughagbaa ùbvù ùbvù; awù wugelengu wugelengu awughagbaa obvu obvu agba abyafuta mu.

⁹Onye mu yeru obu òkwa g'anigo; òzoo gè nwele. Lenu; ò nòakwa l'azù igbulò anyi; pyofu ènya lè windo enyo swìrii.

¹⁰Onye mu yeru obu sùkwaru mu: “Gbèshi gùbe onye ò mu l'obu; mbù gùbe onye ono bù nwõma-mma mu; tsonuru mu!

¹¹Humanu! Udzumini ghaakwarù; igwe buwa mini; udzu-mini laa.

¹²Okoko atushiakwa ige lẹ mgboko. Teke aaguje ebvu rwuakwaru. A nọdu anuwaa ọ̀rà kerekete l'alì anyi.

¹³Oshi figu watakwaru amì mebyi. Mkpọ ige, vayinu tushiru emee ekameka; ọ tuko eshikọta kwẹkweekwee. Gbalihu; gube onye mu yeru obu! Bya! Ọ-ma-mma mu; gbeshi g'anyi je!”

Nwoke ono sụ:

¹⁴Jiko gẹ gube nwando-nwenu mu, nọ lẹ mgbaka ikelepfumu mkpuma; mbu gube onye domiru onwongu lẹ mgbawara, nọ l'eli úbvú; jiko menaa gẹ mu huma iphu ngu! Jiko pfunuru opfu yeru mu; kele opfu ngu atsoje mu uto. Atatiphu ngu nọdu ama ntumatu.

¹⁵Gudekotaru anyi uphega ono nta; mbu unwu uphega ono, anoduje emebyishi vayinu ono; kele vayinu anyi wataakwaru amì mebyi.

Iphe nwanji ono epfu

¹⁶Onye mu yeru obu bu nkemu; mu buru nkiya; mbu onye ono, eche aturu iya l'eka ojimbvu kuru;

¹⁷gbiriri jasụ l'uzenyashi; mbu teke onyonyo-anwu ta aduhedu. Jiko gube onye mu yeru obu; ghakobe pfukwaa ke shooshoo egube ono, anigo me ele nshii apfuje l'eka úbvú du kpokoro kpokoro kpokoro ono; lwapfuta mu.

Ebvu Sólomọnu 3

Nwanji ono achọ onye o yeru obu

¹L'enyashi be mu azekotaje l'iphe aze mu gude egomunggo achọ onye mu yeru obu; ole mu choru iya nta chọ imo; ophu mu ahumaduru iya.

²Mu sụ: “Nta be mu a-gbeshi tsoru oma mkpukpu; mbu tuko oma gbororo; me edupfu jekota; achọ onye ono, mu yeru obu ono.” Ọ buru nno bu gẹ mu lekotaru enya iya; ophu mu ahumaduru iya.

³Anyi lẹ ndu nche enyashi dzuda; teke ephe tsoru oma mkpukpu ejephe. Mu jia phe su: “? Unu levukporu mu onye mu yeru obu?”

⁴Mu gharibeeru phe pho nwanshii; mu huma onye ono, mu yeru obu ono. Mu tu iya gburumu; ophu mu ekweedu iya ahaha. Mu kpua ya gbiriri jasụ mu kpurwuta iya ulo ne mu; mbu kpurwuta iya mkpuru onye tsuru ime mu.

⁵Unube unwada Jierusalemu; unu kwee mu ukwe l'unu taa kpatsudu n-yemobu mu; ophu unu emetedu iya lẹ mgbenya jasụ l'ọ bya l'onwiya; kele n-yemobu bukwa g'eedoje okpa anigo; me k'ele-a bu g'eedoje okpa iya.

Alwalwa onye eze ono

⁶? Bu onye shi l'echiegu eje abya pho; du g'eka enwuru-oku akpu tututuutuu pho? Mbu onye a wuru meru me isensu, e gude iphe, eshi kwẹkweekwee, ndu agba ngho, ere ire mee.

⁷Lenu-o! O kwa iphe, Sólomõnu zẹ bẹ a pa abya phọ! Ndu edu iya nù dọ ụkporo ndu ojogu ẹto, a gutaru l'iphe, bụ ndu kachaa aburu mkparawa lẹ Ízurelu.

⁸Ephe tukururu turu ogu-echi phẹ l'upfu; teme ephe bukotaru ndu k'ogu doru ẹnya. Mbụ l'ephe tukururu turu ogu-echi phẹ l'upfu; kwaberu ẹjo-iphe a-nwụ l'enyashi.

⁹Eze Sólomõnu metaru onwiya iphe, e gude apa eze. Oshi, o gude mee ya bụ oshi, shi l'úbvú úbvú Lébanõnu.

¹⁰Okpa iya bụ mkpọla-ọchaa bẹ o gude mekọta iya. Oshi-ẹhu iya, ẹka aadakobeje adakobe bẹ e gude mkpọla-ododo wua. Ẹka aanọduje anọ bẹ e kwekotaru ẹkwa, eji g'ube. Ime iya bẹ a phushikotaru ẹkwa, amakọta mma; mbụ ẹkwa, unwada Jierúsalemụ kpashiru gude goshi n-yemobu phẹ.

¹¹Unu wufuta-o; unubẹ unwada Zayõnu; unu bya ahuma ẹka eze Sólomõnu kpu okpu-eze iya; mbụ okpu-eze ono, ne iya kpuberu iya mbọku ono, o luru nwanyi ono; bụ mbọku, ẹhu tsoru iya uto ono!

Ebvụ Sólomõnu 4

N-yemobu nwoke ono

¹Iphe, ị dukwanu l'ọo úbvù; gube onye dọ mu l'obu! Iphe, ị dukpokwana l'ọo úbvù! Ẹnya ngu ono, i phuchiteru ẹkwa ono dọepho gẹ kẹ ndo-nwenu Egbushi ngu tuko ejigbaa g'ẹka eghu dzeberu shi l'eli úbvú Giladu awụ-zeta.

²Eze ngu achaepho pemu pemu g'igwe aturu, e bushigbaaru eji k'òphúú; bya awua ya ẹhu; ephe tuko shi l'ẹka ono awufuta. G'ephe ha tuko chigbaaru unwu ẹbo ẹbo; ophu o dudu mẹ nanu, gba ẹka nwa.

³Ugbonu ngu ephebebo tuko nwua kẹ pfu g'oghu uswe. Onu ngu l'onwiya tuko ama ntumatu! Agbagba nchi ngu, i phuchiteru ẹkwa yeru udara, e buwaharu ẹbo.

⁴Olu ngu mitaru ogologo g'ulo-eli, Dévidi kpuru, bụ ẹka eedobeje ngwogu. Oo l'igbulọ iya bẹ e kokaaru iphe, eegudeje ezeru ndzụ l'ogu, dọ unu labọ l'ukporo iri. Ndu ojogu egudeje iya ezeru ndzụ l'ogu.

⁵Era ngu ephebebo dọ g'unwu umoro labọ. Mbụ g'unwu umoro, a nwuru ẹbo, buepho ẹka ojimbvu dọ bẹ ephe anọduje akpa nri.

⁶Mu e-je anọdu l'eli úbvú, a dzaru oshi meru; mekwapho l'eli-òbvù, a dzaru isensu; jeye l'uzenyashi; teke onyonyo-anwu adudu.

⁷Gube onye dọ mu l'obu; ị bukwa nwomarima; mbụ l'o to nwedu ẹka ntucha dọ ngu l'ẹhu mẹ nanu.

⁸Gube nwanyi, mu luru k'òphúú; shi l'úbvú úbvú Lébanõnu tsoru mu! Jiko shinu l'úbvú úbvú Lébanõnu tsoru mu g'anyi je! Ngwa; gbenu l'eli úbvú Amana nyizeta! Shiro l'eli úbvú Seniru, bụ iya bụ mkpokponu úbvú Hamõnu lufuta; mbụ ẹka ono bụ ogba oduma ono; ẹka agu edomishije onwophe.

⁹Gùbe nwamgbòko, mu luru k'òphúú; bya aburu nwune mu; obu, mu yeru ngu hatakwaru mu meji. Ènya, i leri mu mgbo lanu; mē iphe-olu, i tukporu l'olu; bē i gudeepho hata mu meji.

¹⁰Lewarō gē n-yemobu ngu aatso-beru uto; gùbe onye bụ nwamgbòko, mu luru k'òphúú bya aburu nwune mu. N-yemobu ngu kakwa mē atso uto. O bükwarupho nno bụ gē manū, i nyiru kakotakwapho manū ozo eshi mkpō.

¹¹Gùbe nwanyi, mu luru k'òphúú; opfu, eshije ngu l'onu futa anoduje atso gē manū-ēnwu, shi l'ēbakala-ēnwu atada. Ire ngu bụ mini era-eswi; waa manū-ēnwu jiru iya. Uwe ngu eshi kwēkwēkwē g'úbvú úbvú Lébanonu.

¹²Gùbe onye bụ nwanyi, mu luru k'òphúú; bya aburu nwune mu; i dūepho gē mgbabu, a tū-chiru atū-chi. I dū g'òbvú, anwushi mini, e kpuberu iphe; mbū g'ogba-mini, a dōberu iphe.

¹³Udara, amishi akpuru, dū ree bụ iphe, jiru mgbabu ngu. Oshi hena; mē nadū jikwapho mgbabu ngu ono ejiji.

¹⁴Oshi nadū; mē ophu aza safarōnu dū iya. Oshi kalamosu; mē oshi sinamōnu dukwa iya pho. Iphe, bükpoo oshi isensu, dū iche iche pfuru iya. Mēru; mē alowe; mēkota oshi, eegudeje eme iphe, eshi mkpō pfukotakwaru iya pho.

¹⁵I bụ ogba-mini, doru risaa; nō l'ime mgbabu; tēme i buri wēlu-mini, l'anū ndzū; bya aburu ngēle, shi l'úbvú úbvú Lébanonu asoshihu.

¹⁶Gùbe pherephere ụzo isheli; tehu etehu! Watanū ezizi; gùbe pherephere ophu shi l'uzo ndohali! Unu bya ezia lē mgbabu mu-a; gē mkpō iya atuko mgboko vō pfurupfuru! Jiko batanu lē mgbabu ngu gùbe onye mu yeru obu; bya awōta akpuru-iphe, a kuru iya ophu kachaa ree ria.

Ebvú Sólomōnu 5

Ọnu nwoke yēe nwanyi ono eye

¹Gùbe nwanyi, mu luru k'òphúú; bya aburu nwune mu; mu bataakwaru lē mgbabu mu ono. Mu hekoakwaru ùnwù mēru mu; mēwaro ùnwù ozo, eshigbaa kwēkwēkwē. Mu riakwaru manū-ēnwu mu; yēe ēbakala iya. Mē mu; yēe mini era-eswi mu bē mu nguakwaru. Unu ria ngūa; unubē ndu ònyà! Unu ngūa ngūta ike unu; unubē ndu yeru onwunu obu!

²Mu eku mgbenya; obenu l'obu mu nwū ñya. Ngabekpodapho! O kwa onye mu yeru obu akū ēka lē mgbo sū: “Guharu mu ụzo; gùbe onye dū mu l'obu; bya aburu nwune mu; gùbe onye bụ nwando-nwēnu mu; bya aburu onye nkemu, ntucha adūdu l'ēhu! Kēle iji dawaru kpua mu; ishi dūwaa mu minimini. Egbushi mu bē iji ñyashi meakwaru; o bükotaru mini.”

Ọnu, nwanyi ono eye

³Mu yefuakwaru uwe mu. ? Bū gē mu gbē nta-a yephu iya azū ozo tō? Oka bē mu kwōwaru akwōkwo. ? Bū gē mu gbē nta-a zōbe iya l'alī ozo tō?

⁴Onye ono, mu yeru obu ono bya epyoo ẹka lẹ mgbaka mgbo. Ẹhu mee mu pho yereketeke.

⁵Mu zilihu gẹ mu guhaaru onye mu yeru obu ọzo; bya emeta manụ meru nyia; ọ nọdu anwukota mu shokoshoko lẹ mkpushi-ẹka; gẹ mu zuru ẹka l'iphe, eegudeje aguha mgbo ono.

⁶Mu bya aguhaaru onye mu yeru obu ọzo; ọphu ọ nọdu iya; ọ tugbuwa. Atugbu iya ono mee; meji tofu mu. Mu choo ya nta choo imo; ọphu mu acho-vuduru iya. Mu kua ya nta kua imo; ọphu mu ekuvuduru iya.

⁷Ndu nche enyashi huma mu teke ephe tsoru oma-mkpukpu ejephe agbaphe ọzo. Ephe chia mu iphe; chibashicha mu ọnyá; totachaa mu ukpo, mu gbaphuru onwomu; mbu ndu nche igbulọ mkpukpu ono.

⁸Unube unwada Jierúsalemu; unu kwee mu ukwe l'unu -huma onye ono, mu yeru obu ono be unu e-zi iya l'oghoroko iya egbukwa mu egbugbu.

Ọnu unwada Jierúsalemu eye

⁹? Bu gunu be onye obu, i yeru obu obu gude ka ndu ọzo, e yeru obu mma? Gube nwanyi ọphu mma nkengu kapyabekotaru ke ndu ọzo; kaeshiduru anyi g'onye i yeru obu obu gude ka ndu ọzo ama mma; meru g'o gude i nọdu arwo anyi egube arworwo ono.

¹⁰Onye ono, mu yeru obu ono nwukwaru ke pfuu; bya egbu nwii. L'echilabo unubuku nemadzu be yebedua agbajeeppo iche.

¹¹Ishi iya du g'okpobe mkpola-ododo. Egbushi iya toko duchaa ke nwa wuyawuya; bya ejiello hirihiri g'okpoko-ohà.

¹²Enya iya du g'enya ndo-nwenu, beru l'aguga nggele. Mbu l'o doru risaa g'a saru iya l'era-eswi. O nodugbaa le nhamunha iya.

¹³Agbagba nchi iya ephebebo dupho g'igbo, a dzashiru iphe, anoduje eshi kwekweekwee. Ogbogboromonu iya du g'ojimbvu, asoshi manụ meru.

¹⁴Oshi-eka iya du gẹ mgboro mkpola-ododo, e gude kirisolayitu mee; ọ du ubvu l'enya. Ehu iya nọdu akwo ke buruburu g'eze-enyi, e hucharu ehucha; bya egude mkpuma, vu oke-aswa; mbu safayiru mee ya; ọ du ubvu l'enya.

¹⁵Oshi-okpa iya pfuru ke roo g'obvuru mkpuma-egbe; mbu ọphu a pfuberu le ntolali mkpola-ododo. Ugbugba ehu iya nọpoho ke gbomugbomu g'ubvu ubvu Lebanonu; mbu l'omaepho g'oshi sida, no iya nu.

¹⁶Olu-opfu iya anoduje atso gẹ manụ-enwu. O buepho l'oma mma amagharu iya ẹka. Unube unwada Jierúsalemu; ọ kwa g'ọ gbaru bu ono; mbu onye ono, yeru mu obu ono; bya aburu onya mu ono.

Ebvú Sólomónu 6

Aji, unwada Jierúsalemu aji

¹? Bụ awe bẹ onye i yeru obu obu jeru; gube nwanyi, kachaa ama mma l'iphe, bu unwanyi? ? Bụ ụzo awe bẹ onye i yeru obu obu phoberu; k'ophu anyi acho-bude ngu iya?

Ọnu nwanyi ono eye

²Onye mu yeru obu jeru lẹ mgbabu iya; mbụ l'ẹka ọ dzashiru iphe, eshi mkpọ. O jeru eche aturu iya lẹ mgbabu ono; teme l'oomekokwapho ojimbvu.

³Mu bu k'onye mu yeru obu; onye mu yeru obu buru nkemu. Ooche aturu iya l'ẹka ojimbvu kuru.

Nwoke ono atụ ọnu nyee ya l'edzudzu ọha

⁴Gube onye nọ mu l'obu; jima mma ge mkpukpu Tiza; mbụ l'i duta-beru ubvu ge Jierusalemu. I du-be akpabiri ge ndu ojogu, pa ekwa-ogu phe.

⁵Jiko te elehe mu enya; kele enya ngu anoduje alo mu ẹka lẹ meji. Egbushi, nọ ngu l'ishi tuko ejigbaa g'ẹka egbu dzeberu shi l'eli ubvu Giladu awu-zeta.

⁶Eze ngu nodu achaepho pemu pemu g'ikpoto aturu, shi l'ẹka a wushiru phe ehu awufuta. G'ephe ha tuko chigbaaru unwu ebo ebo; ophu ọ dudu me nanu, gba ẹka nwa.

⁷Agbagba nchi ngu, i phuchiteru ekwa ono yeru udara, e buwaharu ebo.

⁸Unyomu eze a-duchakpokwa ukporo eto; ndu ophu abu-zidu unyomu iya adukwaro ukporo eno; teme unwumboko, e teke ejepfuswe abukwaruro aguta aguta.

⁹Gube ndo-nwenu mu; gube onye nkemu, duebe ree; i bu onye gbaru iche; bya aburu onye tubaru ne iya l'enya; mbu onye ntucha adudu l'ehu l'enya ne, nwuru iya nu. Unwumboko humaru iya bya ekua ya onye a goru ehu-utso nu. Ndu bu eze-nwanyi; me ndu a ta luzidu okpobe alulu jakwaru iya pho ajaja.

¹⁰? Bụ onye du g'iphoro nchi-abohu ono? ? Bụ onye egbu pemu pemu g'onwa ono? Mbụ-a; ? bu onye egbu nwijnwii g'enyanwu ono? ? Bụ onye du akpabiri ge ndu ojogu, chigbaa ekwa-ogu?

¹¹Mu jeru l'ẹka a dzashiru oshi, aphoje ishi; ge mu je agbaphee iphe efushigba k'ophuu lẹ nsuda ono; ge mu maeduru vayinu emeshiwa okoko; wakwapho ge mu maru me itorokuma atwa ige.

¹²Iphe ono bya edo mu enya; egomunggo mu gbẹ noduwanu l'ugbo-inya ono, ndibe mu gude dulataru mu nwamgboko mu ono.

¹³Lwanu azu! Lwanu azu; gube nwanyi Shulemu! Lwanu azu! Lwanu azu; g'anyi lerwee ngu enya elerwee! ? Bụ gunu meru iphe, unu anodu ele nwanyi Shulemu taataataa g'onye ele ndu Mahanemu enya ẹka ephe ete ebvu?

Ebvu Solomonu 7

¹Gùbe ada-eze; iphe, ì òkwanu ùbvù l'èka i yeru akpòkpa akpò ebvu akpòkpo! Ùtapfu ngu tũko ama gè mkpuma, vu oke-aswa, onye maru eme òna kwòcharu akwòcha.

²Mkpótubo ngu gbaerupho kerere g'otumu; mbù otumu, mée-vayínu ta abvujedu abvubvu. Èpho ngu òpèpho g'igberì, a kùberu l'ikpo l'ikpo; bya edophee ya ojimbvu, ama mma mgburugburu.

³Èra ngu èphenebo dù g'unwu umoro labò. Mbù g'unwu umoro, a nwuru èbo.

⁴Olu ngu dù g'ùlo-eli, e meru l'eze-enyi. Ènya ngu èphenebo doru kè rìsaa g'okpuru mkpùkpu Hèshìbonu; mbù ono, nò-kube òguzo Batu-Rabimu. Imi ngu degeru edegeru g'ùlo-eli Lébanònu, gharu iphu lè mkpùkpu Damasùkosu.

⁵Ishi ngu meru ngu; ì nòdu ama mma g'ùbvù Kamèlu. Ègbushi, nò ngu l'ishi nòdu eke oruswe oruswe. Iphe, eze eje rwùhuru èka ò nò ele ègbushi ngu g'a swìngashìru iya; ò nòdu ama ntumatu.

⁶Lewarò gè gùbe onye mu yeru obu amabe mma; bya adù ùbvù l'ènya; waa g'ì bù-be nwamgbòko, emeje nemadzù èhu-ùtso!

⁷L'ùgbugba bè ì mìtaerupho kè swangùswangu gè mpfù. Èra ngu èphenebo dùchaephò kè nwajòpfula.

⁸Mu sùru: “Mu e-nyihu mpfù ono enyihu; je enwota iya èpfu.” G'èra ngu òkwa kè jòpfula g'akpuru vayínu. Tème unme, ìitufuta eshi kwèekweekwee gè mpfù-alì.

⁹Tème ònu nòdu atso ngu mée mée gè mée, kachaa atso ùtso.

Nwanyì ono ele ènya onye o yeru obu

G'ò bùkwaru onye ono, mu yeru obu ono a-ngu mée ono! Mbù-a g'ò tòkpoephò nwèhu shi l'ùgbonu sòba iya l'ònu!

¹⁰Ò kwa onye ono, mu yeru obu ono bè mu bù nkiya. Tème mu bùkwarupho onye anòduje agù iya ègu.

¹¹Byanù gùbe onye mu yeru obu g'anyi je l'òma ègu! G'anyi je akwajè l'ime mkpùkpu!

¹²G'anyi nmaa èwa l'ùtsu jèèdu l'opfu-vayínu; je amaru mè vayínu tùwaru ìge. Mbù g'anyi maèduru m'ìge iya jashìkotawaru. Anyi amakwarupho mè oshi ùdara ono tùshìwaru ìge nkiya. Ò bùru èka ono bè mu a-nòdu goshi ngu lè mu yeru ngu obu.

¹³Oshi mandureku eshikwa mkpò. Akpuru oshi òphúú; mè akahù iya, dùgbaa ìche ìche, nò l'ònu-ùlo anyi bè mu dobekwaru gùbe onye yeru mu obu.

Ebvù Sólomònu 8

¹Òme ì gbè bùru nwune mu nwoke; mbù onye ne mu cheru èra; mè anyi lè ngu -hùma l'ùzo mè mu etsutsujekwa ngu ònu; o to nwedu onye a-sù mu sùu.

²Mbụ mę mu eduta ngu dubata l'ulo ne mu; bụ iya bụ onye ziru mu iphe; je echee ngu okpobe męe, mu kutaru; mbụ męe, shi l'ige itorokuma.

³Ekicha bę o yeru mu l'ishi; bya egude ękutara iya gbaphua mu.

⁴Unubę unwada Jierusalemu; unu kwee mu ukwe; l'unu ta akpatsudu n-yemobu jasụ l'ọ bya l'onwiya.

Ike n-yemobu

⁵? Bụ onye bụ ophuu, shi l'echiegu abya pho, dakoberu onye o yeru obu ęgube pho? O kwa lę mkpula udara bę i zę; mu bya akpatsu ngu. O buru l'ęka ono bę ne ngu nwuru ngu. Mbụ l'ọo l'ęka ono bę ime wataru iya ememe; o nwua ngu.

⁶Mee mu gę mu du g'iphe-olu, inya l'olu, egude mee iphe-ohubama; o nodu achichi ngu l'okpoma. Mee mu ro gę mu du g'iphe-ohubama, i gba l'ęka. Kele n-yemobu dubekwa okpehu g'anwuhu. Okophoo ya dukwapho g'ilu, a ta rwo-butajędu arwo-buta. O nodu ahuje g'ọ ta pfupfufu oku; mbụ g'oku enwu phoophoohoo.

⁷Oke mini ta adukwa ike anmanyi n-yemobu; ophu utso adudu ike eri iya. O -buru lę nemadzu gude iphemiphe, o nweru g'ọ ha eme g'ọ zua n-yemobu; bę oomekwa g'a kpoo ya ębo l'afu.

Nwanyi ono yęe unwune iya

⁸Anyi nwekwaru nwune nwanyi; ole ęra teke adudu iya l'okpoma. ? Bụ gunu bę anyi e-meru nwune anyi ono mboku, a jiru aji iya?

⁹O -buru l'o shihuru ike g'igbulo; bę anyi e-woru mkpola-ochaa kwoo ya nkwotankwo l'ęhu. Teke o bukwanu l'o gheru onu g'onu-abata; anyi egude mgbo sida gu-chita iya.

¹⁰Mu shihukwaru ike g'igbulo. Teme ęra mu tuko pfugbaaru kę kekereke g'ulo-eli. Onye mu yeru obu bę maakwaru lę mu l'iya
-no-kubewaa bę ęhu adujee ya pho guu.

¹¹Solomonu nweru opfu-vayinu lę Belu-Hamonu; bya eworu iya ye l'ęka ndu a-nodu apfu iya ugwo. Onyemonye lę ndu ono bụ iphe, ęphe e-wotajęru iya l'aswa akpuru vayinu ono bụ ękpa mkpola-ochaa iri iri.

¹²Obenu l'opfu-vayinu nkemu bụ mu nwe iya. O buru g'ọ du mu ree bụ gę mu e-me iya. Gube Solomonu; o kwa gubedua e-nweru ękpa mkpola-ochaa iri l'iphe, e retaru lę vayinu ono. Ekpa mkpola-ochaa labo aburu kę ndu eletaję iya ęnya.

Uja nwoke ono yęe onye o yeru obu

¹³Gube onye ono, bu lę mgbabu ono; ndu mu l'ęphe eshi onya ngabekwaru nchi g'ęphe numa olu ngu. Gę mu numaedukwa olu-opfu ngu obu!

Nwanyi ono su:

¹⁴Jiko gube onye yeru mu obu; pfukwaa kę shooshoo byapfuta mu ęwegwa; ęgube ono anigo; ozoo ele nshii apfuję pho l'ubvu, a kushiru iphe, eshi mkpo!

Azáya

Azáya 1

¹Ọwaa bụ ophulenya iphe, e-me l'alị ndu Jiuda yee mkpụkpu Jierúsalem. Onye phuru iya nụ bụ Azáya nwa Emọzu. Teke ọ phuru iya bụ teke ndu-a bụ eze ndu Jiuda, bụ iya bụ Uzáya; Jiótamu; Éhazu; yee Hezekáya.

Chileke abarụ ndibe iya mba

²Gube igwe; nụmakwa! Gẹ gube alị ngabekwa nchi; kele Chipfu pfuakwaru opfu. Ọ suru-a: “Mu hewaru unwegirima mu; mee phe metsee; teme phe gbe bya ekwefuru mu ike.

³Eswi makwaru onye nwe iya nụ. Nkapfu-igara bya amaru iphe, onye nwe iya nụ eyejeru iya nri; obenu le ndu Izurelu ta adudu ophu phe maru; mbu le ndu ono, bu ndibe mu ono be iphe edoduru enya.”

⁴Oowaa! Unube oha iphe-aji-a! Unube ndu ejo-iphe jiru ehu-a! Eri ndu ejo-ememe-a! Unwegirima urwuali-a! Ndu-a gwobewaru Chipfu. Phe ta agubeeduru Onye nsọ ke ndu Izurelu iphe; phe woru azu ghaaru iya.

⁵? Denu g'o gude e je a-nu unu aphu ozo? ? Bu gunu meru g'o gude unu kwe eka l'ekwefuru Chileke ike? Ishi bukotawa unu onya onya; teme meji nodu ebuhwaa unu ebuhu.

⁶E -shikpo l'ichirupfu-okpa unu jasụ l'echi ishi unu ta aduedu eka iphe te emedu unu. Iphe, dukota iya nụ bụ igbiri-echachi; mekpoo onya; mekpoo eka alwa unu mee toritori, adudu ophu a saru asasa; ophu o dudu ophu e kechiru ekechi; ophu o dudu ophu e meberu obvu.

⁷Alị unu buwaa ochobu. Mkpukpu unu buru iphe, oku tsufugbaaru. Opfu, unu koru be ndu ohozo no l'iphu unu eripya. Ọ dabyiru karaphongu g'eka ndu ohozo lwuru.

⁸E woru ada Zayonu ono togbo okorobo ge nwa mkpu, a turu dobe l'opfu-vayinu; ge nwulo-egu, a kpuru l'egu akpuru-eli; ge mkpukpu, ndu ohogu iya no-pheru mgburugburu.

⁹Ọ -to bu le Chipfu, bu Okalibe-Kakota-Ike haru haphodoru anyi nwanu ophu phoduru nu; me anyi aduepho ge mkpukpu Sodomu; mbu-a; anyi gege aduepho ge mkpukpu Gomora.

¹⁰Unu nūmakwa Opfu Chipfu; unube ndu-ishi ndu Sodomu! Unu ngabekwa nchi numa ekemu, Chileke anyi turu; unube ndu Gomora!

¹¹Ọ suru-a: “Ọ to duedu iphe, mu guberu ikpoto ngweja, unu anoduje egwe anu mu. Ebili ono, unu akpoje oku nu mu ono; yee eba-anu unu ndu ophu kachaa ree; jiakwaru mu epho jigharu mu iya eka. Mee eswi; yee ke nwaturu; yee k'eghu te emejeekwa g'iphu tusahu mu.

12G'unu abyaję l'iphu mu; ? bụ onye asuje unu g'unu bya; mbụ g'unu byaru mu azotoshiru oma-unuphu?

13Unu ta abyajęhekwa mu anụ iphe, adudu iphe, o bụ! Ụnwù-isensu, unu akpoje oku nụ mu tukoakwaru buru mu ahuma ahuma. Obo Onwa-òphúú; me obo eswe-atuta-unme; mekpoo ekukobe, unu ekukobeje onwunu g'o ha; dukotakwa mu ashi. O buepho l'o to duedu ejo ndzuko unu ophu aduadaa mu ashi.

14Obo-onwa-òphúú, unu anoduje abo; mekpoo obo-iphe unu ozokpo, bu ndu ophu geru egeru dukotakwa mu ashi. Ephe tukowaru anyi mu erwa. Mu tanyawaru iya nshi; ike bvwa mu.

15“G'unu achi-liję aka epfu anụ mu-a be mu ewofujekwa enya l'eka ono. Unu -pfuru nụ mu nta pfua imo; mu ta angadu nchi; kele ochi no unu l'eka.

16Unu jenụ asachaa onwunu; mee onwunu g'unu gbuchafu! Unu wofunu ejo-ememe ono, unu eme ono l'iphu mu! Unu hanaa eme ejo-iphe!

17Unu nwunaa eme iphe, du ree! Unu chonaa ikpe, pfuru nhamunha! Unu ahua ndu eme ndu ozo ewere ahuhu! Unu gbajenuru nwogbee, enwedu nna odzori! Unu agbachitajeru nwanyi, ji iya anodedu ndzu!”

18Wakwa iphe, Chipfu epfu baa: “Unu byanụ g'anyi chia idzu; g'idzu anyi tuko wua nanu! iphe-ęji unu -duchakpoonu ęji eke uswe-uswe be oo-mechaa chaahaa pemu pemu g'aka-mini-sunoo. Teke o bụ l'ooke gbogbogbo g'uswe be oo-mechaa chaahaa phuuphuu g'oghu ochaa.

19O -buru l'oohe unu ihee; teme unu nodu emeje iphe, a suru g'unu mee be unu e-rikwa iphe, kachaa ree, shi l'ali-a.

20Obenu teke unu jikaru bya ekwefu ike bukwa ogu-echi be a-sujashi unu. Nokwa iphe, shi Chipfu l'onu bu ono.”

Jierusalemu bu mkpukpu, eme iphe-ęji

21Lewarọ ge mkpukpu ono, e shi gude aka ono byaru bya aburu ovuoba! Mbụ mkpukpu, duru teke buepho ikpe, pfuru oto be e shi anoduje iya ekpe; mkpukpu, apfubekoto shi buru eburu l'ime. Nta-a be o buwaa ndu egbu nemadzu bu iya.

22Mkpola-ochaa, i shi nweru buwaa nshi-mkpola. Eguru mee ngu ono buwaru iphe, e gude mini gwanyishia.

23Ndu-ishi l'ime ngu bukotawa ndu kwefuru Chipfu ike; bya aburu ndu ephe le ndu-oshi gba l'ogbo. G'ephe ha yeru enya l'eri uphalazu. Teme o buerupho g'a nu phe; l'aduje phe ree. Onye enweedu nna be ephe ta agbajeduru odzori; ophu ephe angajedu nchi l'opfu ehu nwanyi, ji iya anodedu.

24Noo g'o gude Nnajiuphu; mbụ Chipfu, bu Okalibe-Kakota-Ike; mbụ Okalibe ke Izurelu pfua su: “Ihee; ge mu bya emee ndu mu l'ephe du l'ukukanyi iphe; gude dua onwomu obu. Ge mu bya egude ndu ohogu mu gwata ugwo iphe l'onwomu.

²⁵Gẹ mu bya adaa unu ẹka kẹ njọ. Gẹ mu bya ahuchafuchaa nshị-mkpọla ono, a gwakọberu unu ono rengurengu; bya atuko ẹrwu, dọ unu l'ẹhu rwushia.

²⁶Mu e-dophuchaa ndu-ikpe unu azu g'ẹphe dọ g'ẹphe shi dọ teke ndiche. Mu emee ndu akpọ-zijeru unu ọzo g'ẹphe dọ g'ẹphe shi dọ lẹ mbu. E -mechaa l'aawata unu eku mkpukpu, pfulerekoto; mkpukpu, e gude ẹka.”

²⁷Mkpukpu ono, nọ l'eli ọbvú Zayonu ono bẹ ee-gude ikpe, pfulu ọto gbafuta. L'e gude apfulbekoto gbafuta ndu izimanu lwaru azu lẹ mkpukpu ono.

²⁸Obenu lẹ ndu kwefuru Chipfu ike; mọ ndu iphe-ẹji bẹ aa-tuko tsupyashia. Teme iphe, bukpuo ndu gwọberu Chipfu abukotaru ọla-l'iswi.

²⁹Achi ono, aasogbaa nsọ ono e-mechaa mee unu iphe-iphere; g'ọ bu iya bẹ unu yeru ẹnya-a; mbu lẹ mgbabu ngweja ono, unu hotaru ono e-mechaa tu unu ẹberebete;

³⁰kẹle unu e-mechakwaa dọ g'achi, laru ẹkwo; mbu g'opfu, a koru l'ẹka mini adudu.

³¹Ndu shihuru ike e-mechaa dọ g'ẹphuuruu. Ozi, ẹphe jeru abukotaru ẹkoroku; kẹle ẹphenebo a-tuko kekota oku; ọphu ọ dudu onye suru agbanyị oku obu.

Azáya 2

Ẹhu-guu ojeje

(Mayi 4:1-5)

¹Qwaa bu ọphulanya, Azáya nwa Emọzu phuru l'ẹhu ndu Jiuda yee ndu Jierúsalemu.

²Su-a; o -rwua teke ikpazu bẹ ee-me g'eli ọbvú ono, a kpuru eze-ulo Chipfu ono nguru anguru; mee ya g'ọ buru eze l'ẹka iphe, bukpuo ọbvú ọzo nọgbaa. Mbu l'ee-me iya g'ọ kakota ọbvú ọzo l'eli. Noo teke ọhamoha a-nodu awu awu-pfu iya.

³Ikpoto nemadzu a-bya bya asu: “Unu bya g'anyi je l'eli ọbvú kẹ Chipfu! Unu g'anyi je l'ulo Chileke kẹ Jiékpọ! Oo ya e-zi anyi ọzo iya; k'ọphu anyi a-wata etso ọzo, ọ toru.” Noo kẹle ekemu e-shi l'ọbvú Zayonu futa; mbu l'opfu Chipfu e-shi lẹ mkpukpu Jierúsalemu bya.

⁴Oo ya e-doshi opfu, dugbaaru ọha yee ọha ibe iya. L'ọ bya edoshiaru ikpoto nemadzu opfu, duru phe nu. Ẹphe e-woru ogu-echi phe kpukwaa l'ọ buru ogu; woru arwa phe kpua l'ọ buru nwa mma, e gude akocha iphe. O to duedu ọha, a-patakwadu ogu-echi ejepfu ọhoso ogu; ọphu ẹphe anwuedu alwu ogu ọzobaa.

⁵Unube onu-ulo Jiékpọ; unu byanu g'anyi tsoru iphoro ọphu Chipfu nwuberu anyi.

Eswe kẹ Chipfu

⁶I jikawaru ndibe ngu ono; mbu onu-ulo Jiékpọ onoya; kẹle omamanshi ndu shi ọzo ẹnyanwu-awawa jiru iya ejiji. Teme ẹphe nodu agba eja gẹ ndu Filisitayinu. Ẹphe lẹ ndu ọhoso je akua okpa.

⁷Alị phe bu iphe, jiru iya nu bu mkpọla-ochaa mọ mkpọla-ododo. Ọphu ẹku phe abvudu abvubvu. Alị phe bu iphe, jiru iya nu bu inya; ọphu ugbo-inya phe abvudu abvubvu.

⁸Alì phẹ̀ bụ́ iphe, jiru iya nù bụ́ nshi nshi; ọ́ bụ́ru iphe, ẹ́phe abarụ́ ẹ́ja bụ́ iphe, ẹ́phe gude ẹ́ka phẹ́ gẹ́degede mee.

⁹Noo g'o gude e jee ewoze nemadzụ alì. Mbụ́ l'amadụ́ bẹ́ ee-me g'o rwua alì. B'a gụ́kwaru phẹ́ nvù!

¹⁰Gbanuru laa l'agbara-mkpuma! Je je edomia onwongu l'ime alì; kele iitsu Chipfu ebvu; teme akpabiri iya nọ́du eye ngu ebvu!

¹¹Onye etu onwiya ẹ́pha bẹ́ ee-mechaa mee g'ẹ́nya lwa. L'e mee gẹ́ ndu etse etsetse phuru yoo. Ọ́ bụ́ru Chipfu kpoloko bụ́ onye ee-kutse m'o -rwua mbọ́ku ono.

¹²O nwekpọ́erupho ujiku lanụ́, Chipfu, bụ́ Ọ́kalibe-Kakọ́ta-Ike doberu iphe, bụ́kpoo ndu eku onwophẹ́ yẹ́ ndu akpa nggangga; bya edobekwaru iya phọ́ ndu ekutse onwophẹ́. Ọ́o mbọ́ku ono bẹ́ ee-kuze phẹ́ alì.

¹³Mbọ́ku ono bẹ́ e doberu iphe, bụ́ oshi sida, nọ́ l'úbvú úbvú Lébanonu, bụ́ oshi, tsekotaru agbaragba bya ajaa àjàjà; bya edobekwaru iya phọ́ iphe, bụ́kotakpoo achi, nọ́ l'alì Beshanu;

¹⁴bya edoberu iya úbvú úbvú, hagbaa ephekerephe ephekerephe; mẹ́ obvu, ha l'eli l'eli.

¹⁵O doberu iya iphe, bụ́kpoo oje, hagbaa ephekerephe; mẹ́kpoo igbulọ́, a kpushiru ike;

¹⁶mẹ́kpoo ugbo-mini ndu Tashishi g'ọ́ hakọ́ta; mẹ́kpoo iphemiphe, e meru; ọ́ nọ́du ama mma.

¹⁷Onye etu onwiya ẹ́pha bẹ́ ee-me g'ẹ́nya lwa. L'e mee gẹ́ ndu etse etsetse phuru yoo. Ọ́ buerupho Chipfu kpoloko bẹ́ ee-kutse mbọ́ku ono.

¹⁸Nshi ta aduedu adudu ophu kpọ́.

¹⁹Mbọ́ku ono bẹ́ nemadzụ́ a-gbaru laa l'ọ́gba, nọ́ l'agbara-mkpuma; gbaru laa l'enu, a tũru l'alì; kele ẹ́phe atsu Chipfu ebvu; teme akpabiri iya nọ́du eye phẹ́ ebvu teke ono, ọ́o-gbalihu gẹ́ ya nmaghua mgboko l'ophu anmaghu ono.

²⁰Mbọ́ku ono bẹ́ nemadzụ́ a-chiru nshi ono, ẹ́phe gude mkpọ́la-ọ́chaa mẹ́ mkpọ́la-ododo mee dobe agwa agwagwa ono chiru phekaaruru anụ́, bụ́ molu yẹ́ ọ́tsu-nwankuta.

²¹Ẹ́phe a-gbaru laa l'ẹ́ka agbara-mkpuma gbaru ọ́wa; mẹ́kpoo l'ime ọ́gba, nọ́gba l'eli úbvú; kele ẹ́phe atsu Chipfu ebvu; teme akpabiri iya nọ́du eye phẹ́ ebvu teke ono, ọ́o-gbalihu gẹ́ ya nmaghua mgboko l'ophu anmaghu ono.

²²Hanaa akpọ́ru obu yeru nemadzụ́; kele mkpakọ́ iphe, o nweru bụ́ unme, ọ́otu l'imi. ? Bụ́ gunu ọ́zo bẹ́ oo-mefuba ọ́nyá?

Azáya 3

Ikpe, dũru ndu Jierúsalemũ yẹ́ ndu Jiuda

- ¹Sụ-a; lekwa lẹ Nnajiuphu, bụ Chipfu; bya aburu Okalibe-Kakota-Ike abyakwa anafu ndu Jierusalemu; yee ndu Jiuda eka iphe eshije erwu phe eka. Oobya phe anafu eka ephe eshije akpata nri; me eka ephe eshije ekuta mini-angugu;
- ²nafu phe ndu ike du; me ndu ojogu; nafu phe ndu-ikpe; me ndu mpfuchiru Chileke; nafu phe ndu agba eja; me ndu bu ogerenya;
- ³nafu phe ndu-ishi ndu ojogu; me ndu nweru okwa; nafu phe ndu mgbazi; me ndu maru eme ona; mekpoo iphe, bu ndu agba eja doru enya.
- ⁴Mu e-me g'o buru unwokorobya, a-buru ndu-ishi phe; mbu l'oo ndu angukwadu era a-bujeru eze phe.
- ⁵Ndiphe a-wata akpa nwibe phe ehụ. Onyenonu l'oodaru yee nwibe iya; obutobu yee obutobu iya aduru l'opfu. Unwu-ogbo-lanu etso ndu bu ogerenya opfu. Ndu adudu iphe, ephe bu etsokwapho ndu aakwabe ubvu opfu.
- ⁶A -nonyaa; nemadzu azu nwanna iya gburumu; mbu onye shi l'ibe nna iya; zu iya gburumu su: "Oo ngu a-buru ishi anyi eshinu i nweru uwe nwilile. O buru ngu maru g'ii-me mekota ola-l'iswi-a."
- ⁷Noo teke onye ono a-rashi su: "Waawakwa-o! Mu ta asukwa iya emekota. Mu te enwekwa nri; ophu mu enwekwa uwe, eeye l'ehu. Unu te emekwa mu onye-ishi ndu ndu-anyi-o!"
- ⁸O buru iphe, kparu iya nu bu le ndu Jierusalemu be upfu duru l'okpa. Mbu le ndu Jiuda adawaa iko. Iphemiphe, ephe epfu epfupfu; yee iphe, ephe emekota ememe tukoru buru emeswe Chipfu; mbu aturwuepho atatiphu Chipfu ono, egbu nwiiinwii ono.
- ⁹G'iphu gbaru phe bukpoada iphe, agba phe ekebe. Ephe nodu anoduje asa iphe-eji phe asasa ge ndu Sodomu. Ophu ephe edomidu iya edomi. Nshio phe! Noo kele ephe gudewaa eka phe setaru onwophe eze iphe-ehuka.
- ¹⁰Karu onye pfuberekoto l'oo-duru iya le ree; kele oo-ri akpuru, eme oma iya mitaru.
- ¹¹Nshio ndu ejo-iphe; kele ephe a-lakota l'iswi. Aa-pfu phe ugwo iphe, eka phe metaru.
- ¹²Ndibe mu bu unwokorobya akpa phe ehụ. Teme o buru unwanyi bu ishi phe. Sụ-a; ndu mu! O kwa ndu edu unu uto gude unu ephu uto. Ephe duru unu haa uto shiahaa ophu abudu uto.

Ikpe, Chipfu e-kpe ndibe iya

- ¹³Chipfu noakwa l'eka oo-nodu kpee ikpe l'ulo-ikpe. O gbalihuwaru pfuru ge ya kpee ndiphe ikpe.
- ¹⁴Chipfu wataru ekpe ndu bu ogerenya ikpe; waa ndu-ishi ndibe iya su: "O kwa unu mebyishiru opfu-vayinu mu. Iphe, unu gwetaru l'ibe ndu ukpa kukwaru l'ibe unu.

¹⁵? Denu g'o gude unu gwee ndibe mu arakabya; bya egwee iphu ndu ukpa rwukuru rwukuru? Noo iphe, Nnajiuphu epfu; mbu Chipfu, bu Okalibe-Kakota-Ike.”

Okwa, aanmaru unwanyi Jierusalemu

¹⁶Chipfu suru-a: “Unwanyi, bu l'ubvu Zayonu kunukakwaru onwophe. Ephe abujeru; ephe -nodu eje ije ephe eworu olu ngakobe alo enya vaavaavaa; to nwehu eje degengu degengu; azo iphe, ephe gba l'okpa jogongu jogongu.

¹⁷Noo g'o gude Nnajiuphu je l'eworu ekpa-ebyi ghaa unwanyi, bu l'ubvu Zayonu l'ishi. Mbu le Chipfu e-me g'ishi chaa phe swarishwari.”

¹⁸Mboku ono be Chipfu a-nashichaa phe iphe, ephe gude ama mma; mbu iphe obu, a zuru phe jogoro-jogoro obu; me ophu ephe gude kechita ishi; me iyagba, ephe tukporu l'olu;

¹⁹mekpoo iphe-nchi; me iphe-eka; me ophu e gude ekpuchi iphu;

²⁰iphe, e gude edozi egbushi; me iyagba-ishi-ikpere; me olokpo, eeswe l'upfu; me ekpemu manu, eshi mkpo; me nwanshi phe;

²¹echi, ephe agba le mkpushi-eka; me ophu ephe eye l'imi;

²²eguru uwe kpowula-kpowula phe; me ukpo phe; me ekwa achichi phe; mekpoo nweda okpoga phe;

²³me onyo phe; me nweguru uwe ochaa ephe eyeje l'ime eh; me ekwa, ephe agbaphuje l'ishi; me ophu ephe ajikobeje l'ukuvu.

²⁴Noo g'oo-du; teke ephe gege anodu ete iphe, eshi mkpo; ephe eshiaha ishi. Teke ephe gege edo onwophe olokpo l'upfu; ephe ekebechia onwophe eri. Teke ephe gege enweru egbushi, ama ntumatu; ephe akpushia ishi akpushi. Teke ephe gege eye uwe, ama ntumatu; ephe eyechia uwe-aphu. Mma ono, ephe shi ama ono aghakobe buru iphe-iphere.

²⁵Unwoke unu bu ogu-echi be ee-gude gbushia phe. L'a toko ndu ojogu unu gbushia l'ogu.

²⁶Onu-abata Jierusalemu echia mkpu ekwa gua aphu anwuhu. Mbu le Jierusalemu a-du ge nwanyi, gba eka nwa; gwodoshihu l'ali.

Azaya 4

¹Ozo bu l'o -rwua teke ono be unwanyi esaa a-wu-pfutaje nwoke lanu su iya: “Jiko nafunu anyi iphere owa-a! Hanaa g'o buru-a l'anyi a-zaru laaru epha ngu. Anyi a-nodu-a azu onwanyi le nri; anmaru onwanyi ekwa.”

Eedophu Jierusalemu azu l'onodu iya

²O -rwua teke ono be onye ono, bu ekali Chipfu a-nodu ama ntumatu; teme l'o dukwapho akpabiri. Mebyi iphe, amishi l'ali a-buru iphe, ephe e-gude eku onwophe;

buru iphe, ephe e-gude du ùbvù l'ènya; mbu nwa ndu ophu phoduru nu l'alì ndu Ízurelu.

³Nwa ndu ono, phoduru l'ùbvù Zayonu ono; mbu nwa ndu ono, phoduru le Jierúsalemu ono be ee-kuje ndu du nsò; mbu ndu e deru epha phe le ndu dzu ndzu le Jierúsalemu.

⁴Ò buru Nnajiuphu a-sachafu inyinyi, du nwada Zayonu onoya l'ehu. Oo-gude unme nkiya sachafu mee, tukoru Jierúsalemu ehu; mbu unme ophu o gude ekpe ikpe bya aburu unme, enwu oku.

⁵Oo ya bu; Chipfu abya l'ùbvù Zayonu l'ophu; mekpoo iphe, bu ndu ono, edzukobeje l'eka ono; bya emeta urwukpu, akpu tutuutuu doberu phe l'eswe; meta oku, enwu phoophoophoo doberu phe l'enyashi; kele eka ono g'o ha be ee-gude odu-biribiri Chipfu kpuchia.

⁶Oo-buru ikpuka buru ìbvù duru phe g'okpomoku taa du phe l'eswe; bya abukwarupho eka ephe a-gbabaje je anodu zee ndzu; yee eka ephe e-domije onwophe me igwe - nodu alwa yegeyege mini; yee m'o -nodu edze oke mini.

Azáya 5

Ebvú kẹ opfu-vayinu

¹Gẹ mu gwa ebvu nu onye mu yeru obu. Mu e-gude opfu-vayinu iya gwa ya. Onye mu yeru obu gbaru opfu-vayinu l'osu, no l'okpa-ùbvù.

²Ò hazeru iya ahaze bya atutushichaa ya mkpuma bya ahota akpuru vayinu, kachaa ree kua ya. O bya akpua ulo-nche dobe iya; bya emetakwa iya pho eka aakuje mee. O nodu ele iya enya amita akpuru vayinu, du ree. Obenu l'o gbẹ buru ejo akpuru be o mitaru.

³“Oo ya bu le-a; unube ndu bu le Jierúsalemu; me ndu ophu bu l'alì ndu Jiuda; unu yeeshikwa onu l'ehu mu l'opfu-vayinu mu ono.

⁴? Bu gunu be mu gege emebaaru opfu-vayinu mu-a, bu iphe, mu emeadaru; meru g'o gude mu lee enya l'oo-miru mu mebyi, du ree; o bya ami amimi bya amia ejo mebyi.

⁵“Nta be mu a-karu unu iphe, mu e-me opfu-vayinu mu. Mu a-phokashi iphe, e gude kpo-buta iya akpo-buta g'iphe mebyishia ya. Mu etsukposhia igbulò iya haa ya g'a zò ya tolitoli.

⁶Mu e-me iya g'o buru alì, a gbadoru agbado. A taa kochabaedu iya akocha; ophu eegbubaedu iya ogu. Oo ya bu g'olekarara; yee ogara-mbo ezee l'eka ono. Mu akaru igwe g'o to dzebaekwa mini wushiru iya.”

⁷Ò kwa onu-ulo Ízurelu bu opfu-vayinu ono, Chipfu, bu Okalibe-Kakota-Ike gbaru ono. O buru ndu Jiuda bu iphe ono, o kuru iya ono, tubaru iya l'ènya ono. O shi ele enya mgbazi; o buchiaru iphe, o humaru bu mgbaghashi. O lee enya apfubekoto; o buru iphe-aphu be o humaru.

Aphù, Tsòru ndu Ízurelu

⁸Nshio unube ndu anataje ulo yekwa l'ulo unu; nata ali onye ozo yekwa l'ali k'unu; jasụ unu atuko ekameka nata buru l'obotegu nkinyi unu.

⁹Chipfu, bu Okalibe-Kakota-Ike pfuakwaru mu; mu numa su: “Tororo opfu bu l'ulo, du igwerigwe e-mechakwaa dabyiru iphoro. Mbụ l'okoke ulo ono, bugbaa eguru ulo ono e-mechakwaa buru ulo, e te budu ebubu.

¹⁰Eka ee-gude eswi iri, a jigbaberu ebo ebo koo okoro ujiku ophu be nwa mee-vayinu, aa-pyitaje iya e-jijeepho otumu mee eto. Onye kuru mebyi iphe, jiru ogbongu l'o wota iya iphe, jiru nkweka kpoloko.”

¹¹Nshio ndu etehuje le nchi-abohu jeshia achọ eka ephe a-ngu mee; ndu anguje mee jasụ l'echi abali; mbụ jasụ enya ekee phe voo l'eka ephe angu iya.

¹²Egube ndu ono egudeje une; me ogelenda aku l'eka ephe abo iphe. Ephe egbu opu; aphụ upyi; angushi mee. Ole ephe ta akpadu ishi iphe, Chipfu eme; ophu ephe akwabedu ozi, o gude eka iya jee ubvu.

¹³Noo g'o gude e je akpu ndibe mu le ndzu; kele iphe te edojedu phe enya. Ndibe phe, bu ndu nweru okwa bu egu e-mechaa gbua phe. Igwe-oha phe a-buru egu-mini a-gu-gbushi phe.

¹⁴Oo ya bu l'ali-maa be egu kabawaa agugu. O saepho onu ke gabala ghekahu. O buru l'ime iya be ndibe phe, aakwabe ubvu a-wuba. Igwe-oha phe awuba iya; ndibe phe ndu aswoje uswo; me ndu rigbarigba-mee a-tuko wuda iya.

¹⁵Noo teke ee-woze nemadzu ali. Mbụ l'amadu ta aduedu iphe, oo-bukwaduru. Enya alwa ndu etse etsetse.

¹⁶Obenu l'ikpe, pfuru oto ono, Chipfu, bu Okalibe-Kakota-Ike kperu ono be ee-gude kutsee ya ekutse. Mbụ le Chileke ono, du nsọ ono e-goshi le ya du nsọ. O buru apfubekoto nkiya be oo-gude goshi iya.

¹⁷Noo teke aturu a-ta nri g'o bu l'o no l'egu eka eecheje iya. Unwu aturu ataaha nri l'eka iphe ndu eze laru l'iswi.

¹⁸Nshio ndu egudeje okpukpu-eregede akpu ejo-iphe wuruwuru; teme ephe egude okpukpu-eswi akpu iphe-eji.

¹⁹Nshio ndu ono, asuje: “Ge Chileke menaa egwegwa mee iphe, oo-du ike mee g'ephe huma! G'o rwukponaa! G'iphe obu, Onye Nso ke ndu Izurelu tuberu ememe obu mekponaa g'ephe maeduru iphe obu!”

²⁰Nshio ndu ewojeru ejo-iphe kua iphe, du ree; woru iphe, du ree kua ejo-iphe. Ndu ewojeru ochii dochia enya iphoró; woru iphoró dochia enya ochii. Ndu ewojeru iphe, atso ilu dochia enya iphe, atso utso; woru iphe, atso utso kua iphe, atso ilu.

²¹Nshio ndu edobesuje l'ephe maru iphe; dobesukwapho l'ephe kwaru enya.

²²Nshio ndu bu iphe, e gude maru phe bu angu mee. Teme o buru phe be angu ngwaragwa mee wukoru;

²³mbụ ndu ewehaję onye-ikpe nmaru opfu l'ọ nuru phę iphe-ųphalazu; bya anafu onye iswi du mma ikpe, pfuru ọto, e gege ekpe iya.

²⁴Oo ya bu ọ-a; ọ kwa g'ire-ọku erichaję ekperema okponku erichaa; eswa okponku alaa pyetee l'oku, enwu phoophoophoo-a; nokwa g'ogbarabvu phę e-repyahu; okoko phę etsua duu g'urwuku; kele ephe jikaru edobe ekemu, ọ turu; mbu Chipfu, bu Okalibe-Kakota-Ike. O buru opfu Onye Nso ke ndu Izurelu ono be ephe gburu tųphee.

²⁵Noo g'o gude ęhu nodu eghushi Chipfu egbu ike l'iphe, ndibe iya meru iya. O wolia ęka chia phę gbaa; chikata phę tųa. Eli ųbvų nodu anma jiiijii. Odzu phę dakaa poopoo l'oma gbororo. O dųchakpoo nno; ęhu nodu eghule iya-a egbu g'ooghu iya; ọ palięle-a ęka g'ọ paliru iya.

²⁶O bururo oha, noro ųzenya ųzenya be ọ paliru ękwa-ohubama; mbu ọ bururo ndu no l'ęka mgboko jeberu be okporu okwe. Ephe shi l'ęka ono ezi taphutaphu agba abya.

²⁷Ophu ọ dudu g'ephe ha g'ọ ka mma l'oo onye lanu, ike oso bvuru; ophu ọ dudu onye ophu mgbenya rweru; ophu ọ dudu onye mgbenya turu; ophu ọ dudu onye ophu akpo, o keru l'upfu to-woru ato-wo l'upfu; ophu ọ dudu onye ophu eri akpokpa iya gbabuhuru.

²⁸Apfu phę tųpyichaa zinguzingu. Uta phę g'ephe ha gokobechawaa rengurengu. Nzokpa inya phę nodu egbunwutajęchaa oku. Okpa ugbo-inya phę nodu ezichaa phaaphaapha g'oke pherephere.

²⁹Ọrą, ephe ara du g'ęka oduma asu ekiri. Mbu l'ephe agbo ųja ge nwada oduma; ephe nodu asu kororo, anyapyashi ndu dųwaa ge nri phę; apataję phę ro tųgbua; ọ to dudu onye agbaru phę mkpu.

³⁰Mboku ono be ephe a-tu ųzu kpua ya g'ęka mini agba gborogboro. Onye ophu pazetaru ęnya lee l'ali ono; oobuerupho iphe, ọo-huma bu ochii yee mkpamehu; mbu l'iphoro be urwukpu e-mechaa l'ọ gbahu ochii.

Azaya 6

Ozi Azaya

¹L'apha eze, bu Uzaya nwuhuru be mu humakwarupho Nnajiuphu l'ęka ọ no l'aba-eze; ọ nodu ephekerephe; bya aburu onye e kutseru ekutse. Teme igburonu uwe iya tuko eze-ulo Chileke ono l'ophu sweta.

²Ndu no iya l'eli buru unwu-ojosi-imigwe, bu serafu; g'ephe ha fuchaa nkų ishii ishii. Nkų labo be ephe egudeje kpuchia iphu phę; ephe egude ębo kpuchia okpa phę; bya egude ębo ephe ephephe.

³Ephe nodu epfugbaa anu nwibe phę asuje: "Nso! Nso! Nso! Chipfu, bu Okalibe-kangokotaru-nu du nso! Mgboko l'ophu be akpabiri iya jiru!"

⁴Ephe -pfua opfu ono; itso, gude eze-ulo Chileke l'ophu angakota anganga. Enwuru-oku abya ejiępho ęka ono ke pyimu!

⁵Tɔbudu iya bụ; mu sụ: “Nshio mu! Ephuhu mu. Noo kele mu bụ onye onu-urwu; teme mu buru l'echilabo ndu onu-urwu; teme mu bya egude enya mu huma onye eze ono, bụ Chipfu ophu bụ Okalibe-Kakota-Ike!”

⁶Tɔbudu iya bụ; onye lanu l'ime serafu ono bya ephepfa mu. O buru iphe, o gude l'eka bụ icheku-oku, oku du. O buru akpa be o gude kpata oku ono l'oru-ngweja Chileke.

⁷O woru icheku-oku ono daa mu l'onu; bya asu mu: “Lenu; a daakwaru ngu oku l'onu. Nta-a be e nwefuakwaru ngu uta, shi duru ngu nu; teme a pfuwa ugwo iphe-eji ngu l'ophu.”

⁸Noo teke mu numaru olu-opfu Nnajiuphu l'eka oopfu sụ: “? Bụ onye be mu e-zi ozi? ? Bụ onye e-jeru anyi ozi?” Mu sụ: “Wakwa mu! Zia mu iya!”

⁹O sụ: “Ngwa; je akaru ndu-a; sụ phe le-a: ‘Unu a-numa numa nta numa imo; ole o to dudu iphe, edo unu enya. Unu elee enya nta lee imo; ole o to dudu iphe, unu a-huma.’”

¹⁰Mee ndu-a g'okpoma nmaa phe agbadagba. L'iimee ge nchi nyi phe erwa. L'iimee g'enya nyihu phe. Odumeka be phe e-gudekwa enya phe huma; gude nchi phe numa; gude okpoma phe nwuta iphe; dakobe bya l'eeme g'ephe wekorohu.”

¹¹Mu bya ajia sụ: “Jiko Chipfu; ? bụ teke ole be oo-duberu nno?” O sụ: “Oo-du nno jasụ mkpukpu ono adabyiru buru ochobu. O to dudu onye e-buru iya nu; jasụ ulo atuko buru okorobo ulo, adudu onye bu iya nu. Ali emebyishihu buru mkpokoro ali.

¹²Su-a; oo-du nno jasụ teke yebe Chipfu e-me g'onymonye laa aka du enya. L'aaparuru ali l'ophu togbo iphoru.

¹³Su l'a makwaru-a l'oke-lanu-l'uzo-iri a-phodu le ndu ali ono. Ole o kwapho e - mecha; phe aburu mkpurupyata. Ole o bu; oo g'eegbutsuje oshi achi; ozoo oshi akpurata; upfu iya akwaa l'ali-a; bu g'oo-mecha nweru nwa ndu a-phodu nu l'ime oshilokpa Izurelu, bu ndu a-duru mube Chipfu nsọ.”

Azáya 7

Ozi, Azáya ziru eze, bụ Éhazu

¹Teke Éhazu bụ eze ndu Jiuda; mbu Éhazu ono, bụ nwa Jiótamu; Jiótamu buru nwa Uzáya; o buru teke ono be Rezinu, bụ eze ndu Arámu; yele Peka nwa Remalaya, bụ eze ndu Ízurelu wu-lihuru je etsoo ndu Jierúsalemu ogo; ophu phe adudu ike lwukpee phe.

²Tɔbudu iya bụ; e pfuaru iya ndu onu-ulo Dévidi sụ phe: “Ndu Arámu be phe le ndu Ifuremu jeakwaru atugba nanu.” Opfu ono mee; obu teahaa Éhazu yele ndibe iya ophe; g'eka pherephere enwunga oshi, bvuru l'egbudu.

³Noo ya; Chipfu bya asu Azáya: Lufu g'unu le nwa ngu, bụ Sheya-Jiashubu swiru jepfu Éhazu l'ishi mba-mini Okpuru-uzo-imeli; mbu l'uzo ono, eeshije eje l'egu Osa- iphe ono.

- ⁴Sụ iya: “Tọkwa ẹhu; dobekwa onwongu doo; ọphu i tsụkwa ebvu. G'ọ tọ bukwaru nwa icheku-ọku labọ ono, anyihu anyihu ono l'e-me g'obu phefu ngu; mbụ nwa hanyihanyi, ẹphe aba; mbụ Rezinu; yele ndu Arámu; waa kẹ nwatibe Remalaya;
- ⁵Kele ndu Arámu; yele ndu Ifuremu; yele nwatibe Remalaya chiakwaru ẹjo idzu g'ẹphe e-shi mebyishia ngu. Ẹphe sụru-a:
- ⁶G'anyi je alwuta ndu Jiuda l'ọgu. G'anyi je atukaa phe nanunanu; woru keeru onwanyi. Anyi eworu nwatibe Tabele dobe g'ọ buru eze, l'eka ono.’
- ⁷“O bekwanu le Chipfu, bu Okalibe-Kakota-Ike suru l'ọ tọ byadu anwu nno! L'o too medu ememe ophu.
- ⁸? Tọbodu Damasukosu bu ishi mkpukpu ndu Arámu; onye bu ishi ndu Damasukosu buru Rezinu? A -bya anọo ukporo apha eto l'apha ise be ee-gwe ndu Ifuremu arakabya; k'ọphu ẹphe ta asueduru aburu oha eka phe.
- ⁹Su-a; ? tọ buda Sameriya bu ishi mkpukpu ndu Ifuremu; onye bu ishi ndu Sameriya buru nwatibe Remalaya? I -pfuduru pfushia ike l'iphe, i kweru be ii-mechakwaa; i tii pfuduru apfuru ophu.”

Iphe, abyabya Imanelu egoshi

- ¹⁰Chipfu gbeshikwa ozo bya asu Ehazu-a:
- ¹¹“Pfuaru Chipfu, bu Chileke ngu g'o mee iphe-ohubama goshi ngu; m'obeta o -buru l'eka du omilomi g'alí-maa; ozoo l'ephekerephe eka kachaa ephekerephe.”
- ¹²Ehazu sukwanu: “Mu te epfukwa. Mu te ejekwa ahụ Chipfu ama.”
- ¹³Noo ya bu; Azaya su: “Unu ngabekwa nchi; unube ndu onu-ulo Dévidi! ? Nemaazu, unu anoduje egburwashị ẹhu ono teke asuduru unu? ? Unu eme g'unu watafaa egburwashị Chileke mu ẹhu tọo?
- ¹⁴Noo g'o gude Nnajiuphu l'onwiya je l'eme iphe-ohubama nu unu. Le nwamgboko yee nwoke teke akwaswee a-tsuta ime nwua nwa nwoke; teme l'ọ guya ya ‘Imanelu’, bu iya bu ‘Chileke no swiru anyi’.
- ¹⁵Iphe, oo-nodu eri bu manu, e meru l'era-eswi; yee manu-enwu; me o -maerupho iphe ree k'ọphu oo-jikaje ẹjo-iphe hata iphe-oma.
- ¹⁶Ole o -betashia teke nwata ono a-maru iphe ree k'ọphu oo-jikaje ẹjo-iphe hata iphe-oma; ali ndu eze labọ ono, iitsu ebvu ono a-bukotawaru ochobu.
- ¹⁷“Chipfu dobeakwaru teke unu eje iphe-ehuka; ndibe unu ejee iphe-ehuka; ndu onu-ulo nna unu phe ejekwapho iphe-ehuka; mbu egube iphe-ehuka, adudu o-du-g'oo-ya, dujeru nu; e -shi ge ndu Ifuremu shichaa le ndu Jiuda bukafu. Ndu oo-gude bya ogo ono bu eze ndu Asiriya.”
- ¹⁸O -rwua teke ono be Chipfu e-ku shishishi phekuta ijiji, shiro l'ohu enyimu Ijiputu bya ephekutakwapho enwu, shi l'ali ndu Asiriya.

¹⁹Ephe atuko bya akuru le nkwagbo nkwagbo mkpoda-obvu; me le mgbaka mgbaka agbara-mkpuma; tuko egbudu, obvu du sweta; bya atuko ogba, mini aduje kujia.

²⁰O -rwua mboku ono be Nnajiuphu e-gude akiriko, o nataru l'azu enyimu Yufurétisu; mbu eze ndu Asiriya; gude kpua unu ishi; kpua unu éjí okpa; bya akpukwapho unu éjí-agba.

²¹O -rwua mboku ono be onye lanu a-kutaje nweswi yee egbu labo dobe ndzu.

²²O buru era, a-nodu agbo iya jojojo l'e-me g'onye ono nweru manu, du shii, oo-nodu eri, bu manu ophu e meru l'era-eswi. Mbu l'iphe, bukpo nwa g'ephe ha phodu l'alí ono a-noduepho eri manu, e meru l'era-eswi; yee manue-nwu.

²³O -rwua mboku ono; iphe, bukpo eka e shi nweru unu vayinu labo le vayinu ukporo iri, e shi eretaje ekpa-ego ise buwaa iphe, a-du iya nu bu ogara-mbo yee olekarara.

²⁴Iphe, nemadzu e-gudeje eje iya a-buru uta yee apfu; kele ali ono l'ophu bu iphe, e-ji iya nu bu ogara-mbo yee olekarara.

²⁵A -bya l'ubvu ubvu ono, bu eka e shi egudeje ugu ako akoko; nemadzu ta aduedu ike eye iya ishi; kele ogara-mbo yee olekarara a-tuko iya sweta. L'o buru eka eswi yee aturu a-nodu awu-phe.

Azáya 8

Ndu Asiriya bu ndu Chipfu gude eje ozi

¹Noo ya; Chipfu bya asukwa mu pho-a: “Wota ekwo, eedeje iphe; ekwo, du osa dee iphe; gudekwa mkpara-ekwo mmanu dee ya. Iphe, ii-de iya bu ‘Maha-Shalalu-Hashi-Bazu’, bu iya bu ‘Eme egwegwa l'okwata; ezi kororo l'iphe onye ozo.’

²L'i kua onye uke Chileke, bu Uraya; yele Zekaraya nwa Jieberekaya, bu phe bu ndu e gude ire phe eka g'ephe buru ndu ekebe.”

³Noo ya; mu bya ejepfu nyee mu. O tsuta ime nwua nwa nwoke. Chipfu bya asu mu: “Iphe, ii-gu nwata ono bukwa ‘Maha-Shalalu-Hashi-Bazu.’⁴Kele-a; nwata ono -bya amaru eku ‘nana’ yee ‘nene’ be eze ndu Asiriya byakwaru bya achitakota eku ndu Damasukosu yee iphemiphe, ndu Sameriya nweru.”

⁵Chipfu byakwa bya epfuru yeru mu ozo su:

⁶“Eshinu ndu-a jikaru mini ono, aso nwa rima ono; mbu mini Shilowa; bya etechiaru eswa kpua eze Rezinu yee nwatibe Remalaya

⁷be Chipfu abyakwa agbapyabe phe l'eze utso, e-shi l'enyimu Yufurétisu. Utso ono bu eze ndu Asiriya; yee akpabiri iya l'ophu. Utso ono a-tuko ogba iya l'ophu gbafushihu; bya atuko oma iya sweta;

⁸soru gborogboro soba l'alí ndu Jiuda; awuchaa ya awuwu; bya awochaaru iya l'ekpiri. Nku iya, o tusaru atusa atuko uswekete ali ngu ono gbarwee; gube Imanelu!”

⁹Unu chia mkpu ọgu; unube ọhamoha! G'a chikashikwaa unu achikashi! Unu ngabekwa nchi; unube ndu bu l'eka du ọnya! Unu dzukobekwa k'ogu; ọle aa-chikashikwanu unu achikashi. Sụ-a; unu dzukobe k'ogu; ọle aa-chikashikwanu unu achikashi.

¹⁰Unu chikpoo idzu g'unu e-me iphe! Ọle aa-gbaghashile iya-a. Unu pfua g'unu e-me iya! Ọle ọ ọto dudu g'unu pfuru iya. Noo kele Chileke no swiru anyi!

Atsụ Chileke ebvu

¹¹Chipfu bya ebyibe mu mkparawa ẹka iya ono bya epfuru yeru mu; ọo mu ẹka le nchi sụ mu ge mu te etsokwa ndu-a. Ọ sụ mu-a:

¹²“Iphe, ndu-a sụru l'ọ bu achi ẹjo idzu; unu b'ekwekwa l'ọ bu achi ẹjo idzu! Iphe, ephe atsụ ebvu; unu ta atsukwa iya ebvu; ọphu unu ejekwaru iya aphuru kparikpari!

¹³Ọo Chipfu, bu Ọkalibe-Kakota-Ike bu onye unu e-kweje l'ọ du nsọ. Ọ buru iya bu onye unu a-tsuje ebvu; buru iya bu onye unu a-nduje aphu kparikpari l'iphu iya.

¹⁴Teme ọ buru iya a-buru ẹka e doberu nsọ. Teke a byaru l'eka onu-ulo Ízurelu ono no; ephebo be ọo-buru mkpuma, ee-vukotaje daa iko bya abukwarupho agbara mkpuma, e-meje g'ephe daa iko. A -byakwanu l'ehu ke ndu Jierusalemu l'ọ buru igbudu yee ọnyà, a gbaberu phe.

¹⁵Ephe a-du igwerigwe kpoo ya okpa. Ephe adaa tsukwoshihu; l'a nmakokwaa phe pho l'onyà; kpa phe le ndu.”

¹⁶Iphe-a, mu epfu g'e meje-a be ee-woru kechia ekechi; l'e woru ekemu ono suchia g'ọ kwaaruru ndu etsoje mu nu.

¹⁷Mbedua a-ndu kwaberu Chipfu; mbu onye ono, woru iphu iya wohaaruru onu-ulo Jiékopu ono. Ọ buru iya be mu e-le ọnya iya.

¹⁸Wakwa mu baa; mu l'unwegirima ono, Chipfu nuru mu ono. Anyi bukwa iphe, egoshi iphe; bya aburu iphe-ohubama, duru ndu Ízurelu; mbu iphe, shi l'eka Chipfu, bu Ọkalibe-Kakota-Ike; bya aburu Chipfu, bu ebubu l'ubvú Zayonu.

¹⁹Ndiphe asuje ngu g'i je l'aji l'ibe ndu aphu ọphulenyà me ndu emeje omamanshi; ndu bu okpurọswa be ephe aphuje; teme ephe ndu anọduje epfu l'ime onu l'ime onu; ? buchia Chileke be e te ejechidaa ajita iphe? ? Denu g'o gude ọ buru onye nwuhuru anwuhu be ndu dzu ndu ejejechia aji iphe?

²⁰Tube nvọ l'ekemu; yele iphe, mu karu g'e meje. Ọ -buru l'ephe te epfudu akunyabe opfu ono; ọo ya bu l'ephe taa ahumadu iphoro nchi-abohu.

²¹Aphu a-tsuru phe; egu emeshia phe ike; l'eka ephe tsoru ali ẹka ono aghaphe botorii. Teke mbà tueru phe pho; ehuru agbangahu phe. Ephe apalia ọnya imeli wata epfu onye eze phe iphu; yele Chileke phe.

²²Ephe abyakwa apazeta ɛnya lee lɛ mgboko. Iphe, ɛphe a-huma abɛrurupho aphɛ yɛ ɔchii, l'a-nɔdu agba nɛ yɛ ragaraga iphe, a-nɔdu eye phɛ ebvu. L'e woru phɛ chie l'ɛka gbakɔtaru tsukiribaa.

Azáya 9

¹Ole g'ò dɛhabe; e -mechaa bɛ ɔ tɔ dɛdu iphe, adɛ ragaraga l'ɛnya ndu nɔ l'iphe-ɛhuka. Teke k'ichee bɛ ɔ tɔ dɛdu iphe, a gɛberu alɛ ndu Zebulunɛ yɛ alɛ ndu Nafutali. Obenu l'ò -be l'iphu bɛ aa-kwabɛ ndu bu eze-ɛnyimu ntse ùbvù; mbù ndu bu l'azɛ ɛnyimu Jíɔdanu azɛ iya ɔphuu, bɛ iya bɛ alɛ Gálili, bɛ ɛka ono, ndu ɔhozo bu ono.

A nwuru anyi nwaswa

²Su-a; ndu nɔ l'ime ɔchii hɛmaakwaru ìphóró, parɛ ɛka. Ndu k'ono, bu l'alɛ ono, gbakɔtaru tsukiribaa ono bɛ ìphóró nwuakwaru kɛ phorokotokongu.

³Qha ono bɛ i mewaru; ɔ ka shii; bya emee; ɛhu ka phɛ atso ɛtso. Ephe nɔdu anɔduje l'iphu ngu ete ɛswa gɛ ndu ete ɛswa ekpu iphe, ɛphe metaru l'opfu, ɛphe kɔru; gɛ ndu ete ɛswa l'ɛka ɛphe eke iphe, ɛphe kwataru l'ɔkwata.

⁴L'ò bɛ-a g'i meru teke i mekperu ndu Midiyanu teke ndiche phɔ bɛ g'ì chikashiru ivu-ɛrwa, shi nyipyabe ndibe ngu; bya anyakashia mgborígwè, e shi swebe phɛ l'ukuvu; yɛ oshi, ndu emekpa phɛ ɛhu shi gude echi phɛ ɛchachi.

⁵Akpɔkpa ndu ojogu g'ò ha, e gude lwua ɔgu; mekpoo iphe, bɛ uwe, a rwaphuru lɛ mee bɛ bɛ iphe, e doberu k'akpo ɔku; mbù l'oo-du gɛ nkɛ, e gude aphɛ-nwu ɔku;

⁶kele a nwuru anyi nwaswa; mbù l'a nuru anyi nwa nwoke. ɔ buru iya bɛ onye a-buru onye-ishi. Iphe, aa-nɔdu eku iya bɛ “Onye mkpozi-uzo, du biribiri” ; yɛ “Chileke, bɛ ɔkalibe-Kakota-Ike” ; waa “Nna-ojejeje” ; waa “Onye-ishi, eme gɛ nchi du doo” .

⁷Abubu, ɔo-buru onye-ishi; yɛ nchi-odoo, e-shi iya l'ɛka a-nɔdu aka shii eje ala l'iphu; teme ɔphu ɔ byadu abvu abvubvu. ɔo-nɔdu l'aba-eze ochochoroche iya, bɛ Dévidi buru eze. Oo-gude ekpe ikpe, pfuru ɔto; waa apfubekoto mee ya g'ò keru jingujingu; mbù mee ya g'ò nguru anguru e -shi lɛ teke ono jasɛ l'ojejeje. ɔ buru g'ò phɛ-tabe Chipfu, bɛ ɔkalibe-Kakota-Ike l'ɛhu l'e-me g'ò mee ya.

Ndu Ízurelu akpatsu Chipfu ɛhu-eghu

⁸Nnajiuphu pfuwaru iphe, ya e-me oshilokpa Jíekopu. Iphe ono tukuru ndu Ízurelu l'ishi;

⁹k'ophu bɛ lɛ ndu Ízurelu l'ophu a-makɔtaru iya; mbù ndu Ifuremu; mekpoo ndu bukota lɛ mkpukpu Samériya; ndu egudeje eku onwophe yɛ etsetse, shi phɛ l'ɔkpoma su:

¹⁰“Ulo ono, e gude ɛja kpua ono bɛ dakposhihuakwaru nɛ. Ole anyi a-pyikwanu mkpuma kpukwaa ya. Oshi sikamo ono bɛ e gbutsuakwaru. Ole anyi e-wokwanuru oshi sida je adzakwaa l'ozo iya.”

- 11** Ọle Chipfu byaru eyeeru ndu ọhogu Rezinu ọkpukpu-ike g'ẹphe je etsoo phe ọgu; mbu le ndu ọhogu phe be o tugbawaru nanu doberu phe.
- 12** Ndu Aramu shiakwa l'uzo enyanwu-awawa. Ndu Filisitayinu shi l'uzo enyanwu-ariba saa onu gabala bya eworu ndu Izurelu Iwua. Ole iphemiphe ono mechaaru; ehu nodu eghuele-a Chileke eghu. O paliela-a eka g'o paliru iya.
- 13** Ọle ndu Izurelu ta adakobeduru lwapfuta onye ono, chiru phe iphe ono; mbu l'ẹphe ta achoduru Chipfu ono, bu Okalibe-Kakota-Ike ono.
- 14** Ọo ya bu le Chipfu e-bufu ndu Izurelu ishi bufu phe odzu; sashia igu; pheshia eswa l'akpuru enyanwu lanu.
- 15** Ọ buru ndu bu ogerenya; yee ndu nweru enya bu phe bu ishi obu. O buru ndu mpfuchiru Chileke, bu ndu ezi iphe, abudu ire-lanu bu mgbodzu.
- 16** Ndu edu ndu Izurelu eduswekwa phe eduswe; teme ephebedua, eedu uzo obu buru ndu e duphuru uzo.
- 17** Ọo ya bu le ndu bu okorobya l'ali ono te emedu g'ehu tsoo Nnajiuphu utso. Ndu enwedu nna yee unwanyi, ji phe nwuhuru be o too phuduru obu-imemini. Noo kele onyemonye te emedu ele Chileke; teme onyemonye buwaru onye ejo-iphe; bya egudewaa onu epfu mkpokoro opfu. Ole iphemiphe ono mechaaru; ehu nodu eghuele-a Chileke eghu. O paliela-a eka g'o paliru iya.
- 18** Ejo-iphe, ẹphe eme enwu phuruphuru g'oku. Ootsu ogara-mbo etsu olekarara. Teme o tuko epfukala, no l'oswa l'ophu eze wowoowoo; k'ophu bu l'ire-oku iya zelihuru tsoru enwuru-oku iya ala l'eli l'eli.
- 19** Oke ehu-eghu Chipfu, bu Okalibe-Kakota-Ike be a-nma ali ono l'ophu swokoswoko. O buru ndu Izurelu a-buru manu-oku, aa-nodu ekpu l'oku ono g'o gude bulihu ebulihu. Ophu o dudu onye aphujeru nwune iya obu-imemini.
- 20** ẹphe e-gbu l'ekutara ria; egu agule phe-a. ẹphe eria k'ekicha; o too jikwa phe pho. Onyemonye a-taahaa anu onye yee ya bu.
- 21** Mbu le ndu Manase a-taahaa anu ndu Ifuremu. Ndu Ifuremu ata ke ndu Manase. ẹphe atuko gha iphu tsoahaa ndu Jiuda ọgu. Ole iphemiphe ono mechaaru; ehu nodu eghuele-a Chileke eghu. O paliela-a eka g'o paliru iya.

Azaya 10

- 1** Nshio ndu ono, anoduje atu ekemu, apfuduru-oto; mbu ndu asuje g'e mee iphe, egbupyata anu;
- 2** k'ophu a taa haduru ndu ukpa enge; yee k'ophu ẹphe a-nafu ndibe Chileke, bu ndu eemekpa ehu iphe, rwuberu phe nu. Ndu woru ndu ji phe anodedu dobe nri eriri. Teme ẹphe nodu ana ndu enwedu nna nfu.

³? Bụ ụnu bẹ unu e-me mbọku Chileke abya unu agbaphe; mbụ mbọku, mkpurupyata e-shi ụzenya bya? ? Bụ onye bẹ unu a-gbapfu g'ọ dzọo unu? ? Bụ awe bẹ unu a-ha ẹku unu?

⁴Ọ tọ dukwa iphe, aphodu nụ; gbahaa g'ephe kpua unu lẹ ndzụ; lọo unu wuruwuru l'alị; ozoo ephe egbua unu egbugbu. Ọle iphemiphe ono mechaaru; ẹhu nọdu eghule-a Chileke egbu. Ọ paliẹle-a ẹka g'ọ paliru iya.

Ikpe, Chileke e-kpe ndu Asiriya

⁵“Nshio gube Asiriya; mbụ gube ọha ono, bụ ngu bụ oshi-mpaleka, mu egudeje egoshi ẹhu-eghu mu. Teme ọ buru l'eka ngu bẹ mgboro oke ẹhu-eghu mu ono nọ gededede.

⁶Mu a-chiru Asiriya yeru ọha, amadu mube Chileke. Mbụ lẹ mu e-woru iya nwaru ọha, akpatsuje mu ẹhu-eghu; g'ephe kwaa ya okwata kee iphe phe l'ọha. Ephe azoo phe tolitoli g'onye azoka epuchi lẹ gbororo.”

⁷Obenu l'ọ tọ budo iphe ono du yebdua l'obu. Ọ tọ budo iphe ono bụ iphe, ọori. Iphe, bụ uche iya bụ emebyishi iphe emebyishi; g'o mee g'ọha, du igwerigwe chihu.

⁸Ọ -nodu l'ootu onwiya epha sụ: “? Ọ kwa lẹ ndu-ishi ojogu mu bukota eze eze?”

⁹Mkpukpu Kaluno ? tọ budo ge mkpukpu Kakemishi du bụ g'ọ du? Ọ buru ge mu meru mkpukpu Hamatu bụ ge mu meru mkpukpu Apadu; buru ge mu meru mkpukpu Sameriya bụ ge mu meru mkpukpu Damasukosu.

¹⁰Eshinu eka mu duru ike gudecha alị-eze ndu agwo obvu; mbụ alị-eze ophu nshi phe ka ke Jierusalemu yee Sameriya shii;

¹¹? buchia Jierusalemu yee nshi nshi, du iya nụ bẹ mu ta anudu aphu egube ono, mu nuru ndu Sameriya yee iphe, ephe agwa ono?”

¹²Nnajiuphu -meghechaepho iphe, oome l'ẹhu ubvu Zayonu yee Jierusalemu bẹ oopfụ sụ: “Mu a-hu eze ndu Asiriya ahuhu; kele o lekeberu enya gude obu iya eku onwiya; bya egude enya etse etsetse.

¹³“Noo kele ọ sụru: ‘Oo ike okpu nkemu bẹ mu gude mee iphe-a, mu meru-a. Ọ buru mmamiphe mu bẹ mu gude mee ya; opfu l'iphe edoje mu enya. Oke-alị unwu-eliphe bẹ mu meru ophu oke aduedu l'eka o shi du. Mu kwaa ẹku phe l'okwata; bya emekpee ndu eze phe kele mu gbaru mkparawa.

¹⁴Oo g'aachitaje epfunu enu-a bụ ge mu tufuru eka chita ẹku ohamoha. Ọ buru ge nemadzu achikoje ekwa-iphe, a gbagharu agbagharu-a bụ ge mu chikoberu ndu alị, shi ekameka l'ophu. Ophu ọ dudu g'ọ ka mma l'oo ndu alị eka lanu chiru nkù kpaa; ozokwanu jaa onu too; ozoo raa pfurii.’ “

¹⁵Obenu lẹ Chipfu sụru-a: “Ogbunku; ? oo-ku onwiya kughata onye gude iya egbu iphe tọ? Tọo mma, egudeje ekwobu oshi ? oo-wata ekuru onye gude iya nụ onwiya? G'ọ bụ lẹ mgborígwe a-du ike ngalia onye apaliye iya nụ; ozokwanu g'oshi-mpaleka wata etu onwiya epha sụ lẹ ya ta abuekwa oshi.”

¹⁶Oo ya bu le Nnajiuphu; mbu Chipfu, bu Okalibe-Kakota-Ike l'a-chiru ejo iphememe yeru ndu ojogu iya ono, gbaru mkparawa ono. O buru l'ime ehu phe be oo-mecha phu-nwua o-nwu-phuruphuru oku.

¹⁷Iphoro ndu Izurelu a-buru oku; mbu l'onye nsọ ke ndu Izurelu a-buru oku, enwu enwunwu. O buru eswe ujiku lanu be oo-nwu phoophoophoo kekota ogarambo; yee obyambvu, dukota iya nu.

¹⁸Eguru ono, oswa iya du ono; yee ali phe ono, du ree ntumatu ono be oo-mecha mebyishichaa l'o laa pyete e g'onye iphe eme;

¹⁹k'ophu bu l'oshi, a-phodu l'oke oswa iya ono a-du olemole shingushingu kpo; k'ophu nwatanshii e-dekota iya l'ekwo.

²⁰O -rwua teke ono be nwa ndu phoduru nu l'ime ndu Izurelu; mbu nwa ndu ophu wafuru nu l'onu-ulo Jiekopu ta akpodedu obu eyeru ndu ono, echije phe pyaapyaa ono. O buru onye ephe a-kporu obu yeru okpobe eyeru a-buru Chipfu; mbu Onye nsọ ke ndu Izurelu.

²¹Nwandu ono, phoduru nu ono e-mechaa lwa; mbu le nwa ndu a-phodu l'onu-ulo Jiekopu e-mechaa lwa lwapfuta Okalibe-Kakota-Ike ono, bu Chileke.

²²Su-a; mbu l'a makwaru-a l'unube Izurelu ha g'eja, du l'aguga enyimu. Ole o bu-a nwuphodu nemadzu e-mechaa lwa. Ola-l'iswi phe be a tubuwaru l'onoo g'oo-du. G'oo-me iya ono a-buru l'orwuberu iya.

²³O buru Nnajiuphu; mbu Chipfu, bu Okalibe-Kakota-Ike l'e-gude eka iya mebyishia ohamoha obu l'ophu, bu iphe, a tubuwaru l'oo-me phe.

Aphu, Chipfu a-nu ndu Asiriya

²⁴Oo ya bu le-a; wakwa iphe, Nnajiuphu, bu Chipfu ophu bu Okalibe-Kakota-Ike eepfu baa: "Unube unwu mu, bu ndu bu l'ubvu Zayonu; unu ta tsukwa ndu Asiriya ebvu; mbu ndu ono, anoduje echi unu oshi-mpaleka ono. Teme ephe nodu apalije mgboro echi unu ge ndu Ijiputu shi echije iya unu-a.

²⁵O to dukwa g'oo-no-beru; ehu eghubuhu mu eghu l'opfu ehu unu. Mu eworu oke ehu-eghu mu ghaaru ephebedua woru phe mebyishia."

²⁶Chipfu, bu Okalibe-Kakota-Ike l'e-gude echachi chia phe gbaagbaa egube ono, o chiru iya ndu Midiyanu le mkpuma Orebu. Mgboro iya be oo-palikwapho maaru mini egube ono, o meru iya l'ali ndu Ijiputu ono.

²⁷Le mboku ono be ee-zi unu ivu ehu phe g'o to tukoru unu l'ukuvu. L'a nyafu iya unu g'o to tukuehe unu l'olu. Iphe ono, e gude kegbabe unu ono agbabuhu kele unu pawaru okporokpo.

Ndu Asiriya abya ogu

²⁸Ndu ohogu ono bahuwaru mkpukpu Ayatu shita je aghabua mkpukpu Miguronu. O buru eka ephe jeru je akube iphe phe bu le mkpukpu Mikumashi.

²⁹Ephe gbaa gorogoro nyighatakota mgbaka mgbaka úbvú epfuje sù: “Èka anyi a-kwa bukwa lẹ mkpukpu Geba.” Ndu mkpukpu Rama wata anma pyaapyaapya. Ndu mkpukpu Gibiya, bu ẹka Sọlu shi buru; ye ọkpa l'oso gbala.

³⁰Unu chia mkpu; unube ndu mkpukpu Galimu! Unu ngabekpodapho nchi; unube ndu mkpukpu Layisha! Unu kaa; unube ndu mkpukpu Anatotu!

³¹Ndu mkpukpu Madumena be agbawaa oso. Ndu mkpukpu Gebimu nodu edomishiwaa onwophe.

³²O buru mboku ono be ephe e-jeta je agburu lẹ mkpukpu Nobu. Ephe egbu ẹka swikiswiki l'iphu úbvú Zayonu ono; mbu l'eli úbvú Jierúsalemu.

³³Lewarọ; Nnajiuphu; mbu Chipfu, bu Okalibe-Kakota-Ike e-gude okpehu, paru ẹka kwafu ẹkali-oshi ono. Ee-gbutsu oshi ono ndu ophu duje phengara phengara; mbu mee; ndu ophu du ogologo alwazeta ali.

³⁴L'o gude ogbunku gbukaa epfukala k'eze oswa ono. Oo ya bu l'oswa ono, no l'úbvú úbvú Lébanonu ono l'adaa l'iphu onye ono, bu Okalibe-Kakota-Ike ono.

Azáya 11

Èkali Jiesi

¹Mkpirikpu upfu-oshi ono, bu Jiesi l'e-rwuta irwu. O buru l'ogbarabvu iya be ẹkali e-shi nyikata.

²Unme ke Chipfu a-nodu iya l'ehu; mbu Unme, emeje g'a maru iphe; bya abukwarupho Unme, emeje g'iphe doo enya; Unme mgbazi; bya abukwarupho Unme, emeje g'ike du; Unme, emeje g'a nwuta iphe; bya abukwarupho Unme, emeje g'a tsu Chipfu ebvu.

³O buru iphe, a-duje iya ree bu g'a tsuje Chipfu ebvu. O to bukwa iphe, o gude enya huma be oo-gudeje ekpe ikpe; ophu o bukwa iphe, o numaru lẹ nchi be oo-gudeje kpebua iphe, du k'ekpebu.

⁴O chia iphe, meru nu bu l'oo-kpeje ndu adudu g'o du phe ikpe, pfuru oto. O buru ikpe, pfuru nhamunha be oo-gudeje kpebua ikpe ndu ukpa l'eliphe-a. Eliphe l'ophu be oo-gude mgboro, du iya l'onu chia gbaagbaa. O buru unme, o turu atutu be oo-gude phua ndu ejo-iphe terii.

⁵Apfubekoto a-buru iphe, oo-ke l'upfu. Apfushi ike, l'iphe, o pfuru aburu iphe, otubutaje uwe iya l'upfu.

⁶Ejo-nkuta-oswa be oo-me; yee unwu aturu akpaahaa eghirigha. Agụ yee egbu adọaha l'eka lanu. Nweswi; me nwoduma; mekpoo anu, atsuje onwiya eba a-tuko akpa eghirigha. O buru nwatanshii be a-noduje eche phe nu.

⁷Ne-eswi; yee ejo anu-egbudu, bu biye a-nodu ata nri eghirigha. Unwu phe atuko ado l'eka lanu. Temе oduma aburu anu, a-nodu ata eswa g'oke-eswi.

⁸Nwa, angu era a-noduje l'onu enu oghu ebvu ebvu. Nwatanshii, a mifuwaru onu l'era ewojeru eka ye l'enu ogiji.

⁹Iphemiphe ono ta adudu ophu emeka nemadzu iphe; ophu o buro k'emegbu l'ubvu, e doberu mu nsu l'ophu; kele oo ge mini do-jiru oma enyimu-a bu g'eliphe l'ophu a-madzuru Chipfu.

Alwalwa ndu a kpuru le ndzu

¹⁰O -rwua teke ono be ogbarabvu Jiesi ono a-buru ekwa-ohubama k'unwu-eliphe. O buru iya be ohamoha a-noduje agba agbapfu; okpoku iya a-du akpabiri l'enya.

¹¹Mbu l'o -rwua mboku ono be Nnajiuphu a-machi eka iya ozo k'ugbo ebo nafutafuchaa nwandibe iya ndu ophu a-phodu l'ali ndu Asiriya; me l'ali ndu Ijiputu; me l'ali Paturosu; me ndu ophu e-shi l'ali ndu Kushi; me ndu ophu e-shi l'ali ndu Elamu; me ndu ophu e-shi l'ali Shina; me ndu ophu e-shi le mkpukpu Hamatu; me ndu ophu e-shigba l'oha, bukube eze-enyimu.

¹²Ekwa-ohubama be oo-paliru ohamoha; bya atuko ndu Izurelu, a kpuru le ndzu chitachaa; l'o rwukobe ndu Jiuda ono, a tukaru nanunanu ono. Eka oo-shi rwukobe phe bu le nkulahu eliphe uzo eno ono.

¹³Okophoo ndu Ifuremu e-phukashihu; l'e mee ge ndu ohogu ndu Jiuda chihu. Mbu le ndu Ifuremu te ekoeduru ndu Jiuda okophoo; ophu ndu Jiuda adueduru ndu Ifuremu ehuka.

¹⁴Ephe e-zi phaa je ndu Filisitayinu bu l'uzo enyanwu-ariba swokoswoko. Ephe abyakwapho erwukobe onwophe je akwagwoo ndu bu l'uzo enyanwu-awawa. Ephe a-zu ndu Edomu yee ndu Mowabu gburumu. Ephe emee ndu Amonu ephe anodu phe l'eka.

¹⁵Chipfu l'e-me g'o tahu; mbu nkulahu eze-enyimu Ijiputu. O buru pherephere, ekpo pharaphara be oo-zi gude phee eka l'eli eze nggele Yufurétisu. Oo-me iya l'o tabushihu atabushihu; tabuha uzi esaa; k'ophu nemadzu a-zoje gedengu gedengu ghata iya.

¹⁶Nwandibe iya ndu ophu phoduru nu, e-shi l'ali ndu Asiriya alwa be aa-toqboru oji, a-dabyiru ke phorokotokongu; egube ono, a toqboru iya ndu Izurelu teke ono, ephe shi l'ali ndu Ijiputu alwa ono.

Azaya 12

Ebvu ekele

¹Su-a; mboku ono be ii-su: "Mu e-kele ngu ekele gube Chipfu; kele mu shi mee; ehunu nodu egu ngu egu. Ole nta-a be ehunu egu ngu jizetawaru; i bya awata mu adu obu.

²Lenu; o kwa Chileke bu onye ndzota mu. Mu a-kporu obu ye l'eka o no; ophu ndzu agudu mu; kele Nnajiuphu, bu Chipfu ono bu okpehu mu bya aburu iya bu olu ebvu mu. Teme o bya nta-a bya aburu onye dzoru mu nu.

³O kwa ẹhu-utso be ii-gude seta mini le we lu ndzota.”

⁴Noo mboku, ii-wata epfu su: “Unu kele Chipfu ekele; unu raku epha iya! Unu mee g'ohamoha madzuru iphe-oma, o meru! Raa ya arara l'epha iya paru eka!

⁵Gu-ku Chipfu ebvu ekele; kele iphe-oma, o megbaberu nyiberu anyibe. Unu mekwapho ge mgboko l'ophu madzuru iphe ono, o megbaberu ono!

⁶Unube oha, bu l'ubvu Zayonu; unu tua uzu ẹhu-utso; kele onye ono, no l'echilabo unu ono paru eka; mbu Onye Nso ke ndu Izurelu.”

Azaya 13

Epfu opfu ẹhu ndu Babilonu

¹Owaa bu ozi, Chileke ziru zidoru ndu Babilonu. O buru onye o ziru iya bu Azaya nwa Emozu.

²“Palia ekwa-ohubama l'eli ubvu, dabyiru swachamu. Nodu l'eka ono chiaru phe mkpu. Pheeru phe eka g'ephe shia onu-uzo bahu l'eka ndu a maru epha phe no.

³Mbedua, bu Chipfu tɔwaru ekemu nu ndibe mu, bu ndu mu doru nsɔ; bya achikobekwapho ndibe mu, bu ndu okpehu du g'ephe je egoshi l'ehu egu mu egu; mbu ndu ẹhu anoduje atso le mu paru eka.”

⁴Numakpodapho uzu, aatu l'eli ubvu; g'ikpoto ndu paru eka apaa. Numakpodapho woowoowo, ohamoha atu; g'oha, eme ndzukɔ. O kwa Chipfu, bu Okalibe-Kakota-Ike achikobe ndu a-lwuru iya ogu.

⁵Ndu ono shi eka du enya; ephe shi l'eka igwe jeberu. O buru Chipfu; ye le ndu bu ngwogu, o gude egoshi l'ehu egu iya egu be l'eme g'o bya emebyishikota ndu ali-a l'ophu.

⁶Unu kwaa idemini ekwa; kele eswe Chipfu duwaa ntse! Mboku ono a-buru eswe ala iphe l'iswi. O buru l'eka onye oo-shi bu Okalibe-kangokotaru-nu.

⁷Oo ya bu l'eka onyemonye a-tulwahu. Obu eterwuhu onyemonye.

⁸Ephe atsuhu ebvu; ẹhu aphuhu phe uphu; l'ooburu iphe-ehuka byaru phe ge nwanyi, ime eme. Onyemonye adu nwibe iya akpabiri. Ephe agbanwube iphu ehuka ehuka.

⁹Lekwa le mboku ke Chipfu abyaakwaa. Mboku ono a-buru eswe omeliwe; bya aburu mboku oke ẹhu-egu. Noo mboku, ee-me ge mgboko l'ophu buru ochobu. L'aa-tuko ndu iphe-eji, no iya nu mebyishia.

¹⁰Mboku ono be kpokpode, no l'igwe g'o ha te eekwa paapaapa. Enyanwu ekeru l'eka oowataje wata agba ochii. Ophu onwa echidu ilile.

¹¹Chipfu suru-a: “Mu a-nu eliphe l'ophu aphu iphe-eji iya. Mu anua ndu ejo-iphe aphu ejo-iphe, ephe eme. Mu emee ge ndu anoduje aba abaa te ekuhe onwophe; bya ekuzeta ndu eku onwophe l'okponu okponu phe.

- ¹²Mu e-me gę nemadzu du ụko ịe mgboko; mbu g'ọ ka ọkpobe mkpọla-ododo adu ụko. L'ọ kakwaphọ mkpọla-ododo ọphu shi l'alị Ofi adu ụko.
- ¹³Mbu-a; mu e-me g'imigwe l'ophu nmahu jiiijiii. Eliphe anmaa jiiijiii jasụ ọokporiberu l'eka o shi nguru. Ọ buru iphe, a-kpa iya nụ bu oke ẹhu-eghu ono, bu ọphu a-nọdu egbu mube Chipfu, bu Ọkalibe-Kakota-Ike l'eswe oke ẹhu-eghu mu ono.
- ¹⁴“Ọ buru gę mgbada, aachi ọso agbaje-a; ọzoo g'aturu, enwedu onye eche iya nụ agbakashihuje-a bu g'onymonye a-nọdu agba agbapfu ndu ẹphe l'ẹphe bu. Mbu l'onymonye a-ze l'oso agba ala eka a nwuru iya.
- ¹⁵Onymonye a -humakwanuru ahuma; aa-nmafua ya ẹpho. Teke ọ bu onye e guderu egude; ọola l'ogu-echi.
- ¹⁶Unwegirima phe be aa-nọdu l'iphe phe gbubushia mkpirikpu mkpirikpu. L'a kwaa iphe phe l'okwata; phatoshia unwanyi, ẹphe alu alulu.
- ¹⁷“Lekwa; ọ kwa ndu Midiya be mu a-kpatsu g'ẹphe jepfu phe ọgu. Ndu adudu iphe, ẹphe guberu mkpọla-ochaa; ọphu mkpọla-ododo agudu phe ẹgu.
- ¹⁸Apfu phe e-yebushi unwokorobya phe eyebushi. Ọphu imemini akpuru-iphe, shi l'ẹpho a-dudu phe. Ẹphe -gude ẹnya huma unwegirima nshii; ẹphe ta aphuduru phe obu-imemini.
- ¹⁹Temanu-a; alị ndu Babilonu ono, bu eka e gude akwabẹ alị-eze ọzo ubvu ono; mbu ẹguru alị ono, bu iya meru ndu Babilonu; ẹphe nọdu eku onwophe ono; alị ono be Chileke e-mechaa mebyia g'e mebyiru Sodomu yee Gomora.
- ²⁰Ọ to bubaeduru eka ee-buru eburu jasụ l'ojejoje. Ọphu nemadzu abyadu ebuba l'ime iya; e -shi l'ogbo sweru ogbo. Ọphu ọ dudu ndu Arabu akpobe iya ụlo-ekwa; ọphu ndu eche aturu adobedu iya aturu phe.
- ²¹Iphe, a-doru iya nụ a-buru anu, ebu l'echiegu. Ọ buru nkuta-oswa bu iphe, akujeru l'ulo, wushiru iya nụ. Mgbashi-ujiku akukwaru iya pho. Eghu-oswa apfu-phe karagidingu karagidingu l'ime iya.
- ²²Achi-anmabu a-noduje l'ulo phe, a kpushiru ike ara ntumatu. Nkuta-oswa akuru l'ulo phe ndu ọphu shi buru ẹguru ụlo. Ọzo bu ịe teke ee-me iya iphe ono duwaa ntse; mbu l'ọ to nodedu odu l'ọ nwua.”

Azaya 14

- ¹Chipfu a-phuru Jiéọpu obu-imemini k'ọphu bu l'oo-mechaa hota Izurelu ọzo; mee g'ẹphe buru l'alị phe ọzo. Ndu lwaru alwalwa ayikwaru iya pho. Ndu lwaru alwalwa ono ẹphe l'onu-ulo Jiéọpu ebua ẹghirigha.
- ²Ọhamoha l'e-duta phe dulata l'alị ẹphebe ndu Izurelu gededede. Ndu Izurelu ono a-buru ndu e-nweru ọhamoha; mee phe; ẹphe aburu phe ohu: unwoke l'unwanyi l'alị ọphu Chipfu nuru phe l'onwiya. Ẹphe aghaa ọhu kpua ndu ono ịe ndzu; mbu ndu ono, shi kpua ẹphebedua ịe ndzu ono; buru ndu a-nọdu elekota ndu shi emekpa phe ẹhu.

Adada eze ndu Bábilonu

- ³Chipfu e-me g'obu tushihu unube ndu Ízurelu l'aphu-a, unu erigbabe-a; me iphe-ehuka-a, unu ejegbabe-a; mekpoo ozi mkponwu-ehu-a, e keru unu-a.
- ⁴Noo teke unu a-wata aturu eze ndu Bábilonu phukuku su: Onye-a, bu nwa-mmekpa-ehu-a gbẹ mekwadupho bugengu! Ehu gbẹ ghubuhuwa iya nu eghu!
- ⁵Chipfu gbajishiwari mgborígwè, ndu ejo-iphe ono shi swebe phe l'olu; mekpoo oshi, ndu-ishi shi gude echi phe echachi;
- ⁶bu ndu shi egudeje ehu-eghu echi ndiphe iphe nchipyabe; mbu l'ephe gude enya, ata phe kpitikpiti lwu-kpee oha, du igwerigwe; ophu o dudu onye egbo phe nu.
- ⁷Eliphe l'ophu be atutawa unme nta-a. Teme nchi duwaa phe doo. Olu-ebvu gbufu phe l'onu.
- ⁸Mbu l'oshi payinu; mekpoo oshi sida k'ubvu ubvu Lebanonu be ehu tukocharu atso l'opfu ehu ngu. Ephe toko epfu su: Nta-a, e wozewaru ngu-a be ndu ekwo oshi ta abyaedu anyi ekwotsushi.
- ⁹“Ali-maa kwagebewaru akwagebe g'o gba ngu ndzuta me i -lashia. O doziwaru unwumaa, l'abya ngu ndzuta; mbu maa iphe, bukpoo ndu ono, shi buru ishi l'eliphe-a. Ndu ono be o meru g'ephe gbeshichaa agbeshi l'aba-eze phe; mbu ndu shi buru eze ohamoha.
- ¹⁰G'ephe ha l'e-yeru ngu onu su ngu: “? Gubedua kwapho mechaaru bya aduhukwa edzu g'anyibedua; mbu bya abuhukwaru iphe, anyi bu?”
- ¹¹Akpabiri ngu ono g'o ha be e nwuwari ye l'ali-maa; yele oha-gengugengu ogumogu ngu onoya. Ekà buwaa iphe-azee, i ze l'eli. Mgbashiride buwari ekwa, i phushiru l'iphe-azee ngu obu.”
- ¹²Lewaro g'i shi l'imigwe daa l'ali; gube kpokpode nchi-abohu; mbu gube nwatibe onma-ewa-utsu! E chitsuwaru ngu chiru ngu ye l'eliphe; mbu gube onye shi byapyabe ohamoha l'ophu!
- ¹³I pfuwaru l'ime okpoma ngu su: “Mu e-kuli onwomu kuba l'imigwe. Mu a-pali abaeze mu g'o ha l'eli l'eli; g'o kakota kpokpode ke Chileke l'eli. Mu e-je anmakoru l'eli ubvu-ndzuko ono, no l'uzo isheli ono.
- ¹⁴Mu a-tukoepho akpaminigwe l'ophu nyighakota je anodu; mee onwomu ge mu ha ge Okalibe-kakota-shii.”
- ¹⁵Obenu l'a byazeru ngu byaru ngu ye l'ali-maa; l'ohulohu nsukutu ono.
- ¹⁶Iphe, bu ndu humaru ngu nu a-gbe lerwebaa ngu enya elerwe; ephe awata ari oriri ehu ngu su: “To bunaa onye-a bu onye ono, meru mgboko; o nmahu jijijiji-a; mbu onye ono, akpabiri iya guderu ali-eze l'ophu?”

17? Tọ buna iya bu onye ono, meru mgboko l'ophu; ọ dụ g'echiegu; tsupyashiru mkpukpu, a kpushiru ike, nọ le mgboko; ophu ọ dudu ndu mgboko, ọ kpuru le ndzu, duru ophu o kweru g'ephe la ibe phe-a?"

18Iphe, bukpuo ndu shi buru ndu-eze, ohamoha l'ophu be e mekotaru ona lia. Onye ophu nonu l'ooze l'ime ilu nkiya.

19Obenu le gubedua be a chifuru l'ilu nkengu; tuphaa ngu g'onye gbutaru ekali-oshi tuphaa. A chikoo ndu e gburu egbugbu tupyabe ngu; mbu ndu e gude ogu-echi nmafushia ephe; ndu wuru laa le mkpuma ophu nọ l'alima. Oo g'odzu, a zoru pyakapyaka aduje-a bu gi du.

20E tee lidu odzu ngu g'e liru ke ndu ophu; kele i mebyishiwari ali ngu; bya egbua ndibe ngu pyaapya. Awa ndu ejo-ipe be a ta abyakwa ephotaje ephota ophu ozobaa.

21G'e dozia aka ee-dobe unwu iya gbushia gbudoru iphe-iji, nna phe oche metaru. G'ephe te ejekwa agbalihu ke ge mgboko buru okiphe phe; ephe egude mkpukpu le mkpukpu phe buchishia eliphe l'ophu.

Chileke e-mebyishi Babilonu

22Le Chipfu, bu Okalibe-Kakota-Ike pfukwaru su: "Ge mu bya agbalihu tsoo Babilonu ugu; mbu le mu e-me g'epha Babilonu chihu; yele ndibe iya, wafuru nu; mekpoo awa iya yele oshilokpa iya.

23Mu e-me ali ono l'ophu g'o buru ali ebyi. Mu emee ya l'o buru ali uda. Mu e-gude ola-l'iswi zaa phe l'eza." Noo iphe, Chipfu, bu Okalibe-Kakota-Ike eepfu.

Chileke e-mebyishi Asiriya

24Chipfu, bu Okalibe-Kakota-Ike ribuwari iya l'angu su-a: "Tororo bu opfu bu l'oo ge mu tuberu g'iphe du bu g'oo-du. O buru iphe, mu pfuru bu iphe, e-me nu.

25Mu e-gwekwa ndu Asiriya uji; mbu ndu Asiriya ono, nọ l'ali mu ono. Ndu ophu nọ l'eli ubvu iya be mu a-zo tolitoli nwufu phe. Ophu ndibe mu evuedu ivu ehuhu phe. Ophu mkpa phe aduedu phe l'ukuvu."

26Nokwa ge mu chiru l'oo-duru unwu-eliphe l'ophu bu ono. Nokwa aka njo, mu machiru l'ehu ohamoha l'ophu.

27Noo kele oo Chipfu, bu Okalibe-Kakota-Ike tuburu l'onoo g'oo-du. Ophu o dukwa onye suru agbanwe iphe, o pfuru. O machiakwaru aka; ophu o dukwa onye suru iya esela aka azu.

Chileke e-mebyishia Filisitayinu

28O kwa l'apha eze ono, bu Ehazu nwuhuru be mu nataru ozi-a. Ozi obu suru-a:

29"Unu te etekwa eswa; unube ndu Filisitayinu g'unu ha; opfu le mgboro, e chiru unu gbajihuru; kele iphe, e-shi l'agwo ono futa bukwa ogiji. Akpuru, oo-mita buru okpuntu, apfu saa saa.

³⁰Noo teke onye kachaa akpa nri l'ime ndu akpa nri a-huma nri riaha. Ndu adudu g'ọ du phe aze pyakoo; ọ to dudu iphe, byaru eme phe nu. Obenu l'ogbarabvu nkengu be mu e-gude okpa-nri mebyishia. L'o woru nwa ndibe ngu; nwa ndu ophu phoduru nu phushikota teerii.

³¹“Chia mkpu gube oguzo! Taa uzu-ekwa unube mkpukpu ndu Filisitayinu l'ophu! Unube ndu Filisitayinu g'unu ha; unu toko zashihu azashihu; kele enwuru-oku shikwa l'uzo isheli akpu tutuutuu abya. Ophu o dudu onye a-nodu eje nkinyi iya l'ogbo-ogu phe.”

³²? Bu onu gunu be ee-yeru ndu-ozu, shi l'oha onoya? “Onu, ee-ye bu le Chipfu meakwaru Zayonu; o nguru anguru. O buru l'ime iya be ndibe iya, aakpa ehuru a-gbaba je ezee ndzu.”

Azaya 15

Chileke e-mebyishi Mowabu

¹Qwaa bu ozi, Chileke ziru zidoru ndu Mowabu. Mkpukpu Aru, no l'ali ndu Mowabu buakwaa mkpurupyata. O buru enyashi be e gude mebyishia ya. Mkpukpu Kiru, nokwapho l'ali ndu Mowabu buru mkpurupyata. O buru enyashi be e gude mebyishia ya.

²Ndu mkpukpu Dibonu wuru jeshia l'ulo agwa phe; aka ephe meru; o ha l'eli jeshia akwa ekwa. Mbụ le ndu Mowabu atu uzu-ekwa ndu mkpukpu Nebo; yee ke Medeba. Onyemonye kpushiru ishi bya akpushia eji-agba.

³Ndu eje le gbororo yegbaa uwe-aphu. Ndu no l'oma ulo-eli me ndu kuru l'edupfu toko atu uzu-ekwa; arwaphu onwophe l'ali akwa ntumatu.

⁴Ndu mkpukpu Heshibonu me ndu mkpukpu Eleyale toko echi mkpu k'ophu ndu no le mkpukpu Jiahazu anu olu phe. Noo g'o gude ndu ojogu ndu Mowabu chishia mkpu; kele meji tsukahuru phe.

⁵Uzu ekwa atu mu l'obu l'iswi ehuru Mowabu; kele unwu iya, eje phururugbada agba oso agbarwuchaa mkpukpu Zowa; ndu agbarwua mkpukpu Egulatu-Shelishiya. O nwechaaru ndu ophu jerwuchaaru mkpukpu Luhiti. Ephe -nodu eje; ephe akwa ntumatu. Teke ephe tsoru uzo ala mkpukpu Horonayimu be ephe no l'uzo raa ekwa ala-l'iswi phe ono.

⁶Mini, no le nggele Nimurimu tashihuru; eswa nwulwashihu. Egbudu kposhihu nku; ophu o duedu iphe, du oyii, phoduru iya nu.

⁷Eku, ephe kparu akpakpa kube; mbu akanya, ephe seru dobe be ephe e-vuta je adaghata nggele oshi wilo;

⁸Kele ojileka togbo, ephe echi agba Mowabu mgburugburu. Uzu-ekwa, ephe atu rwuchaaru mkpukpu Egulayimu. Teme erwubvu phe rwuchaa mkpukpu Biye-Elimu.

⁹Mini mkpukpu Dimonu be mee jiwaru ejiji; obenu le mu e-mebakwaaro mkpukpu obu, bu Dibonu iphe, ka njo. Mbụ le mu a-chiru oduma ye g'ọ tagbushia ndu shi iya nu agba oso ndzu phe; tagbushikwapho nwa ndu ophu phoduru l'alị ono l'ophu.

Azáya 16

¹Ndu Mówabu chitaru nwaturu g'ọ buru iphe-oku; chiru je anụ eze ndu alị-a. Mbụ l'e shi le mkpukpu Sela chiru iya je aghaa echięgu tugbua jeshia l'úbvú Zayonu je achie ya ndu bu iya nu.

²Ọ kwa g'unwu-enu, a chikaru l'epfune epheje nanunanu-a bu g'unwanyi Mówabu agba nanunanu shia aguga nggele Anonu ibiya ophu eerwuje iya erwurwu.

³Ephe nodu epfu su: “Unu kpozinaaru anyi ụzo! Unu pfunaaru anyi iphe, l'e-me nu! Unu menaa g'ononyo unu buru anyi ibvù, l'a-du ke kpuchii g'enyashi. Unu dominaa anyibe ndu eje phururugbada; ophu unu atukwa anyibe ndu agba oso ndzu jala.

⁴Unu kwenu g'anyibe ndu ono, a chiru oso shi l'alị ndu Mówabu lwapfuta unu. Unu kpuchinaa anyi g'onye mmebyi ono te emebyi anyi! “O -rwua teke ndu mkpamehu achihuwa; ndu mmebyi abwaru bugengu; ndu emeje nemadzu ewere bvuebekpo l'alị-a l'ophu;

⁵be Chileke e-goshi n-yemobu iya; woru onye apfushije ike l'iphe, o pfuru, shi l'onu-ulo Dévidi mee g'ọ buru eze; mbụ onye abujeru; ọ -nodu ekpe ikpe l'o kpe iya l'uzo, pfuru oto. Ophu oopadu apfubekoto eka lanu.”

⁶Anyi numawaru ge ndu Mówabu ekube onwophe; l'ephe anyanuka ndu; teme ephe nodu etse etsetse. L'ekuku ono, ephe eku onwophe ono; mekpoo sukusuku ono, du phe l'ehu ono be pawaru eka. Ole epha ono, ephe etu onwophe ono bukota okorobo iphe.

⁷Noo g'o gude ndu Mówabu nodu ara eka Mówabu obu arashi iya ike. Mbụ l'ephe tukoru ara eka iya. Unu rashikwa eka ike; g'o rwukwaa unu l'ehu, bu opfu ehu okpa-ulo, e gude kpa mkpukpu Kiru-Harsetu. Unu gua aphu iya; kele e tsuwaru iya pyaapya.

⁸Egu mkpukpu Heshibonu be iphe, a koru iya nwukotawaru lwaa. Vayinu, a koru le mkpukpu Sibuma nwukwaapho lwaa. Ndu-ishi ohamoha zowaru okpobe vayinu, du iya nu pyaapya; mbụ vayinu, shi abaje uba barwua mkpukpu Jiaza; mbụ bawaro uba tsowaruro uzo echięgu. Eri iya bawaro uba ono jerwuchaa eze-enyimu.

⁹Noo ya; mbedua nodu arakwapho eka egube ono, ndu Jiaza ara ono. Mu arakwapho eka vayinu ndu Sibuma. Unube ndu Heshibonu; unube ndu Eleyale; mu gudeakwa enya-mini awu unu ehu; kele okwe, e shi erwujeru ekpu iphe, unu meberu l'alị me ọ -chashiahaa; yee okwe, e shi erwuje me a -kpatahaa ya akpata; be bukotawa sutukumu.

¹⁰Ehu-utso yee ete eswa be a nafuwaru egu ono, a koru oshi-omi ono. Ophu o duedu onye anodujekwadu l'egu-vayinu ono agu ebvu; ozokwanu nodu iya erwu okwe. Ophu

o duedu onye anọdujekwadu l'egu ono akụ mee-vayinu. Noo kele mu buchiwaru akwa evu, e shi anọduje l'eka ono akwa.

¹¹Okpoma mu akwa ekwa alị ndu Mówabu; mbụ l'okpoma azu mu uzu g'onye akpo ogumogu. Ime obu mu nọdu akwaru ndu Kiru-Haręsetu ekwa.

¹²Ndu Mówabu -nọdu eje l'eka ephe agwaje iphe; buepho ike be ephe eme g'o ka phe abvubvu. Mbụ teke ono, ephe eje l'agwa phe je iya agwagwa bu iphe, abudu iphe be ephe eme.

¹³Noo opfu, Chipfu pfuhawaru l'opfu ehu ndu Mówabu.

¹⁴Obenu le nta-a be Chipfu ono suru: “L'o kwa apha eto be o phoduru; mbu l'aaguakwaru alị ndu Mówabu apha g'onye-ozu, e ziru ozi, oo-nodu eje. Apha eto be o phoduru ubvu ono, alị ndu Mówabu du ono; mekpoo ikpoto igwe oha ono, bu iya nu ono abukotaru ndu a gubeduru iphe. Nwa ndu a-phodu nu aha nwanshii shii; teme ophu ike adudu phe.”

Azáya 17

Chileke a-nu ndu Arámu; waa ndu Ízurelu aphu

¹Owaa bu ozi, Chileke ziru le k'ehu ndu mkpukpu Damasukosu: “Lewarọ; Damasukosu e-mechakwaa bu-buhuru mkpukpu. Iphe, oo-mecha buru bu ikpozu.

²Mkpukpu le mkpukpu ono, azagba Arowa e-mechaa bukotaru eka e budu ebubu. Ee-mechaa pakotaru iya haaru aturu; waa egbu g'o buru eka ephe a-dojeru; o to dudu onye eye phe ebvu.

³Mkpukpu le mkpukpu ono, a kpushiru ike ono be e-mechaa chihu l'alị ndu Ifuremu. Ophu ndu Damasukosu e-nweeduru onye a-buru eze phe. Oo g'ee-me ndu Ízurelu iphe-iphere-a bukwapo g'ee-me ndu Arámu. Nokwa iphe, yebe Chipfu, bu Okalibe-Kakota-Ike eepfu bu ono.”

⁴“O -rwua teke ono be ubvu, aakwabe oshilokpa Jiékopu a-ngachafu. Okporokpo ono, o du ono awufu.

⁵Ízurelu a-du g'onye akpata iphe l'opfu; g'onye egbu ereshi, pfuru apfuru, bu eka be oogudeje ekpokobe iya. Teme l'o dukwapo g'onye akpa ukpa oyoko ereshi le nsuda Refayimu.

⁶Ole mkpakwa iya a-phodunu iya-a. Oo-dukwapo g'eka a nmaru oshi-olivu yigayiga; l'o phodu nwebo ozoo eto le mkpakpa onu ekali-oshi, olivu obu; phodukwapo eno ozoo ise l'eze ekali iya, mishiru ike. Noo iphe, Chipfu, bu Chileke ke ndu Ízurelu epfu bu ono.”

⁷O -rwua mboku ono be amadu a-gharu onye meru iya nu iphu. Mbụ l'enya phe be ephe a-tuko ghaa l'eka Onye Nso ke ndu Ízurelu no.

⁸Èphe ta aghaèduru òru-nshi phè iphu; mbù iphe, èphe gude èka phè mee. Òphu èphe agubeedu itso Ashera iphe; yèè ònu èka èphe akpoje òku l'iphe, eshi kwèekweekwee, bù iphe, èphe gude èka phè mee.

⁹O -rwua mbòku ono bè mkpùkpu phè, a kpùshiru ike a-dù g'èka a gbadoru agbado l'ime òswa; òzoo l'eli úbvú; ò bùru ndu meru iphe, a gbadoru iya bù ndu Ízurelu. Èkameka atùko bùru okorobo ègu.

¹⁰Kèlè-a; unu zòhawaru Chileke, bù iya dzòtaru unu ono. Unu ta anyataduru onye ono, bù agbara-mkpuma; bya abùru onye meru unu; unu gbashia ike ono. Ò bùru iphe ono meru g'o gude; o -betakponu unu kua akpuru oshi, kakòtakpoo ree; òzoo l'unu kòru vayinu, unu dzètaru l'òhozo;

¹¹mbù-a; o -betakpo unu mee g'ò wata aba ùba mbòku ono, unu kuru iya ono; o be l'ùtsu iya; ò wata atù ige; unu ta awòtakwa iya mebyi; kèlè ò bùepho nrimaphù yèè iphe-èhuka bè mbòku ono a-bùru.

Alwù-kpe ndu òhozo

¹²Oowaa! Ò kwa òha, dù igwerigwe aba hanyihanyi. Hanyihanyi, èphe aba dù g'èka Eze Ènyimu aphù gbudugbudu. Oowaa! Gè ndiphe swòkoberu. Èphe aphù gbudugbudu g'èka oke-mini asò gborogboro!

¹³O -betakponu òhamoha phùchaa gbudugbudu gè mini, a kuru ikpete; ò bù-a mba bè òò-barù phè; èphe agbamihu òkpobe agbamihu. L'a chíru phè ye lè phèrephere g'èswa ereshi, a nò l'eli úbvú aphushi; yèè gè bèrebere iphe, phèrephere apaphe l'èka oke phèrephere ezi.

¹⁴O -be l'ùzenyashi; iphe, eye ebvu atùko kuru. Nchi -bya abòhu; èphe abvuwaa. Noo ònodu ndu ono, egwe ivu anyi ono; mbù okiphe ndu ono, akwa iphe anyi l'òkwata ono.

Azáya 18

Aphù, Chileke a-nù ndu Kushi

¹Nshìo gùbe alì ono, aanù èphu òkù iphe, ephegbaa l'agùga ènyimu ndu Kushi;

²mbù unubè ndu ezije ndu-ozì unu; èphe etsoru mini. Mbù èphe egude ùgbo-èjì daghaa mini. Sù-a; unubè ndu-ozì òkpa-ègwa; unu lapfunu ndu ono, ha l'eli bya akwò akpò-èhu bùruru ono! Unu lapfunu ndu ono, aatsù ebvu l'èka dù ntse mè l'èka dù ènya; mbù òha, ike dù l'ògu; abyajè alwù lwùta; òha, nggele nggele sò-bushiru asò-bushi!

³Unubè unwu-eliphe l'òphu; mbù unubè ndu bu lè mgboko-a; unu lenu! E -wolìepho iphe-òhubama imeli imeli l'eli úbvú bè unu a-hùma iya-a. Teke e gbuerupho opu ono bè unu a-nùma iya-a.

⁴Waa iphe, Chipfu pfuru nù mu baa: “Mu a-nòduepho nggujungguji gbè l'èka mu bu tufu ènya ele; g'anwù echi phuuphuu teke okpomòku dù; òzoo g'urwukpu, akwa ijì l'ònanwu.

⁵Kẹle-a; a -bya erwu teke emetajẹ iphe, e meberu l'ali; mbu teke iphe e meberu l'ali agbawashikwadu ige; iphe ono, shi buru okoko ono abuwaru mebyi iphe, chawaru k'awota; noo teke o-bya bya egude mma beshichaa ekali iya ono chita.

⁶Noo teke aa-tuko g'ephe ha haaru udele, bu l'oma ubvu; paru phe haaru unwu anu, bu l'egbudu. Unwu enu egude phe kpaa nri jasu onanwu alaa. Unwu ejo-anu, bu l'egbudu egude phe kpaa nri jasu udzumini abvu."

⁷Noo teke aa-wata ewota iphe-oma gude bya anu Chipfu, bu Okalibe-Kakota-Ike. O buru ndu a-nodu ewotaru iya iphe obu bu ndu ono, ha l'eli bya akwo akpo-ehu bururu ono; mbu ndu ono, aatsu ebvu l'eka du ntse me l'eka du enya ono; ndu bu oha, ike du l'ogu bya alwuje lwuta; oha, nggele nggele so-bushiru aso-bushi. Iphe-oma obu be ee-gudeje bya l'ubvu Zayonu, bu iya bu eka aanoduje araku Chipfu, bu Okalibe-Kakota-Ike.

Azaya 19

Aphu, Chileke a-nu ndu Ijiputu

¹Owaa bu ozi, Chileke ezi le k'ehu ndu Ijiputu. Unu lenu! Chipfu nokwa l'urwukpu ezi phaaphaaphaa agba abya Ijiputu. Agwa ndu Ijiputu nodu anma pyaapyaapya l'iphu iya. Meji rwushihu ndu Ijiputu.

²"Mu a-kpali ndu Ijiputu g'ephe tsoje ndu Ijiputu ibe phe opfu; k'opfu unwune a-nodu etso unwune phe ugu. Obutobu etso obutobu iya opfu. Mkpukpu etso mkpukpu ibe iya ugu. Ali-eze etso ali-eze ibe iya opfu.

³Meji a-tofu ndu Ijiputu. Ephe -chichaa idzu iphe, ephe e-me; mu emee ya; o to do du g'ephe chiru iya. Ephe ejee l'aja l'iphu nshi; jee l'aji g'ephe kpata maa ishi. Ephe ejee l'aji l'eka ndu aji maa; me l'eka ndu agba aja.

⁴Mu e-woru ndu Ijiputu ye l'eka ndu a-nodu eme phe omeliwe. O buru onye a-buru ishi phe bu eze, eme engiringa." Noo iphe, o pfuru; mbu Nnajiuphu, bu Chipfu; bya aburu Okalibe-Kakota-Ike.

⁵Mini, du l'enyimu Nayilu a-tashihu. Ogbu ogbu nggele akposhihu nku du kpokoro-kpokoro-kpokoro.

⁶Mini, awu l'ose a-nodu eshi ishi. Nggele nggele, nogbaa l'ali ndu Ijiputu awata alwa ali ali eje jasu l'ootahu ree. Okpete okpete; yee eji eji atuko nwushihukota;

⁷mekwapho iphe, a kuru l'aguga enyimu Nayilu, no l'onu-enyimu ono. Opfu, a koru akoko l'ogbu ogbu enyimu Nayilu l'a-dukota kpokoro kpokoro kpokoro. Pherephere atuko iya pata; a taa humaedu iya.

⁸Ndu egbuje ema a-tsu ude kwashia enya-mini. Mbu iphe, bukpo ndu eseje ikokoro l'enyimu Nayilu; ndu anoduje ese ugbu-egege le mini a-tuko nwupyashihu.

⁹Ndu egudeje oghu ocha, ama mma gude akpa iphe a-chihu. Ndu ekwe okpobe ekwa ocha a-buru ndu iphere e-gude.

¹⁰Ndu bu phe gude ali ndu Ijiputu aburu ndu e gweru arakabya. Iphe, bukpo ndu eri ugwo aburu ndu aphu tsoru.

¹¹Ndu-ishi le mkpukpu Zowanu bukota ndu eswe. Ndu maru iphe, bu ndu anoduje akpo-ziru Fero uzo nodu akpo-zi mkpo-zi onye-eswe. ? Denu g'unu e-shi su Fero: “Mbɛdua yikwa le ndibe ngu ndu ophu maru iphe. Mu buru nwa onye eze, shi l'ichee.”

¹²Su-a; ? bu awe be ndibe unu ndu maru iphe no nta? G'ephe goshinu unu g'iphe du; ephe emee g'unu maru iphe, Chipfu, bu Okalibe-Kakota-Ike doberu k'eme ndu Ijiputu.

¹³Ndu-ishi le Zowanu bukotawa ndu eswe. Ndu-ishi le mkpukpu Memufisu be e mewaru mkpurukpuru-nya. Ndu ono, bu mkpuma, gude ulo l'okpa-ipfu phe ono be duswewaru ndu Ijiputu uzo.

¹⁴Chipfu chiwaru unme, achije enyaji chiru ye phe l'ehu. Ephe mee; ndu Ijiputu nodu akpo galagala l'iphemiphe, ephe eme egube ono, onye nguru mee anoduje akpo galagala l'eli egbo, o gboru ono;

¹⁵k'ophu bu l'o to duedu iphe, ishi ozoo odzu emeru ndu Ijiputu; ophu o duedu iphe, ekwo-igu ozoo okpete emekwaduru phe.

Ndu Ijiputu a-baru Chipfu eja

¹⁶Teke ono be ndu Ijiputu a-du g'unwanyi. Ephe e-rwuhu le ndzu-agugu; o buru aka o paliru aka abya phe echichi; mbu Chipfu, bu Okalibe-Kakota-Ike.

¹⁷Ali ndu Jiuda aburu iphe, ee-gudeje eye ndu Ijiputu ebvu. Onye -numaru aka e kuru epa ndu Jiuda; ndzu erwuta iya. O buru iphe, a-kpa iya nu bu iphe, Chipfu, bu Okalibe-Kakota-Ike e-mechaa mee phe.

¹⁸Teke ono be mkpukpu ise l'ali ndu Ijiputu a-wata epfu opfu-ali ndu Kenu. Ephe eria nte l'ephe a-nodu l'aka Chipfu, bu Okalibe-Kakota-Ike. Mkpukpu ono be nanu a-nodu aza “Mkpukpu Ola-l'iswi.”

¹⁹Le mboku ono be ee-dobe aka aa-gwaje Chipfu l'echilabo ali ndu Ijiputu. L'a kpua iphe, e gude anyata Chipfu akpukpu dobe l'oke ali iya.

²⁰Ooburu iphe-ohubama me iphe, agba ekebe le Chipfu, bu Okalibe-Kakota-Ike nwu nya l'ali ndu Ijiputu. A -nodu eme phe mkpawere; ephe raku Chipfu; l'o zia onye adzota phe nu. Onye ono abya anafuta phe.

²¹Oo ya bu le Chipfu e-me ge ndu Ijiputu maru iya. O buru mboku ono be ephe amarweta Chipfu amarweta. Ephe e-gude anu yee nri gude bya agwaa Chipfu. Ephe rifu nte l'owa-a iphe, ephe e-meru Chipfu baa; ephe emeeru iya ya.

²²Chipfu a-tu ndu Ijiputu ehuru. O -tuchakwaa phe ehuru ono mee ephe ewekorohu. Ephe alwapfuta Chipfu; l'o ngabe nchi l'arworwo, ephe arwo iya; mee; ephe ewekorohu.

²³Teke ono bẹ oji a-dabyiru swanmangu shi l'alì ndu Ijiputu je adajaa alì ndu Asiriya. Ndu Asiriya ejeahaa Ijiputu. Ndu Ijiputu ejeahaa Asiriya. Ndu Ijiputu ephe lẹ ndu Asiriya atuko abaru Chipfu eja eghirigha.

²⁴Lẹ mbọku ono bẹ ndu Ízurelu a-buru ndu k'eto mẹ a -gụa Ijiputu yẹe Asiriya, bụ ndu a-buru iphe-oma, duru eliphe l'ophu.

²⁵Chipfu, bụ Okalibe-Kakota-Ike a-goru onu-oma nụ phẹ sụ: “G'onu-oma buru ke Ijiputu, bụ ndibe mu; yẹe Asiriya, bụ ndu mu gude eka mu mee; yẹe ndu Ízurelu, bụ ndu bụ okiphe mu.”

Azáya 20

Iphe, oozi; mbụ onye mpfuchiru, gba ẹhu ọto

¹L'apha, Tatanu byaru mkpukpu Ashidodu; mbụ teke Sagonu, bụ eze ndu Asiriya ziru iya; ọ bya etsoo ndu Ashidodu ogu; naa mkpukpu phẹ;

²bẹ Chipfu gude Azáya nwa Emožu pfua opfu. Iphe, o pfuru bụ: “Yefu uwe-aphu ono, i yeru l'ehu ono; yẹe akpokpa ono, i yeru l'okpa ono!” O yefu iya gbaru ẹhu ọto wata aghaphe; gbakwarupho okpa ọto tsoru ejephe.

³Tobudu iya bụ; Chipfu pfua sụ: “Oo egube ono, onye-ozu mu, bụ Azáya gba ẹhu ọto gbaru okpa ọto ghaphewaa apha ẹto ono; ọ buru iphe-ohubama; yẹe iphe, du biribiri, e meru ndu Ijiputu yẹe ndu Kushi ono;

⁴noo g'eze ndu Asiriya a-kpu ndu Ijiputu yẹe ndu Kushi lẹ ndzu; yeshia phẹ uwe; gbabẹ phẹ okpa ọto kpuru phẹ lashia; mẹ unwokorobya phẹ; mẹ ndu bụ ogerenya phẹ; ebohu egheeru phẹ onu g'ọ buchaaru iphe, ee-gude mee ndu Ijiputu iphe-iphere.

⁵Ndu kporu obu yeru ndu Kushi; bya egude ndu Ijiputu eku onwophe bẹ ndzu e-rwuta; teme iphere emekwa phẹ pho.

⁶Noo mbọku iphe, bụ ndu bukube eze-enyimu-a e-pfu sụ: ‘Unu humawaro iphe, meru ndu ono, anyi kporu obu yeru ono; mbụ ndu ono, anyi gbaru oso gbapfu g'ephe yeru anyi eka nafuta anyi l'eka eze ndu Asiriya! ? Denukpoo g'anyi e-me nahu?’ “

Azáya 21

Alwu-kpe ndu Babilonu

¹Owa-a bụ ozi, Chileke ezi ndu bu l'echiegu ono, no l'aguga eze enyimu ono: Oo g'oke-pherephere eshije l'echiegu ndohali ezi abya ono; bụ g'oo-shi l'echiegu ono bya. Mbụ l'oo-shi l'alì, eye ebvu bya.

²Ejo ophulenia bẹ e goshiru mu; eka nwoderu-oye deru ndu alì iya ye; nwokwata nodu akwa okwata. Unubẹ ndu Elamu; unu gbalihu lwua ogu! Unubẹ ndu Midiya; unu no-pee ndu ohogu unu mgburugburu! L'ude ono, ephe meru; ndiphe tsua ono g'ọ ha bẹ Chileke buchiakwaru.

³Noo g'o gude ogwēhu mu l'ophu nōdu emekōta mu ēhuka; ēhu nōdu aphūkota mu uphu. Mu dūepho gē nwanyi, ime eme. Anūma, mu nūmaru iya mee mu; mu kpōhu kulakula. Ahūma, mu hūmaru iya nmakōta mu ēhu jiiijiii.

⁴Meji nōdu akū mu phēripheri; ndzū-agūgu mee mu; ēhu nōdu anma mu anmanma. Nchi-ejihu, shi aduje mu ree shi byawaru bya aburu iphe, anyi mu ishi edzu.

⁵Ephe gweshia nri; bya atogbochaa utute-ukpo; bya awata eri nri; angū iphe, aangu angūgu. A nōnyaepho; o buri: “Unu zelihi unubē ndu-ishi ojogu! Unu tūa manū lē ngwogu unu!”

⁶Waa iphe, Nnajiuphu pfuru mu baa. “Je je edobe onye-nche, a-nōdu elefu enya! G'onye ono pfujekwa iphe, o hūmaru!”

⁷O -hūma ugbo-inya; mē ikpoto ndu agba l'inya; mē ndu agba nkapfū-igara; ozo ndu agba inya-kamelu; g'o rūkota onwiya; mbū rūkota onwiya okpobe arūkota.”

⁸Noo ya; onye-nche ono chia mkpu sū: Onye nwe mu nū; mbōku-mbōku bē mu a-nōduje l'onyi-eli-a eche nche. Mbū l'enyashi mbōku-mbōku bē mu anōduje nche l'ēka a sūru gē mu nōdu.

⁹Lekpodapho; o nweru onye nō l'ugbo-inya; mē ikpoto ndu agba l'inya etso iya. O nōdu epfu sū: “O daakwaru! Mkpūkpu Bābilōnu daakwaru! Ozo bū l'iphe, bū agwa mkpūkpu ono l'ophu, bū iphe, bū agwa nkepē bē e chikōtawaru pyaapyaa; o rwukōta alj.”

¹⁰Sū-a; unubē ndibe mu; unubē ndu e gwerū uji l'oma ēka eechichajē balj; iphe, mu epfuru unu bukwa iphe, mu nūmaru l'ōnu Chipfu, bū Okalibe-Kakōta-Ike; l'ōnu Chileke kē ndu Ízurelu.

Ozi, Chileke ziru l'ēhu ndu Edōmu

¹¹Wakwa ozi, Chileke ziru lē k'ēhu Duma. O nwekwarū onye gbē l'alj Siye eku mu oku sū: “Onye-nche; ? abalj jeberu ijebe-agma? Onye-nche; ? enyashi jeberu ijebe-agma?”

¹²Onye-nche yee ōnu sū: “Nchi abōhuakwa; bya ejihuēkwapho. O -buri l'unu akpata ishi; unu kpata ishi. Unu lwadupho azū ozobaa.”

Ozi, Chileke ziru l'ēhu ndu Arabu

¹³Waa ozi, Chileke ziru lē k'ēhu ndu Arabu. Sū-a; unubē ndu ije, shi l'alj ndu Dedanu; unu je je adōru l'oswa ndu Arabu.

¹⁴Unu kutakwa mini, unu a-nū ndu mini agū; unubē ndu ophu bu l'alj Tema! Unu wotakwa nri bya anū ndu agha phurii!

¹⁵Ndu ono bē bū ndu gbalarū ogu-echi; mbū ndu a miliru mma; ephe nahū gbalaa. Ndu e setarū apfū kē kikiki g'a gbaa. Ephe shi l'ēka ogu ekpo oku ono nahū gbalaa.

¹⁶Wakwa iphe, Nnajiuphu pfuru mu baa: “Aagwakwaru ndu Keda apha oḡu g'onye e butaru ozi, o-o-ṅodu eje. O kwa apha lanu be o phodu; iphe, bukpoò ùbvù, aakwabeje ndu Keda a-bvukota.

¹⁷Nwa ndu a-phodu nu l'ime ndu agbaje apfu; mbu ndu ike du l'unwu Keda ta abadu ishi; kele o kwa Chipfu pfuru iya; mbu Chileke ke ndu Izurelu.”

Azáya 22

Ozi, Chileke ezi l'ehu ndu Jierúsalemu

¹Owaa bu ozi, Chileke ezi ndu bu le Nsuda Ophulenyanya ono. Su-a; ? bu gunu eme ngu nta-a, meru g'o gude; ndibe ngu tuko wufu wuba l'oma mkpotsu ulo;

²mbu gube mkpukpu ono, bu iphe, jiru iya nu bu etsu utsu. Gube mkpukpu, agba gharagharaghara bya eme rigbarigba. Ndibe ngu, e gburu egbugbu ta abukwa oḡu-echi be e gude gbua phe. Ophu o bukwa l'egu oḡu be ephe no nwuhu.

³Ndu-ishi ngu g'ephe ha tukowaru ye okpa l'oso gbalaa. A kpuru phe le ndzu; ophu e gudedu apfu. Iphe, bukpoò unube ndu e guderu be a tukotaru mkporo tugbabe atugbabe; l'unube ndu gbalaru teke ndu ohogu unu nokwadro enya.

⁴Noo g'o gude mu su: Unu wofu mu ro enya. Mbu-a; unu haa mu ge mu kwaa ekwa kwaghee ya akwaghe. G'e b'jekwa mu egbogbo l'eka o bu ndibe mu be eeme omeliwe ono.

⁵Kele Nnajiuphu, bu Chipfu; mbu Okalibe-Kakota-Ike be meakwaru eswe mboku ono; o buru mboku, utsu daru; a zo iphe pyaapya. Ndu rwuta onyemonye le Nsuda Ophulenyanya ono. Eswe mboku ono be ee-nwukposhi igbulu; l'a ndu araku eze ubvu g'o gbaa mkpu.

⁶Ndu Elamu byakwa bya achita ekpa apfu phe jeshia oḡu; bya achita ndu gude ugbo-inya alwuru phe oḡu; me ndu gude inya eje oḡu gude jeshia. Ndu Kiru bya ekpuhaa iphe-mgbobuta phe woru ghebe onu.

⁷Nsuda unu ophu kachaa ree bu iphe, jiru iya nu bu ugbo-inya. E woru ndu gude inya eje oḡu yechaa g'ephe che onu-abata mkpukpu nche.

⁸Oo ya bu l'iphe, gbobutaru ali Jiuda be a nashichawaru iya. O be mboku ono; unu leaha enya ngwogu ono, kuru l'ibe eze, e meru l'oshi sida, shi l'oswa, du l'ubvu ubvu Lebanonu.

⁹Unu humawaru le mkpukpu Dévidi gbaru oru l'eka du igwerigwe. Unu kukoo mini, du l'okpuru mkpozeta sukaa ya.

¹⁰Unu bya agua ulo, dugbaa le Jierúsalemu oḡu; bya ahara phe tsukposhia gude mekwaa agbarike igbulu Jierúsalemu.

¹¹Unu bya atua okpuru le mgbaka igbulu labo ono ge mini shi l'akahu okpuru ono wubata iya doru. Ophu unu agbapfuduru onye bu iya turu okpuru ono atutu; mbu ophu

unu akpakpodarunu onye ono ishi; mbụ onye ono, bụ iya chiru idzu l'owa-a g'oo-du teke dūhakpowaro ęnya ęnya kpo.

¹²Tobudu iya bụ; o be mboku ono; Nnajiuphu; mbụ Chipfu, bụ Okalibe-Kakota-Ike bya ekua unu sụ g'unu bya araa ękwa gwa aphu; g'unu kpushia ishi; chita uwe-aphu yee.

¹³Ole o bụ; leanaro ęnya! Ehu atsole-a unu! Unu nodu emele-a emereme; egbushi eswi; egbushi aturu; atashi anu; angushi mee! Unu -gbeshi unu asu: “Unu g'anyi rikwaa nri ngwa mee! ? O kwaro: o -be echele; anyi anwuhu-a?”

¹⁴Ole Chipfu, bụ Okalibe-Kakota-Ike mekpooru owa-a; mu maru; mu gude nchi mu numa iya; mbụ l'o suru-a: “iphe-ęji-a, unu eme-a be a ta abyakwa asachafu asachafu jasụ g'unu a-no-beru. Noo iphe, oopfu; mbụ Nnajiuphu ono, bụ Chipfu; bya aburu Okalibe-Kakota-Ike.”

Aalo Shebuna ęka le nchi

¹⁵Waa iphe, Nnajiuphu epfu; mbụ Chipfu ono, bụ Okalibe-Kakota-Ike. O suru-a: “Tugbua je asu onye-ozu ono, mbụ Shebuna, bụ iya be unuphu ibe eze du l'ęka; je asu iya:

¹⁶? Bụ gunu be iime l'ęka-a? Temе ? bụ onye haru ngu g'i bya anodu tua ilu, ee-li ngu? I bya anodu atu ilu ngu l'ephekerephe; egbubashi ęka ii-noduje tuta unme l'ime agbara mkpuma.

¹⁷Lenu! Chipfu abyaakwaa ngu azu gburumu pfurii; tuphakpopho etupha; mbụ gube onye ono, bụ oke-du-ike ono.

¹⁸Oo-wee ngu kperekpere ge bolu je eworu ngu chie l'oha, kwata ha okpobe osa. O buru l'ęka ono be ii-nodu nwuhu. Temе o buru l'ęka ono be eguru ugbo-inya ngu ono a-kwashi; mbụ gube onye ono, bụ iphe, e gude achi ulo nnaji ngu ochi ono!

¹⁹Chipfu a-nashi ngu okwa ngu; chifu ngu l'ęka i no eje ozi.

²⁰“O -be mboku ono be mu e-ku onye ejeru mu ozi, bụ Eliyakimu nwa Hilikaya.

²¹Mu achita uwe kpowula-kpowula ngu woru yee ya; chita akpo, iikebutaje uwe woru mee ya mgburugburu; woru ike, shi du ngu nu nu iya. O buru iya a-buru nna ndu bu le Jierusalem; me ndu onu-ulo Jiuda.

²²O buru iya be mu e-ye igodo onu-ulo Dévidi l'ęka; o -guhhaa uzo ghebe onu; o to dudu onye byaru agu-chi iya nu. Teke o gu-chikwanuru uzo; o to dudu onye byaru aguha iya nu.

²³Mu e-me iya g'o nguru anguru ge nggu, a kpoberu kpo-mia akpo-mi. Ee-gude iswi ehu iya kwabe ndibe nna iya ubvu.

²⁴“Iphemiphe, bukpo iphe, e gude akwabe ndibe nna iya ubvu be aa-tuko nyabekota iya l'olu; mbụ ndu ephe l'iya bu abubu; me unwu, ephe nwutaru anwuta; ngwa ulo l'ophu, bụ ndu ophu ęnya lwaru l'ibe phe; e -shikpo l'ochi jasụ l'ipoti.”

²⁵Chipfu, bu Okalibe-Kakota-Ike sūru-a: “Lẹ mbọku ono bẹ nggu ono, e shi kpọbe kpọ-mia akpọ-mi ono a-kpọfu daa. Ngwa-ulo ono, e shi kobegbaa ya ono aburu gwoo l’ali. Nokwa olu Chipfu.”

Azáya 23

Ozi, Chileke ezi ndu mkpukpu Taya

¹Waa ozi, Chileke ziru lẹ k’ẹhu mkpukpu Taya. Unu kwashia ẹnya-mini; unubẹ ugbo-mini kẹ mkpukpu Tashishi; kẹle mkpukpu Taya bẹ e mebyishiwaru. Nta-a ta aduedu ulo, dū iya nū. Ophu ọ duedu ọdu ugbo-mini, dū iya nū. O buri ẹka e shiro bya emee g’ephẹ maru bu l’ali Sayipurosu.

²Unu dakwaa gbẹẹ unubẹ ndu bukube eze-ẹnymu; mēkpoo unubẹ ndu agba ngho, bu ndu shi lẹ mkpukpu Sayidonu. Ndu unu ziru ozi daakwaru eze-ẹnymu jeshia ẹka unu ziru phe.

³Ephe dawaru ẹnymu olemole. Iphe unu shi egudeje akpa okpoga bu witi, a koru l’aguga ẹnymu Shihọ; mbu witi ophu a kpataru l’aguga ẹnymu Nayilu. Mkpukpu unu shi ẹgube ono buri ẹka ohamoha azukota aswa.

⁴G’iphẹ buri kẹ gube mkpukpu Sayidonu; mbu gubedua, bu onye ike dū, bu l’eze-ẹnymu; kẹle eze-ẹnymu yewaru onu su l’ime teke emeswekwaa ya; ophu ya nwujekwaru nwa. Ophu ya ehejekwaru nwa nwoke; ophu ya emetsejekwaru nwa nwanyi.

⁵Ndu Ijiputu -numaepho iphe, meru lẹ Taya bẹ oo-gburwashị phe ẹhu shii.

⁶Unubẹ ndu bukube eze-ẹnymu; unu daghakwaa eze-ẹnymu la l’azu iya kẹ Tashishi! Unu rakwaa ẹkwa rashia ya ike!

⁷? Bu mkpukpu-a bẹ unu shi anoduje eme emereme-a? Mbu akahu mkpukpu ndiche ono; onye okpa iya ephenebo dutaru je ẹka dū ẹnya; o je eburu buri onye byaru abyabya.

⁸? Bu onye kabẹ chiaru Taya ejo idzu ọwa? Mbu mkpukpu ono, ekpubeje ndu ọzo okpu-eze ono; mkpukpu, ndu agba oke-ngho l’ime iya bukota ndu-ishi ndu-ishi; ndu buepho l’ephẹ agba ngho buri ndu mgboko l’ophu akwabẹ ubvù.

⁹O kwa onye chiru iya dobe g’o dū nno bu Chipfu, bu Okalibe-Kakota-Ike; g’o gude mee g’eku-onwonye k’iphe, bukpo ndu nweru akpabiri kpua epho l’ali; l’ookuzetakwapho iphe, bukpo ndu aakwabẹ ubvù lẹ mgboko l’ophu.

¹⁰Unu gbawaro ali unu ophorokpo g’eka ẹnymu Nayilu byaru utso; unubẹ ndu Tashishi! O to duedu onye no-chikwaduru unu uzo.

¹¹Chipfu machiwaru ẹka maberu eze-ẹnymu; bya emee g’ali-eze ndu mgboko nmakota jijijiii. O tūwaru ekemu su l’owa-a iphe, ee-me ndu Kėnanu; g’a tuko iphe, bukpo ẹka e meru; o nguru anguru, dū iya nū mebyishikota.

¹²O pfuru sù: “Unu tee meekwa emereme; unubè ndu Sayidonu, bù unubè ndu ophu e gweru uji nta! Unu gbalihunu daghata azu iya ophuu jeshia ali Sayipurosù. Unu -jerwukponu eka ono bè unu ta abyakpokwanu atuta unme obu.”

¹³Unu lekpodapho enya l'ali ndu Babilonu; mbu ndu ono, adudu iphe, a guberu phe nta-a ono! Ndu Asiriya mewaru iya; o buru eka unwu anu, shi l'echiegu abyaje adoru. Ephe tsoru iya ugu; bya eworu ulo, a kpushiru ike, du iya nu g'o ha tsukposhia; mee ya; o buru ochobu.

¹⁴Unu raa ekwa rashia ya ike; unubè ugbo-mini ke mkpukpu Tashishi; kele mkpukpu, unu shi dakobe bè e mebyishiwaru!

¹⁵O -rwua teke ono bè aa-zoha mkpukpu Taya no ukporo apha eto l'apha iri, bu iya bu iphe, eze anoje l'okwa eze iya. Ukporo apha eto l'apha iri ono -bvupho l'o nwuaru ndu Taya g'ebvu ono, ndu agba ukpara aguje ono, suru:

¹⁶“Wota ogumogu tsoru oma mkpukpu ghaphechaa; gube nwanyi-ukpara, a zoharu azoha! Kpo ogumogu obu rengurengu; ga ikpoto ebvu guru ye iya; k'ophu aa-nyata ngu ozobakwa.”

¹⁷Le-a; ukporo apha eto l'apha iri ono -bvupho bè Chipfu a-bya emee ndu Taya enweru iphe ozo. Ephe alaphu azu l'iphe ono, shi kwowaru phe ehu ono, bu iya bu agba ukpara. O buru ndu ephe l'iya a-nodu eme iya bu ali-eze ndiphe l'ophu.

¹⁸Ole urwu, oo-rita; me ugwo, aa-pfu iya a-bukotaru iphe, ee-doheru Chipfu. O too dobedu iya l'oba; ophu o dudu eka ochikobe iya. Urwu, o ritaru aburu ndu aa-nuje iya bu ndu no ndzu no-doru Chipfu; ge ndu ono nweru nri nweru okpobe uwe; nweru iya k'etsutsu iya.

Azáya 24

Aphu, Chipfu a-nu ndiphe l'ophu

¹Lekwa! Chipfu abyakwa eme g'eliphe l'ophu dabyiru iphoru. Mbu mee ya g'o buru ochobu. Oo-mebyishi iphu iya chikashia ndu bu iya nu.

²O buru g'e meru onye bu g'ee-me onye! G'e meru ndu-uke bu g'ee-me nemadzu mmanu. G'e meru nnaji bu g'ee-me ohu. G'e meru ne nwe ulo bu g'ee-me nwamgboko, ejeru iya ozi. G'e meru onye ere erere bu g'ee-me onye azu azuzu. G'e meru onye jeru ejita ugwo bu g'ee-me onye jieru ugwo. G'e meru onye jeru ejita ugwo oke ntukwase bu g'ee-me onye ejie oke ntukwase.

³Eliphe l'ophu bè ee-me g'o dabyikotakporu iphoru; mbu mebyishikotakpoo ya g'o ha. O kwa Chipfu pfuru opfu-a l'onwiya.

⁴Eliphe l'ophu agbanwushihu agbanwushihu anwu lwaalwaa anwulwashihu. Mgboko l'ophu nodu atahu atahu anwukwapho lwaa. Iphe, bu ndu eekutse l'eliphe nodu atahukotakwapho atahu.

⁵O kwa ndu no le mgboko pharwuru mgboko; kele ephe jikaru eme iphe, ekemu pfuru; bya agbanwee iphe, a suru g'e meje; bya emebia ogbandzu ojejeje onoya.

- ⁶Noo g'o gude onu, Chileke turu nodu ere phuruphuru le mgboko. O buru ndu bu iya nu e-vuta onwu iya. Oo ya bu le ndu bu le mgboko be e kepyashikotawaru. Ophu nwa ndu ophu phoduru nu abaedu ishi.
- ⁷Mee ophuú tashihuru. Vayinu ata mee nwukota lwa. Iphe, bu ndu eme rigbarigba tsuahaa pfupfupfu.
- ⁸Eguru oda nkwa ono, ephe aku ono buru bugemu. Wowoowoo, ndu angu-sweshi onwophe iphu atu buru sutukumu. Ogumogu ono, shi atso ikpoki ono daa nyonyoronyo.
- ⁹Ophu ephe abujeeduru; ephe -nodu angu mee; ephe agu ebvu-mee eye iya. Mee, atsu atsutsu nodu atsowa ndu angu iya nu ilu.
- ¹⁰Mkpukpu ola-l'iswi ono dabyiwaru ophorokpo. Ulo onyemonye be a gu-chishichaaru agu-chishi g'o to du onye a-bahu iya nu.
- ¹¹Ephe wushiru le gbororo ara g'a nu phe mee g'ephe ngua. Ehu-utso l'ophu tuko gbahukota ochii. Ophu ete eswa aduedu l'eliphe mgburugburu.
- ¹²A haa mkpukpu ono; o buru ikpozu. E woru oguzo, e shi yee ya gbua pyaapya.
- ¹³Noo g'oo-du l'eliphe l'ophu bu ono. Nokwapho g'oo-duru ohamoha. Oo-du g'eka a nmaru oshi olivu yigayiga; ozoo ge nwantukantuka akpuru vayinu, phoduru l'eka a woru vayinu.
- ¹⁴Ephe e-mechaa wolia olu tua uzu; mbu tua uzu ehutso. Ephe eshiro l'uzo enyanwu-adada tata onu ge Chipfu paberu aka.
- ¹⁵Oo ya bu ge ndu no l'uzo enyanwu-awawa jaa Chipfu ajaja. Ge ndu bukube eze-enyimu tukwaapho Chipfu ono, bu Chileke ke ndu Izurelu epha!
- ¹⁶Anyi nodu anuro ebvu, a -gbe l'eka igwe beru ali beru agu, asuje: "G'ajaja buru k'onye ono, pfuberekoto ono!" Mbedua sukwanu: "Mu wufuakwaru! Mu wufuakwaru! Nshio kwa mu nshio! Ndu oderu-oye edeakwaru amadu eye! Ephe gudeakwa eregede ederu amadu eye!"
- ¹⁷Nggiri; yee nsukutu; mekpoo igbudu tukokwaru kwaberu unube unwu-eliphe!
- ¹⁸Onye numaru ukporo nggiri -gbalaaha l'o je adalahu le nsukutu. Onye -shikwanu le nsukutu nyifuta; igbudu atupyabe iya. Uzo-mini uzo-mini, nokota l'igwe ghekotawaru onu. Okpa-ulo mgboko l'ophu nodu angakota anganga.
- ¹⁹Mgboko l'ophu gbawashihuwaru agbawashihu. Mbu le mgboko gbajahawaru ebo. Mgboko aphuwaa kpakpakpa aphushi iya ike.
- ²⁰Mgboko l'ophu angaakwaa phuphupu g'onye mee l'atsu. Ootu kpekengu kpekengu g'ulo, bvuru l'eka oke pherephere ezi. Mbu l'ejo-iphe, o meshiru be ikpe iya nmaru iya nmashia ya ike; k'ophu bu l'oo-da darwua ali; ophu oogbalihubaedu.
- ²¹O -rwua mboku ono be Chipfu a-hu ndu no l'ephekerephe ahuhu k'iphe-eji, ephe no l'eka du ephekerephe mee; hukwapho ndu eze, no l'eliphe ahuhu kwapho.

²²Ee-rwukọbe pẹ l'ẹka lanu g'onye rwukọberu ndu mkpọro l'ọka-mkpọro. L'a tu-chia pẹ l'ọka-mkpọro obu paru haa. A -noephọ ujiku olemole l'e je ahụa pẹ ahùhù.

²³Noo teke iphere a-dụ ọnwá; l'e meru ujikputeru nù ẹnyanwu. Noo kele Chipfu, bụ Ọkalibe-Kakọta-Ike a-buru eze l'eli úbvù Zayọnu yefua lẹ Jierúsalemu. O je l'egoshi ndu bụ ọgerenya mkpukpu ọdu-biribiri iya.

Azáya 25

Etu Chipfu ẹpha

¹Gube Chipfu; ọ bụ ngu bụ Chileke mu. Mu a-nọdu ekutse ngu; eku ẹpha ngu gude aja ngu ajaja. Noo kele i mewaru iphe, dụ biribiri. Ipfushije ike l'iphe, i chiru idzu iya e -shi teke ndiche;

²Kele i mewaru mkpukpu; ọ buru ikpọzu; mbụ mee mkpukpu, a kpụ-pheru igbulọ mgburugburu; ọ buru ọla-l'iswi. Ẹka ndu ọhozo kpuru; ọ nguru anguru bẹ i mewaru; ọ buru ẹka mkpukpu aduedu; ọphu a byadu emezibaa ya jasụ l'ojejoje.

³Noo g'o gude ọha ike dụ je a-nọdu akwabẹ ngu úbvù. Ndu mkpukpu ono, ndu bu iya nù bụ ndu ewebushi akurepho ono a-tuko wata ngu eyeru nsọ.

⁴Ọ kwa ngu shikpọo eshinu buru onye ndu adudu g'ọ dụ pẹ anọduje l'ẹka ezeru ndzụ. Mbụ l'i bụ onye abujeeru; iphe -nọdu atsụ nemadzu l'ẹhu l'ọ gbaba ngu l'ime je anọdu zeeru ndzụ. Ọ buru ngu bẹ aagbabajẹ l'ime je anonyabe mẹ oke pherephere nọdu ezi; mbụ l'ọo ngu bụ ibvù onye okpomọku ekpo; kele mkpawere ndu ewebushi akurepho dụ g'ẹka oke pherephere eme g'o nwutsua igbulọ;

⁵bya adukwapho g'okpomọku, ekpo l'alì, mini adudu. Ọ bụ ngu emeje gẹ ndu ọhozo, atụ kwokwokwo dobe ọnu doo. Ọo g'ibvù, shi l'urwukpu atuzetajẹ okpomọku-a bụ g'iibyanije erwu úbvù ndu ewebushi akurepho.

Nri ọbo-iphe, Chipfu e-shiru ndibe iya

⁶Ọo l'eli úbvù-a bẹ Chipfu, bụ Ọkalibe-Kakọta-Ike a-nọdu kua ndiphe l'ọphu oku iphe-eriri, tsuru ẹba; gaaru pẹ mẹ ndiche; mbụ shiaru pẹ anụ, bụ anụ, ụmi jiru ejiji; yee mẹ, doru ẹrwu.

⁷Ọzo bụ l'ọo l'eli úbvù-a bẹ ọo-nọdu mebyishia phulaphula ẹkwa ono, e gude phukputechaa ọhamoha ono; mbụ ukpo ono, e gude phụ-chia ọha l'ọphu onoya.

⁸L'o mebyia ọnwu lwua ya ree jasụ l'ojejoje. Mbụ lẹ Nnajiuphu, bụ Chipfu l'e-hushi onyemonye ẹnya-mini l'ẹnya. Iphe-iphere ono, e shi eme ndibe iya ono bẹ oo-me g'ọ bvukota l'eliphe mgburugburu; kele ọo iphe ono bẹ Chipfu pfuru.

⁹Ọ -rwua mbọku ono bẹ ẹphe a-sụ: “Lenu! Ọ kpọkwaa Chileke anyi baa. Anyi kpọru obu yeru iya; ọ dzọ anyi. Onye-a bụ Chipfu; anyi kpọru obu yeru iya. G'ẹhu tsoo anyi! G'anyi teje ẹswa l'ọ dzọ anyi!”

Aphụ, Chipfu a-nụ ndu Mówabu

¹⁰Kele ẹka Chipfu a-dukwa l'eli úbvú-a. Mbù lẹ ndu Mówabu bẹ aa-zọ ̀tolitoli l'ibe phẹ ẹgube ono, aazoje ẹswa ekperema pyakapyaka l'ikpọzu ono.

¹¹Ẹphe a-chiru ẹka labọ tũkaa g'onye ebvu mini, tũkaru ẹka l'eli mini ebvu mini onoya. Teme l'ọ bya emee g'eku onwophe ono lwa phẹ ali; g'ẹphe amahabe ẹrengete iya.

¹²Ọo-byazeta phengarangu igbulọ ono, unu kpuru; ọ nguru anguru ono. Oo-me iya l'oodukpoo mkpulali ọkpobe adudu; mbù l'oo-wozetakpo ya ali ọkpobe ewozeta; mbù worwua ya ali gẹdegede kpọ.

Azáya 26

Ebvú Ajaja

¹O -rwua mbọku ono; waa ebvu, aa-gu l'ali ndu Jiuda baa: “Anyi nweru mkpukpu, shihuru ike. Ọ buru ndzota bẹ Chileke gude kpọ-pee ya mgburugburu g'igbulọ.”

²Unu guhaa ọzo mkpukpu ono ghebe ọnu; k'ọphu ọha ono, pfulberekoto ono, bu ndu apfulshije ike l'iphe, ẹphe pfuru ono abahu.

³Ii-kebe iya l'oma; mbù onye ono, uche iya du l'eka i no; opfu l'ọ kpọru obu yeru ngu ono.

⁴Unu kpọru obu yeru Chipfu jasù lẹ tuutuutu lẹ mimiimii; kele Nnajioha, bu Chipfu bu oke agbara mkpuma ojejoje.

⁵Ndu woliru onwophe eli bẹ o kuzetaru; bya emee gẹ mkpukpu, a kpuru; ọ ha ephekerephe ephekerephe lwazetakpo mkpulali; mbù l'ọ gweru iya pyakapyaka jasù o rwua ali; o woru iya gwọo l'urwuku.

⁶E gude ọkpa azọ iya ̀tolitoli; mbù ọkpa ndu e shi emekpa ẹhu; mbù ntọ-ọkpa ndu adudu g'ọ du phẹ.

⁷Uzo, ndu pfulberekoto eshi pfuru nhamunha. Su-a; gube onye obu guru iphoro; ọo ngu meru ọzo ndu pfulberekoto; ọ nodu akwo teretere.

⁸Gube Chipfu; anyi nokpoephe eme iphe, ekemu ngu pfuru; gude nno daa gbẹ ngaberu ngu. Epha ngu; yee engiringa ngu bu iphe, aduje anyi ree l'obu.

⁹Oghoroko ngu aduje mu l'enyashi. O -be l'utsu l'ọ dukwa mu pho g'asù lẹ mu humaru ngu. Teke i kpeerupho unwu-eliphe ikpe; ndu bu iya nu amaru iphe, bu apfulbekoto.

¹⁰Ndu ejo-iphe abujeru; e -mechakporu phẹ eze-iphe-oma; ẹphe ta anwutadu iphe, bu apfulbekoto. Ephe -noduchakponu l'ali ndu obu phẹ guru iphoro; ẹphe emele-a iphe, bu iphe, apfulduru-oto. Ephe ta akpadu ishi kele Chipfu paru ẹka.

¹¹Gube Chipfu; i paliwaru ẹka ephekerephe; obenu l'ẹphe ta ahumaduru iya. G'ẹphe humanu g'opfu-ẹhu ndibe ngu aphu-beru ngu l'ẹhu; g'iphere adu phẹ! G'oku, duru ndu ohogu ngu tsupyashikwaa phẹ!

¹²Gùbe Chipfu; ọ̀ bú ngu e-me gẹ̀ nchì dù anyi doo. Iphe, búkpoo iphemiphe, anyi meru búkota ngu bẹ̀ meru iya nù anyi.

¹³Gùbe Chipfu, bú Chileke anyi; ndu bú nnajiuphu ọ̀zo, abùdu gùbedua shiakwa búru nnajiuphu anyi. Obenu l'ọ̀o gùbedua kpoloko bẹ̀ anyi akwabẹ̀ ùbvù.

¹⁴Ndu k'ono nwùhuakwaru; ẹ̀phe ta anọ̀ekwa ndzù. Ndu maa, lashìwaru nù; ta alwajeẹ̀kwa azù. I hùru phẹ̀ ahùhù; mee phẹ̀; ẹ̀phe búru ọ̀la-l'iswi; bya emee phẹ̀ g'a ta nyatajẹ̀he phẹ̀ anyata ophu.

¹⁵I mewaru ndu ndu-anyi; ẹ̀phe ka igwerigwe; gùbe Chipfu. I mewaru ndu ndu-anyi; ẹ̀phe ka igwerigwe. I shi ẹ̀gube ono mee onwongu; a kwabẹ̀ahaa ngu ùbvù; gùbe onye kpọ̀ribecharu oke alì ono l'ophu.

¹⁶Mbù-a Chipfu; ọ̀ kwa ngu bẹ̀ ẹ̀phe gbapfutaru teke iphe atsù phẹ̀ l'ẹ̀hu. Teke ìhù phẹ̀ ahùhù bẹ̀ ẹ̀phe tùkoru wata ngu araku.

¹⁷Ọ̀o gẹ̀ nwanyi, dù ime; ime nọ̀du emewaa iya; anọ̀duje aswìkposhi onwiya; echi mkpu l'oome iya ẹ̀huka-a; noo g'anyi shi dù nọ̀du ngu l'iphu; gùbe Chipfu.

¹⁸Anyi shi dù ime; anyi nọ̀du aswìkposhi onwanyi l'ẹ̀ka oome anyi ẹ̀huka. E mechaa; ọ̀ dù g'anyi nwùru phẹ̀rẹ̀phẹ̀re; mbù l'anyi ta adùdu ike dzọ̀ta ̀nwu-eliphe; ọ̀phu ndu buchiru mgboko adaduru.

¹⁹Sù-a; ndibe ngu, nwùhuru anwùhu e-mechakwaa nọ̀du ndzù ọ̀zo. Ogwehu phẹ̀ e-teta gbalihu. Unubẹ̀ ndu bu l'ime urwuku; unu gbalihu rwua okwe ẹ̀hu-̀tso. Iji, akwaru unu dũkwa g'iji, akwa lẹ̀ nchi-abọ̀hu. Mgboko e-mechakwaa chifutagbua ndu shi nwùhuhawa nù, dù iya l'ime.

Adzọ̀ ndu Ìzuru ndzù

²⁰Ndu mu; unu tũgbua bahù l'ùlo unu je agù-chia onwunu ̀zo! Unu domia onwunu nwanshii; jasù oke ẹ̀hu-eghu iya adazeta;

²¹kẹ̀le-a; unu lenu! Chipfu shiakwa ẹ̀ka o bu eje afùta; g'ọ̀ bya ahùa ndiphe ahùhù k'iphe-eji, ẹ̀phe meru. Mgboko l'ophu e-kpofutakọ̀ta ndu e gburu l'ime iya; ọ̀phu oodomiẹ̀du ndu a nọ̀ iya l'ime phushia.

Azáya 27

¹O -rwua mbọ̀ku ono bẹ̀ Chipfu e-gude ogu-echi, aha gengugengu. Ogu-echi, parù ẹ̀ka bya adù ike bẹ̀ oo-gude hùà ẹ̀jo-oke-agiyi ono ahùhù; mbù ọ̀kpù-wuruwuru ono, bú agwọ̀; ẹ̀jo-oke-agiyi ono, bú iya bú nwọ̀swi nggẹ̀geringge agwọ̀ ono; mbù l'ẹ̀jo anù, bugbaa lẹ̀ mini bẹ̀ ọ̀o-phushichaa tẹ̀terii.

²O -rwua mbọ̀ku ono bẹ̀ Chipfu e-pfu sù: “Unu gùà ebvu nù opfu-vayìnu ono, eye mebyi ntumatu ono.

³Ọ̀ kwa mùbe Chipfu eleta iya ẹ̀nya. Mu agba iya mini mkpùrumkpuru. Mu nọ̀du eche iya nche eswe l'ẹ̀nyashi; g'ọ̀ tọ̀ dù onye e-mebyi iya nù.

⁴Ehu te eghujekwa mu eghu. O -bukwanuru l'e woru obvu obvu yee mkpo mkpo to-chishia mu uto; mu azoo ya okpa ghata me a -nodu l'iphu ogu; chiru phe ye l'oku g'oku kee.

⁵Odumeka; g'ephe gbapfutaale mu-a bya anodu mu l'eka zee ndzu. G'ephe byale-a ge mu l'ephe doshia; g'opfu ta aduheru mu l'ephe."

⁶E -mechaa l'uzo iphu; be oshilokpa Jiekopu e-mechaa gbaa ogbarabvu. Mbụ le ndu Izurelu e-mechaa tua ige; phoo ishi; mia amimi gude mebyi mi-jia mgboko l'ophu.

⁷Mbụ-a; iphe, Chipfu chiru iya; ? o hakpwanu g'ophu o chiru ndu chiru iya iphe? ? E gbubekpwaru iya nu g'e gburu ndu gburu iya nu?

⁸Iphe, o gude baaru iya mba bu l'o haru; e tsoo ya ogu kpa ya le ndzu; mbụ o buru ejo pherephere, shi l'uzo enyanwu-awawa be o gude bya agu-lia ya.

⁹Wakwa g'ee-gude byachia ikpe, nmaru oshilokpa Jiekopu baa; teme o bukwaru iya pho a-buru mebyi, o miru, bu iya bu l'ee-huchafu iphe-eji iya: Teke oo-gwe mkpuma enya agwa iya rwukuru-rwukuru g'onye egwe ndzu. Itso Ashera taa duedu; ophu enya eka aakpoje unwu-isensu oku adedu ophu apfukwaduru nu.

¹⁰Noo kele mkpukpu, a kpushiru ike dabyiwaru iphoro. O buru ochobu egu mbukobe; buru eka a gbadoru g'echiegu, adudu onye bu iya nu. O buru eka ono be anoduje eche eswi; bya aburu eka aadobeje iya; o nodu ata ekali-oshi, du iya nu l'oburu echachi.

¹¹Teke ekali iya ono kpohuru nku l'eegbushia ya. Unwanyi abya evuta iya jeye l'oku; kele ndu-a bu ndu enwedu egomunggo. O buru iphe ono meru g'o gude ophu imemini phe adudu onye meru phe nu; mbụ ophu o dudu iphe-oma, oo-meru phe me ililekpo.

¹²O -rwua mboku ono be Chipfu e-shiepho l'onu enyimu Yufuretisu tutukoo ndibe iya g'onye atutushi eswa l'ereshi; gbiriri jasụ le nggele Ijiputu. Mbụ l'unube ndu Izurelu be aa-nodu atutukobe nanunanu.

¹³Mboku ono be ee-gbu eze opu. Ndu ono, no l'ali ndu Asiriya ala l'iswi ono; me ndu ophu a kpuru le ndzu laa ali ndu Ijiputu; a-tuko lwakobe bya abaaharu Chipfu eja l'ubvu, du nsọ ono, no le Jierusalemu onoya.

Azáya 28

Aphụ atso ru ndu Ifuremu

¹Nshio mkpukpu Sameriya, bu okpu-eze ono, ndu Ifuremu gude eku onwophe ono; gude iya angughajeru mee eka ono! Nshio eguru okoko ono, anwawa anwanwa ono; mbụ okoko, bu iya bu eguru iya; bya aburu ogbunwiiinwii ya ono, a tu-koberu l'ishi nsuda, emehuje iphe ono! Nshio mkpukpu ono, ephe egudeje eku onwophe; mbụ ndu mee kwatsuru ono!

²Lenu; Nnajiuphu nwekwaru onye okpehu du shii; teme o shihu ike. Oo-gbalikpoe ya pho byia l'ali ke gbaa; g'eka a turu akamini; g'eka oke pherephere mebyishiru iphe; g'eka igwe ezi pherephere; edze oke mini, aso gborogboro.

³Okpu-eze ono, ndu Ifuremu gude eku onwophe ono; gude iya angughajeru mee eka ono be ee-gude okpa tee pyakapyaka.

⁴Okoko ono, anwawa anwanwa ono; mbu okoko, bu iya bu eguru iya bya aburu ogbunwiiinwii ya ono, a tu-koberu l'ishi nsuda, emehuje iphe ono; l'a-du g'akpuru oshi figu, chakeru achake. Ahuma, nemadzu ahuma iya; bya awotawa iya paru l'eka; buwaa g'o wata iya eriri.

⁵O -rwua mboku ono be Chipfu, bu Okalibe-kakota-ike a-buru okpu-eze, egbu nwiiinwii; bya aburu okpu, l'eme phe g'ephe du ubvu l'anya; mbu nwa ndibe iya ophu a kpu-phodoru le ndzu.

⁶Su-a; oo Chileke l'a-buru onye a-nodu eyeru onye-ikpe eka g'o kpee ikpe, pfuru oto; l'o buru iya a-buru onye angeje ndu alwu ugu ike g'ephe nwufu ndu ohogu phe onu-oguzo mkpukpu.

Ndu uke yele ndu mpfuchiru Chileke, ngunukaru mee

⁷Ndu owa akpokwapho kulakula mee; teme epe gudewaa angu mee, shihuru ike dakashihu. Su-a; ndu-uke Chileke epe le ndu mpfuchiru Chileke nguakwaru mee, shihuru ike; akpo kulakula. Mee riakwaru phe ishi. Epe nguru mee, shihuru ike akpo kulakula. Epe nodu anoduje akpo garigari m'ephe nodu aphu ophulunya. Epe -nodu epfu iphe, ee-me; epe epfusweshi iya epfusweshi.

⁸Iphe, bukpo teburu g'o ha be epe gbokotaru egbo kpua; k'ophu bu l'o to dudu eka akpoduru iya idzu.

⁹“? Bu onye be oome g'o zia iphe? ? Bu onye be oome g'iphe, oozi doo enya? ? Bu unwegirima nshii, aamifu onu l'era too; mbu ndu bu-wokwadu-a be a nafuru phe era.

¹⁰Kele o kwa ekemu be e woru tu-kobe l'ekemu; mbu l'ekemu tu-koru l'eli ekemu. A bya akaa iphe l'eli iphe, a karu iphe; kaa iphe l'eli iphe, a karu iphe. E metota l'eka-a; metota l'eka pho.”

¹¹O kwa onye epfu l'onu-oku yee onye epfu opfu-alu ndu ozo be Chileke e-gude pfuru opfu nu ndu-a;

¹²mbu ndu ono, o suru: “Eka-a bu okpoku atuta unme; ge ndu ike bvuru nodukwa iya tuta unme. Teme eka-a buru eka atuta unme.” Ophu epe angaduruo nchi.

¹³Oo ya bu l'opfu, Chipfu epfu eyeru phe a-buru ekemu be e woru tu-kobe l'ekemu; mbu l'ekemu tu-koru l'eli ekemu. A bya akaa iphe l'eli iphe, a karu iphe; kaa iphe l'eli iphe, a karu iphe. E metota l'eka-a; metota l'eka pho; k'ophu epe e-jekwanu adaa idaphu-azu; meka iphe; dalahu l'onya; l'aanmata phe.

Mkpuma, gude ulo, a togboru l'ubvu Zayonu

¹⁴Oo ya bu; unu numakwa opfu, Chipfu epfu anu unube ndu mgbonu! Mbu unube ndu ono, bu ndu-ishi le Jierusalemu ono!

¹⁵Unu anoduje epfu okpu-onu okpu-onu su: “Anyi l'anwuhu gbaakwaru ndzu; mbu l'anyi l'alima-yaekwaru eka l'ekwo. Teke Ochi-gbaagbaa ono, e-dzuru ekameka ono

rwuru bẹ ọ tọ dukwa iphe, oo-me anyi; kele ọo adzụ ụka bẹ anyi meru; ọ buru iphe, anyi egudeje ezeru ndzụ; ughoshi l'onwiya buru ẹka anyi ejeje je edomia onwanyi.”

16Wakwanu iphe, Nnajiuphu, bu Chipfu pfuru baa: “Lekwa; mu togboakwaru mkpuma l'ubvu Zayonu; mkpuma, a huwaru ama; bya aburu mkpuma, vu oke aswa; mkpuma, e doberu l'ishi ẹka o gude okpa-ulo gudeshia ya ike; k'ophu bu l'onye dakoberu iya nu ta abyadu anga anganga.

17Ọo ikpe, pfuru oto bẹ ya e-me oshi onyeka. Ọ buru apfubekoto a-buru iphe, e gude eme g'ọ pfuru nhamunha.” Ọ buru akamini e-kpota iphe obu, unu gude ezeru ndzụ obu; mbu adzụ ụka. Mini abya asopyabe ẹka ono, unu ejeje je edomia onwunu ono.

18Ọgbandzu unu l'anwuhu bẹ tee vuẹduru ire. Ọphu ẹká, unu l'ali-maa yeru l'ekwo apfueduru. Teke o-chi-gbaagbaa ono, e-dzuru ekameka ono rwuru; l'oochita unu togbo.

19Ọ tọ dukpodaa teke ọ bya; ọphu o zikota unu. Utsu g'utsu; eswe l'enyashi bẹ ọo-byajẹ bya ezia zighata. Mbu l'onye-ozia doru enya bukwa ndzụ e-rwuta iya.

20Kele iphe-azẹe taa sụedu nemadzụ azẹe lochia onwiya alochi. Ukpo apaa gberere k'ophu ọ tọ sụedu nemadzụ aphụ onwiya.

21Noo kele Chipfu a-gbalihu g'ọ gbalihuru l'eli ubvu Perazimu. Ehu eguahaa ya egu g'o ghuru iya le nsuda Gibiyonu. Noo teke oo-je ozi iya; jee ya g'o to jejehaadaru iya; mbu mee ungara nkiya g'o to mejehaadaru iya.

22Nta-a bu le-a; unu hakwa agba mgbonu; odumeka bẹ ee-mekwa g'egbirigba unu kabaa unu anyi erwa. Ọ kwa Nnajiuphu; mbu Chipfu, bu Okalibe-Kakota-Ike bẹ pfuru mu sụ mu l'a tu-buwaru l'ee-mebyishi ali-a l'ophu.

Mmamiphe Chileke

23Unu ngabẹ nchi numa olu mu! Unu gebekpodapho numa iphe, mu epfu!

24Teke onye akoje opfu akoshi ẹka ọo-nma iphe; ? ọonoduje akopho okoro nno eje to? ? Bu iphe, ọonodujeepho eme bu egbukposhi bẹ ọonodujeepho egbukoshi ali akpa iya eja eje to?

25Ọ -kochaa ya kpasaa ya; ọ du ree; ? to ghajedu iya akpuru dilu; ghaa akpuru kominu; kua ya witi l'eka rwuberu iya nu; ghaa balị l'ibiya ọphu a karu iphe; bya aghaa ereshi-supelutu l'okoke ali iya obu?

26Ọ buru Chileke iya anoduje egoshi iya iphe, oo-me; bya abukwaru iya pho anoduje ezi iya iphe, bu: o -mee ya; l'ọ buru okpobe iya.

27E tee gudejekwa mgborigwe, eegudeje echi ereshi echishi akpuru dilu. Ọphu eegudejedu ogba-kperekpere-nzoshi-iphe ewephe l'eli kominu. Akpuru dilu bu oshi bẹ eegudeje echishi iya. Ọ buru mgboro bẹ eegudeje echishi kominu.

28? Eegwepyashije witi egwepyashi to? Waawakwa. E te egwejedu iya ngwe lanu. Ọobujeru; e -wechaa ya ogba-kperekpere-nzoshi-iphe; l'ọ phushia ya eswa; ole o too gwepyakwanu iya egwepya.

²⁹Iphemiphe ono bukotaru onye o shi l'eka bu Chipfu, bu Okalibe-Kakota-Ike. Iphe, otu-beje k'ememe du biribiri; mmamiphe iya be pakwaru eka.

Azaya 29

Nshio mkpukpu Jierusalemu

¹Nshio Ariyelu; gube Ariyelu; mbu mkpukpu ono, Dévidi shi buru ono! Unu guru apha ye l'apha. Unu bo obo-iphe bogbabe mgburugburu.

²Obenu le Ariyelu be mu e-me g'o jee iphe-ehuka. Oo-gu aphu kwashia enya-mini. Oo-due mu pho g'eka aakpoje ngweja oku l'oru-ngweja.

³Mu e-keru ngu ugu kephee ngu mgburugburu; woru ose-ugu buphee ngu mgburugburu.

⁴Ee-wozekpo ngu ali k'ophu ii-nodu l'ali aka gberegberere. Olu ngu eshi l'ali adafuta nwiphiphe. Mbu l'ii-nodu l'ali epfu nwa hohoho ge nwamaa. O buru l'ali be ii-ze; olu ngu obu ada nwa rwirwiirwii.

⁵Ndu ohogu ngu, dukpoo igwerigwe be ee-gwe uji g'urwuku, du nukuru nukuru. L'e mee igwerigwe ndibe ngu, ewebushi akurepho; ephe etsu dududu g'eswa ereshi. Teke ono teke ono; mbu a -bya amaru;

⁶be Chipfu, bu Okalibe-Kakota-Ike e-me phereketeke. O -nodu abya l'o tu egbigwe; ali anma jijijijii; ekameka aphu tititi; oke pherephere ezi; oke mini edze; oku, anodu enwu phoophoohoo; ekepyashi iphemiphe.

⁷Noo teke ikpoto oha, a-nodu etso Ariyelu ugu a-wufuta; ephe etsoo ya ugu; mekpoo ulo, a kpshiru ike, du iya nu; no-pee ya mgburugburu. O -nodu eme l'o du iya ge nrwo; g'o bu ophulanya be ophu l'enyasi.

⁸Oo-du g'eka onye ugu agu rworu nrwo ge ya eri nri; o tehushia; ugu nodu agu iya ro l'eka oogu iya; g'eka onye ugu-mini agu rworu nrwo eka ya angu mini; o tehushia; ekpiri kpohukwa iya pho nku g'o kpohuru iya; kele mini obu agule iya pho g'oogu iya. Noo g'oo-du ikpoto oha l'ophu, etso ubvu Zayonu ugu bu ono.

Iphe, e-me ndu ta angaduru Chileke nchi

⁹G'o tufukwaa unu ehu! G'o dukwa unu biribiri! Unu watakwa atsu ishi! Unu ba aphukewa uzo! Ge mee, unu angaduru watakwa unu atsutsu! Unu awata akpo garigari lebe unu angu mee, shihuru ike!

¹⁰Chipfu meakwaru g'oke mgbenya tu unu. O kechiakwaru unu enya; unube ndu mpfuchiru Chileke; o kpuchiwaa unu ishi; unube ndu aphu ophulanya.

¹¹Ophulanya-a l'ophu ta adukwa iphe, o bu unu. O du-a unu g'opfu, e pfuru dee ya lekwo woru nyachia. Teke i wokwanuru ekwo obu nu onye maru agu ekwo bya asu iya g'o ngge gua jiko; iphe, oo-pfu bu le ya taa dukwa ike agu iya. L'a nyachikwaru iya anyachi.

12 Ozoo l'i woru ẹkwo ọbu nū onye amadụ agụgu bya asụ iya: “Nggenu gụa jiko.” Iphe, oo-pfuru ngu bụ: “Mu ta amakwa g'aaguje ẹkwo.”

13 Sụ-a; wakwa iphe, Nnajiuphu epfu baa: “Ndu-a buẹpho epfupfu bẹ ẹphe epfujeru mu l'ẹphe nọ mu ntse. Ọ bụru eli ọnu bẹ ẹphe gude akwabẹ mu ùbvù. Obenu l'obu pẹ nọgbaa mu ụzenya. Ebvụ, ẹphe atsụ mu bụ iphe, ẹphe gude eme iya bụ ekemu, nemadzu tūru.

14 Oo ya bụ lẹ-a; mgbo lanufua bẹ mu e-mefu-a ndu-a iphe, a-dụ pẹ ebvụ l'ẹnya. Mu e-me iphe, dū biribiri tū-kobe l'iphe, dū biribiri. Mmamiphe ndu maru iphe bẹ a-la l'iswi. Nkwamenya ndu iphe edoje ẹnya edomia onwiya edomi.”

Ele ẹnya l'iphu a-ka ree

15 Nshio unubẹ ndu ono, ejeje l'ẹka dū omilomi je edomia iphe, ẹphe chīru idzu ememe; domia ya gẹ Chipfu ta ahuma iya; ndu anọduje l'ọchii eme iphe, ẹphe eme arīro sụ: “? Buro onye hūmaru anyi? ? Buro onye a-maru iphe anyi eme?”

16 Unu ewojeru iphe gha igharaphu g'onye arī l'ọ-kpụ-ite a-dū g'urwa, o gude akpụ ite. ? Ọ dūru teke iphe, e gude ẹka mee a-sụ onye meru iya nū: “Ọ tọ bukwa ngu meru mu?” ? Ọ dūru teke ite a-sụ ọ-kpụ-ite: “Ọ tọ dukwa iphe, i maru g'eeme?”

17 Ọ tọ dukwa g'ọo-nọ-beru l'e woru ùbvù ùbvù Lébanonu mee g'ọ bụru alī, iphe emehuje; alī, iphe emehuje abya ezee dū g'oswa.

18 O -be mbọku ono bẹ ndu ada nkuchi a-nūmachaa opfu, e deru l'ẹkwo ono. Ndu atsụ ishi ahūmachaa iphe l'ime ọchii, gbaru tsukiribaa.

19 Ndu wozeru onwophe alī bẹ a-nọdu l'ẹka Chipfu ẹhu atsọ pẹ ụtso. Mbụ lẹ ndu adudu g'ọ dū pẹ a-nọdu l'ime Onye Nsọ kẹ ndu Ízurelu ete ẹswa.

20 Ndu ewebushi akurepho a-chīhu; ndu mgbonu taa duedu; ndu nweru ẹnya eme ẹjo- iphe l'eenwutsushikota pẹ g'ẹphe ha;

21 mbụ ndu egudeje ọnu mee g'ikpe nmaa nemadzu l'iphe, iswi dū iya mma; woru ọnyà gbaaru onye agbaru nemadzu ọdzori l'ulo-ikpe; gbaa ekebe ụgho jasụ l'e woru ikpe nma onye iswi dū mma.

22 Oo ya bụ lẹ-a; wakwa iphe, oopfu anū ọnu-ulo Jiékpọ; mbụ Chipfu ono, bụ iya gbafutaru Ébirihamu ono. Ọ sūru-a: “Iphere taa adụekwa oshilokpa Jiékpọ ọzo; ọphu iphu agbachihu dū pẹ agbachihu ọzo.

23 Teke ẹphe a-huma ụwegirima, mu a-nū pẹ bẹ ẹphe e-dobe-a ẹpha mu nsọ. Ẹphe ekwetakwapho l'onye nsọ k'oshilokpa Jiékpọ bẹ dū nsọ eviya. Ẹphe anmahụ pyaapyaapya l'iphu Chileke kẹ ndu Ízurelu.

24 Ndu te ebvuduru ebvuru l'iphe kẹ Chileke aburu ndu iphe edoje ẹnya. Ndu agụ-phe aphụ ekwe mee iphe, a sūru g'ẹphe mee.”

Azáya 30

Ọgbandzu, enwedu ishi

- ¹Wakwa iphe, Chipfu epfu baa: “Nshio unube unwu ono, bu ndu ejo-okpoma; mbu ndu anoduje eme iphe, abudu idzu mu; ndu ephe l'ibe phe achije idzu atugba buru nanu; ole ephe te egudekwanu Unme nkemu eme iya; ndu eme iphe-eji akube l'eli iphe-eji;
- ²ndu wufuru lashia ali ndu Ijiputu l'ebe epfuru mu iya; ndu bu Fero be ephe ele enya l'eka g'o yeru phe aka gbobuta phe g'o to du iphe, e-me phe nu; ndu gbapfuru ndu Ijiputu je anodu phe l'eka ezeru ndzu.
- ³Ole egbobuta, Fero a-nodu egbobuta unu be iphere iya e-mechaa du unu; mbu l'eka ndu Ijiputu, unu gbabar; e-mechakwana tee unu ntu l'iphu.
- ⁴A makwaru-a le ndu-a be ndu-ishi phe nowa le mkpukpu Zowanu; mbu le ndu ephe ziru ozi byarwutawaru mkpukpu Hanesu.
- ⁵Ole onyemonye be ee-mekota g'ephe buru ndu iphere du. O buru iphe, a-kpa iya nu bu ndu ono, adudu iphe, ephe gude phe eme ono; ndu te eyeduru phe aka; ophu ephe abaduru phe urwu. O buerupho iphe-iphere yee iphe ata uta be ephe a-buru phe.”
- ⁶Qwaa bu ozi, Chileke ezi le k'ehu unwu anu, no l'echiegu ndohali: “Ndu ono, e ziru ozi ono wuru je aghaa ali iphe-ehuka yee mkpawere; ali, oke oduma; yee ne oduma bugbaa; aka okpantu; yee ejo agwo ozo bugbaa; mbu l'ephe vu eku phe l'okpurukpu nkafu-igara; bya evuru iphe, vu oke-aswa phe l'okpurukpu inya-kamelu; evujeru oha, ta abaduru phe urwu;
- ⁷mbu evujeru ndu Ijiputu l'ebe abu le n-yemeka phe duru urwu, oobaru phe. Noo g'o gude ya kua ndu Ijiputu ‘Eze-oke-agiyi O-no-ke-mmanu’.”

Ndu kwefuru ike

- ⁸“Jekwa ebyiaru phe iphe-a, mube Chipfu epfu-a l'okwekpu; mbu dekwaa ya edede l'ekwo-aphuphu; k'ophu abukwanuru; o -rwua l'iphu; l'o buru iphe-ekebe, a-no jasu l'ojejeje.
- ⁹Le ndu-a bukwa ndu kwefuru ike; bya aburu unwu eregede; mbu unwegirima, o too hedu ihee angabe nchi l'okwa, Chipfu anmaru phe.
- ¹⁰Ephe nodu asuje ndu ophulanya: ‘Unu ta aphuhakwa ophulanya ozobaa!’ Bya asu ndu mpfuchiru Chileke: ‘Unu te ekpuhajekwaru anyi iphe, gbaru anyi l'ememe! Unu pfujeru anyi iphe, atso utso anuma! Unu gbebejeru anyi mpfuchiru egbebe!
- ¹¹Unu haaru anyi uzo! Unu gbeshiru anyi l'uzo! Unu ba byahe anyi l'iphu! Unu te epfuhuru anyi ke Onye Nso ke ndu Izurelu!’ “
- ¹²Oo ya bu le-a; wakwanu iphe, oopfu; mbu Onye Nso ke ndu Izurelu: “Eshinu unu jikaru anuma ozi, mu ziru unu; bya asu l'oo mkpawere be unu a-chiru upfu kwee; bya akporu obu ye l'eregede;
- ¹³be iphe-eji ono a-buru unu igbulu, ha ephekerephe, gbaru oru; teme o nodu ada adada; g'ejia epfua; o dawanu teke ono teke ono.

¹⁴Ọo-kụkposhihu g'onye kụkposhiru ite-urwa; tũkaa ya nanunanu ẹhuka ẹhuka; k'ophu bu l'ibiribe iya be a taa humadu g'o ka mma l'oo mkpebahụ iya g'e gude guta oku l'ovokoku; ozokwanu g'e gude kwota mini l'obvu-mini."

¹⁵Wakwa iphe, oopfụ baa; mbụ Nnajiuphu, bu Chipfu, bya aburu Onye Nso ke ndu Izurelu: "Izimanu -lwa unu azu; unu daa ngaberu mu; l'a dzota unu. Unu -dakpopho gbedomu bya adakobe mu; ike adu unu. Obenu l'o to dudu iphe ono, duru ophu unu meru.

¹⁶Ọ buchia iphe, unu pfuru bu waawaa; l'unu e-nyikotachia inya gude gbala. Ọ buru iphe ono meru g'o gude unu je l'agbala. Temu unu sukwapo l'unu a-nodu l'inya okpa-egwa gude agbala. Ọo ya bu le ndu a-nodu achi unu oso obu a-bukwarupho ndu okpa-egwa.

¹⁷Unu umadzu labo l'ukporo umadzu iri etsukahuje gbala me onye lanu yee unu ebvu. Teke a du ise yee unu ebvu; unu atuko g'unu ha zelihi gbalaa jasụ nwa ndu a-phodu l'echilabo unu aduwa ge nwa itso, bvuru le mkpakponu eze ubvu; mbu ge nwa ekwa, aku peepee l'eli ubvu."

¹⁸Ọle oo-nodulekwa-a agu Chipfu g'o meeru unu eze-iphe-oma. Ọo-gbalihule-a phuru unu obu-imemini; kele Chipfu bu Chileke, ekpeje ikpe, pfuru nhamunha. Ehu-utso be a goru nu iphe, bukpo ndu pfuru echeru iya nu.

Iphe-oma, Chileke e-meru ndibe iya

¹⁹Su-a; unube ndu Zayonu; mbu unube ndu bu le Jierusalemu; unu a-kwata ekwa gberuma. Oo-mekwaru unu eze-iphe-oma; me unu raa ekwa raku iya! Ọo epho anuma, onuma iya; l'o za unu enu.

²⁰Nnajiuphu -nukponu unu nri mkponwu-ehu; bya echebe unu mini eje iphe-ehuka; e tee domieduru unu ndu ezi unu iphe; unu egude enya unu gedegede huma phe.

²¹? Unu shiru ekutara-o; unu shiru ekicha-o; iphe, nchi unu a-noduepho anu l'azu unu a-buru: "Wakwa uzo baa! Unu tsokwaru iya!"

²²Noo teke unu a-turu nshi unu ono, a wuru mkpola-ochaa ono. Unu aturwukwapo nteke unu ono, e gude mkpola-ododo wa ono. Unu eworu phe tuphashia g'onye etupha nkirika-ekwa bya asu phe: "Unu gbaru eka laa!"

²³Noo teke Chileke a-wata edzeru unu mini; edze iya ekpu l'iphe, unu meberu l'alj. Nri, aakota l'alj emehuaha emehu; bya adukwapo shii. Noo teke iphe-edobe unu a-wata akpa ntusaru-ehu.

²⁴Eswi unu; mekpoo nkapfu-igara unu, bu ophu ejeru unu ozi egu l'a-nodu ata nri, a gwophuberu agwophube; pyashichaa ya unu; o buru ago-eze yee shovelu be e gude gwophube iya.

²⁵Teke o rwuru mboku ono, ee-gbu nemadzu pyaapya ono; mbu teke ono, oje-ephekerephe e-zeshihukota ono; be mini a-wata aso gborogboro ge nggele; shigbaa l'ubvu, ha l'eli asoshihu; shikwapo le mkpogiji ophu habe nwahabe asoshihukwapo.

²⁶Onwa a-wata egbu nw̄iinwii g'enyawu; anw̄u akabaa echishi ike eme lẹ g'oochi nta-a ugbo ẹsaa; mb̄u l'ọo-nọdu echibe g'anw̄u chiru ujiku ẹsaa l'ophu l'ophu; teke Chipfu e-pfubechaa iphe l'ẹka o mekaru ndibe iya iphe; bya emee g'onyá, o yeru phe kpohukota.

Aph̄u, Chileke a-n̄u ndu Asiriya

²⁷Unu lenu; Chipfu shi l'ẹka d̄u ẹn̄ya abya. Ẹhu-eghu iya n̄odu enwu phuruphuru g'ọku; tẹme ọ n̄odu akp̄u t̄utuutuu g'ẹn̄wuru-ọku. Ogbogboromonu iya b̄u iphe, jiru iya n̄u b̄u oke-ẹhu-eghu. Tẹme ire iya b̄uru ọku, enwu phoophoophoo.

²⁸Unme, ọotu atutu d̄u gẹ mini, asọ gborogboro, byaru kulakula bya aworu nemadzu l'olu. Ohamoha bẹ ọonmaje yigayiga; mb̄u chiru phe ye lẹ n-yọ ọla-l'iswi. Ọ bya eworu iyagba-inya woru ye ndiphe l'asha g'o dughua phe.

²⁹Noo teke unu awata agu ebvu g'aaguje l'enyashi mb̄oku, unu abo ọbo-iphe, d̄u nsọ. Ẹhu atsoshikpoo unu uto ike gẹ ndu egbu opu eje l'ubvú kẹ Chipfu; mb̄u agbara-mkpuma kẹ ndu Ízurelu.

³⁰Chipfu emekwa gẹ nemadzu n̄uma g'olu iya d̄u-be akpabiri; mekwapho g'ẹphe h̄uma ọkpehu iya l'ẹka ooje alwa l'alì l'ẹka ẹhu-eghu iya enwu phuruphuru; tẹme o gude ọku, enwu phoophoophoo; bya edzekwapho oke mini, at̄u aka-mini.

³¹Olu Chipfu l'a-chikashi ndu Asiriya nanunanu. Oo-gude mgboro-eze iya chitachaa phe togb̄o.

³²Teke Chipfu gude oshi-mpaleka iya ono, o gude anu phe aph̄u ono chia phe gbaa; ebvu aswoshihu; mb̄u ebvu, aaku nkwa eye; bya akpo ogumogu eye iya; teke ono, ọo-nodu etso phe ọgu echi phe ẹka gbaagbaa ono.

³³Noo kele Tofetu shihawaa lẹ ndiche d̄u. E doziwaru iya kwaberu eze. Nsukutu ọku, d̄u iya n̄u bẹ e mewaru; ọ d̄u omilomi bya adu ọsa. Ọku yele nk̄u kwatakporu paa ya ẹka. Unme, Chipfu t̄uru s̄oru gborogboro g'ọku nsh̄i-egbe sobata iya bya emee ya; ọ gbanwuhu ọku nwuahaa phoophoophoo.

Azáya 31

Ọshi, ayoru ndu kporu obu yeru ndu Ijiputu

¹Nsh̄io unube ndu ono, agba ala alì ndu Ijiputu eje achọ n-yemeka; ndu daphuberu inya; bya akporu obu yeru ikpoto ugbo-inya, ẹphe nweru; yee oke ọkpehu d̄u ndu ojogu phe, b̄u ndu egudeje inya eje ọgu; ophu ẹphe adabeduru ẹn̄ya l'ẹka Onye nsọ kẹ ndu Ízurelu nọ; mb̄u ophu ẹphe agbapfuduru Chipfu g'o yeru phe ẹka.

²Ọle ọ b̄u; yebedua l'onwiya bukwa onye maru iphe. Ọ n̄odu ewotajeru nemadzu ọla-l'iswi; ophu oopfujedu opfu laa azu azu. Ọo-gbalihu tsoo ibe ndu ejo-iphe ọgu; mekpoo ndu anoduje eyeru ndu eme ejo-ememe ẹka.

³Obenu lẹ ndu Ijiputu b̄u nemadzu; ẹphe ta abudu Chileke. Inya phe bẹ b̄u anu-ẹhu; ọ to budu maa. Chipfu -machiwaa ẹka bẹ upfu a-d̄u-a onye eye ẹka. Onye eeyeru ẹka adaa gwoo. Ẹphenebo atuko laa l'ite lanu.

⁴Wakwa iphe, Chipfu pfuru nū mu baa: “Oo g'oduma asuje ekiri; mbū g'oke-oduma asuje ekiri mē o -gbua iphe, oo-ri; m'obetakpoo e kua ikpoto ndu eche aturu; ephe tuko dzukoo g'ephe tsoo ya ogu; mkpu, ephe tuko echi te emekpodanu ge ndzu gua ya; ophu uzu, ephe atu akposhidu iya iphe, oome-a. Noo ge Chipfu, bu Okalibe-Kakota-Ike e-nyizeta bya alwua ogu l'eli ubvu Zayonu; mekpoo le mkpakponu ubvu ono.

⁵Chipfu, bu Okalibe-Kakota-Ike e-kpuchita Jierusalemu g'enu, ephe l'eli. Oo-kpuchi iya; teme l'o nafutakwa iya pho; agbaru iya odzori, agbaru iya mkpu; g'o to du iphe, e-me iya nu.”

⁶“Su-a; unube ndu Izurelu; unu lwaphutanu azu lwapfuta onye ono, unu kwefuru ike ono;

⁷kele o -rwua mboku ono be onyemonye le g'unu ha e-mechakwaa jika nshi mkpola-ochaa ono; yee ke mkpola-ododo ono, unu gude aka iphe-aji unu mee ono.

⁸Ndu Asiriya be ee-gude ogu-echi, abudu k'amadu gude gbushia; mbu o buru ogu-echi, abudu ke nemadzu mmanu be ee-gude gbufu phe. Ephe a-gba oso gbalaaru ogu-echi ono; l'a chiru unwokorobya phe ye l'ozi mkponwu-ehu.

⁹Agbarike phe a-dakota; aka eeye phe ebvu. Ndu-ishi ndu ojogu phe -humaepho g'ogu obu eje ala; ephe agbado ekwa-ohubama phe phota oso gbalachaa.” Noo iphe, Chipfu pfuru bu onoya; mbu onye ono, koberu oku l'ubvu Zayonu; bya azube ota pfupfufu oku le Jierusalemu ono.

Azaya 32

Onye eze, pfuberekoto

¹Unu lenu; o nweru eze, abyanu a-buru eze, pfuberekoto. Ndu-ishi iya aburu ndu ekpe ikpe, pfuru nhamunha.

²Onyemonye a-du g'eka edomi onwonye, a no agbalaru pherephere; dukwapho g'eka aanoduje ezeru ndzu l'eka oke-mini edze; dukwapho ge nggele, aso l'ali, mini adudu; dukwapho g'ononyo oke agbara mkpuma, no l'ali, adudu iphe, du iya nu.

³Noo teke e tee meedu ge ndu aphu uzo phu-buhu uzo. Teme ndu anu iphe le nchi awata anga nchi.

⁴Ndu iphe aduje egwegwa e nweru egomunggo. Ndu epfu l'onu-oku epfuahaa opfu gbururu; pfuahaa iphe, doru enya.

⁵E tee kuhedu onye-eswe onye a maru epha iya. Ophu akwabedu ejo nemadzu oke ubvu;

⁶kele onye-eswe epfuje mkpokoro-opfu. Egomunggo iya buepho ejo-iphe be onoduje ari. Iphe, onoduje eme ememe buru umere onye agubeduru Chileke iphe. Teme o nodu anoduje ezi ejo-nzi l'opfu ehuru Chipfu. Ndu egu agu be oohaje; ephe adabyiru iphoro. O to kejedu ndu egu-mini agu mini.

⁷Umere k'onnye ẹjo nemadzu bukwaru ẹjo-iphe. Iphe, ọochije idzu ememe bukota ẹjo-ememe; g'o gude ntuphu-ire mebyishia ndu akpa nri; mbukpoo m'obetaru ndu ono, adudu g'o du phe ono nodu eyekpoo onu, pfuru oto.

⁸Obenu l'onnye a maru epha iya achije idzu, a maru epha iya. O buru iphe, a maru epha iya, oomeje be oogudeje pfuru pfushia ike.

Unwada Jierusalẹmu

⁹Unube unwanyi ono, no tusaru ehu; unu gbalihu ngaberu mu nchi! Unube unwada ono, ari l'o to dudu iphe, abya unu ememe ono; unu numakpodapho iphe, mu abya epfufu!

¹⁰A -noepho apha ophu; tu-kobe iya iphe, ha nwanshii be unube ndu ono, ari l'o to dudu iphe, abya unu ememe ono a-wata anma jijijiii. Vayinu ta adedu mebyi, oomi. O to dudu iphe, aawota l'oshi-omi ililekpoo.

¹¹G'ehu nmakwaa unu anmanma; unube unwanyi, no tusaru ehu! G'ehu tekwa unu kparikpari; unube unwada ono, ari l'o to dudu iphe, abya unu ememe ono! Unu tofukwa ekwa unu; chita uwe-aphu gbaphua onwunu l'upfu!

¹²Unu phukwaru yoo l'opfu ehu egu ono, du ubvu l'enya ono; me ke vayinu ono, amije shii ono;

¹³me k'ali ndibe mu l'opfu; mbu ali, bu iphe, rwuchiru iya nu bu obu yee ewu-obvu. Ee-o! Unu watakwa agu aphu l'opfu ehu iphe, bukpuo ulo, aanoduje abo iphe; me k'ehu mkpuku-a, aanoduje eme emereme-a!

¹⁴Noo kele unuphu ibe eze ono be ee-mechaa gbado. Mkpuku ono, aatu wowoowoo ono adabyiru iphoru. Ubvú Ofelu; yee ulo, a kpushiru ike, du iya nu a-buru ochobu jasuru; buru eka du nkafu-igara-oswa ree; yee eka eeche egu me aturu;

¹⁵gbiriri jasu teke ee-shi l'eli wua anyi unme Chileke l'ehu. Noo teke ee-woru echiegu mee ali, iphe a-nodu emehuje; ali eka iphe emehuje abya eze du g'oswa.

¹⁶Ee-kpeahaa ikpe, pfuru nhamunha l'echiegu; haahaa enge, pfuru oto l'ali, emehuje iphe, a koru iya.

¹⁷Mebyi, apfubekoto a-mi bu le nchi a-du doo. Iphe, e-goshi l'a pfuberekoto aburu l'ekameka a-da nyonyoronyo; meji anmapfuru onyemonye jasu l'ojeje.

¹⁸Temme ndibe mu eburu l'unuphu eka nchi a-du phe doo; l'unuphu, adudu iphe, byaru eme phe nu; l'eka phe a-nodu atuta unme; o to dudu iphe, akpo-byi phe iya nu.

¹⁹Mbu l'igwe a-tu akamini gude tupyashia oke oswa; tupyashia mkpuku ono l'opfu.

²⁰Ehu-utso be a goru nu unube ndu ono, aku iphe, unu aku akuku l'eka mini du; mbu unube ndu haru eswi unu; yee nkafu-igara unu; phe nodu akpa ntusaru-ehu.

Azáya 33

- ¹Nshio gube nwa mmebyi; l'ebe abụ l'o nweru onye mebyiru gubedua! Nshio gube nwoderu-oye; l'ebe abụ l'ọ duru onye deru ngu ye! Ọ kwa: ị -haephho emebyishi; l'e mebyia gubedua. Teke ị haerupho ederu nemadzu ye; l'e deru gubedua ye.
- ²Gube Chipfu; menaarụ anyi eze-iphe-oma! Anyi pfukwaru echeru ngu. Bujenuru ike anyi l'utsu mboku-mboku. L'ị buru onye ndzota anyi; me anyi nodu l'iphe-ehuka.
- ³Qobujeru; olu ngu -daephho g'egbigwe; ndiphe agbalacha. Teke i kwolihuru ekwolihu; ohamoha agbakashihu.
- ⁴A kwaa phe okwata rwukoo phe g'eka inyarinya erwu ekwo; mbu gbaa phe gorogoro g'eka igube wubaru.
- ⁵Chipfu be goshiru l'ọ parụ eka; noo kele o bu l'ephekerephe. Úbvú Zayonu be oo-me g'ọ buru iphe, e-ji iya nụ bu ikpe, pfuru nhamunha; yee apfubekoto.
- ⁶Oo ya a-buru onye e-me g'unu nguru anguru l'ogbo k'unu. L'ọ dzota unu okpobe adzota; mee g'unu maru iphe; kwaa enya. Ọ buru atsu Chipfu ebvu a-buru eku k'unu.
- ⁷Lewarọ; ndibe phe, bu ndu okpehu du l'echikwa mkpu l'oma gbororo. Ndu ephe ziru ozi, bu ndu byaru g'e doshia opfu nodu akwa ntumatu.
- ⁸Eze gbororo be a gbadoakwaru; ophu o duedu ndu ije, eshijekwadu iya nụ. Ephe mebyiwaru oghandzu, ephe gbaru; ophu o duedu iphe, a guberu ndu ekebe. Ophu o duedu onye aakwabekwadu ubvu.
- ⁹Alị-a nodu agu aphu edideshihu edideshihu. Iphere du oswa, no l'ubvu ubvu Lebanonu; o nodu anwulwashihu anwulwashihu. Nsuda Sharonu duephho g'echiegu eka mini adudu. Temme oshi, nogbaa l'alị Beshanu; yele ubvu Kamelu nodu alaephho ekwo kparakpara.

Okwa, Chipfu anmaru ndu ohogu iya

- ¹⁰Chipfu bya eyee onu su: “Oo nta-a be mu a-gbalihu agbalihu! Oo nta-a be mu e-goshi le mu parụ eka!”
- ¹¹Unu du ime eswa okponku; o buru oshi ereshi be unu a-nwu. Unme, unu atu buru iya bu oku, e-ke unu.
- ¹²Ozo bu le ndu ono be a-duephho ge mkpuma layimu, a kporu oku; mbu l'oo g'e gbushije irwu obvu kube tsee ya oku-a bu g'ephe e-tsu gburugburu tsufu.
- ¹³Unube ndu bu uzanya; unu numakwa iphe, mu meru! Unube ndu ophu bu ntse; g'o donaa unu enya l'okpehu du mu!”
- ¹⁴Ndu iphe-eji, bu l'eli ubvu Zayonu be ndzu-agugu rwutaakwaru. Ndu ta adudu iphe, ephe guberu Chileke nodu aphuwaa kpaakpaakpaa epfu su: “? Bu onye ole le g'anyi ha be yee oku, enwu enwunwu e-buru? ? Bu onye ole le g'anyi ha be yee oku, etsu ojejoje e-buru?”
- ¹⁵Ọ kwa onye bu onye emeje iphe, pfuru oto; teme o nodu epfuje iphe, pfuru nhamunha; onye ajikaje anata urwu, shi l'iphe, a nataru l'ike; teme o nodu eselaje eka

azụ l'anata ụphalazu; onye ta angabejedu nchị mę a -nọdu achị idzu g'ee-shi gburu ọchi; tẹme ọphu ọosajedu ęnya hụma iphe, bụ ęjo-iphe.

¹⁶Noo ęgube onye a-nọdu l'ephekerephe. Ọ bụru ęka oo-buru zee ndzụ bụ l'ulo, a kpushiru ike l'eli ńbvú. Ęka ono bę aa-nọdu anụ iya nri. Ọphu ọ dudu teke ọ byaru achọ mini achọcho.

G'iphe a-dụ-be ree l'iphu

¹⁷Gụbedua e-gude ęnya ngu hụma onye eze ono g'ọ dụ-be ńbvú l'ęnya; bya amaa ęnya l'alị ono, nọru ogologo ono.

¹⁸L'ị bya egude ọriri ngu bya alaphu azụ l'akahụ nggiri ono. Mbụ l'ị rịa sụ: “? Bụnaa awe bę onye ono, shi edeje okpoga-akirikọ ono nọhunu? ? Buhunu awe bę onye ọphu e shi apfujeru ego ọbu nụ nọ? Mbụ ? bụnaa awe bę onye ọphu shi agụ ụlo-mgbobuta anyi ọgu nọnaa?”

¹⁹I tii hụmabaedu ndu ono, shi eku onwophe ono ęnya ahuma ọphu; mbụ ndu ono, ọpfu phe egbejeru egberu ono. Ndu atsụ ntsụ; ọphu iphe, ęphe epfu edojedu ęnya.

²⁰Lena ęnya lę Zayonu; mbụ mkpukpu ono, anyi anọduje abọ ọbo-iphe anyi ono! Ii-gudewarọ ęnya ngu hụma Jierúsalemu; mbụ mkpukpu ono, bụ: i -buru iya; nchị adu ngu doo ono; bya adu g'ulo, e meru l'ekwa, adudu onye byaru aphoriberu iya aphoriberu; ọphu ọ dudu onye adu ike apho-lita itso iya apho-lita. Ọphu ọ dukwapho eri iya ọphu byaru agbabuhu agbabuhu.

²¹L'ęka ono bę Chipfu a-buru Onyibe k'anyi. Ęka ono a-dụ g'ęka nggele dụ ọsa; ęnyimu dụ iya ọsa. Ọphu ọ dudu unwu ugbo-mini, nweru akwo-ugbo, byaru eshi iya nụ. Ọphu ọ dukwapho oke ugbo-mini, a byaru anga l'eli iya.

²²Noo kele ọo Chipfu bụ onye-ikpe k'anyi. Mbụ l'ọo Chipfu l'aturu anyi iphe, anyi a-nọdu eme. Tẹme ọ bụru Chipfu bụ onye eze k'anyi. Ọo ya bụ onye a-dzota anyi.

²³Eri, e shi kee gube ugbo toshihuakwaru. Oshi, gube ugbo gude nguru anguru duchaakwa wogowogo. Ọphu ekwa-ugbo ngu adabyiekwaru potoo. Ọo ya bụ l'akwa okwata, parụ ęka kee; mbụ lę ndu ęniyeni a-kwachaa okwata.

²⁴Ọphu ọ duedu onye bu lę Zayonu a-sụ: “Iphe emekwa mu.” Tẹme iphe-ęji ndu bu l'ęka ono meru bę aa-gukotaru phe nvu.

Azáya 34

Aphụ, Chileke a-nụ ndu ọhogu iya

¹Unu kpịritaru ntse; unubę ọhamoha; unu bya anumakpodapho! Unu ngabekpodapho nchị; unubę ndiphe! G'eliphe l'ọphu numakwa; iphemiphe, nọ iya nụ anuma! Ge mgboko numa; iphemiphe, shi iya nụ anuma!

²Chipfu bę avukwaru ọhamoha ọvuma. Oke ęhu-eghu iya bę ọ tụ-koshiakwaru ndu ojogu phe l'ọphu. Oo-mebyishikotakwa phe g'ęphe hakotakpoo rengurengu. Oo-woru phe haa g'e gbushia.

- ³Ndu nkephe, e gburu egbugbu be aa-pajeru tuphaa etupha. Odzu phe awata eshi ishi; mee phe atuko ubvu ubvu swongaa.
- ⁴L'aphu akpaminigwe g'onye phuru utute. Kpokpode atuko adashihu l'ali g'eka ekwo vayinu, nwuru lwaa erishihu l'eri iya; mbu g'akpuru oshi figu, no l'oshi figu gbanwushihuru agbanwushihu dashihu.
- ⁵Ogu-echi mu be a nokwa l'imigwe baa bata nko. Lekwa; a paakwa ya apazeta gude abya anu ndu Edomu aphu; mbu ndu ono, bu ndu mu dochawaru edocha k'emebyishikota rengurengu ono.
- ⁶Ogu-echi Chipfu be mee a-ngugukwa angugu. Iphe, e-ji iya nu bukwa eba-iphe. Mee unwu-aturu; yee mee eghe; waa eba-iphe, shi l'akpuru ebili aduchaa ya. Noo kele Chipfu abya egwe ngweja le mkpukpu Bozura; iphe, ee-gbu egbugbu paa eka l'ali ndu Edomu.
- ⁷Atsu be aa-tuko ephe l'ephe gbushikota; mekpoo oke-eswi ndu ophu ha nwanshii; me ndu ophu paru eka. Ali phe be mee a-nodu aso gborogboro; l'eegude eba-iphe gwoo urwuku l'oburu epuchi.
- ⁸Noo kele Chipfu nweru eswe agwata ugwo iphe; bya enweru apha, ejo-iphe onye meru a-vo iya l'ehu; g'ooshi nno gbaaru ndu bu le Zayonu odzori.
- ⁹Nggele nggele, nokota l'ali ndu Edomu a-wokota korota. Eja, du l'ali ono awokota oku-nshi-egbe. Ali eka ono l'ophu abukotaru korota, oku enwu taphutaphu.
- ¹⁰O to byadu anyihu anyihu eswe l'enyashi; enwuru iya akpu tuutuutuu jasu l'ojejoje. L'o buru ochobu dabyiru nno shi l'ogbo sweru ogbo. O to dudu onye byaru eshibaa ya ghatakponu aghata ozobaa.
- ¹¹Okpo-ngwere yee ebyi esweta iya l'o buru iphe phe; mbu le mgbashi-ujiku yee okpoko-oha akpashi epfunne l'eka ono. Chileke e-me ali ndu Edomu g'o du g'o shi du teke o meru eliphe k'ophuu le mbulembu.
- ¹²Ndu oke amadu phe ta aduedu eka ephe enwekwaduru, bu eka eekuje ali-eze. Ndu-ishi iya g'ephe ha a-chihukota.
- ¹³Ewu-obvu erwuchia l'ulo-eli, du iya nu. Ole-karara yee egbara atuko ulo iya, a kpushiru ike zechia. Iphe, a-nodu akpa iya uri aburu nkuta-oswa. Mgbashi-ujiku eworu iya mee ibe phe.
- ¹⁴Unwu anu, bu l'echiegu ephe l'achi-anmabu atuko edzudagbaa l'eka ono. Eghu-oswa araku ibe iya l'ora. O buru l'eka ono be mgbashi-ujiku anodukwapho atuta unme. O buru l'eka ono be ephe achotaru onwophe eka ephe a-nodu atuta unme.
- ¹⁵Mgbashi-ujiku a-kpa epfunne l'eka ono nodu tushia ekwa. L'o kpua ya; vua nodu l'eka ono kpupyabe phe le nku iya hee hetseshia. O bukwarupho eka ono be egebe edzukwapho okee le nyee.
- ¹⁶Unu jenu elee enya l'ekwo Opfu Chipfu; unu agua ya agugu. Unwu iphe ono ta adukwa me nanu adu-phodo l'eka ono. Ophu o dukwa ophu byaru asu le ya ta

ahumaduru okee ọzoo nyee ya; kele ọ kwa mbɛdua tɔru ekemu sɔ l'onoo g'oo-du bu ono. Teme ọ buru Unme mu a-nodu erwukobe phe l'eka lanu.

¹⁷Oo ya atuje g'oo-duru phe. O nodu egudeje eka iya tɔa ya atutu kee. O je aburu nkephe jasɔ l'ojejoje. Mbɔ epeh ebuwaruro l'eka ono gbɛ l'ogbo sweru ogbo.

Azáya 35

Èhu-ùtso ndu a dzotaru

¹Echiegu yee ali, adudu mini, du iya nu be ehu a-tso. Mgbegu ali-evevee be a-wata ete eswa mehuaha iphe, e meberu iya g'eka okoko jashiru.

²Mbɔ l'oo-jashikpoo igwerigwe. Ehu atsɔo ya tsoshikpoo ya ike; l'o rwua okwe kpua ya. L'e mee ya g'o du biribiri g'ubvu ubvu Lebanonu; du akpabiri g'ubvu Kamelu; yee nsuda Sharonu. Epeh egude enya phe huma odu-biribiri ke Chipfu; mbɔ akpabiri ke Chileke anyi.

³Unu menaa g'eka unu, tsuru mee shihu ike. Unu emee g'ikpere unu, aphu kwɛekweekwee nguru anguru.

⁴Unu pfiaru ndu nweru obu ndzu-agugu sɔ phe-a: “Unu shihu obu ike; ge ndzu ba agushi unu. Le Chileke unu a-bya; bya emelata nemadzu iphe, o meru onye ozo. Oo-bya; bya adzo unubɛdua ndzu.”

⁵Noo teke enya a-sahu ndu atsɔ ishi. Nchi ndu ada nkuchi emee phosangu.

⁶Noo teke ndu eniyeni a-wata azo garamu garamu g'ele. Ire agbutoshihu ndu te epfudu opfu; epeh awata erwu okwe ehu-utso. Mini e-shi l'echiegu gbafuhu soaha ke gborogboro. Teme nggele eshi l'ali, mini te eshidu du gbafuhu soaha gborogboro.

⁷Eja evevee, l'ekpo phurupuru l'a-buru okpuru. Ali, mini tahuru agbafushihi ogba buru nggele. O buru eka ono, bu nkuta-osa shi buru iya ono be eswa e-fushi; eji efushia ya; echara amishia ya.

⁸L'a bya atogbo iya eze gbororo; l'e kua ya uzo, du nsɔ. Ndu aaso nsɔ te eshidu iya. Ndu a-nodu eshi iya nu kpoloko aburupho ndu o duru; ophu ndu eme eswe aghaphedu l'ime iya.

⁹Oduma taa nodu iya. Ophu o dudu anu ozo, eri anu, byaru eshitakpoo ya eshita ophu. A taa humakpoda phe nu ahuma ophu l'eka ono. O buepho ndu a gbafutaru bu ndu a-nodu eshi iya nu.

¹⁰Mbɔ le ndu ono, Chipfu pfuru aswa phe ono a-lwa. Epeh aguru ebvu lwatashia Zayonu. Epeh ekpuru ehu-utso ojejoje g'onye kpu okpu eze. Ete eswa yee ehu-utso atuko phe ehu sweta. Aphu yee atsɔ ude agbaa oso gbalaa.

Azáya 36

Senakeribu eye ndu Jierúsalemɔ ebvu

(2Ndu 18:13-37; 2Iphe 32:1-19)

- ¹Tobudu iya bu; o rwua l'apha, kwe eze, bu Hezekaya apha iri l'eno, o wataru aburu eze; Senakeribu, bu eze ndu Asiriya bya ogu l'ali ndu Jiuda; bya atuko mkpukpu phe g'o ha, bu mkpukpu, a kpushiru ike lwua lwuta.
- ²No iya; eze ndu Asiriya ono bya agbe le mkpukpu Lakishi zia onye-ishi ndu ojogu iya; yeru iya ndu ojogu, du igwerigwe; bya asu iya g'ephe jepfu eze, bu Hezekaya le Jierusalemu. Onye-ishi ndu ojogu ono jerwua bya eje apfuru l'ishi mgba-mini okpuru uzo eli, du l'uzo ono, eeshije eje aka asaje uwe ono.
- ³O nodu l'eka ono; ephe byapfuta iya; mbu Eliyakimu nwa Hilikaya, bu onye-ishi l'ibe eze; waa Shebuna, bu onye edeje ekwo; waa Jiowa nwa Asafu; yebdua bu onye nkwakobe.
- ⁴Onye-ishi ndu ojogu ono bya asu phe: "Unu je akaru Hezekaya le-a: Wakwa iphe, o pfuru; mbu Okalibe eze, bu eze ndu Asiriya. O suru-a: ? Bu le gunu be i chiru nwupfu ophu i nweru kwee?"
- ⁵I suru l'i machawaru eregede ogu bya enweru ike, e gude alwu ogu. Obenu l'opfu ngu bu okorobo opfu. ? Bu onye be i dakoberu ekwefuru yebe eze ndu Asiriya ike?
- ⁶Lenu; o kwa ndu Ijiputu be i dakoberu; mbu Ijiputu ono, bu mgbawa-echara, abujeru: onye dakoberu iya nu l'o yejashia ya aka meka iya iphe onoya. O kwa egube ono be Fero du; mbu eze ndu Ijiputu. O kwa nno bu g'o duru iphe, bukpo ndu dakoberu iya nu.
- ⁷Teke i sukwanuru mu l'oo Chipfu, bu Chileke unu be unu dakoberu; ? to budu Chipfu obu bu ophu Hezekaya lwuru aka aagwaje iya; bya emebyishia oru-ngweja iya; bya asu ndu Jiuda ephe le ndu Jierusalemu g'ephe byaje abaa eja l'atatiphu oru-ngweja-a?
- ⁸"Byalekwa-a g'unu le nnajiuphu mu, bu eze ndu Asiriya tuko chia idzu. I -kweta be mu a-kpuru unu inya ise kpee ngu; me o -buru l'ii-du ike yechaa ya ndu a-nodu agba iya nu.
- ⁹Odumeka; ? denu g'i riru l'ii-du ike kpafu l'iphu onye-ishi ndu ojogu nnajiuphu mu; m'obeta o buru onye enya kachaa alwalwa le ndu-ishi ndu ojogu iya; l'eka o bu ndu Ijiputu be i dakoberu g'ephe chie ngu ugbo-inya; chie ngu ndu agba l'inya-ogu?
- ¹⁰Ozo bu le-a; ? i dobesu l'o to budu Chipfu be mu no l'eka bya ogu l'ali-a ge mu mebyishia ya? O kwa Chipfu l'onwiya ziru mu ge mu bya ogu l'ali-a mebyishia ya."
- ¹¹Tobudu iya bu; Eliyakimu; yee Shebuna; waa Jiowa bya asu onye-ishi ndu ojogu ono-a: "Jiko gude opfu ndu Aramu pfuru yeru anyibe ndu-ozu ngu; eshinu anyi anu iya ree. Te egudeshi opfu ndu Jiuda pfuru yeru anyi; kele ndu no l'eli igbulu anukwa iya."
- ¹²Onye-ishi ndu ojogu ono su phe: "? Bu unu le nnajiuphu unu kpoloko be o du unu ge nnajiuphu mu ziru mu ge mu bya ezia ozi-a? Waawakwa. O kwa unu le ndu ono, no l'eli igbulu ono; mbu ndu ono, unu l'ephe e-mechaa ria nshi unu l'onu; ngua mamini, unu gboru ono be mu epfuru iya."

- ¹³Onye-ishi ndu ojogu ono bya apfuru bya egude opfu ndu Jiuda bya arashia ya ike su: “Unu numakwa iphe, o pfuru; mbu Okalibe eze ono, bu eze ndu Asiriya!
- ¹⁴Wakwa iphe, eze ndu Asiriya pfuru: Unu te ekwekwa ge Hezekaya dephua unu. O too dukwa ike adzo unu!
- ¹⁵Ophu unu ekwekwa ge Hezekaya deta unu g'unu dakobe Chipfu; l'eka oopfuru unu asuje le Chipfu ta adukwa iphe, e-me g'o to dzota unu. Le mkpukpu-a taa lakwa l'eka eze ndu Asiriya.
- ¹⁶Unu ta angakwaru Hezekaya nchi; kele eze ndu Asiriya sukwaru-a g'unu wufuta wu-pfuta iya ge yele unu doshia. Oo ya bu g'onnyemone le g'unu ha eria iphe, shi le vayinu iya; ria akpuru, shi l'oshi figu iya; bya angua mini, du le welu iya;
- ¹⁷jasu teke ya a-bya eduta unu; lashia l'ali, du ge k'unu; mbu ali, ereshi du; mee ophuu du iya; ali, nri du; teme opfu-vayinu du iya.
- ¹⁸“Unu te ekwekwa ge Hezekaya dephua unu; kele oo-su unu le Chipfu l'a-dzotakwa unu. ? O dukporu oha ophu agwa ali phe nafutajewaru l'eka eze ndu Asiriya?
- ¹⁹? Bu awe be agwa ndu Hamatu yee ke ndu Apadu no? Agwa ndu Sefavayimu; ? ephe no l'awe? ? Ephe duru-a ike dzota ndu Sameriya l'eka yee eze ndu Asiriya too?
- ²⁰? Bu agwa ole l'ime agwa ndu ali ono be duru ike nafuta ndu ali iya l'eka iya? ? Denu ge Chipfu e-shi du ike nafuta ndu Jerusalemu l'eka iya?”
- ²¹Ndu Jiuda ono, oopfuru eyeru ono noduepho ngguingguji; ophu o dudu onye ophu pfuru opfu yeru iya; kele eze, bu Hezekaya turu ekemu su g'o to dukwa onye e-yeru iya onu.
- ²²Tobudu iya bu; Eliyakimu nwa Hilikaya, bu onye-ishi l'ibe eze; yee Shebuna, bu onye edejeru eze ekwo; waa Jiowa nwa Asafu, bu onye nkwakobe tugba; o buru phe jepfu Hezekaya. Ephe gbajachaa uwe phe agbaja. Ephe jerwua bya eje akooru iya iphe, onye-ishi ndu ojogu ono pfuru.

Azaya 37

Hezekaya epfu anu Chileke

(2Ndu 19:1-13)

- ¹Tobudu iya bu; Hezekaya numaepho iphe ono o gbajashia uwe iya; bya achita uwe-aphu yee; o buru iya eje l'eze-ulo Chipfu.
- ²O bya ezia Eliyakimu, bu onye-ishi l'ibe eze; yee Shebuna, bu onye edejeru eze ekwo; waa ndu-ishi le ndu-uke Chileke; g'ephe jepfu onye mpfuchiru Chileke ono, bu Azaya nwa Emozu. Ephe tuko yee uwe-aphu jeshia.
- ³Ephe je je asu iya: “Hezekaya suru-a: ‘Ntanu-a bukwa mboku, oke iphe-ehuka dapfutaru anyi; bya aburu mboku, aahu anyi ahuhu; bya aburu mboku, iphe-iphere jiru anyi iphu. O dukwa g'egube ime anoduje eme nwanyi; o to dudu ike nyia onyi nwua nwata obu-a

⁴O nweru g'oo-du; Chipfu, bu Chileke ngu anuma iphe ono, onye-ishi ndu ojogu ono epfu ono; mbu onye ono, nnajiuphu iya, bu eze ndu Asiriya yeru g'o bya epfutoshia Chileke ono, dzu ndzu ono; k'ophu bu le Chipfu a-baru iya mba l'opfu ono, yebe Chipfu, bu Chileke ngu numaru ono. Oo ya bu; pfuru nu Chileke l'opfu ehuru ndu ophu phoduru nu.' "

⁵Oo ya bu; ndu ono, eze, bu Hezekaya ziru ono bya abyapfuta Azaya;

⁶Azaya su phe: "Unu je asu nnajiuphu unu le Chipfu suru-a: 'Ba atsukwa ebvu le k'iphe ono, i numaru ono; mbu opfu ono, ndu-ozu eze ndu Asiriya gude bya epfutoshia mu ono.

⁷Huma le mu e-woru unme lanu ye iya l'ehu; k'ophu bu l'oo-numa asulasu; lashiya ali phe; mu emee g'e gude ogu-echi gbua ya l'ali phe gedegede.' "

⁸Onye-ishi ndu ojogu ndu Asiriya bya anuma l'eze ndu Asiriya lufuwaru le mkpukpu Lakishi; o laphu azu je ahuma onye eze ono l'eka ootso ndu Libuna ogu.

⁹Noo ya; a bya ezia Senakeribu le Tirihaka, bu eze ndu Kushi be abyapfutawa iya ogu; o zia ndu-ozu g'ephe je ezia Hezekaya su:

¹⁰"Waa iphe, unu e-pfuru Hezekaya baa; mbu eze ndu Jiuda: 'B'ekwekwa ge Chileke ngu, bu onye ono, i dakoberu ono duphua ngu; l'eka oopfu le Jierusalemu ta alwadu l'eka mube eze ndu Asiriya.

¹¹Ophu doru enya bu l'i numahawaru iphe, ndu eze ndu Asiriya meru ndu ali ozo; mbu l'o mebyishikotaru phe. ? Aa-nafuta-chia gubedua too?

¹²Mbu-a; ndu ohamoha ono, nna mu oche phe mebyishiru ono; ? agwa phe dzotaru phe-a too? Mbu agwa ndu Gozanu; yee ke ndu Haranu; waa ke ndu Rezufu; me ke ndu Edenu, bu ndu shi nodu le Telasa.

¹³? Bu awe be eze ndu Hamatu no nta-a; me eze ndu Apadu; me eze ndu mkpukpu Sefavayimu; ozo ke ndu Hena; ozo ke ndu Iva?" "

¹⁴Tobudu iya bu; Hezekaya bya anata ekwo-ozu ono l'eka ndu e ziru iya; bya eworu iya gua. O bya abahu l'eze-ulo Chipfu bya eje eworu iya tosa l'iphu Chipfu.

¹⁵Hezekaya bya epfuru nu Chipfu su:

¹⁶"Gube Chipfu, bu Okalibe-Kakota-Ike; gube Chileke ke ndu Izurelu; onye sugaru l'aba-eze iya l'echilabo chierobu. Oo ngu kpoloko bu Chileke, nwekota ali-eze, du le mgboko mgburugburu. Oo ngu meru igwe bya emee eliphe.

¹⁷Ngabenu nchi gube Chipfu; numa iphe, mu epfu. Sanaa enya humadupho. Ngabekpodapho nchi; numa opfu ono, Senakeribu ziru g'e gude bya epfutoshia gube Chileke, no ndzu ono.

¹⁸"Gube Chipfu; o bukwa eviya le ndu eze ndu Asiriya mebyishiwaru ohamoha; waa ali phe.

¹⁹Ephe chiwaru agwa ndu ono ye l'oku; o kepyashia; kele agwa phe obu ta adudu iphe ozo, o bu; gbahaa nkụ; yee mkpuma, bu iphe, nemadzu gude eka mee.

²⁰Oo ya bu le-a; gube Chipfu, bu Chileke anyi; dzonaa anyi l'eka eze ndu Asiriya ono; k'ophu ali-eze, dukota le mgboko l'ophu a-maru l'oo gubedua kpoloko; mbu gube Chipfu be bu Chileke.”

Adada Senakeribu

²¹Tobudu iya bu; Azaya nwa Emozu bya ezia Hezekaya ozi su: Chipfu, bu Chileke ke ndu Izurelu suru l'iphe ono, i pfuru nu iya l'opfu ehu Senakeribu, bu eze ndu Asiriya ono be ya numawaru.

²²Waa iphe, Chipfu pfuru l'opfu ehu Senakeribu baa: Nwada Zayonu ta aduekwa iphe, o guberu ngu; teme o nodu aja ngu ewenu. Nwada Jierusalemu ekwe l'ishi l'eka igba oso le ndaba agbala.

²³? Bu onye bu onye ono, i shi ephu iphu; bya epfutoshi iya ono? ? Bu onye be i shi atu uzu ekpu-a; mbu onye ono, i gude eku-onwonye voru enya ono? O kwa Onye du Nso ke Izurelu!

²⁴I ziru ndu-ozu ngu; ephe bya eburu iphu nyabe Nnajiuphu. I suru l'i gudewaa ikpoto ugbo-inya-ogu ngu nyirwuchaa mkpakponu ubvu ubvu; Mbu l'i nyirwuwaru mkpakponu, eka ubvu ubvu Lebanonu jeberu; bya egbutsushiwa oshi sida, du iya nu, bu ndu ophu kachaa etse ogologo; me oshi payinu iya ophu kachaa adu ubvu l'enya; bya ejeruwaa eka o kachaa aburu epfukala; me eka o kachaa aburu oswa, du ree.

²⁵Mbu l'i tuwaru welu l'ali ndu ohozo; bya angwa ya mini; bya egudewaa obochi-okpa ngu zoo iphe, bu ngele, dukota l'ali Ijiputu tolitoli; jasu o tashihukota.

²⁶Su-a; ? o du gi ti numajeduru iya? Oo mu tubuhawaru g'o du nno teke duhawaa enya. Mbu l'o buru teke ndiche be mu chihawaru iya roo dobe. O buru nta-a be mu meru iya g'o vua; mbu mee; i woru mkpukpu, a kpugbaaru o shihu ike mebyishia; o buru ikpo mkpuma.

²⁷O buru iya bu; ike bvu ndu bu iya nu. Ephe buru ndu a turu eberebete; e meru iphe-iphere kpua phe. Ephe bya adu g'iphe, a kuru l'opfu; g'iphe, rwuru irwu k'ophuu; mbu du g'eswa, furu le mkpotsu ulo, anwu chigbushiru l'ebe adu g'o vutaberu l'eli.

²⁸“Obenu le gubedua be mube Chileke maru eka i no. Mu maru teke ibata abata; maru teke itugbu atugbu. Mu maru g'ibataberu hanyihanyi ekpu mu.

²⁹Eshi ophu o bu mube Chileke be ibaru hanyihanyi; teme beebabee, iipfuru mu rwuwa mu nchi; be mu e-woru ikokoro dzube ngu l'imi; woru mkpurukpu-igwe ye ngu l'onu g'inya. Mu emee ngu g'i shia ophu i shi laphu azu l'eka i shi.

³⁰“A -bya le gubedua, bu Hezekaya; waa iphe, a-buru ngu iphe-ohubama baa: Apha-a be ii-ri iphe, daru eda. O -be apha ozo l'i ria ophu shi l'ono futa. O -rwua l'apha k'eto iya; koo opfu kpata iphe, i koru iya. Gbaa opfu-vayinu; ria akpuru, e-shi iya nu.

- ³¹Sụ-a; nwa ndu ono, a-phodu nụ l'onu-ulo Jiuda bẹ a-gba ogbarabvu l'ime alị; mĩa mebyi l'eli mgboko;
- ³²noo kele o nweru nwa ndu phoduru nụ lẹ Jierúsalem. Ikpoto ndu wafuru nụ e-shi l'úbvú Zayonu. Ọ bụru Chipfu, bụ Ọkalibe-Kakọta-Ike e-gude g'ọ phụ-be iya l'ehu mee ya.
- ³³“Ọo ya bụ; waa iphe, Chipfu pfuru l'ehu eze ndu Asiriya baa: Ọ tọ byadu a-bata lẹ mkpukpu-a; ophu ọ byadu agba g'ọ ka mma l'ọo apfu l'eka-a. O too gudekpodanu iphe, eegbobutajẹ onwonye abyakube iya ntse; ophu ọ byadu ebvuphe iya ose-ogu.”
- ³⁴Ọo ọzo, o shi bya bẹ oo-shi laa. Ọ tọ byadu abata lẹ mkpukpu ọwa abata ophu.” Nokwa iphe, Chipfu eepfu.
- ³⁵“Sụ-a; mu e-gude k'epha mu; mę opfu ẹhu Dévidi, bụ onye-ozu mu gbobuta mkpukpu-a; dzoo ya.”
- ³⁶Tobudu iya bụ; ojozi Chipfu tugbuepho bya eje l'eka ndu ojogu Asiriya doru; bya eje egbua ukporo unu umadzu ugbo ukporo l'eto l'unu umadzu labo l'ukporo umadzu iri l'ime ndu ojogu ono. E tehushia l'utsu; odzu zeshiwaa ke bẹe.
- ³⁷Noo ya; Senakeribu, bụ eze ndu Asiriya tugbua; ọ bụru iya alaphu azu. Ọ laphushia azu lẹ Ninive je anodu.
- ³⁸O be ujiku lanu; ọ nodu agwa agwa iya, bụ Nisuroku; unwu iya, bụ Adurameleku; mę Shareza je egude ogu-echi gbugbua ya; gbaru lashia alị Araratu. Ọo ya bụ; Esahadonu, bụ nwa iya bụru eze nochia enya iya.

Azáya 38

Iphe-ememe guderu Hezekáya

(2Ndu 20:1-11)

- ¹Ọ bụru teke ono bẹ iphe-ememe guderu Hezekáya; k'ophu bụ l'ọ nowaa l'onu onwu. Onye mpfuchiru Chileke, bụ Azáya; nwa Emozu bya ejepfu iya je asu iya: Chipfu suru-a: “Dozia ibe ngu ree; kele iibyawa anwuhu; i tị kadu mma.”
- ²Noo ya; Hezekáya bya aghaa iphu l'uzo igbulọ pfuru nụ Chipfu sụ:
- ³Gube Chipfu; nyatanu ge mu bu-be onye gude ire-lanu; mę obu mu g'ọ ha tsoo ọzo nkengu; mę ge mu gude meberu iphe, du ree l'enya ngu. Hezekáya raa ekwa kpoo pfula pfula.
- ⁴Tobudu iya bụ; Opfu Chipfu bya atuba Azáya lẹ nchi sụ iya:
- ⁵“Je akaru Hezekáya lẹ-a: Waa iphe, o pfuru; mbu Chipfu, mbu Chileke ke nna ngu, bụ Dévidi: Mu numawaru epfupfu, i pfuru nụ mu; bya ahumawaa enya-mini, shi ngu l'enya. Mu e-yekwafua apha iri l'ise lẹ ndzu ngu.
- ⁶Ozo bu lẹ mu a-nafuta ngu; nafuta mkpukpu-a l'eka eze ndu Asiriya. Mu a-gbaru mkpukpu-a odzori.

- ⁷“Waa iphe-ohubama, Chipfu e-goshi ngu baa; g'i gude maru le Chipfu e-me-a iphe ono, o pfuru ono.
- ⁸Nwonyonyo iphe ono, a kpushiru, ee gudeje enyi ulo-eli Ehazu ono; be mu e-me g'o gude ntu-okpa iri tsu-phu azu.” No iya; onyonyo ono tsua ribo; gude ntu-okpa iri tsu-phu azu eme le g'o shi habe ogologo.
- ⁹Owa-a bu iphe, Hezekaya deru; mbu eze ndu Jiuda g'iphe-ememe ono mechaaru iya; o kachaa mma.
- ¹⁰Mu sukwaru: ? Bu le mkpakponu ndzu mu-a be mu jeru je eshisweta onu oguzo ali-maa? A naa mu nfu nafu mu nwa apha ndzu mu ophu phoduru nu?
- ¹¹Mu sukwaru le mu taa humabaedu Chipfu l'ali ndu dzu ndzu. Ophu mu egudebaedu enya ahuma nemadzu, dzu ndzu; ozoo ke g'anyi le ndu nokwadu l'eliphe-a bubaaru.
- ¹²A lashiru ndzu mu g'onye lashiru eswa l'ulo unwu-eswi; mbu l'oo g'onye akpa iphe akpakpa aphukobeje iphe, o kpagheru akpaghe-a bu ge mu phukobewaru ndzu mu. O bya atuwaa mu eri gbupya l'iphe, aakpaje iphe; bya egbubufu iya. O buru-a shi l'eswe ge nchi jihu be i mebufuwaru nu ke ndzu mu.
- ¹³Mu nodu atajekpoepho nshi jasu nchi abohu. Obenu l'o gweru mu okpu arakabya g'eka oduma ata anu. O buru-a shi l'eswe ge nchi jihu be i mebufuwaru nu ke ndzu mu.
- ¹⁴Mu gbogha chachacha g'apya ozoo g'esha. Mu deahaa kukuku g'ede-kuukuu. Mu lenyaa enya l'eligwe; enya meahaa mu ehuka. Mu su: Jiko Nnajiuphu; mu eje iphe-ehuka; byanu agbaaru mu mkpu!
- ¹⁵Ole o bu; ? mu a-sukwanu agha? O pfuakwaru opfu nu mu; mbu o buru yebedua l'onwiya meru iphe ono. Mu a-nodukpoepho eje nwa gelee jasu ge mu a-no-beru; kele obu atawa mu nyikinyiki.
- ¹⁶“Gube Nnajiuphu; o kwa udu iphe, dugbaa egube-a be nemadzu gude buru. O bukwaru iya pho be unme, no mu l'ehu byaru bya egudewaa nodu ndzu nta-a. Jiko menaa ge mu wekorohu; menaa ge mu nodu ndzu!
- ¹⁷Okpobe opfu; o kwa g'oo-duru mu le ree be mu gude jee iphe-ehuka, du nno. O buru l'oo l'i yeru mu obu be i ti kwedu ge mu bahu le nsukutu ola-l'iswi. I bya atuko iphe-aji mu l'ophu chiru ye onwongu l'azu;
- ¹⁸kele ndu nowaa l'ali-maa te etukwa ngu epha. Ophu ndu nwuhuwaru anwuhu agukwa ebvu egude etu ngu epha. Ophu ndu e kpochiru l'ilu eleekwa enya ire-lanu nkengu.
- ¹⁹O kwa ndu no ndzu; mbu l'oo ndu no ndzu bu ndu anoduje etu ngu epha ge mu etu ngu iya ntanu-a. O buru ndu bu nna anoduje akoru unwu phe g'i bu-be onye ire-lanu.
- ²⁰Chipfu a-bya adzoo mu ndzu. Oo ya bu l'anyi a-nodu agu ebvu akpo iya l'une jasu g'anyi a-no-beru ndzu. O buru l'eze-ulo Chipfu be anyi a-nodu gua ya.”

²¹Azáya pfiwaru sù g'e meta iphe oshi figu tsua etsutsu debechaa Hezekáya l'èjo-onwo ono, phòkashiru iya l'èhu ono; l'o -mewaa ya nno; l'o wekòrohu.

²²Hezekáya bya ajía sù: “? Bù gùnu bù iphe-òhubama, e-goshi lè mu e-mechaa bahùbaa l'eze-ùlo Chipfu òzo?”

Azáya 39

Ndu nnochì-ènya, shi Bábilònu

¹Ò bùru teke ono bè Merodaku-Baladanu; mbù nwa Baladanu, bù eze ndu Bábilònu deshìru èkwo-òzi nù g'e je anù Hezekáya; bya eyekwaru iya ya phò iphe-òma g'e gude bya iya ajiji; kèlè ò nùmaru l'iphe shi eme iya; ò kawaa mma.

²Hezekáya nabata ndu ono, e zìru òzi ono; bya egoshi phè iphe, nòkòta l'ùlo-èku iya; mbù goshi phè mkpòla-òchaa; yèè mkpòla-òdodo; mè manù, eshi mkpò; mè ngwògu iya l'òphu; mè iphe, bùkòta èku iya. Ò tò dùdu iphe, dù l'ìbe iya; òzoo iphe, dù l'alì-eze iya l'òphu, o to goshiduru ndu ono; mbù Hezekáya.

³Tòbùdu iya bù; Azáya, onye mpfuchìru Chileke bya ejepfu eze, bù Hezekáya je ajía ya sù: “? Bù awe bè ndu ono shi bya? ? Bù gùnu bè èphe pfuru?” Hezekáya sù iya: “Èphe shikwa èka dù ènya bya. Èphe shi Bábilònu.”

⁴Azáya bya ajía ya sù: “? Bù gùnu bè èphe hùmaru l'ìbe ngu?” Hezekáya sù iya: “Èphe tükòkwaru iphemiphe, dù l'ìbe mu hùma-gbua. Ò tò dùkwa iphe, dù g'èku, mu nweru enweru, mu te egoshiduru phè.”

⁵Noo ya; Azáya bya asù Hezekáya: “Nùma opfu, shi Chipfu l'ònu; mbù Òkalibe-Kakòta-Ike ono.

⁶Ò sùru-a: Lè mbòku abyawaa teke iphemiphe, dù l'ùlo eze ngu; mè iphe ono, nna ngu phè setarù dobe; ò nòò byasù nta-a a-bùru iphe, ee-vuta lashìa Bábilònu. Ò tò dùdu m'òphu ee-wophodo. Noo iphe, Chipfu epfu.

⁷Tème unwu ngu unwoke, bù ndu a nwùtaru ngu bè aa-harù kpùkaa; èphe eje abùru ndu anòduje eleta ìbe eze ndu Bábilònu ènya.”

⁸Hezekáya sù iya: “Opfu Chipfu ono, i pfuru ono dùkwa ree.” Iphe, o gude pfua nno bù l'ò rìru sù lè nchì a-dù-a doo; òphu ò dùdu iphe, bya l'eme teke ya nòkwadu ndzù.

Azáya 40

Adù ndu kè Chileke obu

¹Unu dùnaa ndìbe mu obu! Unu dùnaa phè obu! Nokwa iphe, Chileke unu pfuru bù onoya.

²Unu pfunaa opfu bèlebele yeru Jierúsalemù. Unu ranaa ya arara g'ò maru l'òzi-ike ono, ooje ono bè bvùwaru nù. L'a pfùwaru ugwo èjo-iphe, o meshìru. L'ewere, Chipfu meru iya hawaa g'iphe-èji, o meru; mbù l'ò hawaa g'òo ya ugbo labò.

- ³Ọ duru onye ara iya arara sụ: “Unu meziaru Chipfu ụzo l'echięgu. Unu mee eze gbororo iya g'ọ dughaa nhamunha lę mgbęgu alį-evevee.
- ⁴Ęka dų nsuda bę ee-nwuchi enwuchi. Iphe, bų ńbvń ńbvń bę ee-gbuzekota egbuze. Ęka dų nkwagbo-nkwagbo bę ee-mezi emezi. Ęka dų kpokoro-kpokoro-kpokoro l'a rwazee ya arwaze g'ọ kwoo akwokwo;
- ⁵k'ophu ee-kpuha ọdu-biribiri kę Chipfu g'a huma. Iphe, bukota nemadzu l'ophu ahumakota iya; kęle Chipfu gudewaa onu pfua ya.”
- ⁶Ọ duru olu-opfu, epfu sụ: “Chia mkpu!” Mu sụ: “? Bų gunu bę mu e-chi lę mkpu?” Ọ sụ: “Chia mkpu sụ lę nemadzu l'ophu dukota g'ęswa. Teme mma, ephe ama dukwapho g'okoko ęswa, dų l'ęgu.
- ⁷Oobujeru; ęswa -kpohuwaa nkų; okoko iya erishihu dashihu; kęle udzu-onu Chipfu phushiru phę. Hoo haa; nemadzu bukwa ęswa.
- ⁸Mbų l'obujeru; ęswa -kpohuwaa nkų; okoko iya erishihu dashihu; obenu l'opfu, Chileke anyi pfuru; a-pfuru pfushia ike jasų l'ojejeje.”
- ⁹Je apfuru l'eli ńbvń, ha shii; gube Zayonu; onye byaru ezi ozi-oma. Gube Jierusalemu, byaru ezi ozi-oma; wolinaa olu chia mkpu! Wolia olu; gę ndzu ba agushi ngu! Sų mkpukpu, dughaa l'alį ndu Jiuda-a: “Wakwa Chileke unu baa!”
- ¹⁰Lekwa! Nnajiuphu, bų Chipfu gudekwa ike-okpu abya. Ọ buru okpehu iya bę oo-gude buru eze. Lekwa! O gudekwa obunggo eje abya; bya egudekwapho ugwo ọopfu.
- ¹¹Ndu ephe l'iya swi bę onoduje eche g'onye eche aturu. Ọ nodu achikobeje unwu aturu ono heru l'ęka; mbų heru phę dobe onwiya ntse k'ophu ephe a-noduje iya l'obu. Teme ọ nodu atoje nwehu erwu ndu ophu he nwa.
- ¹²? Bų onye dujewaru ike gbaa ęka okorokoro gude tųa mini, nọ lę mgboko l'ophu atutù; ọzoo gude nkwo-ęka tųa akpaminigwe l'ophu? ? Bų onye dujewaru ike kpokoo urwuku, dų l'eliphe l'ophu kporu ye lę nkata; ọzoo wota iphe-atutù gude tųa ęrwa ńbvń, nokota nų?
- ¹³? Bų onye maru uche Chipfu? tọo ? bų onye a-sų lę ya zijeru iya iphe; lę ya bų onye akpo-zijeru Chileke ụzo?
- ¹⁴? Bų onye bę Chipfu jeru akpata ishi? tọo ? bų onye ziru iya ụzo ophu bų okpobe ụzo? ? Bų onye bę ọ bų; mbų onye ziru iya iphe, ọ maru; ọzoo onye goshiru iya ụzo, oo-shi mee g'iphe doo ya ęnya?
- ¹⁵Tororo opfu bų l'ohamoha dukwa gę mini, daru kpogwu l'ime boketi. Iphe, a guberu phę bų-a nwurwuku, dų l'iphe, egudeje tųa ęrwa iphe. Mbų l'ootuje ndu bukube eze-ęnyimu g'onye kpokoberu urwuku, dų rwukuru rwukuru atų l'iphe.
- ¹⁶Mbų l'oswa, dų l'ńbvń ńbvń Lėbanonu ta asukwa aburu nkų eye l'oku. Ophu anų, nokota iya nų asukwapho g'eegbushi iya gude gweeru Chipfu ngweja-akpo-oku.

- 17L'iphu iya be ohamoha l'ophu ta adukwa iphe, o bu. O guberu phe iphe, adudu iphe, o bu; mbu l'iphe-iphoro ka phe shii.
- 18? Bu onye be unu a-turu Chileke yeru? ? Bu ntekpe gunu be unu a-su le yee ya bu iphe lanu?
- 19L'a -bya l'iphe, a kpuru akpukpu; ono bu onye eme ona kpuru iya. O buru onye-uzú mkpola-ododo wuru iya mkpola-ododo; bya emetaru iya egbirigba mkpola-ochaa.
- 20Oobujeru onye daru ukpa k'ophu o too dudu ike anu Chileke egube iphe ono; l'ooje ahota oshi, kporu akpaa; bya eje achoo onye eme ona emegharu iya aka kua l'o bya apyia ntekpe doberu iya; mbu ntekpe, ta abyadu aharijeru okpa aharijeru.
- 21? Unu ta amahaada? Too ? unu teke anuma-swee? ? Te epfuduru iya unu e -shikpo le mbu? ? Toko dodu unu enya g'e gude too okpa mgboko l'ophu?
- 22L'o no l'aba-eze iya l'ephekerephe; nohata eliphe, gbaru mgburugburu. Ndu no l'eliphe dugbae ya pho ribariba g'unwu ugu. Eligwe l'ophu be o phushiru togbo g'onye phushiru ukpo; bya eworu iya togbo jakpata g'ulo-ekwa, aabya eburu eburu.
- 23Ndu-ishi be oomeje; o to dudu iphe, ephe abu. L'o bya emee ndu-ishi le mgboko-a; ephe aburu iphe-mmanu.
- 24Su-a; oobujeru akuku, aaku phe l'ali; adzadza, aadza phe; ephe -jekwadu-a agbabe ogbarabvu l'ali; l'oophuwa phe onu; ephe anwulwashihu. Oke pherephere abya ezikota phe g'eswa ereshi.
- 25Onye nsọ ono jiru su-a: “? Bu onye be unu a-turu mu yeru? Mbu-a; ? bu onye be unu epfu le mu l'ia ha enya nhamunha?”
- 26Palinaa enya lee l'akpaminigwe. ? Bu onye meru iphemiphe ono dobe? Mbu onye ono, emeje kpokpode, du igwerigwe l'oofushi nanunanu; teme o nodu ekuje phe epha l'ehu l'ehu. O buru l'ike paru onye ono aka; teme okpehu du iya meru g'o gude ophu o dudu kpokpode ono me nanu etuphahuje nu.
- 27Unube ndibe Jiekopu; ? denu g'o gude unu pfua egube opfu-a? Mbu-a; unube ndibe Izurelu; ? denu g'o gude unu nodu agu aphu? Kele unu suru le Chipfu ta amadu iphe-ehuka, unu eje; mbu le Chileke unu ta adudu iphe, o guberu iphe, rwuberu unu?
- 28? Unu ta mahaada? Too ? unu teke anuma-swee le Chipfu bu Chileke, l'a-no jasu le tuutuutu le mijimiimii? O buru iya meru eliphe l'ophu jasu l'aka o jeberu. Ike ta abvudu iya; ophu nkwo atsudu iya mee; ophu o dudu onye amakotaru nkwamenya nkiya.
- 29Oo ya emeje g'ike du onye ike bvuru. Teme o nodu emeje g'onye du nmelenmele rokota ike.
- 30Mbu le-a; unwu ogbo lanu emenyakwaa iphe; ike abvu phe; ephe emehu nmelenmele. Mbu le ndu bukwadu okoroby a -nonya; ephe evukota iphe daa iko.

³¹Obenu lẹ ndu daru ngabẹru Chipfu bẹ ike a-nọdu aka adọdu. Epehe e-gude nkù ephe l'eli l'eli g'ugo. Epehe agbaa ọso; ike ta abvudu phe. Epehe ejee ije; nkwo ta atsudu phe mee.

Azáya 41

Onye a-nọdu eyeru Ízurelu ẹka

¹Unubẹ ndu bukube eze-ẹnyimu; unu nọdukwa nggujungguji l'iphu mu! G'ike kabakwaa adu ohamoha! G'ephe kpiritakwaru bya eyee onu! G'anyi je edzuda l'ulo-ikpe!

²“Sụ-a; ? bụ onye jeru je akpalia onye p̄fuberekoto l'uzo ẹnyanwu-awawa; mbụ onye abụjeru; ọ -halia ọkpa l'ọ lwua lwuta. Mbụ lẹ Chipfu ewojeru ohamoha ye iya l'ẹka; bya akwatsushiaru iya ndu eze. Ọ nọdu egudeje ogu-echi gwee phe arakabya; gbaa phe apfu jasụ ephe phekishihu g'ẹswa ereshi.

³Ọochije phe ọso; ejero l'iphu l'iphu. Ọ tọ dudu iphe, eme iya nụ. Mbụ eshichaa ọzo, ọkpa iya teke eshiswee lẹ mbụ.

⁴? Bụ onye meru iphemiphe ono; mee ya meghaa; mbụ shiepho lẹ mbụ ebu ogbo l'onwiya? Ọ kwa mbedua, bụ Chipfu; onye nọ swiru ndu kẹ mbụ; teme mu jekwa anọdu swiru ndu k'ikpazu; ọo mu bụ onye obu!”

⁵Ndu bukube eze-ẹnyimu hụma iya; ndzụ gūhu phe. Ndu bu l'ẹka eliphe jeberu nọdu anma pyaapyaapya eje akpiritaru.

⁶Onyenonu nọdu eyeru nwibe iya ẹka. Epehe nọdu asuje nwibe phe-a: “Shihukp̄oekwapho ike!”

⁷Ndu maru eme ọna nọdu adukpoepho ndu ọzo mkpola-ododo obu. Onye ọphu egudeje ọngu akwọ iphe teretere nọdu agba onye ọphu edzefufe iya edzefu unme. Ọ -nọdu l'ọ sụ onye ọphu agbajẹ iya ọku gude dzepfua ya: “Ọ dukwaa ree!” L'ọ bya akua ntẹkpe ono ngga g'o to rikashihu.

⁸A -byakwanu lẹ gube Ízurelu, bụ onye-ozu mu; mbụ gube Jiékopu; onye mu gude ẹka mu hota; mbụ gube oshilokpa Ébirihamu, bụ onye mu l'iya eshi ọnyà;

⁹mu jekp̄eruro l'ẹka igwe beru alị beru je eduta ngu. Mbụ l'ọo ẹka ọ kachaa omilomi bẹ mu jeru je ekua ngu. Mu sụ ngu: I buakwaa onye-ozu mu. Mu hotaakwaru ngu; ọphu mu ajikaekwa ngu.

¹⁰Ọo ya bụ; ba atsukwa ebvu; kele mu nokwa swiru ngu. Ge meji ba tofukwa ngu; kele ọ kwa mu bụ Chileke ngu. Mu e-me g'ike dū ngu; mu e-yeru ngu ẹka. Mu e-gude ẹkutara mu ono, bụ ẹka mu egudeje mee iphe, p̄furu ọto ono gudeshia ngu.

¹¹Iphe, bukpo ndu aba hanyihanyi ekpu ngu bẹ ọ tọ dudu iphe, e-me g'e te meru iphe-iphere kpua phe. Ndu etso ngu opfu bẹ ee-me; ephe alaa l'iyi buri mkpurupyata.

¹²Mbụ l'ii-chika ẹnya ndu ohogu ngu; i tii humadu phe. Ndu etso ngu ọgu a-duepho g'iphe-iphoro.

- 13**Noo keḷe ọo mbeḍua bu Chipfu; bya aburu Chileke ngu; onye sekpu ngu l'ekutara ngu; bya asu ngu g'i ba tsushi ebvu; le mu e-yeru ngu-a eka.
- 14**“Ba atsukwa ebvu; gube nworishi ono, bu Jiekopu; mbu gube nwata-une, bu Izurelu; keḷe ọo mbeḍua l'onwomu e-yeru ngu eka.” Noo iphe, Chipfu epfu; mbu onye ono, gbafutaru ngu nu ono; bya aburu Onye nsọ ke ndu Izurelu.
- 15**Lenu; mu e-mekwa ngu g'i buru iphe, e gude echi ereshi; mbu iphe, bu k'ophuu; bya atsu nkọ; bya enweru ezé. Ii-chi ubvu ubvu gbiigbii tsutoo ya etsuto; mbu mee ya l'ọ du swakiri-swakiri g'eswa ereshi.
- 16**L'i phushia phe; pherephere apakaa ya. Mbu oke-pherephere atukaa ya nanunanu. Obenu le gubedua e-gude Chipfu ete eswa. Mbu l'ọ Onye nsọ ke ndu Izurelu ono be ii-gude eku onwongu.
- 17**“Ndu ukpa me ndu adudu g'ọ du phe acho mini angungu. Ophu ọ dudu ophu ephe humaru. Ire nodu atu phe heehee l'eka mini agu phe. Ole ọ bu-a mbeḍua, bu Chipfu a-za phe enu. Mbu le mbeḍua, bu Chileke ndu Izurelu taa hadu phe.
- 18**Mu e-me ge mini wata asoshi ge nggele l'ephekerephe eka du jakporo jakporo jakporo. Ogba eshi le nsuda nsuda gbafushihu. Mu emee g'echiegu buru okpuru okpuru. Ali, du jakporo-jakporo aburu eka mini e-shi asoshihu.
- 19**Iphe, mu e-ye l'echiegu bu oshi sida; yee oshi akesha; mekpoo oshi mituru; yee oshi olivu. Mbu l'oshi payinu; yee oshi firu; yee oshi sipuresu be mu a-tuko dzakota le chakiri chakiri chakiri ali;
- 20**k'ophu ndu nemadzu a-huma; teme ephe amakwarupho. Ephe e-gbukwaa ya pho igo; l'oodoo phe enya l'ọo Chipfu gude eka iya mee iphe ono; l'ọo Onye nsọ ke ndu Izurelu be meru iphemiphe ono dobe.”
- 21**Chipfu sukwaru-a: “Unu byanu edoo edo k'unu.” Mbu l'eze ndibe Jiekopu ono suru-a: Unu byanu epfua g'onwuru unu.
- 22**Unu jenu eduta agwa unu g'ọ bya epfuaru anyi iphe, e-me nu. Ephe epfukwarupho anyi ophu mehawaru nu; k'ophu anyi e-gbu iya igo maru iphe, o mechaaru nwufuta. Odumeka; unu pfunaaru anyi iphe, e-mechaa mee nu.
- 23**Unu pfuaru anyi iphe, e-me l'iphu k'ophu anyi a-maru l'unu bu agwa, ere ire. Unu menaa ohumalenya. Unu menaa iphe, du ree; ozo ophu du eji; k'ophu anyi a-nmahukwanu pyaapyaapya; ndzu aguaha anyi.
- 24**Obenu l'iphe-iphoro ka unu mma. Teme ophu iphe, unu eme adukpoda iphe, ọ bukpo ililekpoo. Onye hotaru unu bukwa ebyi be o meru.
- 25**“Mu jeakwaru akpalia onye shi l'uzo isheli; ọ nodu abyawaa. Oo-nodu l'uzo enyanwu-awawa bya akpo-kua epha mu. Onye ono a-zo ndu-ishi pyakapyaka g'onye atsu nri l'ikwe; mbu g'eka onye akpu ite atsu urwa, o gude akpu iphe.
- 26**? Bunaa onye pfuru iphe-a eshikpoo le mbu; k'ophu anyi a-maru iya? ? Bu onye nmahawaru iya g'okwa k'ophu anyi a-su: ‘O pfukwaru ire-lanu?’ O to dudu onye

pfujeru iya nū. Ọphu ọ dudu onye nmajeru iya l'okwa. Ọphu ọ dudu onye nūmajeru olu unu.

²⁷Ọ buru mbedua vuru ọzo pfiaru Zayonu sū iya: ‘Lenu; wakwa phe baa!’ Mbū; ọ buru mu yeru onye jeru ezia Jierúsalemū ozi-oma ono.

²⁸Mu leri ẹnya; ọphu ọ dudu g'ọ ka mma l'oo onye lanū; mbū g'ọ ka mma l'oo onye lanū, mu humaru l'echilabọ phe, adū ike akpo-ziru mu ọzo. Ọphu ọ dukwapho onye azaje ẹnu mē mu jia ya aji.

²⁹Lewarọ; ẹphe tukoru bukotaru iphe-mmanū! Iphe, ẹphe eme bukwarupho iphe-mmanū. Mbū l'agwa phe ono bukota pherephere yee iphe-iphoro.”

Azáya 42

Onye-ozí kẹ Chipfu

¹Chipfu sūru-a: “Wakwa onye-ozí mu, bụ onye mu gudeshi; mbū onye mu hotaru; bya aburu onye emeje g'obu jidata mu. Mu yeakwaru iya Unme mu l'ehu. Oo-goshi ohamoha iphe, bụ ikpe, pfuru oto.

²O too jekwa ara ọrà; ọphu oojekwa echi mkpu. Ọphu ọ dukwa onye bya anuma olu iya l'etsuzo.

³Mbū l'ekperema, jihuru ejihu bẹ ọ tọ gbajikpokwanu; ọphu ọophunyikwa oroku, enwu reswereswe. Oo-gude ire-lanū goshi iphe, bụ ikpe, pfuru oto.

⁴Ọphu ọodadu adada; ọphu ọ dudu iphe, a-kposhi iya iphe, oome jasū teke ikpe, pfuru oto e-keru l'eliphe. Ọ buru ekemu iya bẹ oha, bukube eze-enyumu a-ndu ele ẹnya iya.”

⁵Sū-a; wakwa iphe, Chileke, bụ Chipfu epfu baa; mbū onye ono, bụ iya meru eligwe l'ophu bya eworu iya tosa; onye bụ iya tosarū eliphe l'ophu mekpoo iphemiphe, shi iya nū; bya anū ndu bu iya nū unme, ẹphe atū; bya eworu ndzū nū ndu eje ije l'eli iya.

⁶Ọ kwa mube Chipfu gude apfubekoto nkemu kua ngu. Mu je l'e-seta ngu l'eka gudeshia. Mu e-dobe ngu; mee ngu g'i buru iphe, mu lẹ ndiphe e-gude gbaa ndzū. Teme l'i buru iphóró, duru ohamoha.

⁷L'i mee g'ẹnya sahu ndu atsū ishi; mee gẹ ndu a kpuru lẹ ndzū nweru onwophe; mekwapho g'a haa ndu nọ lẹ mkporo l'eka gbahuru tsukiribaa.

⁸“Sū-a; ọ kwa mbedua bụ Chipfu. Ọ buru ẹpha mu bụ ono gedegede! Ọphu mu ewokwaru úbvú, rwuberu mu nū anū onye ọzo. Ọphu mu ewokwaru etu ẹpha, eetuje mu woru haarū agwa.

⁹Lewarọ; akahū iphe, a sūru l'oo-me meakwaru. Mu ndu epfuwa k'òphúú. Mbū lẹ mu epfujekwaru iya pho unu teme l'ooowata ememe.”

Ebvú, e gude aja Chipfu

¹⁰Unu gwa ebvu òphúú nù Chipfu! Unu shikpòepho l'èka igwe beru alì beru tuta iya èpha; unubè ndu eje l'oma-mini; mè iphe, bù iphe, bu lè mini! Iphe, bù alì, nò-kube eze-ènyimu; mè iphe, bù ndu bu iya nù; unu tua ya èpha!

¹¹G'echiègu mè òha, bu iya nù wata erwu okwe! Gè ndu bugbaa lè mkpukpu Keda tejekwa èswa! Gè ndu Sela gwa ebvu èhu-ùtso! G'èphe nòdu lè mkpakponu úbvú rwua okwe!

¹²G'èphe kwabèkwa Chipfu ùbvù! Èphe anòdu l'alì, nò-kube eze-ènyimu tua ya èpha!

¹³Chipfu a-zò garamu garamu lufuta gè nwoke, dù ike. L'ò bya akpalia obu iya g'òjogu, ike dù; l'ò phuahaa ya l'èhu. L'ò bya araa òrà gude chia mkpu ògu; lwua ògu lwu-kpee ndu òhogu iya.

¹⁴Chileke suru-a: “Mu shihaakwa ùzenya nòduta doo. Mu nòkpòepho nwapyakò esedekpòepho onwomu. Obenu lè nta-a bè mu a-wata echi mkpu; atsu ude; atu hèhèe; gè nwanyì, ime eme.

¹⁵Mu e-me g'iphe, bù úbvú, nòkota nù dabyikòtaru iphorò. Mu abya emee g'èswa, rwuru iya nù kpòshihu nkù. Mu emee nggele nggele g'ò ghòshia alì òkponku. Mu abya emee g'òkpuru òkpuru tashìhu.

¹⁶Mu e-duru ndu atsu ishi shia ùzo, èphe amahaada. Gbororo, èphe te eshijehaada bè mu a-kpò-ziru phè ùzo iya. Mu e-me g'òchii bùru ìphóró l'ìphu phè; bya emee g'ùzo, dù kpòkoro kpòkoro kpòkoro kwòru phè akwòkwo. Iphemiphe onò bùkota iphe, mu e-me; òphu mu abyadu aha phè.

¹⁷Obenu lè ndu kpòru obu yeru agwa; mbù ndu bù iphe, a kpùru akpukpu bè èphe suru l'ò gude ndzù phè; ndu onò bè ee-me iphe-iphèrè chifu phè.”

Ndu Ízurèlu atsu ishi ada nkùchi

¹⁸“Unubè ndu nkùchi; unu nùmadupho iphe lè nchì! Unubè ndu atsu ishi; unu palidaphò ènya humakpodaphò!

¹⁹? Bùkwanu onye atsu ishi òbu, abudu onye-òzi mu? Tòò ? bù onye adabe nkùchi g'onye onò, mu ziru òzi onò? ? Bù onye atsu-be ishi g'onye nò mu l'èka? Mbù ? bù onye atsu-be ishi g'onye-òzi kè Chipfu?

²⁰Ì humawaru iphe, dù igwerigwe; òphu ìngadu nchì. Nchì gheru ngu ònu; òphu ò dùdu iphe, ìinumaje.”

²¹Chipfu bè bù onye pfulèrekoto. Noo iphe, meru g'ò gude ò nù phè ekemu, ereshi ire ike bya adukwaphò biribiri.

²²Obenu l'èphe byaru bya abùru ndu a lwùtaru iphe phè l'ògu; bya abùru ndu a kwarù l'òkwata. Mbù lè g'èphe ha bè nwulahùkotaru kwaa l'ime nsùkutu; mè ndu òphu a tùru mkpòro woru domia edomi. Èphebedua l'onwophè bùwaa ndu a lwùtaru l'ògu. Òphu ò dùdu onye gbaru phè mkpu. Èphe bùwaa ndu a kwarù l'òkwata. Òphu ò dùdu onye pfuru sù: “Unu chiphu phè nù azu-ò!”

²³? Bụ onye ole lẹ g'unu ha a-ngabẹ nchị l'opfu-a; ọzokwanu nọdukpoepho nwadoo numa iphe, e-mechaa mee nụ?

²⁴? Bụ onye woru ndibe Jiékpọ haa g'ephe bụru iphe, a kwaru l'okwata; mbụ haa ndu Ízurelu g'ephe bụru ndu a lwutaru l'ogu? ? Tọbudu Chipfu l'onwiya meru iya; mbụ onye ono, bụ iya bẹ anyi meshiru iphe-eji ono? Kele ephe te ekwedu etso ụzo iya. Ophu ephe ekwedu eme ekemu iya.

²⁵O bụru iphe ono meru g'o gude ọ wua phẹ oke ẹhu-eghu iya; mee g'ejo ọgu dapfuta phẹ. Ogu ono gude ọku woru phẹ kee mbvu; ophu iphe edoduru phẹ ẹnya. O kee phẹ phuruphuru g'ọku; ophu o rwuduru phẹ l'okpoma.

Azáya 43

Onye bụ iya kpoloko a-dzo ndu Ízurelu

¹O be lẹ nta; wakwa iphe, Chipfu epfu; mbụ onye ono, bụ iya meru gube Jiékpọ; onye bụ iya kpuru gube Ízurelu pfube. O sụru-a: B'atsushi ebvu; kele mu gbafutawaru ngu. Mu kuru ngu oku; kukpoo ngu epa ngu; mbụ l'ị bụ nkemu.

²Teke ọ bụ mini bẹ iirwughata bẹ mu nọepho swiru ngu eswiru. Teke ọ bụ nggele bẹ iime g'ị ghata; o too ridu ngu. Teke i jeru ije je aghabua ọku; ọ tọo hudu ngu; ophu ire ọku iya te ekepyashidu ngu.

³Noo kele ọo mbẹdua bụ Chipfu; bya aburu Chileke ngu; bya aburu Onye nsọ ke ndu Ízurelu; bụru onye ndzota ngu. Oo ndu Ijiputu bẹ mu nuru gude gbata ngu. Mu woru ndu Kushi; yele ndu Seba nụ l'ozori ngu.

⁴Eshinu ị du mu mkpa; teme ị bụru onye aakwabẹ ùbvù l'ẹnya mu; teme eshinu mu yeru ngu obu; bẹ mu e-woru ndu nemadzu nụ gude gbanweta ngu; nukwapho ndiphe gude gbanweta ndzu ngu.

⁵Gẹ ndzu ba agukwa ngu; kele mu nokwa swiru ngu eswiru. Mu e-shi l'uzo ẹnyanwu-awawa chilaru ngu unwu ngu; bya ejekwapho l'uzo ẹnyanwu-ariba je achilatachaa ndibe ngu.

⁶Mu abya asu isheli: “Pakwaru phẹ haa!” Bya asu ndohali: “Be sedeekwa phẹ!” Su phẹ: Unu shikwa l'eka du ẹnya chilaru mu unwu mu ke nwoke! Unu eshi l'eka igwe beru alị beru chilaru mu unwada mu!

⁷Mbụ iphe, bukpo onyemonye zaru epa laaru mu. Ndu mu meru g'e gude tua mu epa. Ndu mu gude eka mu kpua; gude eka mu mee g'oo-du.

⁸Dufutanu ndu ono, nweru ẹnya; obenu l'ephe atsụ ishi onoya; me ndu ophu nweru nchị; ephe nodu ada nkuchi.

⁹Ohamoha l'ophu dzukoru l'eka lanu. Teme ndu nemadzu dzukokwapho. Ole ? bụ onye ole lẹ g'ephe ha pfuru iphe ono, eme nụ onoya; bya epfukwapho ophu mehawaru nụ? G'ephe jenu ekua ndu ekebe phẹ g'ephe bya egoshi lẹ nkephẹ bụ ire-lanu; k'ophu ndu ozo a-numa iya sụ: O kwa eviya.

¹⁰Wakwa iphe, Chipfu epfu baa: “O kwa unu bu ndu ekebe mu; unu bukwarupho onye-ozu mu, mu hotaru l'onwomu; k'ophu unu a-maru mu; bya ekwetakwapho nkemu. L'o dokwapho unu enya l'oo mu bu onye obu. O to duedu Chileke ozo, e meru dobe, abudu mbedua; ophu o dudu ozo, a-dubaa nu gbahaa mbedua.

¹¹Mbedua; mbu mbedua gedegede; oo mu bu Chipfu; ophu o duedu onye ndzota ozo, du nu gbahaa mbedua.

¹²Mu goshiwaru iya egoshi; bya adzota iya dobe; bya echia ya le mkpu l'oo mbedua bu Chileke; l'o to budu agwa ndu ohozo ono, unu dobegbaaru ono. Mbu o buru unu bu ndu ekebe mu.” Nokwa iphe, Chipfu eepfu.

¹³“E -shikpoo l'ichee be o bu mu pho be bu iya nu; ophu o dudu onye adu ike anafu mu onye no mu l'eka. Mu -mewaa iphe g'o du mu; ? bu onye suru g'oo-bya emee ya imephu?”

Chileke l'e-me ge ndibe iya laphu azu l'onodu phe

¹⁴Wakwa iphe, Chipfu epfu baa; mbu onye ono, gbafutaru unu ono; bya aburu Onye Nso ke Izurelu. O suru-a: “Oo l'iswi ehununu be mu e-gude zia g'e je Babilonu; je anyakashia oguzo-igwe g'o ha. Noo teke okoo, ndu Babilonu atu a-gho erwubvu.

¹⁵O kwa mbedua bu Chipfu ono; mbu Onye Nso k'unu ono. Mbu onye ono, bu iya meru unube ndu Izurelu dobe; bya aburu iya bu eze unu.”

¹⁶Su-a; wakwa, iphe, Chipfu epfu; mbu onye ono, toru uzo, o shijaa eze-enyimu; mbu togbo gbororo; o ghajaa eze mini;

¹⁷mbu onye ono, chifutaru ugbo-inya-ogu; me inya; me ndu ojogu; mekpoo ndu gbaru mkparawa; chikobe phe dobe. Epe zeshia l'eka epe ta abyadu agbalihubaa ozo. Mbu o gbanyia phe; mbu phunya phe g'onye aphunyi oku oroku.

¹⁸“Unu zohaa akahu iphe! G'o to bushi l'iphe, mehawaru nu be obu unu a-du!”

¹⁹? Unu te eledu le mu wataru eme iphe ophu! Mbu l'obyawaa efuta. ? Unu ta ahumaduru iya? Mu eyeakwa uzo l'echiegu. Temu mu nodu emewaa nggele l'ali, dabyiru mgbegere.

²⁰Anu-egbudu akwabe mu ubvu; mekpoo nkuta-oswa yee mgbashi-ujiku; kele mu meru ge mini du l'echiegu; bya emee ge mini soo gborogboro l'ali, dabyiru mgbegere; k'ophu ndibe mu a-ngu mini; mbu ndu ono, mu gude aka mu hota ono;

²¹ndu mu gude aka mu mee doberu onwomu g'ephe raa ya arara su g'e tuje mu epha.”

Iphe-eji ndu Izurelu

²²Obenu le gube Jiekopu te ekweduru raku mu. Mbu-a; gube Izurelu su l'ike mu buwaru ngu.

²³Ophu i kputaduru aturu gude gweeru mu ngweja-akpo-oku. Ophu i gweduru mu ngweja mmanu gude kwabe mu ubvu. O to budu le mu bojeru ngu ivu-erwa su gi

gweeru mu ngweja-nri. Ọzokwanu lẹ mu mejeru g'ike bvụ ngu lẹ mu adaru ngu ngweja

ùnwù-isensu.

²⁴I ti gudedu okpoga je azuta oshi omanko, eshi mkpọ gude bya anụ mu. Ọphu i gweduru mu ngweja ẹba-anụ gude mee g'ẹpho ji mu. Ọ bụchia iphe, i meru bụ l'i mewaru mu iphe-ẹji jasụ ọ nọdu anyịwa mu ẹrwa. Mbụ l'i meswewaru mu jasụ ike ngu bvụwa mu.

²⁵Ọ bụru mbẹdua; mbụ l'ọo mu bụ onye e-hufu emeswe, i mesweru mu; g'ẹpha mu apfuru. Ọphu mu anyatabaedu iphe-ẹji, i meshiru ọzobaa.

²⁶Sụ-a; nyatanuru mu iphe, mehawaru nụ. G'anyi tūkonu yee ọnu l'opfu ọbu. Donaa g'ọ nwuru g'a maru ? ọ kalẹru ngu?

²⁷Nna ngu kẹ mbụ meru iphe-ẹji. Ndu-ishi ngu meswee mu.

²⁸Noo g'o gude mu woru ndu-ishi ọlo-dụ-nsọ merwushia; bya ahaa g'e woru Jiékpọ mu mebyishikọta l'ọphu; l'e gude ndu Ízurelu ephu l'iphu.

Azáya 44

Ízurelu bụ ndu Chileke họtaru

¹“Obenu lẹ-a; ngabẹ nchi nta-a; gube Jiékpọ, bụ onye-ozu mu; mbụ gube Ízurelu ono, mu gude ẹka mu họtara ono.”

²Wakwa iphe, Chipfu epfu baa; mbụ onye ono, meru ngu nụ ono; onye bụ iya dozuru ngu teke i nọ l'ẹpho. Teme ọ bụru iya bụ onye e-yeru ngu ẹka: Ta atsukwa ebvu; gube Jiékpọ, bụ onye-ozu mu; mbụ gube Jieshurunu, bụ onye mu gude ẹka mu họtara.

³Mu a-gba mini l'ali, ẹgu mini agụ. Mbụ lẹ mu e-woru ọ-sọ-gborogboro mini wua l'ali, kpohuru jegiri-jegiri. Awa ngu be mu a-wu Unme nkemu. Mu abya awua iphe-oma, shi mu l'eka l'ẹhu ndu bụ oshilokpa ngu.

⁴Ẹphe awata amishi g'ẹswa, amishi l'eka mini aduje shii; mbụ g'oshi wilo, zeru l'aguga nggele, aso asoso.

⁵Ọ nweru onye asu: Mu bukwa kẹ Chipfu. Onye ọzo ekua onwiya ẹpha laaru Jiékpọ. Onye ọzo edee l'eka iya su: Mu bukwa kẹ Chipfu! Ẹpha mu bukwa Ízurelu!

⁶Wakwa iphe, Chipfu epfu baa; mbụ onye ono, bụ eze ndu Ízurelu bya aburu onye gbafutaru phe nụ; mbụ Chipfu, bụ Okalibe-Kakota-Ike: Ọ kwa mbẹdua bụ onye ivuzo; bya aburu onye ikpazu. Ọ to dukwa Chileke ọzo, du nụ; gbahaa mbẹdua.

⁷Ọo ya bụ lẹ-a; ? bụ onye be unu a-nodu atụ eyeru mu? G'onye ono pfunaa ya! G'onye ono menaa ya ge mu maru; g'o doo ya ishi rii l'iphu mu! Mbụ iphe, mekotakporu nụ; eshinu mu meru ndibe mu, shi l'ichee. G'onye ono pfukwapho iphe, e-mechaa mee nụ; mbụ-a; g'ọ k'onaa iphe, abya ememe.

⁸G'ehu ba nmakwa unu anmanma; mbụ gę ndzụ ba agụkwa unu! ? Mu te epfuhaadaru iya unu eshi lę mbụ; mbụ pfua ya raa ya arara? Mbụ-a; ọ kwa unu bụ ndu ekebe mu. ? Ọ duru Chileke ọzo, dū nū, abudu mbēdua? Waawakwa! Agbara mkpuma ọzo ta aduhekwa. Ọ tọ dūekwa onye ọzo, mu maru.

Ndu eme kę ntękpe

⁹Iphe, bụkpoo ndu eme kę ntękpe g'ęphe ha ta adukwa iphe, ęphe bụ. Tęme iphe ono, ęphe sūru l'ọ bụ phę ọkpobe iphe ono buri iphe, adudu iphe, ọ bụ. Ndu agbaru phe odzori bükwa ishi bę ęphe atsū. Ọphu ęphe amadu iphe; k'ọphu iphere a-dū phę.

¹⁰? Bụ onye jejeru je emeta agwa; mbụ kpua ntękpe, adudu iphe, ọo-baru iya?

¹¹Lekwa; iphe, bụkpoo ndu ęphe l'iya swi bę e-mechakwaa buri ndu iphere e-me. Ndu ono, akpuje iya nū ono bunu nemadzu mmanu bę ęphe bụ. G'ęphe dzukobenu bya apfuru huma l'ee-ye phę oke ebvu meru iphere kpua phę g'ęphe ha.

¹²Ọo onye-uzú ewotaję anma hube l'ọku icheku. L'ọ bya egude ọngu tsua ya gude meta ntękpe. Ọ buri ike-ọkpu iya bę oogudeje mee ya. Ọ -menyaa ya; ęgu guahaa ya; ike abvu iya. Teke ọ nguduru mini; a -nonyaa; ęgu mini atsua ya nkwo męe.

¹³Onye ekwo oshi bụ eri bę oogudeje atū nkiya. L'ọ bya egude iphe, aakaję iphe kaa gę ya e-me iya. L'ọ bya egude ayọ bya ebebashia ya. Gude komupasuu mee ya l'ọ dū gę nwoke; mbụ dukpoo akpabiri gę nwoke aduje; woru iya je ebvube l'ulo-nshi.

¹⁴Mbụ lę-a; ọ gbutsuru oshi sida; ọzo oshi sipuresu; ọzokwanu achi, ọ haru; yele oshi ọzo, dū l'oswa tuko vaa. Ọzo l'ọ woru oshi payinu dzaa; igwe dzee mini mee ya; ọ vuta.

¹⁵L'ọ bwaruro nemadzu iphe, oo-gude eshi ite. L'ọ haru hata iya gude nyaa ọku. L'ọ gude iya phunwua ọku ghee buredi. Tęmanu l'ọ gbatakwa iya pho gude pyita agwa wata abaru aja. Mbụ pyia ntękpe phozeaharu iya.

¹⁶L'ọ bya ekee nkū obu ębo chita ye l'ọku; shia ya ite. L'ọ hua ya anu taa; ępho eji iya. L'ọ gudekwa iya pho nyaa ọku; l'ọ su: "Hm! Nta-a bę ęhu evuwa mu ọku. Mu humawaru ọku nyaru."

¹⁷L'ọ bya achita ọphu phoduru nū gude mee agwa; mbụ mee ya ntękpe; phozeru iya wata iya abaru aja. L'ọ bya epfuahaa nuahaa ya su iya: "Dzotanuu mu; ọ kwa ngu bụ Chileke nkemu."

¹⁸Su-a; ęphe ta amakwa iphe; ọphu ọ dudu iphe, edoje phę ęnya; kele a phuchiru phę iphe l'ęnya; k'ọphu ęphe ta aphudu ọzo. Tęme e mechia phę egomunggo; g'ọ tọ dū iphe, e-doję phę ęnya.

¹⁹Ọphu ọ dudu onye ọphu asuje gę ya ria oriri. Mbụ ọphu ọ dudu onye ọphu iphe edoje ęnya kę g'ọ su: "Nta bụ iphe-a, mu hataru ye l'ọku-a; bya egude icheku iya ghee buredi-a; bya egude iya hua anu taa-a; bụ ọphu phoduru nū bę mu e-gude mee ębyi ? Bụ kpukurukpu bę mu a-wata ephozeru?"

²⁰Ọ kwa ńtú bẹ oorije. Ọ bụru obu iya, e dephuru edephu dephuru yẹbedua. Ọ tọ bụdu l'oo-dụ ike adzọ onwiya. Ọphu ọosudu: “? Ọ kwa l'iphe-a, ya gude l'ẹkutara-a bụ iphe, abụdu ọkpobe iphe?”

Chipfu, bụ onye ndzọta kẹ ndu Ízurelu

²¹“Nyatakwa iphe-a; gube Jiékọpu; mbụ gube Ízurelu; kẹle ọ kwa ngu bụ onye-ozu mu. Ọ kwa mu meru ngu dobe; ị bụru onye-ozu mu. Gube Ízurelu; mu ta abyakwa azọha ngu azọha!

²²Mu rwufuwaru emeswe, i mesweru mu. Ọ gbakahụwa g'ẹka igwe rwuchaaru erwurwu; gbakaa ya. Mu bya agbaka iphe-ẹji, i meru mu; ọ tahụ g'iji, kwaru l'utsu atahuje-a. Lwapfutanu mu; kẹle mu gbafutawaru ngu.”

²³Gube imigwe; gūnaa ebvu ẹhu-utso; kẹle o kwa Chipfu mewaru iphe-a! Chia mkpu g'a nūma gube eliphe, nọ igwe lẹ mkpula! Unu watanu agu ebvu; unubẹ úbvú úbvú; mękpoo unubẹ ọswa ọswa; yele iphe, bukpuo oshi, nọ iya nū! Noo kẹle Chipfu gbafutawaru Jiékọpu! O gudewaa Ízurelu goshi ọdu-biribiri iya.

²⁴Wakwa iphe, Chipfu epfu baa; mbụ onye ono, gbafutaru ngu nū ono, bukwa iya pho bụ onye kpuru ngu teke ị nọkwadu l'ẹpho ono. Ọ sūru-a: “Ọ kwa mu bụ Chipfu; onye bụ iya meru iphemiphe dobe. Ọ bụru mu tọsaru eligwe nwẹka mu; ọ dabyiru swoo; bya abukwaru mu pho tọsaru eliphe l'onwomu.

²⁵Ọ kwa mu l'emebyije iphe-ọhumalenya, ẹphe eme; mbụ ndu ono, epfu iphe, mu epfuduru ono. Mu nọdu emejkwapho ndu aphụ ọphulenyā; ẹphe aburu ndu eme eswe. Ọ bụ mu alo-phuje ndu maru iphe azu mee mmamiphe phẹ l'ọoburu iphe, adudu iphe, ọ bụ.

²⁶Opfu, onye ejeru mu ozi pfuru bẹ mu emeje g'ọ dū g'o pfuru iya. Teme teke ndu epfuchiru mu nū pfukwarupho iphe; mu emee ya g'ẹphe pfuru iya; mbụ ndu pfuru opfu ẹhu Jierúsalemū sū l'ee-mechakwaa buru iya eburu ọzo; bya epfukwapho opfu ẹhu mkpukpu lẹ mkpukpu, nọgbaa l'alị ndu Jiuda sū l'ee-mechakwaa kpukwachaa ya; mbụ l'emebyishi ono, e mebyishiru iya ono bẹ ya e-mechakwaa mekwata g'ọ dū g'o shi dū.

²⁷Ọo mu sūru ogbu-mini: ‘Ngwa; tahụ! Mu e-mekwa gẹ mini, nọgbaa lẹ nggele ngu tashihu.’

²⁸Ọo mu pfuru opfu ẹhu Sayirosu sū l'ọ bụ onye echeru mu aturu mu. L'oo-mekota iphe, dū mu l'obu g'o mee. L'oo-sū g'a kpū-phu Jierúsalemū azu. L'ọ byakwapho asu g'a tūa ọkpa-ulo eze-ulo Chileke.”

Azáya 45

¹Wakwa iphe, Chipfu epfu anu onye ono, ọ hotaru g'ọ bụru eze; mbụ Sayirosu, onye ọ lotaru l'ẹkutara gude kwatsushia oha, dū ichiche, byaru iya l'iphu; gude nashia ndu eze ngwogu phẹ gbabẹ phẹ ẹka ọto; gūhashia ụzo gheberu iya onu; k'ọphu a taa gū-chihedu iya agu-chi.

- ²Q sūru-a: Mu e-vuru ngu ụzo je egbuzeru ngu úbvú úbvú egbuze; je agbakwoshia oguzo, e meru l'onwirubvu; bya egbukashia mgborígwè, e gude tụ-chia ụzo.
- ³Mu a-nụ ngu ẹku, e doberu l'ochii; mbụ iphe-enweru, e doberu l'ẹka e domiru edomi. Ono e-me g'i maru ị mu bụ Chipfu bya aburu Chileke ndu Ízurelu; onye ekuje ngu ẹpha ngu gèdegede.
- ⁴Q kwa onye mu eme ele bụ Jiékoṣu ono, bụ onye-ozu mu ono; mbụ Ízurelu ono, bụ onye mu họtaru l'onwomu ono. Q bụru iya meru g'o gude mu kua ngu l'ẹpha; bya eworu okwa, aakwabẹ ùbvù woru nụ ngu l'ẹbe abụ l'i maru onye mu bụ.
- ⁵Q kwa mbèdua bụ Chipfu; oṣhu o dọkwa onye ozo, dụ nụ. Mbụ l'a -gufu mbèdua ta adọkwa Chileke ozo, dụ nụ. Oo mbèdua e-me g'ike dụ ngu l'ẹbe abụ l'i maru onye mu bụ.
- ⁶Q bụru mu -mee ya nno; ndu nemadzu eshita l'ẹka ẹnyanwu awatajẹ jasụ l'ẹka odaje maru l'o tọ dọdu onye ozo, dụ nụ, abudu mbèdua. Q kwa mbèdua bụ Chipfu; oṣhu o dọkwa onye ozo, dụ nụ.
- ⁷Q kwa mbèdua emeje g'ìphóró dụ; bya emee; ochii adu. Q kwa mbèdua emeje g'e nweru ẹku; mu nọdu emejekwapho g'ọla-l'iswi bya. Q kwa mbèdua, bụ Chipfu tukuru iphemiphe ono eme.
- ⁸Gube imigwe, nọgbaa l'ephekerephe; dzenaa apfubekoto gẹ mini! G'urwukpu dzenaa ya yoyoyo! G'eliphe l'ophu saa onu gabala! K'ophu ndzota a-tuko ekameka sweta; apfubekoto atuko ekameka dzuru. Q kwa mbèdua, bụ Chipfu meru iya dobe.
- ⁹Nshio onye etso onye meru iya nụ uswo. Mbụ onye adudu iphe ozo, o bụ gbahaa ite, a kpuru l'urwa. Urwa; ? oojije onye akpu ite su iya: “? Bụ gunu bẹ ikpu?” Iphe, i gude ẹka ngu mee; ? l'oo-nonyasụ ngu l'i mekwaru iya; oṣhu ya enweddu ẹka?
- ¹⁰Aphụ tsoru onye asu nna iya: “? Bụ gunu bẹ o gude i nwua mu egube-a?” Ozoo onye asu ne iya: “? Bụ gunu bẹ i nwuru mu egube owa-a?”
- ¹¹Wakwa iphe, Chipfu epfu baa; mbụ Onye Nso ke ndu Ízurelu; teme o bụru iya bụ onye meru Ízurelu obu dobe. Q sūru-a: “? Unu a-wata mu aji njikpa-onu ị k'unwegirima mu? Tọo ? unu a-nodu aturu mu ekemu gẹ mu e-me iphe, mu gude ẹka mu mee?”
- ¹²Q kwa mbèdua meru eliphe dobe. Mu byakwapho bya emee nemadzu dobe iya. Q kwa ẹka mu bẹ mu gude tosaa imigwe; bya edokaa ya kpokpode kpokpode l'ophu.
- ¹³Q kwa mbèdua meru gẹ Sayirosu futa gude goshi ị mu bụ onye pfuberekoto. Q bụru mbèdua e-me g'uzo, ooshi pfukotaru nhamunha. Oo ya a-kpukwa mkpukpu mu ono mee gẹ ndibe mu, a kpuru ị ndzu nweru onwophe. Oṣhu oomekwa iya g'apfua ya ugwo; ozoo g'e bua ya nggo.” Nokwa iphe, oopfu; mbụ Chipfu, bụ Okalibe-Kakota-Ike.
- ¹⁴Wakwa iphe, Chipfu epfu: “Iphe, e metaru l'alì Ijiputu; mekpoo ngwaswa, shi l'alì Kushi; mekpoo gwagoro-gwagoro ndu ono, shigba alì Seba ono; g'ọ ha a-lwakotaru

ngu; tukoru bukotaru nkengu. Ephe a-tuko etso ngu; awu l'odze awu-pfuta ngu. Ephe abya ephozeta l'iphu ngu rwoahaa ngu arworwo epfu su: 'Tororo opfu bu le Chileke nokwa swiru ngu eswiru. O to dukwa onye ozo, du nu; mbu l'o to dukwa onye ozo, du nu gbahaa yebdua.'

¹⁵Tororo! I bukwa Chileke, anoduje edomi onwiya edomi; gube Chileke, bu onye dzotaru ndu Izurelu.

¹⁶Iphe, bu ndu agwo obvu be ee-me iphe-iphere meru botorii nu phe. Mbu l'ephe a-tuko mehu botorii g'ephe ha tugbua.

¹⁷Obenu le ndu Izurelu bu Chipfu a-dzota phe. Mbu l'adzodo, oo-dzo phe a-buru ojejoje. Ophu a byadu eme unu iphe-iphere; ophu unu abyadu emephe botorii gburu jeye le gbururu."

¹⁸Kele-a; wakwa iphe, Chipfu epfu; mbu onye ono, bu iya meru imigwe dobe. O kwa iya bu Chileke; onye bu iya kpuru mgboko; bya aburu iya meru iya. Oo ya toru okpa iya; ophu o meduru iya g'o nodu iphoro. O meru iya dobe g'e buru iya eburu. O buru iya epfu su: "O kwa mbdua bu Chipfu; ophu o dukwa onye ozo, du nu.

¹⁹Iphe, mu pfuru be mu te epfukwaru le mpya. Mu te ejekwaru anodu l'eka lanu l'ali, ochii agba pfua ya. Ophu mu asukwaru oshilokpa Jiekopu phe g'ephe choo mu kemmanu. Mube Chipfu epfuje okpobe opfu; mu epfuje iphe, du k'epfufu."

²⁰Unu dzukobenu onwunu byakpodapho! Unu nokobe l'eka lanu; unube ndu ono, shi ohamoha tsoru agha phurii ono! Ndu amadu iphe be ephe bu; mbu ndu gworu nshi, a pyiru l'oshi paru aghaphe; ndu epfuje anu iphe, ta adzojedu nemadzu.

²¹Unu pfunaa iphe g'o du; unu byanu edoo g'onwuru unu. G'ephe nokobe chiaru iya idzu. ? Bu onye bu onye pfuhawaru iphe-a teke du enya? ? Bu onye meru g'a maru iya teke duhawaa uzanya-uzanya? ? Tobudu mbdua, bu Chipfu? Ozo bu l'o to duedu Chileke ozo, du nu, abudu mbdua. Oo mbdua bu Chileke, pfuberekoto; bya aburu onye ndzota. O to duedu onye ozo, du nu abudu mbdua.

²²Unu ghanaaru mu iphu; huma l'aa-dzota unu; unube ndu mgboko l'ophu; kele oo mbdua bu Chileke; ophu o dukwa onye ozo.

²³Mu gudewaa onwomu ria angu. Mu gudewaa onu mu pfua opfu onye pfuberekoto. Ophu mu abyadu asu g'o laa azu. Mu pfuru su l'iphe, bu ikpere ndiphe l'ophu e-mechaa rwuchaaru mu ali. O buru mbdua be ndiphe l'ophu e-mechaa gude erije angu.

²⁴"Ephe e-pfu opfu eh mu su: 'Oo Chipfu nweka iya pfuberekoto; bya aburu iya be ike du kpeeku.' Ndu ono g'ephe ha, shi abaru mu hanyihanyi ono l'a-byapfuta mu gude iphere bya.

²⁵Obenu le-a; iphe, bukpo oshilokpa Izurelu l'a-nodu l'eka Chipfu buru ndu pfuberekoto; bya egude Chipfu eku onwophe."

Azáya 46

Agwa ndu Babilonu

- ¹Balụ phozeakwaru; Nebo nọdu ekpuwa ekpukpu. Mbụ lẹ ntẹkpe phẹ ono buwaa onye vu iya nụ bu anụ, evuje iphe. Mbụ l'iphe, o vu anyị iya ntumatu. Teme ọ buru ivu l'ehu nwanu, ike bvuru.
- ²Agwa obu g'ephe ha tukoru ekpu ekpukpu bya atuko phozeta. Ophu ephe adudu ike dzota onwophe. Ochia l'ephebedua l'onwophe be a kpuru le ndzu.
- ³Unu ngabenuru mu nchi; unube onu-ulo Jiékoju; mbụ g'unu ha buru ndu phoduru nụ l'onu-ulo Ízurelu; mbụ unube ndu ono, mu gudeshi eshinu a tsuru ime unu ono; mu nọdu ehe unu eshinu a nwuru unu.
- ⁴Mbukpoo jasụ unu kahụ; ewó tuko unu ishi sweta; be mu bukwapho onye mu bu; mu bukwapho onye gude ndzu unu. Oo mu meru unu; ọ buru mu a-nodu apa unu gelegelee. Oo mu a-nodu edobe unu ndzu; teme ọ buru mu a-nodu agbafutaje unu.
- ⁵? Bu onye be unu a-turu mu yeru? ? Bu onye be unu a-su le mu l'iya ha? ? Bu onye be unu a-su l'ọ kwa onye du egube-a be ọ du g'a turu yeru mu?
- ⁶O nweru ndu evushije mkpola-ododo l'ekpa phe. Ephe achikoo mkpola-ochaa tua atutu l'iphe, aatuje iphe. Ephe eje ebuta onye-uzu mkpola-ododo g'ọ bya egude iya kpataru phe ntẹkpe. A -kpuchaa ya; ephe awata iya abaru eja.
- ⁷Ephe apata iya tua l'ukuvu phe paru iya tugbua. Ephe eje eworu iya kpobe l'eka onodu. O buru eka ono, a kpoberu iya ono be oo-kporu. O to byadu eshi l'eka ono, a kpoberu iya ono kpiberu. Teke nemadzu byaru bya echiku iya le mkpu; ọ to zadu iya enu. Ophu ọ dudu ike adzota iya l'iphe-ehuka, byaru iya nu.
- ⁸Su-a; unube ndu ono, emeje iphe, Chileke suru g'e be meshi ono; unu nyatakwa iphe-a! Unu mekwaa ya g'ọ kwaa unu l'egomunggo! Unu yekwa iya eyeye l'okpoma!
- ⁹Mbu-a; unu nyatakwa akahu iphe; mbụ iphe, shihawaa uzanya. O kwa mu bu Chileke. O to dukwa onye ozo. O kwa mu bu Chileke; ọ to dukwa onye ozo, du ge mu du.
- ¹⁰Mu eshijeepho le mbụ mee g'a maru iphe, a-buru ikpazu iphe. Mbụ le mu anodujero teke ndiche mee g'a maru iphe, eteke medu nu. Mu suru-a: Iphe, mu tberu k'ememe be mu mefutajekwa. Teme ọ buru iphe, du mu ree be mu e-me.
- ¹¹Mu jekporuro l'uzo enyanwu-awawa je ekua enu, erije odzu; bya ejemihu l'ali eka du enya je ekua onye e-me iphe, mu tberu. Iphe, mu pfuru be mu e-me! Iphe, mu chiru idzu iya be mu e-mekwapho.
- ¹²“Unu ngaberu mu nchi; unube ndu ono, okpoma kporu gbengu ono! Mbụ unube ndu ono, apfubekoto kwata du enya ono.
- ¹³Apfubekoto nkemu be mu gudeakwa akpitaru ntse. O to dukwa enya. Ophu ọ dukwa g'oo-no-beru; ndzota mu erwua. Mbụ le mu a-dzota ndu bu l'eli ubvu Zayonu. Mu eworu akpabiri mu nu ndu Ízurelu.”

Azáya 47

Adada Bábilonu

- ¹“Gube nwada Bábilonu; lwakwa alì alì; gwòdoshihukwa l'urwuku! Hakwaa anòdu l'aba-eze je anòdu l'alì; gube nwada ndu Bábilonu! Kẹle e tee kuẹdu ngu nwanyì, du bebebele bya adu nyegenyege.
- ²Pata mkpuma, eegweje iphe wata egwe nri! Phufunu ẹkwa, ì phụ-chiru iphu! Phulinaa uwe ngu aphụ-li; l'ì gbaru ọkpa ọto je erwughashia nggele!
- ³L'aa-gbabekwa ngu ọto; mee g'a huma iphe-iphere ngu. Mu e-melatakwa; ọphu ọ dukwa onye mu a-ha.”
- ⁴Mbu l'onye agbafutaje anyi ono be epha iya bu Chipfu. O bu Okalibe-Kakota-Ike; bya aburu Onye nsọ ke ndu Izurelu.
- ⁵Nodukpoepho nwa nggujungguji! Je anodukpoepho l'eka gbakotaru ochii; gube nwada ndu Bábilonu. Kẹle nta-a be e tee kubaedu ngu eze nwanyì, nwe alì-eze, iche iche.
- ⁶Ndibe mu meru; ẹhu ghuaaha mu egu. Mu turwua ndu ono, bu okiphe mu onoya. Mu woru phe ye ngu l'eka; ọphu ì phuduru phe obu-imemini. I bochaa phe ivu-erwa bochaa me ndibe phe, kahuru akahu.
- ⁷I pfuru su l'ii-buwaruro eze-nwanyì jasù l'ojejoje. Ophu ì ri-vukpodaru iphemiphe-a; ozokwanu chia idzu iphe, e-mechaa mee l'ikpazu iya.
- ⁸Oo ya bu le-a; ngabekpodapho nchi; gube nwophu kporu obu ye l'akpa ntusaru-ehu; mbu gube nwophu arije l'ọ to dudu iphe, byaru eme ngu nu; teme ì nodu asuje onwongu l'owa-a ngu kpoloko du; l'ọ to duedu onye ọzo gbahaa ngu; l'ì ti byadu abu nwanyì, ji iya nwuhuru; ọphu ume nwa abyadu eme ngu.
- ⁹Iphe labo-a a-nwukwaru ngu le ntabu enya lanu. L'ujiku lanu be unwu ngu a-nwushihu; ji ngu anwuhu. Iphe labo ono a-zue ngu pho gburumu pfuurii. I tii metadu iya l'agwugwo; ọphu iigwetadu iya l'ikpoto ngweja.
- ¹⁰Kẹle ì kporu obu ye l'ejo-iphe, inoduje eme. I pfua su l'ọ to dudu onye humaru ngu nu. O buru mmamiphe ngu; yele iphe, ì nwutaru be dephuru ngu nu; mee ngu; ì su onwongu l'owa-a ngu kpoloko du; l'ọ to duedu onye ọzo gbahaa ngu.
- ¹¹Obenu l'ejo-iphe a-nwuru ngu; ọphu imadu eka o shi. Eze iphe-ehuka a-dapfuta ngu; ì tii dudu ike egbobuta iya. Ola-l'iswi a-tu ngu l'upfu; ọphu imadu l'onoo g'oodu.
- ¹²Su-a; mekpokwapho omamanshi ngu g'iime iya! Gwekpokwapho ikpoto ngweja, iigwe; bu iphe, ì shi teke ì bu nwata gweta. ? A maru bu; ì -menyaa ya l'ogbohuru ngu? To ? bu; ì -menyaa ya l'ikpatsu ndzu-agugu?
- ¹³Iphe, bukpuo idzu, a chi-koshiru ngu bu iphe, o meru bu l'ọ tukoru mee; ike kabaa ngu abvubu. Ngwanu ge ndu aphujeru ngu ophulanya kpiritanuru! Mbu ndu ono, anoduje ele enya l'enyanwu yele kpokpode gude akoru ngu g'oo-duru ngu l'onwa l'onwa ono. G'ephe dzonaa ngu l'iphe-a, abyaru ngu anwuru-a!

¹⁴“Ephē dū g'ēs̄wa akpe, kpohuru nkū. Ọ b̄uru ọku e-mechaa kee ph̄e kefu. Ọphu ọ b̄udu l'ephē adūkponu ike adz̄o onwoph̄e; g'ọku ono te nwu phuruphuru kefu ph̄e. L'ẹka-a b̄e icheku ọku k'anyaru ta adūkwa; ọphu ọ dūkwa ọku, a-dū iya nū k'an̄odu l̄e mgboru iya.

¹⁵Nokwa mkpak̄o iphe, ephē e-meru ngu b̄u ono; mb̄u ndu-a, unu l'ephē shi teke ị b̄u nwata seta akanya-a; z̄uta aswa-a. G'ephē ha l'ẹhu l'ẹhu e-shiswek̄otaep̄ho ụzo; ọphu ọ d̄udu g'ọ ka mma l'ọo onye lan̄u, byaru adū ike dz̄oo ngu nū.”

Azáya 48

Ízurelu ada ike

¹Unu ngab̄e nch̄i l'opfu-a; unub̄e ọnu-ulo Jiékopu; mb̄u unub̄e ndu ono, eekujeru laaru Ízurelu ono; mb̄u unub̄e eri Jiuda; mb̄u unub̄e ndu egudeje epha Chipfu eri nte; t̄eme unu n̄odu akp̄o-kuje Chileke k̄e ndu Ízurelu; ọphu ọ d̄udu ọphu unu eme ire-lan̄u; ọphu ọ d̄udu ọphu unu pf̄uberekoto eme;

²mb̄u unub̄e ndu ono, kuru onwunu ndu shi l̄e mkp̄ukpu, dū ns̄o ono; t̄eme ọ b̄uru Chileke k̄e ndu Ízurelu b̄e unu kp̄oru obu yeru; Chipfu, b̄u Ọkalibe-Kak̄ota-Ike; nokwa epha iya b̄u ono.

³Ọ b̄uro teke dū ẹnya ẹnya b̄e mu pfuru iphe, mewaru nū. Mu gudekp̄oo ọnu mu pfua ya; raa ya arara; t̄eme mu mekwaph̄o g'a madzuru iya. A bya l'amaru; mu mee ya; ọ nw̄ua ḡe mu pfuru iya.

⁴K̄ele mu mahawaru g'iidabe ike; mb̄u l'akwara olu ngu b̄u mgb̄orígwe; t̄eme atatiphu ngu b̄uru onyirubvu.

⁵Ọ b̄uru iphe ono meru g'o gude mu pfuhawaru ngu iphe-a teke dū ẹnya; mb̄u t̄eme ọ nw̄uaha b̄e mu vuru ụzo raaru ngu iya arara; k'ọphu ị t̄i s̄udu l'ọo nshi ngu meru iphemiphe ono; l'ọo nt̄ekpe ono, ị pyiru apyipyi ono; ọzoo ọphu ị kpuru l'onyirubvu ono b̄e ọ shi l'ẹka mee.

⁶Ị n̄umawaru iphemiphe-a. Lewa iya r̄o ẹnya! ? Tii kwetadu iya? Nta-a b̄e mu byaru awata ngu egoshi iphe ọph̄úú, b̄u iphe, e domiru edomi, b̄u iphe, ịmadu.

⁷Iphe ono b̄ua nta-a b̄e e meru iya; e te mehaadaru iya ụzenya. Mb̄u l'i tik̄i n̄umaswee ya ab̄udu ntan̄u-a; k'ọphu b̄u l'i t̄i s̄udu l'i machahawaru iya.

⁸S̄u-a; i tik̄i n̄umaswekwaa ya; ọphu ị mahaakwaa ya; eshinu i shi teke ndiche data nk̄uchi. K̄ele mu maru l'i b̄u mebyikp̄oo onye ẹregede; t̄eme iphe, i shikp̄oo l'eph̄o ne ngu zata b̄uru Okwerike.

⁹“Ọ kwa g'ee-shi g'ep̄ha mu apfuru meru g'o gude mu sedekwad̄u ẹhu-eghu mu. Ọ b̄uru g'ee-shi g'a jaj̄e mu ajaja meru g'o gude ọphu mu teke at̄u-koshidu ngu iya; k'ọphu mu te emedu ngu g'ị ch̄ihu.

¹⁰Tii ledu; mu h̄uchaakwaru ngu ah̄ucha; l'ẹbe ab̄u l'i b̄u mkp̄ola-ọchaa. Mu byakwapho ah̄ua ngu l'ọku-uzu, b̄u iya b̄u iphe-ẹhuka.

11 Ọ kwa onwomu bẹ mu emeru iya. Mbụ lẹ mu eme iya emedoru iya onwomu. Kele-a; ? denu gẹ mu e-shi haa g'e woru ẹpha mu tūrwa? Mu te ewokwaru ùbvù, gbaru mu nù aharu onye ọzo.”

Enweru onwonye ndu Ízurelu

12 Ngabẹkpodarú mu phọ nchị gùbe Jiékpọ; mbụ gùbe Ízurelu, mu kuru l'onwomu. Ọ kwa mbẹdua bẹ ọ bụ. Ọ kwa mu bụ onye mbụ bya aburu onye ikpazu.

13 Ọ kwa mbẹdua gude ẹka mu tụa ọkpa mgboko-a l'ophu. Ọ bụru mbẹdua gude ẹkutara mu tọsaa imigwe imigwe l'ophu. Mu -kua phẹ oku; ẹphe atụkoepho zelihi pfuru apfuru.

14 Unu tuko g'unu ha byakọta bya angabẹ nchị. Denu nshi ọphu duru ike pfuaru unu iphe-a; mbụ l'onye ono, mube Chipfu hotaru ono l'e-me iphe, mu tüberu l'ẹhu ndu Bábilonu; mbụ l'oshi ẹka iya bẹ ọ dabẹwaru l'ẹhu ndu Bábilonu.

15 Ọ kwa mu; mbụ l'ọ kwa mu pfuru opfu-a. Ee! Ọ kwa mu kuru iya oku. Ọ bụru mu e-duru iya bya; l'o mee iphe, ọ byaru ememe meghaa.

16 “Unu kpìritaru mu ntse bya angabẹ nchị l'iphe-a. E -shikpọ lẹ mbulembu, mu shi pfuta opfu bẹ mu teke epfuswee opfu lẹ mpya. Teke o mekpọoru lẹ mbụ bẹ mu nọpoho l'ẹka ono.” Nta-a bẹ Nnajiuphu, bụ Chipfu; yele Unme nkiya; yewaru mu gẹ mu bya.

17 Wakwa iphe, Chipfu epfu baa; mbụ onye agbafutaje ngu nù ono, bụ Onye Nso kẹ ndu Ízurelu. Ọ sùru: Ọ kwa mu bụ Chipfu, bụ Chileke ngu; onye bụ iya ezije ngu iphe, a-karụ ngu lẹ ree; bya aburu onye anọduje aturu ngu ẹka l'uzo, ì-nọdu eshi.

18 “Ome ì ngabẹru nchị mee iphe, mu sùru g'e mee; ẹhu-guu gege anọduepho asọru ngu gborogboro gẹ mini asọ asoso. Apfubekoto ngu atụ kpereree g'akpara-mini, atụ l'eze-enyimu.

19 Oshilokpa ngu gege adu igwerigwe g'eja, nọ l'alì. Unwegirima ngu aburu aguta aguta g'unwu akpuru ereshi. ẹpha phẹ ta abyadu achihu achihu; ọphu a byadu emebyishi phẹ emebyishi l'iphu mu.”

20 Unu shikwa lẹ Bábilonu kwafu! Unu gbakwaa ọso gbalaaru ndu Bábilonu! Unu tụa okoo gude pfua ya g'a numa-dzuru! Unu zia nzi g'o rwua ẹka igwe beru alì beru! Iphe, unu e-pfu bụ lẹ Chipfu gbatawaru ndu-ozi iya ono, bụ ndu Jiékpọ.

21 Egu-mini ta agukwaru phẹ teke o duru phẹ ghaa echiegu; mbụ l'o meru; mini shi l'agbara-mkpuma asoshiru phẹ. Ọ gbajaru agbara-mkpuma; mini wata asoshi.

22 “Ndu ẹjo-iphe bẹ ẹhu ta adujekwa guu.” Nokwa iphe, Chipfu eepfu bụ ono.

Azáya 49

Onye-ozi kẹ Chipfu

¹Unu ngaberu mu nchi unube ndu bukube eze-enyimu! Unu numakpodapho iphe-a unube oha, bu l'eka du enya! Chipfu vukwaru uzo kua mu teme a nwua mu. O buru teke mu nokwadu l'epho ne mu be o kuru mu epha.

²O meru onu mu; o nodu atsü nkö g'ogu-echi, a baru ababa; bya eworu mu domia l'ime obochi-eka iya. O meru mu; mu du g'apfu, a rwacharu arwacha; bya eworu mu su-chia l'iphe, ooyeje apfu iya.

³O su mu: “I bukwa onye-ozu mu gube Izurelu. Onye bu ngu be mu e-gude goshi ge mu du-be biribiri.”

⁴Mbedua sukwanu: “Mu seakwaru akanya ola-l'iswi. Mu swishierupho ike mu k'iphoro l'iphe, bu iphe-mmanu. Ole o bu; iphe, rwuberu mu nu bu l'eka Chipfu be o du. Teme obunggo mu buru Chileke mu gude iya.”

⁵O be nta-a Chipfu, bu onye ono, meru mu ro teke mu no l'epho; ge mu buru onye-ozu iya; su: “Duphutaru mu unwu Jiekopu azu. Chikobe unwu Izurelu chitaru mu.” Kele mu bu onye aakwabe ubvu l'enya ke Chipfu; teme o buru Chileke mu bu ike nkemu.

⁶Oo ya bu; o su: “O to bulekwa g'i buru onye ejeru mu ozu duphutaru mu ipfu ipfu unwu Jiekopu azu; wafua g'i dulatakwaru mu pho ndu ke Izurelu, bu nwa ndu ophu mu doberu be i no-doru. Mu e-mekwa ngu pho g'i buru iphoró, duru ndu abudu ndu Jiuda; k'ophu ii-me ge ndzota mu rwua eka igwe beru ali beru.”

⁷Wakwapho iphe, Chipfu epfu; mbu onye ono, bu onye agbafutaje anyi; bya aburu Onye Nso ke ndu Izurelu. Oopfu iya anu onye ono, ohamoha jikaru ajika; akpo-yiru iya ukuvu ono; mbu onye ono, bu onye-ozu ke ndu-ishi. Waa iphe oopfu baa: “Ndu eze e-mechakwaa huma ngu wu-lihu. Ndu-ishi a-huma ngu phozeru ngu.” O buru onye e-me iya nu bu Chipfu; onye ono, apfushije ike l'iphe, o pfuru; mbu Onye nso ke ndu Izurelu, bu onye hotaru ngu nu.

Edophu Izurelu azu l'onodu iya

⁸Wakwa iphe, Chipfu epfu: Oo teke mu a-wata eme eze-iphe-oma be mu a-za ngu enu. O buru mboku, mu a-wata adzota nemadzu be mu e-yeru ngu eka. Mu a-kwakobe ngu mee ngu g'i buru iphe, mu le ndiphe e-gude gbaa ndzu; g'i dopfu ali ono azu l'onodu iya; mee g'ephe keta okiphe ono, shi dabyiru iphoru onoya.

⁹Mbu-a; g'i su ndu ono, a kpuru le ndzu ono g'ephe futa; l'i sukwapfo ndu no l'ochii g'ephe nweru onwophe. Ephe adu g'unwu-aturu, duru ata nri l'aguga gbororo; humachaa nri l'ubvu ubvu, dugbaa kpokoro kpokoro kpokoro.

¹⁰Egu nri ta abyadu agu phe; ophu egu mini agudu phe; ophu okpomoku, shi l'echiegu; ozo ophu shi l'enyanwu ekpoedu phe. O buru onye aphuru phe obu-imemini a-nodu edu phe duru phe shita aguga mini, aso asoso.

¹¹“Mu e-me g'ubvu ubvu, mu nweru buchaaru gbororo. L'aabya atua iphe, bu oji mu mkpoli l'ooha l'eli l'eli.

- 12**Lekwa; ephe e-shigbakwa eka du enya. O duru ndu ophu e-shi l'isheli; ndu eshi l'uzo enyanwu-adada; duru ndu ophu e-shichaa uzo ali Asuwanu.”
- 13**Unube imigwe l'ophu; unu rwua okwe! Gube eliphe; tenaa eswa! Unube ubvu ubvu; unu watanu agu ebvu! Noo kele Chipfu wataru adu ndibe iya obu. Teme o buru ndibe iya ono, shi eje iphe-ehuka ono be oo-phuru obu-imemini.
- 14**Obenu le Zayonu suru: “Chipfu gbadoakwaru mu. Nnajiuphu mu zohaakwaru mu.”
- 15**Ne; ? oozohaje nwa, angu iya era l'obu; mbu ke g'o to phuru nwa, bu iya nwuru iya obu-imemini? O -jekponu azoha be oo-zohakwaa; obenu le mbedua ta azohadu ngu!
- 16**Tii ledu; mu deakwaru epha ngu g'uri l'obochi-eka mu; ophu mu azohajedu igbulu ngu ono azoha.
- 17**“Unwu ngu alwaakwa egwegwa. Ndu ono, shi mee ngu; i buru ochobu ono nodu alufuwaa.
- 18**Palinaa enya ngu imeli lephee mgburugburu! Unwu ngu g'ephe ha anokoakwa alwapfuta ngu. Wakwa iphe, mube Chipfu epfu baa: Eshinu mu no ndzu ge mu no iya-a be ii-mechaa yee phe g'ephe hakota g'onye yeru uwe. Mbu l'ii-gude phe kwaa ngwa ge ngwa nwanyi, aabya alu k'ophuu.
- 19**A makwaru-a l'e shi mebyishia ngu togbo ngu i buru ochobu; ali ngu dabyiru iphoro. Nta-a be i ti sukpoedunu ndibe ngu ebubu. Teme ndu ono, shi mebyishia ngu nu ono nodu ngu uzanya.
- 20**Unwegirima, a nwuru teke ono, iije iphe-ehuka ono e-mechakwapho pfua l'i numa le nchi ngu su: Eka-a paakwaru anyi nwanshii ebubu; chobanaaru anyi ali eka anyi e-buru!
- 21**Noo teke ii-pfu l'okpoma ngu su: “? Bu onye nwushiru mu ikpoto unwegirima owa-a? Mu shi eje iphe-ehuka; teme ophu mu atsudu ime. Mbu le mu shi buru onye a jikaru ajika; a bya akpu mu le ndzu laa ali ndu ohozo. ? Bukwanu onye hefutaru mu unwegirima owa-a? Le mube onye e shi haa; mu nodu nkinyi mu. ? Igwerigwe ndu owa-a shihunu awe?” “
- 22**Wakwa, iphe Nnajiuphu, bu Chipfu epfu baa: “Lenu; mu e-pheru ohamoha eka. Mu e-woru ekwa-ohubama mu paliaru ohamoha. Ephe egude eka phe kulataru ngu unwu ngu unwoke; kworu unwada ngu l'ukuvu kwolataru ngu.
- 23**Ndu eze a-buru nna, ehe ngu nu. Ndu eze-nwanyi aburu ne, ehe ngu nu. Ephe a-nodu ephozeru ngu; bubechaa iphu l'ali. Ephe erichachaa urwuku, du ngu l'okpa. Noo teke ii-maru l'oo mu bu Chipfu; le ndu enya du l'eka mu no be iphere te emedu.”
- 24**? Aa-nata ndu du ike l'ogu iphe, ephe kwaru l'okwata too? Too ? aanafu ndu iwashi ndu ephe kpuru le ndzu?
- 25**Obenu le-a; wakwa iphe, Chipfu epfu baa: “Ee! Ndu a kpuru le ndzu be aa-nafu l'eka ndu ike du l'ogu! Teme l'a nata ndu iwashi iphe, ephe kwaru l'okwata. Ole ndu etso ngu ugu be mu e-tso ugu. Mu adzoo unwu ngu ndzu.

²⁶Ndu emekpa ngu ẹhu bẹ mu e-me g'ẹphe taa anu onwophe. Ẹphe angua mee onwophe jasụ l'ootsuahaa phe ge mee. Noo teke nemadzu l'ophu a-maru le mbedua, bu Chipfu bu onye adzoje ngu nu; bya aburu onye agbataje ngu nu; bya aburu Okalibe ke Jiekoju."

Azaya 50

¹Wakwa iphe, Chipfu epfu: ? Denu ekwo, mu deru nu ne unu gude chifu iya-a? To? bu ndu mu ji ugwo onye ole bẹ mu woru unu ree? O kwa iphe-eji unu kpataru iphe, mu gude woru unu ree. O buru ejo-ememe, unu eme meru g'o gude a chifu ne unu.

²Teke mu byaru; ? bu gunu meru g'o gude ophu o dudu onye no l'eka ono? Teke mu shi eku oku; ? bu gunu meru g'o gude ophu o dudu onye zaru enu? ? Bu eka paru mu mkpurukpu ke ge mu ta agbata unu to? ? Bu ike anafuta unu ta adudu mu to? O kwa mba mmanu be mu abaje; mini atahu l'eze-enyimu. Mu eworu oma nggele mee; l'o buru echiegu. Ema, shi du iya nu ereshihu kele mini ta adudu iya. Egu mini eworu phe gu-gbushia.

³Akpaminigwe be mu eyeje uwe, bu iya bu ochii. Mu nodu achieje iya uwe-aphu g'o kpuchije onwiya.

⁴Nnajiuphu, bu Chipfu nuwaru mu ire ndu nwuru ekwo ge mu maru opfu, mu e-pfuje g'ike du ndu ike bvuru. Ookuteje mu l'utsu g'utsu; l'o bya emee mu echilibe nchi ngabe g'onye eezi iphe.

⁵Nnajiuphu, bu Chipfu ghebechaekwarupho nchi mu onu; ophu mu ekwefujeduru iya ike; ophu mu aladu azu azu.

⁶Mu woru okpurukpu mu doberu ndu echi mu iphe; bya eworu agba mu doberu ndu pheshiru mu

ejí-agba. Ophu mu ewohaduru iphu mu g'a ta chi mu ochi ophu a gbu mu iya onu-mini.

⁷Eshinu Nnajiuphu, bu Chipfu eyejeru mu eka be o to dudu iphere, byaru eme mu nu. O buru iphe ono meru g'o gude mu woru iphu mu kpo gbengu ge mkpuma; teme o doo mu enya l'iphere tee medu mu.

⁸Onye aharu mu enge no mu ntse. ? Bu onye suru g'obyaga aharu mu iphe, mu meru? G'anyi pfunuru dogba iya! ? Bu onye bu onye obu, epfu iphe, o suru le mu meru obu? G'onye obu byanu apfuru mu l'iphu pfua ya!

⁹O kwa Nnajiuphu, bu Chipfu bu onye eyejeru mu eka. ? Bu onye bu onye obu, l'a-bya mu anma ikpe-onwu? Ndu obu a-tuko kahụ g'uwe; o buru mkpu a-takashị phe.

¹⁰? Bu onye l'echilabo unu atsu Chipfu ebvu; teme o nodu emeje iphe, onye-ozu Chipfu suru g'e meje? Mbua-a; g'onye eje ije l'ochii; mbu onye enwedu iphoró, e gude aphu uzo; g'onye ono kporu obu ye l'epha Chipfu! G'onye ono chiru upfu kwee le Chileke iya!

11Obenu nta-a; iphe, bu g'unu ha buru ndu aphu-nwu oku; mbu unube ndu nwuru oku yegbaa l'oroku paru; unu jenu; unu gude iphoro oku unu je ije! Unu gude oroku, unu nwuru oku ye; o nodu enwu; je ije! Iphe, unu a-nata l'eka mu bukwa l'oo l'eje iphe-ehuka be unu a-noduepho!

Azáya 51

Aa-dzota Zayonu ojeje

1“Unu ngaberu mu nchi; unube ndu eme g'unu buru ndu pfuberekoto; mbu unube ndu acho Chipfu. G'anya unu dukwa l'agbara-mkpuma ono, bu eka a kukpofutaru unu ono; mbu le wukirima eka ono, e bvutaru unu ono!

2Mbu-a; g'anya unu dukwa le Ebirhamu, bu nna unu! Wafua le Sera; onye bu iya tsuru ime unu! Teke mu kuru iya bukwa onye lanu be o shi buru. Mu bya ekebe iya l'oma bya emee ya; o du igwerigwe.

3Chipfu te nwedu iphe, e-me g'o to du Zayonu obu; bya egude obu-imemini lee anya l'iswi, yiru iya nu. Ali iya ono, shi buwaru echiogu ono be oo-me g'o du ge Edeu. Ali iya ono, dabyiru iphoro ono adu ge mgbabu Chipfu onoya. Noo teke ehuru a-wata iya atsotso; l'owata ete eswa; l'o keleahaa ekele; guahaa ebvu.

4Unu ngabekpodaaru mu pho nchi; ndibe mu! Unu numakpodapho iphe, mu epfu; unube oha mu! Mu a-tukwaru unu ekemu; mbu l'ikpe, pfuru oto ono, mu ekpeje ono a-bukwaru iphoro, duru ohamoha.

5Mu a-nafuta unu egwegwa. Mbu le mu abyaakwa unu adzota. O buru eka mu be mu e-gude kpee ohamoha ikpe. Ndu bukube eze-enyimu bu mu be ephe a-nodu ele anya l'eka. Teme ephe anodu kwabe; ele anya g'ephe maru iphe, mu e-me l'eka.

6Unu palinaa anya unu lee l'imeli! Unu lenaa anya l'eliphe-a! Igwe e-mechakwaa chihu g'enwuru-oku. Eliphe-a l'ophu anwachaa anwacha g'uwe. Ndu bu iya nu anwushihu g'ijiji. Obenu le ndzota nkemu a-du ojeje. Apfubekoto nkemu taa dadu adada.

7Unu numakpodapho iphe, mu epfu; unube ndu maru iphe, pfuru nhamunha; mbu unube ndu ekemu mu du l'okpoma! Unu ba atsujekwa ebvu l'okonu, nemadzu ako unu; ophu iphu, ophu unu eyejekwa unu ebvu;

8kele nsu e-mecha sukashia phe g'uwe. Eka-ali atakashia phe g'ukpo. Obenu l'apfubekoto nkemu a-no jasul'ojeje. Ndzota nkemu a-no shi l'ogbo sweru ogbo.”

9Tehunu etehu! Tehu etehu yena onwongu okpehu g'uwe; gube oshi-eka ke Chipfu! Tehunu etehu du g'i shi adujehewaa teke k'azu; mbu l'ogbo teke ndiche. ? To bunaa ngu-a bu onye gbubushiru Rehabu mkpirikpu mkpirikpu; mbu gube onye mekaru ejo nwanu-egbudu ono iphe?

10? To bunaa ngu-a bu onye ono, meru eze-enyimu; o tahu; mbu mee; mini, no l'ogbu-enyimu tahu; i woru gbororo togbo l'oma ohulohu enyimu k'ophu ndu ono, a gbafutaru ono wughataru?

11Oo ya bu ge ndu ono, a gbataru ono alwa. Epe aguru ebvu bahu le Zayonu. Ehu-utso ojejoje aburu okpulishi, epe e-kpuru. Ete eswa; yele ehu-utso asopyabe phe asopyabe. Agụ aphụ; yele atsu ude e-gude oso ghata.

12“O kwa mbedua; mbu mbedua gedegede bu onye eyeru unu okpukpu-ike. ? Bu ole be bu ke g'unu nodu atsu nemadzu mmanu ebvu; mbu nwa ndiphe, bu iphe yee ya gba nanu bu eswa;

13ke g'unu zohaa Chipfu, bu onye meru unu; bya aburu iya bu onye tosaru eligwe; o dabyiru; bya aburu iya turu okpa mgboko l'ophu; ke ge ndu rwutaje unu tekenteke egube ono; opfu l'onye eme unu ewere be ehu egu oke egu; mbu onye bu iphe, o shiberu ite iya bu g'o mebyia unu? Kele-a; ? denu oke ehu-eghu onye obu, eme unu ewere obu?

14Ndu ono, a turu mkporo ono l'e-me egwegwa k'ophu ee-me g'ephe nweru onwophe; g'ephe ta nwuhu l'oka; ophu egu nri eme phe.

15Kele o kwa mbedua bu Chipfu; bya aburu Chileke unu; mube onye abujeru: mu -kpakobe mini l'eze-enyimu; akpara-mini iya asua ekiri. Chipfu, bu Okalibe-Kakota-Ike bu epha mu.

16Mu woakwaru opfu mu ye unu l'onu; bya egude obochi-eka mu kpuchia unu. Mbu mube onye ono, bu mu dobegbaaru igwe l'oru iya; bya aburu mu turu okpa mgboko l'ophu; teme o buru mu suru ndu Zayonu-a: ‘Unu buakwaa ndibe mu.’ “

Okoro k'oke ehu-eghu Chipfu

17Tehu etehu! Tehu etehu! Gbalihu agbalihu gube Jierusalemu; mbu gube onye ono, shiwaa l'eka Chipfu nata okoro k'oke ehu-eghu iya ngua; mbu gube onye pataru ipoti mee, emeje ge nemadzu kpoo galagala ngua; ngua urwuku urwuku iya.

18L'ime ikpoto unwu ono, o nwushiru ono ta adudu g'o ka mma l'oo onye lanu letaru iya enya. L'ikpoto unwu ono, o metaru ono be o to dudu me nanu setaru iya l'eka.

19Mkpamehu-a uzi labo-a dapfutawaru ngu; le babu l'o duru onye dua ngu obu. Ola-l'iswi yele mgbu-onwu; okpa-nri yele ogu-echi; mbu-a; ? bu onye a-suje ngu gberuma?

20Unwu ngu kurwuwaru enya. Epe dabyigbaaru l'ishi gbororo ge mgbada, kolahuru l'ugbu. Iphe, zuru phe gburumu pfurii bu oke ehu-eghu ke Chipfu; yele aba mba ke Chileke ngu.

21Oo ya bu le-a; numakpodapho iphe-a; gube onye ono, eemekpa ehu; mbu onye e meru; o nodu akpo garigari l'ebe o ngu mee;

22Wakwa iphe, Nnajiuphu, bu Chipfu epfu baa; mbu Chileke ngu; onye ono, agbajeru ndibe iya odzori ono. O suru: “Tii ledu; mu nafuakwaru ngu okoro ono l'eka bu ophu meru; i nodu akpo garigari. Oke ehu-eghu mu ono, du l'ipoti ono be i tii ngu edu.

²³Mu e-woru iya p̄e ndu ono, an̄u ngu aph̄u ono, b̄u ndu ono, s̄uru ngu-a: ‘Dabyiru kpube iphu l’ali; g’anyi bya eswee ngu godogodogodo!’ I woru okpurukpu ngu mee ali; mb̄u mee ya; ọ d̄u ḡe gbororo, nemadz̄u eshi.”

Azáya 52

¹Tehu etehu! Tehu etehu; ḡube Zayonu! Yena onwongu ọkpehu g’uwe! Yena uwe ngu ono, emeje ngu g’i d̄u biribiri l’anya onoya; ḡube Jierúsalemu, b̄u mkp̄ukpu ono, d̄u ns̄o ono. Ndu ebuduru úbv̄u; ẹp̄he l̄e ndu ono, aas̄o ns̄o ono taa bah̄ubaekwa l’ime ngu ọzo baa.

²Gbalihu agbalihu! J̄ishia urwuku, d̄u ngu l’ẹhu! N̄odu an̄o; ḡube Jierúsalemu! T̄ukufu onwongu ẹgbirigba, a t̄uru ngu l’olu; ḡube ada Zayonu ono, a kp̄uru l̄e nd̄u ono!

³Wakwa iphe, Chipfu epfu baa: “E shi ree unu erere; ọp̄hu a natad̄uru aswa unu. Nta-a b̄e e tee gudekwan̄u okpoga agbata unu.”

⁴K̄ele-a; wakwa iphe, Nnajiuphu, b̄u Chipfu epfu: “L̄e mb̄u b̄e ndibe mu shi laa ali Ijiputu je eburu. T̄eme ndu Asiriya b̄u-wokwad̄u b̄e ẹp̄he shi emekpa p̄h̄e ẹhu.”

⁵Wakwa iphe, Chipfu aji baa: “A -bya l̄e k̄e nta-a; ? ọwa-a b̄uhunu ole? K̄ele ndibe mu b̄e a kp̄taru k̄e mman̄u. T̄eme ndu-ishi p̄h̄e gude p̄h̄e eme iphe-ọchi.” Nokwa olu Chipfu. “T̄eme mkp̄urumkpuru b̄e eepfubyishiẹpho ẹpha mu shi l’utsu jas̄u nchi ejihu.

⁶Oo ya b̄u l̄e ndibe mu a-maru ẹpha mu. Mb̄u l’o -be mb̄oku ono b̄e ẹp̄he a-maru l’o mb̄edua pfuhawaru iya t̄eme ọ nwuje. Ee! Oo mb̄edua!”

⁷Lenu g’oma l’eli úbv̄u ono; mb̄u ọkpa ndu eje abya ezi ozi-oma; ndu ezi ozi nchi-ad̄u-doo; ndu nzi, ẹp̄he gude abya d̄u ree; ndu byaru ezi ozi k̄e ndz̄ota; ndu asuje Zayonu-a: “Ọ kwa Chileke ngu b̄u eze!”

⁸Ngab̄ekpodapho nchi! Ndu nche ngu wolikwaru olu p̄h̄e ewoli. Ẹp̄he t̄ukoru erwu okwe; k̄ele ẹp̄he e-gude ẹnya h̄uma Chipfu teke ọo-n̄odu alwa Zayonu.

⁹Unu t̄uko wata ebvu ẹhu-utso mgbo lan̄u; unub̄e mkp̄okpo iphe, t̄ukoru l̄e Jierúsalemu; k̄ele Chipfu d̄uwaru ndibe iya obu. Ọ gbatawaru Jierúsalemu.

¹⁰Chipfu a-gbab̄e onwiya ẹka ọto l’iphu ọhamoha l’ophu; mb̄u ẹka iya ono, d̄u ns̄o ono; k’ophu aa-h̄umachaa ḡe Chileke anyi e-gude dz̄ota ndibe iya jas̄u l’ẹka igwe beru ali beru.

¹¹Unu t̄ugbua! Unu t̄ugbua! Unu l̄ufu l’ẹka ono! Unu te edenyikwa ẹka l’iphe, aas̄o ns̄o! Unu shikwa l’ẹka ẹp̄he n̄o f̄uta! Unu b̄ukwaru ndu d̄ube ree; unub̄e ndu ono, apajeru iphe k̄e Chipfu, b̄ugbaa iphe, d̄ugbaa iche iche!

¹²Ọle unu ta alakwa gburugburu; ọp̄hu unu agbakwa phuphupu ala; k̄ele Chipfu e-vuru unu ọzo eje. Mb̄u l’o Chileke k̄e ndu Ízurelu l’a-b̄uru onye e-kperu unu azu.

Eje iphe-ẹhuka ȳele ọdu-biribiri k’onye-ozu Chipfu ono

¹³“Lekwa; onye-ozu mu e-mekwa umere onye maru iphe. Aa-pali iya eli; woliam ya ephekerephe; shi nno kutsee ya.

¹⁴G'o gude gbaa ugbugba meru; ekpa-oyi nwua ndu du igwerigwe l'ehu g'ephe humaru iya. O gbachihucharu nchi egube adudu onye gbachihujewaru iya nu; ophu o dukpodaa ge nemadzu ililekpoo.

¹⁵Nokwapho g'oo-du-dzuru oha, du igwerigwe biribiri. Mbụ le ndu eze be oo-kpo onu opfu; kele ephe a-huma iphe, e pfuduru phe; teme iphe, ephe anumajeduru edoo phe enya.”

Azáya 53

¹? Bụ onye kwetaru ozi, anyi ziru? Too ? bu onye be e meru g'o maru g'ike Chipfu habe shii?

²Kele o no iya l'iphu vua g'oshi, rwuru irwu ophuu; mbu g'ogbarabvu-oshi, gbafularu iphe l'ali okponku. O to madu mma; ophu o dudu ubvu l'enya ke g'o gu anyi egu anokube. Mbụ l'o to dudu ugbugba, du iya l'ehu, bu iphe, aasu l'oo ya meru; o nodu agu egu.

³Ndiphe nmaru iya phulaphula bya ajika iya. O bu nwoke, aphu tsoru; bya aburu onye eje iphe-ehuka kwowaru eh; onye ndiphe abujeru: ephe -huma iya; ephe aghaa iphu l'ibiya ozo. Mbụ l'a nmaru iya phulaphula; ophu o dudu iphe, anyi guberu iya.

⁴Tororo opfu bu l'o jeru iphe-ehuka, anyi gege eje; bya evuta aphu gege atsoru anyi. Anyi gbę dobesu l'oo Chileke echi iya iphe; l'oo ya chitsuru iya; anu iya aphu.

⁵Obenu l'e mekaru iya iphe; kele anyi mesweru. Mbụ l'e tsuru iya pyaapya; kele anyi meru ejo-iphe. Aphu, a nuru iya mecharu mee; eh bya adu anyi guu. Teme o buru onya, e chibashiru iya be e gude eme g'ehu du anyi ike.

⁶G'anyi hakota kpaphuakwaru akpaphuhu g'aturu. G'anyi ha l'onye l'onye ghawaru iphu eshi uzo ophu du iya ree. Ole Chipfu woru ejo-iphe anyi l'ophu woru tukobe iya l'ishi.

⁷“A kpapyaru iya ishi bya emekpaa ya eh; ophu o saduru onu pfua opfu. A kputaru iya g'onye kpu nwaturu eje aphupu. O noduepho nggujunguji g'aturu, no l'iphu ndu ebushi iya eji.

⁸E meru iya mkpawere; bya ekpee ya mpfu-gbu; kpuru iya je emegbua. A -bya l'ogbo ke teke nkiya; ? bukwanu onye kpakwanuru ishi? Kele e meru iya; o chihu l'ali ndu dzu ndzu. O buru emeswe, ndibe mu mesweru be e gude chia ya iphe.

⁹E doberu iya ilu l'eka eelije ndu ejo-iphe. O nwuhu; e lia ya l'ilu oke amadu; ole o to wejedoru iwashi; ophu ntuphu-ire adujedoru iya l'onu.”

¹⁰“Obenu l'oo Chipfu be o bu uche iya g'o gwee ya arakabya ono; mee ya g'o jee iphe-ehuka ono. Teme Chipfu bya eworu ndzu iya mee iphe ngweja-apfu-ugwo. Oo-mecha

huma unwu nwanwa iya; bya anodu ndzu ogologo. L'ọ buru l'eka iya be aa-gbe eme uche Chipfu emeshi iya ike.

¹¹O -jechaa iphe-ehuka ono; l'ọ bya ahuma iphoro ke ndzu; ono abya eji iya epho. O buru amaru ono, onye ono, pfuberekoto, ejeru mu ozi a-maru iya ono l'e-me ge ndu du igwerigwe buru ndu aa-gu le ndu pfuberekoto Yebedua evutakwanu ejo-ememe, epe meru.

¹²Oo ya bu le mu a-he iya oke, a heru ndu oke amadu. O buru epe le ndu du ike l'ogu l'e-ke iphe, a kwataru l'okwata; noo kele o miru enya le ndzu iya nwuhu; teme a guru iya yeru ndu ejo-iphe; kele o vutaru iphe-eji ndu du igwerigwe; teme o rwochiru ndu ejo-ememe arworwo.”

Azaya 54

Obu, Chipfu yeru Jierusalemu

¹“Gua ebvu; gube nwanyi, ta atudu ime! Mbụ gube onye teke ezedaswee nwa. Chikpota ebvu! Rwa gerwugerwu; mbụ gube onye ono, ime teke emeswee ono; kele unwu gube nwanyi, dabyiru mgbegere a-kakwa shii eme l'unwu nwanyi alu ji.” Nokwa iphe, Chipfu eepfu.

²Phoribekwaru ulo-ekwa, i bu ebubu g'ọ ka ọsa! Mee g'ekwa, e gude mee ulo ngu obu ha phalaphala; ba lo-phukwa iya azu! Mekwaa g'eri iya kabaa ogologo! Mekwaa g'abara iya kabaa anguru anguru!

³Noo kele ii-mechaa jaa ajaja buru laa l'ekutara buru laa l'ekicha. Awa ngu phe l'a-naphuchaa ohamoha ono azu; je ebuchishichaa mkpukpu phe ono, bugbaa ochobu ono.

⁴Ge ndzu ba agukwa ngu! E tee mekwa ngu iphe-iphere. Ge ndzu ba agukwa ngu k'a nonyaa e kpua ngu iphu le ntu! Kele a ta abyadu eme ngu iphe-iphere. Ii-mecha zohachaa iphere ono, meru ngu teke i bu ogbolanu ono; ophu i byadu anyatabaa mkpatsu aphu, du l'abu onye ji iya nwuhuru;

⁵Kele ọo onye ono meru ngu nu ono bu ji, alu ngu nu. Chipfu, bu Okalibe-Kakota-Ike bu epha iya. O kwa Onye nsọ ke ndu Izurelu ono bu onye gbataru ngu nu. Iphe, eeku je iya bu Chileke ke mgboko l'ophu.

⁶“Kele Chipfu ono e-kuphu ngu azu; g'i bu nwanyi, aalu alulu, a togboru mgbegere; ophu obu adudu iya ree; mbụ nwanyi, a luru teke o bu nwata; ji iya paru iya haa.” Nokwa iphe, Chileke ngu eepfu.

⁷“Mu haru ngu kpoo nwupfu nwanshii; ole mu a-phukwanuru ngu eze obu-imemini gude duphuta ngu azu.

⁸Ehu ghuru mu egbu nwanshii. Mu woru iphu mu domiaru ngu kpoo nwupfu nwanshii. Obenu le mu e-ye ngu obu ojejeje gude phuru ngu obu-imemini.” Nokwa iphe, oopfu; mbụ Chipfu, bukwapho onye agbafutaje ngu.

⁹“L'èhu nkemu bẹ ọwa-a dukwaa gẹ teke kẹ Nuwa, bụ teke mu riru nte sụ l'utso, du teke ono taa dūbaedu lẹ mgboko ọzobaa. Nta-a bẹ mu riwaru nte sụ l'èhu tee ghubaèdu mu eghu l'opfu èhu ngu; ọphu mu ababaèduru ngu mba ọzo.

¹⁰O -betakpọ úbvú l'opfu nmakọta jijijijii; a pashia obvu obvu, l'èka ẹphe nọgbaa; bẹ n-yemobu ojejoje ono, mu yeru ngu ono ta apongakwa aponga; ọphu ọgbandzu èhu-guu nkemu ono egbukahukwa egbukahu.” Nokwa iphe, oopfu; mbụ Chipfu ono, aphuru ngu obu-imemini ono.

¹¹Gube mkpukpu ono, eje iphe-èhuka ono, oke pherephere enwunga; ọphu ọ dudu onye agbaru ngu mkpu; mu e-gude mkpuma, amashi mma ike kpụ-phu ngu azụ. Mu egude mkpuma sáfàya tụ-phu ọkpa-ulo igbulọ ngu azụ.

¹²Mu e-me g'eli igbulọ ngu ono g'ọ ha bukotaru mkpuma rubi. Mu egude mkpuma, aphụ ngerengere, gude kpua onu-abata ngu; gude mkpuma, vu oke aswa kpukota igbulọ ngu l'opfu.

¹³Unwegirima ngu g'ẹphe ha bụ mube Chipfu e-zi pẹ iphe l'onwomu. Teme unwu ngu bẹ èhu a-dukpoo guu mebyi adudu.

¹⁴Ee-me g'i nguru anguru l'uzo, pfuru oto. O tọ dudu onye byaru eme ngu mmegbu; ọphu ọ dudu iphe, byaru eme ngu g'i tsua ebvu. Ndzu-agugu bẹ ee-wofu l'èka i nọ je edobe ụzenya; ọphu ọobyadu ngu ntse ililekpoo.

¹⁵O -nweru onye tsoru ngu opfu; ọ tọ buduru mu bẹ o shi l'èka. Onye etso ngu opfu bụ: o -mechaa l'o yeru ngu ẹka l'alì.

¹⁶“Tii ledu; ọ kwa mbedua meru onye-úzu ono, anmajẹ eko l'icheku jasụ l'o nwuhu ọku ono; gude iya kpua ngwa ọgu l'ọ dū k'egude alwu ọgu. Teme ọ bukwarupho mbedua meru onye mmebyi g'o mebyishia iphe.

¹⁷O tọ dukwa iphe, a kpuru g'e gude meka ngu iphe, byaru evujeru ire. Teme iphe, bukpuo onye ebo ngu ibo bẹ ire a-gwoje ẹji. Nokwa iphe, ndu-ozì kẹ mube Chipfu eketa l'èka mu. Teme ọ bukwarupho ono bụ ọdzori; mu nọdu agbaru pẹ iya.” Nokwa iphe, Chipfu eepfu.

Azáya 55

Oku, eeku ndu mini agụ

¹Unu gebekwa-o! G'iphe, bukpuo onye mini agụ byakwa anguta mini! G'onye enwedu okpoga byakwa azua nri ria! G'ọ byakwa agata mee; zuta era-eswi, e gudedu okpoga azu; ọphu ọ dudu aswa.

²? Denu g'o gude unu nọdu emebyishi okpoga l'iphe, abudu nri; teme unu nọdu ese akanya l'iphe, tee jidu ẹpho? Unu ngabekwa; unu ngabekpodaru mu pho nchi; g'unu eria iphe, du ree; mbụ g'unu eria nri, kachaa aburu ọkpobe nri.

³“Unu ngabẹ nchi! Unu kpiritaru mu nụ ntse! Unu numakpodapho iphe, mu epfu; k'ọphu unu a-nọdu ndzu. Mu l'unu a-gbakwa ndzu ojejoje. Ono buru iphe-oma, mu

kweru Dévidi ukwe lẹ mu e-meru iya; tẹme mu buru onye apfushije ike l'iphe, mu kweru ukwe iya.

⁴Lewarọ; mu meakwaru iya g'ọ buru onye a-nọdu agba ndiphe ekebe; g'ọ buru iya a-buru ishi; mẹ onye a-nọduje aturu ndiphe iphe, ẹphe e-me.

⁵Lewarọ; ọha, i madu ndu ẹphe bu bẹ ii-kukwa oku; ẹphe egude ọso byapfuta ngu; l'ọ bukwaru ọha, amadu ndu unu bu. Ọ buru onye a-kpa iya nu bu Chipfu, bu Chileke ngu; mbu Onye Nso ke Ízurelu; kele o doziwaru ngu; i du akpabiri.”

⁶Chonaa Chipfu teke ii-huma iya! Rakua ya teke ọ nokwadu ntse!

⁷G'onye ẹjo-iphe haa uzo ono, ootso ono; onye ọkpoma mgbashi ahaa ẹjo oriri iya. G'onye ono lwapfuta Chipfu huma l'oo-phuru iya obu-imemini. Mbu-a; g'onye obu lwapfuta Chileke anyi; kele ọo-guru iya nvu ke mmanu.

⁸“Oriri mu ta abukwa oriri ngu; ọphu ọ budu g'iimeje bu ge mu emeje.” Nokwa iphe, Chipfu eepfu.

⁹Ọ kwa g'igwe du-be ali ẹnya-a; bu g'iphe, mu emeje du-be ẹnya l'iphe, iimeje. Ọ buru g'oriri mu du-be oriri ngu ẹnya.

¹⁰Ọ kwa ge mini; yele aka-mini-sunoo eshije l'igwe dzee; ọ to laphuḡedu iya azu; abudu l'ọ gbaru mini l'eliphe-a; mee ya l'ọ gua egugu fushiaha iphe l'ali; k'ọphu ọo-mitaru ndu akọ iphe akpuru-iphe; tẹme ndu eri eriri enweru iphe, ẹphe e-ri;

¹¹nokwa g'opfu, shi mu l'onu du bu onoya. Ọ to gbakwaru ẹka alwaphutaru mu azu. Ọ chia iphe, oo-me bu iphe, bu obu mu; mbu mee iphe, mu ziru iya g'ọ je emee.

¹²“Unu e-gude ẹhu-utso lufu; l'eeduta unu dufu l'ẹhu-guu. Iphe, bu ubvu ubvu aswokobe wata agu ebvu l'iphu unu. Nokwapho g'iphe, bukpo oshi, nokota l'egu a-nodu akukota ẹka.

¹³Ọ -beta g'ogarambo fushia; oshi payinu efushichia. Ọo lashia ọphu ọbyambvu e-fushi; oshi mituru efushichia. Ono a-buru iphe, Chipfu e-gude zaa ẹpha; kele ọo-buru iphe-ọhubama, a-du ojejoje; ọphu a byadu emebyi iya emebyi.”

Azáya 56

Aa-dzotakwapho ndu ọhozo

¹Wakwa iphe, Chipfu epfu: “Unu kpeje ikpe, pfuru nhamunha; unu emeje iphe, pfuru oto; kele teke mu a-dzo nemadzu dukwaa ntse; tẹme apfubekoto nkemu ta adukwa g'ọo-nọ-beru l'e kpuhaa ya goshi.

²Onye a goru onu-oma nu bẹ bu onye eme iphe-a; mbu onye gudeshiru iya ike; onye doberu eswe-atuta-unme nsọ; ọphu ọturwujedu iya; bya eselaje ẹka iya g'ọ to du ẹjo-iphe, oo-meta.”

³G'ọ to dukwa onye shi eshishi bya atugbabe onwiya l'ẹhu Chipfu, a-su lẹ Chipfu agufu iya lẹ ndibe iya. Ọphu ọ dukwa onye te eyedu ime a-su lẹ ya bu oshi, kpohuru nkụ nọdu;

⁴Kele-a; wakwa iphe, Chipfu epfu baa l'ehu onye te eyedu ime, bu onye ophu edobeje eswe-atuta-unme iya nsọ; mbu onye ophu ahataje eme iphe, du Chipfu ree; teme o nodu egudeshije ogbandzu iya eka:

⁵“O kwa phe be mu a-nu iphe nkomepha l'ime eze-ulo mu. Mu agukwaa phe pho epha, l'a-ka l'a nwutaru unwegirima. Mu a-gu phe epha, a-no jasu l'ojejoje; ophu oochihudu echihu.”

⁶Teme ndu ono, shi eshishi ono, bu ndu woru onwophe tugbabe l'ehu Chipfu g'ephe jeeru iya ozi ono; g'ephe yee epha Chipfu obu; teme epe abakwaru iya pho eja ono; iphe, bu ndu ono, doberu eswe-atuta-unme nsọ; ophu epe aturwuduru iya ono; ndu ono, noshiru ike l'ogbandzu yepe epe ono be Chipfu epfu su:

⁷“Oo ndu ono be mu e-gude je l'eli ubvu mu ono, du nsọ ono. Mu emee g'ehu tsoo phe utso l'ulo, eepfuje anu mu. Ngweja-akpo-oku phe; yepe ngweja ozo, epe gude abyapfuta mu be aa-natachaa l'oru-ngweja mu. Noo kele iphe, ee-ku ulo mu bu ulo, ohamoha a-noduje epfu anu mu.”

⁸Nnajiuphu, bu Chipfu epfukwa su-a; mbu onye ono, aachilata ndu Izurelu ono, a kpuru le ndzu ono: “Mu a-chilatabakwa ndu ozo bya eyeru phe; a -gufukwaro ndu ophu mu chilatawaru.”

Iphe, Chileke epfu le ndu ejo-iphe meru

⁹Unu byakwa; iphe, bukpo anu, bu l'egbudu l'ophu! Unu bya atapyashia iphe; unube anu, bu l'oswa l'ophu!

¹⁰Ndu nche ndu Izurelu atsukwa ishi. Epe ta adudu iphe, epe nwutaru. Epe bukota nkuta, no nggujunguji. Epe ta agbodu ire. O buerupho nrwọ be epe azeshije arwo. Mbu l'iphe, aduje phe ree buerupho mgbenya.

¹¹Epe bu nkuta ughoro; ndu epho te ejijedu ejiji. Epe bu ndu eche aturu; buru ndu iphe te edojedu enya. G'ephe ha atukoje gha iphu l'uzo k'eka phe. G'ephe ha acho iphe, epe e-rita l'urwu.

¹²Epe nodu atukoje su: “Unu bya g'anyi je agata mee! G'anyi ngua mee, atsu atsutsu g'o ji anyi! Echele a-dulekwaa ge ntanu. Mbu l'oo-gbenu ka ree okpobe akaka.”

Azáya 57

¹Onye pfuberekoto abujeru; o -nwuhu; o to dudu onye oorwu l'ehu. Teke a kputaru onye obu-imemini je egbua; o to dudu onye oodo enya. Iphe, te edojedu enya buru l'edufu ono, e dufuru onye pfuberekoto ono bu g'ejo-ememe te erwu iya eka.

²Iphe, bukpo onye eme iphe, pfuru oto l'abujeru; o -nwuhu; l'o zee guu wata atuta unme.

³Obe l'unubedua; unu byakpodapho l'eka-a; unube unwu ndu agba eja! Unube eri ndu eri ogori yepe ndu agba ukpara ono!

⁴? Bụ onye bẹ unu gude eme iphe ọchi? ? Bụ onye bẹ unu aphushiru ụgbonu ahashiru ire? Unu bukwa unwu, ndu ono, l'ada ike nwushiru ono; mbụ awa ndu adzuje ụka!

⁵Unubẹ ndu ọonoduje anma ẹhu anmanma agwa iphe l'upfu achi; mekpoo l'upfu iphe, bụ oshi, jaru àjàjà! Unubẹ ndu ejeje lẹ nsuda nsuda je anọdu egbushi unwu unu gude agwa iphe lẹ mgbaka ọgba agbara-mkpuma!

⁶Ọ bụru nshi ono, nọ l'echilabọ mkpuma, akwọ teretere, nọ lẹ nsuda bụ okiphe unu. Ọo ya bẹ ọ bụ. Mbụ l'ọo ya bụ iphe, unu ketarụ. Ee! G'ọ bụ iya bẹ unu agbaru mee gude agwa; bya egude iphe, unu metaru l'egu unu gude agwa iya. ? Bụ unu -nọdu eme iphemiphe ono; unu asụ gẹ mu palia pazeta tọo?

⁷Unu jeru je eworu iphe-azẹe unu gbaa l'eli eli úbvú, ha l'eli. Ọ bụru ẹka ono bẹ unu nyihuru je anọdu agwa iphe unu.

⁸L'abata-aghachi ọlo mẹ l'azu-mgbo ọlo unu bẹ unu dobechaaru ọbvụ unu. Unu jịka mu bya eworu iphe-azẹe unu ghebe ọnu; mbụ nyihu iya ghebe iya karaphongu. Unu lẹ ndu ono, unu yeru iphe-azẹe pẹ obu ono gbaa ndzụ. Unu je anọdu ele iya ẹnya l'ẹka ọ gba ọto.

⁹G'unu jiru manụ, eshi kwekweekwee bya egude manụ olivu jee l'agwa, bụ Moleku; bya ezia ndu nọ-chiru unu; ẹphe jee l'ọbvụ l'ẹka dụ ẹnya ẹnya; mbụ jerwuchaa alị-maa l'onwiya.

¹⁰Unu mee iphe ono, unu eme ono jasụ ike bvụ unu. Ọphu unu adukwapho ike sụ l'iphe-a ta adukwa iphe, ọ bụ. Ọ gbẹ anọduje adu unu obu; ọphu ike iya abvujedu unu abvubvu.

¹¹“? Bụ onye bẹ ndzụ iya shi agụ unu; mbụ onye unu tsuru ebvu k'ọphu unu wataru adzuru mbedua ụka? Ọphu unu anyataduru mu anyata ọphu; ọphu ọ bụro kẹ g'unu jekpoo ya ariri l'obu unu? ? Tọbodu l'ọle mu shi teke-a gbata nkuchi meru g'o gude ọphu unu atsudu mu ebvu?

¹²Mu e-me g'a maru g'unu bụ-be ndu pfulberekoto; yele iphe, unu emegbabe; ọphu ẹphe abyakwa abarụ unu urwu.

¹³Gẹ ribaribariba ọbvụ ono, unu gwoshiru dobe ono dzowaro unu! Ọo pherephere a-tuko g'ẹphe ha pata pafu; mẹ unu -wata o-ji-l'ẹka-togbo. G'ọ bụ pherephere a-tuko iya pata paphua; mbụ l'ọo unme, a turu atutu a-patakota iya paphua apaphu. Obenu l'onye gbabarụ l'ime mu je anọdu ezeru ndzụ bụ alị-a l'a-buru okiphe iya; teme l'ọ bụru iya e-nweru úbvú, dụ nsọ mu onoya.”

Aadụ ndu izimanụ lwarụ azụ obu

¹⁴Ee-mecha sụ: “Unu kpunaa ya; unu kpunaa ya; unu dozinaa ụzo! Unu wofuchaa iphe, a-nọ-chi ndibe mu ụzo.”

¹⁵Kele-a; wakwa iphe, onye ono epfu; mbụ onye ono, ha shii; teme e kutsee ya ephekerephe; mbụ onye ono, nọ ndzụ ojejoje; onye ẹpha iya dụ nsọ: “Eka mu bu bukwa ẹka dụ l'eli bya aburu ẹka dụ nsọ. Teme mu bukwapho l'ẹka o bu; mbụ onye

izimanu iphe-eji iya lwaru azu; bya ewoze onwiya ali; ge mu mee g'obu gu-zeta onye wozeru onwiya ali; mu emekwapho g'obu gu-zeta onye izimanu iphe-eji iya lwaru azu.

¹⁶Mu taa noduadaro l'epfu iphe, e meru mu jaswaruro ya; ophu ehu a-noduadaro egbu mu egbu; odumeka be ndzu nemadzu a-dukwa nyegenyeghe l'iphu mu; mbu unme nemadzu, bu mu gude eka mu mee ya dobe.

¹⁷Iphe, shi ghua mu egbu bu ughoro ono, shi paa eka l'ehu iya ono. Mu hua ya ahuhu; woru iphu wohaaruru iya l'eka ehu egbu mu egbu. O nodu emekwapho iphe, o lekeberu enya eme.

¹⁸“Mu humaakwaru iphe, ephe emeje. Ole mu e-me g'ephe wekorohu. Mu e-du phe l'onwomu mee g'obu nmapfuru phe.

¹⁹Mu e-me g'ajaja du l'ogbogboromonu ndu ono, agu aphu le Izuru ono. Ehu-guu dukwaru ndu no enya me ndu no ntse; ozo bu le mu e-me g'ephe wekorohu.” Nokwa iphe, Chipfu eepfu.

²⁰“Obenu le ndu ejo-iphe du g'oke-enyimu, atu akpara, ata atutajedu unme atuta, bu ophu akpara-mini iya anoduje atsushi urwukutu ye epuchi.

²¹Ndu ejo-iphe be ehu ta adujekwa guu.” Nokwa iphe, Chileke mu epfu.

Azaya 58

Okpobe aswiri Chileke egu

¹“Chia ya le mkpu g'a numa! B'eselakwa olu azu! Wolia olu chia mkpu, a-da g'eka eegbu opu! Karu ndibe mu l'ephe kwefuru mu ike; li karu onu-ulo Jiekopu iphe-eji phe.

²Ole ephe anoduje achu mu mboku-mboku. Ephe -nodu ephe eme g'ogu phe egu amaru uzo mu. Ephe eme g'ephe bu oha, anoduje eme iphe, du nhamunha; g'ephe taa jikadu eme iphe, Chileke phe suru g'ephe meje. Ephe nodu asuje ge mu pfua iphe, pfuru nhamunha mu e-meru phe. O nodu agu phe egu ge mube Chileke kpitaru phe ntse.”

³“Ephe -nodu ephe asu: ‘? Banaa gunu meru g'o gude anyi nodu aswi egu epfu anu Chileke; ophu Chileke ahumaduru iphe anyi eme? ? Banaa gunu meru g'o gude anyi wozechaa onwanyi ali ophu o rwuduru Chileke l'ehu?’ “Ole mboku ono, unu aswi egu epfu anu mu ono be bukwa iphe, du unu ree be unu anoduje eme; mbu erichaa me ndu ejeru unu ozi urwu.

⁴Aswi egu unu bukwa iphe, unu egudeje kpochia ya ishi bu aba mba ye ese opfu; ye egude iwashi echi nwibe unu gbaagbaa. Udu aswi egu ono, unu anoduje aswi ono tee mekwa ge mu nodu l'imigwe numa olu unu.

⁵? Bu egube aswi egu ono be mu hataru too; mbu g'o buerupho le nemadzu wotaru ujiku lanu woze onwiya ali? ? Bu iphe, o bu bu ephuru yoo g'eswa ekperema; ye aze

l'uwe-aphu; yele aze le ntu? ? Bu iphe ono be iiku aswiru Chileke egu; l'eswe, du Chipfu ree?

⁶“Wakwa udu aswi egu, du mu ree baa: Unu gbütoshia egbirigba, unu turu ndu unu eme omeliwe! Unu abya atoshikwapho eri odogoro, unu yeru ndu unu akpa ehü; haa phe g'ephe nweru onwophe! Unu atuko odogoro ono nyakwoshia anyakwoshi!

⁷Iphe ozo, o bnfua bu g'unu l'onye egu agu gbaru mgba le nri ngu! Unu abya achooru ndu akpa nri, enwedu ulo aka phe e-buru. Unu -huma onye gba oto; unu anmabe iya iphe! Ophu unu ewofukwa iphu l'ehu onye unu l'iya bu mee lanu!

⁸“Noo teke iphoro unu e-nwu phoo g'iphoro nchi-abohu; ewekorohu unu emee phuruphuru. Noo teke apfubekoto unu e-vuru unu uzo; unu etso iya etsotso. Odu-biribiri ke Chipfu aburu iphe, a-nodu etso unu l'azu.

⁹Noo teke unu e-ku oku; Chipfu aza unu enu. Unu echia o-ji-l'eka-togbo; l'o su unu le ya no-a. “O -buru l'unu a-toshi eri odogoro ono, unu yeru ndu unu akpa ehü ono; bya ahaa amaru nemadzu ejo aka ono; hakwapho epfu ejo-opfu;

¹⁰O -buru l'unu a-wata anu ndu egu agu nri; wata emeru ndu eeme ewere mkpa phe; be iphoro e-nwuru unu phoo l'eka ochii agba; enyashi adu unu g'echi eswe.

¹¹Oo-buru Chipfu a-nodu edu unu mkpurumkpuru. L'o meeru unu iphe, bu mkpa unu l'eka kporu gbengu; mekwapho g'okpu shihu unu ike l'ehu. Unu abya adu ge mgbabu, a gbaru mini ree; g'ogba, ta anwu-buhujedu shokoshoko anwu-buhu.

¹²Ndibe unu akpukwaa akahu ulo ono, shi dakposhihuwa nu ono; bya akpu-lia akahu okpa-ulo ono, shi le ndiche ono. L'e kuahaa unu: ‘O-kpukwa-mkpokpo-igbulu’; yele ‘O-kpukwa-ulo-l'aguga-oji’.”

Obunggo, ee-bu onye doberu eswe-atuta-unme

¹³“Unu -chifukpowaa okpa unu l'emebyi eswe-atuta-unme; ophu unu emejeedu g'o du unu l'eswe, duru mu nsu ono; unu -gubekpowaa eswe-atuta-unme iphe; mbu-a; unu -kua eswe ono, duru mube Chipfu nsu ono eswe aakwabe ubvu; o -buru l'unu doberu iya iche; ophu unu ahatajedu enu aka unu; ophu unu emedu g'o du unu; ophu unu epfudu okorobo opfu;

¹⁴noo teke unu a-nodu Chipfu l'ehu wata ete eswa. Teme o buru l'eka kachaa ephekerephe l'eliphe be mu e-me g'unu ngakojeru tua okoo. Unu eketa okiphe, shi le nna unu ono, bu iphe Jiekopu; o buru iya be mu e-gude azu unu.” Nokwa onu, Chipfu yeru.

Azaya 59

¹Tororo opfu bu l'eka Chipfu ta adukwa tsokpuru ke g'o to dzota nemadzu. Ophu nchi echihukwaru iya echihu g'o to numa iya iphe.

²O chia ejo-ememe unu dokaharu unu le Chileke unu. Oo iphe-eji unu meru; o wofu iphu l'eka unu no; k'ophu bu l'o to nuedu olu unu;

³Kele ẹka unu bẹ mee ọchi turwuwaru. Mbụ lẹ mkpushi-ẹka unu rwukatawaru ẹjo-
iphe. Ogbogboromonu unu dzuwaru ụka; teme unu nọdu atụ ẹjo opfu kẹ tootoo.

⁴Ọ tọ dudu g'unu ha onye ọphu epfu g'e kpeje ikpe, pfuru ọto. Ọphu ọ dudu onye
edoje opfu iya ire-lanu. Ẹphe achijeru ọpfun kwẹ lẹ mkpokoro opfu, adzushi ụka.
Ẹphe nọdu atsutaje ime nchoko-opfu nwua ẹjo-iphe.

⁵Iphe, ẹphe ekpuje ekpukpu kputa iya nwa buru ẹkwá ogiji. Teme ọghú, ẹphe agbaje
buru ọghu udude. Iphe, bụ onye taru ẹkwa iphe phẹ nwuhufutaje. Teke ọ dukwanuru
ọphu tukpohuru nụ l'ọ vua nwa ogiji.

⁶Udude, ẹphe kweru ta adukwa k'akpa uwe. Ọphu ẹphe egudekotadu iphe, ẹphe gude
ẹka phẹ mee gbobuta onwophẹ. Iphemiphe, ẹphe eme bukota ẹjo-iphe. Ọ buerupho
iphe ike iphe ike aduje phẹ l'ẹka.

⁷Okpa phẹ ekwoje gburumu bahu l'eme iphe-ẹji. Ọphu egbu onye adudu iphe, o meeru
adudu iphe, ọobujeru phẹ. Ọriri phẹ bukota ẹjo ọriri. Mkpurupyata yẹ ọla-l'iswi buru
iphe, anọduje egoshi ụzo, ẹphe shiru.

⁸Uzo, eeshije; nchi-adu-doo bẹ ẹphe ta amadu. Ọphu ikpe, pfuru ọto adudu l'uzo, ẹphe
eshi. Ẹphe tukowaru iya mee; ọ bukotaru ụzo, dū nggodogo nggodogo. Ọphu ọ dudu
onye eshi iya nū, byaru amaru iphe, bụ nchi-adu-doo.

Ndu Izuru ẹpfushi iphe-ẹji, ẹphe meru

⁹Ọo ya bụ l'ikpe, pfuru ọto nọ anyi ẹnya. Ọphu apfubekoto erwuduru anyi ẹka. Anyi
leru ẹnya iphóró; iphemiphe bukotaru ọchii. Anyi lee ẹnya g'iphè gbuchafu
egbuchafu. Obenu l'ẹka anyi nọ aghaphe bụ oke ọchii.

¹⁰Ọ buru gẹ ndu atsụ ishi anọduje aduda ẹka-a bụ g'anyi aduda ẹka l'igbulọ. Mbụ gude
ẹka achọ ụzo anyi gẹ ndu enwedu ẹnya. O -be l'echi eswe; anyi evuko iphe evuko g'ọ
bụ echi abali. Teke anyi nọ l'echilabọ ndu ike dū; anyi aduepho gẹ ndu nwuhuru
anwuhu.

¹¹Anyi atukoje aba hanyihanyi g'oke-ẹjo-nkuta-ọswa; atsuru ntsuru gẹ ndo. Anyi lee
ẹnya ikpe, pfuru ọto. Ọphu ọ dudu ọphu rwuru anyi ẹka. Anyi lee ẹnya g'a dzọo anyi.
Adzota duro anyi ụzenya ụzenya.

¹²Ọ buru iphe, kparu iya nū bụ l'iphe-ẹji anyi paru ẹka l'iphu ngu. Ọ buru iphe-ẹji anyi
agba anyi ekebe. Emeswe, anyi mesweru ngu adujeepho anyi l'egomunggo. Teme
anyi maru ẹjo-iphe, anyi meru ree.

¹³Anyi mesweru Chipfu; teme anyi nọdu ejephe iya. Mbụ l'anyi woru azu ghaaru
Chileke anyi. Opfu, eshije anyi l'onu afushi buerupho eme ewere; yele agirigo;
mekpoo adzu ụka, bụ ọphu tukoru anyi obu sweta.

¹⁴Ọo iphe ono meru g'ọ gude ọphu e kpeedu ikpe, pfuru ọto. Apfubekoto pfururo
ụzenya ụzenya. Ire-lanu dawaa kpoo mkpomishaku l'oma gbororo. Ọphu abụ onye
okpobe opfu adudu ike batakpọnu abata ọphu.

¹⁵Ire-lanu bẹ ta adudu ẹka a humaru iya. Onye jeru g'o zehuru ẹjo-ememe l'a vua ya kpatakpata. Noo ya bu ẹ Chipfu elee ya ẹnya; ọ du iya ẹji; kele ikpe, pfuru oto ta adudu.

¹⁶Ọ huma l'ọ to dudu onye du nu. Mbụ-a; ọ nyia ya ẹhu kpala l'ọ to dudu onye gbaa mkpu, du nu. Ọo ya bu; o gude ẹka iya dzoo ya l'onwiya. Teme ọ buru apfubekoto nkiya sederu iya.

¹⁷Ọ bya eworu apfubekoto mee uwe-igwè onye eje ọgu chibe l'okpoma; bya eworu adzota kpuru l'ishi g'okpu-igwè. Ọ bya eyee agwata ugwo-iphe g'uwe; bya eworu iphe enwu oku l'obu gbaphua onwiya g'onye gbaphuru ẹkwa.

¹⁸Ọ buru g'iphe, ẹphe meru gbaru bu g'oo-gude pfua phe ugwo. Mbụ l'oo-tu-koshi ndu ohogu iya oke ẹhu-eghu iya. L'ọ bya agwata ndu opfu iya ugwo iphe, ẹphe meru iya. L'ọ bya apfua ndu bukube eze-enyimu iphe, rwuberu phe nu.

¹⁹Ọo ya bu ge nemadzu atsuhaha ẹpha Chipfu ebvu jasuchaa l'uzo ẹnyanwu-adada. Ẹphe eshikwapho l'uzo ẹnyanwu-awawa akwabẹ ọdu-biribiri iya ubvu; kele oo-tu kpereree bya g'utso; ọ buru unme ke Chipfu a-nođu adube iya ikike.

²⁰Onye agbafutaje anyi a-bya ubvu Zayonu; mbụ byapfuta oshilokpa Jiékọpu, bu ndu izimanu iphe-ẹji phe lwaru azu. Nokwa iphe, Chipfu eepfu.

²¹Wakwa iphe, Chipfu epfu baa: “A -bya l'ẹhu mube Chipfu; wakwa ogbandzu mu l'ẹphe baa: Unme mu, bu ophu no ngu l'ẹhu; yele opfu mu, bu ophu mu yeru ngu l'onu ta abyakwa abvu ngu l'onu; ophu oobvudu l'onu unwu ngu; ophu oobvudu l'onu oshilokpa phe e -shi nta-a jasụ l'ojejoje.” Nokwa iphe, Chipfu eepfu.

Azáya 60

Zayonu e-mechaa du akpabiri

¹Gbalihu agbalihu! Wata egbu nwjinwii; kele iphoro nkengu byawaru! Teme Chipfu nodu egbuwa nwjinwii l'ẹhu ngu!

²Tii ledu; ochii tukoakwaru eliphe l'ophu gbachia. Teme oke-ochii gbapyabe ndiphe l'ophu. Obenu ẹ Chipfu gbalihuru pfuru pfu-doru ngu. Teme e je ahuma o-gbu-nwjinwii ya l'eli ẹhu ngu.

³Ndu ohozo a-bya anodu l'iphoro, duru ngu nu. Ndu eze abya anodukwapho l'iphoro ono, duru ngu nu ono; me nchi bohueru ngu pho.

⁴Palinaa ẹnya lepee mgburugburu huma ge ndibe ngu dzukoberu awu awupfuta ngu. Unwu ngu ke nwoke shi ẹka du ẹnya alwa. Teme ẹphe kworu unwuada ngu l'ukuvu akwolataru ngu.

⁵Noo teke ii-le iya ẹnya nwujaa. Okpoma evuahaa ngu evuvu; li wata anya ndu. L'e shi l'oke-enyimu kporu ẹku kpotaru ngu. Teme l'ọ bukwaru ngu pho be aa-chitaru ẹku ohamoha.

⁶Q-doru-nyimunyimu inya-kamelu atuko ali ngu sweta. Mbụ unwu inya-kamelu, shigba ali ndu Midiyanu yele ke ndu Ifa. Teme iphe, bu ndu shi ali Sheba azaru bya. Epe eguderu ngu mkpola-ododo yele

unwu-isensu. Teme epe ara iya arara g'e tua Chipfu epha.

⁷Eghu me aturu ndu Keda g'o ha be aa-tuko chitaru ngu. Mbụ-a; ebili ndu Nebayotu e-mechakwaa jeeru ngu ozi. L'a nata phe gude gweeru mu ngweja l'oru-ngweja mu. Mu abya eworu eguru eze-ulo mu mee g'o du ubvu l'enya.

⁸? Bu ndu ole baa? ? Bu ndu ole aso raaraa g'urwukpu, aso l'igwe pho; mbụ ndu ono, eze gbiigbiigbi g'eka ndo-nwenu l'eze gbiigbiigbi epe ala l'epfune iya ono?

⁹Tororo bu le ndu bukube eze-enyimu bu mu be epe achọ abya. Ugho, vutagbaaru phe uzo buru ugho-mini ndu Tashishi. O buru ndu epe achilata bu unwu ngu, shi eka du enya; yele mkpola-ochaa me mkpola-ododo, epe vugbaa alwa. Ono buru ubvu, aakwabe Chipfu, bu Chileke ngu ono; mbụ onye ono, bu Onye Nso ke ndu Izurelu; kele o meru g'i du akpabiri.

¹⁰Oo ndu shi eshishi a-kpukwa igbulọ ngu ono. O buru ndu eze phe a-nodu ejeru ngu ozi. A makwaru-a le mu gude ehu-eghu chitsua ngu. Obenu le mu e-mechaa gude n-yemobu phuru ngu obu-imemini.

¹¹Onu-abata gube mkpukpu ono e-ghejeru onu mkpurumkpuru. A ta abyadu agu-chije iya agu-chi eswe l'enyashi. Oo ya bu ge ndiphe anodu achibatara ngu eku unwuliphe. O buru ndu eze phe a-chijeru phe abya;

¹²kele iphe, bu oha; ozoo ali-eze, a-jika l'ephe te ejeduru ngu ozi a-buru mkpurupyata; ndu ono be ee-mebyishikota l'ophu.

¹³Iphe, ali ubvu ubvu Lebanonu gude du akpabiri a-laru ngu; mbụ oshi payinu; mekpoo oshi firu; mechakpoo oshi sayipuresu, bukota oshi, du iya nu. G'o ha be ee-gude mee g'eka duru mu nso maa mma. Teme mu emekwapho g'eka mu azoje okpa buru eka du akpabiri.

¹⁴Unwu ndu ono, eme ngu ewere ono e-mechaa bya l'iphu ngu bya ephozeru ngu. Iphe, bukpo ndu ono, agubeduru ngu iphe ono e-mechaa bya le mgboru okpa ngu bya ephozeru ngu. Epe e-mechaa tuko kuahaa ngu Mkpukpu ke Chipfu; Ubvu Zayonu ke Onye Nso ke ndu Izurelu.

¹⁵A makwaru-a l'a jikaru ngu bya akpo ngu ash; ophu o dudu onye aghajaje ngu nu. Obenu le mu e-mechaa mee ngu mkpukpu, ogbo l'ogbo e-gude eku onwophe; gude iya ete eswa. O buru g'oo-dwaro bu ono jasu l'ojejoje.

¹⁶Ii-ngu era ohamoha; mbụ l'oo era ndu eze be ee-gude hee ngu. Noo teke ii-maru l'oo mbedua, bu Chipfu be bu onye ndzota ngu; buru onye aagbafuta ngu nu; bya aburu Okalibe ke Jiekopu.

¹⁷O buru mkpola-ododo be mu a-nu ngu l'ozori onyirubvu. Mu anu ngu mkpola-ochaa l'ozori mgbuguru-igwe. Onyirubvu be mu a-nukwanu ngu l'ozori oshi-nku. Mu anu

ngu mkpurukpu-ígwè l'òzori mkpuma. Ọ bụru nchị-ọdu-doo bẹ l'a-nọdu atùru ngu iphe, ịi-nọdu eme. Apfubekoto aburu iya a-nọdu edu ngu.

¹⁸A ta abyadu anumabaa l'iphe-kpangangaa l'eme l'alì ngu l'ophu. Ophu aanumabaedu k'ọla-l'iswi ọzoo mgbu-ọnwu l'alì ngu gbaa mgburugburu. Iphe, ịi-nọdu eku igbulọ ngu a-buru: Ndzota; l'i kua ọnu-abata mkpukpu ngu “Ajaja”.

¹⁹“Ọ tọ bụeduru ẹnyanwu bẹ ii-gude aphụ ọzo l'eswe; ophu ọnwá echieduru ngu phuuphuu l'enyashi. Noo kẹle Chipfu a-buru ìphóró duru ngu nù jasụ l'ojejoje. Mbụ l'ọo Chileke ngu ono a-buru ọdu-biribiri nkengu.

²⁰Enyanwu ta arịbaedu arịba; ophu ọnwá arịbaedu arịba. Ọ bụru Chipfu a-buru ìphóró ojejoje nkengu. Ọ tọ duedu mbọku, aphụ byaru atsọbaaru ngu.

²¹Noo teke ndibe ngu l'ophu a-bukotaru ndu pfuberekoto. Ephe enweru alì ono jasụ l'ojejoje. Mbụ-a; ọ kwa ẹphebedua bụ irwu oshi ono, mu dzaberu ono; mbụ ozi, mu gude ẹka mu jee; g'e gude hụma gẹ mu dụ-be akpabiri.

²²Ndu ophu kachaa alwa alì lẹ g'unu ha a-duje unu labọ l'ukporo iri; teme ndu kachaa nwanshii lẹ g'unu ha aburu mkpukpu, ike dọ. Ọ kwa mbẹdua bụ Chipfu. Iphemiphe-a bẹ mu e-mekwa ẹgwegwa mẹ o -rwuepho teke mu e-me iya.”

Azáya 61

Apha, Chipfu e-me eze-iphe-oma

¹Unme Nnajiuphu, bụ Chipfu dọ mu l'ẹhu; kẹle ọ hotaru mu gẹ mu je ezia ndu wozeru onwophe alì ozi-oma. Ndu meji tofuru bẹ o ziru mu gẹ mu je emee gẹ meji nmapfuru phe; gẹ mu je ezia ndu a kpọtaru lẹ ndzụ l'ephe e-nweru onwophe. Mu epfukwarupho ndu nọ l'ọka-mkpọro l'aa-ha phe.

²Teme gẹ mu bya arakaa l'apha, Chipfu e-meru ndu nkiya eze-iphe-oma rwuwaru; yele eswe mbọku, Chileke anyi a-gbaru ndibe iya ọzori. Mu adua ndu agụ aphụ obu g'ephe ha.

³Teme mu eyekwarupho ndu Zayonu ẹka; mbụ ndu ophu aphụ tsoru. Mu eworu ẹguru okpu-eze kpube phe l'ishi l'ozori ntụ, ephe shi kpube onwophe; wua phe manụ ẹhu-utso; l'ozori agụ aphụ; yee phe uwe, bụ aja Chileke ajaja; l'ozori anọdu yokoo. Iphe, aa-nọdu eku phe aburu “Achi k'apfubekoto”; Oshi, Chipfu kuru l'onwiya g'e gude hụma g'ọ dụ-be akpabiri.

⁴Ephe a-kpukwa akahụ igbulọ ono, dakashihuru e -shi teke ndiche ono; bya atuko akahụ ẹka ono, bühawaa ochobu ono doziphuchaa azụ. Mkpukpu ono, dakposhichuhaar adakposhihu nọdu nno shi l'ogbo sweru ogbo ono bẹ ephe a-tuko kpuzi-kotachaa.

⁵Ọ bụru ndu shi eshishi a-nọdu echeru unu egu mẹ aturu unu. Ndu ohozo aburu ndu a-nọdu ejeru unu ozi egu; yele ozi opfu-vayinu unu.

⁶Iphe, aa-nòdu eku unu aburu “ndu-uke kẹ Chipfu” . Iphe, aa-gùbe unu a-buru “ndu ejeru Chileke anyi ozi” . O buru ẹku unwu-eliphe bẹ unu a-nòdu eri. Mbụ ọ buru iphe-enweru phẹ bẹ unu e-gude eku onwunu.

⁷L'òzori iphe-iphere, e gege anòdu eme ndibe mu bụ-chia iphe, e-me nù bụ lẹ ndibe mu a-nata okiphe nnakwasẹ l'ẹka phẹ. Tẹme l'òzori ekpu iphu lẹ ntụ bẹ ẹphe a-nòdu etechia ẹswa l'okiphe, ẹphe ketarụ. Ẹhu-utso ojejoje aburu nkepẹ.

⁸“Kẹle mbedua, bụ Chipfu bụ iphe, aduje mu ree bụ ikpe, pfuru nhamunha. Ophu dukwanu mu ashi buru ana nfu yele eme ẹjo-ememe. Ozo bụ lẹ mu e-me ire-lanụ bua ndibe mu obunggo. Tẹme mu l'ẹphe agbaa ndzụ ojejoje.

⁹Oshilokpa phẹ aburu ndu a maru amaru l'ọhamoha. Nokwaphọ gẹ ndiphe a-maru awa phẹ. Iphe, bukpo onye humaru phẹ nù a-majeerupho l'ẹphe bụ ndu Chipfu keberu l'oma.”

¹⁰Mu a-nòdu Chipfu l'ẹka tee ẹswa. Mbụ l'obu mu bẹ ẹhu atso l'ime Chileke mu; kẹle o yewaru mu ndzota g'uwe; bya egude apfubekoto kwaa mu yegede g'onye yeru uwe mkpelanu. O meru mu; mu dụ gẹ nwoke, abya alụ nwanyị k'òphúú; mu kpuchia iphe l'ishi g'onye uke Chileke; mbụ mee mu; mu nòdu ama gẹ nwanyị, akwakọ ala ji; mbụ nwanyị, gude iphe-nchị yele iphe-olu kwaa onwiya akwa.

¹¹Kẹle ọo g'alị emeje g'iphe fushia-a; tẹme mgbabu nòdu emeje g'iphe, a kuru iya mehu-a; nokwaphọ gẹ Nnajiuphu, bụ Chipfu e-me g'apfubekoto yele ajaja kpo-futa l'iphu ohamoha.

Azáya 62

Ẹpha òphúú ndu Zayonu

¹O kwa l'iswi ẹhu Zayonu bẹ mu e-gude; mu taa nòdudu doo. Mbụ lẹ mu e-gude l'iswi ẹhu Jierúsalem; mu tee dobedu onu doo; gbiriri jasụ teke apfubekoto iya achafuta g'a hụma iya g'ẹka nchi bọhuru; ndzota iya enwua kẹ phoo g'oroku, eke jajaja.

²Ohamoha a-huma apfubekoto nkengu. Ndu eze l'ophu ahuma ogbu-nwii nkengu. L'a gụa ngu ẹpha òphúú, bụ Chipfu e-gude onu iya gụa ngu iya l'onwiya.

³Gùbedua a-dụ g'okpu-eze, dụ ùbvù l'ẹnya, nọ l'ẹka Chipfu. Mbụ l'ii-nòdu l'ẹka Chileke ngu dụ iya g'okpu-eze, onye eze kpu l'ishi.

⁴Ẹphe te ekubaedu ngu “onye a gbagharu agbagharu” . Ophu e kuedu alị ngu “ochobu” . Iphe, aa-gụ ngu bụ “otsomahu Chileke” . L'a gụa alị ngu “nwanyị, a luru k'òphúú” ; kẹle Chipfu e-gude ngu ete ẹswa. Tẹme alị ngu adụ gẹ nwanyị, a luru k'òphúú.

⁵Mbụ l'oo ẹgube ono, nwokorọbya aluje nwamgboko ono bụ g'unwu ngu a-luru gùbe Zayonu. O buru g'onye eme ekele nwanyị egudeje nyee ya ete ẹswa-a; nokwaphọ gẹ Chileke ngu e-gude ngu ete ẹswa.

⁶Mu woakwaru ndu nche dobechaa l'eli igbulọ, a kpụ-pheru gùbe Jierúsalemu. Ọphu ẹphe abyakwa e-dobe ọnu doo eswe l'enyashi. Mbụ-a; unubẹ ndu eku ẹpha Chipfu; unu ba tụtakwa unme!

⁷Ọphu unu ahakwa iya g'ọ tuta unme jasụ teke oo-me Jierúsalemu g'ọ nguru anguru; mee ya g'ọ buru iphe, eliphe l'ophu e-gude aja Chileke ajaja.

⁸Chipfu gudeakwa ẹkutara iya; yẹle ogwe-ẹka iya l'ophu ria angụ sụ: “Ọ tọ dukwa teke mu byaru ewobaaru iphe, ị kọberu l'alị nù ndu ọhogu ngu g'ọ buru nri pẹ. Ọphu ndu ọhozo abyadụ angubaa mẹe ọphúú ono, bụ ngu seru akanya iya ono.

⁹Ọ chia ndu kpatarụ iya nù e-ri iya jaa Chipfu ajaja iya. Tẹme ndu awọ akpuru vayinu angụ mẹe ya l'oma-unuphu ibe mu ono, dọ nsọ onoya.”

¹⁰Unu ghajaa ya; unu ghajaa ọnu-abata mkpukpu ono! Unu dozia ụzo, ndu ono a-nọdu eshi! Unu tụa mkpoli; unu tụa mkpoli l'eze oji ono! Unu wofuchaa ya mkpuma mkpuma, dọ iya nù! L'e wolia ẹkwa-ọhubama ono pfuluberu ọhamoha g'ẹphe hụma!

¹¹Lenu; Chipfu raakwaru iya; o jedzuru mgboko jasụ l'ẹka igwe beru alị beru sụ: “Unu sụ ndu Zayonu g'ẹphe hụmakwa l'onye ndzọta pẹ abyakwa! O gudekwa obunggo iya; bya egude iphe, oo-gude pfula ụgwọ.”

¹²“Iphe, ee-ku ndu ono bụ ‘Ndu-nsọ kẹ Chileke’; ọzoo ‘Ndu Chipfu gbataru’. L'e kua gube Zayonu ‘Nwanchọta’; ọzoo ‘mkpukpu, a ta gbadoeduru agbado’.”

Azáya 63

Eswe mbọku, Chipfu a-gwata ụgwọ iphe

¹“? Bụ onye bụ ọphuu? ? Bụ onye shi l'alị Edomu abya phọ; mbụ onye ono, yeru uwe, dọ meeme, shi lẹ mkpukpu Bọzura eje abya ono? ? Bụ onye bụ ono yeru akpabiri g'onye yeru kpowula-kpowula uwe; mbụ onye ono, azọ garamugaramu eje l'iphu l'iphu gude egoshi g'ọ kabe ọkpehu ono?” “Ọ kwa mbẹdua. Mu pfulbekwaru ẹka ọto epfu iphe, mu epfu. Tẹme ike adzọta nemadzu dukwa mu phọ.”

²“? Bụkwanu gunu meru g'ọ gude uwe ngu nọdu eke meeme; g'onye azọcha akpuru- iphe, e meje mẹe?”

³“Ọ kwa mu zọshiru mẹe ono nwẹka mu. Ọhamoha l'ophu ta adukwa onye byaru ekwe mu ẹbo. Mu gude ẹhu-eghu zọo ya zọshia; mbụ gude oke ẹhu-eghu mu zọo ya tọlitoli. Ọ buru mee pẹ gbakarụ kpua l'uwe mu. Ọ buru iya bụ lẹ mee, atuko uwe mu l'ophu sweta.

⁴Ọ buru iphe, kparụ iya nù bụ l'eswe agwata ụgwọ iphe nọ mu l'okpoma. Tẹme apha aagbata mu ono rwuwa.

⁵Mu leri ẹnya; ọphu ọ dudu onye gbaa mkpu, dọ nù. Ọ nyia mu ẹhu kpala l'ọ tọ dudu onye byaru agbaarụ mu mkpu. Ọ buru ọkpehu mu bẹ mu gude dzọo onwomu. Tẹme ọ buru oke ẹhu-eghu mu bẹ gudeshi mu nù.

⁶Mu gude ẹhu-eghu mu zọo ọhamoha pyakapyaka; gude oke ẹhu-eghu mu mee; męę tsuahaa phe. Mu woru mee phe wua l'ali."

Ajaja yele epfu anu Chileke

⁷Mu e-pfu k'obu, Chipfu eyeje ndibe iya. Mbụ iphe, Chipfu meshiru anyi, kparu iphe, o gbaru g'a jaa ya ajaja; mbụ ikpoto iphe, du ree, o meru onu-ulo Ízurelu; kele ọophushi obu-imemini ike; teme o nodu eyeje obu yegharu iya ẹka.

⁸O suru: "Eviya eviya; ndu-a bu ndibe mu; unwu mu, ata abyadu adzuru mu uka." O buru iphe ono meru g'o gude a dzota phe.

⁹Ephe nodu ejekpo iphe-ehuka, ephe jeru g'o ha; o nodu atsue ya pho l'ehu. O buru ojozi-imigwe, shi l'eka o no jeru je adzo phe. O buru eye obu, o yeru phe; yele obu-imemini, ọophuru phe be o gude gbata phe. O palia phe ephekerephe; heru phe eheru teke ndiche ono l'ophu l'ophu.

¹⁰Ole o bu; ephe jikale-a l'ephe tee medu iphe, o suru phe g'ephe mee; shi nno mee Unme-du-Nso nkiya iphe aphu. O buru iya meru g'o gude o ghakobe bya aburu onye opfu phe. Mbụ yebedua l'onwiya bya etsoaha phe ọgu.

¹¹A nonyaa; ephe nyata teke ndiche; mbụ teke Mosisu yele ndu nkiya no. Ephe ria su: "Bu awe be onye ono, dugharu phe eze-enyimu ono nohunu; mbụ onye dugharu ndu nche aturu yele aturu me egbu iya-a? Bu awe be o no; mbụ onye ono, woru Unme-du-Nso nkiya ye; ephe l'iya swiru ono;

¹²onye ono, woru okpehu iya ophu du biribiri ye Mosisu l'ekutara; o woru eze-enyimu kee ẹbo l'iphu phe; k'ophu aa-maru epha iya jasụ l'ojejoje;

¹³mbụ onye ono, duru phe ghaa ogbumini ono. Ephe gbaa kwaakwa g'inya agba l'echiegu. Ophu opfu aduduru phe l'okpa.

¹⁴Unme Chipfu rwukpo phe pho g'onye erwu eswi eje le mbarabata; je adobe l'eka ephe noru tuta unme. O bu egube ono bu g'i gude dua ndibe ngu; k'ophu ii-me g'epha ngu buru iphe, a-du akpabiri."

¹⁵Gbenu l'imigwe; mbụ l'ephekerephe ẹka ono, aba-eze ngu no ono; mbụ ẹka ono, du nsọ bya adu akpabiri ono; gbenu l'eka ono tufu enya humakpodapho! Bu awe be nyemobu ngu; yele okpehu ngu no? Eme odoo ngu yele aphu obu-imemini ngu ono ta aduekwa ophu i kweru g'o rwua anyi ẹka.

¹⁶Obenu l'oo ngu bu nna anyi. A makwaru-a le Ebirhamu ta amadu anyi. Ophu Ízurelu amadu onye anyi bu. Obenu l'oo gube Chipfu bu nna anyi; bya aburu onye aagbata anyi. Epha ngu shi l'ojejoje duta.

¹⁷Su-a; gube Chipfu; bu gunu meru g'o gude i mee g'anyi phukuru lufu l'uzo nkengu; i su-chia okpoma anyi k'ophu bu l'anyi ta tsuduru ngu ebvu? Lwanu azu m'obvu ndu-ozu ngu; mbụ okpa-ipfu ono, bu okiphe ngu ono!

¹⁸Ali nsọ ngu ono ta noduru ndibe ngu odu l'eka. Ndu ohogu ngu bya eworu ẹka ono, duru ngu nsọ ono zọo tolitoli.

¹⁹Ole anyi bukwapho nkengu e -shi le ndiche. O gbę du g'i tiki bu-swee ishi anyi; g'e teke ekuswee anyi laaru l'ępha ngu.

Azáya 64

¹O du g'a su g'i gbajaa igwe ębo nyizeta! G'oke ębvú nmaa jiiijijii l'iphu ngu!

²Mbu-a; ęgube ono, ọku etsuje nku, enwu ọku ono; ęgube ono, ọku emeje ge mini, shiru iya nu phuhu uphu ono; nyizetanu bya emee ge ndu ọhogu ngu maru ępha ngu! Byanu emee g'ọhamoha phua kpaakpaakpaa l'iphu ngu;

³kele teke ono, i meru iphe, dugbaa oke ebvu onoya, bu iphe, anyi amadu l'ii-me ono be i nyizetaru. Oke ębvú nmaa jiiijijii l'iphu ngu.

⁴E -shi ke teke ndiche ta adukwa onye numajewaru nu. Ophu o tubajeduru le nchi. Ophu ęnya ahumajeduru Chileke ọzo, du nu, abudu gubedua, bu Chileke, emejeru ndu ele iya ęnya l'ęka iphe, ęphe ele ęnya iya.

⁵Igbajeru phe mkpu; mbu ndu egudeje ęhu-utso eme iphe, pfuru oto. Mbu ndu nyataru iphe, i suru g'e meje. Obenu le teke anyi emekwapho iphe-ęji ekpu phe; ęhu eghuahaa ngu eghu. ? Denuhunu g'ee-shi dzotaba anyi?

⁶G'anyi ha dukwaa g'iphe, aaso nsọ. Temе apfubekoto anyi dukotawa ge nkirika ękwa, du ideyideyi. G'anyi ha nwewaru enwenwe du ge mkpeekwo. Iphe-ęji anyi nodu apa anyi nganganga ge pherephere.

⁷O to duedu onye eku ępha ngu. Ophu o duedu onye eme ge ya e-me woru ngu ęka; kele i woharu anyi iphu; bya eworu anyi wehaaru ejo-ememe, anyi eme.

⁸Obenu le-a; gube Chipfu; o kwa ngu bu nna anyi. Anyibedua bukwa urwa; gubedua buru onye akpu ite. Anyi tukoru buru iphe, i gude ęka ngu mee.

⁹G'ęhu te eghughakwaru ngu eghu ęka jiko Chipfu. Ba gukobekwaru anyi iphe-ęji anyi g'o noo jasụ l'ojejoje! Jikonu lenaa anyi ęnya; kele anyi tukokwaru buru ndibe ngu!

¹⁰Mkpukpu ngu, dugbaa nsọ ono tukokwaru buru ęjagiri echiegu. Mbu je akpachaa le Zayonu buchakwaa ęjagiri echiegu. Temе Jierusalemu buru ochobu.

¹¹Eze-ulo ngu ono, du nsọ; bya adu akpabiri ono, anyi shi nweru ono, bu ęka nna anyi oche phe shi anoduje aja ngu ajaja ono be a tukwaru ọku; o tsua ya tsufu. Temе iphe, bukpo ęka ono, anyi yeru obu ono g'o ha bukotaru ọla-l'iswi.

¹²G'o du ęgube ono gube Chipfu; ? ii-gudeshikwapho onwongu? ? Ii-no-kirishi nwadoo hua anyi ahuhu hugharu iya ęka to?

Azáya 65

Ikpe yele ndzota

¹Mu shi ekpuhaje onwomu goshi ndu akpaduru ishi mu. Ndu achoduru mu achochobe mu shi emeje g'ephe huma mu. O buru oha ono, te eshidu ekuje epha mu ono be mu shi asuje: Wakwa mu-o! Wakwa mu-o!

²Mboku-mboku be mu amachije eka togboru ndu ejo-okpoma. Mbụ ndu ono, ụzo ephe eshi adudu ree ono, buepho iphe, ephe ritaru be ephe anoduje eme g'ephe mee ono;

³mbụ ndu bụ mkpulumkpuru be ephe anoduje akpatsu mu iwe l'iphu mu gedegede; ejeje anodu le mgbabu agwa iphe; kpokobe buloku mee ya enya eka aakpoje unwuisensu oku;

⁴ndu ejeje anodu l'eka eelije odzu; kwaa akwakwa l'eka ono nwukota enya enyashi eme ke maa l'edomi; ndu anoduje ata anu ezi; eshi mini iphe l'ite phe, bu mini anu, aaso nsọ;

⁵ndu anoduje epfu su: O-no-l'uzo gbalakwaa! G'o to dukwa onye a-byakube mu ntse; kele mu dukwa nsọ! Mu kakwa ngu adu nsọ! Egube ndu ono bu enwuru, akpu tuuu ala mu l'imi. Ephe bu oku, enwuje phoophoophoo mkpulumkpuru.

⁶“Lekwa; e dekwaru iya edede dobe mu l'iphu su: Mu taa nodukwa doo. Mu a-pfukwa ugwo pfu-dzua apfu-dzu. Mu a-pfu phe iya nwuru iya enwuru ye phe l'eka;

⁷mekpoo iphe-eji nkephe; me ke nna phe oche phe.” Nokwa iphe, Chipfu eepfu. “O buru iphe, kparu iya nu bu l'ephe jeru je anodu l'eli ubvu agwa iphe; je anodu l'eli obvu epfubyishi mu. Oo iphe ono meru g'o gude mu je apfu phe ugwo iphe, ephe meru; nwuru iya enwuru dee phe adee l'utapfu.”

⁸Wakwa iphe, Chipfu epfu baa: “O kwa egube ono, mee abujeru: o -dukwadu l'ojopfula akpuru vayinu; l'aasu g'e te mebyishikwa iya le nwiphe, du ree hakwaru dukwadu iya ono; nokwa ge mu e-me ke ndu ejeru mu ozi bu ono; mu taa tukokwa g'ephe ha emebyishi.

⁹Mu e-mekwa g'awa Jiekopu phodu. Mbụ le mu e-me g'o duru ndu Jiuda e-nweru oke ubvu mu ono. Mbụ l'oo ndu ono, mu hotaru ono be oo-buru okiphe phe. O buru eka ono be ndu ono, ejeru mu ozi ono e-buru.

¹⁰Nsuda Sharonu a-buru eka aa-nodu eche iphe-edobe. Teme nsuda Akoru aburu odu-eswi duru ndibe mu, bu ndu achọ mu nu.

¹¹“Obenu k'unubedua, bu ndu jikaru mube Chipfu; bya azoha eze ubvu mu ono, du nsọ ono; mbụ ndu meru nri doberu Omelonwiya; bya agbajia mee l'okoro sberu Okpuluwa;

¹²egube ndu ono be mu a-gbakọ doberu ogu-echi. Teme g'unu ha e-phuretaepho g'a phushia unu terii; kele mu kuru unu oku; ophu unu azaduru enu. Mu pfua opfu yeru unu; ophu unu angaduru nchi. Unu nodu mu l'iphu mee ejo-ememe. Teme o buru iphe, du mu eji be unu hataru ememe.”

¹³Oo ya bu ɔ-a; wakwa iphe, Nnajiuphu, bu Chipfu epfu baa: “Ndu ejeru mu ozi e-rikwa nri; unubɛdua aswiru ɛgu. Ndu ejeru mu ozi angua iphe-angungu; unubɛdua akpɔhu ɔnu nku. Ndu ejeru mu ozi e-tekwa ɛswa; unubɛdua aburu ndu e meru iphe-iphere kpua.

¹⁴Ndu ejeru mu ozi a-gu ebvu; ebvu, shi l'ɛhu-utso, jiru phe obu; obenu l'unubɛdua ara ɛkwa aphu, tukoru unu obu sweta; unu echia mkpu l'ɛka meji tofuwaru unu ree.

¹⁵ɛpha unu a-buru iphe, ndu mu hotaru e-gudeje epfu l'iphu. O buru Nnajiuphu, bu Chipfu e-mechaa gbua unu. Obenu ɔ ndu ejeru iya ozi be ɔo-gu ɛpha ɔphuu.

¹⁶Onye agokpo ɔnu-oma anu nemadzu l'alɔ ono l'e-gude Chileke ire-lanu ono ago iya. Onye erikwanu nte l'alɔ ono egude Chileke ire-lanu ono ria nte obu; kele iphe-ɛhuka, shi duhawaa nu be aa-tuko zohachaa woru iya domia ge mu ta ahumajehe iya.

¹⁷“Lekwa; mu e-metakwa igwe ɔphuu; bya emeta eliphe ɔphuu. Akahu iphe be a taa nyatabaedu; ɔphu ɔobatabaedu l'egomunggo.

¹⁸O chia g'ɛhu tsoo unu utso; unu ete ɛswa ojejoje ekpu iphe ono, mu e-meta ono; kele mu e-me Jierusalemu g'o buru mkpukpu ɛhu-utso. Teme ndu no iya nu aburu ndu emeje g'ɛhu tsoo nemadzu.

¹⁹Mu e-te ɛswa kpua Jierusalemu. Teme ndibe mu a-buru ndu e-me g'ɛhu tsoo mu utso. Ophu aanumaedu olu-ɛkwa; ɔzoo echi mkpu l'ime iya ɔzobaa.

²⁰O to dubaedu nwata, a-no ujiku olemole nwuhu l'ime mkpukpu ono; ɔzoo onye bu ogerenya, ata akafudu nka l'ishi. Onye noru ukporo apha ise bya anwuhu be aa-suje l'o gbakwohuru agbakwohu. Onye iphe-ɛji, ano-rwuduru ukporo apha ise be aa-suje l'a turu iya ɔnu.

²¹ɛphe a-kpushi ulo buru iya. ɛphe agbaa opfu-vayinu ria akpuru iya.

²²ɛphe taa kpuedu ulo aharu ndu ɔzo g'ɛphe buru. Ophu ɛphe akɔedu opfu aharu ndu ɔzo g'ɛphe ria; kele ɔo g'oshi akabeje nka bu ge ndibe mu a-ka nka. Mbɔ ɔ ndu ono, mu hotaru ono e-rije iphe, ɛphe seru akanya iya; ria ya noo ɔdu.

²³ɛphe te eseɛdu akanya ɔla-l'iswi. Ophu ɛphe anwushiedu unwegirima, ɛheni a-noɔdu etso; kele ɛphe a-buru ndu Chipfu keberu l'oma; ɛphebedua g'ɛphe ha; mekpoo awa phe l'ophu.

²⁴ɛphe -bya eku oku; mu evuwaru ɔzo za phe ɛnu. ɛphe -gudekwadu-a opfu l'ɔnu epfu; mu anumawa iphe, ɛphe epfu.

²⁵Ejo-nkuta-ɔswa ɛphe l'unwu aturu a-tukoje akpa nri l'ɛka lanu. Teme oduma awata ata ɛswa g'eswi. O buru iphe, agwo e-rije bu urwuku. Iphe ono ta aduedu ɔphu emeka iphe; ɔzoo gbua iphe egbugbu l'eli ubvu mu ono, du nsɔ ono l'ophu.” Nokwa iphe, Chipfu eepfu.

Azáya 66

Ikpe yeɔle ɛka obu a-du

¹Wakwa iphe, Chipfu epfu: “Imigwe bukwa aba-eze mu. Eliphe buru okposhi, mu tukoberu okpa. Denu egube ulo, unu a-kpuru mu? ? Bu egube awe be mu a-noduje iya atuta unme obu?”

²? Tobudu mbedua gude aka mu mee iphemiphe ono g'o ha meru g'o gude ephe du?” Nokwa iphe, Chipfu eepfu. “Wakwa egube onye mu a-gube iphe baa: onye wozeru onwiya ali; yele onye obu iya du agù; onye anumaje opfu mu; ndzu erwuta iya.

³“Obenu l'onye buepho l'oogburu mu eswi; dukwa g'onye egbu nemadzu. Onye gude nwaturu agwa mu dukwanu g'onye aswikwo nkuta olu. Onye gude iphe, o kotaru l'opfu bya mu anunu dule mu-a g'onye agbashi mu mee ezi. Onye akpokwanuru mu unwu-isensu oku dupho g'onye agwa nshi. Noo kele ephe hatawaru enu aka phe. Teme o buru iphe, aduje phe ree bu ejo ahuma, ephe anoduje eme.

⁴Oo ya bu le mbedua a-chotakwapho iphe, mu e-gude mekpaa phe eh. Mbua-a; mu e-meephe phe pho iphe, ephe atsù ebvu; kele teke mu kuru oku ta adudu onye zarù mu enu. Ophu o dudu onye yeru mu onu teke mu pfuru opfu. Ephe nodu mu l'iphu eme ejo-ememe. Teme o buru iphe, ephe hotaru eme bu iphe, adudu mu ree.”

⁵Unu numakwa Opfu Chipfu; unube ndu anmajeru opfu iya pyaapyaapya: “Unwunna unu, bu ndu kpuru unu ashi bya ewuchia unu ewuchi l'opfu eh mu be pfuwaru su: ‘Ge Chipfu goshinu l'o bu onye gbaru g'a kwabeje iya ubvu; k'ophu anyi a-huma ehutso unu!’ Ole ee-mechanaa mee ndu ono iphe-iphere.

⁶Numakpodapho utsu, ada le mkpukpu! Numakpodapho uzu, aatu l'eze-ulo Chileke. O kwa iphe, ada nu bu le Chipfu apfu ndu ohogu iya iphe, rwuberu phe nu.

⁷“Zayonu be ime byaru awata ememe; o nwuwa nwa. Mbua l'upfu byaru awata iya eme ehuka; o nwuwa nwa nwoke.

⁸? Bu onye numajeru egube iphe ono? ? Bu onye humajeru egube iphemiphe ono? ? Aanwuje oha l'ophu l'ujiku lanu? Too ? aa-du ike zeda ndu a-buru oha aka phe le mgbo lanu? Ole o bu; o kwadu-a ime, wataru eme Zayonu; o nwuwanu unwegirima iya.

⁹? Mu e-mechaa g'ime merwua l'anwunwu; mu emedu g'a nwua ya too?” Nokwa iphe, Chipfu eepfu. “Su-a; ? mu a-gbe su-chia ekpa-nwa l'eka mu gbe mewaa ge nwa rwua l'anwunwu?” Nokwa iphe, Chileke unu epfu.

¹⁰G'ehu tuko unu le Jierusalemu tsoo utso! G'unu gude Jierusalemu tee eswa; iphe, bukpo unube ndu yeru iya obu! G'ehu tsoshikpo unu l'iya ike; mbua unube ndu rarù iya ekwa;

¹¹kele unu a-ngu era ngu-jia ephe l'era iya ono, bu era ndumobu ono. Unu a-ngukpoo ya mia ya pyopyopyo l'o tsoo unu utso; kele oo-nodu agbo ke jojojo.

¹²Kele-a; wakwa iphe, Chipfu epfu baa: “Mu e-me g'ehu-guu soru iya gborogboro ge nggele. Teme eku, shi ohamoha alwaru iya ge nggele, aso asoso. Ee-che ngu era; hee ngu l'onwiya; tee ngu ebvu l'utapfu.

- 13 Oo gę ne aduje nwa iya obu bu gę mu a-nodu adu unu obu. O buru le Jierusalemu be mu a-nodu adu unu obu obu.
- 14 Unu -humaephe iphe ono be obu a-tsoahaa unu utso. Unu abyaahaa pulapula g'ęswa. Iphe ono, Chipfu e-me l'ęhu ndu ejeru iya ozi ono; be l'e-me g'a maru iya. Obenu le ndu ohogu iya be oo-tukoshi oke ęhu-ęghu iya.”
- 15 Unu lekwa; Chipfu gudekwa oku abya. Teme ugbo-inya iya dugbaa g'oke pherephere. O buru oke iwe be oo-gude tukoshi phe ęhu-ęghu iya. L'o gude oku, enwu phoophoohoo baaru phe mba;
- 16 kele oo oku yele ogu-ęchi iya be Chipfu ee-gude kpee ndiphe ikpe; mbu le ndu Chipfu a-phu terii a-dukwa igwerigwe.
- 17 “Ndu ono, doru onwophe nsọ bya asachaa onwophe awu eje l'ęnya-agwa; mbu ndu awu l'odze etso onye ono, no l'ęchilabo ndu ata anu ezi; me ndu ata okerepfu; me ikpoto anu ozo, aasogba nsọ; ndu ono g'ęphe ha l'a-tuko tabuhu onu l'ugbo lanu.” Nokwa iphe, Chipfu eepfu.
- 18 “Teme eshinu epeheme egube umere ono; teme epehe nodu arigube oriri ono be mu abyaakwaa achikobe ohamoha; mekpoo ndu epfu egube opfu, epehe epfu g'ęphe bya ahuma gę mu du-be akpabiri.
- 19 “Mu e-me iphe-ohubama l'ęchilabo phe. Mu abya aharu nwa ndu ophu waru nu zia g'ęphe jedzuru ohamoha ono, bu ndu teke anuma-swee udu mu; ophu epehe eke ahuma-swee gę mu du-be akpabiri ono; mbu g'ęphe jee mkpukpu Tashishi; waa ali Pulu; yele ali ndu Lidiya; mbu ndu ono, agbaje apfu ono. Epehe eje ali ndu Tubalu; yele ke ndu Jiavanu; jekota ali ndu bu ęzenya ęzenya le mgboru eze-ęnyimu. Epehe eje emee g'ohamoha ono maru gę mu du-be akpabiri.
- 20 Epehe a-tuko unwunna unu l'ophu, shigbaa l'ohamoha chita bya l'ubvu mu, du nsọ le Jierusalemu. Epehe a-buru iphe, e gude gwaa Chipfu. Epehe anodu l'inya abya; me l'ugbo-inya; mekpoo l'ugbo-ali, ophu aakpu akpukpu. Epehe anodu l'eli inya-mulu; mekpoo l'eli inya-kamelu awu abya.” Noo iphe, Chipfu epfu. “Su-a; aa-chiru phe bya egube ono, ndu Izuru eyeje ngweja-nri l'ite, a ta sodu nsọ gude bya mu anunu l'ezeulo mube Chipfu ono.
- 21 Teme mu a-hakwaru phe pho hota g'ęphe buru ndu-uke mube Chileke; yele ndu Lıvayi.” Nokwa iphe, Chipfu eepfu.
- 22 “Su-a; o kwa g'igwe ophu; yele eliphe ophu, mu e-me a-no jaswaruroya l'iphu mu; nokwa g'ępha unu; yele awa unu a-no.” Nokwa iphe, Chipfu eepfu.
- 23 “Ee-shije l'iphe, bu Obo Onwa-ophu jasu l'iphe, bukota onwa afufu ozo; teme l'e shijekwapho l'iphe, bu eswe-atuta-unme lanu jasu l'iphe, bukota eswe-atuta-unme ozo; mbu le nemadzu l'ophu a-byaje bya abaru mu aja.” Nokwa iphe, Chipfu eepfu.
- 24 “Ozo bu l'ęphe a-lufuje je ahuma odzu ndu kwefuru mu ike. Eka ono be ekà, a-nodu ata phe nu taa nwuhukwa anwuhu. Ophu oku, enwu iya nu anyihudu anyihu. Epehe aburu iphe, ndiphe l'ophu a-nodu akpo-yiru ukuvu.”

Jieremaya

Jieremaya 1

¹Qwaa bu opfu Jieremaya nwa Hilikaya. O tso le ndu-uke Chileke, shi le mkpukpu Anatotu, no l'ali ndu Benjiaminu.

²O numaru opfu Chipfu l'apha k'iri l'eto, Jiosaya nwa Amonu bu eze ndu Jiuda;

³bya anumakwa iya pho teke Jiehoyakimu nwa Jiosaya bu eze ndu Jiuda; gbiriri jasu l'onwa k'ise l'apha k'iri le nanu l'abubu, Zedekaya nwa Jiosaya bu eze ndu Jiuda, bu teke a kpuru ndu Jierusalemu le ndzu laa aka ozo.

Chileke eku Jieremaya

⁴Opfu Chipfu rwuru mu nchi su:

⁵“Mu byaru akpu ngu ye l'epho ne ngu; mu vuhawaru uzo maru ngu. Mbụ l'a byaru anwu ngu; mu vuhawaru uzo hota ngu dobe iche; bya emee ngu onye epfuchiru Chileke l'ohamoha.”

⁶Tobudu iya bu; mu su: “Aa! Gube Nnajiuphu, bu Chipfu; mu ta amakwa g'eepfufe opfu; kele mu bunukaru nwata!”

⁷Chipfu su mu: “Ta asujeshi l'i bunukaru nwata. Iphe, bukpuo onyemonye mu suru gi jepfu be ii-jepfukota je epfuaru iya iphe, mu karu ngu su gi pfua.

⁸Ta tsujekwa phe ebvu; kele mu nokwa swiru ngu eswiru; teme mu je l'anafutaje ngu l'eka phe. Nokwa iphe, mube Chipfu epfu bu ono.”

⁹Tobudu iya bu; Chipfu bya amachia aka iya bya edenyi mu l'onu bya asu mu: “Nta be mu yewaru opfu mu l'onu nkengu.

¹⁰Lekwa le-a; ntanu-a be mu hotaru ngu dongoo ohamoha l'ophu; bya edobe ngu dongoo iphe, bukpuo ali-eze l'ophu; gi pheshia epheshi; lakashia alakashi; gi mebyishia emebyishi; kwatsua iphe, du k'akwatsu; l'i kpu iphe, du k'akpukpu; bya adzaa iphe, du k'adzadza.”

Iphe-ohumalenya labo

¹¹Noo ya bu; opfu Chipfu bya erwua mu nchi su: “? Bu gunu be i humaru; Jieremaya?” Mu su: “O kwa iphe, mu humaru bu ekali-oshi alumundu.”

¹²Chipfu su mu: “O bu-a iphe, i humaru be o bu; kele mu nwu enya kwaberu opfu mu; mu je l'e-me iya ge mu pfuru iya.”

¹³Opfu Chipfu rwukwaa mu le nchi ozo. O su mu: “? Bu gunu be i humaru?” Mu su iya: “Mu humaru ite, puhuru uphu; o gberu egberu kpolia ike l'uzo isheli.”

¹⁴Chipfu su mu: “Oo l'uzo isheli ono be mkpurupyata e-shi dapfu iphe, bukpuo ndu bu l'ali-a l'ophu.

¹⁵Mu abyakwa ekukọbe ndu alì-eze ndu isheli l'ophu. Nokwa iphe, m̀be Chipfu epfu b̀bu ono. Ndu eze phẹ a-bya bya eworu aba-eze phẹ s̀be l'onu-abata mkp̀kpku Jierusalemu. Ephe a-dapfu igbulọ iya gbaa mgburugburu; bya adapfu iphe, bukpo mkp̀kpku, nọ l'alì ndu Jiuda.

¹⁶Mu e-kpe phẹ ikpe; opfu l'ephe meru ejo-iphe; l'ephe jikaru mu je awata akporu agwa ozo ̀nẁ-isenso oku. Teme ephe wata abaru iphe, ephe gude eka phẹ mee eja.

¹⁷Oo ya b̀bu lẹ-a; gubedua l'onwongu; rikobe onwongu. Gbalihu je epfuaru phẹ iphemiphe, b̀bu iphe, mu suru g'i pfuaru phẹ. G'ephe be yekwa ngu ebvu; odumeka be mu e-yekwa ngu ebvu l'iphu phẹ.

¹⁸Ntanu-a be mu mewaru ngu; i buru mkp̀kpku, a kpushiru ike; bya aburu itso, a wuru l'igwè; bya aburu igbulọ, a kpuru l'onwirubvu. Mu mewaru ngu g'i pfuru pfushia ike l'iphu ndu alì-a l'ophu; mbu l'iphu ndu eze ndu Jiuda l'ophu; me ndu-ishi phẹ; me ndu-uke phẹ; me ndu alì-a l'ophu.

¹⁹Ephe e-tso ngu ogo; ole ephe taa lwu-kpedu ngu; kele mu nọ swiru ngu eswiru; teme mu je l'a-nodu adzo ngu l'eka phẹ. Nokwa iphe, m̀be Chipfu epfu b̀bu ono.”

Jieremaya 2

Ndu Izurelu atunwa Chileke

¹Mu byakwa anuma olu Chipfu, suru mu:

²“Je je araa ya arara ge ndu Jierusalemu numa-dzuru; su phẹ-a: “Mu nyatakwaru g'o shi evubeje ngu evuvu eme iphe, du mu ree teke i bukwalu okoroby. I shi yee mu obu ge nwanyi, a luru k'ophuu. I shi etsojeru mu je aghakota echiegu; mbu je aghaa alì ono, adudu iphe, aakoje iya ono.

³Ndu Izurelu shi duru Chipfu nso. O buru phẹ b̀bu akpuru mbu, mu vuru uzo kpata l'iphe, mu koru l'opfu mu. Iphe, bukpo ndu mekparu phẹ ehu be o nmaru ikpe. Teme ejo mmekpa-ehu dapfukwa phẹ pho. Noo iphe, Chipfu epfu b̀bu ono.”

⁴Unu numakwa opfu Chipfu; unube onu-ulo Jiekopu; unube ipfu l'ipfu onu-ulo Izurelu!

⁵Wakwa iphe, Chipfu epfu baa: “? B̀bu gunu be ndiche unu phẹ sukporu lẹ mu mejeru phẹ, meru g'o gude ephe haa mu jemihu? Ephe je awata etso nteke, adudu urwu, o baru phẹ shi nno buru ndu adudu iphe, ephe baru urwu iya l'onwophe;

⁶ophu ephe ajiduru su: ‘? B̀bu awe be o nọ; mbu Chipfu, b̀bu iya dufutaru anyi l'alì Ijiputu; bya edua anyi dughaa echiegu, adudu iphe, dabyiru iya nu; mbu dughaa alì ono, b̀bu evevee du iya; yee iduma iduma; alì, du chakiri chakiri bya agbahukota tsukiribaa; alì, adudu onye eshije iya eshishi; ophu o dudu onye bu iya ebubu?’

⁷Su-a; mu duru unu dubata l'alì emehu iphe, e meberu iya g'unu riye akpuru-iphe, ami iya nu; yee eku, kuru iya nu. Obenu l'unu bataru iya bya aturwua alì mu; bya emee okiphe mu ono; o kpoo idzu.

- ⁸Ophu ndu-uke mu ajiduru su: ‘? Bụ awe bẹ ọ nọ; mbụ Chipfu?’ Ndu eme k'ekemu ta amadu onye mu bu; ndu-ishi kwefuru mu ike; ndu mpfuchiru buru Balu bẹ epe epefuje iphe, o pfuru; buru iphe, epe etso bu nteke, adudu urwu, ọ baru.’’
- ⁹Wakwa iphe, Chipfu ephu baa: “Oo ya bu le mu e-pfunupho iphe, unu meru mu ozo. Mu a-nodu efunupho ozo iphe, unu nwanwa unu meru mu.
- ¹⁰Mbu-a; unu ghabunaa eze-enyimu bahu l'ali ndu Sayipurosus je elekpodapho enya! Unu yenu nemadzu g'e jerwua ali ndu Keda je egbua ya igo rengurengu! Maeshikwaru ? O nweru aka egube iphe ono mejeru?
- ¹¹Mbu-a; ? O duru oha, gbajeru agwa phe inwe; l'ebe abu l'iphe obu, epe agwa obu bu Chi? Obenu le ndibe mu gbanweru mube onye du akpabiri je anata iphe, adudu urwu, ọ baru.
- ¹²Gube igwe; g'iphe-a nyikwaa ngu ishi edzu! G'i kpo-yiaru iya ukuvu! Nokwa iphe, Chipfu eepfu.
- ¹³Ndibe mu mewaru uzi iphe-eji labo. Epe gbadowaru mu; mbu mube ogba mini, doru risaa; aso gborogboro; bya ebvaru onwophe iduma-nnako-be-mini; teme o buru iduma-nnako-be-mini, gbawashihuru agbawashihu; ophu mini adojeduru iya.’’
- ¹⁴“Izurelu ? o bu ohu too? ? O bu onye a byaru anwu; o buwaru ohu too? ? Denukwanu g'o gude a kwaahaa ya okwata?
- ¹⁵Oduma, du igwerigwe suakwaru ekiri; bya abawaru iya hanyihanyi. Epe tukowaru iphe, du l'ali iya mebyishichaa. Mkpukpu, dugbaa ya nu be a tukwaru oku; oku tsufukota iya; ophu o duedu onye bu iya nu.
- ¹⁶Ozo bu le ndu mkpukpu Memufisu; yee ndu mkpukpu Tahupanahesu kpwaru ngu ishi.
- ¹⁷? Tobudu ngu meru iya onwongu; eshinu i jikaru Chipfu, bu Chileke ngu teke o du ngu eje le gbororo?
- ¹⁸Nta-a; ? bu gunu kparu iphe, iije ali Ijiputu eje angu mini, shi l'enyimu Shihoo? Ozokwanu; ? bu gunu bu k'eje ali Asiriya je angu mini, shi l'enyimu Yufuretisu?
- ¹⁹Ejo-iphe, iime bukwa iya e-mechaa hua ngu ahuhu. O buru azu ono, jila ono agboru ngu uja. Rinaa ya ariri maru g'o du-beru ngu eji waa g'ootsu-beru ngu l'ehu g'i jikaru Chipfu, bu Chileke ngu; ophu iitsudu iya ebvu ililekpo. Nokwa iphe, Nnajiuphu ephu bu ono; mbu Nnajiuphu, bu Okalibe-Kakota-Ike.’’
- ²⁰O buro teke duhawaa enya be i nyakafuru ishi iphe, shi segbabe mu le ngu; mbu li nyakafuru egbirigba, e shi gude tugbabe mu le ngu; bya ephu su l'i tii jeeduru mu ozi! G'e lekeberu enya ephu; i wata aze-phe l'eli iphe, bu ubvu, ha l'eli; me l'iphe, bukpo mkpula eze-oshi, jaru ajaja; ge nwanyi-ukpara.
- ²¹Mu kowaru ngu g'onye koru opfu okpobe vayinu, karu upfu bya adubebe ree. ? Denukwanu g'o gude i ghakobeepho bya aworeru mu pho ohu vayinu?

²²Ọ tọ dukwa m'obeta i gude ncha-ọkanwa saa onwongu; bya ekwokpoo ncha kwogharu iya eka; ikpe ono, nmaru ngu ono rakueru ngu pho l'ehu g'o rakuru l'iphu mu. Nokwa iphe, Nnajiuphu, bu Chipfu epfu.

²³? Denu g'ii-shi su l'a ta turwukwaru ngu; ophu i gwokwaru obvu ono, bu Balu? Lewaro enya l'egube umere, i meru le nsuda ono! Gbunaa igo l'egube umere, i meru l'eka ono. Iphe, i bu be bukwa nyee inya-kamelu, ebu nggada karagidimu karagidimu. O -buru nggada ono shia owa-a; l'o buru iya shia ophu.

²⁴Nyee nkapfu-igara-oswa, echiegu kwowaru eh, akpo pherephere furumu; eka o duru iphe, agu iya ememe. Mbụ l'o -nodu ana okee; ta adudu onye alophuje iya azu. Okee ya -nodu achi iya; ike taa bvudu okee ya obu. O -bya eshi nyee ya ono okee; be o humaanaru-a eka o no.

²⁵Su-a; ta agbashi oso gbiriri jasụ g'okpa swachafu ngu; ekpiri akpo ngu jegirijegiri. Obenu l'i pfuluru su: ? Ke gunuhunu? Agwa ndu ohozo be mu yeru obu. O buru phe be mu a-nodu agba etso.

Ndu Izurelu gbaru g'aa-nu phe aphu

²⁶“O kwa geekepuje onye-oshi iphu le ntu me e -gude iya-a; bu g'e kpuru onu-ulo Izurelu iphu le ntu. Epebedua; epe le ndu eze phe; yee ndu-ishi phe; me ndu-uke phe; me ndu mpfuchiru Chileke phe;

²⁷tukoru su ntekepe, a pyiru le mkpurukpu oshi l'o kwa iya bu nna phe. Bya asu iphe, a pyiru le mkpuma l'o kwa iya bu ne, nwuru phe nu. Nta-a be epe ghawaru mu azu; epe ta aghaduru mu iphu. Ole oobujekwanuru; epe -daba l'iphe-ehuka; epe asukwa-a ge mu bya adzo phe!

²⁸“? Denuhunu agwa obu, unu gwoshiru onwunu obu? G'ephe byanu me o -buru l'ephe a-dzota unu me unu -nodu eje iphe-ehuka; kele o g'unube ndu Jiuda nweberu mkpukpu igwerigwe bu g'agwa unu du-be igwerigwe.

²⁹? Denu g'o gude unu nodu epfu l'o nweru iphe, mu meru unu? Ee! Unu tukwakwaru g'unu ha kwefukotaru mu ike! Nokwa iphe, Chipfu eepfu.

³⁰Iphe, mu chiru ndibe unu bukwa iphe-mmanu; g'o to budu l'ephe eye onu k'emezi iphe, epe mesweru-a. Ogu-echi ngu suwaru ndu mpfuchiru unu pyaapya g'oduma, alajashi iphe o guderu alajashi.

³¹Unube ogbo nta; unu lenaa enya ree l'opfu Chipfu, suru: ? Mu bujeru ndu Izurelu echiegu; too ali, gbahuru tsukiribaa? ? Denu g'o gude ndibe mu nodu epfufe su: 'Anyi nwekwaru onwanyi aghaphe g'o du anyi. Ophu anyi abyapfutabaedu ngu ozo?'

³²Nwamgboko ? oozohaje iyagba iya? Too nwanyi, ala ji; ? oozohaje iphe, e gude kwaa ya akwa ala ji? Obenu le ndibe mu zohawaru mu ujiku olemole, ete nweedu aguta.

³³Lewaro g'i gude achọ n-yemobu achọ iya k'erengete! Mbụ l'unwanyi, kachakpoo adu njo be i zichawaru iphe, iime.

³⁴Oo l'uwe ngu bẹ ndiphe humaru mee-ndzụ ndu ukpa, adudu iphe, ephe meru; l'ebe abụ l'i guderu phẹ l'eka ephe etsuka ụlo ngu. “I mechakpoo iphemiphe ono;

³⁵i nọdu epfukwaro sụ l'ọ tọ dukwa iphe, i mejeru. L'ehu tee ghukwa mu egbu l'opfu ehu ngu. Olee mu e-kpekwanu ngu ikpe; eshinu i sụru l'ọ tọ dudu iphe, i mejeru.

³⁶? Denu g'o gude i tsoru aghaphe achọ g'i gbanwee ụzo ngu. O kwa g'ọ tọ dudu iphe, ndu Asiriya duru ike meeru ngu bụ gẹ ndu Ijiputu adudu iphe, ephe a-dụ ike emeru ngu.

³⁷Ii-mechakwa shikwapho l'eka ono vuru eka l'ishi lwajẹ; kelee mu tukowaru ndu ono, i kporu obu yeru ono jika; ophu ephe e-yekwaru ngu eka.”

Jieremaya 3

Ndu Ízurelu, e te gudedu ire phẹ eka

¹“O -buru lẹ nwoke chifuru nyee ya; nwanyi ono -paru iya haa je aluru nwoke ozo; nwoke ono; ? oo-chokwarupho nwanyi ono eje to? Ono ? to budu aturuw alị l'opfu l'opfu? Obenu lẹ gubedua gbawaru ukpara l'eka ndu du igwerigwe, unu l'ephe eshi onya. ? Ii-du ike lwaphuta azu lwapfuta mu to? Nokwa iphe, Chipfu eepfu bu ono.”

²Palia enya huma nggeregede eka aagwaje iphe. ? O nwekpoo eka ono g'ọ ha a noda phaa ngu kutukutu? L'aguga gbororo bẹ inodujecha ele enya onya; mbu noduchaa g'eka ndu Arabu no l'echiegu. I merwuakwaru alị l'ukpara ono, iigba ono; yee ejo-iphe ono, iime ono.

³Nokwa g'o gude e sephu mini azu g'o to dzeshi. Ophu mini ishi-apha edzejeedu ililekpoo. Olee iimele-a umere nwanyi-ukpara. Ophu i kwedu haa g'iphere gude ngu.

⁴“O kwa l'i wataru mu eku oku su: ‘Nnana mu-e! O kwa ngu bu onye shi lẹ teke mu bu nwata ehe mu!

⁵? Ehu a-nodu egbuwa ngu ro egbu tekenteke to? Oke-ehu-egbu ngu; ? oo-no jasụ l'ojejeje to?’ Oo egube ono bẹ inoduje eepfu opfu; ole iphe, bukpo ejo-ememe, ii-du ike mee; bẹ i mekotawaru.”

Ndu Ízurelu me ndu Jiuda gbaru g'izimanu lwa phẹ azu

⁶No iya; o buru teke Jiosaya shi buru eze bẹ Chipfu suru mu-a: “? I humawaru iphe, Ízurelu ono, e te gudedu ire iya eka ono meru? O tukokpooru ubvu, ha l'eli; mekpoo oshi, jaru ajaja jekota je anodu ria ogori.

⁷Mu dobesu l'o -mecha iphemiphe ono bẹ oo-lwaphuta azu lwapfuta mu; obenu l'o to meduru iya nno. Tem nune iya nwanyi, e te egudekwapho ire iya eka bu Jiuda toko iphemiphe ono, oome ono humakota.

⁸Mu bya ederu ekwo achifu nu onye ono, e gudedu ire iya eka ono, bu Ízurelu chifu iya; opfu l'o rinukaru ogori. Mu byakwaro ahuma lẹ nune iya nwanyi, e gudedu ire iya eka kwapho, bu Jiuda bẹ ndu aguduru. Yebedua tugbukwapho lufu je eriahaa ogori.

⁹O buru l'oo l'urwuali, Ízurelu shi arwu ta adudu iphe, Jiuda guberu iya meru g'o gude o merwushia ali; mbu yele iphe, e meru le mkpuma; yee ophu e meru l'oshi nodu eri ogori.

¹⁰Iphemiphe-a mekotakpo Ízurelu; ophu o meduru nwune iya nwanyi, e gudedu ire iya aka bu Jiuda g'o gude obu iya g'o ha lwapfuta mu; o buleru-a eregede be o gude lwa. Nokwa iphe, Chipfu eepfu.”

¹¹Chipfu bya asukwa mu pho: “Ízurelu ono, ekwedu nkemu ilile ono kakwa apfubekoto eme le Jiuda, e gudedu ire iya aka.

¹²Woru ozi-a je ezia ndu isheli; su phe-a: ‘Lwadupho; gube Ízurelu ono, ekwedu nkemu ono! O kwa Chipfu eepfu opfu ono. Mu taa gbanwubekwaru ngu iphu ozo; kele mu phunukakwaru obu-imemini. Nokwa iphe, Chipfu eepfu. Ehu taa noduekwaro egu mu egu l'opfu egu ngu.

¹³Oo epho g'i kweta l'ikpe nmaru ngu. L'i kwefuru Chipfu, bu Chileke ngu ike; bya eworu eme iphe-oma ngu je atukaaru agwa ndu ohozo nanunanu l'iphe, bukpo mkpula oshi, jaru ajaja; ophu iimejeedu iphe, mu suru g'i meje. Nokwa olu Chipfu.

¹⁴“Unu lwadupho; unube ndu ono, ekwedu nkemu ono! Nokwa iphe, Chipfu eepfu; kele o kwa mbedua bu ji, alu unu. Mu a-hokwa unu nanunanu le mkpuku le mkpuku; hoo unu ebo ebo l'ipfu l'ipfu gude lwa Zayonu.

¹⁵Noo teke mu a-nu unu ndu a-noduje eche unu g'onye eche aturu ophu e-shi mu l'obu, bu ndu e-gude mmamiphe yee nkwamenya dua unu.

¹⁶O -rwua mboku ono, bu teke unu a-kawa igwe buru l'ali-a; be epe tee pfubaekwa k'okpoko oghandzu ke Chipfu. Mbu l'o too bahubaedu phe l'egomunggo; ophu epe abyadu anyatabaa ya. Ophu oghoroko iya adubaedu phe; teme ophu epe emebaedu okpoko oghandzu ozo. Nokwa iphe, Chipfu eepfu bu ono.

¹⁷Teke ono be ee-ku Jierusalemu “aba-eze Chipfu.” O buru le Jierusalemu be ohamoha e-dzukoje bya akwabe epha Chipfu ubvu. Epe tee mebaedu iphe, shi phe l'ejo okpoma mgbashi phe ono.

¹⁸O -rwua mboku ono be ndu onu-ulo Jiuda a-tugbabe l'onu-ulo Ízurelu; epe eshi l'ali, du l'uzo isheli tuko bya bya eburu l'ali ono, mu nuru ndiche unu phe g'o buru okiphe phe ono.” “

Ndu ke Chileke abaru agwa ozo eja

¹⁹Mube Chipfu l'onwomu su: “Lenu le mu gege egudekpopho egu-utso emekpoe ngu pho ge nwa; woru eguru ali, du ree nu ngu; mbu aka kachaa ree l'okiphe, ndu oha l'ophu enweje enwenwe. Mu shi dobesu l'ii-ku mu nna; ophu ji-hadu mu etsotso.

²⁰Obenu l'oo ge nwanyi, ji iya egudedu ire iya aka adujeru ji iya gheleghelehele bu g'unu duru mbedua; unube onu-ulo Ízurelu. Nokwa iphe, Chipfu eepfu bu ono.”

²¹A nūmaru olu, ada lẹ nggeregede ẹka aagwajẹ iphe. Ọ buri ẹkwa, ẹphe ara; tẹme ẹphe nọdu arwo arworwo; mbu unwu Ízurelu; kele ẹphe shiswewaru uzo phe bya azohawa Chipfu, bu Chileke phe.

²²“Unu lwadupho; unube ndu ono, ekweedu ke Chileke ono! Mu e-me g'unu ta abuheru ndu laphuru azu.” “Ao; anyi abyapfuta ngu-a; kele o ngu bu Chipfu bya aburu Chileke anyi.

²³Tororo bu l'onye ele enya ge nggeregede ẹka aagwajẹ iphe dzoo ya; ele enya iphe iphoro; ophu uzù, aatù l'eli úbvú adudu onye o-o-dzo. Hoo haa bu l'oo Chipfu, bu Chileke anyi be bu onye ndzota ke ndu Ízurelu.

²⁴E -shikpo teke anyi bu okorobyia be agwa agwa ono, bugbaa iphe-iphere ono tukoakwaru nwakanya, nna anyi oche phe setaru ripyaa; mbu aturu yee eghu phe; yee eswi phe; yee unwu phe nwoke; me unwu phe nwanyi.

²⁵G'anyi zenu azee l'eli iphere anyi obu; anyi anodunu g'e kpua anyi iphu le nu. L'anyi le nna anyi oche phe meakwaru Chipfu, bu Chileke anyi iphe-ẹji. Noo kele anyi te emejeduru iphe, Chipfu bu Chileke anyi suru g'anyi mee; e -shi teke anyi bu okorobyia byasu nta-a.”

Jieremaya 4

Oku izimanu alwa azu

¹Wakwa iphe, Chipfu epfu baa: “O -buri l'ii-lwa; gube Ízurelu; g'i lwapfutanu mu! O -buri l'ii-tso agwa ono, bu mu ebyi ono ogo ge mu ta ahumajehe iya; ophu i kpa-phuhueduru akpaphuhu;

²tẹme o -buri l'ii-noduje egude ire-lanu; waa ikpe, pfuru oto; waa apfubekoto ribua angu su: ‘Eshinu Chipfu no ndzu g'o no iya-a’ be Chileke e-gude iswi ehu iya kebe ohamoha l'oma; tẹme ohamoha ono egude iswi ehu iya riaha ubvu.”

³Su-a; wakwa iphe, Chipfu epfu anu ndu Jiuda waa ndu Jierusalemu: “Unu kopyashinaa ẹka a koduru akoko! Unu ta akushinu iphe l'egbudu!

⁴Unu bunaa onwunu ubvu; buaru iya Chipfu! Unu bunaa onwunu ubvu ime-obu; unube ndu Jiuda yee ndu Jierusalemu. Odumeka be oke ehu-eghu yebe Chileke a-gbanwuhukwa tsuaha g'oku. O buri iphe, a-kpa iya nu bu ejo-ememe, unu mewaru. O -wata etsutsu; ta adukwa onye a-gbanyi iya nu.”

Ọla-l'iswi, e-shi l'isheli

⁵“Unu raa ya arara l'ali ndu Jiuda! Unu echia ya le mkpu le Jierusalemu su: ‘Unu gbua opu-ogu tso ru ali ndu Ízurelu l'ophu!’ Unu rashia ora ike su: ‘Unu dzukobe l'eka lanu! G'anyi gbala laa mkpukpu, a kpu-pheru igbulo mgburugburu!’

⁶Unu palia ẹkwa-ohubama g'e jeshia ubvu Zayonu! Unu gbalaa je anodu ndzu! Be ejekpokwa anmarwube; kele mu shikwa l'uzo isheli gude ọla-l'iswi abya; mbu mgbu-onwu, a-du ejo eji.”

⁷Oduma shiakwa l'epfukala iya wafuta. Ola-iphe-l'iswi k'oha l'ophu be gbalihuakwaru nu. O shiakwa l'eka o no tugbua eje g'o mee ali unu ono g'o buru ochobu. Mkpukpu unu a-tuko buchaaru ikpozu; ophu o dudu onye bya l'ebubaru l'ime iya.

⁸Oo ya bu le-a; unu yee uwe-aphu; raa ekwa; chia mkpu-ekwa; kele o-re-phuruphuru, bu ehueghu Chipfu teke alaphukwa azu l'ehu anyi.

⁹Chipfu suru-a: "O -rwua mboku ono be meji a-tofukwa ndu eze epe le ndu-ishi. Ndzu-agugu egude ndu-uke Chileke; ndu mpfuchiru Chileke agbachihuchaa nchi."

¹⁰O buru iya bu; mu su: "Haa; gube Nnajiuphu, bu Chipfu; ndu-a epe le ndu Jierusalemu be i dusweakwaru uzo rengurengu kpo; kele i suru phe le nchi adukpokwaa phe doo. Ole ogu-echi be a dabekwanuru anyi l'ekpiri!"

¹¹O -rwua teke ono be aa-karu ndu-a epe le ndu Jierusalemu su phe-a: "Ejo pherephere, erebushi anu l'ehu, e-shi le nggeregede, no l'echiegu ono; l'e-zi zipfuta ndibe mu; ophu o bukwa g'o phuchaa phe aphucha ozoo g'o mechaa phe emecha.

¹²Pherephere ophu a-ka ono njo, be l'e-shikwapho mube Chipfu l'eka. Nta-a bu ge mu bya anmaa phe ikpe."

¹³Lenu! Ohogu obu l'asokwa pulapula g'urwukpu abya. Ugbo-inya phe nodu ezi phaaphaaphaa g'oke-pherephere abya. Inya phe kakwa ugo eme egwa. Nshio anyi! Anyi laakwaru l'iswi!

¹⁴Gube Jierusalemu; sashinaa ejo-ememe, no ngu l'obu huma l'aa-dzota ngu! ? Bu jasu teke ole be ii-ha g'ejo oriri kwaa ngu l'obu?

¹⁵O dudu onye-ozu, shi le mkpukpu Danu ara iya arara ephu l'ejo-iphe byapfutaru ali ubvu ubvu Ifuremu.

¹⁶"Woru iphe-a pfiaru ohamoha! Raaru iya ndu Jierusalemu arara; su phe le ndu ohogu phe shikwa l'ali eka du enya abya. Epe nodu echi mkpu-ogu ekpu mkpukpu le mkpukpu, nogbaa l'ali Jiuda.

¹⁷Epe no-pee ya mgburugburu ge ndu eche nche l'egu; opfu l'o kwefuru mu ike. Nokwa iphe, Chipfu eepfu.

¹⁸"O kwa umere ngu; yee iphe, i gude eka ngu meta be lotaru iphe-a kobe ngu. Owaa bukwa iphe, be echi ngu. Oomeshikwa ehuka ike; teme o nodu alo eka le meji!"

Jieremaya agu aphu ndibe iya

¹⁹Epho mu-o! Epho mu-o! Oolokwa mu eka le meji. Meji edekwa mu kukuku l'ime mu. Mu ta adukwa ike edobe onu doo; kele mu numawaru opu-ogu. Mu numawaru mkpu, echi l'iphu ogu.

²⁰Ola-l'iswi tsopyabe ola-l'iswi. Ali ono l'ophu buakwaa ikpozu. Ibe mu g'o ha be a tukoerupho mebyia le buregedegengu; tuko ulo mu mebyishia le ntabu-enya lanu.

²¹? Bu jasu teke ole be mu a-nodu ele ogu enya l'oophuko; mu anukwapho eka eegbu opu-ogu?

²²“Ndibe mu bukwa ndu eswe; kele ephe ta amadu onye mu bu. Ephe bu unwegirima, enwedu egomunggo. Teme ophu iphe edojedu phe enya. Iphe, ephe maru enya iya bu eme ejo-ememe; ophu ephe amadu eme iphe, du ree.”

²³Mu bya elee enya l'eliphe mgburugburu; ophu o nwedu ugbugba; teme ophu o dudu iphe, du iya nu. Mu bya elee l'imigwe; ophu o duedu iphoro, du iya nu.

²⁴Mu bya elee enya l'eli ubvu ubvu; ephe tuko anmagbaa jijijiii; obvu obvu nodu angagbaa anganga.

²⁵Mu bya elee enya; ophu o duedu nemadzu, mu humaru. Iphe, bukpo enu, ephe l'eli tukowaa phehuchaa.

²⁶Mu bya ejeshia ele enya; ali, e shi emehuje iphe a koru iya; buwaru mgbegu-evevee. Iphe, bu mkpukpu, nokota iya nu g'o ha bukotawaru ikpozu l'iphu Chipfu; mbu l'iphu o-re-phuruphuru, bu ehueghu iya onoya.

²⁷Wakwa iphe, Chipfu epfu baa: “Ali ono l'ophu a-bukwaru ikpozu; ole mu tee mebyishibedu iya ro l'ophu.

²⁸Oo ya bu l'eliphe a-gu aphu. Imigwe, no l'ephekerephe agbahu ochii; kele mu pfuakwaru iphe, mu pfuru; ophu mu alakwa azu azu. Mu pfuakwaru g'oo-du; ophu mu a-ghakwa enya l'azu.”

²⁹Ndu mkpukpu ono l'ophu

-numaepho igiji ndu chi inya abya ugu; yee ndu chi apfu abya ugu; ephe agbalaa je edomigbaa onwophe l'egbudu; ndu awuba l'ogba, du l'ubvu je edomishia onwophe. Ephe atuko mkpukpu phe g'o ha gbadogbaa gbalaa. O to duedu ophu nemadzu eburu.

³⁰? Bukwanu gunu be iime gube ochobu onoya? ? Denu g'o gude i yee uwe, eke meeme; teme i yee iyagba, e meru le mkpola-ododo? ? Denu g'o gude i gude iphe techishia enya? Akwa, i kwaru onwongu bukwa ke mmanu. Ndu gu l'ephe eshi onya be i dukwaa ashu. Ephe gbekwanu achowa ndzu ngu.

³¹Mu numakwaru olu-ekwa onye du ge nwanyi, ime eme; mbu l'uude, ootsu du ge k'onye ime-oduu l'eme. Olu ono bukwa ke Nwada Zayonu, l'eme g'oome tua unme; machiru aka iya epfu su: “Oowaa! Ike abvuakwaa mu. Ndzu mu be e woakwaru nu ndu mgbugbumadzu.”

Jieremaya 5

O to dudu onye pfuru oto

¹“Unu tsokpoerupho oma gbororo Jierusalemu jee iphu l'azu; lephee enya maeshiduru; chochaa l'edupfu l'edupfu phe maru me unu a-huma nwonye lanu, bu onye eme ire-lanu; teme o nodu achoje iphe, bu okpobe opfu. Oo ya bu le mu aguaru mkpukpu ono nvu.

²A makwaru-a l'ephe egudeje epha Chipfu ria angu; ole angu ono, ephe eri ono bukwa uka be ephe adzu.”

³Gùbe Chipfu; ? tò bụdu iphe, bụ ire-lanụ bẹ iinoduje ele ẹnya iya? I chiru phẹ iphe; ophu o meduru phẹ ẹhuka. I bya egwee phẹ arakabya; ophu ẹphe ekwekwapho emezita iphe, ẹphe mesweru. Ẹphe mechaa iphu phẹ; o shihugbaa dũngudungu gẹ mkpuma; bya ajika l'izimanu taa lwadu phẹ azu.

⁴Mu bya ariá sù: “Ndu-a bukwa ndu ukpa; teme ẹphe buru ndu eme eswe. Noo kele ẹphe ta amadu ụzo kẹ Chipfu. Mbụ l'ẹphe ta amadu iphe, Chileke phẹ sùru g'ẹphe meje.

⁵Oo ya bụ l'oo gẹ mu bya ejepfu ndu ophu bụ ndu-ishi je epfuru yeru phẹ. Ẹphebedua a-kabekwa maru ụzo kẹ Chipfu; mbụ iphe, Chileke phẹ sùru g'ẹphe meje.” Olee o bụle-a gẹ ndu ophu dụ bụ g'ẹphe dụ. Ẹphebedua kwapho mebyiwaru iphe, shi segbabẹ mu l'ẹphe; bya agbabua ụdo, e shi gude kekota anyi l'ẹphe.

⁶Oo ya bụ l'oduma e-shi l'oswa bya afuaru phẹ. Mbụ l'ejo-nkuta-oswa e-shi l'echiegu bya atapyashia phẹ. Agụ e-domi l'oma mkpukpu phẹ kwaberu phẹ; g'o lajashia phẹ iphiriba iphiriba; mbụ mẹ o -dukupooru onye ophu jeru afuta; kele ekwefu-ike ophu ẹphe kwefuru pawaru ẹka; teme alaphu azu, ẹphe laphuru pawaa igwerigwe.

⁷“? Denu g'o gude mu je l'aguru unu nvu? Unwu unu gbadoakwaru mu; bya egude agwa, abudu Chileke riahaa angu. Olee o kwa mbedua emekotaru phẹ iphe, bụ mkpa phẹ g'o ha. Ẹphe nodu erikwapho ogori bya awu gbiigbiigbi eje l'ulo unwanyi-ukpara.

⁸Ẹphe bụ inya, a nu-jiru ẹpho ree, eshi okee agushi ike; kele g'ẹphe ha aragba mimimi agbapfu nyee nwoke ibe phẹ.

⁹Bụ ẹphe -mechaa nno; mu ahaa phẹ gẹ mu ta nu phẹ aphụ iya to? ? Bụ oha, dū egube ono bẹ mu ta agwatadu ugwo iphe, ẹphe eme? Nokwa olu Chipfu.

¹⁰Unu je atuko upho opfu-vayinu iya ono phokashichaa; olee o tò bukwa kẹ g'unu mebyishibebekota iya g'o ha. Unu kwashichaa ya ekali; kele ndu-a ta aduedu ophu bụ kẹ Chipfu.

¹¹Ndu onu-ulo Izurelu yee ndu onu-ulo Jiuda bẹ mewaru ophu mu egudedu ire phẹ ẹka ililekpoo. Nokwa iphe, Chipfu eepfu.”

Chipfu ajika ndu Izurelu

¹²Ẹphe dzuwaru uka kpua Chipfu; kele ẹphe sùru: “O tò dukwa iphe, oo-me! Ophu o dukwa iphe, byaru eme anyi. Ogu taa dapfukwa anyi; ophu okpa-nri abyapfutakwa anyi.

¹³Ndu mpfuchiru Chileke ta adukwa iphe ozo, ẹphe bụ gbahaa pherephere. Ophu opfu Chileke anọedu phẹ l'ime. Oo ya bụ g'e mee phẹ iphe, ẹphe sùru l'oo-me ndu ozo.”

¹⁴Oo ya bụ le-a; wakwa iphe, Chipfu, bụ Chileke; bya aburu Okalibe-Kakota-Ike eepfu baa: “Eshinu ndu-a pfuru egube opfu-a bẹ mu e-me g'opfu mu, dū gùbe Jieremaya l'onu buru oku; ndu-a aburu nkụ, oo-nodu eke.”

15Wakwa iphe, Chipfu epfu baa: “Gùbe ọnu-ùlo Ízurelu; mu gudekwa ndu shi ẹka dụ ẹnya abapfuta ngu. Ọha ọbu bụ ọha, shi l'ichee; bya aburu ọha, ike dụ; ndu ị tị madu opfu-alị phe; ọphu ịinudu iphe, ẹphe epfu.

16Ẹkpa-apfu phe dụgbaa g'ilu, gheru ọnu. Teme g'ẹphe ha tukuru bụru ndu dụ ike l'ogu.

17Ẹphe a-tuko iphe, i gege akpata l'opfu ripyaa bya eripyaa nri, i nweru enweru. Ẹphe atapyaa unwu ngu unwoke me unwanyi; ẹphe atapyaa ikpoto egbu me aturu ngu; mekpoo eswi ngu; ẹphe eripyaa opfu-vayinu ngu; mekpoo oshi figu ngu; ẹphe egude ogu-echi mebyishia mkpukpu le mkpukpu ngu, bu ndu ọphu a kpụ-pheru igbulo mgburugburu, bu mkpukpu ị kpọru obu yeru.

18“Obenu le-a; o -rwua mboku ono; be mu tee mebyishibekwa unu rengurengu. Noo iphe, Chipfu epfu bu ono.

19Teke ndu Ízurelu jiru su: ‘? Bụ gunu kparu iphe, Chipfu, bu Chileke anyi meru anyi egube ọwa-a?’ Unu asu phe le-a: ‘Eshinu unu gbadoru Chipfu bya eje agwota ọbu ndu ọhozo gwalaha l'alị unu; be nta-a be unu e-jeahaaru ndu ọhozo ozi l'alị, abudu k'unu.’ “

Okwa, Chipfu nmaru ndu nkiya

20“Unu raa iphe-a arara g'ọnu-ùlo Jiékoju numa! Unu ejekwapho echia ya le mkpu l'alị Jiuda su phe le-a:

21Unu numakwa iphe-a; unube ndu eme eswe; teme ọphu unu enwedu egomunggo; unube ndu nweru ẹnya; ọphu unu aphudu iya uzo. Unu nweru nchi; ọphu unu anudu iya iphe.

22Wakwa iphe, Chipfu epfu baa: ? To gbaduru g'unu gege anodu atsụ mu ebvu? ? To gbaduru g'unu a-nodu mu l'iphu phua kpaakpaakpaa. O kwa mbedua gude eja-evevee kpaa oke alị yee eze-enyimu. Teme mu tu-bua le jasụ l'ojejoje be o to byadu l'asoghata iya. Akpara-mini a-tukpokwaa so gborogboro; ole o to dakadu iya. Oo-tukpoo woowoowo; ole o to soghatadu iya.

23Obenu le ndu-a buchaa ndu ejo-okpoma. Teme ekwefu ike dụ phe l'obu. Ẹphe ghakobewaru; o buri phe atugbu.

24Ẹphe ta asujedu onwophe: ‘G'anyi tsushikwa Chipfu, bu Chileke anyi ebvu; onye edzeje mini ishi-apha yee mini udzumini l'orwuberu iya; bya aburu iya doberu teke emetaje iphe e meberu l'alị.’

25Oo emeswe, unu emesweje be meru g'egube iphe ono ta adu. O buri iphe-ẹji unu meru; ọphu iphe, dụ ree erwudu unu ẹka.

26“A -bya l'eka ndibe mu doru be ndu eme ejo-iphe nokwa iya; ndu egepajeru ge ndu agba onya-enu; mekpoo ge ndu agba onya, ẹphe e-gude nmata nemadzu.

27Oo g'unwu-enu ejije ẹpfune iya-a bu g'eregede eregede jiru ọlo phe pyimu. Ẹphe byawaru bya enweru iphe bya aburu ndu ike dụ.

²⁸Èphe bya adachaa okporokpo dū kẹ ẹp̄furepfu. Ọp̄hu iphe-ẹji, ẹp̄he eme enwēdu ókè. Èp̄he ta ahajẹduru ndu enwēdu nna enge; ọp̄hu ẹp̄he agbajẹduru ndu akpa nri ọdzori.

²⁹“Wakwa iphe, Chipfu ep̄fu baa: ? Tọ gbadoru kẹ gẹ mu nua p̄hẹ aphụ iphe-a, ẹp̄he eme-a tọo? ? Tọ gbadoru gẹ mu melata ẹgube ọha, dū ẹgube ọwa-a iphe, ẹp̄he eme mu tọo?”

³⁰Iphe, aasọ oyi; mẹ iphe, anyi ishi ẹdzu meakwaru l'ali-a:

³¹Lẹ ndu mpfuchiru ep̄fukwa iphe, abudu eviya. Ndu uke buru ike-ọkp̄u bẹ ẹp̄he gude buru ishi. Ọ buru ẹgube ono bu g'ọ dū ndibe mu ree. Obenu lẹ-a; ? bu gunu bẹ unu eme mẹ o -rwua l'ikpazụ iya?”

Jieremaya 6

Ndu ọhogu anọ-phe Jierúsalem̄u mgburugburu

¹“Unubẹ oshilọkpa Benjaminu; unu gbadaaphọ ọso ndzụ unu! Unu shidupho lẹ Jierúsalem̄u gbafu! Unu jedupho eḡbua opu-ọgu lẹ mkp̄kp̄u Tekowa! Unu nwube ọku agba ama lẹ mkp̄kp̄u Bẹtu-Hakeremu; kele ẹjo-iphe shikwa l'uzo isheli achafuta; mbu ẹjo-iphe, a-tuko iphe mebyishikota!

²Mu e-mebyishikwa nwada Zayonu, bu onye ono, ama ntumatu ono bya aduchaa nwa tekuteku ono.

³Ndu eche aturu a-chiru aturu p̄hẹ bya afuaru iya. Èp̄he abya eworu ulo-ọgu p̄hẹ kp̄u-pee ya mgburugburu. Onyemonye ekebuta uswe iya nkiya.”

⁴“Unu kwakobekwa g'unu l'ẹp̄he lwua ọgu! Unu gbalihu g'anyi jee ọgu l'echi eswe! Obenu lẹ-a; lewaro ya; iphoro, dū l'eswe anyihuakwa. Teme onyonyo uzenyashi hawa ogologo.

⁵Ọo ya bu lẹ-a; unu gbalihu g'anyi lwua ọgu l'enyashi je emebyishia ibe p̄hẹ ẹka nguru anguru!”

⁶Wakwa iphe, Chipfu, bu Okalibe-Kakota-Ike eepfu baa: “Unu gbutsushia oshi gude je akpo ọkp̄o-kuu kp̄o-pee Jierúsalem̄u mgburugburu! Mkp̄kp̄u-a bẹ e chifutajekwa iphe; kele iphe, jiru iya nu bu eme nemadzụ ewere.

⁷Ọ kwa ẹgube ono, mini anoduje asoshi l'anya-mini ono bu g'ẹjo-iphe shi iya aso asoshihu. Mkpawere yee emebyishi iphe bu ebubu l'ime iya. Iphe-ememe, eme iya nu; yee iphe, e mekaru iya dukota l'ip̄hu mu mkpurumkpuru.

⁸Numakwa alo ẹka lẹ nchi-a; gube Jierúsalem̄u; odumeka bẹ mu a-ghakwaru ngu azu; bya emee ngu g'i buru ochobu; k'ọp̄hu bu l'ọ tọ dudu onye byaru eburu l'ime iya.”

⁹Wakwa iphe, Chipfu, bu Okalibe-Kakota-Ike eepfu baa: “Èp̄he a-tutu nwa ndu Izurelu, phoduru nu ẹgube ono, aatoje nwehu tutua akpuru vayinu nwa ndu ọp̄hu phoduru nu ono. Èp̄he abya atughaa ẹka ghotu p̄hẹ g'onye agho vayinu.”

10? Bụ onye bẹ mu e-pfubaaru opfu nū lọo ya ẹka lẹ nchị? ? Bụ onye a-ngabere mu nchị l'olu? A swọ-chishiakwaru pẹ nchị; k'opfu bụ l'ephe ta anuedu iphe lẹ nchị. Opfu Chipfu anọdujewa egbu pẹ egbu. O tọ dujeedu pẹ ree anuma.

11Obenu lẹ mbedua bẹ oke-eghu egbu, Chipfu eme g'ọ tükoshi pẹ jiru mu obu; k'opfu bụ lẹ mu taa dudu ike atagbu iya lẹ nshi. “Woru iya kpua unwegirima, nọ l'oma gbororo! Kpukwaa ya pho unwokorobya, kuru l'eka lanu. Nwoke yee nyee ya bẹ ootukocha nmata; mbu ephenebo; mechakpoo ndu bu ogerenya; mbu ndu akahu tutsuwaru.

12Ulo pẹ ulo pẹ bẹ ee-wocharu nū ndu ozo; mekpoo alị pẹ; me unyomu pẹ; me mu -machiepho ẹka byia ndu bu l'alị ono. Nokwa iphe, Chipfu eepfu.

13E -shikpo l'onye ophu kachaa nwanshii; jasụ l'onye ophu kachaa shii; g'ephe ha emekotaepho ughoro urwu; mekpoo ndu mpfuchiru Chileke pẹ; me ndu-uke Chileke pẹ nno pho; g'ephe ha agbakotaepho ẹregede.

14Onwo, aba ndibe mu bẹ ephe anọduje eme enyiru enyiru g'ọ bụ l'ọ tọ dudu iphe, o bụ. ‘Nchị dukwa doo! Nchị dukwa doo!’ Noo iphe, ephe anọduje epfu bụ ono; l'ebe abụ lẹ nchị dū doo.

15? Bụ iphere ahuma, ephe meshiru dū pẹ tọ? Waawakwa. Iphere ta adukpoda pẹ ililekpoo! Ephe ta makpodanu g'aasoje enya. Noo g'ọ gude ephe je l'etsoru ndu daru iko daa. Ephe e-rwu alị teke mu a-wata pẹ ahụ ahùhù. Nokwa iphe, Chipfu eepfu.”

16Wakwa iphe, Chipfu epfu baa: Unu pfukpodarupho lẹ mgbakata-uzo lee enya! Unu jieshikwa aji uzo, shi l'ichee! Unu jia aji ẹka uzo, dū ree dū! Unu awata eshi uzo ono! Noo teke meji a-nmapfuru unu. “Obenu l'ephe suleru-a l'ephe te eshidu iya.

17Mu hotaru ndu nche dobe g'ephe chee unu nche bya epfua sụ g'unu ngabeje nchị l'oda opu-ogu pẹ; unu jika sụ l'unu taa ngabedu!

18“Oo ya bụ lẹ-a; unu numakwa owa-a; unube ohamoha! Unu lerwetakwa enya ree; unube ndu ekebe; g'unu ahuma iphe, e-me pẹ nū.

19Gube mgboko; numakwa: Mu gudeakwa ola-l'iswi abapfuta ndu-a; mbu mebyi iphe, ejo-oriri pẹ mitaru. Noo kele ephe ta ngabeduru nchị l'opfu mu. Teme ephe jika ekemu, mu turu dobe.

20Unwù-isensu, shi l'alị Sheba, aakporu mu oku; ? mu gude iya eme gunu; je akpachakpoo l'omanko, shi l'alị, dū enya? Ngweja-akpo-oku unu bẹ mu ta anatajekwa; ophu anu, unu anọduje egburu mu aduekwa mu ree.”

21Oo ya bụ lẹ-a; wakwa iphe, Chipfu epfu baa: “Mu e-dobe iphe, a-dū ndu-a upfu l'okpa. Nna me unwu a-tuko vukota iya daa iko. Ndu obutobu me ndu eshi onyà atuko gude iya laa l'iswi.”

22Wakwa iphe, Chipfu epfu baa: “Unu lenu; o nwekwaru ndu ojogu, a kpatsuru ephe shi l'alị uzo isheli, awu abya. Oha obu bu oha, paru ẹka. Eka ephe shi bụ l'eka igwe beru alị beru.

²³Iphe, ẹphe chi abya bu apfu yee arwa. Ẹphe du ẹjo ẹhuka; teme ophu ẹphe aphudu obu-imemini. Ẹphu phe aduje g'eka eze-enyimu aso gborogboro l'eka ẹphe agba l'inya phe eje abya. Ẹphe doru onwophe ge ndu no l'ogu eje abyapfuta ngu; abya ngu etso ogu; gube Nwada Zayonu!"

²⁴A kọakwaru anyi akọ phe. Eka nwukotachaepho anyi lwaalwaa. Meji tofuwaru anyi. Mbụ iphe-ẹhuka, byaru anyi dọepho ge ke nwanyi, ime eme.

²⁵Unu ta alufukwa l'egu! Ophu o dukwa onye a-nodu aghaphe le gbororo; kele ndu ohogu ono chikwa ogu-echi. Teme iphe, eye ebvu tukoru uzo ekameka.

²⁶"Unube ndibe mu; unu yee uwe-aphu; gwoo onwunu le ntu! Unu raa ekwa; ẹjo-ekwa, du ge k'onye nwa iya lanu nwuhuru; kele o kwa: a -bya l'amaru; ola-l'iswi ono abya afuaru anyi.

²⁷Mu meakwaru ngu onye a-hu ndibe mu ama. Ii-noduje elerweta phe enya; hua uzo phe ama.

²⁸G'ẹphe ha bukota ndu kwefuru ike, obu kporu gbengu, buepho iphe, ẹphe tsoru aghaphe eme bu eye mgbamu. G'ẹphe ha tukoeppo arwu ali. Ẹphe bu onyirubvu yee igwe.

²⁹Ekò, aanma be oku iya ata pfupfupfu; k'ophu ee-gude oku kepyashia otanjele. Obenu l'onye-uzú eme ke mmanu; kele ndu ẹjo-iphe ta abudu l'e mewaru; ẹphe bvuchaa.

³⁰Iphe, e kuru phe bu; mkpola-ochaa, a jikaru ajika; noo kele Chipfu jikawaru phe."

Jieremaya 7

Abu ke Chileke l'eregede

¹Wakwa ozi, Chipfu ziru Jieremaya:

²"Je apfuru l'onu-abata eze-ulo Chipfu raa ozi-a arara l'eka ono: Unu numakwa opfu ke Chipfu; unube ndu Jiuda l'ophu, bu ndu eshije l'onu-abata-a eje abaru Chipfu ẹja.

³Wakwa iphe, Chipfu epfu; mbu Okalibe-Kakota-Ike, bu Chileke ndu Izurelu: Unu mezia uzo unu; yee umere unu; ge mu e-kwe g'unu buru l'eka-a.

⁴Unu ta akpokwaru obu ye l'opfu ndephu ono su: 'Wakwa eze-ulo Chipfu; eze-ulo Chipfu; eze-ulo Chipfu!'

⁵"O -buru l'unu gbanweru uzo unu okpobe agbanwe; bya agbanwee umere unu; bya ekpeharu nwibe unu ikpe, pfuru oto;

⁶o -buru l'unu te emeedu ndu lwaru alwalwa ewere; me ndu enwedu nna; me unwanyi, ji phe anodedu; ophu unu egbedu ndu adudu iphe, ẹphe meru l'eka-a; teme o -buru l'unu ta agbadu etso agwa l'agwa ozo, buhukwaa onwunu be unu emeka iphe;

⁷noo teke mu a-ha unu g'unu buru l'eka-a; mbu ali ono, mu nuru ndiche unu phe g'o buru nkephe jasụ l'ojejoje.

- 8“Obenu lẹ-a; unu lenu; iphe, unu kpọru obu yeru bukwa opfu ndephu, adudu iphe, ọ bu.
- 9? Unu a-nọdu ezi iphuru; egbu ọchi; eri ogori; eri angu ẹregede; akpọru Balu ụnwù-isensu ọku; agba etso agwa l'agwa, unu amadu;
- 10e mechakwa; unu abya apfuru l'iphu mu l'ulo-a, bu ọlo ọphu eeku ẹpha mu alaru-a; pfuru su: ‘A nafutawaru anyi k'ọphu anyi a-nọdu eme ahuma ahuma-a?’
- 11? Ọ du g'ulo-a, eeku ẹpha mu alaru-a be unu mewaru; ọ buru ẹka ndu ana nfu edomije onwophe? Ọle mu elekponupho unu ẹnya! Nokwa iphe, Chipfu eepfu.
- 12Unu tugbunaa nta-a je l'ẹka mu vuru ọzo họta g'ọ buru ẹka mu e-buru eburu le mkpukpu Shilo; je ahumawaro iphe, mu meru iya; ọ buru iphe, kparu iya nu bu ẹjo- iphe ndibe mu, bu ndu Izurelu emegbabe.
- 13Teke ono, unu emekotakpoo iphemiphe ono; mu pfukwaru yeru unu. Mu -pfuchaa; mu epfubaa; ọphu unu angaduru mu nchi. Mu kua unu oku; ọphu unu azaduru mu enu. Noo iphe, Chipfu eepfu.
- 14Oo ya bu l'oo iphe ono, mu meru Shilo ono be mu e-mekwapho ọlo-a, eeku ẹpha mu alaru-a; mbu eze-ulo Chileke ono, bu ọlo ono, unu kpọru obu yeru ono; mbu ẹka ono, mu nuru unu; bya anukwa iya pho nna unu oche phe ono.
- 15Mu a-chifu unu l'ataphu mu egube ono, mu chifuru unwune unu g'ephhe ha, bu ndu Ifuremu.
- 16“Oo ya bu lẹ-a; ge gube Jieremaya te epfukwa nu mu l'iswi ẹhu ndu-a. Te echikwaru phe mkpu; ọphu iirwokwaru phe arworwo; kele mu taa ngakwaru ngu nchi.
- 17? Ọ du g'i ti humaduru iphe, ẹphe eme l'oma mkpukpu le mkpukpu, nogbaa l'ali ndu Jiuda; mekpoo l'onu gbororo Jierusalemu?
- 18Unwegirima akpa nku; ndu nna nọdu aphu-nwu ọku; unwanyi nọdu agwophube ukpokutu witi, koru ekoko g'ephhe gude meeru eze-nwanyi igwe akara. ẹphe nọdu agbaru agwa ọzo mee gude agwa iya k'ọphu ẹphe a-kpatsu mu ẹhu-eghu.
- 19Obenu lẹ-a; ? bu mbedua be ẹphe akpatsu ẹhu-eghu? ? To buchidu-a onwophe be ẹphe emekata; shi nno eme onwophe iphe-iphere? Nokwa iphe, Chipfu eepfu.
- 20Oo ya bu lẹ-a; wakwa iphe, Nnajiuphu, bu Chipfu eepfu baa: Oke-ẹhu-eghu mu be aa-wukwa l'ẹka-a; me l'ẹhu nemadzu; mekpoo l'ẹhu anu; me l'eli oshi, no l'egu; mekpoo le mebyi iphe, eemeta l'ali; l'o tsua ntsulanu; ọ to dudu onye a-du ike agbanyi iya.
- 21“Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Unu gururo ngweja-akpo-oku unu yekobe le ngweja mmanu ọzo; unu ataro anu iphe obu l'onwunu;

²²Kele teke mu dufutaru ndiche unu phe l'ali Ijiputu pfuru opfu nu phe; be o to bulekwapho ekemu k'egwe ngweja-akpo-oku; yee ke ngweja mmanu ozo be mu turu nu phe.

²³Obenu le mu tukwarupho ekemu-a nu phe su phe: Unu meje iphe, mu suru g'unu meje; g'unu ahuma le mu a-buru Chileke unu; unu aburu ndibe mu. Unu tsojekpoeppo uzo iphe, mu karu unu su g'unu tsoje g'o hakpo; k'ophu oo-duru unu le ree.

²⁴Obenu l'ephe ta angabeduru nchi; ophu ephe eyeduru onu; ochia iphe, ephe meru bu l'ephe tsoru iphe, ephe ritaru l'ejo okpoma phe. Obeta ophu ephe a-nodu eje l'iphu l'iphu; ephe nodu ala azu azu.

²⁵E -shi teke ono, ndiche unu phe futaru l'ali Ijiputu ono byasu nta-a; mboku-mboku kpo; be mu anodujeppo ezi ndu-ozu mu, bu ndu mpfuchiru mu g'ephe byapfuta unu; mu -zichaa; mu ezibaa.

²⁶Obenu l'ephe ta ngaduru mu nchi; ophu ephe eyeduru mu onu. Ephe wolerau olu dobe gborojii; mee ejo-iphe, ka ke nna phe oche shii.

²⁷“Gube Jieremaya; i -pfuchakpooru phe nu iphemiphe-a be ephe taa ngakwaru ngu nchi. I -kua phe oku be ephe taa zakwa ngu enu.

²⁸Oo ya bu le-a; waa iphe, ii-pfuru phe baa: Wakwa oha, te emeduru iphe, Chipfu, bu Chileke iya pfuru; ophu ephe emezijedu iphe, ephe mesweru. Ire-lanu laakwaru l'iswi; o gbawaru oso gbafu; ophu o nohedu phe l'ogbogboromonu.

Nsuda Teterii

²⁹Kpushia egbushi ngu woru je etuphakpoeppo etupha. L'i jekpooro le nggeregede aka aagwaje iphe je anodu gua aphu; kele Chipfu jikakwaru ogbo ono, o tu-koshiru oke-ehu-eghu iya ono; mbu l'o gwobewaru phe agwobe ophu.”

³⁰Wakwa iphe, Chipfu epfu baa: “Ndu Jiuda meakwaru ejo-ememe l'enya mu. Ephe dobeakwaru ahuma phe ono l'ulo ono, eeku epha mu alaru ono; woru iya turwua.

³¹Ephe kpuchawaru enya aka aagwaje iphe le nsuda Hinomu gua ya Tofetu; g'o buru aka ephe a-kpoje unwu phe unwoke me unwanyi oku. Iphe ono buru iphe, mu asuduru g'ephe meje; ophu o batajekpodaru mu nu l'uche abata ophu.

³²Oo ya bu le-a; wakwa iphe, Chipfu epfu baa: Lekwa; mboku abyakwa teke eemechaa; e tee kuedu iya Tofetu; ozoo nsuda Hinomu. Ochia iphe, ee-kuje iya bu nsuda Teterii; kele ephe e-mechaa lia odzu le Tofetu jasu a taa humabaedu aka ee-lije odzu l'eka ono.

³³Noo teke odzu ndu-a l'a-buru nri enu, ephe l'eli; yee anu, bu l'eliphe. O to dudu onye a-chi phe chia k'achifu phe.

³⁴Mu emee g'ehu-utso; yee ete eswa mee bugemu. Olu onye alu nwanyi; yee nwanyi, aachọ alulu taa duedu le mkpukpu, nogbaa l'ali ndu Jiuda l'ophu; yele oma gbororo Jierusalem; kele ali-a a-buru ochobu.”

Jieremaya 8

¹“Wakwa iphe, Chipfu epfu baa. O -rwua teke ono bẹ ọkpu ndu shi buri eze l'alì ndu Jiuda; yee ọkpu kẹ ndu-ishi phe; waa ọkpu ndu-uke yee ndu mpfuchiru Chileke; yee ọkpu ndu Jierusalemu l'ophu bẹ aa-chìshichaa l'ìlu phe.

²L'a chiru phe bya awushi jakpata; anwu echi iya; onwa echi iya; iphe, bukpo kpokpode, no l'igwe echikota iya; mbu iphe ono, ephe shi yee obu; shi ejeru iya ozi; mbu iphe ono, ephe shi etso ono; ejeru iya l'aji; abaru iya eja ono. A taa tutukobedu phe; ophu eelidu phe elili; ochia iphe, e-me nu bu l'ephe a-du g'ekiriko nshi, wushiru l'alì.

³Teke ono, mu a-chikashi phe ono bẹ nwa ndu ophu a-nodu ndzu l'iphe, bukpo alì eka mu a-chiru phe laa a-hata anwuhu eme l'anodu ndzu. Nokwa iphe, Chipfu, bu Okalibe-Kakota-Ike eepfu.”

Iphe-ẹji yee eje iphe-ẹhuka

⁴“Wafukwaa iphe, ii-pfuru phe baa: Wakwa iphe, Chipfu epfu baa: Amadu -daa iko; ? to gbeshijeedu to? Onye laphuru azu; ? to lwajeedu azu to?

⁵? Denukwanu g'o gude ndu-a nodu alaepho azu azu? Mbu-a; ? denu g'o gude ndu Jierusalemu nodu alaepho azu azu? O buru eregede bẹ ephe jeru je agbaka eka; jika l'ephe taa lwadu.

⁶Mu ngabekpooru nchi rengurengu; obenu l'ephe te epfujedu iphe, pfuru nhamuha. Ophu o dudu g'ephe ha ophu izimanu ejo-iphe phe alwaje azu; kẹ g'o su: ‘? Banaa gunu bẹ mu meru egube-a?’ Onyemonye emeepho iphe, guru iya nu; g'eka inya eme ena l'iphu ogu.

⁷Mbukponu oku-eswi-uda, me kerekete; mekpoo agbeta; yee ororokiriro; g'ephe ha makotaerupho teke ephe afutaje. Obenu l'unube ndibe mu ta amadu ekemu mu.

⁸“? Denu g'unu e-shi su l'unu maru iphe; l'unu nweru ekemu kẹ Chipfu l'eka ndu ede ekwo gude eregede gbanwee ya; o buru iphe-eregede?

⁹Ndu maru iphe bẹ ee-mekwa iphe-iphere. Ee-ye phe ebvu; nmata phe l'onya. Eshinu ephe jikawaru opfu kẹ Chipfu; ? bu egube mmamiphe gunu bẹ ephe nweru?

¹⁰Oo ya bu le mu e-duru unyomu phe nu unwoke ozo. Mu eworu alì phe nu ndu ophu l'e-nweru iya nu. L'e shikpo l'onye kachaa nwanshii jasu l'onye ophu kachaa shii; g'ephe ha emekotaepho ughoro enweru iphe. Ndu mpfuchiru me ndu-uke Chileke tukoaerupho buru iphe lanu. G'ephe ha agbakotaepho eregede.

¹¹Onwo, aba ndibe mu bẹ ephe anoduje eme obvu enyiru enyiru g'o bu l'o to dudu iphe, o bu. ‘Nchi dukwa doo; nchi dukwa doo!’ Noo iphe, ephe anoduje epfu bu ono; l'ebe abu le nchi du doo.

¹²? Bu iphere ahuma ahuma, ephe meshiru du phe to? Waawakwa. Iphere ta adukpoda phe ililekpo. Ephe ta makpodanu g'aasoje enya. Noo g'o gude ephe je

l'etsoru ndu daru iko daa. Mbụ l'ẹphe e-rwu alì teke mu a-wata phẹ echi iphe. Nokwa iphe, Chipfu eepfu.

13“Wakwa iphe, Chipfu eepfu baa: Mu e-mekwa g'ọ tọ dọ iphe, ẹphe a-nọdu akpata l'opfu phẹ. Vayinu phẹ taa mịekwa amimi. Ọphu oshi figu phẹ amiekwa mebyi. Ọ-lakọta ẹkwo. Iphe, mu shi nụ phẹ bẹ mu a-natakọta phẹ.”

14“? Bụnaa ọunu kparu iphe, anyi nọ l'ẹka-a nggujungguji ọwa-a? Unu dzukọbenu g'anyi tuko gbalaa gbaru lagbaa lẹ mkpukpu ono, a kpu-pheru igbulọ mgburugburu ono je anọdu l'ẹka ono laa l'iswi; kele Chipfu, bụ Chileke anyi tu-buwaru l'anyi a-la l'iswi; bya eworu mini, e yeru iphe, egbu egbugbu woru chee anyi. Ọ buru iphe, kparu iya nụ bụ l'anyi meru iya iphe-ẹji.

15Anyi leri ẹnya nchi-adu-doo; ọphu ọ dudu iphe-oma, byaru anyi. Anyi lee ẹnya teke e-me g'ẹhu dọ ike; ọ buerupho ebvu bẹ eeye anyi.

16Unme, inya ndu ọhogu anyi, nọ lẹ mkpukpu Danu ezi bẹ a -gbẹ l'ẹka-a anu. Teke oke-inya phẹ raaharu mimiimii; ndu alì-a l'ophu awata anma pyaapyaapya; kele ẹphe byaru g'ẹphe lwekọta alì-a l'ophu; yee iphemiphe, nọ iya nụ; mebyia mkpukpu lẹ mkpukpu; yee ndu bu iya nụ.”

17“Lekwa lẹ-a; mu a-chiru ẹjo agwo ẹjo agwo yeru unu; mbụ ogiji ogiji, adudu iphe, a-suru iya ederitaru. Ọ buru agwo ono a-bya atagbushia unu. Nokwa iphe, Chipfu eepfu.”

18Aphu-a, byaru mu nụ-a ta adukwa onye suru mu aduta. Meji tofuakwaru mu l'ime onwomu.

19Ngabekpodapho nchi numa mkpu, ndibe mu echi; mkpu, ẹphe gbẹ l'alì, dọ ẹnya ẹnya echi sụ: “? Ọ dọ gẹ Chipfu ta anọdu lẹ Zayonu tọ? ? Onye Eze phẹ ono ta anọdu iya tọ?” “? Bụ ọunu meru g'o gude ẹphe gude ntekpe phẹ kpatsu mu iwe; mbụ nshi ono, ẹphe gwotaru l'ohozo ono, adudu iphe, ọ bụ ono?”

20“Teke akpatajẹ iphe e meberu l'alì bvụakwaru; Ọnanwu bvụwa; ọphu a dzoduru anyi.”

21Eshinu e gwewaru ndibe mu arakabya bukwa mu bẹ e gwepyaashiru. Mu agukwa aphu; teme ndzu-agugu nọdu agushi mu ike.

22? Tọ dukpoda ọbvuetete, dọ l'alì Giladu? ? Ọ dọ g'ọ tọ dukpoda onye eme ọbvuetete l'ẹka ono? ? Bukwanu ọunu meru g'o gude ọphu onwo ono, aba ndibe mu ono akadụ phẹ mma?

Jieremaya 9

1Ọ dọ g'a sụ l'ishi mu bụ nggele, mini shi asoshihu. Ẹnya mu buru ẹka ẹnya-mini futaru! Mu gege anọduepho ara ẹkwa eswe l'enyashi k'egbushi, eegbushi ndibe anyi.

2Ọ dọ g'a sụ lẹ mu nweru ẹka ndu ije akwajẹ l'echiegu; mẹ mu ahaepho ndibe anyi; mbụ tugbukpoepho lufuru phẹ; kele ẹphe erikọta ogori g'ẹphe ha; ndu kuru l'ẹka ono bukota ndu egudedu ire phẹ ẹka.

³Èphe ekweje ire phẹ g'onye kweru apfụ gude agba ụka agbagba. Ọ tọ bụdu ire-lanụ bẹ èphe gude atụ okoo l'alị-a. “Èphe eshije l'eme iphe-ẹjị ọwa-a daba l'eme ọzo; ọpflu èphe amadụ onye mu bụ.” Nokwa iphe, Chipfu eepfu bụ ono.

⁴Sụ-a; onyenonu kpakwaru ndu èphe l'iya eshi

ònyà l'aphara! Ọpflu unu akpọkwaru obu yeru unwune unu unwoke; kele nwoke, yele nwibe iya bụ nwune agbakwaru iya ẹregede. Teme iphe, bukpo onye unu l'iya eshi ònyà bụru onye mgbamu.

⁵Ònyà nọdu agbaru onye yele iya eshi ẹregede. Ọpflu ọ duedu onye epfufe ire-lanụ. Èphe tukuraru zia ire phẹ adzụ ụka. Èphe mewaru iphe-ẹjị jasụ èphe tulu onwophe ayi.

⁶Ọ buepho l'unu bu l'echilabọ ẹregede. “Èphe gude agba ẹregede ono jika amaru onye mu bụ.” Nokwa iphe, Chipfu eepfu.

⁷Ọo ya bụ lẹ-a; wakwa iphe, Chipfu, bụ Ọkalibe-Kakota-Ike eepfu baa: “Lekwa; mu a-hukwa phẹ ama; nuchaa phẹ anucha; kele-a; ? buba gunu ọzo bẹ mu e-meba lẹ k'iphe-ẹjị, ndibe mu eme?”

⁸Ire phẹ bụ apfụ, egbu egbugbu. Èphe anọduje epfu opfu l'ẹregede. Onyemonye nọdu egudeje ire mecha-mecha epfu eyeru nwibe iya; o bekwanu l'o gude obu iya agbaru iya

ònyà.

⁹? Mu ta ahushi phẹ ahuhù iphe ono, èphe eme ono tọ? ? Mu te emelatashi phẹ iphe, èphe meru mu; mbu ndu alị-a tọ?” Nokwa iphe, Chipfu eepfu bụ ono.

¹⁰“Mu a-kwashị ẹnya-mini; kpoo mkpu-ekwa l'opfu-ehu úbvú úbvú. Mu abya agwa aphụ irwu eswa, du l'echiegu; kele ọ kposihuwaru nkụ; ọpflu ọ dudu ndu eshiswetajekwadu iya nu; ọpflu ọ duedu onye anumaje ọrà eswi l'eka ono. Unwenu, èphe l'eli phekashihuwaru; unwanu gbakashihu.”

¹¹Wakwa iphe, Chipfu epfu baa: “Jierusalemu bẹ mu e-me g'ọ buri ikpozu; eka nkuta-oswa e-buru. Mu jekwa e-mekwapho ge mkpukpu le mkpukpu, nogbaa l'alị ndu Jiuda buri ochobu; k'ọpflu bụ l'ọ tọ dudu onye ebu iya ebubu.”

¹²? Denu onye bụ nwoke, maru iphe ke g'iphe-a doo ya ẹnya? ? Bụ onye bẹ Chipfu ziru iphe k'ọpflu bụ l'ọo-du ike koo ya g'ọ doo ẹnya? ? Bụ gunu meru g'ọ gude e mebyishia alị-a woru iya togbo ophorokpo g'echiegu, a ta adudu onye aghaje iya aghaha?

¹³Wakwa iphe, Chipfu epfu baa: “Ọ kwa iphe, kparu iya nu bụ l'èphe gbadoru eme iphe, mu turu l'ekemu, bụ ọpflu mu turu doberu phẹ. Èphe te emeduru iphe, mu suru g'èphe meje; ọpflu èphe angaduru nchi l'ekemu mu.

¹⁴Ọ bụ-chiaru iphe, èphe jeru etsoru bụ ejo okpoma phẹ. Èphe jeru awata agwo nshi, bụ Balu, bụ iphe, ndiche phẹ ziru phẹ.

¹⁵Oo ya bu lẹ-a; wakwa iphe, Chipfu, bu Okalibe-Kakota-Ike eepfu baa; mbu Chileke ke ndu Izurelu: Lekwa; mu e-me ndu-a g'ephe ria nri, atso ilu. Mu emee phe; ephe anga mini, e yeru iphe, egbu egbu.

¹⁶Mu a-chikashi phe g'ephe dzuru ohamoha, bu eka ephe ta majeduru; ophu ndiche phe amajeduru iya. Ozo bu l'oo ogu-echi be mu e-gude chia phe jasu mu emebyishibe phe.”

¹⁷Wakwa iphe, Chipfu, bu Okalibe-Kakota-Ike eepfu baa: “Unu rinaa ya ariri nta! Unu kunaa unwanyi, akaje akaka ekwa g'ephe bya! Unu zikwaa g'e kua ndu ophu kachaa ara ekwa erengete g'ephe byakwapho!”

¹⁸“G'ephe bya egwegwa bya akaru anyi akaka ekwa jasu enya-mini awata anyi aso gborogboro l'enya; mbu g'enya-mini nodu awu anyi gbukugbuku l'ishishi enya.”

¹⁹Aanukwa akaka-ekwa, aaka le Zayonu eka ephe ara su: “Waa g'e mebyishiru anyi! Waa g'iphere anyi habe shii! Anyi hafutajekwa ali anyi-a kele ulo anyi be e mebyishichawaru.”

²⁰Nta-a bu lẹ-a; unube unwanyi; unu numakwa Opfu Chipfu! Unu saa nchi numa opfu, shi iya l'onu! Unu zikwa unwada unu g'aakaje akaka ekwa! G'onyenonu zia nwibe iya g'eechije mkpu ekwa!

²¹Onwu shiwaa le windo-ulo anyi pyobata bya abahu l'eka anyi meru; o nguru anguru. O bapfu unwegirima l'etsuzo; bya emee ophu unwokoroby edzukedu l'edupfu-oha.

²²Pfua su: “Wakwa iphe, Chipfu epfu: Odzu unwu-eliphe l'a-daka ge nshi l'oma-egu; g'eka e gburu ereshi; eswa iya wushiru; ophu o dudu onye achikobe iya nu.”

²³Wakwa iphe, Chipfu epfu baa: “G'onye maru iphe te egudekwa mmamiphe iya kua onwiya! Ophu onye okpehu du egudekwa okpehu iya kua onwiya! Ophu onye nweru iphe egudekwa iphe, o nweru kua onwiya!”

²⁴Ochia l'onye achu aba abaa; bu iphe, oo-gude aba abaa bu; le mu doru iya enya; teme o maru mu ree; mbu maru le mu bu Chipfu; le mu emeje iphe-oma; bya ekpe ikpe, pfuru oto; bya egoshi le mu pfuberekoto. O buru l'eliphe be mu emekota iphe ono; kele o bukota iphe, ememe iya aduje mu ree. Nokwa iphe, Chipfu eepfu.

²⁵Wakwa iphe, Chipfu epfu baa: “Lekwa; mboku abakwa, bu mboku, mu a-nu phe aphu; mbu ndu e buru ubvu l'ehu kpoloko;

²⁶mbu ndu Ijiputu; yee ndu Jiuda; waa ndu Edomu; waa ndu Amonu; waa ndu Mowabu; mekpoo iphe, bukpoo ndu bukota l'echiegu; mbu ndu akpuje ishi dabunuka iya adabu. Kele ohamoha ono g'ephe ha te ebuduru ubvu ililekpoo; teme je akpaa le ndu Izurelu l'ophu te ebukwarupho ubvu l'ime obu phe.”

Jieremaya 10

Chileke yee nshi

¹Unu numakwa iphe, Chipfu epfu anu unube onu-ulo Izurelu!

- ²Wakwa iphe, Chipfu epfu baa: “Unu ta anwukwa iphe, ndu ohamoha eme; ophu iphe-ohubama, emeshi l'akpaminigwe eyekwa unu ebvu. A makwaru-a l'udu iphe ono eyekwa ndu ohamoha ono ebvu;
- ³kele omelali ndu ono bu iphe, adudu iphe, o bu. Ephe egbutaje oshi l'oswa; ndu eme ona abya egude ayoo phe pyia ya.
- ⁴Ephe abya egude mkpola-ochaa me mkpola-ododo gude mee ya ona. Ephe abya egude ongu; yee nggu kpobe iya g'o to minga aminga.
- ⁵Nshi phe ono du ge nwanggiri-utobo, e keberu l'eka a koru iphe; mbu l'o too pfudu opfu. O buru apata be aapataje iya; kele o to jedu ije. Unu ta atsujekwa iya ebvu; kele o to mekajekwa iphe; ophu o dukwa iphe, du ree, oomeje.”
- ⁶O to dukwa onye du ge gube Chipfu. I paru eka; teme epha ngu be ike du.
- ⁷? Bu onye bu onye tege anodudu atsui ngu ebvu; gube eze ohamoha? Ono bukwa iphe, rwuberu ngu nu. L'iphe, bukpuo ndu mmamiphe, nokota l'ohamoha; mekpoo l'iphe, bukpuo ali-eze phe l'ophu be o to dukwa onye du ge ngu.
- ⁸Ephe bukota ndu enwedu egomunggo bya aburu ndu eswe. Iphe, ezi phe iphe bu ntekepe, a pyiru l'oshi, adudu urwu, o baru.
- ⁹Oo mkpola-ochaa, e tsuru ongu be e jeru eshi le mkpukpu Tashishi wota bya; yee mkpola-ododo, e jeru ewota le mkpukpu Ufazu, bucha iphe, ndu eme ona; yee ndu akpuzu kpuru. Nshi ono be a chitaru uwe, du urwukpu-urwukpu; yee ophu du uswe-uswe woru yee. Iphe ono bukotaru iphe, ndu maru eme ona meru dobe.
- ¹⁰Obenu le Chipfu bu iya bu okpobe Chileke. O bu iya bu Chileke, dzu ndzu. Teme o buru iya bu Eze, a-no jasui l'ojejoje. Ehu -nodu eghu iya eghu; eliphe l'ophu anmahu pyaapyaapya; ophu ndu ohamoha adudu ike ata nshi anata oke-ehu-eghu iya.
- ¹¹“Wakwa iphe, ii-pfuru phe baa: Agwa-a, abudu l'oo phe meru igwe; ophu o budu phe meru eliphe-a be e-mechakwaa laa l'iswi l'eliphe-a; laa l'iswi l'imigwe.”
- ¹²Oo Chileke be gude ike eka iya mee eliphe. O buru yebedua gude mmamiphe iya tua okpa mgboko-a. O buru yebedua gude nkwamenya iya phushi akpaminigwe.
- ¹³Oobujeru; o -dee edede l'igwe; igwe ara ora. O nodu emeje g'urwukpu shi l'eka igwe beru ali beru wata afuta. Ootuje egbigwe me igwe nodu edze mini. Teme o buru l'oba iya be ooshije ezi pherephere.
- ¹⁴Onyemonye te nwedu egomunggo; ophu o dudu onye kwaru enya. Iphe, bu ndu akpu uzu mkpola-ododo g'ephe ha be iphere nshi phe gudeakwaru. Ntekepe, ephe meru tukoru buru ughoshi; g'o to budu l'ootu unme l'onwiya.
- ¹⁵Oo iphe, adudu urwu, o baru; bya aburu iphe, e gude agba mgonu. O -rwua teke Chileke e-kpe ikpe be nshi ono a-bukotaru ola-l'iswi.

¹⁶Obenu l'onye ono, bu okiphe oshilokpa Jiékoṗu ono be ta abudu nno bu g'ò du; kele oo ya bu onye meru iphemiphe dobe; mechaa mee ndu Ízureḷu; mbu okpa-ipfu ono, bu okiphe iya ono. Onye ono be epha iya bu Chipfu; bya aburu Okalibe-Kakota-Ike.

Mgbu-ṗnwu, e-mechaa bya nu

¹⁷Unu kwakobekwa iphe unu g'unu alufu l'alí-a; unube ndu ono, ndu ohogu unu nopheru mgburugburu ono;

¹⁸kele-a; wakwa iphe, Chipfu epfu baa: “Nta-a be mu a-gba ndu bu l'alí-a ke swaramu gbafu mgba lanu. Mu emee phe ewere k'ophu aa-kpu phe le ndzu.”

¹⁹“Nshio mu; kele e mekaru mu iphe! Onwo, aba mu nu buru emeta emeta! Ole iphe, mu epfujeleru-a onwomu bu l'ò buwaa iphe-ememe, no swiru mu nu; mu je l'ataru iya nshi.

²⁰Ulo-ekwa mu be e mebyishiakwaru. Eri iya be a tukoakwaru gbabushichaa. Unwu mu shiakwa mu l'eka gbakashihu; ophu mu l'ephe anodu. O to dudu onye ophu phoduru nu ke g'oo-kpoberu mu ulo-ekwa obu ozo; ozokpoonu g'ò tularu mu nwamkpu.”

²¹Ndu eche anyi ge ndu eche aturu te nwedu egomunggo; ophu epe akpajedu Chipfu ishi. O buru iya meru g'ò gude ophu upete agbaeduru phe; a chia aturu phe nanunanu.

²²Unu lekwa! Nzi obu abyakwaa. Mbu oke utsu, e-shi l'uzo isheli etsu abya. Oo-me ali ndu Jiuda l'ò buru ochobu; aka nkuta-oswa e-buru.

Epfufu, Jieremaya pfuru nu Chileke

²³Gube Chipfu; mu makwaru-a le ndzu amadu ta abudu nkiya; l'ò to budu amadu anodu atu-ziru onwiya aka oo-zo okpa.

²⁴Jiko Chipfu; baaru mu mba! O kwa g'i gude ikpe, pfuru oto mee ya. G'ò to bukwa teke ehu egu ngu egu; a nonyakwa; i mee mu; ophu o dudu iphe, mu bu.

²⁵Tu-koshi ohamoha ono oke-ehu-egu ngu; mbu ndu ono, ekwedu nkengu ono. Tu-koshi iya ndu ono, te ekujedu epha ngu ono; kele epe riwaru oshilokpa Jiékoṗu ripyaa. Epe kewaru iya gburugburu gbeshi; bya emebyishia ali iya, bu ibe iya l'ophu.

Jieremaya 11

Ogbandzu ono be e mebyiru

¹Wakwa opfu, Chipfu pfuru nu Jieremaya. O suru iya:

²“Numakwa iphe, e pfuru gude gbaa ndzu ono; l'i wokwaru iya pho je epfuaru ndu Jiuda; yee ndu bu le Jierusalemu.

³Pfuaru phe su phe l'owa-a iphe, Chipfu, bu Chileke ndu Ízureḷu epfu baa: Onye a turu onu be o bu; mbu onye te emedu iphe, ogbandzu-a pfuru;

⁴mbụ opfu oḡbandzu, mu tūruro l'ekemu nū ndiche unu phẹ teke mu dufutaru phẹ l'alị Ijiputu; mbụ teke mu dufutaru phẹ lẹ phoophoophoo oku, agbazeje ígwè. Iphe, mu pfuru bụ: Unu meje iphemiphe, mu sūru g'unu meje; ọo ya bụ g'unu aburu ndibe mu; mbedua aburu Chileke unu.

⁵Noo teke mu e-mekota iphe, mu riburu ndiche unu phẹ nte lẹ mu e-me; sū lẹ mu a-nu phẹ alị, ẹra-eswi; yee manụ-ẹnwu jiru pyimu pyimu, bụ iya bụ alị-a, unu bu nta-a.” Mu sū iya: “Oo g'ọ dū; gube Chipfu.”

⁶Chipfu bya asū mu: “Raa ya arara l'alị ndu Jiuda; yele oma gbororo Jierúsalemu: Unu ngabẹ nchị l'opfu, dū l'oḡbandzu-a tsoo ya g'ọ dū.

⁷Eshi teke ono, mu dufutaru ndiche unu phẹ l'alị Ijiputu ono jasū ntanu-a bẹ mu shiekwapho lota phẹ ẹka lẹ nchị; mu -lọchaa; mu alọbaa sū phẹ: ‘Unu meje iphe, mu pfuru!’

⁸Obenu l'ẹphe ta angabeduru nchị; ophu ẹphe eyeduru onu; ọ chia iphe, ẹphe meru bụ l'ẹphe tsoru okpoma-mgbashi, shi phẹ l'ejo okpoma phẹ ono. O buri iya bụ lẹ mu atuko ọtu-ọnu, dukota l'oḡbandzu ono, mu sūru g'ẹphe tsoru; ẹphe jika l'ẹphe tee tsodu ono tukota phẹ.”

⁹Tobudu iya bụ lẹ Chipfu asū mu: “Ndu Jiuda yee ndu bu lẹ Jierúsalemu nokobeakwa achiru mu ejo idzu.

¹⁰Ẹphe laphuakwaru azu je emeahaa iphe-eji, ndiche phẹ meru, bụ ndu jikaru l'ẹphe taa ngadu nchị l'opfu, mu pfuru. Ẹphe tugbuakwaru je agwota obvu ozo, dugbanu jeahaaru iya ozi. Ndu onu-ulo Izurelu ẹphe lẹ ndu onu-ulo Jiuda tukoakwaru mebyia oḡbandzu ono, mu lẹ ndiche phẹ gbaru ono.

¹¹Oo ya bụ lẹ-a; wakwa iphe, Chipfu epfu baa: Mu e-mekwa g'oke iphe-ehuka dapfuta phẹ; ophu ẹphe anahukwa iya. O betakpoo ẹphe raku mu; mu taa ngakwaru phẹ nchị.

¹²Ndu bu lẹ mkpukpu, nogbaa l'alị ndu Jiuda; yee ndu Jierúsalemu l'e-je je araku agwa ono, ẹphe shi anoduje akporu unwu-isensu oku ono; ole ẹphe tee yeduru phẹ ẹka ililekpoo; me oke iphe-ehuka ono dapfue phẹ pho.

¹³Oo g'unu nweberu mkpukpu igwerigwe bukwapho g'unu nweru agwa igwerigwe; unube ndu Jiuda. Unu nwekwarupho ikpoto enya ẹka unu doberu, unu a-nodu akpo unwu-isensu oku; mbu akpo iya anu agwa iphere ono, bu Balu; enya ẹka ono dukwapho igwerigwe g'etsuzo, no lẹ Jierúsalemu.

¹⁴Ge gube Jieremaya te epfukwa nu mu l'iswi ehu ndu-a; ophu i chikwaru phẹ mkpu; ophu i rwokwaru phẹ arworwo; kele mu taa angakwaru phẹ nchị; m'ẹphe -kujee mu pho oku; m'ẹphe -nodu eje iphe-ehuka.”

¹⁵“? Bụ gunu bẹ ndu mu yeru obu eme l'eze-ulo mu; l'eka ẹphe l'ikpoto ndu ozo achi ejo idzu eme g'ẹphe chiru iya? ? Bụ anu, dū nsọ a-koshi g'a ta nu unu aphu too? O kwa teke unu eme ejo-iphe bẹ ehu anoduje atso unu utso.

¹⁶Chipfu kuru ngu oshi olivu, abya pulapula; teme o nodu ami mebyi, ama ntumatu l'ugbugba. Ole o o rã, igwe a-ra l'eka oke pherephere ezi be oo-gude kpoo ya oku; teme ekali iya agbakwashihu.

¹⁷“O kwa Chipfu, bu Okalibe-Kakota-Ike, bu onye dzaru ngu nu be tu-buru l'imechaa buru ola-l'iswi; noo kele onu-ulo ndu Izurelu; yele onu-ulo ndu Jiuda mewaru ejo-ememe; shi egube ono kpatsu mu iwe; kele ephe jeru anodu akpo unwu-isensu oku anu Balu.”

Aachiru Jieremaya ejo idzu

¹⁸Eshinu Chipfu kpuharu ejo idzu, ephe achiru mu goshi mu be mu maerupho iphe, ephe achi; kele teke ono be o gosheru mu pho iphe, ephe eme.

¹⁹Mu duperho ge nwaturu, eme gelee, a kpu eje egbugbu. Ophu mu amakpodaro l'achiwaru mu ejo idzu su: “Unu g'anyi mebyishia oshi ono yee mebyi iya. Unu g'anyi mee g'o chihu l'ali ndu dzu ndzu; k'ophu a ta abyadu anyatabaa epha iya.”

²⁰Obenu le-a; gube Chipfu, bu Okalibe-Kakota-Ike; gube onye ono, ekpeje ikpe, pfuru oto ono; teme i nodu ahuje okpoma yee oriri ama; ge mu humanu eka iigwata ugwo iphe, ephe meru mu l'ishi phe; kele o gubedua be mu e-doru g'o duru mu.

²¹“Oo ya bu le-a; wakwa iphe, Chipfu epfu l'ehu ndu mkpukpu Anatotu, bu ndu ono, achu ndzu ngu ono, bu ndu asuje g'i ti gudehekwa epha Chipfu epfu mpfuchiru; odumeka be ii-nwuhukwa phe l'eka.

²²Oo ya bu l'owakwa iphe, Chipfu, bu Okalibe-Kakota-Ike eepfu baa: Mu a-nukwa phe aphu. Unwokorobya phe bu ogu-echi be ee-gude gbushia phe. O buru egu e-gbushi unwu phe nwoke yee unwu phe nwanyi.

²³Ophu o dudu g'o ka mma l'o nweru nwa ndu aa-ha g'ephe phoduru phe. Noo kele mu e-me ge ndu Anatotu l'ophu lakota l'iswi; me o -rwuepho apha ono, aa-nu phe aphu ono.”

Jieremaya 12

Jieremaya agu aphu

¹Gube Chipfu; o to dudu teke i buedupho onye pfuberekoto; jasukpoo le ge mu echi ngu opfu-a. Ole o bu; mu e-pfukwaru ngu pho k'ikpe, pfuru oto, iikpeje. Sua; ? bu gunu kparu iphe, upete agbaru ndu ejo-iphe l'uzo phe? Mbua; ? bu gunu kparu iphe, eh u aduje ndu e gudedu ire phe eka guu?

²Oo ngu dzaru phe; ephe gbaa ogbarabvu; bya evua miahaha amimi. Ephe akpujeru ngu l'onu tekenteke. Obenu l'o to rwujedu phe l'obu.

³Obenu le mbedua be gube Chipfu maru. Iihumaje mu; teme i nodu enyochaje oriri, mu ariru ngu enyocha. Kputanu phe kpufu g'aturu, a kpu eje egbugbu! Wonuru phe dobe iche kwaberu mboku, aa-phu phe!

4? Bụ jasụ teke ole bẹ alị a-gụ aphụ gụ-beru; mbụ ẹswa, nọgbaa l'alị akpòshihukota nkụ? Ọ bụru iphe, kparụ iya nù bụ lẹ ndu bu iya nù bụ ndu eme ẹjo-iphe; o mee unwu anụ mẹ unwu ẹnu; ẹphe lakọta l'iswi. Ọphu kachaakponu bụ lẹ ndu ono bụ iphe, ẹphe epfu bụ: “Ọ tọo humakwa iphe, e-mechaa mee anyi.”

Ọnu, Chileke yeru

5“Ọ -bụru lẹ gụ lẹ ndu gude ọkpa gbaru ọso; ẹphe lọo ngu phelephela; bụ-chia ndu ọphu gude inya bẹ gụ l'ẹphe sūru atutu? Ọzo bụ lẹ-a; ọ -bụru l'upfu adu ngu l'alị, adudu iphe dū iya nū; ? denu g'ii-shi mekọta iya l'oswa ono, nọ lẹ mgboru ẹnyimu Jiódanu ono?

6Mbụ-a; unwune ngu nwoke; mbụ ndu unu ẹphe shi l'unuphu lanu; ẹphebedua deru ngu ye g'e gbua. Ẹphe woliru olu ara g'e mee ngu iphe, a-tsuru ngu nū. Ba adakobekwa phe; m'obeta ẹphe nọdu epfuru ngu opfu oma!”

7“Mu gbadowaru ndu ọnu-ulo mu. Mu gwọbawaru ndu ono, bụ okiphe mu ono. Ndu ono, dū mu l'obu ono bẹ mu yeakwaru l'ẹka ndu ọhogu phe.

8Okiphe mube Chileke ono byaakwaru bya adu mu g'oduma, bu l'oswa. Ọonoduje agbọru mu uja. Ọ bụru iphe ono meru g'o gude ọ dū mu ashi.

9Ndu ono, bụ okiphe mu ono; dūwaa mu g'enu, vọru kidikidi, bụ ẹnu, erije anu ẹnu ọzo; unwu-enu ọzo erijekwapho anu ibiya nọ-pee ya mgburugburu abya iya etso ọgu. Ẹphe je atuko iphe, bukpo anu, bu l'egbudu rwukoo g'ẹphe bya avua anu iya kpatakpata!

10Ikpoto ndu eche aturu mebyishiwaru opfu-vayinu mu. Teme ẹphe gude ọkpa zọo opfu mu pyakapyaka. Ẹguru opfu mu ono bẹ ẹphe meru; ọ bụru echiegu, dabyiru ke mmanu.

11E meru iya; ọ bụru okorobo-egu. Eshinu ọ bụ okorobo-egu; ọ guahaa aphụ rakuahaa mu. Mbụ l'alị ono l'ophu bẹ e meru; ọ bụru okorobo-egu; ọphu ọ dudu onye akpa iya ishi.

12Ndu mgbupya zeru gbiigbiigbi bya asopyabe nggeregede, nọgbaa l'echiegu. Ogu-echi Chipfu e-shi l'ishi alị-a ishi lanu sūa nemadzu pyaapyaasū jasū l'ishi iya ọphuu; ọphu ọ dudu m'onye lanu, ẹhu adu guu.

13Ẹphe kuru witi; ọle iphe, ẹphe mechaaru kpata bụ obvu obvu. Ẹphe sekashiru onwophẹ l'akanya; ọle ọ tọ dudu iphe, ẹphe setaru. Iphere iphe, ẹphe kpataru l'opfu phe nọdu aduje phe. Ọ bụru ẹka ẹhu egbu Chipfu egbu.”

14Wakwa iphe, Chipfu epfu baa: “Ọ -bụru ke ndu iwe ono, bụ obutobu mu ono g'ẹphe ha; mbụ ndu ono, denyiru ẹka l'okiphe, mu heru ndibe mu, bụ ndu Ízurelu g'ọ bụru okiphe phe ono; lekwa lẹ ndu ono bẹ mu e-phefu ephefu l'alị phe. Mu abyakwapho ephefu ndu Jiuda g'ẹphe ba nọhe l'echilabo phe.

15Teke mu phefuchaeru phe pho; mu abya aphuaru phe obu-imemini; duphutachaa phe azu nanunanu g'ẹphe haa; g'ẹphe lwaphuta azu l'okiphe phe ono;

¹⁶gude ɛpha mu riaha angu su: ‘Eshinu Chipfu no ndzu g’o no iya-a’; egube ono, ephe shiwaa zia ndibe mu ephe shi egudeje agwa, bu Balu eri angu ono; be ephe a-ngukwaru anguru l’echilabo ndibe mu.

¹⁷Obenu teke o bu l’o nweru oha, ete ekwedu ngabe nchi be mu e-phefukpoe phe pho rengurengu woru phe mebyishia. Nokwa iphe, Chipfu eepfu.”

Jieremaya 13

Akpɔ ocha, eeke l’upfu

¹Wakwa iphe, Chipfu epfu anu mu baa: “Tugbua je azua akpɔ-upfu, e meru l’ekwa ochaa kebe l’upfu; ole g’i ba tsekwa iya le mini.”

²Mu byanu eje azua akpɔ-upfu ge Chipfu pfuru; bya ekebe iya l’upfu.

³Noo ya; Chipfu byakwa bya epfuru opfu yeru mu k’ugbo ebo su mu:

⁴“Wota akpɔ-upfu ono, i zuru ono, i we l’upfu ono; gude iya je l’enyimu Yufuretisu je edomia ya l’ogba, du l’eze mkpuma.”

⁵Mu tugbukwa je elibe iya le mgboru enyimu Yufuretisu ge Chipfu ziru mu.

⁶A noekwapho ujiku olemole; Chipfu su mu: “Tugbua je l’enyimu Yufuretisu je avota akpɔ-upfu-a, mu suru g’i je edomia-a.”

⁷Noo ya; mu tugbunaa bya ejee l’enyimu Yufuretisu je avota akpɔ-upfu obu; mbu je ewofuta iya l’eka mu shi domia ya; obenu l’o mebyishihuwaru; ophu o duedu iphe, o du ree ememe m’ilile.

⁸Noo ya; Chipfu byakwa bya epfuru opfu yeru mu su mu:

⁹“Wakwa iphe, Chipfu epfu baa: Nokwa ge mu e-mebyishi eku-onwonye ke ndu Jiuda; yee oke eku-onwonye ke ndu Jierusalemu.

¹⁰Ndu-a, bu ndu ejo-iphe-a, bya aburu ndu jikaru l’ephe taa ngadu nchi l’opfu mu; ndu bu iphe, ephe anoduje eme bu iphe, shi phe l’ejo okpoma phe ono. O buru agwa ozo be ephe anoduje etso; ejeru phe ozi; abaru phe eja. Ndu ono bu g’akpɔ-upfu-a du-a bu g’ephe a-du; mbu l’o to dudu iphe, ephe a-du ree ememe m’ilile;

¹¹kele oo g’akpɔ eke l’upfu ekejeru l’upfu nemadzu-a bu ge mu meru ndu Izurelu; yele ndu Jiuda l’ophu ephe keru mu jimujimu l’ehu. Oo ya bu g’ephe a-buru ndibe mu; teme mu egude phe nweru epha; l’aaja mu ajaja akwabegbe mu ubvu. Obenu l’ephe ta angaduru nchi. Nokwa iphe, Chipfu eepfu.”

Akpɔ-mee

¹²“Pfuaru phe su phe le-a: Wakwa iphe, Chipfu epfu; mbu Chileke ke ndu Izurelu: ‘Iphe, bukpo akpɔ-mee l’ophu be ee-yejikota mee.’ Teke ephe suru ngu: ‘? Anyi ta amahaada l’ee-yeji mee l’akpɔ-mee?’

¹³L’i su phe-a: Wakwa iphe, Chipfu epfu baa: Mu e-me ge mee wata atsui iphe, bukpo ndu bu l’ali-a l’ophu; je akpachaa le ndu bu eze, bu ndu no l’aba-eze Dévidi;

mẹ ndu bu uke; mẹ ndu mpfuchiru Chileke; məkpoo iphe, bu ndu bukota le Jierúsalemu l'ophu.

14Mu e-nwuta phe je atupyabe nwibe phe; mbu ndu bu nna; mẹ ndu bu nwa nwoke. Nokwa iphe, Chipfu eepfu. Mu taa yoduru phe oshi; ophu mu aphuduru phe obu-imemini; ophu mu emeduru phe eze-iphe-oma ke ge mu haa ge mu te emebyishi phe.”

Eye ebvu akpu le ndzu

15Unu numakwa; unu ngabekwa nchi! Unu te ejekwa eku onwunu ekuku; kele Chipfu pfuakwaru iya g'oo-du.

16Unu kwabe Chipfu, bu Chileke unu ubvu! Odumeka be oo-mekwa g'ochii gbaa. Temе upfu akpo ngu l'okpa l'eli ubvu ono, agbakota ochii ono. Iphe, unu ele enya iya bu iphoro; ole oo-me iya l'ooburu onyonyo onwu. Temе l'oogbanwee ya; mee ya l'o gbahu tsukiribaa.

17Obenu le teke o bu l'unu ta angadu nchi be mu a-ra ekwa le mpya; kele unu kunukaru onwunu. Mu e-gude enya mu raa ekwa raghee ya araghe. Enya-mini aso mu gborogboro l'enya; kele unwu-aturu Chipfu be aa-kpu le ndzu.

18“Karū eze; yele nyee iya, bu eze-nwanyi su phe-a: Unu shikwa l'aba-eze unu nyizeta; kele okpu-eze unu ono, egbu nwijnwii ono e-mechakwaa dafuchaa unu l'ishi!

19Iphe, bu mkpukpu, nokota l'echiegu ndohali be aa-gu-chishicha agu-chishi; ophu o dudu onye suru iya aguha. Ndu Jiuda l'ophu be aa-kpokota laa ali aka ozo; mbu kpokota phe g'ephe hakota.”

20Palikpodapho enya apali huma ndu shi l'uzo isheli abya. ? Denu ikpoto aturu ono, e yeru ngu l'eka ono; mbu aturu ono, i shi gude eku onwunu ono?

21? Bu gunu be ii-pfu me o -chitaepho ndu ono, i shi dobesu l'ephe bu okpobe onya ngu ono bya achiru dobe; ephe buru ndu-ishi ngu phe? To o watadu ngu eme ehuka g'ime emeje nwanyi, du ime-a?

22Ozo bu; teke i jiru onwongu aji su: “? Bunaa gunu meru g'o gude iphe-a mee ngu?” Iphe, kparu iya nu bu l'iphe-eji ngu paru aka. Noo g'o gude a jia ngu uwele; woru ngu agada pakaa.

23Onye Kushi; ? oo-du ike gbanwee akpo-ehu iya? To o agu; ? oo-gbanwe mkpo ono, o chiru l'ehu ono? Nokwapho ge gube onye ejo-ememe kwowaru ehū ta agbanwekotadu iya eme iphe, du ree.

24Wakwa iphe, Chipfu epfu baa: “Mu e-mechaa phukashia ngu g'onye aphukashi eswa ereshi, pherephere, shi l'echiegu ezikashi ezikashi.

25Noo oke iya nkengu bu ono; mbu okiphe, mu tu-buhawaru doberu ngu. O buru iphe, kparu iya nu bu l'unu zoharu mu je akporu obu yeru agwa, ata abudu ire-lanu.

26Oo ya bu le-a; mu a-ji ngu uwele; phuta uwe ngu kpuke ngu l'iphu; k'ophu aahumakwanu iphe ono, emeje g'iphere du ngu ono.

²⁷Mu humaru ogori, iiri; yee m̄imiimii, ñinoduje ara agba ala l'eme ejo-ememe; mbu ukpara ono, ñigba; ophu iphere adudu ngu ono! Mu humakotaakwaru ahuma ahuma, ñinoduje eme l'eli úbvú; me ophu ñinoduje eme l'egu. Nshio gube Jierúsalemu! ? Bu jasú teke ole be ñi-du-beru inyinyi?"

Jieremaya 14

Anwụ a-kpọbe; unwu abya; ogu-echi etso iya

¹Wakwa opfu, Chipfu pfuru Jieremaya k'anwụ-akpọbe ono:

²"Ndu Jiuda agukwa aphụ. Mkpukpu, nokota iya nū gbajoshihukota agbajoshihu. Epeh nodu ara ekwa l'opfu ehu alì-a. Teme a nodu echikwapho mkpu le Jierúsalemu.

³Ndu a maru epha phe ziru ndu-ozì phe g'ephe je ekuta mini. Epeh je l'obvu-mini; ophu o dudu mini, du iya nū. Epeh paru ite phe l'ophorokpo lwa. Iphere du phe; teme meji tofuwa phe. Epeh woru iphe kpuchia ishi l'eka iphere du phe.

⁴Alì gbaakwaru oru; kele igwe te edzeduru mini wushi iya. Iphere gude ndu ako opfu. Epeh woru eka kpubegbaa l'iphu.

⁵Mbu je akpachaa le ne ele, bu l'egu gbaghachaa unwu, o nwuru k'òphúú; eka o to humaduru eswa, oo-ta.

⁶Nkapfu-igara-oswa pfuchaaru le nggeregede atu phepfuphepfu ge nkuta-oswa. Enya gbahukota phe ochii kele o to dudu eka epeh a-nodu taa nri."

⁷"A makwaru-a l'iphe-eji, anyi meru agba anyi ekebe; ole gube Chipfu; menaa iphe; g'epha ngu apfuru; kele anyi lawaru azu lamihu; teme anyi mewaa ngu iphe-eji.

⁸Gube onye bu ngu bu eka enya ndu Izurelu du; onye adzotaje phe nu m'ephe -nodu eje iphe-ehuka. ? Denu g'o gude i bya adu g'i byaru abyabya l'alì-a? Mbu i bya adu g'onye ije, l'a-no enyashi lanu kpoloko.

⁹? Denu g'o gude i du ge nwoke, a turu l'upfu; g'onye ike ogu du; obenu l'ike ta adudu iya ke g'o dzoo ndzu? Gube Chipfu; anyi le ngu tukonuru nodu. Teme anyi nodu aza epha alaru ngu. Ta agbadoshinu anyi!"

¹⁰Wakwa iphe, Chipfu epfu l'opfu ehu ndu-a: "Iphe, aduje phe ree shii bu aghaphe. Epeh te esedejedu okpa phe. Oo ya bu le mu taa natadu phe. Oo nta-a be oobyanya anyata ejo-iphe ono, epeh megbaberu ono; bya ahua phe ahuhù k'iphe-eji, epeh meru."

¹¹No iya; Chipfu bya asu mu: "Te pfukwa g'o duru ndu-a le ree.

¹²A makwaru-a l'ephe aswijeru Chileke egu; obekwanu le mu ta angadu nchi l'ekwa, epeh ara. A makwaru-a l'ephe egweru mu ngweja-akpo-oku; bya egwekwaru mu pho ngweja-nri. Obenu le mu taa natadu iya. O bu-chia iphe, mu e-me bu le mu e-gude ogu-echi mebyishia ndu-a. Mu egude okpa-nri; yee ejo iphe-ememe mebyikwaa phe pho."

13Ọ bụru iya bụ lẹ mu asụ: “Gube Nnajiuphu, bụ Chipfu; ndu mpfuchiru Chileke anọdujeekwapho epfuru phẹ sụ phẹ l'ephe taa ahụmakwa ogu-echi ahụma ophu; ophu egu emekwa phẹ. Mbụ lẹ gube Chileke e-me gẹ nchị dụ phẹ doo nọo ọdu l'alị-a.”

14Tọbudu iya bụ; Chipfu byakwa bya asụ mu: “Ndu mpfuchiru ono gudekwa epha mu adzụ ụka. Ọ tọ bụkwa mbedua ziru phẹ g'ephe bya; ophu ọ bụkwa mbedua turu phẹ eka; ophu ọ dukwa iphe, mu pfuru nụ phẹ. Mpfuchiru, ephe epfu anụ ngu bụ ophulenyanya eregede. Ephe nọdu agba eja, adudu iphe, ọ bụ; yee iphe, ephe ritaru l'okpoma phẹ.

15Ọo ya bụ lẹ-a; wakwa iphe, Chipfu epfu l'opfu ehu ndu mpfuchiru ono, gude epha mu epfu ono; mbụ ndu abudu mbedua ziru phẹ g'ephe je; ephe je anodu epfu sụ l'ọ tọ dudu ogu-echi; ọzoo egu, byaru edenyi ndu alị-a eka. Ndu mpfuchiru ono l'onwophe be bụ-a ogu-echi ono; yee okpa-nri ono e-mechaa mee g'ephe laa l'iswi.

16Teme ndu ono, ephe epfu anụ ono be ee-mechaa tuphaa etuphaa l'oma gbororo Jierusalemu; ọ bụru iphe, a-kpa iya nụ bụ okpa-nri ono; yee ogu-echi ono. Ophu ọ dudu onye a-dukwadunu ke g'o lia phẹ elili; ọzoo lia nyee phẹ; ọzoo nwa phẹ nwoke me ke nwanyi. Aphụ, rwuberu phẹ nụ be mu a-wu phẹ l'ehu.”

17Ọo ya bụ lẹ-a; pfuru iphe-a yeru phẹ: “G'enyanya-mini sokwa mu gborogboro l'enyanya eswe l'enyashi mkpụrumkpuru. Ndu mu a-nodu araru ekwa ono bụru nwada mu ono, adudu nwoke jepfujeru iya nụ ono; mbụ ndibe mu ono; kele onwo, aba phẹ nụ dụ ejo eji. Ọ bụru pyaapya be e chiru iya.

18Teke mu bamiru l'ime oha ono; mu ahuma odzu ndu e gude ogu-echi gbu. Teke mu bahuru lẹ mkpukpu phẹ; mu ahuma iphe, okpa-nri mebyishiru. Ndu uke me ndu mpfuchiru Chileke tukoakwaru lashia alị eka ephe amadu.”

19? Ọ dū g'i jikawaru Jiuda jikaghaa tọ? ? Tọ dudedu iphe, i guberu Zayonu tọ? ? Denu g'o gude i meka anyi iphe, ta akpohudu akpohu? Anyi leri enya nchị-adu-doo; ophu ọ dudu iphe, dū ree byaru anyi. Anyi lee enya teke ee-me g'ehu dū anyi ike. Ọ buerupho ebvu be a gbenu eye anyi.

20Gube Chipfu; ejo-iphe, anyi emegbabe rwuakwaru anyi l'ehu; yee ikpe, nmaru nna anyi oche phẹ. Anyi meakwaru ngu iphe-eji eviya kpọ.

21Jiko ta agbadokwa anyi; g'epha ngu apfuru! Te ewokwaru aba-eze ngu ono, dū biribiri ono hua l'alị! Nyatakwa ogbandzu anyi lẹ ngu! Te emebyikwa iya!

22? Ọ nweru nshi nshi ono, nọgbaa l'ohamoha ono, adudu iphe, ọ bụgbaa ono; ? ọ nweru ophu aduje ike dzee mini? Mbụ-a ? bụkponu igwe alwaje g'o ka mma l'ọo yegeyege mini? Waawakwa. Ọo gubedua; mbụ gube Chipfu, bụ Chileke anyi. Ọo ngu bụ eka enya dū anyi; kele ọo ngu emekota iphemiphe ono.

Jieremaya 15

- ¹Tɔbudu iya bụ; Chipfu bya asụ mu: Ọ tɔ ɔkwa m'obeta Mósísu yẹ Sámẹlu bya apfuru mu l'iphu; uche mu taa lakubeekwa ndu-a. Chífukpoe phẹ phọ achífú l'iphu mu! Haa phẹ g'ẹphe je!
- ²Teke ẹphe jiru ngu sụ: ? Bụ awe bẹ anyi a-la? Sụ phẹ-a: Wakwa iphe, Chipfu epfu baa: Ndu a tubuwaru l'ọo anwuhu e-gbu phẹ; bụ anwuhu e-gbu phẹ. Ndu a tubuwaru l'ee-gbu l'ogu-echi; l'e gbua phẹ l'ogu-echi. Ndu a tubuwaru l'ọo ẹgu e-gbu phẹ; ẹgu egbua phẹ. Ndu bụ lẹ ndzụ bẹ aa-kpụ phẹ; l'a kpua phẹ lẹ ndzụ.
- ³Wakwa iphe, Chipfu epfu baa: Mu e-zi uzi omeliwe ẹno g'o je emee phẹ l'iwe. Ogu-echi a-nọdu egbu egbugbu; nkuta aloo phẹ wuruwuru; unwu-enu, ephe l'eli; yẹ unwu anụ kẹ mgboko avukaa anụ phẹ; mee phẹ omeliwe.
- ⁴Mu e-me phẹ g'ẹphe buru ndu alì-eze unwu-eliphe l'ophu a-nọdu asọ oyi. Ọ buru iphe, kparụ iya nù bụ iphe, Manáse meru lẹ Jierúsalem. Manáse bụ nwa Hezekáya; tẹme ọ buru eze ndu Jiuda.
- ⁵Gube Jierúsalem; ? bụ onye a-yokpooru ngu oshi? ? Bụ onye a-guchiru ngu aphụ? ? Bụ onye a-dukpoo ike pfucha jia sụ: ? Denu g'oonwuru ngu?
- ⁶Wakwa iphe, Chipfu epfu baa: “Ị gbadowaru mu; laahaa azụ azụ. Ọo ya bụ lẹ mu a-zụ ngu ẹka gburumu woru ngu mebyishia. Ọphu ọ duedu iphe, e-me gẹ mu phuru ngu obu-imemini.
- ⁷Mu e-gude ajakpa phuchaa phẹ aphucha l'onu-abata onu-abata mkpukpu lẹ mkpukpu ono. Mu abya egbua phẹ mgbu-onwu; mbụ l'e-me ndibe mu ẹphe aburu mkpurupyata; noo kele ẹphe ta agbanweduru ọzo phẹ.
- ⁸Unwanyi phẹ, ji phẹ anọedu bẹ mu meru ẹphe ka ẹja, nọ l'aguga eze-enyimu igwerigwe. Eswe kee ẹbo mu wobata omeliwe gude dapfu ne, nwuru unwokorobya phẹ. Mu bya emee iphe anọ yokoo; yẹ iphe ndzụ-agugu; tị phẹ l'uzorehu.”
- ⁹Wakwa iphe, Chipfu epfu baa: “Ne nwanyi, nwutaru unwegirima ẹsaa meerupho yereketeke tị-buhuepho unme atụ-buhu. Ẹnyanwu nkiya rịba lẹ teke bukwa du echi eswe. E meru iya iphe-iphere; kpua ya iphu lẹ ntụ. Nwa ndu phoduru nù bẹ mu nwuru ye; e gude ogu-echi gbushia phẹ l'iphu ndu ohogu phẹ. Nokwa iphe, Chipfu eepfu.”
- ¹⁰Nshio mu; ne mu-e; ? bunaa gunu meru g'o gude ị nwua mu? Gẹ mu byaru bya aburu nwoke ophu yele ndu alì-a l'ophu byaru esehaa opfu dzoahaa ẹnya. Ọphu mu ejitadu ugwo; ophu mu ejiedu ejiejie; ọle onyemonye ephue mu phọ iphu.
- ¹¹Chipfu sukwaru-a: “Gẹ mu gbukwaru ngu iya tororo. Mu a-nafutakwa ngu; g'ọ-duru ngu lẹ ree. Mu e-me ndu ohogu ngu g'ẹphe wata ngu arwo arworwo; mẹ o -rwua teke ee-je iphe-ehuka; yẹ teke ee-me ndiphe mkpawere.
- ¹²Nemadzụ; ? ọo-du ike gbajia igwè? Mbụ igwè ono; ọzoo onyirubvu ono, a zuru l'alì ọzo isheli ono?

13“Eku, i kpataru; yele iphe, i nweru enweru be me e-nwuru ye g'a kwaa l'okwata. A taa pfudu ugwo iya. O buru iphe, kparu iya nu bu iphe-aji, imegbabe l'ali ngu mgburugburu.

14Mu e-me ngu g'i buru ohu l'eka ndu ohogu ngu l'ali, i mahaada; kele ehueghu mu gbanwuhuwaru oku, e-tsu ngu phuruphuru.”

15“Gube Chipfu; o kwa ngu bu onye maru nu. Nyatanu mu! Letanu mu enya! Gbanaaru mu odzori l'eka ndu akpa mu ehue. G'ehu te eghujedu ngu ehue egwegwa-a; be wofushinu mu. Nyatanu ge mu gude jebe iphe-iphere l'opfu ehue ngu.

16Mu numaru opfu ngu; mu nata iya ria ge nri eriri. O mee mu; ehue nodu atso mu utso. Teme o dukwa mu pho ree l'okpoma. O buru kele eeku mu ala l'epha ngu; gube Chipfu, bu Chileke; bya aburu Okalibe-Kakota-Ike.

17Mu teke anodu-swekwaa l'eka ndu mgbonu doru; ophu mu l'ephe eke anodu-swekwa eme emereme. Mu anoduje anopho nkinyi mu; kele mu maru l'eka ngu tukoru mu l'ehu; teme i mewaa; ehue nodu eghushi mu ehue ike.

18? Bu gunu meru g'o gude ophu iphe-a, l'eme mu ehuka-a emebuhudu emebuhu. Teme onwo, aba mu nu du ejo eji; teme ophu okpohudu akpohu. ? Iime g'i bya aduru mu ge nggele, edeje nemadzu edede; mbu ge nggele, e jeru; ophu mini adudu iya.”

19Mbu le-a; wakwa iphe, Chipfu epfu baa: “Izimanu -lwa ngu azu; mu edophu ngu azu l'onodu ngu; k'ophu ii-wata mu ejeru ozi. I -wata epfu opfu, nweru ishi, ophu o buedu mkpokoro opfu; l'i buru onye a-wata epfu iphe, mu suru g'i pfua. Ge ndu a lwapfutanu ngu; o to bukwa ge gubedua lwapfuta phe.

20Mu e-me ngu g'i buru igbulu noduru ndu-a. Igbulu, a kpushiru ike, e gude onyirubvu kpua. Epe e-tso ngu ugu; ole epe tee mekpedu ngu; noo kele mu no swiru ngu eswiru; k'ophu mu a-nafutaje ngu; dzoo ngu.” Nokwa iphe, Chipfu epfu bu ono.

21Mu a-dzo ngu l'eka ndu ejo-iphe; bya agbafuta ngu l'eka ndu njo ono, turu ngu swiswia ono.

Jieremaya 16

Mboku eze iphe-ehuka

1Tobudu iya bu; Chipfu byakwa bya epfuru yeru mu su mu:

2“Ba alukwa nwanyi l'ali eka-a; ophu i nwutakwa iya nwoke; ophu i nwutakwa iya nwanyi;

3kele-a; wakwa iphe, Chipfu epfu baa l'ehu unwu nwoke yee ke nwanyi, a nwushiru l'ali-a; waa l'ehu unwanyi, bu ne phe; yele ehue unwoke, bu nna phe:

4Ipe, e-gbushi phe nu bu ejo iphe-ememe; ophu aa-radu ekwa phe; ophu ee-lidu phe elili. O bu-chia iphe, e-me nu bu l'ephe a-du ge nshi, a nyiru togbo l'ali. O buru iphe, e-gbu phe nu bu ugu-echi; yee okpa-nri. Teme odzu phe aburu nri, unwu enu, epe l'eli; yee unwu anu, bu l'egbudu e-rije.

⁵“Lẹ-a; wakwa iphe, Chipfu epfu baa: Te ejekwa l'ulo-ékwa. Be ejekwa akporu iphu l'eka ono; ophu i jekwa ara ekwa. Noo kele mu tee meedu g'ehu du ndu-a guu ozobaa. Ophu mu eyeheduru phe obu; ophu mu aphuheduru phe obu-imemini.” Nokwa iphe, Chipfu eepfu bu ono.

⁶“Ndu ha shii me ndu ha nwanshii a-tuko nwushihu l'alí-a. E tee lidu phe elili; ophu aradu ekwa phe; ophu o dudu onye a-kà onwiya iphe l'opfu ehu phe; ophu akpushiduru phe ishi.

⁷O to dudu onye a-turu phe nri ulo-ekwa. A taa tuduru iya nna; ophu a-tuduru iya ne m'ephe -nwuhu; ophu o dudu onye evuru mee abya akporu phe iphu.

⁸“Ophu ii-bahukwa l'ulo eka aabo Obo-iphe je anodu eri angu.

⁹Kele-a; wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Unu e-gude enya unu huma le nta, unu no ndzu-a; teke mu e-me g'a ba numajehe kperekpere k'ehu-utso; me k'ete eswa; ophu aa-nuhedu olu unwumboko, alu ji; ozo k'unwoke, alu nwanyi l'eka-a.

¹⁰“I -pfuaru ndu-a iphemiphe-a; ephe -jia ngu su ngu: ‘? Bukwanu gunu meru g'o gude Chipfu tu-bua eme anyi egube ejo-iphe, ha egube ono? ? Bu gunu bu iphe-eji, anyi meru Chipfu, bu Chileke anyi? ? Bu awe be anyi mesweru?’

¹¹Noo teke ii-su phe le Chipfu sukwaru-a: Iphe, kparu iya nu bu le nna unu phe gbadoru mu. Ephe gbadoru mu je agwaahaa agwa ozo; je ejeahaaru phe ozi; bya awata phe abaru eja. Ephe gbado mbdua; ophu ephe emedu ekemu, mu turu phe.

¹²O be l'unubdua; unu bya emekpoero ejo-iphe, kabaa ke nna unu phe eji. Unu humanu g'unu tukoru g'unu hakpo l'ehu l'ehu tuko etso ejo-okpoma unu; haa eme iphe, mu suru g'unu meje.

¹³Oo ya bu le mu a-chifu unu l'alí-a; chiru unu ye l'alí, unu amadu; ophu nna unu phe amajeduru iya. Unu -rwuwaro eka ono; unu awata ejeru agwa ozi eswe l'enyashi; kele mu tee mekwannuru unu eze-iphe-oma.

¹⁴“Ole g'o duhabe; wakwa iphe, Chipfu epfu baa. Teke nemadzu e-mechaa; ephe taa subaedu ‘Eshinu Chipfu no ndzu g'o no iya-a; mbu onye dufutaru ndu Izurelu l'alí Ijiputu.’

¹⁵O buwaru iphe, ee-pfuje bu: ‘Eshinu Chipfu no ndzu g'o no iya-a; mbu onye dufutaru ndu Izurelu l'alí ndu isheli; me l'iphe, bu alí ono l'opfu, bu alí eka o shi chiru phe ye ono.’ Kele e -mechakpo be mu a-chilatakwa phe l'alí ono, mu nuru nna phe oche ono.”

Aphu, Chileke a-nu ndibe iya

¹⁶Wakwa iphe, Chipfu epfu baa: “Lekwa le nta be mu e-je ekua ndu eseje ikokoro; ephe adu igwerigwe. Ephe eje esefuta phe. E -mechaa; mu eyekwapho ndu achije nta; ephe adukwapho igwerigwe je achia nta phe l'iphe, bukpo ubvu ubvu; mekpoo obvu obvu; mekpoo l'ogba, du l'eze mkpuma.

¹⁷Kele mu gude ɛnya mu ahumakota iphemiphe, ɛphe eme; ɔ tɔ dudu ɔphu eedomiru mu edomi; ɔphu ɛphe eemedu ɛjo-ememe ge mu ta ahuma iya.

¹⁸Mu a-pfu phe ugwo ɛjo-ememe, ɛphe eme; me ugwo iphe-ɛji, ɛphe eme; pfua phe iya mpfukwase. Noo kele ɛphe pharwushiwaru ali mu. ɛphe gudewaa agwa phe ono, adzudu ndzu teme ɔ nodu aso oyi ono gude merwushia okiphe mu onoya.”

Jieremaya epfu anu Chileke

¹⁹Gube Chipfu, bu ike mu; bya aburu onye mu gude nguru anguru; bya aburu onye mu agbabaje l'ime je anodu eze ndzu me mu -nodu eje iphe-ehuka. Ndu abudu ndu Jiuda l'a-byapfuta ngu; shikporo l'eka igwe beru ali beru bya byasu: “Tororo opfu bu le nna anyi phe bu iphe, ɛphe shi kwee eka bu iphe, abudu iphe; mbu iphe, bu iphemmanu; bya aburu iphe, urwu adudu.

²⁰Nemadzu; ? oo-gude eka iya metaru onwiya chi l'ebe abu l'iphe obu bu chi?

²¹“Oo ya bu le-a; lekwa-a; mu e-gudufua nwamgbo lanu-a mee g'ephe maru; mbu le mu e-me g'ephe maru g'ike mu waa okpehu mu habe. Noo teke ɛphe a-maru l'epha mu bu Chipfu.”

Jieremaya 17

¹“Iphe-ɛji, ndu Jiuda meru bukwa iphe, e meru l'igwe be e gude kaa ya akaka; bya e gude iphe tpyiru zinguzingu dee iphe l'okwekpu ono, bu obu phe; bya ede iphe le mpu iphe, nogbaa l'anya eka ɛphe agwaje iphe.

²Mbu l'unwu phe nyatachaaru ɛnya eka ɛphe agwaje iphe; yee itso Ashera phe ono, e shi edobeje l'aguga iphe, bukpooshi, jaru ajaja; mekpoo l'eli ubvu ubvu, dugbaa l'eli;

³me l'eze ubvu, nogbaa l'egbudu. Eku eku, unu kpataru; mekpoo iphemiphe, unu nweru; be mu e-mekota g'a kwaa l'okwata. Ono buru aswa iphe-ɛji ono, dzuru ekameka l'ali unu ono.

⁴O buru unu be oo-shi l'eka; okiphe, mu nukpooru unu anunu etuphahu. Mu e-woru unu mee ohu ndu ohogu unu l'ali eka unu amadu; kele unu kpatsuwaru mu iwe; ehue je l'e-ghu mu eghe jashe l'ojeje.”

⁵Wakwa iphe, Chipfu epfu baa: Onu be a turu onye dakoberu nemadzu; onye bu eka ike du iya bu l'ehu nemadzu mmanu; ɔphu okpoma iya aduedu l'eka Chipfu no.

⁶Onye ono a-du g'ishishi-irwu, bvuru l'echiegu; ɔphu oo-humadu teke iphe, du ree abya. O buru eka du kpokoro kpokoro kpokoro l'echiegu obu be oo-buru; mbu ali unu, adudu onye bu iya nu.

⁷Obenu l'onye dakoberu Chipfu bu onye a goru onu-oma nu; onye bu iya be o kporu obu yeru.

⁸Onye ono a-du g'oshi, e yeru l'aguga mini, chiru ogbarabvu iya ye le nggele. Ophu ndzu agujedu iya me anwu nodu echi; ekwo iya anodujeephe eji hirihiri tekenteke. Ophu ooyojedu oshi me okpa-nri du; ɔphu o dudu teke o to nodujedu ami mebyi.

⁹“Obu nemadzū ta adūdu iphe, ọ kadū ẹregede. Teme ẹjo-iphe paa ya ẹka. ? Bū onye sūru iya amaru?”

¹⁰Ọo mūbe Chipfu enyoje obu; teme mu nọdu eleje egomunggo ule; k'ọphu mu a-pfu onyemonye ụgwo g'umere iya gbaru; mbū g'iphe, o meru gbaru.”

¹¹Onye akpa ẹku l'ẹregede dū g'òkwà, kpuru l'ẹkwa, ọ tūduru; kele ẹku onye ono a-gwọbe iya me ọ kajahaephō nka ẹbo. Ọ buri l'ikpazū iya ono be ọo-buru onye-eswe.

¹²Ulo, anyi doberu nsọ bụ aba-eze, dū akpabiri, o shiēpho lẹ mbū; bataru ẹka eekutse ekutse.

¹³Gūbe Chipfu, bụ onye ndu Ízurelu ele ẹnya l'ẹka; iphe, bụ onyemonye, gbadoru ngu nū be ee-mechakwaa mee iphe-iphere. Ndu gharu ngu azū be ee-de ẹpha phe l'urwuku; noo kele ọo Chipfu be ẹphe gbadoru; mbū ishi mini, doru rīśaa; emeje g'a nọdu ndzū.

Jieremaya epfu anū Chileke g'ọ gbaa mkpu

¹⁴Meta mu iphe, eme mu nū; gūbe Chipfu; k'ọphu mu a-buru onye iphe te emedu! Dzọo mu rọ; ge mu a-buru onye a dzotaru; noo kele ọo ngu bụ onye mu ajajẹ ajaja.

¹⁵Iphe, ẹphe anọdujeephō epfuru mu bụ: “Denuhunū iphe ọbu, Chipfu pfuru opfu iya ọbu? G'o menaa g'o pfuru iya!”

¹⁶Mu ta agbakwarū ọso sū lẹ mu tee cheheduru ngu aturu; ọphu ọ dūdu teke ẹjo mbọku gujeru mu. Gūbedua maru l'iphe, shi mu l'onu fūta dabyiru ẹba l'iphu ngu.

¹⁷Be yekwa mu ebvu! Ọ kwa ngu bụ ẹka mu agbabajẹ je anọdu ezeru ndzū me iphe-ehuka -bya.

¹⁸Kpunaa ndu akpa mu ẹhu iphu lẹ ntū! Ọphu i kwekwa g'e kpua mbēdua iphu lẹ ntū! Menaa g'ẹphe buri ndu ee-ye ebvu! Ọphu i kwekwa g'e yee mbēdua ebvu! Mee g'iphe-ehuka dapfuta phe! Gude oke ọla-l'iswi laa phe l'iswi!

Edobe eswe atūta unme nsọ

¹⁹Wakwa iphe, Chipfu pfuru nū mu baa: “Je apfuru l'onu-abata mkpukpu, bụ ụzo ẹka ndu eze ndu Jiuda eshije abata shikwa iya pho alufu. Tūkokpoephō iphe, bụ onu-abata, eeshije abata lẹ Jierusalemū je apfuru;

²⁰sū phe-a: ‘Unu nūmakwa Opfu Chipfu; unubẹ ndu eze ndu Jiuda; mekpoo ndu Jiuda l'ọphu; mekpoo onyemonye bu lẹ Jierusalemū, bụ ndu eshije onu-abata-a abahu.

²¹Wakwa iphe, Chipfu epfu baa: Unu tōnupho nwehu g'unu te vuje ivu l'eswe-atūta-unme; ọphu unu evujekwaru iya shia onu-abata Jierusalemū-a.

²²Unu te shijekwa l'ibe unu vuru iphe fūta etezi; ọphu unu ejejekwa ozi ejeje ọphu l'eswe-atūta-unme. Ọ būchikwaa g'unu dobeje eswe-atūta-unme nsọ, bụ iya bụ iphe, mu sūru ndiche unu phe g'ẹphe meje.

²³Obenu l'ẹphe te eyeduru onu; ọphu ẹphe angaduru nchi. Ẹphe woru ishi ngakobe; jika l'ẹphe taa ngadū nchi; ọphu ẹphe eyedu onu lẹ mba, mu baru phe.’

²⁴“Obenu lẹ-a; wakwa iphe, Chipfu epfu baa: ‘Ọ -bùru l'unubèdua tọru nwèhu angaru mu nchì l'opfu; ọphu unu evujeduru ivu abata l'ọnu-abata-a l'eswe-atùta-unme; unu -dobe eswe-atùta-unme nsọ; k'ọphu bù l'ọ tọ dudu ozi, unu ejeje mbọku ono;

²⁵noo teke eze ndu nọ l'ọkwa eze Dévidi; ẹphe lẹ ndu ejeru phẹ ozi; a-wata eshi ọnu-abata mkpukpu-a abahụ. Ẹphebedua ẹphe lẹ ndu ejeru phẹ ozi a-nọdu agba l'ugbo-inya; mẹ l'eli inya abata lẹ mkpukpu-a. Ndu Jiuda awu etso phẹ; mękpoo iphe, bù ndu bu lẹ Jierúsalemu. Noo teke ee-buru eburu lẹ mkpukpu-a jasụ l'ojejoje.

²⁶Ndiphe e-shi lẹ mkpukpu, nọgbaa l'alì ndu Jiuda abya; mękpoo lẹ nwa mkpukpu, nọgbaa Jierúsalemu mgburugburu; mękpoo l'oke alì ndu Benjiaminu; mękpoo ndu bu l'alì ọkpa úbvú, nọ l'uzo ẹnyanwu-ariba; mękpoo ndu bu l'alì úbvú úbvú; mękpoo ndu bu l'echięgu ndọhali. Ẹphe egudegbaa anu, ẹphe e-gude gwee ngweja-akpo-ọku; waa ngweja mmanu ozo; mękpoo ngweja-nri; mękpoo unwù-isensu; mękpoo ngweja-ekele; gude abya agwa Chipfu l'eze-ulo iya.

²⁷Obenu lẹ teke ọ bù l'unu te emedu iphe, mu sọru g'unu meje; k'ọphu bù l'unu te edobejedu eswe-atùta-unme nsọ; unu -nọdu evujeru iphe abata lẹ Jierúsalemu l'eswe atùta unme bẹ mu a-phu-nwu ọku, e tee menyidu emenyi l'ọnu-abata Jierúsalemu. Ọ bùru ọku ono a-tuko iphe, bù alì-eze, dọ lẹ Jierúsalemu ono kekọta.’ “

Jieremaya 18

Ọkpu-ite; yẹe ọrwa iya

¹Wakwa opfu, Jieremaya nọmaru l'ọnu Chipfu, sọru iya:

²“Tugbua jepfu onye akpu ite l'ibe iya. Noo ẹka mu e-me g'i numa opfu mu.”

³No iya; mu tugbunaa jeshia ibe ọkpu-ite. Mu jeshia; o gudewaa iphe-wilu labo, ọokpuje ite akpu ite.

⁴Ọ kpua ite ọrwa ono, o gude l'ẹka akpu ono kpu-byia ya akpu-byi. Ọ bya egude ọrwa ono kpua ozo lẹ g'ọ dọ iya ree.

⁵Noo teke mu nọmaru Opfu Chipfu, sọru mu:

⁶Wakwa iphe, Chipfu epfu baa: “Gube ọnu-ulo Ízurelu; ? mu te emedu unu g'ọkpu-ite-a l'eme-a? Lekwa; ọ kwa g'ọrwa dọ l'ẹka onye akpu ite bù g'unube ọnu-ulo Ízurelu dọ l'ẹka mu.

⁷Mu -pfua sọ l'ọwa-a g'ee-me ọha baa; ọzoo l'ọwa-a g'ee-me alì-eze baa; l'ee-pheshi iya epheshi; ọzoo l'ee-nwukposhi iya; ọzoo l'ee-mebyishi iya;

⁸Ọ -bùru l'ọha ono, mu pfuru l'ọwa-a g'ee-me iya ono dakoberu haa eme ejo-iphe phẹ; mu ahaa phẹ eme ejo-iphe ono, mu shi ría lẹ mu e-me phẹ ono.

⁹Teke o nwekwanuru teke mu pfuru sọ l'ọwa-a g'ee-me ọha baa; ọzoo l'ọwa-a g'ee-me alì-eze baa; l'a kwọ-lita iya; mee ya g'ọ nguru anguru;

¹⁰Ọ -wata eme ejo-iphe l'iphu mu; k'ọphu bù l'o too mejedu iphe, mu sọru g'e mee; mu ahakwapho iphe, dọ ree ono, mu shi ría lẹ mu e-me g'o rwu iya ẹka ono.

¹¹Oo ya bu ɛ-a; nta-a bu g'i je epfuru yeru ndu Jiuda; me ndu ono, bu ɛ Jierusalemu ono; su phe-a: Wakwa iphe, Chipfu epfu baa: Unu lekwa; mu kwakobekwaru unu ɔla-l'iswi; teme mu nodu ariru unu ejo oriri. Unu dakobekwa lwaphuta azu; g'onyenonu hakwaa ejo-iphe, oome; unu mee uzu unu yee iphe, unu eme g'o du ree.

¹²Ephe asukwaro: 'E tee mekotaekwa iya. Anyi a-nodukwa eme iphe, anyi ritaru l'oriri g'anyi eme iya; g'anyi ha l'onye l'onye a-nodu eme iphe, anyi ritaru l'oriri l'ejo okpoma anyi.' "

Ndu Izuru ajiaka Chipfu

¹³"Oo ya bu ɛ-a; wakwa iphe, Chipfu epfu baa: Unu kpaeshikwa ishi l'ohamoha; ? bu onye numajeru egube owa? Nwada mu yee nwoke akwajeduru ono, bu Izuru be meakwaru iphe, anyi ishi edzu.

¹⁴Aka-mini-sunoo k'ubvu ubvu Lebanonu; ? o duru teke oo-nonya l'o haa adu le kpokoro kpokoro kpokoro aka ono, du le mkpoze ubvu ono? To mini-oyi ono, shi l'aka du enya aso abya ono; ? oo-nonya l'o so-buhu to?

¹⁵Eshinu ndibe mu zohawaru mu; wata akpo unwu-isensu oku anu iphe, abudu iphe; ephe mewaa phe; ephe kpo garigari kpo l'uzo phe ono, bu uzu, shi phe le ndiche ono; wata eshi uzu du werere; mbu uzu, a tuduru mkpoli;

¹⁶ephe mee ali phe; o buru ochobu; buru aka aa-nodu anmaru otsa jasu l'ojejeje. Iphe, bukpo onyemonye, ghataru iya nu be oo-duje biribiri; l'o phuphee ishi.

¹⁷Mu a-tuka phe nanunanu g'iphe, pherephere, shi l'uzo enyanwu-awawa zikashiru; ephe adakaa nanunanu l'aka ndu ohogu phe. Mu e-goshi phe azu mu; mu tee goshidu phe iphu mu m'ephe -nodu eje iphe-ehuka."

Aachiru Jieremaya ejo idzu

¹⁸To budu iya bu; ephe su: "Unu bya g'anyi chiaru Jieremaya ejo idzu; kele anyi nweru-a ndu-uke, a-nodu ezi anyi iphe; anyi nweru ndu maru iphe, bu ndu a-nodu atuziru anyi aka; bya enweru ndu mpfuchiru, a-nodu ezi anyi opfu Chileke. Unu bya g'anyi gude ire mee ya omeliwe; g'anyi ba ngakwa nchi l'iphe, oopfu me nanu."

¹⁹Ngabenuru mu nchi; jiko Chipfu; numa olu ndu acho mu opfu.

²⁰? Ee-gude ejo-iphe pfua ugwo iphe-oma? Kele-a; ephe tukwaru nsu doberu mu. Nyatakwa le mu pfuru l'iphu ngu pfuaru phe opfu oma gude mee g'ehu ghubuhu ngu egu l'opfu eh phe.

²¹Oo ya bu ɛ-a; chinuru unwu phe ye l'okpa-nri; l'e gude ogu-echi gbua phe pyaapya; unyomu phe aburu ndu ume nwa a-nodu eme; teme ephe aburu ndu ji phe nwushihuru. G'e gbushia unwoke phe egbushi; g'unwokorobyia phe buru ndu ee-gude ogu-echi gbushia l'iphu ogu.

²²G'iphe, a-nodu atu l'ulo phe buru uzu-ekwa teke ono, ii-chiru ndu ojogu sobata l'ibe phe bya atu phe l'upfu ono; kele ephe tukwaru nsu doberu mu ge mu dalahu; bya eworu onya gbareru mu ge mu ye okpa.

²³Obenu lẹ gube Chipfu machaarụ ẹjo idzu, ẹphe achiru mu kẹ g'ẹphe gbua mu. Ta agukwaru phẹ nvụ l'ẹjo-iphe ono, ẹphe eme ono. Ophu i hufukwa iphe-ẹji, ẹphe eme l'iphu phẹ. Ochia g'ẹphe nọdu ngu l'iphu buru ndu e mekperu emekpe. Noo iphe, ii-me phẹ bu ono teke ẹhu a-nọdu egbu ngu egbu.

Jieremaya 19

¹Wakwa iphe, Chipfu epfu: “Je azuta ite-urwa l'eka okpu-ite. G'unu lẹ ndu bu ogerenya mkpukpu yee ndu bu ogerenya uke Chileke hakwaru swiru.

²Je lẹ nsuda Hinomu l'aguga ẹka eeshije abahu Jierusalemu, bu Onu-abata Agbagbambeji. I -rwuepho ẹka ono l'i raa iphe-a, mu ezi ngu-a arara;

³sụ phẹ-a: Unu numakwa Opfu Chipfu; unube ndu eze ndu Jiuda; mekpoo ndu Jierusalemu. Wakwa iphe, oopfu; mbu Chipfu, bu Okalibe-Kakota-Ike; bya aburu Chileke ndu Izurelu. Unu ngabekpodapho nchi! Mu abyakwa egude ẹjo-iphe byapfuta ndu ali-a, bu iphe, a-gba onyemonye, numaru iya nu anwirinwa lẹ nchi.

⁴Kele ẹphe gbadowaru mu; bya eworu ali ẹka-a mee ẹka aanoduje agwa agwa ndu ohozo. Epe nowaa ya kpoo ngweja oku nu agwa, ẹphe amadu; ophu nna phẹ amadu iya; ophu ndu eze ndu Jiuda amajeduru iya. Epe noduwa iya gbushia ndu adudu iphe, ẹphe meru; mee phẹ nọdu aso gborogboro.

⁵“Epe kpwaru ẹka aagwaje iphe agwagwa, dugbaa iche iche doberu Balu; k'ophu ẹphe a-nodu akpo unwu phẹ oku l'eka ono gude agwa Balu ono. Iphe ono buru iphe, mu asuduru g'e meje; ophu mu ephotajekpodaru iya nu ephota ophu; mbu l'o toko bahuswekpo mu nu l'egomunggo.

⁶Oo ya bu lẹ-a; wakwa iphe, Chipfu epfu baa: G'enya dokwa unu. O nwekwaru mboku, e-mechaa du nu; mbu teke ee-mechaa; ndiphe tee kuedu ẹka-a Tofetu; ophu eekuedu iya nsuda Hinomu. Iphe, ee-mechaa kuahaa ya bu nsuda Teterii.

⁷O kwa l'eka-a be mu e-chikposhi idzu, ẹphe achi; mbu ndu Jiuda yee ndu Jierusalemu. Mu e-me ge ndu ohogu phẹ gude ogu-echi gbushia phẹ; mbu l'eka ndu achọ ndzu phẹ. Mu eworu odzu phẹ tukaa g'o buru nri duru enu, epe l'eli; yee anu, bu l'egbudu.

⁸Mu e-me mkpukpu ono g'o buru ochobu; g'o buru ẹka aa-kpoyijeru ukuvu. Onyemonye, ghataru iya nu be ẹhu a-nwuje kpalaa; l'o kpoyiaru iya ukuvu ghata. O buru iphe, a-kpa iya nu bu g'e gude mebyishiberu iya.

⁹Mu e-me phẹ g'ẹphe taa anu unwegirima ibe phẹ; teme epe ataa anu nwibe phẹ teke ono, iphe a-nodu atsu phẹ l'ehu ono, bu teke ndu ohogu phẹ, l'achọ ndzu phẹ e-kephe phẹ mgburugburu ono.

¹⁰“No iya; tukpoo ite ono teke ndu ono, unu l'ẹphe swi ono ele ngu enya;

¹¹l'i sụ phẹ-a: Wakwa iphe, Chipfu, bu Okalibe-Kakota-Ike eepfu: Mu a-tukposhi oha-a yee mkpukpu-a egube-a, a tukposhiru ite okpu-ite-a; ophu a byadu l'agbakobe iya

ozobaa. Ephe e-li odzu lẹ Tofetu; noo kele a taa humaedu eka ozo, aa-noḍu elidzuru phe.

¹²Wakwa iphe, Chipfu epfu baa: Nokwa iphe, mu e-me eka-a yee ndu bu iya nu. Mbụ lẹ mu e-me mkpukpu-a l'ọ dọ gẹ Tofetu.

¹³Iphe, bukpuo ọlo, nọ lẹ Jierusalemu; yele ọlo ndu eze ndu Jiuda be aa-turwuchaa g'a turwuru eka-a, bu Tofetu-a, bu eka ephe nogbaa l'eli ọlo akpo unwu-isensu oku nu iphe, bu kpokpode; teme ephe nọdu agbaru agwa mee gude agwa phe.”

¹⁴Tobudu iya bu; Jieremaya byanu bya eshi lẹ Tofetu lwa, bu eka Chipfu shi zia ya g'o je epfuchiru iya opfu-a; bya apfuru l'oma-unuphu eze-ulo Chileke bya asu iphe, bukpuo ndu ono l'ophu su phe:

¹⁵“Wakwa iphe, Chipfu, bu Okalibe-Kakota-Ike eepfu; mbụ Chileke ke ndu Izurelu: Unu lekpodapho. Iphe, bukpuo ejo-iphe ono g'ọ ha, bu ophu mu pfuwaru l'oo-me phe ono be mu abyakwa emekota mkpukpu-a yee mkpukpu, no-pheru iya mgburugburu. O buru iphe, kparu iya nu bu l'ephe ngakoberu ishi jika l'ephe taa angabedu mu nchi l'olu.”

Jieremaya 20

Jieremaya yee Pasho

¹O be teke Pasho nwa Ima numaru mpfuchiru Jieremaya; Pasho bu onye uke Chileke bya aburu onye-ishi ndu-ishi eze-ulo Chipfu; o numaeḗpho iphemiphe ono, Jieremaya epfu ono;

²o mee; e chia Jieremaya, bu onye mpfuchiru ono echachi; bya eworu iya tu-chia l'ulo-mkporo, no l'aguga onu-abata eze-ulo Chipfu ophu aza Ephekerephe Onu-abata Benjiaminu.

³O be lẹ nchitabohu iya; Pasho bya atufuta iya l'ulo mkporo ono. Jieremaya su iya-a: “Epha, Chipfu guru ngu ta abuekwa Pasho. O kwa ‘Nggiri, no l'uzo l'ekameka’;

⁴kele-a; wakwa iphe, Chipfu epfu baa: Mu e-me ngu g'i tsuaha onwongu ebvu; ndu yeru ngu obu g'ephe ha atuko atsu ngu ebvu. Ii-gude enya ngu gedegede huma teke ndu ohogu phe e-gude ogu-echi egbushi phe. Ndu Jiuda mgburugburu be mu e-woru ye l'eka eze ndu Babilonu, bu onye a-kpu phe lẹ ndzu lashia ali ndu Babilonu; ozokwanu gude ogu-echi gbushia phe.

⁵Iphe, bukpuo eku ndu mkpukpu-a be mu e-woru yekota l'eka ndu ohogu phe; mbụ iphe, bukotakpuo iphe, ephe seshiru akanya iya; mekpoo iphe, bukpuo iphe, vu oke aswa, nokota l'ime iya; mekpoo iphe, bu eku, eze ndu Jiuda kparu. Iphemiphe ono be ephe a-kwakota okwata vuta lashia ali ndu Babilonu.

⁶Gubedua, bu Pasho yee iphe, bu ndu bukota l'ibe ngu be aa-kpukota lẹ ndzu laa ali ndu Babilonu. O buru l'eka ono be unu a-noḍu nwushihu; l'e lia unu l'eka ono; unu lẹ ndu yeru unu obu ono, unu suru lẹ Chileke pfuru phe, iphe, ephe pfuru ono.”

Aphu, Jieremaya agu

⁷Gùbe Chipfu; i dusweru mu ụzo; mu bụru onye e dusweru ụzo. I mekperu mu; ịme ọ kaleru ngu. Mu bụwaa onye aanọduje eme iphe-ọchi mkpụrumkpuru. Onyemonye anọduje achi mu ọchi.

⁸Tekenteke, mu epfukpọo opfu bẹ mu araję iya arara l'omeliwe dukwa; ọla-l'iswi dụ. Opfu Chipfu mewaru; mu bụru onye aakọ ọnu; ịme a nọdu achi mu ọchi mkpụrumkpuru.

⁹Teke mu sụkwanuru lẹ mu tee kubaedu iya epha; ophu mu egudebaedu epha iya epfu opfu; opfu iya obu anodu mu l'okpoma enwu mu phuruphuru g'oku; rakuru arakuru l'ime okpu mu. Mbụ l'ike esede iya bvụwaru mu. Mbụ lẹ-a; mu taa dukwa ike esede iya.

¹⁰Kele mu anukwa taba taba, ephe adzugbaaru nwibe phe sụ: “Nggiri dukwa l'uzo l'ekameka!” Ephe tukoru epfu sụ: “Unu je edoo iphe ono, oopfu ono! Unu g'anyi je edoo iphe, oome!” Iphe, bukpuo ndu mu l'ephe eshi ọnyà elekotaepho enya g'ephe maru teke eturu a-lọ mu. Ephe tuko epfu sụ: “? a maru e-dephuu iya. Noo teke ọ-kaleru anyi. Ọ bụru teke ono bẹ anyi e-melata iya iphe-a, oome nta-a.”

¹¹Obenu lẹ Chipfu nọ swiru mu eswiru g'onye eze-ọjogu swiru. Ọo ya bụ lẹ ndu ono, achi mu lẹ njọ ono bẹ upfu a-dụ. Ọ tọo kalẹduru phe; ophu ooreduru phe g'ephe tumberu. Ọo-buru phe iphe-iphere; ophu a byadu azoha enya-olwa phe azoha.

¹²Gùbe Chipfu, bụ Okalibe-Kakota-Ike; gùbe onye ono ahutaje ndu pfuberekoto ama; ịme ị nọdu avoje obu yee oriri; ge mu humanu eka iimelata phe; kele ọo ngu bẹ mu yeru ikpe nkemu l'eka.

¹³Unu gụa ebvu nụ Chipfu! Unu jaa Chipfu ajaja! Kele ọ dzotaru ndzụ onye adudu g'ọ dụ iya l'eka ndu ejo-iphe.

¹⁴Ge mboku, a nwuru mu bukwaru eswe, a turu ọnu! G'a ta gokwaru ọnu-oma nụ eswe mboku ono, ne mu nwuru mu onoya!

¹⁵G'onye byaru ezia nna mu ozi ono bukwaru onye a turu ọnu; mbụ onye byaru asụ iya: “A nwukwaru ngu nwa; ọ bụru nwa nwoke!” K'ophu bụ l'ọ numaru iya; ehu tsahaa ya.

¹⁶Ge nwoke ono dukwa ge mkpukpu, Chipfu mebyishiru; ophu ọ phuduru iya obu-imemini. G'ọ bukwaru iphe, ọo-nodu anụ l'utsu bụ uzu-ekwa. O -be l'eswe; l'oonuaha mkpu ọgu.

¹⁷Kele ọ tọ pyi-gbuduru mu teke mu nọ l'epho; ge ne mu bụru ilu mu. Ephi ahawa iya rọ ragbada jaswaroya.

¹⁸? Būnaa gunu mekpọoru iphe, mu futaru l'epho afuta ophu ge mu bya bya ahuma iphe-ehuka yee nrimaphu; yee ge mu bya akpo-chi ishi ndzụ mu l'iphe-iphere?

Jieremaya 21

Chileke ajika eme iphe, Zedekaya arwọ iya

¹Opfu, shi l'ẹka Chipfu byakwa erwua Jieremaya nchi. Ọ buru teke ono bẹ eze, bu Zedekaya yeru Pasho nwa Malukayijia; yele onye uke Chileke, bu Zefanaya nwa Maseya g'ephe jepfu iya. Ephe bya asu iya:

²“Jieshikwaru anyi Chipfu; kele Nebukadneza, bu eze ndu Babilonu l'etsokwa anyi ogu. ? A maru; ? Chipfu e-meru anyi iphe, du biribiri g'o shi emeje teke ndiche k'ophu oo-laphu azu paru anyi haa.”

³Tobudu iya bu Jieremaya yeru phe onu su phe: “Unu su Zedekaya le-a:

⁴Wakwa iphe, oopfu; mbu Chipfu, bu Chileke ke ndu Izurelu baa: Iphe, mu abya ememe bu le mu e-me ge ngwogu, unu gude alwu ogu buru unu ogu, bu ngwogu, unu gude etso eze ndu Babilonu ogu; yee ndu Babilonu l'onwophe, bu ndu no l'azu mkpukpu no-pee unu mgburugburu. Mu e-mechaa chibata phe l'ime mkpukpu-a.

⁵Ozo bu le mbdua l'onwomu a-nodu etso unu ogu. Mu a-machikpo aka mu; gude okpu aka mu vua ovuma; gude iwe tukoshi unu oke ehueghu mu.

⁶Mu e-chitsushicha iphe, bukpo ndu bu le mkpukpu-a; nemazu yee anu. Ọ buru ejo iphe-ememe e-gbushi phe.

⁷Wakwa iphe, Chipfu epfu baa: Teke e mechaaru nno; mu eworu Zedekaya, bu eze ndu Jiuda; yee ndu-ozu iya; mekpoo ndu ali-a, bu ndu iphe-ememe ono gbuphodoru; yee ndu ophu e gbuphodoru l'ogu-echi; me ndu ophu egu gbuphodoru; chiru ye Nebukadneza, bu eze ndu Babilonu l'eka; yee ndu ohogu phe ono, bu ndu aacho ndzu phe ono. L'o gudekwapho ogu-echi gbushia phe; ophu oo-hadu phe. Imemini phe taa dudu iya; ophu o dudu onye ophu oophutaru.

⁸“Ozokwapho le-a; gi su ndu-a: Wakwa iphe, Chipfu epfu baa: Unu lekwa le mu dobeakwaru unu uzu ndzu yee uzu onwu.

⁹Iphe, bukpo onye no le mkpukpu-a bu ogu-echi be ee-gude gbua ya; egu egbua ndu ophu oo-gbu; iphe-ememe egbua ndu ophuu. Onye lufukwanuru je eworu onwiya ye l'eka ndu Babilonu-a, bu ndu no-pheru unu mgburugburu-a; l'a-nodu ndzu. Onye ono e-gude ndzu iya gbala.

¹⁰Iphe, mu chiwaru idzu iya bu eme g'ejo-iphe dapfu ndu mkpukpu-a; o to budu iphe-oma. Nokwa iphe, Chipfu eepfu. Mkpukpu-a be ee-ye l'eka eze ndu Babilonu; l'o gude oku mebyishia ya.

¹¹“Ozo bu le-a; gi su ndu onu-ulo onye eze ndu Jiuda: Unu numakwa Opfu Chipfu.

¹²Unube ndu onu-ulo Dévidi; wakwa iphe, Chipfu epfu baa: Unu kpeje ikpe, pfuru oto mboku-mboku. Unu adzotaje onye ana nfu l'eka onye emekpa iya ehue. Odumeka be ehueghu mu a-gbanwuhukwa oku. Ọ buru iphe, a-kpa iya nu bu ejo-ememe, unu meshiru; mbu l'ehueghu mu ono e-nwu oku k'ophu bu l'o to nwedu onye a-gbanyu iya nu.

¹³Mu n̄oru ngu l̄e n̄j̄o ḡube Jierúsalem̄u; mb̄u ḡube onye bu l̄e ns̄uda-a; mb̄u ḡube agbara mkpuma, n̄o l̄e baswaa al̄i ̄eka-a. O kwa Chipfu epfu iya an̄u unub̄e ndu ono, asuje: ‘? B̄u onye abya anyi eme gunu? ? B̄u onye ad̄u ike abata l'̄eka anyi bu-a?’

¹⁴Mu a-h̄u unu ah̄uh̄u g'iphe, unu meru gbaru. O kwa m̄ube Chipfu epfu iya. Mu a-nw̄uru ōku ye l'oswa unu; t̄uko iphe, n̄o-pheru unu mgburugburu tsuk̄ota.”

Jieremaya 22

Ikpe, e kperu eze ndu l'eme ̄jo-ememe

¹Wakwa iphe, Chipfu epfu baa: “Je l'ibe eze ndu Jiuda je araa ozi-a arara l'̄eka ono:

²N̄umakwa Opfu Chipfu; ḡube eze ndu Jiuda; mb̄u ḡube onye n̄o l'aba-eze Dévidi; gubedua l'onwongu; m̄e ndu-oz̄i ngu; m̄ekpoo ndibe ngu, b̄u ndu eshije l'onu-abata-a abah̄u.

³Wakwa iphe, Chipfu epfu baa: Unu kpeje ikpe, pf̄uru nham̄unha; unu emeje iphe, pf̄uru ōto. Unu adz̄otaje onye ana nf̄u l'̄eka onye emekpa iya ̄hu. Unu ta ad̄ukwa ewere; ōzoo omeliwe, unu e-meje ndu lwar̄u alwalwa; ōzoo ndu enwed̄u nna; ōzoo unwanyi, ji ph̄e an̄oedu ndz̄u. Ōphu unu an̄ōdujeshi l'̄eka-a gbua ndu ad̄udu iphe, ̄phe meru!

⁴K̄ele-a; ō -b̄uru l'unu jiru obu oyi mee iphe-a, mu s̄uru g'unu meje-a; b̄e eze ndu n̄o l'aba-eze Dévidi; ̄phe l̄e ndu ejeru ph̄e ozi; m̄e ndibe ph̄e a-n̄odu agba l'ugbo-̄inya; m̄e l'eli ̄inya eshi l'onu-abata ibe eze-a abata.

⁵Obenu teke ō b̄u l'unu te emedu iphe, mu s̄uru g'unu mee; ḡe mu gudekwa onwomu riaru unu angu; mb̄u l'ibe eze-a e-mechakwaa b̄uru ochobu. Nokwa iphe, Chipfu eepfu b̄u ono.

⁶“K̄ele-a; wakwa iphe, Chipfu epfu l'opfu ̄hu ibe eze ndu Jiuda: A makwar̄u-a l'̄i d̄u g'al̄i Giladu l'̄ehu mu; ōzoo g'eli úbv̄ú úbv̄ú Léban̄onu. Obenu l'ō t̄o d̄udu iphe, e-me ḡe mu te eme ngu g'̄i d̄u g'echīegu; mb̄u ḡe mkp̄ukpu, e te bujeduru ebubu.

⁷Mu dobewaru ndu mmebyi iche g'̄phe bya emebyia ngu. G'̄phe ha l'onye l'onye e-gudegbaa ngw̄ogu ph̄e. ̄phe abya egbutsushia ̄guru oshi sida ngu ono; bya ach̄iru iya ye l'ōku.

⁸“Ikpot̄o nemadz̄u, shigbaa l'̄oha, d̄u igwerigwe l'a-ghata l̄e mkp̄ukpu-a; ̄phe aji nwibe ph̄e s̄u: ‘? B̄u gunu meru iphe, Chipfu meru ̄gube iphe ōwa-a l'̄ehu oke mkp̄ukpu-a?’

⁹Aa-s̄u ph̄e l'iphe, kpar̄u iya n̄u b̄ukwa l'̄phe gw̄oberu ōgbandzu Chipfu, b̄u Chileke ph̄e; je awata ephoz̄eru agwa; baahaar̄u iya eja.”

¹⁰Unu ta arakwa ̄kwa onye eze ono, nw̄uhuru n̄u ono! Ōphu unu emekwa ̄kwa iya! O b̄uchikwaa onye unu a-kwa ̄kwa iya kwash̄ia ya ike b̄u onye ōphu a kp̄uru l̄e ndz̄u laa ̄ka ōzo. Noo k̄ele ō t̄o lwabāedu; ōphu ōohumabaedu al̄i ̄eka a nw̄uru iya ōzo.

- 11**Kele-a; wakwa ge Chipfu pfuru opfu ehu Shalumu nwa Jiosáya, bu onye no-chiru okwa nna iya; bya aburu eze, ndu Jiuda; mbu onye ono, tugbuwaru l'eka-a: "O to lwabaekwa.
- 12**O kwa l'eka ono, ephe kpuru iya le ndzu laa ono be oo-nodu nwuhu. O to humabaekwa ali eka-a enya ozo."
- 13**Nshio onye ono, akpu unuphu ibe eze iya l'uzo, apfuduru-oto; mbu onye bu l'uzo, apfuduru nhamunha be o gude akpu ulo-eli iya; onye meru ndu ali iya; ephe nodu eje ozi ke mmanu; ophu oopfudu phe ugwo ozi phe.
- 14**O nodu epfuje su: Mu a-kwa unuphu ibe eze mu g'o paa eka. Ya e-mee ulo-eli iya g'o du osa. O bya emee ya bya eyeshia ya windo; bya egude oshi sida gbaa ya uko; bya etee ya penti uswe-uswe gude rwaa ya.
- 15**"? Bu akushi ulo oshi sida l'e-me g'i buru onye eze to? Nna ngu; ? to shidu eri nri; angu iphe, angu angungu? O nodu ekpeje ikpe, pfuru nhamunha; bya eme iphe, pfuru oto. Iphemiphe duru iya le ree.
- 16**Ndu eje iphe-ehuka; waa ndu adudu g'o du phe be o gbaru odzori; o duru iya le ree. ? Tobudu iphe ono bu l'onye-a maru onye mu bu?" Nokwa iphe, Chipfu eepfu.
- 17**Obenu le gubedua be enya ngu; yee okpoma ngu bu l'eka i phoberu iya bu l'eri urwu ghelegheleghele; yele egbu ndu adudu iphe, ephe meru; yele eme nemadzu iphe-kpanganga yele omeliwe.
- 18**Oo ya bu le-a; wakwa iphe, Chipfu epfu l'opfu ehu Jiehoyakimu, bu nwa Jiosáya, bya aburu eze ndu Jiuda: A taa rakwa ekwa iya su: Owiwo nwune mu nwoke-e! Owiwo nwune mu nwanyi-e! A taa rakwa ekwa iya su: Owiwo onye nwe mu nu-e! Owiwo eguru onye-a!
- 19**Ee-li iya g'onye eli nkafu-igara. Mbu l'oo wuruwuru be aa-lo iya lota je etuphaa l'azu mkpukpu Jierúsalem.
- 20**"Jekwa l'ubvu ubvu Lebanonu je echia mkpu! Ge ndu ali Beshanu numakwa olu ngu! Jekwa anodu l'eli ubvu ubvu Abarimu chia mkpu; kele ndu gu l'ephe tugbaru buru nanu be e gbushichaakwaru g'ephe ha.
- 21**Mu kakwaru ngu teke ono, i shi dobesu l'o to dudu iphe, byaru eme ngu nu ono. I sule-a l'i tii yedu onu. O kpokwa g'i shi teke i bu okoroby meta bu ono. I tiki meswekwaa iphe, mu suru g'i mee.
- 22**Pherephere a-tuko ndu echeru ngu aturu pata. L'a tuko ndu gu l'ephe tugbaru buru nanu kpua le ndzu. Noo teke iphere e-gude ngu; l'e woru ngu iphu kpua le ntụ. O buru iphe, kparu iya nu bu ejo-iphe, iimegbabe.
- 23**Unube ndu bu l'ubvu ubvu Lebanonu; mbu ndu kparu epfune l'ulo, a kuru l'oshi-sida; egube ude, unu e-mechakwanaa tsua teke iphe-ehuka azu unu gburumu pfurii; mbu meahaa unu ehuka ge nwanyi, ime eme!"

⁷Wakwa iphe, Chipfu epfu baa: “Oo ya bu l’o -rwua mboku ono be ndiphe taa subaedu: ‘Eshinu Chipfu no ndzu g’o no iya-a; mbu onye dufutaru ndu Izurelu l’ali Ijiputu.’

⁸O buwaru iphe, ee-pfuje bu: ‘Eshinu Chipfu no ndzu g’o no iya-a; mbu onye dufutaru oshilokpa Izurelu l’ali ndu isheli waa l’iphe, bukpo ohamoha, bu eka o shi chi-phua phe.’ Teke ono be epe e-buru l’ali k’eka phe.”

Ndu epfu iphe, Chileke epfuduru

⁹A -bya l’opfu-ehu ndu mpfuchiru; okpoma agbawahukwa mu agbawahu. Mbu l’okpu mu l’ophu anmakota mu jijijijii. Mu dupo g’onye mee ats; mbu g’onye mee tutsuru. O buru iphe, kparu iya nu bu Chipfu yee opfu iya, du nsu.

¹⁰Ali eka-a l’ophu bu iphe, jiru iya nu bu ndu eri ogori. O buru onu, a turu meru g’o gude ali eka-a nodu l’aphu. Eka anu akpaje nri l’echiegu kpoju jegiri jegiri. Ndu mpfuchiru nodu eme ejo-iphe; teme epe nodu eme ike phe g’o gbaduru.

¹¹Wakwa iphe, Chipfu epfu: “Ndu mpfuchiru me ndu-uke Chileke tukoru buru ndu te emedu ele Chileke. Mbu le mu humacharu ejo-iphe obu, epe eme obu l’eze-ulo mu.

¹²Noo g’o gude uzo phe je l’awata echi eturu. Aa-chiru phe chi-phua l’eka agba ochii. O buru eka ono be epe a-da iko. Mu egude ejo-iphe dapfu phe teke ono, ee-chi phe iphe ono.” Nokwa iphe, Chipfu eepfu bu ono.

¹³“L’echilabo ndu mpfuchiru, shi le Sameriya be mu humaru ebyi-a: mbu l’ephe epfuchiru Balu; gude egube ono eduphu ndibe mu, bu ndu Izurelu.

¹⁴Temanukwapho; l’echilabo ndu mpfuchiru ke Jierusalemu be mu humakwarupho iphe, anyi ishi edzu. Epe anoduje eri ogori; teme ndzu phe buru adzu uka. Ndu eme ejo-ememe be epe anoduje eme g’eka ka phe eshihu ike l’iphe, epe eme; k’ophu bu l’o to dudu onye ophu aghajeru ejo-iphe, oome azu. L’ehu nkemu be epe dukotaepho ge ndu Sodomu; ndu Jierusalemu dukotae mu pho ge ndu Gomora.”

¹⁵Oo ya bu le-a; wakwa iphe, Chipfu, bu Okalibe-Kakota-Ike eepfu l’opfu ehu ndu mpfuchiru: “Mu e-me g’ephe ria nri, ats; ilu; epe angua mini, e yeru iphe, egbu egbugbu. Noo kele oo l’eka ndu mpfuchiru, shi Jierusalemu be o shi; be eme ele Chileke barahu dzuru ali eka-a l’ophu.”

¹⁶Wakwa iphe, Chipfu, bu Okalibe-Kakota-Ike eepfu: “Unu ta angajekwa nchi l’iphe, ndu mpfuchiru epfuru unu. Epe emekwa g’unu chiru upfu ye l’iphe, te emedu ememe. Epe asuje l’ephe phuru ophulanya; ama l’oo iphe, epe ritaru l’okpoma. O too buduru iphe, shi yebe Chipfu l’onu.

¹⁷Tekenteke be epe anoduje epfuru ndu kporu mu ebo l’afu su phe: ‘Wakwa iphe, Chipfu epfu baa: Ehu a-dukwa unu guu!’ Ndu ophu bu iphe, shi l’ejo okpoma phe be epe anoduje eme; ndu k’ono be epe asuje: ‘O to dukwa iphe, byaru emebata unu.’ “

³³“Teke ndu ẹka-a; ọzoo onye mpfuchiru; ọzoo onye uke jiru ngu sụ ngu: ‘? I jiru Chipfu ọ sụ g'e mee gunu?’ L'ịisu phẹ-a: ‘G'e mee gunu bu gunu? Ọ suru ẹ ya a-gwobe unu! Noo iphe, Chipfu epfu bu ono.’

³⁴Teke ọ bukwanu l'onye mpfuchiru; ọzoo onye uke; ọzoo onye ọzo mmanụ pfulaharu sụ ẹ ya jikwaru Chipfu; o zia iphe, ee-me; mu anụa onye ọbu aphụ; yele ndibe iya g'ephe ha.

³⁵Iphe, unu a-nọduje aji nwibe unu phẹ; aji iya unwanu unu phẹ bu: ‘? Chipfu sūhunuru agha g'a jiru iya?’ Mbụ: ‘? Buhunu gunu be Chipfu pfuru?’

³⁶Ọle-a; unu te egudekwa ọnu unu pfua iphe, unu jiru Chipfu; ọ sụ g'e mee ọzobakpo. Kele ọ buwaa iphe, onyemonye pfuru onwiya be oome; unu gude nno woru opfu ke Chileke, nọ ndzụ gha igharaphu; mbụ Chipfu, bu Ọkalibe-Kakota-Ike; bya aburu Chileke anyi.

³⁷Waa iphe, ii-pfujeru ndu mpfuchiru baa: ‘? Unu jiru Chipfu; ọ sūhunu unu agha?’ Mbụ; ‘? Bu gunu be Chipfu pfuru?’

³⁸A makwaru-a l'unu epfu l'unu jiru Chipfu; o zia unu iphe, e-me nū. Ọle-a; wakwa iphe, Chipfu epfu baa: Iphe, unu anọduje epfu bu: ‘Wakwa iphe, a jiru Chipfu; ọ sụ g'e mee’; mbụ ọ bukwaru unube ndu mu suru g'unu te epfuekwa nno.

³⁹Ọo ya bu ẹ-a; mu zohafutajekwa unu; chifu unu l'iphe mu; unu ẹ mkpukpu ono, mu nuru unu ẹ nna unu oche phẹ ono.

⁴⁰Ujikputeru, mu e-me unu a-nokwa ojejeje; mbụ l'ọo-buru iphe-iphere, a-nọ ojejeje; ọphu a byadu azoha iya azoha.”

Jieremaya 24

Nkata akpuru oshi figu labo

¹O be g'a kpuchaaru ndu-a ẹ ndzụ; mbụ Jiehoyakinu nwa Jiehoyakimu, bu eze ndu Jiuda; ephe ẹ ndu-ishi ndu Jiuda; mekpoo ndu emeje ọna; yee ndu akpu uzu; be e shikota ẹ Jierusalemu kpa ẹ ndzụ laa ali ndu Babilonu. Ọ buru onye kpuru phẹ nū bu Nebukadineza, bu eze ndu Babilonu. O be g'a kpuchaaru phẹ ẹ ndzụ ono; Chipfu goshi mu nkata akpuru oshi figu labo, a subegbaaru l'aguga eze-ulo Chipfu.

²Nkata lanu bu iphe, du iya nū bu akpuru oshi figu, du ree shii, dugbaa ge figu, charu egwa. Nkata ọphuu buru iphe, du iya nū bu figu, du eji shii; mbụ l'ọ du-be eji; k'ọphu bu l'ọ to dudu k'eriri.

³Noo ya bu; Chipfu bya ajia mu sụ: “? Bu gunu be i humaru; Jieremaya?” Mu sụ iya: “Ọ kwa akpuru oshi figu. Ndu ọphu du ree dushikpoo ree ike; ndu ọphu du eji dushikwanaa eji ike k'ọphu bu l'ọ to dudu k'eriri.”

⁴Tobudu iya bu; mu bya anuma opfu ke Chipfu, suru mu:

⁵“Wakwa iphe, Chipfu, bu Chileke ke ndu Ízurelu epfu baa: O kwa g'akpuru oshi figu figu owa-a, dugbaa ree-a du; bu ge ndu ono, a kpuru le ndzu l'ali ndu Jiuda du mu ree, bu ndu mu chifuru l'ali-a chiru je eye l'ali ndu Babilonu.

⁶Mu e-gude enya mu eche phe nche g'o duru phe le ree. E -mechaa; muedulatakwa phe pho ozo l'ali eka-a. Teke ono be mu e-me g'ephe paa eka; ophu mu akwatsuedu phe. Mu a-dza phe g'onye dzaru oshi; ophu mu ephefubaedu phe ephefu.

⁷Mu a-nu phe obu, ephe e-gude maru mu; mbu l'oo mu bu Chipfu. Ephe a-buru ndibe mu; mbedia aburu Chileke phe. Noo kele ephe e-gude obu phe l'ophu l'ophu lwapfuta mu.”

⁸Wakwa iphe, Chipfu epfu baa: “A bya le k'akpuru oshi figu ono, du eji ono; mbu duta-beru eji; k'ophu bu l'e tee ridu iya eriri ono; noo ge mu e-me Zedekaya, bu eze ndu Jiuda bu onoya; me ndu-ishi l'ali-eze iya; mekpoo iphe, bu ndu ono, phoduru le Jierusalemu ono; m'ephe -no l'ali eka-a; m'ephe -no l'ali ndu Ijiputu.

⁹Mu e-me phe g'ephe buru ndu ali-eze unwu-eliphe l'ophu a-nodu aso oyi. Ephe a-buru phe iphe e gude achi ochi; me iphe, e gude anma l'etu. Ee-gude phe agba mgbonu; gude phe ephe l'iphe l'iphe, bukpo eka mu chiru phe ye.

¹⁰Mu e-me g'e gbua phe l'ogu-echi; egu emee phe; ejo iphe-ememe emee phe gbiriri jasu ephe abvube l'ali-a, mu nuru phe; yele ndiche phe-a.”

Jieremaya 25

Ndu a kpuru le ndzu a-no iya ukporo apha eto l'apha iri

¹Owaa bu opfu Chileke, o pfuru Jieremaya le ke ndu Jiuda l'ophu l'apha, kwe Jiehoyakimu, bu nwa Jiosaya apha eno, o wataru aburu eze ndu Jiuda. Apha ono bu apha mbu, Nebukadineza wataru aburu eze ndu Babilonu.

²Jieremaya, bu onye mpfuchiru Chileke numaeopho opfu Chileke ono; o pfuaru iya ndu Jiuda l'ophu; ephe l'iphe, bu ndu bukota le Jierusalemu. O suru phe-a:

³“E -shi k'ukporo apha l'apha eto nta; mbu e -shi l'apha, kwe Jiosaya bu nwa Amonu apha iri l'eto, o wataru aburu eze unube ndu Jiuda; byasu ntanu owa-a; be mu shiepho nuta Opfu Chipfu; mu nodu epfueru iya pho unu mpfuto; ophu unu angajeduru nchi.

⁴Temekpoo Chipfu bya eyekpoo ndu-ozu iya ono, bu ndu mpfuchiru iya g'ephe ha nyeto g'ephe bya epfuaru unu opfu; ophu unu angaduru nchi; teme ophu unu eyeduru onu.

⁵“Ephe pfua su: ‘Unu ghakobedupho nta; g'unu ha l'ehu l'ehu; unu hadapho ejo-ememe, unu eme; mekpoo ejo-iphe, unu anwu ememe. O kwa iya bu g'unu a-nodu l'ali ono, Chipfu nuru unu; bya anu iya ndiche unu phe ono jasu l'ojejoje.

⁶Unu be tsoshi agwa ndu ozo. Unu be jeshiru iya ozi; ophu unu abashiru iya eja. Unu be gudeshi iphe, unu gude eka mee gude akpatsu Chipfu iwe. O kwa iya bu le mu te emekaduru unu iphe.’

⁷Ophu unu eyeduru mu onu; unu gude iphe, unu gude ẹka unu mee gude akpatsu mu iwe. Unu shi ẹgube ono mekaahaa onwunu iphe.” Nokwa iphe, Chipfu eepfu bu ono.

⁸Oo ya bu ẹ-a; wakwa iphe, Chipfu, bu Okalibe-Kakota-Ike eepfu baa: “Eshinu unu ta ngabeduru nchi l'opfu, mu pfuru;

⁹be mu a-chikobe ndu isheli l'ipfu l'ipfu; yee onye-ozu mu, bu Nebukadineza, bu eze ndu Babilonu. O kwa Chipfu epfu iya. Mu a-chiru phe bya g'ephe buru ndu ali-a ohogu; yee iphe, bu ndu bu iya nu; me iphe, bukpo oha, bupheru phe mgburugburu. Mu e-mebyishibe phe rengurengu kpo; mee phe; ephe aburu iphe, anyi ishi edzu; bya aburu iphe e gude eme iphe ochi; yele iphe, e gude ephu l'iphu; teme l'o buru ochobu jasu l'ojeje.

¹⁰Mu e-me g'o-phu-wuruwuru k'ehu-utso yele ete eswa ta aduhe l'echilabo phe; ophu olu nwanyi, alu ji; yele ke nwoke, alu nwanyi ophu adudu; ophu oda ikwe nri adudu iya; ophu oku emedu iya jaa.

¹¹Ali ẹka-a l'opfu l'opfu a-buru okorobo ochobu; teme oha-a l'opfu anodugbaa eze ndu Babilonu l'eka; ukporo apha eto l'apha iri.

¹²Teke ukporo apha eto l'apha iri ono dzuerupho; mu anu eze ndu Babilonu aphu; yele oha ono l'opfu. Mbụ l'ali ndu Babilonu l'opfu be mu a-nu aphu ejo-iphe, ephe meshiru. Mu eworu iya togbo; l'o buru ochobu jasu l'ojeje. Nokwa iphe, Chipfu eepfu.

¹³Ali ẹka ono be mu e-mekota iphemiphe, mu pfuhawaru le mu e-me iya; mbu iphemiphe, e deru l'ekwo, bu iphe, Jieremaya pfuru le mpfuchiru le k'ohamoha l'opfu.

¹⁴Ephebedua be oha, du igwerigwe; yele eze ndu paru ẹka e-mechakwapho mee phe ohu. Mu apfu phe ugwo g'iphe, ephe meru gbaru; yele iphe, ephe gude ẹka phe meta.”

Okoro oke-ẹhu-eghu Chileke

¹⁵Wakwa iphe, Chipfu, bu Chileke ndu Izuru pfuru mu baa: “Okoro-a, bu iphe, jiru iya nu bu mee k'oke-ẹhu-eghu mu-a; nafunu mu iya l'eka. Jenu emee g'iphe, bu oha, mu e-zi g'i je ali phe ngukota iya!

¹⁶Ephe -ngue ya pho; ephe awata akpo garigari; wata eme obvu obvu; kele mu a-chiru ndu ogu-echi ye g'ephe buru phe ogu.”

¹⁷Tobudu iya bu; mu bya anata Chipfu okoro ono; bya ejee ohamoha, bu ẹka o ziru mu je emee; ephe ngukota iya;

¹⁸mbu Jierusalemu; waa mkpuku, nogbaa l'ali ndu Jiuda; waa ndu eze phe; waa ndu ishi l'ali-eze iya; g'e mekota iya g'o buru ochobu; yele iphe, anyi ishi edzu; waa iphe, e-gude achi ochi; me iphe, e-gude ephu l'iphu, bu g'o du ntanu-a;

¹⁹waa Fero, bu eze ndu Ijiputu; waa ndu-ozu iya; waa ndu-ishi l'ali-eze iya; waa ndu nkiya g'ephe ha;

- 20**waa iphe, bu ndu ọhozo, bu l'alì Ijiputu; waa iphe, bu eze ndu ndu Uzu; waa iphe, bu eze ndu ndu Filisitayinu; mbu eze, ndu mkpukpu Ashikelonu; yele eze ndu mkpukpu Gaza; waa eze ndu mkpukpu Ekuronu; yele nwa ndu phoduru le mkpukpu Ashidodu;
- 21**waa ndu Edomu; waa ndu Mowabu; waa ndu Amonu;
- 22**waa iphe, bu ndu eze ndu Taya; waa iphe, bu ndu eze ndu Sayidonu; waa iphe, bu eze ndu ndu bu l'azu eze-enyimu azu iya ophuu;
- 23**waa ndu Dedanu; waa ndu Tema; waa ndu Buzu; waa iphe, bu ndu bugba l'oha, du enya;
- 24**waa iphe, bu eze ndu ndu Arabu; waa iphe, bu ndu eze ndu ọhozo, bu ndu bu l'echiegu;
- 25**waa iphe, bu eze ndu ndu Zimiri; waa iphe, bu eze ndu ndu Elamu; waa iphe, bu ndu eze ndu Midiya;
- 26**waa iphe, bu ndu eze ndu isheli; ndu bu ntse; me ndu ophu bu enya; mbu ndu ono g'ephe hakpo nanunanu; mbu-a; o buepho ali-eze, nokota l'eliphe mgburugburu. G'ephe ha -nguchaa ya; eze ndu Sheshaku angukwaa ya pho.
- 27**“Su-a; waa iphe, ii-pfuru phe baa: Wakwa iphe, Chipfu, bu Okalibe-Kakota-Ike eepfu; mbu Chileke ke ndu Izurelu: Unu ngua iphe-a; g'o tsu unu atsutsu; unu agbo ya; unu adaa iko; unu taa gbeshibaedu agbeshi; o buru iphe, a-kpa iya nu bu le mu achiru ndu ogu-echi yeru unu.
- 28**Ole teke ephe jikaru l'ephe taa natadu ngu okoro obu angu iphe, no iya nu; l'isu phe-a: Wakwa iphe, Chipfu, bu Okalibe-Kakota-Ike eepfu baa: Unu ngufutajekwa iya!
- 29**Lenu! Mu gudeakwa ejo-iphe abyapfuta mkpukpu ono, eeku eyeru epha mu ono. ? Unu arì l'unu a-la g'a ta nu unu aphu? Unu taa alakwa g'a ta nu unu aphu; kele mu eku ogu-echi oku g'o bya egbufu iphe, bu ndu bu le mgboko-a.” Nokwa iphe, Chipfu, bu Okalibe-Kakota-Ike eepfu.
- 30**Nta-a bu le-a; tuko iphe-a, mu pfuru ngu-a pfuaru phe; su phe le-a: “Chipfu agbekwa l'ephekerephe gbo uja. Oo-nodukwa l'ibe iya, du nsọ chia mkpu; gbọoru ndu alì nkiya uja. Oo-nodu ara gbagbagba ge ndu azoshi akpuru vayinu. O buru ndu onodu araru iya bu ndu bu l'eliphe l'ophu l'ophu.
- 31**Ùtsú a-da gbaa mgboko ophorokpo; kele opfu daru Chipfu yele ohamoha. Oo-kpe nemadzu l'ophu ikpe; woru ndu ejo-iphe haa g'e gude ogu-echi gbushia.” Nokwa iphe, Chipfu eepfu.
- 32**Wakwa iphe, Chipfu, bu Okalibe-Kakota-Ike eepfu baa: “Lenu! Ejo-iphe asakwa galagala; o -shi l'oha owa l'osoba l'ohozo. Mbu l'oke pherephere abyakwa ezizi. O buru eka oo-shi bu l'eka igwe beru ali beru.”

³³Lẹ teke ono bẹ ndu Chipfu phuru tẹterii a-tuko dabyigbaaru l'ekameka; eshi l'ishi mgboko ishi iya-a jasụ l'ishi iya ophuu. O tọ dudu onye a-ra ekwa phe; ophu aapakobedu odzu phe; ophu ee-lidu phe elili. O chia l'ephe a-dujegbaa gẹ nshị dọru l'alị.

³⁴Unubẹ ndu eche aturu; unu raa ekwa chia mkpu! Unu rwaphua onwunu l'urwuku; unubẹ ndu-ishi ikpoto aturu! Noo kele teke ee-gbushi unu rwuakwaru. Unu a-da iko tukposhihu g'ite-urwa, du ree.

³⁵Ndu eche aturu te enwedu aka ephe a-gbaru laa; ophu ndu-ishi ikpoto aturu enwedu aka ephe a-gbaru laa gude nahu.

³⁶O kwa olu ekwa ndu eche aturu ada egube pho; mkpu, ephe echi; mbu ndu-ishi ikpoto aturu; noo kele Chipfu emebyishiwa aka ephe echeje aturu phe.

³⁷Phorokotoko aka ono, shi daa nyonyoronyo ono bẹ ee-me g'ọ dabyiru ke mmanu. O buru iphe, a-kpa iya nu bu ehu-eghu Chipfu.

³⁸Oo-paru ogba iya haa g'oduma; alị phe aburu ochobu. O buru iphe, a-kpa iya nu bu ogu-echi ndu emekpa phe ehu. Ozo bu iphe, a-kpa iya nu bu oke ehu-eghu Chipfu.

Jieremaya 26

Eeme g'e gbua Jieremaya

¹O be lẹ gẹ Jiehoyakimu nwa Jiosaya bahuerupho l'aba-eze ndu Jiuda k'òphúú; Chipfu bya epfua opfu su:

²“Wakwa iphe, Chipfu epfu baa: Je je apfuru l'oma-unuphu eze-ulo Chipfu je epfuru yeru iphe, bukpo ndu bu lẹ mkpukpu, nogbaa l'alị ndu Jiuda, bu ndu abyaje abaru Chileke eja l'ulo Chipfu. Pfuaru phe iphemiphe, mu suru ngu g'i pfuaru phe. Te pfuphodokwaru phe iya me nanu.

³? A maru; ? ephe angabe nchi. Onyenonu aghakobe haa ejo-ememe, oome. Oo ya bu; mu apalia pazeta. Mu tee meedu phe ejo-iphe, mu shi doberu phe; bu iphe, kparu iya nu bu ejo-ememe, ephe meshiru.

⁴“Iphe, ii-pfuru phe bu lẹ-a: O -buru l'unu taa ngabeduru iya nchi; eme iphe, mu turu ekemu iya, bu ophu mu doberu l'iphu unu;

⁵teme o -buru l'unu taa ngadu nchi l'opfu, ndu-ozu mu, bu ndu mpfuchiru epfu, bu ndu mu ziru; ephe byapfuta unu; ephe -byachaa; ephe abyabaa; ophu unu angaduru nchi;

⁶bẹ mu e-mekwa ulo-a g'ọ du gẹ Shilo; mee mkpukpu-a l'oburu iphe, ee-gudeje ephu l'iphu l'ohamoha, no lẹ mgboko mgburugburu.”

⁷No iya; ndu-uke Chileke; me ndu mpfuchiru; mekpoo ndu Izurelu l'ophu numakota aka Jieremaya epfu iphe ono l'ulo Chipfu.

⁸Tobudu iya bu; epfughe, Jieremaya epfugheru ndu ono g'ephe ha iphe, Chipfu suru g'o pfua; ndu-uke ono; me ndu mpfuchiru ono; mekpoo ndu ono g'ephe hakota zule iya pho gburumu gude; su iya: “I nwuhujekwa!

9? Denu g'o gude i gude epha Chipfu epfu l'ulo-a e-mechaa du ge Shilo; teme le mkpukpu-a e-mechaa buru ochobu, adudu onye bu iya nu?" Tobudu iya bu; ndu ono l'ophu bya azupyabe Jieremaya l'ulo Chipfu l'eka ono.

10O be teke ndu-ishi l'alì ndu Jiuda numaru iphe, ada nu; epe shi l'unuphu ibe eze wuhu jeshia l'ulo Chipfu. Epe bya eje anoduchaa l'onu-abata ophuu l'ulo Chipfu.

11Tobudu iya bu; ndu-uke; yee ndu mpfuchiru ono bya asu ndu-ishi ono; yee ndu Izurelu l'ophu su phe: "Nwoke-a gbakwaru k'ekpe mpfu-gbu. Noo kele unu gudekpowa nchi unu numa iphe, o gude mpfuchiru pfua le ke mkpukpu-a!"

12No iya; Jieremaya bya asu ndu-ishi ono g'ephe ha epe le ndu Izurelu g'ephe ha: "O kwa Chipfu yeru mu ge mu bya epfua iphe, ee-me ulo-a; waa mkpukpu-a, bu iya bu iphemiphe-a, unu numaru-a.

13Nta-a bu; unu dozia uzo unu; yele umere unu! Unu wata eme iphe, o pfuru; mbu Chipfu, bu Chileke unu. Oo ya bu ge Chipfu apalia pazeta. O too meedu unu ejo-iphe, o shi su l'oo-me unu.

14O -buru mbedua be unu elenaa le mu no unu l'eka. Iphe, unu rikpooru l'o du ree bya apfuru nhamunha; unu mee mu iya.

15Ole o bu; oo epho ophu unu a-makaharu bu le-a; unu -gbua mu; ikpe-ochi onye adudu iphe, o meru atu-koru unu l'ishi; tu-koru l'ishi mkpukpu-a; yele ishi ndu bu iya nu. Kele tororo iya bu l'oo Chipfu yeru mu ge mu byapfuta unu bya epfua iphe-a g'unu numa."

16Noo ya bu; ndu-ishi ono yee ndu Izurelu l'ophu su ndu-uke; epe le ndu mpfuchiru ono-a: "E tee kpekwa nwoke-a mpfu-gbu! O gudeakwa epha Chipfu, bu Chileke anyi pfua opfu nu anyi."

17Ndu bu ogerenya l'alì ono haru gbeshi kpiritaru bya apfuru su ikpoto ndu kuru l'eka ono-a:

18"Mayika, bu onye Moreshetu be ziru ndu Jiuda ozi Chipfu ziru le teke Hezekaya, bu eze ndu Jiuda. O pfuru ndu Jiuda su phe: Wakwa iphe, Chipfu, bu Okalibe-Kakota-Ike eepfu: "Ee-mechaa ko okoro l'ubvu Zayonu kofu g'onye ako opfu. Mbu le mkpukpu Jierusalemu be e-mechaa buru ikpozu. Eli ubvu ono, bu eka eze-ulo Chileke no ono e-mechaa buru eka egbudu zechiru.

19Hezekaya, bu eze Jiuda; ozo onye ozo kpò l'alì ndu Jiuda; ? epe gburu iya-a egbu? ? To bu-chidaa iphe, Hezekaya meru bu l'o tsuru Chipfu ebvu; wata acho uzo, ya e-shi tuba iya l'enya? To Chipfu ? to paliduru pazeta k'ophu bu l'o to meeduru phe ejo-iphe, o shi su l'oo-me phe. O kwa ejo-iphe be anyi eme onwanyi nta-a."

20O nwekwaruro onye ozo gudejekwapho epha Chipfu pfua mpfuchiru. Onye ono bu Uraya nwa Shemaya. Eka a nwuru iya bu le mkpukpu Kiriyatu-Jiarimu. O pfukwarupho iphe, Chipfu suru g'o pfua l'opfu ehu mkpukpu-a; yele alì eka-a; egube-a, Jieremaya pfuru-a.

²¹O be teke eze, bu Jiehoyakimu; yee ndu-ishi Ojogu iya; waa ndu-ishi l'ali-eze iya numaru opfu iya; eze meahaa ge ya gbua ya. Obenu le Uraya numaru iya gude ndzu-agugu gbalaa laa ali ndu Ijiputu.

²²Eze, bu Jiehoyakimu zile-a Elnatanu nwa Akubo; bya ahakwarupho nemadzu yeru iya; g'o je ali ndu Ijiputu.

²³Ephe je l'eka ono je akputa Uraya bya akpuru iya je anu eze, bu Jiehoyakimu, bu onye pfuru; e gude ogu-echi gbuta nwoke ono tua. E woru odzu iya je etuphaa etupha l'eka eelije ndu enya lwaru.

²⁴Ole g'o duhabe; Ahikamu nwa Shafanu turu ikè yeru Jieremaya. O buru iya bu l'a ta akpuduru iya nu ndiphe g'e gbua.

Jieremaya 27

Ndu Jiuda a-la l'eka Nebukadineza

¹O be ge Zedekaya nwa Jiosaya bahuru l'okwa-eze ndu Jiuda k'ophuu; Chipfu bya epfua opfu-a nu Jieremaya.

²Wakwa iphe, Chipfu epfu baa: "Kwee agadagba yee odogoro; li tuko iya nyabe onwongu l'olu.

³Li zia ndu byaru Jierusalemu ozi g'e je ezia eze ndu Edomu; waa eze ndu Mowabu; waa eze ndu Amonu; waa ke ndu Taya waa ke ndu Sayidonu. L'e zikwaa ya pho Zedekaya bu eze ndu Jiuda.

⁴Zia phe ozi g'ephe je ezia nnajiuphu phe su phe-a: Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu. Waa iphe, unu e-zi nnajiuphu unu baa:

⁵O kwa ike-okpu mu, paru eka; yee oshi-eka mu lochiru alochi be mu gude mee mgboko-a l'ophu; bya emee nemadzu; yele anu, bu iya nu; teme o buru onye du mu ree be mu anuje iya.

⁶Nta-a bu le-a; ali unu l'ophu be mu yekotawaru l'eka onye-ozu mu, bu Nebukadineza, bu eze ndu Babilonu. Mu mekwarupho ge anu, bu l'egbudu noduchaa mu l'eka.

⁷Ohamoha l'ophu a-nodu iya l'eka; nodu iya nwa iya; waa nwanwa iya; jasu ali-eze iya adakpohu. Noo teke ohamoha, du igwerigwe mekpoo eze ndu paru eka e-me iya ohu phe.

⁸"Teke o bu l'o nweru ohamoha; ozoo ali-eze, jikaru anodu Nebukadineza l'eka; mbu eze ndu Babilonu; ozoo l'ephe jikaru edobe olu g'o nyabe phe agadagba-njigba iya; mu egude ogu-echi; yee okpa nri; yee ejo iphe-ememe nua ndu obu aphu. Mbu mee ndu ono iphe gbiriri jasu mu egude eka Nebukadineza mebyishibebe ndu obu. Nokwa iphe, Chipfu eepfu.

⁹Oo ya bu le-a; unu ta angakwaru ndu mpfuchiru unu nchi; me ndu jibya unu; me ndibe unu, akoje iphe, nrwobu; me ndibe unu, ndu agba eja; me ndu karu akaka, bu ndu asuje unu l'unu taa lakwa eze ndu Babilonu l'eka.

- 10**Mpfuchiru, ẹphe epfuru unu bu ụka be ẹphe adzushiru unu. O buru iphe, oo-me bu g'unu haa ali unu lamihukpoo alamihu. Mu e-nwufu unu enwufu; unu eje alaa l'iswi.
- 11**Obenu l'oha -woru olu doberu eze ndu Babilonu; o nyabe phe agadagba-njigba iya; ẹphe nodu iya l'eka; be mu e-kwe haa g'ẹphe buru l'ali k'eka phe; akọ iya opfu; buru iya eburu. Nokwa iphe, Chipfu eepfu.' “
- 12**Mu wokwarupho ozi ono zia Zedekaya, bu eze ndu Jiuda. Mu su iya: “Wozekwa olu doberu eze ndu Babilonu g'o nyabe ngu agadagba-njigba iya; nodu iya l'eka; yee ndibe iya; k'ophu ii-nodu ndzu.
- 13?** Denu g'o gude gubedua gu le ndu ali ngu l'ophu je l'a-buru ndu ee-gude ogu-echi gbushia; ẹgu egbushia phe; yele ejo iphe-ememe, bu iphe, Chipfu pfuru le ya e-gude gbushia oha, jikaru l'ẹphe taa nodudu eze ndu Babilonu l'eka.
- 14**Unu ta ngakwa nchi l'opfu ndu mpfuchiru, asuje unu l'unu ta abyakwa anodu eze ndu Babilonu l'eka; kele o kwa ụka be ẹphe adzuru unu le mpfuchiru ono.
- 15**Wakwa iphe, Chipfu epfu baa: ‘O to bukwa mbedua ziru phe ozi ono. O to bukwa mu be ẹphe epfuchiru. O kwa ụka be ẹphe adzu. O buru iya e-me; mu enwufu unu nwuru unu jeye; unu alaa l'iswi; unubedua l'onwunu; unu le ndu ono, epfuru unu mpfuchiru ono.’ “
- 16**Mu bya asu ndu-uke Chileke; ẹphe le ndu Jiuda l'ophu le-a: “Wakwa iphe, Chipfu epfu baa: Unu ta ngakwa nchi l'opfu ndu mpfuchiru, asuje unu l'o bufukwaa nwanshii nta; l'aatuko ngwa ono, e gwetaru l'ulo Chileke laa ali ndu Babilonu ono gwephuta azu. O kwa ụka be ẹphe adzu le mpfuchiru, ẹphe epfuru unu.
- 17**Unu ta ngakwaru phe nchi. Unu nodu eze ndu Babilonu l'eka g'unu anodu ndzu. ? Denu g'o gude mkpukpu-a je l'a-buru ikpozu?
- 18**O -buru l'ẹphe bu ndu mpfuchiru; ẹphe nodu anumaje olu Chipfu; g'ẹphe rwnaa Chipfu, bu Okalibe-Kakota-Ike ge ngwa-ulo ono, e gude dozia eze-ulo Chipfu ono, bu ophu phodukwaduru nu; yee ophu phoduru l'ibe eze ndu Jiuda; yee ophu phoduru le Jierusalemu ta abuhe iphe, ee-rwuta laa ali ndu Babilonu.
- 19**Le-a; wakwa iphe, Chipfu, bu Okalibe-Kakota-Ike eepfu le k'itso itso eze-ulo Chileke; waa k'iphe ono, eeyeje mini, echi ririri ono; waa k'ogba-kperekpere; waa ikpoto ngwa ozo ono, phodugbaaru le mkpukpu-a,
- 20**bu ndu ophu o gwetaduru; mbu Nebukadineza, bu eze ndu Babilonu; teke o kpuru eze ndu Jiuda, bu Jiehoyakinu nwa Jiehoyakimu le ndzu shi Jierusalemu laa ali ndu Babilonu; kpupyabekota iya ndu a maru amaru l'ali ndu Jiuda yele Jierusalemu.
- 21**Ee! Wakwa iphe, Chipfu, bu Okalibe-Kakota-Ike eepfu; mbu Chileke ke ndu Izurelu; wakwa iphe, oopfu le k'iphe ono, e gwephodoru l'ulo Chipfu ono; yee ophu phoduru l'ibe eze ndu Jiuda; yee ophu phoduru le Jierusalemu:

22‘G’ephe ha be ee-gwetachakwa laa ali ndu Babilonu. O buru l’eka ono be oo-noḍu gbiriri jasū mboku, mu a-choru iya bya. Noo teke mu a-chiphuta iya azu bya edophukwa azu l’eka-a.’ “Nokwa iphe, Chipfu eepfu.

Jieremaya 28

Onye adzufe uka le mpfuchiru, bu Hananiya

1O buru l’apha ono kwapho; ge Zedekaya bahuru l’aba-eze ndu Jiuda k’ophuu; l’onwa k’ise l’ime apha k’eno; be onye mpfuchiru, bu Hananaya nwa Azuru, bu onye shi mkpukpu Gibiyonu; no l’ulo Chipfu l’iphu ndu-uke Chileke; me l’iphu oha l’ophu su mu-a:

2“Wakwa iphe, Chipfu, bu Okalibe-Kakota-Ike eepfu; mbu Chileke ndu Izurelu: Mu a-nyakashi agadagba-njigba ono, eze ndu Babilonu nyaberu unu ono.

3L’ime apha labo be mu a-chi-phutakota iphe, bukpo ngwa ulo Chipfu ono azu l’eka-a; mbu ngwa ono, eze ndu Babilonu, bu Nebukadneza chitaru l’eka-a lashia ali ndu Babilonu.

4Ndu mu a-chi-phutakwapho azu l’eka-a bu Jiehoyakinu nwa Jiehoyakimu, bu eze ndu Jiuda; mekpoo iphe, bukota ndu a kpuru le ndzu l’ali ndu Jiuda, bu ndu laru ali ndu Babilonu; noo kele mu a-nyakwa agadagba-njigba ono, eze ndu Babilonu nyaberu unu ono. Nokwa iphe, Chipfu eepfu.”

5Tobudu iya bu; onye mpfuchiru, bu Jieremaya bya eyee onu su onye mpfuchiru ono, bu Hananaya-a l’iphu ndu-uke; ye le l’iphu iphe, bukpo ndu pfuru l’ulo Chipfu;

6su iya: “G’o dukwa nno! Ge Chipfu mekwaa ya nno! Ge Chipfu mekwaa iphe ono, i pfuru le mpfuchiru ono; g’o chi-phutakwa ngwa ulo Chipfu azu; ye ndu a kpuru le ndzu; g’o shikwa l’ali ndu Babilonu tuko phe chi-phuta azu l’eka-a!

7Ole g’o duhabe; ngabekwa nchi numa iphe, mu abya epfu ye ngu le nchi; ye le nchi ndu-a l’ophu.

8Ndu mpfuchiru, vu mu uzo; bya evuru ngu uzo; mbu ndiche; buepho iphe, ephe epfufe le mpfuchiru nu oha, du igwerigwe; ye ali-eze, paru eka; bu l’ogu a-du; ye okpa-nri; waa ejo iphe-ememe.

9Obenu l’onye mpfuchiru, epfu opfu le nchi a-du doo buepho teke iphe, o pfuru meru g’o pfuru iya be ee-kweje le Chipfu ziru iya eviya.”

10Tobudu iya bu; onye mpfuchiru ono, bu Hananaya bya anyafu Jieremaya, onye mpfuchiru agadagba-njigba ono, o nya ono bya eworu iya nyajia.

11Hananaya bya apfuru l’iphu oha l’ophu su: “Wakwa iphe, Chipfu epfu baa: O kwa egube-a bu ge ya a-gbajifu agadagba-njigba ke Nebukadneza, bu eze ndu Babilonu l’olu ohamoha l’ime apha labo.” O pfeppo nno; Jieremaya tugba.

¹²A nọkwapho nwanshii g'onye mpfuchiru, bu Hananaya gbajifucharu agadagba-njigba ono, nọ l'olu onye mpfuchiru, bu Jieremaya ono; Jieremaya obu numa olu-Opfu Chipfu, sọru iya:

¹³“Je je akaru Hananaya sọ iya lẹ-a: Wakwa iphe, Chipfu epfu: Iphe, i gbajifuru bukwa agadagba-njigba ophu e meru l'oshi; ọle iphe, mu e-gude dochia ya bu agadagba-njigba ophu e meru l'igwè.

¹⁴Wakwa iphe, oopfu; mbu Chipfu, bu Okalibe-Kakota-Ike; mbu Chileke ke ndu Izurelu: Mu e-woru agadagba-njigba ophu e meru l'igwè nyabẹ l'olu ohamoha-a l'ophu gude mee phe g'ọ buru Nebukadineza, bu eze ndu Babilonu be ephe a-nodu l'eka. Mbu lẹ mu e-me iya g'ọ nodu elekotachaa me anu, bu l'egbudu.”

¹⁵Tobudu iya bu; onye mpfuchiru, bu Jieremaya sọ Hananaya, bu onye mpfuchiru-a: “Ngabekpodapho nchi; Hananaya! O to bukwa Chipfu ziru ngu gi bya; obenu li mewaru ndu-a; ephe je adakobe iphe, abudu eviya.

¹⁶Oo ya bu lẹ-a; wakwa iphe, Chipfu epfu baa: ‘Mu abyakwa ngu ewofu l'eli mgboko-a. Apha-a gedegede be ii-nwuhu; kele i pfuwaru opfu, eme g'e kwefuru Chipfu ike.’ “

¹⁷O -rwuepho l'onwa k'esaa l'apha ono kwapho; Hananaya, bu onye mpfuchiru nwuhu.

Jieremaya 29

Ekwo-ozii, e deru nu ndu a kpuru le ndzu

¹Owaa bu iphe, e deru l'ekwo-ozii, Jieremaya gbẹ lẹ Jierusalemu dee nu g'a nu ndu bu ogerenya l'ime ndu ophu nọ ndzu l'ime ndu ono, a kpuru le ndzu ono; l'a nu iya ndu bu uke; me ndu bu ndu mpfuchiru; me iphe, bukpo ndu ono, Nebukadineza kpuru le ndzu shi lẹ Jierusalemu laa ali ndu Babilonu ono.

²Teke ono be a kpukwanaru eze, bu Jiehoyakinu le ndzu; yee ne iya, bu eze-nwanyi; me ndu eleta ibe eze enya; mekpoo ndu-ishi ndu Jiuda yee ndu Jierusalemu l'ophu; me ndu eme ona; me ndu akpu uzu; be a kpukotawaru le ndzu kpuru lufu lẹ Jierusalemu.

³Onye o nuru ekwo-ozii obu bu Eleyasa nwa Shafanu; yee Gemaraya nwa Hilikaya, bu ndu Zedekaya, bu eze ndu Jiuda ziru ozi g'e je zia eze, bu Nebukadineza l'ali ndu Babilonu. Ekwo-ozii, Jieremaya deru obu sọru:

⁴“Wakwa iphe, Chipfu epfu baa; mbu Okalibe-Kakota-Ike; Chileke ke ndu Izurelu. Ndu oopfu iya anu bu ndu ono, a kpuru le ndzu ono g'ephe ha; mbu ndu ono, mu meru; e shi lẹ Jierusalemu kpuru phe laa Babilonu ono:

⁵Unu kpushikwaa ulo buru; unu akoo opfu ria iphe, o metaru.

⁶Unu lushikwaa nwanyi nwushia unwegirima; unu achotaru unwu unu nwoke nwanyi alulu; unu ekee unwu unu nwanyi ji; k'ophu ephebedua l'e-nwekwarupho unwegirima. Unu nodukwa l'eka ono ka adu igwerigwe; unu taa nodukwa aka alwa ali.

⁷Ozo bu lẹ-a; unu chojekwa iphe, e-me gẹ nchị dọ doo lẹ mkpukpu ono, bu ẹka a kpuru unu lẹ ndzụ laa ono. Unu pfujeru nọ Chipfu l'iswi ẹhu ndu ono; kele nchị -dụ phẹ doo; l'ọ dukwapho unu.

⁸Kele-a; wakwa iphe, Chipfu, bu Okalibe-Kakota-Ike eepfu; mbụ Chileke ndu Ízurelu: Unu te ekwekwa gẹ ndu mpfuchiru unu; me ndu agbaru unu ẹja; duru unu ghaa ọzo. Unu ta angajekwaru phẹ nchị lẹ nrwọ, unu meru phẹ; ephe nọdu arwọ.

⁹O kwa ọka bẹ ephe adzuru unu sụ l'ephe gude ẹpha mu epfu mpfuchiru. O tọ bukwa mu yeru phẹ. Nokwa iphe, Chipfu eepfu.”

¹⁰Wakwa iphe, Chipfu epfu baa: “A -nọepfo ukporo apha ẹto l'apha iri lẹ Babilonu bẹ mu a-byapfuta unu bya emeeru unu iphe ono, dọ ree ono, mu kweru ukwe iya ono; mbụ lẹ mu a-bya eduphuta unu azụ l'alì ẹka-a.

¹¹Kele mu maru ọriri, mu arì l'ẹhu unu. Nokwa iphe, Chipfu eepfu. Mu arì k'eme g'ẹhu dọ unu guu; ọ tọ bukwa g'ọ duru unu lẹ njọ. Gẹ mu mee g'uzo iphu duru unu lẹ ree; unu enweru iphe, unu a-nọdu ele ẹnya iya.

¹²Teke ono bẹ unu a-rakuje mu; unu abyapfuta mu; bya epfuru nọ mu; mu angaberu unu nchị.

¹³Teme unu achọo mu; chọta mu; me ọ -buru l'unu gude obu unu l'ophu achọ mu.

¹⁴Teke ono bẹ unu a-chọ mu chọta; nokwa iphe, Chipfu epfu. Mu emee unu; unu taa bueduru ndu a kpuru lẹ ndzụ. Mbụ lẹ mu e-jeepfo l'iphe, bukpo ohamoha; mekpoo ekameka ono, mu chiru unu laa ono je achị-phuta unu azụ l'ẹka ono, mu meru; a kpua unu lẹ ndzụ ono. Nokwa iphe, Chipfu eepfu.”

¹⁵Unu a-sukwaro: “Chipfu yeanaru anyi ndu mpfuchiru lẹ Babilonu.”

¹⁶Obenu lẹ-a; wakwa iphe, Chipfu epfu baa l'opfu ẹhu onye eze ono, nọ l'aba-eze Dévidi ono; yele opfu ẹhu iphe, bukpo ndu phoduru lẹ mkpukpu-a; mbụ unwunna unu, bu ndu ophu a kpukobeduru unu l'ephe lẹ ndzụ.

¹⁷Ee! Wakwa iphe, Chipfu bu Okalibe-Kakota-Ike eepfu baa: “Iphe, mu e-ye bukwa ogu-echi; yee okpa-nri yee ẹjo iphe-ememe g'ọ buru phẹ ogu. Mu emee phẹ; ephe adu g'ẹjo akpuru oshi figu, duta-beru ẹji k'ophu bu l'e tee ridu iya eriri.

¹⁸Mu e-gude ogu-echi; yee okpa-nri; yee ẹjo iphe-ememe achị phẹ ọso. Mu emee phẹ; ephe aburu iphe, ali-eze nọgbaa lẹ mgboko-a a-nọdu asọ oyi; mbụ ephe aburu iphe, e gude atụ onu; yee iphe, anyi ishi ẹdzu; waa iphe e gude achị ọchi; yee iphe, e gude ephu l'iphu l'ẹka ohamoha nọ, bu ẹka mu chiru phẹ jeye.

¹⁹Noo kele ephe ta ngabeduru nchị l'opfu mu; ọ kwa Chipfu epfu iya; mbụ opfu, mu pfuru mpfuto nọ phẹ; ọ buru ndu mu ziru iya bu ndu-ozì mu bu ndu mpfuchiru. Ophu unubedua, a kpuru lẹ ndzụ-a angakwarupho nchị. Nokwa iphe, Chipfu eepfu.”

²⁰Oo ya bu lẹ-a; unu numakwa Opfu Chipfu g'unu ha buru ndu a kpuru lẹ ndzụ; bu ndu mu chitaru lẹ Jierúsalemu chila Babilonu.

²¹Wakwa iphe, Chipfu epfu baa; mbụ Ọkalibe-Kakọta-Ike, bụ Chileke kẹ ndu Ízurelu; wakwa iphe, oopfu l'opfu-ẹhu Éhabu nwa Kolaya; yẹ opfu-ẹhu Zedekaya nwa Maseya, bụ ndu gude ẹpha mu adzuru unu ụka lẹ mpfuchiru: “Mu e-woru phẹ ye l'ẹka Nebukadineza, bụ eze ndu Bábilonu; l'o woru phẹ gbushia l'atatiphu unu ẹka unu ele ẹnya.

²²Oo phẹ a-kpa iphe, ndu Jiuda ono, a kpuru lẹ ndzụ ono g'ẹphe ha, bụ ndu nọ l'alị ndu Bábilonu a-wata ephu l'iphu sụ: ‘Gẹ Chipfu mekwaa ngu iphe, o meru Zedekaya; yẹ Éhabu, bụ ndu eze ndu Bábilonu huru l'ọku.’

²³Noo kẹle ẹphe mewaru iphe-eswe l'echilabo ndu Ízurelu. Ẹphe l'unyomu obutobu phẹ riwaru ogori; tẹme ẹphe gudewaa ẹpha mu dzua ụka, bụchaa iphe, mu asuduru phẹ g'ẹphe mee. Iphemiphe ono bẹ mu makotaru; tẹme mu buru onye-ekebe iya.” Nokwa iphe, Chipfu eepfu.

Ozi, e ziru Shemaya

²⁴“Karụ Shemaya, bụ onye Nehelamu:

²⁵Wakwa iphe, Chipfu epfu; mbụ Ọkalibe-Kakọta-Ike; bya aburu Chileke ndu Ízurelu: I gude ẹpha ngu dee ẹkwo-ozì wolaaru iphe, bukpoò ndu nọ lẹ Jierusalemu; bya anu iya Zefanaya nwa Maseya, bụ onye uke; mekpoo iphe, bukota ndu-uke ndu ophuu g'ẹphe ha. I suru Zefanaya-a:

²⁶“Chipfu meakwaru ngu onye uke g'i nọdu l'okwa Jiehoyada; g'i nọdu eleta ụlo Chipfu ẹnya. O -nweru onye obvu eme, kuru onwiya onye mpfuchiru; chiru iya okpa ye lẹ mkporo; nwua ya olu lẹ mgborígwe.

²⁷? Bụ gụnu kparụ iphe, ị tị gboduru Jieremaya onye Anatoṭu ụja, bụ onye epfuru unu mpfuchiru?

²⁸Wakwa ozi, o ziru anyi lẹ Bábilonu baa: “Iphe obu a-nokwa ọdu. Oo ya bụ lẹ-a; unu kpushikwaa ụlo buru; unu akọo opfu ria iphe, o metaru.” ’ “

²⁹O buru iya bụ l'onye uke ono, bụ Zefanaya abya eworu ẹkwo-ozì guaru Jieremaya, bụ onye mpfuchiru.

³⁰No iya; olu-Opfu Chipfu rwua Jieremaya nchị sụ:

³¹“Woru ozi-a zia g'o rwua lẹ nchị iphe, bụ ndu ono, a kpuru lẹ ndzụ ono g'ẹphe ha: Wakwa iphe, Chipfu epfu l'opfu ẹhu Shemaya, bụ onye Nehelamu: Eshinu Shemaya epfuru unu iphe o suru lẹ mu pfuru; l'ẹbe abụ l'ọo mu ziru iya ya; be o mewaru; unu je adakobe iphe, abudu eviya.

³²Wakwa iphe, Chipfu epfu baa: Shemaya, bụ onye Nehelamu bẹ mu a-nụ aphụ; yẹle awa iya l'ophu; k'ophu bụ l'ọ tọ dukwa onye o nweru a-phodukwadu nụ l'echilabo ndu-a; ophu ọo-humadu iphe-oma ono, mu e-mechaa meeru ndu ndibe ono; noo kẹle o pfuwaru iphe, e gude kwefuru mu ike.” Nokwa iphe, Chipfu eepfu.

Jieremaya 30

Chileke ekwe ukwe alwalwa ndu Ízurelu

- ¹Wakwa opfu, shi l'õnu Chipfu rwua Jieremaya nchi.
- ²“Wakwa iphe, oopfu; mbu Chipfu, bu Chileke ke ndu Ízurelu: Tuko opfu-a, mu pfuru nu ngu-a dekota l'ekwo.
- ³Kele-a: wakwa iphe, Chipfu epfu baa: mboku abyakwa; teke mu e-je l'eka a kpuru ndibe mu le ndzu laa; mbu ndibe mu bu ndu Ízurelu ephe le ndu Jiuda; je eduphuta phe azu; bya edophu phe azu l'ali ono, mu nuru nna phe oche g'o buru nkephe ono. Nokwa iphe, Chipfu eepfu.”
- ⁴Wakwa opfu, Chipfu pfuru pfudoru ndu Ízurelu ephe le ndu Jiuda.
- ⁵“Wakwa iphe, Chipfu epfu baa: Anyi anukwa mkpu, ephe echi; mbu ndu ndzu agu. Mbu l'õo n-yemebvu du; o to budu nchi-adu-doo.
- ⁶Jinaa aji huma; nwoke ? o tsuje ime nwa? ? Denukwanu g'o gude mu humagba unwoke l'ehu l'ehu g'ephe chigbaaru eka kwee l'epho ge nwanyi, ime eme; onyenõnu wocharu iphu gbanwube õnwu õnwu?
- ⁷Tuswekwa! Mboku ono a-dukwa ejo eji; k'õphu bu l'õ to duedu eswe a-dubaa eji g'õõ ya. Teke ono be oshilokpa Jiékõpu e-je iphe-ehuka; obenu l'ee-mechaa dzõta iya l'ime iya.
- ⁸“Wakwa iphe, oopfu; mbu Chipfu, bu Okalibe-Kakõta-Ike: O -rwua mboku ono be mu a-nyakwo agadagba-njigba ono, nõ phe l'olu ono; mu abya atõshia phe egbu, e keru phe; õphu ndu õhõzo emebaedu phe ohu phe.
- ⁹Ephe a-nõdu ejeru Chipfu, bu Chileke phe õzi; yee Dévidi ono, bu eze phe ono, bu onye mu e-me g'õ futaru phe.
- ¹⁰“Ge ndzu ba agukwa ngu; gube Jiékõpu, bu onye-õzi mu! Nokwa iphe, Chipfu eepfu. G'e be yekwa ngu ebvu; gube Ízurelu; kele-a; lekwa le-a; mu e-shikwa l'eka du enya dzõta ngu. Mu adzõta unwu ngu l'ali eka a kpuru phe le ndzu laa. Noo teke Jiékõpu a-lwa azu bya anõdu l'ehu-guu. Teme o to duedu iphe, byaru emebaa ya nu; õphu o dudu onye byaru emebaa ya g'õ buru onye ndzu agu.
- ¹¹Wakwa iphe, Chipfu epfu baa: Mu nõkwa swiru ngu eswiru; mu a-dzõ ngu! A makwaru-a le mu tukoru õhamoha emebyishibebe, bu ndu mu shi woru ngu ghakaa l'ime phe. Obenu le mu tee mebyishibebedu ngu gberegedege. Mu a-huõ ngu ahõhõ l'uzo, pfuru nhamõnha. Ophu mu ahakwanu ngu phuruphuru ge mu ta anu ngu aphu l'õphu l'õphu.”
- ¹²Wakwa iphe, Chipfu epfu baa: Onwo, aba ngu nu be e tee metakwa emeta. Ophu iphe, e mekaru ngu akpõhudu akpõhu.
- ¹³O to dudu onye a-gbaru ngu õdzõri. Ophu o dudu iphe õzo, ee-mebaa l'õnyá õbu, aba ngu nu õbu. Ophu ji-kaedu mma akaka.

¹⁴Iphe, bukpo ndu gu l'ephe shi eshi ònyà zòhakotawaru ngu. Ephe ta akpaèdu ngu ishi ililekpoo. Mu tsuwaru ngu iphe, onye ohogu etsuje ohogu iya. Mu bya echia ngu iphe, onye duru nemadzu ehuka echije iya. O buru iphe, kparu iya nu bu l'i menukaru ejo-iphe. Teme iphe-eji, i meshiru paa igwerigwe.

¹⁵? Denu g'o gude i nodu ara ekwa iphe, mekaru ngu nu; mbu iphe, eme ngu ehuka, bu iphe, taa kpohudu akpohu? O kwa l'i metanukaru iphe-uta; teme iphe-eji, i meshiru paa igwerigwe; meru g'o gude mu mee ngu iphemiphe ono.

¹⁶Obenu l'iphe, bukpo ndu eripya ngu be ee-ripyakwa. Iphe, bukpo ndu ohogu ngu be aa-kpu le ndzu. Ndu kwaru iphe ngu l'okwata be aa-kwakwapho okwata. Ndu keru iphe ngu l'ogu be ee-kekwapfo iphe phe l'ogu.

¹⁷Obenu le mu e-me g'ehu du ngu ike; mee g'onya, du ngu l'ehu kpohu. Nokwa iphe, Chipfu eepfu. O buru iphe, kparu iya nu bu l'e kuru ngu onye a chifuru achifu; Zayonu, aduedu onye akpa ishi iya.

¹⁸“Wakwa iphe, Chipfu epfu baa: Onu-ulo Jiekopu ono, e shi kpa le ndzu ono be mu e-dophu azu l'onodu iya. Mu aphuru aka ephe bu obu-imemini. Mkpukpu ono be aa-kpu-phu azu l'eli ozu iya ono. Ibe eze ono abyakwa anochia l'eka o gbaru g'o nodu.

¹⁹Ephe awata agu ebvu-ekele; atu uzu ehutu. Mu emee g'ephe kabaa igwe; ophu ephe abyadu alwa ali ali. Mu e-me g'ephe buru ndu aakwabebu ubvu; ophu enya abyadu alwa phe.

²⁰Unwu phe bu g'ephe shi du teke ndiche bu g'ephe a-du. Teme edzudzu-oha aburu iphe, nguchaaru anguru l'iphu mu. Mu anua ndu eme phe ewere aphu.

²¹Onye eze phe a-buru onye lanu l'ime ndibe phe. Onye a-buru onye-ishi phe aburu l'echilabo phe be oo-shi. Mu a-kpuritaru iya; l'obyana anodu mu ntse; kele-a: ? bu onye suru g'oo-dobe onwiya iche bya bya anodu mu l'iphu? O kwa Chipfu epfu iya.

²²Oo ya bu l'unu a-buru ndibe mu; mu aburu Chileke unu.”

²³Lekwa! Chipfu gudeakwa ehueghu ezi oke-pherephere; mbu ejo oke pherephere. O buru l'ishi ndu ejo-iphe be ophu temutemu;

²⁴ophu ehueghubuhukwa Chipfu ehueghu gbiriri jasu l'o meebekota iphe, du iya l'okpoma k'ememe. Mboku abya-a l'uzo iphu teke iphe-a l'e-dokota unu enya ree.

Jieremaya 31

Alwalwa ndu Izurelu

¹Wakwa iphe, Chipfu epfu baa: “O -rwua le teke ono; be mu a-buru Chileke k'ipfu l'ipfu ndu Izurelu l'ophu; ephe aburu ndibe mu.”

²Wakwa iphe, Chipfu epfu baa: “Ndu ono, ogu-echi gbuphodoru ono be e meru eze- iphe-oma teke ephe no l'echiegu; mbu Izurelu; teke o shi achu aka oo-nodu tuta unme

³be Chipfu shi l'eka du enya mee g'o huma iya. Mu yeru ngu obu yee ngu iya k'ojeje. Mu gude n-yemobu mu kpuritaru ngu.

⁴Mu a-kpu-phukwa ngu pho azu; l'i buru onye a kpuphuru azu; gube nwamgboko mu yee nwoke akwajeduru ono, bu gube Izurelu. L'i wota nkwa ngu je etsoru ndu ehu atso wata ete ebvu.

⁵Ii-wata ako opfu-vayinu l'eli ubvu ubvu Sameriya ozobaa. Ndu ako opfu a-ko iya; ria iphe, ephe koru iya;

⁶kele e -mechaa; l'o duru mboku, ndu eche nche a-nonya; ephe echiaha mkpu l'ali ubvu ubvu ndu Ifuremu su: 'Unu bya g'anyi je l'ubvu Zayonu; jepfu Chipfu, bu Chileke anyi!' "

⁷Wakwa iphe, Chipfu epfu baa: Unu gua ebvu ehu-utso nu Jiekopu! Unu tua uzu ehu-utso nu onye-ishi ohamoha! Unu raa ya arara; kwaa ya l'evu su: Jiko Chipfu; dzonaa ndu nkengu; mbu nwa ndu Izurelu ndu ophu phoduru nu!

⁸Lekwa; mu e-shi l'ali ndu isheli chi-phuta phe azu. Mu e-erwuchaa eka igwe beru ali beru je erwukoo phe. Mu a-chitachaa me ndu atsuh ishi; me ndu eniyeni; me ndu du ime; me ndu ophu ime emewaa ememe. O buepho l'ikpoto ndu a-lwa nu a-pa eka.

⁹Ephe a-nodu ara ekwa abya. Mbu l'ephe a-nodu arwo mu arworwo; mu edu phe alwa. Mu e-du phe dughaa nggele nggele; dua phe shia uzo, du baswaa k'ophu upfu ata akpodu phe l'okpa. O buru iphe, kparu iya nu bu le mu bu nna Izurelu; teme Ifuremu buru okpara mu.

¹⁰"Unu numakwa Opfu Chipfu; unube ohamoha! Unu araa ya arara ge ndu bukube eze-enyimu l'eka du enya numa! L'onye ono, chikashiru ndu Izurelu ono a-chikobekwa phe pho ozo. L'ooche unwu aturu iya obu nche g'onye eche aturu;

¹¹kele Chipfu gbafutawaru Jiekopu pfua aswa ishi iya l'eka ndu ka phe okpehu.

¹²Ephe a-bya bya atua uzu ehu-utso l'ubvu Zayonu. Ephe eteru eswa kpua iphe, du ree, Chipfu doberu; mbu ereshi-o; me mee-o; mekpoo manu; me unwu aturu me egbu; mekpoo ikpoto eswi. Ephe a-du g'opfu, a koru agba iya mini ree; ophu ephe a-nodubaedu aphu-aphu.

¹³Teke ono be unwumboko a-wata ete ebvu; ehu atso phe; me unwokorobya; me ndu bu ogerenya kwapho. Noo teke mu e-me g'aphu, ephe shi agu buru phe ehu-utso. Mu a-du phe obu; mu agbanwee aphu, tsoru phe nu g'o buru phe ehu-utso.

¹⁴Ndu uke be mu a-nukpo iphe, du ree nua k'etsutsu iya. Teme iphe, du ree, mu doberu be e-jikpoo ndu nkiya ephe." Nokwa iphe, Chipfu eepfu.

Chipfu a-phuru ndu nkiya obu-imemini

¹⁵Wakwa iphe, Chipfu epfu baa: "A numaru uzu-ekwa le mkpukpu Rama; mbu ekwa anwuhu me oke nggumaphu. O buru Rechielu l'ara ekwa unwu iya; ophu o kwedu g'egbobuta iya egbobuta; opfu l'unwu iya bvueberu."

¹⁶Wakwa iphe, Chipfu epfu baa: "Gberuma! Ba rah eka! Huchaa enya-mini, no ngu l'enya; kele ee-mechaa bua ngu nggo ozi ngu; mbu l'ephe e-shi l'ali ndu ohogu lwa. O kwa Chipfu epfu iya.

¹⁷Oo ya bu lẹ-a; unu lee ẹnya l'iphu a-duru unu ree. Unwu unu l'a-lwa l'alị phe.” Nokwa iphe, Chipfu eepfu bu ono.

¹⁸Ude, Ifuremu atsụ be mu nụmawaru; l'ọ sụru: I hụwaru mu ahùhù g'onye ahù nweswi, ekwedu g'a gọta iya. A hụkwanaa mu hùta. Dophunu mu azụ ge mu alwaphuta azụ; noo kele ọo ngu bu Chipfu bya aburu Chileke mu.

¹⁹Mu kpaphuhucharu; izimanu bya alwaphuta mu azụ. Onodu, mu nọ doę mu pho ẹnya. Mu phuru yoo; chiru ẹka ye l'iphu utapfu. Iphere bya egude mu; mu bya aburu onye ẹnya lwaru; kele ọo iphe, mu meru teke mu bu okoro bya be byaru eteahaa mu ntụ l'iphu nta-a.

²⁰“Sụ-a; Ifuremu ? tọ bụdu nwa, mu yeru obu; mbụ nwa, tūbaru mu l'ẹnya? A makwaru-a lẹ mu ahajeru efpuru iya; obenu lẹ mu anyatajele iya-a. Oo ya bu lẹ-a; oghoroko iya dū mu shii; mbụ lẹ mu aphuru iya obu-imemini, paru ẹka. Nokwa iphe, Chipfu eepfu bu ono.

²¹Meshia ohubama dobegbaa l'oji! L'i koshia obvudu obvudu dobegbaa! Li lerwetakwa oji, a tūru mkpoli ẹnya, bu oji, iishi! Lwadupho azụ; gube nwamgboko mu, bu Ízurelu! Lwadupho azụ lẹ mkpukpu ngu ono g'ọ ha!

²²? Ii-ghaphekpo egube ono jasụ teke ole; gube nwada ono, eegudedu ire iya ẹka ono? Chipfu mewaru iphe ophúú lẹ mgboko-a; mbụ lẹ nwanyi a-wata eleta nwoke ẹnya.”

Iphe e-mechaa duru ndibe Chileke lẹ ree

²³Wakwa iphe, Chipfu, bu Okalibe-Kakota-Ike eepfu baa; mbụ Chileke ndu Ízurelu: “O sụru-a: Mu -shiepho l'ẹka a kpuru phe lẹ ndzụ duphuta phe azụ; be ndu nọ l'alị Jiuda; yee mkpukpu lẹ mkpukpu iya a-wata epfu opfu-a ozo sụ: “Ge Chipfu kebe ngu l'oma; gube ibe onye ono, pfulerekoto ono; gube úbvú, dū nsọ!

²⁴Ndu Jiuda me mkpukpu lẹ mkpukpu, nokota iya nū l'a-tuko bukotaruru l'ẹka ono; ndu akọ opfu eburu iya; ephe lẹ ndu aghaphe aghaphe; ephe l'eghu me aturu phe.

²⁵Kele onye ike bvuru be ee-me-a g'epho ji; mu emee iphe, bukpo onye rwuhuru arwuhu g'ọ rokota ike.”

²⁶Mu jeberu nno bya etehu; bya awata achika ẹnya. Mgbenya mu obu nọdu atso mu ntumatu.

²⁷Wakwa iphe, Chipfu epfu baa: Lekwa; mboku abyakwa-a; teke mu e-woru mebyi- iphe, bu nemadzu yee anu woru ghakaa l'alị Ízurelu yele alị Jiuda.

²⁸Oo ge mu eche phe nche; e pheshia phe; nwukposhia phe; e mekpee phe; mebyishia phe; ephe laa l'iswi; nokwapho ge mu a-nodu eche phe nche; aa-kpukwa phe; dzaphu phe azụ. Nokwa iphe, Chipfu eepfu.

²⁹O -rwua mboku ono be a taa subaedu: Nna anyi phe bukwa akpuru vayinu, achaduru achacha be ephe riru. O nodu akpo unwu phe eze ihuku.

³⁰Ọ bụ-chia iphe, e-me nù bụ l'onyemonye a-la l'ejo-iphe, o metaru. Onye riwaruro akpuru vayinu, achaduru achacha; eze akpowa iya rọ ihuku.

³¹Wakwa iphe, Chipfu epfu baa: Mbọku abyakwa teke mu lẹ ndu Ízurelu; waa ndu Jiuda a-gba ndzụ òphúú.

³²Ono taa duedu g'ogbandzu ophu mu lẹ nna phẹ oche gbaru; teke ono, mu gude ẹka seta phẹ dufuta phẹ l'alì ndu Ijiputu; noo kele ephe mebyiru ogbandzu mu; l'ẹka bukwa mbedua bụ ji, alụ phẹ nù. Nokwa iphe, Chipfu eepfu.

³³Wakwa iphe, Chipfu epfu baa: Wakwa ụdu ogbandzu ophu mu l'onu-ulo Ízurelu a-gba: mę e -mechaepho teke ono. Ekemu mu bę mu e-woru ye phẹ l'egomunggo. Ọ buru l'ime okpoma phẹ bę mu e-de iya edede. Mu a-buru Chileke phẹ; ephebedua aburu ndibe mu.

³⁴Nemadzu tee ziedu nwibe iya iphe ozobaa; ophu nemadzu eziedu nwune iya iphe ke g'aasuje: Makwaru Chipfu! Kele ephe e-shiepho l'onye enya kachaa alwalwa l'ime phẹ maru mu jasụ l'onye ophu kachaa shii. Noo kele mu a-guru phẹ nvu l'ejo-iphe, ephe megbaberu. Ophu mu anyatabaedu iphe-eji phẹ ozobakpo. Nokwa iphe, Chipfu eepfu bụ ono.

³⁵Wakwa iphe, Chipfu epfu baa: Mbụ onye ono, doberu enyanwu sụ g'o chije l'eswe; bya emee g'onwu; yee kpokpode chije l'enyasi; onye ono, bụ iya akparwubeje okenyimu; akpara-mini iya ede mba; epha iya bụ Chipfu, bụ Okalibe-Kakota-Ike.

³⁶“Oo ephe m'ọ bụ l'a -nonyaru; iphe-a, mu tuburu k'ememe-a phuhu k'ophu mu huma-buhuru iya; ọ buru iya bụ l'oshilokpa Ízurelu achihu; ephe taa buedu oha ẹka phẹ l'iphu mu jasuru asuru.” Nokwa iphe, Chipfu eepfu bụ ono.

³⁷Wakwa iphe, Chipfu epfu baa: “Oo ephe m'ọ bụ l'aa-tù imigwe imigwe l'iphe, aatuje iphe; aabya ebvua alì bvurwua ẹka a toru okpa mgboko l'ophu; teme mu e-gude iphe, oshilokpa Ízurelu megbaberu jika-gbua phẹ.” Nokwa iphe, Chipfu eepfu bụ ono.

³⁸Wakwa iphe, Chipfu epfu baa: “Mbọku abyakwa teke ee-mechaa kpukwaa mkpukpu-a doberu mube Chipfu eshi l'oje Hananelu jasụ lẹ Onu-abata Mgbureku.

³⁹Ogologo iphe, e-gude atụ iphe l'a-gbe l'ephe l'ẹka ono dabyiru ogologo jasụ l'eli úbvú Garebu; l'ooby a-gọ-jia dabyiru jasụ lẹ Gowa.

⁴⁰Nsuda ono l'ophu, bụ ẹka e shi etuphaje odzu; awushi iya ntụ; mekpoo egu ono l'ophu, dabyiru jasụ lẹ nggele Kidironu l'uzo enyanwu-awawa; gbiriri jasụ l'aguga onu-abata Inya; g'ọ ha a-dukotaru Chipfu nsọ. Ophu a byadu ephefubaa mkpukpu ono ephefu; ophu ee-nwukposhibaedu iya enwukposhi.”

Jieremaya 32

Jieremaya azụ alì-egu

¹Wakwa olu-opfu, rwuru Jieremaya nchi; mbụ olu-opfu, shi l'ẹka Chipfu l'apha, kwe Zedekaya apha iri, ọ wataru aburu eze ndu Jiuda. Ono bukwanuru apha ophu kwe Nebukadineza apha iri l'esato.

²Ndu ojogu k'eze ndu Bábilonu bẹ nọ-pheru Jierúsalemu mgburugburu teke ono. Onye mpfuchiru ono, bụ Jieremaya bụro ẹka ọ kwaru bụ l'oma-unuphu ẹka ndu nche anoje l'ibe eze ndu Jiuda;

³Kele Zedekaya, bụ eze ndu Jiuda turu iya mkpọro l'ẹka ono sụ: “? Bụ gụnu meru g'o gude ị nọdu epfu mpfuchiru nkengu g'iipfu iya ono? I pfuru sụ lẹ Chipfu sụru lẹ ya abyaakwaa eworu mkpukpu-a ye l'ẹka eze ndu Bábilonu; o jekwa l'anata iya.

⁴Lẹ Zedekaya, bụ eze ndu Jiuda taa nahukwa ndu Bábilonu agbala; ọ chikwa l'ọ tọ dudu iphe, e-me g'e te ye iya l'ẹka eze ndu Bábilonu; yele iya epfugbaa opfu iphu l'iphu; l'ọ gude ẹnya iya ẹbo ẹbo hụma iya.

⁵L'oo-kpuru Zedekaya laa Bábilonu bụ ẹka ọo-nọdu jasụ ya anụ ya aphụ. L'onokwa iphe, Chipfu epfu. Lẹ mu -tsoo ndu Bábilonu ọgu; ọ tọ dukwa iphe, mu a-lwuta iya.”

⁶Tobudu iya bụ; Jieremaya sụ: “Olu-Opfu Chipfu rwukwaru mu nchi

⁷sụ lẹ Hanamelu nwa Shalumu, bụ nwune nna mu a-byapfuta mu bya asụ mu gẹ mu zuna alị iya, nọ lẹ mkpukpu Anatotu; kele eshinu ọ bụ mu l'iya kachaa abubu bẹ ọ bụ mu bẹ o rwuberu agbata iya.

⁸E mechaa; ọ nwuepho gẹ Chipfu pfuru ono. Nwa nwune nna mu, bụ Hanamelu mechaa bya abyapfuta mu l'oma-unuphu ẹka ndu nche anoje; bya asụ mu gẹ mu zuna alị iya, nọ lẹ mkpukpu Anatotu; l'oke alị ndu Benjaminu. Eshinu ọ bụ mu bẹ o rwuberu agbata iya nworu; gẹ mu zụ l'iya pho g'ọ buri nkemu. Mu maerupho l'ọ kwa Opfu Chipfu.

⁹Ọ buri iya bụ lẹ mu eje azua alị obu lẹ mkpukpu Anatotu l'ẹka nwa nwune nna mu, bụ Hanamelu bya apfua ya okpoga iya, bụ mkpola-ochaa, ẹrwa iya dọ shekelu iri l'esaa.

¹⁰Mu bya edeeru iya ekwo byaa ya epha mu; mee ya ohubama; ndu ekebe yekwa iya pho ẹka; bya eworu mkpola-ochaa ono tuta l'iphe, aatuje iphe.

¹¹Mu bya eworu ekwo ono, e deru, goshiru l'alị buwaa nkemu ono; mbụ mpekala iya ono, e meru ohubama ono, bụ ophu e deru g'oo-nọ-beru mę gẹ mu nweberu iya; bya ewotakwapho mpekala iya ophu e meduru ohubama gude.

¹²Mu bya eje achiru ekwo ono nụ Baruku, bụ nwa Neraya nwa Maseya; l'iphu nwa nwune nna mu, bụ Hanamelu yele iphu ndu ekebe, bụ ndu byiru ẹka l'ekwo ono; yele iphu ndu Jiuda l'ophu, bụ ndu nọgbaa l'oma-unuphu ẹka ndu nche anoje ono.

¹³Mu nọdu l'iphu phẹ l'ẹka ono bya eworu ozi-a zia Baruku sụ iya:

¹⁴‘Wakwa iphe, oopfu; mbụ Chipfu, bụ Okalibe-Kakota-Ike; mbụ Chileke ndu Ízurelu. Ọ sụru-a: Chita ekwo alị-a, e deru-a; mę ophu e meru ohubama; yee ophu e meduru ohubama l'ekwo ono, e deru gude zua alị-a; woru iya je achiru ye l'ite-urwa k'ophu ọo-nọ ọdu;

¹⁵kele-a; wakwa iphe, Chipfu bụ Okalibe-Kakota-Ike, bụ Chileke ndu Ízurelu epfu baa: Ee-mechakwaa wata ázú ọlo; yee alị; yee opfu-vayinu l'alị ẹka-a ọzo.’ “

Jieremaya epfu anụ Chileke

16 Mu wocharu ẹkwo ono, e gude zua alị ono nuchaa Baruku nwa Neraya; mu bya awata epfu anụ Chipfu su:

17 “Gube Nnajiuphu, bu Chileke! O kwa ngu meru igwe; bya emee alị; o buru ike okpu ngu yee ẹka ngu, i lochiru alochi be i gude mee ya. O to dukwa iphe, tsunukaru ngu l'ehu.

18 Gube onye egoshije igwerigwe nemadzu l'i yeru phe obu. O le iiwojeru aphu ejo iphe, ndu bu nna meru woru nwua l'utapfu ndu bu unwu phe m'ephe anohedu. Gube oke Chileke ono, ike du ono; onye epha iya bu Chipfu, bu Okalibe-Kakota-Ike;

19 iphe, i chiru idzu ememe be ha shii; teme iphe, iime ememe paa ẹka. I saru enya humagbua iphemiphe, nemadzu eme. I nodu ebuje onyemonye nggo g'iphe, o meru gbaru; yee iphe, o metaru.

20 I meru iphe-ohumalenya; yee iphe, du biribiri l'alị ndu Ijiputu; i nodu emele iya pho g'iime iya jasụ ntanụ-a. Iimeru iya ndu Izurelu; bya emeru iya ndiphe mgburugburu; o mee; epha ngu pfuru g'o pfukwaduru-a.

21 I dufutaru ndibe ngu, bu ndu Izurelu l'alị ndu Ijiputu; o buru iphe-ohumalenya; yee iphe, du biribiri be i gude mee ya. O buru ike okpu ngu; yee ẹka ngu, i lochiru alochi; waa iphe, du ebu be i gude mee iphemiphe ono.

22 I nuru phe alị-a, bu ophu i riburu angu l'ii-nu nna phe oche phe, bu alị, mini era-eswi yee manụ-enwu jiru pyimu pyimu.

23 Epe bya abata bya anata iya nworu; ophu epe emeduru iphe, i suru g'ephe meje; ophu epe etsoduru ekemu ngu; mbu l'ephe te emeduru iphe, i karu su g'ephe meje; o buru iya meru g'o gude i haa iphemiphe-a, bu ejo iphe-ehuka-a byapfuta phe.

24 “Lewaro g'a kpuru igbulo-ogu kpuphee mkpukpu-a mgburugburu g'e gude nata iya. O buru ogu-echi; yee egu; yee ejo iphe-ememe be mewaru g'e woru mkpukpu-a nu ndu Babilonu, bu ndu etso iya ogu. Iphe, i pfuru be iilena enya l'o mewaru g'i pfuru iya.

25 O le o bu; a makwaru-a le mkpukpu-a be e yewaru l'eka ndu Babilonu; o le gube Nnajiuphu, bu Chipfu pfuru mu su mu-a: ‘Gude mkpola-ochaa zua alị-a; l'inweru ndu ekebe le g'i gude eme k'azuzu iya obu!’ “

26 No iya; olu-Opfu Chipfu bya erwua Jieremaya nchi su:

27 “O kwa mu bu Chipfu bya aburu Chileke ndiphe l'ophu. ? O duru iphe, atsunukaje mu l'ehu ememe?

28 Oo ya bu le-a; wakwa iphe, Chipfu epfu baa: Mu abyaakwa eworu mkpukpu-a ye l'eka ndu Babilonu; yee Nebukadineza, bu eze ndu Babilonu, bu onye a-nata iya nu.

29 Ndu Babilonu-a, l'etso mkpukpu-a ogu-a l'e-mechaa bata bya atua ya oku l'ootsua ya tsufu; mbu tsukota oku l'ulo; me l'ulo, bu ẹka ndu nemadzu no kpatsu mu iwe; ẹka

ẹphe ejeje anọdu ẹ mkpotsu akpọ ùnwù-isensu ọku anụ Balụ; ẹme ẹphe agbaru agwa mee gude agwa iya.

30Ndu Ízurelu ẹphe ẹ ndu Jiuda ta adudu iphe ọzo, ẹphe mebaaru gbahaa ejo-ememe be ẹphe eme l'ataphu mu; eshinu ẹphe bu nwata be ẹphe anọdujeepho akpatsu mu iwe l'iphe, ẹphe eme l'eka. Nokwa iphe, Chipfu eepfu.

31“E -shi mbọku, e doberu mkpukpu ono jasụ nta-a be mkpukpu-a shiepho kpatsuta mu iwe; yee oke ẹhu-eghu k'ophu bu ẹ mu e-wofu iya l'ataphu mu.

32Ndu Ízurelu ẹphe ẹ ndu Jiuda kpatsuwaru mu iwe; ọ buru iphe, kparu iya nu bu ejo-ememe ono, ẹphe meshiru ono g'ọ ha; ẹphebedua; me ndu eze phe; mekpoo ndu-ishi phe; me ndu-uke phe; me ndu mpfuchiru phe; ndu Jiuda me ndu Jierusalemu.

33Ẹphe gharu mu okpurukpu haa agharu mu iphu. A makwaru-a ẹ mu ziru phe iphe nzito; ọle ẹphe te eyeduru onu ophu ahuhù, mu ahù phe erwudu phe l'ehu.

34Ẹphe woru ejo ahuma phe ono, bu nshi woru dobe l'ulo, e kuru epha mu; shi nno turwua ya.

35Ẹphe kpua eka aagwaje iphe agwagwa doberu Balu ẹ nsuda Hinomu; g'ọ buru eka ẹphe a-kpoje unwegirima phe ọku gude gwaa Moleku; l'ebe abu ẹ mu tujeru ekemu; mbu l'ọ to batajekpodaru mu nu l'obu k'asu g'ẹphe mee ebyi, du egube ono; shi nno mee ge Jiuda mee iphe-eji.”

36“Iphe, unu epfu l'opfu ẹhu mkpukpu-a bu l'ọ kwa ogu-echi; yee okpa-nri; yee ejo iphe-ememe be e gudewaa eworu mkpukpu-a eye l'eka eze ndu Babilonu; obenu ẹ-a; wakwa iphe, Chipfu, bu Chileke ndu Ízurelu epfu baa:

37Ọ to dukwa iphe, e-me ge mu ta chilatachaa phe eshi l'iphe, bukpo eka mu shi chiru phe jeye teke ẹhu egu mu egu; enya nodu ata mu kpitikpiti. Mu e-duphutchaa phe azu duru bya edobe l'eka-a g'ẹphe buru g'ọ to du iphe, e-me phe nu.

38Ẹphe aburu ndibe mu; mu aburu Chileke phe.

39Mu e-me g'okpoma phe buru nanu; umere phe aburu nanu; k'ophu ẹphe a-nodu atsu mu ebvu g'ọ duru phe ẹ ree; duru unwu phe, e-mechaa etso phe l'azu.

40Mu l'ẹphe a-gba oghandzu ojejeje; ophu mu abyadu ahaba emeru phe iphe, du ree; mu akpalia phe g'ẹphe tsuje mu ebvu k'ophu ẹphe ta abyadu ahabaa mu ahaha.

41Ẹhu a-nodu atso mu; mu emeeru phe ree. Ophu ọ dudu iphe, e-me ge mu ta adza phe adzadza l'ali eka-a; mbu mu e-gudekpoo obu mu l'ophu mee ya.”

42“Wakwa iphe, Chipfu epfu baa: Ọ kwa ge mu wotaru ndu-a eze iphe-ehuka-a bu ge mu a-nukota phe iphe, du ree, mu kweru phe ukwe iya.

43Ee-mechaa zuaha ali ozobaa l'ali-a, bu eka unu asuje: ‘Ọ buakwaa ochobu; ali, nemadzu ebudu; ophu anu ebudu iya; kele e wowaru iya yee l'eka ndu Babilonu.’

44Ee-mechaa gudeaha mkpola-ochaa zuaha ali ozo; deaha ekwo ali; meahaa ya ohubama; ndu ekebe eyekwa iya pho eka; l'oke ali ndu Benjaminu-a; yele mkpukpu

lẹ mkpukpu, nọ-pheru Jierúsalemu mgburugburu; mękpoo l'iphe, bụ mkpukpu, nọ l'ali ndu Jiuda; mę l'ophu nọgbaa l'ali úbvú úbvú; mę ophu nọgbaa l'ali okpa úbvú, nọ l'uzo ęnyanwu-ariba; mę ophu nọ l'echięgu ndohali. O buru iphe, a-kpa iya nụ bụ lẹ mu e-dophu phę azụ l'onodu phę; nokwa iphe, Chipfu epfu.”

Jieremaya 33

Ee-mechaa dophu Jierúsalemu azụ l'onodu iya

¹Olu-Opfu Chipfu byakwa erwua Jieremaya nchị kę mgbo ębo teke ono, o nọkwadu l'oma-unuphu ęka ndu nche anoje ono; sụ:

²“Wakwa iphe, Chipfu epfu baa; mbụ onye ono, bụ iya meru mgboko; mbụ Chipfu; onye bụ iya meru mgboko dobe g'ọo-dụ; bya emee ya; o nguru anguru; o kwa Chipfu bụ ępha iya.

³Kua mu oku; hụma lẹ mu a-za ngu ęnu; bya akarụ ngu iphe, paru ęka bya adu omilomi, bụ iphe, i mahakpoda;

⁴kele-a; wakwa iphe, Chipfu, bụ Chileke kę ndu Ízurelu epfu baa l'opfu ęhu ọlo, dugbaa lẹ mkpukpu-a; yele opfu ęhu ọlo ibe eze ndu Jiuda, bugbaa ọlo, a kwatsushiru gude gbobuta obvudu ęja, ndu ohogu kuberu; yeę ogu-echi phę;

⁵l'ęka aalwụ ogu onye lẹ ndu Babilonu: O kwa odzu bę ee-mechaa gude chi-jishia ya achi-jishi; mbụ odzu ndu mu e-gude ęhu-ęghu mu; yeę ęnya, ata mu kpitikpiti gbushia. Mu woharu ndu mkpukpu-a iphu mu; o buru iphe, kparụ iya nụ bụ ęjo-iphe, ęphe emegbabe.

⁶“Ole g'ọ duhabe; mu e-wotaru phę ęhu-odu-ike; mbụ mee g'ęphe wekorohu. Mu e-me g'ęphe wekorohu; mee g'ęhu dụ phę guu dụ k'etsutsu iya; ophu o duedu iphe, byaru eme phę nụ.

⁷Mu e-dophu ndu Jiuda; mę ndu Ízurelu azụ l'onodu phę; mu akpua phę; ęphe adu g'ęphe shi duhawa.

⁸Mu abya asashia phę ęjo-iphe, ęphe meru mu g'ọ ha; bya aguaru phę nvụ l'ęjo-iphe ono, ęphe meru mu ono, bụ l'ęphe kwefuru mu ike ono.

⁹Oo ya bụ ępha mkpukpu-a emehaa g'ęhu tsoo uto. Ohamoha, nọkota lẹ mgboko l'ophu, bụ ndu a-numa iphemiphe, bụ iphe, dụ ree, mu a-nodu emeru phę ajaahaa mu ajaja; kwabęahaa mu úbvú. ęphe awata atsụ ebvu; wata anma pyaapyaapya; kele mu e-meru ndu mkpukpu-a iphe, dụ ree; mee g'ęhu dụ phę guu.”

¹⁰Wakwa iphe, Chipfu epfu baa; “Ali ęka-a, unu sụru l'ọ bụ ochobu, nemadzu ebudu ebudu; ophu anụ ebudu iya-a; mbụ ime mkpukpu lẹ mkpukpu Jiuda; yeę gbororo, dabyigbaaru lẹ Jierúsalemu, bụ ęka a gbadochawaru agbado; ophu nemadzu ebudu iya ebudu; ophu anụ adudu iya-a; bę ee-mechaa naha olu ozobaa;

¹¹olu ęhu-uto; mę olu ndu ete ęswa; olu unwumboko, ala ji; mę k'unwoke, alu nwanyị ophúú; yeę olu ndu gude ngweja ekele abya l'eze-ulo Chipfu; ęka ęphe agụ ebvu asuje: “Kele Chipfu, bụ Okalibe-Kakota-Ike ekele; kele Chipfu dụ ree; n-

yemobu iya anoje jasụ l'ojejoje. Ọ bụrụ iphe, a-kpa iya nụ bụ ị mu e-dophu alị-a azu l'ọnodu iya. Noo iphe, Chipfu epfu.”

12Wakwa iphe, Chipfu, bụ Ọkalibe-Kakọta-Ike eepfu: “L'alị ẹka-a, bụ ochobu; ọphu nemadzu ebudu iya; ọphu anụ ebudu iya-a; l'iphe, bukpo mkpukpu ị mkpukpu, nọ iya nụ; bẹ ẹka eeche eswi e-mechaa lwa azu bya adukota gẹ ndu eche aturu dọbeje anụ, ephe eche.

13L'iphe, bukpo mkpukpu ị mkpukpu ono, nọgbaa l'alị úbvú úbvú; mę ndu ọphu nọ l'alị ọkpa úbvú, nọ l'uzo ẹnyanwu-arịba; yee ndu ọphu nọ l'echiegu ndohali; mę ị k'alị ndu Benjiaminu; mę l'unwu mkpukpu ị mkpukpu, nọ-pheru Jierúsalemu mgburugburu; yefua l'ime mkpukpu, nọgbaa ị Jiuda; bẹ anụ, eeche echeche e-mechaje awughata l'ataphu onye a-nọdu agụ iya ọgu. Nokwa iphe, Chipfu eepfu.”

14Wakwa iphe, Chipfu epfu baa: “Mbọku abyakwa teke mu e-meru ndu ọnu-ulo Ízurelu yee ọnu-ulo Jiuda iphe, dụ ree, mu kweru ukwe ị mu e-meru pẹ.

15Ọ -rwua mbọku ono bẹ mu e-me g'ẹkali-iphe, pfulerekoto kpofuta l'oshilokpa Dévidi. Ọ bụrụ yebedua e-me iphe, pfulu ọto yee iphe, dụ nhamunha l'alị ẹka-a.

16Ọ -rwua mbọku ono bẹ aa-dzọta ndu Jiuda; ndu Jierúsalemu eburu túsaru ẹhu; ọ tọ dudu iphe, eme pẹ nụ. Iphe, aa-wata iya ekuku aburu: ‘Chipfu, bụ apfulbekoto k'anyi’;

17kele-a wakwa iphe, Chipfu epfu baa: Ụko onye a-nọdu l'aba-eze ọnu-ulo Ízurelu ta abyakwa aduru Dévidi;

18Ọphu ndu-uke, bụ ndu Lívayi abyadu akọ ụko onye a-pfulu l'iphu mu mkpurumkpuru egweru mu ngweja-akpo-ọku; waa ngweja-nri; mę ngweja mmanụ ọzo.”

19Tọbudu iya bụ; Opfu Chipfu bya erwua Jieremaya nchị sụ:

20Wakwa iphe, Chipfu epfu baa: “Ọ -bụrụ l'unu a-dụ ike mebyia ọgbandzu, mu l'eswe gbaru; yee ọgbandzu, mu l'enyashi gbaru; k'ọphu bụ l'eswe yee enyashi taa nwuedu l'orwuberu iya;

21a bya emebyikwaphọ ọgbandzu mu ị Dévidi, bụ onye-ozu mu; yee ọgbandzu mu ị ndu Lívayi, bụ ndu-uke, ejeru mu ozu; ọo ya bụ ị Dévidi tee nweedu awa, bụ onye a-buru eze nọdu l'aba-eze iya.

22Mu e-me awa Dévidi, bụ onye-ozu mu; yee awa ndu Lívayi, bụ ndu eje ozu l'iphu mu; g'ephe bụrụ aguta aguta gẹ kpokpode, nọ l'igwe; ọphu aa-tukotadu pẹ l'iphe, aatuje ẹrwa iphe egube-a, a taa tukotajedu ẹja, nọ l'aguga eze-enyimu-a.”

23Tọbudu iya bụ; Opfu Chipfu bya erwua Jieremaya nchị sụ:

24“? Tii ledu iphe, ndu-a anọduje epfu sụ: ‘Ipfu labo-a, Chipfu hotaru-a bẹ ọ paakwaru gwọbe?’ Ephe shi egube ono kpoo ndibe mu ẹbo l'afu; k'ọphu bụ l'ephe ta abuedu ọha ẹka pẹ l'iphu pẹ.

²⁵Wakwa iphe, Chipfu epfu baa: Ọme mu l'eswe yẹ ẹnyasi ta agbaduru ndzu; bya atua ekemu doberu igwe yẹ alì;

²⁶mẹ mu ajika oshilokpa Jiékoṣu; yẹ kẹ Dévidi, bụ onye-ozì mu; ophu mu tege ahotadu onye lanu, bụ nwa iya nwoke g'ọ buru ishi ndu bụ oshilokpa Ébirihamu; yẹ kẹ Áyizaku; yẹ kẹ Jiékoṣu; kẹle-a; mu e-dophu phẹ azu l'onodu phẹ bya aphuaru phẹ obu-imemini.”

Jieremaya 34

Aaloru Zedekaya ẹka lẹ nchi

¹Gẹ Nebukadineza, bụ eze ndu Bábilonu; yẹ ndu ojogu iya l'ophu; waa iphe, bụ ohamoha, nokota iya l'ẹka; tukoru etso Jierúsalemu oṣu; yẹ mkpukpu, nọ-pheru iya mgburugburu bẹ opfu-a shi l'ẹka Chipfu rwua Jieremaya nchi.

²Wakwa iphe, oopfu; mbụ Chipfu, bụ Chileke kẹ ndu Ízurelu. Ọ sọru-a: Jepfu Zedekaya, bụ eze ndu Jiuda je asu iya-a: Wakwa iphe, Chipfu epfu: Mu abyakwa eworu mkpukpu-a ye l'ẹka eze ndu Bábilonu, bụ onye a-tu iya oku l'ootsua ya tsufu.

³Ophu ọ dukwa iphe, e-me g'i nahu iya g'o to gude ngu. Ọ chikwa l'ee-gude ngu kpuru nu iya. L'i gude ẹnasi ngu huma eze ndu Bábilonu; unu l'iya anodu l'iphu l'iphu pfugbaa opfu; l'i lashia alì ndu Bábilonu.

⁴“Ole ọ bụ; numakwa ukwe-iphe, Chipfu ekwe ngu; gube Zedekaya, bụ eze ndu Jiuda. Wakwa iphe, Chipfu epfu l'opfu ẹhu ngu; e tee gbukwa ngu l'ogu-echi;

⁵ii-nwuhukpoo chiriri. Ọo g'a kpoberu oku lia ndiche ngu phẹ, bụ ndu ophu vuru ngu uzo buru eze; nokwapho g'ephe a-kpobe oku l'ulo-ekwa ngu gude raa ekwa ngu su: ‘Owiwo; nnaji mu-e!’ Ọ kwa mbedua l'onwomu ekwe ukwe-iphe-a; bụ iphe, Chipfu epfu.”

⁶Tobudu iya bụ; Jieremaya, bụ onye mpfuchiru tukọ iphemiphe ono pfiaru Zedekaya, bụ eze ndu Jiuda lẹ Jierúsalemu.

⁷Teke ono bẹ ndu ojogu eze ndu Bábilonu etsokwa ndu Jierúsalemu oṣu; yẹ mkpukpu lẹ mkpukpu ozo, nogbaa l'alì ndu Jiuda, bụ mkpukpu ndu ophu phoduru nu, du gẹ Lakishi; yẹ Azeka. Ọ bụ mkpukpu ono ephenebo bụ mkpakọ mkpukpu, a kpupheru igbulọ mgburugburu, phoduru nu l'alì ndu Jiuda teke ono.

Ndu bụ ohu l'e-mechaa nweru onwophe

⁸Owaa bụ opfu, shi l'ẹka Chipfu rwua Jieremaya nchi g'eze, bụ Zedekaya gbachaaru oṣbandzu ephe lẹ ndu Jierúsalemu l'ephe a-ra iya arara lẹ ndu bụ ohu e-nweru onwophe.

⁹Onyemonye l'a-ha ohu iya, bụ onye Hiburu; mẹ ndu kẹ nwoke mẹ kẹ nwanyi; g'ọ to du onye a-gba onye Jiuda ibe iya ohu.

10Oo ya bu; ndu-ishi; mekpoo iphe, bu ndu Ízurelu, bu ndu bahuru l'ogbandzu ono tuko kweta l'ephe a-ha ohu phe nwoke me unwanyi; g'o to duhe onye a-buru ohu ozobaa. Ephe pfubua ya woru phe hakota.

11E mechaa; izimanu lwa phe azu; ephe bya achi-phuta ndu bu ohu ono azu; mbu ndu ono, ephe shi hawa ono; bya agbaphu phe ohu azu.

12Tobudu iya bu; olu-opfu Chipfu bya erwua Jieremaya nchi su:

13Wakwa iphe, Chipfu epfu; mbu Chileke ndu Ízurelu. O suru-a: “Mu le ndiche unu phe gbaru ndzu teke mu dufutaru phe l'ali ndu Ijiputu; mbu l'ali aka ephe no buru ohu. Mu pfua su:

14Iphe, bukpoo apha esaa, a-nwuta anwuta g'onnyemonye l'ime unu l'ehu l'ehu tohajekwa onye Hiburu ibe iya, e reru unu. Mbu l'o -jewaru unu ozi apha ishii; g'unu haje iya g'o la ke mmanu; ophu nna unu oche phe angaduru mu nchi; ophu ephe eyeduru mu onu.

15Izimanu lwa unu azu le mgboru nta-a; unu bya emee iphe, pfuru nhamunha l'enya mu. G'unu ha l'onye l'onye bya araa ya arara su ge ndu ali unu nweru onwophe. Unu nodu l'iphu mu gbaa ndzu l'ulo-a, e kuru laaru epha mu-a.

16O be nta; unu byakwa bya aghakobe bya emerwushiaha epha mu ozo. G'unu ha laphuchaa azu je achi-phuta ohu unu ke nwoke yee ke nwanyi ono azu; mbu ndu unu shi hawa g'ephe jeje aka du phe ree. Nta-a be unu gbaphuwaru phe ohu ozo.

17“Oo ya bu le-a; wakwa iphe, Chipfu epfu baa: ‘Unu te emekwaru iphe, mu suru g'unu mee. Unu ta arakwaru iya arara su ge ndu ali unu nweru onwophe. Oo ya bu le-a; nta-a be mu arawa iya arara l'unu e-nweru onwunu; o kwa Chipfu epfu iya. Enweru onwunu obu bu l'ee-gude ogu-echi gbua unu; ejo iphe-ememe egbua unu; egu egbua unu. Mu e-me unu ge ndu ali-eze, nokota le mgboko l'ophu soo unu oyi.

18Onye ono, mebyiru ogbandzu mu ono; ophu o meduru iphe, e pfuru l'ogbandzu ono, bu ophu ephe no mu l'iphu gbaa; ndu ono be mu e-me g'ephe du ge nweswi ono, a sukaharu ebo bya eshia ya echilabo ghajaa ono.

19Ndu-ishi ndu Jiuda yee ke ndu Jierusalemu; me ndu eleta ibe eze enya; me ndu bu uke; mekpoo ndu ali ono l'ophu, bu ndu ghajaru echilabo nweswi ono

20be mu e-woru ye l'eka ndu ohogu phe, bu ndu acho ndzu phe. Odzu phe l'a-buru nri enu, ephe l'eli; yee anu, bu l'eliphe.

21“Zedekaya, bu eze ndu Jiuda; yee ndu-ishi l'ali-eze iya be mu e-yekota l'eka ndu ohogu phe, bu ndu acho ndzu phe; woru phe ye l'eka ndu ojogu eze ndu Babilonu, bu ndu shi sephuwaa onwophe azu l'eka i no.

22Wakwa iphe, Chipfu epfu baa: Mu a-tu ekemu l'onwomu; o buru mu e-duphuta phe azu le mkpukpu-a. Ephe e-tsoo ya ogu; nata iya; woru oku tua ya l'ootsua tsufu. Mu emee ge mkpukpu, nogbaa l'ali ndu Jiuda buru ochobu; o to duedu onye ebu iya ebubu.’ “

Jieremaya 35

Unwu Rekabu

- ¹Wakwa opfu, shi Chipfu l'eka rwua Jieremaya nchi teke Jiehoyakimu nwa Jiosaya bu eze ndu Jiuda. O suru:
- ²“Jepfu ndu onu-ulo Rekabu je eduru phe bya l'eka ulo eze-ulo Chileke eka lanu. Ephe -bya l'jinu phe mee g'ephe ngua.”
- ³Tobudu iya bu; mu tugbua je ekua Jiazanaya, bu nwa Jieremaya nwa Habazinaya; bya ekua unwune iya g'ephe ha; yee unwu iya g'ephe ha; o buepho ndu onu-ulo Rekabu g'ephe hakota.
- ⁴Mu bya achibata phe l'eze-ulo Chipfu; bya achiru phe bahu l'onu-ulo k'unwu Hananu nwa Igudalaya, bu onye ke Chileke. Onu-ulo k'ono no-kube onu-ulo ke ndu-ishi; bya ano-koru l'eli onu-ulo Maseya nwa Shalumu, bu onye-nche onu-abata.
- ⁵Mu bya agbajishia mee l'ite sūbegbaaru ndu onu-ulo Rekabu ono; bya edoberu phe okoro; bya asu phe: “Unu pata mee ngua!”
- ⁶Ephe yeeru mu onu su mu: “Anyi ta angujekwa mee; kele nna anyi oche, bu Jionadabu nwa Rekabu bukwa iya turu anyi ekemu ono su anyi-a: ‘G'unubedua mekpoo oshilokpa unu ta adukwa teke unu angujekpo mee jasū l'ojejoje!’
- ⁷Ozo bu g'unu ta akpujekwa ulo; ophu unu akujekwa iphe akuku; ophu unu akojekwa opfu-vayinu. G'o to dukwa iphe ono, ophu unu e-nwejeru; oo epho ulo, e meru l'ekwa be unu a-noduje ebuphe. Oo ya bu g'unu a-kaa nka l'alī ono, unu lwaru alwalwa ono.’
- ⁸Anyi nodu emeepho iphemiphe ono, nna anyi oche, bu Jionadabu nwa Rekabu turu anyi l'ekemu ono. Oo ya bu l'anyibedua; mekpoo unyomu anyi mekpoo unwu anyi unwoke me unwanyi teke angu-swekwa mee;
- ⁹ophu anyi eke kpu-swee ulo k'eburu; ophu anyi akodu opfu-vayinu; ophu anyi enwedu egu; ophu anyi akudu iphe, aaku akuku.
- ¹⁰O kwa l'ulo, e meru l'ekwa be anyi ebujeru; teme anyi nodu anoduje emeepho iphemiphe ono, Jionadabu, bu nna anyi oche ziru anyi ono.
- ¹¹O be ge Nebukadineza, bu eze ndu Babilonu byaru bya asopyabe alī eka-a; anyi su: ‘Unu byakwa g'anyi lashia Jierusalemu; g'anyi nahu ndu ojogu ndu Babilonu; yee ke ndu Aramu.’ O kwa iya meru g'o gude o buru le Jierusalemu be anyi no.”
- ¹²Tobudu iya bu; Opfu Chipfu bya erwua Jieremaya nchi su:
- ¹³Wakwa iphe, opfu; mbu Chipfu, bu Okalibe-Kakota-Ike; mbu Chileke ke ndu Izurelu: “Je je akaru ndu Jiuda; yee ndu Jierusalemu su phe-a: ? Unu tee gudedu ndu-a nwuta iphe wata eme iphe, mu suru g'unu meje? O kwa Chipfu opfu.
- ¹⁴Jionadabu nwa Rekabu turu ndibe iya ekemu su g'ephe ta ngujekwa mee. Ephe nodu eme iphe ono, a turu phe l'ekemu ono. Ophu ephe angudu mee jasū ntanu-a; o buru iphe, kparu iya nu bu l'ephe eme g'ephe mee iphe, nna phe oche turu phe l'ekemu.

Obenu lẹ mbẹdua pfuwaru yeru unu; mu -pfuchaa; mu epfubaa; ophu unu ekwedu eme iphe, mu sūru g'unu mee.

¹⁵Ndu ozi mu, bu ndu mpfuchiru g'ephe ha be mu yewaru g'ephe byapfuta unu; mu -yechaa; mu eyebaa; ephe bya bya asu unu-a: 'G'unu ha l'onye l'onye hanaa ejo-iphe, unu eme; dozia umere unu; g'unu te tsohekwaru agwa; unu ba baheru iya eja. Oo ya bu g'unu eburu l'ali ono, mu nuru unu le nna unu oche phe ono.' Ophu unu angaduru nchi; ophu unu eyeduru mu onu.

¹⁶Oshilokpa Jionadabu nwa Rekabu be meakwaru iphe, nna phe oche turu phe l'ekemu; obenu le ndu-a te ekwedu eme ophu mbẹdua sūru g'ephe meje.

¹⁷“Oo ya bu le-a; wakwa iphe, oopfu; mbu Chipfu, bu Okalibe-Kakota-Ike, bu Chileke ke ndu Izurelu: Unu ngabekwa nchi! Iphe, bukpo ejo iphe-ehuka ono, mu sūru le mu e-wotaru unube ndu Jiuda ono be mu e-wotakwaru unu; wotaru iya iphe, bukpo onyemonye, bu le Jierusalemu. Mu pfuru phe opfu; ophu ephe angaduru nchi. Mu kua phe oku; ophu ephe azaduru enu.”

¹⁸Tobudu iya bu; Jieremaya bya asu ndu onu-ulo Rekabu: “Wakwa iphe, o pfuru; mbu Chipfu, bu Okalibe-Kakota-Ike, bu Chileke ndu Izurelu. O sūru-a: Eshinu unu mewaru iphe, nna unu oche, bu Jionadabu turu unu ekemu iya; bya emekota iphemiphe, o sūru g'unu meje; mbu o buerupho g'o goshiru iya unu bu g'unu eme iya;

¹⁹be bu le-a; wakwa iphe, oopfu; mbu Chipfu, bu Okalibe-Kakota-Ike; bya aburu Chileke ke ndu Izurelu. O sūru: O to dukwa iphe, e-me g'awa Jionadabu nwa Rekabu te nwe onye a-nodu ejeru mu ozi.”

Jieremaya 36

Jiehoyakimu echie ekwo Jieremaya l'oku

¹O be l'apha, kwe Jiehoyakimu nwa Jiosaya apha eno, o wataru aburu eze ndu Jiuda; opfu-a shi l'eka Chipfu rwua Jieremaya nchi:

²“Wota ekwo, a phuru aphupu dee iphe, bukpo iphemiphe ono, mu pfuru ngu le k'ehu ndu Izurelu; me ke ndu Jiuda; me k'ohamoha ozo; shikpopho teke mu wataru ngu iya epfuru le teke Jiosaya shi buru eze byasu nta-a; deta iya.

³? A maru; ? ndu onu-ulo Jiuda -numa iya; mbu numa iphe, bukpo ejo iphe-ehuka ono g'o ha, mu doberu le mu e-me phe ono; g'ephe ha l'onye l'onye ahaa eme ejo-iphe, ephe eme; mu aguru phe nvu l'iphe, bukpo iphe-eji, ephe eme.”

⁴Tobudu iya bu; Jieremaya bya ekua Baruku nwa Neraya; o bya anodu. Jieremaya wataru iya epfushiru iphemiphe ono, Chipfu pfuru iya ono; Baruku nodu edeshi iya l'ekwo aphupu ono.

⁵No iya; Jieremaya su Baruku-a: “Mbẹdua be ephe wuchikwaru ewuchi; k'ophu mu taa dudu ike abya l'eze-ulo Chipfu.

⁶Oo ya bu le-a; tugbukwaa je l'eze-ulo Chipfu l'eswe mboku, aaswije egu je aguru ndiphe iphe, i deru l'ekwo aphupu-a; mbu Opfu Chipfu, bu ophu mu pfuru ngu

epfuru; i dee ya edede. Guaru iya ndu Jiuda l'ophu, bu ndu shigbaa le mkpukpu eka ephe shigbaa abata l'ulo ono.

⁷? A maru; ? ephe a-rwo Chipfu; g'ephe ha l'onye l'onye eshi l'eme ejo-ememe ono, ephe eme ono lwaphuta azu; kele oke ehueghu Chipfu, o suru l'otukoru l'ishi ndu-a paru eka.”

⁸Baruku nwa Neraya toko iphemiphe ono, Jieremaya onye mpfuchiru suru g'o mee ono mekota. O pfuru l'eze-ulo Chipfu toko Opfu Chipfu ono, e deru l'ekwo ono woru guaru phe.

⁹O be l'onwa ke tete l'apha, kwe Jiehoiakimu nwa Jiosaya apha ise, o bahuru l'aba-eze ndu Jiuda; e woru eswe aa-swiru Chipfu egu raa arara l'iphe, bukpo oha ndu bu le Jierusalemu l'ophu; mekpoo ndu ophu shi le mkpukpu, nogbaa l'alì ndu Jiuda bya.

¹⁰Baruku bya eje apfuru l'eze-ulo Chipfu l'oma-ulo Gemaraya nwa Shafanu, bu onye edeje ekwo. Onu-ulo k'ono no l'oma ulo-eli iya, no le mgboru onu-abata Ophuu. O pfuru l'eka ono woru opfu Jieremaya, e deru l'ekwo-a woru gua; onyemonye numadzuru.

¹¹O be ge Mayikaya, bu nwa Gemaraya nwa Shafanu numaru Opfu Chipfu ono g'o ha, bu ophu e deru l'ekwo ono;

¹²O bya agbazeta jeshia ibe eze; bya eje abahu l'oma-ulo k'onye edeje ekwo. Iphe, bukpo ndu-ishi g'ephe ha doru l'eka ono. Ndu no iya nu bu onye edeje ekwo l'onwiya, bu Elishama; yee Delaya nwa Shemaya; yee Elunatanu nwa Akubo; yee Gemaraya nwa Shafanu; yee Zedekaya nwa Hananaya; yee iphe, bukpo ndu-ishi ndu ophuu g'ephe ha.

¹³Mayikaya bya eworu iphemiphe, o numaru, Baruku guru ndiphe l'ekwo ono kooru phe.

¹⁴Iphe, bu ndu-ishi ono g'ephe ha bya ezia Jiehudi, bu nwa Netanaya nwa Shelemaya, bu nwa Kushi g'o je asu Baruku g'o gudeeshikwa ekwo aphuphu ono, o guru ndu Izurelu ono gude bya. No iya; Baruku nwa Neraya bya aparu ekwo aphuphu ono l'eka gude bya ejepfu phe.

¹⁵Ephe su iya: “Nodueshikwa anoo guaru iya anyi.” No iya; Baruku bya eworu iya guaru phe.

¹⁶O be teke ephe numaru opfu ono g'o ha; ephe bya elegbabechaa nwibe phe enya l'eka ndu agu phe. Ephe su Baruku: “Opfu-a g'o ha be anyi e-jekwa akooru eze.”

¹⁷Ephe bya ajia Baruku su iya: “Kaeshikwaru anyi. ? Denu g'i meru dekota iphemiphe-a g'o ha? ? Bu Jieremaya epfuru ngu iya; i nodu ede too?”

¹⁸Baruku su phe; “Ee; oo ya pfukotaru mu iphe-a g'o ha; mu gude mini-ekwo dee ya l'ekwo-a.”

¹⁹Tobudu iya bu; ndu-ishi ono bya asu Baruku-a: “Ge gu le Jieremaya tugbukwaa je edomia onwunu. Unu te emekwa g'a maru eka unu no!”

- 20** Ɛphe bya eworu ẹkwo aphuphu ono bya edobe l'ulo ke Elishama, bu onye edeje ẹkwo. Ɛphe bya ejepfu eze l'oma-unuphu ibe iya je epfuaru iya iphemiphe.
- 21** Eze bya ezia Jiehudi su iya g'o je ewotaeshikwa ẹkwo aphuphu obu. Jiehudi bya tugbua je l'ulo Elishama, bu onye edeje ẹkwo je ewota ẹkwo ono bya aguaru eze; yee ndu-ishi; ndu-ishi g'ephe ha pfugbaaru l'aguga iya.
- 22** Teke ono bu onwa tete. O buru l'obu, aanoduje l'udzumini be o no; a zuberu iya oku l'epfu; o nodu enwu taphutaphu l'eka o no.
- 23** O nodu abujeru; Jiehudi -güepho mpekala ẹkwo ono eto ozoo eno; eze egude mma ndu edeje ẹkwo byikata iya ye l'oku epfu ono. O mee ya nno; jasu ẹkwo aphuphu ono kekota oku.
- 24** Ophu eze; yee ndu ejeru iya ozi, bu ndu tukoru opfu ono g'o ha numa ono egoshiduru le ndzu agu phe; ophu ephe alakaduru uwe phe.
- 25** Elunatanu; yee Delaya; yee Gemaraya rwokpoo eze su iya g'o to kposhi ẹkwo aphuphu ono oku; ophu o yeduru phe onu.
- 26** O buchiaru iphe, o meru; mbu eze bu l'o turu ekemu su ge Jierahumelu, bu nwa iya; yee Seraya nwa Azuriyelu; yee Shelemaya nwa Abudelu; g'ephe je egude Baruku, bu onye edeje ẹkwo; yee Jieremaya, bu onye mpfuchiru. Obenu le Chipfu domiru phe.
- 27** Eze kpochaepho ẹkwo aphuphu ono oku; mbu ẹkwo, e deru opfu, bu Baruku deru iya iphe, Jieremaya pfuru iya g'o dee ya; Opfu Chipfu rwua Jieremaya nchi.
- 28** O su: “Wota ẹkwo aphuphu ozo dee iphemiphe ono, du l'ekwo aphuphu ke mbu pho, bu ophu o kporu oku; mbu Jiehoyakimu, bu eze ndu Jiuda.
- 29** Ozo bu le-a; karu Jiehoyakimu, bu eze ndu Jiuda; su iya le-a: Wakwa iphe, Chipfu epfu baa: I kporu ẹkwo aphuphu ono oku su: “? Bu gunu meru g'o gude i dee ya su l'eze ndu Babilonu byafutaje bya emebyishia ali-a mee ge nemadzu yee anu ta aduhe iya?”
- 30** Oo ya bu le-a; wakwa iphe, Chipfu epfu baa l'opfu ehü Jiehoyakimu, bu eze ndu Jiuda: O too nwekwaru onye e-shi iya l'ehu, a-nodu l'aba-eze Dévidi. Odzu iya be aatogbo l'etezi; l'o dabyiru; anwu echia ya l'eswe; iji adaa kpua ya l'enyashi.
- 31** Mu a-nu iya aphu; yee unwegirima iya; yee ndu ejeru iya ozi; kele ephe eme ejo iphe. Iphe, bukpo ejo iphe-ehuka ono, mu suru le mu e-me phe ono be mu emekotacha phe; ephe le ndu bu le Jierusalemu me ndu Jiuda. Noo kele ephe ta ngaduru mu nchi.”
- 32** Tobudu iya bu; Jieremaya bya ewota ẹkwo aphuphu ozo; bya eworu iya nu Baruku nwa Neraya, bu onye edeje ẹkwo. Jieremaya byakwa bya epfuaru iya iphe, oo-de iya; Baruku byakwa bya edekota iya iphe, bukpo iphe, shi du l'ekwo aphuphu ophu, o kporu oku; mbu Jiehoyakimu, bu eze ndu Jiuda. E yebakwaa ya pho ikpoto iphe ozo, dugbakwapho g'ono.

Jieremaya 37

Jieremaya eje mkpọro

- ¹Zedekaya nwa Jiosáya bẹ Nebukadineza, bụ eze ndu Bábilonu meru eze ndu Jiuda. O buru iya bụ eze nọchia ọnya Jiehoyakinu bụ nwa Jiehoyakimu.
- ²Yẹbedua l'onwiya; mę ndu ejeru iya ozi; mę ndu alı ono l'opfu ta adudu onye ngaru nchi l'opfu ono, Chipfu gbę l'onu Jieremaya, bụ onye mpfuchiru pfua ono.
- ³Eze, bụ Zedekaya bya ezia Jiehukalu nwa Shelemaya; yę onye uke, bụ Zefanaya nwa Maseya g'ephe jepfu Jieremaya, bụ onye mpfuchiru je ezia ya ozia sụ iya-a: “Pfuafu ọhu anyi nụ Chipfu, bụ Chileke anyi jikonu.”
- ⁴Teke ono bę Jieremaya nweru onwiya; kele e teke atudu iya mkpọro teke ono.
- ⁵Mbụ lę ndu ojogu Fero-a wufutaru l'alı ndu Ijiputu. O be gę ndu Bábilonu, bụ ndu nọ-pheru Jierúsalemu mgburugburu nọmaru abyabya ndu Ijiputu ono; ephe wufu paru Jierúsalemu haa.
- ⁶Tọbudu iya bụ; Opfu Chipfu bya erwua Jieremaya, bụ onye mpfuchiru nchi sụ:
- ⁷“Wakwa iphe, Chipfu, bụ Chileke ndu Ízurelu epfu baa: Unu karu eze ndu Jiuda, ziru unu g'unu bya akpata mu ishi: ‘Ndu ojogu Fero-a, zefutaru bya unu eyeru ọka-a l'e-mechakwaa laa alı phe, bụ alı ndu Ijiputu.
- ⁸Noo teke ndu Bábilonu a-lwa azu bya etsoo mkpukpu-a ọgu; lwuta iya l'ogu tua ya ọku; ọku etsufu iya.’
- ⁹“Wakwa iphe, Chipfu epfu baa: Unu ba nọdukwa eme onwunu eswe l'eka unu arı sụ lę ndu Bábilonu ta adukwa iphe, e-me g'ephe be mecha haa unu. Ephe taa hakwa unu!
- ¹⁰Ome ọ bukponu ke g'unu mekpekota ndu ojogu ndu Bábilonu l'opfu, bụ ndu etso unu ọgu; ọ buerupho ndu e mekaru iphe phoduru lę mkpu, ephe turu; ephe afutale-a bya akpoo mkpukpu-a ọku.”
- ¹¹Ndu Bábilonu wufuchaepho lę Jierúsalemu, bụ iphe, kparu iya nụ bụ ndu ojogu Fero, eze gbiigbii abyapfuta phe;
- ¹²Jieremaya gbeshi lę Jierúsalemu jeshia alı ndu Benjiaminu g'o je etsoru ndu ọka ono keta okiphe iya.
- ¹³O -rwuepho onu-abata Benjiaminu; onye-ishi ndu nche, epa iya bụ Irayijia, bụ nwa Shelemaya nwa Hananaya gude iya sụ l'ogbalawa agbapfu ndu Bábilonu.
- ¹⁴Jieremaya sụ iya: “O kwa ọka. Mu ta agbalakwa agbapfu ndu Bábilonu.” Ophu Irayijia angaduru iya ro nchi. O bu-chia iphe, o meru bụ l'o guderu Jieremaya kputa iya kpujeru ndu-ishi.
- ¹⁵Ọhu ghuahaa ndu-ishi ono egbu l'opfu ọhu Jieremaya. Ephe zia; e chia ya iphe woru iya tua mkpọro l'ulo Jionatanu, onye edeje ekwo, bụ ọka ephe meru; ọ buru ọlo mkpọro.

- ¹⁶E woru Jieremaya kpuru ye lẹ mkpọro l'obu-ali; ọ nọkpoo l'ẹka ono nọo ọdu.
- ¹⁷Tọbudu iya bụ; eze, bụ Zedekaya bya ezia; e je eduta iya dujeru iya. Ọ jia ya lẹ mpya sụ iya: “? O nweru opfu, shi l'ẹka Chipfu tọ?” Jieremaya sụ iya: “Ee; aa-kpuru ngu ye l'ẹka eze ndu Bábilonu.”
- ¹⁸No iya; Jieremaya bya asụkwapho eze, bụ Zedekaya: “? Bụ gunu bụ iphe-ẹji, mu meru ngu; ọzoo ndu ejeru ngu ozi; ọzoo ndu-a l'ophu, meru g'o gude ị tụa mu mkpọro?”
- ¹⁹? Denu ndu mpfuchiru ngu ono, bụ ndu shi epfujeru unu mpfuchiru sụ: ‘Eze ndu Bábilonu tee tsokwa ngu ọgu; ọphu ẹphe etsokwa ali-a ọgu?’
- ²⁰Obenu lẹ nta; nnajjuphu mu, bụ eze; jiko ngabekpodapho nchi l'arworwo, mu arwo ngu. Mbụ-a; te eduphụekwa mu azụ l'ibe Jionatanu, bụ onye edeje ekwo; ọdumeka be mu a-nwuhukwa l'ẹka ono.”
- ²¹Tọbudu iya bụ; eze, bụ Zedekaya bya eworu ekemu tụa sụ g'e woru Jieremaya dobe l'oma-unuphu ẹka ndu nche anoje; g'a nuje iya ishi buredi mbọku-mbọku; mbukwa udu buredi, ndu egheje buredi gheru; g'a nuje iya ya jasụ buredi, nọ lẹ mkpukpu abvube. Ọ bụru iya bụ l'e woru Jieremaya dobe l'oma-unuphu ẹka ndu nche anoje; ọ nọdu l'ẹka ono.

Jieremaya 38

Echie Jieremaya l'oke iduma

- ¹Shfataya nwa Mátanu; yee Gedalaya nwa Pasho; yee Jiehukalu nwa Shelemaya; yee Pasho nwa Malukayijia numa iphe, Jieremaya anọduje epfuru ndu Jiuda l'ophu; kele ọosuje:
- ²“Wakwa iphe, Chipfu epfu baa: ‘Onye nọ lẹ mkpukpu-a a-lakwa l'ogu-echi; yee ọkpa-nri; yee ẹjo iphe-ememe. Obenu l'onye lapfuru ndu Bábilonu a-nọdu ndzụ. Oogude ndzụ iya gbalaa je anọdu ndzụ.’”
- ³Temanu-a; wakwa iphe, Chipfu epfu: ‘Mkpukpu-a ta adukwa iphe, e-me g'e te woru iya ye l'ẹka ndu ojogu eze ndu Bábilonu, bụ onye e-mechaa lwuta iya l'ogu.’ “
- ⁴Tọbudu iya bụ; ndu-ishi bya asụ eze-a: “G'e gbukwaa nwoke-a. Oomekwa g'ike bvụ ndu ojogu, bụ nwa ndu ọphu phoduru nụ lẹ mkpukpu-a; yee ndu-a l'ophu; ọ bụru iphe ono, oopfu anụ phe ono akpa iya. Nwoke-a ta abukwa iphe, a-duru ndu-a ree be ọocho; ọ kwa iphe, e-mebyi phe emebyi.”
- ⁵Eze, bụ Zedekaya yeeru phe onu sụ phe: “Ọ nonu unu l'ẹka; mbedua, bụ eze ta adukwa iphe, mu akposhi unu ememe.”
- ⁶Tọbudu iya bụ; ẹphe kputa Jieremaya jeye l'oke iduma Malukayijia, bụ nwa eze. Oke iduma mini ono nọ l'oma-unuphu ẹka ndu nche anoje. Ọ bụru eri be ẹphe turu iya seru ye l'iduma obu. Teke ono be mini ta adudu l'iduma ono. Iphe, du iya nụ bụru epuchi. Jieremaya bụru bvubvurubvu l'epuchi ono.

⁷No iya; Ebedu-Meḷeku, bu onye Kushi; bya aburu onye eleta ibe eze ɛnya numa l'e yeru Jieremaya l'oke-iduma mini. O be g'eze no anoo l'onu-abata Jierusalemu, bu Onu-abata Benjaminu;

⁸Ebedu-Meḷeku shi l'ibe eze tugbua jepfu eze je asu iya:

⁹“Nnajiuphu mu, bu eze; iphemiphe-a, ndu-a meru Jieremaya onye mpfuchiru-a buakwaa ejo-iphe be ephe meru. G'ephe woru iya ye l'ime oke iduma g'o nodu l'eka ono g'egu gbua ya; l'ebe abu le nri dukwadu le mkpukpu.”

¹⁰Tobudu iya bu; eze bya aturu Ebedu-Meḷeku bu onye Kushi ekemu su iya: “Duta ukporo umadzu l'umadzu iri l'eka-a g'unu l'ephe swiru je esefuta Jieremaya, onye mpfuchiru l'oke iduma ono; a -nonya o nwuhu.”

¹¹No iya; Ebedu-Meḷeku bya achita ndu ono; ephe l'iya swiru jeshia. O bya abahu l'ibe eze l'ulo, eedobeje iphe bya achita nkiriba ukpo yee nkirika ekwa l'eka ono bya egude eri seru iya nu Jieremaya l'ime oke iduma ono.

¹²Ebedu-Meḷeku, onye Kushi bya asu Jieremaya-a: “Woru nkiriba ukpo yee nkirika ekwa-a dee l'eka g'o buru ewu l'eka ittu onwongu eri ono!” Jieremaya bya eworu iya mee nno.

¹³Ephe gude eri ono selita iya eli sefuta l'ime oke iduma ono. Jieremaya byakwa bya anodu l'oma-unuphu eka ndu nche anoje.

Zedekaya akpata Jieremaya ishi ozo

¹⁴Tobudu iya bu; eze, bu Zedekaya bya ezia; e je ekua Jieremaya, bu onye mpfuchiru. O bya; e duta iya bahu l'onu-abata k'eto, bu ophu e shi abahu l'eze-ulo Chipfu. Zedekaya bya asu iya: “Mu abyakwa ngu aji aji. Ta adukwa iphe, ii-domiru mu edomi!”

¹⁵Jieremaya su Zedekaya-a: “Mu -yeeru ngu onu; ? tii gbudu mu nu? Teke mu chikoshiru ngu idzu; o to budu l'ii-yeru mu onu.”

¹⁶Zedekaya ribuaru Jieremaya angu le mpya su iya: “Eshinu Chipfu no ndzu g'o no iya-a, bu onye meru anyi nodu atu unme; mu tee gbukwa ngu; ophu mu akpukwaru ngu eye l'eka ndu achu ndzu ngu.”

¹⁷Tobudu iya bu; Jieremaya bya asu Zedekaya-a: “Wakwa iphe, oopfu baa; mbu Chipfu, bu Chileke; bya aburu Okalibe-Kakota-Ike; buru Chileke ndu Izurelu; su-a: I -woru onwongu ye l'eka ndu-ishi l'ali eze ndu Babilonu; be ndzu ngu a-du; ophu aakpodu mkpukpu-a oku; gubedua gu le ndibe ngu g'unu ha anodu ndzu.

¹⁸Obenu teke o bu l'i tii woduru onwongu eye l'eka ndu-ishi l'ali eze ndu Babilonu be ee-wokwaru mkpukpu-a ye l'eka ndu Babilonu; ephe akpo ya oku; ophu gubedua l'onwongu eshikwa phe l'eka anahu.”

¹⁹Eze, bu Zedekaya su Jieremaya-a “Ndu mu atsu ebvu bukwa ndu Jiuda, bu ndu ophu wowaru onwophe ye l'eka ndu Babilonu; le ndu Babilonu a-kpukwaru mu nu phe; ephe emelaha mu omeliwe.”

²⁰Jieremaya sù iya: “Èphe taa kpukwaru ngu eye phẹ l'ẹka. Ọo ẹpho g'i mee olu Chipfu, bụ iya bụ iphe-a, mu epfuru ngu-a. Ọo ya bụ l'ọ duru ngu lẹ ree; ẹme ndzu adu ngu.

²¹Obenu teke ị jikaru l'i tii woduru onwongu eye phẹ l'ẹka; wakwa iphe, Chipfu kpuharu goshi mu baa:

²²Iphe, bukpoowunwanyi ono, a haru l'ibe eze ndu Jiuda ono be aa-chitahakwaa chijeru ndu-ishi l'alị eze ndu Babilonu. Unwanyi ono epfuaharu ngu su ngu: “Èphe dephukwaru ngu edephu; bya eworu ngu mekpee; mbu ndu ono, bu onya ngu, ị kporu obu yeru ono. Nta-a be okpa mihuwaru ngu l'epuchi. Ndu onya ngu phẹ ono paru ngu haa gbakashihu.’

²³“Unyomu ngu g'ẹphe ha; yee unwegirima ibe ngu be aa-tuko chifuta chitaru ndu Babilonu. Ophu gubedua l'onwongu anahukwa phẹ agbala; o chikwaa iphe, e-me nu bu l'eze ndu Babilonu e-gude ngu; ẹme ozo bu lẹ mkpukpu-a be aa-kpokwa oku.”

²⁴Tobudu iya bu; Zedekaya bya asu Jieremaya: “Ba adukwa onye ii-me g'ọ maru uja mu lẹ ngu-a; odumeka be ee-gbukwa ngu.

²⁵Ndu-ishi -numa lẹ mu pfuru yeru ngu; ẹphe -byapfuta ngu bya asu ngu: ‘Pfiaru anyi iphe, ị pfuru eze; yee ophu eze pfuru ngu. Be domikwaru iya anyi; odumeka be anyi e-gbukwa ngu!’

²⁶Ọo ya bu l'ii-su phẹ-a l'ọ kwa arwowo be ị shi arwo eze g'ọ to duphukwa ngu azu l'ibe Jionatanu g'i je anodu l'ẹka ono nwuhu.”

²⁷E mechaa; ndu-ishi ono g'ẹphe ha tuko byapfuta Jieremaya bya ajia ya. O woerupho iphe ono, eze suru g'ọ pfuaru phẹ ono woru pfuaru phẹ. Ophu o duedu iphe ozo, ẹphe epfujeba; kele o to dudu onye numaru uja, ẹphe boru.

²⁸Jieremaya nodu l'oma-unuphu ẹka ndu nche anoje l'ẹka ono gbiriri jasụ mboku, a lwutaru mkpukpu Jierusalemu l'ogu.

Jieremaya 39

Adada Jierusalemu

(2Ndu 25:1-7; 2Iphe 36:13-21; Jier 52:3-11)

¹Tobudu iya bu; o be l'apha, kwe Zedekaya apha tete, o wataru aburu eze; l'abalị k'iri l'onwa iri; eze ndu Babilonu, bu Nebukadneza chita ikpoto ndu ojogu iya; ẹphe byatashia Jierusalemu; bya ekepheta mkpukpu ono mgburugburu.

²No iya; o rwukwaa l'abalị ke tete l'onwa k'eno l'apha, kwe Zedekaya apha iri lẹ nanu; e tsukposhia igbulọ, e gude kpu-pee mkpukpu ono mgburugburu.

³O buru iya bu lẹ ndu-ishi l'alị eze ndu Babilonu awubata bya adoru l'onu-abata Echilabo lẹ mkpukpu ono. Ndu obu bu: Nẹgalu-Sareza; yee Samuga-Nebo; waa Sarisekimu onye bu iya bu ishi ndu eleta ibe eze enya; yee Nẹgalu-Sareza, bu iya bu ishi ndu ejeru eze ozi; waa iphe, bukpoowunwanyi ndu bu ishi l'alị eze ndu Babilonu.

⁴O be gę Zedekaya, bụ eze ndu Jiuda yęe ndu ojogu iya l'ophu hụmaru phez; ephe ye okpa l'oso gbalaaha. Ephe gude enyashi wufu le mkpukpu ono. Eka ephe shiru gbalaa bu l'onu oguzo ono, du le mgbaka igbulo labo ono, du le mgboru mgbabu eze. O buru eka ephe shiru bu uzo nsuda Araba.

⁵Ole ndu ojogu ndu Babilonu chipyaberu phez je agbapfu Zedekaya le baswaa ali, du le Jieriko. Ephe gude iya kpuru iya kputaru Nebukadineza, bu eze ndu Babilonu le mkpukpu Ribula l'ali Hamatu, bu eka o no nmaa ya ikpe.

⁶O buru le Ribula l'eka ono be eze ndu Babilonu no gbushia unwu Zedekaya. Zedekaya nodu ele iya enya; o nodu egbushi phez. O byakwapho bya atuko ndu a maru amaru l'ali ndu Jiuda gbushikota.

⁷O bya aswoshia Zedekaya akpuru enya; bya egude egbirigba, e meru l'onwirubvu tu ya mkporo kputa lashia Babilonu.

⁸Ndu Babilonu ono woru oku tua l'ibe eze ono; yee ulo ndiphe; bya enwukposhia igbulo, e gude kpu-pee Jierusalemu mgburugburu.

⁹Nebuzaradanu, bu onye-ishi ndu ojogu, anoduje eche eze ndu Babilonu nche; toko nwanu phoduru nu le Jierusalemu ono; yee ndu wowaru onwophe ye l'eka ndu Babilonu; waa ndu ophuu; kputa le ndzu lashia ali ndu Babilonu.

¹⁰Ole Nebuzaradanu, bu onye-ishi ndu ojogu, anoduje eche eze ndu Babilonu nche ono bu ndu o haru l'ali ndu Jiuda bu ndu ukpa olemole, bu ndu adudu iphe, ephe nweru. O nodu teke ono nuchaa phez opfu-vayinu; yee ali-egu.

¹¹No iya; Nebukadineza, bu eze ndu Babilonu tua ekemu-a tu-doru Jieremaya; o buru onye o turu iya nu bu Nebuzaradanu, bu onye-ishi ndu ojogu, anoduje eze ndu Babilonu nche su:

¹²“Unu dutakwa iya leta iya enya. Unu ta adukwa iphe, unu e-me iya; o chikwaa iphe, o sukpoerupho g'unu meeru iya; unu emeeru iya ya.”

¹³Tobudu iya bu; Nebuzaradanu, bu onye-ishi ndu ojogu, anoduje eche eze ndu Babilonu nche ono; yee Nebushazubanu, bu ishi ndu eleta ibe eze enya; yee Negalu-Sareza, bu ishi ndu ejeru eze ozi; yee ndu ophuu, bu ishi l'ali eze ndu Babilonu;

¹⁴bya ezia; e je eduta Jieremaya dufuta l'oma-unuphu eka ndu nche anoje. Ephe duru iya nu Gedalaya bu nwa Ahikamu nwa Shafanu; su iya g'o duru iya laa ibe iya. O buru iya bu le yee ndibe phez anodu.

¹⁵Teke pho, Jieremaya shi nodu l'oma-unuphu eka ndu nche anoje pho be o numaru Opfu Chipfu, suru iya:

¹⁶“Je akaru Ebedu-Meleku; onye Kushi; su iya: Wakwa iphe, Chipfu epfu baa; mbu Okalibe-Kakota-Ike; bya aburu Chileke ke ndu Izurelu. Su-a; mu abyaakwa emeebe iphe, mu suru le mu e-me mkpukpu-a. Mu e-meru ola-l'iswi nu phez; o to budu upete. O -rwepho teke ono be iphemiphe ono e-mekota l'ogbaa ngu l'iphu.

¹⁷Ole mu a-nafuta ngu m'o -rwua mboku ono. Nokwa iphe, Chipfu eepfu. A taa kpuduru ngu anu ndu iitsu ebvu.

¹⁸O to dukwa iphe, e-me ge mu ta adzota ngu; k'ophu bu l'e tee gbudu ngu l'ogu-echi; o bu-chia l'ii-gude ndzu ngu gbala; kele i kpuru obu yeru mu. Nokwa iphe, Chipfu eepfu bu ono.”

Jieremaya 40

Teke Gedalaya bu ochi-oha ndu Izurelu

(2Ndu 25:22-26)

¹Opfu-a be Jieremaya numaru l'onu Chipfu ge Nebuzaradanu, bu onye-ishi ndu ojogu, anoduje eche eze ndu Babilonu nche tohachaeru iya pho le mkpukpu Rama. Kele o byaru bya ahuma Jieremaya l'eka a turu iya egbirigba; ephe le ndu a kpuru le ndzu, shi Jierusalemu; yee ali ndu Jiuda ala ali ndu Babilonu.

²O be g'onye-ishi ndu ojogu ono humaru Jieremaya; o su iya: “Chipfu, bu Chileke ngu pfukwaru le ya e-me eka-a omeliwe-a.

³Nta-a be Chipfu mewaru iphe, o pfuru. Iphemiphe ono mekotaru; kele unu meru Chipfu iphe-eji; ophu unu emeduru iphe, o suru g'unu mee.

⁴Ole ntanu-a be mu atufuwa ngu l'egbirigba ono, no ngu l'eka ono. Tsoru mu g'anyi la ali ndu Babilonu m'o buru l'o du ngu ree egube ono; o buru mbedua l'a-nodu eleta ngu enya. Teke o bukwanu l'o to dudu ngu ree egube ono l'i haa abyabya. Lekwa! Ali eka-a l'ophu nokwa ngu l'iphu; jejekpopho eka du ngu ree!

⁵Ole o -buru l'o du ngu g'i nodu l'eka-a; g'i laphu azu jepfu Gedalaya, bu nwa Ahikamu nwa Shafanu, bu onye eze ndu Babilonu hofutaru g'o buru ochi-oha, nogbaa l'ali Jiuda l'ophu; je g'unu l'iya buru l'echilabo ndu eka ono; teke odumeka; jekpopho eburu l'eka du ngu ree.” No iya; onye-ishi ndu ojogu, anoduje eche eze ndu Babilonu nche ono bya anu iya nri, eeri eriri; bya anu iya iphe gude meeru iya ree; bya aparu iya haa; o lashia.

⁶O buru iya bu le Jieremaya alapfushia Gedalaya nwa Ahikamu le mkpukpu Mizupa; je yele iya buru l'echilabo ndu ozo, bu ndu a haru l'ali eka ono.

⁷O be ge ndu-ishi ndu ojogu ndu Jiuda g'ephe ha; ephe le ndu nke phe, bu ndu shi nodugbaa l'egbudu numaru l'eze ndu Babilonu hofutawaru Gedalaya nwa Ahikamu g'o buru ochi-oha l'ali ono; l'o wowaru unwoke; me unwanyi; me unwegirima, bu ndu kachaa akpa nri l'ali ono; mbu ndu ophu a ta akpuduru le ndzu laa ali ndu Babilonu; ye iya l'eka;

⁸ephe wufuta wu-pfuta Gedalaya le mkpukpu Mizupa. Ndu byaru nu bu Ishimelu nwa Netanaya; yee Jiohananu; yee Jionatanu, bu unwu Kareya; waa Seraya nwa Tanuhumetu; waa unwu Efayi onye Netofa; yee Jiezanaya, bu nwa onye Maka; ephe le ndu nkephe.

⁹Gedalaya, bu nwa Ahikamu nwa Shafanu bya eribuaru ephe le ndu nkephe ono nte su phe: “Unu ta tsukwa ebvu anodu ndu Babilonu l'eka. Unu nodukpoeppo l'ali ono jeeru eze ndu Babilonu ozi g'o duru unu le ree.

¹⁰Mbedua l'onwomu a-nodu le mkpukpu Mizupa no-chije enya unu l'iphu ndu Babilonu, bu ndu-a, byapfutaru anyi-a; obenu l'unu a-nodu akuta mee; awo akpuru oshi onanwu; yee manu woru kwachia l'eka unu edobeje iya; unu eburu le mkpukpu-a, unu natagbaaru-a.”

¹¹O be teke iphe, bukpuo ndu Jiuda, no l'ali ndu Mowabu; yee ndu ophu no l'ali ndu Amonu; yele ndu k'ali ndu Edomu; mekpoo ndu ophu nogbaa l'ohamoha ozo; numaru l'eze ndu Babilonu nweru nwa ndu o haru haa l'ali ndu Jiuda; bya eworu Gedalaya, bu nwa Ahikamu nwa Shafanu mee onye-ishi phe;

¹²ephe tuko lwakota ali ndu Jiuda; lwapfuta Gedalaya le mkpukpu Mizupa; shigbaa l'eka ephe shi gbachaa nanu nanu. Ephe kwatakpo kua mee kua k'etsutsu iya; bya awo akpuru oshi onanwu; woshia ya ike.

¹³O buru iya bu le Jiohananu nwa Kareya; yee ndu-ishi ndu ojogu ono l'ophu, nokwadu l'egbudu ono bya abyapfuta Gedalaya le Mizupa

¹⁴bya asu iya: “? I maru-a le Balisu, bu eze ndu Amonu zikwaru Ishimelu nwa Netanaya g'o bya egbua ngu?” Ophu Gedalaya nwa Ahikamu ekwetaduru iphe, ephe epfu.

¹⁵Tobudu iya bu; Jiohananu nwa Kareya bya ejepfu Gedalaya le mpya le Mizupa je asu iya: “Ge mu jenu egbua Ishimelu nwa Netanaya g'o to du onye a-maru nu. ? Denu g'o gude e je l'aha iya g'o gbua ngu mee ndu Jiuda l'ophu, bu ndu noru ngu mgburugburu g'ephe gbackashi; mee ge nwa ndu Jiuda ndu ophu phoduru nu laa l'iswi?”

¹⁶Obenu le Gedalaya nwa Ahikamu suru Jiohananu nwa Kareya-a: “E jekwa eme iphe, du egube ono. Iphe ono, iipfu l'opfu ehu Ishimelu ono ta abukwa okpobe opfu.”

Jieremaya 41

¹No iya; o be l'onwa k'esaa; Ishimelu, bu nwa Netanaya nwa Elishama; mbu onye shi l'unuphu ndu eze; bya aburu onye yi le ndu-ishi, noru l'eka eze; bya achiru umadzu iri gude byapfuta Gedalaya nwa Ahikamu le mkpukpu Mizupa. Ephe wataepho eri nri l'eka ono;

²Ishimelu nwa Netanaya yee umadzu iri pho, yele ephe swi pho wu-lihu woru Gedalaya, bu nwa Ahikamu nwa Shafanu gbua. O buru ogu-echi be ephe gude gbua onye ono, eze ndu Babilonu hotaru g'o nodu buru ishi l'ali eka ono.

³Ishimelu tukokwapho ndu Jiuda, ephe le Gedalaya no le Mizupa; yee ndu ojogu ndu Babilonu, no l'eka ono gbushia.

⁴A nepho ujiku lanu g'e gbucharu Gedalaya; kele o to dukpodaro onye mawaru nu teke ono;

⁵Ukporo umadzu eno tuko kpushia éjí-agba; bya agbajashia uwe phe; bya egbukashichaa onwophe ónyá wuru bya. Eka ephe shi buru le mkpukpu Shekemu; yee Shilo; waa Sameriya. Ephe gude ngweja-nri; waa unwù-isensu gude abya l'ulo Chipfu.

⁶Ishimelu nwa Netanaya bya eshi le Mizupa tugbua je agba phe ndzuta; ara ekwa eje. O jepfue phe pho o su: “Unu byapfutakwa Gedalaya nwa Ahikamu!”

⁷Ephe bahuepho l'ime mkpukpu ono; Ishimelu nwa Netanaya; yee ndu ephe l'iya no woru phe gbua chiru phe ye l'eze iduma mini.

⁸Umadzu iri l'ime phe su Ishimelu-a: “Te gbukwa anyi! Anyi nweru witi; yele bali; bya enweru manu; yee manu-enwu, anyi domiru l'egbudu.” O paru ephebedua haa; ophu o gbuduru phe yeru ndu ophuu.

⁹No iya; eze iduma mini ono, o chiru odzu ndu ono, o gbushiru ye ono; bu eze, bu Asa turu iya g'o buru iphe, ya gude adzo ndu ali iya l'eka Basha, bu eze ndu Izurelu. O buru iya be Ishimelu nwa Netanaya gude odzu ndu ono, o gbushiru ono kpojia.

¹⁰Ishimelu bya atuko ndu nokota le Mizupa kpukota le ndzu; mbu unwada eze yee ndu ozokpo, bu ndu phoduru nu l'eka ono, bu ndu Nebuzaradanu, bu onye-ishi ndu ojogu, anoduje eche eze ndu Babilonu nche; hotaru Gedalaya nwa Ahikamu g'o buru ishi phe. Ishimelu nwa Netanaya kpukota phe le ndzu kpuru phe ye; ephe lashia lapfushia ndu Amonu.

¹¹O be ge Jiohananu nwa Kareya; yee ndu-ishi ndu ojogu g'ephe ha, bu ndu ephe l'iya no; tukuru ejo-iphe ono, Ishimelu nwa Netanaya meru ono numakota;

¹²ephe duta ndibe phe l'ophu jeshia etso Ishimelu nwa Netanaya ogu. Ephe l'iya je edzugba le mgboru oke okpuru ono, no le mkpukpu Gibiyonu ono.

¹³O be ge ndu Ishimelu chi je ogu ono g'ephe ha humaru Jiohananu nwa Kareya; yee ndu-ishi ndu ojogu, ephe l'iya swi; ehutsoahaa phe.

¹⁴Iphe, bu ndu ono, Ishimelu chi ono, bu ndu o kpuru le ndzu le Mizupa ono dakobe wu-pfu Jiohananu nwa Kareya.

¹⁵Obenu le Ishimelu nwa Netanaya; yee umadzu esato l'ime ndu ono, ephe l'iya swi ono nahuru Jiohananu gbalaa gbapfu ndu Amonu.

Agba ala Ijiputu

¹⁶Tobudu iya bu; Jiohananu nwa Kareya; yee ndu-ishi ndu ojogu, bu ndu ephe l'iya no; bya achita ndu ono, phoduru nu ono; mbu ndu Ojogu; me unwanyi; mekpoo unwegirima; me ndu eleta ibe-eze enya; g'ephe ha bu ndu Ishimelu nwa Netanaya shi kpua le ndzu le Mizupa g'o gbuchaaru Gedalaya nwa Ahikamu; Jiohananu tuko phe shi le Gibiyonu chi-phuta azu.

¹⁷Oo ya bu; ephe tugbukpoephe; jasu ephe jerwua mkpukpu Gerutu Kimuhamu, no le mgboru Betulehemu; eka ephe phoberu eje ali ndu Ijiputu;

¹⁸g'ephe gude nahu ndu Babilonu. O buru ebvu be ephe atsụ phe; kele Ishimelu nwa Netanaya gburu Gedalaya nwa Ahikamu, bu onye eze ndu Babilonu hotaru mee onyeshi l'alị ono.

Jieremaya 42

¹Tobudu iya bu; ndu-ishi ndu ojogu g'ephe ha; mekpoo Jiohananu nwa Kareya; yee Jiezanaya nwa Hoshaya; mekpoo ndu ono g'ephe ha; eshi le ndu ophu kachaa alwa alị jasụ le ndu ophu kachaa shii; tuko bya awu-pfu

²Jieremaya, bu onye mpfuchiru je asu iya: “Jiko numakpodapho arworwo, anyi arwo ngu g'i pfuru nu Chipfu, bu Chileke ngu l'opfu ehu nwa ndu-a, phoduru nu-a g'ephe ha. Kele-a; giilena; a makwaru-a l'anyi shi du igwerigwe; nta-a buwaa nwa ndu abadu ishi phoduru.

³Pfuru nu Chipfu, bu Chileke ngu g'o karu anyi uzo, anyi e-shi; yee iphe anyi e-me.”

⁴Jieremaya, bu onye mpfuchiru su phe: “Mu numakwaru iphe, unu pfuru. Mu epfukwaru-a nu Chipfu, bu Chileke unu, bu iphe, unu arwo. Mu -mechaa; mu akaru unu iphemiphe, Chipfu epfu; ophu o dukpodaa ophu mu emeru unu le mpya.”

⁵No iya; ephe su Jieremaya-a: “Ge Chipfu bukwaru onye-ekebe, epfu ire-lanu; yee onye e gude ire iya eka l'opfu ehu anyi le ngu; me o -buru l'anyi te emeduru iphemiphe, Chipfu, bu Chileke ngu suru g'i su anyi g'anyi mee.

⁶O -je l'aduru anyi le ree; o je l'aduru anyi eji be anyi e-me iphe, o suru g'anyi mee; mbu Chipfu, bu Chileke anyi; bya aburu onye anyi ezi ngu g'i jepfu g'oduru anyi le ree m'anyi mee olu Chipfu, bu Chileke anyi.”

⁷A noepho abali iri; olu-opfu Chipfu rwua Jieremaya le nchi.

⁸O bya ekukobe Jiohananu nwa Kareya; yee ndu-ishi ndu ojogu ono g'ephe ha, bu ndu ephe l'iya no; me ndu eka ono l'opfu; e -shikpo l'onye kachaa alwa alị jasụ l'onye kachaa shii.

⁹O su phe-a: “Wakwa iphe, Chipfu epfu baa; mbu Chileke ndu Izurelu, bu onye unu yeru mu su ge mu je arworu unu arworwo. O suru-a:

¹⁰‘O -buru l'unu no l'alị eka-a; ya a-kpu unu g'akpuje ulo-a; ya taa lakashidu unu alakashi. Ya a-dza unu adzadza; ya tee phefudu unu ephefu. Kele iphe-ehuka, ya meru unu jee; atsuwaa iya l'ehu.’¹¹Wakwa iphe, Chipfu epfu baa: ‘Unu ba atsukwa eze ndu Babilonu ebvu, bu onye ono, unu atsụ ebvu nta-a ono. Unu ba atsukwa iya ebvu; kele mu nokwa swiru unu eswiru; mu je l'adzota unu; nafuta unu l'eka iya.

¹²Mu a-phuru unu obu-imemini k'opfu imemini unu a-du iya; l'o haa g'unu nodu l'alị unu.’

¹³“Obenu le-a; o -buru l'unu suru l'unu taa nodukwa l'alị-a; unu eshi egube ono kwefuru Chipfu, bu Chileke unu ike.

¹⁴Teke ọ bukwanu l'unu sūru waawaa; l'unu e-je eburu l'alì ndu Ijiputu, bụ ẹka unu taa humadu ọgu l'ẹnya; ọphu unu anụmadu opu-ọgu; ọphu ẹgu nri agụdu unu;

¹⁵Oo ya bụ; unu nūmakwa olu-opfu Chipfu; unubẹ nwa ndu phoduru nū l'alì ndu Jiuda. Wakwa iphe, oopfu baa; mbụ Chipfu, bụ Ọkalibe-Kakọta-Ike; bya aburu Chileke kẹ ndu Ízurelu: 'Ọ -buru l'unu pfuwaru iya hoo haa l'unu a-la Ijiputu; unu nọdu eje eburu l'ẹka ono;

¹⁶bẹ ogu-echi ono, unu atsū ebvu ono a-gbapfutakwa unu l'ẹka ono; teme ọkpa-nri ono, ndzụ iya agụ unu ono etsoru unu lashia alì ndu Ijiputu. Ọ bụru l'ẹka ono bẹ unu a-nọdu nwụhu.

¹⁷Mbụ lẹ-a; iphe, bukpuo ndu ono, gburu iya tororo l'ẹphe a-la Ijiputu je eburu ono bukwa iphe, e-gbu phẹ nū bụ ogu-echi; yẹe ọkpa-nri; waa ejo iphe-ememe. Ọphu ọ dukwa g'ọ ka mma l'ọo onye lanụ a-lwa nū; ọzokwanu nahụ iphe-ẹhuka, mu e-me g'ọ dapfu phẹ.'

¹⁸Wakwa iphe, oopfu baa; mbụ Chipfu, bụ Ọkalibe-Kakọta-Ike; bya aburu Chileke ndu Ízurelu. Sụ-a: 'Ọ kwa gẹ mu tukoshiru ndu bu lẹ Jierúsalemu oke ẹhu-eghu mu; noo gẹ mu a-tukoshi iya unu; mẹ unu laa Ijiputu. Unu a-buru iphe, e gude atụ ọnu; yẹe iphe, anyi ishi ẹdzu; waa iphe e gude achi ọchi; yẹle iphe, e gude ephu l'iphu; ọphu unu egudebaedu ẹnya unu ahuma alì ẹka-a ọzo.'

¹⁹"Unubẹ nwa ndu phoduru nū l'alì ndu Jiuda; Chipfu pfuakwaru iya unu sū unu g'unu ba lakwa Ijiputu! Unu makwaru l'ọo ọkwa bẹ mu anmaru unu ntanụ-a

²⁰l'ọ kwa emeswe bẹ unu mesweru onwunu teke unu ziru mu sū gẹ mu jepfu Chipfu, bụ Chileke unu; mbụ teke unu sūru mu-a gẹ mu pfueshiduru nū Chipfu, bụ Chileke unu l'iswi ẹhu unu. Gẹ mu pfiaru unu iphemiphe, o pfuru; hūma l'unu e-mekọta iya!

²¹Mu pfuakwaru iya unu ntanụ-a; obenu l'unu te ekwedu eme iphe, Chipfu epfu l'ime iphe, ọ sūru gẹ mu pfiaru unu.

²²Nta-a bụ lẹ-a; g'owa-a dokwaa unu ẹnya; ọ kwa iphe, e-mechaa gbua unu l'ẹka ono, unu eje eburu ono bụ ogu-echi; yẹe ẹgu; yẹe ejo iphe-ememe."

Jieremaya 43

¹O be gẹ Jieremaya pfuchaaru ndu ono iphemiphe ono g'ọ ha, bụ Opfu Chipfu, bụ Chileke phẹ; mbụ iphemiphe ono, Chipfu ziru iya sū g'ọ pfiaru phẹ ono;

²Azaríya nwa Hoshaya; yẹe Jiohananu nwa Kareya; yẹe iphe, bukpuo ndu ono g'ẹphe ha, bụ ndu eku onwophe ono tuko sū Jieremaya-a: "Ọo ụka bẹ ịidzu! Chipfu, bụ Chileke anyi te zikwaru ngu g'ì bya asụ g'anyi te ejekwa eburu lẹ Ijiputu!

³Oo Baruku nwa Neraya l'enwu ngu eye g'ì pfiaru anyi iphe, a-buru anyi ọgu; g'eeshi g'e woru anyi ye l'ẹka ndu Bábilonu g'ẹphe gbushia anyi; ọzoo kpua anyi lẹ ndzụ lashia alì ndu Bábilonu."

⁴Tɔbodu iya bụ; Jiohananu nwa Kareya; yee ndu-ishi ndu ojogu ono; mekpoo ndu ono g'ephe ha kwefu ike l'iphe, Chipfu sūru g'ephe mee; l'ephe taa nɔdudu l'alì ndu Jiuda.

⁵Ọ bụ-chia lẹ Jiohananu nwa Kareya; yee ndu-ishi ndu ojogu ono l'ophu dutaru ndu ono, phɔduru nū l'alì ndu Jiuda ono g'ephe ha; mbū ndu ono, lwarū azū bya eburu l'alì ndu Jiuda ono, shigba l'ohamoha, bụ ẹka e shi chigbaaru phẹ ye.

⁶Ephe dutakwapho iphe, bukpuo unwoke; yee unwanyi; yee unwegirima; yee unwada eze; mekpoo ndu Nebuzaradanu, bụ onye-ishi ndu ojogu, anɔduje eche eze ndu Babilonu nche tukoru haarū Gedalaya, bụ nwa Ahikamu; buru nwanwa Shafanu; chitachaa me Jieremaya, bụ onye mpfuchiru; yee Baruku nwa Neraya.

⁷No iya; ephe bahunu l'alì ndu Ijiputu; jikaghaa l'ephe tee medu iphe, Chipfu sūru g'ephe mee. Ephe jekpɔepho jerwua mkpukpu Tahupanahesu.

⁸E rwua lẹ Tahupanahesu; olu-opfu Chipfu rwua Jieremaya nchì sù:

⁹“Gẹ ndu Jiuda lee ngu ẹnya; g'i harū mkpuma, ha shii pata je egude epuchi kpū-butā iya lẹ mkpoze ẹka eeshije abahū l'ibe eze, bụ Fero lẹ Tahupanahesu.

¹⁰No iya; l'ì sù phẹ-a: ‘Wakwa iphe, oopfu baa; mbū Chipfu, bụ Okalibe-Kakota-Ike, bụ Chileke ndu Izurelu: Mu e-zi g'e je ekuaru mu onye-ozì mu, bụ Nebukadineza, bụ eze ndu Babilonu; o buru l'eli mkpuma-a bẹ oo-dobe aba-eze iya; mbū mkpuma-a, mu domiru l'eka-a; l'ò bya eworu uwe agbada eze iya phushi iya l'eli.

¹¹Ọ -bya bẹ ọo-lwū-kpe ndu Ijiputu; ndu o rwuberu l'egbugbu l'ò gbua phẹ; ndu o rwuberu l'akpu lẹ ndzū l'ò kpua phẹ lẹ ndzū; ndu o rwuberu l'egbu l'ogu-echi; l'ò gbua phẹ l'ogu-echi.

¹²Ọo-tū ọku l'ulo nshi ndu Ijiputu. Ọo-kpọ nshi phẹ ono ọku; lwua nshi phẹ olwu lẹ ndzū. Ọ buru egube ono, onye eche aturu agbaphuje onwiya ẹkwa ono; noo g'oo-wota Ijiputu gbaphua onwiya; shi l'eka ono tugbua lashiā l'ehu-guu.

¹³Ọo-tsukposhi mkpuma, dū nsọ, nɔgbaa l'ulo ẹnyanwu, nọ l'alì ndu Ijiputu; bya atuko ulo-nshi ndu Ijiputu l'ophu kpokota ọku.’ “

Jieremaya 44

Ọla-l'iswi, shi l'agwo nshi

¹Opfu-a rwuru Jieremaya nchì l'opfu ẹhu ndu Jiuda g'ephe ha, bụ ndu bu l'alì ndu Ijiputu, bụ iya bụ lẹ mkpukpu Migudolu; yele mkpukpu Tahupanahesu; waa lẹ mkpukpu Nofu; yele alì ndu Paturosu sù:

²Wakwa iphe, Chipfu, bụ Okalibe-Kakota-Ike eepfu baa; mbū Chileke ndu Izurelu: “Unu humanuru-a oke ọla-l'iswi, mu meru ndu Jierusalem; yele mkpukpu ndu Jiuda l'ophu. Nta-a bẹ ephe buwaa ochobu; ophu ọ duedu onye bu iya nū;

³Ọ buru iphe, kparū iya nū bụ ẹjo-iphe, ephe meru; shi nno kpatsu mu iwe; kele ephe watarū akpọ unwū-isensu ọku anū agwa; bya aburu agwa ono, ephebedua l'onwophe; ọzoo unubedua; ọzoo nna unu oche phẹ amajeduru bẹ ephe watarū abarū ẹja.

- ⁴Mu bya ezia ndu-ozu mu, bu ndu mpfuchiru; mu -zichaa; mu ezibaa; epe je asu phe-a: 'Ophu g'unu be meshi ejo ahuma-a, bu iphe, mu kporu ashi-a!'
- ⁵Ophu epe angaduru nchi; ophu epe eyekpodarunu onu; ophu epe aghakobeduru haa eme ejo-iphe, epe eme; ophu epe ahaduru akpo unwu-isensu oku anu agwa.
- ⁶O buru iya bu le mu eworu oke ehu-eghu mu wua phe l'ishi. O nwua phuruphuru tsoru mkpukpu Jiuda l'ophu; bya etsoru onu gbororo Jierusalemu; woru phe mee ochobu, bu ikpozu ono, epe bu ntanu ono.
- ⁷"Nta bu le-a; wakwa iphe, Chipfu, bu Chileke, bu Okalibe-Kakota-Ike eepfu baa; mbu Chileke ndu Izuru: ? Denu g'o gude unu nodu eme onwunu egube ejo-iphe owa-a; ke g'unu mee g'unwoke chihu le Jiuda; unwanyi achihu iya; me ndu bu unwegirima; me ndu bu nwaswa; g'o to duhe onye a-phodu nu ililekpo?"
- ⁸? Denu g'o gude o buru iphe, unu gude aka unu mee be unu gude akpatsu mu iwe; mbu ke g'unu wata akpo unwu-isensu oku anu agwa l'ali ndu Ijiputu, bu aka unu byaru eburu-a? Unu e-mebyikwa onwunu; woru onwunu mee iphe, ee-gude ephu l'iphu; teme ohamoha, no l'eliphe l'ophu anodu achi unu ochi.
- ⁹? Unu zohawaru ejo-iphe, nna unu oche phe meshiru; yee ke ndu eze ndu Jiuda; epebedua me unyomu phe; yee ejo-iphe, unubedua meru; me unyomu unu; l'ali ndu Jiuda; yele oma gbororo Jierusalemu?
- ¹⁰Byasukwa ntanu-a be epe teke ewozekwa onwophe ali; ophu epe eke akwabekwa mu ubvu; ophu epe eke ekwekpodanu mee ekemu mu; yee iphe, mu toru unu okpa iya; yee nna unu oche phe.
- ¹¹"Oo ya bu le-a; wakwa iphe, Chipfu, bu Okalibe-Kakota-Ike eepfu baa; mbu Chileke ke Izuru: Mu gbuakwaru iya tororo su le mu a-buru unu ugu; le mu e-me unu ejo-iphe; mbu le mu e-me ge ndu Jiuda l'ophu chihu-gbua.
- ¹²Mu e-wofu nwa ndu ono, phoduru nu le ndu Jiuda, bu ndu ono, pfuwaru iya hoo haa l'ephe lafutaje Ijiputu je eburu ono. Epe a-nwuhushikota le Ijiputu. O buru ugu-echi be ee-gude gbutsushia phe; ozoo ugu egbushia phe. Epe e-shiepho le ndu kachaa nwanshii jasule le ndu kachaa shii nwushihuepho l'ogu-echi ozoo l'egu ememe. Epe a-buru iphe, e gude atu onu; yee iphe, anyi ishi edzu; waa iphe e gude achi ochi; yee iphe, e gude ephu l'iphu.
- ¹³Ndu ono, laru Ijiputu ono be mu e-gude ugu-echi nua aphu; yee ugu ememe; waa ejo iphe-ememe; egube ono, mu meru ndu Jierusalemu ono.
- ¹⁴Ophu o dudu ndu ono, phoduru nu ono, shi ali ndu Jiuda ono, bu ndu ono, byaru eburu l'ali ndu Ijiputu ono; duru ophu a-gbala nu; ophu o dudu onye ophu a-wa nu k'alwa azu l'ali ndu Jiuda, bu aka agu phe alwa azu bya eburu; o to dudu onye a-lwa nu; gbahaa nwochileka ndu gbaru oso ugu."
- ¹⁵No iya; iphe, bu ndu ono, maru le nyee phe anoduje akpo unwu-isensu oku anu agwa ono; epe l'ikpoto unwanyi, pfuru l'eka ono; mekpoo iphe, bu ndu bukota l'ali Paturosu, no l'ali ndu Ijiputu; toko su Jieremaya-a:

- 16“Ozi ono, i gude ẹpha Chipfu ezi anyi ono bẹ anyi taa ngakwaru ngu nchi.
- 17Iphemiphe, anyi sùkpooru l'anyi e-me bẹ anyi mefùtaje. Anyi a-nọdu akpọ ùnwù-isensu ọku anụ eze-nwanyị igwe; anyi agbaru iya mee gude agwa iya; ẹgube anyịbedua; yee nna anyi phe; yee ndu eze anyi phe; yee ndu-ishi anyi phe shi emeje le mkpukpu, nọgbaa l'alị ndu Jiuda; yele ọma gbororo Jierúsalemu. Teke ono bẹ anyi shinu nweru nri shii; iphe duru anyi le ree; ọphu ọ dudu iphe, shi atsụ anyi l'ẹhu.
- 18Obenu l'eshinu anyi haru akpọ ùnwù-isensu ọku anụ eze-nwanyị igwe; bya ahaa agbaru iya mee gude agwa iya; bẹ ọ tọ dukpoda iphe, ọko iya aduduru anyi; teme ogu-echi yee ọkpa-nri nọdu agwa anyi maa.”
- 19Unwanyị bya eyekwapho onu su: “Teke ono, anyi shi akpọ ùnwù-isensu ọku anụ eze-nwanyị igwe; bya agbaru iya mee gude agwa iya; ndu alu anyi ? ẹphe ta amadu g'anyi shi egheje akara mee ya ẹrengete kpua ya l'ọ du g'ọ du; anyi ebvube iya agba mee gude agwa eze-nwanyị igwe ono?”
- 20Noo ya; Jieremaya bya asu ndu ono g'ẹphe ha; mbu unwoke phe; me unwanyị phe; me iphe, bukpo g'ẹphe ha buru ndu yeru iya udu onu ono:
- 21“O -buru k'ùnwù-isensu ono, unu shi anọduje akpọ ọku l'oma mkpukpu Jiuda ono; me l'oma gbororo Jierúsalemu ono; mbu unubedua; yee nna unu phe ono; ndu eze unu phe; yee ndu-ishi unu phe; yee ndu ali-a l'ophu; Chipfu ? tọ nyataduru iya tọ? ? Tọ batajedu iya l'egomunggo tọ?”
- 22Chipfu bẹ ejo-iphe, unu emegbabe atsukwa l'ẹhu; mekpoo ahuma ahuma ono, unu megbaberu ono. O buru iphe ono meru g'o gude ali unu buru ochobu; bya aburu ikpozu; buru iphe, e gude ephu l'iphu; k'ophu bu l'ọ tọ dudu onye bu iya ebubu; ọ du g'ọ du ntanu-a.
- 23O kwa kele unu kporu ọku l'ùnwù-isensu; yele kele unu meru Chipfu iphe-ẹji; ọphu unu emejedu olu Chipfu; ọphu unu etsodu ekemu iya; ọphu unu emedu omelali iya; ọphu unu emejedu iphe, ọ suru g'e meje; meru g'o gude ejo-iphe-a dapfuta unu g'ọ du ntanu-a.”

Ijiputu bẹ aa-lwụ-kpe l'ọgu

- 24Tobudu iya bu; Jieremaya bya asu ndu ono g'ẹphe ha: “Unu numakwa Opfu Chipfu; unube ndu Jiuda l'ophu, bu ndu no l'alị Ijiputu.
- 25Wakwa iphe, o pfuru; mbu Chipfu, bu Okalibe-Kakota-Ike; bya aburu Chileke ndu Izurelu: Unubedua; unu l'unyomu unu gude onu unu pfua ya epfufu; su l'iphe, unu riburu nte ememe ono bẹ unu mefùtaje; l'unu a-nọdu akpọ ùnwù-isensu ọku anụ eze-nwanyị igwe; teme l'unu a-nọdu agbaru iya mee. Ngwanu; unu mekwapho iphe ono g'unu riburu nte iya ono.
- 26Oo ya bu le-a; unu numakwa olu-opfu Chipfu; unube ndu Jiuda l'ophu, bu ndu bu l'alị Ijiputu. Wakwa iphe, Chipfu epfu baa: Unu lekwa; mu gudekwa eze ẹpha mu ono ria angu su l'onye shi le Jiuda taa gu-kubaedu mu l'enwa l'alị Ijiputu l'ophu l'ophu. L'ẹphe taa subaedu: ‘Eshinu Chipfu no ndzu g'ọ no iya-a’.

²⁷“Unu lekwa-a; mu egekwa phe-a ngge ejo-iphe; o to bukwa k'oma Iphe, bukpo ndu Jiuda, no le Ijiputu be ogu-echi a-sukwa pyaapyaa; ephe akpaa nri jasụ ephe taa phoduedu.

²⁸O buru nwa ndu ophu nahuru ogu-echi be e-shi l'alị Ijiputu lwaphuta azu l'alị ndu Jiuda; ole ephe ta adudu igwerigwe. Noo teke ndu ono, phoduru le Jiuda ono, bu ndu lwaru bya eburu l'alị ndu Ijiputu ono a-maru opfu onye ophu a-pfuru nu; ? bu nkemu; too nkephe?

²⁹Wakwa iphe, Chipfu epfu baa: Wakwa iphe, e-goshi unu le mu a-hu unu ahuhu l'eka-a baa. Oo ya e-me g'unu maru l'iphe-ehuka ono, mu suru le mu e-me unu ono be mu e-mekota unu.

³⁰Wakwa iphe, Chipfu epfu baa: Fero, bu Hofura; mbu eze ndu Ijiputu be mu e-wokwaru ye l'eka ndu ohogu iya; mbu le mu e-woru iya ye l'eka ndu achọ ndzu iya egube ono, mu woru Zedekaya, bu eze ndu Jiuda ye l'eka Nebukadineza, bu eze ndu Babilonu ono, bu onye ohogu iya bya aburu onye achọ ndzu iya onoya.”

Jieremaya 45

¹Wakwa iphe, onye mpfuchiru Chileke, bu Jieremaya pfuru nu Baruku nwa Neraya l'apha k'eno, Jiehoyakimu nwa Jiosaya bahuru l'aba-eze ndu Jiuda; ge Baruku dechaaru opfu, oopfu; o nodu ede iya.

²“Wakwa iphe, Chipfu, bu Chileke ke ndu Izuru epfu eyeru gube Baruku baa.

³I pfuru su: ‘Nshio mu! Chipfu yekwaru nrimaphu l'iphe-ehuka mu. Mu tsuakwaru ude; ike bvụ mu; ophu mu atutajeedu unme.’ “

⁴Chipfu suru-a: “Waa iphe, ii-pfuru iya baa: ‘Wakwa iphe, Chipfu epfu baa: Mu a-bya enwukposhia iphe, mu shi kpua l'onwomu; mu abya epheshi iphe, mu shi dzaa l'onwomu l'alị-a mgburugburu.

⁵? Denu g'ii-shi bya awata achoru onwongu iphe, paru eka? Ba chokwa iya nno. Kele mu e-mekwa nemadzu mgburugburu ejo-iphe. Nokwa iphe, Chipfu eepfu. Obenu le gubedua be mu a-noduepho eleta enya l'ekameka, i jekporu. Mu a-haa ngu ro gi gude ndzu ngu gbala.’ “

Jieremaya 46

Ozi ehu ndu Ijiputu

¹Owaa bu Opfu Chipfu, bu ophu rwuru onye mpfuchiru Chileke, bu Jieremaya nchi, bu opfu ehu ohamoha.

²Opfu ehu ndu Ijiputu: Ndu eezi ozi owa-a bu ndu ojogu Fero Neko, bu eze ndu Ijiputu, bu onye e mekperu le mgboru mkpukpu Kakemishi, no l'aguga enyimu Yufurétisu. O buru onye mekperu phe nu bu Nebukadineza, bu eze ndu Babilonu; l'apha, kwe Jiehoyakimu nwa Jiosaya apha eno, o bahuru l'aba-eze ndu Jiuda.

- ³Unu dozikwaa iphe, unu egudeje ezeru ọgu; unu dozia ndu ọphu ha ọsa mę ndu ọphu ha nwanshii; unu ezefuta jeshia ọgu!
- ⁴Unu kwakọbe inya unu k'ọgu! Unu awu-koru inya-ọgu unu l'eli; unubę ndu agba l'inya! G'onyenonu pfukwaaru l'eka rwuberu iya nu! Unu ekpuchaaru okpu-igwe! Unu rwachaa arwa unu arwacha! Unu atuko uwe-ọgu unu l'ophu yee onwunu!
- ⁵? Bu gunu be mu humaru? Ndzu aguwaa phe. Epe agbawaa oso. Ndu ojogu phe be e mekpewaru. Epe ye okpa l'oso gbala l'ebe agha enya l'azu; kele nggiri du l'uzo l'ekameka. Nokwa iphe, Chipfu eefu bu ono.
- ⁶Ndu okpa egwa ta agbakwa oso. Ophu onye du ike l'ogu agbalakwa. O kwa l'uzo isheli; l'uzo enyimu Yufurétisu be epe vukotaru iphe daa.
- ⁷? Bu ndu ole baa, l'abya kulakula g'enyimu Nayilu; ge nggele, du igwerigwe, asogba gborogboro?
- ⁸O kwa ndu Ijiputu abya kulakula g'enyimu Nayilu ono; ge nggele, du igwerigwe, asogba gborogboro. Epe eefu su l'ephe e-tsulihu tuko mgboko l'ophu sopyabe. L'ephe e-mebyishi mkpukpu le mkpukpu; yele ndu bu iya nu.
- ⁹Unubę inya; unu watakwa eje l'iphu l'iphu! Unubę ndu agba l'ugbo-inya; unu tangirihukwa g'e je! Ge ndu du ike l'ogu gbeshikwa g'e je; mbu unubę ndu Kushi; yee ndu Putu, bu ndu chigbaa iphe, eegudeje ezeru ọgu; me unubę ndu Lidiya, bu ndu agbaje apfu!
- ¹⁰Obenu l'eswe mboku ono bu Nnajiuphu nwe iya; mbu Chipfu, bu Okalibe-Kakota-Ike. O kwa eswe agwata ugwo iphe; mbu mboku, oo-gwata ndu achi iya le njo ugwo iphe. Oo ogu-echi a-su nemadzu pyaapya jasu l'ooji iya epho; jasu teke oo-ngu mee ngu-jia epho; kele oo Nnajiuphu; mbu Chipfu, bu Okalibe-Kakota-Ike agwa iphe l'ali ndu isheli; l'aguga enyimu Yufurétisu.
- ¹¹“Tugbua je l'ali ndu Giladu je emeta obvu etete; gube nwamgboko, yee nwoke akwajeduru, bu Ijiputu! Obenu l'igwerigwe obvu ono, imegbaa ono bukwa ke mmanu. I tii wekorohukwa.
- ¹²Ohamoha numawaru iphere ono, e meru kpua ngu ono. Ekwaa unu tukowa mgboko l'ophu ngaa. Ndu du ike l'ogu tuko dapyabegbaa ibe phe. Epe tuko daa ndatewo.”
- ¹³Wakwa ozi, Chipfu ziru onye mpfuchiru iya, bu Jieremaya le k'ehu Nebukadineza eze ndu Babilonu, abya etso ndu Ijiputu ọgu.
- ¹⁴Raa iphe-a arara l'ali ndu Ijiputu! L'i chia ya le mkpu le mkpukpu Migudolu! Chikwaa ya pho le mkpu le mkpukpu Nofu; yele Tahupanahesu: Onyenonu pfukwaru l'eka rwuberu iya nu kwakobe; kele ogu-echi byawaru egbushi ndu no-kube ngu nu.
- ¹⁵? Bu gunu be agwa ngu, bu Apisu agbahunuru? ? Bu gunu be obobo-ena ngu obu aduedunu ike pfuru? Iphe, kparu iya nu bu le Chipfu nwutsuwaru iya.

16Upfu duru phe ndupyabe; ephe dagbaa dapyabe nwibe phe; ephe su: Unu gbeshi g'anyi laphu azu lapfu ndu ali anyi yee ndibe anyi! G'anyi gbalaaru ogu-echi ndu eme anyi mkpawere!

17Unu gube Fero, bu eze ndu Ijiputu epha ozo. Unu kuje iya: O-pfu-epfu-emegeme.

18Wakwa iphe, Eze ono epfu baa; mbu onye epha iya bu Chipfu, bu Okalibe-Kakota-Ike: Eshinu mu no ndzu ge mu no iya-a be o nweru onye a-bya nu. Onye ono a-du g'ubvu Tabo l'eka ubvu doru. Mbu l'oo-du g'ubvu Kamelu, no l'aguga eze-enyimu.

19Kwakokwa iphemiphe, ii-gude laa ali ozo; unube ndu bu l'ali ndu Ijiputu! Noo kele mkpukpu Nofu be e-mechakwaa buru ochobu; leemebyishia ya; o to dudu onye eburu iya eburu.

20“Ijiputu bu nwada eswi, ama ntumatu. Obenu l'ijiji-onyieka eshije l'uzo isheli eje abyapfuta iya tekenteke.

21Ndu ephe butaru g'ephe bya alwuaru phe ogu be doru l'echilabo phe g'oke-eswi, daru repfurepfu nodu. Ephebedua tukowaru dakobe gbala; ophu ephe adudu ike pfuru. Noo kele eswe mboku ola-l'iswi dapfutawaru phe; mbu teke aanu phe aphu.

22Ndu Ijiputu atsu kpururu g'agwo, awu awuwu awufu; noo kele ndu ohogu phe abyapfuta phe ehuka ehuka; bya egude ogbunku etso phe ogu ge ndu egbutsushi oshi.

23Oswa phe l'ophu be ephe a-supyashichaa asupyashi; g'o duhabe epfukala. Nokwa iphe, Chipfu eepfu. Ephe ka igube adu igwerigwe; k'ophu bu l'a taa gutadu phe l'ogu.

24Nwada Ijiputu be e mewaru iphe-iphere. Mbu l'e woru iya ye l'eka ndu isheli.”

25Chipfu, bu Okalibe-Kakota-Ike, bu Chileke ke ndu Izurelu suru-a: “Lekwa; mu abyakwa phe anu aphu; mbu Amonu, bu agwa ndu mkpukpu Tebesu; yee Fero; yee ndu Ijiputu; ephe l'agwa phe; mekpoo ndu eze phe; yee iphe, bukpo ndu kporu obu yeru Fero.

26Mu e-woru phe ye l'eka ndu achu ndzu phe; mbu l'eka Nebukadineza, bu eze ndu Babilonu; ephe le ndu-ozu iya phe. Ole o bu; e -mechaa be ee-bukwaru-a le Ijiputu ozo g'e shi buhawaru iya.” Nokwa iphe, Chipfu eepfu bu ono.

27“Ta atsukwa ebvu; gube Jiekopu, bu onye-ozu mu! Ophu i nmakwa pyaapyaapya; gube Izurelu! Lekwa; mu a-dzota ngu l'ali, du enya; dzota awa ngu phe l'ali eka a kpuru phe le ndzu laa. Jiekopu e-mechakwaa lwa bya eburu le nchi-odoo tusaru eh. Ophu o dudu onye byaru eyebaa ya ebvu.

28Ta tsukwa ebvu; gube Jiekopu, bu onye-ozu mu; kele mu nokwa swiru ngu. O kwa Chipfu epfu iya. Kele mu e-mebyishicha ohamoha ono, mu chiru unu tukaa l'echilabo phe ono. Ophu mu emebyishidu unubedua. Oo ahuhu be mu a-hu unu huta iya unu l'ahuma. Ophu mu ahakwanu unu phuruphuru ge mu te echi unu echachi.”

Jieremaya 47

Ozi, e ziru ndu Filisitayinu

- ¹Owaa bu Opfu Chipfu, bu ophu rwuru Jieremaya nchi, bu opfu ehu ndu Filisitayinu; teme Fero bya etsoo ndu mkpukpu Gaza ogo.
- ²Wakwa iphe, Chipfu epfu baa: Lewarog ge mini shi l'uzo isheli abya ke kulakula. Oomecha buru utso, aso gborogboro. Oo-so-kputa ali l'opfu; yee iphemiphe, no iya nu; sopyabe mkpukpu; yee onyemonye, bu iya nu. Ndu ono e-chishi mkpu. Mbụ l'iphe, bu ndu bu l'ali ono a-tu uzu-ekwa.
- ³Mbụ l'ephe -numaepho igiji ichirupfu-okpa inya phe; bya anuma uzu ugbo-inya ndu ohogu phe; yee kwokiri kwokiri, okpa ugbo-inya phe ono eme be ndu bu nna tee leedu enya l'azu k'eyeru unwu phe aka. Eka a-tuhu phe lwakpalwakpa.
- ⁴Kele mboku rwuakwaru teke ee-mebyishikota ndu Filisitayinu g'ephe hakota. L'e mee ge nwa ndu phoduru nu, bu ndu gege eyeru ndu mkpukpu Taya yee ndu mkpukpu Sayidonu aka chihu; kele Chipfu abyakwa emebyishi ndu Filisitayinu; mbu nwa ndu phoduru nu le ndu ali Kafuto.
- ⁵Ndu mkpukpu Gaza kpushiwaru ishi aphu. Ndu mkpukpu Ashikelonu be a lawaru l'iswi. Su-a; unube nwa ndu ophu phoduru le ndu Anaku; ? unu e-yejashikpoo onwunu egube-a jasu teke ole?
- ⁶“Sua-a; gube ogu-echi Chipfu; ? bukpo teke ole be oo-jeberu l'ikabe tuta unme? Kabenu miru onwongu yee l'obo! Tutanu unme; nodunu nwa nggujungguji!
- ⁷Ole ? denukwanu g'oo-shi nodu nwadoo l'eka iile enya le Chipfu tuwaru iya ekemu su g'o lwua ndu mkpukpu Ashikelonu; yee ndu bu l'aguga eze-enyimu? Mbụ l'onoo g'o pfuwaru l'oo-du bu ono.”

Jieremaya 48

Ozi ehu ndu Mowabu

- ¹A -bya l'opfu ehu ndu Mowabu; wakwa iphe, oopfu; mbu Chipfu, bu Okalibe-Kakota-Ike; mbu Chileke ndu Izurelu: “Nshio Nebo; kele e meru iya; o buru ochobu. Ndu Kiriayayimu be e meru iphe-iphere; bya akpua phe le ndzu. Ulo phe, bu aka a kpushiru ike be e meru iphe-iphere tukaa ya nanunanu.
- ²A taa jaedu ndu Mowabu ajaja. O buru le mkpukpu Heshibonu be a chiru phe ejo idzu su: ‘Unu bya g'anyi mee g'oha ono chihu!’ Unubedua kwapho; unube ndu mkpukpu Madumenu be ee-mechakwaa laa l'iswi. Ogu-echi e-mechakwaa chia unu ejo oso.
- ³Unu ngabekpodapho nchi numa mkpu, eechi le mkpukpu Horonayimu; mkpu ali arwuhu yee oke ola-l'iswi.
- ⁴Ndu Mowabu be e mebyishiwari. Unwegirima iya chishiru mkpu ike.
- ⁵Ephe enyi obvu awu eje l'uzo mkpukpu Luhiti; akwa ntumatu eje atugbu. Mbụ l'uzo okpa-ubvu mkpukpu Horonayimu be a numaru mkpu ekwa, eechi ekpu iphemiphe ono, laru l'iswi ono.

- ⁶Unu gbalaa! Unu gbaa ọso ndzụ unu! Unu je ebvuru g'irwu, bvuru l'echiegu!
- ⁷Eshinu unu kpọru obu ye l'iphe, unu aduje ike mee; yee ẹku unu be aa-kpufukwaa unubedua le ndzụ. Teme agwa unu, bu Kemoshi be aa-kpukwapho le ndzụ; yele ndu-uke, agwaje iya nu; me ndu-ishi iya.
- ⁸Ee-mebyishi mkpukpu le mkpukpu. Ophu o dudu mkpukpu, byaru anahu nu me nanu. Nsuda nsuda be a-buru mkpurupyata. L'e mebyishia aka du baswa; kele o egube ono be Chipfu pfuru iya.
- ⁹Chibe ndu Mowabu nkù; kele oo-mecha pheliu phefu. Mkpukpu le mkpukpu phe a-bukotacharu ochobu. O to dudu m'onye lanu eburu iya nu.
- ¹⁰Onye a turu onu be o bu; mbu onye gude ẹgedede ejeru Chipfu ozi! A tukwaru onye ono onu, bu onye te egudedu ogu-echi iya egbu ochi!
- ¹¹Eshi teke o bu nwata be ndu Mowabu nokpoephe tusaru ehu g'ohu-mee, doru l'ite. Ophu a wu-phedu iya awu-phe l'ite; kele e teke akpu-swee ndu Mowabu le ndzụ lashia ali ozo. Noo g'o gude o ndu atsoephe g'ootso. Ophu ooshibuhudu mkpo eshibuhu.
- ¹²Wakwa iphe, Chipfu epfu baa: O nwenuru-a mboku, abya nu, bu mboku, mu e-ye ndu awu-phe mee l'ite. Epe awufuta iya l'ite ono, o doru ono. Epe awufuta iya l'ite obu; woru ite ono, o shi du ono tsukposhia.
- ¹³Noo teke iphere Kemoshi e-gude ndu Mowabu; egube ono, iphere Betelu guderu ndu Izurelu, bu iphe, epe shi dakobe ono.
- ¹⁴? Denu g'unu e-shi su l'okpehu du unu; l'unu bu ndu du ike l'ogu?
- ¹⁵Ndu e-mebyishi Mowabu; yee mkpukpu, nogbaa ya nu be nowaa anono. Unwoke phe, kachaa agba mkparawa be ee-gbukota egbugbu. Nokwa iphe, oopfu; mbu Eze ono, epha iya bu Chipfu; bya aburu Okalibe-Kakota-Ike.
- ¹⁶Teke ndu Mowabu a-la l'iswi dukwaa tsokere. Eze iphe-ehuka a-dapfukwa phe egwegwa.
- ¹⁷Unu jekwa akporu phe iphu; unube ndu unu l'ephe bukubegbaa! Mbu unube ndu maru epha phe. Unu su phe-a: '? Denu g'o nwuru a gbajiru mgboro-eze, shihuru ike; teme o buru mgboro, ama ntumatu-a?'
- ¹⁸Unube ndu bu le mkpukpu Dibonu; unu shinu le biribiri unu nyizeta bya anodu l'ali, du jakporo jakporo; kele onye emebyi ndu Mowabu byapfutaru unu bya egwepyaa mkpukpu le mkpukpu unu ono, a kpushiru ike ono.
- ¹⁹Unu pfukpodarupho l'aguga gbororo gee ngge; unube ndu mkpukpu Arowa! Unu jia unwoke, agba oso; yee unwanyi, nahuru nu! Unu jia phe su phe: '? Bu gunu meru?'
- ²⁰Ndu Mowabu be e meakwaru iphe-iphere kpua; kele epe dakashihuwaru. Unu rwua erwubvu; chishia mkpu ike! Raa ya arara le nggele Anonu le Mowabu be e mebyishiwaru!

- ²¹Ndu bu lẹ mbarabata bẹ ikpe dapfuakwaru; mbụ ndu Holonu; yẹ ndu Jiahazu; waa ndu Mefahatu;
- ²²dapfu ndu Dibonu; yẹ ndu Nebo; mękpoo ndu Bẹtu-Dibulatayimu;
- ²³dapfu ndu Kiriayatayimu; yẹ ndu Bẹtu-Gamulu; yẹ ndu Bẹtu-Meyonu;
- ²⁴dapfu ndu Keriyotu; yẹ ndu Bọzura; dapfukọta mkpukpu lẹ mkpukpu ndu Mówabu l'ophu; ndu ophu bu ẹnya mę ndu ophu bu ntse.
- ²⁵Mpu ndu Mówabu bẹ e chikwashiakwaru. Teme e chikwoshiwa iya ẹka.” Nokwa iphe, Chipfu eepfu bụ ono.
- ²⁶“Unu chegharu iya mę ẹka; kele ọo Chipfu bẹ o koru okpa l'ishi. Gę ndu Mówabu watanu ebvuka ẹgbo, ẹphe gbọru; g'ẹphe aburu iphe, ee-gude agba mgbonu.
- ²⁷? Tọbudu ndu Ízurelu bẹ unu shi egudeje agba mgbonu? ? Bụ ẹphe lẹ ndu-oshi shi nọdu teke ono tọ; mekwanuru g'o gude unu shi atuje ọka l'ishi ekweru iya une mę unu -nọdu epfu opfu ẹhu iya?
- ²⁸Unu gwọbechaa mkpukpu unu je eburu l'agbara-mkpuma; unubẹ ndu Mówabu! Unu dọepho gę kparaka, bụ l'onu ọgba bẹ ọokpaje ẹpfune iya!
- ²⁹Anyi numakwaru gę Mówabu gude ekube onwiya. Mbụ l'o kunukaru onwiya; teme ọ nọdu etsenuka etsetse. Mbụ l'eku-onwonye ọbu mękpoo etsetse iya ọbu; mękpoo mkpofu-okpoma iya ọbu bẹ paru ẹka.”
- ³⁰Wakwa iphe, Chipfu epfu baa: “Mu makwaru oke ẹhu-eghu iya; ọle ọ bukwanu ke mmanu. Teme ekuku, ooku onwiya bukwarupho iphe-mmanu.
- ³¹Noo g'o gude mu nọdu erwu erwubvu l'opfu ẹhu ndu Mówabu. Mbụ l'oo ndu Mówabu l'ophu l'ophu bẹ mu echi mkpu iya. Ọ buru ndu mkpukpu Kiru-Haręsetu bẹ mu agu aphu pẹ.
- ³²Mu kakwa ara ẹkwa gube opfu-vayinu ke mkpukpu Sibuma eme lẹ ke Jiaza. I jaru àjàjà jarwuchaa k'ophu ẹkali ngu rwuchaaru eze-ẹnyimu; jerwuchaa eze-ẹnyimu, nọkuba mkpukpu Jiaza. Ọle e mebyishiwaru iphe, bukpuo akpuru ngu.
- ³³E wofuwaru ẹhu-utso yẹ eme emereme l'egu oshi-omi ndu Mówabu yele alı pẹ. Mę bẹ mu mewaru g'a ba kutajehe l'eka aakuje mę. Ophu ọ duedu onye anọdujekwadu akwa ẹvu mę a -nọdu akụ iya. A makwaru-a l'aanọduje anu olu l'eka ono; ọle ọ tọ buedu olu onye akwa ẹvu.
- ³⁴Mkpu, ẹphe echi ngakọtaakwaru. E shi lẹ Hęshibonu chikọta mkpu ọbu; je akpaa lẹ Eleyale; mękpoo lẹ Jiahazu. E shi lẹ Zowa chia ya jasụ lẹ Horonayimu; waa ẹgulatu-Shelishiya; noo kele mini tashihuchaaru je akpaa lẹ ke Nimurimu.
- ³⁵L'alı ndu Mówabu bẹ mu e-me g'a gwabuhu iphe l'ẹnya ẹka aagwajẹ iphe; mee g'a ta akpojehe ụnwù-isensu oku nụ agwa pẹ.” Nokwa iphe, Chipfu eepfu bụ ono.

36“Oo ya bu l'obu mu aphụ swooswooswoo agụ aphụ ndu Mówabu g'onye aphụ ototo; ọ nọdu agụ aphụ ndu Kiru-Haręsetu g'onye aphụ ototo; kele urwu, ęphe ritaru bvụwaru.

37Onyemonye kpüşhiwaru ishi. Onyemonye kpüşhia ęjį-agba.

Ónyá-mma dukota onyemonye l'ęka. Onyemonye gbaphukọta uwe-aphụ l'upfu.

38Mbụ l'iphe, ada l'oma ọlo-eli, nọgbaa l'alį ndu Mówabu; me l'edupfu l'edupfu l'ophu ta adukwa iphe ọzo, gbahaa ọzu-ękwa; noo kele mu tsukposhiwaru ndu Mówabu g'ite, adudu onye ọ du ree.” Nokwa iphe, Chipfu eepfu bu ono.

39“Waa g'a tukashiru phe nanunanu! Waa g'ęphe atụ ọzu-ękwa wọwoowoo! Waa ge ndu Mówabu gude iphere ghaa azu! Ndu Mówabu buakwaa iphe, e gude agba mgbonu. Mbụ l'iphe, bukpuo ndu nọ phe ntse be ọnyi ishi ędzu.”

40Wakwa iphe, Chipfu eepfu baa: “Lenu! Ugo ephekwa raa ephezeta l'alį. O woru nkù iya jashia l'eli alį ndu Mówabu.

41Mkpukpu, nọgbaa ya nụ be aa-lwutachaa. L'a natachaa phe ọlo, ęphe edomije onwophe. Le mboku ono be obu ndu Ojogu ndu Mówabu a-duępho g'obu nwanyi, ime eme.

42Ndu Mówabu l'ophu be ee-mebyishi kele ęphe koru Chipfu okpa l'ishi.

43N-yemebvu; yęe iduma iduma; yęe ọnyà nọgbakwa echeru unu echeru; unube ndu Mówabu!” Nokwa iphe, Chipfu eepfu bu ono.

44“Onye nahuru n-yemebvu; l'odaba l'iduma. Onye nyifutaru l'iduma;

ọnyà a-nmata iya. Noo kele ọo iphe ono be mu e-gude byapfuta Mówabu l'apha, aa-nodu anụ iya aphụ.” Nokwa iphe, Chipfu eepfu bu ono.

45“Le mgboru mkpukpu Hęshibonu be ndu agba ọso ọgu pfuru nyęenyęe. Noo kele oku kpufuru le Hęshibonu. Mbụ l'onwu phuruphuru oku etsu l'ime mkpukpu Sihonu. O buerupho l'echi ishi be otsu ndu Mówabu. Mbụ okpu-ishi ndu ono, shi anoduje aba hanyihanyi ono.

46Nshio unube ndu Mówabu! Ndu Kemoshi be e mebyishiakwaru. Unwu unu nwoke be a kpukwaru le ndzu laa alį ọzo. Teme unwada unu phe buru ndu a lwutaru l'ogu laa alį ọzo.

47Ole mu e-mechakwaa dopu ndu Mówabu azu l'onodu phe le mboku, du l'iphu.” Nokwa iphe, Chipfu eepfu bu ono. Nokwa g'ikpe, e kperu ndu Mówabu jeberu bu onoya.

Jieremaya 49

Ozi ęhu ndu Amonu

1A bya l'opfu ęhu ndu Amonu; wakwa iphe, oopfu; mbụ Chipfu: ? Bu le Izurelu te enwedu unwegirima unwoke to? ? To nwedu onye e-ri iphe iya to? ? Denu g'o gude

Moleku gbẹ nata alì ndu Gadu; ọ buri okiphe iya? ? Denu g'o gude ndibe iya buri le mkpukpu iya be ephe bugbaa?

²Oo ya bu le-a; wakwa iphe, Chipfu epfu baa: Mu e-mechaa mee ge ndu mkpukpu Raba, no l'ali ndu Amonu numa mkpu ogu. O -rwua mboku ono be Raba a-buru ikpozu; teme unwu mkpukpu, no-pheru iya mgburugburu etsufukota l'oku. Noo teke ndu Izurelu a-chifu ndu shi chifu phe nu. Nokwa iphe, Chipfu eepfu bu ono.

³Unu tua uzu-ekwa; unube ndu Heshibonu; kele mkpukpu Eyayi be e mebyishiakwaru! Unu chishikwaa mkpu ike; unube ndu bu le Raba! Unu yekwaa uwe-aphu wata ara ekwa. Unu ekwoo gburugburu shia owa-a yee ophuu l'ime npherenphere igbulo mkpukpu unu ono; kele Moleku be aa-kpukwa le ndzu lashia ali ozo; yele ndu-uke, agwaje iya nu; me ndu-ishi iya.

⁴? Denu g'o gude i gude nsuda nsuda ngu eku onwongu; mbu gube nwada e gudedu ire ngu eka ono; mbu gube onye kporu obu ye l'eku ngu epfu su: ? Bu onye suru mu eme gunu?

⁵Lekwa; mu e-mechakwaa mee ge ndzu-agugu rwuta ngu. O kwa Nnajiuphu epfu iya; mbu Chipfu, bu Okalibe-Kakota-Ike. O buri ndu oo-shi l'eka bu ndu buperu ngu mgburugburu. G'unu hakpo o l'onye l'onye be aa-chifu achifu. Ophu o dudu onye a-chi-phuta ndu gbalawaru nu azu.

⁶“Ole mu e-mechakwaa dopu ndu Amonu azu l'onodu phe. Nokwa iphe, Chipfu eepfu bu ono.”

Ozi ehu ndu Edomu

⁷A bya l'opfu ehu ndu Edomu; wakwa iphe, oopfu; mbu Chipfu, bu Okalibe-Kakota-Ike: “? Mmamiphe ta adukpoedu le mkpukpu Temanu to? ? Okpobe idzu bvuwaru l'eka ndu maru eye onu l'opfu to? Mmamiphe phe ? o rehuwaru erehu to?

⁸Unube ndu bu le Dedanu; unu ghakobe gbalaa! Unu gbaba je edomia onwunu l'ime eka du omilomi; kele mu gudekwa ola-l'iswi abyapfuta oshilokpa Iso le teke mu abya iya anu aphu-a.

⁹O -buri le ndu awo akpuru vayinu byapfutaru ngu; ? ephe ta awo-phodojedu nwopfu du nwolemole? Ndu-oshi -bya ibe ngu l'enyashi; ? to buedupho iphe, mkpa iya duru phe be ephe e-wota kpoloko?

¹⁰Obenu l'oshilokpa Iso be mu gbabewaru oto. Eka ono, ephe edomi edomi ono be mu kpuhawaru ghebe onu; k'opfu ephe tee domikotaedu onwophe. Unwegirima phe; mekpoo abubu phe; mekpoo obutubu phe; lakotaru l'iswi; teme ephebedua chihukwapho.

¹¹Pakwaru unwu ogbee unu haa; kele mu e-me-a g'ephe nodu ndzu! G'unwanyi unu, ji phe nwuhwaru chiru upfu kwee l'ehu mu!”

¹²Wakwa iphe, Chipfu epfu baa: “O -buri le ndu agbaduru k'angu iphe, shi l'okoro ono anguchaa iphe, shi iya nu; ? bu gunu a-kpa g'a haa unu g'a ta nu unu aphu? A taa hakwa unu g'a ta nu unu aphu. Unu ngufutajekwa iphe, shi l'okoro ono;

¹³Kele-a; wakwa iphe, Chipfu ephu baa: Mu gudeakwa onwomu ria angu su le mkpukpu Bozura e-mechaa buru ikpozu; bya aburu iphe, aakpo-yiru ukuvu. Mbụ l'oo-buru ochobu; bya aburu iphe, eephu l'iphu. Teme iphe, bu mkpukpu ozo, nokota l'alị ndu Edomu a-bukotaru ikpozu jasụ l'ojejeje.”

¹⁴Mu numakwaru ozi, Chipfu ziru. Onye-ozu be e ziru g'ephe jepfu ohamoha su phe-a: “Unu dzukobekwa onwunu bya etsoo phe ogu! Unu gbalihukwa jeshia ogu!”

¹⁵Kele-a; lekwa; mu mewaru; i ha nwanshii l'echilabo ohamoha; ophu o dudu iphe, ndiphe guberu ngu.

¹⁶O kwa ebvu, i shi eyeje ndu ozo; yee eku-onwonye, no ngu l'obu ono dephuru ngu; mbu gube onye ono, bu l'ime agbara-mkpuma ono; onye bu l'eka ubvu kakota l'eli. O to dukwa m'obeta i je akpaa ephune ngu l'ephekerephe ephekerephe ge k'ugo; be mu e-shikwa l'eka ono mekota ngu li daa. Nokwa iphe, Chipfu eepfu bu ono.

¹⁷Ndu Edomu e-mechaa buru iphe, aakpo-yiru ukuvu. Iphe, bukpo ndu ghataru phe nu be ishi anyi edzu. Ephe egude iya gbaahaa mgbonu; o buru iphe, a-kpa iya nu bu eze iphe-ehuka ono, a-dapfu phe nu ono.

¹⁸Oo egube ono, e mebyishiru mkpukpu Sodomu yee Gomora ono; bya emebyishia mkpukpu le mkpukpu, nogbaa phe le mgboru ono; nokwa g'o to dudu onye e-bu l'alị ndu Edomu; ophu o dudu onye e-me iya unuphu. Nokwa iphe, Chipfu eepfu bu ono.

¹⁹“Lekwa-a! O kwa g'oduma shi l'oswa, no l'aguga enyimu Jiordanu kwofuta; bya adapfu aturu, doru l'odu aturu, nri du shii bukwapho ge mu e-kwo gburumu je achifu ndu Edomu l'alị iya l'otulupfu. ? Bu onye be mu hotaru g'o buru onye mu a-tu eka g'o mee iphe ono? ? Bu onye du ge mu du? ? Bu onye suru mu eku ikpe? ? Bu onye bu onye eche aturu, a-du ike pfuru ge mu l'iya mee?”

²⁰Oo ya bu le-a; unu numakwa idzu, Chipfu chiru le ya e-me ndu Edomu; mbu iphe, o chiru le ya e-me ndu bu le mkpukpu Temanu. O to dukwa iphe, a-kposhi g'a ta kputa unwu aturu iya me unwu egbu iya kpuhu; ndzu erwuta ndu ophu phoduru nu.

²¹Oda, oo-da teke ephe a-da be a-nmayichaa mgboko anmayi. L'a nodu le mgboru Eze-enyimu Uswe-uswe numachaa olu-ekwa phe.

²²Lenu! Ugo ephekwa raa ephezeta l'alị. O woru nkù iya jashia l'eli mkpukpu Bozura. Le mboku ono be obu ndu Ojogu ndu Edomu a-duepho g'obu nwanyi, ime eme.

Ozi ehu Damasukosu

²³A -bya l'opfu ehu ndu Damasukosu; “Ndu Hamatu yee ndu Apadu be e kpuakwaru iphu le ntu; noo kele ephe numawaru ejo nzi. Meji tofuwaru phe. Okpoma aphuwaa phe gbudugbudu g'eze-enyimu, a swongaru aswonga.

²⁴Ndu Damasukosu be eka tulwahuru. Ephe dakobeakwaru agbalawa agbala. Meji tofuakwaru phe atofu. Ejo iphe-ehuka gudeshiwaa phe ge nwanyi, ime eme.

²⁵? Denu g'o gude ophu a gwobeduru mkpukpu ono, a maru amaru ono? Mbu mkpukpu ono, tubaru mu l'anya ono?

²⁶Oo ya bu ɛ-a; unwokorobyia phe a-nodu ada pɔopoo l'oma gbororo. Ndu Ojogu phe l'ophu be ee-megbushibebe mboku ono. Nokwa iphe, Chipfu, bu Okalibe-Kakota-Ike eepfu bu ono.

²⁷Mu a-tu oku l'igbulu Damasukosu; l'ootsukota iphe, bu ulu, Benu-Hadadu kpuru kpushia ike.”

Ozi ɛhu Keda yee Hazo

²⁸A -bya l'opfu ɛhu ndu Keda yee ali-eze ndu Hazo, bu ophu Nebukadineza, bu eze ndu Babilonu lwu-kperu; wakwa iphe, oopfu; mbu Chipfu, bu Okalibe-Kakota-Ike: “Unu zelihi tsoo ndu Keda ugu! Unu mebyishia ndu shi uzu enyanwu-awawa!

²⁹Ulu phe, bu ulu ophu e meru l'ekwa; yee eggu yee aturu phe be aa-tuko rwuta. L'aachita ekwa phe; yee iphemiphe, ephe nweru enweru; mekpoo inya-kamelu phe. Ndiphe echi mkpu ekpu phe su phe: ‘Nggiri nokwa l'uzo l'ekameka.’ “

³⁰Wakwa iphe, Chipfu epfu baa: “Unu gbalakwaa agbala; unu gbamihukwa agbamihi! Unu jekwa anodugbaa l'ogba, du omilomi; unube ndu bu ɛ Hazo. Noo kele Nebukadineza, bu eze ndu Babilonu chiakwaru idzu unu k'iji; bya epfubuwa iphe, oo-me unu.”

³¹Wakwa iphe, Chipfu epfu baa: “Unu zelihi tsoo oha, tusaru ɛhu ugu, bu oha, bu ophu adudu onye ephe atsuh ebvu; mbu oha, ete nweudu oguzo; ophu o kpobeduru mgborigwe; teme ndibe iya buerupho noduru onwophe.

³²Inya-kamelu phe be aa-kwachaa l'okwata. L'e rwutakwapho ikpoto eswi phe l'ogu. Iphe, bu ndu bugba l'oha, du enya be mu e-wojeruro tukaa ɛ pherephere. Mu eshi l'uzo m'uzo mee g'oke iphe-ehuka dapfu phe. Nokwa iphe, Chipfu eepfu bu ono.

³³Mkpukpu Hazo l'e-mechaa buru aka nkuta-oswa a-dojeru; kele oo-buru ochobu jasu l'ojejoje. O to dudu onye byaru eburu l'eka ono. Mbu l'o to dudu nwoke, byaru akwabaa ya unuphu buru.”

Ozi ɛhu ndu Elamu

³⁴Wakwa Opfu Chipfu, bu ophu rwuru Jieremaya onye mpfuchiru nchi l'opfu ɛhu ndu Elamu. Teke o numaru iya bu ɛ ntsolohu teke Zedekaya wataru aburu eze ndu Jiuda.

³⁵Wakwa iphe, oopfu; mbu Chipfu, bu Okalibe-Kakota-Ike: Lekwa; mu a-gbajikwa apfu ndu Elamu, bu iya bu aka ike phe kpajiru.

³⁶Iphe, mu e-me g'o dapfu ndu Elamu bu uzi pherephere eno, shigbaa ɛ mgbureku akpaminigwe uzi eno. Mu a-tuka phe; ephe edzuru pherephere uzi eno. Ophu o dukpoda oha, nonu bu aka ndu Elamu ataa gbachadaa oso ugu laa.

³⁷Mu a-tukashi ndu Elamu nanunanu l'iphu ndu ohogu phe; mbu l'iphu ndu achu ndzu phe. Mu e-me g'ejo-iphe dapfu phe; mbu ɛ mu a-tu-koshi phe oke ɛhu-eggu mu. O kwa Chipfu epfu iya. Mu e-me g'e gude ugu-echi achi phe jasu teke mu e-me g'ephe ta aduhe.

³⁸Èka mu e-je ebvube aba-eze mu bu l'alì ndu Elamu. Mu emebyishia onye eze phẹ; yẹe ndu-ishi phẹ. Ọ kwa Chipfu epfu iya.

³⁹“Ole mu e-mechakwaa dopu ndu Elamu azu l'onodu phẹ l'atatiphu. Nokwa iphe, Chipfu eepfu bu ono.”

Jieremaya 50

Ozi ẹhu ndu Bábilonu

¹Wakwa opfu, Chipfu pfuru; ọ gbẹ l'ẹka Jieremaya, bu onye mpfuchiru pfua l'opfu ẹhu ndu Bábilonu; yẹe alì phẹ.

²“Unu raa ya arara radzuru iya ohamoha g'a numa-dzuru! Unu palia ẹkwa-ohubama raa ya g'a numa-dzuru! Unu ba adukwa iphe, unu a-ha l'azu. Ochia iphe, unu a-noḍu epfu bu-a: ‘Ndu Bábilonu bẹ a kpukwaru lẹ ndzu. Balu bẹ e mekwaru iphe-iphere. Teme Maruduku bẹ ndzu-agugu gudewaru. Ntekpe phẹ bẹ e mekwaru iphe-iphere. Teme e mee; ndzu-agugu rwuta iphemiphe ono, a kpuru akpukpu ono.’

³Oha, shi l'isheli gbeshiru g'o tsoo phẹ ọgu. Oo-me alì phẹ g'ọ buru ochobu. Ophu ọ dudu onye byaru ebubaaru eburu l'ime iya; nemadzu mekpoo anu a-tuko shi iya gbalaa.”

⁴Wakwa iphe, Chipfu epfu baa: “O -rwua mboku ono bẹ ndu Izurelu yẹe ndu Jiuda a-tugbabekwa gude enya-mini je achoo Chipfu, bu Chileke phẹ.

⁵Ephe a-ji aji uzo, e shi eje ubvu Zayonu woru iphu ghaa l'uzo ibiya ono epfugbaa su: Unu bya; g'anyi lẹ Chipfu tugba buru nanu l'ogbandzu ojejoje, a ta abyadu azoha azoha!

⁶Ndibe mu bu aturu, tuphahuru etuphahu. O buru ndu eche phẹ nu dusweru phẹ uzo; bya emee phẹ; ephe tsoru oma ubvu aghaphe. Ephe tsoru ubvu ubvu yele obvu obvu aghaphe; bya azohaa ẹka ephe anoduje atuta unme.

⁷Iphe, bukpo ndu humaru phẹ nu vuru phẹ kpatakpata. Ndu ohogu phẹ su: ‘Ikpe ta nmakwaru anyi; kele ephe mesweru Chipfu, bu okpobe onye-nche phẹ; mbu Chipfu, bu onye nna phẹ oche kporu obu yeru.’

⁸Unu gbafukwa lẹ Bábilonu! Unu lufukpoepho l'alì ndu Bábilonu alufu ophu! Unu dupeho ge mkpi, a chishiru dobe l'iphu ikpoto egu yẹe aturu!

⁹Noo kele-a; lekwa-a; mu e-jekwa akpalia ikpoto oha, paru ẹka; gude byapfuta Bábilonu ọgu. O buru ẹka mu e-me g'ephe shi bya bu l'uzo isheli. Ephe abya edokaa onwophe kwaberu iya. O buru ẹka ono bẹ ephe e-shi bya alwuta iya. Onu-apfu phẹ adu ge ke ndu maru agba apfu, bu ophu abujeru: ọ -gufu; ọ too gbaduru ẹka alwa.

¹⁰Oo ya bu lẹ ndu Bábilonu bẹ aa-kwa l'okwata. Ndu a-kwa iya okwata obu bẹ e-rjikpoo ephe.” Nokwa iphe, Chipfu eepfu bu ono.

11A makwaru-a l'unu ete ɛswa; ɛhu nɔdu atso unu; mbu unube ndu ono, vukaru okiphe mu ono. A makwaru-a l'unu azo kitimu kitimu ge nwada eswi, azoshi ereshi; teme unu nɔdu egbu ora g'okee inya.

12Ole iphere e-mechaa mee ne unu. Mbu l'onye ono, tsuru ime unu ono be ee-kpu iphu le ntu. Oo-mecha buru iya be enya a-kacha alwalwa l'ohamoha. Mbu l'oo-buru echiegu; yee mgbe gu ali-okponku; waa ali-eveevee.

13Eshinu ɛhu egbu mube Chipfu egbu be e tee bubaedu iya ebubu. Ochia l'aa-togbo iya l'oo-buru okorobo ochobu. Iphe, bukpuo ndu ghataru ali ndu Babilonu ono be onyi ishi edzu; ephe egude iya gbaahaa mgbonu. O buru iphe, a-kpa iya nu bu iphe ono, e mekagbaaru iya ono.

14Unu dokaa onwunu l'ophere l'ophere no-pee ndu Babilonu mgburugburu; mbu unube ndu agbaje apfu g'unu hakpo! Unu gbaje phe iya! Unu ba adukwa onu-apfu unu ophu unu a-gbaphodo me nanu; noo kele oo Chipfu be ephe meru iphe-eji!

15Unu chi mkpu-ogu kpu iya aka ebo ebo! Ike bvwaru iya; mkpoli, o turu k'ogu obu dakotawaru! E nwukposhiwa igbulu, no-pheru iya mgburugburu. Eshinu iphe-a bu emelata be Chipfu emelata; unu melata iya iphe, o shi emeje! Unu mee ya iphe, o shi emeje ndu ozo!

16Unu mee ge ndu ako opfu chihu le Babilonu. Ndu egbuje ereshi; ephe l'iphe, ephe gude egbu ereshi l'okpa-ji achihukwapho. Ndu ohogu phe e-gude ogu-echi mee; onyenonu aghaa iphu gbapfushia ndibe phe; mbu l'onymonye a-gbala lapfushia ndu ali iya.

17“Izurelu buakwaa aturu, a chikashiru achikashi. O buru oduma chikashiru iya. Ke mbu, vuru iya kpatakpata bu eze ndu Asiriya. Onye ikpazu, tapyashiru okpu iya buru Nebukadineza, bu eze ndu Babilonu.”

18Oo ya bu le-a; wakwa iphe, oopfu; mbu Chipfu, bu Okalibe-Kakota-Ike; bya aburu Chileke ke ndu Izurelu: O suru-a: “Mu a-nukwa eze ndu Babilonu aphu; yee ndu ali iya l'ophu; egube ono, mu nuru eze ndu Asiriya aphu ono.

19Obenu le ndu Izurelu be mu e-duphuta azu l'eka ephe shi buru. Ephe abyakwa anodu l'ubvu Kamelu; yee ali Beshanu riaha nri ozo. Ephe anodu l'ubvu ubvu Ifuremu; yele ali Giladu riaha nri; rijiaha ephe.

20Wakwa iphe, Chipfu epfu baa: O -rwua mboku ono; le teke ono gedegede be avokpuo g'a maru aka ikpe nmaru Izurelu; ole o to dudu ophu aa-cho-vu. L'avoo iphe-eji Jiuda nta voo imo; o to dudu iphe, aa-vota. Noo kele nwa ndu ono, mu meru g'ephe phodu ono be mu a-guru nvu.”

21Wakwa iphe, Chipfu epfu baa: “Unu tsoo ndu ali Meratayimu ogu; yee ndu bu l'ali Pekodu! Unu chia phe oso; gbua phe egbugbu; mee phe g'ephe bvueberu mu rengurengu! Unu mekota iphemiphe, mu suru g'unu mee!

22Ephu-ogu aphukwa l'ali ono; mbu ephe ola-l'iswi, paru aka apaa.

- 23**Waa g'ongu ndu mgboko l'ophu gbajishihuru tũkaa nanũnanu! Waa gę Bábilonu byawaru bya abũru ochobu l'echilabọ ọhamoha!
- 24**Mu gbaberu ngu ọnyà gube Bábilonu. I bya amaru; i dalahũwa iya. A hũma ngu gude ngu; kele ọo Chipfu bę iitso opfu.
- 25**Chipfu guhaakwaru ọlo-ẹku iya ghebe ọnu; bya atũko ngwọgu k'oke ẹhu-eghu iya chishia; kele Nnajiuphu, bũ Chipfu; bya abũru Ọkalibe-Kakọta-Ike; nwekwaru iphe, ọoby a ememe l'alị ndu Bábilonu.
- 26**Unu shikwa l'ekameka bya etsoo ya opfu! Unu guhashia ọba-ẹku iya ghebechaa ọnu! Unu rwukọbe iya kũbe l'ikpo l'ikpo g'eka a kũberu ereshi. Unu mee ya g'ọ bvũeberu mu rengurengu g'ọ tọ dukwa onye a-phọduru iya nũ!
- 27**Unu tũko oke-eswi iya gbushichaa! G'a chikotaru phę je l'eka ee-gbushi phę! Nshio phę; kele eswe nke phę rwuakwaru; mbũ eswe mbọku, aa-nũ phę aphũ.
- 28**Unu ngabekpodapho nchi nũma olu ndu agba ọso ọgu, bũ ndu shi l'alị ndu Bábilonu nahũ agba ala Zayonu eje epfu lę Chipfu, bũ Chileke anyi gwatawaru ọgwo iphe; mbũ ọgwo iphe, e meru eze-ọlo iya.
- 29**Mee gę ndu ọgba-afũ dzukọbe tsoo Bábilonu opfu; mbũ iphe, bukpo ndu maru ese ọta kikiki! Unu kpọbe ọlo-ẹkwa unu nọ-pee ya mgburugburu! G'ọ tọ dukwa mę onye lanũ, a-nahũ nũ! Unu pfũa ya ọgwo iphe, o meru! Unu mee ya iphe, o meru ndu ọzo; kele ọo Chipfu bę o kuru ọkpa l'ishi; mbũ Onye nsọ ke ndu Ízurelu.
- 30**Ọo ya bũ lę-a; unwokoroby a phę a-nọdu ada pọpoo l'oma gbororo. Ndu Ojogu phę l'ophu bę ee-megbushibębe mbọku ono. Nokwa iphe, Chipfu eepfu bũ ono.”
- 31**Wakwa iphe, Chipfu epfu baa: “Lekwa; mu bukwa ọgu dũru ngu; gube nwọphu eku onwongu; noo kele eswe nke ngu rwuwaru; mbũ teke aa-nũ ngu aphũ.
- 32**Onye eku onwiya bę ọpfu a-dũ l'okpa l'ọ daa. Ophu ọ dũdu onye a-pali iya nũ. Mu e-ye ọku lę mkpũkpu lę mkpũkpu iya, bũ ọku, e-tsu tsua iphemiphe, nọ iya mgburugburu.”
- 33**Wakwa iphe, oopfũ; mbũ Chipfu, bũ Ọkalibe-Kakọta-Ike: “Ndu Ízurelu bę eemekwa ewere; nokwaphọ g'eeme ndu Jiuda. Ndu kpũru phę lę ndzũ gudeshia phę ike. Ophu ẹphe ekwedu g'ẹphe laa.
- 34**Obenu l'onye agbafutaje phę nũ bę ike dũ. Iphe, ọza bũ Chipfu, bũ Ọkalibe-Kakọta-Ike. Ọo-byakpọo ẹhuka ẹhuka bya phę agbaru ọdzori; k'ophu oo-me g'a tũtaaha unme l'alị phę; mekwanaa gę ndu ọphu bu l'alị ndu Bábilonu ta tũtajehe unme atũta.”
- 35**Wakwa iphe, Chipfu epfu baa: “Ogu-echi a-bũru ọgu dũru ndu Bábilonu! Mbũ l'ọo-bũru ọgu dũru ndu bu lę Bábilonu; mę ndu-ishi iya; yę ndibe iya, bũ ndu maru iphe!
- 36**Ogu-echi a-bũru ọgu dũru ndu mpfuchiru iya epfu iphe, mu epfuduru ono; k'ophu ẹphe a-bũkotaru ndu eme eswe. Ogu-echi a-bũru ọgu dũru ndu ojogu iya; k'ophu ndzũ-agũgu e-rwuta phę ọkpobe erwuta.

³⁷Ogu-echi a-buru oḡu duru inya iya; yee ugbo-inya iya; yee iphe, bukpo ndu Ojogu, byaru abyabya, no iya l'ime; k'ophu g'ephe ha a-bukotaerupho unwanyi. Mbua-a; ogu-echi a-buru oḡu duru ulo-eku iya; k'ophu aa-kwakota iphe iya l'okwata.

³⁸Okpomoku a-byapfuta mini, du iya nu; k'ophu oo-tukoepho tashihuchaa. Noo kele o bu ali, aagwo obvu. Obvu ono-a be ndzu-agugu e-mechaa gbaghaa iphu.

³⁹Oo ya bu l'iphe, e-mechaa buru l'eka ono a-buru anu-egbudu yele achi-anmabu. Teme o bukwarupho l'eka ono be mgbashi-ujiku e-buru. Ophu a byadu ebubaaru iya eburu. Mbua l'e tee bubaedu iya; e -shi l'ogbo sweru ogbo.

⁴⁰Wakwa iphe, Chipfu epfu baa: O kwa egube ono, Chileke mebyishiru Sodomu yee Gomora; yee mkpukpu, no-pheru iya mgburugburu ono bu g'o to dudu onye byaru eburu l'ime iya; ophu o dudu nwoke, byaru akwa iya unuphu buru.

⁴¹Unu lenu! O nweru ndu Ojogu, shi l'uzo isheli abya. Mbua l'oo oha, paru eka apaa; bya aburu eze ndu du igwerigwe be e jeru akpalia; ephe shi l'eka igwe beru ali beru eje abya.

⁴²Iphe, e gude kwaa phe ngwogu buru apfu yee arwa. Ephe du njo; teme ophu ephe aphuduru nemadzu obu-imemini. Ephe anoduje aphu g'enyimu, aphu gbudugbudu l'eka ephe agba l'eli inya phe eje abya. Ephe dokaru onwophe ge ndu keru oḡu abyapfuta gube nwada Babilonu!

⁴³Eze ndu Babilonu numawaru ako phe; eka kuda iya. Ndzu-agugu gude iya; iphe meahaa ya ehuka ge nwanyi, ime eme.

⁴⁴Lekwa-a! O kwa g'oduma shi l'oswa, no l'aguga enyimu Jidanu kwofuta; bya adapfu aturu, doru l'odu aturu, nri du shii bukwaphe ge mu e-kwo gburumu je achifu ndu Babilonu l'ali iya l'otulupfu. ? Bu onye be mu hotaru g'o buru onye mu a-tu eka g'o mee iphe ono? ? Bu onye du ge mu du? ? Bu onye suru mu eku ikpe? ? Bu onye bu onye eche aturu, a-du ike pfuru ge mu l'iya mee?

⁴⁵Oo ya bu le-a; unu numakwa iphe, Chipfu chiru le ya e-me Babilonu; mbua iphe, o chiru le ya e-me ali ndu Kaludiya. O to dudu iphe, a-kposhi g'a ta kputa unwu aturu iya me unwu egbu iya kpufu. Ndu ophu phoduru nu be ndzu e-rwuta.

⁴⁶Teke aa-lwuta Babilonu be oo-da too; k'ophu oo-nmayichaa mgboko anmayi. Ohamoha anuma-dzuchaa olu-ekwa phe.”

Jieremaya 51

¹Wakwa iphe, Chipfu epfu baa: “Unu lekwa; mu a-kpali onye mmebyi g'o buru oḡu duru ndu Babilonu; mbua ndu bu l'ali, aza 'obu ndu wu-lihuru etso mu opfu'.

²Mu e-zi ndu ohozo g'ephe je etsoo ndu Babilonu oḡu; g'ephe je aphuchaa phe aphucha; mee ali phe adabyiru iphoro. Ephe a-nodu abya iya oḡu eka ebo ebo me o -rwuepho mboku ono, ee-mebyishi phe ono.

- ³G'onye agbaję apfu te setakwa ụta iya k'agbagba; ọphu ọ kwakwa onwiya ngwogu. Unu ta aphukwaru unwokorobya phe obu-imemini. Unu mee ndu ojogu phe g'ephe bvụeberu mu rengurengu.
- ⁴Aa-nodu egbushi phe; ephe ada gbiigbii l'alị ndu Babilonu. Mbụ l'aa-nodu emeka phe iphe okpobe emeka l'aguga gbororo.
- ⁵A makwaru-a l'alị ndu Ízurelu ephe le ndu Jiuda l'ophu bu iphe, jiru iya nu bu ikpe-anmanma, nmaru phe l'iphu Onye Nso ke Ízurelu. Oke Chileke phe, bu Chipfu bya aburu Okalibe-Kakota-Ike teke agbadokwa phe.
- ⁶Unu gbaa oso shi l'alị ndu Babilonu gbalaa! G'onyenonu dzoo onwiya ndzu! G'e be mebyishikwa unu opfu l'ephe meru iphe-aji; noo kele o rwuakwaru teke Chipfu e-melata; mbu teke oo-pfu phe ugwo, gbaru phe nu.
- ⁷Babilonu shi buru okoro, e meru le mkpola-ododo l'eka Chipfu. O gude iya mee mee tsuaha ndu mgboko l'ophu. Ohamoha nguru mee, shi l'okoro ono. Oo ya meru g'o gude ephe meahaa obvu obvu nta-a.
- ⁸Babilonu dawaru l'otulupfu tsukposhihu. Unu rashia ekwa iya ike! Unu kpatakwaru iya obvu-etete g'o mebe l'eka iphe eme iya ehuka. ? A maru l'oo-shi nno buru iya ewekorohu?
- ⁹'Anyi gege emetakwa Babilonu iphe, eme iya nu; ole o to nwehedu ewekorohu. G'anyi paru iya haa g'onyenonu lashia alị iya; kele ikpe, nmaru iya nu rwaru akpaminigwe; mbu l'o ha ephekerephe g'eka urwukpu no.'
- ¹⁰'Chipfu meakwaru; anyi buru ndu pfuberekoto ozo! Unu bya g'anyi je l'ubvu Zayonu je akoo iphe, Chipfu, bu Chileke anyi meru!'
- ¹¹Unu rwachaa onu apfu unu arwacha! Unu achị-lia iphe, unu egudeje egbobuta onwunu! Chipfu kpaliakwaru ndu eze ndu Midiya; noo kele iphe, o tuberu bu g'o mebyia alị ndu Babilonu. Chipfu a-gwata ugwo iphe; ugwo iphe, e meru eze-ulo iya.
- ¹²Unu palia ekwa-ohubama gude goshi l'ogu duru igbulo mkpukpu Babilonu! Unu cheshi nche ike! Mbụ-a unu mee ge ndu nche nodu le nche! Unu eje l'egbudu je edokaa ndu mpya-ogu; kele Chipfu e-mekwa iphe, o tuberu; mbu iphe, o chibuhawaru le ya e-me ndu bu le Babilonu.
- ¹³Unube ndu bu l'aguga enyimu; teme unu nweru eku shii; ndzu unu bvukwaru! Mbụ l'eba-oghu ndzu unu ghabuhakwaru!
- ¹⁴Chipfu, bu Okalibe-Kakota-Ike gudeakwa onwiya ria angu su le ya a-chiru nemadzu ye le mkpukpu ono; ephe eji iya kpimu; sweta iya g'eka igube swetaru. Teme ephe atua okoo kpua unu.
- ¹⁵Oo okpehu iya be o gude mee mgboko. O buru mmamiphe iya be o gude mee mgboko; o nguru anguru; bya egude nkwamenya iya phushi akpaminigwe.

16O -mee; igwe raa órà; mini, nọ l'imigwe aphua gbudugbudu. O nọdu emeje g'urwukpu shi l'eka igwe beru sọru sọfuta. Teke o meru; igwe nọdu edze mini l'ootukwapho egbigwe. Teme o nọdu eshije l'ulo eku iya kpofuta pherephere.

17Nemadzu l'ophu te enwedu egomunggo. Teme ophu o dudu iphe, o maru. Iphere gudekota iphe, bukpo ndu akpu uzu; o buru ntekpe, ephe kpushiru meru phe iya; kele ntekpe phe obu bukota ughoshi. O to dudu ophu atu unme.

18Ephe bukota iphe-mmanu; iphe, e gude agba mgbonu. O -rwuepho teke aa-nu phe aphu; ephe alaa l'iyi.

19Onye ono, bu okiphe oshilokpa Jiekopu ono ta adukwa ge ndu k'ono; kele oo ya bu onye meru iphemiphe; mechakpoo okpa-ipfu ono, bu okiphe iya ono. Onye ono be ephe iya bu Chipfu, bu Okalibe-Kakota-Ike.

20O kwa ngu bu ogbunku, mu gude alwu ugu. O bu ngu be mu egudeje chikaa oha l'ophu. O buru ngu be mu egudeje mebyia ali-eze l'ophu.

21O bu ngu be mu egudeje chikaa inya; yee ndu no phe l'eli. Mu nọdu egudeje ngu chikaa ugbo-inya; yee ndu agba iya nu.

22O bu ngu be mu egudeje chikaa nwoke yee nwanyi. O buru ngu be mu egudeje chikaa ndu bu ogerenya; yee ndu bu okorobya. O buru ngu be mu egudeje chikaa nwoke ogbaga; yee nwanyi ogbaga.

23O buru ngu be mu egudeje chikaa onye eche aturu; yee aturu iya. O buru ngu be mu egudeje chikaa onye ako opfu; yee eswi, o gude ako iya. O buru ngu be mu egudeje chikaa ndu achị oha; yee ndu-ishi.

24“Teme; ozo bu le mu a-noduepho unu l'iphu pfua Babilonu; yee iphe, bukpo ndu bukota l'ali ndu Babilonu l'ophu ugwo iphe, ephe meru l'ubvu Zayonu.” Nokwa iphe, Chipfu eepfu bu onoya.

25Wakwa iphe, Chipfu epfu baa: “Lekwa; mu bukwa ugu duru ngu; gube ubvu ono, anoduje emebyishi emebyishi ono; mbu unube ndu ono, mebyishikotaru eliphe l'ophu ono. Mu a-machiru ngu eka l'oburu ugu duru ngu. Mu eshi le mkpakpa-onu ubvu pfua ngu phuzeta l'ali; mee ngu l'iiburu ubvu, a kporu oku.

26Ophu o dudu mkpuma aa-kwata l'ehu ngu k'eme mkpuma, gude ulo. Ophu o dukwapho mkpuma, shi iya nu, e gude atu okpa-ulo. Noo kele ii-dabyiru buru okorobo-egu jasụ l'ojejoje. Nokwa iphe, Chipfu eepfu bu ono.

27Unu palia ekwa-ohubama l'ali ono! Unu gbua opu tsoru ohamoha! Unu dozia ohamoha g'ephe tsoo ya ugu. Unu eje ekua ndu ali-eze, nonu g'ephe tsoo ya ugu; ndu Araratu; waa ndu Mini; waa ndu Ashikenazu! Unu hota onye-ishi-ojogu, a-buru iya ugu! Unu achifuta inya ye g'o zeru gbiigbiigbi je g'eka igube etsu.

28Unu dozia ohamoha g'ephe tsoo ya ugu; mbu ndu eze ndu Midiya; waa ndu achị oha phe; waa ndu-ishi phe; mekpoo ndu ali eka nokota phe l'eka g'ephe hakota.

- ²⁹Alì anma jiiijiii bya echi gburugburu; kele iphe, Chipfu chiru k'eme ndu Bábilonu dukwa g'ò dū. Mbū l'oo-me alì Bábilonu l'ophu l'òoburu ochobu; k'ophu bụ l'ò tọ dudu onye byaru ebubaaru iya eburu.
- ³⁰Ndu ojogu ndu Bábilonu bẹ hakwaru alwu ogo lachaa je anodu l'ulo phe, a kpushiru ike. Ike bẹ bvukotawaru phe nu; ephe duwaa g'unwanyi. Eka ephe bu ebubu bẹ a tuwaru oku. Mgboro-igwè, o gude gbaa upho iya bẹ a nyajishiwaru.
- ³¹Onye okpa-egwa lanu anoduje agba etso nwibe iya; onye-ozì etso onye-ozì ozo; bukpoerupho ndu eje ezi eze ndu Bábilonu l'a nataakwaru iya mkpukpu iya l'ophu l'ophu.
- ³²Eka mini asokahu asokahu bẹ a kuchichaakwaru; bya atufu oku l'uda l'uda, dugbaa l'eka ono. Ndu ojogu bẹ meji tofuwaru.”
- ³³Wakwa iphe, oopfu; mbū Chipfu, bụ Okalibe-Kakota-Ike; mbū Chileke ke ndu Izurelu: “Nwada Bábilonu dukwaa g'alì eka aazoshi eswa le balì teke aazo iya tolitoli. Teke aa-kpa iya g'onye akpa ji rwuakwaru.”
- ³⁴“Nebukadineza, bụ eze ndu Bábilonu ripyawaru anyi. O mewaru; ophu anyi amaedu iphe, anyi eme. O mewaru anyi; anyi buru ite iphoro. Oo g'ejo agwo elweje iphe-a bụ g'o lweru anyi bya egude eku anyi rijia ephe; bya agbe teke ono gbofu anyi.
- ³⁵G'iwashi, e weru l'anu-ehu anyi tukokwaru ndu Bábilonu l'ehu!” Nokwa iphe, ndu bu l'ubvu Zayonu epfu. “Ge mee anyi tukokwaru l'ishi ndu bu l'alì ndu Bábilonu!” Nokwa iphe, ndu bu le Jierusalemu epfu.
- ³⁶Oo ya bụ le-a; wakwa iphe, Chipfu epfu baa: “Lekwa; mu a-gbaru unu odzori; melata iphe, e meru unu. Enyimu phe bẹ mu e-me g'ò tashihu; bya emee ogba mini phe g'ò tashihuchaa.
- ³⁷Bábilonu e-mechaa buru ikpozu; eka nkuta-oswa bugbaa; waa iphe, a-nodu anyi ishi edzu; teme l'e gudekwa iya pho agba mgbonu; eka o tọ dudu onye bya eburu iya eburu ozo.
- ³⁸Ndibe iya g'ephe ha asugbaa ekiri g'oduma. Mbū l'ephe asugbaa kororo g'unwu oduma nshii.
- ³⁹Obenu l'oo teke ono, oonwu phe phuruphuru g'oku ono bẹ mu e-shiru phe nri obo- iphe; mee mee atsuhaha phe; k'ophu ephe a-chiepho ochi kpokirihuchaa akpokirihu; kuwaruro mgbenya, ephe tee tehubaedu etehu. Nokwa iphe, Chipfu eepfu bụ ono.
- ⁴⁰Mu a-kwata phe tua l'alì g'unwu aturu, a chi eje egbushi; mbū g'ikpoto ebili; yee ikpoto eghe.
- ⁴¹Lewaro g'e gude gude ndu Sheshaku; g'e gude lwuta ndu ndiphe l'ophu shi gude eku onwophe. O buakwaa iphe, anyi ishi edzu l'echilabo ohamoha.
- ⁴²Enyimu byaakwaru utso ripyabe alì ndu Bábilonu. O buru gborogboro, ooso bẹ o gude soyyabe iya.

- ⁴³Mkpukpu le mkpukpu, no iya nu bukataru ochobu; kpohu nku; buru ali evevee; ali eka adudu onye bu iya nu; ophu o dudu onye eshi iya eshishi.
- ⁴⁴Mu a-hu Balu ahuhu l'ali ndu Babilonu. Mu emee ya l'o gbao iphe, o lwehawaru elwelwe. Ohamoha taa wuedu awu-pfu iya. Teme igbulo mkpukpu Babilonu adakposhihu.
- ⁴⁵Ndibe mu; unu shikwa l'ime iya wufuta! Unu gbakwaa oso ndzu unu! Unu gbalakwaaru oke ehu-eghu Chipfu!
- ⁴⁶Ge meji ta tofukwa unu; ophu unu atshukwa ebvu; teke unu a-wata anu ude ogu l'ali ono; a -tukpoo owa-a apha-a; apha ozo laawata ozo; mbu teke iwashi adu l'ali ono; teme onye-ishi anodu etso onye-ishi ogu.
- ⁴⁷Oo ya bu; o nweru teke dufutaje nu, bu teke mu a-nu nshi ndu Babilonu aphu. Ali phe l'ophu be ee-me iphe-iphere. Ndibe iya, e gburu egbugbu adabyigbaaru adabyiru l'ime iya.
- ⁴⁸Noo teke imigwe; me eliphe l'ophu; yee iphe, bukpuo iphe, nokota iya nu a-tu uzu l'eka ehu atso phe utso l'opfu ehu ndu Babilonu; kele ndu mmebyi, shi l'uzo isheli abya phe etso ogu." Nokwa iphe, Chipfu eepfu bu ono.
- ⁴⁹"O kwa ge ndu Babilonu meru ndu mgboko l'ophu; ephe daa poopoo bu ge ndu Babilonu ono a-da poopoo ephebedua. O buru iphe, kparu iya nu bu g'ephe gude gbua ndu Izurelu.
- ⁵⁰Unube ndu nahuru ogu-echi; unu tugbuekwapho! Unu be jekpokwa anmarwube! Unu nodukpooro uzanya nyata Chipfu! Unu anyatakwapo Jierusalemu!"
- ⁵¹"E kpuakwaru anyi iphu le ntu; kele a kowaru anyi onu. Teme iphere kpuchiwaa anyi iphu; noo kele ndu ohozo bahuru l'eka dugbaa nsu l'ulo ke Chipfu."
- ⁵²Wakwa iphe, Chipfu eepfu baa: "Mboku abyanu-a, bu mboku, mu a-nu nshi aphu. O buru iphe, a-nodu ada l'ali iya l'ophu bu atsu ude, ndu e mekaru iphe atsu.
- ⁵³O to dukwa m'obetaru Babilonu jerwuchaa akpaminigwe; bya emee ulo, a kpushiru ike nkiya, du ephekerephe; mee ya; ophu aabahudu iya abahu; be mu e-yele-a ndu e-je emebyishia ya. Nokwa iphe, Chipfu eepfu bu ono.
- ⁵⁴Uzu-ekwa adakwa le Babilonu; uzu, egoshi l'e mebyishiwaru iphe, paru eka l'ali ndu Babilonu.
- ⁵⁵Chipfu abyawaa emebyishi Babilonu; byanyikota oke uzu ono, aanoduje atu l'ime iya ono. Ndu ohogu atu akpara g'eze-enyimu abya. Uzu, ephe a-nodu atu ala ephekerephe.
- ⁵⁶Noo kele onye mmebyi byawaru emebyishi Babilonu. Ndu ojogu iya be a kpuchawaru le ndzu. Teme a gbajishiwa uta phe mkpurikpu mkpurikpu; kele Chipfu bu Chileke, apfuje nemadzu ugwo g'iphe, o meru gbaru. O je l'apfu iya ugwo pfu-dzua ya ya apfu-dzu.

⁵⁷Mu e-me gę ndu-ishi iya; yęe ndibe iya, maru iphe; yęe ndu-ishi ojoęu iya; mę ndu-ishi mkpukpu phe; mękpoo ndu ojoęu phe; ngua mee g'o tsu phe atsutsu. Mgbenya atuko tushi phe; ephe tee tetabaędu eteta jasụ 'ojejeje.'” Nokwa iphe, oopfu; mbụ onye eze ono, bụ Chipfu; bya aburu Okalibe-Kakota-Ike ono.

⁵⁸Wakwa iphe, oopfu; mbụ Chipfu bụ Okalibe-Kakota-Ike: “Igbidigbi igbulo Babilonu ono be ee-tsukposhichaa etsukposhi. L'a tufu oku l'ephekerephe onu-abata iya ono. Ndiphe eria aphụ see akanya ke mmanu. Ohamoha abuerupho oku be ephe e-jeru ozi jasụ ike abvu phe.”

⁵⁹Wakwa ozi, onye mpfuchiru Chileke, bụ Jieremaya ziru Seraya, bụ nwa Neraya bya aburu nwanwa Maseya; teke ono, o jeru Babilonu ono; o buru ephe le Zedekaya swi; mbụ eze ndu Jiuda teke o buwaru eze apha eno. Seraya ono bụ onye-ishi, bụ iya achotaje aka ndu ije a-kwaje.

⁶⁰Jieremaya tukoeppo ejo-iphe, a-nwuru Babilonu dekota l'ekwo; mbụ iphemiphe ono, e dekotaru k'opfu ehu Babilonu ono.

⁶¹Iphe, o pfuru Seraya bụ: “Teke i jerwuekwarupho Babilonu; gukwaa iphemiphe-a g'a numa-dzuru.

⁶²Iphe, ii-pfufua bụ: ‘Gube Chipfu; i pfuwaru su l'ii-mebyishi aka-a; k'ophu bu le nemadzu tee buedu iya ebubu; ophu anu a-nodedu iya; l'oo-buru ochobu ojejeje!’

⁶³Teke i guchaerupho ekwo-a; l'iilibe iya mkpuma woru chie l'ime enyimu Yufurétisu.

⁶⁴Iphe ozo, ii-pfufua ye iya bụ: ‘Noo ge Babilonu a-tsu oturi bu ono; ophu oo-sebaedu ozo. O buru iphe, a-kpa iya nu bu ejo-iphe, mu abya eme g'o dapfu iya; ophu ike adubaedu ndibe iya.’ “Noo aka opfu Jieremaya jeberu bu onoya.

Jieremaya 52

Teke Zedekaya bu eze ndu Jiuda

(2Ndu 24:18-20; 2Iphe 36:11-16)

¹Zedekaya be nowaru ukporo apha l'apha lanu teke o wataru aburu eze. Iphe, o noru l'aba-eze le Jierusalemu buru apha iri le nanu. Epha ne iya bu Hamutalu nwada Jieremaya ke Libuna.

²O meru iphe, du eji l'enya Chipfu ge Jiehoyakimu meru.

³O buru ehu-eghu, eghu Chipfu be iphe ono gude nwua l'ehu ndu Jierusalemu; me l'ehu ndu Jiuda; jeye teke o chifuru phe l'atatiphu iya. Zedekaya nonyaa; bya ekwefuaharu eze ndu Babilonu ike.

Adada Jierusalemu

(2Ndu 25:1-7; 2Iphe 36:13-21; Jier 39:1-10)

⁴Tobudu iya bu; o be l'apha, kwe Zedekaya apha tete, o wataru aburu eze; l'abalı k'iri l'onwa iri; eze ndu Babilonu, bu Nebukadineza chita ikpoto ndu Ojoęu iya; ephe byatashia Jierusalemu. Ephe kepheta mkpukpu ono; bvuphee ya ose-ogu mgburugburu.

- ⁵Ɛphe kepheta mkpukpu ono jeye l'apha, kwe eze, bu Zedekaya apha iri le nanu; e -shi teke o wataru abu eze.
- ⁶G'o rwuru abali ke tete l'onwa eno be egu-ememe, du le mkpukpu ono kabaa njo; k'ophu ndu bu iya nu te nwehedu nri, ephe e-ri.
- ⁷O rwua mboku ono; e tsukpoo igbulu mkpukpu ono. O be l'enyashi iya; ndu Ojogu l'ophu tsukahu gbalaa. Eka ephe shiru gbalaa bu l'onu oguzo ono, du le mgbaka igbulu labo ono, du le mgboru mgbabu eze. Teke ono be ndu ojogu ndu Babilonu kepheru mkpukpu ono mgburugburu. O buru eka ephe shiru bu uzo nsuda Araba.
- ⁸Ole ndu Ojogu ndu Babilonu chipyaberu eze, bu Zedekaya je egude iya le baswaa ali, du le Jieriko. Ndu Ojogu iya buhaa ya tsukashihu.
- ⁹Ɛphe kpu a eze, bu Zedekaya le ndzu; kpuru iya kpu-pfu eze ndu Babilonu le mkpukpu Ribula, bu eka o no nmaa ya ikpe.
- ¹⁰O buru le Ribula l'eka ono be eze ndu Babilonu no gbushia unwu Zedekaya; Zedekaya nodu ele iya enya; o nodu egbushi phe. O byakwapho bya atuko ndu-ishi l'ali ndu Jiuda gbushikota.
- ¹¹O bya aswoshia Zedekaya akpuru enya; bya egude egbirigba, e meru l'onirubvu tugbabe iya kputa lashia Babilonu; je eworu iya tua mkporo; o nodu l'eka ono jasu teke o nwuhuru.
- ¹²O bya erwua g'onwa ise du l'abali iri; l'apha, kwe Nebukadineza apha iri le tete, e -shi teke o wataru abu eze ndu Babilonu; Nebuzaradanu, bu onye-ishi ndu ojogu, eche Nebukadineza nche; mbu onye-ozu eze ndu Babilonu ono jeshia Jierusalemu.
- ¹³O je atua oku l'eze-ulo Chipfu; me l'ulo-eze; me l'ulo, dukota le Jierusalemu; mbu l'ulo ndu oke amadu be o tukotaru oku.
- ¹⁴Iphe, bu ndu Ojogu, onye-ishi ojogu ono, echeje eze nche chi; ephe je l'eka ono; be tsukposhiru igbulu, e gude kpu-pheta Jierusalemu mgburugburu.
- ¹⁵Nebuzaradanu, bu onye-ishi ndu ojogu, echeje eze nche toko iphe, bu ndu phoduru le mkpukpu ono rwukoo lashia Babilonu; ephe le ndu lapfuru eze ndu Babilonu alapfu; mekpoo ndu emeje ona, phoduru nu.
- ¹⁶Onye-ishi ndu ojogu ono, bu Nebuzaradanu be ndu ophu o haru haa bu ndu ophu kachakpoo aburu ndu ukpa l'ali ono; g'ephe jeje ozi l'opfu-vayinu; me l'opfu.
- ¹⁷Itso onyirubvu, du l'eze-ulo Chipfu; me ogba-kperekpere; me iphe ono, e shi eyeje mini ono, e gude onyirubvu kpu, du iya nu; be ndu Babilonu kupyashicharu akupyashi; vuta onyirubvu ono lashia ali Babilonu.
- ¹⁸Ɛphe vutakwarupho ite; me iphe, eegudeje ekpo nu; me iphe, apaje oghu oroku; me gbamugbamu; waa iphe, bukpoo iphe, a kpuru l'onirubvu, eegudeje eze ozi l'eze-ulo Chipfu;

¹⁹Onye-ishi ndu ojogu ono bya achitakwapho eze ochi; yee iphe, aaguje oku; yee gbumugbamu; mekpoo ite; me iphe, aapfubeje oroku; mekpoo nkweka; mbu iphemiphe, bukpuo iphe, e meru le mkpola-ododo yee k'ochaa.

²⁰Onyirubvu, lakotaru l'itso labo ono; me l'iphe ono, e shi eyeje mini ono; yee oke-eswi onyirubvu iri l'ebo ono, shi nodu iya le mkpula ono; me l'o-gba-kperekpere ono, buchaa iphe eze, bu Solomonu meshiru dobe l'eze-ulo Chipfu; be erwa, du iya nu be ataa tukotadu onu iya.

²¹Itso ono be eli iya dugbaa nkwo-eka iri l'esato l'ehu l'ehu. Iphe, itso ono du gbaa mgburugburu buru nkwo-eka iri l'ebo. E meru itso ono; uzo du iya l'echi. Igbidigbi itso ono dugbaa mkpushi-eka eno eno.

²²Nchi-itso, a tu-koberu l'eli itso ono be eli iya du nkwo-eka ise ise. A bya egude ugbu yele itorokuma, a kpuchaaruru l'onyirubvu; tsophee ya mgburugburu. Itso k'ebo; yele itorokuma, akpuru dobe iya buru iphe lanu yele ophuu.

²³Itorokuma du ukporo eno l'iri l'ishii l'aguga iya. Mkpako itorokuma, akpuru dophee ugbu ono mgburugburu du ukporo ise.

A kpuru ndu-ishi ndu Jiuda le ndzu

(2Ndu 25:18-21)

²⁴Noo ya; onye-ishi ndu Ojogu ono, bu ndu anoduje eche eze nche ono bya akputa Seraya, bu onye-ishi ndu-uke Chileke le ndzu; kputa Zefanaya, bu onye-uke, etsota Sereya; me umadzu eto, echeje nche l'onu-abata eze-ulo Chipfu.

²⁵A bya abya le ndu ophu nokwadu le mkpukpu; o bya akputa onye aharu ahaha shi buru onye-ishi ndu ojogu; me umadzu esaa, shi agbazijeru eze idzu; kputa onye edejeru onye-ishi ndu ojogu ekwo, bu iya bu onye-ishi ndu egudeje ndu ali ono l'okpehu g'ephe je ugu; me ukporo umadzu eto, bu unwoke ali ono, a humaru le mkpukpu ono.

²⁶Nebuzaradanu, bu Onye-ishi ndu ojogu, anoduje eche eze nche ono toko g'ephe ha kputa kpu-pfuta eze ndu Babilonu le mkpukpu Ribula.

²⁷O buru le Ribula l'eka ono, du l'ali Hamatu be eze ndu Babilonu no gbushia phe. Noo g'e shi kpu ndu Jiuda le ndzu l'ali phe laa ali ozo bu ono.

²⁸Wakwa umadzu ole, Nebukadineza kpuru le ndzu lashia ali ozo. L'apha k'esaa, e -shi teke o wataru aburu eze be o chitaru ndu Jiuda unu umadzu esaa l'ukporo umadzu iri le nanu l'umadzu eto.

²⁹O rwua l'apha ophu kwe iya iri l'esato, e -shi teke o wataru aburu eze; o shi le Jierusalemu chita unu umadzu labo l'ukporo umadzu l'umadzu iri l'ebo.

³⁰O be l'apha, kwe Nebukadineza ukporo apha l'apha eto, e -shi teke o wataru aburu eze; Nebuzaradanu, bu Onye-ishi ndu ojogu, anoduje eche eze nche bya achilaaru iya ndu Jiuda, du unu umadzu l'ukporo umadzu iri l'esaa l'umadzu ise. Mkpako ndu a kpuru le ndzu buru unu umadzu iri le nanu l'ukporo umadzu iri.

A tufutaru Jiehoyakinu l'ulo-mkporo

(2Ndu 25:27-30)

31O buru l'apha, kwe Jiehoyakinu, bu eze ndu Jiuda ukporo apha l'apha iri l'esaa, e - shi teke a kpuru iya le ndzu be Evilu-Merodaku, byaru aburu eze ndu Babilonu. O buru g'onwa iri l'ebo du l'ukporo abali l'abali ishi; be o tufutaru Jiehoyakinu, bu eze ndu Jiuda ono l'ulo-mkporo.

32O pfuru opfu oma yeru Jiehoyakinu; bya edobe iya l'onodu, kakota ree eme le ke ndu eze ozo, a tukoru yele ephe kpua le ndzu laa ali Babilonu.

33O buru iya bu le Jiehoyakinu eyefu uwe mkporo iya; bya awata eri nri le teburu eze gbiriri jasu g'o no-beru.

34Mboku-mboku be eze anuje iya okpoga, oo-gudeje eme mkpa iya jeye g'o no-beru; mbu gbiriri jasu mboku, o nwuhuru.

Ebvü Aphü

Ebvü Aphü 1

Aphü, byaru Jierúsalemü

¹Lewarö gë mkpükpu ono dabyiru buru ochobu; mbü mkpükpu ono, nemadzu shi tsua erupfu ono! Lewarö g'ö byaru adü gë nwanyi, ji iya anöedu; mbü onye ono, shi paa éka apaa l'echilabö öhamoha ono! Onye ono, shi buru eze-nwanyi l'iphe, bü alí-eze l'ophu; bë byawa aburu ohu.

²Enyashi ophu bë öorakotaje ékwa akpö pfula pfula. Enya-mini, shi iya l'enya söshihu tsoru iya asha. Ndu yee ya dukota lë ree ta adüdu më onye öphu abyajë bya adüa ya obu. Iphe, bü ndu yee ya eshi

önüà bë dewaru iya ye. Ephe byawa abükotaru ndu öhogu iya.

³Gë Jiuda nöchaaru lë mkpamehu; bya ejee ozi mkpönwu éhu; bë ephe lashiaru öhozo. Nta-a bë o buwaa l'echilabö ndu öhozo. Öle ö to düdu éka ö humaru tuta unme. Ndu achi iya k'egude bë gbaburu iya iphu l'éka ö nö l'aphü.

⁴Üzo, e shi eje Zayönu bë agu aphü; noo kéle ö tó düedu onye eshijekwadu iya eje öbo-iphe, a turu önu iya. Öguzo, e shije abahu iya l'ophu bë dachishihuwaru nü. Ndu uke iya bë atsugbawaa ude. Iphe, bü unwumboko iya tuko nödu l'aphü. Yëbedua l'onwiya nödu l'oke iphe-ékuka.

⁵Ndu ephe l'iya düru l'opfu gbë buru ndu-ishi iya, teme iphe, nödu ejehuru phë. Ö buru ndu öhogu iya bë éhu dü guu; kéle öo Chipfu bë meru g'aphü dapfuta iya; kéle iphe-éji, o meru pawaru igwerigwe. Ünwegirima iya bë lakötawaru öhozo. Mbü lë ndu öhogu kpütachawaru phë lë ndzü.

⁶Übvü, nwada Zayönu shi dukota bë ö tó dühedu. Ndu-ishi mkpükpu ono dukotawa g'ele, ta ahümaduru irwu-éswa, öo-ta. Ike bvüwaru phë l'éka ephe agbalarü ndu achi phë nü.

⁷Lë mböku ono, mkpükpu Jierúsalemü watarü eje iphe-ékuka ono; mbü g'ö wataru aghaphe phuuri ono; bë ö nyatarü eguru iphe, o shi nweru teke k'ichee. O be teke ndu nkiya dabaru l'éka ndu öhogu; öphu ö tó düedu onye yeru iya éka. Ndu öhogu iya hüma iya; bya ajaahaa ya ewenu; kéle ö dakpöhuwaru.

⁸Mkpükpu Jierúsalemü meakwaru iphe-éji, parü éka apaa; shiwaa nno merwua onwiya. Iphe, bü ndu shi akwabeje iya übvü nödu akpöwa iya ébo l'afü; noo kéle ephe hümaru iya l'éka ö gba öto. Yëbedua l'onwiya nödu atsü ude; bya eworu iphu ghachi l'üzö ibe iya özo.

⁹Emerwüshi ono, o merwushiru onwiya ono bë raküwaru l'iphe, ö nma l'upfu. Ö tó rüdüru öri ri-vu egube iphe, a-dapfuta iya nü l'atatiphu. Öo ya bü; ö daa darwua alí k'öphu dü biribiri; Öphu ö tó düdu onye düa ya obu. Gübe Chipfu; hümanu egube iphe-ékuka, mü eje; Öhogu mü ono bë lwü-kpewaru nü!

10 Ohogu ono bẹ chitakotawaru iphe, bu ẹku, o nweru enweru. O humaru oha ono, bu ndu ta amadu Chileke g'ephe wubaru l'ulo, du nsọ iya; mbu ndu ono, gube Chileke dachiru abata le ndzukọ ndu nkengu ono.

11 Ndu nkiya g'ephe ha l'atsukota pfupfupfu l'eka ephe acho nri eriri. Ephe egudeje ẹku phe gbanweta nri; g'eeshi g'ephe dzukporu nu ndzu. "Gube Chipfu; lenaa enya nyata mu; kele a ta gubeeduru mu iphe."

12? To dudu iphe, o bu l'enya unube ndu aghata aghata? Unu chikakpodapho enya achika; maru ? o nweru iphe-ehuka, dujeru g'ophu mu eje-a? Mbu iphe-ehuka-a, e meru g'ọ dapfuta mu-a. O buru Chipfu be meru g'iphe-ehuka obu dapfuta mu; mbu le mboku ono oke ehueghu iya enwu phuruphuru ono.

13 O shi l'ephekerephe tufu oku; o bya atuko mu okpu kepyashiaha. O wotaru ugbu geberu mu ge mu ye okpa; bya enwuphu mu azu. O mewaru ge mu buru onye nkinyi; Mboku-mboku be mu anoduje aave aveve.

14 Iphe-eji, mu meshiru be o mewaru o buru odogoro; O gudewaa eka iya kekoo ya ekekoo. Ephe tukowa kwotobe mu l'olu. Nnajiuphu be mewaru ike bvụ mu; bya eworu mu ye l'eka ndu ka mu okpehu.

15 Nnajiuphu be jikawaru ndu ike du l'ogu, bu ndu ono, mu l'ephe shi nodu ono. O chikoberu ndu ojogu g'ephe bya etso mu ogu; mbu g'ephe gwee unwokorobyia mu arakabya. Nnajiuphu be zowaru nwada, yee nwoke akwajeduru ono bu Jiuda tolitoli; g'onye azoshi mee l'akpuru vayinu.

16 Oo iphe ono meru g'o gude mu nodu ara ekwa; mbu enya-mini nodu alwa mu ke putuputu l'enya. Ophu o to dudu onye no mu ntse, l'a-du mu obu; mbu onye l'e-me g'obu guzeta mu. Unwegirima mu buwaa nkinyi; Noo kele ohogu ono be lwu-kpewaru nu.

17 Mkpukpu Zayonu be chiliwaru eka g'a gbaaru iya mkpu; Ole o to dudu onye l'a-du iya obu. Chipfu tu-buwaru opfu ehue Jiokopu g'ekemu; mbu ge ndu bupheru iya mgburugburu bukotaru ohogu iya. Jierusalemu be buakwaa iphe, aaso nsọ l'echilabo phe.

18 Chipfu be emekwa iphe, pfuru oto; Noo kele oo mbdua be kwefuru ike l'ekemu iya. Unwu-eliphe; unu ngabekpodapho nchi; Unu lekpodapho egube iphe ehuka, mu eje! Unwada mu waa unwokorobyia mu be a kpukotawaru le ndzu.

19 Mu rakuru ndu mu l'ephe du le ree; Ephe woru mu dephua. Ndibe mu, bu ndu-uke; me ndu bu ogerenya be bukotawa mkpurupyata l'ime mkpukpu ono; l'eka ephe acho nri, ephe e-ri nodu ndzu.

20 Gube Chipfu; humanu aphu, byaru mu nu. Mu nowaa l'oke iphe-ehuka. Obu mu be te ebvueduru ebvuru; kele mu kwefunukawaru ike. L'ime mkpukpu be e gude oguechi egbushi nemadzu. L'ulo be buepho mgbu-onwu be no iya nu.

21 Ndiphe be numawaru ude, mu atsụ. Ole o to dudu onye l'a-du mu obu. Ndu ohogu mu g'ephe ha be numawaru k'aphu, byaru mu nu; Ephe nodu ete eswa l'oo ngu meru

mu iya. Mena a gę mbọku ono, i pfuru opfu iya ono rwua; k'ophu ẹphe a-du gę mu du-a.

²²G'ẹjo-ememe, ẹphe emegbabe rwuna l'ataphu ngu; Mena a phe ẹgube, i meru mu l'opfu le mu mesweru ono. Ude, mu atsu be panukawaru ẹka; meji nodu atofu mu atofu.

Ebvu Aphu 2

Ikpe Chipfu

¹Lenu gę Nnajiuphu gude urwukpu, shi l'ẹhu-eghu iya so-kpute nwada Zayonu. Odu-biribiri ndu Izurelu ono, e shiwaa wolia o jerwuwa l'imigwe ono be o kwadawaru l'ali. Mbọku ono, ẹhu eghe iya eghe ono be o to nyataduru ẹka ootu-kobeje okpa ono.

²Nnajiuphu be taswiberu obu tuko ẹka Jiékọpu bu mee umerekete; ophu o to phuduru iya obu-imemini. Oo oke ẹhu-eghu iya be o gude tsukposhichaa ẹka nwada Jiuda kpushichaa ike. O kwatsuwari ali-eze iya; me ndu no l'aba-eze iya; shi nno meru ujikputeru tu phe.

³O gude g'ẹhu-eghu iya enwu phuruphuru nashichaa Izurelu ike, o nweru enweru g'ọ ha. O sephuru ẹkutara iya azu le teke ono, ndu ohogu phe abyarwutawa. O tsupuyashiru Jiékọpu g'ọku, enwu enwunwu; mbu g'ọku, atukoje iphe, no iya mgburugburu tsukota.

⁴O setawaru apfu iya g'onye ohogu. O gudewaa ẹkutara iya seta iya ke jijiji g'onye ohogu. Iphe, bu ndu ono, du ubvu l'anya be o tukowa gbushia. O buru l'ulo-ekwa nwada Zayonu be o votaru oke ẹhu-eghu iya kpukposhi g'ọku.

⁵Nnajiuphu be duwaa g'ohogu. O mewaru Izurelu umerekete. O mebyishikotawaru ulo ibe-eze iya g'ọ ha; bya emebyishikotawa ẹka a kpukotaru o shihuchaa ike. Nggumaphu; waa ekwa-aphu be o mewaru o kabaa shii l'ẹhu nwada Jiuda.

⁶O gudewaa ehuka phokashia ẹka o bu g'onye phokashiru mgbabu; bya emebyishiwa ẹka ono, ẹphe edzokobeje ono. Chipfu be mewaru gę Zayonu zohachaa obo-iphe, nwegbaaruru teke aboje iya; mekwapho eswe-atuta-unme iya. O gudewaa g'ẹhu-eghu iya, enwube phuruphuru ophu o to gubeduru onye eze; waa onye uke iphe.

⁷Nnajiuphu be jikawaru oru-ngweja iya. O pawaru ulo iya, du nsọ haa. O wowaru ibe eze, dukota le Jiuda ye ndu ohogu l'eka. ẹphe nodu l'ime ulo Chipfu tua rwurwuru g'ọ bu mbọku, obo-iphe.

⁸Chipfu be pfuwaru iya hoo haa su l'oo-tsukposhikota igbulọ, e gude kpu-pheta nwada Zayonu mgburugburu. O kpabuwari iya oke. Ophu o sephuduru ẹka azu; haa ya emebyishi. O mewaru g'eka a kpushiru ike; waa igbulọ raa ekwa aphu. ẹphe tuko g'ẹphe ha yifukota.

⁹Onu-oguzo iya be mibachawaru emiba l'ime ali. Mgbo-igwe iya be o nyakwoshichawaru anyakwoshi bya eworu iya mebyishia. Onye eze iya; me ndu-ishi iya be lakotawaru ohozo je eburu. Ophu o duedu ekemu, no swiru phe nu. Ophu ndu mpfuchiru iya l'ophu aphujeedu ophulunya, shi Chipfu l'eka.

10Iphe, bu ndu bu ogerenya nwada Zayonu be gwodoshihuchawaru l'ali; tuko nodugbaa kpoyoo. Ephe chitawaru uwe-aphu yegbaa; bya ekpota urwuku kpube onwophe l'ishi; Unwumboko Jierusalemu be kpubewaru iphu l'ali.

11Mu kwawaru ekwa; enya duchawaa mu ragaraga. Mu nokwa l'oke iphe-ehuka; meji nodu akufu mu akufu. Iphe, kparu iya nu bu le ndibe mu be e meru ephe buru mkpurupyata. Unwegirima nshii; me ndu e he l'eka be mba tushiru l'oma gbororo mkpukpu.

12O buru ge mba atushiwa phe ge ndu e merwuru eh u l'oma gbororo mkpukpu ono; mbu teke ndzu phe eyifuwa eyifu l'utapfu ne phe; be ephe tuko arakugbaa ne phe asuje: “? Denu nri, anyi e-ri? ? Denu mee, anyi a-ngu?”

13? Bu gunu be mu e-pfuru ngu? ? Bu gunu be mu a-turu ngu yeru gube nwada, yee nwoke teke akwaswee ono, bu Jierusalemu? ? Bu gunu be mu a-su l'i du g'oo ya; k'ophu mu a-du ngu obu?

Onya, tukoru ngu eh u be aba ke yoyoyo g'eze-enyimu; ? Bu onye be e-me gi wekorohu?

14Ophulanya, ndu mpfuchiru ngu phuru ngu be bu uka be ephe dzuru ngu bya abukotaru iphe eswe. Ephe te kpuhaduru ejo-iphe, i meshiru goshi ngu; k'ophu e gege aha ngu akpu le ndzu. Iphe, ephe phuru ngu l'ophulanya be bu uka; Teme o buru iphe, dusweru ngu uzo.

15Iphe, bu ndu aghata aghata be akuje eka kpua ngu. Ephe aphuje okpuroswa; pheeru nwada Jierusalemu ishi kpakakpaka su: “? Bu mkpukpu-a, e shi ekuje ‘nwoma-mma-a’ baa; mbu ‘ehu-utso unwu-eliphe l'ophu ono?’ “

16Ndu ohogu ngu l'ophu be sawaru onu galaba kwaberu ngu. Ephe aphugbaa okpuroswa; bya ata ikireze asuje: “Anyi lwewaru iya! Oo ntanu-a be anyi shi ele enya iya ono. Nta-a be anyi nowa ndzu; huma iya l'enya.”

17Chipfu be mewaru iphe, o tuberu ememe. O mewaru iphe ono, o pfuru ono, bu iphe ono, o tu-buhawaru teke du enya ono. O kwatsuwaru ngu; ophu o to phuduru ngu obu-imemini. O mewaru g'ohogu ngu turu okoo kpua ngu; bya emewaa g'okpehu kabaa adu ndu i du ashi.

18Obu phe be arakugbawa Nnajiuphu; Gube igbulu, no-pheru nwada Zayonu; g'enya-mini shi ngu l'enya sonaa gborogboro g'enyimu; eswe l'enyashi! Ta adukwa teke jitu-tuta unme; ophu o dukwa teke enya a-nwu-buhu ngu gbugbugbu.

19Gbalihu chia mkpu ekwa l'enyashi; mbu le egube teke ono, nche abali awataje ono! Guha obu ngu wushiaru Nnajiuphu g'onye wushiru mini. Chilia eka ngu imeli raku iya l'opfu eh u unwegirima ngu, bu ndu mba l'atugbaa l'ishi mkpukpu; kele egu, eeme phe.

20Gube Chipfu; lenaa enya humadupho. ? Bu onye be i mejewaru egube-a? ? Bu g'unwanyi taahaa anu unwegirima phe; mbu unwegirima, angukwadu phe era? ? Bu g'e gbushiaha ndu-uke; me ndu mpfuchiru l'ulo-nsu ke Nnajiuphu?

²¹Egirima me ọgerenya be tukoru dabyigbaaru l'ali l'oma etsuzo. Unwokoro me unwumboko mu phe be e gudewaa ogu-echi gbukota. Oo mboku, ehu egu ngu egu be i gbushiru phe. I gbushiru phe; ophu i ti phoduru phe obu-imemini.

²²Oo g'eekukobeje k'obo-iphe-a; bu g'i kukoberu ndzu-agugu g'ephe swiphe mu mgburugburu. Le mboku ono, ehu egu Chipfu egu ono be o to dudu onye nahuru nu; ophu o dudu onye phoduru nu. Iphe, bu ndu mu heru hefuta be ndu ohogu mu saru osampfu.

Ebvụ Aphụ 3

Iphe-ehuka ndu Ịzurelu erwu Jieremaya l'ehụ

¹Oo mbedua bu onye gudekpoo enya mu huma iphe-ehuka ono, Chileke gude oke ehu-egu iya echi g'eechi mgboro ono.

²O chifuru mu; mee mu haa eje l'iphoro jeahaa ije l'ochii.

³Ire-lanu bu l'o gudewaa aka iya awago mu mboku-mboku.

⁴Anuehu mu; me akpo ehu mu be o mewaru o nodu ese eli. Okpu, no mu l'ehu be o ku-jishiwaru aku-jishi.

⁵O gude iphe, atso ilu waa iphe-ehuka kephee mu; mbu gude iya gbaphee mu mgburugburu.

⁶O mewaru ge mu nodu l'ochii; ge ndu nwuhuhawaru nu teke du enya.

⁷O kpu-phetaru mu mgburugburu; k'opu bu l'o to nwedu aka mu e-shi lufu alufu. O nyabewaru mu egbirigba, anyi-tsuta mu anyi-tsuta.

⁸Teke mu chiru mkpu nta chia imo; raa nta raa imo g'o gbaaru mu mkpu; O to ngabedu nchi l'epfufu, mu epfu anu iya.

⁹O gudewaa mkpuma, a gbakposhiru agbakposhi dochishia mu uzo; bya emewaa g'uzo mu dukota nggodogonggodogo.

¹⁰Oo g'agu akwagebeje-a bu g'o ze kwaberu mu; Mbu kwabe g'oduma, domiru onwiya edomi.

¹¹O nwufuru mu l'uzo, mu eshije; woru mu labushia nanu nanu; Bya agbado mu; mu dabyiru nkinyi mu.

¹²O setawaru apfu iya; o buru mbedua be o tuberu g'o gbaa ya.

¹³O wotaru apfu, shi l'ekpa apfu iya; woru iya suba mu obu.

¹⁴Mu buwaa onye ndibe mu anoduje atu uzu ochi; Mbu onye aanoduje aguru ebvu eswe l'enyasi gude aja mu ewenu.

¹⁵Oo iphe, atso ilu be o gude nu-jia mu ephe. O buru age be o cheru mu jasu o tsuaha mu atsutsu.

¹⁶O gudewaa ejirija kujishia mu eze; bya azowaa mu tolitoli le nu.

- 17I nafuwaru mu nchi-adu-doo; Mbụ lẹ mu zohawaru iphe, bụ iya bụ ẹhu-guu.
- 18Oo ya meru g'o gude mu nọdu epfu sụ: “Ike bvụakwaru mu; Ophu iphe, mu ele ọnya iya l'ẹka Chipfu erwuẹkwaru mu pho ẹka.”
- 19Mu nyataru iphe-ẹhuka mu; waa phururugbadaa, mu aghaphe; mbụ iphe ono, atso ilu; waa age ono.
- 20Oobujeru teke mu nyataru iya g'o ha; meji atofu mu.
- 21Oobujeru mu -nyata iphe lanu-a; obu eguzeta mu.
- 22L'oo n-yemobu Chipfu ono meru g'o gude ophu anyi atukodu lakota l'iswi. Noo kele obu-imemini iya te nweddu eberu.
- 23L'utsu g'utsu be n-yemobu waa obu-imemini Chipfu ono aduje ophuú
ophuú. Apfushi ike ngu be paru ẹka apaa.
- 24Iphe, mu epfufe l'obu mu bu l'oo Chipfu bu okiphe, mu ketaru. Oo ya meru g'o gude mu je l'anodu kwaberu iya.
- 25Chipfu be dukwaru ndu ono, no kwaberu iya nu le ree; mbụ onye ono, anoduje ele ọnya iya.
- 26Iphe, du ree bu ge nemadzu nọdu nggujungguji kwabe; nọdu kwaberu Chipfu g'o dzoo ya.
- 27Egube ivu-erwa ono be o duje ree ge nemadzu vua ya le teke o bu okorobyia.
- 28G'onye obu nọdu nggujungguji vuru iya nkinyi iya; Noo kele oo Chipfu boru iya ya.
- 29G'onye obu phozekwa kpube iphu l'ali; kele o nweru g'oo-du; l'e meeru iya iphe, oole ọnya iya.
- 30G'o dobe upfuru-nchi iya g'onye echi iya ẹka chita ike iya; O haa g'e gude iphe-iphere nu-jia ya epho.
- 31Kele Nnajiuphu taa -jikadu nemadzu jasụ l'ojejeje.
- 32O bu eviya l'oomeje g'aphu tsoru nemadzu; ole oophujekwapho obu-imemini. Kele n-yemobu iya be nyiberu anyibe.
- 33O too nodujedu atso iya utso g'o mee g'iphe-ẹhuka waa aphu dapfuta unwu-eliphe.
- 34G'e gude okpa zopyashia ndu ono, a turu mkporo le mgboko;
- 35mbụ g'a nafu nemadzu iphe, rwuberu iya nu l'atatiphu Okalibe-kangokotaru-nu;
- 36mbụ l'a -nafu nemadzu iswi-odu-mma, rwuberu iya nu; be iphemiphe ono g'o ha taa dukwa Nnajiuphu ree.
- 37? Bu onye a-du ike pfua opfu; mee ya g'o ree; m'o -buru le Nnajiuphu ta atuduru ekemu g'o ree?

- 38? Tòbudu Ọkalibe-kangokotaru-nu bẹ asuje g'iphe-ẹhuka waa iphe, du ree byapfuta nemadzu?
- 39? Bu gunu meru g'o gude nemadzu, no ndzu je anoduje atsushi aphu; le teke aahu iya ahuhu k'iphe-ẹji, o meru?
- 40G'anyi nyochana uto anyi; gbu ya igo; Lwaphuta azu lwapfuta Chipfu.
- 41G'anyi palinaa obu anyi imeli; Chi-liaru Chileke, no l'imigwe aka imeli su:
- 42Anyi meswewaru; bya ekwe fu ike; ophu i ti gueduru anyi nvu.
- 43I kpuchiteru onwongu ehu-eghu gude chia anyi oso. I gbuwaru anyi; ophu i ti phuduru anyi obu-imemini.
- 44I gudewaa urwukpu kpuchia onwongu; k'ophu o to dudu epfufu, anyi pfuru nu ngu e-rwuje ngu nchi.
- 45I mewaru anyi buru ndu du eka-oyi; buru ikpozu l'echilabo ndiphe.
- 46Ndu ohogu anyi l'ophu be sawaru onu galaba epfubyishi anyi.
- 47Ndu-agugu be rwutawaru anyi; a gbabewaru anyi onya. Mkpurupyata yee ola-l'iswi dapfutawaa anyi.
- 48Enya-mini, aso mu pho gborogboro l'anya ge mini nggele; Kele ndibe mu be e meru umerekete.
- 49Enya-mini ta abyadu asoshi-buhu mu l'anya; mbu l'onodujeepho aso mu mkpulumkpuru;
- 50jasu teke Chipfu a-gbe l'imigwe lee enya l'ali huma mu.
- 51Iphe, enya mu ahuma meru aphu ji mu obu. O buru k'unwada mkpukpu mu ono be kparu iya nu.
- 52Ndu ohogu mu anoduje achi nta mu g'onye achi nta enu l'ebe abu l'o nweru iphe, mu meru phe.
- 53Ephe nwuru mu ye l'ime nsu g'ee-shi g'ephe wota ndzu mu. Ephe nodu atu mu mkpuma.
- 54Mini rikputeru mu ishi; mu rja le mu chihuwaru.
- 55O buru l'ime wukirima nsu ono be mu no raku gube Chipfu.
- 56I numawaru arworwo, mu woru ngu su: Ba gbakwa mu nkuchi l'araku ono, mu rakuru ngu gi gbaaru mu mkpu ono.
- 57I kpiritaru mu ntse teke mu rakuru ngu ono. I su ge mu ba tsushi ebvu.
- 58Gube Nnajiuphu; o kwa ngu leri enya l'opfu ehu mu; bya agbafuta ndzu mu.
- 59Gube Chipfu; i humawaru-a ejo-iphe, e meru mu; hanaaru mu enge!

⁶⁰I hụmawaru g'ẹphe gwataberu mu ụgwọ iphe, mu meru; mękwapho ẹjo-idzu, ẹphe achikotaru mu.

⁶¹Gube Chipfu; i nụmawaru-a g'ẹphe ẹpfubyishi mu; mękwapho ẹjo-idzu, ẹphe achikotaru mu.

⁶²Mbọku-mbọku bẹ ndu ono, etso mu opfu ono; anọdujeepho agba mu mgbamu; bya achiru mu ẹjo-idzu.

⁶³Lewa pẹ rọ ẹn्या! Ẹphe -nọdu anọ; ọzoo l'ẹphe pfulu apfulu; bẹ ẹphe egudejẹ mu phọ agu l'ebvu;

⁶⁴“Gube Chipfu; pfulkwaa pẹ ụgwọ, gbaru pẹ nụ; mbụ ẹgube ono iphe, ẹphe meru du.

⁶⁵Kpọ-chikwaa pẹ obu akpọ-chi; G'ẹphe bukwaru ndu i turu onu.

⁶⁶Gudekwa ẹhu-eghu chipyabe pẹ; woru pẹ mebyishia lẹ mkpula igwe kẹ Chipfu.”

Ebvụ Aphụ 4

Ọnodu Jierúsalemụ, teke ọ daru

¹Lewarọ gẹ mkpọla-ododo ono, shi egbu nwjiiwii ono byaru agbachihuwa agbachihu. Lewarọ g'ọkpobe mkpọla-ododo ono, byaru agbanwee. Mkpuma ụlo, du nsọ bẹ a tũkashichaarụ nanụ nanụ lẹ mgbakata-uzo, nonu.

²Ụnwu Zayonu, vugbaa oke aswa ono; mbụ ndu ono, shi aba urwu g'ọkpobe mkpọla-ododo ono; bẹ byawaru adu rivo rivo gẹ ite, e gude urwa kpua; mbụ g'iphe, ọ-kpu-ite gude ẹka kpua.

³Mbụ-a; nkuta-ọswa bẹ echebejekwa ụnwu iya ẹra; obenu lẹ ndibe mu bẹ ẹjo obu, du pẹ nụ bẹ du gẹ k'oke-enu, bu l'echięgu.

⁴Ire bẹ nyakuchawaru ụnwegirima, angu ẹra l'akpo l'ẹka ẹgu ẹra agu pẹ. Ụnwegirima nshii nọdu arwọ arwọ nri; ọphu ọ dudu onye anuje pẹ iya nụ.

⁵Ndu ono, shi anọduje eri gwogwowo ono; bẹ dakachaawaru l'etsuzọ. Ndu ono, e gude nkũushi hefuta ono bẹ azejewaa l'ikpọzu.

⁶Aphụ, a nuru ndibe mu k'ẹjo-iphe, ẹphe meru bẹ ka shii eme lẹ kẹ ndu mkpukpu Sodomu; mbụ Sodomu ono, e gude ntabu ẹn्या lanu mebyishia; ọphu ọ tọ dudu onye gbaru pẹ mkpu ono.

⁷Ndu-ishi pẹ bẹ shi ka aka-mini-sunoo acha pemu pemu. Ẹphe shi ka ẹra-eswi acha ụcha. Ogwehu pẹ bẹ shi akajẹ mkpuma-egbe acha kẹ ziriri. Ẹphe shi anọduje ama gẹ mkpuma safayà.

⁸Ọle nta-a bẹ ẹphe ka unyi eji uji. Ọ tọ dudu onye ahubejekwadu pẹ ama l'uzo. Akpọ-ẹhu pẹ bẹ nyakuchawaru nwa anyakuru l'okpu pẹ. Ẹphe kpohuwaru nkũ du gẹ mkpũshi nkũ.

- ⁹Ndu e gburu lẹ mma; kakwa mma eme lẹ ndu ẹgu gburu. Ẹgu gwaru phẹ maa; jasụ ẹphe nwụshihu; kele ọ tọ dudu nri, shi l'ẹgu rwuru phẹ ọnu.
- ¹⁰Unwanyi, nweru obu-imemini bẹ gudechawa ẹka phẹ shia unwegirima phẹ l'ite taa; ọ buru nri phẹ lẹ teke ono, ndibe mu laru l'iswi ono.
- ¹¹Chipfu bẹ gbahawaru oke ẹhu-eghu iya ẹka. O kpukposhiwaru ẹhu-eghu iya ono, enwu phuruphuru ono. Ọo ya bẹ dū-nwuru ọku, tsuru Zayonu tsupyashichaa ẹka a turu ọkpa iya.
- ¹²Ndu eze ndu mgboko-a; mẹ ndu bu lẹ mgboko l'ophu bẹ te ekwetaduru lẹ ndu iwashi; mẹ ndu ọhogo bẹ a-dū ike ye ọkpa l'ọnu-abata Jierúsalemu.
- ¹³Obenu l'ọ meru nno. Ọ buru iphe, kpataru iya nū bẹ bụ iphe-ẹji, ndu mpfuchiru iya emegbaa; Mẹkwapho ẹjo-iphe, ndu-uke iya eme; mbụ ndu ono, nọ l'echilabọ mkpukpu gbushia ndu pfuberekoto ono.
- ¹⁴Ẹphe tsoru ụzo aghaphe phururugbada gẹ ndu atsụ ishii. Ẹphe gudewaa mee ndu ẹphe gbushiru merwushia onwophe; k'ophu bụ l'ọ tọ dudu onye a-dū ike edenyi ẹka l'uwe phẹ.
- ¹⁵Iphe unwu-eliphe anọduje araru phẹ bụ: “Unu tughua! Nturuwu dū unu l'ẹhu! Unu tughua! Unu tughua! G'ọ tọ dukwa onye unu e-denyi ẹka!” Ọo ya bụ; ẹphe gbafu je aghapheaha phururugbada. Ndu shi l'ọhamoha, nonu nọdu asuje: “Ẹphe ta abyakwa ebubaaru l'ẹka-a ọzobaa.”
- ¹⁶Ọo Chipfu l'onwiya bẹ bụ onye chikashiru phẹ nū. Ọphu ọo-gubeedu phẹ iphe ọzobaa. Ẹphe ta akwabeduru ndu-uke ụbvù; Ọphu ẹphe te emeduru ndu bụ ọgerenya ree.
- ¹⁷Ọphu kachakpoo nū bụ l'anyi lewaru ẹnya ndu a-gbaru anyi mkpu; ike bvụ anyi; ọ buru ke mmanu. Anyi nọ l'ulo-nche anyi ele ẹnya ọha ono, taa dukpodanu ike adzota anyi.
- ¹⁸Ẹphe anọduje eedo ọkpa anyi; k'ophu bụ l'anyi te eshijeedu ụzo anyi. Mboku ikpazu anyi dukwaa ntse; a guwaru mboku, anyi a-nọ-beru ọgu; noo kele mboku ikpazu anyi ruwaru erwurwu.
- ¹⁹Ndu achị anyi ọso bẹ kakwa ugo, ẹphe l'akpaminigwe eme barabara. Ẹphe chiru anyi ọso l'eli ụbvú ụbvú; ẹphe je egepagbaaru l'echiegu kwaberu anyi.
- ²⁰Onye ono, Chipfu wuru manụ l'ishi; mbụ onye ono, bụ iya bụ unme, anyi atụ ono bẹ nwulahuru lẹ nsu, ẹphe turu; mbụ onye ono, anyi riru sụ l'anyi a-nọdu lẹ mkpula iya dzuru ndzụ l'echilabọ ọhamoha ono.
- ²¹G'ẹhu tsoo ngu uto; tee ẹswa gube nwada Edomu; mbụ gube onye ono, bu l'alị Uzu. Ọle okoro iphe-ẹhuka ono bẹ a-nukwa ngu-a. L'ii-ngua ya; l'ootsua ngu atsutsu; l'iigbabe onwongu ọto.

²²Gube nwada Zayonu; aphụ, anụ ngu k'ejo-iphe ono, i meru ono bẹ bvụakwaru nụ. Ọ tọo haedu ngu g'i buwaruro onye a kpuru lẹ ndzu. Ọle ọo-nụkwanu ngu aphụ ejo-iphe, i meru gube nwada Edomu. Iphe-eji ngu ono, bẹ ọo-tu jalaa.

Ebvụ Aphụ 5

Epfu anụ Chileke g'ọ phụa obu-imemini

- ¹Jiko Chipfu; nyatanụ ejo-iphe, dapfutaru anyi-a. Lenaa ọnya hụma iphe-iphere, eeme anyi.
- ²Okiphe anyi bẹ lakotawaru ndu lwaru alwalwa l'eka. Ibe anyi lakotawa ndu ọhozo l'eka.
- ³Anyi buwaa ndu a togboru nwa maa; ọphu anyi enweedu nna. Ne anyi phẹ bẹ buwaa unwanyi, ji phẹ anọedu.
- ⁴Mini-angungu bẹ bu azuta bẹ anyi azutaje iya. Nku, eeshije ite buru ugwo bẹ anyi apfuje kpata iya.
- ⁵A nyabewaru anyi mkpamehu l'olu. Ike bvụ-gbuwaru anyi; ọphu ephe ekwedu g'anyi tuta unme.
- ⁶Anyi wowaru onwanyi ye l'eka ndu Ijiputu; waa ndu Asiriya g'ee-shi g'anyi humaje nri, a-suru anyi eriri.
- ⁷Nna anyi phẹ bẹ meru iphe-eji; nwushihu. Ọ buru anyibedua byaru evuta aphụ, du iya nụ.
- ⁸Nta bu ndu bu ohu bu phẹ bu ishi anyi. Ọphu ọ dudu onye a-nafuta anyi l'eka phẹ; g'anyi nweru onwanyi.
- ⁹Anyi aloje ishi anyi alolo temanu anyi ahuma nri, anyi e-ri; kele ogu-echi bẹ no l'echiegu.
- ¹⁰Akpọ-ẹhu anyi bẹ ahụ ọku g'ovokoku. Iphe, kparu iya nụ buru l'ejo egu eme anyi.
- ¹¹Unwanyi bẹ e gudechaaru jepfu k'okpehu lẹ Zayonu; gudekwapho unwumgboko jepfu l'ime mkpukpu, dugbaa lẹ Jiuda.
- ¹²Ephe gude ẹka phẹ swi-gbushia ndu-ishi. Ọphu aakwabejeedu ndu bu ọgerenya ubvu.
- ¹³Unwokoro bẹ ephe gudechaaru g'ephe gweje iphe egwegwe lẹ mkpuma, eegweje iphe. Unwegirima unwoke nodu ada tsuutsuu lẹ nku, e boru phẹ.
- ¹⁴Ndu bu ọgerenya ta anojeedu l'onu-abata mkpukpu. Ọphu unwokorobyia agujeedu ebvu, ephe shi aguje.
- ¹⁵Ehu-utso ta aduedu anyi l'obu. Ebvu, anyi eteje bẹ byawaru bya aburu nggumaphu.
- ¹⁶Okpu-eze ono bẹ shiwaa anyi l'ishi dafu. Nshio anyi; kele anyi mewaru iphe-eji!

17 Oo iphe ono meru g'o gude meji tofu anyi. O buru iya kpataru; enya duchawaa anyi ragaraga.

18 Kele ubvu Zayonu be buwaa ochobu; O buru nkuta-oswa be etsojeru ejephe l'eli iya.

19 Oo gube Chipfu be a-buru Onye eze anyi jasuru l'ojejoje. Mbụ l'aba-eze ngu anoje; e - shi l'ogbo sweru ogbo.

20? Bu gunu meru g'o gude i zohaa anyi jasuru asuru? ? Bu gunu meru g'o gude i paru anyi haa nono odu?

21 Duphutanu anyi azu l'eka i nono; jiko Chipfu; k'ophu anyi a-lwapfuta ngu ozo. Mephunu onodu anyi azu g'o du g'o shihawaa du le teke k'ichee.

22? Too i jikawaru anyi l'ophu l'ophu? Mbụ ? iwuwaru ovuma paru anyi haa phuruphuru gberegedege too?

Ezekẹlu

Ezekẹlu 1

Iphe, nọgbaa ndzụ waa ọdu-biribiri Chipfu

¹Tọbudu iya bụ; o be l'apha k'ụkporo l'iri lẹ g'ọnwaa ẹno dū l'abalị ise; gẹ mu lẹ ndu a kpuru lẹ ndzụ tukurọ nọdu l'aguga ẹnyimu Keba; a gūhaa imigwe ghebe ọnu; mu phaa ọphulenyaa, shi l'ẹka Chileke.

²O be mbọku k'ise; l'ọnwaa k'ẹno, bụ apha kwe eze, bụ Jiehoakinu apha k'ise, a kpọturu iya lẹ ndzụ;

³Chipfu bya epfuru opfu yeru mube onye uke Chileke, bụ Ezekẹlu nwa Buzu. Ọ bụru l'aguga ẹnyimu Keba l'alị Babilonu be mu nọ; Chipfu pfiaru mu iphe ono. Ọ bụru l'ẹka ono be mu nọ; ike Chipfu kparwuta mu l'ẹhu.

⁴No iya; mu bya elee ẹnya; bya ahuma oke pherephere g'o shi l'uzo isheli ezi eje abya; urwukpu kpumia; me ọku, alo ke waawaa; yele iphoro, charu vaa, no-pheru iya mgburugburu. Echilabo iya nodu ekepho paapaapa g'ope.

⁵L'echilabo iya onokwapho be iphe ẹno, nọgbaa ndzụ, gbaru ugbugba gẹ nemadzu nokwapho.

⁶G'ephe ha nwekotaru iphu ẹno ẹno; me nkù ẹno ẹno l'ẹhu l'ẹhu.

⁷Okpa phe pfukotaru nhamunha; obochi-okpa phe dukotaepho gẹ ke nweswi nshii; bya aphukota ngerengere g'onirubvu, a jiru manụ.

⁸Ephe fukota ẹka, dugbaa gẹ ke nemadzu lẹ mkpula nkù ẹno ẹno ono, ephe fukotaru lẹ mgbureku ẹno phe ono. Ephe n'ẹno ono nwekotaru iphu me nkù.

⁹Nkù phe ono nodu edenyigbaa l'ibe iya. Ophu nonu nodu akwasejeerupho eje ala l'iphu; ophu ephe aghakobejedu aghakobe.

¹⁰Waa g'iphu phe dugbaa baa: Ephen'ẹno ono dū gẹ ke nemadzu. Uzo ekutara phe be ephe nweru iphu dū gẹ k'oduma; l'uzo ekicha be ephe nwekotakwarupho iphu, dugbaa gẹ k'eswi; teme ephe nwekwarupho iphu, dugbaa gẹ k'ugo.

¹¹Noo g'iphu phe dukota bụ ono. Nkù phe ono be jashikotaru ajashi l'uzo imeli. Ephe nwekotaru nkù ẹbo ẹbo, ephe jashichaaru iya; ophu nonu nodu edenyigbaa nkiya lẹ k'ibe iya l'ibekobo. Ephe nwekwarupho nkù ẹbo ẹbo, ephe gude kpuchikota ogwehu phe.

¹²Ophu nonu nodu akwasejeerupho nhamunha eje ala l'iphu. Ọ nodu abujeru ẹka unme ono shiru; ephe awuru tsoru iya; ophu ephe aghajedu aghaha.

¹³Iphe ẹno ono, nọgbaa ndzụ ono be ugbugba iya dū g'icheku ọku, enwu enwunwu; ọzoo g'oroku, enwu jajaja. Ọku nodu enwuepho ke phoo phoo iphu l'azu l'echilabo iphe ẹno pho, nọgbaa ndzụ ono. Ọku ono nodu egbu ke nwijnwii; teme ebemu-igwe shikwapho l'ọku ono alo ke phaaphaa.

- 14**Iphe ono, nɔgbaa ndzụ ono nɔdu eziēpho kẹ phaaphaa g'ebemu-igwe. Ẹphe -ziru je l'uzo iphu; ẹphe e ziru je l'uzo azụ.
- 15**Gẹ mu elekpɔephɔ iphe ono, nɔgbaa ndzụ ono; bẹ mu byaru ahuma ọkpa ọgba-kperekpere, nọ l'ali; nọ-kubegbaa iphe ono, nɔgbaa ndzụ ono, nweru iphu ẹno ẹno ono.
- 16**Ugbugba ọkpa ọgba-kperekpere ono; mẹ g'e gude mee phẹ bẹ ẹphe egbukota nwɪnwii gẹ kirisòlàyitù. Ọphu nọnu duchaephɔ g'e pyokafuru iya l'ibe iya.
- 17**Ọ nɔdu abujeru teke ọkpa ọgba-kperekpere ono weru tɔgbua; bẹ o wekwasejeru ụzo lanụ l'ime ụzo ẹno ono iphe ono, nɔgbaa ndzụ ono chebecharu iphu ono. Ọkpa ọgba-kperekpere ono ta aswị-jijedu aswị-ji mẹ ọ -nɔdu ewe atugbu.
- 18**Igburonu iya hagbaa ephekerephe ephekerephe; bya adukwapho akpabiri. Igburonu ọkpa iya ono ẹphen'eno bẹ ẹnya nọkota gbaa mgburugburu.
- 19**Ọ nɔdu abujeru teke iphe ẹno ono, nɔgbaa ndzụ ono tɔgburu; ọkpa ọgba-kperekpere ono, nɔgbaa phẹ l'azụ ono eweru tsoru phẹ. Teke iphe ẹno ono, nɔgbaa ndzụ ono shi l'ali ngu-lihu; ọkpa ọgba-kperekpere ono angu-lihukwapho.
- 20**Ẹka unme iphe ono, nɔgbaa ndzụ ono shikpɔerupho; ọkpa ọgba-kperekpere ono atuko wu-lihukwapho tsoru phẹ; kele unme iphe ono, nɔgbaa ndzụ ono bẹ nọkota l'ime ọkpa ọgba-kperekpere ono.
- 21**Ọ nɔdu abujeru; ẹphe -tɔgbua; iphe ono atugbua. Teke ẹphe nọ-kirishiru; ẹphe anọ-kirishia. Teke iphe ono, nɔgbaa ndzụ ono gbẹ l'ali ngu-lihu; ọkpa ọgba-kperekpere ono angu-lihukotakwapho tsoru phẹ; kele unme iphe ono, nɔgbaa ndzụ ono bẹ nọkota l'ime ọkpa ọgba-kperekpere ono.
- 22**Iphe, nọkota iphe ono, nɔgbaa ndzụ l'ishi bẹ haephɔ ọsa ọsa g'akpaminigwe; bya achakota phuuphuu g'akamini; bya adu akpabiri.
- 23**Ọ buri lẹ mkpula iphe ono, heru gabala g'akpaminigwe ono bẹ ẹphe jashikotaru nkù phẹ; ọ nɔdu edenyigbaa lẹ nwibe iya. Ọphu nọnu nwechaaru nkù ẹbo ẹbo, kpuchitegbaaru iya ogwehu.
- 24**Ọ nɔdu abujeru; ẹphe -tɔgbua; mu anuma ukporo, nkù phẹ eme g'oda g'eka mini, achi ọku aphụ gbudugbudu; mbụ ọ nɔdu ada g'olu-opfu Okalibe-kangokotaru-nu; mbụ adaephɔ g'igiji ndu ojogu ede. Ẹphe pfuru nọ-kirishia; ẹphe aji-zeta nkù phẹ ono.
- 25**No iya; ẹphe pfu-kirishiepho; bya aji-zetachaa nkù phẹ ono; a numa olu-opfu, shi l'eli iphe, du g'akpaminigwe ono, nọ phẹ l'eli ishi ono.
- 26**L'eli iphe ono, du g'akpaminigwe ono, nọ phẹ l'eli ishi ono bẹ o nweru iphe, du g'aba-eze, e gude mkpuma safàya mee, nọ iya nu. Iphe, du gẹ nemadzu nɔdu l'aba-eze ono.
- 27**Mu bya elee ẹnya; bya ahuma lẹ shita l'eka du g'ọ bu upfu iya je akpaa l'ishi bẹ dukota g'onwirubvu, eke paapaapa; mbụ duephɔ g'ọ bu ọku nọkota iya; shita l'eka du

g'upfu iya jeye l'uzo ali be o dūepho g'oku; teme iphóró, egbu nwīnwii chaphee ya mgburugburu.

²⁸Oo epho egube ono, eko-mini aduje l'urwukpu le mboku, mini edze ono bu egube iphóró ono du; chaphee ya mgburugburu. Noo g'odu-biribiri Chipfu ono gude gbaa ugbugba bu ono. Mu hūmae ya pho; mu daa kpupyabe iphu l'ali; mu bya anuma olu onye epfu opfu.

Ezekelu 2

Chileke gude kua Ezekelu g'o jeeru iya ozi

¹To bu iya bu; a su mu “Nwa ndiphe; gbeshi pfuru apfuru ge mu pfuru yeru ngu.”

²O nodu epfu iphe ono; Unme Chileke bata mu l'ehu; bya ekulia mu; mu pfuru apfuru. Mu numa iphe, oopfu eyeru mu.

³O su: “Nwa ndiphe; mu ezi ngu g'i jepfu ndu Izurelu; mbu mkpukpu ono, bu okwefurike, kwefuru mu ike ono; mbu ndu ono ephe le nna phe shi k'eshinu metaru mu k'ehuka byasu ntanu-a ono.

⁴Ephe bu ndu ejo okpoma; bya aburu ndu ta anudu anunu me ililekpoo. Mu ezi ngu ge i jepfu phe je asu phe: ‘Wakwa iphe, Nnajiuphu, bu Chipfu epfu baa.’

⁵G'ephe bu ndu ta anudu anunu-a; m'ephe -ngaberu nchi-o; m'ephe ta angabeduru-o; g'o duhabe ephe amarunu l'onye mpfuchiru Chileke be nojeru l'echilabo phe.

⁶“Gube nwa ndiphe; ge ndzu phe ta agukwa ngu; ophu ndzu iphe, ephe epfu agukwa ngu. Ge ndzu ta agukwa ngu; e -gudekpoo l'ogarambo yee obvu be gbaru ngu mgburugburu; teme i buru l'eka akpi jiru ejiji. Ge ndzu iphe, ephe epfu ta agukwa ngu; ophu ehū arwushihukwa ngu; e -gudekpoo l'ephe bu ndu ta anudu anunu me ililekpoo.

⁷Oo iphe, mu pfuru be ii-pfuru phe; g'ephe bu ndu onu-ulo, ta anudu anunu-a; m'ephe ngaberu nchi; m'ephe ta angabeduru.

⁸“Ole-a; gube nwa ndiphe; ngabekwa nchi l'iphe, mu epfuru ngu. Ta abukwaru onye ekwefuje ike ge ndu onu-ulo ono kwefuru. Saa onu; ria iphe, mu anu ngu.”

⁹No iya; mu bya elee enya; hūma eka, a machiru mu. Eka obu pfupfube ekwo, a phukoru aphuko.

¹⁰O bya aphushia ekwo ono l'iphu mu. Iphe, e dekotaerupho l'ekwo ono ibekeboebo bu ekwa-aphu; waa nggumaphu; me nshio mu nshio.

Ezekelu 3

¹To budu iya bu; o su mu: “Nwa ndiphe; ria iphe, e doberu ngu l'iphu; taa ekwo, a phukoru aphuko-a; g'ije epfuaru ndu Izurelu opfu.”

²Oo ya bu; mu saa onu; o woru ekwo ono, a phukoru aphuko ono ye mu l'onu ge mu taa.

- ³No iya; ọ sụ mu: “Nwa ndiphe; taa ẹkwo-a, a phukoru aphuko-a, mu anụ ngu-a; tajia ẹpho ngu.” Ọo ya bụ; mu woru iya taa; ọ nọdu atso mu ẹnugurengu ọ ọmanụ-ẹnwu l'ọnu.
- ⁴Ọ bya asụ mu: “Nwa ndiphe; tughua nta-a jepfu ndu Ízurelu je epfuaru phe iphe, mu pfuru.
- ⁵Ọ to bukwa ọha-ntsu, bụ ndu opfu phe dụ ẹhuka anuma be eezi ngu g'i jepfu. Ọo ndu Ízurelu be e ziru ngu g'i jepfu obu.
- ⁶Ọ to bukwa ikpoto ọha-ntsu ono, opfu phe aduje ẹhuka anuma; mbụ ndu iphe, ẹphe epfu tee dodu ngu ẹnya be e ziru ngu g'i jepfu. Ọme l'ọ gbẹ buru phe be e ziru ngu g'i jepfu; m'ẹphe agbẹkwanu ngaberu ngu nchi okpobe angabe.
- ⁷Obenu le ndu Ízurelu be ta abyadu angaberu ngu nchi; noo kele o too hedu phe ihee angaberu mu nchi. Ọnu-ulo Ízurelu l'ophu be kpo-chiru okpoma buru ekwegekwe.
- ⁸Ọle mu e-me ngu g'i buru enwubata enwubata; buru onye ejo-okpoma g'ẹphebedua bu.
- ⁹Mu e-me g'obu ka ngu eshihu ike; eme le mkpuma-egbe. Ge ndzu phe ta agukwa ngu; ophu ugbugba phe eyekwa ngu ebvu; e -gudekpoo l'ẹphe bu ndu bu ndu ta anudu anunu.”
- ¹⁰Ọ byakwa asụ mu: “Nwa ndiphe; ngaberu mu nchi ẹnugurengu; woru iphe-a, mu epfukotaru ngu-a dobekota l'ime obu ngu.
- ¹¹Tughua nta-a jepfu ndibe unu ono, a kpuru le ndzu ono je epfuaru phe; su phe: ‘Waa iphe, Okalibe, bu Chipfu epfu baa!’ Pfuaru phe iya; me ọ -bu l'ẹphe kwetaru ngabe nchi-o; me ọ -bu l'ẹphe te ekwetaduru-o.”
- ¹²Tobudu iya bu; Unme Chileke bya apalia mu imeli; mu numa igiji, aphụ-ji aphụ-ji, asuje: “G'a nodukwa l'eka Chipfu bu jaa odu-biribiri iya ajaja!”
- ¹³Mu numakwapho oda nkù iphe ono, nogbaa ndzu ono g'o denyijegbaa le ke nwibe phe; me igiji, okpa ogba-kperekpere ono, no l'aguga phe ono; mbu oke igiji, alwa ke gidigidi.
- ¹⁴No iya; Unme Chileke ono bya apalia mu imeli; paru mu tughua; ẹhu-eghu ji mu obu ge mu atugbu ono; mbu ẹhu kwatakpo gbangahu mu okpobe agbangahu ge mu atugbu ono. Teke ono be ike Chileke kparwutaru mu l'ẹhu k'eze iya.
- ¹⁵Tobudu iya bu; mu jepfu ndu ono, a kpuru le ndzu ono, bu le Telu-Abibu le mgboru ẹnimu Keba. Mu je anodu l'eka ẹphe no; noduepho rakafu ẹnya l'echilabo phe mgburugburu no abali esaa.

Aanmaru Ezekelu okwa

(Ezek 33:1-9)

- ¹⁶O be ge abali esaa ono bvuerupho; Chipfu bya epfuru opfu yeru mu su:

17“Nwa ndiphe; mu mewaru ngu g’i b̄uru onye-nche ndu Ízurelu; ọo ya b̄u; teke i n̄umaru opfu, shi mu l’onu; jejekwa anmaaru ph̄e ọkwa, mu nmaru ngu ono.

18Teke mu s̄uru onye iwashi l’o nwuhufutaje; ọphu i ti nmaduru onye ọbu ọkwa; mbu ọphu i ti s̄uduru iya g’o haa ejo ọzo, ootso; k’ọphu ee-shi nno dzoo ya ndzu; b̄e onye iwashi ọbu a-nwuhu n̄u-a; k’ejo-iphe, oome; ọle ọo kwanu ḡubedua b̄e mu a-kpa ishi ọchi iya.

19O -b̄ukwanuru l’i nmaru onye ono ọkwa; ọphu o kwedu haa ejo-iphe, oome; ọphu okwedu haa ejo ọzo, ootso b̄e ọo-nwuhu n̄u-a; l’opfu ejo-iphe, oome ono; ọle ḡubedua dzoakwanaru onwongu.

20Ozo b̄u; teke onye pf̄uberekoto paru eme iphe, pf̄uru oto haa; meahaa ejo-iphe b̄e mu e-doheru iya iphe; l’oovukota daa; dagbua onwiya. Eshinu i ti l̄oduru iya ẹka l̄e nchi b̄e ọo-nwuhu n̄u-a; k’ejo-iphe ono, oome ono, l’a-zohashikota iphe, du ree, o shi mee. Ọle ọo kwanu ḡubedua b̄e mu a-kpa ishi ọchi iya.

21O -b̄uru l’onye pf̄uberekoto b̄e i nmaru ọkwa g’o to meshi ejo-iphe; ọphu o to meduru ejo-iphe b̄e ọo-dzuru ndzu; kele o n̄umaru ọkwa, i nmaru iya; t̄eme ḡubedua dzoakwapho onwongu.”

E me Ezekelu g’o pfubuhu opfu

22Mu nodu l’eka ono; ike Chipfu bya akparwuta mu l’ehu; Chileke su mu: “Gbeshi jeshia l’eka ono, ali du baswaa ono; ọo l’eka ono b̄e mu e-pfuru opfu yeru ngu.”

23Tobudu iya b̄u; mu bya agbalihu tugbua jeshia l’eka ali du baswaa ono. Mu rwua l’eka ono bya ahuma ọdu-biribiri Chipfu, g’o no iya; mbu ọphu du g’odu-biribiri ono, mu humajeru l̄e mgboru ẹnimu Keba pho. Ọo ya b̄u; mu daa kpube iphu l’ali.

24No iya; Unme Chileke bya akparwuta mu l’ehu; palia mu pfube apfube. O bya epfuru yeru mu su: “Tugbua je agu-chia onwongu l’ulo ngu.

25Gube nwa ndiphe; ephe a-tu ngu ọkpukpu gude kee ngu egbu; mbu kee ngu egbu k’ọphu i tii tsoeduru ejephe l’echilabo ph̄e.

26Mu e-me g’ire nyakuru ngu l’akpo; mbu k’ọphu ii-pfubuhu opfu; g’i ti bajheru ph̄e mba; kele ephe bu ndu ejo-okpoma.

27Ole teke mu pfuru opfu nu ngu b̄e mu e-me g’i kpuhaa onu. Teke ono b̄e ii-su ph̄e: ‘Waa iphe, Okalibe, bu Chipfu epfu baa.’ Onye o du g’o ngabe nchi; l’oongabe iya; onye o to dudu g’o ngabe nchi; l’o jika iya angabe; kele ephe bu onu-ulo ta anudu anunu.”

Ezekelu 4

Ọphulanya g’ee-gude kephee Jierusalemu

1“Oo ya b̄u; gube nwa ndiphe; pata eja-urwa, du bachibachi dobe l’iphu ngu; woru mkpukpu Jierusalemu see esese l’eli iya.

- ²L'i bya esee g'ee-gude kepheta iya ekepheta; bvuphee ya ose-ogu; l'i bya esekwapho igbulo, ee-shi nyiba iya swikube iya; woru odu-ogu dobegbaa g'o no-kube iya; teme l'i woru okukpo, eegudeje enwukposhi igbulo dophee ya mgburugburu;
- ³L'i bya ewota iphe-igwe, du osa bvube g'o buru igbulo igwe no-buharu unu le mkpukpu ono; l'i woru iphu ghaaru iya. G'o dūepho g'o bu mkpukpu, ekephetaru ekepheta k'ogu; o buru ngu kephetaru iya obu. Iphe ono be a-buru ndu Izurelu iphe-ohubama.
- ⁴"L'i bya azee azee; gbube mgbureku ekicha ngu; woru ejo-iphe ndu Izurelu bo onwongu. Abali ole, ii-zekota gbube onwongu nno be ii-vukotaru ejo-iphe phe ono.
- ⁵Ukporo abali iri le tete l'abali iri, bu iya no onodu apha ole, ephe mekotaru ejo-iphe; be mu e-me g'i vukotaru ejo-iphe ndu Izurelu.
- ⁶L'iibya aze-zeta azee ozo; ole k'ogu iya bu g'i ze gbube mgbureku ekutara; vuta ejo-iphe ndu Jiuda. Iphe, mu nuru ngu g'i gude vuru iya bu ukporo abali labo; ujiku lanu be no-chiru enya apha lanu.
- ⁷"Ghachi iphu l'iphe ono, egoshi g'ee-gude kepheta Jierusalemu ono; chilia aka pfuaru mkpukpu ono ejo-iphe, mu suru l'oo-me phe.
- ⁸Mu e-gude okpukpu kekoo ngu g'i tii chizi nchizi jeye i no-ghee ujiku ole, ii-nodukota g'onnye kephetaru mkpukpu k'ogu ono.
- ⁹"L'i wota witi; me bali; me agwa; me azamu; me igberi; me supelutu wukotaru ye l'ite dobe, ii-gudeje emetaru onwongu buredi. Iphe ono be ii-nodu eri le teke ono, ii-ze le mgbureku ngu lanu ukporo abali iri le tete l'abali iri ono.
- ¹⁰L'iiswikwapho nri eriri l'aswi; nri, ii-rije mboku-mboku be erwa iya a-duje ukporo shekelu lanu.
- ¹¹Mini, iingu angungu be ii-nodukwapho aswi l'aswi. Kutaje mini jiru okoro nshii, ngua mgbo lanu le mboku.
- ¹²Nri ono be ii-rije egube itaje akara bali-a. Nodu l'eka ndu Izurelu a-nodu ele ngu enya ghee ya; gudeje nshi nemadzu mee nku, e gude eshi ite."
- ¹³No iya Chipfu su mu: "Oo egube ono bu ge ndu Izurelu e-ri nri, e merwuru emerwu l'ohamoha ono, mu a-chiru phe je edobe ono."
- ¹⁴Noo ya; mu su: "Oowaa! Okalibe, bu Chipfu; mu te emerwushijekwaru onwomu. Eshi teke mu bu nwata byasu nta-a be mu te edejekwaru onu l'iphe, nwuhuru anwuhu; ophu mu atajeduru anu, anu-egbudu dzu-gburu; ophu anu, aaso nsu, abahujeduru mu l'onu."
- ¹⁵O su mu: "O du ree; mu haru ngu uzo g'i gudeje nshi eswi ghee buredi ngu obu; haa egude nshi nemadzu."

¹⁶Tobudu iya bu; o su mu: “Nwa ndiphe; mu e-me g'eka nri eshije abata le Jierusalemu chihu. Ephe a-chijeru uche l'eka eri nri, a tũrũ atũtũ. Nwa mini, a tadaru atada l'iphe be ephe achijeru akũrepho l'eka angũ;

¹⁷kele nri waa mini be a-du ũko. Onyenonu a-bujeru o -hũma nwibe iya; o kpoo ya onu-opfu; kele ephe a-jokota ehu wufu; mkpata iya buru ejo-iphe, ephe mekotaru.

Ezekelu 5

¹“Gũbe nwa ndiphe; pata ogu-echi, atsu nkõ; gude iya g'o buru akwo, eegudeje akpu ishi; gude iya kpushia ishi ngu waa ejĩ-agba ngu akpushi. L'i bya ewota iphe, eegudeje atũ erwa iphe tũa ya atũtũ gude kee ya ekẽkẽ uzi eto.

²Ujiku olemole, i gude kepheta mkpũkpu ono k'ogu -bvũepho; l'i woru oke lanũ l'ime ũzo eto ono je akpoo oku l'echi mkpũkpu ono. L'i bya ekpotakwapho uzi lanũ l'ime ũzo eto ono gude ogu-echi gbubushia ya gbaphee mkpũkpu ono mgburugburu; bya ekpotakwapho ophu kwe iya eto phekashia l'imeli; kele mu a-mĩta ogu-echi gude chipyabe phe.

³Hakwarupho egbushi me ejĩ-agba ono hata kekoo l'igburonu uwe ngu.

⁴Hatakwapho nwophu haa nwanshii chiru ye l'oku g'oku kepyashikota iya. Oo eka ono be oku e-shi gba-nwuhu dzuru, Izurelu l'ophu.

⁵“Wakwa iphe, Nnajiuphu, bu Chipfu epfu baa: Lekpodapho le Jierusalemu be mu woru dobe l'echilabo ohamoha; yele igwerigwe mkpũkpu, gbapheru iya mgburugburu.

⁶Ole ephe gude iwashi, ephe ewe kwefu ike l'ephe tee medu ekemu mu; me iphe, mu toru okpa iya; mbũ gbẽ kanũ ekwefuru mu ike e -me le g'ohamoha, no-pheru iya mgburugburu; me mkpũkpu, no-phekwaru iya pho. Jierusalemu jikaru eme ekemu mu; jika etso iphe, mu toru okpa iya.

⁷Oo ya bu le-a; wakwa iphe, Nnajiuphu, bu Chipfu epfu baa: Unu ka mkpũkpu ozo, buphekotaru unu mgburugburu aburu emekota emekota; ophu unu etsojedu iphe, mu toru okpa iya su g'etsoje; teme ophu unu emejedu ekemu mu; mbũ l'unu ta adũkpodanu ike metaberu ekemu mu g'ohamoha, bupheru unu mgburugburu emeberu iya.

⁸Oo ya bu le-a; wakwa iphe, Nnajiuphu, bu Chipfu epfu baa; o suru: Mbẽdua l'onwomu be adawaa ngu eka l'ehu ke njõ gũbe Jierusalemu. Mu a-nũ unu chiipfuu g'ohamoha hũma.

⁹Le k'ebyi ono, unu emegbabe ono be mu e-me unu iphe, mu teke emeswee; ophu mu abyadu emebaa egube iphe ono ozo.

¹⁰Oo ya bu le-a; l'echilabo unu be ndu bu nna a-ta anũ unwu phe; unwegirima ata anũ nna phe. Mu a-nũ unu chiipfuu. Ndu ophu phoduru nũ be mu a-chiru tũkaa nanũ nanũ.

¹¹“Wakwa iphe, Nnajiuphu, bu Chipfu epfu baa: Eshinu mu no ndzũ ge mu no iya-a; be o doru enya l'eshi ophu unu gudewaa ntẽkpe, bu iphe, aakpofu akpofu pharwushia

ulo mu, du nsò; bya arwu urwuali; be mu e-wofu unu obu; ophu mu ta abyadu ele unu enya ke phuru unu obu-imemini; ophu mu tee dobedu unu ndzu.

¹²Ee-ke unu uzi eto; uzi lanu be mgbu-onwu e-gbushi; ozo ego egbushia phe l'echilabo unu; uzi lanu be e-gude ogu-echi gbushia l'azu mkpukpu unu; uzi lanu ophu be mu a-chiru phekaa epheka; bya amita ogu-echi gude chipyabe phe.

¹³“Mu e-kpukposhi phe ehu-eghu mu; mbu le mu a-tukoshi phe oke-ehu-eghu mu ono jasu mu emerwua phe iya g'ooghu mu. Mu -mechaa phe nno; ephe amaru l'opfu, mube Chipfu pfuru nu phe be bu l'okophoo be mu gude pfua ya.

¹⁴Mu e-me unu g'unu buru ola-l'iswi; unu abukwarupho iphe, e gude eme iphe-ochi l'echilabo ohamoha, bupheru unu mgburugburu; me l'anya ndu aghata aghata.

¹⁵“Mu -gudeepho ehu-eghu mu nua unu aphu; mbu gude oke ehu-eghu mu baerupho unu mba, ahu oku l'ehu; be unu a-buru ndu ohamoha ozo iphe e gude eme iphe-ochi; mbu ndu aanoduje epfutoshi epfutoshi; bya aburu iphe, a-nodu alo ndu ozo aka le nchi; me iphe, a-nodu eyeru ndu ozo ebvu. Noo iphe mube Chipfu pfuru bu ono.

¹⁶Su-a; mu a-gba unu ejo apfu ono, te edodu nemadzu edodo ono, bu iya bu ego ememe. Mu a-gba iya unu shi nno; mee g'unu buru mkpurupyata. Mu e-me g'okpa-nri; byapfuta unu ibyato; mu abya egbuchia aka nri eshije abata.

¹⁷Mu e-zi ego-ememe yee ejo anu-egbudu g'o bya awupyabe unu gbushigbua unu unu. Ejo iphe-ememe yee mgbugbumadzu be e-je unu ije l'ehu. Mu e-gude ogu-echi bapfuta unu. O kwa mube Chipfu be pfuru iya nu.”

Ezekelu 6

Emebyi ndu agwaje iphe

¹Tobudu iya bu; Chipfu bya epfuru opfu yeru mu su:

²“Nwa ndiphe; ghachiru ubvu, nogbaa l'ali Izurelu iphu pfuru maberu mu phe;

³su phe: Unube ubvu, nogbaa le Izurelu l'ophu; unu numakwa opfu, Nnajiuphu, bu Chipfu epfu. Wakwa iphe, Nnajiuphu, bu Chipfu epfu anu unube ubvu l'ophu; me unube nsuda l'ophu baa: Unu huma ahuma le mbedua l'onwomu abyaakwaa egude ogu-echi byapfuta unu; teme mu emebyishikwapho aka unu agwaje iphe.

⁴Enya aka unu agwaje iphe be ee-chikposhi; eenwukposhia enya aka unu akpoje unwu-isensu oku. Ndibe unu be mu e-gbushichaa tukaa l'iphu agwa unu.

⁵Odzu unwu Izurelu be mu a-togbochaa l'iphu agwa phe; mu eworu okpu unu tukaa l'anya aka unu agwaje iphe g'o hakota.

⁶Iphe, bukpo aka unu bu ebubu be mkpukpu, nokota iya nu a-buru ochobu. Eenwukposhikota aka unu agwaje iphe enwukposhi; o dabyiru ke mmanu; buru iphe, a gbadoru agbado. Agwa unu be aa-kupyashicha akupyashi; ephe alaa l'iyi. Eka unu akpoje unwu-isensu oku aburu aka ee-tsukposhikota etsukposhi. Iphe, bukpo iphe, unu gude aka mee g'o ha be e-kpo g'eekepoje ntu-a.

⁷Ndibe unu bẹ ee-gbushi; ẹphe adaka l'echilabọ unu; g'unu amakwanuru l'ọo mbẹdua bụ Chipfu.

⁸“Ole o nweru-a ndu ọphu mu e-dobe ndzụ. Mbụ-a ọ duru-a ndu ọphu mu e-me g'ẹphe nahụ ogu-echi ono; ẹphebedua bẹ aa-chikashi je edokashia; ẹphe edzuru alì nonu; mẹ l'ohamoha, dọ iche iche.

⁹L'ohamoha ono, a kpuru pẹ laa ono bẹ ndu ọphu phoduru nọ l'ime unu a-nodu nyata mu. Mbụ l'ẹphe a-nyata g'o gude dọ-beru mu ẹji; l'ẹphe bụ ndu obu pẹ dọ gheleghelehele l'eka mu nọ; mbụ l'ẹphe gbakutaru mu azu; bya ewochiaru iphu ghaaru agwa gwalahaa. Ẹphe -nyatae ya pho ẹphe ala onwophe ashi; k'ejo-iphe, ẹphe meru; waa k'ẹbyi, ẹphe nọ megbabẹ ono.

¹⁰O buru teke ono; bẹ ẹphe a-maru l'ọo mbẹdua bụ Chipfu; l'ọ to budo kẹ mkpe bẹ mu shi pfua lẹ mu e-me g'ejo iphe-ehuka dapfuta pẹ ono.”

¹¹Nnajiuphu, bụ Chipfu bya epfuru yeru mu sụ: Kua ẹka pyaa; zọo okpa kpitikpiti l'ali; chia mkpu sụ: Tuswekwa! Noo kẹle ndu Izurelu eme ejo ahuma; ọ buru ogu-echi bẹ ee-gude gbushia pẹ; waa ẹgu-ememe; mẹ mgbu-onwu.

¹²Ndu ọphu bu l'eka dọ ẹnya bẹ bụ mgbu-onwu e-gbu pẹ; ndu ọphu bu ntse buru ogu-echi bẹ ee-gude gbua pẹ; ndu ọphu phoduru nọ; a -haa pẹ ẹphe nodu ndzụ bẹ bụ ẹgu e-gbu pẹ. Noo gẹ mu e-gude kpukposhi pẹ oke ẹhu-eghu mu bụ ono.

¹³Teke ono; unu a-makwanuru l'ọo mbẹdua bụ Chipfu; mẹ ndibe unu, e gbushiru egbushi -dakaepho l'eka agwa pẹ nọ; mbụ bya adaka nanu nanu l'ẹnya ẹka ẹphe agwaje iphe; mbụ l'eli úbvú úbvú, hagbaa l'eli; mẹ lẹ mkpakponu eze úbvú; mẹ lẹ mkpula oshi, jakashigbaaru ajakashi; məkpo lẹ mkpula achi, ẹkwo dọ; mbụ l'ekameka ono, ẹphe shi akpojeru agwa pẹ unwu-isensu, eshi mkpo oku ono.

¹⁴Mu a-hali ẹka; wata pẹ ada ẹka kẹ njo l'ẹhu; mee alì ono g'ọ buru ochobu, dabyiru kẹ mmanu; shita l'echiegu ono jasụ lẹ Dibula; je akpaa l'iphe, bụ ẹka ẹphe bukotakpoo ebubu l'ophu. Oo ya bụ g'ẹphe amakwanuru l'ọo mbẹdua bụ Chipfu.

Ezekelu 7

Teke ikpazu duakwaa ntse

¹Tobudu iya bụ; Chipfu bya epfuru yeru mu sụ:

²“Nwa ndiphe; wakwa iphe, Nnajiuphu, bụ Chipfu epfuru alì Izurelu baa: O bvụ-o! Kẹ unu abvụ-o! Alì ono, gbaa mgburugburu bẹ nkiya bvụakwaru!

³Teke k'unu a-bvụ bẹ rwuakwaru nọ. Mu a-tukoshi unu ẹhu-eghu mu. Mu e-kpe unu ikpe g'iphe, unu eme gude dọ; pfukwaapho unu ugwo ẹbyi, unu emegbabe.

⁴Mu ta abyakpoda ele unu ẹnya kẹ phuru unu obu-imemini; ọphu mu abyadu edobe unu ndzụ. Mu pfufutaje unu ugwo iphe, unu eme; waa kẹ ẹbyi ẹbyi ono, eeme l'echilabọ unu ono. Noo teke unu a-maru l'ọo mbẹdua bẹ bụ Chipfu.”

⁵Wakwa iphe, Nnajiuphu, bu Chipfu epfu baa: “Ejo iphe-ehuka be kwokwaru ibe iya nkwo tankwo eje abya.

⁶Teke ikpazu rwuakwaru! Mbụ le teke ikpazu be rwuwaru erwurwu! O gbalihuakwaru ejewa abyapfuta unu! O byarwutaakwaru abyarwuta!

⁷Unube ndu bu l'ali-a; o rwuakwaru teke unu a-buru mkpurupyata. Teke o bu be rwuakwaru nu. Mbụ l'eswe-nrimaphu noakwaa unu phakuu. O too buakwa ebvu ehutso be aa-nodu agu; o buakwaa naganaganaga a-nodu adagbaa l'ubvu ubvu.

⁸“Mu abyawaa unu atukoshi oke ehueghu mu; mu e-vuru ehueghu mu byabe unu l'ishi. Mu e-kpe unu ikpe iphe, unu eme; pfukwapho unu ugwo ebyi, unu emegbabe.

⁹Mu ta abyadu ele unu enya ke phuru unu obu-imemini. Mbụ le mu ta abyadu edobe unu ndzu; mu pfufutaje unu ugwo iphe, unu eme; waa ke ebyi ono, eeme l'echilabo unu ono. Noo teke unu a-maru l'oo mbedua, bu Chipfu be echi unu iphe ono.

¹⁰“Lekwa! O kwa ntanu-a be bu mboku ejo-iphe obu; mbụ l'o rwuakwaru! Ola-l'iswi gbeshiakwaru ije! Mgbonu jaakwaru ajaja kpuru yegele! Eku-onwonye tushiwaa ige g'oshi-omi.

¹¹Oo iwashi be e gude ahụ nemadzu ahuhu ejo-iphe. O to dukwa ndu ono, duru onye ophu aphodu nu mbụ l'ikpoto ndu ono taa phodukwa; ophu iphe, ephe nweru enweru aphodudu; ophu iphe, aga le mkpa a-phodukwapho.

¹²Teke o bu rwuakwaru. Mboku o bu be duakwaa ntse. G'onye azuta iphe azuta te etekwa eswa; ophu onye ere iphe erere agukwa aphu; kele oke ehueghu dapfutaakwaru ikpoto oha ono g'ephe ha.

¹³Mbu-a; onye reru iphe be taa gbataekwa iphe, o reru gbiriri jeye g'ephenebo a-noberu; kele ophulenyaa, a phuru l'ishi ikpoto oha ono be a ta abyadu agbanwe agbanwe. Ejo-iphe, ephe eme be mewaru ophu o to dudu m'onye lanu, adu ike adzo onwiya ndzu.

¹⁴Ephe gbuwaru opu-ogu; tukowaa iphemiphe kwakobe ree; obenu l'o to nwedu onye ophu eje ogu; kele oke ehueghu mube Chipfu tukowaru dapfuta ikpoto oha ono g'ephe ha.

Ee-me ndu Izuru omeliwe

¹⁵“L'azu mkpukpu be ogu-echi no kwagebe; l'ime mkpukpu bukwannuru mgbu-onwu waa egu-ememe no iya. Ndu ophu no l'egu be bu ogu-echi be ee-gude gbushia phe. Ndu ophu no l'ime mkpukpu buru mgbu-onwu waa egu-ememe a-vu phe kpatakpata.

¹⁶Ndu phoduru nu be a-gbaru lachaa l'ubvu je anodugbaa kpoyoo ge ndo, no le nsuda; onyenonu a-nodu l'eka ono ara ekwa ejo-iphe, o mekotaru.

¹⁷Onyemonye be aka a-tsushihukota mee; ikpere aphugbaa onyemonye dori dori ge mini, ayọ azamu.

¹⁸Ephe e-ye uwe-aphu; ndzu-agugu erwuta phe erwuta. Iphere ejikota onyemonye iphu; teme aakpushikota phe ishi akpushi.

¹⁹Mkpola-ochaa phe be ephe e-tuphashichaa le gbororo uzo; mkpola-ododo aburu phe iphe, aaso nsò. Mkpola-ochaa phe; me mkpola-ododo phe be taa dudu ike adzota phe le mboku, Chipfu a-tukoshi phe oke ehu-eghu iya ono. O too dudu ike eme g'egu ta aguhe phe; ophu ephe egudeedu iya azu-ji onwophe epho; kele o mewaru; ephe nwulahu l'eme ejo-iphe.

²⁰Mma iphe, ephe anya l'olu ama be ephe gude kuahaa onwophe. O buru iphe-olu ono be ephe gude akpushiru onwophe agwa; yee iphe, aaso oyi ono, ephe dobegbaaru ono. Oo ya bu; mu e-woerupho iphe ono, mee g'o buru iphe, ephe a-nodu aso oyi.

²¹“Mu e-woru iya ye ndu ohozo l'eka g'o buru iphe, ephe a-kwata l'okwata; mbu mee ya g'o buru iphe, ndu iwashi, bu le mgboko-a a-natakota le nfu. O buru ndu ono e-woru iya merwushikota.

²²Mu e-wofu iphu l'eka ephe no; ndu ono abya emerwushikota eka ono, mu yeru enya ono; mbu le ndu ana-nfu a-bahu iya je emerwushia ya.

²³“Meta egbirigba; kele ali ono be bukota egbu-ochi be jiru iya ejiji; mbu le mkpukpu ono be buepho eme ehuka ehuka bu iphe, jiru iya nu.

²⁴Mu e-duta ndu kachakpoò ewe iwashi l'ohamoha l'ophu; g'ephe bya anatakota phe unuphu ibe phe. Mu e-me g'ekuku, ndu nweru okpemu eku onwophe laa nlanan; kele eka duru phe nsò be ee-merwushikota emerwushi.

²⁵Teke ejo ola-l'iswi byaerupho be ephe a-choahaa ehu-guu; ole ephe taa cho-vudu iya.

²⁶Ejo iphe-ehuka akwo ibe iya nkwotankwo; teme ejo-nzi a-dakwapho mgbadapfu. Ephe a-noduje achi karaphaa g'eeshi ge ndu mpfuchiru Chileke phuru phe ophuleny; ndu-uke Chileke agbe zibuhufulenu ekemu; teme ndu bu ogerenya akpo-zibuhuru nemadzu uzo.

²⁷Onye eze a-nodu agu aphu; onye-ishi a-nodu o too maduru iphe, oome ememe. Ndu ali ono be eka a-nodu anmakota jijijijii. Mu e-me phe g'iphe, ephe eme gbaru. Mu e-gude g'ephe gbaru kpee phe ikpe. Noo teke ephe a-maru l'oo mbedua be bu Chipfu.”

Ezekelu 8

A phuru ophuleny l'aagwo nshi l'eze-ulo Chileke

¹“L'ime apha k'ishii l'abali k'ise l'onwa k'ishii kwapho; be mu no l'ulo mu; ndu bu ogerenya ndu Jiuda tuko nodu l'atatiphu mu; unme Nnajiuphu, bu Chipfu bya akparwuta mu l'ehu.

²Mu bya elee enya; bya ahuma iphe, du ge nemadzu. Shita l'eka du g'o bu upfu iya jasuh l'ali be du g'o bu oku; gbè l'upfu iya jasuh l'uzo imeli be egbuopho nwiiinwii g'ope, aphu ke ngerengere.

³Tɔbudu iya bɔ; ɔ bya amachia iphe, dɔ g'ɔ bɔ ɛka wɔru mu l'ɛgbushi. Unme Chileke ono palia mu imeli; mu nɔdu lɛ mgbaka alɔ waa igwe. Ɔ buru l'ɔphulɛnya ono, Chileke meru; mu nɔdu aphɔ ono; bɛ ɔ gbɛkwapho pata mu jeshia Jierusalemu; mbɔ parɔ mu jeshia ɔnu ɛka eeshije abahɔ l'ɔnu-ɔguzo isheli k'ime ɔma-unuphu eze-ɔlo Chileke; mbɔ l'ɛka ono, e doberu agwa ono, akpatsuje oke ɛhu-ɛghu Chileke ono.”

⁴Mu bya elee ɛnya hɔma ɔdu-biribiri Chileke kɛ Ízurelu; mbɔ ɔphu dɛpho g'ɔphu mu humajeru l'ɔphulɛnya l'alɔ, dɔ baswaa phɔ.

⁵Noo ya; ɔ sɔ mu: “Nwa ndiphe; lekɔdapho ɛnya l'ɔzo isheli.” Ɔo ya bɔ; mu bya elee ɛnya l'ɔzo isheli ɔbu. Ɔ buru l'ɛka eeshije abahɔ l'ɔzo isheli l'ɔnu-ɔguzo ɛka ɔrungwɛja nɔ bɛ mu humaru agwa ono, emeje g'e koo okophoo ono.

⁶Ɔ bya asɔ mu: “Nwa ndiphe; ? ɔ humaru iphe, ɛphe eme; mbɔ ɛjo akpamara, ndu Ízurelu eme l'ɛka-a; shi nno achifu mu achifu l'ɛka dɔru mu nsɔ-a? Tɛme ɔ bururo nta-a bɛ ɔbya ahɔma ɛjo akpamara ɔphu kabarɔ ɔwa eshihu ɔka.”

⁷No iya; ɔ duta mu jeshia l'ɛka eeshije abahɔ l'ɔma-unuphu eze-ɔlo Chileke ono. Mu rwua; bya elee ɛnya hɔma ɛnú, a hafuru l'igbulɔ ono.

⁸Onye ono sɔ mu: “Nwa ndiphe; tɔa ɛnú tɔ-fua igbulɔ ono ɔzo.” Ɔo ya bɔ; mu bya eworu igbulɔ ono tɔ-fua ɔzo; bya ahɔma ɔnu-mgbo l'ɛka ono.

⁹Ɔ sɔ mu: “Bahɔ je ahɔma ɛjo akpamara, ɛphe eme l'ɛka ono.”

¹⁰Tɔbudu iya bɔ; mu bahɔ nɔ; bya elee ɛnya hɔma unwu anɔ, dɔ iche iche, awuje l'ɛpho g'e seshikɔtaru iya l'igbulɔ ono g'ɔ ha; mɛkpoo unwu anɔ, aasɔ nsɔ; mɛkwapho iphe, bɔ agwa ndu Ízurelu g'ɔ hakɔta.

¹¹Ndu bɔ ɔgerɛnya ndu Ízurelu dɔ ukporo umadzu ɛto l'umadzu iri pfukotaru l'iphu ɛka ono; Jiazanaya nwa Shafanu bɛ yikwapho lɛ ndu pfuru l'ɛka ono. Onyenɔnu pagbaarɔ iphe, eegudeje akpɔ unwù-isɛnsu ɔku l'ɛka; ɛnwuru ɔku unwù-isɛnsu, eshi kwɛekweekwee shi l'iphe ono akpɔ tɔtutuutu.

¹²Ɔ sɔ mu: “Nwa ndiphe; ? Ɔo kwa ɔ humaru iphe, ndu bɔ ɔgerɛnya ndu Ízurelu anɔduje l'ɔchii eme? Onyenɔnu bɛ nɔchaa l'ɔlo agwa iya. Ɛphe nɔdu epfugbaa asuje: ‘Chipfu ta ahɔmakwaru anyi; tɛme lɛ Chipfu gbakɔtakpoakwaru nɔ alɔ-a azu.’ “

¹³Ɔ byakwa asɔ mu ɔzo: “Ghakɔdapho ɛnya ɔzo hɔma phɛ l'ɛka ɛphe eme iphe, kabaa ndu ɔwa-a eshihu ɔka.”

¹⁴No iya; ɔ bya eduru mu jeshia l'ɔnu-ɔguzo, eeshije abahɔ l'ɔlo Chipfu l'ɔzo isheli iya; mu bya ahɔma unwanyi, nɔgbaa anɔ l'ɛka ono ara ɛkwa agwa phɛ, bɔ Tamuzu.

¹⁵Ɔ sɔ mu: “? Ɔ kwa l'ɔ humaru iya; nwa ndiphe? Ɔ gbɛ bururo nta-a bɛ ɔbya ɛje ahɔmabakpooro ɔphu ka ndu ɔwa-a eshihu ɔka.”

¹⁶Ɔ gbɛ teke ono bya eduta mu bahɔ l'ime ime ɔma-unuphu ɔlo Chipfu ono. L'ɔnu-ɔguzo, eeshije abahɔ l'eze-ɔlo Chileke ono bɛ iphe, rwuru unwoke ukporo l'ise nɔ lɛ mgbaka nwɔlo, nɔ tɛme l'e rwua ɔru-ngwɛja Chipfu. Ɛphe wokɔtaru azɔ ghaaru eze-

ulo Chipfu ono; woru iphu chebekota l'uzo enyanwu-awawa. Epe nodu ephozetajegba l'uzo enyanwu-awawa abaru enyanwu eja.

¹⁷O su mu: “? O kwa i humaru iya; nwa ndiphe? ? O bu iphe, du huswa huswa huswa too; mbu ejo akpamara-a, onu-ulo Jiuda no l'eka-a eme-a? Mbu oo epho iphe-kpanganga be epe meru; o ji ali-a ebushihu ebushihu; shi nno akpatsue mu pho ehu-eghu. Lekpodapho g'ephe ejikwoshi oshi atsu onwophe l'imi; su l'oo mbedua be epe eme iphe-iphere!

¹⁸Oo ya bu le-a; mu e-gude ehu-eghu mee phe iphe. Mu ta abyadu ele phe enya ke phuru phe obu-imemini; ophu mu abyadu edobe phe ndzu. Epe e-chichakpo mkpu l'o tsua mu etsutsu le nchi; ole mu ta abyadu angaru phe nchi.”

Ezekelu 9

Eegbushi ndu agwo nshi

¹Tobudu iya bu; mu numa eka oochi mkpu ara iya arara asuje: “Unu kpitaru ntse; unube ndu echeje mkpukpu nche. G'onyenonu gudechaa ngwogu iya l'eka!”

²Noo ya; mu bya ahuma unwoke ishii g'ephe shi l'onu-oguzo, no l'uzo isheli eje abya. Onyenonu pagbaaru ngwogu iya l'eka. O nwekwarupho nwoke lanu yele epe swi. O yeru uwe ekwa ocha; turu mkpara-ekwo le mgbureku. Epe wuba je apfuru l'aguga oru-ngweja ono, e gude onyirubvu mee ono.

³Noo ya; odu-biribiri Chileke ke Izurelu gbeshi l'eli chierobu ono, bu eka o shi nodu ono je anodu l'onu-abata eze-ulo Chileke ono. Noo ya; Chipfu bya ekua nwoke ono, yeru uwe ekwa ocha; bya eturu mkpara-ekwo le mgbureku ono;

⁴su iya: “Je etsoru mkpukpu Jierusalemu l'ophu jegbabe. Ndu agu aphu bya ara ekwa k'ebyi ono, emegbabe l'ime mkpukpu ono be ii-me iphe-ohubama l'egedegee onu-iphu.”

⁵No iya; mu bya angabe nchi numa eka o suru ndu ophuu: “Unu tsoru iya; je etsoru mkpukpu ono gbushia ndu unu humaru. Unu ta aphukwaru phe obu-imemini; ophu unu edobekwa phe ndzu.

⁶Unu gbushia unwoke, buwaa ogerenya; me ndu bu okorobya; me unwumboko; me unwanyi; mekpoo unwegirima. Ole oo g'o to dukwa ndu ophu e meru iphe-ohubama ono, unu e-byi eka. Eka unu a-wata iya bu l'ulo ono duru mu nsu ono.” Oo ya bu; epe shi le ndu bu ogerenya, no l'ataphu eze-ulo Chileke ono; wata phe egbushi.

⁷O sukwa phe pho: “Unu merwushia eze-ulo ono emerwushi; unu egbushia nemadzu g'o tuko oma iya sweta. Ngwa unu tugbua jeshia!” Oo ya bu; epe tugbua je etsoru mkpukpu ono gbushiahaa nemadzu.

⁸Teke ono, epe egbushi nemadzu ono be mu no nkinyi mu; mu daa kpube iphu l'ali; chishia mkpu su: “Oowaa! Nnajiuphu, bu Chipfu! ? Iime g'i gude oke ehu-eghu ngu-a, i tukoshi Jierusalemu-a gbushigbua ndu Izurelu ophu phoduru nu too?”

⁹Ọ sụ mu: “Ejo-iphe, ndu Ízurelu; waa ọphu ndu Jiuda eme bẹ kwatakwaru paa ẹka apaa. Alì ono bụ iphe, jiru iya nù bụ egbu-ọchi. Mbụ lẹ mkpukpu ono bẹ bụ eme ejo-iphe, jiru iya ejiji. Ẹphe nọdu anọduje epfu sụ: ‘Chipfu gwọbeakwaru alì-a. Chipfu taa humajekwa iphe, anyi eme.’¹⁰Ọo ya bụ lẹ mu ta abyadu ele pẹ ẹnya kẹ phuru pẹ obu-imemini; ọphu mu abyadu edobe pẹ ndzu. Iphe ono, ẹphe mekotaru ono bẹ mu e-vukota kpube pẹ l'ishi.”

¹¹A bya ele ẹnya; nwoke ono, yeru uwe ẹkwa ọchaa; bya eturu mkpara-ẹkwo lẹ mgbureku ono lwaphuta azu; bya asu iya: “Mu meakwaru iphe, ì sùru gẹ mu mee.”

Ezekelu 10

Ọdu-biribiri Chileke lufuru l'eze-ulo Chileke

¹Tobudu iya bụ; mu bya elee ẹnya; mu huma iphe, dụ g'aba-eze, e gude mkpuma safaya mee g'ọ nọ l'akpaminigwe, nọ noghata ishi chierobu ono.

²Noo ya; Chipfu pfuaru nwoke ono, yeru uwe ẹkwa ọchaa ono sụ iya: “Bahụ lẹ mgbaka ọkpa ọgba-kperekpere, nọkota lẹ mkpula chierobu ono. Ye ẹka l'ime chierobu ono vọta icheku-ọku; vọ-jia ọbochi-ẹka ngu. L'i je eworu iya ghaa lẹ mkpukpu ono.” Mu nọdu ele iya ẹnya; ọ bahụ.

³Chierobu ono pfuchaaru l'uzo ndohali eze-ulo Chileke ono lẹ teke nwoke ono bahuru; urwukpu bya ejichaa imime oma eze-ulo ono ejiji.

⁴Tobudu iya bụ; ọdu-biribiri Chipfu shi l'eli chierobu ono gbeshi je anodu l'onu-abata eze-ulo Chileke ono. Urwukpu bya eji eze-ulo Chileke ono ejiji. Ogbu-nwiiinwii, shi l'odu-biribiri Chipfu ono bya eji oma-ulo Chileke ono ejiji.

⁵Igiji nkù chierobu ono bẹ a gbẹchaa l'azu oma-unuphu anu g'odaepho g'ọ bụ olu Chileke, bụ Okalibe-kangokotaru-nu teke oopfu opfu.

⁶Teke Chipfu suru nwoke ono, yeru uwe ẹkwa ọchaa ono g'ọ guta ọku lẹ mgbaka ọkpa ọgba-kperekpere ono; mbụ l'echilabo chierobu ono; bẹ nwoke ono bahuru je apfuru l'aguga ọkpa ọgba-kperekpere lanu.

⁷No iya; chierobu lanu l'ime chierobu eno ono; machia ẹka guta ọku, nọ l'echilabo ẹka ono, ẹphe nọ ono. Ọ guta ọku ono ye nwoke ono, yeru uwe ẹkwa ọchaa ono l'eka. Nwoke ono gude iya tugbua.

⁸Lẹ mkpula nkù chierobu ono bẹ iphe, dụ g'eka nemadzu nọgbaa.

⁹Mu bya elee ẹnya huma Okpa Ogbakperekpere eno, nọkota l'aguga chierobu ono. Okpa Ogbakperekpere ono duchaa nanu nanu nọ-kubegbaa chierobu ono. Okpa Ogbakperekpere ono nọdu aphukotaepho ngerengere gẹ kirisolayitu.

¹⁰Okpa ọgba-kperekpere ono ẹphen'eno bẹ gbakotaepho nanu. Ọ dukotaepho g'ọ bụ ọkpa ọgba-kperekpere ọzo; bẹ e pyoru l'ime iya.

¹¹Ẹphe -nọdu atugbu; ẹphe atuko shia uzo lanu l'ime uzo eno ono, chierobu ono ghagbaaru iphu ono. Ọphu ọkpa ọgba-kperekpere ono aswi-jijedu aswi-ji me chierobu

ono nòdu eje. O bũru ibiya òphu chierobu ono gharu iphu; bẹ ọkwasejeru. Ẹphe - nòdu eje; bẹ ẹphe ta aswì-jijedu aswì-ji m'ẹphe -phobewaa tũgbua.

¹²Ẹhu phẹ l'ophu; mẹkpoo okpurukpu phẹ; mẹ ẹka phẹ; mẹ ñkù phẹ bẹ bụ ẹnya jikọtaru iya ejiji. O bũru g'ọkpa ọgba-kperekpere phẹ ono ẹphe nọ ẹno ono òkòtakwapho bụ ono.

¹³Mu nũma g'eekugbaa ọkpa ọgba-kperekpere ono “Galũgalu.”

¹⁴Chierobu ono nwekọtaru iphu ẹno ẹno l'ẹhu l'ẹhu. Iphu lanu bụ iphu chierobu; iphu k'ẹbo bụ iphu nemadzu; iphu k'ẹto bũru iphu oduma; iphu k'ẹno bũru iphu ugo.

¹⁵No iya; chierobu ono bya angũlihu imeli imeli. O bũru phẹ bẹ bụ iphe ono, nọgbaa ndzu ono, mu hũmajeru l'agũga ẹnyimu Keba ono.

¹⁶O nòdu abujeru teke chierobu ono tũgburu; ọkpa ọgba-kperekpere ono, nọgbaa phẹ l'agũga ono etsoru phẹ. Teke chierobu ono sashiru ñkù g'ẹphe phelihi l'alì; bẹ ọkpa ọgba-kperekpere ono, nọgbaa phẹ l'agũga ono anọdujeepho g'ẹphe nọ; ẹphe ta alũfudu l'ẹka ẹphe nọgbacha.

¹⁷Teke chierobu ono nọ-kirishiru; ọgba-kperekpere ono anọ-kirishikwapho. Teke chierobu ono phelihuru; ẹphe angũ-lihukwapho tsoru phẹ; kele unme iphe ono, nọgbaa ndzu ono bẹ nọkota l'ime phẹ.

¹⁸Tòbudu iya bụ; ọdu-biribiri Chipfu ono lũfu l'ọnu-ulo eze-ulo Chileke ono; je anọdu l'eli chierobu ono.

¹⁹Mu nòdu elekpọepho ẹnya; chierobu ono sashia ñkù phẹ; shi l'alì phelihukota. Ẹphe nòdu ẹphe; ọkpa ọgba-kperekpere ono nòdu etso phẹ. Ẹphe pheru je anọdu l'ọnu-abata ọguzo ọphu nọ l'uzo ẹnyanwu-awawa l'eze-ulo Chileke. Ọdu-biribiri Chileke ke Ízurelu nòdu phẹ l'eli.

²⁰Oo phẹ bẹ bụ iphe ono, nọgbaa ndzu ono, mu hũmaru lẹ mkpula Chileke ke Ízurelu l'agũga ẹnyimu Keba pho. Oo ya bụ; mu bya amaru l'ọo chierobu bẹ ẹphe bụ.

²¹Ẹphe nwekọtaru iphu ẹno ẹno; mẹ ñkù ẹno ẹno l'ẹhu l'ẹhu. Lẹ mkpula ñkù phẹ ono bẹ iphe, ògbaa g'ẹka nemadzu nọkota.

²²Iphu phẹ òkòtaepho g'iphu ndu ọphu mu hũmajeru l'agũga ẹnyimu Keba pho. Ọphu nonu anọdujeepho eje ala l'iphu nhamunha.

Ezekelu 11

Ee-gbushi ndu Jierúsalemũ

¹Tòbudu iya bụ; Unme Chileke bya apalia mu; parũ jeshia l'ọnu-ọguzo ọphu nọ l'uzo ẹnyanwu-awawa l'ulo Chipfu. L'ọnu ẹka eeshije abahũ l'ọnu-ọguzo ono bẹ unwoke ọkporo l'ise nọ. L'ime phẹ bẹ mu hũmaru Jiazanaya nwa Azuru; mẹ Pelataya, bụ nwa Benaya, bụ phẹ bụ ndu-ishi ndu ono.

²Chipfu bya asũ mu: “Nwa ndiphe; ọo ndu-a bẹ anọduje achì ẹjo idzu; bũru phẹ anọduje lẹ mgbazi g'e mee ẹjo-iphẹ lẹ mkpukpu-a.

³Ephe nọdu asuje: ‘? Toko orwudu teke aa-kpushi ọlo ọọ? Mkpukpu-a bu ite, eeshi iphe be o bu; anyibedua buru anu, eeshije l'ite ono.’

⁴Oo ya bu; pfua ejo-iphe e-me phe nu; nwa ndiphe; pfua iphe, mu suru l'oo-me phe.”

⁵Tobudu iya bu; Unme Chipfu bya mu l'ehu; bya asu mu ge mu su: “Wakwa iphe, Chipfu epfu baa: Oo iphe ono be unu epfu; unube ndu Izurelu; ole mu makotaru iphemiphe, unu ari l'oriri.

⁶Unu gbushiwaru ikpoto nemadzu le mkpukpu-a; iphe, jiru gbororo buru odzu ndu unu gbushiru egbushi.

⁷“Oo ya bu le-a; wakwa iphe, Nnajiuphu, bu Chipfu epfu baa: Ndu ono, unu gbushiru kube l'ime mkpukpu ono be bu anu ono; mkpukpu-a buru ite-oku ono; ole mu a-chita unubedua chifu le mkpukpu-a.

⁸Ndzu ogu-echi be agu unu; ole oo ogu-echi ono be mu e-gude bapfuta unu. Noo iphe, Chipfu epfu bu ono.

⁹Mu a-chifuta unu l'ime mkpukpu ono; nwuru unu ye l'eka ndu ohozo; mbu nua unu aphu.

¹⁰Oo ogu-echi be ee-gude gbushia unu. O buru l'oke ali ndu Izurelu be mu a-nu unu aphu ono. Oo ya bu; g'unu amakwanuru l'oo mbedua bu Chipfu.

¹¹Mbu le mkpukpu-a ta abyadu aburu unu ite, eeshi iphe; ophu unu abyadu aburu anu nodu l'ime iya. Mu a-nodu l'oke ali ndu Izurelu nua unu aphu.

¹²Oo ya bu; g'unu amakwanuru l'oo mbedua bu Chipfu; kele unu te etsoduru iphe, mu toru okpa iya su g'e tsoje; ophu unu te emeduru ekemu mu. Iphe, unu gbemechia bu l'unu byaru emeaha g'ohamoha ono, bupheru unu mgburugburu emeje.”

¹³No iya; mu nodukwadu epfu iphe ono; Pelataya nwa Benaya nwuhu. Mu bya adaa kpupyabe iphu l'ali; chia oke mkpu su: “Oowaa; Nnajiuphu, bu Chipfu! ? Iime gi gbushikota ndu Izurelu ophu phoduru nu ọọ?”

E kwe ukwe k'alwalwa ndu alwutaru alwuta.

¹⁴Chipfu byakwa epfuaru mu ozo su:

¹⁵“Nwa ndiphe; ndu bu le Jierusalemu l'epfukwa opfu ehu ndu Izurelu; mbu unwune ngu ono a kpuru unu l'ephe le ndzu ono asuje: ‘Ndu ono, a kpuru le ndzu ono be nonukaakwaru Chipfu uzanya. Ali-a l'ophu buwaru nke anyi.’

¹⁶“Oo ya bu; su phe: ‘Wakwa iphe, Nnajiuphu, bu Chipfu epfu baa: O bu eviya l'oo mbedua rwutacharu phe je edobe uzanya uzanya; l'ali ndu ohozo; mbu woru phe ghakaa le mkpukpu le mkpukpu ono; ole g'o duhabe be mu bulekwaru phe-a akpo gbobutaru mee; le mkpukpu le mkpukpu eka ono ephe lagbaaru ono.’

¹⁷Oo ya bu; su phe: ‘Wakwa iphe, Nnajiuphu, bu Chipfu epfu baa: Mu e-shi l'ohamoha ono rwutakota unu; bya achikobe; mbu shi le mkpukpu le mkpukpu ono, a

chikashiru unu; unu lagbaa ono chita unu chiphuta azu. Mu abya eworu ali Izurelu nuphu unu azu.’

¹⁸“Epehe a-lwaphuta azu l'ali ono; bya atuko iphe, aakpofu l'enwa, no iya nu; me ebyi, eemegbabe l'ime iya wofukota.

¹⁹Mu e-me g'obu buru phe nanu; mu e-woru unme ophu ye phe l'ehu; mu ewofu okpoma mkpolanu, epehe nweru; woru okpoma, du belebele nu phe;

²⁰k'ophu epehe a-noduje etso iphe, mu toru okpa iya; bya anwube enya meahaa ekemu mu. Epehe aburu ndibe mu; mu aburu Chileke phe.

²¹Obenu le ndu ophu kporu obu ye l'iphe, aakpofu l'enwa ono; me l'ebyi, epehe emegbabe; be mu e-woru iphe, epehe eme kpukposhi l'ishi. Nokwa iphe, Nnajiuphu, bu Chipfu epfu bu ono.”

Alufu Odu-biribiri Chipfu le Jierusalem

²²Tobudu iya bu; chierobu ono, okpa ogba-kperekpere nogbaa l'aguga ono woru nku phe sashia; odu-biribiri Chileke ke Izurelu nodu phe l'eli.

²³Odu-biribiri Chipfu ono bya eshi l'ime mkpukpu ono gbalihu je edegebe l'eli ubvu, no l'uzo enyanwu-awawa mkpukpu ono.

²⁴Mu nodu aphu ophulanya, Unme Chileke goshiru mu; Unme ono palia mu je edobe l'eka ndu ono, a kpuru le ndzu ono no le Babilonu. Oo ya bu; mu phu-buhu ophulanya ono, mu shi aphu ono.

²⁵Tobudu iya bu; mu tuko iphe ono, Chipfu goshikotaru mu ono pfuaru ndu ono, a kpuru le ndzu ono.

Ezekelu 12

Onye mpfuchiru Chileke, no onodu onye a kpuru le ndzu

¹Tobudu iya bu; Chipfu bya epfuaru mu su:

²“Nwa ndiphe; o kwa l'echilabo ndu ekwefujeru mu ike be i bu. Epehe nwekwaru enya; ophu epehe aphudu iya uzo; epehe nweru nchi; ophu epehe ta anudu iya iphe; kele epehe ekwefuje ike.

³“Oo ya bu; nwa ndiphe; gwekobe iphe ngu g'onye a kpuru le ndzu ala ohozo. G'o bukwaru l'eswe teke epehe ele ngu enya; be ii-gweta gwefu l'eka i no; tugbua lashia eka ozo. ? A maru; ? iphe ono erwu-a phe l'ehu; e -gudekpoooro l'ephe bu ndu kwefuru ike.

⁴Teke o beru l'eswe teke epehe ele ngu enya; gwetakota iphe ngu gwefu; g'onye a kpuru le ndzu ala ohozo. Teke o beru l'uzenyashi; kwalia teke epehe ele ngu enya; tugbua g'onye a kpuru le ndzu ala ohozo.

⁵Bvufua uzo l'igbulo mkpukpu le teke epehe ele ngu enya; shi l'eka ono vufu iphe ngu ono.

⁶Dɛɛ iphe ono l'ukuvu l'ɛka ɛphe ele ngu ɛnya; vuta iya vufu lɛ nchi ejihu. L'i woru iphe kechia l'iphu g'i ti hɔma alɛ ɛnya; kele mu mewaru ngu g'i bɔru iphe-ɔhubama dɔru ndu Ízurelu.”

⁷Oo ya bɔ; mu bya emee ɛgube ono, a sɔru mu gɛ mu mee ono. O be l'eswe; mu bya egwefutakɔta iphe ono, mu gwekɔru gude alɔfu g'onye a kpuru lɛ ndzɔ ala ɔhozo ono. O bya erwua l'uzenyashi mu gude ɛka bvufu-a ɔzo l'igbulɔ ono. Mu gweta ivu mu lɛ nchi ejihu gbɛshi; ɛphe nɔdu ele mu ɛnya; mu parɔ iya nmakobe l'ukuvu; ɔ bɔru mu atɔgbu.

⁸Tɔbudu iya bɔ; o be l'utsu; Chipfu bya epfuru yeru mu sɔ:

⁹Nwa ndiphe; ? ɔ kwa lɛ ndu Ízurelu, bɔ ndu kwefuru ike ono ta ajiduru ngu sɔ: ? Bɔ gunu bɛ iime nno?

¹⁰Sɔ phɛ lɛ-a: Wakwa iphe, Nnajiuphu, bɔ Chipfu epfu baa: Ozi-a, dukwaru onye bɔ ishi lɛ Jierusalemu; bya aduru ɔnu-ɔlo ndu Ízurelu l'ophu.

¹¹Sɔ phɛ: Mbɛdua bɔ unu iphe-nggoshi; mbɔ l'oo ɛgube ono, mu mekɔtaru ono bɔ g'ee-mekɔta unu. ɛphe a-wufu bɔru ndu a kpuru lɛ ndzɔ lashi ɔhozo.

¹²Onye ɔphu bɔ onye-ishi l'echilabɔ phɛ bɛ e-gweta iphe iya nmakoru l'ukuvu lɛ nchi ejihu tɔgbua. Ee-bvufuru iya ɔzo l'igbulɔ g'o shia lɔfu. Oo-kwechi iphe l'iphu; g'o to gude ɛnya iya hɔma alɛ ono.

¹³Mu e-woru ɔgbu mu geberu iya; g'ɔ nmalahuru mu l'ɔnyà; mu eduru iya jeshia Babilonu, bɔ alɛ ndu Kaludiya. O bɔru l'ɛka ono bɛ ɔo-nɔdu nwuhu; ɔle ɔ tɔ byakwanɔ egude ɛnya iya hɔma alɛ ono.

¹⁴Ndu ono, eswipheje iya nɔ ono bɛ mu a-chikashichaa nanɔ nanɔ; mbɔ ndu ejejeru iya ozi; mɛ ndu ojɔgu iya g'ɛphe ha. Mu a-mita ogu-echi gude chipyabe phɛ.

¹⁵“Teke mu chikashieru phɛ phɔ; ɛphe tɔko iphe, bɔ ɔhamoha dzuru; mbɔ mee ɛphe dzuru mkpɔkpu, nɔnu bɛ ɛphe a-maru-a l'oo mbɛdua bɔ Chipfu.

¹⁶Ole nwa ndu ɔphu habe nwahabe bɛ mu e-me-a g'e te gude ogu-echi gbua; waa g'ɛgu-ememe; mɛ mgbu-ɔnwu te egbu phɛ. Oo ya bɔ g'ɛphe anɔdu l'ɔhamoha ono, ɛphe jekpɔoru; kɔshikota ɛbyi, ɛphebe ndu Ízurelu shi emegbabe. Noo teke ɛphe a-maru l'oo mbɛdua bɔ Chipfu.”

Onye mpfuchiru Chileke, ɛhu aphu kpaakpaakpaa

¹⁷Tɔbudu iya bɔ; Chipfu bya epfuaru mu sɔ:

¹⁸“Nwa ndiphe; gude ɛhu-anmanma ria nri ngu; l'i gude ɛhu-kpaakpaakpaa ndzɔ-agugu ngɔa mini.

¹⁹Sɔ ndu alɛ-a: ‘Wakwa iphe, Nnajiuphu, bɔ Chipfu epfu lɛ kɛ ndu bu lɛ Jierusalemu; mɛ ndu alɛ Ízurelu baa: ɛphe e-gude ndzɔ-agugu eri nri; teke ɛphe angɔ mini meji atɔfu phɛ atɔfu; kele alɛ phɛ bɛ aa-tɔko iphemiphe, nɔ iya nɔ natachaa; kele ndu bu iya nɔ tsobewarɔ wenuka iwashi.

²⁰Mkpukpu, e bu ebubu l'alì ono a-bukotaru ẹka dabyiru iphoro; mbu l'alì ono bẹ a-bukotaru ochobu. Ọo ya bu g'unu amakwanuru l'ọo mbedua bu Chipfu.' “

²¹Tobudu iya bu; Chipfu byakwa epfuru yeru mu su:

²²“Nwa ndiphe; ? buna gunu bẹ ẹtu ono, unubẹ ndu Ízurelu anmajẹ ono bu; mbu ono, unu asuje: ‘Mboku -nọdu anwushi bẹ ọphulenyà, a phuru aphuphu abujeru iphemmanu.’

²³Su phẹ: ‘Wakwa iphe, Nnajiuphu, bu Chipfu epfu baa: Mu e-me g'ẹtu ono ta aduhe; mbu l'aa-nmabuhu ẹtu ono l'alì Ízurelu.’ Su phẹ: ‘Mboku agbarwutakwaa teke ọphulenyà, a phukotaru e-meẹbekota g'a phuru iya.

²⁴Noo kele aa-phu-buhu ọphulenyà ẹregede l'alì Ízurelu; l'agbabuhu iya ẹja, enwedu ishi.

²⁵Mbedua bu Chipfu e-pfukwa opfu; iphe, mu pfuru emee gẹ mu pfuru iya; ọ to nọdu ọdu ememe. Mbu l'ọo l'ogbo unubẹ ndu ekwefujeru mu ike-a bẹ mu e-mekota iphe, mu pfuru. Nokwa iphe, Nnajiuphu, bu Chipfu epfu.’ “

²⁶Tobudu iya bu; Chipfu byakwa epfuaru mu su:

²⁷Nwa ndiphe; lewaro lẹ ndu Ízurelu epfu l'ọphulenyà ono, i phukotaru ono bẹ bu iphe, e-me teke dukwadro ẹnya; mbu l'iphe, iipfukota bẹ bu iphe, a-nọ ọdu teme l'ovua.

²⁸“Ọo ya bu su phẹ lẹ-a: Wakwa iphe, Nnajiuphu, bu Chipfu epfu baa: Ọ to dukwa opfu mu ono mẹ nanu, akpo upfu ememe. Iphe, mu pfuru bẹ e-mekota gẹ mu pfuru iya. Nokwa iphe, Nnajiuphu, bu Chileke epfu bu ono.”

Ezekẹlu 13

Ikpe, a nmaru ndu mpfuchiru, epfu iphe, Chileke epfuduru

¹Tobudu iya bu; Chipfu bya epfuru opfu yeru mu su:

²“Nwa ndiphe; pfuaru mu ndu mpfuchiru kẹ Ízurelu g'ọo-duru phẹ; mbu ndu k'ono epfuchiru Chileke nta-a ono. Pfuà g'ọo-du ndu ono bu iphe, gbatataru phẹ l'uche bẹ ẹphe epfukpofuje su l'ọo Chileke bẹ ẹphe epfuchiru ono. Su phẹ lẹ-a: ‘Unu numakwa iphe, Chipfu epfu!’

³Wakwa iphe, Nnajiuphu, bu Chipfu epfu baa: Nshio unubẹ ndu eswe ono, bu ndu mpfuchiru; mbu ndu ono, anọduje etso iphe, obu phẹ pfuru phẹ; l'ẹbe abu l'ọo duru iphe, ẹphe humaru ono.

⁴Unubẹ Ízurelu; ndu mpfuchiru unu duẹpho gẹ nkuta-ọswa, nọ l'ochobu.

⁵Unu ta agbajeduru okpa l'ẹka igbulọ Ízurelu gbashiru ọru; ọphu ọ buro kẹ kpukwaa ya akpukwa; g'ọ pfushia ike; kwaberu eswe kẹ Chipfu ono.

⁶Ọphulenyà ẹphe aphuje bukota ọphulenyà iphoro. Iphe, ẹphe asuje l'oo-me abukotajeru uka bẹ ẹphe dzushiru. Ẹphe asuje: Wakwa iphe, Chipfu epfu baa'; l'ẹbe

abụ l'ọo Chipfu bẹ ziru phẹ nụ; ẹme ẹphe gbẹ anọduje ele ẹnya g'iphe, ẹphe pfukotaru vua.

⁷? Tọbodu ụka bẹ unu adzujẹ l'ophulenyaa, unu aphụ; bya epfujẹ iphe, abudu eviya lẹ teke unu sūru: Wakwa iphe, Chipfu epfu baa; l'ẹbe abụ l'ọo mbẹdua bẹ pfuru iya nū?"

⁸Oo ya bụ lẹ-a; wakwa iphe, Nnajiuphu, bụ Chipfu epfu baa: "Eshi ophu unu adzushi ụka bya aphụ ophulenyaa ẹregede bẹ mu nọakwaru unu lẹ njọ." Nokwa iphe, Nnajiuphu, bụ Chipfu epfu bụ ono.

⁹Ndu ono, aphujẹ ophulenyaa, bụ ụka ono; waa ndu ono, epfujẹ iphe, abudu ire-lanu ono bẹ mu a-da ẹka l'ẹhu kẹ njọ. Ẹphe ta abyadu anodubaa l'ẹka ndibe mu nọ; ophu a byadu edebaa ẹpha phẹ l'ẹkwo, e deshiru ẹpha ndu onu-ulo Ízurelu; ophu ẹphe abyadu abahubaa l'alị ndu Ízurelu ozobaa. Oo ya bụ; g'unu amakwanuru l'ọo mbẹdua, bụ Nnajiuphu, bẹ bụ Chipfu.

¹⁰"Ẹphe dusweru ndibe mu ụzo; ẹphe asujẹ lẹ nchị dū doo l'ẹbe abụ lẹ nchị dū doo. Oobujeru a -nọdu akpụ igbulọ, eshihuduru ike; ẹphebedua egude penti-ochaa eete iya.

¹¹Oo ya bụ; pfuaru ndu ono, teru iya penti-ochaa ono; l'oo-zekposhihukwa. Oke mini e-dzekwa; akamini-mkpuma adaa; ẹme oke pherephere ezia

¹²Teke igbulọ ono zekposhihuerupho; ? ndiphe ta ajidu unu sū: '? Denuhununu penti-ochaa ono, unu teru iya ono?' "

¹³"Oo ya bụ; wakwa iphe, Nnajiuphu, bụ Chipfu epfu baa: Mu e-gude oke ẹhu-eghu mu mee g'oke pherephere zia; mu egudekwaphọ ẹhu-eghu mu mee g'akamini-mkpuma daa; mebyishia ya; mee ya g'oke mini dzee; mee ya omeliwe.

¹⁴Mu e-nwutsushikọta igbulọ ono, unu teru penti-ochaa ono; mbụ rwazekọta iya jasụ l'alị; k'ophu bụ l'aa-humachaa ẹka a tūru okpa iya. O -dakposhihuepho ono bẹ unu a-bukotaru mkpurupyata l'ime iya. Oo ya bụ; g'unu amakwanuru l'ọo mbẹdua bụ Chipfu.

¹⁵"Noo gẹ mu e-shi tukoshi igbulọ ono oke ẹhu-eghu mu bụ ono; tukoshi iya ndu ono, teru iya penti-ochaa ono. Oo ya bụ; mu akakwanuru unu l'igbulọ obu; mẹ ndu rwaru iya arwarwa bẹ nkephẹ bvụakwaru;

¹⁶mbụ ndu mpfuchiru Ízurelu ono, shi anọduje aphuru Jierúsalemu ophulenyaa; mbụ ndu ono, shi anọduje epfuru phẹ lẹ nchị dū doo l'ẹbe abụ lẹ nchị dū doo. Nokwa iphe, Nnajiuphu, bụ Chipfu epfu."

Iphe, e-me unwanyi, egudeje obvu eduphushi ndu Ízurelu

¹⁷"Oo ya bụ; nwa ndiphe; gharu unwanyi ndibe unu iphu lẹ kẹ njọ; mbụ ndu ono, bụ iphe, ẹphe ritaru l'obu phẹ bẹ ẹphe epfukpofujẹ ono. Pfu mpfuchiru kẹ njọ l'opfu ẹhu phẹ;

¹⁸sū phẹ lẹ-a: Wakwa iphe, Nnajiuphu, bụ Chipfu epfu baa: Nshio unwanyi ono, adzujajegbaa obvu gbakachaa lẹ nkwo-ẹka ono; ẹme ẹphe nọdu emeshi ẹkwa-ishi l'asụ iya l'asụ iya gẹ ndu ozo keje l'ishi. Ẹkwa-ishi ono buri iphe, ẹphe egudeje achi

nta ndzụ ndu ọzo. ? Bụ ndzụ ndibe mu be unu a-ndu achi nta iya; teme unu eche ndzụ nkunu g'ọ duru unu too?

¹⁹Unu gudewaa ese iswi nwa-ochileka bali; waa iswi iphiriba buredi; meswee mu; ophu unu akwabedu mu ubvu. Unu shi nno mee ndu tege anwuhudu nu; epe nwushihu; mee ndu ophu gbaru g'ephe nwushihu; epe ndu-chia ndzụ. O buru iphe, kparu iya nu bu l'unu dzushiru ndibe mu uka; kele epe angabeje nchi me a -ndu adzuru phe uka.”

²⁰“Oo ya bu; ‘wakwa iphe, Nnajiuphu, bu Chipfu epfu baa: O buwaa ke mu l'obvu unu ono, unu gude anmakọ nemadzụ g'ephe bu unwenu ono. Mu a-gbabushichaa obvu ono unu gbaa l'eka ono. Ndu ono, unu achi nta phe ono be mu e-mee g'ephe nweru onwophe; mbu ndu ono unu nmakooru l'onya g'unwenu ono.

²¹Mu a-lashichaa ekwa-ishi unu ono; nafuta ndibe mu l'eka unu. Epe taa dalahubaedu unu l'eka ọzo. Noo teke unu a-maru l'ọ mbedua bu Chipfu.

²²“Eshi ophu unu gudewaa adzụ uka mee g'aphu tsoru ndu pfuberekoto; l'ebe abu le mu meru g'aphu tsoru phe; unu gbetchia eyeru ndu iwashi okpu-ikike; mbu mee g'ephe te eshi l'ejo-iphe, epe eme lufuta; shi nno dzoo onwophe ndzụ;

²³be unu ta abyakwa aphubaa ophulenyaa, abudu ire-lanu ono; ophuu unu abyadu epfubaa l'oo ophuu iphe, e-me nu bu ophuu. Mu a-nafuta ndibe mu l'eka unu. Oo ya bu g'unu amakwanuru l'oo mbedua be bu Chipfu.’ “

Ezekelu 14

Aanma ndu agwo obvu ikpe

¹Tobudu iya bu; ndu bu ogerenya ndu Izurelu haru byapfuta mu; bya anoduchaa anoo l'ataphu mu.

²Chipfu bya epfuru opfu yeru mu su:

³“Nwa ndiphe; ndu-a be kporu obu ye l'agwo obvu. Epe woru ejo-iphe, epe e-vukota daa dobe onwophe l'ataphu. ? Denu ge mu e-shi haa phe g'ephe jitajekwadu mu iphe?

⁴“Oo ya bu; pfiaru phe; su phe le-a: ‘Wakwa iphe, Nnajiuphu, bu Chipfu epfu baa: Teke o nweru onye Izurelu, kporu obu ye l'agwo obvu; teme o woru ejo-iphe, bu iphe, oo-vukota daa doberu onwiya l'iphu; teme onye ono gbete teke ono jepfu onye mpfuchiru Chileke g'ọ jita iya iphe; be bu mbedua, bu Chipfu gedegede be a-karu onye ono egube oo-duru iya le k'ikpoto obvu ono, ogoono.

⁵Noo ge mu e-me iya bu ono; shi nno lo-phuta okpoma ndu Izurelu azu; mbu ndu ono, gudewaa agwo obvu lufu mu l'ehu ono.’

⁶“Oo ya bu; pfiaru ndu Izurelu su phe le-a: ‘Wakwa iphe, Nnajiuphu epfu baa: Ophu g'izimanu lwa unu azu g'unu haa agwo obvu ono, unu agwophe ono; mbu g'unu haa iphe, bu ebyi ono, unu emegbaa ono.

7"Teke o nwekp̄oru onye Ízurèlu; ọ́zoo onye byaru abyabya lẹ́ Ízurèlu, bufuru onwiya l'ẹ́ka m̀be Chipfu nọ́; je akp̄oru obu ye l'agwa iphe; tẹ́me o woru ẹ́jo-iphe, b̀u iphe, oo-vukota daa doberu onwiya l'atatip̄hu; bẹ́ onye ono -gbẹ́ teke ono jepfu onye mpfuchiru Chileke g'ọ́ j̄ita iya iphe; bẹ́ b̀u m̀bẹ́dua, b̀u Chipfu gẹ́degede a-kar̄u onye ọ́bu g'ọ́o-d̄uru iya.

8"Mu a-ghaerupho onye ọ́bu iphu lẹ́ kẹ́ n̄jọ́; mee ya iphe, ee-gude alọ́ ndu ọ́zo ẹ́ka lẹ́ nchi; mb̀u mee ya g'ọ́ buru onye ee-gude anma l'ẹ́tu. Mu e-bufu iya l'echilabọ́ ndibe mu. Ọ́o ya b̀u g'unu amakwanuru l'ọ́o m̀bẹ́dua bẹ́ b̀u Chipfu.

9"Teke ọ́ b̀u l'onye mpfuchiru Chileke bẹ́ e dusweru ọ́zo; o pfua iphe ab̀udu iya ǹu; bẹ́ bukwa m̀be Chipfu meru g'onye mpfuchiru ono pfua ya; k'ọ́phu mu a-mach̄i ẹ́ka; daa ya ẹ́ka kẹ́ n̄jọ́ l'ẹ́hu; woru iya gbua; g'ọ́ tọ́ nọ́duhe l'echilabọ́ ndibe mu, b̀u ndu Ízurèlu.

10"Ẹ́jo-iphe, ẹ́phe meru ono bẹ́ a-tukoru phẹ́ l'ishi. Ọ́o iphe, e meru onye mpfuchiru Chileke ono bẹ́ ee-me onye jeru iya aj̄ita iphe kwaphọ́.

11"Ọ́o ya b̀u gẹ́ ndu Ízurèlu ahaa agbafu l'ẹ́ka mu; tẹ́me ẹ́phe ahakwaaphọ́ egude ẹ́jo-ememe, ẹ́phe eme emerw̄ushi onwophẹ́. Ẹ́phe a-buru ndibe mu; mu aburu Chileke phẹ́. Nokwa iphe, Nnajiuphu, b̀u Chipfu epfu b̀u ono.' "

Nuwa waa Dan̄lu waa Jiobu

12"Tọ́budu iya b̀u; Chipfu bya epfuru opfu yeru mu s̀u:

13"“Nwa ndiphe; ọ́ -buru lẹ́ mkp̄ukpu mesweru mu; ọ́phu mu egudeedu ire phẹ́ ẹ́ka; mu -mach̄ia ẹ́ka gẹ́ mu daa phẹ́ ẹ́ka kẹ́ n̄jọ́ l'ẹ́hu; bẹ́ mu e-me g'ọ́ tọ́ duhe ẹ́ka ẹ́phe e-shije h̄uma nri; ẹ́gu emeahaa phẹ́; tẹ́me mu abya egbushikọ́ta nemadz̀u mẹ́ iphe-edobe phẹ́.

14"O betakp̄oo ǹu ọ́madzu ẹ́to-a nọ́du iya, b̀u iya b̀u Nuwa waa Dan̄lu waa Jiobu bẹ́ bukwa ẹ́phebedua kpoloko bẹ́ a-dzọ́o ndz̀u; kẹ́le ẹ́phe pf̄uberekoto. Nokwa iphe, Nnajiuphu, b̀u Chipfu epfu.

15"“O -buru l'ọ́o ẹ́jo an̄u-ẹ́gbudu bẹ́ mu yeru g'ọ́ je esweta mkp̄ukpu ono; an̄u-ẹ́gbudu ono tagbushikọ́ta ndu bu iya ǹu; mee ya; ọ́ buru ochobu; mb̀u k'ọ́phu b̀u l'ọ́ tọ́ dudu onye adu ike aghata ẹ́ka ono aghata; kẹ́le an̄u-ẹ́gbudu ono tukoru ẹ́ka ono sweta;

16"bẹ́ eshi ọ́phu m̀be Nnajiuphu, b̀u Chipfu nọ́ ndz̀u gẹ́ mu nọ́ iya-a; bẹ́ ọ́madzu ẹ́to-a -nọ́dukponu l'ime iya bẹ́ ẹ́phe taa dukpokwanu ike adzọ́ nwa nwoke; ọ́zoo nwa nwanȳi l'al̄i ono. Ọ́o ẹ́pho ẹ́phebedua bẹ́ a-dzọ́ta kpoloko; al̄i ono a-dabyiru buru ochobu.

17"“Ozoo l'ọ́o ogu-echi bẹ́ mu gude bapfuta mkp̄ukpu ono; s̀u g'ogu-echi ono tukoro mkp̄ukpu ono jegbabe; gbushia nemadz̀u mẹ́ iphe-edobe, nọ́ iya ǹu;

18"bẹ́ m̀be Nnajiuphu, b̀u Chipfu pfuru s̀u-a: Eshi ọ́phu mu nọ́ ndz̀u gẹ́ mu nọ́ iya-a bẹ́ ọ́madzu ẹ́to ono -nọ́dukpoo ya ǹu; bẹ́ ẹ́phe taa dukpokwanu ike adzọ́ nwa nwoke; ọ́zoo nwa nwanȳi. Ọ́o ẹ́pho ẹ́phebedua bẹ́ a-dzọ́ta kpoloko.

19"“Ozoo lẹ́ mu meru ẹ́jo iphe-ememe bya l'al̄i ono; mb̀u mu -gude oke ẹ́hu-ẹ́ghu mu gwaa phẹ́ ọ́chi; mb̀u gbushia nemadz̀u; mẹ́ iphe-edobe;

²⁰be mube Nnajiuphu, bu Chipfu epfu su-a: Eshi ophu mu no ndzu ge mu no iya-a; be ome l'oo ge Nuwa waa Danelu waa Jiobu -nodukpoo ya nu; be ephe taa dukwa ike adzota nwa nwoke; ozoo nwa nwanyi l'ali ono. Oo ephe onwophe be ephe a-du ike dzoo; kele ephe pfulerekoto.

²¹“Le-a; wakwa iphe, Nnajiuphu, bu Chipfu epfu baa: Oo-kabakwaro Jierusalemu njo; teke ono, mu e-gude uzi iphe eno, eye ebvu, gude byapfuta phe bya anua phe aphu ono. Uzi iphe eno ono bu: Ogu-echi; waa egu-ememe; me ejo anu-egbudu; me ejo iphe-ememe. Iphe ono be mu e-gude bya egbushia nemadzu; me iphe-edobe, no l'ali ono.

²²Ole g'o duhabe be o nwekwaru-a ndu ophu a-waa nu. Ndu a-waa nu ono be bu unwegirima unwoke me unwegirima unwanyi, bu ndu e-shi l'eka ono lufuta byapfuta unu. Teke unu humaru umere phe; waa g'ephe gude eme be obu e-jizeta unu le k'ejo iphe-ehuka ono, dapfutaru Jierusalemu ono; mbu k'iphe, bukpuo ejo iphe-ehuka, mu meru; o dapfuta iya ono.

²³Obu e-jizeta unu teke unu humaru umere phe; waa g'ephe eme; kele unu a-bya amaru l'o to nwedu iphe, mu mekotaru l'eka ono, te enwechadaa iphe, kpataru iya nu. Nokwa iphe, Nnajiuphu, bu Chipfu epfu bu ono.”

Ezekelu 15

A turu Jierusalemu yeru vayinu, oku keru

¹Tobudu iya bu; Chipfu bya epfuru opfu yeru mu su:

²“Nwa ndiphe; ? Bu gunu bu iphe, vayinu gude ka oshi ozo, no l'oswa ree?

³? O nwekpooru iphe, baru urwu, eegudeje oshi iya eme to? Mbu-a; ? e gudejekponu oshi iya apyita nggu, eekobeje iphe?

⁴O buchia l'oku be ewojeru iya chie; oku ekee ya ishi labo; bya ekebashia echilabo iya ekebashia. ? Bu gunu be o du k'ememe teke ono?

⁵Teke o bu l'o to dudu iphe, ooga mkpa iya teke o dzuru oke; ? bu-chia teke oku gbe kewa iya ishi labo bya ekebashia echilabo iya; be o-gbechihuna bya enweru iphe o-bya adu ree k'egude mee to?

⁶“Oo ya bu le-a; wakwa iphe, Nnajiuphu, bu Chipfu epfu baa: Oo egube ono, mu wotaru vayinu ye l'oku g'o buru nku l'ime iphe, bu oshi, no l'oswa ono bu ge mu e-me iphe, bu ndu bukota le Jierusalemu.

⁷Mu a-ghachiru phe iphu le ke njo. A makwaru-a l'ephe lufutawaru l'oku ono; ole o bukwapo oku e-kepyashi phe. Teke mu ghachieru phe pho iphu le ke njo; be unu amaru l'oo mbedua be bu Chipfu.

⁸Mbu-a; ali ono be mu e-me g'o buru ochobu; kele ephe ta ahaduru adu ghelegheleghele. Nokwa iphe, Nnajiuphu, bu Chipfu epfu bu ono.”

Ezekelu 16

Gheleghelehele mkpukpu Jierusalemu

- ¹Noo ya; Chipfu bya epfuru opfu yeru mu su:
- ²“Nwa ndiphe; mee ge Jierusalemu makpodarupho akpamara, ephe eme;
- ³su phe: Wakwa iphe, Nnajiuphu, bu Chipfu epfuru Jierusalemu baa: “Eka i shi, bu iya bu eka a nwuru ngu be bu l'ali Kenu. Nna ngu be bu onye Amoru. Ne ngu buru onye Hetu.
- ⁴Mboku, a nwuru ngu be e te buduru ngu otubo ebubu; ophu o dudu onye wuru ngu eh; mbu mee ngu g'i du ree; teme ophu a nyiduru ngu me unu l'eh; ophu o buru ke kpube ngu ekwa l'eh.
- ⁵O to nwedu onye imemini ngu du; ophu o dudu onye nweru obu-imemini ke g'o nweru iphe ono ophu oo-meru ngu. Iphe, mechiaru nu bu l'a nwuru ngu gbado l'oma-egu; kele i bu nwa, aakpofu akpofu teke a nwuru ngu.
- ⁶“Tobudu iya bu; mu ghatashiepho l'eka ono bya ahuma ngu l'eka i dabyiru arwaswi onwongu le mee ngu ono be mu suru ngu g'i dzuru ndzu. Mbu o buru teke ono gu le mee ngu ono puchiru egube ono; be mu suru ngu: ‘Dzuru ndzu!’
- ⁷Mu bya emee ngu; i vua evuvu g'oshi, no l'oswa eh du guu. I bya evuta; ha ke kpaphere; bya akaa kpurukutuku; ama ntumatu; era ji ngu obu; teme i bya agbaa eji ke wogalaa. Obenu l'i gba oto; dabyierupho nno.
- ⁸“Mu ghatashikwa ozo bya elee ngu enya huma l'i kajiwaru k'ala le ji; oo ya bu; mu gude igburonu ekwa mu phukpute ngu; mbu gude iya gbochia ngu oto, i gba ono. Mu kwe ngu ukwe le mu a-buru nkengu; anyi le ngu bya eworu ndzu gbaa; i buru nkemu. Nokwa iphe, Nnajiuphu, bu Chipfu epfu.
- ⁹“Tobudu iya bu; mu bya awua ngu eh; gude sashia ngu mee ono; bya eworu manu jia ngu;
- ¹⁰woru uwe, a kpangashiru iphe erengete yee ngu; bya eyee ngu akpokpa, e meru l'akpo-anu. Mu woru ekwa-ochaa nmabe ngu; bya eworu uwe, ereshi ire ike yee ngu.
- ¹¹Mu gude iyagba kwangashia ngu akwa; bya agbabechaa ngu mgbaleka; bya anyabe ngu iphe-olu.
- ¹²Mu byakwapho eyee ngu eregede-imi; woru eregede-nchi ye ngu le nchi; bya egude okpu, ama ntumatu su-chia ngu ishi.
- ¹³O buru g'e gude mkpola-ododo me mkpola-ochaa memaa ngu bu ono. Uwe, iyeje bu uwe, e meru l'ekwa-ochaa; me uwe, ere ire ntumatu; me uwe, a kparu l'ekwa, e dengashiru iphe o du ree l'enya. Nri, iirije buru okpobe ukpokutu ereshi; me manunenwu; me manu-olivu. Oo ya bu; i bya amashiahaa mma ike bya aburu eze-nwanyi.
- ¹⁴Epha ngu bya atuko iphe, bu ohamoha ngakota; o buru mma, jima kparu iya; kele eguru iphe ono, mu nuru ngu ono be meru; mma, jima dzua oke. Nokwa iphe, Nnajiuphu, bu Chipfu epfu.

- 15“Ole mma ono, ìima ono gbẹ mee; i vuahaa ishi lẹ mkpopfu; bya egude kele udu ngu ngaru ekameka; bya awata agba ukpara. Iphe, bukpo ndu aghata aghata be iiwojeru onwongu togboru; mbu woru mma ngu ono nu phe.
- 16Uwe ngu ono be i haru hata gude mema aka i doberu agwaje iphe emema; o buru aka ono be iinoduje agba ukpara obu. Egube iphe ono ta agbaduru g'o mee ememe ophu; mbu l'o to gbaduru g'o du nno.
- 17I wotakarupho okpobe, iyagba ono, mu nuru ngu ono; mbu iyagba ono, e gude mkpola-ododo mu; me mkpola-ochaa mu mee ono; gude metaru onwongu ntekpe, a kpushigbaaru o du ge nwoke. O buru iya be i gude apharwushi onwongu obu.
- 18I bya achita ekwa ngu ono, e dengashiru o nodu ama mma ono; woru yegbachaa ntekpe ono; bya ewota manu mu; me unwu-isensu mu cheberu phe l'iphu.
- 19Nri ono, mu nuru ngu ono; mbu okpobe utu-ereshi; me manu-olivu; me manu-enwu ono, mu nuru ngu g'i rije ono be i wotakarupho gude gweeru phe eja, eshi mkpo. Oo ephe g'o nwuru bu ge mu pfukotaru ono. Nokwa iphe Nnajiuphu, bu Chipfu epfu bu ono.
- 20“Ophu kachakpo nu bu l'i chitaru unwegirima unwoke; me unwanyi, i nwushiru mu ono gude gwahaa agwa ono; mbu woru phe mee nri agwa. ? Apharwushi ono, iipharwushi onwongu ono ta atsudu ngu iya to?
- 21I bya eworu unwegirima mu gbushia hua ahuhu l'oku gude gwaa agwa ono.
- 22Iphe, bu ebyi ono, iimekotakpo ono; me apharwushi ono, iipharwushi onwongu ono be iimekotakpoephe; ophu i ti nyataduru teke i shi buru nwata; mbu teke ono, i shi gbaru oto; dabyerupho nno; arwaswi onwongu le mee ngu ono.
- 23“Iphe, Nnajiuphu, bu Chipfu epfu eyeru ngu l'ejo-ememe ono, iimegbabe ono bu: Nshio kwa ngu ro! Nshio kwa ngu ro ya nshio!
- 24I kpushigbaru onwongu ulo-nshi; bya akpushikwarupho onwongu enya aka agwaje iphe l'iphe, bu edupfu, nonu.
- 25I tukoru iphe, bu ishi gbororo, nonu dobegbaa enya-agwa; shi egube ono woru mma, iima phaa kutukutu. O nodu abujeru iphe, bu onye ghatashiaru nu l'i pakaaru iya agada; bya eshi egube ono kabaa apharwushi onwongu eje.
- 26I woru onwongu nu ndu Ijiputu ephe pharwushia; mbu ndu obutobu ngu ono, egu nwanyi anoduje enwu phurupuru l'ehu g'oku ono. Eme-eji ngu obu ka ngu pho anwunwe anwunwe l'ehu; i shi nno akpatsu mu ehueghu.
- 27“Tobudu iya bu; mu watanu ngu adaa aka l'ehu ke njo; bya ekebota oke ali ngu ono. Mu woru ngu nu ndu ohogu ngu ono; bu nwada ndu Filisitayinu bu ndu ehuechi oku; mbu ndu ono iphere apharwushi, i pharwushi onwongu gbẹ du ono.
- 28“Ophu ukpara, i gbagbaberu l'ibe iya ozo atsudu ngu iya; i choru ndu Asiriya jeshia; unu le ndu Asiriya pharwushichakpo onwunu; ophu o bukwapho l'o tsuru ngu iya.

29Ị gbafu; jepfu ndu Bábilonu; mbu ndu ono, agba oke-ngho ono; unu l'ephe bya akabakporo apharwushi onwunu; teme ophu o bukwapho l'o tsuru ngu iya.

30“Wakwa iphe, Nnajiuphu, bu Chipfu epfu baa: ‘Obu ngu dahwakwaru adzulakpa; o kwa iya kparu iphe, iimegbabe egube umere owa-a; mbu emeepho ge nwanyi-ukpara, enweedu iphere!

31I woru ulo-nshi ngu kpushicha l'iphe, bukpoo mgbakata-uzo, nonu; bya eworu enya aka jigwaje iphe kpushibe l'iphe, bukpoo edupfu nonu. G'i gbeje jika anata okpoga-a; be i gbekwa ophu iimegbuudu umere nwanyi-ukpara.

32Ị bu nwanyi, alu ji; ole i gbe eri ogori bya akaje aswaru unwoke ozo aswaru; eme le ji ngu.

33Onye agba ukpara be onye yee ya kwaru apfuje ugwo; obenu le gubedua gbe anuje nemadzu iphe g'unu l'iya kwaa; mbu l'i gbe anuje iphe, bu ndu shi ekameka iphe uphalazu g'ephe bya g'unu l'ephe shiru onya.

34Mbu l'agba ukpara nkengu gbe gbaa iche le k'unwanyi ozo; o to nwedu onye achije ngu g'unu l'iya kwaa. I gbe eme iche; kele iinuje nemadzu iphe g'unu l'iya kwaa; ophu o dudu onye anuje ngu nu.

35“Oo ya bu; gube nwanyi-ukpara; numa iphe, Chipfu epfu!

36Wakwa iphe, Nnajiuphu, bu Chipfu epfu baa: Eshi ophu i chishiru iphe, i nweru enweru; bya agbabewa onwongu oto l'apharwushi, unu le ndu i yeru obu anoduje apharwushi onwunu ono; teme waa k'ejo agwa ono, i dobegbaaru ono; waa kele iinuje phe mee unwegirima ngu;

37be iphe, ii-huma ahuma bu le-a; mu a-chikobe ndu ono, apharwushi ngu nu ono g'ephe ha, bu iya bu ndu ono, emeje ngu ehutu-otso ono; ndu ophu i yeru obu; me ndu ophu du ngu ashi; g'ephe ghakobe tsoo ngu ugu. Mu a-gbabe ngu oto l'iphe phe g'ephe huma-gbua ngu ime.

38Mu a-nu ngu aphu, aanuje nwanyi, riru ogori waa onye gburu ochi. Mu e-kpukposhi ngu oke ehueghu mu; bya egude anwuhu nua ngu aphu.

39Teke ono be mu e-nwuru ngu nu ndu ono, i yeru obu ono; ephe enwutsushikota ulo agwa ngu ono; toko aka jigwaje iphe nwukposhikota enwukposhi; yeshikota ngu uwe ngu; bya anatachaa ngu iyagba ngu; mbu mee ngu g'i gbaru oto dabyiru nno.

40“Ephe a-chita ikpoto nemadzu bya etsoo ngu ugu. Ephe atua ngu mkpuma; bya egude ugu-echi phe gbua ngu see see.

41Ephe a-tukota ulo ngu oku; nua ngu aphu l'eka ikpoto unwanyi ele ngu enya. Mu e-me ngu g'i paru agba ukpara haa; l'i pfu-buhu ndu anoduje apharwushi ngu nu ugwo; ephe apharwushi-buhu ngu.

42Noo teke ehuebe ghubuhu mu eghe l'opfu ehue ngu; mu avubuhuru ngu ovuma ono mu shi avuru ngu ono; lebhuhu ngu enya ogori;

⁴³Kele i ti nyataduru teke ono, i shi buru nwata ono. O bu-chiaru iphe, i meru bu l'i gude iphemiphe-a eme g'ehu ghuahaa mu eghu. Huma ahuma le mu a-tuko iphe ono, i mekotaru ono vuru byabe ngu l'ishi. Ophu bu ukpara be iigba; bya emekwapho ebyi atu-ko iya l'eli. Nokwa iphe, Nnajiuphu, bu Chipfu epfu.

⁴⁴"Iphe, bukpo onye abya anma etu; be a-nmaje ngu l'etu su: "Oo ge ne du; bu ge nwa iya nwanyi aduje."

⁴⁵Oo ne ngu be i yekotaru gberegedege; mbu ne ngu ono woru ji iya; me unwegirima iya kpọ ebo l'afu. O buepho g'unwune ngu unwanyi du bu ge gubedua dukwapho; ephe kpokwarupho ji phe; me unwegirima phe ebo l'afu. ? Too ne ngu to budu onye Amoru; nna ngu buru onye Hetu?

⁴⁶"Nwune ngu nwanyi k'ogerenya, bu Sameriya yee unwegirima iya be tukoru buru l'uzo isheli eka iya ophu i bu. Nwune ngu nwanyi ke nwata, bu Sodomu yee unwegirima iya tuko buru le ndohali eka iya ophu i bukwapho.

⁴⁷O to budu-a l'i tsoaharu uzo, ephe eshi; ozoo l'i wataru eme ebyi, ephe tsoru emegbabe; obenu l'umere ngu l'iphemiphe, iimekpoo ememe; gbey bya aka nkephe eshihu uka.'

⁴⁸"Wakwa iphe, Nnajiuphu, bu Chipfu epfu baa: Oo ge mu no ndzu ge mu no iya-a; bu g'o bu ire-lanu le nwune ngu, bu Sodomu yee unwada iya te emerwujeduru iphe-aji, ha g'ophu unu l'unwada ngu meru.

⁴⁹Waa ejo-iphe, nwune ngu ono, bu Sodomu meru baa: Yebedua yee unwada iya shi buru ndu etsenuka etsetse; buru ndu nweru nri k'etsutsu; obenu l'ephe te eshidu akpa ndu ozo ishi; mbu l'ephe te eshidu eyejeru ndu ukpa me ndu adudu g'o du phe eka.

⁵⁰Ephe shi buru ndu ekunuka onwophe; bya eme ebyi l'iphu mu. Oo ya bu; mu hūmae ya pho; mu bya edekufu phe.

⁵¹"Sameriya te emejahakpodaru nu ejo-iphe, i meru ebo. I kakota unwune ngu phe eme ebyi. O buru ebyi, iimegbabe be meru iphe, unwune ngu phe gbey bya adu g'ephe pfuberekoto.

⁵²Vukwaru iphere, i meru onwongu; kele i mewaru g'ikpe kaleru unwune ngu unwanyi. Oo kele ejo-iphe, i meru kabaa nkephe eji; be meru iphe, ephe du g'ephe ka ngu aburu ndu pfuberekoto. Mbu-a; vukwaru iphere, i meru onwongu; g'iphere bukwaru nkengu; kele i mewaru unwune ngu unwanyi g'ephe du g'ephe pfuberekoto.

⁵³"Ole-a; Sodomu yee unwada iya; me Sameriya yee unwada iya be mu e-mekota g'iphe bya aduru le ree; egube o shi duhawaru phe. Mu e-mekwapho g'iphe duru ngu le ree teke ono, mu e-me g'o duru phe le ree ono.

⁵⁴Oo ya bu; g'iivutakwanu iphere, i meru onwongu; mbu g'iphere iphe, i mekotaru adu ngu; m'ephe gudee ya pho adu onwophe obu.

⁵⁵Unwune ngu unwanyi phe; mbu Sodomu me unwada iya; me Sameriya yele unwada iya; be a-bya alwa azu l'onodu phe; mbu g'ephe shi du le mbu ono. Gubedua waa unwada ngu be ee-mekwapho g'unu lwa azu l'onodu unu.

⁵⁶I ti pfukutakpodanu nwune ngu nwanyi, bu Sodomu le teke ono, i shi eku onwongu ono;

⁵⁷mbu le teke ono, ejo-iphe ngu teke eshidu gbafuta iphe ono. Ole nta-a be o duana ngu nno; unwada Edomu emewaa ngu iphe ochi; je akpachaa l'iphe, bu ndu obutobu iya phe; mekwapho unwada Filisitayinu. Mbu l'iphe, bu ndu bupheru ngu mgburugburu akpokotawaa ngu ebo l'afu.

⁵⁸Ii-ri urwu ukpara ono; me urwu ebyi ono, i mekotaru ono. Noo iphe, Chipfu epfu bu ono.

⁵⁹“Wakwa iphe, Nnajiuphu, bu Chipfu epfu baa: ‘Mu a-pfu ngu ugwo iphe, i meru; kele o to dudu iphe, i gubekwaduru ogbandzu ono, mu le ngu gbaru ono; mbu li wowaru ogbandzu ono mebyia.

⁶⁰Ole g'oduhabe be mu a-nyataela ogbandzu ono, mu le ngu gbaru teke i bu nwata ono; mu e-me ge mu le ngu gbaa ndzu, a-no jeye l'ojeje.

⁶¹Oo ya bu; g'iinyata iphe, i mekotaru; iphere iya abya adu ngu; me mu dulataeru ngu pho unwune ngu unwanyi; mbu onye k'ogerenya me onye ke nwata. Mu e-woru phe dee ngu g'ephe buru unwu ngu unwanyi. Ole o to bukwanu kele mu le ngu gbaru ndzu be kparu iya nu.

⁶²Mu e-me g'ogbandzu mu le ngu nguru anguru; g'iimakwanuru l'oo mbedua be bu Chipfu;

⁶³k'opfu bu iphe, bukpo teke i nyataru iya; iphere adu ngu; teme onu aburu ngu kpurukudukuu l'eka iphere jiru ngu iphu; le mu gukotaru ngu nvu l'ejo-iphe, i mekotaru g'o ha. Nokwa iphe, Nnajiuphu, bu Chipfu epfu.’ “

Ezekelu 17

Etu, e gude ugo labo waa vayinu anma

¹Noo ya; Chipfu bya epfuru opfu yeru mu su:

²“Nwa ndiphe; tua ilu-opfu; gude etu pfuaru onu-ulo Izurelu opfu.

³Su phe; ‘wakwa iphe, Nnajiuphu, bu Chipfu epfu baa: O nweru ugo, ha shii, nku iya hakwapho shii; eba iya hagbaa ogologo ogologo; teme o fua eba dengashiru iphe igwerigwe. Ugo ono phee phaa bya adaa ubvu Lebanonu; je aworu oshi sida l'ononu iya.

⁴O tu-buta ononu oshi ono; gude iya pheru lashia ali ndu agba oke-ngho; je eworu iya dzabe le mkpukpu ndu oke-ngho ono.

⁵O hatakwapho iphe, aakuje akuku, no l'ali ono je eworu kua l'ali, emehuje iphe. Eka o woru iya kua bu l'aguga eze-mini g'oshi-wilo.

6 Ọ bya efuta baahaa ụba; ọburu vayinu, baru ụba shingushingu; bya adu ke kpuchi; du mkpulali. Ekalì iya phobechaa onu l'ibe iya ophu o no; ọle ogbarabvu iya kepfuchaaru l'eka o kepfuru. Ọo ya bu; o buru vayinu baa ụba jakashia ekali. Ekwo iya nodu abya ke pulapula.

7 "Ọle o nweru ugo ozo, hakwapho shii, nkù iya hakwapho shii; bya efushikwapho eba du ogologo ogologo. No iya; vayinu ono gbeshi l'eka ono, a dzaru iya ono gbaa ogbarabvu jepfushia ya; bya ajakashia ekali jepfushia ya g'o gbaje iya mini.

8 A dzaru iya l'eka ali du ree l'aguga eka mini jiru ejiji; k'ophu oo-jakashia ekali; mishia akpuru; buru vayinu, du ubvu.'

9 "Su phe: 'Wakwa iphe, Nnajiuphu, bu Chipfu epfu baa: ? O du unu g'a su l'ome vayinu ono a-nya too; g'e te phefu iya; woshia ya akpuru g'o nwulwashihu? Irwu, o rwutakotaru k'ophuu a-nwulwashihukota. E te ejekpodanu ele enya onye okpehu du; ozo ikpoto nemadzu g'a vua ya l'ogbarabvu.

10 O -buru l'e phetaru iya je adzabe l'eka ozo; ? oo-nya-a? ? Too nwulwashihu-gbudu ree; me pherephere uzo enyanwu-awawa byapfuta ya pho; mbu nwulwashihu bu l'eka a dzaru iya?' "

11 Tobudu iya bu; Chipfu bya epfuru opfu yeru mu su:

12 "Waa iphe, ii-pfuru ndu onu-ulo ono, bu ekwegekwe ono baa: ? O du g'unu ta amadu iphe, etu-a, a nmaru unu-a bu too? Su phe; waa iphe, o bu baa: Eze ndu Babilonu be jeru Jierusalemu je akputa onye eze; bya akpukokwapho ndu-ishi mkpukpu ono kpulatakota ali Babilonu.

13 Noo ya; o bya eduta onye lanu, shi l'unuphu ndu eze; yee ya gbaa ndzu; mbu mee o ribuaru iya angu. O tukokwapho ndu nweru enya l'ali ono kpuchaa;

14 k'ophu ali-eze ono a-buru ali-eze, a kwatsuru akwatsu; ophu o byadu egbeliba ishi egbeli ozo; gbahakwa l'o doberu ogbandzu ono; oo ya bu; l'odubaa kwaseru.

15 Obenu l'iphe, eze ono meru bu l'o gbè kwefuru iya ike; ye ndu oozije ozi g'ephe je Ijiputu je akpukooru iya inya; waa g'ephe rwutaru iya ndu ojogu, du igwerigwe. ? O du unu g'onye meru iphe du nno a-nya too? ? Aa-ha iya g'o mee ya ria too? Mbu-a; ? oo-mebyi ogbandzu ono, o gbaru ono laa ke mmanu too?

16 "Wakwa iphe, Nnajiuphu, bu Chipfu epfu baa: O kwa ge mu no ndzu ge mu no iya-a; bu g'o bu ire-lanu l'o nwuhufutaje le Babilonu; mbu l'ali k'onye eze, doberu iya l'aba-eze ono; mbu onye ono, o to gubeduru nte, o nuru iya iphe ono, bu iya bu onye ono, o mebyiru ogbandzu, yee ya gbaru ono.

17 Fero yee ndu ojogu iya, bu ndu ike du; me ikpoto ndu ozo, o rwukoru yeru onwiya be taa dukwa ike adzo iya l'ogu le teke ndu ohogu iya e-vuru eja ku-jia azu igbulu iya; gude kwaberu iya k'ogu; mbu teke ono, ephe e-bvushi ose-ogu g'e gbua ndu du igwerigwe pyaapyaapya ono.

¹⁸Ọ tọ byadu ala kẹ mmanu; noo kẹle o to meduru iphe, o riburu lẹ nte; ọphu o dobeduru ọgbandzu ono, ọ gbaru ono.

¹⁹“Ọo ya bu lẹ-a; wakwa iphe, Nnajiuphu, bu Chipfu epfu baa: Eshi ọphu mu nọ ndzu gẹ mu nọ iya-a; bẹ nte ono, o riru, ọ tọ gubeduru iphe ono; mẹ ọgbandzu mu ono, o mebyiru ono bẹ mu e-vuru byabẹ iya l'ishi.

²⁰Mu e-woru ugbu mu geberu iya; l'ọ nmalahuru mu l'onyà. Mu akpuru iya laa Babilonu je anu-a ya aphu l'ẹka ono; noo kẹle mu te egudedu ire iya ẹka.

²¹Ndu ojogu iya ọphu agbala agbala bẹ bu ogu-echi bẹ ee-gude gbushia phẹ. Ndu ọphu phoduru nu bẹ a-chiru phekaa epheka. Ọo ya bu g'imaruru l'ọo mbedua, bu Chipfu bẹ pfuru opfu.

²²“Wakwa iphe, Nnajiuphu, bu Chipfu epfu baa: Ọo mbedua gedegede bẹ e-gude ẹka mu tu-buta ononu oshi sida ono dzabẹ; mbu lẹ mu a-tu-buta ononu oshi ono l'ẹka ọ du penupenu; je eworu dzabẹ l'ubvu, ha l'eli bya aha ephekerephe.

²³Ọo l'ubvu ndu Izurelu, ha l'eli bẹ mu a-dzabẹ iya. Ọo-jakashị ẹkali; mishia mebyi; buru oshi sida, du ubvu shii. Iphe, bu unwenu, du iche iche bẹ a-kpajẹ epfunẹ l'eli iya. Ẹkali iya a-buru unwenu ono ẹka ibvu du, ephe a-noduje.

²⁴Iphe, bukota oshi, nọ l'egu bẹ a-maru l'ọo mbedua, bu Chipfu bẹ emeje oshi, ha l'eli g'ọ du mkpulali; bya emeje ọphu du mkpulali g'ọ ha l'eli. Mu nodu emejekwapho g'oshi, du oyii kpohu nkụ; bya emeje ọphu kpohuwaru nkụ g'ọ byaahaa kẹ pulapula. Ọ kwa mbedua, bu Chipfu bẹ pfuru opfu ono; mu je l'e-me iya; gẹ mu pfuru iya.”

Ezekelu 18

Onye meru ẹjo-iphe a-nwuhu

¹Tobudu iya bu; Chipfu bya epfuru opfu yeru mu su:

²? Bu gunu bẹ etu ono, unu anmajẹ l'ali Izurelu ono bu? Mbu etu ono, unu anmajẹ su: “Ndu bu nna erije akpuru vayinu, anwu onu; ezé agbẹ je akpohaa unwegirima yigayiga.

³“Waa iphe, Nnajiuphu bu Chipfu epfu baa: Ọo gẹ mu nọ ndzu gẹ mu nọ iya; bu g'ọ bu ire-lanu l'unu ta abyadu anmabaa etu ono ozo lẹ Izurelu.

⁴Unu maru amaru l'iphe, bu nemadzu l'ophu bẹ bu mbedua nwe iya. Ndu bu nna mẹ unwegirima bẹ bu mu nwekota phẹ. Ọo onye meru iphe-ẹji bẹ a-nwuhu nu.

⁵“Ọ -buru l'o nweru onye pfuberekoto; buru onye emeje iphe, pfuru oto; mẹ iphe, gbaru nu;

⁶ọphu onye obu erijedu iphe l'ẹka aagwajẹ iphe l'ubvu; teme ọphu enya iya adujedu l'ẹka agwa ndu Izurelu nọ; teme ọphu onye obu emerwushijedu nyee nemadzu ibiya; ọphu oojepfujedu nwanyi lẹ teke ọ nọ nsọ nwanyi;

⁷ophu onye obu emekpajedu onye ozo ehu; buru onye ewolajeru onye o jieru ugwo iphe, o yeru iya l'itumo; ophu onajedu nfu; o buru onye anuje onye egu agu nri; o nodu anmabeje onye gba oto iphe;

⁸ophu onye obu te ejiejedu nemadzu ugwo ntukwase; mbu ophu o to jiegedu nemadzu ugwo ele enya urwu; teme o nodu esefuje aka l'iphe, du eji; bya ekpejeru nemadzu yele ibe iya ikpe pfuru nhamunha;

⁹bya emeje iphe, mu toru okpa iya g'e meje; mbu bya eyeru ehu eme ekemu mu; onye ono be bukwa onye pfuleru-aka-oto. Oo-nodua ndzu eviya. Noo iphe, Nnajiuphu, bu Chipfu epfu bu ono.

¹⁰“Ole o -buru l'onye ono be nwutaru nwa, eme kpanga kpanga kpanga; buru onye egbu ochi; mbu haru iphe ono eme;

¹¹ophu nna nwata ono adudu iphe ono duru ophu o mejeru; obenu le yebe nwata ono gbegburu onye erije iphe l'eka aagwaje iphe l'ubvu; bya emerwushije nyee nemadzu ibiya;

¹²bya emekpaje ndu ukpa waa ndu adudu g'o du phe ehu; o nodu anaje nemadzu iphe ke ehuka; buru onye te ewolajedu iphe, e yeru iya l'itumo; bya abukwarupho onye enya iya aduje l'agwa; buru onye anoduje eme ebyi;

¹³bya aburu onye ejieje nemadzu ugwo ntukwase; mbu onye ejieje ugwo ele enya urwu; ? o du unu g'aaha iya g'o dzuru ndzu too? O to dzukwaru ndzu. O -buru l'oomekota iphe ono, bu ebyi ono be o nwuhufutajekwa; ishi ochi iya atukoru iya l'ishi nkiya.

¹⁴“O -buru le nwata ono byaru anwuta nwa; nwa ono, o nwutaru ono bya ahumakota ejo-iphe, nna iya ono mekotaru; o -humachaa ya; obenu l'o to meduru ge nna iya meru;

¹⁵mbu ophu o to rijedu nri l'eka aagwaje iphe l'ubvu; ophu o to lejedu enya l'eka agwa ndu Izurelu no; ophu o to merwushijedu nyee nemadzu ibiya;

¹⁶ophu o dudu onye oomekpane ehu; ophu o sujedu ge nemadzu yeru iya iphe l'itumo teme l'oojie ya ugwo; ophu o budu onye ana nfu; obenu l'oowojeru nri iya nu onye egu agu; bya anmabeje onye gba oto iphe;

¹⁷bya aburu onye esefuje aka iya l'iphe, bu ejo-iphe; ophu o budu onye ejieje nemadzu ugwo ele enya urwu; ozoo ntukwase. O buru onye emeje ekemu mu; bya etsoje iphe, mu toru okpa iya g'e meje; be onye ono taa nwuhukwa le k'ejo-iphe, nna iya meru. Oo-dzuru ndzu.

¹⁸Obenu le nna onye obu a-nwuhu k'ejo-iphe, o meru; kele o bu onye riru nemadzu urwu; buru onye naru nwune iya nfu; bya emee iphe, ta adudu ree l'echilabo ndibe phe.

- 19“Unu gbekwapho ajije su: ‘? Bu gunu kparu iphe, nwa ta alajedu l’ochi k’iphe, nna iya meru?’ Eshi ophu nwatibe iya eme iphe, pfuru oto; me iphe, gbaru nu; bya anwube enya emekota iphe, mu toru okpa iya g’e meje be oo-dzunuru ndzu.
- 20Oo onye meru ejo-iphe bu onye a-nwuhu nu. Nwa be taa nwudu onwu iphe, nna iya meru; nna taa nwudu onwu iphe, nwa iya meru. Onye pfuberekoto be aa-gu l’onye eme ree; nokwapho g’onye iwashi, be ejo-iphe iya a-kwotoru l’ehu bu ono.
- 21“Ole o -buru l’onye eme ejo-iphe; byaru agbakuta ejo-iphe, o shi emekota azu; bya atuko iphe, mu toru okpa iya g’e meje meahaa; bya emeahaa iphe, pfuru oto; me iphe, du ree; be oo-dzukwaru ndzu. O too nwuhukwa.
- 22Ejo-iphe, o mekotaru ono be aa-zohakota; a taa gukoeduru iya ya. Eshi ophu o meru iphe, pfuru oto ono; be oo-dzuru ndzu.
- 23? Unu dobesu l’anwuhu onye ejo-iphe atsoje mu utso? Ehu akaje mu atso utso me onye ono haa ejo-iphe iya ono bya anodu chia ndzu? Nokwa iphe, Nnajiuphu, bu Chipfu epfu.
- 24“Obenu; o -buru l’onye pfuberekoto byaru aparu eme iphe, pfuru oto haa; wata eme ejo-iphe; mbu meahaa ebyi, onye ejo-iphe anoduje emegbabe; ? onye ono a-dzuru ndzu too? Wawakwa! O to nwedu iphe, du ree ono, o shi emekota ono ophu aanyatakwadu; noo kele e te gudeedu ire iya aka. Oo-nwuhu; laa l’iphe-eji ono, o mekotaru ono.
- 25“Unu asuje l’iphe, mube Nnajiuphu eme ta pfuduru nhamunha. Unu ngabekpodapho nchi unube ndu Izurelu! ? Unu suru l’iphe, mu eme ta pfuduru nhamunha? ? To buchida unubedua be te emedu iphe, pfuru oto?
- 26Teke o bu l’onye pfuberekoto be haru apfubekoto; bya emeahaa ejo-iphe; be onye obu a-nwuhu k’ejo-iphe ono, o meru ono.
- 27Ozo bu le teke onye eme ejo-iphe paru eme ejo-iphe, oome haa; bya emeahaa iphe, pfuru oto; me iphe, du ree; be onye obu a-dzo onwiya ndzu.
- 28Eshinu o byaru bya ari-phuta oriri azu k’ejo-iphe ono, o mekotaru ono; bya agbakuta iya azu; be oo-dzuru ndzu; o too nwuhudu.
- 29Ole unube ndu Izurelu gbepfu le Nnajiuphu te emejedu iphe, pfuru oto. Unube ndu Izurelu; ? buchia mbedua te emejedu iphe, pfuru oto too? ? Tobudu unubedua be gbepfuechia iphe, a pfuduru oto obu?
- 30“Oo ya bu; unube ndu Izurelu; mu e-kpekwa unu ikpe g’iphe, onyenonu meru gbaru. Nokwa iphe, Nnajiuphu, bu Chipfu epfu. G’izimanu lwadupho unu azu! Unu ahakota ejo-iphe, unu eme; oo ya bu g’ejo-iphe ta aburu iya e-me g’unu buru mkpurupyata.
- 31Unu tukokpoo ejo-iphe, unu mekotaru g’o ha gwobekota; unu emee obu unu g’o buru obu ophu; unu abya anodu ndzu ophu. ? Bu gunu kparu iphe, unu gude aka ekutaru onwunu onwu unube ndu Izurelu?

³²Kele ọ tọ dudu onye ọduje mu ree l'ọ nwuhuru. G'izimanu lwa unu azu; ge ndzu aburu nkunu! Nokwa iphe, Nnajiuphu, bu Chipfu epfu.

Ezekelu 19

Ebvu-aphu, a guru ndu-ishi ndu Izurelu

¹“Guru ndu-ishi ndu Izurelu ebvu-aphu.

²Gua ya su: “Ne ngu shi buru ne oduma, no l'echilabo oduma. O ze l'echilabo aka unwu oduma doru ehe unwu iya.

³O hefu nwa lanu l'ime unwu iya ono. Nwa iya ono bya aburu oduma, okpehu du; O bya anwuta g'eeshije egbu anu; bya ata nemadzu pyaapya.

⁴Ohamoha bya anahaa ke nkiya. Ephe mee ya o nwulahu l'iduma phe. Ephe gude eze ikeke nmata iya kpuru lashia ali Ijiputu.

⁵Ne iya ahuma l'iphe, o tuberu te ejedu g'o tuberu iya; o duta nwa iya lanu ozo; hekwa hefuta; o buru oduma, okpehu du.

⁶O tsoru oduma ibe iya jepheahaa g'o du iya; noo kele oobyawaa aburu oduma, okpehu du. O bya anwuta g'eeshije egbu anu; bya atahaa nemadzu pyaapya.

⁷O woru aka ephe kpushigbaaru ike nwutsushia; mbu aka egbobutaje phe nu; bya atuko mkpuku phe mee umerekete. Ndu-agugu ndu erwutaje ndu ali ono l'ekiri, osuje.

⁸Tobudu iya bu; iphe, bu ohamoha bya akwageberu iya; mbu ndu shikota l'ekali ibiya ono mgburugburu. Ephe bya eworu ugbu phe geberu iya. O nwulahu l'iduma, ephe bvuru.

⁹Ephe gude ikeke nmata iya kpufuta; bya enwuru iya ye le mkpuchi; pata iya pajeru eze ndu Babilonu. Ephe nwuru iya ye le mkporo. Oo ya bu; a numa-buhu aka osu ekiri l'ubvu ndu Izurelu.

¹⁰Ne ngu dupo g'ome vayinu, no l'opfu-vayinu ngu. E yeru iya l'aguga mini; o mia wopfuru awopfuru; jashia aka igwerigwe; kele mini, tsuru iya l'ehu mebyi atsuru.

¹¹Ekali iya ono shikota ike; dupo ree ke g'o buru mgboro onye eze. O jakpo du kpuchii kakota epfukala ozo shii. Uba iya kakota epfukala ozo l'eli k'opu o sengoru iphemiphe ozo baru uba l'oswa.

¹²Obenu l'e gude ehu-eghu vua ya l'ogbarabvu; mbu vuta iya togbo l'ali. Pherphere, shi l'uzo enyanwu-awawa bya ezia; akpuru iya kposhihu nku. A bya anyiswoshikota iya akpuru. Ekali iya ono, shikotaruru ike ono bya akposhihuchaa nku; oku woru iya nmaa swokoswoko.

¹³Nta-a be e je eworu iya dzabe l'echegu; mbu l'ali, kporu gbengu; mini adudu me ililekpo.

¹⁴Ọku bya eshi l'ẹkali iya lanu gbanwuhu; kepyashichaa akpuru iya. Ophu o nweedu ẹkali, shihuru ike, nokwadu iya nu; mbu ophu dukwadu ree k'aburu mgboro onye eze. Owa-a bu ebvu-aphu g'e rwujekwa iya erwubvu.”

Ezekelu 20

Ndu Izuru ekwefuru Chileke ike

¹Tobudu iya bu; o be l'abalị k'iri l'onwa ise l'apha k'esaa; o nweru ndu bu ogerenya ndu Izuru wuru bya ge mu kpataru phe ishi l'eka Chipfu. Ephe bya adoru l'iphu mu.

²No iya; Chipfu bya epfuru opfu yeru mu su:

³“Nwa ndiphe; pfuru nu ndu bu ogerenya Izuru su phe; wakwa iphe, Nnajiuphu, bu Chipfu epfu baa: ? O kwa l'oo ishi be unu byaru mu akpata? Oo ge mu no ndzu ge mu no iya; bu g'o bu ire-lanu le mu ta abyadu ekwe g'unu kpata mu ishi. Nokwa iphe, Nnajiuphu, bu Chipfu epfu bu ono.”

⁴“Nwa ndiphe; woru ge ke nkephe du tua jala; wota g'ephe eme tua phe jala l'atatiphu. Mee g'ephe maru ebyi, nna phe shi emegbabe.

⁵Su phe; wakwa iphe, Nnajiuphu, bu Chipfu epfu baa: Mboku ono, mu hotaru Izuru ono be mu riburu oshilokpa Jiekopu angu; bya emee g'ephe maru onye mu bu le teke ephe no l'ali Ijiputu. Mu pfuaru phe iya hoo haa su phe: ‘O kwa mbedua bu Chipfu, bu Chileke unu.’

⁶Oo le mboku ono be mu riburu phe angu le mu e-dufuta phe l'ali Ijiputu; duru phe laa l'ali, mu chotaru phe; mbu ali, bukota osu ayi-ayi; buru iya bu ali, kakota ree l'iphe, bu ali nonu.

⁷Mu su phe: Onyenonu wofukota ejo obvu ono, unu doberu agwaphe ono, tuphaa. Unu te egudekwa agwa ndu Ijiputu merwushia onwunu. O kwa mbedua bu Chipfu, bu Chileke unu.

⁸Obenu l'ephe gbekwefuru mu ike; ophu ephe ta angaduru mu nchi; ophu ephe ta alwuduru ejo obvu ono aso oyi ono, ephe kporu obu ye ono; ophu ephe ahaduru agwa ndu Ijiputu ono. Oo ya bu; mu su le mu a-tukoshi phe oke ehu-eghu mu mbu le mu ekpukposhi phe oke-ehueghu mu le Ijiputu.

⁹Obenu le mu meru g'e te mebyi epha mu l'iphu ohamoha ono, ndu Izuru shi bugbaaru ono; mbu ndu ono, mu no l'iphu phe mee ge ndu Izuru maru mu shita l'edufuta, mu dufutaru phe le Ijiputu ono.

¹⁰“Oo ya bu; mu kwe dufuta phe le Ijiputu; duru phe lasha l'echiegu.

¹¹Mu bya eworu iphe, mu toru okpa iya su g'e tsoje goshi phe; bya emee g'ephe maru ekemu mu; kele onye emeje iya nu be e-gude iya nodu ndzu.

¹²Mu bya eworu eswe atuta-unme doberu phe g'o buru iphe-ohubama, no le mgbaka mu l'ephe; k'ophu ephe a-makwanuru l'oo mbedua, bu Chipfu meru phe ephe du nsu.

13Ole ndu onu-ulo Ízurelu be kwefuleru mu-a ike l'echiegu ono. Epe te ekwedu mee iphe, mu toru okpa iya su g'emeje; mbu l'ephe te ekwedu mee ekemu mu; mbu ekemu mu ono, bu onye meru iya nu l'o nodu ndzu ono. Epe woru eswe-atuta-unme ono, mu doberu phe ono phaa kutukutu. Oo ya bu; mu pfua ya ruhata iphu su le mu a-tukoshi phe oke ehueghu mu; woru phe gbushia l'echiegu ono.

14Obenu le mu meru g'e te pfubiyi epha mu l'iphu ohamoha ono, bu ndu mu no l'iphu phe dufuta phe ono.

15Mu byakwapho ahalia eka ribuaru phe angu l'echiegu su le mu tee dueduru phe ala l'ali ono, mu nuru phe ono; mbu ali ono, buepho osu ayi-ayi; mbu ali, ono bu iya kakota ree l'iphe, bu ali nonu ono;

16noo kele epe te ekwedu eme ekemu mu; teme ophu epe te etsoduru iphe, mu toru okpa iya su g'e tsoje. Epe woru eswe atuta unme mu phatoshia; noo kele oo l'agwa be obu phe du.

17“Ole mu phuleru phe-a obu-imemini; ophu mu te egbushiduru phe; mbu mee g'ephe chihu l'echiegu ono.

18Mu suru unwu phe l'echiegu ono: Unu te etsokwa iphe, nna unu phe toru okpa iya; ophu unu emekwa ekemu phe; ozoo g'unu gude agwa agwa phe merwushia onwunu!

19Oo mbedua bu Chipfu, bu Chileke unu. Unu tsoje iphe, mu toru okpa iya; mbu g'unu nwube enya meje ekemu mu; mekotaje iya g'o ha.

20Unu emeje eswe-atuta-unme mu g'o du nsu; k'ophu oo-buru iphe-ohubama mu l'unu. Oo ya bu; g'unu a-makwanuru l'oo mbedua bu Chipfu, bu Chileke unu.

21“Obenu l'unwu phe ono be kwefuhukwaru mu pho ike. Epe te ekwedu mee iphe, mu toru okpa iya su g'ephe meje; ophu epe ta anwubekpodaru nu enya l'eme ekemu mu; mbu ekemu mu ono, bu onye meru iya nu l'o nodu ndzu ono. Epe phatoshiru eswe-atuta-unme mu. Oo ya bu; mu pfua su le mu a-tukoshi phe oke ehueghu mu; mbu le mu e-kpukposhi phe ehueghu mu l'echiegu.

22Ole mu mechaleru-a selaa eka azu; mee g'e te epfubiyi epha mu l'iphu ohamoha ono, bu ndu mu no l'iphu phe dufuta phe ono.

23Mu byakwapho eriaru phe angu l'echiegu ono su le mu a-chikashi phe g'ephe lachaa ohamoha, nonu; mbu g'ephe gbakashihu dzuru ali ndu ohozo;

24kele epe te ekwedu eme ekemu mu; mbu l'ephe jikaru eme iphe, mu toru okpa iya; bya aphantoshia eswe-atuta-unme mu. O buru eka enya phe du bu l'agwa, nna phe gwaru.

25“Mu panuru phe nwuhaa g'ephe tsoje iphe, a toru okpa iya su g'ephe tsoje; bu iphe, adudu ree; mbu ekemu, epe te e-gudedu anodu ndzu.

26Mu bya emee epe gude ngweja, epe egweje merwushiahaa onwophe; mbu epe huahaa okpara phe l'oku gude gweahaa eja. Iphe ono be mu meru g'eeshi ge ndzu-agugu rwuta phe; g'ephe amakwanuru l'oo mbedua bu Chipfu.

27“Oo ya bu; nwa ndiphe; pfiaru ndu Ízurelu sù phẹ; wakwa iphe, Nnajiuphu, bu Chipfu epfu baa: Oo egube-a be nna unu phẹ gude gbarwua mu; bya ajika etso ụzo ire-lanu mu.

28Teke mu dubaru phẹ l'ali ono, mu riburu phẹ angu iya le mu a-nu phẹ ono be ephe byaru ahuma iphe, bukpo ubvu ubvu, hagbaa l'eli; mekpoo oshi, ekwo du ke gayii; ephe gweahaa ngweja l'eka ono; gude iya kpatsu mu ehueghu. O bukwarupho l'eka ono be ephe gweru ngweja unwu-isensu, eshi kwekweekwee; me ngweja-mee.

29Tobudu iya bu; mu su phẹ: ? Bu gunu be eka ono, unu ejeje agwa iphe ono bu? Oo ya bu; e kuahaa eka ono Bama byasu ntanu-a.

30Oo ya bu; pfiaru ndu Ízurelu sù phẹ; ‘wakwa iphe, Nnajiuphu, bu Chipfu epfu baa: ? Unu a-nodu emerwushi onwunu ge nna unu phẹ; mbu tsoru agwaphe ejo agwa, ephe shi anoduje agwa ono to?

31Mbukponu le ntanu-a be unu anodujeela egwe egube eja ono; mbu eja ono, unu ahije unwu unu l'oku gude egwe ono. Unu gude agwaphe agwa emerwushikpoepho onwunu eje. Unube ndu Ízurelu; ? bu ge mu haa unu g'unu jitajekwadu mu iphe to? Eshinu mu no ndzu ge mu no iya-a be unu taa jitibaekwa mu iphe ozobaa. Nokwa iphe, Nnajiuphu, bu Chipfu epfu.

32Unu asuje l'ọ du unu g'unu du g'ohamoha ozo, nogbaa nu; mbu g'unu du ge ndu mgboko, bu oshi me mkpuma be ephe abaru eja. Ole iphe ono, unu arị ono ta ayidu mee ememe ophu.

33“Wakwa iphe, Nnajiuphu, bu Chipfu epfu baa: Eshinu mu no ndzu ge mu no iya-a be mu e-gude ike mu; me agburu-ehue mu; yeke oke ehueghu, mu e-kpukposhi unu; buru onye-ishi unu.

34Mu e-gude eka ike; me agburu-ehue; yeke oke ehueghu, mu e-kpukposhi unu gude shi l'iphe, bu ohamoha ono dufuta unu; mbu shi l'iphe, bukpo ali ono, unu gbackashihuru laa ono chikobekota unu.

35Mu e-duta unu lasha l'echiegu, ohamoha bupheru mgburugburu. O buru l'eka ono be mu l'unu a-nodu l'iphu l'iphu; mu e-kpee unu ikpe.

36Oo egube ono, mu kperu nna unu phẹ ikpe l'echiegu ali Ijiputu pho bu ge mu e-kpe iya unu. Nokwa iphe, Nnajiuphu, bu Chipfu epfu.

37“Mu e-chi unu echachi jasụ unu edobeahaa ogbandzu ono.

38Iphe, bu ndu bu ekwegekwe ono; mbu ndu ono, anoduje atupya mu ono be mu a-loshikota l'ime unu. Mu e-dufutakwa phẹ-a l'ali ono, ephe laru je ebugbaaru ono; ole ephe taa bahukwanu l'ali Ízurelu. Oo ya bu; g'unu amakwanuru l'oo mbedua bu Chipfu.

39“Wakwa iphe, Nnajiuphu, bu Chipfu epfu baa: Unube ndu Ízurelu; g'onyenonu le g'unu ha jekpowaro agwaa nshi iya. Ole unu e-mechakwana ngaberu mu nchi; numa

iphe, mu e-pfuru unu; unu aparu egwephe eja haa; mbụ eja ono, unu gude apharwushi epha mu, dụ nsọ apharwushi ono.

⁴⁰Oo l'úbvú mu, dụ nsọ; mbụ l'eze úbvú Ízurelu bẹ mụbe Nnajiuphu, bụ Chipfu sụru l'iphe, bụ ndu Ízurelu a-nọdukota; abajeru mu eja. Ọ bụru eka ono bẹ mu a-nọdu nata phe; teme ọ bụru l'eka ono bẹ unu a-nọduje gwaa mu agwagwa; nụ mu iphe, kachakpoo ree, unu nweru; yee iphe, dukota nsọ, unu egwejeru nụ mu.

⁴¹Mu a-nata unu g'unu bụ ùnwù-isensu, eshi kwèekweekwee lẹ teke ono, mu dufutaerupho unu l'iphe, bụ ohamoha ono, unu nọkota ono; mbụ rwufutakota unu l'iphe, bụ mkpukpu ono, a chikashiru unu laa ono. Teke ono bẹ mu e-goshikwanu ohamoha lẹ mu bụ onye dụ nsọ okpobe adudu.

⁴²Oo ya bụ g'unu a-makwanuru lẹ mu bụ Chipfu lẹ teke ono, mu e-dubata unu l'alị Ízurelu, bụ alị ono, mu riburu angu lẹ mu a-nụ nna unu phe ono.

⁴³Ọ bụru l'eka ono bẹ unu a-nọdu; enya agbarwukota unu l'iphe, unu mekotaru; mbụ iphe ono, unu mekotaru gude merwushia onwunu ono; unu abya adu onwunu ashi lẹ k'ejo-iphe ono, unu mekotaru ono.

⁴⁴Teke mu gude g'epha mu apfuru meeru unu iphe; mbụ ophu mu te ejeduru eme unu iphe g'ejo-iphe unu gbaru; ozoo g'iphe, unu eme rehuberu erehu; bẹ unube ndu Ízurelu a-maru l'oo mbedua bụ Chipfu. Nokwa iphe, Nnajiuphu, bụ Chipfu epfu.' “

⁴⁵Tobudu iya bụ; Opfu Chipfu bya akparwuta mu l'ehu sụ mu:

⁴⁶“Nwa ndiphe; ghachi iphu l'uzo ndohali pfiaru ndu ndohali iphe, a-nwuru phe nụ; l'i pfua iphe, e-me oswa, nọ l'echiegu ndohali;

⁴⁷mbụ g'i pfiaru oswa, nọ l'echiegu ndohali sụ: Numa iphe, Chipfu epfu! Nnajiuphu, bụ Chipfu sụru: Mu abyaakwa ngu atufu oku. Oku ono e-kepyashikota oshi oyii ngu; me ophu kpohuru nkụ. Ire-oku ono bẹ a-buru echinyi echinyi. Iphe, bukpo onye oku ono shitaru ibe iya ophu ọ nọ; shita l'uzo ndohali; jeye l'uzo isheli bẹ oku ono a-nma swokoswoko.

⁴⁸Onyemonye bẹ a-makotaru l'oo mụbe Chipfu bẹ turu oku ono. A ta abyadu echinyi iya echinyi.”

⁴⁹Tobudu iya bụ; mu sụ: “Haa! Nnajiuphu, bụ Chipfu! Epe epfukwaru mu asuje l'oo etu etu bẹ mu anoduje anmashi.”

Ezekelu 21

Chipfu a-miru ndu Ízurelu ogu-echi

¹No iya; Chipfu bya epfuru opfu yeru mu sụ:

²“Nwa ndiphe; gha iphu l'ibiya ke Jierusalemu; pfuru nuru mu eka ono, dụ nsọ ono; pfuru nuru mu alị Ízurelu; karu phe iphe, e-me nụ;

³su iya: Wakwa iphe, Chipfu epfu baa: Lenu! Mu noakwaru ngu le njo. Mu a-mifuta ogu-echi mu l'obo iya; gude gbushikota ndu pfuberekoto me ndu eme ejo-iphe l'echilabo unu.

⁴Eshi ophu mu e-gbushi ndu pfuberekoto me ndu eme ejo-iphe; be mu a-mita ogu-echi mu; gbua iphe, bukpo nemadzu l'ophu. Mu e-shi le ndohali gbua phe jasu l'isheli.

⁵Oo ya bu ge ndiphe l'ophu amaru l'oo mube Chipfu be mifutaru ogu-echi mu l'obo iya; ophu mu ta ami-phuedu iya azu ozo.

⁶“Oo ya bu; tsua ude; gube nwa ndiphe! Tsua ude g'onye meji akufu akufu; gude oke aphu tsua ude l'iphu phe.

⁷Teke ephe jiru ngu su: ‘? Bu gunu kparu iphe, iitsu ude?’ Iphe, ii-pfuru phe bu: ‘Iphe, kparu iya nu bu l'o nweru nzi, abya nu. Teke nzi ono byaerupho be meji a-gbabuhu onyemonye; aka atsushihukota onyemonye me. Onyemonye be ehua a-rwushihukota; ikpere be a-nodu aphukota onyemonye doridori g'akpara-mini. Lenu l'oobyakwa; mbu nzi obu. O mefutaje ememe. Nokwa iphe, Nnajiuphu, bu Chipfu epfu bu ono.’ “

⁸Tobudu iya bu; Opfu Chipfu byakwa akparwuta mu l'ehu; bya asu mu:

⁹“Nwa ndiphe; pfuaru mu phe su: Wakwa iphe, Chipfu epfu baa: “Ogu-echi be a baakwaru o nodu atsu nk; bya ajwa iya manu o nodu aphu onyo!

¹⁰A bawaru iya; o nodu atsu nk g'e gude iya gbushia nemadzu. E huchawaru iya ehucha; o nodu acha vaa vaa g'ebemu-igwe. ? Anyi a-nodu ete eswa le mgboro-eze ke nwa mu kangokotaru mgboro-eze ke ndu ozo to?

¹¹Ogu-echi ono be iphe, e medoru iya bu g'e hua ya manu; waa g'a dzulia ya. A baakwaru iya ababa; huwa iya manu. Onye mgbugbumadzu abyaakwaa iya adzuli.

¹²Nwa ndiphe; raa ekwa; chia mkpu; kele ogu-echi ono bukwa ndibe mu be ocho abya. Oo ndu-ishi le Izurelu be ocho abya obu. E nwutaakwaru ndu-ishi le Izurelu; waa ndibe mu tua l'iphu ogu-echi. Gberu aka ye l'olu.

¹³Aa-dalekwa unu. ? Bu gunu be e-me m'o buru le mgboro-eze ono, kangokotaru ndu ozo ono be ta anodedu? Nokwa iphe, Nnajiuphu, bu Chipfu epfu bu ono.

¹⁴“Oo ya bu; nwa ndiphe; pfuaru phe iphe e-me nu; kua aka kpa. G'e gbua ogu-echi ugbo ebo; mbu g'e gbua ya ugbo eto. Oo ogu-echi, ee-gude gbushia nemadzu; mbu ogu-echi, ee-gude tsua nemadzu o-tsuepfu; bya aburu ogu-echi, ee-gude gbaa phe mgburugburu.

¹⁵Mu dobekotawaru ogu-echi, ee-gude egbushi phe l'onu-oguzo phe; k'ophu bu le meji a-nodu atofu nemadzu atofu; ndu a-la l'iswi a-ha igwerigwe. Oowaa! A bakwaru ogu-echi ono; o nodu acha vaa vaa g'ebemu-igwe. A dzulitawaru iya g'e gude iya gbushia nemadzu.

¹⁶Gube ogu-echi; gbua pharamu laa l'uzo ekutara! Gbukwaapho laa l'uzo ekicha! Gbujekpopho laa l'ibiya ophu iphu ngu nokpopho laa.

17Mu a-kukwapho ẹka pyaa; ẹhu-eghu mu adazeta. Oo mbẹdua, bu Chipfu bẹ epfu iya nu.”

Ogu-echi eze ndu Bábilonu

18Tobudu iya bu; Opfu Chipfu byakwa akparwuta mu l'ẹhu; bya asu mu:

19“Nwa ndiphe; mee gbororo labo, bu ẹka ogu-echi eze ndu Bábilonu e-shi bapfuta phe ogu; g'uzo ono bukotakwaru le mkpukpu lanu bẹ ephe a-watakota. Bvube itso iphe-ohubama l'ẹka uto ono swibaruru le mkpukpu ono.

20Mee uto lanu le gbororo ono g'o buru ẹka ee-shi gude ogu-echi bapfu mkpukpu Raba ke ndu Amonu; l'i bya eme uto ozo g'o buru ẹka ee-shi bapfu Jiuda; me ẹka a kpushiru ike le Jierusalemu.

21Noo kele eze ndu Bábilonu bẹ e-jeta pfuru le mgbakata-uto ono; mbu le mgbakata-uto labo ono. Oo-jjadaa iphe; g'o maru iphe, ee-me nu. Oo-gude apfu tua ido; l'o jita nwobvu iya; bya elee enya le meji anu; g'o gude maru uto ophu oo-shi.

22O buru l'ekutara iya bẹ ido ke Jierusalemu a-daru laa. Oo-do iphe, ee-gude chikposhia Jierusalemu; l'o zia g'a wata egbushi nemadzu; me g'e chia mkpu ogu; l'a bya edoo iphe, ee-gude nwutsushia onu ẹka eeshije abahu le mkpukpu ono; l'a bya akoshia obvudu-ẹja; bya ekephee mkpukpu ono ekephe.

23Ndu ophu yee ya gbaru ndzu bẹ oo-du g'o bu iphe, te emedu ememe; obenu l'oonyatakotaru phe ejo-iphe, ephe mekotaru; bya akpukota phe le ndzu.

24Oo ya bu le-a; wakwa iphe, Nnajiuphu, bu Chipfu epfu baa: Eshi ophu unu byaru bya emewaa a mawaru g'unu emeberu ejo-iphe; mbu k'ophu bu l'iphe-ẹji, unu eme bẹ dabyiwaru ẹba; bya egude iphemiphe, unu emekpo ememe egoshi ejo-iphe, unu eme; bẹ aa-kpukota unu le ndzu.

25“Oowaa! Gube onye bu ishi le Izurelu; mbu gube onye ono, merwushiwaru onwongu ono; mbu gube onye iwashi ono; o rwuakwaru teke aa-nu ngu chipfuu; nu-rwua ngu iya l'ishi.

26Wakwa iphe, Nnajiuphu, bu Chipfu epfu baa: Toshia iphe, i keru l'ishi; kpufu okpu-eze ono. O to bukwa g'iphe shi du bẹ o dukwadu. Ndu wozetaru onwophe ali bẹ aabya ewolia eli; ndu e woliru eli bẹ ee-wozeta ali.

27Oo mkpurupyata! Oo mkpurupyata! Mu e-me mkpukpu ono g'o buru mkpurupyata; ophu a ta abyadu akpukwaba ya akpukwa; jeye teke onye bu iya bẹ o gbaru k'enweru mkpukpu ono a-bya; mu eworu iya nu iya.

28“Oo ya bu; nwa ndiphe; pfuaru phe iphe e-me nu; su phe: Wakwa iphe, Nnajiuphu, bu Chipfu epfu l'opfu-ẹhu ndu Amonu; le k'iphe-iphere, ephe eme ndu Izurelu baa: “Oo ogu-echi! Oo ogu-echi! A mifutaakwaru ogu-echi, ee-gude ekwoshi nemadzu ishi. E huchawaru iya ehucha g'e gude iya lwua nemadzu alwulu; mbu l'e mewaru iya; g'o chaa vaa vaa g'ebemu-igwe.

²⁹“A makwaru-a l'a phujeru unu ophulenyia iphoro; bya agbajewaru unu eja, bu uka be a dzushiru unu. Iphe ono g'ọ ha be aa-gakọ nyabe ndu ejo-iphe l'olu; mbu ndu ono, ee-gude ogu-echi gbushia ono. Mbu ndu ono, mboke, aa-nu phe chiipfuu nu-rwua phe iya l'ishi rwuwaru ono.

³⁰“Mi-phu ogu-echi ono azu l'obo iya. Oo l'eka unu futaru be mu a-nodu kpee unu ikpe; mbu l'ali ndiche unu.

³¹Mu a-tukoshi unu oke ehu-eghu mu; mbu le mu e-kpukposhi unu oke ehu-eghu mu, ata-pfupfufu. Mu e-nwuru unu nu ndu emeje nemadzu l'iwe; mbu ndu bu iphe, eemebyi emebyi bu iphe, doru phe enya.

³²Unu a-buru nku, eeye l'oku. Eka aa-phushi mee unu wushi bu l'echilabo ali unu. A ta abyadu anyatabaa unu ozo; noo kele oo mube Chipfu be pfuru iya nu.”

Ezekelu 22

Ejo-iphe, ndu Jierusalemu eme

¹Tobudu iya bu; Chipfu bya epfuru opfu yeru mu su:

²“Nwa ndiphe; ? ii-kpe iya ikpe too? Mbu; ? ii-kpe-a mkpukpu-a, bu mkpukpu mgbugbumadzu-a ikpe too? Oo ya bu; je aturu iya ebyi, oomekota jalaa.

³Su iya: Wakwa iphe, Nnajiuphu, bu Chipfu epfu baa: Gube mkpukpu-a i gudeakwaa egbu ochi seta mkpurupyata kpube onwongu l'ishi; kele iigbushi nemadzu; bya egudekwapho agwaphe obvu emerwushi onwongu.

⁴“Ikpe ndu ono, iigbushi ono nmaakwaru ngu; teme i gudewaa agwa iphe, i jetaru merwushia onwunu. I mewaru ge mboke, ii-no-beru ndu du tsokere; mbu l'apha, ii-no-beru ndu be rwuakwaru nu. Oo ya bu le mu e-me ngu g'i buru mkpukpu ohamoha a-noduje eme iphe ochi; mbu le mkpukpu, nonu a-noduje atu ngu uzu ochi.

⁵Gube mkpukpu, aamaru ejo eka; teme iphe, tsuru ngu epfu buru nchika-ehu; huma le ndu bu ntse; me ndu bu uzenya a-nodu achi ngu ochi;

⁶Humawaro ge ndu-ishi ngu, nogbaa ngu l'ime gude ike, ephe nweru egbushi nemadzu.

⁷Oo l'ime ngu be ephe ta agubejeedu ne le nna phe iphe. O buru l'ime ngu be ephe no kpa ndu byaru abyabya ehu; bukwarupho l'ime ngu be ephe no megbuta ndu nna phe anodedu; me ndu ji phe nwushihuwaru.

⁸Iphe duru mu nso; be unu ta agubejeedu iphe. Unu wowaru eswe atuta unme mu pharwushikota.

⁹O buru l'ime ngu be ndu asu asulasu no; ndu buepho iphe, ephe eshibeje ite iya bu g'ephe e-me gbua nemadzu. Oo l'ime ngu be ndu ejeje eria iphe, a tushiru l'agwa no; mbu l'agwa, nogbaa l'ubvu ubvu ono. Ephe nmakpuru l'ime ngu apharwushi onwophe.

10Ndu ophu ephe le nyee nna phe akwaje nokwapho l'ime ngu. Ndu ophu ejepfuje unwanyi teke ephe ano nsọ nodu iya; mbu teke unwanyi teke aswafudu nturuw ano nsọ.

11Oo l'ime ngu be nwoke waa nyee nwoke ibe iya emeje ebyi. Onye ophu egude egu ejo-iphe agu iya nu pharwushia nwune nyee nwa iya; onye ophu aburu nwune iya ke nwanyi; mbu nwa, nna iya nwuru gedegede be oomerwushije.

12O buru l'ime ngu be ndiphe erije uphalazu g'e gbuwa nemadzu; a nodu anataje ntukwase; bya eri uphalazu. Nemadzu nodu anataje nwibe iya iphe iya k'ehuka; g'ee-shi g'unu rita urwu. Teme a gbakutawaa mube Chipfu azu. Nokwa iphe, Nnajiuphu, bu Chipfu epfu bu ono.

13“Lenu; mu egbukwaru ngu aka swikiswiki; k'uruw ono, i ritaru l'uzo apfuduru-oto ono; me k'ochi, eegbugbabe l'ime ngu ono.

14?Obu e-shihu ngu-a ike? Mbu; ? aka e-shihu ngu-a ike mboku, ono mu a-da ngu aka ke njo l'ehu ono? O kwa mube Chipfu pfuru iya; mu je l'e-me iya.

15Mu a-chikashi ngu mee g'ephe tuko ohamoha dzuru. Mu ezekaa phe g'ephe lachaa mkpukpu le mkpukpu ozo. Mu emee g'emewushi ono, i merwushiru onwongu ono buru bugemu.

16I -buerupho mkpukpu, rwushihuru arwushihu l'enya ohamoha ono; be ii-macharu-a l'oo mbedua bu Chipfu.”

17Tobudu iya bu; Chipfu byakwa epfuru yeru mu su:

18“Nwa ndiphe; ndu Izurelu be dukwaa mu g'iphe, gbaru egba. Mbu l'ephe dukota g'ope; me ogbongu; me iphe-igwe; me mkpuma ota-njele, kwaru l'oku uzu. Iphe, ephe buepho be bu egba mkpola-ochaa.

19Oo ya bu; wakwa iphe, Nnajiuphu, bu Chipfu epfu baa: Eshi ophu unu bukotawaa egba mkpola-ochaa; be mu e-kpota unu kpokobe le Jierusalemu.

20Mbu l'oo egube eekpokobeje mkpola-ochaa; me onyirubvu; me iphe-igwe; me mkpuma-ota-njele; me ogbongu chiru ye l'oku uzu g'o dazee ya-a; bu ge mu e-gude ehueghu mu; me oke ehueghu mu rwukota unu je achiru dobe le mkpukpu ono; woru unu dazee adaze.

21Mu e-rwukobe unu; kpukposhi unu oke ehueghu mu, ata pfupfufu ono; l'o kee unu; unu azashihukota azashihu.

22Oo egube mkpola-ochaa, adazehuje l'oku uzu-a; bu g'unu a-nodu l'ime mkpukpu ono dazehu. Oo ya bu g'unu amakwanuru l'oo mbedua, bu Chipfu be tukoshiru unu oke ehueghu mu.”

23Tobudu iya bu; Chipfu bya epfuru opfu yeru mu ozo su:

24“Nwa ndiphe; su ali ono-a: I bu ali, e teke aturwudu ejo-iphe, no iya nu; ophu mini edzeduru kpua ya le mboku oke-ehueghu mu ono.

²⁵Ndu mpfuchiru Chileke, nọ l'ime mkpukpu ono bẹ achiru mkpukpu ono ejo idzu; g'oduma, aba hanyihanyi alajashi anu, o gburu. Epehe egbushije nemadzu; nakoo eku; me iphe, vugbaa oke aswa. Epehe mewaa; g'unwanyi, ji phe anodu paa eka l'ime mkpukpu ono.

²⁶Ndu-uke, nọ le mkpukpu ono bẹ kpakashwaru ekemu mu; tuko iphe mu, du nso merwushikota emerwushi. Epehe ta akpajedu oke l'iphe, du nso; yee iphe mmanu ozo. Epehe anoduje ezi nemadzu l'o to nwedu iphe, du iche l'iphe, aaso nso; yee iphe, a ta sodu nso. Epehe wowaru enya nmanyibe; ophu epehe ta akpajedu ishi k'eme eswe-atuta-unme mu g'o du nso. A nodu anoduje epfutoshi epha mu l'echilabo phe.

²⁷Ndu bu ndu-ishi le mkpukpu ono bẹ duepho g'ejo-nkuta-oswa, alajashije anu, o gburu. Epehe egbu ochi; mbu egbushi nemadzu g'ee-shi g'ephe rita urwu l'uzo, apfuduru-oto.

²⁸Ndu mpfuchiru Chileke, nọ le mkpukpu ono bẹ e-gude ophulanya ughoshi yele agbaru phe eja, bukota uka; kpachia ejo-iphe, ndu ono eme akpachi. Epehe asuje: Nnajiuphu, bu Chipfu suru-a l'eba abu l'o nweru iphe, Chipfu pfuru.

²⁹Ndu ali ono bẹ akpaya nemadzu ishi; bya ana nfu. Epehe akpa ndu ukpa; me ndu adudu g'o du phe ehu; bya eme ndu bu mbyambya ewere; ophu epehe emejeduru phe iphe, gbaru g'e meeru phe iya.

³⁰Mu bya elee enya nemadzu l'echilabo phe, bu onye a-kpukwa igbulo ono; mbu onye a-pfuru le mgbaka onye l'ephe l'ali ono; ge mu te emebyishi iya; ophu o to dudu onye mu humaru.

³¹Oo ya bu; mu tukoshi phe oke ehu-eghu mu; gude ehu-eghu mu, ata pfupfufu keyashia phe; mbu woru iphe ono, epehe mekotaru ono byabe phe l'ishi. Nokwa iphe, Nnajiuphu, bu Chipfu epfu bu ono!"

Ezekelu 23

Unwune labo, eri ogori

¹Tobudu iya bu; Chipfu bya epfuru opfu yeru mu ozo; bya asu mu:

²"Nwa ndiphe; o nweru unwanyi labo, bu ne lanu nwuru phe.

³Epehe wata agba ukpara le Ijiputu; mbu l'ephe shiro teke epehe bu nwata gbata ukpara. O buru l'eka ono bẹ epehe nọ a nodu anoduje apyitoshi phe era; mbu l'oo l'eka ono bẹ epehe anoduje l'arwaphe phe eka l'ehe ono, akwokwadu buruburu ono.

⁴Epha onye k'ogerenya bẹ bu Ohola. Epha nwune iya nwanyi buru Oholiba. Epehe bu ndibe mu. Epehe nwushia unwegirima unwoke; me unwegirima unwanyi. Ohola bẹ bu Sameriya. Oholiba buru Jierusalemu.

⁵"Ohola wataruro agba ukpara teke o bukwadu nkemu. O wataru awu-ko ndu o yeru obu; mbu ndu o-lwua-olaa shi le Asiriya.

- ⁶Ndu ono yekotaru uwe, du urwukpu-urwukpu; me ndu bu ndu eze; me ndu-ishi. Ephe bukota unwokorobyaa, amagbaa ntumatu; bukotaru ndu agba l'inya; nodugbaa l'eli inya phe.
- ⁷O woru onwiya mee nwanyi-ukpara unwoke ndu Asiriya; mbu ndu ophu nweru enya. O gude agwa ndu owu-ko ono merwushia onwiya.
- ⁸Ophu o haduru agba ukpara ono, o shi le Ijiputu gbata ono. O buro teke o bu nwata be yele unwoke wataru akwakwa. Ephe nodu anoduje arwa iya eka l'ehe ono, akwokwadu buruburu ono; agboshi iphe ekpu iya.
- ⁹Tobudu iya bu; mu bya enwuru iya ye l'eka ndu o yeru obu ono, bu iya bu ndu Asiriya; mbu ndu ono, agu iya egu ono.
- ¹⁰Ephe gbabe iya oto; kpu unwu iya unwoke me unwanyi le ndzu; bya egude oguechi phua yebedua teerii. Oo ya bu; o buru onye unwanyi gude nmaahaa l'ejo etu; kele oo iphe, gbaru iya nu be e meru iya.
- ¹¹“Nwune iya nwanyi, bu Oholiba humachakwaa iphe ono; egu ejo-iphe nkiya gbekporo kabaa ke nwune iya njoo; mbu l'oo gbek ka nwune iya agba ukpara obu.
- ¹²O nodu awukokwapho ndu obutobu phe, bu ndu Asiriya; mbu ndu bugbaa eze; me ndu-ishi mkpukpu phe; me ndu ojogu phe, kwaru onwophe ngwa; degegbaru l'eli inya; bukotaru unwokoro, amagbaa ntumatu.
- ¹³Mu bya ahuma l'oo merwushifuwaru onwiya. Ephenebo ono tukowaa buru ndu umere phe rehuru erehu.
- ¹⁴“Yebedua be kwataru akwata yemibaa ishi eyemi l'ukpara obu. O humaru unwoke, e seru l'igbuloo; mbu ndu Babilonu, e gude penti uswe-uswe see;
- ¹⁵mbu ndu e seru ephe kebegbaa akpo l'upfu; kebechaa ekwa, ekpo phe wiyawiya l'ishi. G'ephe ha be dukotaephe ge ndu-ishi ugbo-inya ndu Babilonu; mbu ndu shi mkpukpu Kaludiya.
- ¹⁶Ahuma, oohuma phe; ephe wata iya agu egu. O yefu ndu-oozi g'ephe je ezia phe ozi l'ali Babilonu.
- ¹⁷Tobudu iya bu; ndu Babilonu byapfuta iya; g'ephe l'iya wata akwakwa. Ephe gude egu nwanyi agu phe nu pharwushia ya. E merwushichae ya phoo ono; ephe bya adu iya ashi; o gbakuta phe azu.
- ¹⁸Teke ono, o gbaaharu ukpara ono; bya agbagbukporu oto tua onwiya jalaa ono; be mu gude ehueghu gbakuta iya azu; egube mu gbakutaru nwune iya.
- ¹⁹Ole o gbek kabaa eyeru ehueghu l'agba ukpara obu; g'oo nyataru g'oo shi agba iya le teke o bu nwata nodu le Ijiputu.
- ²⁰O shi nodu l'eka ono awu-ko ndu o yeru obu; mbu ndu ehueghu-nwoke phe dukota ge ke nkafu-igara; bya aburu ndu unwuda phe du ge k'inya.

21Oo ya bu l'egu ejo-iphe ono, i shi anoduje eme teke i bu nwata le Ijiputu ono be anoduje agukwadu ngu; mbu teke ono, e shi anoduje arwaphe ngu eka l'ehe; apyikashi ngu eka l'opu era ngu ono.”

22“Gube Oholiba; wakwa iphe, Nnajiuphu, bu Chipfu epfuru ngu baa: Mu a-kpali ndu ono, i yeru obu ono; mbu ndu ono byawaru adu ngu ashi nta-a ono; g'ephe ghakobe buru ohogu ngu. Mu e-me g'ephe shi l'ekameka wufuta tsoahaa ngu opfu;

23mbu ndu Babilonu; me ndu Kaludiya; me ndu Pekodu; me ndu Showa; me ndu Kowa; ephe le ndu Asiriya l'opu. Ephe a-bukotaru unwokorobya, amakota ntumatu; bugbaaru ndu eze; me ndu-ishi mkpukpu; me ndu-ishi ugbo-inya; me ndu nogbaa l'oke okwa; bya aburu ndu nogbaa l'eli inya.

24Ephe e-gude ngwogu; me ugbo-inya du l'iche l'iche; bya achiru igwe oha bapfuta ngu. Ephe a-nodukota l'ekameka kwaberu ngu k'ogu. Ephe a-chiru iphe, e gudeje ezeru onwonye k'eze iya me ke nshii; bya ekpukotaru okpu, e meru l'igwe. Mu e-nwuta ngu nwuru nu phe g'ephe nua ngu aphu; mbu g'ephe mee ngu egube o du phe ree.

25Mu e-gude okophoo mu; mee ngu umerekete. Ephe e-befu ngu imi waa nchi. Ndu ophu phoduru l'ime ngu be ee-gude ogu-echi gbushia. Ephe a-kpu unwu ngu unwoke me unwada ngu le ndzu. Ndu ophu phodufuaru l'ime ngu bu oku e-tsu phe.

26Ephe e-yeshikotakwa ngu pho uwe, i yeru l'ehu; natachaa ngu iyagba, ama mma, i nwekotaru.

27Mu e-me g'ebyi, iime; me ukpara ono, i shi le Ijiputu gbata ono laa nlanan. I ti byadu anyatabaa ya; ke g'o gua ngu egu ozo; ophu i ti byadu anyatabaa Ijiputu ozo.”

28“Mbu le-a; wakwa iphe, Nnajiuphu, bu Chipfu epfu baa: Mu abyaakwaa ngu enwuru ye l'eka ndu du ngu ashi; mbu l'eka ndu ono, i gbakutawaru azu; kele ephe duwaa ngu eji ono.

29Ephe e-gude ndumashi tukokpoo iphe, i seru akanya iya nata ngu. Ephe a-gbabe ngu oto; i dabyiru egube ono. Ukpara ono, iigba ono be e-meru iphere iya kpua ngu le sagaa. Ejo-ememe ngu ono; me ukpara, iigba ono;

30be bu iya meru g'iphe ono dapfuta ngu; kele i wataru awu-ko ohamoha, nonu; bya egude agwa phe merwushia onwongu.

31I tsowaru uzo, nwune ngu nwanyi tsoru. Mu a-pakwanuru okoro iphe-ehuka iya dee ngu l'eka.”

32Wakwa iphe, Nnajiuphu, bu Chipfu epfu baa: “Ii-ngu iphe l'okoro ono, nwune ngu nwanyi nguru; mbu l'okoro ono, ha ke galagala; bya adu omilomi ono. Aa-chi ngu ochi; bya eme ngu ujikputeru; kele iphe no l'okoro ono be jiru ke pyimu.

33Ii-je iphe-ehuka jasuru l'ootsuahaa ngu atsutsu ge mee. O buru mkpurupyata waa ola-l'iswi be ii-ngu nno. Ono buru iphe, nwune ngu nwanyi, bu Sameriya nguru nguphodoru ngu.

34Ii-ngu iya; ngu-gbua gberegedege. L'i tukposhia ya yegiri yegiri; bya alabashia onwongu era alabashi. Mu pfuakwaru nkemu. Nokwa iphe, Nnajiuphu, bu Chipfu epfu bu ono.”

35Oo ya bu le-a; wakwa iphe, Nnajiuphu, bu Chipfu epfu baa: “Eshi ophu i zohawaru mbedua; woru mu jicha l'okotazu; be ejo-ememe ono, iime ono; me ukpara ono, iigba ono be ii-ritakota urwu iya.”

36Tobudu iya bu; Chipfu su mu: “Nwa ndiphe; ? ii-kpe Ohola yee Oholiba ikpe too? Ngwanu; karu phe ebyi, ephe emegbabe;

37mbu l'ephe bu ndu eri ogori; egbu ochi. Ephe gudewaa agwa, ephe gwotaru merwushia onwophe. Ephe nodu egudeje unwu, ephe nwushiru mu tua utara l'agwa phe.

38Waa iphe, ephe mekwaru mu pho bu owa: Le teke onokwapho be ephe merwushiru eka duru mu nsu; bya emebyishikota eswe-atuta unme mu.

39Oo le mboku ono, ephe gude unwu phe gwee eja nu agwa phe ono; be ephe bahuru l'eka duru mu nsu ono; woru iya merwushia. Noo iphe, ephe meru l'ulo mu bu ono.

40“I zicharu ozi g'e zia ndu shi uzo enya g'ephe byachaa; ephe wuru bya. O buru ndu ono be i sacharu onwongu degeberu; i bya etee iphe l'enya; bya egude iyagba memaa onwongu emema kwaberu phe.

41I bya asugaru l'aba, amashi mma ike. A bya eworu teburu dobe ngu l'iphu. I chita unwu-isensu me manu mu tukobe l'eli iya.

42Ikpoto nemadzu, bugbaa idokpamkpata nodu akwa evu ekpu iya. E duta ndu shi l'echiegu, ngu-jishiru mee ephe bya; waa ndu ozo yee ephe swi. Ephe bya agbabe iya mgbalaka; kpuke iya okpu, ama ntumatu.

43Noo ya bu; mu su g'ephe duta yebdua ono, gbawaru ukpara jasu o kpojohu ono; g'ephe l'iya wata eri ogori kele o buwaa nwanyi-ukpara.

44Oo ya bu; ephe jepfuahaa phe egube ono ejepfuje nwanyi-ukpara ono. Mbu ephe jepfuahaa Ohola yee Oholiba; phaahaa unwanyi ono kutukutu.

45Ndu e-kpe phe ikpe bu unwoke pfuleru-eka-oto Ephe a-nma phe ikpe ogori; waa ikpe ochi. Noo kele ephe eri ogori; bya aburu ndu egbu ochi.”

46Wakwa iphe, Nnajiuphu, bu Chipfu epfu baa: “G'a chita ikpoto nemadzu bapfuta phe; mbu g'e nwuru phe nu ndu e-me ge ndzu-agugu rwuta phe; bya atuko iphe phe kwa l'okwata.

47Igwe-oha ono a-tu phe mkpuma; bya egude ogu-echi egbutsushi phe. Ephe e-gbushichaa unwu phe unwoke me unwada phe; bya atseshia oku l'ulo phe.

48Noo ge mu e-shi mee g'emewushi onwonye laa nlalanu l'ali-a bu ono; k'opu unwanyi l'opu e-gudekwanu iya kwaa enya; g'ephe te eje eme egube ono, unu meru ono.

⁴⁹Aa-gwata unu ugwo emerwushi ono, unu emerwushi onwunu ono. Unu e-vuta ejophage o nwutaru unu; mbu nshi ono unu agwo ono. Oo ya bu; g'unu amakwanuru l'oo mbedua, bu Nnajiuphu bu Chipfu.”

Ezekelu 24

Etu, e gude ite, e shiberu l'oku nmaa

¹Tobudu iya bu; o be l'apha ke tete g'onwa iri du l'abaliri; Chipfu bya epfuru opfu yeru mu su:

²“Nwa ndiphe; dee iphe ntanu-a bu l'ekwo; mbu ntanu-a gedegede; kele oo ntanu-a gedegede be eze ndu Babilonu kephetaru Jierusalemu k'ogu.

³Nmaaru ndu ono, bu ekwegekwe ono etu; su phe: Wakwa iphe, Nnajiuphu, bu Chipfu epfu baa: “Shibe ite; shibe iya l'oku kuru mini ye iya!

⁴Chiru mkpirikpu mkpirikpu anu ye iya; mbu ndu ophu a hotaru ahota; utapfu iya; me upfumeke iya; mbu-a woru eka kachaa aburu okpobe anu chi-jia ya achi-ji.

⁵L'i kpata aturu, kachakpo ree gbua; chiru anu iya ye l'ohu ite ono; shighee anu ono eshighe. Shighee yee okpu iya eshighee.

⁶“Oo ya bu le-a; wakwa iphe, Nnajiuphu, bu Chipfu epfu baa: Nshio gube mkpukpu ono, egbu ochi ono! Nshio ite ono, gbawaru egba ono; mbu ite ono, egba iya tee hefuedu ehofu ono. Gushia anu ono nanu nanu; g'o to dukwa ophu aa-ha g'o phodu.

⁷Kele mee ndu o gbushikotaru be yee ya tukowaru nmakuru l'eli mkpuma; o to wushiduru iya l'oma ali eka urwuku gege ekpochikpo ya nu.

⁸Oo ge mee ndu ono akpalia mu ehueghu; k'ophu mu a-bya agwata iya ugwo iphe, o meru kparu iphe, mu doberu mee ndu ono l'eli mkpuma; g'o to du iphe, e-kpochi iya eja.

⁹“Oo ya bu le-a; wakwa iphe, Nnajiuphu, bu Chipfu epfu baa: Nshio gube mkpukpu ono, egbu ochi ono! Mbedua e-yebakwaro nku l'oku obu g'o kabaa shii.

¹⁰Mu a-kube nku ono g'o ha l'ikpo l'ikpo. “Mu eworu oku zunwua ya. Gude iya shighee anu ono eshighee. Mu eyekobechaa ya iphe, emeje g'iphe shi mkpo. Mu eshia ya g'okpu iya kpebatichaa uke ekpebata.

¹¹“L'i bya agbe teke ono shikwase ite iphoro ono l'eli ovokoku ono; shia ya gbiriri jeye oku adu l'ite ono shii; mbu shia ya g'oniyirubvu, e gude mee ya chaa ziriri; k'ophu inyi, no iya nu a-dazehu; mbu g'egba, o gbaru ono kee oku gbiriri jasu ookechafu.

¹²Noo kele e mewaru iya jasu ike labo bvu; ophu egba, o gbaru ono ekweddu eheshihu. Nta-a be oku e-ke egba ono, o gbaru ono.

¹³Iphe, bu inyi ono, du ngu l'ehu ono be bu urwuali. Eshi ophu mu mekotaru ge mu e-me hufu ngu inyi ono; ophu o kwedu ge mu hufu ngu iya; be a ta abyadu ehufubaa ngu iya jasu teke mu e-gude oke ehueghu mu mee ngu g'o du mu.

14Oo mube Chipfu pfuru opfu ono. O rwaakwaru teke mu e-me iya. Mu ta abyadu esela onwomu azu; ophu mu abyadu aphu obu-imemini; ophu mu ta abyadu asu le mu tee meedu ge mu tuberu. Ee-kpe ngu ikpe g'umere ngu waa iphe, iime gbaru. Nokwa iphe, Nnajiuphu, bu Chipfu epfu bu ono.' “

Anwuhu Nyee Ezekelu

15Tobudu iya bu; Chipfu bya epfuru opfu yeru mu su:

16“Nwa ndiphe; mu abyaakwa egude onu echachi lanu nyichata ngu onye ono, i yeru enya ono. Ole-a; ba agukwa aphu; ophu i rakwa ekwa; mbu g'enya-mini ta alwafutakwa ngu l'anya.

17Tokpoepho nwehu tsu ude. Ta kwashikwaru onye nwuhuru anwuhu enya-mini. Kee iphe, iikeje l'ishi egube iikeje iya; l'i yee akpokpa ngu. Te ekechikwa iphe l'onu; ophu i rikwa nri, ndu aphu tsoru erije.”

18Oo ya bu; mu pfeberu ndu ono opfu ono l'utsu; o be l'uzenyashi; nyee mu nwuhu. O be le nchitabohu iya; mu bya emekota egube ono, a suru ge mu mee ono.

19Tobudu iya bu; ndu ono bya ajia mu su: “? Tii kaduru anyi iphe, iphe-a, iimegbabe-a bu l'ehu anyi?”

20Tobudu iya bu; mu su phe le Chipfu pfuru mu su-a;

21ge mu su ndu Izurelu: “Wakwa iphe, Nnajiuphu, bu Chipfu epfu baa: Mu abyaakwa eme eka-du-nsu mu g'o to duhe nsu; mbu eka ono, a kpuru o shihu ike, bu eka unu gude eku onwunu ono; mbu eka ono, unu yeru enya ono; bya aburu eka ono, du unu ree ono. Unwu unu unwoke me unwu unu unwanyi, bu ndu ophu unu haru l'azu; be bu ogu-echi be ee-gude gbushia phe.

22Oo egube ono, mu meru ono be unu e-mekota. Unu tee kechidu iphe l'onu; ophu unu eridu nri, ndu no l'aphu erije.

23Unu e-kebe iphe l'ishi egube unu ekejuhawa iya; yee akpokpa unu. Unu taa agudu aphu; ophu unu taa aradu ekwa; ole unu a-jo ehu bvubebe l'opfu ejo-iphe ono, unu meru ono; mbu l'unu a-nodu ats'u ude l'ime onwunu.

24Ezekelu a-buru unu iphe-ohubama. Iphe ono, o mekotaru ono be unu e-mekota. Teke iphe ono nwuerupho; unu amaru l'oo mbedua, bu Nnajiuphu bu Chipfu.

25“A bya le gubedua; nwa ndiphe; mboku ono, mu a-nafu phe eka ono, a kpushiru ike ono, bu eka ephe gude ehu-utso iya eku onwophe ono; mbu eka ephe yeru enya ono; bya aburu eka du phe ree l'obu ono; mbu mboku ono, mu a-nafu phe unwu phe unwoke me unwu phe unwanyi ono;

26be onye nahuru gbalaa; a-byapfuta ngu bya edooru ngu iphe emenu.

27O buru mboku ono be ii-bebe kuhaa onu ngu; gu l'onye ono nahuru nu ono epfugba opfu; i tii bueduru onye te epfudu opfu ozo. Oo ya bu; l'i buru phe iphe-otube-nvo. Ephe a-maru-a l'oo mbedua be bu Chipfu.”

Ezekelu 25

Eepfu iphe, e-me ndu Amonu

- ¹Tobudu iya bu; Chipfu bya epfuru opfu yeru mu su:
- ²“Nwa ndiphe; ghachiru ndu Amonu iphu; pfuchiru mu; karu phe iphe, e-me phe nu.
- ³Su phe le-a: ‘Unu numakwa iphe, Nnajiuphu, bu Chipfu epfu. Wakwa iphe, Nnajiuphu, bu Chipfu epfu baa: Eshi ophu i teru eswa kpua ulo mu, du nsu; teke e merwushiru iya; teme o nodu atso ngu utso l'e meru ali Izurelu; o buru ochobu; waa l'a kpuru ndu Jiuda le ndzu laa ali ozo;
- ⁴be mu e-nwuru ngu nu ndu uzo enyanwu-awawa g'ephe nworu ngu. Epe a-bya anodu l'ime ngu nwechaaru ali-eze ali-eze; bugbaaru eburu l'ime ngu. Epe e-ri akpuru oshi ngu; ngua mini era-eswi ngu.
- ⁵Mu e-me mkpukpu Raba g'o buru aka inya-kamelu akpaje nri. Mu emee ali ndu Amonu g'o buru aka aturu a-dojeru atuta unme. Oo ya bu g'unu amakwanuru l'oo mu bu Chipfu.
- ⁶“Le-a; wakwa iphe, Nnajiuphu, bu Chipfu epfu baa: Eshi ophu i kuru aka pyaa; tee ebvu; gudekota ejo obu teru eswa kpua ndu Izurelu;
- ⁷be mu a-machi aka; bya adaa ngu aka ke njo l'ehu. Mu e-nwuru ngu nugbaa ohamoha, nonu g'ephe lwua ngu alwulwu. Mu e-dekufu ngu l'iphe, bu oha, nonu; mee ngu l'ii chihu l'iphe, bu mkpukpu nonu; mbu mee ngu g'i buru mkpurupyata. Oo ya bu g'ii-maru l'oo mu bu Chipfu.’ “

Iphe, ee-me ndu Mowabu

- ⁸Wakwa iphe, Nnajiuphu, bu Chipfu pfuru baa: “Eshi ophu Mowabu waa Siye suru ‘Lekpodapho; ndu onu-ulo Jiuda be dukwaa ge ndu ohamoha ozo’;
- ⁹be mu e-me g'ibiya ke Mowabu ono gheru onu; e -shi le mkpukpu ndu ophu no l'iphu egu, bu iya bu aka kakota ree l'ali ono; mbu e -shi le mkpukpu Betu-Jieshimotu; me Belu-Meyonu; me Kiriyatayimu.
- ¹⁰Mu e-nwuru Mowabu yele ndu Amonu nu ndu uzo enyanwu-awawa; g'ephe nworu; ophu a ta abyadu anyatabaa ndu Amonu anyata ophu l'echilabo ohamoha.
- ¹¹Mu anua ndu Mowabu aphu. Oo ya bu g'ephe amakwanuru l'oo mbedua bu Chipfu.”

Iphe, ee-me ndu Edomu

- ¹²Wakwa iphe, Nnajiuphu, bu Chipfu epfu baa: “Eshi ophu ndu Edomu gwataru ndu Jiuda ugwo iphe; be epe shiakwa l'ugwo iphe ono, epe gwataru ono meswee; k'opfu paru aka.
- ¹³Oo ya bu le-a; wakwa iphe, Nnajiuphu, bu Chipfu epfu baa: Mu a-machi aka gude ke njo daa Edomu aka l'ehu. Mu e-gbushi unwoke; me eku, no iya nu. Mu emee ya g'o buru ochobu. A -gbu le mkpukpu Temanu rwua le mkpukpu Dedanu be bu ogu-echi be ee-gude gbushia phe.

¹⁴Mu e-gude ndibe mu, bu ndu Ízurelu gwata ndu Edomu ugwo iphe ono, ephe meru ono. Ephe e-me ndu Edomu g'ooghu mu; mbu mee phe g'oke ehu-eghu mu gude habe mu l'ehu. Oo ya bu g'ephe amakwanuru l'oo mbedua agwa phe ugwo iya. Nokwa iphe, Nnajiuphu, bu Chipfu epfu.”

Iphe, ee-me ndu Filisitayinu

¹⁵Wakwa iphe, Nnajiuphu, bu Chipfu epfu baa: “Eshi ophu ndu Filisitayinu gudewaa ejo obu melata; mbu gwata ugwo iphe; bya egude kele ndu Jiuda shiro teke k'ichee du phe ash; eme g'ephe mee phe g'ephe buru mkpurupyata;

¹⁶be wakwa iphe, Nnajiuphu, bu Chipfu epfu baa: Mu a-machi aka ke njo daa ndu Filisitayinu l'ehu. Mu eme ge ndu Kereti chihu; mee ndu ophu phoduru nu, bu le mgboru eze-enyimu g'ephe buru mkpurupyata.

¹⁷Mu a-kwatakpo akwata gwata phe ugwo iphe, ephe meru; mbu gude oke ehu-eghu mu nua phe aphu. Oo ya bu g'ephe amakwanuru l'oo mbedua bu Chipfu; le teke mu agwata phe ugwo iphe, ephe meru ono.”

Ezekelu 26

Iphe, ee-me mkpukpu Taya

¹Tobudu iya bu; o be l'apha k'iri le nanu; le mboku mbu l'onwa onoya; Chipfu bya epfuru opfu yeru mu su:

²“Nwa ndiphe; eshi ophu ndu Taya ekweru ndu Jierusalemune asuje phe: ‘Hee!’ Eka ono, iphe, bu ohamoha eshije eje azu aswa ono be dakposhihuwaru nu. Mgbo, e yeru iya be guhachawaru gheru onu; ge mu eshije iya g'o du mu. Nta-a, mkpukpu ono dakposhihuwaru-a be buwaa g'iphe bya ejeahaaru mu le ree.

³“Oo ya bu le-a; wakwa iphe, Nnajiuphu, bu Chipfu epfu baa: Gube mkpukpu Taya; mu noakwaru ngu le njo. Mu a-chita oha, du igwerigwe g'ephe bapfuta ngu; mbu l'oo egube ono, eze-enyimu enwutaje akpara-mini ke gbukumu-a; bu ge mu e-nwuta phe; g'ephe byapfuta ngu.

⁴Ephe e-tsukposhi igbulu, e gude kpu-buta mkpukpu Taya; bya enwukposhikota ulo-eli, no iya nu. Mu e-kwochatachaa aja mkpokpo-ulo ono; bya emee aka ono g'o buru mkpuma mmanu be a-nodu iya nu.

⁵Taya a-buru pherere-ali no l'echi eze-enyimu; buru aka aa-noduje asusa ugbu-ikokoro phe g'o korohu. Mkpukpu ono a-buru iphe, ohamoha a-lwu alwulu. Nokwa iphe, Nnajiuphu, bu Chipfu epfu.”

⁶Ndu ophu bugbaa l'ime egu be ee-gude ogu-echi gbushia. Oo ya bu g'ephe amakwanuru l'oo mbedua be bu Chipfu.

⁷“Wakwa iphe, Nnajiuphu, bu Chipfu epfu baa: Oo Nebukadineza, bu eze ndu Babilonu, bu eze, ka ndu eze; mbu onye ono, shi l'uzo isheli; be mu e-me g'o dapfu ndu Taya. Oo-chita inya; me ugbo-inya; me ndu agba l'inya; me igwerigwe ndu ojogu gude bya.

⁸Oo-gude ogu-echi gbushikọta ndu ophu bu l'ime ẹgu. O bvua ose-ọgu gude kepheta ngu; bya akọo obvudu-ẹja g'ọ nọdu kpua oronmono jasụ l'igbulọ ngu. Ọo-pali iphe, eegudeje egbobuta onwonye; gude tsoo ngu ọgu.

⁹Ọo-nọdu asụ ọkurukpo, eegudeje akukposhi ọlo l'igbulọ mkpukpu ngu ke pfuu. Oo-gude ngwọgu iya nwukposhia ọlo-eli ngu.

¹⁰Ịnya, ọo-chiru a-duta-be igwerigwe; k'ọphu bu l'udzu, ẹphe gude ọkpa ekpokashi be e-lichaa ndibe ngu mkpachi. Igbulọ, e gude kpụ-buta mkpukpu ngu ono be a-nọdu ete nmenmenme; l'igiji, ẹphe a-nọdu ede; mbụ ndu agba l'inya; me ikpoto ugbo-inya, ọochi teke ono, oo-shi l'oguzo unu abata ono; mbụ g'onye abahụ le mkpukpu, e nwukpofuru igbulọ iya enwukpofu.

¹¹Upyi-ọkpa inya iya ono be a-zokota gbororo, nọ l'ime ngu tolitoli. Oo-gude ogu-echi gbushia ndibe ngu. Itso ngu, shihuru ike a-ngashihuchaa buru memeeje l'ali.

¹²Ẹphe a-lwụ ẹku ngu alwulwu; gwee ngwaswa ngu tutua. Ẹphe e-nwukposhikota igbulọ, e gude kpụ-buta ngu; nwutsushikọta ọlo nọ l'ime ngu, e meru o nọdu ama mma; bya evukoo mkpuma ngu me oshi ngu; mekpoo mkpokpo-ọlo ngu; je enwuru ye l'eze-enyimu.

¹³Mu e-me g'ebvu ono, i guje ono buru nyonyoronyo. Ebvu ono, i gudeje une akpo ono be a ta abyadu anumabaa ozo.

¹⁴Mu e-me ali ngu g'ọ buru mkpuma mmanu bu iphe, a-nọdu iya nu; l'i buru ẹka aatujaje ugbu, e gude egbu ema g'ọ korohu; ophu a ta abyadu akpukwaba ngu akpukwa; kele ọo mube Chipfu pfuru iya. Nokwa iphe, Nnajiuphu, bu Chipfu epfu bu ono.”

¹⁵Wakwa iphe, Nnajiuphu, bu Chipfu epfuru mkpukpu Taya baa: ? Ọ du ngu g'ali, nokota l'aguga eze-enyimu taa nmakotadu jiiijiii le teke ii-da; mbụ le teke ono, ndu e mekagbaaru iphe a-nọdu atsụ ude ono; mbụ teke ono ee-gbushi nemadzu l'ime ngu ono?

¹⁶Ọ buru teke ono be ndu-ishi, bugba l'aguga eze-enyimu e-nyizetakota l'aba-eze phe; bya yeshikota akpawuru-uwe phe. Ẹphe e-yeshikota uwe phe, e mengashiru o nọdu ama mma ono. Ndzụ-agugu e-rwuta phe. Ẹphe agwodoshihu l'oma ali mmanu; anmagbaa pyaapyaapya tekenteke; l'ọ kpọ phe onu-opfu; mbụ iphe byapfutaru ngu nu.

¹⁷Ẹphe erwaru unu erwubvu su: “Egube g'e mekwanuru i buru mkpurupyata; gube ohamoha ono, a maru amaru ono; mbụ gube oha, okpehu shi du shii bu ndu akpa le mini bukota iya. Gube oha ono shi alwushi ọgu ike le mini; mbụ gubedua; me ndu bu ngu l'ime. Ndu bu l'ibiya ono; be i shi mee ẹphe tuko anmagbaa ruurwu le ndzụ-agugu.

¹⁸Nta-a be ndu bu l'aguga eze-enyimu anmakota pyaapyaapya l'eka i daru. Ali, mini so-phegbaaru mgburugburu l'eze-enyimu be ndzụ-agugu rwutaru; kele i daru.

¹⁹“Wakwa iphe, Nnajiuphu, bu Chipfu epfu baa: Teke mu e-me mkpukpu ngu ono g'ọ buru ochobu; mbu g'ọ du g'eka e te ebuedu ebubu; mbu teke mu e-gude oke eze-enyimu ime ali bapfuta iya; bya emee g'oke mini ono gbamia ya;

²⁰be mu e-mekwa ge gule ndu ophu ekpoda ekpoda; tuko kpoda l'iduma; mbu g'i lapfu ndu teke k'azu. Mu e-me ngu g'i nwuda l'ime ali ge mkpokpo-ulo, mebyishihuru teke ndiche. Ndu unu l'ephe a-swiru bu ndu ala l'uwurukutu-maa; ophu i ti byadu alwabaa azu ozo; mbu ke bya ebubaaru l'ali, ndu no ndzu.

²¹Mu e-me ngu g'i laa ejo alala; mee ngu l'i chihu-gbua ree. A cho ngu nta cho imo; ole a ta abyadu ahumabaa ngu ozo. Nokwa iphe, Nnajiuphu, bu Chipfu epfu bu ono.”

Ezekelu 27

Iphe, e-me ndu Taya

¹Tobudu iya bu; Chipfu bya epfuru opfu yeru mu su:

²“Nwa ndiphe: yooru ndu Taya oshi;

³su iya: Gube mkpukpu Taya, no l'onu eka eeshije abahu l'eze-enyimu; buru mkpukpu, iphe, bu ndu bugbaa l'aguga eze-enyimu abyaje azuta aswa. Wakwa iphe, Nnajiuphu, bu Chipfu epfu baa: “Oowaa gube Taya; i suru l'i maerberu mma.

⁴Eka oke ali ngu kparu be bugbaa l'echi eze-enyimu. Ndu kpuru ngu nu kputsee meru ngu k'ophu i mafufuru mma ngu l'ishi.

⁵Ndu kuru ugbo-mini ngu be bu l'ubvu Seniru be ephe gburu oshi payinu gude kua ya; bya ejekwapho l'ubvu ubvu Lebanonu bua oshi sida gude bvua itso ugbo-mini ngu ono.

⁶O buru oshi-akpurata, shi l'ali Beshanu be e gude pyishia eku-ugbo ngu; o buru oshi-sayipuresu, e bukoru l'aguga enyimu Sayipurosus be e gude mee omali ugbo-mini ngu ono; bya egude eze-enyi mee ya ona.

⁷Ekwa-ochaa, a kparu o du eguru, shi le Ijiputu be e kweru l'imeli ugbo-mini ono; bu iya bu iphe, emeje iya g'o gba oso; bya aburu iya be eegudeje ahube iya ama. Iphe, e gude kwekota l'ugbo-mini ono ge mini ta abahujeshi iya be bu ekwa, du urwukpu-urwukpu; me ekwa, du uswe-uswe, shi l'aguga enyimu mkpukpu Elisha.

⁸Unwoke mkpukpu Sayidonu; me unwoke mkpukpu Avadu be bu ndu shi akpokotaru ngu ugbo; gube Taya. Unwoke ngu, bu ndu iphe doru enya be bukota ndu angakotaru ngu ugbo-mini.

⁹Ndu-bu-ogerenya mkpukpu Gebalu, me ndibe phe, maru eme ona; be anoduje l'ugbo-mini ngu; emezigbaa eka o rifushihuru uzo. Iphe, bu ugbo-mini, nokota l'eze-enyimu; me ndu angakota ugbo-mini ono be abyaje ngu azuta aswa.

¹⁰“Unwoke ndu Peshiya; me unwoke ndu Lidiya; yee unwoke ndu Putu shi bukotaru ndu ojogu ngu alwuru ngu ugu. Ephe achijeru iphe, ephe egudeje egbobuta onwophe; me okpu-igwe phe kobegbaa l'eli igbulu ngu. Ephe meru ngu i du ubvu.

- 11**Unwoke ndu Avadu; mę unwoke ndu Heleku bę bu ndu echejeru ngu igbulọ ngu nche gba mgburugburu. Unwoke ndu Gamadu bu ndu anọdujeru ngu l'ulo-eli. Epe ewojeru iphe, epe egudeje egbobuta onwophe kobegbaa l'eli igbulọ, e gude kpu-buta mkpukpu ngu. Epe meru; mma ngu dzua edzudzu.
- 12**"Ndu Tashishi shi buru ndu azuje ngu aswa; kele i nweru eku, paru eka l'udu iya l'udu iya. Epe shi egudeje mkpola-ochaa; mę iphe-igwe; mę ogbongu; mę mkpuma ota-njele; bya azu-nweta ngu ophu i nweru.
- 13**Ndu Jiavanu; mę ndu Tubalu; mę ndu Mesheku shi achijeru ohu; mę ngwa, e gude onyirubvu mee; gude bya ngu azuta aswa.
- 14**Unwoke Betu-Togarama shi akpujeru inya, eegudeje eje ozi; mę inya, eegudeje alwu ogu; mę inya-mulu bya ngu azuta aswa.
- 15**Unwoke ndu Dedanu bę unu l'ephe shi azugbaje aswa. Igwerigwe ndu bugbaa l'aguga eze-enyimu shi bukotaru ndu azu ngu aswa. O buru eze-enyi yele oshi-eboni bę epe shi egudeje pfua aswa iphe, epe zuru.
- 16**Ndu Edomu bę shi azuje ngu aswa; kele iphe, iimeshi emeshi bę du igwerigwe. Epe shi egudeje mkpuma emeraludu; bya ngu azuta aswa; mę ekwa du uswe-uswe; mę ekwa, a kparu o nodu ama mma; mę ekwa ochaa; mę mkpuma koralu; mę mkpuma rubi.
- 17**Ndu Jiuda; mę ndu Izurelu bę unu l'ephe shi azugba aswa. Epe shi egudeje witi, shi le Minitu; mę igberi; mę manu-enwu; mę manu mmanu; waa manu-balumu; bya ngu azuta iphe, i meshiru.
- 18**"Ndu Damasukosu gudekwapho l'i meshiru iphe, du igwerigwe; waa kele i nweru eku ntumatu; epe nodu egudeje mee, shi le Helubonu; mę eji aturu, shi le Zaharu azu ngu aswa.
- 19**Ndu Danu; mę ndu Jiavanu, shi le Uzalulu bę azuje ngwaswa ngu. Epe nodu egudeje igwe, a kpu akpukpu; ye kashiya; mę kalamosu, bukota iphe, eegudeje eme manu-anyinyi, eshi kwekweekwee; bya ngu azuta aswa.
- 20**Ndu Dedanu shi egudeje ukpo, eegudeje nodu l'eli inya bya ngu azuta aswa.
- 21**Ndu Arabu; mę iphe, bu ndu-ishi ndu Keda bę bukota ndu shi azuje ngu aswa. Epe achijeru aturu; mę ebili; ye egbu bya ngu azuta aswa.
- 22**Ndu Sheba; mę ndu Rama bę shi azujekwa ngu pho aswa. Epe shi egudeje manu, vu oke aswa; mę mkpuma, vu oke aswa; mę mkpola-ododo; bya azu-nweta ngwaswa ngu.
- 23**Ndu Haranu; mę ndu Kane; mę ndu Edenu; ye ndu agbagbaa oke-ngho, shi le Sheba; mę ndu agba oke-ngho, shi le mkpukpu Ashuru; mękpoo mkpukpu Kilimadu bę shi azukotakwa ngu pho aswa.
- 24**Iphe, epe shi azuje ngu aswa iya bu uwe, amagbaa mma; mę ekwa, du urwukpu-urwukpu; yele ekwa, a kparu dengashia ya iphe edengashi; mę jilajila ukpo, vokashiru

avokashi, aatogboje l'oma-ulo; mbu ophu e gude okpukpu swia; bya elichaa ya ke kpukpurukpu.

²⁵Ugbo-mini ndu Tashishi bu gube Taya be ephe anoduje evuru iphe. “I duopho g'ugbo-mini, e dojiru iphe, anyishi erwa ike; o nodu l'echilabo eze-enyimu.

²⁶Ndu l'akpo ngu l'ugbo kpotawaru ngu je edegebe l'echi eze-enyimu. Obenu le pherephere, shi l'uzo enyanwu-awawa a-bya ezijashia ngu iphiriba iphiriba l'echilabo eze-enyimu ono.

²⁷Eku ngu; me iphe, i gude agba ngho; me ngwaswa ngu; me ndu etso ugbo-mini ngu; me ndu angaru ngu ugbo-mini; me ndu aguchijeru ngu ugbo-mini; me ndibe ngu, agba oke-ngho; mekpoo ndu ojogu ngu g'ephe ha; me iphe, bukpo ndu ozo no l'ugbo ngu ono; be e-kpolahu l'echilabo eze-enyimu mboku ono, ugbo-mini ono e-kpu.

²⁸Aguga aguga eze-enyimu be a-nmahukota jijijijii le teke ndu angaru ngu ugbo-mini a-tushi uzu-ekwa.

²⁹Iphe, bukpo ndu gude eku-ugbo akpo ugbo be a-pakotaru ugbo phe nwuhaa. Ndu anga ugbo-mini; me ndu etso ugbo-mini ono be a-pfuchaaru l'aguga eze-enyimu.

³⁰Ephe a-kwatakpo akwata chia oke mkpu ekwa; mbu kwatakpo rashia ekwa ngu ike. Ephe e-kpota ntu kpukposhi onwophe l'ishi; bya arwaswikota onwophe le ntu.

³¹Ephe a-kpushi ishi ngu; bya eyee uwe-aphu. Ephe e-gude obu, aphu jiru ejiji kwaa ekwa ngu; mbu gua aphu ngu gushia ya ike.

³²O buru teke ono, ephe a-nodu ara ekwa ngu; agu aphu ngu ono; be ephe a-guru ngu ebvu-aphu owa-a su: ? Bu mkpukpu ole be bujekporu mkpurupyata l'echilabo eze-enyimu egube-a, mkpukpu Taya bu iya-a?

³³Teke e shi evushije ngwaswa ngu e -shi l'eze-enyimu; be i shi emeje ephe eji oha, du igwerigwe. O buru eku ngu, paru eka; me ngwaswa ngu be i gude mee ndu eze, nogbaa le mgboko-a ephe nweru iphe.

³⁴Obenu le nta-a be mini mebyishiaru ngu l'ohu eze-enyimu. Ngwaswa ngu ono; yee ndu tso ngu nu; be mini rikotawaru unu l'ephe.

³⁵“Iphe, bukpo ndu bukota l'aguga eze-enyimu be iphe, meru ngu nu nyiru ishi edzu; ndu bugbaa eze phe nmahukota rwuurwu l'eka ndzu-agugu rwutaru phe. Iphu gbapfubechaa phe agbapfube l'eka ndzu agu phe.

³⁶Iphe, bu ndu agbagbaa oke-ngho l'ohamoha be ata mgbede le k'iphe nwuru ngu nu. I lawaru ejo alala; ophu i ti byadu adubaa adudu ophu.” “

Ezekelu 28

Iphe, e-me eze ndu Taya

¹Noo ya; Chipfu bya epfuru opfu yeru mu su:

²“Nwa ndiphe; pfiaru onye-ishi ndu Taya sụ iya: Wakwa iphe, Nnajiuphu, bụ Chipfu epfu baa: Eshi ọpụ iitu onwongu ẹpha sụ l'ị bụ Chileke; l'ị sụgaru l'aba-eze Chileke l'echilabọ eze-enyimu; l'ẹka ị bụ nemadzu mmanu; mbu l'ị ti bụdu Chileke; e - gudekpọoro l'iri l'ị maru iphe ọ Chileke.

³? I ka Danelu amaru iphe ọ? ? Iri l'ọ ọ duedu iphe, e domiru edomi; ị ti tukochoada g'ọ ha maru ọ?

⁴I gudewaa mmamiphe ngu; me egomunggo, i nweru kpa ẹku kuberu onwongu; bya evukọo mkpola-ododo; me mkpola-ochaa kube l'ulo-ẹku ngu.

⁵I gude aswa ono, ị maru g'aazuje; mee ẹku ngu kabaa shii. I gbẹ gude l'ị nwewaru iphe bya etuahaa onwongu oke ẹpha.

⁶“Oo ya bụ; waa iphe Nnajiuphu, bụ Chipfu epfu baa: Eshi ọpụ irije l'ị maru iphe; mbu l'ị mawaru iphe ọ Chileke;

⁷bẹ mu e-rwutaepho ndu ọhoro g'ephe bya etsoo ngu ọgu; mbu ndu ọha, kachaa enweru ẹjo-okpoma l'iphe, bụ ọha l'ophu. Ephe a-mita ogu-echi phe gude mee ọgema, ịma; me mmamiphe ngu ono buru ọla-l'iswi. Ubvu, ị du bẹ ephe e-woru gwọọ le ntu.

⁸Ephe a-ọ-tsuta ngu; nwuru ngu ye l'ilu; mbu l'ephe e-gbu ngu l'ike l'echilabọ eze-enyimu.

⁹? Ii-nwekwaduru onu, ii-gude sụ ndu ono, e-gbu ngu nu ono m'ephe -byaepho; l'ị bụ Chileke? Ndu e-gbu ngu nu ono -byaepho; bẹ ịi-maru-a l'ọo nemadzu mmanu bẹ ị bụ; l'ị ti bụdu Chileke.

¹⁰Ii-nwuhu anwuhu onye akpapyi l'ẹka ndu ọhoro. O kwa mbedua pfuru iya. Nokwa iphe, Nnajiuphu, bụ Chipfu epfu.”

Adada eze ndu Taya

¹¹Tobudu iya bụ; Opfu Chipfu byakwa akparwuta mu l'ehu; bya asu mu:

¹²“Nwa ndiphe; raa ẹkwa eze ndu Taya sụ iya: Wakwa iphe, Nnajiuphu, bụ Chipfu epfu baa: I shi buru onye a suru l'ọ duebe ree; bya aburu onye shi maru mmamiphe shii; bya eshikwapho buru onye mafuru mma l'ishi.

¹³I shi buru le Edenu; mbu le mgbabu Chileke. Iphe, bụ mkpuma, vugbaa oke aswa bẹ meru ngu; ị nodu ama mma. Mkpuma ono bẹ bụ rubi; me topazu; me emeraludu; me kirisolayitu; me onikusu; me jiasupa; me safaya; me tokwasu; me berilu. Iphe, e doru mkpuma ono ke ọo; bya egude kpabyabe iya o shihu ike bụ iphe, e meru le mkpola-ododo. Iphe ono bẹ e meru doberu ngu le mboku e keru ngu; ị futa mgboko.

¹⁴A wuru ngu manu l'ishi g'i buru chierobu, anoduje eche nche; mbu l'ọo iphe ono bẹ mu meru ngu g'i buru. I shi nodu l'eli ubvu, du nsọ ke Chileke. I shi edejeru le mkpuma, ebugba ke nwiniwii.

15“Eshi kẹ mbọku, e meru ngu bẹ ụta ta adujeduru ngu l'ẹhu jasụ teke a byaru ahuma l'iime ejo-iphe.

16I gbẹ gude l'i nweru ngwaswa, ha shii wata eme kpangakpangakpanga; shi nno wata iphe-eji. Oo ya bụ; mu chifu ngu; i gude iphere lufu l'ubvú Chileke ono. Mu nwufu gube chierobu, anọduje eche nche ono lẹ mkpuma, egbugbaa nwịnwii ono.

17I gude kẹle iima mma tseahaa etsetse; bya arwutoshia mmamiphe ono, i makotaru ono arwutoshi opfu l'oo l'i dū ubvù. Oo ya bụ; mu pata ngu taa l'alị; mee ngu i buru onye ndu eze wataru ele ọnya kẹ phoriphori.

18I gudewaa ikpoto ejo-iphe, i meshikotaru; mę aswa, i gude ụgho azu merwushikota ẹka-dụ-nsọ ngu. O buru iya meru; mu menaa oku shi l'ime ngu gbanwuhu; woru ngu tsua tsufu. Mu woru ngu mee; i buru ntụ, wushiru l'omali; mbu i buru ntụ ekpofu l'iphu ndu ele ngu ọnya.

19Iphe, bụ ohamoha, makotaru ngu nụ bẹ iphe, meru ngu nụ tufuru ẹhu. I laru ejo alala; ophu i tị byadu adubaa adudu ophu.”

Iphe, e-me mkpukpu Sayidonu

20Tobudu iya bụ; Chipfu bya epfuru opfu yeru mu su:

21Nwa ndiphe; ghachiru mkpukpu Sayidonu iphu; pfuaru mu phe iphe, a-nwuru phe nu;

22su iya: “Wakwa iphe, Nnajiuphu, bụ Chipfu epfu baa: Mu noakwaru ngu lẹ njo; gube Sayidonu. Mu e-me g'i maru ge mu du-be akpabiri. Oo ya bụ; g'ephe amakwanuru l'oo mbedua bẹ bụ Chipfu lẹ teke ono, mu a-nu phe aphu; goshi phe lẹ mu bụ onye dū nsọ ono.

23Mu e-me g'ejo-ẹhu dapfuta iya; mee g'iphe, bụ oma ogbororo iya sokota gborogboro lẹ mee. Ee-gbushi nemadzu ephe adakaa l'ime gube mkpukpu ono; mbu e-gude oguechi gbushia nemadzu l'ekameka lẹ mkpukpu ono. Oo ya bụ g'ephe amakwanuru l'oo mu bụ Chipfu.”

Eekebe ndu Izurelu l'oma

24“Ndu ephe lẹ ndu Izurelu bunyabe ta abyadu abubaaru ndu ephe dū ashi; mbu l'ephe taa dzukashibedu phe; ophu ephe taa lakashibaedu phe g'ogarambo. Oo ya bụ g'ephe amakwanuru l'oo mbedua, bụ Nnajiuphu bụ Chipfu.”

25Wakwa iphe, Nnajiuphu, bụ Chipfu epfu baa: Teke mu dufutaerupho ndu Izurelu l'eka a chikashiru phe ephe laa bẹ bụ l'ime phe bẹ mu e-goshi ohamoha lẹ mu bụ onye dū nsọ. Oo ya bụ; ephe abya eburu l'alị nkephe, bụ iya bụ alị ono, mu nuru nwozi mu, bụ Jiékopu ono.

26Ephe e-buru l'eka ono l'ẹhu-guu; nodu iya kwashia unuphu; kọahaa ya opfu-vayinu. Ephe eburu iya l'ẹhu-guu teke mu a-nu ndu ephe l'ephe bunyabe aphu, bụ ndu ono, shi emekpa phe ẹhu ono. Noo teke ephe a-maru l'oo mu bụ Chipfu, bya aburu Chileke phe.

Ezekelu 29

Iphe, e-me ndu Ijiputu

- ¹O be l'apha k'iri ono le g'onwa iri du l'abali iri l'ebo; Chipfu pfuru yeru mu su:
- ²“Nwa ndiphe; ghachiru Fero, bu iya bu eze ndu Ijiputu iphu le ke njo; gude pfuaru mu iya iphe, a-nwuru iya nu; pfukwarupho ndu Ijiputu l'ophu iphe, e-me phe nu.
- ³Pfuaru iya su iya: ‘Wakwa iphe, Nnajiuphu, bu Chipfu epfu baa: Mu nowaru ngu le njo; gube Fero, bu eze ndu Ijiputu; mbu gube ejo oke agiyi, zee l'echi enyimu ngu. Iisuje l'enyimu Nayilu bu nkengu; l'oo gubedua meru iya doberu onwongu.’
- ⁴Ole mu e-woru ikekee dzubechaa ngu l'okpu-agba; bya emee g'ema, nokota l'enyimu ngu bya eripfua l'ekiri, no ngu l'ehu. Mu a-kpufuta ngu l'enyimu eka ono i no ono; yele ema ono, ripfuru l'ekiri, ngu ono.
- ⁵Mu a-paru ngu haa l'echiegu gu l'ema, nokota l'enyimu ngu. Ii-da l'oma egu; a taa patadu ngu apata; ophu o buro ke lia ngu elili. Mu e-woru ngu nu anu-egbudu, bu le mgboko; me unwenu, ephe l'eli g'i buru nri phe.
- ⁶Oo ya bu ge ndu bukota le Ijiputu amakwanuru l'oo mbedua bu Chipfu. “Noo kele: i shi buru ndu Izurelu oshi ekperema.
- ⁷O nodu abujeru: ephe -kuba ngu eka; i nyakwoshihu; yejashia phe ukuvu. Teke ephe dakoberu ngu; i nyajihu; ephe adaa dajia okpu-upfu.
- ⁸Oo ya bu; wakwa iphe, Nnajiuphu, bu Chipfu epfu baa: Mu e-gude ogu-echi bapfuta ngu; gbushia unwoke ngu me eku ngu.
- ⁹Ali Ijiputu be a-buru mkpurupyata; mbu l'oo-buru ochobu. Oo ya bu; g'ephe amakwanuru l'oo mbedua be bu Chipfu. Iphe, kparu iphe, mu e-me nno bu l'i suru l'enyimu Nayilu be bu ngu nwe iya; l'oo ngu meru iya.
- ¹⁰“Oo ya bu; mu noakwaru ngu le njo; bya anoduru enyimu ngu ono le njo kwapho. Mu e-me ali Ijiputu g'o buru ola-l'iswi; mbu g'o buru ochobu e shikpoo le mkpukpu Migudolu; jasu le mkpukpu Asuwanu; mbu je akpachakpoo l'oke unu le ndu Kushi.
- ¹¹Okpa nemadzu; ozoo k'anu-egbudu ta abyadu aghabubaa ya; ophu o dudu onye byaru ebubaaru l'eka ono jasu ukporo apha labo anwua laa.
- ¹²Mu e-me ali Ijiputu g'o yifuaru l'eka a-buru ochobu g'ali ndu ozo buhawaa. Iphe, bu mkpukpu, nokota l'ime iya a-buru eka egbara phuru; ukporo apha labo mgburugburu. Ephe a-duepho ge mkpukpu ozo, a lwuru alwulwu duhawaa. Mu a-chikashi ndu Ijiputu g'ephe laa ohamoha, nogbaa nu; mbu chikashia phe g'ephe tuko iphe, bu mkpukpu, nonu dzuru.
- ¹³“Ole-a; wakwa iphe, Nnajiuphu, bu Chipfu epfu baa: A -noephe ukporo apha labo ono be mu e-dufutakota ndu Ijiputu ono l'iphe, bu mkpukpu ono, a chikashikotaru phe ephe laa ono.

¹⁴Mu e-shi l'eka a kpuru ndu Ijiputu laa ono duphutakota phe azu; duru phe laa ali Paturosu, bu iya bu ali eka ephe futaru. O buru eka ono be ephe a-nodu buru ali-eze, enya lwaru.

¹⁵Oo-buru ali-eze, enya kachakpoo alwalwa; ophu o to byadu apalihubaa k'aka ohamoha ozo shii. Mu e-me iya g'o kwatakpoo lwaa ali k'ophu bu l'o to duedu oha, o byaru a-du ike bubaaru ishi phe ozo.

¹⁶Ijiputu ta abyadu abubaaru mkpukpu, ndu Izurelu chiru upfu kwee ozo. Ndu Izurelu e-gudeje Ijiputu nyata l'oo ejo-iphe be ephe meru; teke ephe chijeru upfu kwe l'eka o no g'o yeru phe eka ono. Oo ya bu g'ephe amakwanuru l'oo mbedua, bu Nnajiuphu bu Chipfu.”

Nebukadineza, alwu-kpe ndu Ijiputu

¹⁷Tobudu iya bu; o be l'apha k'ukporo l'esaa le mboku onwa mbu furu; Chipfu bya epfuru opfu yeru mu su:

¹⁸“Nwa ndiphe; Nebukadineza, bu eze ndu Babilonu be chiru ndu ojogu iya ye g'ephe je achiahaa ndu Taya onwu l'eka. Ndu ojogu iya ono be o meru ishi kworihuchaa phe akworihu; ukuvu swashihukota phe aswashihu l'eka ephe evu iphe. Ole Nebukadineza yee ndu ojogu iya ono ta adudu urwu, ephe ritaru l'ogu ono, ephe tsoru ndu Taya ono.

¹⁹Oo ya bu; waa iphe, Nnajiuphu, bu Chipfu epfu baa: Mu abyawaa eworu Ijiputu nu Nebukadineza, bu eze ndu Babilonu. Nebukadineza be e-gwe eku ndu Ijiputu tutua atutu. Oo-tuko ali ono lwua alwulwu; gwee iphe phe g'o hakota. O buru iphe ono, o gweru ono a-buru obunggo, ee-bu ndu ojogu iya.

²⁰Mu wowaru ali Ijiputu nu iya g'o buru obunggo, mu buru yee ndu ojogu iya k'akanya ephe seru; mbu l'ephe lwuru mu ogu. Nokwa iphe, Nnajiuphu, bu Chipfu epfu ono.

²¹“Teke o beerupho mboku ono be mu e-me g'ike bya adu ndu Izurelu; mu abya emekwapho gube Ezekelu g'i saa onu pfua opfu l'echilabo phe. Oo ya bu g'ephe amakwanuru l'oo mbedua bu Chipfu.”

Ezekelu 30

Aayo oshi Ijiputu

¹Noo ya; Chipfu bya epfuru opfu yeru mu su:

²“Nwa ndiphe; pfiaru phe iphe a-nwuru phe nu. Su phe: ‘Wakwa iphe, Nnajiuphu, bu Chipfu epfu baa: Chia mkpu su: “Nshio mboku ono!

³Noo kele mboku obu dukwaa ntse; mbu le mboku, bu ke Chipfu dukwa ntse. Mboku ono be a-gbahu tsukiribaa. Teke ono be ohamoha a-la l'iswi.

⁴Ogu-echi be e-gude bapfu ndu Ijiputu. Ejo iphe-ehuka be a-byapfuta ndu Kushi. Teke ndu e gbushiru a-daka le Ijiputu; be aa-tuko eku phe gweta tugba; L'o bya aburu mkpukpu, dakposhuru adakposhihu.

⁵Ndu Kushi; mę ndu Putu; mę ndu Lidiya; mę ndu Arabu l'ophu; mę ndu Libiya; mękpoo ndu alı ono unu l'ephe tuko gbaa ndzu ono bę ee-gude ogu-echi tuko ephe le ndu Ijiputu gbushia.

⁶“Wakwa iphe, Chipfu epfu baa: Iphe, bukpo ndu turu ikę yeru Ijiputu bę a-dashikota; ndu bu ike du iya nu, o gude eku onwiya ono bę a-bvu. Ee-shiepho le mkpukpu Migudolu gude ogu-echi gbushia phe l'ime mkpukpu ono jası le mkpukpu Asıwanu. Nokwa iphe, Nnajiuphu, bu Chipfu epfu.

⁷Ephe a-buru ochobu g'alı ndu ozo bukwapho. Mkpukpu, phe a-dakposhihukwapho; egbara aphua ya; ge mkpukpu ndu ozo dakposhihukwarupho egbara phua ya ono.

⁸Noo teke ephe a-maru l'oo mu bu Chipfu; mbu teke ono, mu a-tufu oku le Ijiputu ono; teme ndu agbajeru phe mkpu bę e gweakwarupho arakabya.

⁹“Mboku ono bę mu e-zi ge ndu-ozı shı l'eka mu no gude ugbo-mini je eyeeru ndu Kushi ebvu l'eka ephe tusaru ehı ono. Ejo iphe-ehuka bę e-rikpote phe le mboku ono, Ijiputu a-la l'iswi ono; mbu l'ejo iphe-ehuka ono byafutaje.

¹⁰“Wakwa iphe, Nnajiuphu, bu Chipfu epfu baa: Ikpoto ndu Ijiputu bę mu e-me g'ephe shı l'eka Nebukadineza, bu eze ndu Babilonu chıhu.

¹¹Yebedua waa ndu ojogu iya, bu ndu kachaa ejo okpoma l'iphe, bu ohamoha nonu bę ee-dubata g'ephe lwua alı ono alwulwu. Ephe a-mıta ogu-echi phe tsopyabe ndu Ijiputu; gbushia nemadzu gbujia alı ono egbuji.

¹²Mu e-me g'enyimu Nayılu tashihukota; mu abya eworu alı ono ree ndu eme ejo-ıphe. Oo l'eka ndu ohozo bę mu e-shı mee alı ono g'ok laa l'iswi; mękpoo iphemıphe, nokota iya nu. Mube Chipfu bę pfuakwaru nu.

¹³“Wakwa iphe, Nnajiuphu, bu Chipfu epfu baa: Mu e-mebyishikota agwa; mee g'ıphe, e dobegbaaru agwa agwagwa chıhu le mkpukpu Memufısu. Ophu okudu onye byaru abubaaru ishi, le Ijiputu. Mu e-me ge ntsu-mebvu dzuru alı Ijiputu.

¹⁴Mu e-me g'alı Paturosu buru ochobu. Mu a-tufu oku le mkpukpu Zowanu; mu anua mkpukpu Tebesu chiipfu.

¹⁵Mu e-kpukposhi mkpukpu Sinu, bu agbabe-adzuru ndu Ijiputu oke ehı-eghu mu. Mu e-mekwapho g'ikpoto ndu mkpukpu Tebesu chıhu.

¹⁶Mu a-tu oku le Ijiputu. Ndu mkpukpu Sinu bę a-nodu l'oke iphe-ehuka. Mkpukpu Tebesu bę ee-chikposhi. Mkpukpu Memufısu bę a-nodu eje iphe-ehuka mkpurumkpuru.

¹⁷Unworoobyia ndu mkpukpu Avenu; mę ke ndu mkpukpu Pi-Besetu bę ee-gude ogu-echi gbushia. Ndu mkpukpu ono, ndu ophu ghuduru nu bę aa-kpukota le ndzu.

¹⁸Mboku ono a-gbahı ndu mkpukpu Tahupanahesu tsukiribaa; mbu mboku ono, mu e-me ge Ijiputu te enweheru ike ono. Oo l'eka ono bę mu e-me g'okpehu ono, ephe gude eku onwophe ono bvı. Urwukpu bę e-rikpote iya erikpote. Iphe, bu unwada iya bę aa-kpukota le ndzu.

¹⁹Mbụ ịe mu a-nụ ndu Ijiputu aphi. Oo ya bu g'ephe amakwanuru l'oo mbedua bu Chipfu.' "

Arwuhu ndu Ijiputu

²⁰O be l'apha k'iri ịe nanu g'onwa mbu du l'abali esaa; Chipfu bya epfuru opfu yeru mu su:

²¹"Nwa ndiphe; mu nyakwowaru Fero, bu eze ndu Ijiputu oshi-eka. E teke ekebedu iya ya iphe k'agbagba; ophi o to dudu iphe, aakpaje ye l'eka okpu jihuru g'o dzekwata, a kpawaru ye iya; k'ophu oo-du ike gudeshia ogu-echi.

²²Oo ya bu; wakwa iphe, Nnajiuphu, bu Chipfu epfu bu owa: Mu nowaru Fero, bu eze ndu Ijiputu ịe njo. Mu a-nyakwoshi iya oshi-eka labo; mbu nyakwofua ya eka ophi du ree; waa ophi a nyakwowaru anyakwo pho; mbu mee g'ogu-echi, o gude l'eka nafu iya; daa.

²³Mu a-chikashi ndu Ijiputu g'ephe dzuru ohamoha; mbu chikaa phe g'ephe tuko mkpukpu, nonu dzuru.

²⁴Mu e-me g'eka shihu eze ndu Babilonu ike; woru ogu-echi mu ye iya l'eka. Obenu ịe Fero be mu a-nyakwoshi eka. Oo-nodu l'iphu eze ndu Babilonu atsu oke ude g'onye etsugbuphodoru ndzu ubele.

²⁵Mu e-me eze ndu Babilonu g'eka shihukota iya ike; obenu ịe Fero be eka a-nodu atukota ke lwakpalwakpa. Noo teke ephe a-maru l'oo mu bu Chipfu; mbu teke ono, mu e-woru ogu-echi mu ye eze ndu Babilonu l'eka; o zeaharu iya ndu Ijiputu ono.

²⁶Mu e-dukashi ndu Ijiputu g'ephe dzuru ohamoha; mbu chikashia phe g'ephe tuko mkpukpu, nonu dzuru. Oo ya bu g'ephe amakwanuru l'oo mu bu Chipfu."

Ezekelu 31

Oshi sida, no l'ubvu ubvu Lebanonu

¹O be l'apha k'iri ịe nanu ịe mboku, onwa k'eto furu; Chipfu bya epfuru opfu yeru mu su:

²"Nwa ndiphe; su Fero, bu eze ndu Ijiputu yee igwe oha iya ịe-a: ""? Bu onye be aatukporu ngu yeru ịe g'i gude habe shii?

³Lewaro Asiriya ono, shi buru oshi sida nodu l'ubvu ubvu Lebanonu ono; O shi nwegbaarụ ekali, amakota ntumatu; o jaa kpuru ke yeketee; so-kputekota oswa, o no. O vua; haa l'eli; mkpakponu iya ephe l'akpaminigwe je anmaa eka l'imeli.

⁴Mini, nokota l'eka ono mee iya; o nodu abya ke kpukakpuka. Mini, shigbaa l'ime ali anwushi mee ya; o vua ha ogologo. Mini, shigbaa ịe nggele ogha ono nodu asophokota upfu iya mgburugburu; O buru eka ono be mini ono eshije sowaruro dzuru oshi nokota l'oswa ono.

⁵No iya; o vua; kakota iphe, bu oshi, no l'oswa ono l'eli. O kabaa ajakashi ajakashi; teme ekali iya tsechaa ogologo ogologo. O jakashiru egube ono; kele mini du l'eka ono okpobe adudu.

⁶Iphe, bukpo enu, ephe l'eli kpashikota efunne l'ekali iya. Iphe, bu anu-egbudu buru le mkpula iya be ephe azushi unwu. Iphe, bu ohamoha, hagbaa shii lwakotaru le mkpula ibvu iya.

⁷Iphe, oshi ono ama be du biribiri; o jakashiru nodu ke kpuchii; kele ogbarabvu iya nochaa je agebe l'eka mini du okpobe adudu.

⁸O to nwedu oshi sida, nogbaa le mgbabu Chileke duru ophu aturu iya nu. Ophu oshi payinu atuduru ekali iya. Mbụ ophu oshi mmanu ta ajakashi-beduru g'ekali iya jakashiru. Ophu o to dudu oshi, nogbaa le mgbabu Chileke duru ophu mapfuru iya le mma.

⁹Oo mbedua meru iya; o nodu ama mma; jakashia ekali igwerigwe egube ono; Mbụ k'ophu bu l'iphe, bu oshi, nokota le mgbabu Edenu, bu mgbabu Chileke ono ejikotaru iya enya.

¹⁰“Oo ya bu le-a; Wakwa iphe, Nnajiuphu, bu Chipfu epfu baa: Eshi ophu o vuliru imeli imeli; mbụ vughatakota iphe, bu epfukala; temanu o nodu eku onwiya; kele o ha l'eli

¹¹be mu nwuwuru iya nu onye bu ishi ohamoha; g'o pfua ya ugwo g'ejo-iphe oome gbaru; mbụ le mu nwutawuru iya nwucha.

¹²Ndu ohozo; mbụ ndu oha, bu phe kakota ejo okpoma be butawuru iya tua; ngeghata. Ekali iya dakachaaru l'ubvu ubvu; mekpoo le nsuda nsuda. Unwu ekali iya nyakwoshihuwaru dabyicharu le nggele ali ono. Iphe, bu mkpukpu, nokota le mgboko, bu ndu shi nodukota iya le mkpula be lufutakotawuru nu; gbado iya.

¹³Iphe, bu enu, ephe l'eli; bya anyinwua oshi ono, daru adada ono. Anu-egbudu l'ophu bya anodugbaa l'ekali-oshi ono.

¹⁴Oo ya bu; g'o to nweheru oshi ozo, nogbaa l'aguga mini, byaru evutabaa kuahaa onwiya; kele ole o ha l'eli; mbụ ke g'o vuta g'ephe l'akpaminigwe je anmaa eka l'imeli. Mbụ l'o to nwedu oshi, amitakpo mini amita l'ali, byaru a-habaa l'eli egube ono; kele e mewaru phe g'o buru anwushihu be ephe a-nwushihu; laa l'ime ali; mbụ je anodu ephe le ndiphe, nwushihuwaru kpoda l'ilu.

¹⁵“Wakwa iphe, Nnajiuphu, bu Chipfu epfu baa: Mboku ono, o laru l'ali-maa be mu meru g'aphu kpukposhi mgboko. Mu gude mini-ime-ali woru iya bye-mia; bya emee; nggele nogbanu tabushihu ebo; enyimu so-buhu asoso. O buru opfu ehụ iya be mu gude mee g'ubvu ubvu Lebanonu nodu l'aphu. Iphe, bu oshi, nokota l'egbudu nwulwashihukota anwulwashihu.

¹⁶Mu meru g'ohamoha nmakota jijijijii l'oda, o daru teke mu nwuru iya chie l'ali-maa g'o lapfu ndu ophu kpolahuhawaru l'ilu; teme oshi, shi pfugbakwaarupho le mgbabu Edenu; mbụ oshi ndu ophu shi kakota ree; bya ahacha okporokpo l'ubvu ubvu

Lébanonu, bu iya bu oshi, mini shi dukota l'eka ephe no rengurengu be obu byaru ejizeta l'ime ali eka ephe no; teke ono o daru ono.

¹⁷Iphe, bu ndu shi nodu l'ibvu iya, bu ndu shi buru agbarike iya be yee ya tukoaakwarupho lakota l'ali-maa; lapfu ndu ophu e gude ogu-echi gbushia.

¹⁸“? Bukpoo oshi ole le Edenu atukporu ngu l'ubvu, i du; yee g'i gude paa eka apaa? Obenu l'aa-tuko unu l'oshi Edenu; nwuru chie l'ime ali. Unu le ndu te ebuduru ubvu; waa ndu e gude ogu-echi gbushia be a-tuko ze l'eka lanu. Noo g'oo-duru Fero yee igwe oha iya bu ono. Nokwa iphe, Nnajiuphu, bu Chipfu epfu.”

Ezekelu 32

A kuru Fero oshi

¹O be l'apha k'iri l'ebo le mboku, onwa k'iri l'ebo furu; Chipfu bya epfuru opfu yeru mu su:

²“Nwa ndiphe; kuaru Fero, bu eze ndu Ijiputu oshi; su iya: Irije l'i bu oduma l'echilabo ohamoha; obenu l'i du g'ejo-oke-agiyi bu l'eze-enyimu. I shi le nggele ngu pafuta onwongu; gude okpa akpako mini; bya aswongashia ya aswongashi.

³Wakwa iphe, Nnajiuphu, bu Chipfu epfu baa: Mu e-woru ikpoto oha mee ugbu; gude nmata ngu. Ephe e-gude ugbu mu ono kpufuta ngu.

⁴Mu a-tu ngu l'ali; mu e-woru ngu chia ogbu l'oma egu. Mu e-me g'iphe, bukpo enu, ephe l'eli bya eripyabe ngu; mu e-gude ngu zu-jia anu-egbudu, no le mgboko l'ophu ephe.

⁵Mu a-tuka anu ngu nanunanu l'ubvu ubvu; mbu le mu e-me g'odzu ngu tuko nsuda nsuda sweta.

⁶Mu e-me g'ali nwukota shokoshoko le mee ngu, a-nodu aso ke gborogboro; mbu so jeyekotakpo l'ubvu ubvu; teme mee ngu be e-jikota nggele ejiji.

⁷Teke mu a-kponyi ngu enya; be mu e-me g'akpaminigwe jikpute; mee ge kpokpode, nokota iya nu gbahukota ochii. Mu e-gude urwukpu so-kpute enyanwu; ophu onwa ta abyadu echi echichi ophu.

⁸Iphe, bukpo iphe, echije echichi, no l'igwe be mu e-me g'ephe gbahukotaru ngu ochii. Mu e-me g'ali ngu gbakota ochii. Nokwa iphe, Nnajiuphu, bu Chipfu epfu.

⁹“Mu e-me g'obu gbarwua ndu du igwerigwe le teke mu e-me g'i buru mkpurupyata l'echilabo ohamoha ono; mbu l'ali, i ti madu.

¹⁰Mu e-me oha, du igwerigwe g'ephe terwuhu l'iphe, a-nwuru ngu nu. Ndu eze phe be ndzu-agugu opfu ehuru ngu e-rwuta; le teke mu e-ze ogu-echi mu l'iphe phe. Mboku, i-buru mkpurupyata be ehuru a-nodu anmakota onyemonye rwuurwu le ndzu-agugu; l'iphe, bukpo teke nonu.

¹¹“Kele Nnajiuphu, bu Chipfu epfukwa su: ‘Ogu-echi eze ndu Babilonu be a-bya ngu l'ehu.

12Mu e-me gę ndu ọkpehu dụ gude ogu-echi phẹ gbushia ikpoto nemadzu, bu ndu nkengu. Mbụ l'ọo ndu ono bu ọha, kachakpoo ejo-ọkpoma ono be unu l'iya e-me. Iphe ono, Ijiputu gude eku onwiya ono be ephe e-chi pyaapya. Iphe, bu ikpoto nemadzu, nokota l'eka ono a-bukotaru mkpurupyata.

13Mu e-gbushikota iphe, bu eswi iya l'eka mini doru nyimunyimu. Okpa nemadzu ta abyadu aswongabaa mini ono ozobaa; ophu okpa eswi abyadu aswongabaa ya.

14Noo teke mu e-me mini phẹ g'o doo risaa bu ono; mekwaa ya pho g'o so asoso ge manu olivu. Nokwa iphe, Nnajiuphu, bu Chipfu epfu.

15Teke mu e-me Ijiputu g'o buru ochobu; woru ali ono mee g'o to duhe iphe, a-nodu iya nu; mbu teke mu e-gbutsushi iphe, bu ndu bu l'eka ono be ephe a-maru l'oo mu bu Chipfu.'

16Waa ebvu-aphu, aa-nodu aguru iya baa. Unwada ohamoha be a-nodu agu iya; ephe a-guru iya Ijiputu; yee ikpoto oha Ijiputu. Nokwa iphe, Nnajiuphu, bu Chipfu epfu."

17No iya; o be l'apha k'iri l'ebo le mboku onwa k'iri l'ebo ono du l'abali iri l'ise; Chipfu bya epfuru opfu yeru mu su:

18"Nwa ndiphe; raa ekwa ikpoto oha Ijiputu; mee phẹ g'ephe l'ohamoha, a maru amaru tuko wuda l'ime ali; mbu g'ephe tuko wulahu l'azu iya ophu g'ephe lapfu ndu ophu kpodawaru l'ilu.

19Su phe: "'? Unu dobesu l'unu ka ndu ozo ama mma to? Unu wuba lamihu; je azeshia l'eka ndu daru odaleba ze.'

20"Ephe a-dashi l'eka ndu ophu e gude ogu-echi gbushia daru. A mitaakwaru ogu-echi; bya akpufutawa; yele igwe oha iya ono akpufuta.

21Iphe, bu ndu okpehu dụ, no l'ali-maa a-su Ijiputu yee ndu agbajeru iya mkpu: Ephe tsulahuakwaru; bya awushiru l'eka ndu te ebuduru ubvu dabyigbaaru; mbu ephe le ndu e gude ogu-echi gbua bya azekota l'eka lanu.

22"Asiriya be no l'eka ono yele ndu ojogu iya l'ophu. Ilu ndibe iya, e gbushiru egbushi be no-pheru iya mgburugburu; mbu ndu e gude ogu-echi gbushia.

23Ilu phe be bu l'ime nsu be o nokota. Ikpoto ndu nkiya be ze-pheru ilu iya mgburugburu. G'ephe ha be e gbukotaru egbu; mbu l'oo ogu-echi be e gude gbushikota ndu ono, shi akpataje ndzu-agugu abya ndu bu l'ali ndu no ndzu l'ehu ono.

24"Elamu be nokwapho l'eka ono yele igwe oha iya l'ophu, do-pheru ilu iya mgburugburu. G'ephe ha be e gude ogu-echi gbushikota; ephe dakota odaleba. Iphe, bu ndu ono, shi eyeje ndu bu l'ali ndu no ndzu ebvu ono be wudakotawaru l'ime ali. Ephe gude iphere laa yele ndu ophu lanu l'ilu.

25E meru iphe-azee doberu Elamu l'eka ndu e gbushiru egbushi kuru; ilu igwe oha iya no-pee ya mgburugburu. G'ephe ha bukota ndu e gude ogu-echi gbushia; ephe dakota odaleba. Ephe shi buru ndzu-agugu duru ndu bu l'ali ndu no ndzu; obenu le nta-a be

ephe gudewaa iphere lapfu ndu ophu l'ali-maa. A togbowaru phe l'eka a togboru ndu ophu e gburu egbugbu.

²⁶“Mesheku; me Tubalu be nokota l'eka ono; ephe l'igwe oha phe, no-pheru ilu phe mgburugburu. G'ephe ha bukota ndu daru odaleba, e gude ogu-echi gbushia; kele ephe shi eyeru ndu no ndzu ebvu.

²⁷? Tobudu l'ali-maa be ephe le ndu ojogu, ike du, daru odaleba ono tukoru lakota? Ephe gude ngwogu phe lakota l'ali-maa; e swibechaa phe ogu-echi phe l'ishi. Ejo- iphe, ephe meru tukocharu l'okpu phe; e -gudekpoooro l'ephe le ndu ojogu, ike du; shi emeje ndzu erwuta ndu bu l'ali ndu dzu ndzu.

²⁸“Gubedua, bu Fero kwapho be aa-nyakwo anyakwo; unu le ndu daru odaleba aze l'eka lanu; mbu unu le ndu e gude ogu-echi gbushia.

²⁹“Edomu be no l'eka ono; yele ndu eze iya; me ndu-ishi iya g'ephe ha. Ephe bukpo ndu okpehu shi du; ole a tukowaru ephe le ndu e gude ogu-echi gbushia togbo l'eka lanu. Mbu l'ephe le ndu daru odaleba tukowaru ze l'eka lanu; ephe le ndu wudaru l'ilu tukowa swiru.

³⁰“Iphe, bu ndu-ishi uzo isheli; me iphe, bu ndu Sayidonu l'ophu be nokotakwapho l'eka ono. Ephe gudewaa iphere lapfushia ndu ophu e gburu egbugbu. Ephe shi egudeje ike, du phe nu eyeru ndiphe ebvu; obenu l'ephe nwushihuwaru daa odaleba; ephe le ndu e gude ogu-echi gbushia toko zeshia l'eka lanu. Ephe vuru iphere ephe le ndu ala l'ilu toko kpoda.

³¹“Fero yele igwe oha iya a-huma phe; gude iya dua onwiya obu le k'igwe oha iya, e gude ogu-echi gbushia. Nokwa iphe, Nnajiuphu, bu Chipfu epfu.

³²“O bu eviya le mu meru iya g'o yee ndu bu l'ali ndu no ndzu ebvu; ole ee-meela-a yebedua waa igwe oha iya g'ephe lapfu ndu daru odaleba; mbu ndu e gude ogu-echi gbushia. Nokwa iphe, Nnajiuphu, bu Chipfu epfu bu ono.”

Ezekelu 33

Ezekelu be eeme g'o buru onye-nche

¹No iya; Chipfu bya epfuru opfu yeru mu su:

²“Nwa ndiphe; pfuaru ndibe unu su phe: Teke mu meru g'a bya etsoo mkpukpu ogu; ndu mkpukpu ono -hota onye lanu le ndibe phe g'o chejeru phe nche;

³onye ono -huma aka ogu abyapfuta ndu mkpukpu ono bya egbua opu g'o gude karu ndu ono;

⁴onye -numacharu oda opu ono; ophu o to ngaduru nchi; ogu ono -bya egbua ya; be bu onye obu vu ochi onwiya.

⁵Eshi ophu o numacharu opu ono; ophu o ngaduru nchi; be bu iya e-vuru ochi onwiya; kele o m'o -ngaru nchi; m'oo-dzo-a onwiya ndzu.

⁶Obenu; ọ -buru l'onye-nche humaru ẹka ọgu abya; ọphu o to gbuduru opu gude karu ndu ono; ọgu ono -bya egbua onye lanu l'ime ndu ono; be iphe, meru g'o gude e gbua onye ọbu bu kele o meru ejo-iphe; obenu le mu e-gude onye-nche ono g'o laa l'ochi onye ono, e gburu ono.

⁷“Nwa ndiphe; mu meakwaru ngu onye-nche ndu Ízurelu. Ọo ya bu; ngabekwa nchi numa iphe, mu epfu; gude iya nmaaru phe okwa.

⁸Teke mu pfuru onye ejo-iphe su: ‘Gube onye ejo-iphe; i nwuhufutajekwa’ ọphu i ti pfuduru iya g'o haa iphe, oome; be onye ejo-iphe ono a-nwuhukwa l'opfu ejo-iphe, oome; obenu l'oo gubedua be mu a-kpa ishi ochi iya.

⁹Obenu; ọ -buru l'i nmaru onye ejo-iphe okwa g'o haa ejo ọzo iya; ọphu o to kwedu; be ọo-nwuhu l'opfu ejo-iphe, oome; obenu le gubedua dzoakwanaru onwongu ndu.

¹⁰“Nwa ndiphe; su ndu Ízurelu le-a: Unu epfuje su: Ejo-ememe, anyi meshiru; waa iphe-eji, anyi meru be anyi-gbuwaa anyi l'erwa. Anyi noduwaa l'ime iya eyifuwa eyifu. ? O nwekwaduru g'anyi e-shi dzubaaru ndu to?

¹¹Su phe; wakwa iphe, Nnajiuphu, bu Chipfu epfu baa: ‘Ọo ge mu no ndu ge mu no iya-a bu g'o bu ire-lanu l'anwuhu onye ejo-iphe ta atsojedu mu uto; ọ chia g'onye ejo-iphe haa ejo ọzo iya; bya adzuru ndu. Unu ghaa umere! Unu ghaa umere; haa ejo ọzo unu g'o ha! Oowaa! ? Bu gunu meru iphe, unu a-nwushihu; unube ndu Ízurelu?’

¹²“Ọo ya bu; nwa ndiphe; su ndu ali unu-a: Umere oma onye pfuberekoto ta abyakwa adzo iya m'o -buru l'o nonyaru o meahaa iphe, du eji; ọphu ejo-iphe, onye ejo-iphe meru te emedu iya g'o laa l'iswi; m'o -buru l'o gharu umere haa ejo-iphe iya. Ọle ọ -buru l'onye pfuberekoto nonyaru meahaa iphe-eji be e te egudekwa kele o shi buru onye pfuberekoto haa ya g'o ndu ndu.

¹³Ọ -buru le mu suru onye pfuberekoto l'oo-dzuru ndu; umere oma ya ono gbẹ bya atsuru iya l'enya; ọ wata eme ejo-iphe be o to nwekwa iphe, du ree ono, o shi emekota ono, aa-nyatakwa du me nanu. Ọ nwuhufutaje le k'ejo-iphe ono, o meru ono.

¹⁴Ọle teke mu suru onye ejo-iphe l'o nwuhufutaje; ọ bya ahaa eme ejo-iphe meahaa iphe, pfuru oto; waa iphe, du ree;

¹⁵Ọ -buru l'iphe, ọ nakoru ndu o jieru ugwo be ọ nu-phukotaru phe azu; bya ewolakota iphe, o zitaru l'iphuru; bya emeahaa iphe, a suru g'e meje; paru eme ejo-iphe haa; be ọo-dzuru ndu; ọ to byadu anwuhu.

¹⁶O to nwedu iphe-eji, o meru me nanu, a bya anyatakwaduru iya ozo. O mewaru iphe, pfuru oto; waa iphe, du ree; o je adzuru ndu.

¹⁷“Ọle ndu ali unu gbẹ epfuje su: ‘Nnajiuphu te emejedu iphe, pfuru oto.’ Ọle ọo ephebedua gbẹ ọphu ephe emejedu iphe, pfuru oto.

¹⁸Ọ -buru l'onye pfuberekoto haru apfubekoto; bya awata eme ejo-iphe be ọo-nwuhukwa le k'ejo-iphe ono.

¹⁹Obenu ọ -buru l'onye ẹjo-iphe bẹ haru eme ẹjo-iphe iya ono bya emeahaa iphe, pfuru ọto; mẹ iphe, du ree; bẹ ee-gudekwa kẹ ree ono, oome ono; mee ya l'ọ dzuru ndzu.

²⁰Ole-a; unubẹ ndu Ízurelu; epfufe sù: 'Nnajiuphu te emejekwa iphe, pfuru ọto.' Ole mu e-kpechaa onyemonye g'unu ha ikpe g'iphe, onye meru gbaru."

Eepfu l'a Iwuru Jierúsalem

²¹O be l'apha k'iri l'ẹbo, e -shi teke a kpuru anyi lẹ ndzu ono; mbu g'onwa iri du l'abali ise; nwoke lanu, shi lẹ Jierúsalem pyofu; bya epfuaru mu sù: "Mkpukpu ono bẹ dakposhihuakwaru nu."

²²O buru l'uzenyashi unyaphu iya; temanu nwoke ono, pyofuru nu pho byapfuta mu; bẹ ẹka Chipfu kparwutawaru mu l'ehu; bya eme onu mu kuhaa; mu pfuahaa opfu. Owa nwuadaru teme o rwua l'utsu iya teke nwoke ono byapfutaru mu. Oo ya bu; a kuhaa mu onu; mu pfuahaa opfu; ophu mu ta abuedu onye te epfudu opfu.

Iphe-ẹji, ndu Ízurelu

²³Tobudu iya bu; Chipfu bya epfuru opfu yeru mu sù:

²⁴"Nwa ndiphe; ndu bugbaa l'ẹka ono, e mebyishiru l'alì Ízurelu ono bẹ asuje: 'Ébirihamu bu onye lanu bẹ ọ bu; o shi nwekotaleru-a alì ono. Obenu l'anyibedua ha igwerigwe; a nuwaru anyi alì ono g'anyi nweru.'

²⁵"Oo ya bu; sù phẹ: 'Wakwa iphe, Nnajiuphu, bu Chipfu epfu baa: Eshi ophu unu atajekwadu anu, mee no; enya unu dukwadu l'ẹka agwa unu nogbaa; unu nodu egbu ochi; ? unu arì l'alì ono bukwalu okiphe unu to?'

²⁶Unu kporu obu ye l'ogu-echi unu; unu nodu eme ebyi; teme onyenonu nodu apharwushi nyee nemadzu ibiya. ? Unu arì l'alì ono bukwalu okiphe unu to?'

²⁷"Sù phẹ lẹ-a; 'Wakwa iphe, Nnajiuphu, bu Chipfu epfu baa: Eshi ophu mu no-a ndzu ge mu no iya-a bẹ ndu ono kwaru l'ẹka ono, a lwuru alwuluwunono bẹ bu ogu-echi bẹ ee-gude gbushia phẹ. Ndu ophu lufuru nodu l'oma egu bẹ e-woru nu anu-egbudu g'ephe vua kpatakpata. Ndu ophu nogbaa l'ẹka a kpushiru ike; mẹ ndu ophu no l'ogba bẹ bu ẹjo iphe-ememe e-gbushi phẹ.

²⁸Mu e-me alì ono g'ọ dabyiru buru ochobu. Ike iya ono, o gude eku onwiya ono bẹ abvu nu. Iphe, bu ubvu, nokota lẹ Ízurelu bẹ a-bukotaru ochobu; k'ophu ọ to dudu onye byaru aghajabaa ẹka ono aghaja.

²⁹Oo teke ono bẹ ephe a-maru l'oo mu bu Chipfu ono; mbu teke mu meerupho alì ono g'ọ buru ochobu l'opfu ebyi, ephe meshiru ono.'

³⁰"A bya lẹ gubedua; nwa ndiphe; ndu alì unu epfugba opfu ehunngu l'ibiya k'igbulo, nogbaa nu; mẹ l'onu-mgbo, du l'ulo, nogbaa nu. Ephe anoduje epfuru nwibe phẹ sù: 'Unu bya anuma ozi, Chipfu ezi-o!'

³¹Ndibe mu abyapfutaje ngu egube ephe abyajekpo ono; bya anodu l'iphu ngu g'ephe ngabe nchi numa iphe, iipfu; ole ephe te emejedu iya. Oo l'onu bẹ ephe asuje l'ephe

yeru mu obu; obenu l'obu phe anoduje aji momomo g'ephe e-shi ria urwu l'uzo, apfuduru-oto.

³²Eviya eviya; o to dudu iphe ozo, ephe guberu ngu; abuedupho l'i bu onye agu ebvu, atso ntumatu; akpo une erengete eye iya. Mbụ l'ephe anumajecha iphe, iipfu; obenu l'ephe te emejedu iya ememe.

³³Oo teke iphe-a meebekotakpoerupho egube ono, o mefutaje ono; teme ephe agbe teke ono maru l'o nweru onye mpfuchiru Chileke, shi nodu l'echilabo phe."

Ezekelu 34

Onye eche aturu yee aturu iya

¹Tobudu iya bu; Chipfu bya epfuru opfu yeru mu su:

²"Nwa ndiphe; pfiaru ndu eche aturu Izurelu iphe, a-nwuru phe nu. Pfiaru phe su phe: Wakwa iphe, Nnajiuphu, bu Chipfu epfu baa: Nshio ndu ono, eche aturu le Izurelu, buepho onwophe be ephe eleta enya. ? To gbaduru ge ndu eche aturu leta aturu phe enya to?

³Unu anguje era, a pyitaru iya; bya eye uwe, e gude eji iya mee; bya egbua ophu kachaa atsụ eba; ole unu gbẹ ophu unu te eletajedu yebe igwe aturu obu enya.

⁴Unu te emejedu g'ike du ndu ophu ike bvuru; ophu unu te emejedu g'ehu du ndu ophu iphe eme ike; ophu unu ekebejedu ndu ophu iphe-ehuka mekaru iphe l'onya. Unu te eduphutajedu ndu ophu kpaphuhuru nu azu; ophu unu ta achojedu ndu ophu tuphashihuru etuphashihu. Oo ehuka ehuka; yee ejo obu be unu egudeje eche phe.

⁵Oo ya meru iphe, ephe gbakashihuru; kele ephe te nwe du onye eche phe nu. Teke ono, ephe gbakashihuru ono; be ephe je aburu nri anu-egbudu.

⁶Aturu mu be aghaphegbaa l'eze ubvu; me l'ubvu nshii. Ephe tuko gbakashihukota tsoru mgboko l'ophu; ophu o dudu onye jeru phe achocho; ozoo lekpoo nu enya phe.

⁷"Oo ya bu; unube ndu eche aturu; unu numa iphe, Chipfu epfu!

⁸Wakwa iphe, Nnajiuphu, bu Chipfu epfu baa: Oo ge mu no ndu ge mu no iya-a bu g'o bu ire-lanu l'eshinu igwe aturu mu te enwe du onye eche phe nu; anu nodu egbushi phe; mbu ephe bya abuwaru nu nri anu-egbudu; ophu ndu eche aturu mu ono ta achojedu igwe aturu mu ono; o buru onwophe be ephe eleta enya; gbẹ paru ikpoto aturu mu ono haa;

⁹g'unube ndu eche aturu ono numakwa iphe, Chipfu epfu.

¹⁰Wakwa iphe, Nnajiuphu, bu Chipfu epfu baa: Unu lenu; mu noakwaru ndu ono, eche aturu ono le njo; mu e-gudeshi phe le k'aturu mu ono. Mu e-me g'ephe chebuhu igwe aturu ono; k'ophu ndu ono, eche iya ono ta aduedu ike anu onwophe nri. Mu alofu phe aturu mu l'onu; g'ephe ta abuhuru nri phe.

¹¹"Wakwa iphe, Nnajiuphu, bu Chipfu epfu baa: Oo mbedua l'onwomu e-je acho aturu mu ono; bya echeahaa phe.

- 12 Oo egube ono onye eche aturu achoje igwe aturu iya, nashihuru iya tuphashihu teke o no swiru iya l'onwiya ono; bu ge mu a-cho aturu mu. Mu a-cho phe humakota l'eka ephe gbakashihuru je anodugba teke ono mboku shi gbahu tsukiribaa ono.
- 13 Mu e-dufutakota phe l'iphe, bu ohamoha; mbu shi le mkpukpu nonu rwukobe phe; duru phe dobe l'ali nkephe. Mu e-cheje phe l'ubvu, nogbaa le Izurelu; me l'aguga nggele; me l'eka e bukota ebubu l'ali ono.
- 14 Mu e-cheje phe l'eka nri du ree. O buru l'eli ubvu Izurelu be ephe a-noduje akpa nri. O buru l'eka ono nri du shii, ephe ataje nri ono be ephe a-zeshije. O buru l'eka ono nri du shii ono; mbu l'ubvu, nogbaa le Izurelu be ephe a-taje nri.
- 15 Mube Nnajiuphu, bu Chipfu suru-a: Mu e-che aturu mu; chiru phe je edobe l'odu.
- 16 "Mu a-cho ndu ophu tuphahuru etuphahu; bya achilata ndu ophu gbakashihuru nu. Mu ekee ndu ophu iphe-ehuka mekaru iphe; l'eka e mekaru phe iphe. Mu emee g'ike du ndu ophu ike bvuru. Obenu le ndu ophu ha okporokpo; me ndu ophu ike du be mu e-me g'ephe buru mkpurupyata. Mu a-nodu eche aturu ono egube o gbaru g'e cheje phe.
- 17 "A bya l'unube aturu mu; waa iphe, mube Nnajiuphu, bu Chipfu epfu anu unu baa: Unu lenu; mu e-kperu aturu yee ibe iya ikpe; mu ekpeeru ebili yee mkpi ikpe.
- 18? Teke o suduru unu; mbu nri ono, unu ata l'eka nri du ree ono too? ? O gbaru g'unu gudefua okpa zotoshia nri unu ophu phoduru nu too? ? To dzuduru unu; mbu mini oma ono, unu angu ono? ? O gbaru ke g'unu gudefua okpa swoo ndu ophu unu nguphodoru erwu too?
- 19? Bu g'aturu mu taa nri, unu zopyashiru l'okpa; bya angufua mini, unu gude okpa swoo erwu too?
- 20 "Oo ya bu; 'Wakwa iphe, Nnajiuphu, bu Chipfu epfu baa: Lenu! Oo mbedua l'onwomu e-kperu aturu ophu ha okporokpo; yee ophu joru ehu ikpe.
- 21 Eshi ophu unu gude mgburaku; gude ukuvu unu akwaphu phe; bya egude mpu unu adukashi ndu ophu ike ta adudu; jasu unu chikashia phe nanunanu;
- 22 be mu a-nafuta igwe aturu mu ono; g'a ta alwuhe phe alwulwu ozobaa. Mu e-kperu aturu yee ibe iya ikpe.
- 23 Teke ono be mu e-ye onye lanu, echeje aturu, bu iya bu Devidi, bu nwozi mu g'o leta phe enya. Oo ya a-noduje anu phe nri; teme o buru yebedua bu onye a-noduje eche phe; bya aburu onye eche phe okpobe echeche.
- 24 "Mbedua, bu Chipfu be a-buru Chileke phe. O buru nwozi mu, bu Devidi a-buru onye-ishi phe. Mube Chipfu pfuakwaru.
- 25 Mu l'ephe a-gba ndzu ehu-guu; mu a-chifukota ejo anu-egbudu l'ali ono; k'ophu ephe e-buru l'echiegu; kuje mgbenya l'ime oswa; o too nweduru iphe, e-me phe nu.

²⁶Mu a-goru onu-oma nù phẹ; ẹphe l'ẹka nọ-pheru úbvú mu mgburugburu. Mu e-me ẹ mini dzejeru phẹ l'orwuberu iya. Onu-oma ono bẹ a-nọdu edze ẹ mini.

²⁷Iphe, bụ oshi, nọ l'ẹgu bẹ a-nọdu amị mebyi l'orwuberu iya. Alị bẹ e-mehujekwapho iphe, e meberu iya. Ndu ono bẹ ọ tọ dudu iphe, e-me phẹ nù l'alị phẹ. Ẹphe amaru l'ọo mbẹdua bụ Chipfu ẹ teke ono, mu a-nyakwo odogoro igwe ono, e yeru phẹ ono; mbụ nafuta phẹ l'ẹka ndu ono, gbaru phẹ ohu ono.

²⁸Iphe, bụ ọhamoha ta abyadu alwuba phẹ alwulwu ọzobaa; ọphu anụ-ẹgbudu ta abyadu egbushibaa phẹ ọzobaa. Ẹphe e-buru tūsarū ẹhu; ọphu ọ tọ dudu onye e-yebaaru phẹ ebvu.

²⁹Mu a-nụ phẹ alị, a maru amaru l'oomehuje iphe. Ẹphe ta abyadu abubaaru ndu ẹgu eme l'alị ono; ọphu ẹphe abueduru ndu ọhamoha a-nọduje anma phulaphula.

³⁰Ọ buru teke ono bẹ ẹphe a-maru ẹ mbẹdua, bụ Chipfu bya aburu Chileke phẹ bẹ nọ swiru phẹ nù. Ẹphe amakwarupho l'ẹphebe ndu Ízurelu bẹ bụ ndibe mu. Nokwa iphe, Nnajiuphu, bụ Chipfu epfu.

³¹“Unubẹ aturu mu; mbụ aturu, mu azu azuzu; bụ unubẹ nemadzu; mbẹdua buru Chileke unu. Nokwa iphe, Nnajiuphu, bụ Chipfu epfu.”

Ezekelu 35

Iphe, ee-me ndu Edomu

¹Nokwa iya; Chipfu bya epfuru opfu yeru mu sụ:

²Nwa ndiphe; ghachiru úbvú Siye iphu ẹ kẹ njọ; pfiaru mu iya iphe, a-nwuru iya nù;

³sụ iya: Wakwa iphe, Nnajiuphu, bụ Chipfu pfuru baa: Mu nọakwaru ngu ẹ njọ; gube úbvú Siye! Mbụ ẹ mu a-machi ẹka mu daa ngu kẹ njọ l'ẹhu; bya emee ngu g'ị dabyiru buru ochobu.

⁴Iphe, bụ mkpukpu ngu bẹ mu e-mekota umerekete; ịi-buru ochobu dabyiru; Ọo ya bụ g'ịmakwanuru l'ọo mbẹdua bụ Chipfu.

⁵Eshi ọphu ndu Ízurelu shi l'edenwede duta ngu ashị; i gude ogu-echi gbushia phẹ ẹ teke ẹphe eje oke iphe-ẹhuka; mbụ teke a nuru phẹ chijipfuu;

⁶bẹ mube Nnajiuphu, bụ Chipfu sūru-a: Ọo ẹ mu nọ ndzu ẹ mu nọ iya-a; bụ g'ọ bụ ire-lanu; ẹ mu e-woru ngu haaru mgbugbumadzu. Eshinu egbu ọchi ta adudu ngu ẹji bẹ bụ ọchi ono a-nọdu etso ngu purupuru.

⁷Mu e-me úbvú Siye g'ọ dabyiru buru ochobu; bya egbufukota ndu anọduje eje iya nggede eje nggede alwa.

⁸Mu e-me ẹ ndu e gbushiru egbushi ji úbvú ngu ejiji. Ndu e gude ogu-echi gbushia bẹ a-daka l'iphe, bụ úbvú úbvú nshii ngu; mẹ ẹ nsuda nsuda; mēkpoo ẹ nggele ngu.

⁹Mu e-me ngu g'ị buru ochobu jasuru asuru; ọphu ọ tọ dudu onye bya eburu ẹ mkpukpu ngu ọzo. Ọo teke ono bẹ ịi-maru l'ọo mbẹdua bụ Chipfu.

10“Oo kele i gude onu ngu su l'oha labo owa-a; me mkpukpu labo ophuu be a-buru nkengu; mbu l'unu a-natakota phe nworu; l'eka mube Chipfu gbę nodu l'eka ono.

11Oo ya meru iphe Nnajiuphu, bu Chipfu gude su: Oo ge mu no ndzu ge mu no iya bu g'o bu ire-lanu le mu a-nu ngu aphu rwuberu ngu nu le k'ashi ono i kporu ndibe mu; me le k'ehu-eghu; me k'anya-pfurupfuru, ephe du ngu, bu iphe goshiru l'ephe dukpoo ngu ashu okpobe adudu. Mu e-me g'unu maru onye mu bu; teke ono mu a-wata unu anu aphu ono.

12Oo teke ono be ii-maru le mube Chipfu numakotaru ejo-epfufu ono, i pfukotaru kpua ubvu ubvu Izurelu ono. I suru: “E mewaru; ephe dabyiru buru ochobu; e wowaru phe nu anyi g'anyi vukaa avuka.”

13I gbawaru mu opfu; bya epfugbuwa g'onu haa ngu l'opfu ehụ mu; mu tuko iya g'o ha numakota.

14“Wakwa iphe, Nnajiuphu, bu Chipfu epfu baa: Mu e-me ngu gi buru ochobu g'iphe, bu mgboko l'opfu tee eswa iya;

15kele i teru eswa teke e meru ali ndu Izurelu o buru ochobu pho; be mu e-me ngu gi du egube ono. Gube ubvu Siye; gubedua me ali ndu Edomu l'opfu be a-buru ochobu. Oo teke ono be ephe a-maru l'oo mbedua bu Chipfu.” “

Ezekelu 36

Opfu epfu anu ubvu, nogbaa le Izurelu

1“Gube nwa ndiphe; pfuru nu ubvu ubvu Izurelu; su phe: ‘Unube ubvu ubvu Izurelu; unu ngabekwa nchi numa Opfu Chipfu!’

2Wakwa iphe, Nnajiuphu, bu Chipfu epfu baa: Oo kele ndu ohogu ngu suru Hee! Nta-a be iphe, bu ubvu ubvu ono, shi le ndiche ono bukotaakwa nkanyi.’

3“Eshi ophu o du nno; pfuru nuru mu phe su: ‘Wakwa iphe, Nnajiuphu, bu Chipfu epfu baa: Eshinu ephe mewaru; unu dabyiru buru ochobu; mbu mewaa unu umerekete; k'opfu unu buwaa iphe, ohamoha ozo nwe enwenwe; bya emee; ndiphe vya unu swii; epfuru unu ejo-opfu;

4bu g'unube ubvu ubvu Izurelu; numa opfu Nnajiuphu, bu Chipfu. Wakwa iphe, Nnajiuphu, bu Chipfu epfuru eze ubvu, nogbaa nu; me ubvu nshii, nogbaa nu; me nggele nggele; me nsuda nsuda; me iphe, bu ochobu ono, dabyikotaru egube ono; me iphe, bu mkpukpu ono, a kwafukotaru akwafu ono; mbu onoya, ohamoha, no-pheru iya mgburugburu lwuru alwulu; bya emee ya iphe ochi ono bu owa.

5“Wakwa iphe, Nnajiuphu, bu Chipfu epfu baa: Mu gudeakwa ehụ-eghu enwu mu phuruphuru l'ehu g'oku pfuru maberu iphe, bu ohamoha ndu ophu phoduru nu pho; me iphe, bu ndu Edomu l'opfu; kele ephe gudewaa ehụ-utso; me iwashi, no phe l'obu mee ali mu; o buru nkephe; k'opfu ephe a-lwu eka eku akpaje nri, no l'ali ono alwulu.’

6“Oo ya bu; pfuaru mu phe ge k'ali Izurelu a-du; pfuaru eze ubvu, nogbaa nu; me ubvu nshii, nogbaa nu; me nggele nggele; me nsuda nsuda, nogbaa nu; su phe:

Wakwa iphe, Nnajiuphu, bu Chipfu epfu baa: Mu gudewaa oke-ehu-eghu enwu mu phuruphuru l'ehu g'oku; pfua opfu; kele ohamoha be mekotawaru ngu iphe-iphere.

⁷Oo ya bu le-a; wakwa iphe, Nnajiuphu, bu Chipfu epfu baa: Mu ribuwakwaru angu l'iphe, bu ohamoha ono, no-phekotaru unu mgburugburu ono be ee-me iphe-iphere.

⁸Ole unubedua, bu ubvu ubvu Izurelu be a-pfukashi ekali; mjaru ndibe mu Izurelu mebyi; kele ephe abyawaa alwa unuphu.

⁹Mu arikwaru unu oriri k'oma. Mu e-gude k'oma ghaaru unu iphu. Ee-mechaa koo unu akoko; kua unu ge mebyi iphe.

¹⁰Mu e-mekwapho ge ndu bu l'ime ngu kabaa igwerigwe; mbu ndu Izurelu l'ophu. Iphe, bu mkpukpu ono be ee-buchishikota ebuchishi; l'a kpukwakota iphe, bu aka o dakposhuhokotaru adakposhihu.

¹¹Mu e-mekwapho ge nemadzu; me eku kabaaru unu igwerigwe; ephe azua azuzu ka l'otu. Mu e-me g'e buchishia unu egube ono, e shi buru l'ime unu ono. Mu abya emee g'iphe duru unu le ree; eme le g'o shi duru unu teke ono. Oo ya bu g'unu amakwanuru l'oo mu bu Chipfu.

¹²Mu e-me ge nemadzu; mbu ndibe mu, bu ndu Izurelu zoo okpa l'eli unu. Ephe e-nweru unu; unu aburu okiphe phe. Ophu unu ta abyadu emebaa phe ume nwa ozo.

¹³“Wakwa iphe, Nnajiuphu, bu Chipfu epfu baa: “Eshinu ndiphe epfu l'unu egbuje nemadzu; teme unu nodu eme ali unu ume nwa; “

¹⁴be unu ta abyakwa egbushibaa nemadzu ozo; ophu unu abyadu emebaa ali unu ume nwa ozo. Nokwa iphe, Nnajiuphu, bu Chipfu epfu.

¹⁵Mu ta abyadu ekwe g'unu numabaa ejo-opfu ohamoha epfu ekpu unu ozo; mbu le mu te ekweedu g'ephe mee unu iphe-iphere ozobaa; ophu mu ekwekwapho g'unu vukotaba iphe daa. Nokwa iphe, Nnajiuphu, bu Chipfu epfu.’ “

¹⁶No iya; Opfu Chipfu byakwa akparwuta mu l'ehu bya asu mu:

¹⁷“Nwa ndiphe; teke ndu Izurelu shi buru l'ali nkephe be ephe gudekwa umere phe; waa iphe, ephe meru pharwushia ya. Umere phe be shikwa du mu ideyideyi ge teke nwanyi anso-nwanyi.

¹⁸Oo ya bu; mu tukoshinu phe oke ehu-eghu mu; kele ephe gbushiru nemadzu l'ali ono; bya egude agwa, ephe agwaphe merwushia ya.

¹⁹Mu chikashia phe ephe dzuru ohamoha; ephe gbakashihu tuko iphe, bu mkpukpu le mkpukpu tsoru. Mu kperu phe ikpe g'umere phe; waa iphe, ephe meru gbaru.

²⁰Iphe, bu aka ephe jeru l'ohamoha ono be ephe emeje eepfubyishi epa mu, du nso ono; kele aasuje phe: ‘O kwa ndibe Chipfu du egube-a; teme ephe gbephe lufuta l'ali iya.’

²¹O bya erwua mu l'ehu; mbu k'epa mu, du nso ono, ndu Izurelu meru anodu eepfubyishi l'echilabo ohamoha ono, ephe laru ono.

- 22“Oo ya bu; su ndu Ízurelu: wakwa iphe, Nnajiuphu, bu Chipfu epfu baa: ‘O to bukwa k'opfu ehu unube ndu Ízurelu be mu gude abya eme iphe-a; oo k'epha mu, du nsọ ono, unu rwutoshiru arwutoshi l'echilabo ohamoha ono, unu lakotaru ono.
- 23Mu e-me goshi l'eze epha mu ono paru eka apaa ono du nsọ; mbu onoya, e mebyishiru l'echilabo ohamoha ono; mbu epha mu ono, unu mebyishiru l'iphu phe ono. Oo ya bu g'ohamoha ono amakwanuru l'oo mu bu Chipfu; mbu teke ono, mu e-gude unu goshi phe le mu du nsọ ono. Nokwa iphe, Nnajiuphu, bu Chipfu epfu.
- 24Noo kele mu a-nafuta unu l'eka ohamoha ono. Mu e-rwukobekota unu e shi l'ali, nonu; dulata unu l'ali nkunu gedegede.
- 25Mu abya epee unu mini, doru risaa; unu abya adu ree; mu a-safukota unu ejo-iphe unu, meshiru; mekpoo agwa, unu gwaru g'o ha.
- 26Mu a-nu unu obu ophuu; bya eye unu unme ophuu l'ime; mu e-wofu unu obu ono, nmaru kpigbii ge mkpuma ono; nu unu obu belebele.
- 27Mu e-woru Unme mu ye unu l'ehu; mee unu g'unu meahaa iphe, mu suru g'e meje; unu abya eleta enya meahaa ekemu mu.
- 28Unu e-buru l'ali ono, mu nuru nna unu oche phe ono; unu a-buru ndibe mu; mu a-buru Chileke unu.
- 29Mu a-dzota unu g'unu te emeha ejo-ememe ono, unu eme ono. Mu e-ku nri oku; mee ya g'o kuru akuru; ophu mu ta abyadu eme g'ejo okpa-nri dapfuta unu.
- 30Mu e-me g'oshi-omi ka ami mebyi; bya emee g'iphe, e meberu l'ali mehu emehu; k'ophu ohamoha e-mebuhu unu iphe-iphere l'opfu egu.
- 31Oo teke ono be unu a-nyata ejo uzo ono, unu tsoru ono; me iphe, adudu ree ono, unu eme ono; unu abya adu onwunu ashi le k'ejo-iphe ono, unu eme ono; me ebyi ono, unu eme ono.
- 32Wakwa iphe, Nnajiuphu, bu Chipfu epfu baa: Iphe, mu eme g'unu maru bu l'o to budu iswi ehu unu be mu gude eme iya. Ophu g'iphere du unu; mbu g'iphere ji unu iphu, l'ejo-ememe unube ndu Ízurelu eme!
- 33“Wakwa iphe, Nnajiuphu, bu Chipfu epfu baa: Mboku ono, mu a-safu unu ejo-iphe, unu mekotaru ono be mu e-me g'e buru le mkpukpu unu ono ozo; a bya akpukwa eka dakposhuhuru adakposhihu.
- 34Egu ono, shi buru eka dabyiru ke mmanu ono be aa-kohaa iphe; obu-buhuru eka dabyiru ke mmanu; l'enya ndu aghata aghata.
- 35Teke ono be epe a-saha: “Ali-a, shi buru eka dabyiru ke mmanu-a be gbę duwanu ge mgbabu Eđenu. Mkpukpu, shi dakposhihu adakposhihu; buru ochobu; e mebyishia ya emebyishia be a gbę kpwa; o shihu ike; teme e buchishikotawa iya nu ebuchishi.”
- 36Noo teke iphe, bu ohamoha, phoduru nu, bupheru unu mgburugburu a-maru l'oo mube Chipfu be kpukwaru iphe ono, e shi nwukposhia enwukposhi ono; bya

adzaphukọta iphe azu l'eka ono, shi buru ochobu ono. Mbɛdua, bu Chipfu be pfuakwaru nu; mu je e-me iya.'

³⁷“Wakwa iphe, Nnajiuphu, bu Chipfu epfu baa: Mu e-kweta ozobakwa meeru ndu Ízurelu iphe, ephe arwo. Mu e-me g'ephe zua azuzu ha igwerigwe g'igwe aturu;

³⁸mbu g'ephe ha igwerigwe g'ikpoto aturu, e gude abya egwe ngweja le Jierusalemu l'obo-iphe, a turu onu iya. Oo egube ono be ikpoto nemadzu e-ji mkpukpu ono, shi dakposhihu adakposhihu ono. Oo ya bu g'ephe a-makwanuru l'oo mu bu Chipfu.”

Ezekelu 37

Nsuda, ojogorogo okpu jiru ejiji

¹Ike Chipfu bya akparwuta mu l'ehu. Unme Chipfu bya ekuta mu je apfube l'echilabo nsuda lanu. Nsuda ono buerupho okpu nemadzu jiru iya ejiji.

²O duta mu; jephekota okpu ono mgburugburu. Mu huma okpu, du igwerigwe l'ime nsuda ono. Okpu ono kpohukotachaa iyororo g'ephe ha.

³O bya ajia mu su mu: “Nwa ndiphe; ? okpu-a; o nweru g'o shi du ike teta noduba ndzu ozo to?” Mu su iya: “Oo gube Nnajiuphu, bu Chipfu be maru nu kpoloko.”

⁴No iya; o su mu: “Pfurumaberu mu okpu ono; su phe: Unube ojogorogo okpu; unu ngabe nchi numa Opfu Chipfu!

⁵Wakwa iphe, Nnajiuphu, bu Chipfu epfuru unube okpu-a baa: Mu e-me g'unme bahu unu l'ehu; k'opfu unu a-bya adzuru ndzu.

⁶Mu e-ye unu akwara l'ehu; mu abya emee g'unu nweru anu-ehu; mu abya ekwee unu akpo l'ehu; woru unme ye unu l'ehu; unu abya anodu ndzu. Oo ya bu g'unu a-makwanuru l'oo mu bu Chipfu.”

⁷Tobudu iya bu; mu bya epfua g'o suru ge mu pfua ono. Mu kpukwaduru-a opfu ono l'onu epfu; g'e jia epfu-a; a nuahaa ukporo iphe, azu jogoro-jogoro; okpu ono bya edepfubekota; ophu nonu dzepfuru l'ibe iya.

⁸Mu bya ele enya; akwara me anu nodukotawa iya; akpo bya ekwekotawa iya nu; ole ephe ta atukwanu unme.

⁹O bya asu mu: “Pfurumaberu mu unme; pfuru nu iya; nwa ndiphe; su iya; Wakwa iphe, Nnajiuphu, bu Chipfu epfu baa: Ge gube unme shikwa l'ishi uzo eno, pherephere eshije ezi; bya ezia le ndu-a, e gbushiru egbushi-a g'ephe nodu ndzu ozo.”

¹⁰Tobudu iya bu; mu pfua g'a suru ge mu pfua ono; unme bya abahu phe l'ehu; ephe bya anodu ndzu; bya agbeshi pfuru apfuru; buru ikpoto ndu ojogu, paru eka apaa.

¹¹Oo ya bu; o su mu: “Nwa ndiphe; okpu-a bu ndu onu-ulo Ízurelu l'opfu. Ephe epfu su: ‘Okpu anyi kpohukotawaru iyororo; ophu o to nweedu iphe, anyi ele enya iya; nkanyi be buakwaru nu.’

¹²Oo ya bu; pfuru maberu mu phe; su phe-a: Nnajiuphu, bu Chipfu suru: ‘Unube ndibe mu; mu e-kpuhakota ilu unu; mee g'unu shi l'ime iya lufuta; mu eduta unu duba l'alì Ízurelu.

¹³‘Oo ya bu; g'unube ndibe mu amaru l'oo mu bu Chipfu le teke ono mu kpuhaerupho ilu unu dufutagbaa unu l'ime iya ono.

¹⁴Mu e-woru Unme mu ye unu l'ehu; unu abya anodu ndzu. Teke ono be mu e-duta unu dobe l'alì unu gedegede. Noo teke unu a-maru le mube Chipfu be pfuru iya; bya emee ya ememe. Oo egube ono be Chipfu pfuru iya.’ “

Ízurelu a-buru ndu lanu, nweru onye eze lanu

¹⁵Opfu Chipfu bya akparwuta mu l'ehu su mu:

¹⁶“Nwa ndiphe: Wota oshi lanu dee ya iphe-a: ‘Owaa bu ke ndu Jiuda yee ndu Ízurelu, bu ndu yee ya tugbaru buru nanu.’ L'i bya ewota oshi ozo bya edekwaa ya pho iphe egube-a: ‘Owaa bu oshi ke Ifuremu, mbu oshi Jiófesu; me ke ndu Ízurelu l'ophu, bu ndu yee ya tugbaru buru nanu.’

¹⁷Woru phe chigbabe g'ephe buru oshi lanu. Mee phe g'ephe buru oshi lanu l'obochi eka ngu.

¹⁸Teke ndibe unu jiru ngu su ngu: ‘? Tii kaduru anyi iphe, iphe ono, iime ono bukpo?’

¹⁹Su phe le Nnajiuphu, bu Chipfu suru-a: Mu abya ewota oshi ke Jiófesu, bu ophu Ifuremu gude l'eka ono; mekpoo k'iphe, bu ipfu Ízurelu, bu ndu ephe l'iya swi; woru iya tugbabe l'oshi ke Jiuda; mee phe g'ephe buru oshi lanu nodu mu l'eka.

²⁰“Oshi ono, i decharu iphe ono be ii-gude l'eka g'ephe huma iya.

²¹L'i bya asu phe; Wakwa iphe, Nnajiuphu, bu Chipfu epfu baa: Mu e-dufutakota ndu Ízurelu l'iphe, bu ohamoha, ephe lakotaru. Mu e-shi l'ekameka rwukobe phe; duta phe duba l'alì nkephe.

²²Mu e-me phe g'ephe buru ndu lanu l'alì ono, no l'ubvu ubvu Ízurelu ono. O buru onye eze lanu a-nodu achikota phe. Ephe ta abyadu abubaaru ndu labo ozo; ophu ephe ta abyadu ekekahabaa buru alì-eze labo ozo.

²³Ephe ta abyadu egudebaa agwa phe; me iphe, aaso nsò, ephe agwaphe; merwushia onwophe ozo; ophu ephe egudehedu ejo-ememe merwushia onwophe; kele mu adzota phe l'ejo-iphe ono, ephe gude laphu azu ono; mu abya asa phe; ephe aburu ndibe mu; mu aburu Chileke phe.

²⁴O buru nwozi mu, bu Dévidi be a-buru eze, achì phe. Ephe e-nweru onye lanu, a-nodu eche phe g'onye eche aturu. Ephe a-nodu eme ekemu mu; bya eleta enya eme iphe, mu suru g'e meje.

²⁵Ephe e-buru l'alì ono, mu nuru onye-ozì mu, bu Jiékopu ono; mbu alì ono, nna unu phe shi buru ono. Ephebedua; me unwu phe; me unwu nwanwanwanwanwa phe be e-

buru l'eka ono jasuru asuru. O buru Dévidi, bu nwozi mu be a-buru onye-ishi phe jeye l'ojejoje.

²⁶Mu l'ephe a-gba ndzu ehu-guu. Oo-buru ogbandzu, a-duru phe jasurwaruroya. Mu e-me g'ephe buru; mee phe g'ephe zua azuzu. Mu abya eworu ulo-nsọ mu dobe l'echilabo phe jasuru asuru.

²⁷Mu l'ephe a-tuko buru. Mu a-buru Chileke phe; ephebedua abukwanuru ndibe mu.

²⁸Oo teke ono be ohamoha a-maru l'oo mbedua, bu Chipfu be meru ndu Izurelu g'ephe du nsọ; mbu teke ono ulo-nsọ mu a-nodu l'echilabo phe jasuru l'ojejoje ono.”

Ezekelu 38

Iphe, e-me Gogu

¹Tobudu iya bu; Chipfu bya epfuru opfu yeru mu su:

²“Nwa ndiphe; ghachiru Gogu iphu le ke njọ; mbu onye ono bu onye-ishi ndu Mesheku waa ndu Tubalu;

³su iya: ‘Wakwa iphe, Nnajiuphu, bu Chipfu epfu baa: Mu nokwaru ngu le njọ; gube Gogu, bu onye-ishi ndu Mesheku waa ndu Tubalu.

⁴Mu a-lo-phe ngu mgburugburu; gude ikekee dzugbabe ngu agba; lofuta ngu; mekpoo ndu ojogu ngu l'ophu; me inya ngu; me ndu agba l'inya, bu ndu kwakotaru onwophe ngwogu rengurengu; mbu ikpoto nemadzu, bu ndu ophu pagbaa iphe, eegudeje egbobuta onwonye, ophu hagbaa shii; me ndu ophu hagbaa nwanshii. Ephe tuko g'ephe ha ephegbaa ogu-echi phe ke pheremu pheremu.

⁵“Ndu Peshiya; me ndu Kushi; me ndu Putu be tsokota phe nu; ephe pakota iphe, eegudeje egbobuta onwonye; bya ekpuchaaru okpu-igwe.

⁶Egube ono be ndu Goma e-rwuta ndu ojogu phe tsokwaru ngu pho. Ndu Betu-Togarama, shi l'ime ime uzo isheli be e-rwukokwapho ndu ojogu phe tsoru ngu; mbu ohamoha, du igwerigwe a-turu ike yeru ngu.

⁷Rukotakwa onwongu; kwagebekwa akwagebe; unu l'ikpoto ndu ono, no-pheru ngu mgburugburu ono; buru phe onye-ishi-ogu.

⁸A -nochapho odu be ee-ku ngu k'ogu. L'apha, du l'iphu be ii-je ogu l'ali ono, shi l'ogu eteta eteta ono, bu iya bu ali ono, e shi l'oha, du igwerigwe rwukobe ndu bu iya nu ono; mbu ndu ono a chikoberu l'ubvu ubvu Izurelu, bu eka shihawaa dabyitaru buru ochobu ono. Ndu ono be e shi l'ohamoha ozo dufuta phe; ephe tuko buru l'ehuguu.

⁹Gubedua waa ndu ojogu ngu l'ophu; me iphe, bu oha, du igwerigwe ono, etsokota ngu nu ono be e-zelihu g'oke pherephere; unu abya eswetakota ali ono g'urwukpu.

¹⁰“Wakwa iphe, Nnajiuphu, bu Chipfu epfu baa: Le mboku ono be oo-nweru oriri, a-gbabata ngu l'obu; li wata agba idzu ejo-iphe.

11Ii-su: Mu e-je alwua ali, e te gudedu igbulọ kpụ-butu mkpukpu, nọ iya nọ ono. Mu e-tso ndu ono, nọ l'ẹhu-guu ono ogu; mbụ ndu ono, bu t̄saru ẹhu ono. Ẹphe bukọta lẹ mkpukpu, e te gudedu igbulọ kpụ-butu; ọphu ọ tọ dudu ọguzo, e gude agu-chi iya agu-chi; t̄me ọphu o nwe du mgbori gwè, e gude agbachi iya.

12Mu a-lwu phe alwulwu; gwee iphe phe; mbụ ghazia ẹka dabẹ l'ẹka ono, bu ochobu, a lwaru azu bya eburu ono; waa ndu ono, e shi l'ohamoha rwukobe ono; mbụ ndu ono, nweru ẹku; m̄e iphe-enweru ozo, bu ndu bu l'echilabo ali ono.

13Ndu Sheba; m̄e ndu Dedanu; yee ndu agba oke-ngho, shi Tashishi; m̄ekpoo mkpukpu phe l'ophu be a-ji ngu su: “? I byawaru g'i gwee tutua? ? I chiwa ikpoto oha ngu g'i bya akwaa okwata; mbụ g'i bya evua mkpola-ochaa m̄e mkpola-ododo; g'unu kpkoo ẹku; kwatakpo kwaa iphe l'okwata to?”

14“Oo ya bu; nwa ndiphe; pfuru nuru mu Gogu; su iya: Wakwa iphe, Nnajiuphu, bu Chipfu epfu baa: Teke ndibe mu e-buru l'ẹhu-guu ono be ii-zilihu;

15shi l'ẹka i shi, du enya l'uzo isheli bya; mbụ gubedua; waa oha, du igwerigwe, unu l'ephe swi. Ẹphe bu ndu agbakota inya; mbụ ikpoto nemadzu, bu igwerigwe ndu ojogu.

16Unu a-bya eji ali ono; so-kpute ndibe mu, bu Izurelu g'onye urwukpu so pyaberu. L'ataphu be mu e-duta gube Gogu; li bya etso ndu ali mu ogu. Oo ya bu g'ohamoha amaru mu; teke ono mu e-shi l'ẹhu ngu goshi phe le mu du nsọ ono.

17“Wakwa iphe, Nnajiuphu, bu Chipfu epfu baa: ? To buna gubedua be mu shi l'onu ndu-ozu mu, bu ndu mpfuchiru Chileke Izurelu pfua opfu ngu le teke ndiche-a? Teke ono be ephe pfukwaru iya apha, du igwerigwe su le mu e-mechaa gude ngu dapfuta phe.

18“Waa iphe, e-me nu le mboku ono baa: “Teke Gogu byaerupho alwushi ali Izurelu ogu be ẹhu-eghu mu a-taliu; mbụ kpohu oku. Nokwa iphe, Nnajiuphu, bu Chipfu epfu.

19Mu gudewaa g'ophu-beru mu l'ẹhu; waa oke ẹhu-eghu mu raa ya arara l'oke ali onma-jijijiji be a-du l'ali Izurelu le teke ono.

20Teke ono be iphe, bu ema, nọ le mini; m̄e enu, ephe l'eli; m̄e anu-egbudu; m̄ekpoo iphe, bu anu, awu awuwu l'ali; m̄ekpoo iphe, bu ndu nọ le mgboko-a e-tehukota kparikpari l'iphu mu. Iphe, bukota ubvu be a-ghakota igharaphu; iphe, bu agbara mkpuma a-vokposhihukota; iphe, bu igbulọ a-dashikota gburugudu l'ali.

21Teke ono be mu e-me g'e shigbaa l'ubvu mu gude ogu-echi bapfuta Gogu. Nokwa iphe, Nnajiuphu, bu Chipfu epfu. Nwoke nonu e-gude ogu-echi nkiya tsopyabe nwune iya nwoke.

22Mu e-gude ejo iphe-ememe; waa egbu-ochi nu ya aphu. Mu abya edzee oke mini nmaa yee igwerigwe ndu ojogu iya; m̄e iphe, bu ohamoha, ephe l'iya swi; bya atua phe akamini-mkpuma; bya ekpukposhi phe oku-nshiegbe, enwu phurupuru.

²³Q buru egube ono be mu e-gude goshi ge mu habe shii; waa ge mu du-be nsọ. Mu e-me g'ohamoha maru onye mu bu. Oo teke ono be ephe a-makwanuru l'oo mbedua bu Chipfu.”

Ezekelu 39

¹“Nwa ndiphe; pfiaru mu Gogu g'oo-duru iya; su: ‘Wakwa iphe, Nnajiuphu, bu Chipfu epfu baa: mu noakwaru ngu le njo; gube Gogu, bu onye bu ishi ndu Mesheku; me ke ndu Tubalu.

²Mu a-lo-phe ngu mgburugburu; kputa ngu ke karakara tugbua. Mu eje avofuta ngu l'uzo isheli bu aka du enya ono; duru ngu g'i je etso ndu bu l'ubvu ubvu Izurelu ogo.

³Mu e-chifu ngu uta, i gude l'ekicha; bya eme g'apfu, i gude l'ekutara nafu ngu daa.

⁴Oo l'ubvu ubvu Izurelu be ii-da; unu le ndu ojogu ngu; mekpoo ohamoha ono, tso ngu nu ono. Mu e-woru unu nu unwenu, du iche iche g'ephe ria; bya ewokwarupho unu taru anu-egbudu.

⁵Unu a-da l'eba l'egbudu. O kwa mbedua pfuru iya. Nokwa iphe, Nnajiuphu, bu Chipfu epfu.

⁶Mu e-ye oku le Magogu; me ndu ophu bukota l'ehu-guu l'aguga eze-enyimu ono. Oo ya bu g'ephe amakwanuru l'oo mu bu Chipfu obu.

⁷Mu e-me ge ndibe mu, bu ndu Izurelu maru epha mu, du nsọ ono. Ophu mu ta abyadu ekwebaa g'e mebyishia epha mu ono, du nsọ ono ozo; teme iphe, bu ohamoha a-maru l'oo mbedua, bu Chipfu, bu onye ono, du nsọ ono, no le Izurelu.

⁸“Oobyaakwa-a! O mefutajekwa. Nokwa iphe, Nnajiuphu, bu Chipfu epfu. O kwa iya bu mboku obu mu pfuru iya opfu iya obu.

⁹Oo teke ono be ndu bu le Izurelu a-wu-lihu je evukoo ngwogu phe gude mee nku, eeye l'oku; woru iya kpokota oku. Ephe a-chita iphe, ndu ono, egudeje egbobuta onwophe ophu ha shii; me ndu ophu ha nwanshii; me uta; yee apfu; me mgboro-ogu; mekpoo arwa phe. Ephe e-gude ngwogu ono shikota iphe apha esaa mgburugburu.

¹⁰Ephe ta abyadu ejebaa akpata nku l'egbudu; ozoo je awata nku l'oswa; kele ngwogu ono a-buru nku, ephe egudeje eshi iphe. Ndu ono, gwejeru iphe phe tutua ono be ephe e-gwekwapho nkephe tutua; ndu ono kwajeru iphe l'okwata ono be ephe a-kwalatakwaphe nkephe l'okwata. Nokwa iphe, Nnajiuphu, bu Chipfu epfu.

¹¹“O buru le mboku ono be mu a-nu Gogu aka ee-li iya le Izurelu; le nsuda ndu ije; mbu le nsuda, no l'uzo enyanwu-awawa eze-enyimu ono. Kele oo l'eka ono be ee-li Gogu yee ikpoto oha iya; ee-gude phe lichia uzo, ndu-ije. Oo ya bu ee-kuahaa aka ono “Nsuda Ikpoto Ndu Gogu” .

¹²Ndu Izurelu e-li odzu phe onwa esaa; shi nno mee g'a ta sohe ali ono nsọ.

13Ndu bukọta l'alì ono g'ẹphe ha bẹ a-tùko phube iphu wata phẹ elili. Mbọku ono, mu e-goshi lẹ mu dọ biribiri ono bẹ aa-kwabẹ phẹ úbvú. Nokwa iphe, Nnajiuphu, bụ Chipfu epfu.

14Onwa ẹsaa -lachaephọ bẹ ee-ye ndu iphe a-buru ozi phẹ bụ g'ẹphe tsojeru ndu-ije gbapheje alì ono; ẹphe -huma odzu, a gbadoru l'eli alì; ndu-ozì ono eworu iya lia. Ẹphe eshi nno mee g'a ta sọhe alì ono nsọ.

15Teke ẹphe a-nọdu agbaphe alì ono bẹ onye humaru ọkpu nemadzu e-meje iphe-ọhubama l'aguga ẹka ọkpu ọbu nọ; jasụ teke ndu elije odzu e-wota iya je elia lẹ Nsuda Ikpoto Ndu Gogu.

16Mkpukpu, eeku Hamona bẹ a-nọdukwapọ l'ẹka ono. Ọ buru g'ẹphe e-shi bụ ono ẹphe eme alì ono g'a sọ-buhu iya nsọ.'

17“Nwa ndiphe; wakwa iphe, Nnajiuphu, bụ Chipfu epfu baa: Kua unwenu, dọ iche iche oku; mẹ anụ-ẹgbudu; sụ phẹ: ‘unu tükocha shi l'ẹka unu nọ bya edzukọbe; bya eria ẹja, mu abya egwegwe; mbụ eze ẹja ono, ee-gwe l'úbvú úbvú Ízurelu ono. Ẹka ono bẹ unu a-ta anụ; ngua mee.

18Unu a-ta anụ ndu ọkpehu dọ; ngua mee ndu-ishi mgboko-a; mbụ g'ẹphe bụ ebili; ọzoo aturu; ọzoo egbu; ọzoo oke-eswi, tsucharu ẹba, shi l'alì Beshanu.

19Ẹja ono, mu abya egweru nụ unu ono bẹ unu a-ta ẹba-iphe jasụ ọo-tushihu unu ayi; unu angua mee jasụ ọotsua unu gẹ mẹe.

20Unu a-nọdu lẹ teburu mu taa anụ inya l'ooji unu ẹpho; mẹ anụ ndu agba iya nụ; mẹ anụ ndu ọkpehu dọ; mẹ ndu ojogu, dọ iche iche.’ Nokwa iphe, Nnajiuphu, bụ Chipfu epfu.

21“Mu e-goshi ọhamoha ọdu-biribiri mu; tẹme ọhamoha a-huma aphụ, mu nuru phẹ; waa gẹ mu gude daberu phẹ ẹka l'ẹhu kẹ njọ.

22E -shi mbọku ono kwasẹru bẹ ndu Ízurelu a-maru l'ọo mu bụ Chipfu, bụ Chileke phẹ.

23Iphe, bụ ọhamoha bẹ a-maru lẹ ndu Ízurelu bẹ a kpuru lẹ ndzụ laa alì ọzo; kele ẹphe meru iphe-ẹji; ọphu mu egudeedu ire phẹ ẹka. Ọ buru iya meru iphe, mu wofuru iphu l'ẹka ẹphe nọ; nwuru phẹ nụ ndu ọhogu phẹ; ẹphe gude ogu-echi gbushikọta phẹ.

24Mu wohaaruru phẹ iphu mu; shi nno gwaa phẹ ugwo emerwushi, ẹphe merwushiru onwophẹ ono; waa ẹjo-ememe, ẹphe mekọtaru ono.

25“Oo ya bụ; wakwa iphe, Nnajiuphu, bụ Chipfu epfu baa: Mu e-je eshi l'ẹka a kpuru Jiékọpu lẹ ndzụ laa; je eduphuta iya azụ. Mu a-bya aphuaru ndu Ízurelu l'ọphu obu-imemini. Mu abya anwuberu ẹpha mu ono dọ nsọ ono ẹnya.

26Ẹphe a-zohakota iphe-iphere ono, e meru phẹ ono; mẹ gheleghelehele ono, ẹphe dọ teke ono ẹphe bu tẹsaruru ẹhu l'alì phẹ ono; ọphu ọ dudu onye byaru eyee phẹ ebvu ono.

²⁷Teke mu shiepho l'ohamoha ono dulata phe; bya eshigbaa l'ali ndu ohogu phe dufuta phe; be mu e-shi l'ehu phe goshi oha, du igwerigwe le mu du nsu.

²⁸Oo ya bu; ephe a-makwanuru l'oo mbedua bu Chipfu, bu Chileke phe; kele o buchakpo eviya l'oo mu meru g'a kpu phe le ndzu lashigbaa ohamoha; obenu le mu e-duphuta phe azu l'ali phe; ophu o to dudu m'onye lanu, mu a-ha l'eka ono.

²⁹Mu ta abyadu ewohabaaru phe iphu mu ozo; noo kele mu a-wuu ndu Izurelu Unme mu." Nokwa iphe, Nnajiuphu, bu Chipfu epfu.

Ezekelu 40

G'eze-ulo ophuu Chileke ono du

¹O be l'apha, kwe anyi ukporo apha l'apha ise; eshi teke a kpuru anyi le ndzu; mbu g'apha ono awata awata; l'abali k'iri l'ime onwa ono; mbu l'apha, kwe apha iri l'eno g'a lwutacharu mkpuku ono. O buru le mboku ono gedegede be ike Chipfu byaru mu l'ehu; bya eduta mu je edobe l'eka ono.

²O buru ge mu aphu ophulunya, Chileke meru; ge mu wata aphupu ono; be o dutaru mu jeshia l'ali Izurelu; je edobe mu l'eli ubvu, ha l'eli shii. Ubvu ono be ulo nokota l'uzo ndohali iya; o dupho ge mkpuku.

³Oo ya bu; o duta mu jerwua l'eka ono; mu huma onye ugbugba iya du g'onvirubvu; onye ono be pfuru l'onu-oguzo; chiru eri oghu ochaa l'eka; bya egudekwapho mgboro, eegudeje atu ogologo iphe.

⁴Onye ono su mu: "Nwa ndiphe; bya egude enya ngu huma; l'ibya egude nchi ngu numa. Lerweta enya okpobe elerweta l'iphemiphe-a, mu abya ngu egoshi-a; kele oo ya kparu iphe, e gude duta ngu g'i bya l'eka. Kokotaru ndu Izurelu iphemiphe, i humaru."

Onu-abata uzo enyanwu-awawa

⁵Mu bya ahuma igbulu, e gude kpu-pheta eze-ulo Chileke ono mgburugburu. Ogologo mgboro ono, eegudeje atu iphe, nwoke ono gude l'eka ono be du nkwo-oshi-eka; le nkwo-obochi-eka; mgbo ishii. O bya atu g'igbidigbi 'igbulu ono habe; o buru ogologo mgboro ono be o du l'igbi; o bukwarupho mgboro ono ugbo lanu be o du l'eli iya.

⁶O bya eje l'onu-abata ophu gharu iphu l'uzo enyanwu-awawa. O bya enyikota eka eeshije abahu iya; bya atu iphe l'onu onu-oguzo ono; ogologo iya buru mgboro ono ugbo lanu.

⁷Nkulahu eka ndu nche anoduje be ogologo iya bukota mgboro ono ugbo lanu; osa iya bukwarupho mgboro ono ugbo lanu. Uzo, nogbaa le mgbaka nkulahu ono be du nkwo-eka ise. Onu eka eeshije abahu le mkpuru onu-oguzo ophu gharu iphu l'uzo eze-ulo ono be ogologo iya bu mgboro ono nanu.

⁸O tuta iphe le mkpuru onu-oguzo ono;

⁹Ọ dū nkwo-ẹka ẹsato. Ọ bya atūa iphe l'igbidigbi oshi mgbo, e yeru iya; ọ dū nkwo-ẹka labo. Mkpuru onu-oguzo ono be no gha iphu l'ime ulo.

¹⁰Onu-abata ophu gharu iphu l'uzo enyanwu-awawa be nweru nkulahu eto eto, nochaa ya ibekeboebo. Ephe no eto ono hakota enya nhamunha; igbulo, nokahagbaaru iya nu l'ibekboebo ono be hakota enya nhamunha.

¹¹Ọ bya atuta iphe l'ogologo onu-oguzo, no iya nu; ọ dū nkwo-ẹka iri l'eto; osa iya dū nkwo-ẹka iri.

¹²L'onu nkulahu ono g'ephe hakota be a kputagbaaru igbulo, dū nkwo-ẹka lanu dobe l'onu-abata. Nkulahu ono g'ephe ha be iphe, ephe dukota bu nkwo-ẹka ishii; ishishi iya uzo eno hakotaru enya nhamunha egube ono.

¹³Ọ bya eshi l'igbulo nkulahu, no l'eka lanu tua iphe jeye l'igbulo nkulahu, no l'eka iya ophuu; ọ dū ukporo nkwo-ẹka le nkwo-ẹka ise; mbu shita l'ishi igbulo ophuu jasū l'ishi igbulo ophuu.

¹⁴Ọ bya atūa iphe le mkpuru onu-oguzo ono; ọ dū nkwo-ẹka ukporo. Onu-oguzo ono be no gbaphee itso oma-unuphu ono.

¹⁵Shita l'iphu onu-oguzo jeye l'ishi mkpuru onu-oguzo ono be dū ukporo nkwo-ẹka labo le nkwo-ẹka iri.

¹⁶Nkulahu ono; me igbulo, nokahagbaaru iya nu be nwekotaru windo, uzo dugbaa ke werere werere; ọ buru egube ono be ọ nokota le mkpuru ulo ono mgburugburu. Windo ono g'ọ hakota be ghakotaru iphu l'ime. Iphu igbulo ono, kebushigbaaru nkulahu ono g'ọ hakota; be e seshigbaaru mpfu l'eli iya.

Ọma-unuphu k'etezi

¹⁷Ọ bya edubata mu l'etezi oma-unuphu ono; mu humagbaa mkpuru; me eka a wukotaru mkpuma gbaa mgburugburu l'etezi oma-unuphu ono. Eka ono, a wukotaru mkpuma ono be a kporo mkpuru ukporo l'iri giriri.

¹⁸Mgbureku onu-oguzo ono be a wukotaru mkpuma ono. Mgbureku onu-oguzo ono be ogologo iya yee uswekete iya haepho. Eka ono be phoru olu.

¹⁹Ọ bya atūa iphe shita l'aabata-aghachi onu-oguzo ono jasū l'atatiphu oma-unuphu ono; ọ dū ukporo nkwo-ẹka ise l'eka iya k'uzo enyanwu-awawa; me eka iya k'uzo isheli.

Ọnu-oguzo uzo isheli

²⁰Ọ bya atuta iphe l'onu-abata ophu gharu iphu l'uzo isheli, bu iya bu ophu shiru lufu l'etezi oma-unuphu ono; g'ọ maru g'ogologo iya; yee uswekete iya habe.

²¹Nkulahu dū iya eto l'eka iya owa-a; bya adu eto l'eka iya ophuu. Igbulo kebushiru nkulahu ono; me mkpuru iya be hakota ge ndu ophuu no l'onu-abata ke mbu pho. Ogologo iya dū nkwo-ẹka ukporo labo l'iri; osa iya dū nkwo-ẹka ukporo l'ise.

²²Windo, nọkota iya nụ; mę mkpuru iya; mękpoo mpfụ, e gude memakọta iya emema bę hakọta gę k'ọnu-abata ophu gharu iphu l'ụzo ęnyanwu-awawa phọ. Ẹka aazọbeje ọkpa abahụ iya dụ mkpopfu ẹsaa; mkpuru iya nọdu ghakọtaru iya iphu.

²³O nweru ọnu-abata, eeshije abahụ l'ime ọma-unuphu ono. Ọnu-abata ono bę gharu iphu l'ọnu-abata k'ụzo isheli; mbụ ẹgube ono, ọ dukwapho l'ụzo ęnyanwu-awawa ono. O shi l'ọnu-abata tuta iya iphe jasụ l'ọnu-abata, ophu nọ gharu iya iphu; ọ buru iphe, ọduje bụ nkwo-ẹka ụkporo ise.

Ọnu-abata ụzo ndọhali

²⁴No iya; ọ bya eduru mu shia ụzo ndọhali; mu hụma ọnu-abata ophu gharu iphu l'ụzo ndọhali. Ọ bya atuta iphe l'igbulọ, kebushiru nkulahụ, nọ iya nụ; mę mkpuru iya; ẹphe hakọta gę ndu ophuu.

²⁵Ọnu-abata ono; waa mkpuru iya bę windo nọkota mgburugburu. Windo ono dukota ẹgube windo ndu ophuu dụ. Ogologo ọnu-abata ono dụ nkwo-ẹka ụkporo labọ l'iri; ọsa iya dụ nkwo-ẹka ụkporo l'ise.

²⁶Ẹka aazọbeje ọkpa abahụ iya dụ ẹsaa; mkpuru iya nọdugbaa l'atatiphu iya. O nwekwarupho mpfụ, e gude memashia igbulọ, kebushiru nkulahụ iya ono, nọchaa ya ibekęboebo ono.

²⁷Ọma-unuphu k'ime ime bę nwekwarupho ọnu-abata, nọ gha iphu l'ụzo ndọhali. Ọ bya eshi l'ọnu-abata ime ọma-unuphu ono tuta iya iphe jasụ l'ọnu-abata ụzo ndọhali; ọ dụ nkwo-ẹka ụkporo ise.

Ọguzo, eeshije abahụ ime ọma-unuphu

²⁸Tọbudu iya bụ; ọ bya eshi l'ọnu-abata ụzo ndọhali ono duru mu bahụ l'ime ọma-unuphu ono. Ọ bya atuta iphe l'ọnu-abata ụzo ndọhali ono; ọ hakwaphọ gę ndu ophuu.

²⁹Nkulahụ, nọ iya nụ; mę igbulọ kebushiru nkulahụ iya ono; mę mkpuru iya bę hakọta gę ndu ophuu. Ọnu-abata ono; waa mkpuru iya bę windo nọkota gbaa mgburugburu. Ogologo ọnu-abata ono dụ nkwo-ẹka ụkporo labọ l'iri; ọsa iya dụ nkwo-ẹka ụkporo l'ise.

³⁰Mkpuru, nọ-pheru ime ọma-unuphu ono mgburugburu bę ogologo iya dụ nkwo-ẹka ụkporo l'ise; ọsa iya dụ nkwo-ẹka ise.

³¹Mkpuru k'ụzo ndọhali ghagbaaru iphu l'etezi ọma-unuphu. E seshiru mpfụ l'igbulọ, e gude kebushigba mkpuru ono. Ẹka aazọbeje ọkpa abahụ iya dụ mkpopfu ẹsato.

³²Tọbudu iya bụ; ọ bya edubata mu l'ime ọma-unuphu ono l'ụzo ęnyanwu-awawa. Ọ bya atuta iphe l'ọnu-abata ono; ọ hakwaphọ gę ndu ophuu ha.

³³Nkulahụ, nọgbaa ya nụ; mę igbulọ, kebushiru nkulahụ iya ono; mę mkpuru iya bę hakọta gę ndu ophuu. Ọnu-abata ono; waa mkpuru iya bę windo nọkota gbaa mgburugburu. Ogologo iya dụ nkwo-ẹka ụkporo labọ l'iri; ọsa iya dụ nkwo-ẹka ụkporo l'ise.

³⁴Mkpuru iya bẹ ghagbaaru iphu l'oma-unuphu etezi. Igbulo, e gude kpu-bushia mkpuru iya ono bẹ e seshiru mpfu l'ibekęboebo. Eka aazọbeje ọkpa abahu iya duchaa mkpopfu ẹsato ẹsato.

³⁵Tọbudu iya bu; ọ bya eduta mu rwua l'onu-abata ọphu nọ l'uzo isheli. O bya atuta iya iphe; ọ ha gẹ ndu ọphuu ha.

³⁶Nkulahu, nọkota iya nu; mę igbulọ kebushiru nkulahu iya ono; mę mkpuru iya bẹ hakota gẹ ndu ọphuu. Windo nọkota iya gbaa mgburugburu. Ogologo iya du nkwo-eka ukporo labo l'iri; ọsa iya du nkwo-eka ukporo l'ise.

³⁷Mkpuru iya gharu iphu l'etezi oma-unuphu. E seshigbaaru mpfu, l'igbulọ e gude kebushia mkpuru ono ibekęboebo. Eka aazọbeje ọkpa abahu iya du mkpopfu ẹsato ẹsato.

Ulo, aanọduje akwakọbe ngweja

³⁸O nweru nwa mkpuru, a kpuru ye iya mgbo, nọ l'onu-abata, nọ l'ime onu-abata oma-unuphu ono. Eka ono bẹ aasaję ngweja-akpo-oku.

³⁹O nwekwarupho teburu labo, e doberu lę mkpuru ono eka labo, bu eka eegbuje anu, e gude egwe ngweja-akpo-oku; mę kę ngweja-iphe-eji; mę kę ngweja-apfu-ugwo.

⁴⁰L'etezi mę a -nọdu eje ala l'onu-abata, nọ l'uzo isheli bẹ teburu labo nọkwapho lę mkpuru iya; lę mkpuru ọphu nọ l'onu-abata ibe iya ọphuu bẹ teburu labo nọkwapho.

⁴¹O du teburu ẹno nọdu l'ibe lanu; teburu ẹno nọdu l'eka onu-abata ono ibe iya ọphuu. O tuko du teburu ẹsato, bu eka eegbuje anu, e gude egwe ngweja.

⁴²O nwekwarupho teburu ẹno, e gude mkpuma mee, bu eli eka eegbuje anu, e gude egwe ngweja, aakpo oku. Ogologo iya duchaa nkwo-eka lanu lę mkpirikpu iya; ọsa iya duchaa nkwo-eka lanu lę mkpirikpu iya; ọ du nkwo-eka lanu l'eli. O buru eka ono bẹ eedobeje iphemiphe, eegudeje egbu anu, e gude egwe ngweja-akpo-oku; mę ngweja ozo, eegwekpo egwegwe.

⁴³Igbulo ono mgburugburu bẹ a kpobekotaru nggu, ogologo iya hakota g'obochieka. Teburu ono g'ephe ha bukota eka eedoje anu, e gude egwe ngweja.

Mkpuru ndu-uke Chileke

⁴⁴L'azu ime onu-abata ono l'ime oma-unuphu ono bẹ o nweru mkpuru labo, nọ iya nu. Nanu nọ l'eka iya k'onu-abata uzo isheli; nọdu gha iphu l'uzo ndohali; ozo nọdu l'eka iya k'onu-abata uzo ndohali; nọdu gha iphu l'uzo isheli.

⁴⁵Onye ono su mu: "Mkpuru ọphu nọ gha iphu l'uzo ndohali ono bu kę ndu-uke Chileke, bu iya bu ndu ọphu anọduje eleta eze-ulo Chileke ẹnya.

⁴⁶Mkpuru ọphu gharu iphu l'uzo isheli bu kę ndu-uke Chileke, bu ndu ọphu eletaje ẹnya l'oru-ngweja. Ndu obu bu unwu Zadoku, bu phe kpoloko bu ndu Lívayi, a-byakubeje Chipfu ntse; bya ejeeru iya ozi."

⁴⁷Tobudu iya bu; ọ bya atuta iphe l'oma-unuphu ono. Ọ haru ẹnya nhamunha ibekeno eno; ọ du nkwo-eka ukporo ise l'ogologo; du nkwo-eka ukporo ise l'osa iya. Ọrungeja ono buru l'iphe eze-ulo Chileke ono be ọ no.

Eze-ulo Chileke ono

⁴⁸No iya; ọ bya eduta mu je le mkpuru, eka eeshije abahu l'eze-ulo ono; bya atuta iphe l'itso-mgbo, nogbaa l'aguga mkpuru ono; ephe duchaa nkwo-eka ise ise ibekeboebo. Osa onu-mgbo iya duchaa nkwo-eka iri l'eno; igbulọ, nochaa su-be l'onu-abata ono ibekeboebo, be osa iya duchaa nkwo-eka eto eto.

⁴⁹Mkpuru ono be ogologo iya du nkwo-eka ukporo; osa iya du nkwo-eka iri l'ebo. Eka aazobeje okpa bahu iya be duchaa mkpopfu iri iri. E bvubechaa itso l'onu-abata mgbo ono eka labo.

Ezekelu 41

¹Tobudu iya bu; nwoke ono bya eduta mu je l'eze-ulo Chileke ono; bya egude iphe tuta okpa-mgbo iya; okpa-mgbo ono ibekeboebo be duchaa nkwo-eka ishii l'osa.

²Onu-abata iya be osa iya du nkwo-eka iri; igbulọ, nochaa ya le mgbureku ibekeboebo; be osa iya duchaa nkwo-eka ise ise. Ọ bya atutakwapho iphe l'ogologo iya; ọ du nkwo-eka ukporo labo; osa iya du nkwo-eka ukporo.

³Ọ bya abahu l'ime eze-ulo ono bya egude iphe tuta okpa-mgbo iya; osa iya duchaa nkwo-eka labo nkwo-eka labo. Onu-abata ono be osa iya du nkwo-eka ishii. Igbulọ, nogbaa le mgbureku onu-mgbo ono ibekebo be osa iya du nkwo-eka esaa.

⁴Ọ bya atuta iphe l'ogologo ime eze-ulo ono; ọ du nkwo-eka ukporo; osa iya du nkwo-eka ukporo l'uzo atatiphu eze-ulo Chileke ono. Ọ su mu: “Owaa bu eka kakota adu nsọ.”

⁵No iya; ọ bya atuta iphe l'igbulọ eze-ulo Chileke ono; igbidigbi iya du nkwo-eka ishii; mkpuru nogbaa l'aguga ulo ono g'ọ ha be osa iya dukota nkwo-eka eno eno.

⁶Ulo ono be bu ulo-eli mkpopfu eto. Mkpofu ophu nonu nwekotaru mkpuru ukporo l'iri iri; a kpukota itso dupfubegbaa l'igbulọ eze-ulo Chileke ono gbaa mgburugburu g'o gudeshia mkpuru, nogbaa ya nu. Iphe ono, a kpuru dupfube iya ono ta abukwa l'ime igbulọ eze-ulo Chileke ono be a kputyaberu iya.

⁷Mkpuru, e yeshiru le mgbureku ulo ono be ka osa eje le mkpopfu iya ono. Ulo ophu e gude kpu-pheta eze-ulo ono be a kpuru ọ nodu le mkpongo le mkpongo; k'ophu bu l'a -nodu enyikota iya; mkpuru ono, a kpushiru iya ono aka osa eje. Eka eeshije enyikota iya be shi le k'omali no je eshijaa k'echilabo iya; bahu le k'imeli iya.

⁸Mu bya ahuma l'eze-ulo Chileke ono nweru oma eka a kpu-liru eli, no gbaphee ya mgburugburu; ọ buru iya bu eka a turu okpa mkpuru ono, a kpushiru gbaphee ya mgburugburu ono. Ọ buru g'ọ habe ogologo bu ge mgboro pho; mbu l'oo nkwo-eka ishii be ọ du l'ogologo.

- ⁹Azụ igbulọ kẹ mkpuru aguga aguga iya ono bẹ igbidigbi iya dụ nkwo-ẹka ise. Ẹka dabyikpọru nụ, nọ lẹ mgbaka mkpuru ono, nọgbaa l'ime eze-ulo Chileke ono; bẹ ọsa iya dụ nkwo-ẹka ise. Mgbaka ẹka dabyiru nụ;
- ¹⁰waa mkpuru ophu a kpụ-pheru ime ọma-unuphu ono mgburugburu bẹ ọsa iya dụ nkwo-ẹka ụkporo.
- ¹¹Mkpuru ono, e yegbaaru l'aguga eze-ulo Chileke ono bẹ e eyecharu ọnu iya; ọ nọdu laaru ẹka ono, dabyiru iphoro ono; ọnu iya lanụ gharu iphu l'uzo isheli; ophuu gha iphu l'uzo ndohali. Ẹka ono, a ta akpuduru mkpuru ono bẹ ọsa iya dụ nkwo-ẹka ise.
- ¹²Ulo ophu a kpuru; ọ gha iphu l'oma-unuphu eze-ulo Chileke l'uzo ẹnyanwu-arịba iya bẹ ọsa iya dụ nkwo-ẹka ụkporo ẹto l'iri. Igbulọ ulo ono bẹ igbidigbi iya gbaa mgburugburu dụ nkwo-ẹka ise; ogologo iya dụ nkwo-ẹka ụkporo ẹno l'iri.
- ¹³No iya; ọ bya atuta iphe l'eze-ulo Chileke ono; ogologo iya dụ nkwo-ẹka ụkporo ise; ọma-unuphu eze-ulo Chileke ono; mę ulo, a kpuru iya; mę igbulọ iya g'ephẹ hakota bẹ ogologo iya dukwapho nkwo-ẹka ụkporo ise.
- ¹⁴Ọma-unuphu eze-ulo Chileke ono ẹka iya ophu gharu iphu l'uzo ẹnyanwu-awawa; mękpoo atatiphu eze-ulo Chileke ono bẹ ọsa iya tukoru dụ nkwo-ẹka ụkporo ise.
- ¹⁵Ọ bya atutakwapho iphe l'ulo ophu nọ gha iphu l'oma-unuphu eze-ulo Chileke ono l'uzo azụ iya; mękpoo igbulọ iya ibekęboebo; ọ buru nkwo-ẹka ụkporo ise bẹ ọ dụ. Ẹka dụ nsọ ono ophu nọfutaru anofuta; mę k'ime ime; yę mkpuru iya ophu gharu iphu l'oma-unuphu;
- ¹⁶mękpoo ọnu-ulo iya; mę windo, dugbaa werere ono; mę ẹka eeshije eshishi, nọkota l'ephẹ n'eto ono bẹ a gbakotaru oshi; shita l'oma-ulo iya; mę igbulọ iya jeye l'eka e yeshiru iya windo; mbụ lẹ windo iya bẹ e kwechishikotaru iphe g'ọ ha;
- ¹⁷je akpakpọ l'eli ọnu-abata ono; mę ime ime ulo ono; mę azụ iya; mękpoo l'eli igbulọ ono ime iya mę azụ iya gbaa mgburugburu; bẹ a pyishiru iphe, dugbaa
- ¹⁸gę chierobu; mę mpfụ. Mpfụ ono bẹ e seshigbaaru lẹ mgbaka mgbaka chierobu. Chierobu ono bẹ nwechaaru iphu labọ.
- ¹⁹Iphu ophu dụ g'iphu nemadzu bẹ ọ gharu mpfụ ophu nọ l'eka iya lanụ; iphu ophu dụ g'iphu oduma bẹ ọ gharu lẹ mpfụ ophu nọ l'eka iya ophuu. Ọ buru ęgube ono bẹ a pyishikotaru iya dophee eze-ulo Chileke ono mgburugburu.
- ²⁰Shita l'omali iya jeye l'eli mgbo bẹ a pyishikotaru chierobu mę mpfụ l'igbulọ eze-ulo ono.
- ²¹Okpa-mgbo eze-ulo Chileke ono bẹ hakota ęnya nhamunha ibekęno ẹno. Ọ buru g'okpa-mgbo ophuu dụ bụ g'ophuu dụ l'iphu ẹka dụ nsọ ono.
- ²²Oru-ngweja Chipfu ono bẹ e gude oshi mee; eli iya dụ nkwo-ẹka ẹto; ogologo iya dụ nkwo-ẹka labọ; ọsa iya dụ nkwo-ẹka labọ. Nkuku iya; mę okpali iya; mę mgbureku iya bẹ bụ oshi bẹ e gudekota mee ya. Onye ono sụ mu: “Ọwaa bụ teburu ono, nọ l'iphu Chipfu ono.”

- ²³Oma eze-ulo Chileke ono; me aka ono, du nso ono be e yekotaru mgbo ebo ebo.
- ²⁴Mgbo ono be nwekotaru iphe labo, aso asoso; eegudeje pyajia ya apyaji. Ophuu nweru ebo; ophuu nweru ebo.
- ²⁵Mgbo oma-ulo eze-ulo Chileke ono be a pyishiru chierobu; me mpfu egube ono, a pyishiru l'eli igbulo pho. L'ataphu mkpuru ono be e gude oshi tua mkpu.
- ²⁶O nwekwarupho windo, dugbaa ke werere, a pyishiru mpfu nogbaa le mgbureku mkpuru ono aka labo. Mkpuru mgbureku eze-ulo Chileke ono be nwecharu mkpu, a turu iya.

Ezekelu 42

Ulo ndu-uke Chileke

- ¹Tobudu iya bu; nwoke ono bya edufuta mu duru mu bahu l'oma-unuphu ono; mbu l'uzo ibiya k'isheli. O bya edubata mu l'ulo, no le mgbaka oma-unuphu eze-ulo Chileke; yee ulo, no l'uzo isheli ono.
- ²Ulo ono, no l'uzo isheli ono be ogologo iya du nkwo-eka ukporo ise; osa iya du nkwo-eka ukporo labo l'iri.
- ³Eka iya lanu be gharu iphu l'eka osa iya du nkwo-eka ukporo, bu aka no l'ime oma-unuphu. Eka iya ophuu be gharu iphu l'eka a wuru mkpuma, no l'ataphu oma-unuphu ono. A kpuru iya mkpopfu eto; o noduchaa le mkpongo le mkpongo.
- ⁴O nwekwarupho uzo, no l'ime, eeshije eshishi, no l'iphu ulo ono; onoya be osa iya du nkwo-eka iri; ogologo iya du nkwo-eka ukporo ise. Onu-mgbo iya be nokota l'uzo isheli ulo ono.
- ⁵Mkpuru ophu nogbaa l'eli be kagbaa kparagu; kele onu-uzo nogbaa ya nu ka eketa aka ha shii; eme le g'onu-uzo ke mkpuru k'echilabo; me le k'uzo ali ketagbaaru.
- ⁶Mkpuru, nogbaa le mkpopfu k'eto l'ulo-eli ono be te nwedu itso, no iya nu egube ulo ndu ophu a kpushiru l'oma-unuphu pho nweru. Oo ya bu l'oma ulo k'imeli ono ka ndu ophu no l'ali; me k'echilabo iya nwanshii.
- ⁷O nwekwarupho igbulo, tsefutaru etsefuta, no le nhamunha mkpuru ulo ono waa oma-unuphu ono; igbulo ono be ogologo iya du nkwo-eka ukporo labo l'iri l'ataphu eze-ulo Chileke ono.
- ⁸Mkpuru ophu no giriri chebe iphu l'oma-unuphu ono be ogologo iya du nkwo-eka ukporo l'iri. Ndu ophu a kpuru o chebe iphu l'eka iya k'eze-ulo Chileke be ogologo iya du nkwo-eka ukporo ise.
- ⁹Mkpuru k'uzo ali be aka eeshije abahu iya no l'uzo enyanwu-awawa me a -gbu l'oma-unuphu ono abahu iya.
- ¹⁰L'ime oma-unuphu l'eka iya k'uzo ndohali be o nwekwarupho mkpuru, a kpugbaaru le mgbaka igbulo ataphu etezi oma-unuphu ono yee oma-unuphu eze-ulo Chileke.

¹¹O nweru ụzo, eeshije eshishi, nọ l'iphu mkpuru mkpuru ono. Mkpuru ono dughbaa ge ndu ophu nọ l'uzo isheli. Ogologo phe waa osa phe be tuko haru enya nhamunha. Eka eeshije phe alufu be gbakaota nanu. G'e gude kpua phe gbakwarupho nanu. Mgbo, nochaa phe nu tuko gbakaota ugbugba lanu.

¹²Ulo k'uzo ali ophu nọ l'uzo ndohali be gharu onu l'uzo enyanwu-awawa, bu eka eeshije abahu iya. O nwekwarupho igbulọ, tsefutaru etsefuta, a kpuru nyakube ulo ono.

¹³Tobudu iya bu; o su mu: "Ulo k'isheli me ke ndohali ono, ghakotaru iphu l'oma-unuphu eze-ulo Chileke ono be bu ke ndu-uke Chileke. O buru l'eka ono be ndu-uke Chileke, bu ndu abyakubeje Chipfu ntse a-noduje eri iphe, kakota adu nsọ, a nuru Chileke. Oo eka ono be ephe e-dobeje iphe, kakota adu nsọ, a nuru Chileke; mbu ngweja-nri; me ngweja-iphe-eji; me ngweja-apfu-ugwo; kele eka ono be du nsọ.

¹⁴Teke ndu-uke Chileke bahawaru l'eka ono, du nsọ ono; g'ephe ta alufukwa etezi gbahaa l'ephe yefuru uwe, ephe eyeje gude eje ozi; kele uwe ono dukota nsọ. Ephe eye uwe ozo teme ephe eje l'eka ndu ozo no."

¹⁵Noo ya; teke o tu-ghechaaru iphe l'iphe, nọ l'ime eze-ulo Chileke ono; o bya eduta mu shia uzo onu-abata uzo enyanwu-awawa; bya atukota iphe l'eka ono g'o ha mgburugburu.

¹⁶O bya egude mgboro, e gudeje atuta iphe ono tuta iphe l'eka iya k'uzo enyanwu-awawa; o buru iphe, o du bu unu nkwo-eka le nkwo-eka ukporo ise.

¹⁷O bya egude mgboro, e gudeje atuta iphe ono tuta iphe l'eka iya k'uzo isheli; o dukwapho unu nkwo-eka le nkwo-eka ukporo ise.

¹⁸O bya egude mgboro, e gudeje atuta iphe ono; tuta eka iya k'uzo ndohali; o du unu nkwo-eka le nkwo-eka ukporo ise.

¹⁹O bya aghachi iphu l'uzo enyanwu-ariba; bya egude mgboro, e gudeje atu iphe ono tuta eka iya ono; o du unu nkwo-eka le nkwo-eka ukporo ise.

²⁰Oo ya bu; o tukota iphe l'eka ono ibekeno eno. E gude igbulọ kpu-phekota iya mgburugburu; ogologo iya du unu nkwo-eka le nkwo-eka ukporo ise; osa iya du unu nkwo-eka le nkwo-eka ukporo ise; shi nno kebuha eka du nsọ ono waa eka nemadzu mmanu anoduje.

Ezekelu 43

Odu-biribiri Chileke l'eze-ulo iya

¹No iya; nwoke ono bya eduta mu bya l'onu-oguzo ophu gharu iphu l'uzo enyanwu-awawa.

²Mu huma odu-biribiri Chileke ke Izurelu g'o shi l'uzo enyanwu-awawa abya. Olu iya nodu ada g'eka eze enyimu aphu ke gbudugbudu. Odu-biribiri Chileke ono mee iphoro ngakota ekameka.

³Ophulenyanya ono, mu phuru ono dūepho g'ophu, mu phujeru teke o byaru emebyishi mkpukpu ono; bya adu g'ophulenyanya ono, mu phujeru l'aguga enyimu Keba pho. Oo ya bu; mu daa kpurumu; kpube iphu l'ali.

⁴Odu-biribiri Chipfu shiepho l'onu-abata ophu gharu iphu l'uzo enyanwu-awawa bahu l'eze-ulo Chileke ono.

⁵Unme Chileke palia mu je edobe l'ime oma-unuphu; odu-biribiri Chipfu bya eji eze-ulo Chileke ono ejiji.

⁶Ge nwoke ono pfu-kube mu ono be mu numaru olu-opfu onye no l'ime eze-ulo Chileke g'oopfu anu mu;

⁷su: “Nwa ndiphe; aka-a bu aka aba-eze mu no; bukwarupho aka mu azobeje okpa. Oo l'aka-a be mu e-buru l'echilabo ndu Izurelu jeye l'ojeje. Ndu Izurelu ta abyadu emerwushiba epha mu ono, du nsọ ono ozobaa. Ephe le ndu-eze phe ta abyadu egude ogori, ephe eri l'aka ephe agwaje iphe merwushia epha mu ozobaa; ophu ephe akpubaedu odzu ndu eze phe nwuhuru anwuhu apfube.

⁸Teke ono, ephe woru onu-ulo phe dokube onu-ulo nkemu; bya eworu onu-mgbo phe ye l'aguga onu-mgbo nkemu; o buru igbulo kpoloko bu iphe, no-buharu mu l'ephe; be ephe gude urwuali, ephe arwu emerwushi epha mu ono, du nsọ ono. Oo ya meru iphe, mu gude ehu-eghu mebyishia phe.

⁹Nta-a bu g'ephe haa eri ogori; ephe apashicha odzu ndu-eze phe ono l'aka mu no; ge mu ebukwanuru l'echilabo phe jasụ l'ojeje.

¹⁰“Nwa ndiphe; t̄aru ndu Izurelu onu g'eze-ulo Chileke ono du. G'ephe ria oriri l'ugbugba ulo ono; k'ophu iphere iphe-eji, ephe meshiru a-du phe.

¹¹Teke o bu l'iphere iphe ono, ephe meru ono du phe; l'i karu phe g'ee-gude kpa eze-ulo Chileke ono; me g'oo-gude gbaa ugbugba; me g'onu iya a-du; me onu-abata iya; me g'aa-kpukotakpoo ya l'ophu; mekpoo nsọ, dulaje iya nu; waa ekemu, dugbaa ya nu. Dekota iphemiphe ono l'ekwo k'ophu ephe e-mekota iya g'o du; mekota nsọ, dulaje iya nu g'o ha.

¹²Waa ekemu, du le k'eze-ulo Chileke ono baa: Iphe, bu mkpakponu ubvu ono gbaa mgburugburu be a-buru aka kakota adu nsọ. Oo ya bu ekemu eze ulo Chileke ono.

Enya aka eegweje ngweja

¹³“Waa g'oru-ngweja ono habe le nkwo-aka le nkwo-aka bu owa: nkwo-aka ono bu iphe, o du bu nkwo-aka lanu; waa nkwo mkpushi-aka eto. Omilomi oswa, no iya mgburugburu be a-du nkwo-aka lanu; osa iya a-du nkwo-aka lanu. Igburonu oswa ono mgburugburu a-du nkwo mkpushi-aka ugbo tete. Waa g'enya aka ono, ee-gweje ngweja ono a-habe l'eli baa:

¹⁴Shita l'oswa, a waru l'omali ono jeye l'uko-ali be eli iya a-du nkwo-aka labo; osa iya adu nkwo-aka lanu. A -gbe l'uko-ali rwua l'apokwa be eli iya a-du nkwo-aka eno; osa apokwa ono adu nkwo-aka lanu.

¹⁵E -shi l'apokwa iya rwua l'anya ẹka eegweje ngweja gededede bẹ eli iya a-du nkwo-ẹka ẹno; ẹnya ẹka ono, eegweje ngweja ono bẹ mpu ẹno, mabecharu l'uzo imeli a-nodu.

¹⁶Enya ẹka ono, eegweje ngweja ono bẹ a-haru ẹnya nhamunha ibekeno ẹno. Ogologo iya a-du nkwo-ẹka iri l'ẹbo; ọsa iya adukwapho nkwo-ẹka iri l'ẹbo.

¹⁷Apokwa iya bẹ a-hakwarupho ẹnya nhamunha ibekeno ẹno; ogologo iya a-du nkwo-ẹka iri l'ẹno; ọsa iya adu nkwo-ẹka iri l'ẹno; igburonu apokwa ono bẹ eli iya a-du mkpirikpu nkwo-ẹka. Ishi apokwa ono a-du nkwo-ẹka lanu gbaa mgburugburu. Ẹka eeshije enyihu ẹnya ẹka eegweje ngweja ono bẹ a-gha iphu l'uzo ẹnyanwu-awawa.”

Edobe ọru-ngweja ono nsọ

¹⁸No iya; ọ sọ mu: Nwa ndiphe; wakwa iphe, Nnajiuphu, bu Chipfu epfu baa: Waa g'ee-gudeje egwe ngweja-akpo-oku l'eli ọru-ngweja ono; me g'ee-gudeje ephe mee-
iphe l'eli ẹka ono me a -kpu-ghẹ ẹ ya pho baa.

¹⁹Ndu-uke Chileke, bu iya bu ndu Lívayi; mbu ndu ono, shi l'eri Zadoku, bu ndu ejeje ozi l'iphu mu ono bẹ ii-kpe nwokeswi g'ephe gude gwee ngweja-iphe-eji. Nokwa iphe, Nnajiuphu, bu Chipfu epfu.

²⁰Haru mee ya nata tee le mpu ẹno ono, no l'anya ẹka eegweje ngweja ono; yele ishishi apokwa ono ephen'eno. L'i tephekwa ya pho l'igburonu iya mgburugburu g'o buru iphe, i gude mee ẹnya ẹka ono, eegweje eja ono g'o du nsọ; gudekwa iya pho safu iphe-eji, no iya nu.

²¹Okeswi ono, e gude egwe ngweja k'iphe-eji ono bẹ ii-kputa je akpo oku l'eka e meru g'a kpoje ngweja oku l'eze-ulo Chileke ono l'azu ẹka du nsọ ono.

²²“Le mboku k'ẹbo bẹ ii-gude mkpi, te enwedu ẹka iphe mebyiru iya gwee ngweja-iphe-eji. Ọru-ngweja ono bẹ ee-me g'o du nsọ egube ono, e gude oke-eswi mee ya pho.

²³Teke i mebecharu iya; ọ du nsọ ono; l'i kputa nwa oke-eswi waa ebili, te enwedu ẹka iphe mebyiru phe gwee ngweja; mbu ophu shi l'eka iphe-edobe no.

²⁴Ii-gwekota phe l'iphu Chipfu. Ndu-uke Chileke ewota unu phekota phe; woru phe mee ngweja-akpo-oku nu Chipfu.

²⁵“Ujiku esaa; mboku-mboku bẹ ii-kpokube kpufutaje mkpi g'e gude gweje ngweja-iphe-eji. Egube ono bẹ ii-kpufutakwapho nwokeswi waa ebili, te enwedu ẹka iphe mebyiru phe, bu ophu shi l'iphe-edobe.

²⁶Abali esaa bẹ ndu achijeru Chileke eja e-gude safu ejo-iphe l'oru-ngweja ono; bya emee ya g'o du nsọ; shi egube ono woru iya ye l'eka Chileke.

²⁷Abali esaa ono g'o ha -dzuẹpho; gbẹ le mboku k'esato kwaseru; bẹ ndu-uke Chileke e-gweru unu ngweja-akpo-oku; me ngweja-ehu-guu l'eli ọru-ngweja ono. Oo buru teke ono bẹ mu a-nata unu. Nokwa iphe, Nnajiuphu, bu Chipfu epfu.”

Ezekelu 44

Onye-ishi mę ndu Lívayi; waa ndu-uke Chileke

- ¹Tọbudu iya bụ; nwoke ono bya eduphuta mu azụ l'ọnu-abata ọphu nọ l'ụzo azụ ẹka ono, dụ nsọ ono; mbụ ọphu gharu iphu l'ụzo ẹnyanwu-awawa phọ. A gu-chia ya aguchi.
- ²No iya; Chipfu sụ mu: “Ọnu-abata-a bę aa-gu-chi ẹgube-a jeyewaruro ya. A ta abyadu aguha iya aguha. Mbụ l'ọ tọ dudu onye byaru eshije iya bahu l'ime iya. Ọ buru ẹgube ono bę ọogu-chi jeyewaruro ya; kele ọo ẹka ono bę Chipfu, bụ Chileke Ízurelu shiru bahu l'eze-ulo ono.
- ³Ọo onye-ishi unu kpoloko bę nweru g'ọdu l'a haa ya g'ọ nọdu l'ime ọnu-abata ono ria nri l'iphu Chipfu. Oo-shi l'ụzo, eeshije abata lę mkpu ọnu-abata ono bahu; shikwa iya phọ lufu.
- ⁴“No iya; nwoke ono duta mu shia ụzo ọphu nọ l'ọnu-abata isheli l'ụzo iphu eze-ulo Chileke ono. Mu bya apalia ẹnya huma ọdu-biribiri Chipfu g'o jiru eze-ulo Chipfu ono ejiji; mu daa kpurumu; kpube iphu l'alị.
- ⁵Chipfu sụ mu; Nwa ndiphe; tọnwube ẹnya ree; ngabę nchị rengurengu; kwabę ẹnya l'iphemiphe, mu epfuru ngu lę kę g'aa-nọduje eme eze-ulo Chipfu ono; mę ekemu, dụ iya nụ. Lerwetakwa ẹnya l'iphe, bụ ụzo, e shi abahu l'eze-ulo Chileke ono; mę ẹka eeshije alufu l'ẹka dụ nsọ ono.
- ⁶“Sụ ndu Ízurelu ono bụ ekwegekwe ono lę-a: Nnajiuphu, bụ Chipfu sụru unubę ndu Ízurelu l'ọ duwa ree mbụ ırwuali ono, unu arwu ono.
- ⁷Iphe ọzo, unu meru yekọberu ırwuali unu ono bụ l'unu dubataru ndu ọhoro l'ulo nsọ mu; mbụ ndu te ebuduru úbvù k'ime ọkpoma; mę k'ogwehu. Unu gude phę merwushia eze-ulo mu l'ẹka unu gude nri; mę ẹba-anụ; mę mee ya egwe ngweja anụ mu; shi ẹgube ono mebyia ọgbandzu mu ono.
- ⁸Ọphu unu eletaduru iphe mu dụ nsọ ẹnya; unu gbęchia zia ndu ọzo g'ephe letaję ulo nsọ mu ono ẹnya.
- ⁹“Wakwa iphe, Nnajiuphu, bụ Chipfu epfu baa: G'ọ tọ dukwa onye ọhoro; mbụ, ndu te ebuduru úbvù k'ime ọkpoma; yęe k'ogwehu, a-bata l'ulo nsọ mu; je akpachakpo lę ndu bụ nlwamulwa, buwa ebubu l'echilabo ndu Ízurelu.
- ¹⁰Ndu Lívayi ọphu gwọberu mu nụ lę teke ono, ndu Ízurelu kpaphushihuru l'ẹka mu nọ; mbụ ndu ọphu lufuru mu l'ẹhu je etsoaha agwa phę bę e-vuru iphe, ẹjo-iphe phę kpatarụ phę.
- ¹¹Ephe nwekwaru ike ephe eje ozi l'ulo nsọ mu; buru ndu nche l'ọnu-abata eze-ulo Chileke; bya eje ozi l'ime iya; ephe egbuchakpo anụ, e gude egwe ngweja-akpo-oku; bya egwejeru ndu ono eja; bya ejeru phę ozi;

- 12obenu kele ọo l'ẹphe gwaru nshi; bya emee ge ndu Ízurelu meahaa ẹjo-iphe; be mu paliakwaru ẹka imeli; ribuwa angu l'ẹphe e-vuru iphe, ẹjo-iphe phe kpataru. Noo iphe Nnajiuphu, bu Chipfu epfu bu ono.
- 13G'ẹphe ta abyakwa mu ntse l'ẹphe abya mu abaru ẹja l'ẹphe bu ndu-uke; ọphu ẹphe ejekubekwa iphe mu, du nsọ; ọzoo iphe, e gweru mu ẹja, kachakpoo adu nsọ. Ẹphe e-vuru iphe-iphere ẹbyi, ẹphe meshiru nwutaru.
- 14Ole g'ọ duhabe be mu emekwa-a phe g'ẹphe letaje ẹnya l'iphe, eme ememe l'eze-ulo Chileke ono; mekpoo iphe, bu ozi, aa-nodu eje l'ime iya.
- 15Ole ndu-uke Chileke, bu ndu ke Lívayi, bu ndu ọphu shi l'eri Zadoku; mbu ndu ọphu shi yeru ẹhu eje ozi l'ulo nsọ mu le teke ono, ndu Ízurelu shi kuhu mu l'ẹhu ono; be bu phe a-byakubeje mu ntse; bya eje ozi l'iphu mu. Ọo ẹphe a-pfujeru mu l'iphu egweru mu ngweja ẹba-anu me ke mee ya. Nokwa iphe, Nnajiuphu, bu Chipfu epfu bu ono.
- 16Oo ẹphebedua nwekinyi phe be a-bahuje l'ime ulo nsọ mu ono; o buru phe nwekinyi phe be e-jekubeje teburu mu k'ejeru mu ozi; waa g'ẹphe mee iphe, mu suru g'e mee.
- 17Teke ẹphe bahuru l'onu-abata k'ime oma-unuphu ono be ẹphe e-yeje uwe ọchaa; g'ẹphe te eyekwa uwe, e gude ẹji anu kwee m'ẹphe nodu eje ozi l'onu-abata ọphu no l'ime oma-unuphu ono; ọzoo l'ime eze-ulo Chileke ono.
- 18Ẹphe e-keje ẹkwa-ọchaa l'ishi; bya eye nwiba ọchaa l'upfu; g'ẹphe te eyejekwa iphe, e-me g'ẹphuru tsua phe.
- 19“Teke ẹphe shiepho l'eka ono lufu eje l'oma-unuphu ono l'eka ndu ọzo doru; g'ẹphe yefu uwe ono, ẹphe shi yee eje ozi ono wushi l'ime ulo nsọ; yeta uwe ọzo; k'ọphu ẹphe tee gudedu uwe phe mee ge ndu Ízurelu du nsọ.
- 20G'ẹphe ta akpushijekwa ishi akpushi; ọphu ẹphe ahajekwa ẹgbushi phe g'o rwua ha ogologo. G'ẹphe kpuje ishi phe akpukpu.
- 21G'ọ to dukwa onye uke Chileke a-nguje mee m'ọ nodu abahu l'ime oma-unuphu Chileke ono.
- 22G'ẹphe ba alujekwa nwanyi, ji iya anoedu; ọzoo nwanyi, ji iya chifuru achifu. Onye ẹphe a-lutaje bu nwamgboko, nwoke teke ejepfuswee, bu onye Ízurelu; ọzoo nyee onye uke Chileke, nwuhwaru nu.
- 23Ẹphe e-zije ndibe mu g'ẹphe maru iphe, du iche l'iphe, du nsọ me ọphu ta adudu nsọ; goshikwa phe pho ẹgube ẹphe e-shije maru iphe, aa-nodu aso nsọ; m'ọphu a taa nodudu aso nsọ.
- 24“O -nweru opfu, daru nu; ndu-uke Chileke a-bujeru ndu-ikpe. Iphe, ẹphe agbabeje okpa kpe ikpe ono bu iphe, mu toru okpa iya su g'e meje. G'ẹphe mekotajekwa ekemu mu; mekpoo iphe, mu suru g'e meje; ẹphe aboje obo-iphe, mu dobegbaaru. Ẹphe e-mejekwapho eswe-atuta-unme mu g'ọ du nsọ.

²⁵G'onye uke Chileke te ejekubejekwa odzu; shi nno merwua onwiya emerwu. Oke teke odzu obu bu nna iya; ozoo ne iya; ozoo nwa iya nwoke; m'ò bu nwada iya; ozoo nwune iya nwoke; m'ò bu nwune iya nwanyi, teke aludu ji; oo ya bu l'o merwuwaro onwiya obu.

²⁶Teke a safucharu iya nturwu ono; g'ò nòadakwa abali esaa.

²⁷Mboku oo-bebe bahu l'ime oma-unuphu ulo nsò Chileke g'ò je ejee ozi l'eka du nsò ono be oo-gwe ngweja-ipe-iji k'onwiya. Nokwa iphe, Nnajuphu, bu Chipfu epfu bu ono.

²⁸Oo mbèdua be a-buru okiphe, ndu-uke Chileke ono e-keta. G'ò tò dukwa oke, unu a-he phe l'alì Ízurelu. Oo mbèdua a-buru iphe, ephe nweru.

²⁹Ephe a-nòduje eri iphe, a nuru ke ngweja-nri; me ke ngweja-ipe-iji; me ke ngweja-afu-ugwo. Iphemiphe, a goru le Chipfu le Ízurelu be a-bukotaru nkephe.

³⁰Iphe, kakota ree l'akporu-ipe-mbu, i kpataru l'opfu; mekpoo iphemiphe, i wotaru bya anunu; be bu ndu-uke Chileke be e-nweru iya nu. Ii-hataje iphe, i vuru uzo kpata l'iphe, i meberu l'alì; mbu iphe, i tsuru etsutsu; je anu phe k'ophu onu-oma a-duru ndibe ngu.

³¹Ge ndu-uke Chileke ta atajekwa iphe, o buhabe, bu iphe, nwuhuru anwuhu; ozoo ophu anu-egbudu dzu-gburu adzu-gbu; m'ò bu enu; m'ò bu anu-egbudu ozo mmanu.

Ezekelu 45

G'ee-gude kee ali ono

¹“Teke unu washijeerupho ali ono g'ò buru okiphe unu; unu wafuru Chipfu eka ogologo iya du ukporo unu nkwo-eka eto l'unu nkwo-eka labo l'ukporo nkwo-eka iri g'ò bukotaru eka du nsò; osa iya adu ukporo unu nkwo-eka labo l'unu iri. Eka ono g'ò hakota mgburugburu be a-buru ali, du nsò.

²L'alì ono be ee-kefuta eka uswekete iya waa ogologo iya a-du unu nkwo-eka lanu l'ukporo nkwo-eka ise haru enya nhamunha dobe g'ò buru eka aa-kpu ulo nsò ono. Ee-kekwapho ali ono eka osa iya a-du nkwo-eka ukporo labo l'iri; ye iya g'ò nò-pee ulo-nsò ono mgburugburu.

³Le phorokotokongu eka du nsò ono be unu a-wafuta eka ogologo iya a-du ukporo unu nkwo-eka eto l'unu nkwo-eka labo l'ukporo nkwo-eka iri; osa iya adu ukporo unu nkwo-eka l'unu nkwo-eka ise. Oo eka ono be aa-kpu eka-kakota-nsò ono gedegede.

⁴Oo-buru oke ali, du nsò noduru ndu-uke Chileke; mbu ndu ono, ejeje ozi l'ulo, du nsò ono; buru phe abyaje l'iphu Chipfu bya iya ejeru ozi ono. Oo eka ono be aa-kpushiru phe ulo-ebubu; teme o bukwarupho eka ono be aa-kpu ulo nsò ono.

⁵Eka ozo, aa-wafu be ogologo iya a-du ukporo unu nkwo-eka eto l'unu nkwo-eka labo l'ukporo nkwo-eka iri; osa iya adu ukporo unu nkwo-eka l'unu nkwo-eka ise. Oke-ali ono a-buru ke ndu Lívayi, bu ndu ejeje ozi l'eze-ulo Chileke; eka ono a-buru eka ephe e-me mkpukpu k'eburu.

6“Unu buta alì, a-bùru mkpukpu ophu dobe g'ò nòdu dupfuru l'alì, dù nsò ono. G'òsa iya dù unu nkwo-èka iri l'èbo l'ùkporo nkwo-èka iri; ogologo iya adu ùkporo unu nkwo-èka èto l'unu nkwo-èka labò l'ùkporo nkwo-èka iri. Alì ono a-bùru ndu Ízurelu l'ophu a-tùko dzepfua èka nweru iya.

7“Onye-ishi unu bè e-nweru alì, nò l'ibekèboebo l'alì, dù nsò ono; alì ono a-nòdukwapo laaru ibiya ophu alì òha nò. Oo-gbè l'uzo enyanwu-arìba èka iya lanu nòo je akpaa l'èka iya ophuu; bya agbè l'uzo enyanwu-awawa èka iya lanu nòdu je akpaa l'èka iya ophuu; mbù shikpòepo l'oke alì ophu nò l'uzo enyanwu-arìba; nòo ogologo jasù l'oke alì ophu nò l'uzo enyanwu-awawa; nòo egube ono je ajìru èhu l'èka a washìru alì ipfu l'ipfu.

8Alì ono a-bùru iphe iya nòdu lè Ízurelu. Teke ono bè ndibe mu, bù ndu-ishi ta abyadu akpabaa ndibe mu èhu òzo. Èphe a-ha ndu Ízurelu g'èphe nweru alì ono l'ipfu l'ipfu g'ipfu phè haa.

9“Wakwa iphe, Nnajiuphu, bù Chipfu epfu baa: G'ò kparù kpakwaru unubè ndu-ishi lè Ízurelu! Unu haa èhuka èhuka, unu eme; waa èhu, unu emekpa nemadzu. Unu meje iphe, pfuru òto; mè iphe, gbaru l'ememe; unu ahaa achìshi ndibe mu l'unuphu ibe phè. Nokwa iphe, Nnajiuphu, bù Chipfu epfu bù ono.

10“Unu gudeje iphe, dù ree tùa èrwa iphe. Iphe, unu e-gudeje tùa èrwa iphe, bù nkweka dzuru edzudzu; mè ogbongu dzuru edzudzu.

11“Nkweka mè ogbongu ono bè a-harù enya nhamunha. Nkweka bù iphe, a-lajè iya nù bù e -kee èda ukpo ùzo iri wota ùzo lanu iya; ogbongu ono bè bukwapo e -kee èda ukpo ùzo iri; uzi lanu iya bè a-la iya nù. Èda ukpo bè a-bùru iphe, ee-gudeje atù iphe l'èphenebo.

12“Shèkelu lanu bè a-bùjeru gera ùkporo. Shèkelu ùkporo, e yekòberu shèkelu ùkporo l'ise; bya eyekòbe iya shèkelu iri l'ise bè a-bùru mina lanu.

Iphe, aa-nù Chileke mè mbòku, dugbaa nsò

13“Owaa bù iphe, dukpoo iche, unu a-nùje Chileke. Unu patajè èda ukpo witi lanu; kpojia ogbongu ekpoji; woru kee uzi ishii; wota uzi lanu nù Chileke. Unu apatakwapò èda ukpo balì lanu; kpojia ekpoji; woru iya kee uzi ishii; wota uzi lanu nù Chileke.

14Manu olivu, unu a-nùje bù ekpemu manu lanu l'ime manu, jiru nkweka iri; òzoo manu jiru ite-mkpa lanu. Nkweka iri bè yele ite-mkpa lanu ha enya nhamunha; kele l'ò nkweka iri alajè l'ite-mkpa lanu.

15Nokwapò g'unu a-kpùtaje aturu lanu l'ime ùkporo aturu iri, shi l'aturu, tsuru èba, ndu Ízurelu nweru. Onoya bù ophu ee-gudeje gwee ngweja-nri; mè ngweja-akpò-òku; mè ngweja-èhu-guu; g'e gude iya pfua ugwo iphe-èji ndu ono. Nokwa iphe, Nnajiuphu, bù Chipfu epfu bù ono.

16“Ndu alì ono g'èphe ha bè a-tùko wotakòta ngweja-a wojeru onye-ishi phè.

¹⁷Oo onye-ishi ono bę ọ duru g'o wofutaję iphe, ee-gude gwee ngweja, aakpo ọku; mę ngweja-nri; mę ngweja-mee; l'obo-iphe, aabokpoo abobo; mekpoo mboku obo-onwa-afufu; mę eswe-atuta-unme; mbu l'iphe, bukpo obo-iphe, e dobegbaaru, ndu Izurelu aboje. Oo yębedua bę a-nuje iphe, ee-gude egwe ngweja-iphe-eji; mę ngweja-nri; mę ngweja-akpo-oku; mę ngweja-ehuguu g'e gude pfua ugwo iphe-eji, ndu Izurelu meru.”

¹⁸Wakwa iphe, Nnajiuphu, bu Chipfu epfu baa: “Onwa mbu -du l'abalı mbu bę unu akputaje nwokeswi, e te enwedu eka iphe mebyiru iya gwee eja; swafu nturuwu l'ulo, du nsọ ono.

¹⁹Onye uke Chileke bę e-wota mee anu ngweja-iphe-eji ono tee l'okpa-mgbo eze-ulo Chileke ono; mę le nkuku nkuku eno no l'apokwa oru-ngweja ono; mę l'okpa-mgbo k'onu-abata ime oma-unuphu.

²⁰Nokwapho g'unu e-mekwa iya pho l'abalı k'esaa l'ime onwa ono l'opfu ehu iphe, bu onye te elekebeduru enya mee iphe-eji; ozoo onye meru iphe-eji l'amagama. Oo egube ono bę unu e-shi chia eja eze-ulo Chileke ono.

²¹“L'abalı k'iri l'eno l'ime onwa mbu ono bę unu a-boje obo Ojaghata. Iphe unu a-boje iya bu abalı esaa. Iphe, unu e-rije bu buredi, e te eyeduru iphe, ekoje buredi.

²²Le mboku ono bę onye-ishi akpufuta nwokeswi, ee-gude gweeru iya ngweja-iphe-eji nkiya gedegede; mę k'iphe-eji ndu bukota l'alı ono g'ephe ha.

²³Mboku-mboku l'ime abalı esaa ono, aa-nodu abo iphe ono bę oo-kpufutaje oke-eswi esaa; mę ebili esaa, te enwedu eka iphe, mebyiru iya g'e gudeje gwee ngweja-akpo-oku nu Chipfu. Oo-nujekwapho mkpi g'e gude gwee ngweja-iphe-eji.

²⁴Oo-nujekwapho nkweka ereshi l'ishi oke-eswi ono nanu nanu; mę l'ebili ono nanu nanu; g'o buru ngweja-nri; teme l'o yekobechaa ya manu, jiru eze ekpemu eno le nkweka ono nanu nanu.

²⁵“Obo-iphe ophu aa-boje le teke onwa k'esaa du l'abalı iri l'ise bę bukwapho iphe, ha egube ono bę oo-wofutaje ujiku esaa g'e gude gwee ngweja-iphe-eji; mę ngweja-akpo-oku; mę ngweja-nri; mę ngweja mmanu.

Ezekelu 46

¹“Wakwa iphe, Nnajiuphu, bu Chipfu epfu baa: ‘Onu-abata ime oma-unuphu, bu ophu gharu iphu l'uzo enyanwu-awawa bę aa-gu-chije agu-chi l'ime abalı ishii, eeejeje ozi. Mboku aa-guhaje iya bu l'eswe-atuta-unme waa mboku, onwa furu.

²Onye-ishi bę e-shi l'etezi shia nwulo, no l'onu-abata bata bya apfuru l'onuzo gedegede. Ndu uke Chileke bę e-gweru iya ngweja-akpo-oku; mę ngweja-ehuguu. O buru l'onu-abata ono bę oo-noduje baaru Chileke eja. O -bachaa eja ono l'o lufu; a taa gu-chiedu onu-abata ono agu-chi jasụ l'uzenyashi.

³Mboku, bukpo eswe-atuta-unme mę mboku, onwa furu bę ndu alı ono a-noduje l'onu eka eeshije l'onu-oguzo ono baaru Chipfu eja l'iphu iya.

- ⁴Ngweja-akpo-oku, onye-ishi unu e-gudeje bya anu Chipfu l'eswe-atuta-unme be abujeru unwu aturu ishii, te enwedu aka iphe mebyiru iya; waa ebili lanu, te enwedu aka iphe mebyiru iya.
- ⁵Iphe, oo-yekobe l'ebili ono gude gwee ngweja-nri be a-buru nkweka ereshi. Ngweja-nri, oo-yekobe l'unwu aturu ono be bu g'eka rwukporu iya pho be oo-nu; nkweka nonu be oo-yekota manu, jiru eze ekpemu eno l'ehu l'ehu.
- ⁶Mboku, onwa furu be oo-nu oke-eswi, te enwedu aka iphe mebyiru iya; me unwu aturu ishii; waa ebili lanu, te enwedu aka iphe mebyiru iya g'e gude gwee ngweja.
- ⁷L'o bya ewofuta iphe, ee-gude gwee ngweja-nri. Nkweka ereshi lanu be oo-ye l'oke-eswi ono; yekobe nkweka ereshi lanu l'ebili pho; unwu aturu pho be oo-ye ereshi g'eka bekpore iya pho; yekobechaa manu, jiru eze ekpemu eno le nkweka ereshi nonu.
- ⁸Teke onye-ishi abahu; g'o shi le nwulo onu-abata ono bahu; l'o shikwapho l'eka ono lufuta.
- ⁹"Teke ndu ali ono byaru l'iphu Chipfu l'iphe, bukpo obo-iphe, a turu onu iya; g'onye -shiru uzo isheli bahu je abaru Chileke aja; shikwaa uzo ndohali lufu. Onye -shiru uzo ndohali bahu; l'o shia uzo isheli lufu. G'o to dukwa onye e-shi uzo, o shiru bahu lufu. G'onye alufu nu shijekwa uzo ophu yee ophu o shiru bata chegbaberu iphu lufu.
- ¹⁰Ephe -nodu abahu; g'onye-ishi phe tsojekwaru phe bahu; teke ephe awufuta g'o tsojekwaru phe pho lufuta.
- ¹¹"Iphe, bukpo obo-iphe nonu; me obo-iphe, gegbaaru egeru be iphe, ee-gudeje gwee ngweja-nri bu: Okeswi be ee-yeje nkweka ereshi; ee-yekobe nkweka ereshi l'ebili; unwu aturu be bu egube du nemadzu ree be oo-yekobeje iya. Nkweka ereshi ophu nonu be ee-yekobeje manu, jiru eze ekpemu eno.
- ¹²Teke onye-ishi turu obu iya onyo nu iphe g'e gude gweeru Chipfu ngweja-akpo-oku; ozoo ngweja-ehu-guu; g'e ghebekwaru iya onu-abata ophu gharu iphu l'uzo enyanwu-awawa onu. Ngweja, aakpo oku; ozoo ngweja-ehu-guu iya ono be oo-gwe egube oogweje iya l'eswe-atuta-unme. Teke o megheerupho; l'o lufu; o -lufuepho; g'a guchia uzo ono.
- ¹³"Mboku-mboku be oo-kputaje nwaturu, gbaru apha, te enwedu aka iphe mebyiru iya nu g'e gude gweeru Chipfu ngweja-akpo-oku. O buru l'utsugutsu be oo-nuje iya.
- ¹⁴Utsugutsu be oo-wotajekwapho uzi lanu l'ime nkweka ereshi, e keru uzo ishii; l'o wotakwapho manu, jiru eze ekpemu l'ubvu iya nu g'e gude gwokobe ukpokutu ereshi ono g'o buru ngweja-nri. Egweru Chipfu ngweja-nri-a be a-buru omelali, a-du jasuru asuru.
- ¹⁵Oo ya bu; nwaturu ono; me ngweja-nri ono; yee manu ono be aa-nodu anuje utsugutsu g'e gude gweje ngweja-akpo-oku.

16“Wakwa iphe, Nnajiuphu, bu Chipfu epfu baa: O -buru l'onye-ishi be ketaru iphe, o nweru enweru nu onye lanu l'unwu iya; ge nwa iya obu nwewaruro iphe obu g'o buru okiphe, awa iya e-nweru.

17Ole o -buru l'oo onye ejeru yebe onye-ishi ono ozi be o ketaru iphe iya nu; g'onye-ozu ono nweru iphe obu jeye l'apha, ndu bu ohu enwejeru onwophe; teme onye-ishi ono anatawa iya ya ro. Iphe onye-ishi ono be bu unwu iya l'e-nwejeru iya; l'o buru nkephe.

18G'onye-ishi ono ta anafujekwa ndu ozo oke ali, gbaru phe nu; shi egube ono chifu phe l'ali phe. Oo oke iya nkiya be oo-shije buta ali nu unwu iya g'o buru nkephe; k'ophu a taa nonyadaa nafu ndibe mu iphe phe.’ “

Eka eeshibeje iphe, e gude gwee ngweja

19No iya; nwoke ono bya eduta mu shia uzo ophu no l'ibiya k'onu-abata ono, shiru bahu le mkpuru, du nsu, nogbaa l'eka ono gharu iphu l'uzo isheli ono. Mkpuru ono bu ndu-uke Chileke be nwegbaa ya nu. O bya enweru eka o goshiru mu l'uzo enyanwuariba.

20O su mu: “Eka bu eka ndu-uke Chileke e-shije iphe, e gude gwee ngweja-apfu-ugwo; me ke ngweja-iphe-eji; nodujekwa iya pho ghee iphe, e gude gwee ngweja-nri; k'ophu ephe tee gudedu iya lufuta l'oma-unuphu; shi nno mee ndu no l'eka ono g'ephe du nsu.”

21O bya edutakwa mu ozo bahu l'oma-unuphu; bya eduru mu jekota le nkuku nkuku oma-unuphu ephen'eno; mu humagbaa oma-unuphu ozo, nochaa le nkuku oma-unuphu ono ephen'eno.

22Le nkuku oma-unuphu ono ephen'eno be o nweru oma-unuphu, nogbaa ya nu. Ogologo phe duchaa nkwo-eka ukporo labo; osa phe du nkwo-eka ukporo l'iri iri. Oma-unuphu ono, nokota le nkuku nkuku ono be hakota enya nhamunha.

23Mgburugburu ime oma-unuphu ono ephen'eno be apokwa, e gude mkpuma gbaa nokota. A kpushikotaru eka aakpobeje oku le mkpula apokwa ono gbaa mgburugburu.

24O bya asu mu: “Eka-a bu eka ndu ejeje ozi l'eze-ulo Chileke e-shije iphe, ephe gude gweeru nemadzu ngweja.”

Ezekelu 47

Enyimu, shi l'eze-ulo Chileke ono asofuta

1Nwoke ono bya eduta mu lashia azu l'onu eka eeshije abahu l'eze-ulo Chileke ono gedegede; mu huma mini, shi le mkpula onu eze-ulo Chileke ono asofuta; aso ala l'uzo enyanwu-awawa; kele eze-ulo Chileke ono be no gha iphu l'uzo enyanwu-awawa. Mini ono be shi le mkpula onu eze-ulo ono eka iya ophu no l'uzo ndohali asofuta; mbu l'uzo ndohali l'oru-ngweja ono.

²Tọbudu iya bu; ọ bya eduta mu shia ọzo ọphu nọ l'ọzo isheli; duru mu jephe mgburugburu l'etezi; bya eduru mu shia ọzo ọnu-abata ọphu gharu iphu l'ọzo ẹnyanwu-awawa ono. Mini pho shi l'ọzo ndohali asoshihu.

³Nwoke ono parụ iphe, egudeje atuta iphe l'eka tugbua shia ọzo ẹnyanwu-awawa. O bya atuta unu nkwo-eka labo l'ukporo nkwo-eka iri. O gbẹ teke ono duta mu rwughata mini, beru l'ogba-echi.

⁴O bya atutakwapho unu nkwo-eka labo l'ukporo nkwo-eka iri ozo; bya eduru mu rwughaa mini, ebe l'ikpere. O bya atutakwapho unu nkwo-eka labo l'ukporo nkwo-eka iri ozo; bya eduru mu rwughaa mini ozo, ebe l'upfu.

⁵O bya atutakwapho unu nkwo-eka labo l'ukporo nkwo-eka iri ozo; ono buru ẹnyimu, mu ta aduedu ike ghata; kele mini ono be byawaru utso shii; hawa ogbu k'ophu bu ebvubvu be ee-bvu iya; mbu ẹnyimu, te enwedu onye a-du ike rwughata iya nu.

⁶O jia mu su: "Nwa ndiphe; ? i humaru iphe-a to?" O gbẹ teke ono bya eduru mu lashia azu l'aguga ẹnyimu ono.

⁷Teke mu rwuru l'eka ono be mu humaru oshi, bu aguta aguta, nogbaa l'aguga ẹnyimu ono azu labo.

⁸O su mu: "Mini-a be anoduje aso ala l'ibiya k'uzo ẹnyanwu-awawa; soru lashia l'uzo nsuda Araba, bu eka ooshije soba l'eze-ẹnyimu. O nodu abujeru teke mini ono sobaru l'eze-ẹnyimu ono; mini eze-ẹnyimu ono abya adu ree.

⁹Igwerigwe unwu-iphe, nogbaa ndzu be a-dzuru ndzu l'iphe, bukpo eka mini ono soru shia. Ema be a-kwatakpo du iya shii; kele mini ono aso ala l'eka ono. O nodu emeje mini eze-ẹnyimu ono g'o du ree. Oo ya bu l'iphe, bukpo eka ẹnyimu ono sobe be iphe, no iya nu a-nodukota ndzu.

¹⁰Ndu egbu ema be a-pfujeru l'aguga eze-ẹnyimu ono. A -gbẹ le mkpukpu Enu-Gedi je akpaa le mkpukpu Enu-Egulayimu be aa-nodu ahumaje eka ee-gebeje ugbu. Ema ono be a-dukwa l'udu l'udu; ha igwerigwe g'ema, no l'oke-ẹnyimu.

¹¹Ole mini, no l'uda; me ophu no l'eka anwu umavu l'aguga eze-ẹnyimu ono be ta abyadu adu ree. Oo-buru umaswi, aa-nodu eshita unu.

¹²Oshi-omi dugbaa l'udu l'udu be a-nodugba l'aguga ẹnyimu ono azu labo. Ophu ekwo phe ta ayidu nwulwashihu anwulwashihu; ophu o to yidu mi-buhu akpuru. Epe a-noduje ami mebyi l'onwa l'onwa; kele mini, shi l'ulo du nsọ ono aso ala l'eka epe no. Akpuru, epe a-mije be a-bujeru nri; ekwo iya aburu obvu, ee-gudeje eme ge nemadzu du iche l'iphe, eme iya nu."

Oke oke ali ono

¹³Wakwa iphe, Nnajiuphu, bu Chipfu epfu baa: "Waa g'oke ali ono a-du baa, bu iya bu g'unu e-keshi ali ono g'ipfu iri l'ebo, no le Izurelu hatacha; g'o buru okiphe phe. Jiosofu be a-hata oke ali labo.

¹⁴Unu e-keru iya ephe enya nhamunha. Oo kele mu paliru eka imeli ribua angu le mu a-nu iya nna unu oche phe be meru g'o gude ali-a je aburu okiphe unu.

¹⁵“Waa eka a-buru oke ali ono baa: L'uzo isheli be oo-shi l'oke-Enyimu l'uzo Hetulonu; jeru lashia Zedadu;

¹⁶me Hamatu; me Berota; me Suburuyimu ophu no le mgbaka oke ali Damasukosu yee Hamatu; je akpaa le mkpukpu Haza-Hatikonu, bu ophu no l'oke ali Hawuranu.

¹⁷Oke iya ono be e-shi l'oke-enyimu noo jasu le Haza-Enanu; no-tsoru oke ali Damasukosu l'uzo isheli; yee oke ali Hamatu a-nodu l'uzo isheli. Oo eka ono a-buru oke iya l'uzo isheli.

¹⁸“L'uzo enyanwu-awawa be oke ali ono e-shija mgbaka Hawuranu yee Damasukosu; no-tsoru enyimu Jiodanu ogologo le mgbaka mkpukpu Giladu; me ali Izurelu je alufu eze-enyimu ono, no l'uzo enyanwu-awawa ono; je akpaa le Tama. Oo eka ono be a-buru oke iya l'uzo enyanwu-awawa.

¹⁹“L'uzo ndohali be oke ali ono e-shi le Tama noo jasu le mini Meriba-Kadeshi; o bya anodu kwaseru nggele Ijiputu jasu l'oke-enyimu. Eka ono a-buru oke iya l'uzo ndohali.

²⁰“L'uzo enyanwu-ariba be bu Oke-Enyimu be a-buru oke iya jasu l'eka yee Lebo-Hamatu chegbaberu iphu. Eka ono be a-buru oke iya k'uzo enyanwu-ariba.

²¹“Unu e-keshiru onwunu ali-a le g'ipfu Izurelu ha.

²²Unu e-keru iya onwunu me iphe, bu nlwamulwa, buwaa ebubu l'echilabo unu nwushia unwu; g'o buru okiphe unu. Unu guru phe ye le ndu a nwuru anwunwu le Izurelu. Unu emee g'ephe hata ali g'unu a-ha iya l'ipfu l'ipfu Izurelu.

²³Iphe, bukpo ipfu ophu nlwamulwa ono bu be ee-keru ali nkiya nu iya.” Nokwa iphe, Nnajiuphu, bu Chipfu epfu bu ono.

Ezekelu 48

G'ee-gude kee ali ono

¹“Waa epha ipfu ono g'ephe ha baa: Danu be e-nweru oke ali lanu l'ishi uzo isheli. Oke-ali iya ono e-shi l'uzo Hetulonu noo jasu l'eka eeshije abahu mkpukpu Hamatu; je akpaa le Haza-Enanu, bu ophu no l'oke ndu Damasukosu l'uzo isheli; mbu le mgboru Hamatu. Oke ali iya ono e-shi l'uzo enyanwu-awawa noo jasu l'uzo enyanwu-ariba ali ono.

²“Asha be a-hatakwapho oke lanu. Nkiya be yee ali ke Danu a-ma oke shita l'uzo enyanwu-awawa jasu l'uzo enyanwu-ariba.

³“Nafutali be a-hatakwapho oke lanu. Nkiya be yee ali ke Asha a-ma oke; shita l'uzo enyanwu-awawa jasu l'uzo enyanwu-ariba.

⁴“Manase be a-hatakwapho oke lanu. Nkiya be yee ali ke Nafutali a-ma oke; shita l'uzo enyanwu-awawa jasu l'uzo enyanwu-ariba.

- 5“Ifuremu bẹ a-hatakwapho oke lanu. Nkiya bẹ yee alì ke Manáse a-ma oke; shita l'uzo ẹnyanwu-awawa jasụ l'uzo ẹnyanwu-arịba.
- 6“Rúbenu bẹ a-hatakwapho oke lanu. Nkiya bẹ yee alì ke Ifuremu a-ma oke; shita l'uzo ẹnyanwu-awawa jasụ l'uzo ẹnyanwu-arịba.
- 7“Jiuda bẹ a-hatakwapho oke lanu. Nkiya bẹ yee alì ke Rúbenu a-ma oke; shita l'uzo ẹnyanwu-awawa jasụ l'uzo ẹnyanwu-arịba.
- 8“Alì ophu yee ke Jiuda a-ma oke; shita l'uzo ẹnyanwu-awawa jasụ l'uzo ẹnyanwu arịba bẹ unu e-wofuta g'ọ buru ophu unu e-dobe iche. Uswekete iya bẹ a-tuta g'ọ dụ ukporo unu nkwo-eka eto l'unu nkwo-eka labo l'ukporo iri; ogologo iya a-buru shita l'uzo ẹnyanwu-awawa jasụ l'uzo ẹnyanwu-arịba; egube k'ipfu ndu ophuu hagbaa pho. Ulo nsọ ono bẹ aa-kpu l'echilabo iya gedegede.
- 9Alì ono ophu unu e-bufu iche doberu Chipfu ono; bẹ ogologo iya a-dụ ukporo unu nkwo-eka eto l'unu nkwo-eka labo le nkwo-eka ukporo iri; uswekete iya adu ukporo unu nkwo-eka l'unu nkwo-eka ise.
- 10O buru ndu-uke Chileke bẹ e-nweru eka ono, e doberu nsọ ono. Ogologo iya bẹ a-dụ ukporo unu nkwo-eka eto l'unu nkwo-eka labo le nkwo-eka ukporo iri l'uzo isheli; uswekete iya adu ukporo unu nkwo-eka l'unu nkwo-eka ise l'uzo ẹnyanwu-arịba; uswekete iya adukwapho ukporo unu nkwo-eka l'unu nkwo-eka ise l'uzo ẹnyanwu-awawa; ogologo iya adu ukporo unu nkwo-eka eto l'unu nkwo-eka labo le nkwo-eka ukporo iri l'uzo ndohali. O buru l'echilabo iya gedegede bẹ aa-kpu ulo nsọ Chipfu ono.
- 11Ndu e-nweru iya nu bu ndu-uke Chileke ono, bu unwu Zadoku, mbu ndu e meru; ephe du nsọ, bu phe bu ndu ono, yeru ehu l'ejeru mu ozi ono. Ephe ta ahaduru etso uzo mu egube ndu Lívayi haru iya le teke ndu Izurelu mesweru ono.
- 12Oo-buru iphe-oma, du iche, ee-wofuta l'alì ono, du nsọ ono nu phe g'ọ buru eka kachaa nsọ, yee ndu Lívayi maru oke.
- 13“L'aguga aguga alì ke ndu-uke Chileke ono bẹ ndu Lívayi a-hata oke alì lanu; ogologo iya a-dụ ukporo unu nkwo-eka eto l'unu nkwo-eka labo le nkwo-eka ukporo iri; uswekete iya adu ukporo unu nkwo-eka l'unu nkwo-eka ise. Ogologo iya a-kpakota du ukporo unu nkwo-eka eto l'unu nkwo-eka labo le nkwo-eka ukporo iri. Uswekete iya bu iphe, oo-kpako du bu ukporo unu nkwo-eka l'unu nkwo-eka ise.
- 14G'ephe te erekwa iya erere; ophu ephe egudekwa iya gbanweta ozo. Oo eka ono bẹ alì ono kachakpo ree; oo ya bu g'ọ to lakwa onye ozo l'eka; kele o bu eka duru Chipfu nsọ.
- 15“Eka ophu phoduru nu pho, osa iya du unu nkwo-eka iri l'ebo le nkwo-eka ukporo iri ono; ogologo iya du ukporo unu nkwo-eka eto l'unu nkwo-eka labo le nkwo-eka ukporo iri ono bẹ a-buru alì oha; eka mkpukpu e-gudeje eme iphe, du phe ree; buru eka aa-kpushi ulo; me eka ephe a-nodu echeje eku phe. Mkpukpu ono bẹ a-nodu l'echilabo alì ono gedegede.

16Waa g'oo-ha baa: Unu nkwo-ẹka iri lẹ nanu l'ukporo nkwo-ẹka ise bẹ ọo-du l'uzo isheli iya. Uzo ndohali iya adukwapho unu nkwo-ẹka iri lẹ nanu l'ukporo nkwo-ẹka ise. L'uzo ẹnyanwu-awawa bẹ ọo-du unu nkwo-ẹka iri lẹ nanu l'ukporo nkwo-ẹka ise; uzo ẹnyanwu-ariba adukwapho unu nkwo-ẹka iri lẹ nanu l'ukporo nkwo-ẹka ise.

17Ali ẹka ndu mkpukpu ono a-nodu echeje ẹku phe bẹ a-du nkwo-ẹka ukporo iri l'ẹbo lẹ nkwo-ẹka iri l'uzo isheli; dukwapho nkwo-ẹka ukporo iri l'ẹbo lẹ nkwo-ẹka iri l'uzo ndohali. Ọo-dukwapho nkwo-ẹka ukporo iri l'ẹbo lẹ nkwo-ẹka iri l'uzo ẹnyanwu-awawa; dukwapho nkwo-ẹka ukporo iri l'ẹbo lẹ nkwo-ẹka iri l'uzo ẹnyanwu-ariba.

18Ẹka phoduru nu l'ẹka yee ali, du nsọ ono maru oke kwaseru ogologo; bẹ a-du ukporo unu nkwo-ẹka l'unu nkwo-ẹka ise l'uzo ẹnyanwu-awawa; dukwapho ukporo unu nkwo-ẹka l'unu nkwo-ẹka ise l'uzo ẹnyanwu-ariba. Ọ buru iphe, a kotaru l'ali ono bẹ ndu ejeru mkpukpu ozi e-rije.

19Ọo ndu ejeru mkpukpu ozi, bu ndu shigbaa l'ipfu l'ipfu ndu Izurelu bẹ a-nodu akoje iya opfu.

20Ali ono, unu e-bufu dobe iche ono l'ophu; mbu ali, du nsọ ono; me ke mkpukpu; bẹ ogologo iya waa uswekete iya a-haru ẹnya nhamunha. Iphe ibe lanu a-duje bu ukporo unu nkwo-ẹka ẹto l'unu nkwo-ẹka labo lẹ nkwo-ẹka ukporo iri.

21“Ẹka phoduru nu l'ali ono ibekęboebo; mbu l'ali, du nsọ ono; me l'ali ke mkpukpu; bẹ a-tuko buru k'onye ishi. Oo-shi l'ẹka ono, a tutaru ali, du nsọ ukporo unu nkwo-ẹka ẹto l'unu nkwo-ẹka labo; lẹ nkwo-ẹka ukporo iri ono; nodu laru okoke iya l'uzo ẹnyanwu-awawa. Ọ buru egube ono bẹ ọo-dukwapho l'uzo ẹnyanwu-ariba. Oo-shi l'iphu ẹka ono, a tutaru ali, du nsọ ukporo unu nkwo-ẹka ẹto; l'unu nkwo-ẹka labo; lẹ nkwo-ẹka ukporo iri ono; nodu laaru okoke iya l'uzo ẹnyanwu-ariba. Ẹka ophu, nọt-sotaru ali ono, e keshiru ipfu l'ipfu ogologo ono; bẹ a-buru k'onye ishi. Ọo ya bu l'ali ono, du nsọ ono; me eze-ulo Chileke ono bẹ a-nodu l'echilabo ali ono.

22Ọo ya bu l'ali ke ndu Lıvayi; me ali oha ono bẹ a-nodu l'echilabo ali k'onye ishi ono. Ẹka iya ophu bu k'onye ishi ono bẹ a-nodu l'echilabo oke ali Jiuda yee oke iya ke Benjaminu.

23“A bya lẹ k'ipfu ndu ophu phoduru nu: Benjaminu bẹ a-hatakwapho oke lanu; ono bẹ a-nodu shita l'uzo ẹnyanwu-awawa jasu l'uzo ẹnyanwu-ariba.

24“Simiyonu bẹ a-hatakwapho oke lanu. Ono bẹ yee ali ke Benjaminu a-ma oke; shita l'uzo ẹnyanwu-awawa jasu l'uzo ẹnyanwu-ariba.

25“Isaka bẹ a-hatakwapho oke lanu. Ono bẹ yee ali ke Simiyonu a-ma oke; shita l'uzo ẹnyanwu-awawa jasu l'uzo ẹnyanwu-ariba.

26“Zebulonu bẹ a-hatakwapho oke lanu. Nkiya bẹ yee ali ke Isaka a-ma oke; shita l'uzo ẹnyanwu-awawa jasu l'uzo ẹnyanwu-ariba.

27“Gadu bẹ a-hatakwapho oke lanu. Nkiya bẹ yee ali ke Zebulonu a-ma oke; shita l'uzo ẹnyanwu-awawa jasu l'uzo ẹnyanwu-ariba.

28“Kẹ Gadu bẹ oke iya l'uzo ndohali e-shi ndohali agbẹ lẹ Tama jasụ lẹ mini Meriba kẹ Kadeshi; jì-jia tsoru aguga nggele Ijiputu jasụ lẹ Oke-Enyimu.

29“Noo alì, unu e-keru iphe, bụ ipfu, nọ lẹ Ízurẹlu g'ọ bụru okiphe phẹ bụ ono. Ọ bụru iya a-buru oke alì phẹ. Nokwa iphe, Nnajiuphu, bụ Chipfu epfu bụ ono.”

Ọnu-abata, nọgbaa lẹ Jierúsalemu

30Waa ọnu ẹka ee-shije alufu lẹ mkpukpu ono baa: L'uzo isheli bụ ẹka a turu; ọ dụ unu nkwo-ẹka iri lẹ nanu l'ukporo nkwo-ẹka ise ono;

31bẹ ọnu-abata mkpukpu ono bẹ aa-gucha ẹpha ipfu, nọ lẹ Ízurẹlu iche iche. Ọnu-abata ẹto, nọ l'uzo isheli bẹ aa-gu ọnu-abata Rúbenu; mẹ ọnu-abata Jiuda; waa ọnu-abata Lívayi.

32Eka iya k'uzo ẹnyanwu-awawa, ogologo iya dụ unu nkwo-ẹka iri lẹ nanu l'ukporo nkwo-ẹka ise ono bẹ ọnu-abata ẹto a-dụ: ọnu-abata kẹ Jiófẹfu; mẹ ọnu-abata kẹ Benjaminu; waa ọnu-abata kẹ Danu.

33Eka iya k'uzo ndohali, ogologo iya dụ unu nkwo-ẹka iri lẹ nanu l'ukporo nkwo-ẹka ise ono; bẹ ọnu-abata ẹto a-dụ: ọnu-abata kẹ Simiyonu; mẹ ọnu-abata kẹ Isaka; waa ọnu-abata kẹ Zebulun.

34Eka iya k'uzo ẹnyanwu-ariba, ogologo iya dụ unu nkwo-ẹka iri lẹ nanu l'ukporo nkwo-ẹka ise ono bẹ ọnu-abata ẹto a-dụ, bụ iya bụ ọnu-abata kẹ Gadu; mẹ ọnu-abata kẹ Asha; mẹ ọnu-abata kẹ Nafutali.

35Iphe, ọo-dụ gbaa mgburugburu bụ ukporo unu nkwo-ẹka ẹbo l'unu nkwo-ẹka ise. Epha, mkpukpu ono a-zaru gbẹ lẹ mboku ono kwaseru bẹ a-buru: “Chipfu nọ l'ẹka ono.”

Danẹlu

Danẹlu 1

Ụnwu Ízurelu ẹno, eze họtaru

¹O beru l'apha, kwe Jiehoyakimu apha ẹto, ọ wataru aburu eze ndu Jiuda; eze ndu Bábilonu, ẹpha iya bu Nebukadineza chita ndu ojoḡu iya bya anọ-ḡhee Jierúsalemu mgburugburu.

²Tọbudu iya bu; Nnajiuphu mee ge Jiehoyakimu, bu eze ndu Jiuda; yee ngwa, no l'ulo Chileke laa l'eka Nebukadineza. Nebukadineza toko iphemiphe ono chiru laa ali Shina; chiru iya je edobe l'eka eedobeje eku l'ulo agwa iya.

³Eze, bu Nebukadineza bya akaru Ashipenazu, bu onye-ishi ndu eleta ibe eze ẹnya; bya asu iya g'ọ haru ndu Ízurelu ono ndu ophu shi l'eri ndu eze; yele ndu ophu shi l'eri ndu a maru ẹpha phe dutaru iya.

⁴Ndu ophu bu unwokorobya, adudu eka iphe mebyiru phe; bya adu ubvu l'ẹnya; bya aburu ndu nweru egomunggo; bya amaru iphe; bya aburu ndu iphe edoje ẹnya ree; bya aburu ndu gbaru g'ẹphe a-nodu eje ozi l'ibe-eze. O -hotachaa phe; l'o zia phe opfu ndu Bábilonu; yee g'eedeje iya edede.

⁵No iya; eze, bu Nebukadineza su g'a nuje phe udu nri, yee eze erije mboku-mboku g'ẹphe riye; ọ buru mee, yee eze anguje be ẹphe a-nodu anguje. O buru apha ẹto be a suru g'e gude zia phe iphe. E -mechaa; ẹphe ejeahaaru yee eze ozi.

⁶Tọbudu iya bu; a bya aho ndu obu. A hota Danẹlu ye iya; waa Hananaya; waa Mishelu; wafua Azariya. Epehedua buchaa ndu Jiu.

⁷Tọbudu iya bu; onye-ishi ndu eleta ibe eze ẹnya bya agushia phe ẹpha ophu. Iphe, ọ guru Danẹlu be bu Beluteshaza; bya agua Hananaya Sheduraku. Mishelu be ọ guru Mishaku; bya agua Azariya Abedinego.

Ama, a huru Danẹlu phe

⁸Obenu le Danẹlu pfuru iya ruhata iphu; su le ya tee ridu udu nri, onye eze erije gude merwua onwiya; ophu ya angudu mee, onye eze anguje. Noo ya bu; ọ su onye-ishi ndu eleta ibe eze ẹnya jiko g'o kwe ge ya te emerwu onwiya l'uzo, du nno.

⁹Chileke byanu bya emee; Danẹlu du nwoke ono l'obu; imemini Danẹlu bya adu iya.

¹⁰Tọbudu iya bu; onye eleta ibe eze ẹnya ono bya asu Danẹlu-a: “Mu atsukwa nnajiuphu mu, bu eze ebvu, bu onye suru ge mu nuje unu udu nri ono; yee udu mee ono. ? A maru; ? unu taa jodunu ehu ka ndu unu l'ẹphe bu oḡbo eji? Eze -huma iya be oo-gbutakwa mu ishi l'opfu ehu unu.”

¹¹No iya; Danẹlu bya asu Meluza, bu onye ono, onye-ishi ndu eleta ibe eze ẹnya yeru g'o leta Danẹlu; waa Hananaya; yee Mishelu; waa Azariya ẹnya ono su iya:

¹²“Jikonu; hunaa anyibe ndu-ozu ngu ama ujiku iri. Iphe, ii-nujeepo anyi be bu eba g'anyi taa; nguru mini ye iya.

¹³E -mechaa l'ì bya egbua anyi lẹ ndu ono, eri nri eze ono igo maru ndu ophu ụgbugba phẹ ka ree; ọo ẹpho g'iphe, ì hụmaru gbaru bụ g'ii-me anyibe ndu-ozi ngu phẹ.”

¹⁴Ọ bya ekweta iphe, ẹphe pfuru bya ahua phẹ ama abali iri.

¹⁵A nochaepho abali iri ono; ọ bya elee phẹ ẹnya huma l'ẹphe ka unwokorobya ophu eri nri eze pho ree bya aka phẹ okporokpo.

¹⁶Ọ buru iya bụ lẹ Meluza aparu phẹ anu nri ndu eze yee mee phẹ ono haa; bya awata phẹ agworu ine ẹba.

¹⁷Chileke mee unwokorobya ẹno ono; ẹphe maru ekwo shii; bya enweru mmamiphe. Teme ophulenyanya nodu edoje Danelu ẹnya; nrwo nodu edojefukwa iya pho ẹnya.

¹⁸Tobudu iya bụ; o -rwuepho teke eze suru g'a chitawaru iya ro ẹphe; onye-ishi ndu eleta ibe eze ẹnya bya achita phẹ je edobe l'iphu eze, bụ Nebukadineza.

¹⁹Eze waa ndu ono, e shi azu ono bya abogbabenu. Ophu o dudu g'ẹphe hakota ono onye ophu aturu Danelu; ozoo Hananaya; ozoo Mishelu; ozoo Azariya. Ẹphe wata ejeru eze ozi.

²⁰Iphe, bukpo iphe, eze jiru phẹ, bụ iphe, laru lẹ ke mmamiphe; ozoo iphe edo ẹnya be ẹphe kakota ndu jibya; me ndu emeje omamanshi, bụ ndu nokota l'ali-eze iya; ugbo iri.

²¹Ọ buru egube ono be Danelu noe ya pho jimujimu jasụ Sayirosu nyibata l'okwa eze l'apha mbu iya.

Danelu 2

Nrwo, eze, bụ Nebukadineza rworu

¹O be l'apha, kwe Nebukadineza apha labo, o wataru aburu eze; o rwokashia nrwo. Nrwo ono nodu atsụ iya l'ehu shii. Ophu mgbenya ekweedu iya atutu.

²Tobudu iya bụ; eze zia g'e je ekuaru iya ndu jibya; me ndu agwugwo; me ndu karu akaka; me ndu maru ẹnya kpokpode g'ẹphe bya ezeeru iya nrwo ono, o rworu ono. Ẹphe tuko bya bya akuru l'iphu eze.

³Eze su phẹ: “Mu rworu nrwo; o buru iphe, atsụ mu l'ehu shii ge mu eeshi maru ishi nrwo ono.”

⁴Ndu maru ẹnya kpokpode bya egude opfu ndu Aramu pfuru nu eze su iya: “Gube eze; nodukwa ndzu ojejeje! Jiko zenaaru anyibe ohu ngu phẹ nrwo obu g'anyi akoru ngu iphe, bụ ishi iya.”

⁵Eze bya eyeeru ndu maru ẹnya kpokpode ono onu su phẹ: “Mu gbuwaru iya unu tororo. Unu -emedu g'a maru iphe, mu rworu maru iphe, bụ ishi iya; l'a lakashia unu iphuriba iphuriba wushi; l'e mee ulo unu g'o bugbaaru ikpozu.

⁶Obenu le-a; teke o bu l'unu meru; a maru iphe, mu rworu bya amaru iphe, ishi iya bu; mu emeeru unu iphe-oma, ha shii; bua unu obunggo; bya akwabẹ unu oke ubvu, paru

eka. Noo g'o gude mu sụ unu-a; unu kọoru mu iphe, mu rworu; unu akọo iphe, ishi iya bu.”

⁷Ephe byakwa eyeeru iya onu k'ugbo ebo sụ iya: “Jiko g'eze zeeruro ndu bu ohu iya iphe, o rworu; g'a kọoru iya iphe, ishi iya bu.”

⁸No iya; eze sụ phe: “Iphe, mu makahakpọoru nta-a bu l'oo mboku be unu achila; noo kele ophu unu a-nyata bu le mu gbuwaru unu opfu tororo.

⁹Le-a: O -buru l'unu te emeduru g'a maru iphe, mu rworu le nrwo-a; be e kpeakwaru unu ikpe lanu kabuaru unu; noo l'unu chiwaru idzu l'unu a-bya anodu adzushi uka; epfushi opfu, rehuru erehu l'iphe mu gbiriri jasụ mboku agbanwee. Oo ya bu; unu - kọoru mu iphe, mu rworu le nrwo-a; mu amakwanuru l'unu a-du-a ike koo iphe, ishi iya bu.”

¹⁰Ndu ono, maru enya kpokpode ono bya asu eze: “O to dukwa nemadzu, no l'eliphe-a, a-du ike meeru eze iphe ono, oopfu g'e meeru iya ono. Ophu o dukwa eze g'udu iya; ozoo ike iya ahahabe, sujewaru ndu jibya ali iya; ozoo ndu emeje omamanshi; ozoo ndu maru enya kpokpode g'ephe meeru iya egube iphe owa-a, i suru g'e meeru ngu-a.

¹¹Iphe, gube eze suru g'e meeru ngu shihunukakwaru ike. Ophu o dudu nemadzu adu ike ekpuha iya egoshi eze; ghahaepho agwa agwa; ophu ephe le nemadzu ebukwanu.”

Danelu humaru nrwo obu

¹²O buru iphe ono meru g'o gude ehu ghuaaha eze eghu shingushingu; ehu gbangahu iya. O tua ekemu sụ g'a tukokpoephe ndu maru iphe l'ali Babilonu gbushikota.

¹³Ekemu eze ono tukonu ekameka jedzuru l'a suru g'a tuko ndu maru iphe gbushia. E yenu nemadzu g'ephe je achọ Danelu yee onya iya phe g'e gbua phe.

¹⁴O be teke Ariyoku, bu onye-ishi ndu nche eze tugburu jeshia egbushi ndu bukota ndu maru iphe l'ali ndu Babilonu; Danelu bya ejikpoephe obu oyi gude mmamiphe yeeru iya onu.

¹⁵Iphe, o jiru Ariyoku bu: “? Bu gunu meru g'o gude eze tua ekemu ophu ada ehuka ehuka egube owa-a?” Oo ya bu; Ariyoku bya eworu iphe, ada nu woru kọoru Danelu.

¹⁶Danelu bya abahu bya eje arwo eze; ephe l'iya tua onu teke oo-gude bya akọoru iya iphe, o rworu le nrwo ono.

¹⁷No iya; Danelu bya alaa unuphu bya eje eworu iphe, ada nu woru kọoru onya iya phe, bu Hananaya; waa Mishelu; waa Azariya.

¹⁸O karu phe g'ephe jepfukwa Chileke, bu l'igwe g'o phuru phe obu-imemini; goshi phe iphe owa-a, bu iphe, e domiru edomi-a; k'opfu yebdua yee ndu onya iya; ephe le ndu maru iphe l'ali Babilonu ata atukodu laa l'iswi.

¹⁹Tobudu iya bu; e kpuhaa iphe ono, e domiru edomi ono goshi Danelu l'ophulenyia l'enyasi. O woru ekele kele Chileke ophu bu l'imigwe.

Ekele, Danelu keleru Chileke

²⁰Danẹlu keke Chileke sụ: “G'e tua Chileke ẹpha jasụ ẹ tuutuutuu ẹ mịimiimii! Noo l'ọo ya nwe mmamiphe bya enweru ike.

²¹Ọo ya agbanweje mbọku yẹle teke iphe e-me. Ọ bụru iya emeje ndiphe eze bya akwatsujekwa pẹ phọ. Ndu maru iphe bụ iya anuje pẹ mmamiphe ọbu. Ndu iphe edoje ẹnya bụru iya emeje g'iphe doo pẹ ẹnya ọbu.

²²Iphe, dọ omilomi bya aburu iphe, e domiru edomi bẹ ookpuhaje ghebe ọnu. Ọ maru iphe, nọ l'ọchii. Ọ bụru yẹe iphóró, echi echichi bu l'unuphu.

²³Ọ bụru gube Chileke kẹ nna mu pẹ bẹ mu ekele bya aja ajaja; noo kẹle i meru gẹ mu maru iphe bya emee g'ike dọ mu; bya emee nta-a; gẹ mu maru iphe ono, ẹphe arwọ ngu sụ g'i mee g'ẹphe maru ono; mbụ i meru; a maru iphe, eze rwọru ẹ nrwọ.”

Danẹlu akọ ishi nrwọ, eze rwọru

²⁴Tọbudu iya bụ; Danẹlu bya ejepfu Ariyọku, bụ onye eze yeru g'o gbushia ndu maru iphe l'alị Babilonu ono. O jepfu iya je asụ iya: “Te ejehẹkwa egbushi ndu maru iphe l'alị ndu Babilonu. Duta mu jepfu eze gẹ mu je akọru iya ishi nrwọ, ọ rwọru.”

²⁵Ọ bụru iya bụ ẹ Ariyọku abya emee ẹgwegwa duru Danẹlu dujeru eze. O rwua bya asụ eze-a: “Mu humakwaru onye e-goshi eze iphe, ọ rwọru ẹ nrwọ. Onye ono gbẹkwa bụru onye shi ẹ ndu a kpuru ẹ ndzụ l'alị Jiuda.”

²⁶Eze sụ Danẹlu-a; iphe, a guru Danẹlu bụ Beluteshaza: “? Ii-dụ ike kọru mu iphe, mu rwọru ẹ nrwọ bya epfuaru mu iphe, ishi iya bụ tọ?”

²⁷Danẹlu yeeru eze ọnu sụ iya: “Ọ tọ dukwa onye maru iphe; ọzoo onye emeje ọmamanshi; ọzoo onye jibya; ọzoo onye karu akaka, adu ike egoshi eze iphe ono, e domiru edomi ono, eze suru g'e goshi iya ono.

²⁸Obenu l'o nweru Chileke, bu l'igwe; onye egoshije nemadzụ iphe, e domiru edomi. Ọo onye ono wotaru iphe, e-mechaa mee nọ l'iphe woru kpuhaa goshi gube eze, bụ Nebukadineza. Nrwọ, ị rwọru; yẹe ọphulenyaa, ị phuru l'egomunggo teke ono, ị zẹ l'iphe-azẹe ngu ono baa:

²⁹“Sụ-a; teke ono, ị zẹ azẹe ono; gube eze; bẹ ọriri ngu gbarwuru l'iphe, e-me l'iphe. Ọ bụru iya bụ l'onye ono, ekpuhaje iphe, e domiru edomi goshi ono kpuhaa iphe, e-mechaa mee nọ goshi ngu.

³⁰A byakwanu l'ẹhu kẹ mbedua; ọ tọ bukwa l'ọo l'ọo mu kachaa amaru iphe meru g'o gude e kpuhaa iphe-a, e shi domia edomia goshi mu. Iphe, e goshiru mu iya bukwa k'ọphu gube eze a-maru ishi iphe, ị rwọru ẹ nrwọ; maru ishi iphe, ị riru l'ọkpoma ngu.

³¹“Sụ-a; gube eze; iphe, ị humaru bụ iphe, a kpuru; ọ dọ gẹ nemadzụ. Iphe ọbu paa ẹjo ẹka; tẹme ọ nọdu echi kẹ swachaswacha; pfuru l'iphe ngu; ugbugba iya nọdu eye ebvu.

³²Iphe, e gude mee ishi iphe ono bụ ọkpobe mkpọla-ododo. A bya egude mkpọla-ọchaa mee ọkpoma iya yẹe ẹka iya. Ọ bụru onyirubvu bẹ e gude mee mkputẹpho iya jasụ l'utapfu iya.

ono. “Oo Okalibe, bu Chileke, kangokotaru nu; goshiru eze iphe, e-mechaa mee l'atatiphu. Noo iphe, gube eze rworu bu onoya; teme iphe ono, mu suru l'o bu ono buru iphe, o bu eviya.”

Eze akwabę Danęlu oke ùbvù

⁴⁶Tobudu iya bu; eze, bu Nebukadineza daepho kpurumu woru iphu bube l'alì gude kwabę Danęlu ùbvù; bya asu g'e gude iphe-ngweja; yęę ùnwù-isensu gwaa Danęlu g'aagwaję iphe-a.

⁴⁷Eze bya asu Danęlu-a: “Oo eviya; Chileke ngu bu Chileke nwekọta agwa, nokota nu; bya aburu Nnajiuphu, nwekọta ndu eze l'ophu; bya aburu onye ekpuhaję iphe, e domiru edomi goshi; noo kele owa-a be i kotakpoerupho g'o du.”

⁴⁸Eze bya eworu oke okwa nu Danęlu bya anushia ya ikpoto iphe, dugbaa okee okee; bya emee ya onye-ishi, a-nodu elekọta alì ndu Babilonu l'ophu; bya emee ya onye-ishi l'iphe, bukpo ndu maru iphe l'alì ndu Babilonu l'ophu.

⁴⁹Danęlu bya arwo eze; o bya eworu Sheduraku; yęę Mishaku; waa Abedinego mekwaapho ndu bu ishi mgbazi l'alì Babilonu; obenu le Danęlu be e meru o buru l'ibe eze.

Danęlu 3

Agwa Nebukadineza

¹Tobudu iya bu; eze, bu Nebukadineza bya egude mkpola-ododo kpua oke ntęke. Ogologo ntęke obu be bu onyeka iri l'ise; oša oša iya buru onyeka lanu le mkpirikpu iya. O je l'ęka du baswaa le Dura, no l'alì Babilonu je apfube iya.

²No iya; eze, bu Nebukadineza bya ezia ozi; e kukoo ndu no-chiru enya eze; me ndu-ishi mkpukpu l'enya iya l'enya iya; me ndu ophu okwa phe tsotaru ndu-ishi le mkpukpu; me ndu bu ishi mgbazi; me ndu edoru eze okpoga; me ndu-ikpe; me ndu-ishi ndu-ikpe; mekpoo iphe, bukotakpoo ndu nweru okwa l'alì ono l'ophu; g'ęphe bya g'e dobe oke ntęke ono onu, bu ntęke, onye eze ono, bu Nebukadineza kpuru dobe ono.

³O buru iya bu le ndu oke-okwa ono abya edzugbua g'a guru phe ono: ndu no-chiru enya eze; me ndu-ishi l'alì ono; me ndu-ishi mgbazi; me ndu edoru eze okpoga; me ndu-ikpe; me ndu-ishi ndu oka-ikpe; mekpoo iphe, bukotakpoo ndu nweru okwa l'alì ono l'ophu; g'ęphe bya g'e dobe oke ntęke ono onu, bu ntęke, onye eze ono, bu Nebukadineza kpuru dobe. Epe bya apfuru l'atatiphu oke ntęke ono.

⁴Onye araję ora bya arashia ya ike su: “Unu gebekwa-o! A suru-a; unube oha l'ophu; unube ndu alì, nonu; me ohamoha, ofu-alì phe dugbaa iche iche;

⁵teke unu numaru oda opu; bya anuma oda ototo; waa oda ogelenda; me k'ogumogu; waa oda une; me k'upyi; mewaro oda iphemiphe ozo, dugbaa nu; unu adaa kpurumu baaru iya eja; mbu oke ntęke mkpola-ododo ono, eze, bu Nebukadineza kpuru dobe ono.

⁶Sụ-a; onye ta adaduru l'alì baa ẹja bẹ ee-chie l'oke ọku, enwu phoophoophoo teke ono teke ono.”

⁷Ọ bụru iya bụ l'anuma, ndu kuru l'ẹka ono nọmaru ọda opu ono; mẹ k'ototo; mẹ ọda ogelenda; mẹ k'ogumogu; mẹ k'une; mẹ k'upyi; mẹ ọda iphemiphe ọzo, dughbaa nù ono; ọha l'ophu; mękpoo ndu alì, nọnu; mẹ ọhamoha, opfu-alì phẹ dughbaa iche iche ono tuko daa kpurumu baaru oke ntekpe ono ẹja, bụ ntekpe, eze, bụ Nebukadineza kpuru.

Ọkpoma, dụ ndu nọ l'ẹka Chileke

⁸No iya; ọ bụru teke ono bẹ o nweru ndu Babilonu, byaru bya epfuahaa iphe, ndu Jiu meru.

⁹Ephe byapfuta Nebukadineza bya asu iya: “Nodukwa ndzu ojejoje; gube eze!”

¹⁰Sụ-a; “Eze; ị turu ekemu sụ g'iphe, bukpuo onye nọmaru ọda opu; bya anuma ọda ototo; waa ọda ogelenda; mẹ k'ogumogu; waa ọda une; mẹ k'upyi; męwaro ọda iphemiphe ọzo, dughbaa nù; daa kpurumu l'alì baaru oke ntekpe ono, e meru lẹ mkpola-ododo ono ẹja.

¹¹L'onye adaduru kpurumu baa ẹja bẹ ee-chie l'oku, enwu phoophoophoo.

¹²Ole ọ dukwanuru ndu Jiu; ndu i yeru g'ephe nodu lẹ mgbazi alì Babilonu; ndu ephe phẹ bụ Sheduraku; yę Mishaku; waa Abedinego; te eyekwaru ngu onu; gube eze! Ephe te ejeduru agwa ngu phẹ ozi; ophu ephe abaduru iphe, i kpuru akpukpu ono ẹja.”

¹³Oo ya bụ; ẹhu ghushiahaa Nebukadineza eghu ikike kpọ. O zia g'e je achitaru iya umadzu ẹto ono, bụ Sheduraku; yę Mishaku; waa Abedinego. A bya achita phẹ bya edobe l'iphu eze.

¹⁴Eze, bụ Nebukadineza sụ phẹ: “Oowaa! Sheduraku; yę Mishaku; waa Abedinego! ? Unu dupho nno l'unu jikaru l'unu te ejeduru agwa mu phẹ ozi; ophu unu abaduru oke ntekpe mu-a, e meru lẹ mkpola-ododo-a ẹja; mbu ntekpe ophu mu gude ẹka mu kpua dobe?

¹⁵Ole-a; teke obu l'unu kwakobewaru nta-a; unu -nunaepho ọda opu; bya anuma ọda ototo; waa ọda ogelenda; mẹ k'ogumogu; waa ọda une; mẹ k'upyi; męwaro ọda iphemiphe ọzo, dughbaa nù; unu -da kpurumu baaru ntekpe-a, mu meru-a ẹja; bẹ ọdushikwa ree ike. Obenu teke unu ta abaduru iya ẹja; l'a parụ unu teke ono teke ono chie l'oku, enwu phoophoophoo. ? Bụ onye bukwanu chi obu, l'a-du ike dzoo unu l'ẹka mu?”

¹⁶Sheduraku; yę Mishaku; waa Abedinego yeeru eze onu sụ iya: “Gube Nebukadineza; opfu ono ta abukwa iphe, anyi e-yeru ngu onu.

¹⁷Ọ -buru l'a chiru anyi ye l'oku-a, l'enwu phoophoophoo-a bẹ Chileke, anyi ejeru ozi a-dukwa-a ike lofuta anyi l'ime iya. Teme o je l'a-dzota anyi l'ẹka gube eze.

¹⁸Teke ọ to dumeka; g'anyi mekwaa ya g'o doo ngu ęnya gube eze; anyi te ejekwaru agwa ngu phẹ ozi; ophu anyi abakwaru oke ntekpe ono, ị kpuru dobe ono ẹja.”

Oke ọku, enwu phoophoophoo

¹⁹ Ẹhu ghushiahaa Nebukadineza egbu ike. O woru iphu gbanwuberu Sheduraku; waa Mishaku; waa Abedinego ẹhuka ẹhuka. O debilihu karu g'e eme ọku ono; g'ọ kabaa ata ririri ugbo ẹsaa eme le g'ọ gbaru g'ọ du.

²⁰ Ọ bya atua ekemu su ge ndu ojoju iya, kachaa okpehu woru egbu kee Sheduraku; waa Mishaku; yee Abedinego chiru ye l'oke ọku ono, enwu phoophoophoo onoya.

²¹ A bya egude ephe n'eto tuko ephe l'uwe mgbalanu phe; me uwe agada phe; mekpoo okpulishi phe; mekpoo uwe ozo, ephe yegbaaru; tuko phe tsukoo chiru ye l'oke ọku ono, enwu phoophoophoo ono.

²² Ekemu ono, eze turu ono dunuka ehuka ehuka; teme ọku obu nwonuka phoophoophoo k'ophu ire iya jikotaru ndu ono, pataru Sheduraku; yee Mishaku; waa Abedinego ono; woru kegbushia.

²³ Umadzu eto ono, e keru egbu ono, bu Sheduraku; yee Mishaku; waa Abedinego tuko buru l'oke ọku ono, enwu phoophoophoo ono ke wuu.

²⁴ G'ejia epfu-a; Nebukadineza kwolihu l'oshi eka o no; eka o humaru iphe, du iya biribiri. O su ndu agbazijeru iya olu: “? To bunu-a umadzu eto be e keru egbu chie l'oku-a?” Ephe su iya: “Ee eze; o kwa iya-a.”

²⁵ Ọ su phe: “Unu lenu! Mu humakwaru umadzu eno, e keduru egbu, aghaphero g'ọ du phe l'ime ọku obu; ophu o dudu iphe, mekaru phe nu. Onye ophu kwe phe eno du ge nwa agwa!”

Nebukadineza ekele Chileke ekele

²⁶ Tobudu iya bu; Nebukadineza bya akpiritaru l'onu oke ọku ono, enwu phoophoophoo ono bya araa ya arara su: “Unube Sheduraku; waa Mishaku; yee Abedinego; unube ndu ejeru Chileke, bu Okalibe-kangokotaru-nu ozi; unu futawaro-o! Unu byawaro l'eka-o!” O buru iya bu le Sheduraku; yee Mishaku waa Abedinego eshi l'oku ono lufuta.

²⁷ Iphe, bukpuo ndu ono, nweru okwa ono; mbu ndu no-chiru enya eze; me ndu-ishi le mkpukpu; me ndu ophu okwa phe tsotaru ndu-ishi le mkpukpu; me ndu mgbazi ibe eze ono g'ephe ha zeru gidigidi bya aso-pee phe mgburugburu. Ephe huma l'oku ta adudu iphe, o meru ndu ono l'ehu; ophu o ketaduru g'ọ ka mma l'oo egbushi phe; ophu o dudu iphe, oku meru uwe phe; ophu ephe eshikpodanu enwuru enwuru.

²⁸ Nebukadineza su: “Mu ekele Chileke ke Sheduraku; waa Mishaku; yee Abedinego ekele; mbu Chileke, yeru ojozi iya; o bya adzota ndu-ozi iya, bu ndu kweru nkiya; woru ekemu, eze turu hua l'ali; bya eworu ishi ndzu phe tua; me o -beta ophu ephe e-woru ozi jeeru; ozoo woru eja baaru iphe ozo, abudu Chileke phe.

²⁹ Nta-a be ekemu mu atu bu; g'oha l'ophu; mekpoo iphe, bukpuo ndu ali, nonu; me ohamoha, opfu-ali phe dugbaa iche iche; onye pfubyiru Chileke ke Sheduraku; waa Mishaku; yee Abedinego; l'egbua onye ono bokashia; woru ulo iya mee ikpozu; noo kele o to dudu iphe ozo, a-du ike adzota nemadzu egube-a, Chileke dzotaru-a!”

³⁰Ọ bụru iya bụ l'eze abya apalia ọkwa Sheduraku; yẹ Mishaku; waa Abedinego; mee pẹ; ẹpẹ kabaa shii l'alị ndu Bábílọnu.

Danẹlu 4

Nrwo k'ẹbo, Nebukadineza rwo

¹Ọwa-a bụ ozi, mube eze, bụ Nebukadineza l'ezi g'e zidzuru ọha l'ophu; mekpoo iphe, bukpo ndu alị, nonu; me ọhamoha, opfu-alị pẹ dugbaa iche iche le mgboko mgburugburu: “G'ehu dukwa unu guu dua k'etsutsu iya!

²“Ootso mube Nebukadineza utso ge mu dooru unu iphe-ohumalenya; me iphe, du biribiri, Chileke, bu Okalibe-kangokotaru-nu meru mu.

³“Iphe-ohumalenya Chileke paru aka. Teme o dukwapho oke ebvu; mbu iphe, du biribiri, oomeje. Eze, o bu be ọo-buru jasu l'ojejeje. O je aburu ishi; e -shi l'ogbo sweru ogbo.

⁴“Su-a; mube Nebukadineza noro tusaru ehulime ulo mu; eku nodu abyaru mu kugbukugbu.

⁵Mu rwo nrwo, mu rwochaaru ndzu guhu mu. Le ge mu ze l'eli iphe-azee mu be iphe, abya mu pho l'oriri; me iphe, mu aphu l'ophulanya yeru mu ebvu.

⁶Ọ bụru iya bu le mu abya atu-a ekemu su g'a tuko ndu maru iphe l'alị ndu Bábílọnu chitaru mu g'ephe koru mu ishi nrwo obu.

⁷O be ge ndu jibya; me ndu emeje omamanshi; me ndu maru enya kpokpode; me ndu karu akaka wuru bya; mu bya ezeeru pẹ nrwo obu; ophu epe adudu ike koru mu iphe, ishi iya bu.

⁸O be l'ikpazu iya; Danẹlu bya abya l'iphe mube eze; mu bya ezeeru iya nrwo obu. Danẹlu ono be a guru Beluteshaza. O buri agwa mube eze be a guru iya ono; teme unme k'agwa ophu du nsọ nodu iya l'ehu.

⁹“Mu su iya: ‘Beluteshaza; onye-ishi ndu jibya. Mu mawaru l'unme k'agwa, du nsọ be du ngu l'ehu; ophu o dudu iphe, e domiru edomi, atsuje ngu l'ehu amaru. Owaa be bu nrwo, mu rwo. Jiko koru mu ro ishi iphe, o bu.

¹⁰Wakwa iphe, mu humaru aka mu ze aze l'iphe-azee mu bu ọwa-a: Mu jeshiaru ele enya; mu huma oshi, pfuru l'echi mgboko gedegede. Oshi obu paa ephekerephe ephekerephe.

¹¹Oshi ono vua bya ajaa ajaja shihu ike shingushingu ko. Eli eli iya je asu-pfuru l'igwe; mgboko l'ophu huma-dzuru iya.

¹²Ekwo iya nodu ama ntumatu; teme o mia deru yekete; mbu le mebyi iya suerupho ndiphe l'ophu eriri. O buri le mkpula iya be anu, bu l'egbudu atukoje nodu; l'ookpuchikota pẹ; enu, epe l'eli bugbaaru l'ekali iya. Iphe, bukpo iphe, e meru dobe le mgboko buri akpuru iya be epe tuku eri.

13“No iya; mu zẹ azẹe l'iphe-azẹe mu ono; mu hũa onye-nche bya abũru onye dũ nsọ. O shiepho l'igwe lufuta.

14O raa ya arara rashia ya ike sũ: “Gbutsua oshi ono egbutsu; koshia ya ekali. Chishia ya ekwo; tukashia akpuru iya nanunanu. G'anũ, kuru iya lẹ mkpula wukashihukwa; enu, bugbaa ya l'ime ephekashihukwapho!

15Obenu l'upfu iya; yele ogbarabvu iya be aa-ha l'ali; ri-phua ya egbirigba-igwè; yee k'onwirubvu; paru iya haa l'eka ono ge yee eswa, no l'egu tua ya. G'iji, shi l'igwe kwaa kpua ya. G'o je ge yele anu-egbudu tua ya l'ime egbudu, du le mgboko.

16G'e wofu iya egomunggo ke nemadzũ; woru egomunggo anu-egbudu woru nu iya. G'o noo egube ono gbiriri jasũ apha esaa awua ya l'eli.

17Ndu turu ekemu-a bu ndu nche; o buru ndu du nsọ suru l'onoo g'oo-du bu onoya. O kwanu iya bu g'iphe, bu ndu no ndu amaru le Okalibe-kangokotaru-nu bu onye ndu eze ndiphe mgburugburu no l'eka; o buru onye Chileke turu obu iya onyo k'anunu iya be oo-nuje iya; m'obeta o buru onye enya kachakpo alwalwa l'unwu-eliphe l'ophu.”

18“Su-a; noo nrwo, mube Nebukadineza rworu bu ono. O buru ge gubedua, bu Beluteshaza kowaro iphe, ishi nrwo ono bu. Noo kele o to dudu me onye lanu le ndu maru iphe l'ali-eze mu, duru ike koru mu iphe, ishi iya bu. Obenu l'ii-du-a ike; kele unme k'agwa ophu du nsọ be no ngu l'ehu.’

Ishi nrwo ono

19“Mu pfuchaa iphe ono; o tufu Danlu ehũ; bya akpo ya opfu. Danlu ono bu onye a guru Beluteshaza. Mu su iya; ‘Beluteshaza; ge nrwo obu; ozo ishi iya ta atufushi ngu ro ehũ egube ono!’ “Beluteshaza su: ‘Nnajiuphu mu; ge nrwo-a vuchiaru ndu i du ashĩ l'enya! G'ishi nrwo ono mechia l'ehu ndu ohogu ngu!

20Gube eze; oshi ono, i hũmaru, vutaru bya ajaa ajajà shihu ike shingushingu kpo ono; eli eli iya je asu-pfuru l'igwe; mgboko l'ophu hũa-dzuru iya;

21ekwo iya nodu ama ntumatu; teme o mia deru yekete; mbu le mebyi iya sũerupho ndiphe l'ophu eriri; o buru le mkpula iya be anu, bu l'egbudu atukoje nodu; l'o kpuchikota phe; nwekwarupho ekali, suru k'ophu enu, ephe l'eli kparũ epfuno l'eli iya.

22Oshi ono bukwa gubedua l'onwongu eze. O kwa gubedua vutaru bya adu okpehu egube ono. O buru udũ ngu vuru vutarwua imigwe ono; i buru eze oha l'ophu jasũ l'eka igwe beru ali beru.

23“Gube eze hũmaru onye-nche, du nsọ, shi l'imigwe futa, byaru bya asu: “Gbutsua oshi ono woru iya mebyishia; ole g'a hakwaa upfu iya g'o bvuru l'ali; ogbarabvu iya akwaa l'ali. G'a ri-phua ya egbirigba-igwè; yee k'onwirubvu. Ge yele eswa, no l'egbudu tua ya. G'iji, shi l'igwe kwaa kpua ya. G'o je ge yele anu-egbudu tua ya l'ime egbudu; gbiriri jasũ apha esaa aghata.”

24“Su-a eze; wakwa ishi iya bu owanawa: O kwa iphe, Chileke, bu Okalibe-kangokotaru-nu suru l'oo-me l'ehu gube nnajiuphu mu, bu eze be i hũmaru ono.

²⁵Aa-chifu ngu l'eka nemadzu anoduje. L'i je gu l'anu-egbudu eburu. L'e mee ngu l'i taahaa eswa g'eswi. Noo eka ii-nodu; iji, shi l'igwe akwaa kpua ngu. L'i noo ya egube ono apha esaa; jasunupho teke ii-maru le Okalibe-kangokotaru-nu bu onye ndu eze ndiphe mgburugburu no l'eka; o buru onye Chileke turu obu iya onyo k'anunu iya be oo nuje iya.

²⁶O buru egube ono, a turu ekemu su g'a haa upfu oshi ono; yee ogbarabvu iya g'o nodu l'ali l'eka ono; bukwapho g'aa-nu-phu ngu ali-eze ngu azu me i -maerupho l'oo Chileke bu eze.

²⁷Oo ya bu le-a; gube eze; kwekwa nata idzu-a, mu abya achiru yeru ngu-a! Watakwa eme iphe, pfuru nhamunha gude haa eme iphe-eji; l'i wata emeru ndu aakpa ehuru ree gude haa ejo-iphe, iimegbabe. G'a maru ? ehuru a-du ngu guu duriberu?" "

Nrwọ Nebukadineza avu

²⁸No iya; e mechaa; iphemiphe onoya mekotaepho l'ehuru Nebukadineza.

²⁹Le g'a nochauerupho onwa iri l'ebo g'o rwochaaru nrwọ ono; o nodu l'oma ulo ibe eze iya, bu l'ulo-eli iya, no l'ali ndu Babilonu; bya atuko oma ulo ono tsoru aghaphe.

³⁰A nonyaa o su: "Unu humawaru ge mkpukpu Babilonu habe shii! O kpoo mbedua gude eka mu kpua ya g'o buru eka mu e-buru eburu. O buru ike du mu nu be mu gude kpua ya; gude goshi g'akpabiri mu habe shii."

³¹O kpukwaduru-a iphe ono l'onu epfu; o numa olu-opfu, e shi l'imigwe pfua su: "Gube eze, bu Nebukadineza; wakwa iphe, a tu-buru l'ehuru ngu baa. Ike, i shi gude buru eze be a nataakwaru ngu!

³²Aa-chifu ngu ge gule amadu ta anohu; g'i je ge gu l'anu-egbudu buru; g'i je ata eswa g'eswi; taa ya nno gbiriri jasunupho apha esaa awua ngu l'ishi; jasunupho teke ii-maru le Okalibe-kangokotaru-nu bu onye ndu eze ndiphe mgburugburu no l'eka; o buru onye Chileke turu obu iya onyo k'anunu iya be oo-nuje iya."

³³Epfupfu, oopfu iya; o nwuaru Nebukadineza g'o pfuru. A chifu Nebukadineza l'eka nemadzu anoduje; chiru iya ye l'egbudu; o je taahaa eswa g'eswi. Iji, shi l'igwe kwaahaa kpuahaa ya l'ehuru. O noo l'egbudu jasunupho egbushi iya hachaeppo loshii loshii g'eba ugo; nvo eka rishichaa ya ge nvo enu.

Izimanu alwa eze azu

³⁴"A nochaeppo apha esaa onoya; mube Nebukadineza nodu l'egbudu eka ono palia enya imeli; egomunggo lwaahaa mu l'oru iya. Mu tuahaa Okalibe-kangokotaru-nu epha; jaahaa ya ajaja; kwabehaa ya ubvu; mbu onye ono, no ndu ojeje onoya. "Ishi, o bu be oo-buru jasunupho l'ojeje. O je aburu eze; e-shi l'ogbo sweru ogbo.

³⁵O to dudu iphe, o guberu nemadzu, no le mgboko mgburugburu. O buru iphe, du iya ree be oomejeru unwu imigwe me ndiphe l'ophu; ophu o dudu onye alo-phu iya eka azu; ophu o buro ke jia ya: "? Bu gunu meru iphe, i meru owa-a?"

³⁶“No iya; egomunggo lwaę mu phọ l'ọru iya; ùbvù, mu shi nweru; mę akpabiri mu ono lwaphutakọtaru mu azu. A wata mu akwabę ùbvù ọzo; g'a kwabeje onye eze. Ndu shi anọduje akpo-ziru mu ọzo; mę ndu a maru ępha phę l'alị-eze mu bya achọo mu huma. A bya eworu ike, mu shi gude buru eze nụ-phu mu azu; nughata g'o shi dụ le mbu.

³⁷Nta-a bę mube Nebukadineza ekele eze k'imigwe ekele; bya akwabę iya ùbvù; bya ekutsekwa iya phọ. Iphemiphe, oome pfuru nhamunha bya adukota ree; ọzo bu le ndu eku onwophe bę ọduje ike kuzeta alị.”

Danęlu 5

Ęka deru iphe l'igbulọ

¹Eze, bu Belushaza bya eshia nri oke ọbo-iphe bya ezia ndu a maru ępha phę l'alị-eze iya unu umadzu labọ l'umadzu ukporo iri. ęphe bya adoru tukọ nguahaa męe.

²A ngunyaepho męe ono; Belushaza karu g'e je achita okoro, e meru le mkpola-ododo; me ke mkpola-ochaa, nna iya, bu Nebukadineza chitaru l'eze-ulo Chileke le Jierusalemu. O zia g'e je achita iya g'ęphe gude ngua męe; yele ndu ono, a maru ępha phę ono; mę unwanyi, ọolu alulu; mę ndu ọphu ọ to ludu ọkpobe alulu.

³E je chitaru iya iphemiphe ono, e meru le mkpola-ododo ono, bu iphe, a chitaru l'eze-ulo Chileke le Jierusalemu; ęphe gude nguahaa męe; mbu yele ndu a maru ępha phę l'alị-eze iya; mę unwanyi, ọolu alulu; mę ndu ọphu ọ to ludu ọkpobe alulu.

⁴ęphe nodu angu męe ono ekele agwa ọphu e meru le mkpola-ododo; mę ke mkpola-ochaa; mę ọphu a kpuru l'onwirubvu; mę ke mgborigwe; mę k'oshi; mę ke mkpuma.

⁵A bya ele ęnya; mkpushi-ęka nemadzu chafuta bya awata ede iphe l'igbulọ; l'iphu ęka oroku suru l'ulo ibe eze l'ęka ono. Eze nodu elekpoeppo ęka nemadzu ono ęnya; ọ nodu ede iphe ono.

⁶Eze gbachihuepho nchi. Ndzu guahaa ya gu-mihu iya; k'ọphu ikpere kugbabecharu iya akugbabe; ọkpa tsukota iya męe.

⁷Eze chishia mkpu su g'e je ekuaru iya ndu emeje omamanshi; mę ndu maru ęnya kpokpode; mę ndu karu akaka. Eze su iphe, bukpo ndu mmamiphe ono, no l'alị Babilonu ono: “Onye duru ike guta iphe-a, e deru l'igbulọ-a bya akọoru mu iphe, ishi iya bu bę ee-ye uwe mgbalanu, du uswe-uswe; l'a bya anyabe iya iyagba, e meru le mkpola-ododo; teme ọ buru iya aburu onye k'eto le ndu kachaa shii, bu phę bu ndu-ishi l'alị-a.”

⁸Ọ buru iya bu l'iphe, bukpo ndu-mmamiphe l'alị-eze ono abata. Ọphu ọ dudu onye duru ike guta iphe, e deru; ọphu ọ dudu onye duru ike kọo iphe, ishi iya bu.

⁹Ndzu kabakpo agu eze; ọ kabaa agbachihu nchi; ọphu ndu ono, a maru ępha phę l'alị-eze iya ono amakpoda iphe, ęphe e-me.

Eze eku Danęlu

¹⁰Eze-nwanyị nūma olu eze; yēe ndu-ishi iya bya abatashia l'ulo ono, a nọ eri nri ọbo-
iphe ono. Ọ bya abata bya asụ: “Gube eze; ge ndzụ ngu bukwaru ojejoje! Ge meji ta
atofukwa ngu! Ophu i gbachihushi nchi dū g'ị dū ono!

¹¹L'alị-eze ngu-a be o nweru onye unme k'agwa ophu dū nsọ bu l'ehu. Teke nna ngu
shi buru eze be onye obu shi egoshije le ya nweru egomunggo; buru onye iphe edoje
enya; bya aburu onye maru iphe. Ọ buephọ le mmamiphe iya ha ge k'agwa. Nna ngu,
bu eze, bu Nebukadineza shi mee ya onye-ishi ndu jibya; me ndu emeje omamanshi;
me ndu maru enya kpokpode; me ndu karu akaka.

¹²Noo kele unme ophu dugharu ree eka nọ iya l'ehu. Iphe nodu edoje iya enya ree;
teme o nweru egomunggo, e gudeje ako iphe, nrwo bu. A -tụa ilu l'ọ koo iphe, e pfuru.
Iphe, atsụ l'ehu l'ọ goshi g'ee-me iya; mbu Danelu. Iphe, eze guru iya bu Beluteshaza.
Oo ya bu; g'e je ekua Danelu g'ọ bya akoo iphe, iphe-a bu.”

¹³E je ekunaa Danelu; ọ bya apfuru l'iphe eze. Eze bya asụ Danelu: “? Ọ kwa l'ị bu
Danelu; onye yi le ndu nna mu, bu eze kpuru le ndzụ eshi l'alị ndu Jiuda?

¹⁴Mu nūmaru údù ngu; l'a sūru l'unme k'agwa ophu dū nsọ nọ ngu l'ehu. A sūru l'ị
kwaru enya; iphe nodu edoje ngu enya; teme i maru okpobe mmamiphe.

¹⁵Ndu mmamiphe me ndu emeje omamanshi be e jewaru ekuaru mu g'ephe bya agwa
iphe-a, e deru l'eka-a; koo iphe, ishi iya bu; ophu ephe adudu ike koo ya.

¹⁶Mu nūma l'iikoje iphe, adudu onye maru iya nu; teme iphe, tufuru ehụ nodu edoje
ngu enya. Oo ya bu le-a; ọ -buru l'ị duru ike gua iphe ono, e deru l'eka ono; kooru mu
iphe, ọ bu; l'e ye ngu uwe-mgbalanu, du uswe-uswe; l'a nyabe ngu iyagba, e gude
mkpola-ododo mee; teme l'ị buru onye k'eto le ndu kachaa shii, bu phe bu ndu-ishi
l'alị-a.”

Ikpe Chileke

¹⁷Tobudu iya bu; Danelu bya eyeeru eze onu su iya: “G'iphe-oma ngu duru ngu ro!
Woruro obunggo, i gege ebu mu bua onye ozo! Ole o to kposhidu ge mu ta aguru
gube eze iphe ono, e deru edede ono. Mu -guchaa ya; mu akooru ngu iphe, e deru obu.

¹⁸“Su-a eze; Chileke, bu Okalibe-kangokotaru-nu meru nna ngu, bu Nebukadineza
eze; bya emee ya; ọ paa eka; bya emee ya; ọ du biribiri; bya adu ubvu l'enya.

¹⁹Eshinu ọ nuru iya okwa, ha shii egube ono; be ọ nuru iya oha l'ophu; me ndu ali,
nonu; teme ndu opfu-ali phe dugbaa iche iche shi anoduje anma pyaapyaapya l'iphe
iya; atsụ iya ebvu. Onye ọ du iya g'ọ gbua l'ọ gbua; onye ọ du iya g'ọ dobe ndzụ; l'ọ
dobe iya ndzụ. Onye ọ du iya g'ọ palia okwa iya l'ọ palia ya; onye ọ du iya g'ọ mee g'ọ
buru onye enya lwaru; l'ọ mee ya.

²⁰O be teke etse etsetse bahuru iya l'obu; o gude eku-onwonye swichia obu; a chifu
iya l'aba-eze; bya anafu iya ubvu, e shi akwabeje iya.

²¹A chifu iya l'eka nemadzu anoduje; bya anu iya egomunggo anu-egbudu. Ephe le
nkafu-igara-oswa je aswajhaa oswi. Ọ taahaa eswa g'eswi; iji mgboko wata iya awu

ḗhu; gbiriri jasú ọ bya amaru lẹ Okalibe-kangokotaru-nú bú onye ndu eze ndiphe mgburugburu nọ l'ẹka; tẹme ọ búru onye Chileke tũru obu iya onyo k'anunu iya bẹ ọonuje iya.

²²“Sú-a; gúbe Belushaza, bú nwa iya bya afúta; bya atúko iphemiphe ono makotaru; ọphu i kuzetakwarupho onwongu.

²³I gbeshi bya asú lẹ gú lẹ Nnajiuphu ọphu bu l'imigwe sũru atũtu. E je achĩtaru ngu okoro l'eze-ulo iya; unu gude nguahaa mee; mbú gú lẹ ndu a maru ẹpha phẹ l'alĩ-eze ngu; mẹ unwanyi, iilu alulu; mẹ ndu ọphu i tĩ ludu ọkpobe alulu. Unu nọdu angu mee ono ekele agwa ọphu e meru lẹ mkpọla-ododo; mẹ kẹ mkpọla-ọchaa; mẹ ọphu a kpuru l'onwirubvu; mẹ kẹ mgborígwè; mẹ k'oshi; mẹ kẹ mkpuma; mbú agwa ọphu ata aphũdu ọzo; ọphu ọonudu iphe; ọphu ọ dudu iphe, ọ maru. Obenu lẹ Chileke ọphu bú iya gude ndzũ unu; tẹme iphemiphe, unu eme búru iya bẹ ọ dú l'ẹka; bẹ unu ta akwabeduru ùbvù.

²⁴Ọo ya ziru mkpũshi-ẹka ono ọ bya edee iphe-a, e deru-a.

²⁵“Waa iphe, e deru baa: MENE; MENE; TEKELU; PERESINU.

²⁶Iphe, ọ bú baa: MENE bú iphe, ọ bú bẹ bú lẹ Chileke gũwaru mbọku, i-bũru eze ọgu; bya emee g'o jeberu nno.

²⁷TEKELU búru iphe, ọ bú bẹ bú l'ọ tũru ngu l'iphe, aatũje iphe; i dapehu.

²⁸PERESU bú iphe, ọ bú bẹ bú l'alĩ-eze ngu bẹ e kehawaru ẹbo; woru nanũ nũ ndu Midiya; bya eworu ọphuu nũ ndu Peshiya.”

²⁹Ọ búru iya bú l'eze, bú Belushaza abya atũa ekemu; a bya achĩta uwe-mgbalanũ ono, dú uswe-uswe ono gude kwaa Danẹlu akwa; a bya achĩta iyagba, e gude mkpọla-ododo mee woru nyabẹ iya. A raa ya arara sũ l'ọo ya búwaa onye k'eto lẹ ndu-ishi l'alĩ-eze ono l'ọphu.

³⁰Ọ búru l'enyashi ono bẹ e gburu eze ndu Bábilonu ono, bú Belushaza.

³¹Dariyosu bú onye Mediya bya abũru eze nọchia ẹnya iya. Teke ono bẹ Dariyosu ono nọwaru ọkporo apha ẹto l'apha labọ.

Danẹlu 6

Ẹjo idzu, a chĩru Danẹlu

¹Eze, bú Dariyosu bya elechaa ẹnya; ọ dú iya ree ememe. Ọ bya ahọta ọkporo ọmadzu ishii bya anuchaa phẹ ọkwa; mbú bya asú g'ọ búru phẹ a-nọdu anọ-chi ẹnya iya l'alĩ-eze iya l'ọphu.

²Ọ bya ahọta ndu-ishi ọmadzu ẹto doberu phẹ; Danẹlu yĩru lẹ ndu k'ono. Ọ búru ọmadzu ẹto ono bẹ ọmadzu ọkporo ishii phọ abyajẹ akọoru iphe, eme l'ibiya ọphu ẹphe bú ishii iya; ọo ya bú g'ọ tọ dú iphe eze ọphu e-te ọkpa.

³Danẹlu ono bya aburu onye kakota ike le ndu no-chiru ẹnya eze; me ndu-ishi phe. Noo kele unme, no iya l'ehu bu unme, kakota shii. Eze meahaa ge ya mee ya onye aburu ishi l'ali-eze ono l'ophu l'ophu.

⁴Tobudu iya bu; ndu no-chiru ẹnya eze; me ndu-ishi phe ono g'ephe ha chọahaa eka ephe a-gbabe okpa chota iphe, ephe a-guru nu Danẹlu l'o meru; ophu o dudu iphe, ephe humaru, o meru. Ophu o dudu mkparwu, ephe humaru iya l'ehu; kele o bu onye e gude ire iya eka; ophu oomedu mkparwu; teme ophu oowedu ozi iya gbegele-gbegele.

⁵O buru iya bu le ndu ono asu: “O to dukwa iphe, anyi byaru ahuma guru nu nwoke-a; gbahaepho l'anyi zoru okpa laa l'ekemu, duru yele Chileke iya.”

⁶No iya; ndu no-chiru ẹnya eze; me ndu-ishi phe ono g'ephe ha bya achia idzu lanu bya ejepfu eze je asu iya: “Gube eze, bu Dariyosu; nodukwa ndzu ojejeje!

⁷Iphe, bukpuo g'a ha buru ndu-ishi l'ali-eze ngu; me ndu-ishi mkpukpu l'anya iya l'anya iya; me ndu no-chiru ẹnya eze; me ndu-ishi mgbazi; me ndu ophu okwa phe tsotaru ndu-ishi mkpukpu tukokwaru g'anyi ha chia idzu su ge gube eze tua ekemu mee ya g'o shihu ike; su g'o to dukwa onye a-rwo Chileke iphe; ozoo agwa; ozoo nemadzu; a -gufukwa gubedua. G'e mee ya nno ukporo abali l'abali iri. Onye meru iya nu g'e chie ya l'ogba oduma.

⁸Eze jiko tua ekemu obu ye eka l'ekwo iya; mee ya meshia ya ike g'o to gbanwe agbanwe, bu iya bu g'ekemu ndu Midiya waa Peshiya aduje, adudu onye agbanweje iya agbanwe.”

⁹Oo ya bu; eze, bu Dariyosu byanu bya atua ekemu; dee ya l'ekwo; bya ebyia eka l'ekwo obu.

Danẹlu l'ime ogba Oduma

¹⁰Danẹlu maerupho l'eze yewaru eka l'ekwo; o bahu l'ulo iya, bu eka e yeru windo l'ulo eli iya; windo ono be gharu iphu l'uzo Jierusalemu. O nodu egbushije ikpere l'ime ulo eka ono pfuru nu Chileke kele iya ekele ugbo eto mboku-mboku, bu iphe, o shi emejhawaa.

¹¹O buru iya bu le ndu ono awuru l'odze je ahuma Danẹlu l'eka oopfu anu Chileke g'o yeru iya eka.

¹²Ephe bya awupfu eze je anyataru iya ekemu iya ono su iya: “Gube eze! ? O kwa l'i yeru eka l'ekwo pfushia ya ike su l'onye rworu agwa; ozoo nemadzu iphe, a -gufukwa gube eze; l'ime ukporo abali l'abali iri-a; g'e chie ya l'ogba oduma?” Eze su: “Iphe, mu pfuru damokwaru ge mu pfuru iya, bu iya bu ekemu ndu Midiya yee Peshiya, adudu onye agbanweje iya agbanwe.”

¹³Ephe pfuru l'iphu eze su: “Danẹlu ono, yi le ndu a kpuru le ndzu l'ali Jiuda ono; ta angakwaru gube eze nchi; ophu ookpakwa ishi ke l'i turu ekemu ye eka l'ekwo; o nodu anodujele-a ekpe ekpere akpo eto mboku-mboku.”

¹⁴Eze nūmaepho iphe ono, ephe epfu ono; iphe ono, o meru ono tūrwa ya ọkpoma. O meahaa g'ọ nafuta Danẹlu. Ọ chọkashia ọzo iya jasụ nchi nọdu abya ejihu; ọphu ọ dudu ọphu meru nū.

¹⁵Ndu ono byakwa awuru l'odze bya ejepfu eze je asụ iya: “Gube eze; nyatakwa g'ekemu ndu Midiya yee ndu Peshiya du; l'eze -tu-buwaa iphe, oo-me; ọzo l'ọ turu ekemu be a taa gbanwejekwa iya agbanwe.”

¹⁶Eze tunaa ekemu; e je egude Danẹlu kpuru bya bya echie l'ogba oduma. Eze sụ Danẹlu: “Jiko ge Chileke ngu onye ibaru aja mkpurumkpuru dzokwaa ngu!”

¹⁷A bya eswita oke mkpuma gude swichia onu ogba obu. Eze bya ebyia ya eka echi-eka iya; bya ebyia ya echi-eka ndu a maru epha phe l'ali-eze iya; g'ọ to du iphe, aagbanwe agbanwe le ndzu Danẹlu.

¹⁸Eze tugba; ọ buru iya ala ibe iya. Ọ nokota enyashi ono; ọphu o riduru nri; ọphu ọ dudu onye kuru nkwa kpengu l'iphu iya k'eeme iya ehu-utso. Ọphu ọ dudu ike kuru mgbanya.

¹⁹Swichechero; eze kwoliu gbaru oso je l'onu ogba oduma ono.

²⁰Ọ byarwutaepho ogba ono, e chieru Danẹlu ono ntse; o gude olu aphu chia mkpu sụ Danẹlu: “Gube Danẹlu; onye-ozu Chileke ọphu dzu ndzu! Chileke ngu ono, ibaru aja mboku-mboku ono; ? ọ duru-a ike dzoo ngu l'eka oduma?”

²¹Danẹlu sụ eze: “Gube eze; nodukwa ndzu ojeje!”

²²Chileke mu yekwaru ojozi iya; ọ bya apyichishia oduma eka l'onu; ọphu ọ dudu ọphu kpakporu mu nu me nvo; kele ọ to dudu iphe, oo-su le mu mejeru iya; ọphu ọ dudu iphe, mu mejeru gube eze.”

²³Ehu gbẹ teke ono tsahaa eze utso; tsoshiahaa ya ike. Ọ karu sụ g'e kufuta Danẹlu l'ogba ono. A bya ekufuta Danẹlu l'ogba obu; ọphu ọ dudu iphe, laru iya me nvo; kele Danẹlu dakobeerupho Chileke iya.

²⁴Eze tua ekemu; e je achita ndu ono, gbapheru Danẹlu ono; bya achiru ye l'ogba oduma; me unwu phe; me unyomu phe. Ọphu oduma ono ekwekpodanu g'ephe rwua ohu ogba ono. Ọ wochaa phe kpokokongu; labushia anu phe; gwechaa okpu phe yogiri yogiri.

Dariyosu ekweta le Chileke Danẹlu bu iphe

²⁵Tobudu iya bu; eze, bu Dariyosu bya edeeru oha l'ophu ekwo; bya edeeru ndu ali, nonu; mekpoo ohamoha; opfu-ali phe dugbaa iche iche l'ali ono mgburugburu su: “G'ehu dukwa unu guu dua k'etsutsu iya!”

²⁶“Nta be mu turu ekemu su-a: ‘G'onymonye no l'ekameka l'ali-eze mu-a l'ophu l'ophu tsukotajekwa Chileke Danẹlu ebvu; kwabe iya ubvu! “‘Noo kele oo ya bu Chileke ọphu dzu ndzu; bya aburu Chileke, a-nodu jasụ l'ojeje. Ali-eze iya ta adudu onye byaru emebyi iya emebyi. Ọ buru iya a-buru eze jasụ l'ikpazu.

²⁷Oonafutaje nemadzu; teme o nodu abujeru nemadzu ogbata. Oomeje ohumalenya; bya emekwapho iphe, du biribiri l'imigwe me l'eliphe. O dzotaru Danelu l'eka oduma.'

²⁸Oo ya bu; upete gbakpoerupho Danelu teke ono, Dariyosu bu eze; ye teke Sayirosu, bu onye Peshiya bukwapho eze.

Danelu 7

Danelu aphu ophuleny

¹O be l'apha mbu, Belushaza bu eze ndu Babilonu; Danelu bya arwo nrwo; teme o buhukwarupho ophuleny, byaru iya l'ishi l'eka o ze aze eku mgbenya. O gbeshi bya atukoephophemiphe ono, o rworu le nrwo ono dekota l'ekwo.

²Waa iphe, Danelu ono pfuru baa: Mu aphu ophuleny l'enyashi; mu bya ele enya; mu huma pherephere, shi l'uzo eno, du l'igwe l'eka oswo-re l'oke eze-enyimu.

³Oke anu eno, adudu ophu ye ibe iya gba nanu shi l'ime eze-enyimu ono nyifutagbaa.

⁴'Ke mbu du g'oduma; ole o nwegbaar nku, dugbaa ge k'ugo. Mu nodu elekpoe ya pho enya. A bya akwashia ya nku ono. A bya apalia ya l'ali pfube apfube. O gude okpa labo pfuru ge nemadzu. A bya eworu obu nemadzu ye iya l'ime.

⁵'Anu k'ebo pfukwaru mu pho l'iphu. Ono du g'ejo anu-egbudu, bu biye. A bya apalia yebdua mgbureku lanu. Egara-iphe du eto ghashihu iya l'onu; phachaa iya apharu l'eze. A su iya: 'Gbalihu; taa anu, ha shii!'

⁶'Ono bvuchaa; mu jeshia ele enya; anu ozo pfuwaru mu l'iphu. Ono du g'agu. Ole o beru l'okpurukpu iya; o fua nku eno, dukotaepho ge nku enu. Anu k'ogiya-a nweru ishi eno; teme o buru iya be a nuru ike g'o buru ishi.

⁷'E mechaa ono; l'ophuleny ono, mu aphu l'enyashi ono kpoekwapho; mu jeshia ele enya; anu ophu kwe iya eno pfuwaru mu l'iphu. Ono nodu anyi ishi edzu; teme o nodu eye ebvu; teme okpehu paa ya aka. Eze iya dugbaa ke phengara-phengara bya adugbaa g'igwe. O nodu avuje anu onye o bu ye ya kpatakpata; gude okpa zoo ophu phoduru nu pyakapyaka. Ono te eyetakpodaru ndu ophuu ililekpoo; teme yebdua nweru mpu iri.

⁸'Mu nodu arikwadu ke mpu ono; o nodu mu l'iphu futa mpu ozo, ha nwanshi. O buru l'echilabo mpu ono g'o ha be o futaru. Mpu eto shi le ke mbu pho nwofu l'iphu iya. Nwa mpu nshii ono fua enya, du ge ke nemadzu; bya efua onu, etu onwiya epha.

⁹'Mu nodu elekpoe kwapho enya: "A bya eworu aba-eze bvube. Onye ono, bu O-shi-l'ichee bya asugaru iya. Uwe iya nodu acha pemu pemu g'aka-mini-sunoo. Egbushi, no iya l'ishi nodu acha phuuphuu g'aji aturu ochaa. Oku nodu enwu phoophoophoo l'aba-eze iya ono. Mbu okpa aba-eze ono bukotaru oku, enwu enwunwu.

¹⁰Oku nodu aso gborogboro ge nggele shi iya l'iphu asofuta. Unubuku nodu ejeru iya ozi. Unu iri ugbo unu iri ozo pfuru iya l'iphu. A bya anozia k'ikpe; a bya ekpuhashia ekwo.

11“Mu nọdu elekpọekwapho; eshinu nwampu phọ etukpọekwapho onwiya ẹpha; mu nọdu elekpọepho ẹnya jasụ e woru anụ ono phua; bya eworu ogwe iya mebyishia woru chie l'ọku ono, enwu phoophoophoo ono.

12A natachaa anụ ọphuu g'ẹphe ha alị-eze pẹ; ọle a hakwanuru pẹ g'ẹphe dzuru ndzu kpọbaa nwupfu.

13“Mu nọdu aphụ ọphulenyia l'enyashi ono; mu jeshia ele ẹnya; ọ dūwaru onye ọphu, dūepho gẹ Nwa ndiphe, gude urwukpu shi l'igwe eje abya. Ọ bya abyarwuta l'iphu O-shi-l'ichee ono; e duru iya durwua ẹka ono gẹdegede.

14E mee g'o nweru alị-eze; bya adu biribiri l'ẹnya; tẹme emee ya ọ buru eze. Oha l'ophu; mẹ ndu alị, nonu; mẹ onyemonye, shi l'ọhamoha, opfu-alị pẹ dūgbaa iche iche nọdu abaru iya ẹja. Alị-eze iya dūepho jasụ l'ojejoje; ọphu ọ byadu l'abvu abvubvu ophu; ọphu uswe-ẹka ọ bu eze abudu ẹgube iya ọphu ee-mebyi emebyi.”

Iphe, nrwọ ono bu

15“Tọbudu iya bu; ọ bya atsuhaa mube Danlu l'ehu. Ọphulenyia ono, mu aphụ ono nọdu agbakashi mu ehụ.

16Mu bya ejepfu onye lanu l'ime ndu pfuru l'eka ono je asu iya g'ọ kọeshikwaru mu iphe, iphe ono bukpuo abubu. “Ọ bya epfuaru mu iya; bya akọoru mu iphe, bu ishi iphemiphe ono.

17Ọ su mu lẹ-a: ‘Oke anu ẹno ono bu ndu eze ẹno, l'e-mechaa du l'eliphe-a.

18Obenu lẹ kẹ Okalibe-kangokotaru-nu l'e-mechaa natachaa alị-eze ono nwowaruro jasụ l'ojejoje; mbu l'ọo-nọduwa iya ro l'eka jasụ lẹ tuutuutu lẹ mijimiimii.’

19“Mu meahaa gẹ mu maru iphe, anu k'eno ono bukpuo abubu, bu ọphu eyetakpodaru ndu ọphuu ililekpoo; tẹme ọ nọdu anyi ishi edzu; anu ọphu nweru eze, e meru l'igwe; nvọ iya buru onyirubvu; anu ọphu ataje onye ọ bu yee ya pyaapya taa tafu; gude okpa zọo ọphu phoduru nu tolitoli.

20Mu mekwapho gẹ mu maru kẹ mpu iri ono, du iya l'ishi ono; yee kẹ nwampu ọphu nonyaaru nu bya akpofuta; mpu eto lẹ ndu ọphu dūhawaanu nwoshihu iya l'ataphu; mpu ọphu nweru ẹnya bya enweru onu, etu onwiya ẹpha; tẹme ọ kachaa nwibe iya akpabiri.

21Mpu ono be mu elekpọepho ẹnya; ọ nọdu etso ọgu bya alwu-kpee pẹ pho;

22jasu O-shi-l'ichee rwua bya eworu ikpe bua; haaru ndu-nsọ kẹ Okalibe-kangokotaru-nu enge. Ọ buru teke ono be ndu-nsọ byaru bya atuko alị-eze l'ophu nwokotaru.

23“No iya; ọ buru iphe, o pfuru iya baa: ‘Anu k'eno ono bukwa alị-eze k'eno, l'emechaa du l'eliphe. Ono taa dudu g'alị-eze ndu ọphuu ililekpoo. Eliphe mgburugburu be ọo-vu kpatakpata; zọo ya tolitoli; gwee ya uji.

²⁴Mpu iri ono bu uzi umadzu iri, a-buchaaru eze l'ime ali-eze lanu ono. Ephe -buchaa eze; onye eze ozo abata l'okwa. Onye k'ono taa dudu ge ndu ophu. Yebedua a-lwukpe ndu eze eto.

²⁵Oo-nodu epfutoshi Okalibe-kangokotaru-nu; teme l'ookpakwapho eh. L'o kukebechaa eh eme ge ya e-me gbanwee mboku; bya agbanwee ekemu. L'a paru haa ya l'eka ugbo lanu; yee ugbo labo; waa mkpirikpu iya.

²⁶E -mechaa l'a bya anozia k'ikpe; l'a bya anata iya ike iya ono mebyishia. Ike taa dubaedu iya jasu l'ojejeje.

²⁷Tobudu iya bu l'a bya eworu ali-eze ono; me okwa-eze; yee akpabiri ali-eze, nokota l'eliphe l'ophu woru ye ndu-nsa l'eka; mbu ndu ono, bu phe bu ndibe onye ono bu Okalibe-kangokotaru-nu ono. Onye ono be abubu, o bu eze l'a-no ojejeje; teme iphe, bukpo ndu bukota ishi a-nodu abaru iya eja emekwapho iphe, o pfuru.'

²⁸"Noo eka iphe obu jeberu bu onoya. Mbdua, bu Danelu rie ya pho l'oriri; meji nodu atofue mu pho mebyi atofu. Mu gbachishihuchaa nchi. Mu woerupho iphemiphe ono suchia l'ime okpoma mu."

Danelu 8

Danelu ahuma ebili yee mkpi l'ophuleny

¹O be l'apha, kwe Belushaza apha eto, o shi butaru eze ndu Babilonu; mube Danelu byakwa bya apua ophuleny yekwaru ophu mu puhawaru.

²Mu bya ele enya l'ophuleny ono; mu noduwaa le Susa, bu ishi mkpukpu, no l'ali ndu Elamu. O buru eka mu no l'ophuleny ono bu le mgboru nggele Ulayi.

³Mu bya apalia enya jeshia elele; ebili, furu mpu labo, pfuwaru mu l'iphu. O pfuwaru l'aguga nggele ono; mpu iya duchaa ke phengara-phengara. Mpu ono nanu ka nwibe ya shii l'ogologo; teme o buru ono ka ogologo ono futakperu azu.

⁴Mu nodu elekpoepho ebili ono enya. O nodu eme ena. O -pfuru laa l'uzo enyanwuariba; l'o pfuru laa l'uzo isheli; pfuru laa l'uzo ndohali. Ophu o dudu anu, duru ike kpafu iya l'iphu; ophu o dudu ophu a-du ike anafu iya iphe, o gude. O buerupho iphe, du iya ree be oomeje; teme o paa eka apaa.

⁵Noo ya bu; mu gudekwadu-a aru k'ono; a bya ele enya; mkpi shiepho l'uzo enyanwuariba chafuta; tukoepho mgboko l'ophu awugha awugha ke wugelengu-wugelengu; ophu okpa erwudu iya ali. Mkpi obu fua mpu, ha shii; mbu woru mpu fua le mgbaka enya iya.

⁶O byatashia ebili mpu labo pho l'iphu; mbu ophu mu shi huma, pfuru l'aguga nggele pho. O nodu aba mba ehuka ehuka eje abyapfuta iya.

⁷Mu huma g'o wataru etso ebili ono ugu ehuka ehuka. O nodu echije ebili ono o-chi-too gude nno chifuchaa ya mpu labo onoya. Ophu ike apfuru ge yee ya l'wua ugu aduedu ebili ono. Mkpi ono tsuta iya togbo l'ali zoo ya tolitoli. Ophu o dudu onye duru ike dzofu ebili ono l'eka iya.

⁸Mkpi ono bya apaa igiri igiri. Igiri iya ono panukaepho eka; a ku-kwofu eze mpu iya ono. Mpu eno ozo, ha shii byaepho bya efuta l'eka eze mpu lanu pho shi du pho. Mpu ono ephen'eno chikotachaaru onu ghagbaa l'uzo eka pherephere shigbaa uzo eno, shi ligwe.

⁹A nonyaa; mpu ono nanu bya efuta nwampu nshii ozo. Nwampu nshii ono nonyaa bya apaa eka; bya evuru lashia uzo ndohali; vukwaa shia uzo enyanwu-awawa bya evukwapho shia uzo ali oma ono.

¹⁰O vua gbiriri jasu o tuko ikpoto iphe, no l'imigwe rwudzuru. O haru igwerigwe kpokpode dukoshia; o dashihu l'ali; o zokota iya tolitoli.

¹¹O bya ekutse onwiya ge ya ha g'onye-ishi iphemiphe ono. O nata iya ngweja, aanoduje egwe anu iya mboku-mboku; bya emee ulo-nsu iya ophu ooreedu ire.

¹²O buru atupya Chileke meru g'o gude a chiru ikpoto ndu-nsu nu iya; bya anukwa iya pho ngweja, eegweje mboku-mboku. Iphe, bukpuo iphemiphe, oome nodu agbaru iya upete. E woru ire-lanu hua l'ali.

¹³Tobudu iya bu; mu bya anuma olu-opfu, onye du nsu epfu. O gude iya epfufu; Onye Nsu ozo su iya: “? Oo-nobekpooru ino-beagha teme ophulenyaa-a avua; mbu ophulenyaa ke ngweja, aanu mboku-mboku-a; yee k'atupya, l'akpata ola-l'iswi-a; yee k'eworu ulo-nsu haaru iya-a; yee k'ikpoto ndu-a, aa-zo tolitoli-a?”

¹⁴O su mu: “Nchi e-jihukwa bohu unu mgbo ise l'ukporo mgbo iri l'ise l'o buru iya bu l'e wophubaa ulo-nsu ono azu g'o dubaa nsu ozobaa.”

Aako iphe ophulenyaa Danelu ono bu

¹⁵O be ge mube Danelu nokpoepho elekpoepho iphe ono, mu aphu l'ophulenyaa ono; bya arikpoepho g'oo-me doo mu enya; mu bya ele enya; a pfuwaru mu l'iphu. Onye obu duepho ge nemadzu.

¹⁶Mu numa olu-opfu nemadzu. Eka o no epfu opfu obu buru l'aguga nggele Ulayi. O kua oku su: “Geburelu-e! Mee ge nwoke ono maru iphe ono, ophu l'ophulenyaa ono-o!”

¹⁷O byarwutashia eka ono, mu pfuru ono; ndzu guahaa mu. Mu dabyierupho dzuladzula. O su mu: “Nwa ndiphe. Ophu e-do ngu enya bu l'ophulenyaa-a bukwa iphe, e-me teke ikpazu.”

¹⁸O gudekwadu-a opfu ono l'eka epfu eyeru mu; oke mgbenya tu mu; mu zee woru iphu kpube l'ali. O bya edenyi mu eka bya ekulia mu pfube apfube;

¹⁹bya asu: “Ge mu bya epfuaru ngu iphe, e-me l'iphu; iphe, e-me teke ehu e-ghu Chileke oke eghu; kele ophulenyaa-a bukwa iphe, e-me teke e dobewaru edobe le teke ikpazu.

²⁰Ebili mpu labo ono, i humaru ono bu ndu o no-chiru enya phe bu eze ndu Midiya yee Peshiya.

- ²¹Mkpi ono buru eze ndu Gurisu. Oke mpu ono, o furu le mgbaka enya iya ono buru onye eze k'ivuzo.
- ²²Mpu eno ono, futarunu teke ophuu nwofuru pho bu ali-eze eno, e-mechaa shi l'oha ono pfukata; ole ike phe taa haduru.
- ²³“Okwa eze phe -bvuepho, bu iya bu teke ndu ntupya ono e-meebewaa ike phe; noo teke onye eze ozo a-bata l'okwa. Onye k'ono be iphu a-gba igiri igiri; teme l'o buru onye opfu-ephuphu edoje enya.
- ²⁴Yebedua be okpehu a-du; ole o to budu yebedua a-nodu ange onwiya ike. G'oo-gudeje emebyishi iphe a-du biribiri. Iphemiphe, o tuberu ememe l'oojehuru iya; ophu o dudu iphe, o too nwudu ememe; l'o tuko ndu ike du mebyishia; bya emebyishikwapho ndu duru Chileke nsu.
- ²⁵Ughoshi be oo-me g'o nodu aka shii. L'o woru onwiya dobe l'onye kakota shii. Teke ono, oo-me ge ndiphe ria le nchi duwaa doo ono bu teke oo-mebyishi ikpoto nemadzu; je apfuru pfu-chia enya Onye-ishi iphe, bu ndu-ishi l'ophu. Ole ee-mechakwaa mebyia ya; obenu l'o to budu l'ike ke nemadzu be oo-shi.
- ²⁶“A bya l'ophulanya ophu i phuru; ke nchi ejihu waa nchi abohu; onoya bukwapho eviya. Ole o bu; byabekwadu ono iphe; kele teke onoya e-me dukwadu enya shii.”
- ²⁷Noo ya; e mechaa ike bya avukota mube Danelu. O mee mu iphe-ememe ujiku olemole. Mu nonyakwaa bya agbalihukwa bya awata ejeru eze ozi, mu ejeru iya. Ophulanya ono nyia mu ishi edzu; kele o to doduru mu enya.

Danelu 9

Danelu epfu anu Chileke

- ¹O rwua l'apha, kwe Dariyosu nwa Kuzakusesu apha lanu; Dariyosu ono bu onye Midiya, e meru eze l'ali-eze ndu Babilonu l'ophu;
- ²o buru apha mbu, o bahuru l'okwa-eze iya be mbedua, bu Danelu guru iphe, e deru l'ekwo opfu Chileke; o doo mu enya; mbu opfu, Nnajiuphu pfuru nu onye mpfuchiru iya ono, bu Jieremaya; su iya le Jierusalemu a-dabyiru buru ochobu noo ukporo apha eto l'apha iri.
- ³No iya; mu byanu aghaaruu Nnajiuphu, bu Chileke iphu bya epfuahaa nuahaa ya; rwahahaa ya arworwo; aswi egu epfu iya; yee uwe-aphu; woru ntu kpua onwomu.
- ⁴Mu pfuru nu Chipfu, bu Chileke mu; bya epfushiaru iya iphe-aji mu su iya: “Gube Nnajiuphu, bu Chileke, paru aka bya adu ebvu; gube onye edobeje ogbandzu nyemobu gu le ndu yeru ngu obu bya emeje iphe, i karu g'e meje.
- ⁵Anyi meakwaru iphe-aji; bya emeswewaa iphe. Anyi bu ndu ejo-iphe bya aburu ndu kwefuru ngu ike. Anyi te emejeedu iphe, i karu su g'e meje; ophu anyi edobejedu iphe, i kperu l'ikpe.

⁶Anyi ta angabēduru nchị l'olu ndu-ozì ngu phẹ, bụ ndu mpfuchìru ngu; mbụ ndu gude ẹpha ngu pfua opfu nù ndu bụ eze anyi phẹ; mẹ ndu-ishi anyi; mẹ ndu bụ nna anyi phẹ; mẹ ndu alị anyi g'ẹphe hakọta.

⁷“Nnajiuphu, ị bụ onye p̄f̄uberekoto; obenu ẹ g'ọ d̄ụ n̄tanu-a bẹ iphere jiru anyi iphu; mbụ anyibe ndu Jiuda; mẹ ndu Jierúsalem̄u; mẹ ndu Ízurelu l'op̄hu; ndu op̄hu nọ ụzenya; mẹ ndu op̄hu nọ ntse; ndu nọkpoo l'ip̄he, b̄ukotakpoo ohamoha ono, ị chiru anyi t̄ukaa nanun̄anu; opfu l'anyi te ekwedu g'e gude ire anyi ẹka ono.

⁸Ḡube Chipfu; anyibedua; mẹ ndu eze anyi; mẹ ndu-ishi anyi; mẹ ndu bụ nna anyi phẹ bẹ iphere jiakwaru iphu; kele anyi mewaru ngu ip̄he-ẹji.

⁹Nnajiuphu, bụ Chileke anyi bụ onye aphuje obu-imemini; bya aburu onye aguje nvu; m'obetachakp̄ooru anyi kwefuru iya ike.

¹⁰Anyi te emejeedu ip̄he, Chipfu, bụ Chileke anyi s̄uru g'anyi meje; op̄hu anyi edobeēduru ekemu ono, ọ t̄uru ndu-ozì iya, bụ ndu mpfuchìru; ẹphe woru nù anyi ono.

¹¹Ndu Ízurelu l'op̄hu mebyik̄otawaru ekemu ngu; bya aghawaru ngu azu; op̄hu ẹphe emejeedu ip̄he, ị s̄uru g'ẹphe mee. “Noo g'o gude onu, a t̄uru; yee ikpe, e riru nte kpebua, e dek̄otaru ẹ Ekemu M̄osisu, bụ onye-ozì Chileke t̄uko buru ip̄he, e kpuberu anyi l'ishi; opfu l'anyi mewaru ngu ip̄he-ẹji.

¹²Ip̄he ono, e pfuru l'oo-me anyi ono; mẹ op̄hu a s̄uru l'oo-me ndu-ishi anyi phẹ bẹ mek̄otawaru anyi; kele ị mewaru g'eze ip̄he-ẹhuka dapfuta anyi. O toko d̄ụ-swee ip̄he, e mejeru ẹ mkpula igwe-a l'op̄hu l'op̄hu, ha g'op̄hu e mewaru ndu Jierúsalem̄u.

¹³Ọ b̄uepho g'e deru iya l'ekwo ekemu M̄osisu b̄uepho g'eze ip̄he-ẹhuka ono dapfutak̄otaru anyi; op̄hu anyi ahaduru ip̄he-ẹji anyi ngabẹ nchị l'ip̄he, bụ ire-lan̄u nkengu; shi nno chokwanaa Chipfu, bụ Chileke anyi g'o meeru anyi eze-ip̄he-oma.

¹⁴Oo ya bụ; Chipfu menaa ẹgwegwa parụ eze ip̄he-ẹhuka ono haa; ọ dapfuta anyi; noo kele Chipfu, bụ Chileke anyi bụ onye p̄f̄uberekoto l'ip̄hemip̄he, oome; obenu l'anyi te emeduru ip̄he, ọ s̄uru g'anyi mee.

¹⁵“Nta-a kwanu; ḡube Nnajiuphu, bụ Chileke anyi, bụ onye gude okpehu dufuta ndibe ngu l'alị Ijiputu; mbụ ḡube onye meru; a maru ẹpha ngu byasu n̄tanu-a; anyi mewaru ip̄he-ẹji; anyi meswewaru.

¹⁶Ḡube Nnajiuphu: eshinu ị b̄uhakpowaa onye emeje ip̄he, pfuru oto; g'ẹhu ghubuhunu ngu eghu; v̄ubuhunuru ndu Jierúsalem̄u ovuma; mbụ mkp̄ukpu ngu onoya; mbụ úbvú ngu ono, d̄ụ nsọ ono. Ip̄he-ẹji, anyi meru; m̄ekpoo ẹjo-ip̄he, nna anyi phẹ meru mewaru ndu Jierúsalem̄u; yee ndibe ngu; ẹphe buru ip̄he, ndu n̄oru anyi mgburugburu gude achị ochi.

¹⁷“Nta-a; Chileke anyi; numanu ep̄fup̄fu, mu ep̄fu anu ngu; yee arw̄orwo, m̄ube onye-ozì ngu arw̄o ngu. Ḡube Nnajiuphu; menaa g'iph̄óró, shi ngu l'at̄at̄ip̄hu duru eze-ulo ngu ono, dab̄yiru ip̄horu ono g'ẹpha ngu ap̄furu.

¹⁸Gùbe Chileke; ngabènu nchì nùma; sanaa ẹnya hùma gẹ mkpùkpù ono, a gùru ẹpha ngu ono dabyiru bùru ochobu. Iphe, anyi gude arwọ ngu iphe-a ta abùkwa l'anyi bù ndu pfulèrekoto; ọ bùchikwaa l'ọo l'ì phùnukaru obu-imemini.

¹⁹Gùbe Nnajiuphu; ngabènu nchì! Gùbe Nnajiuphu; gùnaa nvù! Gùbe Nnajiuphu; nùmanu anùma; mee ememe! Ọ kwa g'ẹpha ngu apfùru! Gùbe Chileke mu; apfùshinu upfu; kẹle mkpùkpù ngu ono; mẹ ndibe ngu ono bùkwa ẹpha ngu bẹ a guwaru phe!”

Èsaa ẹsaa uzi ụkpọrọ ẹto l'iri

²⁰Teke ono, mu epfu anù Chileke; epfushiru iya iphe-ẹji, mu meru; mẹe ọphu ndibe anyi, bù ndu Ízurelu meru ono; mbù arwọ Chipfu, bù Chileke mu l'iswi ẹhu úbvú iya ono, bù úbvú dù nsọ ono;

²¹bẹ Geburelu; mbù nwoke ono, mu phujehawaru l'ophulenyà ono; zierupho phaa nzi lanù byapfuta mu. Teke ọ byaru bù l'uzenyashi l'ẹgube teke aagwajẹ Chileke l'uzenyashi.

²²Ọ bya akaru mu sù mu-a: “Danẹlu; iphe, mu byaru bùkwa gẹ mu mee g'ì kwaa ẹnya; yẹe g'iphe doo ngu ẹnya.

²³Ọ kwarọ teke ono, ì watarù epfu anù Chileke ono bẹ Chileke meru ngu iphe, ì sùru g'e meeru ngu, bù iya bù iphe, mu byaru gẹ mu pfularu ngu; kẹle ì bù onye aakwabe ùbvù, parù ẹka. Ọo ya bù g'ì rìkwaa ozi-a arìri; l'o dokwaa ngu phọ ẹnya mbù ophulenyà-a:

²⁴“Ugbo ẹsaa ẹsaa ugbo ụkpọrọ ẹto l'iri bẹ a tọwaru ọkpa iya doberu ndibe ngu; yẹe mkpùkpù ngu ono, dù nsọ ono g'e mee g'ẹphe tųpya-buhu ntųpya; mee iphe-ẹji meghee; g'e doshia ẹjo-iphe, ẹphe meshiru; wobata apfulèkoto ọphu a-dù ojejoje; woru iphe-ọhubama mee l'ophulenyà yẹe mpfuchiru; woru manù wù l'iphe, kakọta adù nsọ.

²⁵“Ọwa-a bù iphe, ìi-maru; yẹe iphe, e-do ngu ẹnya: E -shi teke ono, a tọru ọkpa sù g'e mee Jierúsalemù g'ọ dù g'o shi dù; g'a kpù-phu iya azu; gbiriri jasù teke k'onye ono, a wùru manù l'ishi ono; mbù onye ono, bù onye-ishi ono, a-byanù ono; bẹ a-bùru ugbo ẹsaa ẹsaa ugbo ẹsaa; yẹe ẹsaa ẹsaa ugbo ụkpọrọ ẹto l'ẹbo. Teke ono bẹ aa-kpù-phu iya azu; tọo ya oji; tųa ya owere; ọle ọo-bùru teke aa-nọdu eje iphe-ẹhuka.

²⁶Teke ugbo ẹsaa ẹsaa ugbo ụkpọrọ ẹto l'ẹbo ono bvuerupho; l'e gbua Onye ono, a wùru manù l'ishi ono; ọ tọo dùedu iphe, oo-nwekwaduru. Ndibe onye-ishi ono, a-byanù ono; abya emebyishia mkpùkpù ono; yẹe ọlo ono, dù nsọ ono. Ọ bùru teke ono bẹ mbọku ikpazù ono a-bya g'utso. Aa-lwùepho ọgu jasù l'ikpazù; mbù l'ọla-l'iswi bẹ a tų-buwaru dobe l'ọo-dù.

²⁷Yẹbedua bẹ yẹe ndu dù igwerigwe a-gba ndzù, shihuru ike l'ime ugbo ẹsaa ono nanù; ọle ugbo ẹsaa ono -jẹbeerupho l'echi l'o buchia agwa iphe; yẹe ngweja. Onye mmebyi abya; bya eworu ẹjo ahuma dobe gbiriri jasù teke ee-mebyishi iya l'ophu, bù iya bù iphe, a tuburu l'ee-mechaa mee onye mmebyi ono.”

Danẹlu 10

Danẹlu ahuma ojozi-imigwe l'ophulenyaa

- ¹O be l'apha, kwe Sayirosu, eze ndu Peshiya apha ẹto, ọ bahuru l'okwa-eze iya; Danẹlu phaa ophulenyaa. Danẹlu ono bu iya bu onye ophu e shi ekuje Beluteshaza. Iphe ono, ọ phuru l'ophulenyaa ono buru iphe, e-me ememe bya aburu iphe, egoshi l'ogu a-du. Ozi ono bya edoo ya ẹnya; teme e mekwaapho g'iphe ono, ophu l'ophulenyaa ono doo ya ẹnya.
- ²Lẹ teke ono be mube Danẹlu no l'aphu-aphu idzu ẹto.
- ³Ophu mu erijedu udu nri, guru mu nu. Ophu anu; ozoo mee ekpuduru mu onu; ophu mu ewotaduru manu-anyinyi nyia l'ehu; gbiriri jasu idzu-mbekee ẹto ono bvụ.
- ⁴O be g'onwa mbu du l'abali ukporo l'eno; mu pfuru l'aguga Eze Enyimu ono, bu enyimu Tigrisu.
- ⁵Mu jeshia apali ẹnya; nwoke lanu pfuwaru mu l'iphu. O yee uwe ocha. O buru akpo, e gude mkpola-ododo, kakota ree mee be o gude tu-buta uwe iya l'upfu.
- ⁶Akpo ẹhu iya nodu akwo murumuru ge mkpuma-kirisdayitu; iphu nodu acha iya ke phuuphuu g'ebemu-igwe; ẹnya iya ephenebo nodu achakota iya vaavaa g'oku, enwu enwunwu. Oshi-eka iya yee oshi-okpa iya duchaa swawara swawara g'onwirubvu, a hucharu ahucha. Olu-opfu iya nodu ada g'opfu, a du igwerigwe epfu.
- ⁷Noo ya; ọ buerupho mube Danẹlu phuru ophulenyaa ono kpoloko. Ophu ndu mu l'ephe no ahumaduru iya. Ole ndzu-agugu guderu phe; k'opfu ephe gbalaru je edomia onwophe.
- ⁸Mu noduepho nwekinyi mu; tabekpoephe ẹnya l'oke ophulenyaa ono, mu aphu ono. Nkwo tsushikota mu mee; iphu jikputechaa mu ejikpute g'odzu. Ike bvuebekota mu.
- ⁹Mu bya anuma eka o pfuru opfu yeru mu. Mu nganyaa nchi l'opfu iya; mu woru iphu kpube l'ali. Oke mgbenya tu mu.
- ¹⁰A bya edenyi mube Danẹlu eka; kulia mu pfube; eka mu ephenebo yee ikpere okpa mu toko phuhu mu kparikpari.
- ¹¹O su mu: “Gube Danẹlu; onye aakwabe ubvu, paru eka; tokwa nwehu togbo nchi numa opfu-a, mu abya epfuru nu ngu-a. Ozo bu g'i gbeshi pfuru apfuru; kele ọ bukpo ezizi be e ziru mu ge mu byapfuta ngu.” O pfuepho nno yeru mu; mu gbalihu pfuru apfuru; ẹhu nodu aphu mu ke kparikpari.
- ¹²O su: “Ge ndzu ba agushi ngu Danẹlu. Eshi le mboku mbu ono, i woru okpoma ngu ghebe onu g'iphe doo ngu ẹnya ono; bya eworu onwongu wozekpo ali l'iphu Chileke ngu; noo teke a numaru olu ngu; e zia mu ge mu bya epfuru yeru ngu.
- ¹³Obenu l'onye-ishi ali-eze ndu Peshiya kwachiru mu uzo ukporo abali l'abali lanu. Noo ya bu; Mayikelu, yi l'onye lanu l'ime ndu-ishi bya bya eyeru mu eka; kele onye eze ndu Peshiya ono sederu mu l'eka ono.

14Nta-a bẹ mu byaru gẹ mu pfiaru ngu iphe, e-me ndu nkengu l'uzo iphu; kele ophulenyaa ono bu iphe, e-mechaa mee l'uzo iphu.”

15Teke ono, oopfu iphe ono anu mu ono bẹ mu phuerupho yoo; ophu mu epfukpodaru m'opfu ilile.

16Noo ya; iphe, gbaerupho ugbugba gẹ nwa ndiphe bya edenyi mu aka l'egbonu. Mu saa onu wata epfu opfu. Mu su onye ono, pfuru mu l'iphu ono-a: “Gube nnajiuphu mu; ophulenyaa-a, mu phuru-a bẹ eyekwa mu ebvu shii. Nta-a ta adukwa ike, dukwadu mu nu.

17Mbu-a; nnajiuphu; ? denu gẹ mube onye-ozu ngu e-shi bya awata abo uja eyeru gube nnajiuphu? Ike ta adukpoekwa mu ililekpo; k'opfu bu l'atu unme tukokwaru rwuhuchawaa mu.”

18Tobudu iya bu; iphe ono, gbaru gẹ nemadzu ono byakwa bya edenyi mu aka ozo; bya emee; ike du mu.

19O su mu: “Gẹ ndzu ba agushi ngu; gube amadu, aakwabe ubvu, paru aka. G'ehu dukwa ngu guu! Shihu ike nta-a! Shihu ike!” O pfiurupho opfu ono nu mu; mu bya aru-keta ike bya asu iya: “Nnajiuphu mu; pfiwaru iphe, iipfu; eshinu i mewaru ike du mu.”

20O byakwa bya epfua ozo su: “? I maru iphe, meru g'o gude mu byapfutashia ngu? O to dukwa g'oo-no-beru; mu alashia azu jeshia gẹ mu l'onye-ishi ndu Peshiya lwa ogo ozo. Mu -mekpechaa onye k'ono; onye-ishi ndu Gurisu a-bya.

21Ole mu e-vuru uzo kodaru ngu iphe, e deru l'ekwo ire-lanu ono. Mbu l'o buepho Mayikelu, bu onye-ishi k'unu bu onye gbaru mu mkpu kpoloko gẹ mu mekpee phe.”

Danlu 11

1“Tobudu iya bu; o be l'apha, bu Dariyosu onye Midiya apha mbu, o wataru aburu eze; mu gbalihu pfuru gẹ mu gbaaru iya mkpu; gbobuta iya g'o to du iphe, e-me iya nu.

Eze ndu ndohali yee ke ndu isheli

2“Nta bẹ mu e-gburu ngu opfu tororo. O phodukwaru ndu eze eto, e-mechaa futa le Peshiya. Ophu e-kwe iya eno a-kwatakpo ka ndu ophu g'ephe ha enweru iphe. Teke o gbephe l'eku iya ono nweru ike; l'o kpa-lia onyemoneye g'ephe wata etso ali-eze ndu Gurisu opfu.

3Noo teke onye eze, paru aka apaa l'a-gbalihu pfuru. Onye k'ono bẹ ali-eze iya a-pa aka apaa. O buru iphe, du iya ree bẹ oo-noduje eme.

4O -gbalihuchaa ono; l'aabya eworu ali-eze iya obu chikpo woru kee l'uzo, pherephere eshije abya uzo eno, du l'igwe. O to dudu awa iya, oo-laru; ophu ike aduedu iya g'o shi du iya. Noo kele ali-eze iya ono bẹ aa-vu l'ogbarabvu; pata je anu ndu ozo.

- 5“Eze ndu ndohali be ike a-du; ole onye lanu le ndu-ishi ojogu iya e-mechaa ka iya ike. Onye k'ono be aka oo-buru eze e-mechaa paa aka apaa.
- 6Teke a noekwarupho nwapha olemole; ephe abyakwa agbaa ndzu. Ada-eze ndu ndohali l'e-je aluru eze ndu isheli; g'ee-shi g'o mee g'ephe du le ree. Ole ogbandzu ono e-gbukahu. Noo teke aa-kponyi nwanyi ono enya; yee ndu shi l'ibe eze duru iya laa ji; yee nna, nwuru iya nu; yee ndu bu agbarike iya.
- 7“E -mechaa be awa nwanyi ono a-gbalihu g'o nochia enya iya. Onye ono e-tso ndu ojogu eze ndu isheli ugu gude nno bahu l'eka eze ono chiberu ifutu. Oo-tso phe ugu gbiriri jasu l'o lwu-kpee phe.
- 8Oo-natachaa phe agwa phe; yee nteke, ephe gude onyirubvu wua; mekpoo iphe, ereshi ire ike, bu mkpola-ochaa me mkpola-ododo; chitachaa ya l'o buru iya ala ali ndu Ijiputu. O byakwa anokpoo apha olemole; hakpopho eze ndu isheli. O to duhedu iphe, oo-me iya.
- 9Noo teke eze ndu isheli e-je eswee ali ndu ndohali. Ole o to dudu g'oo-no-beru l'o laphu azu l'ali iya.
- 10Unwu iya abya akwakobe k'ogu; bya achikobekpoo ndu ojogu, a-pa aka apaa; ndu a-nodu ekpo kojokojo g'utso, nyiberu anyibe. Ephe alwua ugu obu lwu-rwua aka eze ndu ndohali chiberu ifutu.
- 11“Noo teke eze ndu ndohali a-tangirihu; zoru garamugaramu je je etsoo eze ndu isheli ugu. Ndu isheli abya achikobe ndu ojogu, paru aka gude bya; ole ndu ndohali alwu-kpele phe-a.
- 12Teke e rwutaerupho ikpoto ndu ojogu ono; eze ndu ndohali egude iya kuahaa onwiya. L'o gbua unu-kuru-unu ndu ojogu ono; ole o to budu iya e-me iya g'o buwaruro onye ike kachaa adudu.
- 13Noo kele eze ndu isheli a-la je achikobe ikpoto ndu ojogu ozo, a-kwata ka ke mbu pho shii. A -noepho apha olemole l'o byatashia ugu ozo; l'o chiru ndu ojogu, kwatakporu du igwerigwe; teme a chiru ngwogu chi-jia phe aka.
- 14“Teke ono be aa-du igwerigwe etso eze ndu ndohali ugu. Ozo bu le ndibe unu ndu ophu emeje ike ike l'e-kwefukwaru iya pho ike; ephe eshi egube ono mee; ophulunya avua; ole o to dudu iphe, ephe e-mefu onya.
- 15Noo teke eze ndu isheli a-bya akpua oje kpu-pee mkpukpu lanu mgburugburu, bu mkpukpu, a kpu-pheru igbulu mgburugburu; lwuchaa ya lwuta. Ike taa du-ziedu ndu ojogu ke ndu ndohali g'ephe nwuphu iya azu; mbu le ndu ojogu phe, kachaa alwushi ugu ike taa dukwa ike apfuru.
- 16Onye eze ono, bataru nu ono a-noduepho emeepho iphe, du iya ree. O to dudu onye adu ike agboru iya chirii. L'o bya eworu onwiya sibe gedemu l'ali-oma ono; teme ike adukwa iya pho shii k'ophu oo-du ike mebyishia ya.

17Iphe, oo-me bu l'oo-phubeepho iphu gude ike, o gude nodu l'ali-eze iya l'ophu gude bahu. Ephe l'eze ndu ndohali abyakwa atugba nanu. L'o bya ekuru ada iya kee ya k'ophu ya e-shi l'eka ono lwua ali-eze iya ono; ole iphe ono, oochi idzu iya ono be o too meghadu; ophu ooyeduru iya aka.

18L'o gbete teke ono bya aghaaruru ndu bu l'aguga eze-enyimu iphu. L'o lwua phe lwuta ndu ophu du igwerigwe. Ole oo onye-ishi ojogu lanu e-mechaa buchia iphe-iphere ono; melata iya iphe ono, oome ndu ozo ono.

19O -mechaa nno; l'o bya alaphu azu je aghaaruru mkpukpu nkiya iphu, bu mkpukpu le mkpukpu, a kpushigbaaru ike l'ali iya. Noo teke upfu a-du iya; l'o daa darwua aka a taa humabakpoedu iya ahuma ophu.

20“Onye a-notsota iya nu abya eye onye ana akiriko; g'o je anakoo ndu ali-eze ono eku phe. A -nopheo nwapha olemole l'e gbua yebedua. Ole e tee gbukwa iya l'ehu-eghu; ophu o bukwa teke aalwu ogu.

21“Onye ozo, bu onye a-notsota onye k'ono a-buru onye a ta gubeduru iphe; onye a ta akwabedu ubvu, gbaru onye eze. Yebedua e-gude eregede pfubata bya eswee ali-eze ono teke ndu no iya nu ari l'iphe duebekpoo ree.

22Ndu ojogu, abya gbukugbuku be ee-rwuta rwufu l'ataphu iya; mbu gbuchaa gbua onye yele iya rifuru nte aburu nanu.

23Mbu le yele iya a-gba ndzu; e -mechaa l'o gbaaru iya eregede; mbu gude-a nwa ndu abadu ishi bahu je aburu onye ike du.

24Teke mkpukpu, kachaa enweru iphe nogbaro l'o to dudu onye suru phe eme iphe; bu teke oo-bata le mkpukpu ono bya eswechaa ya. Noo teke oo-me iphe, nna iya adujeduru ike mee; ophu nna iya oche phe emejeduru iya. L'o bya eworu iphe, o kwataru l'okwata; waa eku mmanu ozo woru keeru ndu ephe l'ia swi. Ndu sukporu l'ephe kporu abara; l'o chile-a idzu je alwu-kpee phe. Ole iphe ono be o too meribekwaru.

25“Oo-gude ndu ojogu, du igwerigwe shii gude rokota ike; sua aka l'obu jepfushia eze ndu ndohali ogu. Eze ndu ndohali abya egude ndu ojogu, paru aka; teme ike du phe gude wota iya ogu obu. Ole o to dudu ike apfuru. O buru iphe, a-kpa iya nu bu ejo idzu eregede, aa-chiru iya.

26Mbu l'oo ndu eri nri iya l'a-nodu e-me g'ephe gbua ya; mbu le ndu ojogu iya be ee-rwuta rwufu; l'e gbua ndu ophu du igwerigwe l'iphu ogu.

27Ndu eze labo ono, l'e-gude okpoma mgbashi nodu no-kube teburu lanu ede nwibe phe edede; ole o to dudu ophu e-nweru ishi; kele o -rwuekwapho teke a tuburu be mkpochi-ishi iya a-dua.

28Eze ndu isheli e-gudekpoo eku, paru aka gude laphu azu l'ali nkiya; ole iphe, oonoduepho ari bu ge ya mebyia oghandzu ono, du nsu ono. E -mechaa l'o mee iphe ono, o tuburu ono; teme l'o lashia ali iya.

29“Teke a tuburu doberu iya -rwuēpho; l'ọ byakwa eswee alì ndòhali ọzo; ọle k'ọgiya ono l'a-dù iche e -me lẹ kẹ mbù;

30noo kẹle ndu Kitimu l'e-gude ụgbo-mini phẹ bya etsoo ya ọgu; l'o mee meji atọfu iya. L'ọ gbẹ teke ono lashiya azu; je eworu ẹhu-eghu iya swiberu ọgbandzu ono, dù nsọ ono. Ọ -lwa azu ono bụ ndu a-tuba iya l'anya bụ ndu sụru l'ephẹ ta ayihedu l'ọgbandzu ono, dù nsọ ono.

31“Ndu ojogu iya a-wu-lihu wata emerwushi eze-ulo, dù nsọ ono, a kpushiru ike ono. Ephemẹ abya ewuchia g'a ta gwahe Chileke mbọku-mbọku; bya eworu ẹjo ahuma ọla-l'iswi dobe.

32L'o gude opfu-enwunwu merwushia ndu ọphu mebyiwaru ọgbandzu ono; obenu lẹ ndu huberu Chileke phẹ ama e-shihuepho dūngudungu kakpute iya.

33“Ndu maru iphe apfuerupho l'aloru ikpoto nemadzu ẹka lẹ nchi; a makwaru-a l'e -mechaa bẹ ee-gbuchaa phẹ egbugbu; kpoo phẹ ọku; haru tua phẹ mkporo; kwaa iphe phẹ l'okwata.

34Ephemẹ -daa l'e yeru phẹ ẹka nwanshii; teme ikpoto nemadzu awuru tsoru phẹ; ọle ephẹ a-nodu etso phẹ etsotso mkpe.

35Ndu ono, bụ ndu maru iphe ono bẹ upfu a-hakwaru-a dù; k'ọphu aa-hu phẹ ahuhú g'ephẹ gbuchafu duebe ree; mee phẹ; ọ tọ dudu ẹka uta a-dù phẹ l'ehu gbiriri jasụ lẹ teke ikpazu; kẹle teke ikpazu ono a-byakwa lẹ teke a tuburu.”

Eze, l'ekutse onwiya

36“Eze ono e-mekpọkwapho iphe, dù iya ree. Ọo-nodu ekutse onwiya; mee onwiya gẹ ya kakota iphe, bukota agwa l'ophu shii; bya epfukwapho oke opfu, nchi eteke anumaswee gude epfubyishi Chileke ọphu bụ iya nwe agwa l'ophu. Iphe, oome a-nodukpọepho ejehuru iya gbiriri jasụ oke ẹhu-eghu Chileke ono abvubebe. Noo kẹle iphe, a tuburu l'oo-me e-mekotachaa.

37Ọphu ọ dudu iphe, ọ byaru agube agwa, shi lẹ nna iya; ọzo agwa ono, laru unwanyi l'obu ono. Ọphu ọ dudu agwa, ọ byaru agube iphe ililekpoo; ọchia iphe, oo-me bụ l'oo-me onwiya g'ọ kakota iphemiphe onoya shii.

38Iphe ọzo, ọo-nodu eme bụ l'agwa, ọo-nodu akwabe ubvu bụ agwa ulo, a kpushiru ike; mbu agwa ọphu nna iya phẹ amajeduru. Noo agwa, oo-gude mkpola-ododo yee mkpola-ochaa gude akwabe ubvu bụ ono. Ono bẹ ọo-nuchaa mkpuma, aswa dù; yee iphe, bukpoo iphe, ere ire.

39Ọ -huma ẹka ọha chiberu ifutu l'o je etsoo phẹ ọgu. Ọ buru agwa ono, shi eshishi ono bẹ oo-gude eme iya. Ndu guberu iya iphe bẹ ọo-kwabeje ubvu, paru ẹka apaa. Oo-me phẹ ephẹ aburu ishi ndu dù igwerigwe; l'o woru alì keeru phẹ; ephẹ apfua ugwo iya.

40“O -rwutashiepho teke ikpazu ono; eze ndu ndohali etsoo ya ọgu; eze ndu isheli eziepho phaa zipfuta iya; chiru ikpoto ugbo-inya; me ndu agba l'inya; me ikpoto ugbo

ozo mmanu gude jepfu iya. L'o swekwaapho ali oha, du igwerigwe; mbu sopyabe phe g'eka utso gbaru.

⁴¹Ali-oma ono be oo-swetakwapho. Ali eka du igwerigwe be a-dakota nu; obenu le Edomu; yee Mowabu; waa ndu-ishi ndu Amonu be aa-dzota.

⁴²Oo-bukpooru ishi ndu ali eka du igwerigwe; ophu ndu Ijiputu anahukwa iya.

⁴³Oo-natachaa ndu Ijiputu eku mkpola-ododo yee mkpola-ochaa phe; mekpoo iphemiphe, ephe gude baa eze l'ophu. L'o mee ndu Libiya; yee ndu Kushi; ephe anodu iya l'eka.

⁴⁴A -nonyaephe; nzi, e shi l'uzo enyanwu-awawa; yeke uzo isheli zia abya eye ya ebvu. L'o gude oke ehu-eghu kwolihu jeshia ge ya gbua ikpoto nemadzu pyaapya; mbu meahaa g'ikpoto nemadzu bvubebe.

⁴⁵Eka oo-je anmabe eze ulo-ekwa iya bu le mgbaka Eze Enyimu yee oke ubvu ono, du ubvu l'enya bya adu nsu onoya. Ole ike bvujenu iya pho; ophu o dukwa onye byaru agbaru iya mkpu.”

Danelu 12

Teke ikpazu

¹“Su-a; teke ono be Mayikelu, bu eze ndu-ishi, bu iya no swiru ndibe unu a-gbalihu. Teke ono a-buru teke oke iphe-ehuka a-du; udu iphe-ehuka ophu eteke adu-swee nu; eshinu ohamoha wataru adudu jasu teke ono. Ole teke obu be aa-dzotakwa-a ndibe unu; mbu iphe, bukpooru onye a humaru l'e deru epha iya l'ekwo ono.

²Ikpoto ndu kuwaru mgbenya; mbu ndu e kpochiwaru eja, du l'ali e-tetachaa. O nweru ndu ophu e-teta jeshia anodu ndu ojeje; ndu ophuu eteta eteta iphere buru ndu anodu aso oyi jasu l'ojeje.

³Ozo bu le ndu maru iphe l'a-nodu egbu nwijnwii g'ogbunwijnwii k'akpaminigwe. Ndu meru ikpoto nemadzu; ephe buru ndu pfuberekoto; eke paapaapa ge kpokpode jasu l'ojeje.

⁴Ole-a; gubedua, bu Danelu; kpuchikwaa iphe, e deru l'ekwo-a ekpuchi; woru iphe-ohubama mee ya g'o du gbiriri jasu teke ikpazu. Noo teke ikpoto nemadzu e-tsuru ekameka aghaphe achu g'ephe kabaa amaru iphe.”

⁵Tobudu iya bu; mube Danelu jeshia ele enya; a duwaa ebo pfuru mu l'atatiphu. Onye ophuu pfuru l'agugu nggele ono azu iya owa-a; onye ophuu pfuru l'azu iya ophuu.

⁶Onye lanu tufuepho onu su nwoke, yeru uwe-ochaa, no-ngokotaru mini, no le nggele ono su iya: “? Oo-no-beru ino-beru-agma; oke akpabiri iphe-a emee?”

⁷Nwoke ono, yeru uwe ochaa ono, no-ngokotaru mini, no le nggele ono bya apalia ekutara iya; yee ekicha iya ephekerephe. Mu numa g'o rifuru angu, o gude onye ono, a-no ojeje ono ria su: “Oo-buru ugbo lanu; yee ugbo labo; waa mkpirikpu iya. O

buru teke ono, e mechaerupho; ophu o dukpoedu ike, du ililekpoo; noo teke ee-meghe iphemiphe ono.”

⁸Mu numakwa iphe, o pfuru-o; ole o to doduru mu enya. Mu jia su: “Nnajiuphu mu-e! ? Bukpoo gunu a-buru mkpochi-ishi iphemiphe ono?”

⁹O su-a: “Jeshia iphe, iije Danelu; kele opfu ono be e kpuchiru ekpuchi. E wowaru iphe-ohubama mee ya g'o noo jasụ le teke ikpazu.

¹⁰Ikpoto nemadzụ be ee-mekwa g'ephe gbuchafu; mee phe; ephe aduebe ree; buru ndu a huru l'oku jasụ ephe gbuchafu. Ole ndu ejo-iphe a-noduepho eme ejo-iphe, ephe eme. O to byadu edo ndu ejo-iphe enya; obenu le ndu maru iphe be oo-dokota enya ree.

¹¹“E -shi mboku ono, e wuchiru g'a ta gwahe Chileke mboku-mboku pho; bya eworu ejo ahuma ola-l'iswi dobe pho; be a-du unu abali eto l'ukporo abali eno l'abali iri.

¹²Onu-oma be a goru nu onye a-nodu ngabe; no-rwua g'o bvuchaa; mbu unu abali eto l'ukporo abali eno l'abali iri ono.

¹³“O -buru ke gubedua; jeshia iphe, iije jasụ teke ikpazu. Ii-la je atuta unme; teke o rwuru le mboku ikpazu; l'iiteta bya anata okiphe, rwuberu ngu nu.”

Hosiya

Hosiya 1

¹Waa opfu, Chipfu pfuru Hosiya nwa Beri baa. Teke o pfuru iya bu teke Uzáya bu eze ndu Jiuda; yee teke Jiótamu bu eze ndu Jiuda; waa teke Éhazu bu eze ndu Jiuda; me teke Hezekáya bu eze ndu Jiuda; wafukwapho teke Jierobowamu nwa Jiowashi bu eze ndu Ízurelu.

Nyee Hosiya waa unwu iya

²Teke Chipfu wataru egude Hosiya pfua opfu be o suru iya-a: “Tugbua je aluta nwanyi, agba ukpara; li nwushia unwu, a gbataru l'ukpara; kele ndu ali-a agbanukawaa ukpara; mbu l'ephe lufuwaru l'eka mube Chipfu.”

³O tugbunaa je aluta Goma, bu nwada Dibulayimu. O tsuta ime bya anwuaru iya nwa nwoke.

⁴Tobudu iya bu; Chipfu su Hosiya: “Iphe, ii-gu nwata ono bu Jiezerelu; kele o to dudu g'oo-no-beru; mu agwata onu-ulo Jiehu ugwo ochi ndu ephe gburu le nsuda Jiezerelu; teme mu emekwapho g'ali-eze ndu Ízurelu bvuebe.

⁵Mboku ono be mu a-nodu le nsuda Jiezerelu gbajishia apfu ndu Ízurelu.”

⁶Goma byakwa atsuta ime ozo bya anwua nwa nwanyi. No iya; Chipfu su Hosiya: “Iphe, ii-gu iya bu Loruhama; kele mu taa phueduru ndu Ízurelu obu-imemini ozobaa; ophu mu abyadu aguru phe nvu.

⁷Obenu le mu a-phuru ndu Jiuda obu-imemini; mu adzota phe. Ophu o bukwa apfu; ozoo ogu-echi; ozoo alwu ogu be mu e-gude mee ya; ophu o budu inya-ogu; ozoo ndu agba l'inya; oo onye e-me iya nu bu Chipfu ono, bu Chileke phe ono.”

⁸Noo ya; o mifuepho Loruhama onu l'era; mbu Goma; o tsuta ime bya anwuta nwa nwoke ozo.

⁹O buru iya bu Chipfu su: “Iphe, ii-gu iya bu Lowami; kele unu taa buekwaru ndibe mu; ophu mu abuekwaru Chileke unu.”

Eedopu ndu Ízurelu azu l'onodu phe

¹⁰“Ole e -mechaa be ndu Ízurelu a-dukpokwa g'eja, no l'aguga eze-enyimu, bu ophu a taa tukotadu atutu g'a maru erwa iya; ophu aagukotadu iya l'ogu. O kwa l'eka ono, a suru phe: ‘Unu taa buekwaru ndibe mu ono’; be ee-kukwa phe pho ‘unwu Chileke ono, no ndzu ono.’

¹¹L'a bya emee ge ndu Jiuda ephe le ndu Ízurelu tugba buru nanu ozo; ephe ahota onye lanu, a-buru ishi phe; ephe eshi l'ali ono lwakota; kele eswe mboku ke Jiezerelu ono a-pakwa eka apaa.

Hosiya 2

¹“Unu kua ụnwunna unu k'unwoke ‘ndibe Chipfu’; unu ekua ụnwunna unu k'ụnwanyi ‘ndu Chipfu yeru obu.’

Ízurelu eri ogori gẹ Goma

²“Baaru ne ngu mba; baaru iya mba; kele ọ tọ buedu nyee mu; ọphu mu abuhedu ji iya. G'ọ haa umere nwanyi, agba ukpara; l'ọ wofu gheleghelehele ono, du iya l'okpoma ono!

³Odumeka be mu a-gbabeke iya oto; mee ya g'ọ dabyiru swanmangu g'ọ du g'eswe, a nwuru iya. Mbụ le mu e-me iya g'ọ du g'echiegu; ali okponku, adudu iphe, du iya nu; gude egu-mini phua ya terii.

⁴Mu ta aphueduru unwegirima iya obu-imemini; kele ephe bu unwegirima, a gbataru l'ukpara.

⁵Ne phe gbaru ukpara; k'ophu bu le g'ọ gude tsuta ime phe be iphere iya du. Mbụ l'ọ pfuru su le ya a-gbatsoru ndu ephe l'iya eshi onya; ndu bu phe anu iya nri; anu iya mini, ya angu; anu iya eji-aturu; anu iya ekwa-ochaa; anu iya manu-anyiyi; yee iphe, aangụ angungu.

⁶“Noo g'ọ gude mu je l'e-woru obvu to-chishiaru iya uzo. Mu a-kpu igbulọ kpu-pee ya mgburugburu g'ọ to humaje uzo, oo-shi.

⁷Oo-nodu achi ndu yee ya eshi; obenu l'ọ too gudedu phe. L'ọ choo phe; ọ tọ humadu phe. Noo teke oo-su ge ya byakwa alaphu azu l'ibe akahu ji iya; kele teke ono shikwa ka iya ree eme le nta-a.

⁸“O to shidu maru l'ọo mbedua nuru iya ereshi; yee mee-vayinu ophuu; waa manu olivu; l'ọo mu nuru iya mkpola-ochaa; yee mkpola-ododo; ọphu ephe wotaru gude je agwoahaa nshi Balu.

⁹Noo g'ọ gude mu je l'anata iya ereshi iya ono me ọ -chaepho; nata iya mee ophuu iya me o-rwuepho teke akuje iya. Mu anata iya eji-aturu mu; nata iya ekwa-ochaa mu, bu iphe, mu shi nu-doru iya ya bu g'ọ gude gbobutaje onwiya g'ọ to gbaru oto.

¹⁰Nta-a be mu a-gbabe iya oto l'eka ndu yee ya eshi onya ele iya enya; ọphu ọ dudu onye anafu iya l'eka mu.

¹¹Iphe, bukpuo obo-iphe, obojekpuo be mu e-buchikota; mbụ obo-iphe ọphu oboje aphagapha; mekpoo Obo Onwa-ophuu iya; me obo eswe-atuta-unme iya; mbụ iphe, bukpuo obo-iphe iya ono, geru egeru ono.

¹²Mu e-mebyishi opfu-vayinu iya; mebyishia oshi figu iya, bu iphe ono, ọ suru le ndu ephe l'iya eshi onya nuru iya ono. Mu e-me egu ono g'ọ buru egbudu; ọ buru anu, bu l'egbudu e-ri iphe ono, a koru iya ono.

¹³Iphe, bukpuo ujiku olemole ono, ọ koru Balu unwu-isensu oku ono be mu a-hukota iya ahuhu iya. Mbụ o gude iphe-nchi; waa iphe ozo, eegudeje mee omemma kwaa onwiya akwa je etsoru ndu ephe l'iya eshi onya; bya azohaa mu.” Nokwa iphe, Chipfu eepfu.

Chipfu eye ndibe iya obu

- 14“Noo g'o gude mu nòdu abyawaa iya edeta dephua. Mu e-deru iya deba l'echiegu je erwebe ẹhu erwebe pfuru opfu nù iya.
- 15Noo ẹka mu a-nù-phu iya opfu-vayinu iya azu. Mu emee gẹ nsuda Akoru buri ẹka obu a-dù iya. O buri ẹka ono bẹ ọo-nòdu guaru mu ebvu g'o shi agujeru mu iya teke o bu nwamgboko; waa g'ọ guru iya mboku ono, o shi lẹ Ijiputu afuta onoya.
- 16“O -rwua mboku ono bẹ ii-ku mu ji, alu ngu nù. I tii kuedu mu Balu ngu.
- 17Noo kele mu e-me g'ẹpha Balu te eshibahe phe l'onu futa; ophu ẹphe agu-kubaedu ẹpha iya l'enwa.
- 18“O -rwua mboku ono bẹ mu a-gbaru phe ndzu; ẹphe l'anu-egbudu; yele ẹnu, ẹphe l'eli; yee anu, akpu ẹpho l'ali. Apfu; yee ogu-echi; yee alwu ogu bẹ mu e-me g'ọ to duhe l'ali ono adudu ophu; k'ophu ẹphe azeje pyakoo; ẹhu adu phe guu.
- 19“Mu a-luru ngu jasù l'ojejoje; mbu mbedua l'onwomu. Mu a-luru ngu l'uzo apfubekoto; yee k'ikpe, pfuru nhamunha. Mu e-ye ngu obu; aphujeru ngu obu-imemini.
- 20Mu a-luru ngu emeru ngu ire-lanu. L'i makwanuru mube Chipfu rengurengu.
- 21Wakwa iphe, Chipfu epfu baa: 'Lẹ mboku ono bẹ mu a-za ẹnu. Mbu lẹ mu a-za akpaminigwe ẹnu; akpaminigwe azakwanu eliphe-a ẹnu.
- 22Eliphe azakwanu iphe, e meberu l'ali ẹnu; mekpoo mee ophuu; yee manu olivu. Ephebedua azakwanu nsuda Jiezerelu ẹnu.
- 23Oo mbedua l'onwomu e-me phe; ẹphe anguru anguru l'ali ono. Mu a-wata phe aphuru obu-imemini; mbu ndu ono, mu shi su lẹ mu taa phuheduru obu-imemini ono. Mu a-su phe l'ẹphe buwaa ndibe mu; mbu ndu ono, mu shi su l'ẹphe taa bueduru ndibe mu ono. Ephebedua a-sukwanu lẹ mu buwaa Chileke phe.' “

Hosiya 3

Hosiya yee nyee ya edoshi

- 1Tobudu iya bu; Chipfu bya asu mu-a: “Tugbua je egoshi nyee ngu l'i yeru iya obu ozo. Epfukporo ke l'onye ozo yeru iya obu; mbu l'oori ogori. Yee ya obu egube ono, Chipfu yeru ndu Izurelu l'eka ẹphe woru iphu ghaaru agwa; bya akporu obu ye lẹ nri, a gwaru iphe.”
- 2Mu tugbunaa je azua ya azuzu. Iphe, mu zuru iya bu mkpola-ochaa iri l'ise waa ẹkpa balu l'ubvu iya.
- 3Tobudu iya bu; mu bya asu iya-a: “No-dokporu mu pho nwujiku olemole. Ba agbakwa ukpara; ophu o dukwa onye gu l'iya e-shi onya; nokwapho gẹ mbedua a-nodoru ngu.”

⁴Noo kele ndu Ízurelu a-nọ ujiku olemole; ephe tee nweduru onye a-buru eze phe; ophu ephe enweduru ndu a-buru ndu-ishi phe. Ephe taa gwaedu iphe; ophu ephe enweedu mkpuma, du nsọ. Ephe tee nweduru uwe-ukuvu; ophu ephe agwoedu obvu.

⁵E -mechaa ndu Ízurelu alwaphuta azu wata acho Chipfu, bu Chileke phe; wata acho onye eze phe ono, bu Dévidi. Ephe anmaru pyaapyaapya lwapfutashia Chipfu yee iphe, du ree, shi iya l'eka le teke ikpazu ono.

Hosiya 4

Aanma ndu Ízurelu Ikpe

¹“Unu numakwa Opfu Chipfu; unube unwu Ízurelu; kele Chipfu be opfu duru ephe le ndu bu l'ali-a. O to dukwa onye e gude ire iya aka l'ali-a. Ophu n-yemobu adukwa iya pho. Ophu o dudu onye maru Chileke l'ali-a l'ophu.

²Iphe, du iya nu buepho mburonu; yee adzu uka; waa egburu ochi; waa iphuru; wafua eri ogori. Mbụ l'ephe tukokpooru iphe, a suru g'e be mejeshi emekota. E -gude l'egburu ochi l'eegbukwasẹ iya ozo.

³O buru iphe ono meru g'o gude ali l'ophu nodu agu aphu. Teme iphe, bukpo ndu bukota iya nu nodu ajo ehu. Anu, bu l'egbudu; mekpoo enu, ephe l'eli; mekpoo ema, bu l'enyimu tuko anwushihu.”

Aanma ndu-uke Ikpe

⁴Ole o bu; g'o to dukwa onye opfu a-duru yee nwibe iya; ophu o dukwa onye e-bo nwibe iya ibo; kele opfu dukwaru mu l'unube ndu bu uke!

⁵Eswe l'enyashi be unu e-vukotaje iphe daa iko. Teme ndu mpfuchiru etsokwarupho unu adaa kpurumu kpurumu obu. Oo ya bu le mu e-mechaa mebyishia ne ngu.

⁶Ndibe mu be ala l'iswi; kele o to dudu iphe, ephe nwutaru. Eshinu unu jikaru anwuta iphe be mu jikakwarupho unu su l'unu ta abuedu ndu-uke mu. Eshinu o to dudu iphe, unu guberu ekemu ke mube Chileke unu be mbedua ta adukwapho iphe, mu a-gube unwu unu.

⁷Oo ge ndu uke aaka shii eje; bu g'iphe-eji ephe eme mu aaka shii eje. Ephe woru ubvu, e gege anodu akwabẹ phe togbo; wata eme iphe, iphere iya du.

⁸Ephe gude iphe-eji, ndibe mu eme gude aba uba. O nodu anoduje atso phe utso m'ephe -nodu eme ejo-iphe.

⁹Oo ya bu le g'oo-du bu l'oo g'e meru ndu nemadzu mmanu bu g'ee-me ndu bu uke. Mu a-tuko ephenebo nua aphu iphe, ephe eme; pfua phe ugwo iphe, ephe meru.

¹⁰Ephe e-rije nri ria ria; o too jidu phe epho. Ephe agbaa ukpara gbaa gbaa gbaa; ephe taa kadu shii eje; kele ephe paru Chipfu haa.

¹¹Agba ukpara; yee angu akahu mee; yee mee ophuu buchaa iphe, tukoru egomunggo nemadzu sweta.

¹²Ndibe mu wata eje l'aji l'oshi, a pyiru ayipyi. O buru ntẹkpe, a pyiru l'oshi wataru phe epfuru iphe, epe e-me. O buru agba ukpara dutaru phe dughua. Epe bya aburu ndu du gheleghelehele l'iphu Chileke.

¹³Epe wata agwa iphe l'eli ubvu bya awata akpo ngweja oku l'eli eka bu ubvu ubvu; me l'upfu achi; mekpoo l'upfu oshi popula; mekpoo l'upfu oshi terebinti, buchaa oshi, ibvu iya aduje ree l'ehu. Noo g'o gude unwada unu ye eka l'agba ukpara; unwada ophu unu alu alulu wata eri ogori.

¹⁴“Mu ta ahukwa unwada unu ahuhu m'ephe gha iphu l'agba ukpara. Ophu mu ahukwapho unwada ophu unu alu alulu ahuhu m'ephe gha iphu l'eri ogori; kele unwoke phe agbeshije je ekuta nwanyi-ukpara doberu onwophe; mbu l'ephe l'unwanyi-ukpara ulo-agwa anoduje agwa iphe. Oo ya bu le ndu ono, iphe te edojedu enya ono e-mechaa laa l'iswi.

¹⁵“Unu -nodu agbakponu ukpara; unube ndu Izurelu; ge ndu Jiuda te eyenu iya pho eka! Unu te ejekwa mkpukpu Gilugalu! Ophu unu ejekwa mkpukpu Betu-Avenu je agwa iphe! Ophu unu agukwa enwa su: ‘Eshinu Chipfu no ndzu g'o no iya-a!’

¹⁶Ndu ke Izurelu kweru ngguganyi ge nwada-eswi, kweru ngguganyi. ? Denu ge Chipfu e-shi eche phe echeche g'onye eche unwu-aturu l'oma egbudu?

¹⁷Ndu Ifuremu be woakwaru onwophe tugbabe epe le nshi. Oo ya bu g'a haa yebedua.

¹⁸Epe -nguchaa mee ngufu; epe awata agba ukpara phe obu. Mbu-a; ndu-ishi phe bu iphe, aduje phe ree bu eme iphe, iphere iya du.

¹⁹Oo oke pherephere e-mechaa zifu phe. Teme iphe ono, epe agwa ono emechaa kpataru phe iphe-iphere.

Hosiya 5

¹“Unu numakwa iphe-a; unube ndu bu uke! Unu ngabekwa nchi; unube ndu-ishi ndu Izurelu! Unu ngabekpodapho nchi; unube ndibe eze! Ikpe-a nmaakwaru unu; kele unu shi buru igbudu le mkpukpu Mizupa. Teme unu buru ugbu, e geru l'ubvu Tabo.

²Ndu nkwefu-ike ono bamiakwaru abami l'egbu ochi. Ole mu a-nukwanu phe aphu g'ephe hakpo.

³Ndu Ifuremu be mu maru ree. Ophu o dudu iphe, ndu Izurelu emeru mu le mpya. Unube ndu Ifuremu; nta-a be unu wataru agba ukpara. Mbu le ndu Izurelu be turwuakwaru onwophe.”

Hosiya epfu g'a ba agwojeshi nshi

⁴“Iphe, epe emegbabe te ekwedu haa phe g'ephe lwapfuta Chileke phe; kele agba ukpara no phe l'okpoma; ophu epe amadu Chipfu.

⁵O kwa eku-onwonye ndu Izurelu l'a-gba ama g'ephe gbaru. Ndu Ifuremu be iphe-eji phe a-du upfu l'okpa. Ndu Jiuda etsokwaru phe pho etsu okpa l'iphe.

4“Unubẹ ndu Ifuremu; ? bukpuo ọnu bẹ mu e-gude unu mee? Unubẹ ndu Jiuda; ? bu ọnu bẹ mu e-gude unu mee? N-yemobu k'unu dukwa g'iji nchi-abọhu. Ọ dọ g'iji geregere utsu, adudu g'ono-bejeru l'o phukashihu.

5Oo ya bu le-a; mu gudeakwa ndu mpfuchiru mu gbutsushia unu. Mu gudewaa opfu, shi mu l'onu gbua unu; k'ophu ikpe, mu ekpe unu a-nodu egbu zaazaa l'ehu unu g'iphoro anwu, echi echichi;

6kele iphe, agu mu g'unu mee bu aphu obu-imemini. Ọ to budu g'a gwaje mu agwagwa; mbu l'iphe, du mu ree bu g'a maru mube Chileke. Ọ to budu g'e gwee ngweja-akpo-oku nu mu.

7“Epe darwukwaru ogbandzu mu l'ephe ge Adamu. Epe te emeduru ire-lanu l'eka ono.

8Ali Giladu bu ali ndu eme ejo-iphe. Iphe, a lokashiru iya bu mee, a zokaru l'okpa.

9Oo ge ndu abalidebvu anokaje l'egbudu kwaberu nemadzu-a bu g'ikpoto ndu bu uke du. Epe egbuje ochi l'uzo, e shi eje mkpukpu Shekemu. Ophu o dudu egube ejo-ahuma, epe te emejedu.

10Mu humakwaru iphe, anyi ishi edzu le Izurelu. Ọ kwa l'eka ono bẹ ndu Ifuremu no wata agba ukpara; bya aburu l'eka ono bẹ ndu Izurelu no pharwushia onwophe.

11“A -bya l'ehu k'unubẹ ndu Jiuda; e dobeakwaru mboku, aa-kpa unu g'onye akpa ji.”

Hosiya 7

1“Oobujeru teke mu eme ge ndu Izurelu wekorohu; iphe-eji, ndu Ifuremu eme egheru onu. Teme l'a humakwapho ejo-ememe, ndu Sameriya l'eme. Epe anoduje agba eregede; ndu-oshi anodu etsufushi ulo. Ndu abalidebvu ana nfu le gbororo.

2Ophu epe anyatajedu l'ejo-ememe, epe emekota be mu nyatakotaru. Iphe-eji phe no-phewaru phe mgburugburu. Odujeephe l'iphe mu tekenteke.”

Aachi ejo idzu l'ibe eze

3“Epe egudeje ejo-iphe, epe eme mee g'ehu tsoo onye eze phe utso. Epe egude adzu uka mee g'ehu tsoo ndu-ishi phe.

4G'ephe hakota erikota ogori. Oonwu phe phuruphuru l'ehu g'oku-epfu, a phunwuru o nodu enwu phoophoophoo; ophu onye gheberu iya buredi enwezidu iya oku enwezi e-shi teke o wataru aphà utu buredi ono jasū l'o koguee.

5L'eswe mboku, onye eze anyi boru iphe be ndu-ishi nguru mee enya chaa phe achacha. Onye-eze anyi ono yele ndu mgbonu tuko meahaa rigbarigba.

6Ime okpoma phe dukwa g'oku uzu l'eka epe gude ejo idzu, epe chiru doberu iya abya iya ntse. Obu nodu enwukota phe phuruphuru l'enyashi ophu mgburugburu. O be l'utsu; o gbanwuhu phe oku l'ehu g'oku, enwu phoophoophoo.

7“G'ephe ha nɔdu atakɔta pfupfupfu g'oku uzu. Ephe ekepyashije ndu-ishi phe. Iphe, bu ndu eze phe g'ephe hakɔta dakɔtaru. Ophu o dudu g'ephe ha me onye lanu, rakuru mu nu.”

Ízurelu ephe l'ohamoha ozo

8“Ndu Ifuremu jepfuru ohamoha ozo; ephe l'ephe je aghaa eghirigha. Mbù lè Ifuremu dù g'akara, e gheberu; ophu a ghaduru iya aghagha.

9Ndu ohozo anɔduje ami ike iya omiwaa. Ole o too rwujedu iya l'ehu. Egbushi iya be ewó tungawaru; ophu o makpodanu.

10Eku-onwonye Ízurelu anɔduje agba ama g'o gbaru. O -mechakpoo g'oomehabe; o too lwaphutadu azu alwapfuta Chipfu, bu Chileke iya; ophu o chokpoda ya nu achochochu.

11Ifuremu dukwa ge ndo. Eduphu iya ta adudu iphe, oobujeru; teme ophu o nwedu egomunggo. O -gbapfu ndu Ijiputu; l'o gbapfu ndu Asiriya.

12Ephe -jeshiepho be mu e-woru ugbu-egege mu wu-kpute phe. Mu a-nwuko phe g'onye anwuko enu, ephe l'eli. Mu ahua phe ahuhù; mbu mee phe iphe ono, ndu ndzuko phe numawaru ono.

13“Nshio phe; kele ephe shiwaa mu l'eka jephuhuwaa! Ola-l'iswi dukwaru phe; kele ephe kwefuru mu ike! Iphe, agu mu nu bu g'a su le mu gbataru phe. Obenu l'ephe anɔduje adzushi uka ekpu mu.

14Ephe te egudejedu obu phe g'o ha araku mu. Ochia l'iphe-azee phe be ephe azeje ara ekwa. Ephe achikobeje onwophe epfu k'ereshi yee mee-vayinu ophuu; obenu l'ephe aghajeru mu azu.

15Mu zuru phe bya emee g'ike du phe. Obenu l'ephe anɔdujele-a achiru mu ejo idzu.

16Ephe ta aghajeduru mube Okalibe-kakota-shii ono iphu. Ephe du g'apfu, mebyihuru emebyihu. Ndu-ishi phe bu ogu-echi be ee-gude gbushia phe. O buru iphe, a-kpa iya nu bu ejo-opfu, shi phe l'onu. O buru iphe ono a-kpa g'a chia phe ochi l'ali Ijiputu.”

Hosiya 8

Iphe-aji, ndu Ízurelu eme

1Yekwa opu l'onu; kele udele bekwaru l'eli ulo Chipfu; o buru iphe, kparu iya nu bu le ndu Ízurelu mebyiwaru ogbandzu mu l'ephe; bya ekwefu ike l'ephe tee medu ekemu mu.

2Ndu Ízurelu echiku mu le mkpu su: “Gube Chileke anyi; anyi maakwaru ngu!”

3Obenu le ndu Ízurelu jikawaru iphe, du ree. O buru onye ohogu e-mechaa chia ya oso.

⁴“Èphe ahòtajè ndu a-bùru eze phè; o to shidu mu l'èka. Èphe ahòta ndu a-bùru ishi phè; èphe te emedu gè mu maru. Èphe egudeje mkpòla-òchaa yèe mkpòla-ododo phè akpùshiru onwophè nshi; shi nno emetaru onwophè òla-l'iswi.

⁵Unu tuphakwaa nshi nweswi unu ono; unubè ndu Samériya; kèlè o meakwarù èhu-eghu mu nwuhuwaa phuruphuru g'òku! ? Bù teke ole bè ndu Ízurelu a-nò-beru bùru ndu adùdu ike dùbebe ree?

⁶Òo lè Ízurelu bè o shi; mbù nweswi òbù, bù iphe, ndu eme òna meru. Ò tò bùdu Chileke. Ò bù iphe, aa-kùkposhi iphiriba-iphiriba; mbù nweswi ndu Samériya ono.

⁷Èphe akojè phèrèphèrè g'òpfu. Èphe -kpajè iya; èphe akpata iya oke phèrèphèrè. Ereshi ta amìduru amìmi; mbù l'ò tò dùdu mebyi, dù iya nù. Òme ò bùkponu l'òmitaru mebyi; m'ò bùruru ndu òhòzo gege alwùkota iya.

⁸“Ndu Ízurelu bè e lweakwaru elwelwe. Nta-a bè èphe anòdu l'echilabò òhamoha bùru okpokoro iphe, adùdu iphe, dù iya nù;

⁹kèlè èphe tùgburu jeshia Asiriya gè nkafù-ìgara-òswa, aghaphe nkìnyi iya. Ndu Ifuremu je eshiahaa ònyà arwòta.

¹⁰A makwarù-a l'èphe tükowaru òhamoha bùkòò ònyà eshi; òle mu byaru achikobe phè òzo. Èphe awata ala pyètee mè Òkalibe, bù eze ono meahaa phè mkpawere.

¹¹“A makwarù-a lè ndu Ifuremu kpùshiru òru-ngweja, dù igwerigwe, èphe a-nòdu egwe ngweja-iphe-èji. Òle èka ono tükowaru bùru èka a nò eme iphe-èji.

¹²Mu bya edeeru phè èkwo pfiaru phè iphemiphe, mu turu l'ekemu. Èphe wolèru iya-a kua iphe, shi l'òhòzo.

¹³Èphe -gwaa iphe, e gude bya mu anunu; èphe eworu anù iya taa l'onwophè; obenu lè Chipfu bè iphe, èphe eme adùdu ree. Nta-a bè òo-nyata èjo-iphe, èphe eme; hùà phè ahùhù k'iphe-èji phè. Mbù l'èphe e-mechaa laphu azù l'alì ndu Ijiputu.

¹⁴“Ndu Ízurelu zòhaakwaru onye meru phè nù. Èphe kpùshia ùlo ndu eze dobe. Ndu Jiuda gudeakwa igbulò kpù-pee mkpùkpu, dù igwerigwe mgburugburu. Òle mu e-mechakwanaa tùa òku lè mkpùkpu phè ono; l'ò tsua ùlo ùlo, a kpuru kpùshia ike l'ime iya.”

Hosiya 9

Iphe, ee-gude hùà ndu Ízurelu ahùhù

¹“Unu te etekwa èswa; unubè ndu Ízurelu! G'èhu ba atsòkwa unu g'òotso ndu òhamoha òzo; kèlè unu dùkwaru Chileke unu ghèlegheleghele; kèlè òo ùgwò, a gbatarù l'ùkpara bè unu yeru obu l'iphe, bùkpoo èka eechije balì.

²Èka eechije balì; yèe èka aapyìshi mèe-vayìnu bè ta azùjeekwa phè; òphu mèe òphúú adùeduru phè.

³Èphe tee bukwaru l'alì kè Chipfu. Mbù lè ndu Ifuremu e-mechakwaa laphu azù l'alì ndu Ijiputu; je anòdu l'alì ndu Asiriya ria nri, aasò nsò.

⁴Ḑphe te egweḑduru Chipfu ngweja-mḑe; ophu ngweja mmanu ozo, ḑphe egwejeru iya emeḑdu g'ḑhu tṣoo ya utso. Ḑgube ngweja ono l'ḑhu phe a-du ge nri ndu aphu tṣoru. Iphe, bukpuo ndu riru iya nu a-bukotaru ndu aaso nso; kele nri ono a-duru phe nkinyi phe. O toḑ batadu l'eze-ulo Chipfu.

⁵? Bu gunu be unu e-me m'o -rwua mboku ono, e doberu k'obo-iphe ono; mbu eswe obo-iphe ke Chipfu?

⁶Kele-a; ḑphe -jekponu g'ḑphe gbalaru ola-l'iswi; ndu Ijiputu e-rwukoḑele phe-a; ndu mkpukpu Memufisu elia phe. Ḑku mkpola-ochaa phe efuchia l'eswa. Ḑwu-ḑbvú agbaa ibe phe ophorokpo.

⁷“Mboku, aa-hu nemadzū ahuhu ruwakwaru. Mboku, aa-pfu onyemonye ugwo iphe, o metaru dukwaa ntse. Ge ndu Izuruḑu makwaru l'onoo g'o du. Eshinu iphe-eji unu paru igwerigwe; teme ndumashi, unu nweru paa aka; be e mewaru onye mpfuchiru Chileke; o du g'onye eswe. Onye unme Chileke jiru ḑhu buru onye obvu byaru.

⁸Mube onye mpfuchiru Chileke bu onye eche ndu Ifuremu nche; mbu ndibe Chileke mu. Ole a gbakaru mu onya l'iphe, bu uzo, mu eshi. Ndumashi nodukwapho l'ulo Chileke mu.

⁹Ḑphe tsuwaru oturi tsuba l'ime emerwushi onwophe; ḑgube ono, ndiphe du le teke ke Gibiya. Ole Chileke e-mechakwanaa nyata ejo-iphe, ḑphe eme. Mbu l'o hua phe ahuhu iphe-eji ono, ḑphe eme ono.”

¹⁰“Teke mu chotaru ndu Izuruḑu be o dukwa g'onye humaru akpuru vayinu l'echegu. Mbu le teke mu humaru nna unu oche phe be o dukwa g'onye humaru akpuru mbu, vuru uzo chaa l'oshi figu iya. Obenu l'ḑphe byaru ejerwua Balu-Peyo; ḑphe je eworu onwophe gwophua le nshi ono, bu iphe, iphere iya du. Ḑphe bya aburu iphe-mmanu ḑgube iphe ono, ḑphe yeru obu ono bu.

¹¹Mbu l'akpabiri ndu Ifuremu e-mechakwaa phee ephephe phefu g'enu. A taa nwubaedu nwa l'ime iya; ophu aapaedu iya ḑpho ime; ophu aatsutaedu iya ime.

¹²Ḑphe -hechakponu unwegirima hefuta; mu emee; ḑphe anwushihukota g'ḑphe ha. Mbu-a; nshio phe teke mu a-gharu phe azu!

¹³“Ndu Ifuremu be mu humakpooru; ḑphe du ge ndu Taya, bu ndu e yeru g'oshi l'eka dushikpo ree ike. Ole ndu Ifuremu ono e-mechaa chiru unwu phe nu ndu e-gbushi phe nu.”

¹⁴“Nunu phe iphe; gube Chipfu! ? Bu gunu be ii-nu phe? Nu phe ḑpho ume-nwa; yee era, mini-era adudu!”

Aphu, Chipfu anu ndu Izuruḑu

¹⁵“Oo ejo-ememe, ḑphe no emegbabe le Gilugalulu be mu gude kpo phe ashi l'eka ono. O buru k'iphe-eji, ḑphe no emegbabe be mu e-gude chiru phe g'ḑphe ba noduhe l'ulo mu. Mu tee yehedu phe obu; kele ndu-ishi phe g'ḑphe ha kwefukotaru ike.

¹⁶Ndu Ifuremu bẹ e chiakwaru iphe. Oḡbarabvu pẹ kpohuakwaru nku. Ophu ephe amiedu amimi. Ephe -zushichakponu unwegirima; mu egbushia unwegirima ono, ephe yeru obu ono.”

Hosiya epfu opfu ẹhu ndu Ízurelu

¹⁷“Chileke mu a-jika pẹ; kele ephe te emeduru iphe, o sūru g'ephe mee. Ephe e-mechaa wata agha phurii l'ohamoha.”

Hosiya 10

¹“Ndu Ízurelu shikwa du gẹ vayinu, baru ụba, bya amia mebyi. Mebyi iya ono nodu aka shii eje; o nodu aka akpushi oru-ngweja. Alì nodu agba upete eje; yẹbedua nodu emejgbaa mkpuma mkpuma, duru iya nsọ g'ọ kabaa ama mma.

²Eregede jiru okpoma pẹ ejiji. Ole o nta-a bẹ ephe byaru evuta iphe-eji ono, ephe meru ono. Oo Chipfu a-lajashi oru-ngweja pẹ ono; bya emebyishia mkpuma ono, ephe doberu nsọ ono.

³“Noo teke ephe a-wata epfu sū: ‘Anyi te enwekwa onye eze. Iphe, kparu iya nu buru l'anyi ta atsudu Chipfu ebvu. Ole o bu; ome anyi nweru onye eze; ? bu gunu bẹ o gege adu ike meeru anyi?’

⁴Ephe ekweje ukwe l'ephe e-me iphe, du igwerigwe. Ephe eria nte l'eregede gude gbaa ogbandzu. O buru iphe ono kpataru agbapheru onwophe ekwo kpo-fushiaha g'eka ejoeswa akpo-fushi l'eka a koru opfu.

⁵“Ndu watawaru agu ndu bu le Sameriya; o buru iphe, kparu iya nu bu agwa nweswi, du le Betu-Avenu. Mbụ le ndu shi abajeru iya eja aguwa aphu ekpu iya; ndu agwa iya nu nodu eruwaa erwubvu ekpu iya; kele akpabiri iya bvwaru iya l'ehu.

⁶Ee-mechakwaa patakwapo nweswi ono l'onwiya gude lashia alì ndu Asiriya; g'ọ buru iphe-oma, e gude ewotaru Okalibe, bu onye eze ndu alì ono. Ndu Ifuremu bẹ ee-me iphere kpua. Mbụ le ndu Ízurelu bẹ iphere e-gude l'ephe pyiru ntekpe dobe agwa agwagwa.

⁷Ndu Sameriya yee onye bu eze pẹ bẹ ee-me g'ephe chihu. Ephe a-du g'ebaji-oghu, degeru l'eli mini.

⁸Iphe, bukpo eka aagwaje iphe bẹ ee-mebyishichaa. O buchaa ya bu iphe-eji, ndu Ízurelu emegbaa. Ewu-obvú e-fushi l'oru-ngweja pẹ; egbara aphua ya. Noo teke ephe a-su ubvú, hagbaa shii g'ọ tupyabe pẹ. Ephe asu ubvú, hagbaa nwanshi g'ọ danaa dapyabe pẹ.”

Chipfu anma ndu Ízurelu ikpe

⁹“Gube Ízurelu; e -shikpo teke ke ndu Gibiya bẹ i shiepho meta iphe-eji. Teme i ndue ya pho g'i no iya. Ophu oḡ eriduru ndu ejo-iphe le mkpukpu Gibiya.

¹⁰Mbụ le-a; o kwa teke du mu ree bẹ mu a-hu pẹ ahuhu. L'a chikobe ohamoha g'ephe tsoo pẹ oḡ; keshia pẹ egbu kele ephe mewaru ejo-iphe mmekwase.

¹¹“Ndu Ifuremu dukwa ge nwada-eswi, e ziru iphe; k'ophu bu l'azoshi ereshi aduje iya ree. Ole mu miru enya le nweguru olu iya ono. Mbụ le mu e-kebuta ndu Ifuremu g'ephe kwata eje ozi mkponwu-ehu; mbụ le ndu Jiuda a-ko okoro. O buru oshilokpa Jiekopu a-nodu egbukposhi ali.

¹²Su-a; unu kooru onwunu apfubekoto g'opfu! Unu akpata akpuru-iphe, o mitaru, bu n-yemobu! Unu gbukposhia ali unu ono, e te shidu kwaa akoko ono; kele o rwuakwaru teke aa-wata acho Chipfu; jasụ l'ọ bya edzee apfubekoto ge mini l'ehu unu.

¹³Obenu l'opfu unu gbẹ kochia bu ejo-iphe. O buru iphe, apfuduru-oto be unu kpataru iya. Iphe, unu riru buru akpuru eregede. “Eshinu unu chiru upfu ye l'okpehu k'unu yele ikpoto ndu ojogu, unu nweru;

¹⁴be aa-tu uzu ogu kpua ndibe unu; k'ophu bu l'iphe, bu ulo ono, unu anoduje ezeru ndzu ono a-buru iphe, e tsukposhiru etsukposhi; egube ono, Shalumanu tsukposhiru mkpukpu Betu-Abelu le teke a lwuru ogu ono; mbụ teke e chitaru ndu bu ne ephe l'unwu phe tua gbaa l'ali.

¹⁵Noo g'oo-mecha nwuaru unube ndu mkpukpu Betelu; kele ejo-ememe, unu eme pawaru eka. O -rwuepho l'utsu ujiku lanu be ee-mebyikpoeppo eze ndu Izurelu rengurengu kpo.”

11

N-yemobu Chileke l'ehu ndu Izurelu

¹“Teke Izurelu bu nwata be mu yeru iya obu shii. O buru l'ali Ijiputu be mu jeru je ekua nwa mu nwoke ono.

²Obenu l'obujeru; mu -nodu eku ndu Izurelu ono oku; ephe aka mu akpiriberu uzenya. Ephe nodu anoduje agwa Balu; bya anodu anoduje akpo unwu-isensu oku anu ntekepe.

³O kwa mbedua ziru ndu Ifuremu ije. Mu shi esetaje phe l'eka. Ophu ephe amadu l'oo mbedua bu onye meru g'ehu du phe ike.

⁴Mu shi egudeje obu-imemini gude ehe phe. O buru eye obu, mu yeru phe be mu gude edu phe. Mu shi ezije phe ivu-erwa, ephe vu; mu ephozekpo ephoze dee phe nri.

⁵“Ephe e-mechaa laphu azu le Ijiputu. O buru ndu Asiriya e-mechaa buru ishi phe; noo kele ephe jikaru l'ephe taa lwadu azu alwapfuta mu.

⁶Ogu-echi e-mechaa jeaha iphu iphu le mkpukpu le mkpukpu phe. Mbụ gbukashia oguzo-igwe, e yeru l'onu-abata mkpukpu phe; mee iphemiphe, ephe chiru k'ememe; o to duedu ophu ephe eme.

⁷Ndibe mu kebefutaekwarupho l'ephe a-lufu mu l'eka; mbu-a; o to dukwa m'obeta ephe kuchakponu onye ono, bu Okalibe-kakota-shii onoya; o to duedu iphe, e-mekwadu g'o kutsee phe ozo.

⁸“Sụ-a; gùbe Ifuremu; ? dẹ̀nkpoo gẹ̀ mu e-shi haa ngu? Gùbe Ízuru; ? dẹ̀nkpoo gẹ̀ mu e-shi woru ngu ye ndu ọ̀zo l'ẹ̀ka? ? Dẹ̀nu gẹ̀ mu e-shi mee ngu gẹ̀ mu meru ndu mkpukpu Adama? ? Dẹ̀nu gẹ̀ mu e-shi mee ngu gẹ̀ mu meru ndu mkpukpu Zebowimu? Egomunggo lwaakwaru mu azu. Ọ̀guakwa mu agushi mu ike g'a sụ̀ lẹ̀ mu phuru ngu obu-imemini.

⁹Mu ta atụ-koshikwa ngu oke ẹ̀hu-eghu mu; ophu mu alwakwa azu abya emebyishi Ifuremu; noo kele mu bu Chileke; mu ta abudu nemadzu. Ọ̀o mu bu onye du nsọ̀, no l'echilabo unu; ophu mu egudekwa oke ẹ̀hu-eghu mu abyapfuta unu.

¹⁰“Epe e-mechakwaa tsoahaa Chipfu. Mbụ̀ lẹ̀ mu a-sụ̀ ekiri g'oduma. Teke mu sụ̀ru ekiri ono; unwu mu anmaru pyaapyaapya shi l'uzo ẹ̀nyanwu-ariba bya.

¹¹Epe eshikwapho lẹ̀ Ijiputu phuru kwẹ̀kwee bya gẹ̀ nwenu. Epe adu gẹ̀ ndo shi l'alì Asiriya bya. Mu eworu phe chikobe; epe eburu l'ibe phe.” Nokwa iphe, Chipfu eepfu.

Iphe-ẹ̀ji, ndu Ízuru eme

¹²“Ndu Ifuremu gudeakwa adu uka gbaphee mu mgburugburu. Onu-ulo Ízuru nodu agbaru mu ẹ̀regede. Obenu lẹ̀ ndu Jiuda be Chileke maru; mbụ̀ lẹ̀ epehedua be Onye Nso ono gudekwadu ire phe ẹ̀ka.”

Hosiya 12

¹Ndu Ifuremu bu iphe, epe gude azu onwophe bu pherephere. Iphe, epe anoduje achi mkpurumkpuru bu pherephere, shi l'uzo ẹ̀nyanwu-awawa. Epe nodu adu uka adu iya ndzuto; bya ewe iwashi aku iya l'eli. Epe lẹ̀ ndu Asiriya gbaa ndu. Teme epe nodu emeje manu olivu evularu ndu Ijiputu.

²Chipfu nwekwaru opfu, adaru yee ndu Jiuda; mbụ̀ l'oo-hu oshilokpa Jieko bu ahuhu ejo-ipe, epe eme; pfua phe ugwo g'epe eme.

³Teke o nokwadu l'ephe be o zuru nwune iya l'ichiripfu-okpa. O bya afuta buru nwoke; yee Chileke gbaa mba;

⁴mbụ̀ lẹ̀ yee ojozi-imigwe gbaru mba; o mekpee ya. O waa ekwa; rwoahaa g'o meeru iya eze-ipe-oma. O bya ahuma Chileke lẹ̀ mkpukpu Betelu; o buru l'eka ono be yee Chileke ono no bogba uja;

⁵mbụ̀ yele Chipfu, bu Chileke bya aburu Okalibe-Kakota-Ike. O kwa Chipfu bu epha, e gude maru iya!

⁶Ole o bu; unu lwaphutakwa azu lwapfuta Chileke unu! Unu eyee ya obu; unu ekpee ikpe, pfuru oto! Unu anoduje kwaberu Chileke unu mkpurumkpuru!

⁷Obenu lẹ̀ ndu-a du gẹ̀ ndu agba ngho egudeje iphe, e meru l'ugho ere aswa; k'ophu epe e-shi nno mee nemadzu mkpurukpuru-nya.

⁸Ndu Ifuremu anọduje eku onwophe sụ: “Anyi nweru iphe shii; ẹku byaakwaru anyi. Ẹku ono, ọdu anyi ono g'ọ ha e-me; a taa humadu ẹjo-iphe, anyi eme; yee iphe-ẹji, anyi eme.”

⁹Obenu l'ọ kwa mbedua bu Chipfu bya aburu Chileke unu. Ọ kwa mu bu onye dufutaru unu l'alị Ijiputu. Ọ kwa mu e-me unu g'unu bua l'ulo, a kparu l'ekwa ọzo; g'unu shi ebuje teke unu shi aboje ọbo-iphe, geru egeru.

¹⁰“Mu shi epfuje opfu yeru ndu mpfuchiru goshi phe iphe, du igwerigwe l'ophulenyaa; bya eshikwa phe pho l'eka anma etu, du igwerigwe.”

¹¹Ndu Giladu; ? ephe bu ndu ẹjo-iphe ọo? Ephe ta adukwa ophu bu iphe. ? Aagwaje oke-eswi le mkpukpu Gilugalu ọo? Ọru-ngweja phe e-mechakwanaa du ge mkpokobe mkpuma, a kuburu l'eka a koru opfu.

¹²“Jiekopu gbalaru laa alị Aramu. Ọ buru l'eka ono be Izurelu ono no jee ozi jeta nwanji luru. Ọ buru eche aturu be o gude kwaa ya aswa.

¹³Chipfu bukwa onye mpfuchiru be o gude dufuta ndu Izurelu l'alị Ijiputu. Ọ buru onye mpfuchiru be o gude leta iya enya.

¹⁴Obenu le Ifuremu kpatsuru Chipfu iwe, paru ẹka apaa. Ọ buru Nnajiuphu iya e-me g'ikpe onye o gburu tukoru iya l'ishi; teme l'ọ pfukwaa ya pho ugwo iphe-iphere, o meru iya.”

Hosiya 13

Ẹhu-eghu Chipfu l'iswi ẹhu ndu Izurelu

¹“O shi abujeru; Ifuremu -pfua opfu; amadu anmahu pyaapyaapya. Ifuremu shi buru onye e kutseru ekutse l'alị Izurelu. A nonyaepho; ọ wata abaru Balu ẹja; ikpe nmaa ya; ọ nwuhu.

²Nta-a be ndu Ifuremu kabaa eme iphe-ẹji eje. Ephe kpushiru ntekpe dobegbaaru onwophe; mbu ntekpe, e deru enya le mini mee le mkpola-ochaa phe. G'ephe ha bukota iphe, ndu maru eme ona gude ẹka kpa. Ephe nodu asuje: ‘Wakwa iphe, unu a-nodu abaru ẹja baa-o!’ Mbu nemadzu nodu anoduje etsutsu onu l'agwa nweswi!

³Ọo ya meru g'ọ gude ephe je a-du g'iji, akwa l'utsu. Mbu iji, akwa le nchi-abohu, abujeru: ọ -kwachaa l'oophukashihu. Ephe a-du g'udzu eswa ereshi, etsushihu l'eka eechije balị; g'enwuru-oku, shi le windo ekposhihu.

⁴“Obenu l'ọ kwa mbedua bu Chipfu bya aburu Chileke unu. Ọo mu bu onye dufutaru unu l'alị Ijiputu. Unu ta adukwa iphe ọzo, unu e-je amaru gbahaa mbedua. Ophu ọ dukwa onye ndzota ọzo, du nu; gbahaa mbedua.

⁵Ọo mbedua letaru unu enya teke unu no l'echiegu. Mbu l'alị ono, okpomoku enwu phuruphuru ono.

⁶Teke mu nuru phe nri be ephe jiru phe. Teke ono, ephe jiru phe ono; ephe kuahaa onwophe woru mu zohaa.

⁷Oo ya bu lẹ mu a-zu pẹ gburumu g'oduma. Mbụ lẹ mu e-woha onwomu l'aguga gbororo g'agu.

⁸Mu e-tso pẹ ogu lajashia pẹ g'agu, a nataru nwa iya. Mu a-ta pẹ g'oduma ataje anu, o gburu-a. O buru anu-egbudu a-lajashi pẹ togbo eba.

⁹“Unube ndu Izurelu; mu e-mebyishi unu; kele unu etso mu opfu. O buru onye ono, eyeru unu eka ono be unu etso opfu.

¹⁰? Bu awe be onye bu eze unu no g'o bya adzo unu? ? Bu awe be epe no; mbu ndu-ishi le mkpukpu unu g'ephe ha; mbu ndu ono, unu pfuru opfu ehu pẹ teke unu suru g'a hotaru unu onye eze; waa ndu a-buru ndu-ishi unu ono?

¹¹Mu gude ehu-eghu woru eze nu unu; bya egudekwapho oke ehu-eghu mu nafi iya unu.

¹²“Ejo-iphe, ndu Ifuremu mekotaru be a kwachikwaru akwachi. Iphe-eji pẹ be e dekwaru l'ekwo dobe.

¹³Iphe-ehuka, ooje due ya pho g'oduje nwanyi, ime eme. Obenu l'o bu nwata, amadu iphe, abujeru; o -rwua l'ezeda iya; o too maduru eye ishi l'enu ehu ne iya.

¹⁴“Mu a-gbafuta pẹ g'ali-maa ta aka pẹ okpehu. Mbụ lẹ mu a-gbata pẹ l'itumo anwuhu. Gube onwu ? bu awe be ejo iphe-ememe ono, i vu ono nohunu? Gube ali-maa; ? denu iphe ono, iigudeje emebyishi iphe emebyishi ono? “Mu ta aphukwaru iya obu-imemini aphuphu ophu;

¹⁵mbukwa m'obeta o nodu l'echilabo unwanna iya aba yoyoyo; ole oke pherephere, shi l'eka Chipfu e-shi l'uzo enyanwu-awawa ziru bya. Eka o shi ezi abya bu l'echiegu. Ishi ngele ndu Ifuremu atabuhu. Welu pẹ atashihu. L'a tuko eku, o shi kpata akpata rwuta.

¹⁶Ndu Sameriya e-vuru nrimaphu, du l'iphe-eji pẹ; kele epe kwefuru Chileke pẹ ike. Oo ogu-echi be ee-gude gbushichaa pẹ. Unwegirima ibe pẹ be ee-chitachaa togbo l'ali. Unwanyi pẹ, du ime a-buru ndu aa-gbajachaa epho.”

Hosiya 14

Izimanu alwa azu bu iphe-ekweru

¹“Unube ndu Izurelu; unu lwapfuta Chipfu, bu Chileke unu! O kwa iphe-eji, unu eme meru g'o gude unu daa!

²Unu kpuru opfu l'onu gude lwapfuta Chipfu. Unu bya bya asu iya: ‘Guaru anyi nu l'iphe-eji, anyi emekota ngu g'o ha! Gudenu eme odoo nata anyi; g'anyi egudekwanu akpuru-iphe, shi anyi l'onu gude gwaa ngu!

³Ndu Asiriya taa dukwa ike adzo anyi. Ophu o buedu l'eli inya-ogu be anyi annakor. Anyi ta abyadu egudebaa onu anyi woru iphe, bu eka be anyi gude mee ya kua “Chileke anyi; “ kele oo l'eka ngu be onye enweddu nna anoduje l'a phuru iya obu-imemini.’ “

Chipfu ekwe ndu Ízurelu ukwe ndzụ òphúú

⁴“Mu e-me-a g'èphe dụ-buhu ghelegheleghele ono, èphe dụ ono. Mu abya atùshihu èhu; yee phè obu; kèle mu taa vùheduru phè òvuma.

⁵Mu a-dụ g'iji akwaru ndu Ízurelu. Yèbedua abya pulapula g'ojimbvu ègu. Ògbarabvu iya abamia abami l'ime alì g'oshi sida, nò l'úbvú úbvú Lébanonu.

⁶Unwu iya òphu dụ nwa pènupevu amìshikwapho evu evuvu. Akpabiri iya adụ gè k'oshi olivu. Mkpò, òo-nòdu eshi adụ gè mkpò oshi sida k'úbvú úbvú Lébanonu.

⁷Amadụ adòaharu lè mkpula iya òzo. L'ò sòo pulapula g'ereshi. L'ò baa yoyoyo gè vayinu.

Údù iya atùko èkameka ngaa gè mkpò mèe, a kùtaru l'úbvú úbvú Lébanonu.

⁸? Bùbaa gùnu bè ndu Ifuremu èphe lè nshi emegbabaa? L'èka mu a-nòdu anù olu iya eleta iya ènya. Mu dùwaa g'oshi payinu, èkwo iya jihukòtaru kè hùduu; ò bùru mu emeje g'unu mìa mebyi.”

Mkpòchi-ishi iya

⁹“? Bù onye bù onye maru iphe? G'ò nwùtakwa iphe l'iphe-a! ? Bù onye bù onye iphe, edoje ènya ree? G'ò tükokwa doo ya ènya! L'ùzo kè Chipfu dükotakwa nhamùha. Ò bùru ndu pfùberekoto eshi iya. Obenu lè ndu eme èjo-ememe bè ùpfu adùje m'èphe -je iya eshishi.”

Jiowelu

Jiowelu 1

¹Qwaa bu ozi, Chipfu ziru Jiowelu, bu nwa Petuwelu.

Igube, byaru mkpu-danyi-oku

²Unu numakwa iphe-a; unube ndu bu ogerenya! Unu ngabekwa nchi; iphe, bukpo ndu bu l'ali-a l'ophu! Iphe, du egube-a; ? o mejekporu eshinu unu shi noduta ndzu? Too ? o mejeru le teke ke nna unu oche phe?

³Unu pfukwaaru iya unwegirima unu! G'unwu unu pfukwaru iya pho unwu nkephe. Unwu nkephe epfuaru iya ogbo ophu abya nu.

⁴L'iphe, otsu-gbiigbi igube taru taphodo be oke-igube wubataru bya ataa. Ophu oke-igube taru taphodo be unwu ogbolanu igube wubataru bya ataa. Ophu unwu ogbolanu igube taphodoru be mgbagbaramatsu byaru bya atachafu.

⁵Unu tehu etehu; unube ndu angunukaje mee. Unu wata ara ekwa! Unu chia mkpu; unube ndu anguje mee ngugharu iya aka! Unu kpo mkpu mee

ophuu ono; kele a nyichatawaru iya unu l'onu!

⁶O duru oha, byaru bya eripyabe ali mu-a. Ndu ono be okpehu du shii; teme ophu aagutadu phe l'ogu. Eze, du phe l'onu du ge k'oduma; mbu l'o du g'epyii, no l'onu ne oduma.

⁷O tapyashichawaru vayinu mu; bya emee oshi figu mu; o bukotaru ola-l'iswi. O swachacharu iya ugbo woru iya togbo. Ekali iya nodu achagbaa ucha.

⁸Unu gua aphu ge nwamgboko, yee nwoke teke akwaswee, yeru uwe-aphu, agu aphu ke onwu gburu nwoke eje iya alulu.

⁹Ngweja-nri; waa ngweja-mee chihuwaru l'ulo Chipfu. Ndu bu uke no l'aphu; mbu ndu ono, ejeru Chipfu ozi ono.

¹⁰Opfu, a koru akoko be buwaa ola-l'iswi. Ali kpo hu nku; ereshi, a kuru iya mebyishihu. Mee ophuu tashihu; teme manu nodu atahuwa atahu.

¹¹“G'iphere gudekwa unube ndu ako opfu! Unu rashia ekwa ike; unube ndu ako opfu-vayinu! Unu gua aphu witi unu; yee bali unu; kele iphe, a kuru l'opfu be e mebyishiwaru.

¹²Ome vayinu kposhihuwaru nku; teme oshi figu nwukotawaa lwaa. Oshi itorokuma; yee mpfu; waa oshi udara; mewaro iphe, bukpo oshi, nokota l'egu l'ophu kphukotawaru nku; kele iphe, emeje g'ehu tsoo unwu-eliphe utso chihuwaru.”

Oku izimanu alwa azu

¹³Unu yekwaa uwe-aphu wata agu aphu; unube ndu bu uke! Unu watakwa echi mkpu; unube ndu ono, anoduje eje ozi l'oru-ngweja ono! Unube ndu ono, no l'iphu Chileke

mu eje ozi ono; unu byakwa eyee uwe-aphu nokota enyashi l'ophu; kele ngweja-nri yee ngweja-mee be e buchiwaru l'ulo Chileke unu.

¹⁴Unu raa ya arara g'a swiaru Chileke egu! Unu tua ndzuko, a-duru Chileke iche! Unu kua ndu bu ogerenya ndzuko; mekpoo iphe, bu ndu bu l'ali-a l'ophu; g'ephe dzuko l'ulo Chipfu, bu Chileke unu raku Chipfu ono l'ekwa.

¹⁵Ha-o! Egube mboku ono; kele eswe Chipfu dukwaa ntse. Oo-buru eswe, Okalibe-kangokotaru-nu e-mebyishi iphemiphe.

¹⁶“? Tobudu l'iphe anyi gedegede be e meru; nri chihu; bya emee; ehutu-so yee ete eswa bukwapho l'ulo Chileke anyi?”

¹⁷Akpuru iphe, a kuru akuku gbapyashihuchawaru l'ime igbo, a kuru iya. Iphe, bukota ulo, aakubeje nri dabyikotaru iphoru. Oba ereshi toko dakashihu; kele ereshi obu l'onwiya mebyishihuru l'egu.

¹⁸Lewaro g'anu-ulo atsugbaa ude! Eswi be o tugbaru eberebete; kele ephe te enwedu nri, ephe a-ta; mbu l'aturu tukoru eje iphe-ehuka.

¹⁹O kwa gube Chipfu be mu araku; kele oku tsuakwaru aka iphe-edobe ataje nri, du l'echiegu; mbu l'iphe, bu oshi, du l'egbudu nwukotawaru phuruphuru nwufu l'oku;

²⁰anu-egbudu nodu atuchaa heehee agba achu ngu. Nggele nggele be mini tashihwaru. Teme oku tsufuwaa aka iphe-edobe ataje nri, du l'echiegu.”

Jiowelu 2

Igube, etsu gbiigbiigbi

¹Unu gbua opu-ogu l'ubvu Zayonu! Unu echia mkpu-ogu l'ubvu mu ono, du nso ono! G'iphe, bukpoo ndu bu l'ali-a nmakwaa pyaapyaapya; kele eswe ke Chipfu abyaakwaa; mbu l'o rwaakwaru erwurwu;

²mbu mboku, a-buru mboku, agba ochii agba ke tsukiribaa; mboku, urwukpu asopyabe; ekameka ejihu huduu. Ikpoto ndu ojogu, ike du awu gbiigbiigbi aso abya g'eka ochii nchi-abohu asopyabe asopyabe l'eli eze ubvu; udu iya ophu eteke adu-swe teke ndiche; ophu o byadu adu l'ogbo ophu abya nu.

³Oku no phe l'uzo iphu ekepyashi iphe ekepyashi. Oku nodukwa phe pho l'azu enwu phoophoopho. L'iphe phe be ali duopho ge mgbabu Edenu. Eka ephe ghawaru ye l'azu buru echiegu, dabyiru ke mmanu; ophu o dudu iphe, anahuje phe nu.

⁴Ephe gbaru ugbugba g'inya. Teme ephe nodu awu ke wugelengu wugelengu g'inya-ogu.

⁵Igiji, ephe ede gude awu gbiigbiigbi l'eli ubvu eje abya duopho g'eka ugbo-inya awu. Mbu l'ephe duopho g'eka oku alwa wowoowoo etsu ekperema okponku; g'ikpoto ndu ojogu, a chikoberu gude eje ogu.

⁶Oha, humaru phe nu evujeru uzo rwushihu. Iphu adukota onyemonye eji.

⁷Ḑphe abyaję ęnari g'ojogu, ike dę. Ḑphe nodu enyije igbulọ gę ndu ojogu. G'ęphe ha nodu egbuje giriri azọ eje; ophu o dudu onye ophu egbeje egbegbe l'uzo, ęphe eshi;

⁸ophu o dudu onye ophu akwaję nwibe iya nkù. Onyemonye apfųjeerupho kękereke azọ eje l'iphu l'iphu. Ḑphe anodujeepho apfų shošshoo apfuda l'iphu ogu. Ophu ęphe aladu azų azų.

⁹Ḑphe nodu ezehuje zeba lę mkpukpu; tuko igbulọ gbaa gorogoro; nyichaa enyinyi nyibachaa l'ime ọlo l'ime ọlo. Ḑphe nodu eshijechaa windo abahų l'ọlo gę ndu-oshi.

¹⁰“Eliphe l'ophu anmakota jiiijiii l'iphu phe. Akpaminigwe nodu anma yigayiga. Ęnyanwu yę onwa gbahų oçhii. Ophu kpokpode ekeędu paapaapa.

¹¹Chipfu nodu l'iphu ndu ojogu iya ede ririri. Ndu alwuru iya ogu bu aguta aguta. Tęme ndu ono, emeje iphe, o suru g'e mee ono paa okpehu. Mboku kę Chipfu pakwarų ęka bya adų ebvu. ? Bu onye a-dų ike tapyabę iya lę nshi?”

Alaja okpoma haa uwe

¹²Wakwa iphe, Chipfu epfu baa: Ntaakponu; unu gudenu okpoma unu g'o ha lwapfuta mu! Unu gude aswi ęgu; mę ara ękwa; mę agu aphų gude lwa!

¹³Unu lajaa okpoma unu; o to budu alaja uwe! Unu lwapfuta Chipfu, bu Chileke unu; kele oomeje eze-iphe-oma; teme o nodu aphuje obu-imemini! Ehu te eghujedu iya eghu ęwegwa; teme n-yemobu iya dų shii. Tęme ophu oohejedu iya ihee eme gę nemadzų jee iphe-ęhuka.

¹⁴? A maru ? l'oo-ghakobe phuru unu obu-imemini meeru unu iphe-oma; mbų nų unu nri; waa męe; k'ophu bu l'unu e-gude iya gweeru Chipfu, bu Chileke unu ngweja-nri; waa ngweja-męe.

¹⁵“Unu gbua opu-ogu obu l'ubvu Zayonu! Unu raa ya arara g'a swiaru Chileke ęgu, dų nsọ! Unu tua ndzuko, a-duru Chileke iche.

¹⁶Unu chikobe ndu Izurelu l'ęka lanų! Unu emee gę ndu byaru ndzuko ono dų nsọ! Unu chikobe ndu bu ogerenya! Unu achikobe unwegirima; mę ndu ophu eechekwadu ęra! G'onye luru nwanyị ophuu hakwaa erwu iya futa! Nwanyị, aluru k'ophuu ahaa ulo-epfu iya!

¹⁷Gę ndu bu uke, bu ndu ejeru Chipfu ozi nodukwa raa ękwa lę mgbaka nwulo, eeshije abahų l'eze-ọlo Chipfu yele oru-ngweja. G'ęphe pfukwaa su: ‘Gube Chipfu; phunaaru ndu nkengu obu-imemini! Be mekwa gę ndu ono, bu okiphe ngu ono buru iphe, ee-gude achị ochi! G'ęphe ta abukwaru iphe, ohamoha e-gude agba mgbonu; kele-a; ? denu g'o gude ndiphe je l'anodu epfuru ndu Izurelu asuje phe: ? Bu awe be Chileke unu no?’ “

Onu, Chipfu e-ye

¹⁸Noo teke Chipfu a-wata eko okophoo l'ęhu ndu ali ono, bu ndu nkiya ono; bya aphuru ndibe iya obu-imemini.

¹⁹Chipfu eyeeru ndu nkiya ono onu sụ phẹ-a: “Unu lekwa-a; mu anụakwa unu ereshi; yẹe mee òphúú; yẹe manụ olivu; nụkpoo ya unu shii; k'òphu oo-ji unu ẹpho rengurengu. Mu tee mebaedu unu g'unu buru iphe, ọhamoha e-gude achi ọchi.

²⁰Mu a-chi ndu ojogu ono, shi l'uzo isheli ono chi-mihu g'ephẹ nodu unu ụzenya. Mu a-chiru phẹ jeye ị mkpọkoro ali, adudu iphe, b eemetajẹ iya. Ogbo ivuzo ogu phẹ be mu a-chiru ye l'eze-enyimu ụzo ẹnyanwu-awawa. Mu achiru ndu ikpazu ogu phẹ ye l'eze-enyimu ụzo ẹnyanwu-ariba.

Éwó, ẹphẹ a-nodu ekpo etsulihuẹpho etsulihu. Mbụ l'ishishi phẹ a-tukoepho ẹkameka. Ire-lanu, bụ ị Chipfu mewaru iphe, parụ ẹka.

²¹Gẹ ndzụ ba agushi ngu gube ali! Ọ chia g'ẹhu tsoo ngu uto; g'i techia ẹswa! Ire-lanu bụ ị Chipfu mewaru iphe, parụ ẹka.

²²Gẹ ndzụ ta agushi unube anu, bu l'ime ẹgbudu; kele ẹka unu atajẹ nri, du l'echiegu abyawaa erwu irwu. Oshi abyawaa ami mebyi. Oshi figu yẹe vayinu abyawaa eme ike phẹ.

²³G'ẹhu tsoje unu uto; unube unwu Zayonu! Unu nodu l'eka Chipfu, bụ Chileke unu tee ẹswa; kele ọ watawaru edzeru unu mini ishi-apha ono g'ọ gbaru. Ọ watawaru edzeru unu mini ono edzeshi iya ike; edzeru unu mini ishi-apha bya edzekwapho mini ula-apha; g'o shi edzejehawaru iya unu.

²⁴Ẹka eechije balị be balị e-mechaa ji ejiji. Ẹka aakuje mee eji kudumu ị mee òphúú; yẹe manụ olivu.

²⁵Mu a-pfu unu ugwo iya k'apha g'apha pho, igube tapyashiru iphe unu pho; mbụ unwu ogbolanu igube; me mgbagbaramatsu iya; mekpoo otsu-gbiigbiigbi iya; mbụ ojogu mu, ike du ono, mu yeru unu ono.

²⁶Unu e-nwekpooru ikpoto iphe, unu a-nodu eri jasụ l'ooji unu. Teme ọ buru mbedua, bụ Chipfu, bụ Chileke unu be unu a-nodu etu ẹpha; mbụ onye ono, meru iphe, du biribiri l'ẹhu unu ono. Sụ-a; ndu ono, bụ nkemu ono; be e tee mebaekwa iphe-iphere.

²⁷Noo teke unu a-maru ị mu no-a ị Ízurelu; maru l'oo mu bụ Chipfu bya aburu Chileke unu; l'ọ to duedu onye ozo, dubaa nu. Ophu a byadu emebaa ndu bụ ndibe mu iphe-iphere ozo.

Eswe ke Chipfu

²⁸E -mechaa be mu a-wu Unme mu l'ẹhu nemadzu mgburugburu. Unwu unu unwoke me ke nwanyi e-pfuchiru Chileke. Ndu bụ ogerenya unu arwo nrwo. Unworoobyia unu aphua ophulenyia.

²⁹Le mboku ono be mu a-wu Unme mu ono l'ẹhu ndu bụ ohu; unwoke phẹ m'unwanyi phẹ.

³⁰Mu e-goshi iphe-ohumalenya l'akpaminigwe me l'eliphe l'ophu. Ọ buru iphe, mu e-gude mee ya bụ mee; yele oku; yẹe okpu-tutuutuu ẹnwuru-oku.

³¹Enyanwu bẹ ee-me g'ọ gbaahaa ọchii. L'e mee g'onwa buru mee. Teme l'o rwua oke mbọku kẹ Chipfu ono, bụ eswe, a-dụ ebvu onoya.

³²Mbụ l'aa-dzọta iphe, bụkpoo ndu araku ẹpha Chipfu; kẹle oo-nweru ndu a-nahụ nụ, a-nọdu l'úbvú Zayonu yefua lẹ mkpukpu Jierúsalemu; mbụ l'oo-nweru ndu Chipfu e-ku l'echilabọ nwa ndu ono, waru nụ ono; bụ iya bụ iphe, Chipfu pfuru.”

Jiowelu 3

Ikpe, ee-kpe ohamoha

¹“Kẹle-a; o -rwuepho lẹ mbọku ono, bụ teke mu e-dophu ndu Jiuda ẹphe lẹ ndu Jierúsalemu azụ l'onodu pẹ;

²bẹ mu a-chikobe ohamoha tuko g'ẹphe ha chita jeshia lẹ nsuda Jiehoshafatu. Noo ẹka mu a-nodu kpee pẹ ikpe; ikpe ẹhu ndu ono, bụ okiphe mu ono; mbụ ndibe mu, bụ ndu Ízurelu; kẹle ẹphe chikaru ndibe mu; ẹphe dzuru ohamoha; bya eworu alị mu kekashia.

³Ẹphe tũaru ndibe mu ono ido; bya achita unwu pẹ unwu-okoro gude je agbanweta unwanyi-ukpara; bya achita unwu pẹ unwumboko reshia gude gaa mee ngua.

⁴“Sụ-a; ? bụ gunu bẹ unu a-guru nụ mu; unubẹ ndu mkpukpu Taya yee ndu mkpukpu Sayidonu; mēkpoo unubẹ ndu bukọta l'alị ndu Filisitayinu l'ophu? ? Bụ iphe, mu meru bẹ unu apfụ mu ugwo iya ọo? Ọ -buru l'ọo ugwo bẹ unu apfụ mu bẹ mu e-kwo-a gburumu mee ẹgwegwa woru iphe, unu meru tukobe unu l'ishi;

⁵kẹle unu wotaru mkpola-ochaa mu; yee mkpola-ododo mu bya atuko ẹku mu ndu ophu kachaa ama mma vuta je akube l'ulo nshi unu.

⁶Unu woru ndu Jiuda yee ndu Jierúsalemu ree ndu Gurisu g'ee-shi g'unu mee g'ẹphe nọdu ẹnya l'oke alị ẹka ẹphe shi.

⁷“Lekwa; mu e-mechakwaa je achifuta pẹ l'eka ono, unu chiru pẹ je eree ono. Mu ewophutakwanu iphe, unu meru azụ bya atukobe unu l'ishi.

⁸Mu a-chita unwu unu unwoke mē unwu unu unwanyi chiru reshia ndu Jiuda; ẹphe achita pẹ ree ndu Seba; mbụ oha kwata dukpoo ẹnya okpobe adudu.” Ọ kwa Chipfu bẹ pfuru iphe ono.

⁹Unu woru iphe-a pfiaru ohamoha: Unu kwakobekwa k'ogu! Unu mekwaa gẹ ndu ike ogu dū tsulihu! G'iphe, bụkpoo ndu alwuje ogu kpiritakwaru ntse bya awata alwu ogu!

¹⁰Unu kpukwaa ogù unu g'ọ bụgbaaru ogu-echi! Unu akpua nwokarara unu g'ọ buru arwa! G'onye ike bvuru pfukwaa sụ: “Mu buakwaa onye okpehu dushi ike!”

¹¹Unu dzukobe ẹgwegwa; unubẹ ohamoha l'ophu! Unu shikpoo l'ekameka bya edzukobe l'eka ono! Gube Chipfu; menaa gẹ ndibe ngu, bụ ndu ike dū shi l'imigwe lwazeta l'alị!

¹²“G'ohamoha tsulihunu! G'ẹphe zenuru jeshia lẹ nsuda Jiehoshafatu; kẹle ọo l'eka ono bẹ mu a-nodu kpee ohamoha mgburugburu ikpe.

¹³Unu watanu egbu mma unu swiiswiiswii; kele iphe, a kuru l'opfu chawaru. Unu bya azoshia akpuru vayinu obu; kele eka aakuje mee jiwaru. Nsukutu iya jiwaru ejiji; kele ejo-ememe, phe paru eka.”

¹⁴“Igwe-oha; igwe-oha kuru le nsuda, aanoduje pfua opfu pfukaha; kele mboku ke Chipfu dukwaa ntse le nsuda, aanoduje pfua opfu pfukaha.

¹⁵Enyanwu yee onwa be ee-me g'o gbaa ochii. Ophu kpokpode ekehedu paapaapa.

¹⁶Chipfu a-gbe l'ubvu Zayonu sua ekiri; nodukwapho le Jierusalemu dee ririri. Eliphe yee akpaminigwe anmaa jiiijiii. Obenu le Chipfu a-buru onye ndibe iya a-gbabeje le mkpula je anodu zee ndzu. Mbụ l'oo-buru ulo, a kpushiru ike doberu unwu Izurelu.”

Iphe-oma ndu ke Chileke

¹⁷Noo teke unu a-maru l'oo mbedua bu Chipfu bya aburu Chileke unu; le mu bu ebubu l'ubvu Zayonu; mbu ubvu ono, duru mu nsọ ono. Noo teke Jierusalemu a-du nsọ; ophu ndu ohozo agbabaedu iya ophorokpo.

¹⁸“O -rwua mboku ono be ubvu ubvu a-nodu asoshi mee ophuu. Eli obvu obvu asoshi mini-era-eswi. Mini atuko asoshigbaa l'iphe, bukpo nggele, dukota l'ali Jiuda. Ogbamini agbafuhu shi l'eze-ulo Chipfu wata aso gborogboro je agbaa mini le nsuda Shitimu.

¹⁹Obenu l'ali ndu Ijiputu a-buru ochobu. Ali ndu Edomu aburu echiogu, dabyiru ke mmanu. O buru iphe, a-kpa iya nu bu iwashi, ephe weru ndu Jiuda, bu ndu ephe no l'ali phe gbushia ndu adudu iphe, ephe meru.

²⁰Obenu le ndu Jiuda e-buru l'ali phe jasụ l'ojejoje. L'e buru le Jierusalemu; e -shi l'ogbo sweru ogbo.

²¹Noo teke mu a-guru phe nvu l'ikpe-ochi ophu mu te eshidu ghawaru phe nvu iya.”
“Chipfu bu l'ubvu Zayonu!”

Émọsu

Émọsu 1

¹Qwaa bụ olu-opfu Émọsu. Émọsu yì lẹ ndu nche aturu, shi lẹ mkpukpu Tekowa. Qwaa bụ iphe, ọ phuru l'ophulenyà lẹ k'ẹhu ndu Ízurelu lẹ teke Uzáyà bụ eze ndu Jiuda; tẹme Jierobowamu nwa Jiowashi bụru eze ndu Ízurelu. Ọ phuchaa ya; ọ nọada apha labo; tẹme o rwua apha ono, alì nmajeru jiiijiii ono.

²Émọsu pfuru sụ: “Chipfu nọkwa l'úbvú Zayonu asụ ekiri bya anọdukwapho lẹ Jierúsalemu ede ririri. Eka ndu eche aturu anọduje eche aturu kposhihu nkụ. Tẹme elikota úbvú Kamelu nwukota lwaa.”

Aphụ, aa-nụ ndu Arámu

³Wakwa iphe, Chipfu epfu baa: “Eshinu Damasukosu mewaru iphe-ẹji ẹto bya eye ẹka lẹ k'ẹno bẹ mu tee sephuekwaru iya oke ẹhu-eghu mu azụ; kele ẹphe chiwaru ndu Giladu pyaapya g'onye gude mgborígwe echishi ẹswa ereshi.

⁴Mu a-tụ ọku l'ulo Hazelu; l'o tsua ulo ulo, Benu-Hadadu kpuru kpushia ike.

⁵Mu e-tsukashi iphe, e gude tụ-chia onu-abata mkpukpu Damasukosu. Mu emee gẹ ndu bu lẹ nsuda Avenu chihi; yee onye ono, nọ lẹ mkpukpu Betu-Edenu gude mgboro-eze l'eka ono. L'a kpua ndu Arámu lẹ ndzụ lashia alì Kiru.” Nokwa iphe, Chipfu eepfu bụ ono.

Aphụ, aa-nụ ndu Filisitayinu

⁶Wakwa iphe, Chipfu epfu baa: “Eshinu Gaza mewaru iphe-ẹji ẹto bya eye ẹka lẹ k'ẹno bẹ mu tee sephuekwaru phe oke ẹhu-eghu mu azụ; kele ẹphe kpuru oha l'ophu lẹ ndzụ bya eworu phe ye l'eka ndu Edomu.

⁷Mu a-tụ ọku l'igbulọ Gaza; l'o tsua ulo ulo, a kpuru kpushia ike l'ime iya.

⁸Ndu bu lẹ mkpukpu Ashidodu bẹ mu e-me g'ẹphe chihi; yee onye ono, nọ lẹ mkpukpu Ashikelonu gude mgboro-eze l'eka ono. Mu eworu ẹka ghakpoo chiahaa ndu mkpukpu Ekuronu ke gbaagbaa. Mu emekwapho gẹ ndu Filisitayinu lagbua l'iswi g'ẹphe ha.” Nokwa iphe, Nnajiuphu, bụ Chipfu epfu bụ ono.

Aphụ, aa-nụ ndu Taya

⁹Wakwa iphe, Chipfu epfu baa: “Eshinu Taya mewaru iphe-ẹji ẹto bya eye ẹka lẹ k'ẹno bẹ mu tee sephuekwaru phe oke ẹhu-eghu mu azụ; kele ẹphe tukoru oha l'ophu, bụ ndu a kpuru lẹ ndzụ woru ye l'eka ndu Edomu; shi nno woru oghandzu ẹphe l'unwune phe nmaa phulaphula.

¹⁰Mu a-tụ ọku l'igbulọ Taya; l'o tsua ulo ulo, a kpuru kpushia ike l'ime iya.”

Aphụ, aa-nụ ndu Edomu

¹¹Wakwa iphe, Chipfu epfu baa: “Eshinu Edomu mewaru iphe-ẹji ẹto bya eye ẹka lẹ k'ẹno bẹ mu tee sephuekwaru iya oke ẹhu-eghu mu azụ; kele o gude ogu-echi chia

nwune iya ọso; ọphu ọ phuduru iya obu-imemini ililekpoo; kele ẹhu ghueru iya pho egbu ẹhuka ẹhuka ghukwaseru; teme obu-ọku nkiya buru k'ojeje.

¹²Mu a-tu ọku le mkpukpu Temanu; l'o tsua ọlo ọlo, a kpuru kpushia ike, nọgbaa le mkpukpu Bozura.”

Aphu, aa-nu ndu Amonu

¹³Wakwa iphe, Chipfu epfu baa: “Eshinu ndu Amonu mewaru iphe-ẹji ẹto bya eye ẹka le k'eno be mu tee sephuekwaru phe oke ẹhu-eghu mu azu; kele unwanyi, du ime l'ali Giladu be ẹphe wachaaru ibe; opfu l'ẹphe eme g'oke ali phe kabaa ọsa.

¹⁴Mu a-tu ọku l'igbulọ mkpukpu Raba; l'o tsua ọlo ọlo, a kpuru kpushia ike l'ime iya. Noo teke aa-nodu echi mkpu ọgu l'eka ọgu a-nodu ada. Oke pherephere ezikwapho l'eka oke mini edze.

¹⁵L'a kpa onye eze phe le ndzu lashia ali ọzo; yebedua yee ndu-ishi l'ali-eze iya.” Nokwa iphe, Chipfu eepfu bu ono.

Emosu 2

Aphu, aa-nu ndu Mowabu

¹Wakwa iphe, Chipfu epfu baa: “Eshinu Mowabu mewaru iphe-ẹji ẹto bya eye ẹka le k'eno be mu tee sephuekwaru iya oke ẹhu-eghu mu azu; kele o keru ọkpu onye eze ndu Edomu ọku; jasu ọ buru ntụ.

²Mu a-tu ọku le Mowabu; l'o tsua ọlo ọlo, a kpuru kpushia ike le mkpukpu Keriyotu. Mbụ le ndu Mowabu a-nwushihu l'utsu utsu a-nodu adapheru phe nu; mekpoo mkpu, aa-nodu echiru phe; yee opu-ọgu, aa-nodu egbu ẹhuka ẹhuka.

³Mu e-gbu onye eze phe; bya atuko ndu-ishi l'ime iya gbukobe ẹphe l'iya.” Nokwa iphe, Chipfu eepfu bu ono.

Aphu, aa-nu ndu Jiuda

⁴Wakwa iphe, Chipfu epfu baa: “Eshinu ndu Jiuda mewaru iphe-ẹji ẹto bya eye ẹka le k'eno be mu tee sephuekwaru phe oke-ẹhu-eghu mu azu; kele ẹphe jikaru ekemu Chipfu; ọphu ẹphe etsojedu iphe, ọ toru ọkpa iya su g'e tsoje. O buru ughoshi ono, nna phe jeru etsoru ono dephuru phe.

⁵Mu a-tu ọku l'ali ndu Jiuda; l'o tsua ọlo ọlo, a kpuru kpushia ike le Jierusalemu.”

Aphu, aa-nu ndu Izurelu

⁶Wakwa iphe, Chipfu epfu baa: “Eshinu ndu Izurelu mewaru iphe-ẹji ẹto bya eye ẹka le k'eno be mu tee sephuekwaru phe oke ẹhu-eghu mu azu; kele ndu Izurelu reru ndu pfuberekoto gude reta mkpola-ochaa; bya eree ndu akpa nri gude reta akpokpa ẹbo l'echiko.

⁷Ẹphe azoje ndu ukpa okpa l'ishi zo-mia l'urwuku, no l'ali. Ọphu ẹphe ekpejeduru ndu eje iphe-ẹhuka ikpe, pfuru oto. Nna yee nwa iya nodu anoduje ejepfu nwamgboko lanu; shi nno turwua ẹpha mu ono, du nsọ ono.

⁸Èphe nõdu azejegbaa azẹe l'aguga iphe, bu ọru-ngweja l'eli uwe, a sùberu l'itumo. Èphe nõdu anọduje l'ulo agwa pẹ ono angu mẹe, e retaru lẹ nre.

⁹“Mu mebyishiru ndu Amọru l'iphu pẹ. Mbù ndu hagbaa kẹ kpapherengu kpapherengu g'oshi sida; bya akpọo akpaa g'akpūrata. Mu mebyishia mebyi, ọ miru l'elikota; bya emebyishia ọgbarabvu iya l'uzo alì.

¹⁰Mu shi l'alì ndu Ijiputu dua unu dufuta. Mu bya edua unu ụkporo apha labo l'echięgu je emee g'unu lwuta alì ndu Amọru nworu.

¹¹Mu byakwapho bya ahota unwu unu unwoke g'èphe buru ndu mpfuchiru; bya ahotakwapho unwu unu unwokorobyia g'èphe buru ndu duru Chileke iche. ? Tọbodu eviya bẹ mu epfu-a; unubẹ ndu Ízurelu?” Nokwa iphe, Chipfu eepfu bu ono.

¹²“Obenu l'unu meru ndu ono, duru Chileke iche ono; èphe ngua mẹe; bya asu ndu mpfuchiru g'èphe te epfuhẹ mpfuchiru.

¹³Nta-a buru gẹ mu bya abyazeta unu abyazeta egube ono, ugbo ivu abyazetajẹ mẹ e doo ya ereshi onoya.

¹⁴Ndu ọkpa-egwa taa nahukwa; ọphu ndu ọkpehu dọ adukwa iphe, èphe egude ọkpehu pẹ eme; ọphu ndu dọ ike ọgu a-dukwa ike adzo ndzu pẹ.

¹⁵Ndu maru agba apfu taa pfukwaru; ọphu ndu maru agba ọso a-dukwa ike agbala; ọphu ndu agbajẹ inya a-dukwapho ike adzo ndzu pẹ.

¹⁶Mbù je akpachaa l'onye dọ ike ọgu, bu iya bẹ ọkpoma kachaa adudu a-gbakwaru oto gbalaa mboku ono.” Nokwa iphe, Chipfu eepfu bu ono.

Èmọsu 3

¹Unu numakwa opfu-a, Chipfu pfuru gude epfubyishi unubẹ ndu Ízurelu-a; epfubyishi ndu onu-ulo ono l'ọphu, bu ndu yẹbe Chipfu shi l'alì ndu Ijiputu dufuta onoya. Ọ sọru-a:

²“Ọ bu unu kpoloko bẹ mu maru l'iphe, bukpo ipfu, nokota lẹ mgboko l'ọphu. Noo iphe, meru g'o gude mu je l'anu unu aphu ejo-iphe, unu eme g'o ha.”

Ozi onye mpfuchiru Chileke

³Umadzu ẹbo ? èphe aswije ọswi mẹ ọ budu l'èphe zuru mgbede l'èphe a-wata aswi ọswi?

⁴Oduma ? ọonoduje l'ọswa sua ekiri l'ẹbe o gude iphe, oo-ri? Mbù-a; ? nwegbele-oduma abajẹ hanyihanyi l'ẹka o bu l'ẹbe abu l'o nweru iphe, o guderu?

⁵Enu ? l'oodalahuje l'ọnyà l'alì l'ẹka adudu ọnyà, a gbaberu iya tọo?

Ọnyà, a gbaberu agbabe l'alì ? oosweje l'ẹbe abu l'ọ duru iphe, kpọ-sweru iya nu?

⁶E -gbuahaa opu lẹ mkpukpu; ? ndzu ta agujedu ndu bu iya nu tọo? ? Èphe ta anmajedu pyaapyaapya? Teke ọla-l'iswi byapfutaru mkpukpu; ? tọ budu Chipfu meru pẹ iya tọo?

⁷Tororo bu lẹ Nnajiuphu, bu Chipfu ta adudu iphe, oomeje l'ẹbe ekpuha idzu iya goshi ndu-ozì iya, bu ndu mpfuchìru iya.

⁸Oduma sùakwaru ekiri. ? Bu onye a-sù lẹ ya ta atsudu ebvu? Nnajiuphu, bu Chipfu pfuakwaru opfu. ? Bu onye a-sù lẹ ya a-nòdu doo gẹ ya te epfu iphe, Chipfu pfuru?

Iphe-ẹjì ndu Samériya

⁹Raa ya arara l'iphe, bukpuo ọlọ, a kpuru kpushia ike lẹ mkpukpu Ashidodu yẹle ophu nọ l'alì ndu Ijiputu sù phẹ: “Unu je edzukoo onwunu l'úbvú úbvú alì Samériya hùma ùtsú, ada l'ime iya; yẹle mkpawere, eeme ndibe iya!”

¹⁰Wakwa iphe, Chipfu epfu baa: “Ephe ta amadu g'eemeje iphe, du ree. Ulo phẹ, a kpushiru ike bu iphe, jiru iya nu bu iphe, a nataru l'omeliwe; yẹ iphe, a naru lẹ nfu.”

¹¹Oo ya bu lẹ-a; wakwa iphe, Nnajiuphu, bu Chipfu epfu baa: “Ohogu l'a-gba alì ono ophorokpo; kwatsushia iphe, bukpuo ọlọ, akpushiru ike; kwaa okwata l'iphe, bukpuo ẹka unu kpuru o shihu dungudungu.”

¹²Wakwa iphe, Chipfu epfu baa: “O kwa g'onye eche aturu duru ike nafuta aturu iya l'onu oduma; o buru iphe, o nafutaru kpoloko bu nwoshi-okpa iya labo; ozoo nwibiribe nchi iya-a; nokwa g'aa-dzota-beru ndu Izurelu bu ono; mbu ndu ono, bugbaa lẹ mkpukpu Samériya; nogbaa l'igburonu iphe-azee phẹ; yẹle nkuku etemu phẹ.”

¹³Wakwa iphe, Nnajiuphu, bu Chileke epfu; mbu Chipfu, bu Okalibe-Kakota-Ike: “Unu numakwa iphe-a je agbaa onu-ulo Jiekopu ekebe:

¹⁴Mboku, mu a-nu ndu Izurelu aphu atupya, ephe tupyaru mu be mu e-mebyishi orungweja, nogbaa lẹ mkpukpu Betelu. Mpu orungweja ono be ee-chikwofu l'o daa l'alì.

¹⁵Mu alashia ọlọ, ephe kpuru doberu onanwu; yẹle ophu ephe kpuru doberu udzuminì; mbu l'ulo ono, e gude eze-enyi mee omemma ono be mu e-mebyishichaa; l'a kwatsushichaa ọlọ-eli phẹ g'o ha.” Nokwa iphe, Chipfu eepfu bu ono.

Emosu 4

¹Unu numa opfu-a; unube eswi alì Beshanu ono, nogbaa l'úbvú Samériya; mbu unube unwanyi ono, emekpa ndu ukpa ehù; teme o buru ndu adudu g'o du phẹ be unu egwe uji; unu -gbeshi; unu asu nnajiuphu unu phẹ-a: “Unu nu anyi mee g'anyi ngua!”

²Nnajiuphu, bu Chileke gudeakwa adu nsọ iya ria angu sù: “Unu lekwa; ujiku lanu be ee-gudekwa ikekee setachaa unu g'unu ha. Mbu l'eegude ikokoro, e gude anma ema nmatachaa ndibe unu ndu ophu phoduru nu.

³G'unu hakpo nanu nanu buru igbulọ be ee-gbuwa chiru unu chighaa. O buru ọzo ẹka aa-nodu achì-phushi unu bu l'uzo Hamonu.” Nokwa iphe, Chipfu eepfu bu ono.

Ndu Izurelu teke alwapfutadu Chileke

4“Unu je mkpukpu Bɛtelu je emee iphe-ɛji! Unu eje mkpukpu Gilugalu je akabakpoo ya ro ememe! Unu gweje ngweja unu l'utsu mboku-mboku! Unu pfuje oke-lanu-l'uzo-iri unu l'ime ujiku ɛto ɛto!

5Unu woru buredi, e yeru iphe, eekoje buredi woru kpoo oku g'o buru ngweja obunggo! Unu -noɖu anu Chileke iphe ke mmanu; unu araje iya arara! Mbua; unu pfua ya g'a numa-dzuru; unube ndu Izurelu; kele oo iphe ono bu iphe, aduje unu ree ememe.” Nokwa iphe, Nnajiuphu, bu Chipfu epfu.

6“Ge mu haru unu; onu nri chihu unu l'iphe, bukpuo mkpukpu unu l'ehu l'ehu; bya emee; ophu o dudu mkpukpu unu ophu nri du; ophu unu alwakwarupho azu lwapfuta mu.” Nokwa iphe, Chipfu eepfu.

7“Mu mekwarupho g'igwe te edzeheru unu mini teke o phodukwaruro onwa ɛto teme l'eemeta iphe, emeberu l'ali. O noɖu abujeru mu -dzeeru mkpukpu owa-a mini; mu ahaa ndu ophu. Igwe -dzee mini l'egu ibiya owa; l'o haa ibiya ophu l'o kpohu jegiri jegiri.

8Ndu mkpukpu labo ozoo ɛto noɖu anoduje awu gbiigbiigbi eje le mkpukpu lanu eje achu mini-angungu; ophu ephe ahumajedu mini, a-suru phe angungu; ophu unu alwakwarupho azu lwapfuta mu.” Nokwa iphe, Chipfu eepfu.

9“Mu gudewaa nchacha-manu yee atsu-evu gude dafu unu. Mu gude iya mee ge mgbabu unu yee opfu-vayinu unu dabyiru iphoru. Igube bya atapyashia oshi olivu unu; yee oshi figu unu; ophu unu alwakwarupho azu lwapfuta mu.” Nokwa iphe, Chipfu eepfu.

10“Mu bya emee g'ejo iphe-ememe wata unu ememe egube ono, mu meru; o mee ndu Ijiputu ono. Mu gude ogu-echi gbushia unwokorobya unu; bya erwuta inya unu kpua ya le ndzu. Mu bya atsu-jia imi unu atsu-ji l'ishishi iphe, shigbaa l'eka ndu ojogu unu dogbaaru; ophu unu alwakwarupho azu lwapfuta mu.” Nokwa iphe, Chipfu eepfu.

11“Mu haru mkpukpu unu mebyishia egube ono, mu mebyishiru Sodomu waa Gomora ono. Mbua l'unu dupeho ge nku-oku, a lofutaru l'eka oku eke iya; ophu unu alwakwarupho azu lwapfuta mu.” Nokwa iphe, Chipfu eepfu.

12“Oo ya bu le-a; wakwa iphe, mu e-me unube ndu Izurelu baa. Temanua; eshinu mu e-me unu iphe ono; unu kwakobekwa akwakobe ejepfu Chileke unu; unube ndu Izurelu!”

13O kwa onye ono, bu iya meru ubvu; bya edobe pherephere; mbu onye ewojeru iphe, ori kpuhaa goshi nemadzu; onye ono, emeje g'utsu gbahu ochii; teme o noɖu azo garamu garamu l'eli ubvu, nogbaa le mgboko. Epha iya bukwa Chipfu; bya aburu Chileke, bu Okalibe-Kakota-Ike.

Emosu 5

Erwubvu ehunu ndu Izurelu

1Unu numakwa opfu-a; unube onu-ulo Izurelu; mbu erwubvu ehunu-a, mu erwu-a:

- ²“Ndu Ízurelu, bụ nwamgboko ono yee nwoke teke akwaswee ono daakwaru darwua ali; ophu o gbeshibaekwa ozo. A paru iya haa l'ali l'eka o dabyiru; ophu o dudu onye palia ya.”
- ³Wakwa iphe, Nnajiuphu, bụ Chipfu epfu baa: “Mkpukpu, chi unu ojogu labo l'ukporo ojogu iri ejeru Ízurelu ogo bu iphe, oo-gude lwa bu ukporo ojogu ise kpoloko. Mkpukpu ophu chikwanu ukporo ojogu ise eje buru ojogu iri a-lwa.”
- ⁴Wakwa iphe, Chipfu epfu anu onu-ulo Ízurelu: “Unu choo mu; dzuru ndzu.
- ⁵Unu ba achokwa Betelu! Ophu unu ejekwa Gilugalu! Unu ta atugbukwa jeshia Biye-Sheba! Kele ndu Gilugalu be aa-kpukwa le ndzu; l'e mee Betelu; o to dudu iphe, o-bu.”
- ⁶Unu chokwaa Chipfu dzuru ndzu. Odumeka be oo-gbakwa onu-ulo Jiosefu ophorokpo g'eka oku etsu. Mbụ l'oo-tsu iya tsufu; o to dudu onye a-suru iya egbota le Betelu.
- ⁷Nshio unube ndu ono, ewojeru ikpe, pfuru oto mee iphe, atso ilu ono; teme unu nodu ewojeru apfubekoto gwoo l'ali.
- ⁸Onye ono, bu iya meru kpokpode, bu Puleyadesu; bya aburu iya meru kpokpode, bu Orayonu; onye emeje tsukiribaa ochii l'o buru iphoro nchi-abohu; teme o nodu ejikputeje eswe mee ya l'o buru enyashi; onye ekuje mini, doru l'eze-enyimu oku; l'o bya eworu iya dzeeru eliphe l'ophu; o kwa Chipfu bu epha iya.
- ⁹Onye emeje ge mkpurupyata loo vaa so-kpute ndu ike du; teme o nodu emeje ge mkpukpu, a kpu-pheru igbulo mgburugburu buru mkpurupyata.
- ¹⁰Onye abajeru unu mba l'edupfu be unu akpoje ashi; temanu o buru onye epfuje irelanu be unu anoduje akpofu akpofu.
- ¹¹Oo ya bu le-a; eshinu unu azoje ndu ukpa tolitoli; teme unu nodu ekebutaje phe g'ephe nu unu ereshi; be a makwaru-a l'unu pyishiru mkpuma gude kpushia ulo; obenu l'o to dudu ophu unu e-bu. A makwaru-a l'unu kowaru opfu-vayinu, du ubvu l'enya; obenu l'unu taa ngudu mee, shi iya nu;
- ¹²Kele mu maru g'emeswe, unu mesweru habe igwerigwe; bya amaru g'iphe-eji, unu meru habe shii. Unu anoduje emekpa ndu pfuberekoto ehụ; teme unu nodu anoduje eri uphalazu; teme ophu unu ekpejedu ndu ukpa ikpe, pfuru oto l'edupfu.
- ¹³Oo ya bu l'onye nweru egomunggo e-dobejeepho onu doo me o dajewaa nno; kele teke ono bukotakwa ejo mboku.
- ¹⁴Unu choje iphe, du ree; g'o to bu iphe, du eji; k'ophu unu a-nodu ndzu. Noo teke Chipfu; mbu Chileke, bu Okalibe-Kakota-Ike e-swiru unu; egube ono, unu asuje l'o swiru unu nta-a ono.
- ¹⁵Unu kpo ejo-ememe ashi! Unu eyee eme iphe, du ree obu! Unu kpeje ikpe, pfuru oto l'edupfu; ? a maru; ? Chipfu; bu Chileke, mbu Okalibe-Kakota-Ike a-phuru unu obu-imemini; mbu unube nwa ndu ophu phoduru nu le ndu onu-ulo Jiosefu.

¹⁶Oo ya bu ɓe-a; wakwa iphe, oopfu; mbu Nnajiuphu, bu Chipfu; bya aburu Chileke; buru Okalibe-Kakota-Ike: “Uzu-ekwa a-nodu atu l'iphe, bukpoobbororo. Ekwa aphu anodu ada l'edupfu l'edupfu. L'e kua ndu akoje opfu g'ephe bya adobe ekwa raahaa; kua ndu maru aka ereshi ekwa g'ephe bya akwashia ekwa ike.

¹⁷Uzu-ekwa a-nodu atu l'ekameka, a koru opfu-vayinu; kele eka unu doru be mu a-bya eshijaa ebo ghata.” Nokwa iphe, Chipfu eepfu bu ono.

¹⁸Nshio unube ndu oogu g'asu l'eswe ke Chipfu rwaru! Su-a; ? bu gunu kparu iphe, eswe Chipfu agu unu egu? Mboku ono a-bukwaru ochii; o to bukwaru iphoro.

¹⁹Oo-du g'egube-a, aa-su le nwoke nahuru oduma; o gbapfu agu. O nahu ono bya abahu l'ulo iya je anodu woru eka tu-kobe l'igbulu; agwo bya ataa ya.

²⁰Eswe Chipfu a-bukwaru ochii; o to bukwaru iphoro. Mbu l'oo-gbakota tsukuribaa; k'ophu bu l'iphoro taa dukpoda ya ililekpo.

²¹“Obo-iphe, unu aburu mu be mu kpokwaru ashi; teme ophu mu anatakwaru iya; ophu edzuko, unu edzukoju mu adujeekwa mu ree.

²²A makwaru-a l'unu egweje ngweja-akpo-oku nu mu; unu ewota ngweja-nri gude bya mu agwagwa; obenu le mu ta anatajedu iya. Unu -hotachakponu iphe ahota gude bya egweeru mu ngweja-ehu-guu; o to dukwa iphe, mu a-gube iya.

²³Wofukwaru mu uzu ono, du l'ebvu ono, unu agu ono; kele mu ta angabejekwa nchi k'anuma iphe, nkwa unu ada.

²⁴Obenu le-a; g'ikpe, pfuru oto watanu aso gborogboro ge nggele! G'apfubekoto watanu aso g'enyimu, ta aso-buhujedu aso-buhu!

²⁵“Su-a; unube onu-ulo Izurelu; ukporo apha labo be mu l'unu noru l'echiegu. ? Unu shi agwaje mu agwagwa l'eka ono? To ? unu shi anuje mu iphe?

²⁶Obenu le nta-a bu iphe, unu kporu obu yeru bu nshi onye eze unu, bu Sakutu; yee iteshi ibe unu, bu Kayiwani; mbu kpokpode ono, unu gwotaru l'onwunu ono.

²⁷Noo g'o gude mu je l'eme g'a kpa unu le ndzu je aghaa mkpukpu Damasukosu aghagha tugbua.” Nokwa iphe, Chipfu eepfu bu ono; mbu onye ono, epha iya bu Chileke bya aburu Okalibe-Kakota-Ike.

Emosu 6

Oshi, akuru ndu akpa ntusaru-ehu

¹Nshio unube ndu akpa ntusaru-ehu l'ubvu Zayonu; mekwapho unube ndu no l'ubvu Sameriya ari l'o to duedu iphe, adu ike eme unu; mbu unube ndu a maru amaru, shi l'oha, bu ishi oha l'ophu, bu ndu ono, onu-ulo Izurelu anoduje ejepfu.

²Unu jenu mkpukpu Kalune je ahuma g'o gbaru! Unu eshi l'eka ono jeshia Hamatu; mbu eze mkpukpu ono! Unu eshikwapho l'eka ono jeshia Gatu, bu mkpukpu ndu Filisitayinu! ? Unu kakota ali-eze-a g'ephe ha ree too? ? Ali phe ka k'unu osa to?

³Mbụ unubę ndu woru ęjo mbọku dobe ụzenya ụzenya; ọ bụru okposhi omeliwe bę unu pataru dobe onwunu ntse ntse.

⁴Ndu bụ iphe, ęphe azeje azeę bụ iphe-azeę, e gude eze-enyi memaa. Tęme ęphe nọdu azeje manyọo l'iphe-azeę phe. Nri, ęphe eriye bụ anụ unwu-aturu, shigbaa l'igwe aturu phe; yęę unwu-eswi, shigbaa l'ikpoto eswi phe.

⁵Ndu anọduje agụ-phe jogojogojogo ebvu akpọ une eye iya; emeshigbaa iphe ọphúú, e gude agụ ebvu gę Dévidi.

⁶Iphe, unu egudeje angụ męę bụ eze ụwaka. Ọ bụru manụ, kachaa eshi mkpọ bę unu anyije. Obenu l'unu ta agụjedu aphụ ọla-l'iswi-a, ọnu-ulo Jiósefu ala-a.

⁷Noo g'o gude unu je l'aburu ndu mbụ, ee-vuru ụzo kpua lę ndzụ. Ọbo-iphe ndu ono, azeje manyọo ono aburu bugemu.

Chipfu akpọfu eku-onwonye kę ndu ızurelu akpọfu

⁸Nnajiuphu, bụ Chipfu gudewaa onwiya ria angụ; mbụ lę Chipfu ono, bụ Chileke; bya aburu Ọkalibe-Kakọta-Ike ono pfuwaru sụ: “Eku-onwonye, oshilokpa Jiékọpu eku bę mu akpọfu akpọfu. Mbụ l'ulo ulo, ęphe anọduje zeeru ndzụ g'ọ ha bę mu kpọru ashị. Noo g'o gude mu je l'eworu mkpukpu-a; yęę iphemiphe, dụ iya nụ ye l'ęka ndu ohozo.”

⁹Teke ụmadzu iri phoduru l'ulo lanụ; ęphe anwuhukwapho.

¹⁰Teke abubu phe, bụ onye a-kposhi odzu phe ono ọku byaru g'ọ chita phe chifu l'ulo ono; ọ jia onye domikwaduru onwiya l'ęka ono sụ iya: “? O nweru onye gụ l'iya nọ l'ęka ono?” Ọ sụ: “Waawaa-o!” L'ọ sụ: “Ngwa; dobeękwapho ọnu ngu doo! G'anyi te ejekwa ekusweta ępha Chipfu!”

¹¹Kęle Chipfu sụwaru l'o noo g'ọo-du. O je l'etsukposhichaa oke ulo ono etsukposhi; tsukposhia ndu ọphu bụ ulo nshii l'ọ dakaa nanụ nanụ.

¹²? Inya agbaję ọso l'ęka dụ mkpuma mkpuma? Tọo ? eegudeje eswi akọ ọkoro l'ęgube ęka ono? Obenu l'unu mewaru ikpe, pfuru ọto; ọ bụru iphe, egbu egbugbu; bya emee akpuru, apfubekoto a-mi; ọ bụru iphe, atsọ ilu.

¹³Unu ete ęswa l'ęka unu lwutaru mkpukpu Lodeba. Tęme unu nọdu asuje: “? Tọbudu l'ike ọkpu k'anyi bę anyi gude lwuta mkpukpu Kanayimu?”

¹⁴Wakwa iphe, oopfụ; mbụ Chipfu, bụ Chileke; bya aburu Ọkalibe-Kakọta-Ike: “Mu e-je akpatsu ọha, a-bya etso ngu ọgu; gube ọnu-ulo ızurelu. ęphe e-męę ngu pho ewere; e -shi lę mkpukpu Lebo-Hamatu jasụ lę nsuda Araba.”

Émọsu 7

Igube; waa ọku; waa iphe, eegudeje akpụ igbulọ g'ọ pfuru ọto

¹Wakwa iphe, Nnajiuphu, bụ Chipfu goshiru mu baa: Oodozi igube, a-bya bya atapyashia iphe, e meberu l'ali, e-fushi ome mę a -kpatachaephọ kę mbụ. Kę mbụ ono bụ ọphu aanuje eze kęle ọ bụ iphe, rwuberu iya nụ.

²Tòbudu iya bụ; ẹphe tũkoepo iphemiphe, futaru l'alì tafu. Mu chia mkpu sù: “Gùbe Nnajiuphu, bụ Chipfu; gũnaa nvu jiko! ? Denu g'unwu Jiékòpu e-shi wafu l'ẹbe abụ l'ò baru ishi?”

³Ò bũru iya bụ lẹ Chipfu agbanwee ẹka l'eme iphemiphe ono. Chipfu bya eyee onu sù: “Owaa taa nwũkwa!”

⁴Wakwa iphe, Nnajiuphu, bụ Chipfu goshiru mu baa: Nnajiuphu, bụ Chipfu kuru oku, enwu enwunwu oku gẹ ya gude iya kpee ikpe. Ò bya etsua jasù Eze Ẽnyimu tashihu; alì kpòshihu nkù.

⁵Tòbudu iya bụ; mu chishia mkpu sù: “Gùbe Nnajiuphu, bụ Chipfu; te emehenu jiko! ? Denu g'unwu Jiékòpu e-shi waa l'ẹbe abụ l'ò baru ishi?”

⁶Ò bũru iya bụ lẹ Chipfu agbanwee ẹka l'eme iphemiphe ono. Nnajiuphu ono, bụ Chipfu bya eyee onu sù: “Owaa taa nwũkwapho!”

⁷Wakwa iphe, o goshiru mu baa: Chipfu pfuru l'aguga igbulò. Ò bũru iphe, o gude l'ẹka bụ iphe, eegudeje akpu igbulò g'ò pfuru oto. Ò bũru iphe, eegudeje akpu igbulò ono bẹ e gude kpua igbulò obu.

⁸Chipfu bya ajia mu sù mu: “Émòsu; ? bụ gũnu bẹ ì hũmaru?” Mu sù iya: “Ò kwa iphe, eegudeje akpu igbulò g'ò pfuru nhamunha.” Tòbudu iya bụ; Nnajiuphu ono bya asù mu: “Lekwa; mu e-woru iphe, eegudeje akpu igbulò g'ò pfuru oto dobe l'echilabò ndu Ízurelu. Mu taa haedu phẹ ozobaa gẹ mu ta anu phẹ aphu.

⁹Ẽka aagwajẹ iphe agwagwa ono, Áyizaku doberu ono bẹ ee-mebyishikòta. L'a bya etsukpòshia ẹka ndu Ízurelu doberu nsò. Ò bũru ogu-echi bẹ mu e-gude tsoo onu-ulo Jierobowamu ogu.”

Émòsu yẹ Amazaya

¹⁰Tòbudu iya bụ; Amazaya, bụ onye uke, l'agwa iphe lẹ Bètelu bya ezia ozi g'e je ezia onye eze ndu Ízurelu, bụ Jierobowamu sù iya: “Émòsu nòakwa l'echilabò onu-ulo Ízurelu gèdegede achiru ngu ẹjo-idzu. Alì ta asùekwa akube iphe, oopfu.

¹¹Lẹ-a; wakwa iphe, Émòsu epfugbaa baa: ‘Ò kwa ogu-echi bẹ ee-gude gbua Jierobowamu; ophu o dukwa iphe, e-me g'a ta kpu ndu Ízurelu lẹ ndzù chiru phẹ lufu l'alì phẹ gèdegede.’ “

¹²Amazaya bya agbeshikwapho bya ejepfu Émòsu je asù iya: “Tugbua lufu l'ẹka-a gube nwophu aphu ophulenyà! Tugbua laphu azu l'alì ndu Jiuda; je anodu l'ẹka ono kpata nri, ii-ri; nodu l'ẹka ono pfu iphe, iipfu!

¹³Ba noduekwa lẹ Bètelu sù l'i pfuchiru Chileke; kele ẹka ono bukwa ẹka dũru eze lẹ nsò; teme o bũru ẹka ndu Ízurelu kpuru eze-ulo phẹ.”

¹⁴Noo ya; Émòsu bya eyeeru Amazaya onu sù iya: “Mu te eshikwa bũru onye mpfuchiru; ophu o bukwa onye mpfuchiru nwuru mu. Ò kwa onye eche aturu bẹ mu shi bũru; bya abũru onye akò opfu oshi sũkamo.

¹⁵Tobudu iya bu; Chipfu bya ekua mu l'eka mu no eche aturu bya asu mu ge mu tugbua je epfuchiru iya opfu ehu ndibe iya, bu ndu Izurelu.

¹⁶K'ophu bu le-a; numakwa Opfu Chipfu. Gi suru ge mu te epfuhewaru opfu Chileke nu ndu Izurelu; ge mu haa epfu opfu ehu onu-ulo Ayizaku.

¹⁷Oo ya bu le-a; wakwa iphe, Chipfu epfu baa: Nyee ngu e-mechakwaa wata agba ukpara l'oma mkpukpu; teme o buru ogu-echi be ee-gude gbushia unwu ngu unwoke me unwu ngu unwanyi. Ali ngu be aa-tu atutu gude washaru ndu ozo; teme gubedua l'onwongu bu l'ali ndu amadu Chileke be ii-mechaa nodu nwuhu. Ozo bu le ndu Izurelu ta adudu iphe, ee-me g'a ta kpu phe le ndzu chiru phe chifu l'ali phe.”

Emosu 8

Nkata akpuru-iphe, charu achacha

¹Wakwa iphe, Nnajiuphu, bu Chipfu goshiru mu baa: nkata, akpuru-iphe, charu achacha jiru ejiji.

²O bya ajia mu su mu: “Emosu; ? bu gunu be i humaru?” Mu su iya: “O kwa nkata, akpuru-iphe, charu achacha jiru ejiji.” Tobudu iya bu; Chipfu su mu: “Teke ikpazu ke ndibe mu bu ndu Izurelu ruwakwaru. Ophu mu ahaekwa phe ozobaa ge mu ta anu phe aphu.”

³Wakwa iphe, Nnajiuphu, bu Chipfu epfu baa: “O -rwua mboku ono be ebvu, aaguje l'eze-ulo Chileke-a l'a-buru uzu-ekwa be aa-nodu atu iya. Odzu be a-du igwerigwe igwerigwe dakaa l'ekameka. Ekameka adaa nyonyoronyo.”

Aanu ndu Izurelu aphu

⁴Unu numakwa iphe-a; unube ndu azotoshi ndu adudu g'o du phe; teme unu nodu eme ge ndu akpa nri l'ali unu bvubebe;

⁵mbu unube ndu asuje: “? Banaa teke ole be Obo Onwa-ophuu a-bvunaa; k'ophu anyi a-wata ere ereshi? ? Banaa teke ole be eswe-atuta-unme a-bvunaa; k'ophu anyi a-wata azu witi?” Ephe nodu emeje tinu ereshi phe l'o lwa ali; mee aswa iya l'o ka shii; bya egude iphe, aatuje iphe, e meru l'ugho gude eme ndiphe mkpurukpuru-enya.

⁶Unu egudeje mkpola-ochaa zua aswa ishi ndu akpa nri. Teke o bu onye adudu g'o du iya; unu achita nwa akpokpa labo gude zua aswa ishi iya. Unu nodu akpotaje witi ndu ophu e gege awushi awushi gwakobe l'okpobe iya ree.

⁷Chipfu gudekwa l'oshilokpa Jiekopu phe eku onwophe ria angu su: “Mu ta abyakwa azoha iphe, ephe meru.

⁸Iphe-a e-mechakwaa mee ali anmaa jijijiji. Iphe, bukpoo ndu bu iya nu anodu agu aphu iya. Ali-a l'ophu a-bya utso. Aa-kpatsu iya l'o bya kulakula g'utso; l'o bya alaekwapho pyete g'enyimu ndu Ijiputu.”

⁹Wakwa iphe, Nnajiuphu, bu Chipfu epfu baa: “O -rwua mboku ono be mu e-me g'enyanywu riba l'echi eswe; mee eliphe l'ophu agbahu ochii l'echilabo eswe.

¹⁰Obo-iphe, unu aboje bẹ mu a-gbanwe g'unu wata atụ ụzu-ẹkwa. Mu agbanwee ebvu ono, unu aguje ono g'ọ bụru erwubvu. Mu e-me unu g'unu hakọta unu anmakọtaru uwe-aphu; kpushikota ishi anwuhu. Mu emee mbọku ono g'ọ dū unu g'onye agụ aphu nwa nwoke lanu, ọ nwutaru kpoloko, nwuhuru nu. Eswe mbọku ono -bya abvu bẹ ọ-otokotaepho ilu ilu.”

¹¹Wakwa iphe, Nnajiuphu, bụ Chipfu epfu baa: “Mbọku abyakwa; mbụ mbọku, mu e-me g'egu wata eme l'ali-a. Egu, mu epfu opfu iya ta abukwa egu nri; ọzoo egu mini. Obenu l'ọo egu anuma opfu kẹ Chipfu.

¹²Nemadzụ e-tSORU aghaphe; o -shi l'enyimu ọwa-a; l'ọ daghaa enyimu ọphuu; l'ọ shi l'isheli; l'ọ ghaphee jeshia l'uzo ęnyanwu-awawa l'eka ęphe achọ ęka ęphe a-numa opfu kẹ Chipfu; ọle ęphe taa humadu iya.

¹³O -rwua mbọku ono bẹ ęguru nwanyi, ama ntumatu; yee nwokorọbya, gbashiru ike ntumatu a-tulwahu l'eka ękpiri akpọ pẹ jegiri jegiri.

¹⁴Ndu ono, gude ębyi kẹ Sameriya ria angu ono; mbụ ndu ono, asuje: ‘Eshinu agwa ndibe gube Danu nọ ndzụ g'ọ nọ iya-a’; ọzokwanu: ‘Eshinu agwa ndu Biye-Sheba nọ ndzụ g'ọ nọ iya-a’; ndu ono a-dakota; ọphu ęphe abyadu agbeshibaa agbeshi.”

Émọsu 9

Ndu Ízurẹlu bẹ ee-mebyishikwa

¹Mu phuru ọphulenyia huma Chipfu l'eka ọ pfuru l'aguga ọru-ngweja epfu su: “Chia iphe l'eli mkpotsu itso, gude eze-ulo-a; k'ophu ọkpa-ulo iya l'ophu a-nmakota jiiijijii. G'ọ nwukposhihu daa l'eli ishi onyemonye. Nwa ndu ọphu phoduru nu bụru ogu-echi bẹ mu e-gude gbushia pẹ. Ọ tọ dudu mę onye lanu anahu nu. Ọphu ọ dudu onye ọphu byaru agbala nu.

²Ọ tọ dudu m'obeta ęphe tuchakpoo nsu tu-rwua ali-maa; mu eyekwapho ęka l'ime ęka ono guta pẹ. Ọphu ọ dudu m'obeta ęphe nyihu eli nyirwua imigwe; mu eshikwapho l'eka ono lo-zeta pẹ.

³Ọ tọ dudu m'obeta ęphe je edomia onwophe l'eli ubvu Kamelu; mu achilekwaa nta-a pẹ chirwua ęka ono je akpufuta pẹ. Ọphu ọ dudu m'obeta ęphe je edomia onwophe l'ohu eze-enyimu; mu akaru ęjo agwo l'ọ je l'eka ono je atagbushia pẹ.

⁴Ọ tọ dudu m'obeta ndu ohogu pẹ kpuchaa pẹ le ndzụ lashia ali pẹ; noo ęka mu akaru ogu-echi l'ọ je aphua pẹ teerii. Mu a-tabee pẹ pho ęnya gę mu mee pẹ ęjo iphe; ọ tọ bukwa gę mu meeru pẹ ree.”

⁵Ọ kwa Nnajiuphu, bụ Chipfu; bya aburu Okalibe-Kakota-Ike; onye abujeru; o -denyi eliphe l'ophu ęka; l'ọ dazeshihu; iphemiphe, bu iya nu aguahaa aphu; ali-a l'ophu abyaa utso g'enyimu Nayilu; e -mechaa l'ọ daa rigbidii gę nggele ali Ijiputu.

⁶Mbụ onye kpushiru ulo-eli iya dobe l'imigwe. Ọ bụru eliphe bẹ ọ turu ọkpa ulo obu; onye ekuje mini, doru l'enyimu oku; l'ọ bya eworu iya dzeeru eliphe l'ophu; ọ kwa Chipfu bụ ępha iya.

⁷Wakwa iphe, Chipfu epfu baa: “Unubẹ ndu Ízurèlu; unu lẹ ndu Kushi; ? unu ta abudu mu iphe lanu? ? Tọbudu alì Ijiputu bẹ mu jeru je eduta ndu Ízurèlu; bya eje eduta ndu Filisitayinu l'alì Kafuto; bya edutakwapọ ndu Arámu l'alì Kiru?”

⁸Tororo, mu egbuẹru iya phọ unu bu l'enya Nnajiuphu, bu Chipfu dukwa l'ehu alì-eze ono, ejo-iphe du ono; mbu lẹ mu e-mebyishikọta iya g'ọ tọ duhe lẹ mgboko-a. Obenu l'onu-ulo Jiékọpu bẹ mu tee mebyishikwa.” Nokwa iphe, Chipfu eepfu.

⁹“Noo kele mu a-tu ekemu; mu abya anma onu-ulo Ízurèlu yigayiga nmakofu iya l'echilabo ohamoha ozo woru iya yoo ayoyo lẹ n-yo egube-a, aayoje ereshi-a; obenu l'ọ tọ dudu g'ọ ka mma l'ọo akpuru iya lanu erwu l'alì.

¹⁰Iphe, bukpuo ndu iphe-ẹji, nokota l'echilabo ndibe mu l'a-lakota l'ogu-echi; mbu iphe, bukpuo ndu ono, anọduje epfu su l'eze iphe-ehuka tee shiswetakwa ẹka ẹphe nọ; ophu o byapfutakwa phe.”

Eedophu ndu Ízurèlu azu l'onodu phe

¹¹“O -rwua mboku ono bẹ mu e-kpukwakwa ulo-ekwa Dévidi ono, daru adada ono. Mu emekwaa iphe, bukpuo ẹka o mebyihuchaaru emebyihu; bya emekwaa ya g'ọ tọ buhe ochobu; mbu mee ya l'ọ du g'ọ shi adujehawaa;

¹²k'ophu nwa ndu wafuru nu lẹ ndu Edomu a-buru okiphe phe; yee iphe, bukpuo ohamoha, bu ndu eeku epha mu.” Nokwa iphe, Chipfu eepfu; mbu onye bu iya e-me iphemiphe-a.

¹³Wakwa iphe, Chipfu epfu baa: “Mboku abyakwa; mbu mboku, ee-gudekwadu g'e metabebe iphe, e meberu l'egu; ndu okoro awatawaa okoro; teme onye azoshi akpuru vayinu evuru onye emebe iphe l'alì uzo. Mee ophuú eshichaa l'eli úbvú atashi paapaa; mbu shi l'eli obvu aso gborogboro.

¹⁴Ndibe mu ono, bu ndu Ízurèlu ono, a kpuru lẹ ndzu ono bẹ mu e-duphutachaa azu. Epe abya akpukwachaa mkpukpu ono, shi bugbaaru ochobu ono; bya ebuchishia ya ozo. Epe akọahaa opfu-vayinu; nguahaa mee, shi iya nu. Epe agbahaa mgbabu; riahaa akpuru-iphe, e meberu iya.

¹⁵Mu eworu ndu Ízurèlu dzaa adzadza l'alì phe gedegede. Ophu a byadu ephefubaa phe ephefu l'alì ono, mu nuru phe ono.” Nokwa iphe, Chipfu bu Chileke unu epfu bu ono.

Obedaya

Obedaya 1

Aphụ, Chipfu a-nụ ndu Edọmu

¹Qwaa bụ ọphulenyaa, Obedaya phuru. Wakwa iphe, Nnajiuphu, bụ Chipfu epfu l'opfu ẹhu ndu Edọmu. Anyi nūmaru ozi, Chipfu ziru. Ọ kwa onye-ozi bẹ e ziru g'o jepfu ọhamoha je asụ phẹ-a: “Unu gbalihukwa g'anyi je etsoo phẹ ọgu!”

²Unu lekwa; mu meakwaru; ị ha nwanshii l'echilabọ ọhamoha; ọphu ọ dukpoda iphe, a guberu ngu.

³Ọ kwa eku-onwonye ono, nọ ngu l'obu ono dephuru ngu; mbụ gube onye ono, bu l'ime agbara mkpuma; bya eworu unuphu kwaa l'ephekerephe; mbụ gube onye ono, anọduje ari sụ: “? Bụ onye sụru mu akwatsu gẹ mu darwua alị?”

⁴I -wolichakponu onwongu ephekerephe g'ugo; mbụ je akpachakporo epfunne l'eka kpokpode kegbaaru; nokwaphọ ẹka mu a-gbẹ lọ-zeta ngu.” Nokwa iphe, Chipfu eepfu bụ ono.

⁵“Ndu-oshi ọzoo ndu ana nfu

-bya ibe ngu l'enyashi; ? tọ buedupho iphe, mkpa iya duru phẹ bẹ ẹphe e-wota kpoloko? Ọ -buru lẹ ndu awọ akpuru vayinu byapfutaru ngu; ? ẹphe ta awọ-phodojedu nwọphu dọ olemole? Obenu lẹ gubedua bẹ eze iphe-ẹhuka a-dapfu.

⁶Lewarọ ya; alị oshilokpa Iso bẹ aa-vochachaakwaa avocha. Mbụ l'ẹku iya, o domiru edomi bẹ ee-gwèchakwaa tuta.

⁷Ọ kwa ndu ono, gụ l'ẹphe gbaru ndzụ ono g'ẹphe ha l'a-chifu ngu chi-rwua ngu oke-alị ngu. Mbụ lẹ ndu ono, gụ l'ẹphe dọ lẹ ree ono l'e-dephu ngu bya akapyabekwa ngu phọ ẹnya. Ọ buru ndu erije nri ngu a-gbaberu ngu ọnyà; ọphu ị byadu amaru.”

⁸Wakwa iphe, Chipfu epfu baa: “O -rwua mbọku ono bẹ mu a-tukokwa ndu maru iphe l'alị ndu Edọmu mee g'ẹphe buru mkpurupyata; mbụ mebyishia ndu iphe edoje ẹnya, bu l'alị úbvú úbvú k'oshilokpa Iso ono.

⁹Ndibe ngu, ike dọ l'alwụ ọgu gube mkpukpu Temanu; bẹ meji a-tofukwa. L'e gbukota iphe, bukpo ndu alị úbvú úbvú oshilokpa Iso pyaapya.”

Iphe-ẹji ndu Edọmu

¹⁰“Eshi ọphu i meru nwune ngu, bụ Jiékopu mkpawere bẹ iphere e-rikpote ngu ishi; teme l'e mee g'ị chihu jasụ l'ojejeje.

¹¹Mbụ lẹ mbọku ono bẹ ịi pfupheerupho iche; ndu ọhozo anọdu egwe iphe oshilokpa Jiékopu; ndu abudu ndu Ízurelu anọdu awuba l'ọnu ọguzo mkpukpu phẹ; nọdu atụ ido eke Jierúsalemu; mbụ-a; gụ l'ẹphe aduepho g'unu bụ iphe lanu.

12I tigi ledu nwune ngu olegbulenya l'eswe mboku, duru iya eji; ophu i tigi tedu eswa kpua ndu Jiuda l'eswe mboku, e meru ephe buru mkpurupyata; ophu i tigi nodudu abaa l'eswe mboku, iphe-ehuka byapfutaru phe.

13I tigi bahudu l'onu oguzo mkpukpu ndibe mu l'eswe mboku, ephe eje iphe-kpanganga; ophu i tigi ledu iya olegbulenya l'eka ejo-iphe byapfutaru phe l'eswe mboku, ephe eje iphe-kpanganga; ophu i tigi nodudu egwe iphe phe l'eswe mboku, ephe eje oke iphe-ehuka.

14I tigi pfu-chidu uzo le mgbakata-uzo egbutsushi ndibe phe, bu ndu agbala agbala; ophu i tigi kputajedu ndibe phe, bu ndu ophu wafuru nu je akpuphuru phe azu l'eswe mboku ono, iphe-ehuka byapfutaru phe ono.”

Ikpe, Chipfu e-kpe ohamoha

15“Eswe mboku ke Chipfu dukwaru ohamoha ntse. O kwa gi meru onye bu g'ee-me ngu-o! Iphe, i meru l'atukokwaru ngu l'ishi-o!

16O kwa egube ono, unu no l'ubvu mu, du nsu ngu-sweshia iphu ono; bukwapho g'ohamoha a-nodu anguwa iya ro. Ephe a-ngu; ngua nta ngua imo; ephe adule-a g'o bu l'ephe ta adujeduru adudu ophu.”

Aadzota ndu Izurelu

17“Obenu l'oo-duru ndu a-wafu nu l'eli ubvu Zayonu. Eka ono a-du nsu; teme onu-ulo Jiekopu abya anata okiphe, rwuberu phe nu.

18Onu-ulo Jiekopu a-du g'oku, eke paapaapa; mbu le ndu onu-ulo Jiosefu a-du g'oku, enwu phoophoophoo; ndu onu-ulo Iso adukwanu g'eswa ereshi, oku a-daba tsua tsufu; ophu o dudu onye onu-ulo Iso, byaru awafu me onye lanu.” Nokwa iphe, Chipfu pfuru bu ono.

19“O buru ndu shi l'echiegu ndohali l'a-bya ebuchishia ali ubvu ubvu Iso. Ndu ophu shi l'ali okpa ubvu, no l'uzo enyanwu-ariba abya ebuchishia ali ndu Filisitayinu. Ephe abya ebuchishia ali ndu Ifuremu yele ali, no-kube mkpukpu Sameriya. Ndu Benjaminu anata ali Giladu.

20Ndu Izurelu ndu ophu a kpuru le ndzu a-nata ali Kenanu gbiriri jasu le mkpukpu Zarefatu. Ndu ophu, a kpuru le ndzu le Jierusalemu laa Sefaradu l'a-natakota mkpukpu, nokota l'echiegu ndohali.

21Ndu adzoje ndzu e-nyihu ubvu Zayonu je anodu kpee ndu bugbaa l'ali ubvu ubvu oshilokpa Iso ikpe. Noo ya bu; ali-eze obu l'ophu abukotaru ke Chipfu.”

Jiona

Jiona 1

Jiona agbaru Chipfu ọso

- ¹Chipfu ziru Jiona nwa Amịtayi ozi sụ iya-a:
- ²“Tugbua jeshia eze mkpukpu ono, bu mkpukpu Ninive je epfuru opfu nu ndu bu iya nu; kele ejo-ememe, ephe eme rwuwaru aka mu no.”
- ³Obenu le Jiona gbalihuru gbalaa; o buru iya eje mkpukpu Tashishi. O bya ejerwua mkpukpu Jiopa; bya ahuma ugbo-mini, akwakobe eje onu-enyimu mkpukpu ono, bu Tashishi. O bya eje apfu ugwo bahu l'ugbo ono. A kporu ugbo ono; o buru phe eje Tashishi; o buru aka oogbalaru Chipfu.
- ⁴Tobudu iya bu; Chipfu byanu ezia oke pherephere; o wata ezi l'eli eze-enyimu ono. Oke akpara-mini wata atutu; taha k'ophu ugbo meharu g'o nyakashihu.
- ⁵Ndzu wata agu iphe, bukpuo ndu no l'ugbo ono. Onyenonu wata aru nshi iya eh. Ephe pashiahaa iphe, no l'ugbo wata echie le mini g'ugbo du phekpala. Obenu le Jiona gbero nodukpooro l'ohu ugbo ono; mgbenya tu-mihu iya.
- ⁶Onye-ishi ugbo bya ejepfu iya je asu iya: “? Bu gunu be iime nno; gube nwophu eku mgbenya? ? Tii tehudu ruo nshi ngu eh g'a maru nshi ngu obu ? l'a-ri-vu anyi l'oriri mee g'anyi ta ala l'iswi?”
- ⁷Ndu no l'ugbo ono nonyaa bya asu: “Unu bya g'anyi tua ido gude maru onye bu iya eme anyi ahuma-a.” Ephe bya atua ido. O daaru Jiona.
- ⁸O buru iya bu; ephe jia ya su iya: “Yeeru anyi onu. ? Bu onye be ejo-iphe-a, l'eme l'eh anyi-a shi l'eka? ? I meje gunu? ? I shi awe? Ali aka i shi ? aza gunu? ? I bu onye awe?”
- ⁹O bya eyeeru phe onu su phe le ya bukwa onye Hiburu. L'onye ya abajeru eja bukwa Chipfu; mbu Chileke k'imigwe; onye bu iya meru eze-enyimu; bya emee ali l'ophu.
- ¹⁰O bya akoru phe g'oonwuru ye le iya. Ephe bya amaru l'oo agbala be oome g'o nahu Chipfu gbala. Opfu iya ono mee; ndzu guhaa phe. Ephe jia ya su iya: “? O bukwanuru gunu be iime nno?”
- ¹¹Mini ono nodu akakpoekwapho achi oku eje. Ephe bya ajia ya su iya: “? Bu gunu be anyi e-me ngu g'eze-enyimu daaru anyi nyonyoronyo?”
- ¹²O su phe: “Unu palia mu ephekerephe paru chie l'ime eze-enyimu-a g'unu ahuma l'oo-dachaa nyonyoronyo. Mu maru-a l'oo mu kparu iphe, oke akpara-mini-a wataru unu atutu.”
- ¹³O betachia nno; ndu ono toko ike phe mekota g'ephe kpophu ugbo ono azu je apfube l'ali; ophu ephe adudu ike; kele eze-enyimu ono kabaa atangirihu eme le g'o shi du le mbu.

¹⁴Ephe tuko wata araku Chipfu su iya: “Gube Chipfu; jiko te emegbukwa anyi me anyi -gbua nwoke-a. G’ochi onye adudu iphe, o meru ta atukokwaru anyi l’ishi; kele o kwa g’o du ngu bu ge gube Chipfu meru.”

¹⁵Ephe bya apalia Jiona tufu l’ugbo ono; woru iya chie l’eze-enyimu ono; mini ono, achi warawara ono buru nyonyoronyo.

¹⁶Iphe ono, meru nu ono mee; ndu ono wata atsu Chipfu ebvu okpobe atsutsu. Ephe gwaa Chipfu bya ekweshia ya ukwe-iphe.

¹⁷Obenu le Chipfu dobewaru ophomu-okazu, lweru Jiona. Jiona noo l’ime epho ophomu-okazu ono ujiku eto eswe l’enyashi.

Jiona 2

Jiona epfu anu Chileke

¹Tobudu iya bu; Jiona bya anodu l’ime epho okazu l’eka ono wata epfu anu Chipfu, bu Chileke iya.

²O pfua su: Teke mu eje eze iphe-ehuka be mu rakuru Chipfu. O numa olu mu. O buru l’ime ali-maa be mu chiru g’a gbaaru mu mkpu. I numa mkpu, mu echi.

³I paru mu chie l’ime ogbu-mini; mbu l’ohu-ali eze-enyimu. Utso gbaa gbapyabe mu. Akparamini ngu me gborogboro, ooso nodukota awu mu awuwu.

⁴Mu pfua su: A chifuakwaru mu l’ataphu ngu. Ole mu a-dabekwa-a enya l’uzo eze-ulo ngu, du nsọ ozo.

⁵Ge mini meru g’o ria mu rimia; ogbu-mini lwee mu kawomu. Elwubara mini kwechia mu ishi.

⁶Mu dalahukpoepho l’ohu l’ohu eze ubvu. Ohu ali woru mu tua mkporo ojejeje. Obenu li gutaru ndzu mu liduma; mbu gube Chipfu, bu Chileke mu.

⁷Teke mu shi abyawaa atu-buhu unme be mu nyataru gube Chipfu. Mu pfuaaha opfu nuahaa ngu; opfu mu rwua eka i no l’eze-ulo ngu, du nsọ.

⁸“Ndu bu mkpokoro nteke be ephe turu swiswia be o too rwuedu eka; mbu eze-iphe-oma ono, e gege meru phe ono.

⁹Obenu le mbedua a-noduepho agu ebvu-ekele gude agwa ngu. Iphe, mu kweru ukwe ememe be mu e-mekota. Ndzota bukwa onye ooshije l’eka bu Chipfu!”

¹⁰Tobudu iya bu; Chipfu bya aturu okazu ono ekemu; o je agbofu Jiona l’ali okponku.

Jiona 3

Jiona eje Ninive

¹Tobudu iya bu; Opfu Chipfu bya erwua Jiona nchi k’ugbo ebo su iya:

²“Tugbua je mkpukpu Ninive; mbu oke mkpukpu ono; je ezia ndu bu iya nu ozi, mu ziru ngu!”

³Tobudu iya bu; Jiona gbalihu; bya ejeshia Ninive; g'o mee iphe, Chipfu suru g'o mee. Ninive ono bu eze mkpukpu, paru aka apaa. Iphe, eejeje ije teme aaghabua ya ebo bu ujiku eto.

⁴Jiona bya ejee ije ujiku ophu gude bamihu l'ime mkpukpu ono bya eje araaaa ya arara su: “Iphe, o phoduru bu ukporo abali labo; Ninive aburu mkpurupyata.”

⁵Ndu Ninive bya ekweta ke Chileke. Ephe bya araa ya arara su g'onyenonu wata aswiru Chileke egu. G'ephe hakota bya eyee uwe-aphu; e -shikpo l'onye kachaa shii l'ime phe; jasu l'onye kachaa nwanshi.

⁶Eze ndu Ninive bya anuma iphe ono, ada nu ono; o gbalihu l'aba-eze iya; bya eyefu akpawuru uwe eze iya; bya eworu uwe-aphu gbaphua onwiya; bya anodu anoo gwoo onwiya le ntu.

⁷O bya ezia g'a raa ora gbaa Ninive mgburugburu su: “Wakwa iphe, eze yele ndu ephe l'iya bu ndu-ishi mkpukpu pfuru baa: G'o to dukwa nemadzu; ozoo anu; ozoo eswi; ozoo aturu, a-duru iphe, oo-ri; ophu o dukwa onye a-ngu iphe, aangu angungu.

⁸G'a toko nemadzu mekpoo anu phukota uwe-aphu. G'onyenonu wata araku epha Chileke egwegwa. G'ephe toko haa ejo-ememe, ephe eme; mekpoo mkpawere, ephe eme ndu ozo.

⁹G'a maru ? Chileke a-ghakobe gude obu-imemini iya gbanwee oke ehu-eghu iya ono; k'ophu anyi taa laedu l'iswi.”

¹⁰O be teke Chileke humaru iphe, ephe meru; waa g'ephe gude ghakobe haa eme iphe-aji phe ono; o phuru phe obu-imemini; ophu o mebyishiduru phe g'o shi chia dobe le ya e-mebyishi phe.

Jiona 4

Ovuma, Jiona avuru Chileke

¹Iphe ono du Jiona eji ntumatu. O ghuaaha ya eghu.

²O bya epfuahaa nuahaa Chipfu su: “Gube Chipfu; ? to budu iphe-a be mu pfuru teke mu no l'ali anyi-a? O kwa iphe-a meru g'o gude mu mee egwegwa jeshia mkpukpu Tashishi; kele mu maru l'i bu Chileke, menukaru eze-iphe-oma; teme i nodu aphuje obu-imemini; ophu ehu egहुjedu ngu egहु egwegwa; teme i nodu eyeje obu yegharu iya aka; i buru Chileke, e tee ekwojedu gburumu mee ge nemadzu buru ola-l'iswi.

³Nta-a; gube Chipfu; gbua mu egbugbu; kele anwuhu ka mu ree eme l'anodu ndu.”

⁴Obenu le Chipfu yeru iya onu su iya: “Ehu-eghu owa-a, egहु ngu nu-a ? o gbaru ngu-a?”

- ⁵Jiona tɔgbua je anɔdu anɔo l'ɛka lanu le mgboru mkpɔkpɔ ono; l'uzo ɛnyanwu-awawa iya. O je je atɔaru onwiya mkpɔ l'ɛka ono; bya eje anɔdu le mkpɔla iya leahaa ɛnya ge ya maru iphe, e-mechaa mee mkpɔkpɔ ono.
- ⁶Tɔbudu iya bu; Chipfu, bu Chileke bya emee ge vayinu futa l'ɛka ono; bya emee ya; o bachishia ɛkameka le mkpɔla ɛka Jiona no bya emee g'ibvu du l'ɛka ono ge Jiona ta aghahe chirichiri. Vayinu ono mee; ɛhu tsoahaa Jiona utso shii.
- ⁷Obenu l'o beru l'utsu; le nchitabohu iya; Chileke bya eye unwu-ɛhu; o bya atanwua vayinu ono; o nwulwashihukota.
- ⁸Tɔbudu iya bu; anwu chifuɛpho; Chileke bya awata ezi oke pherephere uguru, shi l'uzo ɛnyanwu-awawa; teme anwu chiahaa Jiona igbangu igbangu l'ishi; k'ophu meji tofuaharu iya atofu. O du iya g'a su le ya nwuhuru. O su: "Anwuhu kaakwa mu nu ree eme l'anɔdu ndzu."
- ⁹Tɔbudu iya bu; Chileke bya asu Jiona: "? O gbaru ke g'ɛhu wata ngu egu egu le ke vayinu ono too?" O su iya: "Ee! ɛhu egukwa mu egu. Mbɔ l'iphe, agu mu nu nta bukwa anwuhu."
- ¹⁰No iya; Chipfu bya asu iya: "? I humaru ge ke vayinu-a atsu-be ngu l'ɛhu; l'ɛbe abu l'oo ngu kuru iya; ophu o budu ngu meru iya o baahaa uba. Nchi byaru abohu; o futawaa. Nchi bya l'abohu ozo; o nwuhuwaa.
- ¹¹Obenu le mkpɔkpɔ Ninive be ndu bu iya nu daghataru ukporo unu umadzu iri l'ise , bu ndu amadu onwophe ekicha; ozoo ɛkutara; ɛphe nwekwarupho ikpoto eswi. ? Bu eze mkpɔkpɔ, ha egube ono be mu tege aphuduru obu-imemini too?"

Mayika

Mayika 1

¹Qwaa bu ozi, Chipfu ziru Mayika; onye shi le mkpukpu Moreshetu; teke Jiótamu bu eze ndu Jiuda; yele teke Éhazu bu eze, ndu Jiuda kwapho; wakwapho teke Hezekáya bu eze, le Jiuda ono. O kwa ophulenyá, o phuru l'opfu ehu ndu mkpukpu Samériya ye ndu mkpukpu Jierúsalemu.

²Unube ndiphe; unu numakwa-o! Ge mgboko l'opfu ngabekwa nchi; mekpoo onyemonye, bu iya nu! Ge Nnajiuphu, bu Chipfu gbekwa l'eze-ulo iya, du nsó gbaa unu ekebe.

Ikpe, eekpe ndu Samériya ye ndu Jierúsalemu

³Su-a; lekwa! Chipfu shikwa l'eka o bu ebubu abya. Oo-bya bya azo garamu garamu l'eli-ubvu l'eli-ubvu, nogbaa l'eliphe.

⁴Ubu ubu ono a-zashihu le mkpula okpa iya; nsuda nsuda agbawashihuchaa agbawashihu g'unwu, e doberu le mgboru oku; ge mini, shi le mgbaze asoshihu.

⁵Iphemiphe-a bukota iphe, kparu iya nu bu atopya, oshilokpa Jieko pu tpyaru Chileke; mbu iphe-eji, ndu onu-ulo Izurelu meru. ? Bu onye be uta duru le Jieko pu tpyaru Chileke? ? Tobudu ndu mkpukpu Samériya? ? Bu onye be uta duru le ndu Jiuda meru iphe-eji? ? Tobudu ndu mkpukpu Jierúsalemu?

⁶“Noo g'o gude mu je emee mkpukpu Samériya ikpozu; eka aa-nodu akoje opfu-vayinu. Mkpuma igbulu iya be mu a-chiru ye le nsuda ono. Mu emee g'okpa-ulo iya zekposhihu gheru onu.

⁷Iphe, bu ntekpe, ndu Samériya doberu be ee-tsu yogiri yogiri. Iphemiphe, aapfuje phe l'ulo nshi be ee-tsukota oku. Temu mu abya emebyishikota iphemiphe, o kpuru akpukpu dobe agwa agwagwa. Noo kele iphe ono, onoduje anako ono bukota l'eka o shi bu l'ugwo, aapfuje unwanyi-ukpara. O bukwarupho g'aakpakaje ugwo, aapfuje unwanyi-ukpara bu g'aa-kpaka iya.”

Ara ekwa; waa agu aphu

⁸Oo iphe ono meru g'o gude mu je ara ekwa chia mkpu. Mu a-gbaru okpa oto; gbaru ehu oto. Mu a-kwa phuuphuu ge nkuta-oswa. Mu arakwapho aphu-aphu ge mgbashi-ujiku;

⁹Kele onyá, aba mkpukpu Samériya taa ladu alala; teme o baswewaru ndu Jiuda. O jerwuakwaru onu-abata, e shi ejepfu ndibe mu; mbu jerwuchaa Jierúsalemu l'onwiya.

¹⁰Unu te epfukwaru iya ndu mkpukpu Gatu! Ophu unu arakwa ekwa arara ophu! Unube ndu mkpukpu Betu-Ofura; unu gwo-phua onwunu l'urwuku!

¹¹Unube ndu bu le mkpukpu Shafiya; Unu gbaru oto gude iphere je iphe, unu eje! Ndu ophu bu le mkpukpu Zananu taa futakwa afuta. Ndu mkpukpu Betu-Ezelu be aphu tsokwaru; noo kele iphe, shi gbobuta phe nu be a nafuakwaru.

¹²Mbụ lẹ meji atofukwa ndu bu lẹ mkpukpu Marotu atofu ẹka ẹphe nọ ele ẹnya iphe, du ree; kele ẹjo-iphe shiakwa Chipfu l'ẹka byarwuta onu-abata mkpukpu Jierusalemu.

¹³Unube ndu bu lẹ mkpukpu Lakishi; unu kwakobe ugbo-inya unu k'ogu! O kwa unubedua vuru uzo gbube ishi iphe-ẹji; ndu nwada Zayonu tsoahaa ẹka unu; kele atupya, ndu Izurelu tpyaru mu bu ngu be o shi l'ẹka.

¹⁴Oo ya bu g'i kwaru ivu-ulo nu ndu mkpukpu Moreshetu-Gatu. Ndu mkpukpu Akuzibu l'e-me ndu eze ndu Izurelu mkpurukpuru-ẹnya.

¹⁵Mu a-chita ndu a-bya emekpee unube ndu bu lẹ mkpukpu Maresha. Ndu Izurelu ndu ophu aakwabeje ubvu a-gbaru laa l'ogba Adulamu je ewohaa onwophe.

¹⁶Unu kpushia ishi; ghebe ishi onu; nodu l'aphu unwegirima ono, du unu l'obu ono! Unu mee ishi g'o chaa unu swarishwari ge k'udele; kele ee-mechaa naa phe unu kpua phe le ndzu.

Mayika 2

Iphe, Chileke abya ememe; yee ophu nemadzu abya ememe

¹Aphu a-tsokwaru ndu ono, achi idzu iphe, adudu ree; mbu ndu anoduje l'iphe-azee phe ari k'eme ẹjo-ememe. Nchi -bohuepho; ẹphe awata iya ememe; kele ike, ẹphe e-gude eme iya du phe l'ẹka.

²Ẹphe achabeje ẹnya l'ali onye ozo; naa ya l'okpehu. Teke ẹphe chaberu ẹnya l'ulo; ẹphe anakwaa ya pho l'ehuka. Ẹphe nodu anataje nemadzu unuphu ibe iya; mbu naa obutobu phe iphe, bu okiphe iya.

³Noo g'o gude Chipfu su: "Lenu; mu achiru ndu ono idzu ẹjo-iphe. Ophu ẹphe a-dudu ike anahu ẹjo-iphe ono agbala. Unu te ejehakwa etse etsetse kele teke ono a-du ẹjo ẹji.

⁴Lẹ mboku ono be ndiphe a-nodu eme unu iphe-ochi. Ẹphe emee unu kwaphukwaphu aguru unu ebvu-aphu-a: "E mebyishikotaakwaru anyi rengurengu. Okiphe ndibe mu be e woru kee. Chipfu nataru mu iya l'ẹka! O woru ali anyi nuchaa ndu amadu iya nu."

Ndu mpfuchiru, epfu iphe, Chileke epfuduru

⁵Oo ya bu l'unu te enweedu me onye lanu, a-no-chi ẹnya unu le ndzuko ke Chipfu; onye a-tu ido gude kee ali ono.

⁶Ndu mpfuchiru phe asuje: "Unu ta asujeshi l'oo Chileke pfuru udu iphe ono, unu epfu ono. O to dukpoda iphe-iphere, byaru eme anyi."

⁷Su-a; gube onu-ulo Jiekopu; ? l'aa-su le Unme Chipfu be ehu egu egu to? ? Oomeje egube iphe ono to? Opfu mu ? too mejeduru onye uzo iya pfuru nhamunha iphe, du ree to?

⁸O gbẹ buru ge mboku abvuwaa abvubvu be ndibe mu wu-lihuru buru ndu ohogu mu. Unu yefuchaa phe akpawuru-uwe ndu eze, ẹphe yeru; mbu ndu tuzoshihuru ehu aghatakporo ge ndu shi ogu alwa.

⁹Unu achifuje unwanyi ndibe mu g'ephe te ebuhe l'eguru ibe phe. Unu anaje unwu phe iphe, bu iphe, du ree, shi mu l'eka.

¹⁰Unu gbalihu tugbua lufu; kele eka-a ta abudu okpoku unu; kele e merwuwaru iya emerwu. E mebyishiwaru iya; k'ophu e tee mekwatabaedu iya.

¹¹O -buru l'o duru onye tsoru aghaphe epfu mkpokoro opfu adzushi uka eye iya su le Chileke suru g'a nguje mee-mini yee mee mbekee ngushi iya ike; noo egube ndu epfu iphe, du unu ree anuma bu onoya!

Ekwe nwanu wafuru nu ukwe ndzota

¹²“O to dukwa iphe, e-me ge mu ta atuko g'unu ha chikobe; unube oshilokpa Jiekopu! O to dukwa iphe, e-me ge mu ta achikobe unube nwanu wafuru nu l'onu-ulo Izurelu l'eka lanu! Mu a-chikota phe g'ephe nokobe l'eka lanu g'onye chiru aturu ye l'ulo aturu; g'onye doberu egbu yee aturu l'eka o no ata nri. Ephe e-ji eka ono pyimu pyimu atu wooooo kele ephe a-pa igwerigwe.

¹³Onye e-gbuharu phe uzo osa l'a-buru onye e-vutaru phe uzo. Ephe e-chikaa onu-abata mkpukpu ono wughata wufu. Onye eze phe evuru phe uzo ghataada. Mbụ l'oo Chipfu a-buru phe ivuzo.”

Mayika 3

Mba aabarụ ndu-ishi ephe le ndu mpfuchiru

¹Noo ya bu; mu su: “Unu ngabe nchi; unube ndu bu ndu-ishi oshilokpa Jiekopu; mbu unube ndu bu ndu-ishi l'onu-ulo Izurelu. ? To gbaduru g'unu a-maru g'ekpeje ikpe, pfuru oto to?”

²Mbu unube ndu kporu iphe, du ree ashi; bya eyee ejo-ememe obu; ndu anoduje aswa ndibe mu akpo; bya akpa phe anu l'okpu;

³unube ndu ata anu ndibe mu; bya aswa phe akpo; bya etsu okpu phe yogiri yogiri; ndu ebushije anu phe seese g'anu, aabya eye l'ochi; mbu g'anu aabya ade l'ite?”

⁴E -mechaa; ephe araku Chipfu; ole o too yeduru phe onu. Teke ono be oo-woharu phe iphu iya. O buru iphe, a-kpa iya nu bu l'ephe mewaru ejo-ememe.

⁵Wakwa iphe, Chipfu epfu baa: “A -bya l'opfu ehụ ke ndu mpfuchiru Chileke, bu ndu ono, edusweshi ndibe mu ono; mbu ndu abujeru: onye nuru phe nri; ephe agoru ehugu nu iya. Teke o dudu iphe, a nuru phe; ephe akwakobe etso onye obu ogu.

⁶Noo g'o gude nchi je l'ejipfu unu. Ophulanya anahu unu; ochii erikpute unu. Ike agba eja taa duedu unu. Mbụ l'enyanywu a-nyihuru ndu mpfuchiru ono. Echi-eswe aburu phe tsukiribaa.

⁷Ndu aphuje ophulanya be iphere e-mechaa du. Ndu agba eja aburu ndu e kpuru iphu le ntu. G'ephe ha e-mechaa tuko kpuchia eka l'iphu kele Chileke te eyejeduru phe onu.”

⁸Obenu lẹ mbẹdua bẹ ike jikpọru mu ẹhu pyimu pyimu. Unme kẹ Chipfu jiru mu ẹhu; yẹe ekpe ikpe, pfuru ọto; yẹe ike-ọkpọ, mu e-gude karu oshilokpa Jiékọpu emeswe, o mesweru; mbu karu oshilokpa Ízurelu iphe-ẹji pẹ.

⁹Unu numakwa iphe-a; unubẹ ndu-ishi ọnu-ulo Jiékọpu; mbu unubẹ ndu bu ọnyibe l'ọnu-ulo Ízurelu; ndu-ikpe, pfuru ọto du ashị; tẹme ẹphe nọdu emeje iphe, pfuru ọto l'o gbee nggọ;

¹⁰ndu gude egbu ọchi gude kpua mkpukpu, nọ l'eli úbvú Zayonu; mbu gude eme ẹjo- iphe kpua mkpukpu Jierúsalemu.

¹¹Ndu-ishi pẹ bu a -nụada pẹ iphe-úphalazu tẹme ẹphe ekpee ikpe. Ndu-ishi-uke pẹ nọdu ezije iphe mẹ a -pfuada pẹ ugwo; tẹme ndu mpfuchiru pẹ nọdu agbajẹ ẹja mẹ a -nụada pẹ okpoga. Ọle ẹphe tükokwaru-a dakobe Chipfu epfu sù: “Chipfu nọkwa l'echilabọ anyi; ọphu ọ dukwa ẹjo-iphe, byaru adapfuta anyi.”

¹²Ọo ya bu l'ọo unu kparu iphe, ee-mechaa kọo úbvú Zayonu kọfu g'aakoje opfu-a. Mkpukpu Jierúsalemu e-mechaa buru ikpọzu. Eli úbvú ono, bu ẹka eze-ulo Chileke du ono; e-mechaa buru ẹka ẹgbudu zechiru.

Mayika 4

Ẹhu-guu ojeje

(Azá 2:2-4)

¹Su-a; o -rwua teke ikpazu bẹ ee-me g'eli úbvú ono, a kpuru eze-ulo Chileke ono nguru anguru; mee ya l'ọo buru iya a-kachaa shii l'iphe, bukpo úbvú ọzo nọgbaa nu. Mbu l'ee-me iya g'ọ kakọta úbvú ọzo l'eli. Noo teke ndiphe a-nọdu awu awu-pfu iya.

²Ikpoto ọha a-bya bya asu: “Unu bya g'anyi je l'eli úbvú kẹ Chipfu! Unu g'anyi je l'ulo kẹ Chileke kẹ Jiékọpu. Ọo ya e-zi anyi ọzo iya; k'ọphu anyi a-wata etso ọzo, ọ toru.” Noo kele ekemu e-shi l'úbvú Zayonu futa; mbu l'opfu Chipfu e-shi lẹ mkpukpu Jierúsalemu.

³Ọo ya e-doshi opfu, dugbaaru ikpoto nemadzu. L'ọo bya edoshiaru ọha, ike dugbaa, bugbaa ọzenya ọzenya opfu, duru pẹ nu. Ẹphe e-woru ogu-echi pẹ kpukwaa l'ọo buru ogu; woru arwa pẹ kpua l'ọo buru mma nshii, e gude akọcha iphe. Ọ tọ dudu ọha, a-patakwa du ogu-echi ejepfu ọhoro ogu; ọphu ẹphe anwudu alwu ogu ọzobaa.

⁴Onyemonye a-nọduje lẹ mkpula vayinu nkiya; mękwapho lẹ mkpula oshi figu nkiya; ọphu ọ dudu onye byaru eye pẹ ebvu; kele ọ kwa Chipfu, bu Ọkalibe-Kakọta-Ike eepfu iya.

⁵Ọhamoha ọzo g'ẹphe ha a-nọdukwaro ejegbaa l'ọbvú; agwa nshi pẹ; obenu l'anyibedua bu onye anyi e-gude ẹpha iya eje bu Chipfu, bu Chileke anyi jasú l'ojejeje.

Iphe, Chipfu chiru k'ememe

⁶Wakwa iphe, Chipfu epfu baa: “O -rwua mbọku ono bẹ mu a-chikobe ndu ẹniyeni; mu achikobe ndu a chifuru l'alí pẹ; yẹe ndu mu meru; ẹphe je iphe-ẹhuka.

⁷Ndu ẹniyeni bẹ mu e-me g'ẹphe bụru ndu waru nụ. Mu emee ndu a chifuru l'alị phe g'ẹphe bụru oha, ike dū. O bụru Chipfu a-buru eze phe l'eli úbvú Zayonu e -shi mbọku ono jasụ l'ojeje.

⁸“A -bya lẹ gube nwada Zayonu, bụ ẹka a nọ eche ndu Ízurelu g'onye eche aturu-a; bya aburu ẹka ndu Ízurelu agbabajẹ je ezeeru ndzụ; ii-mechaa bụru ishi g'i shi bụru teke ndiche; mbụ l'aburu eze e-mechaa rwubebaa gube nwada Jierúsalemu ozobaa.

⁹? Bụ gunu kparu iphe, jira ẹkwa? ? Ti nwehedu onye eze to? Onye akpo-ziru ngu uzo; ? o lawaru l'iswi to? mbukwanu meru g'o gude iphe-ehuka gudeshia ngu ge nwanyi, ime eme.

¹⁰Gube nwada Zayonu; nodunu chi gburugburu ge nwanyi, ime eme; kele nta-a be jibyakwa aha oma mkpukpu-a je akwaa l'oma egu. Ii-je alị ndu Babilonu. O bụru ẹka ono be aa-nafuta ngu. Oo l'eka ono be Chipfu a-gbata ngu l'eka ndu ohogu ngu.

¹¹Nta-a be ikpoto oha, du igwerigwe chikoberu onwophe bya etsoo ngu ogo. Epe nodu epfu su: ‘G'a turwua ya! G'anyi chiru enya yeru Zayonu!’

¹²Obenu l'ẹphe ta amadu iphe, bu oriri Chipfu. Iphe, o chiru idzu k'ememe te edoduru phe enya; mbụ onye ono, chikoberu phe g'onye chikoberu balị eje echichi ono.

¹³“Gbalihu chia balị; gube nwada Zayonu; kele mu e-me g'i fua mpu-igwè. Ichirupfu-okpa ngu aburu onyirubvu. L'i zo ikpoto oha tolitoli. L'i woru urwu ono, epe ritaru l'eregede ono woru ye Chipfu l'eka; mbụ woru ẹku phe ono nụ Nnajiuphu ono, nwe mgboko l'ophu.”

Mayika 5

Ukwe k'onye e-shi lẹ Bẹtulehemu bya aburu Ishi

¹“Su-a; unu chikobe onwunu nọ l'ophere l'ophere; unube mkpukpu ono, ikpoto nemadzu nọ ono; kele ndu ohogu unu nọ-pheakwaru unu anọ-phe. Onye-ishi Ízurelu be epe e-chikwa mgboro l'asha ke kpoo.

²“Obenu lẹ gubedua, bu Bẹtulehemu, nọ l'onu-egu Ifurata; mbukpokwaa g'i bu nwa mkpukpu, ha nwanshii l'ime mkpukpu nọ l'ipfu Jiuda l'ophu-a; bukwa l'ime ngu be onye a-buru ishi ndu Ízurelu l'ophu e-mechaa shi futaru mu; mbụ onye shiro teke ndiche noduhawaa; onye shi l'edenwede noduta ndzụ.

³“Oo ya bu lẹ ndu Ízurelu be aa-gwobe gbiriri jasụ teke nwanyi ono, ime eme ono l'ezeda; teme unwunna iya ndu ophuu alwapfutafua ndu Ízurelu.

⁴Onye ono l'a-pfukporu bụru onye eche aturu chee aturu iya ono. O bụru Chipfu a-nu iya ike; bya aburu Chipfu, bu Chileke iya e-me g'a kwabe iya úbvú. Epe ebukporu; o to dudu iphe, eme phe nụ kele teke ono be údù iya e-jedzuru mgboko l'ophu.

⁵O bụru iya e-me ge nchi a-duru phe doo.”

Ndzota yele Ola-l'iswi

“Teke ndu Asiriya l'a-bya awuba l'alì anyi; zoahaa garamugaramu azopyashi eka anyi kpuru kpushia ya ike be anyi a-hota ndu eche aturu umadzu esaa yee ndu bu ndu-ishi umadzu esato g'ephe duta anyi tsoo ndu Asiriya ogu.

⁶Ephe e-gude ogu-echi lwua alì ndu Asiriya ono; mbu l'ephe a-mi-lita ogu-echi phe gude lwua alì Nimurodu. O buru iya a-nafuta anyi l'eka ndu Asiriya; m'ephe -byaephe bya awuba l'alì anyi wata azo garamugaramu awu ala l'oke alì anyi ono.

⁷“Oshilokpa Jiékpou ndu ophu waru nu l'a-nodu l'echilabo ohamoha du g'iji, shi l'eka Chipfu akwa. Ephe a-du ge mini, lwaru yegeyege dugbaa dzedzedze l'eli eswa, bu ophu abudu nemadzu be o no ele enya iya; ophu o dudu onye o no ngaberu.

⁸Oshilokpa Jiékpou ndu ophu waru nu l'a-nodu l'echilabo ndu-ohozo buru oduma, no l'echilabo anu-egbudu; mbu l'ephe a-du ge nwa oduma, ephe l'aturu gharu eghirigha, abujeru o -nodu eje l'oolajashi iphe, o guderu; ophu o dudu onye aduje ike dzoo iphe, dabaru iya l'eka.

⁹Ndu ohogu ngu be ii-mekpekota; l'i chi-lia eka imeli tua okoo. Ozo bu le ndu gu l'ephe duru l'opfu be ee-mebyishikota.”

¹⁰Wakwa iphe, Chipfu epfu baa: “O -rwua mboku ono be mu e-gbushi inya unu bya aku-pyashia ugbo-inya unu.

¹¹Mu e-mebyishi mkpukpu, dugbaa l'alì unu bya etsukposhia ulo-mgbobuta unu g'oha.

¹²Mu e-mebyishi k'eme mgbashi ono, unu eme ono; ophu ndu jibya aduedu l'echilabo unu.

¹³Mu e-mebyishi ntekpe ono, unu pyishiru agwa agwagwa ono; bya emebyishikwapho mkpuma mkpuma ono, unu agwa agwagwa, dugbaa l'echilabo unu ono; ophu unu ephozebaeduru iphe, unu gude eka unu mee ozobaa.

¹⁴Mu abya alwua nshi Ashera ono, no l'echilabo unu ono; woru mkpukpu unu l'ophu tsukposhia.

¹⁵Mu egude oke ehu-eghu mu melata ohamoha ono, jikaru l'ephe tee medu iphe, mu suru g'ephe meje ono.”

Mayika 6

Eeku Ndu Izurelu Ikpe

¹Unu ngabekwa nchi l'olu Chipfu. Ge gube Chipfu gbeshi pfuru apfuru pfua iphe, e meru ngu l'iphu eze ubvu! G'ubvu ubvu numawaro iphe, oome g'o pfua!

²Unube ubvu ubvu; unu numakwa iphe, Chipfu abya edodo! Unu ngabe nchi numa iphe, ada nu; unube itso, gude mgboko jasuru asuru! Noo kele o duru iphe, Chipfu epfu le ndibe iya meru iya; mbu l'o duru iphe, oogushi le ndu Izurelu meru iya.

Onu, Chipfu eye

³“Sụ-a; ndibe mu; ? Bụnaa ụnu bẹ mu meru unu? ? Bụ ivu-erwa ụnu bẹ unu a-sụ lẹ mu boru unu? Unu sanaa mu iya!

⁴Mu dufuwaru unu l'alị Ijiputu; bya agbafuta unu l'alị ono, unu shi nọdu bụru ohu ono. Mu zia Mosisu sụ g'ọ bya edua unu; yefua Eronu; yee Miriyamu.

⁵Unubẹ ndibe mu; unu nyatakwa idzu, ọ chiru; mbụ eze ndu Mówabu, bụ Belaku! Unu anyatakwapọ onu, Belamu yeru; mbụ nwa Beyo! Unu nyatakwa ije, unu jeru e - shi lẹ mkpukpu Shitimu jasụ lẹ mkpukpu Gilugalu; k'ophu unu a-maru iphe, Chipfu meru gude dzota unu!”

⁶? Bụ ụnu bẹ mu e-gude bya l'iphe Chipfu; mbụ bya ephozeru Chileke ono, parụ eka apaa ono? ? Bụ anụ bẹ mu e-wota bya l'ataphu iya gẹ mu gude iya gweeru iya ngweja-akpo-oku; mbụ nweswi mgbapha?

⁷? Oo-du Chipfu ree mẹ a -nụ iya unu-kuru-unu ebili; nụ iya nggele manụ, aso gborogboro unubuku ugbo iri? ? Mu e-wota okpara mu gude gwaa Chileke gwefu atupya, mu tupyaru iya to; mbụ gẹ mu woru nwa, shi mu l'ehu pfua ugwo iphe-iji mu?

⁸O goshiakwaru gube nemadzu iphe, du ree k'ememe. ? Bükwanu ụnu bụ iphe, Chipfu ele ụnya iya l'eka ngu, abudu g'i meje umere, pfuru oto; l'i yee ụnya l'aphu obu-imemini; l'i woze onwongu alị; etso Chileke ngu.

Ikpe, nmaru ndu Izurelu yee iphe, ee-me phe

⁹Unu ngabekwa nchi! O kwa Chipfu eku ndu bu lẹ mkpukpu oku; teme atsu gube Chipfu ebvu bukwanuru mmamiphe. “Unu numakwa iphe echachi ada; yee olu onye echi iya nu!

¹⁰Unubẹ ndu ejo-iphe; ? bụ gẹ mu zohaa eku ono, unu kparu l'uzo eregede ono to; yee nwamkpirikpu nkweka bụ iphe, Chileke turu onu?

¹¹? Mu kpefu onye gude iphe, aatuje iphe l'uzo eregede ere aswa; mbụ onye vu eka, erwa iphe, no iya nu abudu iphe, o suru l'ọ bụ?

¹²Ndu nweru iphe, bu lẹ mkpukpu ono emeje ndu ozo mkpawere. Ndu bu iya nu bu ndu ntuphu-ire; teme ephe nọdu egudeje ire phe epfu opfu l'eregede.

¹³Noo g'o gude mu watawaa emebyishi gube mkpukpu ono; mbụ eme gẹ mu gwepyaangu; kele iimeje iphe-iji.

¹⁴Nri bẹ ii-rikwa; ole epho tee jidu ngu. I -richaa epho egheleru ngu-a onu. I -kpachaa eku dobe; o to dudu ophu adu nu; kele ophu i doberu g'o phodu bẹ bụ ogu-echi bẹ eegude lwua ya.

¹⁵Ii-koebekpoo iphe l'alị; ole i tii kpatadu iya. Akpuru oshi olivu bẹ ii-zoshikwa; ole i tii nyidu manụ iya. Ii-pyishikwapo akpuru-vayinu; ole i tii ngudu mee ya.

¹⁶Kele unu mewaru iphe, Omuri suru g'unu meje; bya emekota iphemiphe, ndibe Ehabu anoduje eme; teme unu byakwapo etsoru omelali phe. Noo g'o gude mu je

l'aha gube mkpukpu ono g'i buru ochobu; bya emee ndu bu ngu nu g'ephe buru ndu aachi ochi. O buru unu be ndiphe a-nodu ata uta."

Mayika 7

Aphu ndu Izurelu

¹O kwa aphu tsoru mu; kele mu du g'onye egu agu le teke a wochaaru akpuru oshi l'onanwu; bya awochakwapho akpuru vayinu. Ophu o duedu tiyotiyoo akpuru vayinu ono, dukwadu nu, aa-wota ria eriri. Ophu o dukwapho akpuru, dukwadu l'oshi figu, bu ophu agushikpoo mu ike.

²Su-a; ndu yeru Chileke obu laakwaru l'iswi l'eliphe-a. Mbụ l'ọ tọ duedu g'ọ ka mma l'ọo onye lanu, bu onye obu iya guru iphoro, phoduru nu. Onyemonye buepho iphe, o kwageberu akwagebe iya bu g'egburu ochi. Onyenonu gude ugbu-egege ege ge ya nmata nwune iya.

³Eka phe ebo ebo be eme ejo-iphe kwowaru ehu. Ndu bu onyibe me ndu-ikpe ekebeje g'a nu iphe-uphalazu. Ndu bu o-kari-eka nodu anataje iphe, guru phe nu l'okpenu. G'ephe ha nodu anoduje achi idzu lanu.

⁴Onye gbę kachakpoo ree l'ime phe adzu g'obvu. Onye ophu kachaa abu onye obu iya guru iphoro ka ikpo ogara-mbo eji. Eswe mboku ono, ndu nche unu shi pfuta opfu iya ono rwaakwaru; mbu mboku, Chileke a-nu unu aphu. O kwa nta-a bu teke aa-tu unu eberebete.

⁵Unu ta adakobekwa nemadzu ibe unu! Ophu unu achijekwaru upfu ye l'onye unu l'iya eshi onya! Mbukponu nwanyi ono, ze tu-kobe ngu ishi ono; makwaru udu opfu, iipfu eyeru iya!

⁶Noo kele nwa ta akwabejedu nna, nwuru iya nu ubvu. Nwa nwanyi nodu etsoje ne iya opfu. Nwa nwanyi, aalu alulu nodu etsoje ne ji iya opfu. Mbụ le ndu bu ogu duru nemadzu bu ndu ephe l'iya bu l'unuphu.

⁷Obenu le mbedua a-nodunupho ele enya Chipfu. Mu a-kwaberu Chileke, bu Onye ndzota mu. Mbụ le Chileke mu a-numa-a olu mu.

Ndu Izurelu a-gbeshia ozo

⁸Unube ndu ohogu mu; unu te etekwa eswa kpua mu! A makwaru-a le mu daru iko; ole mu a-gbalihukwaa ozo. A makwaru-a le mu no l'ochii; obenu l'oo Chipfu a-buru iphoro, duru mu nu.

⁹Eshinu mu meru Chipfu iphe-eji be mu e-vutanu oke ehu-eghu iya vuru; gbiriri jasu teke oo-bya elee enya l'opfu ehu mu; meeru mu iphe, rwuberu mu nu. L'ọ bya edufuta mu dobe l'eka iphoro du. Mu ahuma g'oo-gude dzota mu.

¹⁰Noo teke ohogu mu ono a-humakwa iya pho. L'ọ woru eka kpube l'iphu l'eka iphere e-gude iya. Mu egude enya mu huma eka oda kpurumu kpurumu; mbu onye ono, shi asuje mu: "Denu Chipfu, bu Chileke ngu?" O to dudu g'aa-no-beru l'a zo yebdua tolitoli g'onye azoka epuchi oma gbororo.

¹¹Eswe mbọku, aa-kpukwa igbulọ ngu ono abyaakwa. Mbụ mbọku, ee-me g'oke alị ngu kpọriberu.

¹²O -rwua mbọku ono bẹ ndibe ngu e-shijechaa Asiriya abyapfuta ngu; mękpoo ndu e-shi l'iphe, bụ mkpukpu, nọ l'alị Ijiputu; mbukpoo e-shi l'alị Ijiputu jasụ l'enyimu Yufurétisu; eshi l'eze-enyimu ọwa-a jasụ l'ozo; eshi l'úbvú ọwa-a jasụ l'úbvú ozo.

¹³Eliphe l'ophu aburu ochobu; ọ buru ndu bu iya nụ a-kpa iya; kele ephe a-ghota akpuru-iphe, ephe eme.

Epfu anụ Chileke aja iya ajaja

¹⁴Gudenu oshi-eree ngu chee ndibe ngu g'onye eche aturu; mbụ ndu ono, bụ okiphe ngu ono, bụ ndu ophu bu nwękinyi phez l'ime ọswa; l'alị, zeru ọswa nri egbu yee aturu ono. G'ephe nọdunu l'alị Beshanu yele alị Giladu je ataa nri g'o shi dughawaa teke ndiche ono.

¹⁵“O kwa egube iphe, dū biribiri, mu meru goshi teke ono, unu shi le Ijiputu futa ono bụ ge mu e-me iya goshi phez nta-a!”

¹⁶Qhamoha a-huma iya; iphere egude phez. L'a nashichaa phez ike phez l'ophu. Ephe eworu eka dee l'onu. Nchi echihu phez; ephe awata ada nkuchi.

¹⁷Ephe egude ire richaahaa urwuku g'agwo; mbụ g'unwu iphe, awu l'epho. Ephe eshigbaa l'eka ephe kpuru futa aphugbaa ke kwęekweekwee. Ephe egude ndzu-agugu ghakobechaa byapfutashia Chipfu, bụ Chileke anyi. Ephe awata unu atsu ebvu.

¹⁸? Bụ onye dūbaa ge gube Chileke, bụ onye aguje nvu l'iphe-eji; teme i nodu eleghataje emeswe, nwa ndu ono, phoduru nū ono, mesweru ngu; mbụ ndu ono bühukwapho okiphe ngu ono? Ehu te eghujedu ngu egbu jasụ l'ojeje. Obenu l'iphe, aduje ngu ree bụ g'i phua obu-imemini.

¹⁹Ii-phuru-a anyi obu-imemini ozo. Iphe-eji anyi bẹ ii-mechaa zopyashia l'okpa. Mbụ woru ejo-ememe, anyi emekota vuru je echie l'eze-enyimu.

²⁰L'ii-meru oshilokpa Jiokopu ire-lanu; mbụ phuru oshilokpa Ebirhamu obu-imemini, bụ iya bụ angu, i riru nna anyi oche phez teke ndiche ono.

Nahumu

Nahumu 1

¹Qwaa bu ozi ẹhu mkpukpu Ninive. Ẹkwo, e deru ọphulenyaa, ọ phuru; mbu Nahumu onye Ẹlukoshi.

Ẹhu-eghu Chipfu l'opfu-ẹhu mkpukpu Ninive

²Chipfu ekokwa okophoo. Mbu le Chipfu emelatajeka iphe, e meru iya. Su-a; Chipfu emelatajeka iphe, e meru iya; teme ẹhu nodu eghushije iya egu ike. Chipfu emelatajeka ndu achi iya le njo iphe, ẹphe meru; teme ọ nodu ewojeru oke ẹhu-eghu iya tu-koshi ndu ohogu iya.

³Chipfu be ẹhu te eghujekwa egu ẹwegwa; okpehu pakwanaa ya ẹka. Chipfu taa hakwa onye-ikpe nmaru g'ọ to nu iya aphu. O togboru uto le nswore pherephere yele oke pherephere. Urwukpu l'ophu buchakwaa udzu okpa iya.

⁴Eze-enyimu be ọobajeru mba mee ya l'ọ tahu; ọ nodu emejgbaa iphe, bukpoonyimu g'ẹphe tashihu. Ali Beshanu yele ubvu Kamelu be oomeje g'ọ nwulwashihuchaa; teme ọ nodu emeje g'okoko, no l'ubvu ubvu Lebanonu nwulwashihukota.

⁵L'iphu iya be ubvu ubvu anoduje anma jijijijii; teme obvu obvu nodu adazehujechaa. Mgboko l'ophu anoduje anma pyaapyaapya l'iphu iya; mbu eliphe l'ophu; mekpoo iphemiphe, bu iya nu.

⁶? Bu onye a-du ike pfuru l'iphu iya me ẹhu nodu eghushi iya egu ike? ? Bu onye a-du ike pfuru l'okpomoku, du l'oke ẹhu-eghu iya? Oke ẹhu-eghu iya aduje g'onye e kpuru oku; mbu le mkpuma agbaje yogiri yogiri l'iphu iya.

⁷Chipfu dukwa ree; oo-gbobutaje nemadzu me ọ -nodu eje iphe-ehuka. Ndu gbabarule mkpula iya je ezee ndzu be onoduje eleta enya.

⁸Obenu l'oo-gude utso, nyiru egu mee ge ndu Ninive chihu. Ndu ohogu iya be oo-chi oso chiba l'eka gbakotaru ochii.

⁹Iphe, bukpoonye ojo idzu, unu achiru Chipfu be oo-mekota g'ọ buru bugengu; ophu iphe-ehuka abyadu k'ugbo ẹbo.

¹⁰Ẹphe a-nmalahu l'epfukala obvu; ẹphe angua mee; l'ootsua phe atsutsu; oku etsua phe g'eka oku etsu eswa ereshi okponku.

¹¹Oo l'echilabo gube Ninive be o nweru onye futaru nu bya awata achiru Chipfu ojo idzu; teme ọ nodu anoduje le mgbazi g'e mee ojo-iphe.

¹²Wakwa iphe, Chipfu epfu baa: "A makwaru-a l'ike du phe teme ẹphe du igwerigwe; ọle ee-me g'ẹphe chihu; ẹphe taa dubaedu. A makwaru-a le mu meru ngu; i nodu eje iphe-ehuka; ọle mu tee medu g'i jebaa iphe-ehuka ozo.

¹³Nta-a bu iphe, mu e-me bu l'oke odogoro, ẹphe nyaberu ngu l'olu ono be mu anyafu; bya anyakashia ẹgbirigba ono, ẹphe turu ngu ono."

¹⁴Chipfu tɔakwaru ekemu ɛhu ngu sɔ: “Awa ngu a-bvɔkwa; ɔ tɔ dɔdu ndu a-nɔdu azakwadu ɛpha ngu. Mu e-mebyishi iphe, a pyiru apyipyi; yɛle iphe, a kpuru akpɔkpu dobegbaa l'ulo agwa ngu. Mu abya atɔa ilu doberu ngu; kele i bɔwaa ɔgalemkpa.”

¹⁵Lekpɔdapho ɛnya l'eli ɔbvɔ ɛka phɔ hɔma ɔkpa onye l'abya ezi ozi-ɔma; mbɔ onye ezi ozi nchi-adu-doo. Bɔkwaa ɔbo-iphe ngu; gɔbe Jiuda; l'i meeru Chipfu iphe, i riburu angɔ l'ii-me; kele ndu ɛjo-iphe ta abyahekwa etso ngu ɔgu. Ee-mebyishikɔta phɛ rengurengu kpɔ.

Nahumu 2

Adada Ninive

¹Onye a-chika ngu nanɔ nanɔ abyapfutaakwa ngu. Chekwa ɔlo-eli ngu nche! L'i chee ɔzo ngu nche! Dozia onwongu! L'i rikotakwapho ike ngu l'ophu!

²Chipfu e-mekwa g'oshilɔkpa Jiɛkɔpu bya adɔ ɔbvɔ g'o shi dɔ lɛ mbɔ; g'ɔ bya adɔ ɔbvɔ gɛ ndu ɔzurelu shi adɔjehawaa. A makwaru-a lɛ ndu nchika shi chikashiwaa phɛ; bya eshi mebyishihawaa opfu-vayinu phɛ.

³Iphe, ndu ɔjɔgu iya egudeje gbobuta onwophɛ dɔchaa uswe-uswe. Ndu ɔjɔgu ono yekɔta uwe, eke meeme. Mgbɔro-igwɛ, e gude mee ɔgbo-inya ɔgu phɛ nɔdu aphɔ ngerengere lɛ mbɔku ono, ɛphe kwakɔberu k'ɛje ɔgu ono. Arwa phɛ bɛ a paliwaru; ɔ nɔdu eziwaa swooswooswo.

⁴Ugbo-inya nɔdu eze gbiigbiigbi awɔgha lɛ gbororo; ɔ -zeru gidigidi jee l'oozeru lwaa l'oma edupfu l'edupfu. ɛphe nɔdu ekekɔtaepho jajaja g'orɔku; ezigbaa phaaphaa g'ebemu-igwe.

⁵ɔ kpakɔo ndu ɔjɔgu iya, bɔ ndu ike dɔ l'ɔgu; ɛphe nɔdu evukoɛle-a evuko eje. ɛphe nɔdu ezije phaa eje l'igbulɔ, e gude kpɔ-pee mkpɔkpu ono. Iphe-mgbobe-ɔgu, a nmabɛgbaaru l'igbulɔ ono gude egboberu iya kechawaru iya kɛ jingujingu.

⁶ɔguzo mkpɔkpu ono gharu iphu l'ɛnyimu bɛ e tsukafuru ghebe ɔnu. Unuphu ibe eze gbukahɔ.

⁷A tɔwaru iya; ɔ buru ekemu l'eze-nwanyi bɛ aa-kpɔ lɛ ndzu; kpuru iya laa ɛka ɔzo. Unwumboko, ejeru iya ozi awata akwa muumuu gɛ ndo; akwa akɔ ɛka pɔpɔpo l'ɔkpoma.

⁸Mkpɔkpu Ninive dɔepho g'okpuru, mini nɔ iya nɔ asɔfu asɔfu. ɔ nɔdu ara: “Unu pfuru-o! Unu pfuru-o!” ɔle ɔ tɔ dɔdu onye ɔ dɔ k'agha ɛnya l'azu.

⁹Unu kwaa mkpɔla-ɔchaa l'ɔkwata! Unu akwaa mkpɔla-ododo l'ɔkwata; kele ɛku, vu oke aswa, dɔ iya nɔ taa bvɔkwa abvɔbvɔ!

¹⁰Nta-a bɛ mkpɔkpu ono dabiyakwaru iphoro. Tɛme ɔ bɔwaru mkpɔkoro iphe; bya aburu ochobu. Meji tɔfuwaru ndu bu iya nɔ. Ikpere nɔdu etewaa phɛ kparikpari. ɛphe nɔdu aphɔ kpaakpaakpaa. Iphu gbachishihukɔta onyemonye nchi.

¹¹Nta-e; ? bụ awe bẹ iduma oduma ono nòhunu; Mbụ ẹka ẹphe nọru nua ụnwu pẹ nri; mbụ ẹka oke oduma yẹle nyee ya kparụ; mękpoo ụnwu pẹ; ọphu ọ dudu iphe, yeru pẹ ebvu-a?

¹²Oduma ono nọdu egbuje anụ, a-suru ụnwu iya atata; swigbushia anụ bya atogboru nyee ya. O gbushia anụ bya atụ-jigbaa ọgba iya atụ-ji; mbụ nri, ẹphe a-nọdu eri jigbaa iduma iya ejiji.

¹³Wakwa iphe, Chipfu, bụ Ọkalibe-Kakọta-Ike eepfu baa: “Lenu; mu nọru ngu lẹ njo. Mu e-gude ọku tsufu ụgbo-inya unu l'ọ kpua ẹnwuru-ọku tūuu; ọ buru ogu-echi bẹ ee-gude gbushia ụnwu oduma unu; ọphu ọ dudu nri oduma, mu byaru aharu unu l'eliphe-a; ọphu aanụmabaedu olu ndu unu ezije ozi.”

Nahumu 3

¹Aphụ a-tsọru gube mkpukpu mee ono, bụ iphe, jiru iya nụ bụ adzụ ụka; yẹle iphe, a nataru lẹ nfụ; ọphu ọ dudu teke ịnoduje g'i ti nweru iphe, a kwataru l'okwata.

²Ngabenu nchi numa g'echachi ada swiiswiiswii. Teme ọkpa ụgbo-inya nọdu ezekwapho igiji nkiya. Inya nọdu apfu karagidimu karagidimu karagidimu. Ugbu-inya nọdu agbagbaa ke kwaakwaakwaa.

³Ndu ojogu, agba l'inya agbaakwa abya k'ogu. Ogu-echi nọdu aha swooswooswo; arwa nọdu ezigbaa phaaphaaphaa. Ndu e gburu l'ogu du igwerigwe; ndu nwuhuru anwuhu kuru l'ikpo l'ikpo. Odzu nemadzu buru aguta aguta; ndiphe nọdu evuko odzu evuko.

⁴Ọ buru iphe, kparu iphemiphe ono bụ lẹ nwanyi-ovuoba ono menukaru ke nwoke; kele ọomashi mma ike; teme ọ buru nwanyi, agwoshi nshi ike; onye egudeje eme ke nwoke ree ọha, du iche iche; mbu gude nshi, ọogwo ree ipfu, du igwerigwe.

⁵Chipfu, bụ Ọkalibe-Kakọta-Ike epfukwa su: “Hụmanu! Mu nọkwaru ngu lẹ njo! Mu a-jikwa ngu uwele; chita igburonu uwe ngu wushi ngu l'ataphu. Mbụ lẹ mu e-me g'oha l'ophu huma ngu l'eka i gba oto. Ali-eze ndiphe l'ophu ahuma ngu l'eka iphere guderu ngu.

⁶Mu e-woru iphe, du ejo-adudu tua ngu. Mu eworu ngu mee iphe, a-du ẹhu-eswe ẹhu-eswe; woru ngu mee iphe, aa-byaje ahuma ahuma.

⁷Iphe, bukpuo ndu humaru ngu nụ a-nọdu agbaru ngu oso. ẹphe atuko epfu su: ‘Ninive buakwa ochobu! ? Bụ onye a-gu aphu iya? ? Bụ awe bẹ mu a-huma onye a-nọdu adu ngu obu?’ “

⁸? I ka mkpukpu Tebesu okpehu; mbu mkpukpu ono, no l'aguga enyimu Nayilu; mini no-pee ya mgburugburu? Ọ buru eze-enyimu bẹ o shi egudeje gbobuta onwiya; mini, no l'enyimu ono buru igbulo no-pee ya mgburugburu.

⁹Ndu Kushi yele ndu Ijiputu buru pẹ bụ agbarike iya; ọphu ike abvujedu pẹ abvubu. Ndu Putu ẹphe lẹ ndu Libiya yiru lẹ ndu eyeru iya ẹka.

- 10**Ole e mechaleru-a kpua ya le ndzu; ephe je eburu l'ali ndu ozo. Unwu phe, a nwuru k'ophuu be e gburu pyaapya tukaa le mgbakata-uzo. A tua ido gude kee ndibe phe, bu ndu a maru epha phe. Unwoke pho, shi buru ndu paru eka apaa bukotaru ndu e mechaaru tushia egbirigba.
- 11**Gubedua kwapho be mee e-mechakwaa tsuaha. Ii-mechakwaa wata edomi onwongu edomi; mbu wata achu eka ii-nodu zee ndzu ge ndu ohogu ngu ta adu iphe, ephe e-me ngu.
- 12**Iphe, bukpo uo, i kpushiru ike a-dukotakwa g'oshi figu, migbaaru mebyi mbu, vuru uzo chashia. A -nmaa ya yigayiga; mebyi iya ono esweshihu dalahuchaa l'onu ndu e-ri iya nu.
- 13**Lewaro ndu ojogu ngu g'ephe dugbaa g'unwany! Onu-abata ali ngu gheru karaphoo ge ndu ohogu ngu wubata. Oku tsuwaru mgborigwe, e shi gude tu-chia ya atu-chi.
- 14**Kukwaa mini kukobe m'obvu teke ndu ohogu ngu a-bya ano-pee ngu mgburugburu! L'i mee g'ulo ngu, a kpushiru ike kabaa eshihu ike! Ghaa eja-ulo; yoo buloku; l'i mekwaa iphe, e gude ayu buloku!
- 15**O kwa eka ono be oku a-nodu tsua ngu; ogu-echi asua ngu pyaapya g'eka igube ata iphe pyaapya. Zakwaa igwerigwe g'ogu; zakwaa g'igube!
- 16**I mewaru ge ndu azuru ngu aswa akabaa igwerigwe jasu ephe ka kpokpode, no l'igwe igwerigwe; obenu l'ephebedua zebataru g'igube bya agbabe ali ono l'ophu eka oto; o buru phe eje iphe, ephe eje.
- 17**Ndu-ishi ngu dupeho g'igube; mbu le ndu ederu ngu ekwo dupeho g'igube, etsu gbiigbiigbi, jeru je ebegbaaru l'eli igbulu mboku, oyi atsu; anwu -chifuepho; ephe phekishihu; ophu o dudu onye maru ibiya ophu ephe ephe ala.
- 18**Gube eze ndu Asiriya; ndu echeru ngu aturu ngu be mgbenya turu; ophu ndu nweru enya l'ali-eze ngu adudu iphe, ephe meru. Ndibe ngu be a chikwaru; ephe gbaa nanu nanu l'eli ubvu ubvu; ophu o dudu onye jeru achikobe phe.
- 19**O nyá, aba ngu nu ta adukwa iphe, adu ike eme g'o kpohu. Iphe, e mekaru ngu be onya iya atukwa rikarika. Iphe, bukpo onye numaru g'onwuru ngu akujekwa eka kpa l'oo gubedua daru adada; kele-a; ? bu onye be ejo-ememe, inoduje eme ebutaadaru?

Habakuku

Habakuku 1

Ĕkwo mpfuchiru kẹ Habakuku

¹Owaa bu ophulenyaa, o phuru; mbu Habakuku onye mpfuchiru Chileke.

Aphu, Habakuku guru

²Gube Chipfu; ? i maru-a ime teke mu shi kuta ngu oku; ophu i kwedu mu aza enu? Mbu mu chikuchakpo ngu le mkpu su ngu l'iwe-ashi dukwa; ophu i gbaduru mu mkpu

³Bu gunu meru g'o gude i mee mu; mu nodu ahuma aka eeme ejo-ememe? Mbu-a; ? bu gunu meru g'o gude i haa g'emeswe iphe du? L'iphu mu be o tukoru du; mbu ola-l'iswi yee iwashi; me ndu ese opfu yee ndu aswo uswo.

⁴Eshi egube ono ekemu nyihu; ophu eekpeedu ikpe, pfuru oto; ndu ejo-iphe nodu eripyabeje ndu pfuberekoto; k'ophu bu l'iswi-odu-mma alajeru onye o rwubeduru.

Onu, Chipfu yeru Habakuku

⁵Tabekpoepho enya l'ohamoha ngabekpoepho numa iphe, a-du ngu oke biribiri; kele iphe, mu e-me nta-a, i no ndzu-a be i tii kwekwa l'oo mu e-me iya m'obeta e pfuaru ngu l'onoo g'o du.

⁶Kele-a; lenu-a enya le mu edozi ndu Babilonu; mbu oha ono, ata aphujedu obu-imemini; bya aburu ndu eme barabara ono. Ndu ono bu ndu agbaje mgboko ophorokpo; ndu egudeje okpehu nata ali, abudu nkephe buru.

⁷Ndu ono bu oha, aatsu ebvu; bya aburu ndu du biribiri. Epe bu ekemu aka phe; o buru iphe, epe suru l'ephe e-me be epe emeje; o buru onwophe be epe anoduje ekutse.

⁸Inya phe ka agu agba oso; teme epe ka ejo-nkuta-oswa, nchi jipfuru, eme enari. Ndibe phe, agba l'inya, bu o-phoberu-aka-ophoberu; mbu le ndibe phe, egudeje inya eje ugu shikwa aka du enya bya. Epe anoduje ezi phaaphaaphaa g'eka ugo, humaru iphe, oo-vuka.

⁹G'ephe hakpo bu iphe, epe phoberu iphu abya ememe bu ewe iwashi. Epe ezi phaaphaaphaa eje abya ge pherephere, shi l'uzo enyanwu-awawa; teme epe nodu akpu nemadzu le ndzu; ekpok phe g'onye ekpo eja.

¹⁰Ndu eze be epe anoduje aja ewenu; epfubyishikwapho ndu bu ishi phe. Iphe, bukpo mkpukpu, a kpu-pheru igbulu mgburugburu bukwa ochi be epe achije iya; kele o bu eja be epe ekpokobeje pfuru l'wua phe.

¹¹Epe ezia phaa g'eka pherephere ezi; ghata jeshia iphe, epe eje; mbu ndu ono, ikpe nmaru ono, bu iphe, bu ike phe bu agwa phe ono.

Aphu k'ugbo ebo, Habakuku guru

¹²Gube Chipfu, bu Chileke mu; bya aburu onye du nsọ nkemu; ? ti shinaa l'ojejoje nọduta ọọ? Anyi taa nwuhukwa! Sụ-a; gube Chipfu; nta-a be i hotaanaru phe dobe g'i gude phe kpee ikpe. Sụ-a; gube agbara mkpuma ono; nta-a be i pfubeanaru phe g'i gude phe nua nemadzu aphu.

¹³Enya ngu donukakwaru risaa ke g'i gude iya ele iphe, bu ejo-ememe; i tii hakwa g'iphe, eemeswe emeswe du. ? Denukwanu g'o gude o buru ndu e gudedu ire phe eka be i nataru? ? Denu g'o gude i nodu doo ndu ejo-iphe nodu elwee ndu ka phe apfubekoto?

¹⁴Nemadzu be i meakwaru; ephe du g'ema, no le mini; mbu ephe du g'unwu iphe, awu l'ephe, bugbaa iphe, enweddu ndu-ishi phe.

¹⁵A nodu egudeje ikokoro nmata g'ephe ha; gude ugbu-egege anwuko phe; mbu gude ugbu-aghagha phe anwuko phe; ehu nodu atso phe; ephe nodu ete eswa ekpu phe.

¹⁶Oo ya bu; o gwaahaa ugbu-egege iya ono agwagwa; bya eworu unwu-isensu, eshi kweekweekwee kpoo oku gude gwaa ugbu-aghagha iya; kele oo ugbu ono meru iphe; o no ndzu eri gwogwoo; bya enweru nri okpobe enweru.

¹⁷? L'oo-noduwaro egbuji ugbu iya awufu; gude ogu-echi egbu ohamoha pyaapya l'ebe a phukpooru phe obu-imemini ililekpoo?

Habakuku 2

¹Ge mu bya eje apfuru cheahaa nche; mbu le mu e-jekpoeppo anodu l'eli igbulo mkpukpu leta iya enya ge mu maru iphe, oo-yeru mu onu; makwarupho iphe, mu e-pfuru yeru iya l'aphu-a, mu agu-a.

Onu, Chipfu yeru Habakuku

²Tobudu iya bu Chipfu bya eyeeru mu onu su: "Tukokpoeppo iphe-a, mu abya ngu egoshi l'ophulenyaa dekota l'ekwo; mbu dee ya l'eli okwekpue; yele eli okwekpue-okwa; derwee ya ederwe k'ophu onye agba oso a-gutaje iya.

³Kele ophulenyaa ono be teke oo-me dukwa adudu. Oopfu iphe, e-me teke ikpazu; ophu odzudu uka. O -betakponu o noo odu ememe; kwaberu iya; kele o mefutaje; ophu ononoedu odu.

⁴"Lenu l'ooku onwiya ekuku; ophu iphe, agu iya nu apfuduru nhamunha; obenu l'onye pfuberekoto bu ekweta be oo-gude nodu ndzu."

⁵Me echiyekwa nemadzu eswe. Ophu ndu ekunuka onwophe adukwa teke ephe atutajeru iya unme. Noo kele ephe emebe ughoro g'alima. O buru g'ephe te ejijedu onwu ejiji-a bu g'o too jijedu iya. O tukoje ohamoha l'ophu rwukoo doberu onwiya; teme o nodu atukoje nemadzu l'ophu kpua le ndzu.

⁶? Tobudu ndu ono g'ephe ha e-mechaa gbaaharu iya mgbonu su iya: "Aphu atokwaru onye achiko iphe, e zitaru ezita akuberu onwiya; bya aburu ana nfu be o gude baa eze. ? Unu e-mebekporu iya jasuteke ole?"

- 7“Ndu i ji ụgwọ ? taa n’onyaeđu gbalihu? ? Ẹphe ta agbalihuđu mee ngu iphe, ii-tehu kpariḱpari? Noo teke ii-bya aburu onye o tsuru l’eka phe.
- 8Eshinu i nawaru ohamoha, du igwerigwe iphe phe be nwa ndu ophu phoduru nu anakwa ngu pho iphe nkengu. Noo kele i gbushiwaru nemadzu. I mebyishiwaru ali yee mkpukpu le mkpukpu; mekpoo iphe, bu ndu bugbaa l’ime iya.
- 9“Aphu a-tsoru onye ono, bu ejo urwu be o gude eme ulo-ebubu; mbu onye ono, jeru je akpaa efunne l’ephekerephe ge ya nahu ejo-iphe, e-mechaa dapfuta iya nu!
- 10I mewaru iphe-iphere kpua ndu onu-ulo ngu shi nno mebyia ndzu ngu. O buru iphe, kparu iya nu bu li mewaru ge ndu du igwerigwe chihu.
- 11Mkpuma, e gude kpua igbulo e-chi mkpu; oswebe, e gude kee ya awota iya.
- 12“Nshio onye ono, egbushi nemadzu gude akpu mkpukpu iya g’o shihu ike. O buru eme ejo-iphe be o gude eme ge mkpukpu nguru anguru.
- 13Lenu; ? to budu l’eka onye o shikpo bu Chipfu, bu Okalibe-Kakota-Ike; le ndiphe bu oku, enwu enwunwu be epe eseru akanya; ohamoha nodu eje ozi ke mmanu?
- 14Kele ndiphe l’ophu e-mechaa makotaru le Chipfu paru eka; mbu l’aa-maru iya ramaa; egube ono, mini du ramaa l’oma eze-enyimu ono.
- 15“Aphu tsoru onye ono, ewotaje mee chee onye obutobu iya; mbu onye agbajeru mee yee l’otumu-akpo pee ya; l’o ngua gbiriri jasu l’o tsuaha ya atsutsu; k’ophu epe a-huma iya l’eka o gba oto.
- 16O kwa iphere e-mechaa ji ngu iphu; a taa akwabehedu ngu ubvu. Nguna mee obu gbaru oto kpo kula kula! Okoro ono, shi l’ekutara Chipfu ono so-pheakwaru ngu mgburugburu. Mbu l’iphe-iphere, ee-me ngu a-kakwa shii e -me le ubvu, e shi akwabe ngu.
- 17Iwashi, i weru ubvu ubvu Lebanonu l’a-bya eripyabe ngu ishi nta. Ozo bu l’anu ono, i gbushiru ono l’e-mechaa yee ngu ebvu. Kele oo ndiphe be i gbushiru; i mebyishiwaru ali mebyishia mkpukpu; mekpoo iphe, bukpoo nemadzu, bu ndu bukota iya nu.
- 18“? Bu urwu gunu be ntekpe-nshi baru l’eka o bu nemadzu gude eka pyia ya; ozokwanu iphe, a kpuru akpukpu, bu iphe, oozi bu iphe, abudu eviya? Kele onye eme iya nu kporu obu yeru iphe, o meru l’onwiya; mbu l’o gwotaru ntekpe-nshi, te epfudu opfu.
- 19Nshio onye asuje nku g’o nodukwa ndzu; ozoo onye asuje mkpuma, enwedu ndzu g’o gbeshi agbeshi. Iphe ono; ? oo-du ike kpo-ziaru nemadzu uzo? Iphe ono bukwa iphe, a wuru mkpola-ododo yee k’ochaa; ophu otudu unme.
- 20“Obenu le Chipfu no l’eze-ulo iya, du nsu; g’eliphe l’ophu dakwaa gbee nodu iya l’iphu.”

Habakuku 3

Habakuku epfu anụ Chileke

- ¹Ọwaa bụ epfupfu, onye mpfuchiru Chileke, bụ Habakuku pfuru nụ Chileke. Ọ bụru olu aphụ bẹ o gude gua ya l'ebvu.
- ²Gụbe Chipfu; mu nụmawaru
 ụdù ngu; mbụ l'iphe, i meru eye mu ebvu. Gụbe Chipfu; meshinaa iphe ono nta-a, anyi nọ ndzụ-a! Mbụ-a; menaa g'a maru iya nta-a, anyi nọ ndzụ-a! Ehu -ghuahaa ngu oke egbu; nyatanụ obu-imemini.
- ³Chileke shikwa lẹ Temanu bya; mbụ l'onye ono, dū nsọ ono shi l'úbvú Paranu bya. Ọdu-biribiri iya tuko imigwe l'ophu sweta; teme a nọdu etu iya epha l'ekameka l'eliphe.
- ⁴Ogbu-nwiiinwii ya dū g'eka ẹnyanwu wataru. Ọbochi-eka iya nọdu egbuchaa nwiiinwii. Ọ bụru l'eka iya ono bẹ o domiru ike iya.
- ⁵Ejo-iphe-ememe nọdu eshije iya l'iphu agushihu. Mgbupya nọdu etsokwa iya pho l'azu.
- ⁶Ọ bya apfuru bya anmaa mgboko yigayiga. Ọ bya elee ẹnya elele; ohamoha nmahu pyaapyaapya. Oke úbvú ndiche ono gbawashihuchaa agbawashihu. Eli obvu ndiche ono dakposhihu; ụzo iya bụru ojeje.
- ⁷Mu humaru ụlo-ekwa ndu Kushanu l'eka ooje iphe-ehuka; mbụ l'eka ono, ndu Midianu bu ono anma okpobe jijijijii.
- ⁸? Bụ nggele nggele megbaaru iphe, ehu ghuru ngu egbu tọ; gụbe Chipfu? ? Bụ nggele nggele bẹ i shi atukoshije oke ehu-egbu ngu? ? Bụ eze-enyimu bẹ i shi abaru mba teke ono, i nọ l'eli inya ngu agba ono yele eli ugbo-inya ngu ono, i gude mekpee ohogu ngu ono?
- ⁹I chifutaru uta ngu ghebe onu; bya ekua sụ g'a chitaru ngu apfu, dū igwerigwe. I bya egude nggele kekashia mgboko.
- ¹⁰Oke-úbvú humaru ngu nmahu jijijijii. Ọchioku mini gbaru gborogboro bya agbaghaa. Ogbu-mini swokperehu. Akparamini iya nọdu avo-lihuje ephekerephe ephekerephe.
- ¹¹Enyanwu yee onwa keru jingujingu l'akpaminigwe l'eka epe humaru apfu ngu g'oozi phaaphaa; bya ahuma arwa ngu g'ooku phoophoohoo.
- ¹²I gude oke ehu-egbu zọo garamugaramu zọjaa eliphe l'ophu; bya egude ehu-egbu gwee ohamoha arakabya.
- ¹³I futaru bya g'i dzota ndibe ngu; mbụ g'i dzota onye nkengu, a wuru manu l'ishi. Onye bụ ishi l'ali ndu ejo-iphe-a bẹ i gweru arakabya; mbụ; shi l'ishi phufu iya iphe jasụ l'okpa.

14 Ọo arwa nkiya bẹ i gude sùjaa ya ishi teke ono, ndu ojọgu iya wufutaru bya g'ephe chikaa anyi ono. Ephe nọdu atụ okoo l'ephe abya alajashi ndu iphe-ẹhuka byaru, bụ ndu domiru onwophẹ edomi.

15 Eze-enyimu bẹ i gude inya ngu zọo garamu garamu ghata; mbụ ghata eze mini, kuru l'ikpo l'ikpo.

16 Teke mu nọmaru iya bẹ meji tsukahuru mu; mbụ ụgbu-ọnu phukota mu aphuphu l'eka mu nọmaru igiji iya. Okpu reshiehuchaa mu ereshihu; okpa phukota mu kpaakpaakpaa. Mu a-takpọepho nshi kwaburu mbọku, ephe eje oke iphe-ẹhuka; mbụ ndu ono, gude ojọgu phẹ asopyabe anyi ono.

17 A makwaru-a l'oshi figu ta atuedu ige; ophu vayinu amiedu mebyi; ophu oshi olivu enwedu akpuru; ophu iphe, e meberu l'opfu emehujeedu emehu. Mbụ-a; a makwaru-a l'aturu ta aduedu l'ulo aturu; ophu eswi aduedu l'oka-eswi.

18 Ọle mu e-gudele-a iphe, Chipfu eme ete ẹswa. Ehu a-nodule-a atso mu l'eká Chileke ono, bụ onye ndzota mu ono.

19 Ọ kwa Chipfu, bụ Chileke mu bụ ike mu. Ọ buri iya eme okpa mu g'o shihu ike ge ke mgbada. Mbụ l'oo-me ge mu gude okpa zọo garamugaramu l'eli ẹka dụ úbvú úbvú. Ọ kwa onye-ishi ebvu bẹ ọ duru; ọ buri une bẹ ee-gude gụa ya.

Zefanaya

Zefanaya 1

¹Qwaa bu Opfu Chipfu, rwuru Zefanaya nchi; mbu nwa Kushi. Kushi bukwanu nwa Gedalaya, bu nwa Amaraya, bu nwa Hezekaya. Teke o nataru opfu ono bu teke Jiosaya nwa Amonu bu eze ndu Jiuda.

Chipfu a-nu mgboko aphu

²Wakwa iphe, Chipfu epfu baa: “Mu a-tuko iphemiphe zaa azaza zafu g’o to duche ophu a-du l’eliphe.

³Mu a-za nemadzu zafu; zaa iphe-edobe zafu. Mu azaa enu, ephe l’eli zafu; zakwapho ema, no le mini zafu. Ndu ejo-iphe aburu ola-l’iswi teke ono, mu e-me ge nemadzu chihu l’eliphe-a.” Nokwa iphe, Chipfu eepfu bu onoya.

⁴“Mu a-machikwa aka mu noduru Jiuda le njo; ephe l’iphe, bukpuo ndu bu le Jierusalemu l’ophu. Iphe, bu ndu ophu phoduru nu, bu ndu abajeru Balu eja be mu e-me g’ephe chihu rengurengu l’ali-a; waa epha ndu agwaje iya nu; waa ndu-uke, l’agwa agwa onoya;

⁵waa ndu ono, ejeje anodu l’oma mkpotsu ulo abaru enyanwu eja; yee kpokpode; waa onwa; waa ndu ono, abajeru mu eja ndu ophu egudeje epha Chipfu eri angu teme ephe egudekwapho epha Moleku eri angu;

⁶waa ndu ono, alawaa azu azu l’etso Chipfu ono; waa ndu ono ta achodu Chipfu; ophu ephe ejejeedu iya akpata ishi.

⁷“Nodukwa nwa nggujungguji l’iphu Nnajiuphu, bu Chipfu; kele mboku ke Chipfu dukwaa ntse. Chipfu dobeakwaru iphe-agwagwa. Ndu o ziru g’ephe bya be o dobewaru nsu.

⁸O -be mboku ono, Chipfu a-gwa iphe iya ono be mu a-nu ndu-ishi aphu; mu anua unwegirima ibe eze aphu; mekpoo iphe, bukpuo ndu eme umere ndu ohozo.

⁹Mboku ono be mu a-tuko ndu ono, ete ekwedu azo okpa l’onu-abata ono; nua aphu; mbu ndu ono, bu iphe, ephe eyejije ulo onye nwe phe nu bu iphe, ephe kpataru le mkpawere yee eregede.”

¹⁰Wakwa iphe, Chipfu epfu baa: “O -be mboku ono be uzu-ekwa a-tu le Onu-bata Ema; l’e chikwapho mkpu le Onu-egu Ophu. Ubvu ubvu atuko agba kpookpoo.

¹¹Unu chia mkpu-ekwa; unube ndu bukube aswa; kele ndu agba ngho be ee-gbuebe; mbu le ndu ono, gude mkpola-ochaa azu aswa ono be ee-mebyishikota.

¹²“O -rwua teke ono be mu e-gude oroku vochaa Jierusalemu. Mu anua ndu bu tusaru ehu aphu; mbu ndu nepho rukuu g’ohu-mee; ndu anoduje ari su le Chipfu ta adudu iphe, oo-du ike eme; o too medu iphe-oma ophu oomedu ejo iya.

¹³Ndu ono be aa-kwa eku phe l’okwata; l’e woru ulo phe mee ochobu. Ephe a-kpu ulo; ole ephe tee buduru iya. Ephe akoo opfu-vayinu ole ephe taa ngudu mee, shi iya nu.”

¹⁴Oke mbòku kẹ Chipfu dukwaa ntse; mbù l'ò dūwaa phakuu; tẹme ọ nòdu abya ẹgwegwa. Mbù l'uzu-ẹkwa, aa-nòdu atù lẹ mbòku kẹ Chipfu ono a-danukakwa ẹhuka ẹhuka; mbù mkpu, ndu ojogu, ike dū a-nòdu echi.

¹⁵Mbòku ono a-buru mbòku, Chileke a-tukoshi ndiphe oke ẹhu-eghu iya. Mbòku ono bẹ ndiphe e-je iphe-ẹhuka; tẹme aphù atsoṛu phẹ. Mbòku ono a-buru ndiphe ọla-l'iswi; buru phẹ mkpurupyata. Mbòku ono bẹ a-nòdu agba ọchii; bya adù ragaraga; mbòku, urwukpu a-sopyabe ẹkameka; ẹkameka ejihu kpakpalu.

¹⁶Mbòku, aa-nòdu egbu opu echi mkpu ọgu; ọgu a-dapfu mkpukpu ono, a kpu-pheru igbulọ mgburugburu ono; yẹ ọlo-eli ephekerephe ephekerephe ono, dū iya nū ono.

¹⁷“Mu e-me gẹ ndiphe jee iphe-ẹhuka; metabe phẹ iya k'ophu ẹphe a-wata eje gẹ ndu atso ishi. Ọ buru iphe, kparù iya nū bụ l'ẹphe mewaru Chipfu iphe-ẹji. Ọo ya bụ l'aa-nòdu ekpoka mee phẹ g'onye ekpoka urwuku; aalọkaa anù phẹ g'onye alọka nshì.

¹⁸“Ophu mkpọla-ọchaa phẹ mẹ mkpọla-ododo phẹ adukwa ike anafuta phẹ mbòku ono, Chipfu a-tu-koshi ndiphe oke ẹhu-eghu iya ono; mbù l'okophoo, ọo-nòdu eko e-tsufu mgboko l'ophu g'ọku, etsu etsutsu. Oo-mee g'iphe, bukpuo ndu nọ lẹ mgboko l'ophu chihu nchihu lanu.”

Zefanaya 2

Arwọ g'izimanu lwa azu

¹Unu dzukobe! Unu dzukobe; unube ọha ono, enwedu iphere ono;

²tẹme eswe mbòku ono erwua; mbù mbòku ono etsu duuduudu g'ẹswa ereshi ono; m'obvu teke Chipfu a-tu-koshi unu oke ẹhu-eghu iya; mbù m'obvu teke ẹhu a-gbanwuhu iya ọku l'opfu ẹhu unu.

³Unu choo Chipfu; iphe, bụ unube ndu wozeru onwunu alì l'alì-a; mbù unube ndu emeje iphe, ọ turu ekemu sù g'e meje; unu chokwaa apfubekoto; unu ewoze onwunu alì; ? a maru; Chipfu e-domi unu; m'o -rwua mbòku ono, ẹhu e-ghu iya egghu ono.

Eemebyishi ọha, bupheru ndu izurelu mgburugburu

⁴Mkpukpu Gaza bẹ ee-mechaa gwobe; l'a haa mkpukpu Ashikelonu l'ò buru ochobu. Ọo l'echilabo eswe bẹ nemadzu a-gbakashihu lẹ mkpukpu Ashidodu; tẹme l'a vaa mkpukpu Ekuronu l'ogbarabvu.

⁵Nshio unube ndu bu l'aguga eze-enyimu; mbù unube ndu Kereti. Opfu Chipfu buakwa ohogu unube ndu bu l'alì Kėnanu; mbù unube ndu Filisitayinu. Ọ sùru-a: “Mu e-me unu g'unu buru mkpurupyata; k'ophu bụ l'ò to nwedu onye a-phodu nū.

⁶Sù-a; alì ono, nọ l'aguga eze-enyimu ono, bụ ẹka ndu Kereti bu ono bẹ emechaa buru ẹka ndu eche aturu adobeje aturu phẹ; mbù l'ò-buru ẹka aa-gbashi okà-aturu.

⁷Ndu e-mechaa nweru iya nū a-buru nwa ndu a-wafu nū lẹ ndu onu-ulo Jiuda; ọ buru ẹka ono bẹ ẹphe e-cheje iphe-edobe phẹ. Ọ buru l'ulo ndu Ashikelonu bẹ ẹphe a-kwaje

mẹ o -be l'enyashi. Ọ bụru Chipfu, bụ Chileke phẹ a-nọdu eche phẹ nche; kele oodophu phẹ azụ l'onodu phẹ.

⁸“Mu nũaakwaru ọkonu, ndu Mówabu kọru unu; bya anũaakwapho iphù, ndu Amọnu phuru unubẹ ndibe mu; l'ephẹ gude oke-oke alị phẹ eye unu ebvu.

⁹Oo ya bụ lẹ-a; wakwa iphe, mu epfu; mbụ Chipfu, bụ Ọkalibe-Kakọta-Ike bya aburu Chileke kẹ ndu Ízurelu: Eshinu mu nọ ndzụ gẹ mu nọ iya-a; bẹ ndu Mówabu emechaa dũepho gẹ ndu Sodomu; ndu Amọnu adụ gẹ ndu Gómóra; mbụ l'ephẹ a-buru ẹgbudu yẹe nsukutu únú; mbụ l'ọo-buru ochobu jasụ l'ojejoje. Nwandibe mu ọphu phọduru nụ l'a-kwa iphe phẹ l'okwata; mbụ l'ọo ndu ọha mu nwa ndu ọphu wafuru nụ bẹ alị phẹ a-buru okiphe phẹ.”

¹⁰Oo iphe ono a-buru urwu, ẹphe e-rita l'ekuku, ẹphe eku onwophe; kele ọo ndibe Chipfu, bụ Ọkalibe-Kakọta-Ike bẹ ẹphe kọru ọnu bya eyee ébvù.

¹¹Chipfu e-me phẹ iphe, dũ ebvu; kele ọo-lọpyashi agwa, nọkota l'eliphe mgburugburu. Noo teke onyemonye a-wata abarụ Chipfu ẹja l'ẹka ẹphe nọkpoo; mękpoo iphe, bụ ọha, bukube eze-ẹnyimu.

¹²“Unubẹdua kwaphọ; unubẹ ndu Kushi; ọ kwa ogu-echi mu bẹ ee-gude gbushia unu.”

¹³Chipfu a-machikwapho ẹka maaru ndu isheli mee ndu Asiriya g'ephẹ buru mkpurupyata; mbụ mee gẹ mkpukpu Ninive buru ochobu ẹka a-dũepho g'echięgu, adudu mini, dũ iya nũ.

¹⁴Ọ bụru iphe, a-dojeru iya nũ bụ ikpoto iphe-edobe; mękpoo anũ-ẹgbudu ọphu dũ g'ọ dũ; iphe, bụ mgbashị-ujiku a-tũko akpa ẹpfune l'eli itso, nọ iya nũ. Ngao ngao ngao, ẹphe a-nọdu ara bẹ a-nọdu adagbaa lẹ windo lẹ windo; ikpọzu akuru l'ọnu-ulo l'ọnu-ulo; noo kele e-woru iphe, e gude oshi sida mee lajashichaa alajashị.

¹⁵Nokwa iphe, a-nwuru eze mkpukpu ono, bụ mkpukpu ono, shi ji onwiya ẹpho bya atusaru ẹhu ono; mbụ mkpukpu ono, shi asuje: “Lẹ mgboko mgburugburu ta adũekwa mkpukpu, ha shii, gẹ ya ha.” Obenu; lewaro nta-a g'ọ byaru bya aburu ochobu. Lewaro g'ọ byaru bya aburu ẹka unwu anũ-ẹgbudu bu. Onyemonye, shitaru mgboru iya nọdu akujeru iya ọshi phupheru iya ishi.

Zefanaya 3

G'ọo-dũru Jierúsalemũ l'iphu

¹Nshio gube mkpukpu ono, kwefuru Chileke ike; teme i bụru mkpukpu, mebyishiwuru onwiya emebyishi; mbụ gube mkpukpu iwashị ono!

²Mkpukpu ono ta anujedu iphe lẹ nchị; ọphu ọ dudu iphe, ookweje lẹ ya mesweru. Mkpukpu ono ta akpọduru obu yeru Chipfu; ọphu ọo kpokubejedu Chileke iya ntse.

³Ndu-ishi phẹ bẹ anọduje agbọ uja g'oduma; ndu-ikpe lẹ mkpukpu ono nọdu anọduje aba hanyihanyi g'ejo-nkuta-ọswa, nchi jipfuru, bụ ọphu nchi ta abọ-pfujedu iphe, ọ humaru.

⁴Ndu mpfuchiru iya ta adudu iphe, ephe bu; teme ephe bukotaru ndu bu nwoderu-oye. Ndu uke phe mebyishiwaru aka duru Chileke nsò; teme ephe mebyishiwaaw ekemu Chileke.

⁵Chipfu, bu onye pfuberekoto nokwanu l'echilabo phe. Ophu o dudu iphe, apfuduru-oto, oomeje. Mboku-mboku be oomeje g'a maru le ya ekpeje ikpe, pfuru oto; ophu o dudu mboku, nwutaru anwuta, o too mejedu iya; ophu iphere adujekwapho ndu apfubeduru aka oto.

⁶“Mu mewaru g'oha, du igwerigwe chihu; tsukposhia iphe, ephe gude gbobuta onwophe. Etsuzo etsuzo, nogbaa le mkpukpu phe be mu mewaru; o dakotaephe ke nyonyoronyo. Ophu o duedu ophu nemadzu eshikwadu eshishi. Mkpukpu phe be e mebyishichaa; ophu o duedu onye bu iya ebubu m'ililekpo.

⁷Mu pfuru nu mkpukpu ono su iya: ‘Tororo, mu egbueru iya pho unu bu l'unu aano dukwa atsù mu ebvu; kweje l'unu mesweru mu.’ O bu l'unu meru iya egube ono me mu tege emebyishikwa aka unu bu; ophu mu tege anu-beeduru unu aphu ge mu tuberu. Obenu l'oguele phe-a anodu eme mkparwu mkparwu l'iphemiphe, ephe eme.

⁸“Oo ya bu le-a; wakwa iphe, Chipfu epfu baa: Ngabenuru mu jasù mboku ono, mu agbalihu gbaa ngu ekebe. Mu pfuakwaru iya hoo haa le mu e-kukobe oha, du iche iche l'aka lanu; mu achikobe ali-eze, du iche iche; tu-koshi phe oke ehu-eghu mu l'ophu. Mbù l'okophoo, mu eko e-tsufu mgboko l'ophu g'oku, etsu etsutsu.

⁹“Noo teke mu e-me g'olu-opfu ndiphe gee asa; k'ophu iphe, bu g'ephe ha a-wata araku epha Chipfu; tugba nanu baaharu iya eja.

¹⁰Ee-shijechaa l'azu enyimu Kushi abya mu agwagwa; mbu ndu epfu anu mu, bu ndibe mu, tukaru nanu nanu.

¹¹O -rwua mboku ono be e tee meedu ngu iphe-iphere k'iphe, i meru gude kwefuru mu ike; kele mu a-tukokpoo iphe, bukpo ndu gude eku-onwonye ete eswa l'echilabo unu ono woshichaa g'ephe ha. Ophu unu abyadu ekubaa onwunu ekuku l'ubvu nsò mu.

¹²O buchia le mu a-haru unu ndu du agu bya ewoze onwophe ali; mbu ndu kporu obu yeru epha Chipfu.

¹³Nwa ndu ono, phoduru le Izurelu ono tee mebakwa iphe, apfuduru-oto; ophu ephe abyadu adzu aka; ophu o dudu onye anuma phe opfu eregede l'onu. Mbù l'ephe e-rije nri zee pyakoo; ophu o dudu onye byaru eye phe ebvu.”

Ebvù ehu-utso

¹⁴Gua ebvu ehu-utso; gube nwada Zayonu! Gube Izurelu; tua uzu ehu-utso! G'ehu tsoje ngu utso; l'iigude obu ngu g'o ha tee eswa; gube nwada Jierusalem.

¹⁵Kele Chipfu nafuwaru ngu aphu ono, o shi anu ngu ono. O chi-phuwaru ndu ohogu ngu azu. Chipfu; mbu eze ndu Izurelu nokwa swiru ngu eswiru; ophu o dudu ejo-iphe, i byaru atsuba ebvu ozo.

16O -rwua mboku ono be aa-su Jierusalemu: “Gube Zayonu; ta atsukwa ebvu! G'eka ta atuhukwa ngu lwakpalwakpa!

17Chipfu, bu Chileke ngu nokwa swiru ngu eswiru. O bu onye ike du l'ogu; o suru ngu adzozo. Oo-teru eswa kpua opfu ehuru ngu. Oo-gude n-yemobu mee gi nodu nggujungguji. Oo-guru ebvu teru eswa kpua ngu.”

18“Mbụ l'iphe-aphu e meru ngu l'obo-iphe ono; be mu e-wofu unu l'ehu; kele o bu unu ivu-erwa bya aburu unu iphe-iphere.

19Lekwa; iphe, bukpo ndu eme unu ewere be o -rwua teke ono be mu e-mekwa phe iphe. Ndu eniyeni be mu a-dzota; mu abya achikobe iphe, bukpo ndu e shi chikaa nanunanu. Mu e-me g'a jaa phe ajaja kwabe phe ubvu l'iphe, bukpo ali ono, bu eka e shi mee phe iphe-iphere ono.

20O -rwua teke ono be mu a-chikobe unu. Mbụ l'o -rwua teke ono be mu a-chilata unu unuphu. Mu emee g'a kwabe unu ubvu jaa unu ajaja l'echilabo ndu nokota le mgboko l'ophu; mbụ teke ono, mu e-dophu unu azu l'onodu unu ono; mbụ le mu e-me iya l'ogbaa unu l'iphu gedegede.” Nokwa iphe, Chipfu l'epfu.

Hagayi

Hagayi 1

Oku k'akpukwa eze-ulo Chipfu

¹Opfu Chipfu rwuru onye mpfuchiru ono, bu Hagayi nchi l'apha, kwe onye eze ono, bu Dariyosu ebo l'abu eze iya; le mboku mbu l'ime onwa k'ishii ya. O je epfuaru iya Zerubabelu nwa Sheyalutiyelu; onye bu iya bu nnajioha le Jiuda teke ono. O pfukwaaru iya pho Jioshuwa nwa Jiehozadaku onye bu iya bu onye-ishi ndu-uke Chileke. O su phe:

²“Wakwa iphe, oopfu baa; mbu Chipfu, bu Okalibe-Kakota-Ike: Ndu-a l'anoduje epfu su l'o toko rwudu teke aa-kpukwa eze-ulo ke Chipfu.”

³Tobudu iya bu; Chipfu gbenu l'eka onye mpfuchiru ono, bu Hagayi zia ozi su:

⁴“? Bu nta-a be o gbaru g'unubedua l'onwunu e-bugbaaru l'ulo unu, a kpuru mee ya ona; ulo-a buru okorobo ulo g'o bu-a?

⁵Mbu-a; wakwa iphe, oopfu baa; mbu Chipfu, bu Okalibe-Kakota-Ike: Unu leanaro enya huma g'uzo unu gbaru!

⁶G'unu koru iphe, ha shii l'ali; unu kpata iya iphe, abadu ishi. Unu nodu erije nri; o too jidu unu epho; unu angwa iphe, aangwu angungu; unu taa ngu-jidu epho. Unu nodu eyeje uwe; o too kposhidu g'oyi ta anodu atsu unu. Ndu aapfu ugwo nodu anataje ugwo phe chiru ye l'ekpa, fuhuru uzo.

⁷Wakwa iphe, oopfu baa; mbu Chipfu, bu Okalibe-Kakota-Ike: Unu lenaa enya huma g'uzo unu gbaru!

⁸Unu gbeshi je l'ubvu ubvu je ekwoshia oshi bya egude mee ulo-a; k'ophu oo-me g'ehu tsoo mu utso; teme l'a nodukwa iya pho kwabe mu ubvu. O kwa Chipfu epfu.

⁹“G'unu leri enya iphe, ha shii; abya l'ele enya; o buru iphe, abadu ishi. Iphe, unu wolataru unuphu be mu aphuje swaa phukashia. ? Bu gunu kparu iya? O kwa Chipfu epfu. O kwa ulo mu ono, unu paru haa; o buru okorobo ulo ono kparu iya; l'eka unubedua l'ehu l'ehu esegbaa akanya ulo k'unu.

¹⁰Oo ya bu le-a; o kwa unu meru g'o gude igwe kwabuhu iji; ali mehubuhu iphe, e meberu iya.

¹¹Noo ya; mu kua okpomoku oku; o bya l'egu bya ekpoahaa l'eli ubvu ubvu; bya abaa l'ereshi; mekpoo le vayinu; mekpoo oshi olivu; mekpoo iphe, bukpoo iphe, eemetajekpoo l'ali; kpoahaa nemadzu; mekpoo iphe-edobe; mekpoo l'akanya, unu gude eka unu see.”

¹²Tobudu iya bu; Zerubabelu nwa Sheyalutiyelu; yee Jioshuwa nwa Jiehozadaku, onye bu iya bu onye-ishi ndu-uke Chileke; me iphe, bukpoo nwa ndu ono, wafuru nu ono g'ephe ha bya emee olu Chipfu, bu Chileke phe; mbu ozi, onye mpfuchiru ono, bu

Hagayi ziru phe; kele ọo Chipfu, bu Chileke phe yeru iya g'ọ bya. Ndu ono tsuahaa Chipfu ebvu.

¹³Ọ buru iya bu; Hagayi ono, bu onye-ozu Chipfu ono bya ezia ndu ono ozi-a, bu ozi, Chipfu ziru iya ono: “Mu nokwa swiru unu eswiru. Ọ kwa Chipfu epfu.”

¹⁴Ọ buru iya bu le Chipfu eshi nno kpalia obu Zerubabelu nwa Sheyalutiyelu; onye bu iya bu nnajioha le Jiuda; kpalia obu Jioshuwa nwa Jiehozadaku; onye bu iya bu onye-ishi ndu-uke Chileke; bya akpalia obu iphe, bu ndu Izurelu g'ephe ha, bu nwa ndu ono, wafuru nu ono. Ephe bya awata eje ozi l'eze-ulo Chipfu ono, bu Okalibe-Kakota-Ike ono; mbu Chileke phe ono,

¹⁵le g'onwa k'ishii ono du l'ukporo abali l'abali eno l'apha k'ebo, onye eze ono, bu Dariyosu nowaru l'okwa eze iya.

Hagayi 2

Epfu g'ulo ophuu ono a-maberu mma

¹O rwua le g'onwa k'esaa du le ukporo abali l'abali lanu; Opfu Chipfu rwua onye mpfuchiru, bu Hagayi nchi su:

²“Waa iphe, ii-zi Zerubabelu nwa Sheyalutiyelu, onye bu iya bu nnajioha le Jiuda; zikwa ya pho Jioshuwa nwa Jiehozadaku, onye bu iya bu onye-ishi ndu-uke Chileke; mekpoo iphe, bu ndu Izurelu, g'ephe ha, bu nwa ndu ono, wafuru nu ono. Jia phe su phe-a:

³G'unu hakpoo-a; ? bu ndu ole phodukwaduru, bu ndu humaru ulo-a g'o shi du-be ubvu le mbu? ? Denu g'o du unu nta? ? To dudu unu g'iphe, eeme ke mmanu?

⁴Obenu nta; shihukwa obu ike gube Zerubabelu. Ọ kwa Chipfu epfu. Shihukwa obu ike gube Jioshuwa nwa Jiehozadaku, onye bu ngu bu onye-ishi ndu-uke Chileke; unu noshikota ike; iphe, bu unube ndu ali-a l'ophu. Ọ kwa Chipfu epfu. Unu je ozi, unu eje; kele mu no swiru unu eswiru. Nokwa iphe, Chipfu, bu Okalibe-Kakota-Ike eepfu.

⁵Owaa bukwa oghandzu, mu l'unu gbaru teke unu shi le Ijiputu wufuta; mbu le Unme mu nokwa l'echilabo unu. Ọo ya bu ge ndzu ba agukwa unu!”

⁶“Wakwa iphe, Chipfu, bu Okalibe-Kakota-Ike eepfu: Ọ to dukwa g'oo-no-beru; mu anmaa igwe l'ophu yigayiga; nmaa eliphe l'ophu yigayiga; yee eze-enyimu; yee ali, kpohuru nku.

⁷Mu a-nma ohamoha l'ophu yigayiga. Onye ono, ohamoha ele enya iya ono abya. Mu emee g'akpabiri iya ji ulo-a l'ophu. Ọ kwa iphe, Chipfu, bu Okalibe-Kakota-Ike eepfu.

⁸Mkpola-ochaa bu nkemu; mkpola-ododo buru nkemu. Ọ kwa Chipfu, bu Okalibe-Kakota-Ike eepfu.

⁹Akpabiri k'ulo ikpazu-a a-kakwa shii eme l'akpabiri iya k'akahu iya. Ọ kwa Chipfu, bu Okalibe-Kakota-Ike eepfu. Ọ buru l'eka-a be mu a-nodu wobata ehu-guu.” Nokwa iphe, Chipfu, bu Okalibe-Kakota-Ike eepfu.

Ndu Ízurèlu emerwùshi onwophè

10O rwua l'abalì k'ùkporo l'èno l'ònwà kẹ tete l'ime apha ono, kwe onye eze ono, bụ Dariyòsu ẹbo l'abụ eze iya ono; Opfu Chipfu rwua onye mpfuchiru, bụ Hagayì nchì sù iya:

11“Wakwa iphe, Chipfu, bụ Ọkalibe-Kakọta-Ike eepfu baa: Jìeshikwa ndu-uke Chileke iphe, ẹkwo ekemu Chileke epfu; sù phè:

12Ọ -bùru lẹ nemadzu pyaru igburonu uwe iya apyapya bya egude iya paru anụ, e doru nsọ; igburonu uwe iya ono rwua lẹ buredi; ọzoo l'ò rwuru l'ophe, e teru etete; ọzoo lẹ mée; ọzoo lẹ manụ; ọzoo l'ò rwuru lẹ nri ọzo, dukporo iche; ? o meru g'iphe ono, o rwuru ono dū nsọ tọ?” Ndu uke sù waawaa.

13Noo ya; Hagayì sù: “Onye merwuru onwiya opfu l'ò denyiru odzu ẹka; ọ -hakwanuru iphe ono denyi ẹka; ? O merwuwaru iphe ono tọ?” Ndu uke sù iya: “Ee. O merwuwaru iya.”

14Hagayì byakwa bya eyee onu sù: “Nokwa g'ọ dū l'èhu ndu ọha-a, nọ mu l'iphu-a; waa l'èhu iphemiphe-a, ephe emekpoo ememe; mekpoo iphemiphe, ephe agwa agwagwa, bukota iphe, e merwuru emerwù. Nokwa iphe, Chipfu eepfu bụ ono.”

Chipfu e-kebe ndu Ízurèlu l'oma

15“Sù-a; unu lenaa ẹnya hụma g'ụzo unu gbaru; e -shi ntanụ jasuru. Unu lewaro g'iphe shi dū teke e teke ewotadu mkpuma kpopfube lẹ nwibe iya l'eze-ulo Chipfu.

16Teke ono shi abujeru: onye -jeshiaru l'ẹka ọ kuberu ikpo nri ukporo; l'ọ buwaru iri kpoloko phoduru iya. Onye jeru l'ẹka aakuje mee je akuta iya mee, l'e-ji ugbobele-mee ukporo labo l'iri; l'oburu ukporo lanu kpoloko be ọo-kuta iya.

17Akanya, unu gude ẹka unu see be mu meru ọ chashihu manụ; tsushia evu; mu tpyashia ya l'akamini; ophu unu aghakwaru mu pho iphu. Ọ kwa Chipfu epfu.

18Unu lenaa ẹnya g'ụzo unu a-gba; a -gbè ntanụ-a, bụ ukporo abalì l'abalì ẹno k'ònwà tete-a jasuru. Mbù-a; unu lenaa ẹnya g'ụzo unu gbaru; e -shi mbọku ono, a turu okpa-ulo eze-ulo Chipfu ono.

19? O nwekwaduru mebyi-iphe, dukwadu l'oba? Mbù lẹ-a; e -shi teke ono jasụ nta-a be vayinu; yele oshi figu; waa oshi itorokuma; me oshi Olivu unu g'ọ ha ta adukwa ophu eyeje mebyi. Ọle e -shi ntanụ-a be mu byaru ekebe unu l'oma.”

Zerúbabelu bụ echi, Chipfu gba l'ẹka

20Opfu Chipfu byakwa erwua Hagayì nchì ọzobakwa k'ugbo ẹbo lẹ g'ònwà dū l'ukporo abalì l'abalì ẹno ono. Ọ sù iya:

21“Pfurú Zerúbabelu, onye bụ iya bụ nnajioha lẹ Jiuda; lẹ mu abya anma igwe yee eliphe yigayiga.

²²Mu a-gha aba-eze ndu bu eze igharaphu. Mu emebyishia ike ndu-ishi l'ohamoha. Mu a-gha ugbo-inya yee ndu agba iya nu igharaphu; inya yee ndu agba iya nu adaa ndatewo; onyenonu bu nwibe iya e-gude ogu-echi iya gbua ya.

²³O -rwua mboku ono; o kwa Chipfu, bu Okalibe-Kakota-Ike eepfu; be mu e-duta gube onye-ozu mu, bu Zerubabelu nwa Sheyalutiyelu; o kwa Chipfu epfu. Mu e-mengu gi du g'echi-ohubama, mu agbaje l'eka; kele o kwa mbedua hotaru ngu." Nokwa iphe, Chipfu, bu Okalibe-Kakota-Ike l'epfu.

Zekaraya

Zekaraya 1

Chipfu ekuphuta ndu Izurelu azu

¹L'onwa k'ēsato; l'apha, kwe onye eze ono, bu Dariyosu ẹbo l'abu eze ndu Peshiya be Chipfu pfuru opfu yeru onye mpfuchiru ono, bu Zekaraya; mbu nwa Berekaya, bu nwa Ido su:

²Chipfu be ẹhu ghushiru egu ike l'opfu ẹhu ndiche unu phe.

³Oo ya bu le-a; karu ndu-a su phe-a: Wakwa iphe, oopfu baa; mbu Chipfu, bu Okalibe-Kakota-Ike: Unu lwaphuta azu lwapfuta mu; k'opfu mu a-lwaphuta azu lwapfuta unu. Nokwa iphe, Chipfu, bu Okalibe-Kakota-Ike eepfu.

⁴Unu ta adukwa ge ndiche unu phe, bu ndu ono ndu mpfuchiru ichie pfuru opfu ẹhu phe su: “Wakwa iphe, oopfu mbu Chipfu, bu Okalibe-Kakota-Ike; unu ghakobe haa ẹjo uto ono, unu eshi ono; yee ẹjo-ememe ono, unu eme ono. Obenu l'ephe ta angabeduru nchi; ophu ephe eyekwarupho onu. Nokwa iphe, Chipfu eepfu bu ono.

⁵? Bu awe be ndiche unu obu no nta-a? To ndu mpfuchiru obu; ? ephe anoje ndzu ojeje to?

⁶Iphemiphe ono, mu pfuru ono; mekpoo iphe ono, mu toru okpa iya ono, bu iphe, mu karu ndu-ozu mu, bu ndu mpfuchiru g'ephe meje ono; ? to nwuchaadaru l'ehu ndiche unu phe? O buru iya bu l'izimanu alwa phe azu; ephe pfua su: ‘Chipfu, bu Okalibe-Kakota-Ike mekwarupho anyi iphe, gbaru uto, anyi eshi; yee iphe, anyi eme; mbu l'o meerupho anyi iphe, o tuberu k'ememe.’ “

Nwoke, no le mgbaka oshi mituru

⁷O rwua l'ujiku k'ukporo l'eno l'onwa k'iri le nanu, bu onwa Shebatu; l'apha, kwe onye eze ono, bu Dariyosu ẹbo l'abu eze iya; Chipfu bya epfuru yeru onye mpfuchiru ono, bu Zekaraya; mbu nwa Berekaya, bu nwa Ido.

⁸O buru l'enyashi be mu phuru ophulanya huma nwoke, agba l'inya uswe-uswe! O pfuru le mgbaka oshi mituru, pfugbaaru l'uwuru uwuru. Inya inya ndu ophu pfugbaaru iya l'azu buru ndu adu uswe-uswe; ndu eke mkpumpku; ndu acha ucha.

⁹Mu bya ajia nwoke ono su: “Gube nnajiuphu mu; ? bu gunu be iphe-a bugbaa?” Ojozi-imigwe ono, epfu anu mu nu ono bya eyeeru mu onu su: “Mu e-goshi ngu-a iphe, ephe bugbaa.”

¹⁰To budu iya bu; nwoke ono, pfuru le mgbaka oshi mituru ono bya eyeahaa onu su: “Ndu-a bu ndu Chipfu yeru g'ephe je etsoru mgboko l'opfu jephee.”

¹¹Ephe yeeru ojozi-imigwe ke Chipfu ono, bu onye ophu pfuru le mgbaka oshi mituru pho onu su: “Anyi tukoakwaru mgboko l'opfu jebabe; anyi huma le mgboko l'opfu daru gbee; teme ẹhu du phe gubala.”

¹²Tɔbudu iya bụ; ojozi-imigwe kẹ Chipfu ono bya epfua sụ: “Gube Chipfu, bụ Okalibe-Kakota-Ike; ? ii-nọ-bekpọoru i-nọ-be-agma teme l’i phuaru Jierusalemu obu-imemini; ephe lẹ mkpukpu, nọgbaa lẹ Jiuda, bụ ndu i tu-koshiwaru ẹhu-eghu ngu e - shi k’ukporo apha ẹto l’apha iri-a?”

¹³No iya; Chipfu bya epfua nwopfu, dū nwa bebebe, bụ nwopfu ndumobu yeru ojozi-imigwe ono, epfu anụ mu nụ ono.

¹⁴Tɔbudu iya bụ; ojozi-imigwe ono, shi epfu anụ mu nụ ono sụ mu: “Raa opfu-arara: Wakwa iphe, oopfu; mbụ Chipfu, bụ Okalibe-Kakota-Ike: Mu ekoshikwa okophoo ike l’opfu ẹhu mkpukpu Jierusalemu yee úbvú Zayonu.

¹⁵Obenu lẹ ndu ẹhu eghushi mu eghu ike l’opfu ẹhu phẹ bụ ọha ono, bu tūsarū ẹhu ono. Mbụ l’ẹhu shi eghu mu eghu nwanshii nwanshii; ephe bya bya emee; ndibe mu kabaa eje iphe-ẹhuka.

¹⁶Oo ya bụ lẹ-a; wakwa iphe, Chipfu epfu baa: Mu a-wata aphụ obu-imemini ọzo lẹ Jierusalemu; mbụ l’ee-mechaa kpuphu eze-ulo mu azụ l’eka ono. L’a bya eworu iphe, e gude atụ ogologo iphe tọgbo lẹ Jierusalemu. Nokwa iphe, Chipfu eepfu bụ ono.

¹⁷“Rakabakwaa ya rọ araka sụ: Wakwa iphe, oopfu baa; mbụ Chipfu, bụ Okalibe-Kakota-Ike: Mkpukpu mkpukpu mu a-tuko ekameka; ephe l’eku, a-nodu ezeru phẹ kojokojo; ọzo bụ lẹ Chipfu a-dụ Zayonu obu ọzo; l’ọ hotakwapho Jierusalemu ozobaa.”

Mpu ẹno yee ndu ọkpuzu ẹno

¹⁸Mu bya apalia ẹnya; mpu ẹno nọduwaa mu l’atatiphu.

¹⁹Mu bya ajia ojozi-imigwe ono, shi epfu anụ mu nụ ono: “? Bụ gūnu baa?” O yeeru mu ọnu sụ mu: “O kwa mpu ono bụgbaa mpu, bụ iya chikaru ndu Jiuda; waa ndu Izurelu waa ndu Jierusalemu.”

²⁰No iya; Chipfu bya egoshi mu ndu ọkpuzu ẹno.

²¹Mu bya bya ajia sụ: “? Bụ gūnu be ndu-a l’abya ememe?” O yeeru mu ọnu sụ mu: “Ndu-a bụ phẹ bụ mpu, chikaru ndu Jiuda k’ophu bụ l’ọ tọ duedu onye ophu duru ike gbelia ishi; obenu lẹ ndu ọkpuzu-a byaru g’ephe meru ndzu-agugu nụ phẹ; chitsushia mpu ndu ohamoha-a, bụ ndu paliru mpu phẹ dūaha ndu alị Jiuda k’ophu ephe a-chika phẹ.”

Zekaraya 2

Nwoke, gude iphe, aatuje ogologo iphe

¹Mu bya ejeshia apali ẹnya; o nweru nwoke, pfuru mu l’atatiphu. O buri iphe, aatuje ogologo iphe be o gude l’eka.

²Mu jia ya sụ iya: “? Bụ awe be iije?” O yeeru mu ọnu sụ mu: “Mu ejekwa atụ Jierusalemu g’a maru g’osa iya yee ogologo iya habe.”

³No iya; Ojozi-Imigwe ono, shi epfu anụ mu nụ ono tughushia; Ojozi-Imigwe ọzo jepfushia ya;

⁴bya asụ iya: “Keta ọso je asụ nwokorọbya ono lẹ Jierúsalemụ a-bụkwaru mkpụkpu, a kpụ-pheduru igbulọ mgburugburu; kele ndu e-buru iya nụ a-pa igwerigwe waa iphe-edobe, a-dukwa iya pho ya.

⁵Wakwa iphe, Chipfu epfu baa: Ọ kwa mbèdua l'onwomu a-buru ọku kpua g'igbulọ nọ-pheri ya mgburugburu; tème mu anọdu l'ime iya meru akpabiri ye iya.”

Achị-phuta ndu a kpuru lẹ ndzụ azụ

⁶Wakwa iphe, Chipfu epfu baa: “Unu byanụ! Unu byanụ! Unu shikwa l'alị ndu isheli gbafulu gbalaa; kele mu shi tũkaa unu l'ekameka gẹ pherephere, dzuru uswekete ẹnọ l'akpaminigwe. Nokwa iphe, Chipfu eepfu bu ono.

⁷Unu lenu! Unu gbalakwaa gbaru laa Zayonu; unubẹ ndu ono, unu lẹ Nwada Bábilonu bu ono;

⁸kele-a; wakwa iphe, oopfu baa; mbụ Chipfu, bu Ọkalibe-Kakọta-Ike: Onye bu onye denyiru unu ẹka bụkwa akpuru ẹnya mu bẹ ọorwu ẹka. Teke ọ kwabekpooru mu ụbvụ bya ezia mu gẹ mu je etsoo ọha ono, kwaru iphe unu l'okwata ono ọgu;

⁹bẹ ọ tọ dudu iphe, e-me gẹ mu ta apali ẹka mu nua ndu ono aphụ; k'ophu bu lẹ ndu shi buru ohu phẹ a-ghakọbe kwaa iphe phẹ l'okwata. Noo teke unu a-maru l'ọo Chipfu, bu Ọkalibe-Kakọta-Ike bẹ ziru mu gẹ mu bya.

¹⁰“Tua uzu ẹhu-utso; tème ẹhu atsokwaa ngu pho utso; gube nwada Zayonu; kele mu abyaakwaa. Mu -bya; mu eburu l'echilabọ unu! Nokwa iphe, Chipfu eepfu bu ono.

¹¹Ọha, du igwerigwe bẹ a-tughabekwa onwophe ẹphe lẹ Chipfu mẹ o -rwua mbọku ono; ẹphe aburu ndibe mu. Mu e-buru l'echilabọ unu; k'ophu unu a-maru l'ọo Chipfu, bu Ọkalibe-Kakọta-Ike bẹ ziru mu gẹ mu bya.

¹²Chipfu e-keta Jiuda g'ọ buru okiphe iya l'alị, du nsọ ono; l'ọobyakwa ahọta Jierúsalemụ ọzo.

¹³Nọduekwapho nwa nggujungguji l'iphu Chipfu; unubẹ unwu-eliphe l'ophu; kele ọ kpatsuwaru onwiya l'ẹka ono, o bu ono, bu ẹka du nsọ ono.”

Zekaraya 3

Uwe onye-ishi ndu-uke Chileke

¹Tobudu iya bu; ọ bya egoshi mu Jioshuwa, bu iya bu onye-ishi ndu-uke Chileke ẹka ọ pfuru l'iphu Ojozi-Imigwe ke Chipfu ono; Nsetanu pfukwaru iya pho l'ekutara; abya edoshi iphe, o meru.

²No iya; Chipfu bya asụ Nsetanu: “Gẹ Chipfu gbokwaaru ngu uja; gube Nsetanu! Mbụ gẹ Chipfu ono, bu iya hotaru Jierúsalemụ gbokwaaru ngu uja! ? Nwoke-a ta abudu ishikonku, a lofutaru l'oku?”

³Teke ono, Jioshuwa p̄furu l'ip̄hu Ojozi-imigwe ono bu ip̄he, o yeru bu uwe, kp̄oru idzù.

⁴Ojozi-imigwe ono s̄u ndu p̄furu l'ip̄hu iya: “Unu yefu iya uwe ono, kp̄oru ichikiri ono.” O bya asu Jioshuwa: “Lekwa; mu nafaakwaru ngu ejo-ip̄he, i meshiru; nta-a be mu byaru eworu uwe, vu oke aswa yee ngu.”

⁵Noo ya; mu s̄u g'ep̄he woru okpulishi-ekwa, sahur̄u imò kp̄ube iya l'ishi. A bya eworu okpulishi-ekwa, sahur̄u imò woru kp̄ube iya l'ishi; bya eworu uwe yee ya. Ojozi-Imigwe ke Chipfu bya ap̄fu-kube iya.

⁶Ojozi-Imigwe ke Chipfu ono bya at̄aru Jioshuwa ekemu-a s̄u:

⁷Wakwa ip̄he, oopf̄u baa; mb̄u Chipfu, bu Okalibe-Kakota-Ike: “O -buru l'ji-nodu etso uto mu; emekwapho ip̄he, mu suru g'i meje be bu ngu e-mechaa buru onye-ishi ulo mu; bya aburu ip̄he, i suru g'e mee l'unuphu ibe mu be ee-meje; teme mu anukwa ngu pho oke g'i yiru le ndu-a, p̄furu l'eka-a.

⁸Ngabe nchi; gube onye-ishi ndu-uke, bu Jioshuwa; gu l'ogbo-ekwa ngu phe, bu ndu no-kube ngu nu; mb̄u ndu emeru ngu ahuma oma: Mu e-mechakwaa duta onye-ozu mu ono, bu Ekali-oshi ono duru bya.

⁹Humakwa mkpuma, mu togboru l'ip̄hu Jioshuwa! Mkpuma lanu ono moru enya esaa; teme mu abyakwa iya edefua ip̄he l'eli; o kwa ip̄he, Chipfu, bu Okalibe-Kakota-Ike eepfu. O buru eswe ujiku lanu be mu e-wofu ip̄he-eji, ndu ali-a mejekporu.

¹⁰O -rwua mboku ono be g'unu ha l'onye l'onye a-nodu ezi nwibe iya g'o bya g'unu nokobe le mkpula vayinu unu yele mkpula oshi figu unu.” Nokwa ip̄he, Chipfu, bu Okalibe-Kakota-Ike eepfu bu ono.

Zekaraya 4

Oroku, a wuru le mkpola-ododo; yee oshi olivu labo ono

¹No iya bu; Ojozi-Imigwe ono, shi epfu anu mu nu ono lwaphuta azu byapfuta mu bya ekuteahaa mu g'onye ekute onye eku mgbenya.

²O jia mu su mu: “? I humaru gunu?” Mu su iya: “Mu humaru ip̄he, aapfubeje oroku, e mekotaru le mkpola-ododo; ip̄he, du iya l'eli buru ochi; oroku dukwapho esaa p̄furu iya l'eli; uto, shigbaaru futa l'oroku ono dukwapho esaa.

³Ozo bu l'o duru oshi olivu labo, p̄fu-kuberu iya nu; ophuu p̄furu l'ekutara ochi ono; ophuu p̄furu iya l'ekicha.”

⁴Mu bya ajia Ojozi-imigwe ono, epfu anu mu nu ono su iya: “? Bu gunu be ip̄he-a bu; nnajiuphu mu?”

⁵Tobudu iya bu; Ojozi-imigwe ono, mu l'iya abo uja ono bya eyeeru mu onu su: “? Ti madu ip̄he, ip̄he-a bu?” Mu su iya: “Nnajiuphu mu; mu ta amakwa ip̄he o bu.”

⁶Q buru iya bu l'ọ sụ mu: “Wakwa opfu, Chipfu epfu anụ Zerúbabelu: E tee mekwa iya l'ike; ophu eemekwa iya l'okarieka; ọ kwa onye e gude eme iya bu Unme mu; nokwa iphe, Chipfu, bu Ọkalibe-Kakọta-Ike eepfu.

⁷? I bu ọnu; ọbe oke úbvú? L'iphu Zerúbabelu be ii-mechaa buru alí, du baswaa. Noo teke ọo-pfube mkpuma mkpochi-ishi iya; l'aatua uzu sụ: ‘Ge Chileke ọru ọnu-oma nu iya-o! Ge Chileke ọru ọnu-oma nu iya-o!’ “

⁸No iya bu; Opfu Chipfu bya erwukwa mu nchị sụ:

⁹“Zerúbabelu gudeakwaa ẹka iya tua ọkpa eze-ulo Chileke-a; ọ buru iya e-gudekwapho ẹka iya kpụ-tsee ya. Noo teke unu a-maru l'ọo Chipfu, bu Ọkalibe-Kakọta-Ike ziru mu ge mu byapfuta unu.

¹⁰“Nta bukwa mbọku, iphe, ha nwanshii l'eme; ọle ? bu onye elephekwanu iya ọnya? Ndiphe be ọhu a-tsokwa utso teke ọphe a-huma ẹka Zerúbabelu wataru akpu ulo ono. “A bya l'ọnya ọsaa pho; ọnya ọsaa ono bukwa ọnya Chipfu, anọduje agba mgboko l'ophu mgburugburu.”

¹¹Mu byakwa ajia Ojozi-Imigwe ono sụ iya: “? Bukwanu ọnu be oshi olivu labo-a, ọgbaa ọrọku ono ẹka ẹbo ẹbo ono bu?”

¹²Mu byakwa ajia ya ọzo sụ: “? Bu ọnu bu ẹkali-oshi olivu labo-a, ọgbaa l'aguga uji-iphe labo-a, bu ophu e gude mkpola-ododo mee-a; teme ọ buru ẹka ono be manu shiru asoshihu-a?”

¹³O yeeru mu ọnu sụ mu: “? Ti madu iphe, iphe-a bu?” Mu sụ iya: “Nnajiuphu mu; mu ta amakwa iphe ọ bu.”

¹⁴No iya; ọ sụ mu: “Ndu ono bu ọmadzu ẹbo ono, a wuru manu l'ishi; g'ephe jeeru onye nwe mgboko l'ophu ozi.”

Zekaraya 5

Ekwo, ephe ephephe

¹Mu byakwa elee ọnya ọzo; ekwo-aphuphu, ephe ephephe ọduwaa mu l'iphu!

²Ojozi-imigwe ono sụ mu: “? Bu ọnu be i humaru?” Mu yeeru iya ọnu sụ: “Mu humakwaru ekwo-aphuphu, ephe ephephe; ọ du ukporo nkwo-ẹka l'ogologo bya adu nkwo-ẹka iri l'osa.”

³Q bya asu mu: “Q kwa ọnu, aatu mgboko mgburugburu bu onoya. Kele ọ dua g'iphe o pfuru l'ẹka lanu ono; sụ le ndu bu iphuru g'ephe ha be ee-me g'ephe chihu; teme ọ dukwapho g'iphe, o pfuru l'ẹka iya ophuu sụ; l'iphe, bukpo ndu akpapyabeje iphe, ephe meru ria nte be ee-me g'ephe chihu.

⁴Chipfu, bu Ọkalibe-Kakọta-Ike epfukwa sụ: Mu a-tu ndu iphuru ono ọnu; tukokwapho ndu ono, akpapyabeje iphe, ephe meru gude epha mu gua ẹnwa ono ọnu kwapho. Ọtu-ọnu mu ono abaa l'ibe phe mebyishia ya; mekpoo oshi, e keru ulo iya; me mkpuma, e gude kpua ya.”

Nwanyị, nọ lẹ nkata

⁵No iya; Ojozi-Imigwe ono, epfu anụ mu nụ ono bya akpịritaru bya asụ mu: “Palia ẹnya humakpodapho iphe-a, abya afuta nta-a.”

⁶Mu jia ya sụ iya: “? Bụ ụnu bụ ono?” O yeeru mu ọnu sụ mu: “O kwa nkata, eegudeje atụ iphe.” O sụkwapho: “Owaa bụ ẹjo-iphe, ndu alị-a gbaa mgburugburu mekotaru.”

⁷A bya ekpulia igbidigbi opfu nkata ono; nwanyị nọduwaa anọ l’ime nkata ono.

⁸Ojozi-Imigwe ono sụ mu: “O kwa ẹjo-iphe baa.” O bya enwuphu iya azụ l’ime nkata ono; bya eworu igbidigbi opfu nkata ono kpuchiphu azụ ọzo.

⁹Mu bya apalia ẹnya; ụnwanyi dūwaa ẹbo pfuru mu l’iphu. Ẹphe nọdu ephe ephephe. Nkù phẹ dūepho gẹ nkù ọku-eswi-uda. Ẹphe bya agụ-lia nkata ono parụ paghaa alị yẹ igwe l’ophu parwua mgbaka alị yẹ igwe.

¹⁰Mu jia Ojozi-Imigwe ono, epfu anụ mu nụ ono sụ iya: “? Bụ awe bẹ ẹphe pahunu nkata ọbu eje?”

¹¹O yeeru mu ọnu sụ mu: “Ẹphe pa iya eje alị Shina. Ẹphe eje iya akpuru ụlo l’ẹka ono. A -kpugheẹ ya pho l’e woru nkata ono sūbe l’onodu iya.”

Zekaraya 6

Ụgbo-inya ẹno

¹Mu byakwa apalia ẹnya ọzo; ụgbo-inya ẹno nọduwaa mu l’iphu. Ẹphe shi lẹ mgbaka úbvú labo awufuta. Úbvú ono bụ úbvú onyirubvu.

²Ịnya, akpugbaa ụgbo-inya kẹ mbụ dukota uswe-uswe. Ndu ọphu akpụ k’ẹbo nọdu ejikota uji.

³Ndu ọphu akpụ k’eto nọdu acha ụcha; ndu akpụ k’eno dukota ụkara ụkara. G’ẹphe ha dukota okpehu.

⁴Mu bya ajia Ojozi-Imigwe ono, epfu anụ mu nụ ono sụ iya: “? Bụ ụnu bẹ iphe-a bụ; Nnajiuphu mu?”

⁵Ojozi-Imigwe ono bya eyeeru mu ọnu sụ mu: “Ndu-a bụ ndu e-je lẹ pherephere lẹ mgbureku ẹno, nọ l’akpaminigwe. Ọle ẹphe e-vuru ụzo goshiadaa onwophẹ l’iphu onye nwe mgboko l’ophu.

⁶Ụgbo ọphu bụ inya oji akpugbaa ya; wuru eje ala l’uzo isheli. Ndu ọphu inya akpụ iya nụ achagbaa ụcha nọdu awụ etso iya etsotso. Ndu ọphu bụ inya, dūgbaa ụkara ụkara kpugbaa phẹ nọdu ejepfu ọha, bugbaa l’uzo ndohali.”

⁷O be teke inya ono wufutaru; ọ nọdu anma phẹ anmanma l’ẹhu g’ẹphe wufu je etsoru eliphe l’ophu agbaphe. No iya; ọ sụ: “Unu je; je aghaphee eliphe l’ophu.” Ẹphe wuru tūgbua je awata aghaphe l’eliphe l’ophu.

⁸O bya araku mu sụ mu: “Lekwa; ndu ọphụ eje ala l'ọha isheli meakwaru; unme bvuru mu ebvuru l'alị ọha isheli.”

Okpu-eze kẹ Jioshuwa

⁹Opfu Chipfu rwua mu nchị sụ:

¹⁰“Ndu-a bẹ ii-nata mkpọla-ọchaa yẹe mkpọla-ododo; Hẹludayi; waa Tobayijia yẹe Jiedaya, bụ ndu shi lẹ Bábilonu lwa, bụ ẹka e shi kpua phẹ lẹ ndzụ laa. Ujiku lanụ ono bẹ ii-jekwaphọ ibe Jiosáya nwa Zefanaya.

¹¹Mkpọla-ọchaa ono yẹle mkpọla-ododo ono bẹ ii-gude wua okpu-eze. Okpu-eze ono bụ onye ii-je ekpube iya l'ishi bụ onye-ishi ndu-uke ono, bụ Jioshuwa, bụ nwa Jiehozadaku.

¹²Sụ iya l'owakwa iphe, Chipfu, bụ Okalibe-Kakọta-Ike eepfu: ‘Lekwa; nwoke ono, ẹpha iya bụ Ẹkali-Oshi ọbu l'a-nyikatakwa l'onodu iya bya akpukwaa eze-ulo Chipfu.

¹³O kwa iya a-buru onye a-kpu eze-ulo Chipfu. Ozo bụ l'ee-me iya l'oo-du akpabiri; l'ọ buru eze; nọdu l'aba-eze iya. Teme l'o dokubekwaphọ onye uke l'aba-eze iya ono. Nchị aduepho ẹphenebo doo l'iphe, ẹphe eme.’

¹⁴Okpu-eze ono bẹ ee-dobe l'eze-ulo Chipfu g'ọ buru iphe, ee-gudeje nyata Hẹludayi; yẹle Tobayijia; yẹle Jiedaya; yẹle Henu, bụ nwa Zefanaya.”

¹⁵“Ndu bu l'ẹka dọ ẹnya abya eyeta ẹka g'a kpua eze-ulo Chipfu. Noo teke unu a-maru l'oo Chipfu, bụ Okalibe-Kakọta-Ike bẹ ziru mu gẹ mu bya. Iphemiphe ono e-mekọta mẹ unu -nọdu emeje iphe, Chipfu, bụ Chileke unu epfu.”

Zekaraya 7

Ikpe, pfuru ọto; yẹe aphụ obu-imemini; ọ tọ bụdu aswị ẹgu

¹Tọbudu iya bụ; o be l'apha, kwe eze, bụ Dariyosu apha ẹno l'aba-eze iya; lẹ g'onwa kẹ tete dọ l'abalị ẹno, bụ iya bụ ọnwa Kisulevu; Opfu Chipfu rwua Zekaraya nchị.

²Lẹ ndu Bẹtelu ziwaru Shareza yẹe Rẹgemu-Mẹleku; ẹphe chita ndu ẹphe l'ẹphe swị g'ẹphe je epfuru nụ Chipfu;

³waa g'ẹphe jia ndu-uke ulo Chipfu, bụ Okalibe-Kakọta-Ike; ẹphe lẹ ndu mpfuchiru Chileke sụ phẹ: “? Mu gụwaro aphụ swia ẹgu l'onwa ise gẹ mu shi eshi k'apha olemole meta-a tọ?”

⁴Tọbudu iya bụ; opfu kẹ Chipfu, bụ Okalibe-Kakọta-Ike bya erwua mu nchị sụ mu:

⁵“Jia iphe, bukpo ndu alị-a l'ophu mẹ ndu bụ uke sụ phẹ: Teke ono, unu swiru ẹgu nọo l'aphu l'iphe, bukpo ọnwa ise yẹe ọnwa ẹsaa; e -shi k'ukporo apha ẹto l'apha iri, nwụwaru nụ ? bụ mu-a gẹdegede bẹ unu swi-doru ẹgu ono?

⁶Tọo teke ono, unu shi eri iphe, eeri eriri; angu iphe, aangụ angungu; ? tọ bụdu unu shi eri eriri angu angungu k'ẹhu unu ẹhu unu?

⁷Iphe-a; ? tọ bụdu opfu, Chipfu gbẹ l'ọnu ndu mpfuchiru ndiche pfua teke ono, Jierúsalemu ẹphe lẹ mkpukpu nọ-pheru iya mgburugburu dakpọerupho gbẹ; ẹme ẹku nọdu abyaru pẹ pukapuka; ẹme ndu bu l'echiẹgu ndohali ẹphe lẹ ndu bu l'alị ọkpa úbvú, nọ l'uzo ẹnyanwu-arịba bukpọerupho g'ẹphe bu?"

⁸Ẹme Opfu Chipfu bya erwua Zekaraya nchị ọzo sụ:

⁹Wakwa iphe, oopfu baa; mbụ Chipfu, bụ Ọkalibe-Kakọta-Ike: Unu kpeje ikpe, bu ire-lanụ. Unu mejeru nwibe unu iphe-oma; unu aphujeru pẹ obu-imemini.

¹⁰Unu te emekpajekwa ndu ji pẹ anọedu ẹhu; ọzoo ndu enwedu nna; ọzoo ndu byaru abyabya; ọzoo ndu akpa nri. Ọphu ọ dukwa g'unu ha onye arije l'ime ọkpoma iya k'eme nwune iya ẹjo-iphe.

¹¹“Obenu l'ẹphe jikaru angabẹ nchị; ẹphe gude ẹjo ọkpoma kwefu ike; bya eworu nchị pẹ swọ-chishia g'ẹphe ta anuma iya.

¹²Mbụ-a; ẹphe woru ọkpoma pẹ kpọo gbengu gẹ mkpuma-egbe; jika l'ẹphe taa ngabedu nchị l'ekemu; ọphu ẹphe angabedu nchị l'opfu Chipfu, bụ Ọkalibe-Kakọta-Ike pfuru nụ pẹ; mbụ ozi, o gude Unme nkiya gbẹ l'ọnu ndu mpfuchiru ndiche pfuaru pẹ. Ọ bụru iya meru g'o gude ẹhu wata egbu Chipfu, bụ Ọkalibe-Kakọta-Ike egbu shii.

¹³Teke mu kuru oku bẹ ẹphe ta angabeduru nchị; noo g'o gude ẹphe kujekwanu; ọphu mu angaduru nchị; nokwa iphe, Chipfu, bụ Ọkalibe-Kakọta-ike epfu.

¹⁴Mu wonuru pẹ chikaa; mbụ gude oke pherephere zikaa pẹ; ẹphe dzuru ohamoha; ẹphe je ebugbaaru l'alị ẹka ẹphe amadu. Ọ bụru iya bụ l'alị ono, ẹphe gwọberu ono aburu ochobu; k'ọphu bụ l'ọ tọ duedu onye eshije iya afuta; ọphu ọ dudu onye ejeje iya nụ. Ẹphe woru ẹguru alị ono togbo ọ bụru ochobu.”

Zekaraya 8

Ukwe ọnu-oma Chipfu ekwe Jierúsalemu

¹Ọzokwa; Opfu Chipfu, bụ Ọkalibe-Kakọta-Ike rwukwaa mu nchị ọzo sụ:

²Wakwa iphe, Chipfu, bụ Ọkalibe-Kakọta-Ike eepfu baa: “Mu ekokwa okophoo ẹhu Zayonu shii; mbụ l'okophoo ẹhu iya enwukwa mu phuruphuru l'ẹhu.”

³Wakwa iphe, Chipfu epfu baa: “Mu a-lwaphutakwa azụ lẹ Zayonu je eburu eburu lẹ Jierúsalemu. Noo teke aa-wata eku Jierúsalemu ‘mkpukpu ire-lanụ’; l'awata eku úbvú kẹ Chipfu, ‘úbvú, dọ nsọ’ mbụ úbvú kẹ Chipfu ono, bụ Ọkalibe-Kakọta-Ike ono.”

⁴Wakwa iphe, Chipfu, bụ Ọkalibe-Kakọta-Ike eepfu baa: “Unwoke, kahuru akahụ; yee unwanyi, kahuru akahụ e-mechakwaa anọduje l'oma gbororo Jierúsalemu ọzobaa; onyenonu l'ọ tsua mgboro l'ẹka; kele ọ bụwaa ọgerenya.

⁵Unwumboko mę unwokoro eji oma gbororo mkpukpu ono ebvu ebvu.”

- ⁶Wakwa iphe, Chipfu, bu Okalibe-Kakota-Ike eepfu baa: “Oo-dukwaro nwa ndu eka-a, bu ndu ophu phoduru nu biribiri teke ono; obenu ? oo-duhunu mbedua biribiri?” Nokwa iphe, Chipfu, bu Okalibe-Kakota-Ike eepfu bu ono.
- ⁷Wakwa iphe, Chipfu, bu Okalibe-Kakota-Ike eepfu: “Mu a-dzota ndibe mu l'eka oha, bu l'uzo enyanwu-awawa yele eka ndu ophu bu l'uzo enyanwu-ariba.
- ⁸Mu e-duphuta phe azu g'ephe bya eburu le Jierusalemu. Ephe a-buru ndibe mu; mu abukwanuru phe onye ire-lanu; pfuleru phe eka oto; buru Chileke phe.”
- ⁹Wakwa iphe, Chipfu, bu Okalibe-Kakota-Ike eepfu: “Unube ndu anu opfu-a nta, bu opfu, ephe pfuru; mbu ndu mpfuchiru, no l'eka ono teke a turu okpa ulo-a; mbu okpa ulo Chipfu, bu Okalibe-Kakota-Ike-a; g'eka shihukwa unu ike k'ophu aa-kpu eze ulo ono kpu-ghee.
- ¹⁰Teke eteke atudu okpa ulo ono be e te shidu apfuje amadu ugwo-ozu; ophu aapfudu iya anu-egbudu. Ophu o dudu onye shi ejeje ozi iya le ntusarehu; l'eka onyemonye atsuhogou iya ebvu; kele mu meru; onyemonye buru ohogu nwibe iya.
- ¹¹Obenu le nta-a be mu tee meedu nwa ndu phoduru nu le ndu-a ge mu meru teke ndiche ono.” Nokwa iphe, Chipfu, bu Okalibe-Kakota-Ike eepfu.
- ¹²“Mebyi-iphe, a kuru l'alij a-nodu eme ree; vayinu amij mebyi iya ree; alij amija mebyi iphe, e meberu iya; igwe akwa iji iya. Iphemiphe ono be mu a-nu g'o buru okiphe, nwa ndu ono phoduru nu ono e-keta.
- ¹³O kwa egube ono, ohamoha shi gude unube ndu onu-ulo Jiuda yee Izurelu ephu l'iphu ono; bukwaphe ge mu a-dzo unu; l'a gotaahaa unu l'opho. Unu ba atsukwa ebvu; oo ekwaphe g'eka shihu unu ike.”
- ¹⁴Wakwa iphe, Chipfu, bu Okalibe-Kakota-Ike eepfu: “O kwa egube ono, mu rijwaru l'eme unu ejo-iphe; mu taa phoduru unu obu-imemini; teke ono, ndiche unu phe kpatsuru mu iwe ono; o kwa Chipfu, bu Okalibe-Kakota-Ike eepfu;
- ¹⁵bukwaphe ge mu rijwaru iya nta-a le mu e-meru ndu Jierusalemu yee onu-ulo Jiuda ree ozo. Unu ta atsukwa ebvu.
- ¹⁶Wakwa iphe, unu a-nodu eme baa; unu pfujeru nwibe unu ire-lanu; unu ekpeje ikpe, bu ire-lanu bya aburu ikpe, e-me ge nchi du doo l'ime ulo-ikpe unu.
- ¹⁷Unu ta achijekwaru nwibe unu ejo idzu l'ime obu unu; ophu ohejekwa unu ihee akpapyabe iphe, unu meru gua enwa. Iphemiphe ono bu iphe, dukota mu ashij. Nokwa iphe, Chipfu eepfu.”
- ¹⁸Mu byakwa anuma Opfu Chipfu, bu Okalibe-Kakota-Ike ozobakwa.
- ¹⁹Wakwa iphe, Chipfu, bu Okalibe-Kakota-Ike eepfu: “Aswi egu l'onwa k'eno me k'ise me k'esaa me k'iri a-tuko buru teke ehu a-tsoje unube ndu onu-ulo Jiuda utso; unu etee eswa; l'o buru unu Obo-iphe ehu-utso. Oo ya bu le-a; unu yee ire-lanu obu; unu eyee nchi-adu-doo obu!”

²⁰Wakwa iphe, Chipfu, bu Ọkalibe-Kakọta-Ike eepfu: “Ndu du igwerigwe a-bya; mbu ndu shigbaa le mkpukpu, du igwerigwe;

²¹ndu shi le mkpukpu lanu a-wuru je le mkpukpu ozo je asu: ‘G’anyi je je epfua g’anyi tuba Chipfu l’anya; mbu-a g’anyi je achọ Chipfu, bu Ọkalibe-Kakọta-Ike; le mbedua l’e-jefukwaa.’

²²Ikpoto nemadzu; mekpoo ndu bu oha, ike du l’a-bya achọ Chipfu, bu Ọkalibe-Kakọta-Ike le Jierusalemu; byakwapho g’ephe rwo ya g’ephe tuba iya l’anya.”

²³Wakwa iphe, Chipfu, bu Ọkalibe-Kakọta-Ike eepfu: “E -mechaa be umadzu iri, epfugbaa opfu-ali, du iche iche; bya eshigbaa l’ohamoha; l’a-tuje onye Jiuda lanu swiswia l’onu uwe iya arwo iya su iya: ‘G’anyi tsonuru ngu laa; l’anyi numawaru le Chileke swiru unu eswiru.’ “

Zekaraya 9

Ikpe, ee-kpe ndu ohogu Izurelu

¹Qwaa bu ozi, Chipfu ziru zidoru ndu ali Haduraku; teme o gbupyabewaa mkpukpu Damasukosu; kele enya ndiphe; mekpoo enya okpa-ipfu l’okpa-ipfu Izurelu l’ophu bukota le Chipfu be o nowaa.

²Oopfukwapho iphe, oo-me mkpukpu Hamatu, bu ndu ephe l’ephe maru oke; mekwapho mkpukpu Taya yee mkpukpu Sayidonu; mbukpokwaa ephebedua ono, maru iphe ntumatu ono.

³Ndu Taya kpwakwaru mkpukpu phe kpushia ya ike. Mkpola-ochaa be ephe kpawaru kube g’onye kpokoberu urwuku; bya akube mkpola-ododo g’onye kuberu ozo l’aguga gbororo.

⁴Obenu le Nnajiuphu a-nafu phe iphe, bu nkephe; bya enwuru eku phe ye l’eze-enyimu. Oku etsua mkpukpu Taya ono tsufu.

⁵Ndu mkpukpu Ashikelonu a-huma iya; ndu erwuta phe; ndu mkpukpu Gaza ahuma iya terwuhu le ndu-agugu. Nokwapho g’oo-du ndu Ekuronu; kele iphe, ephe shi ele enya iya a-la pyete. Ndu Gaza be onye eze phe a-la l’iswi; l’a gbakahu le Ashikelonu.

⁶Q buru ndu ali ozo e-buchi mkpukpu Ashidodu; mu emee g’eku-onwonye ndu Filisitayinu buru bugemu.

⁷Mee-iphe ono, ephe anguje ono be mu a-nafu phe; mu anyashia phe nri ono, e merwuru emerwu ono, nyakaaru phe l’eze ono; nwa ndu ophu phoduru nu le ndu ono; anodu-doru Chileke anyi; buru ndu a-duwaa g’ipfu eka phe l’ali Jiuda; ndu Ekuronu abyakporo adu ge ndu Jiebusu.

⁸Obenu le ndibe mu be mu a-nodu adzoje l’eká ndu ojogu, azo garamugaramu agha ono; ophu ndu ewere abyadu agbabaa ndibe mu ophorokpo; kele nta-a be mu gudewaa enya mu huma g’ephe ejebe iphe-ehuka.

Abyabya eze ndu Zayonu

⁹Gùbe nwada Zayonu; tekwaà ẹsua teshia ya ike! Gwa ebvu ẹhu-utso; gùbe nwada Jierusalemu! Lekwa; onye buru ngu eze abyapfutaakwa ngu. O bu onye pfuberekoto; teme o nodu adzoje nemadzu. O wozetaru onwiya ali; nodu l'eli nkapfu-igara agba abya; mbu l'eli nwa nkapfu-igara obu.

¹⁰Ndu Ifuremu be mu a-nafu ugbo-inya-ogu phe; mu anafukwapho ndu Jierusalemu inya, aagbaje alwu ogu. L'a gbajia uta, e gude eje ogu. L'o raa ya arara su g'ehu dukwa ohamoha guu. Abu eze nkiya e -shi l'eze-enyimu owa dasweru eze-enyimu ozo. L'o shikwapho l'enyimu Yufuretisu no jasu l'eka igwe beru ali beru.

Ee-dophu ndibe Chileke azu l'onodu phe

¹¹“A -bya le gubedua; mu e-gude ke mee ono, mu le ngu gude gbaa ndzu ono haa ndibe ngu, no le mkporo l'ime iduma, mini adudu ono; mee phe; ephe enweru onwophe.

¹²Unu laphu azu l'eka ono, unu kpushiru ike ono; unube ndu mkporo ono, enya du l'uzo ono! Mbu le nta-a be mu arakwa iya arara le mu a-nu unu iphe, ha g'iphe, unu shi nwehawaru ugbo ebo;

¹³kele mu e-woru ndu Jiuda kwee g'onye kweru uta; mu eworu ndu Ifuremu mee g'o buru apfu, e gude agba uta obu. Mu a-kpatsu ndibe gube Zayonu g'ephe dapfu ndibe gube Gurisu. Mu emee ngu g'i du g'ogu-echi, onye du ike l'ogu pa.”

¹⁴Noo teke Chipfu a-byapyabe phe. Apfu iya eziahaa phaaphaa g'ebemu-igwe. Nnajiuphu, bu Chipfu abya eworu opu-ogu gbua. O buru oke pherephere, shi ndohali be oo-gude eje.

¹⁵O buru Chipfu, bu Okalibe-Kakota-Ike e-gbobuta phe. Ephe a-nodu atsụ ndu ohogu phe otsu-epfu; alwu phe alwu-kpe phe. O buru iphe, ephe e-gude eme iya bu mkpuma robo agbagba phe. Ephe a-ngu iphe, aangụ angungu; aba ge ndu mee atsụ. Ephe ejije pyimu g'ochi, eegudeje ephe mee l'aguga oru-ngweja Chileke.

¹⁶O buru Chipfu, bu Chileke phe a-nodu adzo phe m'o -rwua mboku ono; eshinu ephe du g'iphe-edobe iya bya aburu ndibe iya. Ephe a-gbaje kpingu l'ali iya g'igopoto, no l'eli okpu-eze.

¹⁷Lewarọ! O dunukaru ree teme o manuka mma. Ereshi l'a-nodu eme g'unwokorobya phe buru ndu nweru iphe shii; mee-ophuu emekwapho g'unwada phe nwujaa onu-ochi.

Zekaraya 10

Chipfu e-leta Jiuda enya

¹Unu pfuaru Chipfu g'o dzeeru unu mini teke oodzeje mini ishi-apha. O kwa Chipfu emeje g'igwe rwua erwurwu. O buru iya ayojeru unwu-eliphe mini; teme o nodu emeje g'iphe-akuku wata aso pulapula l'egu;

²kele obvu agwota atukwa atu-kporoko; ndu agba eja nodu aphu ophulanya, abudu eviya; ephe ezeje nrwo, bu uka; teme o buru mkpokoro obu be ephe a-noduje adu. O

buru iphe ono meru g'o gude ndu-a nɔdu anɔduje awu-phe g'ikpoto aturu, enwedu onye eche phe nu.

³Ɛhu-eghu mu enwukwa phuruphuru l'opfu ɛhu ndu eche aturu ono; mu jekwa l'anu ndu-ishi ono aphu; kele Chipfu, bu Okalibe-Kakota-Ike e-che-a aturu iya, bu iya bu onu-ulo Jiuda. Oo-me phe g'ephe du g'inya, du akpabiri l'eka e gude iya alwu ogu.

⁴O bukwa le Jiuda be mkpuma, gude ulo e-shi futu; o buru iya be nggu, gude ulo-ekwa e-shikwapho; o buru iya be uta, e gude alwu ogu e-shikwapho; o buru iya be iphe, bukpuo ndu a-buru ishi e-shi l'eka.

⁵Ɛphe a-tugba nanu; dupeho ge ndu bu ojogu, ike du; ephe azoo ndu ohogu phe tolitoli le gbororo l'eka aalwu ogu. Eshinu Chipfu no swiru phe eswiru be ephe a-lwu ogu chikaa ndu gude inya alwu ogu.

⁶Mu e-me g'onu-ulo Jiuda shihu ike; mu adzoo onu-ulo Jiosofu. Mu e-me g'ephe laphu azu l'onodu phe; kele mu a-phuru phe obu-imemini. Ephe e-mechaa du ge ndu mu eshidu jika ajika; kele oo mbedua bu Chipfu bya aburu Chileke phe; mu je l'azaje phe enu.

⁷Ndu Ifuremu e-mechaa du ge ndu ike du l'ogu; ɛhu e-mechaa tsahaa phe g'onye nguru mee. Unwu phe ahuma iya tee eswa; obu atsoahaa phe rikpotoo l'eka Chipfu.

⁸“Mu a-gbaru phe ola gude chibata phe; noo kele mu gbafutaru phe; ephe abya adu igwerigwe g'ephe shi duhawaa.

⁹A makwaru-a le mu chiru phe ghakaa l'echilabo ndiphe; ole ephe e-shichaa l'eka du enya nyata mu. Ephebedua ephe l'unwegirima phe a-wafu; ozo bu l'ephe a-lwa.

¹⁰Mu e-je le Ijiputu je achilata phe. Mu eje Asiriya je atutukobe phe. Mu a-chiru phe bya l'ali Giladu yele ubvu ubvu Lebanonu; ophu uzo a-sukpodaa phe nu anono.

¹¹Ɛphe a-ghata eze-enyimu iphe-ehuka ono; ole otu-kpereree mini ono be aa-byanyi; teme ogbu-mini enyimu Nayilu l'ophu atahukota gbengu. Eku-onwonye ndu Asiriya aburu iphe, e wozeru ali; teme ike ono, shi du ndu Ijiputu ono aburu phuchamu.

¹²Mu e-me; ike adu ndu Jiuda; teme o buru epha mu be ephe e-gude buru.” Nokwa iphe, Chipfu eepfu.

Zekaraya 11

¹Unube ubvu ubvu Lebanonu; unu ghashia uzo unu ghebegbaa onu k'ophu oku e-tsupyashi oshi sida unu!

²Unu kwaa ekwa unube oshi payinu; kele oshi sida daakwaru. Oshi ono, shi bugbaaru oshi, kporu akpaa ono be bukotaakwaa ola-l'iswi. Unu chia mkpu ekwa unube achi achi, nogbaa le Beshanu; kele eze oswa eze oswa be a sushichaakwaru.

³Unu ngabekpodapho nchi le mkpu, ndu eche aturu akpo; kele irwu-eswa ono, ephe echeje aturu ono be e mebyishiwaru. Unu numakpodapho ekiri, oduma asu; kele oke-egbudu, no l'aguga enyimu Jiodanu ono ghewaru onu.

Ndu eche aturu umadzu ebo

- ⁴Wakwa iphe, Chipfu, bu Chileke mu epfu: “Watanu eche aturu ono, e doberu k'egbugbu ono.
- ⁵Ndu abyaje azua phe nu azuje phe gbua egbugbu; o to dudu iphe, eeme phe. Ndu erekwanu phe nu nodu asuje: ‘G'ajaja bukwaru ke Chipfu kele anyi nweakwaru eku.’ Ophu ndu eche phe nu aphujeduru phe obu-imemini.
- ⁶Oo ya bu le mu ta aphueduru ndu ali-a obu-imemini ozo. Nokwa iphe, Chipfu eepfu. Mu e-woru onyemonye ye nwibe iya l'eka; yele eka onye eze iya. Epe e-gwe ndu ali-a arakabya; ophu mu adzotadu phe l'eka phe.”
- ⁷No iya; ndu ono, azuje aturu ono bya ere iya erere ono bya ebuta mu; mu byanu awata eche aturu ono, e doberu k'egbugbu ono. Mu chita oshi-mpaleka labo chiru. Mu gube nanu “n-yemobu” ; bya agua ophuu “atugba nanu” . No iya mu cheahaa ikpoto aturu obu.
- ⁸L'ime onwa ophu be mu gude chikashia umadzu eto eche aturu ono. Ikpoto aturu ono kpoo mu ashi; teme echeche phe lakwaa mu pho enyiru.
- ⁹Mu pfuaha sū: “Mu tee chekwa unu. G'onye ala maa larwukwaa agala; onye ala l'iswi alaa ola-gwoo. Ge ndu ophu phoduru nu riye anu nwibe phe.”
- ¹⁰Mu bya ewolita oshi-mpaleka mu ono ophu aza “n-yemobu” bya eworu iya nyajia; bya emebyia oghandzu, mu le ndiphe l'ophu gbaru.
- ¹¹O buru l'eswe mboku ono be e mebyiru iya. Ndu ono, azuje aturu ono bya ere iya erere, bu ndu ophu elekpoe mu pho enya teke ono maerupho l'oo Chipfu gude iphe ono, mu meru ono epfu opfu.
- ¹²Mu su phe: “O -buru l'o du unu ree; unu pfua mu ugwo mu; teke o to dudu; unu ahakpokwaro.” Epe pfua mu ukporo mkpola-ochaa le mkpola-ochaa iri.
- ¹³No iya; Chipfu su mu: “Woru iya je aturu okpu-ite; mbu ikpoto okpoga ono, epe gude zuba aswa ishi mu ono.” Mu byanu bya achiru ukporo mkpola-ochaa le mkpola-ochaa iri ono je awushi l'eze-ulo Chipfu; mbu mu woru iya turu okpu-ite.
- ¹⁴Mu byakwa bya agbajia oshi mkpaleka mu k'ebbo, bu ophu aza “atugba nanu” ; shi nno mebyia abu nwune, Jiuda yee Izurelu bu.
- ¹⁵No iya; Chipfu su mu: “Ngwa kwaa onwongu ngwa onye-eswe, eche aturu, bu onye adudu iphe, o bu;
- ¹⁶kele mu a-ku-lita onye eche aturu l'ali ndu-a, bu onye ata akpadu ishi aturu ono ndu ophu ala l'iswi; ophu ochedu ndu ophu eme kwekwee; ophu oomedu ndu mekaru iphe obvu g'ephe wekorohu; ophu onudu ndu ophu ehu du ike nri. Ochia iphe, onodu eme bu l'oo-nodu ata anu iya ke ndu ophu ehu du ike; aswoshi iya upyi-okpa iya.

¹⁷Nshio onye eche aturu ono, adudu iphe, o bu ono; mbu onye ono, agbaphujeru aturu ono! G'e gbukwaa ya ogu-echi l'eka; gbua ya ya l'anya ekutara! G'eka iya l'ophu nwuhukotakwa; enya ekutara iya apyahu rengurengu!"

Zekaraya 12

Eemebyishi ohogu Jierusalemu

¹Wakwa ozi, Chipfu ziru zidoru ndu Izurelu; mbu Chipfu, onye bu iya tosaru akpaminigwe; teme o buru iya toru okpa mgboko l'ophu; bya aburu iya kuru unme ye nemadzu l'ehu.

²O suru: "Lekwa; mu e-mechaa mee ndu Jierusalemu g'ephe du g'okoro mee, ephe a-ngu tuko akpo garigari; mbu iphe, bukpo ndu bukube phe nu. Ndu ono a-buru ohogu kephee Jiuda yee Jierusalemu mgburugburu.

³O -rwua mboku ono be mu e-me Jierusalemu g'o buru mkpuma, anyi oke erwa doru l'iphe ndiphe l'ophu. Iphe, bukpo ndu meru g'ephe nwuriberu iya; e-meka onwophe iphe-ehuka. Teke ono be ohamoha, no le mgboko l'ophu a-chikobe onwophe g'ephe tsoo ya ogu.

⁴O -rwua mboku ono be inya-ogu phe l'ophu be mu e-yekota ebvu; mu emee g'obvu byakota iphe, bu ndu agba l'eli iya. Nokwa iphe, Chipfu eepfu. Obenu le ndu Jiuda be mu a-nodu eletakpo enya okpobe eleta. Mu emee g'inya, ndiphe gude alwu ogu tsuhukota ishi.

⁵Noo teke ndu-ishi ndu Jiuda e-pfu l'ime obu phe su: 'Ndu Jierusalemu dukwa okpehu; kele Chipfu, bu Okalibe-Kakota-ike bu Chileke phe.'

⁶"O -rwua mboku ono be mu e-me ndu-ishi ndu Jiuda g'ephe kpo chiichiichii g'ite-oku, e shiberu l'oku; ozoo g'eka oku etsu eswa ereshi, e sweshiru esweshi. Ephe a-nodu ekepyashi ndu no phe l'ekutara; me ndu no phe l'ekicha; mbu iphe, bukpo ndu no-pheru phe mgburugburu; obenu le Jierusalemu e-keerupho jingujingu l'ali iya l'eka o keru.

⁷"Chipfu e-vukpodaru uzo dzotaada aka ndu Jiuda bu; k'ophu ubvu, aa-nodu akwabe onu-ulo Devidi yee ndu bu le Jierusalemu ata akadụ ke ndu Jiuda shii.

⁸O -rwua mboku ono be Chipfu e-gbobuta ndu bu le Jierusalemu; k'ophu bu l'onye kachaa arwuhu l'echilabo phe a-du okpehu ge Devidi; ndu onu-ulo Devidi edukwanu phe ge Ojozi ke Chipfu; ge Chileke l'onwiya.

⁹O -rwua mboku ono bu iphe, mu a-gbeshi ememe bu ge mu mebyishia ohamoha l'ophu, bu ndu etso Jierusalemu ogu.

¹⁰"Ozo bu le mu e-woru unme k'eze-iphe-oma; yele unme k'arwo arwo; wua l'onu-ulo Devidi; mu awua ya l'ehu ndu bu le Jierusalemu. O buru mube onye ono, ephe bvukashiru onya ono be ephe a-nodu ele enya l'eka; teme ephe araa ekwa mu g'onye ara ekwa nwa, bu iya nwa lanu; l'oorwua phe l'ehu shingushingu g'oorwuje onye ara ekwa nwa, bu okpara iya.

¹¹O -rwua mbọku ono bẹ ọzu-ẹkwa, aa-nọdu atụ lẹ Jierúsalemụ a-pa ẹka apaa. Oo-
dụepho g'ọzu-ẹkwa, a turu Hadadu-Rimonu lẹ nsuda Megido.

¹²Mbụ lẹ-a; ndu alị ono a-gụ aphụ; ipfu nonu ẹphe anọkobe agụ aphụ onwophe; ipfu
onu-ulo Dévidi ẹphe l'unyomu phe; ipfu onu-ulo Nétanu ẹphe l'unyomu phe;

¹³ipfu onu-ulo Lívayi ẹphe l'unyomu phe; ipfu onu-ulo Shimeyi ẹphe l'unyomu phe;

¹⁴mẹkpoo iphe, bukpo ipfu ono, phoduru nụ ono l'ẹhu l'ẹhu ẹphe l'unyomu phe
unyomu phe.”

Zekaraya 13

¹“O -rwua mbọku ono bẹ aa-sụ-furu onu-ulo Dévidi ọgba-mini; ẹphe l'iphe, bu ndu bu
lẹ Jierúsalemụ; gude iya safu phe iphe-ẹji phe; yẹ emerwu, ẹphe merwuwaru
onwophe.

²O -rwua mbọku ono bẹ mu e-me g'e be kujehẹ ọbvụ-agwọta ẹpha ekuku ophu l'alị-a;
ophu a byadu anyatabaa ya anyata ophu. Nokwa iphe, Chipfu, bu Ọkalibe-Kakota-Ike
eepfu. Ndu mpfuchiru ẹphe l'unme, aturwuje nemadzu bẹ mu a-tuko woshichaa g'ọ to
dụhe l'alị-a.

³Teke ọ bu l'ọ duru onye sụru lẹ ya epfuchikwaduru Chileke; ne iya lẹ nna iya, bu ndu
nwuru iya nụ asụ iya-a: ‘O to dukwa iphe, e-me g'i ti nwuhu; kele i dzuru ọka sụ lẹ
Chipfu pfuru iphe, o pfuduru.’ Teke ono, o gude iya l'ẹka eepfu ono bẹ nna iya ono;
yẹ ne iya ono, nwuru iya nụ ono a-nmagbu iya.

⁴O -rwua mbọku ono bẹ iphere e-gudeje ndu mpfuchiru l'udu iphe, ẹphe a-nọduje
ahuma. Ophu ẹphe eyeedu uwe ẹjí ẹjí ono, ẹphe gude edepushi ndiphe ono.

⁵Iphe, ọo-nọdu eepfu bu: ‘Mu ta abukwa onye mpfuchiru. Mu bukwa onye akọ opfu. O
kwa iphe, e metaru l'alị bẹ mu gude buru eshinu mu bu nwata.’

⁶Teke ọ duru onye jiru iya sụ iya: ‘? Ichi iphe ọwa-a, tukokwanuru ngu ẹhu-a
bukwanuru gunu?’ L'ọ sụ iya: ‘O kwa l'ibe onye mu l'iya eshi ọnyà bẹ e meru mu iphe
ono.’ “

Iphe, e chiru onye eche aturu; aturu iya gbakashihu

⁷“Gube ogu-echi; tehu etehu; tsoo onye ono, echeru mu aturu ono ọgu; ọ kwa onye
ono, nọ mu ntse ono bẹ mu sụru g'i tsoo ọgu. Nokwa iphe, Chipfu, bu Ọkalibe-
Kakota-Ike eepfu. Gbugbua onye eche aturu g'aturu agbakashihu. Mbẹdua amachia
ẹka buru ọhogu ndu ophu ha nwanshii.

⁸Ee-woru ndu bu l'alị-a mgburugburu kee ọzo ẹto; woru ọzo labọ gbushia; ọle ọzo
lanu l'ọzo ẹto ophu a-phodukwa l'ime iya. O kwa Chipfu eepfu.

⁹O buru ọzo lanu l'ọzo ẹto ono bẹ mu e-woru ye l'ọku; mu abya ahucha phe ahucha
g'onye ahucha mkpọla-ọchaa; bya ahua phe ama; g'onye ahụ mkpọla-ododo ama. Noo
teke ẹphe e-ku ẹpha mu; mu aza phe ẹnu. Mu a-sụ l'ẹphe bukwa ndibe mu; ẹphebedua
asụ lẹ Chipfu bukwa Chileke phe.”

Zekaraya 14

Chipfu abyaakwa aburu eze

- ¹Lekwa! Mboku ke Chipfu abyaakwa, bu mboku, aa-kwa iphe unu l'okwata nodu l'echilabo unu kee ya.
- ²Mboku ono be mu a-chikobe ohamoha l'ophu chiru jeshia Jierusalemu je g'ephe tsoo Jierusalemu ogu. Ephe alwua lwuta mkpukpu ono; toko iphemiphe, du l'ulo iya tutuchaa; pharwushia unwanyi phe k'okpehu. L'e kee mkpukpu ono ebo; kpua nanu le ndzu; ole ndu ophu phoduru nu ta adukwanu onye akpufu phe le mkpukpu ono.
- ³E -mechaa; Chipfu abya alufu je etsoo ohamoha ono ogu; egube ono, oolwuje me ogu nodu ada ono.
- ⁴O -rwua mboku ono be oo-gude okpa iya pfuru l'eli ubvu olivu, du l'uzo enyanwu-awawa ke Jierusalemu. Ubvu olivu ono abya ebukahụ ebo; e -shi l'uzo enyanwu-awawa jasụ l'uzo enyanwu-ariba. Echi iya aburu nsuda, a-ha ntumatu; kele ubvu ono eka lanu e-shi uzo isheli; eka lanu eshia ndohali.
- ⁵O buru nsuda ubvu mu ono be unu e-tsoru gbala; kele ogologo iya e-rwu Azelu. O buru udu oso, unu gbajeru teke ali nmajeru jijijiji teke Uzaya bu eze ndu Jiuda-a; noo udu oso, unu a-gba bu onoya. Noo teke Chipfu, bu Chileke mu a-bya; iphe, bukpo ndu du nsọ g'ephe ha etsokwaru iya pho abya.
- ⁶Mboku ono be iphoro taa dudu; ophu oyi atsudu.
- ⁷Eswe a-noduepho anwu eje. Mboku tee nweedu eswe; ophu oo-nweedu enyashi; kele nchi -jihuchakponu; iphoro adule-a. O buepho l'oo Chipfu maru mboku, oo-buru.
- ⁸O -rwua mboku ono be mini, doru risaa; anu ndzu e-shi le Jierusalemu asoshi. Oo-ke ebo; eka lanu aso ala l'eze-enyimu uzo enyanwu-awawa; ophuu aso ala l'eze-enyimu uzo enyanwu-ariba; l'osọ l'udzumini aso l'onanwu.
- ⁹O buru Chipfu a-buru onye eze ndu mgboko l'ophu. O -rwua mboku ono bu Chipfu lanu a-du; o buru epha iya kpoloko bu epha, aa-maru.
- ¹⁰Ali-a l'ophu; e -shikpo le Geba jasụ le Rimonu, bu ndohali Jierusalemu; a-dukota ge nsuda Araba. Obenu le Jierusalemu a-noduepho ephekerephe l'eka o no; e -shikpo l'oguzo Benjiaminu; je akpaa l'eka oguzo mbu du; jasụ l'oguzo mgbureku. L'osọ bya eshi le Ulo-ephekerephe Hananelu noo jasụ l'eka aapyishijeru onye eze akpuru vayinu.
- ¹¹Ee-bukotaru iya eburu. Ophu a byadu emebyishibaa ya oso. Obenu l'osọ to dudu iphe, byakporu eme Jierusalemu.
- ¹²Wakwa ejo iphe-ememe, Chipfu e-kpukposhi iphe, bukpo ndiphe, tsoru Jierusalemu ogu. Ephe a-pfujeru apfuru; anu, no phe l'ehu ereshihu. Enya phe echigaru l'onodu iya rehu erehu; teme ire anodu phe l'onu rehu.
- ¹³O -rwua mboku ono be Chipfu a-kpatsuje nemadzu ndzu-agugu. Onyenonu a-woje nwibe iya l'eka; ephe etsoaha nwibe phe ogu.

¹⁴Ndu Jiuda kwapho; a-ndu le Jierusalemu lwua ogo. Eku, epe kparu; mbu ohamoha, bupheru phe mgburugburu be aa-chikobekota; mbu le mkpola-ododo a-pa iya eka; yee mkpola-ochaa; yee ekwa, aanma anmanma.

¹⁵Egube ejo iphe-ememe ono, e kpukposhiru ndiphe ono be ee-kpukposhikwapho inya; yee inya-mulu; yee inya-kamelu; yee nkafu-igara; mekpoo iphe, bu anu, no l'eka epe kpoberu ulo-ekwa phe.

¹⁶Noo teke nwa ndu wafuru nu, shi l'ohamoha ono, shi etso Jierusalemu ogo ono; e-jeje Jierusalemu apha g'apha je abaru onye eze ono eja; mbu Chipfu, bu Okalibe-Kakota-Ike; epe ejekwapho abo Obo-Mkpù.

¹⁷O -duru ndu bu le mgboko-a, ejeduru Jierusalemu je abaru onye eze ono eja; mbu Chipfu, bu Okalibe-Kakota-Ike; igwe tee dzeduru phe mini.

¹⁸O -buru l'ipfu ipfu ndu Ijiputu te ejeduru ayiru l'abaru iya eja ono; Chipfu ekpukposhikwa phe pho ejo iphe-ememe ono, o kpukposhiru ohamoha ono, ejeduru abo Obo-Mkpù ono.

¹⁹Ono a-buru aphu, aa-nu ndu Ijiputu yee aphu, aa-nu ohamoha, te ejeduru Jierusalemu je abo Obo-Mkpù ono.

²⁰O -rwua mboku ono be iphe, ee-deje l'okunmee, inya nya l'olu bu: "iphe, duru Chipfu nsò." Ozo bu l'ite, eeshi ite l'eze-ulo Chileke a-dujeepho g'ochi, eegudeje epe mee, aduje l'iphu oru-ngweja.

²¹Iphe, bukpoote, nokota le Jierusalemu me le Jiuda a-duru Chipfu, bu Okalibe-Kakota-Ike nsò. Teme iphe, bukpoote ndu byaru egweru Chileke ngweja l'ahajeru wota ite ono gude shia anu ngweja. Ozo bu l'o -rwua mboku ono be ndu ngho taa duedu l'ulo Chipfu, bu Okalibe-Kakota-Ike.

Malakayi

Malakayi 1

N-yemobu Chileke l'ẹhu ndibe iya

¹Ọwa-a bụ ozi, Chipfu ziru Malakayi g'o zia ndu Ízurelu.

²Wakwa iphe, Chipfu epfu baa: “Mu yekwaru unu obu. “Unube ndibe mu a-sukwaro: ‘? Bụ gunu goshiru l'i yeru anyi obu?’ “ Ọle Chipfu sọru-a: “? Iso ta abudu yele Jiékoṣu bụ unwune? Ọle Jiékoṣu be mu yeru obu;

³Iso dukwanu mu ashi; k'ophu mu woru úbvú úbvú ono, bụ alí iya ono mee; ọ buri ochobu; mbu le mu woru okiphe iya ono haaru nkuta-ọswa, bu l'echiegu.”

⁴Oshilokpa Iso, bukwa iya pho bụ ndu Edomu a-sukwaro l'a maru-a l'e nwukposhiru mkpukpu phe; ọle ephe e-mezia iphe, mebyihuru emebyihu. Ọle ọ bụ; wakwanu iphe, Chipfu, bụ Okalibe-Kakota-Ike eepfu baa: “Ephe a-kpukwa iya bụ eviya; ọle ya e-gudee ya pho etsukposhi jasụ l'e kuahaa phe oha, ejo-iphe tsoru; oha ophu Chipfu a-ndu atụ-koshi oke ẹhu-eghu iya jasuru.

⁵Unubedua e-gude enya unu huma iya sụ: ‘Chipfu pakwaru ẹka; mbu daghata oke alí ndu Ízurelu.’ “

Abaru ndu bu uke mba

⁶“Sụ-a; nwa akwabejekwa nna iya úbvù; nwozi ndu akwabeje nnajiuphu iya úbvù. Ọ -buri le mu bụ nna unu; ? unu akwabeje mu-a úbvù, rwuberu mu nu? Teke mu bụ nnajiuphu unu; ? unu atsu mu-a ebvu, rwuberu mu nu?” Noo iphe, Chipfu, bụ Okalibe-Kakota-Ike eepfu. Ọ sukwapo-a: “Ọ kwa unube ndu bu uke akpo mube Chipfu ẹbo l'afu. “Obenu l'unu a-jikwaro sụ: ‘? Denu g'anyi gude akpo ngu ẹbo l'afu?’

⁷“Unu egudeje iphe, aaso nsọ bya mu agwagwa. “Unu a-jikwaa ozo sụ: ‘? Denu g'o gude ọ buri iphe, aaso nsọ?’ Unu asuje l'oru-ngweja mube Chipfu ta aduro iphe, ọ bụ.

⁸Mbu-a; g'unu akputaje iphe, atsu ishi kpuru bya agwaa mu; ? ono teke abudu emeswe, unu meswee mu? Tọo teke unu kputaru iphe, ete okpa; ọzo ophu iphe eme; gude bya agwaa mu; ? ono teke abukwarupho emeswe, unu meswee mu? Unu kpunuru ophu gbaru egube ono je akpee ndu-ishi unu phe. ? Ephe a-nafu iya-a unu l'eka meeru unu iphe-oma?” Noo iphe, Chipfu, bụ Okalibe-Kakota-Ike eepfu.

⁹“Sụ-a; unu gudewarọ egube ngweja ono je arwo Chileke g'o meeru unu eze-iphe-oma g'unu maeshikwaru; ? ọo-nata iya-a unu?”

¹⁰Chipfu, bụ Okalibe-Kakota-Ike sọru-a: “Ọ du g'a sụ l'onye lanu l'echilabo unu a-gbeshi je agu-chia eze-ulo mu; g'unu ta abahu iya je aphu-nwua oku gweeru mu ngweja iphoro l'oru-ngweja mu; noo kele iphe, unu eme duwaa mu ashi. Ophu ọ dukwa ngweja, unu gude bya, duru ophu mu abya anata.

¹¹Sụ-a; ọhamoha l'ophu; e -shikpoo l'eka ẹnyanwu awatajẹ jasu l'eka ọoribaje; bẹ a-makotakwaru l'epha mu parụ eka; mbụ l'iphe, bukpoọ ekameka bẹ ee-mechakwaa kpoo ùnwù-isensu oku nù mu l'uzo, dù mu ree; tẹme ephe egudekwapho iphe, dẹbe mu ree gude gweeru mu ngweja.” Noo iphe, Chipfu, bụ Okalibe-Kakota-Ike eepfu.

¹²“Obenu l'unubedua anoduje eme mu iphe-iphere. Unu asuje l'oru-ngweja mube Nnajiuphu ta adudu iphe, o bu. Teme unu nodu anuje mu iphe, aaso nsọ.

¹³Unu nodu asujekwapho: ‘Iphe owa-a buakwaa anyi ivu-erwa.’ Unu pfuchaa nno; bya agbakutaru mu azu akpo-yiru mu ukuvu.” Noo iphe, Chipfu, bụ Okalibe-Kakota-Ike eepfu. Teme o sukwapo le-a: “Teke unu kputaru iphe, e mekaru iphe; ozoo ophu ete okpa; ozoo ophu iphe eme; bya egude gweeru mube Chipfu ngweja; ? unu ari le mu a-nafu unu egube iphe ono l'eka too?”

¹⁴Sụ-a; o too dukwaru onye ono le ree; mbụ onye eregede ono, nweru iphe, bụ okee ya; o ribua nte le ya a-kpe iya Chipfu; e mechaa; o kpota ophu mkpaka dù l'ehu bya akpee ya.” Chipfu, bụ Okalibe-Kakota-Ike sukwaru-a: “Mu bukwa onye eze, parụ eka apaa! Mu gbakwaru g'ohamoha a-nodu atsuje mu ebvu.”

Malakayi 2

¹“Owaa bukwa eka; mu nodu alo iya unu le nchi unube ndu bu uke.

²Unu -angabeduru mu nchi; mbụ-a; unu -egudedu obu unu g'o ha akwabẹ mube Chipfu, bụ Okalibe-Kakota-Ike ùbvù” ; bẹ “mu a-tukwa unu onu; tukwapo onu l'iphe, ndiphe abyaje unu anunu. Mbụ-a; mu tukwaru iphe ono onu obu atutu; kele unu te egudedu obu unu g'o ha akwabẹ mube Chipfu ùbvù.

³“Oo unu a-kpata iphe, mu e-mechaa nua awa unu aphu. Mu e-woru nshi-iphe, unu egudeje agwa mu techishia unu iphu. L'aa-tuko unu le nshi obu bvuta je akube l'ikpozu.

⁴Noo teke unu a-maru l'iphe, mu gude loo unu eka le nchi-a bu g'ogbandzu mu le ndiche unu phe, bu ndu Lívayi apfuru g'o pfuru.” Noo iphe, Chipfu, bụ Okalibe-Kakota-ike eepfu.

⁵“Le mube Chipfu bẹ mu le ndiche unu phe gbaakwaru ndzu. Ogbandzu ono buru le mu a-nu phe ndzu nu phe ehuguu. Mu mechakwaa nukota phe iya ge mu pfuru. Epebedua kwetakwanu l'ephe a-nodu akwabeje mu ùbvù. Epe kwabekpoo mu ùbvù obu ree bya atsua mu ebvu l'orwuberu iya.

⁶Iphe, ephe shi ezije buru iphe, bu okpobe opfu; ophu o dudu ntuphu-ire, a numajeru phe l'onu. Mu l'ephe swikpoo oswi; ehuguu du phe guu; tẹme o buerupho iphe, pfuru oto bẹ ephe shi emeje. Epe mee ikpoto nemadzu; ephe haa iphe-eji phe.

⁷“Kele iphe, gbaru onye bu uke bu g'o meje ge ndiphe maru iphe; k'ophu ephe e-shi iya l'eka ngabe nchi l'iphe, bu: e -mee ya l'o du Chileke ree; eshinu o bu iya bu onye-ozu Chipfu, bụ Okalibe-Kakota-Ike.

⁸Obenu l'unu hawaru ụzo shiahaa ọphu abụdu iya nū. Unu gudewaa iphe, unu ezi mee ndu dū igwerigwe; ẹphe meahaa ẹjo-iphe. Unu te edobeęduru ọgbandzu, mu ẹ Lívayi gbaru.” Noo iphe, Chipfu, bụ Ọkalibe-Kakọta-Ike eepfu.

⁹“Mbua; mu haakwaru ndu Ízurelu g'ẹphe ha g'ẹphe mee unu ujikputeru; g'ẹphe mee g'unu bụru ndu e wozeru alị; kele unu tee mejedu iphe, mu sụru g'unu meje. Ọchia iphe, unu wataru ememe bụ l'unu aboje nemadzụ ẹbo mę unu -nọdu ezi ekemu mu.”

Adu gheleghelehe, ke ndu Jiuda l'iphu Chileke

¹⁰“Sụ-a; ? tọ bụdu nna lanu be anyi tukoru nweru? ? Tọbudu Chileke lanu tukoru g'anyi ha mee? ? Denu g'o gude anyi nọdu arwutoshi ọgbandzu, shi ẹ ndiche anyi phe; mbu o nọdu abujeru: anyi -kwechaa nwibe anyi ukwe-iphe; anyi tee meedu iphe, anyi kweru ukwe iya?

¹¹“Ndu Jiuda te emekwa iphe, ẹphe kweru ukwe ememe. Eemeakwa ẹbyi ẹbyi l'ime mkpukpu Jierusalemu. Teme ẹbyi obu dzuwaru alị ndu Ízurelu gbaa mgburugburu. Mbụ ẹ ndu Jiuda; mbụ ndu ono, Chileke hotaru; teme ẹphe bụru ndu o yeru obu ono; woakwaru onwophe pharwushia; kele ẹphe jeru je aluhaa unwanyi, shigbaa l'oha, agwa nshi.

¹²Sụ-a; gube onye eme egube iphe ono; m'o rwuharu i bụru onye; ge Chipfu mekwaa g'i chihu l'alị ndu Jiékpọ l'ophu; g'egube onye ono te egudebaekwa iphe bya agwa Chipfu, bụ Ọkalibe-Kakọta-Ike.

¹³“O dukwarupho ẹjo-iphe ọzo, unu emekwapho. Unu anọduje l'oru-ngweja Chipfu raa ekwa; ẹnya-mini aso l'eli ẹka ono gborogboro. Unu anodu iya kwaa ekwa; chia mkpu; opfu ẹ Chileke ta aghajedu ẹnya lee l'eka unu no agwa iya; teme iphe, unu gude agwa iya be o too nafujedu unu l'eka ililekpoo.

¹⁴Ii-jikwaro sụ: ‘? Ishi iya-e?’ Ishi iya bụ ẹ Chipfu humawaru iphe, i meru nwanyi ono, i luru l'okorobyia ono. I no l'iphu iya; unu l'iya gbaa ndzu; ole i tii meeduru iya iphe, i kweru ukwe l'ii-nodu emeru iya. Ole o kwa iya bụ onye ẹbo ngu; mbu nyee ngu, unu l'iya gbaru ndzu l'iphu Chipfu.

¹⁵“? O kwa ẹ Chipfu mewaru unu n'ẹbo g'unu bya aburu onye lanu; obu unu buri nanu gu ẹ nwanyi ono? ? Bu gunu meru g'o gude o mee; unu buri nanu obu? Oo kele oole ẹnya g'a nwushia unwegirima, a-buru ndu a-nodu atsụ Chileke ebvu. Oo ya bu; unu kpokwaa egomunggo okpolohu; g'o tọ duhekwa onye ahaje eme iphe, o kweru ukwe ẹ ya e-meru nwanyi, o luru l'okorobyia.

¹⁶“Wakwa iphe, Chipfu, bụ Chileke ke ndu Ízurelu epfu baa: Asu: ‘Je ẹ mu ta aluhedu’; adujekwa mube Chipfu ashi. Teme o nodu adujekwa mu pho ashi; mbu nwoke, duru nyee ya ehuka.” Noo iphe, Chipfu, bụ Ọkalibe-Kakọta-Ike eepfu. “Oo ya bu; unu dekwaa ẹnya ẹ mini; unu ta ahajekwa eme iphe, unu kweru nwibe unu ukwe l'unu e-meeru iya.”

Epfu k'onye e-mechaa bya nu

17“Unu epfuchinukaakwa Chipfu nchi. “Unu a-jikwaro su: ‘? Denu g'anyi gude epfuchi ngu nchi obu?’ Unu asuje l'iphe, bukpo ndu eme ejo-iphe dukota Chipfu ree; teme iphe, ephe eme nodu atsoje iya utso. Ozo buru l'unu anoduje aji su: ‘? Bu awe be Chileke ono, ekpeje ikpe, pfuru oto ono nohunu?’ “

Malakayi 3

1Wakwa iphe, Chipfu, bu Okalibe-Kakota-Ike eepfu: “Unu humakwa iphe, mu abya ememe. Mu e-zi onye-ozu mu g'o je aboru mu uzo l'iphu. Noo teke o to duedu g'oo- no-beru; Nnajiuphu ono, unu ele enya iya ono abata l'eze-ulo iya; mbu onye-ozu ono, oogu unu g'a su l'o byaru ono, bu onye a-bya araaru unu k'ogbandzu mu l'unu ono arara.”

2Obenu ? bukwanu onye a-du ike nahu ikpe iya ono mboku ono? ? Bu onye a-suru iya akpafu l'iphu me o -byaepho? Noo kele o -byaepho be oo-du g'oku-uzu; ozo ge okpobe ncha, eegudeje asa iphe.

3Oo-hucha ndu bu uke ahucha; mee phe g'ephe gbuchafu egube-a, onye akpu uzu ahuje mkpola-ochaa l'oku gude mee ya l'o gbuchafu-a. L'o bya emee phe; ephe egbuchafu du ge mkpola-ododo yele mkpola-ochaa, onye akpu uzu huru l'oku-uzu jasu o gbuchafu bya aburu okpobe iya. Noo teke Chipfu e-nweru ndu a-pfube-eka-oto gwaahaa ya.

4Teme ngweja, ephe a-nu Chileke; mbu ndu Jierusalemu; waa ndu Jiuda mgburugburu a-buru ophu Chipfu a-nataje g'o shi anatajehawa iya teke ndiche.

5Mbu le Chipfu, bu Okalibe-Kakota-Ike sukwaru-a: “Mu akpitaakwaru unu ntse abya ekpe ikpe. Mu e-mekwa egwegwa bya atua ndu-a jala; mbu ndu agwo nshi; me ndu eri ogori; me ndu akpapyabeje iphe, ephe meru gua enwa; me ndu abujeru: e - jechaaru phe ozi; ephe apfu-pete ndu jeru phe ozi ugwo; me ndu bu unwanyi, ji phe anodu yele unwu-ogbee, enweddu nna; be ephe anoduje emekpa eh; me ndu ekpeje ndu byaru abyabya ikpe, apfuduru-oto; yele iphe, bu ndu ta atsudu mu ebvu ililekpo.”

Apfu oke-lanu-l'uzo-iri

6“Su-a; mube Chipfu taa gbanwekwa agbanwe. O kwa iphe ono meru g'o gude ophu unube oshilokpa Jiekopu achihuduru.

7E -shi le nna unu oche phe be unu shikwa; ophu unu emejeedu iphe, mu suru g'unu meje. Unu lwanu azu lwafuta mu; ge mu a-lwafuta unubedua.” Noo iphe, Chipfu, bu Okalibe-Kakota-Ike eepfu. “Unu a-jikwaro su: ‘? Anyi a-lwa azu ilwaghaa ya?’

8“Mu suru-a: ? O du ree me nemadzu nodu ana Chileke nfu to? Ole unu anakwaro mube Chileke nfu. “Unu a-jikwaro su: ‘? Anyi ana ngu nfu ina-agma?’ “Unu te ekejedu iphe unu uzo iri nu mu oke lanu; ophu unu anujedu mu iphe.

9Su-a; unu buakwaa ndu a turu onu; mbu oha unu l'ophu; kele unu tukoeurpho ana mu nfu.

¹⁰Unu t̄konu oke-lan̄-l'uzo-iri unu g'ò ha wobata l'ùlo mu k'òphu nri a-d̄ l'eze-ùlo mu. Unu menaa ya gude h̄a mu ama maeshikwaru ? mu taa ḡhaduru unu ̄zo, d̄gbaa l'imigwe; dzeeru unu iphe-oma jas̄ unu tee nwēduru ̄ka unu e-dobegbabe iya." Noo iphe, Chipfu, b̄ Ọkalibe-Kak̄ota-Ike eepfu.

¹¹T̄eme Chipfu ono, b̄ Ọkalibe-Kak̄ota-Ike ono s̄kwapho-a: "Mu e-mekwapho g'̄unwehu ta atapyash̄he iphe, unu meberu l'al̄; t̄eme mu emekwapho ḡe vaȳinu unu m̄ja wogalaa.

¹²Noo teke ohamoha a-wata unu eku ndu Chileke keberu l'oma; kele al̄ unu a-b̄aharu ̄ka aḡ eḡu eburu." Nokwa iphe, Chipfu, b̄ Ọkalibe-Kak̄ota-ike epfu.

Ọnu-oma Chileke aḡoru ndu p̄f̄uberekoto

¹³Wakwa iphe, Chipfu epfu baa: "Unu p̄f̄ushiakwaru ejo opfu, d̄ igwerigwe kpua mu. "Unu a-j̄ikwaro s̄: '? B̄ ejo opfu, d̄ idu-agma b̄e anyi p̄furu kpua ngu?"

¹⁴"Unu s̄ru-a: 'l'ejeru Chileke ozi b̄ ejeswash̄ ọkpa. S̄-a; ? b̄ gunu b̄e anyi ritaru l'ememe, anyi emeje iphe, i p̄furu; ȳe an̄ono, anyi an̄oduje ȳokoo l'iphu Chipfu, b̄ Ọkalibe-Kak̄ota-Ike g'onye aph̄ tsoru?"

¹⁵L̄e nta-a b̄chikwanu ndu anyi kuru ndu iphe kweru b̄ ndu eku onwophe. Mb̄ l'ò t̄o b̄ledu-a l̄e ndu ejo-iphe aba yooyooyoo; obenu l'òobujeru; ephe -h̄uchaa Chileke ama; ọ t̄o d̄udu iphe, oo-me p̄he.' "

¹⁶T̄obudu iya b̄; ndu ọphu ats̄kwanu Chipfu ebvu bya awata ab̄ ̄ja l'onwophe l'onwophe. Chipfu t̄ufuepho nch̄i n̄uma iphe, ephe epfu. A bya edee iphe l'ekwo l'iphu Chipfu; mb̄ iphe, ee-gudeje nyata ndu ono, ats̄ Chipfu ebvu bya akwab̄e iya ̄bv̄u ono.

¹⁷Chipfu, b̄ Ọkalibe-Kak̄ota-Ike bya epfua opfu ̄hu p̄he s̄-a: "Ephe a-b̄kwaru nkemu. Mb̄ l̄e mb̄oku, mu a-bya agbazi ̄ku mu ono b̄e mu a-ḡkwaru p̄he ye l̄e ndu b̄ nkemu. Mu emeeru p̄he eze-iphe-oma egube ono, nna emejeru nwa iya, kweru nkiya ono.

¹⁸Noo teke unu a-h̄uma iphe, d̄ iche l'̄ka ndu p̄f̄uberekoto ȳe ndu ejo-iphe n̄o b̄ ono. Unu ah̄makwapho iphe, d̄ iche l'̄ka ndu ejeru Chileke ozi; ȳe ndu te ejeduru iya ozi n̄o."

Malakayi 4

Mb̄oku, Chipfu e-kpe ikpe

¹Chipfu, b̄ Ọkalibe-Kak̄ota-Ike eepfu s̄a: "Unu h̄umakwa! Ọ d̄kwaru eswe mb̄oku, l'a-bya n̄. Mb̄oku ono a-ta p̄f̄upfupfu g'òku-uzu. Ndu eku onwophe yele iphe, b̄kpoo ndu eme ejo-iphe mgburugburu b̄e ọku a-v̄u l'ogbarabvu mb̄oku ono kee p̄he kee ̄kali p̄he.

²A bya l'unub̄e ndu ats̄ ep̄ha mu ebvu; ọo unu b̄e e-gude ̄nya unu h̄uma ap̄f̄ubekoto k̄e Chipfu. Ọo-n̄odu egbu nw̄inwii g'̄enyanwu l'̄hu unu. L'ò mee; ̄hu ad̄kota unu ike. Unu a-w̄u wugelengu-wugelengu ḡe nweswi nsh̄i, a kp̄ofutaru l'̄ka.

³Ọ bụru mbọku ono, mu a-bya ono bẹ unu a-kapyabẹ ndu ẹjo-iphe ẹnya; unu egwee phẹ uji; woru phẹ zọpyabe l'ọkpa; nokwa iphe, Chipfu, bụ Ọkalibe-Kakọta-ike epfu.

⁴“Sụ-a; unu ta azọhakwa ekemu ono, mu tųru nų onye-ozu mu, bụ Mosisu ono; mbụ ekemu; waa omelalị ono, mu goshiru iya l'úbvú Horebu g'o je ezia unubẹ unwu Ízurelu g'unu meje ono.

⁵“Ọle ọ bụ; a -bya erwu eze mbọku, eye ebvu ono, mu e-me iphe ono bẹ mu e-ziadakwa onye mpfuchiru mu, bụ Elayijia g'ọ bya.

⁶Ọ bụru iya e-me ndu bụ nna g'ẹphe woru ọkpoma phẹ nų unwu phẹ; tẹme l'o mee g'unwegirima wokwarupho obu phẹ nų nna phẹ. Ọdumeka bẹ mu -bya bẹ mu a-tụ-byikwa alị unu l'ọnu.”

Izii - All Bible

Matiyu

Matiyu 1

Ochochoroche Jizosu Kéreshi

(Luk 3:23-38)

- ¹Owa-a bu eri Jizosu Kéreshi, Nwa Dévidi, oshilokpa Ébirihamu.
- ²Ébirihamu bu nna Áyizaku; Áyizaku buru nna Jiékoṗu; Jiékoṗu buru nna Jiuda yee unwunna iya.
- ³Jiuda bu nna Pérezu yee Zera. Ne, nwuru ephenebo ono bu Tama. Pérezu buru nna Hézeronu; Hézeronu buru nna Arámu.
- ⁴Arámu bu nna Amínadabu; Amínadabu buru nna Náshonu; Náshonu buru nna Sálumonu.
- ⁵Sálumonu bu nna Bówazu. Ne Bówazu bu Réhabu. Bówazu buru nna Óbedu. Onye bu ne iya bu Rutu. Óbedu buru nna Jiesi;
- ⁶Jiesi bu nna onye eze ichée ono, bu Dévidi. Tòbudu iya bu; Dévidi bukwanuru nna Sólomonu. Onye bu ne Sólomonu bu nwanyi ono, shi buru nyee Uráya ono.
- ⁷Sólomonu bu nna Rehobówamu; Rehobówamu buru nna Abáyijia; Abáyijia buru nna Asa.
- ⁸Asa bu nna Jiehoshafatu; Jiehoshafatu buru nna Jióramu; Jióramu buru nna Uzáya.
- ⁹Uzáya bu nna Jiótamu; Jiótamu buru nna Éhazu; Éhazu buru nna Hezekáya.
- ¹⁰Hezekáya bu nna Manáse; Manáse buru nna Émosu; Émosu buru nna Jiosáya.
- ¹¹Jiosáya bu nna Jièkonáya; waa unwune iya; teke ono bu teke a kpukoru ndu Ízurelu laa alì Bábilonu.
- ¹²Tòbudu iya bu; a kpukochaepo ndu Ízurelu laa alì Bábilonu: Jièkonáya buru nna Shiyálutiyele; Shiyálutiyele buru nna Zerúbabelu.
- ¹³Zerúbabelu bu nna Abíyudu, bu iya bu nna Eláyekimu; Eláyekimu buru nna Azọ.
- ¹⁴Azọ bu nna Zédoku; Zédoku buru nna Ákímu; Ákímu buru nna Éliyudu.
- ¹⁵Éliyudu bu nna Eliyéza; Eliyéza buru nna Mátanu; Mátanu buru nna Jiékoṗu.
- ¹⁶Jiékoṗu bu nna Jiósefu, bu ji Meri. Meri bu iya bu ne Jizosu, bu onye eeku Kéreshi.
- ¹⁷Oo ya bu l'ogbo, dukpoo adudu e -shi le teke ke Ébirihamu jeye le Dévidi bu ogbo iri l'eno. E -shi l'ogbo ke Dévidi jeye le teke a kpukoru ndu Ízurelu laa alì Bábilonu du

ogbo iri l'eno; e -shikwanu le teke ono, a kpukoru phe laa ali Babilonu ono jasụ l'ogbo ke Kereshi obu bukwarupho ogbo iri l'eno.

Anwunwu Jizosu

(Luk 2:1-7)

¹⁸Waa g'e gude nwua Jizosu Kereshi baa: Jiosesu jeru l'eka Meri, bu ne Jizosu jebua. Ophu o toko dutakwanu iya; k'ophu yee ya kwajewaru. A bya l'amaru; Meri obu duwanu ime. O buru Unme-du-Nso be ime ono shi l'eka.

¹⁹Ji iya, bu Jiosesu bu onye pfuberekoto. O nodu emekwanu ge ya te eme Meri iphe-iphere l'edzudzu-oha. O chokashiahaa ge ya e-shi jika alu Meri g'a ta ma.

²⁰O gudekwadu iya ariri; ojozi-imigwe, shi l'eka Nnajiuphu byapfuta iya le nrwọ bya asu iya: “Jiosesu; Nwa Dévidi; ge ndzu eduta Meri je aluru ta agushi ngu. Nwata ono, o du ime iya ono bukwa Unme-du-Nso be o shi l'eka tsuta iya.

²¹E -mechaa be oo-nwu nwa-nwoke. Iphe, ii-gu iya bu Jizosu. Noo kele oo-dzota ndu nkiya l'eka iphe-eji, ephe meshiru.”

²²Iphemiphe ono mee o vua; mbu iphe, Nnajiuphu shi l'onu onye mpfuchiru iya pfua, bu iya bu iphe ono, e pfuru su:

²³“Huma le nwamgboko, yee nwoke teke akwaswee a-tsuta ime nwua nwa nwoke; iphe, aa-gu iya bu ‘Imanelu’, bu iya bu ‘Chileke no swiru anyi’.”

²⁴Jiosesu tehuopho le mgbenya ono bya emee g'ojosi-imigwe, shi l'eka Nnajiuphu suru g'o mee. O je edulata Meri teke ono bya aluahaa.

²⁵Ophu yee ya akwajeduru jasụ o zeda nwua nwa nwoke ono. Jiosesu woru iya gua Jizosu.

Matiyu 2

Ndu mmamiphe, shi l'uzo enyanwu-awawa

¹Tobudu iya bu; o buru teke Herodu shi buru eze be a nwuru Jizosu le mkpukpu Betulehemu. Mkpukpu ono no l'ali Jiudiya. A nwuchae ya pho; ndu mmamiphe, shi l'uzo enyanwu-awawa byatashia Jierusalemu. Ephe rwua bya akpakashiahaa ishi asuje:

²“? Denu nwata obu, a nwuru-a, bu Eze ndu Jiu-a? Anyi humaru kpokpode iya l'uzo enyanwu-awawa. Anyi byatashia g'anyi baaru iya eja.”

³Tobudu iya bu; eze, bu Herodu numaepho iphe ono, ephe pfuru ono; ehu gbangahu yee ndu Jierusalemu l'ophu.

⁴O bya ekukoo ndu-ishi uke Chileke mgburugburu me ndu ezije ekemu oha. Ephe bya edzugbua. O jahaa phe eka aa-nwukpoo Kereshi obu.

⁵Ephe su iya: “Eka aa-nwu iya bukwa le Betulehemu, no le Jiudiya. Noo kele onye mpfuchiru Chileke deru iya lekwo su:

6“Gube Bětulehemu, nọ l'alị Jiudiya; Ọ tọ dudu g'e meru, ọ bukwađu gubedua bẹ ẹnya kachaa alwalwa l'iphe, bu mkpukpu, nweru ẹnya l'alị Jiudiya. Ọo l'ime ngu bẹ onye-ishi e-shi lufuta, bu iya bu onye-ishi, a-nọdu eleta ndibe mu ẹnya; mbu ndibe mu, bu Ízurelu.

7“Tọbudu iya bu; Herodu bya ekua ndu mmamiphe ono, shi l'uzo ẹnyanwu-awawa ono lẹ mpya bya akpafuta phe ishi egube teke kpokpode ono lufutakpooru gedegede. Epe kochaaru iya ya;

8ọ bya ezia phe su g'ephe jeshia Bětulehemu obu. Su phe: Unu je atokpoephe ehu choo nwata obu. Unu -huma ya pho; unu alwa azu bya akaru mu; k'ophu mu e-jekwapho je abaarụ iya eja.”

9Noo ya; epe numabekpoephe ozi ono, eze ziru phe ono; ọ buru phe atugbu. Epe lufutaephe; gube kpokpode ono, epe humahawaruro l'uzo ẹnyanwu awawa pho wafutakwa ozo bya evutakwaru phe pho uzo ozo. O jekpoephe gbiriri jasụ o jerwua eka nwata ono nọ. O keshiru l'eka ono kelerupho jingu jingu l'imeli.

10Epe humaephe kpokpode ono; ehu tsoo phe ntumatu. Epe wata ete eswa.

11Epe bya abahu l'ime ulo ono; bya ahuma nwata ono yele Meri, bu ne iya. Epe bya egbushi ikpere l'alị; baaru nwata ono eja; bya ekpuhaa eđa, epe yeru eku phe bya emeeru nwata ono iphe-oma. Iphe, epe nuru iya bu; mkpola-ododo waa unwu furankisensu; waa unwu meru.

12E mechaa; Chileke byapfuta phe lẹ nrwo su g'ephe ba alaphuekwa azu l'ibe Herodu. Epe kwe hm; tugbua shia uzo ozo; ọ buru phe ala alị phe.

Jiósẹfu phe ala alị Ijiputu

13Tọbudu iya bu; ndu mmamiphe ono tugbuepho; ojozi-imigwe, shi l'eka Nnajiuphu byapfuta Jiósẹfu lẹ nrwo bya asu iya: “Jiósẹfu; gbeshi duta nwata ono yele ne iya gbaru lashia Ijiputu je eburu l'eka ono jasụ teke mu e-zi unu g'unu lwatashia. Lẹ Herodu e-mechakwaa choo nwata ono l'ẹnya mee ge ya megbua ya.”

14O rwua l'enyashi iya ozo; Jiósẹfu gbeshi duta nwata ono yele ne iya; ọ buru phe ala Ijiputu.

15Ọ buru l'eka ono bẹ epe nọru jasụ Herodu nwuhu. Ọ buru iya bu iphe ono, onye mpfuchiru Chileke pfuhawaru ono je avua. L'ọ sụru: “Ọo l'alị Ijiputu bẹ mu jeru je ekua nwa mu nwoke ono.”

Egbushi unwegirima-nshji lẹ Bětulehemu

16Tọbudu iya bu; a nonyaephe; Herodu maru lẹ ndu mmamiphe ono bẹ bu edeha bẹ epe deharu iya. Ọ voru oku wua ehu. O woru ekemu tua. E je egbushikota iphe, bukpo unwegirima unwoke, a nwuru l'alị Bětulehemu l'ophu me ndu a nwuru lẹ mkpukpu ozo, nọ-pheru phe mgburugburu. E shi lẹ ndu ophu, a nwuru k'ophúú gbushia phe je akpaa lẹ ndu ophu nọwaru apha labo. Iphe, o gude mee ya nno bu ajiji pho, ọ jiru ndu mmamiphe pho; epe kooru iya teke kpokpode ono beberu futa pho.

¹⁷Ọ bụru ẹgube ono bụ g'o shiru vwa mbụ iphe ono, Jieremaya bụ onye mpfuchiru Chileke pfuhawaru sụ:

¹⁸“A nūmaru ụzu-ẹkwa ị Rama; mbụ ẹkwa anwuhu mę oke nggumaphu; Ọ bụru Rechielu l'ara ẹkwa unwu iya; ophu o kwedu g'e gbobuta iya egbobuta; opfu l'unwu iya bvueberu.”

Alwalwa, Jiósefu phẹ

¹⁹Noo ya; Herodu nwuhuepho; ojozi-imigwe, shi l'eka Nnajiuphu byapfuta Jiósefu ị nrwọ ị Ijiputu; bya asụ iya:

²⁰“Jiόsefu; gbęshi duru nwata ono yele ne iya lashia alı İzurelu; ị ndu shi achọ ishi nwata ono bę nwushihuakwarunu.”

²¹Ọ gbęshi duta nwata ono yele ne iya o bụru phẹ ala alı İzurelu.

²²Tobudu iya bụ; Jiόsefu nūmaepho ị nwatibe Herodu, bụ Akileyosu bę bụ eze ndu Jiudiya l'ozori nna iya, bụ Herodu; ndzụ eje eburu l'eka ono guahaa ya. A bya anmabaaru iya okwa ozo ị nrwọ. Ọ bụru iphe ono, meru g'o gude o tugbua; o bụru iya ala Gálili.

²³Ọ rwua je eburu ị mkpukpu, eekuje Nazaretu. E shi ẹgube ono; iphe, ndu mpfuchiru Chileke pfuhawaru vwa. L'ephe pfuru sụ: “Ee-ku iya Nwophu Nazaretu.”

Matiyu 3

Ozi Jionu, onye emeje baputizimu eezi l'echiegu

(Mak 1:1-8; Luk 3:1-18; Jiön 1:19-28)

¹Ọ bụru teke ono bę Jiönu ophu emeje baputizimu byaru bya anodu l'echiegu Jiudiya bya awata epfu opfu Chileke sụ:

²“G'izimanu iphe-ęji unu lwa unu azu g'unu ghaa umere lwapfuta Chileke ị Chileke abyaakwaa egoshi ị ya bụ eze.”

³Ọ kwa Jiönu bụ onye ono, Azaya, onye mpfuchiru Chileke pfuru opfu iya sụ: “Ọ duru onye ara iya arara l'echiegu sụ: ‘Unu meziaru Nnajiuphu ụzo. Unu mee gbororo iya g'o dugbaa nhamunha.’ “

⁴Noo ya; uwe, Jiönu eyeje l'ehu bụ uwe, e meru l'ęji inya-kamelu; l'o gude akpo-anu tubuta iya l'upfu. Ọ bụru igube yele manụ-ęnwu abujeru nri iya.

⁵Tobudu iya bụ; ndu Jierusalemu l'ophu; mę ndu Jiudiya; mę ndu bu ị mgboru Jiódanu mgburugburu tuko zefutakota wu-pfutashia ya.

⁶Ephe nodu akoshi iphe-ęji, ephe meshiru; o nodu emejegbaa phẹ baputizimu l'enyimu Jiódanu.

⁷Tobudu iya bụ; o hūmaepho ikpoto ndu Fárisii waa ndu Sadiusii, awu abya g'e mee phẹ baputizimu; o sụ phẹ: “Unube unwu, ęjo agwo nwushiru-a. ? Bụ onye karu unu g'unu gbalaaru oke-ęhu-eghu ono, Chileke a-tukoshi unu mboku, ọo-nma mgboko ikpe ono?”

⁸Unu mĩa amĩmi g'oshi-õmi. Mebyi, unu aa-mĩ bũ eme umere, goshiru l'izimanũ iphe-
eji unu lwawaru unu azu; unu lwapfutawaa Chileke.

⁹Unu ta arikwa k'asũ: ‘? Ɔ kwa lẹ Ébirihamu bũwanu onye-iche anyi phẹ.’ Unu ta
amakwa l'o -beta g'ò tọ dũ bẹ Chileke a-dũ ike meshia mkpuma-a g'ò nwushia unwu,
a-buru unwu Ébirihamu.

¹⁰Mbũ lẹ nta-a bẹ a dabẹakwaru ogbunkũ l'ogbarabvu iphe, bũkpoo oshi. Oshi ophu
amĩduru mebyi, dũ ree; l'ee-gbutsua ya chie l'oku.

¹¹Mbèdua bũkwa mini bẹ mu egudeje eme unu baputizimu gude goshi l'izimanũ lwarũ
unu azu l'iphe-eji, unu meshiru; unu lwapfutawaa Chileke. Obenu l'onye ophu abyanũ
bẹ ka mu l'ishi ka mu l'okpa. Onye mu ta adũkpodanu iphe, mu bũ kẹ gẹ mu vuru
akpọkpa iya tso iya. Onye k'ono l'e-gude Unme-dũ-Nsọ waa oku mee unu baputizimu.

¹²O gudewaa ajakpa, oo-gude phũshia ẹswa lẹ bali; vuta ophu bũ bali vuba l'ulo iya;
kpota ẹswa iya kporu ye l'oku, ata nyihudu anyihu.”

Jionu eme Jizosu baputizimu

(Mak 1:9-11; Luk 3:21-22)

¹³Tobudu iya bũ; Jizosu shi lẹ Gálili byatashia Jiordanu gẹ Jionu mee ya baputizimu.

¹⁴Jionu meahaa g'ò jika sũ iya: “Ɔ chia mbèdua bẹ gbaru kẹ gẹ mu byachia g'i mee
mu baputizimu; ì gbẹchia abyapfutachia mu.”

¹⁵Ole Jizosu sũru iya: “Haarọ g'e mee ya rọ ẹgube ono nta; kẹle ono g'anyi e-shi
meebekota iphemiphe, bũ iphe, pfũru-oto.” Tobudu iya bũ; Jionu kwetanũ.

¹⁶Emeghe, eemeghe Jizosu baputizimu ono; o shiẹpho lẹ mini ono rwufutashia; igwe
bukahaẹpho ẹbo gheru onu. Ɔ hũma Unme Chileke g'ò dũẹpho gẹ ndo pheẹpho phaa
phezeta bya anodu iya l'ẹhu.

¹⁷Noo ya; a nũma olu-opfu, shi l'imigwe ono sũ: “Ɔwa-a bũ Nwa mu nwoke, mu yeru
obu. O jiru mu ẹpho.”

Matiyu 4

Ama, Obutuswe aahũ Jizosu

(Mak 1:12-13; Luk 4:1-13)

¹Tobudu iya bũ; Unme Chileke bya eduta Jizosu duba l'echiẹgu gẹ Obutuswe hũa ya
ama.

²O rwua ẹka ono je anọo ukporo abali labọ: eswe l'enyashi; swikota ẹgu. E mechaa;
ẹgu guahaa ya.

³Nwandale byapfuta iya bya asũ iya: “Ɔ -buru l'ì bũ Nwa Chileke; sũnu gẹ mkpuma-a
ghoshia nri!”

⁴Jizosu sũkwanu iya: “Ẹkwo-opfu Chileke sũkwaru: ‘Ɔ tọ bũdu nri kpũrumu bẹ
amadũ e-gude nọdu ndzu. Ɔ kwa iphe, bũkpoo opfu, shi Chileke l'onu.’ “

- ⁵Tɔ̀budu iya bụ; Obutuswe ono bya eduta iya duru bahu lẹ mkpukpu ono, dū nsọ ono, bya eworu iya dobe l'ẹka kachaa l'eli l'eze-ulo Chileke
- ⁶bya asụ iya: “Ọ -buru l'ị bụ Nwa Chileke; shinu l'eli ẹka-a dafu daa l'alị; l'ẹkwo-opfu Chileke sukwaru: “Chileke a-karu-a unwu-ojozi-imigwe iya g'ephe leta ngu ɛnya. ‘Ephe e-gude ẹka pata ngu apata; a nonyaa ị kpoo okpa lẹ mkpuma.’ “
- ⁷Jizosu sukwanu iya: “Obenu l'e dekwaru iya pho l'ẹkwo-opfu Chileke sụ: ‘Ta ahukwa Nnajiuphu, bụ Chileke ngu ama.’ “
- ⁸Noo ya; Obutuswe ono bya edutakwapho Jizosu ozo bya eje enyihu eze ubvu, haepho ephekerephe ephekerephe ge gunu; je egoshikota iya alị-eze ndiphe mgburugburu me iphe, dū ree, nọ iya nū.
- ⁹Bya asụ iya: “Iphemiphe ono g'ọ ha be mu a-nukota ngu me ị -dakpowa l'alị; baaru mu eja.”
- ¹⁰Tɔ̀budu iya bụ; Jizosu kweepho doo bya asụ iya: “Gbeshi l'ẹka ono Nsetanu; l'ẹkwo-opfu Chileke sukwaru: ‘Oo Nnajiuphu, bụ Chileke ngu bụ onye ịi-baru eja; teme o buru iya kpurumu bụ onye ịi-nodu ejeru ozi.’ “
- ¹¹Tɔ̀budu iya bụ; Obutuswe ono paru iya haa; unwu-ojozi-imigwe bya ejeahaaru iya ozi.

Jizosu ezi Opfu Chileke lẹ Gálili

(Mak 1:14-15; Luk 4:14-15)

- ¹²O be teke Jizosu nūmaru l'a tūwaru Jiṅnu mkporo; o gbeshi jeshia Gálili.
- ¹³Ọ gbeshi lẹ Nazaretu lashia Kapaniyomu je eburu. Mkpukpu ono nọ l'aguga eze-ɛnyimu Genesaretu; mbu l'alị Zebulun me Nafutali.
- ¹⁴Noo ya bụ iphe ono, Azaya onye mpfuchiru Chileke pfuru ono je a-vukota, sūru:
- ¹⁵“Gube alị Zebulun me alị Nafutali, nọ l'ibiya k'eze-ɛnyimu ono; l'azu Jiṅdanu azu iya ophuu. Gube Gálili ke ndu abudu ndu Jiu!
- ¹⁶Ndu ono, nọ l'ime ochii hūmaakwaru iphoro, paru ẹka. Ndu k'ono, bu l'alị ono, gbakotaru tsukiribaa ono be iphoro nwuakwaru ke phorokotokongu.”
- ¹⁷Noo ya; o buru teke ono be Jizosu shiepho wata asa ozi-oma, shi l'ẹka Chileke asasa sụ: “G'izimanu lwa unu azu; unu ghaa umere byapfuta Chileke lẹ Chileke abyaakwa egoshi l'oo ya bụ eze!”

Ndu mbu, wataru etso Jizosu

(Mak 1:16-20; Luk 5:1-11)

- ¹⁸O be ge Jizosu tsoru ogbu ogbu eze-ɛnyimu, nọ lẹ Gálili; o hūma unwune labo, bu ndu ikokoro. Onye lanu be epha iya bụ Sayimonu, onye eekuje Pyita. Nwune iya ophuu be epha iya bụ Anduru. O hūma phe ẹka ephe agha ugbu l'eze-ɛnyimu.
- ¹⁹Tɔ̀budu iya bụ; o sụ phe: “Unu bya etsoru mu ge mu emee unu ndu a-nodu esekutaje nemadzu g'eesetaje ema-a.”

²⁰Epfufu, oopfu iya; ephe gwobe ugbo phe; tsoahaa ya.

²¹Jizosu byakwa eshi l'eka ono jeriberu nwanshii; o humakwa unwune labo ozo, bu Jiemusu, bu nwa Zebedi; yele Jionu nwune iya l'eka ephe le nna phe, bu Zebedi no l'ime ugbo; emezi ugbo phe emezi. O kua phe.

²²Ekuku, ooku phe; ephe haa ugbo ono yee nna phe tugbua je etsoru iya.

Jizosu ezi iphe; bya eme ndu iphe eme g'ephe wekorohu

(Luk 6:17-19)

²³Tobudu iya bu; Jizosu jedzuru ekameka le Galili; ezi opfu Chileke l'iphe, bukpo ulo-ndzuko ndu Jiu; bya epfukwapho opfu Chileke su phe le Chileke abyawaa egoshi le ya bu eze; bya emee g'iphe, bukpo ndu ehume mekpoo ndu iphe-ememe mmanu emegbaa wekorohukota; obeta o buru egube iphe-ememe du idu-agma.

²⁴Epha Jizosu ngakota Siriya mgburugburu. Ephe nodu apatagbaaru iya ndu iphe eme; me ndu iphe, bukpo ehume, du iche iche eme; me ndu iphe eme ehuka shii; me ndu obvu eme; me ndu ndapfu; me ndu ndanwu danwuru ibe-ehume lanu. Noo ya; Jizosu mekota phe; ephe wekorohuchaa.

²⁵Ikpoto nemadzu shi le Galili tsoru iya; me ndu shi le Mkpukpu-iri me Jierusalemu; me ndu Jiudiya; me ndu shi azu enyimu Jiodanu. Ephe toko wuru gidigidi tsoru iya.

Matiyu 5

Jizosu epfu opfu Chileke l'eli ubvu

¹Jizosu bya ahuma ikpoto oha ono bya enyihu eli ubvu je anodu anoo. Ndu etsoje iya nu wu-pfuta iya.

²O wata phe ezi iphe su phe:

Ehu-utso

(Luk 6:20-23)

³"Ehu-utso be a goru nu ndu wozetaru onwophe ali l'iphu Chileke; kele eka Chileke bu eze bu nkephe!

⁴Ehu-utso be a goru nu ndu aphu byaru; Kele Chileke e-mechakwaa dua phe obu!

⁵Ehu-utso be a goru nu ndu du agu; kele oo phe l'e-mechaa nweru mgboko.

⁶Ehu-utso be a goru nu ndu ono, apfubekoto aguje g'egu nri me egu mini ono; kele Chileke e-mechaa mee g'epho ji phe!

⁷Ehu-utso be a goru nu ndu nweru obu-imemini; kele Chileke a-phukwaru phe pho obu-imemini!

⁸Ehu-utso be a goru nu ndu obu guru iphoru; kele ephe e-mechaa huma Chileke!

⁹Ehu-utso be a goru nu ndu eme ge nchi du do; kele oo phe be ee-ku unwu ke Chileke!

¹⁰Èhu-ùtso bẹ a gòru nù ndu aakpa èhu; l'opfu l'èphe eme iphe, dù Chileke ree; kẹle ẹka Chileke bụ eze bụ nkepẹ!

¹¹“Èhu-ùtso bẹ a gòru nù unu teke ndiphe nòdu akọ unu ọnu; akpa unu èhu; adzükota ẹjo ụka, adudu k'anuma ekpu unu opfu l'unu kweru nkemu.

¹²G'èhu tsoje unu uto; unu teje ẹswa; kẹle obunggo unu paru ẹka l'imigwe. O bukwapo g'èphe akpa unu èhu ono bụ g'èphe kpakwaru iya pho ndu mpfuchiru Chileke, vu unu ụzo.”

Únú yẹe iphóró

(Mak 9:50; Luk 14:34-35)

¹³“Oo unubedua bụ únú kẹ mgboko; ọle teke únú tso-buhuru únú-únú; ? denu g'ii-shi mebakwadaa ya g'ọ tso únú-únú ọzo? O tọ dūhekwa iphe ọzo, ọ dukwadu ree ememe; gbahaa g'e woru iya wushia gẹ nemadzụ zopyashia ya l'okpa.

¹⁴“Oo unubedua bụ iphóró kẹ mgboko. Mkpukpu, degeru l'elikota úbvú bẹ e te domikotajekwa edomi.

¹⁵Ophu aanwujeduru oku ye l'oroku kpube iya iphe. Ẹka eedobeje iya bụ l'iphe, eedobeje oroku; k'ophu onyemonye, nọ l'ulo obu a-huma iphóró iya.

¹⁶Oo ya bụ; g'iphóró unu ngakotakwa l'ẹka ndiphe nọ; k'ophu ẹphe a-huma iphe, dù ree, unu emekota gude iya jaa Nna unu, bu l'imigwe ajaja.”

Jizosu ezi k'ekemu

¹⁷“Unu ta arikwa l'iphe, mu byaru bụ gẹ mu gbukaa ekemu Mosisu; ọzo iphe, ndu mpfuchiru Chileke pfuru. Mu ta abyakwaru iya egbuka. Mu byakwaru gẹ mu mee g'ọ vukota g'e pfuru iya.

¹⁸Su-a; gẹ mu gbukwaaru iya unu tororo; igwe a-bvukwa alị abvu; obenu l'akpuru opfu lanu ọzo iphe, a tso ru kpongu, shi l'ekemu ta abyakwa erebuhu ire jasụ teke iphemiphe ono a-vukota.

¹⁹Oo ya bụ l'onye mebyikwanuru ekemu Chileke m'obeta o buru ophu kachakpoo alwa alị; bya ezi ndu ọzo g'èphe mekwapho egube ono; ọo onye ono a-kachakpoo alwa alị l'ẹka Chileke bụ eze. Obenu l'onye eme ekemu ono; bya ezi ndu ọzo g'èphe mekwa iya pho; onye ono a-buru onye ha shii l'ẹka Chileke bụ eze.

²⁰Iphe, mu epfu bụ lẹ teke unu akadụ ndu ezije ekemu; waa ndu Fárisii eme iphe, dù Chileke ree bẹ unu ta abyakwa abahu l'ẹka Chileke bụ eze.”

Oke-èhu-eghu Chileke

²¹“Unu numahawaru lẹ ndu kẹ teke ndiche bẹ a sụru: ‘Te egbukwa ọchi. Onye gburu ọchi bẹ a-kpujukwaru jee l'iphu ndu-ikpe.’

²²Obenu lẹ mbedua epfuru unu nta-a sụ l'onye etso nwune iya opfu l'èbe adu iphe, o meru iya; onye ono bẹ a-kpukwaru bya l'iphu onye-ikpe. Mbụ l'iphe, bukpo onye koru nwune iya onu bẹ a-kpujukwaru bya l'iphu ogbo-ikpe. Iphe, bukpo onye gude onu iya sụ nwune iya: ‘Gube onye-eswe-a’; onye ono a-lakwa l'oku-alị-maa.

23Oo ya bu ị-a; teke o bu l'ị nọ l'iphu ọru-ngweja Chileke; ị -bya anụ Chileke iphe; ị nọdu l'ẹka ono nyata l'ọ duru opfu, duru gẹ nwune ngu;

24parụ iphe ono, ị byaru anunu ono haa l'iphu ẹka ono vuru ụzo tughua jeadaa gẹ gu ị nwune ngu ono doshiadaa; e -mechaa l'ị byawarọ anụ Chileke iphe, ịinu iya.

25“Teke onye gbaru ngu ẹkwo kpụ ngu eje l'ulo-ikpe; kukebe ẹhu mee gẹ gu l'iya doshia ya ẹwegwa teke unu nọkwadu l'etsuzo; g'ọ tọ bu: unu -rwua l'ọ kpuru ngu nụ onye-ikpe; onye-ikpe akpuru ngu nụ ogbogu; ogbogu eje eworu ngu tua mkporo.

26Gẹ mu gbukwaaru ngu iya tororo; ị ti yikwa futa afuta l'ẹka ono jasụ teke ị pfueberu iphe, e gburu ngu nre iya; ị -pfuphodo mẹ afụ bẹ a taa hakwa ngu.”

Eri ogori

27“Unu nūmawaru l'a sūru: ‘Be erikwa ogori.’

28Ole mu sukwanuru unu; o -nwekpowaru onye leri nwanị ẹnya; k'ophu nwanị ono guru iya agugu ejepfu; onye ono bẹ gudeakwaa obu iya ria ogori.

29Oo ya bu; teke o bu l'oo ẹnya ẹkutara ngu esetaru ngu eme iphe-eji; swofu iya tuphaa! L'ọ kakwaru ngu ree l'i tupharu ibe ẹhu ngu lanu; eme l'i dzuru oke; a pata ngu l'ophu chie l'oku-alị-maa.

30Teke o bukwanu l'oo ẹkutara ngu kpataru ngu eme iphe-eji; gbufu iya tuphaa. L'ọ kakwaru ngu ree l'i tupharu ibe ẹhu ngu lanu; eme l'i dzuru oke; a pata ngu l'ophu chie l'oku-alị-maa.”

K'achifu nwanị

(Mat 19:9; Mak 10:11-12; Luk 16:18)

31“E dekwaruphọ sụ g'onye achifu nyee ya vujeadaru ụzo dee ẹkwo-achifu-nwanị nū iya ị ya taa luhedu; tẹme l'oo-chifuwa iya rọ.

32Ole mu sukwanuru unu-a: onye chifuru nyee ya; abudu l'oori ogori; onye ono meakwaru nwanị ono; o nọdu eri ogori; tẹme onye lukwanuru onye a chifuru achifu l'erikwaphọ ogori.”

K'eri angu

33“Ozo bu l'unu nūmahawaru ị ndu teke ono bẹ a sūru: ‘Teke i rifuru angu emeru Chileke iphe; mekwaaru Chileke iphe, i rifuru angu l'ii-meru iya; ta ahakwa iya ememe.’

34Ole mu sukwanuru unu-a: unu te erijekwa angu ililekpoo. Unu te egudejekwa imigwe ria angu; l'imigwe bukwa aba-eze Chileke.

35Ophu unu egudejekwa alị ria angu; l'ọ kwa alị bu ẹka Chileke gbaberu okpa. Sụ-a; unu te egudejekwa Jierusalemu ria angu; ị Jierusalemu bukwa mkpukpu k'onye eze ono, ha shii onoya.

36Ophu unu egudejekpokwaanu ishi unu ria angu; g'ọ tọ budo l'unu adu ike eme g'ọ ka mma l'oo akpuru ẹgbushi lanu, nọ unu l'ishi g'ọ ji uji; ozoo g'ọ chaa ụcha.

³⁷Iphe, unu e-pfuje kpoloko buẹpho ‘ee’; ọzoo ‘waawaa’. O -nweru iphe ọzo, i pfuru, 'abudu opfu labo ono buakwaa Obutuswe be o shi l'eka.”

K'agwata ugwo iphe

(Luk 6:29-30)

³⁸“Unu numahawaru l'ekemu Mosisu suru: ‘Onye meru; enya pyahu nwibe iya g'e mekwaapho g'enya pyahulata onye ono; onye chikwofuru nwibe iya eze; g'e chikwofulata iya ugwo iya.’

³⁹Obenu le mu epfuru unu su: onye meru ngu ejo-iphe; te ejekwa iya emelata. Onye chiru ngu eka l'agbagba-nchi ekutara; ghafuuru iya nchi ekicha.

⁴⁰Teke o bu l'o nweru onye jeru je agbaaru ngu ekwo l'ulo-ikpe ge ya nata ngu nggafu-eka, i yeru l'ime ehu; haa ya g'o natafua ngu uwe ehu ngu.

⁴¹Teke o bu l'o nweru onye kebutaru ngu k'ehuka su ge gu l'iya swiru jee manyiru lanu; tsoru iya ro ge gu l'iya jee manyiru labo.

⁴²Nuje onye suru gi nu iya iphe; iphe, o suru gi nu iya; teme onye byaru ngu arwota iphe; ta ajikakwa iya ya anunu.”

K'eye ndu ohogu obu

(Luk 6:27-28,32-36)

⁴³“Unu numahawaru l'a suru: ‘Yeje onye gu l'iya eshi onya obu; g'onye ohogu ngu duje ngu ashj.’

⁴⁴Ole iphe, mu akaru unu bu: Unu yee ohogu unu obu. Unu epfujeru Chileke opfu ehu ndu emekpa unu ehu;

⁴⁵g'unu a-buru unwu ke Nna unu ophu bu l'imigwe. Kele oo ya emeje g'enyanwu waaru ndu oma me ndu ejo-iphe. Teme o nodu emeje g'igwe dzeru mini wushiru ndu pfuberekoto me ndu apfubeduru-eka-oto.

⁴⁶Teke o buẹpho ndu yeru unu obu be unu yeru obu kpurumu; ? bu obunggo gunu be unu a-nata l'ono? ? To buhedu ge ndu ana okpoga akiriko emeje bu ono?

⁴⁷Teke o buẹpho ndu unu e phe eshi onya be unu ekeleje ekele kpurumu; ? bu gunu be bu iphe, unu ka ndu ozo ememe? ? To buedu ge ndu ta amadu Chileke emeje bu ono?

⁴⁸Oo ya bu g'unu duẹbe ree ge Nna unu, bu l'imigwe duẹbe ree.”

Matiyu 6

Eme iphe-oma

¹“Unu kwabeje enya g'unu te emeje iphe-oma unu sagaa k'ophu onyemonye a-humakotaje iphe unu eme. Odumeka be Nna unu ophu bu l'imigwe ta abyakwa ebu unu nggo iya.

²“Oo ya bu; teke i meru iphe-oma; te ejekwa iya ara arara l'edupfu. Te emekwa ge ndu bu tuko-l'ehu-atuko-l'obu emeje l'ime ulo-ndzuko ndu Jiu me l'etsuzo. Ephe anoduje

eme iya gę ndiphe ajaa phe ajaja. Mu su-a; g'o dokwaa ngu ęnya ree; ọ buakwaa ụgwọ phe bę a pfu-dzuwaru phe ęgube ono.

³Obenu lę-a; teke gubedua eme iphe-oma; te ekwekwa g'ękicha ngu maru iphe ękutara ngu eme.

⁴Oo ya bu l'iphe-oma, iime bę ii-meje g'iime iya lę mpya. Oo ya bu gę Nna ngu ono, ahumaje iphe, eeme lę mpya ono ebukwanaa ngu nggo iya.”

Epfu anu Chileke

(Luk 11:2-4)

⁵“I -nodu epfu anu Chileke; te emejekwa gę ndu bu tuko-l'ęhu-atuko-l'obu. Ephebedua iphe, aduje phe ree bę bu g'ęphe je anmagaru l'ęchi ụlo-ndzukọ ndu Jiu; ọzoo l'aguga etsuzọ epfu anu Chileke; k'ophu aa-humadzuru phe. Gę mu gbukwaaru iya unu tororo; ọ buakwaa ụgwọ phe bę a pfu-dzuwaru phe ęgube ono.

⁶Obenu gubedua; teke iipfu anu Chileke; tugbua bamihukpọoro l'ime mkpuru ụlo ngu woru ụzo gu-chia agu-chi; nodu l'ęka ono pfuru nu Chileke, bu Nna ngu, a ta ahumadu l'ęnya. Oo ya bu gę Nna ngu ono, ahumaje iphe, eeme lę mpya ono ebukwanaa ngu nggo iya.

⁷“Teke unu epfu anu Chileke; unu te epfujekwa igwerigwe opfu mpfukwase 'enwedu ishi gę ndu ta amadu Chileke emeje ono. L'ęphe anoduje ari lę Chileke a-numa olu phe m'ęphe -pfushia opfu igwerigwe.

⁸Oo ya bu; unu te etsokwa ęka phe. Lę nna unu bę mahaakwaru iphe, unu abya iya asu g'ọ nu unu; teme unu pfuje g'ọ nu iya unu.

⁹Oo ya bu l'owa-a g'unu e-pfuje anu Chileke baa: “Gube Nna anyi, bu l'imigwe. G'e dobe ępha ngu iche;

¹⁰Goshinu l'oo gubedua bu eze. G'e meje iphe, du ngu l'uche l'eliphe g'eemeje iya l'imigwe.

¹¹Nunu anyi nri ntanu-a; Nri, a-sujeru anyi eri mboku-mboku.

¹²Guru anyi nvu l'ęka anyi mesweru ngu; G'anyi guru ndu mesweru anyibedua.

¹³Te ekwekwa g'anyi nmalahu l'ohutama. Nafutachikwaa anyi g'anyi ta aba l'ęka onye ęjo-iphe.' Kele oo ngu bu eze iphemiphe; bya aburu ngu nwe ike; nweru akpabiri jasu lę tuutuutuu lę mjimiimii. Nokwa g'ọ du.

¹⁴“Kele ọ -buru l'unu agujeru ndu ọzo nvu l'iphe-ęji, ęphe meru unu; Nna unu, bu l'imigwe a-gujekwarupho unu nvu l'ophu unu meru iya.

¹⁵Obenu teke ọ bu l'unu ta agujeduru ndu ọzo nvu l'iphe-ęji, ęphe meru unu; ọo ya bu lę Nna unu ta abyadu aguru unu nvu l'iphe-ęji, unu meru iya.”

Aswiru Chileke ęgu

¹⁶“Unu -nodu aswiru Chileke ęgu; unu ta agbanwubejekwa iphu gę ndu bu tuko-l'ęhu-atuko-l'obu. Kele ęphe ewojeru iphu dobe shigba shigba; k'ophu onyenonu a-maru

l'ephe aswiru Chileke egu. Ge mu gbukwaaru iya unu tororo; o buakwaa obunggo phe be ephe natadzuru egube ono.

17Obenu gubedua; teke iiswiru Chileke egu; swaa iphu; nyia manu;

18k'oplu ndiphe ata amadu l'iiswiru Chileke egu. Gbahaepho onye a-maru nu bu Nna ngu ono, a ta ahumadu l'enya ono. Nna ngu ono, ahumaje iphe, eeme le mpya-a l'e-bukwa ngu pho nggo iya."

Akpa eku imigwe

(Luk 12:33-34)

19"Unu ta akpakwa eku kuberu onwunu le mgboko owa-a; eka oo-gba egba; teme mkpu atakashia ya; ndu-oshi ejekwapho egwee ya.

20Unu kparu eku unu doberu onwunu l'imigwe; eka o too gbadu egba; ophu mkpu atakashidu iya; ophu o dudu ndu-oshi eje iya egweta.

21L'o kwa eka eku ngu, kachaa ngu mkpa no be obu ngu nokwapho."

Iphoro k'ogwehu

(Luk 11:34-36)

22"O kwa enya bu oroku, du l'ehu nemadzu. Oo ya bu le teke enya doru ngu edodo; ogwehu ngu abukotaru ngu iphoro iphoro.

23Obenu teke enya edoduru ngu edodo; ogwehu ngu abukotaru ochii ochii. Teke o bukwanu l'iphoro, no l'ime ngu be l'agba ochii; l'o gbagharu ochii obu eka."

Etso uto Chileke waa eku ke mgboko-a

(Luk 16:13; 12:22-31)

24"O to dudu onye achita nnaji labo ejeru ozi le mgbo lanu g'o to kpo onye lanu ashi; yee onye ophuu obu; ozoo l'o yeru ehu l'ozi onye lanu; ejeru onye ophuu ozi mkpe. I tii nodudu etso uto Chileke bya emekwapho g'okpoga kwataru ngu.

25"Noo iphe, mu gude su; unu ta akushi photophoto k'iphe, unu e-ri; ozoo iphe, unu angu nodu ndzu. Ozoo k'ogwehu unu; iphe, unu e-ye l'ehu. Noo le ndzu ka nri aburu iphe; ogwehu ka uwe aburu iphe.

26Lewaro enu, ephe l'eli. Ephe ta akokwa opfu; ophu o dukwa iphe, ephe eje akpata l'opfu; ophu ephe akpatadu ewoba l'oba; ole Nna unu ophu bu l'imigwe anodujeelaa azu phe. ? Unu ta amadu l'unu ka phe aburu iphe.

27? Denu g'unu ha onye e-gude ayọ oshi yekwa ujiku ophu le ndzu iya?

28"? Buhunu gunu meru iphe, unu aku-phe photophoto k'uwe, unu e-ye l'ehu? Unu lewaro ojimbvu, du l'egu g'onoduje evu. Ephe te esedu akanya; ophu ephe agbadu oghu k'akwa uwe.

29Obenu le-a; unu huma ge Solomonu yeberu uwe ama mma; ole uwe iya ta amarwuduru g'ojimbvu lanu.

³⁰Teke obu le Chileke eletaberu eswa, no l'egbudu enya egube ono: k'eme iya g'ọ ma mma; l'iphe, bu ọ -dzuru ndzu nọdu l'egbudu ntanụ-a; echele l'e woru iya shia ite. ? Tọo kabadaa unu eleta okpobe enya? mbu unube ndu-a, ekwekwe, unu kweru abadu ishi-a!

³¹Ọo ya bu; unu ta akụ-phehe photophoto ke ‘? Bu gunu be anyi e-ri?’ ‘? Bu gunu be anyi a-ngu?’ Ọzoo ‘? Bu gunu be anyi e-ye l'ehu?’

³²Ọ kwa iphe ono be ndu amadu Chileke tukoru acho. Nna unu, bu l'imigwe makwaru-a l'iphemiphe ono du unu mkpa.

³³Ọo ya bu; unu vuru ọzo choadaa g'unu e-me ge Chileke buru eze le ndzu unu; yele apfubekoto iya; ọo ya bu; iphe ono g'ọ ha aburu iphe, Chileke e-yekwaru unu eyekwa.

³⁴Unu ta ayoshi oshi k'echele; l'echele a-yo-a oshi onwiya. Ejo iphe k'ujiku ophu suwaru ke mboku ono.”

Matiyu 7

Ekpe ndu ọzo ikpe

(Luk 6:37-38,41-42)

¹“Unu te ekpejekwa ndu ọzo ikpe ge Chileke etee kpedu unu.

²Kele ọo iphe, unu gude kpee onye ọzo ikpe be ee-gude kpee unubedua. Teme ọ buru iphe, unu gude turu nu nwibe unu bu iphe, Chileke e-gude tukwarupho nu unu.

³? Bu gunu kparu iphe, i humaru nwiphe, no onye ọzo l'enya; ophu i humaduru ophu ha g'oswebe nodu ngu l'enya nkengu?

⁴Ọzoo; ? denu g'ii-gbe su onye ọzo g'o gebe g'i mefu iya nwiphe, du iya l'enya; l'eka ophu ha g'oswebe swekwaru l'enya nkengu?

⁵Gube onye ono bu tuko-l'ehu-atuko-l'obu ono! Vuru ọzo mefuadaa iphe ophu ha g'oswebe, sweru ngu l'enya nkengu; g'ii-du ike huma-rweta ọzo mefu nwiphe ophu ha nwanshii, du nwanna ngu l'enya.

⁶“Unu te ewojekwaru iphe, duru Chileke nsọ togboru nkuta; ophu unu ewojekwaru igopoto unu, bu iphe, ere ire shii ono woru togboru ezi; g'ephe ataa zopyashidu iya yogiri yogiri l'okpa; bya adakobe byapfuta unu; bya alabushia anu unu alabushi.”

Epfu anu Chileke; yee ekemu, swiru iya nu

(Luk 11:9-13)

⁷“Unu pfua g'a nu unu iphe; aa-nu iya unu! Unu choo iphe; unu a-choa iya! Unu kua eka l'uzo; aa-guharu iya unu.

⁸Kele onyemonye, suru g'a nu iya iphe be aanuje iphe; onye choru nu l'achotaje; onye kuru eka l'uzo be aaguhajeru iya.

⁹Too ? denu g'unu ha, onye nwa iya a-su g'ọ nu iya buredi; l'o woru mkpuma nu iya?

¹⁰Ọzoo l'ọ suru g'a nu iya ema; l'ọ gbe chiru agwo nu iya.

¹¹Eshinu unubẹ ndu bu ndu ẹjo-iphe amajeru nu unwu unu iphe, du ree; ? buchia Nna unu ophu bu l'imigwe taa maduru anu unu okpobe iphe; mbu unubẹ ndu suru g'o nu iya unu?

¹²“Oo ya bu; unu mejeru onyemonye g'o du unu g'onye ozo meeru unu. Kele onoo iphe, ekemu me ndu mpfuchiru Chileke ezi bu onoya.”

Onu ọzo, du kparagu

(Luk 13:24)

¹³“Unu kpata ọzo shia oguzo, du kparagu bahu. L'uzo ophu eeshije ala l'iswi be onu iya ha osa; teme gbororo iya du nphe eshishi; a du igwe awu iya.

¹⁴Obenu l'uzo ophu edujeru nemadzu bahu le ndzu; be onu iya du kparagu; teme ọzo iya du ehuka eshishi; ndu humaru iya nu habe-a nwahabe.”

Oshi-omi yee akpuru iya

(Luk 6:43-44)

¹⁵“Unu kwabejekwaru ndu mpfuchiru, epfu iphe, Chileke epfuduru ono enya. Mbu ndu aduje agù g'ephe bu nwaturu; 'a ma l'ephe bu agu, adzu-gbu aturu.

¹⁶Unu e-gudewaro umere phe maru egube ndu ephe bu. ? A wotaje era nggorobyi l'oshi aga? To ? a wotaje akpuru ujiru l'oshi ukèè?

¹⁷Iphe, bukpo okpobe oshi amijekwa akpuru, du ree. Ejo oshi nodu amije ejo akpuru.

¹⁸O to dudu okpobe oshi, mijeru mebyi, du eji; ophu o dukwanu ejo oshi, mijeru mebyi, du ree.

¹⁹Iphe, bukpo oshi, taa midu mebyi, du ree be ee-gbutsu egbutsu paru chie l'oku.

²⁰Oo ya bu l'unu e-gudewaro akpuru, ephe miru; maru phe.”

²¹“O to bubekwa g'aahaje eeku mu 'Nnajiuphu; Nnajiuphu'; bu g'aa-ha bahukota l'eka Chileke bu eze. O kwa ndu meru iphe, du Nna mu, bu l'imigwe ree.

²²Mboku ikpe ono be aa-du igwerigwe su mu: 'Nnajiuphu! Nnajiuphu! ? O kwa l'anyi shi egudeje epha ngu epfuchiru Chileke; teme anyi shi egudeje epha ngu achishi obvu; bya eshi egudeje epha ngu eme iphe-ohumalenya, du igwerigwe.’

²³Noo teke mu a-karu phe su phe: 'Mu ta amajekwaru ndu unu bu. Unu gbeshi mu l'iphu g'unu ha; unubẹ ndu ono, buepho iphe, Chileke suru g'e te emeshi be unu anoduje eme ono.’ “

Umadzu ebo, l'akpu ulo

(Luk 6:47-49)

²⁴“Oo ya bu l'onyemonye, anu opfu-a, mu epfu-a bya eme iya ememe be a-du ge nwoke, kwaru enya bya eworu ulo iya kpua l'eli mkpuma.

²⁵Igwe bya edzee mini; utso gbaa; pherephere bya ezia; o bukotaru l'eli ulo ono; ophu ulo ono adaduru; noo kele a turu okpa iya l'eli mkpuma.

²⁶“Obenu onye anụ opfu-a, mu epfu-a; ọphu oomedu iya ememe l'a-dụ g'onye eswe, jeru je akpua ụlo iya l'eli evevee.

²⁷Igwe bya edzee mini; utso gbaa; pherephere bya ezia; ọ bukotaru l'eli ụlo ono. Ụlo ono phọhu daa gwoo; daa tsua gwogiri-gwogiri.”

²⁸Tọbudu iya bụ; Jizọsu pfubuhuepho iphemiphe ono, oopfu ono; iphe ono, o pfuru ono kpoo ndu ono onu opfu.

²⁹Kele oozu iphe g'onye ike dụ l'eka. O too zidu ge ndu ezije phe ekemu.

Matiyu 8

Onye ekpenta, Jizọsu meru o wekoro

(Mak 1:40-45; Luk 5:12-16)

¹Noo ya bụ; Jizọsu shiepho l'ubvu ono nyizeta; ikpoto nemadzu wuru tsoru iya.

²Tọbudu iya bụ; onye ekpenta lanu bya abyapfuta iya bya abaarụ iya eja su: “Nnajiuphu; ọ -buru uche ngu be ii-menaa ge mu wekoro.”

³Jizọsu bya amachia eka denyi iya su: “Ọ bụ uche mu. Ngwa wekoro!” Teke ono kwapho; ekpenta ono mishihu iya l'ehu.

⁴Tọbudu iya bụ; Jizọsu su iya: “Ba adukwa onye ii-pfuru iya. Jechikwaa g'onye uke Chileke lerwee ngu enya. G'ii-nukwapho Chileke iphe-ngweja k'egbuchafu, i gbuchafuru; ge Mosisu turu l'ekemu. Oo ya bụ g'oha egude nno maru l'i wekoro.”

Ewekoro nwozi onye-ishi ndu ojogu

(Luk 7:1-10)

⁵Tọbudu iya bụ; Jizọsu bahushiepho le Kapaniyomu; o nweru onye-ishi ojogu ndu Romu, byaru bya anodu arwo iya su:

⁶“Nnajiuphu; nwozi mu ze l'ulo; iphe nodu emeshi iya ike; k'ophu ọ too ghadu aghagha; teme ọ nodu echi mkpu l'ulo.”

⁷Jizọsu su iya: “Mu a-bya-a bya emee ya g'o wekoro.”

⁸Onye-ishi ndu ojogu ono su iya: “Nnajiuphu; obenu le mu ta agbaduru ke g'i bata ibe mu. O bua g'i pfua opfu onu kpurumu; nwozi mu ewekoro.”

⁹Mbedua bukwa-a onye no nemadzu l'eka; o nwekwarupho ndu ojogu, no mu l'eka. Mu -su onye-a g'o jee owa-a; l'o jee ya; mu -su onye ophu g'o bya; l'o bya; mu -su nwozi mu g'o mee owa-a; l'o mee ya.”

¹⁰Jizọsu numa iya; ọ du iya biribiri. O su ndu ephe l'ia swi: “Iphe, mu epfuru unu bu le-a; l'ali Izurelu kponu be mu ta ahumakwaru onye kwetaberu egube-a.

¹¹Iphe, mu epfuru unu bu l'aa-du igwe shi l'uzo enyanwu-awawa me l'uzo enyanwu-ariba bya; ephe le Ebirhamu; waa Ayizaku; waa Jiekopu anodu ria nri l'eka Chileke bu eze.

¹²Aa-gbẹ chiru ndu ophu o gogo gba l'anọ l'ẹka Chileke bu eze obu chiru ye l'ẹka gbahuru tsukiribaa. Noo ẹka aa-nọdu kwaa ejo ẹkwa taa ikireze.”

¹³Jizosu pfuchaa nno bya asu onye-ishi ndu ojogu ono: “Jeshia iphe, iije l'oo gi kwetarū bu g'oo-duru ngu.” O buerupho nwozi nwoke ono ewekorohu teke ono teke ono.

Jizosu emeta igwerigwe ndu iphe eme

(Mak 1:29-34; Luk 4:38-41)

¹⁴Tobudu iya bu; Jizosu bya abata l'ulo Pyita bya ahuma le ne nyee Pyita obu be ze l'ododenyaa.

¹⁵O bya edenyi iya ẹka l'ẹka. Ododenyaa ono paru iya haa. O gbalihu; wata iya akwaru ẹbyaa.

¹⁶O be l'uzenyashi; ephe chitaru iya ikpoto ndu obvu emegbaa. O buru opfu onu be o gude chishichaa obvu ono g'o ha; mbu Jizosu; bya emekota iphe, bukpo ndu iphe eme ephe wekorohuchaa.

¹⁷Iphemiphe ono meru o vukota; mbu iphe, Azaya, bu onye mpfuchiru Chileke pfuru. L'o suru: “O vutaru ehū-otsu-mee anyi l'onwiya; bya evutakwapho iphe-ememe anyi.”

Ndu e-mechaa etsoje Jizosu

(Luk 9:57-62)

¹⁸Tobudu iya bu; Jizosu humaeopho ikpoto ndu ono, no-pheru iya mgburugburu ono; o su ndu etsoje iya nu: “Unu g'anyi dafu azu eze-enyimu azu iya ophu.”

¹⁹Nwoke lanu, bu onye ezije ekemu byapfuta iya bya asu iya: “O-zì-iphe; mu etsojekpoe ngu pho eje ekameka, iije.”

²⁰Jizosu su iya: “Uphega nwekwaru enu; enu, ephe l'eli nweru epfunu; obenu le Abubu-Ndiphe te enwedu ẹka oo-dobeje ishi.”

²¹Onye ozo, yi le ndu etsoje iya nu su: “Nnajiuphu; hakwaa mu ge mu je eliadaa nna mu; ge mu abyawaro.”

²²Jizosu su iya: “Tsoru mu; haa ndu nwuhuru anwuhu g'ephe lia ndu nkephe, nwuhuru anwuhu.”

Jizosu abyanyi oke akpara-mini

(Mak 4:35-41; Luk 8:22-25)

²³Jizosu bahuepho l'ugbo; ndu etsoje iya nu tsoru iya.

²⁴No iya; oke akpara-mini wata atutu l'echi eze-enyimu ono. O nodu atukpoo shingushingu; k'ophu mini abyawaa atuji ugbo ono; ole Jizosu zeele-a eku mgbenya.

²⁵Ephe byapfuta iya bya ekutee ya; su iya: “Nnajiuphu; dzonaa anyi! Ugbo abyakwaa anyi ekpukpu!”

²⁶Ọ sụ phẹ: “? Denu g'o gude ndzu nọdu agụ unu. Unube ndu ono ekwekwe, unu kwere abadu ishi ono.” Ọ gbeshi bya abaarụ pherephere ono yee eze-onyimu ono mba. Ọ bụru nyonyoronyo.

²⁷Ọ dụ ndu ono biribiri. Epe wata epfufu sụ: “? Bụ egube nemadzu gunu be nwoke owa-a bu? Onye ophu pherephere ye eze-onyimu emeje iphe, o pfuru.”

Unwoke labo, obvu eme

(Mak 5:1-20; Luk 8:26-39)

²⁸Tobudu iya bu; Jizosu daepho eze-onyimu ono lufu azu iya ophu, bu iya bu l'ali ke ndu Gadara; unwoke labo, obvu emegbaa gba iya ndzuta. Ndu ono bu aka eelije nemadzu be epe shi lufuta. Obvu kwaru phe ikwato l'ehu. Igiri igiri, epe eme kposhia; ophu o dudu onye aduje ike je eshita uzo ibiya ono.

²⁹Noo ya; epe chiahaa mkpu sụ: “? Bụ gunu be anyi le ngu jigba; gube Nwa Chileke? ? I byawaru g'i bya eshi nta-a nuta anyi aphu; l'ebe abu l'o rwwaru teke ee-me iya?”

³⁰O nweru ikpoto ezi, no phe nwuzenya; akpa nri.

³¹Obvu ono tuko rwoahaa Jizosu sụ iya: “I -chifuwaa anyi; hanaa g'anyi wuba l'ime ikpoto ezi pho.”

³²Jizosu sụ phe g'ephe je. Obvu ono wufuta l'ehu unwoke ono bya awuba l'ime ehu ezi ono. Tobudu iya bu; ikpoto ezi ono g'o ha tuko phota oso; gbaa kpurukpuru gbazeta je awuda l'ime eze-onyimu ono; mini rigbushia phe.

³³Ndu eche ezi ono gbakashihu je eworu iphe, meru nu g'o ha doo l'ime mkpukpu; bya edokwaapho g'o nwuru l'ehu ndu ono, obvu shi eme ono.

³⁴Tobudu iya bu; mkpukpu l'ophu zefuta zepfuta Jizosu bya arwoahaa ya; sụ iya g'o lufuru phe l'ali.

Matiyu 9

Nwoke, iphe lonwuru ibe ehu lanu

(Mak 2:1-12; Luk 5:17-26)

¹Tobudu iya bu; Jizosu bya abahu l'ugbo bya akpoghaa eze-onyimu ono; o buri iya ala mkpukpu, a no hefuta iya gedegede.

²E gude iphe, aaze aze vutaru iya nwoke, iphe lonwushiru ibe ehu lanu. Jizosu humaepho g'ephe gude kwetaberu le ya a-du ike mee g'o jee ije; o sụ nwoke ono, iphe lonwushiru ono: “Nwa mu; nweru iya obu. A guwaru ngu nvu l'iphe-eji, i meshiru.”

³Tobudu iya bu; ndu ezije ekemu haru rihaa l'ime okpoma phe sụ: “Nwoke-a epfubyikwa epha Chileke epfubyi.”

⁴Jizosu maerupho iphe, epe arị bya asu: “? Denu g'o gude unu nọdu arị ejo oriri l'obu unu?”

⁵Sụ-a; ? bụ ole ka nphe epfupfu? ? Bụ asụ: ‘A gụwaru ngu nvụ l'iphe-ẹji, i meshiru?’ ? Tọo: ‘Gbalihu jeahaa ije?’

⁶Ole ọo g'unu a-maru ị Abubu-Ndiphe bẹ ike dū l'ẹka k'agujeru nemadzu nvụ l'iphe-ẹji, o meshiru ị mgboko-a.” Ọ sụ onye ono, iphe lonwushiru ibe ẹhu lanu ono: “Gbalihu palita iphe-azẹe ngu lashia ibe ngu.”

⁷Nwoke ono kwolihu; ọ bụru iya ala unuphu.

⁸Ikpoto ndu ono hūmaepho iphe, meru nū; ọ dū phẹ biribiri. Ẹphe wata aja Chileke ajaja; yẹbedua meru gẹ nemadzu dū ike mee ẹgube iphe ono.

Ekuku Matiyu

(Mak 2:13-17; Luk 5:27-32)

⁹Gẹ Jizosu shi l'ẹka ono tūgbua bẹ ọ hūmaru nwoke lanu, ẹpha iya bụ Matiyu; l'ẹka ọ nọ l'ulo okpoga akiriko. Ọ sụ iya: “Tsoru mu.” Ọ gbalihu tsoru iya.

¹⁰Jizosu phẹ je eriahaa nri l'ibe Matiyu. Ndu ana akiriko mẹ ndu ọzo mmanu, bukwapo ndu aamaru ẹjo ẹka tūkokwapo nọdu l'ẹka ono; ẹphe ị Jizosu mẹ ndu etsoje iya nū nọdu eri nri.

¹¹Ndu Fárisii hūma iya bya asụ ndu etsoje iya nū: “? Denu g'o gude onye ezije unu iphe, ẹphe ị ndu ana akiriko; waa ndu ọzo, aamakwarupho ẹjo ẹka nọdu erigba nri?”

¹²Jizosu nūmae ya phọ bya asụ: “Ọ tọ bukwa ndu ẹhu dū ike bẹ eegudeje gbapfu onye eme ọbvū; ọ kwa ndu iphe eme.

¹³Sụ-a; unu je anwua iphe, opfu ọwa-a, mu abya epfupfu-a bụ; ị Chileke pfuru sụ: ‘Iphe, agụ mu nū ta abukwa g'unu gwajẹ mu agwagwa; ọ kwa g'unu phujeru nemadzu obu-imemini.’ Noo kele mu ta abyakwaru eku ndu pfuberekoto; ọ kwa ndu eme iphe-ẹji bẹ mu byaru ekuku; g'izimanu lwa phẹ azu.”

Aswiri Chileke ẹgu

(Mak 2:18-22; Luk 5:33-39)

¹⁴Tọbudu iya bụ; ndu etsoje Jionu onye emeje baputizimu byapfuta Jizosu bya asụ iya: “? Bụ gunu meru g'o gude anyi ị ndu Fárisii nọdu aswijeru Chileke ẹgu; ọphu ndu etsoje ngu nū aswijedu?”

¹⁵Jizosu sụ phẹ: “? Ndu byaru ekele-nwanyi a-gbẹ agụ aphụ l'ẹka ẹphe l'onye eme ekele-nwanyi nọkwadu l'ẹka-a? Ọle ọ dukwaru teke ee-mechaa; l'a bya anafu phẹ onye ono, eme ekele-nwanyi ono. Ọo ya bụ; ẹphe aswiwaro ẹgu.

¹⁶“E te ewotajekwa ẹkwa ọphúú gude gbachia ẹka akahụ ẹkwa lakahuru alakahụ. Onye meru iya nū; ẹkwa ọphúú ono atsua atsutsu kabaa alaka akahụ iya phọ.

¹⁷Ọphu eewojeduru akuru mẹ ọphúú ye l'ugbobe-mẹ, riwaru pheripheri. Onye yeru iya nū; mẹ ono agbawashia ugbobe ono. Mẹ ono awushihu; teme ugbobe ono agbakpohukwapo. Mẹ ọphúú bẹ eeyeje l'ugbobe ọphúú. Ọo ya bụ; ẹphenebo ono atukokwanu dū.”

Nwa Jiayirosu mẹ nwanyị, nsọ eme mkpulumkpuru

(Mak 5:21-43; Luk 8:40-56)

18Tòbudu iya bụ; Jizọsu kpụkwaduru-a iphemiphe ono l'ọnu epfuru pẹ; onye lanu l'ime ndu-ishi ụlo-ndzukọ byapfuta iya bya abaarụ iya ẹja sụ iya: “Nwatibe mu ke nwanị buepho nta-a bẹ ọ nwuhuru. Ọle ọ bụa g'ị bya ebyia ya ẹka. I -byiwa iya ẹka bẹ ọo-nọdu-a ndzụ.”

19Jizọsu yẹle ndu etsoje iya nụ gbeshi tsoru iya; ọ bụru pẹ ejeje.

20Tòbudu iya bụ; ọ duru nwanị, nọ l'ẹka ono, nọwaru nsọ unwanị mkpụrumkpuru apha iri l'ẹbo. O shia Jizọsu azụ pyobata bya edenyi ọnu uwe iya ẹka.

21Noo kele ọ sụkwanuru onwiya: “Mu -denyikpọwaa ẹka l'uwe iya bẹ mu a-dụa iche.”

22Jizọsu ghakọbe bya ahuma iya bya asụ: “Nwada mu; g'ọkpoma shihu ngu ike. Ekweta, i kwetarụ mewaru g'ị dụ iche.” E shiepho teke ono; ọ bụru nwanị ono ewekorohu.

23Jizọsu byarwutaepho ibe onye-ishi ụlo-ndzukọ ono bya akpovu ụzu, igwe ọha, nọ l'ẹka ono atụ; mękpoo ndu aphụ upyi.

24Ọ sụ pẹ: “Unu lufukotachaa g'unu ha. Kele nwamgboko ọbu ta anwuhukwaru anwuhu. Ọ kwa mgbenya bẹ ooku.” Epe ze iya ọchi.

25A chifuchaepho ikpoto ndu ono etezi; Jizọsu bya abahụ l'ulo bya eseta nwata ono l'ẹka. O teta gbalihu.

26Akọ iya ngakotawaro uswe iya onoya mgburugburu.

Ụmadzu ẹbo, l'atsụ ishi, Jizọsu meru; ẹphe pụahaa ụzo

27Jizọsu parụ ẹka ono haa tughua tsoru gbororo eje. Unwoke labo, atsụ ishi tsoru iya echi mkpu asuje: “Nwa Dévidi; pụaru anyi obu-imemini!”

28Jizọsu bahuepho l'ulo; ndu ono, atsụ ishi ono byapfuta iya l'ulo ono. Jizọsu sụ pẹ: “? Unu kwetarụ-a lẹ mu a-dụ ike mee iphe ono?” Epe sụ iya: “Ee-o! Nnajiuphu.”

29Ọ bụru iya bụ; Jizọsu bya ebyichaa pẹ ẹka l'enyanya ono; bya asụ pẹ: “G'ọ dukwaru unu g'unu kwetaberu.”

30Enya sashihu pẹ. Epe wata aphụ ụzo. Jizọsu bya anmashiaru pẹ okwa ike sụ pẹ g'ẹphe te emekwa g'ọ duru onye a-maru nụ.

31Epe tughuelaa je epfukashia ke Jizọsu l'ọha ono mgburugburu kpọ.

Onye ete pfudu opfu, Jizọsu meru o pfuahaa opfu

32Epe tughushiepho; e dutaru Jizọsu nwoke, ọbvụ bu iya l'ẹhu meru ọphu o pfudu opfu.

33Jizọsu chifuepho ọbvụ ono; nwoke ono pfuahaa opfu. Ọ dya ikpoto ndu nọ l'ẹka ono biribiri ẹtu. Epe sụ: “Ha-oo! Anyi teke ahuma-swekwaa ẹgube iya ọwa-a l'alị Ízurelu!”

³⁴Ndu Fárisii sù: “? A sùru ngu l'ò tò bũdu ike k'onye-ishi iphe, bũkpoo òbvũ bẹ oogudeje achìshi òbvũ ono.”

Jizọsu aphũru ikpoto nemadzũ obu-imemini

³⁵Tòbũdu iya bũ; Jizọsu tũko iphe, bũ mkpũkpũ lẹ mkpũkpũ jegbabe epfu opfu Chileke l'ũlo-ndzukọ ndu Jiu. Ọ nọdu anọduje ezi ozi-oma k'abũbu Chileke bũ eze. Ọ nọdu emeje g'iphe, bũ ndu ẹhu eme mẹ ndu iphe-ememe mmanũ emegbaa tũko wekọrohukota m'obeta ọ bũru ẹgube iphe-ememe, dũ idagha.

³⁶Ọ nọdu abũjeru; ọ -hũma ndu ono; imemini phẹ adũ iya; kele ike bvũwaru phẹ ree; ẹbe ẹphe amahẹdu g'ẹphe e-me iya. Ẹphe dũgbaephọ g'igwerigwe atũru, enwedu onye eleta iya ẹnya.

³⁷Jizọsu sũ ndu etsoje iya nũ: “Iphe, e meberu l'alì chashìakwaru. Ọ kwatakpọkwaru chashì shii. Obenu lẹ ndu-ozi, akpata iya akpata ha nwanshìi.

³⁸Unu pfuru nũ Nnajiũphu, nwe iphe, e meberu l'alì g'o ye ndu-ozi, e-je akpata iya nũ.”

Matiyu 10

Ndu-ishi-ozi iri l'ẹbo

(Mak 3:13-19; Luk 6:12-16)

¹Jizọsu gbẹshi bya ekua ndu etsoje iya nũ ẹphe n'iri l'ẹbo. Ọ bya ezia phẹ g'ẹphe gude ọkpẹhu chìshije òbvũ. Bya asũ g'ẹphe meje gẹ ndu ẹhu eme mẹ ndu iphe-ememe mmanũ eme; obetaru ọ bũru iphe-ememe, dũ idagha; g'ẹphe wekọrohukotachaa.

²Waa ẹpha ndu-ishi-ozi ono ẹphe n'iri l'ẹbo baa: onye kẹ mbũ bũ Sayìmonu, bũ iya bẹ eeku Pyìta; yẹe nwune iya, bũ Anduru; mẹ Jiemusu nwa Zebedi; yẹe nwune iya kẹ nwoke, bũ Jiọnu;

³mẹ Filipu; yẹe Batũlomiya; waa Tọmosu; waa Matiyu, onye ana akìriko; waa Jiemusu, bũ nwa Alufiyọsu; mẹ Tadiyọsu;

⁴mẹ Sayìmonu, bũ onye yì l'ọgbo, l'adzọ g'alì Jiu dũru ndu Jiu; mẹ Jiudasu Isukariyọtu; ọphu mechaarũ deru Jizọsu ye.

Jizọsu ezi ndu-ishi-ozi iri l'ẹbo g'ẹphe je epfua opfu Chileke

(Mak 6:7-13; Luk 9:1-6)

⁵Ọ bũru ndu-ishi-ozi iri l'ẹbo-a bẹ Jizọsu ziru g'ẹphe je je epfua opfu Chileke. Teke oozi phẹ ozi ono bẹ o pfuru phẹ iya pfushiaru phẹ iya ike sũ phẹ: “Unu ta abahũkwa l'ibe ndu abũdu ndu Jiu; ọphu unu abahũkwa mkpũkpũ ndu Samériya.

⁶Ọ kwa iphe, unu e-me bũ g'unu tũgbuephọ jepfu ndu Ízurelũ, bũ igwerigwe atũru, tũphashìhuru etũphashìhu.

⁷Unu je ezia phẹ sũ phẹ lẹ Chileke abyaakwaa egoshi l'ọo ya bũ eze.

⁸Unu emekwaaphọ ndu iphe eme g'ẹphe wekọrohu. Unu emee ndu nwũhuru anwũhu g'ẹphe teta dzũru ndzũ. Unu emekwaaphọ ndu ekpenta g'ẹphe wekọrohu; unu achìfu

obvu l'ehu ndu obvu bu ebubu l'ehu. A nuru unu iphemiphe ono ke mmanu. Nokwapho g'unu a-nu iya ndu ozo ke mmanu kwapho.

⁹Unu te eyekwa kobo; ozo afu; ozo nderi l'ekpa uwe unu.

¹⁰Unu te egudekwa eda gbeshi ije unu. Ophu unu eyekwa uwe n-yekwase. Ophu unu achikwaru akpokpa ozo k'iche. Ophu unu apakwaru oshi-mpaleka. Kele o kwa onye seru akanya be eriri iya rwuberu.

¹¹“Iphe, bukpo mkpukpu le mkpukpu, unu bahukpowaru; unu vujeru uzo lee enya onye gbaru g'a nodu l'ibe iya. Unu noduekwapho l'ibe onye obu. Unu b'ejekwa ebuphe ebuphe jasu unu afuta l'ibiya ono.

¹²Unuphu, unu bahukpooru; unu vuru uzo kele phe ekele.

¹³Teke unuphu ono gbaru k'anodu; g'ekele ehuguu, unu keleru phe bukwaru nkephe. Teke o gbaduru phe; g'ekele ehuguu, unu ono lwaphutaru unu azu.

¹⁴Eka unu jeru; a jika unu; jika anuma opfu Chileke, unu epfu; unu -lufutaepho l'unuphu ono; ozo le mkpukpu ono; unu jishia urwuku okpa unu.

¹⁵Ge mu gbukwaaru iya unu tororo; oo-kakwaru ndu Sodomu yee ndu Gomora mma mboku ikpe; eme le mkpukpu ono.”

Mkpamehu, l'abya nu
(Mak 13:9-13; Luk 21:12-17)

¹⁶“Unu lekwa enya l'unu dukwa g'aturu. Mu chikwaru unu ye g'unu jeshia aka agu jiru ejiji. Oo ya bu g'unu kwakwa enya g'agwo; unu adukwapho agu ge ndo.

¹⁷Ole-a; unu kwabejekwaru ndiphe enya. Kele ephe a-kpukwaru unu kpujeru ndu-ikpe; eechia unu iphe l'ulo-ndzuko;

¹⁸teme unu a-byakwa apfuru l'iphu ndu ochi-oha me l'iphu ndu eze l'opfu ehuguu; g'ee-shi g'unu tularu phe onu mu; tukwaaru iya pho ndu abudu ndu Jiu.

¹⁹Ole teke ephe kpularu unu jee ikpe; unu ta ayokwa oshi iphe, unu e-pfu; ozo g'unu e-dobe onu pfua ya. Noo kele o -rwuepho be ee-me-a g'unu maru iphe, unu e-pfu.

²⁰Kele o to budu unubedua l'epfu iya; oo Unme ke Chileke, bu Nna unu; no unu l'ime epfu opfu.

²¹“Su-a; nwune a-kpukwaru nwune iya nu g'e gbua; nna akpuru nwa iya nu g'e gbua. Unwu e-me g'a kputa ndu nwuru phe nu gbushia.

²²Onyemonye e-gude opfu ehuguu mu kpoo unu ashi; obenu l'onye taru nshi jasul'ikpazu be a-dzota.

²³Unu -bahuguu le mkpukpu lanu; ephe -kpaa unu ehuguu; unu haa ya tugbua jeshia mkpukpu ozo. Le-a; ge mu gbukwaaru iya unu tororo; unu tee jegbabwekwa mkpukpu, nokota l'ali Izurelu mgburugburu ge Abubu-Ndiphe ta abyawaa.

24“Onye anwụ iphe ta akajekwa onye ọonwu iphe l'eka iya shii; ọphu nwokoro akajekwa nnajiuphu iya shii.

25G'onye anwụ iphe makwaru l'oo-dapfukwa iya pho g'o dapfuru onye ezi iya iphe; o dapfukwapho nwozi g'o dapfuru nnajiuphu iya. Ephe -kua nnajiuphu, nwe ulo Biyelezebolu; ? buchia ndibe iya be ephe taa kaduro epfubyishi.”

Onye aa-tsuje ebvu

(Luk 12:2-7)

26“Oo ya bu le-a; unu ta atsujekwa phe ebvu. L'o to dukwa iphe, e kpuchiru ekpuchi g'e te mecha kpuhaa ya; ọphu o dukwa iphe, e meru l'edomi g'e te mecha madzuru iya.

27Iphe, mu epfuru unu l'ochii-a be unu e-pfu l'iphoro; iphe, unu numaru eka aadzu iya taba taba; unu je araa ya arara g'onymonye numa-dzuru iya.

28Unu ta atsujekwa ndu egbu ogwehu nemadzu ebvu; ephe -gbuchaa ogwehu; ephe taa duhedu ike egbu maa onye obu. Onye unu a-tsujekhia ebvu bu onye ono bu: o -gbuchaa egbugbu l'o nwekwarupho ike, oo-gude nwuru ogwehu onye obu yee maa ya je echie l'oku-ali-maa.

29? Tobudu unwu ogbe labo be bu kobo lanu? Ole o to nwekwa ọphu adarwu ali l'ebe o bu uche Nna unu.

30Mbua-a; egbushi, no unu l'ishi be o guchaakwaru ogu nanu nanu.

31Oo ya bu; unu ta atsushi ebvu! Unu kagbaa ikpoto ogbe aba le mkpa; g'o hahabe igwe.”

Epfu l'edzudzu-oha l'a bu ke Kereshi

(Luk 12:8-9)

32“Oo ya bu l'onye pfuru le ya bu nkemu l'edzudzu-oha be mu e-pfukwapho k'onye ono l'iphu Nna mu, bu l'imigwe.

33Obenu l'onye pfuru l'edzudzu-oha pfua le ya ta amadu onye mu bu; onye ono be mu a-sukwapho le mu ta amadu onye o bu l'iphu Nna mu, bu l'imigwe.”

Jizosu agbaghashi ndiphe

(Luk 12:51-53; 14:26-27)

34“Unu ta arikuwa le mu byaru eme ge nchi du ndiphe doo. Mu ta abyakwaru eme ge nchi du doo. O gbete buchikwaru ogu, e gude ogu-echi alwu be mu gude bya.

35Kele iphe, mu byaru bu ge mu lota nwoke yee nna iya ishi tsugbabe. G'onye bu nwanyi buru ohogu ne iya; onye nwanyi, alu ji aburu ohogu ne ji iya.

36Ndu a-buru ohogu nemadzu a-buru ndu onu-ulo onye obu gedegede.

37“Kele onye ka eye ne iya ozoo nna iya obu; eme le g'o yeru mu; ta agbakwaru k'aburu onye etsoje mu nu. Ophu onye kakwapho eye nwa iya nwoke obu; ozoo eye nwa iya nwanyi obu; agbakwarupho k'aburu onye etsoje mu nu.

³⁸Qphu onye evutaduru oswebe ɔnwu iya bya etsoru mu agbakwarupho k'aburu onye nkemu.

³⁹Onye bu onye eme ge ndzu iya duru iya le mgboko-a l'etuphakwa iya etupha. Obenu l'onye gudekwanu opfu ehu mu tuphaa ndzu iya l'a-huma iya.”

Obunggo

(Mak 9:41)

⁴⁰“Su-a; iphe, bu onye gude obu iya nabata unu be bukwa mbedua be onye obu nabataru. Onye nabatakwanuru mu bukwa onye ono, ziru mu ozi ono be onye obu nabataru.

⁴¹Iphe, bu onye gude obu iya nabata onye mpfuchiru Chileke; opfu l'o bu onye mpfuchiru Chileke be Chileke e-bukwa nggo, eebu ndu mpfuchiru Chileke. Onye gudekwapho obu iya nabata onye pfuberekoto; opfu l'o bu onye pfuberekoto be Chileke e-bukwapho nggo, eebu onye pfuberekoto.

⁴²Ozo bu l'iphe, bukpuo onye cheberu onye lanu l'unwegirima-a mini; mbu m'obeta o buru okoro mini-oyi lanu; opfu l'o bu onye etsoje mu nu; ge mu gbukwaaru iya unu tororo; onye ono be Chileke bufutajekwa obunggo iya.”

Matiyu 11

Ozi, Jionu onye emeje baputizimu ezi g'e zia Jizosu

(Luk 7:18-35)

¹Tobudu iya bu; Jizosu ziebekpoepho ndu etsoje iya nu ono iphe, ephe n'iri l'ebo; o shi l'eka ono gbeshi je etsoru ziahaa ozi-oma; asa iya asasa le mkpukpu le mkpukpu.

²Noo ya; Jionu gbegbe l'oka mkporo numa iphe, Kereshi obu emegbabe. O ye ndu etsoje iya nu; umadzu ebo;

³g'ephe je aja ya su iya: “? Bu ngu-a bu onye obu, abyanu obu? Too ? bu g'anyi le enya onye ozo?”

⁴Jizosu su phe: “Unu je epfuaru Jionu iphe, unu anu le nchi; me iphe, unu gude enya unu huma eka onwu.

⁵Ndu atsui ishi be e meru ephe nodu aphuwaa uzo; ndu eniyeni nodu ejewaa ije; e mee ndu ekpenta; ephe wekorohuchaa; ndu ada nkuchi nodu anuwaa iphe le nchi. Ndu nwuhuru anwuhu be e mewaru ephe teta; a saaru ndu ukpa ozi-oma ono asasa; ephe numa.

⁶Su-a; ehu-utso be a goru nu onye ono, mu taa buduru upfu du iya l'okpa.”

⁷Tobudu iya bu; ndu ono tugbuepho; Jizosu wata epfuru ikpoto ndu ono ke Jionu su phe: “? Bu gunu be unu jeru l'echiegu je ahuma? ? Bu ekperema, pherephere enwunga?

⁸? Bukwanu gunu be unu jeru ahuma? ? Unu jeru ahuma onye gbaphuru erengete ekwa? ? Unu ta amadu le ndu gbaphuru erengete ekwa dugbaa l'unuphu ibe eze?

⁹? Buhunu gunu ozo be unu jeru ahuma? ? Unu jeru ahuma onye mpfuchiru Chileke to? Ihee! Oo ya bu onoya; mbu-a; onye unu humaru bukwa onye gbę ka onye mpfuchiru Chileke shii mebyi akaka.

¹⁰Oo ya bu onye ono, Chileke pfuru opfu ehu iya l'ekwo-opfu iya su: 'Lekwa; mu e-zi onye-ozu mu g'o vuru ngu uzo je; je abooru ngu uzo l'iphu.'

¹¹"Ge mu gbukwaaru iya unu tororo; o to dukwa onye kabakpo Jionu onye emeje baputizimu shii l'iphe, bukpo iphe, nwanyi nwuru anwunwu; obenu l'onye bukpo ya be aa-gbekpo su l'enya kachaa alwalwa l'eka Chileke bu eze be gbekwa ka Jionu shii.

¹²E -shi teke Jionu; onye ono emeje baputizimu ono byaru bya eye nta-a be Chileke shi goshita le ya bu eze; ndu ohogu iya shi teke ono meta g'ephe gude k'ehuka kposhia ya. Ndu okpehu du; nodu eme g'ephe bahu l'al-eze obu k'ehuka.

¹³Noo kele ekemu, shi l'eka Mosisu waa iphe, ndu mpfuchiru Chileke pfukporu; tukoorupho epfu iya jeye Jionu bya.

¹⁴Bu iya bu le teke o du unu g'unu kweta; unu ekweta. O kwa Jionu bu Elayijia, e pfuru l'oo-bya obu.

¹⁵Onye nweru enu-nchi, l'anu iphe; numakwa iya.

¹⁶"? Bu gunu be mu a-turu ogbo-a yeru? O du g'unwegirima, no l'edupfu abaru ibe phe mba su:

¹⁷'Nta be anyi phuru unu upyi; ophu unu ekwedu ete ebvu; anyi rwua erwubvu; ophu unu ekwedu ara ekwa.'

¹⁸Noo kele Jionu be byaru nu; ophu o dudu iphe, ookweje eriri; ophu o dudu iphe, ookweje angungu; a su l'oo obu eme iya.

¹⁹Abubu-Ndiphe byakwanu bya anodu eri angu; a su g'e lenu l'o bu ekpiri; buru onye nggaga mee; buru onya ndu ana akiriko me ndu ozo mmanu, bukwapo ndu aamaru ejo eka. Ole oo iphe, mmamiphe Chileke l'eme be e gude amaru le mmamiphe Chileke bu iphe, pfuru oto."

Iphe, ee-me oha, jikaru nu

(Luk 10:13-15)

²⁰Tobudu iya bu; Jizosu wata abaru mkpukpu le mkpukpu ono g'o ha mba; mbu mkpukpu ono, o kachaa emeshi iphe-ohumalenya ono. O baaharu phe mba l'izimanu iphe-eji, ephe emeshi ta alwaduru phe azu. O su phe:

²¹"Nshio gube oha Korazinu! Nshio gube oha Betusayida! Kele ome e wotaru iphe-ohumalenya, e meru l'ime unu mee l'oha Taya yele oha Sayidonu m'ephe eyehaakwaa uwe-aphu; kpua onwophe ntu uzanya; gude goshi l'izimanu lwaru phe azu; ephe ghawaa umere lwapfuta Chileke.

²²Ole iphe, mu epfuru unu bu le-a: oo-karu ndu Taya; waa ndu Sayidonu mma mboku, Chileke e-kpe ikpe eme le g'oo-du unubedua.

²³Gùbe òha Kapaniyòmu! ? Ò dù ngu g'e kulia ngu g'ì supfuru l'imigwe tò? ? Tì madu l'aa-gbènu kwada ngu nù kwarwua òku-alì-maa. Opfu l'òme e wotaru iphe-òhumalenya, e meshiru l'ime ngu woru mee lẹ Sòdomu; mẹ Sòdomu anòdukwa byeye ntau-a.

²⁴Òlẹ iphe, mu epfuru unu bù lẹ-a: òò-kakwaru ndu Sòdomu mma mbòku, Chileke e-kpe ikpe eme lẹ g'òò-dùru gùbedua.”

Abyapfuta Jizòsu bya atùta unme

(Luk 10:21-22)

²⁵Lẹ teke ono kwaphò bẹ Jizòsu yeru ònu sù: “Mu ekele ngu ekele Nna, bù Nnaji igwe yẹ alì; l'ì domiru iphe-a gẹ ndu kwaru ẹnya waa ndu mmamiphe ta amaru iya; i woru iya goshichia ndu bù unwegirima.

²⁶Noo g'ò dù bù ono Nna. Iphe ono bẹ i mekpòerupho g'ò dù ngu; waa g'òotso ngu utso ememe iya.

²⁷“Sù-a; Nna mu yeakwaru mu iphemiphe l'ẹka. Ò tọ dukwa onye maru onye Nwa bù; gbahaa Nna. Ophu ò dukwa onye maru onye Nna bù; gbahaa Nwa; òzo onye Nwa iya ono kpuhaaru Nna iya ono goshi.

²⁸“Sù-a; unu byapfuta mu; unubẹ ndu esegbu onwunu l'akanya; tẹme unu vuru iphe, anyi ẹrwa; mu e-zi iya unu g'unu tuta unme.

²⁹Unu bya evuta ivu, shi mu l'ẹka; g'unu anwuta mu iphe l'ẹka; kẹle mu eme gelee bya aburu onye wozetaru obu alì. Mu e-mekwa gẹ meji nmapfuru unu.

³⁰L'iphe, mu eboje g'e vuru ta abukwa iphe, anyi ẹrwa. Ivu nkemu dukwa nphe evuvu.”

Matiyu 12

Eswe-atùta-unme

(Mak 2:23-28; Luk 6:1-5)

¹O be ujiku lanu; mbòku ono bù eswe-atùta-unme; Jizòsu phẹ nòdu aghata l'ẹgu, a kòru akpe. Ndu etsoje iya nù wòtaahaa akpuru witi ono taahaa; ẹka ẹgu agù phẹ.

²Ndu Fàrisii hùmae ya phò bya asù iya: “Lenu; ndu etsoje ngu nù emeakwaa iphe, e te mejedu l'eswe-atùta-unme!”

³Jizòsu sù phẹ: “? Unu teke agù-vuswee l'ẹkwo-opfu Chileke iphe, Dévidi meru ẹka ẹgu agù yẹ ndu ẹphe l'iya swì?”

⁴G'ò bahuru l'ùlo Chileke je ataa buredi, e doberu Chileke iche, bù buredi erwubeduru iya l'atata; ophu o rwubekwarupho ndu ẹphe l'iya swì. Ndu o rwuberu bù ndu-uke Chileke kpurumu.

⁵? Tòo unu teke agù-vuswee l'ẹkwo ekemu Mòsisu lẹ ndu-uke Chileke jeru ozi l'eswe-atùta-unme l'eze-ùlo Chileke? Ẹphe gude ẹgube ono mebyia ekemu ono; ophu ikpe anmaduru phẹ.

⁶Gẹ mu gbukwaaru iya unu tororo; iphe ọphu ka eze-ulo Chileke ono ike be nokwa l'eka-a.

⁷Ọme unu maru iphe, Chileke epfu l'eka ono, ọ sọru: 'Iphe, agụ mu nụ ta abukwa g'unu gwajẹ mu agwagwa; ọ kwa g'unu phujeru nemadzu obu-imemini; ' me unu tege ewokwaru ikpe nmaa ndu iswi du mma.

⁸Lẹ Abubu-Ndiphe bukwa Nnajiuphu, nwe eswe-atuta-unme."

Onye ẹka lanu nwuhuru anwuhu

(Mak 3:1-6; Luk 6:6-11)

⁹Jizosu shi l'eka ono; ọ buru iya atugbu bya abahu l'ulo-ndzukọ ndu Jiu.

¹⁰Ọ duru onye no l'eka ono ẹka lanu nwuhuru anwuhu. Noo ya; ndu Farisii, no l'eka ono choo iphe, ephe a-su le Jizosu meru; bya ajia ya su iya: "' Ọ bu iphe, rwuberu nemadzu l'ememe; mbu eme g'onye iphe eme wekorohu l'eswe-atuta-unme?'"

¹¹Jizosu bya ajia phe su: "O -nweru onye lanu l'ime unu, nweru aturu lanu; aturu ono dalahu l'ime nsu l'eswe-atuta-unme; ? onye ono tee jedu je akpufuta iya to?"

¹²? Nemadzu ta akadụ aturu aburu okpobe iphe? Ọo ya bu l'eme iphe-oma l'eswe-atuta-unme ta abukwa emebi ekemu."

¹³Ọ pfuchaa nno bya asu nwoke ono: "Ngwa; lochia ẹka alochi." Ọ bya alochia ẹka. Eka ono bya eteta iya bya adu iya g'ophunapho du iya.

¹⁴Ọ buerupho ndu Farisii atugbu je g'ephe chia idzu g'ephe e-shi megbua Jizosu.

Nwozi, Chileke hotaru

¹⁵Jizosu maerupho l'onoo iphe, ephe eje; o shi l'eka ono; ọ buru iya atugbu. A du igwerigwe tsoru iya. O mekota iphe, bu ndu iphe eme; ephe wekorohucha.

¹⁶Ọ pfushiaru phe ike su phe g'ephe ta akojekwa onye ya bu.

¹⁷Iphemiphe ono mee iphe, Chileke shi l'onu Azaya, bu onye mpfuchiru Chileke pfua vukota; sọru:

¹⁸"Wakwa onye ejeru mu ozi baa; onye mu hotaru l'onwomu. Ọ bu onye mu yeru obu bya aburu onye emeje g'obu jidata mu. Mu e-ye iya Unme mu l'ehu g'ọ koru ohamoha, no le mgboko le mu e-kpe phe ikpe.

¹⁹Ọ too jekwa atu igoligoli; ọphu oojekwa echi mkpu. Ọphu ọ dukwa onye byaru l'anuma olu iya l'etsuzo.

²⁰Ọ too nyakwofukwa g'ọ ka mma l'ọ ekperema, rigeru erigeru; ọphu ọ phunyikwa g'ọ ka mma l'ọ oroku, enwu reswereswe. Oo-gudeekwapho ẹka iya g'ọ gude iya jasụ teke iphe, pfuru nhamunha a-kapyabe ejo-iphe.

²¹Ọ buru iya bu onye ohamoha a-nodu ele enya l'eka."

Ẹka ike Jizosu shi

(Mak 3:20-30; Luk 11:14-23)

²²Tɔbudu iya bɔ; a bya edutaru Jizos̄u nwoke lanu, ɔbv̄u bu ebubu l'ehu. ɔbv̄u ono mee ya; ɔ nɔdu ats̄u ishi; tɛme ɔphu o pfudu opfu. Jizos̄u bya emee nwoke ono; ɔ ph̄uahaa ɔzo; pfuahaa opfu.

²³Ɔ dɔ-dzukɔtaru ndu ono g'ɛphe ha biribiri ntumatu. Ɔphe sɔ: “? Tɔ bɔkwanu onye-a bɔ Nwa Dɛvidi ɔbu?”

²⁴Ndu F̄arisii numae ya phɔ bya asɔ: “Nwoke-a tege anɔdukwa ach̄ishije ɔbv̄u; ɔ tɔ bɔ l'o gude ike ɔbv̄u, bɔ Biyelezebɔlu, bɔ iya bɔ ishi iphe, bɔkpoo ɔbv̄u l'ɔphu.”

²⁵Jizos̄u maɛrupho iphe, ɛphe ar̄i bya asɔ phɛ: “Al̄i-eze -keha ɛbo; seahaa opfu bɛ ɔ bɔkwaa ɔla-l'iswi. Nokwaphɔ g'ɔo-dɔ unuphu; ɔzoo mkpukpu, keharu onwiya ɛbo.

²⁶Teke ɔ bɔkwanu lɛ Nsetanu ach̄ifuje Nsetanu; ɔo ya bɔ lɛ nkwoka dɔ l'ibe iya; ? dɛnu g'ee-me g'al̄i-eze iya keru?

²⁷Ɔ -bɔkwanuru l'ɔo Biyelezebɔlu bɛ mu gude ach̄ishi ɔbv̄u; ? bɔ gɔnu bɛ ndu k'unu gudekwanu ach̄ishi ɔbv̄u nkepɛ? Ɔ kwa iya bɔ l'ɔo ndu k'unu e-goshiwarɔ unu l'ikpe nmaru unu.

²⁸Obenu teke ɔ bɔkwanu l'ɔo Unme Chileke bɛ mu gude ach̄ishi ɔbv̄u ɔbu; ɔo ya bɔ l'o noo iphe, egoshi lɛ Chileke bɔkwaa eze l'ehu unu.

²⁹“Tɔo ? dɛnu gɛ nemadzɔ e-shi bahɔ l'ulo onye ɔkpɛhu dɔ je egwee ivu iya k'ɛhuka; a -gɔfu l'o vuru ɔzo kee ya ɛgbu tɛmanu l'o gweta ivu iya k'ɛhuka.

³⁰“Sɔ-a; onye mu l'iya atugbaduru bɔkwa onye opfu mu; onye mu l'iya ta ach̄ikobedu ach̄ikobe l'ach̄ikakwa ach̄ika.

³¹Noo g'o gude mu sɔ unu-a; iphemiphe, bɔ iphe-ɛji, unwu-eliphe eme; mɛkpoo epfubyishi, ɛphe anɔduje epfubyishi Chileke bɛ dukotachakwaa k'ɔphu Chileke a-guru phɛ iya nv̄u; obenu l'onye pfubyiru Unme-dɔ-Nsɔ bɛ Chileke ta abyakwa aguru nv̄u.

³²Onyemonye, pfuru Abubu-Ndiphe ɛjo opfu bɛ aa-gukwaru nv̄u; obenu l'onye pfubyiru Unme Chileke bɛ a taa gukwaru nv̄u lɛ mgboko ɔwa; ɔphu aa-gukwaru iya nv̄u lɛ mgboko ɔphu abya nu.”

Oshi-ɔmi yɛ akpuru iya

(Luk 6:43-45)

³³“I -nɔdu eme g'i wɔta akpuru dɔ ree l'oshi, i yeru; vuru ɔzo meadaa oshi ɔbu g'ɔ dɔ ree. Teke i haru oshi, i yeru; o mebyihu; l'ii-maru l'akpuru iya a-dukwapho ɛji; kele e gude akpuru, oshi m̄iru amaru ɛgube oshi, ɔ bɔ.

³⁴Unubɛ unwu, ɛjo agwɔ nwushiru-a! ? Unu e-shi ishiagha pfua opfu ɔma l'ɛka unu dɔ nɔ? kele iphe, ɔnu epfuje bɔ iphe, jiru obu bushihu.

³⁵Ɔkpobe nemadzɔ eshije l'ɔkpobe iphe, dɔ iya l'obu wofuta ɔkpobe iphe; ɛjo nemadzɔ nɔdu eshijekwapho l'ɛjo-iphe, dɔ iya l'obu wofuta ɛjo-iphe.

36“Gẹ mu karu unu: mboku ikpe Chileke be Chileke e-kpekwa onyemonye ikpe mkpokoro opfu, o pfujekporu.

37L’o kwa opfu, shi ngu l’onu be ee-gude gua ngu l’onye pfuberekoto. O bukwarupho opfu, shi ngu l’onu be ee-gudekwapho nmaa ngu ikpe.”

Iphe-ohumalenya, meru l’ehu Jiona

(Mak 8:11-12; Luk 11:29-32)

38Tobudu iya bu; o nweru ndu ezije ekemu me ndu Farisii haru bya asu iya: “O-zì-
iphe; menaru anyi iphe-ohumalenya, e-goshi l’oo Chileke ziru ngu g’i bya eviya.”

39O yeeru phe iya onu su phe: “Ogbo-nta-a pakpokwaaru njo. Epe te ekwedu
nopyabe l’eka Chileke. Epe nodu acho iphe-ohumalenya. Ole o to dukwanu iphe-
ohumalenya ozo, ee-goshi phe; gbahaa iphe, meru Jiona, bu onye mpfuchiru Chileke.

40Noo kele oo ge Jiona noru abali eto: eswe l’enyashi l’ime epho ophomu okazu ono
bu ge Abubu-Ndiphe a-no abali eto; eswe l’enyashi l’imime ali.

41Ndu Ninive l’a-gbalihu mboku ikpe; nmaa ogbo nta-a ikpe; kele izimanu lwaru ndu
Ninive azu; epe ghaa umere; lwapfuta Chileke l’opfu, Jiona pfuru phe; obenu l’onye
ka Jiona no l’eka-a nta.

42Nwanyị, bu eze ndu Sheba be a-gbalihukwa mboku ikpe; nmaa ogbo nta-a ikpe;
kele o shi l’eka igwe beru; ali beru bya ge ya numa opfu nkwaanya Solomonu. O be
nta-a be onye ka Solomonu no l’eka-a.”

Iphe, akpaje obvu alwa azu

(Luk 11:24-26)

43“Oobujeru teke a chifuru nemadzu obvu l’ehu; obvu ono etsoru echiogu eka mini
adudu aghaphe; acho eka oo-nme anmee. Teke o jenyaa; ophu o dudu eka o
humaru;

44L’o su ge ya laphueshikwa azu l’akahu ulo iya-a. Teke o byatashiaru o dabyiwaru
iphoro; a zawa iya azaza; dozichaa ya ree;

45L’oo je achita obvu esaa ozo, ka iya njo; epe awuba je eburu iya. Ndzu nwoke ono
teke ono abya aka njo; eme le teke mbu pho. Nokwapho g’oo-du ogbo nta-a, megburu
onwophe l’ejo-iphe-a bu ono.”

Ne Jizosu yee unwune iya

(Mak 3:31-35; Luk 8:19-21)

46Noo ya; Jizosu kpukwaduru-a opfu l’onu epfu eyeru ndu ono; ne iya yele unwune
iya byawaa bya apfuru l’etezi zia su g’e kua ya g’ephe pfuru yeru iya.

47O nweru onye suru iya g’o gebekwa le ne iya yee unwune iya nokwa l’etezi acho
g’ephe pfuru yeru iya.

48O su onye ono, pfuru iya ya nu ono: “? Bu onye bu ne mu; too bu ndu ole bu
unwune mu obu?”

⁴⁹Ọ bya atube ndu etsoje iya nū ẹka bya asu: “Wakwa ndu bu phe bu ne mu; bya aburu unwune mu baa.

⁵⁰Kele onyemonye eme iphe, du Nna mu, bu l'imigwe l'uche; buakwaa nwune mu ke nwoke; bya aburu nwune mu ke nwanyi; bya abukwarupho ne mu.”

Matiyu 13

Onye agha mebyi iphe

(Mak 4:1-9; Luk 8:4-8)

¹Ọ buru ujiku lanu onokwapho be Jizosu shi l'ulo ono tugbua je anodu l'aguga eze-enyimu.

²A du igwerigwe gbaphee ya mgburugburu; k'ophu o bahuru l'ugbo, no l'ime mini ono je anodu. Igwerigwe ndu ono kuru l'eli-mgboko.

³O gude etu zia phe iphe, du igwerigwe su: “Nwoke lanu jeru atu mebyi iphe.

⁴Ọ nodu atu mebyi iphe ono; o haru daa l'aguga gbororo; enu bya atutua ya.

⁵Ọzo nashihu iya daa l'ali, du epfu-epfu; ẹka anu ali adu-zidu. Ntanta-a o fushia ome l'anu ali ono, ta adukwanu igbi ono.

⁶Anwu chilahaepho; o chipyashia ya. O nwulwashihu kposhihu nku; kele o to nwedu ogharabvu l'ime ali.

⁷Ọzo daa l'eka akpuru obvu no l'ime ali. Yele obvu ono futakota. Obvu onoya kpagbushia ya.

⁸Ọzo daru l'eka ali du ree. O fushia ome; vua evuvu; bya amia amimi. Ndu amita ukporo ise; ndu ukporo eto; ophu aburu ukporo l'iri.

⁹“Onye nweru enu-nchi, anu iphe numakwa iya!”

Iphe, meru iphe, Jizosu egudeje etu ezi iphe

(Mak 4:10-12; Luk 8:9-10)

¹⁰Tobudu iya bu; ndu etsoje iya nu byapfuta iya bya asu iya: “? Bu gunu meru g'o gude i gude etu epfuru ndu ono opfu?”

¹¹Jizosu su phe: “Oo unubedua be Chileke meru g'unu maru iphe, e shi domigbaa edomi, bu iya bu k'eka Chileke bu eze; obenu le ndu k'ono be o to meduru g'ephe maru iya.

¹²Noo kele iphe, bukpoo onye nweru nu be Chileke e-yebaaru g'o nweru nweru k'etsutsu iya. Obenu onye ete nwedu nu be o-ogbenu natafulenu nwophu, o nweru.

¹³Noo g'o gude mu gude etu etu epfuru phe opfu. Kele ephe e-le enya nta lee imo; o to dudu iphe, ephe ahuma. Teke ephe numachaaaru nta numa imo; o to dudu ophu aga phe nchi. Ophu o dudu iphe, byaru l'edo phe enya.

14 Ọ bụru l'ẹhu phẹ bẹ iphe, Azáya onye mpfuchiru Chileke pfuru vuru; l'ọ sūru: “‘Ephẹ a-nga nchị nta ngaa imo; ọ tọ dudu iphe, edo phẹ ẹnya. Lee ẹnya nta lee imo; ọ tọ dudu iphe, ephẹ byaru ahuma.

15 Opfu l'ephẹ kpochiwaru obu. Ephẹ swọ-chiwaa nchị; tanyibe ẹnya. Ọ -būrabu m'ephẹ egudekwaa ẹnya hūma; gude nchị phẹ nūma. Obu phẹ emee g'ọ doo phẹ ẹnya; m'ephẹ aghakọbe byapfuta Chileke g'ọ dzoo phẹ.’

16 “Sū-a; ẹhu-utso bẹ a goru nū unu; opfu l'unu dūru ike gude ẹnya unu hūma ụzo; gude nchị unu nūma iphe.

17 Lẹ tororo, mu eme gẹ mu gbuaru iya unu bụ lẹ ndu mpfuchiru Chileke; mẹ ndu pfuberekoto, dū igwerigwe bẹ ọ guru ẹgu ahuma iphe-a, unu ahuma-a; ọle ephẹ ta ahumaduru iya. Ọ gūkwaru phẹ phọ anuma iphe-a, unu anu-a; ọle ephẹ ta anumaduru iya.”

Iphe, ẹtu onye agha mebyi iphe ono bụ

(Mak 4:13-20; Luk 8:11-15)

18 “Wakwa iphe, ẹtu k'onye jeru atụ mebyi iphe ono bụ baa:

19 Ọ nweru onye anọduje anụ iphe, eepfu lẹ k'ẹka Chileke bụ eze; ọle o too dodu iya ẹnya. Onye-Njọ ono abya anafu iya mebyi iphe ono, e pfuru, nọ iya l'ime obu ono. Ọ bụru ẹgube onye ono bụ ndu k'ono, a gharu l'aguga gbororo onoya.

20 Ndu ọphu daru l'epfu bụ onye ọphu bụ: teke ọ nūmaru opfu ono bẹ ọ natakpọoru iya l'ẹhu-utso.

21 Ọphu ọ tọ gbaduru iya ọgbarabvu l'obu. Ọ kpọepho ọpfu nwanshii; iphe mkpamehu byapfutaẹ ya phọ; ọzoo ndu ọzo melahaa ya ewere l'ọ kwetarụ opfu ono; l'ọ bụru iphe, ọo-kpakota daa; parụ opfu ọbu buhaa.

22 Ndu ọphu daru l'ẹka obvu dū l'ali; bụ onye ọphu nūmaru opfu Chileke; ọle ọogba egomunggo ẹhu iya. Eyenuka obu l'ẹku batanụ bya akpaahaa opfu ono ẹhu. Ọphu ọ mịduru amimi.

23 Obenu lẹ ndu k'ono, bụ mebyi iphe, a tūru l'ọkpobe alị ono; noo ndu ọphu bụ ndu anumajechaa ya nū; bya ewota iya ye l'ọkpoma phẹ. Ọ bụru ndu k'ono eyeje mebyi. Ọphu eyee ụkporo ise; ọphu eyee ụkporo ẹto; ọphu eyee ụkporo l'iri.”

Ẹtu, e gude ohu iphe anmaa

24 Noo ya; a nonyakwaa Jizosu byakwa anmaaru phẹ ẹtu ọzo sū phẹ: “Gẹ Chileke e-shi goshi lẹ ya bụ eze a-duẹpho gẹ nwoke, chitaru mebyi iphe, dū ree je aghaa l'ali.

25 Ọ be l'enyashi ujiku lanu; teke e kuchawaru mgbenya; onye ọhogu nwoke ono bya achita akpuru iphe je aghakwaapho l'ẹka ono, ọ gharu ọkpobe iya phọ. Ọ ghaẹbe iya bya aburu iya atugbu.

26 Mebyi iphe ono nọdu l'ẹka ono fushia bya awata amimi. Ohu iya phọ fushikwaapho bya amia. A gbẹ teke ono hūma l'ohu mebyi iphe yi iya.

²⁷Ndu ozi nnajiuphu ono byapfuta iya bya asu iya: ‘Nnajiuphu; ? to bunaa okpobe mebyi iphe be i gharu l'ali ngu-a? ? Denuhunu g'o gude ohu iya fushia ya eghirigha nno?’

²⁸Nwoke ono su phe l'o du g'o bu ndu ephe l'iya duru l'opfu be meru iya nu. Ndu ozi ono su iya: ‘? Bu iya bu l'o du ngu g'anyi je epheshia ya too?’

²⁹O su phe: ‘Waawaa! Unu -jeshia epheshi ohu mebyi iphe ono be eka a-tunukakwa unu atutu; unu eje ephekobe iya ndu ophu bu okpobe iya.

³⁰Unu haa ya g'ephe toko vua jeye teke ebubu iya. Noo teke mu a-karu ndu ebu iya nu g'ephe vuru uzo pheshiada ohu iya ono; chikobe l'eka lanu; sweshia ya esweshi kpoo ya oku. Temanu ephe ebutawaro ophu bu okpobe iya vuba l'ulo mu teke ono.’ “

Etu, e gude akpuru oshi mosutadu anma

(Mak 4:30-32; Luk 13:18-19)

³¹Jizosu byakwa anmaaru phe etu ozo su phe: “Su-a; ge Chileke e-gude goshi le ya bu eze l'a-duepho g'akpuru oshi mosutadu, nwoke wotaru ghaa l'egu iya.

³²Akpuru oshi ono bu iya kakota rwiirwiirwii l'iphe, bukota mebyi iphe, aaghaje aghagha l'ali. Ole o bujeru teke o byaru evua; l'o kakota iphemiphe, aakuje akuku l'eli. L'o bya aburu oshi k'ophu unwu enu, ephe l'eli anoduje akpa epfune l'ekali iya.”

Etu, e gude iphe-ekoje-buredi anma

(Luk 13:20-21)

³³No iya; Jizosu byakwa anmaaru phe etu ozo su: “Ge Chileke e-shi goshi le ya bu eze; a-duepho g'iphe-ekoje-buredi, nwanyi hataru nwanshii ye l'ukpokutu iphe, eegudeje eme buredi. Iphe ono jiru nkweka eto.

Jizosu gude etu ezi iphe

(Mak 4:33-34)

³⁴“O buru etu etu egube ono be Jizosu gude zikota ndu ono ozi-oma ono. O -gudedu etu be o to dudu iphe, oozije phe.

³⁵Iphe ono je emee; iphe, onye mpfuchiru Chileke pfuru vua; bu ophu suru: “Mu e-gude etu etu pfiaru phe opfu. Mu e-pfuru phe iphe ono, e domiru edomi eshinu e meru mgboko ono. ”

Jizosu epfu iphe etu ono, o nmaru k'ohu iphe ono bu

³⁶Noo ya; Jizosu paru ikpoto ndu ono haa; bahushia l'ulo. Ndu etsoje iya nu bya abyapfuta iya; bya asu iya: “Konaaru anyi iphe, o bu; mbu k'ohu iphe ono g'o doo anyi enya.”

³⁷O su phe: “Onye ono, agha okpobe mebyi iphe ono bu Abubu-Ndiphe.

³⁸Ali eka ono, o gharu iya ono buru mgboko l'ophu. Okpobe mebyi iphe ono, o gharu ono buru ndu Chileke bu eze phe. Ophu bu ohu iya ono buru unwegirima Onye-Njo ono nwuru.

³⁹Ohogu ono, gharu ohu mebyi-iphe ono buru Obutuswe. Teke ono, ee-butu iya ebuta ono buru g'oo-du me mgboko bvujeepho. Ndu e-bu iya nu buru unwu-ojozi-imigwe.

⁴⁰Oo g'e phekoberu ohu iya ono chita je akpoo oku ono bu g'oo-du teke mgboko a-bvu.

⁴¹Abubu-Ndiphe e-zi unwu-ojozi-imigwe iya g'ephe chishikotakpo iphe, bu ndu ono, kpataru nwibe phe eme iphe-eji ono me iphe, bu ndu emeje ejo-iphe ozo g'ephe hakota;

⁴²chiru ye l'ota chichichi oku. Eka ono be nemadzu a-nodu kwaa ejo ekwa; taa ikireze.

⁴³Ndu ophu pfuberekoto l'iphe Chileke a-nodu egbu nwijnwii g'enyanywu l'eka Nna phe bu eze. G'onye nweru enu-nchi numakwa iya!"

Iphe labo, vugbaa oke aswa

⁴⁴"Eka Chileke bu eze du g'iphe, vu oke aswa, e woru domia edomi l'egu. Onye lanu je ahuma iya woru iphe kpuchia ya; teru eswa lashia. O laa je atuko iphemiphe, o nweru reshia je azua ali ono."

⁴⁵Noo ya; o su: "Onye maru iphe, eka Chileke bu eze bu; emeje g'eze onye agba ngho; o nodu acho igopoto, amashi mma ike, ya a-zu.

⁴⁶O chonyaa ya; bya ahuma ophu ere ntumatu. O laa je atuko iphe, o nweru reshia gude je azua ya.

Ugbu-ikokoro

⁴⁷"Su-a; Eka Chileke bu eze dukwa g'egube eewojeru ugbu-ikokoro tua l'eze-enyimu-a; l'o nwukoo ema, du iche iche.

⁴⁸Ema ono -jiepfo ugbu ono; l'a bya akpuu ya kpufuta eli-mgboko; bya anodu anoo; hoo ya ahoho; hoshia ya ophu du ree ye le nkata bya ekporu ndu ophu du eji je awushia.

⁴⁹Noo g'oo-du teke mgboko a-bvu. Ndu ojozi-imigwe a-lufuta bya ahoshia ndu ejo-iphe l'eka ndu pfuberekoto no.

⁵⁰L'ee-je achiru phe ye l'ota chichichi oku. Eka ono be nemadzu a-nodu raa ejo ekwa; taa ikireze."

Iphe ophuu l'akahu iphe

⁵¹Noo ya; Jizosu jia phe su phe: "? O kwa l'iphe ono, mu epfu ono doru-a unu enya?" Epe su iya: "Ee Nnajiuphu!"

⁵²O su phe: "Oo ya bu l'iphe, bu onye maru ekwo-opfu Chileke maghee ya ree; bya aburu onye kwetawaru le Chileke bu eze iya be dupeho ge nwoke, kwaru eze unuphu. O nodu atukoje akahu iphe me iphe ophuu gwefuta l'ulo ophu o doberu eku, du iya mkpa."

Aajika Jizosu le Nazaretu

(Mak 6:1-6; Luk 4:16-30)

⁵³Tobudu iya bu; Jizosu nmaebekotakpoepo etu etu ono g'ọ ha; ọ bya eshi l'eka ono tugbua;

⁵⁴Iashia mkpukpu iya. O rwua eka ono bya abahu l'ulo-ndzukọ ndu Jiu je eziahaa phe opfu Chileke. O zirwua iphe obu k'ophu ọ du ndu no l'eka ono biribiri. Epe tuko pfuaha su: “? Bu awe be egube oke mmamiphe owa-a shi iya? ? Denu g'o shi emeebe iphe-ohumalenya owa-a?”

⁵⁵? To bunu iya-a bu nwatibe nwoke kapyinta-a? ? To bunua Meri be ne iya aza? ? To bunu iya bu nwune Jiemusu yele Jiosefu; waa Sayimonu; me Jiudasu?

⁵⁶? To bunaa unwune iya ke nwanyi be anyi l'ephe bugbaa l'eka-a? ? Bu awe be o shi nwutachahunaa iphe owa-a?”

⁵⁷Iphe ono kpatsu phe ehu-eghu. Jizosu su phe: “Onye mpfuchiru Chileke be aakwabejekwa ubvu l'ekameka; agufuekwapho le mkpukpu iya waa l'ibe iya.”

⁵⁸Ọ buru iya meru g'o gude ophu iphe, du biribiri, ha shii, Jizosu meru l'eka ono adudu igwerigwe kele epe te ekwetaduru nkiya.

Matiyu 14

Anwuhu Jionu onye emeje bapuzizimu

(Mak 6:14-29; Luk 9:7-9)

¹No iya; ọ buru teke ono be Herodu, bu ochi-oha Galili numaru udu Jizosu;

²bya asu ndu ejeru iya ozi: “? Unu maru-a l'ọ kwa Jionu ophu emeje bapuzizimu tetaru dzuru ndu ozo; ọ kwa iphe ono meru iphe, oduje ike eme iphemiphe ono, dugbaa biribiri ono.”

³Iphe, meru nu bu le Herodu zijeru; e je egude Jionu; kee ya egbu je atuchia l'ulo mkporo. Ọ buru Herodiyasu be kparu iya nu. Herodiyasu ono bu nyee Filipu. Filipu bukwanuru nwune Herodu.

⁴Le Jionu shi asuje Herodu l'oo iphe, ta adudu Chileke ree be o meru; l'o jeru ahata nyee nwune iya ono luru.

⁵Ome o to buwaa le Herodu atsu oha ebvu me o gbuwaa Jionu egbugbu. Obenu l'oha pfudzuwaru le Jionu bu onye mpfuchiru Chileke.

⁶Noo ya; o be mboku, bu eswe, Herodu aboje Obo-iphe gude anyata mboku, a nwuru iya; nwa Herodiyasu ke nwanyi bya etee ebvu l'atatiphu ndu ebyaa Herodu ono. Ehu tsoo Herodu ntumatu.

⁷Tobudu iya bu; o richaaru iya angu su le ya a-nu iya iphe, o rwokpoeru iya pho.

⁸Noo ya; ne iya kwaru iya ye. Ọ byapfuta Herodu bya asu iya: “Yenu ishi Jionu ophu emeje bapuzizimu l'ochi pataru mu l'eka-a!”

⁹Ehu daepo eze ono dzuu. Obenu l'eshinu o riwaru angu l'iphu ndu ono, byaru iya ebyaa ono be o suru g'a nukwa iya iphe, ọ suru g'a nu iya.

¹⁰O zia; e je egbuta Jiṅu ishi l'ulo mkporo;

¹¹ye l'ochi bya apẹe nwamgboko ono. Nwata woru iya je apẹe ne iya.

¹²Ndu etsoje Jiṅu bya bya apata ogwe iya je elia. Ephe mechaa; je akọoru Jizosu iphe, meru nū.

Jizosu anu unu umadzu iri l'ẹbo l'ukporo iri nri

(Mak 6:30-44; Luk 9:10-17; Jiṅu 6:1-14)

¹³Tobudu iya bu; Jizosu numaepho iphe, meru nū; o kwe hm bahu l'ugbo tugbua jeshia l'eka ọo-nodu nwekiya. Ikpoto ndu ono numaepho le Jizosu gudewaa ugbo tugbua; ephe shi le mkpukpu le mkpukpu gude okpa tsoru iya.

¹⁴O futa l'ugbo ono bya ahuma ikpoto nemadzu, ha shii, no l'eka ono. Imemini phe du iya shii; o mee ndu iphe eme; ephe wekorohu.

¹⁵O bejeepho l'uzenyashi ndu etsoje iya nu jepfu iya je asu iya: “? I maru-a l'eka-a bu echiegu; teme nchi nodu ejihuwaa? Sudupho ikpoto ndu-a g'ephe laa; g'ephe abahukwanu le mkpukpu le mkpukpu-a, no-pheru anyi mgburugburu-a je azutaru onwophe nri.”

¹⁶Jizosu su phe: “G'ephe te ejeshiro alala. Unu nunu phe nri g'ephe ria.”

¹⁷Ephe su iya: “Iphe, anyi gude l'eka-a bukwa ishi buredi ise waa ema labo kpurumu.”

¹⁸O su phe: “Ngwa; unu chitaru mu iya l'eka-a.”

¹⁹Noo ya bu; o karu ikpoto ndu ono g'ephe noduchaa anoo l'eka ono, nweswa du kirikiri ono. O bya achita ishi buredi ise ono waa ema labo pho; bya apalia enya imeli; kele Chileke ekele ke nri ono; bya eworu iya nyawashia chiru nu ndu etsoje iya nu. Ndu etsoje iya nu woru iya keshiaru ikpoto ndu ono.

²⁰Ephe toko rijichaa ephe. Ephe bya atutukobe ndu ophu e riphodoru. O ji nkata iri l'ẹbo.

²¹Unwoke, yi le ndu ono, riru nri ono beru l'unu unwoke iri l'ẹbo l'unwoke ukporo iri; a -gufukwa unwanyi l'unwegirima.

Jizosu eje ije l'eli mini

(Mak 6:45-52; Jiṅu 6:16-21)

²²Tobudu iya bu; Jizosu su ndu etsoje iya nu ono g'ephe bahu l'ugbo; vuru iya uzo dafu azu iya ophuu ge ya pfuadaru igwe oha ono g'ephe lashia.

²³O pfuchaerupho igwe oha ono; ephe lashichaepho; o tugbua je anodu l'ubvu nwekinyi iya pfuaha nuaaha Chileke. Nchi jihuchaa; o nodu pho l'eka ono nwekinyi iya.

²⁴Ugbo ono nodu l'echilabo eze-enyimu ono. Oke akpara-mini nodu atukwapho. O mee akpo ugbo ono nodu atsū l'ehu; kele pherephere ezifuanu iziphu.

²⁵Jizosu jeru ije l'eli mini ono jepfushia phe. Teke ono buwaru l'iphe-odu aha enu.

²⁶Ndu etsoje iya nū hūmae ya phọ; ẹka ooje ije l'eli mini ono; ẹhu nmalahaa phe anmanma; ẹka ẹphe dobesu l'ọo maa. Ẹphe chishia mkpu; ẹka ndzū agu phe.

²⁷Teke ono kwaphọ; Jizosu sū phe: “G'okpoma shihu unu ike. Ọ bụa mbedua. Ndzū ba agushi unu.”

Pyita eje ije l'eli mini

²⁸Noo ya; Pyita sū iya: “Nnajiuphu; ọ -būru ngu eviya; kanuru mu gẹ mu nyibata l'eli mini jee ije byapfuta ngu.”

²⁹Ọ sū iya: Ngwa! Byanu! Pyita kwenu do; nyifuta l'eli ugbo ono jeru ije l'eli mini ono jepfushia Jizosu.

³⁰Tobudu iya bụ; ọ hūmaepho akpara-mini ono, atū nū ono; ndzū guahaa ya. Ndzū watae ya phọ agugu ono; ọ wata anguda anguda le mini ono. Ọ rashia: “Nnajiuphu dzoo mu-o!”

³¹Jizosu bya amachia ẹka selita iya sū iya: “Oo-wa! Ekwekwe nkengu apaa nwanshi. ? Bū gunu meru g'o gude i boahaa obu ẹbo?”

³²Yee Pyita bya aswiru bahu l'ime ugbo ono. Oke pherephere ono zibuhu.

³³Ndu etsoje iya nū ono, nokota l'ime ugbo ono bya abaru iya eja sū iya: “I bupho Nwa Chileke obu eviya eviya.”

Jizosu eme gẹ ndu iphe emegbaa wekorohu le Genesaretu

(Mak 6:53-56)

³⁴Tobudu iya bụ; Jizosu phe daghaa mini ono bya afuta le Genesaretu.

³⁵Ẹphe futaeopho; ndu ẹka ono hūbechawaa Jizosu ama. E zia; a gbachaaaru je l'unuphu l'unuphu je apatachaaru iya ndu iphe emegbaa g'ẹphe ha.

³⁶Ẹphe nodu arwoje iya g'o kwe g'ẹphe denyi iya ẹka; obetaru ọ būru l'onu uwe iya. Iphe, bukpuo ndu denyiru onu uwe iya ono ẹka wekorohuchaa.

Matiyu 15

Omelali ndiche ndu Jiu

(Mak 7:1-13)

¹Ọo ya bụ; ọ dūru ndu Fārisii, dōru l'eka ono; wakwapho ndu ezije ekemu. G'ẹphe ha tuko shi Jierusalemu byapfuta Jizosu bya asū iya:

²“? Bū gunu meru iphe, ndu etsoje ngu nū emebyi omelali, shi le nna anyi oche phe? ? Bū gunu meru iphe, ẹphe ta akwojedu ẹka akwokwo temanu ẹphe erije nri?”

³Jizosu bya asū phe: “? Bukwanu gunu meru g'o gude unu gbẹ gwobechia ekemu, Chileke sūru g'e meje je emeahaa omelali, nemadzu doberu?”

⁴Le Chileke sukwaru: ‘Yejekwaru nna ngu yele ne ngu ubvu.’ Bya asukwapho: ‘Onye epfujeru nna iya ozoo ne iya ejo opfu g'e gbukwaa onye obu egbugbu.’

⁵Unubèdua byakwanu epfu bya asu: ‘O -buru le nemadzu suru nna iya; ozoo ne iya: Iphe, mu gege egude kwoo ngu buakwaa iphe Chileke.’

⁶‘Oo ya bu l'onye ono ta agbaeduru ke g'o gbaaru ne le nna iya mkpu.’ Unu su l'o to pfuduru eji. Unu shi egube ono gude l'unu eme omelali, unu ezi; mee Opfu Chileke o buru iphe-mmanu.

⁷Lekwa unube tuko-l'ehu-atuko-l'obu-a! Azaya, onye mpfuchiru Chileke pfugbuakwaru k'unu teke o pfuchiru Chileke su:

⁸‘Ndu-a bu l'ogbogboromonu be ephe gude akpiritaru mu ntse. O buru ire be ephe gude aja mu ajaja; obu phe nodugbaa mu uzanya.

⁹Ephe abaru mu eja mkpe; bya ezi ekemu, nemadzu turu; o nochia enya ekemu Chileke.”

Iphe, aaso nsọ; me iphe, a ta sọdu nsọ

(Mak 7:14-23)

¹⁰Jizosu bya ekua igwe oha ono; bya asu phe: “Unu gebekpodapho ge mu karu unu g'o doo unu enya.

¹¹O to bukwa iphe, nemadzu eri l'onu aturuw iya; o kwa iphe, shi nemadzu l'ime obu futa iya l'onu bu iphe, aturuwe iya nu.”

¹²Tobudu iya bu; ndu etsoje iya nu byapfuta iya bya asu iya: “? I maru-a l'iphe ono, i shi epfu ono shikwa eghe ndu Farisii eghe?”

¹³O su phe: “Iphe, bukpoo oshi, ata budu Nna mu, no l'imigwe gude eka iya yee ya be ee-phefukwa ephefu.

¹⁴Unu paru phe ro haa l'ephe bu ndu atsushi, kpu ndu atsushi. Onye atsushi -kpuru onye atsushi ibe iya be ephe a-tukokwa dalahu le nsu.”

¹⁵Pyita su iya: “Meeshinu g'etu ono doo anyibedua enya.”

¹⁶Tobudu iya bu; o su phe: “? Bu iya bu l'unubedua be iphe ete dojekwapho enya?

¹⁷Unu ta amakwapho l'iphe, eeri l'onu bu l'ephe be obahuje; l'eeshi l'eka ono nyifu iya.

¹⁸Obenu l'iphe, nemadzu epfu l'onu bu l'obu be o shi iya futa. O buru ono bu iphe, aturuw nemadzu.

¹⁹Kele oo l'ime obu nemadzu be iphemiphe-a shi: agba ejo egomunggo; egbu ochi; eri ogori; apharwushi onwonye; ezi iphuru; adzu uka; yele epfurwushi nemadzu.

²⁰Oo iphemiphe ono bu iphe, aturuwe nemadzu. Obenu l'a ta kwoduru eka ria nri tee aturuwudu nemadzu ililekpoo.”

Ekweta nwanyi, abudu onye Jiu

(Mak 7:24-30)

²¹Jizosu gbeshi l'eka ono bya ejeshia mkpukpu le mkpukpu, no-pheru Taya yele Sayidonu mgburugburu.

²²A bya l'amaru; nwanyi Kénanu, bu l'eka ono byapfuta iya bya echia mkpu su: “Nnajiuphu, bu Nwa Dévidi! Phunaaru mu obu-imemini! Le nwatibe mu ke nwanyi be obvu alokwa kpurukpuru.”

²³Ophu Jizosu epfuduru opfu yeru iya. Ndu etsoje Jizosu bya arwoahaa ya su iya: “Chifunu nwanyi-a, l'etsophe anyi arachi anyi nchi-a.”

²⁴Jizosu su: “O to dukwa eka ozo, Chileke ziru ge mu je; gbahaa ge mu jepfu ndu Izurelu, bu igwerigwe aturu, tuphashihuru etuphashihu.”

²⁵Nwanyi ono gbeshi bya adaa kpurumu l'iphu iya su iya: “Nnajiuphu; jiko gbaaru mu ro mkpu.”

²⁶Jizosu su iya: “Nwanyi-a; o to dukwa ree g'e woru nri unwegirima nu unwu nkuta.”

²⁷Nwanyi ono su iya: “Ono dua nno Nnajiuphu! Obenu le nkuta atutujekwaa evirivi nri, dashihuru l'eka onye nwe phe nu eri nri.”

²⁸O pfuchaa nno; Jizosu su iya: “Oowee! Gube nwanyi owa-a! Ekwekwe nkengu apaa. Aa-o! O kwapho g'ogugu ngu bu ge Chileke e-meru ngu.” E shiepho teke ono gedegede; o buru ada iya nwanyi ono ewekorohu.

Jizosu eme g'ehu du ikpoto nemadzu ike

²⁹Jizosu shi l'eka ono tugbua bya etsoru aguga aguga eze-enyimu Galili ogologo; je enyihu eli ubvu je anodu.

³⁰Tobudu iya bu; ikpoto nemadzu wuru byapfutashia ya; dutagbaaru iya ndu eniyeni; me ndu ndanwu danwushiru; me ndu atsu ishi; me ndu te epfudu opfu; mewaro igwerigwe ndu ozo, iphe emegbaa. Epe bya achiru phe wushiru Jizosu le mgboru okpa. O mee; eh du dukota phe ike.

³¹No iya; eh dukota phe ike; k'opfu o du ikpoto ndu ono biribiri g'ephe humaru le ndu te epfudu opfu pfuaharu opfu; ndu ndanwu danwushiru; eh tetachaa phe. Ndu eniyeni jeahaa ije; ndu atsu ishi nodu aphu uzo. Epe jaahaa Chileke ke ndu Izurelu ajaja.

Jizosu anu unu umadzu iri nri

(Mak 8:1-10)

³²Tobudu iya bu; Jizosu bya ekua ndu etsoje iya nu bya asu phe: “Imemini ikpoto ndu-a dukwa mu; g'onye l'ephe nowaru ujiku eto l'eka-a; ophu o budu l'o dukwaduru nri, ephe gude, ephe e-ri-a. Ophu mu a-sukwanu g'ephe swiru egu lashia. Mu -pfua nno; ephe lashia; mbà atushi phe l'uzo.”

³³Ndu etsoje iya nu su iya: “? Bu awe be anyi a-humakwanu buredi l'echiegu-a, l'a-su ikpoto ndu-a eriri?”

³⁴Jizosu sù phẹ: “? Bù ishi buredi ole bẹ unu gudekpoo?” Epehe sù iya: “O kwa ishi buredi esaa; waa unwu-ema, haru yikwaru iya pho.”

³⁵Oo ya bu; o sù g'ikpoto ndu ono nodukota anoo l'ali l'eka ono.

³⁶O bya achita ishi buredi esaa ono waa unwu-ema ono bya ekele Chileke ekele. O bya awashia ya bya achie ndu etsoje iya nu; epehe keeru ikpoto ndu ono.

³⁷Ndu ono tuko ria nri rijichaa epho. Ndu etsoje iya nu bya atutua ibiribe buredi ophu ghuduru nu; o ji nkata-eevu-ipe esaa.

³⁸Ndu riru nri ono du unu unwoke iri; a -gufukwa unwanyi me unwegirima.

³⁹O bya asu ndu ono g'ephe lawaro. Epehe wukahua lashia. O bya abahu l'ugbo; o buru iya eje ali Magadanu.

Matiyu 16

Eepfu ge Jizosu mee ohumalenya

(Mak 8:11-13; Luk 12:54-56)

¹Ndu Farisii me ndu Sadusii bya agbaberu Jizosu onya opfu g'ephe gude nmata iya. Epehe bya asu iya g'o menaarù phe iphe-ohumalenya, shi l'imigwe.

²O yeeru phe iya onu sù phẹ: “Oobujeru teke o bu l'uzenyashi be akpaminigwe charu roboo; unu asu l'echele iya be mboku a-dukwaa ree.

³Teke o bukwanu l'utsu be unu humaru g'igwe du rogoro rogoro; teme erwurwu du iya; unu asu l'igwe e-dzekwa o-lwa-boroboro ntanu-a. Su-a; eshinu unu amajechaaru epfu ge mboku a-du me unu -lee enya l'akpaminigwe; ? denu g'o gude ophu unu adudu ike koo iphe, o bu; mbu iphe, emegbaa l'ogbo nta-a?

⁴Ogbo nta-a pakpokwaru njo. Epehe te ekwedu nopyabe l'eka Chileke. Epehe achu iphe-ohumalenya; ole o to dukwanu iphe-ohumalenya ozo, eemeru phe; gbahaa iphe, meru Jiona.” O pfuchaa nno; o paru phe haa l'eka ono; o buru iya atugbu.

Uta, Jizosu ata ndu etsoje iya nu

(Mak 8:14-21)

⁵No iya; ndu etsoje iya nu bya erwua azu eze-enyimu ono azu iya ophu bya anyata l'ephe zoharu egude buredi.

⁶Jizosu sù phẹ: “Unu letakwa enya; unu kwabekwa enya g'iphe-ekoje-buredi ke ndu Farisii me ke ndu Sadusii te emebyi unu.”

⁷Epehe pfuaharu nwibe phe su: “O kwa kele anyi te egudedu buredi-a.”

⁸Jizosu maerupho iphe, epehe epfu bya asu phe: “Oo-wa! Ekwekwe k'unu apaa nwanshi! ? Bu gunu be o gude unu nodu epfugbaa l'unu te egudedu buredi?

⁹? Toko dokwapho unu enya? Teke mu gude ishi buredi ise keeru unu nemadzu iri l'ebo l'ukporo umadzu iri; ? bu nkata-eevu-ipe ole be unu tutu-jiru l'iphiriba iya?

10Tɔo ? unu ta anyatakwarupho k'ishi buredi ɛsaa ono, mu gude keeru unu nemadzu iri onoya? ? mɛ nkata-eevu-iphe ole, unu tutu-jikwarupho l'iphiriba iya?

11? Dɛnu g'o gude ophu unu amadu l'o tɔ budu opfu buredi bɛ mu epfuru unu teke ono, mu sɔru unu g'unu kwabɛkwa ɛnya g'iphe-ekoje-buredi ndu F́arisii mɛ kɛ ndu Sadiusii te emebyi unu ono?"

12Q buru iya bu l'ɛphe amaru l'o tɔ budu iphe-ekoje-buredi bɛ o kwata epfu sɔ g'ɛphe kwabɛkwa ɛnya iya; l'iphe, oopfu g'ɛphe kwabɛkwa ɛnya iya bu iphe, ndu F́arisii ezi yɛ kɛ ndu Sadiusii.

Pyita akɔ onye Jizosu bu

(Mak 8:27-30; Luk 9:18-21)

13Q buru iya bu lɛ Jizosu phɛ abya erwua mkpukpu, noɓbaa lɛ Sizariya Filipayi. O jiahaa ndu etsoje iya nɔ sɔ phɛ: “? Bukpoo onye bɛ ndiphe asujekpoo lɛ mube Abubu-Ndiphe bu?”

14ɛphe sɔ iya: “O duru ndu sɔru l'i bu Jionu ophu shi emeje baputizimu; ndu asɔ l'i bu Elayijia; tɛme o duru ndu sɔru l'i bu Jieremaya; ndu sɔ l'i bu onye lanu lɛ ndu mpfuchiru Chileke.”

15O sɔ phɛ: “Unubɛdua; ? unu sukwanuru lɛ mu bu onye?”

16Sayimonu Pyita sɔ iya: “Oo ngu bu Kéreshi obu, bya aburu Nwa Chileke; mbu Chileke ophu nɔ ndzu.”

17Jizosu sɔ iya: “Ehu-utso bɛ a goru nɔ gube Sayimonu nwa Jiona! L'o tɔ bukwa amadu meru g'i maru okpobe-opfu ono. O kwa Nna mu, bu l'imigwe.

18Su-a; iphe, mu akafuaru ngu bu; oo ngu bu Pyita. O buru l'eli mkpuma-a bɛ mu akpu Chiochi mu. Ophu o dudu m'obeta o buru anwuhu a-du ike emebyi ya nɔ.

19Mu a-nu ngu ire-igodo k'ɛka Chileke bu eze. Oo ya bu; iphe, bu iphe, i keru egbu lɛ mgboko-a bɛ a gbɛakwaa l'imigwe kee egbu. Iphe, bu iphe, i toru l'egbu lɛ mgboko-a bɛ a gbɛakwaa l'imigwe tɔo l'egbu.”

20O pfuɛbe nno bya akaru phɛ g'o tɔ dukwa onye ozo, ɛphe e-pfuru l'oo ya bu Kéreshi obu.

Epfufu mbu, Jizosu epfu lɛ ya e-je iphe-ɛhuka nwuhu

(Mak 8:31—9:1; Luk 9:22-27)

21No iya; o buru teke ono bɛ Jizosu wataru epfuru ndu etsoje iya nɔ gɛ ya e-gude jee Jierusalemu; ya ejee iphe-ɛhuka, du igwerigwe. O buru l'ɛka ndu bu ogerenya; waa ndu-ishi uke Chileke; waa ndu ezije ekemu bɛ ya e-je iphe-ɛhuka ono. ɛphe eworu iya megbua. O -rwua lɛ mboku k'ɛto iya; ya eteta dzuru ndzu ozo.

22Pyita bya ekuchi iya ekuchi baaharu iya mba sɔ iya: “Tuswekwa Nnajiuphu! Te epfuɛkwa egube ono! Egube owa-a ta abyakwa l'anwuru ngu!”

²³Jizọsu bya aghaa ẹnya bya asụ Pyịta: “Gbeshi mu l'iphu gube Obutuswe ono. Nta-a bẹ iime g'i bụru ụpfu adụ mu l'ọkpa; kele iphe, ịiri ta abụdu uche Chileke; ọo uche nemadzu bẹ ịiri.”

Etso Jizọsu

²⁴Tọbudu iya bụ; Jizọsu sụ ndu etsoje iya nụ: “Onye ọ dū g'o tso ru mu g'onye ono mịa onwiya ẹnya; vuta oswebe ọnwu nkiya bya etsoru mu.

²⁵Kele onye eme g'ọ dzọo onwiya ndzụ l'e-tuphakwa ndzụ iya etupha. Onye gudekwanụ opfu ẹhu mu tuphaa ndzụ iya lẹ mgboko-a e-nwekwanuru ndzụ ojeje.

²⁶Lẹ-a; ? bụ ọnwu bụ urwu, nemadzu ritaru mę o -nwekotachaaru iphemiphe, nọ lẹ mgboko-a; tuphaksana ndzụ iya? Ọ tọ dukwa iphe, nemadzu egude agbata ndzụ iya mę o -tuphahwaa.

²⁷Kele Abubu-Ndiphe a-bya ekpee ndiphe ikpe. Ọ -nọdu abya l'oo gude ụbvù, egbu nwịnwii gę Nna iya egbu. Teke ono yele ụnwu-ọjozi-imigwe iya aswiri; l'ọo-bya apfua onyemonye ụgwo g'iphe, o meru gbaru.

²⁸Sụ-a; gę mu gbukwaaru iya unu tororo; ọ dukwaru ndu haru pfuru l'eka-a, ata yidu nwuhu; gbahaa l'ephe hụmaadaru teke Abubu-Ndiphe a-buru eze; gude ụbvù; waa ike, dū biribiri egbu nwịnwii abya.”

Matiyu 17

Jizọsu egbu nwịnwii

(Mak 9:2-13; Luk 9:28-36)

¹A nọepho abali ishii; Jizọsu duta Pyịta yele Jiemusu; waa Jiọnu, bụ nwune Jiemusu duru pẹ je enyikota ụbvù, ha l'eli; ephe je anọdu nwekaphe.

²Chileke gbanwee ụgbugba iya l'atatiphu pẹ. Iphu iya gbuaahaa nwịnwii g'ẹnyanwu. Uwe iya chaahaa kę phuuphuu g'anwu eswe.

³Noo ya; a bya ele ẹnya; Mosisu yele Elayijia chaa l'iphu pẹ; abọ ụja eyeru Jizọsu.

⁴Pyịta pfu-bulihu sụ Jizọsu: “Nnajiuphu; ọ dukwa ree g'anyi nọ l'eka-a; gę mu tua mkpu ẹto mę ọ -dukwa ngu ree; nanu nkengu; nanu kę Mosisu; nanu kę Elayijia.”

⁵Ọ kpukwaduru-a iphe ono l'onu epfu; urwukpu, chagburu ụcha bya asọ-kputa pẹ. Olu-opfu shi l'urwukpu ono dafuta sụ: “Onye ọwa-a bụ nwa mu nwoke. Mu yeru iya obu. O jiru mu ephe. Unu nọmajekwa iphe, oopfu!”

⁶O be teke ndu etsoje iya nụ nọmaru olu-opfu ono; ephe dakota kpurumu kpube iphu l'ali. Ndzụ nọdu agushikpoo pẹ ike.

⁷Jizọsu bya bya ebyia pẹ ẹka bya asụ pẹ: “Unu gbalihu. Ndzụ ba agushi unu.”

⁸Ephe gbalihu bya achikaa ẹnya; chikaa ẹnya; ọphu ọ duedu onye ephe hụmaru; a -gufu Jizọsu nwekinyi iya.

⁹Ḑphe nyizetashia l'úbvú ono; Jizosu pfushiaru phe iya ike su phe g'ò tò dukwa onye ḑphe e-pfuru iphe, ḑphe humaru jasụ teke Abubu-Ndiphe e-shi l'onwu teta dzuru ndụ.

¹⁰Ndu etsoje iya nụ jia ya sụ: “? Bụ gunu meru iphe, ndu ezije ekemu sụru lẹ Elayijia e-vuadaru ụzo bya?”

¹¹O yeeru phe onu sụ phe: “O kwa eviya lẹ Elayijia vufutajęadaa ụzo bya g'o dozia iphemiphe ree.

¹²Ole-a; gę mu kakwaru unu: Elayijia byahaakwaru; ophu ḑphe amadụ l'oo ya. Ḑphe mee ya umerekete. Nokwapho gę Abubu-Ndiphe e-shi phe l'ęka jee iphe-ęhuka.”

¹³O buru teke ono bę ndu etsoje iya nụ maru l'onye oopfuru phe opfu iya sụ l'o byawaru bụ Jionu ophu shi emeje baputizimu.

Eeme onye obvu atụ ndapfụ g'o wekorohu

(Mak 9:14-29; Luk 9:37-43a)

¹⁴Ḑphe byapfutaḑpho ikpoto ndu ono; nwoke lanụ byapfuta Jizosu bya egbushi ikpere l'iphu iya sụ:

¹⁵“Nnajiuphu; phunaaru nwa mu nwoke obu-imemini; kele ndapfụ atụ iya; mbụ o noḑu atushikpoo ya ike. Kele tekenteke bę otujeru iya chie l'oku; teme o noḑu atujekwaru iya pho chie lẹ mini tekenteke.

¹⁶Tobudu iya bụ; mu dutaru iya ndu etsoje ngu nụ; ophu ḑphe adudu ike mee g'ęhu dụ iya ike.”

¹⁷Jizosu sụ: “Haa-oo! Unube ogbo ejo okpoma owa-a, adudu iphe, unu ekwetaję-a. ? Bụ teke ole bę mu l'unu a-no-beru? ? Mu a-takporu unu nshi taberu teke ole? Unu dutaru mu iya l'ęka-a.”

¹⁸No iya; Jizosu bya abaarụ obvu ono mba. Obvu ono phefu nwata ono l'ęhu. E shi teke ono o buerupho nwata ono ewekorohu.

¹⁹E mechaa; ndu etsoje Jizosu byapfuta iya teke o no nwekiya; bya asụ iya: “? Bụ gunu meru iphe, anyi adudu ike chifu obvu ono?”

²⁰Jizosu sụ phe: “O kwa ekwekwe, unu ekweshiduru ike kparụ iya. Gę mu gbukwaaru iya unu tororo; ekwekwe unu -habekponu shii gę nwa rwirwirwii akpuru mosutadu bę unu a-sukwa eze úbvú-a; ‘Úbvú; phofu onwongu je anodu l'ęka pho.’ L'oo-pholia onwiya. O tò dukwa iphe, a-kpo unu ęka ememe.

²¹Ole ęgube obvu-a ta alufujekwa abudu l'oo onye aswije ęgu epfu anụ Chileke chiru iya.”

Jizosu epfu iya k'ugbo ębo lẹ ya e-je iphe-ęhuka nwuhu

(Mak 9:30-32; Luk 9:43b-45)

²²O be ujiku lanụ; ndu etsoje Jizosu dzukobe lẹ Gálili; Jizosu sụ phe: “Abubu-Ndiphe bę ee-mechakwaa deru ye ndiphe l'ęka.

²³Ephe eworu iya megbua. O -rwua lẹ mbọku k'eto iya l'o teta dzuru ndzu." Aphụ iya kwatakpoo rwua phe l'obu.

Jizosu atụ akiriko eze-ulo Chileke

²⁴Noo ya; Jizosu yee ndu etsoje iya nu byarwutaepho Kapaniyomu; ndu anaje okpoga akiriko k'eze-ulo Chileke bya ejepfu Pyita je ajia ya su: “? O du g'onnye ezije unu iphe ta apfujedu okpoga akiriko eze-ulo Chileke to?”

²⁵Pyita su iya: “O pfujekwa-a.” Tobudu iya bu; Pyita bahuepho l'ulo; Jizosu vuru uzo tufu onu su: “Sayimonu; ? denu gi yeru onu? ? O du ngu g'o bu ndu ole atujeru akiriko; ozoo utu mmanu ozo; nu ndu eze ke mgboko-a? ? Bu ndibe eze; to ndu ozo?”

²⁶Pyita su iya l'o kwa ndu ozo. Jizosu su iya: “O n'ia bu le ndibe eze ta ayidu iya.

²⁷Ole o bukwadupho g'ephe ta asu l'anyi akpatsu phe iwe. Ngwa; je je ewota ikokoro jeshia l'eze-enyimu je awata ese ikokoro. Ema mbu, vuchakpoo uzo lo iphe ngu: nmata iya; vohaa ya onu. Ii-huma okpoga, a-suru atụ akiriko eze-ulo Chileke ono ke mu le ngu. Woru iya je atua ya.”

Matiyu 18

Onye kachakpoo shii

(Mak 9:33-37; Luk 9:46-48)

¹Teke ono kwapho be ndu etsoje Jizosu byapfutaru iya bya asu iya: “? Bu onye a-kachakpoo shii l'eka Chileke bu eze?”

²Jizosu kweepho doo; bya ekua nwata nshii; bya apfube iya l'echilabo phe;

³bya asu: “Ge mu gbukwaaru iya unu tororo; o -budu l'unu gbanweru bya adu g'unwegirima nshii; be unu ta abyakwa l'abahu l'eka Chileke bu eze.

⁴Iphe, bu onye wozetaru onwiya ali bya adu ge nwata nshii-a be bu iya kachakpoo shii l'eka Chileke bu eze.

⁵Onye gude epha mu nabata nwata nshii, ha egube-a; be buakwaa mbedua be o nabataru.”

Anma okwa eme iphe-eji

(Mak 9:42-48; Luk 17:1-2)

⁶“Onye mekwanuru onye lanu l'ime unwegirima-a, wowaru onwophe ye mu l'eka-a g'o shiswee uzo ono be o gogo karu ree; ome a pataru mkpuma-uswe lipyabe iya l'olu; paru chie l'ime eka eze-enyimu kwata du ogbu.

⁷Nshio ndiphe; noo l'iphe, alojeru nemadzu okpa eye l'eme iphe-eji jiru eliphe ejiji. O to dukwa g'e meru; ebe o du iphe, a-noduje ese g'o loru nemadzu okpa ye l'eme iphe-eji. Ole; nshio onye egube iphe ono e-shi l'eka.

⁸“Ozo bu; teke o bu l'oo eka ngu; ozoo okpa ngu a-kpataru ngu eme iphe-eji; gbufu iya tuphaa. L'o kakwaru ngu ree l'i gude eka lanu; ozoo li bu eniyeni; bahu l'eka

okpobe ndzụ nọ; eme l'i nweru ẹka labọ; ọzoo okpa labọ; e nwuba ngu l'ọku, ata nyihudu anyihu.

⁹Teke ọ bu l'oo ọnya ngu e-setarụ ngu eme iphe-eji; swofu iya tuphaa; kele ọ karu ngu ree l'i gude ọnya lanu bahu le ndzu; eme l'ọnya dzuru ngu oke; e chie ngu l'oku-alimaa.”

Etu k'aturu, kpaphuhuru akpaphuhu

(Luk 15:3-7)

¹⁰“Iphe, unu a-kwabejeerupho ọnya bu g'unu ta asu l'unwegirima-a duru ophu adudu iphe, ọ bu. L'iphe, mu eme ge mu karu unu bu l'unwu-ojozi-imigwe nkephe anodujekwa mkpurumkpuru l'iphu Nna mu, bu l'imigwe.

¹¹Le Abubu-Ndiphe byakwaru g'o dzota ndu tuphahuru etuphahu.

¹²“Su-a; ? denu g'unu arikwanu iya? O -buru le nwoke nweru aturu ukporo ise; nanu kpaphuhu; ? too hadu ukporo eno l'iri le tete ophuu l'ubvu l'eka ono; tugbua je etsoru ghaphee choo ophu kpaphuhuru nu pho?”

¹³Ge mu gbukwaaru iya unu tororo; teke ọ bu l'o humaru iya be oo-kwatakpokwaa ka eteshi eswa aturu lanu ono ike; e -me l'ukporo eno l'iri le tete pho, te eshidu tuphahu nu pho.

¹⁴Nokwapho g'o to dudu teke ọ bujeru uche Nna unu, bu l'imigwe g'o duru me onye lanu l'ime unwegirima-a, l'a-la l'iswi.”

Nwanna, mesweru nu

¹⁵“Ozo bu le-a; teke nwanna ngu mesweru ngu; kuchi iya ekuchi; je epfuaru iya iphe, o meru ngu. Teke ọ nataru iphe, i pfuru iya; ọ kwa iya bu l'a maru le nwanna ngu ono be i duphutawaru azu.

¹⁶Teke ọ bu l'o to nataduru iphe, i pfuru; g'i je edutafua onye lanu; ọzoo umadzu ebo ozo yeru onwongu; k'opfu oo-me g'e pfuru iya l'ekwo-opfu Chileke su l'oo ekebe, umadzu ebo; ọzoo eto gbaru be ee-gude doshia ya.

¹⁷Teke ọ bukwanu l'o to natakwarupho iphe, ephe pfuru; je eworu iya kooru Chiochi l'opfu. Teke ọ to natakwarupho iphe, Chiochi pfuru; oo ya bu; unu eworu onye obu dobe g'o bu onye ohozo; ọzoo onye ana akiriko.

¹⁸“Su-a; ge mu gbukwaaru iya unu tororo; iphemiphe, bu iphe, unu keru egbu le mgboko-a be a gbekwaa l'imigwe kee egbu. Iphemiphe, unu toru l'egbu le mgboko-a be a gbekwaa l'imigwe too l'egbu.

¹⁹“Ozo, mu e-pfufuaru unu bu le-a; iphe, bukpoo iphe, unu du ebo nodu le mgboko-a; gude obu lanu kweta bya epfuru iya nu Chileke; iphe ono be Nna mu ono, bu l'imigwe ono e-mekwaru unu.

²⁰Kele iphe, bukpoo eka a du ebo; ọzoo eto gude epha mu nokobe; be mu nokwa l'echilabo ndu obu.”

Etu k'onye-ozu, aguduru nwibe iya nvu

- ²¹Pyita byapfuta Jizosu bya asu iya: “Nnajiuphu-e; ? bu ugbo ole be nwanna mu e-meswe mu; mu aguchaaru iya ya nvu? ? Bu ugbo esaa to?”
- ²²Jizosu su iya: “O to budu-a ugbo esaa kpurumu. Oo ugbo esaa esaa ugbo ukporo esaa esaa ugbo esaa.
- ²³Eka Chileke bu eze be a-duepho g'onye eze lanu, meru ge ye ndu-ozu iya gbazia k'okpoga iya.
- ²⁴O gbakojeepho okpoga ono; e dutaru iya onye lanu, ji iya unu-kuru-unu ekpa-ego.
- ²⁵Ophu nwoke ono enweddu iphe, o gude apfu iya. Nnajiuphu iya ono karu su g'e ree ya; ree nyee ya; ree unwegirima ibe iya g'ephe ha; me iphe, o nweru enweru mgburugburu; g'e gude pfua ugwo ono.
- ²⁶No iya; nwoke ono daepho kpurumu l'ali gbushi ikpere rwoahaa nnajiuphu iya ono su iya: ‘Jiko onye nwe mu nu; tanaa nshi hafua mu ro. Mu a-pfukotakwa ngu-a ugwo ono g'o ha jiko.’
- ²⁷Imemini iya du onye eze ono. O paru iya haa bya asu iya g'o to pfuhewaro ugwo obu le phuruphuru gberegedege.
- ²⁸“Tobudu iya bu; onye-ozu ono lufuepho je ahuma onye ozo, ye ya tukoru buru ndu-ozu, ji iya nwokpoga, abadu ishi. O zu-gude iya; pyita iya l'ekpiri; su iya g'o pfu-dzua ya ugwo, o ji iya.
- ²⁹Nwoke ono daa kpurumu l'ali rwoahaa ya; su iya g'o taa nshi hafua ya ro le ya a-pfu iya ya-a.
- ³⁰O jika su le ya taa hadu iya; bya akputa nwoke ono je atu-chia l'oka mkporo su g'o nodu l'eka ono jasu teke oo-pfu iya ugwo ono.
- ³¹Tobudu iya bu; ndu ephe l'ia atukoje eje ozu huma iya; ehudae phe pho dzu. Ephe gbagbua je akporo nnajiuphu phe iphe, meru nu.
- ³²Nnajiuphu phe bya ekua nwoke ono; bya asu iya: ‘? I humaru gube ejo onye-ozu-a? ? I humaru ikpoto okpoga, i jikota mu l'ugwo; mu hakotaru ngu iya su g'i ti pfuhe mu iya; opfu l'i rworu mu arworwo?’
- ³³? To gbaduru ngu ke g'i phuaru nwibe ngu obu-imemini egube ono, mu phuru ngu ono?’
- ³⁴Nnajiuphu phe ono gude ehueghu kakputa iya je seru ye l'eka ndu a-nu iya aphu jasu l'o pfuebechaa ugwo, o ji g'o ha.
- ³⁵“Nokwapho ge Nna mu ophu bu l'imigwe e-me unu l'onye l'onye; mbukwa onye te egudejedu obu iya g'o ha guaru onye mesweru iya nu nvu.”

Matiyu 19

Ogori me achifu nwanyi

(Mak 10:1-12)

- ¹Tɔbudu iya bu; Jizosu pfuɛbeepo iphemiphe ono, oopfu ono bya eshi lɛ Gálili; ɔ buru iya atugbu. O jeshia alɛ Jiudiya, nɔ l'azu ɛnyimu Jiɔdanu azu iya ophuu.
- ²Ikpoto igwe ɔha wuru tsoru iya. O mekɔta; ɛhu du ndu iphe eme ike l'ɛka ono.
- ³Ndu Fárisii bya agbaberu iya ɔnyà opfu g'ɛphe gude nmata iya; bya ajiahaa ya su: “? O du ree gɛ nwoke chifuje nyee ya mɛ o betakpɔru ɔ buru gunu bɛ o meru?”
- ⁴O su phɛ: “Unu teke agutadu l'onye meru nemadzu e -shi lɛ mbulembukpoo bu nwoke yɛe nwanyɪ bɛ o meru ;
- ⁵bya asu phɛ: ‘Noo g'o gude: nwoke je l'ahajɛ nna iya; haa ne iya gɛ yɛle nyee ya tugba. Ephenebo atuko buru onye lanu.’
- ⁶ɛphe taa bueduru umadzu labo. ɛphe aburu onye lanu. Oo ya bu; iphe, Chileke tugbaberu nanu g'o tɔ dukwa onye e-je iya ekekaha ɛbo.”
- ⁷ɛphe su iya: “? Dɛnukwanu g'o gude Mosisu su g'e dejeru ɛkwo-achifu-nwanyɪ nu nwanyɪ ɔbu; chifu iya? ”
- ⁸Jizosu su phɛ: “Tɔbudu l'unu bu ndu ɛjo ɔkpoma meru g'o gude Mosisu kwe g'unu chifuje unyomu unu. Obenu l'e -shikpoo l'ɔduu bɛ ɔ tɔ duhaadaa ɛgube ono.
- ⁹Nta-a bu iphe, mu epfuru unu bu: Onye chifuru nyee ya je aluta ozo bɛ buakwaa ogori bɛ oori. Gbahakwaa lɛ nwanyɪ ono bu nwanyɪ, eri ogori. Onye lutakwanuru onye ono, a chifuru achifu ono bukwapho ogori bɛ oorikwapho.”
- ¹⁰Ndu etsoje iya nu su iya: “O -buru l'onoo g'o du l'ɛka nwoke yɛe nyee ya nɔ bɛ ɔ kalɛkwapho mma g'a haa k'alulu l'ophu l'ophu.”
- ¹¹O su phɛ: “O tɔ buɛbekwa onyemonye bɛ opfu mu ono e-dodzuru ɛnya. Ndu oo-do ɛnya bukwapho ndu ono, Chileke goshiru iya.
- ¹²L'iphe, kparu iphe, nemadzu ta aludu nwanyɪ dukwa iche iche. O nwekwaru ndu te eyedu ime. O buru g'ɛphe du bu ono eshinu a nwuru phɛ. O duru ndu bu nemadzu haru phɛ aháhá. Duru ndu kpɔ-chiru obu su l'ɛphe a-du gɛ ndu haru onwophe aháhá opfu g'ɛphe ejeeru Chileke ozi ree. G'onye, a-du ike nata opfu ono natakwa iya.”

Jizosu agɔru unwegirima ɔnu-ɔma

(Mak 10:13-16; Luk 18:15-17)

- ¹³ɛphe nodu ekutagbaaru iya unwegirima g'o byibegbaa phɛ ɛka pfuru nu Chileke l'iswi ɛhu phɛ. Ndu etsoje iya nu baaharu ndu ono, ekutaru iya unwegirima ono mba.
- ¹⁴Jizosu su phɛ: “Unu hakwaa unwegirima g'ɛphe byapfuta mu. Unu ta akpɔshishi phɛ abyabya; kɛle ɔ bu ndu du nno bɛ ɛka Chileke bu eze bu nkepɛ.”
- ¹⁵O bya ebyidzuchaarun unwegirima ono ɛka bya eshi l'ɛka ono; ɔ buru iya atugbu.

Onye nweru iphe

(Mak 10:17-31; Luk 18:18-30)

- ¹⁶Noo ya; nwoke lanu byapfuta Jizosu bya asu iya: “O-zì-iphe; ? bukpoo gunu du ree, mu e-me gɛ mu e-nweru ndzu ojejeje.”

- ¹⁷Jizosu sụ iya: “? Denu g'o gude i nodu aji mu aji k'iphe, du ree? O kwa Chileke bu onye lanu du ree kpoloko. Ole teke ogugu ngu g'i bahu l'okpobe ndzu; meje iphe, ekemu pfuru.”
- ¹⁸Nwoke ono sụ iya: “Ekemu ? bu ole bu ono?” Jizosu sụ iya: “Te egbukwa ochi; ophu i rikwa ogori; ophu i zikwa iphuru; ophu i dzujekwa uka.
- ¹⁹Kwabeje nna ngu yee ne ngu ubvu; l'i bya eyee nemadzu ibe ngu obu g'i yeru onwongu.”
- ²⁰Nwokorobia ono sụ iya: “Eshinu mu bu nwata ta adukwa iphemiphe ono ophu mu mebyijeru. ? Denubahuna iphe, phodukwaduru mu nu l'ememe?”
- ²¹Jizosu sụ iya: “O -du ngu g'i duebe ree; laa je erekota iphemiphe, i nweru; woru aswa iya je anu ndu akpa nri. Oo ya bu; l'ii-nweru okpobe iphe l'imigwe. I -mechaa nno; bya etsoru mu.”
- ²²Nwokorobia ono numaepho onu, Jizosu yeru; eh daa ya dzuu. O bueru iya pho atugbu; kele o bu onye nwenukaru iphe.
- ²³Jizosu sụ ndu etsoje iya nu: “Ge mu gbukwaaru iya unu tororo; ootsukwa l'ehu g'ee-me ge ndu nweru iphe bahu l'eka Chileke bu eze.”
- ²⁴Ozo, mu e-pfufuaru unu bu le: epyo inya l'enya ngga kakwa nphe; eme le g'onye nweru iphe e-me bahu l'eka Chileke bu eze.
- ²⁵Ndu etsoje iya nu numa iya; o kabakpo phe ro atufu eh. Ephe sụ iya: “? O buhunuru onye be aa-dzota?”
- ²⁶Jizosu bya elee phe enya bya asu phe: “O kwa l'ehu nemadzu be o bu 'ama-g'ee-me- iya; obenu le Chileke ta adukwa iphe, kporu iya eka ememe.”
- ²⁷Tobudu iya bu; Pyita sụ iya: “Anyibedua, haru iphemiphe, anyi nweru bya etsoru ngu-a ? bu gunu be anyi e-nweru?”
- ²⁸Jizosu sụ phe: “Ge mu gbukwaaru iya unu tororo; o kwa unubedua ono, tsoru mu nu ono be l'a-nodu l'aba-eze iri l'ebo; kpee okpa-ipfu Izurelu iri l'ebo ono ikpe; teke Abubu-Ndiphe a-bya anodu l'aba-eze iya, egbu nwijnwii le mgboko ophuu, abya nu ono.
- ²⁹Ozo bu l'onyemonye, gude opfu eh mu haa ulo, o nwegbaaru; ozoo unwune iya nwoke; ozoo unwune iya nwanyi; ozoo nna iya; ozoo ne iya; ozoo unwu iya; ozoo ali iya; be Chileke a-pfu ugwo iphe, ha g'iphe, o haru mgbo ukporo ise; teme e - mechakwapho Chileke anu iya ndzu ojejoje.
- ³⁰Ole igwerigwe ndu bu ndu ivuzo nta-a l'e-mechaa buru ndu ikpazu; ndu bu ndu ikpazu emechakwanaa bya aburu ndu ivuzo.”

Matiyu 20

Ndu ozi opfu-vayinu

- ¹“Teke Chileke e-goshi lẹ ya bụ eze bẹ ọo-dụkwa gẹ nnajiuphu lanụ, gbeshiru lẹ nchi abọhu je achita ndu-ozu ẹgu g'ẹphe byaru iya ozi l'opfu-vayinu iya.
- ²Ẹphe lẹ ndu ọ humaru bya epfubuchaa l'iphe, ọo-pfu pẹ bụ kobo lanụ kobo lanụ, bụ iya bụ aswa ogburumita ujiku ophu; ọ chiru pẹ jeye l'opfu-vayinu iya.
- ³Enyanwu gbakotajẹpho; ọ lufukwa ọzo je ahuma ndu pfuru kẹ mmanụ l'odu-ozu.
- ⁴Ọ sụ pẹ: ‘Unu tugbua je ejelepho ozi lẹ mgbabu mu. E -mechaa; mu apfua unu iphe, gbaru unu.’ Ẹphe kwee hm jeshia.
- ⁵Ọ be l'echilabo eswe; ọ lufukwapho je achita nemadzu yekwapho lẹ mgbabu ono; bya emekwaapho nno g'enyanwu swifuru l'ishi.
- ⁶Teme o rwukwaapho g'enyanwu ekewaa zaa zaa; ọ lufukwapho ọzo je ahumakwapho ndu pfuru kẹ mmanụ; bya asukwa pẹ: ‘? Bụ gunu meru g'o gude unu shi l'utsu pfuru l'eka-a kẹ mmanụ?’
- ⁷Ẹphe sụ iya l'ọ kwa l'ọ to dudu onye kuru pẹ l'egu. Ọ sụ pẹ: ‘Ngwa; unu je etsoru ndu ophu ejeru mu ozi l'opfu-vayinu mu jee ozi. E -mechaa mu apfua unu iphe, gbaru unu.’
- ⁸“Tobudu iya bụ; ọ be l'uzenyashi; nwoke ono, nwe mgbabu ono sụ onye-ishi-ozu iya g'o kua ndu-ozu ono g'ẹphe ha; pfua pẹ ugwo pẹ. G'o shilepho lẹ ndu ophu byakperu azu-a pfuta iya jeye lẹ ndu ophu vuru uto bya.
- ⁹Tobudu iya bụ; ndu k'ono, byaru l'enyanwu eke zaa zaa ono bya abya. A pfukota pẹ g'ẹphe ha kobo lanụ kobo lanụ gbafu l'ishi.
- ¹⁰Ọ buru g'a pfu-dzuru ndu ono bụ ono; jasụ ọ be lẹ ndu ophu vuchaa uto bya lẹ nchi abọhu pho; ẹphe dobesu l'aa-pfu pẹ iphe, ka shii. Obenu l'iphe, a pfukotaru pẹ bulele-a kobo lanụ kobo lanụ g'ẹphe ha l'ehu l'ehu.
- ¹¹Ẹphe natachaa ya bya aguaharu nnajiuphu ono aphu
- ¹²sụ: ‘Lewaro; nta-a bẹ a pfucharu pfua anyi lẹ ndu owa-a, ejeduru ozi noo odu-a iphe lanụ; l'anyibe ndu ophu shi l'utsu jegbuta onwanyi l'ozu; nyakota anwu eswe ono.’
- ¹³Ọ bya ekua onye lanụ sụ iya: ‘Ishikomu byaedu. ? I maru-a l'ọ to dukwa eji, mu meru unu. ? To bunaa kobo lanụ kobo lanụ bẹ mu l'unu pfuburu?’
- ¹⁴Nata okpoga, gbaru ngu nụ lashia; lẹ mu turu obu mu onyo nụ onye owa-a, byakperu azu-a iphe, mu nuru ngu.
- ¹⁵? Too gẹ mu te egudeshi iphe, bụ nkemu mee g'ọ du mu? Too ? iiji iji-nya opfu lẹ mu meru ndu ophu iphe-oma?’
- ¹⁶“Oo ya bụ lẹ ndu ikpazu a-buru ndu ivuzo; ndu ivuzo aburu ndu ikpazu. Kele ndu e kuru du igwerigwe; ndu a hotaru habe nwahabe.”

K'ugbo ẹto Jizosu epfu lẹ ya e-je iphe-ehuka nwuhu

(Mak 10:32-34; Luk 18:31-34)

¹⁷Jizosu phẹ nọdu eje Jierúsalem. Epe jenya; o kuchi umadzu iri l'ẹbo ono, etsoje iya nọ ono iche je asu phẹ:

¹⁸“Mu suru-a; nta-a be anyi ejeakwa Jierúsalem. L'eka ono be ee-mechaa deru Abubu-Ndiphe ye l'eka ndu-ishi uke Chileke waa ndu ezije ekemu. Epe ekpee ya mpfugbu;

¹⁹kpuru iya nọ ndu 'amadu Chileke g'ephe mee ya sukusuku; chia ya echachi; woru iya kpo-gbua l'oswebe. O -nọ abali ẹto; Chileke emee ya l'o teta dzuru ndzu ozo.”

Unwu Zebedi arwo Jizosu iphe

(Mak 10:35-45)

²⁰Noo ya; a nonyaa; ne, nwuru unwu Zebedi duta unwu iya ono ephenebo byapfuta Jizosu. O rwua bya egbushi ikpere l'iphe iya rwoahaa ya iphe.

²¹Jizosu su iya: “? Bu gunu bu ono?” O su iya: “Jiko kwenu g'unwu mu-a ephenebo no-kube ngu. G'onye lanu nọdu ngu l'ekutara; onye ophuu anodu ngu l'ekicha l'eka i bu eze.”

²²Jizosu su: “Ha! Unu ta amakwa iphe, unu arwo; unube ndu-a. ? Unu a-du ike ngua iphe, shi l'okoro, mu abya angungu; l'e mee unu egube baputizimu e-me mu?” Epe su iya: “Ee! Anyi a-du-a ike.”

²³O su phẹ: “Iphe, mu nguru be unu a-ngu-a bu eviya; l'e mee unu egube baputizimu, e meru mu; obenu le k'anodu mu l'ekutara me l'ekicha ta abudu mu be o du l'eka. Ono duru ndu Nna mu doberu iya.”

²⁴Umadzu iri ophuu numa l'onoo g'ephe jeru iya; ehu-eghu unwune labo ono ghuaahaa phẹ.

²⁵Jizosu bya ekukotachaa phẹ bya asu phẹ: “? O kwa l'unu maru-a le ndu-ishi ndu abudu ndu Jiu; l'anoduje akpa ndu no phẹ l'eka ehu; teme o buru onye no-l'oke-okwa anoduje eme ge ndu ozo maru l'oo ya ka shii.

²⁶Ole oo ge k'unubedua ta adukwa egube ono; g'onye o du g'o ha shii le g'unu ha; bukwaru onye a-nodu ejeru ndu ophuu ozi.

²⁷Onye o du g'o buru onye ivuzo le g'unu ha-a; g'onye ono wozeta onwiya ali; buru ohu unu.

²⁸Nokwapho ge Abubu-Ndiphe l'onwiya ta abyaduru g'e jeru iya ozi; o buchikwaa g'o jeru ndu ozo ozi be o byaru; wafua g'o woru onwiya nu; g'e gude gweeru ngweja nu Chileke g'o buru iphe, oo-gude gbata ndzu igwe oha.”

Jizosu eme ndu atsushi ishi g'ephe wata aphu uzo

(Mak 10:46-52; Luk 18:35-43)

²⁹Epe shiepho Jieriko tugbushia; ikpoto igwe oha tsoru iya.

³⁰Noo ya; umadzu labo, l'atsushi ishi noduwaa l'aguga etsu-uzo. Epe numaepho l'oo Jizosu aghata; epe chishia su: “Nnajiuphu; gube Nwa Dévidi; g'imemini anyi dunu ngu!”

³¹Ikpoto ndu ono gbochia phe onu su phe g'ephe dobe onu doo. Ephe kabakpo ya ro arashi ike su: “Nnajiuphu; gube Nwa Dévidi; g'imemini anyi du ngu ro!”

³²Jizosu pfuru doo bya ekua phe bya asu phe: “? Bu gunu be o du unu ge mu meeru unu?”

³³Ephe su iya: “Nnajiuphu; menaa anyi g'anyi wata aphu uzo.”

³⁴Imemini phe gude Jizosu. O bya ebyichaa phe eka l'anya. Teke ono kwapho ephe phuahaa uzo bya etsoru iya.

Matiyu 21

Jizosu abahu le Jierusalemu

(Mak 11:1-11; Luk 19:28-38; Jion 12:12-19)

¹Ephe byarwutaepho l'ubvu Olivu; me le mgboru mkpukpu Betufeji, nowaa Jierusalemu ntse; Jizosu zia ndu etsoje iya nu umadzu labo;

²su phe: “Unu je l'ime mkpukpu ono, no unu l'uzo iphu ono. Unu -bahuepho l'ime mkpukpu ono be unu a-huma ne nkafu-igara yee nwa iya, e libegbaaru elibe l'eka lanu. Unu totachaa ya chitaru mu.

³O -nweru onye duru iphe o pfuru; unu su iya l'o kwa mkpa iya duru Nnajiuphu. Unu -pfuwaa nno be aa-haekwaru iya pho unu teke ono kwapho.”

⁴Iphemiphe ono mee o vua; mbu iphe, onye mpfuchiru Chileke pfuru su:

⁵“Unu karu Jierusalemu g'o lenu: L'onye buru iya eze abyapfutaakwaa ya. L'o wozetaru onwiya ali nodu l'eli nkafu-igara agba abya; mbu l'eli nwa nkafu-igara obu.”

⁶No iya; e mechaa; ndu etsoje iya nu ono jeshia je emeepho ge Jizosu ziru phe.

⁷Ephe kpuru ne nkafu-igara ono yee nwa iya kputaru Jizosu bya achiru uwe phe wukobe iya l'eli okpurukpu; Jizosu nodu iya l'eli.

⁸Ndu ophu ka l'igwe le ndu ono woru uwe phe to l'uzo. Ndu ophuu je ejikoo irwu oshi je atooru iya l'uzo.

⁹Ikpoto ndu awu etso iya l'azu me ndu ophu no iya l'iphu nodu akpo okwe asuje: “Nwa Dévidi, deejee! Deejee! Owoo! Onye Chileke goru onu-oma nu be o bu; mbu onye ono, bu Nnajiuphu ziru iya g'o bya ono. Deejee! Deejee! Okalibe-kangokotaru-nu, shi l'imigwe!”

¹⁰Tobudu iya bu; o bataepho l'ime Jierusalemu; mkpukpu ono l'ophu toko swokobe. A toko ajikashi su: “? Bu onye bu ono? ? Bu onye bu ono?”

¹¹Ikpoto ndu ono, ephe l'iya swi ono su: “O kwa Jizosu; mbu onye mpfuchiru Chileke. Eka o shi bukwa le Nazaretu Galili.”

Jizosu achifu ndu azu aswa l'eze-ulo Chileke

(Mak 11:15-19; Luk 19:45-48; Jion 2:13-22)

12Tobudu iya bu; Jizosu bya abahu l'ime eze-ulo Chileke bya awata achishi iphe, bukpuo ndu azu aswa bya ere erere l'ime eze-ulo ono. O bya akwatsushichaa teburu ndu agbanweje okpoga; bya akwatsushichaa okposhi ndu ere ndo.

13O su phe: “? Unu ta amadu l'e deru l'ekwo-opfu Chileke su: ‘Ulo mu be ee-kuje ulo, aa-noduje epfu anu mu.’ Unu bya eworu iya mee ulo, ndu ana nfu edomije onwophe.”

14E mechaa; ndu atsu ishi me ndu no eniyeni wu-pfuta iya l'eze-ulo Chileke l'eka ono; o mee phe e phe wekorohu.

15Ndu-ishi uke Chileke waa ndu ezije ekemu humaepho iphe, du biribiri, oomeshi bya anuma eka unwegirima, kuru l'eze-ulo Chileke akpo okwe asuje: “Nwa Dévidi; deejee; deejee; “ ehu ghuaaha phe eghu.

16Ephe su iya: “? O kwa l'inu-a iphe, ndu ono ara?” Jizosu su phe: “Ee! ? Unu teke agu-rwuswee eka ono, e deru l'ekwo-opfu Chileke su: ‘Oo l'onu ndu bu unwegirima me ndu angu era be ee-shi aja ngu okpobe ajaja.’ “

17Tobudu iya bu; Jizosu paru phe haa l'eka ono; o buru iya alufu l'ime mkpukpu ono bya ejeshia Betani. O je akwaa Betani futa l'utsu.

Jizosu atu oshi figu onu

(Mak 11:12-14)

18O be l'utsu; egu nodu agu iya g'oolaphuwa azu l'oma mkpukpu ono.

19O huma oshi figu, no l'aguga gbororo bya akpo-kube iya. O rwua l'eka o no; ophu o dudu mebyi, o humaru iya ilile; gbahaa ikpuchi. O su oshi figu ono: “I ti byadu amibaa mebyi le mgboko-a jaswaruro ya.” G'e jia epfua; oshi ono nwukotaanaa lwaa.

Jizosu gude oshi, o turu onu ezi ndu etsoje iya nu iphe

(Mak 11:20-24)

20Ndu etsoje iya nu huma iya; o du phe ejo biribiri. Ephe su: “? Denu g'o gude oshi ono nwukwadupho lwa egwegwa egube ono?”

21Jizosu su phe: “Ge mu gbukwaaru iya unu tororo; unu -kwetakpowa; ophu unu abodu obu ebo; o to bulekwa iphe, mu meru oshi figu-a be unu e-me nkinyi iya; o to dukwa m'obeta unu su ubvu-a: ‘Ngwa; je aparu onwongu chie l'ime eze-enyimu’; oomeepho nno.

22Oo ya bu l'iphe, bukpuo iphe, unu gude jepfu Chileke je epfuru nu iya su iya g'o nu unu; unu kwetawaa l'oo-nu iya unu; iphe ono be oo-nu unu.”

Aaji Jizosu egube ike, o gude eme iphemiphe ono

(Mak 11:27-33; Luk 20:1-8)

23Noo ya bu; Jizosu bataepho l'ime eze-ulo Chileke; ndu-ishi uke Chileke me ndu bu ogerenya mkpukpu byapfuta iya l'eka oozu iphe bya asu iya: “? Bu egube ike gunu be i gude eme iphemiphe-a? ? Bu onye ngeru ngu ike, i gude eme iya?”

²⁴Jizosu yeeru phe onu su phe: “Unu gebe ge mu jia unu nwaji lanu. Unu -kooru mu iya; mu akooru unu ike, mu gude eme iphemiphe ono.

²⁵Su-a; ? baputizimu, Jionu meru; ? bu awe be o shi? ? O shi l'imigwe? Too ? o shi nemadzu l'eka?” Tobudu iya bu; ephe wata iya adzokashi l'ime onwophe su: “Teke anyi sunuru l'o shi l'imigwe l'o su anyi: ‘? O buru gunu meru g'o gude ophu unu ekwetaduru iphe, o pfuru?’

²⁶Teke anyi sukwanuru l'o shi nemadzu l'eka; ? a maru iphe, oha e-me; eshinu mkpukpu l'ophu pfudzuwaru le Jionu bu okpobe onye mpfuchiru Chileke?”

²⁷Tobudu iya bu; ephe su Jizosu: “Anyi ta amakwa.” Jizosu sukwanu phe: “Ophu mu akokwanuru unu onye ngeru mu ike, mu gude eme iphemiphe ono.”

Etu nwoke yee unwu iya ebo

²⁸“? Denu g'iphe-a du unu? O duru nwoke, nwutaru unwegirima unwoke labo. O be ujiku lanu; o bya asu k'ogerenya: ‘Nwa mu; jiko jekwaaru mu ozi l'opfu-vayinu ntanu.’

²⁹O su iya: Mu tee jekwa.” E mecha; izimanu lwa iya azu; o jeshia.

³⁰Nwoke ono bya ejepfu ke nwata je epfukwaaru iya pho g'o pfuru onye ophuu. O su iya hm le ya e-jekwaa. E mecha; ophu o jeduru.

³¹Su-a; l'ime umadzu labo ono; ? denu onye ophu meru iphe, du nna iya ree? Ephe su iya l'oo onye k'ogerenya. Jizosu su phe: “Ge mu gbukwaaru iya unu tororo; ndu ana akiriko waa ndu agba ukpara l'e-vukwaru unu uzo bahu l'eka Chileke bu eze.

³²Kele Jionu byaru bya egoshi unu okpobe uzo, unu e-tso; ophu unu ekwedu nkiya; obenu le ndu ana akiriko yee ndu agba ukpara be kwetarū nkiya. Unubedua humachaa l'ephe kwetarū; ophu izimanu alwakpodarunu unu azu; g'unu ghaa umere g'e mechaaru ke g'unu kweta ke Jionu.”

Etu, e gude ndu e butaru ye l'opfu-vayinu anma

(Mak 12:1-12; Luk 20:9-19)

³³“Su-a; unu ngabekwa nchi numa etu ozo. O duru nwoke lanu, bu nnajiuphu, laru egu vayinu. O bya agbaa ya mgbabu; bya ebua ya nsu eka aanoduje azoshi mee l'akpuru vayinu ono. O bya akpukwaapho nwulo eli ephekerephe eka ee-nyihuje eche mgbabu ono nche. O bya ebuta ndu-ozie-egu woru iya ye phe l'eka bya ejeshia iphe-ozo.

³⁴O rwujeepho teke aawoje akpuru vayinu ono; o zia ndu-ozie iya g'ephe jepfu ndu-ozie-egu ono g'a wo ya okè akpuru vayinu nkiya.

³⁵Ephe gude ndu ono, e ziru ozi ono tsua onye lanu iphe; bya egbua onye ophuu egbugbu; bya atua onye ophuu mkpuma.

³⁶O bya ezia ndu-ozie ozo, ka ndu ke mbu igwerigwe. Ndu ozie-egu ono mekwaa phe pho g'e meru ndu ophuu.

³⁷E mechaa; ọ bya ezia nwa iya g'o jepfu phe sụ lẹ ya maru-a l'onye ọwa-a, bụ nwa iya-a bẹ ephe a-kabe-a yeru nsọ.

³⁸O be teke ndu-ozu-mgbabu ono humaru nwa iya ono; ephe zua mgbede kpua ya sụ: 'Ihee! Waa onye ali-a e-mechaa buru nkiya me nna iya nwuhu-a. Unu bya g'anyi gbua ya egbugbu nata iya iphe, rwuberu iya nu.'³⁹Ephe kputa iya kpufu lẹ mgbabu ono je eworu iya gbua.

⁴⁰"Sụ-a; onye nwe mgbabu ono -lwaepho; ? bụ gunu bẹ oo-me ndu-ozu-egu ono?"

⁴¹Ephe sụ iya: "Oo-bya egbushikota ndu-ozu-mgbabu ono, ejo okpoma egbu egbugbu ono; mbu gbua phe njo egbugbu woru mgbabu ono ye ndu-ozu-egu ozo l'eka, bu ndu a-wotaje akpuru iya vutaru iya l'o rwuberu iya."

⁴²Jizosu sụ phe: "Unu teke agu-swee iphe, e deru l'ekwo-opfu Chileke sụ: "Mkpuma, ndu akpu ulo jikaru; mechaaru bya aburu mkpuma, gudeshe ulo. Ono buru iphe, Nnajiuphu anyi meru; ọ du anyi biribiri l'enya. "

⁴³"Noo g'o gude mu sụ unu l'eka Chileke bu eze bẹ a-natakwa unu woru iya nu ndu a-nuje iya okè akpuru, ophu gbaru iya nu.

⁴⁴Teme onyemonye, bu onye vukotaru mkpuma ono daa iko bẹ e-tsujishihukwanu; teke ọ turu nemadzu l'o gwee onye ono arakabya."

⁴⁵Tobudu iya bu; ndu-ishi uke Chileke me ndu Farisii numaepho etu iya ono; ephe maerupho l'oo phe bẹ onmadoru iya.

⁴⁶Ephe jee g'ephe gude iya; ndzu oha guhu phe; kele oha l'ophu pfudzuwaru lẹ Jizosu bu onye mpfuchiru Chileke.

Matiyu 22

Etu ndu e yeru lẹ nri ekele nwanyi

(Luk 14:15-24)

¹Jizosu byakwa egude etu yeeru phe onu ozo sụ phe:

²"Eka Chileke bu eze bẹ dūepho g'onye eze lanu, shiru nwa iya nri ekele nwanyi;

³bya ezia ndu-ozu iya g'ephe je ekua ndu e ziru lẹ nri ekele nwanyi obu; ophu ndu ono ekweddu abyabya.

⁴O byakwa ezia ndu-ozu iya ozo bya asu phe: 'Unu sụ ndu e ziru lẹ nri-a lẹ mu shiakwaru nri obu; lẹ mu gbushikwaru oke-eswi mu; me okiri mu gude shia ya; lẹ mu tukoakwaru iphemiphe dozichaa kwabe; g'ephe byawaro lẹ nri ekele nwanyi obu.'

⁵Ndu ono, e ziru lẹ nri ono pael'iya-a eka lanu; ọ buru phe eje iphe, heru phe nu. Onye ejeshia l'egu iya; onye ejeshia ere aswa iya.

⁶Teme ndu ophuu tsukobeekwapho gude ndu ono, onye eze ziru ozi ono mee phe iphe-iphere woru phe gbushia.

⁷Eze ono nūmaepho iphe, meru nū; ẹhu ghua ya ntumatu. Ọ bya ezia ndu ojogu iya; ẹphe je emegbushia ndu ono egbuje nemadzu ono bya atua ọku le mkpukpu phe; ọku tsufu iya.

⁸Teme o gbẹ teke ono bya asu ndu-ozii iya: ‘Nta be e shiebechaaru nri ekele nwanyi; ophu ndu e ziru le nri obu agbaduru k'eriri iya.

⁹Ngwa; unu lufu l'oma eze gbororo; iphe, bukpo ndu unu humaru g'ephe ahahabe l'otu; unu rwuta phe bya le nri ekele nwanyi obu.’

¹⁰Ndu ozii ono bya awufu l'oma eze gbororo je atukokpoepho ndu ẹphe humaru chita; ndu oma me ndu ejo-iphe. A bya ano-jia ulo nri ekele nwanyi obu.

¹¹“O be teke eze bataru g'o huma ndu byaru le nri obu; o huma nwoke, eyeduru uwe ekele nwanyi.

¹²O su iya: ‘Ishikomu; ? denu g'i shiru bata l'ime aka-a; l'ebe abu l'i yeru uwe ekele nwanyi?’ Ophu nwoke ono amadu iphe, oo-pfu.

¹³Onye eze ono su ndu-ozii iya: ‘Ngwa; unu kee ya egbu l'okpa yee aka paru je echie le tsukiribaa etezi. Eka ono be nemadzu a-odu kwaa ejo ekwa; taa ikireze.’ “

¹⁴“Kele ndu e kuru dukwa igwerigwe; ole ndu a hotaru habe ahabe.”

Apfu akiriko

(Mak 12:13-17; Luk 20:20-26)

¹⁵Ndu Farisii tugbuepho je achia idzu g'ephe e-shi gude opfu, Jizosu epfu nmata iya.

¹⁶Ephe bya eduru ndu etsoje phe nu me ndu ke Herodu ye g'ephe jepfu iya je asu iya: “O-zii-iphe; anyi maru l'i bu onye ire-lanu; teme i gude ire-lanu ezi uzo Chileke; ophu o dudu onye iitsu ebvu. Ophu o dudu onye iile enya l'iphu.

¹⁷Su-a; yeeshikwaru anyi onu l'opfu-a. ? Denu g'o dukpoo ngu? ? O bu emebyi ekemu Chileke me anyi -tuje akiriko nu eze nnajioha, no le Romu?”

¹⁸Jizosu maerupho ejo-iphe, no phe l'okpoma bya asu phe: “? Bu gunu meru g'o gude unu gbaberu mu onya opfu; unube toko-l'ehu-atuko-l'obu-a?

¹⁹Unu goshiestikwa mu okpoga, eegudeje atu akiriko obu.” Ephe wotaru iya kobo lanu.

²⁰O su phe: “? Bu ishi onye yele epha onye bu owa-a, e deru iya-a?”

²¹Ephe su iya: “Oo ke Siza!” O su phe: “O n'iya-a bu g'unu woru iphe Siza nu Siza; unu eworu ke Chileke nu Chileke!”

²²Ephe numa iya; o du phe biribiri. Ephe paru iya haa; o buru phe atugbu.

Ke eshi l'onwu teta dzuru ndzu

(Mak 12:18-27; Luk 20:27-40)

²³Le mboku ono kwapho ndu Sadiusii, bu ndu suru l'e tee shidu l'onwu eteta adzuru ndzu; byapfuta Jizosu bya asu iya:

24“O-zì-iphe; iphe, Mòsisu deru l'ekwo ekemu bu; teke nwoke lunyaaru nwanị bya anwuhu; ophu o nwutaduru nwa; ge nwune iya lupyabe nyee ya ono g'o nwutaru onye ophu, nwuhuru anwuhu pho nwa.

25Su-a; o duru unwune esaa, shi buru l'echilabo anyi. K'ogerenya luchaa nwanị; onwu woru iya gba; l'ebe o togbo me ako le mgboko. O paru nyee ya obu haaru nwune iya.

26Onye k'ebo, bu otsota bya alupyabe nwanị ono; bya anonyakwaapho nwuhu; l'ebe atogbo ako; onye k'eto nno pho; jasụ l'onye k'esaa.

27G'ephe ha nwushihubebeephe teme nwanị gbẹ teke ono bya anwuhu nkiya.

28O -rwua teke ee-shi l'onwu teta dzuru ndzu; ? bu onye ole be nwanị ono a-buru nyee ya; g'ephe n'esaa luchaa iya-a?”

29Tobudu iya bu; Jizosu su phe: “Unu eshisweje iya; kele ekwo-opfu Chileke te edoduru unu enya; ophu o buro ke g'ike Chileke habe shii.

30Kele teke ndu nwuhuru anwuhu e-shi l'onwu teta dzuru ndzu be nwoke taa luhedu nwanị; ophu nwanị aluhedu ji. Ephe a-du g'unwu-ojozi-imigwe.

31A -bya le k'eshi l'onwu teta dzuru ndzu; ? unu ta agujedu iphe, Chileke pfuru nu unu l'onwiya su:

32‘O kwa mbedua bu Chileke ke Ebirhamu; buru Chileke ke Ayizaku; bya aburu Chileke ke Jiekopu.’ Oo ya bu le Chileke ta abukwa Chileke ndu nwuhuru anwuhu; o bu Chileke ndu no ndzu.”

33Ikpotu ndu ono numae ya pho; iphe, oozu dua phe biribiri etu.

Ekemu, kpọ-chiru ishi

(Mak 12:28-34; Luk 10:25-28)

34Tobudu iya bu; ndu Farisii numaephe le Jizosu mewaru onu-pfu nu ndu Sadiusii; ephe je erwukobe onwophe.

35A nonyaa; onye lanu l'ime phe, bu onye ezije ekemu meahaa g'o gbabe onya opfu gude nmata Jizosu; bya asu iya:

36“O-zì-iphe; ? bu ekemu ole bu ekemu, kpọ-chiru ishi l'iphe, bu ekemu g'o ha?”

37Jizosu su iya: “‘Yee Nnajiuphu, bu Chileke ngu obu ngu g'o ha. Gude ndzu ngu g'o ha; me uche ngu g'o ha yee Chileke obu.’

38Ono bu ekemu, kakota shii bya aburu iya kpọ-chiru ishi.

39Ophu tsotaru iya nu, dühukwapho g'ono bu: ‘Yee nemadzu ibe ngu obu gi yeru onwongu.’

40Oo l'ekemu labo-a be iphe, bukota ekemu g'o ha yee iphe, ndu mpfuchiru Chileke deru l'ekwo tukoru g'o ha kpakoo.”

Aji k'onye bu Kereshi o bu

(Mak 12:35-37; Luk 20:41-44)

- ⁴¹Ọ buru teke ono, ndu Fárisii nọkoberu ono bẹ Jizọsu jiru phẹ aji sụ phẹ:
- ⁴²“? Ọ dụ unu gẹ Kéreshi ọbu, bukpo Nwa onye?” Ẹphe sụ iya l'ọo Nwa Dévidi.
- ⁴³Ọ sụ phẹ: “? Denukwanu g'o gude Unme-dụ-Nsọ kẹ Chileke mee Dévidi ọ nọdu ekuje iya Nnajiuphu sụ:
- ⁴⁴“Chileke sụru Nnajiuphu mu: Nọdu mu l'ẹkutara jasụ teke mu e-me g'ị zopyabe ndu-ohogu ngu l'okpa.
- ⁴⁵Eshinu Dévidi ekuje iya Nnajiuphu; ? denuhunu g'o gude ọ buru Nwa iya?”
- ⁴⁶Ọphu ọ dudu onye duru ike yeeru iya ọnu; mbụ g'ọ ka mma l'ọo akpuru opfu lanụ. Eshi mbọku ono; ọphu ọ dudu onye tũbaaru ama aji Jizọsu aji ọzo.

Matiyu 23

Jizọsu epfu kẹ ndu ezije ekemu

(Mak 12:38-39; Luk 11:43,46; 20:45-46)

- ¹Jizọsu gbalihu bya asụ ikpoto ọha ono mẹ ndu etsoje iya nụ:
- ²“Ndu ezije ekemu mẹ ndu Fárisii bẹ bụ phẹ bụ ndu-ishi, l'ezije iphe, ekemu Mósisu bụ.
- ³Ọo ya bụ; unu nujekwaru phẹ opfu. Unu mejekwa iphe, bukpo iphe, ẹphe sụru g'unu mee; ọle g'unu te etsokwa ẹka phẹ. L'ẹphebedua bukwa epfupfu bẹ ẹphe epfufe iya l'ọnu; ọphu ẹphe emekwanụ iya ememe.
- ⁴Ẹphe edoje oke ivu, anyị ẹrwa; bya atsụ l'ẹhu evuvu woru bo nemadzu g'o vuru; ọle ẹphebedua l'onwophe taa rwukwa iya g'ọ ka mma l'ọo mkpushi ẹka.
- ⁵Iphemiphe, ẹphe eme bẹ ẹphe anọduje eme gẹ nemadzu hụma phẹ. ? Unu ta ahụmaduru g'ẹphe edeje opfu Chileke phosaa phosaa l'eli akpọ, ẹphe epfubeje l'egedegee ọnu-iphu. ? Unu te eledu gẹ jipfu jipfu ọnu uwe phẹ ahaje.
- ⁶Iphe, aduje phẹ ree bụ g'ọ buru phẹ a-nọdu l'ẹka aa-kachakpọ phẹ akwabẹ ùbvù mẹ a -nọdu abọ iphe; waa g'oshi, bụ iya kachakpọ ree l'ulo-ndzukọ ndu Jiu buru nkephe;
- ⁷waa ẹrengete ekele l'ẹka a dụ igwerigwe; waa gẹ ndiphe kuje phẹ ‘O-zì-iphe’.
- ⁸Ọle unu te ekwekwa g'e kuje unu O-zì-iphe; kele ọo onye lanụ bụ onye l'ezije unu iphe. Onye ono bụ iya bụ Kéreshi. Unubedua l'ọphu bukota unwunna.
- ⁹Ọphu ọ dukwa onye unu e-kuje Nna lẹ mgboko-a; l'ọ kwa Nna lanụ bẹ unu nweru, bụ iya bụ Nna ọphu bu l'imigwe.
- ¹⁰Ọphu unu ekwekwa g'e kuje unu Nnajiuphu; kele ọo onye lanụ bụ Nnajiuphu unu, bụ iya bụ Kéreshi ọbu.
- ¹¹Ọ chia g'onye kakọta shii lẹ g'unu ha buru onye a-nọdu ejeru ndu ọphuu ozi.

12Kele onyemonye, l'ewoli onwiya eli be ee-wozeta ali. Onye wozetakwanuru onwiya be ee-woli eli.”

Jizosu anma ndu bu tuko-l'ehu-atuko-l'obu ikpe

(Mak 12:40; Luk 11:39-42,44,52; 20:47)

13“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu ono. Kele unu woru aka Chileke bu eze guchia; guburu ndiphe ye g'ephe ta abahu iya. Unu taa bahudu iya l'onwunu; teme ndu eme g'ephe bahu be unu te ekwedu g'ephe bahu.

14“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu ono. Kele unu bu ndu eripyaje ulo unwanyi, ji phe anoedu. Unu nodu egudeje eregede epfukpopho ogologo opfu anu Chileke. Oo unu be Chileke a-kachaa anmashi ikpe ike.

15“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu ono. L'eka unu akpojeru ugbo daa eze-enyimu tuko ekameka jebabe g'ee-shi g'unu pfubuta m'obeta o buru onye lanu yeru Chileke. Teke unu pfubutaru onye obu; unu emee ya l'oo-buru onye ka unu agba k'oku-ali-maa ugbo ebolechiko.

16“Nshio unube ndu atsui ishi, eme g'unu goshi onye ozo uzo. L'eka unu asuje l'o to nwedu iphe, o bu me nemadzu -gude eze-ulo Chileke ria angu. Obenu l'onye gude mkpola-ododo eze-ulo Chileke ria angu obu be unu asuje l'ono bu ugwo, tukuru iya l'ishi.

17Lekwa unube ndu eme eswe teme unu nodu atsugbaa ishi-a! ? Buhunu ole ka ere ire? ? Bu mkpola-ododo eze-ulo Chileke; too eze-ulo l'onwiya, gbere buru iya meru mkpola obu o buru iphe ke Chileke?

18Teme unu sukwapfo l'onye gude oru-ngweja Chileke ria angu be o to dudu iphe, o bu; obenu l'onye gude iphe-anunu, e doberu iya ria angu be unu suru l'o buwaa ugwo, tukuru iya l'ishi.

19Lekwa unube ndu-a, l'atsui ishi-a! ? Buhunu ole ka shii? ? Bu iphe, a nuru anunu; too oru-ngweja Chileke, gbere buru iya meru g'iphe obu, a nuru anunu obu buru iphe ke Chileke?

20Oo ya bu l'iphe, bu onye gude oru-ngweja Chileke eri angu gudekwa yee iphe, no iya nu rikota angu obu.

21Onye gudekwanu eze-ulo Chileke ria angu be gudekwapho eze-ulo ono me Chileke, bu iya nu gude ria angu obu.

22Onye gudekwanu imigwe eri angu gudekwapho aba-eze Chileke yee Chileke, onye no iya nu eri angu obu.

23“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu ono. Kele unu agbakebeje je anu Chileke oke-lanu-l'uzo-iri l'agbo me anamita; mekpoo ahuji; bya aparu eme ekemu l'eka o karu akaka paru haa, bu iya bu ekpe ikpe,

pfuru oto; waa aphu obu-imemini; waa apfushi ike l'iphe, onye pfuru. Iphemiphe ono be unu gege anodua eme; ole o to bukwanu g'unu haa ophuu.

²⁴Unube ndu atsushi, eme g'unu goshi ndu ozo uzo; unube ndu azashijechaa zashia iphiriba iphe, ha ge nwenwu, no l'okoro; ole unu elwejekwa iphe, ha g'inya olwe woo.

²⁵“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu. Kele unu anoduje asa azu okoro; asa azu ochi; ole iphe, jiru ime iya bu ana ndu ozo iphe l'eka ike waa egu eme ejo-iphe.

²⁶Gube nwophu Farisii, atsushi; vuru uzo saadaa ime okoro yee ime ochi; oo ya bu; azu iya egbufukwapho chalahaa ucha.

²⁷“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu. Kele unu du g'ilu, e memaru emema, anoduje ama mma l'eli ehuiya; o -rwua l'ime iya; okpu nemadzu; mekpoo iphe ozo, rehuru erehu; eji iya ejiji.

²⁸Nokwapho g'unu aduje g'unu pfuberekoto; 'ama l'iphe, jiru unu ime bu tuko-l'ehu-atuko-l'obu waa ejo-iphe.”

Jizosu epfu l'aa-gwatakota ogbo nta-a ugwo iphe, ephe eme

(Luk 11:47-51)

²⁹“Nshio unube ndu ezije ekemu me ndu Farisii! Unube ndu bu tuko-l'ehu-atuko-l'obu. Kele unu anoduje akpushi ulo l'ilu l'eka ndiche unu phe ligbaaru ndu ephe gbushiru, bu ndu mpfuchiru Chileke; bya ememakwapho eka e liru ndu pfuberekoto emema; asuje:

³⁰“Ome unu no ndzu teke nna unu oche phe no; unu tege eyekwa eka l'egbushi ndu mpfuchiru Chileke.”³¹Unu gude egube ono agba onwunu ama l'unu bupho unwu ndu gburu ndu mpfuchiru Chileke.

³²O du ree; unu yenu eka mefufu-a iphe, ndiche unu phe meru mephodoru unu.

³³Unube ejo agwo ono! Unube unwu, ogiji nwushiru ono! ? Unu e-mekwadu imagha nahu g'a ta nna unu ikpe; kpuru unu ye l'oku-ali-maa?

³⁴Oo ya bu; unu huma le mu e-zi ndu mpfuchiru Chileke waa ndu mmamiphe; waa ndu ezije ekemu g'ephe byapfuta unu. L'ime phe be o duru ndu ophu unu e-gbu egbugbu; duru ndu ophu unu a-kpopyabe l'oswebe; dukwarupho ndu ophu unu e-chi iphe l'ulo-ndzuko unube ndu Jiu; mekota phe ewere le mkpukpu le mkpukpu;

³⁵k'ophu oo-tukoru unu l'ishi; mbu ochi ndu pfuberekoto, unu gbushiru le mgboko e-shi l'ochi Ebelu; nwata pfuberekoto; jasul'ochi Zakaraya; nwa Barakaya; onye unu gburu le mgbaka eze-ulo Chileke; waa oru-ngweja Chileke.

³⁶Su-a; ge mu gbukwaaru iya unu tororo; l'iphemiphe ono bukotakwa l'ishi ogbo-a, no nta-a be aa-gwatakota ugwo iya g'o ha.”

Jizosu yeru Jierusalemu obu

(Luk 13:34-35)

³⁷“Oowaa! Gùbe Jierúsalemu! Ì tükoru ndu mpfuchiru Chileke egbushi; bya egude mkpuma atụ-gbushi ndu e ziru g'ephe byapfuta ngu. Tekenteke bẹ mu meru gẹ mu chikobe unwu ngu l'ẹka lanu gẹ nepfu-ọku achikobeje unwu iya l'ime nkù iya-a; ophu i kwedu!

³⁸Huma ahuma; l'ibe ngu bẹ aa-gbagharu; l'ọ dabyiru iphoro.

³⁹Gẹ mu karu unu; unu ta ahumabaekwa mu jasụ teke unu a-sụ: ‘Chileke goru onu-oma nu onye ono, gude epha Nnajiuphu abya ono.’ “

Matiyu 24

Iphe, e-me teke ikpazu

(Mak 13:1-2; Luk 21:5-6)

¹Tobudu iya bu; Jizosu bya eshi l'ime eze-ulo Chileke lufuta; o buru iya atugbushi. Ndu etsoje iya nu byapfuta iya g'ephe goshikota iya eze-ulo Chileke ono l'ophu.

²Jizosu su phe: “? O kwa l'unu humaru iphemiphe ono? Gẹ mu gbukwaaru iya unu tororo; ee-mechaa nwukposhichaa iphemiphe ono enwukposhi; mbu k'ophu o to dudu g'o ka mma l'oo mkpuma lanu, a-kpo-pfuru l'eli nwibe iya.”

Iphe, bu o -mechaa mgboko abvu

(Mak 13:3-13; Luk 21:7-19)

³Jizosu bya enyihu ubvu Olivu bya eje anodu anoo l'eli iya. Ndu etsoje iya nu byapfuta iya k'iche bya asu iya: “? Bukpoo teke ole be iphemiphe-a, i pfuru-a l'emekpo? Teme ? bu gunu a-buru iphe, ee-gude maru teke ii-bya; waa teke mgboko a-bvu?”

⁴Jizosu yeeru phe onu su phe: “Oo pho g'unu leta onwunu enya g'o to du onye eduswe unu uto.

⁵Kele o duru igwerigwe ndu a-zaru epha mu bya. Onye ophu nonu l'oo-su l'o kwa yebdua bu Kereshi obu. Epe eshi l'eka ono duphua ndu du igwerigwe.

⁶Unu a-nodu anu ude ugu ophu aalwu l'eka du enya; waa ophu aalwu l'eka du ntse; ole g'obu te etsukahukwa unu; noo l'iphemiphe ono mefutajekwa. Ole teke mgboko a-bvu teke erwukwa.

⁷Noo kele oha yele oha ibe iya a-nodu alwu ugu; ali-eze yele ali-eze ibe iya a-nodukwapho alwu ugu nkephe. Ejo okpa nri a-bya. Ali anmaa jijijijii l'eka du igwerigwe.

⁸Ole iphemiphe ono dupho g'egube ime awataje eme nwanyi k'ophuu-a.

⁹“Noo teke epe a-kpuru unu jepfu ndu ochi-oha; eeme unu ewere; gbushia unu. Ohamoha, no le mgboko egude kele unu bu nkemu kpo unu ashi.

¹⁰Nokwapho teke ikpoto nemadzu a-gbakuta azu l'ekwekwe, epe kweru ke Chileke. Epe edeaharu nwibe phe nu g'e gbua; kpo nwibe phe ashi.

11 Igwerigwe ndu mpfuchiru a-bya ị ị mgboko-a bya anọdu epfu iphe, Chileke epfuduru; gude edepushi ndu ị ị igwerigwe.

12 Teme eshinu ejo-iphe a-kwata paa ị ị mebyikpoo apaa ị ị n-yemobu k'igwerigwe nemadzu a-tokpoepho nwehu ejihu oyi eje.

13 Obenu l'onye taru nshi jasụ l'ikpazu ị ị Chileke a-dzota.

14 Teme ozi-oma k'eka Chileke bu eze-a; ị ị aa-sa asasa g'o dzuru mgboko mgburugburu; k'ophu ohamoha l'ophu a-numadzuru iya. E -mechaa teke ono; mgboko abvu.”

Ejo ahuma

(Mak 13:14-23; Luk 21:20-24)

15 “Su-a; unu a-humakwa ejo-ahuma-ola-l'iswi ono, Danelu onye mpfuchiru pfuru unu opfu iya ono; l'eka o pfuru l'eka duru Chileke nso. Ge gube onye agu iphe-a rikwaa oriri iphe, o bu.

16 Unu -huma ya pho; ge ndu no ị ị Jiudiya gbalakwaa lashia l'ubvu.

17 G'onye no l'okpoku te ejeekwa abahu l'ulo ị ị ya eje ewota iphe, du l'ulo iya.

18 Teme g'onye no l'egu te ekekwa ala unuphu je achita uwe iya.

19 Aphu a-tsokwaru unwanyi, du ime; me unwanyi, nwa angukwadu era mboku ono.

20 Oo g'unu pfuru nu Chileke g'agba oso unu ta abu l'udzumini; ophu o bushiru l'eswe-atuta-unme.

21 Kele teke ono ị ị ejo oke iphe-ehuka, eteke adu-swee k'eshinu Chileke meru mgboko byasu nta-a l'a-du; ophu o byadu adubaa ozo.

22 Nnajiuphu -egbuduru teke iphe-ehuka ono mkpirikpu ị ị o to dukwa nemadzu aaphodunu. Ole oo-gude iswi ehuru ndu o hotaru gbua ya mkpirikpu.

23 “O -rwua teke ono; o -duru onye suru unu l'o wakwa Kereshi obu; ozoo l'o phukwa iya; unu te ekwekwa.

24 Kele ndu a-nodu adushi uka su l'ephe bu Kereshi; ozoo l'ephe bu ndu mpfuchiru Chileke; a-duchakwaa teke ono. Ephe a-nodu emegbaa iphe-ohumalenya, dugbaa biribiri. Iphe ono a-buchaaaru g'ephe e-shi dephua ndiphe; mbu je akpaa ị ị ndu Chileke hotaru; m'ephe -je l'adu ike.

25 Ole mu vuakwa uzo epfuru iya unu nta-a, o too meadaa.

26 “Oo ya bu; teke o nweru ndu suru unu g'unu lenu l'o nokwa l'echiegu; unu te ekekwa eka ono. Ephe -su unu: lekwa l'o nokwa l'ime mkpuru; unu te ekwekwa.

27 Kele o kwa g'ebemu-igwe akuje phoo; shi l'uzo enyanwu awawa lojaa akpaminigwe jasụ l'uzo enyanwu ariba-a bu ge Abubu-Ndiphe e-me mboku, oo-bya.

28 “O kwa eka odzu dabyiru ị ị udele adojeru.”

Abyabya Abubu-Ndiphe

(Mak 13:24-27; Luk 21:25-28)

²⁹E -mechaa; teke ejo iphe-ehuka ono bvuerupho be enyanwu e-jikputa; onwa echibuhu echichi; kpokpode eshi l'igwe dashihu; iphemiphe, no l'igwe anmawo anmawo lo-sweshihu.

³⁰Noo teke iphe-ohubama ke Abubu-Ndiphe e-geru egeru l'akpaminigwe. O buru teke ono be iphe, bu ohamoha, no le mgboko mgburugburu a-ra ejo ekwa; aka meji tofuru phe. Noo teke ephe a-huma Abubu-Ndiphe aka o no l'urwukpu shi l'igwe egbu nwiniwii gude ike iya, paru aka abya.

³¹Aabya egbua eze opu ono, oo-gude zia unwu-ojozi-imigwe iya; ephe ejee l'iphu; jee l'azu; jee l'uzo ekutara; jee l'uzo ekicha; je akpaa l'eka igwe beru; ali beru; chikota ndu o hotaru.

Iphe, e gude oshi figu anwuta

(Mak 13:28-31; Luk 21:29-33)

³²“Su-a; unu gude oshi figu nwuta iphe; kele oobujeru; o -mishiwaa bya erwua irwu ophuu; l'aamaru l'onanwu duwaa ntse.

³³Nokwapho g'owa-a du. Teke unu humaerupho iphemiphe ono; unu amaru l'o nokpowaa ntse; mbu l'o nowaa g'onu-oguzo.

³⁴Su-a; ge mu gbukwaaru iya unu tororo; ogbo-a taa bvuebekwa; iphemiphe-a emekota.

³⁵Su-a; igwe a-bvukwa; ali abvu; obenu l'opfu, mu pfuru ta abyadu erebuhu ire erebuhu.

Mboku, oo-buru

(Mak 13:32-37; Luk 17:26-30,34-36)

³⁶“Obenu l'o to dudu onye maru mboku, oo-buru; ozoo teke iphe ono e-megbaa gedegede. Mbu l'unwu-ojozi, bu l'imigwe ta amakwa iya; ophu Nwa Chileke l'onwiya amakwa iya. Onye maru iya nu buepho Chileke, bu Nna nwekiya.

³⁷O kwa g'o du l'ogbo ke Nuwa phe teke ndiche ono bu g'oo-du teke Abubu-Ndiphe l'a-bya.

³⁸Kele teke ndiche ono; teke utso, riru mgboko eteke agbadu; be ephe shi nodu eri angu; alu-phe nwanyi; ekephe nwanyi; jasu mboku, Nuwa bahuru l'eze ugbo;

³⁹ophu ndiphe amadu iphe, ako nu; jasu teke mini byaru atuko phe rikota. Nokwa g'oo-du teke Abubu-Ndiphe a-bya bu ono.

⁴⁰Noo teke unwoke labo a-nodu l'egu; aabya ezikota onye lanu haa onye ophuu.

⁴¹Unwanyi labo a-nodu atsui nri; aabya ezikota onye lanu haa onye lanu.

⁴²Oo ya bu; unu che nche; kele unu ta amadu mboku, Nnajiuphu unu a-bya.

⁴³Ole-a; unu makwarupho ɔ-a; Ome oke, bu l'unuphu maru teke iphuru abya ibe iya me ɔ nwukwaru-a ɛnya; me o to kwekwanu g'iphuru tsufua ɔlo iya bata.

⁴⁴Oo ya bu; unubɛdua l'onwunu; unu kwabekwapho ɛnya; kele Abubu-Ndiphe l'a-bya teke unu te eledu ɛnya iya.”

Nwozi, e gude ire iya ɛka

(Luk 12:41-48)

⁴⁵“? Bu onye bu nwozi, e gude ire iya ɛka teme ɔ buru onye kwaru ɛnya? O bu onye ono, nnajiuphu iya doberu l'unuphu g'o nujeru iya ndibe iya nri l'orwuberu iya.

⁴⁶Ehu-utso be a goru nu nwozi ono me ɔ -buru le nnajiuphu iya a-lwa bya ahuma l'oome iphe ono, e ziru iya ono.

⁴⁷Ge mu gbukwaaru iya unu tororo; nnajiuphu ono e-wokwaru iphemiphe, o nweru enweru ye nwozi ono l'ɛka.

⁴⁸Obenu; teke ɔ bu nwozi ejo okpoma; ɔ rja su: ‘Ha! Nnajiuphu mu anokwaa odu’.

⁴⁹O bya awata etsukashi ndu-ozu nwibe iya iphe; wata eri g'o du iya; nguahaa mee; ephe le ndu nggaga mee.

⁵⁰Nnajiuphu iya ono a-lwa mboku, o too ledu ɛnya iya waa teke ɔ to madu;

⁵¹bya agwaa ya ochi; woru iya gwakobe le ndu bu tuko-l'ehu-atuko-l'obu. Noo ɛka nemadzu a-nodu kwaa ejo ekwa; taa ikireze.”

Matiyu 25

Ako akatikpo unwumboko iri

¹“Eka Chileke bu eze be aa-dupho g'iphe, meru l'ako akatikpo unwumboko iri, chitaru oroku phe gude jeshia onye jeru alu nwanyi ophuu ndzuta.

²Umadzu ise l'unwumboko ono bu ndu eswe; umadzu ise buru ndu kwaru ɛnya.

³Le ndu eswe pho pataru oroku phe; ophu ephe adudu manu, ephe wotafuaru k'etsutsu.

⁴Ole ndu ophu kwaru ɛnya yeru manu l'iphe paru k'iche bya apakwarupho oroku phe.

⁵Onye ono, alu nwanyi ophuu ono nahaeapho odu abyabya; mgbenya rweahaa phe. A nonya; mgbenya tushikota phe.

⁶“Abali keepho ebo; a rashia su: ‘Eeghee! Onye jeru alu nwanyi ophuu obu alwaakwa-o! Unu lufuta bya eje iya ndzuta-o!’

⁷Tobudu iya bu; unwumboko ono wulihukota bya emezichaa oroku phe.

⁸Ndu ophu bu ndu eswe pho su ndu ophuu, kwaru ɛnya pho: ‘Unu menuru nwamanu unu tadaru anyi jiko l'oku anyihuakwaa l'oroku anyi.’

⁹Ndu k'ono, kwaru ɛnya ono su phe: ‘? Teke ɔ to sukwanu anyi l'unu-e? Unu jepfukwa ndu ere manu-oku je akpata k'unu.’

¹⁰Ɛphe tɔgbua jeshia ya akpata. Ɔ bɔru teke ono be onye jeru alɔ nwanɔi ono byarwutaru; ndu ɔphu jikobewaru ɛka ejeje phɔ tsoru iya; ɛphe bahɔ l'ulo ɛka eeme ekele-nwanɔi ono l'enyashi ono. Ɛphe wɔbaepho l'ulo; e woru ɔzo guchia.

¹¹“E mechaa tɛme ɔmadzu ise ɔphuu bya; bya asu: ‘Nnajiuphu! Nnajiuphu! Gɔhaaru anyi ɔzo.’

¹²Nwoke ono sɔ phɛ: ‘Gɛ mu gbukwaaru iya unu tororo; mu ta amakwa onye unu bu.’

¹³Ɔo ya bu lɛ-a; unu chekwa nche; eshinu unu ta amadu mboku, Abubu-Ndiphe a-bya; ɔphu unu amadu teke ɔo-buru.

Ɛtu ndu e yeru okpoga l'ɛka

(Luk 19:11-27)

¹⁴“L'ɛka Chileke bu eze duɛkwapho g'iphe, meru l'ako nwoke lanu, gbeshiru eje iphe-ozo; bya ekua ndu-ozu iya bya eworu ɛku iya ye phɛ l'ɛka.

¹⁵Onye lanu be ɔ nuru ukporo ɛkpa-ego ise; bya anu onye ɔphuu ukporo ɛkpa-ego labo; bya anu onye k'eto ukporo ɛkpa-ego lanu. Onyemonye be ɔ nuerupho gɛ nwoke nkiya beru. Ɔ nuchaa phɛ iya; ɔ bɔru iya eje iphe-ozo, ooje.

¹⁶Onye ɔphu ɔ nuru ukporo ɛkpa-ego ise phɔ tɔgbuepho teke ono gude iya jeshia ngho. O je egude iya gbaa ngho rita urwu ukporo ɛkpa-ego ise ozo tukobe iya.

¹⁷Nokwapho g'onye ɔphu a nuru ukporo ɛkpa-ego labo phɔ meru. O jeru eritakwapho urwu ukporo ɛkpa-ego labo ozo tukobe iya.

¹⁸O be l'onye ɔphu nataru ukporo ɛkpa lanu-a; ɔ tɔgbua je ebvua ali woru okpoga nnajiuphu iya ono libe.

¹⁹“Tɔbodu iya bu; a nokpoepho-oo jasɔ: o be ujiku lanu; nnajiuphu ndu ono lwa g'ɛphe l'ɛphe gbazia okpoga ono.

²⁰Onye ɔphu a nuru ukporo ɛkpa-ego ise phɔ byatashia bya egudekwapho ukporo ɛkpa-ego ise ozo bya asu: ‘Nnajiuphu; iphe, i nuru mu bu ukporo ɛkpa-ego ise. Wakwa ukporo ɛkpa-ego ise ozo, mu ritaru l'urwu tukobe iya baa.’

²¹Nnajiuphu iya sɔ iya: ‘I meru ree! I bu okpobe onye-ozu, e gude ire iya ɛka. Eshinu e gude ire ngu ɛka lɛ nwiphe, edzudu kaa be mu e-me g'i bɔru onye-ishi l'iphe, paru ɛka. Ngwa; bya g'ehu tuko tsoo gu lɛ nnajiuphu ngu utso.’

²²Onye ɔphuu, a nuru ukporo ɛkpa-ego labo phɔ byakwa bya asu: ‘Nnajiuphu; iphe, i nuru mu bu ukporo ɛkpa-ego labo. Wakwa ukporo ɛkpa-ego labo ozo, mu ritaru l'urwu tukobe iya baa.’

²³Nnajiuphu iya ono sɔ iya: ‘I meru ree. I bu okpobe onye-ozu, e gude ire iya ɛka. Eshinu e gude ire ngu ɛka lɛ nwiphe, edzudu kaa be mu e-me g'i bɔru onye-ishi l'iphe, paru ɛka. Ngwa; bya g'ehu tuko tsoo gu lɛ nnajiuphu ngu utso.’

²⁴Onye ọ́phu a n̄uru ụkp̄oro ẹkp̄a-ego lan̄u ph̄o byakwa bya as̄u: ‘Nnajiuphu; mu maru ngu ree; l’i bunukaru ejo nemad̄z̄u. Iiwotaje iphe l’ẹka i kuduru iphe; t̄eme i n̄odu ejeje ekpota iphe, i ghad̄uru.

²⁵Noo g’o gude ndz̄u ḡuhu mu; mu woru ụkp̄oro ẹkp̄a-ego ngu je elibe l’al̄i. Nggekw̄a iphe ngu.’

²⁶“Nnajiuphu iya ono s̄u iya: ‘Lekwa ḡube iberezi iphe, arw̄uhu-a, ejo ọkpoma egbu egbugbu-a. Oo ngu ph̄o maru l̄e mu awotaje iphe l’ẹka mu akuduru iphe; t̄eme mu n̄odu ekpotaje iphe, mu ghad̄uru.

²⁷I gege dobekp̄ooru mu n̄u okpoga mu l’ulo nche okpoga; g’oo-buru mu -lwa mu eje ewota okpoga mu ȳe iphe, o tukoberu onwiya.

²⁸Ngwa; unu nata iya okpoga ono; woru n̄u onye ph̄o, nweru ụkp̄oro ẹkp̄a-ego iri ph̄o.

²⁹Kele onyemonye, nweru n̄u b̄e aa-n̄ubakwa g’o nweru k’etsutsu iya. Obenu l’onye enwedu n̄u b̄e aa-gb̄enu natafulenu nw̄ophu o nweru.’

³⁰‘Ngwa; unu kp̄uta mkp̄okoro onye-oz̄i-a kp̄ufu je eye l’ẹka gbakotaru tsukiribaa. Eka ono b̄e nemad̄z̄u a-n̄odu kwaa ejo ẹkwa; taa ikireze.’ “

Ikpe Ikpaẓ

³¹“Obenu l̄e teke Ab̄ubu-Ndiphe a-n̄odu egbu nw̄inwii abya ȳe iphe, bukota unwu-ozozi-imigwe l’ophu b̄e ọo-n̄odu l’aba-eze iya, egbu nw̄inwii.

³²Teke ono b̄e ndiphe mgburugburu e-dzukota l’iphu iya. L’oobȳa eworu ph̄e h̄o g’onye eche at̄uru, l’ah̄oshije eḡhu l’ẹka at̄uru iya kuru; dobe ph̄e iche iche-a.

³³L’oobȳa ach̄iru ndu ọ́phu b̄u at̄uru dobe onwiya l’uzo ẹkutara; ch̄iru ọ́phu b̄u eḡhu dobe l’uzo ẹkicha.

³⁴Noo teke eze ono a-s̄u ndu k’ono, n̄o iya l’uzo ẹkutara ono: ‘Unu bya; unub̄e ndu Nna mu ḡoru ọnu-oma n̄u. Unu bya enweru mgboko ọ́phúú ono, Chileke kwak̄obehawaruro unu e -shi teke o meru mgboko ono.

³⁵Kele ẹgu ḡuru mu; unu n̄u mu nri; mu ria. Egu mini ḡua mu; unu chebe mu mini; mu nḡua. Mu buru mbyambya; unu dubata mu ibe unu.

³⁶Mu gbaru oto; unu nmab̄e mu iphe. Iphe mee mu; unu gbaaru mu mkpu. Mu jee mkp̄oro; unu bya mu agbaphe.’

³⁷“Noo teke ndu pf̄uberekoto a-s̄u iya: ‘Nnajiuphu; ? b̄u teke ole b̄e anyi h̄umaru ngu ẹka ẹgu aḡu ngu; anyi n̄u ngu nri ọ́bu? Ọzoo l̄e mini aḡu ngu; anyi chebe ngu mini; i nḡua?’

³⁸T̄eme ? buk̄poo teke ole b̄e anyi h̄umaru ngu; i buru mbyambya; anyi dubata ngu ibe anyi? Ọzoo l’i gba oto; anyi nmab̄e ngu iphe?

³⁹? Buk̄poo teke ole b̄e anyi h̄umaru ngu l’ẹka iphe eme ngu; ọzoo l’i n̄o l’oka mkp̄oro; anyi gbaaru ngu mkpu?’

⁴⁰Noo teke eze e-yeru phe onu su phe: ‘Ge mu gbukwaaru iya unu tororo; eshinu unu mekpwaru iya m'obeta o buru onye lanu, enya kachaa alwalwa l'unwunna mu-a be buakwaa mbedua be unu meru iya.’

⁴¹“Noo teke oo-bya asu ndu ophu no iya l'uzo ekicha: ‘Unu lufu mu l'iphu; unube ndu Chileke turu onu. Unu wuba l'oku ono, e-nwu gidigidi jaduru ono, bu iya bu aka Chileke meru doberu Obutuswe yee unwu-ojozi iya ono.’

⁴²Kele egu guru mu; ophu unu anuduru mu nri. Egu mini gua mu; ophu unu echebeduru mu mini.

⁴³Mu buru mbyambya; ophu unu edubataduru mu ibe unu. Mu gbaru oto; ophu o dudu iphe, unu nmaberu mu. Iphe mee mu; teme mu noo l'oka mkporo; ophu unu agbajeduru mu mkpu.’

⁴⁴Noo teke ephe e-yekwapho onu su: ‘Nnajiuphu; ? bu teke ole be anyi humajekpooru ngu aka egu agu ngu; ozoo aka egu mini agu ngu; ozoo aka i bu mbyambya; ozoo aka i gba oto; ozoo l'aka iphe eme ngu; ozoo l'aka i no l'oka mkporo; ophu anyi eyeduru ngu aka?’

⁴⁵Noo teke oo-su phe: ‘Ge mu gbukwaaru iya unu tororo; eshinu unu te emeduru iya g'o ka mma l'oo onye lanu, enya kachaa alwalwa l'ime ndu-a be unu te emekwaru mu iya.’

⁴⁶Oo ya bu; ephe eje anodu l'aka ephe a-nodu eje iphe-ehuka mkpurumkpuru jasu le tuutuutuu le miimiimii. Obenu le ndu ophu bu ndu pfuberekoto e-je l'aka ephe e-nweru ndzu ojejoje.”

Matiyu 26

Ndu-ishi achị idzu egbu Jizosu

(Mak 14:1-2; Luk 22:1-2; Jion 11:45-53)

¹Tobudu iya bu; Jizosu pfughechaepho iphemiphe, oopfu; bya asu ndu etsoje iya nu:

²“Ophu unu maru bu l'o ghudufuwaru-a abali labo; obo Ojehgata erwua. Noo teke eederu Abubu-Ndiphe ye g'a kpopyabe l'oswebe.”

³Tobudu iya bu; ndu-ishi uke Chileke waa ndu bu ogerenya mkpukpu bya edzukobe l'okpoku ibe onye-ishi ndu-ishi uke Chileke. Onye ono be epha iya bu Kayafasu.

⁴Ephe noo ndzukọ su l'ephe e-gude Jizosu le mpya woru gbua.

⁵Ole ephe suru l'o to buduru nta-a, aabo iphe-a; a -nonyaa utsu daa l'aka oha no.

Aawu Jizosu manụ, eshi mkpọ le Betani

(Mak 14:3-9; Jion 12:1-8)

⁶O be ge Jizosu jeru Betani; o je anodu l'ibe Sayimonu, onye ekpenta mejeru pho.

⁷Noo ya; nwanyi lanu gudeepho mgbere, ama ntumatu bata ge Jizosu gude nri l'aka eri. Mgbere ono be manụ, eshi mkpọ, du iya nu kwatakpooru ere ire shii. Nwanyi ono bya eworu manụ ono wua Jizosu l'ishi.

⁸Ndu etsoje iya nū hūmae ya phọ; ẹhu ghuahaa phẹ ẹghu. Ẹphe sụ: “? Bụ kẹ ẹghu bẹ e gude emebyishi ẹguru manū ọwa-a?”

⁹Kẹle manū-a sūru g'ee-reta iya iphe, parū ẹka woru keshiaru ndu akpa nri.”

¹⁰Jizọsu maerupho l'onoo iphe, ẹphe epfu bya asụ: “? Bụ ẹghu meru g'o gude unu nọdu epfuchi nwanyị ono nchị? ? Unu ta amadụ l'ọo ọkpobe iphe bẹ o meru mu ẹgube ono?”

¹¹Ndu akpa nri bẹ unu l'ẹphe anọ tekenteke; obenu lẹ mbẹdua ta abụdu tekenteke bẹ mu l'unu a-nọdu.

¹²L'iphe, meru iphe, ọ wūru mu manū-a bụ g'o shi nta-a kwakọbeta mu m'obvu mbọku, ee-li mu.

¹³Gẹ mu gbukwaaru iya unu tororo; iphe, bukpoọ ẹkameka, a sarū ozi-oma-a lẹ mgboko-a mgburugburu bẹ aa-kojeekwapho akọ iphe-a, nwanyị-a meru-a; gudeje nyata nwanyị-a.”

Jiudasu eederu Jizọsu eye l'ẹka ndu Jiu

(Mak 14:10-11; Luk 22:3-6)

¹⁴Tọbudu iya bụ; Jiudasu Isukariyọtu, bụ onye lanū l'ime ụmadzu iri l'ẹbo ono, etsoje Jizọsu ono bya atugbua jepfushia ndu-ishi uke Chileke;

¹⁵je asụ phẹ: “? Bụ ẹghu bẹ unu a-nū mu gẹ mu deru iya ye unu l'ẹka?” Ẹphe pfua ya ukporo pangu lẹ pangu iri.

¹⁶O shiepho teke ono wata achọ teke gbaru gẹ ya deru Jizọsu ye phẹ l'ẹka.

Nri-onyashi Ikpazu

(Mak 14:12-26; Luk 22:7-23; Jion 13:21-30; 1Kor 11:23-25)

¹⁷O rwua l'eswe, abahū l'ọbo-iphe, aatajẹ buredi, ekoduru ekoko ono; ndu etsoje Jizọsu byapfuta iya bya asụ iya: “? Bụ awe bẹ ọ dū ngu g'anyi doziaru ngu g'i nọdu ria nri ọbo Ojaghata ọbu?”

¹⁸Ọ sụ: “Unu bahū l'ime Jierúsalem. O nweru nwoke lanū, unu e-jepfu je asụ iya lẹ O-zì-iphe sūru; l'ọ rwuwaru iya l'alala. Gẹ ya nọdunu l'ibe ngu ria nri ọbo-iphe ono yee ndu etsoje iya nū.”

¹⁹Ndu etsoje iya nū ono je emee gẹ Jizọsu ziru phẹ. Ẹphe nọdu l'ẹka ono kwakọbeahaa nri ọbo Ojaghata ono.

²⁰O be l'ụzenyashi; Jizọsu yele ụmadzu iri l'ẹbo ono je anọdu kwabẹ k'eri nri ono.

²¹Ẹphe riijeepho nri ono; ọ sụ phẹ: “Gẹ mu gbukwaaru iya unu tororo; ọ kwa onye lanū lẹ g'unu nọ l'ẹka-a bẹ l'e-deru mu ye l'ẹka ndu achọ ishi mu.”

²²Ọ kwata rwua phẹ l'ẹhu; aphū ji phẹ obu. Ẹphe jiahaa ya nanū nanū sụ: “Nnajiuphu; ? bụ mbẹdua tọo mbẹdua?”

²³Ọ sụ phẹ: “Ọo onye mu l'iya eye ẹka l'ochi lanū-a bụ onye ọbu, e-deru mu ye ọbu.

²⁴Abubu-Ndiphe l'a-lakwa g'e deru iya l'ekwo-opfu Chileke. O le aphu a-tso ru onye ono, ee-shi l'eka iya deru Abubu-Ndiphe ye l'eka ndu achọ ishi iya ono. O gogo kakwaru onye ono ree ome a ta nwuduru iya ilile.”

²⁵Jiudasu-a, l'e-mechaa deru iya ye-a sụ iya: “Onyibe; ? bụ mbèdua tọ?” Jizosu sụ iya: “Ooekwa ngu phọ bẹ o shi l'onu.”

²⁶Ephe gudekwadụ nri ono eri; Jizosu bya ewota buredi bya ekele Chileke ekele; bya eworu iya nughbaa ndu etsoje iya nụ; bya asụ phẹ: “Unu gęc ria. Owa-a bụ ogwehu mu.”

²⁷O byakwa apata okoro, mee dụ bya ekelekwaphọ Chileke ekele bya eworu iya nụ ndu etsoje iya nụ bya asụ phẹ: “Unu ngu-dzuru iya g'unu ha.

²⁸Kẹle owa-a bụ mee mu, egude agba ogbandzu òphúú; mee a gbashiru l'iswi ehu igwe oha; k'ophu Chileke a-guru phẹ nvu l'iphe-eji.

²⁹Ole iphe, mu a-karu unu bụ; mu ta abyakwa angubaa mee, shi l'akpuru vayinu jasuru mbọku ono, mu l'unu a-ngu k'òphúú l'eka Nna mu bụ eze.”

³⁰Ephe kwechaa ebvu, e gude aja Chileke ajaja; bya ejeshia l'úbvú Olivu.

Pyita a-gọ lẹ ya ta amadụ Jizosu
(Mak 14:27-31; Luk 22:31-34; Jion 13:36-38)

³¹A nonyaa; Jizosu sụ phẹ: G'unu hakota bẹ e-mechakwaa hakota mu gbalaa l'enyashi-a; g'e deru iya l'ekwo-opfu Chileke. Kẹle e dekwaru sụ: “Mu e-chigbu onye eche aturu; g'ikpoto aturu ono agbakashihu.

³²Ole teke e meerupho gẹ mu shi l'onwu teta dzuru ndzụ bẹ mu e-vukwaru unu ụzo jerwua Gálili.”

³³Pyita sụ iya: “Onyemonye -jekpọ agbalakota paru ngu haa bẹ ephe a-hakwa ngu-a; o kwa lẹ mbèdua ta ayikwa haa ngu.”

³⁴Jizosu sụ iya: “Gẹ mu gbukwaaru ngu iya tororo; l'enyashi ntanụ-a bẹ oke-ọku nchi-abọhu -bya ara órà; bẹ i goakwaru ego ugbo ẹto sụ l'i tị madu mu.”

³⁵Pyita sụ iya: “O betakpọ mu lẹ ngu je a-tuko laa; mu ta abyakwa asụ lẹ mu ta amadụ ngu.” Ndu etsoje Jizosu ndu ophu tuko pfudzuru nno.

Jizosu epfu anụ Chileke lẹ mgbabu Getusemeni
(Mak 14:32-42; Luk 22:39-46)

³⁶Tobudu iya bụ; Jizosu yele ndu etsoje iya nụ swiru bya abyarwuta l'eka eekuje Getusemeni. E rwua eka ono; o sụ ndu etsoje iya nụ: “Unu nodukwa anọ l'eka-a gẹ mu jeriberu l'eka phọ je epfuru nụ Chileke.”

³⁷O bya eduta Pyita yẹe unwu Zebedi ephenebo; ephe swiru tugbua. Aphu ji iya obu; meji nodu etsue ya phọ pharamu pharamu.

³⁸O sụ phẹ: “Ha; egube owa! Meji akukwa mu phọ photophoto; mbụ lẹ meji abyaakwaa mu atofu. Unu nodukwa l'eka-a gẹ mu l'unu tuko chee nche.”

³⁹Ọ kp̄riberu nwansh̄ii; bya adaa bube iphu l'al̄i pfuru n̄ Chileke s̄u: “Nna mu; ọ -buru l'ii-mek̄otakpoo ya; man̄uru g'ii-me naf̄u mu okoro-a ḡe mu ta anḡu iphe, d̄u iya n̄u. Ọle ọ kwa g'ọ t̄o bukwa iphe, d̄u mu l'uche l'e-me. Ọ kwa g'ọ bukwaru iphe, d̄u gubedua l'uche l'e-me.”

⁴⁰Ọ gb̄eshi jepfu Pȳita ph̄e-a, ẹphe l'iya sw̄i-a. O jeshia; ẹphe n̄odu ekuwaa mgbenya. Ọ s̄u Pȳita: “? B̄u ḡunu b̄e unu eme ẹgube ono? ? Unu ta ad̄udu ike nw̄uru ẹnya ḡe mu l'unu n̄o m'obeta ọ buru awa lan̄u?”

⁴¹Unu nw̄uru ẹnya; pfuru n̄ Chileke g'ọ to kwe g'unu nmalah̄u l'ohutama. Maa nemadz̄u b̄e ọ n̄odujekpokwa evushi evuvu ike; obenu l̄e nemadz̄u l'onwiya b̄e ike ad̄udu.”

⁴²Ọ t̄ugbukwaa k'ugbo ẹbo bya ejekwa awata epfu an̄ Chileke s̄u: “O shita mu su gube Nna mu; ọ -buru l'ọ t̄o d̄uhedu g'ii-shi naf̄u mu iphe, d̄u l'okoro-a; gbahalepho l̄e mu nḡufutaje iya b̄e ọ dukwaa ree; ọ kwa g'ọ mee g'ọ d̄u ngu l'uche.”

⁴³Ọ bya alwaphutakwa az̄u byatash̄ikwa; ẹphe n̄odu ekukwaph̄o mgbenya; k̄ele mgbenya jiru ph̄e ẹnya ejiji.

⁴⁴Ọ pakwar̄u ph̄e haa bya at̄ugbua ọzo bya eje epfuru n̄ Chileke k'ugbo ẹto; pfukwaaph̄o iphe, o pfuhawaru.

⁴⁵O mechaa; bya abyapfuta ndu ono, ẹphe l'iya sw̄i ono; bya as̄u ph̄e: “? Unu n̄okpoep̄ho l̄e mgbenya g'unu n̄o iya? ? Unu n̄okpokwadua l̄e nwa at̄uta unme unu ọbu? Unu lekwa l'o rwuakwaru. Ab̄ubu-Nd̄iphe b̄e e deakwaru ye l'eka ndu iphe-eji.

⁴⁶Unu gb̄eshikwa g'anyi je. Ọ kwa onye deru mu ye n̄u ọbu abya n̄u ph̄o.”

Eegude Jiz̄osu

(Mak 14:43-50; Luk 22:47-53; J̄iṅ 18:3-12)

⁴⁷T̄obudu iya b̄u; Jiz̄osu kp̄ukwaduru-a opfu l'onu; Jiudasu-a, b̄u onye ȳikwaa l'umadzu iri l'ẹbo ph̄o-a buru ph̄ereketeke; ȳele igwe ọha sw̄iwaru. Ẹphe pagbaaru mma mekpoo mgboro. Ndu ziru ph̄e n̄u buru ndu-ishi uke Chileke waa ndu b̄u ọgerenya ndu Jiu.

⁴⁸Onye ono, deru iya ye onoya pfuwaru ph̄e iphe, ya e-me g'ẹphe gude maru onye ọphu ọ b̄u. Ọ s̄uhawaru ph̄e l'ọo onye ono, ya e-jepfu je etsutsua ọnu ono b̄u onye ẹphe e-gude.

⁴⁹Jiudasu jeeph̄o phaa byapfuta Jiz̄osu bya ekele iya ekele s̄u iya: “Onyibe! ? I dupho?” bya etsutsua ya ọnu l'asha.

⁵⁰Jiz̄osu s̄u iya: “Ishikomu; jer̄o emee iphe, ị byaru.” Ndu ono bya bya az̄upyabe Jiz̄osu; gudeshia ya ike.

⁵¹T̄obudu iya b̄u; onye lan̄u l̄e ndu ono, ẹphe l̄e Jiz̄osu shi n̄odu ono yeeph̄o ẹka m̄ia mma iya swaram̄u; gbua nwokoro onye-ishi ndu-ishi uke Chileke; paf̄u iya nch̄i.

⁵²Jiz̄osu s̄u iya: “M̄i-phu mma ngu az̄u l'ọbo iya; k̄ele onyemonye, b̄u o-gbu-mma l'a-la l̄e mma.

53Tọo ? i dobesu ọ mu taa dudu ike asu Nna mu nta-a g'ọ dzoo mu; mbu l'oo ye unubuku unwu-ọjọzi-imigwe egwegwa g'ephe bya nta-a?

54Ole; ? denukwanu g'oo-shi vua; mbu iphe, e deru l'ekwo-opfu Chileke, bu iya suru l'iphe-a, eme nu-a mefutaje g'oome-a?"

55Noo teke Jizosu suru ikpoto ndu byaru iya egude: “? Unu chigbaa mma; chiru mgboro abya mu egude? ? Mu bu onye ana nfu? Mu l'unu shikwa anoduje mboku-mboku l'eze-ulo Chileke; aka mu ezi unu iphe; ophu unu egudekpodaaru mu.

56Ole iphemiphe-a mewaru k'ophu iphe, ndu mpfuchiru Chileke deru l'ekwo-opfu Chileke aa-vufutakota g'ephe pfuru iya.” Ndu etsoje iya nu g'ephe ha paru iya haa; gbakashihu.

Jizosu l'iphu ndu-ikpe

(Mak 14:53-65; Luk 22:54-55,63-71; Jion 18:13-14,19-24)

57Ndu guderu Jizosu kputa iya kpuru tugbua jeshia ibe onye bu onye-ishi ndu-ishi uke Chileke. Epha onye ono bu Kayafasu. O buru l'eka ono be ndu ezije ekemu me ndu bu ogerenya dzukotahawaru.

58Pyita gbẹ ụzenya etso iya azu azu jasu ephe bahu ibe onye-ishi ndu-ishi uke Chileke ono. O bya abahu bya eje ano-kube ndu nche; chiru enya ye ge ya humakpoo iphe, a-buru ishi iya.

59Ndu-ishi uke Chileke me ndu ogbo-ikpe l'ophu choahaa ibo, ephe e-bo Jizosu; g'ee-shi g'ee-kpee ya mpfugbu.

60Ophu o dudu iphe, ephe humaru, bu iphe, o meru; l'eka a gbekwa du igwe agba iya ekebe eregede. A nonyaa; umadzu ebo bya

61bya asu: “O kwa nwoke-a suru le ya a-du ike mebyishia eze-ulo Chileke; ya akpukwaa ya l'ime abali eto-a.”

62Onye-ishi ndu-ishi uke Chileke ono gbalihu bya asu iya: “? Ti yedu onu l'iphe, bu ekebe owa-a, ephe agbagbaa ngu-a?”

63Ophu Jizosu epfuduru opfu. Onye-ishi ndu-ishi uke Chileke ono su iya: “Pfukwaa mele Chileke, dzu ndzu. ? Bu ngu bu Kereshi obu? Mbu Onye-Ndzota ono, Chileke kweru ukwe iya-a. ? Bu ngu bu Nwa Chileke obu?”

64Jizosu su iya: “Ooekwa ngu pho be o shi l'onu. O l'oo ge mu gbukwaaru iya unu tororo; nta-a be unu a-huma Abubu-Ndiphe l'eka o no l'ekutara Chileke, bu Okalibe-Kakota-Ike. Tem e -mechaa be unu a-humakwa iya pho l'eka o no l'urwukpu shi l'igwe abya.”

65Onye-ishi ndu-ishi uke Chileke ono woru uwe ke yebdua bu onye-ishi-a zijaa su: “Nwoke-a pfubiyakwaru Chileke nta-a. ? Bubahunaa ekebe gunu ozo be anyi achokwadu? Unu numawaru-a epfubiyi, oopfubiyishi Chileke.

66? Bu gunu bu ikpe unu nta-a?” Ephe tuko wua onu nanu su: “Iphe, gbaru iya nu bu onwu!”

⁶⁷Noo teke ẹphe wataru iya avu onu-mini l'iphu; chiahaa ya iphe; ndu echi iya ẹka le nchi su iya:

⁶⁸“Gube ophu suru l'i bu Kereshi obu; pfunaa mpfuchiru obu; ko onye chiru ngu iphe ono.”

Pyita ago le ya ta amadu Jizosu

(Mak 14:66-72; Luk 22:56-62; Jion 18:15-18,25-27)

⁶⁹Ge Pyita no l'etezi l'ulo-ikpe ono; be nwamgboko, yee nemadzu bu byapfutaru iya bya asu iya: “Gubedua yikwa-a le ndu etsoje nwofhu Galili-a, bu Jizosu-a.”

⁷⁰Pyita nodu l'edzudzu-oha l'eka ono goo ego su: “Ha! Mu ta amakwa iphe, iipfu.”

⁷¹Pyita gbeshiepho l'eka ono tugbua je anodu l'onu-oguzo. Nwamgboko ozo, yee nemadzu bukwapho ebubu humakwa iya bya asu ndu no l'eka ono: “Nwoke-a be yikwa le ndu etsoje Jizosu; mbu nwofhu Nazaretu.”

⁷²Pyita gokwaapho ego ozo buta angu ria su: “Mu ta amakwa nwoke ono.”

⁷³A noepho nwanshii; ndu pfugbaaru le mgboru ẹka ono bya bya asu Pyita: “Ta agoshi ego l'i yichaa ya-a; olu-opfu ngu gbawaru ngu ama.”

⁷⁴O wata eri angu su ge Chileke gbukwaa ya ilu me o -budu ire-lanu be ya epfu-a. Su: “Mu ta amakwa onye ono, unu epfu opfu iya ono.” Teke onokwapho oke-oku nchi-abohu raa ora.

⁷⁵Noo ya bu; Pyita nyata opfu, Jizosu pfuru su: “Oke-oku nchi-abohu -bya ara ora; be i goakwaru ego ugbo eto l'i ti madu onye mu bu.” O tugbua lufu je anodu raahaa ẹkwa arashi iya ike.

Matiyu 27

A kpu Jizosu akpupfu Payileti

(Mak 15:1; Luk 23:1-2; Jion 18:28-32)

¹Nchi bohuepho; ndu-ishi uke Chileke l'ophu me ndu bu ogerenya ndu Jiu bya achia idzu g'ephe gbua Jizosu.

²Ephe kee Jizosu egbu; kputa iya kpuru jeye nnajioha, bu Payileti l'eka.

Anwuhu Jiudasu

(Ndu 1:18-19)

³Jiudasu-a, bu iya deru Jizosu ye-a humaepho l'e kperu Jizosu mpfugbu; izimanu lwa iya azu. O chita ukporo pangu le pangu iri ono chiphu azu je achiru nu ndu-ishi uke Chileke waa ndu bu ogerenya ono su phe:

⁴“Mu meakwaru iphe-aji. O kwa onye adudu iphe, o meru be mu deru nu g'e gbua ono.” Ephe su iya: “? Bu onye akpa ngu ishi iya ono? Tobudu g'i jearo amaru g'ii-me iya.”

⁵Jiudasu chiru okpoga ono ghakaa l'eze-ulo Chileke; o buru iya atugbu je eworu onwiya swi-gbua.

⁶Ndu-ishi uke Chileke bya ewota okpoga ono bya asu: “Okpoga-a ta abukwa iphe, ee-yekebe l'okpoga Chileke eshinu o bu aswa mee ishi nemadzu.”

⁷Tobudu iya bu; ephe chia idzu wota okpoga ono je azua onye akpuje ite ali; woru ali ono mee ali eka ee-rije nlwamulwa.

⁸Noo ya bu; e kuahaa ali ono egu-mee jasunana.

⁹Noo ya bu; iphe, onye mpfuchiru, bu Jieremaya pfuru je avua, bu iphe, suru: “Ephe chita ukporo pangu le pangu iri ono, bu aswa, unwu Izurelu kwetaru l'ephe a-pfu l'ishi mu ono;

¹⁰je azua okpu-ite ali, bu iya bu ge Nnajiuphu pfuru iya ya. ”

Payileti aji Jizosu aji

(Mak 15:1-5; Luk 23:3-5; Jion 18:33-38)

¹¹Jizosu bya apfuru l'iphu nnajioha obu. Nnajioha bya ajia ya su: “? Bu ngu bu Eze ndu Jiu?” Jizosu su iya: “Oekwa ngu pho be o shi l'onu.”

¹²Ndu-ishi uke Chileke me ndu bu ogerenya wata epfushi igwerigwe iphe, du eji, ephe suru l'o meru; ophu Jizosu epfuduru opfu yeru phe.

¹³Payileti su iya: “? O kwa li numaru igwerigwe iphe, ephe epfugbaa l'i meshiru?”

¹⁴Ophu o yeduru iya onu; mbu go ka mma l'oo olu-opfu lanu; mbu o kwata du nnajioha ono okpobe biribiri.

Eekpe Jizosu mpfugbu

(Mak 15:6-15; Luk 23:13-25; Jion 18:39—19:16)

¹⁵Noo ya; o buwaa omelali phe l'anodu abo Obo Ojehata ono be nnajioha ahajeru phe onye mkporo lanu go la; mbu onye ephe sukpoerupho go haaru phe.

¹⁶Teke ono; o duru nwoke, a maru amaru, no mkporo; epa iya bu Barbasu.

¹⁷Tobudu iya bu; ephe dzukobeepho l'eka lanu; Payileti su phe: “? Bu onye ole be o du unu ge mu haaru unu go la? ? Bu Barbasu; to Jizosu onye eekuje Kereshi?”

¹⁸Kele o mawaru l'oo enya-pfurupfuru be ndu-ishi uke Chileke gude kputaru iya Jizosu.

¹⁹Payileti nodukwadua l'ulo-ikpe ono; nyee ya zia g'a bya asu iya go to dukwa iphe, oo-me nwoke ono, pfuberekoto ono; kele ya rwokwaru nrwo l'enyashi jee iphe-ehuka, paru eka l'opfu ehuiya.

²⁰Tobudu iya bu; ndu-ishi uke Chileke me ndu bu ogerenya ono kwaru ikpoto ndu ono ye g'ephe su g'a haaru phe Barbasu; megua Jizosu.

²¹Nnajioha ono bya ajikwa phe ozo su: “? Bu onye ole l'ime umadzu ebo-a be o du unu ge mu haaru unu go la?” Ephe tua uzu su: “Barbasu.”

²²Payileti su phe: “? Unu sukwanuru ge mu me Jizosu; onye eeku Kereshi gunu?” Ephe tuko wua onu nanu su: “Pfu-gbua ya!”

²³Ọ sụ phẹ: “? K'ishi ọ́nu? ? Bụ ọ́nu ọ́ ẹ́jo-íphe, o meru?” Ẹ́phe kabakpọ́o ya nù arashì ike sù: “Pfù-gbua ya!”

²⁴Tọ́budu iya ọ́; Payìleti nọ́nyaa; bya amaru l'ọ́ tọ́ dudu iphe, ya epfuta iya; l'ọ́ chia ùtsú abya adada; o kuta mini kwọ́o onwiya ẹ́ka l'iphu ikpoto ndu ono sù: “Ẹ́ka mu ta adukwa l'ọ́chi nwoke-a. Ọ́ kwa unu maru g'unu e-me iya.”

²⁵Ikpoto ndu ono tuko tọ́a ọ́zu sù: “G'ọ́chi iya tukoru anyi l'ishi mẹ́ l'ishi unwu anyi.”

²⁶Tọ́budu iya ọ́; o woru Barabasu haaru phẹ́ sù g'ọ́ la; bya asù g'e chia Jizọ́su iphe. E chichaa ya iphe; ọ́ kpuru iya nù g'e je akpopyabe iya l'oswebe.

Ndu ojọ́gu eme Jizọ́su sukusuku

(Mak 15:16-20; Jìọ́n 19:2-3)

²⁷Tọ́budu iya ọ́; ndu ojọ́gu kẹ́ nnajìoha ono duru Jizọ́su bahù l'ùlo-íkpe nnajìoha; bya ekukọ́o ndu ojọ́gu nwibe phẹ́ g'ẹ́phe ha.

²⁸Ẹ́phe yeshia ya uwe iya bya achita uwe kpowula-kpowula uswe yee ya.

²⁹Ẹ́phe bya egude obvu kpaa okpu-eze woru kpube iya; bya aparu mgboro dẹ́e ya l'ẹ́kutara. Ẹ́phe bya egbushiru iya ikpere l'iphu wata iya eme sukusuku sù iya: “Ndzù dukwa ngu! Eze ndu Jiu.”

³⁰Ẹ́phe avua ya onu-mini; bya eworu mgboro ono emoje iya l'ishi.

³¹Ẹ́phe meghechaa ya sukusuku ono; bya eyefu iya kpowula-kpowula uwe ono; bya eyee ya uwe iya; bya akpuru iya jeshia apfugbu.

Aapfugbu Jizọ́su

(Mak 15:21-32; Luk 23:26-43; Jìọ́n 19:17-27)

³²Ẹ́phe wufutashia bya ahuma onye Sayirini, ẹ́pha iya ọ́ Sayimonu. Ẹ́phe kebuta iya sù g'ọ́ vutabude Jizọ́su oswebe iya ono.

³³Ẹ́phe byarwutaephọ́ ẹ́ka aza Gọ́lugota, ọ́ iya ọ́ okpokoro ishi;

³⁴ẹ́phe woru mẹ́e, a gwaru obvu, atso ilu; nù Jizọ́su g'ọ́ ngua; g'iphe te eme iya ẹ́huka shii. O tsue ya phọ́ onu; ophu o kweedu iya angungu.

³⁵Ẹ́phe kpopyabe iya l'oswebe l'ẹ́ka ono bya atua ido gude kee uwe iya. Ono mee ọ́ vua mbu iphe ono, ndu mpfuchiru pfuru sù: “Ẹ́phe woru uwe mu keeru onwophe. O rwua l'uwe mu eyeje l'ime ẹ́hu ẹ́phe tọ́aru iya ido.”

³⁶Ẹ́phe mechaa; bya anoshia wata iya eche nche.

³⁷E dee iphe ono, ẹ́phe sùru l'ọ́ meru ono pfube l'oswebe ono. Iphe, e deru ọ́: “Ọ́wa-a ọ́ Jizọ́su; Eze ndu Jiu.”

³⁸E wokwarupho umadzu labọ́, ana nfu; kpopyabekwapho yee ya l'ẹ́ka ono; onye ophuu nọ́du l'uzo ẹ́kutara iya; onye ophuu nọ́du l'uzo ẹ́kicha iya.

³⁹Ndu aghata aghata nọ́du epfubyishi Jizọ́su; ekweru iya une asuje iya:

40“? Tọ bunu ngu-a bụ nwọphu sụru l'ii-nwukpọshi eze-ulo Chileke gude ujiku ẹto kpukwaa ya-a? Dzonaa onwongu mę ọ -buru ngu-a bụ Nwa Chileke ọbu. Shinu l'oswebe ono nyifuta!”

41Ndu-ishi uke Chileke mę ndu ezije ekemu mę ndu bụ ọgerenya nọdu epfuru iya kwaphu kwaphu sụ:

42“O dzọru ndu ọzo; ọphu ọ duedunu ike dzọo onwiya. O -buru eze ndu Ízurelu; g'o shinu l'oswebe l'ẹka ono nyizeta g'anyi ekweta l'ọ bụ iya bụ Kéreshi ọbu.

43O sụru l'ọo Chileke bę ya ma; lę ya bụ Nwa Chileke; ngwa; gę Chileke dzonaa ya nta-a mę ọ -buru l'ọ dọ Chileke ree.”

44Umadzu ẹbo ono, anaję nfu ono, a tukuru ẹphe l'iya kpopyabe l'oswebe phọ nọdu akokwa iya phọ ẹgube ọnu ono.

Anwuhu Jizosu

(Mak 15:33-41; Luk 23:44-49; Jion 19:28-30)

45Tọbudu iya bụ; ẹnyanwu keerupho l'ishi; nchi jihu l'alị ono; nọo gbiriri jasụ l'ẹnyanwu agbuze.

46Ẹnyanwu gbuzepho; Jizosu chishia mkpu ike sụ: “Elayi! Elayi! ? Lema sabakutani?” Bụ iya bụ: “Chileke mu! Chileke mu! ? Bụ gunu bę o gude i haa mu nkinyi mu?”

47Ndu haru pfuru l'ẹka ono numa iya sụ: “Nwoke ono ekukwa Elayijia.”

48Onye lanu gbagbuepho teke ono teke ono je ewota asancha ọphu amije mini woru gwọo lę męe-veniga, woru tsebe l'oshi, dọ ogologo woru nọ iya g'ọ ngua.

49Ndu ọphuu sụ: “Unu gebewarọ g'anyi maru ? Elayijia l'a-bya bya adzọo ya?”

50Jizosu bya echishia mkpu ike ọzo bya atubuhu unme.

51Noo ya; ẹkwa egbobutaję ẹnya ẹka aagwaję Chileke, nọ l'ime eze-ulo Chileke ono shiepho l'ishi gbaepho kę tararaa jasụ l'alị gbajahụ ẹbo. Alị nmakọta jiiijijii; oke mkpuma gbawashihu.

52Iphe, bụ ilu ghekọtaru ọnu. Igwerigwe ndu dọ nsọ, bụ ndu nwuhuhawaru anwuhu tuko shi l'ọnwu tetagbaa dzuru ndzu.

53Ẹphe shigbaa l'ime ilu ono lufuta. Jizosu shiepho l'ọnwu teta dzuru ndzu; ẹphe wuba lę Jierusalemu. A dọ igwerigwe huma phe.

54Tọbudu iya bụ; onye-ishi ndu ojogu ndu Romu waa ndu ojogu iya, ẹphe l'iya pfuru eche Jizosu nche-a; tuko tsuhu ebvu g'ẹphe humaeru phọ alị-ọnma-jiiijijii ono waa iphemiphe, mekọtaru nọ. Ẹphe sụ: “? Unu maru-a lę nwoke-a bukwa Nwa Chileke eviya.”

55O duru ikpoto unwanyi, kuru ụzenya ele ẹnya g'ẹphe maru iphe, eme nọ. Unwanyi ono shi lę Gálili tsota Jizosu; ejeru iya ozi.

⁵⁶Meri onye Magudala yi l'unwanyi ono. Meri ophu nwuru Jiemusu; nwua Jiósefu yiru iya; waa ne unwu Zebedi.

Elili Jizosu

(Mak 15:42-47; Luk 23:50-56; Jiṅ 19:38-42)

⁵⁷O be l'uzenyashi; nwoke oke amadu lanu, shi le Arimatiya bya; epha iya bu Jiósefu. Yebedua l'onwiya yikwa l'onye etsoje Jizosu.

⁵⁸Nwoke ono bya ejepfu Payileti je arwo ya g'a haaru iya odzu Jizosu ge ya lia. Payileti su g'a pee ya ya.

⁵⁹Tobudu iya bu; Jiósefu bya eje apazeta odzu obu bya egude ekwa ochaa, inyi adudu gude kwaa ya.

⁶⁰O bya eje eworu iya nyebe l'ilu ke yebe Jiósefu; ilu, o turu k'ophuu. Ilu ono be o turu le mkpuma, ha shii. O bya eswita oke mkpuma swichia onu ilu obu; o buru iya atugbu.

⁶¹Meri onye Magudala me Meri ophunapho nodukwapho l'eka ono. Epe tuko nodugbaa anoo l'eka ono gha iphu l'ilu obu.

Eeche nche l'ilu Jizosu

⁶²O be le nchitabohu iya, bu iya bu mboku atuta unme; ndu-ishi uke Chileke me ndu Farisii bya edzukobe jepfu Payileti

⁶³je asu iya: "Nnajiuphu; anyi nyatakwaru le teke nwoke ono, dzu-gburu onwiya l'uka ono nokwadu ndzu be o suseru l'a -noepho abali eto be ya e-shi l'onwu teta dzuru ndzu ozo.

⁶⁴Zinaa g'e chee ilu ono okpobe nche jasu abali k'eto onoya; a -nonyaa ndu etsoje iya nu je je ezita odzu iya l'oshi wata epfu l'o shiwaa l'onwu teta dzuru ndzu. G'ejo uka k'ikpazu ta akanu k'ivuzo shii."

⁶⁵Payileti su phe: "? O kwa l'unu nweru ndu nche? Unu tugbua je echeckpo ilu ono g'o du unu."

⁶⁶Epe tugbua je egude eze mkpuma swichia onu ilu ono rengurengu; bya eworu iphe-ohubama mee ya; woru ndu nche ye iya; a wata iya eche nche.

Matiyu 28

Eshi l'onwu teta dzuru ndzu

(Mak 16:1-10; Luk 24:1-12; Jiṅ 20:1-10)

¹Eswe-atuta-unme -bvuepho; o beepho le geregere nchi-abohu mboku Sonde; Meri; onye Magudala; waa Meri ophu; jeshia l'ilu ono.

²A bya ele enya; ali wata anma oke jijijijii; kele ojozi-imigwe, shi l'eka Nnajiuphu be shi l'igwe phezeta bya eswifu eze mkpuma ono je anmakoru iya l'eli.

³Ugbugba iya nodu egbu nwijnwii g'ebemu-igwe. Uwe iya nodu acha pemu pemu g'aka-mini-sunoo.

⁴Ndu nche ono tsuhu iya ebvu; phukota kpaakpaakpaa; dabyichaerupho ge ndu nwuhuru anwuhu.

⁵Ojozi-imigwe ono su unwanyi ono: “Unubedua; unu ta atsukwa ebvu; kele mu maru l'onye unu achọ bu Jizosu; onye a kppyaberu l'oswebe.

⁶O to noekwa l'eka-a. O tetaakwaru dzuru ndzu ozo, bu iya bu iphe, o pfuhawaru unu-a. Unu byanu ahuma eka Nnajiuphu obu shi nyeru.

⁷Unu jekwa egwegwa je epfuaru iya ndu etsoje iya nu l'o shiakwa l'onwu teta dzuru ndzu; l'o vuakwa unu uzo jeshia Galili; l'unu a-huma iya l'eka ono. Nokwa iphe, mu byaru unu ezizi bu ono.”

⁸Ephe gude ndzu-agugu me oke ehutu-shi l'ilu ono gbaru oso tugbua egwegwa jeshia ya akoru ndu etsoje iya nu.

⁹A bya ele enya; Jizosu byapfutawaa unwanyi ono bya asu phe: “? Unu ndupho?” Ephe gbapfuta iya; bya adaa kpurumu l'iphu iya; wogbaaru iya eka l'okpa; bya abaaru iya eja.

¹⁰Jizosu su phe: “Ge ndzu ba agukwa unu. Unu tugbuekwapho je akaru unwunna mu phe g'ephe jeshia Galili; l'onoo eka ephe a-huma mu bu ono.”

Iphe ndu nche epfu

¹¹Unwanyi ono nodukwadu l'uzo; ndu ojogu pho, eche nche pho vuwaru phe uzo wuba l'ime Jierusalemu je akokotaru ndu-ishi uke Chileke iphemiphe, mekotaru nu.

¹²Ndu-ishi ono ephe le ndu bu ogerenya bya edzukobeepho chia idzu bya eworu okpoga, ha shii nu ndu ojogu ono iphe uphalazu;

¹³su phe: “Unu sujekwa l'oo ndu etsoje iya nu byaru l'enyashi bya ezita odzu iya teke unu eku mgbenya.”

¹⁴“O -buru l'unu pfuru nno; o -rwua nnajioha le nchi; unu te eyeshi onu; kele anyi amaru-a g'anyi e-gude pfufu unu.”

¹⁵Ephe kwe hm; nata okpoga obu je emee g'e ziru phe. O buru iya bu l'ephe epfua nno; o dzuru ali Jiu mgburugburu jasutana-a.

Jizosu egoshi ndu etsoje iya nu onwiya

(Mak 16:14-18; Luk 24:36-49; Jion 20:19-23; Ndu 1:6-8)

¹⁶Tobudu iya bu; ndu etsoje Jizosu ono ephe n'iri le nanu tugbua; o buru phe eje Galili. Ephe je anodu l'ubvu ono, Jizosu tuhawaru phe onu iya ono.

¹⁷Ephe humaepho Jizosu obu; ephe baaru iya eja. Obenu l'o duru ndu ophu haru bo obu ebo.

¹⁸Jizosu byapfuta phe bya asu phe: “Chileke be meakwaru g'iphe, bu ike, no l'imigwe me ophu no le mgboko nodu mu l'eka.

¹⁹Oo ya bụ; unu je emee ohamoha g'ephe bụru ndu etsoje mu nụ. Unu gudeje epha ke Nna; me ke Nwa; me ke Unme-du-Nso mee phe baputizimu.

²⁰Unu zije phe g'ephe meje iphemiphe, bu iphe, mu kakotaru unu g'unu meje. Unu huma ahuma le mu nokwa swiru unu mboku-mboku jeye teke mgboko a-bvu.”

Maku

Maku 1

Ozi Jiṅu, onye emeje baputizimu eezi l'echiḡu

(Mat 3:1-12; Luk 3:1-18; Jiṅ 1:19-28)

- ¹Qwa-a bụ ishi ozi-oma Jizosu, bụ Kéreshi; Nwa Chileke.
- ²Azáya onye mpfuchiru Chileke deru l'ekwo sụ: “Nwa mu; mu e-zi onye-ozu mu g'o vuru ngu ụzo je abooru ngu ụzo.
- ³Q duru onye ara iya arara l'echiḡu sụ: Unu meziaru Nnajiuphu ụzo. Unu mee gbororo iya g'o dḡbaa nhamunha.”
- ⁴Noo ya Jiṅu onye emeje baputizimu bya anodu l'echiḡu ara iya arara asuje: “Izimanu iphe-eji unu lwa unu azu; g'e mee unu baputizimu. Oo ya bụ Chileke aguaru unu nvu l'iphe-eji, unu meshiru.”
- ⁵Ndu ali Jiudiya me ndu Jierusalemu mgburugburu nodu awupfutaje iya g'ephe numa iphe, oopfu. Ephe nodu akoshi iphe-eji, ephe meshiru; o nodu emejegbaa phe baputizimu l'enyimu Jiḡdanu.
- ⁶Noo ya; uwe, Jiṅu eyeje l'ehu bu uwe, e meru l'ejí inya-kamelu; o nodu egudeje akpo-anu tubuta iya l'upfu. Nri, oorije bu igube yeke manu-enu.
- ⁷G'ora ora ono be osuje: “Q duru onye ozo, ka mu l'ishi; ka mu l'okpa, l'e-mechaa bya; onye mu ta asukpodanu ge mu e-tupfuru etupfuru; tofu eri akpokpa, o yeru l'okpa.
- ⁸Mbedua meru unu baputizimu le mini; ole onye k'ono l'e-me iya unu le Unme-du-Nso.”

Eme baputizimu me ohutama Jizosu

(Mat 3:13—4:11; Luk 3:21-22; 4:1-13)

- ⁹O rwua ujiku lanu; Jizosu shi le Nazaretu, no l'ali Galili bya; Jiṅu mee ya baputizimu l'enyimu Jiḡdanu.
- ¹⁰Jizosu rwufutashiḡu le mini ono; o huma g'igwe bukaherupho ebo gheru onu; Unme Chileke dḡpḡu ge ndo pheḡu phaa phezeta bya anodu iya l'ehu.
- ¹¹A numa olu-opfu, shi l'imigwe ono sụ: “I bu Nwa mu nwoke, mu yeru obu. I jiru mu epḡu.”
- ¹²G'e jia epfua; Unme Chileke ono mee Jizosu; o je anodu l'echiḡu.
- ¹³Q noo l'ime echiḡu ono ukporo abali labo; Nsetanu nodu ahụ iya ama. Eka ono, Jizosu no ono buerupho unwu anu-egbudu no iya. Jizosu nodu l'eka ono; unwu-ojozi-imigwe nodu ejegbaaru iya ozi.

Opfu Chileke, Jizosu ziru le Galili

(Mat 4:12-22; Luk 4:14-15; 5:1-11)

14A t̄ep̄ho J̄ionu mkp̄oro; J̄iz̄osu bah̄u l'al̄i Gálili; je ezikashiahaa ozi-oma, k'eka Chileke bu eze

15s̄u: “Teke ono, Chileke kweru ukwe iya ono r̄wuakwaru. Chileke abyaakwaa egoshi l̄e ya bu eze; g'izimanu iphe-eji unu lwakwa unu azu; unu bya ekweta ozi-oma Chileke.”

16O be g'o t̄soru aḡuga eze-enyimu, n̄o l̄e Gálili; o h̄uma Sayimonu ȳele Anduru, nwune iya eka ephe agha uḡbu-ikokoro l'eze-enyimu; kele ephe bu ndu ese ikokoro.

17J̄iz̄osu bya as̄u ph̄e: “Unu bya etsoru mu ḡe mu emee unu g'unu buru ndu a-n̄odu esekutaje nemadzu g'eesetaje ema-a.”

18Ep̄fup̄fu, oop̄fu iya; ephe gw̄obe uḡbu ph̄e; tsoahaa ya.

19O byakwa ejeriberu nwansh̄i; o h̄uma Jiemusu nwa Zebedi ȳele J̄ionu nwune iya. Ep̄hebedua n̄o l'uḡbo ph̄e emezi uḡbu ph̄e emezi.

20Ah̄uma, J̄iz̄osu ah̄uma ph̄e; o kua ph̄e. Ep̄he haa nna ph̄e Zebedi l'uḡbo ono; haa ndu ophu e butaru ebuta; je etsoru J̄iz̄osu.

Nwoke, obvu eme

(Luk 4:31-37)

21Ep̄he bya abah̄u mkp̄ukpu Kapaniyomu. O -rw̄ep̄ho eswe-at̄uta-unme ndu Jiu; J̄iz̄osu bah̄u l'ulo-ndzuk̄o ndu Jiu je awata ezi iphe.

22Ep̄he sachaa onu saa nch̄i l'iphe, oozi ph̄e; kele oozi iphe g'onye ike du l'eka. O to zidu ḡe ndu ezije ekemu.

23O duru nwoke, obvu eme, n̄o l'ime ulo-ndzuk̄o ono.

24O chiahaa mkpu s̄u: “J̄iz̄osu onye Nazaretu; par̄u anyi haa! ? Bu ḡunu b̄e anyi l̄e ngu jigba? ? I bya anyi emebyishi? Mu maru onye i bu. I bu onye du ns̄o, shi l'eka Chileke!”

25J̄iz̄osu baaru iya mba s̄u: “Dobe onu doo; futa nwoke ono l'ehu.”

26Obvu ono bya at̄ua nwoke ono ndap̄fu woru iya gbachia; raru iji-nya iji-nya lufuta.

27Onu kuḡbabechaa ndu n̄o l'eka ono akuḡbabe. Ep̄he wata aji nwibe ph̄e s̄u: “? Iphe owa-a bu ḡunu? Iphe, oozi-a gbekwanu buru anyi nch̄i oph̄uú. Onye ophu egudeje nkamenya abaru obvu mba; ephe eme iphe, o pfuru.”

28G'e jia ep̄fua; ep̄ha J̄iz̄osu ngak̄otawaa al̄i Gálili mgburugburu.

Jizosu emeta igwerigwe ndu iphe eme

(Mat 8:14-17; Luk 4:38-41)

29Afuta, J̄iz̄osu ph̄e afuta l'ulo-ndzuk̄o ono ȳele Jiemusu; waa J̄ionu swiru tuḡbua. Ep̄he bah̄u ibe Sayimonu ph̄e, buk̄wapho ibe Anduru ph̄e.

³⁰Ododɛnya nɔdu eme ne nyee Sayimonu; ɔ zɛe l'ime ɔlo. Oo ya bu; a bya epfuaru iya Jizosu.

³¹O bya ejepfu iya bya egude iya ɛka l'ɛka selia; ododɛnya ono mebuhu iya; nwanyi ono wata phe akwaru ɛbyaa.

³²O be l'uzenyashi; g'ɛnyanwu nyihuchaaru; a chitaru iya ndu iphe eme me ndu obvu emegbaa.

³³Ndu ɛka ono l'opfu gbaepfo mkpu bya eji onu-abata.

³⁴O mee igwerigwe ndu iphe eme; ephe wekorohu. O chishikwapho obvu l'ehu ndu obvu emegbaa. Ophu o kwejedu g'obvu ono pfua opfu g'ephe mahawaru iya-a.

Jizosu epfu opfu Chileke le Galili

(Luk 4:42-44)

³⁵Swichechero; ɔ gbeshi jeshia l'ɛka oo-nɔdu nwɛkinyi iya; epfu anu Chileke.

³⁶Sayimonu me ndu ephe l'iya swi tuko achokashi iya.

³⁷Ephe humae ya pho; ephe su iya l'onymonye tukokwaru achɔ iya.

³⁸O su phe: “Unu g'anyi je le mkpukpu ozo, haru dugbaa anyi ntse ge mu je epfufuaru phe opfu Chileke; kele oo iphe ono be mu byaru.”

³⁹O jedzuru ekameka le Galili epfu opfu Chileke l'iphe, bukpo ɔlo-ndzuko. O nɔdu achishi obvu, bugbaa nemadzu l'ime ehɔ.

Onye ekpenta, Jizosu meru o wekorohu

(Mat 8:1-4; Luk 5:12-16)

⁴⁰Onye ekpenta bya abyapfuta Jizosu bya egbushi ikpere; rwoo ya su: “O -buru uche ngu be ii-menaa ge mu wekorohu.”

⁴¹Imemini iya du Jizosu; ɔ bya amachia ɛka denyi nwoke ono; su iya: “O bu uche mu. Ngwa; wekorohuwaro!”

⁴²Teke ono kwapho; ekpenta ono mishihu iya l'ehu; o wekorohu.

⁴³Jizosu nmashiaru iya okwa ike su iya g'o tugbuekwapho lasha;

⁴⁴bya asu iya: “Ba adukwa onye ii-pfuru iya; jechikwaa g'onye uke Chileke lerwee ngu enya. L'i gweru ngweja, onye e metaru l'iphe, eme iya nu anuje nu g'e gweeru ngu ge Mosisu turu ekemu su g'e gweje iya. Oo ya bu ge ndiphe e-gude nno maru le Chileke mewaru ngu; i wekorohu.”

⁴⁵Nwoke ono jeela je epfukashiaharu onymonye iphe ono; tuko akokashi akɔ iphe ono; ophu Jizosu afutajeedu l'ebederebadara le mkpukpu. O nɔdu anoduje l'ɛka nemadzu te ebudu ebubu. A nɔdu eshijeela ekameka awu-pfuta iya.

Maku 2

Nwoke, iphe lonwuru ibe ehɔ lanu

(Mat 9:1-8; Luk 5:17-26)

- ¹Tɔbudu iya bụ; a nɔepho ujiku olemole; Jizosu laphu azu le Kapaniyomu. O ngadzuru ekameka l'ọ nɔwaa l'unuphu.
- ²A dukpoo igwerigwe dzukota; k'ophu o duedu uto, duru phe nu mbukponu me l'onu-uto. O pfuaharu phe opfu Chileke.
- ³Umadzu eno vuru onye iphe lonwushiru ibe ehu lanu vutaru iya.
- ⁴A dukpoo igwerigwe l'eka ono; k'ophu ephe ta adudu ike jekube iya ntse. Oo ya bu; ephe nyihu ulo ono je ebufua uto le nhamunha eka Jizosu pfuru le mkpula iya. Ephe woru iphe, nwoke ono ze pyofu l'uto ono pazeta iya l'ime ulo.
- ⁵Jizosu humapho g'ekweta phe habe shii; o su onye ono, iphe lonwushiru ibe ehu lanu ono: "Nwa mu; a guwaru ngu nvu l'iphe-eji ngu g'o ha."
- ⁶Noo ya; o duru ndu ezije ekemu, no anoo l'eka ono arị l'obu phe:
- ⁷"? Bu gunu be nwoke-a epfu egube-a? Oopfubyikwa epha Chileke epfubyi! ? Bu onye a-du ike guaru nemadzu nvu l'iphe-eji iya; gbahaa Chileke nwekiya?"
- ⁸Jizosu maerupho iphe, ephe arị l'egomunggo bya asu phe: "? Bu gunu meru iphe, unu arị egube oriri ono l'ime obu unu?"
- ⁹? Bu ole ka nphe epfuru onye iphe lonwushiru ibe ehu lanu? ? Bu: 'A guwaru ngu nvu l'iphe-eji, i meshiru?' Too 'Gbalihu phuta iphe, iize azee jeahaa ije.'
- ¹⁰Ole oo g'unu a-maru l'e ziru Abubu-Ndiphe g'o gujeru nemadzu nvu l'iphe-eji, o meshiru le mgboko-a." O su onye iphe lonwuru ibe ehu lanu ono:
- ¹¹"Oo ngu be mu epfuru. Gbalihu palita iphe-azee ngu lashia ibe ngu."
- ¹²Nwoke ono kwolihu bya aphuta iphe, oozee azee; o buru iya atugbu. A tuko ele iya enya eka ooje atugbu; ephe chikafuchaepho enya bya aja Chileke ajaja asuje: "Ha! Anyi teke ahumaswekwaa onye meru iphe, du egube-a!"

Ekuku Lívayi

(Mat 9:9-13; Luk 5:27-32)

- ¹³Jizosu tsoru aguga eze-enyimu tugbua ozo. Ikpoto nemadzu wu-pfuta iya; o ziahaa phe iphe.
- ¹⁴O ghatashia bya ahuma Lívayi nwa Alufiyosu eka o no l'ulo okpoga akiriko. O su iya; "Tsuru mu." O gbalihu tsoru iya.
- ¹⁵Jizosu yele ndu etsoje iya nu je eriahaa nri l'ibe Lívayi. Ndu ana akiriko me ndu ozo mmanu, bukwapho ndu aamaru ejo eka tukokwapho nodu l'eka ono; ephe le Jizosu nodu erigba nri; kele egube ndu ono du igwerigwe awu etso iya.
- ¹⁶Ndu ezije ekemu, bu ndu ke Farisii humapho le yele ndu iphe-eji; waa ndu ana akiriko erigbabe nri; ephe su ndu etsoje iya nu: "? Bu gunu meru iphe, Nnajiuphu unu yele ndu ana akiriko; waa ndu iphe-eji gude erigba nri?"

¹⁷Jizosu nūmae ya phẹ; ọ sụ phẹ: “Ọ tọ bụkwa ndu ẹhu dụ ike bẹ eegudeje gbapfu onye eme ọbvu; ọ kwa ndu iphe eme. Mu ta abyakwaru eku ndu p̄f̄uberekoto; ọ kwa ndu eme iphe-ẹji bẹ mu byaru ekuku; g'izimanu lwa phẹ azu.”

Aswiru Chileke ẹgu

(Mat 9:14-17; Luk 5:33-39)

¹⁸Teke ono bẹ ndu etsoje Jiṅnu; waa ndu kẹ Fárisii aswi ẹgu epfu anu Chileke. Noo ya bu; ndu ọzo byapfuta Jizosu bya ajia ya sụ: “? Bụ ọgunu meru iphe, o gude ndu etsoje Jiṅnu; waa ndu kẹ Fárisii ọdu aswi ẹgu epfu anu Chileke; ọbe ndu ọphu etsoje ngu nu aswiḍu?”

¹⁹Jizosu sụ phẹ: “? Ndu byaru ekele-nwanyị a-gbẹ swiāhaa ẹgu l'ẹka ẹphe l'onye eme ekele-nwanyị ọkwadu l'ẹka-a? Ẹphe ta abyakwa l'aswi ẹgu mẹ ọ -nọdukwadu-a l'ẹka ono.

²⁰Ọle ọ dukwaru teke ee-mechaa; aabya anafu phẹ onye ono, eme ekele-nwanyị ono. Ọo ya bu; ẹphe aswiwaro ẹgu mbọku ono.

²¹“E te ewotajekwa ẹkwa ọphúú gude gbachia ẹka akahụ ẹkwa lakahuru alakahụ. Onye meru iya nno; ẹkwa ọphúú ono atsua atsutsu; kabaa ya alaka.

²²Ọphu eewojeduru akuru mẹ ọphúú ye l'ugbobebe-mẹe, riwaru pheripheri; ọdumeka l'ọ takpoo ugbobebe ono. Mẹe ono alaa l'iswi; ugbobebe alakwapho l'iswi. Mẹe ọphúú bẹ eeyeje l'ugbobebe ọphúú.”

Eswe-atuta-unme

(Mat 12:1-8; Luk 6:1-5)

²³O rwua ujiku lanu; mbọku ono bu eswe-atuta-unme ndu Jiu; Jizosu phẹ ọdu aghata l'ẹgu, a koru witi; ndu etsoje iya nu wotaahaa akpuru witi ono g'ẹphe aghata l'ẹka ono.

²⁴Ndu Fárisii sụ iya: “Shii ? Bụ ọgunu meru iphe ndu-a l'eme iphe, e te emejedu l'eswe-atuta-unme?”

²⁵Ọ sụ phẹ: “? Unu teke agu-swee iphe, Dévidi waa ndu ẹphe l'iya swi meru; ẹka o nweru iphe, atsụ phẹ l'ẹhu; ẹgu ọdu agu phẹ?”

²⁶Ọ bahuru l'ulo Chileke teke Abayata bu onye-ishi uke Chileke je ataa buredi, e doberu Chileke iche. Buredi ono bẹ onye ọzo ta atajedu; gbahaa ndu-uke Chileke. Ọ taa ya bya ahakwarupho nu ndu ẹphe l'iya swi.”

²⁷Jizosu sụ phẹ: “Chileke mekwaru eswe-atuta-unme g'ọ kwọo nemadzu. O to mekwaru nemadzu g'ọ kwọo eswe-atuta-unme.

²⁸Ọo ya bu l'iphemiphe, dụ Abubu-Ndiphe, bu Nnajiuphu l'ẹka; mbu je akpaa l'eswe-atuta-unme.”

Maku 3

Onye ẹka lanu nwuhuru anwuhu

(Mat 12:9-14; Luk 6:6-11)

¹Tɔbudu iya bụ; Jizosụ tughua bya abahụ ọzo l'ulo-ndzukọ ndu Jiu. Ọ duru onye nọ l'eka ono, eka lanu nwuhuru anwuhu.

²Ephe geahaa Jizosụ g'ephe maeshikwaru: ? oo-me g'eka nwoke ono teta iya ge mboku ono bu eswe-atuta-unme-a; g'ephe asu l'o noo iphe, o meru.

³Ọ sụ nwoke ono, eka nwuhuru anwuhu ono: “Gbalihu bya apfuru l'eka-a.”

⁴Jizosụ bya ajia phe su: “? Bu gunu be ekemu suru g'emeje l'eswe-atuta-unme? ? Ọ suru g'e meje ree to g'e meje eji? ? Ọ suru g'a dzoje ndu to g'e gbuje nemadzu?” Ophu o dudu onye pfuru opfu yeru iya.

⁵Jizosụ bya egude ehu-eghu voru phe enya ehuka ehuka; teme o rwuhukwaa ya pho l'ehu l'ejo-okpoma paru phe eka. Ọ sụ nwoke ono: “Ngwa; lochia eka alochi!” Ọ lochia eka. Eka ono bya eteta iya bya adu iya g'ophuu.

⁶Ndu Farisii tughuepho; o buru phe ejefu ndu k'onye eze, bu Herodu g'ephe chia idzu teke ono teke ono g'ephe e-shi megbua Jizosụ.

Ikpoto ndu nọ l'aguga mini

⁷Jizosụ yele ndu etsoje iya nu tughua jeshia l'eze-enyimu Genesaretu. A du igwerigwe shi l'alị Gálili wuru tsoru phe; mekpoo ndu ophu shi Jiudiya;

⁸me Jierúsalemu; me ndu Idumiya; me ndu azu Jiordanu; me ndu buru Taya yele Sayidonu mgburugburu; ndu gudewaa l'ephe numaru iphe, o megbaaru zaru byapfutashia ya.

⁹Ọ sụ ndu etsoje iya nu g'ephe kpataru iya nwugbo ge ya nodu g'ikpoto ndu ono ta akpagbu iya.

¹⁰Ishi iya bu l'o meru g'ehu du ndu du igwerigwe ike; k'ophu ndu ozo, iphe eme adzo uzo g'ephe e-me denyi iya eka.

¹¹Ọ nodu abujeru teke obvu humaeru iya pho; ephe adaa kpurumu l'iphu iya chia mkpu su: “Oo ngu bu Nwa Chileke.”

¹²Ọ nodu epfushije iya ike sụ phe g'ephe te epfukwa onye ya bu l'edzudzu-oha.

Jizosụ ahota ndu-ishi-ozu iri ebo

(Mat 10:1-4; Luk 6:12-16)

¹³E mechaa; Jizosụ tughua jeshia eka ubvu du igwerigwe bya ekua ndu du iya ree; ephe l'iya swiru.

¹⁴Ọ bya ahota phe umadzu iri l'ebo woru mee ndu-ishi-ozu iya bya asu phe: “Mu hotawaru unu ge mu l'unu noduje. Oo unu be mu e-zije g'unu je ezia ozi-oma Chileke;

¹⁵unu aduje ike mee g'onye iphe eme wekorohu; dujekwapho ike achishi obvu l'ehu onye obvu eme.”

¹⁶Ephe ndu ono bu: Sayimonu onye o guru Pyita.

¹⁷Jiemusu nwa Zebedi yele nwune iya Jionu. Ephebe be o guru Egbigwe;

¹⁸waa Anduru; waa Filipu; waa Batulomiyu; waa Matiyu; waa Tomosu; waa Jiemusu nwa ke Alufiyosu; waa Tadiyosu; waa Sayimonu onye yi l'ogbo, l'adzo g'ali Jiu ndu ndu Jiu;

¹⁹waa Jiudasu Isukariyotu, bu iya mechaaru deru Jizosu ye l'eka ndu ohogu iya.

Nsetanu ta achifudu Nsetanu

(Mat 12:22-32; Luk 11:14-23; 12:10)

²⁰E mecha; ndu ono epe le Jizosu swiru bahu l'unuphu. Ikpoto nemadzu wuru byapfuta iya ozo; k'ophu o kposhicharu phe kposhia phe eri nri.

²¹Ndibe Jizosu phe numa iya bya ejeshia ya akputa; kele epe suru l'iphu swehuwaru iya.

²²Ndu ezije ekemu, shi Jierusalemu be suru l'oo obvu, bu Biyelezebolu bu iya l'ehu; l'iphe, o gude achishi obvu bu ike onye-ishi iphe, bukpoobvu ono.

²³O bya ekua phe. Epe byapfuta iya. O gude etu etu ziahaa phe iphe. O su phe: “? Denu g'unu riru le Nsetanu achifuje onwiya?”

²⁴Ali-eze -keha ebo sehaa opfu; ? unu ta amadu l'ali-eze ono gbukahwaru?

²⁵Teke obu l'unuphu keharu onwiya ebo sehaa opfu; unuphu k'ono tee kekwaru.

²⁶Teke o bukwapo le Nsetanu gude ese opfu; keha onwiya ebo; ? unu ta amadu l'ike a-bvu iya?

²⁷“O to dukwa onye a-bahu l'ulo onye okpehu du; je egwee ivu iya ke ehuka; a -gufu l'onye ono vuru uzo kee ya egbu temanu l'o gweta ivu iya ke ehuka.

²⁸“Su-a; ge mu gbuaru iya unu tororo; iphemiphe, bu iphe-eji, unwu-eliphe eme dukotachakwaa k'ophu Chileke a-guru phe iya nvu; mekpoo iphemiphe, bu mpfubyi, epe epfubyi Chileke.

²⁹Obenu onye pfubiyuru Unme-du-Nso be Chileke ta abyakwa aguru nvu. Iphe-eji iya a-tukokwaru iya l'ishi jasu le tuutuutu le mimiimii.”

³⁰Noo kele epe suru l'obvu eme iya.

Ne Jizosu yee unwune iya

(Mat 12:46-50; Luk 8:19-21)

³¹Ne Jizosu yele unwune iya bya bya apfuru l'etezi zia su g'e kua ya.

³²Teke ono be igwe nemadzu no-pheru iya mgburugburu. Epe su iya g'o gebekwa le ne iya yee unwune iya nokwa l'etezi aji aji iya.

³³O su phe: “? Bu onye bu ne mu yee unwune mu obu?”

³⁴O ghaa enya; lee ndu ono, no-pheru iya mgburugburu ono bya asu phe: “Lekwa ndu bu phe bu ne mu; buru unwune mu!”

³⁵O kwa onyemonye, eme iphe, du Chileke l'uche bu nwune mu nwoke; buru nwune mu nwanyi; bya aburu ne mu.”

Maku 4

Onye agha mebyi iphe

(Mat 13:1-9; Luk 8:4-8)

¹O be teke ọzo; Jizọsu byakwa awata pẹ ezibaa iphe ọzo l'aguga eze-ẹnyimu. A du igwerigwe gbaphee ya mgburugburu; k'ọphu ọ bahuru l'ugbo; nwufu iya; je anọriberu pẹ anọriberu l'ugbo lẹ mini. Igwe ndu ono nọdu l'alị l'aguga eze-ẹnyimu ono.

²O gude ẹtu ziahaa pẹ iphe, du igwerigwe. Teke oozi pẹ iphe ono bẹ ọ sọru pẹ:

³“Unu gebekwa-o! Ọ duru nwoke lanu, jeru atu mebyi iphe.

⁴Ọ nọdu atu mebyi iphe ono; ọ haru daa l'aguga gbororo; ẹnu pheru bya atutua ya.

⁵Ọzo nashihu iya daa l'alị, du epfu-epfu ẹka anu alị aduzidu; ntanta o fushia ome l'anu alị ono, ta adudu igbi ono.

⁶Anwu chilahaepho; o chipyashia ya; ọ nwulwashihu kposhihu nkụ; kele o to nwedu ogbarabvu l'ime alị.

⁷Ọzo daa l'ẹka akpuru obvu nọ l'ime alị. Obvu ono futa; yẹbedua futa. Obvu onoya kpagbushia pẹ; ọphu ẹphe amiduru mebyi.

⁸Ọzo daru l'ẹka alị du ree. O fushia ome; vua evuvu bya amiya amimi; ndu amiya ukporo l'iri; ndu amiya ukporo ẹto; ndu amiya ukporo ise.”

⁹Ọ sọ pẹ: “Onye nweru ẹnu-nchi, l'anu iphe; numakwa iya!”

Iphe, kparu iphe, Jizọsu egudeje ẹtu ezi iphe

(Mat 13:10-17; Luk 8:9-10)

¹⁰Jizọsu nọduepho nwẹkiya; ndu etso iya nu yele umadzu iri l'ẹbo pho jia ya iphe, ẹtu ono bu.

¹¹Ọ sọ pẹ: “Ọo unubedua bẹ Chileke egoshi iphe, e shi domia edomi, bu iya bu k'ẹka Chileke bu eze; ọle ndu ọzo bẹ aanmaru iphemiphe ono l'ẹtu ẹtu.

¹²Ọo ya bu g'ọo-buru: “Epe lee nta lee imo; ọ tọ dudu iphe, ẹphe a-huma! Ọphu oododu pẹ ẹnya; o betakporu ẹphe pfubechaa ya nchi epfube! A -nonyaa ẹphe lwaphuta azu lwaphuta Chileke; ọ guaru pẹ nvu .”

Iphe, ẹtu onye agha mebyi iphe ono bu

(Mat 13:18-23; Luk 8:11-15)

¹³“Jizọsu byanu bya ajia pẹ sọ: ? Ẹtu-a te edoduru unu ẹnya tọ? ? Denukpoo g'ee-me g'ẹtu dokotaje unu ẹnya?

¹⁴Onye l'atu mebyi iphe ono l'atu opfu Chileke.

¹⁵Ndu ọphu nọ l'aguga gbororo ẹka aatu opfu Chileke bu ndu numachaa ru iya nu; Nsetanu zirwuta bya anafu pẹ opfu Chileke ono, a turu l'ime obu pẹ ono.

¹⁶Ndu k'ọphuu dukwaphoya gẹ mebyi iphe, a turu l'ẹka du epfu-epfu. Epe numachakpoerupho opfu Chileke ono; gude ẹhu-utso kweta ẹgwegwa;

¹⁷ophu o dudu ogbarabvu, ephe gbaru l'ime onwophe; ephe kpoeppo upfu nwanshii; iphe mkpamehu byapfutaephe phe pho; ozoo ndu ozo melahaa phe ewere l'ephe kwetaru opfu ono; l'oburu iphe, ephe a-kpakota daa; paru opfu obu buhaa.

¹⁸Ndu ophuu du gephe mebyi iphe, aatu l'eka obvu du l'ali. Ephe bu ndu numaru opfu Chileke;

¹⁹ole ephe l'agba egomunggo ehu phe. Eyenuka obu l'eku; waa iphe, agu phe g'ephe nweru iya batanu bya akpaahaa opfu ono ehu. Ophu o miduru amimi.

²⁰Obenu ndu k'ono, bu mebyi iphe, a turu l'okpobe ali ono; noo ndu ophu bu ndu anumajechaa ya; ephe ewota iya ye l'okpoma phe; ephe eyee mebyi; ophu eyee ukporo l'iri; ophu eyee ukporo eto; ophu eyee ukporo ise.”

Oroku e yeru oku kpuchia iphe

(Luk 8:16-18)

²¹Jizosu su phe: “? Aa-nwujeru oku ye l'oroku kpube iya ite; ozoo nwua ya le mkpula iphe, aaze aze? ? Tobudu l'iphe, eedobeje oroku be eedobeje iya?”

²²Kele iphemiphe, e domiru edomi be ee-mechaa mee g'a huma; teme iphemiphe, e meru le mpya be ee-mechaa mee g'o fuhu.

²³Onye nweru enu-nchi, l'anu iphe; numakwa iya.”

²⁴O su phe: “Unu gejekwa ngge l'iphe, unu anu le nchi. O kwa iphe, i gude turu nu nwibe ngu be ee-gude tukwarupho nu ngu; aa-gbenu nu gubedua ophu ka shii.

²⁵L'onye nweru nu be aa-nubakwaa ophu ka shii. Onye enwedu nu be aa-gbenu natafulenu nwophu, o nweru.”

Etu, e gude mebyi iphe, evu evuvu anma

²⁶O su phe: “Eka Chileke bu eze dukwa gephe nwoke, gharu mebyi iphe l'ali.

²⁷Nchi -jihu; nwoke ekuru mgbenya; nchi -bohu l'ootehu; mebyi iphe ono efushia vaa; o to madu g'o meru.

²⁸Ali efushije iphe l'onwiya. Oovujeru uzo bya emee eswa iya; l'o bya emee iyanguyangu; teme l'ogbe teke ono yee mebyi.

²⁹Mebyi iphe ono -kaepho; nwoke ono abya egbuta iya; opfu l'o rwaru teke eegbuje iya.”

Etu, e gude akpuru oshi mosutadu anmaa

(Mat 13:31-34; Luk 13:18-19)

³⁰No iya o su phe: “? Bu gunu be anyi a-su l'eka Chileke bu eze du g'o ya? ? Denu egube etu, ee-gude koo ako g'o du?”

³¹O du g'akpuru oshi mosutadu, bu iya kakota rwiirwii le mgboko l'iphe, bukotakpoo iphemiphe, eemebeje l'ali.

³²Ole ọobujeru teke a byaru akua ya l'ali; oofua bya akakota iphemiphe, aakuje akuku l'ali shii. Ọoby aakashia ekali; k'ophu unwu-enu, ephe l'eli agbeje akpa iya epfunu.”

³³Ọ buru udu etu ono be Jizosu gude zia phe opfu Chileke g'oo-ka phe edo enya.

³⁴Ọ -nmashiduru etu be o to dudu iphe, oozije phe. Teke yee ndu etsoje iya nu noepho nwekinyi phe; ọtuko iphemiphe koru phe g'o doo phe enya ree.

Jizosu abyanyi oke akpara-mini

(Mat 8:23-27; Luk 8:22-25)

³⁵Tobudu iya bu; nchi jihuepho mboku ono; o su ndu etsoje iya nu: “Unu g'anyi dafu azu eze-enyimu azu iya ophuu.”

³⁶Ephe haa ikpoto ndu ono l'eka ono bahu l'ugbo ophu Jizosu nohawaa; koru iya jeshia. Unwu ugbo ozo nodu etso phe.

³⁷Oke pherephere zishiahaa ike; akpara-mini tubaaha l'ime ugbo. O phodu nwanshii me mini eji ugbo.

³⁸Jizosu noduro l'ishi ugbo ishi lanu woru ishi tukobe le pyilo; ekuro mgbenya. Ephe kutee ya su iya: “O-zì-iphe! ? Tii kpakpodaro ishi? Ugbo abyaakwaa anyi ekpukpu!”

³⁹O tehu bya abaru pherephere ono mba bya asu eze-enyimu ono g'o deru yekete. Pherephere ono zibuhu; ekameka buru nyonyoronyo.

⁴⁰Ọ su phe: “? Denu g'o gude ndzu nodu agu unu? ? Unu te ekwetaduru le Chileke adzo unu?”

⁴¹Onu kugbabejaa phe akugbabe. Ephe pfuaharu nwibe phe su: “? Bu egube nemadzu gunu be nwoke owa-a bu? Onye ophu pherephere yele eze-enyimu emeje iphe, o pfuru!”

Maku 5

Nwoke, obvu eme

(Mat 8:28-34; Luk 8:26-39)

¹Jizosu yele ndu etsoje iya nu bya ejerwua azu eze-enyimu ono azu iya ophuu, bu iya bu l'ali ke ndu Gerasa.

²Ọ futashiepho l'ugbo; nwoke, obvu eme shi l'eka eelije nemadzu byapfutashia ya.

³Eka ono be nwoke ono bu ebubu. Obvu obu emeshi iya ike; k'ophu o to duedu onye sukwaduru iya eketsuta l'egbu; mbu m'obeta o buru mkporo be a turu iya.

⁴Tekenteke kpo be aatujehawa iya mkporo l'okpa; tua ya mkporo l'eka; ole oobyaje aghakposhia aka aghakposhi; mkporo k'eka ono anyakashihu. L'o woru k'okpa chipyashia echipyashi. Ophu o duedu onye ike agota iya dukwadu.

⁵Eswe l'enyashi be onoduje l'echilabo aka ono, eelije nemadzu ono yele echi aka ubvu nogbaa echi mkpu; oogude mkpuma ekwobashi onwiya eh.

⁶Ọ humaepho Jizosu l'eka du enya; o phota oso gbapfu iya je adaa kpurumu l'iphu iya;

⁷chia mkpu sụ: “Jizọsu; Nwa Chileke; mbụ Chileke ono, bụ Okalibe-kangokotaru-nụ! ? Bụ gunu bẹ mu lẹ ngu jigba? Mu arwọkwa ngu arwọrwo; Chileke anụkwa iya-a; ta anushinu mu aphụ.”

⁸Kẹle Jizọsu sụhawaru iya: “Gube ọbvụ; shi nwoke ono l'ẹhu lufuta!”

⁹Jizọsu jia ya: “? Bụ gunu bẹ iiza?” O sụ iya: “Epha mu bụ ‘Unubuku’; kẹle anyi dụ igwerigwe.”

¹⁰O rwo Jizọsu rwohia ya ike sụ iya g'ọ tọ sushị pẹ g'ẹphe lufu l'alị ono.

¹¹Noo ya; ọ duru ikpoto ezi, eche echeche, dọru l'aguga ụbvụ ono akpa nri.

¹²Obvu ono tuko rwohaa Jizọsu sụ iya g'ọ hanaa pẹ g'ẹphe je awuba l'ime ẹhu ezi ono.

¹³Jizọsu sụ pẹ g'ẹphe je. Obvu ono wufuta l'ẹhu nwoke ono bya awuba l'ime ẹhu ezi ono. Ikpoto ezi ono, rwuru l'unu ise ono tukolepho shi l'aguga ụbvụ ono phota ọso gbaa kpurukpuru gbazeta je awuda l'ime eze-enyimu ono; mini rigbushia ya.

¹⁴Ndu eche iya nụ gbakashihu je epfukashia ya l'ime mkpukpu mę l'oma oẹgu. Oo ya bụ; ndu ono, e pfuru iya ono wuru byatashia ahuma iphe, meru nụ.

¹⁵Epe bya ejepfu Jizọsu. Epe huma nwoke ono, ọbvụ shi eme ono; mbụ onye ono unubuku ọbvụ shi buru l'ẹhu ono g'ọ nwanu anọ; yewanu uwe l'ẹhu; wekorohwanu. Ndzu guhaa pẹ.

¹⁶Ndu ọphu humaru iphe, meru nwoke ono, ọbvụ shi eme ono; waa iphe, meru ikpoto ezi pho; kọoru iya ndu ono, byaru nụ ono.

¹⁷Epe rwohaa Jizọsu g'ọ lufuru pẹ l'alị.

¹⁸O bahushiepho l'ugbo; nwoke ono, ọbvụ shi eme ono bya bya arwo ya gę yę ya swiru.

¹⁹Jizọsu jika bya asụ iya: “Laa unuphu; je epfukashiaru ndu ndu-unu eze iphe, Nnajiuphu meru ngu; waa g'ọ phụ-beru ngu obu-imemini.”

²⁰O tugbua je arakashiahaa eze iphe, Jizọsu meru iya arakashị l'oha Mkpukpu-Iri. Iphe ono, Jizọsu meru ono dudzuru onyemonye biribiri.

Nwa Jiayiroso mę nwanyi, nsọ eme mkpurumkpuru

(Mat 9:18-26; Luk 8:40-56)

²¹Jizọsu pẹ gude ugbo ono daghaekwapho mini ono jeshia l'azu iya ọphuu; ikpoto nemadzu bya anọ-pee ya mgburugburu. O nodu l'aguga mini.

²²Onye lanu lẹ ndu-ishi ulo-ndzuko byapfuta iya. Epha iya bụ Jiayiroso. Jiayiroso humae ya pho bya adaa kpurumu lẹ mgboru okpa iya;

²³rwohaa ya eyeru iya ẹka l'alị sụ: “Nwatibe mu kę nwanyi anwuhukwa anwuhu. Jiko byarọ ebyibe iya ẹka g'ọ wekorohu dzuru ndzu.”

- ²⁴Jizosu tsoru iya jeshia. A dukpoo igwerigwe awu etso Jizosu; k'ophu a gbe akpa iya mkpa.
- ²⁵O duru nwanyi, no l'eka ono, nowaru nsu-unwanyi mkpurumkpuru apha iri l'ebo.
- ²⁶O jewaru iphe-ehuka l'eka ikpoto ndu eme obu. Iphemiphe, o nweru be o tukowaru mepushichaa; ophu o wekorohuduru; o gbe akajenu njo.
- ²⁷O numaeopho iphe, Jizosu emeje; o shia ya azu pyobata l'ime igwe oha ono bya edenyi uwe Jizosu aka.
- ²⁸Kele o sukwanuru: "Mu -denyikpowa iya aka l'uwe be mu e-wekorohu-a."
- ²⁹Edenyi, oodenyi aka l'uwe Jizosu; mee ono buhu. O rwua ya l'ehu le Jizosu mewaru iya o wekorohu l'iphe, eme iya nu.
- ³⁰Jizosu mawaru l'onwiya l'o duru ike, shi iya l'ehu lufu. O ghakobe l'echi ikpoto oha ono su: "? Bu onye denyiru uwe mu aka?"
- ³¹Ndu etsoje iya nu su iya: "I humacharu g'igwe oha-a akpagbu ngu le mkpa; i gbe aji: "? Bu onye denyiru ngu aka?" "
- ³²O bya achikaa enya ge ya maru: ? ya a-huma onye meru iphe ono.
- ³³Ndzu guahaa nwanyi ono; kele o mawaru iphe, meru l'ehu iya. O gude ehuanmanma bya adaa kpurumu l'iphe iya; bya epfokotaru iya okpobe-opfu.
- ³⁴Jizosu su iya: "Nwada; ekweta, i kwetaru mewaru g'i wekorohu. Laa je eburu l'ehuguu l'iphe, eme ngu nu be e mewaru ngu i wekorohuwaa."
- ³⁵Jizosu gudekwadu-a opfu ono l'eka epfu; ndu shi l'ibe Jiayirosu bya bya asu: "Jiayirosu; nwa ngu nwanyi nwuhukwaru. ? Bu gunu be ituchikwadu O-zi-iphe nchi?"
- ³⁶Ophu Jizosu angakpodaru nchi l'iphe, ndu ono epfu. O su onye-ishi ulo-ndzuko ono: "Ndzu ba agushi ngu. Oo 'ephe g'i kweta."
- ³⁷Ophu o dudu onye Jizosu kwekwaduru g'ephe l'iya swiru; gbahaa Pyita me Jiemusu me Jionu, nwune Jiemusu.
- ³⁸Ephe jerwua ibe onye-ishi ulo-ndzuko ono; o bya akpovu uzu, igwe oha, no l'eka ono atu; bya ahuma g'ephe agu aphu bya egbu onwophe l'ekwa.
- ³⁹Jizosu bya abahu bya asu phe: "? Bu gunu meru iphe, unu atu uzu bya akwa ekwa? Nwata ono ta nwuhukwaru anwuhu; o kwa mbenya be ooku."
- ⁴⁰Ephe ze iya ochi. O kweepho doo bya achifuchaa phe etezi g'ephe ha; bya eduta nna nwata ono yele ne iya; waa ndu ophu yee ya swi bya abahu l'eka nwata ono ze.
- ⁴¹O bya eseta nwata ono l'eka bya asu iya: "Talita kumi," bu iya bu: "Nwangboko-nshii; mu suru g'i teta!"

⁴²Nwata ono teta jepheahaa. Nwamgboko ono nowaru apha iri l'ebo eshinu a nwuru iya. O du phe biribiri ke 'ama g'eme iya.

⁴³Jizosu karu phe su phe g'o to dukwa onye ephe l'e-me g'o maru. O su phe g'a nu nwata ono nri g'o ria.

Maku 6

Aajika Jizosu le Nazaretu

(Mat 13:53-58; Luk 4:16-30)

¹Jizosu shi l'eka ono tugbua lasha ndu phe; yele ndu etsoje iya nu swiru.

²O be l'eswe-atuta-unme; o bahu l'ulo-ndzuku ndu Jiu je eziahaa iphe. O du ikpoto ndu numaru iphe, oozi biribiri. Ephe su: “? Bu awe be nwoke-a nwutacharu iphe owa? ? Bu onye ziru iya egube mmamiphe owa? ? Denu g'o meru emeabe iphe-ohumalenya owa-a, adudu onye numajeru etu iya-a?”

³? To bunu iya-a bu nwoke kapyinta-a; mbu nwa Meri? ? To bunu iya bu nwune Jiemusu yele Jiosesu; waa Jiudasu; me Sayimonu? ? To bunaa unwune iya ke nwanyi be anyi l'ephe bugbaa l'eka-a?” Iphe ono buru upfu du phe l'okpa.

⁴Jizosu su phe: “Onye mpfuchiru Chileke be aakwabejekwa ubvu l'ekameka; a -gufuekwapho le mkpukpu iya yele ipfu iya; waa l'ibe iya.”

⁵O mee ophu o dudu iphe, du biribiri, ha shii, Jizosu meru l'eka ono; a -gufuekwapho nwa ndu iphe emegbaa, o byiru eka; ephe wekorohu.

⁶O du iya biribiri l'ephe te ekwetaduru nkiya. Oo ya bu; o tugbua je etsoru mkpukpu le mkpukpu ozo ziahaa iphe.

Jizosu ezi ndu-ishi-ozu iya iri l'ebo g'ephe je epfua opfu Chileke

(Mat 10:5-15; Luk 9:1-6)

⁷O bya ekua umadzu iri l'ebo ono bya agbaa phe ebo ebo bya ezia phe g'ephe gude okpehu chishije obvu.

⁸O pfua ya pfushiaru phe iya ike su phe: “G'o to dukwa iphe, unu e-gude eje; gbahaa oshi-mpaleka. Unu te egudekwa nri; ophu unu egudekwa eda; ebe unu eyekwa okpoga l'ekpa uwe.

⁹Unu yekwaa akpokpa; ol'oo g'unu te eyekwa uwe n-yekwase.

¹⁰Unuphu, unu bahukpowaru; a -nata unu; unu noduekwapho l'eka ono. Unu te ejekwa eburu l'eka ozo jasununu afuta le mkpukpu ono.

¹¹Eka unu jeru; ephe -jika unu; jika anuma opfu Chileke, unu epfu; unu -tugbueepho l'eka ono; unu ajishia urwuku okpa unu; g'o buru iphe, a-gba phe ekebe. Ge mu gbukwaaru iya unu tororo; oo-kakwaru ndu Sodomu yele ndu Gomora mma mboku ikpe; eme le mkpukpu ono.”

¹²Oo ya bu; ephe jeshia je araru iya ndiphe arara su phe g'izimanu iphe-eji, ephe emeje lwa phe azu.

¹³Ephe chishia obvu, du igwerigwe, bugbaa nemadzu l'ehu; teme ephe nodu eteje ndu iphe eme manu; ephe ewekorohu.

Anwuhu Jionu onye emeje baputizimu

(Mat 14:1-12; Luk 9:7-9)

¹⁴Eze, bu Herodu numa iphe, Jizosu eme; kele e pfudzuwaru nkiya l'ekameka. O duru ndu asuje l'oo Jionu ophu shi emeje baputizimu tetaru dzuru ndzu ozo; l'oo iphe ono meru iphe, oduje ike eme iphemiphe ono.

¹⁵O duru ndu ophu suru l'oo Elayijia. O duru ndu ophu suru l'oo-bukwaru onye mpfuchiru Chileke, yeru onye lanu le ndu mpfuchiru ndiche.

¹⁶Herodu numae ya pho o su: "O kwa Jionu-a, mu ziru; e je egbutaru mu ishi iya-a be dzuwaa ndzu ozo."

¹⁷Iphe, meru nu buru le Herodu zijeru; e je egude Jionu; kee ya egbu; je atuchia l'ulo mkporo. O buru l'eka Herodiyasu be o shi. Herodiyasu ono bu nyee Filipu. Filipu bukwanu nwune Herodu. Herodu gbeshi je ahata nyee nwune iya ono luru.

¹⁸Jionu shi anoduje epfuru Herodu l'oo iphe, adudu Chileke ree be o meru l'o jeru ahata nyee nwune iya luru.

¹⁹Ehu ghuaaha Herodiyasu egbu. O du iya ge a su le ya gburu Jionu; ophu o makwanu uzo, oo-shi gbua ya;

²⁰kele Herodu l'onwiya atsu Jionu ebvu. O maru l'o bu onye pfuberekoto; teme o buru onye duru Chileke nsu. O buru iphe ono meru iphe, Herodu woru iya dobe g'o to du iphe, e-me iya nu. Herodu be opfu, Jionu anoduje epfuru iya agbachije enya; l'owakwa iya pho obu mini; l'o gudeele-a ehutu ngaberu iya nchi.

²¹O rwua ujiku lanu iphe kweru nwanyi ono; kele mboku ono bu eswe, Herodu emeje eswa anyata mboku, a nwuru iya. O kukotachaa ndu-ishi ali eka ono; waa ndu-ishi ojogu; waa ndu bugbaa ishi l'ali Galili g'ephe byaru iya l'obo-iphe ono.

²²Ndu ono byierupho l'eka ono kpiririmu; nwa Herodiyasu ke nwanyi bya etee ebvu l'atatiphu phe. Ehu tsoo Herodu waa ebyaa ono, byaru iya nu ono utso shii. Eze, bu Herodu su nwamgboko ono: "Pfua iphe, dukpoe ngu pho ree ge mu nu ngu; mu a-nu ngu iya."

²³O richaaru iya angu su: "Iphe, i sukpoerupho ge mu nu ngu be mu a-nu ngu; obetaru o buru ali-eze mu be i suru ge mu keha ebo; nu ngu nanu."

²⁴Nwamgboko ono gbafu je ajia ne iya su: "? Bukpoo gunu be mu a-su g'o nu mu?" Ne iya su iya: "Su iya g'o pee ngu ishi Jionu, onye emeje baputizimu."

²⁵O gbaphu azu bya ejepfu eze je asu iya: "Gbuta ishi Jionu, onye emeje baputizimu ye l'ochi pataru mu nta-a nta-a."

²⁶Ehu daepho eze ono dzuu; eka o rwuru iya l'obu shii. Obenu l'eshinu o riwaru angu l'iphu ndu ono, byaru iya ebyaa ono be o too gbanwehedu iphe, o pfuru.

²⁷O ziepho onye lanu l'ime ndu ojoḡu, eche iya nche teke ono teke ono g'o je egbuta Jiḡonu ishi wota bya. Nwoke ono tuḡbua je egbuta ishi Jiḡonu l'ulo mkporo

²⁸ye l'ochi wotaru nwamgboko ono. Nwata woru iya je apẹe ne iya.

²⁹Ndu etsoje Jiḡonu nḡmae ya pho; ephe bya apata ogwe iya je elia.

Jizosu anu unu umadzu iri l'ẹbo l'ukporo iri nri

(Mat 14:13-21; Luk 9:10-17; Jiḡon 6:1-14)

³⁰Tobudu iya bu; ndu-ishi-ozu Jizosu bya anokobe bya ejepfu Jizosu je akokotaru iya iphe, ephe mekotaru; yele iphe, ephe zikotaru.

³¹A du igwerigwe abya. Nemadzu nodu ejeepho nggede eje; nggede alwa; k'opu uzo aduduru Jizosu yele ndu etsoje iya nu mbukponu me ria nri. O su ndu etsoje iya nu: "Unu gbeshi g'anyi je l'eka nemadzu te ebudu ebubu g'anyi je anodu nwekinyi anyi g'unu kabẹ tuta unme nwanshii."

³²Ephe kwe bahu l'ugbo tuḡbua jeshia l'eka ephe a-nodu nwekaphe.

³³A du igwerigwe huma phe teke ephe atugbu bya ahubechaa phe ama. Ndu ono shikpo le mkpuku le mkpuku gudegbaa okpa gbaru jeshia vuru phe uzo jerwua aka ono, ephe eje ono.

³⁴Jizosu futa l'ugbo ono bya ahuma ikpoto nemadzu, no l'eka ono; imemini phe du iya shii; kele ephe du g'aturu, enwedu onye-nche, l'agbaru phe mkpu. O ziahaa phe iphe, du igwerigwe.

³⁵O bejeepho l'uzenyashi; ndu etsoje iya nu jepfu iya je asu iya: "? I maru l'eka-a bu echiegu teme nchi nodu ejihuwaa?"

³⁶Sudupho ndu-a g'ephe bahu le mkpuku le mkpuku me l'unuphu l'unuphu ndu-a, no-pheru phe mgburugburu-a je azutaru onwophe nri.

³⁷Jizosu su phe: "Unubedua l'onwunu nunu phe nri g'ephe ria." Ephe su iya: "? O du ngu g'o bu anyibedua a-zuta buredi, ukporo pangu, aa-nu phe g'ephe ria?"

³⁸O su phe: "? Bu ishi buredi ole be unu gude? Unu je amaru g'o ha." Ephe machaarū g'o ha; ephe su l'o du ishi buredi ise; wafua eji-ema.

³⁹Noo ya bu; o su phe g'ephe kekashia igwe oha ono ekekashi g'ephe noduchaa anoo l'eka ono, nweswa du kirikiri ono.

⁴⁰Ephe nodu anoo keshia onwophe l'ophere l'ophere; o duru ndu du ukporo ise ise; o duru ndu ophu du ukporo labo l'iri iri.

⁴¹O wota ishi buredi ise ono; waa eji-ema pho bya apalia enya imeli kele Chileke ekele ke nri ono; bya eworu iya nyawashia bya anu ndu etsoje iya nu su g'ephe keeru iya ndu ono. O kedzuru ndu ono g'ephe hakota eji-ema ono.

⁴²Ephe tuko ria ya; rijichaa ephe.

⁴³Ibiribe ibiribe buredi yele ema, phoduru nu, ephe tutukoberu be jiru nkata iri l'ẹbo.

44Unwoke, yi le ndu ono, riru nri ono du unu unwoke iri l'ebo le unwoke ukporo iri.

Jizosu eje ije l'eli mini

(Mat 14:22-33; Jion 6:16-21)

45O su ndu etsoje iya nu ono g'ephe bahu l'ugbo; vuru iya uzo; dafu azu iya ophuu; jeshia mkpukpu Betusayida ge ya pfuadaru igwe oha ono g'ephe la unuphu.

46O mechaephe pho ephe lashia; o jeshia l'ubvu je epfuru nu Chileke.

47Ugbo ono nodu l'echi eze-enyimu nchi jihu; yebedua nwekinyiya nodu l'eli-mgboko l'aguga mini ono.

48O gbephe l'eka o no huma l'akpo ugbo ono l'angakpoo phe ehushii; kele pherephere ezi iziphu; o jeru ije l'eli mini jepfushia phe. Teke ono buwaru l'iphe-oduu aha enu. O meahaa g'oo ghata phe aghata le mini ono.

49Epe hūmae ya pho eka ooje ije l'eli mini; ephe dobesu l'oo maa. Epe chishia mkpu.

50Noo kele ephe tukoru g'ephe ha humakota iya; ehushii nmalahaa phe kpeekpeekpee. Teke ono kwapho Jizosu su phe: "G'okpoma shihu unu ike; o bu-a mbedua. Ndu ba agushi unu."

51O nyipfu phe l'ime ugbo ono; pherephere ono zibuhu. Epe sachaa onu saa nchi;

52Kele iphe, Jizosu meru teke o washiru buredi ono te edoduru phe enya; opfu l'a kpochiru phe okpoma.

Jizosu eme ge ndu iphe eme wekorohu le Genesaretu

(Mat 14:34-36)

53Tobudu iya bu; Jizosu phe daghaepho mini ono; futa le Genesaretu; bya eworu ugbo phe lia l'eka ono.

54Afuta, ephe afuta l'ugbo ono; ndu eka ono hubechawaa Jizosu ama.

55Epe gbacharu je l'unuphu l'unuphu je apata ndu iphe emegbaa l'iphe, ephe azeje aze paru byapfuta iya l'ekameka, ephe numakpooru l'o no.

56Ekameka, o shiru l'unwu mkpukpu le mkpukpu; me l'eze mkpukpu; me l'oma egu; ndiphe eworu ndibe phe, iphe eme dobegbaa l'oma aswa rwo ya g'o kwe g'ephe denyi iya eka; obetaru o buru l'onu uwe iya. Iphe, bukpo ndu denyiru iya eka wekorohukota l'iphe, eme phe nu.

Maku 7

Nso ali ndiche ndu Jiu

(Mat 15:1-9)

1Oo ya bu; o duru ndu Farisii; wakwapho ndu ezije ekemu, doru l'eka ono. Epe tuko shi Jierusalemu bya adokobe l'eka ono dophee Jizosu mgburugburu.

²Ḑphe hūma l'ọ dūru ndu emebyi nsọ alì l'ime ndu etsoje Jizosu. Ọ buri l'ḑphe gude ẹka, e merwushiru emerwushi eri nri; opfu l'ḑphe ta akwọduru ẹka gẹ nsọ alì ndu Jiu sūru g'a kwoje iya.

³Kẹle ndu Fárisii; mękpoo ndu Jiu mgburugburu te erijedu nri m'ḑphe -akwọduru ẹka gẹ nsọ alì phẹ sūru g'a kwoje iya, bu iya bu nsọ, shi phẹ lẹ nna phẹ oche.

⁴Tẹme ḑphe -lwa aswa; ḑphe tee ridu nri; gbahaa l'ḑphe gudeadaa mini mefu nsọ. Nokwaphọ g'ḑphe emejegbaa unwu nsọ ọzo, shi lẹ nna phẹ oche, dū gẹ nsọ asa okoro mę k'ite mę k'ochi, e gude ope wua; mę k'oshi-anọ.

⁵Ndu Fárisii ono mę ndu ezije ekemu jia Jizosu sū iya: “? Bu gūnu meru iphe, ndu etsoje ngu nū te emejedu nsọ, shi lẹ nna anyi oche phẹ; ḑphe gbẹ egudeje ẹka, e merwushiru emerwushi eri nri?”

⁶Ọ bya asū phẹ: “Azáya onye mpfuchiru Chileke pfugbuwaru k'unubẹ tuko-l'ḑhu-atuko-l'obu-a sū: “Ndu-a bu eli ọnu bẹ ḑphe gude akwabẹ mu ùbvù. Obenu l'obu phẹ nọgbaa mu ọzenya.

⁷Ḑphe abarū mu ẹja mkpẹ. Ḑphe ezi ekemu, nemadzu tūru; ọ dū g'ekemu Chileke .

⁸“Kẹle unu ahajẹ ekemu Chileke; gbẹ eme nsọ alì, nemadzu doberu; eme k'asa ite; mę okoro; mę iphemiphe ọzo, unu emegbabẹ.”

⁹Ọ sū phẹ: “Ọ nupho l'unu manukaru iphe meru g'o gude unu gbẹ gwọbechia ekemu, Chileke sūru g'e meje je emeahaa nsọ alì, nemadzu doberu.

¹⁰Lẹ Mósisu sukwaru: ‘Yejeru nna ngu yẹle ne ngu ùbvù’; bya asukwapho: ‘Onye epfujeru nna iya; ọzoo ne iya njọ opfu g'e gbua onye ọbu egbugbu.’

¹¹Unubẹdua byakwanū epfu bya asū: Ọ -buri lẹ nemadzu sūru nna iya; ọzoo ne iya l'iphe, ya gege egude kwọ phẹ buakwa ‘kọbanu’, bu iya bu ‘iphe, a nūru Chileke.’

¹²Unu gūfu onye ono g'o to yeheru ne iya ọzoo nna iya ẹka.

¹³Unu shi ẹgube ono gude l'unu eme nsọ alì, unu ezi; mee ọphu opfu Chileke adūedu iphe, ọ bu; tẹme unu nọdu emegbakwaphọ iphe ọzo, dūgbaa ẹgube ono.”

Iphe, aasọ nsọ; mę iphe, a ta sọdu nsọ

(Mat 15:10-20)

¹⁴Jizosu bya ekua igwe ọha ono ọzo bya asū phẹ: “Unu gebekpọdapho gẹ mu karū unu g'o doo unu ẹnya.

¹⁵Ọ tọ bukwa iphe, nemadzu eri l'ọnu aturwu iya; ọ kwa iphe, shi nemadzu l'ime obu bu iphe, aturwuje iya nū.

¹⁶G'onye nweru ẹnu nchi; nūmakwa iya!”

¹⁷Ọ haẹpho ndu ono bya abahū l'ulo; ndu etsoje iya nū jiahaa ya iphe, ẹtu ono bu.

¹⁸Ọ sū phẹ: “? Unubẹdua bẹ iphe ete dojekwaphọ ẹnya? ? Unu ta amakwaphọ l'iphe, eeri l'ọnu ta aturwudu nemadzu?

¹⁹Kele ọ tọ bahudu iya l'obu; ọo l'ẹpho bẹ ọobahuje; l'e shi l'ẹka ono nyifu iya lẹ nshì." Ọo ya bụ l'iphemiphe, eeri l'ọnu bẹ Jizọsu sùru l'ọ tọ dudu ọphu aturwuje nemadzu l'iphu Chileke.

²⁰Ọ sù phe: "Ọo iphe, shi nemadzu l'obu bụ iphe, aturwuje iya nù.

²¹Kele ọo l'ime obu nemadzu bẹ ejo egomunggo shi; waa eri ogori; mẹ apharwushi onwonye; mẹ egbu ọchi;

²²mẹ ezi iphuru; mẹ ẹnya-pfurupfuru; waa eme ejo umere; mẹ agho ụgho; mẹ urwuali; mẹ iji-ẹnya; waa epfurwushi nemadzu; mẹ eku-onwonye; yele eme eswe.

²³Iphe, bukpuo iphe ono g'ọ ha shichaa nemadzu l'obu; ọ buru iya bụ iphe, aturwuje nemadzu."

Ekweta nwanyi, abudu onye Jiu

(Mat 15:21-28)

²⁴Jizọsu gbeshi l'ẹka ono bya ejeshia alì, nọ-pheru Taya yele Sidonu mgburugburu. Ọ rwua ẹka ono bya abahu l'unuphu lanu je anodu. Ọ dọ iya g'a sù l'ọ tọ dudu onye maru nù; obenu l'o to domikotaduru onwiya edomi.

²⁵Noo ya; nwanyi, ọbvụ eme nwatibe iya ke nwanyi numa ke Jizọsu bya atugbuekwapho je adaa kpurumu lẹ mgboru okpa iya.

²⁶Nwanyi ono bụ onye Gurisu; ọle a nwuru iya l'alì ono, bụ iya bụ Fonishiya, nọ lẹ Sayira. Ọ bya arwoahaa Jizọsu g'ọ chifu ọbvụ ono, bu nwatibe iya l'ẹhu ono.

²⁷Jizọsu sù iya: "Gebe g'a nọadaa unwegirima nri temanu; kele ọ tọ dudu ree g'e woru nri unwegirima nù unwu nkuta."

²⁸Nwanyi ono sù iya: "Mu maru-a Nnajiuphu; obenu l'unwu nkuta atutujekwa-anwonu, dashihuru l'ẹka unwegirima eri nri."

²⁹Jizọsu sù iya: "Eshinu i pfuru egube ono; lashia l'ọbvụ ono hawaru nwa ngu ono!"

³⁰Ọ larwushia; Ọbvụ-a hawaa nwata-a. Ọ zewaa azee ke nwakupya l'iphe, aaze azee.

Jizọsu emeta onye ada nkuchi

³¹Jizọsu bya alufuta l'ohamoha, bugbaa lẹ Taya yele Sayidonu jeshia l'eze-enyimu Gálili; bya erwua oha Mkpukpu-Iri.

³²Ephe dutaru iya onye ada nkuchi; teme ọphu oopfujedu opfu ree. Ephe rwoahaa Jizọsu g'o byibe iya ẹka.

³³Jizọsu shi l'ẹka ono, igwe oha ono nọ ono; dufu iya iche bya eye iya mkpushi ẹka lẹ nchì labo bya emeta onu-mini mee ya l'ire

³⁴bya apalia ẹnya l'eli bya atsua ude sù iya: "Efata" bụ iya bụ: "kosahu!"

³⁵Ime nchì iya ephenebo kosahuchaa; ire iya bya agbutoshihu; ọ wata epfu opfu ree.

³⁶Jizosu pfushia ya ike sù phẹ g'ò tọ dukwa onye ẹphe e-pfuru iya; obenu l'obujeru teke o pfuru nno; ẹphe agbẹ ka iya nù arakashì.

³⁷Ọ kwatakporo tufu phẹ ẹhu shii; ẹphe sù: “Ha-o! ? Ọ kwa l'ì hùmaru g'oomekotaje iphemiphe ree; mechaa mee g'onye nkuchi nùmajẹ iphe lẹ nchì; bya emee g'onye l'ete pfujedu opfu pfuahaa opfu.”

Maku 8

Jizosu anù unu umadzu iri nri

(Mat 15:32-39)

¹E rwua ujiku lanù, ikpoto nemadzu dzukobekwaru ozo; ophu o dũhedu nri, ẹphe gude k'eriri. Jizosu bya ekua ndu etsoje iya nù bya asù phẹ:

²“Imemini ikpoto ndu-a dukwa mu g'onye l'ẹphe nọwaru ujiku ẹto l'ẹka-a; ophu o bũdu l'ọ dukwaduru nri, ẹphe gude, ẹphe e-ri.

³Mu -sukwanu g'ẹphe swiru ẹgu lashia; mba atushi phẹ l'uzo; kele o duru ndu ophu shi ẹka dũ ẹnya.”

⁴Ndu etsoje iya nù sù iya: “? Bù awe bẹ aa-humakwanu nri l'echiegu-a, a-suru phẹ eriri?”

⁵Ọ sù phẹ: “? Bù ishi buredi ole bẹ unu gude?” Ẹphe sù iya l'ọo ishi buredi ẹsaa.

⁶Ọo ya bũ; o sù g'ikpoto ndu ono nodukota anọo l'alì l'ẹka ono. Ọ bya achita ishi buredi ẹsaa ono bya ekele Chileke ekele. Ọ bya awashia ya bya achie ndu etsoje iya nù g'ẹphe keeru phẹ. Ndu etsoje iya nù bya ekeeru phẹ iya.

⁷Ọ dukwarupho unwu-ẹma, ẹphe gude. Ọ bya bya ekelekwapho Chileke k'ẹma ono bya eworu iya nù ndu etsoje iya nù bya asù g'ẹphe kekwaaru iya pho ndu ono.

⁸Ndu ono ria nri rijichaa ẹpho. Ndu etsoje iya nù bya atutua iphiriba iphiriba iya ophu ghuduru nù; o ji nkata-eevu-iphe ẹsaa.

⁹Ndu riru nri ono e-bekwa l'unu nemadzu mgbo iri. Jizosu sù phẹ g'ẹphe lashia; ẹphe lashia.

¹⁰Yẹle ndu etsoje iya nù bahù l'ugbo jeshia oha ndu Dalumanuta.

Iphe-ohumalenya, meru l'ẹhu Jiona

(Mat 16:1-4)

¹¹Ndu Fàrisii byapfuta Jizosu; ẹphe l'iya tũahaa ẹgo. Ẹphe sù iya g'o meeru phẹ iphe-ohumalenya, e-goshi l'ọo Chileke ziru iya g'ò bya eviya. Ọ bũru okpa opfu bẹ ẹphe togboru iya ẹgube ono; g'ẹphe gude nmata iya.

¹²Ọ bya atsua oke ude l'ime obu bya asù phẹ: “? Bũkpoo gunu meru iphe, o gude ogbo nta-a buerupho iphe-ohumalenya bẹ ẹphe achoje? Gẹ mu gbukwaru iya unu tororo; o tọ dukwa iphe-ohumalenya ono, a byaru emeru phẹ.”

¹³Jizosu phẹ haa phẹ l'ẹka ono bya abahù l'ugbo kporu jeshia azu iya ophuu.

Ụta, Jizọsu ata ndu etsoje iya nụ

(Mat 16:5-12)

14Noo ya; ndu etsoje iya nụ zọhaa egude buredi. Ọ bụerupho ishi buredi lanụ bẹ ẹphe gude nọdu l'ugbo ono.

15Jizọsu nmaaru pẹ ọkwa sụ: “Unu kwabekwa ẹnya! Unu kwabekwaru iphe-eko-buredi kẹ ndu Fárisii mẹ kẹ Herọdu ẹnya; a -nonyaa o mebyia unu.”

16Ẹphe pfuaharu nwibe pẹ sụ: “Ọ kwa buredi ono, anyi egudedu ono.”

17Jizọsu maru iphe, ẹphe epfu bya asụ pẹ: “? Bụ gụnu bẹ o gude unu nọdu epfugbaa l'unu te egudedu buredi? ? Toko dokwaphọ unu ẹnya? ? Ọ kwa l'egomunggo teke agbarwudu unu l'iphe, ọ bụ; mbụ k'iphe, ekoje-buredi ono? ? Ọ nwuru inwu-agma bẹ unu kpọ-chiru ọkpoma akpọ-chi?

18Ọ kwa l'unu nweru ẹnya; ? Unu ta aphụdu iya ụzo? Nchị bẹ unu furu; ? Unu ta anụdu iya iphe? ? To nwedu iphe, unu anyatajekpoo?

19Teke mu gude ishi buredi ise keeru unu nemadzu iri l'ẹbo l'ukporo umadzu iri; ? bụ nkata-eevu-iphe ole bẹ unu tutu-jiru iphiriba iya, phoduru nụ?” Ẹphe sụ iya l'ọo iri l'ẹbo.

20“Ọ dū ree; teke mu gude buredi ẹsaa keeru unu nemadzu iri; ? bụ nkata-eevu-iphe ole bẹ unu tutu-jiru l'iphiriba iya, phoduru nụ?” Ẹphe sụ iya l'ọo ẹsaa.

21Ọ sụ pẹ: “? Toko dokwaphọ unu ẹnya nta?”

Jizọsu eme g'onye atsụ ishi hụma ụzo

22Ẹphe bya abata lẹ Betusayida. E dutaru Jizọsu onye atsụ ishi. Ẹphe rwoahaa ya g'o byia ya ẹka.

23Ọ bya egude onye atsụ ishi ono ẹka dufuta iya lẹ mkpukpu ono; bya eworu onu-mini vua ya l'ẹnya tsuu; bya ebyia ya ẹka bya asụ iya: “? Ọ duru iphe, i hụmaru?”

24Onye ono, atsụ ishi ono palia ẹnya bya asụ: “Ee; mu hụmaru-a nemadzu; ọle ẹphe dugbaa tsuyọo tsuyọo g'oshi ejegbaa ije.”

25Jizọsu byakwa bya ebyia ya ẹka l'ẹnya ọzo. Ẹnya sahu nwoke ono; ọ pụahaa ụzo; hūmaahaa iphemiphe rengurengu.

26Jizọsu bya asụ iya g'ọ lashia; sụkwa iya phọ: “B'abahukpokwanu lẹ Betusayida; ọphu ọ dukwa onye ii-pfuru iya.”

Pyita akọ onye Jizọsu bụ

(Mat 16:13-20; Luk 9:18-21)

27“Jizọsu waa ndu etsoje iya nụ tugbua jeshia mkpukpu, nọgbaa lẹ Sizariya Filipayi. O rwua l'uzo; ọ jiahaa pẹ sụ: ? Bụkpoo onye bẹ aasujekpoo lẹ mu bụ?”

28Ẹphe sụ iya: “Ọ duru ndu sụru l'i bụ Jionu onye shi emeje baputizimu; ndu asụ l'i bụ Elayijia; teme ọ duru ndu sụru l'i bụ onye lanụ lẹ ndu mpfuchiru Chileke.”

²⁹Jizosu sụ phẹ: “Unubedua; ? unu sukwanuru le mu bu onye?” Pyita sụ iya: “Oo ngu bu Kereshi obu.”

³⁰O pfiaru phẹ iya pfushia ya ike sụ phẹ g'ọ tọ dukwa onye ozo, ephe e-pfuru ke nkiya.

Epfufu mbu, Jizosu epfu le ya e-je iphe-ehuka nwuhu

(Mat 16:21-28; Luk 9:22-27)

³¹Noo ya; Jizosu bebe pfiaru ndu etsoje iya nu iphe, swiru iya nu sụ phẹ: “Abubu-Ndiphe jefutajekwa iphe-ehuka, du igwerigwe. Ndu bu ogerenya; waa ndu-ishi uke Chileke; waa ndu ezije ekemu a-jikakwa iya woru iya ye ndiphe l'eka. Ndiphe ono eworu iya megbua; l'ọ noo abali eto l'ilu; l'ooshi l'onwu teta dzuru ndzu.”

³²Iphe ono be o pfuru phẹ kasaa phẹ iya nchi. Pyita bya ekuchi iya sụ iya: “Tuswekwa! Te epfukwa egube ono.”

³³Jizosu bya aghaa enya bya elee ndu etsoje iya nu bya agbochia Pyita onu sụ iya: “Gbeshi mu l'iphu gube Obutuswe ono! Kele iphe, iri ta abudu iphe, Chileke ari. Oriri ngu bu oriri nemadzu.”

³⁴Jizosu bya ekukota ikpoto ndu ono waa ndu etsoje iya nu bya asu phẹ: “Onye o du g'ọ tsoru mu g'onye ono mia onwiya enya; vuta oswebe onwu nkiya bya etsoru mu;

³⁵kele onye eme g'ọ dzoo onwiya ndzu l'e-tuphakwa ndzu iya etupha. Onye gudekwanu opfu ehụ mu yele k'ozima Chileke tuphaa ndzu iya l'a-dzo onwiya ndzu.

³⁶? Bu gunu bu urwu, nemadzu ritaru me o -nwekotachaa iphemiphe, no le mgboko-a; tuphakwanaa ndzu iya?

³⁷O tọ dukwa iphe, nemadzu egude agbata ndzu iya me o -tuphahwaa.

³⁸Kele onye iphere mu du; iphere ezi ozi-oma mu du iya; l'ogbo owa, l'eri ogori eme iphe-aji-a; be iphere onye ono a-dukwapo Abubu-Ndiphe me o -byatashiepho ekpe ndiphe ikpe. O -nodu abya l'ọ du ubvu l'enya; egbu nwijnwii ge Nna iya egbu; teke ono, yele unwu-ojosi-imigwe, du nsọ a-swiru abya ono.”

Maku 9

¹O sụ phẹ: “Ge mu gbukwaaru iya unu tororo; o duru ndu haru pfuru l'eka-a, ata yidu nwuhu; gbahaa l'ephe humadaru ge Chileke gude ike egoshi l'oo ya bu eze.”

Jizosu egbu nwijnwii

(Mat 17:1-13; Luk 9:28-36)

²A nepho abali ishii; Jizosu duta Pyita yele Jiemusu waa Jionu duru phẹ je enyikota ubvu, ha l'eli; je anodu nwekinyi phẹ. A nonyaa; Chileke gbanwee ugbugba iya l'ataphu phẹ.

³Uwe iya chaahaa ke phuuphuu g'eberugo; k'ophu o dukpoda onye asa uwe le mgboko-a, l'asa iya egube ono.

⁴Noo ya; Elayijia yele Mosisu chaa l'iphu phẹ abo uja eyeru Jizosu.

⁵Pyita pfubulihu sụ Jizọsu: “Nnajiuphu; ọ dukwa ree g'anyi nọ l'ẹka-a; g'anyi tua mkpu ẹto: nanu nkengu; nanu ke Mosisu; nanu ke Elayijia.”

⁶Iphe, o gude pfua iphe ono bu l'ọ to makpoda iphe, oopfu; ẹka ndzu agukpoo phe shingushingu epe n'eto.

⁷Urwukpu bya bya aso-kputa ẹka ono; olu-opfu shi l'urwukpu ono su: “Onye owa-a bu Nwa mu nwoke. Mu yeru iya obu. Unu numajekwa iphe, oopfu!”

⁸Teke ono kwapho; epe chikaa enya chikaa enya; ophu o duedu onye epe humaru l'ẹka ono; gbahaepho Jizọsu nwekiya.

⁹Epe nyizetashia l'ubvu ono; Jizọsu pfushiaru phe iya ike sụ phe g'ọ to dukwa onye epe e-pfuru iphe, epe humaru gbiriri jasụ teke yebe Abubu-Ndiphe e-shi l'onwu teta dzuru ndzu.

¹⁰Iphe ono, o pfuru ono due phe pho l'okpoma; epe nodu ajigbaa nwibe phe iphe, bu eshi l'onwu teta dzuru ndzu.

¹¹Epe jia ya sụ: “? Bu gunu meru iphe ndu ezije ekemu sụru le Elayijia e-vuadaru uzo bya?”

¹²O sụ phe: “O kwa eviya le Elayijia l'e-vukpoadaru uzo bya g'o dozia iphemiphe ree. O le ? bu gunu meru iphe, e dekwarupho l'opfu Chileke sụ le Abubu-Ndiphe e-je iphe-ehuka, du igwerigwe; teme l'e mekwaa ya pho g'ọ to dudu iphe, o bu?”

¹³Ge mu karu unu: Elayijia byahaakwaru; epe mewaa ya umerekete; mbu mee ya pho g'iphe, e dehawaru l'ekwo-opfu Chileke pfuru.”

Eeme onye obvu atu ndafu g'o wekorohu

(Mat 17:14-21; Luk 9:37-43a)

¹⁴Epe byapfutaepho ndu etsoje iya nu ndu ophu; epe huma ikpoto ndu no-pheru phe mgburugburu. Epe le ndu ezije ekemu nodu atu ego.

¹⁵Ahuma, igwe oha ono ahuma Jizọsu; akpabiri iya gude phe. Igwe oha ono wupfu iya je ekele iya ekele.

¹⁶O jia phe sụ: “? Bu gunu be unu l'epe atu?”

¹⁷Onye lanu l'ime ikpoto ndu ono sụ iya: “O-zì-iphe; mu dutaru ngu nwa mu nwoke; kele obvu, guderu iya nu meru iya ophu o pfujedu opfu.

¹⁸Eka o byaru iya l'ọ pata iya tua l'alì; uphu atsushi iya l'onu; oota ikireze; o noduepho ke kwereji. Mu sụ ndu etsoje ngu nu g'ephe chifu iya obvu ono l'ehu; ophu epe adudu ike.”

¹⁹O sụ phe: “Ha-oo! Unube ogbo owa-a, adudu iphe, unu ekwetaje-a. ? Bu teke ole be mu l'unu a-no-beru? ? Mu a-takporu unu nshi taberu teke ole? Unu dutaru mu nwata obu!”

²⁰Epe bya edujeru iya nwata ono. “Obvu ono humaepho Jizọsu bya atu nwata ono l'alì woru iya gbachia. O wepheahaa ewephe; uphu nodu atsushi iya l'onu.

- 21 Jizosu jia nna iya: ? Bu teke ole be iphe obu shi iya?" O su iya: "O shikwa iya teke o bu nwata."
- 22 "Oobujekwaru o -nonyaa; l'o haru turu iya chie l'oku; mekpoo le mini g'eeshi g'o gbua ya. Teke o bu l'o duru iphe, ii-du ike mee; phunaaru anyi obu-imemini; gbanaaru anyi mkpu!"
- 23 Jizosu su iya: "? I suru l'oo iphe, mu a-du ike mee? O to dukwa iphe, akpo onye kweru ke Chileke aka ememe."
- 24 Nna nwata ono chishia mkpu gude enya-mini su: "Mu kwewaru; jiko yenuru mu aka ge mu kabaa ekweshi ike!"
- 25 Jizosu humaepho g'ikpoto nemadzu awu abya l'eka ono; o baaru obvu ono mba su iya: "Gube obvu ophu ada nkuchi; ophu iipfudu opfu; mu suru gi futa l'ime nwata ono. Ta abahubaekwa iya l'ehu ozobaa."
- 26 Obvu ono chia mkpu bya alota nwata ono tua l'ali; gbachia ya; teme o lufu iya l'ehu. Nwata ono dabyierupho g'odzu. A toko su l'o nwuhuwaru.
- 27 Jizosu bya egude aka selita iya eli; o gbalihu.
- 28 Jizosu bahuepho l'ulo; ndu etsoje iya nu jia ya le mpya su: "? Bu gunu meru iphe, anyi adudu ike chifu obvu ono?"
- 29 O su phe: "Egube obvu ono taa futakwa; gbahaa l'oo onye aswije egu epfu anu Chileke chiru iya."

Epfu k'ugbo ebo k'anwuhu Jizosu

(Mat 17:22-23; Luk 9:43b-45)

- 30 Ephe tugbua l'eka ono je aghabua Galili; ophu Jizosu emeduru g'o duru onye a-maru nu;
- 31 kele ndu ono, etsoje iya nu ono be oozi iphe. O su phe-a: "Abubu-Ndiphe be aakpukwaru ye ndiphe l'eka; ephe eworu iya megbua. L'o no abali eto l'ilu; l'ooshi l'onwu teta dzuru ndzu."
- 32 Ophu ephe amadu iphe, oopfu; ndzu nodu agu phe g'ephe e-me jia ya.

Onye kachakpo shii

(Mat 18:1-5; Luk 9:46-48)

- 33 Ephe bya abata le Kapaniyomu. Ephe bahuepho l'ulo; Jizosu jia ndu etsoje iya nu su: "? Bu gunu be unu shi atu l'etsuzo?"
- 34 Ophu ephe epfuduru opfu; kele teke ephe no l'uzo be ephe shi atu ego onye kachaa shii le g'ephe ha.
- 35 O bya anodu anodo bya ekua ephe n'iri l'ebo bya asu phe: "Onye o du g'o buru onye ivuzo g'onye ono buru onye ikpazu waa onye a-nodu ejeru onyemoneye ozi."
- 36 O duta nwata nshii bya edobe l'echilabo phe. O bya eheta nwata ono eheta su phe:

37“Onye gude ẹpha mu nabata nwata nshii, ha ẹgube-a bẹ buakwaa mbẹdua bẹ ọ nabataru. Onye nabatakwanuru mbẹdua ta abukwa mbẹdua bẹ ọ nabataru kpu; onye ono nabataakwarupho onye ono, ziru mu gẹ mu bya ono.”

Onye ata akpọshidu iphe, anyi eme

(Luk 9:49-50)

38Jionu sụ Jizosu: “O-zì-iphe; anyi humakwaru nwoke, gude ẹpha ngu achishi ọbvụ; anyi sụ iya g'o to meshi; kele o too tsojedu anyi.”

39Jizosu sụ phe: “Unu ta asushi g'o to meshi; kele onye gude ẹpha mu eme iphe-ohumalenya te epfubyidu nkemu ẹgwegwa ẹgube ono.

40Onye ata akpọshidu iphe, anyi eme akpọshi bẹ bu anyi.

41Gẹ mu gbukwaaru iya unu tororo; onye gude l'unu bu ndu ke Kéreshi kee unu mini g'unu ngua bẹ Chileke bufutajekwa obunggo iya.”

Anma ọkwa eme iphe-ẹji

(Mat 18:6-9; Luk 17:1-2)

42“Sụ-a; onye mekwanuru onye lanu l'unwegirima-a, wowaru onwophe ye mu l'eka-a g'o shiswee ọzo ono bẹ o gogo kakwaru ree ọme a pataru mkpuma-uswe; lipyabẹ iya l'olu; paru chie l'eze-enyimu.

43Ozo bu; teke ẹka ngu akpataru ngu eme iphe-ẹji; gbufu iya. Oo-karu ngu ree l'i gude ẹka lanu bahu l'eka ọkpobe ndzu no; eme l'i nweru ẹka labo; e nwuba ngu l'oku-alimaa.

44Eka ophu ikpiri-ekà, no iya nu ta anwuhujedu anwuhu; ophu oku enwu iya nu anyihujedu anyihu.

45Teke o bu okpa ngu a-loru ngu ye l'eme iphe-ẹji; gbufu iya. Kele o karu ngu ree g'i buru eniyeni bahu l'eka ọkpobe ndzu no; eme l'okpa dzuru ngu oke; e chie ngu l'oku-alimaa.

46Eka ophu ikpiri-ekà, no iya nu ta anwuhujedu anwuhu. Ophu oku, enwu iya nu anyihujedu anyihu.

47Teke o bu l'oo enya ngu esetaru ngu eme iphe-ẹji; swofu iya tuphaa; kele oo-karu ngu ree l'i gude enya lanu bahu l'eka Chileke bu eze; eme l'enya dzuru ngu oke; e chie ngu l'oku-alimaa.

48Oku-alimaa ono bẹ ekà, no iya nu ta anwuhujedu anwuhu; ophu oku, enwu iya nu anyihujedu anyihu.

49“Oku, ee-gude dàà onyemonye l'a-du g'o bu unu bẹ e gude kwakobe iya.

50Unu bu iphe, du ree; ole teke o tso-buhuru unu-unu; ? denu g'ii-shi mebakwadaa ya g'o buru unu ozo. Unu mee ndzu unu g'o tso unu unu; k'ophu unu le nwibe unu eburu l'ehu-guu.”

Maku 10

Ogori mę achifu nwanyị

(Mat 19:1-12; Luk 16:18)

- ¹Jizosu futa l'eka ono bya ejeshia l'alị Jiudiya; waa mkpukpu ndu azu enyimu Jiordanu. A dukwa igwerigwe wu-pfuta iya ozo. O watakwa phe ezi iphe, bu iphe, bu g'o zijehawaa.
- ²Ndu Farisii bya eworu okpa opfu togboru iya g'ephe gude nmata iya bya ajiahaa ya su: “? O du ree ge nwoke chifuje nyee ya to?”
- ³O su phe: “? Bu gunu be Mosisu suru unu g'unu meje?”
- ⁴Ephe su iya: “Mosisu suru g'onye byajeru achifu nyee ya vujeadaru uzo dee ekwo-achifu-nwanyị nu nyee ya obu le ya ta aluhedu teme onye ono achifuwa iya ro.”
- ⁵Jizosu su phe: “Iphe, Mosisu gude taru unu egube ekemu ono bu kele unu bu ndu ejo okpoma.
- ⁶Obenu le mbulembu teke Chileke meru mgboko be o meru nwoke bya emee nwanyị.
- ⁷Noo g'o gude: nwoke je l'ahaje nna iya; haa ne iya ge yele nyee ya tugba.
- ⁸Ephebo atuko buru onye lanu. Ephe taa bueduru umadzu labo. Ephe aburu onye lanu.
- ⁹Oo ya bu; iphe, Chileke tugbaberu nanu g'o to dukwa onye e-je iya ekekaha ebo ozo.”
- ¹⁰Ephe bahuepho l'ulo; ndu etsoje iya nu jia ya iphe, opfu ono bu.
- ¹¹O su phe: “Onye chifuru nyee ya je aluta nwanyị ozo be buakwaa ogori be oori.
- ¹²Teke o bukwanu l'oo yebedua, bu nwanyị lufuru l'onwiya je aluru ji ozo buakwaa ogori be nwanyị ono eri.”

Jizosu agoru unwegirima onu-oma

(Mat 19:13-15; Luk 18:15-17)

- ¹³Ephe nodu ekutagbaaru iya unwegirima g'o byibegbaa phe eka; ndu etsoje iya nu baaharu ndu ono, ekutaru iya unwegirima ono mba.
- ¹⁴Jizosu huma iya; ehu ghuahaa ya egbu. O su phe: “Unu hakwaa unwegirima g'ephe byapfuta mu. Unu ta akposhikwa phe abyabya; kele o bu ndu du nno be eka Chileke bu eze bu nkephe.
- ¹⁵Ge mu gbukwaaru iya unu tororo; onye ete gudedu obu unwegirima kweta l'oo Chileke bu eze taa bahukwa eka o no.”
- ¹⁶O bya eheta unwegirima ono byidzuchaaru phe eka bya agoru onu-oma nu phe.

Nwoke lanu, kparu eku

(Mat 19:16-30; Luk 18:18-30)

- ¹⁷Jizosu tugbushiepho; nwoke lanu gude oso gbapfuta iya bya egbushi ikpere l'ali l'iphu iya bya ajia ya su: "O-zì-iphe, dubebe ree; ? bu gunu be mu e-me ge mu nweru ndzu ojeje?"
- ¹⁸Jizosu su iya: "? Bu gunu meru iphe, o gude i nodu eku mu onye dubebe ree? O to dukwa onye bu onye dubebe ree; agufu Chileke nwekiya.
- ¹⁹I mawaru iphe, ekemu Chileke suru g'e meje: 'Te egbukwa ochi; ophu i rikwa ogori; ophu i zikwa iphuru; ophu i dzukwa uka; ophu i mekputakwa nemadzu ibe ngu; kwabeje nna ngu yee ne ngu ubvu.' "
- ²⁰Nwoke ono su iya: "O-zì-iphe; eshinu mu bu nwata ta adukwa iphemiphe ono ophu mu mebyijeru."
- ²¹Jizosu lee ya enya bya eyee ya obu bya asu iya: "Iphe lanu bu iphe, phodukwaduru ngu nu: laa je erekota iphemiphe, i nweru; woru iphe, i retaru iya keeru ndu akpa nri. Oo ya bu; l'ii-nweru okpobe iphe l'eka Chileke no. I -mechaa nno; l'ii byawaro etsoru mu."
- ²²O numaepho iphe ono, Jizosu pfuru ono; ehudaa ya dzuu; o dzuru iphu tugbua; kele o bu onye nwenukaru iphe.
- ²³Jizosu bya aghaa enya lee ndu etsoje iya nu bya asu phe: "Egube g'oo-tsube l'ehu; mbu ge ndu nweru iphe e-me bahu l'eka Chileke bu eze."
- ²⁴Iphe ono, o pfuru ono tufu ndu etsoje iya nu ehudaa. Jizosu bya epfukwaa ya ozo su phe: "Unwegirima; oo tsukwa l'ehu ge ndu kporu obu ye l'eku e-me bahu l'eka Chileke bu eze.
- ²⁵Epyo inya l'enya ngga kakwa nphe; eme le g'onye nweru iphe e-me bahu l'eka Chileke bu eze."
- ²⁶O kabakpoo phe ro atufu ehudaa. Ephe wata epfuru nwibe phe su: "? O buhunuru onye be aa-dzota?"
- ²⁷Jizosu bya elee phe enya bya asu phe: "O kwa nemadzu be o bu 'ama-g'ee-me-iyaa; obenu l'o to dudu Chileke nno; kele Chileke ta adudu iphe, kporu iya eka ememe."
- ²⁸Pyita su iya: "? Anyibedua, haru iphemiphe, anyi nweru bya etsoru ngu-a-e?"
- ²⁹Jizosu su: "Ge mu gbukwaaru iya unu tororo; onye gude opfu ehudaa mu; yele k'ozima ono haa ulo iya; ozoo unwune iya nwoke; ozoo unwune iya nwanyi; ozoo nna iya; ozoo ne iya; ozoo unwegirima ibe iya; ozoo ali iya;
- ³⁰be aa-pfu iya ugwo iphe, ha g'iphe, o haru mgbo ukporo ise le ndzu iya-a. Aa-pfu iya ugwo ulo me unwune; me ne; me nna; me unwegirima; me ali; mechakpoo mkpamehu, a kparu onye obu. E -mechaa; o -rwua le mgboko ophu abya nu; Chileke anu iya ndzu ojeje.
- ³¹Ole igwerigwe ndu bu ndu ivuzo nta-a l'e-mechaa buru ndu ikpazu; ndu bu ndu ikpazu emechakwanaa bya aburu ndu ivuzo."

K'ugbo ẹto Jizọsu epfu lẹ ya e-je iphe-ẹhuka nwuhu

(Mat 20:17-19; Luk 18:31-34)

³²Jizọsu bya akparu ndu etsoje iya nū ye l'azū vuta ọzo ẹka ẹphe eje Jierúsalemu. Ndzū gū-shiahaa ndu etsoje iya nū ike; ẹka ọ dū phẹ biribiri. Ndu ophu awū etso phẹ nū l'azū nọdu atsugbaa ebvu. Ọ byakwa ekuchi ọmadzu iri l'ẹbo ono iche bya akọaharu phẹ iphe, e-mechaa mee ya nū.

³³Ọ sū phẹ: “Nta-a bẹ anyi ejewaa Jierúsalemu. Abubu-Ndiphe bẹ ee-mechakwaa kpuru nū ndu-ishi uke Chileke waa ndu ezije ekemu. Ẹphe ekpee ya mpfugbu kpuru iya nū ndu amadu Chileke.

³⁴Ee-gude iya mee iphe, ezi ọnu-ochi; vua ya ọnu-mini; chia ya ẹchachi; bya eworu iya megbua; l'ọ nọ abali ẹto l'ilu; l'ooshi l'onwu teta dzuru ndzū.”

Unwu Zebedi arwo Jizọsu iphe

(Mat 20:20-28)

³⁵“Tọbudu iya bu; Jiemusu yẹ Jionu, bu unwu Zebedi bya ejepfu Jizọsu bya asu iya: O-zì-iphe; ọ dū anyi g'a sū l'ii-meru anyi iphe, anyi a-rwo ngu.”

³⁶Ọ sū phẹ: “? Bu gūnu bẹ ọ dū unu gẹ mu meeru unu?”

³⁷Ẹphe sū iya: “Mee anyi g'anyi nọ-kube ngu: g'onye lanu nọdu ngu l'ẹkutara; onye ophu anọdu ngu l'ẹkicha teke ọ-nọdu l'ọ-du-biribiri ngu.”

³⁸Jizọsu sū phẹ: “Unu ta amakwa iphe, unu arwo. ? Unu a-du-a ike ngua iphe, dū l'okoro, mu a-ngu; l'e mee unu ẹgube baputizimu, ee-me mu?”

³⁹Ẹphe sū iya: “Ee! Anyi a-du-a ike.” Jizọsu sū phẹ: “Unu a-dukwa-a ike ngua iphe, dū l'okoro, mu a-ngu; l'e mee unu ẹgube baputizimu, e meru mu.

⁴⁰Obenu lẹ k'anọdu mu l'ẹkutara yele ẹkicha ta abudu mu bẹ ọ dū l'ẹka. Ono duru ndu Chileke doberu iya.”

⁴¹Umazu iri ophu numa l'o noo g'ẹphe jeru iya; ẹhu-eghu Jiemusu yẹ Jionu ghuaaha phẹ.

⁴²Jizọsu bya ekukotachaa phẹ bya asu phẹ: “Unu mawaru lẹ ndu a sūru l'ọo phẹ bu ishi anọduje akpapyashi ishi ndu ẹphe bu ishi phẹ akpapyashi; teme ọ buru ọ-nọ-l'oke-okwa anọduje eme gẹ ndu ọzo maru l'ọo ya ka shii.

⁴³Ọle ọo gẹ k'unubedua ta adukwa ẹgube ono. K'unu bukwa; onye ọ dū g'ọ ha shii; g'onye ono buru onye a-nọdu ejeru ndu ophu ozi.

⁴⁴Onye ọ dū g'ọ buru onye ivuzọ lẹ g'unu ha; g'onye ono wozeta onwiya ali; buru ohu onyemoneye.

⁴⁵Lẹ Abubu-Ndiphe l'onwiya ta abyakwaru g'e jeeru iya ozi; ọ kwa g'o jee ozi; waa g'o woru ndzū iya nū g'e gude gweeru Chileke ngweja; g'ọ buru iphe, oo-gude gbata ndzū igwe ọha.”

Jizọsu eme onye atsū ishi g'ọ wata aphū ọzo

(Mat 20:29-34; Luk 18:35-43)

⁴⁶Jizọsu phẹ bya abyarwuta Jieriko. Noo ya; ẹphe tųgbushiepho l'ẹka ono; ẹphe lẹ ndu etsoje iya nų mẹ igwe ọha, awų etso iya nų. Nwoke, aza Batimiyọsu, atsų ishi nọduwaa l'aguga etsuzọ; arwọ arwọ. Batimiyọsu ono bų nwa Timiyọsu.

⁴⁷Ọ nųmaepho l'ọo Jizọsu onye Nazaretu l'aghata; o chishia sų: “Jizọsu; Nwa Dévidi; g'imemini mu dųnu ngu!”

⁴⁸A gbọchia ya ọnu sų iya g'o dobe ọnu doo. Ọ kabakpọo ya rọ arashi ike: “Nwa Dévidi; g'imemini mu dų ngu rọ-o!”

⁴⁹Jizọsu pfuru bya asų g'e kua ya. Ẹphe kua ya sų iya: “Teru ẹswa gbẹshi je; ookukwa ngu oku.”

⁵⁰Ọ chiru ukpo iya wųshi bya ezilihu bya ejepfu Jizọsu.

⁵¹Jizọsu sų iya: “? Bų ọnu bẹ ọ dų ngu ọ mu meeru ngu?” Onye atsų ishi ono sų iya: “Nnajiuphu! Mee mu ọ mu wata aphų ọzo!”

⁵²Jizọsu sų iya: “Lashia. Ekweta, i kwetarų mewaru ngu g'i wekọrohu.” Teke ono kwaphọ; nwoke ono phųahaa ọzo bya etsoru Jizọsu tųgbua.

Maku 11

Jizọsu abahų lẹ Jierúsalemu

(Mat 21:1-11; Luk 19:28-40; Jiọn 12:12-19)

¹Ẹphe byarwutajẹepho l'úbvú Olivu mẹ lẹ mgboru Betufeji waa Betani, nọwaa Jierúsalemu ntse; Jizọsu zia ndu etsoje iya nų ọmadzu labọ

²sų phẹ: “Unu je l'ime mkpųkpų ono, nọ unu l'ọzo iphu ono. Unu -bahųepho l'ime mkpųkpų ono bẹ unu a-hųma nwa nkafų-igara, e liberu elibe, eteke adųswee onye nọjeru iya l'eli. Unu tọta iya kpųru bya.

³Ọ -dųru onye jiru unu sų: “? Bų ọnu bẹ unu eme nno?” Unu sų iya lẹ mkpa iya dųru Nnajiuphu; l'o -meghechaa bẹ ọo-kpų-phutakwa iya-a azų l'ẹka-a ẹgwegwa.”

⁴Ẹphe jerwua je ahųma nwa nkafų-igara ọbu l'ẹka e liberu l'aguga ọguzo unuphu, nọ l'aguga gbororo; ẹphe je atọta iya.

⁵Ndu nọ l'ẹka ono jia phẹ sų: “? Bų ọnu bẹ unu eme ẹgube ono? ? Bų ọnu meru iphe, unu atọta nkafų-igara ono atọta?”

⁶Ẹphe pfuaru phẹ iphe, Jizọsu sųru phẹ g'ẹphe pfua. Ndu ono haa phẹ; ẹphe kpųru iya tųgbua.

⁷Ẹphe kpųtaru iya Jizọsu bya achiru ẹkwa phẹ wukobe nkafų-igara ono l'eli okpurukpų; Jizọsu nọdu iya anọo.

⁸Ndu ọphu eworu uwe phẹ tọsaa lẹ gbororo; ndu ọphu abųru igu, ẹphe gbutaru l'ime ẹgbudu bẹ ẹphe tọru l'alị.

⁹Ndu etso iya l'azụ mę ndu nọ iya l'iphu nọdu akpọ okporoko asuje: “Deejee! Deejee! Owoo! Onye Chileke gọru ọnu-oma nụ bę ọ bụ; mbụ onye ono, bụ Nnajiuphu ziru iya g'ọ bya ono.

¹⁰Gę Chileke gọru ọnu-oma nụ ọkwa eze onye-iche anyi, bụ Dévidi; mbụ ọkwa eze ono, abya nta. Deejee! Deejee! Ọkalibe-kangokotaru-nụ!”

¹¹Noo gę Jizọsu gude bata Jierúsalemu. Ọ bya abata l'ime eze-ulo Chileke bya ahumachaa iphemiphe, nọ iya nụ. Ẹphe gude nno ọchii byaahaa. Yele ndu etsoje iya nụ laphushia azụ lę Betani.

Jizọsu atụ oshi figu ọnu

(Mat 21:18-19)

¹²O be lę nchitabọhu iya; ęgu gụahaa Jizọsu g'ęphe shiwaa lę Betani lufuta.

¹³Ọ gbę ụzenya hụma oshi figu, ękwo dụ kę nwa kpuchii. O jeshia l'upfu iya g'ọ maru: ? ọ mịru amimi. O jerwua; ọ buerupho ękwo bụ iphe, dụ iya nụ; kele ọ tọ bụdu teke ọomije bụ ono.

¹⁴Jizọsu tua ya ọnu sụ iya: “Nemadzụ ta abyadụ awotabaa akpuru ngu ria ọzo.” Ndu etsoje iya nụ numa iphe ono, o pfuru ono.

Jizọsu achifu ndu azụ aswa l'eze-ulo Chileke

(Mat 21:12-17; Luk 19:45-48; Jion 2:13-22)

¹⁵Ẹphe byarwutaępho Jierúsalemu; Jizọsu bahụ l'ime eze-ulo Chileke bya awata achishi ndu azụ aswa bya ere erere l'ime eze-ulo ono. Ọ bya akwatsushichaa teburu ndu agbanweje okpoga bya akwatsushichaa okposhi ndu ereje ndo.

¹⁶Ọphu ọ dudu onye o kwekwaduru g'o vuru iphe ghata l'eze-ulo Chileke ono.

¹⁷O ziahaa phę iphe sụ phę: “? Unu ta amadụ l'e deru lę Chileke suru l'ulo iya bę ee-kuje ęka ọhamoha a-nọduje epfu anụ iya. Unu bya eworu iya mee ulo, ndu ana nfu edomije onwophe.”

¹⁸Ndu-ishi uke Chileke waa ndu ezije ekemu nımachaa ya; ęphe choahaa ụzo, ęphe e-shi gbua ya. Kele ęphe atsụ ebvu l'oopfutawaa onyemonye eyeru onwiya; opfu lę ndu ono g'ęphe ha bę iphe, oozi dğbaa biribiri.

¹⁹O -rwuepho l'uzenyashi; Jizọsu phę lufu lę mkpukpu ono.

Jizọsu gude oshi, ọ turu ọnu ezi ndu etsoje iya nụ iphe

(Mat 21:20-22)

²⁰O be l'utsu iya; ęphe ghatashia; ęphe hụma oshi figu phọ, ọ turu ọnu ụnyaphu iya phọ g'ọ nwukotawaru lwaa jasụ l'ogbarabvu iya.

²¹Pyita nyata iphe ụnyaphu ono bya asụ Jizọsu: “Lekpọdapho l'oshi-a, i turu ọnu-a bę nwukotaakwaru lwaa.”

²²Jizọsu sụ phę: “Unu kweta kę Chileke!

²³Gẹ mu gbukwaaru iya unu tororo; onye sūru úbvú-a: ‘Ngwa; je aparu onwongu chie l’ime eze-enyimu’ ọphu onye ono abọkpodaaru obu ẹbo; o kwetaephọ l’iphe ono, o pfuru ono l’e-me; l’oomeephọ g’onye ono pfuru.

²⁴Noo g’o gude mu sū unu l’iphemiphe, unu sūru gẹ Chileke nū unu mẹ unu -nọdu epfu anū iya; unu -kwetawaa l’ọ nūwaru iya unu; iphe ono bẹ ọo-nū unu.

²⁵Ọle unu -nọdu epfu anū Chileke; ọ -duru onye mesweru unu; unu nọdu agbaru iya ẹjo egomunggo; unu vuru ọzo gūaru onye ono nvụ; ọo ya bụ; Nna unu, nọ l’imigwe agukwanaaru unu nvụ l’ọphu unu mesweru iya.

²⁶Teke ọ bụ l’unu ta aguduru iya nvụ ono; Nna unu, bu l’imigwe taa gụkwarupho unu nvụ lẹ k’unu.”

Aaji Jizọsu ẹgube ike, o gude eme iphemiphe ono

(Mat 21:23-27; Luk 20:1-8)

²⁷Ẹphe bya alaphukwa azụ lẹ Jierúsalemu. Jizọsu je ejepheahaa l’ime eze-ulo Chileke. Noo ya; ndu-ishi uke Chileke; waa ndu ezije ekemu; waa ndu bụ ọgerenya bya abyapfuta iya bya asụ iya:

²⁸“? Bụ ẹgube ike gūnu bẹ i gude eme iphemiphe-a? ? Bụ onye ziru ngu g’i bya iya ememe?”

²⁹Jizọsu sū phẹ: “Unu gebe gẹ mu jĩa unu nwaji lanū. Unu -karū mu iya; mu akọoru unu onye ziru mu gẹ mu bya eme iphemiphe-a.

³⁰Unu karū mu onye ziru Jiọnu g’ọ bya emeshi ndiphe baputizimu: ? Bụ Chileke tọo nemadzu?”

³¹Ẹphe wata iya adzọkashi l’ime onwophe sū: “Teke anyi sūnuru l’ọo Chileke; l’ọ sū anyi: ‘? Ọ bụkwanuru gūnu meru g’o gude ọphu unu ekwetaduru iphe, o pfuru?’

³²Ndzu nọdu agukwanu anyi asụ l’ọo nemadzu; kele e pfudzuwaru lẹ Jiọnu bụ ọkpobe onye mpfuchiru Chileke.”

³³Noo ya ẹphe sū Jizọsu: “Anyi ta amakwa.” Ọ sū phẹ: “Ọphu mu a-kọkwanuru unu onye ziru mu gẹ mu meje iphemiphe ono.”

Maku 12

Ẹtu, e gude ndu anwamụ, e butaru ye l’opfu-vayinu anma

(Mat 21:33-46; Luk 20:9-19)

¹Jizọsu gude ẹtu ziahaa phẹ iphe sū phẹ: “Nwoke lanū larū ẹgu vayinu. Ọ bya agbaa ya mgbabu bya ebua ya nsụ ẹka aa-nọduje azọshi mēe l’akpuru vayinu ono. Ọ bya akpukwaapho nwulo eli ephekerephe ẹka ee-nyihuje eche mgbabu ono nche. Ọ bya eworu iya ye l’ẹka ndu o butaru g’ẹphe letajeru iya ya ẹnya bya ejeshia-iphe ọzo.

²O rwua teke eegbuje iya; o zia onye-ozu iya g’o jepfu ndu-ozu-ẹgu ono g’ẹphe wọo ya òkè akpuru vayinu nkiya.

³Ẹphe gude onye-ozu ono tsua ya iphe; gbabẹ iya ẹka ọto; nwufu iya; ọ lashia.

⁴Nwoke ono bya ezia onye-ozu iya ozo g'o jepfukwa phe ozo. Epe tua onye k'ono mkpuma; tsukposhia ya ishi; mee ya iphe-iphere; chifu iya; o lashia.

⁵Nwoke ono byakwa asu g'onye ozo je. Epe gude onye k'ono gbua ya egbugbu. Nokwapho g'ephe meru igwerigwe ndu ozo, o zichaaru ozu ono; ndu epe echia iphe; ndu epe gbua egbugbu.

⁶Jasuru o buwaru-a onye lanu be o nweru, bu iya bu nwa iya, o yeru obu. O zia ya g'o je; su le ya maru-a l'onye owa-a, bu nwa iya-a be epe a-kabe-a yeru nsu.

⁷Ndu ozu-egu ono humae ya pho bya azua mgbede su: 'Ihee! Waa onye ali-a e-mechaa buru nkiya me nna iya nwuhu. Unu bya g'anyi gbua ya g'ali ono a-buru k'anyi.'

⁸Epe gude iya; woru iya megbua; tufu l'azu mgbabu ono."

⁹Noo ya; Jizosu jia phe: "'? Bukpoo gunu be onye nwe mgbabu ono e-me ndu ono? Oo-bya egbushichaa ndu-ozu mgbabu ono; woru opfu-vayinu ono ye ndu ozo l'eka.

¹⁰? Unu teke agu-swee iphe, e deru l'ekwo-opfu Chileke su: "Mkpuma, ndu akpu ulo jikaru; mechaaru bya aburu mkpuma, gudeshe ulo.

¹¹Ono buru iphe, Nnajiuphu anyi meru; o du anyi biribiri l'enya ."

¹²"Epe meahaa g'ephe gude iya; kele epe maru l'oo phe be o nmadoru etu ono. Obenu l'ephe atsu mkpukpu ebvu. Epe haa ya gbakashihu.

Apfu akiriko

(Mat 22:15-22; Luk 20:20-26)

¹³"Tobudu iya bu; epe zia ndu Farisii; waa ndu etsoje Herodu g'ephe je anwuta iya onu.

¹⁴Ndu ono, e ziru ono bya ejepfu iya bya asu iya: O-zu-iphu; anyi maru l'i bu onye ire-lanu; teme ophu o dudu onye iitsu ebvu. Ophu o dudu onye iile enya l'iphu. Iigudeje ire-lanu zia uzo Chileke." "'? Tobudu nu anyi emebyi ekemu Chileke me anyi -tufe akiriko nu Siza?

¹⁵"? Anyi tufe iya to g'anyi ta atujeshi?" Jizosu maerupho l'ephe bu tuko-l'ehu-atuko-l'obu bya asu phe: "'? Bu gunu meru g'o gude unu togboru mu okpa opfu g'unu gude nmata mu? Unu wotaeshikwa kobo lanu ge mu huma."

¹⁶Epe wotaru iya ya. O su phe: "'? Bu ishi onye yee epha onye bu owa-a, e deru iya-a?" Epe su iya: "Oo ke Siza!"

¹⁷Jizosu su phe: "O du ree; unu woru iphe Siza nu Siza; woru ke Chileke nu Chileke." Onu, Jizosu yeru phe dua phe biribiri etu.

Ke eshi l'onwu teta dzuru ndu

(Mat 22:23-33; Luk 20:27-40)

¹⁸Ndu Sadusii, bu ndu ono suru l'e tee shidu l'onwu eteta adzuru ndu ono; byapfuta Jizosu bya ajia ya su:

- ¹⁹“O-zì-iphe; iphe, Mòsisu pfuru anyi l'èkwo ekemu bu: ‘Teke ọ bu ẹ nemadzụ be nwune iya nwoke nwuhuru haa nyee ya, ata nwutaduru nwa; ge nwune iya ono lupyabe nwanyi ono g'o nwutaru onye ophu, nwuhuru anwuhu pho nwa.’
- ²⁰Su-a; ọ duru ndu du esaa l'unwune. Onye k'ogerenya luchaa nwanyi bya ahaa ya nwuhu; ophu ọ nwutaduru nwa.
- ²¹Onye ophu tsotaru iya nu lupyabe iya; onye k'ono nwuhukwapho; ophu ọ nwutaduru nwa. Onye k'eto bya emekwaapho nno
- ²²jasu unwune esaa ono lu-dzuru nwanyi lanu ono; nwushihukota; ophu ephe anwutaduru nwa. E mechaa l'ikpazu; nwanyi l'onwiya bya anwuhu nkiya.”
- ²³“O -rwua teke ee-shi l'onwu teta gbalihu; ? bu onye ole be nwanyi ono a-buru nyee ya g'ephe n'esaa ono luchaarua iya-a?”
- ²⁴Jizosu su phe: Tɔbudu iphe ono meru g'o gude ọ buru l'unu eshisweje iya; kele ekwo-opfu Chileke te edoduru unu enya; ophu ọ buru ke g'ike Chileke habe shii.
- ²⁵Le teke ndu nwuhuru anwuhu e-shi l'onwu teta dzuru ndzu be nwoke taa luhedu nwanyi; ophu nwanyi aluhedu ji. Ephe a-du g'unwu-ojozi-imigwe.
- ²⁶A bya le k'eshi l'onwu teta dzuru ndzu; ? unu ta agujedu ako ono, du l'ekwo Mòsisu ono; mbu eka ono, o pfuru k'ishishi irwu, oku enwu phoophoophoo ono? Eka ono be Chileke pfuru Mòsisu su iya: “O kwa mbedua bu Chileke ke Ebirhamu; buru Chileke ke Ayizaku; bya aburu Chileke ke Jiekopu?”
- ²⁷Bu iya bu l'oto to budu Chileke ndu nwuhuru anwuhu; ọ bu Chileke ndu no ndzu. ? Unu humaru l'unu kwatakporu shiswee uzo?

Ekemu, kpọ-chiru ishi

(Mat 22:34-40; Luk 10:25-28)

- ²⁸Nwoke lanu, bu onye ezije ekemu, no l'eka ono anu iphe, ephe atu; bya ahuma l'iphe ono, ephe aji Jizosu ono be o yeru onu ree; ọ byapfuta iya bya ajia ya su iya: “? Bu ekemu ole bu ekemu ophu kpọ-chiru ishi?”
- ²⁹Jizosu su iya: “Ekemu, kpọ-chiru ishi bu: ‘G'unube ndu Izurelu numa le Nnajiuphu, bu Chileke anyi bukwa iya pho bu Nnajiuphu kpoloko.
- ³⁰Oo ya bu g'i yee Chileke obu ngu g'o ha. Gude ndzu ngu g'o ha; me uche ngu g'o ha; me ike ngu g'o ha yee ya obu.’ Noo ekemu, kpochiru ishi bu onoya.
- ³¹Ekemu ozo, etso iya nu bu g'i yee nemadzụ ibe ngu obu g'i yeru onwongu. O to duedu ekemu, kabakpo ebo ono shii.”
- ³²Onye ezije ekemu ono su iya: “O-zì-iphe; i pfuru okpobe-opfu. Kele Chileke bu nanu. O to duedu Chileke ozo, du nu gbahaa yebedua.
- ³³Oo ya bu ge nemadzụ yee ya obu iya g'o ha; mekpoo uche iya g'o ha; me ike iya g'o ha; yekwaapho nemadzụ ibiya obu iya g'o yeru onwiya. Eme g'ekemu labo ono pfuru

tukoru kakota adu mkpa; eme le ngweja anu, a kporu oku nu Chileke me ngweja ozo, eegwejeru nu iya g'okota.”

³⁴Jizosu humaeopho l'okofuru g'onye nweru uche; okosu iya: “Eka Chileke bu eze ta aduekwa ngu enya.” Okofuchaa nno; okofhu ok duedu onye turu ama ajibaa ya aji ozobaa.

Aji k'onye bu Kereshi obu

(Mat 22:41-46; Luk 20:41-44)

³⁵Okobe teke Jizosu byaru awata ezi iphe l'eze-ulo Chileke; okojia su: “? Denu g'okude ndu ezije ekemu gbekosu lek Kereshi bu Nwa Devidi;

³⁶leka Devidi l'onwiya bek Unme-du-Nso gbek mee okosu: “Chileke suru Nnajiuphu mu: Nodu mu lekutara jasuteke mu e-me g'izopyabe ndu-okogogu ngu lokpa .

³⁷Devidi l'onwiya -nodu ekujekwanu iya Nnajiuphu; ? denu g'okude ok bukwarupho Nwa Devidi?” Ehu tsoo igwerigwe ndu numaru iya nu utso.

Jizosu epfu kek ndu ezije ekemu

(Mat 23:1-36; Luk 20:45-47)

³⁸Teke oozii iphe bek okosu: “Unu kwabejekwaru onwunu enya leka ndu ezije ekemu no; ndu okoguje agugu eye akpawuru uwe aghaphe; iphe, ephe yeru obu buru g'e keje phe erengete ekele leka adu l'igwe;

³⁹waa anodu l'aba, kakota ree l'ulo-ndzukokodu Jiu; waa anodu l'aba ndu karu enya me adu -nodu abo iphe.

⁴⁰Ephe bu ndu eripyaje ulo unwanyi, jii phe anodedu; teme ephe nodu egudeje eredege epfukpopho ogologo opfu anu Chileke. Okole okophe bek aa-kabaa anmashi ikpe ike.”

Iphe, nwanyi, jii iya anodedu gude obu iya anu Chileke

(Luk 21:1-4)

⁴¹Jizosu bya eje anodu anoo l'aguga eka aanuje Chileke iphe l'eze-ulo Chileke lehaa ndu echie okpoga l'okpoko, echiejeru Chileke okpoga. Ndu nweru iphe nodu eyegbaa okpoga, du shii.

⁴²Nwanyi lanu, jii iya anodedu, akpa nri byarwuta bya eworu afu labo, bu iya bu kobo lanu chie.

⁴³Jizosu bya ekua ndu etsoje iya nu bya asu phe: “Ge mu gbukwaaru iya unu tororo; okwa nwanyi-a, l'akpa nri-a, jii iya anodedu-a; bek kachaa eye okpoga lek g'ephe kakota ono.

⁴⁴Kele iphe, onyemonye echiegbaa bu okpoga, tsuru etsutsu; obenu lek yebedua akpapkoo nri; okole ok tukoerupho iphe, ok nweru chie; mbu je akpaa l'iphe, ok doberu k'egudeje akpata nri.”

Maku 13

Iphe, e-me teke ikpazu

(Mat 24:1-2; Luk 21:5-6)

¹Jizosu shiepho l'ime eze-ulo Chileke ono futa; onye lanu l'ime ndu etsoje iya nu su iya: “O-zì-iphè; lekpodapho egube biribiri mkpuma owa me egube biribiri ulo k'owa!”

²Jizosu su iya: “? I humaru-a eze-ulo ono, a kpuru egube ono; ee-mechaa nwukposhichaa iphemiphe ono enwukposhi; mbu k'ophu o to dudu g'o ka mma l'oo mkpuma lanu, a-kpo-pfuru l'eli nwibe iya.”

Iphe, bu o -mechaa mgboko abvu

(Mat 24:3-14; Luk 21:7-19)

³Jizosu nyihu ubvu Olivu; je anodu gha iphu l'eze-ulo Chileke gedegede. Pyita me Jiemusu me Jionu me Anduru bya ejepfu iya k'iche je ajia ya su iya:

⁴“? Bukpoo teke ole be iphemiphe ono e-mekpoo?” “? Bu gunu be ee-gude maru teke iphe ono abyagbaa ememe?”

⁵Jizosu pfuaharu phe su: “Oo 'epho g'unu leta onwunu enya g'o to du onye e-duswe unu uzo.

⁶Kele o dukwaru igwerigwe ndu a-zaru epha mu bya; bya asu l'o kwa ephebedua bu Kereshi obu. Ephe eshi l'eka ono duphua ndu du igwerigwe.

⁷G'obu te tsukahukwa unu teke unu a-nodu anu ude ogu ophu aalwu l'eka du enya; waa ophu aalwu l'eka du ntse; kele iphemiphe ono mefutakotajekwa; ole teke mgboko a-bvu teke erwukwa.

⁸Noo kele oha yele oha ibe iya a-nodu alwu ogu; ali-eze yele ali-eze ibe iya a-nodukwapho alwu ogu nkephe. Ali a-nmagbaa jijijiji l'eka du igwerigwe. Ejo okpa nri a-bya. Iphemiphe ono dukota ge teke nka beberu meahaa nwanyi, ime eme ehuka.”

⁹Ole-a; unu kwabekwaru onwunu enya. Aa-kputachakwaa unu kpuleru ndu-ikpe; e chia unu iphe l'ulo-ndzuko; teme unu a-byakwa apfuru l'iphu ndu nnajioha; me l'iphu ndu eze l'opfu ehu mu; g'ee-shi g'ephe anuma ozi-oma ono.

¹⁰Obenu le g'e mehabe; e vufutaje uzo zidzuadaru ozi-oma ono le mgboko mgburugburu.

¹¹Teke ephe kputaru unu jee ikpe; unu te vukwaru uzo wata ayo oshi iphe, unu e-pfu. Unu pfuekwapho iphe, e yeru unu l'onu teke ono; kele o to budu unubedua e-pfu iya; o bu Unme Chileke.

¹²Nwune e-deru nwune iya nu g'e gbua; nna akpuru nwa iya nu g'e gbua. Unwu e-me g'a kputa ndu nwuru phe nu gbushia.

¹³Onyemonye e-gude kele unu bu nkemu kpoo unu ashi; obenu l'onye taru nshi jasu l'ikpazu be Chileke a-dzota.

Ejo ahuma

(Mat 24:15-28; Luk 21:20-24)

¹⁴“Unu a-humakwa ejo-ahuma-ola-l'iswi ono, Danelu onye mpfuchiru pfuru unu l'onodu l'eka o gbaduru k'anodu ono. (Ge gube onye agu iphe-a rikwaa oriri iphe, o bu.) Unu -huma ya pho; ge ndu no le Jiudiya gbalakwaa lashia l'ubvu.

- 15G'onye nọ l'okpoku atụta unme te ejeekwa abahụ l'ulo lẹ ya eje ewota iphe l'ime ụlo.
- 16G'onye nọ l'egu te ejeekwa agha ọnya kẹ gẹ ya je achita uwe iya.
- 17Aphụ a-tsoru unwanyi, du ime me unwanyi, nwa angukwadu ẹra mboku ono.
- 18Oo g'unu pfuru nụ Chileke g'ọ tọ buru l'udzumini.
- 19Kele teke ono bẹ oke mkpamehu, eteke aduswee k'eshinu Chileke meru mgboko l'adu; ophu ọ byadu adubaa ozo.
- 20Teke iphe-ehuka ono e-me bẹ Nnajiuphu egbuduru iya mkpirikpu bẹ ọ tọ dukwa nemadzu, aa-dzota. Ole o gudewaa iswi ẹhu ndu ophu ọ hotaru g'ephe buru ndu nkiya gbua ya mkpirikpu.
- 21“O -duru onye suru unu teke ono l'ọ wakwa Kéreshi; ọzoo l'ọ phukwa iya; unu be yekwaru iya onu.
- 22Kele ndu a-nodu adzu ụka sụ l'ephe bu Kéreshi; ọzoo l'ephe bu ndu mpfuchiru Chileke; a-duchakwaa teke ono. Ephe a-nodu emegbaa iphe-ohumalenya, dugbaa biribiri. Iphe ono a-bucharu g'ephe e-shi dephua ndiphe; mbụ je akpaa lẹ ndu Chileke hotaru; m'ephe -je l'adu ike.
- 23Oo ya bụ; g'unu letakwapho ọnya; eshinu mu vuwaru ụzo pfuaru unu iphemiphe.

Abyabya Abubu-Ndiphe

(Mat 24:29-31; Luk 21:25-28)

- 24“Ole e -rwua mboku ono; teke ejo iphe-ehuka ono bvuerupho bẹ ọnyanwu e-jikputa; onwa echibuhu echichi.
- 25Kpokpode eshi l'igwe dashihu; iphemiphe, nọ l'igwe anmawoo anmawo lo-sweshihu.
- 26Teke ono bẹ aa-huma Abubu-Ndiphe g'ọ nọ l'urwukpu egbu nwijnwii gude ike iya, paru ẹka abya.
- 27Oobya ezia unwu-ojozi-imigwe iya; ephe abya ejee l'iphu; jee l'azu; jee l'uzo ẹkutara; jee l'ekicha lẹ mgboko mgburugburu gbiriri jasụ l'eka igwe beru alị beru; je edutakota ndu ọ hotaru.”

Iphe, e gude oshi figu anwuta

(Mat 24:32-35; Luk 21:29-33)

- 28“Sụ-a; unu gude oshi figu nwua iphe; kele obujeru; ọ -mishiwaa bya erwua irwu ophuú; l'a maru lẹ teke okpomoku ekpoje dụwaa ntse.
- 29Nokwapho g'owa-a du; teke unu humaerupho g'iphemiphe ono l'emegbaa; unu amaru l'ọ nokpowaa ntse; mbụ l'ọ nowaa g'onu-oguzo.
- 30Sụ-a; gẹ mu gbukwaaru iya unu tororo; ogbo-a taa bvuebekwa; iphemiphe-a emekota.
- 31Igwe l'a-bvukwa; alị abvu; obenu l'opfu, mu pfuru ta abyadu erebuhu ire erebuhu.”

Mbọku, ọo-buru
(Mat 24:36-44)

³²“Obenu l'ọ tọ dudu onye maru mbọku, ọ bụ; ọzoo teke iphe ono e-megbaa. Mbụ l'unwu-ojozi-imigwe ta amadu iya; ọphu Nwa Chileke ta amadu iya. Onye maru iya nụ buẹpho Chileke, bụ Nna nwẹkiya.

³³Unu kwabekwa ẹnya. Unu nwukwaru ẹnya che nche; pfuru nụ Chileke; kele unu ta amadu teke ọo-buru.

³⁴Ọ dū gẹ nwoke, eje iphe-ozo; bya aparū ibe iya haarū ndu-ozī iya; bya eje keshiaru phẹ ozi, ẹphe a-nodu eje l'ẹhu l'ẹhu. O be l'onye eche onu-abata; o pfushiaru iya ike sū iya g'ọ nwukwaru ẹnya.

³⁵Ọo ya bụ; unu nwuru ẹnya; kele unu ta amadu mbọku, Nnajiuphu, nwe unuphu a-lwa. A ta amadu; ? bụ l'uzenyashi; tọ l'echi abali; tọ l'iphe-ohenu; tọ l'utsu bẹ ọo-bata.

³⁶Ọo ya bụ; g'ọ tọ byapfutadu unu l'otulupfu l'eka unu eku mgbenya.”

³⁷“Sū-a; iphe, mu epfuru unu-a bẹ mu epfuru onyemonye. Unu nwukwaru ẹnya!”

Maku 14

Ndu-ishi achị idzu egbu Jizosu
(Mat 26:1-5; Luk 22:1-2; Jiọn 11:45-53)

¹Ọ ghuduwaa abali labo; ọbo Ojehgata erwua; waa ọbo-iphe aatajẹ buredi, ekoduru ekoko. Ndu-ishi uke Chileke waa ndu ezije ekemu nodu achokashikpoepho ọzo, ẹphe e-shi gude Jizosu lẹ mpya gbua.

²Ẹphe sū: “Ọle ọ tọ bukwaru nta-a, aabo iphe-a; a -nonyakwaa ọ buru ọgu eghirigha.”

Aawu Jizosu manū, eshi mkpọ lẹ Betani
(Mat 26:6-13; Jiọn 12:1-8)

³O be gẹ Jizosu nọ lẹ Betani; o jee ibe Sayimonu onye ekpenta shi eme. Noo ya; ọ nodukwadu l'eka ono eri nri; nwanyi lanu gudeepho mgbere, ama ntumatu bata. Mgberere ono bẹ manū, eshi mkpọ, ere ire shii, bụ manū-nadu jiru ejiji. Nwanyi ono bya akū-kwofuepho olu mgberere ono bya eworu manū ono wua Jizosu l'ishi.

⁴Ẹhu ghuahaa ndu haru nodu l'eka ono egbu. Ẹphe sū: “? Bū gunu bẹ e gude emebyishi eguru manū ọwa?”

⁵Manū ono sūru g'ee-reta iya iphe, dū g'ukporo pangu lẹ pangu iri gude keshiaru ndu akpa nri.” Ẹphe baaharu nwanyi ono mba.

⁶Jizosu sū phẹ: “Unu haa ya. ? Bū gunu meru g'o gude unu nodu epfuchi iya nchi? ? Unu ta amadu l'ọo ọkpobe iphe bẹ o meru mu egube ono?”

⁷Ndu akpa nri bẹ unu l'ẹphe anọ tekenteke; teke dukpoepho unu ree; unu emeeru phẹ iphe-oma. Obenu lẹ mbedua ta abudu tekenteke bẹ mu l'unu a-nodu.

⁸Oo iphe, nwanyi-a a-du ike mee be o meru ono. O vuwaa uzo tee ogwehu mu manu gude kwakobe mu k'a -ta asu teke ee-li mu.

⁹Ge mu gbukwaaru iya unu tororo; iphe, bukpo ekameka, a saru ozi-oma-a le mgboko-a mgburugburu be aa-kojeekwapho ako iphe-a, nwanyi-a meru-a gudeje nyata iya.”

Jiudasu eederu Jizosu eye l'eka ndu Jiu

(Mat 26:14-16; Luk 22:3-6)

¹⁰Jiudasu Isukariyotu, onye lanu l'ime umadzu iri l'ebo ono bya atugbua jepfushia ndu-ishi uke Chileke ge ya deru Jizosu ye phe l'eka.

¹¹Ephe numae ya pho; ehu tsoahaa phe utso. Ephe kwee ya okpoga. O choahaa uzo, oo-shi deru iya ye phe l'eka.

Nri-enyashi Ikpazu

(Mat 26:17-30; Luk 22:7-23; Jion 13:21-30; 1Kor 11:23-25)

¹²O rwua l'eswe, abahu l'obo-iphe, aataje buredi, ekoduru ekoko ono, bu mboku ono be ephe egbuje nwaturu obo Ojehgata; ndu etsoje Jizosu su iya: “? Bu awe be o du ngu g'anyi je edoziaru ngu gi nodu ria nri obo Ojehgata obu?”

¹³O bya ezia umadzu ebo l'ime ndu etsoje iya nu bya asu phe: “Unu bahu l'ime mkpukpu Jierusalemu. Unu -rwuepho eka ono be o duru nwoke, e-vuru ite, mini du byapfuta unu. Unu tsoru iya.

¹⁴Eka o jenyaa ru o bahu; unu je asu onye nwe unuphu ono l'onye ezije unu iphe suru: “? Denu eka mu a-nodu mu le ndu etsoje mu nu ria nri obo Ojehgata?”

¹⁵Oo-goshi unu ulo-eli; goshi unu oma ulo, no le k'eli iya; mkpuru ono hakpoe pho osa, e dobechawaru oshi; dozichawaa ya g'oo-du; l'a nodu iya ria nri. Unu bahu eka ono je akwakoberu anyi nri obu.”

¹⁶Ndu etsoje iya nu tugbua bya abahu l'ime mkpukpu ono. O buerupho g'o pfuru phe iya bu g'iphemiphe, du. Ephe nodu l'eka ono kwakobeahaa nri obo Ojehgata ono.

¹⁷O be l'uzenyashi; ye le umadzu iri l'ebo ono swiru bahu l'eka ono.

¹⁸Ephe ri je pho nri ono; Jizosu su phe: “Ge mu gbukwaaru iya unu tororo; o kwa onye lanu le g'unu no l'eka-a be l'e-deru mu ye l'eka ndu achu ishi mu; mbukwa onye mu l'iya tukoru eri nri l'eka-a.”

¹⁹O rwua phe l'obu. Ephe jiahaa ya nanu nanu su: “? Bu mbedua? ? Too bu mbedua?”

²⁰O su phe: “G'unu ha unu n'iri l'ebo be o bu onye lanu; onye mu l'iya yegbaberu eka l'oba-nri lanu-a.

²¹Abubu-Ndiphe l'a-lakwa g'e deru iya l'ekwo-opfu Chileke. Ole nshoro onye ono, ee-shi l'eka iya deru Abubu-Ndiphe ye l'eka ndu achu ishi iya ono. O gogo kakwaru onye ono ree; ome a ta nwuduru iya ilile.”

²²No iya; Jizosu bya ewota buredi bya ekele Chileke ekele g'ephe eri nri ono bya anyawashia ya bya anugbaa phe bya asu phe: “Unu ngge ria. Owa-a bu ogwehu mu.”

²³O bya ewolita okoro bya ekelekwapho Chileke ekele bya eworu iya nu phe; ephe tuko ngua.

²⁴O su phe: “Owa-a bu mee mu, a gbashiru l'iswi ehu igwe oha. Chileke gude mee mu ono eme g'ogbandzu, shi mu l'eka vuru ire.

²⁵Su-a; ge mu gbukwaaru iya unu tororo; mu ta abyakwa angubaa mee, shi l'akpuru vayinu gbiriri jasu teke mu a-ngu k'ophuu le mgboko ophuu ke Chileke.”

²⁶Ephe kwechaa ebvu, e gude aja Chileke ajaja; bya ejeshia l'ubvu Olivu.

Pyita a-gọ le ya ta amadu Jizosu
(Mat 26:31-35; Luk 22:31-34; Jion 13:36-38)

²⁷Jizosu su phe: “G'unu hakota be e-mechaa hakota mu gbala; mbu g'e deru iya l'ekwo-opfu Chileke su: ‘Mu e-chigbu onye eche aturu; g'aturu iya agbakashihu.’

²⁸Teke e meerupho ge mu shi l'onwu teta dzuru ndzu be mu e-vukwaru unu uzo jeshia Galili.”

²⁹Pyita su iya: “Ndu ophuu je l'a-hakota ngu; be ephe a-hakwa ngu; o kwa le mbedua ta abyadu aha ngu.”

³⁰Jizosu su iya: Ge mu gbukwaru ngu iya tororo; “Ntanu-a; mbukwa l'enyashia be oke-oku bya ara ora ugbo labo be i goakwaru ugbo eto l'i ti madu mu.”

³¹Pyita kabaa ya epfushi ike su: “Obetaru e je l'atuko mu le ngu gbua; mu ta abyakwa l'aha ngu ililekpoo.” Ndu ophuu tuko pfudzuru nno.

Jizosu epfu anu Chileke le mgbabu Getusemeni
(Mat 26:36-46; Luk 22:39-46)

³²Ephe byarwutaepho l'eka eekuje Getusemeni; o su ndu etsoje iya nu: “Unu nodu anoo l'eka-a ge mu je epfuru yeru Chileke.”

³³O duta Pyita waa Jiemusu waa Jionu ephe swiru tugba; meji wata iya aku photophoto; ndzu guahaa ya.

³⁴O su phe: “Ha; egube owa! Meji akukwa mu pho photophoto; mbu le meji abyaakwaa mu atofu. Unu nodukwa l'eka-a che nche.”

³⁵O jeribeerupho nwanshii; o daa kpurumu l'alj wata epfu anu Chileke su g'a maru: ? oo-kwe g'iphe-ehuka ke nwa teke ono ta abyapfuta iya.

³⁶O su: “Nna; Nna; oo ngu bu onye a-du ike mekota iphemiphe; nafunu mu okoro iphe-ehuka owa-a! Ole o kwa g'o to bukwa iphe, du mu l'uche l'e-me; g'o bukwaru iphe, du gubedua l'uche.”

³⁷O byatashia; Pyita phe nodu ekuwaa mgbenya. O su Pyita: “Sayimonu! ? Iiku mgbenya? ? Ti dudu ike nwuru enya chefua nche awa lanu?”

³⁸Unu nwuru ɛnya; pfuru nɔ Chileke g'o to kwe g'unu nmalahɔ l'ohutama. Mma nemadzu be ɔ nodujekpokwaa evushi evuvu ike; obenu le nemadzu l'onwiya be ike ta adudu.”

³⁹Ɔ tugbukwaa ozo bya ejekwa awata epfu anɔ Chileke epfukwa iphe-a, o shihawaa pfua.

⁴⁰Ɔ bya alwaphutakwa azu byatashikwa; ephe nodu ekukwapho mgbenya; kele mgbenya jiru phe ɛnya ejiji; ophu ephe amadu iphe, ephe e-pfuru iya.

⁴¹Ɔ byapfutakwa phe pho k'ugbo eto; ɔ su phe: “? Unu nokpoepho le mgbenya g'unu no iya? ? Unu nokpokwadaa le nwatuta unme unu obu? Ɔ duwaa ree nta-a. O rwuwaru. Abubu-Ndiphe be aabyaakwaa ederu ye l'eka ndu eme iphe-eji.”

⁴²“Unu gbeshikwa g'anyi je. Unu lekwa l'onye obu, e-deru mu ye obu byaakwaru.”

Eegude Jizosu

(Mat 26:47-56; Luk 22:47-53; Jion 18:3-12)

⁴³Tobudu iya bu; o gudekwadua iphe ono l'eka epfu; Jiudasu onye yikwa-a l'umadzu iri l'ebo ono, l'etsoje iya nu-a byawa. Yele igwe oha swiwaru. Ephe pagbaarɔ mma mekpoo mgboro. Ndu ziru phe nu bu ndu-ishi uke Chileke me ndu ezije ekemu me ndu bu ogerenya.

⁴⁴Onye ono, eme g'o deru iya ye phe l'eka onoya pfuwaru phe iphe, ya e-me g'ephe gude maru onye ophu o bu. Ɔ suhawaru phe: “Oo onye mu e-jepfu je etsutsua onu bu onye ophu o bu. Unu kpota iya gude tugbua; unu eche iya nche ree.”

⁴⁵Abyarwuta, Jiudasu abyarwuta; o jepfu Jizosu je asu iya: “Onyibe!” Bya anma iya akpa tsutsua ya onu l'asha.

⁴⁶Ndu ono je azupyabe Jizosu; kpuru iya tugbua.

⁴⁷Onye lanu, pfuru le mgboru phe l'eka ono miopho mma iya swaramu; gbua nwokoro onye-ishi ndu-ishi uke Chileke; pafu iya nchi.

⁴⁸Jizosu su ndu byaru iya egude: “? Unu chigbaa mma; chiru mgboro abya mu egude? ? Mu bu onye ana nfu?”

⁴⁹Mu l'unu shikpoo anoduje mboku-mboku l'eze-ulo Chileke; eka mu ezi unu iphe; ophu unu egudekpodaaru mu. Ole oo g'iphe, e deru l'ekwo-opfu Chileke mee g'e deru iya.”

⁵⁰Ndu etsoje iya nu toko paru iya haa gbakashihu.

⁵¹Ɔ duru nwokorobya lanu, tsoru Jizosu. Ebe ɔ dudu iphe, o yeru l'ehu; gbahaepho ekwa ocha, ɔ gbaphuru onwiya l'ehu. E meahaa g'e gude iya.

⁵²Ɔ paru ekwa ochaa ono haaru phe; kwofu gbaru oto gbalaa.

Jizosu no l'iphu ogbo-ikpe ndu Jiu

(Mat 26:57-68; Luk 22:54-55,63-71; Jion 18:13-14,19-24)

⁵³Noo ya; ephe kp̄ta Jiz̄osu kp̄jeru onye-ishi ndu-ishi uke Chileke. Ndu-ishi uke Chileke; m̄e ndu b̄u ogerenya; m̄e ndu ezije ekemu bya edzugbua.

⁵⁴Pȳita n̄odu etso iya ụzenya ụzenya bya etsoru ph̄e bah̄u l'ibe onye-ishi ndu-ishi uke Chileke ono. O je an̄odu an̄o l'eka ndu nche n̄o; nyaahaa ōku.

⁵⁵Ndu-ishi uke Chileke m̄e ndu ōgbo-ikpe ono g'ephe ha ch̄oahaa iphe, ephe a-s̄u l̄e Jiz̄osu meru; g'ee-shi kpee ya mpfugbu; ōphu ō d̄udu iphe, ephe h̄umaru, o meru.

⁵⁶A d̄ukpoo igwerigwe gude ibo gbaa ya ekebe; ōphu ekebe ph̄e adagbaj̄edu.

⁵⁷Ndu agb̄eshi d̄zuahaa ụka s̄u:

⁵⁸Anȳibedua n̄umakpooru l̄e nch̄i anyi l'eka oopf̄u s̄u: “Mu e-mebyishi eze-ulo Chileke ōwa-a, b̄u nemadz̄u gude eka kp̄a ya-a; l'ime abal̄i eto; mu akp̄a ozo, ete egudedu eka kp̄a.”

⁵⁹Ōphu ekebe ph̄e adak̄otakarupho l'ono.

⁶⁰Onye-ishi ndu-ishi uke Chileke bya agbalihu l'edzudzu-oha ono bya aj̄ia Jiz̄osu s̄u: “? Tii yedu ōnu l'iphe, b̄u ekebe ōwa-a, ephe agbagbaa ngu-a?”

⁶¹Ōphu o pfuduru op̄fu; ō n̄okirishiepho nwadoo. Onye-ishi uke ono j̄ia ya ozo s̄u iya: “? B̄u ngu b̄u K̄eshi ōbu? ? I b̄u Nwa Onye ono, a ḡoru Ōnu-oma n̄u ono?”

⁶²Jiz̄osu s̄u iya: “Ee; ōo mu b̄u iya. E -mechaa b̄e unu a-h̄umakwaa Ab̄ubu-Ndiphe l'eka ō n̄o l'ekutara Chileke, b̄u Ōkalibe-Kak̄ota-Ike. Unu ah̄umakwa iya ph̄o l'eka ō n̄o l'urwukpu shi l'imigwe abya.”

⁶³Onye-ishi ndu-ishi uke Chileke ono woru uwe nkiya zijaa s̄u: “? B̄ubahunaa ekebe gunu ozo b̄e anyi ach̄okwadu?”

⁶⁴? Unu n̄umawaru ep̄fubyishi, oopf̄ubyishi Chileke? ? B̄u gunu b̄u ikpe unu?” Ephe t̄uko nmaa Jiz̄osu ikpe ōnwu s̄u: “Iphe, gbaru iya n̄u b̄u ōnwu.”

⁶⁵Ephe v̄uahaa ya ōnu-mini; woru iphe kechia ya enya; chiahaa ya echachi; s̄u iya: “Pfunaa mp̄fuchiru ōbu!” Ndu nche kp̄ta iya awago iya eka.

Pȳita ago l̄e ya ta amad̄u Jiz̄osu

(Mat 26:69-75; Luk 22:56-62; J̄ion 18:15-18,25-27)

⁶⁶Ḡe Pȳita n̄oro l'etezi l'ulo-ikpe ono; onye lan̄u l'ime unwumboko, ejeru onye-ishi uke ono ozi ghatashia;

⁶⁷bya ah̄uma Pȳita l'eka ōonya ōku; bya elee ya enya s̄u iya: “I ȳikwa l̄e ndu etsoje nwophu Nazaretu; mb̄u Jiz̄osu!”

⁶⁸O gofu s̄u iya: “O to dokwaru mu enya! Mu ta amakwa iphe, iipfu.” O l̄ufu l'eka ono mb̄u Pȳita; je an̄odu l'onu ōguzo. Oke-ōku raa ōrà.

⁶⁹Nwamgboko ono h̄umakwa iya ozo bya awatakwa ep̄furu ndu pfuru l̄e mgboru eka ono s̄u ph̄e: “Nwoke-a ȳikwa l̄e ndu etsoje Jiz̄osu.”

⁷⁰Pyíta gòfukwa ọzo. Ọ nọpho nwanshii; ndu p̄fugbaru lẹ mgboru ẹka ono sù Pyíta: “Ì yìchaa ya-a. ? Tì b̄du onye Gálili?”

⁷¹Ọ wata eri angù sù gẹ Chileke gbukwaa ya ilu mẹ ọ -b̄du ire-lanù bẹ ya ep̄fu ono; sù: “Mu ta amakwa onye ono, unu ep̄fu op̄fu iya ono.”

⁷²Oke-ọku raa ọrà teke ono teke ono k'ugbo ẹbo. Pyíta nyata gẹ Jizọsu p̄fujeru ono sù: “Oke-ọku bya ara ọrà ugbo labọ bẹ ì gọakwaru ẹgo ugbo ẹto l'ì tì madù mu.” Ọ raahaa ẹkwa.

Maku 15

Payìleti aji Jizọsu aji

(Mat 27:1-2,11-14; Luk 23:1-5; Jìon 18:28-38)

¹Nchi b̄ohuepho; ndu-ishi uke Chileke; mẹ ndu b̄u ọgerenya; mẹ ndu ezije ekemu; mbù iphe, b̄ukpoo ọgbo-ikpe ndu Jiu g'ẹphe hakọta bya achia idzu; e kee Jizọsu ẹgbu bya akpuru iya je eye Payìleti l'ẹka.

²Payìleti bya aji ya sù: “? Ì b̄u Eze ndu Jiu?” Jizọsu sù iya: “Ọoekwa ngu phọ bẹ o shi l'onu.”

³Ndu-ishi uke Chileke bya ep̄fushiahaa igwerigwe iphe, ẹphe s̄uru l'o meru.

⁴Payìleti byakwa asù Jizọsu: “? Tọ dukpoda iphe, iipfu? ? Ọ kwa l'ì n̄umaru igwerigwe iphe, ẹphe ep̄fugbaa l'i meru?”

⁵Ophu Jizọsu ep̄fueduru op̄fu. Ọ t̄ufu Payìleti ẹhu.

Eekpe Jizọsu mp̄fugbu

(Mat 27:15-26; Luk 23:13-25; Jìon 18:39—19:16)

⁶Noo ya; ọ b̄uwaa omelalì phẹ l'anodu abọ Ọbo Ojeghata ono bẹ Payìleti ahajeru phẹ onye mkpọro lanù g'ọ la; mbù onye ẹphe s̄ukpoerupho g'ọ haarù phẹ.

⁷Ọ duru onye mkpọro lanù, eekuje Barabasù, yì lẹ ndu kwefuru ḡovumenti ike bya egbukwaaphọ ọchi; a t̄ua phẹ mkpọro.

⁸Igwe ọha ono bya bya arwọahaa Payìleti g'o meeru phẹ iphe, oomejehawaru phẹ.

⁹Payìleti sù phẹ: “? B̄u gẹ mu haarù unu Eze ndu Jiu g'ọ la tọ?”

¹⁰Kẹle o doru iya ẹnya l'ọo ẹnya-p̄f̄urup̄furu bẹ ndu-ishi uke Chileke gude kp̄taru iya ya.

¹¹Ndu-ishi uke Chileke ono kpalia igwe ọha ono sù phẹ g'ẹphe kebeẹkwapho g'ọ hachiaru phẹ Barabasù.

¹²Payìleti sù phẹ: “? Unu s̄ukwanuru gẹ mu mee onye-a, unu s̄uru l'ọ b̄u Eze ndu Jiu-a gunu?”

¹³Ẹphe t̄ua ọzu; sù: “P̄f̄u-gbua ya!”

14Payileti sụ phẹ: “? Kẹ ọ́nu? ? Bụ ọ́nu bụ iphe, dọ eji, o meru?” Epe kabakpoo ya arashi ike sụ: “Pfu-gbua ya!”

15Oo ya bụ; Payileti choahanaa gẹ ya mee iphe, dọ ikpoto oha ono ree; bya ewonuru Barabasu haa g'ọ la; kpuru Jizosu nū ndu ojogu g'ephe chia ya echachi. Epe chichaa ya iphe; o kpuru iya nū phẹ g'ephe je je akpopyabe iya l'oswebe.

Ndu ojogu eme Jizosu sukusuku

(Mat 27:27-31; Jion 19:2-3)

16Ndu ojogu bya akpuru Jizosu bahu l'eze ulo nnajioha, bụ Payileti bya ekukota iphe, bụ ndu ojogu g'ephe ha.

17Epe bya eworu uwe kpowula-kpowula uswe yee ya bya egude obvu kpaa okpu woru kpube iya;

18bya ekelehaa ya ekele ndu ojogu asuje iya: “Ndzụ dukwa ngu! Eze ndu Jiu!”

19Epe gude mgboro kujukposhiahaa ya ishi; gbuaaha ya onu-mini; gbuaaha iya ikpere l'alị gude akwabe iya ubvu.

20Epe meghechaa ya sukusuku ono bya eyefu iya uwe uswe ono; bya eyee ya uwe iya; bya akpuru iya jeshia g'ephe je je akpopyabe iya l'oswebe.

Aakpopyabe Jizosu l'eli oswebe

(Mat 27:32-44; Luk 23:26-43; Jion 19:17-27)

21Epe tugbua bya ahuma Sayimonu nwoke Sayirini, shi ndu-egu phẹ alwa. Oo ya bụ nna Aleguzanda yele Rufosu. Tobudu iya bụ; epe kebuta nwoke ono g'ọ vuta oswebe, ee-gude kpogbua Jizosu.

22Epe kpuruwua Jizosu l'eka eekuje Golugota, bụ iya bụ “Okpokoroko Ishi.”

23Epe woru mee, a gwaru manụ-meru nū iya g'ọ ngua. Ophu o kwedu iya angungu.

24Epe woru iya kpopyabe l'oswebe l'eka ono; woru uwe iya kee. Epe tūaru iya ido g'ephe maru ophu a-dabarū onyenonu.

25Teke ono, a kpopyaberu iya l'oswebe ono bụ l'enyawu agbakota.

26E dee iphe ono, e boru iya ibo iya ono l'eli oswebe ono, bụ iya bụ l'ọ bụ “Eze ndu Jiu.”

27Eka ono be a kpopyabekwarupho ndu ana nfu umadzu labo. Onye ophuu nodu lekutara iya; onye ophuu lekicha iya.

28Iphe, e dehawaru lekwo-opfu Chileke vūa sūru: “A guru iya yeru ndu ejo-iphe.”

29Ndu aghata aghata nodu ekweru iya une asuje iya: “Hee! ? Tobudu ngu bụ ophu sūru l'ii-nwukposhi eze-ulo Chileke; gude ujiku eto kpukwaa ya?

30Nyizetanū l'oswebe ono bya adzo onwongu.”

31Ndu-ishi uke Chileke me ndu ezije ekemu pfuaru iya kwaphu kwaphu sū: “O dzoru ndu ozo; ophu o duedunu ike dzoo onwiya.”

³²“Ngwanụ ọ́ ọ́ Kéreshi ọ́bu, ọ́bu Eze ndu Ízurelu shinu l'oswebe ono nyizeta nta-a; anyi -humakwanu iya; anyi amaru l'ọ́ ọ́bupho Kéreshi eviya.” Unwoke labo ono, a kpopyaberu epe l'iya ono ọ́du akokwa iya pho onu.

Anwuhu Jizosu

(Mat 27:45-56; Luk 23:44-49; Jion 19:28-30)

³³Enyanwu keerupho l'ishi; nchi jihu l'alị ono mgburugburu; ọ́ ọ́gbiriri jasụ l'enyanwu agbuze.

³⁴Enyanwu gbuzeepeho; Jizosu chia mkpu sụ: “Eloyi! Eloyi! ? Lema sabakutani?” Bu iya ọ́bu: “Chileke mu! Chileke mu! ? Bu ọ́gunu be o gude i haa mu nkinyi mu?”

³⁵Ndu haru pfulu l'eka ono numa iya sụ: “Unu gebekwa; o dukwa g'ooku Elayijia.”

³⁶Onye lanu gbagbua je eworu asancha ophu amije mini woru gwoo le mee-veniga; woru tsebe l'eli oshi, du ogologo woru nu iya g'o ngua; sụ g'a maeduru: ? Elayijia a-bya ekufuta iya.

³⁷Jizosu bya echishia mkpu ike bya atu-buhu unme; o buru iya anwuhu.

³⁸Ekwá, eegudeje gbobuta enya eka aagwaje Chileke, ọ́ l'ime eze-ulo Chileke ono shiepho l'ishi gbaepho ke tararaa jasụ l'alị gbajahu ebo.

³⁹Onye-ishi ojogu ndu Romu, pfulu Jizosu l'iphu teke ono humaeppho g'o chiru mkpu nwuhu nno o sụ: “? Unu maru-a le nwoke-a bukwa Nwa Chileke eviya?”

⁴⁰O duru unwanyi, nokwapho uzanya l'eka ono ele enya g'ephe maru iphe, eme nu. Meri onye Magudala yi l'unwanyi ono. Meri ne Jiosesu; waa Jiemusu ke nwata yiru iya; waa Salomi.

⁴¹Unwanyi ono shi etso Jizosu bya ejeru iya ozi teke o no le Galili; mekpowaro unwanyi ozo, tso iya bya Jierusalemu, nokwapho l'eka ono ele enya.

Elili Jizosu

(Mat 27:57-61; Luk 23:50-56; Jion 19:38-42)

⁴²Noo ya; o rwua ge nchi jihuerupho le mboku, akwakobeje k'echele iya bu eswe atuta unme;

⁴³Jiosesu, bu onye Arimatiya bya aburu onye nweru enya l'ogbo-ikpe ndu Jiu, shihaakwapho uzanya leta enya teke Chileke e-goshi l'oo ya bu eze; shihukwapho obu ike jepfu Payileti je arwo ya g'a haaru iya odzu Jizosu ge ya je elia.

⁴⁴O dukpoo Payileti biribiri shii l'o nwuhu-kebwaru. O bya ekua onye-ishi ndu ojogu ono bya aja ya: “? Bu eviya l'o nwuhwaru?”

⁴⁵Payileti numachaepho l'onu onye-ishi ndu ojogu ono le Jizosu nwuhwaru; o su Jiosesu g'o jearo je apata iya lia.

⁴⁶Jiosesu bya atugbua bya eje anmata ekwa ochaa; bya eje je apazeta odzu Jizosu; bya eworu ekwa nmabechaa ya; bya eje enyebe odzu iya ono l'ilu, a turu le mkpuma; bya eswita oke mkpuma swichia onu ilu obu.

⁴⁷Meri onye Magudala waa Meri ne Jiosesu nọdu hụma ẹka e liru iya.

Maku 16

Eshi l'ọnwu teta dzuru ndzu

(Mat 28:1-8; Luk 24:1-12; Jiọn 20:1-10)

¹O be l'uzenyashi ge nsọ eswe-atuta-unme ono bvuerupho; Meri onye Magudala waa Salomi waa Meri ne Jiemusu ke nshii tugbua jeshia je akpata manụ, eshi mkpo, du iche iche, ephe e-te Jizosu gude kwaa ya.

²O be le nchi abohu mbochi Sonde; ephe jeshia l'ilu ono g'enyawu wawaru.

³Ephe nodu epfugbaa su: “? Bupoo onye e-swifuru anyi oke mkpuma ono, no l'onu ilu ono?”

⁴Ephe jeshia apali enya; e swifuwaa mkpuma obu. Mkpuma, eepfu opfu iya obu pakporu ẹka apaa.

⁵Ephe kwoba l'ime ilu ono; bya ahuma nwokorobya, no phe lekutara, yeru kpowula-kpowula uwe ochaa. O du phe biribiri; ndzu guahaa phe.

⁶Onye ono su phe: “Ndzu ba agushi unu. ? O kwa l'oo Jizosu onye Nazaretu be unu achọ; mbu onye-a, a pfugburu l'oswebe-a? O tetaakwaru dzuru ndzu ozo! O to nohekwa l'eka-a. Unu byanu ahuma ẹka e shi lia ya.

⁷Unu je epfuaru iya ndu etsoje iya nu waa Pyita l'o vuwaa unu uzo jeshia Galili; l'unu a-huma iya l'eka ono, bu iphe, o pfuhawaru unu-a.”

⁸Ephe kwofuta l'ilu l'eka ono bya agbagbua lashia. Onu kugbabejaa phe akugbabe. Ehu nodu etekwa phe pho etete. Ophu o dudu onye ephe pfuru iphe ono; ẹka ndzu agu phe.

⁹Jizosu shi l'ọnwu tetachaepho le mboku mbu l'idzu ono; o mee ge Meri onye Magudala vuru uzo huma iya, bu iya bu nwanyi ono, o chifuru ejo obu esaa, shi buru iya l'ime ehu ono.

¹⁰Meri ono tugbua je epfuaru iya ndu ephe le Jizosu shi aswije l'eka ephe no ara ẹkwa iya.

¹¹O pfuchaaru phe l'o dzu ndzu; teme le ya humakporu iya l'enya; ophu ephe ekwedu l'oo eviya.

¹²E mejaa; Jizosu gbaa ugbugba ozo byapfuta umadzu labo l'ime ndu etsoje iya nu l'eka ephe eje l'echiegu.

¹³Ephe lwaphuta azu je epfuaru iya ndu ophuu; ophu ephe ekwekwapho.

Jizosu egoshi ndu etsoje iya nu onwiya

(Mat 28:16-20; Luk 24:36-49; Jiọn 20:19-23; Ndu 1:6-8)

¹⁴E mechaa; ọ bya abyapfuta ụmadzu iri lẹ nanụ ono; l'ẹka ẹphe eri nri. Ọ taahaa pẹ uta sụ l'ẹphe bụ ndu aboje obu ẹbo; waa ndu ejo ọkpoma; kele ẹphe te ekwetaduru l'iphe, ndu humaru iya nụ gẹ ya tetachaarụ dzuru ndzụ pfuru bụ eviya.

¹⁵Ọ sụ pẹ: “Unu jedzuru ẹkameka lẹ mgboko l'ophu je epfukashia ozi-oma-a g'onnyemonye nụmakota.

¹⁶Onye kwetarụ nụ; e mee ya baputizimu bẹ Chileke aa-dzọta. Onye ete ekwedu nụ bẹ aa-nma ikpe.

¹⁷Ndu kwetarụ nkemu bẹ ee-gude iphe-ọhumalenya ọwa-a hụbe ama. Ẹphe e-gudeje ẹpha mu achishi ọbvụ; gude ẹpha mu epfu l'olu Unme-dụ-Nsọ.

¹⁸Ẹphe -chita agwọ l'ẹka; ọ tọ dudu iphe, oo-me pẹ. Teke ẹphe nguru iphe, egbu egbugbu; ọ tọ dudu iphe, oo-me pẹ. Ẹphe -byia onye iphe eme ẹka l'o-wekorohu.”

Jizọsu alapfu Chileke l'imigwe

(Luk 24:50-53; Ndu 1:9-11)

¹⁹Noo ya bụ; Nnajiuphu, bụ Jizọsu pfuchaaru pẹ opfu ono; Chileke wolia ya woba l'imigwe. O je anọdu l'ẹkutara Chileke.

²⁰Ndu etsoje iya nụ laa je epfukashiahaa ozi-oma ono l'ẹkameka. Nnajiuphu nọdu eyeru pẹ ẹka l'ozi ono; shi l'iphe-ọhumalenya, ẹphe emegbaa egoshi l'ozi-oma ono, ẹphe ezi ono bụ l'ẹka Chileke bẹ o shi. Nokwa g'ọ dụ.

Luku

Luku 1

¹Eshi ọphu a dụwaa igwe wata ede akọ k'iphe, meẹbekpooru l'echilabọ anyi ono l'ẹkwo;

²ọ buerupho g'a kọru iya anyi; mbụ ndu shi lẹ mbụ buru ndu humaru l'ẹnya mechaa bya aburu ndu ejeru opfu Chileke ozi; bụ gẹ ndu ono edegbaa;

³bẹ ọ dukwa mu phọ ree; onye ẹguru, bụ Tiyófilosu; gẹ mu ọtoru ngu iphe, meru nù l'ọkpa iya l'ọkpa iya; eshinu mu ọtoru nwẹhu nwụkota iphemiphe ono, daru nù ono eshikpọo lẹ mbụ.

⁴Iphe, mu ede bụ g'ị kwatakpọo maru ọkpobe-opfu ono, e gude ọnu zia ngu ono.

Ozi kẹ l'aa-nwụ Jionu, onye emeje baputizimu

⁵Teke Herodu bụ eze ndu Jiudiya bẹ ọ duru onye ẹpha iya bụ Zakaráya, onye uke Chileke. O shi l'ẹkali ọgbo uke kẹ Abáyijia. O luru nwanyi, shi l'ọkpa-ipfu Eronu, bukwapo ọkpa-ipfu ndu-uke Chileke. Ẹpha nwanyi ono bụ Elízabetu.

⁶Ẹphenebo ọkoru buru ndu pfulerekoto l'iphu Chileke; emeẹbekota ekemu Chileke g'ọ ha bya etsokotakwapo nsọ Chileke g'ọ ha. Ẹphe te emejeduru iphe, a taru phẹ uta.

⁷O buepho l'ẹphe luru kahụ; ọphu ẹphe anwutaduru nwa; kele Elízabetu ta atsudu ime.

⁸Tobudu iya bụ; Zakaráya nọdu eje ozi uke iya l'iphu Chileke; kele ozi uke rwuberu ẹkali ọgbo uke nkepẹ.

⁹A turu ido, bụ nsọ, duru phẹ nù; ọ daaru iya l'abahụ lẹ mkpuru l'ẹka ẹnya ẹka eegwejeru Chileke ngweja nọ je egwee ngweja ùnwù-isensu, ẹnwuru iya eshi kwẹekweekwee.

¹⁰Ikpoto ndu ono l'ọphu ọko kuru l'etezi epfu anụ Chileke g'ọ gbaru teke eeyeje ọku l'ùnwù-isensu ono.

¹¹Ojozi-imigwe, shi l'ẹka Nnajiuphu chaa Zakaráya l'iphu bya anọdu l'ẹkutara ọrunweja ono.

¹²Meji tsukaha Zakaráya g'ọ humaru iya. Ndzụ wata iya agụgu.

¹³Ojozi ono sụ iya: “Gẹ ndzụ ba agushi ngu Zakaráya; kele opfu, i pfuru nù Chileke tubawaru iya lẹ nchị. Nta-a bẹ Elízabetu, bụ nyee ngu l'a-nwutaru ngu nwa-nwoke. Iphe, ịi-gụ iya bụ Jionu.

¹⁴Oo ya bụ g'ẹhu atsọo ngu; l'i tee ẹswa; l'a-dụ igwerigwe tee ẹswa mẹ a -nwue ya phọ.

¹⁵Kele ọo-buru onye nweru ẹnya l'iphu Nnajiuphu, bụ Chileke; teme ọ tọo ngukwa mee; ọzoo iphe, aangụ angungu, bụ iphe, atsụ atsutsu. Unme Chileke bẹ e-shi l'ẹpho ne iya buru iya l'ẹhu.

- ¹⁶Igwerigwe unwu Ízurelu bẹ oo-me g'ẹphe dakọbe jepfu Nnajiuphu, bụ Chileke pẹ.
- ¹⁷Oo ya bụ onye e-gude Unme Chileke; gude ike, dọ gẹ kẹ Elayijia, onye mpfuchiru Chileke vuru Kéreshi obu ọzo je akwakọberu iya ẹka. Ọo-gọ-zetaru unwegirima obu nna pẹ. Ọo-gota ndu bụ 'anu-ẹ-nchị gọru ye l'uzo okwa-ẹnya, ọphu ndu p̄fuberekoto etso; g'ee-shi g'oo-dozikwarupho Nnajiuphu ono ndu bụ ndu a-kwakọberu abyabya iya.”
- ¹⁸Zakaraya sụ ojozi-imigwe ono: “? Denu gẹ mu e-shi maru l'iphemiphe-a bụ ọkpobe-opfu; l'ẹka mu kahwaru; teme nyee mu kahwakwapho?”
- ¹⁹Ojozi-imigwe ono sụ iya: “Ọ kwa mbedua bụ Geburelu; onye anoje l'iphu Chileke. Ọ kwa Chileke ziru mu gẹ mu bya epfuru yeru ngu; zia ngu ozi-oma-a;
- ²⁰ọphu i kwetaduru l'opfu, mu pfuru bẹ a-vu gẹ mu pfuru iya. Huma ahuma; ẹ nta-a bẹ onu a-buru ngu kpurukudukuu. I tii pfubaedu opfu jasụ mboku, iphemiphe-a a-vukota. Opfu mu a-vukotakwa l'o rwuberu iya.”
- ²¹Igwe ọha kuru eche Zakaraya; ọphu ẹphe amadu iphe, meru iphe, ọono ọdu l'ime eze-ulo Chileke ono.
- ²²Ọ futashia; ọphu ọ duedu ike pfuru opfu yeru pẹ; ẹphe maru l'ọ phuru ọphulenyia l'ime eze-ulo Chileke; ọphu o p̄fuedu opfu. Ọ buwaru ẹka bẹ oogudeje epfu opfu.
- ²³Eswe ozi uke iya -bvupho; ọ lashia ibe iya.
- ²⁴A nonya; nyee ya, bụ Elízabetu tsuta ime. Ọ nokota l'ulo mkpurumkpuru onwa ise.
- ²⁵Ọ sụ: “Nta-a bẹ Nnajiuphu lecharu mu ẹnya bya eshia ọzo, dọ egube-a nafu mu iphere l'iphu ndiphe.”

Ozi, eezi; l'aa-nwu Jizosu

- ²⁶O be l'onwa, kwe Elízabetu onwa ishii, ọ tsutaru ime; Chileke byakwa ezia ojozi-imigwe, bụ Geburelu g'o je Nazaretu l'alị Gálili
- ²⁷je ezia nwamgboko ozi. Ẹpha nwamgboko ono bụ Meri. Nwamgboko ono bẹ yee nwoke teke akwaswee. Onye eje iya alulu bụ nwoke, ẹpha iya bụ Jíósefu. Nwoke ono bụ onye onu-ulo onye eze ndiche ono, bụ Dévidi.
- ²⁸Geburelu byapfuta Meri bya sụ iya: “? I dupho ya? Onye Chileke kwaberu oke ubvu! Nnajiuphu swikwaru ngu eswiru. I bụ onye Chileke gọru onu-oma nụ l'echilabo unwanyi l'opfu.”
- ²⁹Meri numa ekele ono; obu tsukahụ iya. Ọ rịa l'egomunggo iya sụ: “? Bụ egube ekele gunu bụ ọwa?”
- ³⁰Ojozi-imigwe ono sụ iya: “Gẹ ndzụ ba agushi ngu Meri; ẹ Chileke mewaru ngu eze-ipe-oma.
- ³¹Huma l'ii-tsuta ime; nwua nwa-nwoke; iphe, ii-gu iya bụ Jizosu.

³²Qo-buru onye nweru ɛnya. Ee-ku iya Nwa Okalibe-kangokotaru-nu. Nnajiuphu, bu Chileke e-dobe iya l'aba-eze onye-iche iya ono, bu Dévidi.

³³Qo-buru eze ndu onu-ulo Jiékoju jaswaruro ya; ophu o bubuhuduru eze abubuhu jasụ lẹ tuutuutuu lẹ m̄imiimii.”

³⁴Meri sụ ojozi-imigwe ono: “? Denu gę mu e-shi tsuta ime l'eka mu lẹ nwoke eteke akwaswee?”

³⁵Ojozi-imigwe ono sụ iya: “Unme Chileke l'a-bya asopyabe ngu; teme ike ke Okalibe-kangokotaru-nu l'a-bya bya emee ngu ire l'ehu. Qo ya bu; nwa ono, ii-nwu ono, bu onye du nsọ ono be ee-ku Nwatibe Chileke.

³⁶Teme; lekwa abubu ngu, bu Elízabetu tsutafuakwaru ime nwoke lẹ nka-a. Onwa owa kweakwaa ya onwa ishii; mbu onye ono, e shi eku onye ata tsudu ime ono;

³⁷kele Chileke ta adudu iphe, nyiru iya eka ememe.”

³⁸Meri sụ: “Mu nona-a! ? O kwa lẹ mu nowa Chileke l'eka. G'o dunuru mu gi pfuru.” Ojozi-imigwe ono phuhu.

Meri eje ibe Elízabetu phe

³⁹E mechaa; Meri jikobe gude oso jeshia mkpukpu lanu, no l'ali Jiuda eka ubvu jiru ejiji

⁴⁰bya abahu l'ulo Zakaraya bya ekele Elízabetu ekele.

⁴¹Elízabetu numaepho ekele Meri; nwaswa ono mee ya ukporo l'epho. Unme Chileke kparwuta Elízabetu l'ehu.

⁴²Q raa ya arara sụ: “Onye Chileke goru onu-oma nu be i bu l'unwanyi mgburugburu; teme nwa ono, no ngu l'epho ono be Chileke gokwarupho onu-oma nu.

⁴³? Bu gunu be e kweru gę gubedua, bu ne Nnajiuphu mu bya ibe mu?

⁴⁴Kele teke olu ekele ngu rwuru mu lẹ nchi be nwaswa, no mu l'epho pfulihuru tee eswa.

⁴⁵Gube nwanyi; g'ehu tso ngu utso; kele i kweru l'opfu ono, shi Nnajiuphu l'eka rwua ngu nchi ono l'a-vu.”

Ebvu, Meri agụ gude aja Chileke

⁴⁶Meri sụ: “Obu mu l'ekutse Nnajiuphu.

⁴⁷Mu nodu ete eswa lẹ Onye-Ndzota mu, bu Chileke.

⁴⁸Q guberu mube nwanyi, no iya l'eka iphe; lẹ mube nwanyi ophu bu mu be ɛnya kachaa alwalwa. Ogbomogbo e-shi nta-a wata mu eku onye a goru onu-oma nu.

⁴⁹Okalibe, bu Chileke meshiwaru mu iphe, nweru epha. Epha Chileke du nsọ.

⁵⁰Obu-imemini, ophujeru ndu atsụ iya ebvu eshije l'ogbo sweru ogbo.

⁵¹O gudewaa ẹka iya egoshije ọkpehu iya. Ndu gude etsetse ari ọriri l'obu phe be ọochikashije.

⁵²Qolo-zetaje ndu-ishi, ike du l'aba-eze phe. O nodu ekulije ndu wozeru onwophe ali.

⁵³Ndu ẹgu agu be oogudeje iphe, du ree zu-jia ẹpho; l'o su ndu nweru iphe g'ẹphe gbaru ẹka laa.

⁵⁴O gbaru ndu-ozi iya, bu Ịzurelu mkpu; mbu l'o nyataru phe; phuaru phe obu-imemini.

⁵⁵Ono buru iphe, o pfuru nna anyi oche phe, bu iya bu iphe, o pfuru Ẹbirihamu yee oshilokpa iya g'ẹphe ha.”

⁵⁶Meri no-rwua iphe, rwuru onwa eto l'ibe Elízabetu phe; teme o lashia.

Anwunwu Jiṅu, onye emeje baputizimu

⁵⁷O rwua Elízabetu l'ezeda; o bya ezeda; nwua nwa-nwoke.

⁵⁸Obutobu iya me abubu iya phe; numa egube ge Chileke phu-beru iya obu-imemini; ẹphe bya; ẹphe l'iya tee eswa.

⁵⁹Nwaswa ono nọpho abali esaa; o rwua le k'esato; ẹphe bya ebua ya ubvu. Ẹphe meahaa g'ẹphe gube iya ẹpha nna iya, bu Zakaraya.

⁶⁰Ne iya su: “Awa-o. O to bukwa iya-o. O kwa iphe, aa-gu iya bu Jiṅu.”

⁶¹Ẹphe su iya: “? I humajeru abubu unu, zaru egube ẹpha ono?”

⁶²Ẹphe bya aturu nna iya ẹka ẹba gude jia ya iphe, o du iya g'a gu nwata ono.

⁶³O maa ẹka g'a nu iya okwekpu, eedeje iphe. A nu iya ya; o dee su: “Ẹpha iya bu Jiṅu.” O dukota phe biribiri.

⁶⁴Teke ono teke ono; onu kuhaa ya; ire tushihu iya. O pfuahaa opfu gude jaahaa Chileke ajaja.

⁶⁵Ndu rwuta iphe, bukpoobu iphe, numaru iphe ono. E pfudzuru iphe ono l'ubvu ubvu ono, du l'ali Jiudiya.

⁶⁶Iphe, bukpoobu ndu numaru iya nu dobee ya pho l'okpoma phe; tuko epfugbaa su: “? Bu gunu be nwata owa-a l'a-bukpooru?” kele o doru enya le Chileke turu iya ẹka; g'o buru onye du iche.

Zakaraya epfuchiru Chileke

⁶⁷Unme Chileke kparwuta nna iya ono, bu Zakaraya l'ehu; o wata epfuchiru Chileke su:

⁶⁸G'a goru onu-oma nu Nnajiuphu, bu Chileke Ịzurelu; kele o kpapfutaru ndu nkiya bya agbata phe.

⁶⁹O meru ge Onye-Ndzota, nyiberu anyibe futaru anyi l'oshilokpa onye no iya l'eka, bu Dévidi.

- ⁷⁰Ono buru iphe, yebe Chileke gbẹ l'onu ndu mpfuchiru iya, duru iya nsọ lẹ teke ndiche pfua sụ
- ⁷¹l'aa-dzọta anyi l'ẹka ndu ọhogu anyi waa l'ẹka ndu anyi dū ashị;
- ⁷²g'ọo-phua obu-imemini ono, ọ sūru ndiche anyi phẹ lẹ ya a-phụ ono; wafua g'ọo-nyata ukwe-iphe, dū nsọ, o kweru ndu nkiya.
- ⁷³O rihakpọwaruro onye-iche, bụ nna anyi Ébirihamu angu
- ⁷⁴l'ọo-nafuta anyi l'ẹka ndu ọhogu anyi; g'anyi ejeahaaru iya ozi; ndzụ taa gudu anyi;
- ⁷⁵anyi aburu ndu dū nsọ; buru ndu pfuberekoto l'iphu iya jasụ g'anyi a-nọ-beru.
- ⁷⁶“Gube nwata ọwa-a; Iphe, ee-ku ngu bụ onye epfuchiru Ọkalibe-kangokotaru-nụ; kele ii-vuru Nnajiuphu ọzo je abọoru iya ọzo;
- ⁷⁷je emee gẹ ndu nkiya maru lẹ Chileke e-shi l'agu nvu l'iphe-ẹji dzọo phẹ;
- ⁷⁸kele oogudeje eme odoo phuaru anyi obu-imemini. Oo-me gẹ ndzọta ọphu echi echichi g'enyawu wapfuta anyi
- ⁷⁹g'ọo-buru ìphóró, duru ndu nọ l'ochii mẹ ndu ọnwu heru gabala asọ-kputa; waa g'ooduru anyi bahụ l'uzo ẹhu-guu.”
- ⁸⁰Tọbudu iya bụ; nwata ono nọdu evu; bya aka enweru egomunggo. Ọ nọo l'echiegu jasụ teke ọ futaru l'edzudzu-ọha ndu Ízurelu.

Luku 2

Anwunwu Jizọsu

(Mat 1:18-25)

- ¹Ọ buru teke ono bẹ eze nnajioha, bụ Ọgosutosu tūru ekemu; sụ g'e deshia ẹpha onyemonye l'ẹkwo; mbụ iphe, bukpo onyemonye, bu l'ọhamoha, nọ l'alị-eze iya.
- ²Ono bụ ọgú mbụ, e vuru ọzo gụa. Teke a gūru ọgú ono bụ teke Kwiriniyosu bụ nnajioha ndu Siriya.
- ³Tọbudu iya bụ; onyemonye lashia ẹka a nwuru iya; jeshia g'e dee ẹpha iya l'ẹkwo.
- ⁴Jiósẹfu shikwaphọ lẹ Nazaretu, nọ l'alị Gálili jeshia Bẹtulehemu, nọ l'alị Jiudiya; ẹka a nwuru Dévidi, bụ eze ndiche; kele Jiósẹfu shi l'ọkpa-ipfu iya; bya aburu ndu unuphu ono gẹdegede.
- ⁵Jiósẹfu yẹe nwanyị ono, e kwetawaru l'ọo-lụ ono, bụ Meri swiru jeshia g'e dee ẹpha phẹ. Teke ono bẹ ẹpho bewaru Meri l'ezeda.
- ⁶Ọ buru g'ẹphe nọ lẹ Bẹtulehemu bẹ ọ gbaru iya l'ezeda.
- ⁷Ọ bya ezeda ọkpara iya nwoke; bya eworu nwamkpirikpu ẹkwa phua ya; bya eworu iya nyebe l'iphe, eeyejeru anụ nri; kele ọ tọ dudu ẹka ẹphe a-nọdu l'ulo ndu ije.

Ojozi-imigwe ezi ndu eche aturu ozi-oma

⁸Noo ya; ọ dūru ndu eche aturu, nọ l'ẹgbudu lẹ ndu ẹka ono; swiru igwe aturu phe l'enyashi ono.

⁹Ojozi-imigwe, shi Chileke l'ẹka chafuta byapfuta phe; ogbu-nwiiinwii Nnajiuphu chaphee phe mgburugburu. Ndzū rwuta phe.

¹⁰Ojozi-imigwe ono sū phe: “Gẹ ndzū ba agushi unu; unu ngabẹ nchi. Mu byaru ezi unu ozi-oma, l'e-me g'ehu tsoo ndiphe mgburugburu utso shii.

¹¹Kele a nwuru unu Onye-Ndzota ntanu-a lẹ mkpukpu Dévidi; Onye-Ndzota, bụ iya bụ Kéreshi; bya aburu Nnajiuphu.

¹²Waa iphe, e-me g'unu maru baa: unu a-huma nwaswa, a phuru nwamkpirikpu ẹkwa; nyebe l'iphe, eeyejeru anu nri.”

¹³A bya ele enya; igwerigwe ojozi-imigwe ozo kpofutawaa byapfuta ojozi-imigwe k'ono ephe tuko aja Chileke ajaja asuje:

¹⁴“Chileke, nọ l'imigwe gbaru g'aakwabẹ iya ubvù. Amadu, nọ l'ali, bụ ndu kweru l'o yeru phe obu bẹ ẹhu a-du guu.”

¹⁵Unwu-ojozi-imigwe ono wufuepho l'ẹka ephe nọ wuba l'imigwe; ndu eche aturu ono wata epfufu sū: “G'anyi jeeshikwa Betulehemu je ahuma iphe-a, meru nu-a, Nnajiuphu turu anyi onu iya-a.”

¹⁶Ephe gude oso choru iya jeshia; je ahuma Meri yee Jiófesu bya ahumakwapho nwaswa obu, zẹ l'iphe, eeyejeru anu nri obu.

¹⁷Ephe humachaa ya; ephe bya eworu iphe ono, e pfuru phe l'opfu ẹhu nwata ono woru kooru ndu nọ l'ẹka ono.

¹⁸Ọ tufukota iphe, bụ ndu nūmaru iya nū ẹhu; mbụ iphe ono, ndu nche aturu pfuru phe ono.

¹⁹Meri tukokpoephe iphe ono g'ọ ha kwakobe l'okpoma; agbaru iya egomunggo.

²⁰Ndu eche aturu ono lasha. Ephe nodu eje bya etu Chileke epha; aja iya ajaja iphemiphe ono, ephe nūmaru ono waa iphe ono, ephe hūmaru ono, dūephe g'e pfuru phe iya onoya.

Eebu Jizosu ubvù

²¹A nọ-dzuepho abali esato; e bua nwata ono ubvù; bya agua ya Jizosu, bụ iya bụ epha, ojozi-imigwe pfuhawaruro; teme a tsuta ime iya ono.

Eeye Jizosu l'ẹka Chileke l'eze-ulo Chileke

²²O rwua teke ọ gbaru Meri l'eme nsọ aswafu nturuwu, bụ iya bụ ekemu, shi Mosisu l'ẹka; ephe kuru Jizosu jeshia Jierusalemu je g'ephe ye iya Nnajiuphu l'ẹka,

²³bụ iya bụ iphe, e deru l'ekemu Nnajiuphu sū: “Iphe, bukpo nwa-nwoke, bụ iya vu uzo l'ephe ne iya bẹ ee-dobejeru Chileke iche .

²⁴Ephe jekwarupho anụ ngweja g'e gweeru Chileke, bụ iya bụ g'e pfuru iya l'ekemu Nnajiuphu: kparaka labo; ozoo unwu ndu-pfu ebo-lechiko .”

²⁵O duru onye Jierusalemu, epha iya bụ Simiyonu. Nwoke obu bụ onye pfuberekoto; bya aburu onye atsu Chileke ebvu; ele enya onye a-du Izurelu obu. O bụ onye Unme Chileke jiru ehu;

²⁶teme Unme Chileke mehawaru g'o maru l'onwu tee shitadu eka o no jasụ teke o humaadaru Kéreshi, shi l'eka Nnajiuphu.

²⁷Unme Chileke duru iya bahụ l'eze-ulo Chileke. O be teke ndu nwuru Jizosu ku nwata ono, bụ Jizosu bata g'ephe meeru iya g'ekemu pfuru;

²⁸Simiyonu bya ekuta iya heru jaahaa Chileke ajaja sụ:

²⁹“Nnajiuphu; haa ge mube onye-ozu ngu nwuhu l'ehu-guu nta-a, bụ iya bụ opfu, i pfuhawaru;

³⁰kele mu gudewaa enya mu huma Ndzota ono,

³¹i kwakoberu g'iphe, bụ ohamoha huma-dzuru ono, bụ iya bụ iphe, i kweru ukwe iya.

³²Iphoro, e gude eme ge ndu ohozo maru ngu; waa iphoro, a-buru ubvu ke ndu nkengu, bụ Izurelu. ”

³³Nna nwata ono yele ne iya sachaa onu saa nchi l'iphe ono, Simiyonu pfuru l'ehu nwa phe ono.

³⁴Simiyonu bya agooru phe onu-oma bya asu Meri, bụ ne nwata ono: “Nwata-a be Chileke hotawaru g'o buru e -vukota a daa; bukwarupho a -kuba eka a gbeshi, duru igwe oha le Izurelu; g'o bukwarupho onye aa-du igwerigwe jika nkiya.

³⁵Aagbe l'eka ono a madzuru iphe, ephe arị l'ime obu phe. Gubedua be aphu a-nodu agbawashi obu g'e gude ogu-echi sūbaa ngu okpoma; mbu l'opfu ehu nwata-a.”

³⁶O dukwarupho nwanyi, aza Ana, bụ onye mpfuchiru Chileke. Nwanyi ono bụ nwa Fanuwelu. O shi l'okpa-ipfu Asha; bya abuwaru nwanyi ogerenya. Ji iya kuru iya akuku; lua ya apha esaa bya anwuhu; ebe o lubaeduru ji.

³⁷O nowaa ukporo apha eno l'apha eno. Ophu o lufujedu alufu l'eze-ulo Chileke. O nodu anoduje abaru Chileke eja; aswi egu epfu anu Chileke eswe l'enyashi.

³⁸O byakwapho le teke ono bya ekele Chileke ekele. O bya epfua ke nwata ono nu iphe, bukota ndu ele enya ge Chileke gbata Jierusalemu.

Ndu nwuru Jizosu du iya alaphu azu le Nazaretu

³⁹Tobudu iya bu; ndu nwuru nwa ono meebekota iphemiphe g'ekemu Nnajiuphu du; bya alaphushia azu l'ibe phe, bu Nazaretu, no l'ali Galili.

⁴⁰Nwata ono vuta bya eshihu ike; bya akwashia enya ike; Chileke nodu emeru iya eze-iphe-oma.

Nwata ono, bu Jizosu no l'eze-ulo Chileke

- ⁴¹Iphe, bukpo aphagapha be ndu nwuru iya nu ejeje Jierusalemu me o -be l'obo Ojehata.
- ⁴²O be ge Jizosu nowaru apha iri l'ebo; ephe tuko jeshikwaa Jierusalemu g'ephe ejejehawaa.
- ⁴³Ephe no-dzuepho eswe obo-iphe ono bya alashia. Nwata ono, bu Jizosu tsukpaa le Jierusalemu; ophu ndu nwuru iya nu amadu.
- ⁴⁴Ephe jee ije ujiku ophu; temanu ephe wata iya achocho; kele ephe shi dobesu l'o yi l'ikpoto ndu awu l'uzo ono. Ephe chochaa ya l'eka abubu phe no; choo ya l'eka ndu ephe maru no;
- ⁴⁵ophu ephe ahumaduru iya. Ephe choru iya laphushia azu le Jierusalemu.
- ⁴⁶Ephe choo ya ujiku eto; teme ephe je ahuma iya l'eze-ulo Chileke l'eka ye le ndu ezije ndu Jiu iphe no; o nodu anga nchi l'iphe, ephe ezi bya ajikwa phe pho aji.
- ⁴⁷O du-dzukotaru ndu anu iphe, oopfu biribiri; mbu g'iphe edobeje iya enya; waa g'o gude eye onu l'opfu ree.
- ⁴⁸Ndu nwuru iya nu huma iya; o kpoo phe opfu. Ne iya su: "Nwa mu; ? denu g'o gude i mee ya anyi egube-a? ? I maru-a le mu le nna ngu gudekpowa enya-mini acho ngu?"
- ⁴⁹O su phe: "? Unu acho mu icho-agma? ? Unu ta amahaadaa l'o gbaru ge mu nodu l'ulo Nna mu?"
- ⁵⁰Ophu opfu ono edoduru phe enya.
- ⁵¹O tsoru phe lashia Nazaretu. O nodu emejekpopho iphe, ephe ziru iya. Ne iya wokpoperupho iphemiphe ono dobekota l'obu.
- ⁵²Jizosu nodu akabaa akwa enya eje; teme o nodu evukwapho evuvu. O du Chileke ree l'obu bya adu ndiphe.

Luku 3

Ozi, Jionu onye emeje baputizimu ezi l'echiegu

(Mat 3:1-12; Mak 1:1-8; Jion 1:19-28)

- ¹O be l'apha, kwe Tayibiriyosu, bu eze nnajioha apha iri l'ise, o shi butaru eze; teke ono be Ponchiosu Payileti bu nnajioha Jiudiya; Herodu buru ochi-oha Galili; nwanna iya nwoke, bu Filipu buru ochi-oha Ituriya; waa Tirakonayitisu; teke ono kwapho be Layiseniyasu bu ochi-oha Abilinu.
- ²O bukwarupho teke ono be Anasu; waa Kayafasu bu ndu-ishi uke Chileke; teke ono be Jionu nwa Zakarya nokwadu l'echiegu; noo teke Chileke kuru Jionu ono; zia ya ozi.

³Tɔbudu iya bụ; ọ tuko ohamoha, bupheru ɛnyimu Jiódanu mgburugburu jegbabe ara iya arara sù: “G’izimanu iphe-eji unu lwa unu azu; g’e mee unu baputizimu; ọo ya bụ Chileke aguru unu nvu l’iphe-eji, unu meshiru.”

⁴Bu iya bu g’e deru iya l’ekwo Azaya, bu onye mpfuchiru Chileke su: “O duru onye ara iya arara l’echiegu su: ‘Unu meziaru Nnajiuphu uzo. Unu mee gbororo iya g’o dugbaa nhamunha.

⁵Eka du nsuda be ee-nwuchi enwuchi. Ubvú waa obvú be ee-gbuzekota egbuze. Eka du nggodogo nggodogo be unu a-pfube oto. Eka du kpokoro-kpokoro-kpokoro l’aarwazee ya g’o kwọ akwọkwo.

⁶Iphe, bukota nemadzu l’ophu l’a-humakota ge Chileke e-shi dzota ndu nkiya.’ “

⁷Noo ya bu; Jionu su ikpoto ndu futaru nu bya g’o mee phe baputizimu: “Unube unwu, ejo agwo nwushiru-a! ? Bu onye karu unu g’unu gbalaaru oke ehu-eghu Chileke ono abya nu ono?

⁸Unu mia amimi g’oshi-omi. Mebyi, unu aa-mi bu eme umere, goshiru l’izimanu iphe-eji unu lwaru unu azu; unu lwapfutawaa Chileke. Unu ta arikwa su: ? O kwa le Ebirihamu buwanu onye-iche anyi phe. Unu ta amakwa l’o -beta g’o to du be Chileke a-du ike meshia mkpuma-a g’o nwushia unwu, a-buru unwu Ebirihamu.

⁹Mbu le nta-a be a dabekwaru ogbunku l’upfu iphe, bukpo oshi. Oshi ophu amiduru mebyi, du ree; l’e gbutsua ya chie l’oku.”

¹⁰Ikpoto ndu ono jia ya su: “? Bu gunu be anyi e-mekpo nta-a?”

¹¹O su phe: “G’onye nweru uwe ehu labo yee onye enwedu nu kee ya. G’onye nweru nri mekwaapho g’onye ophu meru.”

¹²Ndu anaje utu byakwapho g’e mee phe baputizimu bya asu iya: “O-zì-iphe; ? bu gunu be anyibedua e-me?”

¹³O su phe: “Unu ta anaghatajeshi iphe, a karu unu g’unu nata.”

¹⁴Ndu ojogu byakwapho bya ajia ya su: “Anyibedua-e; ? Anyi mekwanu-a gunu?” O su phe: “Unu ta anajeshi nemadzu iphe k’ehuka; ophu unu ebojeshi nemadzu ibo g’ee-shi g’unu naa ya iphe iya. G’ugwo, aapfu unu jije unu epho.”

¹⁵Ndu ono tubata onwophe. Ephe tuko rihaa l’obu phe su: “Oo-bukwaru-a nwoke-a bu Kereshi obu.”

¹⁶Jionu bya eyeeru g’ephe ha onu su phe: “Mbedua bukwa mini be mu egudeje eme unu baputizimu. Obenu l’onye ka mu l’ishi ka mu l’okpa abyakwa; mbu onye mu ta adudu iphe, mu bu l’eka o no ke ge mu tofu iya eri akpokpa iya. Onye k’ono e-gudeje Unme-du-Nso; waa oku eme unu baputizimu.

¹⁷O gudewaa ajakpa, oo-gude phushia eswa le balì; vuta ophu bu balì vuba l’ulo iya; kpota eswa iya kporu ye l’oku, ata nyihudu anyihu.”

¹⁸Jionu nodu ezi phe ozi-oma gude egube ono akasa phe nchi l’uzo, du iche iche.

¹⁹Ole Ochi-oha, bu Herodu be Jiṅu goshiru iphe-eji iya, bu iya bu ke Herodiyasu, bu nyee nwanna iya; waa k'ejo-iphe ozowaro, bu iphe, Herodu megbaar.

²⁰O bya emefua ophu ka njo tukobe l'ono; kele o turu Jiṅu mkporo.

Jiṅu eme Jizosu baputizimu

(Mat 3:13-17; Mak 1:9-11)

²¹Toḅudu iya bu; ndu ono bya; Jiṅu mechaa phe baputizimu; Jizosu byakwapho g'e mee ya; o nodu epfu anu Chileke. G'oopfukwadu anu Chileke ono; igwe gheru onu.

²²Unme-du-Nso dupeho ge ndo phezeta bya anodu iya l'ehu. A numa olu-opfu, shi l'imigwe ono su: "I bu nwa mu nwoke, mu yeru obu. I jiru mu epho."

Eri Jizosu

(Mat 1:1-17)

²³A nwuru Jizosu; o noo iphe, du g'ukporo apha l'apha iri; teme o gbube ishi eje ozi iya. A suerupho l'o bu nwa Jiosefu; Jiosefu buru nwa Heli.

²⁴Heli bu nwa Matatu; Matatu buru nwa Lívayi; Lívayi bu nwa Meliki; Meliki buru nwa Jianayi; Jianayi buru nwa Jiosefu.

²⁵Jiosefu bu nwa Matatayasu; Matatayasu buru nwa Emoṣu; Emoṣu bu nwa Nahumu; Nahumu buru nwa Hesuli; Hesuli buru nwa Nagayi.

²⁶Nagayi bu nwa Maatu; Maatu buru nwa Matatayasu; Matatayasu bu nwa Semeyinu; Semeyinu buru nwa Jioseku; Jioseku buru nwa Jioda.

²⁷Jioda bu nwa Jiowananu; Jiowananu buru nwa Risa; Risa bu nwa Zerúbabelu; Zerúbabelu buru nwa Shiyálutiyelu; Shiyálutiyelu buru nwa Neri.

²⁸Neri bu nwa Meliki; Meliki buru nwa Adi; Adi bu nwa Kosamu; Kosamu buru nwa Elumadamu; Elumadamu buru nwa Eru.

²⁹Eru bu nwa Jioshuwa; Jioshuwa buru nwa Eliyiza; Eliyiza bu nwa Jiorimu; Jiorimu buru nwa Matatu; Matatu bu nwa Lívayi.

³⁰Lívayi buru nwa Simiyonu; Simiyonu bu nwa Jiuda; Jiuda buru nwa Jiosefu; Jiosefu bu nwa Jionamu; Jionamu buru nwa Eláyekimu.

³¹Eláyekimu bu nwa Meliya; Meliya buru nwa Mena; Mena bu nwa Matata; Matata buru nwa Nétanu; Nétanu bu nwa Dévidi.

³²Dévidi buru nwa Jiesi; Jiesi bu nwa Óbedu; Óbedu buru nwa Bówazu; Bówazu bu nwa Sálumonu; Sálumonu buru nwa Náshonu.

³³Náshonu bu nwa Amínadabu; Amínadabu buru nwa Aduminu; Aduminu bu nwa Aní; Aní buru nwa Hézeronu; Hézeronu bu nwa Pérezu; Pérezu buru nwa Jiuda.

³⁴Jiuda bu nwa Jiékoṗu; Jiékoṗu buru nwa Áyizaku; Áyizaku bu nwa Ébirihamu; Ébirihamu buru nwa Tera; Tera bu nwa Neho;

³⁵Nehọ bụru nwa Sérugu; Sérugu bụ nwa Reyu; Reyu bụru nwa Pẹlegu; Pẹlegu bụ nwa Iba; Iba bụru nwa Shela.

³⁶Shela bụ nwa Kayinanu; Kayinanu bụru nwa Afakusadu; Afakusadu bụ nwa Shemu; Shemu bụru nwa Nuwa; Nuwa bụ nwa Lamẹku.

³⁷Lamẹku bụru nwa Metusela; Metusela bụ nwa Inọku; Inọku bụru nwa Jiaredu; Jiaredu bụ nwa Mahalalilu; Mahalalilu bụru nwa Kayinanu.

³⁸Kayinanu bụ nwa Inọsu; Inọsu bụru nwa Sẹtu; Sẹtu bụ nwa Ádamu; Ádamu bụru nwa Chileke.

Luku 4

Ama, Obutuswe aahụ Jizọsu

(Mat 4:1-11; Mak 1:12-13)

¹Unme Chileke ji Jizọsu ẹhu. O shi lẹ Jiódanu lasha.

²Unme Chileke duta iya; o je anọ l'echiegu ụkporo abali labo. Obutuswe hukota iya ama teke ono. O nokota ụkporo abali labo ono; ophu o dudu nri, o rijeru. O no-dzue ya pho; ẹgu gahaa ya.

³Obutuswe ono su iya: “O -buru li bu Nwa Chileke sụnu ge mkpuma-a gho nri!”

⁴Jizọsu su iya: “Ekwo-opfu Chileke sukwaru lo to budu nri kpurumu be amadu e-gudeje nodu ndu.”

⁵Obutuswe ono bya eduru iya je anodu l'eka du ephekerephe. A bya aji enya birimu; o goshikotawaa Jizọsu ali-eze ndiphe mgburugburu;

⁶bya asu iya: “Oo ngu be mu e-me gi buru onye a-buru ishi iphemiphe-a me iphe, du ree, no iya nu; kele o bu mu be e yeru iya l'eka; teme o buru onye du mu l'uche be mu a-nu iya.

⁷I -bakpowaru mu aja; mu ahakotaru ngu iya.”

⁸Jizọsu su iya: “Gbeshi l'eka ono Nsetanu. L'ekwo-opfu Chileke sukwaru loo Nnajiuphu, bu Chileke ngu bu onye ii-baru aja; teme o buru iya kpurumu bu onye ii-nodu ejeru ozi!”

⁹O bya eduru iya jeshia Jierusalemu bya eworu iya dobe l'eka kachaa l'eli l'eze-ulo Chileke bya asu iya: “O -buru li bu Nwa Chileke; shinu l'eli eka-a dafu daa l'ali.

¹⁰L'ekwo-opfu Chileke sukwaru le Chileke a-karu-a unwu-ojozi-imigwe iya g'ephe leta ngu enya; chee ngu nche.

¹¹L'ephe e-gude eka pata ngu apata; a -nonyaa i kpo okpa le mkpuma.”

¹²Jizọsu sukwanu iya: “Ekwo-opfu Chileke suru-a; gi ti hukwa Nnajiuphu, bu Chileke ngu ama.”

¹³Obutuswe hukashichae ya pho ama ono bya aparu iya buhaa ke nwa teke ono.

¹⁴Jizosu nọdu l'ike Unme Chileke Iwatashia Gálili. E pfudzuru nkiya l'iphe, bukpo ndu bupheru Gálili mgburugburu.

¹⁵Ọ nọdu ezije iphe l'ime ọlo-ndzukọ ndu Jiu phẹ. Onyemonye nọdu aja iya ajaja.

Aajika Jizosu lẹ Nazaretu

(Mat 13:53-58; Mak 6:1-6)

¹⁶Ọ bya abahụ lẹ Nazaretu, bụ iya bụ ẹka e hefutaru iya. O rwua eswe-atuta-unme; ọ byakwa abahụ l'ọlo-ndzukọ, bụ iphe, oomejehawaa. Ọ gbeshi gẹ ya gua iphe.

¹⁷A bya anụ iya ẹkwo, Azáya onye mpfuchiru Chileke deru. Ọ bya aphuhaa ẹkwo ono bya achota ẹka e deru sụ:

¹⁸“Unme Nnajiuphu dụ mu l'ẹhu; kele ọ hotaru mu gẹ mu je ezia ndu ụkpa ozi-oma. O ziru mu gẹ mu je ezia ndu a kputaru lẹ ndzụ l'aa-ha phẹ; Mu eje emee ndu atsụ ishi g'ephe phuhaa ụzo. Mu eje emee ndu aakpa ẹhu g'ephe nweru onwophe.

¹⁹Teme gẹ mu bya arakaa l'apha, Nnajiuphu a-dzota ndu nkiya rwuakwaru. ”

²⁰O woru ẹkwo ono phua g'e shi phua ya; woru iya yephu azụ l'eka onye ejeru ndzukọ ozi; bya anọ-zeta anọ. Iphe, bukota ndu nọ l'ọlo-ndzukọ chiru ẹnya dzee ya.

²¹Ọ pfuaharu phẹ sụ: “Ntanu-a bẹ iphe, e deru l'ekwo-a, unu nọmaru-a vuru g'e deru iya.”

²²Ephe zukota mgbede. Opfu oma, l'afushi iya l'onu dụ phẹ biribiri. Ephe sụ: “? To bunaa nwa Jiósefu-a baa?”

²³Ọ sụ phẹ: “O doru mu ẹnya l'unu a-nmaru mu etu-a sụ: ‘Gẹ nwophu eme obvu metanu onwiya iphe, eme iya nụ. Anyi nọmawaru iphe, i megbaberu lẹ Kapaniyomu; menaa ya l'alị ngu l'eka-a.’ ”

²⁴Ọ sụ phẹ: “Gẹ mu gbukwaaru iya unu tororo; Onye mpfuchiru Chileke bẹ a ta anatajekwa ree l'alị iya.

²⁵Sụ-a; unu nyatakwa l'unwanyi, ji phẹ anọedu dukpokwaa igwerigwe lẹ Ízurelu teke Elayijia nọ, bụ iya bụ teke igwe buchiru mini apha eto l'onwa ishii; ejo okpa nri bya l'alị ono mgburugburu.

²⁶Opfu ọ dukpodaa unwanyi ono mẹ nanu, Chileke ziru Elayijia g'o yeru ẹka; gbahaarọ nwanyi, ji iya anọedu, bu lẹ Zarefatu, nọ l'alị Sayidonu.

²⁷Ndu ekpenta dukwapho igwerigwe lẹ Ízurelu teke Elayisha, bụ onye mpfuchiru Chileke nọ. Opfu ọ dudu mẹ onye lanu, ọ safuru ekpenta iya; gbaharọ Nemanu onye Siriya.”

²⁸Ephe numaepho nno; ẹhu wata egbu iphe, bukpo ndu nọ l'ọlo-ndzukọ ono egbu shingushingu kpọ. Ephe tangirihu.

²⁹Swo-lihu; chifu iya lẹ Nazaretu. Ephe duru iya je enyihu mkpakponu úbvú, mkpukpu phẹ dụ; meahaa g'ephe gbẹ l'eka ono tufu iya; sua ya ishi isuphu.

³⁰O shiɛlaa echilabo ikpoto ndu ono; ọ bụru iya atugbu.

Nwoke, ọbvụ eme

(Mak 1:21-28)

³¹Jizosu nyizeta bahu ị Kapaniyomu, nọ ị Gálili. Ọ nọdu ezi phek iphe l'eswe-atuta-unme kek ndu Jiu.

³²Epkhe sachaa onu saa nchi kek opfu, oopfu goshirupho l'oo Chileke ziru iya eviya.

³³No iya; ọ duru nwoke, ọbvụ eme, nọ l'ime ulo-ndzuko ono. Nwoke ọbvụ ono chishia oke mkpu su:

³⁴“Paru anyi haa; Jizosu onye Nazaretu! ? Bu gunu be anyi kek ngu jigba? ? I bya anyi emeyishi? Mu maru onye i bu. I bu onye du nsọ, shi l'eka Chileke.”

³⁵Jizosu baaru iya mba su: “Dobe onu doo! Futa nwoke ono l'ehu!” Ọbvụ ono bya atuta nwoke ono ndapfu l'edzudzu-oha l'eka ono; bya afuta iya l'ehu; ọphu ọ dudu iphe, o meru nwoke ono.

³⁶Ọ du phek biribiri. Epkhe pfuaaha su: “? Egube opfu ọwa-a bu gunu? Onye ọphu egudeje egube nkamena ọwa me ike su g'ọbvụ wufuta; epke awufuta.”

³⁷E pfudzuru kek Jizosu l'ekameka l'iphe, bukpuo mkpukpu, nọ l'eka ono.

Jizosu emeta igwerigwe ndu iphe eme

(Mat 8:14-17; Mak 1:29-34)

³⁸Ọ gbalihu; ọ bụru iya alufu l'ulo-ndzuko ono bya abahu ibe Sayimonu. Ododena nọdu eme ne nyee Sayimonu. Epkhe rwo ya g'ọ gbaaru iya mkpu.

³⁹Ọ bya apfu-kube iya bya abaru ododena ono mba; ọ paru nwanyi ono haa; nwanyi ono kwolihu wata phek akwaru ebyaa.

⁴⁰Enyanwu nyihushiepho; onyemonye, nweru onye iphe-ememe eme dutaru iya Jizosu; o ruharu ọ bụru iphe-ememe, du idagha. Ọ byakwasikota phek eka mee epke wekorohu.

⁴¹Ọbvụ nọdu awufutaje l'ehu ikpoto ndu oome bya echigbaa mkpu asuje: “I bu Nwa Chileke!” Ọle ọobajeru phek mba. Ọphu o kwejedu g'epke pfua opfu; kek epke maru l'oo ya bu Keshi obu.

Jizosu epfu opfu Chileke ị Gálili

(Mak 1:35-39)

⁴²Nchi bohuepho; ọ tugba jeshia eka ọo-nodu nwekinyi iya. Ikpoto nemadzu wata iya achochu bya awupfuta iya; bya emehaa g'epke sede iya g'ọ to hahek phek ahaha.

⁴³Ọ su phek: “Mu zifutajekwapho ndu mkpukpu ozo ozi-oma ono, bu iya bu kek Chileke egoshi kek ya bu eze. Noo iphe, e zidoru mu bu ono.”

⁴⁴Ọ nọdu ara opfu Chileke arara l'ulo-ndzuko ndu Jiu kek Gálili.

Luku 5

Jizosu eku ndu mbu, tsoaharu iya nu

(Mat 4:18-22; Mak 1:16-20)

- ¹O be ujiku lanu ge Jizosu pfuru l'aguga eze-enyimu Genesaretu; ikpoto nemadzu nodu asopyabe iya asopyabe abya anuma opfu Chileke.
- ²O humu ugbo labo, no l'aguga mini ono. Ndu ikokoro, shi nodu l'ugbo ono lufuwaa je anodu asa ugbo ikokoro phe asasa.
- ³Jizosu bya abahu l'ugbo ono nanu; ophu bu ke Sayimonu bya asu iya g'o nwubaekwa ugbo ono le mini nwanshii. O bya anodu anoo l'ime ugbo ono; wata phe ezi iphe.
- ⁴O pfughechaepho iphe, oopfu; o su Sayimonu: "Kpeshikwaru ugbo bahubaa l'eka mini du ogbu; je g'unu tua ugbo unu le mini nwukoo ema."
- ⁵Sayimonu su iya: "Onyibe; anyi tukoru enyashi mgburugburu sekota akanya iya; o buru ke mmanu. Ole eshinu i pfuru nno be mu a-ghawkaa ugbo obu ye le mini."
- ⁶Ephe mee ya pho nno bya anwukoo ikpoto ema, jiru ugbo ono; k'ophu o gbememe g'o lakaa ugbo.
- ⁷Ephe pheku ndu ikokoro ibe phe, no l'ugbo ophuu g'ephe gbataru phe. Ephe bya anwu-ji ugbo labo ono; k'ophu o wataru emimi.
- ⁸Sayimonu Pyita humae ya pho; o bya adaa kpurumu l'iphu Jizosu su iya: "Jiko Nnajiuphu! Paru mu haa jeshia iphe, iije; kele mu bukwa onye iphe-eji."
- ⁹Biribiri ikpoto ema ono, a nwukoru ono gude Sayimonu yee ndu ephe l'iya no.
- ¹⁰Nokwapho g'o du unwu Zebedi, ephe le Sayimonu atukoje ese ikokoro ono, bu Jiemusu yee Jionu. Noo ya bu; Jizosu su Sayimonu: "Ge ndzu ba agushi ngu. E -shi ntanu-a buwaa nemadzu be ii-nodu esekutaje."
- ¹¹Ephe kpufutachaepho ugbo phe l'eli-mgboko; ephe hakota iphemiphe tsoahaa Jizosu.

Onye ekpenta, Jizosu meru o wekorohu

(Mat 8:1-4; Mak 1:40-45)

- ¹²O be ujiku lanu ge Jizosu no le mkpukpu lanu; nwoke lanu, ekpenta dzuru ehuru byapfuta iya. O humae Jizosu; o daa kpurumu rwahaa ya su: "Nnajiuphu; o -buru uche ngu be ii-menaa ge mu wekorohu."
- ¹³Jizosu bya amachia aka denyi iya su: "O bu uche mu. Ngwa wekorohu!" Teke ono kwapho ekpenta ono mishihu iya l'ehu.
- ¹⁴O karu iya g'o to dukwa onye oo-pfuru iya bya asu iya: "Jechikwa g'onye uke Chileke lerwee ngu enya; l'i gweru ngweja, onye e metaru l'iphe, eme iya nu anuje nu g'e gweeru ngu ge Mosisu turu ekemu su g'e gweje iya. Oo ya bu ge ndiphe egude nno maru l'i wekorohuwaru."
- ¹⁵Ole a kabaalaa epfukashi ke Jizosu pfudzuru iya k'ophu ikpoto igwe oha dzukoru g'ephe numa le nchi; waa g'o mee phe g'ephe wekorohu l'iphe, emegbaa phe nu.

¹⁶Obenu lẹ Jizọsu atsulaje azu je anodu l'echiegu pfuru nu Chileke.

Nwoke, iphe lonwuru ibe ehu lanu

(Mat 9:1-8; Mak 2:1-12)

¹⁷O be ujiku lanu ge Jizọsu no ezi iphe; ndu Farisii waa ndu ezije ekemu dokwarupho l'eka ono. Epe shigbaa le mkpukpu le mkpukpu, no le Galili me Jiudiya; shigbakwapho Jierusalemu bya. Ike Nnajiuphu, bu Chileke mee ya go du ike mee g'ehu dukota ndu iphe eme ike.

¹⁸O duru nwoke, iphe lonwushiru ibe ehu lanu, unwoke vu l'iphe, aaze aze gude bya. Epe chokpoo uzo, epe e-shi vubata iya l'ime eka ono bya edobe l'iphu Jizọsu; ophu o dudu.

¹⁹Epe mee nta mee imo; ophu epe ahumaduru uzo; opfu le nemadzu kunukaru akuru l'eka ono. Tobudu iya bu; epe bya enyihu eli ulo ono; je alafua uzo l'oma mkpotsu; pyofu iphe-aze, nwoke ono ze. Epe shi nno mee ya o rwua ali l'iphu Jizọsu.

²⁰Jizọsu humaeopho g'ephe gude kwetaberu le ya a-du ike mee ge nwoke ono jee ije; o su iya: "Nwoke ibe mu; a guwaru ngu nvu l'iphe-eji ngu g'o ha."

²¹Ndu ezije ekemu waa ndu Farisii ono wata ariri su: "? Bu egube nemadzu gunu bu owa-a, l'epfubyi epha Chileke epfubyi-a? ? Bu onye a-du ike guaru nemadzu nvu l'iphe-eji iya; gbahaa Chileke kpurumu?"

²²Jizọsu maerupho iphe, epe ari bya asu phe: ? O nwuru inwagha be unu ari egube iphe ono?

²³? Bu ole ka nphe epfufu? ? Bu: A guwaru ngu nvu l'iphe-eji ngu? ? Too: Gbalihu wata eje ije?

²⁴Ole oo g'unu a-maru l'e ziru Abubu-Ndiphe g'o gujeru nemadzu nvu l'iphe-eji, o meshiru le mgboko-a. O su nwoke ono, iphe lonwushiru ibe ehu lanu ono: Oo ngu be mu epfuru; gbalihu palita iphe-aze ngu; lashia ibe ngu.

²⁵Nwoke ono kwolihu l'edzudzu-oha ono pata iphe-aze ya; o buru iya ala unuphu. O nodu aja Chileke ajaja.

²⁶Onu kugbabechaa ndu ono akugbabe. Akpabiri iya gudechaa phe. Epe jaahaa Chileke ajaja. Epe su: Anyi akabekwa huma iphe, kporu onu opfu ntanu.

Ekuku Lívayi

(Mat 9:9-13; Mak 2:13-17)

²⁷E mechaa; Jizọsu tugbuepho l'eka ono bya ahuma onye ana akiriko, epha iya bu Lívayi; eka o no l'ulo okpoga akiriko. O su iya: "Tsuru mu."

²⁸O haa iphemiphe; gbalihu tsoru iya.

²⁹Lívayi bya akwaaru iya oke ebyaa l'ibe yebedua, bu Lívayi. Ikpoto ndu ana akiriko me ndu ozo bya anodu epe l'ephe toko erigba nri ono.

³⁰Ndu Fárisii waa ndu ezije ekemu guaharu ndu etsoje Jizosu aphụ sụ: “? Bụ gunu meru iphe, unu lẹ ndu ana akiriko waa ndu ozo, aamakwarupho njọ ẹka eri angugba?”

³¹Jizosu sụ phẹ: “Ọ tọ bukwa ndu ẹhu dụ ike bẹ eegudeje gbapfu onye eme ọbvụ; ọ kwa ndu iphe eme.

³²Mu ta abyakwaru eku ndu p̄fuberekoto; ọ kwa ndu iphe-ẹji bẹ mu byaru eme g'izimanu lwa azu.”

Aswiri Chileke ẹgu

(Mat 9:14-17; Mak 2:18-22)

³³Ephe sụ iya: “? Denu g'o gude ndu etsoje Jiṅnu n̄du aswije ẹgu epfu anu Chileke; nokwapho gẹ ndu etsoje ndu Fárisii aswije; obenu lẹ ndu etsoje ngu n̄u eri angu g'ọ dụ phẹ?”

³⁴Jizosu sụ phẹ: “? Unu a-gbẹ meahaa gẹ ndu byaru ekele-nwanyị gbẹ swi ẹgu; l'ẹka ephe l'onye eme ekele-nwanyị nokwadu l'ẹka-a?

³⁵Ọ dukwaru teke ee-mechaa nafu phẹ onye ono, eme ekele-nwanyị ono. Ọo ya bụ; ephe aswiahawaro ẹgu teke ono.”

³⁶Ọ bya anmaaru phẹ ẹtu sụ: “A ta alakatajẹkwa uwe ọphúú gude gbachia akahụ uwe. Onye meru iya n̄u; onye ono alakaa k'ọphúú ono alaka; tẹme mpekala uwe ọphúú ono yele akahụ uwe ono taa gbaduru nanu.

³⁷Ọphu a wujeduru m̄e ọphúú ye l'ugbobe-m̄e, riwaru pheripheri. Ọdumeka m̄e ọphúú ono agbawashia ugbobe ono; m̄e ono awushihu; ugbobe ono agbakpohukwapho.

³⁸Obenu lẹ m̄e ọphúú bẹ eeyeje l'ugbobe ọphúú.

³⁹Onye anguje akahụ m̄e bẹ k'ọphúú ta agujeedu. Noo kele ọosuje l'akahụ iya pho ka iya ree.”

Luku 6

Eswe-atuta-unme

(Mat 12:1-8; Mak 2:23-28)

¹Ọ be l'eswe-atuta-unme; Jizosu phẹ n̄du aghata l'ẹgu, a k̄oru witi; ndu etsoje iya n̄u wotaahaa akpuru witi ono haru nmaa swokoswoko wata atata.

²Ndu Fárisii haru sụ phẹ: “? Bụ gunu meru iphe unu eme iphe, e te emejedu l'eswe-atuta-unme?”

³Jizosu sụ phẹ: “? Unu ta aguduru l'ekwo-opfu Chileke iphe, Dévidi meru l'ẹka ẹgu agụ yee ndu ephe l'iya swi.

⁴G'ọ bahuru l'ulo Chileke je ewota buredi, e doberu Chileke iche woru taa, bụ buredi, onye ozo ta atajedu; gbahaa ndu-uke Chileke. Ọ hakwarupho n̄u ndu ephe l'iya swi?”

⁵Jizosu sụ phẹ: “Ọ kwa Abubu-Ndiphe bụ Nnajiuphu, nwe eswe-atuta-unme.”

Onye ẹka lanu nwuhuru anwuhu

(Mat 12:9-14; Mak 3:1-6)

⁶O be l'eswe-atuta-unme ozo ge Jizosu bahuru l'ulo-ndzukọ phe je eziahaa iphe; o duru nwoke, no l'eka ono, ekutara nwuhuru anwuhu.

⁷Ndu ezije ekemu waa ndu Farisii geahaa Jizosu ngge g'a maeshikwaru: ? l'oo-me g'ehu du nemadzu ike l'eswe-atuta-unme; g'ephe achokwanaa ophu ephe a-su l'o meru.

⁸Ole Jizosu mawaru egomunggo phe bya asu nwoke, eka nwuhuru anwuhu ono: "Gbeshi bya apfuru l'atatiphu onyemoye l'eka-a!" Nwoke ono gbalihu je apfuru.

⁹Jizosu su phe: "Ge mu jia unu aji. Ekemu eswe-atuta-unme ? bu g'e meje ree; too g'e meje ejo-iphe? ? Bu g'a dzoje ndzu; too bu g'e mebyije ndzu emebi?"

¹⁰O bya aghaa enya lephechaa phe g'ephe ha bya asu nwoke ono: "Ngwa; lochia eka alochi!" O lochia eka. Eka ono bya eteta iya.

¹¹Ephe swo-lihu wata achi idzu iphe, ee-me Jizosu.

Jizosu ahota umadzu iri l'ebo

(Mat 10:1-4; Mak 3:13-19)

¹²Tobudu iya bu; o be ujiku lanu; Jizosu bya ejeshia eka ubvu du igwe; jeshia epfuru nu Chileke. O pfukota nukota Chileke enyashi ophu mgburugburu.

¹³Nchi bohu; o bya ekua ndu etsoje iya nu bya ahota phe umadzu iri l'ebo. O gua ndu ono ndu-ishi-ozu iya.

¹⁴Ndu o bu bu: Sayimonu onye o guru Pyita; waa Anduru, bu nwune iya; waa Jiemusu; waa Jionu; waa Filipu; waa Batulomiyu;

¹⁵waa Matiyu; waa Tomosu; waa Jiemusu, bu nwa Alufiyosu; waa Sayimonu, onye yi l'ogbo, l'adzo g'alji Jiu duru ndu Jiu;

¹⁶waa nwa Jiemusu, bu iya bu Jiudasu; waa Jiudasu Isukariyotu, bu iya mecharu nodu le mpfube; e gude Jizosu.

Jizosu ezi iphe bya eme ndu iphe eme g'ephe wekorohu

(Mat 4:23-25)

¹⁷Jizosu yele ndu ono, o hotaru ono tuko shi l'eli ubvu ono kpọ-zeta; bya anodu le mkpọ-ze iya; ephe l'ikpoto ndu etsoje iya nu ozo; me oke igwerigwe ndu shigbaa le Jiudiya l'ophu; me Jierusalemu; me oha onu-eze-enyimu Taya waa Sayidonu; ndu byaru anuma iphe, oo-zi; waa g'o mee g'ephe wekorohu l'iphe, emegbaa phe nu.

¹⁸Ndu obvu eme wekorohuchakwapho.

¹⁹Ikpoto ndu ono tuko emegbaa g'ephe denyigbaa ya eka; kele ike, shi iya l'ehu emeje g'ephe wekorohuchaa g'ephe ha.

Emereme l'aphu

(Mat 5:1-12)

20 Jizosu bya apalia ɛnya dabɛ ndu etsoje iya nɔ bya asu: “Ehu-utso bɛ a goru nɔ unubɛ ndu ukpa; kɛle ɛka Chileke bu eze bu k'unu.

21 Ehu-utso bɛ a goru nɔ unubɛ ndu ɛgu agu nta; kɛle ɛpho e-ji unu. Ehu-utso bɛ a goru nɔ unubɛ ndu akwa ɛkwa nta; kɛle unu a-chia ochi.

22 “Ehu-utso bɛ a goru nɔ unu mɛ amadu -kpoo unu ashi; wuchia unu ewuchi; ako unu onu; eku unu ndu ejo-iphe opfu l'unu kweru kɛ Abubu-Ndiphe.

23 G'ehu tsoo unu mboku ono; unu pfulihu tee ɛswa; kɛle obunggo unu paru ɛka l'imigwe; kɛle ono bukwapo gɛ nna phɛ ndiche megbaaru ndu mpfuchiru Chileke.

24 “Ole; nshiokwaro unubɛ ndu nweru iphe; kɛle unu natabɛbewaru iphe, rwuberu unu.

25 Nshio unubɛ ndu ɛpho jiru nta-a; kɛle ɛgu a-gu unu. Nshio unubɛ ndu achi ochi nta; kɛle unu a-kwa ɛkwa gua aphu.

26 “Nshio unu; mɛ onyemonye -nodu epfu l'unu eme ree; kɛle ono bukwapo gɛ nna phɛ ndiche pfuru kɛ ndu mpfuchiru, shi epfuje iphe, Chileke epfuduru.”

Eye ohogu obu

(Mat 5:38-48; 7:12a)

27 “Ole iphe, mu a-karu unubɛ ndu anu iya nɔ bu: Unu yee ohogu unu obu; unu mejeru onye unu du ashi ree.

28 Unu gojeru onu-oma nɔ onye tɔru unu onu. Unu pfujeru nɔ Chileke k'onye koru unu onu.

29 Onye chiru ngu ɛka l'agbagba nchi; dobefuuru iya nchi ophu; tɛme onye yetaru ngu uwe-ehu ngu; haa ya g'o yetafua nggafu-ɛka ngu.

30 Nujekwa onyemonye iphe o rworu ngu; tɛme onye wotaru iphe ngu; ta ajiekwa iya aji iya ozo.

31 Unu mejeru onyemonye g'o du unu g'onye ozo mejeru unu.

32 “Teke o buɛpho ndu yeru unu obu bɛ unu yeru obu kpurumu; ? bu urwu gunu bɛ ono baru unu? Kɛle ndu iphe-ɛji bukwapo ndu yeru phɛ obu bɛ ɛphe eyeje obu.

33 Teke o buɛpho ndu emejeru unu ree bɛ unu emejeru ree; ? bu urwu gunu bɛ ono baru unu? Kɛle ndu eme iphe-ɛji emejkwapho ɛgube ono.

34 Teke o buɛpho ndu unu ele ɛnya l'unu a-nata l'ɛka phɛ bɛ unu ejieje ugwo; ? bu urwu gunu bɛ ono baru unu? Ndu eme iphe-ɛji l'ejiekwapho ndu eme iphe-ɛji ibe phɛ ugwo g'ɛphe anata iphe, ha g'ugwo, ɛphe jieru phɛ.

35 O buchia g'unu yee ohogu unu obu; mejeru phɛ ree. Unu jieje ugwo wofu iya ɛnya g'obunggo unu aha shii; tɛme g'unu aburu unu Okalibe-kangokotaru-nu, bu Chileke; kɛle ndu ta amadu iphe-oma yɛ ndu ejo-iphe bɛ Chileke duchakwaruro odo.

36 Unu buru ndu obu-imemini gɛ Nna unu bukwapo.

Agbarwu ndu ozo

(Mat 7:1-5)

37“Unu ta agbarwujekwa ndu ozo; ge Chileke etee ekpedu unu ikpe; ophu unu anmajekwa onye ozo ikpe; ge Chileke ataa anmadu unubedua ikpe. Unu gujeru ndu ozo nvu ge Chileke a-gukwaarupho unu.

38Unu nuje nemadzu iphe ge Chileke a-nukwapho unu. Iphe, Chileke e-nwuru ye unu l'eka bu iphe, a tu-jiru atu-ji; tsua ya atsutsu; bya ayo-jia ya ayo-ji; o ji godogodo awushihu awushihu. Kele oo iphe, unu gude turu nu nwibe unu bu iphe, Chileke e-gude tukwarupho nu unu.”

39O bya anmaaru phe etu su: “Onye atsu ishi ? o kpuleru onye atsu ishi ibe iya too? ? Ephe taa atukodu dalahu le nsu?”

40Onye anwu iphe l'eka nemadzu ta akajekwa onye onwu iphe l'eka iya enweru enya. Onye eezi iphe bukwa; o -nwutachaa iphe, eezi iya l'oo-bya aha g'onye ono, ziru iya iphe ono.

41“? Bu gunu kparu iphe, i humaru nwiphe, no onye ozo l'enya; ophu i humaduru ophu ha g'oswebe l'enya nkengu?

42Ozoo; ? denu g'ii-gbe su nwanna ngu g'o gebe g'i mefu iya nwiphe, du iya l'enya; l'eka gubedua ata ahumaduru ophu ha g'oswebe, sweru ngu l'enya nkengu? Gube onye ono bu tuko-l'ehu-atuko-l'obu ono! Vuru uzo mefuadaa iphe ophu ha g'oswebe, sweru ngu l'enya nkengu; g'ii-du ike huma-rweta uzo; mefu nwiphe ophu ha nwanshii, du nwanna ngu l'enya.”

Oshi me akpuru iya

(Mat 7:16-20; 12:33-35)

43“O to dukwa okpobe oshi, mijeru mebyi du eji; ophu o dukwanu ejo oshi, mijeru mebyi, du ree.

44Eegudeje akpuru, oshi miru maru egube oshi, o bu. A ta awotajekwa akpuru ujiru l'oshi aga; ophu a wotajedu era-nggorobyi l'egbara.

45Okpobe nemadzu eshijekwa l'okpobe iphe, du iya l'obu; wofuta okpobe iphe. Ejo nemadzu nodu eshijekwapho l'ejo-iphe, du iya l'obu; wofuta ejo-iphe. Kele iphe, oopfu l'onu bu iphe, jiru iya obu ebushihu ebushihu.”

Umadzu labo, akpu ulo

(Mat 7:24-27)

46“? Bu gunu be o gude unu nodu ekuje mu Nnajiuphu; ophu unu emejedu iphe, mu suru g'unu mee?

47Onyemonye, byapfutaru mu nu; bya anuma opfu mu bya eme iya ememe be mu e-goshi unu onye o du g'oo ya.

48O du ge nwoke, l'akpu ulo bya ebvumia ali ebvumi; tua okpa ulo obu le mkpuma. O be teke utso gbaru; mini bya agbapyabe ulo ono; ophu o ngakpodaaru iya nu me anganga; kele a turu okpa iya l'eli mkpuma.

⁴⁹Obenu l'onye anụ opfu mu; ophu o medu iya ememe dụ g'onye kpuru ụlo l'elikoru; ophu o waduru oswa taa okpa iya; mini gbapyabẹ iya; o daarọ teke ono teke ono dapyashihu; tsua gwogiri-gwogiri.”

Luku 7

Ewekorohu nwozi onye-ishi ndu ojogu

(Mat 8:5-13)

¹Jizosu pfuẹbektakpoephe iphe, oopfu; ndu kuru l'eka ono numa; o bahu le Kapaniyomu.

²O duru onye-ishi ndu ojogu ndu Romu, iphe eme nwozi iya; k'ophu oobyawaa anwuhu. Nwokoro ono be o yeru obu shii.

³Onye-ishi ndu ojogu ono numaephe ke Jizosu; o bya ezia ndu bu ogerenya ndu Jiu g'ephe je arwo Jizosu g'o bya adzo nwozi iya ndu.

⁴Ephe byapfutaephe Jizosu bya akwatakpo rwoshia ya ike su iya: “Jikonu; nwoke ono bukwa onye gbaru ke g'i meeru iya iphe ono;

⁵kele o yeru ndu ali anyi obu; o buru iya kpuru anyi ulo-ndzuko anyi-a.”

⁶Jizosu tsoru phe jeshia. Unuphu ibe nwoke ono due ya pho ntse; onye-ishi ndu ojogu ono zia ndu onya iya g'ephe gbapfu iya je asu iya: “Nnajiuphu; e jehero eri aphu k'abyabya; kele mu ta agbaduru ke g'i bataru mu l'unuphu;

⁷ophu mbedia l'onwomu agbaduru k'akpiritaru ngu ntse. O bua g'i pfua opfu onu; nwozi mu a-dua iche.

⁸Mu bu onye no nemadzu l'eka; o nwekwarupho ndu ojogu, no mbedia l'eka. Mu -su onye-a g'o jee owa-a; l'o jee. Mu -su onye ophu g'o bya; l'o bya. Teke mu suru nwozi mu g'o mee owa-a; l'o mee ya.”

⁹Jizosu numa iya; nwoke ono du iya biribiri. O ghakobe bya asu igwe ndu ephe l'iya swi: “Mu suru-a; l'ali Izurelu kponu be mu ta ahumakwaru onye kwetaberu egube-a.”

¹⁰Ndu e ziru lwaphutashia azu l'unuphu; nwozi ono wekorohuchawaa ree.

Jizosu emete nwatibe nwanyi, ji iya anedu

¹¹O rwua le nchitabohu iya; Jizosu tugbua jeshia mkpukpu, aza Nenu. Ndu etsoje iya nu me ikpoto ndu ozo tsoru iya jeshia.

¹²O byakubeshiepho onu-abata mkpukpu ono ntse; a nodu apafutawaa odzu nwoke, bu iya bu ne iya nwa lanu eje elili; teme ne iya ono buru nwanyi, ji iya anedu. Igwerigwe ndu shi l'oma mkpukpu ono kwatakpo awu etso nwanyi ono.

¹³Noo ya; Nnajiuphu humapheo nwanyi ono; imemini iya du iya. O su nwanyi ono: “Hua eka l'enya! Ta arape ekwa!”

¹⁴Jizosu bya edenyi eka l'akwata, a pa odzu ono. Ndu pa iya nu pfuru. O su: “Nwokorobyia; mu suru ngu g'i teta!”

15 Onye ono, nwuhuru nu ono gbalihu bya awata epfu opfu. Jizosu seru iya ye ne iya l'eka.

16 Ndzụ rwutakota phe g'ephe ha l'eka ono. Ephe jaahaa Chileke ajaja su: “Okalibe onye mpfuchiru Chileke afutaru anyi-o! Chileke kpapfutaakwaru ndibe iya-o!”

17 E pfudzuru ke Jizosu l'alị Gálili l'ophu me l'alị ndu bupheru phe mgburugburu.

Ozi, Jiṅu onye emeje baputizimu ezi g'e zia Jizosu

(Mat 11:2-19)

18 Ndu etsoje Jiṅu kokotaru Jiṅu iphemiphe ono.

19 Jiṅu bya ekua ndu etsoje iya nu umadzu labo bya ezia phe g'ephe je ajia Nnajiuphu su iya: “? Bu ngu-a bu onye obu, abya nu obu? To ? bu g'anyi lee enya onye ozo?”

20 Ndu ono byapfuta Jizosu bya asu iya le Jiṅu onye emeje baputizimu ziru g'ephe bya ajia ya su iya: “? Bu ngu-a bu onye obu abya nu obu? To ? bu g'anyi lee enya onye ozo?”

21 Teke ono be Jizosu eme g'igwerigwe ndu iphe eme wekorohu; mekpoo ndu ejo iphe-ememe eme; me ndu obu eme; mewaro igwerigwe ndu ophu atsu ishi, o mekwarupho; ephe puhahaa uzo.

22 O su ndu ono, Jiṅu ziru ozi ono: “Unu je akaru Jiṅu iphe, unu humaru; waa iphe, unu numaru. Unu su iya le ndu atsu ishi l'aphuwaa uzo; ndu eniyeni nodu ejewaa ije; ndu ekpenta wekorohuwaa; ndu ada nkuchi nodu anuwaa iphe le nchi; ndu nwuhuru anwuhu be e mewaru; ephe teta dzuru ndzu; a nodu asaru ndu ukpa ozi-oma ono asasa.

23 Su-a; ehutu be a goru nu onye onoya, mu taa buduru upfu adu l'okpa.”

24 Ndu ono, Jiṅu ziru ozi ono tugbuepho; Jizosu wata epfuru ikpoto ndu ono ke Jiṅu su phe: “? Bu gunu be unu jeru l'echiegu je ahuma? ? Bu ekperema, pherephere enwunga?”

25 ? Bukwanu gunu be unu jeru ahuma? ? Unu jeru ahuma onye gbaphuru erengete ekwa? ? Unu ta amadu le ndu kwaru g'oke-amadu bya eburu eriji ephe; anguji ephe be dugbaa l'unuphu ibe eze?

26 ? Buhunu gunu ozo be unu jeru ahuma? ? Unu jeru ahuma onye mpfuchiru Chileke to? Ihee! Oo ya bu onoya! Mbu-a; onye unu humaru bukwa onye gbekwa onye mpfuchiru Chileke shii mebyi akaka.

27 Oo ya bu onye ono, Chileke pfuru opfu ehuru iya l'ekwo-opfu iya su: ‘Onye owa-a bu onye-ozu mu, mu e-zu g'o vuru ngu uzo; je abooru ngu uzo l'iphe.’

28 Ge mu kakwaru unu: o to dukwa onye kabakpoo Jiṅu l'iphe, bukpuo iphe, nwanyi nwuru anwunwu; obenu l'onye bukpuo ya be a gbekpuo su l'enya kachaa alwalwa l'eka Chileke bu eze be gbekwa ka Jiṅu.”

- ²⁹Ikpoto ndu ono g'ephē ha mēkpoo ndu ana akirikō nūma iphe, Jizōsu pfuru bya etua Chileke onye p̄f̄uberekoto ēpha lē Jionu mecharu p̄hē baputizimu.
- ³⁰Obenu lē ndu Fārisii waa ndu maru ekemu j̄ikaru uche Chileke l'onwophē bya aburu ndu Jionu emeduru baputizimu.
- ³¹Jizōsu sū p̄hē: “? Bū gūnu bē mu a-turu oḡbo-a yeru; b̄kpoo gūnu bē ēphe dū g'ō ya?”
- ³²Ēphe dū g'unwegirima, nō l'edupfu eku nwibe p̄hē oku asujē: ‘Nta bē anyi phuru unu ūpyi; ophu unu ekwedū ete ebvu. Anyi rwua erwubvu; ophu unu ekwedū ara ēkwa.’
- ³³Noo kēle Jionu onye emeje baputizimu bē byaru nū; ophu o dūdu iphe, ookweje eriri; ophu o ngūdu mē; unu sū l'ōbvū eme iya.
- ³⁴Abūbu-Ndiphe byakwanū; bya anōdu eri angū; unu sū g'e lenu l'ō b̄ ēkp̄iri; b̄uru onye nggaga mē; b̄uru ònyà ndu ana akirikō mē ndu iphe-ēji.
- ³⁵Ōle ndu kwetarū kē mmamiphe Chileke; l'egoshi lē mmamiphe iya b̄ iphe, pfuru ōto.”

Jizōsu akpafū ibe Sayimonu; onye Fārisii

- ³⁶Tōbudu iya b̄; onye lanū lē ndu Fārisii seeru iya ēbyaa. Ō bya eje ibe onye Fārisii ono bya anōdu kē nri ono.
- ³⁷Nwanyī ovuōba, shi l'ime mkp̄kpu nūmaep̄ho l'ō nō lē nri l'ūlo onye Fārisii; o gude mgbere manū, eshi mkp̄o tēme o nōdu ere ire shii
- ³⁸gude bya apfuru iya lē mgboru ōkpa; wata akwashī ēnya-mini. Ō nōdu akwashī Jizōsu ēnya-mini l'ōkpa bya egude ēgbushi, nō iya l'ishi gude ehucha iya ya; etsutsu iya ōnu l'ōkpa bya eworu manū ono, eshi mkp̄o ono wūa ya ya.
- ³⁹Onye Fārisii ono, shiru iya ite ēbyaa ono hūmae ya phō; o r̄ia sū: “Ōme nwoke-a b̄ onye mpfuchiru Chileke eviya; mē o manurua onye nwanyī-a, l'edenyi iya ēka-a b̄; maru g'ooomebe iphe-ēji kparū.”
- ⁴⁰Jizōsu sū iya: “Sayimonu; o dūru iphe, mu e-pfuru ngu.” Sayimonu sū iya: “Pfunaa ya; O-zì-iphe.”
- ⁴¹Jizōsu sū iya: “Nwoke lanū jieru ūmadzu labō ūḡwo. Onye ophuu bē o jieru ūkporo pangu labō lē pangu iri. Onye ophuu bē o jieru pangu ise kp̄urumu.
- ⁴²Ō nōnya; ophu ēphe adūdu ike p̄f̄ua ya ūḡwo ono. Ō parū ūḡwo ono hakōtaru p̄hē ēphenebo. ? Bū onye ole bē a-ka iya eye obu l'ēphenebo ono?”
- ⁴³Sayimonu sū iya: “Mu ar̄ikwa l'ōo onye ophu o harū ophu ka shii phō.” Jizōsu sū iya: “I pfuru ree!”

⁴⁴Ọ bya aghaa ẹnya l'ẹka nwanyi ono nọ bya asu Sayimonu: “? I humaru nwanyi-a? Mu bataru ulo ngu; ọphu i keduru mu mini ge mu saa ọkpa; ọle nwanyi-a gude ẹnya-mini saa mu ọkpa; bya egude ẹgbushi iya huchaa ya.

⁴⁵Ọphu i tsutsuduru mu ọnu; ọle eshinu mu bataru be nwanyi-a gudee mu pho etsutsu ọnu l'ọkpa.

⁴⁶Ọphu i wuduru mu manu l'ishi. Obenu le nwanyi-a gudeepho manu, eshi mkpo; bya ere ire shii, awu mu l'ọkpa.

⁴⁷Oo ya bu ge mu karu ngu: a guru nwanyi-a nvu l'ikpoto iphe-ẹji iya. O buru iphe ono meru g'o gude o yee mu obu shii. Obenu l'onye a guru nvu l'iphe, ha nwanshii; eyeje obu nwanshii.”

⁴⁸O su nwanyi ono: “A guwaru ngu nvu l'iphe-ẹji ngu g'o ha.”

⁴⁹Ndu epe l'iya eri nri wata epfufu su: “? Bu onye baa? Onye ọphu agujefuaru nemadzu nvu l'iphe-ẹji.”

⁵⁰O su nwanyi ono: “Ekweta, i kwetaru nkemu dzowaru ngu. Laa l'ehu-guu.”

Luku 8

Unwanyi, l'etso Jizosu

¹Ntsolohu teke ono kwapho; Jizosu tuko mkpukpu le mkpukpu jephekota; ara ozi-oma k'eka Chileke bu eze ono arara; bya epfu iya epfufu. Yee umadzu iri l'ebo ono swikpoerupho;

²mekpoo unwanyi, o haru mee g'ephe wekorohu l'obvu, eme phe nu; me iphe-ememe mmanu. Unwanyi ono, epe l'iya swigbaa ono bu Meri ọphu eekuje onye Magudala; onye Jizosu chifuru obvu esaa l'ehu;

³waa Jiowana, nyee Kuza ọphu bu iya l'eyeru Herodu aka l'achikobe eku iya waa Suzana; waa ikpoto ndu ozowaro. G'ephe ha gude iphe, epe nweru ejeru Jizosu phe ozi.

Onye agha mebyi iphe

(Mat 13:1-9; Mak 4:1-9)

⁴O be teke ikpoto nemadzu zakoberu; ndu shi le mkpukpu wu-pfuta iya; o nmaaru phe etu su phe:

⁵“Nwoke jeru l'egu atu mebyi iphe iya. O nodu atu mebyi iphe ono; o haru daa l'aguga gbororo; a zopyashia ya l'okpa teme enu bya atutua ya.

⁶O duru ndu ọphu daru l'epfu; efufu, oofuta o nwulwashihu nwushihu; kele mini ta adudu l'epfu ono.

⁷O duru ndu ọphu daru l'eka akpuru obvu no l'ime ali; epe l'obvu ono tuko vutakota. Obvu ono kpagbushia ya.

⁸O dukwarupho ndu ophu daru l'eka ali du ree bya evushia; bya amia gbaa mgburugburu ugbo ukporo ise.” O pfunya nno bya ara ya arara su: “Onye nweru enuchi, l'anụ iphe; numakwa iya!”

Iphe, meru g'o gude Jizosu nodu egudeje etu ezi iphe

(Mat 13:10-17; Mak 4:10-12)

⁹Ndu etsoje iya nu jia ya iphe, etu ono bu.

¹⁰O su phe: “Oo unubedua be Chileke meru g'unu maru iphe, e shi domigbaa edomi, bu iya bu k'eka Chileke bu eze; obenu le ke ndu ozo be a tukoru anmaru phe l'etu etu; g'oburu ephe -lee enya nta lee imo; o to dudu iphe, ephe ahuma; teke ephe numachaa nta numa imo; o to dudu ophu aga phe nchi.”

Iphe, etu onye agha mebyi iphe ono bu

(Mat 13:18-23; Mak 4:13-20)

¹¹Su-a; waa iphe, etu ono bu baa: “Mebyi iphe ono bu opfu Chileke.

¹²Ndu ophu daru l'aguga gbororo bu ndu ophu numachaa iya nu; Obutuswe bya anafu phe mebyi opfu ono, a kuru l'ime obu phe ono; g'ephe te ekweta g'a dzoo phe.

¹³Ndu ophu daru l'epfu bu ndu ophu bu teke ephe numaru opfu ono be ephe natakpoo iya l'ehu-utso; ole o to gbaduru phe ogbarabvu l'obu; ephe kwetaepho; kpoo nwupfu nwanshii; o beepho teke ohutama byapfutaru phe; ephe gwobe iya.

¹⁴Ndu ophu daru l'eka akpuru obvu no l'ime ali bu ndu ophu numachaa iya nu; ephe jenya l'uzo phe ono; oke egomunggo; waa eku; waa iphe-utso ophu du le ndzu phe kpanuka phe eh; ophu o dudu iphe, ozi-oma ono meru phe l'ehu.

¹⁵Ndu ophu daru l'okpobe ali; noo ndu ophu bu ndu numaru opfu ono bya egude okpobe obu oma gudeshia ya ike-ike. Ephe taa nshi pfukashia opfu Chileke ono ge ndu ozo kweta.”

Oroku, e yeru oku kpuchia iphe

(Mak 4:21-25)

¹⁶“O to dukwa onye abujeru; o -yechaa oku l'oroku l'o woru iphe kpuchia ya; ozoo l'o woru iya nwua le mkpula iphe, aaze aze. Eedobeje iya l'iphe, aapfubeje oroku g'onnyemonye, bataru nu a-huma iphoró iya.

¹⁷Kele o to dudu iphe, e domiru edomi, e tee mechadaa mee g'a madzuru; ophu o dudu iphe, eeme le mpya, e tee mechadaa mee g'a madzuru.

¹⁸“Unu kwaberu onwunu enya l'iphe, unu anu le nchi; kele iphe, bukpo onye nweru nu be ee-yebaaru l'ophu o nweru. Onye ete nwedu nu be nwophu o dobesu le ya nweru be aa-gbenu natafua ya nu.”

Ne Jizosu yee unwune iya

(Mat 12:46-50; Mak 3:31-35)

¹⁹E mecha; ne Jizosu waa unwune iya bya abyarwuta eka ono. Ophu ephe adudu ike jekube iya; kele nemadzu du igwerigwe.

²⁰A sù iya: “Ne ngu yẹe unwune ngu nọkwa l'etezi eku ngu.”

²¹Ọ sù: “O to nwekwa onye ọzo, bụ ne mu; ọzoo unwune mu; gbahaa ndu nọmaru opfu Chileke ono bya eme iya ememe.”

Jizọsu abyanyi oke akpara-mini

(Mat 8:23-27; Mak 4:35-41)

²²O be ujiku lanu; Jizọsu yele ndu etsoje iya nu bahu l'ugbo. Ọ sù phe: “Unu g'anyi dafu azu eze-enyimu azu iya ophuu.” Ephe kporu ugbo jeshia.

²³Ephe kponyaa; mgbenya tu Jizọsu. Oke pherephere gude oke akpara-mini bapfuta phe l'echi ogbu mini ono. Mini wujiahaa ugbo-a; ndu ono nma l'agaga.

²⁴Ephe je ekutee Jizọsu sù iya: “Onyibe! Onyibe! Ugbo abyaakwa anyi ekpukpu!” Ọ gbalihu bya abaarụ pherephere mba; baarụ oke akpara-mini mba; ọ buru bugemu. Ekameka daa nyonyoronyo.

²⁵Ọ sù phe: “? Denuhununu ekwekwe obu, unu kweru obu?” Ndzụ guahaa phe. Ephe gude ehu anmanma wata epfu sù: “? Bụ egube nemadzu gunu baa? Onye ophu asuje pherephere yee mini l'ọ waa iphe, ephe e-me; ephe emee g'o pfuru.”

Nwoke, obvu eme

(Mat 8:28-34; Mak 5:1-20)

²⁶Jizọsu phe bya akpo-rwua ali ndu Gerasa, no ghaaru Galili iphu.

²⁷Afuta, ofuta l'ugbo; nwoke, obvu eme, shi l'ime mkpukpu gbapfuta iya. Nwoke obu nokpowaru odu o yeberu uwe l'ehu; ophu o budu l'ulo; ọ buru l'eka eelije nemadzu be o bu.

²⁸Ọ humaepho Jizọsu; ọ daa kpurumu l'iphu iya; bya echia mkpu sù: “Jizọsu! Nwa Okalibe-kangokotaru-nu, bu Chileke! ? Bụ gunu be mu le ngu jigba? Mu arwokwa ngu arworwo; ta anushinu mu aphu.”

²⁹Jizọsu kahawaru obvu ono g'ọ futa nwoke ono l'ehu; kele tekenteke be ọ kparwutawaru iya l'ehu. A tua ya mkporo l'okpa yele eka; chee ya nche. Ọ nodu atukoje iphe ono gbabushia; obvu ono emee ya; l'ọ sahu laa l'echiegu.

³⁰Jizọsu bya ajia ya sù: “? Iza gunu?” Ọ sù l'epha iya bu Unubuku; kele obvu du igwerigwe buru iya l'ehu.

³¹Obvu ono tuko rwọ Jizọsu sù g'ọ to sukwa phe g'ephe wulahu l'iduma, enwedu ohu.

³²Ọ duru ikpoto ezi, akpa nri l'aguga ubvu l'eka ono. Obvu ono g'ephe ha rwọhaa ya g'o kwe g'ephe wuba ezi ono l'ehu. Ọo ya bu; ọ sù g'ephe wubanu.

³³Obvu ono wufuta l'ehu nwoke ono je awuba ezi ono l'ehu. Ikpoto ezi ono shi l'aguga ubvu ono phota oso; gbaa kpurukpuru gbazeta je awuda l'eze-enyimu ono; mini rigbushia ya.

34Ndu eche iya nū hūmaepho iphe, meru nū; ephe gbackashihu je epfukashia ya l'ime mkpukpu me l'oma obegu.

35Oo ya bu; a wuru jeshinaa ahuma iphe, meru nū. Ephe byapfuta Jizosu; ephe bya ahuma onye obu, obvu shi l'ehu wufu obu g'o no-kube Jizosu. O dūwanu iche; yewanu uwe l'ehu; ndzu guahaa phe.

36Ndu humaru iphe, meru nū kooru phe g'e gude mee onye ono, obvu shi eme ono o wekorohu.

37Oo ya bu; ndu bupheru mkpukpu Gerasa mgburugburu rwoahaa Jizosu g'o lufuru phe l'ali; kele ndzu-agugu rwutaru phe. Jizosu bahu l'ugbo laphushia azu.

38Nwoke ono, a chishiru obvu l'ehu ono rwoahaa Jizosu ge yee ya nodu. Ophu Jizosu ekwedu; bya asu iya:

39“Te etsoshiru mu. Laa ndu unu je akoo eze iphe, Chileke meru ngu.” O tugbua je etsoru mkpukpu ono mgburugburu ara eze iphe, Jizosu meru iya arara.

Nwa Jiayirosu me nwanyi, nsọ eme mkpurumkpuru

(Mat 9:18-26; Mak 5:21-43)

40Jizosu lwaepho; ikpoto ndu kuru l'eka ono nata iya okpobe anata; kele onyemonye echewaru iya echeru.

41O duru nwoke lanu, aza Jiayirosu, bu onye-ishi ulo-ndzuko. O bya adaa Jizosu le mgboru okpa; bya arwo iya; eyeru iya eka l'ali g'o bya ibe iya.

42Ishi iya bu l'iphe, nwoke ono nwutaru bu mgbawali lanu kpurumu, nowaru iphe, ha g'apha iri l'ebo. Nwata ono nodu abya anwuhu. Jizosu tsoru iya jeshia. A nodu awu gidigidi akpa mkpa; ekpo iya eka labo.

43O dukwarupho nwanyi, nsọ-nwanyi mewaru mkpurumkpuru apha iri l'ebo, yi le ndu ono. Nwanyi ono tukowaru iphemiphe, o nweru mephushichaa l'eka ndu eme obvu; ophu o dudu onye ophu metaru iya nu.

44O shia Jizosu azu pyobata bya edenyi onu uwe iya eka; nsọ nwanyi ono meepho bugengu.

45Jizosu su: “? Bu onye denyiru mu eka?” Ophu o dudu onye kweru l'oo ya. Pyita su iya: “Ha! Onyibe; igwe oha-a ekpo ngu eka labo egube-a; i nodu aji onye denyiru ngu eka.”

46Jizosu su: “O duru onye denyiru mu eka; kele mu mawaru l'ike shi mu l'ehu lufu.”

47Nwanyi ono nonyaa bya amaru le ya tee domikotadu onwiya; o gude ehū anmanma bya adaa ya kpurumu l'iphu; bya araa ya arara l'iphu oha iphe, kparu iphe, ya denyiru iya eka; bya epfukwaapho ge ya gude wekorohu teke ono teke ono.

48Jizosu su iya: “Nwada mu; ekweta ngu mewaru i wekorohu. Laa l'ehu-guu!”

⁴⁹Tobudu iya bu; Jizosu kpukwaduru-a opfu l'onu; nemadzu shi l'ibe onye-ishi ulondzuko pho bya asu yebedua ono, bu onye-ishi ulondzuko ono: "Hakwaa O-ziphe; te epfuchiakwa iya nchi; le nwa ngu nwanyi nwuhwakwaru."

⁵⁰Jizosu numa iya bya asu iya: "Ta atsushi ebvu! Oo 'epho g'i kweta! I -kwetawaa be nwa ngu a-dua iche."

⁵¹Jizosu byarwutaepho unuphu; ophu o dudu onye o kwekwaduru ge yee ya swiru bahu l'ulo; gbahaa Pyita; waa Jionu; waa Jiemusu; waa ne le nna nwata ono.

⁵²Onyemonye tuko echi mkpu; akwa ekwa nwata ono. Jizosu su: "Unu ta arashi ekwa; kele o to nwuhuduru anwuhu. Oo mgbenya be ooku."

⁵³Ephe ze iya ochi; kele o doru phe enya le nwata ono nwuhuru anwuhu.

⁵⁴O bya eseta nwata ono l'eka bya ekua ya su: "Nwata! Teta!"

⁵⁵Nwata ono lwaphuta azu l'ekpa iya. O kwolihi. Jizosu su g'a nu nwata ono nri g'oria.

⁵⁶O du ndibe phe biribiri. O su g'o to dukwa onye ephe e-pfuru iphe ono, meru nu ono.

Luku 9

Jizosu ezi ndu-ishi-oziri l'ebog'ephe je epfua opfu Chileke

(Mat 10:5-15; Mak 6:7-13)

¹Jizosu bya ekukobe umadzu iri l'ebog'ephe ono l'ekalanu; bya eyeru phe okpukpu-ike g'ephe gudeje ike chishije obvu g'o duhabe; waa g'ephe meje ge nemadzu wekorohu l'iphe, eme iya nu.

²O bya ezia phe su g'ephe je araa k'eka Chileke bu eze arara; waa g'ephe mee ndu iphe eme g'ephe wekorohu.

³O su phe: "Unu ta adukwa iphe, unu e-gude gbeshi ije unu. Unu ta apakwaru oshimpaleka; ophu unu apakwaru ekpa. Unu te egudekwa nri; ophu unu egudekwa okpoga. Ophu unu eyekwa uwe n-yekwase.

⁴Unuphu, unu bahukpowaru; unu noduekwapho l'eka ono. Unu -shi l'eka ono unu ejeshia mkpukpu ozo.

⁵Eka unu jeru; a -jika unu; unu lufuta le mkpukpu ono jishia urwuku okpa unu g'oburu iphe, l'a-nodu agba phe ekebe."

⁶Ephe tugbua je ejepheahaa le mkpukpu le mkpukpu; ara ozi-oma ono arara; bya eme ge ndu iphe eme wekorohu l'ekameka.

Iphe, atufu Herodu ehu

(Mat 14:1-12; Mak 6:14-29)

⁷Ochi-oha, bu Herodu numa iphemiphe ono, emenu ono; o tufu iya ehu. O duru ndu suru l'oo Jionu tetaru dzuru ndu ozo.

⁸Ndu asụ l'ọo Elayijia tetaru; ndu asụ l'ọo onye lanụ l'ime akahụ ndu mpfuchiru Chileke tetaru.

⁹Herodu sụ: “Ha! ? Buhunu onye bu onye ọwa-a, mu anụ nkiya egube ọwa? ? Bu Jiṅu-a, mu ziwaru; e je egbuta iya ishi wotaru mu-a; ọo ? buhunu onye?” No iya; Herodu meahaa gę ya e-me humakpoo Jizosu ọbu ęnya.

Jizosu anụ unu umadzu iri l'ębo l'ukporo iri nri

(Mat 14:13-21; Mak 6:30-44; Jiṅ 6:1-14)

¹⁰Ndu-ishi-ozu ono jechaa bya alwaphuta azụ bya akokotaru Jizosu iphe, ephe meru. O duta pę; ephe swiru jeshia Bętusayida nwękinyi pę.

¹¹Ikpoto ndu ono numa iya bya etsoru iya. O nata pę okpobe anata bya awata pę epfuru k'ęka Chileke bu eze; bya emee ndu iphe eme; ephe wekorohu; mbu ndu o bu mkpa.

¹²O be l'uzenyashi; umadzu iri l'ębo ono byapfuta iya bya asu iya: “Sudupho ikpoto ndu-a g'ephe tsoru unuphu l'unuphu l'iphe, bukpuo mkpukpu-a, bupheru mgburugburu-a je akpata nri, ephe e-ri; choo ęka ephe a-kwa; kele ęka-a, anyi no-a bukwa echięu.”

¹³O sụ pę: “Unubędua l'onwunu nunu pę nri g'ephe ria.” Ephe sụ iya: “Iphe, anyi gude l'ęka-a bukwa ishi buredi ise waa ęma labo kpuu; gbahaa g'anyi je l'onwanyi je azutaru g'ephe ha nri.”

¹⁴Kele unwoke, dokwanuru l'ęka ono beru l'unu unwoke iri l'ębo l'unwoke ukporo iri. Jizosu sụ ndu etsoje iya nu: “Ngwa; unu mee pę g'ephe nodugbaa anoo l'ophere l'ophere; g'ephe noo ukporo ębo-ębo l'iri-iri.”

¹⁵Ephe bya emee g'o pfuru bya emee pę; ephe noduchaa anoo g'ephe hakota.

¹⁶O bya ewota ishi buredi ise ono waa ęma labo pę; bya apalia ęnya imeli kele Chileke ekele kę nri ono; bya eworu iya nyawashia; bya anu ndu etsoje iya nu g'ephe keeru ikpoto ndu ono.

¹⁷Ephe tuko rijichaa ephe. A tutukobe ophu ephe riphodoru; o ji nkata iri l'ębo; mbu ibiribe buredi ono.

Pyita akọ onye Jizosu bu

(Mat 16:13-19; Mak 8:27-29)

¹⁸O be teke Jizosu no epfu anu Chileke nwękinyi iya; ndu etsoje iya nu nodukwapho l'ęka ono ephe l'iya. O sụ pę: “? Bukpuo onye be ndiphe asuje le mu bukpuo?”

¹⁹Ephe sụ iya: “O nwekwaru ndu asuje l'i bu Jiṅu, onye shi emeje baputizimu. O nwekwarupho ndu asuje l'i bu Elayijia. Ndu asu l'ọo onye lanu l'ime akahu ndu mpfuchiru Chileke tetaru dzuru ndzu.”

²⁰O sụ pę: “Unubędua-e; ? Unu sukwanuru le mu bu onye?” Pyita sụ iya: “Oo ngu bu Kęreshi ọbu, shi Chileke l'ęka.”

Epufufu mbu, Jizosu epfu le ya e-je iphe-ęhuka nwuhu

(Mat 16:20-28; Mak 8:30—9:1)

- 21**Ọ karu p̄hẹ bya alọoru p̄hẹ ẹka lẹ nchị g'ọ tọ ɔ̀kwa onye ẹp̄he e-pfuru ip̄he ono.
- 22**Ọ sụ: “Abubu-Ndip̄he jefutajekwa ip̄he-ẹhuka, ɔ̀ igwerigwe; ndu bu ọgerenya; waa ndu-ishi uke Chileke; waa ndu ezije ekemu l'a-jikakwa iya woru iya megbua. O -rwua lẹ mbọku k'eto iya Chileke emee ya l'o teta dzuru ndzụ ọzo.”
- 23**Ọ sụ p̄hẹ g'ẹp̄he ha: “Onye ọ ɔ̀ du iya g'ọ tsoru mu; g'onye ono wofu ẹnya l'ẹhu onwiya; vutajẹ oswebe ọnwu nkiya mbọku-mbọku vuru tsoru mu.
- 24**Kele onye eme g'ọ dzọ onwiya ndzụ l'e-tuphakwa ndzụ iya etupha. Onye gudekwanu op̄fu ẹhu mu tuphaa ndzụ iya l'a-dzọ onwiya ndzụ.
- 25**Mbu ? bu gunu bu urwu, nemadzụ ritaru m̄e o -nwekotachaa ip̄hemip̄he, nọ lẹ mgboko-a bya alakwanaa onwiya l'iswi; a nua ya ap̄hẹ?
- 26**Kele onye ip̄here Abubu-Ndip̄he ɔ̀; ip̄here ezi ozi-oma iya ɔ̀ iya; ip̄here onye ono a-ɔ̀kwapho Abubu-Ndip̄he m̄e ọ -nọduepho l'ogbu-nw̄inwii nkiya abya; waa l'ogbu-nw̄inwii ke Nna iya; waa ogbu-nw̄inwii k'unwu-ọjọzi iya, ɔ̀ nsọ.
- 27**Ọle ḡe mu gbukwaaru iya unu tororo; ọ ɔ̀kwaru ndu haru pfuru l'eka-a, ata yidu nw̄uhu; gbahaa l'ẹp̄he h̄umaadaru ẹka Chileke bu eze.”

Jizosu egbu nw̄inwii

(Mat 17:1-8; Mak 9:2-8)

- 28**“A nọep̄ho ip̄he, ha g'abalị ẹsato, o pfuru ip̄he ono; ọ bya eduta Pyita; waa Jiọnu; waa Jiemusu je enyihu eli ubvú; jeshia ep̄furu n̄ Chileke.
- 29**O pfunyaep̄ho n̄nyaep̄ho Chileke; ip̄hu iya gbuchafu; uwe iya chanwehu; gbuaaha nw̄inwii.
- 30**A bya ele ẹnya; ndiche labo nọdu ep̄fuwaa eyeru iya. Ndu ono bu Mosisu yee Elayijia.
- 31**Ep̄hebedua goshikwarup̄ho onwop̄he l'ogbu-nw̄inwii imigwe. Ep̄he nọdu ep̄furu Jizosu k'anw̄uhu, ọo-nw̄uhu lẹ Jierusalemu, bu ip̄he, Chileke tubuwaru l'oo-me iya.
- 32**Teke ono be Pyita yee ndu ẹp̄he l'iya swi kumihuwaru mgbenya. Ep̄he tehu bya ahuma ogbu-nw̄inwii ya ono waa umadzu ẹbo ono, ẹp̄he l'iya pfuru l'eka ono.
- 33**Ndu ono byaep̄ho aha Jizosu; Pyita sụ iya: Ọnyibe; ọ ɔ̀kwa ree g'anyi nọ l'eka-a; g'anyi tua mkpu ẹto: nanu nkengu; nanu ke Mosisu; nanu ke Elayijia.” Pyita ta amahedu ip̄he, oop̄fu.
- 34**Ọ kp̄kwaduru nno l'onu ep̄fu; urwukpu bya aso-kputa p̄hẹ. Ndzụ guahaa p̄hẹ g'urwukpu sopyaberu p̄hẹ ono.
- 35**Olu-op̄fu shi l'urwukpu ono gbufu sụ: “Onye ọwa-a bu Nwa mu nwoke, mu hotaru. Unu numajekwa ip̄he, oop̄fu!”
- 36**Olu ono pfuchaep̄ho ip̄he ono; onye a h̄umaru buwaru Jizosu nwekiya. Ep̄he nọkirishia; ọphu ọ ɔ̀du onye ẹp̄he pfuru iya teke ono; mbu ip̄he ono, ẹp̄he h̄umaru ono.

Eeme onye ọbvu atụ ndapfụ g'o wekọrohu

(Mat 17:14-18; Mak 9:14-27)

37O be lẹ nchitabọhu iya g'ephe nyizetachaaru l'eli úbúvú ono; ikpoto nemadzu wụ-pfuta iya.

38Noo ya bụ; nwoke lanụ l'ime ikpoto ndu ono chishia sụ: “O-zì-iphe; jiko lenaa nwa mu-a ọnya; kele ọ kwa iya bụ mu nwa lanụ.

39O duru egube ọbvu, akparwutaję iya l'ẹhu; ọ -bya l'ọ tụa ya ndapfụ; k'ọphu úphù anọduje atsushi iya l'ọnu; oomekaadaa ya iphe tẹme l'ọ haa ya.

40Mu rwọo ndu etsoje ngu nụ g'ephe chifu iya; ọphu ephe adudu ike.”

41Jizosu sụ: “Ha-oo! Unubę ọgbo ẹjo ọkpoma ọwa-a, adudu iphe, unu ekwetaję-a! ? Bụ teke ole bę mu a-takpọo nshi gę mu l'unu nọ-beru? Gudeeshikwa nwa ngu ọbu kpiritaru!”

42Nwata ono jefpushiępho Jizosu; ọbvu ono tuta iya tụa l'alị bya eworu iya gbachia. Jizosu bya abaarụ ọbvu ono mba; bya emee nwata ono o wekọrohu. O duru iya nụ nna iya.

43Ephe chikafuchaepho ọnya ele g'ike dụ-be Chileke.

Jizosu epfu iya k'ugbo ẹbo lẹ ya e-je iphe-ẹhuka nwụhu

(Mat 17:22-23; Mak 9:30-32)

O tuko dughakwada phez-a biribiri mbụ iphemiphe, Jizosu emegbaa. O sụ ndu etsoje iya nụ:

44“G'opfu-a bamikwaa unu l'enu-nchi; kele Abubu-Ndiphe bę ee-mechakwaa kpuru ye ndiphe l'eka.”

45Ọphu ephe ta amadụ iphe, o pfuru; kele e domiru iya edomi g'o to doshi phez ọnya. Ndzụ nọdu agụkwanu phez g'ephe e-me jia ya.

Onye kachakpọo shii

(Mat 18:1-5; Mak 9:33-37)

46Ephe wata adzokashi onye kachaa shii lẹ g'ephe ha.

47Jizosu maerupho iphe, dụ phez l'ọkpoma bya ekuta nwata nshii pfụ-kube onwiya;

48bya asụ phez: “Onye gude k'iswi ẹhu mu nabata nwata nshii, ha egube-a buakwaa mu bę ọ nabataru. Onye nabatakwanuru mbędua; buakwanaa onye ono, ziru mu ozi ono bę ọ nabataru; kele ọo onye ọnya kachaa alwalwa lẹ g'unu ha bụ onye kachaa shii.”

Onye ata akpọshidu iphe, anyi eme

(Mak 9:38-40)

49Jionu sụ iya: “Ọnyibe; anyi humaru onye gude ẹpha ngu achishi ọbvu. Anyi sụ iya g'o to meshi l'ọ too tsodu ngu g'anyibedua.”

50Jizosu sụ iya: “Unu ta asushi iya g'o to meshi; kele onye ata akpọshidu iphe, anyi eme akpọshi bụ anyi.”

Ndu Samériya ajika Jizosu

- ⁵¹O rwutashie ya pho l'ala l'imigwe; o tugbua le ya jefutaje Jierusalemu.
- ⁵²O haru ndu-ozu zia g'ephe vuru iya uzo je. Ndu ozu ono tugbua bya abahu le mkpukpu lanu, no le Samériya je g'ephe doziaru iya aka oo-ze.
- ⁵³Ophu ndu aka ono ekwedu iya anata; kele o phoberu uzo Jierusalemu.
- ⁵⁴Jiemusu; waa Jionu, bu ndu etsoje iya nu huma egube iphe ono bya asu iya: “Nnajiuphu! ? Bu g'anyi karu oku g'o shi l'imigwe bya ekepyashia phe too?”
- ⁵⁵Jizosu ghakobe bya agbochia phe onu su phe: “Unu ta amakwa egube iphe, unu l'iya l'eme.
- ⁵⁶Kele Abubu-Ndiphe ta abyaduru emebyi ndzu ndiphe; o chia g'o dzoo ndzu.” E mecha; ephe shi l'eka ono tugbua jeshia mkpukpu ozo.

Ndu e-tso Jizosu

(Mat 8:19-22)

- ⁵⁷Ephe jenyaepho l'uzo; nwoke lanu su iya: “Nnajiuphu; mu e-tsojekpoe ngu pho eje ekameka, iije.”
- ⁵⁸Jizosu su iya: “Uphaga nwekwaru enu; enu, ephe l'eli nweru epfune; obenu le Abubu-Ndiphe te enweddu aka oo-dobeje ishi.”
- ⁵⁹O su onye ozo: “Tsoru mu!” Onye k'ono su iya: “Nnajiuphu; ge mu jekwa elifua nna mu.”
- ⁶⁰Jizosu su iya: “Haa ndu nwuhuru anwuhu g'ephe lia ndu nkephe, nwuhuru anwuhu. Gubedua l'onwongu je epfua k'eka Chileke bu eze g'a numadzuru.”
- ⁶¹Onye ozo su iya: “Nnajiuphu; mu e-tsokwaru ngu; ole oo ge mu je asuadaa ndibe mu g'ephe nokwa-ehu mma!”
- ⁶²Jizosu su iya: “O-pa-ogu agha enya l'azu ta ayikwa l'ozu k'eka Chileke bu eze.”

Luku 10

Jizosu agba ndu-ozu iya ebo-ebo l'ozu-oma ono

- ¹E mecha; Nnajiuphu byakwa bya ahota ukporo umadzu eto l'umadzu iri l'ebo ozo bya agbaa phe ebo-ebo; su g'ephe vuru iya uzo jekota l'iphe, bukpo mkpukpu mekpoo ekameka, yebedua l'onwiya abya ejeje.
- ²O su phe: “Iphe, a koru l'opfu chashakwaru; mbu l'o kwatakpokwaaru ha shii; obenu le ndu-ozu, akpata iya akpata ha nwanshii. Unu pfuru nu Nnaji, nwe iphe, a koru l'opfu g'o ye ndu-ozu, l'a-bya akpata iya nu.
- ³Unu tugbua jeshia. Unu lekwa enya: l'unu dukwa g'unwu aturu; mu chiakwaru unu ye g'unu jeshia aka agu jiru ejiji.

⁴Unu te egudekwa ẹda-okpoga; ọzoo ẹda mmanu; ọzoo akpokpa. Unu te ejekwa anodu k'ekwe ekele le gbororo.

⁵Unuphu, unu -bahukpooru; unu vuru uto su: 'Ge nchi dukwa doo l'unuphu-a.'

⁶Teke nwa nchi-odoo no l'eka ono; nchi-odoo unu aburu nkiya. Teke 'o dudu; l'o lwaphutaru unu azu.

⁷Unu bukwarupho l'unuphu ono; riye nguje iphe, bukpo iphe, ephe nuru unu; kele onye akanya gbaru k'anata ugwo iphe, o setaru. Unu te ebuphekwa l'unuphu l'unuphu.

⁸Teke unu bahuru mkpuku; ephe -nata unu ree; unu riyekwapho iphe, a nuru unu.

⁹Unu mee g'ehu du ndu iphe eme ike l'eka ono; unu asu phe: 'Chileke abyaakwaa aburu eze unu.'

¹⁰Teke unu bahukwanuru mkpuku; ophu ephe anaduru unu; unu alufu l'oma gbororo iya bya asu phe:

¹¹'Urwuku mkpuku unu, du anyi l'okpa be anyi jishiakwaru unu-o! O kwa iphe, unu a-maru bu le Chileke abyawaa egoshi le ya bu eze.'

¹²Ole iphe, mu akaru unu bu; oo-kakwaru ndu Sodomu mma mboku ikpe; eme le mkpuku ono."

Iphe ee-me oha, jikaru nu

(Mat 11:20-24)

¹³"Nshio gube oha Korazinu! Nshio gube oha Betusayida! Kele ome e wotaru iphe-ohumalenya, e meru l'ime unu mee l'oha Taya yele oha Sayidonu m'ephe eyekwaa uwe-aphu; kpua onwophe nu uzanya; gude goshi l'izimanu lwaru phe azu; ephe ghawaa umere lwafuta Chileke.

¹⁴Ole oo-karu ndu Taya waa ndu Sayidonu mma me Chileke kpeje ikpe eme le g'oodu unubedu.

¹⁵Gube oha Kapaniyomu! ? O du ngu g'e kulia ngu g'i supfuru l'imigwe to? Aa-gbekwanu kwatsua ngu kwarua ngu oku-ali-maa!"

¹⁶O su ndu etsoje iya nu: "Onye numaru iphe, unu pfuru numawaru iphe, mu pfuru; onye jikaru unu jikakwaru mu pho; teme onye jikakwanuru mbedua buakwaa onye ono, ziru mu ozi ono be o jikaru."

Ndu Jizosu ziru ozi alwa l'ehu-utso

¹⁷Ukporo umadzu eto l'umadzu iri l'ebo ono jechaa bya egude ehutso lwa bya asu Jizosu: "Nnajiuphu; anyi gude epha ngu kachaa obvu ike!"

¹⁸O su phe: "Mu shia ele Nsetanu g'o shi l'igwe ada g'ebemu-igwe.

¹⁹Su-a; mu yeakwaru unu ike l'eka g'unu zopyabejehaa agwo l'okpa me akpi me g'unu kakota iphe, bukpo ike k'ohogu ono, bu Obutuswe ike. O to dudu iphe, byaru ayi mee unu.

²⁰Ole g'ò tò bukwaru iphe, ẹhu iya a-nòdu atso unu bu l'unu ka obvu ike; g'ẹhu tsojechia unu l'e dewaru ẹpha unu l'ẹkwo l'imigwe.”

Ẹhu atso Jizosu

(Mat 11:25-27; 13:16-17)

²¹Lẹ teke ono kwapho bẹ Unme Chileke meru Jizosu; ẹhu tsomahu iya. Ọ sù: “Mu ekele ngu ekele Nna, bu Nnaji igwe yee alì; l'i domiru iphe-a gẹ ndu kwaru ẹnya; waa ndu mmamiphe ta amaru iya; i woru iya goshichia ndu obu phẹ gùru ìphóró gẹ k'unwegirima. Ee! Nna; noo iphe, i mekpọerupho g'ò dọ ngu; waa g'ootso ngu uto ememe iya.

²²“Nna mu yeakwaru mu iphemiphe l'ẹka. Ọ tọ dukwa onye maru onye Nwa Chileke bu; gbahaa Nna iya, bu Chileke. Ọphu ọ dukwa onye maru Nna iya, bu Chileke; gbahaa Nwa iya; ozo 'ẹpho onye Nwa iya ono hotaru; goshi iya Nna iya.”

²³Jizosu yee ndu etsoje iya nù nọduepho nwẹkinyi phẹ; ọ ghakobe sù phẹ: “Ẹhu-uto be a goru nù unube ndu gude ẹnya unu ahuma iphe-a, unu ahuma-a.

²⁴? Unu maru-a lẹ ndu mpfuchiru Chileke; waa ndu eze, dọ igwerigwe bẹ ọ gùru ẹgu ahuma iphe-a, unu ahuma-a; ọle ẹphe ta ahumaduru iya. Ọ gùkwaru phẹ pho anuma iphe-a, unu anu-a; ọle ẹphe ta anumaduru iya.”

Ekemu, kpọ-chiru ishi

(Mat 22:34-40; Mak 12:28-34)

²⁵Noo ya bu; onye lanu, maru ekemu gbalihu gẹ ya gude aji hua Jizosu ama bya asu iya: “O-zì-iphe; ? bu gunu bẹ mu e-me gẹ mu dzuru ndzù ojejeje.”

²⁶Ọ sù iya: “? Bu gunu bẹ e deru l'ẹkwo ekemu? ? I gutaru gunu?”

²⁷Nwoke ono sù iya: “Ẹkwo ekemu sùru: ‘Yee Nnajiuphu, bu Chileke ngu obu ngu g'ò ha. Gude ndzù ngu g'ò ha; mẹ ike ngu g'ò ha; mẹ uche ngu g'ò ha yee Chileke obu. Waa g'i yee nemadzù ibe ngu obu g'i yeru onwongu.’ “

²⁸Jizosu sù iya: “I pfukotaru iya; i -mee nno; l'inweru ndzù.”

Ẹtu k'onye Samériya, nweru obu oma

²⁹Nwoke ono kùchata iya bya asu iya: “? Ọ bukwanuru onye bu nemadzù ibe mu obu?”

³⁰Jizosu nmaaru iya ẹtu sù: “Ọ duru nwoke, shi Jierúsalem eje Jieriko. O je evubaa ndu ana nfu. Ẹphe tsua ya iphe tsugbuphodo iya ndzù nwanshii; gbabẹ iya oto bya aparu iya haa; ọ nọduwaa mkpọkpo ndzù. Ẹphe gbakashihu.

³¹Ọ duru g'ò nwuru; onye uke Chileke nọdu aghata l'uzo l'ẹka ono bya ahuma iya; bya agbangoo ya; shia uzo ozo; ọ buru iya atugbu.

³²Oshilokpa Lívayi ghatashikwaapho l'uzo ono bya ahumakwa iya pho bya aghangokwaa ya pho.

³³Obenu l'onye Samériya, ejekpọoro iphe, ooje ghatashiaru ẹka nwoke ono nọ bya ahuma iya; imemini iya dụ iya.

³⁴Ọ bya ejepfu iya bya edebechaa ya manụ l'ónyá, dughaa ya l'ẹhu; kpua ya ya mẹe bya ekechishia ya ya. Ọ bya apata iya tukobe ẹ nkapfụ-igara iya; bya aparwuta iya ulo ndu ije; bya edobe iya swiru.

³⁵O be ẹ nchitabọhu iya; ọ chifuta shiru labọ bya anụ onye-nche ulo ndu ije ono bya asụ iya: 'Letakwa iya ẹnya. Teke mu lwaru; ọ -duru iphe ọzo, o phubaaru ngu; mu a-pfua ngu iya.'

³⁶“? Bụ onye ole l'ime umadzu ẹto ono bẹ i riru l'ọo ya bụ nemadzu ibe nwoke ono, vubaru ndu ana nfu ono?”

³⁷Onye ezije ekemu ono sụ iya: “Ọo onye ọphu phuru iya obu-imemini phọ.” Jizọsu sụ iya: “Laa; je emeje egube ono.”

Jizọsu akpafuta Mata yẹ Meri

³⁸Tọbudu iya bụ; Jizọsu phẹ kwaseru ejekpọekwapho iphe, ẹphe eje. Ẹphe jenyaephọ l'uzo; ọ bahụ l'oma mkpukpu lanu. Nwanyị, ẹpha iya bụ Mata dubata iya ibe phẹ; ge ya kwaaruu iya ẹbyaa.

³⁹Nwanyị ono nweru nwune nwanyị, ẹpha iya bụ Meri. Meri je anọdu nonyabe Nnajiuphu; anụ opfu iya.

⁴⁰Mata yenukakwanuru ẹhu l'eme nri. Ọ bya ejepfu Jizọsu je asụ iya: “Nnajiuphu! ? Tii sudu nwune mu nwanyị g'ọ tọ hashiru mu ozi-a ge mu je nwẹkinyi mu? Sunu iya g'ọ bya eyeru mu ẹka!”

⁴¹Nnajiuphu sụ iya: “Mata! Mata! I kunukaru photophoto megbushinuka onwongu.

⁴²Iphe lanu bụ iphe, dụ mkpa kpurumu. Meri hataakwanaru òkè-iphe ono ọphu ka ree. Ọphu a nafubaedu iya ya anafu.”

Luku 11

Jizọsu ezi g'eeefuje anụ Chileke

(Mat 6:9-13; 7:7-11)

¹O be ujiku lanu; Jizọsu nọdu ẹka lanu epfu anụ Chileke. O pfughechaẹ ya phọ; onye lanu l'ime ndu etsoje iya nụ sụ iya: “Nnajiuphu; zinaa anyi g'eeefuje anụ Chileke ge Jionu zikwarupho ndu etsoje iya nụ-a.”

²Ọ sụ phẹ: “Unu -nọdu epfu anụ Chileke; unu sụje: “Nna anyi, bu l'imigwe; G'e dobe ẹpha ngu iche. Goshinu l'ọo gubedua bụ eze. G'emeje iphe, dụ ngu l'uche l'eliphe; g'eemeje iya l'imigwe.

³Nunu anyi nri ntanu-a; Nri, a-sujeru anyi eri mbọku-mbọku.

⁴Guaru anyi nvu l'ẹka anyi mesweru ngu. G'anyi guru ndu mesweru anyibedua. Te ekwekwa g'anyi nmalahu l'ohutama. Nafutachikwaa anyi g'anyi ta aba l'ẹka onye ẹjo- iphe.”

⁵Jizosu sụ phẹ: “Denu g'unu ha onye e-jepfu ònyà iya l'echi abali je asụ iya g'o jie ya ugwo ishi buredi ẹto;

⁶l'ònyà iya, shi ẹka dụ ẹnya byaru ibe iya; ophu ya enwedu nri, ya a-nụ iya.

⁷Ònyà iya ono gbẹ l'ime ọlo sụ: ‘E pfuchishi mu nchi! Mu gu-chiwaru ụzo; swobe iya iphe. Mu l'unwu mu zewaa azee. Ophu mu agbeshiedu abya ngu anụ buredi ke nta.’

⁸Gẹ mu kakwaru unu: ọ -buru l'ọ tọo gbeshidu abya iya anụ buredi ono kele ọ bu ònyà iya; l'oo-gudenu kele oopfuchi iya nchi; ophu iphere adudu iya bya anụ iya iphe, ọ byaru asụ g'ọ nụ iya.

⁹Noo g'o gude mu sukwanu unu; unu pfua g'a nụ unu iphe; aa-nụ iya unu! Unu chọo iphe; unu a-chọta iya! Unu kua ẹka l'uzo; aa-guharu iya unu!

¹⁰Kele onyemonye, sụru g'a nụ iya iphe be aa-nuje iphe; onye choru nụ l'a-chotaje; onye kuru ẹka be aa-guhajeru ụzo.

¹¹? Denu g'unu ha, buru nna, onye nwa iya a-sụ g'ọ nụ iya ẹma; l'ọ gbẹ chiru agwo nụ iya;

¹²ozoo teke ọ sụru g'ọ nụ iya ẹkwa-ọku; l'ọ nuchia ya akpi?

¹³Eshinu unube ndu bu ndu ejo-iphe amajeru nụ unwu unu iphe, dụ ree; ? buchia Nna unu bu l'imigwe ta akabadaa amaru g'oo-me nụ unu Unme-du-Nso; mbu unube ndu sụru g'ọ nụ iya unu?”

Ẹka ike Jizosu shi

(Mat 12:22-30; Mak 3:20-27)

¹⁴O be teke ọzo; ọ duru nwoke, Jizosu chifuru obvu, bu iya l'ehu, meru ẹbe oopfujedu opfu. Kpiridangu-obvu ono lufuepho nwoke ono l'ehu; nwoke wata epfu opfu. Ọ dụ ikpoto ndu ono biribiri.

¹⁵Ọ duru ndu ophu sụru l'oo obvu, bu Biyelezebolu, bu iya be bu onye-ishi iphe, bukpoobvu be o gude achishi obvu.

¹⁶Ndu ophu abya agbaberu iya onya opfu g'ephe gude nmata iya; sụ iya g'o menaru phe iphe-ohumalenya, e-goshi l'oo Chileke ziru iya eviya.

¹⁷Ọ maerupho iphe, ephe ari bya asụ phẹ: “Ali-eze -keha ẹbo; seahaa opfu be ọ buakwaa ọla-l'iswi. Nokwapho g'oo-du l'unuphu, keharu onwiya ẹbo.

¹⁸Teke ọ bukwanu le nkwoka dụ l'ibe Nsetanu; ? denu g'ee-me g'ali-eze iya keru; me unu -sụ l'oo Biyelezebolu be mu gude achishi obvu?

¹⁹Ọ -bukwanuru l'oo Biyelezebolu be mu gude achishi obvu; ? bu gunu be ndu k'unu gudekwanu achishi obvu nkephe? Ọ kwa iya bu l'oo ndu k'unu e-goshiwaro unu l'ikpe nmaru unu.

²⁰Obenu teke ọ bukwanu l'oo ike Chileke be mu gude achishi obvu obu; oo ya bu l'oo noo iphe, egoshi le Chileke buakwaa eze l'ehu unu.

21“Onye ọkpehu dụ -kwaghe ngwọgu akwaghe nọdu eche ibe iya nche; ? tị madụ l'ọ tọ dudu iphe, eme iphe iya?”

22Obenu teke onye ka iya ike byaru afuaru iya; bya alwu-kpee ya l'ọ nata iya ngwọgu ono, bu iphe, o doberu ọnya ono; bya akwaa ivu iya ono kekashia.

23“Su-a; onye mu l'iya ata tugbaduru bukwa onye opfu mu; onye mu l'iya ata achikobedu achikobe l'achikakwa achika.

Iphe, akpaję ọbvụ alwa azụ

(Mat 12:43-45)

24“Teke a chifuru nemadzu ọbvụ l'ẹhu; ọbvụ ono etsoru echiegu ẹka mini adudu aghaphe; achọ ẹka ọo-nme anmee. Teke o jenyaa; ọphu ọ dudu ẹka ọ humaru; l'ọ sụ ge ya laphuëshikwa azụ l'akahụ ụlo iya-a.

25Teke ọ byatashiaru; a zawa iya azaza; dozichaa ya ree;

26l'ọ je je achita ọbvụ ẹsaa ọzo, ka iya njọ; ẹphe awuba je eburu iya; ndzu nwoke ono teke ono abya aka njọ; eme le teke mbu pho.”

Ọkpobe ẹhu-utso

27Jizosu pfuepho nno; nwanyi lanu l'ime igwe oha ono chia mkpu su: “Ehu-utso be a goru nu nwanyi ọphu paru ẹpho-ime ngu bya echee ngu era!”

28O sụ iya: “Ehu-utso be gochiaru nu ndu anumaje opfu Chileke bya eme iya ememe!”

Iphe-ohumalenya, meru l'ẹhu Jiona

(Mat 12:38-42; Mak 8:11-12)

29O be g'ikpoto ndu ono aka shii eje; Jizosu pfuaaha su: “Ogbo-nta-a pakpokwaaru njọ. ẹphe achọ iphe-ohumalenya. Ole ọ tọ dukwanu iphe-ohumalenya ọzo, ee-goshi phe; gbahaa iphe, meru Jiona.

30Mbu-a; ọo kwa ge Jiona bujeru ndu Ninive iphe-ohumalenya pho bu ge Abubu-Ndiphe bu ndu ogbo-nta-a.

31Nwanyi, bu eze ndu Sheba be a-gbalihu mboku ikpe; nma ogbo-nta-a ikpe; kele o shi l'eka igwe beru; ali beru bya ge ya numa opfu nkwananya Solomonu. O be nta-a be onye ka Solomonu no l'eka-a.

32Teme ndu Ninive l'a-gbalihu mboku ikpe; nma ogbo-nta-a ikpe; kele izimanu lwaru ndu Ninive azu; ẹphe ghaa umere; lwapfuta Chileke l'opfu, Jiona pfuru phe; obenu l'onye ka Jiona no l'eka-a nta.”

Orọku, dụ l'ẹhu bu ẹnya

(Mat 5:15; 6:22-23)

33“O tọ dukwa onye abujeru; ọ -yechaa oku l'oroku l'ọ woru iya je edomia edomi; ọzoo l'ọ woru ite kpube iya. Owojechiaru iya kobe le nggu-oroku g'onymonye, bataru nu ahuma iphoro iya.

³⁴Enya ngu bu oroku, du ngu l'ehu. Teke enya doru ngu edodo; ogwehu ngu abukotaru ngu iphoro iphoro. Teke enya edoduru ngu edodo; ogwehu ngu abukotaru ochii ochii.

³⁵Oo ya bu; letakwa enya; a -nonyakwaa iphoro, no ngu l'ime gbey bya aburu ochii.

³⁶O -buru l'ogwehu ngu bukota iphoro; ophu o dukpodaaka aka ogoba ochii; bey oo-nodu enwu enwunwu g'oroku anoduje enwu-a gude nwuberu ngu oku."

Jizosu epfu ke ndu ezije ekemu

(Mat 23:1-36; Mak 12:38-40)

³⁷Jizosu kpukwadurua opfu l'onu epfu; onye Farisii bya asu iya: "Oshi adukwa l'ibe mu." O tsoru iya je anodu k'eri nri ono.

³⁸O du onye Farisii ono biribiri l'o to vuduru uzo meadaa nso akwo aka; bya anodu k'eri nri.

³⁹Nnajiuphu su iya: "Unube ndu Farisii anoduje asa azu okoro asa azu ochi; ole iphe, unu maru bu ana ndu ozo iphe l'eka ike yee ejo-iphe.

⁴⁰Unube ndu eswe! ? To buedu aka lanu, meru azu, mekwarupho ime?

⁴¹Ole-a; unu woru iphe, no l'ime okoro waa l'ime ochi meeru ndu ukpa iphe-oma; huma le nso a-bvuru unu l'iphemiphe.

⁴²"Nshio unube ndu Farisii; kele unu apfujechaaru apfuru nu Chileke oke-lanu-l'uzo-iri: l'agbo; me olubu; mekpoo iphemiphe, bukpo nwekwo, eeri eriri; unu agbe haa apfubekoto waa eye Chileke obu. Unu gege apfubekoto; yee Chileke obu; mejekwapho ekemu ophu unu emejehawaa.

⁴³"Nshio unube ndu Farisii; mbu unube ndu oduje g'unu nodu l'ishi l'ulo-ndzuko; teme o nodu aduje unu g'e keleje unu ekele k'iche l'eka a du igwe.

⁴⁴Nshio unu; kele unu du g'ilu, chihuru echihu, a ta humaduru l'enya; a nodu azoje iya okpa; ophu a madu l'ime iya rehuru erehu."

⁴⁵Onye lanu bu onye maru ekemu su iya: "O-zi-iphe; eshinu iipfu egube ono bey i tukoakwaru anyi l'ephe abaru mba."

⁴⁶Jizosu su iya: "Nshio unube ndu maru ekemu; kele unu ewojeru ivu, anyi erwa boo ndiphe; ole unubedua ta arwukwa ivu ono g'o ka mma l'oo mkpushi-eka lanu.

⁴⁷Nshio unube ndu gbey nta-a akpushi ulo-ilu l'eka ndiche unu phe ligbaaru ndu ephe gbushiru, bu ndu mpfuchiru Chileke.

⁴⁸Oo ya bu l'unu egoshi l'unu kweru l'iphe, ndiche unu phe meru bey du ree; teme aka unu dukwa iya pho; kele ephe gburu phe egbugbu; unu nodu akpushi ulo-ilu l'eka e liru phe.

⁴⁹Noo iphe, Mmamiphe Chileke pfuru su: 'Mu e-zi ndu mpfuchiru Chileke; me ndu-ozu g'ephe jepfu phe. Ndu ono, mu e-zi ono nweru ndu ophu ephe e-gbu egbugbu; duru ndu ophu ephe a-kpa ehunumanu.'

⁵⁰Oo ya bu l'aa-gwata ogbo-a ugwo ochi iphe, bukpo ndu mpfuchiru Chileke ono, ndiche phe shi teke iphe du gbushita ono;

⁵¹e -shikpo le mee Ebelu jasule ke Zakarya, onye e gburu le mgbaka oru-ngweja Chileke yee eze-ulo Chileke. Su-a; ge mu gbukwaaru iya unu tororo; o kwa ogbo-a be aa-gwata ugwo mee phe.

⁵²“Nshio unube ndu maru ekemu; kele unu wotawaru ire-igodo ulo mmamiphe. Unu ta abahudu l'onwunu; teme ndu eme gephe bahu be unu kposhiru abahu.”

⁵³Jizosu bya latugbu l'eka ono; ndu ezije ekemu me ndu Farisii ono kwatakpo tsoahaa ya opfu; teme phe ndu akuchashikwa iya pho opfu akuchashi; eme g'o pfua igwerigwe opfu;

⁵⁴eka phe ege iya gephe gbaaru iya onya opfu, phe e-gude nmata iya.

Luku 12

Iphe-ekoje-buredi ndu Farisii

(Mat 10:26-27)

¹Teke ono kwapho; umadzu ukporo l'unu zakobewaa l'eka ono; k'ophu phe azogbaa nwibe phe toli toli. Jizosu karu ndu etsoje iya nu gedegede su phe: “Unu kwabekwaru iphe-eko-buredi ndu Farisii enya, bu iya bu tuko-l'ehu-atuko-l'obu, phe bu.

²O to dukwa iphe, e kpuchiru ekpuchi g'e te mechaa kpuhaa ya; ophu o dukwa iphe, e domiru edomi g'e te mechaa maru iphe, o bu.

³Iphe, unu pfuru l'ochii be aa-numa l'iphoro; teme iphe, unu dzuru taba taba l'ime ulo be aa-ra arara g'onymonye numadzuru.”

Onye aa-tsuje ebvu

(Mat 10:28-31)

⁴“Ge mu kakwaru unube ndu bu onya mu phe: Unu ta tsukwa ndu egbu ogwehu nemadzu ebvu; ndu bu: phe -gbuchaa; o to duedu iphe ozo, phe adu ike eme.

⁵Ge mu kakwaru unu onye unu a-ndu atuje ebvu: onye unu a-tsuje ebvu bukwa onye bu: o -gbuchaa egbugbu; l'o nwekwarupho ike, oo-gude nwuru onye ono chie l'oku-ali-maa. Ee! Mu suru unu-a; nokwa onye unu a-tsuje ebvu bu ono.

⁶“? Tobudu unwu ogbe ise bu kobo ebo? Ole Chileke ta adukwa unwu ogbe me nanu, o to nyataduru.

⁷Mbu-a; egbushi, no unu l'ishi be o guchaakwaru ugu nanu nanu. Unu ta atsushi ebvu! Unu kagbaa ikpoto ogbe aba le mkpa; g'o hahabe igwerigwe.”

Epfu l'edzudzu-oha l'a bu ke Kereshi

(Mat 10:32-33; 12:32; 10:19-20)

⁸“Ge mu gbukwaaru iya unu tororo; onye pfuru l'edzudzu-oha pfua ya hoo haa le ya bu nkemu be mube Abubu-Ndiphe l'a-pfukwarupho l'edzudzu unwu-ojozi-imigwe pfua ya hoo haa l'onye ono bu nkemu.

⁹Obenu l'onye pfuru l'edzudzu-oha pfua ya hoo haa le ya ta amadu mu be mu a-pfukwarupho l'edzudzu unwu-ojozi-imigwe ke Chileke pfua ya hoo haa le mu ta amadu onye obu.

¹⁰“Onyemonye, pfuru Abubu-Ndiphe ejo opfu be aa-gukwaru nvu; obenu l'onye pfubyiru Unme Chileke be a taa gukwaru nvu.

¹¹“Teke o bu l'ephe kpuru unu bya edobe l'ulo-ndzuko; waa l'iphu ndu-ishi; waa l'iphu ndu govumenti; unu ta ayokwa oshi iphe, unu e-pfu; ozoo g'unu e-dobe onu pfua ya gude kpefu onwunu.

¹²Kele Unme Chileke l'e-zia unu iphe, unu e-pfu teke ono.”

Etu k'onye eze, bu onye-eswe

¹³Onye lanu l'ikpoto ndu ono su iya: “O-zì-iphe-e! Rwonaa nwune mu g'o kwe ge mu l'ia kee iphe, shi le nna anyi.”

¹⁴Jizosu su iya: “? Bu onye meru mu onye ekpejeru unu ikpe; ozoo onye ekeru unu oke; gube nwoke ono?”

¹⁵Jizosu su ikpoto ndu ono: “Unu tokwa ehuzehujeru iphe, bukpuo iphe, akpataje eye enya l'eku mgboko-a; l'okpobe ndzu nemadzu te eshikwa l'eku, o kpataru akpata; g'ohahabe.”

¹⁶O wataru phe anmaru etu su: “Nwoke lanu, nweru iphe; koru opfu; kpata iya iphe, ha shii.

¹⁷O bya ariahaa l'egomunggo su: “? Denuanu ge mu e-me iya g'o to duedu eka akube iphe-a?”

¹⁸Mu e-me iya egube-a. ‘Mu a-phoka oba mu phoribebaaaru iya g'o ka osa; l'obuwaruro eka mu akube mebyi iphe mu; me iphe, mu nweru enweru.’¹⁹Noo ya bu; mu asu ndzu mu; eku abyakwaru ngu! Owa-a bukpukwaa iphe, a-suru ngu eri apha, du igwerigwe. Tuta unme nta; ria ngua g'ehu tsoo ngu utso!”

²⁰“Ole Chileke suru iya: ‘Onye eswe! Enyashi-a be aa-nata ngu ndzu ngu ono. Iphemiphe-a, i doberu onwongu-a; ? bu onye e-ri iya?’

²¹“Noo g'onye akparu onwiya eku; ophu o dudu iphe, o bu l'iphu Chileke du bu ono.”

Eye Chileke iphemiphe l'eka

(Mat 6:25-34)

²²Jizosu su ndu etsoje iya nu: “Noo iphe, mu gude su: Unu ta akushi photophoto g'unu e-me ndzu unu: k'iphe, unu e-ri; ozoo k'ehu unu: k'iphe, unu e-ye l'ehu.

²³Kele ndzu ka nri; teme ogwehu ka uwe aburu iphe.

²⁴Lewaro okpoko-oha, ephe l'eli! Ephe ta akokwa opfu; ophu o dukwa iphe, ephe eje akpata l'opfu; ophu ephe enwedu ulo eku; ophu ephe agbadu oba; ole Chileke anodujeelaa azu phe. ? Unu ta amadu l'unu ka enu aburu iphe.

- 25? Denu g'unu ha onye e-gude ayo oshi; yekwa iphe, ha nwanshii le ndzu iya?
- 26Oo ya bu; o -buru l'unu taa dudu ike eme nwiphe habe nwanshii nno; ? buhunu gunu meru iphe, unu aku-phe photophoto?
- 27Unu lewaro ojimbvu g'onoduje evu. Ephe te esedu akanya; ophu ephe agbadu oghu k'akwa uwe. Obenu le-a; unu huma ge Solomonu yeberu uwe, ama mma; ole uwe iya ta amarwuduru g'ojimbvu lanu.
- 28Teke o bu le Chileke eyeje eswa, no l'egbudu uwe; l'iphe, bu o -dzuru ndzu ntanu-a; echele l'e woru iya shia ite; ? too kabadaa unu eye okpobe uwe? mbu unube ndu-a, ekwekwe, unu kweru abadu ishi-a!
- 29Oo ya bu; unu ta anodujeshi aku-phe photophoto iphe, unu e-ri me iphe, unu a-ngu.
- 30O kwa iphe ono bu iphe, ohamoha tukoru ayo oshi iya. Nna unu makwaru-a l'o du unu mkpa.
- 31Unu chochia aka Chileke bu eze! Oo ya bu; iphemiphe ono aburu iphe, ee-yekwaru unu eyekwa.”

Eku imigwe

(Mat 6:19-21)

- 32“Unu ta atsushi ebvu; unube unwu ndokobe aturu, adudu igwe-a; l'o dukwa Nna unu ree okpobe adudu eme g'unu bukwarupho eze l'eka o bu eze.
- 33Unu reshia iphemiphe, unu nweru gude mee iphe-oma. Unu meeru onwunu eka okpoga ophu taa kahudu akahu; kparu eku unu dobe l'imigwe; aka o to lwadu ali alwalwa; kele ndu-oshi te ejedu iya; ophu mkpu atadu iya.
- 34L'o kwa aka eku ngu, kachaa ngu mkpa no be obu ngu a-nodukwapho.”

Ndu ozi, nwu enya

- 35“Unu lishia anamu unu ike; g'oku dukwapho l'oroku unu.
- 36Unu adu g'unwokoro, nwu enya echeru nnajiuphu phe g'o lwa ekele-nwanyi, o jeru; g'ephe a-guhakeberu iya uzo me o -bya bya akua aka l'uzo.
- 37Ehu-utso be a goru nu ndu-ozu ono, nnajiuphu phe l'a-byatashia; ephe anwuru enya. Ge mu gbukwaaru iya unu tororo; oo-rukotakwa onwiya su phe g'ephe nodu anoo ge ya kwaaru phe okpobe ebyaa.
- 38O -buru l'echi abali be o byapfutaru phe nno; ozoo l'iphe-oha enu; ephe nwukwaduru enya; l'o buru phe iphe ehutso.
- 39Ole-a; unu makwarupho l'ome oke, bu l'unuphu maru teke iphuru abya ibe iya; me o nwukwaru-a enya; k'ophu o to kwekwanu g'iphuru ono tsufua ulo iya bata.
- 40Unubedua l'onwunu; unu kwabekwapho enya; kele Abubu-Ndiphe l'a-byakwa teke unu te eledu enya iya.”

Nwozi, e gude ire iya aka

(Mat 24:45-51)

⁴¹Pyita sụ iya: “Nnajiuphu-e! ? Bụ anyịbedua bẹ ị nmaru ẹtu ọwa-a gèdegede tọ ọha?”

⁴²Nnajiuphu sụ: “? Bụ onye bụ nwozi, e gude ire iya ẹka; teme ọ bụru onye kwaru ẹnya? Ọo ya bụ onye ono, nnajiuphu iya doberu l'unuphu g'ọ nujeru iya ndibe iya nri l'ọ rwùbèrù iya.

⁴³Èhu-utso bẹ a ọru nù nwozi ono mę ọ -bụru lẹ nnajiuphu iya a-lwa bya bya ahuma l'oome iphe ono, o ziru iya ono.

⁴⁴Gę mu gbukwaaru iya unu tororo; nnajiuphu ono e-wokwaru iphemiphe, o nweru enweru ye nwozi ono l'ẹka.

⁴⁵Obenu teke nwozi ono riru sụ: ‘Haa! Nnajiuphu mu anọkwaa ọdu alwalwa’; bya awata etsukashi ndu-ozu nwoke ono iphe: unwoke mę unwanyi; wata eri g'ọ dụ iya; nguahaa mę; ọ tsuahaa ya.

⁴⁶Nnajiuphu iya ono a-lwakwa mbọku, o to ledu ẹnya iya waa teke ọ tọ madu bya agwaa ya ọchi; woru iya gwakọbe lẹ ndu e gudedu ire phẹ ẹka.

⁴⁷“Onye-ozu, machaarụ uche nnajiuphu iya; ọphu ọ kwakọbeduru ẹka; ọzoo mee iphe, bụ uche nnajiuphu iya bẹ ee-chishi ẹchachi ike.

⁴⁸Obenu l'onye ata amadu uche nnajiuphu bya emeta iphe echi ẹchachi bẹ ee-chipete iphe. Onyemonye, a nuru iphe, ha shii bẹ ee-le ẹnya iphe, ha shii l'ẹka iya. Onye e yekwanuru iphe, ha shii l'ẹka bẹ aa-jikwapho aji iphe, kabaa shii.”

Jizọsu agbaghashi ndiphe

(Mat 10:34-36)

⁴⁹“Iphe, mu byaru bukwa atụ ọku l'eliphe; mbụ l'ọ dụ mu g'a sụ l'ọku ọbu etsuwaa etsutsu!

⁵⁰Obenu l'ọ nweru baputizimu, ee-me mu. Obu akue mu phọ phoophoophoo; mbụ jasụ teke e meadaru iya.

⁵¹? Unu dobesu lẹ mu byaru eme gę nchi dụ ndiphe doo? Aawa! Iphe, mu epfuru unu bụ l'iphe, mu byachiaru bukwa mgbaghashi.

⁵²Kele e -shi nta-a bẹ unuphu, umadzu ise bu bẹ a-gbaghashihuepho. Umadzu ẹto aburu ọhogu umadzu labo; umadzu labo aburu ọhogu umadzu ẹto.

⁵³Ephe a-gbaghashihu: nna aburu ọhogu nwa iya; nwa aburu ọhogu nna iya. Ne aburu ọhogu nwa-nwanyi; nwa-nwanyi aburu ọhogu ne iya. Ne ji nwamgboko aburu ọhogu nyee nwa iya; nyee nwa aburu ọhogu ne ji iya.”

Amaru gę mbọku gbaru

(Mat 16:2-3)

⁵⁴Ọ sukwapho ikpoto ndu ono: “Ọobujeru teke unu humaru ẹka igwe rwuru erwurwu l'uzo ẹnyanwu ariba; unu asu l'igwe e-dze nwa yegeyege mini; l'oduepho nno.

⁵⁵Teke pherephere shi l'uzo ndohali wata ezizi; unu asu l'onanwu abyawaa; l'o du g'unu pfuru.

⁵⁶Unube ndu ono, bu tuko-l'ehu-atuko-l'obu ono. Unu aduje ike lee enya l'eli lee l'ali; kota ge mboku gbaru. Obenu ? bu gunu kparu iphe, unu amadu koo iphe, nta-a du g'oo ya?"

Edoshi opfu

(Mat 5:25-26)

⁵⁷"? Bu gunu be o gude ophu unu achijedu idzu l'ime obu hota iphe, pfuru oto mee?

⁵⁸Teke onye gbaru ngu ekwo kpu ngu eje l'ulo-ikpe; kukebe ehuru g'unu l'iya doshia l'uzo; g'o to kpuru ngu je anu onye-ikpe; onye-ikpe e-woru ngu ye l'eka ogbogu; ogbogu eje atua ngu mkporo.

⁵⁹Ge mu gbukwaaru iya unu tororo; i ti yikwa futu afuta l'eka ono jasute teke i pfeberu iphe, e gburu ngu pfua pfua afu iya."

Luku 13

Izimanu alwa azu ozoo ala-l'iswi

¹O duru ndu no l'eka ono teke ono, pfuru Jizosu ke ndu Galili, Payileti gbushiru aka ephe no agwa iphe; mee phe gwakobe le mee iphe, e gude agwa iphe.

²O su phe: "Unu dobesu le ndu Galili ono kakota ndu Galili ozo abu ndu eme iphe-iji opfu l'e gburu phe egube ono.

³Mu su unu: Waawaa-o! Teke o bu l'izimanu iphe-iji unu ta alwakotaduru unu azu; unu lwapfuta Chileke be unu a-lakotakwapho l'iswi egube ono.

⁴Too umadzu iri lesato ono, ulo-eli ephekerephe Sayilowamu zero tugbushia ono; ? unu dobesu l'ephe ka ndu Jierusalemu ophu abu ndu ejo-iphe?

⁵Mu suru unu: Waawaa-o! Teke o bu l'izimanu iphe-iji unu ta lwakotaduru unu azu; unu ghaa umere be unu a-lakotakwapho l'iswi nno."

Etu oshi, ta amiduru amimi

⁶O bya anmaa etu-a su: "O duru oshi figu lanu, nwoke yeru le mgbabu iya. O nodu abyajee elee ya enya mebyi; o to dudu iphe, oohuma.

⁷O su onye-ozu mgbabu: '? I humaru le mu byawaru apha eto mgburugburu bya elee enya mebyi l'oshi figu-a: ole o to dudu iphe, o mitaru. Gbutsua ya! ? Bu gunu meru g'o gude o jee adzuru ndu emebyishiru mu ali?"

⁸Onye-ozu mgbabu ono su iya: 'Jiko hafua ya ro apha lanu-a; ge mu bvupheadaa ya mgburugburu yeadaa ya ozu.

⁹Teke o bu l'o miru mebyi apha ozo; oo ya bu l'o du ree; teke odumeka l'ii-gbutsuwa iya ro.' "

Jizosu eme ge nwanyj, okwebe kweberu wekorohu l'eswe-atuta-unme

- 10**O be teke ọ nọ l'ulo-ndzukọ ndu Jiu ono nanu ezi iphe l'eswe-atuta-unme;
- 11**Ọ duru nwanyi, nọ l'eka ono, ọbvụ mewaru iphe-ememe mgbarapha iri l'esato. Ọ lotawa iya phugobe; ọphu o kwejedu g'ọ pfuru nhamunha.
- 12**Jizosu huma nwanyi ono bya ekua ya sụ iya: “Nwanyi oma! I nwewaa onwongu l'iphe ono, eme ngu nu ono!”
- 13**Ọ bya ebyibe iya eka; nwanyi ono lochia onwiya teke ono teke ono pfuru nhamunha; bya ekeleahaa Chileke ekele.
- 14**Ehu ghuahaa onye-ishi ulo-ndzukọ egbu lẹ Jizosu meru g'onye iphe eme wekorohu l'eswe-atuta-unme. Ọ sụ ndu ono: “Abali ishii be e doberu k'ejeje ozi; unu byaje g'e mee g'unu wekorohu teke ono; unu ta abyajeshi l'eswe-atuta-unme.”
- 15**Nnajiuphu sụ iya: “Unube tuko-l'ehu-atuko-l'obu-a! ? Unu ta akpofujedu eswi unu l'ehu l'ehu; ọzoo nkafu-igara unu l'oka iya; chiru iya je g'ọ nguta mini l'eswe-atuta-unme?”
- 16**Su-a; nwanyi-a, bu awa Ebirhamu-a, Nsetanu keru egbu eshi k'apha iri l'esato-a; ? to gbaduru ke g'a tofu iya l'egbu ono l'eswe-atuta-unme?”
- 17**O pfuchaepho nno; iphere gude ndu ono, etso yebe Jizosu opfu ono. Ikpoto ndu nọ l'eka ono tuko teahaa eswa k'eze iphe ono, Jizosu emeshibebe ono.

Etu, e gude akpuru oshi mosutadu anmaa

(Mat 13:31-33; Mak 4:30-32)

- 18**Jizosu sụ: “? Bu gunu be eka Chileke bu eze du g'ọ ya? ? Bu gunu be mu a-turu iya yeru?”
- 19**Ọ du g'akpuru oshi mosutadu, nwoke wotaru je akua lẹ mgbabu iya. O fua; vuta buru oshi k'eka iya; k'ophu enu, ephe l'eli byaru bya akpaahaa epfunne l'ekali iya.”
- 20**Ọ sukwa phe pho ọzo: “? Bupoo gunu be mu a-turu eka Chileke bu eze yeru?”
- 21**Ọ du g'iphe-ekoje-buredi, nwanyi hataru nwanshii ye l'ukpokutu iphe, eegudeje eme buredi, jiru eda-mbacha; o woru iya dobe jasụ ọ tuko koo.”

Eshi ọzo, du kparagu abahu

(Mat 7:13-14,21-23)

- 22**Jizosu nodu ejekpopho ọzo Jierusalemu, ooje. Ọ nodu aghatagbaa mkpukpu lẹ mkpukpu ezi iphe.
- 23**Noo ya; ọ duru onye jiru iya sụ iya: “Nnajiuphu-e! ? Ndu aa-dzota a-ha nwanshii too?” Ọ sụ phe:
- 24**“Unu kpata ọzo shia ọzo, du kparagu bahu; kele aa-du igwerigwe mee g'a bahu; ole ephe taa dudu ike.
- 25**A -nonyawaa onye nwe ulo gbeshi woru ọzo guchia; unu apfuru l'etezi akụ eka l'ọzo sụ: ‘Nnajiuphu; guhaaru anyi ọzo!’ L'ọo sụ unu lẹ ya ta amakwa eka unu shi-o!

²⁶Unu awata epfu sụ: ‘Obenu l'anyi rikwaru; bya angwa l'iphu ngu; tẹme i zia iphe l'edupfu anyi.’

²⁷Ole ọo-sụkwapho: ‘Mu sụru unu lẹ mu ta amadụ ẹka unu shi bya; unu gbeshi mu l'iphu g'unu ha; unubẹ ndu ẹjo-iphe ono!’²⁸Noo ẹka unu a-nọdu kwaa ẹjo ẹkwa; taa ikireze teke unu a-nọdu ele Ẹbirhamu ẹnya; waa Áyizaku; waa Jiékoṣu; waa ndu mpfuchiru Chileke l'ẹka ẹphe nọ l'ẹka Chileke bụ eze; unubẹdua bụru ndu a chishiru achishi.

²⁹Amadụ e-shi l'uzo ẹnyanwu awawa mẹ l'uzo, ẹnyanwu ariḅa; shikwapho ndegu; shi ndohali; bya lẹ nri l'ẹka Chileke bụ eze.

³⁰Unu hụma-a; ọ dūru ndu bụ ikpazụ, l'e-mechaa bụru ivuzo; tẹme ọ dukwarupho ndu bụ ivuzo, e-mechakwanaa bụru ikpazụ.”

Jizosụ yeru Jierúsalemụ obu

(Mat 23:37-39)

³¹Teke ono teke onokwapho bẹ ọ dūru ndu Fárisii, byaru bya asụ Jizosụ: “Shilekwaa l'ẹka-a tūgbua nta; kele Herodu achokwa ngu egbugbu.”

³²Ọ sụ phẹ: “Unu je akaru awuru ono lẹ mu achifu ọbvụ; bya eme gẹ ndu iphe eme wekorohu ntanụ-a yeḅe echele; o -be mbọku k'eto; ozi mu abvụ.

³³Ole g'ọ dūhabe; mu a-nọdukpoepho eje iphe, mu eje ntanụ-a; waa echele; waa nwarechi; kele ọ tọ dudu ẹka ọzo, onye mpfuchiru Chileke l'e-phuhu gbahaa lẹ Jierúsalemụ!

³⁴“Gūbe Jierúsalemụ; Jierúsalemụ, tukuru ndu mpfuchiru Chileke egbu; bya egude mkpuma atụ-gbushi ndu e ziru g'ẹphe byapfuta ngu. Tekenteke bẹ mu meru gẹ mu chikobe unwu ngu l'ẹka lanụ gẹ nepfu-ọku achikobeje unwu iya l'ime nkù iya-a; ọphu i kwedu!

³⁵Hụma ahuma; l'ibe ngu bẹ aa-gbagharu haa ya l'ọ bụru ochobu! Gẹ mu karu unu: unu taa hụmabaekwa mu jasụ teke unu a-sụ: ‘Chileke goru ọnu-oma nụ onye ono, gude ẹpha Nnajiuphu abya ono.’ “

Luku 14

Jizosụ eme onye iphe eme g'ọ wekorohu

¹O be l'eswe-atuta-unme lanụ; Jizosụ jeshia eri nri l'ulo onye nọ l'ishi lẹ ndu Fárisii; ẹphe nọdu egekpọe ya pho ngge.

²Noo ya; onye ẹhu-ekoko eme bya bya apfuru iya l'iphu.

³Jizosụ bya epfuru yeru ndu maru ekemu waa ndu Fárisii sụ phẹ: “? A sụru g'e meje onye iphe eme g'ọ wekorohu l'eswe-atuta-unme tọ?”

⁴Ọphu ẹphe epfuduru opfu. Ọ bya eduta iya bya emee ya o wekorohu; bya edufu iya; ọ lashia.

⁵Jizosu sụ p̄h̄e: “? D̄enu g'unu ha onye nwa iya; ọzoo oke-eswi iya l'adaba l'iduma l'eswe-atuta-unme; g'o to me ẹgwegwa je apafuta iya?”

⁶Ọphu ẹp̄he amadu g'ẹp̄he e-ye ọnu l'opfu ono.

Ewoze onwonye ali

⁷Ọ bya anmaaru ndu e ziru ẹ nri ono ẹtu; ẹka o lerwataru ẹnya l'ẹp̄he hotagbaaru aba ndu nweru ẹnya je anodu. Ọ sụ p̄h̄e:

⁸“Ọ -buru ẹ nemadzu ziru ngu ẹ nri ekele-nwanyị; te ejekwa je anmakoru l'aba ndu eze; atasu ọ duru onye ka ngu enweru ẹnya, e ziru ẹ nri ono.

⁹Onye ono, ziru gu l'iya ono l'a-byakwa bya asu ngu: ‘Gbeshi ge nwoke-a nodu.’ L'i gb̄e teke ono nyigobe je anọ-zeta l'aba ndu ẹnya lwaru.

¹⁰Ọo ya bu; teke e ziru ngu ẹ nri; tugbua je anodu l'aba ndu ẹnya lwaru: g'oo bukwanuru; teke onye ziru unu byaru; l'oo-su ngu: ‘Ọnyà mu; gbeshi bya l'eka ka ree’; ọo ya bu; aa-kwab̄e ngu ùbvù l'ip̄hu onyemonye, unu l'ẹp̄he nọ ẹ nri.

¹¹Kele onyemonye, l'ekuli onwiya eli b̄e ee-kuzeta ali; onye kuzetakwanuru onwiya ali b̄e ee-kuli eli.”

¹²Ọ sukwap̄ho nwoke ono, ziru iya ẹ nri ono: “Teke ọ bu l'i ziru ẹ nri; ọzoo l'i kuru ọbo-ip̄he; te kukwa ọnyà ngu p̄h̄e; ọzoo unwune ngu p̄h̄e; ọzoo abubu ngu p̄h̄e; ọzoo obutobu ngu p̄h̄e, nweru ip̄he. Ọ -dumeka b̄e ẹp̄he e-ziphutakwa ngu azu; l'ogbe buru l'aapfu ngu ugwo ip̄he, i meru.

¹³Ọ buchia; teke i shiru nri ọbo-ip̄he; zia ndu ukpa; m̄e ndu edzuduru oke; m̄e ndu eniyeni m̄e ndu atsu ishi.

¹⁴Ọo ya bu l'oo ẹhu-utso b̄e a goru nu ngu; kele ẹp̄he taa pfudu ngu ugwo iya. Teke Chileke a-pfu ngu ugwo iya bu teke ndu pfuberekoto e-shi l'onwu teta nodu ndzu.”

Ẹtu ndu e yeru ẹ nri

(Mat 22:1-10)

¹⁵Onye lanu l'ime ndu ẹp̄he l'iya nọ ẹ nri ono numa iya bya asu iya: “Ẹhu-utso b̄e a goru nu onye ono, l'e-ri nri l'eka Chileke bu eze!”

¹⁶Jizosu sụ iya: “Ọ duru nwoke, shijeru nri, ha shii; bya ezia ikpoto nemadzu ẹ nri ip̄he-oma obu.

¹⁷Ọ gbaep̄ho l'eri nri ono; o zia onye-ozu iya g'o je ekua ndu e ziru ẹ nri ono sụ p̄h̄e g'ẹp̄he bya l'e shighewaru iya.

¹⁸G'ẹp̄he ha tuko loru agalaba ye iya. Onye k'ivuzo suru iya jiko ẹ ya taa byakotadu. L'ọ duru ali, ya zuru k'òphúú; ya nodu eje iya ahuma nta-a.

¹⁹Onye k'ophuu sụ jiko ẹ ya ta abyakotadu. Ẹ ya zuru oke-eswi iri; ya nodu eje iya ahuta ama ozi.

²⁰Onye k'ophuu sụ jiko ẹ ya lutaru nwanyị k'òphúú; ophu ya abyakotadu.

²¹Noo ya bụ; onye-ozì onò bya eworù iphe onò zia nnajìuphu iya. Nwoke onò, nwe unuphu onò gude ẹhu-ẹghu sù onye-ozì iya: ‘Ngwa; gbarù ẹgwegwa lufu; jeje etsorù ojì l’ojì mkpukpu tsorù iphe, bukpoò gbororò je achibata ndu ukpa; mē ndu edzuduru oke; mē ndu atsu ishi; mē ndu eniyeni.’

²²E mechaa; onye-ozì onò je asù iya: ‘Nna; iphe, ì sùrù g’e mee bẹ e meakwaru; ọle a ta nọ-chishikwaru oshi anọ.’

²³Nnajìuphu onye-ozì onò sù iya: ‘Ngwa; je etsorù ụzò l’ụzò mē iphe, bukpoò owere ụzò ẹgu je achibata nemadzu g’unuphu jì ejiji.

²⁴Kele-a; gē mu karù unu; ọ tọ dukwa g’ọ ka mma l’ọo onye lanù lẹ ndu onò, e zihawaru lẹ nri onò, e-de ọnu lẹ nri mu.’ “

Iphe, oo-phuje onye etso Jizosu

(Mat 10:37-38)

²⁵Teke onò bẹ a dukpoò igwerigwe etso Jizosu. Ọ ghakọbe bya asù phe:

²⁶“Onye abyapfuta mu nù; ọphu nna iya adudu iya ashì; mē ne iya; mē nyee ya; mē unwu iya; mē unwune iya nwoke; mē kẹ nwanyi; mbu je akpaa lẹ ndzu iya; onye onò ta abyakwa etsokota mu.

²⁷Onye ete evudu oswebe ọnwu k’eka iya etso mu ta abyakwa abukotarù onye etsoje mu nù.

²⁸Su-a; ? Denu g’unu ha onye arì k’akpu ọlo-eli; g’o to vuru ụzò nọduadaa anọ; gbaa iphe, oo-phu iya; maru: ? ya nwekpọrunu okpoga, l’a-suru iya nù.

²⁹Odumeka; ọ -tuebe okpa-ulo; ọphu ọ duedu ike kpufu iya; ndu humaru iya nù awata iya agbaru mgbonu sù:

³⁰‘Lewarọ nwọphu, jeru akpu ọlo; ọphu ọ duedu ike kp-tsee ya.’

³¹Qobujeru; eze -gbeshi jepfushia eze ibe iya ọgu; l’o vuru ụzò nọduadaa anọ chịadaa idzu sù: ? a maru bụ ukporo unu ndu ojogu bẹ ya e-gude ejepfu onye gude ukporo unu ojogu labọ tọ?

³²Teke odumeka ọo-buru onye ọphuu -nọdukwaduro l’eka du ẹnya; l’ọ họtà nemadzu ye g’ephe je arwọo ya g’e doshia opfu.

³³Qo ya bụ; g’unu ha ta adukwa onye byaru a-buru onye etsoje mu nù; gbahaa l’onye onò wofuru ẹnya l’eku iya.”

Únú, tsuhuru etsuhu

(Mat 5:13; Mak 9:50)

³⁴“Únú bụ iphe, du ree; ọle teke únú tsọ-buhuru únú-únú; ? bụ gunu bẹ ee-gude mebaa ya g’ọ buru únú ọzo?

³⁵Ọ tọ dukpoedunu ree k’eye l’alì; ọzoo l’ikpọzu. Ee-woru iya wushia. Onye nweru enu-nchi, l’anu iphe; numakwa iya.”

Luku 15

Ètu k'aturu, kpaphuhuru akpaphuhu (Mat 18:12-14)

- ¹Ndu ana akiriko mę ndu ọzo, bu ndu eme iphe-ẹji wata akpɔritaru ntse g'ephe ngabe nchi l'iphe, Jizosu ezi.
- ²Ehu ghuahaa ndu Farisii waa ndu ezije ekemu egbu; ephe pfuahaa su: "Nta be nwoke owa anataje ndu eme iphe-ẹji; ephe l'iya atuko erigbachaa nri."
- ³Jizosu bya anmaaru phe etu-a su:
- ⁴"O -buru l'onye lanu le g'unu ha nweru ukporo aturu ise; nanu -tuphahu; ? to hadu ukporo eno l'iri le tete ophu l'echiegu; je achohaa ophu tuphahuru nu pho jasu l'oohuma iya?"
- ⁵Teke o humaeru iya pho; l'o woru iya nmakobe l'ukuvu teru eswa lashia.
- ⁶O -rwua unuphu; l'oo-bya ekukota onya iya phe me obutobu iya phe su phe: "Unu bya etebude mu eswa-o; le mu humawaru aturu mu, shi tuphahu nu-o."
- ⁷Su-a; noo g'emere me l'a-ha shii l'imigwe l'ishi onye eme iphe-ẹji lanu, izimanu lwaru azu; o lwafuta Chileke; eme l'ukporo ndu oma eno le ndu oma iri le tete, mkpa izimanu alwa azu aduduru.

Okpoga, a choru achochu

- ⁸"Ozo ? denu nwanyi, e-nweru okpoga mkpola-ochaa iri; nanu etuphahu g'o to nwuru oku ye l'oroku; zakota ulo; choo ya gbiriri jasu l'oohuma iya.
- ⁹Teke o humaeru iya pho l'o bya ekukobe onya iya phe me obutobu iya phe su phe: 'Unu bya etebude mu eswa; kele mu humaru kobo mu, shi tuphahu nu.'
- ¹⁰Su-a; nokwapho g'unwu-jozi-imigwe e-te eswa onye shi eme iphe-ẹji, izimanu lwaru azu; o ghaa umere lwafuta Chileke."

Nwata, gbaphuhuru nu

- ¹¹Jizosu bya anmaaru phe etu ozo su: O duru nwoke, nwutaru unwokoro labo.
- ¹²Ke nwata nonyaa bya asu nna iya: "Nnana; kee iphe ngu nu mu ophu rwuberu mu nu." Nna phe bya eworu iphe, o nweru enweru keeru phe.
- ¹³Ophu o dudu g'a no-beru; ke nwata ono chikobe iphemiphe, o nweru tugbua ije. O buru iya ala oha, du enya. O je anodu l'eka ono kpakabebe okpoga iya le gaphu-gaphu.
- ¹⁴O kpakabebechaepho iphemiphe, a nuru iya; ejo okpa nri bya l'ali ono; o kpaahaa nri.
- ¹⁵O lapfu onye lanu le ndu a nwuru l'ali ono. Onye ono zia ya g'o chejeru iya ezi l'egu.
- ¹⁶Egu metabe iya k'ophu oduje iya g'a su l'a nuru iya egbo iphe, aawushijeru ezi ono; ole o to dudu onye anuje iya ya nu.

- ¹⁷O be teke a nonyaru egomunggo lwa iya azu. O su: “? Būnaa ūmadzu ole l'ime ndu-
ozi nna mu nweru nri nweru k'letsutsu iya; mu bya anodu l'eka-a; egu nodu abya mu
egbugbu?
- ¹⁸Mu a-gbeshikpoepo jepfu nna mu je asu iya: ‘Nna; mu meswewaru Chileke bya
emeswee ngu.
- ¹⁹Mu ta agbaeduru ke g'e kua mu nwa ngu ozo. Meje mu giime ndu-ozu ngu ndu i
butaru ebuta.’
- ²⁰O gbalihu bya alapfushia nna iya. “O nodukwadro l'eka du enya; nna iya huma iya;
imemini iya du iya. O gbapfu iya je anmata iya akpa; tsutsua ya onu.
- ²¹Nwata ono su iya: ‘Nna; mu meswewaru Chileke bya emeswee ngu. Mu ta
agbaeduru ke gi kua mu nwa ngu ozo.’
- ²²Nna iya ono suele-a unwokoro iya: ‘Unu chitaru mu akpawuru uwe, bu iya kakota
ama mma g'e yee ya; gbabe iya echi eka; yee ya akpokpa.
- ²³Unu akputa adeswi, tsuru eba gbua g'anyi gude swaa eswa iya.
- ²⁴Kele nwa mu-a nwuhuru anwuhu; nta-a be o byaru bya adzwaru ndzu ozo. O shi
gbaphuhu agbaphuhu; ole nta-a be a humawaru iya.’ Ephe wata eme eswa.
- ²⁵“Teke ono be okpara iya no l'egu. O lwarwutashia unuphu ntse; o numa oda nkwa
me ebvu.
- ²⁶O bya ekua onye lanu l'ime unwokoro nna iya bya asu iya: ‘? Bu ole ada?’
- ²⁷Nwokoro ono su iya: ‘O kwa nwune ngu lwaru; nna ngu gbua ada-eswi, tsuru eba;
kele o humaru iya; o nodukwadu ndzu.’²⁸Ehu ghuahaa okpara iya ono egu. Ophu o
kweedu abahu unuphu. Nna iya jepfu iya je arwo ya su iya g'o bataro.
- ²⁹O su nna iya: ‘Lenu! Apha olemole-a be mu jekotawaru ngu ozi. O toko du-swe
iphe, i zijeru mu, mu jikajeru ememe. Ole i tiki nu-swee mu g'o ka mma l'oo nwa-
eghu ge mu gude mee emereme mu l'onya mu phe.
- ³⁰O be ge nwa ngu owa-a, jeru je atuko iphe ngu kpakaaru unwanyi ukpara-a lwaru; i
gbuaru iya ada-eswi, tsuru eba.’
- ³¹Nna iya su iya: ‘Nwa mu; ? O kwa le mu le ngu anokpoo tekenteke; teme
iphemiphe, mu nweru buwaru nkengu.
- ³²O gbaru g'e mee emereme tee eswa; kele nwune ngu-a shi nwuhuwaa anwuhu; ole
nta-a be o byaru bya adzuru ndzu ozo. O shi gbaphuhu agbaphuhu; ole nta-a be a
humawaru iya.’ “

Luku 16

Onye-ishi, kwaru enya l'ozu nnaji

¹Jizosu sukwapo ndu etsoje iya nu: “O duru nwoke lanu, nweru iphe; nwekwarupho onye-ishi ndu-ozu iya. Ama bya agbaarū nwoke ono sū l'onye-ishi ndu-ozu iya ono l'ebvukakwa iphe iya ebvuka.

²O bya ekua onye-ishi ndu-ozu ono sū iya: ‘? Bū gunu bē mu anū l'iime? Ngwa; goshi mu g'i gude eletaru mu iphe mu enya; kele i tii bueduru mu onye-ishi ndu-ozu ozo.’

³Onye-ishi ndu-ozu ono bya aria sū: ‘? Būnaa gunu bē mu e-me gē nnajiuphu mu abya mu anafū abū ishi ndu-ozu-a? L'ēbe abū l'ike okoro dukwadu mu; tēme o dukwanu mu iphere gē mu e-me jeshia arwo.

⁴Mu mawaru iphe, mu e-me gē ndiphe ekweje gē mu bataru phē unuphu mē a -chifue mu pho l'abū ishi ndu-ozu-a.’

⁵O bya ekukota ndu ji nnajiuphu iya ono ugwo nanu nanu. O sū onye k'ivuzo: ‘? Bū gunu bē i ji nnajiuphu mu?’⁶Onye k'ono sū iya l'oo ite manū ukporo ise. O sū iya: ‘Ngwa; nggē ekwo-ugwo ngu; no-zeta egwegwa; dee ite manū ukporo ebo l'iri.’

⁷O sū onye ozo: ‘Gubedua-e ? i ji gunu?’ O sū iya l'oo e da ereshi ukporo ise. O sū iya: ‘Nggē ekwo-ugwo ngu; dee e da ereshi ukporo eno.’

⁸Nnajiuphu onye-ishi ndu-ozu ono, 'eegudedu ire iya eka ono jakpo ya ajaja; opfu l'o meru umere onye kwaru enya; kele unwu-eliphe ka akwa enya l'iphemiphe, ephe l'ogbo-nta-a eme; eme le ndu no l'iphoro Chileke.”

⁹Jizosu pfukwapo sū: “Noo iphe, mu gude sū unu-a: g'unu gude eku mgboko-a shitaru onwunu onya; g'oo-buru teke eku obu laerupho l'ee-duru unu bahu l'unuphu, te echihudu echihu.

¹⁰Onye e gude ire iya eka l'iphe, ha nwanshi bē ee-gudekwapho ire iya eka l'iphe, ha shii; tēme onye 'apfubeduru-eka-oto l'iphe, abadu ishi ta apfubekwapho-eka-oto l'iphe, baru ishi.

¹¹Oo ya bu; teke o bu l'e te gudedu ire unu eka l'opfu eku ke mgboko-a; ? denu g'ee-shi gude ire unu eka l'opfu okpobe eku?

¹²Tēme; teke o bu l'e te gudedu ire unu eka l'eka iphe onye ozo no; ? bu onye anukwanu unu ophu a-buru k'unu?

¹³“O to dukwa nwokoro, achita nnaji labo ejeru ozi le mgbo lanu g'o to kpo nanu ashi; yee onye ophu obu; ozoo l'o yeru ehu l'ozu onye lanu; ejeru onye ophu ozi mkpe. Unu taa nodukwa ejeru Chileke ozi bya emekwapho g'okpoga kwataru unu.”

Jizosu ezi iphe, bu uche Chileke

(Mat 11:12-13; 5:31-32; Mak 10:11-12)

¹⁴Ndu Farisii tukokpoo iphe ono numakota bya awata agbaru Jizosu mgbonu; opfu l'ephe yenukaru okpoga enya.

¹⁵O sū phē: “Oo unubedua bu ndu l'eme onwunu ndu pfuberekoto l'iphu ndiphe; ole Chileke maru obu unu; kele iphe, amadu riru l'o bu iphe-oma bē bu ejo-iphe l'iphu Chileke.

16“Ekemu, shi l'eka Mosisu; waa opfu ndu mpfuchiru Chileke nokwa jasụ teke Jiõnu onye emeje bapuzimu byaru. E -shi teke ono be a wataru ara ozi-õma, bu k'eka Chileke bu eze arara; teme onyenõnu nõdu adzõ ụzo abahu iya.

17Obenu l'õ kakwa nphe g'igwe bvụ; g'alì bvụ; eme le g'akpuru opfu ekemu ono nanu buru iphe-mmanu.

18“Onye chifuru nyee ya je alua nwanyi ozo buakwaa ogori be oori; teme onye lukwanuru nwanyi, ji iya chifuru l'erikwapho ogori.”

Onye eze yee Lazarõsu

19“O duru nwoke lanu, baru eze, eyeje uwe, du eguru bya ere ire; eri gwõogwoo mbõku-mbõku.

20O dukwarupho onye ukpa, onwo aba, aza Lazarõsu, l'azeje l'õnu-õguzo onye eze ono.

21O nõdu aduje iya g'a su l'a nuru iya nwekpu, shi le nri, eze ono l'eri. Ophu kachaakponu bu le nkuta awujeru bya erichaahaa ya onwo ono.

22A nõnya; onye ukpa ono nwuhu; unwu-ojõzi-imigwe kulia ya je edonyabe Ebirihamu. Onye eze pho nwuhukwapho; e lia ya.

23O nõdu l'õku-alì-maa eka õ nõ le mkpamehu; palia enya; huma Ebirihamu ụzenya-ụzenya bya ahuma Lazarõsu l'eka õ nõ-kube iya.

24“O chishia su: ‘Nna mu Ebirihamu; g'imemini mu dunu ngu! Zinaa Lazarõsu g'õ tsee õnu mkpushi-eka le mini bya edee mu l'ire g'ire jidata mu; kele mu nõ l'oke iphe-ehuka l'õku-a.’

25Ebirihamu su iya: ‘Nwa mu; nyatakwa le gubedua teke i nõ ndzu be i natakõtaru iphe, du ree nkengu; nokwapho ge Lazarõsu natakõtaru ejo-iphe teke ono. Nta-a be ehu duwaa iya guu; gubedua nõdukwanu le mkpamehu.

26A -gufukpoonu ono; õ duru oke ose, paru eka nõ-butaru g'õ tõ du onye a-du ike shi l'eka-a bya l'eka ono; ophu õ dukwanu onye l'e-shi l'eka ono byapfuta anyi.’

27Nwoke ono su iya: ‘O du ree; eshinu õ du nno nna; jiko zinaa ya ibe nna mu;

28kele mu nweru unwune ise; zia ya g'õ je anmaaru phe okwa g'ephe ta abyapfuta mu l'eka-a, mu eje oke iphe-ehuka-a.’

29Ebirihamu su iya: ‘Unwune ngu nweru Mosisu waa ndu mpfuchiru Chileke; g'ephe numaje iphe, ndu k'ono epfu.’³⁰O su iya: ‘Aawa nna mu Ebirihamu! ? Tì madu le nemadzu -shi l'õnwu teta jepfu phe be izimanu a-lwa phe-a azu.’

31‘Ebirihamu su iya: Ephe -anumaduru olu-opfu Mosisu waa olu-opfu ndu mpfuchiru Chileke; nokwapho g'ephe tee kwetakwapho m'obeta õ duchakpooru nu onye shi l'õnwu teta dzuru ndzu.’ “

Luku 17

Anma ọkwa eme iphe-ẹji

(Mat 18:6-7,21-22; Mak 9:42)

¹Jizosu sù ndu etsoje iya nù: “O doru ẹnya l'ọ dughbaaru iphe, e-mechaa mee amadu g'o shiswee ọzo kẹ Chileke; ọle nshiooro onye oo-shi l'ẹka.

²O gogo karu onye ono mma ọme a pataru mkpuma-uswe woru lipyabe iya l'olu; je aparu chie l'eze-ẹnyimu; eme l'o meru unwegirima-a g'ọ ka mma l'oo onye lanu o shiswee ọzo.

³Unu kwaberu onwunu ẹnya! “Teke ọ bu ẹ nwanna ngu mesweru ngu; baaru iya mba. Teke izimanu lwaru iya azu; guaru iya nvu.

⁴Teke ọ bu l'o mesweru ngu akpo esaa l'ujiku lanu bya abyapfutakota ngu akpo esaa ono; bya asu ngu l'izimanu lwaakwaru iya azu; gukotakwaru iya ya nvu.”

Ekwekwe

⁵Ndu-ishi-ozu ono su Nnajiuphu: “Nna; mee g'anyi kabaa ekweshi ike!”

⁶Ọ su phe: “Ọme ekwekwe, unu kweru kẹ Chileke habekponu shii ge nwa rwirwirwii akpuru mosutadu lanu; me unu adujekwa ike su eze oshi sikamayinu-a: ‘Phofu je akpobe onwongu l'ime eze-ẹnyimu’; me o mee iphe, unu pfuru.”

Iphe, gbaru onye-ozu l'ememe

⁷“G'e dobe iya l'onye lanu ẹ g'unu ha nweru ohu, l'akoru iya okoro; ozoo l'echeru iya aturu. Teke ọ bu l'ohu ono shi l'egu lwa; ? ii-su iya-a g'ọ byaepho bya anodu ria ngua?

⁸? Tobudu iphe, ii-pfuchiaru iya bu: ‘Shiaru mu nu ite ẹnyashi mu egwegwa; je eyee uwe ngu; pafutaadaru mu nri ge mu riadaa; nguadaa mee teme l'i ria nkengu?’

⁹Mu ta arikuwa l'oo-kele ohu ono ekele; g'o jeru iphe, o ziru iya-a.

¹⁰Nokwapho g'unu du: unu -meebekotakpoephe iphe, e ziru unu; unu a-su: ‘Anyi bukwa ndu-ozu, ta abadu ẹ mkpa; anyi meerupho iphe, gbaru anyi l'ememe.’ “

Jizosu eme ndu ekpenta iri g'ephe wekorohu

¹¹Ge Jizosu eje Jierusalemu ono be ọ ghajaru okè ndu Sameriya yee Galili.

¹²Ọ bahuepho l'oma mkpuku lanu; ndu ekpenta iri byapfuta iya; bya agbe ọzenya ọzenya;

¹³chia mkpu su: “Jizosu! Onyibe! Jiko g'imemini anyi dunu ngu.”

¹⁴Jizosu huma phe bya asu phe: “Unu je ge ndu-uke Chileke lee unu ẹnya l'ehu!” Epe tugbua jeshia; bya ejeberu l'uzo; ekpenta ono mishihu; ọ buru phe agbakerehu.

¹⁵Onye lanu humaephe ẹ ya kawaa mma; bya agbaphu azu; echi mkpu aja Chileke ajaja.

¹⁶Ọ byarwuta bya adaa kpurumu ẹ mgboru okpa Jizosu wata iya ekele ekele. Onye k'ono bu onye Sameriya.

17Noo ya bu; Jizosu su: “? Tɔbudu ɔmadzu iri be e meru ephe wekorohu? ? Denuhunu ɔmadzu tete ophuu?”

18? Tɔ dukpoedu onye ophu o rwuru l'ehu le ya a-lwaphuta azu bya ekele ekele; gbahaa onye-a, shi ali ozo-a?”

19O su nwoke ono: “Gbalihu jeshia iphe, iije. Ekweta, i kwetaru ke Chileke mewaru g'i du iche.”

Mboku, o-buru

(Mat 24:23-28,37-41)

20Ndu Farisii jia Jizosu su: “? Buhunu teke ole be Chileke e-goshi l'oo ya bu eze?” O su phe: “Chileke -bya egoshi l'oo ya bu eze be o too mekwa iya k'ophu a-huma l'anya.

21Ophu o dukwa onye a-su: ‘Huma iya l'eka-a; ozoo l'oo phu iya’; kele Chileke buakwa eze unu nta-a.”

22O su ndu etsoje iya nu: “Oorwuakwaa teke unu anyataje nwa teke unu le Abubu-Ndiphe shi anoje; ole unu taa humaedu iya.

23O duru ndu ophu a-su unu: ‘Lekwa iya l'eka pho’; ozoo ‘g'unu lekwa iya l'eka-a!’ Unu te ejekwa; ophu unu etsokwa phe.

24Kele o bu g'ebemu-igwe akuje phoo l'akpaminigwe; shi l'eka lanu lojaa jasu l'eka iya ophuu bu ge Abubu-Ndiphe e-me mboku, oo-bya.

25Ole o vufutaje uzo jeadaa igwerigwe iphe-ehuka; teme ogbo-nta-a a-jikaadaa ya.

26Oo g'o du l'ogbo Nuwa phe teke ndiche pho bu g'oo-du teke Abubu-Ndiphe l'a-bya.

27Teke ono be ndiphe no eri angu; alu-phe nwanyi; ekephe nwanyi; jasu mboku, Nuwa phe bahuru l'eze ugbo, o kuru. Utso bya agbaa; rigbushia ndiphe l'ophu.

28Nokwapho g'o du l'ogbo Lotu. Ephe eri angu; agba ngho; ako opfu bya akpushi ulo.

29O be mboku, Lotu lufuru le Sodomu; oku nshi-egbe shi l'igwe dzee ge mini bya ekegbushikota phe g'ephe ha.

30Noo g'oo-du mboku, Abubu-Ndiphe e-he gboo.

31“O -rwua mboku ono; g'onye no l'okpoku atuta unme; iphe iya nodu l'ulo; te ejekwa iya ewota. G'onye no l'egu te ejekwa ala unuphu.

32Nyatakwa iphe, meru nyee Lotu.

33“Onye bu onye eme ge ndzu iya duru iya l'e-tuphakwa iya etupha. Onye tuphakanuru ndzu iya etupha bu kwa akwakobe be o kwakoberu iya.

34Ge mu kakwaru unu; enyashi ono be ɔmadzu labo a-ze l'iphe, aaze aze; e zikota onye lanu; haa onye ophuu.

35Unwanyi labo a-nodu atsū nri; l'e zikota onye lanu; onye lanu akwaa.

36Umadzu labo l'a-nodu l'egu; e zikota onye lanu; onye lanu akwaa.”

³⁷Ndu etsoje iya nū sū: “Nnajiuphu; ? bụ l'awe bẹ iphe ono e-me?” O sū phẹ: “Oo ẹka odzu dabyiru bẹ udele edzukọbeje.”

Luku 18

Ẹtu nwanyi, ji iya anọedu yẹ onye ekpe ikpe

¹Jizosu bya anmaaru phẹ ẹtu, o gude goshi phẹ sū g'ẹphe pfuje nū Chileke; g'ẹphe ta asu l'ike epfufu bvūwaru phẹ.

²O sū phẹ: “O nweru mkpukpu lanu, onye ekpe ikpe bu; ophu ọotsudu Chileke ebvu; ophu ọ gubeduru nemadzu iphe.

³O dukwarupho nwanyi, ji iya anọedu ndzu, bukwapho l'ime mkpukpu ono. Nwanyi ono nọdu ejepfuje onye-ikpe ono tekenteke je anọdu arwo iya sū iya jiko g'o kpefuta iya l'ẹka onye opfu iya.

⁴Onye-ikpe ono jikanyakpoepo bya arja sū: ‘A maru-a lẹ mu ta atsudu Chileke ebvu; ophu ọ dudu onye mu guberu iphe;

⁵ọle nwanyi-a pfuchinukawaru mu nchi. Mu e-kperu iphe iya nū iya; a -nonyaa o pfugbua mu l'opfu.’ “

⁶Oo ya bụ; Nnajiuphu sū: “? Unu nūmaru iphe, ẹjo onye-ikpe ono pfuru?

⁷Su-a; ? ọ dū unu gẹ Chileke ta akabadaanu ekpefu ndu ọ hotaru egwegwa; mbu ndu araku iya nū eswe l'enyashi? ? Ọoby a nọ ọdu g'ọ tọ yeru phẹ ẹka?

⁸Gẹ mu gbukwaaru iya unu tororo; oo-kpefukwa phẹ l'ọku l'ọku. Obenu lẹ-a; Abubu-Ndiphe -byaepo; ? ọ duru-a ndu ọo-huma, kweru nọdu iya l'ẹka l'eliphe tọ?”

Ẹtu onye Fárisii yẹ onye anajẹ okpoga akiriko

⁹O bya anmaa ẹtu-a nū ndu gude l'ẹphe dobesu l'ẹphe pfuberekoto; woru ndu ọzo nmaa phulaphula. O sū phẹ:

¹⁰“O duru umadzu labo, bahuru l'eze-ulo Chileke je epfuru nū Chileke. Onye lanu bu onye Fárisii; onye ophuu bu onye ana akiriko.

¹¹Onye Fárisii ono gbalihu je apfu-pheru bya epfuru nū Chileke k'ẹhu onwiya sū: ‘Chileke; mu ekele ngu ekele lẹ mu ta adudu g'unwoke ọzo; mbu ndu ana nfu; ọzoo ndu eme kẹ nwanyi; mẹ ndu eme ẹjo-iphe; ọzoo dū gẹ nwoke-a ana okpoga akiriko-a.

¹²Mu aswijeru Chileke ẹgu ujiku ẹbo l'idzu; tẹme iphe, mu kpatakporu akpata bẹ mu ekeje oke-lanu-l'uzo-iri; nū Chileke.’

¹³Onye k'ophuu, bu onye ana akiriko pho je apfururo ụzenya; ophu ọ palikpodarunu iphu imeli; gbahaepo ẹka bẹ ọoku ọpọpọpo l'okpoma sū: ‘Chileke ẹka l'alị! G'imemini mube onye iphe-ẹji dū ngu rọ!’

¹⁴Su-a; gẹ mu kakwaru unu; onye ana akiriko ono byakwaru ala ibe iya; Chileke guwa iya l'onye pfuberekoto; haa onye ophuu; kele onyemonye, l'ekuli onwiya eli bẹ ee-kuzeta alị; onye kuzetakwanuru onwiya alị bẹ ee-kuli eli.”

Jizosu agoru unwegirima onu-oma

(Mat 19:13-15; Mak 10:13-16)

¹⁵A nodu ekutagbaaru Jizosu unwegirima, e he l'eka g'o byia phe eka. Ndu etsoje iya nu huma iya bya abaarū ndu ono, ekutaru iya unwegirima ono mba.

¹⁶Jizosu bya ekua phe su: “Unu hakwaa unwegirima g'ephe byapfuta mu; unu ta akposhikwa phe abyabya; kele o bu ndu du nno be eka Chileke bu eze bu nkephe.

¹⁷Ge mu gbukwaaru iya unu tororo; onye ete gudedu obu unwegirima kweta le Chileke bu eze taa bahukwa eka o no.”

Onye nweru iphe

(Mat 19:16-30; Mak 10:17-31)

¹⁸Onye lanu, bu onye-ishi jia Jizosu su iya: “O-zì-iphe, nwoke, dube ree; ? bu gunu be mu e-me ge mu nweru ndzu ojeje?”

¹⁹Jizosu su iya: “? Bu gunu meru g'o gude i nodu eku mu onye dube ree? O to dukwa onye bu onye dube ree; a -gufu Chileke nwekiya.

²⁰I mawaru iphe, ekemu Chileke suru g'e meje: ‘Erikwa ogori; ophu i gbukwa ochi; ophu i zikwa iphuru; ophu i dzukwa uka; kwabeje nna ngu yee ne ngu ubvu.’ “

²¹Nwoke ono su iya: “Eshinu mu bu nwata ta adukwa iphemiphe ono ophu mu mebyijeru.”

²²Jizosu numaeopho nno bya asu iya: “Iphe lanu bu iphe, phodukwaduru ngu nu; laa je erekota iphemiphe, i nweru; woru aswa iya keeru ndu ukpa; li byawaro etsoru mu. Oo ya bu l'inweru okpobe iphe l'imigwe.”

²³Nwoke ono numaeopho nno; ehu dae ya pho dzuu; kele o nweru iphe shii.

²⁴Jizosu lee ya enya bya asu: “Egube g'ootsubekwanu l'ehu; mbu ge ndu nweru iphe e-me bahu l'eka Chileke bu eze.

²⁵Kele ewota inya pyoo l'enya ngga kakwa nphe; eme le g'onye nweru iphe e-me bahu l'eka Chileke bu eze.”

²⁶Ndu numaru iya nu su: “? O buhunuru onye be aa-dzota?”

²⁷Jizosu su: “Iphe kpobaru nemadzu eka ememe be bukwa Chileke suru iya ememe.”

²⁸Pyita su: “Lewaro anyibedua, tukoru iphemiphe haa bya etsoru ngu-a.”

²⁹O su phe: “Ge mu gbukwaaru iya unu tororo; o to dukwa onye gude k'eka Chileke bu eze; haa ulo iya; ozoo nyee ya; ozoo nwune iya; ozoo ndu nwuru iya nu; ozoo unwu iya;

³⁰ge Chileke ta apfu iya ugwo iya mpfu-ngo nta; l'o nweru ndzu ojejeje l'ogbo ophu no l'iphu.”

K'ugbo eto Jizosu epfu le ya e-je iphe-ehuka nwuhu

(Mat 20:17-19; Mak 10:32-34)

³¹Jizos̄u bya eduta ʊmadzu iri l'eb̄o ono bya as̄u ph̄e: “Unu h̄uma l̄e nta-a b̄e anyi ejewaa Jierusalem̄u. Iphemiphe, ndu mpfuchiru Chileke deru k'eh̄u Abub̄u-Ndiphe b̄e e-mekotanu.

³²Kele aa-kpuru iya n̄u ndu amadu Chileke; aa-gbaru iya mgbonu; gude iya mee iphe ochi; v̄ua ya onu-mini;

³³chia ya echachi; woru iya megbua. Teke o beru mboku k'eto iya l'ooshi l'onwu teta dzuru ndzu ozo.”

³⁴Ophu o dudu iphe ono m̄e nanu, doru ph̄e enya; kele e meru g'opfu ono tuchi ph̄e enya; ophu ephe amadu iphe, o pfuru.

Jizos̄u eme onye atsu ishi g'ọ wata aph̄u ọzo

(Mat 20:29-34; Mak 10:46-52)

³⁵Jizos̄u rwutashia Jieriko; o duru nwoke, atsu ishi, n̄o l'aguga etsuzo arwo arwo.

³⁶O numa igiji ikpoto ndu awugha n̄u; bya ajjahaa: “? Bu gunu ada?”

³⁷Ephe su iya l'o kwa Jizos̄u onye Nazaretu l'aghata.

³⁸O chishia: “Jizos̄u! Nwa Dévidi! Phunaaru mu obu-imemini.”

³⁹Ndu n̄o l'iphu gbochia ya onu; su iya g'o dobe onu doo. O kabakpoo ya ro arashi ike: “Gube Nwa Dévidi! Phunaaru mu obu-imemini.”

⁴⁰Jizos̄u pfuru bya ezia g'e duta iya bya. O byarwutaepho ntse; Jizos̄u su iya:

⁴¹“? Bu gunu b̄e o du ngu ge mu meeru ngu?” O su iya: “Nnajiuphu; mee ge mu wata aph̄u ọzo.”

⁴²Jizos̄u su iya: “Wata aph̄u ọzo; l'ekweta, i kwetar̄u ke Chileke mewaru g'i du iche.”

⁴³Teke ono kwapho; o wata aph̄u ọzo; bya etsoahaa Jizos̄u; nodu etu Chileke epha. Iphe, bukpo onye h̄umaru iya n̄u jaa Chileke ajaja.

Luku 19

Jizos̄u yee Zakiyosu

¹Jizos̄u bya abahu l̄e Jieriko; bya aghajaahaa ya aghaja.

²O duru nwoke, epha iya bu Zakiyosu, bu iya bu onye-ishi ndu anaje akiriko; teme o nweru iphe shii.

³O chohakpoo ge ya h̄uma Jizos̄u, maru onye o bu; ophu ikpoto oha ono ekwedu g'o kpata ọzo; kele o du mkpurukpu.

⁴Noo ya bu; o gbavuta ọzo je enyihu eli oshi sikamo; je anodu ge ya ahuma Jizos̄u; kele oo-shi l'eka ono ghata.

⁵Jizos̄u byarwutaepho eka ono bya apalia enya bya asu iya: “Zakiyosu; nyizeta egwegwa; kele o l'ulo ngu b̄e mu kwafutaje ntanu-a.”

⁶O nyizeta ẹgwegwa bya egude ẹhu-utso duru Jizosu duba ibe iya.

⁷Ẹhu ghuahaa iphe, bu ndu humaru iya nu eghu. Ẹphe pfuahaa su: “Lenu; nwoke-a abahu jeshia g'a kwaru iya ẹbyaa l'ibe nwoke-a, eme iphe-ẹji-a.”

⁸Zakiyosu gbalihu bya asu Nnajiuphu: “Mu su-a; Nnajiuphu; iphe, mu nweru enweru be mu e-ke uzo ẹbo; nu ndu ukpa oke lanu. Teke o bu l'o duru onye mu riru urwu; iphe, o bu iphe, o bu; mu a-pfu ya iphe, ha g'iphe, mu riru iya mgbo eno.”

⁹Jizosu su iya: “Ntanu-a be a dzoru ndu unuphu-a; kele nwoke-a l'onwiya bukwapho oshilokpa Ẹbirhamu.

¹⁰Abubu-Ndiphe byakwaru achu ndu tuphahu etupahu g'oo-dzoo phe.”

Ẹtu ndu e yeru okpoga l'eka

(Mat 25:14-30)

¹¹Ẹphe nunyakpoepho iphemiphe ono; o wataru phe anmaru etu; kele o nowa Jierusalemu ntse; teme ẹphe dobesu le Chileke abyakebewaa egoshi le ya bu eze.

¹²Oo ya bu o su: “O duru nwoke lanu, bu eri ndu eze, jeru oha, du enya; g'e kpube iya okpu-eze teme l'oolwa.

¹³O bya ekua ndu-ozu iya umadzu iri bya ekeeru phe pangu iri. O su phe: ‘Unu gude iya see akanya jasu mu a-lwa.’

¹⁴Ole nwoke ono du ndu ali iya ashi. Ẹphe zia ndu-ozu g'ẹphe tso iya azu azu je epfu l'eka ono; su l'o to dudu phe g'o buru nwoke ono, a-buru eze phe.

¹⁵“E kpubechaepho nwoke ono okpu-eze ono; o lwa bya ezia g'e kuaru iya ndu-ozu-a, o nuru okpoga-a ge ya maru urwu, ẹphe ritaru iya.

¹⁶Onye ke mbu bya apfuru iya l'iphu bya asu: ‘Nna; pangu olu ngu ono tukobeakwaru onwiya pangu iri ozo.’

¹⁷O su iya: ‘I meru ree! I bu okpobe onye-ozu. Eshinu e gude ire ngu eka l'iphe, ha nwanshii be mu yeru ngu mkpukpu iri l'eka; g'i buru ishi phe.’

¹⁸Onye k'ẹbo bya bya asu: ‘Nna; pangu olu ngu ono tukobeakwaru onwiya pangu ise.’

¹⁹Onye eze ono su iya: ‘O kwapho mkpukpu ise be ii-buru ishi phe.’

²⁰Onye ozo bya asu: ‘Nna; wakwa pangu olu ngu. Mu woekwaru iya pho kechia le nwampekala ekwa;

²¹kele mu atsu ngu ebvu l'i dunukaru ehuka. Iiwotaje iphe, i dobeduru; teme i nodu awotaje iphe, i kuduru.’

²²“Onye eze ono su iya: ‘Gube iberezi iphe-a! O kwa opfu-onu ngu be mu e-gude nmaa ngu ikpe. Eshinu i maru le mu du ehuka; mu nodu ewotaje iphe, mu edobeduru; teme mu nodu awotaje iphe, mu akuduru.

²³? Bu gunu meru iphe, i yeduru mu okpoga mu l'ulo nche okpoga; g'oo-buru: mu -lwa mu eje ewota iya yee iphe, o tukoberu onwiya?’

²⁴Ọ bya asụ ndu pfuru l'ẹka ono: 'Unu nata iya okpoga ono woru nụ onye ọphu nweru pangu iri phọ.'

²⁵Ẹphe sụ iya: 'Ii-nhi Nnajiuphu! ? Bụchia yẹbedua, nwewaru pangu iri-a?'

²⁶Ọ sụ phẹ: 'Gẹ mu gbukwaaru iya unu tororo; onye nweru nụ bẹ aa-nụbakwaa ọphu ka shii. Obenu l'onye enwedụ nụ bẹ aa-gbenu natafulenu nwọphu o nweru.'

²⁷Sụ phẹ: 'A bya lẹ ndu opfu mu-a, bụ ndu ete ekwedu l'ọo mu a-buru eze phẹ-a; unu chita phẹ bya egbushia l'atathphu mu l'ẹka-a.' "

Jizọsu abahụ lẹ Jierúsalemụ
(Mat 21:1-11; Mak 11:1-11; Jiọn 12:12-19)

²⁸Jizọsu pfuchaephọ iphe, oopfu bya ejeshia Jierúsalemụ, oo-je.

²⁹Ọ byarwutaephọ l'úbvú, eekuje Úbvú-Olivu, bụ iya bụ lẹ mgboru Betufeji; waa Betani; o zia ndu etsoje iya nụ ụmadzu ẹbo sụ phẹ:

³⁰"Unu je l'ime mkpukpu ono, nọ unu l'uzo iphu ono. Unu -rwuephọ l'ọnu ụzo, e shi abahụ lẹ mkpukpu ono bẹ unu a-huma nwa nkafụ-igara, e liberu elibe l'ẹka ono, e teke adu-swe onye nojeru iya l'eli. Unu tota iya kpuru bya.

³¹Teke ọ duru onye jiru unu sụ: '? Bụ gunu meru iphe, unu atota iya?' Unu asụ iya lẹ mkpa iya duru Nnajiuphu."

³²Noo ya; ndu ono, e ziru ozi ono tugbua bya ejerwua; ọ buerupho g'o pfuru bụ g'ọ dụ.

³³Ẹphe totaahaephọ nkafụ-igara ono; ndu nwe iya nụ sụ phẹ: "' Bụ gunu meru g'o gude unu nọdu atota nkafụ-igara ono?'"

³⁴Ẹphe sụ phẹ: "Ọ kwa mkpa iya duru Nnajiuphu."

³⁵Ẹphe kputa nkafụ-igara ono je anụ Jizọsu; bya eworu uwe ẹhu phẹ wukobe iya; bya eyeru Jizọsu ẹka; ọ nọdu iya anọo l'eli.

³⁶O be g'ogba eje; ndu nọ l'uzo toọ uwe ẹhu phẹ l'uzo.

³⁷Ọ zakubejeephọ Jierúsalemụ ntse lẹ mkpọ-zeta úbvú Olivu; iphe, bukpo ikpoto ndu etsoje iya nụ ono wata ete ẹswa; echi mkpu; aja Chileke ajaja k'eze iphe ono, paru ẹka ono, o meru; ẹphe humakota ono.

³⁸Ẹphe sụ: "Onye Chileke goru ọnu-oma bẹ eze ono bụ; mbụ onye ono, bụ Nnajiuphu ziru iya g'ọ bya ono. Gẹ nchị dukwa doo l'imigwe; g'úbvù duru Chileke, bụ Okalibe-kangokotaru-nụ."

³⁹Ndu Fárisii, yị l'ikpoto ndu ono haru sụ Jizọsu: "O-zì-iphe! Baaru ndu etsoje ngu nụ mba."

⁴⁰Ọ sụ phẹ: "Gẹ mu kakwaru unu: ndu-a -nọdu doo; mkpuma, nọ l'alì echia mkpu ono l'onwiya."

Jizọsu ara ẹkwa Jierúsalemụ

⁴¹Jizos̄u levuēpho Jierúsalem̄u; ọ raahaa ẹkwa iya s̄u:

⁴²“Ọ -b̄u l'ị makp̄okwanaaru iphe, e-me ọ nch̄i d̄u ngu doo nta; obenu ọ nta-a b̄e e domiru iya g'enȳa ngu ta ah̄uma iya.

⁴³Kele ọo ujiku lan̄u b̄e ndu ọhogu ngu aa-f̄uru ngu; bvua ose-ọgu; n̄o-pee ngu mgburugburu; buchia ngu ọnu nri; shi ẹkameka at̄u kpereree abyapfuta ngu;

⁴⁴bya egbua ọu l'unwu ngu, kuru ngu l'ime pyaapyaa. Mb̄u l'ohogu ngu taa hakwa mkpuma lan̄u g'ọ kp̄o-pfuru nwibe iya l'eli igbul̄o ngu; kele ị t̄i mad̄u teke a byaru ngu adz̄ota.”

Jizos̄u ach̄ifu ndu az̄u aswa l'eze-ulo Chileke

(Mat 21:12-17; Mak 11:15-19; Jion 2:13-22)

⁴⁵Jizos̄u bya abah̄u l'eze-ulo Chileke bya awata ach̄ishi ndu az̄u aswa.

⁴⁶S̄u ph̄e: “Unu ta amad̄u l'e deru l'ekwo ọ Chileke s̄uru: ‘Ulo mu a-b̄uru ọlo, aa-n̄oduje epfu an̄u mu.’ Unu bya eworu iya mee ọlo, ndu ana n̄fu edomije onwophe.”

⁴⁷Ọ n̄odu an̄oduje ezi iphe l'eze-ulo Chileke ono mb̄oku-mb̄oku. Ndu-ishi uke Chileke; m̄e ndu ezije ekemu; m̄e ndu nweru ẹn̄ya l'oha ono ch̄oahaa ọzo g'ephe e-me gbua ya.

⁴⁸Ọphu ephe amad̄u g'ephe e-me iya; kele onyemonye d̄o-pheru iya mgburugburu; woru nch̄i t̄ogbo l'iphe, oo-pfu.

Luku 20

Aaji Jizos̄u ẹgube ike, o gude eme iphemiphe ono

(Mat 21:23-27; Mak 11:27-33)

¹O be ujiku lan̄u ọ Jizos̄u n̄o ezi ọha iphe l'eze-ulo Chileke; ara ozi-oma ono arara; ndu-ishi uke Chileke; waa ndu ezije ekemu; waa ndu b̄u ọgerenya byapfuta iya bya as̄u iya:

²“Kar̄u anyi ? B̄u ẹgube ike ọnu b̄e i gude eme iphemiphe-a? ? B̄ukpoo onye ziru ngu g'ị bya iya ememe?”

³Ọ s̄u ph̄e: “Mb̄edua a-j̄ikwap̄ho unu aji lan̄u. Unu zakwaa mu iya.

⁴? B̄u onye ziru Jionu g'ọ bya eme baputizimu? ? B̄u Chileke; t̄oo nemadz̄u?”

⁵Ephe wata iya adz̄okashi l'ime onwophe s̄u: “Teke anyi s̄uru l'oo Chileke ziru iya; l'oo-s̄u anyi: ‘? Ọ b̄uhunuru ọnu meru g'ọ gude ọphu unu ekwetaduru iphe, o pfuru?’

⁶Teke anyi s̄ukwanuru l'oo nemadz̄u ziru iya; ọha atugbua anyi ọ mkpuma; kele o dowar̄u ọha ẹn̄ya ọ Jionu b̄u onye mpfuchiru Chileke.”

⁷Ephe je jas̄u iya: “Anyi ta amakwa onye ziru iya ya n̄u.”

⁸“Jizos̄u s̄ukwanu ph̄e: Ọphu mu a-k̄okwanuru unu onye ziru mu n̄u ọ mu meje iphemiphe ono.”

Ẹtu, e gude ndu anwam̄u, e butaru ye l'opfu-vaȳinu anma

(Mat 21:33-46; Mak 12:1-12)

- ⁹Ọ wata anmaru ọha ẹtu-a su: “Nwoke lanu koru opfu-vayinu bya eworu iya ye l'eka ndu o butaru g'ephe letajeru iya ya ẹnya; bya atugbua jeshia iphe-ozo je anoo odu.
- ¹⁰Ọ rwua teke aawoje akpuru iya; ọ bya ezia onye-ozu iya g'o jepfu ndu-ozu-egu ono g'ephe woo ya oke iya nkiya. Ephe gude onye ono, o ziru ozu ono; tsua ya iphe; gbabe iya eka oto; nwufu iya; ọ lashia.
- ¹¹Ọ bya ezia onye-ozu ozo; ephe tsukwapho onye k'ono iphe; mee ya iphe-iphere; gbabe iya eka oto; nwufu iya; ọ lashia.
- ¹²Ọ zikwaapho onye k'eto; ephe mekwapho onye k'ono iphe; chifu iya.
- ¹³Onye ono, nwe opfu-vayinu ono su: ‘Ọ du ree; mu maru-a iphe, mu e-me nta. Mu e-ye nwa mu, mu yeru obu g'o je. ? A maru; ? ephe a-kabe kwabe yebedua ubvu m'ephe-huma iya?’
- ¹⁴Ọ be teke ndu-ozu-egu ono humaru onye k'ono; ephe zua mgbede kpua ya su: ‘Ihee! Waa onye ali-a e-mechaa buru nkiya me nna iya -nwuhu. Unu g'anyi gbua ya egbugbu; g'ali ono a-buru k'anyi.’
- ¹⁵Ephe kpufu iya l'egu ono je eworu iya megbua. “Su-a; ? Ọ dukpoo unu g'o bu gunu be onye nwe opfu-vayinu ono e-me phe?
- ¹⁶Ọo-bya egbushichaa ndu-ozu-egu ono bya eworu opfu-vayinu ono ye ndu ozo l'eka.” Oha numapho nno; ọ toko buru: “Tuswekwa! Tuswekwa!”
- ¹⁷Ọ bya elee phe ẹnya bya asu: “? Ọ bhunuru gunu be bu iphe, e deru l'ekwo-opfu Chileke su: “Ọ kwa mkpuma, ndu akpu ulo jikaru; mechaaru bya aburu mkpuma, gudeshi ulo?
- ¹⁸Onyemonye, bu onye vukotaru mkpuma ono daa; be e-tsujishihunu; teme teke ọ turu nemadzu; l'ogwee onye ono arakabya.”

Apfu akiriko

(Mat 22:15-22; Mak 12:13-17)

- ¹⁹Ndu ezije ekemu waa ndu-ishi ndu-uke Chileke meahaa g'ephe zugude iya teke ono; kele ephe maru l'oo phe be onmadoru ẹtu ono; ephe nodu atsukwanu oha ebvu.
- ²⁰Ephe wata iya anwu ngge; bya ezia ndu ngge g'ephe je emetakpopho g'ephe bu ndu okpobe-opfu; g'ephe a-tuta nvo l'iphe, o pfuru gude kpata iya ye l'eka onye nwe ike, bu iya bu nnajioha, shi Romu.
- ²¹Tobudu iya bu; ephe jerwua bya ajia ya su: “O-zu-iphe; anyi maru l'iipfuje opfu, pfuru nhamunha; teme i nodu ezi iphe, pfuru oto; ophu ọ dudu onye iile ẹnya l'iphu epfu; gbahaa uzo Chileke be i gude ire-lanu ezi.
- ²²Su-a; ? to budunu emebyi ekemu Chileke me anyi -tufe akiriko nu eze nnajioha, no le Romu?”
- ²³Ọ maerupho ẹregede phe bya asu phe: ? Denu g'o gude unu nodu ahụ mu ama?

24“Unu goshiëshikwa mu kobo lanu. ? Bụ ishi onye yee epha onye bu owa-a, du iya nu-a?” Epe su iya: “Oo ke Siza!”

25O su phe: “O du ree; unu wonuru iphe Siza nu Siza; unu eworu ke Chileke nu Chileke.”

26Ophu epe adudu ike pfuru l'edzudzu-oha l'eka ono shi l'opfu onu iya gude iya. G'o gude pfua iphe ono du phe biribiri. Ophu epe epfueduru opfu.

Ke eshi l'onwu teta dzuru ndzu

(Mat 22:23-33; Mak 12:18-27)

27O duru ndu Sadiusi, bu ndu ono, suru l'e tee shidu l'onwu eteta adzuru ndzu ono; byapfutaru Jizosu.

28Bya ajia ya aji su: “O-zì-iphe; Mosisu deru l'ekwo ekemu su: Teke o bu le nemadzu nwuhuru; ebe o nwutaduru nwa; ge nwune onye ono lupyabe nyee ya; nwutaru iya nwa.

29Su-a; o duru unwune esaa, k'ogerenya luchaaru nwanyi bya ahaa ya nwuhu; ophu o nwutaduru nwa.

30Onye k'ebo lupyabe nwanyi ono. Lua ya jasu nwoke ono nwuhu; ophu o nwutakwaru iya pho nwa.

31Onye k'eto nnopho; jasu epe n'esaa ludzuru nwanyi lanu ono nwushihukota; ophu o dudu onye ophu nwutaru nwa.

32E mechaa l'ikpazu; nwanyi l'onwiya bya anwuhu nkiya.

33Su-a; o -rwua teke l'ee-shi l'onwu teta dzuru ndzu; ? bu onye ole be nwanyi ono a-buru nyee ya? G'ephe n'esaa ono luchaaru iya-a.”

34Jizosu su phe: “Unwu ogbo-nta-a alu nwanyi; unwanyi nodu alu ji;

35obenu le ndu a guru l'ephe gbaru k'eshi l'onwu teta gbalihu bya eburu le mgboko ophu a-bya nu taa luhedu nwanyi; ophu nwanyi aluhedu ji.

36Epe taa nwuhuhedu anwuhu ozo; kele epe l'unwu-ojozi-imigwe a-gbaru nanu. Eshinu epe bu unwu, shi l'onwu teta dzuru ndzu be epe buwaa unwu Chileke.

37O -buru k'eshi l'onwu teta dzuru ndzu be ekwo Mosisu goshiru iya l'eka o pfuru k'irwu, oku enwu phoophoophoo. Eka ono be Mosisu kuru Chileke: Chileke ke Ebirhamu; waa ke Ayizaku; waa ke Jiekopu.

38Bu iya bu l'o to budu Chileke ndu nwuhuru anwuhu. O bu Chileke ndu no ndzu; kele onyemonye dzu ndzu l'enya Chileke.”

39Ndu ezije ekemu ono haru su iya: “O-zì-iphe! I pfuru ree!”

40E shiepho teke ono, ophu epe atubaeduru ama ajibaa ya aji ozo.

Aji k'onye bu Kereshi o bu

(Mat 22:41-46; Mak 12:35-37)

- ⁴¹Jizosu bya asu ndu Farisii ono: “? Denu g'e gude su le Kereshi obu bu Nwa Dévidi;
⁴²l'eka Dévidi l'onwiya pfukwaru l'ekwo-ebvu Chileke su: “Chileke suru Nnajiuphu mu: Nodu mu l'ekutara
⁴³jasu teke mu e-me ndu ohogu ngu g'ephe buru iphe, ii-zopyabe l'okpa.”
⁴⁴Bunu iya bu le Dévidi kuru iya Nnajiuphu! ? Denuhunu g'o gude o buru nwa iya?

Jizosu epfu k'ezije ekemu

(Mat 23:1-36; Mak 12:38-40)

- ⁴⁵Jizosu nodu l'edzudzu-oha l'eka ono su ndu etsoje iya nu:
⁴⁶“Unu kpakwaru ndu ezije ekemu l'aphara; mbu ndu bu iphe, aduje phe ree bu g'ephe gude kpowula-kpowula uwe kwaa onwophe yegede ejephe; g'e keleje phe erengete ekele l'eka a du igwerigwe g'ephe bu oke nemadzu. G'oshi ophu bu iya kachakpo ree l'ulo-ndzuku ndu Jiu buru nkephe; waa g'o buru phe a-nodu l'eka aa-kachakpo phe akwabẹ ubvu me a -nodu abo iphe.
⁴⁷Ephe bu ndu eripyaje ulo unwanyi, ji phe anodedu; teme ephe nodu egudeje eregede epfukpopho ogologo opfu anu Chileke. O bu phe be aa-kachaa anmashi ikpe ike.”

Luku 21

Iphe, nwanyi, ji iya anodedu anu Chileke

(Mak 12:41-44)

- ¹Jizosu bya apalia enya bya ahuma ndu nweru iphe g'ephe echiegbaa okpoga phe l'okpoko, eechiejeru Chileke okpoga l'eze-ulo Chileke.
²O huma nwanyi, ji iya anodedu ndu, akpa nri, byaru bya echie afu labo.
³Jizosu su: “Ge mu kakwaru unu; o kwa nwanyi ukpa-a, ji iya anodedu ndu-a be kachaa eye okpoga le g'ephe hakota ono.
⁴Kele iphe, ndu ophu g'ephe ha echiegbaa bu okpoga, tsuru etsutsu; obenu le nwanyi-a akpakpo nri shii; ole o wotakotaru iphe, o gude buru bya echie.”

Iphe, e-me teke ikpazu

(Mat 24:1-2; Mak 13:1-2)

- ⁵A haru pfuphenyaepho k'eze-ulo Chileke ono g'e gude kpumata iya l'eguru mkpuma, du ebvu; waa k'iphe, a nuru Chileke, du iya nu; Jizosu su phe:
⁶“O -buru iphe owa-a, unu ele enya-a; o dukwaru mboku, ee-mechaa nwukposhichaa iphemiphe ono enwukposhi; mbu k'ophu o to dudu g'o ka mma l'oo mkpuma lanu, akpo-pfuru l'eli nwibe iya.”

Iphe, bu o -mechaa mgboko abvu

(Mat 24:3-14; Mak 13:3-13)

- ⁷Ephe jia Jizosu su iya: “? Bukpoo teke ole be iphemiphe ono e-mekpo? ? Bu gunu be ee-gude maru teke iphe ono abyagbaa ememe?”

⁸O sụ: “Oo pho g'unu leta ɛnya g'ọ to du onye e-duswe unu ụzo. O dukwaru igwerigwe ndu a-zaru ɛpha mu bya. Onye ophu nonu l'ọ sụ l'oo ya bu Kéreshi obu; mbu l'ooḡbaakwa teke obu. Unu te etsokwaru phe.

⁹Teke unu n̄aharu k'ogu; waa le mkpaka aswoli l'ibiya ophuu; ozoo l'ibiya ophuu; ge ndzu ba agukwa unu; kele iphemiphe ono mefutakotaje; ole teke ikpazu tee rwuekwapho egwegwa nno.”

¹⁰No iya; o sụ phe: “Oha yele oha ibe iya a-nodu alwu oḡu; ali-eze yee ali-eze ibe iya a-lwukwapho oḡu.

¹¹Ali-onma-jijijijii a-nodu anma anmashi iya ike; ejo okpa-nri mekpoo ehu, eme ememe l'e-mekota l'eka du igwerigwe. Ahuma a-nodu emegbaa l'akpaminigwe mekpoo eze iphe-ohubama ozo.

¹²“Ole-a; iphemiphe ono -bya emegbabe be ee-vuadaru ụzo kpa unu ehu; gude unu; kpuru unu je l'ulo-ndzukọ ndu Jiu je ekpee unu ikpe; tua unu mkporo; mbu l'aa-kp̄tachakwaa unu bya edobe l'iphu ndu eze; mekpoo l'iphu ndu-ishi oha l'opfu ehu mu.

¹³Noo teke o gbaru g'unu goshi l'edzudzu-oha l'unu bu ndibe mu.

¹⁴Su-a; unu te evujekwaru ụzo wata arị iphe, unu e-pfu gude kpefu onwunu;

¹⁵kele oo mbedua l'e-ye unu opfu l'onu. Mu e-me unu amaru iphe k'opfu ndu ohogu unu a-ta amaduru g'ephe e-yeje onu l'iphe, unu epfu; ophu ephe a-byadu atu-kpute unu l'ego.

¹⁶Ndu nwuru unu; mekpoo unwune unu; mekpoo abubu unu; me onya unu phe e-mechaa deru unu ye ndiphe l'eka; l'a haru unu gbua egbugbu.

¹⁷Onyemonye e-gude k'iswi ehu mu kpo unu ashi.

¹⁸Ole o to dudu g'ọ ka mma l'oo eḡbushi lanu, no unu l'ishi, byaru l'ala l'iswi.

¹⁹Oo ephe g'unu taje nshi; kele o kwa o-ta-nshi tataru okpobe ndzu.”

Ejo ahuma

(Mat 24:15-21; Mak 13:14-19)

²⁰“Su-a; teke unu humaerupho ge ndu ojogu no-pheru Jierusalemu mgburugburu; unu amaru l'akwakposhi iya duwaa ntse.

²¹O -be teke ono; ge ndu no le Jiudiya gbalakwaa laa l'ubvu; ge ndu kuru l'ime mkpukpu wufu; ge ndu lufuru je l'egu te jeekwa alaphu azu l'ime mkpukpu onoya.

²²Kele teke ono bukota mboku, Chileke a-gwa ndiphe ochi g'e gude nno g'iphemiphe, e deru l'ekwo Opfu Chileke vukota.

²³Nshio unwanyi, du ime; me ndu nwa l'angukwadu era mboku ono. Kele ejo iphe-ehuka, paru eka a-du l'eliphe; teme Chileke e-gude oke-ehu-eghu kpee ndu Izurelu ikpe.

²⁴Ee-gbu phẹ lẹ mma; kpua phẹ lẹ ndzu laa l'iphe, bukpo ohamoha. Ndu abudu ndu Jiu e-tee Jierusalemu pyakapyaka jasụ oo-rwube ephebedua.”

Abyabya Abubu-Ndiphe

(Mat 24:29-31; Mak 13:24-27)

²⁵“Iphe-ohubama l'a-nodu eme l'enyanwu; me l'onwa; me lẹ kpokpode. L'eliphe be eze-enyimu waa ochioku mini iya a-nodu abya enari; k'ophu meji a-gbabuhu ndiphe mgburugburu lẹ ndzu-agugu.

²⁶Nemadzu e-gudeje ndzu-agugu avehu avehu teke aa-nodu ele enya iphe, abya ememe lẹ mgboko; kele iphemiphe, no l'igwe a-nmawo anmawo; lo-sweshihu.

²⁷Noo teke ephe a-huma Abubu-Ndiphe l'eka o no l'urwukpu; egbu nwijnwii gude ike iya, paru eka abya.

²⁸Teke iphemiphe-a wataerupho ememe; unu kwolihu; palia enya; kele ooruwaa teke aa-gbata unu.”

Iphe, e gude oshi figu anwuta

(Mat 24:32-35; Mak 13:28-31)

²⁹Jizosu bya anmakwaaru phẹ pho etu-a: “Unu leekwa enya l'oshi figu yee oshi mmanu ozo.

³⁰Oobujeru teke o wataerupho erwu irwu; unu ahuma iya l'onwunu; maru lẹ teke okpomoku ekpoje duwaa ntse.

³¹Nokwapho g'owa-a du. Teke iphemiphe-a wataerupho ememe; unu amaru lẹ teke Chileke e-goshi lẹ ya bu eze duwaa ntse.”

³²Su-a; ge mu gbukwaaru iya unu tororo; ogbo-a taa bvuebekwa; iphemiphe-a emekota. Nokwa g'o du.

³³Igwe a-bvukwa ali avu; obenu l'opfu, mu pfuru ta abyadu avu avubvu.

O gbaru unu lẹ nche

³⁴“Ole-a; unu chekwa onwunu nche. Unu te ekwekwa g'ike bvụ unu; opfu l'unu eri gwogwoo; angunuka mee; waa l'unu achophe eku ke mgboko; odumeka be mboku ono a-tukwa unu l'upfu.

³⁵Kele iphe, bukotakpoo ndu mgboko mgburugburu be o-nma g'onya.

³⁶Ole-a; unu che nche tekenteke; unu pfu nu Chileke g'unu a-du ike pfu-shia ike me iphemiphe ono -meje. Teke e mecharu unu apfuru l'iphu Abubu-Ndiphe.”

³⁷Noo ya; Jizosu nodu anoduje l'eze-ulo Chileke; ezi iphe mboku-mboku; o -be l'enyashi ooje akwaa l'ubvu, eekuje Ubvu-Olivu.

³⁸O -be lẹ nchi abohu; e kporu wu-pfuta iya l'eze-ulo Chileke bya anuma iphe, oopfu.

Luku 22

Jiudasu eederu Jizosu eye l'eka ndu Jiu

(Mat 26:1-5; Mak 14:1-2; Jìon 11:45-53)

- ¹O be teke idzu, aatajẹ buredi, ekoduru ekoko dụwaa ntse, bụ ọbo-iphe, eekuje Ojaghata;
- ²ndu-ishi uke Chileke waa ndu ezije ekemu nọdu achọkashi ụzo, ẹphe e-shikpọo gbua Jizọsu; obenu l'ẹphe atsụ ọha ebvu.
- ³Nsetanu bya abahụ l'ime obu Jiudasu, bụ onye ntushi-ẹpha iya bụ Isukariyotu, bukwa-a onye lanụ l'ime umadzu iri l'ẹbo phọ-a.
- ⁴Ọ tughua bya ejepfu ndu-ishi uke Chileke mę ndu-ishi ọgbogu eze-ulo Chileke je epfuaru phẹ kẹ gę ya e-shi deru Jizọsu ye phẹ l'ẹka.
- ⁵Ehu tsoahaa phẹ. Ẹphe kwee ya okpoga.
- ⁶O kweta ẹgube ono bya awata ele ẹnya teke bụ teke gbaru gę ya e-deru Jizọsu ye ndu ono l'ẹka g'ọha ta ama.

Nri-ẹnyasi Ikpazụ

(Mat 26:17-30; Mak 14:12-26; Jìon 13:21-30; 1Kọr 11:23-25)

- ⁷Noo ya bụ; eswe, aatajẹ buredi, ekoduru ekoko ono rwua, bụ iya bụ mbọku, eegbuje nwaturu, e gude anyata eswe Ojaghata.
- ⁸Jizọsu bya ezia Pyita yẹe Jìonu sụ phẹ: “Unu je akwakọberu anyi nri-ẹnyasi k'ọbo Ojaghata g'anyi bya eria.”
- ⁹Ẹphe sụ iya: “? Bụ awe bẹ anyi e-je akwakọbe iya?”
- ¹⁰Ọ sụ phẹ: “Unu lenu; teke unu bahụerupho l'ime Jierúsalemụ bẹ nwoke, vu ite mini a-byapfuta unu; unu tsoru iya bahụ l'unuphu, ọ bahụkpọerupho.
- ¹¹Unu sụ onye nwe unuphu ono lẹ O-zì-iphe sụru g'o goshi unu ẹka ya a-nọdu ria nri ọbo Ojaghata iya yẹe ndu etsoje iya nụ.
- ¹²Oo-goshi unu ụlo-eli; goshi unu ọma ụlo, nọ lẹ k'eli iya; mkpuru ono hakpọepho ọsa; e dozichawa iya g'ọ dụ ree. Unu kwakọberu iya anyi l'ẹka ono.”
- ¹³Ẹphe tughua jerwua. Ọ bụerupho g'o pfuru bụ g'ọ dụ. Ẹphe nọdu l'ẹka ono kwakọbeahaa nri ọbo Ojaghata ono.
- ¹⁴Ọ gbaepho lẹ teke erije nri ono; Jizọsu yẹle ndu-ishi-ozì iya ẹphe n'iri l'ẹbo ono bya anọdu k'eri nri ono.
- ¹⁵Ọ sụ phẹ: “Ọogushikpokwaa mu ike gę mu l'unu riadaa nri Ojaghata-a; tẹmanu mu ejee iphe-ẹhuka-a.
- ¹⁶Kẹle-a; gę mu karụ unu; mu tee riẹkwa iya ọzo jasụ teke ee-ri ọkpobe iya l'ẹka Chileke bụ eze.”
- ¹⁷Ọ bya ewolita okoro, męe dụ; bya ekele Chileke ekele bya asụ phẹ: “Unu gęe ngudzuru!

¹⁸Kele iphe, mu epfuru unu bu l'e -shi ntanu-a be mu taa ngubaekwa mee, shi l'akpuru vayinu jasụ teke Chileke e-goshi le ya bu eze.”

¹⁹Q bya ewota buredi bya ekelekwapho Chileke ekele; bya eworu iya washiaru phe su: “Owa-a bu ogwehu mu, a nuru nu-doru unu. Unu meje iya g'anyi eme iya-a gude nyataje mu.”

²⁰Nokwapho g'ephe richaaru nri; o bya apere phe okoro mee bya asu phe: “Okoro-a bu ogbandzu ophuu ono, e gude mee mu gbaa; mbu mee mu ono, a gbashiru l'opfu ehu unu ono.

²¹“Ole-a; unu lekwa l'onye e-deru mu ye l'eka ndiphe be mu l'iya tukokwaru eri nri l'eka-a.

²²Kele Abubu-Ndiphe l'a-la g'o gbaru iya l'alala. Ole-a; nshoro onye ono, ee-shi l'eka iya deru Abubu-Ndiphe ye g'e gbua ono.”

²³Ephe wata ajikashi nwibe phe onye o bu le g'ephe ha su: “? Bu onye e-mekpo iphe, du nno?”

Ego onye ka nu

²⁴Ndu etsoje iya nu l'onwophe wata adzo onye kachaa shii le g'ephe ha.

²⁵Jizosu su phe: Ndu bu ndu eze le mgboko-a anoduje akpapyashi ndu no phe l'eka akpapyashi. A nodu ekuje ndu bu ndu gude ike-okpu buru ishi phe “omeluko.”

²⁶Obenu l'o to budu g'oo-du l'ehu unu bu ono. G'onye bu iya kachaa shii le g'unu ha dukwa g'o bu iya be enya kachaa alwalwa. G'onye-ishi dukwa ge nwozi.

²⁷? Bu onye ka shii l'onye no anoo eri nri l'onye ejeru iya ozi nri ono? ? Tobudu onye ophu no anoo eri nri ka shii? Obenu le mbedua bu ozi be mu ejeru unu.

²⁸“Oo unubedua bu ndu mu l'unu nokpoepho l'ohutama mu g'o ha;

²⁹k'opfu bu l'o buepho ge Nna mu meru mu eze bu ge mu eme unu eze;

³⁰ge mu l'unu eria ngua; l'eka mu bu eze; unu anodugbaa l'aba-eze; kpee okpa-ipfu Izurelu iri l'ebo ono ikpe.”

Pyita a-go le ya ta amadu Jizosu

(Mat 26:31-35; Mak 14:27-31; Jion 13:36-38)

³¹A nonyaa; Jizosu ku Pyita: “Sayimonu! Sayimonu! Lekwa! Nsetanu sukwaru g'a haa ya ge ya hukota unu ama g'unu ha; ge ya phuchaa unu g'onye aphushi eswa l'ereshi.

³²Ole mu pfuwaru opfu ehu ngu nu Chileke g'i ti buha ekwekwe, i kweru. Oo ya bu; teke i dakoberupho lwaphuta azu byapfuta mu; g'i mee g'unwunna ngu pfushia ike.”

³³Pyita su iya: “Nnajiuphu; mu doziakwaru onwomu k'etsoru ngu jee mkporo; tsoru ngu laa maa!”

³⁴Jizosu sụ iya: “Gẹ mu karu ngu Pyita; oke-oku nchi-abohu -bya ara ọrà bẹ i pfuakwaru mgbo ẹto l’i tị madu onye mu bu.”

Okpoga; ẹda; yele ogu-echi

³⁵Noo ya; Jizosu sụ phe: “Teke ono, mu zijeru unu sụ g’unu je; g’o tọ dukwa iphe, unu e-gude eje onoya; g’unu te egudekwa iphe, eeyeje okpoga; ophu unu egudekwa ẹda; ọzoo akpokpa; ? ọ duru iphe, duru unu ọko?” Ephe yeeru iya onu sụ: “O tọ dukwa.”

³⁶O sụ phe: “Obenu lẹ nta-a bu; g’onye nweru iphe, eeyeje okpoga wota iya. G’onye nweru ẹda; nyakwaru iya pho. G’onye ete nweddu mma; ree ukpo iya zuta iya.

³⁷Gẹ mu karu unu l’iphe-a, e deru l’ekwo-opfu Chileke-a bẹ a-vukwa g’e deru iya k’ehu mu; mbu iphe, e deru sụ: ‘A guru iya yeru ndu eme ẹjo-iphe.’ Mbu l’iphemiphe, e deru lẹ k’ehu mu bẹ a-vukotakwa g’e deru iya.”

³⁸Ephe sụ iya: “Nnajiuphu; lekwa mma labo, anyi gude.” O sụ phe: “O duwaa ree.”

Jizosu epfu anu Chileke l’ubvu Olivu

(Mat 26:36-46; Mak 14:32-42)

³⁹Jizosu lufuta bya atugbua jeshia l’ubvu Olivu, bu iphe, oomejehawaa. Ndu etsoje iya nu tsoru iya.

⁴⁰O rwua ẹka ono bya asu phe: “Unu pfukwaru nu Chileke g’o to kwe g’unu nmalahu l’ohutama.”

⁴¹O haa phe tugbua kpiriberu jerwua ẹka ha g’eka aa-turwu lẹ mkpuma; bya egbushi ikpere bya epfuru nu Chileke sụ:

⁴²“Nna; o -buru l’o du ngu l’uche; nafunu mu okoro iphe-ehuka owa-a; ole o kwa g’o tọ bukwa iphe, du mu l’uche l’e-me; g’o bukwaru iphe, du gubedua l’uche.”

⁴³Ojozi-imigwe shi l’imigwe chaa ya l’iphu bya awata eme g’obu shihu iya ike.

⁴⁴Obu wata iya etsu mini etsushikpoo ya ya ike. O kabakpoo epfu anu Chileke. Ephuru, shi iya l’ehu dūepho gẹ mee ada paapaa l’ali.

⁴⁵O pfuchaepho nu Chileke ono bya agbeshi bya ejepfu ndu etsoje iya nu. O jeshia; ephe nodu ekuwaa mgbenya aphu.

⁴⁶O sụ phe: “? Bu gunu meru iphe, unu eku mgbenya? Unu gbalihu pfuru nu Chileke g’o to kwe g’unu nmalahu l’ohutama.”

Eegude Jizosu

(Mat 26:47-56; Mak 14:43-50; Jion 18:3-11)

⁴⁷Jizosu kpukwaduru-a opfu l’onu; ikpoto oha zebata waa nwoke ono, epha iya bu Jiudasu ono, bu onye lanu l’umadzu iri l’ebo-a. O buru iya bu onye-ishi ikpoto oha ono. O bya akpiritaru Jizosu ntse bya etsutsua ya onu.

⁴⁸Jizosu sụ iya: “Jiudasu; ? bu etsutsu onu bẹ i gude ederu Abubu-Ndiphe eye g’e gbua?”

⁴⁹O be teke ndu nọ-kube iya nọ hụmaru iphe, abya ememe; ephe sụ: “Nnajiuphu! ? Anyi gbuwaro mma?”

⁵⁰Onye lanu gbua nwokoro onye-ishi ndu-ishi uke Chileke mma; tukoe ya pho nchi ekutara pafu.

⁵¹Jizosu sụ: “Te emekwa.” O pfuchaa nno bya edenyi nwokoro ono aka le nchi ono; nchi ono du iya g'o shi du iya.

⁵²Jizosu sụ ndu-ishi uke Chileke; waa ndu-ishi ogbogu eze-ulo Chileke; waa ndu bu ogerenya, byaru iya egude: “? Unu chigbaa mma; chiru mgboro abya mu egude? ? Mu bu onye ana nfu?”

⁵³“Mu l'unu anokpoo mboku-mboku l'eze-ulo Chileke; ophu unu azukpodaru mu aka. Ole nta-a be o gbaru unu l'ememe iya. Nta-a be Obutuswe no l'ochii buru eze.”

Pyita ago le ya ta amadu Jizosu

(Mat 26:57-58,69-75; Mak 14:53-54,66-72; Jion 18:12-18,25-27)

⁵⁴Ephe zu Jizosu; kpuru tugbua jeshia ibe onye-ishi ndu-ishi uke Chileke. Pyita gbe uzanya etso phe azu-azu.

⁵⁵Ephe phu-nwuepho oku l'echilabo unuphu bya anoshia no-pee oku ono mgburugburu anya. Pyita bya ano-kube phe.

⁵⁶A nonyaa; nwamgboko, eje ozi ulo; huma Pyita l'eka o no anya oku ono. O tabe iya enya bya asu: “Nwoke-a be yee Jizosu-a shifukwa ano.”

⁵⁷Pyita goo sụ iya: “Nwanyi-a; mu ta amakwa iya amama ophu.”

⁵⁸A kpoekwapho upfu nwanshii; onye ozo huma iya bya asu iya: “Gubedua yifukwaa le ndu etso iya nu.” Pyita sụ iya: “Nwoke ibe mu; mu ta ayikwa iya-o!”

⁵⁹A noepho iphe, ha g'awa ophu; onye ozo pfushiahaa ya ike sụ: “O kwa okpobe-opfu le nwoke-a be yee Jizosu shi ano; eshinu o bu onye Galili.”

⁶⁰Pyita sụ: “Nwoke ibe mu; mu ta amakwa iphe, iipfu!” O kpukwaduru-a opfu l'onu; oke-oku raa ora.

⁶¹Nnajiuphu bya aghaa enya lee Pyita. Pyita nyata opfu, Nnajiuphu pfuru iya teke o suru iya: “Oke-oku -bya l'ara ora ntanu-a be i gokwaru ego ugbo eto l'i ti madu onye mu bu.”

⁶²O kwofu etezi je atukpoo ekwa too!

Eetsu Jizosu iphe; aja iya ewenu

(Mat 26:67-68; Mak 14:65)

⁶³Ndu ono, swiru Jizosu ono jaahaa ya ewenu; bya echiahaa ya echachi.

⁶⁴Ephe kechia ya ekwa l'enya echi iya aka le nchi asuje iya: “Pfunaa mpfuchiru obu!”

⁶⁵Ephe pfushiwaro iphe ozo, du igwerigwe gude ako iya onu.

Jizosu l'iphu ogbo-ikpe ndu Jiu

(Mat 26:59-66; Mak 14:55-64; Jiṅ 18:19-24)

⁶⁶O be l'utsu; ndu bu ọgerenya Jiu bya anọkobe; me ndu-ishi uke Chileke; me ndu ezije ekemu. Epe kpuru iya jeshia l'iphu ọgbo-ikpe phe.

⁶⁷Epe su iya: “Kanuru anyi. ? Bu ngu bu Kereshi obu, Chileke kweru ukwe iya obu too?” O su phe: “Mu -karu unu be unu te ekwekwa.

⁶⁸Temete teke mu jiru unu aji-a; unu taa maduru eye iya onu; ophu unu a-hakwa mu pho.

⁶⁹Ole e -shi ntanu-a be Abubu-Ndiphe a-nodu l'ekutara Okalibe-Kakota-Ike, bu Chileke.”

⁷⁰Epe tuko su: “? Bu iya bu l'oo ngu bu Nwa Chileke obu?” O su phe: “Ooepho g'unu pfuru ono bu g'o du; l'oo mu bu iya.”

⁷¹Epe su: “? Bu bahuna ekebe gunu be anyi ele enya iya? Anyi numakwaru iya l'onu iya l'onwanyi.”

Luku 23

Payileti aji Jizosu aji

(Mat 27:1-2,11-14; Mak 15:1-5; Jiṅ 18:28-38)

¹Oo ya bu; ikpoto oha ono wulihu kputa Jizosu kpuleru Payileti.

²Epe rwuepho eka ono bya awata epfushi iphe, epe suru l'o meru su: “Anyi humaru nwoke-a eka ooduweshi ndu ndu-anyi. O jikaru su g'anyi ta apfujeshi akiriko nu Siza; teme o sukwapo l'oo ya bu onye eze ono, bu Kereshi.”

³No iya; Payileti jia Jizosu su iya: “? I bu Eze ndu Jiu?” Jizosu su iya: “Ooekwa ngu pho be o shi l'onu.”

⁴Payileti su ndu-ishi uke Chileke waa ikpoto oha ono: “O to dukwa ejo-iphe, mu humaru, nwoke-a meru.”

⁵Epe kabaa ya epfushi ike su: “O tukoru Jiudiya mgburugburu zigbabe iphe, egbuka mkpukpu egbuka. O wataru iya ezizi le Galili; zia ya byasu l'eka-a.”

Jizosu l'iphu Herodu

⁶Payileti numaeopho iphe, ndu Jiu pfuru bya ajia su: “? O bu onye Galili?”

⁷O maerupho le Jizosu be shi ibiya ophu Herodu bu ochi-oha; o su g'e gudekwa iya jepfu Herodu. Herodu no le Jierusalemu teke ono.

⁸Herodu humaepho Jizosu; ehu tsoo ya utso; kele o shihawaa uzanya guta iya ge ya huma iya; l'o nunukawaru nkiya; o nodu agu iya ge ya huma iphe, du biribiri, oo-haru mee.

⁹O buru iphe ono meru g'o gude; o jia ya aji no nwo; ole Jizosu ta adudu onu, o yeru iya.

¹⁰Ndu-ishi uke Chileke waa ndu ezije ekemu bya apfu-kube iya ehuka ehuka; pfushiahaa iphe, ephe suru l'o meru.

¹¹Herodu yele ndu ojogu iya phe tuko wata aja Jizosu ewenu; eme iya sukusuku. A nonyaa; Herodu bya ezia phe; ephe chita uwe, ama ntumatu, bu uwe oke amadu bya eworu yee Jizosu bya akpuphuru iya Payileti azu.

¹²Eshi mboku ono; Herodu yee Payileti bya aburu okpobe onya; kele ephe shi nodu lukukanyi teke iphe ono eteke emedu.

Eekpe Jizosu mpfugbu

(Mat 27:15-26; Mak 15:6-15; Jion 18:39—19:16)

¹³Payileti bya ekukobe ndu-ishi uke Chileke; me ndu gude oha; waa oha l'ophu bya asu phe:

¹⁴“Unu dutaru mu nwoke-a su l'oodusweshi ndu ndu-unu edusweshi. Mu jichaa ya aji l'iphu unu; ophu o dudu iphemiphe ono, unu suru l'o meru ono, duru ophu mu humaru l'ikpe iya nmaru iya.

¹⁵Nokwapho ge Herodu ahumaduru, meru g'o gude o su g'a kpu-phutaru iya anyi azu. Unu huma l'o to dudu iphe, nwoke-a metaru ke g'a pfu-gbua ya.

¹⁶Mu e-chi iya iphe paru iya haa.”

¹⁷Noo ya; o buwaa omelali phe l'anodu abo Obo Ojoghata ono be Payileti atufujeru phe ndu mkporo onye lanu g'o la.

¹⁸Igwe oha ono tua uzu su: “Gbuaru anyi nwoke-a; hachia Barabasu g'o la.”

¹⁹Nwoke ono, bu Barabasu bu nwoke, a turu mkporo ke mgbaghashi, o gbaghashiru mkpukpu waa kele o gburu ochi.

²⁰Payileti byakwa bya epfuru yeru phe ozo; kele oome ge ya haa Jizosu.

²¹Ephe tua uzu ozo su: “Pfu-gbua ya! Pfu-gbua ya!”

²²Payileti sukwa phe ozo k'ugbo eto: “? K'ishi gunu? ? Bu ejo-iphe gunu be o meru? O to dukwa ejo-iphe, mu humaru, o meru. Ikpe onwu ta anmakwaru iya. Iphe, e-me nu bu le mu e-chi iya iphe paru iya haa.”

²³Ephe nodu aturo woowoowo epfu su g'a kpopyabe iya l'oswebe. Ephe raa; rata.

²⁴Payileti bya ebua ikpe su ge nkephe mee.

²⁵Bya aparu nwoke-a, e shi tua mkporo ochi-a waa ke mgbaghashi-a paru haaru phe, bu iya bu onye ephe suru g'a haaru phe. O su g'a kpopyabe Jizosu l'oswebe, bu iphe du phe ree.

Aakpopyabe Jizosu l'eli oswebe

(Mat 27:32-44; Mak 15:21-32; Jion 19:17-27)

- ²⁶No iya; ẹphe kpuru Jizosu tugbushia. Ẹphe rwua l'uzo bya aworu onye Sayirini, shi ndu-egu phe alwa, ẹpha iya bu Sayimonu. Ẹphe bo iya oswebe, Jizosu vu su iya g'o vuru iya; tsoru iya l'azu.
- ²⁷Ikpoto igwe oha ono nodu awu etso phe l'azu mekpoo unwanyi, akwa ekwa; ayo oshi iya.
- ²⁸A nonyaa; Jizosu bya aghaa enya lee phe bya asu: "Unwuada Jierusalem; unu ta akwashị ekwa mu. Unu kwaa ekwa onwunu me k'unwu unu.
- ²⁹Kele mboku abya teke ẹphe a-su: 'Iphe ẹhu atsokwanu unwanyi, eteke atsū-swee ime; ophu nwa 'eke angu-swee phe era l'okpoma.'³⁰Noo teke o-du phe g'ubvu zee tūpyabe phe domia phe.
- ³¹Le-a; leanaro g'e meru oshi-oyii; akakakwanu oshi, okponku."
- ³²Noo ya; o dukwarupho umadzu labo, meru ejo-iphe, a kpu etso iya; eejkwapho apfu-gbukota ẹphe l'iya.
- ³³Ẹphe byarwutaepho l'eka eekuje "Okpokoroko Ishi" ; ẹphe woru iya kpopyabe l'oswebe l'eka ono; waa ndu ejo-iphe labo pho. Onye ophuu l'ekutara; onye ophuu l'ekicha.
- ³⁴Jizosu su: "Nna; guaru phe nvu; kele ẹphe ta amadu iphe, ẹphe eme." Ẹphe tua ido gude kee uwe iya.
- ³⁵Igwe oha ono pfugbaaru; ele iya enya. Ndu bu ndu-ishi oha gude iya agba mgbonu asuje: "Oodzotaje ndu ozo. G'o dzonaa onwiya; me o -buru iya bu Kereshi obu, shi l'eka Chileke, bu iya bu onye o hotaru."
- ³⁶Ndu ojogu nodu agbakwaru iya pho mgbonu. Ẹphe gbarwuta bya anu iya mee-veniga g'o ngua;
- ³⁷su iya: "O -buru ngu bu Eze ndu Jiu; dzonaa onwongu!"
- ³⁸O duru iphe, e deru pfube l'oswebe ono su: "Waa Eze ndu Jiu." E deru iya l'opfu Giriku; waa l'opfu Latinu; waa l'opfu Hiburu.
- ³⁹Onye lanu le ndu ono, a kpopyaberu ẹphe l'iya ono kokwaa ya pho onu su iya: "'? Tɔbudu ngu bu Kereshi obu? Dzonaa onwongu; dzoo anyibedua."
- ⁴⁰Onye ophuu gbochia ya onu su iya: "'? Tji tsudu Chileke ebvu; l'a nmaru ge nwoke-a ikpe lanu, bu iya bu ikpe onwu?"
- ⁴¹Ikpe k'anyibedua be du nhamunha; kele o bu urwu iphe, anyi meru be anyi erita; obenu le nwoke-a ta adudu iphe, du eji, o meru."
- ⁴²O su Jizosu: "Jiko nyatakwa mu; me i -buerupho eze."
- ⁴³Jizosu su iya: "Ge mu gbuaru ngu iya tororo; ntanu-a be mu le ngu a-nodu l'okpoku Chileke."

Anwuhu Jizosu

(Mat 27:45-56; Mak 15:33-41; Jiṅ 19:28-30)

⁴⁴Enyanwu keerupho l'ishi; nchi jihu l'alì ono. Ekameka gbahukota tsukiribaa jasu l'oke-eswe ụzenyashi;

⁴⁵kele enyanwu jikputeru; ekwa, egbobutaję enya ęka aagwaję Chileke, nọ l'ime eze-ulo Chileke ono gbaepho kę tararaa gbajahụ ębo.

⁴⁶Jizosu chia mkpu sụ: “Nna; mu yeru ngu Unme mu l'ęka.” O pfuchaa nno bya atubuhu unme; ọ buru iya anwuhu.

⁴⁷Onye-ishi ndu ojogu ndu Romu humaepho iphe, meru nụ; ọ jaahaa Chileke ajaja sụ: “Okpobe-opfu; nwoke-a pfubekwaru-ęka-oto!”

⁴⁸Iphe, bukotakpoo ikpoto ọha, kuru l'ęka ono, byaru ahuma iphe, ada nụ; humaepho iphe, eme nụ bya egberu ęka ye l'olu; ebu mkpu; eje ala.

⁴⁹Iphe, bukpuo ndu maru Jizosu ree; je akpaa l'unwanyi, shi lę Gálili tsoru iya; pfuru ụzenya ele iphemiphe ono, l'eme nụ ono.

Elii Jizosu

(Mat 27:57-61; Mak 15:42-47; Jiṅ 19:38-42)

⁵⁰O duru nwoke, ępha iya bu Jiósefu; onye shi Arimatiya; l'alì ndu Jiu. Nwoke ono yi l'ogbo-ikpe; bya aburu onye ọma; buru onye pfuberekoto;

⁵¹onye adudu teke o kwejeru l'idzù ono, ndu-ikpe chiru ono; yęe iphe ono, ęphe meru ono du ree. Yębedua elekpoo enya teke Chileke e-goshi lę ya bu eze.

⁵²Nwoke ono bya ejepfu Payileti je arwoo ya g'a haaru iya odzu Jizosu gę ya lia.

⁵³E mechaa; ọ bya eje apazeta odzu ono; gude ekwa ọchaa kwaa ya; bya eje elia ya l'ilu, a turu l'ogba mkpuma; ilu, eteke adu-swe onye e lijewaru l'ime iya.

⁵⁴Mboku ono bu eswe, echele iya a-buru eswe-atuta-unme; mbu mboku Sabatu; teme Sabatu obu nodu agbawaa.

⁵⁵Unwanyi ono, ęphe lę Jizosu shi lę Gálili swiru ono tsokwarupho Jiósefu je. ęphe lee ilu ono enya ọhubama; bya ahumakwapho g'e nyeberu odzu iya l'ime ilu obu.

⁵⁶ęphe lwa bya akwakobe manụ, eshi-mkpọ; waa manụ ọzogbaa k'ete odzu ono. ęphe tuta unme l'eswe Sabatu, bu iya bu iphe, ekemu phe suru g'e meje.

Luku 24

Eshi l'onwu teta dzuru ndu

(Mat 28:1-10; Mak 16:1-8; Jiṅ 20:1-10)

¹O be lę nchi-abohu mboku mbu l'idzu, bu iya bu Sonde; unwanyi ono gude manụ, eshi mkpọ ono, ęphe kwakoberu g'ọo-du ono gude jeshia l'ilu Jizosu.

²Noo ya; ęphe jeshia; e swifuwaa mkpuma, e shi gude swichia onu ilu-a.

³ęphe bahu l'ime iya; ọphu ęphe ahumaeduru odzu Nnajiuphu, bu Jizosu.

⁴Ɛphe pfuru l'eka ono ari iphe ono; o tufu phe ehu. A bya l'amaru; unwoke labo, yeru uwe, egbu nwjinwii pfu-kubewaa phe.

⁵Ndzu guhu phe; epe woru iphu kpube l'ali. Unwoke ono su phe: “? Bu gunu meru g'o gude unu nodu achu onye no ndzu l'eka ndu maa no?”

⁶“O to noekwa l'eka-a. O tetaakwaru dzuru ndzu ozo. Unu nyatakwa iphe, o pfuru unu teke o no le Galili.

⁷O suru le Abubu-Ndiphe be ee-seru ye l'eka ndu eme iphe-eji. Epe eworu iya pfu-gbua. O -be le mboku k'eto iya l'o teta dzuru ndzu ozo.”

⁸Enya gbarwua phe l'opfu iya ono.

⁹Ɛphe shi l'ilu ono lwa bya eje akoru iya umadzu iri le nanu pho; waa ndu ophu g'ephe ha.

¹⁰Unwanyi ono bu Meri ke Magudala; waa Jiowana; waa Meri, bu ne Jiemusu; waa unwanyi ozo, epe l'ephe swi. O buru phe koru ndu-ishi-ozu iphe ono.

¹¹Iphe ono du phe g'o bu opfu, 'enweddu ishi; ophu epe ekweddu l'o bu eviya.

¹²Pyita kwolihu bya agbaru jeshia l'ilu ono. O rwua bya ephureta bya enyoo ime ilu ono. O buerupho eka odzu ono be o humaru kpurumu. O dakobe; lashia unuphu. O ji iya enya; mbu iphe ono, meru nu ono.

Uja, abo eje l'uzo Emeyosu

(Mak 16:12-13)

¹³Mboku ono kwapho gedegede be umadzu ebo le ndu etsoje iya nu swi eje mkpuku, eekuje Emeyosu. E -shi le Jierusalemu jasu l'eka ono bu manyiru esaa.

¹⁴Ɛphe nodu epfukpopho k'iphemiphe ono, mekotaru nu ono.

¹⁵Ɛphe gudekwadu uja ono abo bya arikwa iya pho l'obu; Jizosu l'onwiya byapfuta phe; epe l'iya swiru.

¹⁶E kwechia phe enya; ophu epe ahubeduru iya ama.

¹⁷O su phe: “? Bu egube uja gunu be unu abokpoo tsoru uzo egube ono?” Ɛphe pfuru; kele aphu jiru phe obu.

¹⁸Onye lanu l'umadzu ebo ono, epha iya bu Kuliopasu su iya: “? Bue ngu pho bu onye byaru abyabya le Jierusalemu, 'amadu iphe ono, megbaberu l'eka ono l'idzu-a?”

¹⁹O su phe: “? Iphe, du idu-agma?” Ɛphe su iya: “Mbu ke Jizosu; onye Nazaretu, bu onye mpfuchiru Chileke; onye shi l'iphe, o mekpooru ememe me opfu, o pfuru l'onu goshi l'iphu Chileke me l'iphu oha g'ike iya habe shii.

²⁰Ndu-ishi uke Chileke me ndu-ishi anyi phe seru iya nu; a nmaa ya ikpe onwu bya eworu iya kpopyabe l'oswebe.

²¹Mbu onye-a, epe shi ele enya iya l'oo ya a-gbata Izurelu-a. A -gufukpokwaaro iphemiphe ono; ntau-a kweakwaa ujiku eto, iphe ono meru.

- ²²Ophu, ka nū buru l'unwanyi, gba l'ogbo anyi haru bya epfukpooro 'ama-g'ee-me-ia. Unwanyi ono nmaru ewa jee l'ilu ono.
- ²³Ephe jerwua; ophu ephe ahumaeduru odzu iya. Ephe lwa bya asu l'ephe phuchaaru phua ophulena; huma unwu-ojozi-imigwe, suru phe le Jizosu dzuakwaa ndzu.
- ²⁴Ndu anyi l'ephe ano haru je l'ilu l'eka ono. Ephe jerwua; o buerupho g'unwanyi ono pfuru bu g'o du; ophu ephe ahumaeduru iya eviya."
- ²⁵Jizosu su phe: "Oo eswe be o bu unu; unube ndu ono, akpu onwunu akpukpu ekweta iphe, ndu mpfuchiru Chileke pfuru ono."
- ²⁶? To gbaduru Kereshi obu g'o jefutaadaa iphe-ehuka ono; teme l'o bahu l'eka e-goshi ubvu, Chileke kwaberu iya?
- ²⁷Jizosu bya eshikpopho l'iphe, bukota ekwo Mosisu me ekwo ndu mpfuchiru Chileke; towashiaru phe iphe, e deru l'ekwo-opfu Chileke k'ehu iya ono nanu nanu.
- ²⁸Mkpukpu, ephe eje zajee phe pho ntse; o meahaa umere g'o ghata aghata tugbubaa.
- ²⁹Ephe sede iya su iya: "Byanu g'anyi je akwaa; le nchi ejihuwaa; teme mboku bvuwaa." O tsoru phe bahu g'ephe je akwaa.
- ³⁰Noo ya; ephe rijeepho nri; o bya ewota buredi ono bya ekele Chileke ekele; bya awaa ya; bya eworu nu phe.
- ³¹Enya sahu phe. Ephe gbete teke ono hube iya ama. O phuhu; ophu ephe ahumaeduru iya.
- ³²Ephe wata epfuru nwibe phe su: "? O kwa l'i maru l'o shi elwu anyi l'obu teke ono, o shi abo uja eyeru anyi l'uzo ono; aturu anyi iphe, e deru l'ekwo-opfu Chileke poopoo."
- ³³Ephe kwolihuekwapho teke ono teke ono; gbaphu azu le Jierusalemu. Ephe jeshia; umadzu iri le nanu ono nokobewaa l'eka lanu; waa ndu ephe l'ephe no.
- ³⁴A su phe le Nnajiuphu tetaakwaru eviya; le Sayimonu humakwaru iya.
- ³⁵Ephebedua bya akoo iphe, meru l'uzo; koo g'ephe gude hube iya ama teke o waru buredi.

Jizosu egoshi ndu etsoje iya nu onwiya
(Mat 28:16-20; Mak 16:14-18; Jion 20:19-23; Ndu 1:6-8)

- ³⁶Ephe gudekwadua epfu nno; Jizosu pfuwaru l'echilabo phe bya asu phe: "G'ehu dukwa unu gu."
- ³⁷Ephe lwu-bilihu; meji tofu phe. Ephe dobesu l'oo maa.
- ³⁸O su phe: "? Bu gunu be ndzu iya agu unu? ? Bu gunu meru iphe, unu abo obu ebo?"
- ³⁹"Unu huma eka mu me okpa mu. Unu huma l'o bu-a mbedua gedegede. Unu woru mu l'eka huma; kele maa te enwedu anu-ehu waa okpu g'unu ele le mu nweru-a."

⁴⁰O pfuchaa nno bya egoshi phe ẹka iya; waa ọkpa iya.

⁴¹Ẹhu-utso; waa biribiri, ọ dụ phe mee ọphu ẹphe eke akwatadu kweta ọkpobe ekweta. Ọ sūwaa phe: “? Ọ dūru iphe, eeri eriri, unu nweru l'ẹka-a gẹ mu ria?”

⁴²Ẹphe bya anụ iya owuriwo ẹma waa ẹbakala manụ-ẹnwu.

⁴³Ọ nata iya nọdu phe l'iphu l'ẹka ono taa ya.

⁴⁴Ọ sū phe: “Iphe-a bukotakpoephe iphe, mu pfuru unu teke mu l'unu nọ; sū unu l'iphemiphe, e deru dekuta mu l'ẹkwo ekemu Mosisu me ke ndu mpfuchiru Chileke; waa l'ẹkwo-ebvu be vukotaje g'e deru iya.”

⁴⁵Ọ bya anwūsa phe egomunggo g'iphe, e deru l'ẹkwo-opfu Chileke edoo phe ẹnya.

⁴⁶Ọ sū phe: “E deru sū le Kéreshi jefutaje iphe-ẹhuka nwuhu; o -be le mboku k'eto l'o teta dzuru ndzu.

⁴⁷Bya asū l'ee-gude ẹpha iya raa le Chileke a-guru nemadzu nvu l'iphe-ẹji; me izimanu -lwa onye obu azu. Ee-shi le Jierusalemu gude ẹpha iya ono radzuru l'ohamoha le mgboko mgburugburu.

⁴⁸Ọ buru unu e-pfuru ndu ozo k'iphe-a, unu humaru-a.

⁴⁹Unu huma le mu e-zilataru unu iphe ono, Nna mu kweru unu ukwe iya ono. Unu nodukwa le Jierusalemu l'ẹka-a jasū teke Chileke e-gude ike, shi l'imigwe nua unu anunū; unu anata ike, shi l'imigwe bya.”

Jizosu alafu Chileke l'imigwe

(Mak 16:19-20; Ndu 1:9-11)

⁵⁰Noo ya; Jizosu bya eduru phe jasū le Betani; bya apalia ẹka iya eli gọhaaru phe onu-oma.

⁵¹O gude phe agoru onu-oma ono bya ahaa phe. Chileke kulia ya kuba l'imigwe.

⁵²Ẹphe baaru iya ẹja bya alaphushia azu le Jierusalemu. Ẹhu nọdu atsọ phe ntumatu.

⁵³Ẹphe je anọhaa mkpulumkpuru l'eze-ulo Chileke; ekele Chileke ekele.

Jionu

Jionu 1

Opfu Ndzu

- ¹E -shi le mbulembu be Opfu Chileke ono nohawaa. Opfu ono be ye Chileke nohawaa. Opfu ono buru Chileke.
- ²Onye ono be ye Chileke shiepho le mbu nodu.
- ³Oo l'eka iya be Chileke shi mee iphemiphe. O to dudu iphe, bu iphe, e meru ememe, duru ophu e meru l'ebe o no iya.
- ⁴Oo ya be ndzu shi l'eka; o buru ndzu ono be bu iphoro, duru ndiphe.
- ⁵Iphoro ono du l'ochii; ophu ochii ono adujeduru ike so-kputa iya.
- ⁶O nweru onye lanu, Chileke yeru g'o bya. Epha iya bu Jionu.
- ⁷Iphe, o byaru bu ge ya pfua k'iphoro ono. O byaru g'o saaru iya oha l'ophu; k'ophu ephe a-numa ozi ono kweta.
- ⁸O to bukwa yebdua bu iphoro obu. Iphe, o byaru bukwa g'o karu ndiphe g'iphoro ono du.
- ⁹Oo iphoro ono be bu okpobe iphoro; ophu bu iya byaru le mgboko-a bya aduru ndiphe l'ophu.
- ¹⁰Oo ya bu le Opfu Chileke ono shi nodu le mgboko-a. O buru l'eka iya be Chileke shi mee mgboko; obenu le ndiphe ta amadu onye o bu.
- ¹¹O byapfutaru ndu nkiya; ndu nkiya jika iya anata.
- ¹²Ole iphe, bukpuo ndu nataru iya nu; mbu ndu kweru nkiya; ndu ono be o suwaru g'ephe buru unwu Chileke.
- ¹³Abubu ono, ephe bu unwu Chileke ono ta abukwa g'aanwuje nemadzu bu g'a nwuru phe; ebe o bukwa egu nwa meru a nwua phe; ophu o bukwa ge nemadzu ritaru iya l'okpoma; onye nwuru phe nu buakwaa Chileke.
- ¹⁴Tobudu iya bu; Opfu ono bya aburu nemadzu; anyi l'iya buru. Anyi gude enya anyi huma odu-biribiri iya; mbu odu-biribiri, gbaru iya nu; eshinu o bu iya bu Nwa nwoke lanu, Nna iya, bu Chileke nwutaru. Iphe, ndzu iya bu buerupho eze-iphe-oma yee irelanu.
- ¹⁵Jionu bya epfuahaa ke Nwa Chileke ono; ara iya arara su: "Wakwa onye obu, mu shi epfuru unu opfu iya teke mu suru unu l'o duru onye l'e-mechaa bya nu-a, ka mu l'ishi ka mu l'okpa; kele a byaru anwu mu o noduhawanu."
- ¹⁶Eze-iphe-oma iya ono nyiberu anyibe. O buru l'eze-iphe-oma iya ono b'ooshije emeru anyi eze-iphe-oma; mbu o -mechaa; oomekwasebaa ya ozo; emewaa iya ro k'anyinyi.

17Oo l'eka Mosisu be Chileke shi tɔ̄aru anyi ekemu. Eze-iphe-oma ye ire-lanu shikwanu l'eka ke Jizosu Kereshi bya.

18O to dukwa onye gudejewaa enya huma Chileke. Oo Nwa lanu ono, ye Chileke, bu Nna tugbaru buru nanu okpobe aburu ono be bu onye meru; anyi maru ge Chileke du.

Ozi, Jionu onye emeje baputizimu eezi l'echiegu

(Mat 3:1-12; Mak 1:1-8; Luk 3:1-18)

19Tobudu iya bu; ndu Jiu shi Jierusalemu zia ndu-uke Chileke me ndu bu eri Liviayi g'ephe je ajia Jionu su iya: “? Bu onye be i bu?”

20Ebe Jionu ajikakwaru eyeru phe onu. O kaekwaru phe pho l'edzudzu-oha su phe: “O to bukwa mbedua bu Kereshi obu.”

21Epe jia ya; “? O buhunuru onye be i bu? ? Bu ngu bu Elayijia?” Jionu su phe waawaa; le ya ta abukwa Elayijia. Epe jia ya: “? Bu ngu bu onye mpfuchiru Chileke, anyi ele enya iya obu?” O su phe: “Waawaa.”

22Epe su iya: “? O bukphonaaru onye be i bu? Yenuaru anyi onu g'anyi maru iphe, anyi e-je epfuaru ndu ziru anyi ozi. ? Denukphunaa g'i pfuru opfu ehuru ngu?”

23Jionu su phe: Oo mbedua bu onye ono, Azaya deru nkiya l'ekwo su: O duru olu onye aha gengugengu l'echiegu su: Unu mee uzo, Nnajiuphu g'o pfuru nhamunha!

24No iya; ndu ono, byaru ozi ono bu ndu Farisii be ziru phe nu.

25Epe jia Jionu su iya: “I -budu Kereshi; ebe i budu Elayijia; ophu i bukwaphe onye mpfuchiru Chileke; ? o nwuhunuru inwu-agma be iimeje baputizimu?”

26Jionu su phe: “Unu eleanaa l'oo mini be mu gude eme baputizimu. Obenu l'o duru onye unu l'iya tukoru nodu, unu ta amadu.”

27Onye ono, l'e-mechaa bya nu ono kakwa mu shii; k'ophu mu ta asudu ge mu e-phureta tofu iya eri akpokpa iya.”

28No iya; eka iphemiphe ono mekotaru bu le Betani; l'azu enyimu Jiodanu azu iya ophuu; l'eka Jionu shi anoduje eme ndiphe baputizimu.

Jizosu bu Nwaturu Chileke

29O rwua le nchitabohu iya; Jionu huma ge Jizosu eje abyapfuta iya. O su: “Unu huma onye obu, bu Nwaturu Chileke obu. Oo ya e-gwefu iphe-eji ndiphe l'ophu!”

30Su-a; o kwa onye ono be mu pfuru opfu ehuru iya ono su l'o duru onye l'e-mechaa bya nu. L'onye obu ka mu l'ishi ka mu l'okpa. L'a byaru anwu mu; o noduhawaro-a.

31Mbedua te eshikwa maru onye o bu; obenu l'oo ge ndu Izurelu amaru iya meru g'o gude mu bya anodu; gude mini eme baputizimu.”

32Jionu pfukwaapho iphe, o gude enya iya huma su: “Mu humaru Unme Chileke g'o shi l'imigwe du ge ndo bya anodu iya l'ehuru.”

³³Mbèdua te eshikpòkwanu maru iya; òle onye ono, ziru mu gè mu bya egude mini mee baputizimu ono sùru mu: ‘Òo onye ono, ìi-hùma gè Unme Chileke shi l’imigwe bya nòdu iya l’èhu ono bù iya bù onye òbu, e-gude Unme-dù-Nsò eme baputizimu òbu.’

³⁴Sù-a; nta-a bè mu gudewaa ẹnya mu hùma iya bya apfùwaru epfu l’òo onye ono bù Nwa Chileke òbu.”

Ndu mbù, l’etso Jizòsu

³⁵O rwukwaa lè nchitabòhu iya; Jìonu pfùkwaru l’èka ono yèle ùmadzu labò, shi lè ndu etsoje iya nù.

³⁶No iya; ò hùmaepho Jizòsu g’òoghata ò sù: “Unu hùmakwa Nwatùru Chileke òbu.”

³⁷No iya; ndu labò ono, etsoje iya nù ono nùmaepho iphe ono, o pfuru ono; ephe tsoru Jizòsu.

³⁸Jizòsu bya aghaa ẹnya hùma phè g’èphe etso iya bya ajìia phè sù phè: “? Bù gùnu bè unu achò?” Ephe sù iya: “Rabayi! ? Bù awe bè ìikwaje?” Rabayi bù O-zì-iphe.

³⁹Ò sù phè: “Unu byanù bya ahùma iya.” Noo ya; ephe tsoru iya je ahùma èka òokwaje. Ephe l’iya nò-jìwarò nchi mbòchi ono. Teke ono, ephe byaru ono bù l’oke eswe ùzenyashi.

⁴⁰Onye lanù l’ùmadzu labò ono, nùmaru opfu Jìonu; tsoru Jizòsu ono; bù Anduru, nwune Sayìmonu Pyìta.

⁴¹Anduru vuru ùzo lòbaru je achò-vu nwune iya Sayìmonu sù iya: “Anyi hùmaakwaru Mezaya òbu, bù iya bù Kéreshi òbu.”

⁴²O duta Sayìmonu byapfuta Jizòsu. Jizòsu hùmae ya phò bya asù iya: “Òo ngu bù Sayìmonu, bù nwa Jìonu. Iphe, aa-nòduje eku ngu nta-a bù Sifasu, bù iya bù Mkpuma.”

Jizòsu eku Filipu yèle Natanelu

⁴³O rwua nchitabòhu iya; Jizòsu chìta k’èje Gálili. No iya; ò hùma Filipu; bya asù iya “Tsoru mu.”

⁴⁴Filipu ono bù onye Bètusayida. Ò bùkwarupho mkpùkpu ono bè a nwùru Anduru yèle Pyìta.

⁴⁵No iya; Filipu kwe iya hm; bya eje elee ẹnya Natanelu. Ò hùma iya bya asù iya: “Anyi hùmaakwaru onye òbu, Mòsisu deru nkiya l’èkwo ekemu; tème ndu mpfuchiru Chileke dekwaa ya phò-a. Onye ò bù Jizòsu kè Nazaretu, nwa Jiósefu.”

⁴⁶Natanelu sù iya: “? Ò òkpòru-a iphe, dù ree, e-shi lè Nazaretu?” Filipu sù iya: “Byanù bya egude ẹnya ngu hùma.”

⁴⁷Jizòsu hùmaepho gè Natanelu eje abyapfuta iya; ò sù: “Onye òwa-a bù òkpobe onye Ízurelu, adùdu iphe, aata iya ùta iya.”

⁴⁸Natanelu jia ya: “? Nenu g'i meru maru mu?” Jizosu su iya: “Mu humahawaru ngu ro teke i no l'upfu oshi figu pho teme Filipu bya ekua ngu.”

⁴⁹Natanelu su iya: “Onyibe! Oo ngu bu Nwa Chileke obu. Oo gubedua bu Eze ndu Izurelu obu.”

⁵⁰Jizosu su iya: “? Bu-a l'ole mu suru ngu le mu humaru ngu l'upfu oshi figu pho meru g'o gude i kweta? Ii-mechakwaro humabaa iphe, kabaa owa-a shii!

⁵¹Ge mu gbukwaru ngu iya tororo; unu e-mechakwaa huma g'imigwe gheru onu; unwu-ojozi Chileke nodu enyiba iya enyiba; enyizetakwa iya pho enyizeta awupfu Abubu-Ndiphe.”

Jionu 2

Eke nwanyi le Kena

¹O be le mboku k'eto; o duru aka eeke nwanyi le Kena. Kena be du le Galili. Ne Jizosu nodukwapho l'aka ono.

²No iya; Jizosu ye le ndu etsoje iya nu jee aka eeke nwanyi ono; kele e yekwanuru phe le nri.

³A ngu-gbuchaepho mee, a gataru; ne Jizosu jepfu iya je asu iya: “Ndu-a te enwekwa mee.”

⁴Jizosu su iya: “Ha! Nwanyi-a! ? Bu gunu be mu le ngu jigba? Teke mu e-me egube iphe ono, enya du ngu ono teke erwukwa.”

⁵Ne iya su ndu nkwako nri: “Iphe, o sukpowaru g'unu mee; unu mekwaa ya!”

⁶O duru aragbada ite-era ishii, e gude urwa kpua, sukaaru l'aka ono, ndu Jiu egudeje eme nsu nri. Iphe, alaje l'ite-era ono nanu bu galonu ukporo; ophu aburu galonu ukporo l'iri.

⁷Jizosu su ndu nkwako nri ono: “Unu kujishia ite-era ono mini g'o ha.” Ephe kujishia ya; o toko jichaa pyimu pyimu.

⁸O su phe: “O du ree; unu gbatawa iya ro je anu onye bu iya bu ishi, iphe, eeme l'aka-a.” Ephe mee g'o pfuru.

⁹Onye bu ishi iphe, eeme l'aka ono bya etsua ya onu; mini ono ghowaa mee. O tufu iya ehua aka mee k'ono shihunu. O buerupho ndu nkwako nri ono, kuru mini ono maru aka o shi. O buru iya bu; o kua nwoke, byaru alu nwanyi-a

¹⁰su iya: “Ibe ngu evujeru uzo pashia mee, du ree l'a nguadaa. Teke mee dupeho ndu byaru nu l'enya; teme l'a pashiahaa mee ophu du eji. Owa be i gbe sumia mee, du ree byasu nta-a.”

¹¹Iphe-ohumalenya mbu ono, Jizosu meru ono be o meru le Kena, no le Galili; mee ya gude goshi odu-biribiri iya. Ndu etsoje iya nu kweta nkiya.

¹²E meebekpoephe iphe ono; Jizosu waa ne iya; me unwune iya ke nwoke; me ndu etsoje iya nu tugbua jeshia Kapaniyomu. Epehe je anoo nwujiku olemole l'eka ono.

Jizosu achifu ndu azu aswa l'eze-ulo Chileke

(Mat 21:12-13; Mak 11:15-17; Luk 19:45-46)

¹³Obo Ojehata ndu Jiu nodu erwuwaa; Jizosu tugbua jeshia Jierusalemu.

¹⁴O rwua bya eje abahu l'eze-ulo Chileke. O huma ndu nogbaa l'eka ono ere eswi; me aturu; me ndo; me ndu agbanwe okpoga, no l'eka onokwapho agbanweshi okpoga l'eli teburu phe.

¹⁵O bya achita udo; mee echachi gude chikashigbua phe g'ephe ha l'ime eze-ulo Chileke ono; chikashichaa me aturu me eswi ono. O bya aghakashia okpoga ono, ndu ono agbanweshi ono; toko teburu phe ghashia igharaphu.

¹⁶O bya abaru ndu ophu ere ndo mba su phe: "Unu toko iphe ono chishia l'eka-a. O to budu ulo Nna mu be unu e-me g'o buru ulo aswa."

¹⁷Ndu etsoje iya nu bya nu bya anyata iphe, e deru l'ekwo-opfu Chileke, suru: "Obu, mu yeru ulo ngu enwu phuruphuru g'oku; o buru n-yemobu ono a-ta ishi mu."

¹⁸Tobudu iya bu; ndu Jiu su iya: "? Denu iphe, ii-meru goshi anyi g'anyi gude maru l'iphe-a, i meru-a be i meru l'orwuberu iya?"

¹⁹Jizosu su phe: "Unu tsukposhia eze-ulo Chileke-a; oo ujiku eto kpekpu be mu e-gude kpukwaa ya g'o du g'o shi du."

²⁰Ndu Jiu ono jia ya su iya: "? I suru l'oo ulo-a, a kpuru ukporo apha labo l'apha ishii-a be ii-gude ujiku eto kpu-phu azu?"

²¹Ebe a madu l'oo onwiya gedegede be bu eze-ulo Chileke, oopfu opfu iya obu.

²²Noo g'o shitaru o nwuhuchaa; Chileke mee o shi l'onwu teta dzuru ndzu; ndu etsoje iya nu nyata l'o pfujewaru iphe ono. O buru iya bu l'ephe ekweta iphe, e deru l'ekwo-opfu Chileke; kwetawapho iphe, Jizosu pfuru.

Jizosu maru onyemonye

²³Teke ono, Jizosu nokwadu le Jierusalemu g'aabokwadu obo Ojehata ono be a dukpoo igwerigwe kweta nkiya. Kele epehe huma-butaru iphe-ohumalenya, o meshiru.

²⁴Obenu le Jizosu te egudedu ire phe eka; kele o makotawaru g'onnyemonye gbaru.

²⁵O to budu ke hm g'a bya akoharu iya ge nemadzu tukoru gbaa; eshi ophu yebdua l'onwiya makotawaru iphe, du nemadzu l'okpoma.

Jionu 3

Nikodimosu yele Jizosu

¹O nweru nwoke lanu, epha iya bu Nikodimosu. Nikodimosu be yi l'ogbo ke Farisii bya abukwarupho onye-ishi ndu Jiu.

- ²O rwua ɛnyashi ujiku lanu; o byapfuta Jizosu bya asu iya: “O-zì-ìphe! Anyi makwaru-a l'ì bu onye ezije mmamiphe; l'oo Chileke yeru ngu g'ì bya. O to dùdu onye a-dù ike eme eze iphe-a, imegbabe-a, abudu l'oo Chileke pfuru onye obu l'azu.”
- ³Jizosu su iya: “Ge mu gbukwaaru ngu iya tororo; onye aanwu-phuduru azu be ta abyakwa ahuma aka Chileke bu eze.”
- ⁴Nikodimosu su iya: “? Denu g'ee-shi nwu-phu nemadzu azu ozo me onye ono buchaaru ogerenya? ? Oo-laphu ne iya azu l'epho je anodu g'a nwua ya k'ugbo ebo to?”
- ⁵Jizosu su iya: “Ge mu gbukwaru ngu iya tororo; o to dukwa onye abahu l'eka Chileke bu eze; gbahaa l'e gude mini; waa Unme-du-Nso nwu-phu iya azu.
- ⁶Onye nemadzu nwuru; me iphe, shi l'eka nemadzu tukokwaru buru ke nemadzu. Onye Unme-du-Nso nwuru; me iphe, shi l'eka Unme-du-Nso toko bukwanuru ke Unme-du-Nso.
- ⁷G'o to dukwa ngu biribiri le mu suru l'anwu-phufutaje unu azu ozo.
- ⁸Oobujeru; pherephere -nodu ezi ala ibiya ophu du iya ree l'i nu ephu iya; obenu l'i ti makwanu aka o shi; ophu i makwapho aka oozu ala. Nokwapho g'o du iphe, bukpo onye Unme-du-Nso nwuru bu ono.”
- ⁹Nikodimosu su iya: “? Denukpoo g'egube iphe ono e-me nwua?”
- ¹⁰Jizosu su iya: “? I bu onye ezi iphe le Izurelu; ebe iphe, du nno edoduru ngu enya?”
- ¹¹Su-a; ge mu gbukwaaru ngu iya tororo; o kwa iphe, anyi tutaru nvo be anyi epfuje; o buru iphe, anyi humaru l'enya be anyi atuje onu iya; obenu l'unu te ekwedu kweta iphe, anyi epfu.
- ¹²Mu -pfuaru unu iphe ke mgboko-a; unu tee kwetadu. ? Denu g'unu e-shi kweta me mu -pfuaru unu g'iphe k'imigwe du?
- ¹³O to dukwa onye bahujewaru l'imigwe; a -gufu onye ono, shi l'imigwe bya, bu Abubu-Ndiphe.
- ¹⁴“Su-a; o kwa ge Mosisu gude mgboro wolia agwo ono, e gude ope mee ono l'echiegu pho bu g'e wolifutaje Abubu-Ndiphe
- ¹⁵g'oo-bukwanuru onye kwetaru nu; onye ono enweru ndzu ojejeje.
- ¹⁶Le Chileke yekwaru ndiphe obu; yetabe iya k'ophu o nuru Nwa lanu, o nweru kpoloko: g'oburu onye kwetaru nkiya; onye ono taa ladu l'iswi; o nwechiaru ndzu ojejeje.
- ¹⁷Iphe, Chileke yedoru Nwa iya g'o bya le mgboko-a ta abukwa g'o bya anmaa ndiphe ikpe. O kwa g'ee-shi iya l'eka dzoo ndiphe.
- ¹⁸“Onye kwetaru nkiya be a taa nmakwa ikpe. O bekwanu l'onye ekwedu nu be a nmahaakwaruro ikpe; kele onye ono te ekwedu k'onye ono, bu Chileke Nwa lanu ono.

¹⁹Gẹ Chileke e-bukafu ikpe ono bụ; l'ìphóró ono byaru lẹ mgboko-a; ndiphe gbẹ haa ìphóró ono hatachia ọchii; opfu l'ìphe, ẹphe eme bụgbaa ẹjo-iphe.

²⁰Ishi iya bụ l'onye bụ onye eme ẹjo-iphe akpoje ìphóró ashị; onye ono te eshitajèdu ẹka ìphóró dū; a -nonyaa ẹjo-iphe, oomegbabẹ gbafuta iphe.

²¹Obenu l'onye eme ire-lanụ l'afutaje bya anodu l'ẹka ìphóró dū g'aa-huma-dzuru iya; maru l'ìphe oome bẹ ẹka Chileke dūpho.”

Jizosu yẹle Jiṅu onye emeje baputizimu

²²E mechaa; Jizosu yẹle ndu etsoje iya nū tūgbua jeshia alì Jiudiya. Ẹphe kpoo nwupfu l'ẹka ono; ọ nōdu emeshi nemadzu baputizimu.

²³Jiṅu l'onwiya nōdukwapfo lẹ Inṅu eme baputizimu nkiya. Inṅu bụ mkpukpu, nō-kube Selimu. O nōdu l'ẹka ono eme baputizimu; kele mini dū shii l'ẹka ono. Ndiphe nōdu awu awu-pfuta iya l'ẹka ono; ọ nōdu emeshi phe baputizimu.

²⁴Teke ono bụkwanuru teke e teke atudu Jiṅu mkporo.

²⁵A nonyanaa; ndu etso Jiṅu ẹphe l'onye Jiu tūpfuru ẹgo g'eemeje ke nsọ asafu onwonye nturuwu.

²⁶Noo ya; ẹphe tūru iya jepfu Jiṅu je asu iya: “? I nyatakwadurua nwoke ono, unu l'iya shi nōdu l'azu Jiṅdanu azu iya ọphuu-a? ? Tì madu nwoke ono, i pfuru anyi opfu ẹhu iya-a? O meakwa baputizimu l'ẹka-a nta-a. Mbụ; a nōdu awuakwa gidigidi ejepfu iya.”

²⁷Jiṅu sū phe: “O tọ dukwa onye dūru iphe, ọ byaru anata me ọ -būdu iphe, Chileke nuru iya.

²⁸Unubedua l'onwunu kabekwa buru ndu ẹto, nūmaru teke mu pfuru sū l'ọ tọ bụkwa mbedua bụ Kéreshi obu; l'ọ kwa ẹzizi bẹ e ziru mu gẹ mu vuru iya ụzo bya.

²⁹Su-a; ọ kwa nwata nwokoro, eje alu nwanyị bẹ nwanyị ono, aabya eke ji ono nō-doru. Ọnyà nwata okoro ono nōdu abujeru; ọ -pfuru l'ẹka ọnyà iya pho nō anu iphe, oopfu; ẹhu atso iya ntumatu. O buru egube ono bẹ ẹhu atsokpoo mu utso atsofu l'ishi nta-a.

³⁰Mbụ-a; ọo-nōdukwa aka shii eje; epha nkemu aka alwa alì eje.”

Onye shi l'igwe bya

³¹“Onye ono, shi l'igwe bya ono bẹ bụ iya kakota shii g'a ha. Onye shi lẹ mgboko-a buepho ke mgboko-a; teme ọ nōdu anodujeepfo epfu gẹ ndu mgboko-a; onye ono, shi l'imigwe bya bụ iya kakota shii g'a ha.

³²Oo iphe, ọ nūmaru lẹ nchi; huma l'anya iya bẹ oopfuge. Obenu l'ọ tọ dudu onye ekweje nata ozi iya.

³³Onye nataru ozi iya bẹ gudewaa nno kweta lẹ Chileke bụ ọkpobe iya.

³⁴Noo l'onye ono, Chileke yeru ono epfu opfu, Chileke pfuru. Ishi iya bu le Chileke ta anuduru iya Unme-du-Nso nu-phodo iya ya anu-phodo.

³⁵Chileke, bu Nna yeru Nwa iya obu; bya ewowaru iphemiphe ye iya l'eka.

³⁶Onye kwetaru ke Nwa iya ono be nwewaru ndzu ojeje; onye ta anuduru Nwa Chileke opfu be ndzu ono ta abyakwa erwube eka. Onye ono be oke-ehu-eghu Chileke dukwaa swiru; o buru g'oo-du swiru iya bu ono je aduwaruro aduru."

Jionu 4

Jizosu yeke nwanyi Sameriya

¹Tobudu iya bu; Nnajiuphu bya amaru le ndu ogbo Farisii numawaru le ndu yebedua, bu Jizosu meru baputizimu; ephe nodu etso iya kawaa shii eme le ndu ophu Jionu meru baputizimu; ephe nodu etso yebedua.

²Ole o to dukpodaanu onye Jizosu gude eka iya mee baputizimu; gbahaa ndu etsoje iya nu emeje iya.

³O gbeshi le Jiudiya; o buru iya alaphu azu le Galili.

⁴Uzo ono, o shiru eje Galili ono be oo-ghaja Sameriya.

⁵No iya; Jizosu jenya bya ejerwua mkpukpu lanu, eekuje Sayika le Sameriya. Mkpukpu ono no-kube egu ono, Jiekopu nuru nwa iya, bu Jiosefu.

⁶O nwekwarupho welu, Jiekopu turu, du l'eka ono. Jizosu rwuepho l'eka ono g'enyanyu alwawaa l'ishi; ike ije buchawa iya ree. O je anodu anoo l'aguga welu ono.

⁷O nweru nwanyi, byaru eseta mini le welu ono. Nwanyi ono bu onye Sameriya. Jizosu su iya: "Nwanyi; kenaa mu mini ge mu ngua."

⁸Teke ono be ndu etsoje Jizosu jeshiwaru l'ime mkpukpu je azuta nri, ephe e-ri.

⁹Tobudu iya bu; nwanyi Sameriya ono su iya: "? O nwuru inwu-agma be o bu gube onye Jiu gbese su mube nwanyi Sameriya ge mu kee ngu mini gi ngua?" Iphe, nwanyi ono gude pfua nno be bu le ndu Jiu be ephe le ndu Sameriya te erigbadu.

¹⁰Jizosu su nwanyi ono: "Ha! O -bu li maru iphe-oma, Chileke emejeru nemadzu; mbu-a; o -bu li makporu onye suru gi kee ya mini-a amama ophu me o gbese buru gubedua gege arwo iya me o nu ngu mini, l'anuje ndzu gi ngua."

¹¹Nwanyi ono su iya: "Nwoke-a! ? G'oodukwanu iphe, i gude, ii-gude seta mini-a-e? Tem welu-a be i maru lo du omi. ? Buhunu awe be mini, anuje ndzu obu shi ngu?"

¹²? Bu iphe, iipfu bu li byaru akawanu ochoroche anyi Jiekopu shii, bu iya turu anyi welu-a; tuchaa ya bya angua ya mini; unwu iya ngua ya mini; iphe, bu anu, o nweru enweru ngukwaa ya pho mini?"

¹³Jizosu su iya: "O to dukwa onye nguru mini welu-a ge mini ta agu iya ozo.

14Obenu l'onye nguru mini ophu mbedua nuru iya be mini ta ayidu gubaa jasụ le tuutuutu le mijimiimii. Noo le mini ophu mu a-nu onye ono a-duwa iya ro l'ehu buru iya ishi ngege, a-noduje anwushi mini, anuje ndzu ojejeje.”

15Nwanyị ono sụ iya: “Jiko nunu mu egube mini ono ge mu ngua; k'ophu bu: mu -nguchaa ya; mini ta abyadu agubaa mu ozo; mu ahakwanaa k'abyaje ekuta mini l'eka-a.”

16Jizosu sụ iya: “Lanu je ekua ji ngu ge gu l'iya swiru bya l'eka-a.”

17Nwanyị ono sụ iya: “Mu ta alukwa ji.” Jizosu sụ iya: “Oo ngu eviya. I -sụ l'i tii ludu ji be o bu ngu okpobe-opfu.

18Kele i luhwaru unwoke ise; temanu onye ophu gu l'iya bu nta-a ta abudu ji ngu. Oo ire-lanu be i pfuru ono.”

19Nwanyị ono sụ iya: “Nta-a be mu maru l'i bu onye mpfuchiru Chileke.

20Nna anyi oche phe be bu l'ubvu-a be ephe shi anoduje abaru Chileke eja. Nta-a be unube ndu Jiu byaru bya asu l'o buepho le Jierusalemu be aanoduje abaru Chileke eja.”

21Jizosu sụ iya: “Nwanyị-a; kwetaele-a iphe-a, mu epfuru ngu-a; l'ogbabeakwa teke aduedu onye byaru anodu l'ubvu-a baaru Chileke, bu Nna eja; ophu aabaduru iya ya le Jierusalemu.

22Unube ndu Sameriya abaru iphe, unu amadu eja; anyibedua, bu ndu Jiu bu iphe, anyi maru be anyi abaru eja; kele oo l'eka ndu Jiu be ndzota e-shi.

23Ole ogbabeakwa; mbu l'o ruwakwaru teke ndu l'abaru Chileke, bu Nna eja okpobe abaru e-gude Unme-du-Nso me obu phe g'o ha abaru iya ya g'o gbaru. Noo egube ndu du Chileke, bu Nna ree g'ephe baru iya eja bu onoya.

24Chileke bu Unme. Oo ya bu le ndu abaru iya eja gundefutaje Unme-du-Nso yele ire-lanu abaru iya eja okpobe abaru.”

25Nwanyị ono sụ iya: “Mu makwaru-a le Mezaya obu, bu iya bu onye eekuje Kereshi l'a-bya. L'o -byaepho be oo-tuko iphemiphe kokotaru anyi.”

26Jizosu sụ iya: “Oo mbedua, epfu anu ngu nu-a bu mu bu Kereshi obu.”

27Ephe gudekwadaa nno epfu; ndu etsoje iya nu pho lwa. O tufu phe ehụ g'ephe byaru ahuma ge Jizosu yele nwanyị abo uja. Ebe o dukwanu onye ophu jiru nwanyị sụ iya: “? Bu gunu be icho?” Ozoo jikpoonu Jizosu sụ iya: “? O nwuru inwuagha be gu le nwanyị epfu?”

28Noo ya; nwanyị ono gbado ite ono, o gude bya ekuta mini ono l'eka ono; gbagbua gbaba l'ime mkpukpu ono je echiaru ndu ozo mkpu sụ phe:

29“Unu byakpodapho bya ahuma nwoke, tukoru iphe, bukpo iphe, mu mejeru koshiaru mu. Mu ta amakwa ? to budu iya nu bu Kereshi obu too?”

- ³⁰Ephe wufuta l'ime mkpukpu ono wu-pfuta Jizosu.
- ³¹Teke ono, nwanyi ono tugburu ono be ndu etsoje Jizosu rworu iya su iya g'ọ kabero ria nri.
- ³²Q su phe: "Mu nweru-a nri ophu mu e-ri, unu ta amadu."
- ³³Q buru iya bu le ndu etsoje iya nu pfuaaha l'ime onwophe su: "? O duru onye kabe wotawaru iya nri to?"
- ³⁴Jizosu su phe: "Iphe, bu nri mu bu ge mu mee iphe, du onye ono, ziru mu ge mu bya ono ree l'obu; wafua ge mu jekota ozi, o ziru mu g'ọ ha jefu iya l'ishi.
- ³⁵Su-a; ? to budu unu anmaje etu su: 'Tofukwaa onwa eno nta-a l'o rwua teke eewolataje iphe, e meberu l'ali.' Ole mu suru g'unu palikpodapho enya legbabe l'opfu, a koru akoko; gbua ya igo huma l'iphe, e meberu l'ali kachawaru akaka duchawaa k'ewolata unuphu!
- ³⁶Onye akpata iphe ono, e meberu l'ali ono be aapfuje ugwo ozi iya. Onye ono achikobe mebyi iphe, l'a-nodu l'eka lanu kwaberu ndzu ojejoje. Oo ya bu ge ndu aku akuku; me ndu akpata akpata atuko tee eswa.
- ³⁷Noo eka iphe ono, e pfuru ono gude buru okpobe-opfu; a suru: 'L'onye lanu emebeje iphe l'ali; onye ozo eje akpata iya akpata.'
- ³⁸Mu yewaru unu g'unu je akpata iphe, e meberu l'egu, unu ejeduru ozi iya. Oo ndu ozo jeru ozi l'egu ono; o l'oo unubedua be unu l'ephe gbawaa mgba eri urwu iphe, ephe seru akanya iya."
- ³⁹Igwerigwe ndu Sameriya, shi le mkpukpu ono bya ekweta ke Jizosu; opfu le nwanyi ono suru phe l'o tukoru iphe, bukpo iphe, ya mejeru koshiaru iya.
- ⁴⁰Tobudu iya bu; ndu Sameriya ono byapfutaepho Jizosu; ephe rwoo ya g'ephe l'iya notabaa. O kwe; ephe l'iya noo ujiku labo le mkpukpu ono.
- ⁴¹A dubakpo igwerigwe gude k'iphe shi iya l'onu kweta.
- ⁴²Ephe su nwanyi ono: "O to bukwa olu-opfu ngu kparu iphe, anyi kwetaru. Iphe, anyi kwetaru bukwa l'anyi gudewaa nchi anyi numa iya l'onwanyi; maru l'oo okpobe-opfu: l'oo onye-a bukpo Kereshi obu eviya, bu iya bu Onye-Ndzota ke mgboko-a."

Jizosu eme nwa oke-amadu g'o wekorohu

- ⁴³Jizosu nochaphe ujiku labo ono l'eka ono; o tugbua jeshia Galili.
- ⁴⁴Le yebedua, bu Jizosu l'onwiya pfuhaakwaru su l'onye mpfuchiru Chileke be a ta kwabejedu ubvu l'ali iya.
- ⁴⁵Tobudu iya bu; o rwuepho Galili; ndu Galili nabata iya; kele ephe humakotaru iphemiphe, o meshiru le Jierusalemu teke ono, aabo iphe l'eka ono; kele ephebedua jekwarupho abo iphe ono le Jierusalemu.

⁴⁶Oo ya bu; Jizosu bya atugbua laphushia azu le Kena ke Galili, bu iya bu eka ono, o mejeru mini o gho me pho. O duru oke-amadu lanu, iphe eme nwa iya le Kapaniyomu.

⁴⁷Nwoke ono numaepho le Jizosu shiwa Jiudiya bya Galili; o jepfu iya je arwo ya su iya g'o bya emee ge nwa iya nwoke wekorohu; kele onwuhu anwuhu.

⁴⁸O buru iya bu; Jizosu su iya: "Unu egudedu enya unu huma iphe-ohumalenya, dugbaa biribiri be unu ta abyakwa ekweta."

⁴⁹Oke-amadu ono su iya: "Nnajiuphu; jiko byaro g'anyi je; a -nonyaa nwa mu obu nwuhu."

⁵⁰Jizosu su iya: "Tugbua lasha; le nwa ngu a-noduru ngu-a ndzu." Nwoke ono kweta iphe ono, Jizosu pfuru iya ono; o buru iya alala.

⁵¹Nwoke ono nodukwadia l'uzo; ndu ejeru iya ozi gba iya ndzuta; su iya le nwa iya ono gbakerehuakwaru.

⁵²O jia phe su phe: "? Bu egube teke ole be nwata ono beberu wata aka mma?" Epe su iya: "O kwa g'e rigbuerupho nri eswe unyaphu be ehoku ono zebuhuru iya."

⁵³Nna nwata ono nyata l'oo teke ono gedegede be Jizosu suru iya ge ya la le nwa iya a-noduru iya-a ndzu-a. Nwoke ono yee ndibe iya toko kweta ke Jizosu.

⁵⁴Ono buru iphe-ohumalenya k'ebo, Jizosu meru g'o shi le Jiudiya bya Galili.

Jionu 5

Jizosu yele eniyeni aguga okpuru

¹E mechakpoakwaro; o duru obo-iphe, ndu Jiu abo. Jizosu jeshinaa Jierusalemu.

²L'ime Jierusalemu, le mgboru Oguzo Aturu, be o duru nwa okpuru, ndu Hiburu ekuje Betusayida; uzo eshije abahu iya du uzo ise.

³Ndu iphe eme dukpoo igwerigwe zegbaa l'ime eka ono: ndu atsu ishi-o me ndu eniyeni-o me ndu iphe, lonwuru ibe ehulanu. Epe toko zeshia l'eka ono kwabegba teke mini ono l'eme ukporo.

⁴Kele obujeru; a -nonyaepho nwanshii; ojozi-imigwe, shi l'eka Nnajiuphu abya l'okpuru ono bya agbarwua mini ono. Onye iphe eme, vukpowaa uzo ye okpa le mini ono me ojozi-imigwe ono gbarwuchaa ya; o buru onye ono ewekorohu l'iphe, eme iya nu.

⁵Noo ya; o nweru nwoke lanu, no l'eka ono, nyawaru ehulaporo apha l'apha iri l'esato.

⁶Jizosu byaepho bya ahuma l'o shihawaa uzanya zeta l'eka ono. O su iya: "? O du ngu ree g'e mee ngu g'i wekorohu?"

⁷Nwoke ono, iphe eme ono sụ iya: “Ee! Ọle ọ tọ dudu onye mu nweru, a-paru mu chie l'okpuru ono me a -gbarwuepho mini ono. Ọ nodu abujeru; mu -jeshia ge mu ye iya okpa; onye ozo evuwaru mu uzo.”

⁸Jizosu sụ iya: “Gbalihu; phuta utute ngu wata eje ije.”

⁹Teke ono teke ono; nwoke ono wekorohu bya aphuta utute iya jeahaa ije. Mboku, iphe ono meru bu eswe-atuta-unme ndu Jiu.

¹⁰Oo ya bu; ndu Jiu sụ nwoke ono, e metaru l'iphe, shi eme iya nu ono: “Ntanu-a bukwa eswe-atuta-unme. ? I maru-a le gi phutaru utute ngu eje nno be o buwaa ngu adarwu ekemu?”

¹¹Ọ sụ phe: “Ọ kwa nwoke ono, meru mu wekorohu ono suru mu ge mu phuta utute mu wata eje ije.”

¹²“Ephe jia ya sụ iya: ? Bu egube nemadzu gunu be nwoke obu bu, suru gi phuta utute ngu wata eje ije?”

¹³Ophu nwoke ono, e meru o wekorohu ono amadu onye obu kele Jizosu gudewaa le nemadzu paru aka l'eka ono lufu o buru iya atugbu.

¹⁴E mechaa; Jizosu huma nwoke ono ozo l'eze-ulo Chileke bya asu iya: “Lenu; nta-a be i dukwaa iche; ta adukwa teke ii-je eme iphe-eji ozobaa g'iphe ozo, ka njo ta abyapfuta ngu.”

¹⁵Nwoke ono godobe ya pho je akaru ndu Jiu l'o kwa Jizosu be meru iya; ya wekorohu obu.

¹⁶Noo iphe, meru g'o gude ndu Jiu chiahaa nta Jizosu; opfu l'oo eswe-atuta-unme be o meru iphe ono.

¹⁷Noo ya; Jizosu sụ phe: “Nna mu ejekwa ozi g'ooje iya bya asu nta-a; mbedua nodu ejekwapho.”

¹⁸Iphe ono, o pfuru ono mee ndu Jiu; ephe kabakpo achu uzo, ephe e-shi gbua ya. Ọ to budua kele o turwuru nsu eswe-atuta-unme; ophu ka phe ehuka bukwa l'o gbekufua nu Chileke Nna iya, bunu iya bu le ye Chileke gbekharu enya nhamunha.

Ike ke nwa

¹⁹Noo g'o gude; Jizosu sụ phe: “Ge mu gbukwaaru iya unu tororo; o to dukwa iphe, Nwa egudeje ike aka iya eme l'onwiya; abudu iphe, o humaru le Nna iya eme; kele oo iphe, Nna eme bukwapho iphe, Nwa emeje.

²⁰Nna yeru Nwa iya obu. Ọ nodu egoshikotaje iya iphemiphe, oome l'onwiya. Oogoshibakpokwaa ya nu iphe, ka owa-a shii g'o mee; mbu k'ophu odu unu biribiri.

²¹L'o kwa ge Nna emeje ndu nwuhuru anwuhu; ephe eshi l'onwu teta gbalihu l'o nu phe ndzu-a bu ge Nwa e-woru ndzu nu ndu du iya l'uche.

- 22** Ọ tọ ẹkwa onye Nna egude ẹka iya ekpe ikpe; o wokotaakwaru k'ikpe ye Nwa iya ono l'ẹka.
- 23** Ọo ya bu ẹ ndiphe l'ophu akwabeje Nwa ubvu g'ephe akwabeje Nna. Onye ono, ta akwabeju Nwa ubvu ta akwabeju Nna, bu iya bu onye ziru iya nu.
- 24** “Su-a; ẹ mu gbukwaaru iya unu tororo; onye numakpowaru opfu mu bya ekweta k'onye ono, ziru mu ẹ mu bya ono nweakwa ndzu ojejoje. Onye ono ta abyadu apfuru g'e kpee ya ikpe. Onye ono shiwaa l'onwu bahu le ndzu.
- 25** Ẹ mu gbukwaaru iya unu tororo; mbochi agbabeakwaa; mbu l'o ruwakwaru erwurwu teke ndu nwuhuru anwuhu a-numa olu ke Nwa Chileke; ndu ophu numaru iya nu a-nodu ndzu.
- 26** Ọo ẹ ndzu shi Nna l'onwiya l'ẹka bu ẹ Nna mekwarupho ẹ ndzu shi Nwa l'ẹka.
- 27** Ọ nukwarupho Nwa ono ike g'o kpeje ikpe kpebua; kele ọo ya bu Abubu-Ndiphe.
- 28** G'iphe-a te ejikwa unu enya; le mboku agbabeakwaa teke iphe, bukpo ndu no l'ilu g'ephe ha a-tuko numa olu iya;
- 29** shi l'ilu phe futachaa. Ndu ophu shi eme iphe, du ree eteta dzuru ndzu; ndu ophu shi eme ejo-iphe etetakwapho g'a nma phe ikpe.

Iphe, egoshi l'ike du Jizosu l'ẹka

- 30** “Su-a; ọ tọ ẹkwa iphe, mu egudeje ike ẹka mu mee l'onwomu. Ọ kwa ẹ Chileke suru ẹ mu kpee ikpe bu ẹ mu ekpeje; teme ikpe, mu ekpe buru ikpe, pfuru oto; kele mu te ekpejedu g'o du mu. Ọo g'o du onye ono, ziru mu nu ono ree l'uche bu ẹ mu ekpeje.
- 31** “Teke ọ bu le mu gbẹ bya atuahaa onu onwomu; ọ kwa iya bu l'iphe, mu epfu ta abudu ire-lanu.
- 32** Obenu l'ọ dukpooruro onye ozo, bu iya a-tu onu mu; mbu l'ophu mu tuberu nvo bu l'iphe, onye ono e-pfu l'opfu ehu mu bu okpobe-opfu.
- 33** Ọ kwa unu ziru ndu-ozu g'ephe byapfuta Jionu; Jionu pfukwaaru unu k'okpobe-opfu ono.
- 34** Ọ tọ bukwa ẹ nemadzu bya atuahaa onu mu. Iphe, mu zoberu agba iya okpa bukwa g'aa-dzo unu.
- 35** Jionu l'onwiya bu oroku, enwu enwunwu; teme ọ nodu eke jajaja. O shikwapho evu unu evuvu g'unu nodu l'iphoro iya ono tetota nweswa.
- 36** Iphe, mu meshiru kakwa atu onu mu; eme le ẹ Jionu turu onu mu. Ishi iya bu l'ozu ono, Nna ziru ẹ mu bya ejee jefu l'ishi ono; mbu ozi ono g'o ha, mu eje nta-a ono be atu onu mu l'ọ bua Nna ziru mu ẹ mu bya.
- 37** Nna mu ono, bu iya ziru mu ono tuakwarupho onu mu. Unu teke anuma-swekwaa olu Nna mu ono; ophu unu 'eke ahumaswekwaa ya; k'ophu unu a-maru g'o gbaru.

- ³⁸Unu ta akwakọbeduru opfu ono, shi Nna mu l'ọnu ono l'ime obu unu; kele unu te ekwetaduru k'onye ono, o ziru g'ọ bya ono.
- ³⁹Unu anọduje enyocha iphe, e deru l'ekwo-opfu Chileke; dobesu l'onoo ẹka unu e-shi nweru ndzu ojejoje. Ekwo-opfu Chileke ono tųkokpokwaaru atų ọnu mu.
- ⁴⁰Obenu l'unu te ekwedu byapfuta mu g'unu enweru ndzu.
- ⁴¹“O to nwekwa teke mu ele ẹnya gẹ ndiphe bya ajaahaa mu ajaja.
- ⁴²Ọle mu makwaru-a l'unu te eyeduru Chileke obu.
- ⁴³Ọ kwa ike ke Nna mu ono be mu gude bya; unu jika mu. Teke ọ buẹpho l'ọ duru onye ọzo, gude ike k'eka iya bya; l'ọ buru onye k'ono be unu a-nata.
- ⁴⁴Su-a; ? denu g'unu e-shi kweta nkemu; l'unube ndu abujeru; nwibe unu -nọdu aja unu ajaja l'ootso unu ntumatu. Ebe ọ budu l'unu achọ ọzo, unu e-shi gẹ Chileke ophu bu iya bu Chileke kpeekpu jaa unu ajaja.
- ⁴⁵G'ọ tọ dukwa unu g'ọ bu mbedua eje edo g'unu gbaru l'ataphu Nna mu; onye e-do edo ẹhu unu gbekikwanu buru Mosisu pho, unu chiru ẹka bebe pho.
- ⁴⁶Ọ -bu l'unu kweru ke Mosisu me unu ekwekwapho nkemu; noo kele Mosisu deru dekuta mu l'ekwo iya.
- ⁴⁷Teke ọ bu l'unu te ekwetaduru iphe, o deru; ? denuhunu g'unu e-shi kweta l'opfu, mu epfu bu okpobe opfu?”

Jionu 6

Jizosu anu unu umadzu iri l'ẹbo l'ukporo iri nri

(Mat 14:13-21; Mak 6:30-44; Luk 9:10-17)

- ¹E mechaa; Jizosu tugbua jeshia azu eze-enyimu Galili azu iya ophuu, bukwa iya pho bu eze-enyimu Tayibiriyasu.
- ²Igwerigwe nemadzu nodu awu gidigidi etso iya; kele ephe humawaru iphe-ohumalenyaa, o meshiru teke ono, o meshiru ndu iphe eme ephe wekorohuchaa ono.
- ³Jizosu kweepho doo bya enyikota ẹka ono, bu o-ka-l'ubvu-ubvu ono je anodu anoo l'eka ono yele ndu etsoje iya nu.
- ⁴Teke ono be obo Ojaghata ndu Jiu duwaa ntse.
- ⁵Jizosu bya apalia enya; huma le ndu awu abyapfuta iya nu du igwerigwe shii. O buru iya bu l'ọ su Filipu: “? Bukpoo awe be anyi a-zuta buredi ge ndu-a eria nri?”
- ⁶Iphe, o gude pfua nno ta abukwa l'ọ tọ madu iphe, oo-me. O kwa g'ọ maeduru iphe, Filipu e-pfu.
- ⁷Ọ buru iya bu le Filipu asu iya: “Ukporo pangu taa sukpokwanu azuta buredi, a-suru g'oo-rwudzuru phe l'ọnu ilile.”

⁸Noo ya; onye lanu le ndu ono, etsoje iya nu ono, bu Anduru; mbu nwune Sayimonu Pyita su iya:

⁹“O dukwaru nwata nwokoro nshii, no l'eka-a, gude ishi buredi bali ise; waa eji-ema. O bekwanu ? o duru iphe, iphe ono bu l'ehu igwe oha-a?”

¹⁰Jizosu su phe: “Ngwa unu su phe g'ephe noduchaa anoo.” Eka ono be unwu irwu eswa dukwanu shii. Ephe bya atuko noduchaa anoo l'eka ono. G'ephe ha doru l'eka ono bu unu unwoke iri l'ebo l'ukporo unwoke iri.

¹¹Jizosu bya achita buredi ono bya ekelechaepho Chileke ekele bya ekeshiaru iya ndu ono, no l'eka ono. O bya emekwaapho ema pho nno; o dzuru onyemonye.

¹²Ephe rijichaepho ephe g'ephe ha; Jizosu su ndu etsoje iya nu: “Unu tutukobe iphiriba iya ophu ephe riphodoru g'o to du ophu a-la l'iswi.”

¹³Ephe bya atutua iphiriba iphiriba iya ophu shi l'ishi buredi ise ono tutu-jia ya nkata-evu-iphe iri l'ebo, bu iya bu ophu ndu ono riphodoru.

¹⁴Ndu ono humaepho iphe ohumalenya ono, Jizosu meru ono ephe su: “O kwa okpobe-opfu l'oo nwoke-a bu onye mpfuchiru Chileke obu, l'a-bya le mgboko-a!”

¹⁵Jizosu maerupho l'ephe abya iya akputa k'ehuka; mee ya onye eze phe; o buru iya alaphu azu l'ubvu ubvu pho nwekinyi iya.

Jizosu eje ije l'eli mini

(Mat 14:22-33; Mak 6:45-52)

¹⁶O rwuepho l'uzo enyashi; ndu etsoje iya nu tugbua jeshia l'eze-enyimu pho.

¹⁷Ephe bahu l'ugbo kporu iya eme g'ephe ghabua le mini ono jeshia Kapaniyomu. Ochii wata agbagba; ophu Jizosu 'eke abyapfutadu phe.

¹⁸Noo ya; oke pherephere nonyaa bya awata ezizi; k'ophu eze mini ono wataru atu oke akpara-mini atushi iya ike; k'ophu o byaje enari.

¹⁹Ndu etsoje iya nu ono kpoepho ugbo ono o du ge manyiru eto me eno; ephe huma Jizosu g'ooje ije l'eli mini eje abyakube ugbo phe. Meji tofu phe.

²⁰Jizosu su phe: “Ndzu ba agushi unu; l'o bu-a mbedua.”

²¹O buru l'o pfuru nno meru g'o gude o lwuahaa phe l'obu g'ephe kubata iya l'ugbo phe. G'ejia epfua; ugbo phe hee l'eli-mgboko eka ephe eje alufu.

Aachọ Jizosu

²²O rwua le nchitabohu iya; ndu ophu shi nodu l'azu eze-enyimu azu iya ophuu bebe maru l'oo ugbo lanu be likwaduru-a l'eka ono. Ephe makwarupho le Jizosu te tsodu ndu etsoje iya nu bahu l'ugbo phe; l'oo ndu ono, etsoje iya nu ono tugburu nweka phe.

²³O dukwarupho igwerigwe ugbo ozo, shigbaa Tayibiriyasu byakube eka ono ntse, bu iya bu mgboru eka pho, ephe no taa buredi ge Nnajiuphu kelechaaru Chileke ekele pho.

²⁴No iya; igwe oha ono humaeopho le Jizosu ta anodu l'eka ono; ebe ndu etsoje iya nu anodu iya; ephe tuko bahu l'ugbo choru Jizosu jeshia Kapaniyomu.

Jizosu bu nri, anu ndzu

²⁵Ephe cho-vuepho Jizosu l'azu eze-enyimu ono azu iya ophuu; ephe su iya: “? Buhunu teke ole be i rwuwaru azu iya-a?”

²⁶Jizosu su phe: “Ge mu gbukwaaru iya unu tororo; iphe, meru g'o gude unu chohaa mu nta-a ta abukwa l'ole unu humaru iphe-ohumalenya, mu meshiru. Iphe, unu zoberu achu mu bukwa le mu nuru unu buredi; unu taa tajia epho.

²⁷Su-a; ophu g'unu te segbushihe onwunu l'akanya nri ophu bu ola-l'iswi. Unu sejechia akanya nri ophu a-nodu anuje unu ndzu ojejoje, bu iya bu nri ophu Abubu-Ndiphe a-nu unu; kele o kwa yebdua be Chileke, bu Nna meru g'e shije l'eka iya huma ike, egoshi l'onoo iphe, yebe Nna gude su ge ya bya.”

²⁸Ephe jia ya su iya: “? Bu gunu be anyi a-nodu eme l'o buru iya bu l'anyi eje ozi Chileke?”

²⁹O su phe: “Iphe, bu iya bu ozi Chileke bu g'unu kweta k'onye ono, Chileke yeru g'o bya ono.”

³⁰Oo ya bu; ephe su iya: “? Bu egube iphe-ohumalenya, du idu-agma be ii-me goshi anyi g'anyi gude enya anyi huma kweta obu? ? Denu iphe, ii-me obu?”

³¹Kele teke k'azu be nna anyi oche phe rikwaru nri ono, bu mana ono teke ephe no l'echiegu. O buru iya bu iphe obu, e deru l'ekwo-opfu Chileke su: ‘O nuru phe nri, shi l'imigwe ephe ria.’ “

³²Jizosu su phe: “Ge mu gbukwaaru iya unu tororo; o to bukwa Mosisu nuru unu nri ono shi l'imigwe ono. Obenu l'oo Nna mu egudeje eka iya nu unu okpobe nri ophu shi l'imigwe.

³³Le nri ono, Chileke anuje ono bukwa iya bu onye ono, shi l'imigwe bya ono; teme o buru onye ono anuje ndiphe ndzu.”

³⁴Ephe su iya: “Nnajiuphu; jiko nujenu anyi nri ono tekenteke.”

³⁵Jizosu su phe: “O kwa mbedua l'onwomu bu nri ono, anuje ndzu ono. Onye byapfutaru mu nu be egu ta ayikwa gubaa ozo; ophu egu mini abyakwa agubaa onye kwetaru nkemu.

³⁶Ole mu pfuakwaru unu l'unu humaakwaru mu; ophu unu ekwedu nkemu.

³⁷Obenu l'iphe, bu ndu Nna mu yeru mu l'eka a-byapfutakotakwa mu; ophu mu abyakwa achifu onye byapfutaru mu nu.

³⁸Noo kele mu shi l'imigwe bya. Iphe, mu byaru ta abukwa ge mu bya emee uche nkemu; o kwa uche onye ziru mu ge mu bya be mu byaru ememe.

- ³⁹Iphe, bukwanu uche onye ono, ziru mu nu ono bu g'ọ to du ndu ono, o yeru mu l'eka ono me onye lanu, a-nahu mu tuphahu; gbahaa ge mu tuko phe mee g'ephe tuko teta nodu ndzu mboku ikpazu.
- ⁴⁰Noo kele iphe, du Nna mu ree bu g'onye bu onye humaru Nwa iya ono bya ekweta nkiya nweru ndzu ojeje. Mu e-mekwapho onye obu g'o shi l'onwu teta dzuru ndzu mboku ikpazu.”
- ⁴¹Oo ya bu; ndu Jiu wata ata hanyihanyi l'eka ono; kele o suru l'oo yebedua l'onwiya bu nri obu, shi l'imigwe bya.
- ⁴²Ephe wata epfu su: “? To bunu-a nwoke-a bu Jizosu, nwa Jiosifu; mbu onye anyi maru nna iya; waa ne iya ree-a? ? Denuhunu g'o shitaru o gbete nta-a bya asu le ya shi l'imigwe bya?”
- ⁴³Jizosu su phe: Unu ta atanyihe ntanyi l'ime onwunu.
- ⁴⁴Mbu-a; o to dukwa onye byaru l'abyapfuta mu nu; abudu l'oo Nna mu ono, ziru mu nu ono kuritaru onye obu. O buru mbedua l'onwomu e-me onye obu l'ooshi l'onwu teta dzuru ndzu mboku ikpazu.
- ⁴⁵Ndu mpfuchiru Chileke dekwaru l'ekwo su: “Oo Chileke e-zi onyemonye iphe.” Onye bu onye numaru ke Nna obu; bya anwuta eka iya; nokwa onye a-byapfuta mu nu bu ono.
- ⁴⁶Iphe, mu epfu ta abukwa l'o dujewaru onye humajewaru Nna ono, abudu onye ono, shi Chileke l'eka bya ono. Oo yebedua bu onye humajewaru iya nu.
- ⁴⁷Ge mu gbukwaaru iya unu tororo; onye kwetaru nkemu be dzuakwaa ndzu ojeje.
- ⁴⁸O kwa mbedua, bu nri ke ndzu.
- ⁴⁹Nna unu oche phe riru nri ono, bu mana l'echiegu; ephe nwuhuelaa.
- ⁵⁰Obenu le nri owa, shi l'imigwe-a be bu nri ophu anuje ndzu; mbu nri ophu onye riru iya nu taa nwuhuedu anwuhu.
- ⁵¹O kwa mbedua bu nri, dzu ndzu; shi l'imigwe bya. Onye bu onye riru nri ono a-dzuru ndzu jasu l'ojeje. Nri ono, mu a-nu ono bu anu-ehu mu. Mu e-woru iya nu l'iswi ehunu ndu mgboko-a g'ephe ha; k'ophu bu; onye riru iya nu; l'o dzuru ndzu.
- ⁵²Ndu Jiu tukashiahaa ego l'ime onwophe. Onye aji su: ? Denu ge nwoke-a l'e-me nu anyi anu-ehu iya g'anyi ria?
- ⁵³O buru iya bu le Jizosu asu phe: “Ge mu gbukwaaru iya unu tororo; unu eriduru anu-ehu Abubu-Ndiphe; ngua mee ya be unu tee nwekwaru ndzu l'ime ehunu.
- ⁵⁴Onye bukwanu onye riru anu-ehu mu; ngua mee mu obu; be nwewaru ndzu ojeje; teme mu emee onye ono; l'ooshi l'onwu teta dzuru ndzu mboku ikpazu.
- ⁵⁵Kele anu-ehu mu kwataru buru nri eriri; mee mu bukwarupho okpobe iphe-angungu.

⁵⁶Onye bụ onye riru anụ-ẹhu mu; bya angwa mee mu; nọwaa mu l'ime; mbedua nọdu onye ono l'ime.

⁵⁷Oo Nna ono, bụ iya bụ ishi ndzụ ono yeru mu gę mu bya; ọ bụkwaru iya phọ bę mu gude nọdu ndzụ; nokwaphọ g'iphe, bụ onye riru anụ-ẹhu mu e-gude mu nọdu ndzụ.

⁵⁸Oo ya bụ l'onoo nri ọbu, shi l'imigwe bya ọbu bụ ono. Ọ tọ bụdu ęgube ochochoroche unu phę richaaru ęphe nwuhuelaa. Onye bụ onye riru nri ọwa l'a-nọduwara ndzụ jasụ lę tuutuutuu lę mimiimii.”

⁵⁹Iphe ono bụkota iphe, Jizọsu nọ pfushia teke oozi iphe l'ulo-ndzukọ ndu Jiu lę Kapaniyomu.

Opfu ndzụ ojeje

⁶⁰Igwerigwe ndu etso Jizọsu numa iphe ono bya asụ: “Ha! Opfu ọwa atakwa ęru lę nchi. Ọ tọ bụkwa iphe anuma.”

⁶¹Obenu lę Jizọsu mawaru l'onwiya iphe, ndu etso iya nụ atanyi-doru k'opfu ono. Ọ sụ phę: “? Bụ iphe onoya, mu pfuru ono eghe unu eghe?”

⁶²? Dęnukwanu g'ọo-du mę unu -huma Abubu-Ndiphe g'ọ kwasęru imeli ala azụ l'ęka o shi nọduhawaa?

⁶³Ọ kwa Unme Chileke anụ ndzụ. Iphe, bụkpoo k'anụ-ẹhu nemadzụ bụkwa iphe-mmanụ, adudu iphe, ọ yi. Opfu, mu shi teke-a pfushita anụ unu-a bụkwa unme bya abụkwarupho ndzụ.

⁶⁴Obenu l'ọ dęchanuru-a ndu ọphu teke ekwetadu nkemu lę g'unu ha-a.” Noo lę Jizọsu shihawaa lę mbulembu maru ndu ọphu teke ekwetadu nkiya; makwarupho onye ọphu ọbu l'e-mechaa deru iya ye.

⁶⁵Ọ sụkwapho: Noo g'ọ shitaru mu sụ unu l'ọ tọ dudu onye byaru abyapfuta mu nụ; abudu l'ọ shi l'ęka Nna ono.

⁶⁶Ọ pfuchaępho nno; igwerigwe ndu ono, shi etso iya nụ ono tsuphuchaa azụ; ębe ęphe etsojehedu iya.

⁶⁷Ọ bụru iya bụ lę Jizọsu asụ umadzu iri l'ębo ọphu etsoje iya nụ: “Unubedua-e; ? Unu a-gbakashiufua tęnu?”

⁶⁸Sayimonu Pyita sụ iya: “Nnajiuphu! ? Anyi a-gbakashihu gbapfuhunu onye? G'ọ bụ gubedua gude opfu, anuje ndzụ ojeje-a.

⁶⁹Anyi kwetaakwaru bya amaakwarupho l'ọo ngu bụ Kęreshi ọbu mbụ Nwa kę Chileke, dzụ ndzụ ono.”

⁷⁰Jizọsu sụ phę: “? Tọbudu mbedua gude ęka mu họt a unu n'iri l'ębo? Ọle onye lanu l'ime unu bụkwa Obutuswe.”

⁷¹Onye oopfu iphe ono ele ɛnya buru Jiudasu, nwa Sayimonu Isukariyotu; kele ọ Jiudasu bu onye e-mechaa deru iya ye; mbu ọ bukwaru-a onye lanu l'ime umadzu iri l'ebo ono, etsoje iya nu ono.

Jionu 7

Jizosu yele unwune iya

¹E meebekpoephe; Jizosu tsoru Galili ejephe; ophu ọ dudu iya l'okpoma ge ya tsoru Jiudiya; kele ndu Jiu, no l'eka ono achọ g'ephe e-shi gbua ya.

²Teke ono be obo-iphe ndu Jiu ono, bu Obo-Mkpù phe ono gbaritawaru ntse.

³Ọ buru iya bu l'unwune Jizosu asu iya: “Shikwapho l'eka-a tugbua jeshia Jiudiya ge ndu etsoje ngu nu ahuma eze iphe, du biribiri, iime.

⁴Ọ to dukwa onye anoduje edomi iphe, oome edomi me ọ -nodu eme g'oha maru iya. Eshi ophu i tukoru egube eze iphe ono eme; menaa ge ndu mgboko-a madzuru ngu.”

⁵Noo l'unwune iya te ekwetakpodarunu nkiya.

⁶Noo ya; Jizosu su phe: “O toko rwukwa teke mu e-je; obenu l'unubedua ta adudu teke unu gbeshiru ebe unu ejeshia.

⁷Unu ta abyakwa adu ndiphe ashi: obenu le mbedua be duwaa phe ashi; kele mu anoduje epfuru phe su phe l'oo epho ejo-iphe be epe eyeje eka.

⁸Unu tugbua jeshia obo-iphe, unu eje; kele mbedua be o toko gbadu mu l'ejeje.”

⁹O pfuchaa nno bya anodu le Galili l'eka ono.

Jizosu eje Obo-Mkpù obu

¹⁰E mechaa g'unwune iya tugbucharu jeshia le Obo-Mkpù onoya; Jizosu tugbua le mpya jeshia; ebe o jeduru l'eberebadara ophu oha maru.

¹¹Ndu Jiu tsoru elekashi ɛnya iya l'eka ono, aabo iphe ono asuje: “? Buhunu awe be ọ no?”

¹²A nodu adzu-pheephe taba taba iya l'eka ono, e jiru ejiji ono. Ndu ophu asu: “O kwa okpobe nemadzu.” Ndu asu: “Oo uka. Oo ndiphe be o tsochiaru edepushi edepushi.”

¹³Ọ buru ebvu, epe atsu ndu Jiu meru g'o gude ebe ọ duhedunu onye duru ike pfufuta iphe ono k'ophu aa-numa iya.

¹⁴O rwujeephe l'echilabo obo-iphe ono; Jizosu bahu l'eze-ulo Chileke je eziahaa iphe.

¹⁵Ọ du ndu Jiu biribiri. Epe su: “? Denuhunu ge nwoke-a meru maru iphe egube-a l'ebe abu l'ọ guru ekwo me ililekpoo?”

¹⁶Jizosu su phe: “Iphe, mu ezi ta abukwa mu be o shi l'eka. Onye o shi l'eka iya bukwu Chileke ono, ziru mu nu ono.

17Onye eme g'o mee iphe, bụ obu Chileke a-maru: ? iphe-a, mu ezi-a shi l'eka Chileke to o ike k'onwomu be mu gude ezi iya.

18Su-a; onye gude ike k'onwiya epfu bukwa onwiya be oome g'a jaa ajaja; obenu l'onye eme g'onye ono, ziru iya nu ono jaa ya ajaja buwaa onye egoshi l'o gbaru g'eegude ire iya aka; mbu o to dudu aka ntuji du iya l'ehu.

19Mbu-a; ? to budu Mosisu doberu unu ekemu? Obenu l'o to dudu g'unu ha, duru onye emeje iphe, ekemu ono pfuru. ? Bukpoo gunu be unu zoberu eme g'unu gbua mu nta-a?"

20Ndu ono su iya: "Oo obu be gu l'iya eme. ? Bu onye eme g'o gbua ngu?"

21O su phe: "? Mu su l'o kwadu iphe lanu be mu meru l'eswe-atuta-unme; o tufuwaa unu eh.

22Oo l'oo le Mosisu suru; a -nwua nwata nwoke; o -noepho abali esato g'unu buje iya ubvu meru g'o gude unu nodu ebujehaa phe iya bua me o -betaru o buru l'eswe-atuta-unme. G'a gufukpokwaaro l'o to budu Mosisu be wataru iya nu; o bukporo ochochoroche unu phe wataru iya.

23O -buru l'iphe, unu e-buje nemadzu ubvu l'eswe-atuta-unme bu g'unu ete emebyidu ekemu Mosisu ? o nwuru inwu-agma be eh eghu unu eghu le mu meru nemadzu o wekorohu l'eswe-atuta-unme?

24Ophu g'unu be lejekwa nemadzu enya l'iphu kpee ya ikpe; unu pfubejekwa ikpe oto kpee nemadzu."

?Bu Jizosu bu Kereshi obu?

25Oo ya bu; ndu Jierusalemu haru su: "? To bunu-a nwoke-a be aachokashi g'e gbua?

26O gbenu bya apfuru l'edzudzu-oha l'eka-a asa opfu; ophu o dudu onye wotaru iya ya nu. ? O dukwa ge ndu-uke Chileke mawaru l'oo ya bu Kereshi obu gedegede?

27Obenu le teke Kereshi obu a-bya be o to dukwa onye amaru aka o shi. Onye owa be anyi kabekwa maru aka o shi."

28Noo ya; Jizosu zinyaa phe iphe l'eze-ulo Chileke ono; o raahaa ya arara su: "? Unu makporu-a onye mu bu amama ophu? ? Unu maru-a aka mu shi? O to bukwa ike k'eka mu be mu gude bya. Onye ono, ziru mu ge mu bya ono bukwa onye ire-lanu; ole unu ta amadu iya.

29Oo mbedua maru iya. Ishi iya bu l'oo aka o no be mu shi; teme o buru iya ziru mu ge mu bya."

30Epe chokashiahaa g'ephe e-me gude iya; ole o to dudu onye ophu byiru iya aka; kele o toko o gbadu iya l'anwuhu.

31Ndu kwetaru nkiya l'igwe oha ono kwata haela shii. Epe nodu epfu asuje: "Teke Kereshi obu byaru; ? oo-mebaa iphe, du biribiri, l'a-dakata owa-a, nwoke-a shi teke-a meta-a?"

Eezi ndu nche g'ephe je egude Jizosu

³²Ndu Fárisii numanu taba taba ono, a tukuru aadzụ ke Jizosu ono. Tòbudu iya bụ; ndu-ishi uke Chileke me ndu Fárisii yefunụ ndu nche; ephe jeshia ya egude.

³³Oo ya bụ; Jizosu sụ: “O kwaa ge mu l'unu nọfua nwanshii; mu alapfushiwaro onye ono, ziru mu ge mu bya ono.

³⁴Mbu l'unu a-cho mu nta choo imo; unu taa humadu mu; eka mu no be unu ta ayikwa bya.”

³⁵Ndu Jiu ono tuko pfuaaha l'ime onwophe sụ: “? Bupoo egube awe be nwoke-a abya alala, anyi taa dudu ike ala? A ta amadu ? o kwako le ya a-lashi Gurisu, bu iya bu eka ndu Jiu gbakashihuru je eburu; jeshia eka ono je ezi ndu Gurisu iphe too?”

³⁶Meru iphe, o gbẹ sụ: ‘Unu a-cho mu nta choo imo; ole unu taa humadu mu.’ Sụkwapho: ‘Eka mu no be unu ta ayikwa bya.’ ? Iphe ono bupoo gunu be o bu?”

Mini, anuje ndzu

³⁷O beepho le mboku agba l'upfu oha, bu iya bu mboku, kachaa mkpa l'obo-iphe obu; Jizosu gbalihu pfuru apfuru raa ya arara sụ: “Onye mini agu g'onye ono byapfuta mu ge mu kee ya mini g'o ngua.

³⁸Onye kwetarụ nkemu be iphe ono, ekwo-opfu Chileke pfuru ono a-vukwa l'ehu iya, suru: ‘Oo l'ehu onye ono be nggele ono, asoshi mini, anuje ndzu ono a-du.’ “³⁹Jizosu pfuru iphe ono, o pfuru ono pfudoru iya Unme-du-Nso, bu iya bu Unme-du-Nso ono, ndu woru onwophe ye iya l'eka a-nata ono. Teke ono be e teke anudu phe iya; opfu le Jizosu be Chileke teke ewolidu dobe l'odu-biribiri iya l'imigwe.

Igwe oha aabọ onwophe ebo

⁴⁰G'igwe oha ono numaru iphe ono, o pfuru ono ephe haru sụ: “Ha! Nwoke-a bukwa onye mpfuchiru Chileke obu, anyi ele enya iya obu eviya.”

⁴¹Ndu ophu asu: “O kwa iya bu Kereshi obu.” Ndu asu: “? Buna-a le Galili be Kereshi obu e-shi bya?”

⁴²Ekwo-opfu Chileke sukwaru le Kereshi obu l'e-shi l'eri Dévidi. L'oo le Betulehemu be aa-nwu iya, bu iya bu le mkpukpu, Dévidi shi buru gedegede.”

⁴³No iya bu; ndu ono gude opfu ehụ Jizosu ono boo onwophe ebo.

⁴⁴Ephe haru choahaa uzo, ephe e-shi gude iya; ole o to dukwanu onye ophu byiru iya eka.

Ndu-ishi ndu Jiu te ekwedu woru onwophe ye Jizosu l'eka

⁴⁵Ndu nche pho, ephe ziru ozi-a jechaa bya alwaphuta azu lapfushia ndu-ishi uke Chileke me ndu Fárisii, bu ndu ziru phe ozi. Ephe rwua; ndu ono, ziru phe nu ono jia phe sụ: “? O nwuru inwuagha be unu akputaduru iya?”

⁴⁶Ndu nche ono sụ phe: “Ha-o! Anyi teke ahumaswekwaa onye asa opfu egube ono.”

- ⁴⁷Ndu Fárisii ono sù phẹ: “? O duswefuakwarupho unubèdua?”
- ⁴⁸? Akọ kọjeru unu l'ọ duru onye-ishi anyi; ọzoo onye Fárisii, wojeru onwiya ye iya l'ẹka?
- ⁴⁹Abyakwanu l'iphe, bukpuo igwerigwe oha ono, bu ekemu Mosisu be epe amadu ono be Chileke tuakwaru onu.”
- ⁵⁰No iya; Nikodimosu, bu onye lanu le ndu Fárisii ono, bukwa iya pho gbeshijeru jepfuta Jizosu-a su phe:
- ⁵¹“E -tsoje iphe, ekemu anyi pfuru be anyi taa nmakwa nemadzu ikpe me anyi - anumaduru opfu iya; marweta iphe, o meru.”
- ⁵²Epe su iya: “? Gubedua bufunu-a onye Galili? Lerwenaa enya l'ekwo-opfu Chileke g'ii-huma l'ọ to dudu onye mpfuchiru Chileke, e-shi le Galili.”
- ⁵³E mechaa onyenonu tugbua lashichaa ibe iya.

Jionu 8

Nwanyị, e gechiru l'ẹka oori ogori

- ¹Tobudu iya bu; Jizosu tugbua jeshia ubvu Olivu.
- ²O rwuepho l'onmewa utsu echele iya; o tugbua ozo byatashia l'eze-ulo Chileke. A du igwerigwe zakoo l'ẹka ono bya ado-pee ya mgburugburu. O bya anodu anoo; wata phe ezi iphe.
- ³No iya; ndu ezije ekemu me ndu Fárisii kpuru nwanyị, e gechiru l'ẹka oori ogori kputaru iya; bya eworu iya dobe l'echilabo phe l'ẹka ono.
- ⁴Epe su Jizosu: “O-zì-iphe! Nwanyị-a be e gechiru yee nwoke.
- ⁵? O dukpuo ngu g'e mee ya gunu nta-a? A -bya l'ekemu anyi bukwa iphe, Mosisu pfuru bu g'e gudeje mkpuma tugbua onye meru iphe, du nno.”
- ⁶Iphe ono, epe epfu nno buru onya opfu be epe gbaberu iya g'ephe maru: ? o duru iphe, epe e-gude nmata iya su l'o noo ophu o mesweru. Jizosu gbenu bya etupfuru etupfuru bya egude mkpushi-eka dekaashahaa iphe l'ali.
- ⁷Epe jinyaa ya aji; o gbalihu su phe: “Teke o duru onye teke emeswee iphe-eji g'unu ha l'ẹka-a g'onye ono vuwaruro uzo wota mkpuma tua nwanyị-a.”
- ⁸O tupfutakwa ozo gudekwa mkpushi-eka deahaa iphe l'ali ozo.
- ⁹Epe numachaepho iphe ono; epe geshihuahaa nanu nanu; kele egomunggo phe anmaa phe ikpe. No iya; epe shiepho ageshihu le ndu bu ogerenya gbiriri jasu o buwaru Jizosu pfu-pheru nwekiya yele nwanyị ono, pfuru iya l'ataphu ono.
- ¹⁰Jizosu bya agbalihu su iya: “Nwanyị! ? Denuhunu phe? ? To duhedunu onye ophu pfuru nma ngu ikpe obu?”

11Nwanyị ono sụ iya: “Ọ tọ ụdekwa Nnajiuphu.” Jizọsu sụ iya: “? Bụchihunaa mbèdua a-gbè nmaa ngu ikpe? Tụgbua lashia. Ọ l'ọo g'i ti mebèkwa iphe-èji ọzo.”

Jizọsu bụ ìphóró kẹ ndu mgboko

12Jizọsu byakwa eyeeru phẹ ọnu sụ phẹ: “Ọ kwa mbèdua bụ ìphóró, ụru ndiphe. Onye bụ onye tsoru mu nụ ta abyakwa eje ije l'ọchii; gbahaa ìphóró kẹ ndzụ bẹ a-nọdu iya l'èhu.”

13Ọo ya bụ; ndu Fárisii sụ iya: “Nta-a bẹ ọ gbẹ ụru gbèdua l'onwongu atụ ọnu onwongu. Iphe ono, iipfu ono ta adụkwa ọphu bụkpoo ire-lanụ.”

14Jizọsu sụ phẹ: “Mu -nọdu atụkpooonu ọnu onwomu; unu makwarụ l'iphe, mu epfu bụkota ire-lanụ; kele mu maru ẹka mu shi; makwarupho ẹka mu ala; obenu l'unubèdua ta amadụ ẹka mu shi; ẹbe unu amadụ ẹka mu ala.

15Unubèdua l'ekpe ikpe gẹ nemadzụ ekpeje. Mbèdua ta adụdu onye mu ekpe ikpe.

16Tẹmanu; ọ -bụkpooonu nụ l'ọo gẹ mu kpee ikpe; bẹ ikpe nkemu bụkwa ikpe, pfulu ọto; kele ọ tọ bụdu mbèdua nwèkinyi mu ekpe ikpe ọbu. Ọo mu lẹ Nna mu ono, bụ iya ziru mu gẹ mu bya ono.

17Tẹme e dekwaa ya phọ l'ẹkwo ekemu unu sụ l'umadzu labọ -nọdu agbawaa ekebe l'iphe bẹ iphe ono bụnupho ọkpobe-opfu.

18Mu atụ ọnu onwomu; tẹme Nna mu ono, bụ iya ziru mu gẹ mu bya ono nọdu atụkwapho ọnu mu.”

19Tọbudu iya bụ; ẹphe jia ya sụ iya: “? Bụ awe bẹ Nna ngu ọbu nọ?” Jizọsu sụ phẹ: “Unu ta amakwa mu; ọphu unu amakwa Nna mu. Ọ -bụ l'unu maru mu mẹ unu amakwarupho Nna mu.”

20Opfu ono bẹ ọ nọ l'ẹka e dobeje okpoga, a tụtotarụ Chileke pfushia g'ọ nọ l'eze-ulo Chileke ono ezi iphe. Ẹbe ọ dudu onye byiru iya ẹka k'egude; kele o toko ọ gbadu iya l'anwuhu.

Jizọsu anma ọkwa ekwegewe

21Jizọsu sụkwa phẹ: “Mu a-la; unu achoro mu nta choro imo; ọle unu taa choro-vudu mu. Unu evuru iphe-èji, unu meru l'ishi g'unu vu iya nwushihu. Ẹka ọbu, mu a-la ọbu bẹ unu ta ayikwa bya.”

22Ọ ụru iya bụ lẹ ndu kẹ Jiu asụ: “? Ọo-kabèhunu gbua onwiya ọphu ọ sụru l'ẹka ya a-la bẹ anyi ta ayikwa bya?”

23Ọ sụ phẹ: “Unubèdua shi l'uzo-alị; ọle mbèdua shi l'uzo-imeli. Unu bụ ndu kẹ mgboko-a; obenu lẹ mbèdua ta abudu onye kẹ mgboko-a.

24Mu sụru unu l'o noo iphe, meru g'o gude unu je evuru iphe-èji, unu meru l'ishi g'unu vu iya nwushihu; mbụ unu a-nọdukwa l'iphe-èji unu ono nwushihu; gbahaa l'unu byaru bya ekweta lẹ mu bụ onye ono, mu sụru lẹ mu bụ ono.”

²⁵Ephe jia ya sụ iya: “? Bụ onye bẹ ị bụ?” Jizọsu sụ phẹ: “Oo onye ono, mu shi lẹ mbụ kataru unu lẹ mu bụ ono bẹ mu bụ.

²⁶O nwechaaruro iphe, mu e-pfu pfukuta unu; mekwapho igwerigwe iphe, mu e-kpe unu ikpe iya; ole onye ono, ziru mu nụ ono bụ onye ire-lanụ; teme o buru iphe, mu nūmaru iya l'onu bẹ mu arajẹ arara g'onnyemonye nūma.”

²⁷Ebe ephe amadu l'oo Chileke, bụ Nna bẹ oopfu ama ẹka.

²⁸Oo ya bụ Jizọsu sụ phẹ: “Unu -woliepho Abubu-Ndiphe; unu agbẹ teke ono maru l'oo mu bụ iya. Noo teke unu a-makwarupho l'o to dudu iphe, mu egudeje ike k'eka mu mee; l'o buepho iphe, Nna ziru mu bẹ mu anoduje epfu.

²⁹Temanu onye ono, bụ iya ziru mu gẹ mu bya ono te ebuhakwaru mu ẹka. O pfukwaru swiru mu eswiru; kele o buepho iphe, dū Nna mu ono ree l'obu bẹ mu anoduje eme tekenteke.”

³⁰Igwerigwe ndu nūmaru teke Jizọsu epfu iphe ono kweta nkiya.

Ohu l'amadu

³¹Oo ya bụ; Jizọsu sụ ndu Jiu ono, kwetawaru nkiya ono: “Unu -nodu emejekpowaa gẹ mu epfu-a; bẹ unu buakwaa okpobe ndu etsoje mu nū.

³²Mbụ; unu amaru okpobe-opfu ono. Okpobe-opfu ono emee g'unu nweru onwunu.”

³³Ephe sụ iya: “? G'anyi shi l'eri Ebirhamu-a-e? Ebe o budu l'o dujeru onye gbajeru anyi ohu-a. ? Buhunu ole bụ k'epfu sụ l'anyi e-nweru onwanyi?”

³⁴Jizọsu sụ phẹ: “Gẹ mu gbukwaaru iya unu tororo; iphe, bụ onye eme iphe-eji buakwaa ohu iphe-eji.

³⁵Ohu te ebujeakwaruro l'ibe nnajiuphu iya jasụ lẹ gbururu. Oo nwa, a nwuru anwunwu l'unuphu anodujewa iya ro jeye lẹ gbururu.

³⁶Oo ya bụ; teke Nwa ono meru unu g'unu nweru onwunu; unu enweru onwunu okpobe enweru.

³⁷Mu makwaru-a l'unu shi l'eri Ebirhamu; unu gbẹ emekwanu g'unu gbua mu-a; opfu l'unu te ekwedu g'opfu mu ree unu ire l'ehu.

³⁸Iphe, mu epfu opfu iya bụ iphe, mu gudewaa ɛnya mu hūma l'eka mu lẹ Nna no; iphe, unubedua emekwanu buru iphe, unu nūmaru l'onu nna unu.”

³⁹Ephe sụ iya: “O kwa Ebirhamu bụ Nna anyi.” Jizọsu sụ phẹ: “O -bụ l'unu bụ unwu Ebirhamu me unu emenaa iphe, Ebirhamu meru.

⁴⁰Obenu lẹ nta-a bẹ unu achọ ụzo, unu e-shi gbua mu; mbụ mube onye pfuru unu ire-lanụ, mu nūmaru Chileke l'onu. O to bukwa egube iphe ono bẹ Ebirhamu meru.

⁴¹Oo iphe, nna unu meru bẹ unu eme.” Ephe sụ iya: “E te vutakwaru anyibedua l'ovuoba. O kwa Nna lanu bẹ anyi nweru, bụ iya bụ Chileke.”

⁴²Jizosu sụ phẹ: “Ọ -bụ l'ọo Chileke bụ Nna unu mę unu eyenaa mu obu; kele ọo l'eka Chileke nọ bę mu shi gbęshi byatashia. Mu ta anọnyaekwarupho bya egude ike k'onwomu byatashia. Ọ kwa Chileke ziru mu gę mu bya.

⁴³? Ọ nwuru inwu-agma bę iphe, mu epfu agbeje sweru unu uswe lę nchi? Iphe, meru iya nụ bụ l'unu te ekwedu l'unu a-nụma opfu mu.

⁴⁴Unu bụ unwu Obutuswe. Ọ buru Obutuswe bụ nna unu. Iphe, dụ unu ree l'obu buru g'unu e-me mee iphe, dụ nna unu ono ree. E -shikpọo lę mbulembu bę ọ bụhawaa mgbugbumadzu. Eka iya ta adujeduru l'ire-lanụ; kele ọ tọ dudu ire-lanụ dụ iya l'onu. Ọ -dzua ụka bę a mawaru l'ọo iphe, gbaru egube onye ọ bụ bę oome; noo l'ọ bụ onye ntuphu-ire buru nnaji ụka l'onwiya.

⁴⁵Obenu lę mbedua epfuję ire-lanụ. Ọ buru iphe ono meru g'o gude ębe unu ekwetaduru nkemu.

⁴⁶? Ọ dukpooru onye a-gbęshi pfua sụ l'owa-a iphe-ęji, mu mejeru baa? Teke ọ bukwanu l'ọo ire-lanụ bę mu epfu; ? ọ nwuru inwu-agma bę unu te ekwekwanu lę nkemu bụ eviya?

⁴⁷Onye bụ-a Chileke bụ Nna iya anumaje opfu Chileke. Iphe, meru iphe, unu ta anudu opfu Chileke bụ l'unu ta abudu unwu Chileke.”

Jizosu lę Ébirihamu

⁴⁸Ndu Jiu sụ iya: “? Ọ dụ ngu g'anyi te epfuduru okpobe-opfu mę anyi -sụ l'ị bụ onye Samériya; tẹme ọbvụ nọdu eme ngu?”

⁴⁹Jizosu sụ phẹ: “Ọ tọ dukwa ọbvụ, eme mu nụ. Ọ kwa Nna mu bę mu akwabę ụbvù; unu gbę agbarwụ mu agbarwụ;

⁵⁰ębe ọ bụ lę mu eme g'a jaa mu ajaja. Ọ duru onye lanụ, adzo g'a jaję mu ajaja; ọ buru onye ono e-kpe ikpe.

⁵¹Gę mu gbukwaaru iya unu tororo; iphe, bukpooru onye eme iphe, mu epfu-a ta abyakwa anwuhu anwuhu jasụ lę tuutuutuu lę mịimiimii.”

⁵²Ndu Jiu sụ iya: “Ihee! Nta-a bę anyi makpọwaru l'ọo ọbvụ eme ngu eviya. Lę-a; Ébirihamu kakkpọwaru nka nta ka imo; mechaa bya anwuhule-a. Iphe, bụ ndu mpfuchiru Chileke nwuhukotakwapho; ọ buru iya bę ị sụru anyi l'onye bụ onye eme iphe, i pfuru ta ayidu nwuhu anwuhu jasụ lę tuutuutuu lę mịimiimii.

⁵³Tọo ? iime g'ị sụ l'ị ka nna anyi Ébirihamu shii, mechaaru nwuhuela-a? Tẹme ndu mpfuchiru Chileke nwushihukotakwapho. ? Bụ onye bę iitukpọ l'ị bụ?”

⁵⁴Jizosu sụ phẹ: “Ọ -bụ l'ọo gę mu jaahaa onwomu ajaja mę nkemu ta adukwa iphe, o gege aburu. Ọo Nna mu ono, unu sụru l'ọo Chileke unu ono aja mu ajaja.

⁵⁵Obenu l'unu teke amaduru iya; mbedua makwanuru iya. Ọ -bụ lę mu sụru lę mu ta amadu iya m'ọ buru ụka bę mu adzụ g'unubedua adzuję-a. Ọle mu maru iya bya emeje iphe, o pfuru.

⁵⁶Nna unu, bụ Ébirihamu bę ęhu tsọru uto l'oo-gude ęnya iya huma mbọku, mu a-bya. O huma iya; o tee ęswa.”

⁵⁷Tọbudu iya bụ; ndu Jiu sụ iya: “? G'i tiki nọdu ụkporo apha labọ l'apha iri-a bę i gbe humawanu Ébirihamu?”

⁵⁸Jizọsu sụ phę: “Gę mu gbukwaaru iya unu tororo; a byakwaru anwụ Ébirihamu; mu nọduhawaa.”

⁵⁹Tọbudu iya bụ; ęphe kwakọahaa mkpuma g'ęphe tya ya. O domia onwiya; lufushia l'eze-ulo Chileke ono.

Jionu 9

Jizọsu emeta nwoke, a byaru anwụ o nọdu atsuwaa ishi

¹Jizọsu nọdu aghata aghata; o huma nwoke lanu, a byaru anwụ o nọdu atsuwaa ishi.

²Noo ya; ndu etsoje Jizọsu jia Jizọsu sụ iya: “? Bụkpohuna onye ole mesweru? ? Bu nwoke-a meru iphe-ęji; tọo ndu nwuru iya nu, meru g'o gude a bya l'anwụ iya; o nọdu atsuwaa ishi?”

³Jizọsu sụ phę: “O tọ bụkwa lę nwoke-a mesweru; ozoo l'oo ndu nwuru iya nu mesweru meru g'o gude; o nọdu atsu ishi. O kwa iphe, kparu iya nu bụ; g'e shichia l'ęhu iya goshi g'ike kę Chileke erebe ire.

⁴Anyi jefutajekwa ozi onye ono, ziru mu gę mu bya ono teke iphoro dukwadu. Noo le nchi ejihuwaa teke aduedu onye adu ike eje ozi.

⁵Nta-a, mu nokwadu lę mgboko-a bükwa mbedua bụ iphoro kę ndu mgboko-a.”

⁶O pfuchaępho iphe ono bya agbushi onu-mini l'alı bya egude onu-mini ono gwọ-phube ępuchi meta tee nwoke ono l'ęnya;

⁷sụ iya: “Tugbua je aswaa iphu l'okpuru Sayilowamu,” bụ iya bụ okpuru, aza “onye e ziru ozi.” Tọbudu iya bụ; o tugbua je aswaa iphu l'okpuru ono. O lwaphutashia azu; o nọdu aphuwaa uto.

⁸Ndu obutobu ono mę ndu shi ahumajewa iya nu ęka oorwo arwo jiahaa: “? Tọ buna-a nwoke-a, anọduje arwo arwo-a baa?”

⁹Ndu asu l'o kwa iya-a; ndu asu l'o tọ bükwa iya; l'o kwa onye yeru iya nu. Nwoke ono sụ: “O kwa mu-a-o.”

¹⁰Ęphe jia ya: “? Dęnu g'e meru i phuharu uto?”

¹¹O sụ phę: “O kwa nwoke ono, eekuje Jizọsu ono gwọ-phuberu ępuchi meta tee mu l'ęnya labọ; bya asu mu gę mu tugbua je aswaa iphu lę Sayilowamu; mu tugbua je aswaa iphu; mu wata aphu uto.”

¹²Ęphe jia ya sụ iya: “? Bụ awe bę onye obu no?” O sụ phę lę ya ta amakwa.

Ndu Fárisii aji onye ono, shi atsu ishi ono aji

- 13**Noo ya; ephe duta nwoke ono, shi atsū ishi ono jepfu ndu Fárisii.
- 14**Mbòku ono, Jizòsu gwò-phuberu epuchi tee nwoke ono l'ènya ò phuahaa ụzo ono bu eswe-atụta-unme.
- 15**Ndu Fárisii bya ajikwaa nwoke ono ọzo sū iya g'ò kòkpoo g'o shiru phuahaa ụzo. Ọ sū phẹ: “O metaru epuchi tee mu l'ènya labò; mu je aswaa iphu; mu phuahaa ụzo.”
- 16**Ndu Fárisii ono haru sū: “Nwoke ono te eshikwa l'èka Chileke; ò -buru 'abu ? denu g'o gude ophu o dobejedu nsò, dù l'eswe-atụta-unme?” Ndu ophu asū: “? Denukwanu g'onye eme iphe-eji e-me emekòta iphe-ohumalenya, dugbaa egube ono.” Ephe bọ onwophẹ ẹbo.
- 17**A nonyakwaa; ndu Fárisii ono jikwaa nwoke ono ọzo sū iya: “? Denukpohuna onu, gubedua yeru lẹ kẹ nwoke ono; eshi ophu ò bu iya meru; ì phuahaa ụzo.” Ọ sū phẹ: “Oo onye mpfuchiru Chileke bẹ ò bu.”
- 18**Ophu ndu Jiu ono ekwetakwanuru lẹ nwoke ono shi atsuhawaa ishi; l'oo teke ono bẹ e meru iya; ò phuahaa ụzo ono; jasuru ephe je ekua ndu nwuru nwoke ono;
- 19**bya ajia phẹ sū phẹ: “? Bu onye ọwa-a bu nwa unu, unu sūru l'a byaru anwu ò nọdu atsūwaa ishi-a? ? Denu g'e meru ò nọdu aphuwaa ụzo nta-a?”
- 20**Ndu nwuru nwoke ono sū: “Iphe, anyi makaharu bu l'ò bu nwa anyi. Iphe ọzo buru l'o shi l'epho ne iya tsuta ishi.
- 21**G'e shiru mee ò phuahaa ụzo nta-a bẹ anyi amaekwa. Ebe anyi amakwa onye meru; ò phuahaa ụzo. Ọ kwa g'unu jia ya g'o pfua l'onu onwiya; eshinu ogerenya iya duwaa shii.”
- 22**Iphe, ndu nwuru nwoke ono gude pfua nno bu l'ephe atsū ndu Jiu ebvu; kele ndu Jiu chihawaru iya sū l'ò -duru onye gudebaa onu iya pfua l'edzudzu-oha l'oo Jizòsu bu Kéreshi obu; ephe akpo-chia onye obu mkpo-chi sū g'ò tọ batabahe l'ulo-ndzukò phẹ.
- 23**Noo g'o gude ndu nwuru iya nū sū: “Unu jia ya; ogerenya iya duwaa shii.”
- 24**Oo ya bu; ephe byakwa ekua nwoke ono, shi atsū ishi ono k'ugbo ẹbo sū iya: “Kwabẹ Chileke nwekiya ùbvù; pfuaru anyi ire-lanu; l'anyibedua l'onwanyị maakwaru lẹ nwoke ono bu onye iphe-eji.”
- 25**Nwoke ono sū phẹ: “Mu ta amakwa ? ò bu onye iphe-eji-o tọ tọ budu iya. Ophu mu gude ẹka bu lẹ mu shi atsū ishi; ọle nta-a bẹ mu aphuwaa ụzo.”
- 26**Ephe jia ya sū iya: “? Denu g'ò nwuru unu l'iya? ? Denukpoo g'o gude mee ngu; ì phuahaa ụzo obu?”
- 27**Ọ sū phẹ: “Ọ kwa-a iphe lanu-a, mu pfuhawaru unu-a; ebe unu angabeduru iya nchi-a. ? Ọ nwuru inwu-agma bẹ unu eme g'unu numa iya ọzo? Tọo ? ò dufua unu g'unu buru ndu etsoje iya nū?”
- 28**Ephe phuahaa ya iphu sū iya: “Ọ kwa gubedua bu onye etsoje iya nū! Anyibedua bukwa ẹka kẹ Mòsisu bẹ anyi etso!

²⁹Ọ bụru Mósísu bẹ anyi maru lẹ Chileke pfuru opfu nụ. Ọ -bụru onye ọwa-a bẹ anyi ta amakwa ẹka o shi.”

³⁰Nwoke ono, shi atsụ ishi ono bua ntumatu sụ: “Ha-oo! Ọwa-a dukwa mu nụ biribiri! Unu ta amadu ẹka o shi; ọle o mekwanuru; mu saa ọnya labo gude aphụ ụzo.

³¹Iphe, doru ọnya bụ lẹ Chileke ta angajeduru ndu iphe-eji nchi; o bekwanu l'onye abajeru Chileke ẹja bya emeje iphe, du Chileke ree l'obu bẹ ọongajeru nchi.

³²Eshinu mgboko du bẹ ọ toko du-swekwaa onye numajeru l'ọ duru onye mejeru onye shi l'epho tsuta ishi; ọ phuahaa ụzo.

³³Ọ -bụ lẹ nwoke-a te shi l'ẹka Chileke bya; mę ọ to dukwa iphe, o gege adu ike mee.”

³⁴Ephe vupyabe iya sụ: “? Iibya anyi ezi iphe! Gube onye ngupyaberu eme iphe-eji l'era?” Ephe chifu iya.

Atsụ ishi kę ndu Fárisii

³⁵Jizosu numa l'ephe chifuwaru nwoke ono bya eje achọ-vu iya sụ iya: “? I kwetaru l'ii-nodu l'ẹka Abubu-Ndiphe?”

³⁶Ọ sụ Jizosu: “Jiko kanuru mu onye ọ bu gę mu ekweta nkiya.”

³⁷Jizosu sụ iya: “I gbę gudewaa ọnya ngu humawaa onye obu. Mbụ l'ọo ya epfu eyeru ngu nta-a.”

³⁸Nwoke ono sụ: “Nnajiuphu! Mu kwetawaru!” Ọ bya adaa kpurumu l'alı baaru iya ẹja.

³⁹Jizosu sụ iya: “Iphe, mu zoberu bya lẹ mgboko-a bụ gę mu kpee ikpe; k'ophu ndu atsụ ishi a-phuahaa ụzo; ndu aphụ ụzo a-tsuhaa ishi.”

⁴⁰Ndu Fárisii, haru nọ-kube iya nụ numa iphe ono; ephe sụ iya: “? Iipfu l'anyibedua atsufua ishi to gunu?”

⁴¹Jizosu sụ phe: “Ọ -bụ l'ọo iphe unu atsụ ishi; mę ọ to dukwa iphe-eji gege adu unu l'ehu. Obenu lẹ nta-a, unu suru l'unu aphụ ụzo-a bẹ unu vukwapho iphe-eji unu l'ishi g'unu vu iya.”

Jionu 10

Onye eche aturu

¹Jizosu sụ phe: “Gę mu gbukwaaru iya unu tororo; onye eshidu l'oguzo bahụ l'ẹka aachibaje aturu; ọ gbę shia ibiya ọzo nyiba iya enyiba; onye ono bukwa iphuru bụru onye ana nfu.

²Ọo onye shiru oguzo bahụ l'ẹka aachibaje aturu bụ onye eche aturu ono.

³Ọ bụru onye ono bẹ onye eche oguzo ẹka aachibaje aturu aguhajeru ụzo; ọ bụru onye eche aturu ono bẹ aturu ono anumaje olu iya; l'ọ bya ekua ophu bụ aturu nkiya l'epha l'epha; duta phe lufushia.

⁴Teke ọ chifutagbuchaerupho aturu nkiya; l'o vuta ọzo; aturu iya ono awu etso iya; kele ephe mawaru olu iya.

⁵Ephe tee kwekwa etsoru onye shi uswe. Ọ kwa ọso be ephe a-gbe agbaru onye obu; kele ephe ta amadu olu ndu shi uswe.”

⁶Noo etu, Jizosu nmaru phe; obenu l'iphe, o pfuru phe te edoduru phe enya.

Jizosu bu onye obu-oma, eche aturu

⁷Tobudu iya bu; Jizosu sukwa phe ozo: “Ge mu gbukwaaru iya unu tororo; ọo mbedua bu oguzo aka aachibaje aturu.

⁸Iphe, bu ndu vu mu ọzo bya bukota iphuru; buru ndu ana nfu; ole aturu ono te eyeduru onu yeru phe.

⁹Ọ kwa mbedua bu oguzo ono. Onye shiru iya nu bata be aa-dzotakwa. Onye ono e-shi iya bata; shikwa iya pho lufu; huma aka ọo-ta nri g'aturu ahumaje-a.

¹⁰Iphe, iphuru abyaje ememe kpeekpu bu g'o zita iphe; waa g'o gbua aturu; ozoo ge ya mee g'iphemiphe laa l'iswi. Obenu l'iphe, mbedua l'onwomu byadoru bu g'ephe enweru ndzu; nweru k'etsutsu iya.”

¹¹“Ọ kwa mbedua bu onye obu-oma obu, eche aturu. Onye obu-oma, eche aturu atuje ishi ndzu iya gude see iswi aturu iya.

¹²Onye e butaru ebuta; a-paru aturu ono haa gbalaa me ọ -huma l'agu abya; kele ọ to budu iya echeje aturu ono; teme ebe ọ budu iya nwe iya. Ọo ya bu; agu ono abapfuta aturu ono bya achikaa phe.

¹³Onye ono, e butaru ebuta ono agbalaje; kele ọ maru l'oo ebuta be e butaru iya; ebe ọ dudu iphe, ọ guberu aturu ono.

¹⁴Su-a; ọ kwa mbedua bu onye obu-oma obu, eche aturu obu. Mu maru ndu ophu bu aturu mu; ndu ophu bu nkemu maru mu.

¹⁵Nokwapho ge Nna mu maru mu; mu maru Nna mu. Mbedua atuje ishi ndzu mu gude see iswi aturu mu.

¹⁶Mu nwekwarupho ikpoto aturu ozo, ayidu le ndu owa-a. Mu jefutajekwa je achitafua phe dobe; ephe atuko anu olu mu. Ọo ya bu; ephe atuko nmagba buru igwe aturu lanu; nweru onye lanu, eche phe nu.

¹⁷“Iphe, meru g'o gude Nna mu yee mu obu bu le mu turu ishi ndzu mu; k'ophu mu a-nataphu iya azu.

¹⁸Ọ to dukwa onye bu iya nataru mu ndzu mu ono. Ọ kwa mbedua turu obu mu onyo tua ishi ndzu mu obu. Ọo mbedua be ọ du l'eka. Mu -su le mu a-tu iya; mu atua ya. Mu -su le mu a-nataphu iya azu; mu anataphu iya azu. Noo iphe, Nna mu ziru mu ge mu mee bu ono.”

¹⁹Ndu Jiu gudekwapho k'opfu ono, Jizosu pfuru ono bo onwophe ebo ozo.

²⁰Ephe dụ igwerigwe sụ: “Ọ kwa ọbvụ bu nwoke-a l'ẹhu; ẹme ọbvụ nọdu emekwa iya phọ. ? Dẹnu g'o gude unu je angabẹ nchị l'iphe, oopfu?”

²¹Ndu ọphu asụkwanu: “Opfu ọwa-a, oopfushi-a ta abụkwa opfu onye ọbvụ eme. ? Unu humajeru ẹka ọbvụ duru ike mee onye atsụ ishi; ọ wata aphụ ụzo?”

Ndu Jiu ajika Jizọsu

²²O rwua teke aabọ iphe lẹ Jierúsalemụ, bụ iya bụ ọbo-iphe, eegudeje anyata teke ono, a kpụ-ghechaaru eze-ulo Chileke bya eworu iya ye iya l'ẹka ono. Teke ono bụru l'udzumini.

²³Jizọsu nọdu ejephe l'ime eze-ulo Chileke ono l'oma Onuzo-Sólomonu.

²⁴No iya; ndu Jiu bya adọ-pee ya mgburugburu sụ iya: “? Bụkpohunaa a -nọ-beru inoberuagha ẹme l'i mee g'unme rwua anyi ọhu-ẹpho? Ọ -bụru ngu bụ Kéreshi ọbu; pfukahunuru anyi.”

²⁵Jizọsu sụ phẹ: “Mu pfuhaakwaru iya unu; unu jịka ekweta. Iphe, bụ ozi ono, mu eje ono, bụ ozi, Nna mu ziru mu gẹ mu jee ono bụkota iphe, agbaru mu ekebe;

²⁶obenu l'unu te kwetakwarupho; kele unu ta ayidu lẹ ndu ọphu bụ aturu nkemu.

²⁷Sụ-a; aturu nkemu anugbakwaa olu mu; mu maru phẹ; ephe nọdu awuje etso mu.

²⁸Iphe, mu anuje phẹ bụ ndzụ ojejoje; ẹbe ephe ayidu laa l'iswi; ẹbe ọ dukwapho onye byaru anafu phẹ l'ẹka mu.

²⁹Oo Nna mu, bụ iya yeru phẹ l'ẹka mu bụ onye kakota shii; ẹbe ọ dudu onye adu ike anafu phẹ l'ẹka Nna mu ono.

³⁰Mbedua mu lẹ Nna mu bụkwa nanu.”

³¹No iya; ndu Jiu kwakokwaa mkpuma k'ugbo ẹbo g'ephe tugbua ya.

³²Jizọsu sụ phẹ: “Mu goshiakwaru unu igwerigwe eguru ozi, shi Nna mu l'ẹka. ? Bụkpohunaa ole l'iphe ono, mu meshiru ono bẹ unu zọberu eme g'unu gude mkpuma tugbua mu?”

³³Ndu Jiu ono sụ iya: “Ọ tọ bụkwa k'eguru ozi ngu bẹ anyi gude eme g'anyi gude mkpuma tugbua ngu. Ọ kwa l'iipfurwushi ẹpha Chileke. Noo kele ọo gube nemadzu mmanu woru onwongu mebe Chileke.”

³⁴Jizọsu jia phẹ sụ phẹ: “? Te denuru iya-a l'ekwo ekemu unu sụ lẹ Chileke suru l'unu bugbaa chi l'ẹhu l'ẹhu.

³⁵A makwaru-a l'iphe, e deru l'ekwo-opfu Chileke te enwedu echikpohu. Ọ -bụru lẹ Chileke kuru ndu ono, o yeru opfu iya l'ẹka ono chi l'ẹhu l'ẹhu;

³⁶? ọ nwuru inwu-agha bẹ unu suru l'ọo epfurwushi bẹ mu epfurwushi ẹpha Chileke; opfu lẹ mu suru l'ọo mbedua bụ Nwa Chileke ọbu? Mbụ-a; ọ kwa Chileke ono hotaru mu; bya ezia mu gẹ mu bya lẹ mgboko.

³⁷Ọ -bụru l'iphe-a, mu emegbaa te eshidu l'ẹka Nna mu; unu te ejekwaro ekweta nkemu.

³⁸Teke o bukwanu l'o bu-a iphe, shi l'ẹka Nna mu be mu emegbaa; unu kwetakponu l'iphemiphe ono, mu eme ono shi l'ẹka Nna mu; m'o betaruro ophu unu ekwetadu ke mbedua. Unu -kweta; oo ya bu l'o doo unu enya; teme unu amakwarupho le Nna mu no mu l'ime; mu nodu Nna mu ono l'ime."

³⁹Ephe wu-lihukwa ozo g'ephe gude iya; o nyikofu gbalala.

⁴⁰O tugbukwaa ozo je adabua Jiodanu lufu azu iya ophuu jerwua aka ono, Jionu shi anoduje emeshi baputizimu le mbu pho je anodu l'eka ono.

⁴¹A du igwerigwe wu-pfuta iya. Ephe nodu epfu su: "O to dukwa iphe-ohumalenya, Jionu meru; ole iphe, bukpo iphe Jionu pfuru k'ehu nwoke-a bukotakwa okpobe-opfu."

⁴²A dukpo igwerigwe kweta ke Jizosu l'eka ono.

Jionu 11

Onwu Lazarosu

¹Noo ya; o duru nwoke lanu, aza Lazarosu, bu onye Betani; iphe nodu eme iya. Betani bu mkpuku, Meri yele nwune iya ke nwanyi, bu Mata bu.

²Meri ono bu nwanyi ono, mecharu wota manu, eshi mkpo bya etee Nnajiuphu l'okpa labo; gude egbushi iya huchaa ya ya-a. O buru nwune iya ke nwoke bu Lazarosu ono, be iphe eme obu.

³Tobudu iya bu; unwune iya ke nwanyi phe zia ozi g'e zia Jizosu l'onya iya-a, o yeru obu-a be iphe-ememe zupyabekwaru.

⁴Jizosu numae ya pho bya asu: "Ehu ono te emekwa iya k'anwuhu. O kwa iphe, ee-gude kwabe Chileke ubvu; bya egudekwa iya pho jaa Nwa Chileke ajaja."

⁵Jizosu yekporu Mata obu; me nwune iya ke nwanyi; me Lazarosu.

⁶Noo ya; Jizosu numachaepho l'iphe-ememe zupyaberu Lazarosu; o kpo upfu nofua abali labo l'eka ono, o no ono.

⁷E mecha; o su ndu etsoje iya nu: "Unu g'anyi laphu azu le Jiudiya."

⁸Ndu etsoje iya nu su iya: "? O kwa l'o bu-a mgboru nta-a be ndu Jiu shi eme g'ephe tugbuwa ngu le mkpuma-a? O buru iya be i suru l'ii-laphu azu l'eka ono ozobaa."

⁹Jizosu su phe: "? Tobudu awa iri l'ebo du l'eswe ujiku ophu? Onye eje iphe l'eswe te evukotajekwa iphe daa; kele onye ono gude iphoro ke mgboko-a ahuma uzo.

¹⁰Obenu l'onye eje ije l'enyashi evukotaje iphe daa opfu l'iphoro ono ta adudu iya l'ehu."

¹¹O pfughechaepho iphe ono; o sụ phẹ: “Ọnyà anyi, bụ Lazarosu bẹ mgbenya tṛakwaru; ọle mu e-jekwa ekutee ya lẹ mgbenya ọbu.”

¹²Ndu etsoje iya nṛ sụ iya: “Nnajiuphu! O -nṛdu ekuwaa mgbenya bẹ o bṛanaa ya ewekorohu.”

¹³Kẹle ndu etsoje iya nṛ gbẹ dobesu l'oo mgbenya mmanṛ bẹ o sṛru l'ooku. Eṛphe ta amadu l'iphe, Jizosu epfu bṛ l'o nwuhuwaru anwuhu.

¹⁴Tobudu iya bṛ; Jizosu pfuaru phẹ iya hoo haa sụ phẹ: “Lazarosu nwuhuakwaru.”

¹⁵“Teme o bukwaruro l'iswi ehu unu bẹ ehu gude atso mu utso lẹ mu ta anodu l'eka ono. Oo iphe ono e-me g'unu kweta. Olo o bṛ; unu gbalihu g'anyi jepfu iya.”

¹⁶Tomosu, bṛ onye eekuje “Ejima” sụ ndu g'ephe tṛkoru etsoje Jizosu: “Unu g'anyi tsofukwaarupho Nnajiuphu; k'ophu anyi l'iya a-nwuhukota l'eka lanu.”

Jizosu l'onwiya bṛ eteta l'onwu bṛru ndzu

¹⁷Tobudu iya bṛ; Jizosu byaepho; o hṛma lẹ Lazarosu bẹ a gbẹ liwanṛ o nṛwanu ujiku eno l'ilu.

¹⁸Betani nokwaa ntse lẹ Jierusalemu. O bṛa; a -gbẹ lẹ manyiru labo mẹ e -shi lẹ Jierusalemu.

¹⁹Noo g'o shitaru; ndu Jiu dṛ igwerigwe wṛru byapfuta Mata yeṛle Meri; byaru phẹ akporu iphu kẹ nwune phẹ ono, nwuhuru nṛ ono.

²⁰No iya; Mata nṛmaepho lẹ Jizosu abya; o gba iya ndzuta. Meri gwodoshihuro l'ulo.

²¹Mata sụ Jizosu: “Nnajiuphu; o -bṛ l'i nṛ l'eka-a mẹ nwune mu nwoke ono tege anwuhukwa.

²²Ole nta-a bẹ mu makwaru-a l'iphe, bukpo iphe, i sṛru Chileke g'o nṛ ngu bẹ oo-nṛ ngu.”

²³Jizosu sụ iya: “Nwune ngu nwoke e-tetakwa-a ozo nṛdu ndzu.”

²⁴Mata sụ iya: “Mu makwaru-a l'oo-teta ozo dzuru ndzu mboku ikpazu teke nemadzu l'ophu e-shi l'onwu teta bya anoduchaa ndzu.”

²⁵Jizosu sụ iya: “O kwa mbedua bṛ eshi l'onwu teta bya aburu ndzu. Mbṛ l'iphe, bṛ onye kwetarṛ nkemu a-nṛdu ndzu o betakporu o nwuhu anwuhu.

²⁶Temanu; iphe, bṛ onye nṛ ndzu bya ekweta nkemu taa byadu anwuhu anwuhu jasṛ lẹ tuutuutuu lẹ mijiimii. ? I kwetarṛ opfu mu ono; toṛ ti kwetaduru?”

²⁷Mata sụ iya: “Ee; Nnajiuphu. Mu kwekwaru-a l'oo ngu bṛ Kereshi ọbu, bṛ Nwa Chileke, bṛ iya bṛ onye ọbu, a-bya lẹ mgboko.”

Eṛnya-mini ghakashihuru Jizosu l'enya

²⁸Mata pfuchaa nno bya alaa je ekuchi nwune iya Meri ekuchi; to nwehu pfuaru iya sụ iya: “O-zì-iphe nokwa l'eka-a; mbṛ l'ookukwa ngu oku.”

²⁹Anuma, Meri anuma iya; o zilihu gbapfushia Jizosu.

³⁰Teke ono be Jizosu teke abatakpokwanu l'ime mkpukpu ono. O nokwadurolẹ mgbadagba pho, Mata jepfuru iya pho.

³¹Ndu Jiu ono, ephe le Meri no l'ulo; ephe nodu adu iya obu ono wufuta wu-tsuru iya g'ephe humaru g'o gbalihuru kwofu etezi. Ephe gbẹ dobesu l'ooje l'ilu eje ara ekwa l'eka ono.

³²Noo ya; Meri byarwutaepho l'eka Jizosu no; bya ahumae ya pho; o daa kpurumu l'aguga okpa iya su iya: "Nnajiuphu! O -bu li nohawaa l'eka-a me nwune mu nwoke-a tege anwuhukwa."

³³Jizosu humaepho Meri g'ora ekwa me ge ndu Jiu, ephe le Meri ono swi tukoru ara ekwa; ehu ghuahaa ya egu; teme o rwuhukwa iya pho l'ehu.

³⁴O su phe: "? Bu l'awe be unu liru iya?" Ephe su iya: "Nnajiuphu; bya bya ahuma eka obu."

³⁵Enya-mini ghakashihu Jizosu.

³⁶Ndu Jiu su: "Owiwo-e! Unu lewaro g'o yeberu Lazarosu obu-o!"

³⁷O duru ndu ophu haru su: "? O du ngu ge nwoke-a, meru onye atsu ishi; o puhahaa uzo-a tege adudu ike mee ge Lazarosu ta anwuhushi to?"

Jizosu eme ge Lazarosu shi l'onwu teta dzuru ndzu

³⁸Anwuhu Lazarosu ono ghuahaa Jizosu egu ozo; o tugbua jeshia l'ilu eka ono, e liru iya ono. Ilu ono bu ogba, e gudekwapho eze mkpuma swichia onu iya.

³⁹Jizosu su phe: "Unu swifu eze mkpuma ono." Noo ya; Mata, bu iya bu onye o bu nwune iya nwuhuru obu su iya: "Nnajiuphu! Nta-a be oobekwanu eshiwaa ishi. Ntanu-a kweakwaa ya abali eno, e liru iya."

⁴⁰Jizosu su iya: "? Mu ta asuhaadaru ngu li -kweta li gude enya ngu huma odubiribiri Chileke."

⁴¹Tobudu iya bu; ephe bya eswifu mkpuma ono. Jizosu bya apalia enya imeli su: "Nna! Mu ekele ngu ekele; li numaru olu mu.

⁴²Mu makwaru-a l'o to dudu teke i ti nujajedu olu mu. Obenu l'oo iswi ehu ndu-a, pfu-kube eka-a be mu gude epfu owa g'ephe ekweta l'oo ngu ziru mu ge mu bya."

⁴³O pfuchaepho nno bya arashia ya ike su: "Lazarosu! Lufuta!"

⁴⁴Nwoke ono, nwuhuru anwuhu ono futa yele ekwa ochaa ono, e gude phuchia ya eka me okpa; me ekwa odzu ophu e gude phuchia ya iphu. Jizosu su phe: "Unu toshichaa ya iphe ono g'o tugbua."

Ndu-ishi achu idzu egbu Jizosu

(Mat 26:1-5; Mak 14:1-2; Luk 22:1-2)

⁴⁵Igwerigwe ndu Jiu ono, wutsoru Meri ono gude ɛnya phẹ hụma iphe ono, Jizọsu meru ono; bya ekweta nkiya.

⁴⁶Obenu l'ọ duru ndu ọphu jepfulerua ndu Fárisii je akọoru phẹ iphe, Jizọsu meru.

⁴⁷Tọbudu iya bụ; ndu-ishi uke Chileke mę ndu Fárisii bya akpakọo ọgbo-ikpe, ẹphe l'ẹphe ekpeje ikpe sụ: “? Anyi e-mekpọo iphe-a ime-agma? Nwoke-a emeshinụkakwa igwerigwe iphe-ọhumalenya.

⁴⁸Teke anyi haru iya g'o mee iphe-a, oome-a bẹ onyemonye a-tụkokwa kweta nkiya; ndu Romu a-byakwa atuko eze-ulo anyi-a mę ndu ndu-anyi l'ọphu lwua rengurengu.”

⁴⁹Obenu l'onye lanu l'ime phẹ, ẹpha iya bụ Kayafasu, bụ iya bụ onye-ishi ndu-ishi uke Chileke k'apha ono suru phẹ: “Unu ta amakwa iphe ilile.

⁵⁰? Unu ta amadu l'ọ karu anyi ree g'onye lanu nwuhu-chiru ndu Jiu l'ọphu; eme l'onye lanu no ndzu; ọha l'ọphu tuko buru mkpurupyata.”

⁵¹Iphe ono, o pfuru ono ta abukwa ike k'onwiya bẹ o gude pfua ya. Obenu l'eshi ọphu o bụ iya bụ onye-ishi ndu-ishi uke Chileke k'apha ono bẹ o humaru lẹ Jizọsu e-mechaa nwuhu-chiru ọha l'ọphu.

⁵²Ọ tọ bukwa-a ọha ono nwẹkiya bẹ ọo-nwuhu-chiru. Ọ kwa g'ooshi nno chikobe unwu Chileke ono, gbakashihuru dzuru mgboko ono g'ẹphe buru nanu.

⁵³Ọo ya bụ; ndu-ishi ndu Jiu shi eshi mboku ono chiahaa idzu g'ẹphe e-me megbua Jizọsu.

⁵⁴Ọ bunuru iya bụ lẹ Jizọsu akpabuhu l'edzudzu-ọha l'echi ndu Jiu. Ọ gbeshi l'eka ono jeshia ali, no-kube echiegu bya alaa lẹ mkpukpu, no l'eka ono, eekuje Ifuremu. Ọ laa eka ono je anodu yele ndu etsoje iya nu.

⁵⁵Teke ono bẹ ọbo Ojaghata ndu Jiu rwukpwaru ntse. A du igwerigwe shigbaa l'ali ndu Jiu eje Jierusalemu g'ẹphe je emee nsọ aswafu onwophe nturuwu; teme l'oorwua l'obo-iphe ono.

⁵⁶Ẹphe tuko elephe ɛnya Jizọsu. Ẹphe dzukoephọ l'eze-ulo Chileke; ẹphe nodu ajijegbaa nwibe phẹ sụ: “? Denukpoo g'unubedua arị iya? ? Ọ du unu g'ọ tọ byadu obo-iphe-a tọ?”

⁵⁷Ndu-ishi uke Chileke mę ndu Fárisii tubuhawaru sụ l'ọ -buru l'ọ duru onye maru eka o no; g'onye obu mee g'ẹphe maru k'ọphu ẹphe e-je egude iya.

Jionu 12

Aawu Jizọsu manụ, eshi mkpọ lẹ Betani

(Mat 26:6-13; Mak 14:3-9)

¹Ọ ghuduepho abali ishii teme l'a bahu l'obo Ojaghata ono; Jizọsu tugbua jeshia Betani. Betani bu mkpukpu, Lazarosu bu, bu iya bu nwoke ono, Jizọsu mejeru; o shi l'onwu teta nodu ndzu pho.

²O rwua l'eka ono; ephe shiaru iya ite ebyaa. O buru Mata akwakoru phe nri; yebedua, bu Lazarosu yiru le ndu ephe le Jizosu eri nri ono.

³No iya; Meri gbeshiepho je ewota mgbere manu, eshi mkpo, a zuru oke aswa; mbu manu, e gude nadu, guru egugu mee. O wota iya gude bya awua Jizosu l'okpa bya egude egbushi iya huchaa ya okpa obu. Mkpọ manụ ono tuko ulo ono voo pfurupfuru.

⁴O buru iya bu le Jiudasu Isukariyotu, yi le ndu etsoje Jizosu, bu iya bu onye ono, mechaaru deru iya ye-a; tufuepho onu su:

⁵“? Buna-a gunu be e te wotaduru manua je eree reta ukporo pangu le pangu iri gude je ekeeru ndu adudu g'o du phe?”

⁶Iphe, Jiudasu gude pfua iphe ono ta abukwa l'oo g'o letaberu ndu adudu g'o du phe enya. Iphe, o gude pfua ya bukwa l'o bu iphuru; o buru iya egudeje ekpa, okpoga phe aduje; o nodu ezitaje iphe, e yeru iya.

⁷Jizosu su iya: “Paru nwanyi haa! Haa ya g'o kwakobe iphe, o gude ngaberu mboku, ee-li mu.

⁸Unu le ndu adudu g'o du phe ano tekenteke; obenu le mbedua ta abyaduru ke ge mu l'unu buwaruro bupyabe.”

Idzu g'e gbua Lazarosu

⁹O be teke igwerigwe ndu Jiu numaru l'oo le Betani be Jizosu no; ephe wuru jeshia eka ono. O to bukwa Jizosu be ephe choru jee kpurumu. Ephe jekwarupho g'ephe huma Lazarosu, bu iya bu onye ono, o meru; o shi l'onwu teta ono.

¹⁰Ndu-ishi uke Chileke chikwaapho idzu l'ephe e-gbufukwaapho Lazarosu.

¹¹Ishi iphe, ephe gude su l'ephe e-gbu iya bu l'oo opfu ehuru Lazarosu ono be igwerigwe ndu Jiu gude anashihu ndu-ishi phe agbakashihu ejgbaa eworu onwophe ye l'eka Jizosu.

Jizosu abahu le Jierusalemu

(Mat 21:1-11; Mak 11:1-11; Luk 19:28-40)

¹²O rwua nchitabohu iya; igwerigwe oha ono, byaru k'obo Ojehgata ono numa le Jizosu abya Jierusalemu.

¹³O buru iya bu ephe gbafutachaa je egbukoo ekwo-igu gude gba iya ndzuta. Ephe nodu akpo okwe asuje: “G'ajaja buru ke Chileke! Onu-oma tsoru onye ono, shi l'eka Nnajiuphu anyi, bu Chileke abya ono! G'ajaja buru ke Eze ndu Izurelu!”

¹⁴No iya; Jizosu bya ahuma nwa nkafu-igara bya ano-koru iya, bu iya bu iphe obu, e deru l'ekwo Opfu Chileke su:

¹⁵“Ge ndzu ta agukwa ngu nwada Zayonu! Le nta-a be onye-eze ngu noakwaa l'eli nwa nkafu-igara abya! ”

¹⁶Ebe iphe ono eshidu edoje ndu etsoje iya nu enya le mbu. Ole o -rwuerupho ge Chileke kubataru Jizosu l'imigwe; kwabe iya ubvu, paru eka; ephe gbete teke ono rita

iphe ono, e deru ke nkiya ono; l'ephe mewaru iya iphe ono, ekwo-opfu Chileke pfuru ono.

¹⁷Teke ono, Jizosu kuru Lazarosu oku; mee ya o dzukwaru ndzu ozo; shi l'eka e liru iya futa ono be a du igwerigwe nodu l'eka ono. O buru igwerigwe ndu ono be pfukashiru ndu ozo iphe ono, nwuru nu ono.

¹⁸Noo iphe, meru g'o gude a du igwerigwe nno gba iya ndzuta. Ephe numahawaru l'oo Jizosu be meru iphe-ohumalenya ono.

¹⁹Ndu Farisii pfuaaha l'ime onwophe asuje: “Unu ahuma. Idzu anyi obu arwuhuhanaa. Unu lewaro ge mgboko l'ophu zelihuru awu etso iya.”

Ndu Gurisu haru achu Jizosu

²⁰Ndu shi l'ali Gurisu haru yiru le ndu jeru abaru Chileke eja le Jierusalemu g'aabo iphe ono.

²¹Ndu ono bya ahuma Filipu; Filipu bu onye Betusayida, bu mkpukpu, no le Galili. Ephe wupfu iya je asu iya: “Nwoke-ibe mu! ? Denu g'eeme g'anyi le Jizosu huma?”

²²Oo ya bu; Filipu je epfuaru iya Anduru. Anduru ye le Filipu swiru je epfuaru iya Jizosu.

²³Noo ya; Jizosu su phe: “Nta-a be o rwuakwaru teke aa-huma Abubu-Ndiphe l'odu-biribiri iya.

²⁴Ge mu gbukwaaru iya unu tororo; akpuru ereshi -adabaduru l'ali rehu ewa be o noekwapho g'o no. Ole o -rehukwanu be omije deru yekete.

²⁵Onye yeru enya le ndzu iya l'e-tuphakwa iya etupha; ole onye kporu ndzu iya ashile le mgboko-a l'e-gude iya gbata ndzu ojeje.

²⁶Onye o du iya g'o buru onye ejeru mu ozi g'onye obu bya etsoru mu g'oo-bukwanuru eka mu no be onye obu, ejeru mu ozi obu a-nodu. Onye bu onye ejeru mu ozi be Nna mu a-kwabekwa ubvu.”

Jizosu opfu opfu onwu iya

²⁷“Su-a; o kwa nta-a be obu etsu mu mini. ? Bu gunu be mu e-pfu? ? Bu ge mu su Nna mu g'o dzoo mu le nta-a? Tuswekwa! O kwa iphe, abya eme nta-a be mu byadoru.”

²⁸“Nna! Mena g'a huma odu-biribiri du l'epha ngu.” Tobudu iya bu; o duru olu, shi l'imigwe su: “Mu meakwaru a huma odu-biribiri ono; mu jekwapho emebaa g'a humabaa ya ozo.”

²⁹Igwerigwe oha ono, pfukube eka ono numa iya; ephe su l'oo igwe deru edede. Ndu haru su: “O kwa ojozi-imigwe pfuru yeru iya!”

³⁰Jizosu su phe: “O kwa unu be e pfudoru opfu ono; o to bukwa mbedua be e pfudoru iya.

31 Ọ kwa nta-a bẹ Chileke e-kpe ndu mgboko-a ikpe. Ọ kwa nta-a bẹ aabya echikpo ike k'onye ono, bu iya bu onye-ishi ndu mgboko-a.

32 Mbẹdua bẹ teke ono, ee-shi l'alị wolia mu eli ono bẹ mu a-tuko onyemonye sekuta g'ẹphe tsoru mu.”

33 Iphe ono bẹ o pfuru gude goshi gẹ ya e-gude nwuhu.

34 Igwe ọha ono sụ iya: “Anyi nṃmawaru iphe, e deru l'ekwo ekemu sụ lẹ Kéreshi ọbu anọduwaro ndzụ jasụ l'ojejoje. ? Denuhunu g'o gude i gbẹ sụ lẹ Abubu-Ndiphe nwuhufutaje? ? Bụkpohunaa onye bu Abubu-Ndiphe ọbu?”

35 Jizosu sụ phẹ: “Ìphóró ono bụfukwa nwanshii bẹ ọo-nofua l'echilabo unu. Ọphu g'unu lobaru ije nta, ìphóró duru unu; a -nonyakwa ọchii byapfuta unu. Noo kele onye eje ije l'ọchii ta amajekwaru ẹka o phuku eshi.

36 Ọphu g'unu kweta woru onwunu sẹe ase l'ìphóró ono teke ìphóró ono dukwadu swiru unu g'unu aburu ndu bu l'ẹka ìphóró dụ.” Jizosu pfughechaepho nno bya atugbua je edomia onwiya; ọphu ẹphe ahumaheduru iya.

Ndu Jiu bu ekwegekwe

37 Ọ bu eviya l'o mehawaru iphe-ohumalenya, dụ igwerigwe l'iphe phẹ; ọle ẹphe te ekwedu woru onwophe ye iya l'ẹka.

38 Ọ buru iya bu l'iphe ono, Azáya, bu onye mpfuchiru Chileke pfuru ono avukota g'o pfuru iya. Ọ suru: “Nnajiuphu; ? bu onye kwetakporu ozi, anyi ziru? Tọo ? bu onye bẹ Chileke goshiru ike, shi iya l'ẹka?”

39 Noo g'o shitaru; ẹbe ẹphe ekwetaduru. Lẹ Azáya pfukwarupho ọzo sụ:

40 “Chileke mewaru phẹ; ẹphe tsuhaha ishi; bya emewaa phẹ g'ẹphe kpochia ọkpoma g'ee-shi g'o tọ duhe iphe, ẹnya phẹ a-humaje; ọzoo k'ọphu ọriri e-rwu phẹ l'ọhu ẹpho; g'ẹphe gbanwee byapfuta mu gẹ mu mee phẹ g'ẹphe wekorohu.”

41 Ọ buru Jizosu bẹ Azáya epfu opfu iya ono. Iphe, o gude pfua iphe ono bu l'ọ humahawaruro ọdu-biribiri iya.

42 G'e jia epfua bẹ a duna-a igwerigwe kweta l'ọo ya bu onye ọbu, Chileke yeru g'o bya ọbu; mbu lufuchaa lẹ ndu-ishi kwetachaakwaru l'ọo ya. Ọle ẹphe ta adudu ike pfufuta iya; kele ẹphe atsunuka ndu Fárisii ebvu; a -nonyakwaa; a kpochia phẹ mkpochi sụ g'ẹphe ta abatajẹhe l'ulo-ndzukọ.

43 Noo l'ẹphe ka eye ẹnya l'ajaja ọphu ndiphe aja phẹ; eme l'ajaja ọphu Chileke gege aja phẹ.

Opfu, Jizosu pfuru e-kpe nemadzụ ikpe

44 Jizosu raa ya arara sụ: “Onye kwetarụ nkemu ta abukwa-a nkemu bẹ o kwetarụ kpoloko; o kwetakwarupho k'onye ono ziru mu nụ ono.

45 Onye humaru mu nụ humaakwarupho onye ono, ziru mu gẹ mu bya ono.

⁴⁶Mbèdua l'onwomu byaru gè mu bya aburu ìphóró dùru ndiphe; k'òphu a-buru; onye kwetarù nkemu; onye ono taa nõduhedu l'òchii.

⁴⁷Onye numachaarù iphe-a, mu epfu-a; èbe o medu iya ememe; bè ta abukwa mu e-kpe iya ikpe; kèle mu ta abyakwaru ekpe ndiphe ikpe. Iphe, mu byaru bukwa gè mu dzòo ndu mgboko.

⁴⁸Onye jìkaru mu nù; bya ajìka anata opfu, mu epfu bè ò dukwaruro onye e-kpe iya ikpe. Oo opfu ono, mu pfuru ono bè bụ iphe, a-nma iya ikpe lè mbòku ikpazù.

⁴⁹Ishi iya bụ l'iphe, mu epfu ta abudu ike èka mu bè mu gude epfu iya. Oo Nna mu ono, ziru mu; mu bya ono gude onu iya goshi mu iphe, mu e-pfu; kakwaru mu phò gè mu e-pfu iya.

⁵⁰Mu makwarupho l'iphe ono, ò sùru gè mu pfua ono anuje ndzù ojejoje. Oo ya bụ l'iphe, bụ iphe, mu epfu buèpho iphe, Nna sùru gè mu pfua bè mu epfu.”

Jiõnu 13

Jizõsu akwõ ndu etsoje iya nù òkpa

¹O ghuduepho ujiku lanù; l'a bahù l'òbo Ojeghata ono; Jizõsu mawaru lè teke ya a-ha mgboko òwa; lapfushia Nna iya rwuwaru. Jizõsu shiepho lè mbù yee ndu bụ ndu nkiya lè mgboko-a obu; mbù yee phè iya phò yerwua l'ishi.

²Noo ya; Jizõsu yele ndu etsoje iya nù tũko nõdu eri nri-ènyashi. Obutuswe yehawaruro Jiudasu Isukariyõtu, bụ nwa Sayimonu oriri l'obu g'o je ederu Jizõsu ye l'èka ndu ohogu iya.

³Jizõsu maèkwarupho lè Nna iya yekõtaru iya iphemiphe l'èka; maru l'òo l'èka Chileke bè ya shi; tème ò bukwarupho Chileke bè ya alapfu.

⁴Tõbudu iya bụ; Jizõsu gbalihu l'èka ò nõ eri nri-ènyashi ono bya achiru uwe èhu iya wùshi; chĩa anamù nmarù l'upfu.

⁵O bya ekuru mini ye lè gbamugbamù wata akwõ ndu etsoje iya nù òkpa; bya egude anamù phò, ò nma l'upfu phò ehucha phè iya.

⁶Tõbudu iya bụ; o -rwuepho l'èka Sayimonu Pyita nõ; Pyita sù iya: “Tuswekwa! Nnajiuphu! ? Buchia gbèdua abya mu akwõ òkpa?”

⁷Jizõsu sù iya: “Iphe, mu eme bè ì tì makwa nta-a. O kwa l'e mechaa bè oo-do ngu-a enya.”

⁸Pyita sù iya: “Ephokwarò k'akwõ mbèdua òkpa ephopho ophu.” Jizõsu sù iya: “Mu akwõduru ngu òkpa bè mu lè ngu tee megbakwa.”

⁹Sayimonu Pyita sù iya: “Jikokwa! Nnajiuphu! O -dù nno bè ò tò bukwa òkpa bè ìi-kwõ mu kpeèkpu; tũkokwa mu èka mè ishi sakõta.”

- 10**Jizosu sụ iya: “Onye a wụwaru ẹhu bẹ mkpa awụ ẹhu ọzo aduhokwaru. Ọo ọkpa bẹ onye ọbu akwoje eshi ọphu inyi aduhedu iya l'ẹhu ilile. Unu tukuraru dụ ree; ọle ọ tọ bụdu g'unu ha dụ-gbua ree.”
- 11**Iphe, Jizosu gude sụ l'ọ tọ bụdu g'ẹphe ha dụ-gbua ree bụ l'ọ mawaru onye ọphu bụ iya e-deru iya ye l'ẹka ndu ọhogu iya.
- 12**No iya; ọ kwochae pẹ pho ọkpa ono; ọ chita uwe ẹhu iya yee bya alaphu azu l'ẹka o shi nọdu bya aja pẹ sụ: “? Unu makporu iphe ono, mu meru unu ono?”
- 13**Iphe, unu anọduje eku mu bụ ‘O-zì-iphe’ bya eku mu ‘Nnajiuphu’. Ọphu unu ekuswekwaru; kele ọ bukwa iphe onoya bẹ mu bụ.
- 14**Ọle-a; eshi ọphu ọ bụ mbẹdua, bụ Nnajiuphu unu bya aburu onye ezije unu iphe bẹ gbẹchia bya akwo unu ọkpa; bẹ ọ gbakwaru g'unu jenu je akwoje nwibe unu ọkpa ẹgube ono, mu kworu unu ono.
- 15**L'ọ kwa iphe, unu e-letajẹ eme bẹ mu meru goshi unu ono; g'unu eletajẹ iya mee ge mu meru unu ono.
- 16**Lẹ-a; gẹ mu gbukwaaru iya unu tororo; nwokoro ta akajekwa nnajiuphu iya shii; ẹbe onye e ziru ozi akajekwa onye ziru iya ozi shii.
- 17**Unu makotawaru iphemiphe ono. Ọ -buru l'unu tukuru iya eme ememe bẹ Chileke a-gokwaru ẹhu-utso nụ unu.
- 18**“Ọ tọ bukwa unu g'unu ha bẹ mu epfu opfu-a anụ. Mu makotakwaru gẹ ndu mu hotaru gbaru. Ọle iphe, e deru l'ekwo-opfu Chileke wufutajenupho g'e deru iya, bụ iya bụ iphe, sụru: ‘Ọ kwa onye ono, mu l'iya rigbaaru nri; mechaaru bya emeahaa iphe, a-tsuru mu nụ.’
- 19**Mu epfukwaru iya unu nta-a, o toko rwudu-a; k'ọphu bụ; ọ -nwujẹ; unu ekweta l'ọo mbẹdua bụ onye ọbu.
- 20**Gẹ mu gbukwaaru iya unu tororo; onye bụ onye nataru onye mu ziru ozi nataakwaru mbẹdua. Onye natakwaru mu nụ nataakwarupho onye ono, ziru mu gẹ mu bya ono.”

Jizosu epfu l'ee-deru iya ye ndu ọhogu iya l'ẹka

(Mat 26:20-25; Mak 14:17-21; Luk 22:21-23)

- 21**Jizosu pfuchaa nno; meji tsua ya pharamu. Ọ sụ pẹ: “Gẹ mu gbukwaaru iya unu tororo; ọ kwa onye lanu lẹ g'unu ha-a l'e-deru mu ye.”
- 22**Ndu ono, etsoje iya nụ ono tuko legbaa nwibe pẹ ẹnya; ẹka iphe ono tufuru pẹ ẹhu; ẹbe ẹphe amadu onye oopfuru.
- 23**Onye lanu lẹ ndu ono, etsoje iya nụ ono, bụ iya bụ onye ọphu Jizosu kakota eye obu bẹ nọ-kubekwa iya pho ntse teke ono.
- 24**Tobudu iya bụ; Sayimonu Pyita tabuaru iya ẹnya sụ iya g'ọ jitaekwa iya onye oopfuru.

²⁵Ọ bya akpọ-kubebaa Jizọsu ntse bya asụ iya: “Nnajiuphu! ? Bụ onye bẹ iipfu ama ẹka?”

²⁶Jizọsu sụ iya: “Ọo onye ono, mu a-nụ ibiribe buredi, mu tsutarụ l'iphe-a, eeri nri-a bụ onye ọbu.” Ọ bya etsutaepho ibiribe buredi ono; o woru iya nụ Jiudasu Isukariyotu, bụ nwa Sayimonu.

²⁷Jiudasu tachaepho buredi ono; Nsetanu pheba iya l'ehu. Ọ bụru iya bụ lẹ Jizọsu asụ iya: “Iphe, bụ iphe, ìbya ememe mee ya egwegwa.”

²⁸Èbe ọ dudu ndu ono, nọ l'ẹka ono, eeri nri ono, duru onye ọphu maru iphe, ọ zọberu pfiaru iya nno.

²⁹Ndu arịa sụ l'eshi ọphu ọ bụ Jiudasu, l'egudeje ẹkpa okpoga pñe bụ iphe, Jizọsu epfuru iya bụ g'ọ zutachakwaa iphe, ephe gude eme k'obo-iphe; ọzoo l'iphe, Jizọsu pfuru Jiudasu bụ g'ọ nụ ndu ukpa iphe.

³⁰Ọo ya bụ; ọ natachaepho ibiribe buredi ono; ọ tugbua lufushia; nchi jihuanaa.

Ekemu ọphúú

³¹Jiudasu tugbuchaepho; Jizọsu sụ: “Ọo nta-a bẹ e goshiru ọdu-biribiri ke Abubu-Ndiphe. Ọ bukwarupho l'ẹka iya bẹ ee-shi hụma ọdu-biribiri ke Chileke.

³²Ọo ya bụ; ọ -buru lẹ Abubu-Ndiphe meru g'a hụma ọdu-biribiri ke Chileke; nokwapho ge Chileke e-me g'e shi l'ẹka nkiya hụma ọdu-biribiri ke Abubu-Ndiphe; mbukwa nta-a bẹ oo-me g'a hụma ọdu-biribiri iya ọbu.

³³Unwu mu! Mu l'unu ta anọhekwa iphe, barụ ishi nta-a; unu achọahaa mu. Ọle ọo iphe ono, mu pfuru ndu Jiu ono bẹ mu epfukwarupho unu nta-a. ‘Eka mu eje bẹ unu taa dukwa ike abya.’

³⁴Ọ kwa ekemu ọphúú bẹ mu aturu unu. Unu yee nwibe unu obu; mbụ g'ọ buerupho ge mu yeru unu obu bụ g'unu e-yeje nwibe unu.

³⁵Ọo obu ono, unu e-ye nwibe unu ono bẹ ndu ọzo e-gude maru l'unu bụ ndu etsoje mu nụ.”

Pyita a-gọ lẹ ya ta amadu Jizọsu

(Mat 26:31-35; Mak 14:27-31; Luk 22:31-34)

³⁶Sayimonu Pyita jia ya sụ iya: “Nnajiuphu; ? bụ awe bẹ ñla ọbu?” Ọ sụ iya: “Eka mu ala bẹ ì tị dukwa ike etsoru mu ala nta. Ọ chikwa alwapfuta bẹ ii-mechaa lwapfuta mu l'ẹka ono.”

³⁷Pyita sụ iya: “Nnajiuphu; ? ọ nwuru ñwu-agma bẹ mu taa dudu ike etsoru ngu nta-a? Mbụ-a; mu dukwaa onwomu ree amị ẹnya lẹ ndzụ mu see iswi ẹhu ngu.”

³⁸Jizọsu sụ iya: “Aa! ? Ì sụ l'ì-dụ ike mịa ẹnya lẹ ndzụ ngu see iswi ẹhu mu? Ge mu gbukwaaru ngu iya tororo; oke-ọku nchi-abọhu -bya ara ọrà; bẹ ì goakwaru ẹgo ugbo eto sụ l'ì tị madu onye mu bụ.”

Jionu 14

Jizosu; ụzo, e shi alafu Nna

- ¹Jizosu sụ p̄h̄e: “Unu ba ayokwa ọshi l’ime obu unu. Unu woru onwunu ye Chileke l’eka; unu ewokwarupho onwunu ye mb̄edua l’eka.
- ²L’ibe Nna mu b̄e ụlo-ebubu dukwa igwerigwe. Ọ -b̄u l’o t̄o d̄u nno; ? d̄enuhunu ge mu g’eme s̄u unu l̄e mu eje unu emeru ̄eka unu a-n̄odu.
- ³Mu -jechaep̄ho je emechaerupho unu ̄eka ọbu; mu abya ọzo bya ekuta unu dokube onwomu; k’ophu b̄u ̄eka mu n̄o b̄e unu a-n̄odukwapho.
- ⁴Unu mawaru ̄eka mu ala; unu makwarupho ụzo, mu shi ala iya.”
- ⁵T̄omosu s̄u iya: “Nnajiuphu; anyi ta amakwa ̄eka ọbu, ịila ọbu. ? D̄enuhunu g’anyi shi maru ụzo iya?”
- ⁶Jizosu s̄u iya: “Ọ kwa mb̄edua b̄u ụzo; bya aburu ọkpobe-opfu; bya aburu ndz̄u. Ọ t̄o dukwa onye abyapfuta Nna; abudu l’onye ọbu shi mu l’eka.
- ⁷Mb̄u-a; ọme unu maru mu; m̄e unu amakwaru-a Nna mu. Ọle e -shi nta-a b̄e unu mawaru Nna bya ah̄umawa iya.”
- ⁸Filipu s̄u iya: “Nnajiuphu; goshinu anyi Nna ọbu ḡe meji anmapfuru anyi.”
- ⁹Jizosu s̄u iya: “Filipu; e -shi teke-a b̄e mu l’unu shi n̄oduta; ̄ebe ị makwa mu p̄ho. Onye h̄umaru mu n̄u h̄umaakwaru Nna. ? D̄enuhunu g’o gude ị n̄odu epfukwad̄u ge mu goshi unu Nna ọbu?
- ¹⁰? Ti kwetaduru l̄e mu n̄o Nna mu l’ime; Nna mu n̄odu mu l’ime. Opfu, mu an̄oduje epfuru unu ta abukwa ike k’eka mu b̄e mu egudeje epfu iya. Ọ kwa Nna ono, bu mu l’ime ono agbeje mu l’ime eje ozi.
- ¹¹Ọo ̄ep̄ho g’unu kweta l̄e mu n̄o Nna mu l’ime; Nna mu n̄odu mu l’ime; ọdumeka unu gudekp̄oonu k’ip̄he ono, mu emeshi ono kweta ip̄he, mu epfu.”
- ¹²Ḡe mu gbukwaaru iya unu tororo; onye b̄u onye kweru nkemu a-dukwapho ike mee ip̄he-a, mu emeshi-a. Onye ọbu a-kabakwaan̄u eme ọphu ka shii. Noo l̄e mu alapfuwa Nna mu.
- ¹³Ip̄he, buk̄poo ip̄he, unu gude ̄ep̄ha mu s̄u ḡe Nna meeru unu b̄e mu e-mek̄otar̄u unu. Ọo ya b̄u; g’eeshi l̄e Nwa h̄uma ọdu-biribiri k̄e Nna.
- ¹⁴Ọ -dukpowaru ip̄he, unu gude ̄ep̄ha mu s̄u ḡe mu meeru unu; mu emeeru iya unu.

Jizosu ekweta ukwe Unme-d̄u-Ns̄o

- ¹⁵“S̄u-a; ọ -b̄uru l’unu yeru mu obu; unu mek̄otaje ekemu, mu t̄uru unu.
- ¹⁶Mu e-pfuru Nna l’ooyeru unu onye N-yem̄eka ọzo, a-n̄oduwaro swiru unu jeye l̄e tuutuutu l̄e m̄iimiimii.
- ¹⁷Onye N-yem̄eka ono, Nna e-ye ono b̄u Unme-d̄u-Ns̄o, b̄u iya b̄u Unme k’ire-lan̄u; mb̄u onye ndip̄he taa natad̄u; opfu l’ep̄he ta ah̄umajeduru iya; ọphu ep̄he amad̄u iya. Ọ

bekwanu l'unubedua maru iya. Noo kele o bu ebubu swiru unu. O jekwapho anoduwaro l'ime unu.”

18“Mu taa gbahakwa unu eka. Mu a-byapfutakwa-a unu.

19Mbu l'ọ phodukwaru-a nwanshii nta-a; ndu mgboko-a taa humabaedu mu ọzo; ọle unubedua l'a-huma mu-a. Eshinu mu nọ ndzu be unubedua l'a-nodukwapho ndzu.

20O buru mboku ono be unu a-maru le mu nọ Nna mu l'ime; unubedua nodukwanu mu l'ime; mu nodukwapho unu l'ime.”

21“O kwa onye maru ekemu, mu turu bya eme iya ememe bu onye yeru mu obu. Onye yeru mu obu; Nna mu eyekwa iya pho obu. Mbedia eyekwapho onye obu obu; woru onwomu goshi iya.”

22No iya Jiudasu; o to bukwa Jiudasu Isukariyotu; su iya: “Nnajiuphu; ? denu g'ii-shi goshi anyi onwongu g'o to bu ndu mgboko be iigoshi onwongu?”

23Jizosu su iya: “Onye yeru mu obu anoduje eme iphe, mu pfuru. Nna mu eyekwanaa onye ono obu. Mu le Nna mu a-byapfuta onye obu; anyi l'iya eburu eburu.

24Onye eyeduru mu obu te emejekwa opfu mu. Unu maanaru-a l'opfu ono, unu anu ono ta abukwa opfu mu. O kwa opfu Nna ono, ziru mu ge mu bya ono.

25“Mu pfukotakwaru unu iphemiphe-a nta, mu l'unu nokwadu.

26Ole oo onye N-yemeka ono, bu iya bu Unme-du-Nso; mbu onye ono, Nna e-gude epha mu zia g'o lwapfuta unu ono be e-zikota unu iphemiphe; mekwapho g'unu nyataje iphemiphe, mu pfuhawaru unu.

27“Su-a; mu haakwaru unu ehu-guu. Ehu-guu ono buru mbedia be o shi l'eka; o to bukwa udu iya ophu eshije ndiphe l'eka be mu nuru unu. Unu ta ayojekwa oshi l'ime obu unu; ophu unu atsukwa ebvu.

28Unu numawaru ge mu suru unu: ‘Mu alaakwa; ole mu a-lwapfutakwaa unu ozo.’ O -bu l'oo iphe, unu yeru mu obu me unu etekwaa eswa; kele mu alapfu Nna; noo le Nna ono ka mu ike.

29Su-a; nta-a be mu tukoakwaru iphemiphe gheberu unu onu teke o toko nwudu. Oo ya bu; teke o nwujeru g'unu e-kweta.

30Mu te epfuekwaru unu opfu anọ odu; noo kele onye ono, bu iya bu onye-ishi ndu mgboko-a l'abyawaa. O bekwanu l'ọ to dudu iphe, ọo-du ike emebata mu.

31Iphe, o gude mu nodu emeje iphe, Nna ziru mu ge mu mee bu ge mgboko l'ophu amaru le mu yeru Nna mu obu.” O pfuchaa nno bya asu phe: “Unu gbalihu g'anyi lufu l'eka-a.”

Jionu 15

Jizosu bu okpobe vayinu

- 1“O kwa mbɛdua bu ɔkpobe vayɪnu; ɔ buru Nna mu bu onye eleta opfu-vayɪnu ono ɛnya.
- 2Iphe, bukpuo ɛkali, kapfuru mu l'ɛhu, bu ndu ophu ta amɪdu mebyi bɛ ɔo-kwashikwa. ɛkali ophu amije mebyi bɛ ɔonoduje akɔcha akɔcha ree g'ookabaa amimi.
- 3Opfu ono, mu pfuru yeru unu ono mewaru unu nta-a; unu dɛbe ree.
- 4Unu nopyabekwa mu l'ime; k'ophu mu a-nopyabekwapho unu l'ime. Oo g'ɛkali-oshi ayɪdu mɪta mebyi k'ɛka iya m'ɔ -bɛdu l'ɔ kapfuru l'oshi vayɪnu-a; bukwapo g'unu ta ayɪdu yee mebyi mɛ mu l'unu atugbaduru.
- 5“O kwa mbɛdua bu vayɪnu ono; unubɛdua buru ɛkali iya. Onye nopyaberu mu l'ime; mbɛdua nopyabe iya l'ime; onye ono a-mi mebyi mɪshia ya ike; noo kɛle ɔ tɔ dudu iphe, unu adu ike eme ililekpoo; mɛ mu l'unu atugbaduru buru nanu.
- 6Onye bu onye ta anopyabeduru mu l'ime bɛ ee-tuphakwa g'ɛkali-oshi, a kɔfuru akɔfu; l'ɔ kposhihu nku; l'a chiru iya ye l'oku; g'oku kepyashia.
- 7O -buru lɛ mu l'unu tugbaru buru nanu; opfu mu buru unu eburu l'ime bɛ ɔ tɔ dukwa iphe, bu iphe, du unu ree, unu suru g'e meeru unu, e tee meduru unu.
- 8Noo ɔzo, ee-shi goshi ɔdu-biribiri kɛ Nna mu; mbu g'unu mia mebyi mɪshikpuo ya ike gude nno goshi l'unu bu ndu etsoje mu nu.
- 9Oo gɛ Nna mu yeru mu obu bu gɛ mu yeru unu. O buru g'unu nopyabeekwapho l'ime n-yemobu ono, mu yeru unu ono.
- 10Unu -mee iphemiphe, mu suru g'unu mee bɛ unu a-nopyabekwaa lɛ n-yemobu nkemu; mbu egube ono, mu mekotaru iphe, Nna mu suru gɛ mu mee; mu nopyabe lɛ n-yemobu kɛ Nna mu ono.
- 11“Su-a; iphemiphe-a bɛ mu epfukotaru unu g'ɛhu-utso nkemu aburu k'unu; waa g'ɛhu atsɔo unu utso tsɔfu l'ishi.
- 12Wakwa iphe, mu turu unu ekemu iya baa; unu yee nwibe unu obu gɛ mu yeru unu.
- 13O to nwekwa n-yemobu ɔzo, nemadzu e-ye nwibe iya, ka ɔwa-a; mbu lɛ nemadzu gude iswi ɛhu ɔnyà iya; mia ɛnya lɛ ndzu iya kweta anwuhu.
- 14Unu bugbaa ɔnyà mu mɛ unu -nodu emeje iphe, mu suru g'unu meje.
- 15Mu tee kuhɛkwa unu ndu-ozu mu ɔzobaa; kɛle onye-ozu ta amajɛduru iphe, nnajiuphu iya eme. Iphe, mu e-ku unu bu ɔnyà mu phɛ; kɛle iphe, mu nɔmaru l'onu Nna mu bɛ mu tukowaru togboru unu ɛba.
- 16O tɔ bukwa unubɛdua hotaru mu; ɔ chikwa mbɛdua hotaru unu dobe iche; k'ophu unu a-mi mebyi; mbu mebyi, a-duwaro kwasɛru. Oo ya bu; iphe, bukpuo iphe, unu gude ɛpha mu su gɛ Nna nu unu bɛ ɔo-nu unu.
- 17Ekemu, mu atɛrɛpho unu bu g'unu yee nwibe unu obu.”

Ndumashi kɛ ndu mgboko-a

18“Teke ọ bụ l'unu dū ndu mgboko-a ashị; unu nyatajẹkwa lẹ mbẹdua vuadaa ọzo duhaadaa phẹ ashị; tẹme unu duje phẹ.

19Ọ -bụ l'ọo iphe, unu bụ ndu kẹ mgboko-a mẹ ndu kẹ mgboko-a eyee unu obu; l'unu bụ nkephe. Obenu lẹ mu shiwaa lẹ mgboko-a họtta unu dobe iche; ẹbe unu abụedu nkephe. Noo g'o gude unu dū phẹ ashị.

20Unu nyatajẹkwa iphe ono, mu pfuru unu ono; mbụ lẹ mu sūru unu lẹ nwokoro ta akajẹdu nnajūphu iya shii. Ọo g'ẹphe mekparu mbẹdua ẹhu bụ g'ẹphe e-mekpa unu. Ọ buru g'ẹphe te emejedu iphe, mu pfuru bụ g'ẹphe tee mekwapho iphe, unu epfu.

21Iphe ono g'ọ ha bẹ ẹphe a-tuko mee unu; opfu l'unu bụ ndibe mu; kele ẹphe ta amadu onye ono, bụ iya bẹ mu shi l'eka bya ono.

22Ọ -bụ lẹ mu ta abyawaa bya epfuru yeru phẹ mẹ ọ tọ bukwa phẹ eme iphe-ẹji; obenu lẹ nta-a, mu byawaru-a bẹ o to nwekwa iphe, ẹphe gude agofo k'iphe-ẹji, ẹphe meru.

23Iphe, bụ onye mu dū ashị bẹ Nna mu dukwapho ashị.

24Ome mu ta anodu l'echilabo phẹ meshia iphe, onye ozo taa dudu ike eme; mẹ ọ tọ bukwa phẹ eme iphe-ẹji. Obenu lẹ nta-a bẹ ẹphe humawaru iphe, mu meshiru; mu dū phẹ ashị; Nna mu dukwa phẹ pho ashị.

25Iphe ono, ẹphe eme ono je emee ọ vua; mbụ iphe ono, e deru l'ekwo ekemu phẹ sū: 'Mu dū phẹ ashị; ẹbe ọ bụ l'ọo duru iphe, mu meru phẹ.'

26“Mu e-shikwa Nna mu l'eka zia Onye N-yemeka ono; l'ọo lwapfuta unu. Onye N-yemeka ono bẹ bụ iya bụ Unme-du-Nso, bụ iya bụ Unme ire-lanu ophu shi Nna mu l'eka. Ọ -byaepho l'ọo pfua opfu ẹhu mu yeru unu.

27Unubẹdua l'onwunu bufukwaapho ndu a-nodu epfu iphe, unu gude ẹnya unu hūma kẹ nkemu; opfu lẹ mu l'unu shiepho lẹ mbulembu noduta.

Jiṣonu 16

1“Mu pfushikotaru unu iphemiphe-a g'e tee medu unu g'unu shiswee ọzo.

2Ndu Jiu a-kpo-chikwa unu mkpo-chi g'unu ta abatajẹhe l'ulo-ndzuko phẹ. Mbụ-a; mboku erwuakwaa teke a-bujeru: onye egbu unu egbugbu l'ọo gbẹ arinu l'ọo Chileke bẹ ya ejeru ozi.

3Iphe, meru g'o gude ẹphe je anodu eme iya bụ l'ẹphe ta amadu Nna; ophu ẹphe amadu mu.

4Ole mu tukowaru iphemiphe-a epfuru unu g'ọo-buru: o -rwuepho teke ẹphe e-me iphe ono; unu anyatajẹ lẹ mu pfuhawaru unu opfu ẹhu phẹ.”

Ozi, Unme-du-Nso ejeje

“Mu te eshikwa pfuhawaaru unu iphe-a lẹ mbulembu; opfu lẹ mu nokwadu swiru unu.

5Nta-a bẹ mu alapfuakwa onye ono, bụ iya ziru mu gẹ mu bya ono. Ole ọ tọ dudu g'unu ha, onye jijeru mu sū mu: ? bụ awe bẹ iije?

- ⁶Èhu gbẹ rwùhu-chia unu opfu lẹ mu tukurù iphemiphe-a epfushiru unu.
- ⁷Ole g'ò dùhabe; gẹ mu mekwaa ya g'ò doo unu ẹnya; ọ kakwaru unu ree mẹ mu -laa; kẹle mu aladuru bẹ Onye N-yemẹka ono ta alwapfutakwa unu. Obenu l'ọo mu -laẹpho; mu ezia ya g'ọ lwapfuta unu.
- ⁸Teke ọ byaerupho bẹ oo-goshi ndiphe l'ọ tọ bọdu iphe, ẹphe ari l'iphe-ẹji bọ bẹ ọ bọ; goshi phẹ l'ọ tọ bọdu iphe, ẹphe riru l'apfubekoto bọ bẹ ọ bọ; goshikwa phẹ phọ l'ọ tọ bọdu iphe, ẹphe riru l'ikpe Chileke bọ bẹ bọ iya nọ. Noo g'oo-gude goshi l'ikpe nmaru phẹ bọ ono.
- ⁹Oo-goshi phẹ l'anọno, ẹphe anọdu mu l'ẹka bọ iphe-ẹji bẹ ẹphe eme.
- ¹⁰Oo-goshikwa phẹ phọ iphe, bọ apfubekoto kẹ Chileke; kẹle ọo lẹ mu pfuberekoto meru iphe, mu alapfu Nna; ọphu unu ahumabaedu mu ẹnya.
- ¹¹Goshikwa phẹ phọ iphe, ikpe kẹ Chileke bọ; kẹle onye-ishi ndu mgboko-a bẹ e kpewaru ikpe.
- ¹²“Opfu, mu gege epfuru unu dukwa igwerigwe; ọ kwa lẹ mu -pfueberu iya unu bẹ oo-panuka unu ẹka nta.
- ¹³Teke Unme-dù-Nsọ, bọ iya bọ Unme ire-lanọ ono byaerupho; l'ọ tukurupoo iphe, bọ ire-lanọ g'ọ ha kpọ-zigbuaru unu ọzo iya; noo l'ọ tọ bukwa ike k'ẹka iya bẹ oo-gude epfu; ọ buẹpho iphe, ọ nọmaru bọ iphe, oo-pfuje; l'ọ kafukwaarupho unu iphe, e-me l'iphu.
- ¹⁴Sù-a; ọ kwa Unme-dù-Nsọ ono e-me g'unu hụma gẹ mu dù-be biribiri; kẹle oo-wota iphe, ọ nọmaru mu l'ọnu bya akọoru unu.
- ¹⁵Iphemiphe, bọ kẹ Nna bukota nkemu. Ọo ya meru g'ọ gude mu sù l'oo-wota iphe, ọ nọmaru mu l'ọnu bya epfuaru unu.

Ndu rarọ ẹkwa a-chi ọchi

- ¹⁶“Ọ phọduru nwanshii; unu ta ahumabaedu mu; a -nọkwaa nwanshii; unu ahumakwa mu ọzo.”
- ¹⁷O pfuchaa nno ndu etsoje iya nọ haru jiahaa nwibe phẹ sù: “? Ọwa-a, oopfu egube ọwa-a bọ gọnu? ? Ọ sù l'ọ phọduru nwanshii; a taa humahedu iya; a -nọkwaa nwanshii; a humakwa iya ọzo; sukwapfo lẹ ya alapfu Nna.”
- ¹⁸Èphe sù: “? Buhunu ole bọ kẹ l'ọ phọduru nwanshii? Anyi ta amakwa iphe, oopfu epfupfu.”
- ¹⁹Jizosu mawaru l'ẹphe abya iya aji aji; ọ sù phẹ: “? Unu aji onwunu k'iphe-a, mu shi pfua sù l'ọ phọduru nwanshii; unu taa humahedu mu; a -nọkwaa nwanshii; unu ahumakwa mu ọzo-a?”
- ²⁰Gẹ mu gbukwaaru iya unu tororo; unu a-rakwa ẹkwa; gwa aphu; ole ndiphe bẹ ẹhu a-nọdu atso uto. Unu a-nodukwa atsù ude l'ime obu; ọle ude ono e-mechakwaa gbanwee; unu anwujaa onochi.

²¹Oobujeru upfu watawaa eme nwanyi, du ime ehuka; ehuhue ya pho arwuhu; kele o mawaru l'o rwuwaru teke ya e-je iphe, a-tsu iya l'ehu. O -zedachapho; l'o zohaa iphe-ehuka ono. Ehu awata iya atso utso; kele o nwutaru nwa, l'a-nodu le mgboko.

²²Nokwapho g'o du unu nta-a bu ono. Nta-a be unu a-nodu atsu ude; ole ujiku lanu be mu l'unu a-huma ozo; teke ono be onochi a-nashihu unu. O to duedu onye anafubaa unu ehutso unu teke ono.

²³“O -rwuepho teke ono be o to dukwa iphe, unu byaru aji mu aji iya. Ge mu gbukwaaru iya unu tororo; iphe, bu iphe, unu gbe mu l'eka su ge Nna nu unu be oo-nu unu.

²⁴Mbu-a; o toko du-swekwaa iphe, unu gbeje mu l'eka kpaa ishi iya byasu nta. Unu pfiaru Chileke g'o nu unu iphe, mkpa iya duru unu; oo-nu iya unu. Oo ya bu g'ehu atsoo unu utso tsoku l'ishi.”

Jizosu meru mgboko eriri; turu okoo kpua ya

²⁵“Iphe-a be mu tukokwaru nmashiaru unu l'etu etu. Oo rwuakwa teke mu taa nmaheduru unu etu etu; mbu le mu atogbojeru unu opfu ke Nna mu ono eba.

²⁶O -rwuepho teke ono be unu a-gbeje mu l'eka su ge Nna nu unu iphe, mkpa iya duru unu; mu ta asukwanu unu le mu e-je egude iswi ehuhue unu pfuru yeru iya.

²⁷Ishi iya bu le Nna l'onwiya yeru unu obu; kele unu yeru mu obu bya ekweta le mu shi l'eka Chileke no bya.

²⁸O kwa eka Nna no be mu shi futu byatashia le mgboko-a; mu nodu alufuakwa le mgboko alapfuwa Nna.”

²⁹Oo ya bu; ndu etsoje iya nu su iya: “Ihee; nta-a be o ka ree; nta-a be i togbochaaru iphemiphe eba; i ti nmaphehedu iya l'etu etu.

³⁰Nta-a be anyi maru l'i makotaru iphemiphe. O to gbaheduru g'o duru onye abya ajjahaa ngu aji. Owa mewaru; anyi kweta l'i shi-a l'eka Chileke no bya.”

³¹Jizosu su phe: “? Unu kwetawaru nta?”

³²Mboku agbabeakwa; mbu o gbe rwuwanu erwurwu teke aa-chikashi unu nanu nanu; onyenonu agbaru laa ibe iya; unu atuko haa mu; mu apfu-pheru. Ole mu ta apfu-phekwaru nkinyi mu; kele Nna pfukwaru-a swiru mu.

³³Mu tukokwaru iphe-a pfiaru unu; k'ophu ehuhue a-du unu guu me mu l'unu -tugba buru nanu. O bukwapho aphu a-tsuru unu le mgboko-a; oopho g'unu nweru iya obu. Mu meakwaru mgboko-a eriri; turu okoo kpua ya.”

Jionu 17

Jizosu epfu anu Chileke

- ¹Jizosu pfughechaepho iphe ono bya apalia enya tabe l'imigwe bya asu: "Nna; o gbabeakwaru; menaa ge ndiphe huma odu-biribiri ke Nwa ngu; ge Nwa ngu ono emekwaapho ge ndiphe huma odu-biribiri nkengu.
- ²Oo ngu nuru iya ike; o kakota iphe, bu nemadzu ike. Iphe, i gude mee ya nno bu g'onuje ndu ono, i yeru iya l'eka ono ndzu ojejoje.
- ³Ndzu ojejoje ono bu g'ephe maru ngu; mbu gube onye ono, bu ngu bu okpobe Chileke kpeekpu; makwarupho Jizosu Kereshi, bu onye o bu ngu ziru g'o bya.
- ⁴Mu no le mgboko-a mee ge ndiphe huma g'i du-be biribiri; eshinu mu tukoru iphe ono, i ziru mu ge mu bya emee ono mekota.
- ⁵Nta-a; gube Nna; menaa ge mu nodu l'odu-biribiri ono, mu shihawaa nodu ono nta-a l'ataphu ngu; mbu l'odu-biribiri ono, mu le ngu shihawaa noduta teme mgboko du ono.
- ⁶"Mu meakwaru ndu ono, i hotaru le mgboko-a ye mu l'eka ono; ephe maru ngu. Oo gubedua nwehawaa phe; o buru gubedua woru phe ye mu l'eka; ephe mekotawaa opfu ngu.
- ⁷Nta-a be ephe mawaru l'iphemiphe, i nuru mu shi ngu l'eka.
- ⁸Noo le mu ziwaru phe ozi ono, i ziru mu ono; ephe natawa iya. Ephe makwarupho l'oo okpobe-opfu l'oo l'eka i no be mu shi bya; ephe kwetaakwa l'oo ngu ziru mu ge mu bya.
- ⁹"Oo opfu ehuh phe be mu epfu anu ngu-a. O to bukwa opfu ehuh ndu mgboko be mu epfuru ngu; o kwa ke ndu ono, i yeru mu l'eka ono; nokwa ndu mu epfu nkephe bu ono; kele ndu k'ono bu nkengu.
- ¹⁰Iphemiphe, bu nkemu bukwapo nkengu. Iphemiphe, bu nkengu bukwarupho nkemu. O buru phe egoshi odu-biribiri nkemu.
- ¹¹Humanu le nta-a be mu alwapfutaakwa ngu. Mu ta anhekwa le mgboko-a; obenu l'ephebedua nokwadu le mgboko-a. Nna, du nso; gudenu ike ono, du l'epha ngu ono gudeshia phe ree; mbu epha ngu ono, i nuru mu ono; k'opfu ephe a-buru nanu ge mu le ngu bu-a.
- ¹²Teke ono, mu shi swiru phe ono bukwa ike ono, du l'epha ngu ono, i nuru mu ono be mu shi gude gudeshia phe ree; chee phe; ebe o dudu onye ophu tuphahuru nu; a - gufukwa nwa ola-l'iswi pho. Ono bukwanuru g'iphe, e deru l'ekwo-opfu Chileke emee g'e pfuru iya.
- ¹³"Ole nta-a be mu alwapfutaakwa ngu. Iphemiphe-a be mu tukoru epfuru ngu nta-a, mu nokwadu le mgboko-a g'ephe enweru ehuh-utso nkemu; l'o dzua phe oke l'ehuh ree.
- ¹⁴Mu pfuwaru phe opfu, shi ngu l'onu; ephe du ndu mgboko ashi; kele ephe ta abudu ndu ke mgboko; egube ono, mbedua abudu onye ke mgboko-a.

- ¹⁵Mu te epfukwaru ngu g'i wofu phẹ lẹ mgboko. Ọ kwa g'i gbobutajẹ phẹ g'ọ tọ du iphe, Onye-njọ ono, bụ Obutuswe l'e-me phẹ.
- ¹⁶Ọ kwa gẹ mu ta abudu onye kẹ mgboko-a bụ g'ẹphe ta abudu ndu kẹ mgboko-a.
- ¹⁷Opfu nkengu bụ ọkpobe-opfu. Gudenu ọkpobe-opfu ngu ono mee phẹ g'ẹphe buru nkengu.
- ¹⁸Ọ kwaphọ g'i ziru mu gẹ mu bya lẹ mgboko-a bụ gẹ mu zikwaru phẹ phọ g'ẹphe je lẹ mgboko.
- ¹⁹Ọ bukwarupho iswi ẹhu phẹ bẹ mu zọberu woru onwomu gbaa ẹja ẹhu phẹ g'ee-shi g'ẹphebedua aburu ndu nkengu ọkpobe aburu.
- ²⁰“Ọ tọ bukwaa ndu ọwa-a bẹ mu epfu opfu ẹhu phẹ eyeru ngu; mu epfukwapho opfu ẹhu iphe, bụ ndu a-nụma ozi-oma ono, ẹphe ezi ono; woru onwophẹ ye mu l'ẹka.
- ²¹Mu epfukwaru ngu phọ sụ g'i mee g'ẹphe buru nanu g'ẹphe ha. G'ọ buerupho gẹ gubedua, bụ Nna nọ mu l'ime; mu nọdu ngu; bụ g'ẹphe a-nọdu anyi l'ime; g'ẹphe aburu nanu; k'ophu ndu mgboko-a l'e-kweta l'ọo ngu ziru mu gẹ mu bya.
- ²²Ọdu-biribiri ono, i nuru mu ono bẹ mu woakwaru ye phẹ l'ẹka g'ẹphe aburu nanu ẹgube-a, mu lẹ ngu bụ nanu-a.
- ²³Mu -nọdu phẹ l'ime; gubedua -nọdu mu l'ime; ọo ya bụ; ẹphe aburu nanu ọkpobe abubu; k'ophu ndu mgboko-a l'a-maru l'ọo ngu ziru mu gẹ mu bya; makwarupho l'ọo g'i yeru mu obu bụ g'i yeru phẹ.
- ²⁴“Nna; i wowaru phẹ ye mu l'ẹka. Iphe, mu epfu buru g'ọ buru l'ẹka mu nọ bẹ ndu ono a-nọdukwapo. Ọo ya bụ g'ẹphe egude ẹnya phẹ huma ọdu-biribiri nkemu; ọdu-biribiri ono, i gude l'i yeru mu obu nụ mu rọ teke mgboko teke adudu.
- ²⁵Gube Nna, pfuberekoto; ndiphe teke amakwaru onye i bụ; ọle mbedua makwanuru ngu; teme ndu-a mawaru l'ọo gubedua ziru mu gẹ mu bya.
- ²⁶Mu mewaru; ẹphe mawaru ngu; mu jekwa l'e-me g'ẹphe marwee ngu ree; k'ophu n-yemobu ono, i yeru mu ono a-du l'ime phẹ; mbedua anọdukwapo l'ime phẹ.”

Jiṅnu 18

Eegude Jizosu

(Mat 26:47-56; Mak 14:43-50; Luk 22:47-53)

- ¹Jizosu pfughechaepo opfu ono; yele ndu etsoje iya nū swiru tugbua je adafu azu nwanggele Kidironu. Ọ dukwarupho mgbabu, du l'azu mini ono azu iya ophuu. Jizosu yele ndu ono, etsoje iya nū ono bahu lẹ mgbabu ono.
- ²Noo ya; Jiudasu-a, deru iya ye-a mahaakwarupho ẹka ono; kele Jizosu bẹ yele ndu etsoje iya nū edzukojuhawaa l'ẹka ono tekenteke.
- ³Ọo ya bụ; Jiudasu gbeshi byatashia ẹka ono. Ndu-ishi ndu-uke Chileke mẹ ndu Farisii yeru iya ndu ojogu ndu Romu; bya eyeru iya ndu nche eze-ulo Chileke; ẹphe

l'iya tuko swiru. Ephe chigbaaru oku-apyipyi me oroku gudegbaa ngwogu teke ephe abya.

⁴Jizosu mahawaru iphe, abya iya ememe; bya agba phe ndzuta bya asu phe: “? Bu onye be unu acho?”

⁵Ephe su iya: “Oo Jizosu onye Nazaretu.” Jizosu su phe: “Oo mbedua bu iya.” Jiudasu, deru iya ye-a pfukubekwa phe pho l'eka ono.

⁶Teke ono, Jizosu suru phe l'oo yebedua be bu iya nu ono; ephe kpochaa gala gala laa l'azu l'azu je adachaa l'ali ke gburugudugu.

⁷Jizosu jikwaa phe ozo su phe: “Mu suru-a: ? bu onye be unu acho?” Ephe sukwa iya: “Oo Jizosu, onye Nazaretu.”

⁸Jizosu su phe: “Mu suru unu l'oo mu bu iya. O -buru l'oo mbedua be unu acho; oo ya bu ge ndu owa-a atugbunaa lashia.”

⁹Iphe ono je emee o vukota mbu opfu ono o pfuhawaru su: “Nna; o to dukwa g'o ka mma l'oo onye lanu, tuphahuru le ndu ono, i yeru mu l'eka ono.”

¹⁰Sayimonu Pyita tu mma iya teke ono. O mitaepho mma iya ono; gbua nwohu onye-ishi ndu-ishi uke Chileke; tukoe ya pho nchi-ekutara pafu. Epha nwohu ono bu Malukosu.

¹¹Noo ya; Jizosu su Pyita: “Miru mma ngu ye l'obo iya. ? Bu ge mu ta angu-gbuhe iphe, aangu angungu, no l'okoro iphe-ehuka-a, Nna mu nuru mu-a?”

A kpụ Jizosu akpụ-pfu Anasu

¹²Oo ya bu; ndu ogbogu ono me onye-ishi phe; me ndu nche ndu Jiu bya egude Jizosu; kee ya egbu;

¹³bya evuru uzo kputa iya kpụ-pfu Anasu. Anasu bu nnaji, keru Kayafasu nwanyi. Kayafasu l'onwiya bukwanuru onye-ishi ndu-ishi uke Chileke k'apha ono.

¹⁴O bukwarupho Kayafasu ono bu onye ono, chijeru idzu su ndu Jiu l'o ka ree g'onye lanu nwuhu-chiaru oha pho.

Pyita agọ le ya ta amadu Jizosu

(Mat 26:69-70; Mak 14:66-68; Luk 22:55-57)

¹⁵Sayimonu Pyita nodu etsokpopho Jizosu azu azu. Onye lanu ozo l'ime ndu ono, etsoje iya nu ono nodu etsokwa iya pho. Onye lanu k'ono be yele onye-ishi ndu-ishi uke Chileke ono mahawaru. Noo iphe, meru g'o gude o tsoru Jizosu bahu l'ulo-ikpe l'unuphu ibe onye-ishi ndu-ishi uke Chileke ono.

¹⁶Pyita pfuru l'etezi l'onu-oguzo. Tobudu iya bu; onye k'ophunapho, etsoje Jizosu pho tsoru iya bahu l'ulo-ikpe ono, bu iya bu onye ophu onye-ishi ndu-ishi uke Chileke mahawarupho; lufuta je epfuru yeru nwamgboko, eche onu-oguzo ono. Nwamgboko ono haa ya; o dubata Pyita.

¹⁷Noo ya; nwamgboko ono, eche onu-oguzo ono sụ Pyịta: “? Tị yinaa lẹ ndu etsoje nwoke-a, e guderu-a?” Pyịta sụ iya: “Mu ta ayikwa iya.”

¹⁸Unwokoro Kayafasu mę ndu nche pho gude icheku zu-nwua oku pfi-phee ya mgburugburu anya; kele oyi atsu. Pyịta bya apfukubekwa phe pho wata anya oku.

Anasu aji Jizosu aji

(Mat 26:59-66; Mak 14:55-64; Luk 22:66-71)

¹⁹Oo ya bu; onye-ishi ndu-ishi uke Chileke ono bya ajiahaa Jizosu aji ke ndu etsoje iya nu me k'iphe, onoduje ezi.

²⁰Jizosu sụ iya: “Mu tukowaru iphemiphe togboru ndu mgboko eba. Mu shi anoduje ezi phe iphe l'ulo-ndzuko ndu Jiu me l'eze-ulo Chileke, bu eka ndu Jiu edzukoje. O to dukwa iphe, mu pfuru, duru ophu mu pfuru le mpya.

²¹? O nwuru inwagha be iiji mu nno? Jinaa ndu numaru iphe, mu pfuru; l'ephe maru-a iphe, mu pfuru.”

²²Jizosu pfuepho nno; onye lanu le ndu nche ono, pfi-kube Jizosu ono gbakpopho eka waa ya le nchi ke daa sụ iya: “? I maru-a l'oo onye-ishi ndu-ishi uke Chileke be iiwo opfu nno?”

²³Jizosu sụ iya: “Teke o bu l'o duru iphe, du eji, mu pfuru; pfunaa ya. Teke odumeka; o -buru le mu pfuru-a iphe, pfuru oto; ? o nwuru inwagha be iichihunu mu eka?”

²⁴Tobudu iya bu; Jizosu nodukwadu l'egbu-a, e keru iya-a; Anasu zia; a kputa iya kpujeru Kayafasu, bu iya bu onye-ishi uke Chileke.

Pyita agokwapho ozo le ya ta amadu Jizosu

(Mat 26:71-75; Mak 14:69-72; Luk 22:58-62)

²⁵Noo ya; Sayimonu Pyita pfukwaduru-a l'eka o pfuru anyakwadu oku. A nonyaa; ephe sụ iya: “? Tị yinaa lẹ ndu etsoje nwoke-a?” Pyita goo sụ: “Mu ta ayikwa iya.”

²⁶Nwokoro onye-ishi ndu-ishi uke Chileke pho onye lanu; onye ophu yele onye ophu Pyita pafuru nchi pho bu abubu tufuepho onu jia Pyita sụ iya: “? Mu ta ahumanuru ngu-a ge gu l'ia no le mgbabu pho?”

²⁷Pyita gofukwa ozo. Teke ono teke ono; oke-okuru raa ora.

Payileti aji Jizosu aji

(Mat 27:1-2,11-14; Mak 15:1-5; Luk 23:1-5)

²⁸Ephe kpufuta Jizosu l'ibe Kayafasu kpuru jeshia l'eze ulo-ikpe onye Romu, bu nnajioha teke ono. Teke ono buwaru nchi abohu. Ebe ndu Jiu abahuduru l'eze-ulo ono g'ephe ata a-turwudu nsọ. Ephe -aturwuduru nsọ; oo ya bu; ephe ayiru le ndu e-ri iphe, obo Ojehata.

²⁹Oo ya bu; Payileti bya ejepfu phe l'etezi je ajia phe sụ phe: “? Bu iphe-eji gnu be unu suru le nwoke-a meru?”

³⁰Ephe sụ iya: “O -bu le nwoke-a ta abu onye ejo-iphe me anyi ta akputakwaru ngu iya.”

³¹Payileti sù phẹ: “Unu kpùta iya unubèdua je egude ekemu-alì unu kpee ya ikpe.” Ndu Jiu sù iya: “A tũkwaru anyi ekemu sù g'anyi ta apfũ-gbujekwa nemadzu.”

³²Iphe ono je emee iphe, Jizosu pfuru ono vùkota, bù iya bù iphe, o pfuru gude tũ onu egube anwũhu, ya a-nwũhu ono.

³³Noo ya; Payileti bya alaphu azũ l'eze-ũlo ono bya ekua Jizosu sù iya: “? Bũ ngu bù Eze ndu Jiu?”

³⁴Jizosu sù iya: “? Bũ gbùbedua epfu iya k'onwongu; tũ ndu ọzo sũru l'o noo onye mu bù?”

³⁵Payileti sù iya: “? Mu bù onye Jiu? ? Tũbudu ndu alì ngu waa ndu-ishi uke Chileke kpũ ngu kpũtaru mu? ? Bũ gũnu bẹ i meru?”

³⁶Jizosu sù iya: “Abũbu, mu bù eze te eshikwa lẹ mgboko-a. Ọ -bũ l'abũbu, mu bù eze shi lẹ mgboko-a mẹ ndu-ozì mu atũkwaa ọhu ituphu; mee g'a ta kpũru mu nũ ndu Jiu. Obenu l'abũbu, mu bù eze te eshidu lẹ mgboko-a.”

³⁷Payileti sù iya: “Ha! ? Bũnu iya bù l'ì bù eze?” Jizosu sù iya: “Ọekwa phọ g'i pfuru ono bù g'ọ bù eviya lẹ mu bũkwa eze. Mbũ l'ọ kwa gẹ mu bũru eze bẹ a nwũ-dokpọoru mu. Ọ bũru iphe ono bẹ mu byadoru lẹ mgboko-a; gẹ mu bya egoshi ndiphe iphe, ọkpobe-opfu bù. Iphe, bù ndu etso ọkpobe-opfu ono anũmaje olu mu.”

³⁸Payileti jĩa ya sù iya: “? Bũ gũnu bù ọkpobe-opfu?”

Eekpe Jizosu mpfugbu

(Mat 27:15-31; Mak 15:6-20; Luk 23:13-25)

Noo ya; Payileti jì-ghechaa ya aji ono bya alaphu azũ jepfu ndu Jiu ono ọzo; bya asù phẹ: “Ọ tọ dũkwa ejo-iphe, mu hũmaru, nwoke-a meru.

³⁹Ọle eshi ọphu omelalì unu bù gẹ mu hajeru unu onye mkpọro lanũ g'ọ la mẹ a -boje ọbo Ojeghata; ? ọ dũ ree gẹ mu haarũ unu Eze ndu Jiu tọ?”

⁴⁰Ephe swọ-lihu sù: “Ọ tọ bũdu onye ọwa bẹ jì-haru anyi; haarũ anyi Barabasù g'ọ la!” Barabasù ono-a bũkwa onye ana nfũ.

Jiõnu 19

¹Ọo ya bù; Payileti bya akpũta Jizosu sù g'e chia ya iphe. E chigochaa ya echigo.

²Ndu ojõgu bya egude obvu kpaa okpu-eze bya ekpube iya l'ishi bya achita uwe mgbalanũ, eke uswe-uswe woru yee ya.

³Ephe byapfuta iya bya asuje iya: “Ndzũ dũ ngu; eze ndu Jiu.” Ephe awaa iya ẹka l'atatiphu kẹ gbaa.

⁴Payileti bya alũfukwa jepfu ndu Jiu ono ọzo sù phẹ: “Mu akpũfutaakwaru unu nwoke-a g'unu hũma l'ọ tọ dũdu ejo-iphe, mu maru, o meru.”

⁵Tũbudu iya bù; Jizosu kpuru okpu obvu ono yee uwe uswe-uswe phọ lũfuta. Payileti sù phẹ: “Unu wakwa nwoke ọbu baa.”

⁶Noo ya; o be gę ndu-ishi uke Chileke me ndu nche hūmaeru iya pho; ephe tuko chishia su: “Pfu-gbua ya! Pfu-gbua ya!” Payileti su phe: “Unubedua l'onwunu kpata iya je apfu-gbua; le mbedua ta ahumakwaru ejo-iphe, o meru.”

⁷Ndu Jiu su iya: “Eshinu o gude onu iya su l'oo ya bu Nwa Chileke obu; be bukwa anwuhu rwuberu iya. Nokwa iphe, ekemu anyi suru g'e meje onye pfuru nno bu ono.”

⁸Payileti numaepho iphe ono, e pfuru ono; ndzu kabaa ya agugu.

⁹O bya alaphu azu l'eze-ulo ono je ajia Jizosu su iya: “? Bunaa awe be i shi?” Jizosu gbaa ya nkuchi.

¹⁰Oo ya bu; Payileti su iya: “? Iigba mu nkuchi? ? O du g'i ti madu l'oo mu be o du l'eka? Mu -su g'a haa ngu; l'a haa ngu; teke mu suru g'a pfu-gbua ngu; l'apfu-gbua ngu.”

¹¹Jizosu su iya: “I tigi nwekwaru egube ike ono l'ehu mu; o -bu l'o to bu Chileke, bu l'igwe nuru ngu iya. Oo ya bu l'iphe-eji k'onye ono, seru mu ye ngu l'eka ono ka nkengu shii.”

¹²Payileti numachaepho iphe ono; o chokashiahaa g'oo-me haa ya. Obenu le ndu Jiu chishiru su: “I -haa nwoke-a; l'a maru l'i noru eze nnajioha le njo; kele onye, gude eka iya mee onwiya eze buakwaa ohogu eze nnajioha.”

¹³Payileti numaepho iphe ono, ephe pfuru ono; o gude Jizosu lufuta etezi bya anodu anoo l'oshi, onye ekpeje ikpe anoduje ekpe ikpe, du l'eka eekuje Nwodu-l'eli. Eka obu be e gude mkpuma nmalia anmali. Iphe, eekuje iya l'opfu Hiburu buru Gabata.

¹⁴O betashiepho l'enyanwu alwa l'ishi mbochi ono, nchitabohu iya a-buru obo Ojehata ono; Payileti su ndu Jiu: “Wakwa eze unu.”

¹⁵Ephe tushia uzu su: “Pfu-gbua ya! Pfu-gbua ya! Pfu-gbua ya!” Payileti jia phe su phe: “? Unu suru ge mu pfu-gbua onye eze unu?” Ndu-ishi uke Chileke su: “Anyi te enwekwa eze ozo; abudu eze nnajioha.”

¹⁶Tobudu iya bu; Payileti kpuru iya nu phe g'ephe je apfu-gbua.

Aapfugbu Jizosu

(Mat 27:32-44; Mak 15:21-32; Luk 23:26-43)

¹⁷Oo ya bu; Jizosu lae phe pho l'eka; ephe gude iya tugbua. O vuru oswebe iya je eyeru; ephe rwua l'eka eekuje Okpokoroko ishi. Iphe, eekuje eka ono l'opfu Hiburu bu Golugota.

¹⁸O buru l'eka ono be ephe woru iya kpopyabe l'oswebe. Ephe kpopyabekwapho unwoke labo ozo l'eka ono; kpopyabechaa phe iche iche. Onye lanu l'eka iya ophuu; onye ophuu l'eka iya ophuu. Jizosu nodu phe l'echi.

¹⁹Payileti bya ewokwarupho iphe dee pfube l'oswebe ono. Iphe, o deru bu: “JIZOSU, ONYE NAZARETU; EZE NDU JIU.”

²⁰Igwerigwe ndu Jiu gwa iphe ono, o deru ono; kele aka obu, a kpopyaberu Jizosu obu du-kube oma mkpukpu ono ntse. Opfu-ali ndu e gude dee ya buru Hiburu; me Latinu; me Giriku.

²¹Oo ya bu; ndu-ishi uke Chileke me ndu Jiu bya asu Payileti: “Be deshi l’o bu ‘Eze ndu Jiu’. Iphe, ii-dechia bu ‘l’o suru le ya bu Eze ndu Jiu’.”

²²Payileti su: “Iphe, mu deru be mu dewaru.”

²³Tobudu iya bu; ndu ojogu ono kpopyabechara Jizosu l’oswebe ono bya achita uwe, ooyeje l’ehu kee uzo eno. Onye ojogu nonu; l’o keta uzo lanu. Ephe bya achitakwapho eze uwe ime ehuru iya. Ono buru uwe mgbalanu, ta adudu aka a gbagbaberu iya agbagbabe me nanu. E shiepho l’imeli kwee ya mgbalanu bya asu l’uzo ali.

²⁴Ndu ojogu ono su nwibe phe: “Unu g’anyi ta alakakwa uwe owa-a alaka. G’anyi tuchikwaaru iya ido maru onye oo-laru.” Iphe ono tukokpoephe mee iphe, e deru l’ekwo-opfu Chileke vukota, bu iya bu iphe, e deru su: “Ephe keru uwe mu l’ime onwophe; O be l’ophu mu eyeje l’ime ehuru; ephe tu ido g’ephe maru onye a-chita iya nu.” O buru iphe ono be ndu ojogu ono meru.

²⁵Ndu pfuru l’aguga oswebe Jizosu ono teke ono bu ne iya; me nwune ne iya ke nwanyi; me Meri, nyee Kulopasu; waa Meri onye Magudala.

²⁶Jizosu humaeppho ne iya waa onye ono, etsoje iya nu ono, o yeru obu pho g’ephe pfukube aka ono; o su ne iya: “Nwanyi; wakwa nwa nwoke ngu.”

²⁷O bya asukwapho onye ono, etsoje iya nu ono: “Wakwa ne ngu.” Eshi mboku ono; onye ono, etsoje Jizosu ono duta Meri lashia ibe iya ye l’iya je eburu.

Anwuhu Jizosu

(Mat 27:45-56; Mak 15:33-41; Luk 23:44-49)

²⁸E mechara; Jizosu maru l’e meebewaru iphemiphe o su: “Egu mini agukwa mu!” Ono je emee iphe, e deru l’ekwo-opfu Chileke vukota g’e deru iya.

²⁹O duru nwa ite, suru l’eka ono, mee-veniga, jiru ejiji. Oo ya bu; ephe bya ewota asancha tsee le mee ono. O nguguel’iya pho; ephe bya etsebe iya l’ekali-oshi isopu; mabe iya o rwua ya l’onu.

³⁰Jizosu ngutaephe mee ono, shihuru aka ono o su: “O bvwuru.” O tukwe ishi; tubu unme; nwuhu.

Aanma Jizosu arwa le mgburuku

³¹E mechara; ndu Jiu je arwo Payileti g’ephe je aku-jishia ndu ono, a kpopyaberu l’oswebe ono oshi-okpa; k’ophu aa-patachara phe pafu. Ishi iya buru le mboku ono be nchitabohu iya buwaa eswe-atuta-unme. Ephe nodu emekwanu g’odzu ndu ono ta atuko kpopbaaru l’oswebe l’eswe-atuta-unme ono eshi ophu eswe-atuta-unme k’ono bu phe obo-iphu.

³²Oo ya bu; ndu ojogu ono bya aku-jishia okpa onye ke mbu; bya aku-jishikwapho okpa onye ophuu; mbu ndu ono, a tukoru ephe le Jizosu kpopyabe ono.

³³Ephe byarwutaepho ẹka Jizosu kporu; ephe huma l'ọ nwuhuhawaru; ephe haa ya; ebe ephe akụ-jishięduru yębedua ọkpa.

³⁴No iya; onye ojogu lanu gbęshiepho bya ewota arwa nmaa Jizosu le mgbureku. Teke ono teke ono; mee yele mini shi iya l'eka ono alwa patapata.

³⁵Oo onye humaru iphemiphe-a teke ọonwu turu onu iphe, o humaru. Iphe, o pfuru tukoru bukotaru ọkpobe-opfu. Yębedua l'onwiya maru l'oo ire-lanu be ya epfu. Oo ya bu g'unubędua l'onwunu ekwetakwapho.

³⁶Iphemiphe ono je emee iphe, e deru l'ekwo-opfu Chileke vua g'e deru iya, bu ophu suru: “O to dukwa okpu, no iya l'ehu, a byaru akụ-ji akụ-ji me nanu.”

³⁷Tęmanu; o dukwarupho ẹka ozo, e deru iya l'ekwo-opfu Chileke su: “Ephe e-gude enya phe ele onye ono, ephe nmaru arwa ono.”

Elili Jizosu

(Mat 27:57-61; Mak 15:42-47; Luk 23:50-56)

³⁸E mechaa; Jiosefu onye Arimatiya jepfu Payileti je arwo ya ge ya pata odzu Jizosu. Payileti kweta g'o pata iya. Oo ya bu; o bya eje apata odzu Jizosu ono pata pafu. Jiosefu ono bukwapho onye etsoje Jizosu; ole ootsoje iya le mpya; kele ọotsu ndu Jiu ebvu.

³⁹Nikodimosu byakwapho. Nikodimosu ono bu onye ono, byapfutajęhawaru Jizosu l'enyashi pho. No iya; o byatashia bya egude manu meru, agwakoberu “alowe”. Manu ono be erwa iya hakwa g'erwa ẹkpa-unu labo, unu jichaa ru ejiji.

⁴⁰Ephe pazeta odzu Jizosu bya egude ẹkwa ọchaa, bu ẹkwa odzu yele manu ono, ishishi iya atso utso ono gude kwaa ya, bu iya bu ge ndu Jiu egudeje akwa odzu phe k'elili.

⁴¹O duru mgbabu, du l'eka ono, a kpopyaberu Jizosu ono. O dukwarupho ilu, no le mgbabu ono. Ilu ono be a turu k'ophuu; ophu o toko du-swee onye ozo, e lijehawaru iya.

⁴²Oo ya bu; ephe pata Jizosu je elia l'eka ono; eshi ophu mboku ono be echele iya buwaa eswe-atuta-unme ndu Jiu; teme ilu ono bya adufuanu ntse.

Jionu 20

Eshi l'onwu teta dzuru ndzu

(Mat 28:1-8; Mak 16:1-8; Luk 24:1-12)

¹O rwua le geregere nchi-abo hu mboku Sonde; Meri onye Magudala bya l'ilu ono g'ochii agbakwadu; bya ahuma le mkpuma, e shi gude swichia onu ilu ono be e swifwaru.

²Oo ya bu; o gude oso gbapfu Sayimonu Pyita; waa onye ophuu, etsoje Jizosu pho, Jizosu yeru obu pho je asu phe: “A pafuakwaru Nnajiuphu l'ilu ono. Ebe anyi amakwa ẹka a togboru iya.”

- ³Pyíta yéle onye k'ono, etsoje Jizọsu ono gbalihu tųgbua jeshia l'ilu ono.
- ⁴Ephenebo tųko ye ọkpa l'ọso jeshia. Ọle onye k'ono, etsoje Jizọsu ono gbagharu Pyíta; vuru iya ọzo gbarwua ilu ono.
- ⁵Ọ bya ephureta ephureta; nyoo ime ilu ono bya ahuma ẹkwa ọchaa phọ, a kwaru Jizọsu gude lia ya phọ g'ọ wushiru l'ẹka ono. O nyoo ya enyonyo; ọphu ọ bahuduru l'ime ilu ono.
- ⁶Sayimonu Pyíta nọdu etsowa iya l'azu. O rwua bya ekwoba l'ime ilu ono bya ahuma ẹkwa ọchaa ono g'ọ wushiru;
- ⁷mẹ ẹkwa k'ono, e shi gude phua ya l'ishi ono. Ọphu ẹkwa k'ishi ono yéle ẹkwa ọchaa phọ awushiduru l'ẹka lanu. A phukoru k'ishi ono aphuko dobe iche.
- ⁸Tọbudu iya bu l'onye etsoje Jizọsu k'ophunapho, bu iya vu ọzo gbarwuta l'ilu ono-a bya abahukwapho. O je egude enya iya huma; kweta.
- ⁹Teke ono be epe teke amaduru iphe ono, e deru l'ekwo-opfu Chileke, suru le Jizọsu shifutaje l'onwu teta dzuru ndzu ono.
- ¹⁰Ọ buru iya bu le ndu etsoje Jizọsu ono atugbuchaa; onyenonu l'ọ laphushia azu l'ibe iya.

Jizọsu egoshi onwiya Meri onye Magudala

(Mat 28:9-10; Mak 16:9-11)

- ¹¹Meri bya apfuru le mgboru onu ilu ono wata ara ẹkwa. Ọ kwanyaa ẹkwa ono bya ephureta nyoo ime ilu ono;
- ¹²bya ahuma ojozi-imigwe labo, yegbaaru uwe ọchaa nọdu anọ l'ẹka ono, e shi nyebe odzu Jizọsu ono. Onye lanu nọdu l'uzo ishi; onye ọphuu nọdu l'uzo ọkpa.
- ¹³Epe su iya: “Nwanyị; ? ịraru gunu?” Ọ su phe: “A pataru Nnajiuphu mu; ebe mu amadu ẹka a togboru iya.”
- ¹⁴Epfughe, oopfughe iphe ono; ọ ghakobe huma Jizọsu g'ọ pfuru. Ebe ọ makwanu l'ọo Jizọsu.
- ¹⁵Jizọsu su iya: “Nwanyị; ? bu gunu be ịraru? ? Bu onye be ịicho?” Meri dobesu l'ọo onye eche mgbabu ono bya asu iya: “Teke ọ bu l'ọo ngu pataru iya pafu; jiko kanuru mu ẹka ị togboru iya ge mu je apata iya.”
- ¹⁶Jizọsu kua ya oku su iya: “Meri!” Meri ghakobe gude opfu Hiburu su iya: “Rabonayi!” bu iya bu O-zì-iphe.
- ¹⁷Jizọsu su iya: “G'ẹka ngu te erwukwa mu l'ehu; kele mu teke alarwudu l'igwe jepfu Nna mu. Ọle ọ bu; tųgbua jepfu unwanu mu je asu phe le mu alawaa l'imeli alapfu onye ono, bu Nna mu; buru Nna unu ono; mbu onye ono, bu Chileke mu bya abukwarupho k'unu ono.”
- ¹⁸No iya; Meri onye Magudala jepfu ndu ono, etsoje Jizọsu ono je asu phe: “Mu gudeakwa enya mu huma Nnajiuphu!” Ọ buru iya ziru mu ozi ono.

Jizosu egoshi ndu etsoje iya nu onwiya
(Mat 28:16-20; Mak 16:14-18; Luk 24:36-49; Ndu 1:6-8)

¹⁹O rwua l'uzenyashi mboku ono, bu iya bu mboku mbu l'idzu ono; ndu etsoje Jizosu swo-chishikota iphe l'ulo, ephe dokoberu; kele ephe atsu ndu Jiu ebvu. A bya l'amaru; Jizosu pfuwaru phe l'echi. O bya ekele phe ekele su phe: "G'ehu dukwa unu guu."

²⁰O kelechaephe phe pho nno; o bya egoshi phe eka iya ephebebo goshi phe mgbureku iya. Ehu tsoo ndu etsoje iya nu ono ntumatu g'ephe humaru Nnajiuphu.

²¹Jizosu sukwa phe ozo: "G'ehu dukwa unu guu. Oo ge Nna mu ziru mu; mu bya-a bu ge mu ezi unu g'unu je."

²²O pfuchaepho nno bya ekushi phe Unme su phe: "Unu nata Unme-du-Nso.

²³O -duru onye unu guru nvu l'iphe-eji iya; be Chileke guakwaru nvu. Onye unu aguduru nvu be Chileke taa gukwarupho nvu l'iphe-eji iya."

Jizosu yele Tomosu

²⁴Noo ya; ophu Tomosu; onye ono ntushi-epha iya bu Ejima anodu l'eka ono teke Jizosu byaru ono. Tomosu ono yikwa l'umadzu iri l'ebo ono, etsoje Jizosu ono.

²⁵E mechaa; ndu ophuu ephe l'iya etsojekwapho Jizosu pho su iya: "Anyi humakwaru Nnajiuphu obu!" Tomosu su phe: "Mu tee kwetakwa; gbahaa le mu gude enya mu huma ichii ngga pho l'obochi-eka iya; mbu woru mkpushi-eka mu ye l'eka ono, ngga ono shiru ono; woru eka mu nwua ya le mgbureku iya. O dudu nno be mu tee kwetakwa."

²⁶Noo ya; a noekwapho abali esato; ndu etsoje Jizosu ono nodukwa l'ulo ono ozo; ephe le Tomosu. A tukokwa mgbo ulo ono swo-chishikota. Jizosu byaelaa bya apfuru phe l'echi bya ekele phe ekele su: "G'ehu dukwa unu guu."

²⁷O pfuchaa nno bya asu Tomosu: "Ngwa; rwua mu mkpushi-eka l'obochi-eka l'eka-a. Mee mu eka le mgbureku obu. Tomosu; ta abuhekwaru ekwegekwe. Kwetajekwa."

²⁸Tomosu su iya: "I bu Nnajiuphu mu! Bya aburu Chileke mu!"

²⁹Jizosu su iya: "Buna-a l'oo l'i humaru mu meru iphe, i kwetaru. Ehu-utso be a goru nu ndu ahumaduru l'enya bya ekwetaela-a."

Ishi iphe, e dedoru ekwo-a

³⁰Jizosu meshikwaapho igwerigwe iphe-ohumalenyaa ozo l'iphu ndu etsoje iya nu, bulaje iphe, e deduru l'ekwo-a.

³¹Ndu owa-a, e deru edede-a bu g'unu e-gude iya kweta l'oo Jizosu, bu Kereshi, bya aburu Nwa ke Chileke obu; teke unu kwetaru unu eshi iya l'eka nweru ndzu.

Jionu 21

Jizosu egoshi umadzu esaa l'etsoje iya nu onwiya

- ¹E mechaa; Jizosu goshikwapho onwiya ndu etsoje iya nu ozo l'aguga eze-enyimu Tayibiriyasu. Waa g'o gude goshi onwiya obu bu owa-a:
- ²Sayimonu Pyita; waa Tomosu, eekuje Ejima; waa Natanelu ke Kena Galili; me unwu Zebedi; mefukwapho umadzu labo ozo l'ime ndu ono, etsoje Jizosu ono tukokpoerupho nokobe l'eka lanu.
- ³Noo ya; Sayimonu Pyita nonyaa bya asu: "Nta-a be mu ejeakwa ikokoro." Ephe su iya: "Anyi le ngu a-tukokwa swiru." Ephe toko wufu; o buru phe eje ikokoro. Ephe jerwua je atuko bahu l'ugbo. Ephe toko enyashi ono l'ophu sekota ikokoro; ophu o dudu iphe, ephe nmataru.
- ⁴O -rwuepho le geregere nchi-abohu; ephe jeshia ele enya; Jizosu pfuwaru l'aguga mini ono; ebe ndu ono, etsoje iya nu ono amadu l'oo Jizosu pfuru l'eka ono.
- ⁵O su phe: "Unwu mu; ? o duru ema, unu nmataru?" Ephe su iya: "Waawaa."
- ⁶O su phe: "Unu ghaedu ugbo unu l'ekutara ugbo ono g'unu a-nmata iphe." O buru iya bu ephe ghanaa ya; ebe ephe aduedu ike lobata iya l'ugbo phe; kele ema, ephe nmataru paru igwerigwe.
- ⁷No iya; onye k'ono, etsoje Jizosu ono, Jizosu yeru obu pho su Pyita: "O kwa Nnajiuphu!" Anuma, Sayimonu Pyita anuma iya; o chita uwe iya yee; kele o to shidu yee uwe iya. O daa le mini ono ke voo; bvupfushia ya.
- ⁸Ndu etsoje iya nu ndu ophuu nodu l'ime ugbo ono akpu ugbo ono, ema jiru godogodo ono alufuta eli-mgboko; kele ephe ta anodu enya l'eli-mgboko. Ephe no-a iphe, ha ge ntokpa ukporo ise.
- ⁹Ephe lufutaepho eli-mgboko; ephe huma oku icheku l'eka ono. Ephe huma ema, a miberu l'oku ono; wakwapho buredi.
- ¹⁰Jizosu su phe: "Unu hataedukwa ema ono, unu nmataru nta-a ono bya."
- ¹¹Tobudu iya bu le Sayimonu Pyita atugbua bahu l'ugbo ono je akpufuta ugbo ono l'eli-mgboko. Iphe, jiru iya nu buerupho eze ema, hagbaa shii. Ema, du iya nu tukoru du ukporo ema esaa l'ema iri l'eto. Ema ono hakpokwa igwerigwe g'o ha ono; ole ugbo ono te emekpodaru me kingu k'alakahu.
- ¹²Jizosu su phe: "Unu bya achia onu." Noo ya; ophu o duedu ndu ono, etsoje iya nu ono onye ophu jeru atu ama ke jia ya su iya: "? I bu onye?" Eka ephe tukowaru maru l'oo Nnajiuphu.
- ¹³Jizosu bya ewota buredi ono nu phe; bya anufukwaa phe pho ema pho.
- ¹⁴Egoshi k'ono, o goshiru phe onwiya ono kwewa iya ugbo eto, o goshiru ndu etsoje iya nu onwiya g'o shichaa l'onwu teta ono.

Jizosu yele Pyita

¹⁵Ephe chichaepho onu ono; Jizosu su Sayimonu Pyita: “Sayimonu; nwa Jionu; ? i ka mu eye obu; eme le ndu owa-a?” Pyita su iya: “Ee; Nnajiuphu. I maru le mu yeru ngu obu.” Jizosu su iya: “Nujekwa unwu aturu mu nri.”

¹⁶Jizosu bya eku iya k'ugbo ebo su iya: “Sayimonu; nwa Jionu; ? I yeru mu obu?” Pyita su iya: “Ee! Nnajiuphu; I maru le mu yeru ngu obu.” Jizosu su iya: “Letajekwa aturu mu enya.”

¹⁷O byakwa eku iya k'ugbo eto su iya: “Sayimonu; nwa Jionu; ? I yeru mu obu?” Ehu rwuhuepho Pyita arwuhu l'o jiru iya ya k'ugbo eto su iya: “? I yeru mu obu?” O su iya: “Nnajiuphu; I tukoru iphemiphe makotaru; I maru le mu yeru ngu obu.” Jizosu su iya: “Nujekwa aturu mu nri.”

¹⁸“Ge mu gbukwaaru ngu iya tororo; teke i bu okorobyia be o bu ngu agbeshije wota ekwa ngu nmaru lobaru jeshia iphe, iije; ole teke i kahuerupho be ii-chili eka ngu ephenebo; onye ozo abya anmabe ngu ekwa ngu l'upfu; duta ngu jeshia eka abudu uche ngu.”

¹⁹Iphe ono be o pfuru gude tua onu ge Pyita e-gude nwuhu; shi egube ono goshi odubiribiri Chileke. Jizosu pfuchaepho nno bya asu Pyita: “Tsuru mu.”

Jizosu yele onye etsoje iya nu ophuna

²⁰Pyita bya aghaa enya l'azu; huma onye ophunapho, etsoje Jizosu, Jizosu yeru obu-a g'ootso phe. Oo ya bu onye k'ono, no-kube Jizosu ntse g'ephe eri nri-enyashi pho; mbu jiru iya su iya: “Nnajiuphu; ? bu onye e-deru ngu ye-a?”

²¹Pyita hūmae ya pho bya ajia Jizosu su iya: “Nnajiuphu; ? Denukpohunaa g'ee-me k'onye owa?”

²²Jizosu su iya: “O -buru l'o du mu g'o nodu ndzu jasu teke mu a-bya ozo; ? eka ngu du iya l'awe? Nkengu bu g'i tsuru mu.”

²³No iya; iphe, bu unwunna g'ephe ha kwoahaa l'iphe ono, o pfuru ono bu l'onye etsoje Jizosu k'ono ta abyadu anwuhu anwuhu. Ole Jizosu ta asukwaru l'o to byadu anwuhu anwuhu. Iphe, o pfuru bukwa l'o suru: “O -buru l'o du mu g'o nodu ndzu jasuru teke mu a-bya ozo; ? eka ngu du iya l'awe?”

²⁴Oo onye etsoje Jizosu ono bu iya epfu iphe, o gude enya iya huma l'iphemiphe-a g'o ha. O bukwaru iya pho deru iphemiphe-a. Anyi maru l'iphe, o deru be o pfuru ire-lanu.

²⁵O nwechakwaaruro igwerigwe iphe ozo, Jizosu meshiru. G'o du mu bu le: o -bu l'e mejeru g'a tuko g'o hakota degbua l'ekwo nanu nanu; me mgboko-a l'ophu tege asukwaru edobe ekwo, e dekotaru iya.

Ndu-ishi-ozì

Ndu-ishi-ozì 1

- ¹Èguru ònyà mu, bụ Tiyófilosu: Èkwò, mu vuru ụzò deeru ngu bẹ mu deru iphemiphe, Jizọsụ watarụ ememe yẹle iphemiphe, ọ watarụ ezizi e -shikpọọ lẹ mbụ;
- ²jasụ teke Chileke kubarú iya l'imigwe. Ọ byalẹpho ala l'imigwe; o shi l'ẹka Unme-dụ-Nsọ karụ ndu ono, ọ hotaru g'ẹphe buru ndu-ishi-ozì iya ono iphe, ẹphe e-me.
- ³O jechaaru iphe-ẹhuka; bya anwuhu; nwuhuchaa teta dzuru ndzu; bya anọo ụkporo abalị labọ; goshi phẹ onwiya lẹ ya dzụ ndzụ. O -goshichaa; o -goshibaa k'ọphu o doru phẹ ẹnya; ẹbe ọ dudu onye atụ ẹgo kẹ ? a maru ọ dzụ ndzụ eviya? Ẹphe gude ẹnya phẹ hụma iya. O pfiaru phẹ k'ẹka Chileke bụ eze.
- ⁴Ọ duru teke ẹphe l'iya nọkobe; ọ sụ phẹ: “Unu ta alufukwa lẹ Jierúsalemú. Unu nọdukwa kwabẹru iphe ono, Nna sụru lẹ ya a-nụ ono, bụ iya bụ iphe-oma-a, mu pfuhawaru unu-a.
- ⁵Kẹle Jionu gude mini mee baputizimu; ọle a -nọephe ujiku olemole nta-a bẹ ee-gude Unme Chileke mee unu baputizimu.”

Jizọsụ alapfu Chileke l'imigwe

- ⁶Ọo ya bụ; ndu-ishi-ozì ono dzukọbeephe; ẹphe lẹ Jizọsụ; ẹphe jĩa ya: “Nnajiuphu; ? o rwuwaru teke ịi-nuphu ndu Ízurelu alị-eze phẹ azụ tọ?”
- ⁷Jizọsụ sụ phẹ: “Ọ tọ gbakwaru unu l'amaru mbọchi, ọ bụ; ọzoo ẹgube teke ọ bụ, bụ teke Nna mu gudewaa ẹka iya tụa l'onwiya.
- ⁸Ọle Unme-dụ-Nsọ a-bya unu l'ẹhu; l'o mee unu; unu esihu ike; k'ọphu unu a-nọdu epfu iphe, unu hụmaru kẹ nkemu. Unu e-pfu iya lẹ Jierúsalemú; mẹ alị Jiudiya; mękpoo alị Samériya jasuwaruroya l'ẹkameka, nọ lẹ mgboko mgburugburu.”
- ⁹O pfuchaephe nno; ẹphe nọdu ele iya ẹnya; Chileke wolia ya. Urwukpu woru iya domia.
- ¹⁰Ẹphe nọdu elekpọekwapho ẹnya l'akpaminigwe l'ẹka ono g'o mihuchaaru. Unwoke labọ, yeru uwe ọchaa bya bya apfu-kube phẹ;
- ¹¹sụ phẹ: “Unubẹ unwoke kẹ Gálili; ? bụ gunu bẹ meru iphe, o gude unu pfuru l'ẹka ono ele ẹnya l'akpaminigwe? Jizọsụ ono, a nataru unu kuba l'imigwe ono bụkwapho g'unu ele iya ọ bahụ l'imigwe ono bụ g'oo-gude bya ọzo.”

Onye ee-gude dochia ẹnya Jiudasu

- ¹²Tọbudu iya bụ; ẹphe shi l'úbvú ono, eekuje Olivu ono lashĩa Jierúsalemú. Úbvú ono kalibe-a ubvu manyiru mẹ a -gbẹ lẹ Jierúsalemú.
- ¹³Ẹphe rwuẹpho Jierúsalemú; ẹphe bahụ l'ulo eli. Ẹphe shi lẹ k'alị bahụ lẹ k'eli, bụ iya bụ ẹka ẹphe nọkpoo anọno. Ndu ono bẹ ẹpha phẹ bụ: Pyita waa Jionu waa Jiemusu waa Anduru waa Filipu waa Tọmosu waa Batulomiyu waa Matiyu waa Jiemusu

Alufiyosu waa Sayimonu, onye adzo g'alị ndu Jiu duru ndu Jiu wafua Jiudasu bu nwa Jiemusu.

¹⁴Ephe l'unwanyị nọkwapho l'eka ono; mekpoo Meri, bu iya bu ne Jizosu waa unwune Jizosu. G'ephe ha jeru atuko nodu l'eka lanu gude obu lanu epfu anu Chileke.

¹⁵O rwua ujiku lanu; ephe rwua ukporo ishii dzukobe l'eka lanu. Noo ya; Pyita gbalihu l'echilabo unwunna ono su:

¹⁶“Unwunna mu; iphe ono, e dehawaru l'ekwo-opfu Chileke ono, mefutaje nu ono vukotaakwaru, bu iya bu iphe ono, Unme-du-Nso shihawaa l'onu Dévidi pfua ke Jiudasu ono, bu iya bu onye du ndu byaru egude Jizosu ono.

¹⁷Jiudasu ono be e shi guru yeru anyi; o shi yiru l'eje ozi-a, anyi eje-a.”

¹⁸O gude okpoga, a pfuru iya l'ejo-iphe, o meru zua alị; e mechaa o daa su-gbua onwiya; ephe gbafuhu iya; akurepho iya g'o ha kposihu.

¹⁹Iphe, bu ndu Jierusalemu mgburugburu numa iphe ono, meru nu ono. Ephe woru alị ono kua Akeludama l'opfu ibe phe, bu iya bu “Alị mee.”

²⁰Kele e deru le Ekwo-ebvu-oma su: G'egbara fua l'ibe iya! G'o to dukwa onye ebu iya ebubu! Ozo bu: “G'onye ozo nochikwaa enya iya l'eje ozi, o shi eje!”

²¹“Oo ya bu g'a hota nwoke lanu le ndu-a, anyi l'ephe shi teke Nnajiuphu ono, bu Jizosu eje eje alwa alwalwa noduta ono;

²²e -shi teke Jionu eme bapuzizimu jasụ teke ono a nataru anyi Jizosu kuba l'imigwe. G'onye ono tsoru anyi l'epfu le Jizosu shiwaa l'onwu teta nodu ndu.”

²³Tobudu iya bu; ephe bya hota umadzu labo; Jiosofu onye eekuje Basabasu, ntushi-epha iya bu Jiosutosu; waa Matayasu.

²⁴Ephe bya epfuru nu Chileke su: “Gube Nnajiuphu; gube onye maru obu onyemonye; goshi onye ophu i hotaru l'ime umadzu ebo-a;

²⁵g'o nochia enya Jiudasu buru onye-ishi-ozii; meje iphe ono, o haru lashia eka gbaru iya nu ono.”

²⁶Ephe taru phe ido. O daaru Matayasu. E woru iya yekoberu ndu-ishi-ozii iri le nanu onoya.

Ndu-ishi-ozii 2

Abyabya Unme-du-Nso

¹O be mboku obo-iphe, Pentikosutu gedegede; ephe tuko g'ephe ha dzukobe l'eka lanu.

²G'e jia epfua; ephu shi l'imigwe phuru g'ephu oke pherephere bya ejiopho ulo ono, ephe no ono ejiji.

³Ephe hūma iphe, dūgbaa g'oku, enwu enwunwu g'ọ jakashiru ajakashī kekashia onwiya bya anọduchaa phẹ l'ishi l'ẹhu l'ẹhu.

⁴Unme-dụ-Nsọ ji phẹ ẹhu g'ephe ha; o woru phẹ olu-opfu ghaa. Ephe pfuahaa l'olu Unme-dụ-Nsọ.

⁵Noo ya; ọ duru ndu Jiu, jiru Jierúsalemu; ndu Jiu, atsu Chileke ebvu, shigbaa l'alị mgboko mgburugburu.

⁶O be teke ephe nūmaru ụzu ono; a dū igwerigwe gbakodzua. O kpoo onyemonye opfu; kele onyenonu nūmaru g'eepfu opfu-alị iya.

⁷O dū phẹ biribiri; teme o jikwa phẹ phọ ẹnya. Ephe jiahaa nwibe phẹ aji sụ: “Ndu-a, epfu opfu-a ? ephe ta abuna-a ndu Gálili?”

⁸? Denukwanu g'o gude anyi nọdu anugbaa opfu-alị anyi l'ẹhu l'ẹhu?

⁹Mbụ opfu anyibe ndu Patiya me ndu Midiya me ndu Elamu me ndu shi Mesopotemiya me ndu shi Jiudiya me ndu shi Kapadosiya me ndu shi Pontosu me ndu shi Eshiya

¹⁰mekpoo anyibe ndu shi Firijiya waa Pamfiliya anyibe ndu shigbakpoo Ijiputu me ndu shi Sayirini l'alị Libiya teme yekpooru ndu byaru abyabya, shi le Romu

¹¹me ndu Jiu me ndu anwu ẹka ndu Jiu; ndu Kiritu me ndu Arabu anyi tukoru anugbaa ẹka ephe gude opfu-alị anyi epfu k'eze iphe, Chileke emegbaa.”

¹²O dū phẹ biribiri; teme ọ tufu phẹ ẹhu. Ephe nọdu ajigbaa nwibe phẹ sụ: “? Bụ gunu be iphe ọwa-a bukpo?”

¹³O duru ndu gude mgbonu sụ l'oo mee l'atsụ phẹ.

Pyita asa opfu

¹⁴Oo ya bụ; Pyita gbalihu yee ndu-ishi-oziri le nanu ophuu bya apfuru. Pyita bya awata iya arara sụ: “Mu sụ-a; unube ndu Jiudiya waa ndu bukpo le Jierúsalemu mgburugburu; unu gebekwa-o! Unu ngabe nchi l'iphe, mu abya epfufu-a!”

¹⁵Ndu-a ta angukwaru mee, bu iya bu iphe, unu ari. ? Tobudu enyanwu agbakota nta?

¹⁶Iphe ọwa-a buchikwa iphe ono, o pfuru; mbu Jiowelu onye mpfuchiru Chileke teke k'ichee ono sụ:

¹⁷“Qwaa bu iphe, Chileke epfu! L'ikpazu be mu a-wu nemadzu mgburugburu Unme mu. Oo ya bu; unwu unu unwoke me unwanyi epfuchiaharu mu. Teme unwokorobyia unu aphua ophulenyia. Ndu bu ogerenya unu a-rwo nrwo.

¹⁸Ee! Teke ono be mu a-wuchaa Unme mu ono wua l'unwoke me unwanyi, ejeru mu ozi. Ephebedua epfuchiahakwaru mu pho.

¹⁹Mu e-me iphe-ohumalenya l'akpaminigwe bya emee iphe, jiru enya le mgboko. Aa-huma mee waa oku yeke okpu tututuutu enwuru-oku.

- ²⁰Enyanwu a-gbahụ tsukiribaa. Onwa ekeahaa meeme ẹme l'o rwua mbọku Nnajiuphu a-bya, bụ iya bụ eze mbọku ono, a-dụ akpabiri ono.
- ²¹Iphe, bukpo onye rakuru Nnajiuphu teke ono bẹ ọo-dzọta.
- ²²“Sụ-a; unwoke Ízurelu; ọ kwa Jizosu ke Nazaretu ono bẹ bụ nwoke ono, Chileke shi l'iphe-ohumalenya yele iphe, jiru ẹnya, dugbaa biribiri, o gude iya meshia l'echilabo unu; mee g'o doo unu ẹnya l'ọo yebe Chileke ziru iya. Iphemiphe ono bẹ unu makotaru ree l'onwunu.
- ²³Ole a kpuru iya nụ unu; unu shi l'eka ndu ta amadu ekemu kpopyabe iya l'oswebe woru iya pfu-gbua. Iphe ono buru iphe, Chileke mahawaru bya achihawaa ya l'idzu dobe.
- ²⁴Ole Chileke tofuwaru iya l'egbu, onwu shi kee ya bya emee o shi l'onwu teta dzuru ndzu; kele onwu ta adudu ike gudeshia ya.
- ²⁵Lẹ Dévidi pfukwaru ke Jizosu sụ: “Mu ahumaje Nnajiuphu tekenteke. Tekenteke bẹ ọ nọ mu l'ekutara g'ọ to dụ iphe, e-me mu nụ.
- ²⁶Noo g'o gude obu nọdu atso mu utso. Ehu-utso iya mee mu nọdu agu ebvu; ete eswa. Mu maru lẹ mu
-nwuhuchakpoo bẹ ii-dobe mu-a ndzu ọzo.
- ²⁷Noo kele i tji hadu mu l'ali-maa. I tji hadu onye nkengu, i yeru obu g'o rehu erehu.
- ²⁸I goshiwaru mu uto ndzu. Ii-me g'ehu tsoo mu utso kele mu lẹ ngu bu.
- ²⁹“Sụ-a; unwunna mu; mu a-toğboru ke nna anyi oche, bụ Dévidi eba. O to budua l'owuhuru anwuhu; e likwaru iya pho elili; ẹme ilu iya dukwa-a byasu ntanu-a.
- ³⁰Obenu l'o shi buru onye mpfuchiru Chileke. O maru lẹ Chileke kweru iya ukwe bya eriru angu ye iya lẹ ya e-shi l'awa iya hota onye a-nochi okwa eze iya.
- ³¹O humaru iphe, Chileke e-mechaa mee. O pfua lẹ Kéreshi e-shi l'onwu teta dzuru ndzu, bụ iya bụ teke ono, ọ sụru: “O to haduru iya l'ali-maa. Ẽme ebe anu-ehu iya erehuduru erehu.”
- ³²Chileke mewaru Jizosu ono o shi l'onwu teta dzuru ndzu, bụ iya bụ ọwa-a, anyi tukoru gude ẹnya anyi huma-a.
- ³³Oo ya bụ lẹ Chileke woliru iya eli woru dobe l'ekutara iya. O nataakwaru Unme-dụ-Nso l'eka Nna, bụ iphe-oma, Chileke kweru ukwe iya. Iphe-a, unu humaru-a waa iphe-a, unu anu-a bukwa iphe-oma ono, bụ iya bụ Unme-dụ-Nso ono, ọ wuru anyi ono.
- ³⁴L'ọ to bukwa Dévidi bẹ laru l'imigwe l'onwiya; kele yebedua l'onwiya sukwaru: “Chipfu sụru Nnajiuphu mu: Nodu mu l'ekutara;
- ³⁵jasu teke mu e-me ndu ohogu ngu g'ephe buru iphe, ii-zopyabe l'okpa. ”

³⁶“Oo ya bu; g'o doo Ízurelu mgburugburu ɛnya rengurengu lẹ Chileke mewaru Jizosu ono, unu kpopyaberu l'oswebe ono g'o buru Nnajiuphu buru Kéreshi obu.”

³⁷Noo ya; ɛphe nɔmae ya phọ; meji tsukahụ phẹ. Ẹphe sụ Pyita waa ndu-ishi-ozu ndu ophuu: “Unwunna anyi; ? bu gunu be anyi e-me?”

³⁸Pyita sụ phẹ: “G'izimanu iphe-ɛji unu lwa unu azu; g'unu lwapfuta Chileke; g'e gude ɛpha Jizosu, bu Kéreshi mee unu baputizimu g'unu hakota l'ehu l'ehu ge Chileke aguaru unu nvu l'iphe-ɛji unu; unu a-nata iphe-oma ono, bu iya bu Unme-du-Nso.

³⁹L'iphe ono be Chileke kwekwaru ukwe lẹ ya e-meru unu; meeru iya unwu unu; meeru iya iphe, bukpuo ndu nokwadu ɛnya me iphe, bukpuo onye Nnajiuphu, bu Chileke anyi e-ku.”

⁴⁰Pyita pfuchaa nno bya epfukwaapho igwerigwe opfu ozo pfushia ya ike bya anmaaru phẹ okwa su: “Ophu g'unu dzoo onwunu l'ogbo-a, a-la l'iswi-a.”

⁴¹Oo ya bu; a du igwerigwe nata ozi iya; e mee phẹ baputizimu. Mboku ono; iphe, rwuru unu nemadzu mgbo esaa l'umadzu ukporo iri bya ayiru lẹ ndu kwetawaru nu.

Umere ndu chiochi mbu

⁴²Iphe, ɛphe yeerupho ehu ememe buru anodu abyajekpoepho anuma iphe, ndu-ishi-ozu ono ezi phẹ bya atukoje nokobe g'unwune; atu mgbabe l'eri Nri Nnajiuphu waa l'epfu anu Chileke.

⁴³Iphe, bukpuo onyemonye tsuaha ebvu. Ndu-ishi-ozu ono nodu emeshi igwerigwe iphe-ohumalenya me iphe, jiru ɛnya, dugbaa biribiri.

⁴⁴Iphe, bukpuo ndu kwetaru ke Jizosu g'ɛphe ha tuko iphemiphe, ɛphe nweru tu mgbabe.

⁴⁵Ẹphe reshikota eku phẹ waa iphemiphe, ɛphe nweru enweru. Ẹphe woru iya keeru onyemonye ge mkpa haru onye.

⁴⁶Mboku-mboku; ɛphe atuko tugba nanu je anodu l'eze-ulo Chileke. Ẹphe nodu atugbaje eri Nri Nnajiuphu l'unuphu l'unuphu phẹ; teme ɛphe nodu egudeje ehu-utso waa obu iphoro eri iphe, bukpuo iphe, ɛphe eri eriri.

⁴⁷Ẹphe nodu ekelejekpeepho Chileke. Ẹphe buru ndu du ndiphe mgburugburu l'obu. Nnajiuphu nodu eyekwaru phẹ ndu o dzotaru k'ophuu mboku-mboku.

Ndu-ishi-ozu 3

Emeta onye eniyeni

¹O be ujiku lanu; Pyita yee Jionu nodu eje l'eze-ulo Chileke l'okuloku eto k'eswe teke eepfuge anu Chileke.

²O duru nwoke, shi l'epho buru eniyeni, a pa je edobe l'onu-abata ophu eekuje “Onu-abata-ama-mma.” Nwoke ono be aapataje mboku-mboku bya edobe l'oguzo ono g'o rwoje ndu abahu l'eze-ulo Chileke ono arwo.

³O hūmaepho Pyīta yēe Jionu ẹka ẹphe abata l'ime eze-ulo ono; ọ rwoahakwa phe pho iphe.

⁴Ẹphe tabe iya ẹnya. A nonyaa; Pyīta sū iya: “Lee anyi ẹnya!”

⁵O leahaa phe ẹnya dobesukwanu l'ọ dūru iphe, ẹphe abya iya anūnu.

⁶Pyīta sū: “Mu te enwekwa mkpola-ododo ozoo mkpola-ochaa; ọle ọphu mu nweru be mu a-nū ngu. L'ẹpha Jizosu Kéreshi, onye Nazaretu; gbalihu jeahaa ije!”

⁷Ọ lota nwoke ono l'ẹkutara lo-lia ya eli. G'e jia epfua ọkpa iya labo waa nkwo ọkpa iya tetachaa ya.

⁸Ọ pfulihu pfuru apfuru jeahaa ije. O tsoru phe bahu l'eze-ulo Chileke. Ọ nodu apfuphe ete ẹswa ejephe etu Chileke ẹpha.

⁹O be teke onyemonye hūmaru g'o jephe etu Chileke ẹpha;

¹⁰ẹphe hūbechaa ya ama l'ọo onye-a, shi nodu “le Onu-abata-ama-mma” eze-ulo Chileke arwo arwo-a. Ọ dū phe biribiri teme ọ tufukwa phe pho ẹhu; mbu iphe ono, e meru iya ono.

Pyīta asa opfu l'eze-ulo Chileke

¹¹O be ge ndiphe hūmaru g'ogba etso Pyīta yēe Jionu l'ẹkameka; ẹphe gbaa mkpu bya anodu ele iya l'onu-ulo ọphu eekuje “Onuzo Sólomonu.” Ọ dū phe ọkpobe biribiri.

¹²Pyīta hūmaepho ndu ono ọ sū: “Unube ndu Ízurelu; ? bu gunu meru g'o gude iphe-a dū unu biribiri? ? Bu gunu meru g'o gude unu nodu ele anyi g'ọ bu ike anyi be anyi gude mee nwoke-a o jeahaa ije-a; ozoo l'ọo ke g'anyi bu-be ndu akwabẹ Chileke ùbvù?”

¹³Ọ kwa Chileke ke nna anyi oche phe; mbu Chileke ono, bu Chileke ke Ébirihamu; bya aburu Chileke ke Áyizaku; buru Chileke ke Jiékoju ono; ọ kwa iya be gudewaa iphe-a, meru nu-a goshi ọdu-biribiri ke Nwa iya, bu Jizosu; mbu onye ono, unu kpuru nu ndu Romu bya ajikakwa iya pho l'iphu Payileti ono. Payileti ono-a gudehawaa ọkpoma iya sū le ya a-ha iya ke mmanu.

¹⁴Unu jika onye ono, dū iche; teme ọ buru onye pfuberekoto; bya abu-chiaru onye gburu ọchi be unu suru g'a haaru unu ke mmanu.

¹⁵Unu shi nno gbua onye gude ndzu. Obenu le Chileke meru g'o shi l'onwu teta dzuru ndzu ozo, bu iya bu ọkpobe-opfu-a, anyi agba ekebe iya-a.

¹⁶Nwoke-a, unu hūmaru-a teme ọ buru onye unu maru-a bukwa ike ke Jizosu ono be meru iya o wekorohu; kele anyi kweru l'ike dū l'ẹpha iya. Mbua; ọ kwa ekweta ke Jizosu be meru nwoke-a, pfuru l'iphu unu g'unu ha-a o wekorohu.

¹⁷“Sū-a; unwunna mu; mu maru-a l'unu le ndu-ishi unu meru Jizosu egube ono; kele unu ta amadu.

- ¹⁸Chileke shi l'eka ono mee iphe, o pfuru l'onu ndu mpfuchiru iya g'ephe ha teke ndiche su le Kereshi obu e-je iphe-ehuka.
- ¹⁹Oo ya bu g'izimanu lwa unu azu. Unu lwaphuta azu lwapfuta Chileke g'o hufu iphe-aji unu.
- ²⁰G'ehu-guu eshikwapho l'eka Nnajiuphu byaru unu. Ehu-guu ono a-bya me o -ziepho Onye-Ndzota ono, o hotahawaru unu ono, bu iya bu Jizosu.
- ²¹Jizosu ono a-nodu l'imigwe jasu teke Chileke e-mephu iphemiphe azu g'o buru k'ophuu, bu iphemiphe ono, Chileke shi l'onu ndu mpfuchiru iya pfuaru anyi teke ndiche ono.
- ²²Mosisu pfukpokwaaru sua: 'Nnajiuphu, bu Chileke be e-zi onye mpfuchiru iya g'o ziru yebdua. Onye ono a-buru nwanna unu gedegede. Unu a-numaje iphemiphe, o pfuru; mee ya ememe.'
- ²³Onye ata angabeduru onye mpfuchiru Chileke ono nchi be aa-hofu l'echilabo ndibe Chileke mee g'o laa l'iswi.
- ²⁴Iphe, bu ndu mpfuchiru Chileke g'ephe ha; e -shikpoo le Samele je akpaa le ndu ophu etso iya nu; g'ephe ha be tukoru pfukota opfu iphe-a, eme nta-a.
- ²⁵Iphe ono, Chileke shi l'onu ndu mpfuchiru iya su l'oo-me ono be bu unu be o pfudoru iya; kele oo unu bu unwu ndiche, Chileke kweru ukwe-iphe teke o suru Ebirhamu: 'Oo awa ngu be ya e-shi goru mgboko mgburugburu onu-oma'.
- ²⁶Chileke yeru onye ejeru iya ozi, bu Jizosu su g'o vuru uzo byapfuta unu g'o goru unu onu-oma, bu iya bu g'o mee unu l'ehu l'ehu g'unu ghaaru ejo-iphe ono, unu eme ono azu."

Ndu-ishi-ozii 4

Pyita asa opfu l'iphu ndu-ishi ndu Jiu

- ¹Ephe kpukwaduru-a opfu, ephe epfuru ndu ono l'onu; ndu-ishi uke Chileke waa ndu Sadiusii waa onye-ishi ogbogu eze-ulo Chileke wu-pfuta phe.
- ²Ehu nodu eghe phe eghe; kele umadzu ebo ono ezi iphe bya arakwa iya pho arara l'eshinu Jizosu tetaru dzuru ndzu be ee-mechaa shi l'onwu teta dzuru ndzu.
- ³Ephe kputa phe je atuchia kele nchi jihuwaru. Ephe noo jasu le nchitabohu iya.
- ⁴Ole igwerigwe ndu numaru ozi, Pyita phe ziru woru onwophe ye Jizosu l'eka. Ndu ophu bu unwoke rwua iphe, du g'unu nemadzu mgbo iri l'ebo l'umadzu ukporo iri.
- ⁵O be le nchitabohu iya ono; ndu-ishi ndu Jiu waa ndu bu ogerenya phe waa ndu ezije ekemu bya edzukobe le Jierusalemu.
- ⁶Noo ya; Anasu, bu onye-ishi ndu-ishi uke Chileke nokwapho l'eka ono waa Kayafasu mekpoo Jionu waa Aleguzanda; mewaro iphe, bukpo ndu shigbaa l'eri ndu-ishi uke Chileke nokotakpoephe l'eka ono.

⁷Ḑp̄he bya eworu ndu-ishi-oz̄i ono bya edobe l'echi bya ajīahaa ph̄e ike onye Ḑp̄he gude eme iphemip̄he onoya; ọ̄zoo onye ziru ph̄e iya n̄u.

⁸Unme Chileke ji Pȳita ḑhu; o p̄fuaaha s̄u ph̄e: “Unub̄e ndu-ishi m̄e ndu b̄u ọ̄gerenya Í̄z̄ur̄el̄u.

⁹O doru anyi ḑnya l'ip̄he, unu ekpe anyi ikpe iya n̄tan̄u-a b̄u k'ip̄he, d̄u ree, e meru onye n̄o l̄e mkpa, b̄u iya b̄u g'e gude mee nwoke-a g'o wek̄orohu-a.

¹⁰Ọ̄le ọ̄o g'unub̄e ndu n̄o l'ḑka-a; m̄e ip̄he, b̄u ndu Í̄z̄ur̄el̄u mgburugburu makwar̄u l'o b̄u ike k'ḑpha Jiz̄osu K̄éreshi onye Nazaretu ono; b̄e nwoke-a gude wek̄orohu p̄furu l'ip̄hu unu-a. Mb̄u Jiz̄osu ono, unu kp̄opyaberu l'oswebe l'onwunu; obenu l̄e Chileke mechakwanaar̄u bya emee ya o shi l'onwu teta dz̄uru ndz̄u ọ̄zo ono.

¹¹Ọ̄o Jiz̄osu ono b̄e e deru nkiya l'ḑkwo-op̄fu Chileke s̄u: “‘Ọ̄waa b̄u mkpuma, unub̄e ndu akp̄u ọ̄lo j̄ikaru, mechaar̄u bya ab̄uru mkpuma, gude ọ̄lo.’”

¹²Ọ̄ t̄o d̄udu onye ọ̄zo, ad̄u ike adz̄ota anyi gbahaa Jiz̄osu K̄éreshi kpoloko. Ḑbe ọ̄ d̄ukwa ḑpha onye ọ̄zo l̄e mgboko-a mgburugburu, Chileke meru g'a maru; mb̄u ḑpha, a-d̄u ike dz̄oo nemadz̄u gbahaa k̄e Jiz̄osu ono nw̄ekiya.

¹³Ḑp̄he n̄umachaa ḡe Pȳita ȳe J̄ionu asa kpaa kpaa; l'ḑka ḑp̄he b̄u nemadz̄u mman̄u, ab̄udu l'ḑp̄he nw̄uru ḑkwo; o ji ph̄e ḑnya. Ḑnya gbarwua ph̄e l̄e Pȳita ph̄e b̄u ndu ḑp̄he l̄e Jiz̄osu shi aswije.

¹⁴Ọ̄phu ḑp̄he enwēedu ọ̄nu op̄fu ḡe nwoke ọ̄bu, e meru o wek̄orohu ọ̄bu p̄fukwarupho l'ḑka ono-a.

¹⁵Ḑp̄he s̄u Pȳita ph̄e g'ḑp̄he t̄ugbua l̄ufu l'ọ̄lo-ikpe ono g'ḑp̄he ch̄ia idzu.

¹⁶Ḑp̄he s̄u: “? B̄ukpoo ḡunu b̄e anyi e-me ndu-a? Ip̄he, b̄u Jierúsalem̄u mgburugburu madzuwaru n̄ta-a l'ọ̄o ph̄e b̄e Chileke shi l'ḑka mee ḡe nwoke-a wek̄orohu. Ono b̄e a ta at̄uduru ẹ̄go.

¹⁷Ip̄he, anyi e-me g'e te ep̄fukashiḑe iya l'al̄i Jiu b̄ukwa g'anyi yesh̄iaru ph̄e ebvu ike g'ḑp̄he te ep̄fuḑhe k̄e nwoke ono ọ̄zo.”

¹⁸Ḑp̄he kua Pȳita ph̄e bya at̄uaru ph̄e ekemu s̄u g'ḑp̄he te ephotabaḑkwa ḑpha Jiz̄osu; ọ̄phu ḑp̄he egudebaḑkwa ḑpha iya zia ip̄he l'edzudzu-ọ̄ha ọ̄zobaa.

¹⁹Pȳita ȳe J̄ionu bya eyeeru ph̄e ọ̄nu s̄u: “Unu ghanaa ya hata. ? B̄u ole ka ree l'ip̄hu Chileke? ? B̄u g'anyi n̄uj̄eru Chileke op̄fu t̄oo g'anyi n̄uj̄eru unu op̄fu?”

²⁰K̄eḑe anyi ta aȳikwa haa ep̄fu ip̄he, anyi h̄umaru bya an̄umakwapho l̄e nch̄i anyi.”

²¹Ḑp̄he bya anmash̄ibaaru ph̄e ọ̄nwu ike bya ahaa ph̄e; ḑp̄he lash̄ia. Ḑbe ọ̄ d̄udu ip̄he, ḑp̄he maru, ḑp̄he a-gbab̄e ọ̄kpa n̄ua ph̄e aph̄u; k̄eḑe ndip̄he ekele Chileke ekele k'ip̄he, meru n̄u;

²²op̄fu l̄e nwoke ono, e meru o wek̄orohu l'uzo, d̄u biribiri ono n̄oghataawaru ọ̄kporo apha lab̄o.

Ndu kẹ Chileke epfu anụ Chileke g'o mee g'ike dị phẹ

- ²³A haaepho Pyita phẹ; ephe tugbuwa jepfu ndu ephe l'ephe aswije je akokotaru phẹ iphemiphe ono, ndu-ishi uke Chileke waa ndu bu ọgerenya ono pfuru ono.
- ²⁴Ephe nūmachae ya phọ; ephe gude obu lanu kwata epfu anu Chileke su: “Nnajiuphu, bu iya bu Chileke, doberu igwe dobe ali dobe eze mini dobe iphe, bu l'ime iya.
- ²⁵Gube onye gude ike Unme-du-Nso mee onye-iche anyi, bu Dévidi; onye shi ejeru ngu ozi; o dee su: “? Bu gunu kparu iphe, ohamoha gude ehu-eghu aba hanyihanyi? ? O nwuru inwagha be ndiphe achị ejo idzu ke mmanu?”
- ²⁶Ndu eze ndiphe nodu akwakobe k'ogu. Ndu-ishi dzukobe g'ephe tsoo Nnajiuphu ogu; mbu g'ephe tsoo Kéreshi ogu.
- ²⁷O bu okpobe-opfu l'ephe dzukoru le Jierusalemu l'eka-a; mbu Herodu me Ponchiosu Payileti; me ndu ohozo me ndu Izurelu; g'ephe tsoo okpobe Nwa ngu, bu Jizosu, i hotaru ogu.
- ²⁸Obenu l'iphe ono tukoru buru g'ephe mee iphe, i chihawaru l'idzu l'o noo g'ee-me iya.
- ²⁹Nta-a Nnajiuphu; lenaa egube onwu, ephe anmashiru anyi. Oo ya bu; yenu anyibe ndu ejeru ngu ozi ike l'ehu; g'anyi ta atsujeshi ebvu ililekpoo k'epfu opfu ngu ono.
- ³⁰Yetanu eka mee ge ndu iphe eme wekorohu; teme g'anyi gude epha Jizosu, bu Nwa ngu, du nsọ ono meshia iphe-ohumalenya ozo, dugbaa biribiri.”
- ³¹Ephe pfuchaaru nu Chileke; eka ono, ephe no ono nmakota jijijijii. Unme Chileke bya eji phe ehu; ephe kwata ziahaa ozi-oma Chileke; ophu ndzu aguedu phe.

Agbaru mgbala l'iphe; ke ndu ke Chileke

- ³²Tobudu iya bu; ndu kweru l'oo Jizosu bu Nnajiuphu phe g'ephe ha toko tugba buru nanu. Obu phe buru nanu. Ophu o dudu onye ophu asujekwadu l'iphe, o nweru bu k'eka iya. Ephe toko iphemiphe tugbabe gbaru mgbala.
- ³³Ndu-ishi-ozu nodu asa iya l'edzudzu-oha g'o doo enya; le Nnajiuphu, bu Jizosu shiwaa l'onwu teta dzuru ndzu. Chileke kwatakpoọ emeru phe eze-iphe-oma, paru eka g'ephe ha.
- ³⁴Iphe, bukpoọ g'ephe ha huma-dzuru iphe, mkpa iya duru phe. Ndu nweru ali; ozoo ulo reshia ya
- ³⁵chitaru ndu-ishi-ozu okpoga iya. A nodu ekejeru onyemonye okpoga obu ge mkpa onye ha.
- ³⁶Noo g'o nwuru meru iphe, Jiosofu mekwarupho nkiya nno. Jiosofu ono bu onye Liviayi; onye a nwuru le Sayipurosu, ndu-ishi-ozu guru Banabasu, bu iya bu “onye anuje onye ozo okpu-ikike.”
- ³⁷Yebedua woru ali, o nweru ree bya achiru okpoga iya nukota ndu-ishi-ozu.

Ndu-ishi-ozì 5

Ananayasu yẹle Safayira

- ¹Noo ya; nwoke lanu, eeku je Ananayasu yee nyee ya, bu Safayira bya erekwaapho ali phe.
- ²Ananayasu haphodo aswa ali ono dobe; nyee ya makwarupho. O bya ewotaru ndu-ishi-ozì uphodu iya.
- ³Noo ya; Pyita su iya: “Ananayasu! ? Bu gunu meru g'o gude i kwe ge Nsetanu bata ngu l'obu bya emee ngu g'i gbaarun Unme-du-Nso eregede; mbu g'i kweta haphodo okpoga, i retaru l'ali ngu?”
- ⁴Teke ono, i ti shidu ree ali ono; ? to budu nkengu? Temi i rechaa ya erere; ? to budu ngu be okpoga iya du l'eka; o buru ngu maru iphe, du ngu ree, i gege gude iya mee? ? Bu gunu meru g'o gude i kwe gegube iphe ono bata ngu l'obu? O to bukwa nemadzu be i gbarun eregede obu; o kwa Chileke!”
- ⁵Anuma, Ananayasu anuma iya; o daa gbaragadaga nwuhu. Ndu rwuta ndu numarun iya nu.
- ⁶Unworo bya wulihu bya akwaa ya akwa pata je elia.
- ⁷A nepho iphe, ha g'awa eto nyee ya bata; ophu o madu iphe, meru nu.
- ⁸Pyita su iya: “? Bwaa iphe, gu le ji ngu retaru l'ali unu-a baa?” O su iya: “Ee; l'o bukwaa ya bu ono.”
- ⁹Pyita su iya: “? Bu gunu meru g'o gude gu le ji ngu chia idzu g'unu hua Unme Chileke ama? Lekwa ndu jeru eli ji ngu alwapho. Oo phe a-pafufukwa ngu pho.”
- ¹⁰Epfufu, oopfua iya; o daa gworogodogo le mgboru okpa Pyita l'eka ono nwuhu. Unworo bya ono batashia o nwuhuwaa; ephe pata iya je elikube ji iya.
- ¹¹Ndu Chiochi mgburugburu waa ndu ozo, bu ndu numarun iphe ono wata anma pyaapyaapya.

Ndu-ishi-ozì kabaa emeshi iphe-ohumalenya

- ¹²Ndu-ishi-ozì meshiarun ndiphe igwerigwe iphe-ohumalenya, dugbaa biribiri l'echilabo phe l'eka ono. Ndu kweru ke Nnajiuphu gegube ha tugba nanu ejeje anokobe l'eka lanu le Onu-uzo Solomonu; l'ime eze-ulo Chileke.
- ¹³Ophu o dudu ndu ophu ayidu l'ogbo ono jeru atu ama k'etsoru phe; egudekpokwaaro l'ephe bu ndu duru ndiphe le nso.
- ¹⁴Ikpoto nemadzu byaelaa bya ekweta ke Nnajiuphu; unwanyi me unwoke.
- ¹⁵Ephe gude k'iphe ono, ndu-ishi-ozì eme ono pashia ndu iphe, eme je edobe l'aguga gbororo; je enyebegbaa phe l'iphe, aaze aze me l'utute; g'oo-buru Pyita -ghatashia l'o mee phe ephe ewekorohu; mbu o -denyiduru phe eka; onyonyo iya ahakporu phe nu rwua l'ehu.

¹⁶Ikpoto nemadzu, shi le mkpukpu le mkpukpu, no-kubegbaa Jierusalemu ntse gbakodzua patagbaaru phe ndibe phe, iphe eme waa ndu obvu eme. E mee phe epe wekorohuchaa.

Aakpa ndu-ishi-ozu ehu ozokwa

¹⁷Onye-ishi ndu-ishi uke Chileke waa ndu etsoje iya nu, bu iya bu ndu gba l'ogbo ndu Sadiusi tangirihu; jaharu phe iji-nya.

¹⁸Epe tutachaa ndu-ishi-ozu ono je achiru ye l'ulo-mkporo, oha nwe.

¹⁹O be l'enyashi; ojozi-imigwe shi l'eka Nnajiuphu bya aguhashia uzo ulo mkporo ono bata je edufuta ndu-ishi-ozu ono bya asu phe:

²⁰“Unu je apfuru l'ime eze-ulo Chileke kokotaru ndiphe ako ndzu, shi l'eka Kereshi.”

²¹Ndu-ishi-ozu ono kwe iya hm. O be l'utsu; epe je anodu l'eze-ulo Chileke wata ezi iphe. Noo ya; onye-ishi ndu-ishi uke Chileke waa ndu ye l'iya gba l'ogbo bya ekuko ndu ogbo-ikpe ono g'ephe ha; mbu iphe, bu ndu-ishi Izurelu; g'ephe nokobe chia okpobe idzu. Epe zia g'e je atufuta ndu-ishi-ozu l'ulo mkporo kputa byapfuta phe.

²²Ndu e ziru jeshia; ophu epe ahumaeduru phe l'ulo mkporo. Epe lwaphuta azu byapfuta ndu-ikpe ono bya asu phe:

²³Anyi jeshikwaaru; a tuchia ulo mkporo atuchi; gua ya kpukpurukpu. Ndu nche nodugbakwaa nche l'onu-ulo mkporo ono. Anyi tuhaa uzo; ophu o duedu onye anyi humaru l'ime iya.

²⁴Onye-ishi ogbogu eze-ulo Chileke waa ndu-ishi uke Chileke numa iphe ono; o tufu phe ehu; epe rihaa iphe, l'e-me nu.

²⁵Nwoke lanu gbatata bya asu: “? Unu maru-a l'unwoke-a, unu turu mkporo-a be pfuakwaru l'ime eze-ulo Chileke ezi ndu no l'eka ono iphe.”

²⁶Onye-ishi ndu ogbogu ono lufu chita ndu ogbogu je akputa ndu-ishi-ozu ono kpu-phuta azu. Ophu epe egudedu okpehu kputa phe; kele epe ats u ebvu a -nonyaa ndiphe gude mkpuma tugbua phe.

²⁷Epe kputa ndu-ishi-ozu ono bya edobe l'iphu ndzuk o ogbo-ikpe phe. Onye-ishi ndu-ishi uke Chileke jahaa phe aji su:

²⁸“? Anyi ta anmanaru-a unu okwa su g'unu te egudehe epha nwoke ono ezi iphe? Unu gude iphe ono, unu ezi ono zigbabe Jierusalemu. Iphe, unu emekpoeppo bu g'unu tukobe anyi ochi nwoke ono l'ishi.”

²⁹Noo ya; Pyita yele ndu-ishi-ozu ndu ophunapho yeeru phe onu su phe: “O kwa iphe, Chileke suru g'anyi mee be anyi e-meje. O to bukwa ophu nemadzu pfuru.

³⁰Chileke nna anyi oche phe; meru ge Jizosu shi l'onwu teta dzuru ndzu g'unu kppyabecharu iya l'oswebe o nwuhu.

³¹Chileke wolia ya dobe l'ekutara iya mee ya Nnajioha waa Onye-Ndzota g'oo-shi l'eka ono goshi ndu Izurelu uto, ephe e-shi g'izimanu lwa phe azu; g'o guaru phe nvu l'iphe-eji phe.

³²Ono be anyi bu ekebe iya. Nokwapho ge Unme-du-Nso, ophu Chileke anuje onye emeje iphe, o pfuru bukwapho ekebe iya."

³³Ephe numae ya pho; mbu ndu-ikpe ono; ephe guru oku wua eh; bya emeahaa g'ephe gbushia ndu-ishi-ozu ono.

³⁴Onye lanu l'ime phe, epa iya bu Gameliyelu gbalihu wata eye onu. Gameliyelu ono yi l'ogbo ndu Farisii; teme o bukwapho onye ezije ekemu; bya aburu onye ndiphe eyeru nso. O su g'a chita ndu-ishi-ozu ono chifu etezi.

³⁵Ephe lufuepho; o su ndu-ikpe ono: "Mu su-a Izurelu! Unu gebekwa! Unu kwabekwapho enya l'iphe, unu abya eme ndu-a.

³⁶L'unu maru l'o nwegehawaru teke nwoke, eeku Tiyudasu suseru le ya bu onye ha shii. Ndu rwuru unu nemadzu tsoahaa ya. E gbua ya. Ndu ono, etso iya nu ono gbakashihu. Ogbo, o wataru laa.

³⁷E mechaa; o be teke a guseru ugu-a; Judasu onye Galili futakwa. O chikotakwapho ndu ophu tsoru yebdua. E gbukwaa ya pho. Ndu ono, etsoje iya nu ono tuko gbakashihu.

³⁸Nokwa ge ke ndu-a byaru bya adu nta. Ge mu karu unu; unu ta adukwa iphe, unu eme ndu-a. Unu pakwaru phe haa. O -buru l'iphe-a, ephe achi idzu iya-a; ozoo iphe-a, ephe eme-a shi l'eka nemadzu be o-lakwa-a.

³⁹Obenu l'o -shi Chileke l'eka be unu taa dukwa ike akposhi iphe, ephe eme. L'o -shi Chileke l'eka be unu e-mechakwaa huma l'oo Chileke ono l'onwiya be unu etso ugu." Ndu-ikpe ono mee iphe, Gameliyelu pfuru.

⁴⁰Ephe kua ndu-ishi-ozu ono bya e chia phe iphe bya anmaaru phe okwa g'o to dukwa mboku, ephe e-gudebaa epa Jizosu epfu opfu ozo; bya aparu phe haa.

⁴¹Ndu-ishi-ozu ono shi l'iphu ndukwo ogbo-ikpe ono tugbua. Ehu nodu atso phe utso le Chileke guru phe le ndu du ree k'eje iphe-ehuka l'opfu eh Jizosu.

⁴²Ophu ephe ahaduru ezi iphe, l'eze-ulo Chileke me l'unuphu l'unuphu mboku-mboku arakwapho ozi-oma ono arara l'oo Jizosu bu Onye-Ndzota obu, Chileke kweru ukwe iya obu.

Ndu-ishi-ozu 6

Aahota umadzu esaa g'ephe yeru ndu-ishi-ozu aka

¹O be teke a nonyaaru; ndu etso uto Jizosu nodu aka shii eje; ndu Jiu, opfu-ali phe bu Giriku wata agu aphu ndu Jiu, ophu opfu-ali phe bu Hiburu. Iphe, kparu iya nu bu le mboku-mboku be oo bujeru a -wata eke nri; a ta kpadu ishi unwanyi phe, ji phe angedu.

²Ndu-ishi-ozì iri l'èbo ono bya ekua ndu etso ụzo Jizọsu ono g'èphe ha bya asụ phẹ: “Ọ tọ dukwa ree g'anyi gude k'iphe, eeri l'ọnu haa ezi ozi Chileke.

³Ọo ya bụ ụnwunna; unu họtà ụmadzu ẹsaa l'ime unu; g'anyi ye phẹ opfu nri-a l'ẹka. Ndu ono a-buru ndu aama ẹka ọma tẹme Unme-dụ-Nsọ ji phẹ ẹhu; tẹme ẹphe buru ndu maru iphe.

⁴Anyịbedua a-nọduepho l'epfu anụ Chileke yẹle ezi ozi-ọma ono.”

⁵Ẹphe zụkota gberegbedegbemụ l'iphe ono, ndu-ishi-ozì sụrụ g'e mee ono. A bya ahọtà Sutivinu, bụ nwoke, kweru kẹ Nnajiuphu ọkpobe ekwekwe; tẹme Unme-dụ-Nsọ jikwa iya phọ ẹhu; bya ahọtakwapho Filipu waa Pọrokorosu waa Nikenọ waa Tayimonu waa Pamenasu; waa Nịkolasu, onye Antiyọku, onye ọhozo, mewaru onwiya onye Jiu.

⁶Ndu etso ụzo Jizọsu ono bya eduta phẹ byapfuta ndu-ishi-ozì. Ẹphe bya abyabẹ phẹ ẹka; pfuru opfu ẹhu phẹ nụ Chileke.

⁷A kabaa anuma opfu Chileke l'ẹkameka. Ndu etso ụzo Jizọsu lẹ Jierúsalemụ kwatakpọo aka shii eje. Igwerigwe ndu-uke Chileke bya ekweta kẹ Nnajiuphu.

Egude Sutivinu

⁸Sutivinu buru onye Chileke meru eze-iphe-ọma bya aburu onye ike dụ k'ọphu oomeje oke iphe-ọhumalenya, dughaa biribiri l'iphu ndiphe.

⁹Noo ya; ọ duru ndu-ishi l'ụlo-ndzukọ ndu Jiu, shi buru ohu. Ndu ono shigbaa Sayirini waa Alẹguzandiriya waa Silisiya waa Eshiya. Tọbudu iya bụ; ẹphe byapfuta Sutivinu ẹphe l'iya lipfuru l'igoligoli.

¹⁰Ọle Unme Chileke nuru Sutivinu mmamiphe k'ọphu abujeru teke o yeru ọnu; ọ tọ duedu onye amakwaduru iphe, oo-pfu.

¹¹Ẹphe je ebuta nemadzụ ebuta g'èphe sụje: “Anyi nọmaru ẹka oopfurwushi Mosisu yẹle Chileke.”

¹²Ẹphe gude ẹgube ono kpalia ndiphe waa ndu bụ ọgerenya ndu Jiu waa ndu ezije ekemu. Ẹphe bya akputa Sutivinu kpujeru ndzukọ ọgbo-ikpe ndu Jiu.

¹³E je eduta ndu byaru bya agbaahaa ya ekebe sụ: “Nwoke-a ta adukwa teke ọ tọ nọdujedu epfubyishi eze-ulo-a, dụ nsọ-a waa ekemu Mosisu.

¹⁴Kẹle anyi nọmaru ẹka ọ sụrụ lẹ Jizọsu-a, bụ onye Nazaretu-a bẹ e-mechaa lakashia eze-ulo-a; tẹme ọobyaa agbanwekọtachaa omelalị anyi, shi lẹ Mosisu.”

¹⁵Iphe, bukpo ndu ono, nọkota l'ulo-ikpe ono tuko tabẹ Sutivinu ẹnya l'iphu. Iphu iya nọdu egbuepho nwiinwii g'iphu ojozi-imigwe.

Ndu-ishi-ozì 7

Ọnu, Sutivinu eye

- ¹Onye-ishi ndu-ishi uke Chileke jĩa Sutivinu sụ iya: “? Bụ iphe, ndu-a pfuru-a bụ iphe, meru nù?”
- ²Ọo ya bụ Sutivinu sụ phẹ: Ndibe anyi; unu gebekwapho-o! Mu sụ-a; ọo Chileke ọphu gbaru g'a tukoje kwabẹ iya úbvù meru g'onye-iche anyi, bụ Ébirihamu hụma iya. Teke ono bụ lẹ Mesopotémiya bẹ Ébirihamu bukwadụ; o toko ladụ Haranu.
- ³Noo ya; Chileke sụ iya: “Gbeshi lufu l'alị unu-a; haa ndibe unu; lashĩa alị ẹka mu l'e-goshi ngu.”
- ⁴Ọ haa alị Kaludiya tugbua je eburu lẹ Haranu. Nna iya nwuhuepho; Chileke mee ya ọ bya eburu l'alị-a, unu bu ntanụ-a.
- ⁵Ọphu ọ dudu alị ono ọphu Chileke nuru iya g'o nworu teke ono; mbụkpoo mẹ ntọkpa lanụ. Obenu lẹ Chileke pfuru iya sụ lẹ ya a-nụ iya ya g'ọ bụru nkiya mẹ k'unwu nwanwanwaranwa iya. Teke Chileke pfuru Ébirihamu iphe ono bẹ Ébirihamu teke anwutakwa nwa.
- ⁶Chileke sụru Ébirihamu: Awa ngu e-mechakwaa laa alị ndu ọzo je aburu ohu; teme eeme phẹ aphụ unu apha asugba ishi.
- ⁷Obenu lẹ ndu ono, ephe a-buru ohu phẹ ono bẹ mu a-nmakwanu ikpe; e -mechaa ephe afuta l'alị ono bya abaaharu mu eja l'ẹka-a.
- ⁸Noo ya; Chileke bya ekweta Ébirihamu ukwe-iphe bya edobe omelalị ebu úbvù g'ọ bụru iphe-ọhubama k'iphe ono, o kweru iya ukwe iya ono. Ọo ya bụ; Ébirihamu nwuta Áyizaku. Áyizaku nọephe abalị ẹsato; e bua ya úbvù. Nokwapho gẹ Áyizaku nwutaru Jiékpọ bụ ya úbvù; Jiékpọ nwushia ochochoroche anyi phẹ ephe n'iri l'ẹbo bushichaa phẹ úbvù.
- ⁹“Ochochoroche anyi phẹ gude iji-ẹnya ree Jiósefu ndu Ijiputu. Obenu lẹ Chileke nọ swiru Jiósefu rengurengu.
- ¹⁰Chileke dzokota iya l'iphe-ẹhuka iya g'ọ ha bya anụ iya umere ọma waa mmamiphe l'ibe onye eze ndu Ijiputu, bụ iya bụ Fero. Fero mee Jiósefu; ọ bụru iya bụ onye-ishi l'alị Ijiputu l'ophu; bya abụkwarupho onye-ishi l'okpoku ibe eze gẹgedede.
- ¹¹“A nọnyaa ẹjo okpa nri bya l'alị Ijiputu mgburugburu mẹ Kénanu. Ọ bụru eze iphe-ẹhuka. Ọphu ochochoroche anyi phẹ ahumaheduru nri, ephe e-ri.
- ¹²A nọnyaa; Jiékpọ numa lẹ nri dụ lẹ Ijiputu. Ọ bya ezia ochochoroche anyi phẹ g'ephe jee. Ọ bụru ejeje k'ivuzo bụ ono.
- ¹³O be lẹ k'ẹbo Jiósefu mee g'ephe maru lẹ ya bụ nwanna phẹ; teme Fero shikwapho nno maru ndu unuphu Jiósefu.
- ¹⁴Ọo ya bụ; Jiósefu bya ezia ozi g'e je asụ nna iya, bụ Jiékpọ g'ọ lwatashĩa Ijiputu; ephe lẹ ndu okpoku phẹ mgburugburu; ndu tukuru dụ ukporo umadzu ẹto l'umadzu iri l'ise.

- 15Oo ya bu; Jiékoṗu laa Ijiputu, bu iya bu ẹka yẹe ochochoroche anyi phẹ buru jasu ẹphe nwushihu.
- 16E vutakota phẹ laa Shekemu je elia l'ilu, Ébirihamu gudehawaa okpoga zuta okpa-
ipfu Hamo le Shekemu.
- 17“O betashiẹpho teke Chileke e-meru Ébirihamu iphe ono, o kweru iya ukwe iya ono; ndibe anyi, bu le Ijiputu yekwawaa onwophe iphe; kawaa mebyikpoo shii.
- 18A nonyaa eze ozo, amaedu ke Jiósefu bya aburu ishi ndu Ijiputu.
- 19O gbaṅeru ndibe anyi ono ẹregede teme o watakwapho eme oche anyi phẹ aphu; k'ophu o turu phẹ ekemu su g'onye nwuru nwa ọphúú tuphaje iya etupha; g'o to dzushiru ndzu.
- 20Noo teke a nwuru Mosisu bu ono. O buru ẹguru nwata, du ree l'iphu Chileke. E hee ya l'ime ọlo onwa ẹto.
- 21O be teke a pataru iya je edobe gbado iya; nwa Fero ke nwanyi turuta iya bya eworu iya zua; o buru nwa iya.
- 22E zikota iya iphe, bukpo ẹkwo, aanwukpo anwunwu le Ijiputu teke ono. O shi l'eka ono buru eze nemadzu l'opfu onu me l'iphe, eeme l'eka.
- 23“Mosisu noṅpho ukporo apha labo; o rihaa le ya e-je agbaphee ndu ali iya, bu iya bu ndu Ízurelu.
- 24O huma onye lanu l'eka onye Ijiputu eme iya eji. O jepfu iya je agbaaharu iya ọdzori. O gude k'iphe ono chigbuẹkwapho onye ke Ijiputu ono l'eka ono; shi ẹgube ono melata iya iphe, o meru onye Ízurelu ono.
- 25O dobesukwanu le ndu nkiya a-maru le Chileke e-mechaa shita l'eka iya mee g'ẹphe nweru onwophe; obenu l'o to doduru phẹ ẹnya.
- 26O be le nchitabohu iya; o huma ẹka ndu Ízurelu labo alwu ọgu bya ejeshia g'o gboo phẹ; doshiaru phẹ iphe, adaru phẹ nu. O su phẹ: ‘Unu gebe! ? Unu ta amadu l'unu bu unwunna? ? Bu gunu meru iphe, unu achọ onwunu opfu?’
- 27Onye ophu achọ opfu nwufu Mosisu su iya: ‘? Bu onye meru ngu onye-ishi; yee onye-ikpe anyi?’
- 28To ? iimewaa g'i gbua mu g'i gburu onye Ijiputu unyaphu-a?
- 29Mosisu numaeṅpho iphe ono; o gbaṅu l'ali Ijiputu gbalaa je eburu l'ali ndu Midiyanu. O nodu l'eka ono nwuta unwegirima labo.
- 30“A noṅpho ukporo apha labo; Mosisu huma ojozi-imigwe l'echiegu, no l'aguga ubvu Sayinayi. Ojozi ono no l'oku, enwu l'irwu.
- 31Mosisu nodu ele iya ẹnya; o du iya biribiri. O jekubeshie ya pho ntse ge ya maru iphe, o bu; o numa olu Nnajjuphu l'oku ono. Olu ono suru:

32“O kwa mu bu Chileke nna ngu oche phe, bu iya bu Chileke ke Ébirihamu; buru Chileke ke Áyizaku; bya aburu Chileke ke Jiékoṗu.’ Ndzu gūahaa Mósisu; ophu o tuduru ama elebaa ɛnya l'eka ono.

33Oo ya bu; Nnajiuphu su iya: ‘Yefu akpokpa, i yeru l'okpa; kele eka ono, i pfuru ono bukwa ali, du nsɔ.

34Mu lewaru ɛnya hūma ɛgube aphū, eeme ndibe mu l'ali Ijiputu. Mu hūmawaru iphe-ɛhuka, ɛphe eje; mu byatashia ge mu dzoo phe. Ngwa; bya ge mu zia ngu g'i je Ijiputu.’

35“O bukwaru-a Mósisu-a, ndu Ízurelu jikaru su iya: ‘? Bu onye meru ngu onye-ishi; yee onye-ikpe anyi-a?’ be Chileke shi l'eka ojozi-imigwe iya, Mósisu hūmaru l'irwu, enwu phoophoophoo pho hɔta; zia ya g'o je aburu onye-ishi waa onye a-gbata phe nu.

36Mósisu meshia iphe-ohumalenya, dugbaa biribiri le Ijiputu bya eshi le Ijiputu ono dufuta phe. O bya emeshikwaapho iphe-ohumalenya, dugbaa biribiri le Eze-ɛnyimu-uswe waa l'echiegu charachara, e te budu ebubu, ɛphe noru ukporo apha labo.

37Oo ya bu Mósisu ono, suru ndu Ízurelu: ‘Chileke e-mechakwaa shi l'echilabo unu zia onye mpfuchiru iya; g'o ziru mbedua. O buru yebedua be unu a-numajeru olu’

38O buru Mósisu ono no-chiru ɛnya Ízurelu teke ɛphe zakoru l'ubvu Sayinayi l'echiegu, e te budu ebubu pho. Oo ya anaru ojozi-imigwe ono, byapfutaru iya l'ubvu ono opfu epfuru ochochoroche anyi phe. O buru iya shi l'eka Chileke nata opfu ono, anu ndzu ono wolataru anyi.

39“Ole ndiche anyi phe nyiru iya nchi manu; bya ajika iya. O du phe g'a su l'ephe laphuru azu le Ijiputu.

40Noo ya bu; ɛphe su Erɔnu: ‘Doberu anyi agwa, e-vutajeru anyi uzo; l'anyi ta amaedu iphe, meru Mósisu-a, dufutaru anyi le Ijiputu-a.’

41Noo teke ɛphe meru agwa, du ge nweswi wata agwagwa. ɛphe wata abo iphe ono, ɛphe meru l'onwophe ono.

42Tobudu iya bu; Chileke wofu phe ɛnya; haa phe; ɛphe gwaahaa kpokpode, no l'igwe, bu iya bu iphe, e deru l'ekwo ndu mpfuchiru Chileke; eka Chileke suru: “Ndu Ízurelu! Ukporo apha labo be unu gbushiru anu l'echiegu, e budu ebubu gude gwaa iphe. Ebe o dudu ophu unu gude gwaa mbedua.

43? Tobudu ulo-ekwa agwa Moloku be unu vutaru bya evuta kpokpode, unu kpuru akpukpu o du ge k'agwa unu bu Refanu? Iphe ono bu iphe, unu gude eka unu meshia wata abaru eja. Noo g'o gude mu je achita unu chighaa Babilonu. ”

44Ndiche anyi phe shi nweru ulo-ekwa, ɛphe shi akpobeje l'eka ɛphe jeberu l'echiegu ono, nemadzu ebudu ebubu ono. O buru ulo-ekwa ono egoshi le Chileke swiru phe-a. E meru ulo obu ge Chileke suru Mósisu g'e mee ya, bu iya bu ɛgube iya ophu o goshiru iya.

⁴⁵Ndiche anyi phẹ woru ọlo-ẹkwa ono ye ọgbo ọphu etso phẹ nù l'ẹka. E mechaa; ọgbo k'ono vuta iya tsoru Jioshuwa je anaa alì ndu ọzo; mbụ alì, Chileke chìshihawaru ndu bu iya nù l'onwiya. Ọlo-ẹkwa ono nọo l'ẹka ono jasụ l'ogbo kẹ Dévidi.

⁴⁶Dévidi buru onye yẹle Chileke dọ lẹ ree. O sụ gẹ Chileke haa gẹ ya kpọaru iya ọlo; ọlo kẹ yẹbedua, bụ Chileke kẹ Jiékọpu.

⁴⁷O buru Sólomọnu mechaaru kpọaru Chileke ọlo ọbu.

⁴⁸“Obenu lẹ Chileke, bụ Ọkalibe-kangokotaru-nù te ebujedu l'ọlo, nemadzu kpuru l'ẹka, bụ iya bụ iphe, Azáya bụ onye mpfuchiru Chileke pfuru sụ:

⁴⁹“Igwe bụ aba-eze mu. Eliphe buru okposhi, mu tukoberu ọkpa. ? Bụ ẹgube ọlo gunu bẹ unu a-kpuru mu? ? Bụ ẹgube awe bẹ mu a-nọduje atuta unme ọbu?

⁵⁰? Tọbudu mbẹdua gude ẹka mu mee iphemiphe ono g'ọ ha?

⁵¹“Unubẹ ndu ẹjo ọkpoma-a; unubẹ ndu-a, l'adagbu opfu Chileke lẹ nkuchi-a; unu kpọ-chiru obu kpọ-chia nchị g'unu ta anuma ozi Chileke. Teme unu nọdu ajikaje Unme-dụ-Nsọ gẹ ndiche unu phẹ jikaru iya.

⁵²? O dọru ndu mpfuchiru Chileke mẹ onye lanu, ndiche unu phẹ ata kpaduru ẹhu? Ndu ọphu Chileke ziru ozi bẹ ẹphe gbukotaru egbugbu; mbụ ndu bụ phẹ rarụ iya arara teke ono sụ l'onye lanu ono, pfulerekoto kpoloko ono e-mechaa bya. O be nta-a o bya: unu deru iya ye; e eworu iya gbua.

⁵³Oo unu bẹ Chileke gbẹ l'ẹka unwu-ojozi-imigwe iya tọaru ekemu iya; ẹbe unu angaduru ekemu ono nchị.”

A tugburu Sutivinu lẹ mkpuma

⁵⁴“Ndu ọgbo-ikpe ono nọdu anu opfu ono; o nọdu ata phẹ ẹru lẹ nchị. Ẹphe nọdu atagbaa kpookpookpo; l'ẹka ẹhu egbu phẹ egbu.

⁵⁵Ọle Unme-dụ-Nsọ byaru eji Sutivinu ẹhu. O palia ẹnya lee l'eli; bya ahuma ogbunwiiwii kẹ Chileke; humakwapho Jizosu l'ẹka o pfuru l'ekutara Chileke.

⁵⁶O sụ: Unu lekpodapho imigwe g'o gheru onu; Abubu-Ndiphe pfuru l'ekutara Chileke!”

⁵⁷Ẹphe chishia mkpu swọ-chishia ẹka lẹ nchị. Ẹphe wulihu ugbo lanu je azugude iya;

⁵⁸kputa iya kpufu l'ime mkpukpu; jeshia ya atugbu lẹ mkpuma. Ndu eje iya atugbu chiru uwe phẹ wushiru nwoke, eekuje Sọlu.

⁵⁹A nọdu atụ iya mkpuma ono; o kua Chileke sụ: “Nnajiuphu, bụ Jizosu; natakwa ndzụ mu!”

⁶⁰O gbushi ikpere chia mkpu sụ: “Nnajiuphu! Ta agukokwaru phẹ iphe-ẹji-a, ẹphe eme mu-a!” O pfuchaa nno; ike bvụ iya.

Ndu-ishi-ozì 8

Solu akpa Chiochi ẹhu

¹A ọdu egbu Sutivinu; Solu ọdu ekwe l'ishi. Noo ya; e shi mbọku ono gẹdegede; a wata akpa Chiochi ẹhu lẹ Jierúsalemu kpashiahaa pẹ iya ike. A chikashikotachaa ndu ono, kweru nọ ono g'ẹphe hakọta a -gufukwa ndu-ishi-ozì. Ẹphe gbakashihu dzuru alì Jiudiya waa alì Samériya.

²Ndu Chileke duru lẹ nsọ haru bya akwaa ẹkwa Sutivinu pata iya je elia meebekpoephe nkiya ree.

³Solu kukebekpọo ẹhu gẹ ya gbukaa Chiochi ọbu bya etsoru jepheahaa l'unuphu l'unuphu tsoru akputagbaa unwanyi mẹ unwoke pẹ achì eye l'ulo mkpọro.

Ozi-oma rwuru Samériya

⁴Ọo ya bu; ndu ono, kweru nọ ono, a chikashiru ẹphe dzuru ẹkameka ono ọdu eziẹpho ozi-oma kẹ Jizosu.

⁵Filipu jeshia mkpukpu Samériya je epfukashiaru ndu ẹka ono kẹ Kéreshi.

⁶Ndu ẹka ono numaephe iphe, oopfu; bya ahumakwapho iphe, du biribiri, oomeshi; ẹphe ngabekotaru iya nchì.

⁷Ẹphe huma lẹ ndu ọbvụ eme du igwerigwe; ọ ọdu echigbaa mkpu agbafutagbaa l'ẹhu ndu ono. Ẹphe humakwapho lẹ ndu ibe ẹhu pẹ nwuhuru anwuhu; mẹ ndu eniyeni du igwerigwe; o mekotachaa pẹ; ẹphe wekorohu.

⁸Ẹhu emereme dzuru mkpukpu ono.

⁹Ọ duru nwoke, ẹpha iya bu Sayimonu, bu lẹ mkpukpu ono, anọduje eme omamanshi. Ọ ọdu emeje iphe, dugbaa ndu Samériya biribiri. Ọ sù l'ọ tọ duedu onye ha g'ọo ya.

¹⁰Mkpukpu ophu mgburugburu ọdu awuje gidigidi ejepfu iya; ẹgirima mẹ ọgerenya. Ẹphe sù: “Ọ kwa nwoke-a bu Eze Ike Chileke ọbu.”

¹¹Nwoke ono shiwaa ọzenya meta omamanshi k'ọphu onyemonye tukoru sù l'ọ bu ọkpobe nemadzu.

¹²No iya; Filipu byaephe bya ezia pẹ ozi-oma kele ọo Chileke bu eze waa l'ọo Jizosu Kéreshi bu Onye-Ndzota; ẹphe kweta. E meshia pẹ baputizimu; unwanyi mẹ unwoke.

¹³Sayimonu l'onwiya kwetakwapho. E mekwaa ya pho baputizimu; ọ ọdu anọephe Filipu ntse. Ọ ọdu asajechaa onu saa nchì mẹ ọ -huma oke iphe-ohumalenya, dugbaa biribiri, Filipu emegbaa.

¹⁴Ndu-ishi-ozì ọdu lẹ Jierúsalemu numa lẹ ndu Samériya natawaru opfu Chileke. Ẹphe zia Pyita yee Jionu g'ẹphe je ẹka ono.

¹⁵Ẹphe byarwuta bya epfuru nọ Chileke gẹ ndu ono, wowaru onwophe ye Jizosu l'ẹka ono nata Unme-du-Nsọ.

- ¹⁶Lẹ teke ono bẹ bukwađu l'ẹpha Nnajiuphu, bụ Jizọsu bẹ e meru phẹ baputizimu; ophu ọ ọ̀toko ọ̀dudu mẹ onye lanu natawaru Unme Chileke.
- ¹⁷Noo ya bụ; Pyita yẹe Jiọnu bya ebyibe phẹ ẹka; ẹphe nata Unme-đu-Nsọ ono.
- ¹⁸Sayimonu hụma l'ẹphe nataru Unme-đu-Nsọ ono gẹ ndu-ishi-ozii ono byaberu phẹ ẹka. O kwee Pyita yẹe Jiọnu okpoga
- ¹⁹sụ: “Unu menaa gẹ mu nweru ẹgube ike ono g'oo-bujekwanuru onye mu byiberu ẹka l'oo-nata Unme-đu-Nsọ.”
- ²⁰Pyita sụ iya: “Gẹ gụ l'okpoga ngu lakwaa l'iswi! ? I dobesu l'ii-zuta iphe, Chileke nuru kẹ mmanu azuta?”
- ²¹I ti yikwa l'ozii-a; kẹle okpoma ngu ta adudu ree l'iphu Chileke.
- ²²G'izimanu lwa ngu azu l'ejo oriri ngu ono. Rwo Chileke arwo g'a maru; ? ooguru ngu nvu l'iphe-ẹji ono, i shi aru ono?
- ²³Kẹle mu maru l'oo ẹnya-pfurufuru jiru ngu ẹhu; teme eme ejo-iphe kewaa ngu ẹgbu.”
- ²⁴Sayimonu sụ Pyita phẹ: “Jiko unu pfuru nu Chileke g'o to du iphe ono, unu pfuru ono duru ophu e-me mu nu.”
- ²⁵Noo ya; Pyita waa Jiọnu kochaa akọ iphe, Jizọsu meru bya ezichaa ozii-oma Chileke l'eka ono; ẹphe laphushia azu lẹ Jierusalemu. Ẹphe nodu ezi ozii-oma ono l'uzo lẹ mkpukpu, du igwerigwe lẹ Sameriya ẹka ẹphe atugbu.

Filipu yẹe eze onye Itiyopiya

- ²⁶Ojosi-imigwe shi l'eka Nnajiuphu byapfuta Filipu bya asu iya: “Kwakobe jeshia uzu ndohali. Kwaseru jasụ g'i lufu lẹ gbororo ono, shi lẹ Jierusalemu ghabua echiegu ẹka e te budu ebubu jeshia Gaza ono.”
- ²⁷Filipu kwakobe; ọ buru iya ejeje. O -rwuepho gbororo ono; ọ huma onye Itiyopiya, kwatakporu buru oke nemadzu, a haru ahaha. O buru iya eletaru Kadesi, bu eze-nwanyi Itiyopiya ẹnya l'okpoga iya.
- ²⁸O shi jee abaru Chileke ẹja lẹ Jierusalemu. O nodu l'ime ugbo-inya iya ala unuphu. O nodu agu opfu Chileke l'ekwo, Azaya onye mpfuchiru Chileke deru.
- ²⁹Unme Chileke sụ Filipu g'o jepfu ugbo-inya ono je etsokube iya ntse ntse.
- ³⁰Filipu jekube iya bya anuma ẹka oogu ekwo Azaya. O sụ iya: “? O doru ngu ẹnya; mbu iphe, iigu?”
- ³¹Nwoke ono sụ iya: “? Denu g'oo-shi doo mu ẹnya mẹ ọ -dudu onye ziru mu iya nu?” O sụ Filipu g'o nyibata bya g'ẹphe l'iya nodu l'ime ugbo-inya ono.
- ³²Ekwo-opfu Chileke ẹka oogu bu ẹka Azaya deru sụ: “Onye ono du g'aturu, a kpọ eje egbugbu. O nọ nwadoo gẹ nwaturu, eebushi ẹji. Ophu o pfuduru mẹ akpuru opfu lanu.

³³E meru iya iphe-iphere ọle ikpe, a nmaru iya be e mechaaru mebyia. ? Bu onye atukota onu g'awa iya gbaru? Kele a kpọ-kwofuru ndzu iya akpọ-kwofu le mgboko. ”

³⁴Nwoke ono jia Filipo su: “Jiko kanuru mu. ? Bu onye be onye mpfuchiru Chileke ono epfuru? ? Oopfu opfu ehu iya to oopfu opfu ehu onye ozo?”

³⁵Filipo wata iya ezi iphe. O shiepho l'iphe ono, oogu ono wata iya ezi ozi-oma ke Jizosu.

³⁶Ephe jenya ee phe byarwuta eka mini du. Nwoke ono su: “? Tobudu mini baa? ? Bu gunu kparu iphe, i tii medu mu baputizimu l'eka-a?”

³⁷Filipo su iya: “I -gudewaa obu ngu g'o ha kweta be ee-mekwa ngu-a baputizimu.” O su iya: “Ee! Mu kwetakpwaru le Jizosu Kereshi bu Nwa Chileke.”

³⁸Nwoke ono su g'onye anga ugbo-inya ono pfuru; o pfuru. Filipo yee nwoke onoya swiru bya atuko rwuba le mini. Filipo mee ya baputizimu.

³⁹Ephe rwufutaepho le mini ono; Unme Nnajiuphu mee Filipo o phuhu; ophu nwoke ono ahumaeduru iya. Onye Itiyopiya ono tugbua jeshia iphe, ooje; ehu nodu atso iya utso l'uzo.

⁴⁰Eka a humaru Filipo ozo buwaruro le Azotosu. O pfukota opfu Chileke l'ekameka, o ghataru jasu o jerwua Sizariya.

Ndu-ishi-ozu 9

Jizosu afuru Solu l'uzo

¹Su-a; eshinu Solu eyeshikwada ndu etso uzo Jizosu ebvu ike l'ee-gbushi phe; bya eseshi ike ge ya gbushia phe; o tugbua jepfu onye-ishi ndu-ishi uke Chileke

²je asu iya g'o deru ekwo nu iya, ya e-goshije l'ulo-ndzuko ndu Jiu me ya -rwua Damasukosu; g'oo-buru ya -huma onye etso uzo nwoke onoya; ya atua ya mkporo kputa iya kpuru bya Jierusalem; unwanyi me unwoke phe.

³O jenya l'uzo Damasukosu ono; o nodu abyawaa ejerwu. A nonya iphoro shiepho l'imigwe chaepho vaa chaphee ya mgburugburu.

⁴O daa kpurumu mbu Solu. O numa olu-opfu, suru iya: “Solu! Solu! ? Bu gunu meru iphe, iikpa mu ehu?”

⁵Solu su iya: “? Bu onye be i bu Nnajiuphu?” Olu ono su iya: Oo mu bu Jizosu; onye iikpa ehu-a. Oo-tsukwaru ngu me i nodu agba okpa le mpyipyi-oshi.

⁶Ehu wata iya anma anmanma. Onu kugbabejaa ya akugbabe. O su: “Nnajiuphu; ? bu gunu be mu e-me.” Nnajiuphu su iya: “Gbeshi bahu l'ime mkpukpu eka aa-karu ngu iphe, ii-me.”

⁷O kpoo ndu ee phe le Solu swi opfu; kele ee phe anu olu ono; ophu ee phe ahumaduru onye epfu iya nu.

⁸Solu gbalihu bya asaa ɛnya; ɔphu ɔ phuhedu ɔzo. Eɓhe gude iya l'ɛka duba l'ime Damasukosu.

⁹Ɔ nokota abali ɛto ono; ɔphu ɔ humaduru ɔzo; ɔphu o riduru nri; ɔphu ɔ nguduru mini.

¹⁰Ɔ duru onye etsoje Jizosu, bu le Damasukosu, epha iya bu Ananayasu. Nnajiuphu byapfuta iya l'ophulenyia bya asu iya: “Ananayasu!” Ɔ za iya: “Owe Nnajiuphu!”

¹¹Ɔ su iya: “Kwakobe jeshia l'uzo, eekuje Uzo-pfuru-nhamunha. I-rwua l'ulo Jiudasu; g'i jia aji onye Tasosu, epha iya bu Solu. Ɔ no l'ɛka ono epfu anu Chileke;

¹²bya ahumakwapho nwoke, epha iya bu Ananayasu l'ophulenyia ɛka ɔ byaru abyabe iya ɛka l'ishi mee ya g'ɔ phuahaa ɔzo.”

¹³Ananayasu su: “Nnajiuphu! A dukwaa igwerigwe pfuaru mu opfu nwoke-a; pfukotaru mu ejo-ipe, o meru ndu duru ngu nsɔ le Jierusalemu.

¹⁴A suru l'onye-ishi uke Chileke ziru iya g'ɔ bya akputakota onyemonye, sukpooru l'oo ngu bu Nnajiuphu iya.”

¹⁵Nnajiuphu su iya: “Jero! Kele oo mu hotaru iya g'o jeeru mu ozi; g'oomee ge ndu abudu ndu Jiu me ndu-ishi phe mekpoo ndu Izurelu maru onye mu bu.

¹⁶Mu e-goshi iya iphe-ehuka, oo-jekota le k'iswi ehuru mu ono.”

¹⁷Noo ya; Ananayasu jeshinaa. O jerwua bya abahu l'ulo obu; bya abyabe Solu ɛka su iya: “Nwanna mu Solu! Nnajiuphu, bu Jizosu l'onwiya suru ge mu bya. Ɔo Jizosu ono bu onye goshiru ngu onwiya l'uzo teke jibya ɛka-a. Ɔ suru ge mu bya emee ngu g'i phuahaa ɔzo ɔzo; waa g'i nata Unme-du-Nso.”

¹⁸Teke ono teke ono; iphe, du g'akpanyaka shi Solu l'enya dafu; ɔ phuahaa ɔzo ɔzo. Ɔ gbalihu; e mee ya baputizimu.

¹⁹Ɔ gbɛ teke ono bya eria nri; ike du iya.

Solu epfu opfu Chileke le Damasukosu

Yee ndu etso ɔzo Jizosu no ujiku olemole le Damasukosu.

²⁰Ɔ jegbabe ulo-ndukoo ndu Jiu je awata ezi le Jizosu bu Nwa Chileke.

²¹Ɔ tufu ndu numaru iya nu ehuru. Eɓhe su: “? To bunaa nwoke-a be bu onye-a, shi egbushi ndu eeku epha-a le Jierusalemu-a? Ipe, ɔ byadoru ɛka-a bukwa ge ya bya akputachaa phe chijeru ndu-ishi uke Chileke.”

²²Solu nodu akaepho epfu opfu Chileke epfushi iya ike; egoshi l'oo Jizosu, bu Kereshi obu; bya eyechaaru phe iphe, meru g'o gude ɔ du nno l'enya iya l'enya iya k'ophu ndu Jiu, no le Damasukosu enwehedu onu opfu.

²³A nepho ujiku olemole; ndu Jiu nokobe chia idzu egbu Solu.

24Obenu l'a byaru agbaaru iya ama l'eemeakwa g'e gbua ya. A noḍu anḍuje eche nche eswe l'enyashi l'onu-oguzo, eeshije bahu l'ime mkpukpu ono g'eeme huma Solu gbua.

25O be l'enyashi; ndu onya iya paru iya ye le nkata, a turu eri pyoo l'uzo l'igbulo, e gude kpuphe mkpukpu ono mgburugburu pazeta iya; o rwua ali.

Solu alwa azu le Jierusalemu

26Solu tugbua bya ejerwua Jierusalemu bya ejeshia ge ya jepfu ndu etso uzo Jizosu. Ndu tuko guahaa phe; kele phe te ekwe du l'o buwaa onye etso uzo Jizosu.

27Oo ya bu; Banabasu yeru iya aka duru iya jepfu ndu-ishi-ozu bya akoru phe ako ge Solu gude huma Nnajiuphu l'uzo; kokwaaru phe pho ge Nnajiuphu l'onwiya gude pfuru yeru Solu. O turu phe onu ge Solu gude pfushiahaa ke Jizosu ike le Damasukosu.

28Tobudu iya bu; ndu-ishi-ozu kwe g'o jeje g'o du iya le Jierusalemu. O tsokwarupho Jierusalemu epfushi iya ike l'oo Jizosu ziru iya ge ya pfu iya l'iswi ehu iya.

29Ye le ndu Jiu, epfu opfu Giriku noḍu anḍuje atu igoligoli. A nonyaa; phe meahaa g'ephe gbua ya.

30A nonyaa unwunna numa iya; phe duru Solu jerwua Sizariya; je eyeru iya aka o jeshia Tasosu.

31O bueru iya pho bu le nchi adu Chiochi doo ke nwa teke ono, bu iya bu ndu ophu nokota le Jiudiya me Galili me Sameriya. Chiochi noḍu apalihu aka eshihu ike eje. Phe noḍu eme uche Chileke. Unme-du-Nso noḍu eyekwaru phe nemadzu k'opu obu ka phe eshihu ike.

Pyita eje Lida waa Jiopa

32Pyita tsoru ekameka jegbabe. O be ujiku lanu; o jeshia ge ye le ndu du nso, bu le Lida kwee.

33O rwua l'eka ono; o huma nwoke, epha iya bu Iniyasu, iphe lonwushiru ibe lanu k'opu o dabyiru l'iphe, aazeje aze nonyaa apha esato; ophu o gbeshijeduru agbeshi.

34Pyita kua ya: "Iniyasu! Gbeshi le Jizosu mewaru; i wekorohu. Gbalihu phu-lita iphe, ji zeje aze."

35Ndu bukota le Lida waa le Sharonu huma l'o wekorohuwaru tsoru ejephe; phe kweta bya eworu onwophe yee Nnajiuphu l'eka.

36Le Jiopa be o duru nwanyi lanu, bu onye ke Kereshi. Nwanyi ono anḍuje eme ree tekenteke; teme o noḍu anḍuje emeru ndu adudu g'o du phe iphe-oma. Epha iya bu Tabita, bu iya bu Dokasu l'opfu Giriku; ozoo umoro-enyimu.

37A nonyaepho teke ono; iphe meahaa ya. O nwuhu. A bya awuebe odzu ono ehu bya aparu iya nyihu ulo-eli je enyebi.

³⁸Noo ya; ndu etso ụzo Jizọsu, bu ị Jịpa numa ị Pyịta nọ ị Lịda, nọkwaa ntse ị Jịpa ono. Tọbudu iya bụ; ẹphe zia ụmadzu labọ g'ẹphe je ekua Pyịta g'ọ bya ẹgwegwa.

³⁹Pyịta kwakọbeepho tsoru pẹ. O rwua; e duru iya nyihu ụlo-eli ono. Ụnwanyi, ji pẹ anọedu dọ-phee ya mgburugburu tuko aara ẹkwa egoshigbaa ya uwe, Dokasu kwashiru teke ọ nọ ndzụ.

⁴⁰Pyịta chishikota pẹ l'ẹka ono bya egbushi ikpere bya epfuru nọ Chileke. Ọ bya aghaa ẹnya lee odzu ono bya asụ: “Tabịta! Teta dzuru ndzụ!” Ọ saa ẹnya. Ọ hụmaepho Pyịta; ọ gbalihu nọdu anọ.

⁴¹Pyịta bya alọta iya l'ẹka yeru iya ẹka; ọ pfuru apfuru. Pyịta bya ekua Chiochi l'ophu waa ụnwanyi ono, ji pẹ ta anọedu ono; bya eduru Tabịta nọ pẹ g'ọ tetawaru dzuru ndzụ-a.

⁴²E pfudzuru iya ị Jịpa. A dọ igwerigwe woru onwopẹ ye Nnajiuphu l'ẹka.

⁴³Pyịta buru l'ulo Sayimonu nọ ọdu ị Jịpa. Sayimonu ono bụ onye eseje akanya l'akpo-anu.

Ndu-ishi-ozu 10

Pyịta eje ibe Kọnelusu

¹Ọ duru nwoke lanu, bu ị Sizariya. Nwoke obu aza Kọnelusu. Ọ bụ onye-ishi ndu ojogu ndu Romu. Ndu ọ bụ ishi pẹ bụ ndu ojogu ukporo ise ị “Ọgbo ojogu ndu Itali.”

²Kọnelusu bụ onye akwabeje Chileke ụbvù. Yẹ ndibe iya g'ẹphe ha nọdu atsụ Chileke ebvu. Ndu Jiu, enwedu iphe bẹ ọonujekpoo iphe shii; teme ọ nọdu epfufe anu Chileke tekenteke.

³O be ujiku lanu; g'ẹnyanwu swifuwaru l'ishi; ọ hụmakpoo ojozi-imigwe, shi l'ẹka Chileke rengurengu l'ophulenyia g'ọ bataru bya ekua ya sụ iya: “Kọnelusu!”

⁴O gude ndzụ-agugu lee ojozi-imigwe ono ẹnya; bya asụ iya: “Owe-e! ? Bụkwa ole Nnajiuphu?” Ojozi-imigwe ono sụ iya: “Chileke nūmawaru epfufu iipfufe anu iya bya anataakwapho iphe-oma ono, iimeje ono. Chileke nyatawaru ngu.

⁵Haru unwoke zia g'ẹphe je Jịpa je ekua nwoke lanu, ẹpha iya bụ Sayimonu; onye ẹpha iya bụkwapho Pyịta.

⁶Ọ byaru abyabya. Ọ nọ l'ulo nwoke ono, eekuje Sayimonu ono, bu l'aguga eze-enyimu bya abukwarupho onye eseje akanya l'akpo-anu.”

⁷Ojozi-imigwe ono, shi epfu eyeru Kọnelusu ono tugbuepho; o kua unwokoro iya ụmadzu labọ bya eyeru pẹ onye ojogu lanu; Chileke duru ị nsọ, yi ị ndu anọkubẹje Kọnelusu ntse ejeru iya ozi.

⁸Ọ bya akochaaru pẹ iphe, meru nọ; o zia pẹ g'ẹphe jeshia Jịpa. Ẹphe tugbua jeshia.

- ⁹O rwua nchitabohu iya ge ndu-ozu ono abyawaa erwu Jiopa; Pyita nyihu eli ulo, du baswaa l'echi eswe; jeshia epfuru nu Chileke.
- ¹⁰A nonyaa egu guahaa ya. O du iya g'a su le ya riwaru nri. Nri shikwaduru l'oku. Noo ya; o gbete du go bu mgbenya zinwutaru iya enya.
- ¹¹O huma g'imigwe gheru onu; huma iphe, shi l'igwe alwa l'ali; iphe, du g'ekwa ochaa, ha shii, e setacharu eka l'ishi-ishi iya uzu eno gude ewozeta l'ali.
- ¹²L'ime ekwa ono be o to dudu egube anu, nweru okpa eno, du le mgboko-a adudu iya nu. Ebe o dudu egube anu, akpu wuruwuru adudu iya nu. Ebe o dudu egube enu, ephe l'eli adudu iya nu.
- ¹³O numa olu, suru iya: “Gbeshi Pyita! Gbua ria!”
- ¹⁴Pyita su: “Mu tee rikwa Nnajiuphu! Mu teke eriswekwaa iphe, ta agbaduru k'ophu ee-ri iya; ozoo iphe, aaso nsu.”
- ¹⁵Olu ono sukwa iya k'ugbo ebo: “Ta adukwa teke isubaa l'iphe, Chileke suru g'a ta soshi nsu be aaso nsu.”
- ¹⁶Iphe ono mee nno ugbo eto. E mechaa; e wolia ya woba l'imigwe.
- ¹⁷Pyita rihaa iphe, ophulanya pho bu; o tufu iya eh. Teke ono be ndu Konelusuziru ziru ozi chotawaru ulo Sayimonu jewaa je apfuru l'onu-abata.
- ¹⁸Ephe kua oku bya ajia su: “? O duru onye byaru abyabya, bu l'eka-a, epha iya bu Sayimonu Pyita?”
- ¹⁹Pyita nodu arikwadia iphe, ophulanya pho bu. Unme Chileke su iya: “Gebekwa! O dukwaru umadzu eto, no l'eka-a, achu ngu nu.
- ²⁰Gbalihu nyizeta je etsoekwaru phe pho; te ejekpokwaa anmagbube; kele o kwa mbedua ziru g'ephe bya.”
- ²¹Pyita nyizeta je asu phe: “Oo mbedua be unu achu obu. ? Unu byaru gunu?”
- ²²Ephe su iya: “O kwa Konelusuziru, bu onye-ishi ndu ojogu ndu Romu be ziru anyi g'anyi bya. O bu onye obu oma; teme o buru onye Chileke duru le nsu. O bu onye ndu Jiu eyeru nsu shingushingu. Ojozi-imigwe suru iya go zia gi bya l'ulo iya g'oo-numa iphe, ii-pfu.”
- ²³Pyita bya eduta phe; ephe je akwaa akwakwa. O be le nchitabohu iya; o gbeshi tsoru phe. Unwunna, bu le Jiopa hakwarupho tsoru iya.
- ²⁴O be le nchitabohu mboku ono; ephe jerwua Sizariya, bu eka Konelusuziru yee abubu iya g'ephe ha me ndu onya iya phe, o ziru g'ephe bya no echeru iya.
- ²⁵Pyita bahushia l'ulo; Konelusuziru gbapfu iya je adaa kpurumu l'iphu iya abaru iya eja.
- ²⁶Pyita kpulia Konelusuziru su iya: “Gbeshi agbeshi le mu bu-a nemadzu mmanu gi bu ono.”

²⁷Pyíta yele Kõnelusu bokwaseru uja jasuru ephe bahu l'ime ulo Kõnelusu. Ephe je ahuma ikpoto oha, doru iya nu.

²⁸O su phe: “Unu maanaru-a l'onwunu rengurengu l'o du le nsõ l'omelali anyibe ndu Jiu ke g'onye Jiu kpafu onye abudu onye Jiu; ozoo g'o duru iphe, yee onye abudu onye Jiu anodu emegbaa. Ole Chileke goshiru mu su g'o to dukwa onye mu a-soje nsõ; ophu o dukwa onye mu a-suje l'o to gbaduru k'ophu mu e-denyi iya eka.

²⁹O buru iphe ono meru g'o gude ophu mu ejekpodaru ro akpa ishi iphe, eekuru mu. Mu tsoerupho ndu unu ziru g'ephe bya ekua mu. Su-a; iphe, mu aji nta-a bu: ? unu ekuru mu gunu?”

³⁰Kõnelusu su: “Egube nta-a nwaraswaphuru, bu iya bu l'okuloku k'eto k'eswe egube-a be mu no epfu anu Chileke l'ulo mu. No iya; mu bya ele enya; onye yeru uwe, egbu nwijnwii pfuwaru mu l'iphu.

³¹O su mu: Kõnelusu! ‘Chileke numaakwaru epfufu, iipfu anu iya; nyatakwaapho iphe-oma, iimeje.

³²Ge mu zia nemadzu g'e je ekua onye epha iya bu Sayimonu; teme epha iya bukwarupho Pyita. O byaru abyabya. O no l'ulo Sayimonu onye akanya akpo-anu, bu l'aguga eze-enyimu.’

³³Tobudu iya bu; mu ziekwapho nemadzu teke ono teke ono g'a bya ekua ngu. I mekwaa ree g'i byaru-a. Nta be anyi nokotaakwaa l'iphu Chileke anga g'anyi numa iphe, Chileke a-su ngu g'i pfuaru anyi.”

Onu, Pyita eyeru Kõnelusu

³⁴Noo ya bu; Pyita wata eye onu. O su: “Nta be o dowaru mu enya le Chileke ta akpochadu mkpocha.

³⁵O to pfudu kele nemadzu shi l'ali ophu; ozoo l'o shi l'ali ophu. Iphe, bukpo onye atsõ iya ebvu; teme o nodu emeje iphe-oma be o nabatawaru.

³⁶Su-a; Chileke ziru ndu Izurelu ozi bya eshi l'eka Jizosu Kereshi zia phe ozi-oma k'ehu-guu. O buru Kereshi ono, bu iya bu Nnajiuphu onyemonye.

³⁷Unu mawaru iphe, wataru ememe le Galili jasõ o mekota le Jiudiya mgburugburu ge Jionu rachaaru k'eme baputizimu arara.

³⁸Unu numawaru ke Jizosu, bu onye Nazaretu; ge Chileke meru Unme-du-Nso ji iya ehu bya emee ike du iya k'ophu o tukoru ekameka jephee nodu eme iphe, du ree; atoje onyemonye l'egbu, Nsetanu keru iya; kele Chileke swiru iya.

³⁹Anyibedua gudekpo enya anyi huma iphe, Jizosu meru l'ali ndu Jiu waa Jierusalemu. Ndu Jiu woru iya kpopyabe l'oswebe; o nwuhu.

⁴⁰Ole Chileke meru o shi l'onwu teta dzuru ndzu g'o nocharu ujiku eto l'ilu; bya emee o goshi onwiya le ya dzu ndzu.

⁴¹Ophu ọ bụdu onyemonye bẹ hūmaru iya nū. Ọ buepho anyịbedua, l'atụ onu iya-a, bụ ndu Chileke hotaru-a bẹ hūmaru iya nū. Anyi l'iya nọkporu ria nri ngua iphe, aangu angungu gẹ Chileke mechaaru o shi l'onwu teta dzuru ndzụ.

⁴²O zia anyi sụ g'anyi zikashiaru onyemonye ozi-oma ono. Sụ g'anyi saaru iya ndiphe l'ọ bụ iya bẹ Chileke meru onye e-kpe ndu dzụ ndzụ mę ndu nwuhuru anwuhu ikpe.

⁴³Ndu mpfuchiru Chileke g'ephe hakota pfuru opfu iya. Ephe suru l'onyemonye, kwetaru nkiya bẹ Chileke a-guru nvu l'iphe-eji iya.”

Chileke anu ndu abudu ndu Jiu Unme-du-Nso

⁴⁴Pyita kpukwaduru-a opfu l'onu; Unme-du-Nso bya ejikotapho ndu anu opfu ono ehu.

⁴⁵O du ndu Jiu ono, etso uzo Kereshi ono; mbu ndu ono, ephe le Pyita shi le Jiopa swiru ono biribiri le Chileke nukwarupho ndu abudu ndu Jiu Unme-du-Nso.

⁴⁶Kele ephe numaru eka ephe epfugbaa l'olu Unme-du-Nso; bya aja Chileke ajaja. Pyita su:

⁴⁷“Eshinu ndu-a natawaru Unme-du-Nso g'anyi nataru-a; ? buhunu gunu ozo akposhi g'e te eme phe baputizimu?”

⁴⁸O su g'e gude epha Jizosu, bu Kereshi meshia phe baputizimu. E mecha; ephe rwoo ya g'ephe l'iya nodu nwujiku olemole.

Ndu-ishi-ozu 11

Iphe, meru le Sizariya

¹Ndu-ishi-ozu me unwunna, no le Jiudiya mgburugburu numa le ndu abudu ndu Jiu nataru opfu Chileke.

²Pyita laphuepho azu le Jierusalemu; ndu Jiu wata iya ata uta.

³Ephe su iya: “? Bu gunu meru iphe, i jeru ibe ndu e te buduru ubvu ge gu l'ephe rigba nri?”

⁴Pyita shiepho l'ishi kokotaru phe iphe, meru nu g'o hakota nanu nanu. Su phe l'iphe, kparu iya nu bu le-a:

⁵“Mu no le Jiopa. Mu nodu epfu anu Chileke. A nonyaa o gbę du g'o bu mgbenya zinwutaru mu enya. Mu phuahaa ophulenyia. Mu huma iphe, du g'ekwa, ha osa, e setaru l'ishi-ishi iya uzo eno; shi l'imigwe apazeta l'alı. Ekwa ono byarwutaę mu pho ntse; o pfuru.

⁶Mu bya elerweta iya enya. Mu huma iphe, bukpo anu, nweru okpa eno mekpoo anu-ęgbudu; mekpoo iphe, bu anu, akpu akpukpu; mekpoo iphe, bu enu, ephe l'eli.

⁷Mu numa olu, suru mu: ‘Pyita; gbalihu gbua ria!’

⁸Mu sù iya: Nnajiuphu; mu tee rikwa! Iphe, adudu k'eriri ozoo iphe, aaso nso teke ekpuswekwaa mu onu.

⁹Olu-opfu ono, shi l'imigwe ono sukwa mu: 'Ta adukwa teke iisubaa l'iphe, Chileke suru g'a ta asoshi nso be aaso nso.'

¹⁰Iphe ono mee nno mgbo eto. E mechaa e wolikota iya woba l'imigwe.

¹¹Teke ono kwapho be umadzu eto, shi Sizariya, e ziru g'ephe bya ekua mu byarwutawaru l'ulo, mu bu.

¹²"Unme Chileke su mu ge mu tsoekwaru phe pho; ge mu te ejekwa anmagbube. Unwunna-a, no l'eka-a ephe n'ishii tsoru mu jeshia Sizariya obu. Anyi rwua bya atuko bahu l'ulo Konelus.

¹³Konelus kooru anyi le ya humaru ojozi-imigwe, pfuru l'ime ulo iya; ojozi ono su iya g'o zia nemadzu g'e je ekuaru iya Sayimonu, onye epha iya bukwapho Pyita.

¹⁴O buru iya e-pfuru ngu opfu, Chileke e-gude dzoo gule ndibe ngu.

¹⁵No iya; mu bya abyarwuta bya awataepho epfu opfu; Unme-du-Nso bya eji phe ehu egube ono, o jiru anyi le mbu ono.

¹⁶Mu nyata le Nnajiuphu suru le Jionu gude mini mee baputizimu; ole unubedua be ee-gude Unme-du-Nso mee ya.

¹⁷O doru enya le Chileke nuru ndu abudu ndu Jiu ono iphe, o nuru anyibe ndu kweru ke Nnajiuphu anyi, bu Jizosu Kereshi. ? Bu onye be mu bu k'akposhi iphe, Chileke eme?"

¹⁸Noo ya; ephe numachae ya pho; ephe tabuhu Pyita uta bya awata ekele Chileke su: "Oo ya bu le Chileke hakwarupho ndu abudu ndu Jiu uzo g'izimanu lwa phe azu g'ephe gbanwee umere nata ndzu ophuu."

Eedobe Chiochi le Antiyoku

¹⁹Ndu a chikashiru le mkpamehu, a kparu ndu Chiochi g'e gburu Sutivinu gbakashihu tsoru Fonishiya me Sayipuros; mekpoo Antiyoku. O buerupho ndu Jiu kpurumu be ephe ezi ozi-oma ono teke ono.

²⁰Ole ndu Chiochi ono; ndu ophu shi Sayipuros waa Sayirini tugburu jeshia Antiyoku je arakashiaru ndu abudu ndu Jiu, bugbaa l'eka ono ozi-oma ke Nnajiuphu, bu Jizosu.

²¹Chileke yeru phe eka; a du igwerigwe kweta; bya eworu onwophe yee Nnajiuphu l'eka.

²²E pfukashia k'ekwekwe ono k'ophu o rwuru Chiochi Jierusalemu le nchi. Ephe su ge Banbasu jeshia Antiyoku.

²³O jerwua je ahuma egube eze-iphe-oma, Chileke emeru ndu ono. Ehu tsogahaa ya utso. O su phe g'ephe gudekpokwapho uche phe g'oha noshia ike l'ire-lanu nodudoru Nnajiuphu.

²⁴Kele Banabasu ono bu okpobe nemadzu; Unme-du-Nso ji iya ehu; teme o gude obu iya g'o ha kweta ke Chileke. Oo ya bu; e mee ndu du igwerigwe wogbaru onwophe yee Nnajiuphu l'eka.

²⁵E mechaa; Banabasu tugbua jeshia achog Solu le Tasosu.

²⁶O huma iya bya eduta iya byatashia Antiyoku. Ephenebo noo mgbarapha l'eka ono; ephe le ndu Chiochi. Ephe zikota ikpoto nemadzu ozi-oma ono. O buru le Antiyoku ono be e vuchaa uzo kua ndu etso uzo Jizosu ndu ke Kereshi.

²⁷Le teke ono be o duru ndu mpfuchiru Chileke, shi le Jierusalemu bya Antiyoku.

²⁸Onye lanu be epha iya bu Agabosu. Agabosu gbalihu gude ike Unme Chileke su l'oke okpa-nri abyakwa adudu le mgboko mgburugburu. Oke okpa-nri ono mechaaru du ge Kulodiyosu bu eze nnajioha ali ono.

²⁹Ndu ke Kereshi ono chia idzu su g'onymonye tua iphe g'ike beru iya g'e wolaaru unwunna ophu bu le Jiudiya.

³⁰Ephe mee ya nno. E woru iphe obu, a tutaru obu nu Banabasu yee Solu; ephe wolaaru ndu e meru ogerenya le Chiochi Jiudiya.

Ndu-ishi-ozu 12

Eegbu Jiemusu bya atu Pyita mkporo

¹O buru teke ono be eze, bu Herodu haru haru ndu Chiochi wata akpa ehu.

²O gude nwune Jionu, epha iya bu Jiemusu gbufu iya ishi.

³O lee enya l'egbugbu, ya gburu nwoke ono be du ndu Jiu ree; o je egudufua Pyita. Teke o guderu Pyita bu l'obo-iphe eswe, aataje buredi, ekoduru ekoko.

⁴O gude Pyita tua ya mkporo. A bya agbaa ndu ojogu eno eno uzo eno woru dobe g'ephe cheje iya nche. Iphe, Herodu riru bu l'oo a -bochaa iphe ya akpufutaru iya oha.

⁵Noo ya; Pyita nodu l'ulo mkporo; obenu le ndu Chiochi epfukpopho anu Chileke epfushi iya ike l'iswi ehu iya.

Ojozi, shi l'eka Nnajiuphu adzo Pyita le mkporo

⁶O be l'enyashi, bu nchi -bohu be aa-kputa Pyita kpufutaru oha; o nodu eku mgbenya; ndu ojogu labo noru iya ye l'echi eche iya nche. A tua ya mkporo uzi labo l'eka. Ndu ojogu nodugbaa nche l'onu-uzo oka-mkporo ono.

⁷A bya l'amaru; ojozi, shi l'eka Nnajiuphu pfuwaru l'eka ono, Pyita no ono. Ulo mkporo ono mgburugburu nwukotaepho ke phoo. Ojozi-imigwe ono bya enwua Pyita eka kutee ya su iya: "Ngwa; tehu egwegwa!" Mkporo ono, a turu iya l'eka labo ono weshihu daa l'ali.

⁸Ojozi-imigwe ono sụ iya: “Ngwa; lishia akpọ uwe ngu ike yee akpọkpa ngu egwegwa!” Pyita bya emee g'e pfuru iya. Ojozi-imigwe ono sụ iya: “Chita ukpo ngu gbaphua onwongu tso mu l'azu.”

⁹Pyita tsoru iya; ephe lufu l'ulo mkporo ono. Ophu Pyita amadu l'iphe ono, ojozi-imigwe eme ono bu iphe, meru ememe. O dobesu l'oo nrwọ be ya arwo.

¹⁰Ephe bya aghata ndu nche k'ivuzo; bya aghaa ndu k'ebọ gbiriri jasụ ephe jerwua onu-abata eka eeshije abahu l'ime mkpukpu. E gude mgbo-igwe guchia oguzo iya. Oguzo ono guhaa l'onwiya; ephe bya aghata tugbua. Ephe tsoru uzo lanu l'ime mkpukpu ono. A bya l'amaru; ojozi-imigwe-a phuhuwaa; paru Pyita haa nwekinyi iya.

¹¹Pyita gbẹ teke ono maru iphe shi eme nu bya asu: “Nta be o doru mu enya l'iphe-a, bu iphe, meru ememe! Aa! ? Bu Nnajiuphu ziru ojozi-imigwe iya; o bya adzo mu l'eka Herodu; dzoo mu l'eka iphemiphe, bu iphe, ndu Jiu ari l'ephe e-me mu.”

¹²O maerupho eka ya no; bya atugbua jeshia ibe Meri phe, bu iya bu ne Jionu onye eekujekwapho Maku. A du igwerigwe dzukobe l'eka ono epfu anu Chileke.

¹³Pyita bya akua eka l'oguzo. Nwamgboko, yee nemadzu bu gbaru jeshia amaru onye o bu. Epha nwamgboko ono bu Roda.

¹⁴O numa olu Pyita; ehu tsoo ya ntumatu k'ophu o to guhaeduru uzo ono; o gbaphu azu je echiaru phe mkpu su phe l'o kwa Pyita be pfuru l'onu-oguzo obu.

¹⁵Ephe su iya: “? Bu obvu eme ngu?” O nodu epfushikwa iya pho ike. Ephe su l'oburu l'oo ojozi-imigwe Pyita.

¹⁶Pyita nodu akukwa-a eka-a, oku-a. E mecha; ephe guhaa uzo. O du phe oke biribiri g'ephe humaru iya.

¹⁷O meeru phe eka paapaapa g'ephe ngaberu iya nchi. O bya eshi ishi lanu kooru phe ge Nnajiuphu gude dufuta iya l'ulo mkporo ono. O su phe g'ephe kooru iya Jiemusu waa unwunna ndu ophu. O tugbua jeshia eka ozo.

¹⁸O be l'utsu; o tufukpoo ndu ojogu ono, no nche ono ehu ge Pyita meru. Ephe gbaahaa katakatakata.

¹⁹Herodu su g'a choo ya. A choo ya; ophu a humaduru iya. O jichaa ndu nche ono aji bya ezia g'e gbutachaa phe ishi. E mecha; Herodu shi le Jiudiya tugbua jeshia Sizariya je anoo nwodu.

Herodu no ndzu rehu erehu

²⁰A nonyaa; opfu daru Herodu ye le ndu mkpukpu Taya; waa ndu mkpukpu Sayidonu. Herodu voru oku wua ehu. Ephe hoo nemadzu ye g'e je arwo ya. Ephe vuru uzo je arwo-buta Bulasutosu, bu iya bu onye eleta ulo eze enya; teme ephe jepfu eze teke ono je arwo ya g'e doshia opfu ono; kele o bu l'ali-eze iya be e shi ewotaru phe nri eriri.

²¹O be mbòku, Heròdu tũru ònu opfu òbu; ò bya eyee uwe eze iya; bya anòdu l'aba-eze iya bya awata eyeru ndu ono ònu.

²²Èphe tũa ọzu sũ: “Ò tò bukwaa nemadzũ epfu opfua-o. Ò buakwaa ya bũ chi-o!”

²³Teke ono teke ono; ojozi-imigwe, shi l'ẹka Nnajiuphu chitakpòepho Heròdu tũa ke gbaragadaga; kele ò haru; e wota ùbvù, gbaru Chileke nwẹkiya akwabẹ iya. Èkà bya eripyabẹ iya; ò nwũhu.

²⁴Opfu Chileke kabakpòo edzuru ẹkameka; a kabakpòo adũ igwerigwe kweta ke Nnajiuphu.

Aahòta Banbasu yẹ Pòlu g'èphe je ezi ozi-oma

²⁵Banbasu yẹ Sòlu jechaa ozi, e ziru phẹ; èphe shi lẹ Jierúsalemũ laphushia azũ lẹ Antiyòku. Èphe duta Jìonu onye eekujekwaphò Maku; èphe l'iya swìru.

Ndu-ishi-ozì 13

¹Lẹ Chìochi, dũ lẹ Antiyòku bẹ ò duru ndu mpfuchiru Chileke; mẹ ndu ezije opfu Chileke, nò iya nũ. Èpha phẹ bũ: Banbasu; waa Simiyònu onye ntushi-èpha iya bũ Nayijia, bũ iya bũ Nwuji; waa Lusiyòsu onye Sayirini; waa Sòlu; waa Maneyenu; onye bũ yẹ Heròdu, bũ eze bẹ e hefutaru l'unuphu lanũ.

²O be ujiku lanũ; èphe nòkobe aswì ẹgu epfu anũ Chileke. Unme-dũ-Nsò sũ phẹ: “Unu hòtaru mu Banbasu yẹ Sòlu g'èphe je ejeeru mu iphe, mu kuru phẹ oku iya.”

³Èphe swì ẹgu pfuru nũ Chileke bya abyabẹ phẹ ẹka l'ishi bya asũ phẹ g'èphe jeshia.

Iphe, meru lẹ Sayipuròsu

⁴Eshinu ò bũ Unme-dũ-Nsò ziru Sòlu yẹ Banbasu; èphe tũgbua jeshia Selusiya je abahũ l'ugbo-mini jeshia Sayipuròsu.

⁵Èphe jerwua Salamisu bya epfua ke Chileke l'ùlo-ndzukò ndu Jiu, nògbaa l'ẹka ono. Èphe lẹ Jìonu onye eekujekwaphò Maku swìkwarupho g'ooyejeru phẹ ẹka l'èje ozi ono.

⁶Èphe kwaseru òha ono, eze-ẹnyimu gbapheru ono jasũ èphe jerwua Pafòsu, nòkwapho l'alì ono. Èphe hũma onye Jiu, nò l'ẹka ono, anòduje eme òmamanshi; tẹme ò buru onye mpfuchiru l'epfujẹ iphe, Chileke epfuduru. Èpha iya bũ Ba-Jizòsu.

⁷Yẹle òchi-òha alì ono nòdu eshi ònyà. Èpha òchi-òha ono bũ Sejiyosu Pòlosu; tẹme ò buru nwoke, makpòoru iphe shii. Òchi-òha ono bya ekua Banbasu yẹ Sòlu; kele ò dũ iya g'ò nũma opfu Chileke.

⁸Noo ya; Ba-Jizòsu meahaa gẹ ya kpòshia iphe, Sòlu phẹ byaru; kele ò tò dũdu iya g'onye eze ono kweta ke Jizòsu. Iphe, ọza l'opfu Giriku bũ Elimasu, bũ iya bũ onye emeje òmamanshi.

⁹Noo ya bũ; Unme-dũ-Nsò bya eji Sòlu, onye eekujekwaphò Pòlu ẹhu. O kefuru iya ẹnya;

10bya asụ iya: “Ị bụ nwa ọkọ Obutuswe. Ọo ngu bụ onye emebyi iphemiphe, ọ ree. Ọ tọ ọdụdu ọdụdu ọgho, ị tịi ọgho; ọpụ ọ ọdụdu ọgube ọregede, ị tịi ọgho. ? Bụ teke ole be ịi-hakpoo egude ọka epfubyishi ọkpobe-ọpụ ọkọ Chileke?”

11Ge Chileke bya ebyia ngu ọka. Nta-a be ịi-wataepho atụ ishi; ọpụ ị tịi ọdụdu humabaa iphoro shi l'enyanwu noo ujiku olemole.” G'e ejia epfu-a; enya gbahụ iya ke tsukiribaa. O bukuahaa ebuku; chokashiahaa onye e-gude iya ọka.

12Onye eze ono hụma iphe ono, meru nū ono bya ekweta ọkọ Nnajiuphu, bụ Jizosu. Iphe ọkọ Jizosu ono, e ziru iya ono ọdụ iya oke biribiri.

Iphe, eme ọkọ Antiyoku, ọdụ ọkọ Pyisidiya

13Polu pẹ bya abahụ l'ugbo ọkọ Pafosu jeshia Pega, bụ mkpukpu, ọdụ ọkọ Pamfiliya. O rwua l'ọka ono; Jionu onye eekujekwapho Maku parụ pẹ haa laphushia azụ ọkọ Jierusalemu.

14Ephe shi ọkọ Pega tugbuja jerwua Antiyoku, ọdụ ọkọ Pyisidiya. O be mboku eswe-atuta-unme ndu Jiu; ephe bahụ l'ulo-ndzukọ ndu Jiu je anodu; ephe ọkọ ndu byaru nū.

15A guchaa iphe agugu, shi l'ekwo ekemu Mosisu waa ọpụ shi l'ekwo ndu mpfuchiru Chileke; ndu-ishi ulo-ndzukọ sụ g'e pfuaru Polu pẹ: “Unwunna anyi; ọ -buru l'ọ ọdụdu ọpụ, unu e-pfu gude gbaa ndu-a, no l'ọka-a unme; unu pfua ya.”

16Polu gbalihu bya apaliaru pẹ ọka g'ephe nodu doo sụ: Unu gebekwa-o! “Sụ-a: unube ndu Izurelu ibe mu me unube ndu ọzo, bụ ndu Chileke ọdụdu ọkọ nso.

17Chileke ndu-a, bụ Izurelu-a hotaru ndiche anyi pẹ bya emee pẹ; ephe paa ọka teke ephe shi buru ndu byaru abyabya l'alị Ijiputu ono. Chileke gude eze ike nkiya dufuta pẹ l'alị Ijiputu.

18Ọ takpoperupho umere pẹ nshi dua pẹ ukporo apha labo l'echiegu, e budu ebubu.

19Ọ gbushia ọha esaa l'alị Kėnanu bya eworu ndibe iya dochia; ephe nweru alị ono noo iphe, ha g'unu apha l'apha ukporo labo l'apha iri.

20“E mechaa; ọ bya eyeaharu pẹ ndu-ikpe jasụ l'ogbo k'onye mpfuchiru, bụ Sámelu.

21O be teke ephe suru l'ọ ọdụ pẹ g'a sụ l'ephe nweru eze; Chileke hotaru pẹ Solu, bụ iya bụ nwa Kishu; oshilokpa Benjaminu; ọ buru eze pẹ ukporo apha labo.

22Chileke wofuepho onye k'ono; ọ hota Dévidi g'ọ buru eze pẹ. Chileke pfuru ọpụ Dévidi sụ: ‘Dévidi, bụ iya bụ nwa Jiesi bụ onye ọdụ mu l'obu; onye e-mekota iphemiphe, mu tuberu.’²³Ọo Nwa Dévidi ono, bụ iya bụ Jizosu be Chileke yeru g'ọ buru Onye-Ndzota ọkọ ndu Izurelu, bụ iya bụ iphe, o kweru ukwe iya.

24Jizosu -bya abya; Jionu vuhawaru ọzo raaru iya ndu Izurelu mgburugburu arara g'ephe ghaa umere g'izimanu lwa pẹ azụ g'e mee pẹ baputizimu.

25O rwujeepho teke Jionu e-jeghe ozi ono; ọ sụ pẹ: “? Bụ onye be unu dobesu ọkọ mu bụ? Ọ tọ bukwa mbedua bụ onye obu, unu ele enya iya obu. Obenu l'onye k'ono e-

mechaa etso mu l'azụ; onye mu ta adudu iphe, mu bu ke ge mu yefu iya akpokpa, o yeru l'okpa.'

²⁶“Unwunna mu; unube ndu shi l'okpa Ebirhamu me ndu ohozo, no l'eka-a, Chileke duru le nsọ! Oo anyi l'unu be Chileke ziru ozi ono g'e zia anyi l'oo Jizosu adzo ndzu.

²⁷Ndu bu le Jierusalemu waa ndu-ishi phe ta amakpokwaanu l'oo Jizosu bu Onye-Ndzota obu. Ophu o dokpodaaru phe nu enya; mbu opfu ndu mpfuchiru Chileke, aaguru phe l'eswe-atuta-unme, anwuta anwuta. E mechaa; ephe gbeni mee g'iphe, ndu mpfuchiru Chileke ono pfuru vaa g'e pfuru iya teke ephe nmaru Jizosu ikpe onwu.

²⁸Ephe su ge Payileti haa g'e gbua ya l'ebe abu l'o duru iphe, ephe maru, bu iphe, ephe a-su l'oo iphe, e gude egbu iya.

²⁹Ephe mechaa iphemiphe, bu iphe, opfu Chileke pfuru ke nkiya; ephe shi l'eli oshi pazeta iya bya aparu iya lia l'ilu.

³⁰Ole Chileke meru g'o shi l'onwu teta dzuru ndzu.

³¹E mechaa; o woru onwiya goshi ndu ephe l'iya shi le Galili swiru je Jierusalemu. O goshi phe onwiya ujiku olemole. Nta-a buwaa phe bu ndu epfuru ndu Izurelu iphe, ephe huma-butaru ke nkiya.

³²Iphe, anyi byaru bu g'anyi bya akooru unu ozi-oma ono, bu iya bu l'iphe ono, Chileke kweru ndiche anyi phe ukwe iya ono

³³be o meakwaru anyibe oshilokpa phe. O meru iya teke ono, o meru Jizosu o shi l'onwu teta dzuru ndzu ono. O buru iphe, ono bu iphe, e deru le Ebvu-oma k'ebo su: “Oo ngu bu Nwa mu nwoke. E -shi ntanu-a buwaa mu bu Nna, nwuru ngu nu.

³⁴Chileke pfukwarupho ke ge ya e-me iya g'o shi l'onwu teta dzuru ndzu g'o to nwuhubahe anwuhu ophu o buro k'erehu erehu. O pfuru su: Mu e-meru unu iphe-oma ono, du nsọ ono, ta arwuhudu arwuhu ono, mu kweru Dévidi ukwe iya ono.”

³⁵Noo iphe, meru g'o gude o pfukwaapho l'eka ozo su: “I tii kwedu g'onye nkengu, i yeru obu rehu erehu.”

³⁶Ole Dévidi meru uche Chileke l'ogbo nkiya; o bya anwuhu; e lia ya l'eka e liru nna iya oche phe; o nodu l'eka ono rehu.

³⁷Obenu l'onye ono, Chileke meru o shi l'onwu teta dzuru ndzu ono te erehuduru erehu.

³⁸Su-a; g'o doo unu enya g'unu hakota unwunna mu; l'oo Jizosu ono be Chileke shi l'eka iya gbuhaarụ unu ụzo, unu e-shi g'o guaru unu nvu l'iphe-aji unu.

³⁹L'ekemu Mosisu ta adukwa ike mee unu g'unu buru ndu pfuberekoto l'iphu Chileke. Obenu le teke unu byaru egude obu unu g'o ha kweta ke Jizosu; Chileke agukotaru unu nvu l'iphe-aji, unu meru.

⁴⁰Oo ya bu; g'unu letakwa enya g'iphe ono, ndu mpfuchiru Chileke pfuru ono te eme unu. Ephe suru:

41“Unu lenu! Unube ndu ono akpo Chileke ebo l'afu ono. G'o tufukwa unu ehu; unu alaa l'iswi. Kele iphe, mu e-me l'ogbo unu-a bu iphe, unu ta abyadu ekweta l'o bu okpobe-opfu; m'o betakporu e pfuaaru iya unu.”

42“Polu yee Banabasu lufushiepho l'ulo-ndzuko ono; ndu ono rwo phe su g'ephe lwabakwaa azu l'idzu eswe-atuta-unme ozo bya akobaaru phe iphe ono.

43Ndu ono gbakashiepho; ndu Jiu me ndu ohozo, mewaru onwophe ndu Jiu; tsoru Polu yee Banabasu phe. Polu phe nodu epfushiru phe ike su phe g'ephe ta ahakwa eze-
iphe-oma, Chileke meru phe.

44“O be l'eswe-atuta-unme ozo; o phodu nwanshi me mkpuku ono l'ophu awufutakota bya l'ulo-ndzuko ono bya anuma opfu Chileke.

45Ndu Jiu humaepho igwe oha ono; epe wata iji-nya bya awata agbaghashi iphe, Polu ezi; wata iya ephu iphu.

46Polu waa Banabasu saahaa ya kpa kpa su phe: Oo unube ndu Jiu be o gbaru ke g'e
vuru uzo zia ozi-oma-a. Obenu l'eshinu unu jikaru iya; ophu unu ekwedu l'unu du
k'enweru ndu ojeje be anyi a-ha unu ghaaru ndu abudu ndu Jiu iphu nta.

47Kele o noo iphe, Nnajiuphu hotaru anyi zia anyi teke ono, o suru: “Mu hotaru unu
g'unu buru iphoro ndu abudu ndu Jiu. G'unu gude ozi ono, Chileke e-shi dzota ndiphe
ono gude jedzuru mgboko mgburugburu.”

48Ndu abudu ndu Jiu numa iya; ehu tso phe; epe jaahaa opfu ke Nnajiuphu ono
ajaja. Ndu Chileke ghawaru le ndu e-nweru ndu ojeje; bya ekweta ke Nnajiuphu.

49Ozi-oma ke Nnajiuphu ono dzuru ekameka l'oha ono.

50Ndu Jiu kpalia unwanyi, bu ndu nweru nya le mkpuku; bya aburu ndu anwu eka
ndu Jiu; waa unwoke ndu-ishi le mkpuku ono; epe wata emekpa Polu yee Banabasu
ehu; bya achifu phe l'uswe iya ono l'ophu.

51Ndu-ishi-ozu ono jishiaru phe urwuku okpa phe; o buru phe eje Ayikoniyomu.

52Ehu nodu atso ndu ke Kereshi ono utso. Unme-du-Nso jikota phe ehu.

Ndu-ishi-ozu 14

Iphe, eme le Ayikoniyomu

1O rwukwaapho le Ayikoniyomu; Polu yee Banabasu bahukwapho l'ulo-ndzuko ndu
Jiu je epfukpoo opfu ono k'ophu ikpoto ndu Jiu waa ndu Gurisu kwetaru ke Kereshi.

2Obenu le ndu Jiu ndu ophu, ekwetaduru nu jeru akpalia ndu ophu abudu ndu Jiu;
yeru phe oku k'ophu epe kporu unwunna ono ashj.

3E mechaa; ndu-ishi-ozu ono nelaa odu l'eka ono. Epe nodu l'eka Nnajiuphu asa
nkiya kpa kpa. Nnajiuphu mee g'ike emeshi iphe-ohumalenya, dugbaa biribiri du
phe; shi nno goshi l'iphe ono, epe ezi k'eze-iphe-oma iya ono bu okpobe-opfu.

⁴Ikpoto ọha, bu lẹ mkpukpu ono keha ẹbo. Ndu asu l'ọo kẹ ndu Jiu bu iya; ndu asu l'ọo kẹ ndu-ishi-ozu ono bu iya.

⁵Ndu ono, abudu ndu Jiu ono me ndu Jiu obu me ndu-ishi phe chia idzu g'ephe ripyabe ndu-ishi-ozu ono tugbua phe lẹ mkpuma.

⁶No iya; ama gbaaru ndu-ishi-ozu ono; ephe gbalaa jeshia Lisutura me Debi, bugbaa mkpukpu labo, no lẹ Layikoniya; mewaro ndu ozo, bunyabegbaa phe nu.

⁷Eka ono be ephe jeru anodu ziahaa ozi-oma ono.

Iphe, eme lẹ Lisutura waa lẹ Debi

⁸Lẹ Lisutura be o duru nwoke lanu, iphe lonwushiru okpa. O nodu eniyeni k'eshinu ne nwuru iya. O buerupho adoparu be odopajeru; ebe o toko jeswee ije.

⁹O nodukpoeppo l'eka o no ngabe nchi l'iphe, Polu epfu. No iya; Polu humaeppo l'o kwetawaru k'opu ee-me iya g'o wekorohu; o bya atabe iya enya l'iphu;

¹⁰bya epfua ya pfushia ya ike su: "Gbeshi pfuru apfuru!" Nwoke ono pfulihu tsoru ekameka zo-pheahaa.

¹¹Ikpoto ndu ono humaeppo iphe, Polu meru; ephe gude opfu-ali phe, bu opfu ndu Layikoniya chiahaa: O-ji-l'eka togbo-o! "Oke agwa, doberu anyi aghoshia nemadzu byapfuta anyi-o!"

¹²Ephe su lẹ Banbasu bu Zeyusu; Polu buru Hemisu; eshinu o bu iya aasa opfu.

¹³Noo ya; onye agwaje Zeyusu shi l'eze-ulo agwa ono, nofuru anofu lẹ mkpukpu ono haru oke-eswi chita tukaa ya okoko byatashia l'onu eka e shije abata lẹ mkpukpu ono g'ephe l'igwe oha ono gbua gude gwaa ndu-ishi-ozu ono.

¹⁴Banbasu yee Polu numaepo iphe, ephe abya ememe; ephe dojaha uwe phe ebo gbagbua gbapfu ikpoto ndu ono je adakaha phe l'echi chia mkpu su:

¹⁵"Ndu mu; ? bu gunu be unu eme nno? ? Unu ta amadu l'anyi bua nemadzu g'unu bu? Iphe, anyi byaru bu g'anyi zia unu ozi-oma; g'anyi mee unu g'unu tuko agwa ono, adudu iphe, ephe bu ono ghaaru azu; lwapfuta Chileke, dzu ndzu; mbu Chileke, bu iya meru igwe mee ali bya emee eze-enyimu waa iphemiphe, bu phe l'ime.

¹⁶Lẹ mbu be o haru ndiphe ephe nodu eshi uzo, du phe ree.

¹⁷Ole oogudeje iphe, du ree, oomeje gude goshi onye ya bu. Oodzejeru unu mini; teme iphe, unu koru l'ali be oomeje g'o mia mebyi teke gbaru iya nu. O nodu anu-jije unu ephe; teme o nodu emeje g'obu tsoo unu utso."

¹⁸Ephe pfuchakpo nno; mbu ndu-ishi-ozu ono; o buleru-a l'ehuka be ephe gude sede mkpukpu ono g'ephe te ejehẹ agwa iphe ono g'ephe tuberu.

¹⁹E gudekwadu-a nno; ndu Jiu, shi lẹ Antiyoku waa Ayikoniyomu byarwuta. Ephe bya epfuta ikpoto ndu ono yeru onwophe; bya atuahaa Polu mkpuma. Ephe tua ya

mkpuma ono jeaduru ephe dobesu l'ọ nwuhuwuru bya alọo ya wuruwuru lofu le mkpukpu ono.

²⁰Obenu le ndu ke Kereshi byaru anọ-pee ya pho mgburugburu; o gbalihu. Ephe laphushia azu l'ime mkpukpu ono. O be le nchitabohu iya yee Banabasu swiru jeshia Debi.

Polu phe alaphu azu le Antiyoku Siriya

²¹Polu phe zia ozi-oma ke Chileke shii le Debi. Ephe pfuta ndu du igwerigwe; mee phe ephe bya etsoahaa uzo Jizosu. Ephe tugbua teke ono laphushia azu le Lisutura; gbewaro l'eka ono jeshia Ayikoniyomu; bya eshikwapho le Ayikoniyomu jeshia Antiyoku.

²²Ephe je je emee g'okpoma shihu ndu ke Kereshi, no l'eka ono ike. Ephe bya eyeru phe okpu-ikike g'ephe noshikpoekwapho ike l'iphe ono, ephe kwetaru onoya. Ephe nodu ezi ndu ono l'ekameka, ephe jekporu su: "Unu makwaru l'anyi jefutaje iphe-ehuka, du igwerigwe; teme anyi abahu l'eka Chileke bu eze."

²³Ephe bya ahotagbaa nemadzu mee ephe buru ogerenya le Chiochi le Chiochi. Ephe bya aswia egu pfuru nu Chileke, bu iya bu onye ephe kwewaru l'oo ya bu Nnajiuphu phe; bya eworu phe ye iya l'eka.

²⁴Ephe jegbabachaa Pyisidiya bya ejeshia Pamfiliya.

²⁵Ephe bya epfuchaa opfu ke Chileke ono le Pega bya ejeshia Ataliya.

²⁶Ephe gbẹ l'eka ono kporu ugbo jeshia Antiyoku, bu iya bu eka ono, e yeru phe l'eka ge Chileke mejeru phe eze-iphe-oma l'eje ozi ono, ephe jefufuru nta ono.

²⁷Ephe jerwua Antiyoku ono bya achikobe ndu Chiochi l'eka lanu bya akooru phe iphemiphe, Chileke gude phe mee; kooru phe ge Chileke gude gūhaaru ndu abudu ndu Jiu uzo g'ephe kweta nkiya.

²⁸Ephe le ndu ke Kereshi noo odu l'eka ono.

Ndu-ishi-ozu 15

Ndzuko Jierusalemu

¹O duru ndu shi le Jiudiya bya bya awata ezi unwunna ono su: "A taa dzokwa unu gbahaa l'unu buru ubvu g'ekemu Mosisu suru g'e buje iya."

²Polu yee Banabasu su l'iphe, ephe epfu bu uka. Ephe le Polu phe tufuru ego. A nonyaa; a bya achia idzu su le Polu waa Banabasu waa ndu ke Kereshi, haru nodu le Antiyoku l'e-je Jierusalemu je epfuaru ndu-ishi-ozu waa ndu e meru ogerenya le Chiochi iphe ono.

³Ndu Chiochi byanu ezia phe; ephe jeshia. Ephe shita Fonishiya lufuta le Sameriya jeshia. Ephe nodu ako l'ekameka ge ndu abudu ndu Jiu gude dakobewaa bya ewowaru onwophe ye Jizosu l'eka. Ozi ono tsokota unwunna utso shii.

⁴Polu phẹ rwua Jierúsalemu; ndu Chiochi me ndu-ishi-ozu; me ndu e meru ogerenya le Chiochi kwatakpo nata phẹ okpobe anata. Epe bya akotaru phẹ iphe, Chileke gude phẹ mee.

⁵Ndu gba l'ogbo Farisii, haru buwaru ndu ke Kereshi gbalihu su: "G'e bukwa ndu ono abudu ndu Jiu ono ubvu. L'e zia phẹ l'ephe mefutajekwapho ekemu, Mosisu turu."

⁶Ndu-ishi-ozu waa ndu e meru ogerenya bya edzukobe g'e pfua opfu ono.

⁷E pfunyakpooepho opfu ono; dzokashinyaa ya; Pyita gbalihu bya asu: "Unwunna mu; ? o kwa l'unu maru le teke duhawaa enya be Chileke hotajeru mu ge mu je ezia ndu abudu ndu Jiu ozi-oma ono g'ephe anuma bya ekweta ke Jizosu.

⁸Chileke; onye bu iya maru okpoma nemadzu goshi anyi le ya nataru phẹ; kele o nuru phẹ Unme-du-Nso g'o nuru anyibedua.

⁹Oo iphe anyi bu be epe bu l'iphe Chileke; kele o sashwaru phẹ iphe-eji, epe meru. Iphe, meru g'o gude o sashia phẹ iphe-eji ono buru l'ephe kwetaru.

¹⁰Su-a; ? bu gunu meru iphe, unu eme g'unu hua Chileke ama su g'ephe meje iphe, ekemu pfuru? Eme egube ono bukwa ivu-erwa be unu ebo phẹ; mbu ivu-erwa, anyi adudu ike vua; ophu nna anyi oche phẹ adudu ike vua ya.

¹¹Awakwa-o! Anyi kwetaru le Nnajiuphu, bu Jizosu e-gude k'eze-iphe-oma iya dzoo anyi. O bukwarupho g'oo-dzo phẹ bu ono."

¹²Igwe oha ono no-kirishia ngabe nchi. Polu yee Banabasu kohaa iphe-ohumalenya, dugbaa biribiri, Chileke gude phẹ meeru ndu abudu ndu Jiu.

¹³Epe koebekpoe ya pho; Jiemusu gbalihu su: "Unwunna mu; unu ngabekwa nchi l'iphe-a, mu abya epfufu-a.

¹⁴Sayimonu kowaru anyi ge Chileke meru teke o beberu hotaahaa ndu abudu ndu Jiu g'ephe buru ndu nkiya.

¹⁵Iphe, ndu mpfuchiru Chileke pfuru yee opfu Pyita ono je adagba buerupho iphe lanu, bu iya bu g'e deru iya l'ekwo-opfu Chileke su:

¹⁶"E -mechaa be mu a-lwa bya akpukwaa ulo ibe Dévidi, zeru ezeze. Mu e-gude mkpokpo ulo ono kpulia ya ozo.

¹⁷Oo ya bu ge ndu ozo g'ephe hakpo awatakwanu acho Nnajiuphu, bu iya bu iphe, bukpoo ohamoha, mu kukotaru g'ephe bya aburu nkemu. Noo iphe, oopfu; mbu Nnajiuphu, emekotaje iphemiphe ono.

¹⁸Iphemiphe, Chileke eepfu be Chileke ono makotaru e -shi teke mgboko du."

¹⁹"Oo ya bu l'onu, mbedua eye bu g'anyi te ejekwa eme iphe, a-tsuru ndu ono shi l'echilabo ndu abudu ndu Jiu bya awata etso Chileke ono.

²⁰G'anyi dechiaru phe ekwo su g'ephe te erijekwa iphe, a gwaru iphe; kele e merwuru iya emerwu; ophu o dukwa onye ejepfuje onye nwanji ta abudu nyee ya; ophu ephe atajekwa anu, a swigburu aswigbu; ophu ephe atajekwa mee-iphe.

²¹Kele ekemu Mosisu be e shiwaa uzanya guta l'ulo-ndzuko. O to dudu eswe-atuta-unme, a ta agudu iya. Teme a nodu ara iya arara le mkpukpu le mkpukpu.”

Ekwo, e deru nu ndu ke Kereshi, abudu ndu Jiu

²²Noo ya bu; ndu-ishi-ozu waa ndu e meru ogerenya; mekpoo ndu Chiochi l'opfu bya achia idzu bya ahara nemadzu hota yeru Polu yee Banabasu g'ephe je Antiyoku. Ndu ephe hotaru bu Jiudasu onye eekuje Basabasu waa Sayilasu. Umadzu ebo ono tuko yiru le ndu-ishi le Chiochi.

²³A bya edee ekwo nu phe. Iphe, e deru bu: “Anyibe ndu-ishi-ozu me ndu e meru ogerenya, bu unwanu unu l'ekekota unube unwanu, abudu ndu Jiu, no le Antiyoku me le Siriya; me le Silisiya.

²⁴Anyi numaru l'o duru ndu shi l'ogbo anyi-a, byaru egude opfu onu gbaghashia unu obu g'ehu te ebvuru unu ebvuru. Ephe suru g'unu buje ubvu; unu eme iphemiphe, ekemu pfuru. O to bukwa anyi ziru phe g'ephe bya eme nno.

²⁵Noo iphe, o gude obu anyi buru nanu; anyi chia idzu su g'anyi haru nemadzu hota zia g'ephe bya akaru unu. Ndu ono, anyi ziru ono be ephe l'eguru onya anyi phe, bu Banabasu yee Polu swi.

²⁶Banabasu yee Polu bu ndu ono, tuchawaru ishi ndu phe k'iswi ehu Nnajiuphu anyi, bu Jizosu Kereshi.

²⁷Anyi ziru Jiudasu yee Sayilasu g'ephe bya l'onwophe gudewaro onu pfuwararo unu iphe-a, anyi deru edede-a.

²⁸Kele Unme-du-Nso be anyi l'iya chiru idzu su l'anyi tee boedu unu ivu ozo gbahaa ishi opfu-a, bu iya bu:

²⁹G'unu te erijekwa iphe, a gwaru iphe; ophu unu atakwa mee-iphe; ophu unu atakwa anu, a swigburu aswigbu; ophu unu apharwushijekwa onwunu. Unu -mewaa egube ono be o-duru unu le ree. Unu buru guu.”

³⁰A su ndu e ziru ozi ono g'ephe jeshia. Ephe jerwua Antiyoku bya achikobe ndu Chiochi ono l'eka lanu bya eworu ekwo ono nu phe.

³¹Ephe guchaepho ekwo ono; ehu tsahaa phe k'ozu ono, meru g'ephe patsua unme ono.

³²Jiudasu yee Sayilasu, buchakwaapho ndu mpfuchiru Chileke l'onwophe pfuaru unwanu ono opfu noo odu; eyeru phe oku g'obu shihu phe ike bya emekwapho g'ekwekwe, ephe kweru ke Kereshi kabaa eshihu ike.

³³Ephe nonyaa l'eka ono; unwanu ono kwakoberu phe su g'ephe laa l'ehu-guu. Ephe laphu azu lapfushia ndu ziru phe nu.

³⁴Sayilasu sù lẹ yẹbedua a-nọbaa l'ẹka ono.

³⁵Pọlu yẹe Banbasu je anọtota lẹ Antiyọku. Ẹphe lẹ ndu ọzo nọdu ezi opfu Nnajiuphu ezizi bya ara iya arara.

Pọlu yẹe Banbasu eshi iche iche

³⁶A bya anọkwaa ujiku olemole; o be ujiku lanu; Pọlu sù Banbasu: “G'anyi laphu azu l'iphe, bukpo mkpukpu, anyi mewaru ẹphe maru opfu kẹ Nnajiuphu je agbaphechaa unwunna g'anyi amawaruro g'ẹphe eme ala.”

³⁷Banbasu sù g'ẹphe duta Jiọnu onye eekujekwaphọ Maku g'ẹphe l'iya swiru.

³⁸Pọlu sukwanu l'ọ ka ree g'ẹphe te edutahe ẹgube onye ono, gbalaru g'ẹphe nọ lẹ Pamfiliya; ọphu o tsoduru phe jefufu ozi ono.

³⁹Ẹphe tu-tabe iya ẹgo k'ọphu a nonyaru; ẹphe swikata shia iche iche. Banbasu duta Maku; ẹphe jeshia Sayipurọsu.

⁴⁰Pọlu duta Sayilasu tugbua. Unwunna woru phe ye l'ẹka Chileke gẹ Chileke mejeru phe eze-iphe-oma.

⁴¹Pọlu jekota Siriya waa Silisiya; emekota g'obu shihu ndu Chiochi, nogbaa l'ibiya oo ike.

Ndu-ishi-ozì 16

Timoti etsoru Pọlu yẹe Sayilasu

¹Pọlu phe rwua Debi bya ejekwaphọ Lisutura. Ọ duru onye kẹ Kéreshi, bu l'ẹka ono. Ẹpha onye ono bu Timoti. Timoti ono bu nwanyi Jiu nwuru iya. Nwanyi ono bukwapo onye kẹ Kéreshi. Nna Timoti ono buru onye Gurisu.

²Unwunna, bukota lẹ Lisutura me ndu ọphu bu lẹ Ayikoniyomu epfukotaepo lẹ Timoti bu ọkpobe nemadzu.

³Pọlu sù lẹ ya e-duta Timoti gẹ yẹe ya swiru. O duta iya bya ebua ya ubvu. Iphe, o gude bua ya ubvu bu l'iphe, bukpo ndu Jiu, bukota l'ẹka ono mawaru lẹ nna Timoti bu onye Gurisu.

⁴E mechaa; ẹphe l'iya swiru tugbushia. Iphe, bukpo mkpukpu, ẹphe ghataru; ẹphe akokotaru ndu kẹ Kéreshi idzu ono, ndu-ishi-ozì waa ndu e meru ọgerenya chiru lẹ Jierusalemu ono. Ẹphe nọdu asuje phe g'ẹphe meje g'a chiru ono.

⁵Ọo ya bu; e mee Chiochi ono g'ọ hakota; ẹphe kabaa eshihu ike l'ekwekwe, ẹphe kweru kẹ Kéreshi; teme ẹphe nọdu aka shii mboku-mboku.

Ọphulenyà Pọlu lẹ Tirowasu

⁶Ẹphe jee g'ẹphe bahu lẹ Eshiya g'ẹphe epfua opfu Chileke l'ẹka ono; ọphu Unme-du-Nso ekwedu. Ọ buru iya bu l'ẹphe akwaseru ghabua oha Firijiya waa Galeshiya.

⁷Ẹphe jerwua mgba Misiya ẹphe lẹ Bitiniya; ẹphe jeshia abahu lẹ Bitiniya; ọphu Unme Jizosu ekwedu.

⁸Èphe je aghajaa alì Misiya jeshia Tirowasu.

⁹O be l'enyashi g'èphe rwuru Tirowasu; Pòlu hùma onye Masedoniya l'ophulenyà. O bya apfuru Pòlu l'iphu arwò iya asuje: “Jiko ghabunaa byatashia Masedoniya bya eyeru anyi èka!”

¹⁰Pòlu phùchaepho ophulenyà onò; anyi kwakòbe teke onò teke onò jeshia Masedoniya; kèlè o dowarù anyi ènyà lè Chileke eku anyi g'anyi bya ezia phè ozi-òma kè Chileke l'èka onò.

Lìdiya anata Jizòsu g'ò buru Nnajiuphu iya lè Filipayi

¹¹Oo ya bù; anyi gude ùgbo shi lè Tirowasu tùgbua bya akpoghaa jeshia Samoturesu; shiwarò l'èka onò kpòru ùgbo bahù lè Niyapòlisu lè nchitabòhu iya.

¹²Anyi shi lè Niyapòlisu gude òkpa bamihuwaròya Filipayi, bù iya bù ishi alì Masedoniya; tème ò bùkwarupho mkpùkpu, ndu shi Romu bu. Anyi nòkpoo nwujiku olemole lè mkpùkpu onò.

¹³O be mbòku atùta unme; anyi shia ònu òguzo mkpùkpu onò jeshia l'aguga ènyimu. Èka onò bè anyi dobesu l'òò èka ndu Jiu edzukoje epfu anù Chileke. Anyi rwua bya anò-zeta wata epfuru ùnwanyi, dzukòru l'èka onò opfu Chileke.

¹⁴Onye lanù l'ùnwanyi onò, nùmaru opfu anyi onò bù Lìdiya. Lìdiya onò bù onye Tayatayira. Oogba nghò èkwa uswe-uswe. O bù nwanyi, abùdu onye Jiu; òlè Chileke duru iya lè nsò. Nnajiuphu bya anwùsaa ya obu; ò ngabè nchì l'iphe, Pòlu epfu.

¹⁵E mee yèè ndibe phè baputizimu. O sù anyi: “Unu byanù anòta l'ibe mu mè unu - kwewaa lè mu bùwaa onye kweru kè Nnajiuphu.” O rwònyanaa anyi; anyi jeshia.

Pòlu nò mkpòro lè Filipayi

¹⁶O rwua ujiku lanù; anyi nòdu eje èka aanòduje epfu anù Chileke; anyi hùma nwamgbòko, bù ohu; tème òbvù buru iya l'èhu k'òphu òogba èja. Ndu nwe iya nù bè òokpatakpooru oke okpoga l'agba èja onò.

¹⁷O tsoahaa anyi lè Pòlu. O nòdu echi mkpu asuje: “Ndu-a bùkwa ndu ejeru Chileke, bù Òkalibe-Kangokòtaru-nù ozi. Èphe aakòru unu ùzo, ee-shi dzòo unu.”

¹⁸Mbòku-mbòku l'òopfu iya. A nònyaa iphe onò, oopfu onò kabakpòò adù Pòlu ashì k'òphu ò tò dùedu ike ata nshi. O ghakòbe bya asù òbvù onò: “Mu gude èpha Jizòsu Kéreshi akarù ngu g'ì lùfuta l'èhu nwata onò!” Epfufu, oopfu iya; òbvù onò lùfu nwata onò l'èhu.

¹⁹Ndu nwe iya nù hùmaepho l'òbvù onò lùfuwaru iya l'èhu k'òphu ò tò kpataèduru phè okpoga; èphe gude Pòlu yèè Sayilasù kpuru phè kpufu aswa; kpufu ndu-ikpe phè,

²⁰bù iya bù ndu-ikpe ndu Romu; je asù phè: “Ndu-a bù ndu Jiu, byaru anyi akpataru opfu lè mkpùkpu.

²¹Èphe ezi omelalì, ta abùdu ekemu-alì, gbaru anyi l'edobe; òphu ò bùdu ekemu-alì anyìbe ndu Romu. Èbe anyìbedua etsokwa ègube omelalì onò-o!”

- ²²Ikpoto ndu ono wulihu g'ephe tsua Pọlu phẹ otsukputu; ndu-ikpe ono woru uwe Pọlu yẹ Sayilasu lawashia sụ g'e chia phẹ ẹchachi.
- ²³E chiebe phẹ ẹchachi kpachaa akpachaa; bya enwuru phẹ nwuba l'ulo mkpọro. A sụ onye eche ụlo mkpọro g'ọ tuchikwaa ụlo mkpọro ono gua ya kpukpurukpu.
- ²⁴Onye eche ụlo mkpọro ono gude l'e pfuru ẹgube ono woru phẹ jeye l'ọhu l'ọhu ime ụlo mkpọro ono. O tụa phẹ mkpọro bya akpọru phẹ ọkpa ye l'oshi, a tufushiru ụzo.
- ²⁵O betashia l'echi abali; Pọlu yẹ Sayilasu nọdu epfu anụ Chileke bya ekwe ebvu anụ iya. Ndu ephe l'ephe nọ l'ulo mkpọro l'eka ono nọdu angaru phẹ nchi.
- ²⁶Teke ono teke ono; ali nmaahaa jiiijiii; kwata anmashi iya ike. Ụlo ono nmakota jiiijiii jasụ l'okpa iya. G'e jia epfua; ụzo ụlo mkpọro ono tuko gụhashia ghegbaru onu. Mkpọro, a turu onyemonye tuko gbushihuchaa.
- ²⁷Onye eche ụlo mkpọro ono tehu bya ejeshia ele ẹnya; ụlo mkpọro ghegbawaaru onu. O dobesu le ndu nokota l'ulo mkpọro ono gbalachaawaru. O mitaepho ogu-echi iya amita ge ya nmagbua onwiya.
- ²⁸Pọlu chishia mkpu sụ iya: “Te ejekwa ememe! Te ejekwa ememe! Ta adukwa iphe, ii-me onwongu! Anyi nokotakwaa l'eka-a!”
- ²⁹Onye ono, eche ụlo mkpọro ono sụ g'a nwutaedu oku. O gude ẹhu anmanma; ẹka ndzu agu iya gbagbua je adaa kpurumu le mgboru okpa Pọlu yẹ Sayilasu.
- ³⁰O bya edufuta phẹ bya asụ phẹ: “Ndu mu; ? bu gunu be mu e-me g'a dzoo mu?”
- ³¹Pọlu phẹ sụ iya: “Kweta ke Nnajiuphu, bu Jizosu Kereshi g'aa-dzoo ngu; gu le ndibe ngu g'unu ha.”
- ³²Pọlu phẹ bya epfuaru iya ke Nnajiuphu; pfukwaaru iya pho ndu nokota l'ulo iya g'ephe ha.
- ³³Onye eche ụlo mkpọro ono bya eduta phẹ le teke onokwapho l'enyashi ono je asachaa phẹ ẹka ono, e chibashiru phẹ ẹhu onya ono. E mee yele ndibe iya baputizimu l'enyashi onokwapho.
- ³⁴O duru Pọlu yẹ Sayilasu laa ibe iya je anụ phẹ nri; ephe ria. Emereme ji yẹ ndibe iya ẹhu; kele nta-a be ephe byawaru bya amaru Chileke ono, bu iya bu okpobe Chileke ono.
- ³⁵O be l'utsu iya; ndu-ikpe Romu ono zia ndu ogbogu phẹ g'ephe je ezia g'a haa Pọlu phẹ g'ephe la.
- ³⁶Onye eche ụlo mkpọro ono bya ezia ya Pọlu; sụ iya: “Ndu-ishi sukwaru g'a haa gu le Sayilasu g'unu la. Unu toekwapho nwehu tugbua lashia nta-a le nchi odo.”
- ³⁷Obenu le Pọlu suru ndu ogbogu ono: “E te ejekwaru anyi ekpe ikpe; g'ọ ka mma l'a nmaru anyi ikpe. E chia anyi iphe l'edzudzu-oha; l'eka anyi bukwa-a ndu Romu. E nwuru anyi ye le mkpọro. Nta-a be ephe suru g'anyi la le mpya. Ono be tee medu ememe! G'ephe bya l'onwophe bya edufuta anyi.”

³⁸Ndu ọgbogu ono je epfuaru ndu-ikpe ẹgube ono. Ndzụ rwuta phẹ g'ẹphe nūmaru lẹ Pọlu yẹ Sayilasụ bụ ndu Romu.

³⁹Ẹphe je je arwọo Pọlu phẹ arwọrwo. Ẹphe dufuta phẹ l'ụlo mkpọro ono bya arwọo phẹ g'ẹphe lufuru phẹ lẹ mkpukpu.

⁴⁰Pọlu yẹ Sayilasụ lufuta l'ụlo mkpọro ono bya ejeshia ibe Lidiya. Ọ bụru l'ẹka ono bẹ ẹphe jepfuru unwanna je yechaaru phẹ ọkpukpu ike sụ g'obu shihu phẹ ike; ọ bụru phẹ atugbu.

Ndu-ishi-ozì 17

Iphe, eme lẹ Tesalonayika

¹Pọlu yẹ Sayilasụ tugbua ije je aghabua Amfipolisu waa Apoloniya. Ẹphe bahu lẹ Tesalonayika. Mkpukpu ono bẹ ụlo-ndzukọ ndu Jiu dụ.

²Pọlu bya ejee l'ụlo-ndzukọ ono, bụ iya bụ g'oojejhawa. Ọ kpokube jee ya eswe-atuta-unme ẹto. O gude iphe, e deru l'ekwo-opfu Chileke asaru phẹ opfu;

³bya emee opfu Chileke ono g'o doo phẹ ẹnya; goshi phẹ lẹ Kéreshi ọbu bẹ jefutaje iphe-ẹhuka nwuhu; l'e lia ya. L'ooshi l'onwu teta dzuru ndzụ. Ọ bụru Jizosu-a, mu epfuru unu opfu iya-a bụ Kéreshi ọbu.

⁴O nweru ndu Pọlu yẹ Sayilasụ pfutaru; ẹphe laaru phẹ. O nwekwarupho ikpoto ndu Gurisu, Chileke duru lẹ nsọ mẹ igwerigwe unwanyi, nweru ẹnya, ẹphe pfutakwarupho yeru onwophe.

⁵Obenu lẹ ndu Jiu wataru ejiru iya iji-ẹnya. Ẹphe bya eje akpakọo obokoboko nemadzu l'aswa bya agbaa ọgbo. Ẹphe kpakaa mkpukpu ono; mkpukpu gbaahaa gharagharaghara. Ẹphe zeru gidigidi zeba l'ibe Jiasonu ẹka ẹphe achọ Pọlu yẹ Sayilasụ g'ẹphe gude kpufutaru ọha.

⁶Ọphu ẹphe ahumaduru phẹ; ẹphe kputa Jiasonu bya aharu unwanna anyi ọzo kputa yeru iya. Ẹphe kpuru phẹ kpujeru ndu-ikpe mkpukpu je asu phẹ: “Ndu-a, woru mgboko l'ophu gha igharaphu-a bẹ byaakwaru ibiya-a;

⁷Jiasonu gbẹ duta phẹ ẹphe je anodu l'ibe iya. Ndu ono bẹ tukokwaru ekemu eze nnajioha, bụ Siza egbukakota egbuka. Teme ẹphe sụ l'ọ duru onye eze ọzo, dụ nụ, ẹpha iya bụ Jizosu.”

⁸Ẹhu gbangahu ọha waa ndu-ikpe mkpukpu ono g'ẹphe nūmaru iphe ono.

⁹E gbubuaru Jiasonu yẹ ndu e guderu yẹ ya nre; tubuaru phẹ okpoga, ẹphe e-ye, bukwanu a -nūmabaeduru ukporo phẹ lẹ mkpukpu ono ọzobaa; ẹphe anataphu okpoga phẹ azu. Ẹphe bya eyee nre ono; a haa phẹ ẹphe lashia.

Iphe, eme lẹ Beriya

¹⁰O be l'enyashi; unwanna ono meephọ ẹgwegwa dufu Pọlu yẹ Sayilasụ; ẹphe jeshia Beriya. Ẹphe jerwua; bya ejeshia l'ụlo-ndzukọ ndu Jiu.

¹¹Ndu ẹka ono ka enweru obu ìphóró e -me lẹ ndu Tesalonayika. Ọ nọdu agụ phẹ agugu anuma ozi-oma ono. Mbọku-mbọku ẹphe agụ ẹkwo-opfu Chileke g'ẹphe maru ? iphe, Pọlu phẹ epfu búa eviya?

¹²Ọ buri iya bu lẹ ndu du igwerigwe ekweta; mekpoo igwerigwe unwanyi Gurisu, nweru enya l'ẹka ono mekwapho unwoke Gurisu.

¹³Ndu Jiu, bu lẹ Tesalonayika gbẹ l'ẹka ono numa lẹ Pọlu eziakwa opfu Chileke lẹ Beriya; ẹphe bya l'ẹka ono bya agbaghashia oha ono; woru phẹ kpalia bya eyeru phẹ kurukuru.

¹⁴Unwunna dutaepho Pọlu ẹgwegwa dufu durwua ya eze-enyimu. Timoti yẹ Sayilasunọ-kpe azu lẹ Beriya.

¹⁵Ndu edu Pọlu durwua ya Atensu. Ẹphe laphushia azu lẹ Beriya. Pọlu su phẹ ge Sayilasun yẹ Timoti byapfutakwa iya ẹgwegwa.

Iphe, eme lẹ Atensu

¹⁶Pọlu nọdu lẹ Atensu cheaharu Sayilasun yẹ Timoti. Ọ huma g'enya agwa habe shii lẹ mkpukpu ono. Ọ phushiahaa ya uphu ike l'okpoma.

¹⁷Ẹphe lẹ ndu Jiu me ndu Gurisu, anwu ẹka ndu Jiu nọdu anọduje atu ego l'ulo-ndzukọ ndu Jiu. Ọ nọdu ejejekwapho aswa mbọku-mbọku ẹphe lẹ nwa ndu ophu o humaru l'ẹka ono aboahaa ke Chileke.

¹⁸Ọ duru ndu mmamiphe, shi l'ogbo eekuje Epikuriya waa Sutoyiku, byaru ẹphe lẹ Pọlu tūahaa ya. Ndu asu: “? Bukwa ole be nwa owa-a, epfu beebabee-a epfu?” Ndu asu: “Ọ dukwa g'o duru agwa ndu ozo, ootu onu iya.” Iphe, ẹphe gude epfu nno bu lẹ Pọlu epfu ke Jizosu waa k'eshi l'onwu teta dzuru ndzu.

¹⁹Ẹphe duta Pọlu bya edufu l'edupfu, ndzukọ Ariyopagosu bya asu iya: “Menaa g'anyi maru iphe ophuu owa-a, iipfu opfu iya-a.

²⁰L'iphe owa-a, ipfugba-a bugbakwaa anyi nchi ophuu. Menaa g'anyi maru iphe, o bugbaa.”

²¹Kele ndu Atensu mgburugburu mekpoo ndu lwaru iya alwalwa ta aduedu iphe ozo, ẹphe ejeje gbahaa g'ẹphe numa me g'ẹphe pfua iphe ophuu.

²²No iya; Pọlu bya apfuru l'iphu ndu ono l'edupfu Ariyopagosu onoya su: “Atensu unu gebekwa-o! Mu su-a; mu humawaru l'unu yenukaru agwa nsọ.

²³Kele ge mu ejephekpoo lẹ mkpukpu unu-a be mu humagbaaru enya agwa unu. Mu humakwarupho enya agwa ophu e deru su: ‘Owa-a bu k'agwa ophu a madu epha iya’. Onye ono, unu abaru eja l'ebe abu l'unu maru epha iya ono, bu iya be mu epfuru unu opfu iya nta-a.

²⁴Oo ya bu Chileke, bu iya meru mgboko mee iphemiphe, no iya l'ime. Oo ya bu Nnajiuphu, nwe igwe nweru ali; teme ophu oobujeduru l'ulo, nemadzu gude ẹka kpua.

²⁵Ophu mkpa iphe, nemadzu ejeta anu iya adudu iya; eshinu o bu iya anu ndzu bya anu unme bya anu nemadzu iphemiphe.

²⁶Oo Chileke lanu ono meru onye ivuzo; bya eshi l'onye lanu ono mee ohamoha, nokota le mgboko-a mgburugburu. Oo ya tubuhawaru teke ndu no le mgboko-a a-no-beru; tubuhawaa aka oke ali phe a-kpa.

²⁷Iphe, Chileke medoru iphemiphe ono bu ge ndiphe achoo ya chota iya m'ephe - rwaphenaa aka iya; eshinu Chileke ta adudu onye o no enya le g'anyi ha; mbu me onye lanu.

²⁸Kele "Oo ya gude ndzu anyi. O buru iya meru iphe, anyi ejephe. Teme o buru iya meru iphe, anyi du adudu ophu." O du-a g'egube ndibe unu, agu ebvu guru su: "Anyi tukoru buru unwu iya."

²⁹Eshinu anyi tukoru buru unwu Chileke; g'anyi ta ariekwa le Chileke du g'iphe, e gude ope wua; ozoo iphe, a kpuru l'urwa; ozoo iphe, e gude oshi pyia. Oriri nemadzu te erwukwaru ge Chileke gbaru; ophu o buro k'egude iphe, emeru ona goshi g'o gbaru.

³⁰Chileke lesweakwaru teke e shidu maru iya enya. Nta-a be o suru g'izimanu lwa onyemonye azu l'ekameka; g'ephe byapfuta iya.

³¹Kele o dobeakwaru mboku, oo-kpe ndiphe mgburugburu ikpe pfuru-oto. Onye oo-gude kpee ikpe ono bu nwoke obu, o hotaru l'onwiya. Iphe, o gude mee g'onyemonye maru l'iphe ono e-mekota ge ya tuberu bu l'o meru g'onye ono shi l'onwu teta dzuru ndzu.

³²Polu pfufutaepho k'eshi l'onwu teta dzuru ndzu ono; ephe haru gbaaharu iya mgbonu. O dukwarupho ndu suru: "O dukwa anyi g'a su l'ii-pfubaa iphe-a ozo g'anyi numabaa."

³³Polu paru phe haa; o buru iya atugbu.

³⁴O duru ndu tsoru iya nu bya eworu onwophe ye Jizosu, bu Nnajiuphu l'eka. Dayonisiyosu, onye gba l'ogbo Ariyopagosu yi le ndu ono waa nwanyi, eekuje Damarisu; mewaro ndu ozo.

Ndu-ishi-ozu 18

Iphe, eme le Korentu

¹E mechaa; Polu shi le Atensu jeshia Korentu.

²O rwua l'eka ono; o huma onye Jiu, eekuje Akwila. Eka a no nwua ya bu le Pontosu. Akwila be yee nyee ya bu Pisisila shikwada Itali lwa Korentu teke ono; kele eze nnajioha, bu Kulodiyosu suru g'iphe, bukpo ndu Jiu mgburugburu lufu le Romu. Polu jee ge yee phe kwee.

³O jerwua; ephe l'iya nodu jeahawaro ozi; kele iphe, ephe gude buru bu ekwe ekwa, eegudeje eme ulo-ekwa. Polu l'onwiya bukwapo onye ekweje ekwa.

- ⁴Ọ nọdu ejeje l'ulo-ndzukọ ndu Jiu idzu g'idzu eswe-atuta-unme g'ephe bọo kẹ Chileke; bya esee gẹ ya pfuta ndu Jiu mẹ ndu Gurisu yeru Jizọsu.
- ⁵Sayilasu yẹe Timoti shi lẹ Masedoniya Iwatashia; Pọlu phubewaa iphu l'epfu kẹ Chileke mbọku-mbọku. Ọ nọdu egoshi ndu Jiu l'ọo Jizọsu, bụ Kéreshi ọbu.
- ⁶Teke ephe jikaru bya epfuaharu iya ejo opfu; l'ọ jia uwe iya kpowulangu sụ phẹ: “Inyorokoto inyorokoto! Unu vukwaru ọchi unu l'ishi unu. Eka mu ta adukwa iya. Nta-a buakwaa ndu abudu ndu Jiu bẹ mu e-jepfu.”
- ⁷Ọ parụ phẹ haa je eburu l'ibe onye Gurisu, eekuje Tayitosu Jiọtosusu, bụ nwoke, Chileke duru lẹ nsọ. Ibe iya nọ-kube ọlo-ndzukọ ndu Jiu.
- ⁸Onye-ishi ọlo-ndzukọ ọbu, bụ Kirisupọsu bẹ yẹe ndibe iya kwetawaru l'ọo Jizọsu bụ Nnajiuphu phẹ. A dukwapho igwerigwe lẹ Kọrentu numa kẹ Jizọsu ono bya ekwetakwaphọ; e mee phẹ baputizimu.
- ⁹Ọ be l'enyashi ujiku lanu; Pọlu phua ọphulenya. Jizọsu sụ iya: “Ndzu ba agukwa ngu Pọlu! Pfukwa iphe, iipfu; ta adukwa teke jia iya.
- ¹⁰Mu nọkwaa swiru ngu eswiru. Ọ tọ dukwa onye a-furu ngu nọ k'emeka ngu iphe; kele a dukwa igwe lẹ mkpukpu-a bugbaaru ndu bụ ndu nkemu.”
- ¹¹Pọlu nọo lẹ mkpukpu ono mgbarapha l'onwa ishii zikọta ndu eka ono opfu Chileke.
- ¹²Ọ buru teke Galiyo bụ onye-ishi ndu Gurisu bẹ ndu Jiu byaru anokobe gude Pọlu kpuru jeshia l'ulo-ikpe.
- ¹³Ephe sụ lẹ Pọlu eme g'o mee ndu ndu-phẹ g'ephe baje ru Chileke eja l'uzo, abudu iphe, ekemu ali phẹ pfuru.
- ¹⁴Pọlu jeshia eye onu; Galiyo sụ ndu Jiu ono: “Ọme iphe-a bụ opfu kẹ l'e mesweru; ọzoo l'e meru ejo-iphe mẹ mu asụ ee l'ọ du-a ree gẹ mu yeru unubẹ ndu Jiu onu.
- ¹⁵Obenu l'eshinu iphe, unu adzo bụ k'epha mẹ opfu onu; mẹ ekemu unu; unu jekwa edoshia ya l'onwunu. Mu te ekpejekwa egube iphe ono.”
- ¹⁶Ọ chishia phẹ l'ulo-ikpe.
- ¹⁷G'ephe ha gude Sosutenisu, bụ onye-ishi ọlo-ndzukọ ndu Jiu ono tsua ya iphe l'iphu ọlo-ikpe l'eka ono. Ọphu Galiyo eyeduru phẹ onu.

Pọlu alaphu azu lẹ Antiyọku

- ¹⁸Pọlu yẹe unwunna nọepfo lẹ Kọrentu ujiku olemole; ọ parụ phẹ haa; yẹe Pirisila waa Akwila swiru bahu l'ugbo jeshia Siriya g'ọ kpushichaadaru ishi lẹ Kenkiriya; kele iphe, o kweru Chileke ukwe iya bẹ o mewaru.
- ¹⁹Ephe jerwua Efesosu. Pọlu haa Pirisila yẹe Akwila l'eka ono bya abahu l'ulo-ndzukọ je yẹe ndu Jiu bọahaa kẹ Chileke.
- ²⁰Ephe rwọo ya g'ephe l'iya nọbaa; ọphu o kwedu.

²¹Ọ tųgbushia bya asų phẹ: Ọbo-iphe-a abyanų-a bẹ mu lwaphutajẹkwa azų lẹ Jierúsalemų bya abọ mẹ ọ -bųru uche Chileke. Ọ bahun l'ųgbo lẹ Efesọsu tųgbua.

²²Ọ -rwuepho lẹ Sizariya; bya egude ọkpa jeshia Jierúsalemų je ekele ndu Chiochi ẹka ono. O shiwarọ eli-eli jeshia Antiyọku.

²³Ọ nọekwapho nwanshii lẹ Antiyọku; ọ tųgbua ọzo. O je eshita alị Galeshiya waa Firijiya eme g'obu kabaa eshihu ndu kẹ Kéreshi l'ibiya ono ike.

Apọlosu byaru Efesọsu waa Kọrentu

²⁴Ọ dųru onye Jiu, ẹpha iya bų Apọlosu, a nwųru lẹ Alẹguzandiriya, byaru Efesọsu. Ọ maru epfu opfu bya amaru iphe, e deru l'ẹkwo-opfu Chileke mashia ya ike.

²⁵E zihawaru iya k'ųzo Nnajiųphu; ọ nọdu evukpọo ya evuvu epfuru ndu ọzo kẹ Jizọsu ono; tẹme ọ nọdu ezikwa iya phọ ezizi. Ọotukojekpo kẹ Jizọsu tọo l'ọkpa iya l'ọkpa iya; ọle ẹka ọ maberu bųepho kẹ baputizimu ọphu Jiọnu shi emeje.

²⁶Ọ saahaa kẹ Chileke kpaa kpaa l'ųlo-ndzukọ ndu Jiu. Pirisila yẹe Akwila nųma iphe, oopfu bya eduru iya laa ibe phẹ; je akabaa ya ezirwe ųzo Nnajiųphu ezirwe.

²⁷Apọlosu sų lẹ ya e-je alị Gurisu. Ọnwunna, nọ lẹ Efesọsu sų l'ọ dųkwa ree shii; bya ederu ẹkwo nų iya gẹ ndu kẹ Kéreshi, nọ l'ẹka ono nata iya ree. O jerwua; ọ kwata yeru phẹ ẹka shii; mbų ndu shi l'eze-iphe-ọma, Chileke eme kwetawaa.

²⁸Ọ nọdu atų-kputajẹ ndu Jiu l'edzudzu-ọha; egudeje iphe, e deru l'opfu Chileke goshi phẹ rengurengu l'ọo Jizọsu, bų Kéreshi ọbu.

Ndu-ishi-ozu 19

Pọlu nọ lẹ Efesọsu

¹Teke ono, Apọlosu nọ lẹ Kọrentu ono bẹ Pọlu kwasẹru ųzo ẹnyanwu ariiba lųfu lẹ Efesọsu. O rwua l'ẹka ono; ọ harų hųma ndu etso ųzo Jizọsu.

²Ọ jia phẹ: “? Unu natarų Unme-dų-Nsọ teke unu kwetarų?” Ẹphe sų iya: “Anyi teke anųma-swekpọkwaanu kẹ Unme-dų-Nsọ anųma ọphu.”

³Ọ sų phẹ: “? Bų ẹgube baputizimu gunu bẹ e meru unu?” Ẹphe sų iya l'ọo baputizimu kẹ Jiọnu.

⁴Pọlu sų phẹ: “Jiọnu shikwa emeje baputizimu gude egoshi l'onye-a bẹ izimanų iphe-ẹji iya lwarų azų; ọ ghawaa umere lwapfuta Chileke. Iphe, o shi epfufefuaru ndu Jiu bų g'ẹphe kweta k'onye ono, a-bya nų ono, bų iya bų Jizọsu.”

⁵Pọlu pfuchaepho nno; ẹphe nųma; e gude ẹpha Nnajiųphu, bų Jizọsu mee phẹ baputizimu.

⁶Pọlu bya ebyibe phẹ ẹka; Unme-dų-Nsọ bya eji phẹ ẹhu. Ẹphe pfuahaa l'olu Unme-dų-Nsọ; bya awatakwapọ epfuchiru Chileke.

⁷Ndu ono rwuru iri l'ẹbo.

⁸Pọlu nọkọta mgburugburu ọnwá ẹto sakọta kẹ Chileke kpaa kpaa l'ulo-ndzukọ ndu Jiu. Ẹphe l'iya nọdu adzọ opfu ono. Ọ nọdu anọduje eme g'o doo phẹ ẹnya l'ozí-oma kẹ Chileke, bú eze ono; bú ọkpobe-opfu.

⁹Ole ndu ono haru kpochia nchi; ọphu ẹphe ekwetaduru iphe, Pọlu pfuru. Ẹphe wataepho epfubyishi ọzo Nnajiuphu ono epfubyishi l'eka ono; Pọlu paru phẹ haa bya eduta ndu kẹ Kéreshi ono; ọ búru iya atugbu. Mbọku-mbọku; oojeshia asa opfu l'ulo, eedzukoje k'anwu iphe l'ibe Tiranosu.

¹⁰O mekpọe ya phọ ẹgube ono gbiriri jasú o megba iya apha labọ. Ọo ya bú ndu bukọta l'alí Eshiya mẹ ndu Jiu mẹ ndu Gurisu nưmakota opfu kẹ Nnajiuphu, bú Chileke.

Unwu Sukiva

¹¹Chileke shi Pọlu l'eka eme iphe-ohumalenya, ete emejehaadaa nu;

¹²k'ọphu ọobujeru e -shi iya l'ehu wota nkachifu; ọzoo nwampete ẹkwa gude jepfu ndu iphe eme; iphe-ememe ono alaa; ọbvú, bú phẹ l'ehu alufuchaa.

¹³Ọ dukwarupho ndu Jiu, tsoru ejephe achishikwapho ọbvú, emegbaa nemadzú. Ẹphe nọdu emeje g'ẹphe gude ẹpha Jizosu eme iya. Ẹphe nọdu asuje ọbvú ono: “Mu gude ẹpha Jizosu, onye Pọlu epfu nkiya akaru ngu g'í lufu.”

¹⁴O nweru nwoke Jiu lanu, bú onye-ishi uke Chileke, ẹpha iya bú Sukiva, nwutaru unwoke ẹsaa. Noo ya; o be ujiku lanu; unwoke ẹsaa ono mekwaaphọ g'ẹphe gude ẹpha Jizosu chifu ọbvú ẹgube ono, ndu ọphuu achifuje phọ.

¹⁵Ọbvú ono, ẹphe eme g'ẹphe chifu ono sù phẹ: “Jizosu bẹ mu maru bya amakwarupho Pọlu; unubẹdua ? unu bú ndu ole?”

¹⁶Onye ono, ọbvú eme ono gude ẹjo ọkpehu tsoo phẹ ọgu; kakọta ẹphe n'ẹsaa ike. O meka phẹ iphe gbabẹchaa phẹ ọto. Ẹphe shi l'ulo ono gbafu.

¹⁷Ndu Jiu mẹ ndu abudu ndu Jiu, bukọta lẹ Efesosu nưma iphe ono; ndzú rwuta phẹ. A kwabẹahaa ẹpha Nnajiuphu, bú Jizosu ọkpobe ubvù.

¹⁸Igwerigwe ndu búwaa ndu kẹ Kéreshi wuru bya bya akoshiahaa iphe, ẹphe shi emeje; bya egbukachaa oswe, ẹphe shi kegbaa ndu ọzo.

¹⁹Ndu emeje ọmamanshi bya achita ẹkwo, ẹphe egudeje eme ọmamanshi ono chikobe l'eka lanu kpọo ya ọku l'iphu ọha. A bya agbakọo aswa ẹkwo ono; ọ búru ukporo ẹkpa-ego iri l'ẹbo l'ẹkpa-ego iri.

²⁰E shi ẹgube ono; opfu kẹ Chileke goshi g'oorebe ire bya akabaa ejedzuru; bya akabakwaaphọ eshihu ike eje.

Ùtsú etsu lẹ Efesosu

²¹Iphe ono nwuchaepho; Unme-du-Nsọ mee gẹ Pọlu sù lẹ ya shifutaje Masedoniya waa alí Gurisu lufu lẹ Jierúsalemú. Ọ sù lẹ ya -jechaa ẹka ono bẹ ya e-jekwaphọ Romu.

22O bya ezia ndu eyejeru iya ẹka ụmadzu ẹbo; Timoti yee Erasutosu g'ẹphe vuru iya ụzo jeshia Masedoniya ge yẹbedua nọbaadaa l'alị Eshiya.

23Teke ono be oke mkpaka bataru le mkpukpu ono l'opfu ụzo Nnajiuphu ono.

24L'ọ duru onye akpuje ụzu, eme ọna shii, egudeje mkpola-ochaa akpushi unwu iphe, adujegbaa l'eze-ulo eze-nwanyị ndu Efesosu, bu Atemisu. Epha onye-uzú ono bu Dimitiriyoosu. Yee ndu akpujeru iya iphe ono gude iya akpa okpoga ntumatu.

25O bya ekuko ndu ono l'eka lanu; mekpoo iphe, bukpoo ogbo ndu uzú ono su phe: "Ndu mu! Unu maru l'oo iphe, anyi eme-a be anyi gude aba.

26? O kwa l'unu anu-a; teme unu nodu ele-a iphe, nwoke-a, bu Polu eme? O suru l'agwa, nemadzu gude eka dobe ta abudu okpobe iphe ilile. Nta-a be o gudewaa egube ono pfuta ndu du igwerigwe le Efesosu; ghudu me oojegbabe alị Eshiya mgburugburu.

27Iphe, du eji, du iya nu bu l'iphe-a, anyi akpuje-a a-zaahaa ejo epha. Ozo ka njo bu l'eze-ulo eze-nwanyị taa duedu iphe, oobukwaduru. Waa l'aa-paru iya haa; mbu eze-nwanyị ophu alị Eshiya l'ophu me mgboko mgburugburu abaru eja."

28Ikpoto ndu ono nunyaepho iphe ono, oopfu ono; ehu gbangahu phe l'ehu-eghu. Ephe tu ụzu su: "Atemisu ndu Efesosu bu eze agwa!"

29Utsu daa le mkpukpu ono. Ephe dzukobe egwegwa gude Gayosu yee Arisutakosu, bugbaa ndu Masedoniya labo, ephe le Polu swi; kpuru phe kpufuru oha l'eka mkpukpu ono edzuje.

30Polu l'onwiya jeshia ge ya jepfu ikpoto ndu ono; ophu ndu ke Kereshi ekwedu.

31Ndu nweru enya le Eshiya, bu ndu ephe l'iya eshi onya; zia ozi g'e je ezia ya su iya jiko g'a ta ahumakwa iya l'eka ono, mkpukpu edzuje ono ahuma ophu.

32Kele teke ono be utsu ono adakpoepho le ndzuko ono. Ndu echi ke ne phe; ndu echi ke nna phe; kele ephe ta amadu iphe, ada nu. Mbu l'o ghuduru nwanshii me o buru le g'ẹphe hakota kuru l'eka ono ta amadu iphe, ephe gbafuta-doru.

33No iya; e dobesu l'oo nwoke lanu, eekuje Aleguzanda akpa iphe ono; kele ndu Jiu hofutaru iya nwuru iya ye l'iphu ikpoto ndu ono. Aleguzanda palia eka g'e gebekwa ge ya dofu onwiya.

34Ephe humaepho l'ọ bu onye Jiu; g'ẹphe hakota gude olu lanu chiahaa su: "Atemisu ndu Efesosu bu eze agwa!" Ephe raaepho iphe ono nra lanu-oo jasụ iphe, ha g'awa labo.

35E mechaa; onye edejeru mkpukpu ekwo kukebe ehu mee a rabuhu iphe ono. O su phe: "Mu su-a; Efesosu! O to dukwa onye amadu l'oo Efesosu bu mkpukpu, nwe eze-ulo Atemisu bya aburu mkpukpu, abaru nteke, gbaru iche ono, shi l'igwe daa ono eja.

36O to dudu onye a-su l'oo uka. Oo ya bu; unu nodunu nwadoo. Unu te emekwa ge ndu amadu iphe.

³⁷Unu kputawaru ndu-a bya ẹka-a l'ẹbe ọbu l'ẹphe zitaru iphe eze-ulo eze-nwanyi; teme ọphu ọ dudu ẹjo opfu, ẹphe pfuru iya.

³⁸Su-a; teke ọ bu ẹ Dimitiriyosu waa ndu ẹjeru iya ozi nweru ndu ẹphe suru l'ọ duru iphe, ẹphe meru; ulo-ikpe dọpho adudu teme ndu-ishi mkpukpu nọduepho l'ẹka ono. G'ẹphe je l'ẹka ono je epfu iya.

³⁹Teke ọ bu l'ọ duru iphe ọzo, unu epfu; unu epfua ya me mkpukpu dzua opfu.

⁴⁰Kele ọgu, duru anyi nta-a bukwa l'aa-su l'anyi kparu utsu ntanu-a l'ẹbe abu l'o nweru ishi iphe, bukwanu e -kuje anyi; anyi egude iya dofu onwanyi l'egube mkpu ọwa-a, a gbaru ntanu-a.”

⁴¹O pfuchaa nno; ọ su phe g'ẹphe la. Ẹphe wufu lashia.

Ndu-ishi-ozì 20

Iphe, meru ẹ Masedoniya waa ẹ Gurisu

¹Utsu ono dazetaepho; Polu bya ekuko ndu ke Kereshi bya eyeru phe okpu-ikike g'ẹphe ta atsukwa ebvu bya ekelecha phe; ọ buru iya eje Masedoniya.

²O jephekotachaa l'iphe, bu ẹka ono g'ọ ha pfuaru phe igwerigwe opfu bya eyeru phe okpu-ikike. E mecha; ọ bya ejeshia Gurisu.

³O nọ ọnwa ẹto l'ẹka ono. A nonyaa; ọ kwakobe jeshia abahu l'ugbo eje ali Siriya. Ndu Jiu gbaru je akwachia ya ọzo. O laphu azu je eshia ọzo Masedoniya lashia.

⁴Ndu ẹphe l'iya swi l'ije ono bu Sopeta, nwa Pirusu, onye Beriya waa Arisutakosu waa Sekundosu, ẹphebedua shi ẹ Tesalonayika; waa Gayosu onye Debi; waa Tikikosu waa Tirowasusu; noo ndu ke Eshiya; waa Timoti.

⁵Ndu ono vuru ọzo je anodu ẹ Tirowasu pfuru-cheru anyi.

⁶A -bochaa iphe “Obo-buredi, ekoduru ekoko” ; anyi bahu l'ugbo ẹ Filipayi tugba. A nọepho ujiku ise; anyi byapfuta phe ẹ Tirowasu. E rwua ẹka ono; anyi nọ abali esaa l'ẹka ono.

Ejeje ikpazu, Polu eje Tirowasu

⁷O be ẹ mboku mbu l'idzu; anyi dzukobe g'anyi ria Nri-enyashi-Nnajiuphu. Polu wata phe asaru opfu; kele okwakobekwanu k'ala l'utsu iya. O pfuepho opfu gbiriri jasu abali kee ẹbo.

⁸Oroku du igwerigwe l'ime ulo-eli ono l'ẹka anyi nyikotaru je adokobe ẹ k'eli iya.

⁹Nwokerobyanya lanu, aza Yutikosu nodu anọ l'igburonu windo. Polu pfunyaepho opfu ono; mgbenya rweahaa Yutikosu. A nonyaa mgbenya tu iya. O shi ẹ mkpopfu ulo-eli ẹto ono ngabufu bya echia onwiya l'ali. E jeshia ya apali; ọ nwuhuwaa.

¹⁰Polu bya enyizeta bya anmakoru iya l'eli bya agbakua ya ẹka su: “Unu ta akwagbushihe onwunu l'ọ dzuwaa ndzu!”

¹¹Ọ tughua laphu azu je anyawaa buredi ono kee; ephe ria. O pfuaharu phe opfu ozo; pfua ya jasu nchi bahu. O buru iya alala.

¹²Ephe duta nwokorobya ono le ndzu. O buru iphe, e gude dua phe obu; obu shihu phe ike okpobe eshihu.

Polu shi le Tirowasu jeshia Militosu

¹³Anyi tughua bya abahu l'ugbo kporu jeshia Asosu g'anyi apata Polu l'eka ono; kele o suru g'anyi gude ugbo byapfuta iya le ya e-gude okpa lufuta l'eka ono.

¹⁴Ọ byapfuta anyi le Asosu; anyi pata iya l'ugbo tughua jasu anyi jerwua Mitilini.

¹⁵Tobudu iya bu; anyi shi l'eka ono tughua. O be le nchitabohu iya; anyi shi l'eka ono gude ugbo ghaa mgboru Kiyosu. O rwua echele iya; anyi kpo-rwua Samosu. O be le nchitabohu mboku k'ono; anyi kpo-rwua Militosu;

¹⁶kele Polu pfuhawaru su le ya a-gha Efesosus aghagha ge ya te eje akpo upfu l'ali Eshiya. O du iya egwegwa; kele oome ge ya kukebe ehu jerwua Jierusalem; teme l'oorwua mboku Pentikosutu.

Polu asu: "Nokwa-ehu mma"

¹⁷Polu nodu le Militosu zia g'e je ezia ndu e meru ogerenya Chiochi le Efesosus g'ephe bya ge ye l'ephe dzuda.

¹⁸Ephe byarwuta Polu su phe: "Unu mawaru-a ge mu shi emeje teke ono, mu l'unu nokpoo ono eshinu mu byaru ali Eshiya.

¹⁹Mu wozetaru onwomu ali ejeru Nnajiuphu ozi; mu gude enya-mini gude iphe-ehuka, byapfutakotaru mu nu, shigbaa l'ejo idzu, ndu Jiu achiru mu eje ozi ono.

²⁰Unu maru l'o to dudu iphe k'uzo ono, Chileke e-shi dzoo unu ono, mu atogboduru unu eba; mbu l'o to dudu eka mu wachiru iya unu awachi me nanu. Mu raru iya unu arara zia ya unu l'edzudzu-oha me l'ibe unu l'unuphu l'unuphu.

²¹Mu nmaru ndu Jiu me ndu abudu ndu Jiu okwa su g'izimanu iphe-eji phe lwa phe azu g'ephe gha umere lwapfuta Chileke bya ekweta l'oo Jizosu bu Nnajiuphu phe.

²²Nta-a be mu e-mekwa ge Unme-du-Nso ziru mu. Mu e-je Jierusalem; ebe o bukwa le mu maru iphe, ee-me mu nu l'eka ono.

²³Iphe, mu maerupho bu le Unme Chileke emeje mu le mkpukpu le mkpukpu mu ahuma le mkporo waa iphe-ehuka, paru eka swiru mu le Jierusalem ono.

²⁴Ole o to dudu iphe, mu guberu ndzu mu. Oo 'nu ge mu jefukponu ozi mu l'ishi; mbu ge mu jefubebe ozi ono, Nnajiuphu bu Jizosu ziru mu ge mu jee ono, bu iya bu ge mu pfukaaru ndiphe k'ozi-oma le Chileke a-phuru phe obu-imemini.

²⁵"Nta be mu mawaru l'unube ndu ono, mu tsoru jephee zia ozi-oma l'oo Chileke bu eze ono be taa humabaekwa mu ozo.

- ²⁶Noo iphe, mu gude sù unu ntanù-a; ọ -duru onye larù l'iswi bẹ ẹka mu ta aduẹkwa iya ozo.
- ²⁷Kele mu tukuraru iphemiphe, Chileke tüberu togbokotaru unu ẹba. Ọ to dudu ophu mu wachiru unu awachi me nanu.
- ²⁸Unu leta onwunu ẹnya letakwapho unwu aturu ono, Unme-du-Nso yeru unu l'eka ono ẹnya. Unu buru ndu azu Chiochi, Chileke gude mee, Nwa iya gedegede gbaru l'oswebe; mee g'ọ buru nkiya.
- ²⁹Mu maru le mu -tugbuchaephe lashia bẹ ndu ejo nzi a-wubata g'ejo agu bya adakaa unu. Ọ to dukwa g'e meru; ebe ephe ebyi eka l'igwe aturu-a.
- ³⁰Ọ duru teke aa-nonyia ndu shikwaa l'ime ogbo unu ono awata adzu uka. Ephe egude egube ono meahaa g'ephe dzuta ndu kweru ke Kereshi l'uka g'ephe etsoru eka phe.
- ³¹Noo ya bu; unu kwabe ẹnya. Unu nyatajekwa le mu kwataru gude ẹnya-mini kukebe ehu eme unu g'unu tsoru uzo, pfuru oto. Mu ziru iya unu l'ehu l'ehu; eswe l'enyashi apha eto ophu.
- ³²“Nta bẹ mu yeru unu l'eka Chileke. Mu ziwaru unu ozi-oma k'eze-iphe-oma, Chileke emeru ndiphe. Ọo ozi-oma ono eche unu bya aduje ike emetse unu emetse bya adujekwapho ike mee g'unu le ndu ozo, bu ndu ke Chileke gbaru mgba l'iphe ono, o doberu ndu nkiya ono.
- ³³Unu maru l'ọ to dudu onye egu iphe iya gujeru mu. Ophu ọ dudu onye mu suseru g'ọ nu mu afu; ozoo kobo; ozoo uwe iya.
- ³⁴Ọo eka mu-a ephenebo bẹ mu gude jee ozi jeta iphe, mkpa iya duru mu; waa iphe, mkpa iya duru ndu mu l'ephe swi.
- ³⁵Mu gudewaa egube ono goshi unu l'anyi a-nodu ejeshije ozi ike g'anyi egude egube ono yeru ndu adudu g'ọ du phe eka. G'anyi nyatajekwa iphe ono, Jizosu, bu Nnajiuphu pfuru l'onwiya ono su: ‘Onye anu anunu bẹ ehu kakwa utso eme l'onye anata anata.’ “
- ³⁶Polu pfuchaa nno; o gbushi ikpere yee ndu ono g'ephe ha pfuru nu Chileke.
- ³⁷Ọ tugbushia; ephe tuko bungee eka je arikua ya eka l'olu; tsutsuchaa ya onu gude su iya tokwa ehu.
- ³⁸Ọ buru epufufu ono, o pfuru l'ephe taa humabaedu iya ozo ono bẹ kachakpo phe erwu l'ehu. Ephe duru iya jeshia l'ugbo.

Ndu-ishi-ozu 21

Polu eje Jierusalemu

- ¹Anyi su phe: “Nokwa-ehu mma” bya abahu l'ugbo kpokwaseerupho nhamunha jasu anyi lufuta le Kosu. O be le nchitabohu iya; anyi kporu byarwuta Rodzu. Anyi shi l'eka ono kporu jeshia Patara.
- ²Anyi rwua bya ahuma ugbo, adagha eje Fonishiya. Anyi bahu iya kporu tugbua.

³Anyi kpọ-rwuepho ẹka anyi gbẹwaa elewaa Sayipurosu ẹnya; anyi jiru iya ye l'ẹkicha kpọru jeshia Siriya. Anyi byarwutaepho Taya, bu iya bu ẹka aabya egweshi iphe, ugbo ono vu; anyi nyishihu.

⁴Anyi huma ndu ke Kéreshi l'ẹka ono. Anyi l'ephe no abali esaa. Unme Chileke mee ephe huma iphe, e-me Polu le Jierusalemu. Ephe nmaaru iya okwa su iya g'o to jekwa.

⁵Anyi nodzuepho abali esaa ono; anyi haa ẹka ono tugbua ije anyi. G'ephe hakota; me unyomu phe; me unwegirima phe toko wuru tsoru anyi jasụ anyi lufutabebe le Taya. Anyi lufutabebeepho; anyi toko gbushi ikpere l'onu eze-enyimu l'ẹka ono pfuru nu Chileke.

⁶Anyi l'ephe kwechaa ekele ikpazu-a; anyi bahu l'ugbo tugbua. Ephebedua wuru lashia ibe phe.

⁷Anyi shi le Taya l'ẹka ono kpọru ugbo tugbua. Anyi bya akporwua l'ali Tolemeyisu. O buru l'ẹka ono be anyi no-buhuru l'ugbo l'ije anyi obu. Anyi bya eje ekelechaa unwunna; anyi l'ephe no ujiku ophu l'ẹka ono.

⁸O be le nchitabohu iya; anyi gude okpa tugbua bya ejerwua Sizariya. Anyi rwua bya abahu l'ibe Filipu, onye Ozi-oma; anyi l'ephe nodu. Filipu ono yi l'unwoke esaa pho, a hotajeru g'ephe yeje ẹka pho.

⁹O nwutaru unwumboko eno, ata aludu ji. Unwumboko ono ephen'eno toko epfuchijechaarua Chileke.

¹⁰Anyi nokpoo ujiku olemole l'ẹka ono. A nonyaa nwoke lanu, bu onye mpfuchiru, epha iya bu Agabosu shi le Jiudiya bya.

¹¹O byapfuta anyi bya ewota akpo, Polu atubutaje uwe iya bya egude kegbabe onwiya ẹka waa okpa bya asu: “Unme-du-Nso suru-a; l'onye nwe akpo-a be ndu Jiu l'e-ke egube-a le Jierusalemu kpuru iya nu ndu amadu Chileke.”

¹²Anyi numachaa ya; anyi le ndu no l'ẹka ono wata arwo Polu g'o to jeshi Jierusalemu.

¹³O su: “? Ekwa owa, unu ara owa-a bu gunu? ? Unu gbẹ eme g'obu nmafụ mu? Mu noakwaa onwomu ree egude ke Nnajiuphu, bu Jizosu nwuhu le Jierusalemu; o to budu-a g'e kee mu egbu kpurumu.”

¹⁴Anyi pfua nta pfua imo; ophu o kwedu. Anyi paru haa su: “G'iphe, du Nnajiuphu l'uche mee.”

¹⁵Anyi nonyaa l'ẹka ono; anyi kwakobe jeshia Jierusalemu.

¹⁶Unwunna, no le Sizariya haru tsoru anyi. Ephe dua anyi durwua ibe onye anyi eje anodu, epha iya bu Menesonu onye Sayipurosu; onye shi l'oduu buru onye ke Kéreshi.

Polu eje ekele Jiemusu

¹⁷Anyi rwua Jierusalemu; unwunna natakpoo anyi okpobe anata.

¹⁸O be lẹ nchitabọhu iya; anyi lẹ Pọlu swiru jeshia ekele Jiemusu. Anyi jeshia; ndu e meru ọgerenya Chiochi dzugbuwaa l'ẹka ono.

¹⁹Pọlu kelechaa phẹ bya eshi l'ishi kọkotaru phẹ iphe, Chileke gude ozi, ya jeru ndu abudu ndu Jiu meeru phẹ.

²⁰Ephe nımachaa iphe ono, o pfuru ono bya atuko kele Chileke ekele. Ephe sụ Pọlu g'o leanarọ g'iphe du l'ẹka-a. Sụ iya l'ikpoto ndu Jiu bẹ kwetaakwaru l'ọo Jizosu bu Nnajiuphu phẹ; ẹme ephe phubekwaphọ iphu l'eme ekemu, shi l'ẹka Mosisu.

²¹E pfuwaru phẹ l'iizi ndu Jiu mgburugburu, bugbaa l'alị ọzo g'ephe gwọbe ekemu Mosisu; g'ephe te ebujeshi unwu phẹ ubvù; ọphu ephe etsohe omelalị ndu Jiu.

²²? Anyi e-me iya imagha? Ọha a-gbakwa mkpu. Kele ephe nımajekwa l'i lwawaru.

²³Iphe, ii-mekwa baa; ọ duru umadzu ẹno, kweru Chileke l'ephe edoberu iya onwophe iche; bya atụ-bua teke ephe e-meberu iya.

²⁴Teke ephe tuburu gbabeakwa. Jekwa etsoru phẹ mee nsọ, nturuwu. L'i pfiaru phẹ ugwo iphe, iphe ono e-phu phẹ k'ophu ephe a-kpushikwanu ishi. Ọo ya bu g'onymonye amaru l'iphemiphe ono, a tuko epfu l'iime ono bukota ụka. Ephe amaru lẹ gubedua l'onwongu atukojekwaa g'ekemu Mosisu pfuru emekota.

²⁵Ọ -buru ke ndu abudu ndu Jiu, buwaa ndu ke Kéreshi bẹ anyi chihaanaru-a idzu dewaa ẹkwo-ozu zilaaru phẹ sụ g'ephe te erijeshi iphe, a gwaru iphe. Ọphu ephe atajekwa mee-iphe. Ọphu ephe atakwa anu, a swi-gburu aswi-gbu. Ọphu ephe apharwushijekwa onwophe.

²⁶Ọo ya bu; Pọlu byanu bya eduta umadzu ẹno ono yeru onwiya. O be lẹ nchitabọhu iya; ephe l'iya je emee nsọ ono l'eze-ulo Chileke. Ephe shi egube ono mee a madzuru l'a -nofua ujiku ẹsaa bẹ ephe lẹ ndu ọphuu e-gude iphe bya g'e gweeru phẹ ẹja l'ẹhu l'ẹhu g'ọ gbaru.

Eegude Pọlu l'eze-ulo Chileke

²⁷Abalị ẹsaa ono nođu abvuwaa. O be ujiku lanu; ndu Jiu, shi Eshiya haru huma Pọlu l'ime eze-ulo Chileke. Ephe kpalia ikpoto nemadzu l'ẹka ono; yeeru phẹ ọku; ephe gude Pọlu

²⁸chishia mkpu sụ: “Ízurelu! O-ji-l'ẹka togbo-o! Unu bya eyeta ẹka-o! Waa nwoke-a, tsoru ẹkameka eje ezi nemadzu iphe; epfubyishi ndibe anyi bya ezibi ekemu Mosisu bya epfubyishi eze-ulo Chileke-a. Ọphu ka njo bu l'o dutaru ndu abudu ndu Jiu dubata l'eze-ulo Chileke shi egube ono merwushia ẹka duru Chileke lẹ nsọ.”

²⁹Iphe, ephe gude epfu nno bu l'ephe humajeru ẹka Pọlu yee onye Efesosu, ephe iya bu Tirofimosu swi ejephe lẹ Jierusalemu. Ephe dobesu lẹ Pọlu du nwoke ono bahu l'ime eze-ulo Chileke.

³⁰Mkpukpu gbaahaa gharagharagara. Ephe gbakodzua bya akputa Pọlu kpufuta iya l'ime eze-ulo Chileke. A guchishia eze-ulo Chileke ono teke ono teke ono.

³¹Ephe nọdu emekwadu-a g'ephe gbua Pọlu; onye-ishi ndu ojogu ndu Romu, bu iya bu onye-ishi ndu uswe iya ono numanu l'utsu ada le Jierusalemu.

³²Onye-ishi ono chitaepho ndu-ishi ojogu waa ndu ojogu phe egwegwa gbapfushia ikpoto ndu ono. Ephe humaeapho onye-ishi ono yee ndu ojogu ono; ephe tsubuhu Pọlu iphe.

³³Onye-ishi ndu ojogu ono bya eje egude Pọlu bya akaru g'a tua ya uzi mkporo labo. Bya agbe teke ono jiahaa su: “? Bu onye be o bu? ? Bu gunu be o meru?”

³⁴Ndu echi l'o meru owa; ndu echi l'oo ophuu. A nodu epfuepho iphe, edoduru enya k'opu onye-ishi ndu ojogu ono amaedu iphe, bu l'oo waa iphe, o meru baa. O su ndu ojogu iya g'ephe kpata Pọlu kpaba l'odu ndu ojogu.

³⁵Ephe kpuru iya rwua onu-abata odu-ogogu ono; ephe palita iya apalita paru; l'eka mkpukpu ono ede igiji eme g'ephe nata iya megbua.

³⁶Ephe nodu eze gidigidi etso iya l'azu echigbaa: “Chigbua ya! Chigbua ya!”

Pọlu eme g'ọ dzọ onwiya

³⁷Ephe jeshiepho g'ephe kpaba Pọlu l'ime odu ndu ojogu ono; o su onye-ishi ndu ojogu ono: “Ge mu pfunaaru ngu iphe.” Onye-ishi ndu ojogu ono su iya: “Inhi! ? I gbe maru opfu Giriku?”

³⁸? Bu iya bu l'o to budu ngu bu nwophu Ijiputu ono, kpalikwaduru-a opfu; chita mgbugbumadzu unu umadzu iri, chiba l'echiegu, e budu ebubu je anodu-a?” “? Tobudu ngu?”

³⁹Pọlu su iya: “Mbedua bukwa onye Jiu, a nwuru l'alij Silisiya gedegede. Mu shikwa Tasosu, bu mkpukpu nweru enya. Jiko ge mu pfunuru nu ndu-a.”

⁴⁰Onye-ishi ndu ojogu ono bya ekweta g'o yee onu. Pọlu bya apfuru le mkpokota eka eeshije enyiba l'ulo bya achi-liaru ikpoto oha ono eka g'e gebe ge ya yee onu. Ephe daepho kpiriri; Pọlu gude opfu Hiburu pfuaharu phe opfu:

Ndu-ishi-ozu 22

¹“Mu su-a; unube unwunna mu phe; me nna mu phe! Unu ngaberu mu nchi ge mu dofu onwomu l'iphu unu!”

²Ephe numa l'oopfu opfu Hiburu; ophu o duedu onye mebaru me pyimu. Pọlu wata asa opfu ono.

³“Mu bu onye Jiu, a nwuru le Tasosu, no l'alij Silisiya. Eka a no hee mu bu le Jierusalemu l'eka-a. Onye ziru mu ekwo bu Gameliyelu. O kwata zishia mu ekemu ndiche anyi phe ike. Oo g'unube ndu nokota l'eka-a adzoshi ke Chileke ike-a bu ge mu shi anoduje adzo iya.

⁴Ndu shi etso Uzo Nnajiuphu ono be mu shi akpashije ehu ike; mbu shi egbuje phe egbugbu. Mu shi egudeje unwoke phe me unwanyi phe tua mkporo.

⁵Onye-ishi ndu-ishi uke Chileke waa ndu bu ọgerenya unu be a-gbakwaa ekebe l'iphe-a, mu epfu-a bu ọkpobe-opfu. Mu jeru je anata phe ẹkwo, e deru nu unwune phe ndu Jiu, bu le Damasukosu bya ejeshia ẹka ono ge mu gudechaa ndu kwetaru ke Jizosu taa phe mkporo kpuru bya Jierusalemu g'a hua phe ahuhu.

Polu akọ ge ndu iya gude gbanwe

⁶“No iya; mu nodu eje; mu rwutashiepho Damasukosu ghenyanwu alwawaa l'ishi; iphoro shiepho l'imigwe chaephe ke vaa chaphee mu mgburugburu.

⁷Mu daa kpurumu l'ali. Mu numa olu-opfu, epfu anu mu nu su mu: ‘Solu! Solu! ? Bu gunu meru iphe, iikpa mu ehuh?’

⁸Mu su iya: ‘? Bu onye be i bu Nnajiuphu?’ O su mu: ‘Mu bu Jizosu onye Nazaretu, bu onye iikpa ehuh-a.’

⁹Ndu mu l'ephe swi humachaa iphoro ono obenu l'ephe ta anumaduru opfu ono, onye ono epfu anu mu ono.

¹⁰Mu jia su: ‘Nnajiuphu; ? bu gunu be mu e-me?’ O su mu: ‘Gbalihu bahu l'ime mkpukpu Damasukosu. I -rwuwaro ẹka ono be aa-karu ngu-a iphemiphe, du Chileke g'i mee ya.’

¹¹Iphoro ono mee mu tsuahaah ishi. Ndu mu l'ephe swi kpuru mu l'eka anyi bahu le Damasukosu.

¹²“Anyi rwua ẹka ono; o duru nwoke, epha iya bu Ananayasu: onye Chileke duru le nsọ. Oomekotaje g'ekemu pfuru; teme o buru onye duru ndu Jiu, bukota l'eka ono le nsọ.

¹³Ananayasu ono byapfuta mu bya apfu-kube mu bya asu mu: ‘Solu nwune mu; ngwa wata aphu uto uto!’ Teke ono teke ono mu wata aphu uto bya ahuma iya.

¹⁴O su mu: ‘Chileke ndiche anyi phe be hotaakwaru ngu g'i maru iphe, du iya l'uche; l'i huma onye ono, pfuberekoto kpoloko ono; numa iphe, oopfu l'onwiya.

¹⁵Kele ii-gbaru mu odzori l'iphu ndiphe mgburugburu. L'i pfuaru onyemonye iphe ono, i humaru ono waa iphe ono, i numaru ono.

¹⁶Nta-a; ? bu gunu uto be i ngaberu? Gbalihu g'e mee ngu baputizimu; l'i kweta ke Nnajiuphu, bu Jizosu g'o safu ngu iphe-aji ngu.’ “

Polu eje ezi ndu abudu ndu Jiu ozi-oma

¹⁷“No iya; mu laphu azu le Jierusalemu. Mu nodu l'eze-ulo Chileke ẹka mu epfu anu Chileke phua ophulanya huma Nnajiuphu.

¹⁸O su mu: ‘Mee egwegwa lufu le Jierusalemu; kele ndu ẹka-a taa ngakwa nchi l'iphe, ii-pfu k'ehuh mu.’

¹⁹Mu su: ‘Nnajiuphu; ephe machachakwaru-a rengurengu ge mu shi ejeje l'ulondukọ ndu Jiu je ataa ndu etso uto ngu mkporo su g'e chia phe iphe.

²⁰Teke e gburu onye-ekebe ngu bu Sutivinu; be mu nokwa l'eka ono; teme mu zua mgbede l'egbugbu, e gburu iya du ree. O buru mbedua no swiru uwe ndu jeru iya atugbu.'

²¹Nnajiuphu su mu: Tugbua jeshia! Mu e-zi ngu aka du enya g'i jepfu ndu abudu ndu Jiu."

²²"Ndu ono dakpopho jii ngabe nchi l'iphe, Polu epfu jasụ o pfulpho ke ndu abudu ndu Jiu ono; ephe swo-lihu su: Unu wofu egube onye owa-a le mgboko! O to dukwa k'anodu ndzu!"

²³Ephe nodu atu wowoowoo; alashi uwe phe; ekpoka urwuku; l'eka ehu egu phe egu.

²⁴Onye-ishi ndu ojogu ono su ge ndu ojogu iya kpuba Polu l'ime odu ogu ono. O karu phe g'ephe chia ya iphe g'a maru oo-pfu iphe, kparu iphe, ndu Jiu aturu iya woowoowoo g'ephe atu iya ono.

²⁵A bya ekechaa Polu egbu g'e chia ya iphe; o su onye-ishi ojogu ndu Romu lanu, pfuru l'eka ono: "? E chije onye Romu iphe l'ebe abu l'e kperu iya ikpe g'a maru iphe, o meru to?"

²⁶Onye-ishi ojogu ono numa iya bya ejepfu eze onye-ishi ndu ojogu je asu iya: "? I maru-a iphe, i suru g'e mee? ? I maru-a le nwoke-a bu onye Romu?"

²⁷Eze onye-ishi ndu ojogu ono bya ejepfu Polu je asu iya: "? I bu onye Romu eviya?" Polu su iya: "Ee."

²⁸Eze onye-ishi ndu ojogu ono su iya: Mu pfukwaru okpoga, paru aka; teme mu buru onye Romu. Polu su iya: Obenu l'a nwuru mbedua anwunwu le Romu.

²⁹Ndu ono shi abya aji Polu aji ono paru iya haa. Ndu guahaa eze onye-ishi ono g'o numaru le Polu bu onye Romu. O buru nwa Romu be o turu mkporo.

Polu no l'iphu ogbo-ikpe ndu Jiu

³⁰O be le nchitabohu iya; Eze onye-ishi ndu ojogu ono su g'a tufu Polu mkporo. O bya ezia ge ndu-ishi uke Chileke me ndu ogbo-ikpe ndu Jiu dzugbua. Ephe dzugbuepho; o duta Polu dufutaru phe. O buru iphe, ochokpoo bu g'o maru iphe, ndu Jiu gudedoru Polu.

Ndu-ishi-ozu 23

¹Polu bya atabe ogbo-ikpe ono enya bya asu phe: "Unwunna mu; o to dukpokwaa iphe, mu maru, mu mejeru byasu nta-a, bu iphe, mu a-su l'owa mu obu mini l'iphu Chileke."

²Noo ya; Ananayasu, bu onye-ishi ndu-ishi uke Chileke gbalihuepho su ge ndu pfukube Polu chia ya aka l'onu.

³Pọlu sụ iya: “Gẹ Chileke chikwa ngu iphe gube igbulọ, e teru ndzú ono! Nta-a bẹ ị nọ l'ẹka-a eme g'i gude ekemu kpee mu ikpe; ẹme ị nọdu emebyikwaphọ ekemu ono; eshinu ị sụru g'e chia mu iphe.”

⁴Ndu pfulu-kube Pọlu sụ iya: “Shii! ? Tị madu l'ọo onye-ishi ndu-ishi uke Chileke bẹ iiphu iphu egube ono?”

⁵Pọlu sụ: “Unwunna; mu te eshikwa maru l'ọ bụ onye-ishi ndu-uke Chileke. L'opfu Chileke sụkwaru: Te ephukwa onye bụ onye-ishi ngu iphu. ”

⁶“Tọbudu iya bụ; Pọlu hụmaepho lẹ ndzukọ ọgbo-ikpe ono dū ẹbo; l'ogbo ndu Sadiusii dū iya; ọgbo ndu Fárisii dū iya; o chishia: Unwunna mu; mu yikwa l'ogbo Fárisii. Ndu nwuru mu nū yikwapho l'ogbo Fárisii. Iphe, e kpedoru mu ikpe iya-a bukwa lẹ mu ele ẹnya lẹ ndu nwuhuru anwuhu bẹ Chileke e-me ujiku lanu g'ephe teta dzuru ndzu.”

⁷Epfuzeta, oopfuzeta iphe ono; ndu ọgbo Fárisii waa ndu ọgbo Sadiusii wata aswo uswo. Ọgbo-ikpe keha ẹbo.

⁸Kele ndu Sadiusii sụru lẹ Chileke tee medu ndu nwuhuru anwuhu g'ephe teta dzuru ndzu ọzo; sụ l'unwu-ojozi-imigwe ta adudu; ọphu ọ dudu ndu ọzo, dūbaa nū, bụ ndu a ta ahụmadu l'ẹnya. Obenu lẹ ndu Fárisii tukuroru iphe ono kwetakota.

⁹Uzu nọdu atụ wọwoowoo aka shii eje. Ndu ezije ekemu ndu ọphu bụ ọgbo Fárisii haru gbalihu epfushi ike sụ: “Ọ tọ dukwa iphe, dū ẹji, anyi hūmaru, nwoke-a meru! ? A maru bụ maa; ọzoo ojozi-imigwe epfujeru nū iya.”

¹⁰A nọnyaa; uswo ọbu paa ẹka k'ọphu eze onye-ishi ndu ojogu ono dobesu l'ephe a-lọkashi Pọlu nanu nanu. Ọ sụ gẹ ndu ojogu iya ye ishi je akpuphu Pọlu azu l'odu ndu ojogu ono.

¹¹O be l'enyashi iya; Nnajiuphu, bụ Jizosu bya apfulu-kube Pọlu sụ iya: “G'ike ta abvukwa ngu Pọlu! Kele ọo g'i gbaru ọdzori mu lẹ Jierusalemu l'ẹka-a bụ g'i jefutaje agbaaru mu iya lẹ Romu.”

Aachi idzu egbu Pọlu

¹²O be lẹ nchitabohu iya; ndu Jiu bya edzukọbe bya erifu nte l'ephe ta abyadu atso nri onu; ọphu ephe etsudu onu l'okoro jasụ teke ephe gbuadaru Pọlu.

¹³Ndu ono, riru nte ono ghatakwaru ukporo labo.

¹⁴Ephe byapfuta ndu-ishi uke Chileke waa ndu bụ ọgerenya ndu Jiu je asu pẹ: “Anyi rifuakwaru nte l'anyi taa tsodu nri onu jasụ teke anyi gburu Pọlu.

¹⁵Ọo ya bụ; unu l'ogbo-ikpe zia eze onye-ishi ndu ojogu ndu Romu g'o dutaru unu Pọlu. Unu mee ya g'o dobesu l'unu eme g'unu jibaa ya aji. Ọle anyibedua a-kwabẹ gbua ya l'uzo; ẹme l'ọo rwua ẹka-a.”

¹⁶Noo ya; nwokorọbya lanu numanu k'ewohagbaa onwopẹ l'uzo kwaberu Pọlu ono. Nwokorọbya ono bụ nwune Pọlu kẹ nwanyi nwuru iya. O je l'odu-ogbu l'ẹka ono je epfuaru iya Pọlu.

¹⁷Pọlu bya ekua onye-ishi ndu ojogu lanu bya asu iya: “Duta onye-a jepfu eze onye-ishi ndu ojogu. O duru iphe, oo-pfuru iya.”

¹⁸Onye-ishi ndu ojogu ono bya eduta iya bya edujeru eze onye-ishi ndu ojogu ono bya asu iya: “Onye mkporo ono, bu Pọlu kuru mu su ge mu dutaru ngu nwokorobia-a l'ọ duru iphe, du mkpa, oo-pfuru ngu.”

¹⁹Eze onye-ishi ndu ojogu ono bya eduta iya bya eje anodu iche bya ajia ya le mpya su iya: “? Bu gunu be i byaru mu pfuru?”

²⁰O su iya: “Ndu Jiu chiru idzu l'ephe a-su ngu g'i duta Pọlu dufutaru ogbo-ikpe echele. L'ephe aa-su ngu le ndzuko ogbo-ikpe achọ g'ephe jibaa ya aji.

²¹Ole ọo g'i ti ngakwaru phe nchi; kele o duru ndu ghataru ukporo labo e-wohagbaa onwophe ewoha l'uzo kwaberu iya. Ndu ono rifuwaru nte l'ephe tee ridu nri; ophu o dudu iphe, ephe a-ngu m'ọ budu l'ephe gbuadaru Pọlu. Ephe doziwaru onwophe. Iphe, ephe kwaberu nta-a bu g'i kweta g'e duru iya bya.”

²²Eze onye-ishi ndu ojogu ono su iya: “Ta adukwa onye ii-me g'ọ maru l'i pfuwaru mu iya.” O su ge nwokorobia ono la. O lashia.

E du Pọlu je anu nnajioha, bu Felikusu

²³Eze onye-ishi ndu ojogu ono bya ekua ndu-ishi ndu ojogu iya umadzu ebo bya asu phe: “Unu je achikobe ndu ojogu ukporo iri; waa ndu ojogu ukporo eto l'iri; ndu anodu agba l'inya; waa ukporo iri ozo ndu a-chiru arwa. Unu kwakobe phe k'eje Sizariya le nri-enyashi ntanu-a.

²⁴Haru inya dozia, Pọlu a-nodu agba g'unu duru iya nu nnajioha, bu Felikusu. G'ọ to dukwa iphe, e-me iya nu.”

²⁵Eze onye-ishi ndu ojogu ono bya edee ekwo-ozu su:

²⁶“Kulodiyosu Lisiyasu ede ekwo-a anu Okalibe Nnajioha, bu Felikusu asu: Nnajioha; mu ekele ngu-o.

²⁷Ndu Jiu guderu nwoke-a, mu suru g'e gude byapfuta ngu-a eme g'ephe gbua. A nonyaa e mee mu maru l'ọ bu nwa Romu. Mu gude ndu ojogu mu je anafu phe iya.

²⁸Mu meahaa ge mu maru iphe, ephe gudedoru iya. Mu duru iya jepfu ndzuko ogbo-ikpe phe.

²⁹Mu huma l'iphe, o meru ta abudu iphe, o du ke g'a pfu-gbua ya; ophu o dukpodanu k'atu mkporo. Iphe, ephe pfu l'o meru bu opfu k'ekemu-ali ndu Jiu.

³⁰Mu numa le ndu Jiu chiru idzu g'ephe gbua ya; mu su g'e gude iya byapfutashia ngu. Mu su ndu pfu iphe, o meru g'ephe byapfuta ngu bya pfua ya l'iphu ngu.”

³¹Ndu ojogu ono bya emee g'e ziru phe. Ephe gude Pọlu jee l'enyashi ono jasụ le Antipatirisu.

³²O be lẹ nchitabọhu iya; ndu ojogu ono ndu ophu gude okpa laphushia azu l'odu-ojogu. Ndu ophu gude inya duru iya jeshia.

³³Ephe durwua ya Sizariya bya eworu ekwo ono nu nnajioha bya eworu Pọlu ye iya l'eka.

³⁴O bya aguebe ekwo ono; bya ajia Pọlu ali eka a nwuru iya. O numaepho l'o bu onye Silisiya;

³⁵O su: "Mu a-numawaro onu-mini ngu rengurengu me ndu epfu iphe, i meru byarwutaepho." O su g'e je dobe Pọlu l'eze-ulo Herodu che iya nche.

Ndu-ishi-ozu 24

Iphe, ndu Jiu epfu lẹ Pọlu meru

¹A noepho abali ise; Ananayasu, bu onye-ishi ndu-ishi uke Chileke waa ndu bu ogerenya l'ogbo-ikpe ndu Jiu haru swiru jeshia Sizariya. Ephe gudekwapho onye maru eye onu l'opfu, epha iya bu Tetalosus gude jeshia. Ephe rwua bya atuko iphe, ephe suru lẹ Pọlu meru doshiaru nnajioha, bu Felikusu.

²A bya ekua Pọlu. Tetalosus wata epfu iphe, ephe suru l'o meru su: "Okalibe Nnajiha; oo g'i gude nwubeberu anyi enya ree meru g'o gude anyi buru lẹ nchi odoo. O buru nkwananya ngu meru iphe, a gbanwechaaru iphemiphe ono, a gbanweshiru ono g'oduru ndibe anyi lẹ ree.

³Iphemiphe ono, iimeru anyi ono du anyi ree. Anyi nodu l'ekameka ekele ngu ekele iya.

⁴Mu te ejeekwa epfukwaduru ngu ro ogologo opfu. Iphe, mu arwo ngu bu jiko gi kweru numa iphe-a, anyi abyaru ngu epfuru-a. Anyi e-gbue ya pho mkpirikpu.

⁵Nwoke-a be anyi humawaru l'o bu onye shiberu ite ejo-iphe. Okpaje utsu l'eka ndu Jiu nokpoo lẹ mgboko mgburugburu. Teme o buru iya bu ishi ndu ejo ogbo ono, bu ogbo ndu Nazaretu.

⁶O nodu eme g'o merwua eze-ulo Chileke. Anyi gude iya eme g'anyi gude ekemu-ali anyi kpee ya ikpe.

⁷Ophu eze onye-ishi ndu ojogu, bu Lisiyasu ekwedu. O bya eye iya eka; bya egude eka ike nata iya anyi.

⁸O su g'anyi be ndu guderu iya nu bya l'iphu ngu. I -jia nwoke-a aji be ii-humawaru iphe obu, anyi epfuru ngu l'o meru obu."

⁹Ndu Jiu ophu ye iya eka su l'iphemiphe, Tetalosus pfuru bukota eviya.

Pọlu edofu onwiya l'iphu Felikusu

¹⁰Nnajiha bya epheeru Pọlu eka g'o wata eye onu. Pọlu su: "Mu su-a; mu maru li shiwaa uzanya nodu l'ishi ikpe l'ali-a. Noo g'o gude ehu nodu atso mu utso edo edo dofu onwomu l'iphu ngu.

11 Ọ tọko nọghadu abalị iri l'ẹbo, mu jeru Jierúsalemu je abarụ Chileke ẹja. Jìkwaa pẹ g'a maru ? mu l'adzu ụka.

12 Ndu Jiu ta ahụmakwaru l'ọ duru onye mu l'iya wataru atu ẹgo; ọphu ẹphe ahụmaduru mu l'ẹka ọ duru ndu mu swongaru l'ime eze-ulo Chileke; ọzoo l'ulo-ndzukọ pẹ; ọzoo l'ime mkpukpu.

13 Ọzokpoonu g'ẹphe goshi l'ibo ono, ẹphe boshiru mu ono duru ọphu bu eviya.

14 Ọphu, mu kweru bu ẹ mu abarụ Chileke ndiche anyi pẹ ẹja ẹ Ụzo Nnajiuphu ono, ẹphe ekuje ẹjo ọgbo ono. Mu tükokwarupho iphemiphe, e deru l'ekwo ekemu Mosisu waa ekwo ndu mpfuchiru Chileke kweta.

15 Iphe, ndu-a ele ẹnya iya be mu elekwapho ẹnya iya, bu iya bu ẹ Chileke e-mechaa mee onyemonye g'o shi l'onwu teta dzuru ndzu me ndu oma me ndu ẹjo-ipe.

16 Ọ buru iphe ono meru iphe, mu ekukebeje ẹhu g'obu ta anodu awa mu mini l'iphu Chileke me l'iphu nemadzu.

17 “Oo ya bu; mu nochaa apha olemole l'ẹka ọzo; mu lwa alị mu ge mu wolataru ndu alị mu okpoga gude yeru pẹ ẹka; wakwapho ge mu nu Chileke iphe-ngweja.

18 Ọ buru ge mu mechaaru nsọ, tso ngweja ono be ndu Jiu ọphu haru shi Eshiya lwa humaru mu l'ime eze-ulo Chileke l'ẹka ono. Ọ to dukwa ikpoto ndu mu l'ẹphe swi; ọphu mu emekwaru ge mkpukpu gbaa gharagharagara.

19 Ọ kwa ndu Jiu ono, shi Eshiya ono gege abya l'iphu ngu l'ẹka-a bya epfua iphe, ẹphe suru ẹ mu meru me ọ -duru iphe, ẹphe epfu.

20 Ọzoo su ge ndu-a, no l'ẹka-a pfua ẹjo-ipe ẹphe humaru, mu meru, bukpo iphe, e gege anma mu ikpe teke ono, a jiru mu aji l'iphu ndzukọ ọgbo-ikpe pẹ ono;

21 gbahakwa iphe lanu ono, mu nokwa-a l'iphu ndzukọ ọgbo-ikpe ono pfushia ike su l'ipe, unu ekpedoru mu ikpe iya ntanu-a bu ẹ mu kweru ẹ Chileke e-mechaa mee ndu nwuhuru anwuhu g'ẹphe shi l'onwu teta gbalihu dzuru ndzu.”

22 Oo ya bu; eshinu Felikusu magbuwaru ke Ụzo Nnajiuphu ono ree; ọ su g'ẹphe la. “Mu e-kpe ikpe ono me eze onye-ishi ndu ojogu, bu Lisiyasu byaepho.”

23 Ọ su g'onye-ishi ojogu ndu Romu, Polu no l'ẹka letakwa iya ẹnya ree; ọle ọo g'o hakwaa ya g'o tusaru ẹhu; ge ndu onya iya byaje g'ẹphe l'iya kwe; g'ẹphe mejeru iya iphe, bu mkpa iya.

Polu eye onu l'iphu Felikusu yee Durusila, nyee ya

24 A noepho ujiku olemole; Felikusu duru nyee ya Durusila, bu nwanyi Jiu byatashia. Ọ bya ezia; e je ekua Polu. ẹphe ngaberu iya nchi; o pfuaaha k'ekweta ke Kereshi, bu Jizosu.

25 Polu kpukwaduru-a opfu l'onu epfu k'apfubekoto me k'esede onwonye; waa ke mboku ikpe, a-bya nu ono; ndzu rwuta Felikusu. Ọ su iya g'o jwaro ke nta; ẹ ya e-ku iya-a ọzo teke ụzo duru iya.

²⁶Iphe, ọori bụ l'ọ duru okpoga ụphalazu, Pọlu a-nụ iya. Ọ bụru iphe ono bẹ meru g'o gude ọ nọdu abujeru nta nta l'o kua ya g'ephe bọo ụja.

²⁷A nọepho mgbarapha labo; Felikusu lufu. Ọ byalepho alufu ono; ọ parụ Pọlu haa l'ọka-mkpọro l'ẹka oome gẹ ya mee iphe, dū ndu Jiu ree. Nwoke ọzo, ẹpha iya bụ Poshosu Fesutosu bya anọdu l'okwa iya.

Ndu-ishi-ozì 25

Pọlu epfu g'eze nnajioha Romu kpee ya ikpe

¹A nọepho abali ẹto, Fesutosu lwapfutaru ndu ono, ọ bụ nnajioha phe ono; o shi le Sizariya jeshia Jierusalemu.

²E rwua ẹka ono; ndu-ishi uke Chileke waa ndu-ishi ndu Jiu bya epfuaharu iya iphe, ẹphe suru le Pọlu meru. Ẹphe rwoọ ya

³g'o meeru phe iphe-oma, bụ iya bụ g'o mee Pọlu g'ọ lwa azu le Jierusalemu. Ẹphe nọdukwanu achi idzu g'ephe kwabe l'egbudu gbua Pọlu.

⁴Obenu le Fesutosu suru phe le Pọlu nokwa mkpọro le Sizariya. Le ya ta adukwa gẹ ya anọ-beru ya alaphushia azu l'ẹka ono.

⁵Ọ sụ phe: “Gẹ ndu-ishi unu tsokwaru mu je Sizariya. Ọ -bụru l'ọ duru iphe, dū eji, o meru; unu je epfua ya l'ẹka ono.”

⁶Ẹphe le Fesutosu nọo iphe, ha g'abali iri l'ẹka ono teme ọ lashia Sizariya. O be le nchitabohu iya; o je anọdu l'ulo-ikpe bya asu g'e dubata Pọlu.

⁷Pọlu bataepho; ndu Jiu, shi Jierusalemu bya apfu-pee ya mgburugburu bya epfushiahaa igwerigwe akpamara, ẹphe suru l'o meshiru. Ophu ọ dudu ophu ẹphe duru ike goshi l'ọ bụ eviya me nanu.

⁸Pọlu bya edoahaa gẹ ya dofu onwiya sụ: “Ọ tọ dukwa teke mu pfubyijeru ekemu ndu Jiu; ophu mu epfubyikwaru eze-ulo Chileke; ophu ọ dukwa teke mu pfuswejeru eze nnajioha Romu.”

⁹Fesutosu meahaa gẹ ya mee iphe, dū ndu Jiu ree; ọ sụ Pọlu: “? Ọ dū ngu ree g'i je Jierusalemu g'e kpee ngu ikpe iphe-a, ẹphe suru l'i meru-a l'iphu mu l'ẹka ono?”

¹⁰Pọlu sụ: “Ẹka-a, mu pfuru-a bukwa l'iphu ogbo-ikpe eze nnajioha Romu gẹdegede, bụ iya bụ ẹka ọ gbaru g'e kpee mu ikpe. Gubedua l'onwongu maru l'ọ tọ dudu ẹjo-ipe, mu meru ndu Jiu.

¹¹Kele ome mu eme ẹjo-ipe; meta iphe, gbaru k'ekpe mpfugbu me mu asu ? Mu atsuhunu ebvu anwuhu? Obenu teke iphe, ẹphe suru le mu meru phe ta abudu eviya be ọ tọ dukwa onye byakporu akpuru mu nū phe. Iphe, mu pfuru bukwa g'ikpe mu laa l'iphu eze nnajioha Romu.”

¹²Noo ya bụ; Fesutosu yee ndu ogbo-ikpe iya chichaa idzu; ọ sụ iya: “Eshinu i suru g'ikpe ngu laa l'iphu eze nnajioha Romu bukwa l'iphu eze nnajioha Romu ono be ii-je.”

Pọlu nọ l'iphu Agiripa yee Baniisu

- 13**O be ujiku lanu; eze, bu Agiripa waa nwune iya nwanyi, bu Baniisu bya Sizariya g'ephe kele Fesutosu.
- 14**Ephe noepho ujiku olemole l'eka ono; Fesutosu bya eworu ke Pọlu kọoru Agiripa. O su iya: “O duru nwoke, Felikusu haru mu l'ulo mkporo.
- 15**Mu jee Jierusalemu; ndu-ishi uke Chileke waa ndu bu ogerenya ogbo-ikpe phe pfuaharu mu akpamara, ephe suru l'o meshiru. Ephe su mu ge mu nmaa ya ikpe.
- 16**Mu su phe l'o to bukwa omelali ndu Romu g'a kpuru onye a suru l'o duru iphe, o meru nu; l'ebe abụ le yee ndu odaru ephe l'iya nọ l'iphu l'iphu g'o dofu onwiya l'iphe ono, a suru l'o meru ono.
- 17**“O be mboku, ephe dzuru l'eka-a; ophu mu ejekpodaaro akpo upfu. Mu jeshiepho l'ulo-ikpe ono le nchitabohu iya bya asu g'e je edubata nwoke obu.
- 18**Ndu epfu iphe, o meru gbalihu; ophu o dudu me ejo-iphe, mu riru l'o meru, duru ophu ephe suru l'o meru.
- 19**Iphe, ephe pfuerupho buerupho opfu g'ephe abajeru Chileke phe eja waa onye obu, a suru l'epha iya bu Jizosu, nwuhuhawaru nu; obenu le Pọlu suru l'o nokwadu ndzu.
- 20**Ophu mu amadu iphe, mu e-me l'egube opfu ono. Mu jia Pọlu ge mu maru ? o du iya ree g'o jee Jierusalemu g'e kpee ya ikpe iphe, ephe suru l'o meru-a l'eka ono.
- 21**Pọlu jika su le ya a-nodua le mkporo jasụ teke Okalibe eze nnajioha e-kpe iya ikpe. Mu karu su g'e che iya nche jasụ teke mu e-zi iya g'o jepfu eze nnajioha.”
- 22**Agiripa su Fesutosu: “O dukwa mu g'a su le mu numaru olu nwoke obu l'onwomu kwapho.” Fesutosu su iya g'o haa l'echele be oo-numa-a olu iya.
- 23**O be le nchitabohu iya; Agiripa yee Baniisu bya akwakpoeppho onwophe okpobe akwa ndu eze. Ephe bya abahu l'ulo-ikpe ono waa eze ndu-ishi ojogu; me ndu a maru epha phe le mkpukpu ono. Fesutosu zia; e je eduta Pọlu bata.
- 24**Fesutosu wata epfu opfu su: “Onyibe, bu Agiripa me unube ndu nokota l'eka-a. Unu humakwa nwoke-a, ndu Jiu mgburugburu ndu ophu nọ l'eka-a me ndu ophu nọ le Jierusalemu tukoru echi ichi iya obu. Ephe echi mkpu su g'o to noduhe ndzu.
- 25**Ole o to dudu iphe, mu humaru, o meru bu iphe, du k'e gude kpee ya mpfugbu. Eshinu o gude onu iya su g'ikpe iya je l'iphu Okalibe eze nnajioha be mu sukwaru le mu e-zi g'e dularu iya eze nnajioha.
- 26**Obenu le mu ta amadu iphe, bu l'owa-a iphe, mu e-de l'ekwo su eze nnajioha l'o meru. Nokwa iphe, mu gude dutaru iya unu; mbu dutaru iya gube Onyibe, bu Agiripa gedegede g'obukwanuru: e -lechaa enya l'ikpe obu; mu amakwanuru iphe, mu e-de l'ekwo.
- 27**Kele o du mbedua g'o bu umere onye-eswe mbu ge mu su g'e duru onye mkporo je; l'ebe egoshi iphe, a suru l'o meru.”

Ndu-ishi-ozì 26

Pòlu edofu onwiya l'iphu Agìripa

- ¹Agìripa sù Pòlu: “A haakwaru ngu nta-a g'i yee ònu. I -makwaru iphe, ii-do dofu onwongu dokwaa ya.” Pòlu bya apalia òka kele iya bya awata edodo sù:
- ²“Onyibe, bù Agìripa; òhu atso mu l'i kweru gè mu pfulu ngu l'iphu pfua opfu; doo edo dofu onwomu ntanu-a l'iphemiphe, ndu Jiu sùru lè mu eme.
- ³Òhu, atso mu nù bù l'i maru omelali ndu Jiu ree bya amaru iphe, ephe adzo. Jiko ngabekpoekwapho nchi ree l'iphe-a, mu abya epfufu-a.
- ⁴“Ndu Jiu mgburugburu makotaru gè ndzu mu du eshikpoo teke mu bù nwata; kele mu shiepho lè mbu buru l'ali mu waa lè Jierusalemu.
- ⁵Ephe makwarupho; m'ephe -jenu ekwe gbaa ekebe iya; lè mu shiepho lè mbu gbaru l'ogbo ono, kachaa atube nvò l'ekemu Chileke anyi ono, bù iya bù ogbo ndu Fàrisii.
- ⁶Nta-a bè mu pfulu l'òka-a; a nodu ekpe mu ikpe; kele mu ele enya iphe ono, Chileke kweru nna anyi oche phe ukwe lè ya e-me ono.
- ⁷Oo iphe ono, o kweru ukwe iya ono bè okpa-ifu iri l'èbo ndibe anyi phe elekpoo enya iya gude òhu anmanma iya abaru Chileke eja eswe l'enyasi-a. Sù-a; Onyibe; nta-a bè ndu Jiu sùru lè mu mesweru; kele mu ele enya iphe lanu ono.
- ⁸? Bù gunu meru g'o gude o nodu atsù unube ndu Jiu l'òhu ekweta lè Chileke e-me ndu nwuhuru anwuhu g'ephe shi l'onwu teta gbalihu dzuru ndzu?
- ⁹“Mbedua l'onwomu shikwapho dobesu l'ome o duru iphe, mu e-me gude mebyia iphemiphe, lakporu k'epha Jizosu onye Nazaretu me mu emewaa iya.
- ¹⁰Noo iphe, mu meru lè Jierusalemu bù ono. Mu jeru anata ndu-ishi uke Chileke ekwo, egoshi l'oo phe ziru mu ozi. Mu je akputa igwerigwe ndu-nsò tushia phe mkporo. Teke e kperu phe mpfugbu; mu ekweeru phe une.
- ¹¹Ugbo olemole bè mu zichawaru g'e chia phe iphe l'iphe, bukpoò ulo-ndzukò ndu Jiu; l'òka mu eme g'ephe sù l'ephe te ekwetaheduru iphe ono, ephe kwetaru ono. Kè nkephe nodu eghutaberu mu egu shii k'ophu mu shi agbeshije jeshia ali ozo je phe avota.”

Pòlu akò gè ya gude gbanwee waa k'ozì iya

- ¹²“O buru k'iphe ono meru g'o gude mu jeshia Damasukosu. Ndu-ishi uke Chileke kwe gè mu je; o buru phe bè mu no l'òka jeshia.
- ¹³Noo ya Onyibe; o buru l'echilabo eswe ono gè mu no l'uzo bè mu humaru iphorò, ka enyanwu, no l'akpaminigwe egbu nwijnwii. O nwuepho nwuphee mu lè ndu anyi l'ephe swi mgburugburu.
- ¹⁴G'anyi ha dakota kpurumu l'ali. Mu numa olu-opfu, e gude opfu Aramu epfu sù: ‘Solù! Solù!’ ‘? Bù gunu meru iphe, ikpa mu òhu? I -nodu eme g'i mekata mu bè o

bukwa onwongu be iimekata. O gbekwa du g'eswi, emeka onwiya iphe-ehuka; kele oogba okpa le mpyipyi oshi, onye nwe iya nu gude achi iya.'

¹⁵Mu jia ya su: '? Bu onye be i bu Nnajiuphu?' O su mu: 'Oo mu bu Jizosu; onye iikpa ehuhu.'¹⁶Gbalihu pfuru apfuru. Iphe, mu gude byapfuta ngu bu ge mu gua ngu le ndu ejeru mu ozi. G'i je epfukashiaru ndu ozo iphe-a, i humaru ntanu-a ke nkemu-a; waa iphe, mu e-goshi ngu l'iphu.'

¹⁷Mu a-dzota ngu l'eka ndu Izurelu waa l'eka ndu abudu ndu Jiu, bu iya bu ndu mu ezi ngu g'i je ali phe obu.

¹⁸'Ii-je emee g'ephe saa enya k'ophu ephe e-shi l'ochii futa bata l'iphoro; waa k'ophu ephe e-shi l'eka Nsetanu futa lwapfuta Chileke. Oo ya bu; mu aguaru phe nvu l'iphe-aji phe guru phe ye le ndu mu hotawaru g'ephe buru ndibe mu.'

¹⁹"Oo ya bu; Onyibe; mu ta asukwaru waawaa le mu tee medu iphe ono, mu numaru l'ophulanya, shi l'imigwe ono.

²⁰Mu vuru uzo jee Damasukosu; teme mu bya ejeshia Jierusalemu. Mu bya ejegbabe ali Jiudiya mgburugburu shia jeshia ali ndu abudu ndu Jiu. Ishi iphe, mu jedoru ekameka ono buru ge mu karu phe g'izimanu iphe-aji phe lwa phe azu g'ephe ghaa umere lwapfuta Chileke; ephe emeje iphe, e-goshi l'izimanu lwaru phe azu eviya.

²¹Noo iphe, kparu iphe, ndu Jiu guderu mu l'eka mu no l'eze-ulo Chileke eme g'ephe gbua mu.

²²Ole Chileke eyekpokwaru mu pho eka byasu ntanu owa. Noo g'o gude mu pfuru l'eka-a agba ekebe g'onnyemonye numa; nwata me ogerenya. Mu nodu epfu iphe, abudu iphe ozo gbahaa iphe ono, Mosisu yee ndu mpfuchiru Chileke pfuru su l'oo-me ono.

²³Ephe suru le Kereshi ono, jefutaje iphe-ehuka. E -mechaa l'o buru iya a-buru onye Chileke e-vuru uzo mee g'o shi l'onwu teta gbalihu dzuru ndzu; g'o pfukaaru ndu Jiu me ndu abudu ndu Jiu l'oo ya bu iphoro, Chileke e-shi dzoo phe."

Oonu, Agiripa yeru Polu

²⁴Polu donyaepho iphe ono; Fesutosu raswerehu: "Polu! Oo buakwaa obvu byaru ngu! Oke ekwo, i nwuru gbaghaakwaru ngu iphu!"

²⁵Polu su Fesutosu: "Obvu te emekwa mu Onyibe. Iphe, mu epfu dokwaru enya; teme o buru okpobe-opfu."

²⁶? Tobudu Agiripa baa? O makotaru iphe-a, mu epfu-a rengurengu; teme mu nodu epfue ya pho hoo-haa; kele o doru mu enya l'o to dudu iphe ono ophu o numahaadaru; eshinu o dudu ophu e meru l'edomi.

²⁷Su-a; Onyibe, bu Agiripa; ? I kwetaru iphe, ndu mpfuchiru Chileke pfuru to? Mu maru-a l'i kwetaru-a!

²⁸Agiripa sù iya: “? I dobesu l’ii-pfubutakebewaa mu ẹgwegwa ẹgube ono ẹ mu bũru onye kẹ Kéreshi?”

²⁹Pọlu sù iya: “? Ọ bũ ẹgwegwa-o; ? ọo-nọ ọdu-o; iphe, mu epfu anù Chileke bũ ẹ ẹ ẹ ndu-a, nọkota l’ẹka-a bũru iphe, mu bũ; mbũ ẹ ndu-a, anù iphe-a, mu epfu ntanũ-a bũekwarupho iphe, mu bũ; a -gũfukwaru unu kẹ mkpọro-a.”

³⁰O pfuchaepho nno; eze, bũ Agiripa waa Ọkalibe nnajioha Jiudiya, bũ Fesutosu waa eze-nwanyị, bũ Baniisu waa ndu ọzo, ephe l’iya nọ l’ẹka ono tũko wulihu wũfu.

³¹Ephe lufuepho; ephe tũko pfuaharu nwibe phẹ sù: “Nwoke-a te emetakwaru iphe opfu k’ẹje mkpọro; ọphu ọ bũro k’apfugbu.”

³²Agiripa sù Fesutosu: “? I maru-a l’ọ tọ bũ ẹ nwoke-a sũru g’ikpe iya lufu l’iphu Ọkalibe nnajioha ẹ Romu; e gege apakwaru iya-a haa.”

Ndu-ishi-ozì 27

Pọlu nọ l’ugbo-mini ẹje Romu

¹O be teke a chiru iya; ọ wũkoo l’anyi a-nọdu l’ugbo jeshia Itali; e woru Pọlu yẹ ndu mkpọro ọzo ye Jiuliyosu, bũ onye-ishi ndu ojogu ndu Romu l’ẹka. Onye ono bũ onye-ishi “Ọgbo ndu ojogu Ọgosutosu.”

²Anyi tũko wũba l’ugbo-pherephere-apa, shi Adaramitiyomu abya; ẹje l’odu ugbo, nọgbaa l’aguga aguga alì Eshiya. Ọ dũkwarupho nwoke Masedoniya, a nwũru ẹ Tesalonayika, ephe iya bũ Arisutakosu, anyi l’iya tũkoru nọdu l’ugbo ono jeshia.

³O be ẹ nchitabohu iya; anyi rwua Sayidonu. E rwua ẹka ono; Jiuliyosu gude eme odoo kwe ẹ Pọlu je ekelecha ọnyà iya phẹ g’ephe anũchaa ya nwiphe, bũ mkpa iya.

⁴Anyi shikwa l’ẹka ono tũgbua ọzo; kpọru ugbo kwaseru ọzo ẹnyanwu awawa; shita aguga Sayipuros; kẹle pherephere ezi anyi iziphu.

⁵Pherephere ngata ugbo ono anyi ghabua mini ono l’aguga Silisiya waa Pamfiliya bata l’aguga Mayira, bũ mkpũkpu, nọ l’alì Lisiya.

⁶E rwua l’ẹka ono; onye-ishi ndu ojogu ono hũma ugbo-pherephere-apa, shi Alẹguzandiriya. Ugbo ono ẹje Itali. Ọ chiru anyi ye iya.

⁷Anyi tọkpoephe nwẹhu ngaa ugbo ono ujiku olemole; mbũ ọ tsushikpoo l’ẹhu ike tẹme anyi ngarwua Knayidosu ntse. Ọphu pherephere ekwekpọedu g’anyi shia ono. Anyi rọ-jia shia aguga mini ọzo Kiritu. Pherephere ono ngaru anyi shikube Salumonu.

⁸Eshi aguga Salumonu ono tsushikpoo anyi l’ẹhu ike. Anyi bya ekukebekpoo ẹhu tẹme anyi rwua ẹka lanu, eekuje “Ọdu-ugbo-oma” ; ẹka ono bẹ mkpũkpu Lasiya dũwaa ntse.

⁹Anyi gude nno nọdu ọdu l’ẹka ono k’ọphu anyi nọ-rwuru teke ije ugbo atsujẹ l’ẹhu bya anoghatawaa teke ndu Ízurelu emeje omelalì aswì ẹgu. Pọlu nmaaru ndu ugbo ono mẹ ndu ojogu phọ ọkwa sù:

10“Ndu mu; iphe, mu humaru bu l'ije ugbo anyi-a e-mechakwaa du ehuka shii. O to bukwa a l'ivu, no l'ugbo-a me ugbo l'onwiya a-la l'iswi; obenu l'ishi anyi be aalokwapho alolo.”

11O buru iphe, onye-ishi ugbo waa onye nwe ugbo pfuru be onye-ishi ndu ojogu ono ngaberu nchi. Ophu o kwataduru yee onu le ke Polu.

12Eshinu odu-ugbo-mini ono ta dudu k'anodu l'udzumini ono; be onu ka awu nanu su g'anyi tugbua l'eka ono g'a maru ? anyi a-du ike ngarwua Fonikusu. Fonikusu bu odu-ugbo-mini, no le Kiritu. Eka eeshije abahu l'odu-ugbo-mini ono du ebo. E -chebe iphu l'uzo enyanwu ariba be nanu gharu iphu g'e jewaa ala l'uzo ekutara; ophuu gha iphu g'e jewaa ala l'uzo ekicha. O buru l'eka ono be anyi a-nodukota l'udzumini ono.

Oke pherephere byapfutaru Polu phe l'echi enyimu

13Pherephere shi l'uzo ndohali wata ezi nwa reswereswe; ephe dobesu l'ephe a-du ike mekota g'ephe tuberu. Ephe shi le mini lo-lita mgborigwe, a goru g'ikokoro, eegudeje lo-de ugbo le mini wata anga ugbo ono le mgboru mgboru Kiritu.

14A noepho nwanshii; oke pherephere shi l'uzo isheli mini ono ziru byatashia.

15O zikotaepho ugbo ono tugbua; ebe o kweedu kwaseru ibiya ono, pherephere shi abya ono. Ebe anyi amaedu g'anyi e-me iya; anyi paru iya haa ge pherephere pata anyi tugbua.

16Anyi ghatashia mgboru ali, eekuje Kulawuda, no l'echi mini; ophu pherephere ezishiedu anyi ike g'o shi ezi. Anyi kukebekpoo eh; teme anyi kpuru nwugbo ke nshii, eelibeje l'eze ugbo ye l'eze ugbo ono.

17A kpubatashaa nwugbo ono, eegudeje agufuta nemadzu ono ye l'ugbo pherephere apa ono; ephe bya egude eri kee ugbo mgburugburu kee ya kpukpurukpu g'o shihu ike. Ndu guahaa phe ke: ? a maru ugbo te ejedu nu emia l'evevee, du l'aguga mini le Libiya. Ephe lo-zetashaa ekwa ono, emeje ge pherephere nga ugbo ono; pherephere to nwehu gude ugbo ono jeahaa.

18Oke pherephere ono nodu ezikwapho ehuka ehuka akwanga ephe k'ophu ephe wataru achishi ivu, du l'ugbo tuphashiahaa le mini le nchitabohu mboku ono.

19O be le mboku k'eto; ephe gude eka phe l'onwophe mishiahaa iphe, e gude mee ugbo ono tuphashiahaa le mini.

20A no ujiku olemole ophu anyi ahumaduru enyanwu enya; ophu o buro ke kpokpode teme oke pherephere ono nodu ezishikwadu ikike ikike; o mee k'ophu anyi ta ariedu ke ndzu.

21Unwoke ono nokpoo odu; ophu o dudu onye ophu riru nri. Oo ya bu; Polu gbeshi bya ejepfu phe je asu phe: “Ndu mu; ome unu kweru nkemu haa afuta le Kiritu me anyi te etuphashikwa iphemiphe-a, e tupharu-a waa iphe-a, mebyishihuru nu-a.

22Nta-a be mu arwo unu su g'obu shihu unu ike. O to dukwa g'o ka mma l'oo onye lanu, etupha ndzu iya. Oo 'epho ugbo-a a-la l'iswi.

- ²³L'enyashi-a, laru nu-a be ojozi-imigwe, shi l'eka Chileke ono, mu bu nkiya; teme o buru iya be mu ejeru ozi ono byapfutaru mu;
- ²⁴bya asu mu: 'Ge ndzu ba agushi ngu Polu l'i jefutaje je apfuru l'iphu eze nnajioha Romu. Ozo bu le Chileke e-gudekwapho iswi ehu ngu dzoo iphe, bu ndu gu l'ephe no l'ugbo-a.'
- ²⁵Oo ya bu; ndu mu; g'obu shihu unu ike; kele o doru mu enya le Chileke e-mekota iphemiphe g'e pfuru mu iya.
- ²⁶Ole o duru nwali, enyimu so-pheru mgburugburu, ugbo-a a-paru anyi je asube."
- ²⁷O be l'enyashi k'ujiku iri l'eno; pherephere ono nodu apakwadu-a anyi eje le mini Adiriyatu. O ruwe l'echi abali; ndu ugbo su l'o dukwa g'ali aduwaa anyi ntse.
- ²⁸A bya eworu nwiphe, anyi erwa libe l'eri bya echie ya l'ime mini ono. A tuta ya; ogbu mini ono buru iphe, ha ge onyeka ukporo. A nonyakwa; a bya atua ya ozo; o buru onyeka iri l'ise.
- ²⁹Ndzu guahaa phe l'ugbo anyi e-je ekwoo onwiya l'oke mkpuma rikashihu. Epe mifu egube mgborigwe-onu-ikokoro pho eno, du l'azu ugbo ono gude eri tu-zetachaa ya; o bahu l'ohu mini gudeshia ugbo ono. Epe nodu arwo ge nchi e-me bohu.
- ³⁰Ndu ugbo ono meahaa g'ephe gbado ugbo-pherephere-apa ono. Epe bya apazeta ugbo ke nshii pho paru dee le mini. Epe mee nno g'e dobesu l'ephe eje agbe l'iphu eze ugbo ono ye mgborigwe-onu-ikokoro le mini.
- ³¹Polu su onye-ishi ndu ojogu ono waa ndu ojogu ono le ndu ugbo-a -pfufuwaa be unu ta alwakwa.
- ³²Oo ya bu; ndu ojogu ono bya ebufu eri nwugbo nshii ono; mini pata iya.
- ³³Nchi bohushia; Polu rwahaa phe g'ephe kabero ria nri. O su phe: "Nta be unu nowaru abali iri l'eno; ophu o dudu iphe, unu riru.
- ³⁴Jiko unu ria nri g'ike adu unu; kele o to dukwa g'o ka mma l'oo egbushi, du unu l'ishi, etuphahu nu."
- ³⁵O pfuchaa nno bya ewota buredi bya ekele Chileke l'iphu phe g'ephe ha bya awata atata.
- ³⁶Obu shihu phe ike. G'ephe ha rikotakwapho nri.
- ³⁷Iphe, anyi du l'ugbo ono bu umadzu ukporo ukporo mgbo iri l'eto l'umadzu iri l'ishii.
- ³⁸Onyemonye rijichaa epho; a pashia ereshi, e vu l'ugbo ono tushia le mini g'ugbo adu npe.

Ugbo, pherephere apa tsukposhihuru

- ³⁹Nchi bohuepho; ebe ndu ugbo ono amaedu mgbadagba, epe no. Oo l'epho l'ephe humaru l'ali zawaru phe ntse. Epe huma eka mini gworu agwogwo; huma l'eka ono

bẹ alì dū baswaa l'agūga mini ono. Ẹphe sù g'ẹphe maru ? ẹphe e-me g'ugbo ono je eliru l'evevee l'agūga mini ono.

⁴⁰Ẹphe gbubushia eri, gude mgborígwè-ònu-ìkokoro ono hakòta iya lẹ mini bya atoshia ụdò, e gude kegbabẹchaa eku-ugbo, eegudeje agò-zi ugbo ono teke ono kwaphò. Ẹphe bya apalia ẹkwa, nọ l'eli oshi, shi dū l'iphu ugbo gẹ phẹphẹre awatakwanụ enwu ugbo ono. Ẹphe nọdu agò-zi iya; jasụ ọ lashia l'ẹka ono, mini gwọru agwògwò ono.

⁴¹Ugbo ono je agbaba l'ikpo evevee, dū l'ime mini ono; ishi ugbo phẹ liru l'evevee ono k'ọphu ugbo ono kwarụ l'ẹka ono. Oke akpara-mini bya etsukashia azụ ugbo ono iphiriba iphiriba.

⁴²Ndu ojogu ono rịahaa k'egbushi ndu mkpọro ono g'ọ tọ dū onye ọphu e-bvufu gbalala.

⁴³Obenu l'onye-ishi ndu ojogu ono eme g'ọ dzọ Pọlu. Ọ sù g'ọ tọ dukwa onye ẹphe e-gbu. Ọ sù iphe, bukpo ndu maru ebvu mini g'ẹphe pfulbachaa lẹ mini vuru ụzọ bvufu eli-mgboko.

⁴⁴Gẹ ndu ọphuu gudegbaa ẹka l'ogodo ugbo; ọzoo ibiribe oshi ugbo ono gude iya bvufu. Ọ buru g'anyi gude bvufukòta eli-mgboko bụ ono. Ọphu ọ dudu onye iphe meru.

Ndu-ishi-ozì 28

Iphe, eme lẹ Mọluta

¹Anyi bvufukòtaephe eli-mgboko; a sù anyi l'ẹka ono, mini gbapheru mgburugburu ono bu iphe, ọza bụ Mọluta.

²Ndu ẹka ono phọaru anyi obu-imemini shii. Ẹphe kpọberu anyi ọku sù g'anyi nyaa; kele teke ono bụ udzumini; oyi nọdu atsu.

³Pọlu rwuta ẹyonku je achiru yee l'ọku ono. Agwọ shi iya wufuta g'irè ọku ono byaru iya l'ẹhu. Ọ bya ataa Pọlu l'ẹka kepfuru.

⁴Ndu ẹka ono hụma g'ẹjo agwọ ono taru Pọlu l'ẹka kepfuru; ẹphe pfuahaa sù: “Nwoke-a nọkpokwaa l'ọchì. O bvufutaakwaru-a lẹ mini bu eviya; obenu l'alì ta ahaduru iya.”

⁵Obenu lẹ Pọlu phefuru agwọ ono chie l'ọku; ọphu o mekaduru iya iphe mẹ ilile.

⁶Ẹphe nọdu ele ẹnya teke ẹka e-ko Pọlu gbapfuru; ọzoo teke ọo-da gba nwuhu; ọphu ọ dudu. A kpọephe ọpfu nwanshii; ẹphe hụma l'ọ tọ dudu iphe, meru iya nù; ẹphe ghakọbe sù lẹ Pọlu bụ oke agwa.

⁷Nwoke, bụ onye-ishi mkpukpu ono bẹ alì-ihe iya jeru bya asube lẹ mgboru ẹka ono. Ẹpha iya bụ Pabuliyosu. O seeru anyi ẹbyaa; bya achita anyi jeshia ibe iya; je akwaaru anyi ẹbyaa ujiku ẹto.

⁸Anyi jeshia; ododo-ɛnya gudeshiwaa nna iya; ɛme ɛpho-anùnù nɔdu emekwa iya pho. Pɔlu bya abahụ l'ime ụlo iya bya epfuru nù Chileke bya ebyibe iya ẹka; mee ya o wekorohu.

⁹Noo ya; iphe ono mechaepho; iphe, bụ ndu iphe emegbaa l'alì ono wuru bya; e mekọta phẹ ɛphe wekorohuchaa.

¹⁰ɛphe nyako anyi iphe shingushingu; shi ɛgube ono kwabẹ anyi ùbvù. O rwua g'anyi byaru atugbu; ɛphe gwekokpoepho iphe, bụ mkpa anyi yejiaru anyi ugbo.

Eshi lẹ Mɔluta eje Romu

¹¹Anyi nọ ọnwa ẹto l'ẹka ono, bya etsoru ugbo, shi Alẹguzandiriya tugbua lashia. Ugbo ono bẹ eekuje “Unwune, a nwuru ẹbo.” O nọkotawaru udzumini ono l'odu-ugbo l'alì ono.

¹²Anyi rwua mkpukpu Sayirakusu bya anọ l'ẹka ono abalì ẹto.

¹³Anyi shi l'ẹka ono kpokpoepho mgburugburu mgburugburu jasuru anyi rwua Regumu. O be lẹ nchitabohu iya; pherephere shi l'uzo ndohali shi anyi l'azu wata ezizi. O rwua nwarechi iya; anyi rwua Putiyoli.

¹⁴O duru ndu kẹ Kéreshi, anyi humaru l'ẹka ono. ɛphe rwo anyi g'anyi l'ephe nọ abalì ẹsaa; anyi nọ nno. E mechaa; anyi tugbua jeshia Romu.

¹⁵Ndu kẹ Kéreshi, nọ lẹ Romu numahawaru l'anyi abya; ɛphe bya anyi ndzuta byarwutachaa aswa Apyiyosu waa oma mkpukpu, “Ulo nri ẹto.” Pɔlu huma phẹ bya ekele Chileke; obu ka iya esihu ike.

Pɔlu epfu opfu Chileke lẹ Romu

¹⁶Anyi jerwua Romu; a haa Pɔlu; o buru l'onwiya. E ye onye ojogu; o nọdu eche iya nche.

¹⁷A nọepho abalì ẹto; Pɔlu bya ekua ndu-ishi ndu Jiu l'ẹka ono ndzuko. ɛphe dzuepho; o sụ phẹ: “Unwunna mu; a turu mu mkporo lẹ Jierusalemu kpuru mu nù ndu Romu l'ẹbe adu iphe, mu meru ndibe anyi; ophu o dudu iphe, mu mebyiru l'omelali, shi lẹ ndiche anyi phẹ.

¹⁸Ndu Romu ono jichaa mu aji bya emeahaa g'ephe haa mu; kẹle ɛphe humaru l'ọ to dudu iphe, mu meru, gbaru kẹ g'a pfu-gbua mu.

¹⁹Ndu Jiu jika. A kwaru mu ye; mu sụ g'i kpe mu futa l'iphe eze nnajioha l'ẹbe adu iphe, mu a-sụ l'owa-a iphe, ndibe anyi meru mu.

²⁰Noo iphe, mu gude kua unu; kẹle o du mu ge mu l'unu huma pfugba. Iphe, unu gude huma mu lẹ mkporo-a, a turu mu l'ẹka-a bukwa lẹ mu ele ɛnya onye ono, anyibe ndu Jiu ele ɛnya iya ono.”

²¹ɛphe sụ iya: “O to dukwa ẹkwo, e shi lẹ Jiudiya detaru anyi, epfu nkengu. Ophu o dukwa unwunna anyi, byaru edo nkengu k'ẹji; ọzoo sụ l'ọ duru iphe ọzo, i meru.

- 22** Ọ dukwa anyi g'anyi numa olu ngu; kele anyi maru l'ekameka be eepfuepho l'ogbo-a, i gbaa ta adudu ree.”
- 23** Epe tuaru Pọlu onu mbọku, epe e-dzu. O be mbọku ono; epe kwatakpoọ du igwerigwe bya l'eka Pọlu nọ. Pọlu shi l'utsu kooru phe iphe, o humaru, bu iya bu ge Chileke shiwaa egoshi l'oo yebe Chileke bu eze; o koo ya g'o doo phe enya ree ko-jia ya nchi. O gude iphe, e deru l'ekwo ekemu Mosisu waa l'ekwo ndu mpfuchiru Chileke mee ge ya pfuta phe yeru Jizosu.
- 24** Ọ duru ndu ophu gude iphe, oopfu kweta ke Jizosu; o duru ndu ophu ekwedu nu.
- 25** Epe gude k'iphe ono pfugbaaru ekpa l'iche iche. Epe bya atugbu; Pọlu su phe: “A-a! Iphe-a, Unme-du-Nso shi l'onu Azaya; onye mpfuchiru Chileke pfuaru ndiche unu phe-a bu okpobe-opfu.
- 26** Ọ suru: “Je akaru ndu-a l'ephe a-nga nchi nta ngaa imo; o to dudu iphe, edo phe enya. Epe e-lee enya nta lee imo; o to dudu iphe, epe ahuma.
- 27** Kele epe kpo-chiru obu. Epe swo-chiru nchi tanyiibe enya. O -buru 'abu m'ephe egude enya huma; gude nchi phe numa; obu phe emee g'o doo phe enya; m'ephe aghakobe lwapfuta mu ge mu dzoo phe.
- 28** “Pọlu su phe: Iphe, unu a-maru bu l'ozi-oma ndzota ono, Chileke kweru ukwe iya ono be o ziwaru g'e je ezia ndu abudu ndu Jiu. E zia phe iya; epe natawa iya.” Noo olu Pọlu.
- 29** Ọ pfuchaa nno; epe l'ephe tukashiahaa ego atushikpoo ya ike; epe wuru tugbua.
- 30** Pọlu jita ulo buru pfuahaa ugwo. O bua ya mgbarapha labo. O nodu anabataje onyemonye, byaru iya ekele.
- 31** Ọ nodu anoduje epfu ge Chileke gude egoshi l'oo ya bu eze bya anoduje ezi iphemiphe, ke Nnajiuphu, bu Jizosu Kereshi. O nodu asaje iphe ono g'o du iya. Ophu o tsudu ebvu; teme ophu o dudu onye akposhije iya ya nu.

Romu

Romu 1

¹Ekwo-ozì ọ̀wa-a shì l'ẹ̀ka m̀be Pọ̀lu; onye ejeru Jizọ̀su Kéreshì ozi; b̀ru onye Chileke kuru gẹ̀ mu b̀ru onye-ishi-ozì ono; bya ab̀ru onye Chileke họtaru gẹ̀ mu bya ezia ozi-ọ̀ma iya ono.

²Ozi-ọ̀ma ono b̀ iphe, Chileke shihawaa l'ọ̀nu ndu mpfuchìru nkiya kwehawaa ukwe iya teke d̀hakpowaro ẹ̀nya ẹ̀nya; tẹ̀me a byakwaphọ̀ edehawa iya l'ẹ̀kwo-opfu Chileke.

³Ozi-ọ̀ma ono b̀ kẹ̀ Nwa iya, b̀ iya b̀ Nnajiuphu anyi Jizọ̀su Kéreshì. A -bya l'ab̀bu, ọ̀ b̀ nemadz̀ b̀ l'a nwuru iya ọ̀ b̀ru Nwa Dévidì.

⁴Chileke shì l'ike ono, meru iya ọ̀ b̀ru onye d̀ nsọ̀ ono; mee ya o shì l'ọ̀nwu teta dzuru ndz̀ egoshi l'ọ̀ b̀ Nwa iya.

⁵Ọ̀ b̀ iya bẹ̀ Chileke gbẹ̀ l'ẹ̀ka iya meeru mu eze-iphe-ọ̀ma ono, b̀ kẹ̀ gẹ̀ mu b̀ru onye-ishi-ozì duru ọ̀ha, shìkpọ̀ ẹ̀kameka lẹ̀ mgboko mgburugburu duba l'uzo, ẹ̀phe e-shì kweta; meje iphe, e deru l'ẹ̀kwo-opfu Chileke g'eeshi nno kutsee ẹ̀pha Kéreshì ono.

⁶Gẹ̀ mu edu ndiphe l'ophu ono bẹ̀ unubẹ̀ ndu Romu yìchakwaa ya; mb̀ unubẹ̀ ndu Chileke kuru g'unu b̀ru kẹ̀ Jizọ̀su Kéreshì.

⁷Ọ̀ ya b̀ lẹ̀ mu ede ẹ̀kwo-a aǹ unu g'unu hakọ̀ta lẹ̀ Romu; mb̀ unubẹ̀ ndu Chileke yeru obu bya ekua unu; g'unu b̀ru ndu-nsọ̀. Gẹ̀ Chileke, b̀ Nna anyi yẹ̀ Nnajiuphu ono, b̀ Jizọ̀su Kéreshì meeru unu eze-iphe-ọ̀ma; mekwaaphọ̀ g'ẹ̀hu d̀ unu guu.

Pọ̀lu epfu k'ẹ̀je Romu

⁸Iphe mb̀ kpọ̀da b̀ lẹ̀ mu gbẹ̀ Jizọ̀su Kéreshì l'ẹ̀ka ekeleru unu Chileke g'unu ha; kẹ̀le e pfudzuwaru k'ekwekwe, unu kweru kẹ̀ Chileke l'elìphe mgburugburu.

⁹L'ọ̀ kwa Chileke b̀ onye ekebe mu l'anọ̀duje epfuru iya opfu ẹ̀hu unu eswe l'ẹ̀nyashi mẹ̀ mu -nọ̀du epfu aǹ iya. Ọ̀ Chileke ono bẹ̀ mu gude obu mu g'ọ̀ ha ejeru ozi k'ezì ozi-ọ̀ma kẹ̀ Nwa iya ono, b̀ Jizọ̀su.

¹⁰Mu anọ̀duje epfu aǹ iya s̀ g'o gude obu ọ̀maa ya mee gẹ̀ mu kabẹ̀ kpata ọ̀zo bya agbaphee unu.

¹¹L'ọ̀gukpo mu agugu gẹ̀ mu l'unu huma; k'ọ̀phu mu e-me g'ìphe-ọ̀ma, shì Unme-d̀-nsọ̀ l'ẹ̀ka rwube unu ẹ̀ka. L'eshì ẹ̀gube ono mee g'obu shìhu unu ike.

¹²Mb̀ lẹ̀-a; iphe, mu epfu b̀ l'ekweta, unu kwetar̀ e-me g'obu shìhu mu ike; ekweta nkemu emekwaaphọ̀ g'obu shìhu unu ike. Ọ̀ ya b̀; anyi eshi nno yeru nwibe anyi ẹ̀ka.

¹³Iphe, unu a-maru; ọ̀nwunna mu; b̀ lẹ̀ tekenteke bẹ̀ mu as̀je lẹ̀ mu abyawaa unu agbaphe; ọ̀le eshìkpọ̀ teke ono bya as̀ nta-a bẹ̀ o nweurupho iphe, akpọ̀shìje mu

abyabya. Mu atubeje le mu a-bya ge mu aharu ndu ndu-unu pfuta yeru Kéreshi ge mu epfukwa iya pho l'ohamoha ozo, abukwapho ndu Jiu.

¹⁴Le mu jikwa onyemonye ugwo ezi ozi-oma ono. Mu ji iya ndu Gurisu bya ejiru iya ndu abudu ndu Gurisu. Mu ji iya ndu guru ekwo; bya ejiru iya ndu aguduru ekwo.

¹⁵Noo g'o gude o nodu agu mu egu abya ezi unube ndu no le Romu ozi-oma onokwapho.

Ike ophu Chileke gude adzo ndiphe

¹⁶L'iphere ezi ozi-oma ke Kéreshi ono ta adukwa mu. Kele o kwa iya bu ike, Chileke gude adzo iphe, bukpo ndu kwetaru ke Kéreshi. O gude iya vuru uzo adzo ndu Jiu; ndu ta abudu ndu Jiu nodu etso phe.

¹⁷L'o kwa ozi-oma ono be Chileke gude egoshi apfubekoto nkiya, bu iya bu ekweta nkiya, shita l'ishi jasu l'ikpetemazu; bu iya bu g'e deru iya l'ekwo-opfu Chileke su: "Onye pfuberekoto e-gude ekweta nodu ndzu."

Ikpe, nmaru ndiphe l'ophu

¹⁸O buru iya meru g'o gude Chileke shiwaa l'imigwe goshi ge ya e-gude oke-ehu-eghu iya mee ndiphe; mbu oke-ehu-eghu, l'eghu iya nu le ndiphe kporu iya ebo l'afu; teme ephe nodu eme ejo ememe. Ephe gude ejo ememe, ephe eme akparya okpobe-opfu ono ishi.

¹⁹Iphe, gbaru nemadzu g'o gogo maru iya le ke Chileke be dabyiru eba l'iphu iya; kele Chileke goshiru phe iya l'onwiya.

²⁰Eshikpo teke Chileke meru mgboko be nemadzu shiwaa l'iphe, Chileke meshiru maru egube onye o bu okpobe amaru. L'ike iya, nyiberu anyibe a-no ojejoje; teme o buru iya gedegede bu Chileke. Oo ya bu l'ephe ta agofuedu.

²¹Le nemadzu machachaaru le Chileke du; ophu ephe akwabejedu iya ubvu l'o bu Chileke; ophu ephe ekelejedu iya ekele. O chia iphe, meru nu bu l'egomunggo sweshihwaru phe; k'ophu oriri phe buwaa iphe-mmanu; o buwaru eme eswe jiru phe obu; k'ophu obu phe gbahwaru tsukiribaa.

²²Ephe gude l'ephe suru l'ephe maru iphe; kabakporo aburu ndu eswe.

²³Ephe woru ubvu, e gege akwabe Chileke ono, a-no je adwaruro aduru ono ye l'azu bya abaaharu ntakpe eja; ntakpe, e megbaaru o du ge nemadzu, ta adudu eka o-no-beru; ozoo g'enu, ephe l'eli; ozoo g'anu; ozoo g'agwo.

²⁴Noo g'o gude Chileke paru phe haa; ephe melahaa ejo ememe, bu iphe, agu obu phe. Ephe wata eme onwophe njo ememe.

²⁵Nemadzu woru iphe, bu okpobe-opfu ke Chileke ye l'azu; kweta iphe, bu uka; bya awata abaru iphe, Chileke meru ememe eja; akwabe iya ubvu; haa Chileke ono, meshiru iya nu ono; bu onye o gbaru ke g'anyi tuje epha jasu le tuutuutu le mimiimii. Nokwa g'o du.

²⁶Ọ bụru iphe ono meru g'o gude Chileke parụ nemadzu haa; ẹphe wata aji momomo; eme iphe dụ ideyideyi. Kẹ g'unwanyi pẹ hajẹ ejepfu unwoke, bụ iphe, Chileke medoru pẹ; wata ejepfu unwanyi ibe pẹ.

²⁷Nokwapho g'unwoke pẹ haru ejepfu unwanyi, bụ iphe, gbaru pẹ n; ẹgu ejepfu unwoke ibe pẹ nọdu anọduje enwu pẹ phuruphuru g'ọku l'ẹhu. Nwoke yee nwoke ibe iya wata akwakwa. Ẹphe watanu ahuma urwu, gbaru oriri, sweshihuru pẹ n l'ẹhu pẹ.

²⁸Su-a; eshinu ndiphe te ekwedu amaru iphe, bụ okpobe-opfu lẹ kẹ Chileke; Chileke parụ pẹ haa; ẹphe nọdu arije oriri, enwedu ishi; watanu eme iphe, agbaduru pẹ n.

²⁹Ophu o dudu egube ejo ememe; mẹ iphe, apfuduru-oto, ẹphe te emedu; k'ophu oobushihu pẹ ebushihu l'ẹhu. Ẹphe nọdu aji momomo g'ẹphe naa iphe, abudu nkepẹ; edoberu nwibe pẹ okpoma mgbashi. Ẹnya pfurupfuru paa pẹ ẹka l'ẹhu; ẹphe nọdu egbu ochi; esephe opfu opfu bya agho-phe ugho; ẹphe nọdu eme iphe-ashi; bya asu-phe asulasu.

³⁰Ẹphe nọdu evu nwibe pẹ nvu azu; buri ndu Chileke dụ ashị; ndu anọduje eme nwibe pẹ iphe-iphere l'obu oku; buri ndu eme ngganga bya etse etsetse. O buerupho g'ẹphe e-me mee ejo-iphe bẹ ẹphe anọduje ari; teme ẹbe ẹphe ekwejedu eme iphe, ne pẹ lẹ nna pẹ pfuru.

³¹Ẹphe bụ ndu enwedu egomunggo; ophu e gudedu ire pẹ ẹka. Ẹphe ta aphujeduru nwibe pẹ obu-imemini; ẹbe ẹphe enwedu obu-oma.

³²Ẹphe bụ ndu machacharu iphe, bụ ikpe Chileke; maru lẹ ndu eme egube ejo-iphe ono bụ onwu, bụ iphe, gbaru pẹ n. Ophu o budua l'ẹphe eme nno; obenu lẹ ndu eme g'ẹphebedua agbeje dụ pẹ ree.

Romu 2

Ikpe, Chileke nmaru onyemonye

¹Noo g'o gude mu su ngu l'i ti gofukwapho gube onye ophu ekpe onye ozo ikpe; onye i buhabe. Kẹle oo iphe ono, iikpe onye ozo ikpe iya ono bẹ i gudekwapho anma onwongu ikpe. Kẹle gubedua, l'ekpe ikpe emekwapho iphe ono, iikpe onye ozo ikpe iya ono.

²Ọle ophu anyi makaharu bụ l'ikpe Chileke pfuru-oto l'ẹhu ndu eme egube iphe ono.

³Gube nwodumeka; ? I dobesu lẹ teke igbarwushije ndu eme egube iphe ono; bya emekwa iya pho l'onwongu; ? i dobesu l'ii-nahu ikpe kẹ Chileke?

⁴Too; bụ eze odoo ophu parụ ẹka apaa, Chileke emeje; waa l'ọ bujeru nemadzu -mee iphe-eji l'ọ parụ iya haa; teme o nọdu anọduje ata nshi shii; ? bụ iphemiphe ono, bẹ i woru nmaa phulaphula? Ophu i madu l'iphe, o gude Chileke nọdu emejeru ngu odoo bụ l'ooome g'izimanu lwa ngu azu; g'i haa eme iphe-eji lwapfuta iya.

⁵Obenu lẹ nta-a bẹ i nweru ẹjo ọkpoma kwefu ike g'odoo, Chileke eme te eme g'izimanu lwa ngu azu. Oo ya bu l'iime g'iphe-ehuka nkengu ka shii mboku ikpe ono, Chileke e-goshi oke-ehu-eghu iya me g'ikpe nkiya du, bu iya bu ikpe pfuru-oto ono.

⁶Mboku ono bẹ Chileke e-bukwa onyemonye nggo lẹ g'iphe, o meru gbaru.

⁷Ndu taru nshi nodu eme iphe, du ree; kukebe ehuh achọ gẹ Chileke jaa phe ajaja; kwabe phe ubvu; bẹ oo-me g'ephe nodu ndzu ojejoje; ephe taa nwuhubaedu anwuhu.

⁸Obenu lẹ ndu ono, bu ndu kwefuru ike ono; ndu ata ngaduru ọkpobe-opfu nchi; o chia iphe, ephe etso bu iphe, apfuduru-oto; ndu ono bẹ Chileke a-tu-koshi oke-ehu-eghu iya, paru eka.

⁹Iphe, bu onye emekpoọ ẹjo-iphe bẹ ehuh ta abyadu eburu ebvuru; teme o je l'e-je iphe-ehuka iya. Oo-vuru uzo dapfuta ndu Jiu; teme ndu abudu ndu Jiu etsota iya.

¹⁰Obenu l'onyemonye, eme iphe, du ree bẹ Chileke a-ja ajaja; kwabe iya ubvu bya emee; ehuh adu iya guu jasuh lẹ tuutuutu lẹ mijimiimii. Oo-vuru uzo meeru iya ndu Jiu; teme ndu abudu ndu Jiu etsota iya.

¹¹Kele Chileke ta adudu onye oole enya l'iphu.

¹²Iphe, bukpo onyemonye, amadu ekemu mee iphe-ẹji bẹ Chileke a-nmakwa ikpe; ephe alaa l'iyi; obeta ebe ephe amadu ekemu. Iphe, bukwanu ndu bu ndu maru ekemu bya emealaa iphe-ẹji bẹ Chileke e-gudekwapho ekemu ono nmaa ikpe.

¹³L'ọ to bukwa ndu anumaje ekemu bẹ bu ndu pfuberekoto l'iphu Chileke; o chia ndu eme iphe, ekemu pfuru bu ndu Chileke a-gu lẹ ndu pfuru-oto.

¹⁴Lẹ teke o bu lẹ ndu abudu ndu Jiu, bu iya bu ndu amadu ekemu gbẹ egudeje uche phe eme iphe, du l'ekemu; bu nu iya-a bu l'ephe egoshi l'ephe maru iphe, gbaru phe l'ememe; obeta ebe ephe amadu ekemu.

¹⁵Umere phe egoshi l'iphe, ekemu pfuru bẹ Chileke dewaru phe l'obu. Teme egomunggo phe nodu agbakwa phe pho ekebe; eshinu oriri phe anoduje anmaa phe ikpe bya ahajekwarupho aharu phe enge.

¹⁶Mboku ono, Chileke e-kpe ikpe ono bẹ oo-gbẹ Kéreshi Jizosu l'eka kpee nemadzu ikpe iphe, nemadzu arije domia l'okpoma iya. Noo iphe, ozi-oma ono, mu anoduje ezi onoya pfuru.

Ndu Jiu ephe l'ekemu

¹⁷A bya l'ehuh gubedua, bu onye Jiu; i nodu etu onwongu onye Jiu bya akporu obu ye l'ekemu; bya egude gule Chileke aba l'abaa.

¹⁸I maru iphe, bu uche Chileke; teme ekemu iya nodu egoshi ngu iphe, gbaru ngu l'ememe; me iphe, agbaduru ngu l'ememe.

¹⁹I makaharu l'i bu onye edu ndu atsu ishi; bya aburu iphoró ke ndu no l'ochii.

²⁰I buru onye akpo-ziru ndu eme eswe uto; bya aburu onye ezi ndu bu unwegirima iphe. I maru ekemu Chileke; bya amaru okpobe-opfu du l'ekemu ono.

²¹Oo ya bu; eshi ophu inoduje ezi ndu ozo; ? bu gunu kparu iphe, i tii zidu onwongu? Gube onye ara iya arara su g'e te zijeshi iphuru; ? tii zikwanu iphuru l'onwongu?

²²Gube onye epfu su g'e te erijeshi ogori; ? ti rikwanu ogori? Gube onye ono, agburu nshi, a gworu agwogwo tuphe ? ti jejekwanu ezita iphe, e doberu l'eze-ulo-nshi?

²³Gube onye ono, aba abaa le Chileke turu ekemu doberu ngu ono; ? ti nodujekwanu emebyishi ekemu obu; gude iya eme Chileke iphe-iphere.

²⁴L'e dekwaru l'ekwo-opfu Chileke su: "Ndu ohozo epfubyishi Chileke; o buru umere unu kparu iya."

²⁵Urwu dukwa l'ebu ubvu bu eviya; ole oo 'ekwapho me o -buru l'i meje-a iphe, ekemu pfuru. Obenu teke o bu l'inoduje emebyi ekemu be gu l'onye ebuduru ubvu agbaru l'aji.

²⁶Nokwapho g'o du onye ebuduru ubvu. Teke o bukwanu l'onye ebuduru ubvu emeje iphe, ekemu pfuru; ? ta agudu iya l'onye buru ubvu to?

²⁷Oo ya bu le ndu abudu ndu Jiu ono, bu ndu ebuduru ubvu ono l'a-nma gube onye Jiu ikpe. Unubedua, bu ndu Jiu nweru ekemu, e deru l'ekwo bya ebua ubvu; teme unu gbe emebyi ekemu.

²⁸Onye buepho onye Jiu l'enya ndiphe ta bukwa iya bu l'a bu onye Jiu. Ophu ebu ubvu ophu eebu l'anu-ehu abukwa iya pho bu l'e buru ubvu.

²⁹Iphe, bu okpobe onye Jiu bukwa onye bu iya nu l'ime okpoma iya. Okpobe ebu ubvu; buru ophu eebu l'ime obu, bu iya bu ophu Unme Chileke buru nemadzu; o to bukwa ophu e buru l'oo g'e mee ya g'e deru l'ekwo ekemu. Egube onye ono ta abukwa nemadzu ajaje iya ajaja; o kwa Chileke be ajaje iya nu.

Romu 3

¹Su-a; ? bukwanu gunu be onye Jiu gude ka onye abudu onye Jiu mma? ? Denukwanu urwu, du l'ebu ubvu?

²O kwatakpokwaaru baa urwu, ha shii l'uzomuzo. Ke mbu kpada bu l'oo ndu Jiu be Chileke woru opfu, o pfuru ye l'eka.

³Le-a; ome o bukwanu l'ephe haru buru ndu ekwetaduru nu teke ono; ? e gege gude l'ephe te ekwetaduru su le Chileke be ta agbaeduru g'e gude ire iya aka to?

⁴Tuswekwa! G'e goshichikwa le Chileke ta adudu teke o buedupho onye ire-lanu g'o bu; o betakporu nemadzu mgburugburu je a-bueberu ndu ntuphu-ire. Noo iphe, e deru l'ekwo-opfu Chileke su: "Oo l'opfu ngu Chileke be ee-shi goshi l'i bu onye pfuru oto. Ophu o dudu teke e kuru ngu ikpe g'i ti kpefu."

⁵Teke ọ bụkwanu l'ọo l'anyi ta agbaduru g'e gude ire anyi ẹka emeje g'a huma ge Chileke gbaberu k'egude ire iya ẹka; ? bahunu gunu be anyi e-pfu? ? Anyi a-su le Chileke meru ejo-iphe l'ọ kpaberu anyi oke-ẹhu-eghu iya? Nta be mu ajikpoakwa aji-a ge ndiphe ozo anoduje aji.

⁶Tuswekwa! Ọ -bu l'ọ to du nno me ? Chileke emehunu imagha oo-kpe ndiphe ikpe?

⁷Le-a; teke ọ bu onye ntuphu-ire; ọ buru iya agbeje mee g'a kabaa amaru le Chileke bu onye ire-lanu; jaa ya ajaja; ? denu g'o gude Chileke jehunu a-nma mu ikpe le mu bu onye iphe-eji?

⁸? Bu gunu kparu iphe, anyi tee pfudu iphe ono, ndu anoduje agbaru anyi mgbamu; ebo anyi ibo suru l'anyi epfuje ono? Iphe ono bu: "G'anyi meanaro ejo-iphe g'ee-shi ge k'oma eshi iya futu." Ndu ono be Chileke a-nmakwa ikpe, bu iphe, gbaru phe nu.

Ikpe, nmaru onyemonye

⁹? Nta-a-ee? Onodu anyibe ndu Jiu ? ọ ka ke ndu abudu ndu Jiu mma to? Tuswekwa! Anyi ta akakpoda phe mma ililekpoo. Iphe, anyi goshiru bu l'anyibe ndu Jiu; me ndu abudu ndu Jiu tukoru buru ndu iphe-eji pyitaru l'ekpiri.

¹⁰L'e dekwaru l'ekwo opfu Chileke su: "Ọ to dukwa me onye pfuberekoto; mbukwa m'onye lanu.

¹¹Ophu ọ dudu me onye lanu, nweru egomunggo; ophu ọ dukwapho onye eseje ge ya maru Chileke.

¹²Onyemonye ghawaru Chileke azu. Ephe tukowaru yifu. Ọ to dudu onye ophu eme iphe, pfuru-oto g'ọ ka mma l'oo onye lanu.

¹³Ekipiri phe bu ilu, gheru onu. Ire phe be ephe egudeje edephusi nwibe phe. Opfu, shi phe l'onu nodu egbu egbugbu g'eru ejo agwo.

¹⁴Iphe, jiru phe onu bu ephu iphu yee opfu, shi l'okpoma mgbashi.

¹⁵Ephe ekwoje gburumu je egbua nemadzu.

¹⁶Uzo, ephe eshi bu iphe, aduje iya nu bu ola-l'iswi yele aphu.

¹⁷Ephe ta amadu uzo nchi adu-doo.

¹⁸Ophu ephe ta atsudu Chileke ebvu ililekpoo."

¹⁹Ophu anyi makahakporu bu l'iphemiphe, e deru l'ekwo ekemu Chileke bu ndu a tudoru ekemu obu be e dedoru iya. Oo ya bu g'ọ to du onye a-gofu nu. Onu aburu onyemonye kpurukudukuu; wafua g'onyemonye e-shi egube ono buru onye-ikpe nmaru l'iphu Chileke.

²⁰Iphe, o gude ọ du nno bu l'ọ to dudu onye a-su le ya e-gude eme g'ekemu pfuru buru onye pfuberekoto l'iphu Chileke; eshinu iphe, ekemu emeje bu l'o meje ge nemadzu maru le ya mewaru iphe-eji.

Apfubekoto ophu shi l'ekweta

- ²¹Obenu lẹ nta-a bẹ e goshiwaru iphe, bụ apfubekoto kẹ Chileke, abụedu ọphu shi l'edobe ekemu. Iphe ono bụru iphe, ekemu mę ndu mpfuchiru Chileke gbarụ ekebe iya.
- ²²Apfubekoto kẹ Chileke-a; shi l'ekweta anyi kwetaru kẹ Jizosu Kéreshi rwube anyi ẹka. Ọ tọ dudu onye ọogufuje mę nanu;
- ²³kẹle onyemonye mewaru iphe-ẹji; shi nno nafu onwiya ọdu-biribiri kẹ Chileke.
- ²⁴Obenu lẹ Chileke mewaru onyemonye eze-iphe-oma kẹ mmanu gwa ya l'onye pfuberekoto. Ọ bụru onye o shi l'ẹka mee ya bụ Kéreshi Jizosu onye meru g'ephe nweru onwophe.
- ²⁵Chileke goshiru Kéreshi l'edzudzu-oha g'ọ bụru ẹja, e gweru gwefu iphe-ẹji ndiphe. Ọ bụru mee, Kéreshi ono gbashiru teke ọ nwuhuru ono bẹ Chileke egudeje aguru nemadzu nvu l'iphe-ẹji iya; mbu ndu woru onwophe ye iya l'ẹka. Chileke shi egube ono mee gę ya goshi lẹ ya pfuberekoto. Lẹ teke ndiche bẹ Chileke shi abujeru onye meru iphe-ẹji l'ọ taęlaa nshi lephua ya ęnya.
- ²⁶Ọle nta-a bẹ oogoshije gę ya eshije mee ndiphe g'ephe bụru ndu pfuberekoto; kẹle yębedua bụ onye pfuberekoto bya abukwarupho onye emeje iphe, bụ ndu kwetaru kẹ Kéreshi g'ephe bụru ndu pfuberekoto.
- ²⁷Su-a; ? ọ dukwaduru onye duru iphe, ọo-nodu aba l'aba nta? Ọ tọ dukwa. ? Ọ bụru ẹka o meru imagha? ? Bụ l'anyi eme iphe, ekemu pfuru tọ? Waawakwa. Ọ buakwaa l'anyi woru onwanyi ye Kéreshi l'ẹka.
- ²⁸Kẹle iphe, anyi maru bụ lẹ Chileke agujeekwapho nemadzu l'onye pfuberekoto mę ọ -buru l'onye ono kwetaru kẹ Kéreshi; ọ tọ bukwa shita l'eme iphe, ekemu pfuru.
- ²⁹Chileke ? ọ bụ Chileke ndu Jiu kpurumu tọ? ? Tọ bụedu Chileke kẹ ndu abudu ndu Jiu? Ee! Ọ bụfua Chileke ndu abudu ndu Jiu.
- ³⁰Ọ bụepho Chileke lanu du kpoloko. Ọ bụru iya a-gu ndu Jiu, kweru kẹ Kéreshi lẹ ndu pfuberekoto; bya abukwaru iya pho a-gu ndu abudu ndu Jiu, kweru kẹ Kéreshi lẹ ndu pfuberekoto.
- ³¹? Ọ pfuru l'anyi gudewaa k'ekweta-a rwutoshia ekemu tọ? Tuswekwa! Iphe, anyi emechia bukwa g'ekemu nguru anguru.

Romu 4

Iphe-nggoshi, Ébirihamu meru

- ¹? Denu iphe, anyi e-pfu lẹ kẹ Ébirihamu, bụ nnaji ndiche anyi phe? ? Denu g'ọ nwuru ye ya?
- ²Lẹ teke ọ bụ l'ọo iphe-oma, Ébirihamu metaru bẹ Chileke gude gwa ya l'onye pfuberekoto; bẹ o nwekwaru iphe, o gogo gude aba l'abaa; ọle ọ tọ bukwanu l'iphu Chileke.

³Noo iphe, e deru l'ekwo-opfu Chileke su: “Ébirihamu kwetarū ke Chileke; a gūaru iya ya l'apfūbekoto.”

⁴Su-a; onye jeru ozi be a ta sujekwa l'iphe, a nūru iya le k'ozi ono bu iphe-oma be e meru iya; gbahaa l'oo ugwo, rwuberu iya nu be a pfuru iya.

⁵Obenu le teke nemadzu gwoberu k'ese akanya ehu iya; bya ekweta ke Chileke ono emeje g'onye iphe-eji buru onye pfuberekoto ono; a gūaru iya ya l'apfūbekoto.

⁶Q kwapho iphe, du nno be Dévidi tūberu epfu teke ono, o pfuru k'ehu-utso nwoke ophu Chileke guru l'onye pfuberekoto; l'ebe abu l'o gude eka iya meta ge Chileke nata iya.

⁷Q suru: “Ehu-utso be a goru nu ndu a guru nvu l'iphe, ephe mesweru; ndu a safubebewaarū iphe-eji, ephe megbaberu.

⁸Ehu-utso bu k'onye Nnajiuphu taa gukoeduru iphe-eji ililekpoo.”

⁹? Q du g'o buepho ndu buru ubvu kpekpu be Chileke epfu l'eka-a g'ehu tsoo utso? Too; ? ndu ebuduru ubvu yi iya-a? Eshinu anyi suru: “Ébirihamu kwetarū ke Chileke; a gūaru iya ya l'apfūbekoto.”

¹⁰? Denu g'eshiru gūaru iya ya? ? Bu teke o toko budu ubvu; too g'o buwaru ubvu? Q guadaru iya ya teme o bua ubvu.

¹¹Úbvù ono, o buru ono buru iphe-ohubama, goshiru le Chileke guru iya ro l'onye pfuberekoto; kele o kwetarū ke Chileke teke o toko budu ubvu. Oo ya bu ge Ébirihamu aburu nna k'iphe, bukpo ndu woru onwophe ye Chileke l'eka; ndu Chileke guru le ndu pfuberekoto l'ebe abu l'ephe buru ubvu.

¹²Q bukwarupho nna ndu buru ubvu; ole o to bukwa nna phe; opfu l'oo l'ephe buru ubvu; iphe, o gude buru nna phe bu l'ephe tsoru eka Ébirihamu, woru onwiya ye Chileke l'eka teme o bua ubvu.

Qphu bu ishi bu ekweta

¹³Chileke kweru Ébirihamu yee awa iya ukwe-iphe su phe: l'oo phe e-nweru mgboko. Q to bukwa le Ébirihamu meru iphe, ekemu pfuru meru iphe, o gude kwe iya ukwe-iphe ono. Q kwa l'o kweru ke Chileke meru iphe, Chileke guru iya ya l'apfūbekoto.

¹⁴Su-a; ome o bu ndu eme iphe, ekemu pfuru be e-nweru mgboko ono, Chileke kweru ukwe iya ono me ekweta aburu iphe-mmanu; me ukwe-iphe, Chileke kweru tege vukwarupho ire.

¹⁵Kele ekemu akpatsuje oke-ehu-eghu. Noo l'eka ekemu adudu be emeswe adukwapho.

¹⁶Noo g'o gude iphe, Chileke kweru ukwe iya ono buru iphe, shi l'ekweta; g'ee-shi g'oo-buru iphe, shi l'eze-iphe-oma, oome; mbu ophu o mekwarupho gbabe awa Ébirihamu. Q to bukwapho ndu emeje iphe, ekemu suru g'e meje kpurumu. Chileke

dobekwaru iya pho iphe, bu ndu kwetaru nu ge Ebirihamu kwetaru. L'ọ kwa Ebirihamu bu nna anyi g'anyi hakotakpoo.

17Ọ buru iya bu iphe, e deru su: “Mu meakwaru ngu nna igwerigwe oha.” Ọo ya bu le Ebirihamu bu nna anyi l'iphe Chileke, bu onye o kweru nkiya; mbu Chileke, emeje ndu nwuhuru anwuhu g'ephe dzuru ndzu ozo; teme o nodu emeje iphe, eshihaada du nu l'oo-bya adu.

18Ébirihamu woru onwiya ye Chileke l'eka; bya anodu ele enya iphe; teke adudu iphe, o tuseru ele enya iya. Ọo ya bu; o buru nna ohamoha, du igwerigwe, bu iya bu nu iphe, e pfuru iya su: “Noo g'awa ngu a-ha bu ono.”

19Ọphu o dudu teke Ebirihamu kwenyaaru ke Chileke bya akpoahaa okpolohu. Ọphu o pfuduru kele ya kahwaru; libahuchawaa alibahu ophu ya a-duedu ike eye ime; l'eka o nowaru iphe, ha g'ukporo apha ise eshinu a nwuru iya; ophu o pfuduru ke nyee ya, bu Sera, ata tsudu ime.

20Ọ to dudu teke obu bojeru iya ebo l'iphe, Chileke kweru iya ukwe iya; kele o noshierupho ike l'eka Chileke akwabee ya pho ubvu.

21Ọ dokporu iya enya okpobe edodo le Chileke suru emekota iphe, o kweru iya ukwe iya.

22Noo g'o gude Chileke guaru iya ya l'apfubekoto.

23Ọ to bukwa l'iswi ehu Ebirihamu kpekpu be e dedoru iphe ono, e deru su: A guru iya ya l'apfubekoto.

24Ọ kwa l'iswi ehu anyibedua be e dedokwaru iya pho, bu ndu Chileke e-mechaa gua le ndu pfuberekoto; me o -buru l'anyi kweru ke Chileke, bu iya bu onye meru Nnajiuphu anyi, bu Jizosu; o shi l'onwu teta dzuru ndzu.

25Jizosu ono be Chileke haru; o gude onwiya gwee eja nwuhu k'ophu oo-gwefu iphe-eji, anyi meshiru. Chileke bya emee ya; o shi l'onwu teta dzuru ndzu g'e-shi ge ya agua anyi le ndu pfuberekoto.

Romu 5

Adu le mma onye le Chileke

1Ọo ya bu le Chileke guaru anyi le ndu pfuberekoto opfu l'anyi kweru nkiya. Nta-a be anyi shiwaa l'eka Nnajiuphu anyi, bu Jizosu Kereshi; ehu duwaa anyi guu l'onodu anyi le Chileke.

2Ọo Jizosu Kereshi ono shi l'ekwekwe, anyi kweru nkiya duba anyi l'eze-iphe-oma owanawa, anyi gude dzuru ndzu-a. Ehu nodu anoduje atso anyi l'anyi ele enya l'anyi le Chileke e-mechaa gbaru mba l'odu-biribiri iya.

3Ọ to bukwa ono kpurumu; ehu atsojekwapho anyi utso me anyi nodu eje iphe-ehuka; opfu l'anyi humawaru l'oo l'iphe-ehuka be eeshije nwuta ata nshi.

- ⁴Ọ bụrụ ọta-nshi emeje g'anyi shihu ike l'ọhutama. Anyi eshi ẹgube ono kabaa apfushi ike l'iphe, anyi ele ọnya iya.
- ⁵Ọphu ele ọnya iphe ono, anyi ele ono emebyidu anyi iphu; kele Chileke l'onwiya mewaru anyi gbẹ l'ẹka Unme-dụ-Nso, ọ nuru anyi maru gẹ n-yemobu iya habe shii.
- ⁶L'ọ kwaduro teke adudu ike, du anyi k'eme iphe, du ree l'iphu Chileke bẹ Kéreshi byaru bya anwuhu-chiru ndu ata tsudu Chileke ebvu. Iphe ono buri teke Chileke tumberu bẹ o meru.
- ⁷Kele ọ dukwa le nta gẹ nemadzu e-shi nwuhu-chiru onye pfuberekoto. O le a -choje iya bẹ aa-humakwaa onye a-nwuhu-chiru onye oma.
- ⁸Obenu le Kéreshi nwuhuru l'iswi ẹhu anyi teke anyi bukwa du ndu eme iphe-ẹji; shi nno goshi le Chileke yenukaru anyi obu.
- ⁹Oo ya bu l'eshinu Chileke shiwaa l'anwuhu, Jizosu nwuhuru; gu anyi le ndu pfuberekoto l'iphu iya bẹ ọo-kabakpokwanu adu ike shi l'ẹka Kéreshi ono dzota anyi; g'a taa tu-koshidu anyi oke-ẹhu-eghu iya.
- ¹⁰Su-a; eshinu anyi shi buri ohogu Chileke; Chileke bya eshiwaa l'anwuhu, Nwa iya nwuhuru mewaa anyi buri onya iya; bẹ nta-a, anyi buwaa onya iya-a bẹ ndzu Kéreshi ophu no anyi l'ẹhu a-kabakpokwaanu adzota anyi l'oke-ẹhu-eghu Chileke.
- ¹¹Ọphu ọ budua ono kpoloko; anyi nokwapho l'ẹka Nnajiuphu anyi, bu Jizosu Kéreshi ete eswa; mbu onye ono, meru anyi le Chileke doshiwaa ono.

Ádamu le Kéreshi

- ¹²Su-a; ọ kwa nwoke lanu bẹ iphe-ẹji shi l'ẹka bata le mgboko. Onwu shikwapho l'iphe-ẹji ono batakwapho le mgboko. Oo ya bu; onwu shi nno swiru iphe, bukpo nemadzu; kele onyemonye mewaru iphe-ẹji.
- ¹³Iphe-ẹji dzuhaakwaru eliphe teme ekemu bya. O le a ta gukoduru nemadzu iphe-ẹji l'ẹka ekemu adudu.
- ¹⁴O le onwu shielaa l'ogbo ke Ádamu phe buri eze jasụ l'ogbo ke Mosisu; mbu buchaaru eze ndu emesweduru ekemu gẹ Ádamu mesweru. Ádamu l'onwiya bu onyonyo Kéreshi, bu iya bu onye ophu, e-mechaa byanu pho.
- ¹⁵Obenu l'iphe-oma ke Chileke bẹ a ta tukwa eyeru iphe-ẹji ke Ádamu. Kele ọ -buri l'iphe-ẹji, onye lanu meru; bẹ meru a du igwerigwe nwuhu; nokwapho gẹ Chileke a-kabakpoo eshi l'ẹka onye lanu ono, bu Jizosu Kéreshi meeru ndu du igwerigwe eze-iphe-oma, nyiberu anyibe.
- ¹⁶Ọphu iphe-oma ke Chileke adukwanu gẹ iphe-ẹji, onye lanu meru. L'ikpe, nmakotaru ndiphe mgburugburu k'iphe-ẹji ono. Obenu l'iphe-oma ophu Chileke meru nyiberu igwerigwe iphe-ẹji; shi nno mee aguhaa ndiphe le ndu pfuberekoto.
- ¹⁷Kele eshinu ọ bu emeswe, onye lanu mesweru bẹ onwu shi l'ẹka onye lanu ono buri eze; bẹ ndu ono, shiwaa l'ẹka Jizosu Kéreshi nata eze-iphe-oma ke Chileke ono, bu

iphe-oma ophu nyiberu anyibe ono; waa iphe-oma ophu bu apfubekoto; ndu ono a-
nodu l'eka onye lanu ono, bu Jizosu Kereshi buru eze le ndzu-a.

¹⁸Oo ya bu l'oo g'emeswe, onye lanu mesweru kparu iphe, Chileke nmakotaru
onyemonye ikpe; bukwapho ge Chileke shi l'apfubekoto Kereshi mee g'ikpe kaleru
onyemonye ge ndzu du phe.

¹⁹Kele oo ge nwoke lanu ono meru iphe, Chileke suru g'o to meshi; e shi egube ono
mee ndu du igwerigwe ephe buru ndu iphe-eji; bukwapho g'ee-gude k'onye lanu ophu
meru iphe, Chileke suru g'o mee; Chileke agua ikpoto nemadzu le ndu pfuberekoto.

²⁰Iphe, e gude e mechaa tua ekemu dobe bukwa g'a kabaa amaru g'iphe-eji habe shii.
Obenu l'oo teke a kabaa amaru g'iphe-eji habe shii; eze-iphe-oma ke Chileke akwata
kabakwaapho shii.

²¹O kwa anwuhu be iphe-eji gude buru eze. Nokwapho g'o bu apfubekoto be eze-
iphe-oma ke Chileke gude bukwapho eze. O buru apfubekoto ono, shi l'eka
Nnajiuphu anyi, bu Jizosu Kereshi ono edu anyi ala le ndzu ophu onwu ta aduhedu.

Romu 6

Iphe, baputizimu eme

¹Su-a; ? bu awe be anyi suseru iya ishi nta-a? ? Anyi a-noduje eme iphe-eji g'eze-
iphe-oma ke Chileke aka shii to?

²Tuswekwa! ? Denu g'anyibe ndu nwuhuwuru anwuhu l'iphe-eji e-shi nodukwapho
ndzu l'ime iya ozo?

³Too ? unu ta amadu l'e shiwaa le baputizimu mee anyi du igwerigwe buru ndu a
tugbaberu l'anwuhu ono, Kereshi ono?

⁴Le teke ono, e meru anyi baputizimu ono be anyi l'iya tukwakwaru nwuhu; a tuko
anyi l'iya likota. Oo ya bu le-a; oo egube ono Kereshi gude ike akpabiri ke Nna shi
l'onwu gbalihu dzuru ndzu ono bukwapho g'anyi a-du ike dzuru ndzu ophu.

⁵O -buru l'anyi le Kereshi tugbaru buru nanu l'anwuhu, du g'ophu o nwuhuru; o n'iya
bu Chileke emee g'anyi shi l'onwu teta g'o meru iya; anyi l'iya adzuru ndzu ophu.

⁶Ophu anyi maru bu owa-a: l'e wotaru akahu onye anyi shi buru woru yee Kereshi
tuko kpopyabe l'oswebe; oo ya bukwanu; g'ee-mebyia ike k'ejo obu ono, anyi shi
nweru teke ono, buepho iphe-eji be anyi shi maru ono; g'anyi ata abueduru ohu k'iphe-
eji.

⁷L'o kwa teke nemadzu nwuhuru bu teke yele ike k'eme iphe-eji tokaharu ishi anamu.

⁸Teke o bukwanu l'anyi le Kereshi tugbaru nwuhu be anyi maru l'anyi l'iya a-
tukokwapho dzuru ndzu.

⁹L'iphe doru anyi enya bu l'eshinu Chileke meru ge Kereshi shi l'onwu teta dzuru ndzu
be o to nwuhubedu ozo. Anwuhu ta abyadu akabaa ya ike ozobaa.

¹⁰Anwuhu ophu o nwuhuru bu l'ọ nwuhuru mgbo lanu kpoloko kpeekpu g'o mekpee iphe-eji. Ndzụ ophu o dzụ nta-a buwaru ge yee Chileke buru nanu jasuwaruroya.

¹¹Nokwapho g'unu a-guje onwunu l'unu buwaa ndu nwuhuru anwuhu me a -bya l'eka iphe-eji no. Ole eshinu unu le Kereshi Jizosu tugbawaru buru nanu be buwaa Chileke be unu dzuru ndzu.

¹²Unu te ekwekwa g'iphe-eji buru eze l'ehu unu owa-a, bu ophu a-nwuhu anwuhu-a; k'ophu bu l'oo ejo-iphe, agu unu, o suru g'unu mee be unu e-meje.

¹³Unu te ewokwaru iphe, no unu l'ehu g'ọ hahabe nwanshii haaru iphe-eji g'ọ buru iphe, o gude ejepfu iphe, pfuru oto ogu. O chia iphe, unu e-me bu g'unu woru onwunu hagbuaru Chileke l'unu buwaa ndu shi l'onwu futa bya anodu ndzu. Oo ya bu ge Chileke egude unu alwu ogu iphe, pfuru oto.

¹⁴Iphe-eji ta akaedu unu ike; eshinu ekemu ekeeduru unu egbu; kele nta-a be Chileke gudewaa eze-iphe-oma iya to unu l'egbu ekemu ono.

Aburu ohu k'apfubekoto

¹⁵Su-a; ? o pfuru l'anyi anoduwaro eme iphe-eji; opfu l'eze-iphe-oma ke Chileke tofuwaru anyi; ebe ekemu ekeeduru anyi egbu to? Tuswekwa!

¹⁶Unu ta amahaadaa le teke unu woru onwunu haaru nemadzu bya emeje iphe, o pfuru g'ohu iya be unu buwaa ohu onye obu, unu emeje iphe, o pfuru obu. Teke o bu l'unu woru onwunu haaru iphe-eji; buru ohu iya; unu anwuhu anwuhu, bu iphe, tso iphe-eji l'azu. Teke o bukwanu l'unu emeje iphe, Chileke pfuru; oo ya bu l'oo-gua unu le ndu pfuberekoto l'iphu iya.

¹⁷Ole mu ekele Chileke ekele l'ọ duru teke unu shi buru ohu iphe-eji; obenu le nta-a be unu gudewaa obu unu g'ọ ha eme iphe, bu okpobe-opfu ono g'e ziru iya unu.

¹⁸Eshinu a towaru unu l'egbu, iphe-eji shi kee unu be unu buwaa ohu k'apfubekoto.

¹⁹Mu gudeakwaa ehuru ohu le nnajiuphu iya anmaru unu etu; odumeka be iphe, mu epfu te edokwa unu enya. Egube ono unu shi woru onwunu haaru ejo umere, rehuru erehu; waa akabaa eme iphe, apfuduru-oto g'e-shi g'iphe-eji akabaa shii ono; bukwapfo g'unu e-woru onwunu haaru eme iphe, pfuru oto nta-a; g'e-shi ge ndzu unu abukotaru ke Chileke.

²⁰Kele teke unu shi buru ohu iphe-eji; be unu eshidu eyeru apfubekoto onu.

²¹? Buhunu urwu gunu be unu ritaru l'ejo-iphe ono, unu shi eme ono; mbu iphe ono, iphere iya byaru adu unu nta ono? Kele eka iphemiphe ono suberu ishi bukwa anwuhu.

²²Obenu le nta-a be a towaru unu l'egbu ono, iphe-eji shi kee unu ono; unu buwaru ohu Chileke. Urwu, unu ritaru iya buru le ndzu unu bukotawaa ke Chileke. Eka o suberu ishi buru ndzu ojejeje.

²³Ugwo, aanata l'iphe-ẹji bukwa anwuhu; iphe-oma, Chileke eme bukwanuru ndzu ojejoje ophu shi Nnajiuphu anyi, bu Jizosu Kereshi l'eka.

Romu 7

Etu iphe, emeje nu l'alulu

¹Su-a; unwunna mu; ? unu ta amadu le teke ekemu bu-beru ishi le ndzu nemadzu bu teke onye ono no ndzu? O kwa unube ndu tukoru maru ekemu be mu epfuru.

²Kele ekemu bu le nwanyi, alu ji nofutaje l'eka ji iya jasukporu teke ji iya l'a-no-beru. Ole teke a nonyaaru; ji iya nwuhu be o nwewaa onwiya. Ekemu ono, shi gudepyabe iya nu ono ta aduedu iphe, o bu.

³Bu iya bu le teke ji iya nokwadu ndzu; o je aluru ji ozo; l'aasu l'oori ogori; teke o bu le ji iya nwuhuwaru; l'o buru nwanyi eke ji. Ekemu te egudepyabedu iya. O to buedu iya eri ogori me o -je aluru ji ozo.

⁴Su-a; noo g'o du l'ehu unu bu ono; unwunna mu. Oo ekemu shi buru ji unu; ole unu le Kereshi tugbawaru nwuhu. Oo ya bu l'eshi ophu unu nwuhuwaru be ekemu abuedu ji unu. Ebe o duedu iphe, unu l'iya jigba. E mecha; unu bya adzuru ndzu ozo teke ono, Kereshi tetaru dzuru ndzu ono. Nta-a, be buwaa onye ono, shi l'onwu teta dzuru ndzu ono bu ji unu; k'ophu anyi a-dzuru ndzu, pfuru oto meje iphe, du Chileke ree.

⁵Kele teke ono, anyi shi nodu ndzu eme g'o guru anyi ono be egu ejo-iphe, shi anoduje enwu phuruphuru l'ehu anyi meru anyi shi anoduje eme iphe-ẹji. Iphe, tso eme iphe-ẹji ono bukwanuru onwu.

⁶Ole nta-a be a dzowaru anyi l'eka ekemu. Anyi nwuhuwaru; nahu iphe ono, shi kee anyi egbu ono. Oo ya bu l'anyi etsowaa uzo ndzu ophu shi l'eka Unme-du-Nso ejeru Chileke ozi. Anyi te etsohedu akahu uzo ono, bu iya bu ekemu ono, e deru l'ekwo ono gude eje iya.

Ekemu waa iphe-ẹji

⁷? Bu gunu be anyi e-pfu nta? Ekemu l'onwiya ? o bu iphe-ẹji too? Tuswekwa! Mu tege amakwaru iphe, bu iphe-ẹji; ome ekemu ta adu. Mu tege amakwaru iphe, bu nchamena ome ekemu ta asu: "G'iphe onye ozo ta agujekwa ngu."

⁸Iphe-ẹji shinu l'ekemu ono kpata uzo je akpatsushia mu iphe, bukpoog egu ejo-iphe ozo, dugbaa nu. Kele ekemu -adudu be iphe-ẹji nwuhukwaru anwuhu.

⁹Mbedua l'onwomu duru teke mu shi nodu ndzu; ophu mu amadu k'ekemu. A nonyaa mu bya amaru k'ekemu ono; iphe-ẹji jakerehu mu l'ehu; o buru mu anwuhu.

¹⁰Ekemu onoya bu ekemu, gege eme g'a nodu ndzu ono gbey bya aburu ikpe be o nmaru.

¹¹Kele iphe-ẹji kpataru uzo; gude ekemu ono wopyabe mu l'ugho; shi l'ekemu ono woru mu gbua.

12Oo ya bu l'ekemu l'onwiya du nsò. Iphe ono, a sùru g'e meje ono du nsò; bya aburu iphe, pfuru oto; bya adu ree.

13? O pfuru l'oo iphe ono, du ree ono gbè kpataru mu anwuhu to? Tuswekwa! O kwa iphe-eji gude iphe ono, du ree ono kpataru mu anwuhu g'ee-shi g'iphe-eji aburu iphe, aa-huma l'o bu iphe-eji. Oo ya bu le Chileke shi l'iphe, e deru l'ekemu eme g'iphe-eji goshigbua ge yebe iphe-eji du-be ideyideyi.

Iphe labo adzo enya l'ehu amadu

14Iphe, anyi maru bu l'ekemu shi Unme Chileke l'eka; obenu le mu bu nemadzu mmanu, iphe-eji gbaru ohu.

15Umere mu l'onwomu agbachijekwa mu enya; kele mu te emejedu iphe, du mu g'a su le mu meru iya. Iphe, mu emejechia bu iphe, du mu ashi ememe.

16Su eshi ophu iphe, mu agbeje eme bu iphe, mu maru l'o to dudu mu ree; oo ya bu le mu kweru l'ekemu du ree.

17O n'ia-a bu l'o to budu mbedua l'eme iya. Iphe, eme iya nu bu iphe-eji ono, buwaa mu ebubu l'ehu ono.

18L'iphe, mu maru bu l'o to dukpoda iphe, du ree, no mu l'obu ililekpoo, bu iya bu l'obu egube nemadzu, mu shi buru teke mu shi anoduje eme ejo-iphe, agugbabe mu nu. Mu emeje ge mu mee iphe, du ree l'ememe; ole mu ta adujedu ike mee ya.

19Kele mu te emejedu iphe, du ree, du mu g'a su le mu meru iya. Oo 'epho ejo-iphe ono, ata dudu mu ge mu mee ya ono be mu emeje.

20Su-a; o -buru l'iphe, mu agbeje eme bu iphe, adudu mu ree; o n'ia bu l'o to budu mbedua l'eme iya. Iphe, eme iya nu bu iphe-eji ono, buwaa mu ebubu l'ehu ono.

21Noo ya bu; mu shi egube ono huma ekemu, du adudu; l'o bujeru; teke mu eme ge mu mee iphe, du ree; o buerupho ejo iya akpataje mu uzo l'ehu.

22Mu -bya l'ime onwomu be ekemu ke Chileke anodujekpokwaa atso mu utso l'obu.

23Obenu le mu humaru ekemu ozo, anoduje adzo uzo l'ehu mu. Ekemu k'ono be yeke ekemu ophu du mu ree l'egomunggo pho anoduje akpa enya. L'o tua mu mkporo kpuru mu nu iphe-eji. O buru ekemu k'ono be aatujeru mu ekemu ophu kpuru mu le ndzu.

24Nshio mu! ? Bukpoo onye a-dzo mu l'ogwehu owa-a, edu mu ala l'onwu-a?

25Nta be mu no l'eka Jizosu Kereshi, bu Nnajiuphu anyi ekele Chileke ekele. Mbù le mu egudeje egomunggo eme ekemu ke Chileke l'onwomu; mu egude anu-ehu mu eme ekemu k'iphe-eji.

Romu 8

Unme, l'anuje ndzu ophuu

- ¹Oo ya bu le ntamanu-a be o to duedu ikpe, nmakwaduru ndu no l'eka Kereshi Jizosu; ndu te emeedu iphe, agu phe egu ememe; gbahaa iphe, Unme Chileke suru g'ephe mee.
- ²Kele ekemu ophu Unme Chileke aturu mu nta-a bu ike, eshije Kereshi Jizosu l'eka duru nemadzu bahu l'uzo ndzu. O buru ike ono tofuwaru mu l'ike k'ekemu, bu iya eshije l'iphe-eji duru nemadzu bahu l'anwuhu.
- ³Iphe, ekemu adudu ike mee opfu le nemadzu ta adujedu ike mee g'ekemu pfuru be Chileke mewaru. O yewaru Nwa iya gedegede; o bya aburu nemadzu; nweru anu-ehu, iphe-eji anoduje akpasa uzo l'ehu g'ehu k'anyi; bya emee onwiya ngweja gwefu iphe-eji, anyi meru; shi nno mebyia ike k'iphe-eji ono. Chileke shi l'ehu ono, Kereshi nweru ono nmaa iphe-eji ikpe.
- ⁴Iphe, Chileke gude mee iphe ono bu k'ophu anyi a-du ike meebekota iphe, pfuru oto ono, ekemu pfuru ono. Kele nta buwaa Unme Chileke be anyi etso; anyi te etsoedu anu-ehu.
- ⁵Kele ndu etso anu-ehu buepho g'ephe e-me mee iphe, du anu-ehu ree be aduje phe l'obu. Ndu etso Unme-du-Nso buru iphe, o suru g'ephe mee be ephe emeje.
- ⁶Kele akporu obu ye l'eme iphe, du anu-ehu ree bukwa onwu; akpokwanuru obu ye l'eme iphe, du Unme-du-Nso ree buru ndzu waa ehugu.
- ⁷Noo kele akporu obu ye l'eme iphe, du anu-ehu ree bu ohogu Chileke; kele o too tsodu ekemu Chileke; ophu o byadu etso iya.
- ⁸Ophu ndu emeje iphe, du anu-ehu ree 'abyadu adu ike mee iphe, du Chileke ree.
- ⁹Obenu l'unubedua te emejedu uche unu. O buwaa iphe, Unme-du-Nso epfu be unu eme; bukwa me o -buru-a le Unme ke Chileke bupho ebubu l'ime ehugu unu. Iphe, bukpo onye enwedu Unme ke Kereshi ono ta abukwa onye nkiya.
- ¹⁰Temel' o -buru le Kereshi bu unu ebubu l'ehu; be ogwehu unu ta anokwa ndzu eme iphe-eji; obenu le Unme Chileke buwaa ndzu l'ehu ndu pfuberekoto.
- ¹¹Teke o bu le Unme ke Chileke ono, meru ge Jizosu shi l'onwu teta dzuru ndzu ono, bu l'ime unu; oo ya bu le yebedua ono, meru ge Kereshi Jizosu shi l'onwu teta dzuru ndzu ono l'e-mekwapho g'ehu unu ono, bu ophu a-nwuhu anwuhu ono dzuru ndzu. Chileke e-shi le Unme-du-Nso ono, bu unu l'ehu ono mee iphe ono.
- ¹²Oo ya bu; unwunna mu; anyi jikwa ugwo, abudu g'anyi meje iphe, du anu-ehu ree.
- ¹³Le teke unu eme iphe, du anu-ehu ree be unu a-nwuhukwa anwuhu. Obenu teke o bu l'unu shi l'eka ke Unme-du-Nso kpagbua umere ono, shi l'anu-ehu unu ono; oo ya bu; unu anodu ndzu.
- ¹⁴L'o kwa iphe, bukpo ndu kweru ge Unme-du-Nso buru onye a-nodu edu phe nu bu unwu Chileke.

¹⁵Lẹ Unme-dụ-Nsọ, Chileke nuru unu ta abụkwa Unme, e-me g'unu buru ohu k'ophu ndzụ a-nọdu agụ unu. Ọchia iphe, unu nataru bu Unme, e-me g'unu buru unwu ke Chileke; anyi shi egube ono arakuje iya sụ: “Abba! Nnana!”

¹⁶Ọ buru Unme Chileke ono l'onwiya be anọduje agba ekebe l'obu anyi l'anyi buwaa unwu ke Chileke.

¹⁷Ọo ya bu l'ọ -buru-a l'anyi buwaa unwu iya; ọ n'iya bu l'anyi buwaa ndu Chileke a-nu iphe, o kweru unwu iya ukwe iya. Ọo-nu anyi iphe ono, ọ nwaru Kéreshi ono. L'ọ -buru-a l'anyi le Kéreshi tugbaru eje iphe-ehuka be Chileke e-mechakwaa mee g'anyi gbaru mgba l'odu-biribiri ke Kéreshi.

Ọdu-biribiri ophu du l'iphu

¹⁸Iphe, doru mu enya bu l'iphe-ehuka owana, anyi eje nta-a ta asukpoda nu g'ee-wota iya atu eyeru egube odu-biribiri, Chileke e-mechaa dobe anyi.

¹⁹Iphemiphe, Chileke meru ememe be onma anmanma l'ehu g'ephe huma teke Chileke e-goshi unwu iya l'odu-biribiri ono.

²⁰Kele iphemiphe ono, Chileke meru ememe ono be Chileke turu onu g'ọ tuko buru iphe, laru l'iswi. Ebe ọ bukwa iphemiphe, Chileke meru ememe meru iphe-iji k'onwiya. Ọ kwa iphe, tso ikpe, Chileke nmaru nemadzu le nemadzu mesweru. Ọle Chileke mekwapho g'iphemiphe ono, o meru ememe ono lekwapho enya

²¹l'ujiku lanu be ya a-goshi onu ono, ọ turu iya sụ g'ọ rekashihu ono. Ọogbe teke ono mee g'iphemiphe ta abheru ohu iphe-iji; g'ọ bahu-chia l'odu-biribiri k'unwu yebe Chileke.

²²Iphe, anyi maru bu l'iphemiphe, Chileke meru ememe l'atsugbaa ude iphe-ehuka ge nwanyị, ime eme; mbukwa byasu nta-a.

²³Ọle ọ to bukwa phe-a kpurumu. Anyibedua l'onwanyị, bu ndu nwewaru Unme Chileke; mbu Unme, Chileke yeru anyi l'ehu gude goshi le ya e-mechaa meeru anyi iphe ono, o kweru anyi ukwe iya ono; l'atsukwapho ude; g'anyi ele enya ge Chileke mee anyi g'anyi buru unwu iya, g'ọ gbata ogwehu anyi l'ophu.

²⁴Kele a dzotawaru anyi; ọ buru iya bu iphe, anyi elekwadu enya teke oo-dzu oke. Kele ọ -buru le nemadzu natawuru iphe, oole enya iya; ? o lekwadu enya iya ke gunu ozobaa?

²⁵Teke anyi teke anatadu iphe, anyi ele enya iya; ọo ya bu; anyi ata nshi nodunupho ele enya iphe obu.

²⁶Nokwapho ge Unme Chileke anọduje eyeru anyi aka; kele ike ta adudu anyi; teme ebe ọ budu l'anyi maru g'e pfuje anu Chileke g'ọ gbaru anyi. Ọo ya bu l'ọo Unme-dụ-Nsọ l'onwiya egudeje atsụ ude ophu buepho yebedua maru iphe, o pfuru epfu anuru anyi Chileke.

27 Oo Chileke, bu yebedua, l'enyoje ime obu nemadzu be mawaru iphe, bu uche ke Unme-du-Nso; kele Unme-du-Nso anoduje epfu anu Chileke l'iswi ehu ndu-nso le g'o du Chileke ree.

28 Anyi maru l'iphemiphe, eme l'ehu ndu yeru Chileke obu anoduje emekota g'oo-duru phe le ree; mbu ndu Chileke kuru g'o tuberu.

29 Kele Chileke mahawaru ndu nkiya teme mgboko du; bya ahotahawaa phe g'ephe buru ndu a-du ge Nwa iya du; ge Nwa iya ono buru ogerenya me a -gujukwanu unwunna iya l'ophu.

30 Oo ndu Chileke hotahawaru be o kuru. O buru ndu ono, o kuru ono be o guru le ndu pfuberekoto. O buru ndu ono, o guru le ndu pfuberekoto ono be o dobewaru l'odu-biribiri iya.

N-yemobu Chileke l'ehu ndu ke Kereshi

31? Bu onu gunu be anyi e-yebaa l'iphemiphe ono nta? O -buru le Chileke agbaru anyi odzori; ? bu onye suru g'oo-me anyi gunu?

32 Mbu onye ono te sephuduru Nwa iya azu; obenu l'o gbetchia duru iya ye g'o bya anwuhu-chiru anyi g'anyi ha. ? Bu egube iphe gunu be o too gbedu Nwa iya ono l'eka nu anyi ke mmanu?

33? Bu onye suru eku ndu Chileke hotaru ikpe? L'eka o gbę buwaru Chileke l'onwiya meru g'ikpe kaleru phe.

34? Bu onye be suru phe anma ikpe? Oo kwa Kereshi Jizosu l'onwiya bu onye gude iswi ehu phe nwuhu. Ophu o buledaa ono kpekpu; ophu kachaakponu bu l'o shi l'onwu teta dzuru ndzu je anodu l'ekutara Chileke epfu anuru anyi Chileke.

35? O dukpooru iphe, suru akposhi ge Kereshi te eyehe anyi obu? ? Bu eje iphe-ehuka; too oke mkpa; too mkpawere; too egu ememe; too ta ahuma iphe, gagbobe l'upfu? ? too iphe, alo ishi onwonye alo? ? Too l'e gbugburu anyi le mma suru iya ememe?

36 O dua g'iphe, e deru su: "Oo l'iswi ehu ngu be o to dudu teke onwu ta anodujedu eme g'o gbua anyi mboku-mboku. Aanoduje eme anyi g'aturu, a chitaru eje egbushi. "

37 O to dukpodaa; noo l'iphemiphe ono e-mekota; ole anyi eshije l'eka onye ono, yeru anyi obu onoya kakota iya ike; mekpee ya.

38 L'ophu doru mu enya bu l'anwuhu; ozoo ndzu; ozoo ndu ojozi-imigwe; ozoo ndu ochi-oha imigwe; ozoo ndu okpehu du; ozoo iphe, du nta; me ophu e-mechaa du nu;

39 ozoo igwe; ozoo ali; ozokpoo iphemiphe ozo, Chileke meru ememe; ta adudu ophu suru akposhi ge Chileke te eyehe anyi obu ophu, o shi l'eka Nnajiuphu anyi, bu Kereshi Jizosu yee anyi.

Romu 9

Chileke le ndu o hotaru

- ¹Iphe, mu epfu bu ọkpobe-opfu. Mu bu onye ke Kéreshi; ebe mu adzudu ụka. Unmedu-Nso bu mu ebubu l'ime obu bya emeje g'obu mu marwetaje iphe, gbaru iya nu. O buru obu mu ono meru g'o doo mu enya le mu ta adzudu ụka.
- ²Aphu ejije mu obu. Ebe o dudu teke o to nodujedu atsụ mu l'ehu; k'ophu oorwujechaa mu l'anụ mee
- ³Oduje mu g'a sụ le mu bu onye a turu onu; ophu mu le Kéreshi atugbaeduru; me o -buru l'oo iphe ono a-dzo ndu anyi le phe bu mee lanu;
- ⁴bu iya bu unwu Ízurelu. Ephebedua be Chileke hotaru g'ephe buru unwu iya. O buru phe be o goshiru odu-biribiri iya; ephe l'iya nodu l'ogbandzu, ukwe-iphe tso. O goshi phe g'a-abajeru iya eja.
- ⁵Ephe bu awa ndiche anyi phe; teme Kéreshi l'onwiya buru eri phe; me a -bya l'abubu, o bu nemadzu. G'e tuje Chileke, kangokotaru iphemiphe epha jasụ le tuutuutuu le mimiimii. Nokwa g'o du.
- ⁶Su-a; ebe o bukwanu ke g'a sụ l'iphe ono, Chileke pfuru ono buwaa iphe-mmanu; kele o to bugbabekwa ndu shi le Ízurelu bu ọkpobe ndu Ízurelu.
- ⁷Ophu g'ephe ha abuebedu ọkpobe unwu Ébirihamu opfu l'ephe bu awa iya. O kwa g'o duchia baa: “Oo ndu shi l'okpa Áyizaku be bu ndu a-buru unwu ngu kpurumu.”
- ⁸Iphe, iphe ono egoshi bu l'o to budu iphe, bu ndu a nwuru anwunwu mmanu be bu unwu Chileke. Oo ndu Chileke kweru Ébirihamu ukwe l'oo-nwuta bu ndu aagu eye l'okpobe unwu Ébirihamu.
- ⁹Le ge Chileke gude kwe Ébirihamu ukwe-iphe ono bu l'o suru iya: “Egube nta apha ozo be mu a-bya agbaphee ngu; Sera anwuta nwa nwoke.”
- ¹⁰Ebe o buledaa ono kpurumu; unwu Ribeka tukokwa shi le nna lanu, bu Áyizaku, bu iya bu nna anyi ke ndiche.
- ¹¹Mbuo teke eteke anwudu unwegirima labo ono; ophu ephe eke emedu iphe, du ree; ozo iphe, du eji be o pfuru opfu ehu phe; k'ophu iphe, Chileke tuseru e-me; le k'ahota, o hotaru ndu nkiya, l'ebe abu l'ephe meru ree; ozo l'ephe meru eji.
- ¹²O buru iya meru g'o gude a sụ Ribeka: “Oo onye k'ogerenya e-mechaa ejeru onye ke nwata ozi.”
- ¹³Bu iya bu iphe, e deru su: “Jiékopu be mu yeru obu; Iso dukwanu mu ashi.”
- ¹⁴? Denu g'anyi e-ye iya onu nta? ? Anyi a-su le Chileke te emeduru iphe, pfuru oto to? Tuswekwa!
- ¹⁵Kele o suru Mosisu: “O -duru onye o du mu ge mu phuaru obu-imemini; mu aphuaru iya ya. Teke o duru onye o du mu ge mu doberu obu-oma; mu edoberu iya ya.”
- ¹⁶Oo ya bu l'o to budu uche nemadzu; ozo iphe, eeme l'eka; oo Chileke aphuje obu-imemini.

¹⁷Kele ekwo-opfu Chileke pfukwaru sụ lẹ Chileke sụru Fero: “Iphe, mu gude mee ngu eze ta adukwa iphe ọzo, ọ bụ; gbahaa gẹ mu egude ngu goshi g'ike mu ha; wafua gẹ ndiphe mgburugburu eshi nno maru onye mu bụ.”

¹⁸Oo ya bụ lẹ Chileke bụ onye ọ dū iya g'ọ phuru obu-imemini bẹ ọ phujeru iya; ọ nọdu akpo-chije obu onye dū iya g'ọ kpọ-chia ya.

Èhu-eghu mẹ obu-imemini kẹ Chileke

¹⁹Ii-sukwa mu rọ: Ọ -buru l'ọ dū egube ono ? bahunu gunu meru g'o gude Chileke nọdu anodujekwapho ata nemadzu uta? Chileke -gbẹ tubewaa l'ọo ọwa-a iphe, ya e-me; ? bụ onye sụru akposhi iphe, Chileke tuberu lẹ ya e-me?

²⁰Ole gube nwa nemadzu ophu a-sụ l'iphe, Chileke meru ta adudu ree; ? I bụ gunu? ? Iphe, a kpuru l'urwa, ọjije onye kpuru iya nū sū: “? Ọ nwuru inwagha bẹ o gude i kpua mu g'i kpuru mu-a?”

²¹? Tọbodu ọ-kpu-ite maru g'oo-me urwa iya? Ọ -dū iya g'o gude uzi urwa lanu kpua ite labo gẹ nanu buru ite, e meru ọna; ophuu aburu ite, e meduru ọna; ? tọo kpudu iya?

²²? Ii-sukwanu agha mẹ ọ -buru l'ọo Chileke eme egube ono? Ọ duru ndu Chileke meru gẹ ya gude goshi oke-ehu-eghu iya; waa g'ike iya beru. A makwaru-a lẹ ndu ono gbawaru g'o gege egude oke-ehu-eghu iya mebyia phe; ọle ọotaru phe nshi shii.

²³Ọ dukwanuru ndu ophu Chileke gude eme gẹ ya goshi l'odu-biribiri iya te nweđu etu. Ndu k'ono bẹ ọ phuru obu-imemini, bụ iya bụ ndu ono, ọ tubehawaru lẹ yele ephe a-gbaru l'odu-biribiri iya ono.

²⁴Ọ buru anyibe ndu k'ono, o shi lẹ ndu Jiu mẹ ndu abudu ndu Jiu kua ono bẹ ọ phuru obu-imemini ono.

²⁵Ọ buru iphe ono bẹ o pfuru l'ekwo Hosiya sụ: “Ndu eshidu buru ndibe mu bẹ mu e-mechaa kua ndibe mu. Oha ono, mu eshidu yee obu ono bẹ mu e-mechaa kua ndu mu yeru obu.

²⁶Teme ọ buru l'echilabo aka ono, e shi sụ phe l'ephe ta abudu ndu kẹ Chileke bẹ anodu kua phe unwu Chileke; mbu Chileke no ndzu. ”

²⁷Teme Azaya chikwaapho mkpu ehū ndu Izurelu sụ: “Unwu Izurelu -hakpo m obeta ephe je l'aha g'aja, kuru l'enyimu; ọ kwapho nwa ndu ophu abadu ishi bẹ adzota.

²⁸Noo kele Nnajiuphu e-mekota iphemiphe, o pfuru ndiphe. Oo-mechachaa ya egwegwa; mee ya rengurengu g'oo-du.”

²⁹Ọ duhwakaa g'iphe, Azaya pfuhawaruro teme o mee sụ: “Ọ tọ bụ lẹ Chipfu, bụ Okalibe-Kakota-Ike te ekweddu g'awa anyi bvuebe mẹ anyi abvu gẹ Sodomu; mbu m o mee anyi iphe, o meru Gomora.”

Upfu, adu ndu Izurelu l'okpa

³⁰Nta-a ? bụ awe bẹ anyi a-sụbekwanu iya ishi? Ndu ono, abụdu ndu Jiu ono, eshidu kukebe ẹhu eme g'a gwa phẹ lẹ ndu p̄fuberekoto ono; bụakwaa ndu p̄fuberekoto; kele ẹphe kwetaru.

³¹Obenu lẹ ndu Ízurelu, bụ ndu kukeberu ẹhu eme g'a gwa phẹ lẹ ndu p̄fuberekoto ono; ta adukwa ike buru ndu p̄fuberekoto.

³²? Ọ buru ọ́nu kparu iya? Ọo kele ẹphe te egudedu ekweta choo ya; ọ gbẹ buru iphe, ẹphe gude ike k'eka phẹ meta; opfu l'ẹphe eme iphe, ekemu pfuru bẹ ẹphe gude choo ya. Ẹphe jenụ evukota oke mkpuma ono daa iko.

³³Ọ buru iya bụ iphe, e deru sụ: “Unu humakpodapho! Mu woakwaru mkpuma, a-ndu adu ndiphe upfu togo lẹ Zayonu; mbụ mkpuma ẹphe e-vukota daa iko. Ọphu onye kweru nkiya abyadu akwa izimanu. ”

Romu 10

¹Unwunna mu; iphe, dukpoo mu ree l'obu; teme ọ buru iphe, mu anoduje epfu anu Chileke g'o meeru iya ndu Ízurelu bụ g'o mee g'a dzoo phẹ.

²L'ọphu mu makpoooru bụ l'ọphu phẹ aphuphu l'ẹhu emeje uche Chileke; ọle ẹphe te egudedu mmamiphe eme iya.

³L'eshinu ẹphe amadu k'apfubekoto ọphu shi Chileke l'eka; ẹphe gbẹ acho apfubekoto k'eka phẹ; bẹ ẹphe shi nno jika eworu onwophe dee l'apfubekoto ke Chileke.

⁴Lẹ Kéreshi meakwaru g'ekemu ta abuhe ọzo, Chileke shi agu nemadzu l'onye p̄fuberekoto; g'iphe, bukpo onye kweru ke Kéreshi buru onye Chileke a-gu l'onye p̄fuberekoto.

Ndzota bụ ke ndu ke Kéreshi

⁵Wakwa ge Mosisu deru k'apfubekoto ọphu shi l'ekemu baa: “Onye eme iphemiphe ono bukwa iya bẹ oo-gude ndu ndu.”

⁶Obenu l'ọ waa iphe, e deru lẹ k'apfubekoto ọphu shi l'ekweta baa: “Ta adukwa teke ii-je ari sụ: ? Bụ onye a-du ike laa l'imigwe.” Mbụ je ekuzeta Kéreshi.

⁷Ọzo; “? Bụ onye l'e-nyiba l'alị-maa?” Mbụ je ekufuta Kéreshi.

⁸? Bụ ọ́nu bẹ eepfukwanu? “Opfu Chileke noakwa ngu ntse. Ọ kwa iya bụ opfu, iikpu l'onu; bya aburu iya bụ iphe, no ngu l'egomunggo.” Ọo ya bẹ bụ ozi-oma ono, anyi ezi onoya, bụ iya bụ opfu k'ekweta-a.

⁹Teke ọ bụ l'i gude onu ngu pfua ya hoo haa l'ọo Jizosu bụ Nnajiuphu obu; bya egude okpoma ngu g'ọ ha kweta lẹ Chileke meru iya; o shi l'onwu teta dzuru ndu; l'a dzoo ngu.

¹⁰Onye gude obu iya g'ọ ha kweta; Chileke agwa ya l'onye p̄fuberekoto; ọ buru onu bẹ eegudeje pfua ke Kéreshi hoo haa; l'adzo onye obu.

11L'e dekwaru l'ekwo-opfu Chileke sụ: “Onyemonye, woru onwiya ye iya l'eka be iphere tee mekwa.”

12Ọ tọ d̄ekwa mkpocha, d̄u n̄u. L'onye pho bu onye Jiu; onye ophuu buru onye Gurisu ta ad̄ekwa; kele o buhukwapho Nnajiuphu lanu ono bu Nnajiuphu phe g'ephe ha. O nodu emeru iphe, bukpo ndu epfuje anu iya nu eze-iphe-oma, paru eka apaa.

13Kele “o kwa iphe, bukpo onye l'eku epha Nnajiuphu be aa-dzota.”

14? Denu g'ephe e-shikwanu eku epha iya m'ephe ekwetaduru nkiya? Tememe ? denu g'ephe e-shi kweta k'onye ephe teke anumaswee nkiya? ? Denukwanu g'ephe e-shi numa iphe, adudu onye pfuru phe iya nu?

15? Denukwanu ge ndu-ozima e-shi je ezi ozima; l'ebe abu l'e ziru phe g'ephe je? O buru iya bu iphe, e deru su: “Lenu iphe, okpa phe ama; mbu okpa ndu ezi ozima ke nchi adu doo; tememe ephe nodu ezi iphe, du ree.”

16Ole o to bubedu g'ephe ha be meru iphe, ozima ono pfuru. Kele Azaya pfukwaru su: “Nnajiuphu ? buhunu onye be kweru kweta iphe, o numaru anyi l'onu?”

17Oo ya bu l'ekweta shi l'anuma iphe. Iphe, aanuma bukwannuru Opfu Chileke.

18Ole ge mu jishikwa: ? Bu anuma be ephe ta anumaduru ozima obu too? Waawakwa! Ephe numachacharu iya-a! “A numadukwaru olu phe l'ekameka l'eliphe. Mbu l'opfu phe ngakotaru eliphe jasụ l'eka igwe beru; ali beru.”

19Mu byakwa ajia su: ? Bu enya be ozima ono eshidu doo ndu Izurelu too? Le Mosisu vuhaakwaru uzo yee ya onu su: “Mu e-gude oha, abudu okpobe oha meru okophoo ye unu l'ehu. Mu e-gude oha, eme eswe kpatsu unu ehu-eghu.”

20Tememe Azaya kabakwaa ya ro epfushi ike su: “O kwa ndu te eshidu achọ mu nu be humaru mu nu. O buru ndu te eshidu aji aji mu be mu goshiru onwomu.”

21O byakwanu l'ehu ndu Izurelu; o su: “O to dudu teke mu ta amachijedu eka ge mu heta ndu ono, bu ndu kwefuru mu ike ono; mbu ndu ejo-okpoma ono; g'ephe dakobe lwaphuta azu lwapfuta mu.”

Romu 11

Obu-imemini, Chileke aphuru ndu Izurelu

1Mu byakwa ajia ozo su: ? Bu ajika be Chileke jikawaru ndu nkiya too? Tuswekwa! Mbdua l'onwomu bukwa-a onye Izurelu. Mu bu oshilokpa Ebirihamu; bya aburu onye okpa-ifu Benjaminu.

2Chileke ta ajikakwaru ndu nkiya, bu ndu o vuru uzo mahawaru. ? Unu ta amadu iphe, ekwo-opfu Chileke pfuru; mbu ge Elayijia gude chia Chileke ichi ndu Izurelu su:

3“Nnajiuphu; ephe tukoakwaru ndu mpfuchiru nkengu gbuębe; bya enwukposhia orungweja ngu. O buwaru mbdua phoduru kpoloko; ephe nodu emekwapho g'ephe gbua mu.”

⁴Ole, ? Búkwanu gunu bẹ Chileke pfuru iya? Ọ sùru iya: “Mu dobekwaru iphe, ha g'unu nemadzu iri l'èsaá l'umadzu ọkporo iri, bú ndu teke ewosweeru ikpere gbuaru Balu l'alì.”

⁵Nokwapho g'ọ dú nta. Ọ dúkwaru-a nwa ndu Chileke gudeepho k'eze-iphe-oma, oome haru hóta.

⁶Teke ọ búkwanu l'ọo eze-iphe-oma bẹ e gude hóta phẹ; ọ n'iya-a bú l'ọ tọ buedu iphe, e setaru l'akanya; ọdumeka bẹ eze-iphe-oma ta abụekwa eze-iphe-oma. Teke ọ búkwanu l'ọo iphe, e setaru l'akanya; ọ n'iya-a bú l'ọ tọ buedu eze-iphe-oma; ọdumeka bẹ akanya ta abụekwa akanya.

⁷Su-a; ? bú awe bẹ anyi a-sube opfu obu ishi nta-a? Ọ tọ bubekwa ndu Ízurelu l'ophu nataru iphe, ephe riru aphu iya; ọ kwa ndu a hotaru nataru iya. Ndu ophuu bukotaru ndu a kpọ-chiru okpoma.

⁸Ọ búru iya bú iphe, e deru l'ekwo-opfu Chileke sù: “Chileke nukwaru phẹ maa meru mgbenya nodu erwe phẹ. Ephe te egudeedu enya aphu ọzo; ophu ephe anumajeedu iphe lẹ nchì byasù ntanù-a.”

⁹Teme Dévidi pfukwaapho sù: “Gẹ nri, ephe eri eriri bukwaru phẹ ọnyà-enu yele ọnyà-anu, ephe a-nmalahu. L'ọ búru upfu dú phẹ l'okpa; g'e gude iya gwata phẹ ugwo iphe, ephe meru.

¹⁰G'enya gbahukwa phẹ ọchii g'ọ tọ dú iphe, ephe a-huma. G'apfu hufukwa phẹ bukili jasu l'ojejeje.”

¹¹Mu byakwa ajia ọzo sù: ? okpa kabẹ tsua ndu Ízurelu ntsu k'ophu ephe darwuwaru alì; ebe ephe agbalihubaedu tọ? Tuswekwa! Ochikwa l'okpa, tsuru phẹ ntsu ono meru g'ọ gude ndzota rwube ndu ohozo; g'eeshikwanu egube ono gẹ ndu Ízurelu awata phẹ ekoru okophoo.

¹²L'eshinu ọ bú emeswe, ndu Jiu mesweru meru g'ọ gude urwu kwata gbaaru ndiphe mgburugburu. Uburu, butaru ndu Jiu mekwaapho g'urwu kwata gbaaru ndu abudu ndu Jiu. Mbù l'urwu a-kwatakwa kabaanu shii okpobe akaka mẹ ndu Ízurelu g'ephe ha lwaphuta azu lwapfuta Chileke.

Ndzota kẹ ndu abudu ndu Jiu

¹³Nta-a bukwa unube ndu abudu ndu Jiu bẹ mu epfu eyeru. Su-a; eshinu mu bú onyeshi-ozì kẹ ndu abudu ndu Jiu; bẹ mu gudekwa ozi ono eku onwomu.

¹⁴K'ophu bú; g'ọ duhabe; mu egudeje iya eme gẹ ndu alì mu ono awataru unu ekoru okophoo; gẹ mu eshi nno haru phẹ dzoo.

¹⁵L'ọ -búru teke ephe jikaru Chileke bẹ Chileke gbẹ mee gẹ yele ndiphe bya adu lẹ ree; ? bú gunu e-mekwanu mẹ Chileke natae phẹ pho ọzo? Ndu nwuhuru anwuhu a-gbeshikwa dzuru ndzu ọzo.

¹⁶L'ọ -búru lẹ mebyi-iphe-mbu ono dú nsọ; bẹ mkpukorophu iya dukotanaa nsọ. Ọ -búru l'ogbarabvu-oshi dú nsọ bẹ ekali iya l'ophu dukotaakwapho nsọ.

¹⁷Sụ-a; ndu Jiu dụ g'oshi olivu unuphu, a haru ẹkali iya kwashia. Unubedua, abudu ndu Jiu buru ẹkali-oshi olivu ẹgu, e wotaru bya edepfube l'eka a kwafuru ẹkali k'unuphu pho. E depfube iya; o dzuru ndzu. Nta-a be unu shiwa l'ogbarabvu olivu unuphu pho amitaje mini gude nodu ndzu.

¹⁸Oo ya bu le-a; te ejekwa asu l'o to dudu iphe, ẹkali iya ophu a kwashiru pho bu. ? Bu ke gunu be ii-gude eku onwongu? Nyatakwa l'o to budu ngu gudeshi ogbarabvu-oshi ono; l'o chia ogbarabvu-oshi ono gudeshi ngu.

¹⁹Ii-gbenu su: "A kwafuakwaru ẹkali-oshi ono; g'e depfube mbedua."

²⁰Ole makwaru l'iphe, kparu iphe, e gude kwashia ya bukwa l'o to woduru onwiya ye Kereshi l'eka. Gubedua nyikatakwanu pfuru pfushia ike; kele i kwetaru. Oo ya bu le-a; te etsenupho etsetse; ge ndzu gujekwa ngu.

²¹Eshinu Chileke ahaduru okpobe ẹkali-oshi ono ke mmanu; ? bu-chia gubedua be oha ke mmanu?

²²Nowaro g'ii-gude huma le Chileke emeje odoo; humakwapho l'oomeje nemadzu iphe kpangangaa. O meru ndu jikaru iya nu iphe kpangangaa. O mekwanaaru gubedua odoo; mbukwa me o -buru l'i kweru nopyabe l'odoo obu, oomeru ngu; odumeka be o kwafujekwa ngu pho.

²³Teke o bu le ndu ke Jiu jika-buhuru eze-iphe-oma ke Chileke be Chileke ewolekwaru phe-a dophu azu l'eka ephe shi nodu; kele Chileke a-dukwa ike dophu phe azu l'eka ephe shi nodu.

²⁴Oo ya bu le-a; o -buru l'a kwafuru ngu l'oshi olivu-egu ono; bya eworu ngu depfube l'oshi olivu-unuphu pho; mbu o buru iphe, e meru g'e te emejedu iphe; ndu owa-a, bukwanu phe bu ẹkali-oshi olivu-unuphu ono gedegede be oo-kabakwanu Chileke nphe eworu ẹkali iya, o shi kwafu akwafu pho woru depfube l'oshi, ẹkali iya ono shi nodu.

Obu-imemini Chileke l'ehu onyemonye

²⁵Unwunna mu; o nweru okpobe-opfu, e domiru edomi, mu eme g'unu maru; g'unu ete ejejedu aru l'unu manukawaru iphe. Iphe, unu a-maru bu le-a; o to bukwa ge ndu Izurelu bu ejo-okpoma nta-a bu g'ephe a-duwaro jeaduru. Teke ejo-okpoma phe ono a-no-beru bukwa teke ndu abudu ndu Jiu, Chileke hotaru l'a-tukowa lwaphutawa azu byapfuta iya.

²⁶Oo ya bu; teke ono; aa-tuko iphe, bu Izurelu mgburugburu dzoo, bu iya bu iphe, e deru l'ekwo-opfu Chileke su: "Onye-Ndzota e-shi le Zayonu bya. Oo-tuko ejo ememe, unwu Jiekopu shi eme wofukota phe l'ehu.

²⁷'Kele owa-a bukwa ogbandzu, e-shi mu l'eka laaru phe teke ono, mu a-gukotaru phe nvu l'iphe-eji, ephe mekotaru ono.' "

²⁸A -bya lẹ k'ozì-oma ono bẹ ọ gbẹkwa bụru iphe kweru unu l'ẹphe bụ ọhogu Chileke. Obenu l'a -bya lẹ k'ahọta, Chileke họtaru ndu Jiu bẹ ẹphe bụkwanu ndu Chileke yeru obu l'opfu ẹhu ndiche anyi pẹ.

²⁹Lẹ Chileke ta agbanwejekwa iphe, ọ rihawaru k'ememe l'ẹhu ndu ọ họtaru g'ẹphe bụru ndu nkiya.

³⁰L'unubẹ ndu abudu ndu Jiu shi bụru ndu te kwejedu eme iphe, Chileke pfuru; obenu lẹ nta-a bẹ Chileke phuru unu obu-imemini opfu lẹ ndu Jiu te ekwejedu eme iphe, o pfuru.

³¹Nokwaphọ g'ọ dụ ndu Jiu bụ ono. Nta-a bẹ ẹphe te ekwekwaphọ eme iphe, Chileke pfuru g'ee-shi gẹ Chileke aphuru pẹ obu-imemini g'ọ phuru unu.

³²Oo ya bụ lẹ Chileke haru onyemonye ọzo g'ẹphe te ekweshi eme iphe, o pfuru gẹ ya a-phuru onyemonye obu-imemini.

Ọdu-biribiri Chileke

³³Ha-oo! nkwa menya yele mmamiphe kẹ Chileke pakwaru omilomi. Ikpe, ookpeje ta adukwa onye suru iya amaemberu; ẹbe ọ dukwa onye suru amakotaru g'o meje iphe iya.

³⁴“? Bụ onye maru uche Nnajiuphu? ? Bụ onye egoshije iya iphe, ọo-nọduje eme?”

³⁵? Bụ onye nujeru iya iphe; k'ophu ọo-su g'ọ pfukwaa ya ugwo iphe iya?”

³⁶Oo ya meru iphemiphe. Ọ bụru iya bẹ iphemiphe shi l'eka iya dụ; ọ bukwaru iya pho bẹ iphemiphe, dụ dụ-doru. G'ajaja bụru kẹ Chileke jasụ lẹ tuutuutu lẹ mimiimii. Nokwa g'ọ dụ.

Romu 12

Adzuru ndzụ je ozi Chileke

¹Oo ya bụ; unwunna mu; eshinu Chileke aphuru anyi obu-imemini nno bẹ mu arwo unu sụ g'unu woru onwunu nụ Chileke okpobe anunu; unu bụru iphe, dzụ ndzụ, unu gude gweeru Chileke ngweja, dụ nsọ bya aburu ophu Chileke nataru. Noo iphe, bụ okpobe abaru Chileke ẹja bụ onoya, bụ iphe, gbaru iya nụ.

²Unu te ekwekwa eme g'unwu-eliphe anọduje eme. Iphe, unu e-mechia bụ g'unu haaru Chileke onwunu g'ọ bụru iya l'a-nọduje agbanwe obu unu; g'uche unu bụru iphe ọphúú g'unu a-duje ike maru iphe, bụ uche Chileke, bụ iya bụ iphe, dụ iya ree; bụru iphe, ọ nataru bya aburu iphe, ẹbe ree.

³Iphe, mu gude epfuru unu iphe-a, mu abya epfufu-a bukwa lẹ Chileke mewaru mu eze-iphe-oma; mu nọdu epfuru iya unu g'unu ha sụ g'unu ta arijekwaru onwunu g'unu ahadu. Ọ chia iphe, unu e-meje bụ g'unu deje ẹnya lẹ mini maru iphe, unu ari. Chileke hewaru onyemonye oke iphe-oma, shi l'ekwekwe, onye kweru nkiya. Noo iphe, e-goshije onyemonye iphe, ọo-nọdu ariru onwiya bụ ono.

⁴L'ọ kwa g'ọ dụ l'ẹhu nemadzụ bụ ono; l'ogwehu lanu enwejekwaru mpfukashi, dụ igwerigwe; mbụ ẹphe nọdu atukoje emegbaa iphe, dụ iche iche.

⁵Nokwapho g'anyi du igwerigwe; o le anyi shiwaa l'atugba, anyi le Kereshi tugbaru buru ogwehu lanu. Onyenonu l'ooome ge ye le nwibe iya dogba ehu.

⁶Anyi nwegbaarū iphe-oma, Chileke meru nu anyi l'ehu l'ehu; onye g'eze-iphe-oma nkiya ha. Nta-a bu g'anyi gudeje iya mee iphe, g'o gbaru. O buru mpfuchiru, g'onye ono pfujekwa iya g'o goshiru iya ya l'ekwekwe, o kweru.

⁷Teke o bu onye Chileke meru iphe-oma k'eje ozi; g'onye obu yeru ehu l'eje ozi. Teke o bu ezi iphe; g'onye obu zijekwa iphe.

⁸Teke o bu adu obu; g'onye obu nduekwapho l'adu nemadzu obu. Teke o bu l'anu iphe; g'onye ono sajekwa eka asasa nu iya. G'onye no l'ishi kukebejekwa ehu jeshi ozi ike; g'onye aphu obu-imemini phujekwa iya l'ehu-utso.

N-yemobu

⁹Ge n-yemobu i yeru nemadzu ta abukwaru l'eregede. Kpajeru iphe-eji l'aphara; gudeshia eka l'eme iphe, du ree.

¹⁰G'onyenonu yeje nwibe iya obu mebyi eyeye gude goshi l'unu tukoru buru unwunna lanu. G'onyenonu kajekwa akwabę nwibe iya ubvu eme l'onwiya.

¹¹Jeshijekwa ozi ike; te emejekwa enyiru. Hakwaa ge Unme-du-Nso meje ngu ire l'ehu; shi egube ono mee g'ejeru Nnajiuphu ozi e-vuje ngu evuvu l'obu.

¹²G'iphe ono, unu ele enya iya ono meje g'ehu tso unu utso. Unu atakwapho nshi me unu -nodu eje iphe-ehuka. Unu epfu anu Chileke mkpurumkpuru.

¹³Unu yejeru nwibe unu, unu l'ephe tukoru buru ndu ke Chileke eka le mkpa, duru phe nu. Unu ekukebeje ehu kwaa ebyaa, byaru unu.

¹⁴Unu gojeru onu-oma nu ndu eme unu mkpawere. Mbu-a unu gojekwa onu-oma; unu ta atujekwa nemadzu onu.

¹⁵Ndu ozo -nodu ete eswa; unu tsojekwaru phe tee eswa; ndu ozo -nodu ara ekwa; unu tsokwaru phe raa ekwa.

¹⁶G'uche unu le nwibe unu bujekwaru nanu. Unu te edobejekwa onwunu g'unu ahadu. O chia iphe, unu e-meje bu g'unu le ndu enya lwaru megbaje. Unu ta abujekwaru nwomaru-o-machata.

¹⁷Unu te egudejekwa ejo-iphe pfua nemadzu ugwo ejo-iphe, o meru unu; gbahaa g'unu kukebeje ehu meje iphe, onyemonye a-maru l'oo iphe, du ree.

¹⁸Unu kukebe ehu seje g'unu l'onyemonye nodu le nchi-odoo; l'iphemiphe, unu eme; me oo-je l'ekwe ememe.

¹⁹Ndu mu yeru obu; unu te emelatajekwa ugwo iphe, e meru unu. Unu hajekwa ge Chileke gude oke-ehu-eghu iya melata onye ono. L'e dekwaru l'ekwo-opfu Chileke su: "Emelata bukwa mu be o duru; o buru mu l'a-pfu ugwo." Noo iphe, Nnajiuphu eepfu.

²⁰Ọ chia iphe ii-meje bu: “Ọ -buru l'onye opfu ngu be ẹgu agu; nu iya nri. Teke ẹgu mini agu iya; kee ya mini g'ọ ngua; le i -nodu eme nno be i kpoberu iya icheku-oku l'ishi.”

²¹Te ekwejekwa g'ejo-iphe mekpee ngu; gudejehia iphe-oma mekpeje ejo-iphe.

Romu 13

Akwabẹ ndu-ishi ùbvù

¹G'onymonye mejekwa iphe, ndu-ishi phe suru g'e meje. L'ọ to dukwa onye byaru aburu ishi me ọ -budu l'o shi l'eka Chileke; teme ọ buru Chileke be yeru ndu ophu bu iya nu nta-a.

²L'onye jikaru eme iphe, ndu-ishi pfuru bukwa ndu-ishi, Chileke yeru be onye ono jikaru. Ndu ajikakwanu phe nu buru ikpe be ephe eseko ekpu onwophe l'ishi.

³Le ndu eme iphe, du ree ta atsujekwa ndu-ishi ebvu. Ndu atsu ndu-ishi ebvu bukwa ndu eme ejo-iphe. Teke ọ bu l'ọ du ngu g'i b'atsujeshi ndu-ishi ebvu; ọ n'iya bu g'i meje iphe, du ree g'onye-ishi ajaa ngu ajaja.

⁴Kele onye-ishi ono bukwa onye-ozu Chileke; iphe, oome buru iphe, a-duru ngu le ree. O le teke i mekwanuru iphe, adudu ree; tsukwaa ya ebvu; kele e te eyekwaru iya ke mmanu. O bu onye-ozu Chileke; buru onye ahù ndu eme ejo-iphe ahùhù gude egoshi oke-ẹhu-eghu ke Chileke.

⁵Noo g'o gude unu je l'emeje iphe, ndu-ishi pfuru; ọ to buledaa g'unu agbalaaru oke-ẹhu-eghu Chileke; obenu l'ọ bufukwaapho g'unu meje iphe, obu ta anmadu unu ikpe.

⁶Nokwapho iphe, meru g'o gude unu je apfuje akiriko. Noo kele ndu-ishi ono bu Chileke be ephe ejeru ozi; ephe nodu anoduje eme g'ephe jee ya g'ọ gbaru.

⁷Unu mejeru phe iphe, rwuberu phe nu. Onye o rwuberu l'aturu akiriko nu; unu aturu iya nu iya; onye o rwuberu l'aturu utu nu; unu aturu utu nu iya; onye ọ gbaru l'eyeru nsọ; unu eyejeru iya nsọ; onye ọ gbaru l'akwabẹ ùbvù; unu akwabẹ iya ùbvù. Unu mejeru onymonye iphe, rwuberu iya nu.

Eye nemadzù ibe ngu obu

⁸G'ọ to dukwa ugwo, unu e-jijeru nemadzù; gbahaa ugwo n-yemobu. Kele onye yeru nwibe iya obu mekotaakwaru iphe, ekemu suru g'e meje.

⁹Kele iphe, bukpo ekemu-a g'ọ hakotakpoo, bu iya bu; te erikwa ogori; ophu i gbukwa ochi; ophu i zikwa iphuru; ophu iphe, onye ozo agujekwa ngu; mewaro unwu ekemu ozo, yigbaa ya nu. Ekemu ono g'ọ hakotakpoo jeru asube ishi le: “Yee nemadzù ibe ngu obu g'i yeru onwongu.”

¹⁰Onye yeru nemadzù ibiya obu te emejekwa iya ejo-iphe. Noo g'o gude n-yemobu buru emebe iphe, ekemu pfuru.

Akwakọbe k'abyabya Kéreshi

¹¹Sụ-a; iphe mefuaru g'o gude unu je atukoje iphemiphe ono eme bu ge nta-a gbaru; mbu l'o rwuwaru teke unu e-shi le mgbenya tehu. Noo kele nta be ndzota anyi kawaa ntse eme le g'o shi du-be enya me a -gbe le teke anyi beberu kweta ke Kereshi.

¹²O dukwaa enya abali keru ebo; nchi aboju dukwaa ntse. Oo ya bu; unu g'anyi gwobenu iphe, eeme l'ochii; kwaa onwanyi ngwogu ophu anyi e-gude alwu ogu l'iphoro.

¹³G'anyi meje okpobe umere, eme l'iphoro; anyi ahaa eme ke nwanyi ozoo ke nwoke; haa angunuka mee. Anyi ahakwaapho emephe opfu; haa iji-enya.

¹⁴O chia iphe, unu e-meje bu g'unu tukokpoepho umere Nnajiuphu, bu Jizosu Kereshi meje g'oha. Unu ta ahakwaru obu egube nemadzu, unu shi buru uzo; mbu k'opu unu e-mejeepho ejo-iphe agu iya nu.

Romu 14

Anma nemadzu ikpe l'egomunggo

¹Onye ekwekwe iya du nyegenyege; unu hajekwa iya g'unu l'iya nodu. O l'oo g'unu l'iya te ejejekwa atu ego l'iphe, o suru l'oo owa-a g'o du iya bu owa.

²O duru ndu adudu iphe, ephe aso nso eriri; o bekwanu l'onye ophuu, ekwekwe iya dukwadu nyegenyege pho buepho iphe, oorije bu eba-ophe.

³Oo ya bu; g'onye ono, ta adudu iphe, oso nso pho ta akpokwanu onye ophuu ebo l'afu l'o to ridu ge ya eri. Noo kele Chileke nataakwarupho yebdua.

⁴I bu gunu? ke g'o buru onye ejeru onye ozo ozi be ii-nodu agbarwushi. Oo Nnajiuphu iya be a-nma iya ikpe l'oome eji; ozoo l'osusu l'oome ree. O bekwanu l'oo-nodu eme ree; kele Nnajiuphu suru g'oo-me iya g'o me ree.

⁵O nweru onye a-hota eswe ujiku lanu dobe l'oo eswe ono kakota ndu ophuu mkpa; nweru onye a-ri su l'eswe ta adudu ophu ka nwibe iya mkpa. G'onyenonu pferupho l'opu o pfuru pfushia ya ike.

⁶Onye riru l'o nweru mboku ophu ka nwibe iya mkpa dobe iya iche; l'eme iya gude akwabẹ Nnajiuphu ubvu. Onye adudu mboku, duru iya le nso bukwarupho Chileke be oomeru iya. Onye adudu iphe, oso nso eriri l'eri iya gude akwabẹ Nnajiuphu ubvu. Noo kele ookeleje Chileke ekele iya. Onye aso iphemiphe nso buru Nnajiuphu be oosoru iphemiphe nso; teme o nodu ekeleje Chileke ekele iya.

⁷O to dukwa g'anyi ha; onye no ndzu no-doru onwiya; ophu o dukwa onye anwuhu anwuhu anwuhu-doru onwiya.

⁸Anyi -dzuru ndzu; bu Nnajiuphu be anyi dzuru iya; teke anyi anwuhu anwuhu; o kwapho Nnajiuphu be anyi anwuhu alapfu. Oo ya bu l'anyi bu ke Nnajiuphu: me anyi no ndzu; me anyi anwuhu anwuhu.

⁹Kele Kereshi nwuhuchaaru bya adzuru ndzu ozo g'oo-buru Nnajiuphu ndu nwuhuru anwuhu; me ke ndu dzu ndzu.

¹⁰Sụ-a; ? denu g'o gude i nọdu agbarwushi nwanna ngu l'ime obu ngu? Ọzoo; ? o meru imagha be o gude i nọdu akpo iya ebo l'afu? ? Ti madu le g'anyi ha l'e-mechaa pfukotaru l'iphu Chileke; onye bu iya l'e-kpekota anyi ikpe?

¹¹Noo l'e deru l'ekwo-opfu Chileke su: “Eshinu mu dzu ndzu”; be onyemonye e-mechakwaa gbuaru mu ikpere l'ali. Nokwa iphe, Chipfu eepfu. Onyemonye e-mechaa pfukota l'oo mu bu Chileke. ”

¹²Oo ya bu le g'anyi ha l'onye l'onye l'e-emecha nọdu l'iphu Chileke; doo edo onwiya.

Akwatsu nwibe ngu

¹³Oo ya bu; g'anyi ta anodujeshinu agbarwushi nwibe anyi. O chia g'anyi tuko tubua g'anyi ta abujeru upfu du nwanna anyi l'okpa; ozoo meta iphe, e-me g'o mee iphe-eji.

¹⁴Eshinu mu le Nnajiuphu, bu Jizosu tugbaru buru nanu be ophu dokporu mu enya okpobe edodo bu l'o to dudu iphe, eeri eriri, mu asokwadu nsọ. Ole teke o bu l'o nweru onye pfuru su l'iphe, du egube-a be ya aso nsọ; oo ya bu; iphe ono a-buru iphe, aaso nsọ l'ehu onye ono kwa.

¹⁵Teke o bu l'i gude k'iphe, iiri l'onu mee nwanna ngu; k'ophu ehvuduru iya ebvuru; oo ya bu l'i ti mehedu iphe, egoshi l'i yeru iya obu. Oo ya bu; g'iphe, iiri l'onu ta akpatakwa ge nwanna ono, Kereshi nwuhu-chiru onwu ono laa l'iswi.

¹⁶Te ekwekwa g'iphe, du ree, iime vuta ejo epha.

¹⁷L'iphe, bu le Chileke bu eze ta abukwa l'iphe, eeri l'onu; ozoo l'iphe, aangu angungu. O kwa apfubekoto; yele nchi-adu-doo; waa ehvutso ophu shi l'eka Unmedu-Nso.

¹⁸Onye ejeru Kereshi ozi egube ono eme iphe, jiru Chileke epho; bya emekwapho iphe, du ndiphe ree.

¹⁹Oo ya bu; g'anyi tubeepho nvọ l'iphe ono, emeje ge nchi du doo onoya; mbu iphe ono, l'a-nodu eme ge nwibe ngu pfushia ike l'ekwekwe, o kweru ke Chileke ono.

²⁰Te egudekwa k'iphe, iiri l'onu mebyia iphe, Chileke eme. Iphemiphe, eeri eriri, duebekwa ree. Ole o to gbaduru ge nemadzu ria iphe, a-kpata ge nwibe iya mee eji.

²¹O kakwa ree g'i ti tashi anu; ophu i ngushi mee; ophu o dukpoo iphe, ii-je ememe, bu iphe, a-buru upfu du nwanna ngu l'okpa mee ya g'o daa; ozoo mee ya g'o du nyegenyeg.

²²G'iphe, bukpo iphe, i kweru bukwarupho iphe, duru gu le Chileke. Onye ehvutso utso bukwa onye meru iphe, o riru l'o du ree ememe; ebe o dudu teke obu anma iya ikpe l'iphe, o meru.

²³Obenu l'onye abo obu ebo be ikpe nmakwaru me o -ria iphe obu; kele o to nodu Chileke l'eka eme iphe, oome. Kele iphemiphe, nemadzu eme; ebe o nodu Chileke l'eka eme iya bukwaa ya eme iphe-eji.

Romu 15

Etso ẹka Jizosu Kéreshi

¹Anyiḅe ndu shihuru ike; l'a-nọduje ata nshi l'iphe, ndu eshihuduru ike eme. G'anyi te emejeekwapho ẹhu anyi ẹhu anyi.

²Onyenonu g'anyi ha meje iphe, a-tso nwibe iya uto; l'o buru iphe, ee-gude kutsee ya. Oo ya bu; g'obu akabakwanaa ya eshihu ike l'iphe, ke Chileke.

³Le Kéreshi ta abukwa ẹhu iya ẹhu iya be o shi emeje. Iphe, meru nu buephopho iphe ono, e deru su: "Iphe, bukpo ejo-opfu, ndu epfuru ngu ejo-opfu pfuru ngu bu mbdua vutaru onwu iya."

⁴L'iphemiphe, e dekotaru teke ndiche be e dekwaru g'o zia anyi iphe. Oduje anyi obu g'anyi aduje ike taa nshi nodu ele ẹnya iphe, Chileke kweru anyi ukwe iya.

⁵Ge Chileke ono, bu iya emeje g'anyi taju iphe nshi; bya aduje anyi obu ono mee g'unu gude etso ẹka Kéreshi Jizosu g'obu buru unu nanu.

⁶Oo ya bu; g'unu atuko g'unu ha tugba; gude obu lanu; gudekwapho olu lanu aja Chileke ajaja; mbu Chileke, bu iya bu Nna ke Nnajiuphu anyi, bu Jizosu Kéreshi.

Ozi-oma bu ke ndiphe mgburugburu

⁷Oo ya bu; unu gudeje obu unu haa g'unu le nwibe unu tugba; ge Kéreshi hakwarupho; unu l'iya tugba; noo ya bu g'aa-jakwanaa Chileke ajaja.

⁸L'iphe, mu epfu bu le Kéreshi byaru bya aburu onye-ozu ndu buru ubvu; g'o mee g'iphe ono, Chileke kweru ndiche anyi phe ukwe iya pho vukota. Oo ya bu; g'oo-shi nno goshi le Chileke bu onye ire-lanu, emeje iphe, o pfuru.

⁹Wafua ge ndu abudu ndu Jiu ajaa Chileke ajaja l'o phunukaru phe obu-imemini, bu iya bu iphe, e deru su: "Oo ya meru g'o gude mu je l'etu ngu epha l'echilabo ndu abudu ndu Jiu. Mu e-gude epha ngu ga ebvu jaa ngu ajaja."

¹⁰Tem e dekwaapho su: "Unube ndu abudu ndu Jiu; unu le ndu Chileke hotaru toko tee eswa!"

¹¹Ozo buru: "Unu tua Chileke epha; unube ndu abudu ndu Jiu g'unu ha. Ndiphe mgburugburu; unu tua ya epha!"

¹²Tem Azaya byakwapho bya epfua su: "Oshilokpa Jiesi l'a-bya! Oo ya e-tsefuta bya aburu eze k'iphe, bu ndu bu ndu abudu ndu Jiu. O buru iya bu onye epe a-nodu ele ẹnya iya."

¹³Ge Chileke, onye bu iya emeje g'anyi lee ẹnya iphe, o kweru ukwe iya; mee g'ehu-uto unu dzua oke; l'oomekwapho g'ehu dube unu guu g'unu ha; kele unu kweru nkiya. Oo ya bu; g'unu egude ike ke Unme-du-Nso kabakpo ele ẹnya iphe ono, Chileke kweru ukwe iya ono.

Iphe, kpataru Polu ede ekwo-ozu-a egube-a

14 Unwunna mu; unubedua be mu maakwaru majia enya; l'iphe, unu maru buepho eme iphe, du ree; l'unu maru iphe, bu uche Chileke okpobe amaru; k'ophu unu suru g'unu a-nodu akpo-ziru nwibe unu uzo.

15 Ole g'o duhabe; o nwekwarupho nwiphe, mu eme ge mu haru nyatachaaru unu; o buru iya meru g'o gude mu haru pfua iphe ono pfushia ya ike; mbu ophu mu atsudu ebvu; ke Chileke mewaru mu eze-iphe-oma.

16 O mewaru mu; mu buru onye-ozu Kereshi Jizosu; ge mu je ezia ndu abudu ndu Jiu ozi; mu eje ozi, gbaru onye uke Chileke l'ezi ozi-oma ono, shi l'eka Chileke onoya. Oo ya bu ge Chileke anatakwanu ngweja ndu abudu ndu Jiu. L'o buru iphe, Unme-du-Nso e-me g'o buru iphe, e doberu Chileke iche.

17 Oo ya bu le mu a-nodu etukpo onwomu epha ozi, mu ejeru Chileke; eshinu mu le Kereshi tugbawaru buru nanu.

18 O to dukwa iphe, mu atu ama epfupfu, abudu iphe ono, Kereshi gbem mu l'eka mee ono, bu iya bu l'o meru ge ndu abudu ndu Jiu kweta bya aburu ndu emeje iphe, Chileke pfuru. Iphe ono be Kereshi gude opfu onu mu; me iphe, mu eme ememe; mee o du egube ono.

19 O gudekwapho ike k'eme ohumalenya, dugbaa biribiri; me ike ke Unme-du-Nso gude mee ya. Oo ya bu; e shi egube ono mu nodu asaje ozi-oma ke Kereshi ono g'o gbaru l'ekameka; e -shi le Jierusalemu jasu mu rwua Ilirikumu.

20 O buerupho iphe lanu, anoduje evu mu evuvu l'obu bu eje epfu opfu Chileke; ole o to bukwa ge mu je iya epfupfu l'eka a mahawaru ke Kereshi; ge mu ta agbe gbeshi je akpuahaa ulo l'eli okpa ulo, onye ozo tuhawaru.

21 O dua g'iphe, e deru l'ekwo-opfu Chileke su: "Ndu e teke pfsweeru nkiya l'a-huma l'enya. Ndu e teke anuma-swee nkiya be ke nkiya ono e-do enya."

Polu e-je g'ephe le ndu Romu kwee

22 Oo iphe ono meru g'o gude o nweru iphe, kposhichawaru mu ugbo olemole ge mu ta abya agbaphee unu.

23 Obenu le nta-a be eshinu mu jeebewaru iphe, gbaru mu l'ejeje l'uswe iya owa; teme mu nowaa apha olemole, mu shi meta ge mu e-me ge mu bya ge mu l'unu kwee;

24 be mu arikwa le mu e-megha iya nta. Mu aru le mu a-bata me mu -jejeepho Supenu. Mu l'unu kpochoa nwupfu nwanshi g'obu shihu mu ike; unu eduwa mu ro ije; ge mu jeshia eka ono.

25 O -buru ke nta-a bukwa ndu ke Chileke no le Jierusalemu be mu gude iphe ewojeru g'ephe mee eka atsuh phe l'ehu.

26 Le ndu ke Kereshi le Masedoniya; me ndu ke Akaya be chiru idzu; tua iphe g'a nu ndu-nso le Jierusalemu; ndu ophu adudu g'o du phe.

²⁷Ephe tɔkpoo obu phe onyo nu iphe ono. Teme e -jejekpoo ya epfufu be unu maru l'ọ dɔwaa g'ugwo; ephe jiru iya ndu ke Chileke le Jierusalem; le teke o bu le ndu abudu ndu Jiu be ephe le ndu ophu bu ndu Jiu gba mgba l'iphe-oma, shi Unme-du-Nso ono, Kereshi meru nu ndu Jiu onoya l'eka; oo ya bu l'ọ gbaru g'ephe gudeje eku ophu ephe kpataru gude yeru ndu Jiu ono eka.

²⁸Teke mu jechaerupho ozi onoya; nuchae phe pho okpoga ono, a tutaru onoya l'oo-buru mu eje Supenu; mu e-shiwaro bata teke onoya.

²⁹Ophu mu maru bu le teke mu byaru be mu e-me g'iphe-oma, shi Kereshi l'eka dzua unu oke l'eka.

³⁰Unwunna mu; mu arwo unu su g'unu gude k'iswi ehu Nnajiuphu anyi, bu Jizosu Kereshi waa k'eye obu ophu shi Unme-du-Nso l'eka lwubude mu ogo ono. Unu pfuje opfu ehu mu nu Chileke.

³¹Ge Chileke te ekwekwa ge ndu jikaru ozi-oma ono l'alj Jiudiya fuaru mu l'uzo; yefua g'iphe, mu gude eje dukwapho ndu-nso le Jierusalem ree anata.

³²Oo ya bu; o -buru uche Chileke; mu egude ehu-utso byapfuta unu g'anyi l'unu nota; k'ophu oo-buwaruro mu l'unu atuta unme.

³³Ge Chileke ono, emeje ge nchi du doo ono swikwaru unu eswiru g'unu ha. Nokwa g'o du.

Romu 16

Polu ekelegbaa ndu o maru l'ehu l'ehu

¹Mu eme g'unu maru nwanna anyi nwanyi, bu Fibi; onye lejeru Chiochi, no le Kenkiriya ozi.

²Unu gude iswi ehu Nnajiuphu anyi nata iya okpobe anata g'o gbaru ndu-nso l'ememe; unu eyejeru iya eka l'iphe, bukpoo iphe, mkpa iya duru iya l'echilabo unu; l'o yekpookwaru ikpoto nemadzu eka; mekpoo mbedua l'ishi onwomu.

³Unu keleru mu Pirisila yee Akwila; ndu anyi l'ephe tukoru ejeru Kereshi Jizosu ozi;

⁴ndu gude iswi ehu mu loo ishi phe alo. O to bulekwa mu-a l'ekele phe nwekinyi mu k'iphe, ephe meru mu. Iphe, bukotakpoo Chiochi, no l'alj ndu abudu ndu Jiu mgburugburu l'ekelekwapho.

⁵Nokwapho g'unu e-keleru mu Chiochi ono, edzukoje l'ibe phe ono. Unu kelekwaru mu pho Epenitosu; okpobe onya mu, mu yeru obu. Oo ya bu onye vuchakpoo uzo woru onwiya ye Kereshi l'eka le Eshiya.

⁶Unu kelekwaru mu pho Meri; onye jeru anyi ozi jeshia ya ike.

⁷Unu ekelekwapho Anduronikosu yee Jiuniyasu; ndu mu l'ephe bu ndu Jiu lanu bya aburu ndu mu l'ephe shi tuko nodu mkporo. Ephe bu ndu kwatakporu duru onyemonye le nso me a -bya l'eka ndu-ishi-ozi no; teme ephe vuru mu uzo buru ndu ke Kereshi.

- ⁸Unu kelekwapho Ampuliyatosu; onye mu yeru obu l'ime Nnajiuphu.
- ⁹Unu ekelekwapho Ubanosu; onye anyi l'iya tukoru ejeru Kereshi ozi; mekwapho onye ono, mu yeru obu ono, bu Sutakisu.
- ¹⁰Unu kelekwapho Apelisu; onye gudewaa umere iya goshi le ya pfu-shiru ike l'ekwekwe, o kweru ke Kereshi. Unu ekelekwapho ndibe Arisutobulosu.
- ¹¹Unu kelekwapho Herodiyonu onye mu l'iya tukoru buru abubu. Unu ekelekwapho ndu bu l'ibe Nasisosu; ndu nowaa Nnajiuphu l'eka.
- ¹²Unu kelekwapho Tirayifina yee Tirayifosa ndu ejeru Kereshi ozi ejeshikpoo ya ike. Unu ekelekwapho onye mu yeru obu, bu Pesisu; onye jewaru Kereshi ozi jeshikwaa ya pho ike.
- ¹³Unu kele Rufosu onye ono, gbaru iche l'ejeshi ozi ke Nnajiuphu ike ono. Unu ekele ne iya; onye duhukwapho g'o buwaa ne nkemu.
- ¹⁴Unu kelekwaru mu pho Asinkiritosu; waa Fulegonu; waa Hemisu; waa Paturobasu; waa Hemasu; mekpowaro unwunna ozo, ephe l'ephe tukoru nodu l'eka ono.
- ¹⁵Unu kele Filologosu; waa Jiuliya; waa Niriyosu; waa nwune iya ke nwanyi; waa Olimpasu; mekpowaro iphe, bukotakpoo ndu-nso, ephe l'ephe no l'eka ono.
- ¹⁶Unu kelekwa nwibe unu ekele; nmata phe akpa, du nso. Ndu ke Kereshi, no l'iphe, bukota Chiochi l'opu ekelekwapho unu ekele.

Iphe, unu e-meje

- ¹⁷Unwunna mu; mu arwokwa unu arworwo su g'unu letakwa enya m'obvu ndu ono, anoduje eme g'ekwo du onoya; ndu egudeje egube ono agbaghashi iphe, Chiochi kwetaru l'o bu okpobe-opfu. Iphe, ephe anoduje eme be yee iphe ono, e ziru unu ono ta adagbajedu. Unu kpakwaru phe l'aphara.
- ¹⁸Kele ndu eme udu iphe ono ta abukwa Nnajiuphu anyi, bu Kereshi be ephe ejeru ozi; o kwa iphe, ekpiri iya du phe be ephe eje ozi iya. Ephe eteje manu l'opfu; gude ire mecha mecha edepushi ndu enwezidu egomunggo.
- ¹⁹Ole onyemonye tukoru maru g'unu emeberu iphe, ozi-oma ono pfuru. O buru iphe ono meru g'o gude ehu nodu anoduje atso mu utso. Ole o du mu g'a su g'unu gudeje mmamiphe majeru iphe, bu iphe, du ree; sefuje eka l'iphe, adudu ree.
- ²⁰Chileke onye bu iya be nchi-adu-doo shi l'eka taa noekwa odu g'o to mee g'unu zopyashia Nsetanu l'okpa. Ge Nnajiuphu anyi, bu Jizosu Kereshi mekwaaru unu eze-iphe-oma.
- ²¹Timoti, mu l'iya tukoru eje ozi-a; l'ekelekwapho unu. Lusiyosu; waa Jiasonu; me Sosipeta phe; ndu anyi l'ephe tukoru buru abubu l'ekelekwapho unu.
- ²²Mbedua, bu Teshiyosu, l'ede ekwo-ozia; bya aburu onye unu l'iya tugbaru nanu l'ime Nnajiuphu l'ekelekwapho unu ekele.

²³Gayosu-a, mu bu l'ibe iya-a; teme o buru l'ibe iya be Chiochi l'ophu edzukoje-a; l'ekelekwapho unu-o! Nokwapho ge Erasutosu; mbu onye owa-a, bu iya edobejeru oha okpoga phe-a; l'ekelekwapho unu yee nwanna anyi, bu Kwotosu.

²⁴Ge Nnajiuphu anyi, bu Jizosu Kereshi meeru unu g'unu hakota eze-iphe-oma. Nokwa g'o du.

Aja Chileke ajaja, Pofu gude kpochia ozi ishi

²⁵G'anyi jaa Chileke ajaja; l'oo ya l'a-du ike mee g'unu pfuru pfushia ike l'ekwekwe, unu kweru nkiya. O buru ozi-oma ono, mu ezi ono be oogudeje eme g'unu pfushia ike ono; mbu ozi-oma ono, l'epfu ke Jizosu Kereshi onoya; bya egoshikwapho iphe ono, e shi domia edomi ono, a phuru l'ophulenyia eshi l'edenwede ono.

²⁶O buru iphe ono be o gbete nta-a bya emee g'a maru. Nta-a be okpobe-opfu ono shiwaa l'iphe, ndu mpfuchiru Chileke deru bahu g'ite; a numa-dzuru iya. Nta-a be Chileke ono adudu teke aa-su l'o shi; ophu o dudu teke aa-su l'o noo teke onono-beru ono; ziru e woru okpobe-opfu ono mee; ohamoha mgburugburu madzuru iya; k'ophu ee-kwetadzuru meje iphe, o suru g'e mee.

²⁷G'e shi Jizosu Kereshi l'eka jaa Chileke ajaja; mbu onye lanu ono, bu yebedua nwekiya bu Chileke; teme o buru iya nwekinyi iya nwe ke mmamiphe. G'a jaa ya jasuru le tuutuutuu le mijimiimii. Nokwa g'o du.

1 Kọrentu

1 Kọrentu 1

¹Qwaa bụ ẹkwo-ozì, mụbe Pọlu ede; mbụ onye onọ, Kéreshi Jizọsu kuru bya emee ya ọ bụrụ onye-ishi-ozì iya. Ọ bụrụ g'ọ bụ uche Chileke bụ onọ. Onye mu l'iya tukurú ede ẹkwo onọ bụ nwanna anyi, bụ Sosutenisu.

²Ndu eede iya anụ bụ ndu Chiochi ke Chileke, bụ ndu ọphu nọ le Kọrentu; gude iya ekele unube ndu Chileke doberu iche g'unu bụrụ ndu dọ nsọ opfu l'unu le Jizọsu Kéreshi tugaru bụrụ nanu. Eedekwa iya pho anụ onyemonye, nọ l'ekameka, bụ ndu abajeru Nnajiuphu anyi, bụ Jizọsu Kéreshi ẹja. Jizọsu onọ bụ Nnajiuphu phe bya aburu Nnajiuphu anyibedua kwapho.

³Gẹ Chileke, bụ Nna anyi; me Nnajiuphu anyi, bụ Jizọsu Kéreshi meeru unu eze-ipe-oma; mekwaapho gẹ nchi dọ unu doo.

Ekele k'ipe-oma, shi l'eka Kéreshi

⁴Mu anọduje ekeleru unu Chileke mu ekele k'eze-ipe-oma, o shi l'eka Kéreshi Jizọsu emeru unu.

⁵L'unu le Kéreshi tugaru bụrụ nanu; unu shi egube onọ baa eze l'iphemipe, shi iya l'eka. Unu tuko opfu onu magbuaru tuko mmamipe magbuaru.

⁶Ozi ke Kéreshi onọ be e mewaru ọ noshia unu okpobe ike l'obu;

⁷k'ophu bụ l'ọ to dudu iphe, bụ iphe Unme Chileke anu anunu me nanu, duru ophu duru unu uko; mbu g'unu nọ ngabe teke Nnajiuphu anyi, bụ Jizọsu Kéreshi a-lwa azu goshi onwiya l'odu-biribiri iya.

⁸Jizọsu onọ e-me unu g'unu shihu dundu dundu nno jasọ l'ikpetemazu. Ọo ya bu; g'ọ to dọ ẹka aata unu uta mboku onọ, Nnajiuphu anyi, bụ Jizọsu Kéreshi e-kpe ikpe onọ.

⁹Chileke apfushijekwa ike l'ipe, o pfuru. Ọ bụrụ Chileke onọ be kuru unu g'unu le Nwa iya, bụ Jizọsu Kéreshi bya bya aburu nanu gbaru mgba l'iphemipe; mbu onye buhukwapho Nnajiuphu anyi onọ.

Ekwo, dọ le Chiochi

¹⁰Su-a; ọ kwa Nnajiuphu anyi, bụ Jizọsu Kéreshi be mu nọ l'eka arwo unube unwunna anyi su g'unu wuje onu nanu g'unu hakota l'iphemipe, bụ iphe unu epfu. Ọo ya bu g'ekwo ta adu l'echilabo unu. Unu tugaru buri nanu okpobe aburu. G'egomunggo buri unu nanu; idzu unu abujeru nanu.

¹¹Unwunna mu; l'ipe, mu epfu onọ bukwa le ndibe Kuloyi byaakwaru akoru mu koruaru mu iya ali su l'unu kwaru le ntumego.

¹²Mbu l'ipe, mu epfu bu l'a suru l'unu anoduje adzakashi iya. Onye ophu asu le ya laru Pọlu; onye asu le ya laru Apolosu; onye asu le ya laru Pyita; onye asu l'ọo Kéreshi be ya laru.

13? A gbenu keshiwa Kéreshi ekeshi? ? Bụ Pọlu bę apfugburu l'oswebe l'iswi ęhu unu? Tọo ? bụ ępha Pọlu bę e gude mee unu baputizimu?

14Mu ekele Chileke ekele l'ọ -tọ bụ Kirisupọsu yęe Gayọsu mę mu asụ l'ọ tọ dudu g'unu ha mę onye lanụ mu meru baputizimu.

15Oo ya bụ g'ọ tọ dụ onye a-sụ l'e gude ępha mu mee ya baputizimu.

16Aa! Ndu mu mefuaru baputizimu bụ Sutifanasu yęe ndibe iya. O to doduru mu ęnya l'ọ dubaaru ndu ozo, mu meru baputizimu abudu ndu ono.

17Kéreshi ta abukwa baputizimu bę o yeru mu gę mu bya emeje. Iphe, o ziru mu gę mu bya emeje bukwa gę mu zije ndiphe ozi-oma ono. Gę mu te egudekwa opfu, egoshi mmamiphe ndiphe zi iya; a -nonyaa ọ turwua ike, dụ l'anwuhu, Kéreshi nwuhuru l'oswebe.

Kéreshi bụ ike bya aburu mmamiphe, shi l'ęka Chileke

18L'opfu k'anwuhu Kéreshi l'oswebe ono bę bukwa iphe-eswe l'ęnya ndu ala l'iswi; obenu l'anyibe ndu a dzotaru bę ọ bụ ike, shi l'ęka Chileke.

19L'e dekwaru sụ: “Mmamiphe ndu maru iphe bę mu e-mebyishi emebyishi! Mu emee nkwamenya ndu manukaru iphe l'ọ buru iphe-mmanu. ”

20Sụ-a; ? bahunu awe bę ndu mmamiphe pfuru nta? ? Bụ awe bę ndu edeje ękwo pfuru? ? Bụ awe bę ndu maru opfu lę mgboko-a pfuru? ? Chileke te emeadaru gę mmamiphe, ndiphe buru iphe-eswe?

21A makwaru-a lę Chileke meru nemadzu k'ophu oo-shi lę mmamiphe, ọ nuru iya maru iya; obenu lę nemadzu te egudedu iya maru iya. Noo g'ọ shitaru Chileke sụ lę ya e-shi l'iphe ono, ndu maru iphe suru l'ọ bụ iphe-eswe ono, bụ iya bụ k'ozima ono, anyi ezi ono; gude dzọo ndu kwetarụ nụ.

22Ndu Jiu bę bụ iphe-ohumalenya bę ęphe suru g'e goshi phe; ndu Gurisu bukwanuru mmamiphe bę ęphe achọ.

23Obenu l'iphe, anyibedua ezi ozi iya bụ l'a kpopyaberu Kéreshi l'oswebe. Ono buru upfu, adu ndu Jiu l'okpa; bya aburu iphe-eswe l'ęnya ndu abudu ndu Jiu.

24Obenu lę ndu Chileke kuru; mbu ndu Jiu mę ndu abudu ndu Jiu; bę Kéreshi ono bụ ike Chileke bya abukwarupho mmamiphe shi l'ęka Chileke.

25L'iphe, Chileke eme; ọ dụ ęhu-eswe ęhu-eswe; gbekwa ka mmamiphe ndiphe shii; teme iphe, gbę dụ g'ọ bụ Chileke arwuhu kakwapho unwu-eliphe ike.

Gę Chileke emeje iphe iya

26Oo ya bụ lę-a; unwunna mu; unu nyatajekwa iphe unu shi buru teme Chileke kua unu. Unu te eshidu dụ igwe marwua iphe gę ndiphe, maru ękwo amajeru iya; ophu unu eshidu dụ igwe nweru ęnya; ophu ndu shi l'oke amadu eshidu baa ishi.

²⁷Obenu lẹ Chileke hotaleru-a iphe, dū ẹhu-eswe ẹhu-eswe l'ẹnya ndiphe; gude mee ndu maru iphe iphe-iphere. Ọ bya ahotakwapho iphe, rwuhuru arwuhu l'ẹnya ndiphe; gude mee ndu okpehu dū iphe-iphere.

²⁸Chileke hotaru iphe, ẹnya lwaru l'eliphe; mbu iphe, ndiphe agubeduru iphe, iphe, ẹphe suru l'ọ tọ dudu iphe, ọ bu; ọ hota iya gude mee iphe, ndiphe riru l'ọ bu okpobe iphe g'ọ tọ dū iphe, ọo-bu.

²⁹Ọo ya bu g'ọ tọ dū nemadzu, e-je aba abaa l'iphu Chileke.

³⁰Obenu l'unubedua be Chileke mewaru unu lẹ Kéreshi Jizosu tugba buru nanu; teme ọ byakwapho emee ya; ọ buru mmamiphe k'anyibedua. Ọo ya be o shi l'eka; ọ buru iya bu l'anyi aburu ndu pfuberekoto l'iphu Chileke. Anyi shi iya l'eka buru ndibe Chileke; bya aburu ndu a gbataru l'iphe-eji, pyitaru anyi l'ekpiri.

³¹Ọo ya bu g'oo-buru iphe, ekwo-opfu Chileke pfuru su: “Onye ọ dū g'ọ baa abaa; g'onye ono nodu Nnajiuphu l'eka ba iya.”

1 Kọrentu 2

Kéreshi l'oswebe

¹Su-a; unwunna mu; teke mbu ono, mu byapfutaru unu bya unu ezi ozi-oma ke Chileke ono, a makharu l'ọ bu okpobe-opfu ono; mu te egudekwa opfu mecha mecha zia ya unu; ophu mu abyakwaru unu egoshi lẹ mu nwuru ekwo buru ọ-maru-ọ-machata.

²Lẹ mu pfukpoakwaru su lẹ mu e-mekiritakpooro l'echilabo unu g'ọ tọ dudu iphe, mu maru; gbahaa Jizosu Kéreshi kpeekpu, bu iya bu onye a kpopyaberu l'oswebe.

³Ozo bu lẹ teke ono, mu l'unu shi nodu ono be ike adudu mu; teme ndzu shi nodu agushikwa mu pho ike; teme ẹhu shi etehukwa mu pho etete shii.

⁴Ophu iphe, mu pfuru epfupfu me ozi, mu ziru ezizi, abudu iphe, mu gude ire mecha mecha k'ophu manukarunu pfua g'eeshi g'ee-kweta iya. Ọ chia iphe, meru nu bu lẹ mu goshiru unu l'oo Unme Chileke yee ike ke Chileke ere ire l'opfu ono;

⁵k'ophu ekwekwe, unu kweru ke Kéreshi tee shidu lẹ mmamiphe nemadzu; g'ọ shichia l'ike ke Chileke.

Mmamiphe Chileke

⁶Ole-a; ọ bujekwaru-a; mu lẹ ndu kawaru ẹnya l'iphe ke Unme Chileke nodu epfu; mu egude mmamiphe epfu eyeru phe. Ole ọ tọ bukwa mmamiphe ophu shi l'eka ndiphe; ophu ọ bukwa mmamiphe ophu shi l'eka ndu eze ndu mgboko l'ophu; ẹphebedua be Chileke emewaa ike phe g'ọ buru iphe-mmanu.

⁷Mmamiphe ophu mu egudeje epfu bukwa mmamiphe ophu Chileke shi domia edomi; mmamiphe ophu o meru ge ndiphe ta ama. Mmamiphe ono bu lẹ Chileke tubuhakpowaruro teme o mee mgboko; l'anyi l'iya a-gbaru mgba l'odu-biribiri iya.

⁸Mmamiphe k'ono ta adukwa ndu bu ndu-ishi le mgboko-a mgburugburu maru iya nu. Ome ephe maru iya; m'ephe te eje akpopyabe Nnajiuphu ono l'oswebe; mbu Nnajiuphu ono, yee Chileke gba mgbal'odu-biribiri iya ono.

⁹Obenu l'e deru l'ekwo-opfu Chileke su: "Iphe enya ahumajeduru; ophu nchi ahumajeduru iya; ophu o dudu onye egomunggo rwujeru l'oo-mee; be Chileke meru doberu ndu yeru iya obu."

¹⁰Chileke gbewa l'eka Unme nkiya goshi anyi iphe ono, o shi domia edomi ono. Le Unme Chileke avofutajekwa iphemiphe, bukpo iphe, e domiru edomi je akpachaa l'idzu, Chileke chiruro l'ime obu iya k'ememe dobe.

¹¹Le-a; ? bu onye maru iphe no nwibe iya l'obu? ? Tobudu o nonu maru iphe, du l'obu nkiya. Nokwapho g'o to dudu onye maru iphe, no Chileke l'uche a -gufu Unme Chileke.

¹²Su-a; o to bukwa unme ndiphe be anyi nataru; o kwa Unme, shi l'eka Chileke be anyi nataru, bu iya bu Unme, l'e-mekwanu g'anyi makotaru iphe-oma, Chileke meshiru anyi.

¹³Oo ya bu le-a; l'o to bukwa opfu, e gude mmamiphe ndiphe zia anyi be anyi egudeje epfu iphe ono. Iphe, anyi egudeje epfu iya bukwa opfu, Unme Chileke ziru anyi. Oo ya bu g'anyi ewojeru okpobe-opfu, shi Unme Chileke l'eka akoru ndu Unme Chileke bu l'ehu g'o doo phe enya.

¹⁴Onye Unme ke Chileke ta anodu l'ehu ta anatajekwa iphe, shi l'eka Unme Chileke; kele iphe ono aduje iya ehueswe ehueswe l'enya. Teme ophu o dojedu iya enya eshinu o to byadu amaru urwu iya me o budu le Unme Chileke, no l'ime iya eyeru iya eka.

¹⁵Obenu l'onye Unme Chileke bu l'ehu; amajeru urwu iphemiphe; ophu nemadzu mmanu adujekwanu ike maru iphe onye ono eme.

¹⁶Oo ya bu iphe, e deru l'ekwo-opfu Chileke su: "? Bu onye maru uche Nnajiuphu, bu Chileke? ? Bu onye be bu onye adu ike kaju iya iphe, oo-me? " O bekwanu l'anyibedua nweru uche ke Kereshi, bu iya emeje g'anyi ri oriri g'oori.

1 Korentu 3

Ndu ejeru Chileke ozi

¹Unwunna mu; mu ta adukwa ike pfuaru unu opfu, eepfuru ndu Unme Chileke bu l'ehu. Opfu, mu pfuru unu bukwa opfu, eepfuru ndu emekwadu umere ndiphe; mbu ndu bukwadu nwaswa l'iphe ke Kereshi.

²Noo g'o gude mu chee unu era; ophu mu ededuru unu nri eshinu unu eshidu suwaru k'eriri iya. Mbu le nta-a be unu teke asukpokwaa ya nu;

³kele unu emekwadua umere ndiphe. Eshinu unu ejikwadu iji-enya; teme unu nodu adzo-phe enya; bya anodu ekpa l'iche iche; ? unu ta amadu l'unu etsokwadu uzo ke ndu mgboko-a; l'unu emekwadua umere ndiphe.

- ⁴L'eshinu unu atukoje epfugbaa su: “Mbɛdua lakwaru Pɔlu.” Onye ophu asu: “Mbɛdua lakwaru Apɔlosu.” ? Unu ta amadu l'unu emekwadu umere ndiphe?
- ⁵Mbu-a; Apɔlosu ono; ? o bu onye? Too Pɔlu; ? o bu onye? O to dukwa ndu ozo, anyi bu gbahaa ndu ejeru Chileke ozi; ndu goshiru unu uzo, unu shiru bya eworu onwunu ye Jizosu l'eka. G'anyi ha nwekotaru iphe, Nnajiuphu suru g'anyi mee.
- ⁶Iphe, anyi meru dukwa g'egube-a, aakuje akpuru oshi-a. O buru mbɛdua be kuru akpuru oshi obu akuku; Apɔlosu gbaa ya mini. O bukwanuru Chileke bu onye meru g'o vua evuvu.
- ⁷Oo ya bu l'onye kuru akpuru oshi; me onye gbaru iya mini ta adukwa iphe, ephe pfube buru. O kwa onye bu iphe bu Chileke, bu iya bu onye meru iya g'o vua.
- ⁸Onye kuru iphe akuku me onye gbaru iya mini tukokwaru eje ozi lanu. Ole g'ephe ha l'ehu l'ehu be Chileke e-bukwa nggo; onye jeru g'o jeru be oo-bu nggo g'ozi, o jeru gbaru.
- ⁹L'o kwa Chileke be anyi l'iya tukoru gbaru mgbaja eje ozi ono. Unubɛdua bu opfu, Chileke koru bya aburu ulo, Chileke akpu.
- ¹⁰Mu gude iphe-oma, Chileke yeru mu l'eka ge mu gude jeeru iya ozi mee iphe, onye maru akpu ulo okpobe akpukpu emeje. Mu turu okpa-ulo; onye ozo nodu akpukwanu ulo obu akpukpu. Ole g'onye akpu g'okpu; letakwa enya maru iphe, okpu l'eli okpa-ulo obu.
- ¹¹Noo kele o to dukwa onye ozo, atubaa okpa-ulo ozo abudu ophu a tɔwaru, bu iya bu Jizosu Kereshi.
- ¹²L'eli okpa-ulo ono be o duru ndu e-gude mkpola-ododo akpu iya ulo; ndu egude ope; ndu egude mkpuma, aswa du; o dukwarupho ndu bu oshi be ephe e-gude akpu nkephe; ndu egude eji; ndu abukpooruro eta be ephe e-gude akpu nkephe.
- ¹³Obenu l'onymonye be aa-maru g'iphe, o gude kpua nkiya du-be ree mboku ikpe ono, Chileke e-woru iya tua jala onoya. L'oku, e-tsu mboku ono be bu o -tsuchaa; aa-huma ozi, onymonye jeru iphu. Oku ono e-tsu iya hua ya ama goshikwanu g'o gbaru.
- ¹⁴Onye oku ekeduru iphe, o gude kpua ulo l'eli okpa-ulo ono; Chileke ebua ya nggo.
- ¹⁵Onye oku keru nkiya; l'oolaarua iya l'iswi; yebɛdua l'ishi onwiya b'aa-dzotakwa-a; ole adzota nkiya a-dutabewa g'onye a lofutaru l'oku enwunwu.
- ¹⁶? Unu ta amadu l'unu bu eze-ulo Chileke; le Unme Chileke be bu ebubu l'ime unu?
- ¹⁷Onye emebyi eze-ulo Chileke be Chileke e-mebyikwapho. L'eze-ulo Chileke dukwa nsu; o buru unubɛdua gedegede bu eze-ulo iya obu.
- ¹⁸G'o to dukwa g'unu ha onye anoduje agho-pheru onwiya ugho. G'onye ari le ya maru iphe l'ogbo owa-a; hakwaa egube oriri ono bya aburu onye-eswe; e -mechaa g'oo-buru onye maru iphe okpobe amaru.

¹⁹Kele iphe, ndiphe guberu mmamiphe le mgboko-a be bukwa iphe-eswe l'iphu Chileke. L'e dekwaru l'ekwo-opfu Chileke su: "Oo Chileke bu onye anmataje ndu kwaru enya le nkwananya phe."

²⁰A bya edekwaa ya pho l'ekwo-opfu Chileke su: "Nnajiuphu makwaru-a l'egomunggo ndu maru iphe bu mkpokpo iphe."

²¹Oo ya bu; g'o to dukwa onye e-gudeje nemadzu aba abaa. L'e -pfujekpo ya nu epfufu; iphemiphe tukokwaru buru iphe unu iphe unu;

²²me Polu-o; me Apolosu-o; mekpoo Pyita-o; mgboko l'ophu; me ndzu me onwu. Iphe nta-a me iphe e-me l'iphu; iphemiphe ono tukoru bukotaru iphe unu.

²³Unubedua tukokwanu bukotaru iphe ke Kereshi; Kereshi bukwannuru ke Chileke.

1 Korentu 4

Iphe ndu-ishi-ozu Kereshi egoshi anyi

¹Su-a; unu te edobejekwa anyi g'anyi bu ndu ozo gbahaa ndu-ozu Kereshi; ndu Chileke yeru g'ephe letaje enya l'opfu Chileke ono, bu opfu ophu Chileke shi domia edomi ono.

²Iphe, eele enya iya l'eka onye eleta ndu-ozu enya bu g'o buru onye e gude ire iya aka.

³Mu ta akpakwa ishi l'unu doberu mu nno; ozo le nemadzu kperu mu ikpe k'ozu, mu jeru; mbedua l'onwomu ta adukpokwanu teke mu suseru l'o waa ge mu du;

⁴o noo kele o to dudu iphe, mu humaru onwomu l'ehu, bu iphe, mu a-su l'o noo aka mu shiswewaru uzo; ole o to bukwa iphe ono goshiru le mu kpefuwaru. Oo Nnajiuphu bu onye e-kpe mu ikpe.

⁵Oo ya bu g'unu ta adushi onye unu a-nodu anmawa ikpe l'ebe 'oko ruw teke aa-nma ikpe; ikpe bu teke Nnajiuphu a-bya; l'o kpee ya. Noo teke oo-wofuta iphe, e shi domia l'ochii bya edobe l'iphoro; l'o bya eworu iphe, amadu chiru k'ememe, bu iphe, du iya l'okpoma; woru tua jala. Noo teke Chileke a-ja onyemonye ajaja, rwuberu iya nu.

⁶Unwunna mu; o kwa g'e-shi g'o doo unu enya be mu gude woru iphemiphe ono dobe l'ehu mu le Apolosu; g'unu anwuta iphe ono, e pfuru su: "Unu te etsoghatajekwa iphe, e deru l'ekwo-opfu Chileke." Su-a; g'o to dukwa g'unu ha onye egudeje onye lanu eku onwiya; woru onye ophu nmaa phulaphula.

⁷Su-a; ? bu onye mekpoo ru ngu i ka onye ozo? ? Bu gunu be i nweru 'abudu iphe, Chileke nuru ngu? Eshinu o bu Chileke nuru ngu iya; ? denukwanu g'o gude i gbegude iya eku onwongu g'o -bu l'o to buedu iphe, a nuru ngu anunu?

⁸Epho gbeg jichaakwanu unu! Unu gbekwa nwekotawaru nu iphemiphe; buchawaru nu ndu eze; ebe anyibedua abudu. O dukwa ree. O gbekwanu du mu g'a su l'unu buchawaa eze obu; me anyi abya g'anyi l'unu tukoburu iphe.

- ⁹Obenu l'ò dukwa mu g'anyibe ndu-ishi-ozì Kéreshi bẹ Chileke woru dobe l'ikpazu. Anyi nòwaa gẹ ndu e doberu k'apfù-gbu; mbù g'anyi bùru iphe, mgboko mgburugburu, a-byajẹ ahùma ahùma; mbù ndiphe mẹ ụnwu-ojozi-imigwe.
- ¹⁰Anyi gude opfu ẹhu Kéreshi bùru ndu eswe; unubèdua gbẹwanu l'ẹka Kéreshi bùru ndu maru iphe. Anyi dù arwùhu; obenu l'unubèdua gbenu shihu ike! Anyi bụ ndu a nmaru phulaphula; obenu l'unubèdua bẹ a gbẹ kwabẹ ùbvù.
- ¹¹Sù-a; ẹgu anòdujekwa agù anyi; mbùkwa byasù nta-a; ẹgu mini nòdu anòduje agù anyi; anyi nòdu anma nkìrika ẹkwa; a nòdu etsu anyi iphe; anyi tsoru ẹkameka aghaphe; ọphu anyi enwedu unuphu.
- ¹²Anyi gbẹ gude ẹka anyi ese akanya g'anyi e-meje anu onwanyi nri. Teke a turu anyi onu; anyi agoru onu-oma nu onye obu. A -nòdu akpa anyi ẹhu; anyi ataru iya nshi.
- ¹³Teke e pfubyishiru ẹpha anyi; anyi epfuru opfu bebebebe nu onye obu; anyi gbẹ bya abuwaru ikpozu kẹ ndiphe; mbù iphe, dù ideyideyi, e gude ẹza zafu l'ẹkameka; byasù l'eswe, dù gẹ ntanu-a.
- ¹⁴Iphe, mu ederu unu iphe-a ta abukwa g'o mee g'iphere dù unu. O kwa ẹka bẹ mu aloru unu lẹ nchi; l'unu bụ unwu mu, mu yeru obu.
- ¹⁵L'unu -nwechakpokwaaru m'obeta o buri unubuku ndu eleta unu enya l'uzo kẹ Kéreshi; nna unu ta adukwa igwerigwe. O kwa mbedua bu nna unu, nuru unu ndzu, shi l'ẹka Kéreshi; eshinu o bu mbedua byaru ezia unu ozi-oma ono.
- ¹⁶Noo g'o gude mu nòdu arwo unu arworwo su; jiko unu tsoru ẹka mu.
- ¹⁷O kwa iphe ono meru g'o gude mu zia Timoti su g'o byapfuta unu. Timoti ono bẹ eshinu mu ziru iya etso Nnajiuphu bẹ o buwaa nwa mu, mu yeru obu; teme o buri onye goshiwaru lẹ ya gbaru gẹ mu gude ire iya ẹka. Sù-a; g'o byapfuta unu bya anyatabaaru unu gẹ mu egudeje etso uzo kẹ Kéreshi ono; mbù gẹ mu ezije iya l'iphe, bukpo Chiochi g'o ha l'ẹkameka.
- ¹⁸O duru ndu gbẹ hawaru nu eku onwophe; g'o bu lẹ mu ta abyadu alwabaa azu lẹ ndu-unu.
- ¹⁹Ole a taa nòdu ọdu; mu abyapfuta unu; mẹ Chileke kwenu. Noo teke mu a-huma iphe, ndu ono, eku onwophe ono a-du ike mee; ọọ ẹphe bu o-pa-onu.
- ²⁰L'iphe, bu lẹ Chileke bu eze ta abukwa opfu, eepfu l'onu; o kwa iphe, gude ike ere ire.
- ²¹? Bu ole ka unu ree? ? Mu gude echachi byapfuta unu? ? Ọọ gẹ mu gude obu-iphoro waa ewoze onwonye ali bya?

1 Kọrentu 5

Urwu-ali, haru du le Chiochi

- ¹Sụ-a; mu anụkwa l'unube ndu Chiochi haru arwu urwuali. L'ejo urwuali, unu haru arwu du-be eji; k'ophu bu le ndu 'amadu ekemu Chileke ta atukpodanu ama ememe iya; ke ge nwoke duta nyee nna iya wata alulu.
- ²Unu nodu ekukwapho onwunu; o buru iphe, unu gege agbe agu aphu. Unu wuchikwaa onye ono ewuchi; g'o to noduhekwa l'echilabo unu.
- ³L'a makwaru-a le mu ta anodu l'eka unu no ono; k'ophu unu ele mu enya; obenu l'obu mu nokwa-a l'eka unu no. Noo g'o gude mu gude ike ke Nnajiuphu anyi, bu Jizosu Kereshi nmaa onye ono, meru ebyi ono ikpe g'o bu le mu l'unu no l'eka ono.
- ⁴Sụ-a; unu -nokobeepho; teke ono obu mu anodukwapho l'eka ono, unu no ono; ike ke Nnajiuphu anyi, bu Jizosu a-nodukwapho l'eka ono, anyi no ono;
- ⁵unu woru onye ono ye Nsetanu l'eka g'o mebyia ogwehu iya; l'o noo iphe, gbaru iya nu bu ono. Oo ya bu ge Chileke a-dzoo ndzu iya mboku, Nnajiuphu a-bya.
- ⁶Sụ-a; ekuku, unu eku onwunu ta adukwa ree. ? Unu ta amadu l'oo nwochileka iphe, ekoje buredi be asujeru ekoli ishi buredi ophu?
- ⁷Unu to nwehu sashia akahu iphe-ekoje-buredi ono, g'unu aburu buredi ophuu, e te eyeduru iphe, ekoje buredi. Noo kele nwaturu Ojaghata ono, bu Kereshi be e gbuakwaru.
- ⁸Nta-a buakwaa g'anyi wata abo obo-iphe ono g'o gbaru. G'anyi te egudekwa buredi ophu akahu iphe-ekoje-buredi ono du, bu iya bu ejo-iphe yee iphe-ashi gude bo ya. O kwa g'anyi gude buredi ophu iphe-ekoje-buredi adudu ililekpo bo ya, bu iya bu anodu ndzu ophu ntucha adudu ilile waa l'eme ire-lanu.
- ⁹Mu dehaakwaru unu ekwo su unu g'unu le ndu eme ke nwoke me ndu eme ke nwanyi te emegbajekwa.
- ¹⁰Ndu mu epfuru unu ta abukwa ndu 'amadu Chileke, eme egube iphe ono; ozoo l'oo ndu enya-pfurupfuru; ozoo ndu ana nfu; ozoo ndu agwo nshi. Ndu k'ono be unu -jeshia phe ezeru; buanaa iphe, gbaru unu l'ememe bu g'unu lufuepho le mgboko alufu ophu.
- ¹¹Iphe, mu shi epfu bukwa g'unu bujeru ubara yeru onye kuru onwiya nwanna teme o gbememe ke nwanyi; ozoo eme ke nwoke; ozoo nweru enya-pfurupfuru; ozoo l'oo gwo nshi; ozoo l'oo onye evu onye ozo nvu azu; ozoo l'oo onye angugharu mee eka; ozoo onye ana nfu. Oo egube onye ono be mu sukwarupho g'unu l'iya te erigbajeshi nri.
- ¹²O -buru ke ndu amadu Jizosu; ? nkemu bu l'ole; k'eje phe anma ikpe? ? Tobudu ndu ophu no l'ime Chiochi be o gbaru anyi l'ekpe ikpe?
- ¹³Obenu le ndu ophu anodu l'ime Chiochi bu Chileke e-kpe phe ikpe. Oo ya bu le-a; "Unu chifujekwa onye njo l'echilabo unu."

1 Korentu 6

Agbaru unwunna ekwo

- ¹? Denu g'o gude o nodu abujeru teke o bu l'o nweru g'unu ha onye opfu adaru yee nwibe iya; l'o gbę paru iya jepfushia ndu apfubeduru eka oto g'ephe kpee; ephe ta apafudu iya ndu-nsọ ibe phe?
- ²? Unu ta amadu l'oo unube ndu-nsọ bu ndu e-mechaa kpee ndiphe l'ophu ikpe? Eshinu o bu unu e-kpe ndiphe l'ophu ikpe; ? unu ta akabedu suru ekpe unwu iphiriba ikpe onoya?
- ³? Unu ta amadu l'oo anyibedua be l'e-mechaa kpee unwu-ojozi-imigwe ikpe? O buchiaru nu opfu k'eliphe be unu ta adudu ike kpeshia.
- ⁴O -buru l'egube opfu ono duru unu; ? denu g'o gude unu gbę ewotaje iya eje edoru ndu unube Chiochi suru l'o to dudu iphe, ephe bu?
- ⁵Iphe, mu gude epfu iphe-a bu g'iphere iya du unu. ? To dukpoda g'o ka mma l'oo onye lanu l'echilabo unu; bu onye maru iphe k'ophu oodojeru unube unwunna ono opfu?
- ⁶O gbę abujeru nwanna -gbęshi l'oo-je agbaarụ nwanna iya ekwo l'iphu ndu ta amadu Chileke.
- ⁷Agba ekwo ono, unu anoduje agbaru nwibe unu ono buakwaa iphe, du eji be unu anoduje emeta ekpu onwunu. O shitachia ono; ? bu gunu kparu iphe, unu ta adujedu ike taa nshi me e -mee unu eji? ? To kachidaa ree g'o buchiaru l'oo unubedua be onye ozo gbęchia gude ugho emekputa?
- ⁸Unubedua l'onwunu gbę anoduje eme nwibe unu eji; gude ugho eme nwibe unu iphe, apfuduru-oto; l'eka nwibe unu ono buhukwapho unwunna unu.
- ⁹? Unu ta amadu le ndu apfubeduru-eka-oto be uzo aduduru l'eka Chileke bu eze? Unu te ekwekwa g'e duru unu ghaa uzo. Ndu urwuali; me ndu agwo nshi; me ndu eri ogori; me onye nwoke araje nwoke ibe iya;
- ¹⁰me ndu-oshi; me onye enya-pfurupfuru; me ndu angughajeru mee eka; me ndu evuje nvu azu; me ndu ana nfu; ta adukwa g'ephe ha me onye lanu, abahu l'eka Chileke bu eze.
- ¹¹O buru g'unu shi haru duchaa bu onoya. Obenu le Kereshi safuwaru unu iphe-eji unu; bya emee unu ndu ke Chileke, dueberu Chileke ree. O buru l'eka Jizosu Kereshi, bu Nnajiuphu waa l'eka Unme-du-Nso be Chileke shi gua unu le ndu pfuberekoto l'iphu iya.

Ēhu ngu l'ophu bu ke Chileke

- ¹²“Iphemiphe be a haru mu uzo ge mu meje g'o du mu.” Ole o to bukwanu iphemiphe be bu mu -mee ya l'o duru mu le ree. “A haru mu uzo ge mu meje iphemiphe g'o du mu.” Ole mu tee kwekwanu g'o duru iphe, e-wota mu mee ge mu buru ohu iya.
- ¹³“Nri be e mekwaru g'o laje l'epho; bya emee epho ge nri laje iya.” Ole Chileke e-mechakwanaa tuko ephenebo mebyia. Iphe, Chileke medoru ogwehu ta abukwa g'e

gude iya pharwushije onwonye; ọ kwa Nnajiuphu, bu Jizosu be o medoru iya; teme Nnajiuphu l'onwiya bukwarupho Nnajiuphu k'ogwehu.

¹⁴Chileke kuliru Nnajiuphu o shi l'onwu teta dzuru ndzu; ọ bukwarupho nno bu g'oo-gude ike iya kulia anyibedua.

¹⁵? Ọ du g'unu ta amadu l'ogwehu unu bu mpfukata ehu Kereshi? ? Denu ge mu a-gbe wota mpfukata ehu Kereshi jeye l'ehu nwanyi ukpara? Tuswekwa!

¹⁶? Unu ta amadu l'onye jepfuru nwanyi ukpara be ye l'iya tugbawaru buru onye lanu? Eshinu e pfuru su: "Ephenebo l'a-buru onye lanu."

¹⁷Obenu l'onye yee Nnajiuphu, bu Jizosu tugbaakwanaru be ye l'iya bukwapho onye lanu le Unme Chileke.

¹⁸Unu buru ubara yeru apharwushi onwonye. Iphe, bukpo iphe-eji ozo, eemekpo ememe ta adukwa ophu emebyi anu-ehu nemadzu; obenu l'onye apharwushi onwiya l'emebyi anu-ehu iya.

¹⁹? Unu ta amadu l'ogwehu unu bu eze-ulo ke Unme-du-Nso ono, bu l'ime unu ono; mbu Unme-du-Nso ono, unu nataru l'eka Chileke ono? Noo g'o gude ebe ọ buedu unu, nwe onwunu.

²⁰Unu buwaa aswa, Kereshi zuru azuzu. Oo ya meru g'o gude unu je l'egude ogwehu unu ekutse Chileke.

1 Korentu 7

A bya le k'alu nwanyi

¹A bya abya le k'iphe ono, unu deru mu l'ekwo-ozu ono. Iphe, du ree bukwa ge nwoke te ejejeshi alu nwanyi.

²Ọ buwaa g'o to me g'amadu wata eme ke nwanyi meru g'o gude mu su: ge nwoke l'ehu l'ehu lutaje nwanyi k'eka iya; nwanyi nonu eje aluru ji k'eka iya.

³Ge nwoke lajeru nyee ya l'ulo g'o gbaru iya eshinu oolu iya alulu. Nokwapho ge nwanyi a-lajeru ji iya l'ulo g'o gbaru iya l'oo ya bu ji iya.

⁴Le nwanyi, aalu alulu te enwekwa ehu iya. Ọ kwa nwoke nwe ehu nyee ya. Nokwapho g'ehu ke nwoke 'abukwa iya pho nwe iya. Ọ kwapho nwanyi nwe ehu ji iya.

⁵Ge nwoke ta ajikajekwa ejepfu nyee ya; ophu nwanyi ajikajekwa ji iya; gbahakwa l'unu chiru iya achichi su l'oo g'unu haa onwunu ke nwateke ono; k'ophu unu e-woru uche dobe l'epfu anu Chileke okpobe epfufu. Ole teke unu tuburu k'epfu anu Chileke obu bukwapho; unu watakwa akwakwa ozo; ọ -nonyakwaa Nsetanu kwaru unu ye l'iphe, du eji opfu l'unu ta adudu ike esede onwunu.

⁶Ole iphe-a, mu epfuru unu-a bukwa kele mu kwetaru g'o du egube ono; ọ to bukwa l'oo ekemu, a taru atutu dobe.

⁷Lẹ mu -jeshia epfupfu; bukwa iphe, dukporo mbedua ree bu g'a su l'onyemonye du-dzuru ge mu du-a; obenu l'onyemonye nwekotaru iphe-oma, du iche, Chileke seru ye iya l'eka; onye nkiya adu egube-a; onye ophu nkiya aduro g'oo-du.

⁸Su: o -buru ke ndu ta aludu ji me ndu ta aludu nwanyi; me unwanyi ophu ji phe anodedu; ndu k'ono be iphe, mu epfuru phe bu l'o duru phe ree g'ephe noduepho ta aluhe ji; ebe nwoke aluhe nwanyi; nodu ge mu no-a.

⁹Ole o -buru l'ephe taa dudu ike emekota iya; ge nwoke lukwaa nwanyi; ge nwanyi lukwaru ji. L'ono kakwapho mma eme l'anodu taahaa nshi okpehu l'iphe, agushi phe ike.

¹⁰O be le ndu ophu aluwaanu be mu aturu ekemu su; ge nwanyi b'adukwa teke oolufuje libe ji iya. Mbu l'o to bukwa mu atu ekemu obu; o kwa Nnajiuphu anyi, bu Jizosu.

¹¹Teke o bukwanu l'o lufuru; ge nwanyi obu kwakwaa b'aluj ji ozo; odumeka g'o laphukwa azu ge yele ji iya doshia. Ge nwoke ta adukwa teke o-chifuje nyee ya.

¹²A bya le ndu ophu phoduru nu mu su-a; owa-a bukwa mu epfu iya; o to bukwa Nnajiuphu; teke o bu l'onye kweru ke Kereshi alu nwanyi, te ekwedu ke Kereshi; g'onye ono ta achifukwa iya me o -buru le nwanyi obu kweru-a le ye l'iya a-tuko-a nodu alu.

¹³O -bukwanuru l'oo nwanyi, kweru ke Kereshi alu nwoke, ekwedu ke Kereshi; ge nwanyi obu ta alufukwa l'ibe ji iya obu; me o -buru le nwoke obu kweru-a le ye l'iya a-nodu alu.

¹⁴Kele nwoke, ekwedu ke Kereshi bya alu nwanyi, kweru ke Kereshi be shiakwaa l'eka nyee ya buwaru ke Chileke. Nokwapho ge nwanyi, ekwedu ke Kereshi bya alu nwoke, kweru ke Kereshi shiakwapho l'eka ji iya buwaru ke Chileke. O -bu l'o to du nno me unwu unu phe abujeru ndu aaso nsu; obenu le nta-a be ephe dukota nsu.

¹⁵Teke o bu l'onye ophu ekwedu ke Kereshi be suru le ya ta aluedu; g'o hakwaa. Onye nwoke ozoo nwanyi kweru ke Kereshi ono be e tee kebutaekwa ekebuta; eshinu Chileke kuru anyi g'anyi buru le nchi-odu-doo.

¹⁶Mbu-a; gube nwanyi, alu ji; ? denu g'ishiru maru l'e tee shidu ngu l'eka dzoo ji ngu? Too ? denu ge gube nwoke meru maru l'e tee shidu ngu l'eka dzoo nyee ngu?

Aadu ge Chileke doberu onye

¹⁷Oo 'epho g'onyenonu mejeepho iphe, Chileke keru nu iya g'o meje; mejekwa iya pho ge Chileke suru g'o meje iya teke o kuru iya. Ono bu ekemu, mu atu edoberu iphe, bukpo Chiochi, no l'ekameka.

¹⁸Mbu l'iphe, mu epfu bu; g'onye buru ubvu teme e kua ya te ejeekwa eme onwiya onye e buduru ubvu. G'onye ebuduru ubvu te ejeekwa ebu ubvu.

¹⁹Kele e buru ubvu l'e te ebuduru te enweddu iphe, o bu l'iphu Chileke. Iphe, bu iphe bu g'e meje iphe, Chileke karu su g'e meje.

²⁰Oo ya bu g'onyenonu dujeepho g'ọ du teke Chileke kuru iya.

²¹Teke ọ bu l'i bu ohu teke Chileke kuru ngu; ta ayọekwa ọshi. Gbahakwa l'i maru uzo, ii-shi gbaa onwongu; g'i menaa ya nweru onwongu.

²²L'onye Chileke kuru; ọ bya yee Kéreshi bya atugba; teke onye ono bu ohu; g'onye ono nyatakwa le Nnajiuphu towaru iya l'egbu, iphe-eji keru iya. Nokwapho g'onye 'abudu ohu teke Chileke kuru iya byawaru bya aburu ohu Nnajiuphu, bu Kéreshi.

²³Unu buakwaa aswa, Kéreshi zuru azuzu. Oo ya bu; unu ta laekwa azu je aburu ohu ke ndu mgboko-a.

²⁴Unwunna mu; g'onyenonu jiko dujeekwapho g'ọ du teke Chileke kuru iya; g'onye ono noduakwaro l'atugba, yele Chileke tugbaru.

Ndu ata aludu alulu

²⁵A bya l'ehu k'unwanyi, ata aludu ji me unwoke, ata aludu nwanyi; ọ to dudu ekemu, mu a-su le Nnajiuphu turu doberu unu. Obenu le mu e-ye onu, rwuberu mu nu; eshinu e shiwaa l'obu-imemini ophu Chileke aphuru mu; mu buru onye goshiwaru l'ọ gbaru g'unu gude ire mu eka.

²⁶Oo ya bu l'iphe, mu arikuwa bu le ge mkpawere habe shii nta-a be iphe, kakwa ree bukuwa g'onyenonu noduerupho onwiya g'ọ no.

²⁷Teke iluwaa nwanyi; ta achifukwa iya. O bukwannuru l'i ti luada nwanyi; te jeekwa aluta.

²⁸Ole ọ to bukuwa eme iphe-eji me i -je alua nwanyi. Teke ọ bukwannu le nwamgboko jeru je alua ji; ọ to bukuwa iya pho eme iphe-eji. O kwa l'iphe, ọ bu bu le ndu alu nwanyi me unwanyi, alu ji be vu iphe-ehuka ke mgboko-a l'ishi. Ophu ọ dukwanu mu g'a su l'unu dabaru l'iphe-ehuka, du nno.

²⁹Mbu l'iphe, mu epfu unwunna mu; bu le mboku abvukwa. Ge ndu alu nwanyi shiepho nta-a metajekpooro g'ephe ta aludu nwanyi.

³⁰Ge ndu aphu tsoru metajekpooro g'ọ to dudu iphe, atsu phe l'ehu. Ge ndu ehuh atso utso mejekpooro g'ehuh ta atso du phe. Ge ndu nweru aswa, ephe azu metajekpooro g'ọ to dudu iphe, ephe azu.

³¹Teme ge ndu emekpooro iphe, ephe eme le mgboko-a metajekpooro g'ọ to dudu iphe, iphe ono bu. Le mgboko-a, du g'ọ du-a ta aduekwa g'oo-no-beru.

³²Ole iphe, mu eme ge mu karu unu bu g'unu haa ayọ-phe ọshi. Iphe nwoke, ta aludu nwanyi a-nodu epfu buepho ge ya e-me jeeru Nnajiuphu, bu Jizosu ozi, bu iya bu ge ya e-me meje iphe, jiru Jizosu epho.

³³Obenu l'onye alu nwanyi be l'ayọ ọshi iphe mgboko, bu iya bu ge ya e-me meje iphe, jiru nyee ya epho;

³⁴shi nno chita iphe labo ari. Nokwapho ge nwanyi, ata aludu ji me nwamgboko, ta aludu ji du bu onoya; iphe, ephe eyejeru ehuh bukwapho g'ephe e-me jeeru Nnajiuphu

ozi; g'ephe e-me wota ehu phe me oriri phe doberu Chileke iche. Obenu le nwanji, alu ji be iphe, ooyo oshi iya bu oshi iphe mgboko, bu iya bu ge ya e-me mee iphe, jiru ji iya epho.

³⁵Su-a; iphe, mu gude epfu iphemiphe-a bukwa le mu eme ge mu yeru unu eka. Mu te emekwa ge mu sede unu. O chikwaa iphe, mu eme bu ge mu mee g'unu meje iphe, pfuru nhamunha, gbaru unu l'ememe; g'o to du iphe, a-nafuje unu egomunggo l'eje ozi Chileke ono.

³⁶Teke o bu le nwoke, eje alu nwanji nonyaru bya emeahaa umere egoshi le nwanji ono agushikpowa iya ike; teme nwamgboko ono kajiwaa akaji; o duwaa nwoke g'o lua ya; be o dukwa ree g'ephe lua. O to bukwa iya eme iphe-eji.

³⁷Obenu onye obu shihuru ike; o gude obu iya pfua ya pfushia ya ike le yee ya taa kwadu; kele o maru l'o to tsudu iya l'ehu; l'oo-dua ike sede onwiya; o to dukwa eji me onye obu nodu; ebe yele nwanji obu akwadu. Onye ono mekwaru ree.

³⁸Oo ya bu l'onye luru nwanji meru ree. Onye aluduru iya nu kabakwaro eme ree.

Nwanji, ji iya anohedu

³⁹Nwanji, aalu alulu be ji iya nwekwa enwenwe me ji iya -nodukwadu ndzu. Mboku, o nonyawaru ji iya nwuhu; e -shi mboku ono be o to duhedu iphe, gude iya g'o to je aluru onye du iya ree. Ole g'o lukwaa onye ke Kereshi.

⁴⁰Obenu l'ehu gege aka iya atso utso ome o haru alu ji ozo. Nokwa ge mube Polu yeru onu bu ono. Mu nodu arikuwa le Unme Chileke bukwa mu pho l'ehu.

1 Korentu 8

Eri iphe, a gwaru iphe

¹Onu, mu yeru le k'iphe, a gwaru iphe bu le-a; l'a makwaru-a l'unu suru l'anyi tukoru maru iphe. Egube mmamiphe ono emejekwa nemadzu g'o ku onwiya; obenu le nyemobu anoduje emetse emetse.

²Teke o bu l'o duru onye arije le ya maru iphe; onye ono teke amarwukwa iphe g'o gbaru iya l'amama iya.

³Obenu l'onye yeru Chileke obu be Chileke maru.

⁴A bya le k'eri iphe, a gwaru iphe mu su; iphe, anyi makpodaru bu l'o to dudu iphe, bu iphe, aagwa agwagwa me ilile duru iphe, o bu; mbu l'o bukota okorophoo iphe. Anyi makwarupho l'o to duedu Chileke ozo, du nu gbahaa Chileke lanu ono kpoloko.

⁵Kele o duchakpooru nu igwerigwe iphe, eeku agwa, no l'imigwe ozo l'eliphe; g'iphe, e dobegbaaru abaru eja dunaa igwerigwe; teme ndu ophu ekuru nnajiuphu dukwapho igwerigwe;

⁶obekwanu l'iphe, anyibedua makharu bu le Chileke du nanu kpoloko kpekpu, bu iya bu Nna, onye iphemiphe shi l'eka; teme o buru iya bu onye anyi no-doru ndzu. O bukwarupho Nnajiuphu lanu kpoloko du, bu iya bu Jizosu Kereshi; onye bu iya be

Chileke gbẹ l'ẹka iya mee iphemiphe; tẹme ọ bukwaru iya phọ bẹ anyi shi l'ẹka iya nọdu ọkpobe ndzụ.

⁷Ole unu maru l'ọ tọ bụdu onyemonye marwuru iya ẹgube ono. Ndu ọphu egomunggo phẹ dū l'agwa ono mbukwadia ntau-a; l'erikwadu iya l'ephẹ eri iphe, agwaru iphe. Iphe ono, ẹphe eri ono emerwushia phẹ egomunggo; kele ẹphe te ekweshiduru ike.

⁸Ọ tọ bukwa nri l'e-me g'anyi kabaa akpɪritaru Chileke ntse. ? Anyi riru iya-o; ? anyi te eriduru iya-o; anyi taa kakwa ẹji; ọphu anyi a-kakwa ree l'iphu Chileke.

⁹Oo phọ g'unu kwabẹ ẹnya g'enweru onwonye unu ono ta aburu ọpfu dū ndu ọzo l'ọkpa, bụ ndu ọphu ekweshiduru ike.

¹⁰Kele ọ -buru l'onye ekweta iya eshihūdu ike hūmaru gbẹ onye ekweta ngu shihuru ike l'ẹka ị nọ l'ulo agwa eri iphe, agwaru iphe; ? tị madu l'ị gbẹ eyeru iya ọkpu-ikike g'ọ je asee ya onwiya asee wata eri iphe ono, a gwaru iphe ono?

¹¹Ọ n'ia bụ onye ono, ọkpobe-ọpfu ono teke eshihudu ike l'ọkpoma ono eshi l'amaru iphe, ị maru laaru onwiya l'iswi; mbụ nwanna ngu ono, Kéreshi nwuhuru l'iswi ẹhu iya ono.

¹²Oo ya bụ lẹ teke unu meru ẹgube ono bẹ unu meswewaru unwunna unu; ọpfu l'unu mekaru phẹ iphe l'obu phẹ ono, dukwadu nyegenyege ono. Ọ kwa iya phọ bụ l'unu shiwaa l'ẹhu unwunna unu ono meswee Kéreshi l'iphe ono, unu meru ono.

¹³Noo g'ọ gude mu sụ: ọ -shita g'iphe eri l'onu kpata gẹ nwanna mu mee iphe-ẹji; mu ebuchiẹpho ata anu lẹ phuruphuru gberegedege gẹ mu ta akporu iya ọkpa ye l'eme iphe-ẹji.

1 Kọrentu 9

Iphe, rwuberu onye ishi-ozu

¹Su-a mbɛdua; ? mu ta abudu onye-ishi-ozu bya aburu onye nweru onwomu; bya egudekwapho ẹnya mu hūma Jizosu Kéreshi, bụ Nnajiuphu anyi? ? Tɔbudu unu bụ iphe, egoshi ozu, mu nọ l'ẹka Nnajiuphu anyi ono jee?

²Mu 'abudu onye-ishi-ozu Jizosu l'ẹnya ndu ọzo; mu aburu iya nū unubɛdua. Ọo unubɛdua bụ iphe-ohubama, egoshi lẹ mu bụ onye-ishi-ozu Nnajiuphu; ọpfu l'unu byawaru bya aburu ndu ẹphe lẹ Nnajiuphu tugbaru buru nanu.

³Wakwa onu, mu eyejeru ndu epfu l'iphe, mu eme ta abudu iya baa:

⁴Mu asuje phẹ: ? To rwubeduru mu g'aanuje mu nri waa iphe, aangū angūngu k'ozu, mu eje?

⁵? Tọ gbaduru mu eme gẹ ndu-ishi-ozu ọzo; mbụ eme g'unwune Nnajiuphu phẹ; mē Pyita phẹ? Mbụ l'ọ gbaru gẹ mu ga luta nwanyi, etso ọzo kẹ Kéreshi dujeru eje ẹka mu ejekpo.

⁶Buepho mu lẹ Banabasu kpoloko bẹ l'e-seje akanya nri, anyi e-rije nọdu ndzụ tọ?

- 7? Bụ onye ojogu gunu jejeru ogu apfu onwiya ugwo? ? Bụ onye kojeru opfu vayinu; o haa eri akpuru, shi iya nu? ? Bụ onye dobejeru aturu ophu o ridu iphe, shi iya nu?
- 8? O du unu ge mu epfu iphe-a kele o iphe, ndiphe epfuje? ? To o ta atukwaru iya pho l'ekemu?
- 9Noo kele e deru iya l'ekwo ekemu, Chileke turu nu Mosisu su: "Unu te ekechijekwa eswi onu me unu mee ya o nodu azoshiru unu eswa l'ereshi." ? O du unu g'o bu eswi be Chileke ay oshi iya ono?
- 10O bukpwaa opfu ehuru anyi be oopfu ono. Oo anyi be e dedoru iya. Kele onye ako opfu anoduje ako iya ele enya iphe, o-meta l'eka ono. Onye echishi eswa l'iphe, o koru anodujekwapho echishi iya togbo enya l'iphe, o-metakwa iya pho.
- 11Anyi kuwaru iphe-oma, shi l'eka Unme Chileke l'echilabo unu g'aakuje akpuru-iphe l'egu-a. ? O bu iphe, paru eka me anyi -shi unu l'eka kpataje iphe, eele l'anya riye nodu ndzu?
- 12Eshinu ophu unu agbeje kwe l'o rwuberu ndu ozo g'ephe rita iphe l'eka unu; ? to kachidaa anyi erwube g'anyi rita? O duchakpoo nno; ole mu teke atu-swee ya ama ememe. O chia iphe, mu emejechia bu nshi be mu atagbuje iphemiphe g'eeshi ge mu ta agbe egbuchi uzo ozi-oma ke Kereshi.
- 13? Unu ta amadu le ndu eje ozi l'eze-ulo Chileke bu nri shi l'eze-ulo Chileke be ephe erije? Ndu eje ozi l'oru-ngweja Chileke nodu eketajekwapho iphe, e gude gwaa Chileke.
- 14Nokwapho ge Nnajiuphu turu ekemu su ge ndu ezi ozi-oma riye iphe, shi l'ozi-oma, ephe ezi.
- 15Obenu le mu teke aji-swee unu aji iphe, du egube ono. Ophu o bukwa l'ekwo-ozi-a, mu ederu unu-a bu le mu suru l'iphe ono rwuberu mu nta. Mbu-a; o kachikwa mu ree le mu nwuhuru; eme l'o nweru onye meru g'aba ono, mu abaa ono, buru mkpokoro opfu.
- 16Unu maru l'iphe, mu anoduje aba l'abaa ta abukwaa le mu ezi ozi-oma ono. Ezi ozi-oma bukwa iphe, mu mefutaje. Nshio mu me mu eziduru ozi-oma ono!
- 17O -buru le mu turu obu mu onyo ezi ozi-oma ono; be obunggo iya rwubekwaru mu. Obenu le mu eje iya kele o buwaa ozi, e yeru mu l'eka.
- 18? Bu gunu bu mu obunggo iya nta? Iphe, bu mu obunggo iya bu le mu anoduje ezi ozi-oma ono; mu ta anatadu aswa iya, bu iya bu iphe, gbaru mu l'ememe l'ozi ono, mu ezi ono.
- 19A makwaru-a l'o to dudu nemadzu, aturu mu iphe, mu e-me; ole mu gudewaa eka mu mee onwomu ohu onyemonye; g'eeshi ge mu gude ozi-oma ono kabaa epfubuta igwerigwe nemadzu.

²⁰Mu lẹ ndu Jiu nọdu; mu emeahaa umere ndu Jiu; g'eeshi gẹ mu pfubuta ndu Jiu. Mu lẹ ndu gude ekemu buru nọdu; mu emeahaa g'onye gude ekemu buru; k'ophu mu e-pfubuta ndu gude ekemu buru.

²¹Mu lẹ ndu ete pfudu k'ekemu nọdu; mu ahaḅkwapho k'ekemu; egudekpọoro l'a ta haduru mu gẹ mu b'e mee iphe, ekemu Chileke pfuru; obenu lẹ mu gude ekemu Kéreshi buru; g'eeshi gẹ mu pfubuta ndu ete epfudu k'ekemu.

²²Mu lẹ ndu ekweta phẹ dọ nyẹgenyege nọdu; mu aburu onye ekweta iya dọ nyẹgenyege g'eeshi gẹ mu epfubuta phẹ. Oo ya bọ l'iphe, bukpuo iphe, onyemonye bọ; mu abụekwarupho iphe ono gẹ mu eshi nno dọ ike pfuta ndiphe yeru Kéreshi g'ọ dzọo phẹ.

²³Iphe, mu gude emekotakpuo iphe ono bọ lẹ mu ese iswi ozi-oma ono; g'eeshi gẹ mu ayiru l'iphe-oma, dọ iya nọ.

²⁴? Unu ta amahaadaa l'a -nọdu agba oso bẹ a tukoje agba iya; ọle ọo onye lanu kpẹkpu emechajẹ nata obunggo oso obu? Oo ya bọ; g'unu kukebe ẹhu gba oso ono g'unu aburu ndu a-nata obunggo iya.

²⁵Onyemonye, bukpuo onye akwako atu ẹgo oso l'ekukebeje ẹhu esede onwiya l'iphemiphe, oome. Iphe, oosedede onwiya ono bọ g'ọ nata obunggo, dọ l'oso ono; mbu obunggo ta adudu g'ọo nọ-beru l'o mebyishihu. Obenu l'anyibe ndu etso Kéreshi esedeje onwanyi g'anyi anata obunggo ophu a-nọwaro jasọ lẹ tuutuutuu lẹ mijimiimii.

²⁶Noo iphe, meru g'o gude mu nọdu agba gẹ mu gbarwua ẹka a kparu mu oke gẹ mu gbarwua. O bukwarupho iphe ono meru g'o gude ophu mu etsudu ẹka g'onye etsu pherephere ẹka.

²⁷O chia iphe, mu emeje bọ lẹ mu etsuje onwomu iphe; tsushia ya ike k'ophu mu esede onwomu okpobe esede; g'ọ tọ buru mu -pfutachaa ndu ọzo yeru Kéreshi; e - mechaa mu a-gbẹ buru onye ophu Chileke a-jika ajika.

1 Kọrentu 10

Anma okwa

¹Su-a; unwunna mu; unu nyatajẹkwa g'ọ nwuru nna anyi oche phẹ. Lẹ g'ẹphe hakotakpuo bẹ nokotaru lẹ mkpula urwukpu ono. G'ẹphe ha jekota ije l'ali okponku ono gude ghaa eze mini ono.

²G'ẹphe ha bẹ Chileke gude urwukpu ono waa eze-enyimu ono mee baputizimu g'ẹphe buru ndu etso Mosisu.

³G'ẹphe ha rikotaru udu nri lanu ono, shi l'imigwe ono

⁴bya angukotakwapho mini ono, shi l'eka Unme Chileke ono. Kele ẹphe nguru mini, shi lẹ mkpuma ono, a ta humajedu l'anya ono. Mkpuma ono bọ iya bọ Kéreshi. O buru mkpuma ono bẹ tsoru phẹ nọ ono.

- ⁵Oo l'òobu; ndu òphu mechaaru mee iphe, ejiduru Chileke èpho mechakwaaru ka shii. Ndu k'ono bè ishi phè tuphashihururo teke èphe ñoro l'echiègu.
- ⁶Su-a; iphemiphe ono tükokwaru buru iphe, alò anyi èka lè nchì g'anyi gude kwaa ènya; g'ègu eme èjo-iphe ta agujeshi anyi g'ò guru ndu ono.
- ⁷Unu ta agwajèkwa iphe; l'ò kwa g'èphe haru mee teke ndiche ono, bu iya bu iphe, e deru l'èkwo-opfu Chileke su: “Ndu Ízurelu ðoru eri nri; bya angù mee; emechaa èphe wulihu meahaa èmereme.”
- ⁸G'anyi te ejekwa eme kè nwanyì òzoo kè nwoke g'èphe hakwarupho mee; e mechaa unu unu nemadzu ùkporo labò l'iri l'èśaa l'umadzu ùkporo iri nwùshihukota l'akpuru ènyanwu lanu.
- ⁹Ophu anyi ahukwa Nnajiuphu ama, bu iya bu g'èphe haru hua ya teke ndiche ono; agwo tagbushia phè.
- ¹⁰Ophu unu agujekwa aphu; g'èphe hakwarupho gua ono; ojozi-imigwe bu O-gbu-nemadzu, shi l'èka Chileke bya eworu phè gbushia.
- ¹¹Su-a; iphemiphe-a mekotaru l'èhu phè g'ò buru iphe, e gude anmaru anyi òkwa; tème e deshia ya l'èkwo g'ò buru iphe, e gude ezi anyi iphe; mbu anyibe ogbo òwa-a, buwaa teke iphemiphe e-meèbekota-a.
- ¹²Oo ya bu; g'onye riru lè ya pfushiru ike pfukwaru kwabè ènya; a -nonyaa ò daa!
- ¹³L'ò tò ðukwa òhutama, byapfutajewaru unu, 'abudu egube òhutama, abyapfutajèkwapho ndu òzo. Obenu lè Chileke bu onye emeje iphe, ò suru l'oo-me. O to kwedu g'a hua unu ama hughata iya g'ike unu ha; ò chia lè teke aahu unu ama ono bè oo-goshikwapho unu ùzo, unu e-shi nahu òhutama ono. Oo ya bu g'unu adu ike tagbua ya lè nshi.
- ¹⁴Noo ya bu lè-a; ndu mu yeru obu; unu nahu egwe eja.
- ¹⁵O kwa opfu, eepfujeru onye nweru egomunggo bè mu epfuru unu-a. Unu leanarò ènya l'iphe ono, mu epfu ono.
- ¹⁶Okoro ònu-òma ono, anyi tükoru ago anyata nri Nnajiuphu ono, bukwaphe iphe, anyi ekele Chileke ekele iya ono; ? tò budu mee Kéreshi bè anyi gba mgba l'okoro ono? Tò; buredi ono, anyi awashije ata ono; ? tò budu èhu Kéreshi bè anyi tükokwarupho gbaru mgba ono?
- ¹⁷Eshinu ò bu buredi lanu ðu bè anyi tükokwaru buru èhu lanu; obeta ò buru l'anyi ðu igwerigwe; eshinu anyi tükoru erigba buredi lanu ono.
- ¹⁸Unu leanarò iphe, ndu Ízurelu emeje. Iphe, bu ndu taru anu ono, e gude bya egweeru Chileke ngweja l'òru-ngweja ono; ? èphe ta abuada ndu eje ozi l'òru-ngweja òbu?
- ¹⁹? Bukwanu gunu bè mu eme gè mu pfua? ? Bu l'ò ðuru iphe, òbu mbu iphe, aagwa agwagwa; òzoo iphe, a tushiru l'iphe tò?

²⁰Waawakwa! Iphe, mu epfu bukwa le ngweja, ndu ta abudu ndu Izurelu egweje bu obvu be ephe egweru iya. O to budu Chileke. Ophu mu ekwekwanu g'unu l'obvu tugba buru nanu.

²¹Unu ta abyakwa l'a-nodu angu iphe, shi l'okoro ke Nnajiuphu bya angukwapho ophu shi l'okoro k'obvu. Nokwapho g'unu ta abyadu l'a-nodu eri nri le teburu ke Nnajiuphu bya erikwapho le teburu k'obvu.

²²? Anyi agbe kpata Nnajiuphu eko okophoo? ? O du unu g'anyi ka Chileke ike?

Eme iphe m'obvu nwune ngu

²³Iphemiphe be a hakwaru uzo g'e meje; ole o to bukwanu iphemiphe bu e -mee ya l'o duru onye meru iya nu le ree. A hakwaru uzo g'e meje iphemiphe; obenu l'o to budu iphemiphe l'emeteje onye eme iya nu emetse.

²⁴G'o to dukwa onye anodu acho iphe, a-duru iya le ree. G'onyenonu chojechia iphe, a-duru ndu ozo le ree.

²⁵Iphe, bukpo anu, i zuru l'aswa; taje ya pho; te ejekwa akpa ishi aka o shi; g'obu etee jedu ngu anma ikpe.

²⁶“Le mgboko l'ophu; me iphe dukota iya nu; bukotakwa ke Nnajiuphu, bu Chileke.”

²⁷Teke onye te ekwedu ke Kereshi ziru ngu le nri; i kweta l'ii-je; riokwapho iphemiphe, e doberu ngu g'i ria. B'ajikwa aji; m'obvu obu anma ikpe.

²⁸Obenu o -buru l'o duru onye tufuru onu su ngu: “Iphe-a bukwa iphe, a gwaru iphe”; te erikwa iphe obu; m'obvu onye ono, pfuru ngu iphe onoya; mekwapho m'obvu obu anma ikpe. “Kele eliphe l'ophu mekpoo iphemiphe, nokota iya nu bukotakwa ke Nnajiuphu.”

²⁹Obu anma ikpe mu epfuru ta abukwa nkengu; o kwa k'onye ono. Kele-a; ? bu obu anma ikpe k'onye ozo; l'e-me ge mu ta atusaru ehuh?

³⁰Eshinu mu ekeleje Chileke ekele me mu -bya eri nri; ? denuhunu g'o gude o buru iphe ono, mu keleru Chileke ekele teme mu rije iya ono be aa-gbe epfubyishi mu.

³¹Oo ya bu; m'obeta unu ria nri-o; ozoo l'unu nguru iphe, aangu angungu-o; ozoo iphe, bukpo iphe, unu meru; unu meje iya g'o buru iphe, unu gude aja Chileke ajaja.

³²G'o to dukwa onye aburu upfu du onye ozo l'okpa; m'o bu onye Jiu; m'o bu onye abudu onye Jiu; m'o bu Chiochi ke Chileke.

³³Oo pho ge mu emeje bu g'unu e-meje; mbu ge mu anoduje eme ge mu mee iphemiphe g'o du onyemone ree. Mu ta achojedu iphe, a-duru mu le ree; gbahaa iphe, a-duru ikpoto ndu ozo le ree g'eeshi g'a dzoo phe.

1 Korentu 11

¹Oo ya bu; g'unu tsoje aka mu ge mu etso aka Kereshi.

Ekpuchi iphe l'ishi abaru Chileke aja

- ²Mu ajakpoo unu ajaja unwunna mu; l'unu anyataje mu tekenteke; teme unu gudeshia iphe ono, Chiochi ezije ono; g'e yeru mu iya l'eka mu bya ezia ya unu.
- ³Ole iphe, mu eme g'unu makwarupho bu l'oo Kereshi bu ishi iphe, bukpo onye nwoke; nwoke bukwanuru ishi ke nwanyi, oolu alulu. O bukwanuru Chileke bu ishi ke Kereshi.
- ⁴Nwoke, epfu anu Chileke; ozoo l'oopfuchiru Chileke; bya ekpuru okpulishi; bukwa ishi iya be o to kwabedu ubvu.
- ⁵O bekwanu le nwanyi, epfu anu Chileke; ozoo l'oopfuchiru Chileke; ophu o kechiduru iphe l'ishi; bukwa ishi iya be o to kwabedu ubvu; kele ono duwaa g'o kpushiru ishi akpushi.
- ⁶Le teke o bu le nwanyi tee kebedu iphe l'ishi; ge nwanyi obu kpashienupho egbushi iya akpashi. Ole eshinu o bu iphe-iphere ke ge nwanyi kpashia egbushi; ozoo g'o kpashia ya akpushi; o n'iya bu ge nwanyi kebeje iphe l'egbushi.
- ⁷Nwoke ta agbaduru g'o kpuru okpulishi eshinu Chileke meru iya o yee ya teme o buru iya egoshi ge Chileke du-be biribiri; obenu le nwanyi egoshi ge nwoke du-be biribiri.
- ⁸Noo l'o to bukwa nwoke be e gude iphe, shi l'ehu nwanyi mee; o kwa nwanyi be e gude iphe, shi l'ehu nwoke mee.
- ⁹Ophu o budu nwoke be o meru g'o buru ke nwanyi; o chia nwanyi be o meru g'o buru ke nwoke.
- ¹⁰Noo g'o gude nwanyi je l'ekebeje nkelishi gude goshi l'oo ji iya nwe iya; wakwapho m'obvu unwu-ojozi-imigwe.
- ¹¹G'o duhabekpo; o to dukwa iphe, nwanyi bu me e -wofu nwoke; ophu o dukwa iphe, nwoke bu me e -wofu nwanyi l'atugba-a, anyi le Kereshi tugbaru-a.
- ¹²O kwa iphe, shi l'ehu nwoke be Chileke gude mee nwanyi; o bukwanuru nwanyi be anwuje nwoke. Ole ephenebo shikota Chileke, bu iya meru iphemiphe l'eka.
- ¹³Unu lewa iya ro enya l'onwunu. ? O gbaru ke ge nwanyi ghebeje ishi onu l'eka oopfu anu Chileke to?
- ¹⁴? Unu ta amadu le ge nemadzu gbakporu ugbuga be nwoke eme onwiya iphe-iphere me o -buru l'o haru egbushi iya; o loshia ogologo?
- ¹⁵Obenu le teke nwanyi nweru egbushi ogologo be o buchaa ya adu ubvu. Egbushi ogologo be Chileke nuru nwanyi g'o buru iphe, e-kpuchije iya ishi.
- ¹⁶O -duru onye atu ego l'o to dudu egube ono; anyi te nwekwa omelali ozo; ophu Chiochi ke Chileke enwekwapho.

Eri nri-enyashi Nnajiuphu

- 17**A bya l'iphe ọwa-a, mu abya epfupfu-a; bẹ mu ta ajakwa unu ajaja iya l'edzuko, unubẹ Chiochi edzukoje agbejekwanu buru; o -shita ọphu ooye ẹka l'ogbe egbuchi ndu ọzo ọzo.
- 18**Kẹ mbu iya kpoada; bu lẹ mu nọmaru l'unu anọduje akparu onwunu oke mẹ unu -dzukoje; mbu l'ọ dukwa mu g'iphe ono a-haru buru eviya.
- 19**Mu maru l'ọ bu eviya l'ọ tọ dudu g'eemehabe g'unu ta anọdu ẹkpa l'iche iche. Ọo ya bukwanu g'aa-majeru ndu ọphu eme iphe, dube ree l'iphu Chileke.
- 20**G'unu edzukojeje ono; ta abukwa nri-enyashi Nnajiuphu bẹ unu edzukojeje g'unu ria;
- 21**eshinu ọobujeru; unu gbeshi onyenonu apata nri nkiya eri angu l'ẹbe akwaberu onye ọzo. E -mechaa; ẹgu agu ndu ọo-nodu agu; mẹe atsụ ndu ọphu ọo-nodu atsụ.
- 22**Ha! ? Ọ du g'unu te enweedu ọlo, unu a-noduje l'ibe unu eri angu ọbu? Tọo; ? ọ bukpoepho Chiochi ke Chileke bẹ unu akpo ẹbo l'afu; bya eme ndu adudu g'ọ du phe iphe-iphere? ? Denukpoo iphe, mu e-pfuru nu unu? ? Mu a-nodu etu unu ẹpha iya tọ? Mu tee tukwa unu ẹpha iya!
- 23**L'iphe ono, mu ziru unu ono bukwa Nnajiuphu l'onwiya pfuru mu iya; lẹ yẹbedua, bu Jizosu wotaru buredi l'enyashi mboku ono, e deru iya ye ono;
- 24**bya ekelechaa Chileke ekele iya bya eworu iya nyawashia bya asu: “Ngge ta! Ọwa-a bu ogwehu mu, e gude gwee ẹja ẹhu unu. Unu meje iphe-a gude nyataje mu.”
- 25**Nokwapho g'o wotaru okoro ono g'e richaaruru nri-enyashi ono bya asu: “Okoro-a egoshi ogbandzu ọphuu, e gude mee mu gbaa. Teke bukpo teke unu nguru iya; unu gudeje iya nyata mu.”
- 26**Kele teke unu ata buredi-a; bya angu iphe, shi l'okoro-a; bẹ unu epfukashiakwaa k'anwuhu Nnajiuphu ono; jasụ l'ọ bya.
- 27**Su-a; onye bukwanu onye riru buredi ono; ọzo l'ọ nguru iphe, angungu l'okoro ke Nnajiuphu ono l'uzo apfuduru-oto; onye ono bẹ ikpe ogwehu yee mee Nnajiuphu ono nmakwaru.
- 28**Ọo ya bu ge nemadzu nyochajadaa onwiya ime teme l'o ria buredi ono ngua iphe, shi l'okoro ono.
- 29**L'onye eri angu; ẹbe ọ makahadu iphe, ogwehu Kereshi bu; l'eritakwa bya angutakwapho ikpe eye onwiya l'ehu.
- 30**Ọ kwa iphe ono meru g'o gude igwe oha l'ime unu du nyegenyege; ndu azee l'iphe-ememe; ndu onwu egbushia.
- 31**Obenu lẹ teke anyi vuwaa ọzo kpee onwanyi ọkpobe ikpe; ọ n'iya bu l'e tee kpeedu anyi ikpe.
- 32**Ole teke ọ bukwanu lẹ Nnajiuphu kperu anyi ikpe; kpechaa bya ahua anyi ahuhu; iphe, oome iya buana g'oo too jehedu achigbabe anyi lẹ ndiphe tukọ nmaa ikpe.

³³Oo ya bu; unwunna mu; unu -nodu edzuko k'eri nri Nnajiuphu ono; unu nodujekwa kwaberu nwibe unu.

³⁴Teke o bu l'o duru onye egu agu; g'onye ono vuru uto riadaa nri l'unuphu; o nonyakwaa Chileke nmaa unu ikpe k'edzuko, unu edzukoje. Noo ge k'ono du bu ono. A bya l'iphemiphe ndu ophuu; ono buwaro mu -bya; mu eyefua ya onu.

1 Korentu 12

Iphe-oma, shigba l'eka Unme-du-Nso

¹A bya le k'iphe-oma, shigbaa l'eka Unme-du-Nso; unwunna mu; ge mu mekwaa ya g'o doo unu enya ree.

²Unu maanaru-a le teke unu eshidu buru ke Kereshi be bu unwu-obvu-a, ete pfudu opfu-a shi alo unu kpurukpuru. O buru iya shi anoduje egoshi unu uto unu a-nodu eshi.

³Noo g'o shitaru mu nodu eme g'o doo unu enya l'o to dukwa onye gude Unme Chileke epfu opfu abya asu: "Ge Jizosu vukwaru onu." Ophu o dukwapho onye adu ike epfufuta su le Jizosu bu Nnajiuphu gbahaa l'o gude Unme-du-Nso epfu iya.

⁴Iphe-oma, shi l'eka Unme-du-Nso du iche iche; ole o kwa Unme lanu kpoloko bu Unme, anukota iya nu.

⁵Nokwapho g'uzo, e shi ejeru Nnajiuphu ozi dukwapho iche iche; o bukwarupho Nnajiuphu lanu ono be a tukoru ejeru ozi obu.

⁶Ike, Chileke eyeje nemadzu l'ehu g'o gude meje iphe, dukwa iche iche. Ole o kwaa Chileke lanu emekotaje ike ono g'o ree ire l'ehu onyemonye, o yeru iya l'ehu.

⁷Chileke gbegbe l'eka onyemonye l'ehu l'ehu egoshi g'ike Unme-du-Nso erebe ire g'o buru iphe, a-baru onyemonye urwu.

⁸Mbua; onye lanu be Unme-du-Nso ono eyeje ike l'ehu k'opfu oopfuge opfu mmamiphe; l'o ye onye ozo ike l'ehu k'opfu oopfuge opfu, egoshije l'o maru Chileke okpobe amama. O bukwaru-a Unme-du-Nso lanu ono.

⁹O -gbeshi l'oobya eye onye ozo ike l'ehu; ike k'ekweta ke Chileke gudeje iya eme iphe, dugbaa biribiri; l'oo bukpoekwarupho Unme-du-Nso lanu ono. Onye ophu ooye ike l'ehu k'emeje g'onye iphe, eme wekorohu; o bukwaru-a Unme lanu ono kpoekwapho.

¹⁰Onye ozo be ooyeje ike l'ehu k'eme iphe-ohumalenya; l'ooye onye ozo ike l'ehu k'epfuchiru Chileke; l'ooye onye ozo ike l'ehu k'akokahaje iphe, shi l'eka Unme-du-Nso l'opfu eshidu iya nu; l'ooye onye ozo ike l'ehu k'epfuge l'olu Unme-du-Nso; l'ooye onye ozo ike l'ehu k'akoje iphe, eepfu l'olu Unme-du-Nso ono.

¹¹Ole o tukokwaru buru Unme-du-Nso lanu atukotaje iphemiphe ono eme. Oomejeru onyemonye iphe-oma, du iche iche g'o turu obu iya onyo l'oome iya.

Ogwehu lanu ye le iphemiphe, pfukashiru iya nu

- 12**Lẹ Chiochi kẹ Kéreshi dukwa g'ogwẹhu lanu. Ogwẹhu nemadzu enwejekwaru mpfukashi, du igwerigwe. A makwaru-a lẹ mpfukashi iya du igwerigwe; ọle ọ buenupho ogwẹhu lanu g'ọ bu iya.
- 13**Kẹle iphe, bukpo g'anyi ha; ? i bu onye Jiu-o; ? i bu onye Gurisu-o; ? i bu ohu-o; ? i bu amadu-o; Unme-du-Nso tukwakwaru anyi jigba; anyi buru ogwẹhu lanu teke anyi meru baputizimu; anyi toko gbawaru mgbala lẹ Unme-du-Nso ono, bu iya be eyeje anyi ike l'ehu ono.
- 14**L'ogwẹhu l'onwiya ta akpukokwaru ophu. Iphe, du iya nu dukwa igwerigwe.
- 15**Ọ -bu l'oo kẹ g'okpa su l'eshinu ya abudu eka be ya abukwa iphe, du l'ehu; ? bu iphe ono a-kposhi iya aburu iphe, du l'ogwẹhu?
- 16**Ozoo l'oo nchi suru l'eshinu ya abudu enya be ya abukwa ehunemadzu; ono taa kposhikwa iya aburu iphe, tefuru l'ehu.
- 17**Ome ehunemadzu l'ophu tukoru buru enya lanu; ? bu gunu be e gege egudeje anu iphe? Mbua ome ogwẹhu l'ophu tukoru buru nchi lanu; ? bu awe be e gege egudeje anu ishishi iphe?
- 18**Obenu lẹ g'ọ du nta-a bu lẹ Chileke meru ehunemadzu bya emobechaa ya mpfukashi iya g'ọ tuberu.
- 19**Ome iphemiphe ono tukoru kpukoo ophu; ? bu awe gege aburu ogwẹhu?
- 20**Obe lẹ g'ọ du nta-a bu l'ọ nweru mpfukashi igwerigwe; ọle ọ tukokwaru-a buru ogwẹhu lanu.
- 21**Ọ to dudu teke enya a-gbe gbeshi l'ọ su eka l'ọ to dudu iya mkpa. Ophu ọ dukwapho teke ishi a-gbeshi l'ọosu okpa l'ọ to dudu iya mkpa.
- 22**Ọ chia iphe, meru nu bu lẹ mpfukata ehunemadzu anyi ibiya ono, gbaru g'ọ bu iya be enya kachaa alwalwa ono be gbe yihukwaru-a l'iphe, aba lẹ mkpa.
- 23**Teme mpfukata ehunemadzu anyi ibiya ono, anyi riru l'ọ to kwataduru gbaa k'akwabe ubvu ono be anyi akwaje akwa gude kwabe iya ubvu, pfuru iche. Ibiya ono, anyi edomi edomi ono be anyi gbe akajenu eleta enya;
- 24**mbu eleta enya, mkpa iya aduduru ibiya ozo. Oke Chileke woleru-a ehunemadzu dzepfua nanu; bya eworu ubvu, ka shii kwabe mpfukata ehunemadzu anyi ibiya ono, aakwabe-ziduru ubvu ono.
- 25**Noo ya bu; ge mpfukata ehunemadzu yee nwibe iya ata adzeduru onwophe enya; gbahaa g'ephe tukoje leta nwibe phe enya.
- 26**Teke iphe eme nanu ehuka; oomedzukwarupho ehunemadzu l'ophu. Teke a kwaberu nanu ubvu; ehunemadzu l'ophu etedzuru eswa iya.
- 27**Su-a; ọ kwa unu bu ogwẹhu Kéreshi; onyemonye l'ehu l'ehu buru mpfukata iya.

²⁸Chileke bya atụa nemadzu ẹka iche iche lẹ Chiochi shi nno goshi onyemonye iphe, ọo-nọdu eme. O vuru ụzo bya edobe ndu-ishi-ozii; bya edotsota iya ndu epfuchiru iya nū. O bya lẹ k'eto bya edobe ndu ezi iphe; bya edobe ndu emeje iphe-ohumalenya; waa ndu emeje ndu iphe eme g'ephe wekorohu; waa ndu anọduje eye ẹka; waa ndu mkpozi-uzo; mę ndu epfujẹ l'olu Unme-dụ-Nsọ.

²⁹? Bụ onyemonye bụ-dzuru ndu-ishi-ozii? ? Bụ onyemonye bụ onye epfuchiru Chileke? ? Bụ onyemonye bụ onye ezije iphe? Tọo ? bụ g'ephe ha nwedzuru ike eme iphe-ohumalenya?

³⁰? Bụ g'ephe ha bẹ Chileke yedzuru ike l'ẹhu k'eme g'onye iphe eme wekorohu? ? Bụ ọha epfudzuru l'olu Unme-dụ-Nsọ? Tọo ? bụ ọha aduje ike kọo iphe, eepfu l'olu, Unme-dụ-Nsọ?

³¹Sụ-a; g'onyenonu yejeru ẹhu lẹ gẹ ya e-shi meje iphe ono ndu ophu ka mkpa; ọle mu e-goshiadaa unu ụzo ophu bụ iya kwataru kabakporo mkpa.

1 Kọrentu 13

N-yemobu

¹Sụ-a; ọ tọ dukwa mę mu aghaję opfu-alı mu egudeje iphe, bukpoopfu unwu-eliphe; ọzoo opfu unwu-ozozi-imigwe epfu; n-yemobu rwuhu mu l'ẹhu bę mu bukwa njaja ogena; ọzoo eze okunmengu, aha igbangu igbangu.

²Mbụ-a; ọ tọ dukwa mę Unme-dụ-Nsọ yechaaru mu ike l'ẹhu gę mu pfuchijeru Chileke; mu bya amacharu Chileke okpobe amaru; makotaru iphemiphe, o shi domia edomi; bya akachakpo ekweta kę Chileke ono kweshia ike; k'ophu bụ mu -sụ úbvú g'ọ phofu l'ẹka ọ nọ; l'ọ phofu; ophu mu enwedu n-yemobu bę ọ tọ dukwa iphe, mu bụ.

³Ọ tọ dukwa mę mu tukoru iphe, mu nweru enweru mekota iphe-oma; bya ekwechaa g'e woru mu kpo oku; ẹbe mu enwedu n-yemobu; ọ tọ dukwa urwu, mu ritaru iya.

⁴N-yemobu atajeru iphe nshi; bya eme odoo. O to jidu iji-nya. Ebe ookudu onwiya; ophu o tudu onwiya o-phushia-ugbu.

⁵O to kwejedu gę nemadzu mee iphe, adudu ree; ophu ookwejedu gę nemadzu buru o-pfu-nkiya-anu-nkiya; ophu ẹhu eghujedu iya eghu egwegwa; ẹbe ọ madu k'edo iphe l'okpoma.

⁶O to tejedu ęswa ekpu iphe, apfuduru nhamunha. O chia iphe, bụ ire-lanu bę o teje ęswa ekpu.

⁷Ootajeru iphemiphe nshi; ọ nọdu ekwetaję iphemiphe; ele ęnya k'oma l'iphemiphe; bya apfu-shiję ike l'iphemiphe.

⁸N-yemobu a-dukwa gburruru jeaduru aduru. Ike k'epfuchiru Chileke e-mechakwaa bvụ; ike k'epfu l'olu Unme-dụ-Nsọ abvụ. O bukwarupho egube ono bę k'amaru Chileke okpobe amama l'a-bvụ nkiya.

⁹Kẹle anyi maru mapete; anyi nọdu epfuchiru Chileke epfupete iya.

¹⁰Obenu lẹ teke Chileke e-goshigbu anyi g'iphemiphe gbaru; bẹ iphe, bukpo iphe, edzuduru oke ephushihu.

¹¹Su-a; teke mu shi buru nwata bẹ mu shi epfuje g'unwegirima; mu shi nweru egomunggo unwegirima; shi arije oriri g'unwegirima. Mu buerupho onye bu ogerenya; mu tuko ehu nwata gwobe.

¹²Lẹ nta-a bẹ anyi gudekwa onyo aphu iphemiphe ono inyoki inyoki. O -rwua teke ono bẹ anyi lẹ Kéreshi a-humagbabe onwanyi l'iphu l'iphu. Nta-a bẹ mu maru iphemiphe eka lanu eka lanu; o -rwua teke ono bẹ mu a-makotaru iphemiphe okpobe amaru; gẹ Chileke makotaru mbedua nta-a.

¹³Oo ya bu l'oo uzo iphe eto a-phodu, bu iya bu ekweta; waa iphe, eele enya iya; waa n-yemobu; epe n'eto tukoru buru iphe, ta ayidu bvụ abvubvu; ole ophu kachaa shii bu n-yemobu.

1 Kọrentu 14

Iphe-oma kẹ mpfuchiru waa k'epfu l'olu Unme-du-Nso

¹Unu seje g'unu yee nwibe unu obu. G'iphe-oma, shigbaa l'eka Unme-du-Nso gu-shijekwa unu ike; kekelele k'iphe-oma k'epfuchiru Chileke.

²L'onye epfu l'olu Unme-du-Nso ta abukwa nemadzu bẹ oopfu anu; o kwa Chileke bẹ oopfu anu. O gude Unme Chileke epfu iphe, Chileke shi domia edomi.

³Obenu l'onye epfuchiru Chileke bẹ bu nemadzu bẹ oopfu eyeru. O shi egube ono emetse onyemonye emetse; eyeru phe oku g'obu shihu phe ike bya adukwa phe pho obu.

⁴Onye epfu opfu l'olu Unme-du-Nso bukwa onwiya bẹ oometse; obenu l'onye epfuchiru Chileke bẹ bu Chiochi bẹ oometse.

⁵Iphe, gege adu mu ree bu g'iphe, bukpo g'unu ha pfuje l'olu Unme-du-Nso; ole o gege akabaa mu ro ree g'a su l'unu epfuchiru Chileke. Kẹle onye epfuchiru Chileke kakwa onye epfu l'olu Unme-du-Nso; gbahakwaa l'o nweru onye duru ike ko iphe ono, oopfu ono. Oo ya bukwanu g'opfu obu a-buru iphe, a-nodu emetse Chiochi emetse.

⁶Mbua; unwunna mu; mu -byapfuta unu bya egude olu Unme-du-Nso epfu eyeru unu; ? denu urwu, unu e-rita iya? Gbahaa lẹ mu byaru bya egoshiahaa unu iphe ophuu; ozoo lẹ mu byaru bya eziahaa unu k'amaru Chileke okpobe amama; ozoo lẹ mu byaru bya epfuchiaharu Chileke; ozoo lẹ mu byaru bya awata unu ezi iphe.

⁷Mbukpoonu iphe, du g'opu ozoo ogumogu, bugbaa iphe, adzudu ndzu; a ta amajekwaru iphe, oopfu gbahaa l'odafuta oda ree.

⁸Teme teke o bu l'onye egbu opu-ogu te egbuduru iya g'eegbuje iya g'a maru l'ogu abya; ? bu onye abya akwakobe k'eje ogu?

- ⁹Oo ya bu l'o nokwapho g'ọ du l'ehu unu bu ono. Teke o bu l'unu epfu l'olu Unme-du-Nso; unu nodu epfu opfu, a madu iphe, o bu; ? denu g'ee-shihunu maru iphe, unu eepfu? Unu ta amadu l'opfu, unu epfu bu pherephere be unu epfu iya anu.
- ¹⁰A ta atukwa iya ego l'opfu-ali ndu dugbaa iche iche, du le mgboko-a be a ta agutadu aguta; obenu l'o to nwedu me nanu te edojedu ndu epfu iya nu enya.
- ¹¹Oo ya bu le teke o bu le mu ta anudu opfu-ali obu; mu aburu ohantsu l'enya onye epfu iya nu; onye epfu iya nu a bukwanuru mbedua onye ohantsu.
- ¹²Nokwapho g'ọ du l'ehu unu; eshinu iphe-oma, shi l'eka Unme-du-Nso agu unu agugu; unu kukebe ehuru g'ọ du unu shi l'ehu; g'oo-bukwanuru iphe-oma, a-nodu emetse Chiochi emetse.
- ¹³Oo ya bu; g'onye epfu opfu l'olu Unme-du-Nso; pfujekwapho nu Chileke g'ọ nu iya ike g'ọ gudeje koo ya g'a maru iphe, oopfu.
- ¹⁴Le teke mu epfu l'olu Unme-du-Nso; be bukwa obu mu be epfu anu Chileke; ophu iphe, oopfu edokwanuru mu enya.
- ¹⁵? Bukwanu gunu ozo be gbaru mu l'ememe? Mu e-gude Unme-du-nso epfu anu Chileke; agu ebvu, doru enya.
- ¹⁶L'ọ -buru l'ija Chileke ajaja l'olu Unme-du-Nso; ? denu g'onye ozo, no l'eka ono iphe, iipfu edoduru enya e-me su: "Nokwa g'ọ du" l'ajaja iija; eshinu o madu iphe iipfu?
- ¹⁷Iinodukpokwa ekele ekele rengurengu; ole o too metsedu onye anu iya nu.
- ¹⁸Mu ekele Chileke ekele le mbedua l'onwomu kakota unu epfu opfu l'olu Unme-du-Nso.
- ¹⁹Ole o -beta ge mu nodu le Chiochi gude olu Unme-du-Nso pfua unubuku opfu; mu ahatachia epfu nwakpuru opfu ise, doru enya gude ezi ndu ozo iphe.
- ²⁰Unwunna mu; unu ta arijeshinu oriri g'unwegirima nshii. Unu dujekwa ge nwaswa me a -bya l'eme ejo-iphe. Teke a byaru l'egomunggo; unu enweru egomunggo ogerenya.
- ²¹L'ekwo ekemu be e dekwaru su: "Mu e-gude opfu ndu ali ozo, dugbaa iche iche; me opfu ndu ohantsu gude pfuru yeru ndu nkemu. Ole o to bukpodanu l'ephe angabe nchi l'iphe, mu epfu." Nokwa iphe, Nnajiuphu eepfu.
- ²²Oo ya bu l'epfu opfu l'olu Unme-du-Nso bu iphe-ohubama, duru ndu ekwedu ke Kereshi; o to budu ke ndu kweru ke Kereshi. Ophu epfuchiru Chileke abukwa ke ndu ekwedu ke Kereshi; o kwa ke ndu kweru nkiya.
- ²³Oo ya bu le-a; teke Chiochi l'ophu dzukoberu; onyemonye toko epfu opfu l'olu Unme-du-Nso; ndu shi eshishi; ozoo ndu te ekwedu ke Kereshi byapfuta unu; ? ndu ono taa sudunu l'oo obvu be eme unu?

²⁴Obenu teke ọ bụ l'onyemonye bẹ epfuchiru Chileke; onye ete ekwedu ke Kéreshi; ọzoo onye shi eshishi bya abata; ? ị madu l'iphe ono, ọonukota ono bẹ a-nọdu erwu iya l'ẹhu; ẹnya agbarwua ya l'iphe-ẹji, o meshiru.

²⁵Iphe ono, ọonu ono atuaru iya iphe, ọori l'egomunggo jala. Ọo ya bụ; onye ono adaa kpurumu l'alị wata abaru Chileke ẹja; watakwapọ epfu sụ: “Ọ bukpoọ ọkpobe-opfu; unu lẹ Chileke nọpho l'ẹka-a.”

Iphe, eeme ememe lẹ Chiochi

²⁶Sụ-a; unwunna mu; ? ọ dụ unu g'ọ bụ gunu bẹ mu epfu? Teke unubẹ Chiochi dzukoberu; onye egude ebvu-oma; onye egude opfu Chileke ezi iphe; onye aphu ọphulenyā; onye epfu opfu l'olu Unme-dụ-Nsọ; onye akọ iphe, opfu Unme-dụ-Nsọ ono bụ. G'onye eme ọphu oome mee ya g'ọ buru iphe, ee-gude emetse unu emetse.

²⁷Ọ -buru l'ọ duru ndu epfu opfu l'olu Unme-dụ-Nsọ; g'ọ buru-a nwumadzu ẹbo; ọzoo ẹto kpeekpu; ọ l'ọo g'onyenonu pfuje nkiya mę o -rwube iya. G'onye lanu lẹ g'unu ha kọo iphe, opfu.

²⁸Teke ọ bụ l'ọ tọ dudu onye akọ iphe, ọ bụ g'ẹphe tukokwa dobegbaa onu doo lẹ Chiochi; g'onye ọphu nonu pfujeekwapo nu onwiya pfukwapo nu Chileke.

²⁹Gẹ ndu epfuchiru Chileke dukwapo ẹbo; ọzoo ẹto pfua; ndu ọphuu elerwee iphemiphe, ẹphe pfuru ẹnya.

³⁰Teke ọ bụ l'onye ọzo, nọ lẹ ndzuko l'ẹka ono wataru ọphulenyā; g'onye ke mbu pho, shi epfu opfu pho dobeekwapo onu doo.

³¹Unu a-dukwa ike epfuchiru Chileke nanu nanu; g'e-shi g'onyemonye anwuta iphe; teme Unme Chileke eyekwarupho onyemonye oku g'obu shihu iya ike.

³²G'onye epfuchiru Chileke dukwa ike sedeje onwiya mę ọ -nọdu epfu iya.

³³Lẹ Chileke ta abukwa onye mkpaka; ọ buchikwaa onye nchi-odu-doo; bụ iya bụ g'ọ dugbaa l'iphe, bukpoọ ndzuko ndu-nsọ l'ophu.

³⁴Unwanyi unu dobejekwa onu doo lẹ Chiochi. Unwanyi bẹ e te kwekwa g'ẹphe pfuje opfu mę ndu Chiochi dzukobe. Ọ chia g'ẹphe wozeje onwophe alị; l'ọ noo iphe, ekemu pfuru bụ onoya.

³⁵Ọ -buru l'ọ nweru iphe, agu phe amaru; ẹphe -laa unuphu; ẹphe akpatajẹ ji phe ishi iya. L'ọ bụ iphe-iphere ke gẹ nwanyi pfujeru l'ẹka Chiochi dzuru edzumoke epfu opfu.

³⁶Mu suru; ? ọ dụ unu g'ọ bụ l'ẹka unu bẹ opfu Chileke shi? Tọo ? bụ unu beberu numa-sweru opfu Chileke?

³⁷G'onye riru lẹ ya bụ onye epfuchiru Chileke; ọzoo lẹ ya nataru iphe-oma, shi l'ẹka Unme-dụ-Nsọ; g'ọ doo onye ono ẹnya l'iphemiphe-a, mu ederu unu-a bụ ekemu, shi l'ẹka Nnajiuphu.

³⁸Onye agubeduru iphemiphe-a iphe; g'a ta agubekwapo onye obu iphe.

³⁹Oo ya bu; unwunna mu; g'ò guje unu egu epfuchiru Chileke. Ophu unu akpòshijekwa epfu opfu l'olu Unme-dù-Nsò.

⁴⁰Oo 'èpho g'e meje iphemiphe g'ò gbaru waa l'o rwuberu iya.

1 Kòrentu 15

Eshi l'ònwu teta kẹ Kéreshi

¹Unwunna anyi; nta-a bu gẹ mu bya anyatabaaru unu k'ozì-oma ono, mu zihawaru unu ono. Ozi-oma ono bẹ unu nataru; ọ buru iya meru iphe, ekwekwe, unu kweru kẹ Kéreshi shihuru ike.

²Oo ya bu l'e gude ozi-oma ono adzọo unu; mbukwa mẹ unu -gudeshia ya ẹka ike gẹ mu ziru iya unu; gbahakwaa l'ekwekwe, unu kweru te enwedù ishi.

³Iphe ono, kachaa mkpa, e yeru mu l'ẹka; mu zia unu ono; tẹme ọ buhukwarupho iphe, e dehawaru l'ekwo-opfu Chileke l'o noo g'òo-dù bu ono; bu lẹ Kéreshi nwuhuru opfu l'anyi meru iphe-ẹji.

⁴E lia ya; o rwua lẹ mbọku k'eto Chileke kulia ya. O bukwarupho g'e dehawaru iya l'ekwo-opfu Chileke.

⁵Lẹ Pyita humakpooru iya; ndu-ishi-ozì iri l'ẹbo phọ humakwa iya phọ.

⁶E mechaa unwunna anyi ndu ghataru unu nemadzu l'ukporo umadzu ise huma iya lẹ mgbo lanu. Ndu k'ono hagbaru tuko nodukwadua ndzu nta-a; ọle o nwekwaru-a ndu ophu haru nwuhuwaa nu.

⁷E mechaa; Jiemusu bya ahuma iya; ndu-ishi-ozì ophunapho g'ephe ha humakwa iya phọ.

⁸O be l'ikpazu iya; mbẹdua l'onwomu huma iya. Mbẹdua dụwaa gẹ nwa a nwuru lẹ teke ọ kaduru akaka;

⁹noo l'ò kwa mbẹdua bẹ ẹnya kachaa alwalwa l'iphe, bukpo ndu-ishi-ozì Jizosu l'ophu; mbu lẹ mu ta agbakpodaaru nu g'ee-ku mu onye ishi-ozì Jizosu; kẹle mu shi akpajẹ Chiochi kẹ Chileke ẹhu.

¹⁰Obenu l'e shi l'eze-iphe-oma kẹ Chileke, mu buru onye-a mu bu-a; ophu eze-iphe-oma ono, Chileke meru nu mu ono abudu iphe-mmanu. Mu gbẹchianu bya akakota ndu-ishi-ozì ophuu g'ephe ha ejeshi ozi ike; e gudekpọoro l'ò tọ budu mu meru iya l'onwomu; l'ọo eze-iphe-oma Chileke reru ire l'ẹhu mu.

¹¹Oo ya bu; m'ò bu mu ziru unu ozi ono; m'ò bu ẹphebedua-o; ọo iphe lanu ono bẹ unu kwetarù.

Eshi l'ònwu teta k'anyi

¹²Su-a; ọ -buru l'ozì-oma ono bu lẹ Kéreshi shi l'ònwu teta dzuru ndzu; ? denuhunu g'ò gude unu gbẹ haru su l'e tee shidu l'ònwu eteta?

- 13Teke ọ bụ eviya ịe ndu nwụhuru anwụhu tee shidu l'ọnwu eteta; ọ n'iya-a bụ ịe Kéreshi te etetaduru.
- 14Teke ọ bụkwanu ịe Chileke te emeduru Kéreshi g'o shi l'ọnwu teta dzuru ndzụ; ọ n'iya bụ l'iphe ono, anyi ezi ono bụ iphe-mmanụ; ekweta, unu kwetarụ ke Kéreshi bụkwarupho iphe-mmanụ.
- 15Ọ tọ bụdua iphe-mmanụ kpụ; obenu l'ono egoshifua l'anyi adzụ ụka atụ-kobe Chileke eshinu anyi epfu l'ọo Chileke meru Kéreshi o shi l'ọnwu teta dzuru ndzụ. E -mechaa; ọphu Chileke emeduru ndu nwụhuru anwụhu ẹphe teta dzuru ndzụ eviya; ọ n'iya bụ l'anyi dzuru ụka.
- 16Teke ọ bụ ịe Chileke tee medu ndu nwụhuru anwụhu g'ẹphe teta dzuru ndzụ ọzo; ọ n'iya bụ ịe Chileke te emekwarupho Kéreshi g'o shi l'ọnwu teta dzuru ndzụ.
- 17Teke ọ bụkwanu ịe Chileke te emeduru Kéreshi g'o shi l'ọnwu teta dzuru ndzụ; bụ n'iya bụ l'ekweta, unu kwetarụ ke Kéreshi bụ mkpọkoro iphe, enwedu ishi; ịeme iphe-ẹji, unu meshiru dụkwapho unu l'ẹhu g'ọ dụ iya.
- 18Ọ n'iya bụkwapho ịe ndu onoya, ẹphe ịe Kéreshi tughbaru ịeme ẹphe nwụhu ono be lawarụ l'iswi.
- 19Ome ẹka anyi eleberu ẹnya iphe, Kéreshi e-meru anyi bụ ịe ndzụ-a, anyi nọ nta-a kpurumu; mę anyi a-bụkwaru ndu gege akachaa agba k'akuru ọshi ịe mgboko-a.
- 20Obenu ịe Kéreshi shiwaa l'ọnwu teta dzuru ndzụ. Ọ bụwaru iya bụ onye mbụ ịe ndu nwụhuru anwụhu, e-shi l'ọnwu teta.
- 21Ọ kwa g'ọnwu shi l'ẹka nwoke lanụ barahụ bụkwapho g'eteta l'ọnwu e-shi l'ẹka nwoke lanụ vuru ire.
- 22Ọo gę nemadzụ mgburugburu anwụhuję; kele ẹphe shi l'ẹhu Ádamu bụkwapho g'iphe, bụ ndu ẹphe ịe Kéreshi tughbaru bụru nanụ e-nweru ndzụ ọphúú.
- 23Obenu l'onymonye e-teta nọdu ndzụ mę o -rwubeę ya phọ; Kéreshi, bụ iya bụ onye mbụ-a vuwaa ụzo; ndu bụ ndu ke Kéreshi etsota iya mę ọ -byaępho.
- 24E -mechaa; l'a byarwuta ịe teke ikpazụ, bụ teke Kéreshi e-woru ike, o gude bụru eze ye Chileke, bụ Nna l'ẹka; teke ono be oo-mewaa g'ike bụkota iphe, bụkotakpoo ọchi-ọha mę ọ-nọ-l'oke-ọkwa mę o-gude-ike g'ẹphe ha.
- 25Ọle Kéreshi bụfutaje eze, ndu mgboko l'ọphu jasụ teke Chileke e-me iya g'ọ zopyabe ndu ọhogu iya l'ọkpa.
- 26Iphe, bụ ọhogu ikpazụ, oo-mebyi irè iya bụ ọnwu.
- 27“L'o meakwaru ọ zopyabe iphemiphe l'ọkpa iya.” Ọphu doru ẹnya bụ l'a -sụ l'ọ zopyaberu “iphemiphe” l'ọkpa be a gụfuru Chileke; mbụ onye ono, meru ọ zopyabe iphemiphe l'ọkpa ọbu.

28Teke Nwa ke Chileke buepho ishi iphemiphe; noo teke oo-woru onwiya woru ye Chileke ono l'eka; mbu onye ono meru g'o buru ishi iphemiphe ono; k'ophu Chileke a-buru ishi iphemiphe.

29O -buru l'e tee shidu l'onwu eteta; ? ee-mekwanu ndu ono imeagha? mbu ndu ono, e meru baputizimu l'iswi ehu ndu nwuhuru anwuhu ono? O -buru le ndu nwuhuru anwuhu te etetadu ililekpoo; ? buhunu gunu meru g'o gude a nodu eme baputizimu l'iswi ehu ndu ono?

30? Bu gunu meru g'o gude anyi nodu anoduje alo ishi anyi alo tekenteke?

31Unwunna mu; o kwa eku onwomu, mu egudeje unu eku k'atugba, anyi l'unu tugbaru le Kereshi meru g'o gude mu nodu epfuru iya unu su le mu anodujekwa ala maa mboku-mboku.

32O -buru le mu l'ejo anu-egbudu lwuru ogo le Efesosu o buru nemadzu be mu alwodoru iya; ? bu gunu be mu ritaru iya? O -buru le ndu nwuhuru anwuhu tee shidu l'onwu eteta; "G'anyi watanu eri g'o du anyi; ngu g'o du anyi; o -be echele; anyi anwushihunu."

33Unu te ekwekwa g'e dephua unu. "O kwa ejo oswi emebyi ama onye."

34Ophu g'egomunggo lwadupho unu azu; g'unu ahaa eme iphe-eji wata eme iphe, pfuru oto. Iphe, mu epfukwa owa-a bukwa g'iphere kabu du unu. L'o nwekwaru g'unu ha ndu ophu amadu Chileke ililekpoo.

Ogwehu, ee-gude shi l'onwu teta

35O nweru onye a-gbeshi l'o jia su: ? Denukpoo ge ndu nwuhuru anwuhu e-shi teta dzuru ndzu? ? Bu ogwehu du idagha be ephe e-nweru m'ephe teta obu?

36I bukwanu onye-eswe! Iphe, i koru l'ali te erwutajekwa ozo gbahaa l'o rehuru ewa

37Ozo bu l'o to budu g'iphe, a kuru l'ali aduje me o -vugheepho bu g'oduje teke anyi kuru iya. Iphe, akuje bukwa akpuru iya; mbu du g'akpuru akpe me akpuru-iphe ozo, dugbaa l'udu iya l'udu iya.

38Ole Chileke egudeje eka iya meru ugbugba nu iya g'o du yebe Chileke ree; o nuje akpuru iphemiphe ugbugba, gbaru iya nu.

39Anuehu iphemiphe ta agbadzukwaru nanu. Nemadzu nweru anu-ehu nkiya; anu nweru nkiya; enu nweru nkiya; ema nweru nkiya.

40Iphe, du l'imigwe nweru ugbugba nkiya. Iphe, du l'ali nweru ugbugba nkiya. Ole biribiri k'ugbugba iphe, du l'imigwe be du iche; biribiri k'ugbugba iphe, du l'ali dukwapho iche.

41Enyanwu nweru biribiri nkiya iche; onwa nweru nkiya iche; nokwapho ge kpokpode nweru biribiri nkiya. Ke kpokpode bu l'o nweru ophu akaje ibe iya ekeke.

42Nokwapho g'oo-du teke ee-shi l'onwu teta dzuru ndzu. Ehu nemadzu rehuru erehu teke e yeru iya l'ali. Ole teke oo-teta dzuru ndzu be oo-buru iphe, tee rehubaedu erehu.

⁴³E liru iya teke ọ dū ideyideyi; ọle o -teta bẹ ọo-dū biribiri l'ẹnya. E liru iya teke ike adūdu iya; ọle teke oo-teta bẹ ike a-dū iya.

⁴⁴E liru iya teke ọ bụ ogwẹhu mmanụ; teke o-shi l'ọnwu teta bẹ ọo-buru ogwẹhu, shi l'ẹka Unme Chileke. Ogwẹhu mmanụ dukwa; ogwẹhu shi l'ẹka Unme Chileke dukwapho.

⁴⁵L'e dekwaru l'ẹkwo-opfu Chileke sụ: “Onye ivuzọ, bụ Ádamu bẹ e meru ọ buru nemadzu, dzu ndzu.” Ọ bya emee Ádamu k'ikpazu, ọ buru unme, emeje g'anodu ndzu.

⁴⁶Ọ tọ bukwa ugbugba, shi l'imigwe evujeru ụzo; ọ kwa ugbugba k'eliphe evujeru ụzo; k'imigwe etsota iya.

⁴⁷Nwoke mbụ bẹ e gude ẹja, shi l'alị mee; nwoke k'ẹbo shikwanu l'imigwe.

⁴⁸Ọo gẹ nwoke mbụ pho e gude ẹja, shi l'alị mee pho dū; bụ g'iphe, bụ ndu e gude ẹja, shi l'alị mee dukota. Ọ buru gẹ nwoke ophu shi l'imigwe dū; bụ gẹ ndu k'imigwe a-dukotakwapho.

⁴⁹Ọo 'ẹpho g'anyi yeru onye k'ono, e gude ẹja, shi l'alị mee ono bụ g'anyi e-ye onye k'imigwe.

Teke Kéreshi l'a-bya ọzo

⁵⁰Unwunna mu; iphe, mu e-pfufuaru unu bụ; iphe, nweru anụ-ẹhu bya enweru mee taa bahukwa l'ẹka Chileke bụ eze. Ophu iphe, erehuje erehu ta anojekwa je aduwaruro aduru.

⁵¹Unu ngabẹ nchị gẹ mu kooru unu iphe, e shi domia edomi. G'anyi ha taa nwuhugbukwa; obenu l'aa-gbanwegbukotakwanu anyi

⁵²Ịẹ ntabu-ẹnya lanu mẹ e -gbuepho opu-ọgu ono, ee-gbu gude goshi ị teke ikpazu rwuwaru ono. Teke e gbuerupho opu ono; ndu nwuhuru anwuhu etetakota dzuru ndzu ọzo; k'ophu ẹphe taa nwuhubaedu anwuhu; l'ọ gbanwekwaapho anyịbedua.

⁵³Iphe, unu a-maru bụ l'ogwẹhu ọwa-a, l'e-rehu erehu-a; chitafutajekwa ogwẹhu ophu tee rehuedu erehu woru kpube onwiya. Ogwẹhu ọwa-a, l'anwuhuje anwuhu-a chitajekwapho 'anwuhu anwuhu kpube onwiya.

⁵⁴Teke ogwẹhu-a, l'e-rehu erehu-a chitaerupho ogwẹhu ophu tee rehudu erehu kpube onwiya; ogwẹhu ọwa-a, l'anwuhu anwuhu-a chita ophu taa nwuhudu anwuhu kpube onwiya; noo teke iphe ono, e deru ono a-vu g'e deru iya. O pfuru sụ: “Ọnwu bẹ emekpewaru; lwua ya ree.”

⁵⁵Gube onwu ? denuhunu ogba-kpii ngu obu? Gube ilu; ? denuhunu iphe, iigudeje emekpe ndzu?

⁵⁶Anwuhu bẹ ogba-kpii ya bụ iphe-eji; ike k'iphe-eji bukwanuru ekemu.

⁵⁷Ọle-a; Chileke dukwa ike; yebedua meru g'anyi gbẹ l'ẹka Nnajiuphu anyi, bụ Jizosu Kéreshi lwu-kpee iphemiphe ono.

⁵⁸Noo g'o gude mu sù: unubẹ ụnwunna mu, mu yeru obu; unu kpoo onwunu g'abara. Unu p̄furu p̄fushia ike; te ekwekwa g'e mee unu g'unu te etete. G'eka unu kangojẹkwapho l'ejeru Nnajiuphu ozi, nyịberu anyịbe tekenteke; eshinu unu maru l'akanya, unu nọ l'eka Nnajiuphu ese ta abudu akanya ọla-l'iswi.

1 Kọrentu 16

Okpoga, e gude eyeru ndu kẹ Kéreshi ẹka

¹A bya l'okpoga ono, unu gude obu unu anụ ndu kẹ Chileke lẹ Jierúsalemú ono; mu sù g'unu meje iya ẹgube ono, mu ziru Chiochi, nọgbaa lẹ Galeshiya g'ẹphe meje iya ono.

²Iphe, bụ Sonde, a-nwụta nụ g'onyenonu wofutajẹ iphe gẹ Chileke mekpọerupho o nweberu iphe; woru kwakọbeje iche; g'ọ tọ bụepho mu -bya tẹmanu unu agbẹ teke ono nakọahaa ya.

³Teke mu byaerupho; mu ederu ẹkwọ nụ ndu unu a-họta g'ẹphe gude iphe ono, unu nuru ono wolaa Jierúsalemú.

⁴Teke ọ bụ l'ọ iphe, gbaru k'ọp̄hu mu e-je; mu l'ẹphe asw̄iru jeshia.

Iphe, Pọlu r̄iru k'ememe

⁵Mu a-kpapfutakwaa unu mẹ mu -shiepho alị Masedoniya; lẹ mu arikwa k'eshita ẹka ono.

⁶Uzo -dụ; mu l'unu anọduwaro mẹ mu -bya; ọzoo mu a-nọkpoonu udzumini ono; g'unu edukwanaa mu ije gẹ mu jeshia ẹka bụkpoo ẹka mu eje.

⁷L'ọ -buru nta-a, mu aghabu aghabu-a bẹ ọ tọ dukwa mu g'a sù lẹ mu l'unu humaru. Mu arị lẹ mu -byaepho bẹ mu l'unu a-nọ nwodu mẹ ọ -bunuru lẹ Nnajiuphu kweru.

⁸Ọle mu a-nọdu lẹ Efesosu jasù l'ọbo Pentikosutu.

⁹Lẹ Chileke gbuhaakwaru mu ọzo ọkpobe egbuha gẹ mu jee ozi, e-ye ẹka shi; tẹme ndu l'eme g'ẹphe kpọshia mu iya dụ igwerigwe.

Timoti yẹ Apolosu

¹⁰Teke Timoti byaru; unu letakwa ẹnya mee ya g'ọ t̄saru ẹhu. L'unu maru l'oojeru Nnajiuphu ozi gẹ mu eje-a.

¹¹Ọo ya bụ lẹ-a; g'ọ tọ dukwa onye a-nma iya phulaphula. Unu dukwaa ya ije; g'oogude ẹhu-utso lwa; lẹ mu elekwa ẹnya lẹ yẹle ụnwunna anyi ndu ọp̄huu l'a-tuko sw̄iru lwa.

¹²Ọ -buru kẹ Apolosu; mbụkwapho onye k'ono, anyi l'iya t̄kokwarupho ejeru Nnajiuphu ozi ono; mu p̄fushikwaru iya ike sù iya gẹ yẹ ụnwunna anyi ndu ọp̄huu t̄ko sw̄iru k̄papfuta unu; ọle ọ t̄ko dudu iya g'ọ bya nta-a. Ọo-bya mẹ ọzo d̄leru iya phọ.

Opfu, Pọlu gude akpochi iya ishi

¹³Sụ-a; unu kwabejekwa ẹnya; unu apfuru pfushia ike l'ekwekwe, unu kweru ke Kéreshi; unu mejekwa ge nwoke l'iphe, bukpo iphe, unu eme ememe; unu eshikwapho ike.

¹⁴Unu gudeje n-yemobu meje iphemiphe, unu eme ememe.

¹⁵Unwunna mu; ophu unu maru bu l'oo Sutifanasu yee ndibe iya be bu ndu e vuchaa uzo pfuta yeru Kéreshi l'alí Gurisu; teme ephe hofutawaa onwophe dobe; su l'ephe a-ndujeepho eyeru ndu-nsọ eka.

¹⁶G'ọ bukwaru egube ndu ono be unu e-meje iphe, ephe pfuru. Nokwapho g'unu e-meje k'iphe, bukpo ndu ephe l'ephe gba mgba eje ozi bya esekwapho akanya ono.

¹⁷Ehu atso mu utso le Sutifanasu yee Fochiunetosu me Akayikosu be byaru nu; kele iphe, unu gege eme be ephe mekotawaru.

¹⁸Ephe mewaru g'ehu ka mu ebvuru ebvuru bya akakwapho unubedua. Oo egube ndu ono be a-dujeru unu le nsọ.

¹⁹Ndu Chiochi Eshiya l'ekelekwapho unu-o. Akwila yee Pirisila me ndu Chiochi, l'edzukoje l'ulo phe gudekpoo obu phe ekele unu ekele; mbu unube ndu unu l'ephe tugbaru le Kéreshi buru nanu.

²⁰Iphe, bukpo unwunna anyi l'ekelekota unu ekele. Unu ekelekwapho nwibe unu ekele nmata phe akpa, du nsọ.

Ekele, shi l'eka Pọlu

²¹Ekele owa-a bukpokwaa mbedua, bu Pọlu ede iya l'onwomu ekele unu.

²²G'onye ete eyeduru Nnajiuphu, bu Jizosu Kéreshi obu; bukwaru onye a turu onu. Marana ta!

²³Ge Nnajiuphu, bu Jizosu kéreshi meeru unu eze-iphe-oma.

²⁴Mu yekotaru unu obu g'unu ha opfu l'anyi l'unu tukoru tugba le Kéreshi, bu Jizosu. Nokwa g'ọ du.

2 Kọrentu

2 Kọrentu 1

¹Ọwa-a bụ ẹkwo-ozì, mụbe Pọlu ede; mụbe onye Chileke kuru mee gę mu buru onye-ishi-ozì Kéreshi Jizọsu. Onye mu l'iyà ede ẹkwo-a bụ nwanna anyi Timoti. Ndu anyi ede iya anụ bụ Chiochi kę Chileke lę Kọrentu mę iphe, bukpuo ndu-nsọ, bu l'alì Akaya l'ophu.

²Anyi sụ gę Chileke, bụ Nna anyi yę Nnajiuphu, bụ Jizọsu Kéreshi meeru unu eze-iphe-oma; mekwaaphọ g'unu buru l'ẹhu-guu.

Pọlu ekele Chileke

³Unu g'anyi kele onye ono, bụ Chileke bya aburu Nna kę Nnajiuphu anyi, bụ Jizọsu Kéreshi. Oo ya bụ Nna ophu aphu obu-imemini nkiya nyiberu anyibe; bya aburu Chileke, bụ iya bę ndumobu l'ophu shikọta l'ẹka.

⁴O bụ iya bụ onye aduje anyi obu l'iphe, bukpuo iphe-ẹhuka, anyi ejekpuo ejeje; g'anyi adukwanu ike dya ndu ozo obu m'ephe -nodu eje iphe-ẹhuka g'ọ duhabe. Anyi egudekwanu ndumobu ono adu ndu ozo.

⁵L'ọ kwa g'anyi yi l'iphe-ẹhuka, nyiberu anyibe, Kéreshi jeru bụ g'anyi yihukwapho lę ndumobu, nyiberu anyibe ophu Kéreshi adu anyi.

⁶Su-a; ọ -buru l'anyi eje iphe-ẹhuka; unu makwaru l'iphe-ẹhuka ono, anyi eje bukwa g'ee-shi gę Chileke adya unu obu; teme ọ bukwarupho g'ee-shi gę Chileke adzo unu. Teke Chileke adukwanu anyi obu; ono aburu iphe, unu e-gude shihu obu ike teke unu a-nodu ata nshi eje egube iphe-ẹhuka ono, anyi eje ono.

⁷Oobujeru anyi -nyata unu; anyi asu l'anyi maru-a l'unu a-pfushia ike. Noo kele anyi maru l'oo g'unu yi l'iphe-ẹhuka, anyi eje-a bụ g'unu yihukwapho lę ndumobu ophu Kéreshi adu anyi.

⁸Unwunna anyi; iphe, anyi eme g'unu maru bukwa k'iphe-ẹhuka, anyi jeru lę Eshiya. Ewere, meru anyi meghakwaru anyi ẹka k'ophu ọ dọ g'onye e boru ivu, nyi-kworu iya olu. O tsuta-beru anyi l'ẹhu k'ophu anyi eshiędu rikwadaa l'anyi e-mechaa dzukwaduru ndzu ozo.

⁹Mbu-a; anyi shi rja l'e kpewaru anyi mpfugbu; ole ono tukoru buru iphe, e-me g'anyi ta anodu arị l'anyi a-du ike dzoo onwanyi; mekwaaphọ g'anyi wotachia onwanyi ye Chileke l'ẹka, bụ iya bụ Chileke l'aduje ike mee g'onye nwuhuru anwuhu shi l'onwu teta dzuru ndzu.

¹⁰O dzotaru anyi l'ęjo ogu ono, gege eri anyi ishi ono. O bukwarupho g'oo-noduje adzo anyi bụ ono. Oo ya buwaa ẹka ęnya anyi du l'oo ya a-dzota anyi.

¹¹Unubedua kwapho; unu yekwarupho anyi ẹka; unu pfuje nuru anyi Chileke. Oo ya bụ; g'aa-du igwe kele Chileke ekele ẹhu anyi; kele iya k'eze-iphe-oma, o meru anyi; kele ọ numaru olu ikpoto ndu epfu anu iya nu.

Polu agbanwe iphe, o tüberu

- 12**Obu anyi meru g'o doo anyi enya rengurengu le ndiphe ta aghachadu umere anyi aghacha; ophu ntuphu-ire adudu iya; kelekele me a -bya l'ehu anyi l'unu. Umere anyi pfuru nhamunha l'iphe Chileke. O buru iphe ono be anyi aba aba iya. O to bukwa le mmamiphe ke ndiphe be o shi; o kwa eze-iphe-oma, Chileke l'eme.
- 13**L'iphe, anyi ederu unu bukwa iphe, unu a-du ike guta maru iphe, o pfuru. Mu elekwa enya l'oo-mechaa dogbua unu enya ree;
- 14**mbu iphe ono, doru unu enya eka lanu eka lanu nta-a ono. Unu maru le mboku ono, Nnajiuphu anyi, bu Jizosu a-bya ono be unu a-huma iphe, a-zobe gude anyi aba l'abaa; anyibedua egudekwapho unu abakwapho.
- 15**O kwa l'o doru mu enya l'unu maru iphe ono; meru g'o gude mu shi su le mu a-byaadaa ndu-unu bya emee g'urwu gbaaru unu k'ugbo ebo.
- 16**Mu eshiwaro elieli jeshia Masedoniya. Mu -shiepho Masedoniya lwaje me mu abatakwanu ozo byapfuta unu me unu edua mu ije ge mu jeshia Jiudiya.
- 17**? O du unu ge mu shi agha onwomu aghagha teke ono, mu shi tube iya egube ono? ? Too unu riru le mu epfuje iphe nkemu ge ndiphe. L'o kwa ndiphe asuje: Ee l'iphe, uche phe suru: Waawa.
- 18**Tuswekwa! O kwa ge Chileke l'onwiya bu onye gbaru g'e gude ire iya eka bu g'iphe, anyi epfu gbaru g'e gude iya eka le Ee anyi bu Ee; Waawa anyi buru Waawa.
- 19**Le Jizosu Kereshi ono, bu Nwa Chileke ono, Sayilasu pfuru unu opfu iya ono; Timoti pfuaru iya unu ono; mbedua l'ishi onwomu pfuaru iya unu ono ta abukwa egube onye asuje Ee l'iphe, uche iya suru Waawaa. O chikwaa iphe, o bu bu le Kereshi ono -suwaa Ee be o bu Ee.
- 20**Oo ya bu le Chileke shi l'ehu Kereshi ono emeebekota iphemiphe, yebe Chileke kweru ukwe iya. Noo g'o gude anyi nodu eshije iya l'eka su "Amenu" ; g'ee-shi nno kwabe Chileke ubvu.
- 21**Oo Chileke meru g'onye l'unu shi l'eka Kereshi pfuru pfushia ike; teme o bukwaru iya pho hotaru anyi.
- 22**O meru anyi iphe-ohubama, egoshi l'anyi bu ndu nkiya bya eworu Unme-du-Nso nkiya ye l'obu anyi gude goshi iphe ono, o kweru anyi ukwe iya l'oo-mechaa meeru anyi ono.
- 23**Oo Chileke ono be bu ekebe mu. Mbu; g'o mekwaa mu g'o du iya ree me o -budu ire-lanu be mu epfu-a: Iphe, kparu iphe, mu haru abya Korentu bukwapho ge mu ata abaduru unu mba shii.
- 24**Anyi te emekwa g'anyi tubujeru unu iphe, unu e-kweta; eshinu unu pfu-shiru ike l'ekwekwe, unu kweru ke Kereshi. O chia iphe, anyi shiberu ite iya bu g'anyi tuko atuko mee g'ehu kabaa unu atso-shi utso ike.

2 Kọrentu 2

¹Noo g'ọ gude mu gude obu mu g'ọ ha sù lẹ mu ta abyaedu ndu-unu; bya unu akpatsu aphụ ọzo.

²Lẹ teke ọ bụ lẹ mu kpatsuharu unu aphụ ọzo; ? bụhunu onye a-nọdu emehunu g'ẹhu tsoje mu uto? ? Buhukwapho ndu ono, mu kpatsuru aphụ-a?

³Noo g'ọ gude mu dee iphe ono, mu deru ono; g'ọ tọ bụ ọme mu byaru; mę ndu gege eme g'ẹhu tsoo mu uto agbẹ kpatsuhaha mu aphụ. L'iphe, doru mu ęnya bụ l'unu - mewaa g'ẹhu tso mu bẹ ẹhu a-tsoahakwapho unubedua uto.

⁴Teke mu ede ekwo ono bẹ o shikwa atsụ mu l'ẹhu k'ophu ẹhu eshidu buru mu ẹhu; mbụ-a; aphụ jikwaru mu obu; mu nọdu ehubu ęnya-mini ede iya. Mu te edekwaru iya gę mu kpatsu unu aphụ. Ọ chikwaa iphe, mu gude dee ya bụ g'ọoburu iphe, e-me g'unu maru lẹ mu yenukaru unu obu.

Aguru onye a hürü ahühü nvü

⁵Ọ -buru l'ọ duru g'unu ha onye mewaru onye ọzo egube iphe, aphụ ono; unu makwaru l'ọ tọ bukwa mu bẹ o meru iya; ọ kwa unubedua g'unu ha bẹ oome iphe, aphụ obu. Ọle mu tee jedu iya rọ efunuka. Ọo 'ẹpho iphe, mu epfu bụ l'ọ ghuduru mę ọ bwaru unu g'unu ha bẹ o meru iphe, aphụ ono.

⁶Onye ono bẹ mu epfukwa sù l'ahühü ono, unu ka l'otu hua ya ono dukwaa ree; g'a ta hukwa.

⁷Ọ chia iphe, unu e-me nta-a bụ g'unu ghakobe guaru iya nvü dua ya obu; a -nonya o gude agu aphụ; obu phefu iya.

⁸Ọo ya bụ l'iphe, mu arwo unu bụ g'unu mee g'ọ maru l'unu yeru iya-a obu.

⁹L'iphe, mu shi gude deeru unu ekwo pho bukwa gę mu hushikwa unu ama; maru ? unu emeje-a iphemiphe, mu suru g'unu mee.

¹⁰Iphe, bukpo onye unu guru nvü l'iphe, bukpo iphe, o mesweru bẹ mbedua l'ishi onwomu guakwaru nvü. Iphemiphe, mu guru nemadzu nvü iya; mbụ mę o -nwekwaru iphe, mu guru nvü iya; bẹ bukwa l'iswi ẹhu unu bẹ mu nọ l'iphu Kéreshi gua ya.

¹¹Ọo ya bụ g'eeshi egube ono gbobuta Nsetanu g'ọ tọ gbahaa anyi l'eregede eshinu anyi machaarü iphe, ọ tüberu ememe majia ya ęnya.

Teke Pọlu nọ lẹ Tirowasu

¹²Sụ-a; lẹ teke ono, mu jerwuru Tirowasu je asa ozi-oma kę Kéreshi ono bẹ mu rwuru je ahuma lẹ Kéreshi mewaru ọzo dukpooru mu okpobe adudu gę mu bya ejeeru iya ozi.

¹³Ọle mu rwuru ophu ẹhu ebvukpodaaru mu ebvuru; kele mu rwuru; ophu mu ahumaduru nwanna anyi, bụ Tayitosu l'eka ono. Tọbudu iya bụ; mu parü phe haa; ọ buru mu eje Masedoniya.

Etso Kéreshi gbọo ogboo

¹⁴Mu asụ Chileke l'ọ dū ike; yẹbedua, shiwaa l'iphe ono, Kéreshi meru ono; eduphe anyi; anyi nọdu Kéreshi l'ẹka agbọ ogboo; k'ọphu bụ ẹkameka, anyi jeru eeshi l'ẹhu anyi maru onye yẹbe Chileke bụ; waa k'ọphu ozi-oma ono a-vọ ẹkameka pfurupfuru g'iphe, mkpọ iya eshi kwẹekweekwee.

¹⁵L'iphu Chileke bẹ anyi dū gẹ mkpọ ozi-oma ono, eshi kwẹekweekwee l'ẹhu ndu a dzọtaru; mẹ l'ẹhu ndu ala l'iswi ono.

¹⁶L'ọ dūru ndu ọphu mkpọ ozi-oma ono atagbu l'ẹpho; ọ dūru ndu ọphu o meru g'ẹphe nọdu ndzụ. Oo ya bụ; ? bụ onye sūru eje ẹgube ozi, dū nno?

¹⁷Anyịbedua ta arwutoshikwa ozi-oma ono arwutoshi gẹ ikpoto ndu ọzo eme iya. Anyịbedua, Chileke ziru-a egudejekwa obu iphóró epfu opfu ono l'iphu iya, bụ iya bụ iphe, gbaru ndu ejeru Kéreshi ozi.

2 Kọrentu 3

¹? Ọ dū unu g'anyi watawaru aja onwanyi ajaja ọzo tọ? ? Bụ g'e dee ẹkwo l'anyi bụ ndu ire-lanu nū anyi g'anyi nū unu gẹ ndu ọzo anuje unu? Tọo ? Bụ g'anyi sū g'unu nū anyi ẹkwo, l'egoshi l'anyi bụ ndu ire-lanu g'anyi paru gẹ ndu ọzo apajeru?

²Ọ kwa unubedua l'onwunu bụ ẹkwo, e deru nū anyi. Ẹkwo k'ono bẹ e deru ye anyi l'okpoma g'onnyemonye guje g'o doo ya ẹnya.

³Ọ bụwaa g'unu goshije l'unu bụ ẹkwo ọphu Kéreshi deru nū anyi g'anyi pajeru. Ẹkwo obu ta abudu mini-ẹkwo bẹ e gude dee ya. Iphe, e gude dee ya bụ Unme, shi l'ẹka ke Chileke; mbukwa Chileke ọphu dzū ndzụ. Ọphu ẹka e deru iya abudu lẹ mkpuma, dū g'okwekpu; ẹka e deru iya bụ l'obu nemadzu.

⁴Iphe, anyi gude epfu nno bụ lẹ Kéreshi mewaru anyi g'anyi gudeje ire Chileke ẹka.

⁵Iphe, mu epfu-a ta abukwa l'o nweru ike, dū anyi l'ẹhu, bụ ike, anyi e-gude epfu l'anyi sūru eme ẹgube iphe ono. Ike, anyi nweru bukwa Chileke bẹ o shi l'ẹka;

⁶yẹbedua, bụ iya meru anyi sūru eme g'a maru l'anyi bụ ndu ejeru Ogbandzu ọphúú ono ozi. Ọ tọ bukwa ekemu ọphu e deru l'ẹkwo bẹ ọnuje anyi nta-a. Ọ kwa Unme-dụ-Nsọ nkiya bẹ ọnuje anyi. L'ekemu ọphu e deru l'ẹkwo egbukwa egbugbu; obenu lẹ Unme Chileke l'anuje ndzụ.

⁷Sụ-a; ọ bụru l'ekemu mgbu-ọnwu ono e deru kaa ya akaka lẹ mkpuma, dū bachibachi ono bẹ gburu nwịnwii; k'ọphu bụ lẹ unwu Ízurelu ta adudu ike lee Mosisu ẹnya l'iphu; mbụ ogbu nwịnwii ọphu e-mechaa phukashihu nū;

⁸buchia ozi Unme-dụ-Nsọ eje taa kabadaa adu akpabiri?

⁹Teke ọ bụ l'ozi, nmaru ikpe-ọnwu ono dū-be akpabiri ẹgube ono bẹ ozi k'apfubekoto ono a-kabakwanu adu akpabiri.

¹⁰Oo ya bụ; l'e -pfuje iya epfufu; mu asụ l'ogbu-nwịnwii ọphu ọzo mbụ pho gude ta aduedu iphe, ọ bụ l'ẹka ogbu-nwịnwii ke nta-a nọ. Ogbu-nwịnwii ke nta-a ono bụ ogbu-nwịnwii, nyiberu anyibe.

- ¹¹Lẹ teke ọ bụ l'iphe ono, l'e-mechaa phukashihu nụ ono dọ-be akpabiri egube ono bẹ ophu a-dọwaro adudu a-kabakwanu adu akpabiri.
- ¹²Oo ya bụ l'e -shinu enya anyi dọ l'egube iphe ono bẹ anyi apfushije ike asa kpa kpa.
- ¹³Anyi te emedu gẹ Mosisu, jeru je achita ekwa phuchia iphu gẹ ndu Izurelu ta ahuma iya iphu g'ogbu-nwiiwii ono chihuada.
- ¹⁴Ebe ọ bukwa l'ephe ta ahumaduru iya; Chileke kwechikwaru phe pho enya; kele oobujeru ephe -nodu agukpoo ekwo oibandzu k'akahu ono; mbukwa jasụ ntanu-a; odu g'e gude egube ekwa ono phuchikwaa phe pho iphu g'ephe ta amaru iphe, ephe agu. Oo 'epho atugba onwonye lẹ Kereshi kpurumu l'a-phufu ekwa ono.
- ¹⁵Mbu-a; oobujeru teke ephe agu ekwo ekemu Mosisu ono; mbukwa byasu nta-a; egube ekwa onoya aphuchie phe pho egomunggo.
- ¹⁶Ole ọ kwaa g'ekwo-opfu Chileke pfuru ke Mosisu bu g'oo-du ndu Izurelu; l'ekwo-opfu Chileke pfukwaru ke Mosisu su: "Oobujeru teke ọ ghawaru Nnajiuphu iphu; ekwa ono aphufu."
- ¹⁷Oo Nnajiuphu ono bu Unme-du-Nso ono. O buru l'eka Unme-du-Nso ono bẹ ato l'egbu shi.
- ¹⁸Anyibe ndu ono g'anyi ha bu ndu adudu iphe, phuchiru anyi iphu; anyi nodu ele ogbu-nwiiwii ke Chileke ono enya g'onye ele enya l'onyo; ọ gbanwee anyi; anyi du g'ọ du; mbu shi l'ogbu nwiiwii kaba egbu nwiiwii. Onye o shi l'eka buru Nnajiuphu ono, bu Unme-du-Nso.

2 Korentu 4

Ekwu, no l'ite-urwa

- ¹Oo ya bu; l'eshinu Chileke phuru anyi obu-imemini bya eworu ozi ono ye anyi l'eka bẹ ike ta abyakwa abvu anyi l'ozi ono.
- ²Iphe, anyi jikaru bu iphemiphe, bu iphe-iphere; mbu iphe, eeme lẹ mpya. Anyi te emedu iphe eregede; ophu anyi agwadu opfu Chileke ngwaragwa. Iphe, anyi emejechia bu l'anyi epfuje okpobe-opfu ono tu ya jala. Anyi anoduje l'iphu Chileke eme egube ono g'onnyemonye egude nno shi l'obu iya maru ndu anyi bu.
- ³Lẹ teke ọ bụ l'ozi-oma ono, anyi ezi ono bu iphe, e gude iphe kwechia ekwechi; ọ kwa l'enya ndu ala l'iswi bẹ e kwechiru iya iphe obu.
- ⁴Lẹ Obutuswe, bu iya bu ishi ke ndu mgboko-a bẹ woakwaru eka pyichia ndu bu ekwegekwe l'egomunggo g'o mee k'ophu ephe taa humadu iphoro, shi l'ozi-oma ono, echiru phe swacha swacha ono. Iphoro ono egoshi ogbu-nwiiwii ke Kereshi. O buru lẹ Kereshi ono bẹ a humaru Chileke l'onwiya.

- ⁵Oo ya bu; l'ò tò bukwa onwanyi bè anyi anòduje epfu g'a maru. O kwa Kéreshi Jizosu, bu Nnajiuphu anyi ono. Anyibedua l'ishi onwanyi bukwapho ndu ejeru unu ozi l'iswi ẹhu Jizosu.
- ⁶O kwa Chileke ono, sùru g'ìphóró shi l'òchii nwua phoo ono buhukwapho Chileke, meru g'ìphóró iya nwukwaapho phoo l'ime obu anyi. Oo ya bu gẹ ndiphe, amaru ọdu-biribiri kẹ Chileke; mbu ọdu-biribiri, shi l'iphu Kéreshi egbu nwìnwii.
- ⁷Su-a; anyi dukwapho g'ite, e gude urwa kpua, Chileke woru iphe ono, ereshi ire ike ono, bu iya bu iphóró iya ono woru dee. Iphe, o gude dee ya nno bu g'a huma l'ike iya ono, nyiberu anyibe ono te eshidu anyi l'eka; l'oo yebedua be o shi l'eka.
- ⁸Aanoduje akpa anyi ẹhu tekenteke l'ekameka; ole o tò bukwanu l'aakpapyaje anyi ishi. A -nonyaa iphe, ahuru atsu anyi l'ẹhu k'ophu anyi taa majeeduru iphe, anyi e-me; ole okpoma eshihujeele anyi ike.
- ⁹Eemeje anyi ewere; ole Chileke te ebuhajekwanu anyi eka. E chitsuje anyi; ole e te echigbukwanu anyi echigbu.
- ¹⁰Mboku-mboku be anyi ejeje iphe-ehuka ono, Kéreshi jeru teke ono, ooby a nwuhu ono. Oo ya bukwapho g'aa-huma ndzu, shi l'eka Jizosu l'ẹhu anyi.
- ¹¹O tò dukwa tekenteke anyibe ndu ophu dzu ndzu ta atso-gejeduru atso-geru l'onu onwu; l'opfu ẹhu Jizosu; g'aa-huma ndzu, shi l'eka Jizosu, du anyi l'ẹhu owa-a, a-nwuhu anwuhu-a.
- ¹²Oo ya bu l'onwu swiru anyi; ndzu swikwanuru unu.
- ¹³Su-a; l'ekwo-opfu Chileke be e dekwaru su: “Mu kweru kẹ Chileke. O buru iphe ono meru g'o gude mu nodu epfu opfu iya.” O buru l'anyi kweru kẹ Chileke egube ono meru g'o gude anyi nodu epfukwapho opfu iya.
- ¹⁴Ishi iya bu l'anyi maru le Chileke ono, meru gẹ Nnajiuphu, bu Jizosu shi l'onwu teta dzuru ndzu ono l'e-mekwapho g'anyi shi l'onwu teta dzuru ndzu opfu l'anyi le Jizosu tugbaru buru nanu; l'ogbe teke ono toko anyi l'unu duta bya edobe l'iphu iya.
- ¹⁵Iphemiphe ono bukota l'opfu ẹhu unu. Oo ya bu g'eze-iphe-oma kẹ Chileke akabaa erwu ndu du igwerigwe eka. Eze-iphe-oma ono emee g'a du igwe kabaa ekele Chileke ekele; shikwapho nno kwabe iya ubvu.
- ¹⁶Oo ya bu l'ike ta abyakpoda abvu anyi l'ozi ono. A makwaru-a l'ẹhu anyi libahuwaru alibahu teme o nodu abyawaa anwuhu; obenu le ndzu ono, Chileke nuru anyi ono be onoduje eme mboku-mboku g'o du ophuu ophuu.
- ¹⁷Teme iphe-ehuka, anyi eje-a, du nwanphe-a; teme ophu o dudu g'oo-no-beru-a; l'e-mechakwaa setaru anyi ubvu, a-du shi; mbu ubvu ophu nyiberu anyibe k'ophu aamadu g'aatu onu iya; teme ophu o bvudu abvubu.
- ¹⁸Iphe, anyi chiru upfu ye ta abukwa l'iphe, eele l'enya; o chikwa l'iphe, enya ta ahumaduru. L'iphe, enya l'ele ta adukwa eka onono-bejeru; obenu l'ophu a ta ahumadu l'enya l'a-no ojejeje.

2 Kọrentu 5

Unuphu, anyi e-buru l'imigwe

- ¹Anyi maru lẹ teke a phokataru nwa mkpu ọwa-a, anyi bu l'eliphe-a; bẹ anyi nweru-a unuphu ọzo, Chileke kwaru anyi. Ụlo k'ono ta abudu ẹka bẹ e gude kpua ya. Ọ bu ụlo ophu anyi a-nọ ojejoje l'imigwe.
- ²Su-a; anyi a-nojeekwapho atsu pfu lẹ mgboko-a jasụ g'anyi a-nọ-beru. Iphe, ẹgu iya agụ anyi bukwa teke Chileke e-me anyi ewota ogwehu ọphuu ono, Chileke e-shi l'imigwe nu anyi ono yee g'uwe.
- ³Ọo ya bu; anyi -yewaa ogwehu ọphuu ono g'uwe; anyi taa duedu g'anyi gba ẹhu ọto.
- ⁴Lẹ teke anyi nokwadu l'ime ogwehu ọwa-a, anyi nweru nta-a bẹ anyi atsukwa pfu g'anyi vu ivu-erwa; ophu ọ dukwanu anyi g'a su l'anyi togboru ogwehu ọwa-a, anyi nweru nta-a. Iphe, ẹgu iya gbẹ agụ anyi bu g'a gbẹ yepyabefua anyi ogwehu ọphuu ono l'eli iya. Ọo ya bu g'ogwehu ono eshi ẹgube ono lwee ọwa-a, e-mechaa nwuhu anwuhu-a.
- ⁵Ọ kwa Chileke l'onwiya bu onye eme ire l'ẹhu anyi g'eeshi g'ẹhu anyi eyee ogwehu ọphuu ono g'uwe; kele ọ nuru anyi Unme-du-Nso gude goshi anyi iphe ono, o kweru ukwe l'oo-me ono.
- ⁶Ọo iphe ono meru g'o gude obu nọdu eshihuje anyi ike tekenteke kpoo. Iphe, anyi maru bu lẹ teke anyi nọ ndzu eme ẹhu anyi ẹhu anyi bẹ anyi ta anodu Nnajiuphu l'eka.
- ⁷Iphe, anyi gude buru bukwa l'anyi kwetaru l'ẹbe abu l'anyi humaru l'anya.
- ⁸Obenu lẹ mbedua epfu su l'obu te etedu anyi ophe; teme ọ nọdu ehe anyi ihee aparu ogwehu ọwa-a haa; je g'anyi lẹ Nnajiuphu buwaruro eburu.
- ⁹Ọo ya bu l'iphe, anyi ese akanya iya bu g'anyi meje iphe, du iya ree; me anyi nọ l'ibe iya; me anyi nọ lẹ mgboko-a.
- ¹⁰Lẹ g'anyi hakotakpoo; byafutajekwa bya apfuru l'iphu Kereshi me ọ -byaepho ekpe ikpe. Ọo ya bu; g'onyenonu a-nata iphe, rwuberu iya nu; m'ọ bu k'oma-o; m'ọ bu ẹjo iya-o; onyenonu anata ugwo iphe, o meru teke ọ nọ ndzu lẹ mgboko-a.

Eshi l'eka Kereshi eshita Chileke ọnyà

- ¹¹Ọ kwa l'oo l'anyi anoduje atsu Nnajiuphu ebvu opfu l'anyi maru l'oo ya e-kpe ikpe ono meru g'o gude anyi nọdu anoduje eme g'anyi pfuta ndiphe yeru iya. Obenu l'oo Chileke makotaru g'anyi gbaru; teme ọ dukwa mu pho g'unubedua l'onwunu makwarupho anyi l'obu unu.
- ¹²Anyi te etukwa onwanyi epha l'iphu unu ọzo; ọ chia iphe, anyi eme bu g'anyi goshi unu iphe, unu a-zobe okpa gude anyi eku onwunu; ọo ya bu g'unu a-majeru onu, unu e-yeru ndu ono, egudeje g'ephe gbaru l'eli ẹhu aba abaa; hakwaa g'ephe gbaru l'ime obu phe ono.

¹³Ọ -bụkpooru nū l'ọo egomunggo swehuru anyi bẹ iphe, anyi epfu bụkwa Chileke bẹ anyi epfudoru iya. Teke ọ bụ l'egomunggo anyi ọ́ nhamunha bụkwa-a l'opfu ẹhu unu bẹ ọ bụ.

¹⁴L'iphe, bụ iya emeje anyi eme g'anyi eme-a bụkwa eye obu ọ́phu Kéreshi yeru anyi. Kele iphe, kwatakpooru doo anyi ẹnya ọkpobe edodo bụ l'ọo onye lanu nwuhuru l'iswi ẹhu ọ́ha. Ọo ya bụ l'ọo ọ́ha nwuhuru.

¹⁵Ọ nwuhu-chiru ọ́ha l'ọ́phu. Ọo ya bụ gẹ ndu nọ ndzụ ta adzheru ndzụ ono dzụ-doru iya onwophe. Ọ chia g'ẹphe dzuru ndzụ dzụ-doru iya onye onoya, nwuhu-chiru phe ọ́nwu; e mechaa o shi l'ọ́nwu teta dzuru ndzụ ono.

¹⁶Su-a; eshi nta-a bẹ ọ tọ ọ́kwá onye anyi elekwadu ẹnya, ndiphe ele amadụ; tẹme anyi amaru g'onye ọ́bu gbaru. Anyi -shi elejekpoonu Kéreshi ẹnya, ndiphe eleje amadụ maru g'ọ́ gbaru; nta-a bẹ anyi te elehkwá iya ẹgube ono.

¹⁷Ọo ya bụ l'onymonye, nọ l'ime Kéreshi bụwaa onye e meru k'ọ́phúú. Akahụ iphe bvụakwaru; iphemiphe bụwaru iphe ọ́phúú!

¹⁸Iphemiphe-a bụkota Chileke bẹ o shi l'ẹka. Chileke shikwanu Kéreshi l'ẹka mee g'anyi l'iya doshia; bya eworu ozi k'edoshi opfu ono ye anyi l'ẹka.

¹⁹Ọo ya bụ lẹ Chileke shi Kéreshi l'ẹka edoshi opfu duru yẹ ndiphe mgburugburu; ọ́phu ọ́gukoeduru phe iphe-ẹji, ẹphe anọduje eme iya. Tẹme o yekwaaphọ anyi ozi k'edoshi opfu ono l'ẹka.

²⁰Ọo ya bụ l'anyi bụ ndu nọ-chiru Kéreshi. Chileke gbẹ anyi l'ẹka arwo ndiphe arworwo. Anyi nọ-chiru Kéreshi arwo unu sụ: unu kwe g'e doshia opfu, duru unu lẹ Chileke.

²¹Kele Chileke meru iya o vuta iphe-ẹji anyi l'ọ́phu l'ẹbe abụ l'o mejeru iphe-ẹji; k'ọ́phu anyi e-shi iya l'ẹka tuko bya aburu ndu pfuberekoto gẹ Chileke.

2 Kọrentu 6

¹Ọo ya bụ l'anyibe ndu anyi lẹ Chileke gba mgba eje ozi-a; l'arwọkwa unu arworwo sụ g'unu ta anatakwa eze-iphe-oma ke Chileke-a mee ya g'ọ́ buru ọ́la-l'iswi.

²L'ọ́ sụkwaru: “Teke ọ́ gbaru l'angabẹ nchị bẹ mu ngaberu ngu nchị. O rwua l'eswe ndzọta; mu dzọo ngu.” Gẹ mu kakwaru unu; ọ́ kwa nta bụ eswe eze-iphe-oma ke Chileke. Ọ́ kwa ntanụ bụ eswe ndzọta.

Iphe-ẹhuka, Pọlu eje

³Ọ tọ ọ́kwá onye ọ́ dū anyi g'a sụ l'o pfutoshiru ozi, anyi eje. Ọ́ buru iphe ono meru g'ọ́ gude anyi nọdu eme g'ọ́ tọ́ dū onye umere anyi a-gbẹ buru upfu dū iya l'ọ́kpa.

⁴Ọ́ chia iphe, anyi emejechia bụ l'anyi egudeje iphemiphe, byapfutaru anyi egoshi l'anyi ejeru Chileke ozi. Anyi atajẹ nshi mẹ iphe-ẹhuka -byapfuta anyi; ọ́zoo mẹ oke mkpa -byaru anyi; ọ́zoo mẹ a -nọdu akpa anyi ẹhu.

⁵Eechi anyi iphe; bya atụ anyi mkpọro; bya eyeru anyi mkpaka. Anyi ejegbu onwanyi l'ozị; ẹbe anyi edobejedu ishi l'oshi; anyi nọdu akwa ẹgu.

⁶Ntucha ta adukwa ịe ndzụ anyi; iphe nọdu edoje anyi ẹnya; anyi nọdu atajeru iphe nshi; nweru obu ọma; nọdu l'ẹka Unme-dụ-Nso; nweru n-yemobu ọphu abụdu l'eli-ọnu;

⁷epfu ire-lanụ; nọdu l'ike kẹ Chileke chiru ngwogu k'apfubekoto l'ekutara me l'ekicha;

⁸me a -nọdu akwabẹ anyi ùbvù; ọzoo l'akwa anyi eswe; me a -nọdu epfu l'anyi eme ẹji; ọzoo l'epfu l'anyi eme ree; eeme anyi g'anyi bu ndu ẹregede; obenu l'anyi bu ndu ire-lanụ;

⁹eeme anyi ge ndu amadu amama; obenu l'a makwanuru anyi rengurengu; ge ndu anwuhu anwuhu; ole anyi dzukwanu ndzụ; ge ndu echi echachi; ole e te echigbukwanu anyi echigbu;

¹⁰ge ndu agu aphu; ole anyi anodujeele-a ete eswa tekenteke; ge ndu ukpa; ole anyi meru ikpoto ndu nemadzu ephe nweru iphe; ge ndu adudu iphe, ephe nweru; ole anyi tukoru iphemiphe, nweru.

¹¹Su-a; unube ndu Korentu; anyi togboakwaru unu iphemiphe eba; anyi bya eghebewaru unu okpoma anyi onu.

¹²Anyi te ewofukwaru unu obu; o chikwa unubedua wofuru anyi obu.

¹³Su-a; unu gheberu anyi obu unu onu g'anyi gheberu unu obu k'anyi-a. Nta be mu epfuakwaru unu opfu, nna epfujeru unwu iya.

Ezehuru iphe, adudu Chileke ree

¹⁴Unu ịe ndu ekwedu kẹ Chileke ta atugbakwa buru nanu. Kele-a; ? bu gunu be apfubekoto yele eme ejo-ememe gude buru nanu? ? Denu g'iphoro yele ochii e-shi dogba ehu?

¹⁵Kereshi yee Obutuswe ta ayikwa chia idzu agbaru mgbamee iphe lanu. Oo ya bu; ? buhunu gunu be onye kweru kẹ Chileke yee onye ekwedu kẹ Chileke gba mgbamee?

¹⁶Su-a; ? denu g'eeshi wota eze-ulo Chileke yee ulo-nshi dogbabe? O kwa anyi bu eze-ulo Chileke; mbu Chileke ophu no ndzu. Le Chileke pfukwaru iya l'onwiya su: "Mu e-buru eburu l'ime phe tsojeru phe eje ekameka, ephe eje. Mu aburu Chileke, doberu phe nu; ephe aburu ndibe mu."

¹⁷Noo g'o gude Chileke pfukwaapho su: "Unu hofuta onwunu l'echilabo phe bya anodu iche. Unu te eyejekwa eka l'iphe, aaso nso ge mu anatakwanu unu.

¹⁸Oo ya bu ge mu aburu nna unu; unu aburu unwu mu unwoke me unwu mu unwanyi." Nokwa iphe, Nnajiuphu, bu Okalibe-Kakota-Ike eepfu.

2 Korentu 7

¹Sụ-a; ndu mu; eshinu Chileke kweru anyi ukwe-iphe dụ egube-a; g'anyi safukotanu onwanyi iphe, bukpo iphe, emerwu ogwehu bya emerwu obu nemadzu. G'anyi tsuje Chileke ebvu; g'anyi kukebeje ehu buru ndu dobekotaru onwanyi iche k'ophu anyi abukotaru ke Chileke okpobe aburu; meje iphe, o suru g'anyi meje.

Ehu-utso Polu

²Unu menaa g'anyi maru l'anyi dukwadia unu l'obu. O to dukwa g'unu ha onye anyi mesweru; ophu o dukwa onye anyi dephuru; ophu o dukwapho onye anyi gudeje ugho mee iphe, apfuduru-oto.

³Iphe, mu epfua ta abukwa le mu agbarwushi unu agbarwushi eshinu mu pfuhawaru su l'unu dukwa anyi l'obu shii. Anyi l'unu bu nanu; me anyi dzu ndzu-o; me anyi nwuhuru anwuhu-o.

⁴Mu anoduje asa kpa kpa l'opfu ehu unu; mu nodu egudeje unu aba l'abaa. Anyi no le mkpamehu; ole unu adujekwanu mu obu; teme ehu nodu atsoje mu ntumatu me mu -nyata unu.

⁵L'anyi batakwaru Masedoniya; ophu ehu ebvubaeduru anyi ebvuru. A nodu emeepho anyi mkpawere l'ekameka. Opfu du l'etezi; ndzu-agugu du l'ime-ulo.

⁶Obenu le Chileke, bu onye aduje onye aphu tsoru obu be gudewaa abyabya, Tayitosu byaru gude dua anyi obu.

⁷Ophu o budua abyabya, o byaru kpurumu; edo, o dokpoodaru anyi g'unu gude dua ya obu yichakwapho l'iphe, duru anyibedia obu. O pfuru anyi su l'ogoshi unu egu ike ge mu l'unu huma; l'unu agu aphu okpobe agugu k'iphe, unu meru; teme l'unu agbajeru mu odzori shii. Onoya be mekpooru mu ehu kabakpo mu atso utso nta-a.

⁸L'o betakponu ekwo-ozia, mu deru-a nodu eme g'aphu ji unu obu; mu ta atakwa onwomu uta le mu deru iya. Teke mu gege ata onwomu uta bukwa teke mu humaru le mu gude iya mee g'aphu ji unu obu; obetaru o buerupho ke nwa teke ono.

⁹Obenu le nta-a be ehu atso waa mu utso. Ehu-utso mu ta abukwa l'oo le mu meru aphu ji unu obu. Ehu-utso mu bukwa l'aphu ono meru izimanu iphe-eji unu lwa unu azu. Aphu k'ono bukwa aphu ophu meru g'unu mee iphe, du Chileke ree. Oo ya bu l'o to dudu iphe, anyi mekataru unu.

¹⁰Kele nggumaphu ophu du Chileke ree emeje g'izimanu lwa nemadzu azu g'adzoo ya; ophu atadu onwonye uta iya k'ono. O bekwanu le nggumaphu k'unwu-eliphe l'egbu egbu.

¹¹Unu humaanaro iphe aphu ono, du Chileke ree ono meru. Unu humaanaro g'unu yeberu ehu l'eme g'a maru l'unu pfuberekoto l'iphu Chileke. Unu humanu g'iphe, meru nu nwu-beru unu oku l'ehu. Sụ-a; unu humanu g'unu atsube ebvu iphe e-menu. Unu humaru g'ogube unu egu g'unu huma mu; unu humaru g'oolwube unu l'obu g'unu gbaaru mu odzori. Unu humaru g'o du-be unu g'unu hua onye ono, mesweru nu ono ahuhu. L'ime iphemiphe ono be unu goshiru l'o to dudu eka o deru unu.

¹²Oo ya bu l'edede, mu deru ekwo-ozu ono ta akwatakwa buru k'iswi ehu onye ophu mesweru nu; ozoo k'iswi onye ophu o mesweru. Iphe, mu gude dee ya bukwa g'o mee g'unu maru g'unu agbaberu anyi odzori l'iphu Chileke.

¹³Noo ya bu l'oodu nu pho anyi obu. A -gufukpooro adu obu ophu unu duru anyi; ehu kabakpooro anyi le Tayitosu utso l'unu tukoru g'unu ha mee ya ehu bvuru iya ebvuru.

¹⁴Le mu tukwaru Tayitosu onu unu; gude unu aba l'abaa; e mechaa; o buerupho ge mu pfuru bu g'o du; ophu unu emeduru mu iphe-iphere. O to dudu teke anyi ete epfujeduru unu iphe, bu okpobe-opfu. Nokwapho g'iphe, anyi pfuru Tayitosu k'ehu unu tukoru buru eviya.

¹⁵O buru iya meru g'o gude o nodu akajebaa unu eyeshi obu ike me o -nyata l'unu g'unu ha atukoje eme iphe, mu suru g'unu mee; waa me o -nyata g'unu gude ndzu-agugu gude ay oshi k'anonyakwaa unu mee iphe, adudu iya ree; unu gude egube ono meshiaru iya l'ibe unu.

¹⁶Nta-a be ehu atsokpoo mu atsoshi mu iya ike le mu gude ire unu aka okpobe egude l'iphemiphe.

2 Korentu 8

Gę ndu ke Kęreshi a-nuje iphe

¹Iphe, anyi eme g'unu maru; unwunna mu; bu k'eze-iphe-oma, Chileke meshiru le Chiochi, nogbaa le Masedoniya.

²Kele mkpamehu, a kparu phe huru phe ama hushia phe iya ike. Oe ehu tsoleru phe-a tsoshia phe iya ike teke ono; k'opu ephe saru aka sagharu iya aka l'anu Chileke iphe; l'ebe abu l'ephe nweru iphe ilile.

³Ge mu e-pfubeeru iya pho bu l'ephe nuru g'eka ha phe; bya anukwapho nughata egube ono. Ephe tukpooru obu phe onyo

⁴rwoo anyi rwoshia anyi ike su g'anyi kweru g'ephe le ndu ke Kęreshi ozo gbaru mgba nuje iphe, g'e gude gbaaru ndu-nsu mkpu.

⁵Ephe meberu iphe ono g'anyi aru-vujeduru l'egomunggo. Ephe vukpodaru uzu gbeshi bya eworu onwophe ye Nnajiuphu l'eka; teme ephe gbeshi bya eworu onwophe yehukwapho anyi l'eka, bu iya bu g'o du Chileke ree.

⁶Noo g'o shitaru anyi rwoo Tayitosu; yebdua, bu iya gbuberu ishi eje ozi ono; su iya g'o mekpokwapho iphe, oome; g'o yekwaru unu aka g'unu jefufu ozi ono, unu eje ono l'ishi; mbu ozi ono, unu eje k'eze-iphe-oma ono.

⁷Iphemiphe, unu nweru be unu nwekwaru nwegharu iya aka; mbu l'unu kwetaru kwegharu iya aka; pfua opfu Chileke pfugharu iya aka; maru ke Chileke magharu iya aka; bya ekukebe ehu eye aka; bya eyekwaapho anyi obu yeshia ya ike. Oo ya bu g'unu nukwapho iphe nugharu iya aka g'e gude jee ozi k'eme iphe-oma ono.

⁸Iphe, mu epfua ta abukwa l'oo anmakobe; mu nodu anmakobe iya unu. Oo iphe, mu eme bu ge mu goshi unu g'ogugu-be ndu ozo egu eye eka; shi egube ono mee unu g'unu goshi l'eye obu ophu unu yeru bua okpobe eye obu.

⁹Kele unubedua mahukwarupho eze-iphe-oma, shi l'eka Nnajiuphu anyi, bu Jizosu Kereshi; l'a makwaru-a le Kereshi nweru iphe shii; obenu l'o woleru-a onwiya mee onye ukpa l'iswi ehu unu. O buru iphe, o meru bu g'oo-shi l'aburu onye ukpa ono mee g'unu nweru iphe shii.

¹⁰Onu, mu e-ye l'opfu ono bu le-a; o karu unu ree l'unu gbete nta-a mefufu iphe ono, unu wataru akaphuru ono l'ishi; kele o to budua l'oo unubedua vu uzo chia idzu iya; o kwapho unubedua vu uzo wata iya ememe.

¹¹Ngwa; unu kukebenu ehu mee ya gbiriri jasu unu emebe iya. O kwapho g'o phuru unu aphuphu l'ehu teke unu wataru iya ememe bu g'emefufu iya a-nodu aphu unu l'ehu. G'iphe, unu gude eme iya bukwarupho g'eka beru unu.

¹²Le teke o bu l'ogugu ngu agugu anu Chileke iphe; be Chileke a-natakwa iphe, i nuru iya okpobe anata. Chileke atuje iphe, onyemonye nuru iya le g'onye ono nweberu. O too tukwa iya le g'onye ono enwedu.

¹³O to buka iphe, mu epfu nta-a bu l'oo ge mu pata ivu ndu ozo bofua unu g'unu vuru; ephebedua agbaru eka.

¹⁴Obenu l'eshinu unu ka ndu eeje eyeru eka obu enweru iphe shii ke nwa nta; be iphe, du ree bu g'unu gbataru phe le mkpa, duru phe nu. Teke mkpa dukwanuru unubedua; ephebedua nweru shii ephe a-gbataru unu. Oo ya bu l'unu ibekobo be eyeru onwunu eka enya nhamunha.

¹⁵O n'ia bu iphe, e deru l'ekwo-opfu Chileke su: "Onye kpotaru shii te ekpoghaduru iya eka. Ophu onye kpotaru nwanshi ekpopeteduru."

Tayitosu yele ndu ephe l'ia swi

¹⁶Anyi ekele Chileke ekele shii ke l'o kwapho g'ophu anyi l'obu eyeru unu eka bu g'ophuhukwapho Tayitosu.

¹⁷O to budua l'o nataru arworwo, anyi rworu iya kpurumu; obenu l'ophu iya l'ehu eye eka shii k'ophu o turu obu iya onyo su le ya a-byapfutashia unu.

¹⁸Anyi yekwarupho nwanna anyi nwoke ge yee l'ia swiru. Nwanna anyi ono bu onye a kwatakpo akwabe okpobe ubvu l'iphe, bukpo Chiochi le Chiochi. O buru g'o gude ezi ozi-oma ono.

¹⁹Temme a -gufukwaro onoya; o kwa Chiochi ge Chiochi ha hotaru iya woru iya ye su g'o tsoje anyi je ozi ono, anyi gude agbataru unwunna anyi ono. Anyi gude ozi ono ekutse Nnajiuphu temme anyi gude iya egoshi l'o du anyi g'anyi yeje eka.

²⁰Anyi tokwaru nwehu dee enya le mini eme k'ophu o too dudu onye a-ta anyi uta g'anyi gude eme k'iphe-oma ono, nyiberu anyibe ono, e yeru anyi l'eka ono.

²¹L'iphe, anyi t̄beru ememe b̄kwa g'anyi meje iphe, d̄ ùbvù l'ènya; ọ t̄ b̄kwaa ọphu d̄ ùbvù l'ènya Nnajiuphu b̄ anyi e-meje nk̄inyi iya; obenu g'ọ b̄kwarupho iphe, d̄ ùbvù l'ènya ndiphe.

²²T̄eme anyi yekwaph̄o nwanna anyi ọzo s̄ g'èphe sw̄iru bya. Nwanna anyi k'ono b̄ anyi ahujekwa ama tekenteke maru l'iphe, aḡu iya n̄ b̄epho ḡe ya e-me eye ẹka. Nta-a b̄ ọ kabakp̄oo ya aph̄u l'èhu ḡe ya yeru unu ẹka; kele o gude ire unu ẹka k̄e b'ama g'e-me iya.

²³A bya l̄e Tayit̄osu; mu s̄ l'ọo ya b̄ mu onye ẹbo; onye mu l'iya t̄koru eje ozi-oma gude eyeru unu ẹka-a. Ẹnwunna anyi ọphuu, ẹphe l'iya sw̄i-a b̄kwanu ndu ọphu n̄-chiru ẹnya Ch̄iochi l̄e Ch̄iochi t̄eme ẹphe b̄uru ndu ekutse K̄éreshi.

²⁴Unu goshikwa ẹphebedua waa Ch̄iochi l'ophu l'unu yeru anyi obu ọkpobe eyeye; t̄eme l'aba, mu egudeje unu aba b̄-a l'o rwuberu iya.

2 K̄orentu 9

Eme iphe-oma

¹Mu te ejeḗduro unu ederu ẹkwo k'iche k'iphe, unu a-n̄ ndu-ns̄o, n̄ l̄e Jierúsalem̄u.

²L'o doru mu ẹnya l'ọogua unu ẹgu eye ẹka; mu gudewaa unu aba l'abaa l'iphu ndu Masedoniya. L'unub̄e Ẹnwunna anyi, n̄ l̄e Akaya kwak̄obeakwaruro k'eye ẹka e -sh̄i k'akaph̄u. L'aph̄uphu, ọophu unu l'èhu k'eye ẹka ono kpatsuwaru ndu d̄ igwerigwe.

³Iphe, kpar̄u iphe, mu s̄uru g'Ẹnwunna-a bya b̄u g'aba ono, anyi gude unu aba ono ta ab̄u iphe-mman̄u. Ọ b̄u-chia g'ọ d̄u ḡe mu pfuru s̄u l'unu kwak̄obewaru eye ẹka.

⁴Odumeka; ọ -b̄uru l̄e mu l̄e ndu Masedoniya har̄u sw̄iru bya; anyi bya ah̄uma l'ọ d̄udu g'unu kwak̄oberu; ọ kwa iya b̄u l'iph̄ere ab̄uru k'anyi; kele mu s̄uwaru l'unu kwak̄obewaru ree; ọ b̄ururo unu b̄e iphere k'unu a-kabaa sh̄ii.

⁵Noo g'ọ gude mu s̄u l'ọ d̄u ree g'Ẹnwunna-a vuru mu Ẹzo byaadaa ibe unu bya evuru Ẹzo kwak̄obe iphe ono, unu kweru ukwe an̄unu ono. Ọo ya b̄u g'aamaru l'unu gude obu unu g'ọ ha an̄u iya; l'a ta at̄upfubeduru iya unu at̄upfube.

Eme omeluko

⁶Iphe, unu a-nyataj̄ep̄ho b̄u l'onye emebeduru iphe, ha sh̄ii l'al̄i ta akpataj̄ekwa iphe, ha sh̄ii. Onye mebekwan̄uru iphe, ha sh̄ii l'al̄i b̄e akpataj̄e iphe, ha sh̄ii.

⁷G'onyen̄onu n̄ep̄ho g'obu iya s̄uru g'ọ n̄u. G'ọ t̄o d̄ukwa onye a-n̄ ọphu ọogbe b̄uru; ọ -n̄uchaa ya l'ọ taahaa onwiya Ẹta; ọphu ọ d̄ukwa onye an̄odu an̄u iya g'ọ b̄u Ẹtu, ọ t̄ufutaj̄e; kele ọ kwa onye gude ẹhu-Ẹtso an̄u b̄e Chileke yeru obu.

⁸Ọzo b̄uru l̄e Chileke s̄ukwaru emeru unu eze-iphe-oma mee k'etsutsu iya; k'ophu unu e-nwek̄otaj̄eru iphemiphe, b̄u iphe, mkpa iya d̄uru unu; unu abyakwaph̄o enweru iphe nwegharu iya ẹka k'ophu unu e-gude iya eme iphe, b̄u iphe-oma.

⁹Ọo ya b̄u iphe, e deru l'ẹkwo-opfu Chileke s̄u: “Ọosaj̄e obu iya asasa n̄u ndu Ẹkpa iphe; ap̄fubekoto nkiya an̄oje jas̄u l'ojejeje.”

¹⁰Oo Chileke, bu iya anuje onye akọ opfu iphe, oomebeje l'opfu iya; bya anuje iya nri su g'o ria-a; be bukwapho onye a-nu unu akpuru-iphe, mkpa iya duru unu; unu akoo. O buru iya bu onye e-me g'iphe, unu meberu l'alị mehu emehu k'opfu unu a-kabaa enwenwe; gude iya kabaa eme iphe-oma ono, unu eme ono.

¹¹Chileke ono e-me unu g'unu nweru iphe okpobe enweru k'opfu unu e-meje iphe-oma tekenteke; oo ya bu g'aa-du igwe keje Chileke ekele iphe-oma, unu shi anyi l'eka emeru phe.

¹²L'ozia, unu eje-a ta abulekwa-a mkpa ndu ke Chileke be oome kpurumu. Iphe, o mefa bu l'aa-du igwe kele Chileke ekele kelegharu iya aka.

¹³O kwa iphe ono, unu eme ono e-goshi egube ndu unu bu. Noo ya bu aadu igwe jaa Chileke ajaja. Noo l'o to bukwaa l'unu gude iphe ono, unu meru ono goshi l'unu kwetawaru k'ozia-oma Kereshi ono; unu egoshikwapho l'unu emeje iphe, ozi-oma ono pfuru. Bu iya bu l'unu asaje aka okpobe asasa mee iphe-oma g'eka beru unu; unu shi egube ono unu l'ephebedua me ndu ozo tuko gbaru mgba l'iphe, unu nweru enweru.

¹⁴Oo ya bu l'ephe e-gudekpoo obu phe epfu anu Chileke l'iswi ehununu; l'oogukpo phe g'a su l'unu l'ephe humaru; noo l'eze-iphe-oma ke Chileke nyiberu anyibe l'ehununu.

¹⁵Su-a; unu g'anyi keje Chileke ekele iphe-oma iya; mbu iphe-oma ono, a ta amadu g'aa-tu onu iya ono.

2 Korentu 10

Polu agbaru ozi-oma odzori

¹Nta-a buakwaa mube Polu gedegede arwo unu arworwo owa-a. Mu gudeakwaa adu geele waa obu-oma ke Kereshi arwo unu. Mbdua abujekwaru mu -nodu ntse mu epfuru unu opfu belebele; teke mu no enya; mu epfuahaaru unu opfu okpu-onu okpu-onu.

²Ole iphe, mu arwokwanu unu bu g'unu te emekwapho iphe, e-me ge mu pfuaharu unu okpu-onu okpu-onu me mu -byaepho. Le mu e-pfukwaru ndu ono, suru l'anyi eme ehununu anyi ehununu anyi ono okpu-onu okpu-onu.

³L'a makwaru-a l'anyi bu le mgboko-a; ole anyi ta alwudu ogu ge ndu mgboko-a l'alwu.

⁴Kele ngwogu, anyi gude alwu ogu k'anyi ta abukwa ngwogu ke ndu mgboko-a. O bu ngwogu, shi l'eka Chileke; bya aburu ngwogu ophu shihuru ejo ike. O bu ngwogu ophu e gude egbuka aka ohogu Chileke doberu obu okpehu iya. Oo ya be anyi gude emebyi ntumego-ugho.

⁵O buru ngwogu ono be anyi gude mebyishikota eku-onwonye ono, e gude to-chia uzo to-buta g'a ta maru Chileke ono. Iphe, bukpoo oriri, nemadzu ariri ariri be anyi alwu-kpeje mee ya g'o du ge Kereshi suru g'o du.

⁶Nta-a be anyi kwageberu akwagebe k'ahu iphe, bukpoo a-nu-le-nchi ahuhu me unu meebekotajepho iphemiphe, a suru g'unu meje.

⁷Iphe, unu l'iya eme bukwa l'unu te elerwejedu iphe ɛnya elerwe. Onye guwaru onwiya lɛ ya bu kɛ Kɛreshi; g'onye ono nyatajɛru onwiya l'ɔ bu gɛ ya bu kɛ Kɛreshi ono bu g'anyi bukwapho.

⁸L'ophu unu a-makpoadaru bu l'ɔ tɔ dukwa mu iphere m'obetaru mu kwata gudenuka ike ono, Nnajiuphu yeru anyi l'ɛka ono aba abaa. Ike ono bɛ ɔ nukwaru anyi g'anyi gude metse unu emetse. ɔ tɔ nukwaru iya anyi g'ɔ buru iphe, anyi e-gude egbuka unu egbuka.

⁹Noo iphe, mu epfu sɔ g'unu b'edobesukwa lɛ mu gude ɛkwo-ozu mu-a eme gɛ mu yee unu ebvu.

¹⁰ɔ dukwaruro ndu agbɛ asuje: “ɛkwo-ozu, Pɔlu ede bɛ opfu iya agbɛje adanuka kpaa kpaa; bya aburu opfu, erwu nemadzu l'ɛhu. Teke anyi l'iya nɔpɛho l'ipɛho l'ipɛho; ɔogbe nyihu; opfu iya te enweɛdu iphe, ɔoburu.”

¹¹G'ɔ dokwaa ɛgube onye ono ɛnya l'ɔ kwa iphe, mu deru l'ɛkwo-ozu teke mu l'unu anɔdu bukwapho iphe, mu e-me l'ɛka mɛ mu l'unu -nɔduepho.

¹²ɔphu anyi ata atudu ama bu kɛ g'anyi wota onwanyi je agukobe lɛ ndu ono, anɔduje atɔ ɔnu onwopɛho ono. ɔzoo kɛ g'anyi sɔ l'anyi l'ɛpɛho aturu. ɔo ɛphebedua eme eswe; ɛphebedua egudeje onwopɛho aturu onwopɛho ama; gude gɛ nwibe pɛho ha amaru g'ɛphebedua ha.

¹³Obenu l'anyibedua taa tudu ɔnu onwanyi atughata gɛ Chileke tɛberu sɔ g'anyi rwua. Anyi a-tu-bejɛrɛpho ɔnu onwanyi g'ozu, Chileke doberu anyi g'anyi jee gbaru. Ozi ono bɛ ɔphu anyi eje l'echilabɔ unu tukokwa yiru.

¹⁴Anyi ta tughakwaru ɔnu iphe, anyi meru; eshinu anyi gudewaa ozi-oma kɛ Kɛreshi ono rwuchawaa ɛka unu nɔ gɛdegede; tɛme ɔ buru anyi bu ndu mbu, gude iya byapfuta unu.

¹⁵ɔo ya bu; l'anyibedua ta atujedu ɔnu onwanyi tughata gɛ Chileke tɛberu sɔ g'anyi rwua. Anyi te egudejedu ozi ndu ɔzo aba l'abaa. ɔ kwa iphe, anyi ele ɛnya iya bu l'unu -nɔdu aka ekweshi ike eje; anyi aka eje ozi, kabaa shi l'echilabɔ unu; kɛle anyi a-nɔdujɛpho eme iya gɛ Chileke sɔru g'anyi mebejeru iya.

¹⁶ɔo ya bu g'anyi ezia ozi-oma ono zighatachaa ya mkpukpu unu; ziwa iya rɔ kwasɛru; k'ophu anyi ta anɔdukwanu aba abaa ozi, onye ɔzo jehawaru l'ɛka iya nkiya.

¹⁷ɔoepɛho “G'onye aba abaa bajɛkwa iya l'iphe, Nnajiuphu meru.”

¹⁸Kɛle ɔ tɔ bukwa onye atɔ ɔnu onwiya bɛ aagubeje iphe; ɔo kwa onye Nnajiuphu atɔ ɔnu iya.

2 Kɔrentu 11

Ndu-ishi-ozu ɔphu abudu ɔkpobe iya

¹Jiko unu takwaa nshi gɛ mu kabɛkpo pfua g'onye eswe; mu makwaru-a l'unu kwewaru.

- ²Lẹ mu ekokwaru unu okophoo gẹ Chileke ekoje-a. Kẹle unu dukwa mu gẹ nwamgboko, doberu onwiya do, nwoke eteke ngeswee okpa; nwamgboko, mu doberu k'eke ji; mbukwa k'eke onye lanu kpeckpu, bu iya bu Kéreshi.
- ³Ole ndzu anoduje agu mu su ? a maru teke agbaghashidu nu unu obu; merwushia uche unu g'unu te egudehe obu unu g'o ha yee Kéreshi obu okpobe eyeye. O kwa egube ono be agwo meru gude ejo eregede dephua Ivu.
- ⁴Kẹle unu gude ehutu kwe k'onye byaru bya awata epfuru unu ke Jizosu ozo, abudu ophu anyi pfuru unu opfu iya-a; teme unu kwe natakwapo unme ozo, du iche, abudu Unme-du-Nso ophu unu natahawaru; bya ekwekwapo nata ozi-oma ozo, du iche, abudu ophu unu kwetahawaru.
- ⁵L'iphe, mbedua ariekwa bukwa l'o to budu mu be enya gbe bya akachia alwalwa eme le ndu ono, ezi unu ozi-oma ono, etu onwophe o-phushia-ugbu ono.
- ⁶O -buru le mu ta ama epfu opfu erengete; mu amakporu nu Chileke okpobe amaru. Ono be anyi shiwaa l'uzomuzo mee unu maru okpobe amaru.
- ⁷? O gbe buru iphe-eji be mu meru; le mu kuzetaru onwomu ali g'ee-shi g'e kulia unu eli; ebe o dudu iphe, mu suru g'unu pfua mu k'ozima Chileke, mu byaru ezia unu?
- ⁸Teke mu shi eje ozi l'echilabo unu; be bukwa Chiochi ozo shi anoduje apfugbaa mu ugwo. Mu shikwa ana phe nfu; g'eeshi ge mu yeru unu aka.
- ⁹Su-a; mkpa okpoga, duru mu nu teke ono, mu l'unu no ono ta adukwa onye mu pfuchijeru nchi su g'o yeru mu aka. Kẹle unwunna anyi ndu shi Masedoniya wotakotawaru mu iphe, bukpo iphe, mkpa iya duru mu. Mbụ l'o to dudu iphe, mu zekporu unu nzeri iya. Ebe o dukwa iphe, mu byaru ezeru unu nzeri iya.
- ¹⁰Mu gude okpobe-opfu ke Kéreshi ophu du mu l'ehu ekweta ukwe-a su l'o to dukwa nemadzu, a nwuru anwunwu l'ali Akaya, suru eme g'aba-a, mu aba-a buru iphe-mmanu.
- ¹¹? Denu g'o gude mu yee ya onu nno? ? Bu le mu te eyeduru unu obu to? A-o! O kwapho Chileke maru le mu yeru-a unu obu.
- ¹²Mu taa hakwa eme iphe, mu gude l'eka eme nta-a. Oo ya bu ge mu emekwanu-a ndu-ozima ophunapho g'ephe te enwehe iphe, ephe a-zobe okpa gude eku onwophe; kele o kwapho g'anyi ese akanya ozi-oma ono bu g'ephe ese.
- ¹³Ndu k'ono ta abukwa okpobe ndu-ishi-ozima Kéreshi. Ephe bukwa ndu eje ozi l'ugho. Ndu ewojeru onwophe mee g'e dobesu l'ephe bu okpobe ndu-ishi-ozima ke Kéreshi.
- ¹⁴O to budu iphe, aa-su l'o kporu onu opfu; eshinu Nsetanu ewojeru onwiya mee g'ojosi, shi l'ogbu-nwijnwii k'imigwe bya.
- ¹⁵Oo ya bu l'o to buedu iphe, du oke biribiri me o -buru le ndu ejeru Nsetanu ozi woru onwophe mee g'e dobesu l'ephe bu ndu ejeru Chileke ozi. Teke o rwuru mboku ikpazu be Chileke a-gwa phe ugwo ochi iphe, ephe meru.

Iphe-ẹhuka, Pọlu eje

- 16**Ge mu pfukwaa ya ọzo; g'ọ tọ dukwa onye arije l'ọo egomunggo swehuru mu. Teke ọ bu l'unu ari l'egomunggo swehuru mu; unu ahakpokwaa mu rọ ge mu pfubaa g'onye egomunggo swehuru. Ọo ya bu ge mu abakwanaa aba nwilile.
- 17**Ole iphe-a, mu epfu nta-a be mu makwaru-a l'ọ tọ budu Nnajiuphu suru ge mu pfua ya. Mu -baaha aba be mu abakwa iya g'onye egomunggo swehuru.
- 18**Ole eshinu ndiphe egudeje iphe ke mgboko-a aba abaa be mbedua l'a-bakwapho aba nkemu.
- 19**? Tọ buedu l'unu manukaru iphe meru g'ọ gude unu nodu egudeje ehu-utso kwe haa ndu egomunggo swehuru g'unu l'ephe nodu.
- 20**Unu atajeelaa nshi no-kirishia; a -nonyaa onye lanu abya eworu unu mee nwohu iya; ọzo bya anodu tuko iphe unu riebe; ọzo bya anodu emephe unu l'uji; ọzo bya awata unu anma phulaphula; ọzo bya eworu eka waa unu le nchi ke gbaa.
- 21**Ha! Ọ gbekwa du mu iphere epfufu; noo le mbedua ta adukwa teke mu adu ike eme unu egube iphe ono. Ole-a; owa-a, mu abya epfufu-a bukwa opfu, du ge k'onye egomunggo swehuru. Su-a; e -pfujekpo ya epfufu; mu asu l'iphemiphe, bukpo iphe, ndu ọzo turu ama egude aba l'aba be mbedua gudekwaa aba l'abaa nkemu.
- 22**Ọ -buru le ndu ono bu ndu Hiburu; be mbedua buhukwa iya pho. Teke ephe bu unwu Izurelu; mbedua buhukwapho onye Izurelu. Teke ephe bu oshilokpa Ebirhamu; mbedua buhukwaa oshilokpa Ebirhamu g'ephe bu iya.
- 23**Mu su-a; ? ephe bu ndu ejeru Kereshi ozi to? Ono be mbedua gbekwa ka phe nu abubu. Nta-a be mu epfukpokwa g'onye, obvu byaru. Mu kakwa phe iya abubu; ge mu gbe ka phe eje ozi ke Kereshi ono; bya aka phe eje mkporo iya ijeto; a kakwa mu pho echi iphe iya ichito. Ophu o dudu tekenteke mu ta atsogjeduru atsogeru l'onu onwu le k'ozu ono.
- 24**Akpo ise be ndu Jiu chiwaru mu onu echachi ukporo labo, e wofuru nanu.
- 25**E chiwaa mu mgoro akpo eto; bya atuwaa mu mkpuma akpo lanu. Akpo eto be o phoduchawaru nwanshi me ugbo ekpua mu. O nwecharu ophu mu noru ujiku ophu le mini eswe l'enyashi mgburugburu.
- 26**L'ikpoto ije ono, mu jekotaruru ono be mu lowaru ishi mu alolo l'utso, gbaru nu; loo ishi mu alolo l'eka ndu ana nfu; me l'eka ndu Jiu ibe mu; me l'eka ndu abudu ndu Jiu. Mu jee iphe mini pharu mu l'eze l'oma mkpuku; me l'echiegu; me l'echi ogbu eze-enyimu; me l'eka ndu abudu okpobe ndu ke Kereshi.
- 27**Mu jewaa ozi kuta epuru phee; mu bya anuwaa enya enyashi; egu nri gua mu; egu mini gua mu; egu mee mu tekenteke; mu gbaru oto oyi tsua mu.
- 28**A -gufukpooro iphemiphe ono; be o nwekpoerupho iphe, anoduje akposhi mu mgbenya mboku-mboku. Iphe ono bu k'iphe, bukpo Chiochi ke Kereshi g'ọ ha.

²⁹? Bụ onye bę ike bvuru; ọphu ọ dudu g'ọ bụ mbedua bę ọ bvuru ọbu? ? Bụ onye nmalahuru l'iphe-ęji ọphu o rwuduru mu l'ęhu?

³⁰Ọ -buru lę mu bafutaje aba bę iphe, mu e-gude aba abaa ọbu bukwa iphe, egoshi ge mu du-be arwuhu.

³¹Su-a; ọ kwa Chileke, bụ Nna Nnajiuphu onoya, bụ Jizosu ono, bụ onye ajaja bụ nkiya jasụ l'ojejoje ono bę bụ onye maru l'iphe-a, mu epfu-a ta adudu ọphu bụ ụka.

³²Lę teke mu nọ lę Damasukosu bę nnajioha mkpukpu onoya, bụ iya bụ onye nọ-chiru ęnya Aritasu, bụ eze ndu ono; woru ndu ojogu, eche nche woru dochia ọnu oguzo ęka eeshije abata l'ime mkpukpu ono sụ g'e gude mu.

³³Tobudu iya bụ; e woru mu ye l'ime nkata pyoo mu l'uzo, du l'eli igbulo, e gude kpuphee mkpukpu onoya mgburugburu; mu shi l'ęka onoya nahu iya gbalaa.

2 Korentu 12

Iphe, eegoshi Pọlu l'ophuleny

¹A makwaru-a l'aba aba ta abaduru l'urwu; ọle mu bafutaje aba. Nta-a bę mu a-wata epfu k'ophuleny me iphemiphe, bụ mu iphe ọphuu, Nnajiuphu goshiru mu.

²Ọ duru nwoke lanu, mu maru bụ onye ke Kereshi, Chileke zikotaru; o jerwua mkpopfu igwe k'eto. A nokwaru apha iri l'eno, iphe ono meru. Ọle mu ta maedu ? o jeru ęka onoya k'eviya; to ọ phuru iya l'ophuleny? Ọo 'epho Chileke nwękiya maru g'ọ nwuru.

³Onye ono bę mu makwaru; me o jeru iya lę ndzu-o; to lę maa-o; bę mu amaekwa; ọ kwa Chileke bę o doru ęnya.

⁴E zikotaru iya worwua ya okpoku Chileke gedegede. Ọ nodu l'ęka ono numachaa iphe, kporu ọnu epfufu; mbu iphe, a suru ge nemadzu te epfushi.

⁵Ọo ya bụ lę nwoke ono bę mu e-gude aba l'abaa. Ọle mu tee gudedu onwomu aba l'abaa; gbahaa lę mu aba abaa k'arwuhu du mu nu.

⁶Ọme mu jeshiaru aba abaa k'onwomu me mu tege abukwaru onye egomunggo swehuru; kele iphe, mu g'epfu gege abuerupho okpobe-opfu bę mu g'anodu epfu. Obenu lę mu te ejedu aba abaa; lę teke mu jeshiaru aba abaa l'oo-nweru ndu a-wata aru lę mu kabaa shii; paru iphe, ephe humaru mu l'ęhu me iphe, ephe numaru, mu pfuru paru haa.

⁷Mu humakwaru iphe, dugbaa oke biribiri l'ophuleny. Ọ buru iphe ono meru g'o gude a loru mkpo dobe mu l'ęhu; ọ nodu akpo mu cherere. Iphe ono buru iphe, ejeru Nsetanu ozi bę byaru bya etsua mu iphe gude go-zeta mu ge mu te eje ekunuka onwomu.

⁸Iphe ono bę mu rwowaru Nnajiuphu akpo eto sụ iya g'o mee g'iphe ono paru mu haa.

⁹O b̄uru iphe, o epfujeēru mu ph̄o b̄u: “Eze-iphe-oma, mu meru ngu s̄wakwaru ngu; kēle teke mu akajē ere ire l'ehu ngu bukwa teke ī d̄u arw̄udu.” O n'iya-a b̄u lē mu a-nōdu aba abaa l'arw̄uhu d̄u mu; g'ike kē Kéreshi ree mu ire l'ehu.

¹⁰Noo g'o gude mu s̄u l'arw̄uhu ono, d̄u mu n̄u ono; mēkpoo iphe-iphere ono, eeme mu ono; mēkpoo iphe ōtsu-l'ehu; mē mkpamēhu; mē mkpawere, aan̄oduje emephe mu l'opfu ēhu Kéreshi; meru ēhu nōdu atso mu utso. L'o kwa teke mu d̄u arw̄uhu bē ike nkiya ere mu ire l'ehu.

P̄olu agba egomunggo kē ndu K̄orentu

¹¹Nta-a bē mu meakwaru g'onye egomunggo swehuru l'eku-onwonye ono; o b̄uru unu nwuru mu ye iya. Kēle unu gege an̄odu aja mu ajaja; l'o t̄o d̄udu iphe, ndu-ishi-oz̄i ophuu gude ka mu; l'ebe ad̄u iphe, mu b̄u.

¹²Mu tar̄u nshi meshia iphe-ohumalenya, dugbaa biribiri; bya emeshikwaapho iphe ozo, t̄ufugbaru ēhu, egoshi ike kē Chileke l'echilabo unu. Iphe ono būgbaaru iphe, mu gude goshi unu lē mu b̄u onye-ishi-oz̄i Kéreshi.

¹³? O nweru ̄zo ozo, mu kabaa eme Ch̄iochi ozo ree, mu emeduru unu? ? B̄uepho lē mu ta as̄uduru g'unu pf̄ua mu ugwo-a? A-o; wakwa ēka l'al̄i-o; eshinu ono gb̄e buwaru eji; mu mee ya unu.

¹⁴Owa-a kweakwa ugbo ēto, mu j̄ikoberu abya ndu-unu. Mu -bya; mu taa s̄ukwa g'unu pf̄ua mu ugwo; kēle iphe, mu ach̄o abya ta ab̄ukwa okpoga unu. O kwa unub̄ēdua l'onwunu bē mu ach̄o. O t̄o bukwa unwegirima akpajē ēku doberu ne lē nna phe; o chikwa ne lē nna agbeje akpa ēku edoberu unwu phe.

¹⁵Mu e-gudekp̄oep̄ho okpobe ēhu-utso mephusiaru unu iphe, mu nweru; t̄a ishi onwomu g'eeshi g'o d̄uru unu lē ree. ? Unu a-gb̄e yepete mu obu opfu lē mu kabaa unu eye obu?

¹⁶O d̄uru ndu har̄u kwe lē mu te eshidu b̄uru unu ivu-erwa. Ole o dukwanuru ndu a-s̄u lē mu shi gban̄uka ēregede; lē mu gude ugho nmata unu.

¹⁷? D̄enukwanu g'o nwuru? ? O dukpooru iphe, b̄u ndu ono, mu ziru g'ephe byapfuta unu ono onye ophu mu gb̄e shi l'ēka iya ria unu urwu?

¹⁸Mu rw̄oru Tayit̄osu s̄u iya g'o bya; bya as̄u gē nwanna anyi ophuu tsoru iya. ? O nweru iphe, unu a-s̄u lē Tayit̄osu byaru bya erita unu? ? T̄o būedupho ̄du umere lan̄u bē mu l'iya l'eme; t̄o t̄o būedupho ̄zo lan̄u bē mu l'iya l'eshi?

¹⁹? T̄o unu shi e -shi teke-a r̄ita l'iphe, anyi an̄oduje eme b̄u g'anyi e-me pfufu onwanyi l'iphu unu? Iphe, anyi an̄oduje epfu bē anyi epfujeē maru l'anyi epfu iya l'iphu Chileke; t̄eme l'anyi lē Kéreshi t̄ugbaru b̄uru nan̄u. Oo ya b̄u; ndu mu yeru obu; l'iphemiphe, anyi an̄odujekpoo eme bē anyi an̄odujekwa eme g'anyi gude metsee unu.

²⁰Mu atsukwa ebvu s̄u: ? mu maru t̄o bukwaru n̄u; mu -byarwuta; unu taa d̄uedu gē mu r̄iru l'unu a-d̄u; mu taa d̄uekwapho unu g'unu r̄iru lē mu a-d̄u. Mu atsukwa ebvu s̄u: ? mu taa byakwan̄u bya ah̄uma l'unu an̄oduje aswo-phe uswo; ejiphe iji-anya; b̄uru

ndu obu oku; l'unu akpappe enya; ephuphe onwunu iphu; agba nwibe unu mgbamu; ekuphe onwunu ekuku; eme mkpaka.

²¹Mu atsukwa ebvu le mu -bya ogiya-a, be Chileke ewoda mu ali l'iphu unu; mu aguru aphu kpua ikpoto ndu mehawaru iphe-eji; ophu ephe ekwekwapho l'izimanu lwaru phe azu g'ephe haa ejo umere, rehuru erehu; haa eme ke nwanyi; haa aburu ndu iphere bvuru l'iphu.

2 Korentu 13

Anma okwa ikpazu

¹Abyabya owa-a, mu abya abyabya nta-a kweakwa ugbo eto, mu abya unu agbaphe. "O kwa ekebe umadzu ebo; ozoo eto be eegudeje bua ikpe."

²Mu nmahaakwaru unu okwa teke mu byaru k'ugbo ebo pho. Mu nodu anmakwaru iya pho unube ndu eme iphe-eji ono nta-a, mu ta anodu l'eka ono-a; me ndu ozo; le mu -bya be mu taa hakwa unu.

³Oo ya bu; g'unu e -shi nno maru le Kereshi gude mu-a epfu opfu; l'unu sukwaru g'e goshi unu iphe, e-me g'unu maru l'o gude mu-a epfu opfu. Kereshi ono te emejekwa g'onye ike bvuru me o -nodu eme unu iphe. O chia iphe, oo-me bu l'oo-goshi g'okpehu iya habe l'eka unu no.

⁴L'a makwaru-a l'ike te eshidu dukwadu iya teke a kpopyaberu iya l'oswebe; obenu le nta-a bu ike ke Chileke be o gude nodu ndzu. O kwapho g'ike te eshidu dukwadu iya ono bu g'o to shidu dukwadu anyibedua; obenu le nta-a be ike ke Chileke e-me anyi adzuru ndzu ge Kereshi dzu; ike adu anyi g'o du iya; k'opu ike a-du anyi l'iphe, anyi emekpo unu.

⁵Unu nyochakwaa onwunu enyocha maru ? unu kwetakwaduru-a? Unu hukwa onwunu ama. ? Unu ta amadu le Jizosu Kereshi bu unu ebubu l'ehu? gbahaekwapho l'unu te ekwetaeduru.

⁶Ophu mu gude eka bu l'unu e-mechaa maru l'anyibedua ta agwobeduru ekweta ono, anyi kwetaru ke Kereshi ono.

⁷Iphe, anyi anoduje epfu anu Chileke bu g'o to kwekwa g'unu mee iphe, adudu ree. O to bukwa g'e gude goshi l'anyi mekotaru; o chikwa g'unu meje iphe, pfuru oto; o rwuhakporu o jee a-du g'o bu l'ekwekwe, anyi shi kwe le mbu ono be anyi ekweeduru.

⁸L'o to dukwa g'o ka mma l'oo iphe lanu, anyi suru ememe k'emebyi okpobe-opfu ke Chileke; gbahachia l'anyi a-noduje eme iphe gude ese iswi okpobe-opfu ono.

⁹Oo ya bu l'ehu anoduje atso anyi utso me o -buru l'anyi du arwuhu; ike dukwanu unu. Noo g'o gude o du anyi g'a su l'unu lwaru azu l'onodu, duebe ree.

¹⁰Mu ede iphe-a nta-a, mu l'unu ata anodu l'eka ono-a. Ge mu te eje egude ike ono gbę duru unu ehuka me mu -bya. Mbu ike ono, o yeru mu l'eka ge mu gude metsee unu emetse ono gbęchia mee unu omeliwe.

Ekele ikpazụ

¹¹Kẹ ikpazụ iya ụnwunna mu bụ; unu nọkwapho oma-o. Unu dọebekwa ree; iphe, mu arwọ unu bụ g'uche unu bụkwaru nanu. Unu eburu lẹ nchi-odoo. Gẹ Chileke ono yeru anyi obu teme o nọdu emeje g'ẹhu dọ anyi guu ono swikwaru unu eswiru-o.

¹²Unu kelekwa onyemonye ekele l'ẹhu l'ẹhu nmata phẹ akpa, dọ nsọ.

¹³Iphe, bụkpoo ndu-nsọ l'ophu l'ekelekwaphọ unu.

¹⁴Mu sụ g'eze-iphe-oma kẹ Nnajiuphu, bụ Jizọsu Kéreshi; mẹ eye obu ophu Chileke eyeje ndibe iya; mẹ ike ono, Unme-dọ-Nsọ meru g'anyi l'unu gbarụ mgba ono dzukotakwa oke l'ẹhu unu g'unu ha. Nokwa g'ọ dọ.

Galeshiya

Galeshiya 1

¹Ekwo-ozhi-a shi l'eka mube Polu, onye-ishi-ozhi Jizosu Kereshi. Onye-ishi-ozhi, e meru mu ta abukwa nemadzu meru mu iya; ophu o bukwa nemadzu be o shi l'eka. O kwa Jizosu Kereshi yee Chileke, bu Nna be o shi l'eka, mbu onye ono bu iya meru ge Jizosu ono shi l'onwu teta dzuru ndzu ono.

²Unwunna anyi, mu l'ephe no l'eka-a be mu l'ephe tukoru ekele iphe, bu Chiochi, no le Galeshiya.

³G'eze-iphe-oma; yele nchi-adu-doo bukwaru k'unu; mbu ophu shi l'eka Chileke, bu Nna; waa l'eka Nnajiuphu anyi, bu Jizosu Kereshi,

⁴bu onye ono woru onwiya nu g'e gbua g'o buru ngweja, e gude gwefu iphe-eji anyi; k'ophu odzota anyi l'eka mgboko-a, iphe-eji jiru ejiji-a. Iphe ono buru uche Nna anyi, bu Chileke be o meru ono.

⁵Anyi su g'ajaja buru ke Chileke jasu le tuutuutuu le mijimiimii. Nokwa g'o du!

Ozi-oma lanu kpoloko du

⁶Iphe owa-a dukwa mu nu biribiri l'o to duedu g'o noberu unu gbe agbakutawaru nu Chileke unu ono azu; mbu onye ono kuru unu ono ge Kereshi eshi l'eze-iphe-oma ono, o meru unu ono dzota unu; unu gbe wowarunu iphu ghaaru ozi ozo gbaru iche;

⁷mbu ozi ophu abudu ozi-oma ililekpoo; ochia l'o duru ndu agbaghashi unu agbaghashi; ndu eme g'ephe gbanwee ozi-oma ke Kereshi ono.

⁸A-o; teke o bukwa l'oo anyibedua; ozoo ojozi, shi l'imigwe byaru bya eziahaa unu ozi-oma ophu yee ophu anyi ziru unu adagbaduru; g'a tu-phukwaa ya l'onu.

⁹Oo iphe, anyi pfuhawaru be mu epfu ozo nta-a su: onye ezi unu ozi-oma ophu yee ophu anyi ziru unu adagbaduru; ge Chileke tu-phukwaa onye ono l'onu g'o laa l'iswi.

¹⁰? O du unu ge mu eme ge mu pfua iphe, a-tso ndiphe ozoo Chileke utso le nchi? To ? Bu ge mu mee ge ndiphe su le mu bu onye oma? O bu l'iphe, mu eme bu g'a su le mu bu onye oma me mu ta abukwaru onye-ozhi ke Kereshi.

Polu epfu ge ya gude buru onye-ishi-ozhi

¹¹Su: iphe, unu a-maru; unwunna mu; bu l'ozhi-oma ophu mu ezije ta abukwa l'uche nemadzu be o shi.

¹²Kele o to budu nemadzu be o shi l'eka; ophu o budu nemadzu kpo-ziru mu uzo iya. Oo Jizosu Kereshi goshiru mu onwiya l'ophulanya bya eworu ozi-oma ono ye mu l'eka.

¹³Unu numawaru-a ge ndzu mu shi du teke mu shi eme k'omelali, ndu Jiu egudeje abaru Chileke aja; ge mu shi eme Chiochi ke Chileke ewere emegharu iya aka. Unu numawaru l'iphe, mu shi emekpoeppo ge mu mee bu ge mu mebyia ya l'ophu l'ophu.

¹⁴Mu shi atukojekpoeppo ekemu ndu Jiu ono mekota g'a turu iya. Mu mekpoeppu iya pho metaberu iya k'ophu mu tukoru igwerigwe ndu mu l'ephe bu ogo gbaghakota l'ememe iya; teme eme omelali ndiche anyi phe shi anoduje aphukpoo mu l'ehu shii.

¹⁵Obenu le Chileke, bu iya doberu mu iche eshi l'ephe ne mu; byaru ekua mu; ono buru eze-iphe-oma, o meru mu.

¹⁶O bya ekpuhaa nwa iya ono goshi mu k'ophu mu awata aturu ndu abudu ndu Jiu onu iya. Ophu o dudu nemadzu, dzu ndzu mu chikoshiru iya.

¹⁷Ophu mu ejekwarupho Jierusalemu ke ge mu jepfu ndu vuru uzo buru ndu-ishi-ozia je phe akpata ishi. Iphe, mu mechiaru bu le mu gbeshiru tugbua bahu le Arebiya bya eshi eka ono laphu azu le Damasukosu.

¹⁸A nepho mgarapha eto; mu tugbua jeshia Jierusalemu ge mu je amaru Pyita. Mu l'iya no idzu eto.

¹⁹Ole o to dudu ndu-ishi-ozia ono ndu ophu, mu humaru gbahaa Jiemusu, bu nwune Nnajiuphu anyi.

²⁰Oo Chileke nwekiya maru l'iphemiphe-a, mu no l'iphu iya ederu unu-a ta adudu ophu bu uka, mu nodu adzu iya.

²¹Tobudu iya bu; mu tugbua jee ali Siriya bya ejee ali Silisiya.

²²G'e pfukpo-a ta abukwa le Chiochi Kereshi le Jiudiya g'ephe ha duru ndu ophu mawaru onye mu bu.

²³Iphe, ephe anepho le nchi bueppo l'a suru le "onye-a, shi emephe anyi ewere-a be asaakwa ozi-oma ke g'e kweta ke Kereshi ono asasa. Mbue ekwekwe ono, o shi eme g'o mebyia emebyi ono."

²⁴Noo g'o gude ephe nodu ekeleje Chileke ekele opfu ehu mu.

Galeshiya 2

Polu ejepfu ndu-ishi-ozia ndu ophu

¹A nepho apha iri l'eno mu le Banabasu swiru laphushia azu le Jierusalemu. Mu duta Tayitosu anyi l'iya swifuaru.

²Iphe, mu gude jee bu le mu humaru iya l'ophulenyia. Mu le ndu ono, bu ndu-ishi ono bya anoo nduko k'iche. Mu bya eworu ozi-oma ono, mu ziru ndu abudu ndu Jiu ono toboru phe eba. Oo ya bukwanu g'akanya, mu sehawaru me ophu mu ese nta-a ta aburu mu ke mmanu. Ephe zua mgbede.

³Ophu e kebutakpodaru nu Tayitosu-a, abudu onye Jiu-a, mu l'iya swia g'o bua ubvu.

⁴Ole g'o duhabe; o dukwarua ndu meru g'ephe bua ya ubvu; ndu pyobataru eme g'ephe bu ndu ke Kereshi; 'ama l'ephe ta abudu iya; l'oo ngge be ephe byaru anwunwu g'ephe bya bya egeta g'anyi gbakuta-beru ekemu azu opfu l'anyi bu ndu ke Kereshi. Iphe,

ephe shi achọ ụzo iya bụ g'ephe mee anyi g'anyi mejeepho iphe ekemu phẹ pfuru g'ohu anoje eme iphe onye gbaru iya nū pfuru-a.

⁵Ophu anyi ekwekwanu haaru phẹ ụzo ahaha ophu kpọ g'ọ ka mma l'ọo mgbo lanu g'ee-shi g'anyi edoberu unu iphe ono, bụ okpobe-opfu ono, bụ ozi-oma onoya.

⁶Obenu lẹ ndu ono, a sūru l'ephe bụ ndu-ishi ono; mu ta akpakwa ishi iphe, ephe bụ; kele Chileke ta adukwa onye oole enya l'iphu; ndu ono, a sūru l'ephe bụ ishi ono ta adukwa iphe ọzo, ephe yeru onu sū gẹ mu yebaa l'ozi-oma ono.

⁷O gbekikwa buru iphe, ephe meru bụ l'ephe humaru lẹ Chileke wowaru ozi-oma ono ye mu l'eka gẹ mu je ezia ya ndu abudu ndu Jiu; mbu egube ono o wokwaru iya pho ye Pyita l'eka g'o je ezia ya ndu Jiu.

⁸Kele ọo g'ike ke Chileke reru ire l'ehu Pyita; o buru onye-ishi-ozia zia ndu Jiu ozi-oma ono; bukwapo g'ike ke Chileke reru ire l'ehu mu; mu buru onye-ishi-ozia zia ya ndu abudu ndu Jiu.

⁹Tobudu iya bụ; Jiemusu me Pyita me Jionu bụ ndu ono, a sūru l'ọo phẹ bụ ndu-ishi, gudesi Chiochi-a bya amaru l'ọo Chileke yeru mu ozi-oma ono l'eka. Ephe zua mgbede; bya ana mu lẹ Banabasu l'eka; bya ekweta l'anyi l'ephe tukoru buru nanu. Anyi l'ephe bya atukokwapo wua onu nanu lẹ mu lẹ Banabasu a-nodu ezi ndu abudu ndu Jiu ozi-oma ono; g'ephebedua zije iya ndu Jiu.

¹⁰Iphe lanu, ephe sūru g'anyi mee bụ g'anyi nyatajekwa ndu akpa nri. Ono be mu kukebekporu ehu eme.

Mba, Pọlu baru Pyita lẹ Antiyoku

¹¹O be gẹ Pyita byaru Antiyoku; mu pfuru iya l'iphu baaru iya mba l'edzudzu-oha; kele o nweru iphe, o meru deru iya nū.

¹²Lẹ teke mbu kpọ be Pyita yee ndu abudu ndu Jiu shi erigbaje nri. E mecha gẹ ndu ephe lẹ Jiemusu nọ byapfutachaeru iya pho; o bufu onwiya sū l'ephe lẹ ndu ono, abudu ndu Jiu ono tee rigbaedu. Kele o wataru atsu ndu Jiu ono ebvu, bụ ndu sūru l'onymonye bufutajadaa ubvu ono.

¹³Unwunna anyi ndu Jiu ndu ophuu bya eyefua eka l'ogozu Pyita phẹ obu. Mbu lufuchakpo lẹ Banabasu be ephe jitachakwaru o tsoru phẹ buru ndu gozi.

¹⁴O be teke mu byaru bya ahuma l'enya mu; l'ephe te etsodu ozi-oma ono lẹ nhamunha iya; mu pfuru l'iphu ndu Chiochi g'ephe ha sū Pyita: “Humaru gẹ gubedua bụ onye Jiu; teme i nodu eme umere ndu abudu ndu Jiu; ? Denuhunu g'o gude i nodu eme g'i kebuta ndu abudu ndu Jiu g'ephe meje ekemu ndu Jiu?”

Ekweta adzo ndu Jiu waa ndu abudu ndu Jiu

¹⁵A makwaru-a l'anyibedua be a nwukporu; anyi buru ndu Jiu; ebe anyi abudu ndu iphe-eji gẹ ndu abudu Jiu bụ.

¹⁶Obenu l'anyibedua maru l'ọ to budu eme g'a tūru l'ekemu emeje nemadzu g'ọ buru onye pfuberekoto l'iphu Chileke; l'ọo ekweta ke Jizosu Keresi. Oo ya bụ l'anyibedua

kwapho, kwetawaru ke Jizosu Kereshi a-buru ndu pfuberekoto l'iphu Chileke; o to bukwa kele anyi eme iphe, a turu l'ekemu. Noo kele o to dudu onye Chileke agu l'onye pfuberekoto opfu l'onye ono meru iphe, a turu l'ekemu.

¹⁷Eshinu anyibe ndu Jiu emekwapho g'anyi shi Kereshi l'eka buru ndu pfuberekoto l'iphu Chileke; o n'iya bu l'anyi kwewaru l'anyi buhukwapho ndu eme iphe-eji ge ndu amadu ekemu Chileke. Teke o bu l'o du nno; ? o pfuru le Kereshi eme g'eme iphe-eji kabaa shii to? Tuswekwa!

¹⁸Kele o -buru le mu wataru emekwaa iphe, mu shi mebyiwaa emebyi be mu buakwaa onye emebyi ekemu.

¹⁹Mu gudeakwa eme ekemu; mu huma le mu nwuhuwuru anwuhu; l'ekemu gbuwaru mu egbugbu; g'ee-shi ge mu a-dzuru Chileke ndzu.

²⁰A kpopyabewaru mu le Kereshi l'oswebe. Nta be mu noakwaa ndzu. Ole o to budu mu no ndzu obu; o buakwaa Kereshi no ndzu l'ime ehu mu. Ndzu ophu mu no l'eliphe nta-a bukwa le mu kwetaru ke Nwa Chileke be mu gude nodu iya; mbu onye yeru mu obu; woru ishi ndzu iya tua l'opfu ehu mu.

²¹Mu taa jikakwa eze-iphe-oma ke Chileke. O -buru l'oo eme ekemu be e-me amadu onye pfuberekoto l'iphu Chileke; o n'iya bu l'anwuhu, Kereshi nwuhuru te enweddu ishi.

Galeshiya 3

Ekweta ozoo eme ekemu

¹Oo-waa! Egube g'eswe unube ndu Galeshiya habekpokwana! ? Bu onye kabere rwa unu eka l'iphu g'unu jika okpobe opfu ono? ? Tobudu unu be mu tukoru k'anwuhu, Jizosu Kereshi nwuhuru l'oswebe togboru eba; o doo unu enya ree-a?

²Iphe lanu, mu aji unu bu: ? Buada-a iphe, ekemu pfuru be unu meru teme unu nata Unme-du-Nso ono, unu nataru ono? ? Tobudu l'unu numaru ozi-oma ke Kereshi ono bya ekweta?

³? Denuhunu g'o gude unu gbere buru ndu eswe? Le mbu be unu gude Unme ke Chileke gbube ishi etso Kereshi. ? Buhunu gunu meru iphe, unu paru Unme Chileke ono buhaa dobesu l'oo ike k'unu be unu e-gude tsokota Kereshi obu?

⁴? Iphe-ehuka ono, unu jekotaru ono bu ke mmanu to? O to dukwa mu g'o bu ke mmanu.

⁵Chileke anodujekwa anu unu Unme-du-Nso bya emeshiru unu iphe-ohumalenya. ? O tukoru iphemiphe ono eme opfu l'unu eme iphe, ekemu pfuru too bu-a l'ole unu numaru ozi-oma ono bya ekweta?

⁶Nokwapho ge Ebirhamu kwetaru ke Chileke; o guaru iya ya l'apfubekoto.

⁷Oo ya bu l'unu eleana iya enya; l'oo ndu kwetaru ke Chileke be bu unwu Ebirhamu.

⁸Èkwo-opfu Chileke pfuhawaru sù lẹ Chileke e-me ndu abudu ndu Jiu g'èphe buru ndu p'fuberekoto m'èphe -kweta kẹ Chileke. E vuhawaa ọzo zia Èbirihamu ozi-oma ono sù iya: “Èbirihamu; ọo l'ẹka ngu bẹ e-shi meeru ndiphe mgburugburu eze-iphe-oma.”

⁹Ọo ya bụ; l'eshinu Èbirihamu kwetarù kẹ Chileke; Chileke gọoru iya ọnu-oma; bẹ ọ bukwapfo ẹgube ono bẹ Chileke a-goru ọnu-oma nù iphe, bukpo ndu kwetarù nkiya.

¹⁰Iphe, bukpo ndu chiru ọp'fu kwẹe l'ekemu sù l'ọo eme ekemu a-dzo phẹ bẹ buakwaa ndu a turu ọnu. Kẹle ẹkwo-opfu Chileke sùkwaru: “Onye ta atukoduru iphemiphe, e dekọtaru l'ẹkwo ekemu g'ọ ha eme buakwaa onye a turu ọnu.”

¹¹Iphe lanù, dokpọoru ẹnya ree bụ l'ọ tọ dudu onye a-dù ike egude eme iphe, ekemu pfuru aburu onye p'fuberekoto l'iphe Chileke. Kẹle “Onye p'fuberekoto bukwa ekweta bẹ oo-gude nọdu ndzù.”

¹²Obenu l'eme iphe ekemu pfuru yẹe ekweta kẹ Chileke ta adukwa iphe, ẹphe jigba; kẹle e dekwarupho sù: “Lẹ ndu emegbuje iphemiphe, ekemu pfuru e-gudekwa iya pho dzuru ndzù.”

¹³Kéreshi gbafutaru anyi lẹ mburọnu, ekemu meru anyi vuru; eshinu o vutachiru anyi mburọnu ono anyi shi vuru ono. Kẹle ẹkwo-opfu Chileke sùkwaru: “Iphe, bukpo onye a pfugburu l'eli oshi bukwa onye larù lẹ mburọnu.”

¹⁴Kéreshi larù lẹ mburọnu ono g'ee-shi g'eze-iphe-oma, Chileke sùru lẹ ya e-meru Èbirihamu eshi l'ẹka kẹ Kéreshi Jizosu rwua ndu abudu ndu Jiu ẹka. Anyịbedua e-shikwanù l'ekwekwe, anyi kweru kẹ Kéreshi nata Unme ono, Chileke kwehawaru ukwe lẹ ya a-nù anyi ono.

Iphe, a tudoru ekemu waa iphe, Chileke kweru ukwe iya

¹⁵Unwunna mu; gẹ mu gudekpọadanu iphe, anyi emeje nmaaru unu ẹtu ọwa-a. Amadù -kee ekpe dee ya l'ẹkwo byia ya ẹka ta adukwa onye emebyi iya nù; ọphu ọ dukwa onye eyekwa iya iphe; mbù a makwarù-a l'ọo ekpe, nemadzù keru.

¹⁶Sù-a; ọ kwa Èbirihamu yẹe oshilokpa iya bẹ Chileke kweru ukwe-iphe. Ọ tọ sùkwaru iya l'ọo yẹle ndu shi l'okpa iya; g'ee-gudekwanù nno makwanuru l'ọo ikpoto nemadzù. Ọ sùru iya l'ọo yẹe oshilokpa iya, bụ iya bụ l'ọo onye lanù, bụ iya bụ Kéreshi ọbu.

¹⁷Mbù l'iphe, mu epfu bụ lẹ-a; l'ogbandzu ono, shi Chileke l'ẹka bẹ Chileke kwetarù ukwe sù lẹ ya e-me iphe ya pfuru. Sù-a; ekemu, a nọadaru unu apha l'apha ukporo l'iri gẹ Chileke kwechaaru ukwe-iphe ono tẹme ekemu ono bya ta ayikwa gbukaa iphe, Chileke kwewaru ukwe iya. O to mekwa ukwe-iphe ono, Chileke kweru ono g'ọ buru iphe-mmanù.

¹⁸Ọme ọ bụada g'e me iphe, ekemu pfuru tẹme Chileke emee iphe, o kweru ukwe iya mẹ aamanuru l'ọ tọ buedu ukwe-iphe. Obenu lẹ Chileke nuru Èbirihamu iphe, o kweru ukwe iya; opfu l'ọ kwewaru iya ya.

¹⁹Sụ-a; ? ọ bụhunuru ọ́nu bẹ́ a tų-doru ekemu? Iphe, a tų-doru ekemu bų g'ekemu goshi iphe eme iphe-ẹ́jị bų. A tų-doru iya g'ọ́ ńọ́du jasų teke oshilọ́kpá Ẹ́birihamu ọ́bu a-bya, bų iya bų onye ọ́bu, Chileke kweru ukwe-iphe doberu ọ́bu. Ọ́ Chileke tųru ekemu ono bya agbẹ́ l'ẹ́ka ụ́nwu-ọ́jozi-imigwe woru iya nų onye-ẹ́to bų Mọ́sisu, ńọ́-chiru ẹ́nya nemadų g'ọ́ tųaru ndiphe.

²⁰L'ọ́ kwa a -dų ẹ́bo eme iphe bẹ́ aachọ́je onye-ẹ́to; obekwanu lẹ́ Chileke bų onye lanų.

²¹? Ọ́ pńfuru l'ekemu egbuka iphe, Chileke kweru ukwe iya egbuka tọ́? Tuswekwa! Kẹ́le ọ́me ọ́ -dųru ekemu, a tųru g'ọ́ gude ndų mẹ́ apńbẹ́koto l'iphu Chileke eshinu l'edobe ekemu.

²²Obenu l'ẹ́kwo-opfu Chileke egoshi lẹ́ ndiphe mgburugburu bẹ́ iphe-ẹ́jị pyítaru l'ẹ́kpiri. Iphe, o gude egoshi iya ono bų g'iphe ono, Chileke kwetarų lẹ́ ya e-meru onye woru onwiya ye Kẹ́reshi ono l'ẹ́ka abųerupho ndu woru onwophẹ́ ye Kẹ́reshi l'ẹ́ka bẹ́ oo-meru iya kpoloko.

²³Kẹ́le teke k'ekweta teke adųdu bẹ́ ekemu shikwa tuchia anyi atuchi g'anyi ta ahųma ųzo anyi e-shi kweta kẹ́ Kẹ́reshi.

²⁴Ọ́o ya bų l'ekemu shi edu anyi ųzo g'onye eleta ụ́nwegirima ẹ́nya; dua anyi jasų Kẹ́reshi bya g'anyi a-bųru ndu Chileke ọ́ru lẹ́ ndu pńbẹ́rekoto; opfu l'anyi woru onwanyi ye iya l'ẹ́ka.

²⁵Nta-a, Chileke ọ́uhawaru anyi ųzo g'anyi woru onwanyi ye Kẹ́reshi l'ẹ́ka-a bẹ́ anyi ta ńọ́kwa l'ẹ́ka onye ono, eleta anyi ẹ́nya ono, bų iya bų ekemu.

²⁶Ọ́o ya bų; l'eshinu unu wowaru onwunu ye Kẹ́reshi l'ẹ́ka; unu l'iya tųgba bųru nanų bẹ́ unu bųkotawa ụ́nwu kẹ́ Chileke.

²⁷Lẹ́ g'unu ha bųru ndu e gude ẹ́pha Kẹ́reshi mee baputizimu bẹ́ yeakwaru Kẹ́reshi g'onye yeru uwe.

²⁸Mkpọ́cha l'onye-a bų Jiu ẹ́be onye-a abųdu ta adųekwa; ọ́phu ọ́ dųekwa l'onye-a bų ohu; onye-a bųru amadų; ọ́phu l'onye-a bų nwoke onye ọ́phuu bųru nwanyi adųekwapho; kẹ́le g'unu ha shiwaa l'ẹ́ka Kẹ́reshi tųgba bųru nanų.

²⁹Sų: unu -bųwaru ndu kẹ́ Kẹ́reshi bẹ́ unu bųwaa oshilọ́kpá Ẹ́birihamu, bų iya bų ndu iphe ono, Chileke kweru Ẹ́birihamu ukwe iya ono rwuberu.

Galeshiya 4

¹Sų-a; waa iphe, mu e-gude goshi unu iphe, mu epfu bų ọ́wa-a: l'onye bų iya e-mechaa ria iphe nna iya; bẹ́ teke ọ́ bų nwata bẹ́ bųkwa g'eeme ohu bų g'aanọ́duje eme iya. A makwarų-a l'ọ́o ya nwe iphemiphe;

²ọ́le oonwejeru onye yẹ́e ya bu; onye a-ńọ́du emefuta iya nų; l'ọ́ dųkwarupho onye a-ńọ́du eleta iphe, o nweru ẹ́nya jasų teke nna iya pńfuru sų l'o noo teke nwata ono sųwaru egweta iphe iya.

³Nokwapho g'ọ dụ l'ẹka anyi nọ bụ ono. Teke anyi te eshidu maru iphe bẹ ọbvụ, bugbaa ishi mgboko ọwa-a shi mee anyi ohu pẹ.

⁴Ọle o rwuru teke ọ gbaru; Chileke ye Nwa iya sụ g'ọ bya. Ọ bya aburu nemadzu; nwananyi nwua ya. Ọ buri iphe, ekemu suru g'e meje bẹ oomeje;

⁵g'oo-shi egube ono gbata ndu ekemu keru egbu; g'ee-gude egube ono Chileke anata anyi g'anyi buru unwu iya.

⁶Ọ buri l'ọo l'unu buwaa unwu iya meru g'ọ gude Chileke woru Unme Nwa iya ye unu l'obu; mbu Unme ophu emeje g'e kuje Chileke "Nnana!"

⁷Ọo ya bụ l'e shi Chileke l'ẹka; ophu i buedu ohu; i buwaru nwa Chileke. Eshinu i buwaa nwa Chileke buanaa ya-a bụ l'i yiwaa le ndu e-ri iphe ono, Chileke doberu unwu iya ono.

Pọlu agba egomunggo kẹ ndu Galeshiya

⁸Lẹ mbu teke unu eshidu maru Chileke bẹ unu shi bugbaaru ohu iphe, abudu Chileke.

⁹Obe nta-a, unu byawaru bya amaru Chileke-a; waawaa; ge mu pfuchia ya egube-a; ọ chia nta-a, Chileke mawaru unu-a; bẹ mu suru: ? Denuhunu g'ọ gude unu dakobe alaphu azu alapfu ọbvụ ono, adudu ike dụ iya nu; teme ọ buri iphe-mmanu ono? ? Bu gunu meru g'ọ gude unu nodu eme g'unu laphukporo azu je aburu ohu pẹ ọzo?

¹⁰Unu aboje mboku l'obo-iphe; me onwa; me teke iphe meru; me apha.

¹¹Ndzu unu anodujekwa agu mu. ? Ozi, mu jeru l'ishi unu ta abuduru mu nu ke mmanu?

¹²Unwunna mu; mu arwo unu arworwo; su g'unu dunu ge mu du; kele mbedua duwaa g'unu du. Ọ to dukwa iphe, du eji, unu meru mu ililekpo.

¹³Unu maru-a l'ọo teke iphe eme mu bẹ mu byaru ezia unu ozi-oma ono le mbu.

¹⁴E -gudekpokwaaro l'iphe, eme mu nu shi buru unu oke iphe-ohutama; ole mu ta adukwanu unu ashu; ophu unu ajikakwaru mu. Unu gbenu meberu mu ree ge mu bu ojozi-imigwe; ozoo le mu bu Kereshi Jizosu l'onwiya.

¹⁵? Unu meru ehua, shi tsoo unu utso l'opfu ehua mu teke ono-a imagha? Kele mu maru l'a ta tudu iya ego; l'ome unu duru ike teke ono me ọ buchaaru k'unu aswoshi akpuru enya nkunu chie mu.

¹⁶? Mu gbenu buwaru onye opfu unu nta-a; opfu le mu pfuru unu iphe, bu okpobe-opfu?

¹⁷Ndu ono, eduphu unu ono emekwaru unu emereme shii; ọo l'ọo g'unu makwaru l'iphe, ephe emedoru unu emereme ono ta adukwa ree. Ephe emekwa g'ephe bufu unu l'ehu mu g'unu gbaru tsoru pẹ.

¹⁸Agbatsoru ndu ọzo adujekwa ree; ọo l'ọo g'unu gbatsojekwaru ndu ọbu m'ẹphe - nọdu epfu iphe, dụ ree. Unu mejekwa ẹgube ono tekenteke; g'ọ tọ bukwapho teke mu l'unu nọ.

¹⁹Unwu mu! Mu nọkwa l'iphe-ẹhuka opfu ẹhu unu nta; mbụ ẹ nwanị, abya ezeda. Mu je a-nọdu l'iphe-ẹhuka ono jasunupho teke unu a-dụ ẹ Kéreshi.

²⁰Ọ dọe mu phọ g'a sụ lẹ mu l'unu nọ nta-a; mẹ mu amaru ẹ mu gege dobe ọnu pfuaru unu opfu. Nta-a bẹ ọ tufuru mu ẹhu ẹ mu e-mekpọo k'ẹhu unu.

Ẹtu Hega yẹe Sera

²¹Unubẹ ndu ọogu anọdu emeje iphe, ekemu pfuru; unu kaeshikwaru mu; ? unu ta anumaduru iphe ekemu pfuru tọ?

²²Kẹle e dekwaru sụ lẹ Ébirihamu nwutaru unwegirima unwoke labọ. Onye lanu bu nwanị, bu ohu nwutaru iya ya; onye ophuu bu amadu yeru iya ya.

²³Onye ophu, ohu yeru bẹ a tsutaru ime iya ẹbe ọ dudu ukwe Chileke kweru swibe l'ẹhu iya k'iche. Onye ophuu, shi l'ẹka amadu phọ bẹ a tsutaru ime iya opfu lẹ Chileke kweru ukwe l'aa-nwu iya.

²⁴Mu gude iphe ono, mehawaru nu ono anmaru unu ẹtu. Unwanị ono ẹphenebo, bugbaa ne phe ono nọ-chiru ẹnya ọgbandzu labọ, shi Chileke l'ẹka. Onye ophu, bu Hega nọ-chiru iphe ono, Chileke kweru ukwe iya l'ọgbandzu shi l'eli úbvú Sayinayi. Unwu nkiya bẹ a nwuru g'ẹphe buru ohu.

²⁵Hega nọ-chiru úbvú Sayinayi ono nọ l'alị Arebiya. Ọ buru Arebiya ono bu Jierúsalemu kẹ nta-a. Noo kẹle yẹe unwu iya shi buru ohu.

²⁶Obenu lẹ Jierúsalemu ophu dụ l'imigwe ta abudu ohu; tẹme ọ buru iya bu ne anyi.

²⁷Kẹle e deru l'ekwo-opfu Chileke sụ: “Tee ẹswa gube nwanị, pfuru apfuru, eteke atsu-swee ime! Gude ẹhu-utso tee ẹswa gube nwanị, amadu iphe, eme lẹ nka nwanị, ime eme; Kẹle nwanị ono, e shi gbado agbado ono l'a-gbẹ kanu enweru nwa eme lẹ nwanị ophu alu ji.”

²⁸Su-a; unwunna mu; anyibedua bukwapho unwegirima e kweru ukwe iya tẹme a nwua phe ẹ Ayizaku.

²⁹Ọ bukwarupho g'ọ dụ teke ono bu g'ọ dụ nta-a. Teke ono bẹ onye k'ono, a tsutaru ime iya ẹ kẹ ndu ọzo phọ shi anọduje akpa onye ophu ndu iya shi l'ẹka Unme Chileke phọ ẹhu.

³⁰Ole ? bu gunu bẹ ekwo-opfu Chileke pfuru? Ọ suru: “Chifukwa ohu yẹe nwa iya; kẹle nwa, shi l'ohu bẹ yẹe nwa, amadu nwuru taa gbakwaru mgba eke iphe nna phe.”

³¹Ọo ya bu; unwunna mu; anyi ta abukwa unwu, ohu nwuru; anyi bukwu unwu, nwanị bu amadu nwuru.

Galeshiya 5

Enweru onwonye l'ime Kéreshi

- ¹Kéreshi toakwaru anyi l'egbu; sù g'anyi ba buheru ohu. Oo ya bu; unu pfushia ike. Unu te ekwekwa g'ò duru onye e-gude ekemu mee unu g'unu buru ohu ozobaa.
- ²Sù-a; gè mube Pòlu karu unu; ò -buru l'unu buru úbvù bẹ Kéreshi ta adukwa urwu, ò baru unu.
- ³Gè mu kasachakwaa onyemonye, buru úbvù nchì; l'ò mefutajekwa iphemiphe, bu iphe, ekemu pfuru g'ò ha.
- ⁴Unubẹ ndu eme gè Chileke gwa unu lẹ ndu pfuberekoto; opfu l'unu eme iphe ekemu pfuru bufuakwaru onwunu l'eka Kéreshi nọ. Unu nashiakwaru onwunu eze-iphe-oma kẹ Chileke.
- ⁵Ò -buru anyibedua bẹ iphe anyi zoberu ele ẹnya eleshia iya ike lẹ Chileke a-gu anyi lẹ ndu pfuberekoto l'iphe iya bukwa l'anyi nataru Unme-du-Nso; opfu l'anyi woru onwanyi ye Kéreshi l'eka.
- ⁶L'anoduwaa l'ime Kéreshi bẹ l'e buru úbvù; ozoo l'e te buduru ta adukwa iphe, ò bu. Iphe, bu iphe, buakwaa ekweta kẹ Kéreshi ophu shi lẹ n-yemobu.
- ⁷Unu shikpokwa etsokotawa ọzo ono ree. ? Buhunu onye kposhiru unu anodu eme iphe, bu okpobe-opfu ono nta?
- ⁸Ophu a maru bu l'ò to budu Chileke-a, bu iya kuru unu-a gbẹ bya apfubuta unu g'unu te emehẹ okpobe-opfu ono.
- ⁹Ò kwa nwa-ò-chi-l'eka iphe-ekoje-buredi l'ekoje ishi buredi ophu.
- ¹⁰Ole atugba, anyi l'unu tugbaru lẹ Nnajiuphu mekwaru-a gè mu shihu obu ike l'eka unu nọ; l'unu a-lwa azu bya etsozita ọzo wata arị iphe, mu arị; l'onye gbaghashiru unu agbaghashi; ò -bu onye; ò -bu onye-o; onye ono bẹ Chileke a-nmakwa ikpe.
- ¹¹Obenu-a; unwunna mu; ome ò bu l'oo g'e buje úbvù bẹ mu ezijekwadu asa iya asasa ono; ? m'ò buhunuru gunu bẹ o gude a nodu a-kpakwadu mu ehu? Ò -bu l'ò du egube ono mẹ asasa, mu asa lẹ Chileke a-guepho anyi lẹ ndu pfuberekoto; opfu lẹ Kéreshi nwuhuru l'oswebe tege adukwa onye o gogo bujeru iphe egu.
- ¹²Teke ò bu lẹ k'ebu úbvù aphunuka ndu ono, agbaghashi unu ono l'ehu g'ephe jenu je ahachafua onwophe ahaha.
- ¹³L'unubedua unwunna mu; bẹ e kukwaru bya atowaa l'egbu. Ole-a; unu ta ahakwa onwunu g'iphe, anoduje agu unu egu waa iphe, unu arị l'okpoma bya ekee unu egbu ọzo. Ò chikwa iphe, unu a-nodu eme bu g'onnyemonye yee nwibe iya obu k'ophu unu anoduje eyeru nwibe unu eka.
- ¹⁴Kele ekemu ono g'ò hakota tukoru kpakoo l'akpuru opfu lanu, bu iya bu: "Yee nemadzu ibe ngu obu g'i yeru onwongu."
- ¹⁵Obenu teke ò bu l'unu atakashi nwibe unu eru bya anmabushi nwibe unu anu; unu letakwa ẹnya a -nonya unu tuko onwunu taebe.

Unme Chileke waa ẹjo-iphe agugbaa nemadzu

- ¹⁶Ole mu suru-a; unu hakwaa Unme Chileke g'o goshije unu ọzo. Ọo ya bukwanu g'unu ete emejeedu ẹjo-iphe, agugbaa unu.
- ¹⁷Kele ẹjo-iphe agugbaa amadu be ta adujekwa Unme Chileke ree. Ophu iphe, agukwanu Unme Chileke adujedu uche amadu ree. Noo l'iphe labo ono duru onwophe l'opfu. O buru iphe ono meru g'o gude ebe unu adujedu ike mee iphe, du ree, unu riru k'ememe.
- ¹⁸Obenu teke o bu Unme Chileke egoshije unu ọzo; o n'iya bu l'ekemu te ekeeduru unu egbu.
- ¹⁹Su-a; iphe shigbaa l'uche amadu doru enya, bu iya bu eri ogori; apharwushi onwonye; eme umere, rehuru erehu; iphere abvu l'iphu;
- ²⁰agwo nshi; eme mgbashi; ndumashi; alwu ogu; okophoo; obu-oku; akpa enya; ekpa l'iche iche; ẹjo-nzi;
- ²¹enya-pfurupfuru; egbu-ochi; mee-atsutsu; eri angu-sweshi iphu; mewaro iphe dugbaa egube ono. Noo iphe shigbaa l'uche amadu bu ono. Su-a; ge mu lokwaa unu eka le nchi ge mu lohawaru iya unu; ndu eme nno taa bahukwa l'eka Chileke bu eze.
- ²²Obekwanu l'iphe shigbaa le Unme Chileke bu: n-yemobu; ehu-utso; nchi-adu-doo; nshirima; eme odoo; eme oma; ekweta;
- ²³eme gelee; me esede onwonye. O to dudu ekemu, a turu swibe ndu k'ono.
- ²⁴Ndu bukwanu ndu ke Kereshi Jizosu; wowaru ẹjo-iphe, agugbaa phe nu me ẹjo umere, shigbaa phe l'uche kpopyabe l'oswebe.
- ²⁵Eshinu anyi gude Unme Chileke dzuru ndu; unu g'anyi hanaa ge Unme ono goshije anyi ọzo.
- ²⁶G'anyi te emejekwa iphe g'ee-shi g'a jaa anyi ajaja. Ophu anyi emejeshi nwibe anyi iphe, e-ghu iya egbu. Ophu anyi ejijekwaru nwibe anyi iji-enya.

Galeshiya 6

Evuru ivu nwibe ngu

- ¹Unwunna mu; teke o bu l'o duru onye e guderu gedegede teke o duru iphe, oome adudu ree; g'unubedua, Unme Chileke gude ndu unu-a; jinaa obu oyi duphuta iya azu l'uzo pfuru oto. Ole oo g'on'yemonye letakwa onwiya enya g'e te nwufuaru iya ye l'eme iphe-aji.
- ²G'onyenonu gbatajeru nwibe iya l'iphe, atsụ iya l'ehu g'unu e-gude egube ono mekotaje ekemu, Kereshi turu.
- ³Kele onye riru le ya bu iphe l'eka o dudu iphe, o bu; onye ono bukwa onwiya be oome eswe.

⁴Ọ kwa g'onyenonu gudejekwa ɛnya lee onwiya maru g'umere iya gbaru; l'i wotaje iphe, iime ɥuru yeru umere gbaru ngu nɔ. Ọo ya bɔ; i ti jeɛduro ewota iphe, i meru aturu eyeru k'onye ọzo.

⁵Kɛle onyemonye e-vukwaru ivu nkiya l'onwiya.

⁶G'onye, eezi ozi-oma kɛ Kéréshi ono hejekwa onye ezi iya ya nɔ iphe, dɔ ree, o nweru.

⁷Unu te ekwekwa g'e duswee unu ɔzo; Chileke ta abɔkwa onye akwa eswe; noo l'oo iphemiphe, onye kuru bɛ ọowotaje akpuru iya.

⁸L'onye eme ɛjo-iphe, agɔ iya nɔ bɛ a-lakwa l'iswi. Obenu l'onye eme gɛ Unme Chileke ziru iya bɛ Chileke a-nɔ ndzɔ ojejeje.

⁹Ọo ya bɔ g'ike ta abvɔkwa anyi l'eme ree; kɛle anyi e-ritakwaa urwu iya l'orwuberu iya mɛ anyi -gudeshia ɛka anyi g'anyi gudeshi iya.

¹⁰Ọo ya bɔ g'anyi mejeru onyemonye ree nta, ɔzo duru anyi l'ememe iya. Ndu anyi a-kabajekpoo emeru ree ono bɔ ndu anyi l'ephe bɔ onu-ulo lanɔ; opfu l'anyi tukowaru kweta kɛ Kéréshi.

Ekele

¹¹Nta-a bɛ mu gudeakwa ɛka mu gɛdegede ederu unu ɛkwo ọbu. ? Unu ta ahumaduru g'akpuru opfu ọbu hachaa kakporo kakporo?

¹²Ọ kwa ndu eme g'a jaa phɛ ajaja k'iphe, ɛphe sɔru l'e mefutaje l'eli ɛhu bɔ ndu ekebutaje unu sɔ g'unu bua ɔbvɔ. Iphe, ɛphe gude eme iya bɔ gɛ ndu Jiu ta akpa phɛ ɛhu. ɛphe maru lɛ ndu Jiu gege akpa phɛ ɛhu; ọme ɛphe kweru l'oo 'epho Kéréshi ono, nwuhuru l'oswebe ono a-dzɔ phɛ.

¹³Ndu ọbu, bukporo nɔ ɔbvɔ ọbu ta abɔkwa l'ephe emeje iphe ekemu pfuru. Ọ kwa iphe, ọogu phɛ g'ephe mee g'unu bua ɔbvɔ bɔ g'ephe abaaha aba l'ephe meru unu; unu mee iphe-ohubama l'anɔ-ɛhu.

¹⁴A bya lɛ mbɛdua; ɥswekwa! Mu ta ayikwa baa aba k'iphe ọzo gbahaa k'oswebe Nnajiuphu anyi, bɔ Jizosu Kéréshi. L'eshi ọphu ọ nwuhuru l'oswebe bɛ iphe kɛ mgboko-a ta adɛkwa iphe, ọ bɔ mu; tɛme mbɛdua dɔakwapho g'onye nwuhuru anwuhu l'iphe kɛ mgboko-a.

¹⁵Kɛle anoduwaa l'ime Kéréshi Jizosu bɛ l'e buru ɔbvɔ; ọzoo l'e te buduru ta adɛkwa iphe, ọ bɔ, abɛdupho aburu onye Chileke meru k'ophúú.

¹⁶Gɛ Chileke mee g'ɛhu dɔ iphe, bukporo ndu etsoje ɔzo ono, mu goshiru unu ono guu; phɔkwaaru phɛ phɔ obu-imemini. Ọo phɛ bɔ ọkpobe ndu Ízurelu kɛ Chileke.

¹⁷Sɔ-a; e -shi ntanɔ-a g'ọ tɔ dukwa onye epfuchibaa mu nchi. Ichii-iphe ọwa-a, mu vu l'ɛhu-a buakwaa iphe-ohubama, egoshi lɛ mu bɔ ohu Jizosu.

¹⁸Unwunna mu; gɛ Nnajiuphu anyi, bɔ Jizosu Kéréshi mekwaaru unu eze-iphe-oma g'unu ha. Nokwa g'ọ dɔ!

Efesosu

Efesosu 1

¹Ọwa-a bụ ẹkwo-ozì, mụbe Pọlu ede. Mu bụ onye Chileke hotaru mee gę mu buru onye-ishi-ozì Kéreshi Jizosu. Mu ede iya anụ ndu dụnso, bu lę Efesosu; mbụ ndu kwetaru kę Kéreshi Jizosu; ęphe l'iya tugba buru nanu.

²Mu sụ gę Chileke, bụ Nna anyi yę Nnajiuphu, bụ Jizosu Kéreshi meeru unu eze-
iphe-oma; mekwaapho g'unu buru l'ęhu-guu.

Ọnu-oma, shi l'ęka Kéreshi

³Unu g'anyi kele onye ono, bụ Chileke bya aburu Nna kę Nnajiuphu anyi Jizosu Kéreshi ekele; onye bụ iya goru onu-oma nụ anyibe ndu anyi lę Kéreshi tugbaru buru nanu. Onu-oma ono bụ lę Chileke meru; anyi shi Kéreshi l'ęka yiru l'oha imigwe. O buru ęka o shi bụ l'o wotaru iphe, bukotakpoo iphe, aanu anunu, shi l'ęka ono woru nụ anyi.

⁴Chileke byaru eme mgboko; o vuru uzo shi l'atugba ono, anyi lę Kéreshi tugbaru buru nanu ono; hotahawaro anyi g'anyi buru ndibe iya; k'ophu anyi a-duru iya iche; bya aburu ndu adudu ęka ntucha a-dụ l'ęhu anyi l'iphu iya.

⁵Oo n-yemobu iya meru g'o gude o chihawa iya l'idzù dobe l'anyi a-buru unwu iya; onye oo-shi l'ęka buru Jizosu Kéreshi. Ono buerupho iphe, duhawa iya ree ememe bya abukwarupho iphe dụ iya l'uche;

⁶g'anyi etuje Chileke ępha k'eze-iphe-oma ono, dụ biribiri ono, o meru anyi kę mmanu ono; mbụ anyibe ndu anyi lę Nwa iya ono, o yeru obu ono tugbaru buru nanu.

⁷Mbụ-a; Nwa iya ono bę gbashikwaru mee ya; gude gbata anyi; teme o bukwaru iya pho bụ lę Chileke aguru anyi nvu l'iphe-ęji anyi. Sụ-a; eze-iphe-oma ono buru iphe-oma, kwatakporu paa ęka bę o meberu anyi ęgube ono;

⁸mbụ eze-iphe-oma ophu o kwatakporu gude mmamiphe yele nkwanęnya saa ęka okpobe asasa meeru anyi.

⁹O byakwapho bya emee g'anyi maru iphe; nweru okpobe egomunggo; k'ophu iphe, oome e-doje anyi ęnya. O meru; anyi bya amaru iphe, shi buru iphe, o domiru edomi, bụ iphe, o rihawaru lę ya e-shi Kéreshi l'ęka mee.

¹⁰Iphe ono, o tuberu ono, bụ iphe, oo-me teke o gbaru ono bụ l'oo-tuko iphe, o gude ęka iya mee tuko chigbabe; mbụ iphe, dụ l'igwe; mę ophu dụ l'alı; l'o woru Kéreshi mee ishi iya.

¹¹Oo Kéreshi bę anyi l'iya tugbaru; o buru iya meru g'anyi yiru l'iphe ono, o kweru ndu bụ nkiya ukwe iya ono. O buru iya mekwarupho g'o gude Chileke, emekotaje iphemiphe g'o tubehawaru iya; mee ya g'o dụ iya l'uche; vuhawaru uzo hotahawaa anyi.

¹²Oo ya bu g'anyibedua, bu ivuzo ele enya Kéreshi egude umere anyi l'ophu egoshi g'odu-biribiri Chileke habe shii; g'ee-gude iya jaa ya ajaja.

¹³Nokwapho g'o du unubedua; l'unu numaerupho okpobe ozi ono, bu ozi k'adzota ono, Chileke dzotaru unu ono; unu kweta ke Kéreshi. O buru iya bu le Chileke egude Unme-du-Nso, o kwetaru ukwe iya; mee unu iphe-ohubama; gude goshi l'oo ya nwe unu.

¹⁴Unme-du-Nso ono egoshi l'anyi a-nata-a iphe ono, Chileke kweru ndibe iya ukwe iya ono, bu iphe, anyi a-nata teke Chileke a-gbata ndibe iya okpobe agbata ke mkpochi-ishi; g'anyi jaa odu-biribiri iya ajaja.

Polu epfu anu Chileke

¹⁵Noo iphe, meru g'o gude mu numachaa k'ekwekwe unu kweru ke nnajiuphu, bu Jizosu waa k'obu unu yekotaru ndu-nso ono;

¹⁶ebe o dudu teke mu ekelebuhjeru unu Chileke ekele. Mu -nodu epfu anu iya; be mu epfujekwaru iya pho opfu ehu unu.

¹⁷Mu asuje ge Chileke ke Nnajiuphu anyi Jizosu Kéreshi; mbu Nna bu O-ka-le-biribiri; g'o nu unu Unme iya, e-me unu g'unu maru mmamiphe; phua ophulanya; k'ophu unu a-maru iya okpobe amaru.

¹⁸Mu asujekwa iya pho g'o mee obu unu g'o huma iphoro iya; k'ophu unu a-maru iphe, bu iphe, o kuru unu g'unu le enya iya; makwarupho l'iphe, o kweru ndu-nso ukwe iya nyiberu anyibe.

¹⁹Wakwapho g'ike iya ono, bu ike ophu enwedu etu ono emeberu ire l'ehu anyibe ndu kweru ke Jizosu. Ike ono, l'eme ire l'ehu anyi ono be bukwa iphe lanu yee eze ike iya ono,

²⁰bu iya bu ophu o gude mee ge Kéreshi shi l'onwu teta dzuru ndzu; bya eworu iya dobe l'ekutara iya l'imigwe.

²¹Kéreshi ono no-ngokotaru iphe, bukotakpoo ochi-oha imigwe; mekpoo o-no-l'oke-okwa imigwe g'ephe ha; mekpoo o-gude-ike imigwe g'ephe ha; mekwapho nnajioha imigwe l'ophu; mekpoo iphe, bukpo iphe, e kuru epha l'eliphe-a; mekpoo l'eliphe ophu abya nu.

²²Chileke meru ge Kéreshi tuko iphemiphe zopyabe l'okpa; bya ewokwaru iya pho yeru Chiochi g'o buru iya l'a-buru ishi iphemiphe kpoo.

²³Chiochi l'ophu bukwa ogwehu Kéreshi; o buru l'echilabo ndu Chiochi be iphe ke Kéreshi dzuru edzumedzu. O bukwanuru le Kéreshi be iphemiphe ke Chileke dzukwanuru edzumedzu.

Efesosu 2

Eshi l'onwu bahu le ndzu

- ¹Ọ dūru teke unu shi bŭru ndu nwŭhuru anwŭhu. Ọ bŭru iphe, kparŭ iya nŭ bŭ l'unu te eyejeduru Chileke ọnu; unu nọdu anọduje eme iphe-ẹji.
- ²Teke ono bẹ unu shi etso ẹka ndiphe. Unu shi anọduje eme iphe, epherephere pfuru, bŭ iya bŭ onye ọphu, bŭ onye-ishi l'ephekerephe bya abŭru ọbvụ ono, l'emeje gẹ nemadzŭ kwefuru Chileke ike ono.
- ³Anyịbedua g'anyi ha shikwa tŭko etso ụzo ono. Anyi shikwa etsoephō iphe, agŭ anyi ẹgu ememe. Iphe, anyi shi emeje buerupho iphe, dŭ anyi ree l'ẹhu; mẹ iphe, dŭ anyi ree l'egomunggo. Anyi shikwa lẹ mbŭ bŭru ndu shi tukotawaa oke-ẹhu-eghu kẹ Chileke kpube onwanyi gẹ ndu ọphuunapho.
- ⁴Obenu lẹ Chileke bŭ onye aphuje obu-imemini; phŭa k'etsutsu iya. O yeru anyi obu yegharŭ iya anyi ẹka.
- ⁵Anyi shi l'emeswe, anyi mesweru Chileke; bŭru ndu nwŭhuru anwŭhu. Obenu lẹ Chileke mewaru; anyi lẹ Kéréshi tŭko bya adzŭru ndzŭ; ọ bŭru eze-iphe-oma iya bẹ o gude dzọo unu.
- ⁶Anyi lẹ Kéréshi Jizosu tŭgbaru bŭru nanŭ; Chileke tŭko anyi l'iya mee; anyi teta dzŭru ndzŭ bya emekwapho g'anyi l'iya tŭko nọdu l'imigwe.
- ⁷Iphe, o gude mee ya nno bŭ g'oo-mecha goshi ọgbo ọphu nọ l'iphu eze-iphe-oma iya ọphu nyiberu oke anyibe; waa g'oo-goshi phẹ g'obu ọmaa ya, shi l'ẹka Kéréshi habe l'ẹhu anyi.
- ⁸Ọo l'ọo lẹ Chileke menŭkaru eze-iphe-oma meru g'o gude ọ dzọo unu. Adzọdzo ono shi l'ekweta, unu kwetarŭ kẹ Kéréshi; ọ tọ bukwa unu bẹ o shi l'ẹka; ọ buephō iphe-oma, Chileke meru unu kẹ mmanŭ;
- ⁹ọphu ọ bŭdu iphe, e setarŭ l'akanya; g'ọ tọ dŭkwanu onye e-gude iya wata eku onwiya.
- ¹⁰Anyi tŭkokwaru bŭru iphe, Chileke gude ẹka iya mee. O shi Kéréshi Jizosu l'ẹka kee anyi; k'ọphu anyi a-duje ike je ọkpobe ozi, ọ kwakọbehawaru anyi g'anyi jee.

Abŭru nanŭ l'ime Kéréshi

- ¹¹Ọo ya bŭ; unu nyatakwa iphe, unubẹ ndu abŭdu ndu Jiu shi buhawaru. Ndu Jiu shi ekuje unu akpapyi. Ẹphebedua nọdu ekuje onwophẹ ndu buru úbvù. Ọle úbvù, ẹphe buru buephō iphe, nemadzŭ gude ẹka ebu l'eli ẹhu.
- ¹²Unu nyatajẹkwa lẹ teke ono bẹ unu te eshidu nọdu Kéréshi l'ẹka; unu shi bŭru ndu ọhozo, a gŭfuru agŭfu lẹ ndu Ízurelŭ tẹme unu bŭru mbyambya, ọphu unu eshidu dŭ l'ukwe-iphe, Chileke kweshiru ndibe iya ono. Ọphu ọ dŭdu iphe unu shi ele ẹnya iya lẹ mgboko-a. Ọphu unu eshidu maru onye Chileke bŭ.
- ¹³Obenu lẹ nta-a bẹ o shiwaa l'ẹka Kéréshi; onye unu l'iya tŭgbaru bŭru nanŭ; Chileke kuritaru unu ntse; l'unubẹ ndu shi nọdu iya ụzenya; ọ bŭru mee Kéréshi bẹ e gude mee ya.

¹⁴Ọ kwa Kéreshi l'onwiya bụ ẹhu-guu k'anyi; yẹbedua, meru anyịbe ndu Jiu mę ndu abudu ndu Jiu; anyi buru ndu lanu. Tọbudu iya bụ; o shi ẹgube ono nwukpofu ndumashi ono, shi buru igbulọ nọ-buha anyi l'unu ono.

¹⁵Iphe, o meru bụ l'o meru; ophu ekemu erehedu ire; mbụ ekemu ndu Jiu mękpoo nsọ; mę omelali omelali, dukota iya nu. Iphe, Chileke eme g'o mee bụ gę Kéreshi e-shi ẹgube ono gude mba labọ ono metaru onwiya ndu lanu, ẹphe l'iya tugbaru buru nanu. Ndu ono aburu mbà ọphúú. Ọo ya bụ l'o gude ẹgube ono mee gę nchị du doo.

¹⁶Kéreshi egudekwaphọ anwuhu ono, ọ nwuhuru l'oswebe ono; mee gę ndumashi ono bvụ. Ọo ya bụ; g'o gude anwuhu iya l'oswebe ono; mee gę mba labọ ono buru nanu. Ọo ya bụ g'ooduphuta phe azu dupfuta Chileke.

¹⁷Noo iphe, Kéreshi gude bya; bya ezidzuru g'a ha ozi-oma nchị-adu-doo ono; zia ya unubę ndu shi nọdu Chileke ụzenya; zikwaa ya phọ ndu shi nọdu iya ntse.

¹⁸Kele ọ bụ iya bę o shi l'eka anyinebo tuko buru ndu aduje ike gude Unme lanu bya apfuru l'iphu Nna.

¹⁹Ọo ya bụ; l'unu ta abuhedu nlwamulwa; ophu unu abuhedu ndu ohozo. Nta bę unu buwaa ndu ẹphe lę ndibe Chileke tukoru buru ndu a nwuru l'eka lanu; unu tukowaru buru ndu onu-ulo Chileke.

²⁰Nta-a bę Chileke gudeakwa unubedua akpu-tse ulo iya ophu ndu-ishi-ozu mę ndu shi epfuchiru Chileke turu okpa iya. Ọ buru Kéreshi Jizosu l'onwiya bụ mkpuma, gude ulo obu.

²¹Ọo ya bụ onye gude ulo ono g'ọ ha gudeshia ya ike bya aburu iya e-me g'o vua buru eze-ulo, e doberu Nnajiuphu nsọ.

²²Nokwaphọ g'unu l'iya tugbaru; ọ tukokwapho unu akpu; unu lę ndu ozo g'a kpua unu akpukpu g'ulo; g'unu buru eze-ulo, Chileke e-shi l'eka Unme-du-Nsọ buru.

Efesosu 3

Ozi, Pọlu ejeru ndu abudu ndu Jiu

¹Noo g'o gude mube Pọlu, onye nọru Kéreshi Jizosu mkporo l'iswi ẹhu unubę ndu abudu ndu Jiu; nọdu anọduje epfu anu Chileke.

²O doru mu ęnya l'unu numawaru lę Chileke shiwaa l'eme eze-iphe-oma iya ono; ye mu ozi-a l'eka sụ gę mu jee; g'oduru unu lę ree.

³Ono buru iphe, e domiru edomi e meru gę mu huma l'ophuleny. Gę mu dehaawaru iya unu lę mbu; ọle mu gburu iya mkpirikpu.

⁴Unu -gụepho iphe, mu dehawaru; unu agbę l'eka ono maru g'o doberu mu ęnya; mbu iphe kę Kéreshi ono, e shi domia edomi ono.

⁵Lę teke ndiche bę Chileke te eshikwa emeje gę ndiphe maru iphe nkiya ono, o domiru edomi ono. Obenu lę Chileke shiwaa l'eka Unme-du-Nsọ nkiya togbo iya ẹba

nta; k'ophu ndu o hotaru dobe iche; mbu ndu-ishi-ozu iya me ndu mpfuchiru iya amaru iphe ono.

⁶Mbu le ndu abudu ndu Jiu be epe le ndu Jiu gbawaa mgba l'onu-oma ophu shi l'eka Chileke. Epe tukoru dzepfuwaa l'ehu onye lanu; toko yiwaru l'ukwe-iphe, Chileke shi l'eka Kereshi kwee. O buru ozi-oma ono meru g'anyi maru iya nta.

⁷Oo ozi-oma ono be mu ese akanya iya. Chileke hotaru mu ge mu jeje ozi-oma ono; ono buru eze-iphe-oma, o meru mu ke mmanu. O gude nno goshi mu g'ike iya erebe ire l'ehu mu.

⁸L'iphe, bukpuo ndu enya lwaru le ndu ke Chileke bu mu be o kachaa alwalwa; o buleru mbedu-a be Chileke gbeme eze-iphe-oma ono ke ge mu buru onye e-tsoru ohamoha; pfukashiaru ndu abudu ndu Jiu k'eze-iphe-oma ono, shi l'eka Kereshi ono paru eka; k'ophu nemadzu ta asudu g'oo-rivu g'o habe.

⁹Oo mu be o yeru ge mu mee ge ndiphe l'ophu huma ge Chileke eshije eme iphe, o tuberu. Chileke onye bu iya meru iphemiphe chihawaru iphe ono; teme o mee mgboko; ole o shikpopho e -shi teke ono domia ya edomi.

¹⁰O buru nta-a be Chileke shi Chiochi l'eka mee ge ndu ochi-oha imigwe; mekpoo ndu o-no-l'oke-okwa imigwe maru ge mmamiphe Chileke gbaebekotaru.

¹¹Chileke tukoru iphemiphe ono mee g'o riru iya ro l'edenwede. O buru onye o shi l'eka mee ya bu Nnajiuphu anyi, bu Kereshi Jizosu;

¹²onye anyi kwetaru nkiya bya emee; anyi l'iya tugba buru nanu; k'ophu obu te etedu anyi ophe; anyi nweru onu-opfu; teme anyi nweru eka anyi a-pfuru pfushia ike l'iphu Chileke.

¹³Noo g'o gude mu nodu epfuru unu su: jiko g'unu te egudekwa k'iphe-ehuka-a, mu eje l'opfu ehununu-a; tuwoo Kereshi eka; l'o bukwa iphe e-wotaru unu ubvu.

Eye obu, Kereshi yeru anyi

¹⁴Oo iphe ono meru g'o gude mu nodu anoduje egbu ikpere l'alipfu anu Chileke, bu Nna;

¹⁵onye bu iya be ipfu l'ipfu l'imigwe me l'eliphe shi l'eka gbube ishi ndzu phe.

¹⁶Mu anoduje epfu anu Chileke g'o shi l'odu-biribiri iya, nyiberu anyibe gbeme l'eka Unme iya, du Nso; nu unu ike g'obu shihu unu ike;

¹⁷ge Kereshi bata bya eburu unu eburu l'ime obu; eshinu unu kweru nkiya; wafua g'eye obu mee unu g'unu gbaa ogbarabvu nguru anguru;

¹⁸g'unu le ndu-nsu g'ephe hakota aduje ike g'o doo unu enya; mbu ge adzota, Chileke dzotaru unu habe osa; waa g'ogologo iya habe; me g'o habe l'eli; mekpoo omilomi iya;

¹⁹g'unu makwarupho le n-yemobu ke Kereshi paru eka; k'ophu o dudu onye abya iya amaerberu. Oo ya bu g'aatuko ge Chileke gbaru; humagbukotakpoo l'ehu unu.

²⁰Chileke aduje ike meeru anyi iphe megharụ iya ẹka mebyikpọo ọkpobe emegharu; mbụ mechaa meghata g'anyi aduje ike sụ g'o mee; mechaa mee ophu anyi ari-vuduru l'egomunggo. Ẹgube ike ọwa-a, o gude ere ẹgube ire ọwa-a l'ẹhu anyi-a shihukwaru ike.

²¹G'e shi Chiochi l'ẹka tuje iya ẹpha; shikwapho l'ẹka Kéreshi Jizosu tuje iya ẹpha jasụ lẹ tuutuutuu lẹ m̄imiimii. Nokwa g'ọ dụ.

Efesosu 4

Ndu etso Jizosu bụ nanụ

¹Noo g'o shitaru mbedua, bụ onye a tūru mkpọro; opfu lẹ mu ejeru Nnajiuphu ozi-a nọdu arwo unu sụ g'unubẹ ndu kẹ Chileke dzuru ndzụ meje iphe, Chileke tūberu teke ono, ọ họtaru unu ono.

²Unu wozejekwa onwunu alị; unu emeje gelee bya aburu ndu atajeru iphe nshi; ndu atagbuje iphe nwibe unu meru unu lẹ nshi; gude ẹgube ono goshi l'unu yeru nwibe unu obu.

³Unu kukebeje ẹhu g'unu ta aha aburu nanụ ono, Unme Chileke meru g'unu buru ono. Gẹ Chileke mee gẹ nchị dụ unu doo g'unu lẹ nwibe unu aburu nanụ.

⁴Sụ-a; ọ kwa ogwehu lanụ dụ; waa Unme-du-Nsọ lanụ; nokwapho g'ọ bụ iphe lanụ bẹ Chileke kuru anyi g'anyi le ẹnya iya.

⁵Ọo Nnajiuphu lanụ dụ; ọ buru ekweta lanụ dụ; nokwapho g'ọ bụ baputizimu lanụ dụ.

⁶Ọo Chileke lanụ dụ; onye bụ iya bụ Nna anyi g'anyi ha; bya aburu iya nọ-ngokotaru; bya egudekọta onyemonye eje ozi iya; bya eburu l'ime onyemonye.

⁷G'anyi ha l'onye l'onye bẹ Chileke mekotaru eze-iphe-oma. Ọ buru gẹ Kéreshi gude kee ya bụ g'anyi natagbaaru iya.

⁸Noo iphe, o gude ọ sụ: “Teke ono, ọ gbeshiru lashia l'imigwe bẹ o dutaru igwerigwe ndu ọ kpuru lẹ ndzụ lashia; bya ekèeru ndiphe iphe kẹ mmanụ.”

⁹Ọ dụ ree; ọ -buru l'a sūru l'ọ larụ l'imigwe; ọ n'iya bụ l'o vuru ọzo shiada l'igwe bya mgboko rwua l'alị ree.

¹⁰Ọ kwapho yebe onye ono, nyizetaru nū ono; nyihuru; tūko imigwe g'ọ ha nyighaa; k'ophu ọ tūkoru ẹkameka sweta.

¹¹Ọo ya bụ onye tūru ẹka lẹ ndu a-buru ndu-ishi-ozii; tūa ẹka lẹ ndu ophu a-buru ndu mpfuchiru Chileke; mẹ ndu ophu a-buru ndu-ozii-oma; mẹ ndu ophu a-nọduje eleta Chiochi ẹnya bya atukwapho ẹka lẹ ndu ophu a-nọduje ezi opfu Chileke.

¹²Iphe, o gude mee ya nno bụ g'o shi phẹ l'ẹka mee ndibe Chileke; k'ophu ẹphe a-du ike jeeru Kéreshi ozi-a; wafua k'ophu ogwehu Kéreshi ono e-tsehu etsehu.

¹³Noo g'oo-du jasụ teke anyi a-tụko buru ndu tughbaru nanu; opfu l'anyi tukuru kweta ke Nwa Chileke ono; me opfu l'anyi majiru iya enya. Noo iphe, e-me g'anyi bukwarupho ndu e-tsefuta; buru mkpurophu onye lanu, dzuru oke l'ime Kéreshi.

¹⁴Anyi taa bueduru unwegirima, a-noduje akwaphu akwaphu; ndu e gude iphe opfu, shi l'ejo nzi ephe anoduje ezi; gude eregede me ugho edepushi.

¹⁵Iphe, anyibedua g'emeje bu g'anyi yeje nwibe anyi obu; pfuje ire-lanu; g'anyi egudeje egube ono evu evuvu l'iphemiphe; evu evupfu Kéreshi, yebedua bu iya bu ishi anyi.

¹⁶Oo ya emeje g'ogwehu l'ophu dzepfua le nkwo iya le nkwo iya; buru nanu. Teke ono be ogwehu l'ophu a-tuko evu evuvu; shihu ike; eshinu iphemiphe, e meru; o du l'ehu tukuru emegbaa g'o gbaru iya. Nokwapho g'oo-du l'ehu Kéreshi me ndu nkiya - yee nwibe phe obu.

Ndzụ òphúú, shi l'eka Kéreshi

¹⁷Oo Nnajiuphu be ziru mu nu ge mu pfua ya pfushia ya ike su ge ndzu unu ta aduhekwa ke ke ndu ta amadu Chileke; ndu egomunggo swehuru;

¹⁸ndu oriri phe gbakotaru ochii; teme ebufu phe ge ndzu ono, shi l'eka Kéreshi ono te erwube phe eka. O buru iphe, kparu iya nu bu l'ephe kpochiru okpoma; ophu o to du iphe ke Chileke, duru ophu ephe maru.

¹⁹Iphere buwaru phe l'iphu; ephe woru onwophe togboru umere, rehuru erehu. Ephe wata eme okorokoto iphe, adudu ree; k'ophu ephe ajiwa momomo ala l'arwu urwuali, dugbaa iche iche.

²⁰O to bukwa egube iphe ono bu iphe, unu nwutaru le ke Kéreshi!

²¹Ophu doru enya bu l'unu numaru ke nkiya; teme e zikwaapho unu iphe, bu okpobe-opfu, du l'ehu Jizosu.

²²Oo ya bu g'unu haa ejo umere ono, bu akahu onye, rehuru erehu ono, bu iya meru ebe unu amadu l'oo onwunu be unu aghoru ugho; o bukwaru iya pho emeje; unu alaa l'iswi.

²³Ge Chileke mee obu unu; me uche unu g'o buru iphe òphúú.

²⁴Unu yeta umere òphúú ono g'onye yetaru uwe, bu iya bu umere ophu Chileke meru o yee ya. Egube umere ono egoshije onwiya l'okpobe ndzu, pfuru oto bya adu Chileke ree.

²⁵Oo ya bu; unu ta adzuphehekwa uka. G'onnyemonye pfujeru nwibe iya ire-lanu; eshinu anyi tukuru dzepfua l'ogwehu lanu.

²⁶Ehu -ghuahaa unu egu; unu te ekwekwa g'ehu-eghu ono kpataru unu eme iphe-eji. Ophu o dukwa onye e-kweje g'ehu ghua ya egu jasụ ge nchi jihu.

²⁷Unu te ekwekwa ge Nsetanu kpata unu uzo l'ehu.

²⁸G'onye shi ezi iphuru; haa iphuru; gude ẹka iya wata ese akanya gude setajẹ iphe l'uzo, p̄furu ọto g'oo-gudeje nno eyeru ndu ọzo, nọ lẹ mkpa ẹka.

²⁹Unu te epfujekwaru nwibe unu ẹjo opfu. Ọ chikwa opfu ọma bụ iphe, e-shije unu l'ọnu, bụ iya bụ ẹgube opfu emetse nemadzū emetse; bya akwoje ndu nūmaru iya nū lẹ mkpa.

³⁰Unu te emekwa Unme-dū-Nsọ kẹ Chileke iphe aphū. Kẹle ọ kwa Unme-dū-Nsọ ono bẹ Chileke gude mee unu iphe-ọhubama dobe; kwaberu mbọku, ya a-gbata unu.

³¹Unu tūkokpo k'ẹhu nkōnko; mẹ obu ọku; mẹ ẹhu-eghu parū haa. Unu haa arachije nwibe unu nchị; m̄kpoo ephu iphu. Ọphu unu edobejekwaru nwibe unu ẹjo obu g'ọ dūhabe.

³²Ọ chia g'unu mejeru nwibe unu odoo; phujeru phẹ obu-imemini. Unu agujeru nwibe unu nvu; ẹgube Chileke shi Kéreshi l'ẹka guaru unu ono.

Efesọsu 5

Umere, gbaru ndu kẹ Kéreshi

¹Eshi ọphu unu bụ unwu Chileke, o yeru obu; unu nwuje ẹka iya g'unu adū g'ọ dū.

²Gẹ ndzū unu g'ọ ha goshije l'unu yeru nwibe unu obu ẹgube ono, Kéreshi yeru anyi obu; m̄ia ẹnya lẹ ndzū iya l'iswi ẹhu anyi; woru onwiya gweeru Chileke ẹja, dū Chileke ree.

³Sū-a; eshinu unu b̄waa ndibe Chileke bẹ ọ tọ gbaduru g'unu ye ẹka l'apharwūshi onwonye mẹ ẹjo ememe ililekpoo. Unu te edobekwa ẹnya-p̄f̄urup̄furu l'ẹka iphe nwibe unu nọ; ẹbe ọ d̄kwa ẹjo-iphe ono, unu e-jejekp̄o ephota ephota ilile l'ẹka unu nọ.

⁴Ọphu ọ d̄kwa teke unu e-p̄f̄uje ẹjo ep̄f̄uf̄u; ọzoo t̄kpo t̄kpo t̄kpo op̄fu; ọphu unu atujekwa ẹjo nt̄-ọnu. Ọ chia iphe, unu e-meje b̄u g'unu n̄duje ekele Chileke ekele.

⁵L'ọphu unu a-t̄be nv̄o b̄u l'ọ tọ d̄d̄u onye arw̄u Ƴrwuali; ọzoo onye eme ẹjo ememe; ọzoo onye ẹnya-p̄f̄urup̄furu, abya abahū l'ẹka Kéreshi waa Chileke b̄u eze. Onye ẹnya-p̄f̄urup̄furu d̄a g'onye agwa iphe.

⁶Unu te ekwekwa g'ọ d̄uru onye e-gude mkp̄okoro op̄fu dephua unu. Ọ kwa iphemiphe ono b̄u iphe, e-me gẹ Chileke tukoshi ndu te eyejeduru iya ọnu oke-ẹhu-eghu iya.

⁷Ọo ya b̄u; g'unu l'ẹphe ta swijekwa ọswi.

⁸Unub̄dua l'onwunu shi n̄dugbaa l'ochii; ọle nta-a, unu b̄waa ndibe kẹ Nnajiuphu-a b̄e unu n̄akwaa l'iphóró. Ọo ya b̄u g'unu meje umere, e-goshi l'unu b̄u ndu nọ l'iphóró.

⁹Kẹle iphe, ìphóró akpatajẹ b̄uepho ọkpobe eme ọma; m̄e ap̄f̄ubekoto; m̄e ire-lanū.

¹⁰Unu kukebeje ẹhu nwuje eme iphe, dū Nnajiuphu ree.

- ¹¹Unu te etsokwa ndu ono, l'eme iphe, abaduru urwu, bu iphe, ndu no l'ochii emeje ono. Unu wojechiaru iphe ono, ephe emeje ono tujeru phe jalaa l'iphu.
- ¹²L'iphe ono, ephe anoduje eme le mpya ono duta-beru eji k'ophu iphere iya te ekwekpodanu g'e je iya ephota ilile.
- ¹³Teke e wofutakotawaru iphemiphe l'iphoro be a humakotawaru g'o gbaru;
- ¹⁴kele iphemiphe, bukpo iphe, e wofutawaru l'iphoro be buwaa iphoro l'onwiya. Noo g'o gude a nodu epfuje su: "O-ku-mgbenya; tehu nwuru enya! Shi l'anwuhu, i nwuhuru teta gbalihu! Ge Kereshi buru iphoro chiahaa l'ehu ngu."
- ¹⁵Oo ya bu; unu kwakwaa enya le'gube umere, unu emeje nta. Unu meje ge ndu maru iphe; te emeh ge ndu amadu iphe.
- ¹⁶Teke o duru nwuzo, unu kpataru k'eme iphe, du ree; unu ta ahajekwa iya g'o laa l'iswi; opfu l'iphe-eji paakwaru aka le mgboko nta.
- ¹⁷Oo ya bu; unu ta abuekwaru ndu eswe. Unu seje g'unu maru iphe, du Nnajiuphu ree g'unu meeru iya.
- ¹⁸Unu ta angujekwa mee k'ophu oo-tsu unu atsutsu; kele oodubaje l'iphere abvu l'iphu. O chikwaa iphe, unu e-meje bu g'unu kwe ge Unme-du-Nso ji unu eh.
- ¹⁹Unu gudeje ebvu oma; me ebvu ekele; me ebvu ozowaro, shikota le Unme-du-Nso gude pfuru nwibe unu opfu. Unu gujeru Nnajiuphu ebvu ekele; unu agujekwaru iya pho ebvu oma. Unu egudejekwapho obu unu kele iya ekele.
- ²⁰Unu gudeje epha Nnajiuphu anyi, bu Jizosu Kereshi keleje Chileke, bu Nna ekele k'iphemiphe.

Umere, gbaru nwoke yele nyee ya

- ²¹Unu wozejekwa onwunu ali l'eka nwibe unu no; gude nno goshi l'unu kwaberu Kereshi ubvu.
- ²²Unube unwanyi; unu wozejekwa onwunu ali l'iphu ji unu; g'o bu Nnajiuphu, bu Kereshi be unu emeru iya.
- ²³L'o kwa nwoke bu ishi nyee ya egube o bu Kereshi bu ishi Chiochi; bya abukwarupho Onye-Ndzota ogwehu iya ono.
- ²⁴O kwapho ge Chiochi wozeru onwiya ali l'iphu Kereshi bu g'unwanyi e-wozeje onwophe ali l'iphu ji, alu phe nu l'iphemiphe.
- ²⁵Unube unwoke, unu yeje nyee unu obu ge Kereshi yeru Chiochi; woru ndzu iya nu opfu eh Chiochi.
- ²⁶Iphe, o gude mee ya bu g'oo-buru: o -gudechaa mini yee opfu onu iya saa Chiochi o du ree; l'oogude iya mee ya g'o duru Chileke iche;

²⁷k'ophu oo-kulataru onwiya Chiochi gę nwanyi, eje alu ji; mbu nwanyi ama mma, adudu iphe, takuru iya l'ehu; ophu iphu te esedu iya eli; me iphe ozo, dukpoo egube ono; bya aduru Chileke iche; ebe o dudu eka uta du iya l'ehu ilile.

²⁸Nokwapho g'unwoke e-yeje nyee phe obu g'ephe yeru onwophe. Nwoke, yeru nyee ya obu buakwaa onwiya b'o yeru obu.

²⁹O to dudu onye akpoje ehu iya ashi. O chia iphe, oomeje bu azuzu be onoduje azu iya; eleta iya enya. Nokwapho gę Kereshi emejeru Chiochi.

³⁰Kele o kwa anyi bugbaa mpukashi, du l'ogwehu iya. Anyi bu anu-ehu iya me okpu iya.

³¹“Noo g'o gude nwoke je l'aha ne iya; haa nna iya je; ye nyee ya atugba. Ephenobo atuko buru onye lanu.”

³²Iphe ono buru iphe, e shi domia edomi. Iphe, mu epfu opfu iya ono bu ke Kereshi ye Chiochi.

³³Ole oopfukwarupho unu l'ehu l'ehu; su l'onyenonu yefutaje nyee ya obu g'o yeru onwiya; gę nwanyi nonu goshije le ji iya duru iya le nso.

Efesosu 6

Umere, gbaru unwegirima me ndu nwuru phe nu

¹Unube unwegirima; unu mejekwa iphe ndu nwuru unu, kweru ke Kereshi suru g'unu mee. Kele o iphe, du k'ememe be o bu.

²“Kwabeje ne ngu le nna ngu ubvu; “ bu iya bu ekemu mbu, Chileke kweru ukwe- iphe tukobe.

³“G'oo-duru ngu le ree waa g'ikakwapho nka le mgboko-a.”

⁴Ndu bu nna; unu te emekwa unwegirima unu iphe e-ghu phe eghu. O chikwa iphe, unu e-meje bu g'unu zije phe iphe; hujе phe ahuhu l'uzo ke ndu bu ndibe Kereshi.

Ndu bu ohu ye ndu nwe phe nu

⁵Unube ndu bu ohu; unu mejekwa iphe ndu bu nnaji unu k'eliphe-a ziru unu. Unu gudejekwa ndzu-agugu; me obu awa mini me iya. Unu gudejekpopho obu iphoro me iya; g'unu emeru iya Kereshi.

⁶O to bukwapho teke ephe ele unu enya be unu emeje iya g'ee-shi g'ephe ajaa unu ajaja. O chia g'unu gudeje obu unu meje iphe, du Chileke ree, bu iya bu iphe, gbaru ndu bu ohu Kereshi.

⁷G'ehu tsojekwa unu utso g'unu je ozi unu l'unu bu ohu ejeru Nnajiuphu, bu Jizosu ozi; o to budu nemadzu mmanu be unu ejeru iya.

⁸Unu nyatajekwa le Nnajiuphu, bu Jizosu l'e-bu onyemonye obunggo iphe, du ree, o shi emeje; me ? i bu ohu-o; me ? i bu amadu-o.

⁹Unubẹ ndu bụ nnaji; unu mejekwaruphọ ohu gẹ mu sūru g'ephẹ mejeru unu ono. Unu hakwaa phẹ eye ebvu. Unu nyatajekwa l'unu l'ohu unu tukuru nweru Nnajiuphu lanu l'imigwe. Yẹbedua bẹ onyemonye ha ẹnya nhamunha l'iphu iya.

Ngwọgu, Chileke anuje unu

¹⁰Iphe, mu e-gude kpochia ya ishi unwunna mu bụ; unu noshia ike l'eka Nnajiuphu; g'ike iya, nyiberu anyibe mekwa unu g'unu shihu ike.

¹¹Unu tuko ngwọgu, shi l'eka Chileke kwaa onwunu; g'unu adukwanu ike pfuru pfushia ike l'ejo ugho ke Obutuswe.

¹²L'ọ tọ bukwa nemadzu mmanu bẹ anyi l'ephẹ alwu ọgu. Ndu anyi l'ephẹ alwu bukwa ndu ọchi-ọha imigwe; mẹ ndu ọ-nọ-l'oke-ọkwa imigwe; mẹ ndu imigwe, nwe mgboko ọwa-a, agba ọchii-a; mękpoo igwerigwe ejo ojogu, nokota l'imigwe.

¹³Ọo ya bụ; unu chilikota ngwọgu ono, shi l'eka Chileke ono g'ọ ha! Ọo ya bụ; ejo mboku ono -rwuepho g'unu adu ike pfuru pfushia ike; mbu unu -lwughechaa ya; unu akpoo abara g'unu kporu.

¹⁴Su-a; unu kwakobe! Unu woru ire-lanu kee onwunu l'upfu. Unu eworu apfubekoto mee uwe-igwe ndu l'eje ọgu.

¹⁵Unu gudeshia ozi-oma k'ehu-guu ono g'ọ buru akpokpa, unu yeru g'eturu ata alodu unu.

¹⁶Unu gudewakwapho ekweta, unu kwetaru ke Jizosu g'ọ buru iphe unu e-gbobeje gude zeru onwunu; gude iya nashije apfu, Onye-Njo ono, bu Obutuswe agba unu; mbu apfu ono, enwu oku, shi l'eka Nsetanu.

¹⁷Unu anata ndzota dobe g'ọ buru okpu-igwe, unu e-kpuru. Unu atsua opfu Chileke l'eka g'ọ buru ogu-echi, Unme Chileke yeru unu l'eka.

¹⁸L'iphemiphe ono bẹ unu a-noduje epfuru Chileke su g'ọ yeru unu eka. Unu pfujekpochwapho nu Chileke gẹ Unme-du-Nso edu unu. Noo g'ọ gude unu je l'anwujeru ẹnya mkpurumkpuru. Unu ta ahakwa epfu anu Chileke l'iswi ehu ndu-nso.

¹⁹Unu pfujekwarupho nu Chileke k'opfu ehu mu; gẹ mu saje opfu kpaa kpaa; mẹ mu -nodu epfu iphe, e domiru edomi ono, du l'ozi-oma ono.

²⁰Ọo ese iswi ozi-oma ono bẹ o gude mu buru onye no-chiru Jizosu; egudekwaro le nta-a bẹ mu no le mkporo. Noo iphe, mu epfu su g'unu pfuje nu Chileke gẹ mu nweru obu saje ozi-oma ono kpaa kpaa g'ọ gbaru gẹ mu saa ya.

Ekele, Pọlu gude akpochi iya ishi

²¹Mu mawaru l'oo-du unu g'unu maru gẹ mu eme ala l'eka-a. Nwanna anyi Tikikosu, anyi yeru obu; mbu onye e gude ire iya eka l'eje ozi ke Kereshi e-pfukwarupho unu iphemiphe; k'opfu unu a-maru gẹ mu eje iya.

²²Noo g'ọ shitaru mu nodu ezi iya g'ọ byapfuta unu; k'opfu ọo-koru unu g'anyi eme ala; g'obu eshihukwanu unu ike.

²³Gẹ Chileke, bụ Nna; mę Nnajiuphu bụ Jizosu Kéreshi mekwaa g'ẹhu dụ unubę unwunna guu; mekwaphọ g'unu yee nwibe unu obu; l'o mekwaphọ g'unu kweta nkiya.

²⁴Gẹ Chileke mekwaarupho unu eze-iphe-oma; unubę ndu yeru Nnajiuphu anyi, bụ Jizosu Kéreshi obu; yee ya k'ojeje. Nokwa g'ọ dụ.

Filipayi

Filipayi 1

¹Oo mbèdua, bu Pòlu; mu lẹ Timoti, bu ndu l'ejeru Kéreshi Jizọsu ozi l'ede ẹkwo-ozia anu ndu-nsọ ono, bu lẹ Filipayi g'ẹphe hakọta; mbu ndu ono, ẹphe lẹ Kéreshi tugbaru buru nanu. Anyi edekwa iya pho anu ndu-ishi Chiochi phe me ndu ejeru Chiochi ozi.

²Ge Chileke, bu Nna anyi; me Nnajiuphu, bu Jizọsu Kéreshi meeru unu eze-iphe-oma; mekwaapho g'unu buru l'ehu-guu.

Polu epfu anu Chileke l'opfu ẹhu ndu Filipayi

³Mu ekeleje Chileke mu ekele iphe, bukpo teke mu ritaru unu.

⁴Tekenteke, mu epfukpo opfu ẹhu unu g'unu ha anu Chileke be mu egudeje ẹhu-utso epfu iya.

⁵Noo kele e -shi ke mboku mbu ono, unu numaru ozi-oma ke Kéreshi ono be unu shiepho e -shi teke ono eyeru mu ẹka l'anodu asa ozi-oma ono asasa g'a numa-dzuru gbiriri jeye nta.

⁶Iphe lanu, mu ka akota ohu bu lẹ Chileke ono, bu iya bu onye wataru eme iphe-oma ono l'ehu unu ono be l'e-gudeepho nno eme jeye teke oo-mefufu iya l'ishi lẹ mboku ono, Kéreshi Jizọsu a-bya ono.

⁷Noo egube oriri, mu arijeru unu bu ono; kele o iphe, gbaru mu l'ememe; eshinu unu no mu l'okpoma. Noo kele g'unu ha be anyi l'unu tukoru gbaru mgba l'eze-iphe-oma ono, Chileke meru mu ono. Mu no lẹ mkporo nta-a; anyi l'unu tukokwapho gbaru mgba l'eze-iphe-oma k'agbaru ozi-oma ono odzori; bya agbakwarupho mgba l'eze-iphe-oma k'anodu eme iya g'o shihu ike.

⁸Su-a; o kwa Chileke be bu onye maru l'oo okpobe-opfu be mu epfu su l'oghoroko unu g'unu ha du mu shii; ono buru n-yemobu ophu shi l'eka Kéreshi Jizọsu.

⁹Iphe, mu anoduje epfu anu Chileke bu g'o mee g'obu ono, unu yeru nwibe unu ono nodu akaepho shii eje; wakwapho g'unu kabaa amaru Chileke okpobe amaru; me g'unu du ike marwetaje iphe, gbaru unu l'ememe.

¹⁰Oo ya bu g'unu aduje ike hotaje iphe, ka ree mee; k'ophu bukwanu mboku ono, Kéreshi e-kpe ndiphe ikpe ono rwuepho; oolewaro l'unu doberu onwunu oru; o to duedu iphe, oo-ta unu uta iya;

¹¹elekwapho l'umere, unu shikpo meta lẹ ndzu unu l'ophu bukota umere, pfuru oto, shi Jizọsu Kéreshi l'eka; umere l'e-me ge ndiphe kwabe Chileke ubvu; jaa ya ajaja.

Egude ndzu onye egoshi l'a no-doru Kéreshi

¹²Unwunna mu; iphe, mu eme g'unu maru bu l'iphe ono, dapfutaru mu nu ono be gbe yetabakwaanu ẹka g'ozia-oma ono kabaanu edzuru mgboko.

13Noo kele iphe, bukotakpoo ndu ojogu, eche nche l'ibe onye eze; mewaro iphe, bu ndu ozo be tukowaru makotaru nta-a l'oo le mu ejeru Kereshi ozi be meru g'o gude a tua mu mkporo.

14Nta-a be mkporo-a, a turu mu-a mekwaru; ikpoto unwunna, anyi l'ephe kweru ke Kereshi tukowaa buru ndu obu kabawaa eshihu ike; k'ophu ephe kabaa asa ozi-oma ono kpaakpaa; ophu o dudu onye ephe atsu ebvu.

15A makwaru-a l'o nweru ndu gude enya-pfurupfuru ezi ozi-oma ke Kereshi obu; mbu ndu ezi iya nu g'iphe, eeme l'opfu; ole o nwekwaru-a ndu ophu gude obu iphoro ezi iya.

16Ndu k'ono, gude obu iphoro ezi iya ono be ezi iya nu; opfu l'ephe yeru Kereshi obu. Noo kele ephe maru l'oo ya be kuru mu ge mu bya agbajeru ozi-oma ono odzori.

17O be le ndu ophuu ezi iya nu g'o bu iphe, eme l'opfu pho; egudedu obu phe ezi iya ono; bu iphe, ephe emelepho bu g'iphe-ehuka-a, mu eje le mkporo-a, mu no-a kabaa shii.

18Ole o bu; ? mu eyekwanuru phe onu? Mbu-a; ? e gude obu iphoro epfu iya-o; ? o bu l'o nweru iphe, ndu epfu iya nu vu l'uche epfu iya-o; iphe, o bu; iphe, o bu; g'e pfu iya nu mee g'opfu eh Kereshi ono jedzuru mgboko. O kwa iphe ono e-me g'ehu tsoo mu utso. Mbukwa eh je anodukwaro atsowa mu ro nno.

19Kele mu maru l'eshinu unu anoduje epfu anuru mu Chileke; teme Unme Jizosu Kereshi nodu anoduje eyeru mu aka be mu maru l'ee-mechaa haa mu.

20Iphe, mu dobekporo enya dobeshia ya ike bya aburu iphe, mu ele enya iya bu le g'iphe aduhabe be mu ta abyadu emeru iphere nu onwomu l'iphe, bu iphe, mu eme. O chia iphe, obu eshihuje mu ike mu eme iya; mbu emekwa iya eme iya nta-a ge mu shi emehawa iya; bu le mu e-gude ndzu mu g'o ha ekutse Kereshi; ? o bu mu le ndzu? ? o bu mu l'onwu?

21L'ehu nkemu be bukwa; mu -nodu ndzu; mu anoduru iya Kereshi; teke mu nwuhuru anwuhu; ono a-buwaruro urwu gbaaru mu.

22Obenu teke o bu le mu no ndzu l'eli-mgboko-a be mu a-ka ejetaru Kereshi ozi; oo ya bu le mu ta maedu ophu mu a-hata.

23Uzi iphe labo ono be mu pfuru l'echi. Ephe tuko alo mu ibekobo. Ole ophu egu iya agushi mu ike bu ge mu laa lapfu Kereshi ge mu l'iya nodu. Ono ka mu ree okpobe akaka.

24Obenu l'o kakwanurupho unu ree okpobe akaka ge mu nodu ndzu swibaaru unu.

25Eshi ophu o doru mu enya egube ono be mu maru le mu a-nodu-a ndzu nodu swiru unu g'unu ha; yetajeru unu aka g'ehu-utso unu akabaa shi, bu iya bu eh-utso, shi l'ekweta unu.

26Oo ya bu; teke mu l'unu noepho ozo g'unu a-kabaa enweru iphe unu a-zobe gude mu aba abaa; eshinu mu l'unu tukoru buru ndu ephe le Kereshi Jizosu tugbaru buru nanu.

²⁷Ole g'ò dūhabe; unu mejeḗkwapho umere, gbaru onye anụ ozi-oma ke Kéreshi ono; ọọ ya bụ g'oo-bụkwanuru: mu -dụ ike bya ndu unu; ọzoo le mu ta aduhedu ike bya; mu anule-a l'unu gude obu lanu pfuru pfushia ike; anukwapho l'unu ese iswi ekwekwe ono, unu kweru k'ozima ono.

²⁸Unu te ekwekwa g'ò duru iphe, ndu opfu unu e-gude yee unu ebvu ilile. Ọọ iphe ono l'e-goshi phe l'oo ephedua l'emechaa laa l'iswi; unubedua a-buru ndu aa-dzota. Ọọ buru Chileke a-tuko iya mekota.

²⁹Kele unubedua be Chileke mewaru g'unu kweta ke Kéreshi; wafua g'unu jeje iphe-ehuka l'opfu ehu iya.

³⁰Nta-a be mu l'unu gbaakwaa mgba alwu ọgu ono, mu shihawaa alwu ono, bukwa iya pho be mu alwu nta-a. Teke ono, mu shi alwu iya ono be unu gude enya unu huma iya. Ole nta-a buwaa le nchi be unu anu iya.

Filipayi 2

Anwu eka Kéreshi

¹Ọọ ya bụ; ekweta unu kwetarū ke Kéreshi; ? o meru obu shihu unu ike to? Obu ono, o yeru unu ono ? l'ọ duje-a unu obu? ? Unu le Unme-dụ-Nsọ tugbaru-a buru nanu? ? Unu emejeru-a nwibe unu odoo? Mbụ-a; ? unu aphujeru-a nwibe unu obu-imemini?

²Ọọ ya bụ; unu mee g'ehu tsoo mu utso tsofu mu iya l'ishi. G'egomunggo unu bujeerupho nanu; n-yemobu unu aburu nanu; obu unu me uche unu abukwarupho nanu.

³Unu ta akpajekwa enya l'iphemiphe, unu eme. Ophu unu ekujekwa onwunu iphe, unu ahadu g'oo ya l'iphe, unu emekpo ememe. Unu wozeje onwunu ali l'eka nwibe unu no. G'onnyemonye rijeepho l'iphe, gbaru k'ememe bu g'a ka akwabẹ nwibe iya ubvu; eme le yebedua.

⁴G'ò to dukwa g'unu ha onye buepho iphe, a-duru iya le ree be onoduje achọ kpurumu; ọ kwa g'onnyenonu chojekwa iphe, a-duru ndu ọzo le ree kwapho.

⁵G'uche unu yee ke Kéreshi Jizosu bujeru iphe lanu.

⁶Jizosu be shiepho le mbu dupepho ge Chileke du. Ophu ọ dudu teke ọ rijeru l'adudu ono ọ du ge Chileke ono be ya tee wofubaedu enya.

⁷Ọ chia iphe, o mechiaru bu l'o meru onwiya onye adudu iphe, ọ bu; bya eworu onwiya mee nwozi. E mee ya ọ buru nemadzu.

⁸Eshinu e meru iya ọ buru nemadzu; be o wozeru onwiya ali; bya ekweta anwuhu; mbukwa anwuhu k'eli oswebe.

⁹Noo g'ò gude Chileke wolikwanaa ya eli; ọ kakota iphemiphe l'eli. Ọ bya agua ya epha, kakota shii l'iphe, bu epha, aazaje azaza;

¹⁰k'ophu iphemiphe, du l'imigwe; me ophu du l'eli mgboko owa-a; me ophu du le mkpula ali a-buru; epe -numaepho epha iya ono; epe egbushi ikpere; baaru iya eja;

11waa k'ophu onyemonye e-pfu iya hoo haa l'oo Jizosu Kéreshi bu Nnajiuphu; shi egube ono kwabe Chileke, bu Nna ùbvù.

Aburu iphóró, dù l'ochii ké mgboko-a

12Oo ya bu; ndu mu yeru obu; teke mu l'unu shi nõdu be unu shikpøekwapho anuru mu opfu. Unu kabakwaa mu anuru opfu nta-a, mu nõ unu ụzenya-a. Unu gude ndzụ-agugu me ẹhu-anmanma; meje g'a maru l'adzõtawaru unu.

13Noo kele oo Chileke be bu onye ereshi ire ike l'ẹhu unu. Oo ya emeje g'unu chia idzù mee iphe, dù iya ree l'òkpoma; mee ya g'ò tũberu.

14Sụ-a; iphemiphe, unu eme; unu ta agujekwa aphụ me iya; ophu unu alojekwaru ntũmego ye iya.

15Oo ya bu k'ophu unu l'a-buru ndu adukpoodaa iphe, aata unu ụta iya; unu aburu ndu duebe ree; teme unu abukwarupho unwu Chileke; ndu adudu iphe, ẹphe gude merwushia onwophe l'echilabo ejo ogbo-a, egomunggo swehuru; teme ẹphe nõdu anõduje eme ejo ememe-a. O buru l'echilabo phe be unu nõ egbu nwĩnwii g'iphóró le mgboko-a;

16me unu -gude opfu ono, l'anụ ndzụ ono ewopfu phe. Oo ya bu ge mu enweru iphe, mu e-gude eku onwomu mboku ono, Kéreshi a-bya ozo ono; k'ophu oso ono, mu agbakpoo ono me akanya ono mu ese ono taa buduru mu ọla-l'iswi.

17Ophu o dukwa me obetaru e gbua mu gbashị mee mu l'ekweta, unu kwetarụ waa l'ozi unu eje be ẹhu a-nõdulekwa-a atso mu uto; mu l'unu atukolea ete ẹswa.

18G'ò bukwarupho nno bu g'ẹhu l'a-nõdu atso unubedua uto kwapho; mu l'unu etekwapho ẹswa.

Timoti yee Epafurodayitosu

19Mu arikwala le Nnajiuphu, bu Jizosu eme mu-a ge mu zia Timoti g'ò bya agbaphee unu; k'ophu oo-bya akõoru mu g'unu eme ala; gude dua mu obu.

20O to dukwa onye ozo, mu nweru, du ge Timoti, bukwanu onye oriri ẹhu unu echije ẹhu.

21Ndu ozo g'ẹphe ha be abujeerupho oriri ẹhu phe be echije phe ẹhu. Ophu ẹphe arivujeedu iphe ophu buwaa ke Jizosu Kéreshi l'oriri.

22Obenu le Timoti be unu mawaru-a l'o goshiwaru onwiya le ya bu onye gbaru g'e gude ire iya ẹka. Kele o shi teke ono ejeru mu ozi ge nwa ejejeru nna iya le k'ozi-oma ono mu l'iya eje ono.

23Oo ya bu le mu arikwapho le mu e-zi Timoti ono ibe unu egwegwa me mu -bebeepho maru g'oo-mechaa nwuaru mu.

24Teme mu gudekwapho Nnajiuphu ẹka l'ò to dudu ge mu anõ-beru; mu abyawaa agbaphee unu l'ishi onwomu.

²⁵Mu byakwapho ariã lẹ mu zifutajẹ Epafurodayitosu, bu nwune mu bya aburu onye mu l'iya tukoru eje ozi k'alwu ogu ehu Kéreshi ono; bukwarupho onye ono, unu ziru g'o wotaru mu iphe ono, mkpa iya shi duru mu ono; g'o bya ndu unu.

²⁶Noo kele oghoroko unu g'unu ha be shiwaa uzanya duta iya; mbu l'o shihawaa uzanya tsuta iya l'ehu l'unu numaru l'iphe shi eme iya.

²⁷Iphe shikwaa eme iya eviya; k'ophu o ghuduru nwanshii me o nwuhu. O le Chileke phuru iya obu-imemini. O to budua yebedua nwekiya be o phuru iya. O phukwaru iya pho mbedua; o-buru-abu me aphu atso mu ishi labo.

²⁸Oo ya bu l'o gbenu ka mbedua ehe ihee ge mu zikebe iya g'o bya g'unu l'iya kwee; k'ophu ehu a-tsokwanu unu utso l'unu gude enya unu huma iya ozo; ge mbedua agbabuhukwanuru iya egomunggo.

²⁹Oo ya bu; unu gude ehu-utso gbobe eka labo nata iya okpobe anata; l'o bu nwanna, unu l'iya me Nnajiuphu tukoru tugba buru nanu. Unu kwabejekwa iphe, bukpo ndu du ge yebedua ubvu.

³⁰Noo l'o phoduru nwanshii me ishi iya abaa l'eje ozi Kéreshi. O mia enya le ndzu iya; emeru mu iphe unu gege anodu emeru mu.

Filipayi 3

Okpobe apfubekoto

¹Su-a; eka mu a-suberu iya unu ishi; unwunna mu; bu g'unu nodu Nnajiuphu l'ime tee eswa. O too tsukwa mu l'ehu edephuru unu iphe, mu dehawaru azu; noo kele oo-me g'unu kabaa egude eka l'iphe, mu pfuhawaru unu ono.

²Unu kwabekwaru ndu ono, bu nkuta ono enya; mbu ndu ono l'anoduje eme ejo ememe ono. Unu kpakwaru phe l'aphara; mbu ndu ono, ekebutaje nemadzu ekebuta g'o bua ubvu ono.

³Kele oo anyibedua buru okpobe ubvu; mbu anyibe ndu gude Unme-du-Nso abaru Chileke eja; teme anyi nodu anoduje l'eka Kéreshi Jizosu ete eswa; ophu o dudu iphe, anyi guberu iphe, eeme l'anu-ehu.

⁴Ome oo iphe, eeme l'anu-ehu adzoje nemadzu me o buru mbedua gege asuje l'oo ya a-dzo mu. O -buru l'o egube nemadzu onye bu l'adzoje iya; me o -buru mbedua gege enwechiaru iphe, mu g'a-zobeje su l'oo ya l'a-dzo mu.

⁵Noo l'a nwuru mu; mu noepho abali esato; e bua mu ubvu; mu buru onye Izurelu gedegede; mu buru onye okpa-ipfu ke Benjiaminu. Mu bukpo onye Hiburu; mbu okpobe nwa, ndu Hiburu nwuru. A -bya l'eme iphe, ekemu ndu Jiu pfuru; mu buru onye Farisii.

⁶A -bya le k'iphe, aphu l'ehu be mu shi buru onye achi nta Chiochi. A -bya le k'iphe, ekemu pfuru su l'oo ya bu onye -meru iya nu; onye ono aburu onye pfuberekoto; ono ta adukwa ophu aata mu uta iya le mu mesweru.

⁷G'ò dūhabe; iphemiphe ono, bụkota iphe, mu shi anọduje ari l'ọo iphe, a-baru mu urwu ono be mu gudeakwa iswi ẹhu Kéreshi wofukọta ẹnya; guru iya ye l'iphe, bu mu iphe, ọla-l'iswi.

⁸Ọ tọ budua iphemiphe ono; iphemiphe ọzo be mu tūkokwaru gụkota l'iphe, tūkoru buru mu ọla-l'iswi; kele urwu ọphu rwuberu mu ẹka, bu ọphu nyiḅeru g'atụ ọnu iya, be bu Kéreshi Jizọsu, bu Nnajiuphu mu ono, mu mawaru majia ẹnya ono. Ọ buru l'iswi ẹhu iya be mu gude wofukọta ẹnya l'iphemiphe, mu nweru g'ọ buru iphe, iyi yifuru. Nta-a be ẹphe bụkotawaa ntụ ekpofu l'ẹnya mu; k'ọphu bu l'ọ bụepho Kéreshi be bu urwu, mu e-rita nwẹkinyi iya.

⁹Mẹ k'ọphu mu e-goshikwanu le mu l'iya tūgbaru buru nanu. Ọphu mu emeedu g'a suje le mu bu onye pḅuberekoto, bu ọphu shi l'eme iphe, ekemu pfuru; ọ bụwaru ọphu shi l'ekweta ke Kéreshi. Ọ buru ono bu apḅubekoto ọphu shi Chileke l'ẹka bya eshikwapho l'ẹka ke Kéreshi.

¹⁰Gẹ mu amaru iya; maru ike ono o gude shi l'ọnwu teta dzuru ndzu ono; me ge mu le Kéreshi ọbu atuko gbaru mgba l'iphe-ẹhuka ono, o jeru ono; me ge Chileke emee ge mu du ge Kéreshi l'anwuhu ono, ọ nwuhuru;

¹¹k'ọphu bu le g'ọ dūhabe mu eshi l'ọnwu teta nọdu ndzu.

Agba ọso gbafu iya l'ishi

¹²Iphe, mu epfu ta abukwa l'o ruwaru mu ẹka erwurwu; ọphu ọ bukwa le mu dukotawaa ree; ọle iphe, mu anọduje adzọbaa bu ge mu nata obunggo ọso, mu gbaru; eshinu Kéreshi Jizọsu natawaru mu mee mu buru nkiya.

¹³Unwunna mu; mu ta asukwaru le mu natawaru obunggo ọso ono; obenu l'iphe lanu, mu emejkpọepho kpurumu bu le mu atukoje iphe, mu towaru azu zohashichaa kukebeepho ẹhu agba agbapfu ọphu no mu l'uzo iphu.

¹⁴Mu anọduje adzo ge mu gbafu ọso ono l'ishi; k'ọphu mu a-nata obunggo, bu iya bu ndzu ojejoje ono, Chileke shi l'ẹka Kéreshi Jizọsu kua mu ge mu bya anata l'imigwe ono.

¹⁵Ọo ya bu; g'iphe, bụkotakpoo anyibe ndu kawaru ẹnya l'iphe ke Chileke bukwarupho egube iphe ono, mu ari ono be ẹphe l'a-nọduje ari. Ọ -bukwanuru l'o nweru g'ọ du; unu haru ari iphe ọzo be Chileke e-goshikwa iya-a unu g'ọ doo unu ẹnya.

¹⁶Ọo ya bu le-a; eshinu anyi gbawaru ọso ono gbarwua ya l'ishi; g'anyi mejeekwapho iphe ono anyi mehawaru ono.

¹⁷Unwunna mu; unu tuko g'unu ha meje ge mu eme. Anyi egoshiwaa unu iphe, unu e-meje. Unu tuko nwutaepho ẹka ndu ono, eme iphe ono, anyi egoshi unu ono.

¹⁸Mu pfuhawaru unu iphe-a ugbo olemole; nta-a be mu gudeakwaa ẹnya-mini ẹkwa epfuphuru iya unu azu; su l'o nweru ikpoto ndu umere phe egoshi l'ẹphe bu ọhogu oswebe Kéreshi.

¹⁹Ndu ono e-mechaa laa l'iswi; kele ọo iphe, a-la phe l'ephe bu chi phe. O buru iphe, iphere iya gege aduje phe be ephe egudeje aba l'abaa. O buerupho l'iphe ke mgboko-a be ephe woru uche phe dobe.

²⁰A bya abya l'anyibedua; ibe k'anyi buru imigwe. O buru l'eka ono be Onye-Ndzota anyi ono, anyi ele enya iya eleshi iya ike ono e-shi bya, bu iya bu Nnajiuphu anyi, bu Jizosu Kereshi.

²¹Oo ya bu onye l'a-gbanwe ogwehu anyi-a, adudu iphe, o bu-a; mee ya l'o du g'ogwehu nkiya, l'egbu nwijnwii. Ike, oo-gude mee ya bu ike ono, o gude emekota iphemiphe g'o lwa iya le mkpula ono.

Filipayi 4

Iphe, gbaru ndu ke Kereshi l'ememe

¹Oo ya bu; unwunna mu, mu yeru obu; unu pfuru pfushia ike l'eka Nnajiuphu. Oghoroko unu egbukwa mu egbugbu. Oo unu bu ehutu mu; o bukwarupho unu be bu obunggo, mu e-gude aba abaa. Mu yeru unu obu shii.

²Mu arwo unwanyi labo ono, bu Yuwodiya yee Sintiki su g'obu buru phe nanu l'eka Nnajiuphu.

³Teme gubedua kwapho, bu okpobe onya; mu l'iya tukoru eje udu ozi lanu; mu arwokwa ngu pho su g'i yejeru unwanyi ono eka g'ephe meje iphe ono, mu suru g'ephe me ono; noo l'ephe sekporu akanya ezikashi ozi-oma ono; mekpoo Kelementi yee ndu ozowaro, bu ndu anyi l'ephe jegbaru ozi ono; bu ndu epha phe dukota l'ekwo, Chileke deshuru epha ndu a-no ndzu ojejeje.

⁴G'ehu tsojeepho unu utso l'eka Nnajiuphu tekenteke. Ge mu pfuphukwa iya azu ozo; g'ehu tsojeekwapho unu utso.

⁵Unu meje iphe l'orwuberu iya gude goshije ndiphe l'unu bu ndu obu oma. Nnajiuphu noakwa ntse.

⁶G'o to dukwa iphe, unu e-jeje ayo oshi iya. Iphe, unu e-mejechia bu g'unu pfujeru nu Chileke gude kajeru iya iphemiphe, mkpa iya duru unu; unu ekelejekwa iya pho ekele.

⁷Oo ya bu; g'ehu-guu ke Chileke, bu iya kwata dakiri ge nemadzu e-gude uche iya maru; aburu iphe, e-wota obu unu me uche unu kwachia l'ime Kereshi Jizosu.

⁸Eka mu l'a-suberu iya unu ishi unwunna mu bu; g'iphe, l'e-shitajepho unu l'uche buru oriri k'iphe ono, bukota okpobe-opfu ono; me iphe, bukpoo iphe, gbaru ke g'e yeru iya ubvu; me iphe, bu iphe, pfuru oto; me iphe, bukpoo iphe, e te merwuduru emerwu; me iphe, bu iphe, du ree l'enya; me iphe, onu tukoru wukoo nanu l'o dukota ree; me iphe, du ubvu; mekpoo iphe, bu iphe, aaja ajaja.

⁹Unu meje iphemiphe ono, unu nwutaru le ndzu mu ono; mekpoo ophu mu ziru unu ezizi; unu emekwapho iphemiphe, unu numaru mu l'onu; me ophu unu gude enya unu huma l'ehu mu. Oo ya bu; Chileke ono, emeje g'unu buru guu ono eswiru unu eswiru.

Pọlu ekele ndu Filipayi ekele kẹ ree, ẹphe meru iya

¹⁰Su-a; ẹhu atso mu uto l'ime Nnajiuphu; kele nta-a be unu byawaru bya emeaharu mu ree ozo. Iphe, mu epfu ta abukwa l'unu ta anodujedu epfu opfu ẹhu mu; o chikwa uzo te eshidu adujeru unu g'unu mee ya l'eka.

¹¹Mu te epfukwa l'o nweru iphe, uko iya duru mu; le mbedua nwutaakwaru g'iphe, mu nweru g'o hahabe phujeru mu l'enya; m'obetaru o nodu anwuru mu inwuagha.

¹²Mu maru g'a bujeru onye ejo eka duru; bya amaru g'a bujeru onye nweru iphe. L'iphe, bukpo eka mu no be iphemiphe ono mewaru mu; ebe o duedu iphe, abujekwaduru mu enya-aphapha l'ehu nkemu; mbu le mu rijiru epho; ozo le mu no egu; ? mu nweru iphe; me mu te enwe-o; mu ano-kirishilekwaa.

¹³O to dudu iphe, mu ta adudu ike emekota; noo l'oo Kereshi be bu onye emeje ike adu mu k'ememe iya.

¹⁴Su-a; unu nweru obu oma l'eka mu no; yetaru mu eka teke ono, mu shi eje iphe-ehuka ono.

¹⁵Temu unube ndu Filipayi l'onwunu maru le teke mu watakporu ezi ozi-oma ono le mbu; ge mu lufutaru le Masedoniya be o to dudu Chiochi ozo, mu l'ephe tugbaru nanu; gbahaepho unubedua kpurumu: oo unu bu ndu anuje mu iphe bya aburu unu bu ndu anataje l'eka mu.

¹⁶Mbu je akpachakpo le teke mu no le Tesalonayika; unu shi emejeru mu mkpa; me mkpa byaru mu; mbu ebe o bukwa ugbo lanu kpuu be unu meru mu iya.

¹⁷O to bukwa iphe ono, unu anuje mu ono be mu ele enya iya; o chia iphe, mu ele enya iya bu g'urwu gbaaru unu berebere.

¹⁸Mu natakotawaru iphemiphe ono, unu nuru Epafurodayitosu g'o wotaru mu ono. Oo-sukpokwaaru iphe, mu eme iya tsufu etsufu. Iphe ono be unu vuru nu iya k'anyinyi. Iphe ono, unu nuru mu ono du ge ngweja, eshi kwekweekwee; ngweja, mkpo iya akpu tuu alafu Chileke. Mkpọ iya ono atso Chileke uto; k'ophu o gboberu eka labo nata iya.

¹⁹Le Chileke mu a-nukotakwaa unu iphe, bukpo iphe, mkpa iya duru unu. O buru l'iphe o nweru, odu-biribiri iya dakiri atu onu iya ono, shi l'eka Kereshi Jizosu ono be o-shi mee ya.

²⁰G'o buru Chileke ono, bu iya bu Nna anyi be ajaja l'a-buru nkiya jasu le tuutuutu le mimiimii. Nokwa g'o du.

Ekele mkpochi-ishi

²¹Unu keleru mu iphe, bu ndu-nso l'ehu l'ehu; mbu ndu ono, no l'eka Kereshi Jizosu ono. Unwunna anyi ndu mu l'ephe no l'eka-a l'ekelekwapho unu.

²²Iphe, bukpo ndu-nso, nokota l'eka-a g'ephe ha l'ekelekota unu-o; kelekele ke ndu bu l'ibe eze nnajioha, bu Siza.

²³Gẹ Nnajiuphu, bụ Jizọsu Kéreshi meeru unu eze-iphe-oma-o. Nokwa g'ọ dọ.

Kolosì

Kolosì 1

¹Qwa-a bu ẹkwo-ozì, mube Pọlu ede. Mu bu onye Chileke hotaru mee ge mu buru onye-ishi-ozì Kéreshi Jizosu. Onye mu l'iya gba mgba ede iya bu nwanna anyi, bu Timoti.

²Ndu anyi ede iya anu bu ndu ke Chileke; mbu ndu ophu no le Kolosi, bu unwanwa anyi ndu ophu no l'eka Kéreshi. Mu su ge Chileke, bu Nna anyi yele Nnajiuphu, bu Jizosu Kéreshi meeru unu eze-iphe-oma; l'o mekwaapho g'unu buru l'ehu-guu.

Epfu anu Chileke ekele iya ekele

³Anyi anodujeepho ekele Chileke, bu iya bu Nna ke Nnajiuphu anyi, bu Jizosu Kéreshi me anyi -nodu epfu opfu ehununu anu Chileke.

⁴Noo l'anyi numawaru g'ekwekwe unu shiuberu ike l'ime Kéreshi. Anyi bya anumaakwapho l'unu yeru ndu-nsọ obu g'ephe ha.

⁵Kele unu ele enya iphe, a kwakoberu unu l'imigwe; mbu iphe ono, e meru; unu maru teke ono, a byaru bya ezia unu ozi-oma ono, bu okpobe-opfu ono.

⁶Ozi-oma ono erekwa ire l'ekameka bya atukoakwapho mgboko ejedzuru. O buru egube ono bu g'o jedzuru eka unu no bya ere ire le ndzu unu e -shi mboku, unu numaru iya; o doo unu enya ree; mbu iphe, eze-iphe-oma Chileke ono bu.

⁷Oo Epafurasu, bu onye anyi yeru obu; onye anyi l'iya tukoru eje udu ozi lanu be bu onye ziru unu ozi-oma ono. Epafurasu ono bu onye goshiwaru le ya bu onye e gude ire iya eka l'ejeru Kéreshi ozi; o buru iya no-chiru enya anyi l'ibe unu;

⁸teme o buru iya pfuru anyi ke n-yemobu unu ono, shi l'eka Unme-du-Nso ono.

⁹Nokwa iphe, meru g'o gude ebe anyi atuwojeduru eka l'epfu anu Chileke l'iswi ehununu; g'o mee g'unu makotajeru iphe, bu uche iya; waa k'opu mmamiphe, shi l'eka Unme-du-Nso edoje enya ree.

¹⁰Oo ya bu g'unu emejekwanu umere, l'e-me ge ndzu unu l'opu buru iphe, unu l'e-gude akwabẹ Chileke ubvu; teme unu emekwapho iphe, du Chileke ree l'iphemiphe, unu eme ememe. Unu eshi egube ono meje iphe, bukpuo iphe-oma tekenteke; kakwapho amarweta onye Chileke bu.

¹¹L'o gude ike iya ono, du biribiri mee unu g'unu shihu ike okpobe esihu; k'opu unu a-duje ike gude ata nshi nwejeru obu l'iphemiphe, byaru unu.

¹²Unu egudejekwapho ehunutu so keje Chileke, bu Nna ekele. Noo l'oo ya bu onye meru; unu buru ndu gbaru g'unu le ndu-nsọ gbaru mgba l'iphe, o kwakoberu phe l'eka ono, bu iphoró dukota iya ono.

¹³O dzotaru anyi l'eka ochii nweru ike bya eworu anyi je edobe l'eka Nwa iya, o yeru obu bu eze.

14O buru iya be e shi l'anwuhu iya gbata anyi; bya agukwaarupho anyi nvu l'iphe-aji.

Onye Kereshi bu me iphe, oomeje

15Oo ya bu ugbugba Chileke ono, a ta ahumajedu l'enya ono; bya aburu iya be Chileke doberu l'okpara l'iphe, bukpo iphe, o meru ememe.

16Noo kele oo l'eka iya be Chileke shi mekota iphe, bukpo iphemiphe, bu ophu du l'imigwe me ophu du le mgboko; ophu enya ahumaje me ophu a ta humadu l'enya; mbu ndu eze ojozi-imigwe; me ndu bu nnajioha; me ndu ochi-oha g'ephe hakotakpoo; me ndu ophu no l'oke okwa, nokota l'imigwe. Oo yebedua, bu Kereshi ono be Chileke shi l'eka iya mee iphemiphe kpoo; teme o buru iya be o meru iya doberu.

17Yebedua l'onwiya vukota iphemiphe uzo duhaadaa. O bukwarupho ike nkiya be o gude mee iphemiphe, Chileke meru ememe; o dukota l'eka Chileke doberu iya.

18Oo ya bu ishi, kpoo-pfuru l'ogwehu iya ono, bu Chiochi. Oo yebedua bu eka ndzu l'ophu futaru. O bukwaru iya pho bu onye ivuzo, Chileke meru o shi l'onwu teta nodu ndzu; k'ophu oo-buru iya a-kakota shii l'iphemiphe, Chileke meru ememe.

19Oo Chileke be chiru iya l'obu iya mee g'o buru l'ehu Nwa iya be aa-huma-gbukpoo iphemiphe.

20Waa g'oo bukwarupho l'eka Nwa iya ono be ya e-shi mee ge ye iphemiphe, no l'imigwe me ophu no le mgboko du le ree. Ya eshi egube ono gude mee ono, Nwa iya gbashiru l'oswebe ono mee g'opfu ta adheru yebe Chileke ye iphemiphe, o meru ememe.

21Noo l'o nwekwarupho teke unubedua shi buru ndu 'anodu Chileke l'eka. O buru ejo iphe unu shi anoduje ari l'oriri; eme iya l'umere be shi mee; unu buru ohogu Chileke.

22Ole nta-a be Chileke shiwaa le ndzu, Nwa iya shi nodu l'eliphe-a waa anwuhu, o nwuhuru; mee g'unu l'iya du le ree; k'ophu Nwa iya ono e-duta unu; unu aburu ndu duru Chileke iche; o to dudu iphe, aata unu uta iya; ophu unu abuduru ndu aamaru ejo eka jasuh l'o duta unu bya apfube l'iphu Chileke ono.

23Ole iphe, unu mefutaje bu l'unu a-pfushi ike l'ekweta unu; kpoo onwunu g'abara; ophu unu ekwedu g'e mee unu g'unu wofu obu l'iphe ono, unu ele enya iya ono, bu iya bu ozi-oma ono, unu numaru ono, e zidzuru mgboko mgburugburu ono; bya abukwaru iya pho be Chileke ziru mbedua, bu Polu ge mu je ezia ndu ozo.

Ozi, Chileke ziru Polu g'o je ezia Chiochi

24Nta-a be ehuh atsokpoo mu utso; kele oo unu be mu ejedoru iphe-ehuka-a. Noo kele oo iphe-ehuka-a, mu eje nta-a be mu gude eyeta eka eme g'o dzukota mbu iphe, phodukwaduru l'iphe-ehuka ono, Kereshi jeru jedoru ogwehu iya ono, bu Chiochi.

25Oo Chileke ono, bu onye hotaru mu nu ge mu buru onye-ozi Chiochi be ziru mu ozi ge mu zia unu; ge mu mee unu g'unu tuko iphe, ya pfuru makotaru;

26mbu iphe ono, o shi domia edomi eshinu o meru mgboko ono. O be nta o bya egoshi iya ndibe iya, du nsu.

²⁷Ọ bụru phẹ bẹ Chileke hotaru lẹ ya e-goshi iphe ono, nyiberu anyibe ono, e shi domia edomi l'enyanya ndu abudu ndu Jiu ono, bu iya bu li -nodu Kereshi l'eka; l'ii buru onye e-mechaa gbua nwii.

²⁸Oo opfu ehu iya bẹ anyi anoduje asa kpa kpa g'onymonye numa-a; alo onymonye eka lẹ nchi gude mmamiphe ezi iphe k'ophu anyi e-me onyenonu g'o buru onye no l'ime Kereshi buru onye duebe ree.

²⁹Noo g'o gude mu nodu anoduje eseshi akanya ike; kukebe ehu eme ge mu e-me jeebe ozi ono, Chileke ziru mu ono. Ike, mu gude eje ozi-a bẹ bu ike ono, Kereshi eyeje mu l'ehu ono. Noo ike, l'ere ire l'ehu mu bu onoya.

Kolos 2

¹Iphe, mu eme g'unu maru bu lẹ mu ese akanya unu eseshi iya ike; me akanya ndu Chiochi, no lẹ Layodeshiya; mewaro iphe, bukpo ndu ozo, mu l'ephe teke ahuma-swee lẹ ndu-a.

²K'ophu obu e-shihu phẹ ike; wafua g'ephe tugba buru nanu lẹ n-yemobu; oo ya bu g'ephe abya amaebekporu okpobe-opfu ono; e-shi egube ono iphe ono, Chileke shi domia edomi ono edoo phẹ enya ree, bu iya bu ke Nna yeke ke Kereshi.

³Oo l'ime Kereshi ono bẹ Chileke domiru iphe, bukpo eku, du lẹ mmamiphe yeke nkwananya l'ophu.

⁴Iphe, mu gude epfu iphe-a bu k'ophu o to dudu onye a-bya egude ire mecha mecha duswee unu uzo.

⁵Kele a makwaru-a lẹ mu ta anodu l'eka ono, unu no ono; ole o kwa-a l'eka ono, unu no ono bẹ obu mu du. Iphe, atsoje mu utso bu g'unu gude mekobe onwunu buru nanu waa g'unu gude buru enwubata enwubata l'ekwekwe, unu kweru ke Kereshi.

Jizosu bu nnajioha

⁶Oo ya bu; eshinu unu gbobewaru eka labo nata Kereshi Jizosu o buru Nnajiuphu unu; unu l'iya tugbaekwapho buru nanu kwaseru.

⁷G'o bukwarupho g'oshi agbabeje ogbarabvu l'ime ali-a bu g'unu a-gbabe ogbarabvu l'ime Kereshi. G'o buru Kereshi bẹ l'a-buru okpa-ulo, unu a-nodu akpu ndu unu l'eli iya. Unu akabaa ekweta iphe ono, e ziru unu ono kweshia ya ike. Unu egudejeepho obu unu g'o ha ekele iya k'anyinyi.

⁸Iphe, unu akwaberu enya bu g'o to du onye e-gude mmamiphe nwomaru-o-machata me ugho, enwedu ishi bya aturwua ekweta unu. Iphe ono bukota iphe, shi l'iphe, ndiphe ezi; bya aburu iphe, a toru okpa iya su g'e tsoje, bu iphe, eshidu Kereshi l'eka.

⁹Noo l'oo l'ehu Kereshi ono, byaru bya aburu nemadzu ono bẹ Chileke l'onwiya byaru bya edzua oke egoshikota onye ya bu.

¹⁰Chileke bẹ shiwaa l'eka Kereshi ono, unu l'iya tugbaru buru nanu ono mee ge ndu unu dzua oke. O buru Kereshi ono bu onye-ishi, kakota iphe, bukotakpo ndu ochi-

oha imigwe g'ephe hakotakpoo; bya akakotakwapho ndu nokwapho l'oke okwa l'imigwe.

11Su-a; o kwa teke ono, unu l'iya byaru bya atugba buru nanu ono be e buru unu ubvu; mbu ubvu ophu abudu aka be e gude bua ya unu. Oo Kereshi l'onwiya bu onye buru iya unu. Ubvu ono, o buru unu ono bukwa ogwehu unu l'ophu be o yefuru unu g'onye yefuru uwe; mbu ogwehu unu ophu iphe-eji shi phawaa kutukutu.

12Le teke ono, e meru unu baputizimu ono be a tukoakwaru unu le Kereshi likota elili. Tem Chileke tukokwapho unu l'iya mee unu toko shi l'onwu teta dzuru ndzu. Noo l'unu kwetaru l'ike du Chileke bya achiru upfu ye l'ike iya ono; mbu ike ophu, o gude mee Kereshi o shi l'onwu teta dzuru ndzu.

13O nweru teke unu shi nwuhu anwuhu kwaa l'ime iphe-eji unu; ophu unu ebuduru ubvu; ole nta be Chileke byawaru emee; unu le Kereshi toko nodu ndzu; o gukotaru anyi nvu l'iphe, bukpo iphe-eji, anyi meru g'oha.

14O tukochaa iphe ono, e deru edede lekwo ono hushikotachaa g'oha; mbu iphe ono, egoshi l'anyi darwukotawaru iphe, ekemu iya pfuru, bu iphe ono duwaa g'ugwo, topyitaru anyi lekpiri ono. Chileke mechaa nno bya atuko iphemiphe ono kopyabe l'oswebe shi egube ono mee ya o rebuhu ire. Ophu oo-rebaedu ire je adwaruro ya.

15Oo teke pho, Kereshi nwuhuru l'oswebe pho be o chikporu ike iphe, bukpo ochi-oha, nokota l'ephekerephe; me ike iphe, bukpo ndu ophu no l'oke okwa l'ephekerephe; kpu phe le ndzu kpu futa l'edzudzu-oha teke ono, yebdua l'atu okoo k'alwu-gbu, ya lwu-gburu phe ono.

16Oo ya bu; g'oha to dukwa onye a-bya anodu akpocha-pheru unu mkpocha l'iphe, unu eri eriri me l'iphe, unu angu angungu. Ophu o dukwa onye a-bya akpochaaharu unu mkpocha ke l'owaa iphe, unu aboje; g'unu dobekwa mboku ophu boje iya abobo; ozoo l'onwa fukwaru k'ophuu g'unu watakwa iya abobo; ozoo k'iphe, unu e-meje mboku atuta unme.

17Ekemu ndu Jiu ono g'oha hakota, e shi tushia k'iphemiphe ono be shi bukotaru onyonyo iphe, l'e-mechaa mee l'iphu. Obenu l'ophu bu okpobe iya bu Kereshi.

18Oo ya bu g'unu te ekwekwa g'oha duru onye l'abya akposhia unu anata obunggo ono, Chileke l'e-bu unu ono. Unu b'ekwekwa ge ndu ono, onoduje atso utso l'ephe emeje g'a su l'ephe wozeru onwophe ali ono nafu unu obunggo Chileke. Ephe anoduje epfu g'a bageru unwu-ojozi-imigwe eja; ephe asu l'iphe, ephe gbaberu okpa epfu iya bu ophulanya, ephe phuru. Egube ndu ono anodujeepho eku onwophe iphe, ephe ahadu g'oha ya. O buerupho egomunggo, enwedu ishi be ephe anoduje agba.

19Ephe ta anyatajeedu l'oha duru onye bu ishi, bu aka ogwehu dzepfuru le nkwo iya le nkwo iya; mekpoo akwara, dukota l'ehu. O buru ishi emeje ogwehu ono l'ovu evuvu ge Chileke tuberu.

Anwuhu waa eteta k'onye le Kereshi

²⁰Sụ-a; eshi ọphu unu lẹ Kéreshi tukuru nwuhukota bẹ Chileke bofuakwaru unu l'eme iphe, ndiphe toru okpa iya, sụ g'e tsoje. ? Bụ gunu meru g'o gude unu nođu emekwadia gẹ ndu bukwadu ndu mgboko-a; emekwadu iphe, ekemu pfuru, bụ ọphu suru:

²¹“B'ebiyikwa ẹka lẹ nri ọwa! B'edekwa ọwa-a ire; ọphu i denyikwa ọphuu ẹka?”

²²Iphe, bukpoo ekemu ono g'ọ ha tukokwaru bukeru-a iphe, nemadzu ezi waa iphe, a toru okpa iya sụ g'etsoje. Noo kele iphe, eeri eriri bụ e -richawa iya bẹ ọ bvwaru.

²³Iphe ono, ephe ezi ono adujekwa g'o shi lẹ mmamiphe; bya aburu iphe, nemadzu gude ẹka kotaru onwiya; buru ndu eme g'a sụ l'ephe wozetaru onwophe ali; buru ndu anu ogwehu phe aphu. O le iphemiphe ono ta adukwa ọphu eyetajeru phe ẹka g'ephe sede onwophe l'egu ejo-iphe, l'agu phe nu.

Kolosi 3

¹Sụ-a; eshinu Chileke mewaru unu lẹ Kéreshi tuko shi l'onwu teta dzuru ndzu; unu chojenu ọzo, unu e-shi g'iphe ono, du l'imigwe ono rwube unu ẹka; mbu iphe, du l'eka ono, Kéreshi no l'ekutara Chileke ono.

²Unu woru uche unu dobe l'iphe ono, du l'eli ono; unu te ewoshiru iya dobe l'iphe ke mgboko l'eka-a.

³Noo kele unu nwuhuru anwuhu. Ndu unu bẹ Kéreshi wowaru domia l'eka Chileke. Kéreshi nodukwanu l'ime Chileke.

⁴Oo Kéreshi bẹ bụ okpobe ndzu anyi g'anyi hakota. Teke ono, Kéreshi a-bya ozo ono bẹ unu e-tsokwaru iya pho bya. Unu l'iya agbaru mgbala l'odu-biribiri iya.

⁵Oo ya bụ; unu pyi-gbushia iphe, bukotakpoo iphe ke mgboko-a, bụ iphe, dzukwadu ndzu l'ehu unu, bụ iya bụ; apharwushi onwonye; umere, rehuru erehu me egu eme ejo-iphe; iji-enya me enya-pfurupfuru, buhukwapho agwa obvu.

⁶Oo iphemiphe ono bẹ l'e-me g'oke-ehu-eghu ke Chileke dapfu ndu ta ndu iphe le nchi.

⁷O nwekwaru-a teke unubedia shi emegbaa iphemiphe ono, bụ iya bụ teke ejo-iphe ono shi gudegbaa ndzu unu eme g'ọ du iya.

⁸Ole nta-a bẹ unu a-ha iphemiphe ono. Unu haa ehueghu; obu oku; edoberu nwibe unu ejo obu; ephu nemadzu iphu. G'opfu erehu te eshijekwa unu l'onu.

⁹Unu ta adujekwaru nwibe unu uka; eshinu unu hakotawaru akahu umere ono yee ejo ememe, tso iya nu.

¹⁰Oo ya bụ g'unu yee umere ophuu ono g'onye yeru uwe. O kwa Chileke ono, nuru unu umere ophuu ono anoduje eme unu g'unu kabaa aburu ndu o meru k'ophuu. Oo ya bụ g'unu amakotaru onye Chileke bụ; marwee ya amarwe k'ophu unu a-nođu akabaa adu g'ọ du kwaseru.

¹¹Eshinu ọ dūwaa nno bẹ a ta akpahẹkwa ishi kẹ l'onye ọphuu bụ onye Jiu; onye ọphuu buru onye abudu onye Gurisu; onye ọphuu buru onye buru úbvù; ọphu onye ọphuu ebuduru. Onye ọphuu bụ nlwamulwa; onye ọphuu buru onye ime-ọswa. Onye ọphuu bụ ohu; onye ọphuu buru amadu. O buwaa Kéreshi bụ mkpako lẹ nswiko; teme o buru l'ime onyemonye.

¹²Unu bụ unwu Chileke. O yeru unu obu bya ahota unu g'unu buru ndu nkiya. Noo g'o gude unu je aphujeru nemadzu obu-imemini; nwejeru obu omaa; unu wozeje onwunu ali; meje odoo; unu atajeru iphe nshi. Unu tuko iphe ono g'o hakota chita yee g'onye yeru uwe.

¹³Nwibe unu -mee unu eji; unu tagbuje iya lẹ nshi. Teke nemadzu meru unu iphe, unu a-ta onye obu uta; unu aguaru iya ya nvu. Nnajiuphu guakwaru unu nvu l'iphe-eji unu. Oo ya bu; unu gujekwaru ndu ozo nvu m'ephe meswee unu.

¹⁴Ọphu kachakponu l'iphemiphe ono bu g'unu yee nwibe unu obu. G'o chikobe unu g'unu tugba buru nanu okpobe aburu.

¹⁵G'ehu-guu ọphu shi Kéreshi l'eka nodukwa l'obu unu; duzi unu uzo; kele oo ya meru g'o gude Chileke kukobe unu g'unu bya aburu ogwehu lanu. Unu keje Chileke ekele iphe onoya.

¹⁶Unu kwe g'opfu kẹ Kéreshi ono bya eburu l'ime obu unu dzua ya oke lẹ mmamiphe; ezi iphe; yele adu nwibe unu obu. Unu egudekwa iya pho aloru phe eka lẹ nchi. Unu guje ebvu-oma nu Chileke; me ebvu ekele; me ebvu ozo, shikota Unme-du-Nso l'eka. Unu gude obu unu g'o ha meje iphemiphe ono; gude nno ekele Chileke ekele.

¹⁷Iphe, bukpo iphe, unu epfu epfufu me iphe, unu eme ememe; unu gudeje epha Nnajiuphu, bu Jizosu Kéreshi mekotaje iphe obu. Mbu-a; unu shije Kéreshi l'eka kelejekoepho Chileke, bu Nna ekele.

Umere, ee-meje l'unuphu ndu kẹ Kéreshi

¹⁸Unube unwanyi; unu wozejekwaru ji unu onwunu ali; kele oo ya bu iphe, gbaru onye etso Nnajiuphu l'ememe.

¹⁹Unube unwoke; unu yeje nyee unu obu. Unu ta adujekwaru phe ehuka.

²⁰Unube unwegirima; unu nujeru ne lẹ nna, nwuru unu opfu l'iphemiphe, epe epfuru unu. Noo l'oo iphe, du Nnajiuphu ree bu ono.

²¹Unube nna; unu te emejekwa unwegirima unu iphe, e-ghu phe egu; anonya obu dahu phe adzulakpa.

²²Unube ndu bu ohu; unu mejekwa iphe, ndu bu nnaji unu k'eliphe-a ziru unu. O to bukwapho teke epe ele unu enya be unu e-meje iya g'ee-shi g'aa-jaa unu ajaja. Unu gudejekpoepho obu iphoro me iya. Iphe, unu azobeje eme iya aburu lẹ Chileke duru unu lẹ nso.

²³Iphe, bu iphe, unu emekpo; unu phubeje iphu me iphe obu maru l'oo Nnajiuphu anyi be unu emeru iya. Unu te emejekwa iya g'o bu nemadzu be unu emeru iya.

²⁴Unu nyatajẹkwa l'ọo Chileke bẹ l'e-bu unu obunggo iya, bu iya bu lẹ Nnajiuphu l'a-nu unu iphe ono, o kwetarū ndu nkiya ukwe iya ono. Noo kẹle ọo Kéreshi bu Nnajiuphu, bẹ unu ejeru ozi.

²⁵Ole onye eme iphe-ẹji bẹ Chileke a-pfukwanu ụgwo ọphu gbaru iya nu; m'obeta onye ọbu buru onye. Noo lẹ yẹbedua, bu Chileke ta adudu onye oole ẹnya l'iphu.

Kọlosi 4

¹Unubẹ ndu bu nnajiuphu; unu mejekwaru ohu unu iphe, pfuru ọto mẹ iphe, rwuberu phẹ nu. Unu nyatajẹkwa l'unubedua nwekwarupho onye bu Nnajiuphu unu, bu l'imigwe.

Iphe unu e-meje

²Unu yemia ishi l'epfu anu Chileke; unu eche nche; ekelejekpọe ya pho ekele.

³Unu pfujekwarupho opfu ẹhu anyi nu Chileke su iya g'o mee g'anyi nwejeru ẹka anyi e-zije ozi-oma ono; mbu g'anyi zije k'iphe ono, Chileke shi domia edomi, bu iya bu Kéreshi l'onwiya. O kwa k'ozima ono bẹ o gude a tuta mu mkporo-a.

⁴Unu pfujekwarupho nu iya g'o mee mu gẹ mu duje ike pfuje iya g'o doo ẹnya lẹ g'o gbaru mu l'epfufu iya.

⁵Unu meje umere ndu maru iphe l'iphu ndu abudu ndu kẹ Kéreshi. Unu ta ahajẹkwa uto duru unu g'o laa kẹ mmanu.

⁶G'opfu unu guje egugu; dujeepho g'iphe, unu tsuru; k'ophu ooheje ndu unu epfuru iya ihee angaberu unu nchi. Unubedua amakwanuru g'unu e-yejeru onyemonye onu l'opfu.

Ekele ikpazu

⁷Tikikosu e-pfukotarua unu gẹ mu eme ala. Yẹbedua bu nwanna anyi, anyi yeru obu; bya aburu onye-ozima, e gude ire iya ẹka; bya aburu onye anyi l'iya tukoru eje ozi ono.

⁸Mu ziru Tikikosu obu g'o bya ndu-unu bya akoru unu g'anyi l'eme ala; teme l'oomekwaapho g'obu shihu unu ike.

⁹Onye anyi tukoru ye l'iya ezi g'ephe bya ndu-unu ono bu Onesimosu, bu onye anyi yeru obu; bukwarupho onye goshifuakwarupho lẹ ya gbaru g'e gude ire iya ẹka; mbu Onesimosu k'ibe unu. Ephenebo ono a-kowaruro unu g'iphemiphe, du l'ibiya-a.

¹⁰Arisutakosu, bu onye mu l'iya tukoru nodu lẹ mkporo l'ekelekwaro unu. Maku nodu ekelekwapho unu; mbu nwa nwune-nna Banabasu. E zihaakwaru nzi ẹhu iya; o rwua unu nchi. Teke o shitaru uto ibiya k'unu; unu goshijekwa iya l'ehu atso unu uto l'o byaru.

¹¹O nodu ekelekwapho unu mbu Jizosu ono, eekuje Jiosutosu ono. Oo umadzu eto ono bẹ bukwalu ndu Jiu, tso mu eje ozi ono, anyi eje gude egoshi l'ọo Chileke bu eze ono. O buru phẹ bẹ anoduje adu mu obu.

¹²Epafurasu k'ibe unu ekelekwapho unu. Yebedua be bukwapo onye ejeru Kereshi Jizosu ozi. Oogudeje obu iya g'o ha phube iphu epfu anu Chileke l'ishi ehu unu epfushi iya ike. Ge Chileke mee g'unu ba akporeru laa azu; l'oomekwapho unu: unu amakotaru umere, gbaru onye ke Kereshi l'ememe okpobe amaru; l'oomekwapho g'o heje unu ihee emebekota iphe, du Chileke l'uche.

¹³Mbedua epfukporo l'onwomu su l'oosekpo akanya ehu unu eseshi iya ike; mekpoo akanya ehu ndu Layodeshiya; me ke ndu Hiyerapolisu.

¹⁴Onye dokinta ono, anyi yeru obu ono, bu Luku l'ekelekwapho unu. O nodu ekelekwapho unu mbu Dimasu.

¹⁵Unu keleru anyi unwunna anyi phe ono, no le Layodeshiya. Unu ekeleru anyi Nimfa me Chiochi ono, edzukobeje l'ibe iya ono.

¹⁶Unu -guchaa ekwo-ozia l'ibiya k'unu; unu mekwaa ya g'o rwua ndu Layodeshiya eka k'ophu ephebedua l'a-gukwa iya pho. Unu agukwaapho ekwo-ozia ophu shi Layodeshiya.

¹⁷Unu zia Akiposu le mu suru g'o kukebekwa ehu jebe ozi ono, e ziru iya g'o jee l'ozia ono, anyi ejeru Nnajiuphu ono.

¹⁸Oo mbedua, bu Polu gude eka mu ede owa-a nta-a gude ekele unu. Unu ta azohajekwa le mu no le mkporo. Ge Chileke meeru unu eze-iphe-oma. Nokwa g'o du.

1 Tesalonayika

1 Tesalonayika 1

¹Ekwo-ozii-a shi l'eka mbedua, bu Polu alaru Chiochi Tesalonayika, bu ndu ke Chileke, bu Nna; bya abukwarupho ndu ke Nnajiuphu, bu Jizosu Kereshi. Ndu mu ephe tukoru dee ya bu Sulivanusu yee Timoti. Ge Chileke meeru unu eze-iphe-oma; mekwaapho g'ehu du unu guu.

Umere ndu Tesalonayika waa ekwekwe phe

²Tekenteke, anyi epfu anu Chileke, bu Nna anyi be anyi l'anyatajekwa unu. Anyi nodu anoduje ekele Chileke ekele ehununu ha.

³O to dukpodaateke anyi ta anyatajedu ozi unu gude ekweta jee; me g'unu gude nyemobu eseshiberu akanya ike; waa g'unu gude ota-nshi nodu Nnajiuphu anyi, bu Jizosu Kereshi l'eka elshiberu enya mboku ono ike.

⁴Unwunna anyi; anyi makwaru-a le Chileke yeru unu obu; bya ahota unu g'unu bya aburu ndu nkiya.

⁵Noo l'anyi byaru ezia unu ozi-oma ono; ophu o budu-a opfu onu be anyi gude zia ya unu kpurumu; Chileke gudekwa iya pho goshi unu l'ike iya ereshi ire ike. Unme Chileke ono be yekwarupho anyi eka; anyi du ike mee; unu maru okpobe amaru l'iphe anyi ezi bu okpobe-opfu. Umere, anyi meru teke anyi l'unu shi toko nodukota mewaruro unu maru egube ndu anyi bu. O kwa g'oo-duru unu le ree meru g'o gude anyi mee egube umere ono.

⁶Tobudu iya bu; unu bya aburu ndu anwu eka anyi. O buwaruro unu anwu eka Nnajiuphu. Ophu unu eleduro ke l'unu eje iphe-ehuka teke e ziru unu ozi-oma ono; unu gudelaahunutsu ophu shi l'eka Unme-du-Nso nata ozi ono.

⁷Oo iphe ono meru g'o gude unu bya aburu ndu iphe, bukota ndu ophu, kweru ke Kereshi le Masedoniya waa l'ali Gurisu byaru awata anwu eka phe.

⁸O to budu-a l'ozii-oma ono, shi l'eka Nnajiuphu, bu ozi, unubedua l'ezi ono dzuru Masedoniya yee Gurisu kpurumu; obenu l'ekwekwe, unu kweru ke Chileke be ngakotaakwaru ekameka k'ophu o to duedu onye anyi a-bya akoharu iya k'iche.

⁹Iphe, bukpo eka anyi jeru be aanoduje epfugbaa ke g'unu gude meshiberu anyi g'anyi byajeru ndu unu-a; me g'unu gude sefukotawaa eka l'agwa obvu bya aghachiwaru Chileke iphu; wata ejeru okpobe Chileke ono, no ndzu ono ozi;

¹⁰bya awatakwapho ele enya Nwa iya ono, e-shi l'imigwe bya ono; mbu Nwa iya ono bu Jizosu, o meru o shi lonwu teta nodu ndzu ono. Oo ya bu onye l'a-dzo anyi l'oke-ehununu ke Chileke, o-tukoshi ndu eme iphe-eji.

1 Tesalonayika 2

Ozi, Polu jeru le Tesalonayika

- ¹Su-a; unubedua l'onwunu; unwunna anyi; maru l'akpafuta, anyi kpapfutaru unu ta abudu anyi ke mmanu.
- ²E -gudekporu l'anyi jewaru iphe-ehuka le Filipayi me iphe-iphere, e meru anyi; ole Chileke mekwaru-a obu shihu anyi ike; k'ophu anyi byaru ezia unu ozi-oma ke Chileke ono. Ophu anyi ejedururo epfu kele aakpobyi iphe, anyi eme akpobyi.
- ³Mbu-a; teke ono, anyi l'arwo unu g'unu bya aburu ndu ke Kereshi ono be o to bukwa g'anyi bya edephua unu edepu; ophu o dukwa ejo-iphe, du anyi l'okpoma; ophu anyi abyakwaru g'anyi haru unu ghota l'ugho.
- ⁴O chikwa g'o du Chileke l'uche g'anyi pfua be anyi epfuje. Noo le yebedua be lewaru anyi enya maru l'anyi goshiwaru l'o gbaru ke ge ya gude ire anyi eka; o woru ozi-oma ono ye anyi l'eka. Anyi te epfukwa g'o tsoje nemadzu utso le nchi; gbahaa g'anyi pfuje iya g'oo-du Chileke ree; mbu onye ono, l'eletaje ime obu anyi; maru iphe, anyi l'ari ono.
- ⁵Unu maru-a l'onwunu l'o to dukpoda teke anyi gude ire mecha mecha pfuru yeru unu. Ophu anyi emeduru umere g'o bu l'oo iphe, anyi abudu be anyi suru l'anyi bu; g'eeshi g'anyi erita iphe l'eka unu. O kwa Chileke bu onye a-haru anyi enge iphe, anyi epfua.
- ⁶Anyi te emekwaru ge ndiphe; ozoo g'unubedua; ozoo ge ndu ozo jaa anyi ajaja. A makwaru-a l'eshinu anyi bu ndu-ishi-ozu Kereshi be o gbaru g'unu vuru mkpa-ehu anyi;
- ⁷obenu l'anyi duru unu odoo ge nwanyi adujeru unwegirima iya-a.
- ⁸Anyi yeru unu obu shii; k'ophu o to budu-a ozi-oma ke Chileke ono kpurumu be anyi l'unu gba mba; anyi gbakwapho ndu anyi mba; kele unu dunukaru anyi l'obu.
- ⁹Mbu-a; unwunna anyi; unu nyatajekwa egube akanya, anyi seru; l'anyi jekwaru ozi kuta ephuru phee. Teke ono anyi l'ezi unu ozi-oma ono, shi Chileke l'eka ono be anyi jeru ozi l'eswe jee ya l'enyashi gude ejeta nri, anyi e-ri; g'o to du onye anyi a-buru ivu-erwa swiru.
- ¹⁰Unu a-nodu agbakpodaru anyi odzori. Nokwapho ge Chileke a-nodukwapho agbaru iya anyi. Umere, anyi shi emejeru unube ndu kwetaru ozi-oma ono gekwaru egeru bya aburu umere, pfuru nhamunha. O to dukpoda eka anyi metaru iphe, aata anyi uta.
- ¹¹Unu maru l'oo ge nna anoduje ehe unwu iya-a bu g'anyi shi gude ehe unu l'ehu l'ehu. Anyi duru unu obu; bya emee g'obu shihu unu ike; anyi pfushiaru iya unu ike;
- ¹²su g'unu meje iphe, du Chileke ree; mbu onye ono, kuru unu g'unu bata l'eka ya bu eze; waa l'odu-biribiri iya ono.
- ¹³Iphe, meru g'o gude ophu anyi atuwojedu eka ekele Chileke ekele me anyi -nodu epfu anu iya bu; le teke unu numaru opfu Chileke ono, anyi byaru ezia unu ono be unu ta anataduru iya ge opfu nemadzu; obenu l'unu nataru iya ge Opfu Chileke; o

bukwarua Opfu Chileke bẹ ọ bụ eviya. Noo kele ọo Chileke ono bẹ l'ere ire l'ime unubẹ ndu nataru ozi-oma ono.

¹⁴Unwunna anyi; ọo iphe ono, nwuru unu ono bụ iphe, shi nwuru Chiochi ke Chileke, bụ ndu ephe le Kéreshi tugbaru buru nanu l'alị Jiudiya. Ọo 'ephe ge ndu alị unu eme unu mkpawere bụ ge ndu alị ephebe ndu Jiu shi eme phe iya.

¹⁵Ọo ndu Jiu ono bẹ bụ ndu ono, gburu Nnajiuphu, bụ Jizosu; gbuu ndu mpfuchiru Chileke; chia anyibedua chifu l'alị phe. Ephe gude egube ono meta iphe, ta adudu Chileke ree swibe onwophe. Ephe buru ọgu duru onyemonye.

¹⁶Ephe kposhiru anyi ezi ndu abudu ndu Jiu ozi-oma, l'adzo phe nu ono. Ọ to dukpoda teke ephe te emetajedu iphe-iji jasụ l'oobe phe l'ekpiri. Ọle oke-ehu-eghu ke Chileke bẹ mechakwanaaru dapfuta phe.

Ọogu Pọlu egu akpafu ndu Tesalonayika

¹⁷A bya abya l'ehu k'anyi; unwunna anyi; anyi noakwaru nwodu ophu anyi l'unu ahumaduru; ọle obu anyi nokwa-a l'eka unu no. Oghoroko unu duta-beru anyi; k'ophu bụ l'anyi shiwaa ụzenya seta g'eeshi g'anyi l'unu humakpoo ozo.

¹⁸Anyi shi eme g'anyi eme kpapfuta unu; mbedua, bụ Pọlu l'ishi onwomu tukpoakwaru onyo abyabya ugbo olemole; ophu Nsetanu ekwedu g'anyi bya.

¹⁹G'ooduhabe; ? ọ duru ophu abuedu unu kpurumu bẹ bụ ndu anyi chiru upfu yeru bya aburu unu l'e-me g'ehu tsoo anyi utso; bya aburu unu bẹ l'a-buru obunggo, anyi e-gudeje eku onwanyi l'atathu Nnajiuphu anyi, bụ Jizosu Kéreshi me ọ -byalepho ozo.

²⁰Mbu-a; ọ kwa unubedua bụ iphe, ee-gude jaa anyi ajaja bya aburu unu bụ ehutu-utso anyi.

1 Tesalonayika 3

¹No iya; a nonyakpoo; oghoroko unu ono duta-be anyi; k'ophu anyi aduedu ike tagbua ya le nshi; anyi chia idzu su l'anyi a-noduwanu le Atensu nkinyi anyi.

²Anyi zia Timoti, bụ nwune anyi nwoke; bya aburu onye-ozu ke Chileke; buru onye anyi l'iya tukoru ese akanya k'ezi ozi-oma ke Kéreshi ono; g'ọ bya emee g'unu kabaa apfushi ike; l'o mekwapho g'obu kabaa unu esihu ike l'iphe, unu kweru.

³G'ọ to du g'unu ha onye e-gude k'ehu-a, aakpa unu-a kpolaahaa azu; eshinu unubedua l'onwunu maru l'iphemiphe ono bụ iphe, nwufutajenu l'ehu anyi.

⁴Le-a; anyi gbuakwaru iya unu tororo; teke ono, anyi no l'ibe unu ono su unu l'ee-mekwa anyi ewere. Nta-a bẹ unu eleanaa l'ọ nwuru egube ono obu; ọ buru iphe, unu tukoru makotaru.

⁵Noo g'ọ gude mu nonyaa; ophu mu aduedu ike takota nshi; mu zia g'a bya amaru g'unu pfu-shiberu ike l'ekwekwe, unu kweru ke Chileke. Le mu tsuhukwaru ebvu su ? a maru nwandale ono ta ahudaaaru nu unu ama; akanya ono, anyi seru l'ehu unu ono buru akanya ola-l'iswi.

⁶Ole nta-a bẹ Timoti shiwaa l'ẹka unu nọ lwawaa lwapfuta anyi bya ezia anyi ozi, ọ ree sù l'unu kweshiru-a ike; bya enweru n-yemobu; teme unu nọdu anọduje anyata anyi ọkpobe anyata tekenteke. L'ọo g'oghoroko unu aduje anyi bukwapfo g'oghoroko anyi ọdu unu.

⁷Unwunna anyi; ọ kwa l'unu pfuru pfushia ike l'ekwekwe, unu kweru ke Chileke meru g'o gude obu nọdu eshihuje anyi ike l'iphe, bukpo iphe-ẹhuka, anyi eje; mekpoo ewere, eemekota anyi.

⁸Kele ọo nta-a bẹ ndzu bu anyi ọkpobe ndzu; eshi ọphu unu pfuru pfushia ike l'atugba, unu le Nnajiuphu tugbaru.

⁹Su-a; ? denkpoo g'anyi a-wata awata ekele Chileke ekele ẹhu unu; me k'ẹhu-utso ono, o meru ọ nọdu atsọ anyi l'iphu yẹbe Chileke opfu ẹhu unu ono?

¹⁰Eswe l'enyashi bẹ anyi egudeje obu anyi g'ọ ha epfu anu Chileke epfushi iya ike su g'o mee g'iphu anyi l'unu kpogba; g'anyi e-mekwanaa; ẹka unu teke ekweshidu ike g'unu kweshia ike.

¹¹Nta-a bu ge Chileke anyi, bu Nna anyi l'onwiya; me Nnajiuphu anyi, bu Jizosu Kereshi tooru anyi uto, anyi e-shi abya unu agbaphe.

¹²Teme ge Nnajiuphu mekwaapho g'unu kabaa eye nwibe unu obu; mbu g'unu kwata ye phe iya yeshia phe iya ike; ye phe iya k'anyinyi. Nokwapho g'unu e-ye iya nemadzu mgburugburu. Ono bukwarupho g'anyi yeru unu.

¹³Qo ya bu; g'oo-mee g'obu shihu unu ike; unu a-pfuru l'iphu Chileke, bu Nna anyi buru ndu debe ree. O to dudu ẹka uta aduru unu teke ono, Nnajiuphu anyi, bu Jizosu Kereshi yee ndu nkiya a-swiru bya ono.

1 Tesalonayika 4

Umere, du Chileke ree

¹Unwunna anyi; iphe ozo, anyi no l'ẹka Nnajiuphu anyi bu Jizosu epfuru unu epfushiru iya unu ike bu l'iphe, unu nwutaru l'ẹka anyi bukwa g'unu l'e-shi gude ndzu unu eme iphe, du Chileke ree emeshi iya ike. O buerupho iphe ono be unu emeepho. Nta-a bukwa g'unu kabaa ya emeshi ike.

²Noo l'unu mawaru-a l'anyi shi l'ẹka Nnajiuphu, bu Jizosu tularu unu ekemu.

³Su-a; iphe, du Chileke ree g'unu meje iya bu; g'unu dobe onwunu nsọ l'ẹka Chileke; mbu g'unu ta anodukwa apharwushi onwunu ililekpoo.

⁴Mbu-a; g'onyenonu le g'unu ha majekwaru g'ooshi eme ẹhu iya g'ọ du nsọ; buru iphe, aakwabe ubvu.

⁵Unu te egudejekwa aphu kparikpari iya dalahu iya je alua ge ndu abudu ndu Jiu, bu ndu amadu Chileke.

⁶Oo ya bụ g'ọ tọ dū onye e-meswe nwibe iya; ọphu ọ dukwa onye e-mekputa nwibe iya. Mbụ-a; anyi pfuhaakwaru iya tsua ya unu atsutsu lẹ nchi; sụ l'onye eme egube iphe ono bẹ Nnajiuphu a-gwakwa ọchi.

⁷Noo lẹ Chileke ta abukwa g'anyi bya emerwushije onwanyi bẹ o kuru anyi oku iya; ọ kwa g'anyi dū nsọ.

⁸Oo ya bụ; l'onye jikaru iphe ono, anyi ezi ono ta abukwa nemadzū bẹ ọ jikaru. Ọ kwa Chileke b'ọ jikaru; mbụ Chileke ono, anuje Unme-dū-Nsọ iya ono.

⁹A bya abya lẹ k'eye unwunna unu obu; ono ta abhekwa iphe, aa-bya awatarū unu ederu l'ekwo. Noo kele unubedua l'onwunu bẹ Chileke l'onwiya ziwaru eye nwibe unu obu.

¹⁰Mbụ unu nọdu emekwapho g'o ziru iya unu; bya eyee unwunna anyi, nokota lẹ Masedoniya mgburugburu obu egube ono. Ọle iphe, anyi epushiru unu ike; unwunna bụ; g'unu kabakporo eme egube ono kwaseru.

¹¹Unu kukebeje ẹhu g'unu nọdujeepho lẹ nchi odoo; leta ẹnya l'eye ozi ẹhu unu; gude ẹka unu setaje iphe, unu e-gude buru, bħukwaa iphe, anyi pfuhawaru unu-a.

¹²Noo iphe unu a-nọduje eme: ọ buru iya bụ umere, gbaru unu l'eka ndu ta abudu ndu ke Kereshi nọ; k'ọphu ẹphe a-kwabeje unu ubvù; ọ tọ dukwanu onye unu a-sụ l'ọo ya teme unu emee mkpa, dūru unu.

Abyabya Nnajiuphu

¹³Unwunna anyi; iphe, anyi eme g'o doo unu ẹnya bụ ke ndu nwuhuru anwuhu; g'ootoo rwujekwanu unu l'ẹhu shii g'oorwuje ndu te eledu ẹnya kele ẹphe lẹ Kereshi emecha nọdukota.

¹⁴Anyi kwetawaru kweshia ike lẹ Jizosu nwuhuchaaru bya eteta nọdu ndzū. Nokwapho g'anyi kwekwarupho lẹ Chileke e-shi Jizosu l'eka tuko ndu woadaru onwophe ye Jizosu l'eka teme ẹphe nwuhu mee g'ẹphe lẹ Jizosu tuka teta nọdu ndzū; mee ẹphe etsoru iya bya.

¹⁵Sụ-a; iphe-a, anyi epfuru unu-a bẹ bukwa ozi, shi Nnajiuphu l'onu; l'anyiibe ndu ọphu a-nọdukwadua ndzū teke ono, Nnajiuphu a-bya ọzo ono; bẹ tee vukwaru ndu ọphu nwuhuhawaru nū pho ọzo.

¹⁶Noo lẹ Nnajiuphu l'onwiya bẹ e-shi l'imigwe alwazeta l'ali; gude olu eze onye-ishi ojozi-imigwe echi mkpu; egbukwapho opu Chileke. Tōbudu iya bụ; ndu ono kwetaadaru ke Kereshi teme ẹphe nwuhu ono evuru ọzo teta nọdukota ndzū.

¹⁷Chileke ezichata anyibe ndu ọphu nokwadu ndzū teke ono; anyi l'ẹphe atuko nọdu l'ime urwukpu jeshia Nnajiuphu, bụ Jizosu ndzuta l'ephekerephe k'ọphu bụ; ẹka Nnajiuphu nokpoepho; anyi anọdu.

¹⁸Oo ya bụ; unu gudeje opfu-a dūa nwibe unu obu.

1 Tesalonayika 5

Anwuru ɛnya kwabɛru abyabya Nnajiuphu

- ¹Su-a; unwunna anyi; o to buhekwaro iphe, aa-bya awata ederu unu l'ekwo su unu l'o waa egube teke o bu; ozoo l'o waa mboku, iphemiphe ono e-me.
- ²Kele unubedua l'onwunu maru okpobe amaru le mboku, Nnajiuphu a-bya be a-tu l'upfu g'iphuru, byaru oshi l'enyashi.
- ³Kele oo teke ndiphe suru: "Ha! Mgboko dukwaa jii nta; oo akwa g'onyenonu jeje eka du iya ree." Noo teke bu; a -bya amaru ola-l'iswi atu phe l'uzorehu g'ezeda atuje nwanyi, du ime-a; woru phe yifu; o to dudu me onye lanu anahu nu.
- ⁴Obenu-a; unwunna anyi; unubedua ta anokwa l'ochii ke ge mboku ono tu unu l'uzorehu g'abyabya onye-oshi.
- ⁵Noo kele g'unu ha be bu ndu bu l'iphoro me l'eka bu eswe. Anyi ta abukwa ndu bu l'eka bu enyashi; ophu anyi abukwa ndu bu l'ochii.
- ⁶Oo ya bu; l'eshinu o du egube ono; g'anyi te kukwaru mgbenya ge ndu ophu ekugbaa. O chia g'anyi nwuru enya; g'enya doo anyi risaa.
- ⁷Mbu-a; ndu eku mgbenya bukwa l'enyashi be ephe ekuje iya. O buru l'enyashi be ndu angutaje me akpo kulakula anguje iya akpo iya.
- ⁸Obenu l'eshinu anyibedua bu l'eka bu eswe; g'enya donaa anyi risaa. G'ekwekwe, anyi kweru ke Chileke yee eye obu, anyi yeru ibe anyi buru uwe-igwe, anyi e-yeje; mbu uwe-igwe, l'egbobutaje anyi okpoma. G'adzota ono, anyi ele enya iya ono buru okpu-igwe, anyi e-kpuru.
- ⁹Chileke ta atukwaru anyi eka g'anyi buru ndu ya a-tukoshi oke-ehu-eghu iya. O chikwa g'anyi buru ndu ya e-shi Nnajiuphu anyi, bu Jizosu Kereshi l'eka dzota.
- ¹⁰Mbu Jizosu ono, nwuhu-chiru anyi ono; g'oo-buru e -mechaa; anyi l'iya atuko dzuru ndzu teke oo-bya; me anyi -no ndzu; me anyi -nwuhuru anwuhu.
- ¹¹Noo g'o gude anyi su unu-a; unu meje g'obu shihu nwibe unu ike. Unu eyejekwarupho nwibe unu eka g'ephe pfushia ike l'iphe, ephe kweru, bunaa iphe, unu emena-a.

Iphe, unu e-meje

- ¹²Unwunna anyi; o kwa arworwo be anyi arwo unu su g'unu kwataje kwabe iphe, bu ndu ono, l'ese akanya ehununu ono ubvu, bu phe bu ndu ono, Nnajiuphu hotaru g'ephe buru ishi unu; bukwarupho ndu a-nodu akpo-ziru unu uzo.
- ¹³Unu egudekwapho k'ozi ono, ephe ejeru unu ono eyeru phe eso; yekwaa phe pho obu okpobe eyeye. Unu l'ibe unu eburu le nchi odo.
- ¹⁴Oo arworwo be anyi arwokwapho unu unwunna; su g'unu lojeru ndu enyiru-ozie eka le nchi. Ndu ophu obu ebvuduru ebvuru be unu e-meje g'obu shihu ike. Ndu ekweshiduru ike be unu eyejeru eka g'ephe kweshia ike. Unu atajeru onyemonye nshi.

¹⁵Unu letaję ęnya g'ọ tọ dọ g'unu ha onye e-gudeje ejo-iphe melata nemadzọ iphe-ęji, o meru iya. Gbaha iphe, unu a-nọdujeepho achi nta iya bụ g'unu e-shi mejeru nwibe unu ree; mekwaaru iya phọ onyemonye ọzo.

¹⁶G'ẹhu tsojekpoeppo unu ọtso tekenteke.

¹⁷Unu ta atuwojekwa ẹka l'epfu anụ Chileke mkpọrumkpuru.

¹⁸Unu keleje Chileke ekele iphemiphe, anwuru unu g'iphe aduhabe. Noo iphe, Chileke achọ unu l'ẹka bụ ono; unubedua, unu lẹ Kéreshi tųgbaru bụru nanu-a.

¹⁹Unu ta agbanyijekwa iphe, Unme-dụ-Nsọ eme.

²⁰Ophu unu anmajekwa mpfuchiru phulaphula.

²¹Ole-a; unu hujekwa iphemiphe ama; họta ophu dọ ree; gudepyabeshia ya ẹka ike.

²²Unu esefukọta ẹka l'iphemiphe, bụ ejo-iphe g'ọ duhabe.

Opfu mkpọchi-ishi

²³Anyi sụ-a; gẹ Chileke, bụ iya emeje g'anyi buru l'ẹhu-guu mee unu g'unu bụru ndu nkiya okpobe aburu. G'o dobe ndzọ unu l'ophu; mbụ uche unu mę obu unu mę ẹhu unu; l'o dobe iya nno g'ọ tọ dọ ẹka uta a-dụ iya teke Nnajiuphu anyi, bụ Jizosu Kéreshi a-bya ọzo.

²⁴Iphe ono bę bụ iphe, oo-mekọta g'ọ ha; noo kele ọo ya kuru unu; teme ọ bụru onye apfushije ike l'iphe, o pfuru.

²⁵Unwunna anyi; unu pfujekwa nụ Chileke l'opfu ẹhu anyibedua.

²⁶Unu kelekwa iphe, bụ unwunna anyi g'ephe ha ekele nmata phę akpa, dọ nsọ.

²⁷Iphe, mu eme gẹ mu pfuaru unu bụ; unu gukwaa ẹkwo-ozia g'o rwudzuru unwunna l'ophu lẹ nchi. Nnajiuphu anukwaa iphe-a, mu epfu-a.

²⁸Gẹ Nnajiuphu, bụ Jizosu Kéreshi meeru unu eze-iphe-oma g'unu ha. Nokwa g'ọ dọ.

2 Tesalonayika

2 Tesalonayika 1

¹Ekwo-ozii-a shi l'eka mbedua, bu Polu alaru Chiochi Tesalonayika, bu ndu ke Chileke, bu Nna anyi bya aburu ke Nnajiuphu, bu Jizosu Kereshi. Ndu anyi ephe gba mgba ede iya bu Sulivanusu yee Timoti.

²Ge Chileke, bu Nna yee Nnajiuphu, bu Jizosu Kereshi meeru unu eze-iphe-oma; mekwaapho g'unu buru guu.

Ikpe, Kereshi e-kpe me o -byalepho

³Unwunna anyi; o buakwa iphe, anyi mefutaje l'anyi a-nodujeepho ekele Chileke ekele ehununu tekenteke; kele o bu iphe, gbaru anyi lememe. Noo kele ekwekwe, unu kweru ke Chileke be kwatakpo akaepho eshihu ike eje; nokwapho ge nyemobu, unu yeru nwibe unu l'ehununu akaepho shii akaka eje.

⁴Noo iphe, anyibedua l'onwanyie egudeje unu abaa abaa l'iphe, bukpo Chiochi Chileke. Ishi abaa abaa onoburu l'unu suru aka l'obu kweshia ike l'iphe, unu kweru; l'ewere ono, e mekotakpooru unu ono; me l'iphe-ehuka ono, unu jekotakpooru ono.

⁵Ono buru iphe, unu e-gudekwanu aka maru l'o bu okpobe-opfu le Chileke ekpeje ikpe, pfuru oto. Oo iphemiphe ono, l'eme l'ehununu ono l'e-me unu agbaa k'abahu l'eka Chileke bu eze, bu iya bu iphe obu, unu anwu onwu iya nta-a.

⁶Chileke be bu onye l'emeje iphe, pfuru oto; mbu l'iphe, bu ndu ono, meru unu nodu eje iphe-ehuka ono be oo-mekwapho ephe ejee iphe-ehuka.

⁷Unubedua obu, aakpa ehununu nta-a be oo-me unu enweru onwunu. Nokwapho g'oo-me anyibedua. Teke oo-me iphe ono be bu teke Nnajiuphu a-nodu l'oku enwuphoophoopho shi l'imigwe abaya yee unwu-ozozi-imigwe iya ono, bu phe l'e-goshi g'ike iya habe shii ono.

⁸Oo bya agwaa ndu amadu Chileke ochi; waa ndu te emedu iphe, ozi-oma ehununu Nnajiuphu anyi, bu Jizosu Kereshi epfu ono.

⁹Ndu ono be a-nu chiipfu bya achifu phe l'iphu Nnajiuphu me l'odu-biribiri du l'ike iya; je dobe l'eka ephe a-nodu laa l'iswi jasul'ojeje.

¹⁰Noo iphe, e-me mboku ono, oo-bya. Oo ya bu ge ndu nkiya, bu ndu kwehawaru nkiya akwabe iya ubvu; jakwaa ya pho ajaja. Unubedua l'onwunu anodukwapho l'eka ono, ndu nkiya no ono; kele unu kwetaru k'ozii ono, anyi byaru ezia unu ono.

¹¹Noo g'o gude anyi nodu anodujeepho epfu anu Chileke l'iswi ehununu tekenteke; g'o mee unu g'unu du k'anodu ndzu ono, o kuru unu g'unu nodu ono. Unu aduje ike meje iphe, du ree, l'agu unu egu ememe. L'o mekwaapho g'o dzua oke; mbu ndzu ono, unu no; opfu l'unu kweru nkiya ono.

¹²Oo ya bu; g'ee-shi l'eka unu kwabe epha Nnajiuphu anyi, bu Jizosu Kereshi ubvu; Chileke eshikwanu Nnajiuphu anyi, bu Jizosu Kereshi l'eka kwabe unubedua ubvu.

Iphemiphe ono bẹ Chileke e-shikọta l'eze-iphe-oma, oome mẹ kẹ Nnajiuphu anyi, bụ Jizọsu Kéreshi mekọta.

2 Tesalonayika 2

Ọ-chi-nta Kéreshi

¹A bya abya lẹ k'abyabya kẹ Nnajiuphu anyi, bụ Jizọsu Kéreshi mẹ k'edzuko, oo-me g'anyi dzukọbe g'anyi l'iya tugba buru nanu anyi nọdu arwo unu unwunna anyi su;

²g'ọ tọ tufu-kebekwa unu ẹhu l'oriri; ọphu obu awatakebekwa ete unu ophe; opfu l'a suru unu lẹ mbọku ono, Nnajiuphu a-bya ono erwuwaa. Unu te eyejekwa onu m'obeta o nweru onye byaru bya asu unu l'ọo iphe, Unme-du-Nso pfuru bẹ ya l'epfu; ọzoo l'ọ kwa iphe, nemadzu pfuru iya bẹ ya epfu; ọzoo l'e deru iya l'ekwo-ozu, a suru l'ọo anyibedua deru.

³G'ọ tọ dukwa onye e-duswe unu ọzo; kẹle mbọku ono ta abyakwa abya abudu lẹ teke ono, ndiphe e-kwefuru Chileke ike ono vuadaru ọzo bya; mẹ teke ọ byaadaru mbu nwa-ogbuka-ekemu ono, bụ iya bụ onye ono lafutaje l'iswi ono.

⁴Ọ -byaepho bẹ ọo-su l'ọo-buru kẹ yee iphemiphe, ndiphe ekukpoo chi g'ọ ha; mẹ iphemiphe ndiphe abaru ẹja. Oo-woru onwiya dobe lẹ ya kakọta iphemiphe ono shii. Mbu; oo-jechakwaa je asugabe onwiya l'eze-ulo Chileke su l'ọo yebedua bụ Chileke l'onwiya.

⁵? Unu ta nyataheduru lẹ mu pfuhawaru iya unu teke anyi l'unu tukoru nọdu?

⁶Unubedua l'onwunu makwaru-a iphe, akposhi iya abyabya nta-a. Ọ kwa k'opfu a-huma iya teke gbaru iya nu

⁷Ike ono, a ta humadu l'enya ono, bụ ike kẹ nwa-ogbuka-ekemu ono nọdu erekwanu ire nta. Ole yebedua l'onwiya ta abyadu abya jeye teke onye ono, sedekwaduru iya nu ono l'e-tochiru iya.

⁸Ọ -tochiru iya pho ono; ọo ya bụ nwa-ogbuka-ekemu ono abya teke ono; l'aa-humadzuru iya. E mechaepho; Nnajiuphu, bụ Jizọsu egude uphere onu iya gbu ya. Ọ buru nwijnwii ono, Nnajiuphu a-nọdu egbu teke l'ọo-bya ono bẹ bụ mkpako-iphe l'e-me nwa-ogbuka-ekemu ono l'ọ laa l'iswi.

⁹Abyabya, nwa-mgbuka-ekemu ono a-bya bẹ bukwa l'ike kẹ Nsetanu bẹ oo-shi l'eka. Ọ -bya l'ọ meshiahaa iphe, du biribiri, dugbaa iche iche, bụ iphe, a-kpo ndiphe opfu. Nokwapho g'oo-gude ọgho emegbaa iphe-ohumalenya, du biribiri.

¹⁰Oo-gude ẹjo ọgho mgbashi gude eduphushi ndu ono, buwaa ndu l'a-la l'iswi ono. Iphe, ephe e-gude laa l'iswi ono a-buru l'ephe jikaru l'ephe ta akpoduru obu eye l'okpobe-opfu ono, bụ iya gege adzota phe nu ono.

¹¹Noo iphe, meru g'ọ gude Chileke gbahaa phe ẹka; ephe shiswee ọzo; shiswee ya k'opfu buepho iphe, abudu okpobe-opfu bẹ ephe ekwetaje l'ọ bụ okpobe-opfu.

¹²Èka ọ wùkoru bụ l'iphe, bụkpoo ndu ono, ekwetaduru ọkpobe-opfu ono; ọ bụchiaru ejo-iphe ka phẹ ụtsọ ono bẹ Chileke a-nmakọta ikpe.

Apfuru pfushia ike

¹³Unwunna anyi; Nnajiuphu yekwaru unu obu. Ọ bụakwa iphe, anyi mefụtaje; l'anyi a-nọdujeepho ekele Chileke ekele ẹhu unu tekenteke; kele Chileke shiẹpho lẹ mbụ họtá unu k'ọphu ọo-dzọta unu; mbụ o jekwa e-shi Unme-dụ-Nsọ ono l'ẹka l'ere ire l'ẹhu unu ono; waa l'ekwekwe ono, unu kweru l'ọkpobe-opfu ono; dzọo unu.

¹⁴Oo iphe ono bẹ o shi l'ẹka ozi-oma ono, anyi ziru unu ono kua unu oku iya; g'unu lẹ Nnajiuphu anyi, bụ Jizọsu Kéreshi gbarụ mgba nweru ọdu-biribiri iya.

¹⁵Noo ya bụ; ụnwunna anyi; unu pfuru pfushia ike; unu gudeshikwa ọkpobe-opfu ono, anyi ziru unu ono; mę anyi gude ọnu zia ya unu-o; mę anyi deru iya unu edede l'ekwo-ozí.

¹⁶Gẹ Nnajiuphu anyi, bụ Jizọsu Kéreshi l'onwiya; yele Chileke, bụ Nna anyi, bụ onye yeru anyi obu; bya emee g'obu shihu anyi ike jasụ lẹ tuutuutuu lẹ mịmimiimii; meeru unu anyi eze-iphe-oma; mekwaarupho anyi iphe ono, anyi ele ẹnya iya ono.

¹⁷G'o mee g'obu shihu unu ike; mekwaaphọ unu g'unu shihu ike sụru k'eme iphe, dụ ree, unu emekpọo ememe; pfuje iphe, dụ ree l'ọnu.

2 Tesalonayika 3

Aarwọ g'epfuru nụ Chileke

¹Èka anyi a-sùbe opfu ono ishi ụnwunna anyi bụru; g'unu pfuje nuru anyi Chileke g'ozí-oma ke Nnajiuphu kabaa edzuru ẹkameka ẹgwegwa; g'a kwabejekwapho ozi-oma ono ụbvù l'ẹkameka ẹgube ono, unu akwabeje iya ono.

²Wafua g'ọ nafụtaje anyi l'ẹka ndu iwe mę l'ẹka ndu ejo-iphe. Noo kele ọ tọ bụbedu ndiphe l'ọphu bẹ kwetarụ k'ozí-oma ono.

³Obenu lẹ Nnajiuphu bụ onye apfushije ike l'iphe, o pfuru. Ọo ya bụ onye e-me g'unu shihu ike; tẹme l'o chekwaphọ unu g'ẹka Onye-Njọ ono te erwu unu l'ẹhu.

⁴Anyịbedua bẹ Nnajiuphu meakwaru ọphu anyi awaheduru unu obu mini. O doru anyi ẹnya l'unu eme-a iphe, anyi sụru g'unu meje; tẹme unu je l'e-meru iya kwaseru.

⁵Gẹ Nnajiuphu kpọ-ziaru unu ụzo k'ọphu unu akabaa anọdu eye Chileke obu eje l'iphu; mę k'ọphu ata nshi unu l'a-bụ ọphu shi Kéreshi l'ẹka.

Ozi Nnajiuphu, e jefụtaje

⁶Unwunna anyi; iphe, anyi nọ Nnajiuphu anyi, bụ Jizọsu Kéreshi l'ẹka epfuru unu nta-a bụkwa; g'unu bujeru ụbara yeru iphe, bụkpoo nwanna, ẹnyeru ozi dụ; ọphu o mejedu iphemiphe ono, anyi ziru unu g'unu meje ono.

⁷Noo l'unubedua bẹ maru-a l'unu nwufutaje ẹka anyi. Anyi te eshikwa bụru ndu ẹnyeru ozi teke anyi l'unu shi nọdukota.

⁸O tọ dukwa onye anyi natajeru nri ria ke mmanu. O chia iphe, anyi shi emejechia bu l'anyi shi esekotaje akanya eswe l'enyashi jasụ ike labo abvu anyi; g'o tọ du g'unu ha onye anyi a-pata mkpa ehu anyi je ebo g'o buru iya ivu-erwa.

⁹Iphe, anyi shi eme iya ta abukwa l'o tọ gbaduru anyi g'anyi a-su g'unu vuru mkpa ehu anyi. O kwa g'anyi gude umere anyi goshi unu iphe, unu e-letaje eme.

¹⁰Mbu lufuchakwa le teke anyi no l'ibe unu be anyi pfuhaakwaru unu iphe-a pfushia ya ike su: "G'onye ete kwedu eje ozi te erijekwa nri."

¹¹Iphe, anyi gude nodu epfu iphe-a bu l'anyi numawaru l'o nweru g'unu ha ndu haru buru ndu enyiru ozi du; ndu buepho iphe, ephe no bu o-jeru-opfu, 'e kuduru phe; ophu o dudu iphe ozo, ephe anoduje eme.

¹²Anyi no Nnajiuphu, bu Jizosu Kereshi l'eka akaru egube ndu ono alokwaru phe pho eka le nchi su g'ephe noduekwapho nwa doo seje akanya l'onwophe seta iphe, ephe e-gude buru.

¹³Su-a; unwunna anyi; g'ike ta abukwa unu l'eme iphe, du ree.

¹⁴Teke o bu l'o duru onye jikaru emeje iphemiphe-a, anyi deru l'ekwo-ozia; unu hubekwa onye obu ama. Unu wuchia ya ewuchi; g'e gude nno g'iphere a-du iya.

¹⁵Ole g'unu te emejekwa iya g'onye unu l'iya duru l'opfu. Unu gudeje iya loo ya eka le nchi; kele o bukwa nwanna unu.

Opfu, mkpochi-ishi

¹⁶Ge Nnajiuphu l'onwiya, bu iya be ehu-odu-guu l'eshije l'eka mekwaa g'ehu dujekpoepho unu gubala tekenteke; me l'ekameka. Ge Nnajiuphu swikwaru unu eswiru g'unu ha.

¹⁷Ekele-a, du l'ekwo-ozia be bu mbedua, bu Polu gude eka mu dee ya. Owa-a buakwaa ge mu edeje iphe edede. Oo ya bu iphe, unu e-gudeje hube ekwo-ozia, mu deru ama.

¹⁸Ge Nnajiuphu anyi, bu Jizosu Kereshi meeru unu eze-iphe-oma g'unu hakota. Nokwa g'o du.

1 Timoti

1 Timoti 1

¹Ekwo-ozhi-a bẹ shi l'ẹka mbedua, bu Polu; mbu mube onye-ishi-ozhi Kereshi Jizosu. Oo Chileke ono, bu onye l'adzoje anyi; yee Kereshi Jizosu ono, bu onye anyi ele enya iya-a; be ziru mu ge mu buru onye-ishi-ozhi ono.

²Onye mu ede ekwo-a anu bu gubedua, bu Timoti; onye buwaa okpobe nwa mu; l'ekweta ono anyi kwetaru ono. Ge Chileke, bu Nna; me Nnajiuphu, bu Kereshi Jizosu; meeru ngu eze-iphe-oma; phuru ngu obu-imemini; mekwapho g'ehu du ngu guu.

Alọ ndu ẹjo-nzi ẹka lẹ nchi

³Su-a; teke ono, mu eje Masedoniya be mu sukwaru ngu: jiko g'i noduekwapho le Efesosu k'ophu ii-haru alọ ndu ẹjo-nzi ẹka lẹ nchi g'ephe b'e ezihakwa iphe, abudu okpobe-opfu.

⁴Ophu ephe anodujeshi akophe mkpokoro akophe ndu Jiu. Ophu ephe agushijeshi ndzepfu ndzepfu epha ndiche; epha ophu ta abvujedu abvubvu. Egube iphe ono buepho igoligoli be okpa-ije. O to yejeduru nemadzu ẹka g'o mee iphe, Chileke tuberu g'o mee; mbu iphe ono, anyi shi l'ozhi-oma, anyi kwetaru ono maru.

⁵Iphe, kparu iphe, mu gude nmaaru ngu okwa-a bukwa ge ndu ke Kereshi egude obu iphoro yee nwibe phe obu; gude egomunggo phe maru iphe, gbaru phe l'ememe; kweta ke Chileke okpobe ekweta.

⁶O duru ndu hawaru shiswee okpobe uzo ono; woru iphu chee ichephu; shiwaro nno wata epfuphe mkpokoro opfu.

⁷Ndu ono be ogu egu aburu ndu ezi ekemu Chileke l'ebe abu l'opfu, ephe epfu doru phe enya; ophu iphe ono, ephe epfushi opfu iya ike ono edokwaru phe pho enya.

⁸Anyibedua g'anyi hakota be tukokwaru machaaru l'ekemu Chileke be du ree me a - nodu emekwa iya g'o gbaru g'e meje iya.

⁹Ole ophu doru enya bu l'o to bukwa ndu pfuberekoto be a tu-doru ekemu ono. O kwa ndu adarwu ekemu adarwu; me ndu bu okari-eka; taru iya ndu anoduje akpo Chileke ebo l'afu; me ndu iphe-aji; taru iya ndu aduduru Chileke nsu; me ndu ono adudu iphe, bu ke Chileke me nanu duru ophu ephe eyeru nsu ono; bya aturu iya ndu egbuje nna phe me ne phe; bya aturu iya ndu mgbugbumadzu l'ophu.

¹⁰A taru iya doberu ndu arwuje urwuali; me unwoke ejepfuje unwoke ibe phe; bya aturu ya doberu ndu apa nemadzu l'oshi. A taru iya doberu ndu adzufe uka me ndu akpapyabeje iphe, ephe meru ria nte; bya aturu ya doberu iphe, bukpo ndu eme iphe, abudu okpobe-opfu ono, e ziru unu ono.

¹¹Okpobe-opfu ono, e ziru unu ono be shikwa l'ozhi-oma ono, Jizosu Kereshi yeru mu l'eka ono. Ozi-oma ono bukwanuru ozi-oma k'odu-biribiri Chileke ono, bu Chileke dukota ree bya edzukota oke l'ime onwiya ono.

Pọlu etu Chileke ẹpha

¹²Mu etu Nnajiuphu, bu Kéréshi Jizosu ẹpha. Oo ya be bu onye meru; mu du ike eje ozi-a, mu eje-a. Mu etu iya ẹpha; kele o lewaru ẹnya huma le mu gbaru k'ophu ya e-gude ire mu ẹka; bya ahota mu ge mu jeeru iya ozi ono.

¹³A makwaru-a le mu shi anoduje epfutoshi Jizosu Kéréshi le mbulembu; shi anoduje achi nta iya; shikwapho anoduje eme iya iphe-iphere. O le Chileke be phulekwaru mu-a obu-imemini; kele iphemiphe ono, mu shi eme ono be mu shi eme l'amagama. Mu te eshidu kwetawaa teke ono l'oo Jizosu bu Nnajiuphu.

¹⁴Tobudu iya bu; Nnajiuphu anyi ono, bu Jizosu Kéréshi ono bya aphuaru mu obu-imemini ophu nyiberu g'aatu onu iya. O mee mu: mu bya ekweta l'oo yebedua bu Nnajiuphu; mekwaa mu pho: mu bya eyee ndu ozo obu. Ono buru iphe, oomejeru iphe, bukpo ndu ephe l'iya tugbaru buru nanu.

¹⁵Owa-a bu opfu, gbaru g'e gude iya ẹka; teme o du ree g'onnyemonye gbobe ẹka nata iya okpobe anata. Le Kéréshi Jizosu byaru le mgboko-a ge ya bya adzo ndu eme iphe-ẹji. O buru mbedua be eme iphe-ẹji obu shi wukoru.

¹⁶Noo g'o gude Jizosu Kéréshi phuaru mbedua obu-imemini bya emee g'o buru l'ehu mu be ya e-shi goshi ndu ozo ge ya atabeje nshi shii. Oo ya bu le Jizosu Kéréshi be gude ehhu mu egoshi ndu ozo le ya a-gbenu dzoo phe; nu phe ndzu ojejoje; o betakpooru iphe-ẹji phe du idagha; me o -buru l'ephe kwetaru nkiya.

¹⁷Su-a; gube Chileke ono, bu eze ojejoje; bya aburu onye ta anwuhujedu anwuhu; bya aburu onye ata humajedu l'ẹnya; bya aburu ngu bu Chileke, maru iphe kpoloko; g'a kwabe ngu ubvu; jaa ngu ajaja; jasu le tuutuutu le mijimimii. Nokwa g'o du bu ono-o.

¹⁸Su-a; nwa mu Timoti; mu anma okwa-a eye ngu l'eka. Ge mu gude iya nyataru ngu iphe, ono ndu mpfuchiru Chileke pfuru l'opfu ehhu ngu ono; k'ophu ii-gude iya lwua ogu ehhu Chileke ono.

¹⁹Kwekpøekwapho ke Kéréshi; g'iphemiphe, iime bujeekwarupho iphe, obu ngu marwataru l'oo iphe, gbaru iya l'ememe. O nwekwaru ndu machacharu-a iphe, gbaru phe l'ememe, obu phe suru g'ephe mee; ophu ephe emejedu iya. O buru iphe ono meru g'o gude ekwekwe, ephe kweru ke Kéréshi rikashihu erikashihu g'ugbo-mini, jeru asua onwiya l'akpaa.

²⁰Ndu haru yiru le ndu ono be bu Hayimeniyosu waa Aleğuzanda. Ndu ono be mu woakwaru ye Nsetanu l'eka g'o nua phe aphu k'ophu ephe a-nwutakwanu l'o to dudu ree mbu epfutoshi Chileke.

1 Timoti 2

Abaru Chileke ẹja le Chiochi

- ¹Iphe mbu, mu epfu epfushi ike bu; g'e pfujeru nu Chileke su iya g'o gbaaru ndiphe mkpu; l'o meeru phe iphe, mkpa iya duru phe. L'a rwojekwa iya pho arworwo ehu onyemonye; ekelejekwa iya pho ekele.
- ²G'e pfujeru nu Chileke l'iswi ehu ndu eze; mewaro iphe, bukpuo ndu bu ndu-ishi. Oo ya bu k'ophu nchi a-du anyi doo; anyi eburu l'ehu-guu; anyi a-nodu anuru Chileke opfu; mekwapho k'ophu anyi a-noduje eme umere, gbaru anyi l'iphemiphe, anyi eme.
- ³Su-a; nokwa iphe, du ree bu onoya. Teme o bukwaru iya pho bu iphe, du Chileke ree; mbu Chileke ono, bu Onye-Ndzota anyi ono.
- ⁴O du Chileke l'uche ge ya tuko iphe, bukpuo nemadzu l'ophu dzoo. O dukwa iya pho g'a su l'iphe, bu nemadzu g'a ha byakotaru bya amaru iphe ono, bu okpobe-opfu onoya.
- ⁵Noo kele oo Chileke lanu be du nu kpoloko; o bukwarupho onye lanu kpoloko be bu onye apfujeru le mgbaka Chileke yee nemadzu. Onye ono bu iya bu Kereshi Jizosu, bukwapo nemadzu l'onwiya.
- ⁶Onye woru onwiya nu g'e gude ndzu iya gbata oha l'ophu; agba ekebe iya l'orwuberu iya.
- ⁷Noo g'o gude o hota mu mee mu ge mu buru onye-ozima; buru onye-ishi-ozima ono; k'ophu mu e-gude ozima ono je araa arara l'ali ndu abudu ndu Jiu; k'ophu epe ekwetakota okpobe-opfu ono. Mbua; o kwa okpobe-opfu be mu no l'eka Kereshi epfu ono. Mu ta adzukwa uka.
- ⁸Su-a; iphe, du mu ree bu g'unwoke pfujekwa nu Chileke l'iphe, bukpuo ekameka. G'ephe chilije eka phe gude obu iphoro epfu anu Chileke. G'ehu te eghujekwa phe eghu; ophu epe abojekwa obu ebo m'ephe nodu epfu anu Chileke.
- ⁹A bya abya l'unwanyi; iphe, du mu ree bu ge nwanyi rije oriri maru egube uwe, ooye l'ehu. Ge nwanyi yeje uwe gbaru iya nu. G'iphe, epe e-gudeje eme omemma buru iphe, egoshi l'ephe doberu onwophe oru bya esedeje onwophe. G'o to bukwa eme egbushi g'o buru iya bu eka enya a-nodu eje. G'unwanyi te egudejekwa mkpola-ododo yee aka eme omemma. Ophu epe eyejekwa uwe erenuka ire gude akwa onwophe ngwa.
- ¹⁰Iphe, unwanyi emejekhia bu g'ephe meje iphe-oma, bukwanu iya bu iphe, gbaru unwanyi, suru le Chileke duru phe le nsu l'ememe.
- ¹¹G'unwanyi wozekwa onwophe ali okpobe ewoze; noduje nwa nggujunguji; nwuje iphe, eezi phe.
- ¹²Mu te ekwekwa g'unwanyi zije iphe. Ophu mu ekwedu g'o duru nwanyi, anodu aturu unwoke iphe, epe a-nodu eme. G'unwanyi jipyajepho onwophe nwadoo.
- ¹³L'o kwa Adamu be Chileke vuru uzo mee teme o meje Ivu.
- ¹⁴Ophu o bukwa Adamu be Nsetanu ghoru ugho; o kwa nwanyi be o ghoru iya; mee ya o mebyia ekemu, Chileke turu.

¹⁵Ole iphe, Chileke l'e-gude dzoo nwanji bu anwushi unwu; me o bukpowaru l'o no-shiru ike l'ekwekwe, o kweru ke Kereshi; bya eyee ndu ozo obu; buru onye ke Chileke okpobe abubu; bya edobe onwiya oru.

1 Timoti 3

Ndu-ishi ndu Chiochi

¹Iphe ono, e pfuru ono bukwa okpobe-opfu: "O -buru l'o duru onye enya du g'o buru onye-ishi Chiochi; onye ono bukwa okpobe iphe be agu iya nu."

²Onye-ishi Chiochi bufutajekwa onye uta adudu le ndzu iya; onye alu nwanji lanu; bukwarupho onye esedeje onwiya; buru onye nweru uche; onye umere iya du ree; onye ooheje ihee akwa ebyaa; l'o bukwarupho onye aduje ike ezi ndu ozo iphe.

³G'onye ono ta abukwaru onye anguje mee g'o tsu iya atsutsu; ophu onye ono abukwaru onye eme ehuka. G'o to bukwaru onye eme ughoro. G'onye ono buchiaru onye atajeru iphe nshi; onye ta aswojedu uswo; l'o buru onye te eyeduru enya l'okpoga.

⁴G'onye ono bukwaru onye duru ike leta ibe iya enya ree; onye unwegirima ibe iya anuru opfu bya akwabebu.

⁵Le teke o bu le nemadzu ta adudu ike buru onye-ishi l'ibe iya; ? denuhunu g'onye obu e-me du ike buru onye-ishi Chiochi ke Chileke?

⁶G'onye ono ta abukwaru onye teke adudu iphe, o mawaru le ke Chileke; k'ophu onye obu ata watadu etse etsetse; eshi egube ono Chileke anmaa ya ikpe g'o nmaru Obutuswe.

⁷Onye ono aburu onye ndu abudu ndu Chiochi epfu l'oome ree; oo ya bu g'o to dukwanu onye a-su l'o phuu iphe, onye-ishi Chiochi meru; a -nonyaa Obutuswe gude egube iphe ono nmata onye-ishi onoya l'onya.

Ndu ejeru Chiochi ozi

⁸Nokwapho ge ndu ejeru Chiochi ozi bufutaje ndu eeyeru ubvu. Ephe taa buduru ndu ntuphu-ire; ophu ephe abuduru ndu ngunukaru mee; ophu ephe abuduru ndu anoduje achu urwu l'uzo adudu ree.

⁹Ephe e-gude obu phe g'o ha gudepyabe okpobe-opfu ono, Chileke goshiru anyi ono; g'obu ta awajekwa phe mini.

¹⁰G'e vujeadakwaru uzo huadaa ndu obu ama; teke a huchaaaru phe ama; ophu o dudu eka onu aboru phe ebo; temanu e yewa phe ro g'ephe jejeru Chiochi ozi.

¹¹Nokwapho ge unyomu phe bufutaje ndu eeyeru ubvu; ndu ta asudu asulasu; ndu aduje ike sede onwophe; ephe aburu ndu e gude ire phe eka l'iphemiphe.

¹²G'onye ejeru Chiochi ozi bukwaru nwanji lanu kpoloko be oo-nodu alu. L'o buru onye duru ike eleta unwu iya enya rengurengu; eletakwapho ibe iya enya ree.

¹³Noo lẹ teke ọ bu lẹ ndu ejeru Chiochi ozi bẹ ejerwe iya ejerwe bẹ ọ gbakwaru kẹ g'a kwabeje phe ubvu, ha shii. Ephe adujekwanu ike shihu obu ike asa iphe ono, anyi kweru ono kpaa kpaa; mbu iphe ono, anyi no Kereshi l'eka kweta ono.

Iphe, Chileke shi domia edomi

¹⁴Ekw-ozi-a bẹ mu ede anu ngu; ole o to dukwa ge mu ano-beru nta-a mu abyapfuta ngu;

¹⁵k'ophu bu; mu -noahaa odu abyabya l'ii-maru g'i-gudeje eme umere l'ulo Chileke ono, bu iya bu Chiochi kẹ Chileke ophu dzu ndzu; bya aburu itso yee okpa-ulo k'okpobe-opfu onoya.

¹⁶A tukoru kwetakota l'okpobe-opfu ono, Chileke shi domia edomi onoya pfubekpooru paa eka mebyi apaa. Chileke goshiru iya anyi; anyi kwetakwa iya pho. Okpobe-opfu obu bẹ pfuru su: Jizosu bẹ byaru lẹ mgboko-a bya aburu nemadzu. Unme Chileke goshi l'o bu onye pfuberekoto. Unwu-ojozi-imigwe gudekwapho enya phe huma iya. E pfukotaru ohamoha, no lẹ mgboko opfu ehu iya. Ndiphe kweta nkiya; Chileke bya ekuta iya kuba l'imigwe je akwabe iya ubvu, ka l'ubvu.

1 Timoti 4

Ndu ejo-nzi

¹Unme Chileke bẹ epfuru iya anyi enwu iya anyi enwunwu lẹ nchi su l'e-mechaa nweru ndu e-dochi ekweta onoya wata anga nchi l'iphe, ndu obu alo-kpurukpuru epfu; wata etso iphe, obu ono ezi.

²Gude opfu toko-l'ehu-atuko-l'obu adzushi uka; ndu e gudewaa oku mkpurukpu-igwe huchishia egomunggo.

³Ephe anoduje ezi g'a ta alujeshi nwanyi; ophu erijeshi egube nri owa-a ozo ophuu; mbu nri, Chileke meru ge ndu kweru nkiya bya amaru okpobe-opfu ono rije eriri.

⁴Iphemiphe, bukpo iphe, Chileke meru bẹ dukotakwa ree. O to dukwa ophu gbaru kẹ g'a jikaje iya me e kelewaa Chileke ekele iya.

⁵Noo kele opfu Chileke yee epfupfu, e pfuru nu Chileke onoya bẹ mewaru iphe onoya o du nsọ l'iphu Chileke.

Onye ejeru Kereshi Jizosu ozi okpobe ejeje

⁶O -buru l'i woru iphe, bu okwa-a, a nmakotaru ngu-a g'o ha nmakotaru iphe, bu unwunna g'ephe hakota bẹ bukwa iya bu l'i bu onye ejeru Kereshi ozi eje iya okpobe ejeje. Oo ya bu l'iigoshi l'oo opfu Chileke ono, i kwetaru me okpobe iphe ono, e ziru ngu ono, i shiepho k'eshinu ono tsota ono bẹ bu nri, i gude azu onwongu.

⁷Ta angabejekwa nchi lẹ mkpokoro ako-iphè unwanyi ogerenya, bu ako adudu iphe, bu okpobe-opfu, du iya nu ililekpoo. Iphe, ii-mechia bu g'i hujẹ onwongu ahuhù; g'iigude nno nodu ndzu, du Chileke ree.

⁸Kẹle ahùhù ọphu aahù ogwẹhu bẹ urwu, dọ iya nọ hakwa nwanshii; obenu l'ọphu urwu gbaru mgburugburu bu lẹ nemadzu anuru Chileke opfu. Noo kẹle Chileke kweru ukwe lẹ ndu eme nno bẹ ya e-meru eze-iphe-oma lẹ ndzu ọphu ẹphe nọ nta-a; bya emeeru phẹ iya lẹ ndzu ọphu ẹphe a-nọdu l'oduliphu.

⁹Opfu-a bẹ bu opfu, e gude ẹka; mbu opfu gbaru g'onnyemonye machia ẹka labọ nata iya.

¹⁰Oo iphe ono meru g'o gude anyi nọdu anọduje eseshi akanya iya ike; eje iphe-ẹhuka. Kẹle anyi kporu obu yeru Chileke, nọ ndzu; mbu Chileke ọphu bu Onye-Ndzota ndiphe l'ọphu; kelekele kẹ ndu kweru nkiya.

¹¹Pfuaru phẹ iphe onoya pfushiaru phẹ iya ike; l'iizikwaa phẹ iya phọ ezizi.

¹²Te ekwekwa g'ọ duru onye a-nọdu eko ngu ọkpa l'ishi opfu l'i bu nwata. Iphe, ii-mechia bu g'i buru iphe-leta-mee l'opfu onu; mẹ abọ uja; mẹ lẹ n-yemobu; mẹ l'ekweta kẹ Chileke; mẹ l'aduebe ree.

¹³Iphe, iinodukpoepho emeje jasọ mu abya bukwa: g'i gujeru Chiochi ẹkwo-opfu Chileke; l'i meje g'obu shihu phẹ ike; l'i towashijekwaru phẹ phọ opfu Chileke g'o doo phẹ ẹnya.

¹⁴Ta akwaswekwaru ẹnya l'iphe-oma ono, Chileke meru ngu teke ono, ndu mpfuchiru Chileke gude ike, Chileke nuru phẹ pfuchiaru iya ono; mbu teke ono, ndu e meru ogerenya Chiochi byaberu ngu ẹka l'ishi ono.

¹⁵Kebekpoepho ẹhu meje iphe ono; phube iphu me iya ree; k'ọphu onnyemonye l'ahuma g'i gude ejekpoepho l'iphu l'iphu.

¹⁶Kwabekwarupho umere ngu ẹnya; l'i kwabekwarupho ẹnya l'iphe ono, iizi ndu ọzo ono. Mejekwapho iphemiphe ono; kẹle i -nọdu emewaa ẹgube ono; l'i dzọo onwongu ndzu; dzọo ndu anọduje anu iphe, iipfu.

1 Timoti 5

¹Ta abajekwaru nwoke, ka ngu aburu ogerenya mba; tojechikwa nwehu pfuru yeru iya g'ọ bu iya bu nna ngu. L'i mejeru unwoke, ka aburu nwata gẹ gu l'ẹphe bu unwune.

²Unwanyi ka aburu ogerenya bẹ ii-meje g'ẹphe bu ne ngu. L'iimejekwarupho unwanyi, ka ngu aburu nwata gẹ gu l'ẹphe bu unwune. Te emerwushikwa onwongu l'ẹhu phẹ.

Unwanyi, ji phẹ anọdu

³Kwabekwara unwanyi, ji phẹ anọdu ubvu; mbu ndu ọphu adudu g'ọ du phẹ ililekpoo.

⁴Teke o bu lẹ nwanyi, ji iya anọdu nweru unwegirima; ọzo unwu nwa-nwa; g'unwegirima ono nwata l'ọo ẹphebedua evukpoadaru ọzo leta ndu unuphu phẹ ẹnya; l'o nokwa iphe, gbaru ndu kẹ Chileke bu ono. Oo ya bu; g'ẹphe eshi nno melataru ndu nwuru phẹ nọ ree, ẹphe meru phẹ. O kwa iphe ono bu iphe, du ree l'iphu Chileke.

⁵Ole gę nwanyi, ji iya anọedu; ẹbe ọ dudu g'ọ dọ iya ililekpoo; ọphu ọ tọ dudu onye eleta iya ẹnya; bukwaru Chileke bẹ ọo-nọdu ele ẹnya l'ẹka. G'ọ tọ tu-gbejekwa ẹka l'anọdu epfu anọ Chileke eswe l'enyashi. Iphe, ọonoduje epfuru Chileke bọ g'ọ kwọọ ya lẹ mkpa.

⁶Nwanyi, ji iya anọedu ọphu anọdujeeppo eme iphe, bataru iya l'obu bẹ nwuhuakwaru anwuhu; l'ẹka ọ nọ ndzụ.

⁷Noo iphe, ii-pfuru phẹ bọ onoya; mbụ pfua ya kwata pfushiaru phẹ iya ike; k'ọphu ephe a-nọdu eme umere, gbaru phẹ nọ. Ọo ya bọ; g'ọ tọ dọ iphe, aa-ta phẹ ọta iya.

⁸Ọ -buru l'ọ nweru onye haru ndu ephe l'iya bọ; ọphu ooletadu phẹ ẹnya; kekekele ndu ọphu bọ ndibe phẹ gẹdegede; onye ono bukwa iphe, oogoshi bọ lẹ ya te ekwedu kẹ Kéreshi; mbụ l'onye te ekwedu kẹ Kéreshi bẹ gbekwa ka iya nọ mma.

⁹G'e te edejekwa ẹpha nwanyi, ji iya anọedu l'ẹkwo; mbụ onye ọphu teke anọ-rwudu ukporo apha ẹto lẹ mgboko; gbahaepho onye bọ nwoke lanu kpoloko bẹ ọ lujeru;

¹⁰waa nwanyi, aatu-dzuru ọnu iya; l'oome ree shii. G'ọ bukwaru nwanyi, hefutaru unwu iya ree; buru onye akwajẹ ẹbyaa ree; buru nwanyi, gudewaa mini kwọọ ndu-nso ọkpa; bya aburu nwanyi, yewaru ndu eje iphe-ẹhuka ẹka; bukwarupho onye wowaru onwiya yekọta l'eme iphe-oma mgburugburu kpoo.

¹¹Jikajekwa ede ẹpha nwanyi, ji iya anọedu, bukwa du nwẹpa. Noo kẹle ọobujeru teke ẹgu nwoke gutaeru phẹ phọ; ephe aghaar Kéreshi azu wata achọ g'ephe e-me je aluru ji ọzo.

¹²Ephe -mewa iya nno bukwa iya bọ lẹ Chileke a-nma phẹ ikpe l'ephe te emeedu iphe ono, ephe kweru Kéreshi ukwe ememe onoya.

¹³Teme ọzo buru l'ephe a-wata eme ẹnyiru; tsoru ekpuphe l'ulo l'ulo edophe gwerigwerigweri; buru o-jeru-opfu, 'e kuduru iya; epfugbaa iphe, agbakpodaaru phẹ l'epfufu.

¹⁴Nokwa g'ọ gude mu sọ gę nwanyi, ji iya anọedu, bukwa du nwẹpa je aluru ji ọzo; nwushia unwegirima; leta ulo iya ẹnya. Ọo ya bọ; g'onye ọhogu anyi ono te enwe iphe, ọo-huma anyi l'ẹhu gude epfubyishi anyi.

¹⁵L'ọ nwekwaru ndu ọphu hawarunu Kéreshi wata etso Nsetanu.

¹⁶Ọo ya bọ; ọ -duru nwoke ọzo nwanyi kweru kẹ Kéreshi, nweru abubu, ji iya anọedu ndzụ; g'onye ọbu letakwa abubu iya ono ẹnya. G'onye ono ta apakwaru mkpa ẹhu nwanyi ono bya ebo Chiochi. G'ọ bukwarupho ndu ọphu ji phẹ anọedu; ẹbe ephe amadu g'ephe e-me onwophe bẹ Chiochi a-nọduje eleta ẹnya.

Ndu e meru ọgerenya Chiochi

¹⁷Iphe, gbaru g'e meje iya bọ g'a kwabeje ndu e meru ọgerenya Chiochi ubvu ọkpobe akwabe; mbukwa ndu ọphu l'ejeru Chiochi ozi ree; kekekele kẹ ndu ono, kukeberu ẹhu asa opfu Chileke asasa; ezikwa iya phọ ezizi ono.

¹⁸Noo kele e deru iya l'ekwo-opfu Chileke su: “Te ekechijekwa eswi onu me o -nodu azoshiru ngu ereshi.” Bya asukwapho: “Onye akanya gbaru k'anata ugwo akanya iya.”

¹⁹O -buru l'o nweru onye suru l'onye e meru ogerenya Chiochi be meru eji; te eyekwaru onye obu onu; a -gufukwa l'a du ebo; ozoo eto gbaa ya ekebe iphe obu l'o meru iya eviya.

²⁰Ndu ophu, bu ndu eme eji be ii-bajeru mba l'edzudzu-oha. Oo ya bu ge ndu ophunapho atsuhukwanu ebvu.

²¹Mu nokwa l'iphu Chileke; me l'iphu Nnajiuphu, bu Jizosu Kereshi yee l'iphu unwu-jozi-imigwe ono, o hotaru ono epfushiru ngu iya ike su g'i mejekwa iphemiphe-a, mu epfuru ngu-a g'o ha; g'o to dukwa ophu ii-mephodoje. Ophu o dukwa iphe, ii-leje nemadzu enya l'iphu eme.

²²Rije-odakwa oriri; teme l'i byabe nemadzu aka l'ishi. G'eka ngu ta adujekwa l'iphe-eji, ndu ozo eme. Dobeekwapho onwongu oru.

²³O to buekwapho mini kpoloko bu iphe, ii-nguje. Ngutajekwa mee nwanshii m'obvu epho ngu ono; me ehu ba adu ike ngu onoya, bu iphe ono anoduje eme ngu tekenteke onoya.

²⁴O nweru ndu ejo-iphe, epe eme dabyiru eba; mbu o gbekwanu du g'o bu l'iphe-eji, epe eme be vuwaa phe uzo eje ge Chileke nmaa phe ikpe. O nwekwarupho ndu ophu nkephe akpoodaa upfu teme l'oo v0-lishihu.

²⁵Nokwapho g'eme ree du. O nweru ree, nemadzu e-me l'o buru ree, a tukoru ele l'anya. Teke o bu l'o nweru ree, e meru; ophu a humaduru iya nta; a -nonyakwapho be oo-tukokwaa v0-lishihukota.

1 Timoti 6

Ndu bu ohu

¹G'iphe, bu ndu bu ohu guje nnajiuphu, nwe phe nu le ndu gbaru g'a kwabeje phe ubvu; k'ophu e tee wotadu epha Chileke yee iphe ono, anyi ezi ono epfubyishi epfubyishi.

²G'ohu, ndu ophu nnajiuphu phe bu ke Kereshi; te ekojekwa phe okpa l'ishi; kele epe bu unwunna. G'ephe gbejchikwa kabakpo phe ro ejeshiru ozi ike; eshinu onye ono, nweru ohu ono kweru ke Kereshi; buru onye du Chileke l'obu teme o nodu anoduje emeru ohu iya ree gude ebu iya nggo ozi ono, oojeshiru iya ike ono. Noo iphe, ii-noduje ezi ezizi; anma okwa iya anmashia iya ike.

Ejo nzi waa okpobe eku

³Su-a; teke o bu l'o nweru onye ozo, byaru awata ezi iphe, gbaru iche; ophu iphe, oozi adagbaduru l'okpobe-opfu ono, bu opfu ke Nnajiuphu anyi, bu Jizosu Kereshi ono; onye obu jikafua iphe ono, anyi ziru le ke g'ee-shije etso Chileke ono;

⁴onye ono ekukwa onwiya ekuku l'ẹbe adu iphe, o maru. Iphe, yele onye ono eme bukwa ntumego; yee abaphe mba l'opfu, enwedu ishi; opfu buepho eme ge nemadzu nwejeru nwibe iya enya-pfurupfuru; adzo-phe enya; epfubyishi nwibe phe; yee anodu elephe nwibe phe ejo enya;

⁵me aloru opfu chie le mgbaka nwibe phe. Ndu ono bu ndu egomunggo phe dahwaru adzulakpa; bya abukwarupho ndu ta amadu okpobe-opfu ono. Ephe anoduje ari l'anuru Chileke opfu bu uzo, ephe e-shi rita urwu. Kpajeru egube ndu ono l'aphara.

⁶Obenu l'anuru Chileke opfu; yele iphe-ephuru-l'enya bukwa urwu, paru eka apaa.

⁷L'o to dukwa iphe, anyi gude bya mgboko-a; nokwapho g'o to dudu iphe, anyi e-gude eshi le mgboko ala.

⁸Oo ya bu; anyi -nwewaru nri bya enweru uwe; g'ono phujeru anyi l'enya.

⁹Obenu le ndu anoduje achu g'ee-shi g'ephe kpaa eku be ejo-iphe ono, ephe anoduje achu ono enwujeru ye l'eme iphe-aji. O buru iphe ono abujeru onya nmata phe. Ikpoto iphe, agu phe nu tukokpoerupho buru iphe-mmanu; teme o buru iya ahije phe onu l'oku; teme o nodu alotaje phe lo-mia l'eka ephe a-nodu mebyishihu; lakota l'iswi.

¹⁰O kwa eye enya l'okpoga bu ogbarabvu iphemiphe, bu ejo-iphe. O yekwaru ndu bu opfu l'oo l'ephe achu okpoga be o gude ephe shiswee uzo; paru ekwekwe, ephe kweru ke Kereshi paru haa. O bukwaru iya pho meru g'o gude ephe shi egube ono gude eka phe kpataru onwophe iphe-ehuka, du igwerigwe.

Iphe Timoti e-meje

¹¹Ole-a; gubedua, bu onye ke Chileke-a; gbalakwaaru egube iphe ono g'o ha; kukebe ehu buru onye pfuberekoto; akwabeh Chileke ubvu; nweru ekweta; yee n-yemobu; me nshirima; yee eme odoo.

¹²Gude ekweta lwa ogu ono lwa ndu ojejoje, bu iphe, e kuru ngu oku iya ono; teme i pfuru l'edzudzu oha gbua ya tororo su l'i kwewaru ke Kereshi ono.

¹³Oo l'iphu Chileke ono, bu Chileke ophu anuje iphemiphe ndu; waa l'iphu Kereshi ono, pfuru l'iphu Payileti gbaaru okpobe-opfu ono ekebe ono; oo l'iphu phe be mu no epfu iya epfushiru ngu iya ike su ngu:

¹⁴g'i tukojeekwapho okwa okwa-a, mu anmaru ngu g'o ha-a tsokotaje. G'o to dukwa eka ii-tsoswe iya me eka lanu; oo ya bu g'o too dukwanu eka aa-ta ngu uta jeye teke Nnajiuphu anyi, bu Jizosu Kereshi a-bya ozo.

¹⁵O -rwuepho be Chileke e-me-a g'a huma-dzuru Kereshi obu; mbu onye ono, dukota ree; bya edzukota oke l'ime onwiya; buru Eze ndu eze; bya aburu Nnajiuphu ndu bu nnajiuphu.

¹⁶Oo ya kpoloko kpekpu bu onye ta abyadu anwuhu anwuhu. Eka o bu be iphoru, du iya nu te ekwejedu ge nemadzu zakube iya ntse. O to dukwa nemadzu igbakoroshienyi gudejewaa enya huma iya; ophu o dukwa onye byaru ahuma iya nu.

G'ò buru iya bẹ ndiphe a-kwabeje ùbvù; ike ono, te enwedu abvùbvù ono aburu nkiya. Nokwa g'ò dù-o!

17A bya lẹ kẹ ndu nweru iphe lẹ mgboko-a; karu phẹ g'ephe te egudejekwa iya ku onwophe; ophu ephe edobekwa obu l'iphe ono, adudu g'oo-nọ-beru onoya. G'ephe dobechia obu phẹ lẹ Chileke ono, bu omeluko onoya. Chileke ono anukotaje anyi iphemiphe; nu iya anyi k'anyinyi g'oomee g'ehu tsomahu anyi.

18Gẹ ndu nweru iphe meje iphe, dù ree; mbu-a; g'ephe mejekpoo iphe, dù ree tekenteke; g'ephe buru omeluko; l'ò guje phẹ egu g'ephe lẹ ndu ozo gbaru mgbà l'iphe phẹ.

19Oo ephe -nọdu eme nno l'ò buru iya bu l'ephe nweru okpobe iphe. Noo l'ephe e-shi egube ono kpata okpobe iphe kuberu onwophe; mbu okpobe iphe ophu a-nọduwaru phẹ rọ jeyewaruro l'uzo iphu. Oo ya bu; o -rwuepho; g'ephe anata ndzu ono, bu okpobe ndzu ono.

20Su-a; jiko Timoti; kwabeekwarupho iphe ono, e yeru ngu l'eka ono enya. G'i letaje enya g'i ti nọdu epfuphe mkpokoro opfu, bu iphe eswe; ophu i nọdukwa atuphe mkpokoro ego, ndiphe ahajeru su l'ò bu mmamiphe.

21O nweru ndu anọduje arị l'ephe maru iphe; ephe egude nno phua ọzo ekwekwe ono, anyi kweru ono. Gẹ Chileke meeru unu eze-iphe-oma. Nokwa g'ò dù.

2 Timoti

2 Timoti 1

¹Oo mube Pọlu; onye-ishi-ozì Kéreshi Jizọsu lẹ g'ọ bụ uche Chileke l'ede ẹkwo-a; gẹ mu gude pfiaru ndiphe l'ophu k'ọkpobe ndzụ ono, Chileke kweru ukwe lẹ ya e-shi l'ẹka Kéreshi Jizọsu nụ anyi ono.

²Onye mu ede iya anụ bụ gube nwa mu ono, mu yeru obu, bụ Timoti. Gẹ Chileke, bụ Nna; yẹ Nnajiuphu anyi, bụ Kéreshi Jizọsu meeru ngu eze-iphe-oma; phukwaaru ngu pho obu-imemini; mekwapho g'ẹhu dụ ngu guu.

Pọlu ekele Chileke bya aadukwapho Timoti obu

³Mu etu Chileke ẹpha; mbụ onye mu gude obu mu g'ọ ha ejeru ozi gẹ nna mu oche phe jeru iya; ophu ọowadu mu obu mini. Iphe, bukpuo tekenteke, mu epfu anụ Chileke l'eswe mẹ l'enyashi bẹ mu anyatajẹ tua ya ẹpha l'opfu ẹhu ngu.

⁴Timoti; mu nyatakwaru-a ẹnya-mini ono, ghakashihuru ngu l'ẹnya ono. O bụru iphe ono meru g'ọ gude oghoroko ngu dụ mu shii. Mbụ-a; ọ gukwa mu g'a sụ lẹ mu lẹ ngu humaru ọzo k'ophu ẹhu-utso e-jikwanu mu ọkpoma.

⁵Mu anyatajẹkwa ọkpobe ekwekwe ono, i kweru kẹ Nnajiuphu anyi ono. Ekwekwe ono bẹ ne ngu oche, bụ Loyisu yẹ nene ngu, bụ Yunayisu vuhaadaa ngu rọ ọzo kwetaadaa; o dokwaa mu pho ẹnya l'o nokwapho gẹ gubedua kwetaru.

⁶Noo g'ọ gude mu nọdu anyataru ngu sụ g'i mekwaa iphe-oma ono g'ọ ree ire; mbụ iphe-oma ono, Chileke shi l'ẹka ono, mu byaberu ngu l'ishi nụ ngu teke ono, mu pfuru nụ Chileke l'opfu ẹhu ngu ono.

⁷Lẹ Unme-dụ-Nsọ ophu Chileke nuru anyi ta abukwa Unme, l'e-me anyi g'anyi tsuje ebvu. O kwa Unme a-nuje anyi ike bya aburu Unme n-yemobu; bya aburu Unme emejkwapho g'anyi dụ ike sedekotaje onwanyi.

⁸Oo ya bụ; g'ọ tọ dukwa teke iisoje ẹnya epfuru ndiphe l'i bụ onye kẹ Nnajiuphu anyi ono. Ophu iphere ẹhu mbedua adujekwa ngu; mbụ mbedua ono, a turu mkporo l'opfu ẹhu Nnajiuphu anyi ono. Iphe, ii-mechia bukwa g'i jee okè iphe-ehuka nkengu l'iphe-ehuka ono, anyi eje gude ese iswi ozi-oma ono. Chileke bẹ e-mekwaa g'i dụ ike ejeje iya.

⁹Oo Chileke ono bẹ bụ onye dzoru anyi; bya eku anyi oku, dụ nsọ ono; ọ tọ bụdu iphe, anyi setaru l'akanya; ọ bụ eze-iphe-oma, bụ iphe, ọ tubehawaru l'o noo gẹ ya l'eme iya. Ono bụru iphe, ọ gbẹ l'ẹka Kéreshi Jizọsu meeru anyi teme mgboko dụ.

¹⁰Ole nta-a bẹ ọ byaru emee: a huma-dzuru eze-iphe-oma ono; kẹle Kéreshi Jizọsu ono, bụ Onye-Ndzota anyi ono bẹ byawaru eliphe-a bya emebiyi waa ike k'anwuhu. Nta-a bẹ o shiwaa l'ozì-oma ono mee g'ahuma-dzuru ndzụ ono; mbụ ndzụ ophu bụ a - dzuwaru iya; a taa nwuhubaedu anwuhu.

¹¹O bụru iya bẹ a hotaru mu gẹ mu saje àsàsà; mu abukwarupho onye-ishi-ozì iya; bụru onye ezi iphe ezizi.

¹²Q kwa iphe ono meru g'o gude mu nòdu ejekotakpoo iphe-ehuka-a, mu eje-a; ophu o bũdu l'iphere iya aduje mu; noo le mu maru onye mu kweru nkiya; teme o doo mu enya ree l'oo-du ike kwakobe iphe ono, mu yeru iya l'eka ono jeye mboku ono.

¹³Gudeshiekwapho okpobe-opfu ono, i nũmaru mu l'onu ono; g'o buru iya a-nodu akpo-ziru ngu uzo g'ii-gudeje epfu opfu; kweta iya; nodu Kereshi Jizosu l'eka yee nwibe ngu obu.

¹⁴Kwabekwaru eguru iphe ono, e yeru ngu l'eka ono enya. Oo Unme-du-Nso ono, bu l'ime anyi ono e-me g'i du ike letakota iya enya.

¹⁵? Q kwa l'i maru le ndu Eshiya, g'ephe ha be tukoakwaru g'ephe ha gbakashihu paru mu haa; mbu je akpaa le Fayigelosu yee Hemojinizu.

¹⁶Ge Nnajiuphu phuru ndibe Onesiforosu obu-imemini; kele o shi anoduje agba mu unme; ophu iphere mu adujedu iya ge mu no mkporo-a.

¹⁷Teke o beberu byarwuta Romu be o wataru mu pho achoshi ike jeye teke o humaru mu.

¹⁸Ge Nnajiuphu jiko yekwaru iya aka; ge Chileke phuru iya obu-imemini mboku onoya; gubedua l'onwongu mawaru-a g'o yetaberu mu aka le Efesos.

2 Timoti 2

Okpobe onye ojogu ke Kereshi

¹Oo ya bu; gubedua, bu nwa mu; ge Chileke mee g'i gude eze-iphe-oma ono, shi l'eka Kereshi Jizosu ono shihu ike.

²I numawaru-a iphemiphe ono, mu pfuru l'edzudzu-oha ono. Woru iya ye l'eka ndu goshiwaru l'ephe gbaru g'e gude ire phe aka bukwanu ndu a-du ike zikwaa ya pho ndu ozo.

³Takwaa nshi jee okè iphe-ehuka nkengu l'opfu eh Kereshi Jizosu, bu iphe, gbaru okpobe onye ojogu ke Kereshi.

⁴Q to dukwa onye ojogu, no l'eka ugu ekpo oku, ewojeru onwiya je eye l'akanya k'eliphe-a; gbahaa g'o mee iphe, du onye hotaru iya nu ono ree.

⁵Ozo buru l'onye agba oso be e te bujekwa nggo k'onye kachaa agbagba me o -bũdu l'o gbaru iya g'aagbaje iya.

⁶Oo onye akpo opfu, ejeshi ozi ike be o gbaru ke g'o vujeru uzo ria iphe, o metaru l'opfu iya obu.

⁷Rikwaa iphemiphe ono, mu pfuru ono ariri. Ge Nnajiuphu yetakwaru ngu aka g'iphemiphe dokota ngu enya.

⁸Nyatakwa Jizosu Kereshi ono, Chileke meru: o shi l'onwu teta dzuru ndzu ono. Jizosu ono bu eri Dévidi; o buru iphe ono bukotakpoo iphe ozi-oma ono, mu ezi ono epfukpo.

⁹Q kwa l'oo le mu ezi ozi-oma ono meru g'o gude mu nodu eje iphe-ehuka-a, mu eje-a; g'o bu le mu bu onye meru ejo-iphe. Ole o bu; a -tuchaa mu mkporo; ? a tuhunuru ozi-oma ono mkporo?

¹⁰Noo g'o gude mu gude k'ehu ndu Chileke hotaru atagbukota iphemiphe ono le nshi; oo ya bu ge Chileke eshikwanu l'eka Kereshi dzokwaa phe pho; shi egube ono nu phe ndzu ojeje, du biribiri.

¹¹Opfu-a be bukwa opfu, e gude aka, pfuru su: O -buru l'anyi le Kereshi be tukoru nwuhukota be anyi l'ia a-tukokwapho nodukota ndzu.

¹²O -buru l'anyi atagbukotaje iphemiphe le nshi be anyi le Jizosu a-tukokwapho buru eze. O -buru l'anyi suru l'anyi ta amadu onye o bu be oo-sukwapho le ya ta amadu ndu anyi bu.

¹³O -buru l'anyi ta apfushijedu ike l'iphe, anyi pfuru be yebdua apfushijekwa ike l'iphe, o pfuru. Kele o to gbanwejedu iphe, o pfuru.

Onye e kweru l'oojerwe ozi ejerwe

¹⁴Nyatajeru onyemonye iphemiphe ono; l'i noduje l'iphe Chileke pfuaru phe iya pfushiaru phe iya ike su phe g'ephe ta nodujekwa abaphe mba l'opfu, enweddu ishi. O to dukwa urwu du iya nu. O 'ekwapho emebyi be oomebyije ndu anu iya nu.

¹⁵Kukebe ehugoshije phe le Chileke hukotawaru ngu ama bya agua ngu l'onye gbaru ke g'i jejeru iya ozi; mbu l'i bu onye-ozi, iphere ozi, ooje adudu; teme i buru onye anoduje ezirwe okpobe-opfu ono ezirwe.

¹⁶L'i zejeru onwongu g'i ti yijeshi le ndu epfu mkpokoro opfu, bu iphe eswe. Noo kele egube opfu ono e-me ndu anu iya nu: ephe alaa azu azu; ephe te eyeheduru Chileke ubvu.

¹⁷Iphe, ephe ezi aduje g'onwo, ababushi anu. Ndu haru yiru le ndu ono, epfu iphe ono bu Hayimeniyosu yee Filitosu.

¹⁸Ephe gwobewaru etso okpobe-opfu ono; kele ephe suru le ndu nwuhuru anwuhu gbeshiwanu l'onwu teta dzuru ndzu. Ephe gude egube ono nweru ndu ophu ephe haru enwunga enwunga; gude nno nwufu phe l'ekwekwe ono, ephe kweru ke Chileke ono.

¹⁹Ole okpa-ulo ono, shihuru ike ono, Chileke turu ono be bukwanu 'enwubata enwubata. Iphe-ohubama, Chileke deru l'okpa-ulo ono bu: Nnajiuphu maru ndu bu ndu nkiya. Iphe ozo, o dekwaru iya pho bu: G'iphe, bukpo onye suru le ya bu ke Nnajiuphu anyi; wofukwapho aka l'eme ejo-iphe.

²⁰“Eze-ulo, ha shii ta abukwapho udu ite, du iche iche, e gude mkpola ye ope, vu aswa kpua be aduje iya nu kpoloko. Iphe, a pyiru l'oshi me ophu a kpuru l'urwa adujechakwaa ya. Ndu aburu iphe, aanodu akwabe ubvu; ndu abuerupho iphe, e gude eme iphe.

²¹Oo ya bu; o -buru l'o nweru onye safukotaru onwiya ejo-iphe ono, mu gushiru ono; o kwa iya bu l'onye ono a-buru ite, aakwabè ùbvù ono, e doru nsò o buru iphe, e gude ejeru Nnajiuphu ozi; teme edozia ya g'e gude iya jeje iphemiphe, du ree.

²²Oo ya bu; gbalajèru ègu eme ejo-iphe ono, l'anòduje agu unwokorobya ono. Iphe, ii-mechia bu g'i buru onye pfuberekoto; l'i kweta kè Kéreshi; nweru n-yemobu; nweru nchi-adu-doo unu lè ndu ono, egudeje obu-iphóró akpòku Nnajiuphu ono.

²³Te eyejekwa onu l'opfu ntumego eswe, enwedu ishi; l'i maanaru-a l'egube iphe ono bè buèpho uswo bè e gudeje iya aswo.

²⁴L'onye-ozi kè Nnajiuphu bè bufutajekwa onye ta aswojedu uswo; onye emejeru onyemonye odoo; onye maru g'ezije iphe; buru onye atajèru iphe nshi.

²⁵O bufutaje onye ewozeje onwiya ali; akpo-ziru ndu agbajè iya opfu agbagba uzo. Kèle o nweru g'oo-me Chileke agbè yeru phè èka; izimanu ejo-iphe ono alwa phè azu; èphe alwapfuta Chileke; èphe abya amakotaru okpobe-opfu onoya.

²⁶Oo ya bu; enya abya ekosahu phè teke ono; èphe emefu l'ónyà ono, Obutuswe nmataru phè onoya, bu iya shi mee phè: èphe nodu eme iphe, bu uche Obutuswe onoya.”

2 Timoti 3

Umere ndiphe lè mbòku ikpazu

¹“Su-a; iphe lanu, ii-maru okpobe amaru bu l'o -rwuepho teke k'ikpazu bè okpobe iphe-èhuka a-byakwa.

²Noo lè teke ono bè ndiphe a-bujeerupho onwophe bè èphe e-yeje obu kpoloko; èphe aburu ndu nchamenya okpoga; buru ndu atu onu onwophe; buru ndu eku onwophe ekuku; buru ndu anòduje ephu ndu ozo iphu; ndu karikotaru ne lè nna, nwuru phè nu èka; ndu amadu iphe-oma, e meru phè; ndu ta adudu iphe, adujeru phè lè nsò ememe.

³No iya; èphe a-buru ndu nemadzu du ashì; ndu iphe ta abvujedu l'obu; ndu atukobeje nemadzu ibe phè iphe, o meduru; ndu te esedejedu onwophe; buru ndu eme enari; ndu iphe, du ree aduje ashì.

⁴Èphe a-buru o-deru-oye; buru 'anuma anuma phè; buru ndu etse etsetse; èphe aburu ndu ka eye iphe-utso obu eme lè Chileke;

⁵ndu anòduje eme g'èphe kweru kè Chileke l'èbe èphe ekweta lè Chileke ere ire. Jiko pakwaru egube ndu ono haa.

⁶“Ndu du nno bè bu phè l'ahajèru abaphe l'ulo l'ulo edusweshi unwanyi, enwedu egomunggo; mbu unwanyi metawaru ejo-iphe; o kwowaru phè èhu; iphe, l'alo-phu egube unwanyi ono buru ègu ejo-iphe, dugbaa iche iche, anòduje agu phè nu.

⁷Ègube unwanyi ono bè onoduje eheshi ihee ike; mbu g'èphe nwuta iphe; ole èphe ta abyakwanu adu ike takebe marweta okpobe-opfu onoya.

⁸Ndu ono, l'anọduje eduphushi unwanyi ono bẹ kwachiru ọkpobe-opfu ono ọzo gẹ Jianesu yẹe Jiambirisu kwachiru iya Mosisu teke ndiche ono. Ẹphe bu ndu egomunggo phe dahwaru adzulakpa; ekwekwe, ẹphe kweru bẹ bu ekwekwe, daru l'ẹba l'anya ke Chileke.

⁹Ole ndu ono ta adudu ẹka ẹphe ejebearu; onyemonye atuko humakota l'ẹphe bu ndu eswe; mbukwapho g'onyemonye huma-dzuru le Jianesu yẹe Jiambirisu bu ndu eswe."

Ọkwa, Ọlu nmaru gude kpochia ozi-a ishi

¹⁰"Ole gubedua mawaru iphe, mu ezi; ọkpobe amaru; bya amaru umere mu; maru iphe, mu tuberu; maru ekweta mu; maru ge mu ejebu iphe-ehuka; maru n-yemobu mu; maru nshirima mu;

¹¹maru mkpamehu ono, a kpakotakpooru mu ono g'o ha; mekpoo iphe-ehuka ono, mu jebaberu onoya, bu iphe, tukoru dapfukota mu le Antiyoku; waa le Ayikoniyomu; waa le Lisutura. Su-a; mkpamehu, dapfutakotaru mu nu ta abukwa iphe epfufu! Ole Nnajiuphu dzokotakwaru mu l'iphemiphe onoya.

¹²Mbu-a; iphe, bukpo ndu bu ndu oogu g'ẹphe le Kereshi Jizosu tugba buru nanu; g'ẹphe shi egube ono nodu ndzu, du Chileke ree bẹ aa-kpakotakwa eh.

¹³Obenu le ndu bu ndu eme ejo-iphe; me ndu anọduje agho ugho; g'ẹphe ha bẹ anoduepho aka eji akaka eje l'eme ejo-iphe, ẹphe eme; ẹphe egude nno duphushia ndu ozo; ndu ozo eduphushikwapho ephebedua.

¹⁴Ole o bu; gubedua l'onwongu; pfushiekwapho ike l'okpobe-opfu ono, e ziru ngu ono, bu iya bu iphe, i kwetaru; opfu l'i makotaru ndu bu phe ziru ngu iya.

¹⁵L'i nyatajekwapho l'i shi le nwata makotaru iphe, e deru l'ekwo-opfu Chileke. Oo iphe ono, e deru l'ekwo-opfu Chileke ono, du nsọ ono bẹ a-du ike mee ngu l'i nweru mmamiphe k'ophu Chileke e-shi l'ekwekwe, i kweru ke Kereshi Jizosu dzoo ngu.

¹⁶Iphe, bu iphe, e deru l'ekwo-opfu Chileke bẹ shikotakwa l'eka Unme Chileke. O du ree l'egudeje zia okpobe-opfu ono; me g'e gudeje iya goshije nemadzu ẹka o meru eji; waa g'e gudeje iya agbazi egomunggo; waa g'e gude iya mefutaje nemadzu g'onye obu buru onye pfuberekoto l'iphu Chileke.

¹⁷Oo ya bu g'onye ke Chileke aburu onye a kwakobewaru okpobe akwakobe k'ejeru Chileke ozi ono, du ree ono, duru iya nu ono g'oduhabe."

2 Timoti 4

¹Su-a; mu noakwa l'iphu Chileke yẹe Kereshi Jizosu anmaru ngu okwa anmashiru ngu iya ike su ngu g'i nyatakwa le Kereshi Jizosu ono, bu iya bu onye e-kpe ndu no ndzu me ndu nwuhuru anwuhu ikpe ono a-lwakwa azu ujiku lanu bya egoshi l'oo ya bu eze.

²Sajekwa ozi-oma Chileke ono kpaa kpaa; m'o du ndu iisaru iya nphe anuma-o; m'o bu l'o to dudu phe nphe-o; letaekwapho ozi ngu enya. Goshije nemadzu ẹka onye obu

mesweru; baje ru onye meru eji mba; gudejekpøekwapho ota-nshi meje g'obu shihu phe ike; ebe i hajekwa phe ezi iphe.

³Noo kele o nweru teke ndiphe e-mechaa jikaaha okpobe-opfu ono, anyi ezi ono; o buerupho egu ejo-iphe, agu phe nu be ephe a-gbatsoru. Ephe achikoo ikpoto ndu ezi iphe ozo su g'ephe bya bya ezije phe iphe, atso phe utso le nchi anuma.

⁴Ephe te ekweedu angabe nchi l'okpobe-opfu onoya. O buru ophu ephe a-nodu anga nchi bu ako-iphè.

⁵Ole-a; gubedua l'onwongu; sedekotajekwa onwongu l'iphemiphe kpo; tajekwaru iphe-ehuka nshi; l'isà ozi-oma ono asàsà; ejekota ozi, gbaru ngu nu; l'i bu onye-ozima ke Chileke.

⁶Le mbedua be bukwa iphe-ngweja; teme o gbabewaa mu l'alala.

⁷Mu lwuakwaru okpobe ugu ono lwu-ghee. Mu jegheakwaru ozi mu. Mu pfushiepho ike l'ekwekwe, mu kweru ke Kéreshi.

⁸Iphe, phoduru nu nta-a buwaa ge Chileke bua mu obunggo, o doberu mu; mbu le Nnajiuphu ono, l'ekpeje ikpe nhamunha ono be a-gu mu l'onye pfuberekoto mboku onoya. Mbu o to bulekwa mu-a kpurumu be oo-bu nggo ono; oo-bukota iya iphe, bukpoo ndu gude obu phe g'o ha kwaberu abyabya iya.

Ozi, Pølu ezi Timoti k'iche

⁹Maekwarupho g'ii-me byapfuta mu egwegwa.

¹⁰Kele Dimasu be pakwaru mu haa tugbushia; kele iphe ke mgboko-a be ka iya ree eme le Chileke. Nta-a be o tugbuwaru jeshia Tesalonayika. Keresensu be jeru Galeshiya. Tayitosu jee Dalumesha.

¹¹Nta-a buwaa Luku kpoloko be mu ya no. Ge gu le Maku swikwaru jiko me i -byaje kele mkpa iya dukwaru mu shii; g'o bya eyetajeru mu aka.

¹²Tikikosu be mu ziru Efesosu.

¹³Teke i byajeru; chitakwaru mu uwe-ukpo mu pho, mu haru l'ibe Kaposu le Tirowasu pho. L'i chitakwaru mu pho iphe, bukpoo ekwo ono g'o ha; kekele ke ndu ophu e gude akpo-aturu mee.

¹⁴Aleguzanda ophu akpuje uzu be mekwaru mu ejo-iphe, ha shii. Oo Nnajiuphu be apfukota iya ugwo iphe, o meru mu.

¹⁵Kpakwaru iya l'aphara gubedua l'onwongu; l'o kwatakwaru kwachia ozi-a, anyi ezi a uzo.

¹⁶Edo mbu, mu vuchakpo uzo pfuru doo l'ulo-ikpe ono ta adukwa g'o ka mma l'oo onye lanu shi agba eyeru mu nu. Onyemonye tukoerupho buhaa mu. Ge Chileke jiko ta agukwaru iya yeru phe l'o bu iphe-eji, ephe mee ya.

¹⁷Oo Nnajiuphu bẹ bụ onye p̄f̄u-kube mu n̄u eyeru mu ọkpukpu ike; ọo ya bụ k'ophu mu e-zikota ozi ono g'ọ ha gẹ ndiphe mgburugburu n̄uma-dzuru iya. Ọ kwa iya pho bụ onye nafutaru mu l'onu oduma.

¹⁸Ọ kwapho Nnajiuphu ono bẹ l'a-nafuta mu l'iphe, bukpo ejo-iphe mgburugburu kpo; dua mu gele gele je edobe l'eka ọ bụ eze l'imigwe. G'ajaja buru nkiya jasụ le tuutuutu le m̄imiimii. Nokwa g'ọ d̄u.

Ekele, P̄olu gude kpochia ozi iya ishi

¹⁹Keleru mu Pyirisuka yee Akwila me ndibe Onesiforosu.

²⁰Erasutosu nokwa le Korentu. Tirofimosu bẹ mu hakwaru le Militosu; kele iphe eme iya.

²¹Kukebekwa ehu byaadaa temanu l'o rwua l'udzumini. Yubulosu l'ekekwa ngu ro. Ọ nodu ekekwa ngu pho mbu Pudensu yee Layinosu; yefua Kulodiya; mewaro unwunna anyi ndu ophuu g'ephe ha.

²²Gẹ Nnajiuphu, bụ Jizosu Kereshi dobekwa ngu ndzu-o. Chileke emeeru unu g'unu ha eze-iphe-oma. Nokwa g'ọ d̄u.

Tayitōsu

Tayitōsu 1

¹Ekwo-ozī ọwa-a shi l'ẹka mube Pọlu, bụ onye ejeru Chileke ozi bya aburu onye-ishi-ozī Jizosu Kéreshi. Chileke hotaru mu bya ezia mu gẹ mu bya emee gẹ ndu Chileke hotaru kabaa ya anoshi ike l'ẹka; mu emekwaapho g'ephē maru iphe, bụ okpobe-opfu kẹ Chileke; g'ephē atsujē iya ebvu lẹ ndzụ-a, anyi nọ-a;

²noo l'anyi ele ẹnya ndzụ ojejoje. Ndzụ ojejoje ono bẹ Chileke, onye ta adzujedu ụka pfuhawarurọ tẹme mgboko dụ; sụ lẹ ya a-nụ anyi.

³O be teke ọ gbaru; Chileke, bụ Onye-Ndzota anyi mee g'e shi l'ozī-oma iya maru ndzụ ono, o kweru ukwe iya ono. Ozi-oma iya ono bẹ o woru ye mu l'ẹka sụ gẹ mu tōwashiaru iya ndiphe g'o doo phẹ ẹnya.

⁴Mu nọdu ede ekwo-a anụ ngu Tayitōsu. I bụ okpobe nwa mu; opfu lẹ mu lẹ ngu kwetarū iphe lanū! Gẹ Chileke, bụ Nna; waa Kéreshi, bụ Jizosu bya aburu Onye-Ndzota anyi meeru ngu eze-iphe-oma; mee g'ẹhu dụ ngu guu.

Ozi Tayitōsu lẹ Kiritu

⁵Iphe, mu gude haa ngu lẹ Kiritu bukwa g'i dozia iphe, phoduru nū; waa g'i hota ndu a-buru ọgerenya Chiochi lẹ mkpukpu lẹ mkpukpu gẹ mu pfuhawaru ngu ono.

⁶G'onye ọgerenya Chiochi bukwaru onye a ta maduru ejo ẹka; onye alū nwanyị lanū; onye unwegirima iya wowaru onwophe ye Kéreshi l'ẹka; ophu ephe adudu gaphugaphugaphu; tẹme ophu ephe akpadu opfu.

⁷L'onye-ishi Chiochi bufutajekwa onye uta adudu lẹ ndzụ iya; eshinu ọ bụ onye-ishi, eleta ozi Chileke ẹnya. Onye abudu opfu-nkiya-anu-nkiya; ophu ọ budu onye obu-oku; ophu ọ budu onye anguje mee g'ọ tsu iya atsutsu; onye te emedu ehuka; ophu onodujedu achọ urwu l'uzo, adudu ree.

⁸Oo g'ọ bụ-chiaru onye bụ ọ-kwa-ẹbyaa; onye maru l'iphe, dū ree bẹ dū ree; onye nweru egomunggo; onye pfuberekoto; bya adu nsọ; bya aburu onye esede onwiya.

⁹Onye ono bufutaje onye nọ-shiru ike l'opfu ono, a maru l'ọ gbaru k'egude ẹka ono g'e ziru iya ya; g'oo-dū ike gude ezi okpobe iphe ono, oozi ono dushia ndu ọzo obu ike; tẹme oogoshi ndu jikaru iphe, oozi ẹka o jeberu; ụzo kpọ-swehu phẹ.

¹⁰Kele ọ duru ndu dū igwerigwe, bụ okariēka; ndu epfu mkpokoro opfu gude aghota ndu ọzo l'ugho; kekeke kẹ ndu k'ono, e buje ubvù ono.

¹¹G'a kpọ-bujeru opfu ye egube ndu ono l'onu; kele ephe egudeje ezi iphe, ephe tege zidu gbaghashia unuphu l'ophu g'eeshi g'ephē erita urwu, apfuduru oto.

¹²L'onye lanū lẹ ndu Kiritu, bụ onye ephe sūru l'ọ bụ onye agbaję eja sukwaru: “Ndu Kiritu shi lẹ mbu buru atukporoko; ephe bụ ejo anu-egbudu; ndu ẹnirū, iphe ka utso l'onu.”

¹³Iphe nwoke ono pfuru buru okpobe-opfu; oo ya bu; bashijekwaru phe mba ike; g'ekweta phe aburu okpobe iya.

¹⁴G'ephe ta angahe nchi l'ako-iphè ndu Jiu; ozoo ekemu, ndu jikaru okpobe-opfu turu l'onwophe.

¹⁵Ndu obu guru iphóró be iphemiphe guru iphóró. Obenu le ndu merwushiru onwophe emerwushi; mbu ndu te ekwedu ke Kéreshi; ta adudu iphe, 'abudu phe nsò nsò. Oriri phe rwuhuru arwuhu; ophu ejo-iphe awajehedu phe obu mini.

¹⁶Ephe anoduje epfu l'onu l'ephe maru Chileke; ole ephe egudeje umere phe egoshi l'ephe ta amadu iya. Ephe du ashi bya aburu ndu ta nudu iphe le nchi; bya buru ogalemkpa, adudu iphe, du ree, ephe dakafuru ememe.

Tayitosu 2

Okpobe-opfu, eezi ezizi

¹Obenu gubedua l'onwongu; g'iphe, iizi yele okpobe-opfu, eezi ezizi dagbakwa.

²Zia unwoke ndu bu ogerenya g'iphe, ephe eme doje phe enya; g'ephe meje umere, egoshi l'o gbaru g'e yejeru phe ubvu; g'ephe sedeje onwophe; g'ekweta, ephe kwetaru ke Kéreshi; me eye obu phe; me atanshi phe buru okpobe iya.

³G'i karu unwanyi ogerenya kwapho g'ephe meje umere, egoshi le Chileke duru phe le nsò; g'ephe ta abukwaru ndu asulasu; ophu ephe angunukajeshi mee; o chia g'ephe zije iphe, du ree.

⁴Oo ya bu; g'ephe eshi egube ono zua unwanyi ophu bukwadu nwepa g'iphe, ephe eme doje phe enya; ephe eyeje ji phe waa unwegirima phe obu.

⁵Ephe enweru egomunggo; dobe onwophe oru; kwakobeje ulo phe; buru ndu obu oma; buru ndu anuru ji phe opfu; g'e te egude iswi ehuhu phe pfubyishiahaa opfu ke Chileke epfubyishi.

⁶Nokwapho g'ii-pfuru unwokorobya g'ephe sedeje onwophe.

⁷G'o duhabe; gubedua l'onwongu l'a-buru onye e-letaje enya eme umere oma; liizije iphe, doru risaa; gbanwuje ehuhu gude ire-lanu zije iya okpobe ezizi.

⁸Pfuje opfu, nweru ishi; mbu opfu, aata avodu echi; g'ii-gude egube ono mee ndu epfuru ngu nu iphe-iphere; eshinu ephe taa maeduru ejo-iphe, ephe e-gude epfuru anyi.

⁹Pfujeru ndu bu ohu g'ephe nujeru ndu gbaru phe nu opfu; g'iphemiphe, ephe eme jije ndu gbaru phe nu epho; g'ephe ta awojeshi phe opfu;

¹⁰ophu ephe ezikwa iphuru. Oo g'ephe goshije l'ephe bu ndu gbaru ke g'e gude ire phe eka okpobe egude l'iphemiphe. Oo ya bu; g'ephe egudekota umere phe g'o ha kutsee iphe, eezi ezizi ke Chileke, bu iya bu Onye-Ndzota anyi ono.

¹¹Noo le Chileke goshiwaru eze-iphe-oma iya, o gude adzo onyemonye.

¹²Eze-iphe-oma ophu ezi anyi g'anyi e-shi haa anodu ndzu, ubvu Chileke adudu; me g'anyi e-shi haa egu ejo-iphe ke mgboko-a; buru ndu esedeje onwanyi; ndu pfuberekoto; waa ndu eyejeru Chileke ubvu le mgboko-a.

¹³Anyi noakwa kwaberu mboku ehu-utso ono, bu iphe, anyi ele enya iya ono. Oo mboku ono e-goshi odu-biribiri ke Okalibe Chileke ono, bu Onye-Ndzota anyi, bu iya bu Jizosu Kereshi.

¹⁴Onye woru onwiya nu l'iswi ehu anyi g'oo-shi egube ono gbata anyi l'eka iphe-eji; waa g'o saa obu anyi g'anyi buru nkiya; mee anyi ndibe iya; ndu eme oma anoduje ehe ihee.

¹⁵Su-a; tuko iphe ono pfushije; gude iya kasaa nemadzu nchi; gudekwa iya pho goshije nemadzu eka o mesweru; gude iya duphuta iya azu. G'o to dukwa onye a-su l'o to dudu iphe, i bu.

Tayitosu 3

Umere, gbaru ndu ke Kereshi

¹Nyatajeru ndiphe g'ephe noduje ndu-ishi waa ndu-mbekee l'eka; meje iphe, ephe suru g'e meje; g'ephe buru ndu doziru onwophe k'eje iphe, bukpo ozi, geru asa.

²G'o to dukwa onye ephe e-pfujeru ejo opfu; g'ephe ta aswojekwa uswo; g'ephe buchiaru ndu du agu; ephe emejeru onyemonye odo.

³L'anyibedua l'onwanyi dukwaru teke anyi shi buru ndu eswe; buru ndu ta adudu onye ephe anuru opfu; ndu e dusweru uzo ke Kereshi; ndu shi buru ohu egu ejo-iphe, anoduje agugbaa nemadzu me ohu ekpiri iphe, dugbaa iche iche. Iphe, anyi shi eshibeje ite iya mboku-mboku buerupho ejo oriri waa enya-pfurupfuru; anyibe ndu shi du ndu ozo ash; teme nemadzu ibe anyi dukwapho anyi ash.

⁴O be teke Chileke, bu Onye-Ndzota anyi goshiru anyi obu omaa ya waa g'o yeberu anyi obu;

⁵o dzota anyi; ophu o bukwa ke l'oo iphe, anyi gude eme oma meta; obenu l'o buepho obu-imemini, o phuru anyi be o gude dzota anyi. Adzota ono shi l'asasa, o saru obu anyi ge Unme-du-Nso mee anyi g'anyi buru ndu a nwuphuru azu; mekwaapho ndzu anyi g'o buru ndzu ophu.

⁶Chileke kwatakporu shi l'eka Jizosu, bu Onye-Ndzota anyi; nu anyi Unme-du-Nso ono mebyikpo anunu;

⁷g'anyi buru ndu o gude eze-iphe-oma iya gua le ndu pfuberekoto l'iphu iya; waa ndu e-keta ndzu ojejoje, bu iphe, anyi ele enya iya.

⁸Opfu-a bu opfu, pfuru oto. Iphe, mu eme ge mu karu nu bu g'i pfua ya pfushia ya ike ge ndu kwewaru l'oo Chileke bu Nnajiuphu phe eletaje enya yeru ehu l'eme iphe, du ree. Iphe-a bukota iphe, geru asa okpobe egege bya aburu iphe, a-kwo nemadzu.

⁹Ole-a; zehuru ntumego, enwedu ishi; zehuru atụ ẹgo ndzefu ndzefu ẹpha, shi le ndiche; me aswo uswo; mekpoo aba mba k'iphe shi l'ekemu. Atụ ẹgube ẹgo ono bukota iphe, adudu iphe, o bu; teme ophu urwu adudu iya.

¹⁰Ge gu l'onye ebukataje ogbo le Chiochi ta adukwa iphe, unu e-megbajekwadu me i - nmawaru iya okwa iya ugbo lanu; ozoo ugbo ẹbo; ophu o kwedu.

¹¹Makwaru l'egube onye ono be oriri iya gbajoshihuwaru agbajoshihu; o nodu emewaa iphe-ẹji bya amaru nno l'ime obu iya.

Iphe, Tayitosu e-meje

¹²Mu -ziępho Atemasu; ozoo Tikikosu; o bya ibe ngu; kukebekwa ẹhu byapfuta mu le Nıkopolisu ęwegwa; kele o l'eka ono be mu turu onu anodu l'udzumini-a, aabya abahu-a.

¹³Dufu Zinasu ophu bu onye loya; waa Apolosu g'ephe tugbua ije phe. Nukwa phe iphe-ije g'o to du iphe, a-duru phe uko.

¹⁴Mee g'unwunna anyi nwua g'ephe e-shije gude akanya iphe, du ree, ephe ese dzoje ndu ozo le mkpa, kparu phe nu. Ephe 'emedu egube ono g'ephe makwaru l'akanya phe ta adudu iphe, o bu.

¹⁵Iphe, bu ndu mu l'ephe no l'eka-a l'ekele ngu. Kelecha ndu yeru anyi obu; ndu anyi l'ephe tukoru kweta ke Nnajiuphu. Ge Chileke meeru unu eze-iphe-oma g'unu ha. Nokwa g'o du.

Fayilimōnu

Fayilimōnu 1

¹Oo mbèdua, bụ Pọlu ono, e gude k'iswi ẹhu Kéreshi Jizosu tọa mkpọro ono bẹ mu lẹ nwanna anyi, bụ Timoti gba mgba ede ẹkwo-ozia. Onye anyi edekpoo ya anụ bụ gube onye ono, anyi yeru obu, bụ Fayilimōnu, anyi lẹ ngu tukurọ ejeru Kéreshi ozi ono.

²Anyi edekwa iya phọ anụ gu lẹ Apfiya, bụ nwune anyi kẹ nwanyị yee Akiposu, onye anyi l'iya tukurọ alwụ ogu ẹhu Kéreshi; bya edekwa iya phọ anụ iphe, bụ Chiochi ono, edzukọbeje l'ulo ngu ono.

³Gẹ Chileke, bụ Nna anyi yee Nnajiuphu, bụ Jizosu Kéreshi meeru unu eze-iphe-oma; mekwaaphọ g'unu buru guu.

Pọlu l'ekele Chileke ekele ẹhu Fayilimōnu

⁴Mu anọduje ekele Chileke ono, mu ejeru ozi ono ekele iphe, bukpo tekenteke, mu epfu anụ iya l'iswi ẹhu ngu.

⁵Noo lẹ mu anụ l'i yekotaru ndu-nsọ obu g'ephe ha; bya anukwapho g'i nọ-shiberu ike l'eka Nnajiuphu, bụ Jizosu.

⁶Iphe, mu anọduje epfu anụ Chileke bụ g'o mee g'i gude ekweta ono, i kwetarụ ono mee gẹ gu lẹ ndu ozo tuga buru nanu okpobe aburu; mbu iphe, bukpo ndu ono, woru onwophe ye Nnajiuphu, bụ Kéreshi l'eka ono. Oo ya bu; g'unu eshikwanu nno nodu akabaa amarweta iphemiphe, bụ iphe, bukotakpo iphe-oma, gbaru anyi l'ememe k'ophu aa-nodu akwabe Kéreshi ubvu.

⁷Su-a; nwanna mu; obu ono, i yeru ndu-nsọ ono bẹ bukwa iya bẹ kakota eme g'ehu tsoo mu utso. O mekwarupho obu ka mu eshihu ike. O buru iphe, kparu iya nu bu l'oo n-yemobu ono, i yeru ndu kẹ Chileke ono meru obu ka phe eguzeta.

Pọlu arwo Fayilimōnu kẹ ẹhu Onesimosu

⁸Oo ya bu lẹ-a; a makwaru-a l'ọ gbaru gẹ mu gege anọduje l'eka Kéreshi pfugbuje g'onu ha mu; gude kaju ngu iphe, gbaru ngu l'ememe;

⁹Ọle ọ nupho n-yemobu ono kpanurupho iphe, mu a-nodunupho arwochia ngu arwo. O kwa mbèdua, bụ Pọlu, buwaa nwoke ogerenya bya abukwarupho onye nọru Kéreshi mkpọro nta-a bẹ l'arwo ngu nu obu.

¹⁰Arwo ono, mu arwo ngu ono bukwa kẹ ẹhu nwa mu, bụ Onesimosu; bu nwa mu nwuru nta-a, mu nọ mkpọro-a.

¹¹Lẹ mbu bẹ o shi buru ngu 'ogalemkpa nemadzu; obenu lẹ nta-a bẹ oobawaru mu lẹ ngu lẹ mkpa.

¹²Nta-a bẹ mu edufuakwaa ya g'ọ lwaphuta azu l'ibe ngu. Yebèdua ono bukpo kwa onye du mu l'obu shingushingu kpo.

- ¹³Mu shikwa rĩa lẹ mu a-ha iya gẹ mu l'iya nọdu l'ẹka-a k'ọphu ọo-nọdu emeru mu iphe, i gege anọdu emeru mu lẹ mkpọro-a, mu nọ; opfu lẹ mu ezi ozi-oma Chileke-a.
- ¹⁴Obenu l'ọ tọ dudu iphe, mu eme l'ẹbe abụ lẹ mu pfiadaru ngu iya; g'ọ tọ dudu g'ọ bụ l'e guderu ngu egude i nọdu eme iya. G'ọ bụchiaru iphe, i turu obu ngu onyo eme.
- ¹⁵Mu -jeshia epfufu; mu asu l'ọ gbẹ dudu g'agbafu, ọ gbafuru l'ibe ngu kẹ nwa teke ono bụ gẹ gụ l'iya emechaa buwaruro jasụ.
- ¹⁶A makwaru-a l'ọ bụ ohu; ọle ọ tọ buziakwa ohu nta-a; ọ kaakwa ohu mma. Nta-a bẹ ọ bụwaa nwanna anyi, anyi yeru obu; kekeke kẹ mbedua. Gubedua l'a-kakwa iya nū eye obu; eshinu ọ bụ ohu ngu; bya abukwarupho onye yee Nnajiuphu tugbawaru buru nanu.
- ¹⁷Mbu-a; ọ -burupho l'i guru mu-a l'onye gụ l'iya tukoru ejeru Kereshi ozi; nata iya okpobe anata g'i gege anata mu ome ọo mu byaru.
- ¹⁸Ọ -buru l'o nweru iphe, dudu eji, o meru ngu; ọ -bu l'o nweru ugwo, o ji ngu; tuko iya bo mu.
- ¹⁹Ọo mbedua l'a-pfu ngu iphe obu, o ji ngu ugwo iya obu. Ọ kwa mbedua, bu Polu bẹ gude ẹka mu dee iphe-a l'ekwo. Mu te ejekwaru ngu ro epfuru l'i bụ onye ugwo mu; mbu l'i ji mu ugwo ndzu ngu l'ophu.
- ²⁰Su-a; nwanna mu; iphe, mu epfu opfu iya; jiko bụ g'i yeru mu ẹka-o; eshinu anyi tukoru buru ndu kweru kẹ Nnajiuphu; g'i meero g'obu guzeta mu; eshinu anyi lẹ Kereshi tukoru tugba buru nanu.
- ²¹Iphe, mu gude mu nọdu ederu ngu ekwo-ozi-a bukwa lẹ mu maru l'ii-meru mu-a iphe, mu suru g'i mee; mbu mee ya meru etsutsu iya ye iya.
- ²²Ozo, mu e-pfufu-a bụ g'i kwakoberu mu ẹka mu a-nọdu me mu -bya. Lẹ mu arikwa lẹ Chileke e-mekwaru-a unu iphe ono, unu shihawaa pfutaru iya opfu iya ono; oomekwaa gẹ mu bya k'ophu anyi l'unu a-huma.

Ekele, Polu gude akpo-chi ozi-a ishi

- ²³Epafurasu l'ekelekwu ngu ro-o. Mu l'iya bẹ tukokwaru nọdu mkpọro l'ẹka-a l'opfu ehu Kereshi Jizosu.
- ²⁴Ephe nọdu ekelekwu ngu pho; mbu Maku yee Arisutakosu me Dimasu me Luku. Ndu ono bẹ mu l'ephe tukoru nọdu l'ẹka-a ejeru Chileke ozi.
- ²⁵Gẹ Nnajiuphu anyi, bụ Jizosu Kereshi mejeru unu eze-iphe-oma. Nokwa g'ọ dudu.

Hiburu

Hiburu 1

Opfu, Chileke shi l'onu Nwa iya epfu

¹Lẹ teke k'azụ bẹ Chileke shi l'onu ndu mpfuchiru iya pfuru nụ ndiche anyi pẹ ugbo olemole l'uzo, dughaa iche iche.

²O be lẹ nta, buwaa ikpazu-a; ọ buru onye bu Nwa iya bẹ o gude pfuru nụ anyi. Ọ buru l'eka Nwa iya ono bẹ ọ gbẹ mee mgboko mgburugburu; teme ọ hotakwa iya pho su l'oo ya bẹ iphemiphe kuru ishi l'eka.

³Nwa ono egbu nwijnwii; shi egube ono egoshi l'o noepho gẹ Chileke egbu nwijnwii bu ono; teme ọ buerupho gẹ Chileke du bu g'ọ dukota kparamu. Opfu, Nwa iya ono pfuru ereshi ire ike. Ọ buru ire ono, oore ono bẹ o gude gudeshia mgboko mgburugburu. Ọ safuchaaru ndiphe iphe-eji pẹ; ọ gbeshi je anodu anoo l'imigwe l'ekutara Chileke, bu iya bu onye ono, kakota ike.

Nwa ono ka ojozi-imigwe

⁴Nwa ono bẹ Chileke meru; ọ nyibekota unwu-ojozi-imigwe; ọ bukwarupho egube ono bu g'epha, Chileke guru iya dangokwarupho epha k'unwu-ojozi-imigwe.

⁵Lẹ-a; ? bu ojozi-imigwe ole bẹ Chileke suseru: “Oo ngu bu Nwa mu nwoke. E -shi ntanu-a bẹ mu buwaa Nna ngu.” Ozo buru: “Mu a-buru iya Nna; l'oo-buru mu Nwa.”

⁶Temanu kwapho teke Chileke dubataru Nwa iya ono, bu okpara iya ono lẹ mgboko bẹ ọ suru: “G'iphe, bukpoo unwu-ojozi-imigwe kẹ Chileke l'ophu bakotakwaru iya eja.”

⁷A bya l'eka k'unwu-ojozi-imigwe; ọ buru iphe, Chileke pfuru bu: “O meru unwu-ojozi-imigwe iya ephe buru pherephere; bya emee ndu-ozu iya ephe buru oku, enwu phoophoohoo.”

⁸A byakwanu lẹ kẹ Nwa Chileke obu ọ su: “Aba-eze ngu gube Chileke a-no ojejoje. Ọ buru apfubekoto a-buru mgboro-onye-eze, ii-gude buru eze obu.

⁹Iphe, pfuru oto du ngu ree; iphe, apfuduru-oto dukwanu ngu ashi. Noo g'o gude Chileke ono, bu Chileke ngu ono hota ngu; bya akwabe ngu ubvu; mee ehu nodu atso ngu utso; ubvu me ehu-utso ophu kwata ka kẹ ndu unu l'ephe gba nanu shii.”

¹⁰Ozo buru; “E -shikpo lẹ mbu bu gube Nnajiuphu meru ali mee iphe, no iya nu; teme ọ buru ngu gude eka ngu mee igwe; bya emee iphemiphe, no iya nu.

¹¹Iphemiphe ono e-mechaa mebyishihukota; obenu lẹ gubedua l'a-du gi du. Iphemiphe ono e-mechakwaa kashihu g'uwe.

¹²L'iipyakobe pẹ g'a pyakoberu ukpo; woru pẹ gbanwee g'a gbanweru uwe. Obenu lẹ gubedua buepho onye i bu bẹ i bu; I nowaa g'ii-nodu jasụ lẹ tuutuutu lẹ mimiimii.”

¹³Tọo ? bụ ojozi-imigwe ole bę Chileke sụjeru: “Nọdu mu l'ẹkutara jasụ teke mu e-me ndu ọhogu ngu g'ẹphe bụru iphe, ịi-zopyabe l'ọkpa?”

¹⁴Sụ-a; ? bụ ọgunu bę ụnwu-ojozi-imigwe bụkpoo? Ẹphe tukuru bụru ụnwu-ojozi, a taa hụmadu l'ẹnya, ẹjegbaaru Chileke ozi; bya aburu ndu Chileke yeru g'ẹphe bya eyeru ndu oo-mechaa dzọta ẹka.

Hiburu 2

Ndzọta, parụ ẹka

¹Noo g'o gude anyi jee eyefutaru ẹhu l'opfu ono, anyi nọmaru onoya; g'anyi ta akponyaa ọge ọge kọpofu.

²Kẹle ọ -bụru l'ozi ono, ụnwu-ojozi-imigwe zihawaru onoya bę meru g'a maru l'opfu Chileke ono ere ire; k'ọphu ndu jikaru iya nụ yele ndu jikaru eme iphe, Chileke pfuru bę ọ gwaru ọchi, bụ iphe, gbaru pẹ nụ;

³? ọdenụ g'anyi e-shi nahụ mę ọ -bụru l'anyi weru eze ndzọta ono gbęgelegbegele, bụ ọphu Nnajiuphu vuhawaa ọzo pfua opfu iya; ndu nọmaru iya nụ byakwanu bya emee g'anyi maru l'ọ bụ eviya.

⁴Chileke l'onwiya goshikwapho l'ọ bụ eviya teke ono, o gude ike iya meshia iphe-ohumalenya, dughaa biribiri bya eworu iphe-oma, shigbaa Unme-du-Nso l'eka keshikwaarupho ndu kweru nkiya g'ọ dū iya g'o kee ya ono.

Jizosu egoshi ọzo ndzọta

⁵L'ọ to bụkwa ụnwu-ojozi-imigwe bę Chileke meru g'ẹphe bụru ishi lę mgboko ono, e-mechaa bya nū ono, bụ iya bụ mgboko ono, anyi epfu opfu iya ono.

⁶L'ọ chia iphe, Chileke meru bụna g'e pfuru l'ekwo-opfu iya sụ: “Gube Chileke; ? bụ ọgunu bę nemadzu bụ kę g'i ri-vuje iya? ? Bụ ọgunu b'ọ bụ kę g'i letaje iya ẹnya?”

⁷I meru iya ọ ka ụnwu-ojozi-imigwe ọlwali; nọo ọdu nwanshii; bya eworu ogbunwii yele ọkwabe ụbvù gude kpube iya okpu-eze;

⁸bya emee ya ọ nongokota iphemiphe, i meru ememe.” Eshinu o meru iphemiphe nọdu iya l'eka; buna iya bụ l'ọ to dudu g'ọ ka mma l'ọo iphe lanu, ọ gufuru. Obenu lę nta-a bę e teke ahụmadu g'o shiru bụru ishi iphemiphe.

⁹Ọ chia Jizosu bę anyi hụmaru g'e meru iya ọ ka ụnwu-ojozi-imigwe ọlwali nọo ọdu nwanshii; onye e kpuberu okpu-eze, dū biribiri yele ọkwabe ụbvù k'ọphu o shi l'eze-iphe-oma ọphu Chileke eme nwuhu-chiru onyemoneye.

¹⁰Ọ buleru-a yębedua, bụ Chileke, iphemiphe shi l'eka teme ọ bụru iya nwe iphemiphe bę ọ gbaru l'eshi l'iphe-ehuka, onye-ndzọta ono jeru dzugbua oke l'ẹhu iya; shi nno mee ndu dū igwerigwe g'ẹphe bụru ndu egbu nwii.

¹¹Lę yębedua ono, bụ Jizosu ono, emeje gę nemadzu dube ree l'iphu Chileke onoya; mę ndu ọbu, o meru g'ẹphe dube ree ọbu tükokwaru shi lę nna lanu ono. Noo g'o gude ọphu iphere adujedu iya eku pẹ ụnwunna iya.

¹²L'ò sùkwaru: “Mu e-me g'ùnwunna mu maru ngu; mu a-nòdu l'edzudzu-òha gùà ebvu jaa ngu ajaja.”

¹³Bya asùkwapho: “Òo ya bè mu a-dakobe.” Sùkwapho; “Wakwa mu nò l'èka-a mu l'unwegirima ono, Chileke chìru nù mu ono.”

¹⁴Eshinu ùnwegirima onoya bùgbaa nemadzù, furu èka fua òkpa bè ò gbèshierupho bya abùru nemadzù g'èphe bù. Iphe, o gude mee nno bù g'oo-shi l'anwùhu, ò nwùhuru mebyia ike onye ono, bù iya bè anwùhu gude ere ire; onye ono bù Obutuswe.

¹⁵Òo ya bù; o shi l'anwùhu ono, ò nwùhuru ono tọ phẹ l'ègbu; mbù ndu ono, shi eshinu èphe fùtaru l'èlìphe nòdu bùru ohu ono; opfu l'èphe atsù ebvu anwùhu.

¹⁶Lẹ-a; òphu doru ènya bù l'ò tọ bùdu ùnwu-òjozi-imigwe bè ò byaru g'o yeru èka; òo oshilòkpa Ébirhamu phẹ.

¹⁷Noo g'o gude ò bùru iphe, rwuberu iya erwube l'ò byafùtaje bya abùru nemadzù g'ùnwunna iya bù l'ùzo iphemiphe. Òo ya bù g'oo-shi ègube ono bùru phẹ onye-ishi uke kẹ Chileke; bùru onye obu-imemini; bùkwarupho onye e gude ire iya èka l'iphemiphe, oomeru Chileke; g'ee-shi ègube ono gẹ Chileke agùaru ndiphe nvù l'ìphe-èjì phẹ g'ò ha.

¹⁸Yẹbedua l'onwiya jewaru iphe-èhuka; tẹme òhutama byapfutakwaa ya phọ. Noo g'o gude ò nòdu aduje ike yeru ndu òhutama byapfutaru èka nta.

Hiburu 3

Jizọsu kakwaphọ Mosisu

¹Òo ya bù lẹ-a; ùnwunna mu, dù nsọ, bù ndu a gbèkwapho l'imigwe kua; unu rijekponaa òriri kẹ Jizọsu ono, bù onye-ishi-òzi; waa onye-ishi uke Chileke mẹ a -bya l'ìphe ono, anyi sùru l'ò bù òkpobe-opfu ono.

²Lẹ yẹbedua goshiekwarupho Chileke ono, hòtaru iya g'ò bùru onye-ishi uke iya ono lẹ ya bù onye o gude ire iya èka; ègube e gudekwaphọ ire Mosisu èka l'òzi, o jeru ndu ònu-ùlo iya.

³Òle ò gbakwarù g'a ka aja Jizọsu ajaja eme lẹ Mosisu; mbù ègube ono aakajẹ akwabẹ onye kpùru ùlo ùbvù; eme l'ùlo òbu l'onwiya ono.

⁴A makwarù-a l'ò tọ dùdu ùlo, abùdu nemadzù kpùru iya; obenu l'òo Chileke bù onye mekwanùru iphemiphe.

⁵Sù-a; Mosisu bùkwaphọ onye-òzi kpù. O goshiru Chileke lẹ ya gbaru g'e gude ire iya èka l'òzi, o jeru ndu Ízurelù l'òphu, bù ndu ònu-ùlo Chileke. Ò bùru iya goshiru iphe, Chileke mechaarù mee l'ìphu.

⁶A byakwanù lẹ Kéreshi; ò bùru Nwa, eleta ùlo Nna iya ènya. Nna iya ono bù Chileke. O goshikwaphọ Chileke l'ò gude ire iya èka. Ò bùru anyi bù ònu-ùlo Nna iya òbu mẹ ò -bùru l'òkpoma shihuru anyi ike; anyi dobe obu l'ìphe ono, anyi ele ènya iya ono.

Chileke e-me gę ndu nkiya tuta unme

- ⁷Unme-dụ-Nso pfukwaru sụ: “Teke unu nūmaru olu iya ntanụ-a;
- ⁸unu ta akpọ-chikwa obu unu gę ndiche unu phę shi kpọ-chia ya teke ono ęphe kwefuru iya ike l'echięgu; teke ono, ęphe shi anọduje ahụ mu ama onoya.
- ⁹Ọ bụru l'ęka ono bę ndiche unu phę nọru hụa mu ama; bya adalekwaa mu phọ adale; l'ęka ęphe hūmakwaru-a iphe, mu meru l'ime ụkporo apha labọ.
- ¹⁰Ọ bụru iphe ono meru g'o gude ọgbo teke ono mee ęhu ghua mu egbu mu sụ: ‘Ndu-a bę egomunggo phę jephuhuakwaru ejephuhu; ọphu ęphe amadụ iphe, mu sụru g'e meje.’
- ¹¹Ọ bụru iya bụ l'ęphe akpatsu oke-ęhu-egbu mu; mu ria angụ sụ: ‘Ęphe ta abyadụ anọdu l'ọkpoku mu.’ “
- ¹²Ọo ya bụ; unwunna mu; unu kwabekwaru onwunu ęnya g'ọ tọ dụ onye ęjo ọkpoma a-dụ l'echilabọ unu; ọphu ọ dụ onye a-buru onye te ekwetajędu iphe, Chileke epfu; shi nno haa etsoru Chileke ono, bụ ọphu dzụ ndzụ ono.
- ¹³Ọ chia iphe, unu a-nọdu eme bụ g'unu pfushijeru nwibe unu opfu ike mbọku-mbọku, a gbeshikpowaru kua “Ntanụa” g'ęphe haa iphe-ęji g'ọ tọ dụ onye iphe-ęji e-dephu.
- ¹⁴L'anyi tųkokwaru bụru ndu ęphe lę Kęreshi tųkoru gbarụ mgba l'iphe nkiya mę ọ - bụru l'anyi pfu-shikpọerupho ike l'iphe ono, anyi shi lę mbụ dobe ọkpoma ono jasụ l'ikpazu.
- ¹⁵Eshinu e deru sụ: “Teke unu nūmaru olu Chileke ntanụ ọwa; unu ta akpọ-chikwa obu unu gę ndiche unu phę shi kpọ-chia ya teke ono, ęphe kwefuru iya ike ono. ”
- ¹⁶? Bụ ndu ole bę nūmabebecharu olu Chileke ono bya ekwefukwaru iya phọ ike? ? Tọ bųedu ndu ono, Mosisu dufutaru l'alį Ijiputu onoya?
- ¹⁷? Bụ ndu ole bę kpatsukpọerupho Chileke ęhu egbu ụkporo apha labọ? ? Tọbudu ndu meru iphe-ęji; e mechaa odzu phę daka l'echięgu?
- ¹⁸? Bụ ndu ole bę o riru angụ sụ l'ęphe ta abyadụ anọdu l'ọkpoku iya-a? Tọbudu ndu ono, ekwedu eme iphe, o pfuru onoya.
- ¹⁹Ọ n'iya bụ l'anyi hūmawaru l'o to kwedu g'ęphe nọdu l'ọkpoku iya kęle ęphe te ekwedu mee g'o pfuru.

Hiburu 4

- ¹Ọo ya bụ lę-a; l'eshinu Chileke kwewaru anyi ukwe-iphe l'anyi a-bata l'ọkpoku iya; gę ndzụ gųje anyi g'anyi kwabę ęnya g'ọ tọ dụ onye aa-sụ l'o metaru iphe, e-me g'oto rwu ęka ono.
- ²Kęle ọ kwaphọ gę ndiche ono, Mosisu edu ųzo l'echięgu ono nūmaru ozi-oma ono bụ g'anyibedua nūmaru iya nta-a. Obenu l'opfu ono, ęphe nūmaru onoya ta adudu urwu, ọ

barụ p̄hẹ; k̄ēle ẹ̄phe n̄umachaāru ukwe-iphe, Chileke kweru bya emee g'ẹ̄phe ta an̄umaduru iya.

³L'ọ b̄uekwapho anyībe ndu n̄umaru ozi Chileke ono -kweta; anyi an̄odu l'ọkpoku iya. L'ọ p̄fuakwaru s̄u: “Ẹ̄phe kpatsuru oke-ẹ̄hu-eghu mu; mu ria anḡu s̄u: ‘Ẹ̄phe ta abyadu an̄odu l'ọkpoku mu.’ “ O p̄fua ya ẹ̄gube ono l'ẹ̄ka ozi iya gb̄ekwa bv̄uhawaro e -shi teke o meru mgboko.

⁴L'ọ d̄ukwaru ẹ̄ka e deru p̄fukuta mb̄oku k'ẹ̄saa s̄u: “O be l̄e mb̄oku k'ẹ̄saa; Chileke t̄uta unme iphemiphe, o meru.”

⁵Ọle o p̄fukwarupho l'ẹ̄ka lan̄u ono s̄u: “Ẹ̄phe ta abyadu abata l'ọkpoku mu.”

⁶S̄u-a; ọ d̄ukwarua ndu a-n̄odu iya n̄u; obenu l̄e ndu ono, vuru ụzo n̄uma ozi-oma ono ta abah̄uduru l'ẹ̄ka ono; k̄ēle ẹ̄phe kwefuru ike.

⁷Noo g'ọ gude Chileke gb̄eshikwa bya eworu mb̄oku ọzo dobe, b̄u iya b̄u “Ntan̄u-a.” A bya an̄okpoakwaro ọdu shii g'abah̄u ono rw̄uhuchaaru; t̄eme Chileke shi l'ọnu onye eze p̄hẹ teke k'ichee, b̄u Dévidi p̄fua op̄fu iya l'ẹ̄ka ono, e p̄fuhawaru l'ọ s̄uru: “Teke unu n̄umaru olu iya ntan̄u-a; unu ta akp̄o-chikwa obu unu.”

⁸K̄ēle ọme Jioshuwa meru ẹ̄phe t̄uta unme ọbu; m̄e e tege ep̄fuh̄ekwa k'edobe mb̄oku ọzo.

⁹Ọo ya b̄u l̄e teke ndu k̄e Chileke a-t̄uta unme ọbu abyakwadu abyabya.

¹⁰Onyemonye, ȳele Chileke n̄o at̄uta unme b̄e ta ad̄uedu ozi, oojekwadu; ẹ̄gube ono, Chileke eje ozi nkiya ono.

¹¹Ọo ya b̄u; g'anyi kukebe ẹ̄hu n̄odu l'ọkpoku iya ono; a -n̄onya ọ d̄uru onye ekwefu ike g'ẹ̄phebedua.

¹²L'op̄fu Chileke dz̄ukwa nd̄u bya ere ire. Ọ kakwa ogu-echi, ats̄u akpatip̄hu labo ats̄u nk̄o; k'ọphu ọosujaje nemadz̄u s̄u-rwua mgbaka ọkp̄u ȳe ụmi iya; mb̄u s̄u-rwuchaa ẹ̄ka obu nemadz̄u n̄o; uche iya n̄odu iya. Ọovofutajechaa iphe, nemadz̄u ar̄i m̄ekpoo ḡe nemadz̄u ḡbaru l'ime obu iya.

¹³Ọphu ọ d̄udu iphe, n̄o l̄e mgboko, d̄uru ọphu Chileke ah̄umaduru. Iphemiphe, n̄o l̄e mgboko gbak̄ota ọto dabyiru l'ebederabadara l'ip̄hu Chileke. Ọ b̄uru Chileke ono b̄u onye anyi p̄fufutaje l'ip̄hu iya k̄okota iphe, anyi meru.

Jiz̄osu b̄u Ọkalibe ishi uke Chileke

¹⁴Noo ya b̄u; unu g'anyi kwata gudeshia iphe ono, anyi s̄uru l'ọ b̄u ọkpobe-op̄fu ono ike; k̄ēle anyi nweru Ọkalibe ishi uke Chileke; onye t̄ukoru igwe l'ọphu ghak̄ota je an̄oduro l'imigwe ẹ̄ka Chileke l'onwiya n̄o. Onye ono b̄u Jiz̄osu, Nwa k̄e Chileke.

¹⁵Ọkalibe ishi uke Chileke ono, anyi nweru onoya ta ab̄ukwa ẹ̄gube onye ata amaj̄eduru ẹ̄ka anyi d̄u arw̄uhu. Onye anyi nweru b̄ukwa onye ọhutama, d̄u iche iche byapfutawaru g'ọo byapfutaj̄e anyi ono; ọphu o med̄uru iphe-ẹ̄ji.

¹⁶Qo ya bu; g'obu shihu anyi ike g'anyi jerwua aba-eze eze-iphe-oma ono; k'ophu a-phuru anyi obu-imemini; l'eemeeru anyi eze-iphe-oma yejeru anyi eka le mkpa.

Hiburu 5

¹L'iphe, bukpo onye-ishi uke Chileke g'ephe hakpo be bukwa ndiphe edzukobeje shi l'echilabo phe hota iya woru iya mee onye a-no-chijeru oha l'iphu Chileke; nuje Chileke iphe, ndiphe nuru iya; gwejekwarupho Chileke ngweja k'iphe-eji phe.

²Yebedua ejije obu oyi; etso ndu eshiswe uzo; opfu l'ephe bu ndu amadu iphe; eshinu yebedua l'onwiya bukwapho onye ahajekwarupho du arwuhu.

³Eshi ophu yebedua bukwapho onye emesweje nu be o gwefutajenurupho Chileke ngweja k'iphe-eji ophu yebedua l'onwiya meru; yele ophu oha meru.

⁴Iphe ozo bu; l'o to dukwa onye agbeshije hota onwiya kwabe ubvu-a. Oo onye Chileke l'onwiya hotaru abujeru iya, bu iya bu g'o hotaru Eronu le teke ndiche.

⁵Nokwapho g'o to budu Kereshi gbeshierupho; kwabe onwiya ubvu k'eme onwiya onye-ishi uke Chileke. O Chileke be suru iya: "Oo ngu bu Nwa mu nwoke. E -shi ntanu-a be mu bukwaa Nna ngu."

⁶O byakwa epfu-a l'eka ozo su: "I bu onye uke Chileke jasule tuutuutuule lejimiimii; ge Melikizedeku bu iya."

⁷Teke Jizosu bu l'eliphe owanawa be o shi anoduje akwa ekwa akwashi enya-mini g'oo-dzota iya g'o to nwuhu. O pfua nno; Chileke numa olu iya; eshi ophu o bu onye ewodaje onwiya ali kwabe Chileke ubvu.

⁸Su-a; a makwaru-a l'o bu Nwa ke Chileke; ole oo iphe-ehuka, o jekotaru be o gude nwuta iphe, eme iphe, Chileke suru g'e meje bu.

⁹O buru g'o tukoadaru ge Chileke tuberu mebekota be o byaru aburu onye adzotaje iphe, bu ndu eme iphe, o pfuru; dobe jasule l'ojejeje.

¹⁰O buru Chileke kuru iya mee ya onye-ishi-uke jasule tuutuutuule lejimiimii ge Melikizedeku bu iya.

Anma okwa g'a ta ala azu

¹¹O duru igwerigwe iphe, anyi gege epfu phota iphe owanawa; ole ootsu l'ehu g'ee-shi kooru iya unu; kele iphe te edojeedu unu enya egwegwa.

¹²Ole e -pfujekpo ya epfupfu nta-a be o gbaakwaru g'unu gege abuwuru ndu ezi ndu ozo iphe; obenu l'unu gbey bya aburu ndu gbaru g'aa-nodu ezi unu iphe, gbaru g'unu vuru uzo maru iya l'opfu Chileke. Unu bya aburu ndu angukwadu era; l'unube ndu gege anodu eriwaa nri.

¹³Onye angukwadu era bu nwaswa be o bu. Opfu k'apfubekoto teke edodu iya enya.

¹⁴Obenu le nri bu ke ndu buwaa ogerenya; ndu a zuwaru azuzu ephe mawuru iphe k'ophu bu: ephe -lee iphe enya; ephe a-makharu ? o du ree to o du eji.

Hiburu 6

¹Eshinu ọ dū ẹgube ono; unu g'anyi tuko gwobe iphe ono, gbaru g'anyi vuru ọzo maru iya l'ozu ono, e ziru anyi le ke Kereshi ono; yeru ẹhu l'anwu iphe, e-me g'anyi buru ndu karu ẹnya l'ozu ono. G'anyi ta abyashi agaru k'egbube ishi ezi ndu k'ono ọzo; le ndu k'ono be unu mahawaru. G'anyi wofu obu l'ari l'oo iphe-oma, anyi metaru be Chileke e-gude dzoo anyi, me l'ekweta ke Chileke;

²me le k'eme baputizimu; me abyabe nemadzu aka l'ishi; me k'eshi l'onwu teta; me k'ikpe ojejeje ono.

³Ono be anyi e-me-a me Chileke -kwe.

⁴Kele ootsukwa l'ehu g'izimanu e-shi lwaphuta phe azu; mbu ndu iphe, shi dowaa ẹnya; iphe-oma, shi l'imigwe ono shi rwuwaa phe aka; teme ẹphe shi anatajewaa Unme-du-Nso;

⁵ẹphe shi anumajewaa okpobe-Opfu Chileke ono; mawaru k'ike, du l'ogbo ophu abyanu;

⁶mbu ndu tukoru iphemiphe ono, makotaru bya agbakuta iya azu; lekebe ẹnya akpopyabe Nwa Chileke l'oswebe ọzo; eme iya iphe-iphere l'edzudzu-oha.

⁷Su-a; l'ali, echeje mini, igwe edzejeru iya tekenteke; bya egudeje iya eme g'iphe, a kuru iya baaru ndu kuru iya nu l'urwu be Chileke a-gokwaru onu-oma nu.

⁸Obenu l'ali ophu buepho ewu-obvu yee ogarambo be efu iya nu bu mkpokoro ali. Ali k'ono phoduru nwanshii; Chileke atua ya onu. Ee-mechaa; oburu oku, e-tsufu iya.

⁹Ole-a; ndu mu yeru obu; anyi epfukwaa egube-a bukwa eviya; ole anyi makwaru-a ree l'unu e-tsoru-a ọzo ophu ka ree, e-me ge Chileke dzota unu.

¹⁰Le Chileke ta adukwa onye oomeje iphe, apfuduru-oto. O too zohakwa ozi, unu jeru; ophu oo-zohakwa g'unu gude yehawaru unwunna aka me ophu unu eyekwapho nta. Iphe ono tukoru egoshi l'unu yeru iya obu.

¹¹Iphe, agu anyi bu g'onymonye le g'unu ha meje goshi ge ke Chileke aphu-beru iya l'ehu; meje iya egube ono jasu l'ikpazu g'iphe, unu ele ẹnya iya erwua unu aka.

¹²Iphe, anyi ese iswi iya bukwa g'unu ta aburu ndu ẹnyiru. G'unu nwuchia aka ndu ono, gude ekweta, ẹphe kwetaru opfu Chileke me ata nshi, ẹphe ata gude anata iphe ono, Chileke kwegbaaru ukwe iya ono.

Aburu eviya k'ukwe-iphe Chileke

¹³Su-a; teke ono, Chileke kweru Ebirhamu ukwe-iphe onoya be bukwa onwiya be o gude riaru iya angu iya; eshinu o to duedu onye ọzo, kabaa ya shii k'egude ria angu obu.

¹⁴Tobudu iya bu; o su: "Mu gofutajeru ngu onu-oma; mee g'unwu ngu kwata du igwerigwe."

- ¹⁵Ébirihamu mechaa taa nshi; jasụ iphe-oma ono, rwu iya ẹka.
- ¹⁶Onye eri angụ bụ ẹpha onye ka iya shii bẹ oogudeje ria ya; ẹme ọ nọdu abụjeru: a - guwaru ẹnwa ye l'iphe, aatụ ẹgo; k'igoligoli alaa.
- ¹⁷Kele Chileke eme g'o doo phẹ ẹnwa; mbụ ndu ono, a-nata iphe ono, o kweru ukwe iya onoya; lẹ ya ta ayidu gbanwee iphe, ya kweru ukwe ememe; o riru angụ ye iya.
- ¹⁸Sụ-a; Chileke kweru anyi ukwe-iphe; ẹme ọ bya eriru angụ ye iya. Ụzo iphe labo ono bụchaa iphe, ta agbanwedu agbanwe; ẹme ọ bụkwarupho iphe, Chileke ta ayidu dzuru ụka ye. Oo ya bụ g'obu eshihu anyi ike; anyibe ndu gbapfuru iya nụ g'ọ dzoo anyi; g'anyi te eje abo obu ẹbo k'a maru: ? ọo-nua anyi iphe ono, anyi ele ẹnwa iya ono.
- ¹⁹Iphe ono, anyi ele ẹnwa iya ono emeje g'obu bvuru anyi ebvuru. Oosedeye anyi obu l'ẹka lanụ mee ya g'ọ nguru anguru. O mewaru anyi bahu l'ime ime eze-ulo Chileke, bụ iya bụ ẹka Chileke l'onwiya nọ l'imigwe.
- ²⁰Oo Jizosu bụ onye vuru ụzo bahuchiru anyi l'ẹka ono; kele ọo ya bụwaa onye-ishi uke Chileke. O bụru iphe, ọo-buru bụ ono jeye lẹ tuutuutu lẹ mịimiimii, bụ iya bụ gẹ Melikizedeku bụ.

Hiburu 7

Melikizedeku shi bụru eze bya aburu uke Chileke

- ¹Melikizedeku ono, anyi epfuru ono shi bụru eze ndu Salemu teke k'ichee; bya aburu onye uke Chileke; mbụ Chileke, bụ Okalibe-kangokotaru-nụ. O gbaru Ébirihamu ndzuta teke o shi ọgu, ẹphe gbushiru ndu eze alwa; bya agoru onu-oma nụ iya.
- ²Ébirihamu bya eworu iphemiphe, ọ lwutaru l'ọgu; kee ụzo iri; nụ iya ụzo lanụ. A - kọkahakpo ẹpha Melikizedeku bẹ iphe mbụ, ọ bụ bụ: “Onye eze, pfulerekoto.” Ẹpha iya bụfukwaapho Onye eze, shi lẹ Salemu, bụ iya bụ Onye eze kẹ nchi-odu-doo.
- ³Melikizedeku te enwedu ne; ọphu o nwedu nna; ọphu o nwedu okpa-ipfu, o shi; ọphu o nwedu teke o shi; ọphu o nwedu teke ọ nọ-beru. Oo ya bụ l'ọ dūwaa gẹ Nwa Chileke; opfu l'ọ bụwaa onye uke Chileke jasụ lẹ tuutuutu lẹ mịimiimii.
- ⁴Sụ-a; ? unu hūmaru gẹ Melikizedeku ono bụ-be oke nemadzụ; ọ gbẹ bụchiaru yẹbedua bẹ Ébirihamu ono, bụkpoo ya bụ onye-iche anyi ono gbẹ kee iphe, ọ kwataru l'ọgu ụzo iri; woru uzi lanụ woru nụ iya.
- ⁵O kwa ndu-uke Chileke, shi l'awa Lívayi kpụ bẹ ekemu Mosisu sūru gẹ ndu Ízurelu keje iphe phẹ ụzo iri woru uzi lanụ nūje phẹ. O bụru phẹ bẹ ekemu sūru g'ẹphe nataje unwune phẹ iphe ono; mbụ ẹka ẹphe l'ẹphe gbekwa tūkokwaa bụru unwu Ébirihamu.
- ⁶Obenu lẹ Melikizedeku ta abudu oshilokpa Lívayi. Ébirihamu ono gbẹ woleru-a iphe, o nweru kee ụzo iri; woru uzi lanụ nū iya. Melikizedeku bya agoru onu-oma nū Ébirihamu ono, Chileke kweshiru ukwe-iphe ono.
- ⁷A ta tudu iya ẹgo k'amaru: ? onye ago onu-oma bẹ ka onye ọogoru iya shii too.

⁸A bya l'ehu ndu-uke Chileke ono, shi l'awa Lívayi ono; ọ bụru ndu e-mechaa nwuhu anwuhu bẹ anatajẹ oke-lanụ-l'uzo-iri ono. Teke a byakwanuru l'ehu kẹ Melikizedeku; ọ bụru onye ẹkwo-opfu Chileke pfuwaru l'ọ tọo nwuhudu anwuhu bẹ nataru iya nù.

⁹Mu -jeshia ya epfufu mu asụ lẹ Lívayi kwaphọ, aapfujeru oke-lanụ-l'uzo-iri nù ono bẹ gbewaa l'ime Ébirihamu pfukwapho oke-lanụ-l'uzo-iri nkiya.

¹⁰Noo kele ọ nowaa l'ime ẹhu ndiche iya phẹ teke ono, ẹphe lẹ Melikizedeku dzudaru ono.

¹¹Ọ -bụru l'adubebe ree shi l'eka ndu-uke kẹ ndu Lívayi; g'ọ bụ iya bẹ a gbaberu ọkpa nù ndiphe ekemu-a; ? bahunu gunu meru g'o gude mkpa onye-ishi uke ọzo dukwadu, bụ onye ọphu a-du gẹ Melikizedeku, abudu onye ọphu dụ gẹ Eronu?

¹²Ole teke Chileke gbanwewaru uke iya bya anaa uke ọzo, yele ọphunapho agbaedu; ọo ya bụ l'ọ gbanwefutaje ekemu phọ, ọ tūhawaru phọ.

¹³Kele onye eepfu opfu iya-a bukpokwaro onye ọkpa-ipfu ọzo; ọphu ọ dudu onye ipfu phẹ, jejeru ozi uke l'iphu ọru-ngweja Chileke.

¹⁴A makahakwaru lẹ Nnajiuphu anyi shi l'ọkpa-ipfu Jiuda. Ọphu ọ dudu teke Mósisu photajeru Jiuda teke o pfuru opfu kẹ ndu-uke Chileke.

Onye uke ọzo, dụ gẹ Melikizedeku

¹⁵Mbu l'iphe, anyi epfu kabakwaa edo ẹnya; mẹ ọ -bụru l'onye-ishi uke ọzo, dụ gẹ Melikizedeku futaru.

¹⁶Abụ uke nkiya ta abụekwa nsọ nsọ mẹ ekemu ekemu, nemadzụ tūshiru dobe bẹ o gude bụru iya. Ọ kwa ike kẹ ndzụ ojejoje ọphu ọ dzụ bẹ o gude bụru onye uke Chileke.

¹⁷L'e dekwaru sụ: “Ìi-bụru onye uke Chileke jasụ lẹ tuutuutuu lẹ m̄imiimii, bụ iya bụ gẹ Melikizedeku bụ iya.”

¹⁸Kele ekemu phọ, Chileke tūhawarupho bẹ Chileke nwuchiakwaru; kele o too redu ire; tẹme ọ bụru mkpokoro iphe.

¹⁹Iphe, o gude ọ dụ ẹgube ono bụ l'ekemu Mósisu ono ta adudu onye ọ duru ike mee g'ọ dubebe ree l'iphu Chileke. Nta-a bẹ anyi elewaa ẹnya iphe, ka ree. Ọ bụru iphe ono, ka ree ono, anyi ele ẹnya iya ono bẹ anyi shiwaa akpo-kube Chileke ntse.

²⁰Ọzo bụ lẹ Chileke riru angụ ye l'aburu onye uke nkiya. Ndu uke k'ọphunapho bẹ e te riduru angụ ye lẹ nkepẹ.

²¹Obenu lẹ Jizosu bẹ Chileke meru onye uke bya eria angụ ye iya teke ono, ọ suru: “Nnajiuphu ribuwaru angụ; ọphu ọ gbanweedu iphe, ọ tūberu ememe. Ìi-bụru onye uke Chileke jasụ l'ojejoje.”

²²Ọ bụru angụ ono, Chileke riru ono meru Jizosu ọ bụru onye Chileke gude egoshi l'ogbandzu ọwa-a, ya riru angụ ye-a ka akahụ iya ree.

²³Iphe ọzo bụ lẹ ndu-uke Chileke k'ono dū igwerigwe kele anwūhu te ekwejedu g'ephe nopyabe iya.

²⁴Obenu lẹ Jizosu buepho uke, ọ bụ; bushia ya ike; opfu lẹ yebedua a-no je aduwaruroya.

²⁵Ọ buri iphe ono meru g'o gude ọ nodu aduje ike dzoo ndu gbẹ iya l'eka lwapfuta Chileke; dzoo phe okpobe adzozo; noo kele yebedua dzuwaa ndzu ojejoje epfuje anu Chileke l'iswi ehu phe.

²⁶Ọ buri egube onye-ishi-uke ono be mkpa iya duru anyi; onye du nso ophu ọ dudu iphe-eji, o mejeru. Chileke hofuru iya iche l'echilabo ndu iphe-eji bya ewolia ya doghakota iphe, bukpo eligwe l'ophu.

²⁷Ndu-ishi uke Chileke ophu, shi l'okpa-ipfu Livayi pho shi anoduje egwe ngweja mboku-mboku. Epe shi anoduje egwe ngweja ono k'iphe-eji phe bya egwedokwaru iya pho oha l'ophu. Obenu lẹ Jizosu be ọ to gbaduru g'o gwee nkiya g'ephebedua. O gweru nkiya ngwe lanu sefu eka. Ngwe lanu ono bu ophu o gude onwiya gwee.

²⁸Kele ekemu Mosisu bukwa nemadzu mmanu be ọ suru g'ephe buri ishi uke Chileke; mbu nemadzu mmanu, ahajeru meswee nu. Obenu lẹ g'a nonyaaru Chileke bya eria angu pho shi egube ono nwuchi ekemu ono be ọ hotaru Nwa Chileke mee ya onye-ishi uke iya. Yebedua, bu Nwa Chileke ono be meebewaru iphemiphe lẹ ke ge ndiphe e-meje bata l'eka Chileke no; ge Chileke tuberu iya. Iphe ono be o meebewaru g'oo-du jasụ lẹ tuutuutu lẹ mimiimii.

Hiburu 8

Jizosu onye-ishi uke k'ogbandzu ophuu

¹Waa iphe, bukpo ishi iphemiphe ono, anyi epfu ono bu owanawa: anyi nweru egube onye-ishi uke Chileke ono; onye ophu no anoo l'imigwe l'ekutara aba-eze Okalibe-kangokotaru-nu.

²Yebedua eje ozi uke nkiya l'eka Chileke no gedegede, bu iya bu l'eze-ulo Chileke ophu no l'imigwe. Ulo k'ono ta abudu nemadzu gude eka mee ya. O buro Chileke l'onwiya meru iya.

³L'iphe, Chileke hota-doru iphe, bukpo ndu-ishi uke iya bukwa g'ephe nuje iya iphe, ndiphe nuru iya; waa g'ephe gwejekwaru iya pho ngweja. Oo ya bunu l'ọ gbaru g'onye-ishi uke owa-a nweru ngweja, oo-nodu egwe.

⁴Su-a; ome Kereshi ono no l'eliphe-a me e te ekwekpokwanu g'ọ buri onye uke Chileke; eshinu ndu bu uke Chileke ke mgboko-a egwejeru Chileke ngweja lẹ g'a turu iya l'ekemu ndu Jiu.

⁵Iphe, ephe emeje l'eka eegwejeru Chileke ngweja lẹ mgboko-a bukwa iphe yeru ophu onye-ishi uke k'anyi ono eme l'imigwe; ke mgboko-a bukwa onyonyo nkiya l'imigwe. Lẹ teke Mosisu eme g'ọ kpobe ulo-ekwa, eegwejeru Chileke ngweja ono lẹ teke

ndiche bẹ Chileke sụkwaru iya: “Nyatakwa g'i mekotakpoepfo ụlo ọbu g'ọ dūepfo ge ya tūru ngu ọnu iya l'eli úbvú phọ.”

⁶Obenu lẹ gẹ ọ dū nta-a bẹ Chileke ziwaru Jizosu eje ozi uke iya; mbụ ozi ọphu ọkwa iya kwata ka shii; eme lẹ kẹ ndu-uke k'ophunapho. Nokwaphọ g'ogbandzu ọphu shi iya l'ẹka o gude gudegbabẹ Chileke yele nemadzu kwata ka akahụ iya ree; eshinu o shi l'ogbandzu k'owa-a; kwee anyi ukwe-iphe, ka ree; eme l'ọphu o shi l'ophunapho kwee.

⁷Lẹ-a; ọ -bụ l'uta ta adụ l'ogbandzu kẹ mbụ m'o to jekwa iya enwuchi k'agba ndzu ọzo.

⁸Obenu lẹ Chileke taru ndu nkiya uta teke ndiche. Ọ sūru phẹ: “Mbọku abyakwa; nokwa iphe, Chipfu epfu; teke mu l'onu-ulo Ízurelu waa ọnu-ulo Jiuda a-gba ndzu ọphúú.

⁹Ono taa dūedu g'ogbandzu ọphu mu lẹ ndiche phẹ gbaru teke ono, mu kputaru phẹ l'ẹka kpufuta l'alị Ijiputu ono. L'e mechakwaaru; ephe mebyia ogbandzu mu l'ephe; ọphu mu eyebaeduru phẹ ọnu. Nokwa iphe, Chipfu eepfu.

¹⁰Chipfu sụkwapho: Ọwa-a bụ ogbandzu mu l'unwu Ízurelu a-gba mẹ o -rwuepho teke ono. Ekemu mu bẹ mu a-tushi ye phẹ l'egomunggo. Ọ bụru l'ime ọkpoma phẹ bẹ mu e-de iya edede. Mu aburu Chileke phẹ; ephe aburu ndibe mu.

¹¹Ọ tọ dūedu onye ejekwadu ezi nwibe iya; ọzo ziahaa nwune iya sụ iya: ‘Maru Chipfu’. Noo lẹ g'ephe ha a-tuko maru mu; nwata mẹ ọgerenya.

¹²Mu a-phuru phẹ obu-imemini l'emeswe, ephe mesweshiru mu. Ọphu mu anyatabaedu iphe-ẹji, ephe meshiru mu.”

¹³Sụ-a; eshinu ogbandzu-ọphúú-a byaru bẹ kẹ mbụ phọ buakwa akahụ-iphe. Teme iphe, bukpo iphe, akahuwaa akahụ bya atsuhuwaa mẹ ta adudu g'ono-beru; l'oo-chihu.

Hiburu 9

Abaru Chileke ẹja l'uzo k'akahụ mẹ k'ọphúú

¹Sụ-a; ogbandzu mbụ ono nwekpokwaaru nsọ nsọ, a tūru g'e dobeje mẹ a -nọdu abaru Chileke ẹja bya enwekwarupho ụlo, nemadzu gude ẹka mee, aanọduje mẹ a -nọdu egwekwaru iya phọ ngweja.

²Kẹle a kpọberu eze ụlo-ẹkwa. L'ime mkpuru iya kẹ mbụ bẹ e doberu orọku; waa teburu, aatukobeje buredi, dūru Chileke iche. Mkpuru kẹ mbụ ono aza Ẹka-dụ-nsọ.

³A bya lẹ mkpuru k'ẹbo eku Ẹka-kakọta-adu-nsọ bụ ẹkwa bẹ e gude gebuta iya.

⁴Iphe, dū iya nū bụru ọru-ngweja, e meru lẹ mkpọla-ododo g'akpoje ụnwù-isensu ọku; waa okpoko ogbandzu, e gude mkpọla-ododo kwekọta mgburugburu. Iphe nọgbaa l'ime okpoko ono bụ ite, a wūru lẹ mkpọla-ododo. Iphe, nọ l'ime ite ono bụru nri ono,

bụ mana; yee mgboro Eronu; mbụ mgboro ono, rwuru irwu tua ige ono; waa mkpuma labo ono, e deru ekemu iri ono, bụ mkpuma oğbandzu onoya.

⁵Iphe, dū l'eli okpoko ono buru ojozi-imigwe labo, bụ Chierobimu, egoshi odu-biribiri Chileke. Ephe woru nkù phe sashia gude gbobuta eka ono, Chileke aphujeru ndu nkiya obu-imemini; guaru phe nvu l'iphe-eji, epe meru ono. O gbabeepho be e-pfubaa ono tua ya jalaa.

⁶O buru eka ono, e meru egube ono be ndu-uke Chileke abahuje l'ime mkpuru ke mbu onoya mboku-mboku je eje ozi uke, gbaru phe nu.

⁷A bya le mkpuru k'ebō pho; o buerupho onye-ishi uke Chileke kpeekpu l'abahuje iya. Abahu ono, obahuje iya ono bukwa mgbo lanu kpoloko l'apha. Ebe o yikwa bahu iya me o -gudedu mee-iphe, oo-gude gwee ngweja ehu onwiya yele mee-iphe, ophu oo-gude gwefu iphe-eji ndu ke Chileke meru l'ebe ama ono.

⁸Waa iphe, Unme-du-Nso gude iphe ono eme g'o doo anyi enya bu owanawa. Le teke ono, eka ono, nemadzu gude eka mee ono, eegwejeru Chileke ngweja ono nokwadu be e teke aguhadu uzo, e shi abahu l'eka Chileke no g'onymonye bahu.

⁹Eka ono, eegwejeru Chileke ngweja ono nokwa onodu etu, egoshi iphe, eme nta-a, bu iya bu l'iphemiphe, a nuru Chileke me iphe, bu ngweja, e gweru nu iya l'eka ono ta ayidu mee g'obu onye abaru Chileke eja nmabuhu iya ikpe.

¹⁰O tukoru buru nsō nsō, eemegbaa ala le ke nri; me k'iphe, aangū angungu; mekpoo ke nsō nsō, dū l'asashi iphe, e gudegbaa mee k'abaru eja ono. O tukoru buerupho nsō nsō ke mgboko-a, Chileke suru g'e tsoje jasū teke ya e-goshi uzo ophuu, ee-shije abaru iya eja.

¹¹Obenu le nta-a be Kereshi byawaru bya aburu onye-ishi uke Chileke; mbu onye-ishi uke k'uzo ono, ka ree ono, Chileke goshiwaru nta-a ono. Eka o jeru ozi uke iya kakwa shii bya abukwarupho eka Chileke ka egude mee g'iphe, ya tuberu le k'adzota ndiphe ono meebekota ge ya tuberu iya. Eka ono ta nodu le mgboko owa; eshinu o to budu eka nemadzu gude eka mee.

¹²O to bukwa mee egbu ozoo mee eswi be o gude bahu; oo mee nkiya gedegede be o gude bahu l'eka ono du nsō ono ugbo lanu; k'ophu anyi a-buru ndu a gbataru l'itumo jasū l'ojejeje.

¹³Le mbu be obujeru e wotawaa mee egbu; ozoo mee eswi; ozoo ntū nwada eswi, a kporu oku woru phee ndu turwuru nsō; l'o mee ndu obu epe adubebe ree le ge nsō ekemu phe gude du.

¹⁴Eshinu o du nno eviya be mee ke Kereshi l'a-kabakwanu ere ire. Kereshi ono shi l'eka Unme Chileke, anō je-aduwaruro ya woru onwiya gweeru Chileke ngweja, adudu eka ntūji du iya. Mee nkiya ono a-kabakwaanu asafu obu anyi g'o du ree l'iphu Chileke; k'ophu anyi a-hakwanu eme iphe, Chileke a-nma anyi ikpe onwu; letachia enya l'ozi Chileke, bu Chileke dzu ndzu.

¹⁵Ọ bụru iphe ono meru g'o gude ọ bụru Kéréshi gudegbabẹ Chileke yẹle nemadzu l'ogbandzu ọphúú ono. Ọo ya bụ gẹ ndu Chileke hotaru eshikwanu l'eka Kéréshi ọdu ndzu ọphúú ono, Chileke kweru ukwe iya ono jaswaruro ya. Iphe, o gude ephe jee l'anodu ndzu ono bụ lẹ Kéréshi nwuhuwaru; gude nno gbata pẹ l'iphe-eji, ephe megbaberu teke ono, ogbandzu kẹ mbu pho, shi Chileke l'eka pho shi vukwaduru ire.

¹⁶Ukwe-iphe, Chileke kweru tukobe l'ogbandzu nkiya dukwa g'onye keru ekpe. L'obujekwaru; e -kee ekpe dobe bẹ aavojeadakwaa ya g'a maru: ? onye keru ekpe obu nwuhuwaru; teme l'ọ duru g'ee-me iphe iya obu.

¹⁷Noo l'ekpe, nemadzu keru te evujeduru ire teke onye ono nokwadu ndzu. Teke ooreje ire bụ mę onye ono nwuhuchaa.

¹⁸Noo g'o gude ọ bụru mee bẹ e gude mee ogbandzu mbu pho; o reahaa ire.

¹⁹Iphe mbu bụ lẹ Mosisu pfuru ndu Ízuru iphe, bukotakpoo nsọ nsọ, du l'ekemu onoya g'ọ hakpoo. Ọ gbeshi ọzo bya ewota oshi isopu yele eji aturu, e meru ọ ọdu eke uswe-uswe; woru tsee lẹ mee nweswi; waa mee egbu; bya atsekwa ya pho lẹ mini bya egude iya phedzuru l'ekwo, e deru ekemu ono; bya ephedzukwaru iya pho iphe, bụ ndu ono g'ephe ha.

²⁰Ọ ọdu ephe iya bya epfuje sụ: “Ọwa-a bụ mee, egoshi l'ogbandzu unu lẹ Chileke gbaru vuwaa ire; mbu ogbandzu ono, o shi goshi unu iphe, unu e-me gẹ yebedua emekwanaa iphe, ya pfuru unu.”

²¹Nokwapho g'o woru mee ono phedzuru ọlo ono, e gude ekwa mee ono; mbu ọlo ono, aanoduje gweeru Chileke ngweja onoya; bya ephedzukwaru iya pho l'iphe, bukpo iphe, e gude abaru iya eja.

²²Mbu-a; e -tsojekpoo ya g'ekemu du; l'ọ bụru nwanshi mę iphemiphe abukotaru mee bẹ eegudeje mee ya g'ọ safu du ree. Teme ophu aa-gbatadu nemadzu abudu l'ọ duru iphe, e gburu gbashi mee ya.

Eja Kéréshi egwefu iphe-eji

²³Ọ bụ iphe, gbaru l'ememe lẹ teke ono; g'e shi lẹ nsọ nsọ gbashada mee ono; mee g'iphemiphe ono, tukoru buri iphe, yeru k'okpobe iya ophu du l'imigwe ono; g'iphemiphe ono tukoru buri iphe, safuru du ree. Ọle okpobe iphe ono, du l'imigwe ono bụ iphe, gbaru iya nū bụ ngweja ophu tukoru kakota ophu eegbuje anu gude gwee ree.

²⁴L'eka Kéréshi bahuru ta abukwa eka eegwejeru Chileke ngweja ophu bụ nemadzu gude eka mee ya; mbu eka yeru ophu bụ okpobe iya pho. Eka ọ bahuru bukwa l'imigwe gedegede, bụ iya bụ eka ọ nọ l'iphu Chileke epfu opfu ehu anyi.

²⁵Onye-ishi uke kẹ ndu Jiu l'egudeje mee, abudu kẹ yebe onye-ishi uke ono bahu lẹ Eka-kakota-adu-nsọ ono aphagapha je egwee eja. Obenu lẹ Kéréshi bụ ugbo lanu kpoloko bẹ ọ bahuru l'eka ono je egude onwiya gwee eja.

²⁶Odumeka bẹ Kéreshi e-je iphe-ẹhuka k'o -jechaa oojebaa; eshi teke Chileke meru mgboko. Obenu l'ọ byaru ejee iphe-ẹhuka ono mgbo lanu sefu ẹka; gẹ mgboko abvwa-a; gude onwiya gwee ẹja nwuhu; shi nno gwefu iphe-ẹji, anyi meru g'ọ ha.

²⁷Iphe, duru onyemonye bu l'onyemonye nwuhufutaje akpo lanu; o nwuhuchaa; iphe ozo, e-mefuanu bu le Chileke e-kpe iya ikpe.

²⁸Nokwapho gẹ Kéreshi gude onwiya gwee ẹja mgbo lanu kpurumu nwuhu g'ooshi egube ono gwefu iphe-ẹji, igwe oha meru. Oo-mechakwaa bya k'ugbo ẹbo; obenu l'ọ byaepho k'ugbo ẹbo bẹ o to byadoeduru iphe-ẹji. Iphe, oobyawaa bu g'ọ dzota ndu echeru iya nu.

Hiburu 10

¹Ekemu bukwa nwinyekinyeki onyonyo iphe, du ree, Chileke tuberu l'oo-me l'iphu; o to budu okpobe iya. O buru iphe ono meru g'o gude ophu o byadu eme gẹ ndu byaru abaru Chileke ẹja dube ree; eshinu anoduje egwe ẹja ono mkpurumkpuru; e - gwechaa egwebaa; aphagapha.

²O -bu le ndu ono, agwaje Chileke egube ono shi waa l'egwe ẹja ono safu iphe-ẹji phe mgbo lanu; buwaru ndu pfuberekoto l'iphu Chileke; me obu phe anmabuhawaa phe ikpe iphe-ẹji phe; ephe ahaa egwe ngweja anu Chileke.

³Obenu l'iphe, emeje nu bu l'oo ẹja ono, ephe anoduje egwe ono emeje g'ephe nodu anyata iphe-ẹji phe aphagapha.

⁴Le mee eswi; me k'eghu ta asukwa egwefu iphe-ẹji.

⁵O buru iphe ono meru g'o gude; teke Kéreshi abya mgboko o su Chileke: "I ti ledu enya g'e wota iphe gbua gweeru ngu ẹja; ozoo g'e gweru iphe-ngweja nu ngu. Obenu l'i meru mu buru nemadzu, nweru anu-ehu.

⁶Iphe ngweja, akpokotaru oku nu ngu; me ophu e gweru k'iphe-ẹji ta adukwa ophu jiru ngu epho.

⁷Noo ya bu; mu su: 'Waa mu Chileke; mu byawaru gẹ mu mee iphe, du ngu l'uche; gẹ mu mee g'e deru ke nkemu l'ekwo ekemu.' "

⁸Ovukpodaru uzo su: "Iphe, e gburu gweeru ngu ngweja; ozoo ngweja, e gweru nu ngu; ozoo iphe-ngweja, a kpokotaru oku nu ngu; me ophu e gweru k'iphe-ẹji ta adudu ophu iile enya iya; ophu o dudu ophu jiru ngu epho." E -gudekpoo l'iphe, bukpo eja ẹja ono bẹ eegwekotaepho g'a turu iya l'ekemu.

⁹O pfuchaa nno bya asu: "Waa mu Chileke! Mu byawaru gẹ mu mee iphe, du ngu l'uche." Tobudu iya bu; o bya eworu ke mbu pho docha k'ophu oo-me k'ẹbo g'ọ nguru anguru.

¹⁰Jizosu Kéreshi meru iphe, du Chileke l'uche teke o woru onwiya gweeru Chileke ẹja mgbo lanu sefu ẹka; shi nno mee anyi du nsọ.

¹¹Iphe, bukpo onye uke Chileke apfujeru eje ozi uke iya mboku-mboku; o buru egube eja, o gwehawaru be oogwephuje azu tekenteke; ophu egube eja ono ayidu du ike safu iphe-eji.

¹²Obenu l'onye uke owa-a gweru ngweja k'iphe-eji mgbo lanu sefu eka; bya eje anodu lekutara Chileke.

¹³O buru eka ono be oo-nodu jasu teke Chileke e-woru ndu ohogu iya mee g'ephe buru iphe, oo-zopyabe l'okpa.

¹⁴Oo ya bu; o shi egube ono buru akpo ngweja lanu be o gweru gude mee ge ndu o safuru iphe-eji phe buru ndu pfuberekoto l'iphu Chileke jasu le tuutuutuu le mimiimii.

¹⁵Le Unme-du-Nso goshikwarupho anyi l'iphe ono bu eviya; kele o vuchaaru uzo su:

¹⁶“Owa-a bu oghandzu, mu l'ephe a-gba me mboku ono -rwuepho. Nokwa iphe, Chipfu eepfu. Ekemu mu be mu a-tushi ye phe l'obu; mu edee ya edede l'egomunggo phe.”

¹⁷O gbeshikwa ozo su: “Mu ta anyatabaedu iphe-eji phe me ejo-ememe ephe eme ozobaa.”

¹⁸Oo ya bu; le teke o bu le Chileke guwaru ndu nkiya nvu l'iphemiphe onoya; bunu iya bu le mkpa egwe ngweja ono k'egwefu iphe-eji ta aduedu.

Akpitaru Chileke ntse

¹⁹Nta-a; unwunna mu; be anyi ta atsuedu ebvu eshi le mee Jizosu bahu l'eka ono, Kakota-adu-nsa ono.

²⁰Le Kereshi gudeakwa ogwehu iya guhaaru anyi uzo ophu; ophu anu ndzu. O buru ogwehu iya ono no onodu g'ekwa ono, egbobutaje eka eeshije abahu l'Eka-kakota-adu-nsa ono. Ekwa ono mechaaru gbajahu ebo; shi egube ono egoshi l'anwuhu, Kereshi nwuhuru ghawaru anyi uzo ono g'anyi bahu l'eka ono.

²¹Eshinu anyi nweru onye-ishi uke ke Chileke du egube ono; onye bu iya be ndu onu-ulo Chileke du l'eka;

²²bunu iya bu g'anyi gude obu anyi g'o ha; mbu obu, kwetashikporu ike le Chileke a-nata anyi gude kpitaru iya ntse. Le Jizosu gudeakwa mee ya phedzuru obu anyi; k'opu bu l'o to duedu g'o ka mma l'oo nwantekuru iphe-eji, anmakwadu anyi ikpe l'obu. Anyi dukwapho ge ndu e gudewaa mini, doru edodo saa.

²³Unu g'anyi kwata gudeshia iphe ono, anyi suru l'anyi ele enya iya ono ike; g'anyi ta tahu mgbeleke ele enya iphe obu; kele Chileke yebdua, kweru anyi ukwe-iphe obu l'apfushijekwa ike l'iphe, o pfuru.

²⁴Unu g'anyi yejeru ehul'iphe, a-duru nwibe anyi le ree; k'opu anyi e-meje ndu ozo g'ephe yeje nwibe phe obu; waa g'ephe meje iphe, du ree.

- 25**Unu g'anyi ta ahakwa edzukọbeje l'ẹka lanu ono, anyi edzukọbeje ono; noo l'ọ dọakwaru ndu ọphu watawaru agbala; ọ chia g'anyi meje g'ọkpoma shihu nwibe anyi ike; kelekele g'unu elenaa ẹnya lẹ teke ọbu dọwaa ntse-a.
- 26**Su-a; anyi -gbẹ nta-a, anyi mawaru ọkpobe-opfu-a bya elekebe ẹnya eme iphe-ẹji bẹ ọ tọ dọkwa ngweja, egwefukwadu iphe-ẹji anyi.
- 27**Ọ chia iphe lanu, dọ nu kpeekpu bu ndzu-agugu k'iphe l'e-me nu, bu iya bu ndzu ikpe Chileke; kele ọo ẹjo ọku ono, abya igiri onoya bu ọku ọphu e-mebyishi iphe, bukpo ndu kwefuru Chileke ike.
- 28**Ọ bujekwaru onye darwuru ekemu Mosisu; a -dọwaa ẹbo; ọzoo ẹto; gbawa iya ekebe; a nmaa ya ikpe; l'e woru onye ọbu megbua emegbu; a ta phuduru iya obu-imemini.
- 29**Unu leanaro g'ọo-du onye lephuru Nwa ke Chileke. Onye ono bẹ Chileke a-kabakwaanu anu aphu; mbu onye woru mee ọgbandzu ono zotoshia gua ya l'iphe, adudu nso; bya eworu Unme-du-Nso ono, emejeru anyi eze-iphe-oma ono nmaa phulaphula.
- 30**L'anyi makwaru onye ono, pfuru su: “Ọ kwa mbẹdua nwe emelata; ọ buru mu bẹ apfu ugwo du l'ẹka.” Sukwapho: “Ọ kwa Chipfu e-kpe ndibe iya ikpe.”
- 31**Mbu lẹ-a; adaba Chileke ono, no ndzu ono l'ẹka bukwa iphe, gbaru g'a tsua ya ebvu.
- 32**Unu nyatajekwa g'o shi duru unu lẹ mbulembu teke ono, unu humaru iphoro ke Chileke onoya. Unu nyatajekwa g'unu gude jee iphe-ehuka, du igwerigwe; unu taɛlaa nshi; ọphu unu ekwedu g'ọ kapyabẹ unu ẹnya.
- 33**Ọ nwechaaru teke e shi achijechaa unu ọchi; mee unu iphe-iphere l'edzudzu-oha; obenu l'ọ bujeru akpadu unubẹdua ehụ; unu agbaɛla ọdzori ndu ọphu aakpa iya.
- 34**Unu aphu-tabewaru ndu ọphu no lẹ mkporo g'ọ bu unu, no lẹ mkporo ọbu. Aanakotaje unu iphe, unu nweru enweru lẹ mgboko; unu egudeɛlaa ehụ-utso tagbua ya lẹ nshi; opfu l'unu maru l'unu nweruro iphe ọzo, kabaa ree, bu ọphu a-nowaro ojeje.
- 35**Su-a; g'ọkpoma shihuɛkwapho unu ike g'o shihuru iya unu; unu ta abokwa obu ẹbo; lẹ Chileke e-mechakwaa pfua unu ugwo iya l'iphe, ha shii.
- 36**Iphe, mkpa iya duru unu bu ata nshi g'unu emejekwanu iphe, du Chileke l'uche; shi egube ono nata iphe, o kweru ukwe iya.
- 37**L'ọ fukwaa nwanshii onye ono, byafutajenu ono abya. Ọ tọ noekwa ọdu.
- 38**Ọle onye pfuberekoto e-gude ekweta nodu ndzu. Teke ọ bukwanu l'ọ tsuphuru azu; bẹ ọ tọ dukwa mu ree l'obu.
- 39**Ọ bekwanu l'anyi ta abudu ndu ọphu tsularu azu, a-la l'iswi. Anyi buchia ndu woru onwanyi ye iya l'ẹka; a dzoo anyi.

Hiburu 11

Iphe, ekweta bu

- ¹Iphe ono, bu ekweta bu: achiru upfu ye l'iphe, eele enya iya; bya aburu amakaharu l'iphe ono, a humaduru l'enya ono du pho eviya.
- ²Kele oo ekweta ono meru g'o gude ndiche anyi phe buru ndu ajaru ajaja l'ephe eme ree.
- ³Oo ekweta meru g'o gude o doo anyi enya le mgboko-a bu opfu onu be Chileke gude mee ya; mbu l'iphemiphe-a, akpurennya elegbaa bu iphe, aahumaduru l'enya be e gude mee ya.
- ⁴Su-a; oo ekweta Ebelu meru g'o gude o gweeru Chileke ngweja, ka ke Kenu ree. Chileke nata iya gua ya l'onye pfuberekoto; o nwuhuchakpoo iphe, o meru nodu epfulaa opfu byasu nta.
- ⁵O buru ekweta Inoku meru g'o gude o nodukwadu ndzu; Chileke bya ewolita iya g'anwuhu te egbu iya egbugbu ophu; ebe o dudu onye maru g'o meru; kele Chileke woliwaru iya; temanu e wolia ya ono be ajaru iya ajaja l'o shi emeje iphe, jiru Chileke epho.
- ⁶Unu maanaru-a l'o to dudu onye a-du ike eme iphe, jiru Chileke epho; gbahaa l'onye obu kwetaadaru ke Chileke. Kele onye akpitaru Chileke ntse vufutaje uzo kweta le Chileke du; kwetakwapho l'oo-buje ndu achu iya nu nggo.
- ⁷Su-a; oo ekweta Nuwa meru g'o gude o ngaberu Chileke nchi teke Chileke nmaru iya okwa iphe, e-mechaa mee nu, bu iphe, o toko humadu l'enya. O mee iphe, Chileke pfuru; kua eze ugbo, Chileke gude dzoo yee ndibe iya ndzu. O shi egube ono goshi nemadzu l'umere ndiphe du eji. O buru ekweta ono meru iphe, Chileke gude gua ya l'onye pfuberekoto. Opfu le Chileke aguje ndu kwetaru nkiya le ndu pfuberekoto.
- ⁸Oo ekweta Ebirhamu meru g'o gude o mee ge Chileke pfuru teke o kuru iya. O tugbua lufu jeshia ali, Chileke kweru iya ukwe le ya a-nu iya g'o buru nkiya. Ebirhamu shi l'ali iya tugbua ije; l'ebe ama eka ooje.
- ⁹Oo ekweta ono meru g'o gude o je eburu l'ali ono, Chileke kweru iya ukwe iya ono. O buru iya g'onye lwaru alwalwa. Ulo, yee Ayizaku waa Jiekopu shi ebujeru buerupho ulo, e gude ekwa mee. Ephebedua be Chileke kwekwarupho ukwe-iphe lanu ono, o kweru Ebirhamu onoya.
- ¹⁰L'iphe Ebirhamu ele enya iya bu eze mkpukpu ono, a turu okpa iya; k'opfu onowaro ojejeje ono; mbu eze mkpukpu ophu bu Chileke gude eka iya tua ya g'oo-du bya egude eka iya kpa ya l'onwiya.
- ¹¹O buru ekweta Sera l'onwiya mechakwarupho g'o gude o buru nwanyi, noru; ebe o tsujeduru ime jasu o noghaa atsuta ime be Chileke meeluru-a g'o du ike tsuta ime le nka. Iphe, kparu iya nu buru l'o doberu Chileke l'onye apfushije ike l'iphe, o kweru ukwe iya.

12Ọ bụru iphe ono meru g'o gude ọ bụru nwoke lanu ono, bu Ébirihamu mechaaru buru nna, nwuru igwe oha; mbu nwoke ono shiwaa kahuwaa duwaa g'onye nwuhuru anwuhu. Unwu iya mechaa bya ajaa ajàjà; ha l'otu ge kpokpode du l'igwe; ha igwerigwe g'eja, no l'ali; buru 'aguta aguta.

13Iphe, bu ndu ono, a gushiru ono chiru upfu ye l'iphe ono, Chileke kweru phe ukwe iya ono jasụ epe nwushihu; ophu o rwukwaru phe eka teke epe nokwadu ndu. Obenu l'ephe humakotaru iphe ono, nokwadu enya ono bya etee eswa iya. Epe saa ya asasa l'ephe humawaru l'ephe bu mbyambya bya aburu ndu kpafutaru uri le mgboko-a.

14Ndu epfu nno bu iphe, epe egoshi bu l'ephe achokwadu ali, e-mechaa buru nkephe.

15Ozo bu l'ome oghoroko ali phe ono, epe shiru futa ono shi aduje phe m'ephe achole-a uzo laphushia ya azu.

16Obenu l'eka enya du phe bu l'ali ophu ka ree, bu iya bu ophu du l'imigwe. O buru iphe ono meru g'o gude ophu iphere adudu Chileke l'ephe kuru iya Chileke phe; kele o duru mkpukpu o kwakoberu doberu phe.

17Su-a; oo ekweta Ébirihamu meru g'o gude o kweta duta nwa iya, bu Áyizaku jeshia egbugbu g'o gude gwaa Chileke teke ono, Chileke mejeru ge ya dalee ya ono. O buru onye ono Chileke kweru ukwe-iphe ono dutaru nwa lanu, o nweru jeshia egbugbu.

18O bukwaru onye-a Chileke suru: “Oo le Áyizaku be ii-shi nweru unwu nwanwanwanwanwa-a.”

19Ébirihamu buerupho iphe, o lechawaru enya huma bu le Chileke a-dua ike mee Áyizaku g'o shi l'onwu teta dzuru ndu, bunu iya bu l'e -pfuje iya epfupfu be Áyizaku shiwaa l'onwu teta dzuru ndu; eshinu e mechaaru o tsoru Ébirihamu laphu azu.

20O buru ekweta Áyizaku meru g'o gude o goru onu-oma nu Jiékopu yee Iso; goru phe iphe, e-me l'iphu.

21Oo ekweta Jiékopu meru g'o gude o goru onu-oma nu unwu Jiósefu l'ehu l'ehu teme o nwuhu. O pfuru apfuru; woru mgboro iya sibe l'ali; phozeta l'eli iya; baaru Chileke eja g'o go onu-oma ono.

22Oo ekweta Jiósefu meru g'o gude o bya l'anwuhu; o vuru uzo pfua opfu awufu, ndu Izurelu mechaaru shi l'ali Ijiputu wufu lashia ali, Chileke kweru phe ukwe iya. O bya egoshikwapho g'ee-me okpu iya m'ephe -wufuje.

23Oo ekweta ne le nna Mosisu meru g'o gude epe domia Mosisu onwa eto g'a nwuchaaru iya; opfu l'ephe leri iya enya l'o bu nwata, du ubvu l'enya; ophu ndu agueduru phe emebyi ekemu, eze ndu Ijiputu turu su g'e gbuje iphe, bu nwa nwoke, onye Jiu zedaru k'ophuu.

24Oo ekweta Mosisu ono meru g'o gude o vutaepho; o jika g'e te ekuhe iya nwatibe nwa nwanyi eze ndu Ijiputu.

- 25** Ọ hataru etsoru unwu Chileke jee iphe-ehuka; eme l'anodu l'eka ehu atso iya utso eme iphe-eji; mbu ehu-utso, adudu eka onono-beru.
- 26** Iphe, o kparu eka bu l'a -nodu eme iya ewere l'opfu ehu Onye-Ndzota ono, Chileke kweru ukwe iya l'oo-bya le mgboko ono be o ka iya ree eme le ya nwekotaru eku, du l'ali Ijiputu mgburugburu. Onoo kele enya du iya l'obunggo ophu du l'iphu.
- 27** Ọ buru ekweta Mosisu meru g'o gude o haa Ijiputu tugbushia; ophu ndzu aguduru iya l'ehu e-ghu eze ndu Ijiputu eghu. Ọ sua eka l'obu no-kirishia g'o -bu l'o humaru Chileke enya; l'ebe abu le Chileke bu onye aahumaje l'enya.
- 28** Ọo ekweta Mosisu meru g'o gude o gbube ishi k'obo Ojehata; teke ono, o suru ndu Izurelu l'opfu g'ephe woru mee nwaturu phedzuru l'iphe, bukpo onu mgbo ulo phe; g'ojosi-imigwe, byaru egbushi okpara ndu Ijiputu ta adu okpara ke ndu Izurelu, oobu.
- 29** Ọo ekweta unwu Izurelu meru g'o gude ephe wughaa l'echi ogbu Enyimu-uswe eje l'oma ali g'onye eje l'echi gbororo. Ndu Ijiputu jeshia aghata; mini rigbushikota phe.
- 30** Ọ buru ekweta ndu Izurelu meru g'o gude igbulu, e gude kpuphee Jieriko mgburugburu daa g'ephe jephechaaru iya mgburugburu abali esaa.
- 31** Ọo ekweta, nwanyi ovuoba ono, bu Rehabu meru g'o gude a haa ya; ophu a tukoduru yee ndu kwefuru Chileke ike mee g'ephe laa l'iswi; opfu l'o domijeru ndu Izurelu ono, byaru ngge le mkpuku Jieriko pho; shi egube ono dzoo phe.
- 32** ? Mu e-le ole agu? ? Denu teke mu a-nodu gushiwaro Gidiyonu phe me Beraku; me Samusinu; me Jiefuta; mbukpo Devidi phe; mekpoo Samelu; waa ndu mpfuchiru Chileke.
- 33** Ọo ekweta phe be meru g'o gude ephe tsoo ohamoha ozo ogu; lwu-kpee phe; bya eme iphe, pfuru oto; bya anata iphe, e kweru phe ukwe iya; mee g'oduma ta adu ike kuhaa onu akuha;
- 34** bya egude iya zonyia oku, ata ririri; bya egude iya nahu ndu gude ogu-echi achi phe k'egbugbu. Ephe shi buru ndu ike te eshidu du; e mechakwanaa ephe bya aburu ndu okpehu du. Ephe shi buru o-kariaka l'ogu; k'opfu ephe shi achije ojogu ndu ohozo nanu nanu.
- 35** Unwanyi, kwetaru nu humaru ndibe phe, nwushihuru nu g'ephe shi l'onwu tetagbaa. Ọ duru ndu e meru l'iwe jasu ephe nwuhu. Ephe nata su l'o -shita ophu ephe a-jika Chileke g'e-shi g'a haa phe g'ephe gbalaa; g'e gbuchia phe ro g'ephe nwuhu. Iphe, kparu iya nu bu l'ephe ele enya le Chileke e-mechaa mee g'ephe teta dzuru ndzu ophu ka ree.
- 36** Ọ duru ndu a haru chia ochi; chia phe iphe; tua phe mkporo; nwuru phe ye l'oka mkporo.

³⁷Ọ duru ndu a tugbushiru lẹ mkpuma; duru ndu e kwobuharu ẹbo; duru ndu e gude mma gbugbushia; ẹphe shi etsojeru aghapheephō; buru iphe, ẹphe shi eyeje bu akpo egbu mẹ akpo aturu. Ẹphe kparu nri; a kpaa phe ẹhu; mee phe ewere.

³⁸Mgboko du-be phe ẹji; k'ophu o to gbaduru k'ophu ẹphe a-nokota iya. Ẹphe shi anoduje aghaphe l'echiegu, e te budu ebubu mẹ l'eka ubvu du; ẹphe shi ebuje l'ogba mẹ l'obu-ali ge ndu agba oso ndzu.

³⁹Su-a; ndu-a tukokwaaru buru ndu a suru l'ẹphe shi eme ree. O buru ekweta phe kparu iya. Ẹphe noelaa; ẹbe iphe ono, Chileke kweru ukwe iya ono erwuduru phe ẹka.

⁴⁰Ole Chileke achiru anyi idzu, ka ree; k'ophu bu l'ooepho anyi l'ẹphe -tugba; teme ẹphe a-buru ndu dube ree.

Hiburu 12

Chileke emetse anyi

¹A bya l'ẹhu k'anyibedua; iphe, bu ndu ono tukokwaaru so-pee anyi mgburugburu g'onye urwukpu sopyaberu; agbaru anyi eze ekebe ono. Oo ya bu g'anyi gwobe iphemiphe, bu iphe, esela anyi azu; gwobekota iphe, bukpo iphe-ẹji ono, ete ekwedu anyi aha ẹka onoya. G'anyi gude ẹka l'obu maa oso-amama ono, duru anyi ono.

²G'anyi tabekpoepho Jizosu enya gba oso obu; l'oo ya bu onye vutaru uzo k'ekweta ono; teme o buru iya e-me g'anyi gbaa ya gbafu l'ishi. Yebedua mawaru ẹhu-utso, Chileke doberu iya; o buru iphe ono meru g'o gude o kweta jee iphe-ẹhuka jasu a kpopyabe iya l'oswebe; o nwuhu; ophu iphere, e shi l'egube anwuhu ono, o nwuhuru ono mee ya adudu iphe, o bu iya. Nta-a be o jewaru anodu anoo l'ekutara aba-eze Chileke.

³Unu rijekponaa ke Jizosu ono, tukoru iphe-ẹhuka ono jegbabe. O tukoru ẹjo ememe, ndu iphe-ẹji meru iya mẹ ẹjo opfu ẹphe pfuru iya gbagbukota lẹ nkuchi. Unu nyataje iya g'ike ata abvudu unu; ozoo su l'unu ta agbaedu oso ono.

⁴L'ogu, unu l'iphe-ẹji alwu be unu teke alwu-rwukwa k'ophu unu a-lwu iya nwuhu.

⁵? Unu zohawaru opfu ono, Chileke pfuru gude mee g'obu shihu unu ike l'unu bu unwu iya ono? O suru: "Nwa mu; te edobesujekwa l'ahuhu, Chipfu ahù ngu ta adudu iphe, o bu. Te egudejekwa l'o baru ngu mba wata ala azu azu;

⁶kele o kwa onye Chipfu yeru obu be oohuje ahuhu. O buru onye o nataru g'o buru nwa iya be oochije iphe."

⁷Oo ya bu; Chileke -nodu ahù unu ahuhu; unu tajekwa nshi; l'ahuhu ono bukwa ahuhu, nna ahuje nwa iya; kele unu bu unwu iya. ? Unu humajeru nwa, nna iya ahuduru ahuhu?

⁸Teke o bu lẹ Chileke ta ahudu unu ahuhu g'unu maru iphe g'ohu unwu iya ozo; oo ya bu l'unu ta abudu unwu iya; unu bu unwegirima, enwedu nna.

⁹Qobujeru; nna anyi l'eliphe-a -nọdu echi anyi iphe; anyi eyelere phe-a nsọ. ? Buchia Nna anyi ophu nọ l'imigwe be anyi ta akabadaa eworu onwanyi nu g'anyi eshi egube ono nweru ndzu.

¹⁰Nna anyi l'eliphe ahụ-tabejeepho anyi ahụhụ nwapha olemole g'ọ du phe ree. Obenu le Chileke ahụje anyi ahụhụ g'ọo-duru anyi le ree; g'anyi adubebe ree ge yebedua.

¹¹Qobujeru teke aahụ anyi ahụhụ l'oome anyi ehuka; ehụ taa tsodu anyi utso. Ndu kweru; a hua phe huta; l'emechajekwa buru ndu eme ree; bya abukwarupho ndu ehụ emechaje du guu.

Anma okwa

¹²Oo ya bu le-a; unu lochinaa aka ono, tsuhuwaru unu mee ono; yele okpa ono, aphuwaa unu kparikpari ono.

¹³Unu mechia gbororo, unu eshi g'ọ pfuru nhamunha; a -nonyaa okpa ono, aphu kparikpari ono shiswee uto; g'e mechia ya g'ọ gbakerehu shihu ike.

¹⁴Unu kukebeje ehụ meje g'unu l'onnyemonye nọdu le nchi odo; unu aburu ndu du nsọ; kele onye adudu nsọ ta ayikwa huma Nnajiuphu.

¹⁵Iphe, unu a-kwaberu enya bu g'ọ to du onye a-gbakutaru eze-iphe-oma ke Chileke azu. Unu eletakwapho enya g'ọ to du onye a-bya adu g'ogbarabvu-oshi, atsọ ilu kpo-futa l'echilabo unu bya egburwashiahaa unu ehụ; shi egube ono merwushia igwe oha.

¹⁶Unu letakwa enya g'ọ to du onye a-nọdu eme ke nwanyi; ophu o du onye anodu elephu iphe, ke Chileke ge Iso. Le Iso gudekwa aphu kpaakpaakpaa nri; woru okpara, o bu ree nwune iya.

¹⁷L'unu maanaru-a l'e mechaaru; o chọahaa ge nna iya gooru iya onu-oma. A su iya l'ogbawaru iya l'azu; kele o to duedu g'ooshikwadu emezi iphe, o mebyihawaru. Tobudu iya bu; o gude enya-mini ekwa choo onu-oma nna iya onoya; ophu o dudu.

¹⁸L'eka unu byaru ta abukwa ubvu, unu e-denye aka; teme oku, nọdu enwu iya phoophoophoo. Ophu o bukwa ochii ono; ozoo aka ono, gbahuru tsukiribaa ono be unu bataru. Ophu o bukwa oke pherephere ono byaru.

¹⁹O to bukwa oda opu ono; ozoo olu-opfu ono, daru g'egbigwe ono be unu numaru. Le teke ndu Izurelu numaru olu ono be ephe rwokwaru su g'o to pfuhakwa yeru phe ozo.

²⁰Kele ekemu, Chileke turu be ephe suru l'ọ kariru phe aka, bu iya bu ekemu suru: “O betakpo o buru anu be ehụ iya rwutaru l'ubvu ono g'a tugbua ya le mkpuma; ozoo g'a nmagbua ya l'arwa.”

²¹Iphe, ephe humaru l'eka ono paa biribiri; k'ophu Mosisu suru: “Ndu agushikwa mu ike; k'ophu ehụ anma mu anmanma.”

²²O chia ẹka unu byaru bu úbvù Zayonu; mbu mkpukpu ke Chileke, dzu ndzu; mbu Jierusalemu ophu du l'imigwe. Unu byapfutaru unwu-ojozi-imigwe ophu bu 'aguta aguta.

²³Eka unu byaru bukwa ẹka unwu Chileke, o dobekotawaru l'onodu okpara dzukoru; mbu ndu e deru epha phe l'ekwo l'imigwe. Unu byapfutawaru Chileke; onye bu iya e-kpe onyemonye ikpe. Ndu unu byapfutaru bu ndu nwuhuhawaru nu, pfuberekoto; ndu Chileke meru g'ephe duebe ree l'iphe iya.

²⁴Su-a; onye unu byapfutaru bukwa Jizosu; onye bu iya gudegbabe Chileke yele nemadzu l'ogbandzu ophuu ono; unu byapfutakwapho mee ono, o gbashiru l'oswebe onoya, bu mee ophu egoshi iphe, ka ree eme le ke Ebelu.

²⁵Oo ya bu g'unu kwabe enya g'unu ta jika angaberu onye ono, epfu opfu onoya nchi. L'eshinu ndiche anyi phe anahuduru ikpe Chileke; opfu l'ephe te eyeduru onu l'iphe ono, a loru phe ẹka le nchi le mgboko-a be anyibedua taa nahukwa me o -buru l'anyi jikaru onye ono, no l'imigwe alo anyi ẹka le nchi onoya.

²⁶Teke ndiche onoya be olu-opfu iya nmakotaru eliphe mgburugburu jijijijii; obenu le nta-a be o pfuwaru su: "Ugbo lanufua be mu a-nmafua eliphe jijijijii; nmachaa nmaa imigwe."

²⁷Chileke suru l'oo "ugbo lanufua." Ugbo lanufua ono, o pfuru ono goshiru l'iphe ono, o meshiru ono be oo-mekota g'o nmaa jijijijii; l'oowofu iya. Oo ya bu ge ndu ophu anmaduru jijijijii anodukwanu.

²⁸Oo ya bu g'anyi keleje Chileke ekele; kele o nuwaru anyi ẹka o bu eze; mbu ẹka adudu iphe suru iya anma jijijijii. G'anyi keleje iya; gudeje atsù ebvu akpabiri iya; woda onwanyi ali; kwabeje iya ubvu;

²⁹le Chileke anyi bukwa oku, ekepyashije iphe, o bapfuru.

Hiburu 13

Eme iphe, du Chileke ree

¹Unu ta ahakwa n-yemobu unu yeru unwunna unu ono.

²Unu ta azohakwa akwajeru ndu byaru abyabya ebyaa; l'o dukwaru ndu gudechawaa l'ephe akwaa ebyaa; ephe kwaaru iya unwu-ojozi-imigwe; ophu ephe amadu.

³Unu nyatajekwapho ndu mkporo; g'o dujekwapho unu g'o bu unu no mkporo obu. Unu nyatajekwapho ndu eje iphe-ehuka; g'o dujekwapho unu g'o bu unu eje iphe-ehuka obu.

⁴G'alulu bukwaru iphe, akwabe ubvu; g'iphe, bu ndu alu alulu te emerwushijekwa iphe-azee phe; kele nwoke eme ke nwanyi; ozo nwanyi, eme ke nwoke; me ndu eri ogori be Chileke a-nmakwa ikpe.

⁵Unu te eyenükakwa okpoga ɛnya. G'iphe, unu nweru jijeɛkwapho unu ɛpho. Lɛ Chileke pfuakwaru iya l'onwiya sɔ: “Mu ta agbahakwa ngu ɛka; ɔphu mu agwɔbekwa ngu.”

⁶Oo ya bɔ; unu g'anyi pfushijenu ike pfuje opfu-a; g'anyi ta atsujekwa ebvu epfupfu iya. G'anyi pfuje sɔ: “Oo Chipfu bɔ onye eyeru mu ɛka; ndzɔ ta abyadɔ agu mu; nemadzɔ ta adɔdu iphe, oomebata mu.”

⁷Unu nyatajɛ ndu ono, vu ɔzo goshi unu ɔzo ono, bɔ iya bɔ ndu ono, ziru unu ozi-oma Chileke ono. Unu kpoo egomunggo ɔkpolohu; nyata g'ɛphe shi anɔduje eme teke ɛphe nɔ ndzɔ jasɔ ɛphe nwuhu; g'ekweta unu dukwa gɛ nkepɛ.

⁸Jizosu Kɛreshi bɛ bɔ onye ono, ɔ bɔ unyaphu; bya aburu iya ntanɔ-a; o jee l'abu iya jasɔ lɛ tuutuutuu lɛ mijiimii.

⁹Unu te ekwekwa g'iphe eezi ezizi, dugbaa iche iche shi uswe bya akpɔ-swee unu ɔzo. O dɔ ree g'anyi gude eze-iphe-oma, Chileke eme shihu obu ike. Eme nsɔ nsɔ, tso nri tee mekwa g'obu shihu anyi ike; l'o tokɔ dɔ-swekwaa onye tsojeru iya ɛgube ono, o yejeru ɛka.

¹⁰Anyi nwekwaru ɔru-ngweja bɔ ɛka ndu egwekwaduru Chileke ɛja l'ulo-ɛkwa ono ta agbaduru g'ɛphe ria iphe, shi iya nɔ.

¹¹Onye-ishi uke Chileke phɛ egudeje mee unwu anɔ, e gburu egbugbu gude abahu lɛ ɛka-kakɔta-adɔ-nsɔ l'eze-ulo Chileke; g'o gude iya gwee ɛja gwefu iphe-ɛji; obenu l'anɔ ono, a phɔwaru aphɔphu ono bɛ eewotajɛ lufu alufu je l'ɛka eebudu ebubu je akpoo ya ɔku.

¹²O bɔru iphe ono meru g'o gude Jizosu nɔdukwapo l'azɔ mkpukpu jee iphe-ɛhuka nwuhu; g'eeshi g'oogude mee ya safu iphe-ɛji ndiphe.

¹³Oo ya bɔ; unu g'anyi jepfu iya l'azɔ mkpukpu g'a tuko anyi l'iya mee iphe-iphere.

¹⁴Kɛle ɔ tɔ dɔdu mkpukpu, anyi nweru l'eliphe-a, bɔ mkpukpu ɔphu l'a-dɔ ojejoje; ɔ chia iphe, meru nɔ bɔ l'anyi achɔ mkpukpu ɔphu abya nɔ.

¹⁵Oo ya bɔ; g'o tɔ dukwa teke anyi a-ha etuje Chileke ɛpha; g'etu ɛpha ono aburu ɛja, anyi shi l'ɛka Jizosu egwe. Oo ɛpha ono, anyi etu iya ono a-buru iphe, shi anyi l'onu, egoshi l'anyi bɔwaa ndu nkiya.

¹⁶Unu ta ahakwa eme iphe, dɔ ree; ɔphu unu ahakwa egudeje iphe, unu nweru yeru nwibe unu ɛka; kɛle ɔo ɛgube ngweja ono bɔ ɔphu dɔ Chileke ree.

¹⁷Unu meje iphe, ndu-ishi unu sɔru g'unu meje; m'obeta ɔ nɔdu atsɔ unu l'ɛhu ememe. L'ɔ kwa ndu ono, bɔ ndu-ishi ono anɔduje eche ndzɔ unu echeche; eshinu ɛphe emechaa pfuru l'iphu Chileke doo g'ɛphe jetaberu ozi ɛhu unu. Unu -nɔdu emejewaa iphe, ɛphe sɔru g'unu meje bɛ ɛphe e-gude ɛhu-utso jee ozi phɛ ono. Teke ɔdumeka bɛ ɛphe agbɛkwa atsɔ ude eme iya; ono ta adɔdu urwu, ɔo-baru unu.

¹⁸Unu pfujekwaru nuru anyi Chileke. Ophu anyi makaharu bu l'obu ta anmadu anyi ikpe; ebe o dudu teke o to buedupho g'anyi mee iphe, du ree l'iphemiphe, anyi eme ememe be anyi eshibeje ite iya.

¹⁹Iphe, mu arwoshikpoo unu ike; unwunna mu; bu g'unu pfuje nu Chileke; ge Chileke kwe ge mu byapfuta unu egwa.

Epfu anu Chileke

²⁰Ge Chileke ono, bu iya emeje g'ehu du guu ono; mbu onye ono meru ge Nnajiuphu anyi, bu Jizosu Kereshi shi l'onwu teta dzuru ndzu ono; bu iya bu Eze onye eche aturu ono, l'eche aturu ono; o buru mee, o gbashiru teke ono, o nwuhuru ono be o gude mee ukwe-iphe, Chileke kweru tukobe l'ogbandzu yele nemadzu g'o vuru ire jasu le tuutuutuu le mijimiimii ono;

²¹mee g'unu dube ree l'iphemiphe, bu iphe, du ree, unu eme; g'unu meje iphe, bu uche iya. Ge Chileke shikwapho Jizosu Kereshi l'eka mee iphe, du iya ree l'obu anyi. G'ajaja buru ke Kereshi jasu le tuutuutuu le mijimiimii. Nokwa g'o du.

Ekele, e gude akpochi ishi ekwo-ozia

²²O kwa arworwo be mu arwo unu; unwunna mu; su g'unu takwaa nshi numa ozi-a; l'ekwo-a, mu deru unu-a ta adukwa ogologo. Oo ya bu g'oomee unu g'obu shihu unu ike.

²³Iphe, mu eme g'unu maru bu le nwune anyi, bu Timoti, e shi tuchia be a haakwaru. O -bya egwa be mu l'iya a-tuko swiru me mu -byatashia unu agbaphe.

²⁴Unu kelechaaru mu iphe, bukpuo ndu-ishi unu me iphe, bukpuo ndu bu ndu ke Chileke. Unwunna anyi ndu Itali l'ekelekwapho unu.

²⁵Ge Chileke meeru unu eze-iphe-oma g'unu hakotakpoo. Nokwa g'o du.

Jiemusu

Jiemusu 1

¹Mube Jiemusu, onye bu onye-ozu Chileke; buru onye-ozu Nnajiuphu, bu Jizosu Kereshi l'ekele okpa-ipfu iri l'ebo ono, dzuru mgboko ono ekele.

Ekweta waa mmamiphe

²Unwunna mu; teke iphe-ohutama g'ọ dūhabe byaru unu; unu wojeru iya dobe l'iphe, eeteru eswa.

³Kele unu maru l'a -nodu adale ekweta unu be unu e-shi iya nwuta ota-nshi.

⁴Unu takpoeppo nshi tafu iya l'ishi g'unu a-dube ree; dzukwapho oke g'ọ to du iphe, a-phodu l'ehu unu.

⁵Teke o duru g'unu ha onye mmamiphe phoduru; g'onye ono su Chileke g'ọ nu iya mmamiphe. Oo-nu iya ya; eshinu Chileke bu omeluko; teme o nodu egudeje obu iphoro nu onyemonye iphe, o suru g'ọ nu iya.

⁶Ole g'onye ono kwetakwa l'iphe oopfu ge Chileke nu iya be oo-nu iya. G'ọ bo bokwa obu ebo; l'onye obu abo ebo dukwa g'akpara-mini eze-enyimu, bu pherephere anoduje enwunga iya. O -kwaru iya shia ophuu; o kwaru iya shia ophuu.

⁷G'egube onye ono ta ariekwa l'ọ duru iphe, oo-nata l'eka Nnajiuphu;

⁸Kele onye abo egomunggo ebo ta apfushijekwa ike l'iphemiphe, oomekpoo ememe.

Ukpa waa enweru iphe

⁹Ge nwanna, daru ukpa tua onwiya epha le Chileke kuliru iya eli.

¹⁰Nokwapho g'onye ophu nweru iphe e-tu onwiya epha l'enya lwaru iya; kele oomechaa rifu g'okoko eswa;

¹¹Kele enyanwu awaje chishiahaa ike k'ophu oomeje eswa anwua lwaa; okoko iya erishihu; mma iya abvu. Noo g'onye nweru iphe a-gbabuhukwapho nwuhu l'eka oome iphe, du iya mkpa.

Ahuta ama waa enwu eye

¹²Ehu-utso be a goru nu onye taru nshi l'ohutama; kele teke a hucharu iya ama obu; ophu o daduru be ee-kpube iya okpu-eze, bu iya bu ndzu; buru obunggo, Chileke suru le ya e-bu ndu yeru iya obu.

¹³Oo ya bu; onye aahu ama g'o mee ejo-iphe; o -wata iya agugu; g'ọ to sukwa l'oo Chileke enwu iya eye g'o mee ya. Kele o to dukwa onye Chileke enwuje eye g'o mee ejo-iphe; ophu o dukwa onye enwu Chileke eye g'o mee ejo-iphe.

¹⁴Oo eme ejo-iphe, agu nemadzu be edetaje iya nu; l'ọ nmalahu iya.

¹⁵Oo ya bu; teke egu ejo-iphe tsutaru ime; l'oonwua iphe-eji; iphe-eji kagheppo; l'oonwua anwuhu.

¹⁶Unwunna mu, mu yeru obu; unu te etsoswekwa ụzo.

¹⁷Iphe, aanụ anụnu, dị ree waa iphe-oma, adudu ẹka ntucha dị iya shikota l'imigwe. O shi l'eka Nna ke iphoro imigwe, bu iya bu Nna ophu te echibuhujedu g'enyanywu abujeru o -chibuhu; ochi agbaahaa-a.

¹⁸O turu obu iya onyo gude okpobe-opfu ono nwua anyi; g'anyi du g'akporu iphe-mbu l'iphemiphe, o meru ememe.

Anuma emee

¹⁹Unwunna mu, mu yeru obu; iphe, unu a-maru bu owa-a: g'onymonye bukwaru onye angabeje nchi l'iphe, eepfu temanu ooyee ya onu; buru onye ehu te eghujedu eghu egwegwa;

²⁰Kele iphe, eeme l'ehu-eghu taa bukwaru iphe, pfuru oto l'iphu Chileke.

²¹Oo ya bu; unu tofu onwunu iphe, bukpo umere, l'eshi ishi; waa iphe, bukpo iphe-ashi; jia obu oyi; nata opfu ono, a kuru l'ime okpoma unu ono, bu iya l'a-du ike dzoo unu ono.

²²Ole-a; unu bukwaru ndu eme opfu ono ememe. Unu ta abukwaru ndu anu iya anunu kporumu; kele ono bukwa eme onwunu eswe.

²³Onye anupho opfu ono anunu; ophu oomedu iya ememe yeru nwoke, ele g'iphu gbaru iya l'onyo.

²⁴Mbu onye lechaekwadurupho enya l'onyo bya atugbua bya azohaehukwapho g'iphu gbaru iya.

²⁵Obenu onye enyoje ekemu ono, adudu ẹka ntucha du iya; mbu ekemu, emeje g'e nweru onwonye ono; o -duru onye phuberu iya iphu; ophu o budu onuma-ozohaa; o -buru onye emeje iya ememe; onye ono be ee-gude iphe, oome meeru eze-iphe-oma.

²⁶Onye dobesu le ya bu onye ke Chileke l'ebe abu l'oosedede ire iya eme onwiya eswe. Onye ono be eme ke Chileke nkiya bu ke mmanu.

²⁷Abu onye ke Chileke ophu Chileke, bu Nna kweru l'o bu okpobe iya bya aburu ophu ntucha adudu ono be bu akwo unwoogbee le mkpa, duru phe nu; waa eyeru unwanyi, ji phe anohedu ẹka; waa ewofu ẹka le mkparwu ke mgboko-a.

Jiemusu 2

Anma okwa abo nemadzu ebo

¹Unwunna mu; g'unube ndu kweru ke Nnajiuphu anyi, bu Jizosu Kereshi-a; mbu Nnaji akpabiri; unu ta abojekwa nemadzu ebo.

²Kele-a; o -buru l'onye nweru iphe gbacharu mgbuguru bya akwaa onwiya yegele bataru l'ulo-ndzukọ unu; onye ukpa -yee nwankiriba iphe batakwapo;

³teke unu kwaberu onye pho, kwaru akwapho ùbvù sù iya: “Bya asugabe onwongu l'okposhi-echi-a” bya asu onye ukpa pho: “Pfuru l'eka ono” ozoo: “Bya anodu l'ali l'eka-a no-kube mu” ;

⁴? to budu nemadzu be unu abo ebo egube ono; teme unu gude ejo egomunggo ekpe ikpe?

⁵Unu ngabekpodapho nchi; unwunna mu, mu yeru obu. ? To budu ndu ukpa le mgboko-a be Chileke hotaru g'ephe buru ndu shi l'ekweta, ephe kwetaru nweru iphe l'iphu Chileke; bukwarupho ndu e-nweru eka o bu eze, bu iphe, o suru le ya a-nu ndu yeru iya obu-a.

⁶Unu gbenu meru iphe-iphere kpua ndu ukpa ? Tobudu ndu nweru iphe be l'akpaje unu ehu-a? ? To budu phe be l'akpujeru unu je edobe l'ulo ndu-ikpe-a?

⁷? Tobudu phe anoduje epfubyi eguru epha ono, unu aza ono epfubyi-a?

⁸Unu -nodu emewaa eze ekemu ono be unu emewaa ree, bu iya bu eze ekemu, no l'ekwo Opfu Chileke, suru: “G'i yee nemadzu ibe ngu obu g'i yeru onwongu.”

⁹Obenu le-a; unu -nodu aboje nemadzu ebo be unu emekwa iphe-eji; teme ekemu nodu anmakwapho unu ikpe, bu iphe, gbaru onye emebyi ekemu.

¹⁰Kele onye meebekotaru iphe, ekemu pfuru g'o ha; mephodo nanu be ikpe nmakwaru l'o mebyikotaru iya g'o ha.

¹¹Kele o bukwapo onye suru g'i ti rishi ogori suru g'i ti gbushi ochi. O -buru l'i ti ridu ogori; i nodu egbu ochi; i buakwaa onye emebyi ekemu.

¹²Oo ya bu; unu pfuje; teme unu emejekwapho ge ndu ee-gude ekemu ono, emeje g'e nweru onwonye ono kpee ikpe.

¹³Kele onye ta aphuduru onye ozo obu-imemini be a taa phukwarupho obu-imemini me e -kpeje ikpe. Obu-imemini atujeru okoo kpua ikpe!

Ekweta yeke iphe, eeme ememe

¹⁴Unwunna mu; ? denu urwu, du le nemadzu suru le ya nweru ekweta; ophu oogoshidu iya l'umere? Egube ekweta ono ? oo-du ike dzoo ya?

¹⁵Teke o bu l'o duru nwanna ke nwoke; ozoo ke nwanyi, gbagbuwa oto; teme ophu o humajedu nri ria;

¹⁶onye lanu g'unu ha su iya: “Tokwa ehu-o! Laa je anyaru oku; g'epho ji ngu” l'ebe abu l'o nuru iya iphe, bu mkpa ehu iya; ? denu urwu, du l'egube iphe ono?

¹⁷Noo g'ekweta kpoloko e te goshiduru l'iphe, eeme ememe bu iphe, nwuhuru anwuhu.

¹⁸Obenu l'a su mu: “Gubedua nweru ekweta; mbedua nodu ejekwanu ozi.” O du ree; goshiekwa mu ekweta ngu me ii -jedu ozi, du iya nu. Mbedua-a egudekwanu ozi, mu eje goshi ngu ekweta mu.

- ¹⁹I kweru lẹ Chileke bụ Chileke lanụ; i meru ree. Ono bụkwapho g'òbvu kwegbaaru gude iya anmagbaa pyaapyaapya.
- ²⁰Ole iphe, ìi-maru gùbe onye mmanụ ono bụ l'ekweta, eegoshiduru l'iphe, eme ememe ta abụdu òkpobe iya.
- ²¹? Denu g'onye-iche anyi, bụ Ébirihamu gude bụru onye p̄berekoto l'iphe Chileke? O shi l'iphe, o meru; kele o gude Áyizaku, bụ nwa iya je egbugbu gẹ ya gude gweeru Chileke ngweja l'oru-ngweja.
- ²²? Tị hụmaduru g'ekweta iya yẹ iphe, o meru dagbaru? Iphe, o meru goshiru l'ekweta iya dzuru edzudzu.
- ²³Iphe, e deru l'ekwo-opfu Chileke mee g'e pfuru iya; kele o sūru: “Ébirihamu kweru ke Chileke; o gūaru iya ya l'ap̄berekoto”; teme o gūa ya eguru ònyà iya.
- ²⁴Unu hūma l'oo iphe, nemadzu eme bẹ e gude agū iya l'onye p̄berekoto; o tọ bụdu-a ekweta kpurumu.
- ²⁵Nokwapho gẹ nwanyị ovuoba-a, bụ Réhabu-a dū. Oo iphe, o meru bẹ o gude bụru onye p̄berekoto; kele o kweru gẹ ndu Jiu, e ziru ozi bata ibe iya; bya eyeru phẹ ẹka; ephe shia ụzo ozo laa.
- ²⁶Kele oo g'anụ-ẹhu, unme adudu nwuhuru anwuhu-a bụ g'ekweta, egoshiduru l'iphe, eeme ememe nwuhuru.

Jiemusu 3

Ire bụ ogu

- ¹Unwunna mu; unu ta adukwa igwe bụru ndu ezije iphe; kele unu maru l'anyibe ndu ezije iphe bẹ Chileke a-ka ekpeshi ikpe ike.
- ²G'anyi ha etsosweje iphe, dū igwerigwe. O kwa onye opfu teke edeswe bụ onye dūbe ree. O bụru egube onye ono adujekwapho ike sede onwiya.
- ³Anyi -woru mkp̄rukpu-ígwè-inya kobe inya l'onu g'o meje iphe, anyi sūru g'o mee bẹ anyi emeje inya l'ophu; l'ooshi ẹka anyi sūru g'o shia.
- ⁴Ozokwapho ugbo-mini; ? I hūmaru g'ò habe shii; teme o bụru oke pherephere anoduje akpo iya; ole oo nwa gberere eku ugbo bẹ eegudeje anga iya l'ooshi iphe, bkpoo ẹka onye-ishi ugbo anga iya eshi.
- ⁵Nokwapho g'ire bụ nwiphe nshii; ole ootuje onwiya epha lẹ ya erenuka ire. ? Tị hūmaduru g'oswa habe shii? ole akpuru oku lanụ etsuje obote-egu.
- ⁶Su-a; ire bụ akpuru oku. Ire nọ-chiru ẹnya iphe, bkpoo ẹjo-iphe, nọ lẹ mgboko-a l'ehu anyi. Ire epfurwuje ogwehu nemadzu mgburugburu; teme o nodu alotaje oku-alimaa tsobe lẹ ndzu nemadzu; l'ootsua ya tsufu; ooshiẹpho teke a nwuru onye ono; tsua jasū g'oo-nọ-beru.

⁷Ọ tọ dudu ẹgube anu-ẹgbudu; ọzoo ẹnu; ọzoo iphe, akpu akpukpu; ọzoo iphe, bu le mini, nemadzu ata agotajedu agota; l'ooburu l'unuphu; ophu o dudu ophu a gotaadaru; o buru l'unuphu.

⁸Obenu l'ire ta adudu amadu suru iya agota; o bu ejo-iphe, e te gudeshijedu egudeshi. O du g'eru ejo agwo, te edodu onye o taru edodo.

⁹O bu iya be anyi gude aja onye ono, bu Nna bya buru Nnajiuphu ono; ole o buhukwa iya pho be anyi gude atu nwibe anyi onu; mbukwa onye e meru; o du ge Chileke.

¹⁰O buru onu lanu ono be ago onu yee atu onu shi. Unwunna mu; o to gbaduru g'o du ẹgube ono.

¹¹O to dudu nggele, asofutaje mini, atso ilu bya asofutajekwapho mini, atso utso mgbo lanu.

¹²Unwunna mu! Oshi figu ta amijekwa akpuru olivu. Ophu vayinu amijekwa akpuru figu. Nokwapho g'e te ekutadu mini, atso utso l'umaswi.

Mmamiphe, shi l'igwe

¹³? O duru onye ari le ya maru iphe; nweru uche g'unu ha? Onye ono goshieshikwa iya l'eme umere oma; waa l'eme gelee ophu shi le mmamiphe.

¹⁴Teke o bukwanu l'unu eji iji-anya, atso-ilu bya aburu ndu akpa anya; unu te ejekwa etu onwunu epha ke mmamiphe ono; kele o o uka be unu gude emebyi okpobe-opfu.

¹⁵Egube mmamiphe ono te eshikwa l'igwe. O shi l'eka ndiphe. O to shidu l'eka Unme Chileke. O shi l'eka Nsetanu.

¹⁶Kele eka iji-anya yee akpa anya du be mkpaka dukwapho; ophu o dudu ẹgube ejo-iphe, adudu iya nu.

¹⁷Obenu le mmamiphe ophu shi l'igwe dube ree; bya aburu nchi-adu-doo; bya eme gelee; bya eme onu-utso; bya aphu obu-imemini; bya ami okpobe mebyi; ophu ookpochadu mkpocha; ophu o budu tuko l'ehu-atuko-l'obu.

¹⁸Teme mebyi, ndu eme ge nchi du doo amije bu apfubekoto.

Jiemusu 4

Eshita ndiphe onya

¹? Bu awe be abaphe mba yee esephe opfu ono shigbaa unu? ? Tobudu eka o shigbaa unu bu l'iphe, ekpiri iya du unu? ? Tobudu iya bu iphe, bu ogu, du l'ehu unu?

²Oobujeru iphe, agu unu erwuduru unu eka; unu egude k'iphe ono gbuaaharu ochi. Unu -chabe anya l'iphe onye ozo; ophu o dudu; unu abaahaa mba; seahaa opfu. Unu ta ahumaduru uzo iphe, agu unu; kele unu ta asuduru g'a nu iya unu.

³Unu nodu asuje g'a nu unu iphe; a ta nodu iya unu; opfu l'unu egudeje oriri, adudu ree epfu iya g'ee-shi g'unu egude iya mee iphe, agu unu egu.

⁴Unubẹ unwanyi mẹ unwoke, eri ogori ono; ? unu ta amadụ l'onye yee iphe-utso, dū lẹ mgboko-a eshi ònyà bụwaa onye ohogu Chileke? Oo ya bụ l'ọ tọ dudu m'obeta ọ buru onye dū idagha hatarụ g'ephe lẹ ndiphe shiru ònyà; onye ono emekwa onwiya onye ohogu Chileke.

⁵Tọ ? ọ dū unu g'iphe, e deru l'ekwo-opfu Chileke bụ kẹ mmanụ, sūru lẹ “Chileke eko okophoo unme ono, o yeru g'o buru l'ime anyi ono?”

⁶Ole eze-iphe-oma kẹ Chileke ka shii. Noo iphe, e deru l'ekwo-opfu Chileke sū: “Chileke apfuchijekwa ndu nggangga ụzo. O nọdu emejeru eze-iphe-oma nū ndu wozeru onwophẹ alị.”

⁷Oo ya bụ; unu nọdu Chileke l'eka. Unu apfu-chia Obutuswe ụzo; hūma l'oo-gbaru unu oso.

⁸Unu kpitaru Chileke ntse; hūma l'oo-kpitarakwarupho unu ntse. Unu kwoo onwunu eka unubẹ ndu eme iphe-eji. Unu sachaa obu unu ree unubẹ ndu abo obu ebo.

⁹G'o rwua unu l'ehu; g'aphu ji unu obu; unu kwashia enya-mini. G'achi ochi buru unu aphu; g'emere me buru unu iphere.

¹⁰Unu wozeje onwunu alị l'iphu Chileke g'ookulia unu eli.

Anma okwa epfurwushi nwanna onye

¹¹Unwunna mu; unu te epfurwushijekwa nwibe unu. Onye epfurwushi nwanna iya; ozoo onye anma nwanna iya ikpe bẹ epfubyikwa ekemu; teme ọ buru ekemu bẹ ọ gbẹ ekpe ikpe. Obenu lẹ teke iikpe ekemu ikpe bẹ i ti meekwa iphe, ekemu pfuru. O kwa onye-ikpe bẹ i bụ.

¹²Onye lanu kpurumu bụ onye atuje ekemu; teme ọ buru iya bụ onye-ikpe; mbu onye ono, aduje ike dzoo ndzu; dukwapho ike gbua nemadzu. Obenu ? bụ onye b'i dobesu l'i bụ gube onye ono, anma nwibe ngu ikpe?

Anma okwa etu onwonye epha

¹³Unu ngaberu mu nchi; unubẹ ndu sūru “Ntanu-a; ozoo echele bẹ ọ duru mkpukpu, anyi e-je je anogba apha; gbaa ngho rita urwu; “

¹⁴l'ebe abu l'unu maru g'echele a-du. ? Ndzu unu bu gunu? O bu enwuru-oku, akpu-lihuje; a noekwapho nwanshi l'oophukashihu.

¹⁵Noo iphe, unu gege asuje-chia: “O -du Chileke l'uche bẹ anyi a-tuko nodu ndzu; mee owa-a; ozoo ophuu.”

¹⁶Obe l'owa bẹ unu etse etsetse bya etu onwunu epha. Egube ekuku ono g'o hakota dukwa eji.

¹⁷Oo ya bụ l'onye maru ree, o gege eme; ophu o meduru iya bẹ ọ bukwa onye obu eme iphe-eji.

Jiemusu 5

Anmaru ndu nweru iphe okwa

- ¹Nta-a bu k'unube ndu nweru iphe; unu kwashia enya-mini; chia mkpu ejo-aphu, abyaru unu.
- ²Èku unu reshichuakwaru ereshihu. Teme ngwá unu buru iphe, nsu sukashichawaru.
- ³Mkpola-ododo unu me ke mkpola-ochaa unu gbaakwaru egba. Oo egba iya ono apfuru agba unu ekebe. Oo-kepyashi anu-ehu unu g'oku. Nta-a be unu kparu eku kuberu onwunu l'ikpazu-a.
- ⁴Ndu jeru unu ozi egu be unu ta apfuduru ugwo; aphu, ephe agu be erwuakwa l'igwe. Teme mkpu ke ndu kpataru unu iphe, unu koru l'opfu rwuakwapho nchi Chipfu, bu Okalibe-Kakota-ike ono.
- ⁵Unu buru le mgboko; tusaru ehu; eri gwogwoo; eme ehu unu ehu unu. Unu tsua onwunu ebà g'anu-ebà kwaberu mboku egbu unu.
- ⁶Unu nmaru ndu pfuberekoto ikpe; gbua phe; l'ebe abu l'o duru iphe, ephe akposhijehawaa unu ememe.

Ata nshi waa epfu anu Chileke

- ⁷Unwunna mu; unu takpockwapho nshi nodu jasute Nnajiuphu a-bya. Unu humaru g'onye koru opfu ataje nshi; kwaberu opfu iya g'o rwuta iphe, baru urwu. Otaje nshi; igwe eshi l'awuze dzee mini dzekota iya udzumini; l'ootaa nshi jasute l'ephefuta.
- ⁸Unubedua kwapho; unu takwapho nshi; shihu obu ike; kele teke Nnajiuphu a-bya duakwaa ntse.
- ⁹Unwunna mu; unu ta agujekwaru nwibe unu aphu g'eete ekpedu unu ikpe. Unu lekwa onye-ikpe g'opfuru l'onu mgbo!
- ¹⁰Unwunna mu; unu nyatajekpopho ndu shi epfuchijeru Nnajiuphu. Unu gudeje phe nwua ota-nshi teke unu eje iphe-ehuka.
- ¹¹Unu eleanaa; o kwa ndu taru nshi be anyi ekuje ndu a goru ehu-utso nu. Unu numawaru atanshi ke Jiobu. Unu makwarupho iphe, Nnajiuphu nuru iya l'ikpazu. Kele Nnajiuphu bu onye obu-imemini bya aburu o-gba-mkpu.
- ¹²Ole ophu kachakponu; unwunna mu bu; unu te erijekwa angu. Unu te egudejekwa igwe ozoo ali ria angu; ophu o dukwa iphe ozo unu e-gudeje ria angu. Unu -su "ee" g'o buru ee; teke unu suru "waawaa" g'o buru waawaa; g'a ta anma unu ikpe iya.
- ¹³? O duru g'unu ha onye eje iphe-ehuka? G'onye ono pfuru nu Chileke. ? O duru onye ehu atso? G'onye ono gua ebvu ajaja!
- ¹⁴? O duru g'unu ha onye iphe eme? G'onye ono kukoo ndu e meru ogerenya Chiochi g'ephe pfuru opfu ehu iya nu Chileke. Ephe egude epha Nnajiuphu wua ya manu l'ishi.
- ¹⁵Opfu, e pfuru nu Chileke bya ekweta l'oo-mee be a-dzota onye iphe eme; Nnajiuphu abya emee; l'o wekorohu. Teke o bu l'oo iphe-eji be o meru; a guaru iya ya nvu.

¹⁶Noo ya bu; unu koshijeru nwibe unu iphe-eji unu; teme unu epfukwapho anuru nwibe unu Chileke g'ee-me g'unu wekorohu. Opfu, onye pfuberekoto pfuru nu Chileke be ike dukwa l'ere ire.

¹⁷Elayijia bu nemadzu mmanu g'anyi bu. O pfuru nu Chileke pfushia ya ike su g'igwe buchia mini. O noo mgarapha eto l'onwa ishii; ophu mini atadaduru l'ali.

¹⁸O bya epfuru nu Chileke ozo; igwe bya mini. Iphe, a kuru l'ali miahaa mebyi ozo.

¹⁹Unwunna mu; o -duru g'unu ha onye shisweru uzo l'okpobe-opfu ono; onye ozo duphuta iya azu l'uzo, pfuru oto;

²⁰g'onye ono maru l'onye duphutaru onye eme iphe-eji azu; mbu onye l'eshi uzo, gberu nggo; onye ono be dzotaru nemadzu l'eka onwu; teme o meakwarupho; a guaru iya nvu l'ikpoto iphe-eji.

1 Pyita

1 Pyita 1

¹Ekwo-ozhi-a shi l'eka mbedua, bu Pyita, bu onye-ishi-ozhi Jizosu Kereshi. Ndu mu ede iya anu bu unube ndu Jiu ono, a chikashiru unu laa ohozo je ebugbaaru ono. Ndu eburu le Pontosu; ndu eburu le Galeshiya me le Kapadosiya; mechaa le Eshiya yee Bitiniya.

²Mbu unube ndu Chileke, bu Nna hotaru mee; unu buru nkiya. Chileke hotaru unu; kele o shikporo le mbu maru l'unu l'a-buru ndu nkiya. Tobudu iya bu; o bya ezia Unme-du-Nso; o mee unu: unu buru nkiya; k'ophu unu a-nodu anujeru Jizosu Kereshi opfu; wafua ge Jizosu ono egude mee ya safukota unu iphe-eji, unu mekotaru g'o ha. Mu su ge Chileke mee g'eze-iphe-oma nkiya yee nchi-odu-doo rwube unu aka; rwube iya unu k'anyinyi.

Ele enya ndzu ojeje

³G'anyi jaa Chileke ajaja. Oo ya bu Nna Nnajiuphu anyi Jizosu Kereshi. O phwaru anyi obu-imemini ophu nyiberu g'aa-tu onu iya. O mewaru Jizosu Kereshi: o shi lonwu teta nodu ndzu. O gbe l'ono nwu-phu anyi azu ozo. Nta-a be anyi elewaa enya ndzu ophu anyi a-dzuru jasu le tuutuutuu le mimiimii.

⁴Anyi elekwapho enya l'anyi l'unu e-mechaa toko gbaru mgba nweru iphe-oma, Chileke doberu unu l'imigwe; mbu iphe-oma ophu ta abyadu erehu erehu; ophu o byadu emebyihu emebyihu; ophu o yidu kahu akahu.

⁵Oo kele oo l'unu woru onwunu ye Jizosu l'eka be meru g'o gude o nodu egudeje ike iya akwachi unu g'o to du iphe l'e-me unu jeye teke oo-goshi unu le ya dzohawaruro unu. O kwaro l'ikpazu be oo-goshi iya unu.

⁶Ono bukpoadanu iphe unu a-noduje ete eswa iya; a makwaru-a l'unu jefutaje iphe-ehuka, du iche iche, a-hu unu ama; ole ono bu-a ke nwa nta-a; o to dudu g'oo-no-beru;

⁷k'ophu e-gude iphe-ehuka ono huta ekweta unu ama maru ? to dudu nu nyegenyege. Unu leanaro mkpola-ododo. O bu iphe, vu oke aswa teme o nodu emebyihujekwanu emebyihu. O buferu-a l'oku be aahuje iya gude maru ? o bu okpobe iya. Nokwapho g'aahuta ekweta unu ama g'a maru ? o bu okpobe iya. Ekweta ono be unu maanaru-a l'aswa iya ka ke mkpola shii. A -dalechaa ya; o -buru okpobe ekweta; l'aa-jaa unu ajaja; mee g'unu nwua phoo g'iphoro, shi Chileke l'eka; aakwabekwapho unu ubvu. O buru mboku ono, Jizosu Kereshi a-bya ono be oo-nwukota nno.

⁸Onye unu yeru obu; l'ebe abu l'unu gude enya huma iya; unu ta ahumaduru iya l'enya ke nwanta-a; obenu l'unu kweru nkiya; ete eswa; ehunodu atso unu k'ophu aamadu g'a-tu onu iya.

⁹Iphe ono, unu ele enya iya ono, rwua unu aka; mbu l'obu unu be a dzotaru.

¹⁰Ndu mpfuchiru, pfuru k'eze-iphe-oma ono, ee-mechaa meru unu ono; tokporu nwehu choo ndzota ono okpobe achochu.

11 Ɛphe mee g'ɛphe maru teke Unme Kéréshi, nɔ phɛ l'ime epfu ama ɛka l'oo teke Kéréshi e-je iphe-ɛhuka; yɛɛ teke a-kwabɛ iya oke ùbvù.

12 Tɔbudu iya bɛ; Chileke bya emee ndu mpfuchiru iya ono, ɛphe maru l'ozi ono, ya ziru phɛ ono ta abudu ozi ɛhu phɛ; l'oo unubɛdua bɛ e ziru phɛ iya g'ɛphe bya ezia. Nta-a bɛ unu shiwaa l'ɛka ndu-ozi ono, bɛ phɛ byaru ezia ya unu ono bya amaru iya. Ɛphe byaru bya egude ike kɛ Unme-dù-Nsɔ zia ya unu. Unme-dù-Nsɔ ono bɛ Chileke bɛ shi l'imigwe ye phɛ iya l'ɛhu. Ozi ono, e ziru unu ono bɛ aguchakwaa agu unwu-ɔjozi-imigwe. Ɔ dù phɛ g'a sù l'o nwekpɔoru g'e meru: o doo phɛ ɛnya.

Umere, dù Chileke ree

13 Ɔo ya bɛ; unu chikobe egomunggo unu l'ɛkalanu; g'ɔ kwabɛ akwabɛ g'onye liru anamu l'upfu; unu esedeje onwunu esede; unu elekwaphɔ ɛnya eze-iphe-oma ono; Chileke e-meru unu teke Jizɔsu Kéréshi e-goshi onwiya ono.

14 Lɛ teke unu te eshidu mawaru ɔkpobe-opfu ono bɛ bɛ ɛgu ejo-iphe, shi anɔduje agu unu shi kpuru unu l'ɛka. Nta-a, unu buwaa ndu l'anuru Chileke opfu-a unu te ekweɛkwa g'ɛgu ejo-iphe kpukwaduru unu ɛgube ono, o shi kpuru unu ono.

15 Iphe, unu e-mechia nta-a bukwa g'unu shi l'iphemiphe, unu eme goshi l'unu dù nsɔ; lɛ Chileke ono, bɛ iya kuru unu ono bɛ dukwa nsɔ.

16 L'e dekwaru sù: “Unu dukwa nsɔ; lɛ mbɛdua dukwa nsɔ.”

17 Ɔobujeru; unu -nɔdu epfu anu Chileke; unu eku iya Nna; mbu Chileke ono, bɛ iya bɛ onye ekpejeɛpho onyenonu ikpe g'iphe, o meru gbaru; ɔphu ɔ dùdu onye oomeje ele ɛnya l'iphu. Noo g'o gude unu je anɔdu ndzu unu l'ophu; tsuje iya ebvu lɛ mgboko ɔwa-a, a byaru abyabya-a.

18 Unu nyatajɛkwa iphe, o phuru Chileke tɛmanu ɔ gbata unu l'ɛka mkpɔkoro umere ono, unu nwɛtaru l'ɛka nna, nwuru unu phɛ ono. Iphe, o gude pfua aswa ishi unu gbata unu ta abukwa iphe emebyihuje emebyihu g'okpoga-mkpɔla-ɔchaa mɛ mkpɔla-ododo.

19 Iphe, o gude gbata unu bɛ mee ono, aswa iya paru ɛka ono, bɛ iya bɛ mee Kéréshi. Kéréshi ono bɛ dù gɛ nwaturu, e gude eje egwe ngweja; nwaturu, adukpodaa ɛka ɛta dù iya l'ɛhu ilile; tɛme ɛbe ɔ dùdu ɛka iphe, takuru iya l'ɛhu.

20 Ɔo iphe ono bɛ Chileke hɔta-doru iya. Ɔ hɔtaru iya rɔ tɛme mgboko dù; o rwua lɛ nta-a, bɛ ikpazu-a; o gude k'iswi ɛhu unu goshi iya ndiphe.

21 Ɔo Kéréshi ono bɛ unu nɔ l'ɛka iya kweta kɛ Chileke; ɔ buru Chileke ono meru iya o shi l'onwu teta dzuru ndzu; bya abukwaru iya phɔ kwaberu iya ùbvù ɔphu shi l'imigwe. Ɔo ya bɛ; l'unu nɔwa Chileke l'ɛka elekwaphɔ ɛnya l'oo ya l'a-dzo unu.

22 Sù-a; unu anɔduje eme iphe, ɔkpobe-opfu ono pfuru. Unu shi ɛgube ono safukota iphe, dù eji lɛ ndzu unu; k'ɔphu bɛ l'unu byaru bya eyewa unwunna unu obu; ɔphu obu obu, unu yeru unwunna unu obu abukwa tuko-l'ɛhu-atuko-l'obu. Ɔo ya bɛ; unu ta

ahakwa eye nwibe unu obu. Unu kukebejekwa ẹhu gude ọkpoma unu l'ophu yee nwibe unu obu.

²³Kele e gudewaa opfu Chileke ọphu dzu ndzu ojejoje nwuphu unu azu; ọphu o to shidu le ndzu erehuje erehu; ọ chia ọphu tee rehedu erehu.

²⁴Kele “Nemadzu l'ophu dukota g'eswa. Mma ke nemadzu dukwapho g'okoko eswa ono. Eswa -kpohuwaa nku be okoko iya erishihuje dashihu.

²⁵Obenu l'opfu, Nnajiuphu pfuru a-duẹpho jeye l'ojejoje.” Opfu ono be bu iya bu ozi-oma ono, a byaru ezia unu onoya.

1 Pyita 2

Mkpuma, dzu ndzu; buru iya gude ọlo

¹Qo ya bu; unu tua onwunu ẹkpu tushia iphe, bukpo ejo-iphe, unu eme. Unu haa adzu uka; ọphu ọ duhe onye a-buru tuko-l'ẹhu-atuko-l'obu; unu ahaa enya-pfurupfuru; haa epfubyishi nemadzu ibe unu.

²G'ọ buru g'egu era l'anoduje agu nwamee nshi-a bu g'opfu Chileke anoduje agu unu; mbu opfu Chileke ono, e te emerwushiduru emerwushi ono; ọo ya bu g'unu e-gude iya vua evuvu; vuta k'ọphu Chileke a-dzo unu.

³Le unu le Nnajiuphu megbabewaru iphe; unu huma l'ọ du ree.

⁴Su-a; unu byapfuta Nnajiuphu ono. Ọo ya be bu mkpuma ono, dzu ndzu ono, Chileke gude tua ọkpa ọlo iya ono. Mkpuma-a be ndiphe hofuru tuphaa su l'ọ bu ọgalemkpa. Ole humanu; l'enya ke Chileke be ọ gbẹchikwa buru iya be ọ hotaru kwabe ubvu.

⁵Unubedua kwapho, bu ndu du ge mkpuma, dzu ndzu; be Jizosu Kereshi gudekwa akpu ọlo Unme-du-Nso; edozi ọgbo uke, du nso ke Chileke. G'unu buru ndu a-noduje anu Chileke ngweja, du iya ree.

⁶Kele e deru l'ekwo-opfu Chileke su: “Lenu; mu gudeakwa ẹka mu togbo mkpuma le Zayonu. Mkpuma ono be mu hotaru; ọ buru mkpuma vu oke-aswa; teme ọ buru itso gude ọlo. Iphe, bukpo onye daphuberu iya nu be ta abyakwa akwa izimanu.”

⁷Qo kwa l'ẹhu k'unubedua, kwetaru ke Kereshi be mkpuma ono bu iphe, akwabe ubvu; a bya l'ẹhu ke ndu te ekwedu ke Kereshi be; “Mkpuma ono, ndu l'akpu ọlo jikaru ono mecharu bya aburu mkpuma, gude ọlo.”

⁸Teme e dekwaapho su: “Mkpuma ono be bukwa mkpuma, anoduje adu ndiphe upfu bya abukwarupho epfu, ephe e-vukotaje daa iko.” Noo kele ephe jikaru ekweta opfu Chileke. Ọ buru ge Chileke dobpohawaru l'oo-du phe bu onoya.

⁹Obenu l'unubedua bu ndu Chileke gude ẹka iya hota. Unu bu ọgbo uke ke Chileke; bya aburu oha du nso; buru ndu Chileke nwe enwenwe; k'ọphu unu e-me g'ajaje iya ajaja; mbu onye ono kufutaru unu l'ochii kuru unu ye l'iphoro iya, du biribiri ono.

¹⁰Qo dukwaru teke unu eshidu buru ndu ke Chileke; nta-a be unu buwaa ndu nkiya. Ete shidu pharu unu obu-imemini; obenu le nta-a be ọ phuwaru unu obu-imemini.

Umere, gbaru ndu Kéreshi tɔwaru l'ɛgbu

11Ndu mu yeru obu; unu bukwa nlwamulwa le mgboko-a; teme unu byakwa iya pho g'onye kpafutaru uri. Oo iphe ono meru g'o gude mu nodu epfuru iya unu; epfushiru iya unu ike su unu jiko g'unu te ewokwaru onwunu togboru egu ejo-iphe, du iche iche, anoduje agu nemadzu egu ememe. O kwa ndzu ophuu ono, Chileke nuru unu ono be egu eme ejo-iphe ono anoduje etso ogu.

12G'umere unu shije ekiri l'iphu ndu ete ekwedu ke Chileke; k'ophu bu ephe - bokponu unu ibo l'unu bu ndu eme ejo-iphe; ephe eleanaa umere unu l'o dunukaru ree; ephe egudekwanu iya jaa Chileke ajaja mboku ono, oo-bya ekpee phe ikpe ono.

13Unu wozejekwa onwunu ali l'iphu ndu oha meru ndu-ishi; m'obvu Nnajiuphu; l'iphu ndu-eze, bu phe be ike du l'eka;

14me l'iphu ndu bu o-chi-oha, bu ndu e yeru g'ephe huje ndu eme ejo-iphe ahuhu; ephe ajaje ndu ophu eme iphe, du ree ajaja.

15Noo kele iphe, du Chileke l'uche bu g'unu gude umere oma mechishia ehueswe ehueswe ndu amadu iphe anoduje epfuru unu ono.

16Kéreshi be tokwaru unu l'ɛgbu. Ole o to bukwa g'unu bya eworu onwunu saaru eme iphe-aji ogbo. Unu mejechia umere, gbaru ndu ejeru Chileke ozi.

17Unu kwabeje onyemonye ubvu. Iphe, bukpo ndu bu unwunna; mbu ndu no Kéreshi l'eka; be unu eyekotaje obu. Unu tsujekwa Chileke ebvu. Unu akwabejekwapho eze ubvu.

Iphe-ehuka, Kéreshi jeru bu anyi iphe-leta-mee

18Unube ndu ejeru nemadzu ozi; unu wozejekwa onwunu ali l'iphu nnajiuphu unu; kwabeje iya ubvu. Iphe, bukpo iphe, ephe suru g'unu mee; unu mejekwa iya. G'o to bukwapho onye ophu nnajiuphu iya duru odoo bya emeru onu utso be a-kwabeje iya ubvu kpoloko. G'onye ophu nnajiuphu iya duru ehuka kwabejekwa iya pho ubvu.

19Chileke be ehue atsojekwa utso me o -buru l'unube ndibe iya gude iya ata nshi eje iphe-ehuka, byaru unu; mbu iphe-ehuka, e meru unu; unu nodu eje l'ebe abu l'o duru iphe, unu meru, du eji.

20Ole o to bukwa: a -nodu ahue ngu ahuhu iphe, du eji, i meru i nodu ata nshi; ono ta agbakwaru g'a jaa ngu ajaja iya. O kwa onye meru iphe, du ree; a nodu echi iya iphe ehene; onye ono nodu ata nshi; noo onye Chileke a-ja ajaja iya bu ono.

21Noo l'o kwa eje iphe-ehuka egube du Chileke ree ono be Chileke kudoru unu oku iya. Le Kéreshi l'onwiya gudekwa k'iswi ehue unu jekwaapho iphe-ehuka. Ono buwaruro iphe-leta-mee be o meru doberu unu; k'ophu unu a-nodu anwu eka iya.

22“Onye adudu iphe-aji, o mejeru; ophu ntuphu-ire adujeduru iya l'onu.”

23A kwagokpokwaaru iya ihu; ole o to phulataduru. E mee ya mkpawere; ophu o dudu onye o suseru le ya e-melata. Iphe, o mechiaru bu l'o woru onwiya ye Chileke l'eka; mbu Chileke ono, bu onye-ikpe, ekpeje ikpe, pfuru nhamunha ono.

²⁴Kéreshi l'onwiya bẹ vutawaru iphe-eji, anyi meru g'ọ hakọta l'ẹhu onwiya teke ono, a pfugburu iya l'oswebe onoya. G'anyịbedua ono, nọ l'eme iphe-eji nwụhu anwụhu ono abya adzuru ndzụ buru ndu pfuluberekoto. Ọ kwa igbiri echachi e chiru iya bẹ e gude mee g'unu wekorohu.

²⁵Noo l'unu shi eje phururugbadaa g'aturu, ephu ụzo; obenu lẹ nta-a bẹ unu lwaphutawaru azu; lwapfuta onye ono, eche unu g'onye eche aturu; bya abukwarupho onye eleta ndzụ unu ọnya ono.

1 Pyita 3

Umere, gbaru nwanyi yee ji iya

¹Nokwapho g'ọ dū unubẹ unwanyi, alu ji. Unu wozejekwa onwunu alị l'eka ji unu nọ. Ọo ya bụ k'ophu bụ; o -nweru ji unu phẹ ndu ophu te eyejedu onu l'opfu Chileke; ephe ahuma eguru umere, unu eme gude iya bya emelaha opfu, Chileke pfuru; m'obetaruro ophu unu epfuduru phẹ kẹ Chileke.

²Noo kẹle ephe e-gudewaro ọnya phẹ ahuma umere, adudu eka uta dū iya, unu eme eyeru phẹ; opfu l'unu atsu Chileke ebvu.

³Omemma unu ta agbakwaru g'ọ buru iphe, eme l'akpo-ẹhu, bụ iya bụ aswinghamshi egbushi; waa egude unwu iphe, e meshiru lẹ mkpola-ododo kwaa onwunu ngwa; yele eye erengete uwe.

⁴G'ọ bujehiaru g'unu e-me dozirwee ime okpoma unu g'ọ to buru eka retoshihuru eretoshihu; g'ọ buru omemma k'eme odoo yee eji obu oyi. Iphemiphe ono bẹ tukokwaru bukotaru iphe, aswa paru eka l'ọnya kẹ Chileke.

⁵Kẹle ọo egube ono bụ g'unwanyi shi egudeje eme omemma nkephe teke k'ichee. Ephe shi edobejeru onwophe Chileke iche; teme ephe shi anoduje ele Chileke ọnya l'eka. Ephe shi ewozeje onwophe alị l'iphu ji phẹ.

⁶Ọo egube ono bẹ Sera shikwapho anuru Ebirhamu opfu ekuje iya nnajiuphu. Nta-a bẹ unubedua buakwaa okpobe unwu Sera me unu -nodu emeje-a iphe, pfuru oto; ophu o dudu iphe, eyejekwadu unu ebvu.

⁷Unubẹ ndu ophu bukwanu unwoke, alugbaa nwanyi; unu mejekwarupho nyee unu umere, dū ree. Unu maru onwunu ẹhu l'alulu, unu alu nwibe unu. Unu kwabejekwa phẹ ubvu; eshinu unu maanaru-a l'unwanyi bẹ uvohu ka b'adu; eme lẹ nwoke. Unu letaje phẹ ọnya; mejeru phẹ iphe, mkpa iya duru phẹ. Noo kẹle unu l'ephe a-tuko shi l'eka Chileke gbaru mgba nweru eze-iphe-oma ono, bụ iya bụ ndzụ ojejoje. Unu mejekwa umere, dū egube ono k'ophu o to dudu iphe, akposhi unu epfu anu Chileke.

Ewere, eeme onye pfuluberekoto

⁸Eka mu a-sube opfu ono ishi bụ; g'uche unu bujekwaru nanu. G'iphe-ehuka, byaru nwibe unu rwuje unu l'ẹhu g'o rwuru onye o byaru. Unu yejekwa nwibe unu obu. Noo kẹle unu bụ ndibe Chileke. Unu bukwaru ndu obu-imemini. Unu wozejekwa onwunu alị l'eka nwibe unu nọ.

⁹Onye -meru unu eji; unu te egudejekwa eme eji pfa ya ugwo iya. Onye -phuru unu iphu; unu te ephulatajekwa. O chikwaa iphe, unu e-mejechia bu g'unu gojechiaru onu-oma nu onye obu. L'iphe, Chileke kuduru unu oku iya bukwa ge ya goru onu-oma nu unu.

¹⁰“L'iphe, bu onye o du g'a su le ndzu iya e-tse ogologo; teme o dukwa iya pho g'a su le mboku-mboku abujeru iya k'oma; g'onye ono te egudehekwa ire iya tu ikpoki; ophu onye obu adzujekwa uka.

¹¹G'onye ono gbakutaru eme iphe-eji azu watachia eme iphe, du ree. G'onye ono kukebeje ehu cho iphe, bu o -mee ya nchi-adu-doo. O -chota iya g'o to tutowkwa iya eka.

¹²Noo kele Nnajiuphu, bu Chileke be anodujeepho eleta ndu pfuberekoto enya. O nodu angabejekwapho nchi numa epfupfu, ephe epfu anu iya. Obenu le ndu ejo-iphe be ooghajeru azu.”

¹³Su-a; ? denukpoo onye suru unu emekata me o -nodu ehe unu ihee eme iphe, pfuru nhamunha?

¹⁴O -bukpooru nu l'unu a-nodu eje iphe-ehuka; opfu l'unu eme iphe, pfuru-oto; g'ehu tsojekwa unu. Ge ndzu ta agujekwa unu m'ephe -nodu eye unu ebvu; ophu o dukwa iphe, unu ejejekpo ay oshi iya.

¹⁵Iphe, unu e-mejechia bu g'unu gudeje obu unu g'o ha kwabeje Kereshi, bu Nnajiuphu unu ubvu; gude goshi iya l'oo ya bu Nnajiuphu unu. Unu kwagebejeph akwagebe tekenteke k'opfu bu l'o -duru onye jiru unu k'iphe ono, unu ele enya iya ono; unu eyeeru iya okpobe onu; goshi iya iphe, meru g'o gude unu nodu ele enya iphe ono, unu ele enya iya ono.

¹⁶Unu meje nno g'obu ataa awajekwanu unu mini; k'opfu bukwanu o -nweru ndu l'epfuru unube ndu ke Kereshi ejo opfu; unu egude umere oma ono, unu eme ono meru iphere kpua phe.

¹⁷L'o kakwa ree le nemadzu jeru iphe-ehuka; opfu l'oome iphe, du ree; m'o -bukwaru l'o bu iphe, du Chileke l'uche bu onoya; eme le nemadzu anwu onwu ejo-iphe, o meru.

¹⁸Kele Kereshi l'onwiya jekwarupho akpo iphe-ehuka lanu nwuhu kele ndiphe eme iphe-eji. O buru onye ono, pfuberekoto ono be nwuhu-chiru ndu apfubeduru-eka-oto; k'opfu oo-duta anyi dupfu Chileke. Ndiphe bu egbugbu mmanu be ephe gburu ogwehu iya. Obekwanu le Unme Chileke meru iya o nodu ndzu.

¹⁹O buru ike Unme Chileke ono be o gude bahu le maa jepfu ndu maa ono, a tuchiru le mkporo ono je epfuaru phe opfu Chileke.

²⁰Le teke ndiche ono, Nuwa kuru eze ugbo ono be ndu teke ono jikakwaru angabe nchi l'iphe, Chileke epfu; Chileke takpoeppo nshi ngabekotaru phe; ophu o dudu; jeye teke o nonyaru o haa mini; o bya erigbushikota phe. O buerupho nwa ndu abadu ishi be bahuru l'eze ugbo ono; iphe, ephe du bahu iya bu umadzu esato kpoloko. O buru mini ono, ugbo ono ese eli l'eli iya ono be Chileke shi dzoo phe.

²¹Mini ono bẹ nọ ọnodu baputizimu, e gude adzọ unu kwaphọ. Ọ tọ bụkwa l'a asafuje anyi inyi l'ẹhu; ọ chikwa l'anyi egudeje iya arwọ Chileke g'o mee g'obu ta awa anyi mini. Ọ bụru l'eteta, Kéreshi shi l'ọnwu teta nọdu ndzụ bẹ ooshije dzọo anyi.

²²Ọ tetaru ono lashi je anọdu l'imigwe l'ekutara Chileke, bụ Nna. Iphe, bụkota ojozi-imigwe g'ephe hakotakpoo; mekpoo iphemiphe, ike dọ l'eka; me iphemiphe, bukotakpoo ndu-ishi l'imigwe nọdukota iya l'eka.

1 Pyita 4

Ndzụ ọphúú

¹Kéreshi bẹ jeru iphe-ẹhuka teke ọ nọ lẹ mgboko-a. Ọo ya bụ; g'ọ bụekwarupho ge k'iphe-ẹhuka ono dọ Kéreshi bụ g'ọo-duje unu; mbụ g'unu kwakobekwa k'eje egube iphe-ẹhuka ono. Ọ tọ dukwa onye jebejeru egube iphe-otsu-l'ẹhu ono lẹ mgboko-a ọ gbeshi jeye ẹka l'eme iphe-eji ọzo.

²Ọo ya bụ; unu watakwapho eme iphe dọ Chileke l'uche. Ọ bụru g'unu e-gudewa iya rọ ememe bụ onoya lẹ nwa nta-a, unu nọkwadu l'eliphe l'eka-a. Unu te eyeekwaru egu ejo-iphe agugbabe unwu-eliphe ọnu.

³Unu lewarọ ime teke unu shi meta iphe, unwu-eliphe eme. Unu shi bụru ndu iphere bvuru l'iphu; unu nọdu ewojeru onwunu haaru egu ejo-iphe; yee angunuka mee yee ejo-uzere; me etsojeerupho achọ-phe ẹka unu angu mee; yee anọdu agwaphe agwa me obvu.

⁴Nta-a bẹ ọ gbekwa bya adu ndu ono, ta amadu Chileke ono biribiri l'unu te etsojeeduru phe emephe ejo ememe ono; ophu unu l'ephe anọdu ndzụ ọla-l'iswi ono. Ọo iphe ono meru g'o gude ephe nọdu anọduje epfubyishi unu.

⁵Ọle mbọku, Chileke e-kpe phe ikpe abyaakwaa. Ọo mbọku ono bẹ ephe a-bya apfuru Chileke l'iphu; gude ọnu phe shi ishi lanu dokotaru iya iphe, ephe meru l'eli-mgboko-a; mbụ Chileke ono gbẹ kwakobehawanu k'ekpe ndu nwuhuru anwuhu me ndu nọ ndzụ lẹ mgboko-a ikpe ono.

⁶Ọ kwa iphe ono meru g'o gude e je ezia ndu maa ozi-oma ono k'ophu e-kpe phe ikpe, duru ogwehu; ephe anodukwanu ndzụ ophu Chileke nọ.

Egude iphe-oma, Chileke meru ngu jeeru iya ozi

⁷Su-a; teke iphemiphe-a l'abvu bẹ dukwaa ntse. Ọo ya bụ g'unu sedeje onwunu; g'enya doo unu risaa; k'ophu unu a-duje ike epfu anu Chileke.

⁸Ọphu kachakpoo nu bụ g'unu yeekwapho nwibe unu obu okpobe eyeye kwaseru; kele egube n-yemobu ono ekpuchijekwa ikpoto iphe-eji.

⁹Unu kwajeru nwibe unu ebyaa. Ọle g'unu ta agujekwa aphu iya.

¹⁰Eshi ophu Chileke megbawaru unu eze-iphe-oma, dọ iche iche; bya anuchakwaapho onyemonye iphe-oma l'ẹhu l'ẹhu; g'onnyemonye gude iphe-oma ophu Chileke nuru iya

mee iphe, a-baru nwibe iya urwu. O kwa unu mee nno l'ọ buru iya bu l'unu bu ndu letaru ẹnya ọkpobe eleta l'iphe-oma, Chileke nuru unu.

¹¹O -duru onye epfu opfu; g'onye ono pfujee ya pho g'ọ bu Chileke l'onwiya epfu iya. O -duru onye eyetaru ndu ozo aka; g'onye obu yetaje iya ge Chileke nu-beru iya ike. Oo ya bu; g'ee-shikwanu l'iphe, anyi emeje ememe ndiphe eshi Jizosu Kereshi l'eka kwabe Chileke ubvu; mbu onye ono, okwabe ubvu me eze ike, paru aka apaa; bu nkiya ono jasụ le tuutuutu le mijimimii. Nokwa g'ọ du.

Iphe-ehuka, ndu no Kereshi l'eka eje

¹²Ndu mu yeru obu; g'ejo iphe-ehuka ono, abyapfujaje unu ono ta adujekwa unu biribiri. Egube oke iphe-ehuka ono bukwa iphe, e gude eme g'a maru ? unu noshiru-a ike l'eka Chileke. G'ọ to dujekwa unu g'ọ bu iphe, etu iya adujeduru be byapfutaru unu.

¹³O chikwaa iphe, unu e-meje bu g'ehu tsoje unu utso l'unu tukoru gbaru mgba eje udu iphe-ehuka, Kereshi jeru; e -mechaa g'ehu akwata tsoo unu tsohikpoo ya unu ike mboku ono, Chileke e-goshi odu-biribiri Kereshi ono; mbu unu a-kwata gude obu unu g'ọ ha tee eswa.

¹⁴O -buru l'egude iswi ehụ Kereshi ako unu onu; be unu bukwaa ndu a goru onu-oma nu; noo kele Unme Chileke, bu iya emeje g'unu gbaru mgba l'odu-biribiri Chileke anopyabewaro unu l'ehu kwaseru.

¹⁵Ole o -duru onye l'eje iphe-ehuka; g'iphe-ehuka, ooje ta abukwaru k'iswi ochi, o gburu; ozoo iphuru o ziru; ozoo ejo-iphe ozo, o meru; ozoo kele o bu onye eseje opfu.

¹⁶O chia teke unu eje iphe-ehuka opfu l'unu bu ndu ke Kereshi; g'iphere iya ta adukwa unu; o chia g'unu kejeje Chileke ekele l'oo epha Kereshi be eeku unu.

¹⁷Le teke Chileke e-kpe ndiphe ikpe dukwaa ntse. O buru ndibe iya be oo-vuru uzo dabẹ ikpe obu l'ehu. Teke o bu le Chileke vu uzo dabẹ anyi egube iphe ono l'ehu; doanaa mu ro g'oo-dukpoo ndu ono, jikaru ozi-oma Chileke ono.

¹⁸“Teke o bukwanu le g'e-me dzota onye pfuberekoto shihuru ike egube ono; leanaro g'oo-duru ndu ta atsudu Chileke ebvu mewaro iphe, bukpo ndu ozo, ta anuduru Chileke opfu g'ephe ha.”

¹⁹Oo ya bu; g'iphe, bukpo ndu eje iphe-ehuka le g'ọ du Chileke g'ephe jee ya; mejekwa umere omaa. G'ephe wokwaru ndzu phe ye Chileke ono l'eka, bu onye ono, meru phe nu; teme o buru onye epfuje iphe; pfushia ike l'iphe, o pfuru.

1 Pyita 5

Eleta ndu Chiochi ẹnya

¹Iphe-a, mu abya epfufu-a bukwa ndu e meru ogerenya Chiochi be mu epfu eyeru. Le mbedia, bu Pyita bukwa onye e meru ogerenya Chiochi g'unu bu teme mu gudekpoo ẹnya mu humakota iphe-ehuka ono, Kereshi jeru onoya g'ọ hakotakpoo

gberegedege. Mu yikwarupho le ndu onye le Kéreshi gbawaa mgba nweru odu-biribiri iya, bu iphe, ata duedu g'oo-no-beru Chileke emee l'aa-huma-dzuru iya.

²Su-a; unu chejekwa unwu aturu Chileke ono nche, letaje phe enya ree. Unu egude obu unu meje iya egube o du Chileke l'uche; unu te emejekwa iya g'o bu iphe, e kebutaru unu ekebuta; o chia g'unu yeru ehu l'eje ozi ono. Unu te ejekwa iya nweru ekpiri okpoga.

³Unu te emejekwa ndu ono, Chileke yeru unu l'eka ono g'ephe bu ohu, unu gbaru agbagba. G'umere unu buchikwaaru phe iphe-leta-mee.

⁴Oo ya bukwanu g'oo-buru teke onye-ishi ndu nche aturu ono byaerupho k'egoshi onwiya l'oo-mee g'unu nodu ndzu ojeoje, bu iya bu obunggo, du biribiri, ata yidu mebyihu emebyihu.

⁵Nokwapho ge mu akakwarupho unube ndu ophu ka aburu unwegirima; unu wozejekwa onwunu ali l'iphu ndu bu ogerenya. Mbua; iphe, mu epfuru unu g'unu ha bu; g'iphemiphe, unu eme goshijekwa l'unu ewozeje onwunu ali l'eka nwibe unu no. Unu eyetajeru nwibe unu aka; kele "Chileke ajikajekwa ndu eku onwophe; o nodu emejekwanuru ndu ophu wozeru onwophe ali eze-iphe-oma."

⁶Oo ya bu; unu wozeta onwunu ali l'iphu Chileke; k'ophu oo-woli unu eli me o - rwuepho. Chileke ono bukwa iya be bu Okalibe-Kakota-Ike.

⁷Unu tukoo iphe, bukpo iphe, unu ayoo oshi iya tukoo ye Chileke l'eka; kele enya iya ta alufujedu alufu l'eka unu no.

⁸G'enya doo unu risaa g'unu nodu che nche l'onye ohogu unu, bu Nsetanu tsoakwaru ejephe g'oduma, tsoru aba hanyihanyi achoo onye oo-dzu-gbu lajashia taa.

⁹Unu pfu-chije iya uzo; unu apfu-shikwanaa ike l'ekwekwe, unu kweru ke Chileke; l'unu maakwaru-a l'unwunna unu g'ephe hakota l'eliphe-a be tukuru ejekota egube iphe-ehuka ono.

¹⁰Obenu l'oo Chileke ono, bu iya bu onye eze-iphe-oma kpakoru mikoo l'eka ono be kuru unu g'unu le Kéreshi tugba buru nanu; oo ya bu g'unu l'iya atuko nodukota l'eka lanu, bu aka odu-biribiri iya ono, ata bvudu abvubvu ono no. Oo ya bu l'unu -jetaepho iphe-ehuka ono nwanshii; yebdua l'onwiya emee unu; unu adukota ree; mee unu; unu eshihu ike; bya emekwapho unu; unu akabaa apfushi ike l'ekwekwe, unu kweru.

¹¹G'ikemike bukotaru nkiya jasuu le tuutuutuu le miimiimii. Nokwa g'o du.

Ekele mkpochi-ishi

¹²Mu pfuakwaru nwakpuru opfu olemole deeru unu l'ekwo-ozia. O buru Sulivanusu be gude aka iya deeru mu iya. Sulivanusu ono bu nwanna anyi, mu maru l'o bu onye e gude ire iya aka. Su-a iphe, mu ederu iya unu bu ge mu gude iya mee g'obu shihu unu ike; teme mu nodu emekwapho ge mu gude iya pfuru unu l'iphemiphe ono be tukuru buru eze-iphe-oma, shi Chileke l'eka. Unu pfukwaru l'eze-iphe-oma ono; pfushia ya ike.

¹³Lẹ ndu kẹ Chileke, nọ lẹ Bábilonu; mbụ Chiochi, Chileke họtakwarupho g'ọ họtaru unu bẹ l'ekelekwarọ unu. Maku, bụ nwa mu ekelekwarọ unu.

¹⁴Unu kelekwa nwibe unu ekele; nmata phẹ akpa, dụ nsọ. Gẹ Chileke mee g'unube ndu unu lẹ Kéreshi tųgbaru bųru nanų g'unu ha buru guu. Nokwa g'ọ dụ.

2 Pyita

2 Pyita 1

¹Ekwo-ozii-a be shi l'eka mbedua, bu Sayimonu Pyita, onye ejeru Jizosu Kereshi ozi; bya abukwarupho onye-ishi-ozii iya. Ndu mu ede iya anu bu unube ndu ono shi l'apfubekoto ke Chileke me ke Onye-Ndzota bu Jizosu Kereshi nata ekweta ophu bu okpobe iya ge k'anyibedua.

²Ge Chileke mekwaa g'unu kabaa ya amaru; l'o mekwaapho g'unu kabaa amaru Nnajiuphu anyi bu Jizosu okpobe amaru eje. G'eze-iphe-oma me ehuguu, shi iya l'eka rwube unu eka rwube iya k'anyinyi.

Chileke kuru unu bya ahota unu

³Anyi maru Nnajiuphu ono marweta iya ree; mbu onye ono, bu iya kuru anyi g'anyi bya g'anyi l'iya gbaru mgba l'odu-biribiri iya; waa l'iphe-oma, onoduje eme. Oo l'amama ono, anyi maru iya ono be Chileke shi gude eze ike nkiya nu anyi iphemiphe, mkpa iya duru anyi g'anyi gude noduru iya ndzu; emekwapho umere, egoshije l'anyi akwabe iya ubvu.

⁴Oo eze ike iya ono be o gudekwapho kweshia anyi ukwe-iphe, dukota ree okpobe adudu; ukwe-iphe dakiri atu onu iya; oo ya bu g'unu egudekwanu k'ukwe-iphemiphe ono gbaka azu l'emebyishi onwonye ono, ndu mgboko-a l'emebyishi onwophe; kele epe eyedzujeru onu l'egu ejo-iphe anoduje agugbabe phe nu; waa g'unu le Chileke agbaru mgba meje umere omaa ono, oome ono.

⁵Oo ya bu g'unu kukebeje ehuguu se g'unu meje umere omaa yekwa l'ekweta unu. Iphe ozo, unu e-yekwa l'umere omaa aburu anwuta.

⁶Iphe ozo, unu e-yekwafua l'anwuta iphe aburu esede onwonye. Iphe, unu e-yekwakwanu l'esedeje onwonye aburu ota-nshi. Iphe, a-nodukwa nu etso ota-nshi aburu akwabe Chileke ubvu.

⁷Akwabe Chileke ubvu aburu iphe, a-nodu etso iya nu bu ehe onwunu. Iphe ozo, unu e-yekobefua l'ehe onwunu ono aburu n-yemobu.

⁸Unu -nodu emewaa egube umere ono eje l'iphe be unu taa bukwaru 'ogalemkpa; ophu unu abudeduru ndu ta amidu mebyi; l'amama unu maru Nnajiuphu anyi, bu Jizosu Kereshi.

⁹Ole-a; onye iphemiphe ono teke erwubedu eka; atsukwa ishi; mbu l'onye ono ta ahumajedu iphe, no enya. Tememe onye ono zohawaa l'oo Jizosu be sashikotaru iya iphe-eji, o shi mehawaa.

¹⁰Oo ya bu le-a; unwunna mu; o kwa unu bu ndu Chileke kuru hota unu mee unu buru unwu iya. Oo iphe ono meru g'o gude unu jee ekukebeje ehuguu eme g'unu gude umere unu egoshi l'unu bupho unwu iya obu eviya; le teke unu emewaa iphemiphe ono be unu ta abyakpokwa eshiswe uzo.

11Unu -nòdu emewaa nno ta adùkpoekwa iphe, byakpòo anò-chi unu ụzo g'unu ta abahùshi l'alì-eze Jizòsu Kéreshi, bụ Nnajiuphu anyi, bya aburu Onye-Ndzòta anyi.

12Noo g'o gude mu nòdu arì lẹ mu a-nyatajèkpoerupho unu iphemiphe ono. Mu makwaru-a l'unu machahawaru iya; tème l'unu pfùshiwaru ike l'òkpobe-opfu ono, e ziru unu ono.

13Ò buru iya meru mu nòdu arì l'ò ka ree gẹ mu nyatakòtaru unu iphemiphe ono nta-a, mu nòkwadu ndzù l'ùlo-èkwa k'ogwèhu-a gude yeru unu ókú;

14eshinu mu mawaru l'ò tọ dudu g'òo nò-bekwaduru nta-a; mu alashia; noo kẹle Nnajiuphu, bụ Jizòsu Kéreshi bẹ goshiwaru mu l'o rwuwaru mu l'alala.

15Mu e-kukebekpòepho ẹhu anyataru iya unu; k'òpflu bụ mu -anòedu; unu ta azòhabaedu iya azòha.

Ndu gudekpòo ẹnya phẹ hụma ùbvù, Chileke kwabèru Kéreshi

16Lẹ teke anyi ziru unu k'ike Jizòsu Kéreshi ono, bụ Nnajiuphu anyi ono, bụ ike, oo-gude bya ọzo ono; bẹ ọ tọ bukwa akò-iphè, nemadzù rítaru l'òriri iya bẹ anyi kòru unu. Anyìbedua bẹ gudekpòkwa ẹnya anyi hụma ọdu-biribiri iya.

17Kẹle Chileke, bụ Nna kwabèru iya ùbvù bya emee ya o gbua nwìnwii teke ono, ẹguru olu-opfu ono shi l'akpabiri Ogbu-nwìnwii rwua ya nchì sù: “Onye ọwa-a bụ Nwa mu nwoke, mu yeru obu; o jiru mu ẹpho.”

18Anyìbedua l'onwanyi nùmakwaru olu-opfu ono, shi l'imigwe ono teke ono, anyi l'iya tukurù nòdu l'eli ùbvù, dù nsò ono.

19Anyi kabaa ekweshi ike l'iphemiphe ono, ndu mpfuchiru Chileke pfuhawaru ono bẹ bukota ọkpobe-opfu g'ò ha. Ọo-buru unu eme ree mẹ unu -nòdu angabeje iya nchì; unu dù g'ìphóró, nò l'èka ọchii agba jasù nchi abòhu; gẹ kpokpode nchi-abòhu ono ekeahaa paapaapa l'obu unu.

20Ole ọpflu kachakpòonu, bụ ọpflu unu e-vukpòadaru ụzo maru bụ lẹ-a; iphe, ndu mpfuchiru Chileke pfuru ta adùkwa ọpflu ẹphe shi l'uche phẹ pfua g'ò dù phẹ.

21Kẹle mpfuchiru te eshidu l'uche nemadzù. Obenu lẹ ndu mpfuchiru, dù-nsò pfuru opfu, shi Chileke l'ònu gẹ Unme-dù-nsò meru g'ẹphe pfua ya.

2 Pyita 2

Iphe, e-me ndu mpfuchiru, epfu iphe, Chileke epfuduru

1Lẹ teke ndiche bẹ o nwekwaru ndu mpfuchiru shi epfuje iphe, Chileke epfuduru. Nokwaphò g'ò duru ndu a-nòdu l'echilabò unu ezi iphe, Chileke epfuduru. Ẹphe a-jìkachakwa jìka Nnajiuphu anyi, bụ Jizòsu; mbụ onye ono, bụ iya gbafutaru phẹ l'èka iphe-ẹji ono, ẹphe shi eme ono. Ọo iphe ono meru g'ò gude iphe-ẹji, ẹphe meshiru tukurù phẹ l'ishi. Ọ buru iya e-me ẹphe alaa l'iyi ẹgwegwa.

²Ikpoto nemadzu e-mechakwaa tsoahaa phe; meahaa ejo ememe. Ooburu iphe, ephe a-nodu emegbabe be ndu ta abudu ndu ke Chileke ee-gude wata epfubyishi okpobe-opfu ono, bu iya bu uzo ke Chileke ono, anyi etso ono.

³Ndu ono, anoduje ezi unu iphe, abudu okpobe-opfu ono bukwapho ekpiri okpoga be eshitaje phe iphu. Ephe -gbeshi; ephe atuko uka, no le mgboko dzushia wushiru unu. Ephe egude nno ghopyabe unu l'ugho; ria unu okpobe okpoga. Ole o to dukwanu g'oo-no-beru nta-a; Chileke anmaa egube ndu ono ikpe. Noo ke Chileke pfuhawaru iya ro teke ndiche dobe edobe. Mbu l'iphe ono, bu iya e-gbu ndzu phe ono te ekujekwa mgbenya.

⁴Le-a; o -buru le Chileke ta ahaduru unwu-ojozi-imigwe, meru iphe-eji g'ephe ria ya ke mmanu; o tua phe mkporo chiru ye l'oku-ali-maa; le tsukiribaa aka agba ochii g'ephe nodu ngaberu mboku ikpe onoya;

⁵o -buru le Chileke ta ahaduru ndiphe ono, meru iphe-eji teke ndiche ono ke mmanu; obenu l'o gude utso bya atuko unwu-eliphe ono rigbushia; ndu o dzotaru buerupho Nuwa, bu onye ezi phe k'apfubekoto waa umadzu esaa ozo kpoloko;

⁶o -buru l'o nmaru Sodomu yee Gomora ikpe gude oku tsufukota phe ephe buru ntu; ephe chihu le mgboko l'ophu; shi nno mee ge ndu ta akwabedu Chileke ubvu maru egube iphe, ya e-me phe;

⁷teme o buerupho Lotu, bu onye pfuberekoto be o dzoru l'eka ono, ndu eme ejo-ememe bu ono. Nno l'o shi abujeru; ndu ali ono -nodu eme ejo umere, rehuru erehu ono; l'odu Lotu eji shii; bya atsukwa iya pho l'ehu atsushi iya ya ike.

⁸Mbu-a; o to dudu mboku-mboku, nwoke ono pfuberekoto ono te eshidu aphurwushije enya; anurwushi nchi l'ejo-ememe, ndu iphe-eji ono shi anoduje eme; k'ophu bu l'ejo-ememe, oogudeje enya huma me ophu onu le nchi shi anoduje agbawashi iya obu.

⁹Oniya bu l'o -buru l'o noo g'o du bu ono; oo ya bu le Nnajiuphu maru-a g'oo-me dzoo ndu kweru nkiya; maru g'oo-me yeru phe aka g'ephe nahu iphe-ehuka, byapfutaru phe nu; bya amakwarupho g'oo-shi tuchia ndu iphe-eji l'eka ephe a-nodu; l'o nua phe aphu k'iphe-eji, ephe meru; o buru aka ono be ephe a-nodu jeye mboku ikpe.

¹⁰Mbu-a; ndu oo-kachakpoo njoo bu ndu ejo-iphe ono; mbu ndu ono, buepho iphe, ephe anodujeepho achoo bu g'ephe mee iphe, bukpo iphe, egu iya enwu phe phuruphuru l'ehu; mbu iphe, bu ephe -mee ya; ephe emerwushia onwophe; ndu adudu onye ephe anuru opfu; mbu ndu ono, ezi iphe, abudu okpobe-opfu ono; ndu bu 'anu-le-nchi; ndu anoduje eku onwophe ekuku; ndu ata atsujedu ebvu epfubyishi ndu ono, a ta ahumajedu l'enya l'ogbu-nwijnwii imigwe ono.

¹¹L'unwu-ojozi-imigwe be kakwa ndu ono ike okpobe akaka bya akakwa phe pho enweru unme; ole ephe te ejejekwa anodu l'iphu Chileke epfurwushi phe su l'ephe meru eji.

- 12**Obenu lẹ ndu ọwa-a; bu iphe, edoduru phe ọnya bẹ ẹphe anọduje epfubyishi. Ẹphe du g'anu-ẹgbudu, enwedu egomunggo, bu iphe, a nwudoru phe bu g'a nmatajẹ phe l'ọnyà gbua; ọ buru g'e meru anu-ẹgbudu bu g'ee-me phe; ẹphe alaa l'iyi.
- 13**Oo iphe ono a-buru urwu, ẹphe e-rita l'ẹjo-iphe ono, ẹphe yeru ẹka ememe ono. Je akpachakpoo l'echilabo eswe bẹ ẹphe anọdujeela-a eme g'ẹphe ria iphe ono, ẹgu iya enwu phe phuruphuru l'ẹhu ono; ẹphe -nọdu eme iya ẹhu atsole phe-a utso. Ono bu iphe, iphere bya aburu iphe, uta mẹ unu -nọdu ahajẹ phe g'unu l'ẹphe tuko eri nri; mẹ unu dokobe eri nri.
- 14**Lenea l'ọobujeru; ọnya phe -humawaa nwanyi; l'ogue phe pho g'a su l'ẹphe lẹ nwanyi ono kwaru. Ophu ọ dudu teke ẹgu eme ẹjo-iphe agu-buhuje phe agu-buhu. Ntanta-a ẹphe edetawa ndu ophu anọ-shiduru ike l'iphe, ẹphe kwetaru; ẹphe anma l'ọnyà phe. Iphe, doru phe ọnya buẹpho g'ẹphe e-shi kpaa okpoga. Ono bẹ ẹphe metawaru jeye o ria phe ishi; ẹphe buru ndu a tuwaru onu!
- 15**Ẹphe paru okpobe ọzo ono, pfuru nhamunha ono haa eje phururugbadaa; bya eetsowaa ẹka Belamu, bu nwa Bosoru; mbu onye ono bu iphe, o yeru ọnya bu okpoga, okpa l'uzo apfuduru oto ono.
- 16**A baaru iya mba ẹjo-ememe ono; k'ophu bu lẹ nkafu-igara, ete pfujedu opfu saru onu pfua opfu gẹ nemadzu gude kposhia onye mpfuchiru ono eme umere onye obvu.
- 17**Ndu ono, ezi iphe, abudu eviya ono bu 'ogalemkpa. Ẹphe du g'obvu, mini tahuru. Ẹphe du g'igwe -rwuchaaru erwurwu k'edze mini; pherephere zikaa ya. Chileke nmawaru phe ikpe. Ẹka akwakoberu phe bẹ gbahuru tsukiribaa.
- 18**Ẹphe anọdujee pho opfu g'ọ bu phe kachaa amama; temanu opfu obu abukwarupho mkpokoro opfu. Ẹphe nọdu egudeje iphe ono, ẹgu iya enwu phe phuruphuru l'ẹhu ono gbabẹ ọnyà nmata ndu buwokwadu-a bẹ ẹphe nahuru ndu eshiswe ọzo.
- 19**Ẹphe ekweje phe ukwe enweru onwonye; ọle ẹphebedua l'onwophe te enwekwanu onwophe. Ẹphebedua bu ohu umere, rehuru erehu ono, ẹphe anọduje eme ono. Noo kele ọo iphe, ka amadu ike; lwu-kpee ya bẹ amadu bu ohu iya.
- 20**Mbu lẹ ndu ono nwekwaru-a teke ẹphe shi maru Nnajiuphu anyi, bu Jizosu Kereshi okpobe amaru; mbu Onye-Ndzota anyi ono. Su ophu ẹphe eshiedu eshi ẹjo ọzo ono, emerwuje unwu-eliphe ono. A nonyaepho; ẹjo umere ono, ẹphe shi hawaa ememe ono lwa azu bya eria phe ishi ọzo; ka phe ike lwu-kpee phe. O kwa iya bu l'onodu ẹhu onye ono abya aka njo; eme lẹ g'ọ duhawaa lẹ mbu.
- 21**Mbu-a; o gogo kakwaru ẹgube onye ono ree; ome ọ to dukpodaa teke ọ majeru ọzo bu o -shia ya; Chileke agua ya l'onye pfuberekoto; eme l'onye ono machaaru ọzo ke Chileke bya atsu-phu azu haa emeje ekemu ono, Chileke turu iya ono.
- 22**O kwa iya bu l'iphe ono, aanmajẹ l'etu ono a-vua l'ẹhu onye ono, bu iya bu etu, a nmaru, suru lẹ “Nkuta nwachaaru enwa laphu azu je erichaa ya.” Etu ọzo buru lẹ “Ezi bẹ a wuchaaru ẹhu; ọ laphu azu je ebvua epuchi.” Noo gẹ ndu ono du bu onoya.

2 Pyita 3

Nnajiuphu a-bya ozo

- ¹Ndu mu yeru obu; owa kweakwa akpo ekwo-ozu ebolechiko, mu dewaru unu. L'ime ekwo-ozu labo ono be mu dewaru gude yeru unu oku; nyataru unu g'unu riye oriri iphemiphe ono, e ziru unu ono.
- ²Oo ya bu; unu nyatajekwa opfu, ndu mpfuchiru Chileke ono pfuru teke ndiche. Ndu ono bu ndu eeyeru ubvu. Unu anyatajekwapho iphe ono, Nnajiuphu, bu Onye-Ndzota ono shi l'eka ndu-ishi-ozu iya zia unu.
- ³Iphe, e-vukpodaru uzo doo unu enya bu owa kpada; mgboko-a bya l'abvu be o nwekwaru ndu e-mechaa buru ndu taa dujedu ike sede onwophe l'egu ejo-iphe, enwu phe phuruphuru l'ehu; bukwarupho ndu a-noduje aja unu ewenu.
- ⁴Iphe, ephe e-pfuje bu; “? Denuhunu Jizosu obu, kweru unu ukwe le ya a-bya ozo obu? Kele e -shi teke nna anyi oche phe noru laa be iphemiphe dukwapho g'o du; e -shi teke e meru mgboko.”
- ⁵Ephe elekebekpopho enya; jika jinyia enya l'ephe taa ridu oriri iphe ono, Chileke meru teke ndiche ono. L'oo opfu, Chileke pfuru l'onu kpoloko be o gude mee igwe mee ali. Ali shi le mini du; o buru mini ono meru iphe ndzu du le mgboko.
- ⁶Teme le Chileke meru igwe dzee mini; rigbukota iphe, shi du le mgboko ophu shi du teke ono l'ophu; o buru ola-l'iswi.
- ⁷Igwe yele ali, bu ophu du nta-a bukwa opfu onu be e gude sede iya g'o nodu jeye mboku, oku e-kepyashi iya, bu iya bu mboku oke ikpe ono. Noo mboku, Chileke a-nma ndu ta anuduru iya opfu ikpe; mee phe ephe aburu ola-l'iswi.
- ⁸Ole-a; ndu mu yeru obu; iphe lanu unu ata zohajedu bu l'enya nnajiuphu be ujiku lanu dukwa iya-a g'unu-kuru-unu apha; unu-kuru-unu apha dukwa iya pho g'ujiku lanu.
- ⁹Nnajiuphu ta akpukwa eh u akpukpu eme iphe, o kweru ukwe iya, bu iya bu iphe, ndiphe anoduje ari. O kwa nshi be otaru anyi kele o to dudu onye o du iya g'a su l'olaru l'iswi; o chia g'izimanu lwa onyemonye azu.
- ¹⁰Mbu le mboku, Nnajiuphu a-bya be oo-byakwa g'onye-oshi byaru oshi l'enyashi. Mboku ono be igwe e-deru riiriiri mihu. Iphemiphe, du l'igwe; kpokpode me onwa me enyanwu be oku e-kekota. Mgboko l'ophu mekpoo akanya, ndiphe seru dobe l'ime iya be oku e-kepyashikotakwa.
- ¹¹Eshinu unu mawaru l'iphemiphe-a, du le mgboko-a bukota iphe, e-kepyashihu l'oku; unu kwabekwarupho onwunu enya meje umere, gbaru unu l'ememe. Unu nujeru Chileke opfu; unu eworu ndzu unu g'o ha ye iya l'eka g'o bukotaru nkiya.
- ¹²Unu chierupho enya yee l'uzo; ngaberu mboku, Chileke a-bya emebyia mgboko-a. Oo mboku ono be Chileke a-tu oku l'igwe; oke okpomoku apaa eka; k'ophu iphe, nokota iya nu a-dazehukota.

13Ọle-a; Chileke bẹ kwekwaru anyi ukwe emefuta igwe òphúú yẹ mgboko òphúú. Ono bụwaa ndu p̄f̄uberekoto l'ɛnya Chileke bụ ndu e-buru iya n̄ kpoloko. Ọ b̄uru mgboko òphúú ono bẹ anyi ele ɛnya iya.

14Ọo ya b̄u; ndu mu yeru obu; eshinu unu ele ɛnya iphemiphe-a; unu kukebeep̄ho ẹhu dobe onwunu òr̄ù g'ò t̄o d̄u iphe, aa-ta unu ụta iya l'ip̄hu Chileke. G'unu l̄ Chileke d̄u l̄ ree.

15Unu anyataj̄ekwa l'iphe, meru g'o gude Nnajiup̄hu n̄odu ata nshi ono b̄u g'unu bya ḡe ya dz̄o unu. Ọ kwaph̄o iphe ono bẹ nwan̄na anyi P̄olu, anyi yeru obu dehaakwarup̄ho unu l'ekwo-ozi, o detaru unu. Ọ kwa Chileke bẹ n̄uru iya mmamiphe, o gude dee ya.

16L̄e-a; iphe, b̄ukotakpoo ẹkwo-ozi, o deru g'ò ha bẹ o pfuk̄otakwaru op̄fu iphe-a, e-mechaa mee n̄u-a l'iphe, b̄ukpoo ẹkameka, o pfuru op̄fu gbaa ya ọkpa. Iphemiphe ono, P̄olu deshik̄otaru ono nwekwaru ndu op̄hu oop̄f̄uje, te ekwejedu edo ɛnya. Ọ b̄uru iphe ono meru g'o gude ndu amad̄u iphe; mb̄u ndu ap̄f̄ushiduru ike l'ekwekwe, ẹphe kweru k̄e Chileke; n̄odu ewojeru iya gha igharaphu, b̄uhukwaa g'ẹphe aghaj̄e ikpoto iphe ọzo, e deru l'ekwo-op̄fu Chileke. Ọ b̄uru ẹgube ono bẹ ẹphe emeje gude ẹka p̄h̄e meta ọla-l'iswi tukobe onwop̄h̄e l'ishi.

17Ọo ya b̄u; ndu mu yeru obu; eshinu unu vuwaa ụzo mak̄otaru iphemiphe-a; unu kwab̄ekwaru onwunu ɛnya ḡe ndu ẹjo-mb̄oku ono te edup̄hu unu; g'ẹphe te eme unu g'unu kweta l'ụka ono, ẹphe an̄oduje ad̄z̄ushi ono bẹ b̄u ọkpobe-op̄fu; shi nno mee g'ọkpa chiswaf̄u unu g'unu l̄ufu l'ọkpobe ụzo ono, unu pfuru p̄f̄ushia ike ono.

18Ọo ya b̄u l̄e-a; g'eze-iphe-oma k̄e Chileke n̄odu aka shii l'ẹhu unu; unu akakwaph̄o amaru Nnajiup̄hu anyi bya ab̄uru Onye-Ndz̄ota anyi, b̄u Jiz̄osu K̄éreshi ọkpobe amaru. Ọo ya kpoloko k̄p̄ekpu b̄u onye aa-n̄odu akwab̄e ụbv̄ù mb̄oku-mb̄oku jas̄u l̄e tuutuutuu l̄e m̄imiimii. Nokwa g'ò d̄u.

1 Jìonu

1 Jìonu 1

Opfu, bụ ndzụ, shi Chileke l'ẹka

¹Iphe, anyi ede l'ẹkwo-ozì-a anụ unu-a bụkwa k'onye ono, ẹpha iya bụ Opfu Chileke-a, bụ iya bụ kẹ Opfu, bụ ndzụ, shi Chileke l'ẹka-a. Opfu ono, anuje ndzụ ono shikpo le mbulembu dū. Anyi nūmakpooru iya le nchì; bya ahuma iya l'ẹnya; gbua ya ẹnya igo; bya ebyia ya ẹka.

²Onye ono, bụ ndzụ ono bẹ e meru k'ophu eegudeje ẹnya hūma iya; anyi hūmawa iya. O buri iya bẹ anyi aturu unu onu iya-a, bụ iya bụ kẹ ndzụ ojejeje onoya. Ndzụ ono bụ yẹ Chileke, bụ Nna shihawaa nọduta. Chileke bya egoshiwa iya anyi; mee anyi maru iya.

³O bụ iphe ono, anyi hūmaru l'ẹnya bya anuma le nchì ono bẹ anyi akọkwarupho unu-a g'anyi l'unu atugbabe onwanyi. Atugba ono bụ atugba ophu anyi le Chileke, bụ Nna waa Nwa iya, bụ Jizosu Kéreshi tugbaru.

⁴Iphe, anyi ededoru unu iphemiphe-a bụ g'ẹhu atsọfu anyi l'unu uto l'ishi.

Chileke bụ iphóró, ngarụ ẹgu

⁵Owa-a bụ ozi, anyi nūmaru iya l'onu; bụ iya bẹ anyi akọru unu-a, bụ iya bụ le Chileke bụ iphóró; ọchii ta adudu iya ililekpoo.

⁶Teke anyi sūru l'anyi l'iya tugbaru onwanyi; l'ẹka anyi nọ l'ọchii; bụkwa ụka bẹ anyi adzū; tẹme ophu anyi emedu ire-lanu.

⁷Obenu teke anyi bu l'iphóró gẹ yẹbedua nọ l'iphóró-a; ọo ya bụ l'anyi le nwibe anyi tugbaru; mee Jizosu, bụ iya bụ Nwa Chileke nọdu asafukotaje anyi iphe-ẹji, anyi meru g'ọ ha.

⁸Teke anyi sūru l'anyi te emedu iphe-ẹji bụkwa onwanyi bẹ anyi aghoru ugho; tẹme ophu okpobe-opfu ono adudu anyi l'ẹhu.

⁹Teke anyi koshiru iphe-ẹji, anyi meshiru b'oo-guru anyi nvu l'iphe-ẹji ono g'ọ ha; bya asafukota anyi iphe, bụkota ẹjo umere, anyi eme; eshinu o bụ onye apfushije ike l'iphe, o kweru ukwe iya; bya aburu onye emeje iphe, pfuru oto.

¹⁰Teke anyi sūru l'anyi te emeduru iphe-ẹji bẹ anyi mewaru iya onye ntuphu-ire; tẹme ophu opfu iya adudu anyi l'ẹhu.

1 Jìonu 2

Kéreshi agbajeru anyi mkpu

¹Unwegirima mu; iphemiphe-a bẹ mu edekwaru unu l'ẹkwo g'unu te emeje iphe-ẹji; ọle teke o duru onye meru iphe-ẹji bẹ anyi nwekwaru-a onye epfuchiru anyi l'iphu Nna anyi. Onye ono bụ Jizosu Kéreshi, bụ onye pfuberekoto.

²O woru onwiya gwee ẹja ọha; gude gwefu iphe-ẹji, anyi meshiru mękpoo iphe-ẹji, ndu mgboko mgburugburu meshiru; ọ tọ bọdu-a ọphu anyi meshiru nwẹkiya.

³Teke anyi emeje iphe, Chileke tųru ekemu sų g'e meje; ọo ya bų anyi amakaharu l'anyi maru iya.

⁴Onye sųru lẹ ya maru iya; ọphu oomedu iphe, ọ tųru ekemu sų g'e meje bų onye ntuphu-ire; ọkpobe-opfu ta anọdu iya l'ẹhu.

⁵Obenu l'onye eme iphe, Chileke pfuru bẹ bų onye yeru Chileke obu yefukpọo ya ya l'ishi. Noo iphe, e-me g'anyi makaharu l'anyi l'iya tųgbaru bųru nanų bų onoya.

⁶Onye sųru lẹ yẹ Chileke tųgbaru bẹ ọ gbaru kẹ g'ọ nọdu ẹgube ndzų ono, Jizọsu shi nọdu ono.

Ekemu ọphúú

⁷Ndu mu yeru obu; ekemu-a, mu ederu unu-a ta abụekwa ekemu ọphúú; ọ bųwaa akahų ekemu, unu shikpọ lẹ mbụlembu nweru; akahų ekemu ono bų ozi, unu nųmahawaru.

⁸Ole mu edekwaru-a unu ekemu ọphúú; kẹle ọkpobe-opfu iya ono bẹ a gbẹ nųmawaa l'ẹhu Kéreshi waa l'ẹhu unubẹdua; noo l'ọchii abvųwaa abvųbvụ; ọkpobe iphóró gbẹ shiwaa unu l'ẹhu abyawaa adųdu.

⁹Onye sųru lẹ ya nọ l'iphóró ono; tẹme nwanna iya dųkwa iya phọ ashị bẹ bųkwa l'ọchii bẹ ọ nọkwadu byasų nta-a.

¹⁰Onye yeru nwanna iya obu nọ l'iphóró ono; ẹbe ọ dųdu iphe, onye ono emejekpọo bų iphe, e-me g'onye ọzo dalahų l'eme iphe-ẹji.

¹¹Obenu l'onye nwanna iya dų ashị nọ l'ọchii ono; tẹme ọ nọdu eje daadishi l'ọchii; ọphu ọ madų ẹka ooje; kẹle ọchii ono mewaru ẹnya gbahųkota onye ono tsųkiribaa.

¹²Mu ede ẹkwo-a anų unubẹ ndu bų ụnwegirima; kẹle Chileke gudewaa k'ẹhu Jizọsu guaru unu nvų l'iphe-ẹji, unu meshiru.

¹³Mu ede iya anų unubẹ ndu bų nna; kẹle unu maru onye ono, shi lẹ mbų dų onoya. Mu nọdu ede iya anų unubẹ ndu bų okorọbya; kẹle unu lwų-kpewaru Onye-Njọ ono, bų Obutuswe l'ọgu. Mu ede iya anų unubẹ ụnwegirima; kẹle unu maru nna ono.

¹⁴Mu dewaru iya nų unubẹ ndu bų nna; kẹle unu maru onye ono shi lẹ mbų dų onoya. Mu bya edewa iya nų unubẹ ndu bų okorọbya; kẹle unu shihuru ike; opfu Chileke buru unu eburu l'ẹhu; tẹme unu lwų-kpewaa Onye-Njọ ono, bų Obutuswe.

¹⁵Unu te eyekwa mgboko-a ẹnya; ọzoo iphe, dų iya l'ime. Onye yeru mgboko-a ẹnya bẹ te eyekwaru Chileke bų Nna ẹnya.

¹⁶Kẹle iphemiphe, dų lẹ mgboko-a, bų iya bų ẹgu ẹjo-iphe, agugbaa nemadzų; waa ẹgu enweru iphemiphe, ẹnya humaru; mękpoo eku-onwonye ọ-phųshia-ųgbu l'iphe mgboko-a ta abụkwa l'ẹka Nna bẹ o shigbaa; ono shigbaa lẹ mgboko.

¹⁷Mgboko-a mę iphe, dę iya nę, bę iphe, agugbaa nemadzų tųkokwaru abyawaa ephushihukọta; obenu l'onye eme iphe, dę Chileke l'uche a-dzųru ndzų jasų le tuutuutuu le mįimiimii.

Onye-achi-nta-Kęreshi

¹⁸Unwegirima mu; nta-a bųakwa teke ikpazų. Unu nųmawaru l'onye-achi-nta-Kęreshi l'a-bya. Nta bę ndu achi-nta-Kęreshi dųakwaa igwerigwe. Ọ bųru iphe ono meru g'o gude anyi maru le nta-a bųwaa teke ikpazų.

¹⁹Ndu ono shikwa l'echilabọ anyi lųfu; anyi l'ęphe shihaakwa nọduta; ọle ọ tọ dųdu teke ęphe bųjeru anyi. Ọme ęphe bų anyi mę anyi l'ęphe anọdukwaa; obenu l'ęphe lųfuru g'ọo-bųru iphe, doru ęnya l'ọ tọ dųdu g'ęphe ha mę onye lanų, bų anyi.

²⁰Obenu l'unubędua bę Kęreshi yewaru Unme-dų-Nsọ l'ęhu; unu makọtaru iphe ono, bų ọkpobe-opfu ono.

²¹Sų-a; iphe, mu ededoru unu ękwo-a ta abųkwa l'unu ta amadų ọkpobe-opfu ono. Ọ kwa l'unu maru iya; tęme unu makwaruphọ l'ųka g'ọduhabe ta abųdu l'ọkpobe-opfu bę ooshije.

²²? Bųhunu onye bų onye tarų ishi k'adzų ųka, abųdu onye ekwedu l'ọo Jizọsu, bų Kęreshi ọbu, Chileke kweru ukwe iya. Noo onye bų onye-achi-nta-Kęreshi bų ono; mbų onye jįkaru Nna jįka Nwa.

²³Kęle onyemonye, jįkaru Nwa jįkawaru Nna. Obenu l'onye kwetarų kę Nwa bę woakwaruphọ onwiya tųgbabe l'ęhu Nna.

²⁴A bya l'ęhu k'unubędua; mu sų g'ozı ono, unu nųmaru eshi le mbų ono nọ-shiękwapho unu ike l'ọkpoma; g'unu gudeshia ya ike. Ọ -bųru l'iphe ono, unu nųmaru eshi le mbų ono nọ-shiru unu ike l'ọkpoma; noo ya bų; unu le Nwa mę Nna atųgba bųru nanų; g'unu tųgbaru iya kwasęru.

²⁵Ọwa-a bų iphe, Kęreshi kweru anyi ukwe iya, bų iya bų ndzų ojejoje.

²⁶Ono bųkwa kę ndu eme g'ęphe mee unu mkpurukpuru-ęnya; duswee unu ųzo l'iphe kę Kęreshi bę mu deru unu ono.

²⁷Obenu l'unubędua bę Chileke yewaru Unme-dų-Nsọ nkiya l'ęhu. Mkpa onye ọzo, ezi unu iphe ta adųeduru unu; eshinu Unme ono ezikọtaje unu iphemiphe; tęme iphe, oozije bųru ọkpobe-opfu; ọphu ọ dųdu ųka, dę iya nę. Ọo ya bų; unu le Kęreshi tųgbakwa bųru nanų g'unu tųgbaru iya kwasęru. Nokwa iphe Unme ono ziru unu bų ono.

²⁸Nta-a bų le-a; unwegirima mu; unu l'iya tųgbakwa bųru nanų g'unu tųgbaru; g'ọoburu teke o goshięruphọ onwiya g'obu eshihu anyi ike g'anyi te egude iphere tsųhu iya ebvu teke ọbya.

²⁹Teke ọ bų l'unu maru le Chileke bų onye pfųberekoto; g'o dokwaaphọ unu ęnya l'onyemonye, eme iphe, pfųru ọto bę bų nwa, Chileke nwųru.

1 Jìonu 3

Aburu unwu Chileke

¹Unu humaru egube ge Chileke, bu Nna yebewaru anyi obu ke g'ọ kua anyi unwu iya; teme o buru iphe, anyi bu bu ono. Iphe, meru iphe, ndiphe amadu anyi bu l'ephe ta amadu iya.

²Ndu mu yeru obu; nta-a be anyi buakwaa unwu Chileke. Iphe, anyi e-mechaa buru teke afutakwa; ole iphe, anyi maru bu le teke Kereshi byaerupho be anyi a-du g'ọ du; eshinu o buepho g'ọ du bu g'anyi a-huma iya.

³Noo ya bu; onye no Jizosu l'eka ele enya abyabya iya ono; l'a-bujeru onye duebe ree; le Jizosu obu l'onwiya be bukwa onye duebe ree.

⁴Onyemonye meru iphe-eji be ikpe nmaakwaru l'o mebyiru ekemu Chileke; kele eme iphe-eji bu emebyi ekemu Chileke.

⁵Unu maru l'oo Kereshi obu byaru g'ọ bya ewofu nemadzu iphe-eji l'ehu; teme yebedua l'onwiya ta adukwa iphe-eji, du iya l'ehu.

⁶O to dukwa onye yee Kereshi tugbaru buru nanu emejekwadu iphe-eji; ophu o dukwa onye emeje iphe-eji humajewaru iya nu; ophu o buro k'amaru iya amaru.

⁷Unwu mu; unu te ekwekwa g'ọ duru onye e-duswee unu uzo l'iphe ke Kereshi. Onye eme iphe l'uzo, pfuru oto be bukwa onye pfuberekoto ge Kereshi bukwapho onye pfuberekoto.

⁸Onye eme iphe-eji bu ke Obutuswe; kele Obutuswe anoduje emeswe Chileke e - shikpo o le mbu. Iphe, Nwa Chileke byadoru bukwa g'o mebyia iphe Obutuswe eme emebyi.

⁹Onyemonye, Chileke nwuru te emejeedu iphe-eji; kele Unme Chileke l'erewa ire l'ehu onye ono; k'ophu o to byadu emeje iphe-eji; eshinu o bu Chileke nwuru iya.

¹⁰Waa g'ee-gude maru ndu bu phe bu unwu Chileke; me ndu bu unwu Obutuswe bu owa-a: onyemonye ete emejeedu iphe l'uzo pfuru oto te shikwa le Chileke; ophu onye eyeduru nwanna iya obu eshikwapho le Chileke.

Eye nwibe onye obu

¹¹Unu makwaru l'ozi-oma ono, e shi le mbulembu zita unu ono bu g'anyi yee nwibe anyi obu.

¹²G'anyi ta adukwa ge Kenu. Le Kenu nokwa l'eka Onye-Njo ono, bu Obutuswe gbua nwune iya. Su-a; ? bu gunu kparu iphe, o gburu nwune iya obu? Iphe, kparu iya nu bu le Kenu obu l'onwiya be umere iya du eji; umere ke nwune iya buru umere, pfuru oto.

¹³Unwunna mu; g'ọ to dujekwa unu biribiri l'unu du ndiphe ashi.

¹⁴Ophu anyi makpodaru bu l'anyi shi nwuhu anwuhu; ole anyi shiwaa l'anwuhu ono futawaa; bahu le ndzu. O buru iphe, anyi gude maru l'o noo g'ọ du bu ono be bu l'anyi

yeru unwunna anyi obu. Onye te eyeduru nemadzu ibi ya obu be nwuhukwaru anwuhu g'ọ nwuhuru.

¹⁵Iphe, bukpo onye nwanna iya du ashi bukwaa ochi be o gburu; unu maanaru-a l'onye gburu ochi be ndzu ojeje ta nodu l'ehu.

¹⁶Su-a; g'anyi gude maru iphe, bu eye obu bu le Kereshi haru g'e gbua ya l'opfu ehuru anyi. Oo ya bu l'anyibedua be o rwubekwarupho ahaje g'e gbua anyi l'opfu ehuru onye anyi l'iya tukoru nodu Chileke l'eka.

¹⁷Ole teke o bu l'o duru onye eku mgboko-a byaru; o buru onye yee ya tukoru nodu Chileke l'eka be mkpa byaru; obeta ophu ogbaru iya mkpu o kpo-chiaru iya okpoma; ? bu gunu be egube onye ono a-gbabe okpa su le ya yeru Chileke obu?

¹⁸Unwegirima mu; g'anyi te eyejeshi obu l'onu l'onu; g'anyi gudeje umere goshi l'onye-a be anyi yeru pho obu eviya.

Enweru okpoma l'iphu Chileke

¹⁹Oo ya bu; anyi -nodu eme nno; anyi egude iya maru l'anyi shi-a l'okpobe-opfu ono. Oobuwaru iya ro be anyi e-gude mee g'obu kabaa anyi eshihu ike l'iphu Chileke;

²⁰me o -duru teke obu anma anyi ikpe; kele Chileke ka obu anyi shii; teme o maru iphemiphe.

²¹Unwunna mu; o -buru l'obu ta anmajedu anyi ikpe; bunu iya bu le ndzu ta aguedu anyi l'iphu Chileke.

²²Anyi anataje l'eka iya iphe, bukpo iphe, anyi suru g'o nu anyi; kele anyi emeje ekemu, o turu; teme anyi nodu eme iphe, du iya ree.

²³Iphe, bu ekemu ono, Chileke turu su g'anyi meje ono bu g'anyi woru onwanyi ye l'eka Nwa iya bu Jizosu Kereshi; wafua g'anyi yee nwibe anyi obu, bu iya bu iphe, o turu anyi l'ekemu su g'anyi meje.

²⁴Onye emeje ekemu Chileke be bukwa ebubu l'ime Chileke teme Chileke bukwarupho l'ime iya. Iphe, anyi egudeje maru le Chileke bu l'ime anyi bu Unme iya, o nuru anyi.

1 Jionu 4

Unme Chileke l'unme Obutuswe

¹Ndu mu yeru obu; o to bubekwa ndu suru le Unme Chileke bu phe l'ehu be l'abujeru epe -pfua iphe; unu ekweta l'o bu eviya. Unu dalejeadakwaa ya adale g'unu maru; ? Unme obu shia l'eka Chileke? L'o nwekwaru ndu mpfuchiru wufuru dzuru mgboko nta-a epfu iphe, Chileke epfuduru.

²Su-a; wakwa g'unu e-gudeje maru Unme ophu shi Chileke l'eka baa. Iphe, bukpo onye pfukpwaru l'edzudzu-oha su le Jizosu Kereshi byaru-a bya aburu nemadzu eviya le mgboko-a; unu amaru le Unme, bu onye ono l'ehu bu Unme, shi Chileke l'eka.

³Iphe, bukpo unme te ekwejedu epfu le Jizosu Kereshi byaru-a bya aburu nemadzu le mgboko; unu amaru l'unme k'ono te eshidu l'eka Chileke. Unme k'ono bu unme k'onye ono, bu iya bu ochi-nta-Kereshi. ? O kwa l'unu numawaru l'onye-achi-nta-Kereshi ono e-mechaa bya? O byaakwaru. O noakwa le mgboko anono.

⁴Obenu le-a; unwu mu; unubedua shikwa le Chileke. Unu mekpeakwaru phe. Noo kele onye bu unu l'ime kakwaa onye bu le mgboko-a okpehu.

⁵Su-a; ephe shikwa le mgboko-a; opfu ephe epfu shi le mgboko-a; ndu mgboko-a nodu anuru phe opfu.

⁶Anyibedua bu ke Chileke. O buru ndu maru Chileke bu ndu ekweje le k'anyi bu iya. Ndu abudu ke Chileke te ekwejedu le k'anyi bu iya. Nokwa g'anyi egudeje makaharu unme ire-lanu yeke unme ntuphu-ire.

Chileke bu n-yemobu

⁷Ndu mu yeru obu; unu g'anyi toko yee nwibe anyi obu l'eye obu shikwa l'eka Chileke; temanu onye yeru nwibe iya obu be bukwa onye Chileke nwuru; teme o buru onye maru Chileke.

⁸Onye te eyejedu nwibe iya obu ta amakwa Chileke; kele Chileke bukwa eye obu l'onwiya.

⁹Ge Chileke gude goshi anyi ge ya yeberu anyi obu bu l'o ziru Nwa iya lanu, o nwuru kpoloko; g'o bya le mgboko g'anyi eshi iya l'eka dzuru ndzu.

¹⁰Eka n-yemobu owa-a gude shia iche bu le-a; o to budu l'oo anyibedua yeru Chileke obu; o bu chia Chileke be goshiru l'oo yebedua yeru anyi obu. G'o gude goshi iya bu l'o woru Nwa iya ye g'o bya eworu onwiya gwee eja oha; gude gwefu iphe-eji, anyi meru.

¹¹Ndu mu yeru obu; eshinu Chileke yeberu anyi obu egube ono be o gbakwaru-a anyi g'onnyemonye eyegbaa nwibe iya obu.

¹²Chileke be o toko du-swekwaa onye humajewaru iya nu. Obenu le-a; anyi -yewaa nwibe anyi obu; oo ya bu Chileke ebukwanuru anyi eburu l'ehu; teme n-yemobu Chileke edzuhukwaapho oke l'ehu anyi.

¹³Le Chileke nukwaru anyi Unme nkiya gedegede. O buru Unme ono, o nuru anyi ono meru g'o gude anyi maru le Chileke bu ebubu l'ime anyi; teme anyibedua bukwarupho l'ime iya.

¹⁴Teme anyi humawaa l'enya; bya epfuru iya onnyemonye su le Nna yeru Nwa iya g'o bya aburu Onye-Ndzota unwu eliphe.

¹⁵Oo ya bu l'onye duwaru ike pfuru l'edzudzu-oha; pfua le Jizosu bu Nwa Chileke be a maerupho le Chileke buwa iya ebubu l'ehu; teme onye obu bukwarupho l'ehu ke Chileke.

¹⁶Sụ-a; anyi maakwaru lẹ Chileke yeru anyi obu; anyi bya ewowaru onwanyi ye iya l'ẹka; opfu l'anyi kwetarụ l'ọ yeru anyi obu eviya. Chileke bukwa n-yemobu l'onwiya. Ọo ya bụ l'onye gude n-yemobu buru bẹ buwa ebubu l'ime Chileke; tẹme Chileke bukwaruphọ l'ime onye obu.

¹⁷Iphe e-goshi lẹ n-yemobu dzuru oke l'ẹhu anyi bụ l'obu e-shihu anyi ike mbọku ikpe ono. Noo l'ọo gẹ ndzụ Kéreshi dū bụ gẹ ndzụ anyi dukwapho lẹ mgboko-a.

¹⁸N-yemobu te enwedu ndzụ-agugu. N-yemobu, ophu dube ree agbejechikwa chifu iphe, bukpo ndzụ-agugu g'ọ ha. Noo lẹ nemadzụ -nọdu eme iphe; ndzụ nọdu agụ iya; bẹ ọ maru l'aa-hụ iya ahùhù. Ọo ya bụ l'onye ono ndzụ agụ ono bẹ n-yemobu iya adubebedu ree.

¹⁹Anyi yeru iya obu; kele o vururọ ụzo yee anyi obu.

²⁰Teke ọ bụ lẹ nemadzụ bẹ nwanna iya dū ashi; l'ẹka onye obu sukwaru lẹ ya yeru Chileke obu; ọ kwa ụka bẹ onye obu dzuru. ? Denu g'ọ bụ onye yee ya bụ nwanna, bụ onye ọ humaru l'anya bẹ o to yeduru obu; ọ buchiaru Chileke, ọ tọ humaduru l'anya bẹ ọo-gbẹ yechia obu.

²¹Jizosu l'onwiya tukwaru ekemu-a sụ g'onye yeru Chileke obu yekwaaphọ nwanna iya obu.

1 Jionu 5

Okoo, anyi atụ ekpu iphe mgboko

¹Sụ-a; iphe, bukpo onye kwetarụ l'ọo Jizosu bụ Onye-Ndzota obu, Chileke kweru ukwe lẹ ya e-zi g'ọ bya obu; onye ono bukwaa nwa Chileke. Ọzo bụ l'onyemonye, bụ onye yekpowaru onye nwuru nwa obu l'atukojekwa onye obu yee nwa iya obu yee obu.

²Anyi -yee Chileke obu bya emeje ekemu, ọ turu; ọo ya bụ anyi amaru l'anyi yeru unwu Chileke obu.

³Lẹ g'anyi e-shije goshi l'anyi yeru Chileke obu bukwa emeje iphemiphe, Chileke turu l'ekemu sụ g'e meje. Ophu iphe, ọ turu l'ekemu iya obu abukwa l'ootsu l'ẹhu ememe.

⁴Onyemonye, Chileke nwuru; alwu-kpeje iphe mgboko; ka iya ike. Ọ buru l'ọo l'anyi wowaru onwanyi ye Chileke l'ẹka meru iphe, anyi lwu-kpewaru iphe mgboko; turu okoo kpua ya.

⁵Mbụ-a; ? bụ onye dū idagha bụ onye atuje okoo kpua iphe mgboko? ? Tọbudu onye kwetarụ l'ọo Jizosu bụ Nwa Chileke?

Anọru Jizosu l'ekebe

⁶Ọ kwa Jizosu Kéreshi bụ onye ono, byaru nū ono. Teke ọ byaru bẹ bụ mini bẹ o gude bya; bya egudekwaphọ mee. Mbụ-a; ọ tọ bụdu mini kpoloko bẹ o gude bya; o gude mini bya egude mee gude bya. Onye egoshi l'iphe ono bụ eviya bụ Unme Chileke; kele ọo Unme Chileke l'onwiya bụ ọkpobe-opfu ono.

⁷Kele ephe du eto agba ekebe l'imigwe. Ndu ono bu Nna; yele Opfu-Chileke; yele Unme-du-Nso. Ephe n'eto ono tugbaru buru nanu.

⁸Ephe dukwapho eto agba ekebe l'eliphe. Ndu ono bu Unme Chileke yele mini waa mee. Ephe n'eto tukoru tugba nanu.

⁹Anyi ekwetaje ekebe, nemadzu agba. Ekebe, Chileke agba gbekwa kabaa eshihu ike. Ono buru ge Chileke gude egoshi le Jizosu bu Nwa iya.

¹⁰Oo ya bu l'onye wowaru onwiya ye Nwa Chileke ono l'eka be ekebe ono duwaa l'okpoma. Onye te ewokwanuru onwiya ye Chileke l'eka be meakwaru iya onye ntuphu-ire; kele o to kwedu l'ekebe Chileke agba le k'ehu Nwa iya bu eviya.

¹¹Ekebe ono bu le Chileke nuru anyi ndzu ojejoje; waa le ndzu ono bu l'ehu Nwa iya be o shi.

¹²Onye yee Nwa iya ono tugbaru buru nanu be nweakwa ndzu ono; ophu onye yee Nwa iya ono atugbaduru buru nanu enwekwanu ndzu ono.

Ndzu ojejoje

¹³Su-a; iphe-a, mu ede-a bukwa unubedua, unu le Nwa Chileke tugbaberu buru nanu-a be mu ederu iya; g'unu amakwanuru l'unu nwewaru ndzu ojejoje ono.

¹⁴Obu eshihujee anyi ike l'iphu Chileke; noo l'onumaje olu anyi me o -buru l'iphe, anyi suru g'o nu anyi be anyi pfuru g'o du iya l'uche.

¹⁵O n'iya bu l'eshinu anyi maru l'onumaje olu anyi l'iphe, bukpo iphe, anyi suru g'o nu anyi; be anyi maanaru-a l'anyi natawaru iphe, anyi suru g'o nu anyi obu.

¹⁶O -duru onye humaru nwanna iya eka oome iphe-eji, abudu e -mee ya; l'o gbua onye meru iya nu; g'onye ono pfukwaru nu Chileke ge Chileke woru ndzu nu nwanna iya ono, meru iphe-eji ono. Nokwapho iphe, Chileke e-me l'ehu ndu eme iphe-eji, du egube ono. O dukwanuru iphe-eji ophu bu e -mee ya; l'oogbua onye meru iya nu. Mu ta asukwaru g'e pfuje nu Chileke k'egube iphe-eji k'ono.

¹⁷Iphe, bukotakpoo iphe, e meru l'uzo, apfuduru-oto bukwa iphe-eji; ole o dukwarupho iphe-eji ophu abudu e -mee ya; l'oogbua onye meru iya nu.

¹⁸Anyi maru l'onyemoneye, Chileke nwuru te emejedu iphe-eji. Kele Nwa ono Chileke nwuru ono anoduje eleta onye obu enya okpobe eleta; k'ophu Onye-Njo ono, bu Obutuswe tee byidu iya eka.

¹⁹Anyi maakwaru l'anyi bu ke Chileke; le ndiphe mgburugburu be Onye-Njo ono, bu Obutuswe turu gburumu swiswia.

²⁰Ophu anyi makpodaru bu le Nwa Chileke byaru; anyi bya amakwarupho l'o meru g'enya sahu anyi; k'ophu anyi byaru bya amaru onye ono, bu iya bu okpobe Chileke ono. Onye ono bu okpobe Chileke ono be anyi l'iya tugbaru buru nanu. O buru onye o shi l'eka bu Nwa iya ono, bu Jizosu Kereshi. Yebedua, bu Jizosu Kereshi bu okpobe Chileke ono; bya aburu iya bu ndzu ojejoje ono l'onwiya.

²¹Unwegirima mu; unu te ekwejekwa g'ọ duru iphe, unu ahaję g'ọ bya anọ-chia ęnya Chileke l'ime ọkpoma unu.

2 Jìonu

2 Jìonu 1

¹Èkwo-ozì ọ̀wa-a shì l'ẹ̀ka m̀be onye e meru ọ̀gerenya Chìochì. Onye mu ede iya anù b̀ eze-nwanyì onò, Chileke h̀taru onò ỳe ndibe iya, b̀ ndu mu yeru obu; opfu l̀e mu l'ẹ̀phe t̀kòwaru bya amaru ọ̀kpobe-opfu onò. Mb̀-à; ọ̀ t̀ b̀kwa mb̀dua nwẹ̀kinyi mu yeru iya obu ọ̀bu. Iphe, b̀kotakpoo ndu mawaru ọ̀kpobe-opfu onò yek̀takwaru iya ph̀ obu.

²Noo k̀le ọ̀kpobe-opfu onò buwa anyi ebubu l'ẹ̀hu. Ọ̀ b̀ru g'oo-buwarurò b̀ onò; swiru anyi jasù l̀e tuutuutu l̀e m̀mimiimii.

³Gẹ̀ Chileke, b̀ Nna ỳe Nwa iya, b̀ Jizosu K̀reshi meeru anyi eze-iphe-oma; ph̀aru anyi obu-imemini; mee gẹ̀ nchì d̀ anyi doo g'anyi gude ire-lanù m̀ eye obu t̀gba b̀ru nanù g'anyi t̀gbaru iya.

Ọ̀kpobe-opfu waa eye-obu

⁴Èhu tsòshikporu mu ̀tso ike gẹ̀ mu harù h̀ma ndibe ngu; ndu ọ̀phu eme ọ̀kpobe-opfu onò gẹ̀ Nna s̀ru g'anyi meje iya.

⁵Nta-a b̀ iphe, mu arwò g̀be eze-nwanyì b̀ ọ̀wa-a: unu g'anyi yee nwibe anyi obu. Ọ̀ t̀ b̀kwa l̀e mu ederu ngu ekemu ọ̀phúú; ọ̀ kwa ọ̀phu anyi natahawaru eshikpoo l̀e mb̀ onò, b̀ iya b̀ g'anyi yee nwibe anyi obu.

⁶Wakwa iphe, b̀ n-yemobu baa: g'anyi mejeephò iphe, ọ̀ t̀ru l'ekemu. Wakwanù iphe, b̀ ekemu baa: g'unu yeje nwibe unu obu, b̀ iya b̀ iphe onò, unu ǹmaru e -shì l̀e mb̀ onò.

⁷L̀-à; ndu egudeje ẹ̀gedede dephua nemadzù d̀kwaa igwerigwe; ẁfu dzuru ẹ̀kameka l̀e mgboko; ndu j̀karu l̀e Jizosu byaru-a bya ab̀ru nemadzù eviya l̀e mgboko-a. Egube onye onò b̀ onye ọ̀bu, egudeje ẹ̀gedede dephua nemadzù; t̀me ọ̀ b̀ru iya b̀ onye-achì-nta-K̀reshi ọ̀bu.

⁸Iphe unu a-kwab̀eruphò onwunu ẹ̀nya iya b̀kwa g'unu te eme g'iphe onò, unu jeru ozi iya onò nahù unu; t̀phahù k̀ mmanù. Unu kwab̀eru onwunu ẹ̀nya; k'ọ̀phu unu a-natadzuchia obunggo iya anatadzu.

⁹Onyemonye, ete emejedu iphe onò, K̀reshi ziru onò g'o ziru iya; onye onò b̀ ỳle Chileke at̀gbakwaru b̀ru nanù. Onye emekwanù iphe onò, K̀reshi ziru onò; ọ̀ nòdu emerwue ya ph̀ l'oke; onye onò b̀ ỳle Chileke waa Nwa iya, b̀ Jizosu t̀gbaakwaru b̀ru nanù.

¹⁰Mb̀-à; ọ̀ -d̀ru onye byapfutaru unu; ọ̀phu ọ̀ b̀du iphe onò, e ziru anyi onò b̀ ọ̀ gude bya; unu ta asujekpokwaanu onye onò: oshi adù; ọ̀phu unu ekelekpokwaa ya nù ekele.

¹¹L'onye s̀ru onye onò oshi-adù b̀ ỳe ya d̀kwaa ẹ̀bo gbaru l'ejo-iphe, oome.

¹²Mu nweru ikpoto iphe, mu gege ederu unu; ọle ọ tọ bụdu ẹkwo yẹ mini-ẹkwo bẹ mu e-gude degbuaru unu g'ọ dụ mu; iphe, mu arichia bụ lẹ mu a-kpapfutachia unu; anyi l'unu abogbawaro l'ọnu onwanyi; g'ẹhu atsokwanu-a anyi tsọfu l'ishi.

¹³Ndibe nwanna ngu nwanyi, bụ onye Chileke họtaru l'ekelekwā ngu phọ. Nokwa g'ọ dụ.

3 Jìonu

3 Jìonu 1

¹Èkwo-ozì ọwa-a shì l'ẹka mube onye e meru ọgerenya Chìochì. Onye mu ede iya anu bu Gayọsu onye mu yeru obu opfu lẹ mu l'iya tukuraru bya amaru ọkpobe-opfu ono.

²Su-a; ọnyà mu, du mu l'obu; mu epfujekwa anu Chileke g'o mekwaa g'iphemiphe, jehuru ngu; ẹhu adu ngu ike; mbu ge mu maanuru-a l'obu ngu be ẹhu dukwapho guu.

³Ọ duru unwunna, haru bya akọoru mu l'i pfu-shikwaduru-a ike l'ọkpobe-opfu ono; le ndzu ngu l'ophu bukotaepho ndzu ire-lanu. Ehu tsoo mu ntumatu.

⁴Ọ to dudu iphe, akajebaa mu eme g'ehu tsoo mu utso; 'abudu lẹ mu numaru lẹ ndzu unwegirima mu bukotaepho ndzu ire-lanu.

Aaja Gayọsu ajaja

⁵Ọnyà mu, du mu l'obu; iigoshijekwa l'ọ gbaru g'e gude ire ngu ẹka l'iphe, iimekpọoru unwunna anyi; mbukpoo me unwunna, byaru abyabya.

⁶Ephe koru Chìochì-a k'eye obu nkengu. Jiko yejekwaru phe ẹka m'ephe -gbeshi jeshia ije phe. Mbu-a; mejekpọeru phe pho iphe, jiru Chileke epho.

⁷L'eshinu ephe gbeshikpọoru ije l'iswi ẹhu Kéreshi-a be ta adukwa iphe, ephe ekweje anata l'ẹka ndu abudu ndu ke Kéreshi.

⁸Noo ya bu lẹ ndu du egube ono be o gbaru ke g'anyi yejeru ẹka; g'oo-buru iya bu l'anyi l'ephe tukuraru gbaru mgba l'eje ozi k'ọkpobe-opfu ono.

Dayotirifisu waa Dimitiriyosu

⁹Mu deru nwekwo-ozì nu Chìochì; ophu Dayotirifisu, onye woru onwiya dobe l'ishi eyeduru mu onu.

¹⁰Ọo ya bu lẹ: mu -bya; be mu e-wofuta iphe, oomegbabe, bu iya bu mkpọkoro opfu, anọduje afushi iya l'onu, oogudeje adzushi uka ekpu anyi. Teme ophu ono ejikwaru iya pho epho. O gbeshi ozo; o jika g'unwunna ta abya g'ephe lẹ ndu Chìochì kwee; bya akpọshikwaapho ndu o du g'ephe l'ephe kwee g'ephe te eme nno; bya ebufu phe lẹ Chìochì.

¹¹Ọnyà mu, du mu l'obu; ta anwukwa ẹka ejo-iphe; nwuchikwa ẹka iphe, du ree. O kwa o-me-ree bu ke Chileke; o-me-njo teke ahuma-swekwaa Chileke.

¹²Dimitiriyosu be onyemonye tu-dzuru onu eme oma nkiya; teme ọkpobe-opfu ono l'onwiya nodu ajakwa iya pho ajaja; mbedua l'onwomu nodu ajakwa iya pho. Unu maru l'ajaja, anyi aja iya bu eviya.

Ekele mkpochi-ishi

¹³Mu nwekwaru ikpoto iphe, mu gege ederu ngu; ole o to budu mkpara-ekwo yee mini-ekwo be mu e-gude degbuaru ngu g'ọ du mu.

14Mu ari lẹ mu ta anọedu ọdu; mu akpafuta ngu; anyi lẹ ngu abọwaroya l'iphu l'iphu.

15G'ẹhu dukwa ngu guu.

Ọnyà ngu phẹ l'ekekwa ngu roya-o. Kelekwaruphọ anyi ọnyà anyi phẹ l'ẹhu l'ẹhu.

Jiudu

Jiudu 1

¹Ekwo-ozí-a bẹ shi l'ẹka mbedua, bụ Jiudu; onye l'ejeru Jizosu Kéreshi ozi; bukwarupho nwune Jiemusu. Ndu mu ede iya anụ bụ ndu ono, Chileke kuru bya emee ephe buru ndu nkiya ono. Chileke ono, bụ Nna bẹ yeru unu obu; bya akwakọbe unu l'ime Jizosu Kéreshi g'ọ tọ dụ iphe, e-me unu.

²Gẹ Chileke phukwaaru unu obu-imemini; l'oomee g'ẹhu dụ unu guu; l'ooyekwaapho unu obu. G'ọ tuko iphe ono meeru unu; mbụ meeru iya unu k'anyinyi.

Ndu ẹjo nzi

³Ndu mu yeru obu; iphe, mu shi arí lẹ mu e-deru unu l'ekwo-ozí-a bụ k'adzota ono, Chileke dzotaru anyi g'anyi ha ono. O gbẹ bya akachia ree lẹ mu e-dechia ya gude dua unu obu; g'unu bya awata agbaru ekweta ono odzori; mbụ ekweta ono e yeru ndu-nso kẹ Chileke l'ẹka ono.

⁴Iphe, mu gude epfu iya bụ l'ọ haru nweru ndu ta akwabedu Chileke ubvù, toru nwehu pyobata l'echilabo unu; ẹbe a madu. Ephe anoduje ezi l'ọ dua ree gẹ nemadzu meje umere, rehuru erehu; eshinu Chileke buwanu onye emeje eze-iphe-oma. Ephe nodu ajikaje Jizosu Kéreshi ono, bụ iya bụ Nnajiuphu anyi kpoloko; bya abukwaru iya pho kpoloko kpeekpu bụ onye gude ndzu anyi. Lẹ teke ndiche bẹ e dehaakwaru iya ro l'ekwo-opfu Chileke sụ lẹ Chileke a-nma phe ikpe iphe ono, ephe eme ono.

⁵Iphemiphe-a bẹ unu makotabebahaakwaru rengurengu; ọle iphe, mu emelepho gẹ mu nyataru unu bụ lẹ teke ndiche bẹ Nnajiuphu dzokwaru ndu nkiya teke ono, ephe shi buru l'alí Ijiputu ono. O meru ephe wufuta l'alí ono. O le ọ dzochakwaaru phe ono; e mechaalaa; o gbushialaa ndu ophu ekwedu nkiya

⁶Teme unwu-ojozi-imigwe ono g'ephe ha; mbụ ndu ophu, kwefuru ike l'ephe taa nopyabedu l'ẹka Chileke doberu phe g'ephe nodu; bya agbado ẹka a suru g'ephe buru l'imigwe bẹ Chileke tukwaru mkporo mgbe-abvu-abvu; chiru phe ye l'ejo ochii ẹka gbahuru tsukiribaa. O buru ẹka ono bẹ ephe a-nodu jasụ l'oke mboku ono, bụ mboku, Chileke e-kpe phe mpfugbu ono.

⁷Nokwapho g'ọ nwuru Sodomu yee Gomóra; mewaro iphe, bukpo mkpukpu lẹ mkpukpu ono, ephe l'ephe naru onu-egu ono. Ephebedua wokotakarupho onwophe togboru eme kẹ nwanyi me eme iphe, bukpo ẹbyi, adudu k'epfufu. A nua phe aphu k'ojeje. Iphe ono buru iphe, Chileke gude alo ndiphe l'ophu ẹka lẹ nchi.

⁸Su-a; nokwapho g'oo-du ndu ono, ezi iphe, abudu okpobe-opfu ono. Ephe arwoje nrwo, emeje ephe emerwushia onwophe; ndu-ishi nodu aduje phe ashi; ephe nodu anoduje epfubyishi ndu ono, a ta ahumadu l'enya l'ogbu-nwiiinwii imigwe ono.

⁹Epfubyishi ono, ephe epfubyishi ndu ono ta adukwa g'ọ ka mma l'oo Mayikelu, bụ onye-ishi unwu-ojozi l'imigwe turu iya ama ememe. Mbụ lẹ teke ono, Mayikelu ono yee Nsetanu turu ego onye a-pata odzu Mosisu ono bẹ Mayikelu 'atukwaru ama ephu

Nsetanu iphu; g'e-shi gę ya nma iya ikpe. Iphe, o pfuru Nsetanu buępho: "G'ọ buru Nnajiuphu a-baru ngu mba."

¹⁰Ndu ono bu iphe, te edoduru phe ęnya be ęphe anọduje epfubyishi. Ęphe du g'anu-ęgbudu, enwedu egomunggo, buępho iphe, agu iya nu be ọomajeru; teme ọ buerupho iphe ono be oomeje. Nokwapho gę ndu ono emeje bu ono. Ọo iphe, agu phe nu be ęphe anọduje eme; ọ buru iya l'e-gbu phe.

¹¹Nshio phe! Ọo ejo ọzo ono, Kenu tsoru teke ndiche ono be ęphe etsokwapho. Mbua; ndu ọwa-a bukwa ękpiri okpoga be kparu iphe, ęphe shisweru ọzo ono, pfuru nhamunha ono; bya emeahaa iphe ono, Belamu meru teke ndiche ono. Mbua ọ buru gę Kora kwefuru Chileke ike bu g'ęphe wataru ememe. Ęphe jekwanu ala l'iswi g'ọ laru.

¹²Qobujeru; ęphe -bya anọ-kube unu; eri nri l'eka unu dokoberu tugba nri eri gude egoshi l'unu yeru nwibe unu obu; ęphe aburu iphe-iphere nodu l'echilabo unu. Ọphu iphere onwophe adujedu phe; l'ọ buępho onwophe be ęphe letaru ęnya. Ęphe du g'urwukpu, pherephere zikashiru; ęgube-a igwe erwuchaa erwurwu; pherephere ezikaa ya; igwe te edzedu mini-a. Ęphe du g'oshi-omi; ole ọ kwa ọphu ata amijedu mebyi teke ọ gbaru iya l'amị mebyi. Ęgube ndu ono be ọnwu gbuwaru l'ono-ndzu; ọ to buledua akpo anwuhu lanu be ęphe nwuhuru; noo kele e phefuwaru phe tuphaa g'eepefuje oshi-a.

¹³Ęphe dukwapho g'akpara-mini, ha shii, l'atu l'eze-ęnyimu. Noo kele ęphe aphukpotaje ejo umere, rehuru erehu ono, ęphe eme ono g'eka uphu mini bulihuru. Ęphe du gę kpokpode, ephu ọzo. Ole eka Chileke doberu kwaberu phe bukwanu tsukiribaa eka agba ejo ochii. Ọ buru eka ono be ęphe a-nodu jasu le tuutuutu le mimiimii.

¹⁴Ọ kwa Inoku, bu onye ogo k'ęsaa l'eri Adamu be pfuru mpfuchiru ke ndu ono su: "Unu lenu; Nnajiuphu be yee ndu nkiya, du unubuku ugbo iri shikwa l'imigwe swiru abya;

¹⁵g'ęphe bya ekpee ndiphe g'ęphe ha ikpe. Oo-goshikota iphe, bu ndu ono, ata madu Chileke ono iphemiphe, ęphe meru iya, bu iphe-eji; l'oo-gude emeswe ono, ęphe mesweru iya ono nmaa phe ikpe l'ęphe ta akwabeduru iya ubvu; bya anmakwa phe pho ikpe iphe, bukpo ejo opfu, ęphe gude pfubyishia epha iya."

¹⁶Ndu ono abujeru; iphe -byaru phe; l'ọ buerupho Chileke be ęphe anọduje ata uta iya; mbua; iphe -byaru phe; ęphe agbe wata aguru Chileke aphu iya. Ęphe eworu onwophe togboru ęgu ejo-iphe, agugbabe phe nu. Iphe, eshije phe l'onu buerupho aja onwophe mkpokoro ajaja. Ęphe -humakpowa l'o nweru urwu, ęphe e-rita nemadzu l'eka; ęphe ajakposhikpoepho onye obu.

Anna okwa me iphe, ee-meje

¹⁷Ole ọ bu; ndu mu yeru obu; iphe, mu eme g'unu maru bu; unu nyatajeepho iphemiphe ono, ndu-ishi-ozu Nnajiuphu anyi Jizosu Keshi vuhawaa ọzo pfuaru unu ono.

¹⁸Mbụ iphe ono, ẹphe shi anọduje aguru unu l'ọgu ebvu ono, bụ iya bụ: “L'o - rwujeepo teke mgboko-a l'a-bvụ bẹ o nwechaaru ndu a-nọdu aja unu ewenu. Iphe, ẹphe a-nọdujeepo awoko ẹka iya bụ g'ẹphe e-shi mee iphe, ẹgu iya enwu pẹ phuruphuru l'ẹhu; mbụ iphe, ẹgu iya agụ pẹ; opfu l'ẹphe ta akwabedu Chileke ùbvù.”

¹⁹Ndu eme ẹgube ono bẹ l'akpatajẹ g'ogbo bua onwophe ẹbo; wata akpa iche iche. O kwa ẹgu iphe, dū lẹ mgboko-a, l'agụ pẹ nū bẹ kpụ pẹ l'ẹka; o tọ bukwa Unme-dụ-Nsọ gude ndzụ pẹ.

²⁰Obenu lẹ-a; unubẹ ndu ọphu mu yeru obu; unu pfiẹkwarupho pfiushia ike l'ekwekwe ono, dū iche ono, unu kweru ono; mbụ ekwekwe ono, shi Chileke l'ẹka ono. Unu gude ekwekwe ono vuje evuvu. Unu hajẹ gẹ Unme-dụ-Nsọ goshije unu g'unu l'e-gudeje epfu anụ Chileke.

²¹Unu nopyabeekwapho lẹ n-yemobu Chileke; unu anọdukwapo ngaberu Nnajiuphu, bụ Jizosu Kéreshi g'ọo-phuru unu obu-imemini; mekwaapho g'unu nọdu ndzụ ojejoje.

²²Unu phujekwaru ndu abokwadu obu ẹbo obu-imemini.

²³Ẹgube ndu ono bẹ unu e-yetajeru ẹka; lofuta pẹ l'ọku. Unu aphujekwaru pẹ pho obu-imemini; mbụ ndu ono, bụ ẹgu ẹjo-iphe agụ pẹ nū bẹ gude ndzụ pẹ ono. O-ẹ-a; unu ta akwaswejekwaru pẹ ẹnya mẹ unu -nọdu aphuru pẹ obu-imemini obu. Iphemiphe, bụ nkephẹ bẹ unu a-kpokotajekwa ashị; mbụ je akpachaa l'uwe, ẹphe eye l'ẹhu, bụ ọphu ẹphe gudewaa ẹjo-ememe pẹ pharwushia.

Ajaja bụ kẹ Chileke

²⁴G'anyi tua Chileke ẹpha; mbụ onye ono, a-dū ike gudeshia unu g'unu ta ada; tẹme o bukwaru iya pho l'e-me g'ọ tọ dū iphe, aa-ta unu ụta iya teke oo-kuta unu dobe l'odu-biribiri iya. Ẹka ono bụ ẹka ẹhu a-nọdu atsowaro unu uto.

²⁵G'anyi tua ya ẹpha l'ọo ya kpoloko kpeekpu bẹ bụ Chileke. O buri l'ẹka Nnajiuphu anyi, bụ Jizosu Kéreshi bẹ oo-shi dzoo anyi. G'odu-biribiri mẹ abụ Okalibe, kangoru nū; mẹ ike; mẹ abụ ishi, buhakpada nkiya tẹme mgboko dū; buri nkiya nta; bukwarupho nkiya jasụ lẹ tuutuutu lẹ mijimiimii. Nokwa g'ọ dū.

Ophulenyā

Ophulenyā 1

¹Owa-a bụ ophulenyā Jizọsu Kéréshi, Chileke nṛu iya g'o goshi ndu ejeru iya ozi, bụ iphe, aduedu g'oo-nọ-beru l'oomee. Tọbudu iya bụ; Jizọsu Kéréshi bya ezia ojozi-imigwe iya sụ g'o je atuko iphe ono g'ọ ha goshi Jiṅu, bụ onye-ozī iya.

²Oo iphemiphe, Jiṅu hūmaru bẹ ọ tukuru g'ọ ha pfukọta-a. Ọ bụru l'ekwo-a l'eka-a bẹ Jiṅu tukuru opfu ono, Chileke pfuru ono deshikọta. Iphemiphe ono bukotaru okpobe-opfu, Jizọsu Kéréshi ono goshikotaru iya.

³Onu-oma bẹ a goru nṛ iphe, bụ onye agụ ekwo-a, e deru opfu, epfuchiru Chileke-a mē ndu nūmaru iya nṛ; ngabẹ iya nchị bya emeje iya ememe; noo lẹ teke iphemiphe-a l'e-mekọta bẹ zaakwaru ntse.

Jiṅu l'ekele Chiochi ẹsaa

⁴Oo mbɛdua, bụ Jiṅu bẹ ekele unubẹ Chiochi ẹsaa ono, dukota l'alī Eshiya ono ekele. Mu sụ g'eze-iphe-oma yee ẹhu ọdu guu, shi Chileke l'eka tso unu. Chileke ono bụ onye nọ ndzụ; bya aburu onye shihawaa nọduta tẹmanu mgboko dṛ; bya aburu iya bụ onye ono, abya nṛ ono. G'eze-iphe-oma, shi iya l'eka; mēkwapho ophu shi l'eka Unme ẹsaa Chileke buri k'unu jeyewaruroya. Unme ẹsaa, mu epfuru bụ Unme ẹsaa ono, l'anọduje l'atatiṣhu Chileke l'eka ọ nọ l'aba-eze iya ono.

⁵Eze-iphe-oma yee ẹhu-guu ono shikwapho Jizọsu Kéréshi l'eka onye l'apfushije ike l'iphemiphe, o pfuru anyi; bya aburu onye mbu, Chileke meru o teta nọdu ndzụ. Ọ bukwaru iya pho bụ onye-ishi iphe, bukotakpoo ndu bụ eze lẹ mgboko-a. Ọ bụ onye yekpọoru anyi obu; k'ophu ọ nwuhu-chiru anyi anwuhu, anyi gege anwuhu. Ọ buri mee ya b'o gude tọo anyi l'egbu ono, iphe-ẹji shi kee anyi ono.

⁶Ọ bya emee anyi; anyi buri eze; bya aburu uke Chileke; ndu ejeru Chileke, bukwapo Nna iya ozi. G'ajaja mē ike bukotaru kẹ Jizọsu jasụ lẹ tuutuutu lẹ mimiimii. Nokwa g'ọ dṛ.

⁷Unu lekwa l'ọ noakwa anono l'urwukpu abya. Onyemonye l'e-gude ẹnya iya hūma iya. Iphe, bụ ndu ono, turu iya arwa ono bẹ a-humakwa iya pho. Ohamoha, dṛ lẹ mgboko-a bẹ l'a-rakota ẹjo ẹkwa; ẹka meji a-tofu phe mē ọ -byaepho. Noo iphe, e-me nṛ bụ onoya. Nokwa g'ọ dṛ.

⁸“Ọ mbɛdua bụ Alufa bya aburu Omega. Mu bụ onye mbu bya aburu onye ikpazu.” Nokwa iphe, Nnajiuphu, bụ Chipfu eepfu; mbu onye ono, bụ iya bụ Okalibe-Kakota-Ike; bya aburu onye shihawaa nọduta tẹmanu mgboko dṛ; bya aburu iya bụ onye ono, l'abya nṛ ono.

Ahuma Kéréshi l'ophulenyā

⁹Oo mbɛdua bẹ bụ Jiṅu, bukwapo nwanna unu. Mu bụ onye mu l'unu tukuru buri ndu ephe lẹ Jizọsu tugbaru buri nanu l'ẹje ẹjo iphe-ehuka-a, anyi ẹje-a. Mu l'unu tukokwarupho nweru ọta-nshi. Ọ buri egube ono bẹ anyi e-mechkwapho tuko gbaru

mgba nweru mgboko òphúú ono, l'e-shi Chileke l'ẹka ono. L'o nweru teke a kputajeru mu je edobe l'ali, ẹnimu so-pheru. Iphe, eekuje ẹka ono bu Patumosu. Iphe, e gude kpuru mu laa ẹka ono bu l'ole mu asa opfu Chileke asasa; mekwapho le mu anoduje epfuru ndu ozo l'edzudzu-oha k'okpobe iphe ono, Jizosu Kereshi goshiru mu ono.

¹⁰Tobudu iya bu; o be l'eswe ujiku lanu, bu eswe Nnajiuphu; Unme Chileke bya ejie mu pho ehu pyimu. Mu wata aphu ophulenyia. Mu numa olu-opfu, kwata adashikpo ike ike ike ike g'onye egbu opu-ogu l'uzo azu mu.

¹¹Olu ono su: “O kwa mbedua bu Alufa bya aburu Omega; mu bu onye mbu bya aburu onye ikpazu. Tukokpoephe iphe, iibya ahuma-a dekota l'ekwo; zikaaru Chiochi esaa-a, no le Eshiya; mbu ndu Chiochi, no le Efesosu; waa ndu ke Sumena; me ndu ke Pegamomu; waa ndu ke Tayatayira; waa ndu ke Sadisu; waa ndu ke Filadelufiya; me ndu ke Layodeshiya.”

¹²Mu bya aghaa enya l'azu ge mu humaeshikwa onye ono, epfu eyeru mu nu onoya. Mu ghaa enya ono mu huma oroku esaa e mekotaru le mkpola-ododo.

¹³O duru onye dwepho ge Abubu-Ndiphe, yekotaerupho akpawuru uwe, l'akpa iya l'ogba-echi pfuru le mgbaka oroku esaa ono. Uwe ono be e gude akpo-mkpola-ododo kebuta iya l'unme.

¹⁴Egbushi, du iya l'ishi nodu achaephe ke phuuphuu g'aji aturu, maru acha ucha; mbu kwata acha pemu pemu g'aka-mini-sunoo. Enya iya dwepho g'iphoro oku, enwu enwunwu.

¹⁵Okpa iya labo chakota ziriri ge mkpurukpu-igwe, ama mma, a huru l'oku jeye o chaa achacha; mbu huta iya jasu o gbuchafu. Olu-opfu iya dwepho g'eka eze mini aphu gbudugbudu.

¹⁶O chiru kpokpode esaa l'ekutara iya. Ogu-echi, atsu nko akpatiphu labo nodu alufutaje iya l'onu. Iphu onye ono nodu egbuepho nwiiinwii g'enyanwu keru l'ishi.

¹⁷Mu huma iya bya adaa ya kpurumu le mgboru okpa; dabyierupho g'onye nwuhuru anwuhu. O bya ebyibe mu ekutara iya bya asu mu: “Ndzu b'agushi ngu. Oo mbedua bu Onye Ivuzo bya aburu Onye Ikpazu.

¹⁸Oo mbedua bu onye ono, shi nwuhu anwuhu; ole mu nowaa ndzu ojejoje nta-a. Nokwa g'o du. O kwa mu gude ire-igodo oku-ali-maa me k'anwuhu.

¹⁹Dee iphemiphe-a, i humawaru-a l'ekwo waa iphe, du nta-a; mekwapho iphe, e-me l'iphu.

²⁰Waa iphe, e domiru edomi du le kpokpode esaa-a pho, i humaru l'ekutara mu pho; ye le oroku mkpola-ododo esaa pho. Kpokpode esaa ono be bu unwu-ojozi-imigwe, l'anoduje eletgbaa Chiochi esaa ono enya; oroku esaa ono buru Chiochi esaa obu.”

3 Jionu 1

¹Ekwo-ozu owa-a shi l'eka mube onye e meru ogerenya Chiochi. Onye mu ede iya anu bu Gayosu onye mu yeru obu opfu le mu l'iya tukowaru bya amaru okpobe-opfu ono.

²Su-a; ònyà mu, dù mu l'obu; mu epfujekwa anu Chileke g'o mekwaa g'iphemiphe, jehuru ngu; ehu adu ngu ike; mbu ge mu maanuru-a l'obu ngu be ehu dukwapho guu.

³O duru unwunna, haru bya akooru mu l'i pfu-shikwaduru-a ike l'okpobe-opfu ono; le ndzu ngu l'ophu bukotaepho ndzu ire-lanu. Ehu tsoo mu ntumatu.

⁴O to dudu iphe, akajebaa mu eme g'ehu tsoo mu utso; 'abudu le mu numaru le ndzu unwegirima mu bukotaepho ndzu ire-lanu.

Aaja Gayosu ajaja

⁵nyà mu, dù mu l'obu; iigoshijekwa l'o gbaru g'e gude ire ngu eka l'iphe, iimekpooru unwunna anyi; mbukpoo me unwunna, byaru abyabya.

⁶Ephe koru Chiochi-a k'eye obu nkengu. Jiko yejekwaru phe eka m'ephe -gbeshi jeshia ije phe. Mbu-a; mejekpoeru phe pho iphe, jiru Chileke epho.

⁷L'eshinu ephe gbeshikpooru ije l'iswi ehu Kereshi-a be ta adukwa iphe, ephe ekweje anata l'eka ndu abudu ndu ke Kereshi.

⁸Noo ya bu le ndu du egube ono be o gbaru ke g'anyi yejeru eka; g'oo-buru iya bu l'anyi l'ephe tukoru gbaru mgba l'eje ozi k'okpobe-opfu ono.

Dayotirifisu waa Dimitiriyosu

⁹Mu deru nwekwo-ozu nu Chiochi; ophu Dayotirifisu, onye woru onwiya dobe l'ishi eyeduru mu onu.

¹⁰Oo ya bu le: mu -bya; be mu e-wofuta iphe, oomegbabe, bu iya bu mkpokoro opfu, anodeje afushi iya l'onu, oogudeje adzushi uka ekpu anyi. Teme ophu ono ejikwaru iya pho epho. O gbeshi ozo; o jika g'unwunna ta abya g'ephe le ndu Chiochi kwee; bya akposhikwaapho ndu o du g'ephe l'ephe kwee g'ephe te eme nno; bya ebufu phe le Chiochi.

¹¹nyà mu, dù mu l'obu; ta anwukwa eka ejo-iphe; nwuchikwa eka iphe, du ree. O kwa o-me-ree bu ke Chileke; o-me-njo teke ahuma-swekwaa Chileke.

¹²Dimitiriyosu be onyemonye tu-dzuru onu eme oma nkiya; teme okpobe-opfu ono l'onwiya nodu ajakwa iya pho ajaja; mbedua l'onwomu nodu ajakwa iya pho. Unu maru l'ajaja, anyi aja iya bu eviya.

Ekele mkpochi-ishi

¹³Mu nwekwaru ikpoto iphe, mu gege ederu ngu; ole o to budu mkpara-ekwo yee mini-ekwo be mu e-gude degbuaru ngu g'o du mu.

¹⁴Mu ari le mu ta anodedu odu; mu akpafuta ngu; anyi le ngu abowaroya l'iphu l'iphu.

¹⁵G'ehu dukwa ngu guu.

Ònyà ngu phe l'ekelekwa ngu roya-o. Kelekwarupho anyi ònyà anyi phe l'ehu l'ehu.

Qphulenyà 2

Ozi, Kéreshi ezi Chìochi Efesòsu

¹“Waa iphe, ii-de nù ojozi-imigwe kẹ Chìochi Efesòsu baa: Ọwa-a bụ ozi, onye ono, chi kpokpode ẹsaa l'ẹkutara ono ziru; onye ejephe lẹ mgbaka orọku mkpọla-ododo ẹsaa ono.

²Mu makọtakwaru iphemiphe, iimeje g'ọ ha; mu maru g'iijeshiberu ozi ike; bya amaru g'ii taberu iphe nshi. Mu maru l'i tị kwejedu gẹ ndu eme ẹjo-iphe shita ẹka i nọ. L'i hụchawaru iphe, bụ ndu ono, sụru l'ẹphe bụ ndu-ishi-ozì ono ama; mbụ ndu sụru l'ẹphe bụ ndu-ishi-ozì; l'ẹbe abụ l'ẹphe bụ iya; i shi ẹgube ono maru l'ẹphe bụ ndu ntuphu-ire.

³Mu makwaru-a l'i tajeru iphe nshi; l'i jewaru iphe-ẹhuka, dụ shii l'opfu ẹhu mu; ọphu ike abvuduru ngu;

⁴Ọle-a; o nweerupho ọru, mu hūmaru ngu l'ẹhu. Ọ tọ buedu g'i shi yee mu obu bụ g'i yeru mu iya nta-a.

⁵Nyatanu ẹka o jeberu ụzo kpọ-swehu ngu. G'izimanu lwa ngu azu; g'i wata eme iphe ono, i shihawaa lẹ mbulembu meta ono; ọdumeka bẹ mu a-byapfutakwa ngu ẹgwegwa; bya apafu orọku ngu l'ẹka ọ pfuru; gbahaa l'izimanu lwaru ngu azu.

⁶Ọle g'ọ dūhabe; iphe, mu aja ngu ajaja iya bụ l'ẹjo-iphe ndu ọgbo Nìkolasu ono eme bẹ dū ngu ashì; ọ bụru g'ọ dūkwa mu phọ ashì bụ ono.

⁷“G'onye nweru nchì ngabekwa iya numa iphe-a, Unme Chileke epfu anu iphe, bukpo Chìochi g'ẹphe ha-a. “Ọ kwa iphe, bụ onye alwuje ọgu ono lwuta bẹ mu e-kwe g'o ria akpuru oshi ono, emeje g'a nọdu ndzụ ono; mbụ oshi ono, pfuru l'okpoku Chileke ono.

Ozi, Kéreshi ezi Chìochi Sumena

⁸“Waa iphe, ii-de nù ojozi-imigwe kẹ Chìochi Sumena baa: “Ọwa-a bụ iphe, oopfu mbụ onye ono, bụ onye ivuzọ bya aburu onye ikpazu; onye ono, shi nwuhu anwuhu; ọle ọ dzuwaa ndzụ ọzo ono.

⁹Mu makwaru-a l'iije iphe-ẹhuka; teme i nọdu akpa nri; obenu l'i nweru iphe shii. Mu makwaru-a epfubyishi ono, ndu ono, sụru l'ẹphe bụ ndu Jiu l'ẹbe ẹphe abụ iya ono epfubyishi Chileke ngu ono; ndu ono bụ ọlo-ndzukọ ndu abajeru Nsetanu ẹja.

¹⁰Ii byakwa eje iphe-ẹhuka nta-a; ọle ọo gẹ ndzụ ba agukwa ngu. Unu lekwa; Obutuswe a-hakwaru unu chita je atushia mkporo; g'e shi ẹka ono hua unu ama. Mbụ l'unu e-je iphe-ẹhuka ujiku iri mkpurophu. Ọle; nọduekwa mu phọ l'ẹka g'i nọ iya jasụ l'egbua ngu egbugbu; e-mechaa mu ekpube ngu okpu-eze ono, bụ ndzụ.

¹¹“G'onye nweru nchì ngabekwa iya; numa iphe-a, Unme Chileke epfu anu iphe, bukpo Chìochi g'ẹphe ha-a. “L'ọ kwa iphe, bụ onye alwuje ọgu ono lwuta bẹ bụ onye a ta abyadu ekwe g'onwu mgbu labo gbua.”

Ozi, Kéreshi ezi Chìochi Pegamomu

¹²Teme waa iphe, ii-de nū ojozi-imigwe ke Chiochi Pegamomu baa: “Owa-a bu ozi, onye ono, gude ogu-echi, atsū nkọ akpata iphu labo ono ezi.

¹³Mu makwaru-a l'i bu l'eka aba-eze Nsetanu no anono. Obenu l'i gudeshiepho epha mu; ophu i gojeduru ego l'i ti kweedu nkemu; mbukponu teke ono e gburu Antipasus l'eka Nsetanu bu ebubu; opfu l'oo l'o pfuru l'edzudzu-oha pfua l'oo mu be ya no l'eka ono.

¹⁴Ole o nweekwarupho iphe olemole, bu oru, mu humaru ngu l'ehu. O nweru ndu haru nodu ngu l'ime, bu ndu eme ejo-iphe, epehe nwutaru l'eka Belamu, bu onye ono ziru Belaku g'o-shi dephua unwu Izurelu; deru phe ye l'eri iphe, a gwaru iphe; ye apharwushi onwophe.

¹⁵Nokwapho g'o duru ndu no l'echilabo unu; eme iphe ono, ndu ogbo Nikolasu ezi ono, bukwapho iphe, du mu ashi-a.

¹⁶Oo ya bu; g'izimanu lwakwa unu azu; odumeka be mu a-byapfutakwa unu l'eka-egwa bya egude ogu-echi ono, shi mu l'onu ono gude tsoo egube ndu ono ugu.

¹⁷“G'onye nweru nchi ngabekwa iya; numa iphe-a, Unme Chileke epfu anu iphe, bu Chiochi g'ephe ha-a. “O kwa onye alwuje ugu ono lwuta be mu a-haru nri ono, bu mana ono, Chileke domiru edomi ono; waa mkpuma ochaano, e deru epha ophuu ono. Epha ono ta adudu onye ozo, maru iya nu; gbahaa onye ono, a nuru iya ono.

Ozi, Kereshi ezi Chiochi Tayatayira

¹⁸“Waa iphe, ii-de nū ojozi-imigwe ke Chiochi Tayatayira baa: ‘Owa-a bu ozi, Nwa Chileke ono ezi; onye enya iya dupeho g'iphoro oku, enwu enwunwu; teme okpa labo chakota iya ke ziri ri g'ope, a huru l'oku o gbuchafu egbuchafu.

¹⁹Mu makotakwaru-a iphemiphe, unu emeje g'o ha. Mu maru n-yemobu unu; maru g'unu yeberu ehu l'ozi bya amaru ekweta unu; maru g'unu ataberu iphe nshi; maru ozi unu. Mu maru l'iphe, unu eme nta-a be nyiberu iphe, unu shi eme le mbu.

²⁰Ole-a; o nweerupho oru, mu humaru unu l'ehu: Unu kweru g'ejo nwanyi ono, bu Jiezebelu nodu l'echilabo unu, bu nwanyi ophu asuje le ya bu onye-mpfuchiru Chileke; unu haa ya o nodu ezi iphe; gude iya mee ndu-ozu mu epehe nodu apharwushi onwophe; eri iphe, a gwaru iphe.

²¹Mu hakporu iya uzo noo odu g'ee-shi g'izimanu iphe-eji iya lwa iya azu; ophu o kwedu g'izimanu lwa iya azu g'o haa apharwushi onwiya.

²²Mu abyakwa iya eme g'o zee l'ehu, e-mee iya l'o kwaa l'ulo. Ndu ono, epehe l'iya azeje ono be mu e-me g'ephe jee ejo oke iphe-ehuka, paru eka apaa; gbahaa l'izimanu iphe-eji phe lwaru phe azu; epehe haa etso nwanyi ono.

²³Unwu iya g'ephe ha be mu e-chigbushikota echigbushi. Oo ya bu g'iphe, bu Chiochi g'ephe ha amakwanuru l'oo mbedua bu onye ono, l'enyochoje uche nemadzu; nyochaa okpoma iya maru iphe du iya l'egomunggo ono. Su-a; g'unu hakotakpoo l'onye l'onye

bẹ mu a-nụkotachaa aphụ gbaru iya nụ l'ẹhu l'ẹhu. Onyemonye bẹ mu a-nụ aphụ lẹ g'iphe, o meru gbaru.

24“A bya l'unubẹ ndu ọphu bukwapho lẹ Tayatayira; unubẹdua te ekwedu ye ẹka l'ẹjo-iphe ono, ndu ono ezi ono. Unubẹdua bụ ndu ọphu amadu iphe ono, o nweru ndu ahajeru sụ l'ọo iphe, e domigbaru edomi k'ẹhu Nsetanu. Unubẹdua ta adụekwa iphe ọzo, mu asụkwadu g'unu mee.

25Ọ buẹpho lẹ-a; g'ọ dūhabe; unu chikwaru ẹka labo kwẹe l'iphe ono, buwaa k'unu ono gudeshia ya ike jasụ teke mu a-bya ọzo.

26Ọ kwa onye alwuje ọgu ono lwuta yee onye emeje iphe, mu pfuru; mbụ onye gude iya ememe jeye l'ikpazu; nokwa onye mu e-ye iya l'ẹka g'ọ buru onye-ishi ọhamoha.

27Oo-gude mgborígwè buru ishi ọhamoha; gwee ọhamoha ono uji. Ono buru iphe, Nna sụru gẹ mu mee.

28Ọzo bụ lẹ mu a-nụkwa iya pho kpokpode nchi-aboju.

29“G'onye nweru nchị ngabekwa iya; numa iphe-a, Unme Chileke epfu anụ iphe, bụ Chiochi g'ephe ha-a.” “

Ọphulenyia 3

Ozi, Kéreshi ezi Chiochi Sadiusu

1“Waa iphe, ii-de nụ ojozi-imigwe kẹ Chiochi Sadiusu baa: “Owa-a bụ ozi, onye ono ezi; mbụ onye ono gude Unme ẹsaa Chileke ono waa kpokpode ẹsaa ono. Mu makotakwaru-a iphemiphe, unu emeje g'ọ ha. L'aanọduje eku unu ndu nọ ndzụ; ọle unu bụ ndu nwuhuru anwuhu.

2Ọ tọ dūekwa g'ọo-nọ-beru nta-a iphe ọbu, unu nweru ọbu anyihu ẹnya ree. Ọo ya bụ; unu tehukwa nwuru ẹnya; kwaberu iya ẹnya k'ọphu ọo-rọ-kerehu. Mu daleakwaru unu humawaa l'iphemiphe, unu eme ta adudu ọphu unu metabewaru g'ọ gbaru l'iphu Chileke mu.

3Ọo ya bụ; unu nyatajekwapho ozi-oma ono, unu gude nchị unu numa kwetakwapho ono. Unu pfukwarupho pfushia ike l'iphe ozi-oma ono epfu. G'izimanu lwakwa unu azu. Teke ọ bụ l'unu te etehuduru nwuru ẹnya bẹ mu a-tukwa unu l'uzorehu; mbụ byaepho g'onye-oshi, ata dudu onye amaje teke ọobya. Ọo ya bụ l'unu ta abyadu ama teke mu a-byapfuta unu.

4Ọle g'ọ dūhabe; o nwekwaru nwumadzu olemole, unu l'ephe nọ lẹ Sadiusu; ndu te emerwushiduru uwe phe. Ọ buru ndu ono bẹ e-ye uwe ọchaa; mu l'ephe eburu; kele ephe goshiwaru l'ọo iphe ono rwuberu phe.

5Ọ kwa onye alwuje ọgu ono lwuta bẹ e-ye uwe ọchaa ono. Ọphu mu abyakwa ehufu ẹpha onye ono l'ekwo, e deshiru ẹpha ndu dzu ndzụ ojejeje. Mu a-pfuru l'iphu Nna mu; mẹ l'iphu unwu-ojozi iya, nọ l'imigwe; pfua ya hoo haa l'onye ono bẹ bukwa onye nọ mu l'ẹka.

6“G'onye nweru nchi ngabekwa iya; numa iphe-a, Unme Chileke epfu anu iphe, bu Chiochi g'ephe ha-a.”

Ozi, Kéreshi ezi Chiochi Filadelufiya

7Waa iphe, ii-de nu ojozi-imigwe ke Chiochi Filadelufiya baa: “Owa-a bu ozi, onye ono, du nsọ bya aburu onye ire-lanu ono ezi. Onye ono, bu iya gude ire-igodo eze ono, bu Dévidi. Onye abujeru: o -gūhaa ụzo; o tọ duedu onye ozo asuru iya agụ-chi; teke o gu-chiru iya agụ-chi; o tọ duedu onye ozo suru iya agūha.

8Sụ-a; mu makotakwaru-a iphemiphe, unu emeje g'ọ ha. Mu gūhaakwaru ụzo gheberu unu onu; ophu o dukwa onye suru iya agụ-chi agụ-chi. Mu makwaru-a l'ike ta aduzidu unu; ole unu pfulekwaru-a pfu-shia ike l'opfu ono, mu pfuru ono; unu nodu emekwa iya pho ememe; ophu unu agojedu ego l'unu ta abudu ndibe mu.

9“Iphe unu a-huma bu le ndu ono bu ndu ndzukọ ophu abajeru Nsetanu eja ono; ndu ono adzuję uka su l'ephe bu ndu Jiu l'ebe ephe abu iya ono; ndu ono be mu e-me: ephe abya egbushi ikpere l'alị baaru unu eja. Noo ge mu e-shi mee: ephe amaru le mu yeru unu obu bu ono.

10Eshinu unu taru nshi ono, bu iya bu iphe, mu karu unu g'unu meje ono; be mbedua e-gudeshikwapho unu me ohtama -byaepho; mbu ohtama ono l'abya l'eliphe l'ophu; g'ọ hua iphe, bu ndiphe l'ophu ama ono.

11O tọ dukwa g'oo-no-beru mu abya. Unu gudeshikwa iphe ono, buwaa k'unu ono ikike g'ọ tọ du onye l'anata unu okpu-eze ono.

12O kwa onye alwuje ogo ono lwuta be mu e-me g'ọ buru itso no l'ime eze-ulo Chileke mu; ophu oo-lufubaedu iya alufu. Mu eworu epha Chileke mu dee ya l'onu-iphu; dekwa ya pho epha mkpukpu ke Chileke mu ono, bu iya bu Jierusalemu ophuu. Mkpukpu ono bu l'imigwe eka Chileke mu ono no be oo-shi bya. Mu abya edefukwaa pho epha ophuu nkemu l'onu-iphu onye ono.

13“G'onye nweru nchi ngabekwa iya; numa iphe-a, Unme Chileke epfu anu iphe, bu Chiochi g'ephe ha-a.

Ozi, Kéreshi ezi Chiochi Layodeshiya

14“Waa iphe, ii-de nu ojozi-imigwe ke Chiochi Layodeshiya baa: “Owa-a bu ozi, ozi; mbu onye ono, epha iya bu: Nokwa g'ọ du”; mbu onye ono, o gbaru ke g'e gude ire iya eka l'iphemiphe, oopfu ono; bya aburu iya bu onye pfuru anyi okpobe-opfu Chileke; bya abukwaru iya pho bu onye iphemiphe, Chileke meru dobe le mgboko shi l'eka.

15Mu makotakwaru-a iphemiphe, unu emeje g'ọ ha; l'unu te ejidu oyi ophu unu evudu oku. Unu gege anodu eji oyi; ozoo l'unu evu oku.

16Oo ya bu; l'eshinu unu du wuruwuru; unu te ejidu oyi ophu unu evudu oku be mu agbūfu unu.

¹⁷L'unu anọduje aba abaa enweru iphe; l'iphe akabẹ kweru unu; l'ọ tọ dukpoda iphe ọko iya duru unu. Nshio unu; unu ta amaduro l'unu du k'ayoru oshi; l'unu akpa nri; unu nodu atsu ishi bya agbakwaru pho oto.

¹⁸Oo ya bu l'ldzu, mu a-chiru unu nta-a bu g'unu bya azuta mu mkpola-ododo mbu ophu a kpuru l'oku-uzu; k'ophu aduedu mkpaba du iya nu; g'oo-mee unu g'unu buru ndu nweru iphe; unu abyakwapho bya azuta mu uwe ocha g'unu yeje g'unu ta agbaheru oto; oo ya bu g'iphere adu-buhu unu. Unu azutakwa mu pho obvu enya tee l'enya ono g'unu awata aphu uzo.

¹⁹L'ọ kwa ndu mu yeru obu be mu abajeru mba; hua phe ahuhu; g'ephe maru iphe. Oo ya bu; unu gude nu obu unu g'ọ ha meje ge mu pfuru ono; g'izimanu iphe-aji unu lwadupho unu azu.

²⁰Unu lenu; mu pfuakwaru l'onu mgbo aku aka l'uzo. Onye numaru olu mu; guhaaru mu uzo; mu abata; mu l'iya erigba nri; onye eria ke nwibe iya; onye eria ke nwibe iya.

²¹O kwa onye alwuje ogo ono lwuta be mu e-kwe g'ọ no-kube mu l'aba-eze mu; bunaa ge mbedua lwuru lwuta bya ano-kube Nna mu l'aba-eze iya-a.

²²“G'onye nweru nchi ngabekwa iya; numa iphe-a, Unme Chileke epfu anu iphe, bu Chiochi g'ephe ha-a.”

Ọphulenyà 4

Abaru Chileke aja l'imigwe

¹Tobudu iya bu; ono bvuchaepho mu byakwa elee enya ozo; huma uzo, gheru onu l'imigwe. Olu mbu pho, mu shi numahawaa pho; mbu olu pho l'ada g'opu-ogu pho; su mu: “Nyikota byakpodapho l'eka ge mu goshi ngu iphe, e-me l'iphu.”

²G'e jia epfua Unme Chileke bya ejiana mu-a ehụ pyimu. E jeshia ele enya; e dobewaa aba-eze l'imigwe l'eka ono. O dukwarupho onye no iya nu.

³Onye ono, no iya nu ono nodu egbuapho ke nwiiinwii ge mkpuma jiasupa. Iphu iya nodu eke zaaza ge mkpuma kaneliyanu. Iphe no-pheru aba-eze ono mgburugburu buru eko-mini, ekelepho oyingo oyingo ge mkpuma, bu emeraludu.

⁴Aba-eze ukporo l'eno ozo no-pee aba-eze ono mgburugburu. Ndu bu ogerenya ukporo l'eno noduchaa ano l'aba-eze ono. Ephe yekotaepho uwe, achagbaa pemu pemu. Ephe bya ekpugbaaru okpu-eze l'ishi. Okpu-eze ono g'ọ ha be bukota mkpola-ododo be e gude wua ya.

⁵Ebemu-igwe nodu eshijeepho l'eka ono, aba-eze ono no ono alo ke waa waa. Igwe nodu ede riiriiri; ara ora; atu egbigwe. Oroku esaa nodugbaa l'iphu aba-eze ono enwugbaa jajaja, bu iya bu Unme esaa Chileke ono.

⁶Iphe, dufukwaapho l'iphu aba-eze ono bu iphe, du g'eze-enyimu, aphu ngerengere g'iphe, e gude onyo mee. O nweru iphe eno, nogbaa ndzu no l'echilabo aba-eze ono. Iphe ono bya ano-phakwaapho aba-eze ono mgburugburu. Iphe eno obu tukoeppo iphe, bu ehụ iya l'ophu g'ehụ iya ha mokashia enya enya; iphu l'azu.

⁷Kẹ mbụ bẹ dụ g'oduma; k'ẹbo dụ gẹ nwa oke-eswi; k'ẹto bẹ nweru iphu dụ gẹ ke nemadzu; k'ẹno dụ g'ugo, ephe l'eli.

⁸Iphe ẹno ono, nọgbaa ndzụ ono nwegbachaaru ñkù ishii ishii l'ẹhu l'ẹhu. Ẹhumehu bukotaru pẹ ẹnya ẹnya mẹ eli ẹhu pẹ mẹ l'ime ẹhu pẹ. Eswe mẹ ẹnyashi ta adudu teke ephe ta anodujedu agụ ebvu sụ: “Nsọ! Nsọ! Nsọ! bẹ Nnajiuphu ono, bụ Chileke, bụ iya bụ Okalibe-Kakota-Ike dụ. Oo ya bụ Chileke ono, shihawaa nọduta temanu mgboko dụ ono; bya aburu onye nọ ndzụ nta bya aburu iya bụ onye ono, abya nù ono.”

⁹Iphe ẹno ono, nọ ndzụ ono bẹ agụ ebvu aja onye ono, nọ ndzụ ojejoje ono ajaja; onye ono, bụ iya nọ l'aba-eze ono; teme ephe nọdu agukwa iya pho gude akwabẹ iya ùbvù; bya egude iya etu iya ephe. No iya; o nọdu abujeru teke ephe guerupho ebvu ono;

¹⁰ndu bụ ọgerenya ukporo l'ẹno ono adakotaepho kpurumu l'iphu onye ono, nọ l'aba-eze ono baarụ iya ẹja; mbụ onye ono, bụ iya nọ ndzụ ojejoje ono. Ephe abya ekpushia okpu-eze pẹ woru wushi l'iphu aba-eze ono gụa ebvu sụ:

¹¹“O gbakwaru ngu gube Nnajiuphu bya aburu Chileke anyi; g'aatuko g'a ha jaa ngu ajaja; kwabẹ ngu ùbvù; anuru ngu opfu l'oo ngu kachaa ike. Noo kele oo ngu meru iphemiphe dobe. Oo l'o dụ ngu l'uche meru g'o gude ephe dụ; buru iphe, e meru dobe.”

Ọphulenya 5

Nwaturu-ngweja, shi l'ẹka Chileke yele ẹkwo, a phuru aphupu

¹Tobudu iya bụ; mu bya ahuma l'o duru ẹkwo, a phuru aphupu, o gude l'ekutara; mbụ onye ono, nọ l'aba-eze ono. Ẹkwo ono bẹ e deru iphe l'iphu; dee ya l'azu. A phuchia ya aphuchi gude iphe-ohubama esaa nyachishia ya.

²Mu bya ahuma ojozi-imigwe lanu, e yeru ike, ha shii l'ẹka; ẹka ọora iya arara arashi iya ike asuje: “? Bụ onye bụ onye a-sụ lẹ ya maru onwiya; lẹ ya gbaru k'anyashi iphe-ohubama ono, e gude nyachishia ẹkwo ono, a phuru aphupu ono; ? onye a-bya anyashia ya puhaa?”

³Ophu o dudu mẹ onye lanu l'imigwe; ọzoo l'eliphe; ọzoo l'ime-ali, duru ike puhaa ẹkwo ono, a phuru aphupu ono; ophu o bụ kẹ lee ya ẹnya l'ime.

⁴Enya-mini buru mu vurukutuku l'ẹnya l'o to dudu onye a humaru, gbaru k'aphuha ẹkwo ono, a phuru aphupu ono; ophu o buru onye eje epfu kẹ lee ya ẹnya l'ime.

⁵Tobudu iya bụ; onye lanu l'ime ndu bụ ọgerenya ono sụ mu: “Ta arashi ẹkwa! Lekwa l'onye ono, bụ Oduma kẹ Jiuda; mbụ oshilokpa Dévidi ono lwuakwaru ọgu ono lwuata. O buru iya bụ onye a-dụ ike puhaa ẹkwo ono, a phuru aphupu ono nyashia ya iphe-ohubama esaa ono, e gude nyachia ya ono.”

⁶No iya; mu bya ahuma Nwaturu ono l'ẹka o pfuru lẹ mgbaka aba-eze ono yẹ iphe ẹno pho, nọgbaa ndzụ, nọ l'echilabo ndu bụ ọgerenya ukporo l'ẹno ono. Nwaturu ono bẹ duẹpho g'e gbujehawaru iya egbugbu. O furu mpu esaa; mokwaapho ẹnya esaa, bụ

iphe, nọ-chigbaaru ɛnya Unme ɛsaa Chileke; mbụ Unme ɛsaa, Chileke ziru g'ephe gbakashihu dzuru mgboko l'ophu.

⁷Ọ gbalihu bya ejepfu onye ono, nọ l'aba-eze ono bya anata iya ẹkwo ono, a phuru aphuphu ono, o gude l'ẹkutara ono.

⁸O wotaepho ẹkwo ono; iphe ẹno ono, nọgbaa ndzụ ono mę ụkporo ndu bụ ọgerenya lę ndu bụ ọgerenya ẹno phọ tuko daa kpurumu l'iphu Nwaturu ono baaru iya ẹja. Ndu bụ ọgerenya ono tuko pagbaaru eze une l'ẹhu l'ẹhu bya egudegbakwaapho eze-ochi, e gude mkpola wua. Iphe dughbaa ya nụ bụ ụnwù-isensu, ẹnwuru-ọku iya anọduje eshi kweekweekwee. Ẹnwuru-ọku iya ono nọ-chiru ɛnya epfupfu ono, ndu-nsọ anọduje epfu anụ Chileke ono.

⁹No iya; ndu bụ ọgerenya ono nọdu agụ ebvu ọphúú asuje: “Ọo ngu gbaru k'ewota ẹkwo ono; nyishia ya iphe-ọhubama ono, e gude nyachishia ya ono. E gburu ngu egbugbu; I gude mee ngu gbataru Chileke nemadzu; mbụ ndu shigba l'ipfu l'ipfu g'ipfu hagbukpo l'ophu; mę lę ndu shikota l'iphe, bukota opfu-alị ndu dọ iche iche, nọ lę mgboko-a; mę mkpukpu lę mkpukpu gę mkpukpu hakpoo l'ophu; mękpoo ọhamoha kpọ mgburugburu.

¹⁰I mee phe: ẹphe bughbaaru eze bya emekwaa phe pho: ẹphe bughbaaru uke kę Chileke anyi. Ọ buru phe a-buru ishi ndiphe l'ophu.”

¹¹Tobudu iya bụ; mu bya ahuma unwu-ojozi-imigwe, dọ igwerigwe. Mu nọdu anukwapho olu phe. Ojozi-imigwe obu bukwa unubuku unubuku ugbo olemole; mbụ lę-a; ẹphe habekpoeppo l'igwerigwe; k'ophu bụ l'ọ tọ dudu onye adu ike aguta phe l'ogu. Ẹphe tuko g'ephe hakota; ẹphe l'iphe ẹno pho, dzugbaa ndzụ pho; mę ndu bụ ọgerenya pho; tuko g'ephe ha pfuphee aba-eze ono mgburugburu.

¹²Ẹphe nọdu agụ ebvu agushikpoo ya ike asuje: “Nwaturu ono, e gburu g'ọ buru ẹja ọha ono bę ọ gbakwaru g'e mee g'ike tuko lwa iya l'eka; l'oo tuko iphemiphe nworu; tuko mmamiphe nweru; buru onye-ishi iphemiphe. G'a kwabeje iya ụbvù; jaje iya ajaja; gojeru onu-oma nụ iya.”

¹³Mu numa g'iphe, bukpo iphe, Chileke meru dobe l'imigwe; mę ophu, o meru dobe l'eliphe; mę ophu o meru dobe l'ime-alị; mękpoo iphe, o meru dobe l'eze-ɛnyimu; tukuru agụ ebvu asuje: “G'iphe, bukpo onu-oma, aago agogo; mę ụbvù g'ụbvù ha; mę ajaja; mę abụ ishi k'iphemiphe tuko buru kę gube onye ono, nọ l'aba-eze ono waa gube Nwaturu ono jasụ lę tuutuutu lę miiimii.”

¹⁴Iphe ẹno ono, nọgbaa ndzụ ono tuko sụ: “Ọo g'ọ dọ.” Ndu bụ ọgerenya ụkporo l'ẹno ono tuko daa kpurumu baaru onye ono, nọ l'aba-eze ono waa Nwaturu ono ẹja.

Ọphulenya 6

Iphe-ọhubama, e gude nyachishia ẹkwo ono

¹Tobudu iya bụ; mu huma gę Nwaturu ono nyafuru kę mbụ l'iphe-ọhubama ɛsaa ono, e gude nyachishia ẹkwo ono. Mu bya anuma gę nanu l'ime iphe ẹno ono, nọgbaa ndzụ ono gude olu, daerupho g'egbigwe sụ: “Byakpodaapho-o!”

²Mu bya elee ɛnya; mu hɔma ɪnya, acha ɔcha. Onye nɔ iya l'eli agba parɔ ɔta, eegudeje agba apfu. Onye ono be e kpuberu okpu-eze l'ishi. O nɔdu l'ɪnya ono; o buru iya eje oɔu. O jeshia alwu ndu ohogu iya g'oolwujehawaa phe.

³Nwaturu ono byakwa anyakafu iphe-ohubama ono k'ebɔ bu iphe, e gude nyachishia ekwo ono. Mu numakwa ge k'ebɔ l'iphe eno ono, nɔgbaa ndzu ono suru: "Byakpodaapho-o!"

⁴ɪnya ozo lufutakwa. Ono nɔdu eke uswe-uswe. Onye nɔ iya l'eli be e woru ogu-echi, ha njo ahaha pee. E zia ya g'o je emee g'unwu-eliphe tsoje ibe phe oɔu; g'o mee g'unwu-eliphe wata egbushi onwophe; k'ophu ehɔ odu guu ata adubaedu le mgboko.

⁵Nwaturu ono byakwa anyakafu iphe-ohubama ono k'eto. Mu numakwa ge k'eto l'iphe eno ono, nɔgbaa ndzu ono suru: "Byakpodaapho-o!" Mu bya elee ɛnya hɔma ɪnya, eji ke hirihiri. Onye nɔ iya l'eli parɔ iphe, eegudeje atɔ erwa iphe.

⁶Mu numa iphe, du g'olu l'echilabo iphe eno ono, nɔgbaa ndzu ono l'eka osuje: "Iphe e-rekwa ire shii; k'ophu nri, e gude aswa ozi ujiku ophu kpata buepho onye lanu be oo-ji epho kpekpu. Nri, e gude aswa ozi ujiku lanu kpata bukwanuru umadzu eto be oo-ji epho kpurumu. O buepho g'e te emebyikwa manɔ yee mee emebyi."

⁷Nwaturu ono byakwa anyakafu iphe-ohubama ono k'eno; mu numakwa ge k'eno l'iphe eno ono, nɔgbaa ndzu ono asuje: "Byakpodaapho-o!"

⁸Mu bya elee ɛnya hɔma ɪnya, gbachishihuru agbachishihu. Onye nɔ iya l'eli buru Anwuhu gedegede. Ali-maa nɔdu etso iya l'azu. A bya ekee mgboko ɔzo eno; woru eka lanu ye phe l'eka; su g'ephe gude ogu-echi gbugbushia iphemiphe bu iya nu; g'ephe kpo-gbushia phe l'egu; gude ejo iphe-ememe mekpoo ejo anu-egbudu megbushia phe.

⁹O byakwa anyakafu iphe-ohubama ono ophu kwe iya ise. Mu bya ahuma oru-ngweja l'eka ono. Iphe, kuru le mkpula iya buerupho maa ndu ono, e gburu l'ike opfu l'ephe kwetarɔ iphe, ekwo-opfu Chileke pfuru ono; teme epe shi anɔduje eme egoshi l'ephe bu ndu ke Chileke.

¹⁰Epe tuko g'ephe ha ara ora arashi iya ike su: "Nnajiuphu-e! Oo ngu bu onye du nso; bya aburu ngu bu onye emeje iphe, g'i pfuru iya. ? Bu anyi nɔ-beadaru ino-beagha temanu l'i kua ndu bu l'eliphe kpaa ishi iphe, meru anyi-a; gwaa phe ugwo egbugbu-a, epe gburu anyi-a?"

¹¹Tobudu iya bu; a bya ekeshikotarɔ phe awurukpata uwe, achagbaa nmalanmala l'ehu l'ehu. A su phe: "Unu nɔduro tutaro unme, unu atuta. Unu tafua nshi ngabefua nwanshii l'unu teke edzudu. Unu tutakpoephe unme ono jeye teke unu e-dzu temanu. L'o kwa g'e gburu unubɔdua bu g'e gbujekwapho ikpoto ndu ozo l'eliphe; ndu bukwaphe unwunna unu, ejeru Chileke ozi g'unubɔdua jeru iya ya-a."

¹²Mu nɔdu elekpoephe ɛnya teke o nyafuru iphe-ohubama ono k'ishii. Noo ya; ali wata anma jiiijiii anmashi iya ike; ɛnyanwu wata eji hirihiri g'uwe-aphu, e meru l'ejii eghu-ojii. Onwa l'ophu gbanwekota keahaa meeme.

¹³Kpokpode, dụ l'igwe dashihuaha l'alì g'ẹka oshi figu erishihu akpuru, akaduru akaka me oke pherephere ndu ezi anma iya yiga yiga.

¹⁴Igwe phuepho onwiya g'onye aphụ utute phuta phufu; a huma-beru iya. Iphe, bukpo ubvu, dụ l'ekameka; me ali, mini so-pheru mgburugburu bukotar iphe, e wofuru l'eka epe shi ndugbaa.

¹⁵Tobudu iya bu; ndu eze ke ndiphe; me ndu oke amadu phe; me ndu-ishi ndu ojogu phe; me ndu nweru iphe; me ndu okpehu du; mekpoo onyemonye mgburugburu; ohu me amadu; toko je edomikota onwophe l'ogba me le mgbaka mkpuma, nogbaa l'eka ubvu du.

¹⁶Epe toko arakugbaa ubvu me mkpuma ono asuje: "Jiko daa dapyabe anyi g'iidomia anyi g'onye ono, no l'aba-eze ono ta ahuma anyi; waa ge Nwaturu ono ta atukoshi anyi oke-ehu-eghu iya.

¹⁷Noo kele mboku epe atukoshi ndiphe oke ehu-eghu phe be ruwakwaru nu. ? Denu onye suru iya akpafu l'iphu nta?"

Qphulenyanya 7

Igwerigwe ndu Izurelu, e meru ohubama l'iphu

¹E mecha; mu bya ahuma ojozi eno l'eka epe pfuru le mgboko l'uzi eka igwe bechaaru; ali beru uzi eno. Epe sede pherephere, eshije l'uzi eka ono ephen'eno g'o to zihel le mgboko. Pherephere zibuhu l'elipe mgburugburu; ophu oozidu l'ali; ophu oozidu le mini; ophu o dudu g'o ka mma l'oo oshi lanu ezi pherephere.

²Mu humakwa ojozi-imigwe ozo, shi l'uzo enyanwu awawa epe abya. Ojozi k'ono be gude iphe, shi l'eka Chileke ono, no ndzu; mbu iphe eegudeje eme iphe-ohubama l'ehu. O bya araa ya arara rashia ya ike su unwu-ojozi-imigwe eno, Chileke ziru g'epe je emebyishia ali; mebyishia mini;

³su phe: "Unu ta adukwa iphe, unu e-mewaa mgboko; ozo mini; ozo oshi; g'anyi vuadaru uzo mee iphe, bu ndu ejeru Chileke anyi ozi iphe-ohubama l'egedegee onu-iphu."

⁴A ko umadzu ole, e meru iphe-ohubama Chileke ono mu numa; epe du ukporo unu nemadzu iri l'esato. Ndu ono shikota l'iphe, bu okpa-ipfu Izurelu l'ehu l'ehu.

⁵Ndu e meru ohubama ono l'okpa-ipfu Jiuda du ukporo unu l'unu iri; ndu e meru iya l'okpa-ipfu Rubenu du ukporo unu l'unu iri; ndu e meru iya l'okpa-ipfu Gadu du ukporo unu l'unu iri.

⁶Ndu e meru ohubama ono l'okpa-ipfu Asha du ukporo unu l'unu iri; ndu e meru iya l'okpa-ipfu Nafutali du ukporo unu l'unu iri; ndu e meru iya l'okpa-ipfu Manase du ukporo unu l'unu iri.

⁷Ndu e meru ohubama ono l'okpa-ipfu Simiyonu du ukporo unu l'unu iri; ndu e meru iya l'okpa-ipfu Livayi du ukporo unu l'unu iri; ndu e meru iya l'okpa-ipfu Isaka du ukporo unu l'unu iri.

⁸Ndu e meru ohubama ono l'okpa-ipfu Zebulunụ dụ ukporo unu l'unu iri; ndu e meru iya l'okpa-ipfu Jiófesu dụ ukporo unu l'unu iri; ndu e meru iya l'okpa-ipfu Benjaminu dụ ukporo unu l'unu iri.

Igwerigwe ndu ozo, bu aguta aguta

⁹“E mecha mu bya elee enya huma ikpoto ndu nmaru erupfu; k'ophu bu l'o to dudu nemadzu igbakoroshienyi suru g'oguta phe l'ogu. Ndu ono bu ndu shigbakpo l'ohamoha, du le mgboko; me ipfu g'ipfu ha le mgboko-a; me mkpukpu le mkpukpu l'ophu; me le ndu epfukota opfu-alị ndu du iche iche, no le mgboko-a. Epe tukoru g'ephe ha yekota akpawuru uwe, achagbaa nmalanmala. Epe tuko g'ephe ha pfugbaaru l'ataphu aba-eze ono; me l'iphu Nwaturu ono; bya apagbaaru igu l'eka.

¹⁰Epe tuko ara iya arara arashi iya ike asuje: Ndzota bukwa ke Chileke anyi, bu iya no l'aba-eze ono; bya abukwarupho ke Nwaturu ono.”

¹¹Ndu ojozi-imigwe g'ephe ha tuko bya apfu-pee aba-eze ono; yee ndu bu ogerenya pho me iphe eno, nogbaa ndu pho mgburugburu. Ndu ojozi-imigwe ono g'ephe ha tuko daa kpurumu l'iphu aba-eze ono baaru Chileke eja;

¹²su: “Nokwa g'o du bu ono! G'ago onu-oma me ajaja me mmamiphe me ekele me akwabe ubvu me ike me okpehu buru ke Chileke anyi jasụ le tuutuutu le miimiimii! Nokwa g'o du!”

¹³Tobudu iya bu; onye lanu l'ime ndu bu ogerenya ono bya ekua mu su mu: “? O du ngu g'o bu ndu ole be ndu ono, e yeru awurukpata uwe, achagbaa nmalanmala ono bu? ? O du ngu g'awe be epe shi?”

¹⁴Mu su iya: “Onyibe; o kwa ngu ka amama.” O su mu: “Ndu-a bukwa ndu ono, shi l'ejo oke iphe-ehuka ono futa. Epe gudewaa mee Nwaturu ngweja, shi l'eka Chileke saa awurukpata uwe phe ono; o nodu acha ucha nno.

¹⁵Noo g'o gude epe nodu l'iphu aba-eze Chileke ejeru iya ozi eswe l'enyashi l'ime eze-ulo iya. O buru onye ono, no l'aba-eze ono be ano-kubeje phe eche phe g'o to du iphe, e-me phe nu.

¹⁶Egu taa gubaedu phe; ophu mini agubaedu phe. Anwụ te echihedu phe; ophu okpomoku aduedu phe.

¹⁷Noo le Nwaturu ono, no l'echilabo aba-eze ono be a-noduepho eche phe g'onye eche aturu. Oo-dujeru phe je l'eka mini, anuje ndu futaru. Chileke a-tuko enya-mini ekwa phe hushichaa phe.”

Ophulenyia 8

Iphe-ohubama k'esaa, e gude nyachishia ekwo ono

¹Tobudu iya bu; Nwaturu ono bya anyafuepho iphe-ohubama k'esaa, e gude nyachishia ekwo ono; ekameka l'imigwe daepho ke nyonyoronyo jasụ l'iphe, ha g'e kee awa lanu ebo.

²No iya; mu bya ahuma ojozi-imigwe esaa ono, apfujeru l'iphu Chileke ono. A bya achie phe opu-ogu esaa.

³No iya; ojozi-imigwe ozo bya bya abata bya apfuru l'iphu oru-ngweja Chileke ono. O paru ochi, a wuru le mkpola-ododo. A bya anu iya unwu-isensu, ha shii g'o gwakobe enwuru unwu-isensu ono l'epfufu ono, ndu-nso g'ephe ha anoduje epfu anu Chileke ono; tuko gwee l'eli oru-ngweja mkpola-ododo ono, no l'iphu aba-eze ono.

⁴Enwuru oku ngweja ono kpu-lihu yee epfufu, ndu-nso epfuje anu Chileke; shi l'eka ojozi ono pfuru akpuepho tuuu ala l'iphu Chileke.

⁵Noo ya bu: ojozi ono mechaepho bya aguta oku l'oru-ngweja ono; gu-jia ochi ono; bya eworu iya tua kpoo l'eliphe. Mgboko swokobe. Igwe nodu ede edede bya agbe l'eka ono atu egbigwe; o nodu ara ora; ebemu-igwe nodu alojeepho ke waa waa; ali nodu anmakota jijijiji.

Opu-ogu

⁶Tobudu iya bu; ojozi-imigwe esaa ono, chi opu-ogu esaa ono bya akwakobe g'ephe bya awata egbu opu-ogu phe.

⁷Ojozi-imigwe ke mbu bya egbua opu-ogu nkiya. Akamini me oku, a gwakoberu mee nodu edzeepho ge mini l'eliphe. Oku kee eliphe eto kepyashia uzi lanu; bya ekée oshi, no l'eliphe uzi eto kepyashikwapho uzi lanu; bya atuko eswa oyi kepyashia.

⁸Ojozi-imigwe k'ebbo bya egbua opu-ogu nkiya. A paru iphe, du g'eze ubvu, ha shii, oku etsu phuruphuru paru chie l'ime eze-enyimu, dukota le mgboko l'ophu. Enyimu kee uzi eto; aka lanu bukotaruu mee.

⁹Iphe, bu iphe, no ndzu, bukota le mini kee uzi eto; uzi lanu nwushihukota. Ugbo mini kee uzi eto; uzi lanu mebyishihukota.

¹⁰Ojozi-imigwe k'eto bya egbua opu-ogu nkiya; eze kpokpode shi l'imigwe bya adaa. O nodu eke jaajaaja g'oku-apyipyi bya ekée iphe, bukpo mini mgburugburu yele aka nggele nggele futaru; o kee ya uzi eto daa l'eka lanu.

¹¹Epha kpokpode ono buru "Age." Mini, no le mgboko kee eto; aka lanu tsahaa ilu g'age. Ikpoto ndu ngutaruu mini ono, bu ndu no le mgboko nwushihu; o buru iphe, kparu iya nu bu le mini ono atso ilu.

¹²Ojozi-imigwe k'eno bya egbua opu-ogu nkiya. E kee enyanwu uzi eto chia aka lanu iphe; bya ekée onwa eto chia aka lanu iphe; bya ekée kpokpode uzi eto chia aka lanu iphe; k'ophu oke lanu l'uzi eto l'iphoro phe gbaaharu ochii. Eswe kee eto; ophu iphoro adudu l'eka lanu. O bukwarupho nno bu g'o dafuru enyashi; mbu o kee eto; uzi lanu kabaa agba ochii.

¹³Mu bya elee enya huma ugo lanu l'eka oophe l'akpaminigwe. O nodu ara iya arara arashi iya ike asuje: "Nshio unwu-eliphe; nshio unwu-eliphe; nshio! Aphu atoru ndu bu le mgboko me ojozi-imigwe eto-a, phoduru nu-a gbuepho opu-ogu ophu ephe abya egbugbu-a."

Ọphulenyà 9

¹Tọbudu iya bụ; ojozi-imigwe k'ise bya egbugba opu-ọgu nkiya. Mu hụma kpokpode, shihawarọ l'igwe bya adaa l'alị. E woru ire-igodo, eegudeje tūhaa ẹka eeshije enyiba l'iduma, enwedu ọhú woru nū iya.

²Kpokpode ono bya atūhaa ẹka eeshije enyiba l'iduma ono. Iduma ono wata akpu ẹnwuru tūtuutuu g'ẹka a kpọberu ọku icheku. Ẹnwuru ọku ono mee anwụ mę phẹrephere wata agba ọchii.

³Noo ya bụ; igube shi l'ẹnwuru-ọku ono tsulihu tsuba l'eliphe. Igube ono bę e yeru ike l'ẹka g'ọ gbaję g'akpi.

⁴A kakọtaru igube ono g'ọ tọ dukwa iphe, oo-me ẹswa, nọ l'eliphe; ọphu o mebyikwa oshi; ọphu ọ dukpoo iphe, futaru l'alị bvuru lę mgboko; mbụ iphe ẹkwọ dū, oo-mebyi; gbahaa ndu ọonu aphụ bụ ndiphe, e te emeduru iphe-ọhubama Chileke l'egedegee ọnu-iphu.

⁵Igube ono bę e ziru g'ọ nūa ndiphe aphụ ọnwa ise; ọle ọ g'ọ tọ dukwa onye oo-gbu egbugbu. Obenu l'ẹjo mkpamẹhu, ọo-kpa ndiphe bę a-phue phę phọ g'akpi aphuje onye ọ gbaru-a.

⁶L'ime ọnwa ise ono bę ndiphe a-nọdu achọ anwuhu achọcho; ẹphe taa hụmadu iya. Ọo-gu phę anwuhu; obenu l'ọnwu phehuwaru.

⁷Igube ọbu bę a -nọdu ele iya ẹnya bę ọodugbajeeppo g'inya, e doziru k'egude eje ọgu. Iphe, dughbaa ya l'ishi dūchaa g'okpu-eze, e gude mkpọla-ododo mee. Iphu phę dughbaa g'iphu nemadzū.

⁸Ẹgbushi, nọ phę l'ishi hachaephọ ogologo ogologo g'ẹgbushi ụnwanyi. Eze, nọ phę l'ọnu dughbaa g'eze oduma.

⁹Ẹphe yeru iphe l'unme gude gbobuta obu phę g'uwe-ígwè, ndu eje ọgu eyeje gude gbobuta ọkpoma. Igiji, ẹphe gude nkù phę ede dūephọ g'igiji igwerigwe ụgbo-inya, e gude eje ọgu.

¹⁰Igube ono nwechakwaaru ụdé, ẹphe egudeje agba agbagba g'akpi. Ẹka ike dū phę, bụ iya bụ ike ono, ẹphe e-gude nūa nemadzū aphụ ọnwa ise ono bụru l'ụdé phę ono bę ọ kpakọru nọdu.

¹¹Onye eze phę bụru ojozi-imigwe ono; ọphu bụ iya bę iduma, enwedu ọhu dū l'ẹka. Ẹpha ojozi ono l'opfu ndu Hiburu bụ Abadonu; o be l'opfu Giriku; ọ bụru Apọliyonu.

¹²Tọbudu iya bụ; ẹjo iphe-ẹhuka kę mbụ abvụ. Ọ phọdukwaduro uzi ẹjo iphe-ẹhuka labọ.

¹³No iya; ojozi-imigwe k'ishii bya egbugba opu-ọgu nkiya; mu nūma olu-opfu, eepfu l'oru-ngweja ono, e gude mkpọla-ododo mee ono. Opfu ono bę e pfuru l'ishishi mpu ọru-ngweja ono ẹphen'eno l'ẹnya ẹka ono; a tūko nūmakota iya mgbo lanū. Ọru-ngweja ono bụerupho l'atatiphu Chileke bę ọ dū gedegede.

¹⁴Olu ono sụ ojozi-imigwe k'ishii ono, bụ iya gude opu-ọgu ono: “Tòshichaa ojozi-imigwe ẹno ono, e keru ẹgbu l'eze-ẹnyimu Yufurétisu ono.”

¹⁵No iya bụ; a parụ ojozi ẹno ono wehakọta. Iphe, e meru phẹ dobedoru bụ g'epheme mee iphe ono, a sụru g'epheme mee ono; lẹ teke ono; lẹ mbọku ono; l'ọnwa ono; l'apha ono gẹdegede. G'epheme kèé ndiphe uzi ẹto; tuko uzi lanu megbushikọta.

¹⁶A sụ mu lẹ ndu ojoju ndu ophu nọ l'eli inya bẹ dọ miliyonu ukporo iri.

¹⁷No iya; mu huma ndu agba inya ono l'ophulenyanya ono; bya ahuma inya, ephe nogbaa l'eli iya agba. Uwe-ígwè, bụ uwe okpoma, ndu ono yeru l'okpoma nọdu ekegbaa uswe-uswe g'oku; eke oyingo oyingo; bya ekekwapọ ododo ododo. Ishi dugbaa inya phẹ ono g'ishi oduma. Oku, enwu phoophoophoo; mę ẹnwuru-oku; mę nshi-egbe shi phẹ l'onu afushi.

¹⁸O buri ejo iphe-ememe ẹto ono bẹ e gude kèé ndiphe ẹto; gude oku; yele ẹnwuru-oku; yele oku-nshi-egbe, shi phẹ l'onu woru uzi lanu gbushia.

¹⁹Ẹka ike dọ inya ono bụ l'onu phẹ mę l'odzu phẹ. Odzu phẹ ono dugbaa g'agwo bya enwegbaaru ishi. O buri ishi ono bẹ ephe egudeje emeka nemadzu iphe.

²⁰Ophu izimanu alwaduru ndiphe azu; mbu nwa ndu ophu e gbuphodoru l'ejo iphe-ememe ono. Ophu ephe a haduru ejo-iphe, ephe eme; ophu ephe ahaduru abaru obu ye iphe, ephe pyiru apyipyi eja; mbu iphe ono, ephe gude mkpola-ododo ozoo mkpola-ochaa wua; mę ophu ephe kpuru l'ope; mę ophu ephe pyitaru lę mkpuma; mę ophu ephe pyiru l'oshi. Mbu iphe tukoru buri iphe, ta aphudu uto; ophu o nudu iphe lę nchi; ophu o jedu ije.

²¹Ophu izimanu ejo-iphe ono alwaduru phẹ azu; ophu ephe ahaduru egbu ochi; eme mgbashi; apharwushi onwophe; waa ezi iphuru.

Ophulenyanya 10

Ojozi-imigwe yele nwekwọ, a phuru aphupu

¹Tobudu iya bụ; mu huma ojozi-imigwe lanu, e yeru ike, ha shii l'eka g'o shi l'igwe alwazeta lę mgboko; urwukpu so-pee ya mgburugburu. Eko-mini gbaa ya l'ishi. Iphu nọdu egbu iya nwiiinwii g'enyanywu. Okpa iya ephebebo dugbaa g'oku, kpuru oronmono g'obvuru.

²Iphe, o gude l'eka buri nwekwọ, e kpuharu ekpuha. O woru okpa ekutara zobe l'eli eze-ẹnyimu bya eworu okpa ekicha zobe l'eli-mgboko.

³O bya echia mkpu chishia ya ike. Ora iya dupho g'oduma suru ekiri. O chiepho mkpu ono egbigwe esaa ono tuahaa gbaagbaa gude yeaharu iya onu.

⁴Mu nọdu emekwada gę mu dee iphe egbigwe esaa ono pfuru; mu numa olu-opfu, shi l'imigwe sụ: “Iphe ono, egbigwe esaa ono pfuru ono ta abukwa iphe, ii-je edede. Ophu o dukwa onye ii-pfuru iphe ono, i numaru ono.”

⁵Ojozi ono, mu humaru ono, zoberu okpa lanu l'eli eze-enyimu bya azobe nanu l'eli-mgboko ono bya apalia ekutara iya eli;

⁶bya egude epha Chileke, dzu ndzu ojejoje ono rifu angu; mbu onye ono, bu iya meru igwe; mee iphe, du iya nu; bya aburu iya meru eliphe yee iphe, du iya nu; mee eze-enyimu yee iphe, dukota iya nu. O buru epha Chileke ono be o gude rifu angu su l'o rwwaru teke oo-me iphe, o tuseru.

⁷Le teke ojozi k'esaa gbuwaru opu-ogu nkiya be Chileke e-megbu iphe, o domiru edomi, bu iya bu g'o pfuru iya ndu shi ejeru iya ozi, bu iya bu ndu mpfuchiru iya.

⁸Olu-opfu ono, e shihawaa gbę l'imigwe gude pfuru yeru mu ono byakwa epfuru yeru mu ozo su: "Je anata nwekwwo ono, e kpuharu ekpuha ono, o gude l'eka mbu ojozi ono, zoberu okpa lanu l'eli eze-enyimu; zobe nanu l'eli-mgboko ono."

⁹Mu bya ejepfu ojozi ono je asu iya g'o nu mu nwekwwo ono. O su mu: "Ngge ya; taa. I -tachae ya pho l'oo-tsoo ngu ilu jeye l'akurepho. Ole teke ita iya be oo-nodukwa atsō ngu utso ge manu-enwu l'onu."

¹⁰Mu bya anata ojozi-imigwe ono nwekwwo ono woru taa. Mu nodu ata iya; o nodu atsō mu ge manu-enwu l'onu. Mu tachaa ya; o tsō mu ilu jeye l'akurepho.

¹¹No iya; o su mu: "Jekwa je apfuru l'edzudzu-oha pfuchiaru Chileke ugbo lanufua; mbu pfua iphe, Chileke shi domia edomi l'oo-me l'igwerigwe mkpukpu le mkpukpu, no le mgboko; me ohamoha; me ndu shi l'iphe, bukpuo l'opfu-ali ndu du iche iche, no le mgboko-a; me ndu eze."

Qphulenyā 11

Umadzu labo, ara opfu Chileke arara

¹Noo ya bu; a bya eworu owa, eegudeje atu iphe nu mu bya asu mu: "Gbeshi je atua eze-ulo Chileke; yee ime eka ono, e doberu oru-ngweja Chileke ono; gua ndu abaru Chileke eja l'ime eze-ulo iya ono ogu.

²Ole o g'i ti tukwa oma eka ono, no-pheru eze-ulo ono mgburugburu ono. Pakwaru ono haa; l'ono be e dobekwaru oha, ata amadu Chileke. Mkpukpu ono, du nsō ono be oha ono e-gude okpa tee pyakapyaka ukporo onwa labo l'onwa labo.

³Noo teke mu e-ye umadzu labo, a-nodu epfuchiru mu nu. Umadzu labo ono e-yechara uwe-aphu. O buru ujiku ujiku unu eto l'ujiku ukporo eto be epe e-gude zikota ozi, Chileke ziru phe."

⁴Umadzu labo ono bu upfu olivu labo ono me oroku ono, bvuru l'iphu Nnajiuphu, nwe mgboko ono.

⁵O -nweru onye jeru ge ya meka phe iphe; oku eshi phe l'onu bya eworu onye ono yee ndu epe l'iya achi ejo idzu lanu kegbushia; mbu ndu ono, buwaa ohogu phe ono. Mbu-a; iphe, bu onye jeru ge ya meka phe iphe bu egube ono bu g'ee-shi gbua ya.

⁶E yeru phẹ ike l'ẹka; k'ophu ẹphe a-gu-chi akpaminigwe; k'ophu igwe ta abyadu atada mini l'alì teke ono, ẹphe a-nodu epfuchiru Chileke ono. E yekwa phẹ phọ ike l'ẹka g'ẹphe duje ike mee mini g'oo-buru mee; waa g'ẹphe tujekwapho ndiphe ẹjo iphe-ememe, dukpoo phẹ ree tekenteke, du phẹ ree.

⁷Teke ẹphe ziębechaaru ozi ono, Chileke ziru phẹ ono bẹ ẹjo anu-ẹgbudu ono, e-shi l'iduma, enwedu ọhú futa ono l'a-bya etsoo umadzu labọ ono ọgu. L'oolwu-kpee phẹ woru phẹ gbushia.

⁸Odzu phẹ bẹ a-wushi l'echilabọ eze mkpukpu ono, a kpopyaberu Nnajiuphu phẹ l'oswebe ono. Ẹpha mkpukpu, e gude anma ẹtu ẹhu mkpukpu ono bu Sodomu yele Ijiputu.

⁹Odzu umadzu ẹbo ono bẹ e te ekwekwa g'e lia elili. Ndu shi lẹ mkpukpu lẹ mkpukpu, du iche iche; mẹ ipfu ipfu, du iche iche; mẹ ndu shikọta l'iphe, bukota opfu-alì ndu du iche iche, nọ lẹ mgboko-a; mẹ ndu shi l'ohamoha, nọkpoonu l'a-wukotaru bya ahuma odzu phẹ. Ọ buru g'aa-huma odzu phẹ bu ono ujiku ẹto lẹ mkpirikpu iya.

¹⁰Ẹhu atuko atsọ ndu bu lẹ mgboko l'ophu uto; opfu l'e gburu umadzu ẹbo ono. Ẹphe abọ ya g'aaboje iphe-a; nuchaa ibe phẹ iphe ọbo-iphe; kele umadzu labọ ono, epfuchiru Chileke ono shi akpa ndu bu lẹ mgboko ẹhu shii.

¹¹A nọepho abalì ẹto lẹ mkpirikpu iya Chileke kuru unme-ndzu ye phẹ l'ẹhu; ẹphe teta nodu ndzu. Ndzu rwuta iphe, bukpo ndu humaru phẹ nu.

¹²Tobudu iya bu; umadzu labọ ono numa olu oku, e kushiru ike, shi l'imigwe su phẹ: “Unu bata l'ime ẹka-o.” Ndu ohogu phẹ ono kuru ele phẹ ẹnya; ẹphe nodu l'urwukpu bahu l'imigwe.

¹³Alì wata anma oke jiiijiii teke onokwapho. Mkpukpu ono kẹe uzi iri; ẹka lanu bukotaru mkpurupyata. Ndu alì ono, nmaru jiiijiii ono gburu egbugbu du unu nemadzu iri l'ẹsaa l'umadzu ukporo iri. Ndzu rwuta ndu phoduru nu. Ẹphe wata aja Chileke imigwe ajaja.

¹⁴Ẹjo iphe-ẹhuka k'ẹbo bvu. Ole ọ g'unu lekwa lẹ k'eto abyaakwaa.

Opu-ọgu k'ẹsaa

¹⁵Tobudu iya bu; ojozi-imigwe k'ẹsaa bya egbugba opu-ọgu nkiya. Ikeropfu swoshihu l'imigwe asuje: “Nta bẹ ike k'alì-eze unwu eliphe l'ophu buakwa ke Chileke anyi yee ke Kereshi iya ono, bu eze, o woru mgboko ye l'ẹka ono. O je l'aburu eze jasu lẹ tuutuutu lẹ miiimii.”

¹⁶Ndu bu ọgerenya ukporo l'eno ono, nọ l'aba-eze phẹ l'iphu Chileke ono daa kpurumu kpupe iphu l'alì baaru Chileke ẹja;

¹⁷su: “Anyi ekele ngu ekele Nnajiuphu, bu Chileke, bu Okalibe-Kakota-Ike. Onye bu Chileke, nọ ndzu bya aburu onye shihawaa noduta temanu mgboko du. Anyi ekele ngu l'i goshihawaru oha l'eze ike ngu ono paru ẹka apa. I goshiakwarupho nta-a l'oo gubedua bu onye-eze, iphemiphe du l'ẹka.

¹⁸Ehu wata egghu ohamoha egghu; i tukoshi phe oke-eghu-eghu ngu. O le o rhuakwanaru teke ii-kpe ndu nwhuru anwhuru ikpe; me teke ii-bu ndu mpfuchiru ngu obunggo; mekpoo ndu-nsa g'ephe ha; waa ndu akwabe epha ngu ubvu; onye upfu me onye nta; o rhuakwaapho teke ii-mebyishi ndu ono, emebyishi mgboko l'ophu ono.”

¹⁹Oo ya bu; a guhaa eze-ulo Chileke ono, du l'imigwe ono. A huma okpoko oghandzu ono, shi Chileke l'eka l'ime eze-ulo ono. Igwe nodu alo ebemu ke waa waa; o nodu ara ora; ede edede bya agbe l'eka ono atu egbigwe. Ali wata anma jijijiji. Igwe nodu atu oke akamini.

Ophulanya 12

Nwanyị yee ejo-oke-agiyi

¹A nonyaa; oke iphe-ohubama wata ememe l'imigwe. O duru nwanyị lanu, yeru enyanwu g'onye yeru uwe. O pfuru apfuru l'eli onwa. O kpuru kpokpode iri l'ebo l'ishi g'onye kpu okpu-eze.

²Nwanyị ono be epho bewaru l'ezeda. Ime nodu eme iya emeshi iya ike k'anwu nwa ono. O metabe iya k'ophu o rasharu eka.

³Iphe-ohubama ozo wata ememe l'imigwe. O buru ejo-oke-agiyi, eke uswe-uswe be futaru nu. O nweru ishi esaa; bya efua mpu iri bya ekpuchaaru okpu-eze l'ishi iya ono epe n'esaa.

⁴O gude odzu iya kee kpokpode, no l'igwe eto chikoshia uzi lanu; o dashihu l'ali. O bya apfuru nwanyị ono, abya ezeda ono l'iphu; g'oo-buru: ezeda, oozeda; ya apata nwa iya taa.

⁵O bya ezeda; mbu nwanyị ono; bya anwu nwa nwoke. Nwata ono bu iya bu onye emechaa gude mgborigwe buru eze ohamoha l'ophu. A bya ezichata nwata ono gude jepfu Chileke l'eka aba-eze iya no.

⁶Nwanyị ono gbala gbaba l'echegu. Eka ono be Chileke mematawaru iya eka oo-buru g'a nodu anu iya nri unu ujiku eto l'ujiku ukporo eto.

⁷Ogu tsu l'imigwe! Mayikelu yee ojozi, etso iya l'azu wata etso ejo-oke-agiyi ono ugu. Ejo-oke-agiyi ono yee ndu ojozi iya wota phe ugu ono.

⁸Mayikelu phe lwu-kpee phe; kele ike ta adu-zidu phe. E mecha; ophu o duedu eka e kweru g'ephe nodu l'imigwe.

⁹A chifu ejo-oke-agiyi ono l'imigwe. O kwa-a ejo-oke-agiyi ono be bu agwo teke ndiche pho. Oo ya bu onye ono bu Obutuswe bya aburu Nsetanu; mbu onye anoduje edephu unwu-eliphe l'ophu. A chifu iya l'imigwe l'eka ono; chidata iya le mgboko yee ndu ojozi iya g'ephe ha.

¹⁰Mu numa mkpu, echi l'imigwe su: “O nwakwaru nta-a. Chileke dzokwaru anyi obu. Chileke goshiakwaru nta-a l'oo ya be ikemike du l'eka. L'eze ono, Chileke yeru o bya ono, bu iya bu Kereshi be goshiakwaru ike iya nta. A chifuwaru onye mgbamu

ono, shi anọduje edophe kwerikwerikweri l'iphu Chileke eswe l'enyashi onoya; epfuru iya k'unwunna anyi; l'onye pho meswekwaru; onye pho meswee.

¹¹Iphe, unwunna anyi phe gude lwu-kpee Nsetanu bu mee Nwaturu ono waa asasa ono, ephe apfujeru l'edzudzu-oha saa okpobe-opfu ke Chileke ono. Noo kele ephe miru enya le ndzu phe su: l'o -buru anwuhu; ephe anwuhu iya.

¹²Oo ya bu; g'imigwe tee eswa; ge ndu bu iya nu tekwaapho eswa. Obenu le-a; nshiokwanu gube ali l'ophu; nshio gube eze-enyimu; kele Obutuswe gudewaa ehueghu bapfuta unu; eshinu o mawaru l'o to duedu ge ya an-beru.”

¹³Ejo-oke-agiyi ono humapho l'e shiwaa l'imigwe chifu iya chiru iya ye l'eliphe; o wata achi nta nwanyi pho, nwuru nwa nwoke pho.

¹⁴A bya eworu eze nkù ugo; nkù ebolechiko chie nwanyi ono g'o gude pefu nahu ojo-oke-agiyi ono lashia echiegu aka o bu; je ebua aka ono g'a zua ya apha eto le mkpirikpu iya. Ophu o duedu iphe, ojo agwo ono jekwaduru iya ememe.

¹⁵Tobudu iya bu; ojo agwo ono wata agbo mini l'onu; mini ono nodu agba gborogborogboro g'eze nggele. O buru iphe, oome bu ge mini ono buru utso pata nwanyi ono.

¹⁶Ali yeru nwanyi ono aka. Iphe, ali meru bu l'o saru onu toko mini ono, ojo-oke-agiyi ono gboru ono mikota.

¹⁷Ehu ghuaaha ojo-oke-agiyi ono eghe l'opfu ehue nwanyi ono. O tugba jeshia etso unwu nwanyi ono ndu ophu phoduru nu ugu. Ndu obu, ooje etso ugu obu bu ndu obu phe du l'iphe, Chileke suru g'e meje; me ndu pfuru pfushia ike l'okpobe-opfu ono, Jizosu meru a maru ono.

¹⁸Tobudu iya bu; eze ojo-oke-agiyi ono tugba je apfuru l'aguga eze-enyimu.

Ophulenyia 13

Ejo anu-egbudu labo: nanu shi le mini; ophuu shi l'ali

¹Tobudu iya bu mu bya ahuma ojo anu-egbudu, shi l'eze-enyimu ono afuta. O fua mpu iri bya enweru ishi esaa. O kpuru okpu-eze le mpu iya ono l'ehu l'ehu ephe n'iri. L'ishi iya ono g'o ha be e dekotakpoerupho epha, epfubyishigbaa Chileke epfubyishi.

²Ejo anu-egbudu ono, mu humaru ono duopho g'agu. Okpa iya dugbaa g'okpa ojo nwanu biye. Onu iya dugbaa g'onu oduma. Ejo-oke-agiyi pho bya eworu ike, shi buru nkiya ye iya l'eka; bya eworu aba-eze iya nu iya su iya g'o megbujekpoo g'o du iya.

³Ishi ojo anu-egbudu ono nanu be ichii onya, e gburu iya ya be teke e gburu iya ya be o gogo nwuhukwa. Ole onya ono kpothuwaru. Ejo anu-egbudu ono du-dzuru ndiphe mgburugburu biribiri. Ndiphe l'ophu wata iya etsotso.

⁴Ephe wata abaru ojo-oke-agiyi ono aja; kele o yewaru ojo anu-egbudu pho ike iya l'eka. Ephe nodu abakwarupho ojo anu-egbudu ono aja su: “? Bu onye dubaa g'ejo anu-a? ? Bu onye suru g'oo-kpafu iya l'iphu k'ogu?”

⁵A parụ ejo anụ-egbudu ono haa g'o pfugbua g'onu ha iya. O nọdu ajakposhi onwiya gude nno epfubyishi Chileke. A hakwaaru iya pho uto g'o megbukpoo g'o du iya l'ime ukporo onwa labo lonwa labo.

⁶O saa onu wata epfubyishi Chileke; epfubyishi epha iya; me aka Chileke ono bu; mekpoo ndu ophu bu l'imigwe.

⁷Chileke haa ya g'o tsoje ndu-nsọ ono ogu; lwu-kpeje phe. A nọdu ahaje iya g'o mee g'o du iya l'ehu ndiphe; mbu iphe, bu ipfu ipfu l'ophu; me mkpukpu le mkpukpu l'ophu; me le ndu shikota l'iphe, bukota opfu-ali, du l'iche l'iche, no le mgboko-a; mekpoo iphe, bu ohamoha, no le mgboko-a; o nọdu emejgbaa phe; epe eme iphe, o suru g'ephe mee.

⁸Iphe, bukpo nemadzu, bu l'eliphe mgburugburu a-nọdu abakotaru iya eja. Mbu l'o kwa ndu e te deduru epha phe l'ekwo ono, e shi teke a turu okpa mgboko deshita epha ndu a-nọdu ndu ojejoje ono; be bu ndu a-nọdu abaru iya eja ono.

⁹G'onye nweru nchi ngabekwa iya.

¹⁰O kwa onyemoneye, aa-kpu le ndu be a-kpu le ndu. Onye ee-gbu le mma be e gbufutajekwa le mma. O kwa iya bu le ndu-nsọ gbaru g'ephe buru ndu a-ta nshi nọdu Chileke l'eka noshia ya ike.

¹¹Mu bya ahuma ejo anụ-egbudu ozo, bu l'ali be o shi emifuta. Yebdua furu unwu-mpu labo, dugbaa ge mpu nwa aturu; opfu, oopfu l'onu du ge k'ejo-oke-agiyi.

¹²O bya egude ike ejo anụ ke mbu pho meahaa iphe, bukpo iphe, du iya ree ememe l'atatiphu ejo anụ-egbudu ke mbu onoya. O bya emee: ndiphe wata abaru ejo anụ-egbudu ke mbu pho eja; mbu anu k'ono, onya e shi gbua ya l'ishi, bu onya, gege gbu iya nu teke e gburu iya ya kpohuwaru-a.

¹³Ejo anụ-egbudu k'ebo-a nọdu emeshiepho oke iphe-ohumalenya. O nọdu emejchaa mee oku l'ooshi l'igwe bya adaa l'ali l'iphu ndiphe.

¹⁴O gude oke iphe-ohumalenya ono, a haru iya g'o meje l'atatiphu ejo anụ-egbudu ke mbu ono; duphua iphe, bukota nemadzu, bu le mgboko. O su ndiphe g'ephe kpu ntekpe, dupepho g'ejo anụ-egbudu mbu ono; bageru iya eja; mbu ntekpe du g'ejo anu ono, e gburu onya; ophu o nwuhuduru onoya-a.

¹⁵E kwechaa su g'ejo anụ-egbudu ono k'ebo kuru unme ye le ntekpe ono, a kpuru: o du g'ejo anụ-egbudu ke mbu pho g'o dzuru ndu dujchaa ike pfua opfu; l'oomee g'e gbushia ndu te ekweddu abaru yebe ntekpe ono, a kpuru: o du g'ejo anu ono eja.

¹⁶Ejo anụ-egbudu k'ebo ono kebuta onyemoneye; onye upfu me onye nta; onye ukpa me oke amadu; ohu me amadu; kebuta phe; a gbashia phe ngga ohubama l'ekutara; ozoo l'egedegee onu-iphu;

¹⁷k'ophu o to dudu onye azu aswa; ophu o dudu onye ere aswa erere; gbahaa l'o gbaru ngga ohubama k'ejo anụ-egbudu ono. Ngga obu, aagbaje obu bu epha ejo anụ-egbudu obu; ozoo ogu, no onodu epha iya.

¹⁸Ono buru iphe, gbaru ge nemadzu goshi le ya nweru mmamiphe. G'onye nweru uche je aria ogu epha ejo anu ono ariri jasu teke oo-maru iphe, ogu obu bu; kele ogu ono bukwapho epha nemadzu. Ogu obu be bu "666", bu iya bu unu l'ukporo iri l'eto l'ishii.

Qphulenyanya 14

Ebvu, ndu a gbataru agu

¹Mu bya elee enya; mu huma Nwaturu ono g'o pfuru l'ubvu Zayonu. Ndu pfu-kube iya nu l'eka ono du ukporo unu nemadzu mgbo iri l'esato, bu ndu e deru epha Nwaturu ono yee epha Nna iya l'egedegee onu-iphu.

²Mu bya anuma olu-opfu, a no l'imigwe pfua. Opfu ono nodu adaepho g'eka eze mini aphu gbudugbudu; teme o nodu adahukwapho g'eka igwe ede edede atu egbigwe. Mu byakwapho anuma oda ogumogu ndu akpoje ogumogu akpo.

³Ikpoto ndu ono, pfuru l'iphu aba-eze ono me l'iphu iphe eno ono, nogbaa ndzu ono; me l'iphu ndu bu ogerenya ono; nodu agu ebvu ophu. Ophu o dudu onye suru anwuta ebvu ono gbahaepho ukporo unu nemadzu iri l'esato ono, bu ndu a gbataru l'eliphe ono.

⁴Ndu ono bu ndu te emerwujeduru onwophe l'ehu unwanyi. Ndu doberu eka doo ge nwamgboko, nwoke teke engeswee okpa. Ephe bu ndu ono, buepho Nwaturu ono be ephe awujeru etso eje ekameka, ooje ono. Ndu a gbataru l'eka ndiphe no; ephe buru akpuru iphe-mbu a nuru Chileke yee Nwaturu ono.

⁵Ephe bu ndu teke adu-swee onye a-su l'ephe dzujeru uka. Ophu o dudu iphe uta, du phe l'ehu.

Ojozi-imigwe eto

⁶Mu huma ojozi-imigwe ozo, ephero ephekerephe ephekerephe l'akpaminigwe. O buru iphe, e ziru iya bu g'o je ezia ndiphe mgburugburu ozi-oma ojejoje ono; g'o je ezia ya ohamoha, nokpoo le mgboko; me ipfu l'ipfu g'ipfu ha; me le ndu shikota l'iphe, bukota opfu-ali ndu du iche l'iche, no le mgboko-a; me iphe, bukpo mkpukpu, nokpo le mgboko.

⁷O nodu ara iya arara asuje: "Unu tsujekwa Chileke ebvu. Unu kwabejekwa iya ubvu; le teke oo-kpe ikpe rwuakwaru. Unu bajekwaru Chileke eja; l'o kwa iya meru igwe bya emee ali; bya aburu iya meru eze-enyimu; mekota iphe, bukotakpoo eka mini futaru."

⁸Ojozi-imigwe ozo, bu k'ebo nodu ephe etso ke mbu pho l'azu epfu su: "Ike buakwaru Babilonu! Ike buakwaru Babilonu! Mkpukpu ono, a maru epha iya ono, bu Babilonu be ike buakwaru nta. Mbu mkpukpu onoya, cheru ohamoha mee ya ono, bu iya bu oke-ehu-eghu ke Chileke ophu Chileke a-tu-koshi iya; opfu l'opharwushi onwiya."

⁹Ojozi-imigwe ọzo, bu k'eto pheru tsoru phe. O nodu arakwa iya pho arashi iya ike asuje: “Onye abaru ejo anu-egbudu ono eja; bya abaru ntekpe, a kpuru o du g'o du; onye kweru g'o gbaa ya ngga ohubama l'egedegee onu-iphu; ozoo l'eka;

¹⁰onye ono be a-ngukwa oke-ehu-eghu Chileke ge mee, aagwaduru mini. Ee-gude oku, enwu phuruphuru yee nshi-egbe nua onye ono aphu l'iphu unwu-ojozi-imigwe, du nsọ; waa l'iphu Nwaturu ono.

¹¹Oku ono, ee-gude nua phe aphu ono be enwuru iya a-noduepho akpu tututuutu ala l'imeli jasụ le tututuutu le mijiimii. Ndu ono be a ta abyakpoda aha g'ephe tuta unme me teke lanu; eswe l'enyashi; mbu ndu ono, l'abajeru ejo anu-egbudu ono eja; bya abakwaru iya pho ntekpe, a kpuru o du g'o du onoya; me iphe, bukpo onye kweru: a gbaa ya ngga ohubama, egoshi epha ejo anu-egbudu onoya.”

¹²O kwa iya bu ota-nshi ke ndu-nsọ; ndu anoduje eme iphe, Chileke pfuru; ndu no Jizosu l'eka.

¹³Mu numa olu-opfu, a no l'imigwe pfua su mu: “Dee iphe-a l'ekwo. Ehu-utso be a goru nu ndu a-nwuhu shita nta-a kwaseru; mbu ndu a-nwuhu l'oo l'ephe woru onwophe ye Nnajiuphu l'eka.” Unme Chileke nalita iya su: “Oo ya-o! Oo g'o du bu ono. Ehu a-tso phe utso eviya; noo l'ozi, ephe jeru be ephe jefuwaru l'ishi; atutawa unme; e jekwanu l'ebu phe obunggo ozi ono, ephe jeru onoya.”

Aakpata ndiphe g'iphe, e meberu l'opfu

¹⁴Mu bya elee enya huma urwukpu ochaa. Mu huma onye no anoo l'urwukpu ono. Onye ono, no iya nu ono duopho ge nwa ndiphe. O kpuru okpu-eze, e gude mkpola-ododo wua; o pakwaru pho mma, atsụ nkọ l'eka.

¹⁵Ojozi-imigwe ọzo, shi l'eze-ulo Chileke lufuta bya araku onye ono, no l'eli urwukpu ochaa ono su iya: “Gude mma ngu ono kpatachaa iphe, e meberu l'ali l'o gbawaru l'akpakpa iya. Noo l'iphe, e meberu le mgboko kachawaru akaka gbawaa g'aakpata iya.”

¹⁶Tobudu iya bu; onye ono, no l'eli urwukpu ono bya ewota mma iya gbua ke chaphukumu l'eliphe; shi nno kpata ndiphe g'aakpaje iphe, e meberu l'ali-a.

¹⁷O nwekwarupho ojozi-imigwe ọzo, shikwapho l'eze-ulo Chileke l'imigwe lufuta. Yebdua gudekwapho mma, atsụ nkọ.

¹⁸Ojozi-imigwe ọzo shi l'ime eka ono, oru-ngweja Chileke no ono lufuta. Yebdua be oku enwu phoophoophoo du l'eka. O kua onye k'ono, gude mma, l'atsụ nkọ ono oku; kushia ya ike su: “Gude mma ngu, l'atsụ nkọ yebutachaa mebyi vayinu, du l'opfu-vayinu, tukoru mgboko dzuru; kele mebyi iya kachawaru akaka!”

¹⁹Tobudu iya bu; ojozi-imigwe ono woru mma iya dabẹ l'eliphe bya atukokpoepho mebyi vayinu no iya nu gbubutachaa bya achiru iya ye l'eze eka, aazoshije mee l'akpuru vayinu, bu iya bu oke-ehu-eghu Chileke.

²⁰A bya azoshia mee l'akpuru vayinu ono l'eka aazoshije iya l'azu mkpukpu. Mee ono buru mee nemadzu. Mee ono nodu aso gborogboro ge nggele l'eka ono. O soo sorwua eka ogologo iya ha g'ukporo manyiru iri. Teme o byakwapho utso, du-tabe ogbu; k'ophu oo-nodu akpa inya l'onu me inya rwuba iya.

Ophulenyanya 15

Ojozi-imigwe, gudegbaa ejo iphe-ememe k'ikpazu

¹Mu bya ahuma oke iphe-ohubama, du biribiri ozo, eme l'imigwe. O buru ojozi-imigwe esaa be gude ejo iphe-ememe esaa. O buru iya bu ejo iphe-ehuka esaa k'ikpazu, bu oke-ehu-eghu Chileke a-tukoshi unwu-eliphe. Teke iphe-ehuka ono bvuerupho ephe n'esaa; oke-ehu-eghu Chileke abvu.

²Mu humakwapho iphe, du g'eze-enyimu, aphu ngerengere g'e woru onyo yee oku, enwu enwunwu gwakobe iya. Mu humakwapho ndu lwu-kperu ejo anu-egbudu pho yee ntekpe, a kpuru o du g'o du pho. Ndu ono bukwapho ndu jikaru l'ephe te ewoduru ubvu akwabe ogu ono, no-chiru enya epha ejo anu ono. Ephe pfuru pfu-kube eze-enyimu ono, du g'onyo ono. Ephe pagbaaru eze une, Chileke nuru phe.

³Ephe nodu agu ebvu Mosisu ono, bu nwozi Chileke; mbu ebvu, bukwapho ebvu Nwaturu ono su: "Gube Chileke; oo ngu bu Okalibe-Kakota-Ike. Iphemiphe, i mekotaru paru eka bya adukwapho biribiri. Oo ngu bu eze l'ohamoha. Uzo ngu pfugbaaru nhamunha bya abugbaaru okpobe uzo.

⁴Nnajiuphu; ? bukpoo onye bu onye a-su le ya taa tsudu ngu ebvu; ophu ya taa akwabe du epha ngu ubvu? O kwa ngu kpurumu bu onye du nsu. Ohamoha a-bya abaaruu ngu eja. Noo kele onyemonye huma-dzuwaru iphemiphe, iime, pfuru oto."

⁵E mechaa; mu bya elee enya ozo. No iya; mu huma eze-ulo Chileke l'imigwe g'a guharu ime iya aguha. Mbu ime eka ono, ulo ono, e gude ekwa mee bu Chileke be o shi l'eka ono no; mbu ulo ekwo ono, no-chiru enya ogbandzu, shi Chileke l'eka ono.

⁶Ojozi-imigwe esaa ono, bu phe gude uzi ejo iphe-ememe esaa ono shi l'ime eze-ulo Chileke ono lufuta. Ephe yegbaa uwe, bu asagu-mini; egbu ke nwii. Ephe gude akpo, e gude mkpola-ododo mee; gude kebuta iya l'okpoma.

⁷No iya; onye lanu l'ime iphe eno ono, nogbaa ndzu ono gbeshi bya eworu ochi esaa, a wuru le mkpola-ododo; woru nugbaa ojozi esaa ono. Iphe, jiru ochi esaa ono ejiji buru oke-ehu-eghu Chileke; mbu Chileke ono, no ndzu ojejeje.

⁸Enwuru oku kposihuepho ji ulo ono pyimu; kele eze-odu-biribiri Chileke me ike iya be du l'eka ono. Ophu o dudu onye duru ike bahu l'ime ulo ono jasuu teke ejo iphe-ememe esaa ono, ojozi-imigwe esaa gude ono bvadaru.

Ophulenyanya 16

Ochi, e yejiru oke-ehu-eghu Chileke eyeji

¹Tobudu iya bu; mu numa olu-opfu, e shi l'ime eze-ulo Chileke ono chia g'e chiru mkpu su ojozi esaa ono: "Unu je eworu ejo iphe-ehuka ono, shi l'oke-ehu-eghu

Chileke ono wushikota lẹ mgboko l'ophu; mbụ ejo iphe-ehuka ono, dū l'ochi ẹsaa ono.”

²Ojozi-imigwe kẹ mbụ bya atugbua je awushia ejo iphe-ehuka ophu nọ l'ochi nkiya lẹ mgboko. Onwo, aba yoyoyo bya eme ejo ehuka; wata abagbaa iphe, bụ ndu ono, a gbaru ngga ohubama k'ejo anụ-egbudu ono; waa l'ehu iphe, bụ ndu ono, shi abarụ ntekpe ono, a kpuru o dū g'ejo anụ-egbudu ono ẹja.

³Ojozi-imigwe k'ẹbo bya atugbua je awuru ejo iphe-ehuka ophu nọ l'ochi nkiya ye l'ime eze-enyimu. Mini, nọ l'eze-enyimu gho mee; dūepho gẹ mee onye nwuhuru anwuhu. Iphe, bukpo iphe, dzu ndzu, bu l'ime mini nwushihukota.

⁴Ojozi-imigwe k'eto bya atugbua je awuru ejo iphe-ehuka ophu nọ l'ochi nkiya ye lẹ nggele waa l'ime iphe, bụ ẹka mini futakporu g'o ha. Mini bukotarū mee.

⁵Mu numa ẹka ojozi-imigwe, bụ iya eche iphe, bụ mini nche sūru: “Gube Nnajiuphu pfubekwaru ẹka oto; mbụ gube onye ono, nọ ndzu; bya aburu onye ono, shihawaa nōduta ono. Ikpe-a, i nmaru ndiphe-a bẹ goshiru l'i bụ onye ekpeje ikpe nhamunha.

⁶Lẹ ndiphe ono, bụ phẹ gbushiru ndu-nsọ bya egbushia ndu mpfuchiru ngu l'echilabo phẹ ono; mbụ gbushia phẹ ghakaa mee phẹ ono bẹ i cheakwarupho mee; ephe ngua. Iphe ono, i meru ndiphe ono buru iphe, gbaru phẹ nū bụ onoya.”

⁷No iya; mu numa olu-opfu, a nọ l'oru-ngweja Chileke epfu; mbụ ẹka aakpoje unwù-isensu oku l'imigwe. Olu ono nōdu asuje: “Nokwa g'o dū-o! Nnajiuphu, bụ Chileke; o gubedua bụ Okalibe-Kakota-Ike-o. Ikpe, i kperu bẹ buepho okpobe ikpe bya abukwarupho ikpe, pfuru nhamunha.”

⁸Tobudu iya bụ; ojozi-imigwe k'eno bya atugbua je eworu ejo iphe-ehuka ophu nọ l'ochi nkiya kpua l'enyanywu. E mee enyanwu; okpomoku iya wata erebushi nemadzu anu k'ophu oomeje nemadzu l'oo dū g'iphe, a huberu l'oku.

⁹Ejo okpomoku ono wata erebushi ndiphe anu. Ephe wata epfubyishi epha Chileke; mbụ yebedua, kweru g'egube ejo iphe-ehuka ono byapfuta phẹ. Ophu izimanu alwaduru phẹ azu kẹ g'ephe wata iya akwabẹ ubvu.

¹⁰Ojozi-imigwe k'ise bya atugbua bya eje eworu ejo iphe-ehuka, nọ l'ochi nkiya kpua l'aba-eze ejo anụ-egbudu pho. Ochii buru kpukumu bya agbachikota iphe, bukpo ndu kweru g'ejo anụ-egbudu ono buru eze phẹ. Ndiphe wata ata kpokpookpo k'ejo iphe-ehuka ono, paru ẹka ephe eje ono.

¹¹Ephe wata epfubyishi Chileke k'imigwe k'iphe ono, aphugbaa phẹ uphu me onwo ono, aba phẹ nū ono. Ophu izimanu iphe, ephe eme alwakwaru phẹ pho azu.

¹²Ojozi-imigwe k'ishii je eworu ejo iphe-ehuka, nọ l'ochi nkiya wuru ye l'oke-enyimu Yufurétisu. Mini iya tashihu; k'ophu bụ lẹ gbororo a-dabyiru iya gẹ ndu eze, shi l'uzo enyanwu awawa aghajaje iya.

¹³Mu bya ahuma ọbvụ ẹto, dughbaa g'ẹwo g'ẹphe afutagbaa. Nanu shi l'onu ẹjo-oke-agiyi ono afuta; nanu shi l'onu ẹjo anu-egbudu pho afuta; nanu shikwapho l'onu onye mpfuchiru ono, l'epfuje iphe, Chileke epfuduru ono.

¹⁴Ephe bugbaa ọbvụ, shikota l'eka Nsetanu; emegbaa iphe-ohumalenya. Ephe jepfugbaa ndu eze ndiphe mgburugburu je achikobe phe dzua ogu l'eka lanu kwaberu mboku ono, Okalibe-Kakota-Ike, bu Chileke a-bya egoshi ndiphe onye ya bu ono.

¹⁵“Unu lekwa l'o kwa g'abyabya onye-oshi atuje nemadzu l'uzorehu-a bu ge mu a-tu unu l'uzorehu. Ehu-utso be a goru nu onye ono, nwu enya bya eletakwapho uwe iya enya; k'ophu onye obu taa gbaduru oto ejephe mboku onoya; iphere adu iya.”

¹⁶No iya; ọbvụ ẹto ono, shi l'eka Nsetanu ono bya emee ndu eze ke mgboko-a l'ophu: ephe bya akpakoo l'eka lanu obu, eekuje Amagedonu l'opfu Hiburu.

¹⁷Oo ya bu; ojozi-imigwe k'esaa je ephekaa ẹjo iphe-ehuka ophu no l'ochi nkiya le pherephere. O nweru olu, shi l'aba-eze, no l'ime eze-ulo Chileke ono chia mkpu su: “E mewaru iya!”

¹⁸Ebemu-igwe wata alo waa waa. Igwe wata ede edede; wata ara ora; bya atuahaa egbigwe. Ali-onma-jijijiji egube iya ophu eteke anmaswee; eshinu nemadzu futaru mgboko wata anmanma; mbu l'ali-onma-jijijiji obu pakporu aka apaa.

¹⁹Mkpukpu ono, a maru epha iya ono, bu Babilonu bukaha onwiya uzi ẹto. Iphe, bukpuo mkpukpu ozo, dukota le mgboko dakashihukota buru ala-l'iswi. Ebe Chileke azohakwaru mkpukpu ono, a maru epha iya ono, bu Babilonu; yee ẹjo-iphe, o no megbabe. Chileke mee mkpukpu ono: o ngua mee l'eze okoro, e yejiru oke-ehu-eghu ke yebe Chileke eyeji, bu iya bu ikpe o nmaru iya.

²⁰Iphe, bukotakpuo ali, bu ali, mini no-pheru mishihukota. Ophu o duedu onye humabaaru ubvu.

²¹Eze akamini-mkpuma, l'anyigbaa ke tuduu ge mkpuma-uswe shigbaa l'igwe aada l'ali; adagbushi unwu-eliphe. Ndiphe wata epfubyishi Chileke; kele akamini-mkpuma ono anu phe aphu. Noo l'ejo iphe-ememe, akamini ono wotaru phe ka g'aa-atu onu iya.

Qphulenyà 17

Eze-nwanyị ovuoba ono, bu Babilonu

¹Ojozi lanu l'ime ojozi-imigwe esaa ono, shi gude ochi oke iphe-ehuka esaa ono byapfuta mu; bya asu mu: “Bya ge mu je egoshi ngu g'ee-gude woru ikpe nmaa eze-nwanyị ovuoba ono, nmagaru l'eka nggele du igwerigwe ono.

²Le ndu eze ke mgboko-a be ephe l'iya riakwaru ogori. Ephe l'iphe, bu ndu bu l'eliphe l'ophu nguwaa mee phaa onwophe kutukutu.”

³Tobudu iya bu; Unme Chileke byakwa bya eji mu ehụ pyimu. Ojozi-imigwe ono bya eduta mu jeshia l'echiegu. Noo aka mu no huma nwanyị, no l'eli ẹjo anu-egbudu, eke

uswe-uswe. E dekania ejo anu-egbudu ono epha, epfubyishi Chileke l'ehu iya mgburugburu. Ejo anu-egbudu ono nweru ishi esaa bya enweru mpu iri.

⁴Iphe, nwanyi ono gude kwaa onwiya akwa buru uwe kpowula-kpowula, eke uswe-uswe. Iphe ozo, o gude memachaa onwiya emema bu iphe, e meru le mkpola-ododo. O gbachaa echi, ere ire l'eka bya edoo onwiya igopoto, aswa du l'olu. Iphe, o pa l'eka buru okoro, a wuru le mkpola-ododo. Iphe, jiru okoro ono buru ejo akpamara me ebyi ebyi, shi l'apharwushi, nwanyi ono pharwushiru onwiya.

⁵A bya edee ya epha iya l'egedegee onu-iphu iya. Iphe, e domiru edomi e deru iya bu: "Babilonu ono, a maru epha iya; mbu ne iphe, bukota ndu agba ukpara me iphe, bukota ndu eme ahuma le mgboko."

⁶Mu bya ahuma ge nwanyi ono nguwaru mee ndu-nsu; o nodu atsu iya atsutsu; waa mee ndu e gburu l'ike l'opfu ehu Jizosu. Mu huma iya; o kwatakpo tu fu mu ehu g'iphe atufuje ehu.

⁷Ojozi-imigwe ono su mu: "? Bu gunu be o gude o tu fu ngu ehu? Ge mu byanu akaru ngu iphe, du le nwanyi ono, bu iphe, e domiru edomi; mekpoo k'ejo anu-egbudu ono, nweru ishi esaa ono waa mpu iri ono, bu iya pa iya ono.

⁸Anu-egbudu ono, i humaru ono dukwaru teke o shi nodu ndzu; obenu le nta-a be o to noedu ndzu. O phoduakwaru-a nwanshii nta-a l'o shi l'iduma, enweddu ohu ono futa bya alaru onwiya l'iswi. Ndu ono, bu l'eliphe ono, bu iya bu ndu ophu e shikpo teke Chileke meru mgboko; ophu e deduru epha phe l'ekwo, e deshuru epha ndu a-no ndzu ojeje; iphe, bu ndu ono be oo-tufukpo ehu m'ephe -humaepho ejo anu-egbudu ono; kele o shi nodu ndzu; ophu o dzuedu ndzu nta; ole oo-mechakwaa nodu ndzu ozo.

⁹"Ono buru iphe, gbaru ge nemadzu goshi le ya nweru uche bya arije iphe ariri g'o doo ya enya. Su-a; ishi esaa ono no-chiru enya ubvu ubvu esaa, nwanyi ono no anoo l'eli iya. Iphe ozo, o no-chifuaru enya iya bu ndu eze esaa.

¹⁰O dukwarupho ndu eze esaa, no nu. Umadzu ise l'ime ndu eze esaa ono ta anekwa. Onye lanu be nokwadu nu; onye lanu teke afutadu. O -futaepho; l'a haa ya l'o kpo upfu nwanshii.

¹¹A bya le k'ejo anu-egbudu ono, shi nodu ndzu; ophu o noedu iya ono; yebdua bu onye eze k'esato; ole yee ndu eze esaa ophu be nokwa l'oshi lanu; o je emechaa laa l'iswi.

¹²"Teme mpu iri ono, i humaru ono bu ndu eze iri; ophu e teke adudu ali-eze, a nuwaru phe. Ole a hakwanuru phe g'ephe nodu l'eka anu-egbudu ono buru eze awa lanu kpoko kpekpu.

¹³Ndu eze ono be obu phe abukotajeru nanu. Ephe eworu ike phe me abubu ono, ephe bu eze ye ejo anu-egbudu ono l'eka.

¹⁴Ephe a-tuko g'ephe ha swikoo ike phe nanu; tsoo Nwaturu Chileke ono ogo. Ole Nwaturu ono l'a-lwu-gbulekwa phe-a. Noo kele oo ya bu Nnajiuphu, kakota ndu bu

nnajiuphu; bya abukwarupho Eze, kakota iphe bu ndu eze. Iphe, bu ndu Chileke kuru bya ahota ono; teme ephe pfushia ike ono l'a-lwu-gbukwa phe pho.”

¹⁵No iya; ojozi-imigwe ono su mu: “? I humaru mini ono, nwanyi ovuoba ono no anoo ono; mini ono be bu iphe, bukpo mkpukpu le mkpukpu; me ikpoto oha me ohamoha me ndu shi l'iphe, bukota opfu-ali ndu du iche l'iche, no le mgboko-a.

¹⁶Ejo anu-egbudu ono yee mpu iri ono, i humaru ono be bu ndu nwanyi ovuoba ono du ashii. Ephe a-tuko iphe, o nweru enweru natachaa ya g'o ha; l'o gbaru oto dabyiru. Ephe eria ya anu; gude oku kepyashia ya.

¹⁷Noo kele oo Chileke be yeru phe egube oriri ono l'okpoma; g'o guje phe egu emeekota iphe, Chileke tuberu, bu iya bu ge ndu ono swikoo ike phe; g'okpoma buru phe nanu; k'ophu ephe e-wota ali-eze phe ono woru ye ejo anu-egbudu ono l'eka g'o gude eka-ike buru eze phe jasu teke iphe, Chileke pfuru e-meekota.

¹⁸“Teme nwanyi ono, i humaru ono bu mkpukpu ono, a maru epha iya ono, bu iya bu eze; teme iphe, bukotakpo eze ndiphe l'ophu nodu iya l'eka.”

Ophuleny 18

Adada Babilonu

¹E mechaa; mu bya ahuma ojozi-imigwe ozo, shi l'igwe phezeta. O buru iya be Chileke yeru ike paru eka l'eka. Ogbu-nwainwii ya tuko mgboko l'ophu ngaa.

²O nodu ara iya arara arashi iya ike su: “Eze mkpukpu Babilonu daakwaru! O daakwaru! O buakwaa eka mkpako-iphe, bukotakpo obvu laru egu. O buakwaa okpoku unwu-ojozi Nsetanu l'ophu; mekpoo epfune-enu iphe, bukpo nwenu njo ora; me enu, dukota ndiphe ashii l'ophu.

³Noo l'ohamoha, nokpo le mgboko nguwaru mee ya ono, bu iya bu apharwushi ono, nwanyi ono apharwushi onwiya; teme ephe le ndu eze ndiphe l'ophu zekotawaa. Teme iphe, bu ndu agba oke-ngho le mgboko-a mgburugburu be shiakwa l'eku ono, nwanyi ono nweru ono, nyiberu g'aatu onu iya ono bugbaaru eze.”

⁴Tobudu iya bu; mu numakwa olu ozo, shikwa l'imigwe su: “Ndu mu; unu lufutakwa iya l'ehu; g'unu te eje eye eka l'eme ejo-iphe, oome ono; odumeka unu l'iya a-gbakwaru mgba l'ejo iphe-ememe, a-byapfuta iya nu;

⁵l'iphe-eji, oome kukwaru l'ikpo l'ikpo; ha l'eli l'eli; je asupfuru l'akpaminigwe; teme Chileke nyataakwaru ejo ememe, oomeje g'o ha.

⁶G'e mee ya g'o meru ndu ozo; g'a pfua ya ugwo iphe, o meru; pfua ya ya mpukwase. G'e gude mee atsü-be atsutsu ugbo labo ge nkiya gwajiaru iya okoro, o gude gwaaru ndu ozo g'o ngua.

⁷G'a gwaa ya maa; nua ya aphu, habe g'ajaja ono, o jaru onwiya yee eku ono, nyiberu g'aatu onu iya ono, o kparu swibe onwiya ono. G'e mee ya ya nno; eshinu o shi anoduje etu onwiya epha su: ‘Nta be mu nowa buru eze-nwanyi! Mu ta anodu l'aphu nwanyi, ji iya anodedu ndzu. Ophu mu ta abyadu l'atsö onu l'aphu!’

⁸Noo g'o gude iphe, bu ejo iphe-ehuka ono, tukoru kwaberu iya nu ono; je l'a-tuko byapfutakota iya ujiku lanu, bu iya bu ejo iphe-ememe; waa aphu waa okpa nri. Oku be e-tsufu iya nu; kele Nnajiuphu, bu Chileke; onye ike iya paru eka be bu iya nmaru iya ikpe.”

⁹Oo ya bu l'eze ndiphe ono, ephe l'iya shi apharwushi onwophe ono me ndu ono, ephe l'iya atukoje emegbaa ejo-iphe, agu phe nu ono; ndu ono l'a-ra ekwa iya; aphu eji phe obu l'opfu ehuru iya m'ephe -humaepho ghenwuru-oku iya kpufuru; l'eka oku etsupyashi iya.

¹⁰Ephe a-pfuru uzanya ele iya enya le ndzu agugu epfu su: “Nshio! Nshio eze Babilonu bu mkpukpu, a maru epha iya bya amaru g'ike iya beru; awa lanu be e gude nma ngu ikpe; i daa g'i daru-a!”

¹¹Ndu agba ngho l'eliphe arakwaapho ejo ekwa nkephe gua aphu iya; kele o to nweedu onye azubaa phe aswa.

¹²O to duedu onye azuje mkpola-ododo phe; ozoo mkpola-ochaa phe; ozoo ogbu nwijnwii mkpuma, bu mkpuma, vu oke aswa me igopoto phe. O to duedu onye azuje ekwa ochaa phe me ekwa uswe-uswe phe; me nkushu; buragidi uswe phe; mekpoo oshi, eshi mkpo, bu iphe, ephe erekota erere; mekpoo iphemiphe, e gude eze-nyi kpa; mekpoo iphemiphe, bu iphe, e meru l'oshi, aswa du; me ophu e meru l'ope; ozoo ophu e meru l'igwe; ozoo ophu e meru le mkpuma-egbe;

¹³mekpoo ekwo-ophe, bu sinamonu; me unwu iphe ozo, eshigbaa mkpo ge senti; me unwu-isensu; me meru; mekpoo furankisensu; mekpoo mee; mekpoo manu nri; mekpoo utu-witi; me witi l'onwiya; mekpoo eswi; mekpoo aturu; me inya; me ugbo-inya; me ohu; mbu je akpachaa le nemadzu gedegede.

¹⁴“Ha! Nta-a be iphe, bukotakpoo akpuru oshi ono, shi aguje ngu agugu ono be ta aduedu. Eku ono, i shi kpaa swiphee onwongu ono be yifuakwaru nta; iphemiphe, bu iphe, atsoje ngu utso; teme o buru iphe, ama ngu mma bvwaru; ophu o bukwa l'i bya ahumabaa ya.”

¹⁵Ndu ngho ono, shi agbataje ngho iphemiphe ono je eree le mkpukpu ono rita iya oke urwu ono be a-pfugbaaru iya uzanya uzanya; kele ndzu a-nodu agu phe k'aphu ono, aanu mkpukpu ono. Ephe araa ejo-ekwa gua aphu asuje:

¹⁶“Nshio! Nshio gube eze mkpukpu ono shi eyeje uwe ochaa; me ekwa uswe-uswe; me buragidi uswe-uswe gude kwaa onwongu akwa ono! Gudekwapho iphe, e meru le mkpola memata onwiya ree; bya eworu echi, ere ire doo joo l'eka; bya ewojeru igopoto doo onwiya joo l'olu.

¹⁷L'awa lanu-a kpoloko be e gudewaa mekota eku obu g'o ha; o bukotaruru ola-l'iswi egube-a.” Iphe, bukpo ndu-ishi ugbo-mini g'ephe ha; me iphe, bukpo ndu egudeje ugbo eje; me ndu akpo ugbo; me ndu egudeje ugbo tsoru eze-enyimu agba ngho; g'ephe ha tukoru je apfugbaaru uzanya uzanya.

¹⁸Wata echi mkpu teke ephe humaru enwuru-oku iya g'ọ kpuru tūuu l'eka ọku etsu iya. Ephe epfuahaa su: ? Ọ dukpoorua mkpukpu ozo, dujeru g'eze mkpukpu-a?

¹⁹Ephe kpota urwuku kpube onwophe l'ishi. Ephe nodu echi mkpu ara ekwa; agu aphu su: “Nshio! Nshio gube eze mkpukpu, mbu gube mkpukpu ophu bu eku, nyiberu g'atu onu iya, i kparu be iphe, bukpo ndu gude ugbo phe tsoru eze-enyimu agba ngho shikota l'eka barahu buru eze! ? Awa lanu-a kpoloko be e gudewaa mekota iya; o buru ola-l'iswi egube-a?”

²⁰Teru eswa kpua ya gube igwe! Unube ndu-nso; me ndu-ishi-ozu ono; me ndu mpfuchiru Chileke unu teje eswa le Chileke be nmawaru iya ikpe ejo-iphe ono, o meru unu ono!

²¹Tobudu iya bu; ojozi-imigwe lanu, okpehu du; pata mkpuma, ha ge mkpuma-uswe paru chie l'eze-enyimu su: “Waa g'ee-gude okpehu chie mkpukpu ono, a maru epa iya ono, bu Babilonu l'eka o to dudu onye ahumabaa ya ozo bu owa-a.

²²Ọ to dudu onye ahumabaa oda nkwa; ozoo numabaa eka a gu ebvu; ozoo ke ndu aphu upyi me ndu egbu opu l'ime gube mkpukpu ono ozobakpo ilile. Ọ to dudu onye-ona, eme ona g'oo-duhabe aahumabaa l'ime ngu ozobakpo. Ophu a byadu ahumabaa ya oda ikwe-nri.

²³Ophu iphoro oku oroku abyadu enwubakpo jaa l'ime ngu; ophu o dudu onye ahumabaa eka a no l'ime ngu eme uzere k'eka eeke nwanyi; ozoo k'eka a lutaru nwanyi k'ophuu. Noo l'o kwa ndu ono, shi buru l'ime ngu agba ngho ono shigbaa buru ndu nweru enya l'eliphe-a. Teme i gude eme mgbashi; dumphushikota ohamoha l'ophu mgburugburu.

²⁴“Teme o buru l'ime mkpukpu ono be a humaru mee ndu mpfuchiru Chileke me mee ndu-nso; mekpoo mee iphe, bu ndu e gburu egbugbu l'eliphe g'ephe ha.”

Qphulenya 19

¹Ono mechaepho; mu numa olu-opfu ndu du igwerigwe epfu l'imigwe su: “Aliloya! Ge ndzota; me ogbu-nwainwii; me okwabe ubvu; me ike; bukwaru ke Nnajiuphu anyi, bu Chileke anyi!

²L'ikpe, o kperu be bukwa ire-lanu; bya aburu ikpe, pfuru nhamunha. Ọ nmaru eze-nwanyi ovuoba pho ikpe; mbu nwanyi ono, gude apharwushi onwonye mee unwueliphe l'ophu: ephe buru mkpurupyata-a. Chileke be gwataakwaru iya ugwo mee ndibe yebe Chileke ono, o gbushiru ono. Ochi phe tukoru iya l'ishi.”

³Ephe byakwa atua uzu ozo su: “Aliloya! Enwuru-oku, etsu mkpukpu ono kpua tūuu je atuko imeli l'ophu sweta. Noo g'oo-kpu iya jasū le tuutuutuu le miimiimii bu ono.”

⁴Ukporo ndu bu ogerenya le ndu bu ogerenya eno pho; waa iphe ono, nogbaa ndzu ono ephen'eno tuko daa kpurumu baaru Chileke eja; mbu Chileke ono, no l'aba-eze ono. Ephe su: “Nokwa g'ọ du-o. Aliloya!”

Ete eswa nwanyi, a luru k'ophuu

⁵O duru olu, shi l'aba-eze ono su: “Unu jaa Chileke ajaja iphe, bu unube ndu ejeru Chileke ozi g'unu ha; unu kele iya unube ndu atsụ iya ebvu; onye upfu me onye nta.”

⁶Mu bya anuma uzu, ndu du igwerigwe atu. O nodu adaepho g'eka mini aphu gbudugbudu; bya adahukwapho g'eka igwe ara ora; asuje: “Aliloya! O kwa Nnajiuphu, bu Chileke ono, bu Okalibe-Kakota-Ike ono bu Eze.

⁷G'ehu tsoo anyi utso; g'anyi tee eswa teshia ya ike; kwabe iya ubvu; kele nta-a be o rwuakwaru Nwaturu ono l'alu nwanyi. Nwanyi obu, oobyala alulu obu be kwaakwaru onwiya akwa kwaberu iya.

⁸Chileke bya ekwewa g'o yee uwe ochaa, egbu nwainwii bya aburu asagu-mini.” Uwe ochaa ono bu umere pfuru oto, ndu-nsọ eme.

⁹Tobudu iya bu; ojozi-imigwe ono su mu: “Dee iphe-a l'ekwo: ‘Ehu-utso be a goru nu ndu ono, e kuru g'ephe yiru le ndu e-ri nri, e gude eme eswa nwanyi ono, Nwaturu Chileke ono eje alulu onoya.’ “ O pfuchaa nno bya asu mu: “Opfu ono bukwa Chileke gude onu iya pfua ya.”

¹⁰Mu daa kpurumu l'iphu ojozi-imigwe ono jeshiaru iya abaru aja. O su mu: “Te ejekwa ememe! O kwa ge gubedua unu l'unwunna ngu phe bukota ndu ejeru Chileke ozi be bu ge mbedua bukwapho onye ejeru Chileke ozi; mbu unwunna ono, bu phe be Jizosu goshiru okpobe-opfu nkiya ono. Bachiaru Chileke aja. L'okpobe-opfu ono, Jizosu goshiru anyi ono be bukwa l'eka Unme Chileke be o shi; mbu Unme Chileke ono, bu iya emeje ge nemadzu pfuchijeru Chileke ono.”

Onye no l'eli inya ochaa

¹¹“Mu bya anuma g'imigwe gheru onu. Mu huma inya ochaa, no iya nu. O duru onye no l'eli inya ono. Epha onye ono buru: O pfushiru ike l'iphe, o pfuru” ; bya aburu “Okpobe-Opfu ono.” O nodu ekpeje ikpe, pfuru oto bya alwu ogu l'uzo, pfuru oto.

¹²Iphoro enya iya dupeho g'iphoro oku, enwu enwunwu. O kpuru okpu-eze, du igwerigwe l'ishi. O duru epha, e deshuru iya l'ehu, adudu onye maru iya nu gbahaa yebedua l'onwiya.

¹³O buru uwe, a tseru le mee be o yeru. Epha onye ono buru “Opfu Chileke” ono.

¹⁴Iphe, bu ndu ojogu, no l'imigwe gudegbaa uwe ochaa, egbu nwainwii bya aburu asagu-mini kwaa onwophe akwa. Ephe tuko nodugbaa l'eli inya ochaa awu etso onye ono, no l'eli inya ochaa ono.

¹⁵Iphe, eshije l'onu onye ono lufuta buru ogu-echi, atsụ nkọ, bu iphe, oo-gude lwua iphe, bu ohamoha, no le mgboko. L'o bya egude mgborigwe buru eze phe. O buru iya l'a-zoshi mee vayinu l'akpuru vayinu ono, bu iya bu eze oke-ehu-eghu ke Chileke, bu Okalibe-Kakota-Ike.

¹⁶E dee epha iya l'uwe, o yeru bya edee ya ya l'utapfu, bu iya bu: “Eze ndu eze; waa Nnajiuphu ndu bu nnajiuphu.”

¹⁷Mu bya ahuma ojozi-imigwe, pfuru l'ime enyanwu. O chia mkpu chishia ya ike gude kukota iphe, bukpo enu, ephe l'akpaminigwe oku su: "Unu bya edzukobe ria nri, dashihuru unu; nri-enyashi ophu bu Chileke be o shi l'eka.

¹⁸Unu bya avukaa anu ndu eze; me anu ndu-ishi ojogu; me ke ndu ojogu l'onwophe; anu inya; me ndu agba iya nu; anu ndiphe l'ophu; amadu me ohu; ndu upfu me ndu nta."

¹⁹Mu bya ahuma ejo anu-egbudu pho me ndu eze ndiphe mgburugburu g'ephe chitawaru ndu ojogu phe dokobe l'eka lanu g'ephe bya etsoo onye ono, no l'eli inya ochaa ono ogu yee ndu ojogu iya.

²⁰A kpa ejo anu-egbudu ono le ndu. E gudekwapho onye mpfuchiru ono, epfuje iphe, Chileke epfuduru ono. Oo ya be bu onye ono, shi abujeru: o -nodu ejo anu-egbudu ono l'iphu; l'o meshia iphe-ohumalenya-a, bu iya bu iphe ono, o gude dephua ndu ono, kweru g'a gbaa phe ngga ohubama k'ejo anu-egbudu ono; me ndu ono, shi abaru ntekpe, a kpuru o du g'o du ono eja. A kputachaa onye mpfuchiru ono l'epfuje iphe, Chileke epfuduru ono yee ejo anu-egbudu ono le ndu je achiru ye l'eze iduma, bu oku nshi-egbe enwu iya taphutaphu.

²¹Onye ono, no l'eli inya ochaa ono bya egude ogu-echi ono, shi iya l'onu alufuta ono gude tuko ndu ophu phoduru nu gbushikota. Iphe, bu enu, nokota le mgboko-a dzukoo bya avua anu phe kpata kpata; rijishia ephe.

Ophulenyanya 20

¹Noo ya bu; mu bya ahuma ojozi-imigwe, shi l'imigwe abya. O gude ire-igodo onu iduma, enwedu ohu ono l'eka; bya achikwarupho oke egbirigba.

²O zuapho ejo-oke-agiyi ono gburumu; mbu agwo shi l'ichee ono, bu iya bukpo Obutuswe ono bya aburu iya bu Nsetanu. Ojozi-imigwe ono bya azu-gude iya kee ya egbu togbo; o zee l'egbu ono unu apha labo l'apha ukporo iri.

³Ojozi-imigwe ono paru iya chie l'ime iduma, enwedu ohu ono. O chiechaa ya bya eworu iya gu-chia; woru iya tu-chia okpobe atu-chi; k'ophu o dudu onye adu ike atuha iya nu. Oo ya bu g'oo too dephushihedu ndiphe ozobaa jasuteke unu apha labo l'apha ukporo iri ono bvuaru. Teke unu apha labo l'apha ukporo iri ono bvuerupho l'e wehaa ya g'o kpaa nwantusaru-ehu nwanshii.

⁴Noo ya; mu bya ahuma aba-eze aba-eze me ndu nogbaa ya nu. Ndu ono be bu ndu a hotaru dobe g'ephe kpeje ikpe. Mu humakwapho maa ndu a pfu-gburu apfu-gbu; opfu l'oo l'ephe pfuru l'edzudzu-oha pfua l'oo Jizosu bu Nnajiuphu; ndu shi asaje opfu Chileke asasa. Oo ephe bu ndu te ekwedu baaru ejo anu-egbudu ono yee ntekpe, a kpuru o du g'o du pho eja; ophu ephe ekwedu g'a gbaa phe ngga ohubama k'ejo anu-egbudu ono l'egedegee onu-iphu ozoo l'eka. Ephe tetachawaru nodu ndu; ephe le Kereshi buwaru eze unu apha labo l'apha ukporo iri.

⁵Eteta k'ono, ndu a pfu-gburu apfu-gbu tetaru ono buru eteta k'ivuzo, Chileke meru nemadzu teta dzuru ndzu. Ndu ophu phoduru nu le ndu ono, nwuhuru anwuhu ono ta adukwa ophu tetaru nu jeye unu apha labo l'apha ukporo iri ono bvubebe.

⁶Ehu-utso yee adu-nsa bu ke ndu a-yiru le ndu ivuzo ono, Chileke e-me g'ephe shi lonwu teta nodu ndzu ono. Onwu nwu-labo pho te erwudu phe eka; obenu l'ephe aburu ndu-uke ke Chileke; waa ke Kereshi a-tuko buru eze l'eliphe unu apha labo l'apha ukporo iri ono.

A Iwukperu Nsetanu

⁷Teke unu apha labo l'ukporo apha iri ono bvuerupho; l'aa-tofu Nsetanu l'egbu ono l'oo-lufuta le mkporo ono, a turu iya ono.

⁸L'ooshi l'eka ono byatashikwa edepushi ohamoha, nokpoo le mgboko mgburugburu, bu iya bu Gogu yee Megogu. L'ookpakobe phe l'eka lanu gude phe dzua ogo. Ndu bu e -jeshia phe agugu ephe aha g'aja, no l'ali.

⁹No iya; ndu ono zoru garamu garamu garamu le phorokotoko eli-mgboko-a; bya anophokota eka ono, ndu ke Chileke doru ono mgburugburu; no-phekwaapho mkpukpu ono, Chileke yeru obu ono. Obenu l'oku shiepho l'imigwe nwua ke phuruphuruphuru bya ekegbushikota phe.

¹⁰A bya eworu Obutuswe, bu iya l'anoduje edupushi phe ono bya eworu chie l'eze iduma ono, bu oku nshi-egbe l'enwue ya pho taphutaphu ono, bu iya bu eka ejo anuegbudu pho yee onye mpfuchiru pho l'epfuje iphe, Chileke epfuduru ono no. O buru eka ono be ephe a-nodu l'aa-nua phe chiipfuu eswe l'enyashi jasu le tuutuutuu le mijimiimii.

Ikpe ikpazu

¹¹Mu bya ahuma oke aba-eze acha ucha; bya ahumakwapho onye no iya nu. Igwe me ali phota oso; shi iya l'iphu gbafu. Ophu o duedu eka ephe a-nodu.

¹²Mu humakwapho iphe, bukpo ndu nwuhuru anwuhu; ndu upfu me ndu nta; eka ephe pfugbaaru l'iphu aba-eze ono. A bya e kpuhashia ekwo ghebe onu; a bya ekpuhakwapho ekwo lanu ozo; ono buru ekwo ndu no ndzu. O buru iphe, e deru l'ekwo ono be e gude ekpe ndu nwuhuru anwuhu ikpe le g'iphe onyemonye meru gbaru.

¹³Eze-enyimu bya atuko ndu o rijekporu chifutabebe. Anwuhu yee ali-maa tuko ndu onwu gbujekporu chifutabebe. A tuko g'ephe ha kpee ikpe. E kpee onyemonye ikpe g'iphe, o meru gbaru.

¹⁴A chiru mgbu-onwu yee ali-maa chiru ye l'eze iduma ono, oku enwu taphutaphu ono. Ono buru onwu nwu-labo.

¹⁵Onyemonye, a humaduru epha iya l'ekwo, e deshuru epha ndu a-nodu ndzu ojejoje pho be e chieru l'eze iduma ono, oku enwu taphutaphu ono.

Ophulenyanya 21

Imigwe òphúú mę alì òphúú

- ¹Tòbudu iya bụ; mu bya ahuma igwe òphúú bya ahuma alì òphúú; kele igwe ophu shi du nu ta aduedu; ophu alì ophu shi du nu aduhedu. Ophu eze-onyimu aduedu.
- ²Mu bya ahuma mkpukpu, du nsò ono, bụ iya bụ Jierúsalemú òphúú. Mu huma iya g'o shi l'imigwe ẹka Chileke nọ alwazeta l'alì. E memakpọe ya phọ gę nwanyị, abya ala ji; mbụ nwanyị, a kwawaru akwa g'oo-du yęe ji iya aswiru.
- ³Mu numa olu, a nọ l'aba-eze ono chia g'e chiru mkpu sụ: “Wakwa ibe Chileke ba-o! Nta-a bę Chileke byaakwaru anọdu swiru nemadzu eswiru. Nta-a bukwaa ẹka nemadzu bu bę bụ ẹka Chileke e-buru; nemadzu aburu ndibe iya. Chileke l'onwiya eswiru phę eswiru; buru Chileke phę.
- ⁴Oo-hushichaa phę ęnya-mini ẹkwa phę. Anwuhu ta adubaedu; ophu atsu aphụ aduhedu; ophu aarahędu ẹkwa; ophu o duedu iphe emebaa nemadzu ehuka; kele iphe ono, shi dukota nu ono bvwaru.”
- ⁵Tòbudu iya bụ; onye ono, nọ l'aba-eze ono sụ: “Lenu; nta-a bę mu emeakwaa iphemiphe g'ọ bukataru iphe òphúú.” O sukwa mu phọ-a: “Tuko opfu-a dee l'ekwo; noo l'ọ bukota okpobe-opfu bya abukwarupho opfu, gbaru g'e gude iya ẹka.”
- ⁶O bya asụ mu: “E meakwaru iya! O kwa mbędua bụ Alufa bya aburu Omega; Onye mbụ mę Onye ikpazu. Iphe, bukpo onye mini agụ bę mu e-kekwa mini shi l'ogba mini anuje ndzụ kę mmanụ.
- ⁷O kwa onye alwuje ọgu ono lwuta l'e-nworu iphemiphe. Mu aburu Chileke onye ono; onye ono aburu nwa mu.”
- ⁸Obenu kę ndu ono, atsu ebvu ęnya ono; mę ndu ono, ekwedu nu ono; mę ndu ono eme ęjo ahuma ono; mę ndu egbu nemadzu; mę ndu eme kę nwanyị; mę ndu mgbashi; mę ndu anọduje agwa iphe; mę ndu adzuję ụka g'ephe ha; ndu ono bę iphe nọ swiru phę nu bụ eze iduma ono, oku mę nshi-egbe enwu taphutaphu ono, bụ iya bụ onwu nnwu labọ.

Jierúsalemú òphúú ono

- ⁹Tòbudu iya bụ; ojozi-imigwe lanu l'ime ojozi ęsaa ono, shi paru ochi ęjo iphe-ememe ęsaa ikpazu phọ byapfuta mu bya asụ mu: “Bya gę mu je egoshi ngu nwanyị òphúú ono, l'abya ala ji ono, bụ iya bụ nyee Nwaturu Chileke onoya.”
- ¹⁰Unme Chileke bya ęjie mu phọ ẹhu. Ojozi-imigwe phọ duta mu je enyihu ephekerephe úbvú, ha l'eli ntumatu. O je egoshi mu mkpukpu ono, du nsò, bụ iya bụ Jierúsalemú g'o shi l'imigwe ẹka Chileke nọ alwazeta l'alì.
- ¹¹Ogbu-nwiiinwii kę Chileke mee ya o nọdu eke kę zaa zaa. Ìphóró iya nọdu eke zaa zaa gę kę mkpuma, bụ iya bę aswa kakota; mbụ ìphóró dųepho gę kę mkpuma jiásupà. Mkpuma obu anọduje ama mma; bya aphụ ngerengere.
- ¹²Mkpukpu ono bę e gude igbulọ kpụ-pheta mgburugburu. Igbulọ obu haepho mebyikpọo kę phengara. E bua ya onu-abata uzi iri l'ẹbo. E ye unwu-ojozi-imigwe iri

l'ẹbo g'ẹphe cheje ọnu-abata iri l'ẹbo ono nche. L'ọnu-abata ono ẹphe n'iri l'ẹbo bẹ e degbachaaru ẹpha ipfu iri l'ẹbo ono, ọ ẹ Ẹzurelu l'ẹhu l'ẹhu.

13E bua ọnu-abata ẹto l'uzo ọphu gharu iphu l'uzo ẹnyanwu awawa; a bya ebua ọnu-uzo ẹto l'uzo ẹnyanwu ariba; bya ebua ọnu-uzo ẹto l'uzo isheli; bya ebua ọnu-uzo ẹto l'uzo ndohali.

14Ọ buru mkpuma iri l'ẹbo bẹ e gude tua ọkpa igbulọ mkpukpu ono mgburugburu. Mkpuma ono ẹphe n'iri l'ẹbo bẹ e deshiru ẹpha ndu-ishi-ozu iri l'ẹbo; mbu ndu-ishi-ozu Nwaturu ono.

15Ojozi-imigwe ono, shi epfu anu mu nu ono bẹ gude ogugu mkpola-ododo, oo-gude tui mkpukpu ono yele ọnu-abata iya yele igbulọ iya kpo.

16Mkpukpu ono nweru mgbureku ẹno, haepo ẹnya nhamunha. Ọ bya egude ogugu tui ya. Iphe, ọ dugbaa l'ogologo iya me uswekete iya me eli iya mekwapho ọsa iya buru unu manyiru ugbo ẹto ẹ manyiru ukporo iri l'ise.

17Ọ bya atua igbulọ iya; igbidigbi iya du ntu ọkpa ukporo labo ẹ ntu ọkpa esato ẹ ge ndiphe atuje iphe. Noo g'ojozi-imigwe ono turu iya.

18Iphe, e gude kpua igbulọ ono buru mkpuma jiasupa. Mkpukpu l'onwiya buru mkpola-ododo bẹ e gude mee ya. Ọ nodu aphu ngerengere g'onyo.

19Ọkpa igbulọ ono bẹ e gudegbaa mkpuma, du iche iche, ereshigbaa ire ike bya aphugbaa ngerengere gude mee ya; ọ nodu ama mma. Mkpuma ono ke mbu bu jiasupa; k'ẹbo buru safaya; k'eto buru agetu; k'eno buru emeraludu;

20k'ise buru onikusu; k'ishii buru kaneliyanu; k'esaa buru kirisolayitu; k'esato buru berilu; ke tete buru topazu; k'iri buru kirisopurasu; k'iri ẹ nanu buru jiasintu; k'iri l'ẹbo buru amitisutu.

21Ọnu-uzo iri l'ẹbo ono buru igopoto iri l'ẹbo bẹ e gude mee ya. Ọnu-uzo ono ẹphe n'iri l'ẹbo l'ẹhu l'ẹhu bukotaru igopoto lanu bẹ e gude mee ya. Oma oji ime mkpukpu buru mkpola, guru egugu bẹ e gude mee ya. Ọ nodu aphu ke ngerengere g'onyo.

22Ọphu ọ dudu eze-ulo Chileke, mu humaru l'ime mkpukpu ono; kele Nnajiuphu bu Chileke, bu iya bu Okalibe-Kakota-Ike ye Nwaturu ono buwaa eze-ulo Chileke ke mkpukpu ono.

23Mkpukpu ono ta aduedu iphe, o gude ẹnyanwu eme; ọphu ọ dukwapho iphe, o gude onwa eme. Noo kele ogbu-nwijnwii Chileke bẹ echiwa l'ime iya. Nwaturu Chileke ono buru iphoro, e gude aphu uzo.

24Ọ buru iphoro, shi ẹ mkpukpu ono bẹ ohamoha e-gude nodu ndzu. Iphe, bukpo ndu eze, nokota ẹ mgboko evuko ọdu-biribiri phe vubata l'ime mkpukpu ono.

25Ọnu-abata mkpukpu ono e-ghekotajeru ọnu tekenteke; kele ẹnyashi ta abyakpodaanu adu l'eka ono.

²⁶Ọhamoha, ụ́ l'eliphe bẹ́ a-tụ́ko ọ́du-biribiri, ẹ́phe nweru enweru vutakọ́ta bya akụ́be lẹ́ mkpụ́kpụ́ ono; ẹ́phe akwabẹ́ mkpụ́kpụ́ ono ùb̀v̀ù.

²⁷Ọ́le ọ́ tọ́ ụ́kwanu iphe, aasọ́ nsọ́, byaru abahụ́ lẹ́ mkpụ́kpụ́ ono. Onye eme ẹ́jo ememe m'onye adzụ́ ụ́ka bẹ́ e te ekwekwa g'ọ́ bahụ́ iya. Ndu a-bahụ́ iya nù kpoloko bụ́epho ndu e deru ẹ́pha pẹ́ l'ẹ́kwo Nwaturu ono, bụ́kwanu ẹ́ka e deshuru ẹ́pha ndu a-nọ́ ndzụ́ ojejoje.

Ọ́phulenyà 22

¹Tọ́budu iya bụ́; ojozi-imigwe ono bya egoshi mu nggele, bụ́ iya bụ́ mini ọ́bu, l'anuje ndzụ́ ojejoje ọ́bu. O doẹ́pho rị́saa aphiẹ́pho kẹ́ ngerengere g'onyo. Ọ́ bụ́ru ẹ́ka o shi asọ́futa bụ́ l'aba-eze Chileke yẹ́ kẹ́ Nwaturu onoya.

²Mini ono nọ́du asọ́epho l'echi oji mkpụ́kpụ́ onoya. Oshi, anuje ndzụ́ ojejoje pfiugbaaru nggele ono ibe k'ẹ́bo ẹ́bo. Oshi ono amije uzi akpuru iri l'ẹ́bo, ụ́gbaa iche iche bya amị́ nno l'onwa l'onwa ugbo iri l'ẹ́bo l'apha. Ọ́ bụ́ru ẹ́kwo oshi ono bẹ́ aakpatajẹ́ gude mebe ọ́hamoha ọ́bvụ́ l'iphe, eme pẹ́ nù; ẹ́phe ewekọ́rohu.

³Ọ́phu ọ́ ụ́du iphe, Chileke turu ọ́nu anọ́dubaa l'ime mkpụ́kpụ́ ono. Iphe, a-ụ́ lẹ́ mkpụ́kpụ́ ono bụ́ aba-eze Chileke yẹ́ kẹ́ Nwaturu ono. Ndu ejeru iya ozi a-nọ́du abarụ́ iya ẹ́ja.

⁴Ndu ono, ejeru iya ozi ono a-hụ́maje iya l'iphu l'iphu. Ẹ́pha iya bẹ́ ee-dechaa pẹ́ l'egedegee ọ́nu-iphu.

⁵Ẹ́nyashi ta adụ́hedu. Mkpa iphóró́ orọ́ku; ọ́zoo k'ẹ́nyanwu ta adụ́eduru pẹ́ ọ́zo; kẹ́le Nnajiuphu, bụ́ Chileke l'a-buru iphóró́ pẹ́. Ẹ́phe aburu eze jasụ́ lẹ́ tuutuutu lẹ́ mị́mimii.

Abyabya Jizọ́su

⁶Noo ya; ojozi-imigwe ono sụ́ mu: “Opfu-a g'ọ́ ha bụ́kotakwa ọ́kpobe-opfu bya aburu opfu, gbaru kẹ́ g'e gude iya ẹ́ka. Lẹ́ Nnajiuphu, bụ́ iya bụ́ Chileke ono anuje ndu ono, epfuchiru iya nù Unme iya ono bẹ́ ziakwaru ojozi-imigwe g'ọ́ bya egoshi ndu ejeru yẹ́be Nnajiuphu ono ozi iphe, adụ́edu g'ọ́o-nọ́-beru l'oomẹ́.”

⁷“Lekwa; mu abyakwaa ẹ́gwegwa! Ẹ́hu-utso bẹ́ a goru nù onye emeje iphemiphe-a, e deru l'ẹ́kwo mpfuchiru-a.”

⁸Mụ́be Jionu gẹ́degede bụ́ onye nụ́makotaru iphemiphe-a lẹ́ nchị́ mu; bya ahụ́ma iya l'ẹ́nya. Mu nụ́machaa ya ono bya ahụ́machaa ya ono; mu daa kpurumu l'iphu ojozi-imigwe ono, goshuru mu iya nù ono jeshiaru iya abarụ́ ẹ́ja.

⁹Ọ́ sụ́ mu: Te ejekwa ememe! “Ọ́ kwa gẹ́ gụ́bedua unu l'unwunna ngu bụ́ ndu ejeru Chileke ozi-a bụ́ gẹ́ mbẹ́dua bụ́kwapho onye ejeru Chileke ozi; mbụ́ unwunna ngu bụ́kwa ndu ono, epfuchiru Chileke mẹ́ ndu ọ́zo, emeje iphe, ẹ́kwo-a pfuru. Ọ́o Chileke bẹ́ jì-bachiaru ẹ́ja.”

¹⁰Ọ́ sụ́ mu: “G'ọ́ tọ́ ụ́kwa opfu, e deru l'ẹ́kwo-a mẹ́ nanụ́, ii-domi edomi. Lẹ́ teke iphemiphe-a e-mekọ́ta bẹ́ ụ́kwaa ntse.

¹¹G'iphe, bu ndu emeje ejo-iphe kwaekwapho l'eme ejo-iphe, ephe eme. Ge ndu eme umere, rehuru erehu kwaekwapho l'eme ejo umere, rehuru erehu, ephe eme. Ge ndu ophu pfubekwanuru-eka-oto l'iphu Chileke gudeepho eka phe g'ephe gude iya. G'onye doberu onwiya Chileke iche dobeekwarupho onwiya Chileke iche g'o doberu iya.

¹²“Mu suru-a; mu abyaakwa nta-a nta-a! Mu -byatashia be mu e-gude iphe obunggo, mu e-bu onyenonu nggo g'iphe, o meru gbaru.

¹³O kwa mbedua bu Alufa bya aburu Omega. Mu bu onye Ivuzo bya aburu onye Ikpazu. O buru mu bu mgbube ishi iphemiphe; bya aburu mu bu eka iphemiphe sberu ishi.”

¹⁴Ehu-utso, be a goru nu ndu asaje awurukpata uwe phe l'oocha ke pemu pemu; kele o phe be ee-kwe g'ephe wotaje akpuru, oshi ono, anuje ndzu ojejoje ono mitaru; rije. O buru phe be ee-kwe g'ephe shi l'onu-uzo bahu l'ime mkpukpu ono, Chileke no ono.

¹⁵Obenu le ndu ono, bu nkuta ono; me ndu mgbashi ono; me ndu apharwushi onwophe ephe l'unwanyi; me ndu egbu nemadzu; me ndu anoduje agwaphe iphe; me ndu abujeru; onye ozo -nodu adzu uka l'ootso phe utso; teme ephe nodu adzu uka l'onwophe; ndu ono g'ephe ha bu l'azu mkpukpu ono be ephe a-nodu.

¹⁶“O kwa mbedua, bu Jizosu gedegede be ziru ojozi-imigwe mu g'o bya emee g'unube Chiochi makotaru iphemiphe-a. Mu bu eri Dévidi bya aburu oshilokpa iya. Mu bukwarupho kpokpode nchi-abohu ono, anoduje eke paapaapa onoya.”

¹⁷Unme Chileke ono yee nwanyi ophuú ono tuko su: “Bya-o!” G'onye numakpooru iphe-a su: “Bya-o!” G'onye egu mini agu byakwa! G'onye o du iya g'o bya byakwa g'e kee ya ya ke mmanu g'o ngua. O kwa mini ono anuje ndzu ojejoje.

Mkpochi-ishi iya

¹⁸Iphe, bu onye anu opfu-a, e dekotaru l'ekwo-mpfuchiru-a; be mu alo eka le nchi. Onye bu onye yekwaru iphe, l'iphe-a, e deru l'ekwo-a be Chileke e-yekwakwa iphe, l'iphe, bukotakpoo ejo iphe-ehuka, e pfukotaru opfu iya l'ekwo-a; tuko iya byabe onye ono l'ishi.

¹⁹Teke o dukwanuru onye wofuru iphe ewofu l'ekwo mpfuchiru-a be Chileke e-wofukwa okiphe onye ono l'akpuru, o mitaru; mbu oshi ono, anuje ndzu ojejoje ono; oshi ono, e pfuru opfu iya l'ekwo-a; wofukwapho okiphe nkiya le mkpukpu, du nso ono, bukwaphe iphe, e pfuru opfu iya l'ekwo-a.

²⁰Oo onye ono, meru g'a maru l'iphemiphe-a bukota okpobe-opfu be suru: “Ee; mu abyaakwa nta-a nta-a.” O noo g'o du. “Jiko bya; Nnajiuphu, bu Jizosu!”

²¹Ge Nnajiuphu, bu Jizosu; bya aburu Kereshi meeru unu eze-iphe-oma g'unu ha. Nokwa g'o du.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil